

Holy Bible

Aionian Edition®

Anumzamofo Ruotage Avontafere
Kamano-Kafe Bible

AionianBible.org
The world's first Holy Bible untranslation
100% free to copy and print
also known as " The Purple Bible "

Holy Bible Aionian Edition ®
Anumzamofo Ruotage Avontafere
Kamano-Kafe Bible

Creative Commons Attribution ShareAlike 4.0 International, 2018-2024

Source text: eBible.org

Source version: 8/25/2024

Source copyright: Creative Commons Attribution ShareAlike 4.0

Tyndale Bible Translators, 2022

Formatted by Speedata Publisher 4.19.20 (Pro) on 8/31/2024

100% Free to Copy and Print

TOR Anonymously

<https://AionianBible.org>

Published by Nainoia Inc

<https://Nainoia-Inc.signedon.net>

We pray for a modern Creative Commons translation in every language
Translator resources at <https://AionianBible.org/Third-Party-Publisher-Resources>

Report content and format concerns to Nainoia Inc

Volunteer help is welcome and appreciated!

Celebrate Jesus Christ's victory of grace!

Preface

Kamano-Kafe at AionianBible.org/Preface

The *Holy Bible Aionian Edition* ® is the world's first Bible *un-translation!* What is an *un-translation?* Bibles are translated into each of our languages from the original Hebrew, Aramaic, and Koine Greek. Occasionally, the best word translation cannot be found and these words are transliterated letter by letter. Four well known transliterations are *Christ*, *baptism*, *angel*, and *apostle*. The meaning is then preserved more accurately through context and a dictionary. The Aionian Bible un-translates and instead transliterates eleven additional Aionian Glossary words to help us better understand God's love for individuals and all mankind, and the nature of afterlife destinies.

The first three words are *aiōn*, *aiōnios*, and *aīdios*, typically translated as *eternal* and also *world* or *eon*. The Aionian Bible is named after an alternative spelling of *aiōnios*. Consider that researchers question if *aiōn* and *aiōnios* actually mean *eternal*. Translating *aiōn* as *eternal* in Matthew 28:20 makes no sense, as all agree. The Greek word for *eternal* is *aīdios*, used in Romans 1:20 about God and in Jude 6 about demon imprisonment. Yet what about *aiōnios* in John 3:16? Certainly we do not question whether salvation is *eternal!* However, *aiōnios* means something much more wonderful than infinite time! Ancient Greeks used *aiōn* to mean *eon* or *age*. They also used the adjective *aiōnios* to mean *entirety*, such as *complete* or even *consummate*, but never infinite time. Read Dr. Heleen Keizer and Ramelli and Konstan for proofs. So *aiōnios* is the perfect description of God's Word which has *everything* we need for life and godliness! And the *aiōnios* life promised in John 3:16 is not simply a ticket to eternal life in the future, but the invitation through faith to the *consummate* life beginning now!

The next seven words are *Sheol*, *Hadēs*, *Geenna*, *Tartaroō*, *Abyssos*, and *Limnē Pyr*. These words are often translated as *Hell*, the place of eternal punishment. However, *Hell* is ill-defined when compared with the Hebrew and Greek. For example, *Sheol* is the abode of deceased believers and unbelievers and should never be translated as *Hell*. *Hadēs* is a temporary place of punishment, Revelation 20:13-14. *Geenna* is the Valley of Hinnom, Jerusalem's refuse dump, a temporal judgment for sin. *Tartaroō* is a prison for demons, mentioned once in 2 Peter 2:4. *Abyssos* is a temporary prison for the Beast and Satan. Translators are also inconsistent because *Hell* is used by the King James Version 54 times, the New International Version 14 times, and the World English Bible zero times. Finally, *Limnē Pyr* is the Lake of Fire, yet Matthew 25:41 explains that these fires are prepared for the Devil and his angels. So there is reason to review our conclusions about the destinies of redeemed mankind and fallen angels.

The eleventh word, *eleēsē*, reveals the grand conclusion of grace in Romans 11:32. Take the time to understand these eleven words. The original translation is unaltered and a note is added to 64 Old Testament and 200 New Testament verses. To help parallel study and Strong's Concordance use, apocryphal text is removed and most variant verse numbering is mapped to the English standard. We thank our sources at eBible.org, Crosswire.org, unbound.Biola.edu, Bible4u.net, and NHEB.net. The Aionian Bible is copyrighted with creativecommons.org/licenses/by/4.0, allowing 100% freedom to copy and print, if respecting source copyrights. Check the Reader's Guide and read online at AionianBible.org, with Android, and TOR network. Why purple? King Jesus' Word is royal... and purple is the color of royalty!

History

Kamano-Kafe at AionianBible.org/History

- 04/15/85 - Aionian Bible conceived as B. and J. pray.
- 12/18/13 - Aionian Bible announced as J. and J. pray.
- 06/21/15 - Aionian Bible birthed as G. and J. pray.
- 01/11/16 - AionianBible.org domain registered.
- 06/21/16 - 30 translations available in 12 languages.
- 12/07/16 - Nainoia Inc established as non-profit corporation.
- 01/01/17 - Creative Commons Attribution No Derivatives 4.0 license added.
- 01/16/17 - Aionian Bible Google Play Store App published.
- 07/01/17 - 'The Purple Bible' nickname begins.
- 07/30/17 - 42 translations now available in 22 languages.
- 02/01/18 - Holy Bible Aionian Edition® trademark registered.
- 03/06/18 - Aionian Bibles available in print at Amazon.com.
- 10/20/18 - 70 translations now available in 33 languages.
- 11/17/18 - 104 translations now available in 57 languages.
- 03/24/19 - 135 translations now available in 67 languages.
- 10/28/19 - Aionian Bible nursed as J. and J. pray.
- 10/31/19 - 174 translations now available in 74 languages.
- 02/22/20 - Aionian Bibles available in print at Lulu.com.
- 05/25/20 - Illustrations by Gustave Doré, La Grande Bible de Tours, Felix Just.
- 08/29/20 - Aionian Bibles now available in ePub format.
- 12/01/20 - Right to left and Hindic languages now available in PDF format.
- 03/31/21 - 214 translations now available in 99 languages.
- 11/17/21 - Aionian Bible Branded Leather Bible Covers now available.
- 12/20/21 - Social media presence on Facebook, Twitter, LinkedIn, YouTube, etc.
- 01/01/22 - 216 translations now available in 99 languages.
- 01/09/22 - StudyPack resources for Bible translation study.
- 02/14/22 - Strong's Concordance from Open Scriptures and STEPBible.
- 02/14/23 - Aionian Bible published on the TOR Network.
- 12/04/23 - Ελέεσē added to the Aionian Glossary.
- 02/04/24 - 352 translations now available in 142 languages.
- 05/01/24 - 370 translations now available in 164 languages.
- 08/05/24 - 377 translations now available in 166 languages.
- 08/18/24 - Creative Commons Attribution 4.0 International, if source allows.

Table of Contents

OLD TESTAMENT

Jenesis	11
Zmavarene	147
3 Mose	268
4 Mose	349
Tiuteronomi Kasege	465
Zosua	566
Jasi Vahere	642
Rut	713
1 Samue	723
2 Samue	816
1 Kva	891
2 Kva	985
1 Kroniku	1087
2 Kroniku	1178
Ezra	1285
Nehemaia	1317
Esta	1366
Jovu	1388
Sams-Zgame	1478
Mani'zanti Mofo Nanekee	1696
Ikrisiaasatis	1771
Soromoni'	1796
Aizaia	1809
Zeremaia	1987
Lementesen-Zavi Krafa	2185
Izikeli	2203
Taneo	2360
Hosea	2415
Zoe	2440
Emosi	2449
Obadaia	2468
Jona	2472
Maika	2478
Nahumu	2495
Havakaki	2503
Zefanaia	2511
Hagai	2520
Zekraia Sekaraia	2526
Marakai	2553

NEW TESTAMENT

Matiu	2565
Maki	2658
Ruku	2718
Joni	2821
Aposolo	2899
Roma	2997
1 Korinti	3043
2 Korinti	3086
Galesia	3114
Efesasi	3129
Filipai	3143
Kolosi	3153
1 Tesaronaika	3163
2 Tesaronaika	3172
1 Timoti	3177
2 Timoti	3189
Taitus	3198
Falimoni	3203
Hivru	3205
Jemisi	3236
1 Pita	3247
2 Pita	3259
1 Joni	3267
2 Joni	3278
3 Joni	3280
Zute	3282
Hufore Hu'nea Naneke	3286

APPENDIX

Reader's Guide
Glossary
Maps
Destiny
Illustrations, Doré

OLD TESTAMENT



Hagi Anumzamo'a ana ne'ma Ideni hozafinti ahenatigeno vutegeno'a, zage hanati kaziga
hankavenentike ankerozamantege'za ana hoza kegava nehazageno, tevenefa tagivazu nehia
bainati kazimo kagigagi nehige'za, ana manivava zafamofona kegava hu'naze.

Jenesis 3:24

Jenesis

1 Ese agafare Anumzamo'a monane mopane trohu'ne. **2**
Ama mopama fore osu'nerera, mago zana omnetfa hu'neane.
Hankino tusi'a hanimo tina refite'negeno, ana timofo agofetura
Anumzamofo Avamumo vono nehiane. **3** Anante Anumzamo'a
huno, Masa fore hino! higeno masa fore hu'ne. **4** Hagi
masamo'a knare higeno Anumzamo'a keteno, masane haninena
refko hu'ne. **5** Anumzamo'a masagura zagegane huno agi'a
nemino, kumazukura hanine huno agi'a ami'ne. Hanki hani huno
ko'matigeno'a, pusankna emente'ne. **6** Hagi tinke me'negeno
Anumzamo'a huno, Mago kankamu amu'nompina me'neno tina
refko hanie. **7** Huteno Anumzamo'a tina refkohu fenka netreno,
hunagamu atregeno, kankamu efore hu'ne. **8** Anumzamo'a
ana kankmumofona agi'a mone huno ante'ne. Hanki haninkino
masa higeno, nampa 2 kna emente'ne. **9** Anante Anumzamo'a
huno, Timo'a monamofo hinkanaga mago kaziga eri zogino
evanigeno, ho'mu mopa fore hanie, huno higeno anaza efore
hu'ne. **10** Anumzamo'a hagagema hiankazigagura mope nehuno,
tima evazu huno omeri atruma hiantinkura, hagerine huno
hu'ne. Anumzamo'ma anazama kegeno'a, e'i knare hu'ne. **11**
Hagi Anumzamo'a amanage huno hu'ne, Mopafinti maka'za
hagesie. Za'ara zane zafane rumofo rumofo raga'a revava
hanaza zantamimo'za hagesaze. Ragazmifina avima'a efore
hanie! Hanige'za zafa rgama rentesazana e'i zamagu'afinka
avima'amo'za zamagr'iagna raga rentesaze. Hige'za mopafina
ana zantamimo'za efore hu'naze. **12** Ana nehazage'za mopafina
ruzahu ruzahu trazana erifore nehazageno, ruzahu ruzahu
ne'zampina avima'a me'nea rentageno, avima'amo'a agragna
raga fore nehigeno, zafa rgama renteana e'i agu'afinka

avima'amo'za zamagri'agna huno nemegeno, avima'a rentetere hu'ne. Hanki Anumzamo'ma anazantamima kegeno'a knare hu'ne. **13** Haninkino masa higeno nampa 3 kna emente'ne. **14** Hagi Anumzamo'a huno, Tavitamimo'za mona kankamumpi me'neza, masane haninena refko nehu'za, kafugi, zagegi, ko knagi hanagu nemesageno, **15** ana tavitamimo'za mona kankamumpi efore hu'za me'neza mopamofona remasa hanaze, hige'za ana zantamina fore hu'naze. **16** Anumzamo'a tusi'a tavi tre tro hu'ne. Rantavimo feru remasa hanigu zage tro nehuno, rankna tavi hanimpi remasa hanigu, ika tro nehuno, ofuntaminena tro hu'ne. **17** Anumzamo'a mopamofoma masama amisanagure huno mona kankamumpina tavitamina zamante'ne. **18** E'i ana tavi'mo'za hanimpine masafinema remasama hanagure huno zamante'ne. Anumzamo'ma anazantamima kegeno'a knare hu'ne. **19** Hagi haninkino masa higeno, nampa 4kna emente'ne. **20** Anante Anumzamo'a amanage hu'ne, Timpina nozame zagane, zamasimu ante'za manisaza zagamo'za efore hu'za ruvinetesageno, mona kankamumpina namazagamo'za efore hu'za hare'za vano hugahaze. **21** Hagi anante Anumzamo'a tusinasi nozameramine, osifaveramina trohuno hagerimpina zamagrite zamagrite zamantege'za timpina avite'za mani'neza kaza kaza hu'za vano nehaze. Hanki namazaga zamagri kna huno tro huzmante'ne. Anumzamo'ma anazama keana knare hu'ne. **22** Anumzamo'a asomu ke hunezmanteno amanage hu'ne, kase hakare huta hagerimpina mani aviteta nemaninkeno, namamo'zanena mopafina kase hakare hu'za mani titipa hiho. **23** Hagi haninkino masa higeno, nampa 5fu kna emente'ne. **24** Anumzamo'a amanage huno hu'ne, Mopafina miko zagagafa rumofo rumofo fore hanaze. Kumate zagagafagi, afi zagagafagi,

ne'onse zagaramine, zamagragna rumofo rumofo fore hu anante
anante hiho. Anage higeno maka ana zagaramina fore hu'naze.

25 Hanki Anumzamo'a zagagafa tro hu'neana, trampi mani
zagagafa zamagri kna tro nehuno, nontegama mani zagagafa
zamagri kna tro nehuno, mopafi ne'onse zagaramina zamagri kna
tro hu'ne. Anumzamo'ma anazama kegeno'a knare hu'ne. **26** Hagi
Anumzamo'a amanage huno hu'ne, Vahe tro hamnena tagrikna
hu'za manine'za, maka'za kva nehu'za nozameramine, hare'za
vano nehaza namaramine, kumate zagagafane, mopafima
kazama hu'za vanoma nehaza zagarami kegava hugahaze.

27 Hagi Anumzamo'ma vahe'ma tro hu'neana, Agra'agna tro
hu'ne. Vene a'ene tro huzanante'ne. **28** Anumzamo'a asomu ke
huneznanteno amanage huno zanasmi'ne, Mofavre kase hakare
hanakeno, mopafina mani vitesaze. Ana nehuta mikoza kegava
hi'o. Timpi nozame zagane, hareno vano nehia nama zagane,
hakare'a mopafi kaza huno vano nehia zagaramine ana makaza
kegava hi'o. **29** Anumzamo'a amanage hu'ne, Kma antahi'o!

Mopafima nehagea zamofona avima'ane zafa raga'ane nezama
nesa'aza tanami'noe. **30** Hanki mika ama mopamofo agofetu
vonomo nehaza zagagafamo'zane, monafima hare'za vonomo
nehaza nama'zaga'mozane, mika zagagafama zamasimuma
ante'za vanoma nehaza zagamo'zama nesaza zana, ruzahu
ruzahu traza Nagra zami'noe, huno higeno ana zana fore hu'ne.
31 Anumzamo'a mika'za trohuteno keana knare huno hentofa
zanke fore higeno keteno, muse hu'ne. Hagi haninkino masa
higeno, nampa 6si kna emente'ne.

2 E'inahu huno monane mopane, anampima me'nea zantamina
maka trohu vagare'ne. **2** Eri'za eri vagareteno, nampa 7ni knarera
Anumzamo'a manigasa hu'ne. **3** Anumzamo'a nampa 7ni knarera

manigasa nehuno, ana kna eri ruotge huno asomu hunte'ne.
Na'ankure miko'a eri'zana eri vagarenegu huno manigasa hu'ne.

4 Ra Anumzamo'ma monane mopane eri fore'ma hunte'nea
nanekea, amanahu me'ne. **5** E'i ana knafina za'ara zana fore
ama mopafina osu'ne, na'ankure Ra Anumzamo'a ana knafina
kora atregeno oru'ne. Ana higeno eri'za eri vahera fore huno
omani'negeno, **6** kampu'i tintamimo'za mopafinti hanati'za mika
mopamofona tina ami'naze. **7** Ra Anumzamo'a kugusopa erino
regripeteno vahe tro huno agonagampi Agra'a asimu'a huhu
huvazigeno, vahe efore hu'ne. **8** Hanki Ra Anumzamo'a mago
hoza zage hanati kaziga ante'neankino, ana hozagura Ideni
hoze hu'nea hozamofo agu'afi, ana nera avreno ome ante'ne. **9**
Ra Anumzamo'a rumofo rumofo zafa higeno, mopafinti hage'ne.
Hakare zafamo'za zamuma kete'ene ne'zama ne'arera knare
hu'naze. Hagi ana hoza amu'nompina tare zafa me'ne. Mago zafa
ofri manivava hu zafe. Hagi mago zafa knare zanki, havizanki
huno'ma antahino keno'ma hu zafe. **10** Hagi Ideni hozafintira
mago ti hanatino enevuno, hozafina tina nemino ana timo'a refko
huno 4'afi ranti evu'ne. **11** Ese'ma evu'nea timofo agi'a Pisoni
tinkino, maka Havira mopafi rugagino evu'ne. Ana mopafina
knare goli me'ne. **12** Ana mopafima me'neana mago'zana
ruokamre knare goline, mana nentake'zane, mizama'amo
mareri'nea oniksie nehaza havene me'ne. **13** Anante timofo
agi'a Gihoni tinkino, Kusi mopafi rugagino evu'ne. **14** Hagi
nampa 3a Taigrisi tinkino, zage hanati kaziga Asiria mopafi
evu'ne. Hagi nampa 4a Yufretis tine. **15** Hanki Ra Anumzamo'a
ana ne'ma avreno Ideni hozafima ante'neana, hoza eri'zama
enerino kegavama hanigure huno avrente'ne. **16** Hianagi Ra
Anumzamo'a amanage huno kasegea hunagru hunte'ne, Kagra

mika hozafima me'nea zafa raga amne negahane. **17** Hianagi knare'zanki havi'zanki huno antahino keno'ma hu zafa raga onetfa huo. Hanki kagrama ana zafa ragama nesnanana, tamage hunka anazupa frigahane. **18** Hagi anante Ra Anumzamo'a anage hu'ne, Vemo'ma agrake maniazamo'a knare osianki'na, azahu vahera tro hanugeno knare hu'ne tragote'ne manigaha'e. **19** Nehuno mopa kateno mika zagagafane, namaramine, ne'one zagagafaraminena tro huzmantetenno zamavareno zamagi antezamisie huno ana nete vigeno, zamagi'a ante'zamigeno ana zamagima ante'nere me'ne. **20** Higeno ana ne'mo'a mika nontegama nemaniza zagagafagi, monafima hare'za vanoma nehaza nama'zagagi, mopafima nemaniza maka afi zagagafagi huno zamagi zami'neanagi, agri'ma azahu knampa'a omani'ne. **21** Ana higeno Ra Anumzamo'a ve mofona azeri avukoko higeno mase himre'negeno, magoke omete asoza'a avazu huteno, avufanu renkanirente'ne. **22** Ra Anumzamo'a ana ne'mofo asoza'ama eri'nereti a' trohuno avreno egeno, **23** ana ne'mo'a huno, Ha e'ine! Nagri zaferinareti zaferina'a tro nehuno, nagri navufareti avufga'a tro hu'neanki'na, are hu'na agi antemue. Na'ankure e'i ve'mofo avufafinti erino trohu'negu hu'ne. **24** E'i ana agafare vemo'a nererane, nefanena atreno, a'ane hagerafino eri mago huke nemani'e. **25** Zanagra arave huke kena omasi zanavufga zanavapa manina'anagi, zanagazea osu'ne.

3 Hanki Ra Anumzana Anumzamo'a maka zagagafama mopafima trohu zamante'nefintira, tamage huno masavenentake kema hu'arera osifa'vemofo antahi'zamo'a zamagatereankino, osifavemo'a ana a'mofona antahigeno, Hozafima me'nea zafa rgagura Ra Anumzana Anumzamo'a tamagerfa huno mika one'o huno huranante'nefi? **2** Higeno ana a'mo'a osifavemofo kenona

huno, Hozafintira mika zafa raga amane ne'o huno hurante'he. 3
Hu'neanagi mago zafa hoza amu'nompi me'nea zafa rgagura
avako osuta one'o hurante'ne. Hagi ana zafa ragama nege,
avako'ma huge'ma hanuta'a, frigaha'e huno tasami'ne. 4 Higeno
osifavemo'a a'mofonkura amanage hu'ne, Tamagerfa hutna
tanagra ofrigaha'e. 5 Na'ankure Anumzamo'a keno antahino
hu'neankino, nesna'ana tanavumo'a hari hina Agri kna hutna
antahi antahi tani'amofona eriama hanigetna, knare zanki, havi
zanki hutna keta antahita hugaha'e. 6 Higeno ana a'mo'ma ana
zafa rgama keana ne'zama ne'amo'a knare higeno, zafa ragamo'a
knare hu'neankino, ana a'mo'a amanahu antahintahi eri'ne. Ama
zafa raga tagina nene'na knare antahi'za erisue nehuno, ana zafa
raga tagino neneno, neve'ene mani'negukino, mago'a nevena
amigeno ne'ne. 7 Netakeno zanavumo'a hari hige'ne, zanavufga
zanavapa mani'nene, zanagazegu nehune fiki zafa anina
anakike zanavufgarera kena masina'e. 8 Kinaga zasi anteno
fruma higeno'a Anumzamo'a hozafi ne-egeno agasasanke'a
nentahike hozafi mago'a zafa asoka frakike mani'na'e. 9
Mani'nakeno Ra Anumzana Anumzamo'a vemofonkura kezatino
anage hu'ne, iga mani'nane? 10 Higeno vemo'a huno, Hozafi
neanke'na kagasasanke nentahi'na frakina mani'noe. Na'ankure
navufga navapa mani'nena, koro hu'na fraki'noe. 11 Higeno
Ra Anumzana Anumzamo'a huno, Iza hugantegenka kavufga
kvapara mani'nane? Nagrama ono hu'na hunagru'ma hugante'noa
zafa raga'a taginka ne'nampi? 12 Higeno vemo'a huno, Kagrama
nami'nana a'mo ana zafa raga tagino neneno namige'na
ne'noe. 13 Higeno anante Ra Anumzana Anumzamo'a ana
a'kura huno, Kagra e'i zana na'a hu'nane? Huno antahigegeno
a'mo'a kenona huno, Osifavemo renavatga hige'na tagi'na

ne'noe. **14** Higeno Ra Anumzana Anumzamo'a amanage huno osifavemofona asami'ne, Osifavemoka e'inama hana nona'a, vahe'mo'zama kumate'ma kegavama nehaza zagagafane, trampi afi zagagafama mani'nafintira kazusi (kes) hugantoankinka, kagra zamageterenka rankna erinka kasiguregati regraro henka vano nehunka, mika knafina kugusopa nenenka manigahane. **15** Nagra kagri'ene a'mofo amunompina ha'za nentena, tanagigomokizmi amu'nompina ha'za antesugeno, a'mo'ma kasentesia mofavremo kasenia reprorovazina, kagra agrira agamerumpafi amprigahane.

16 Anage nehuno Anumzamo'a a'mofonkura amanage hu'ne, Mofavrema kasentenaku'ma hananke'na Nagra rama'a kata kamisugenka, ana katafi mani'nenka mofavrea kasentegahane. Ana nehunka negavena tusiza hunka avesintegahane. Hianagi agra kagrira kegava krigantegahie. **17** Hagi Anumzamo'a Adamuna amanage huno asmi'ne, A'kamofo ke antahinka Nagrama kase hugante'na hunagru'ma hugante'noa zafa raga ne'nanku mopamofona Kazusi huntoankinka, kata negrinkenka maka zupa hozaka'a e'nerisankeno nezanka'a fore hinkenka negahane. **18** Hozafi ne'zana ave'ave zane agaso tra'zamo fore huno refinetena ne'zana anampinti erinka negahane. **19** Kavugosafinti kamunasisi hutesigenka nezanka'a eri fore hunka negahane. Ana hume vunka kugusopareti tro hugante'nogu frinka ete mopafi ufregahane. **20** Ana ne'mo'a nenaro agi'a Ivi'e huno antemi'ne. Na'ankure mika vahe'mokizmi zamarera'zama hanigure huno antemi'ne. **21** Hanki Ra Anumzana Anumzamo'a zagagafa akru'a tavrofeno Adamune, Ivinena kukena masizanante'ne. **22** Hagi Ra Anumzana Anumzamo'a amanage hu'ne, Ama ne'mo'a tagri kna huno knare zanki havi zanki huno hago keno antahino hie. E'ina hu'negu

manivava hu'mofo zafa raga'a tagino nesanuno'a manivava
hu'zanku atresanunkeno ana zafarera urava'o osanie. 23 Anage
nehuno Ra Anumzana Anumzamo'a, Ideni hozafintira huntegeno
fegi'a agri'ma tro hu'hea mopare hoza eri'zama erisnigu
huntegeno vu'ne. 24 Hagi Anumzamo'a ana ne'ma Ideni hozafinti
ahenatigeno vutegeno'a, zage hanati kaziga hankavenentike
ankerozamantege'za ana hoza kegava nehazageno, tevenefa
tagivazu nehia bainati kazimo kagigagi nehige'za, ana manivava
zafamofona kegava hu'naze.

4 Adamu'a nenaro Ivi'ene masegeno amu'ene huno ne'mofavre
kasenenteno ana a'mo'a huno, Anumzamo naza hige'na
ne'mofavre erifore hue, nehuno Keni'e huno agi'a antemi'ne.
2 Hagi henka Ivi'a Keni neganana Abeli kasentegeno ana
ne'mo'a ra huno sipisipi afu kegava higeno, Keni'a mopafi
eri'za erino hoza anteno kegava hu'ne. 3 Magokna Keni'a
Ra Anumzamofo ofa hunteku hoza'afinti ne'za erino e'ne.
4 Ana higeno Abeli'a sipisipi afutamimpinti afovage hu'hea
agonesa afu mago aheno eme Kresramana vuntegeno, Ra
Anumzamo'a negeno Abelina antahi muse hunte'ne. 5 Hianagi
Keni'ma ofa hunte'neaza keteno, Anumzamo'a antahi musena
huontegeno, Kenina tusi asi vazigeno avugosa rugriri'ne. 6
Ana higeno Ra Anumzamo'a negeno Keninkura amanage
hu'ne, Nahigenka krimpagna nehunka kavugosa runegaririne?
7 Hagi kagra'ma knare kavu'kava'ma hantesina Nagra muse
hugantosine. Hanki kagrama havizama hanankeno'a, kumimo'a
kazeri kagateregahianki, kagra hankavetinka mani'nenka kumira
azeri agatero. 8 Hagi mago knazupa Keni'a nagana'amofo
Abelinku hofa trampi vanu'e huno agi higeke, vukema ana hofa
trampi umanineke, Keni'a nagna'amofo Abelina ahe fri'ne. 9

Anante Ra Anumzamo'a Kenina antahigeno, Negagna Abeli'a
inantega mani'ne? Higeno Keni'a huno, Nagra onke'noanki,
Kagrama kagesama antahinana nagra nagananimofo kva
hunte ne' mani'nofi? **10** Higeno Ra Anumzana Anumzamo'a
amanage hu'ne, Kagra na'a higenka kefo kavukvara hu'nane?
Nagnakamofo koramo'a mopafi tagiramineno keaga hunto huno
Nagritega krafage nehie. **11** Hagi nagna kamofoma ahenka
eri taginana koramo'a, mopafi tagiramigeno mopamo ne'negu,
ana mopa kazusi huntoankino ne'zana forera osugahie. **12**
Hagi mopafima hozama erinka antesnana hozamo'a, hikazake
huno nena ahenonte'na, nonka'a omanena kanke kanke hunka
ama mopafina vano hugahane. **13** Keni'a amanage huno Ra
Anumzamofo kenona hu'ne, Nagri'ma hunantana kemo'a tusi'a
kna navesie! **14** Hanki kama antahio! Kagra ama mopafinti
nagrira meni nazeri atranankina, Kagri kavuga omaninugeno,
noni'a omane'enigena ama mopafina kanke kanke neha'nena,
aza'o nagesuno'a nahe frigahie. **15** Higeno Ra Anumzamo'a
kenona'a huno, Kagri'ma kahesimo'a ana nona'a 7ni'a zupa
kna'zana agetereno erigahie, nehuno Kenima vahe'mo'zama
negezama ohesnagu mago avame'za agofetu antente'ne. **16** Ana
higeno Ra Anumzamofo avugatira Keni'a atreno Ideni hozamofo
zage hanati kaziga vuno, Nodi mopare umani'ne. **17** Keni'a
nenaro'ene masegeno amu'ene huno ne'mofavre kasenteno,
agi'a Inoku'e huno ante'ne. Hagi anante mago rankuma erifore
huno kiteno, ana kumamofo agi'a Inoku'e huno mofavre'amofo
agire asamre'ne. **18** Hagi Inoku'a mago mofavre eri fore huno
agi'a Iradi'e hu'ne. Iradi'a Mehusaeli nef'a'za higeno, Mehusaeli'a
Metusael nef'a'za higeno, Metusaeli'a Lemeki nafa'za hu'ne. **19**
Hagi Lemeki'a tare atre zanante'ne, mago'mofo agi'a Ada'e,

mago a'mofo agi'a Zila'e. **20** Ada'a ne'mofavre kasenteno agi'a Jabali'e huno ante'neankino, fugagi nom a ki'za nemase'za afu'ma kegava nehaza vahe'mokizmi nezamageho'e. **21** Hagi ngana'amofo agi'a Jubali'e. Jubali'a ese'ma agafa hunonofite zavena (harp) nehaza naga'mokizmi nezamageho'e. **22** Hanki Zila'a Tubalkein kasente'neankino, agra aenima, kopama tevefi krefizo huteno amasagino eri'zama eri'zantami tro nehia nere. Tubalkeini nesaro agi'a Na'ama'e. **23** Mago zupa Lemeki'a nenaro kiznigura amanage huno zanasmi'ne, Adagane Zilagata'a kama antahi'o, mago nehaza ne'mo nahe kuzafa antege'na, agrira ete ahe fri'noe. **24** Hagi mago ne'mo'ma, Kenima eme ahe frisanuno'a, 7ni'a zupa knazana eri agofetu huno erigahie. Hianagi tamage huno nagri'ma Lemeki'nama eme nahesanuno'a, 77ni'a knazana agofetu huno nona'a erigahie. **25** Hagi Adamu'a nenaro'ene masegeno ne' mofavre kasenteno amanage hu'ne, Keni'ma Abelima ahe fri'nea nona'a Anumzamo'a ne'mofavrea namiankino agi'a Seti'e. **26** Henka'a Setina ne'mofavre fore humigeno agi'a Enosi'e huno antemi'ne. Ana knafi vahe'mo'za erigafa hu'za Ra Anumzamofo agihanta nevazi'za, Agrite mono hunte'naze.

5 Adamumpinti'ma vahe'ma fore'ma hu'za e'naza nanekea amanahu hu'ne. Anumzamo'ma vahe'ma trohu'neana, Agra'agna huno trohu'ne. **2** Agra vene, a'ene tro huzmanteno, vahere huno hu'ne. **3** Adamu'a 130'a Zagegafu nehuno agra avugosagna ne'mofavre kasenteno, agi'a Seti'e hu'ne. **4** Ananteti 800'a zagegafu agatereno mani'neno, ne' mofara mago'a kasezamante'ne. **5** Hagi Adamu'a 930'a zagegafu maniteno fri'ne. **6** Hagi Seti'a 105fu'a zagegafu nehuno, ne' mofavre eri fore huno agi'a Enosi'e huno antemi'ne. **7**

Hagi Enosima kasenteteno'a, ananteti Seti'a 807ni'a zagegafu nemanino, mago'a ne'mofara kasezamante'ne. **8** Ana huteno 912fu'a zagegafu Seti'a maniteno fri'ne. **9** Enosi'a 60'a zagegafu nehuno ne' mofavre eri fore huno, agi'a Kenani'e huno antemi'ne. **10** Kenanima kasenteteno'a Enosi'a 815ni'a zagegafu maniteno mago'a ne'mofara zamante'ne. **11** Enosi'a 905fu'a zagegafu maniteno fri'ne. **12** Kenani'a 70'a zagegafu nehuno, ne'mofavre eri fore huno agi'a Mahalari'e huno antemi'ne. **13** Mahalarima fore'ma hutegeno'a Kenani'a 840'a zagegafu nehuno, mago'a ne'mofara kasezmantene. **14** Kenani'a 910ni'a zagegafu maniteno fri'ne. **15** Mahalari'a 65'a zagegafu nehuno, ne' mofavre anteno agi'a Jareti'e huno antemi'ne. **16** Jaretima kasenteteno, Mahalari'a 830'a zagegafu nehuno mago'a ne'mofara kasezmante'ne. **17** Hanki Mahalari'a 895fu'a zagegafu maniteno fri'ne. **18** Jareti'a 162tu'a zagegafu nehuno ne' anteno agi'a Inoku'e huno antemi'ne. **19** Enokuma kasenteteno Jareti'a 800'a zagegafu nehuno mago'a ne' mofara kasezmante'ne. **20** Jareti'a 962'a zagegafu maniteno fri'ne. **21** Inoku'a 65'a zagegafu maniteno, ne' mofavre Metusera kasente'ne. **22** Ananteti Metuserama kasenteteno'a Inoku'a 300'a zagegafufina knare huno Anumzane tragoteno mani'neno mago'a ne' mofara kase zamante'ne. **23** Hagi ana makara 365'a zagegafu Inoku'a mani'ne. **24** Inoku'a Anumzane tragoteno mani'negu, Anumzamo'a avre'ne. **25** Metusera'a 187ni'a zagegafu maniteno, ne'mofavre Lemeki kasente'ne. **26** Metusera'a Lemekima kasenteteno'a, 782'a zagegafu maniteno, mago'a ne'mofara kase zamante'ne. **27** Hagi Metusera'ma manino'ma e'nea kna'a, 969ni'a zagegafu huteno fri'ne. **28** Lemeki'a 182'a zagegafu nehuno ne' mofavre kasente'ne. **29** Lemeki'a Noa'e huno agi'a antemi'ne. Ra

Anumzamo'a mopamofona tusi hunte'negeta tusi'a eri'za erita nevunkeno tagri taza hanigu ama mofavre agi'a, mani fruhu nere nehuno, zamagra kefina Noa'e huno antemi'ne. 30 Hanki Noama kasenteteno'a Lemeki'a 595fu'a zagegafu maniteno, mago'ane ne' mofara kasezmante'ne. 31 Lemeki'a ana maka kna'a, 777ni'a zagegafu maniteno fri'ne. 32 Noa'a 500'a zagegafu maniteno, ne'mofavrea tagufa zamanteno zamagi'a Semi'e, Hamu'e, Jafeti'e huno zamante'ne.

6 Veamo'za ama mopafina vahera kase hakare hazageno, knare'nare mofa'nerami fore hu'naze. 2 Hanki vahe'mo'za rama'a mofane zaga kasezmantage'za, Anumzamofo mofavre naga'mo'za ke zamasane nehu'za zamavesia a'ne eri'naze. 3 Ana hianagi Ra Anumzamo'a amanage hu'ne, Avamunimo'a vahe'mofompina mani'neno zamasimura zami vava osugahie. Na'ankure vahera fri'zaga mani'nazanki'za, 120'a zagegafua agateore'neza frigahaze. 4 Ana knafine henka'anena tusinasi vahe'mo'za ama mopafina mani'nazankino, Anumzamofo mofavremo'za e'za vahe'mokizmi mofane zagane emasageno mofavrea kasezmante'naze. Hanki'za fore'ma hazana korapa knafina hankavenentake hu'za hihamu'ane vahe fore hu'naze. 5 Hianagi Ra Anumzamo'ma vahe'mokizmima zamage'neana, mika kna havi avu'avazamo ama mopafina ra huno vahe'mofo antahi antahifina, havi avu ava'zamo aviteno meno vu'ne. 6 E'na nehazageno Anumzamo'a nezamageno rimpa haviza higeno muse osuno, nahige'na vahera trohu'noe huno asunke nehuno, 7 Ra Anumzamo'a amanage hu'ne, Vahe'ene, zagagafane, namaramine, mopafi ne'onse zagarami'nena zamahe fanane hugahue. Nagrama tro'ma huzmante'noa zankura nasunku hue hu'ne. 8 Hianagi Noa'a agrake Ra Anumzamofo avurera

fatgo nera mani'negeno muse hunte'ne. 9 Hagi Noa nagamofo
nanekea amanahu me'ne. Ana knafima mani'naza vahepina
Noa'a fatgo huno hazenke'zama'a omanegeno Anumzane
tragoteno mani'neno amage anteno vu'ne. 10 Noa'a ne'
mofavre tagufa zamanteno zamagi'a Semi'e, Hamu'e, Jafeti'e
huno antezmi'ne. 11 Ama mopamo'a Anumzamofo avurera
haviza hu'ne, ha' zamo'ene, kefo avu'avazamo enena avite'ne.
12 Anumzamo'ma ama mopafima ke'neana, tamage huno
makazamo'a haviza hu'ne, ama mopafima me'neazama keana
kumike'za huvagare'naze. 13 Hagi Anumzamo'a anage huno
Noana asmi'ne, Ke ontahizageno kefo avu'ava zamo'a aviteankina
zamagri'ene mopazimine zamahe fanane huku Nagra nagesa
nentahue. 14 Hagi kagra hanave zafareti ra ventea tro nehunka,
asa hutanenka hunaraginto. Timo'ma ufre'zankura agu'ane
megianena fukinu renkaniro. 15 Ana ventema kisanana, zanra'a
150'a mitagi, kahesa'a 25 mitagi, atrure'a 15 mitagi hunka
neginka, 16 anagamu no amumpa tvaonte mago mitamofona
agema'a hafu'a mita zasikana hagento. Magokaziga kaha
hagentenka, ana ventemofo agu'afina ese nonki, anante nonki,
agofetu nonki hunka kio. 17 Hagi Nagra ha'enkeno tusi'a ti
hageno mopa refitena mani'ne'za zamasimu nentaza zane,
maka'zanena zamahe fanane hugahue. 18 Hu'neanagi kagrane
huhagerafinugu huvempa hu'na negasamue. Kagrane a'mofavre
ka'ane knoferahe'zane tamagra maka ventefi marerigahaze. 19
Hagi rumofo rumofo zagagafama mani'nazafintira vene, a'ene
zamavaretere huge'za kahefa hu'za manisagu ventefi marerihio.
20 Zgagafama nama, rumofo rumofo kumate zagane, mopafi
ne'onse zagarmine, vene a'ene kasefa hu'za manisagu kagrite
egahaze. 21 Ana nehunka aru ne'za aru ne'zana, tamagrane

maka zagagafanema nesazazana erinka eme eritru huo. 22

Higeno Anumzamo'ma asmi'neaza huno Noa'a maka'zana tro hu'ne.

7 Hagi Ra Anumzamo'a anage huno Noana asami'ne, Maka ama mopafima menima mani'naza vahepina kagrake fatgo nera mani'nanke'na negagoe. E'igu kagrane nagaka'anena ventefi mareriho. 2 Kase avima hanagu avusese zagagafaintira 7ni'a aravere aravere zamavarentetere huo. Ana nehunka avusese osu zagagafaintira magoke arave zanavrentetere huo. 3 Ana nehunka kase avima hanagu nama 7ni'a aravere aravere zamavarentetere huo. 4 Na'ankure 7ni'a zagegna manite'na Nagra ha'nenkeno kora rugahie. 40'a zagine hanine ko' nerinke'na, Nagrama mopafima trohu zamante'noa zana maka zamahe fanane hugahue. 5 Higeno Anumzamo'ma asmi'neaza huno Noa'a mika'zana hu'ne. 6 Ana knafina Noa'a 600'a zagegafu mani'tegeno, timo'a mopa ahe refite'ne. 7 Ko' runaku nehige'za, Noa'ene nenaro'ene, mofavre zaga'ane anoferahe'zane ventefi mareri'naze. 8 Hagi agru osu zagaramimpinti'ene agruma hu'naza zagaramimpinti'ene namaramimpinti'ene, mika zagaramimpintira vene a'ene taretare hu'za Anumzamo'ma kema hu'neaza hu'za Noa'ene ventefi ufre'haze. 10 Hagi 7ni'a zagegna manitageno, kora erigafa huno rigeno, ti hageno refite'ne. 11 Noa'a 600'a zagegafu manitegeno 2 ikana 17tini zupa mopamo'a ruhagro higeno mopa agu'afinti tina hanatino tusi'a ti hage'ne. Tusi'a ko' ruvava huno havi avufgafinti hatihati huno tusi'a ti hage'ne. 12 Ana nehuno masane, hanine 40'a knafi ruose kora ruvava huno vu'ne. 13 Noa'ma ventefi mareria zupa, mofavre naga'a Semiki, Hamuki, Jafeti'ma a'ne zamima nezmarerama hu'za mareri'naze. 14 Trampi zagagafane, kumate zagagafane, namane, rumofo

rumofo mopafi ne'onse zagarmina, vene a'ene Noante etere
hu'za ventefi ufre'naze. **15** Aravere aravere zamasimu nentaza
zagagafamo'za ana maka Noante e'za ventefi ufre'naze. **16**
Anante Anumzamo'ma kema hu'neaza huno aravere aravere
mika ufre varetageno, Ra Anumzamo'a kafana erigi zamante'ne.
17 Ranko'ma ru'neana zagine hanine 40'a knafi kora ruvava
huno tusi'a ti hageno ana ventea mopafinti erisga huno mareri'ne.
18 Ana nehuno timo'a reviteno marenerino mopa refitegeno,
ventemo'a timofo agofetu me'ne. **19** Hagi timo'a mago'ene hageno
marerino osi agonaramine, zaza agonaraminena mika erinakri
vagare'ne. **20** Hagi timo'a mago'ene mareri aviteno, mika mopane
mareri agatere'nea agonaraminena 7ni'a mita aru agatereno
refite'ne. **21** E'ina higeno mopafima mani'nea zagaramine,
nontega zagagafane, trampi zagagafane, namaramine, ne'onse
zagarmine, vahe'ene, mopafima vanoma nehaza zagarminen
zamahe fri vagare'ne. **22** Hagi mopafima zamasimu eri'za
mani'naza zagagafa, maka fri hana hu'naze. **23** Anumzamo'a
vahe'ene, ne'onse zagarmine, namaramine, zagagafanena
zamahe fanane hige'za omanitfa hu'naze. Higeno Noa'ene
ventefi mani'namo'za zamagrake kasefa hu'za mani'naze. **24**
Hagi 150'a zagegnafi timo'a mopa refite'ne.

8 Hagi timo'a mopa refite'negeno Anumzamo'a Noanku'ene mika
zagagafama ventefi mani'hagu agesa nentahino, zaho atufegeno
zaho erino tina retufegeno taneno urami'ne. **2** Anumzamo'a
mopafinti'ma hanati'nea tina renkani nereno, monafinti ru'hea
kora eri refitegeno ruse'ne. **3** Hagi 150'a knamofo agu'afi timo'a
akoheno taneno urami'ne. **4** Hagi 7ni ikamofona, 17ni zupa ana
ventemo'a eramino Ararati agonare eme runtrako hu'ne. **5** Timo'a
akoheno taneno uneramigeno 10ni ikamofo ese knazupa, mago'a

agonamo'za osi'a hanaku hazage'za ke'naze. **6** Hagi henka
40'a zagegna maniteno Noa'a zaho'ma erikana eri anagino,
7 kotikoti nama huntege vuteno, vano vano nehigeno, timo'a
taneno uramigeno mopa efore hu'ne. **8** Hagi mopamo'ma ho'mu
hu'nesigu, Noa'a mago maho nama huntegeno, **9** hareno vano
hiana manisnia zana omaneno tinke me'negeno ete e'ne. Egeno
Noa'a aza antegame teno ventefi avre vazi'ne. **10** Avrentegeno
7ni'agna manitegeno, Noa'a ete maho nama huntegeno hareno
vu'ne. Hagi ana maho namamo'a kasefa olivi zafa asina atasino
agipi haninkofino ana kinagage ehanati'ne. Ana higeno Noa
keteno, hago timo'a taneno uramie huno agesa antahi'ne.
12 Mago'ene 7ni'agna maniteno, ana mahona huntegeno
hareno vuteno ete ome'ne. **13** Noa'a 601ni'a kafuma nehigeno,
pusa ikamofona ese knazupa, mika ama mopafina timo'a
ho'mu higeno, Noa'a ana ventemofona amumpafinti anasgeno
keana, mopamo'a ho'mu huvagare'negeno ke'ne. **14** Anante
2 ikamofona 27ni knazupa mopamo'a ho'mu huvarenegeno
Noa'a ke'ne. **15** Anumzamo'a amanage huno Noana asmi'ne,
16 kagrane nagaka'anena ventefintira atreta fegi'a atiramiho.
Ventefima mani'naza zagagafane, namaramine, mika mopafi
vano nehaza zagaraminena, zamavare atrege'za mopafi vu'za
eza nehu'za kase hakare hu'za maniho. **18** Anage hige'za Noaki,
nenaroki, mofavre naga'ane, anoferahe'zane atirami'naze. **19**
Hagi ana zagagafane, ne'onse zagaramine, nama zagane, mika
vanoma nehaza zagaramina, zamagrare zamagrare erizogi'za
ventefintira atirmi'naze. **20** Anantera, Noa'a Ra Anumzamofonte
Kresramana vu ita trohuteno, mago'a avusese zagagafinti'ene
avusese namafinti'enena aheno mika Kresramana vu'ne. **21**
Hagi Ra Anumzamo'a Kresramana vu'nea mana'a nentahino

muse nehuno amanage hu'ne, vahe'mo'za kumi'ma hanaza
zankura mago'anena ama mopa eri havizana osugahue. Hakare
vahe'mo'za mofavrema mani'nazareti'ma eno ama knare'ma
eana, havi antahi'zampinke mani'naze. Hakare zagaramima
zamasimu nentaza zagaramina menima huaza hu'na zamahe
refiotegahue. **22** Ama ana mopa me'enkeno maka'zana me'nena
hoza negri'za, kafigahaze. Zasi'ma hu kna ne'enkeno, amuhoma
hu kna egahie. Ko' aru knane zagegnanena nemenkeno, zagine
hanine nehanigeno ana maka'zana vaga oregahie.

9 Noane mofavre naga'anena Anumzamo'a asomu
hunezmantero amanage huno zamasmi'ne, Mofavrea kase
zamantenke'za ama mopa ruvite'za maniho. **2** Zafafima
nemaniza zagaramima, timpima nemaniza zagaramima,
namaramima, kazakaza hu'za vano nehaza zagaramina mika
kegava hihogu tami'noanki'za tamagoro nehanageta kegava
hugahaze. **3** Ana zagagafa nesnagu meni neramue. Kotera
hagu' kamosa tami'noanki'na, menina maka'zana nesnagu
neramamue. **4** Hianagi korama me'nea ame'a onegahaze,
na'ankure korampina e'i asimu me'ne. **5** Tamage huankino,
mago ne'mo'o, mago'a zagagafamo'zama tamahe'za tamagri
korama eri fegi tesige'na, Nagranena ahena agri korana eri fegi
atregahue. Mago'mo nefuma ahe frisnige'na, Ngaranena, agrira
ahe frigahue. **6** Aza'o mago ne'ma ahe frisiana, ana nera ahe
frigahaze. Na'ankure Nagra Anumzamo'na vahera Nagragna
trohu zamante'noe. **7** Kagrane, kagehe'zane, vahera kase
hakare huta miko'a mopafina mani viteho. **8** Hagi mago'ane
Anumzamo'a Noanku'ene, mofavre naga'agu'enena amanage
huno zamasami'ne, **9** Menina antahio, kagrane, nagaka'ane
kagehe'zane hagerfita mani'sunegu huvempage nehue. **10**

Hagi ventefinti'ma atiramiza kagranema mani'naza zagagafane namaramine, kumate zagafaramine, trampi zagagafaraminte'ene ana huvempa kea nehue. **11** Nagra huvempa ke'ni'a huama nehue, runena kora atresanugenno zamasimu ante'za mani'naza zagaramine, mohanena tina hageno zamahe fanane osugahie.

12 Anante Anumzamo'a huno, Nagrama amama nehuana huvempa ke nehue, Nagrane, tamagra'ene hakare zamasimu eneriza zagaramima tamagrane mani'nazane, henkama fore'ma hanaza vahe'ene amu'nontifi huvempa kea nehuanki'na, **13** mago avame'zana monare furagena ante'nanena, negeta antahi vava hugahaze. **14** Hampona huntesugenno mopa refinetenkeno, furagenamo'a monare fore hugahie. **15** Nagrama kagri'ene maka ama mopafima zamasimu eri'za nemaniza zagagafagu'ma huvempama hu'noa ke'ni'agu nagesa nentahi'na, ete tinura tamahe fanane osugahue. **16** Hagi monare'ma furage'nama Nagrama negesuna, maka zamasimu'ma eri'za nemaniza zagaramina huvempa kema huzamante'noa kegu nagesa antahigahue. **17** Mopafi vea'ene zagagafane huhagerafinogu avame'a, e'inahu'za fore hugahie, huno furagenakura Anumzamo'a Noana asami'ne. **18** Hagi ama Noa mofavre naga'ma ventefinti atirami'namokizmi zamagi'a, Sem'i'e, Hamu'e Jafeti'e. Hagi Hamu'a Kenani nefal'e. **19** Noana tagufa mofavre nagapinti mopafima mani'nona vahera, forehu hakare hu'none. **20** Hagi tima hagetegeno henka, Noa'a hoza ne' mani'neno krepi hoza ante'ne. **21** Mago zupa waini tima'a neteno negineno kena omasi avufga avapa seli noma'afi mase'ne. **22** Kenani nefal'e Hamu'a ome keana Noa'a avufa avapa mase'negeno keteno atiramino nempu'amokizni ome zanasmi'ne. **23** Hagi Semike, Jafetikea tavrave eri'ne

zanafunte antetene zanamigati ana seli nompi vu'ne neznafana ome refitentena'e. Zanavugosa arugaziga hunte'ne nezanafa avufga onke'na'e. 24 Hagi Noa'ma negineno mase'nefinti henka ruhari huno negeno Hamu'ma hunte'nea zana keno antahino huteno, 25 Noa'a amanage hu'ne, Kenani'a sifnafi nemanino, afuhe'mokizmi zamagafinka evuramino amane eri'za vahe'zami manigahie. 26 Hagi mago'ane Noa'a anage hu'ne, Semi Anumzamofo ra agi nemita agi'a ahentesga hanune. Kenaniga, Semi kato vahe manigahane. 27 Anumzamo'a Jafetina, mopa'a erira huntenkeno Semi'ene tragotene mani'ne snakeno Kenani'a Jafeti eri'za vahe manigahie. 28 Timo'a tanetegeno Noa'a mago'ane 350'a Zagegafu mani'ne. 29 Hagi ana miko 950'a zagegafu Noa'a maniteno fri'ne.

10 Rantima hageno mika'zama ahe refitetegeno'a, Noana tagufa mofavre nagapinti maka'a vahera fore hu'naze. Ana kogna naga zamagi'a Semiki, Hamuki, Jafeti'e. 2 Hagi Jafeti mofavre naga zamagi'a ama'ne, Goma'e, Magogi'e, Madai'e, Javani'e, Tubali'e, Meseki'e, Tirasi'e. 3 Hanki Goma amohe'i zamagi'a Asikenazi'e, Rifati'e, Togarma'e. 4 Hanki Javani mofavre naga zamagi'a Elisa'e, Tarsisi'e, Kitimi'e, Dodanimi'e. 5 Ana nagapintira refko hu'za hagerinkena mopa zamagerute zamagerute kognare, famote ranra kuma erifore hu'za kegava hutere hu'za mani'naze. 6 Hanki Hamu mofavre naga zamagi'a Kusi'e (Etopia), Mizrami'e (Isipi), Putie (Libya), Kenani'e (Palestine). 7 Hanki Kusi mofavre naga zamagi'a Seba'e, Havila'e, Sabta'e, Rama'e, Sabiteka'e. Hanki Rama'a tare ne'mofavre zanante'ne, zanagi'a Sebake Dedanike. 8 Kusi'a, Nimiroti nef'a'e. Nimiroti'a agra harafa nere. 9 Anumzamofo avurera knare harafa vahe fore huno mani'nea nere. E'ina'ma hu'negu menina vahe'mo'za rumofoma

husga huntenakura, Nimroti kna vahe mani'ne hu'za nehaze. **10**
Nimroti'ma kegava hu'nea moparera tagufa rankumara me'ne,
zamagi'a Babelie, Erekie, Akatie, Kalne, e'i ana kumatmina Sinari
(Babiloni) mopafi me'ne. **11** Nimroti'a Babiloni rankumara atreno,
Asiria kaziga vuno rankumazaga ome azeri otino ki'ne. Ana
kuma zamagi'a Ninive, Rehobotirie, Kalae, Resenie. **12** Hanki
Reseni rankumara Ninivene, Kala kumamofo amu'nompi me'ne.
13 Isipi'a amana vahe'mokizmi nezamageho'e, Luti vahe'ma,
Anami vahe'ma, Lehabi vahe'ma, Naftu vahe'ma, Pasru vahe'ma,
Kaslu vahe'ma, Kriti vahere. Filistia vahera Kriti vahepinti fore
hu'naze. **15** Kenanina agonesa mofavrea Saidoni'e, hanki
anazanke hu'za agripinti'ma fore'ma hu'nazana Hiti vahe'ma,
16 Jebusi vahe'ma, Amori vahe'ma, Grgasi vahe'ma, **17** Hivi
vahe'ma, Arkisi vahe'ma, Sini vahe'ma, **18** Arvada vahe'ma,
Zemari vahe'ma, Hamati vahe'mo'zanena Kenanimpinti fore
hu'naze. Hanki henka Kenani, agehe'za mago mago hu'za ru
mopare ru mopare umani emani hu'naze. **19** Hanki Kenani vahe
mopamo'a, Saidoni kumateti eri agafa huno Gerari vuno Gaza
uhanatiteno, ananteti vuno Sodom Gomora kaziga uhanatino,
Admane, Zeboim kaziga vuteno Lasa uhanati'ne. **20** Hamu
agehe'za nagatenofite hu'za mani'neza ruzmegeru ruzmegeru
neru'za rankuma trohu'za kegava hutere hu'za mani'naze. **21**
Hagi Semina mago'a ne'mofavre'a fore humi'neankino, Jafetina
nempu amo'e. Semi'a Eberi nagamokizmi nezamageho mani'ne.
22 Semi mofavre naga zamagi'a, Elamu'e, Asari'e, Arpaksadi'e
Ludiki, Aramu'e. **23** Aramu mofavre naga zamagi'a Uzi'e, Huli'e,
Getari'e, Masi'e. **24** Arpaksadi'a Sela nef'a'e, Sela'a Eberi nef'a'e.
25 Eberi'a tare ne' mofavre zanante'ne. Mago'mofo agi'a Peleki'e,
Peleki'e hu'nea agimofo agafa'a amanahu hu'ne, mopa refko

hu'za nagatenofite hu'naze. Hanki nefu agi'a Joktani'e. 26
Joktani'ma zamante'nea naga zamagi'a, Almodati'e, Selepi'e,
Hazarmaveti'e, Jera'e, 27 Hadoramuki, Uzaliki, Dikla'e, 28 Obaliki
Abimaeliki, Seba'e. 29 Hagi Ofiriki, Havilaki, Jobabiki hu'za
zamagra Joktani mofavre naga mani'naze. 30 E'i ana naga'ma
kuma tro hu'za mani'naza mopamo'a Mesati agafa huteno vuno,
Sefari zage hanatitega agona mopama me'nerega uhanatine.
31 Hagi Semimpinti'ma fore hu'naza vahera nagatenofite
mago mago hu'za manitere hu'ne'za zamagerute zamagerute
hu'za mopa zamire mani'ne'za, rankuma trohu'za kegava hu'za
manitere hu'naze. 32 Hagi tima hagetegeno ana amefi'a Noa
ahi'mo'za mofavre naga'afinti forehu anante anante nehu'za,
hakare kaziga mopafina ranra kuma ante'za maniza vu'za e'za
hu'naze.

11 Korapa knafina ama mopafima mani'naza vahe'mo'za
magoke zamageruke neru'za, magoke kege hu'naze. 2
Vahe'mo'za hage'za zage hanatitega nevu'za mago agupo
mopa Sinar (Babiloni) ome kete'za, anante kuma ome ante'za
mani'naze. 3 Mani'ne'za ke hugantugama hu'za anage hu'naze,
Mopa kateta briki tro huta tevefi kre hanavenetita, kolta fuki erita
simenia eri hanavetita tro huta nona kisune hu'za hu'naze. 4
Anante amanage hu'naze, Tagrati rankuma trohuta za'za no kita
monafi marerisnunkeno, ana nomo'a ran tagi neramina, arurega
vuta eta hu'zankura tazeri atru hanie. 5 Hianagi Ra Anumzamo'a
rankuma'ene, zaza none, vahe'mo'zama ki'naza nonku'ma
kenaku erami'ne. 6 Ra Anumzamo'a amanage hu'ne, Zamagra
magoke naga mani'ne'za magoke zamageru neru'za, amazana
eri agafa hazankiza, mago'zama hunaku'ma hanaza zana, amne
tro hugahaze. 7 E'i zanku tagra uramita ke'zami eri savari

hamanenke'za, zamagra zamageru'ma antahizankura amuho hugahaze. **8** Anage nehuno Ra Anumzamo'a zamazeri fragu vazige'za kumazimi tro huvaga ore'za atre'za maka moparega vu'za e'za hu'za umani'naze. **9** E'ina hu'nea agafare ana ran kumakura Babelie hu'za hu'naze. Na'ankure Ra Anumzamo ana mopafi vahe'mokizmi zamagerura zamazeri havia huteno, hakare moparega zamazeri atrege'za vu'za e'za hu'naze. **10** Tima hagetegeno tare kafuma evigeno'a, Semimpinti'ma fore'ma hu'naza vahera amana hu'ne. Semi'a 100'a zagegafu huteno, Arpaksadina nef'a'za hu'ne. **11** Arpaksadi nafa'za huteno Semi'a 500'a zagegafu nehuno ne'mofara mago'ane zamante'ne. Semi'a 600'a zagegafu maniteno fri'ne. **12** Arpaksadi'a 35'a zagegafu huteno, Selana nef'a'za hu'ne. **13** Arpaksadi'a Sela nef'a'zama huteno'a, 403'a zagegafu nehuno mago'ane ne'mofara zamante'ne. Arpaksadi'a 438'a zagegafu huteno fri'ne. **14** Sela'a 30'a zagegafu maniteno, Eberina nef'a'za hu'ne. **15** Sela'a Eberi nef'a'za huteno 403'a zagegafu nehuno mago'ane ne'mofara zamante'ne, Sela'a 433'a zagegafu maniteno fri'ne. **16** Eberi'a 34'a zagegafu maniteno, Peleki nef'a'za hu'ne. **17** Eberi'a Peleki nefaza huteno, 430'a zagegafu nehuno mago'ane ne'mofara zamante'ne. Eberi'a 464'a zagegafu maniteno fri'ne. **18** Peleki'a 30'a zagegafu nehuno Reuna nef'a'za hu'ne. **19** Peleki'ma Reu nef'a'za huteno 209ni'a zagegafu maniteno mago'ane ne'mofara zamante'ne. Peleki'a 239ni'a zagegafu maniteno fri'ne. **20** Reu'a 32'a zagegafu maniteno, Serugina nef'a'za hu'ne. **21** Serugi'ma fore hutegeno henka Reu'a 207ni'a zagegafu maniteno, mago'ane ne'mofara zamante'ne. Reu'a 239ni'a zagegafu maniteno fri'ne. **22** Serugi'a 30'a zagegafu maniteno, Nahona nef'a'za hu'ne. **23** Serugi'a Naho nefaza huteno 200'a zagegafu maniteno,

mago'ane ne'mofara zamante'ne. Serugi'a 230'a zagegafu huteno fri'ne. 24 Naho'a 29ni'a zagegafu nehuno, Terana nef'a'za hu'ne. 25 Naho'a, Terana nef'a'za huteno 119ni'a zagegafu maniteno, mago'ane ne'mofara zamante'ne, Naho'a 148'a zagegafu maniteno fri'ne. 26 Tera'ma 70'a zagegafu nehuno'a Abrama, Nahoma, Haranikizmi nezmafa'za hu'ne. 27 Tera nagara amanahu hu'ne. Tera'a Abrama, Nahoma, Haranikizmi nezmafa'e. Hagi Harani'a Loti nef'a'e. 28 Tera'a ofri mani'negeno, Harani'a kasente'naza kumate Ur kaziga Kaldi'a mopare fri'ne. 29 Hagi Abramu'ene Nahokea a' eri'na'e. Hagi Abramu a'mofo agi'a Sarai'e. Naho a'mofo agi'a Milka'e, agra Harani mofare. Milkane Iskakizni neznafa'e. 30 Hianagi Sarai'a mofavre onte narvo a' mani'ne. 31 Hagi Tera'a mofavre'a Abramuma, negeho Lotima Abramu nenaro Sarainki huno nezmavreno Kaldi'a kaziga Ur kumara atre'za Kenani vunaku vu'naze. Hianagi Harani kumate'ma unehanati'za anante umani'naze. 32 Tera'a 205fu'a zagegafu huteno, Harani mopare fri'ne.

12 Ra Anumzamo'a amanage huno Abramuna asami'ne, Mopakane, vaheka'ane negafa vahe'enena zamatreka Nagrama kaveri hanua mopare vuo. 2 Nagra kagripinti vahera zamazeri ra hanuge'za, rama'a vahe fore hu'za manigahaze. Nagra asomu hunegante'na, kagi'a eri ra neha'nena, kagripinti maka ama mopafi vahe'mo'za asomura erigahaze. 3 Kagri'ma asomu hugantesimofona Nagra asomu huntegahue. Hianagi aza'o kagri'ma kazeri haviza hanimofona, Nagra azeri haviza hugahue. Maka mopafi naga'mo'za kagripinti asomura erigahaze. 4 Anumzamo'ma kema asmiazza huno Abramu'a Harani kumara atreno nevigeno, Loti'a agrane vu'ne. Abramu'a 75'a zagegafu nehuno Haranitira otino vu'ne. 5 Abramu'a nenaro Saraima,

nagana'amofo mofavre Loti'ma, eri'za vahe'ane, nezmareno
maka afufenoma'ane e'nerino Harani kumara atre'za Kenani
mopare vu'za, Kenani uhanati'naze. **6** Hanki Abramu'a Kenani
mopa amu'nompi rugitagino eva eva huno Sekemu ra oki
zafa me'nere More kumate ehanati'ne. Hanki ana knafina
Kenani vahe'mo'za ana mopafina mani'nageno ehanati'ne. **7**
Ra Anumzamo'a Abramunte eno amanage huno eme asmi'ne,
Maka ama mopa nagaka'a zamigahue, higeno Abramu'a Ra
Anumzante Kresramana vunaku ita trohu'ne. **8** Ananteti atreno
agonarega vuno Betel kumara agatereno, Ai zage hanati kaziga
megeno, Betel kuma zage fre kaziga me'negeno amu'nompi
seli nona ome ki'ne. Ana huteno Ra Anumzanku nentahino,
have ita tro huno Ra Anumzamofo agihanta vazino monora
hunte'ne. **9** Hagi Abramu'a mago'ene manitere hume vuno
Negevi uhanati'ne. **10** Ana knafina tusi'a agatonto kna fore
higeno Abramu'a Isipi moparega vu'ne, na'ankure tusi'a agate
kna fore higeno'e. **11** Hagi Isipima vu kofta nehuno nenaro
Sarainkura amanage huno asami'ne. Kagri'ma kagoana kagra
knare hunka soe a' mani'nananki'za, **12** Isipi vahe'mo'za
kagesu'za Agri nenaro'e hu'za nahe fri'za kagrira a' kavre
antegahaze. **13** E'ina hu'negu, nensaro mani'ne hunka huge'za
onahe'za natre'sage'na mani'neno. **14** Abramu'a anage huno
nehuno Isipi uhanatige'za, Isipi vahe'mo'za Saraima kazana
knare a' mani'nege'za ke'naze. **15** Fero eri'za vahe'mo'za Saraina
kete'za Ferona ome asami'za, knare a' mani'ne hu'za nehu'za,
Saraina avre'za Fero nompi ome ante'naze. **16** Fero'a Saraima
muse huntea kazigati, knare huno Abramuna kegava hunenteno,
sipisipima, bulimakaoma, donkima, eri'za vahera vene a'ene
nemino, a' donkine kemorine huno Abramuna ami'ne. **17** Hianagi

Ra Anumzamo'a tusi'a kirami atregeno Feronte ene, noma'afima nemaniza vahete'ene e'ne. Na'ankure Abramu nenaro Sarainteku e'inhura huzmante'ne. **18** Fero'a ke higeno Abramu'a egeno anage huno asami'ne, Na'a ama zana hunante'nane? Nahigenka Sarai'a a'ni'a mani'ne hunka onasmi'nane? **19** Nahigenka nensaro'e hankena ara avre'noe? Ama'ne negnaro'a! Ko avrenka vuo. **20** Fero'a hankave'ane ke vahe'a huzmanteno, Abramuna kegava hu'enkeno nenaro'ene mika afu fenoznia enerine, ama mopa atrene vi'o huno huzmante'ne.

13 Abramu'a Isipi mopareti hakare afufenoma'a enerino nenanone, Lotine neznavreno Negev vu'naku mareri'ne. **2** Menina Abramu'a afu'zagama, golima, silvama huno rama'a ante'nea ne'kino tusi'a feno ne' mani'ne. **3** Hagi masetere hume nevuno, Negev mopare vuno ko'ma mani'neno'ma hu'nere uhanati'ne. Mago kaziga Beteli kuma me'negeno, mago kaziga Ai kuma me'nere uhanati'ne. **4** Abramu'a ko'ma have itama tro hunte'here anante uhanatino, Ra Anumzamofona mono hunte'ne. **5** Abramu'ene vu'nea ne' Lotina sipisipi afu'zaga'ane, bulimakao afuzaga'ane seli noma'araminena me'hea ne' mani'ne. **6** Hianagi anama mani'a mopamo'a knarera huozanante'ne. Maka afuzaga zani'amo'a titipa huno ne'zama ne'zamo'a atupa higeno, magopi manigara osu'na'e. **7** Ana nehigeno Abramune, Lotikizni afu kva vahe'mo'za fra vazi'naze. Ana knafina Kenani vahe'ene, Perisi vahe'mo'za ana mopafina mani titipa hu'haze. **8** Abramu'a amanage huno Lotina asami'ne, Tagra mago kora mani'noku fra ovazisnue, bulimakao afuti'are kegavama nehaza vahe'mo'zanena fra ovazisazanki, **9** rama'a mopa me'neanki kagra kavesite vanuema hanana kaziga vuo. Kagrama hog a kaziga vugahue hananke'na, nagra tamaga

kaziga vugahue. Hanki kagrama tamaga kaziga vugahue hananke'na, nagra hoga kaziga vugahue. **10** Loti'ma kesga huno kegantugama nehuno Zoari kazigama keana, Jodani kokamo'a hakare kaziga masavenke huno Ra Anumzamofo Edeni hozagna nehuno, Isipi mopagna hu'negeno ke'ne. Anama hu'neana Sodomune, Gomoranema Ra Anumzamo'ma ahe fananema osu'nea knafi anara hu'ne. **11** Anante Loti'a mika Jodani agupoma hunehamprino'a zage hanatitega vu'ne. Ananteti naga'ane otre atre hu'na'e. **12** Abramu'a Kenani mopare manigeno, Loti'a ranku'ma zaga me'nefi Jodani agupofi Sodomu tva'onte seli noma'a omegino mani'ne. **13** Sodomu vahe'mo'za havi avu'ava nehu'za kumi huhakare hu'za, Ra Anumzamofo ha' rente'naze. **14** Loti'ma, Abramu'ma atreno vutegen, Ra Anumzamo'a amanage huno Abramuna asami'ne, Kesga hunka zage hanatitegane, zage fretegane keganti kegama hunka ko. **15** Hagi mika kagri'ene, kagehe'ine tami vaganeroe. **16** Nagra kagehe'ina zamazeri hakare ha'nena, ama mopafina kugusopagna hanage'za, vahe'mo'zahamprigara osugahaze. **17** Hagi otinka vunka enka nehunka, kamisua mopamofo agema'a ko. **18** Higeno Abramu'a otino seli noma'a tagna vazino erino vuno Mamre me'nea oki zafa tavaonte Hebron kumate, Ra Anumzamofo ita ome tro hu'ne.

14 Ana knafina ana mopafima nemaniza kini vahe'mo'zara ha' hu'naze. Mago kaziga mani'naza kini vahe'mokizmi zamagi'a, Amrafeli'a Babiloni kumate kini nere. Arioki'a Elasa kumate kini nere. Kedolaoma'a Elami kumate kini nere. Tidali'a Goimi kumate kini nere. **2** Hagi vu'za ha' ome huzmante'nazana Bera'a Sodomu kumateti kini nere. Birsa'a Gomora kumateti kini nere. Sinabu'a Adma kumateti kini nere. Semeba'a Zeboimi

kumate kini nere. Hagi Bela kumaku'ma, Zoari kumarema nehaza kumateti kini ne'ene hara hu'naku hu'naze. **3** Hagi ana knafina e'i ana kumatera kini vahe'mo'za magopi hagerafi'za Sidimi krahopi nemani'zane. Ana kazigagura menina Fri Hagerine hu'za nehaze. **4** E'i ana kumatamimpi vahera 12fu'a zagegafufina Kedolaoma kegava huzmanteg'e'za mani'naze. Hagi 13nima hiankafufina zamasi vazige'za, ke'a antahi omi'naze. **5** Hagi 14nima hiankafufina Kedalaoma'ene hagerafi'za mani'naza kini vahe'mo'za eza Refaim vahe'ma, Astero-Karnaimi kumate'ene Zuzimi kumate'ene Hami kumate'ene, Emimi kumate'ene Save-Kiriataim kumate vahe'ene, **6** Horaeti kumate vahe'enena ha'eme huzmantenza zamavaririge'za Idomu mopa zamirega El-parani nevazage'za, zamarotgo hu'za hagege hu'nea ka'ma mopa me'nea tvaonte vu'naze. **7** Hagi ete rukrahe'ma hu'za En-mispatima ne-e'za, Amori vahe mopa zamahe'za nehanare'za, Hazazon-tamari nemaniza, Amori vahe'mokizmi mohanena ha'huzmante'za eri'naze. **8** Anantera Sodomu kinigi, Gomora kinigi, Adma kinigi, Zeboim kinigi, Bela kiniki, Belagura menina Zoari hu'za nehazankino, ana 5fu'a kini vahe'mo'za eri mago hute'za, Sidim agupofi hara hunaku tro hu'naze. (Dead Sea) **9** Hagi Sidim agupofima ha'ma hazana, Kedolaoma'a Elami kini neki, Tidali'a Goimi kini neki, Amrafeli'a Sainari kinigi, Arioku'a Elasari kini ne'ki hu'za ana 4'a kini vahe'mo'za 5fu'a kini vahe'ene Fri Hagerima me'nea agupofi hara hu'naze. **10** Ana agupofina koltama kafizama eneri'za keriramina hakare'a me'neankino, Sodomu kini ne-ene Gomora kini ne'ene sondia vahe'znine koro freza ne'eza ana keriramimpi tamizageno, mago'a amanema mani'zamo'za fre'za agonarega vu'naze. **11** Ha'ma hugateraza 4'a kini vahetamine sondia vahe'zmimo'za, Sodomu kumateti'ene

Gomora kumatetira maka fenozmine hozafinti mika ne'zazminena eri'za vu'naze. **12** Ana nehu'za Abramuna nefu mofavre Loti'a Sodomu kumate mani'nege'za nevre'za, afufenoma'ane eri'za vu'naze. **13** Hianagi anampinti mago ne'mo zamatreno freno nevuno, Hibru ne' Abramuna ana mikozamofo nenekea ome asmi'ne. Ana knafina Abramu'a Amori ne' Mamre oki zafa agafare mani'ne. Hagi Mamre'a Eskoline, Anelkizni'a neznafukino Abramu'ene tragote'za mani'nazageno anara hu'ne. **14** Hagi ha' vahe'mo'zama Lotima avre'za vu'naza nanekema Abramu'ma nentahino'a, agranema maninaza vahe'mo'zakasezmante'za ha'zama rempi huzamige'za antahi'naza vahetamina 318ni'a vahe zamavare'za zamarotgo hu'za vuvava hu'za Dani uhanati'naze. **15** Abramu'a eri'za vahe'a ana kenage zamazeri atru huno tarefi refko huzmantege'za nevu'za, ha' vahera hara hu zamagatere'za zamarotgo hu'za Damaskas kumamofo noti kaziga Hoba uhanati'naze. **16** Hagi ha'ma eme hu'za maka fenone, negana mofavre Lotine, maka'zane a'nene vahe'ene hapinti eri'za vu'naza zanena Abramu'a mika zana ete erino ene. **17** Ananter Abramu'a Kedalaoma'ene mani'naza kini vahe ha' huzmagatereteno ete e'ne. Hanki Sodomu kini ne'mo'a Save agupofi eme agenaku e'ne. Ana agupogura kini vahe'mokizmi agupoe hu'za nehaze. **18** Melkizedeki'a Salemi kinigino, bretine, wainine erino eme ami'ne, agra Marerisa Anumzamofo pristi nere. **19** Abramuna amanage huno asomu kea hunte'ne, Monane mopane eri fore hu'nea Marerisa Anumzamo'a kagrira asomura hugantegahie. **20** Ha' vahe ka'a kagri kazampima ante'nere Marerisa Anumzamofo ra agi amisune. Higeno Abramu'a mika zama eri'nefintira refko huno 10ni'a kevu anteteno, anampinti mago kevu Melkizedekina ami'ne. **21** Sodomu kini ne'mo'a Abramunkura amanage hu'ne,

mika vahe'zaga nagri nemaminka, Mika fenona kagraka'a erio. 22
Hianagi Abramu'a Sodomu kini nekura amanage hu'ne, Monane
mopane tro'ma hu'nea Marerisa Anumzantega nagra huvempage
hunte'noankina, 23 ru kagra nehunka Abramuna nagra hugeno
feno nera mani'ne hunka hu'zanku nagra kukena hatinofiro,
agia anomofa nofira, e'oritfa hugahue. 24 Nagrani'a mago'zana
e'orisoanagi, vahe'ni'amo'zama ko'ma ne'zama ne'nazareke
mesie. Hanki nagranema hate'ma vu'namokizmi atrege'za
Aneriki, Eskoliki, Mamreki hu'za mago'a zana zamagra'a eriho.

15 Henka'a Ra Anumzamo'a ava'na gnazampi amanage
huno Abramuna asami'ne, Abramuga korera osu. Nagra
hankoka'agna hu'na mani'noe. Ana nehu'na rama'a knare'nare
zantamina kamigahue. 2 Hianagi Abramu'a anage hu'ne, Ra
Anumzamoka hakare'za nami'nanke'na, mofavre onte'noanki,
iza anazana erigahie? Frisugeno'a Damaskasi kumati eri'za
ne'nimo Eliesa erigahie. 3 Hanki mofavre onami'nanankino,
noni'afima kasente'nea eri'za vahe'nimo ana afufenoni'a erigahie.
4 Hu'neanagi Ra Anumzamo'a kenona'a huno, A'o! Rumo'a
afufenonka'a e'origosie. Kagrama kasentesana mofavremo
afufenonka'a erigahie. 5 Huno nehuno Abramuna avre atiramino
megi'a vuno anage huno asmi'ne, monafi hanafitamina hampriga
hunampi kesga hunka ko? Higeno kesga huno kegeno,
Anumzamo'a huno, ana avamente kagripintira kagehe'za fore
huhakare hu'za manigahaze. 6 Ra Anumzamo'a anage huno
asmigeno, Abramu'a ana kea nentahino, amentinti nehigeno
Anumzamo'a fatgo nere huno Abramunkura hu'ne. 7 Hagi
Ra Anumzamo'a amanage huno Abramuna asami'ne, Ur
kumateti, Kaldia vahepinti Nagra Ra Anumzamo'na kavre'na
e'nomo'na, ama mopa negamue. 8 Higeno Abramu'a huno,

Marerisa Anumzamoka ama mopa kamigahue nehanana, inankna kzigati ama mopa erigahue hu'na ke'na antahi'na hunaku hugenka nehane? 9 Higeno Ra Anumzamo'a amanage huno asami'ne, Tagufa kafu hu'nesia bulimakao a' anenta afu'ene, tagufa kafu hu'nesia a' anenta memene, tagufa kafu hu'nesia ve lama afu'ene, tare maho namararene, zamavarenka Nagrite eno. 10 Higeno Abramu'a kema hia kante anteno ana zagaramina aheno rutne tare hugagufeno kanti kama nenteno, namararena taga osu aga' ante'ne. 11 Ana zana tumpa namamo'za kete'za nenaku neageno Abramu'a keteno harige'za vu'naze. 12 Hagi zage ufregeno avukoko higeno Abramu'a mase himare'neno, avanama keana, tusi'a hanimo agrira refitente'negeno negeno koro hu'ne. 13 Ra Anumzamo'a amanage huno Abramuna asami'ne, Nagra amama negasamua kea antahise huo. Kagehe'za ru vahe mopafi umani'nesage'za zamazeri haviza nehanage'za, kazokzo eri'zana 400'a zagegafufi erigahaze. 14 Hianagi Nagra ana eri'za eri'zmantesaza kumate vahera keaga huzamantegahue. Ana amefiga'a zamagrama atirami'za esu'za, rama'a feno eri'za egahaze. 15 Hanki kagra Abramuga zaza kna so'e hunka manitenka, ozafa renka krimpa frune frisanke'za asegentesagenka kafahezane umanigahane. 16 Hanki kagehe'za 4'a zupa vahera forehu anante anante hute'za, ete ama moperara egahaze. Ana knazupa Amori vahem'o'zama hu'naza kumikura zamazeri haviza hugahue. Hianagi Amori vahem'a zamazeri haviza hanua kna zahufa ome'ne. 17 Hagi zage ufreno hani higeno Abramu'ma keana, nezama kre kavofina tevegumo'a tusiza nehfinti, tevemo'a akrukru huno nerea tevemo afu'ma rutanenteno refko hunte'nea amunompi nevigeno ke'ne. 18 Ana zupage'za Ra Anumzamo'a

Abramu'ene hagerfine manisa'a kea huvempa huno amanage hu'ne, ama mopa kagehe'i zamigahue. Isipi tima me'nereti agafa huteno uvavava huno, Jufretisi rantima me'nere vanige'na, ana maka mopa zamigahue. **19** Ana mopare mani'naza vahe'mokizmi zamagi'a, Kenasi vahe'ene, Kin vahe'ene, Kadmo vahe'ene, **20** Hiti vahe'ene, Peresi vahe'ene, Refaemi vahe'ene, **21** Amori vahe'ene, Kenani vahe'ene, Gilgasi vahe'ene, Jebusi vahe'mokizmi mopa erisanti haregahaze.

16 Abramu nenaro agi'a Sarai'ino, mofavre onte narvo a' mani'ne. Hagi Isipi mopareti Sarai'a eri'za mofo'a Haga avregeno eri'zama'a enerino mani'ne. **2** Sarai'a amanage huno Abramuna asami'ne, Kama antahio. Ra Anumzamo'a mofavre kuni'a erigige'na mofavre kaseontoanki, vunka eri'za a'ni'ane umasegeno agripinti mago'a mofavrezaga eri fore hunamino, huno higeno Abramu'a a'amofonke antahino ana hu'ne. **3** Hagi Abramu'ma Kenani mopare 10ni'a zagegafu manitegeno, Hagana Isipiti'ma avre'nea eri'za mofara Abramuna nenaro'za hanie huno Sarai'a avre ami'ne. **4** Higeno Abramu'a Hagana anteno masegeno, Haga'ma keno antahino'ma hiana amu'enema nehuno'a, kva'a Saraina ke azanava hu'ne. **5** Hagi Sarai'a amanage huno Abramuna kesu'ne, Kagra haviza hu'nankeno eri'za a'mo'a antahi haviza hunenanteno avesinonante. E'i ana knazamo'a nagritetira kagrite vugahie. Nagra eri'za a'nia avre kamugenka antenka mase'hankeno amu'ene huteno antahi haviza hunenante. Kagra havizana hu'nampi, Nagra havizana hu'nofi, Ra Anumzamoke nerageno refko hurantegahie. **6** Hianagi Abramu'a amanage huno Saraina asami'ne, Antahio, knareki kagri eri'za a' mani'neanki kagri'ma kavesisaniaza hunto, huno higeno Sarai'a tusiza huno Hagana azanava higeno koro

freno vu'ne. 7 Freno Suri kumatega nevia kamofo kampui
ti me'nere ka'ma mopafi umani'ne. Anante Ra Anumza'mofo
ankeromo eme negeno, 8 anage hu'ne, Hagaga, Sarai eri'za
a'moka igati ne-enka, iga vu'za nehane? huno higeno, Saraima
eri'zama'ama eri nentoa a'mofo kvafinti fre'na e'noe. 9 Higeno
Ra Anumzamofo ankeromo'a amanage huno asami'ne, Rukrahe
hunka vunka, umani'nenka ke'amofo amage antenka eri'zama'a
omerinto, 10 huno nehuno anage hu'ne, Nagra kazeri ra
ha'nena kagehe'za ohampriga'a vahe fore hugahaze. 11 Ra
Anumzamofo ankeromo'a mago'ene huno, Kamu'ene hunankeno
kna kavenesigenka ke hankeno Anumzamo'a antahi'negu
ne'mofavre kasentenka ana mofavremofo agi'a Ismaeli'e hunka
antegahane. 12 Hagi mofavre ka'amo'a ra huteno, afi' donki afu
kna huno manigahie. Hagi agra mika vahera nezmahanke'za
agrira ahegahaze. Afu agna'zanena fru huno omanigosie. 13
Hanki Haga'a ke humia Ra Anumzamofo agi neheno amanage
hu'ne, Kagra nenagana Anumzane, na'ankure nagra kagoanagi
ofri mani'noe. 14 Ana hu'negu ana tinkerimofo agi'a Bir Lahai
Roie hu'ne. Ana tinkerimo'a Beretine, Kadesine amunozanifi
me'neankino, menina me'ne. 15 Hanki Haga'a ne' kasentegeno,
Abramu'a ana mofavre agi'a Ismaeli'e huno agi'a ante'ne.
16 Abramu'a 86'a zagegafu manitegeno Haga'a Ismaelina
kasente'ne.

17 Abramu'a 99ni'a zagegafu higeno, Ra Anumzamo'a agrite
efore huno amanage huno asami'ne, Nagra Hihamu'ane
Anumzamo'na kagrira negasmue. Nagri namagenentanku
fatgo kavu'kava hunka manio. 2 Hanki Nagri huvempa
keni'amo'a amu'nonti'afi me'nena, Nagra kagripinti vahera
zamazeri hakare hugahue. 3 Abramu'a avugosaregati mopafi

mase'negeño, Anumzamo'a mago'ene amanage huno asami'ne,
4 Nagra kagrane huhagerafi huvempa ke huankino, hakare'a
kokantega vahera kagripinti fore hu'za ku'ma ante'za mani
avitesnagenka, kagra nafazami'za hugahaze. 5 Hagi Abramuge
hu'za mago'enena kagia ohegahaze. Menina Abrahamuge hu'za
hugahaze. Na'ankure kagra hakare'a veamokizmi nafazamiza
hugahaze. 6 Nagra kazeri ra hanena kagripinti hakare'a
kokankoka vahera fore nehanageno, kini vahe'enena fore
hugahaze. 7 Hanki'na Nagra amunonti'afi huhagerafi huvempage
huankino, ama ana mevava huvempa ke'mo'a, kagrite'ene
kagripinti'ma fore hanaza vahete'ene henkama fore hunante
anante hu'za vanaza vahete'enena meno nevanige'na Nagra
kagri Anumza mani'nena, kagripinti'ma fore hu anante ante'ma
hu'za vanaza vahe'mokizmi Anumza manigahue. 8 Kagri'ene,
kagehe'ine, henkama fore hanamokizmine kragama emanina
Kenani mopa tamivaneroe. Ana mopamo'a tamagriza seno
mevava nehina, Nagra zamagri Anumza manigahue. 9
Hagi Anumzamo'a mago'ene amanage huno Abrahamuna
asami'ne, Kagrane mofavrezaga ka'ane, kase anante anante
hanamozanena huvempa keni'a amage anteho. 10 Nagranema
huhagerafi'nonku amanahu hugahaze, ne' mofavretmia mika
zamagozamofo amega anom'a taga hutregahaze. Henkama
fore hu' anante anante'ma hu'za vanaza vahe'mo'zanena ana
zanke hugahaze. 11 Abrahamuga, Nagrane huhagerafi'noa
zamofo avame'zama mesiana, kagozamofo amega noma'a taga
hutro. 12 Hagi maka ne' mofavre'ma kasentesamokizmia 8ti zage
gnare, knane knanena henkama fore hanaza mofavre'mokizmi
zamufga taga hugahaze. Nonka'afima eri'za vahe'mo'ma
kasentesia vahe'pinti'ene zagoreti'ma mizasesana vahe'ma

aruregati e'nesia vahe'enena zamufa taga huzmantegahaze.

13 Kagri nompima mani'ne'za kasentenesa vahepi, zagoreti miza hu'nenaza vahe'mo'zanena, zamagoza anom'a taga hugahaze. E'inama hanaza zamo'a Nagranema huhagerafi'noa zamofo avame'za zamagri zamufgarera mevava hugahie. **14** Hagi agoza anom'a taga osanimo'a, Nagranema huhagerafi'noa kea ruhantaginigu, agrira naga'afintira avre atregahaze. **15** Hanki Anumzamo'a amanage huno Abrahamuna asami'ne, kотera negnarona Sarai'e hu'nane. Hagi menina kasefa agi'a Sera'e hunka hugahane. **16** Nagra Serana asomu huntesugeno, agra mofavre eri fore hunegamina, asomu huntanena hakare vahe'mokizmi antazmiza nehanigeno, agripinti kini vahera fore hugahaze. **17** Abrahamu'a rena reno kepri huno agu'afina kizanereno anage hu'ne, Nagra 100'a zagegafu hugeno Sera'a 90'a zagegafu higeta, ko' ozafa tavava re'noanki, inankna huta mofavre kasentenaku nehukeno nehie? **18** Abrahamu'a amanage huno Anumzamofo kenona hu'ne, knare Ismaeli'a kavure mani'neno asomura erigahie! **19** Hianagi Anumzamo'a amanage hu'ne, A'o tamage huno negnaro Sera'a mofavre kasentesigenka, agi'a Aisaki'e hunka antegahane. Nagra agrane huvempa hanugeno ana huvempa kemo'a agrite'ene, agripinti'ma henkama fore hu anante anante'ma hanaza vahete'ene mevava huno vugahie. **20** Ismaeli kazigagu'ma nantahima kanana, hago antahuanki'na Nagra asomu huntesugeno, agripintira rama'a vahe fore hu'za manigahaze. Ana nehanageno 12fu'a kva vahe'mokizmi nezmafaza hugahie. Nagra agehemokizmia zamazeri hankavetisuge'za hanvenentake vahe manigahaze. **21** Hianagi Nagra hu hagerafi huvempa ke'ni'a, Sera'ma kasentesia mofavre Aisakinte eri hanavetigahue. Ama ana knare anaga'a

kafufi kasentegahie. **22** Anumzamo'a anage huno Abrahamu asmiteno, atreno vu'ne. **23** Abrahamu'a Ismaeline, eri'za vahe'amokizmine zamazerino zamagoza anona taga huvagare zamante'ne. Agranema manine'za kasezmante'naza eri'za vahe'ane, ru mopareti miza se'nea vahe'ane miko zamagoza anona taga huzmante'ne. Anumzamo'ma asmi'nea kante anteno ana zupage'za taga hu'ne. **24** Abrahamu'a 99ni'a zagegafu manino ozafa reteno, avufga taga hu'ne. **25** Hanki Ismaeli'a 13ni'a zagegafu huno nehzave seno manigeno avufga taga hu'ne. **26** E'i ana zupage Abrahamune, Ismaelikizni zanavufga taga huzanante'ne. **27** Miko eri'za vahe'ane, mofavrezimine agrane nemaniza kasente'nazampi, arurega vahe zagoreti miza sezmante'nea vahe'ene ana mika zamagoza anona taga hu'naze.

18 Abrahamu'a zagemo tusi amuho higeno, Mamrea hunagru hu'nea oki zafa agafare seli noma'a kasante mani'negen, Ra Anumzamo'a anante ehanati'ne. **2** Seli noma'a kasante mani'nereti kesga huno keana, taregi magoki vahe ot'i'nageno keteno, agareno viazamo zamagafi ome arena arenal kepri huno, **3** anage hu'ne, Ranimota nagrama knare nehanugeta musema nehusuta eri'za vahetami mani'nogu muse huramantoanki nagatereta eoviho! **4** Muse huramantoanki ama zafa agafare manigsa hunenke'za osia tina afi'za eme tamina tamaga sese hih. **5** Ana nehanage'na ne'zana uri'na eme taminena neneta manifru huteta kama vanarega vugahaze. Eri'za vahekamo'na noni'a kasante nantu ante nante'nagu ne'zana neteta vugahaze, hige'za knareki kema hanaza huo. **6** Anage hazageno Abrahamu'a ame huno noma'afi umarerino amanage huno nenaro Serana asamine, Knare hu'nesnia flaua tagufa kevu urinka eme herunka

bretia kro, 7 nehuno Abrahamu'a agareno vuno bulimaka'afinti
anenta afu ome aheno eri'za vahe'a eme amigeno, hantka
huno erino ome kre'ne. 8 Abrahamu'a meme'mofo ami rima'a
tagino eme ante nezmanteno, ko'ma kragefe'neama'a erino
kaone eme ante nezamanteno tva'onte zafa agafare otino
mani'nege'za ne'naze. 9 Nene'za mani'ne'za Abrahamuna
amanage hu'za antahige'naze, Negnaro Sera'a iga mani'ne?
Hazageno Abrahamu'a huno, Ami seli nompi mani'ne. 10 Higeno
anampinti mago'mo'a amanage huno hu'ne, Henka'a ama ana
knare'ma esnuana negnaro Sera'a ne' mofavre kasente'nena
egahue. Huno nehigeno agu'afi Sera'a seli no kasama'are
mani'neno ana ke antahi'ne. 11 Abrahamuke ozafa tavava
rakeno, kafu zanimo'a agaterege'nne. Sera'a mofavre antega
osu'hegeno avufagamo ampasagigeno mani'ne. 12 Ana higeno
Sera'ma ana kema nentahino'a agu'afi kiza nereno amanage
huno agesa antahi'ne, Nagrane ranimo'enena ozafa tavava
renoanki, inankna huno mofavrea fore huraminogu nehie?
13 Ra Anumzamo'a amanage huno Abrahamuna asami'ne,
Nahigeno Sera'a kizana nereno, tavavamo'na inankna huna
mofavrea kasenteku hugeno nehie huno nehie? 14 Nazamo Ra
Anumzamofona amuho huntegahie? Anaga'a kafufina ama ana
knare, Sera'a ne' mofavre kasente'nena egahie. 15 Sera'a amano
vazigeno havige huno, A'o kizana ore nogenka nehane, huno
higeno Anumzamo huno, A'o kagra kiza re'nane. 16 Ana tagufa
vahe'mo'za ot'i'za vunaku nehu'za, Sodomu kuma me'nea kaziga
zamavurga negageno (Abrahamu kantega ome zamatreteno
enaku nevigeno), 17 Ra Anumzamo'a amanage hu'ne, Menima
hunaku'ma nehua zana Abrahamu avurera eri frara okisue.
18 Tamage huno Abrahamumpinti tusi'a hankavenentake vahe

fore hu'za kuma ante'za manigahaze. Kokankoka mika kumate
vahe'mo'za agripinti asomura erigahaze. **19** Nagra Abrahamuna
huhamprinte'noankino mofavre'ane, agehe'ine huvempa keni'a
rempi huzamisige'za, mani fatgo hu'za nemaniza fatgoma huno
refkoma hu avu'ava zana nehu'za Ra Anumzamo'na kante
vanazegu huhamprinte'noe. **20** Anante Ra Anumzamo'a amanage
hu'ne, Sodomune Gomora vahe'mokizmia tusi'a kumizmimofo
kezanke antahue, hankino kumi'zmimo'a tusi'a zampi mareri'ne.
21 E'ina hu'nagu kumi zmimofo zamagenkema antahi'noa zana
tamagefi, urami'na ome zamage'na antahina hanue. **22** Anage
nehige'ne tare netremokea rukrahe hu'ne Sodomu kaziga
vu'ha'e. Nevakeno Abrahamu'a anante Ra Anumzamo'ene ot'i'ne.
23 Hagi Abrahamu'a erava'o huno Ra Anumzamofona anage
huno antahige'ne, Ana kumapima fatgo vahe'ene, hazenke
vahe'ene mani'nazana ana maka zamahe fanane hugahano?
24 Hagi 50'a ana kumapima fatgo vahe'ma mani'nesazana,
ana 50'a fatgo vahera zamahoke henka ana kumara zamahe
fanane osugahano? **25** E'i kagri kavu kvara omane'neankinka,
havi vahe'ene fatgo vahe'enema zamahe fanane hananke'za
havi vahe'ene, fatgo vahe'mo'zanena mago'zahu knazana
e'origahaze. Mika mopafi vahe'mota mago'zanke hunka Kagra
refko hunerantane. **26** Higeno Anumzamo'a amanage hu'ne,
Nagra'ma kesugenoma' 50'a fatgo vahe'ma Sodomu ran
kumapima mani'nesazana, ana mika rankumara zamagriku hu'na
zamahe fanane osugahue. **27** Anante Abrahamu'a mago'ane
antahigeno, Nagra kugusopage hu'na tanefake vahe'mo'na
Ra Anumzamokane naneke nehue. **28** Hagi 50'a fatgo vahe
mani'nesafinti 5fu'a vahe'ma omanisnagenka, knare ama ana
mika rankumara zamazeri havizana hugahampi? Higeno Ra

Anumzamo'a ete ke nona'a amanage hu'ne, Kesugenoma
45'a fatgo vahe'ma mani'nesage'na Nagra zamazeri havizana
osugahue. **29** Higeno Abrahamu'a mago'ene antahige'no, 40'a
fatgo vahe mani'nesagenka knare zamahe fanane hugahano?
Higeno Ra Anumzamo'a ete ke nona'a hunteno, Kesugen
40'a fatgo vahe'ma mani'nesage'na, Nagra zamazeri havizana
osugahue. **30** Hagi Abrahamu'a mago'ane amanage hu'ne, Ra
Anumzamoka mago'ane kea hugahuanki krimpa aheonanto,
30'a fatgo vahe mani'nesagenka knare zamazeri havizana
hugahano? Higeno Ra Anumzamo'a ke nona'a amanage
hu'ne, Kesugenoma 30'a fatgo vahe'ma mani'nesage'na, Nagra
zamazeri havizana osugahue. **31** Higeno Abrahamu'a mago'ene
hanave e'erino Ra Anumzamofo antahige'ne, 20'a fatgo vahe'ma
mani'nesagenka knare zamahe fanane hugahano? Higeno Ra
Anumzamo'a kenona'a amanage hu'ne, Kesugenoma 20'a fatgo
vahe'ma mani'nesage'na Nagra zamazeri havizana osugahue.
32 Higeno Abrahamu'a anage hu'ne, Ra Anumzamoka mago'ene
kantahigegahuanki krimpa aheonanto, 10ni'a fatgo vahe'ma
mani'nesagenka knare zamahe fanane hugahano? Higeno
Ra Anumzamo'a ke nona'a amanage hu'ne, Kesanugenoma
10ni'a fatgo vahe'ma mani'nesage'na Nagra zamazeri havizana
osugahue. **33** Hagi Anumzamo'ma Abrahamu'ene keaga
huvagama nereno'a atreno vigeno, Abrahamu'a kuma'arega ete
vu'ne.

19 Tare ankero tremoke kinagasegeke Sodomu kumate
uhanati'na'e. Loti'a ana ra kumamofo kasante mani'nege'ne
ome ke'na'e. Hanki Loti'a neznageno otino vuno zanagafi upari
huno, arena ome nereno amanage hu'ne. **2** Muse huranantoanki
ranimota'a eri'za vahetani'amo'na nompi marerita tanaga sese

hi'o. Nagrane maseteta okina vugaha'e, huno hige'ne zanagra
anage hu'na'e. A'o, megi'a kumapi masegahu'e. 3 Hianagi
Loti'a hankavetigene agrane vu'na'e. Vakeno noma'afi ra ne'za
ome kre neznanteno zo'ore bretia mago'a kre znantegene
ne'na'e. 4 Hagi ne'zana nete'za omase mani'nageno, miko
Sodomu kumate nehazavene ranra vahe'mo'zanena Loti nona
eme regagi'naze. 5 Ana hute'za Lotina ke'za atimi'za, Iga
nantu vahe'ma zanavrenkama nonka'afima ante'nana vahera
mani'na'e? Zanavre kamategeta znanteta masamaneno. 6
Hazageno Loti'a atineramino amefiti kafana eri negino, 7
anage hu'ne, Muse hurmantoanki nafuheta kefo avu'ava zana
huoznantegahaze. 8 Kama antahiho, mofani'amokea vene
omase mofatre manina'anki, zanagri zanavre'na eme tami'nena
tamavesinia zama hunaku'ma hanuta anara huznantegahaze.
Hagi muse (plis) hurmantoanki nantu vahe'ma noni'afima
emanina'ana zanagrira mago'zana huoznantegahaze. 9 Huno
nehige'za zamagra anage hu'naze, Kagra manigano! Ru kazigati
vahe'moka tagrikura nehananki, hago kagra refko hurante'za
nehampi, kagrira kazeri havizantfa hugahune. Lotina atufe'za
kafama'are eme rentrako hu'za kafana anafe hu'za ufre'za
hu'naze. 10 Ana netremokea Lotina avazuhu nompinka nente'ne,
kafana erigi'na'e. 11 Maka vene'nema no kasante'ma ot'i'naz
vahe'mokizmia zanagra ositeti vuno rante vu'nea nagara
zamavurga erisu hige'za impane eneri'za, kafanku hakre'za vu'za
e'za hu'naze. 12 Anama nehazage'ne ana netremokea amanage
huke Lotina antahige'na'e, Ama kumapina vaheka'a mago'a
mani'nazo? Ne'mofaka'ane, neganemone, ruga'a vaheka'ane
zamavarenka amafintira ko viho. 13 Ama kumara eri haviza
hugahu'e. Zamagenkemo'a Ra Anumzamofonte marerigeno Ra

Anumzamo'a ama rankumara omeri haviza hi'o huno hurantegeta e'no'e'. **14** Anagema hakeno'a mofa'amoke arave hugahaze hu'za huhampri znante'naza ne'trente Loti'a vuno amanage huno ome zanasami'ne, Anumzamo'a ama kumara ahe fanane huku nehianki otinketa ama kura atreta vamaneno, huno hige'ne, reravatga nehunka taginke nehane nehu'ne kiza re'na'e. **15** Ko'atu afu'za rugeka nehigeno ankeru netremokea amanage huke asami'na'e, Lotiga ame' hunka mofaka'ararene, negnarone zamavarenka vu. Amafi vahe knaza mani'neta erizanku freta viho. **16** Hianagi Loti'a tare agesa nentahige'ne, ana netremokea Lotine, nenarone, mofa'ararene zamazante zamavazu huke, ana kumapinti vu'ne fegi'a ome zamatre'na'e. Anumzamo'a asuntaginegugu huno Lotina anara hunte'ne. **17** Fegiama atiramitageno'a, mago ankeromo huno, Frisagi ko' atreta freho! Magore huta rukrahera huta onkeho, ama agupomofo tvaontera omanita agonarega mareriho. Anama osanuta tamagranena frigahaze. **18** Hianagi Loti'a amanage hu'ne, A'o! Ranimota'a keke hurantonki, anara osugahie! **19** Hanki antahio, eri'za vahekamo'na nagu'nevazinka, nahoke nehenka navrenka eme natrane. Hianagi agonamo'a afete me'neankina ovu'nenugeno knazamo'a nazeri haviza hanige'na, ama ana vahe'ene frigahue. **20** Hagi ko, antu onensa kumara tava'onte me'neanki, natrege'na ana osi kumapi fre'na umani'nena, ana knazana agatera'neno. **21** Higeno ankeromo'a huno, Knareki mago'ene nantahiganke'na keka'a antahigamuankina kema hana osi kumara eri havizana osugahuanki traginka ana kumapi vu. **22** Ame hunka mago'zama osunesure ana kumate vu. Ana hu'negu ana osi kuma'mofo agi'a Zoari hu'naze. **23** Hagi Loti'a Zoari kumate uhanatigeno zage hanatino rumasa hu'ne. **24** Ana higeno Ra Anumzamo'a tevene,

teve nerea salfa haverami monafinti herafitregeno ko'ma riaza
huno Sodomu kumate'ene Gomora kumate erami'ne. **25** Ana
huno ana maka ranra kuma'ene, ranra kuma agu'afi mani'naza
vahe'ene, hozane, trazane, mopafi nehagea maka'zana ahe
fanane huvagare'ne. **26** Hianagi Loti nenaro'a henka ne-eno
rukrahe huno ana kumatega negegeno'a, avufgamo'a ruzah
higeno hagemo'ma hiaza huno krage feno anante oti'ne. **27**
Abrahamu'a masereti ame nantera otino Ra Anumzanema
oti'neno keaga hu'nere vu'ne. **28** Vuno unemanino ke fenkamu
teno Sodomu kuma'ene, Gomora kuma'enema me'nea agupofima
keana mago'zana onke'neanki teve kunke ke'ne. Kumo'a tusiza
huno marenerino vemagu vemagu nehuno refite vagare'ne. **29**
Anumzamo'a ana huno Loti'ma agupofima nemania kumatamima
eri havizama nehuno'a, Abrahamu'enema huvempama hu'nea
kegu agesa nentahino, Lotina avreno rurega ome ante'ne. **30** Zoari
kumapi mani'zanku Loti'a koro nehuno tare mofa'arare'ne hage'za
agonarega havegampi umani'naze. **31** Umani'ne'za nuna'amo'a
ngana'amofona amanage huno asami'ne, Nafati'amo'a ozafa
re'ne. Amafi ve erita mofavre kasentesnu'a vahera omanitfa
hu'ne. **32** Hagi antahio, tafati'amofona negi ti ami'manenkeno
neteno negi nenena nagatimofo zamagi fanane hu'zankura
anukita mase'neta, tafati'amofo mofavre kasentesanu'e. **33** Huno
hige'ne ana kenage nafaznimofona hanave ti amikeno neteno,
agesa ontahi negi neno mase'negene, nuna'amo'a anteno
mase'ne. Anazama ha'ana neznafa'a antahino keno osu'ne.
34 Nuna'amo'a nefama anteno masegeno komatia nanterana,
nagana'amofona amanage huno asami'ne, Hago nagra kenage
nerafa'ene mase'hoanki meni kenage anahu kna huta hanave ti
ami'manenkeno neteno, ete negi nenena anukinka masetegeta,

nagati'amofo zamagi fanane huzankura nafati'amofo mofavre
tamu'ene huta kasenta'maneno, huno hige'ne, **35** ana hu'ne
nafa'zanimofona waini ti amikeno neteno agesa ontahi negineno
masenegeno nagana'amo anteno mase'ne. Anazama hiana
neznafa'a antahino keno osu'ne. **36** E'ina nehuke, Loti mofa
tremokea nafa'zanimofonteti zanamu'ene hu'na'e. **37** Kota
mofa'mo ne'mofavre kasenteteno, agi'a Moapu'e huno ante'ne,
agra Moapu vahe'mokizmi nezmageho'e. **38** Hagi nagana'amo
enena ana zanke huno ne' mofavre kasenteno, agi'a Ben-Ammi'e
huno ante'ne. Ana mofavrefinti'ma fore hu'nea vahekura Amoni
vahere hu'za nehaze.

20 Abrahamu'a maka feno zama'a enerino kumara atreno,
Negev kaziga vuno Gerar umani'ne. Ana kumara Kadesine,
Surine amu'nompi me'ne. **2** Hagi Abrahamu'a nenaro Serankura
amanage huno zamasmine, Ama nensaro mani'ne. Higeno
Gerari kumate kini ne' Abimeleki'ma ana nanekema nentahino'a,
eri'za vahe'a huzmanteg'e'za Serana ome avre'za eme ami'naze.
3 Hianagi ana kenagera Anumzamo'a ava'nafi Abimelekina
amanage huno eme asmi'ne, Antahio vereti a' avre'za eme
kami'nazankinka frigahane. **4** Higeno Abimeleki'a Sera'enema
omase'negu huno amanage hu'ne. Ra Anumzamoka mago
ke'a omane'nesia vahera knare amane kuma'ane naga'anena
zamahe fanane hugahano? **5** Abrahamu'a agra nasmino, ama
ara nensaro'e nehigeno, Sera'a Abrahamunkura nagra nesarone
huno hu'ne. E'ina hu'negu Serama avre'za eme nemizage'na
nagra nagu'areti'ene antahi antahini'areti'ene fatgo avu'ava
hu'noe hu'na nagesa antahi'noe. **6** Higeno Anumzamo'a
ava'nafina amanage huno Abimelekina asami'ne, Tamage hane,
Nagra antahi'noe, kagra fatgo antahintahi antahinenka, anazana

hu'nane. E'ina hu'hanke'na Nagra kase hugantogenka Serana avako osu'nane. E'igu kefozana osu'nane. 7 Hianagi ama a'mofo neve'a kasnampa ne' mani'neanki, huntegeno neve hirega vino. Nevanigeno negeno kagrama fri'zankura nunamu huno kza hino. Hanki hunte'nankeno ovaniana, kagrane maka'a naga kanena frigahaze. 8 Nanterame Abimeleki'a maka kva vahera ke hige'za eme atru hazageno, Anumzamo'ma ava'nafima asami'nea nanekea huama huno zamasmi'ne. Nezamasmige'za nentahi'za, tusi'za hu'za zamagogogu hu'naze. 9 Abimeleki'a ke higeno Abrahamu'a egeno amanage huno antahige'ne. Kagra naza hurante'nane? Nagra kagrira mago'a kumira hugante'nogenka amanahu havizana kuman'i'ane vahe'nianena hurantano? Amanahu avu'avazama banana, fatgo osu avu'ava hane. 10 Nehuno Abimeleki'a amanage huno Abrahamuna asami'ne. Kagra nankna antahintahi hunka amanahu'zana hu'nane? 11 Higeno Abrahamu'a kenona amanage hu'ne, Na'ankure nagra amanage hu'na nagesa antahi'noe, ama kumapina Anumzamofonkura koro nosazanki'za, zamagra a'ni'areku hu'za nahe nefri'za a'nia erigahaze nehu'na anara hu'noe. 12 Hanki ami ara nenfa mofa nensaro mani'ne. Ana hu'neanagi nenrera mofa omani'negu huno a'ni'a mani'ne. 13 Hanki Anumzamo'ma hunantege'na nenfa noma netre'na amanage hu'na Serana asami'noe, hakare'a kaziga vanu'ana so'e kavukva hunantenka nensaro'e hunka huo hu'na asami'noe. 14 Anante Abimeleki'a sipisipine, bulimakaone, kazokazo eri'za vahera vene a'ene Abrahamuna avrenemino, nenaro Seranena avreno eme ami'ne. 15 Abimeleki'a amanage hu'ne, Ko! Ama maka nagri mopa me'neanki, kavesinirera amne umanio. 16 Nehuno Serana amanage huno asami'ne. Kagri'ma kagazema eri

kami'nogu hu'na negasro Abrahamuna ama mizana 1tauseni'a silva zagoa mika negazage'na amue. E'ina nehanuge'za mika vahe'mo'za nege'za, nagrikura havi zana osu'ne hu'za hugahaze.

17 Anage hutegeno Abrahamu'a Anumzamofontega nunamu higeno Anumzamo'a Abimelekine, nenanone, kazokzo eri'za mofanene, a'nenea zamazeri soe hige'za mofavre kasente'haze.

18 Na'ankure Abrahamu nenario Seranteku huno Ra Anumzamo'a Abimeleki naga'mofo a'nea zamarimpa erigi'neane.

21 Ra Anumzamo'ma huvempa kema ko'ma Serama hunte'nere, Serana eri knare hunte'ne. **2** Sera'a amu'ene huno ne' mofavre kasente'ne. Abrahamu'a ozafa retegeno kasentegahane huno Anumzamo'ma asami'nea kna egeno kasente'ne. **3** Abrahamu'a Sera'ma kasentea ne'mofavregura Aisaki'e huno agi'a ante'ne. **4** Hanki Abrahamu'a nemofo Aisakina 8'a zagegna manitegeno, Anumzamo'ma asmi'nea kante anteno agoza anona taga hunte'ne. **5** Abrahamu'a 100'a zagegafu mani'tegeno Sera'a mofavre Aisakina kasente'ne. **6** Hagi Sera'a amanage hu'ne, Anumzamo naza hige'na kizaneroe. Vahe'mo'za antahisu'za nagrane muse nehu'za kiza regahaze. **7** Anage huteno Sera'a amanage huno hu'ne, Iza Abrahamuna, Sera'a mofavre'a ante omigahie huno hugahie? Ana hu'neanagi menina agra ozafarefinka mofavre kase amue. **8** Ana Mofavremo nena huno ami a'o nehigeno, Abrahamu'a ra ne'za kre'ne. **9** Mago zupa Sera'a keana Haga, Isipi a'mofo mofavre Abrahamunteti ante'nea ne'mo avaharo nehigeno ke'ne. **10** Sera'a amanage huno Abrahamuna asami'ne, Erizanti'a e'neria a'ene mofavre'anena zanahenatigeke vi'o, eri'za a'mofo mofavremo'a fenonka'a e'origahie. Hagi mofavre'nimo Aisaki erigahie. **11** Anage nehigeno nentahino, Abrahamu'a mofavre'agura tusi rimpagna hu'ne. **12**

Hianagi Anumzamo'a amanage huno asami'ne, Abrahamuga krimpa havizana osuo. Na'ankure mofavrene eri'za a' kagura kagesa ontahio, Sera'ma nanekema kasamiaza huo, Aisakimpinti kagehe'za fore hugahaze. **13** Eri'za a'mofo mofavrefintira Nagra zamazeri hakare ha'nena, rankuma ante'za manigahaze. Na'ankure zamagra kagri kageheze. **14** Hanki Abrahamu'a nanterame otino bretine, zagagafa avufgare tro hu'naza tafempi tinafino Haga afunte nenteno, mofavre'a avrenemino hunte'ne. Hanki Haga'a atreno Berseba ka'ma kopi vuno umani'ne. **15** Hagi zagagafa avufgaretima tro'ma hu'naza tintafempi ti'mo'ma vagaregeno'a, mofavre'a osi zafamofo tonapi ome ante'ne. **16** Ana huteno kevema ahetregeno nevia avamente Haga'a umanineno amanage hu'ne, Negesugenno mofavreni'a fri zankura navresra hie, nehuno krafa huno zavi ate'ne. **17** Hianagi ne' mofavremofo zavike'a, Anumzamo'a antahi'ne, Anumzamofo ankeromo monafinti amanage hu'ne, Hagaga kagripina na'a hu'ne? Korera osuo, antuma mani'neno ne'mofavremo'ma zavima neteana Anumzamo'a antahi'ne. **18** Otinka vunka ne'mofavre azante ome azeri otinka avro, Nagra azeri ra hanugeno, tusi'a vahe fore huno rankuma antegahie. **19** Anage nehuno Anumzamo'a ana a'mofo avurga azeri hari higeno keana, mago tinkeri me'negeno keteno vuno zagagafa avufgareti tro'ma hu'naza tafempi tina afino ana mofavrea ome amigeno ne'ne. **20** Hagi Anumzamo'a ana ne'mofavrene mani'negeno nena huno, ka'ma mopafina atima ahe'zantera harfa ne' mani'ne. **21** Agra ka'ma mopafi Parani mani'negeno, nerera'a Isipi mopareti a' ome avreno eme ami'ne. **22** Ana zupage Abimeleki'ene vugota sondia kva ne'a Fikoli'enena amanage hu'ne Abrahamuna asmi'na'e, Anumzamo'a kagrane mani'neno maka'zama hana zampina

asomu hunegante. **23** Hanki kagra tamage hunka Anumzamofo avufi huvempa hunka nasamio. Nagri'ene, mofavre'niane, nagehe'inena reravatga hunka havizana huoranto. Hagi amama emani'nana mopafima knare navu'nava hugante'noaza hunka nagira knare kavukva hunanto. **24** Higeno Abrahamu'a huno, Nagra huvempa huanki'na kema hanaza hugantegahue. **25** Hagi mago zupa Abrahamu'a tinkeri'agu Abimelekina keaga hunte'ne. Na'ankure Abimeleki eri'za vahe'mo'za tinkeria hanare'nazagu anara hu'ne. **26** Abimeleki'a amanage hu'ne, Iza e'inahu'zana hu'nefi, kagra nasaminke'na ontahi'noe. Hanki meni ama nehanka nentahue. **27** Abrahamu'a mago'a bulimakaoramine, sipisipiraminena refko huno Abimelekina eme nemino, anante raru hu'ne tragote'ne manisa'a nanekea huvempa (covenant) hu'na'e. **28** Abrahamu'a sipisipi kevu'afintira 7ni'a a' sipisipi anentatami avre arure ante'ne. **29** Ana higeno Abimeleki'a amanage huno Abrahamuna antahige'ne, Ami 7ni'a a' sipisipi anentatamina nankna kagukagesare avre rurera ante'nane? **30** Abrahamu'a amanage hu'ne, Kagra ama 7ni'a a' sipisipi anentatamina nazampinti kamuana erigeno, ana zamo huama huranteno, ama tinkeria nagriku kafinte'ne hino. **31** E'inage nehuno ana kumara Besebe huno agi'a ante'ne, na'ankure anante tarega'moke huvempa kea hu'na'e. **32** Hanki zamagra huvempa hu'za Berseba hute'za, Abimeleki'ene sondia kva ne'a Fikoli'ene otine mopa zaniarega Filistia vu'na'e. **33** Abrahamu'a tamariski zafa Berseba negrino, anante manivava Ra Anumzamofo agi hanta vazi'ne. **34** Abrahamu'a za'za kna Filistia vahe mopafina mani'ne.

22 Hagi mago'a kafua agateretegeno Anumzamo'a Abrahamuna reheno kenaku anage hu'ne, Abrahamuo higeno, ama mani'noe

huno Abrahamu'a hu'ne. 2 Anumzamo'a anage huno asami'ne, Magoke mofavre, kavesi kavesi hunentana mofavrea Aisakina avrenka Morea moparega vuo, Nagrama kaverisua agonare anantega agrira ome ahenka tevefi Kresramana vuo. 3 Higeno amenantera Abrahamu'a otino donki afura azeri retro nehuno, Kresramana vu tevea ape huno krevare'are enerino, tare eri'za vahe'ane mofavre'a Aisakine zamavareno, Anumzamo asmi'nea kotega vu'naze. 4 Tare zagegna agateregeno, anante knarera Abrahamu'a nevuno kesga huno anama asmi'nea kokana ke'ne. 5 Agra eri'za vahetrema'agura amanage hu'ne, Amare donki afura anteta mani'neke'na nagrane ne'ni'ane anturega vuta Anumzamofona mono ome hunteteta ete egahu'e. 6 Abrahamu'a Kresramana vu teve erino Aisaki kofinenteno, agra'a hugre tevene, kazine erige'ne vu'na'e. Zanagra kantega nevu'ne, 7 Aisaki'a anage huno nefana antahige'ne, Nenfao, higeno Abrahamu huno, voe, higeno, Hugre tevene, kre tevene eri'noe. Hagi inantegati Kresramana vu lama afura erigahu'e? Huno Aisaki'a antahige'ne. 8 Higeno Abrahamu'a kenona huno, Anumzamo Kresramanavu lama afura tamigahie, huno higeke vu'na'e. 9 Anumzamo'ma asami'nea kaziga unehanati'ne, Abrahamu'a have erino ita tro huno teve hanavazine. Ana huteno nemofo, Aisakina agare azante nofi anakinteteno, ana ita agofetu azeri sga humasente'ne. 10 Abrahamu'a kazima'a erino Aisakina kazi refriku nehigeno, 11 monafinkati Ra Anumzamofo ankeromo kezatino, Abrahamu! Abrahamu! Higeno Abrahamu'a huno, Ama mani'noe. 12 Higeno ankeromo'a huno, Mofavremofo avufgarera kazana onto, mago'zana huonto. Menima kagri'ma kagentoana Nagrite kamentinti nehunka, Anumzamofonku kore nehane. Na'ankure Nagri'ma nami'zanteria

magoke mofavreka'a aze'orinane. **13** Higeno Abrahamu'a kesga huno osi zafa titipafi ve rama afumo pazine'afi rusi hu'negeno ke'ne. Ana ve rama afu ome azerino mofavre'amofo nona'a aheno tevefi kre fananehu ofa hu'ne. **14** Abrahamu'a ana agonagura Ra Anumzamo tamigahie huno agi'a ante'ne. Hankino eno menima mani'nona knafinena, Ra Anumzamofo agonare tamigahie hu'za nehaze. **15** Ra Anumzamofo ankeromo monafinkati Abrahamunku mago'ene kezatino, **16** Anage hu'ne, Nagrani'a Ra Anumzamo'na hankavenentake ke nehue, na'ankure ke'nia erizafa nehunka ne'mofavreka'a, magoke ne'mofavrea azeorinane. **17** Nagra asomu huneganta'nena kagri kagehe'impintira fore huhakare hu'za monafinka hanafi ene hagerinkenafi kasepankna nehanage'za, ha' vahe'zmi ranra kumara eri nafa'a hugahaze. **18** Na'ankure kagri kagehe'impinti mika kokankoka vahe'mo'za asomura erigahaze. Na'ankure nagri ke'mofo avaririnanku anara hugahue. **19** Anage hutegeno, Abrahamu'ene Aisakikea eri'za ne'trentega ake'za, maka'mo'za kuma zamirega Berseba vu'naze. Abrahamu'a anante Berseba rama'a kna mani'ne. **20** Hagi mago'a kna evutege'za, Abrahamuna eme asamiza, Negafu Nahori nenaro Milka'a mago'a ne'mofavre'zaga kasezmante'ne hu'za eme asami'naze. **21** Ana mofavremokizmi zamagi'a, Uzi'a pusa nere, Buzi'a agri negna'e, magora Kemuelikino Aramu nef'a'e. **22** Hagi mago'a mofavre nagara Keseti'e, Hazori'e Pildasi'e, Judlafi'e, Betueli'e. **23** Hagi Betueli'a Rebeka nef'a'e. Milka'a, Nahorintetira 8'a ne'mofavre zaga zamante'ne. Nahori'a Abrahamuna nefu'e. **24** Hanki Nahorina mago kazokzo eri'za a'mofo agi'a Reumakino, Nahorintetira Teba anteno, Gahamu anteno, Tahasi anteno, Makakizmi zamante'ne.

23 Sera'a 127ni'a zagegafu maniteno, **2** Kiriat-arba kumate fri'ne. Menina ana kumara Kenani mopafi me'neankino, Hebronie hu'za nehaze. Hanki Abrahamu'a tusi'za huno Serankura asunku nehuno zavi ate'ne. **3** Sera fri kerfare'ma Abrahamu'a mani'nereti netreno otino Hiti mofavre'zaga amanage huno ome zamantahige'ne. **4** Tamagra antahi'naze, nagra mopa agafa nera omani'noanki, amne tamagri mopafi eman'i'noe. Hagi a'nimo'a fri'nege'na mopa miza hu'na anampi ome asenteku tamantahinegoe. **5** Hige'za Hiti mofavre naga'moza amanage hu'za Abrahamuna asami'naze. **6** Kama antahio ra ne'moka, kagra ra kva ne' tagranena mani'nane. Knare'ma huno kavesinia matipi asenteku'ma hananketa, amne kamigahune. Hagi aza'o ana matimofo nafa'a mani'enimo'a i'o osugahie. Amne kamina ana matimatipina ome asentegahane. **7** Abrahamu'a Hiti mofavre'mokizmi zamufi otino, Maka vahe zamufi kepri huno anage hu'ne. **8** Hanki antahih! A' ka'ama asentesane hanuta, nagri nagi erita vuta Zohari nemofo, Efroni'ene ome keaga hih. **9** Ome antahigenkeno Makpela mopa naminke'na, ana mopa agentega havegampi Serana ome asentaneno. Ana mopamo'a nagri'za segahie. Hanki hu izoma hanige'na hakaremota tamufi ana mopa mizahu fatgo hugahue. **10** Hankino Efroni'a ana Hiti mofavre'mokizmi amunompi mani'ne. Efroni'a Hiti ne'kino rankuma'mofo kafante eman'i'na vahe'mokizmi zamagesafi, ke nona'a huno Abrahamuna asami'ne, **11** Efroni'a amanage hu'ne, ra ne'moka kama antahio, havegana miza osegahane. E'i ana mopane haveganena maka'a naga'nimokizmi zamufi huvempa hu'na meni ana mopa kamigahue. Kamisnugenka anampi fri kerfa'a ome asente'gahane. **12** Anage higeno Abrahamu'a antahima ami'za kazigati maka vahe zamufi kepri hu'ne. **13**

Abrahamu'a ana vahe zamufi amanage huno Efronina asami'ne. Efroniga muse (plis) hugantoanki kama antahio, nagra menina ana mopa miza hugahue. Hanki zagoma kamisnuana, erige'na ana mopafi a'nimofo fri kerfa ome asenta'neno. **14** Efroni'a ana naneke nentahino, amanage huno Abrahamuna kenona'a asami'ne. **15** Kama antahio, ra vahe'moka, ama mopamofo mizama'a 400'a silva me'neanagi amu'nonti'afina osi'zane. Amne fri kerfa'a ome asentegahane. **16** E'inage nehigeno Abrahamu'a mago rimpa nehuno, mago'a zago'a refko huno Efroni eme ami'ne. Efroni'a agra'a kehia avamente 400 ti'a silva zago hakare vahe zamufi eme ami'ne. **17** Efroni mopa Makpela Mamre kazigama avugosama hunte'nea mopa erigeno, ana mopafima me'nea havegane, zafane, mopane, hakarezanena ami vagare'ne. **18** Hanki hakare'zana Abrahamu'ma eri nafa'a hanigu Hiti ne'mofavre naga'mo'za ran kuma'mofo kahante ke refko nehaza vahe'zmufi ami vagare'naze. **19** E'ina huteno Abrahamu'a Serana Makpela havegampi, Mamre kaziga avugosa hunte'nea havegampi ome asente'ne. Ana kuma agi'a Hebron hu'za nehaza kumakino, Kenani mopafi me'ne. **20** Mopane, havegane anampima me'nea zanena, Abrahamu naga'ma asezmente mope hu'za Hiti mofavre naga'mo'za ami vagare'naze.

24 Abrahamuna tusiza huno hakare'a zama'afina Ra Anumzamo'a asomu hunentegeno manino vuno ozafare'ne. **2** Korapa eri'za ne'a, maka'a fenonte'ene nonte kegava kri'nea ne'ku, Abrahamu'a amanage huno asami'ne, Muse (plis) hugantoanki kazana namo'mofo fenka antenenka, **3** monane mowanema tro'ma hu'nea Anumzante kagra huvempa hunantenka, Kenani mopafintira ara ne'nimofona avre omigahue hunka huo. **4** Hagi vunka mopa agafa'niare vahe'niafinti a' uvrenka

Aisakina eme amio. 5 Higeno eri'za ne'amo'a Abrahamuna asamino, Hagi ana a'mo'ma navaririno'ma ama mopare omena, ete negamofona avre'na mopakare ome atregahufi? 6 Higeno Abrahamu'a eri'za ne'a asamino, I'o hue! Ne'nimofona avrenka ovutfa hugahane. 7 Hagi monafinkati Ra Anumzamo'ma nenfa vahepinti'ene fore hu'noa mopareti'ma nagima huteno, navareno eme nante'nea Anumzamo'a amanage huno huvempa huno nasm'i'ne, ama mopa nagakamofo zamigahue huno hu'neankino, Anumzamo'a mago ankero vahera huntenkeno kagota huno vanigenka, Aisaki nенарона anantegati uvarenka egahane. 8 Hagi ana a'mo'ma ovugahuema hinkenka huvempama hu'nana kegura korora osunka atrenka eno. Hagi ne'nimofona ana moperara avrenka ovugahane. 9 Anage higeno, eri'za ne'amo'a azana Abrahamu amo'mofo fenka anteno, anankerera huvempa hu'ne. 10 Eri'za ne'amo'a ozafa'amofo kemoriramimpintira 10ni'a kemori afu nezmavreno, mago'a knare'nare zana e'nerino, otino Nahori rankumate Mesopotamia vu'ne. 11 Eri'za ne'mo'ma anantegama vuteno'a, kemori afu'tmina zamazeri zamarena rezmantge'za, kinaga a'nemo'za ti nefiza knare rankuma'mofo fegi'a tinkerire mani'naze. 12 Eri'za ne'mo'a amanage huno nunamu hu'ne, Ra Anumzane, kvanimofo Abrahamu Anumzamoka muse (plis) hugantoanki, menina antahinaminka, ozafani'a Abrahamuna avesintenka azeri so'e hanane! 13 Ko, ama tinkerire nagra otina mani'noankino, rankumate vahe'mokizmi mofanemo'za ti afinakura egahaze. 14 Mago mofaku'ma hu'na, muse (plis) hugantoanki, ti afi kavoka'a ante mopafitege'na tina afi'na na'neno nehanugen, tina nenege'na kemorika'a tina afi zami'neno huno hanimo, eri'za neka'a Aisaki nенарона'za hugahie. Anama hinke'na ozafani'a Abrahamuna avesintenka azeri so'e hane

hu'na hugahue. **15** Ana eri'za ne'mo'a nunamuna huvaga ore'negeno, mago mofara Rebekakino agra ti afi kavo afunte kofi'neno rankumapintira atirmino e'ne. Rebeka'a Betueli mofa mani'neankino Milka kasente'ne. (Milka'a Abrahamu negna Nahori nenaro'e). **16** Ana mofara vemo ke asane hu'are, vene'nene omase'nea mofamo, tinkerirega uramino kavo'afi ti omefirino marerino e'ne. **17** Abrahamu eri'za ne'mo'a, ana mofa'mo'ma ti afirino marenerigeno agia reno vuno anage huno ome antahigene, Muse hugantoanki kavoka'afinti osi'a tina namisnanke'na nesanue. **18** Higeno ana mofa'mo'a anage hu'ne. Ranimoka amne negahane, nehuno ana kavo'a anteramino azeri sga huntogeno ne'ne. **19** Amigeno netegen, ana mofa'mo'a anage hu'ne, Kemorika'a ana zanke hu'na tina afi zami'nena nezmu hugahaze. **20** Huteno ame huno Rebeka'a tina kavo'afinti afu'moza ti nenaza zompaфи taginte zamantge'za nenageno, ufino ete ete huno neragige'za ana maka kemorimo'za nezamu hu'naze. **21** Ana nehigeno Abrahanu eriza ne'mo ke osuno ana mofa'mofo avufi negeno, kama e'noa zamofona, Anumzamo'a ama naza hu'za nehifi huno agesa antahi'ne. **22** Kemorimo'za tina nehana hutageno, ana eri'za ne'mo'a golire tro hu'naza rini kna'amo'a 5fu'a gremi hu'neane, manogosane, golire tro hu'nea tare asana tarega azampi antaninte'neankino golimofo kna'amo'a 100'a grem hu'ne. **23** Nehuno ana mofaku huno, Muse (plis) hugantoanki iza mofa kagra mani'nampi nasamio? Knare negafa nompina kankamuna me'nesigu ama nagranema enaza vah'enena umasegahuno? **24** Higeno ana mofa'mo'a anage huno asami'ne, Nagra Betuel mofa mani'noe. Milkane, Nahorigizni mofavremo kasenante'ne. **25** Ana mofa'mo'a mago'ane eri'za nera asmino, kemorimo'ma nesia ne'zane trazanena hakare'a megeno,

mase kankamunena me'neankinka meni kenagera masegahane.

26 Higeno ana ne'mo'a kepri huno, Ra Anumza'mofona mono hunte'ne. **27** Ana huteno ana eri'za ne'mo'a anage hu'ne, Kvani'a Abrahamu Ra Anumzamofona ra agi amue. Ozafa'nimofona agekani onteno soe'za hunenteno aza nehie. Hanki nagrira Ra Anumzamo naza nehuno kana naverige'na, ozafanimofo afu'agna nompi efatgo hue. **28** Anage higeno ana mofa'mo'a agia reno nerera nompi mani'namokizmi ana naneke ome zamasmi'ne.

29 Hagi Rebeka nempu'amofo agi'a Lebani'e. Lebani'a agia reno rankumamofo fegi'a tifi kerire'ma mani'nea nete vu'ne. **30** Hagi nesaro Rebekama agonafima manogosane, azampima asama antani'neno ana eri'za ne'mo'ma asami'nea kema ome asamigeno nentahino'a, Lebani'a vuno ome keana tinkerire ana ne'mo'a kemori afu'zagane ot'i'negeno ome ke'ne. **31** Lebani'a ana nera asamino, Ra Anumzamo'a asomu hugantene'moka no agu'afi emarerio. Nahigenka fegira mani'nane, noma masesana zane kamorimokizmi kuma'enena nagra ko erise hunte'noe. **32** Hagi ana ne'mo'ma nompima marerigeno'a, anante Lebani'a kemori agumpinti fenoma'a erinenteno, osapa trazane ne'zane kemorimofona nezmino, agia sesehu ti tagi zamige'za agrane e'naza vahe'ene zamaga sese hu'haze. **33** Ne'za kre'za avugaeme antenentageno ana eri'za ne'mo'a amanage hu'ne, Kavera one'nena amafima e'noa zamofo agafa'a tamasamite'na ne'zana negahue. Higeno Lebani'a anage hu'ne, Knareki tasamisanketa antahisune. **34** Higeno ana eri'za ne'mo'a anage hu'ne, Nagra Abrahamu eri'za ne' e'noe. **35** Ra Anumzamo'a tusiza huno ozafa'nimofona asomu hunentegeno afufeno ne' mani'ne. Ra Anumzamo'a sipisipima, bulimakaoma, silvama, golima, eri'za vene'nema, eri'za a'nema, kemorima, donkima huno ami'ne.

36 Hanki kva'nimofo nenaro Sera'a tavavateteno ne'mofavre
kase amigeno, kvanimo'a mika zama'a ana mofavremofo
ami vagare'ne. **37** Kva'nimo'a huvempa hunanteno, amama
emani'noa Kenani vahe'mokizmi mopafintira ne' mofavreni'arera
ara avre omigahane huno hu'ne. **38** Hianagi vunka nenfa
mopa agafareti, vahe'niafinti ara ome avrenka ne' mofavreni'a
eme amio. **39** Hige'na nagra kva'nimofonkura anage hu'noe.
Ana a'mo'ma navaririno omenke'na na'a hugahue? **40** Hugeno
agra huno, nagrama amage'ma nentoa Ra Anumzamo'a, Agra
ankero vahe'a huntenkeno kagrane nevina, kama vanana kamo'a
knare hanigenka, vahe'ni'afinti nenfa nagapinti ne'nimofo ara
uvregahane hu'ne. **41** Hagi kagrama nagri vahepima vananke'za,
ana a'ma onkamisnageno'a, nagrama huvempa hu'noa kemo'a
kaze'origahie. **42** Hige'na nagra tinkerire enehanati'na amanage
hu'na nunamuna hu'noe, Ra Anumzamoka kvanimofo Abrahamu
Anumzamoka naza nehanankeno kama e'noa kamo'a knare
hugahianki, **43** amare nagra ot'i'na tinkerire mani'nesnugeno,
ina mofamo'o ti afiku'ma esanige'na ana mofaku hu'na, muse
(plis) hugantoanki tina kavoka'afintira osi'a namige'na na'neno
hanugeno, **44** ana mofamo'ma nasmino, tina nenege'na
kemorikamokizmi tina afi'na eme zami'neno huno hanimo,
kvanimofo ne'mofo ara Kagra hampri nentane hu'na antahigahue.
45 Anage hu'na nagu'afinka nunamuna nehugeno, Rebeka'a
kavo afunte kofino tinkerireti ti afinaku uramigena kete'na, muse
(plis) hugantoanki ti afi namige'na na'neno. **46** Hugeno kavo'a
afuntetira ame huno anteme neramino amanage hu'ne, Tina
nenege'na, kemorika'aramina tina afi zamineno huno hige'na,
nenogeno kemori nagara ti afizamige'za ne'naze. **47** Ana higena
nagra anage hu'na antahige'noe, kagra iza mofa mani'nane?

Hugeno Nahori nenaro Milka'ma kasentenea mofavre Betueli
mofa mani'noe huno higena, agonafi rinia renente'na, asana
azantrempi antaninte'noe. **48** Ana hute'na kepri hu'na Ra
Anumzamofona mono hunte'noe. Ra Anumzamofo agi ahesga
hu'na, kvanimofo Abrahamu Anumzamo'a kva hunantege'na
kvani'mofo afu'aganampinti ne'amofo ara kena erifore hu'noe.
49 Hagi menima kva'nimofoma antahimisuta, na'ane huna
ome asamigahufi nasami fatgo hiho. Hagi anama osanuta
nasaminke'na, nagra nentahi'na, nazano hunaku'ma hanua zana
ha'neno. **50** Anage hige'ne Lebanike, Betuelikea ana kemofo
nona'a anage huke asami'na'e, Ra Anumzamo amanahu'zana
higu, tagra mago kea osugahu'e. **51** Rebeka'a ama kavuga
mani'neanki, Ra Anumzamo'ma kema hiazza hunka avrenka
vugeno, kva kamofo ne'mofo nenaro'za ome hino. **52** Hagi
Abrahamu eri'za ne'mo'ma ana kema nentahino'a, kepri huno
mopafi rena reno Ra Anumzamofona muse hunte'ne. **53**
Abrahamu eri'za ne'mo'a avasese hu'zana silvare'ene, golire
tro hu'naza zane, kukenane Rebekana nemino, ana zanke
huno mago'a knare'hare zantamina zago'amo mareri'nea zana
nesarone, nererane zanami'ne. **54** Ana hutenge'za ana eri'za
ne'ene agrane e'naza naga'mo'zanena kave'ene tinena nete'za
mase'naze. Ko'atige'za o'neti'za nanterampi Abrahamu eri'za
ne'mo'a amanage huno zamasmi'ne, Nazeorita natrenke'na ete
kvanimo'ma maninerega va'neno. **55** Hianagi nempu'amo'ene
nererakea anage hu'na'e, A'o, atrenkeno mago'agna maniteno,
10ni'agna nazana agaterete'na avreta vugahaze. **56** Hianagi
eri'za ne'mo'a huno, Ra Anumzamo naza higeno eri'zanimo'a
knare hianki, nazeri onteta natrenke'na ete kvanima mani'nerega
va'neno. **57** Higene, ana mofa'mofo avesi antahigeta kesune,

58 nehu'za Rebekana ke hakeno ege'ne antahige'na'e, Kagra ama ne'enena vugahano? Hazageno ana mofamo'a huno, ozo vugahue. **59** Anagema hige'za zamagra nezmasaro Rebekama, kegavama hunentea a'ene, Abrahamu eri'za ne'ene, agranema e'naza naga'ene ana makamokizmia huzmante'naze.

60 Rebekana asomu ke hunente'za amanage hu'naze, Tagri nersaroga, kagripintira tusi'a vahe krerfa fore hugahaze. Hagi kagri kagehe'za zamesi ozmantesaza vahe'mokizmi rankumazmi zamahe'za hanaregahaze. **61** Hagi Rebeka'ene mago'a agri eri'za a'nene kemori agumpi mareri'za, ana ne'mofo amage vu'naze. Higeno Abrahamu eri'za ne'mo'a Rebekana avreno vu'ne. **62** Hagi ana knafina Aisaki'a Ber-lahai-roiti eno, Negev emani'ne. **63** Aisaki'a mago kinaga vuno hofage kopi umani'neno agesa antahi antahi nehuno kesga huno keana, kemori'zaga neageno ke'ne. **64** Rebeka'a kesga huno Aisakina negeno, kemori agumpinti eramino, **65** eri'za nekura amanage hu'ne, Aza amanu nera tavrenakura ne-e? Higeno eri'za ne'mo'a huno, E'i nagri kvani'e, higeno Rebeka'a tavrave erino avugosa refite'ne.

66 Hagi eri'za ne'mo'a hakare zama hu'nea zana Aisakina asami vagare'ne. **67** Ana hutegeno Aisaki'a Rebekana avreno nerera Sera seli nompi ome antegeno nenaro'za higeno, avesintene. Aisakina nerera'a fri'nere amena eme arentinti hu'ne.

25 Abrahamu'a aru a' eri'neankino, agi'a Ketura'e. **2** Ana a'mo kase zamante'nea naga'mokizmi zamagi'a Zimranima, Joksanima, Medanima, Midianima, Ispakima, Suama huno zamante'ne. **3** Joksani'a, Sebane, Dedanikizni neznafaza hu'ne. Hanki, Dedani mofavre nagara Asurimi'e, Letusimi'e, Leumimi'e. **4** Hanki, Midiani mofavre zamagi'a Efa'ma, Eferi'ma, Hanoki'ma, Abita'ma, Elda'ma, Ana maka'mo'za Ketura agehe'za mani'naze. **5**

Menina Abrahamu'a maka zama'a Aisaki ami'ne, **6** ana hu'heanagi
henka eri'nea a'nemokizmi mofavre nagara, Abrahamu'a
kasefa'ma mani'neno muse'za nezmino huzmantenge'za, Aisakina
atre'za afete'are zage hanati kaziga umani'naze. **7** Ama'i
Abrahamu'ma mika zagegafu mani'neana, 175'a zagegafu hu'ne.
8 Abrahamu'a ozafarfa reteno hakare'a zagegafu hu'nea zanku
muse nehuno, vagare asimu anteteno frino naga'ane umani'ne.
9 Hanki Hiti mopa Zohari nemofo Efroni ami'nea mopa Mamre
kaziga avugosa hunte'nefi agri mofavre Aisaki'ene, Ismaelikea
Abrahamu fri kerfa eri'ne Makapela havegampi ome asente'na'e.
10 Abrahamu'a Hiti mofavremofo mopa miza hu'nea mopafi
nenaro Serama asente'nefi Abrahamuna ome asente'na'e. **11**
Hanki Abrahamu'ma fritegeno'a Anumzamo'a agri ne'mofavre
Aisakina asomu huntogeno, Aisaki'a Ber-hai-roi mani'ne. **12** Hagi
Haga'a Isipi a'mo Sera eri'za e'nerino Abrahamunteti Ismaelina
kasente'nea mofavremofo naga'mokizmi naneke. **13** Ismaeli
mofavre naga'mozama ese'ma fore'ma hu'hazareti'ma vuno
henkamofonte'ma vu'nea nagamofo zamagi'a ama'ne, Ismaeli
agonesa mofavrea Nebaioti'e, Kedariki, Adbiliiki, Mibsami'e. **14**
Misima'ma, Duma'ma, Masa'e. **15** Hadadiki, Temaki, Jetuki,
Nafisi'ma, Kedema'e. **16** Ama'i Ismaeli ne'mofavre nagamofo
zamagigiza, 12fu'a kva vahe'mo'za kva huzamantazage'za
mago'mago kuma'zmire'ene, nagatenofitera hu'za mani'naze.
17 Hagi ama maka Ismaeli'ma mani'nea zagegafu'a 137ni'a
zagegafu huteno, vagare asimu anteno frino, fri'naza naga'ane
uman'i'ne. **18** Hanki Ismaeli agehe'za Havilati mani'za Suri
uhanati'naze, zage hanati'tega Isipi tvaonte, Asiri'a kaziga vu
kamofo, zamagonaru'za zamagraku arure umani'naze. **19** Hagi
Abrahamu'a Aisaki nefae. Aisaki'pinti fore hu'naza naga'mokizmi

naneke. **20** Aisaki'a 40'a zagegafu huteno Rebekana Betueli mofa eri'ne, Lebani'a Aramea nekino, Mesopotamia mopareti ne'mofo nesaro erigeno, nenaro'za hu'ne. **21** Rebeka'a mofavre ontegeno, Aisaki'a Ra Anumzamofontega nenaro agi erino nunamu higeno, Ra Anumzamo'a nunamuma'a antahi'migeno, Rebeka'a amu'ene hu'ne. **22** Hianagi tare mofavreraremake arimpafintira kanive nerakeno anage hu'ne, amazana na'a nehie, nehuno Anumzamofona antahige'ne. **23** Ra Anumzamo'a amanage huno asami'ne, Tare kumamoke krimpfina mani'na'e, hiankino tare'mokea arure arure kavufgafinti vu'ne e'ne hugaha'e. Mago'mo'a hanavetina, mago'mo'a hanave otigahie. Ese'ma fore'ma hanimo'a, henkama fore hanimofo eri'za vahe manigahie. **24** Hagi mofavrema kasente knama egeno'a, tare kugaveza mofavre arimpafi mani'na'e. **25** Kota mofavrema kasenteana, koranke avufgane antegeno hakare avufgamo'a azokake hu'nege'za, agi'a Iso'e hu'za ante'naze. **26** Hanki amefiga'a negna kasentegeno, Iso agiare azerino atiramigeno, agi'a Jekopu'e hu'za antemi'naze. Ana knarera Aisaki'a 60'a zagegafu hutegeno, nenaro'a mofavrea kase zanante'ne. **27** Hagi ana mofavre'mokea nena hute'ne, Iso'a zagagafa hofa trampinti ahe ne' mani'negeno, Jekopu'a rimpa frune kazone ne' seli nompi mani'ne. **28** Aisaki'a Isona avesinte'ne, na'ankure agrama zagagafa aheno eme amigeno nenea zankure. Hagi Rebeka'a Jekopu avesinte'ne. **29** Hagi mago zupa Jekopu'a ne'zana negregeno, Iso'a trampinti agaku nehuno e'ne. **30** Iso'a amanage huno Jekopuna asmi'ne, Ame'ama hunka antu koranke migri (sup) ne'zana eri namige'na na'neno, na'ankure naganetege'na nehue. E'inama hu'nea agafare mago agi'a Idomu'e hu'za ante'naze. **31** Hagi Jekopu'a amanage hu'ne, Zage mofavremo eri asomura kota'zana nagri

namitege'no. 32 Higeno Iso'a amanage hu'ne, Negano nagra fri'za
nehuanki, zage mofavremo eri asomumo'a na'a hunantegahie?
33 Higeno Jekopu'a amanage huno asmine, Kotazana huvempa
hutegeno, higeno agra huvempa hunteno zage mofavremo eriga
asomura Jekopu ami'ne. 34 Jekopu'a bretine, lentol koheki huno
amigeno neteno atreno vu'ne. Iso'a ese mofavremo'ma eriga
asomu'agura antahi amneza se'ne.

26 Agatekna ko'ma Abrahamu knafi fore hu'neankna huno
ana mopafina fore higeno, Aisaki'a Gerari kumate Filistia kini
ne' Abimelekintega vu'ne. 2 Ra Anumzamo'a agrite efore
huno amanage huno asmi'ne. Nagrama kasmisua mopare
manigahananki, Isipia ovuo. 3 Ama mopafi mani'nege'nna,
Nagra asomu hunegantane'na kagri'ene kagehe'ine ama mopa
mika nerami'na, Nagrama huvempa negafa Abrahamuma
hunte'noa kea eri knare ha'heno. 4 Nagra kagehe'ina zamazeri
ra ha'nenke'za monafi hanafi kna hanage'na, Nagra ama
mopa kagehe'i zamisugeno, kagehe'impinti miko kokankoka
vahe'mo'za asomura erigahaze. 5 Na'ankure kema huankea
Abrahamu'a amagenenteno Nagri kasegene tra ke'nianena
avariri'ne. 6 Ana higeno Aisaki'a Gerari mopare mani'ne. 7
Ana kumate vahe'mo'za Aisakina nenaronku antahi kageno
agra a'nimo'e huno huzankura koro nehuno Nensaro'e hu'ne.
Hagi agrama agesama antahiana Rebeka'a vahe'mofo anunu
hu'are mani'negeno, ana kumate vahe'mo'za ahezanku anage
hu'ne. 8 Za'za kna anampi umaniteno, Aisaki'a nenaro Rebeka
agazafe'negeno, Abimeleki'a Filistia kini ne'mo nomofo zaho
eri kampinti ke'ne. 9 Anante Abimeleki'a, Aisakina ke higeno
egeno, amanage huno asami'ne, Antahio, tamage huno ami
kagri a' mani'ne! Nahigenka kagra nensaro'e hunka hu'hane?

Higeno Aisaki'a amanage huno asmi'ne, Na'ankure agriteku hu'za vahe'mo'za nahe fri'zanku anagea hu'noe. **10** Higeno Abimeleki'a amanage hu'ne, Amazana naza hunerantane? Mago vahe'mo'ma neganaro'ene maseresina, kagra mago knaza eri tamisine. **11** Anage huteno Abimeleki'a hakare vahe mago kasege antezmanteno amanage hu'ne, aza'o ama nero, nenanono avako'ma hanimofona ahe frigahaze. **12** Hagi Aisaki'a ana mopafina avimaza hozafima hankre'neana ana kafufina 100'a agatereno hamare'ne. Ana higeno Ra Anumzamo'a asomu hunte'ne. **13** Ana higeno Aisaki'a feno ne' fore nehuno, mago'ene ra huno tusi'a feno anteno, mika feno ante agatere'nea ne' mani'ne. **14** Aisaki'a sipisipi zagane, memeki zagane, Bulimakaone, eri'za vahe'ene, rama'a ante'nege'za, Filistia vahe'mo'za zamasigu hunte'naze. **15** Ana hige'za mika tinkerima agri nefu Abrahamu eri'za vahe'mo'zama ko'ma kafimante'nazana, Filisti'a vahe'mo'za mopa kate'za refite'naze. **16** Hagi henka Abimeleki'a amanage huno Aisakina asmi'ne, Kagra tagrira tagaterenka hanave'nentake hananki, tagri'pintira atrenka vuo. **17** Hazageno Aisaki'a atreno Gerari agupofi seli no omegino anantega mani'ne. **18** Hagi Aisaki'a eteno korapa Abrahamu kafinte'nea tinkeriramina eri so'e hu'ne. Na'ankure nefu'ma fritege'za Filistia vahe'mo'za refite'naza tinkeri raminkino, kafiteno nefu'ma ami'nea agi'aramina erikasefa huno antetere hu'ne. **19** Aisaki eri'za vahe'mo'za ana agupofi tinkeri nesageno, anampinti ti hanatino mareri'ne. **20** Hianagi Gerari afu kva vahe'mo'za, Aisaki afu kva vahera frage huzmante'za amanage hu'naze. Ama tagri tine! Hazageno Aisaki'a agi'a Eseki'e huno ante'ne. Na'ankure zamagra frage hunante'nazagu hu'ne. **21** Aisaki eri'za vahe'mo'za mago'ane ru tinkeri nesageno, esaza

hu'za Gerari vahe'mo'za fra vazizmente'naze. Fra vazizageno negeno, Aisaki'a ana tinkerimofona Sitne huno agia ante'ne.

22 Aisaki'a ana tinkeria atreno ru tinkeri ome kafige'za, hafra huontageno, ana tinkerimofo agi'a Rehoboti'e huno nenteno anage hu'ne, na'ankure Ra Anumzamo'a tazahuno kankamuna retro hurante'neankita, ama ana mopare manineta, maka zampina knare hugahune. **23** Hagi Aisaki'a ana kumara atreno marerino Berseba kumate uhanati'ne. **24** Ana'ma uhanatia kenegera Ra Anumzamo'a efore humino amanage huno asami'ne, Nagra Abrahamu nafaka'amofo Anumzane, e'igu korora osuo. Nagra kagrane mani'nena asomura hunegantena henka'a kagripinti kegehe'za fore hanamoki'zminena zamazeri hakare hugahue. Na'ankure Abrahamu'a Nagri eri'za vahe mani'negu anara hugahue. **25** Hutegeno Aisaki'a ana kumatera Kresramana vu ita trohuno, Ra Anumzamofo agi hanta vazino ana kumateke seli no azeri onetige'za, Aisaki eri'za vahe'mo'za mago tinkeri kafi'naze.

26 Hagi Abimeleki'a Aisaki ome kenaku Gerari nevuno, magora knare antahintahi nemia ne' agi'a Ahusati'e, hanki magora sondia vahe'amofo kva ne' Fikoligizni neznavreno vu'ne. **27** Aisaki'a amanage huno zamantahige'ne, Ko'ma mopa tamifintira tamavesra hunanteta nahe nat'inazanki, tamagra na'anku nagritega neaze? **28** Higeno ana kemofo nona'a anage hu'naze, Ra Anumzamo'a kagrane mani'neno kaza nehigeta negeta, tagra anage nehune, Kagri ene tagri ene amu'notifina tamage hunka huvempa naneke hugeta kagrane, tagranena hagerfita mani'maneno. **29** Kagra, tagrira tazeri havizana osugahane. Tagra kazeri havizana kagrira osuta, trimpa frune hugantonkenka e'nane. Menina Ra Anumzamo knare huneganteno asomura hunegante. **30** Hazageno ana kezmia nentahino, Aisaki'a ra

kave kre zamentege'za tine ana ne'zana ne'naze. **31** Nanterame oti'za raruma hu'za manisaza huvempagea hute'za, anante Aisaki'a huno, Tamarimpa frune viho, huno huzmantege'za vu'naze. **32** Ana'ma huzamantege'za vaza zupa, Aisaki eri'za vahe'mo'za amanage hu'za eme asmi'haze. Hago mago tinkerima kafinompintira tina fore hie. **33** Ana tinkerimofo agi'a Sibae huno ante'ne. Meninena ana kumamo'a rahige'za Berseba kumare hu'za nehaze. **34** Iso'a 40'a zagegafu maniteno, Hiti ne'mofo mofa' eri'ne, agi'a Juditi'e, nef'a Beri'e. Hanki mago a'amofo agi'a Basematikino Hiti ne' Eloni mofare. **35** Ana a'tremokizni mani'zamo Aisakine Rebekagiznia zanarimpa zanata zanami'ne.

27 Hagi Aisaki'a ozafarfa reno avua keso'e osuno zage mofavre'a Isonku amanage huno asami'ne, Mofavrenige, higeno ama mani'noanki nahie huno higeno, **2** Aisaki'a agra anage hu'ne, Menina antahio, nagra ozafare'na fri knania ontahi'noe. **3** Hanki ati keveka'a erinka hofa trampinti vunka, zagagafa ome ahenka eme namio. **4** Nagri'ma navenesia ne'za kre haga hunka eme namige'na nene'na, nagu'reti hu'na manu regantete'na, mani'ne'na henka'a frineno. **5** Hianagi Aisaki'a nemofo Isoma asmia kea Rebeka'a agesa anteno antahiteno, Iso'ma trampinka zaga aheno eme krenteku nefreana, **6** Rebeka'a mofavre'a Jekopuna anage huno asami'ne, Antahio, negafa'a negfu Isonkura nentahugen amanage huno asami'ne, **7** zaga ome ahenka kre haga hunka eme namige'na nene'na Anumzamofo avure manuna regantete'na fri'neno, nehigena antahi'noe. **8** Hanki mofavre'niga kasmisua kea antahinka kema kasami'nua zana ome huo. **9** Menina vunka afu kevufintira tare agaho mementre ome avrenka eme namigena, negafama avenesia ne'za kre haga hugami'nena, **10** negafa'na erinka

ome amisnankeno neteno, manu aregenteteno mani'neno frino.

11 Hianagi Jekopu'a kenona'a Rebekana hunteno, Antahio, nempunimo'a avufga azokake ne' manigeno, nagrira navufgarera nazokara ore'ne. **12** Hagi nafanimo'ma navako'ma huno'ma kesige'na, agri avufina nagra havige revatga nehu'na, nagra navufare manuna e'origahuanki, kna eri kofigahue. **13** Anage higeno nerera'a amanage huno asmi'ne, Kagri knazamo'a nagrite egahie. Mofavre'nimoka ke'nia erizafa hunka, vunka ome azerinka eme namio. **14** Higeno ke hiaza huno tare mementre ome avreno nererante egeno, nefama avenesia kavera kre haga huteno, **15** Rebeka'a zage mofavre'a Iso knare kukena nompima me'neana erino Jekopu hankrente'ne. **16** Rebeka'a meme akru'a taga huno, tarega azantrempi antenenteno, azoka onte avufgare anankempi antente'ne. **17** Rebeka'a kave'ma kre haga huntea ne'zane, bretima tro'ma hunteana nemofo Jekopu eri ami'ne. **18** Hagi Jekopu'a nafa'amofonte uhanitino amanage ome hu'ne, Nenfa'o, higeno nafa'amo amanage hu'ne, kama ama mani'noanki, Kagra izage, Ina mofavrenimoka nehane?

19 Higeno Jekopu'a amanage huno nefana asmi'ne, Nagra Iso'na zage mofavre kamo'na, ke hunantanaza hu'na ne'za krerigante'na neoe. Muse (plis) hugantoanki otinka mani'nenka erinka nezanka'a nenenka manurenanto. **20** Hianagi Aisaki'a nemofonku amanage huno asami'ne, Mofavre nimoka mensi hugantogenka vu'nananki, inankna hunka ame' hunka neane? Higeno Jekopu'a huno, Ra Anumzana, kagri Anumzamo naza huno eri fore hunamige'ne. **21** Higeno Aisaki'a amanage huno Jekopuna asami'ne, Muse hugantoanki tvaonte ege'na Isoga mani'hampi kavufgare kavako hu'na ka'neno. **22** Higeno Jekopu'a nefra tva'onte egeno avufgare azerino negeno anage hu'ne,

Kagerumo'a Jekopu ageru kna nehie. Hianagi kazamo'a, Iso azankna nehie. **23** Aisaki'a ke so'e Jekopuna osu'ne, na'ankure azamo'a azokake huno nefu Iso azankna hu'negeno, Aisaki'a Jekopuna manua rente'ne. **24** Aisaki'a mago'ane amanage hu'ne, Tamage hunka kagra mofavreni'a Isoga mani'nano? higeno, Jekopu'a revatga huno, Izo nagra anane. **25** Hanki Aisaki'a anage hu'ne, Ana ne'za erinka eme namige'na nene'na manu reganta'neno, higeno ana ne'zane, waini tine erino eme amigeno ne'ne. **26** Anante nefafa Aisaki'a nemofonku anage hu'ne, Muse (plis) hugantoanki mofavre'nimoka nagrite enka eme nantako huo. **27** Higeno Jekopu'a eazamo eme antako nehigeno, kena'areti'ma mana nevigeno nentahino'a, anante manu renenteno amanage hu'ne, Ko, mofavreni'amofo mana. E'i ana mnamo'a Ra Anumzamo hozamofo asomu huntegeno, nevia kna mana nevie. **28** Nagri'ma navesiana, menina Anumzamo'a monafinkati ata kora kamisigeno, mopa aru fru hanigeno, ne'zamo'a hakare nehuno, raga nerkeno kasefa wainimo'enena hakare hugahie. **29** Veamo'za kagri eri'za e'nerisageno, maka moparegati vahe'mo'za kagri kagorga manigahaze. Kagra kafuhe'ina razimi manigahane. Negrera mofavre zagamo'za zamarena re'za kepri hugantesaze. Kagri'ma sifna hugantesamo'za zamagranena sifna erigahaze. Asomu ke hugante'samo'za, asomu erigahaze. **30** Aisaki'a Jekopuna manu rente vagaregeno, Jekopu'a Aisakina anama atreno atirmino arugagino nevigeno, Iso'a zaga zantetira e'ne. **31** Agranena haga'anee ne'za tro huno nefante erino e'ne. Iso'a anage huno eme asmi'ne, Nafa'nimoka otinka negamofona zagagafa netenka, henka manuna renanto. **32** Hianagi Aisaki'a kenona hu'no, Kagra azage? Higeno agra amanage hu'ne, Nagra Iso'na zage

mofavre kamo'ne. 33 Higeno Aisakina tusi'a ahirahi neregeno amanage hu'ne, Iza zaga aheno kreno eme namige'na nete'na, asomura huntogeno vigenka, kagra henka neane? Ne'zama'a eri'na nete'na ko'ma manu rente'noa manuna anante megahie.

34 Iso'a nef'a'ma hianke nentahino tusiza huno rimpamo'a haviza nehigeno, tusiza huno zavira neteno nafa'amofona anage huno asmi'ne, nafa'nimoka! Nagri'enena ana zanke hunka manurenanto! 35 Hianagi Aisaki'a huno, Naganakamo havige eme renavatga huno kagri'ma kamiku'ma hu'noa asomura ko emerino vu'ne. 36 Higeno Iso'a amanage hu'ne, Jekopu'e hunka agima ante'minanana tamage, tare zupa nagri ku'ma eri'ne? Kota mofavremo'na asomura agra eri'ne, menina ko, nagri asomura agrake e'nerie. Hagi menina mago'a asomura eri'nampi manua renanto. 37 Higeno Aisaki'a Iso ke'are nona huno, antahio, Hago kva vaheka'a azeri ot'i'noe. Hakare naga'a eri'za vahere hu'na huzmante'noe, ana nehu'na hozare kave'ene kasefa wainimo'ena agri azeri sga hugahie hu'na hunte'noe. Hanki mofavre'niga, nagra na'a hugantegahue? 38 Iso'a nefana anage huno antahigene, Nafanimoke, kagra magoke manuntfana eri'hano? Nagri'ene manurenantogu nehue, nafao huno nehuno Iso'a krafa huno tusi zavi ate'ne. 39 Anante nef'a Aisaki'a kenona huno, Antahio, kagra msavema'a omanesia mopafi manigahane. Anagamu monafinkatira, ata'mo'a mopakafina eoramigahie.

40 Ama mopare manisnanana ha' nehunka manigahane, ana nehunka naganakamofo katoza humigahane. Hinkenka mani rva osunka, agra kaomofo anankempi agare namare zafa anteno azeri kante nehiankna zafa knankempima ante'neana, kagra eri hantagi atregahane. 41 Aisaki'ma Jekopuma manuma rente'nea zanku, Iso'a nagna'amofona antahi haviza huntenu asi

vazinenteno amanage hu'ne, nafa'nimofonku'ma nasunku'ma hanua kna egofta hie. Hankina henka'a nagra naganani'a Jekopuna kegahue. **42** Rebekana zage mofavre'a Iso'ma hianke eme asmi'zageno, anante mofavre'a Jekopuna agi higeno egeno anage huno asmi'ne, kama antahio, negafu Iso'a rimpa ante fru huteno, kagrira kahe frinaku kea retro hie. **43** E'ina higu menina mofavre'nimoka keni'a erizafa hunka, otinka frenka Harani nensaro Lebani'ma mani'nerega vuo! **44** Mago'a gna agrane umani'negeno, negafuna rimpa ahezamo'a ravaheno. **45** Kagri'ma arimpa ahegante'neama fru huno agekanina, anante ke ha'enkenka egahane. Hagi nankna hu'na tarega'motna'a magoke'zupa frisnake'na nasunkura hugahue? **46** Anage nehuno Rebeka'a anage huno Aisakina asami'ne, Hiti vahe'mokizmi mofa'negura, nagrira navesra huno nagote nagesahie. Na'ankure Jekopu'ma Hiti vahe'mokizmi mofanefinti'ma a'ma erisiana, nankna huno knarera mani'zanimo'a hugahie?

28 Hanki Aisaki'a ke higeno Jekopu'a egeno asomu ke hunenteno, hankavenentake ke asamino amanage hu'ne, Kagra mago Kenani vahe'mokizmi mofara ara e'origahane. **2** Hanki otinka Padan-Aram moparega (Mesopotemia), Betuel nontega vuo. E'i negrerana nef'a'e. Anantegati a'ka'a erisanana negrera nesaro Lebani mofanefinti mago mofa ara erio! **3** Ana'ma hanankeno'a Hankavenentake Anumzamo'a asomu huneganteno, kazeri hakare hugante'na tusi'a vahe fore hunka manigahane. **4** Nagri'ma navesiana Anumzamo Abrahamu hunte'neaza huno kagri'ene, mofavreka'ane asomu hugantesnie. Ama vanoma nehana mopa, Anumzamo'a Abrahamu ami'nea mopa eri nafa'a kagra hugahane. **5** Aisaki'a Jekopuna huntogeno Padan-Aram (Mesopotemia) Lebani nemofo Betueli Aramia

ne'mofontega vu'ne. Rebeka'a Jekopune Isonena neznarera'e. **6**
Hagi Aisaki'ma Jekopuma asomu hunenteno Padan-aramuti
a' erinogu huntogeno nevigeno hankavenentake ke asmino,
kagra Kenani vahe'mokizmi mofa'nefintira ara e'oriogahane
hiankea Iso'a antahine. **7** Hagi Jekopu'ma nefane nerera
kema erizafa huno Padan-Aram vu'nea zamofo kenena keno
antahino hu'ne. **8** Iso'ma keana nefa Aisaki'a Kenani mofa'negura
musena osu'ne. **9** Ana higeno Iso'a Ismaelintega vuno a'nema
zamante'nefi mago'ene a' omeri'ne. Ismaeli mofa agj'a Mahalati'e,
Ismaeli'a Abrahamu nemofo'e. Mahalati'a Nebaioti nenunkna'e.
10 Hagi Jekopu'a Berseba atreno Harani kaziga vu'ne. **11**
Nevigeno kantega zage ufreno hani ome higeno, have fita
erinteno mase'ne. **12** Anante mase'neno ava'nama keana,
mago latamo'a mopareti agafa huteno anagamu monafinka
mareri'negeno, Anumzamofo ankeromo'za ana latarera mareri'za
tami'za nehazageno ke'ne. **13** Ana huno nezmagegeno Ra
Anumzamo'a anante otino mani'neno anage huno asami'ne,
Nagra negageho Abrahamune, negafa Aisakine Anumzane,
Menima mase'nana mopa kagri'ene, kagehe'in tamigahue. **14**
Kagripinti'ma fore'ma hanaza vahe'mo'za kasepankna hu'za fore
huhakare hu'za manigahaze. Zage fre kazigane, zage hanati
kazigane, ruga raga agentega vu'za e'za hu'za mani titipa hu'za
manigahaze. Kagri'ene kagehe'impinti ama mopafi vahe'mo'za
asomura erigahaze. **15** Hanki antahio, Nagra kagrane mani'nena
inantego vanoma hananana kva hunegante'na, ete kavre'na
ama ana mopare egahue. Ana nehu'na Nagra onkatre'na,
huvempama hugante'noa kea eri knare huvagaregahue. **16**
Higeno Jekopu'a avu'ma masenereti otino anage hu'ne, Tamage
huno Ra Anumzamo'a amafi mani'negena nagra ontahi'noane.

17 Agra amanogu nehuno amanage hu'ne. Ama mopa ruzahu hu'nea mopare e'noe! Ra Anumzamo mani'nea nompi e'noankino, ama mona kafa me'ne. 18 Jekopu'a nanterame otino, fita aruno mase'nea havea erisga huno retru renteteno, masve tagino agofetu frenteno eri ruotge hunte'ne. 19 Agra ana kumakura Beteli'e huno agia antemi'ne. Korapara ana kumamofo agi'a Lusie huno me'neane. 20 Jekopu'a amanage huno huvempa hu'ne, Afete kama nevanugen Anumzamo'ma nagrane nevuno nagu'vazino ne'za ni'ane kukena'n'i'ane nazama nehanigeno, 21 mago knazamo navate'ma omesanige'na, nafa'nimofo kumate ete rukrahe hu'na uhanatisu'na, Ra Anumzana nagri Anumzane hu'na hugahue. 22 Ama havema eri retruroana, Anumzamofo no mesie. Mika'zama Anumzamo'ma namisifintira 10ni'ma hania kevua refko hu'na Anumzamofo amitere hugahue.

29 Jekopu'a masetere hume vuno, zage hanati kaziga vahe'mofo mopafi uhanati'ne. 2 Agra kesga huno trazampi keana, tinkerire tagufa afu kevu masenageno ke'ne, ana tikerireti sipisipiramina tina afi'za nezmize. Hanki ana tinkerimofo agitera ra have runkani rente'naze. 3 Anante mika sipisipi kva vahe'mo'za utru hute'za, kerimofo agiteti havea atufe ante'ne'za, tina afi'za sipisipi zamia zamite'za, ete ana havea atufe'za ana kerimofo avazare runkani rentetere nehzane. 4 Hagi Jekopu'a zamagrikura amanage hu'ne, Nafuheta tamagra igatire? Hige'za kenona hu'za, Tagra Haranitire. 5 Hazageno Agra amanage huno zamasmi'ne, Nahori negeho Lebanina ke'nazo? Hige'za zamagra kenona amanage hu'naze, Tagra agrira ke'none. 6 Hazageno Jekopu'a zamagrira amanage huno zamasmi'ne, Lebani'a knare huno mani'nefi? Hige'za zamagra hu'za, Agra knare huno mani'ne. Hanki antu ko, agri'mofa Resoli'a sipisipi zaga'ane

ne-e. 7 Hazageno Jekopu'a anage huno zamasmine, Keho, zagea anamifi megeno afu'zagarami eritru hukna omane'neanki, sipisipi afuzaga tina nezmita zamavareta vinke'za trazana ome neho, huno nehige'za, 8 zamagra amanage hu'naze, E'inahura osu'nenunkeno mika'a emetru hute'nageta, tinkeriretira have avaza'a eritretra tina afi zamisunke'za negahaze. 9 Hagi Jekopu'a nanekea zamagrane nehigeno, Resoli'a agra sipisipi kva nehia mofakino, nefasipisipi zamavareno e'ne. 10 Jekopu'a nenogo Lebani mofa Resoli'ma sipisipi'ane ne-egeno, negeno vuno tin keriretira havea ome rekrehe huno, nerera nesaro Lebani sipisipia ti afizmi'ne. 11 Anante Jekopu'a Resolina antako hunenteno, ranke huno zavi ate'ne. 12 Jekopu'a Resolina amanage huno asamine, Nafakamofo nesaro Rebeka mofavre mani'noe, higeno Resoli'a agareno vuno nefasipisipi'ane. 13 Hanki Lebani'a nesaro mofavre nenogo neneke'ma nentahino'a, ome ke'naku agareno vuno, ome anukino antako hunenteno avreno noma'afi e'ne. Ana higeno Jekopu'a hakare'a kea asami vaga'rene. 14 Ana hutegeno Lebani'a amanage huno asami'ne, Kagra nagri kora mani'nane. Higeno Jekopu'a anante mago ika agrane mani'ne. 15 Hagi Lebani'a amanage huno Jekopuna asami'ne, Kagra nagri kora mani'nankure hunka amne eri'zana e'origahane. Nama'a kagrira miza hugantegahufi nasamio? 16 Lebani'a tare mofatre zanante'ne, kotamofo agi'a Lia'e, osi'mofo agi'a Resoli'e. 17 Lia avurgamo'a kazakiri'ne, hagi Resoli avurgamo'ene, avufgamo enena knarezantfa hu'ne. 18 Jekopu'a Resolina avesinenteno amanage hu'ne, Nagra 7ni'a kafufi mofaka'a Resolima a'ma erinte'nakura erizanka'a erigantegahue. 19 Higeno Lebani'a amanage hu'ne, Ru vahe ami'zankura kagr'i'ma kamisuana knare hu'neanki nagrane manio. 20 Jekopu'a 7ni'a zagegfufi Resolima

a'ma erikura eri'zana eri'nearinkino, ana knamo'a agritera osi knasente'ne. Na'ankure agrama Resolima avesinte'negu anara hu'ne. **21** Hagi henka ana knamo'a vagaregeno Jekopu'a amanage huno Lebanikura hu'ne, Knama nami'nana knamo'a hago vagareanki, a'ni'a namige'na ara eri'heno. **22** Higeno Lebani'a ana kumate vahera miko zamare tru huno, aravema hu ne'za kre'ne. **23** Ana kenegera Lebani'a Lia avreno Jekopu ome amigeno anteno mase'ne. **24** Lebani'a eri'za erinentea a' Zilpa avreno mofa'a Lia katoza huminogu eme ami'ne. **25** Hanki Jekopu'a maseno kotigeno nanterama keana Lia mani'negeno keteno, agra amanage Lebanikura hu'ne, Resolinte eri'zana eri kantenoanki, kagra na'a amazana hunantane? Nahigenka renavatga hane? **26** Anage hianagi Lebani'a ana kenona amanage hu'ne, Tagri kumapina nagna'amo nuna'amofo agatereno ve' eri'zana omene'ne. **27** Mago sonta manitegeta, tagra mago'mofona kamisnunkenka ara erigahananki, ete mago'ene 7ni'a zagegafu eri'zana eri nantegahane. **28** Higeno Jekopu'a mago sonta Lia'ene mani vagare'tegen, Lebani'a mofa'a Resolina avreno Jekopuna amigeno nenaro'za hu'ne. **29** Lebani'a, katozama'a e'neri a' Bilhana avreno Resoli katoza eri aminogu ami'ne. **30** Hanki Jekopu'a Resolina anteno mase'ne, agra Liama avesi nenteama'a agatereno Resolina tusiza huno avesintene. Agra ana nehuno Lebanina erizana 7ni'a zagegafufi erinte'ne. **31** Hanki Ra Anumzamo'ma keana Jekopu'a Liana avesi ontogeno, Anumzamo'a rimpa eri vasne'ne, ana hianagi Resoli'a narvo a' mani'ne. **32** Lia'a amu'ene huno ne' kasenteno agi'a Rubeni'e huno nenteno anage hu'ne, Na'ankure Ra Anumzamo natazani'a nazeri knare hiankino, nenave'a avesi nantegahie. **33** Anante Lia'a mago'ene amu'ene huno ne'

kasenteno amanage hu'ne, nenave'a avesi onantegeno Ra Anumzamo antahi namino mago'ene ama mofavrea nemacie, nehuno Simioni'e huno agia antemi'ne. **34** Anante Lia'a amu'ene huno ne' kasenteno amanage hu'ne, Menina ama knarera, nenave'a tvaonire manigahie. Na'ankure nagra tagufa ne'mofavre kase amue. Ana hu'negu agi'a Levi'e huno antemi'ne. **35** Anante Lia'a mago'ene amu'ene huno, ne'mofavre kasenteno amanage hu'ne, Menina nagra Ra Anumzamofo agi'a erisga hue. Ana hu'negu agi'a Juda'e hu'ne. Ana huteno ana a'mo'a mago'ene mofavrea onte'ne.

30 Resoli'a mofavrea Jekopuna kase omino nuna'amofo kaniverenenteno, amanage huno Jekopuna asami'ne, Mofavre onte manine'na frisugi, Mofavre eri fore hunamio. **2** Higeno Jekopuna asi vazigeno Resolina rinkfa henenteno amanage hu'ne, Nagra Anumzana omani'noanki, aza karimpa erikigenka mofavrea kamu'enena hunka kasenontane. **3** Higeno Resoli'a amanage hu'ne, Kato mofani'a Bilha'a ama mani'neanki, antenka masegeno mofavre kase naminkeno, agripinti nagranena ana zanke hu'na mofavrea eri fore haneno. **4** Anage nehuno kato mofa'a Bilhana amigeno anaroza higeno, Jekopu'a anteno mase'ne. **5** Ana higeno Bilha'a Jekopunteti amu'ene huno ne'mofavre kasente'ne. **6** Resoli'a amanage hu'ne, Anumzamo'a fatgoza hu'nane nehuno, nunamuni'a antahinamino ne'mofavre namie. Nehuno agi'a Dani'e huno ante'ne. **7** Resoli kato mofa Bilha'a ete mago'ene amu'ene huno Jekopuna ne'mofavre kase amigeno tare se'ne. **8** Resoli'a nevreno anage hu'ne, nuna nimofona tusiza hu'na kruno renente'na agateroe. Anage nehuno ana mofavremofo agi'a Naftali'e huno ante'ne. **9** Hanki Lia'a mago'ene mofavre onte mani'heno keana higeno, kato mofa'a

Zilpana avreno Jekopu nenarioza hinogu eme ami'ne. **10** Lia kato mofa Zilpa'a Jekopuna ne'mofavre kase ami'ne. **11** Anante Lia'a amanage hu'ne, Na knare'za hue, nehuno agi'a Gati'e huno antemi'ne. **12** Lia kato a'mo Zilpa'a ne'mofavre Jekopuna kase amigeno tare se'ne. **13** Ana higeno Lia'a anage hu'ne, Nagra muse huankino, a'nemo'za muse hu'mo'e hugahaze. Nehuno Asa'e huno agi'a antemi'ne. **14** Witi taga hu'za eme vatu nehaza knare, Rubeni'a vano hiregati mago'a rone hunte flaua raga (Mandrake) erino nerera Lia hirega e'ne. Higeno Resoli'a amanage huno Liana antahige'ne, Muse (plis) hugantoanki Rubeni'ma rone hu flaua'mofo raga'a eme kami'nefintira mago'a namio. **15** Hianagi Lia'a amanage hu'ne, Kagrama nenavema hanre'nanana, e'i osi zampi? Hutenka menina ne' mofavrenimo'ma ronema hu flauama erino'ma e'nea erisue hunka nehano? Higeno Resoli anage hu'ne, Ha knarere, ana ronehu flauama namisana nona'a Jekopu'a meni kenage kagrane emasegahie. **16** Higeno ana zupa kinaga Jekopu'a hozaregati ne-egeno, Lia'a kantegati ome nevreno anage huno asmi'ne, mofavre'nimo'ma rone hu flauama erino e'nea flauateti Resolina nemina, kagrira ko miza se'noanki, kagra enka nagrane emasegahane. Higeno ana kenege Jekopu'a Lia'ene umase'ne. **17** Anumzamo'a Leana antahi amigeno, amu'ene huno 5fu'mofona ne'mofavre Jekopu'na kase ami'ne. **18** Lia anage hu'ne, Anumzamo'a mizani'a namie, na'ankure eri'za mofani'a nenave avre amugenno anteno masegeno mofavre kase nami'ne. Huteno agi'a Isaka'e huno antemi'ne. **19** Lia'a Isaka amageteti amu'ene huno 6simofona ne'mofavre Jekopuna kase ami'ne. **20** Lia'a anage hu'ne, Anumzamo'a mareri'nea miza muse hunanteno nami'neankino, menina nenave'a nagrira antahinamigahie. Na'ankure 6si'a

ne'mofavre kase amue. Nehuno agj'a Zebuluni'e huno ante'ne.

21 Henka'a Lia'a Zebuluni amagetetira mofara mago anteno agj'a Daina'e hu'ne. **22** Ananteria Anumzamo'a Resoli nunamuna antahi'nemino mofavre ante ku'a eri vasanente'ne. **23** Ana higeno amu'ene huno ne'mofavre kasenenteno anage hu'ne, Anumzamo'a nagaze zana eri amne hunante huno nehuno, **24** agj'a Josefe'e huno antenemi'no anage hu'ne, Anumzamo'a ne'mofavrea mago'ene namisie. **25** Hagi Resoli'a Josefema kasentetegeno Jekopu'a Lebanina amanage huno asami'ne, nonkuma'niare mopani'arega vunaku huanki hunantege'na va'neno. **26** A'neni'ane mofavre nagani'ane zamagriku hu'na eri'zanka'a eri'na e'noanki natregena va'neno. Hagi kagrake'za eri'zama erigante'noa zana kenka antahinka hu'nane. **27** Hianagi Lebani'a amanage huno Jekopuna asami'ne, Nagrama kasnampa hu'na kagri'ma kagoana, nagrane mani'nankeno Ra Anumzamo'a kagriku huno asomura hunenante. Hagi menima kagrama kavesi nantesunka nagrane manio. **28** Nehuno Lebani'a ru'ene kea avazu huno anage hu'ne, Kema hananama'a ana avamente kamigahue. Hagi miza agi ahenanto. **29** Higeno Jekopu'a amanage huno asami'ne, nagrama eri'zanka'a eri'na neogeno maka afukamo knareke huno e'neana, kagra kenka antahinka hu'nane. **30** Nagrama ome'nogenka, kagra osi'a sipisipi afuzaga ante'nananagi, nagrama erua eri'zampi Ra Anumzamo'a asomu hugantegeno rukazi huno rama'a fore hu'ne. Hagi ina zupa natre'nankena a' mofavreni'a zamaza hugahue? **31** Higeno Lebani'a amanage huno Jekopuna asmi'ne, Na'a nagra kamigahue? Higeno Jekopu'a anage hu'ne, Kagra mago zane hunka onamigahane. Kagra magoke zantfa nagrira hunantegahane, nagra mago'ene afuzagaka'a traza me'nesirega

kegava hugantegahue. **32** Hagi menina natrege'na maka afu zagaka'a mani'nafe vano nehu'na, tupri tapri sipisipine, aganumpa lama anenta'ma tegre ramine'niane, tupri tapri hu'nenia memene avre rure ha'nenkeno, e'i ana afu'zagamo nagri miza megahie. **33** Henka mizama naminaku hanana zupa, havigema hu'zankura e'i anamo eriama hunantegahie. Hakare'a agrono kre ramineni'ane, tupri tapri osu'enenia memempi, aganumpa osu'enenia lama anenta'enema, nagri afupima kenunka kumzafa se'nane huo. **34** Higeno Lebani'a amanage hu'ne, Ha knareki, kema hanaza huo. **35** Higeno ana zagekna zupage, agra'a Lebani'a vuno maka'a agrono krerami'neane, tupri taprima hu'nea ve memene tupri tapri hu'nea a' memene, efeke hu'neane, aganumpa sipisipi afura avrezamige'za amohe'za afete'are ome ante'za kegava hu'naze. **36** Lebani'a Jekopuna atreno taregi magoki zagegna vu'are afete afu'zaga'a avreno umanigeno, Jekopu'a ruga'a afu'zagare kegava krino mani'ne. **37** Hianagi kegava huno mani'neno tagufa ruzahu ruzahu zafamofo azankunatmi akafrino, ukari'za mago'a neharenno noharenno higeno efeke nehigeno, tupri tapri hu'ne. Ana zafa ukari'ma haregeno'a efeke hu'ne. **38** E'i ana zafa azankunatamina erino vuno sipisipine mememo'za ti nenazare zamavuga ana zotaramina mopafi ome rentetere hu'ne. Hagi tima nenaku esanu'za eme nege'za ve afu'moza a' afu'tamimofo zamagumpi marerihogu anara hu'ne. **39** Hanki e'i ana zafa azankunatamima rente'nea tva'ontema ve afu'mo'ma a' afumofo agumpima marerinkeno'a, ana afu'mo'a tupri tapri azoka'ene anenta antegahie. **40** Hanki Jekopu'a tupri tapri' azoka'ene ve afu'zaga agra'a suza refko huganti netreno, aganumpa ve afuzaga zamatrege'za Lebani afuzagafi mani'naze. **41** Hanki hankavenetake ve afu'zagamo'zama a' afumokizmi

zamagumpima marerizama nehazageno'a, Jekopu'a ana zafa azankuna zamavuga tinkampi arentetere hu'ne. Ana hige'za zafa azankuna rente'nea tava'onte agumpina mareritere hu'naze.

42 Hianagi hankave'a omane'nea ve afu'zagamo'zama, a' afu'mokizmi zamagumpima marerizama nehazageno'a, Jekopu'a ana zafa azankunatamina zamavuga ome reonte'ne. Hagi hankave'a omne'nea afu'zaga e'i Lebani afu'zagagi, hanave afu'zaga Jekopu suzane. **43** Ana nehuno afu'amo hakare higeno, eri'za vene a'ene, kemorine, donkine, hakare'aza nenteno Jekopu'a feno ne' before hu'ne.

31 Lebani mofavre naga'mo'za agriku'ma nehaza ke'ma Jekopu'ma antahi'neana amanage hu'naze, Jekopu'a nerafa zana maka eri vaganereno, nerafa zanteti agra feno vahe fore huno manie. **2** Hanki Jekopu'a Lebani avu'ava'ma keana ko'ma nehiaza osuno, avugosa hunenanteno ha' vahe'mo hiaza hu'ne. **3** Ana nehigeno Ra Anumzamo'a anage huno Jekopuna asmi'ne, Nagra kagrane manigahuanki ete negafane vaheka'a moparega vu'o. **4** Higeno Jekopu'a ana kema nentahino'a afu'zagama zamavareno ome zamate'noma mani'nerega e'ogu, Resoline, Liagiznirega ke atreznantegeke, **5** anante akeno amanage huno zanasmi'ne, neranafa'a ko'ma nehiaza huno nagranena kiza zokago huno menina omanie. Hagi avugosamo'a ruzahu nehige'na negoe. Hianagi nenfa Anumzamo'a nagrane mani'ne. **6** Nagrama neranafa eri'zama tusi namu'na sisi nehige'na hanaveni'a atre'nama eri'noana, tanagra nageta antahita hu'na'e. **7** Anama hu'nogura agesa ontahino, renavatga huno mizani'a 10ni'a zupa eri antenaga henka hu'ne. Hianagi Anumzamo'a atregeno nazeri havizana osu'ne. **8** Kora Lebani'a amanage huno nasmi'neane, maka'a tupri tapri azoka'ene afu'zaga eri'za

enerina mizanka'e, higeno tupri tapri ke'za fore hu'ne. Hagi agrono tegre ramira mizanka'e hiana, anazanke hu'ne. **9**
E'ina higeno Anumzamo'a neranafa azampintira memeramine, sipisipiramine, rama'a nagri avre nami vagare'ne. **10** Hanki afu'zagamo'ma agafima ahea knafi amanahu ava'na ke'noe.
Maka'a ve mememofo avufgarera tupri tapri ene agrono krerami krerami hu'nea azoka me'nege'na negogeno, a' mememofo agumpina mareri'ne. **11** Anumzamofo ankeromo'a ava'nafi amanage huno nagia ahe'ne. Jekopuo! Hige'na ama mani'noe hu'na hugeno, **12** Anumzamofo ankeromo'a amanage hu'ne, tupri tapri'ene avon krerami'nea ve meme zagamo'a a' meme agumpima marerime neviana, kesga hunka ko, Lebani'ma maka'a avu'ava zama hunegante'mofona, Nagra ko ke'noe. **13** Nagra Betelima efore'ma hugenka have eri atru hunka masave taginka frenentenka navufi huvempa hu'nana Anumzamo'na nehuanki menina otinka ama kumara atrenka, fore'ma hu'nana kumatega vuo huno hu'ne. **14** Higeke Resolike, Liakea ana nanake nentahi'ne, amanage hu'na'e. Tagra nerafa afu fenompintira mago'zama erisu'a zana huhampri orante'neanki, na'a hugahu'e?
15 Hagi nerfa'ko hurantegeta ruregati emanı vahe kna hu'noe. Tagrira ko mizante tatre'ne, Tagriteti afufeno eriana ko ana afu fenona atre hana hu'ne. **16** Tamage nerfa azampinti Anumzamo'a maka zana kagri hanare kamiana, e'i ana maka zana tagri'ene mofavre'tine suzane. E'ina hu'negu Anumzamo'ma kasami'niazza huo. **17** Hagi Jekopu'a maka a'mofavre'a, kemori afutamimofo zamagumpi zamavarentere nehuno, **18** maka'a afu'ane, fenoma'ane emanı'neno eritru hu'nea zana zogi hana huno Padan-Aram mopa atreno, Kenani moparega nefä Aisaki'ma mani'nerega vu'ne. **19** Hagi Lebani'a afete umani'neno, sipisipi

azoka neharegeno, Kenanima vunaku'ma retrotra nehzageno'a, Resoli'a nompi marerino Lebani'ma havi anumzante mono hunentea zana, musufa seno erino vu'ne. **20** Jekopu'a Arameania nera Lebanina osami revatga nehuno freno vu'ne. **21** Jekopu'a maka zama'a enerino otino fre'no vuno, Yufretis tina takaheno Gileati agonarega avugosa hunteno vu'ne. **22** Hagi taregna evutege'za anante knazupa mago'a vahe'mo'za, Jekopu'a hago katreno fre'ne hu'za Lebanina ome asami'naze. **23** Lebani'a ananke nentahino naga'a nezamavaren Jekopuna arotgo hu'za vu'naze. Hagi agene re'nazana 7ni'a hanine, zagine karanka mase'naze. Hagi Jekopu'a Gileati agonafi mani'nege'za ome azeri'naze. **24** Hianagi Anumzamo'a Arameani ne' Lebanina kenage ava'nafi efore humino anage huno asami'ne, Kva huo, Jekopuna magore hunka so'e kefi havigea huonto. **25** Jekopu'a seli no omegino agonafi mase'negeno, Lebani'a ana agonafi Jekopu'na ome azeri'ne. Hagi Lebani'a vahe'ane mago kaziga seli no omegino, Gileati agonafi mase'naze. **26** Lebani'a anage huno Jekopuna asami'ne, Kagra nahigenka renavatga hutenga mofani'ararena hapinti kina huzmante'za zamavare'za frazankna hunka zamavarenka e'nane? **27** Nahigenka okura frenka renavatga hu'nane, nasminke'nsinia, muse nehu'za tambori'nine, zavena nehe'za hugantagenka tarenka asine. **28** Hagi nahigenka nasminke'na nagehe'ine, mofani'ararena zamantako nehu'na huso'e huzmantogenka zamavarenka ome'nane? Kagra mago kefo avu'avaza hu'nane. **29** Nagrira hanaveni'a me'neankina, kagrira ha' kahenaku e'noanagi, meni kenagera masenogeno negafa Anumzamo'a amanage huno nasm'i'ne, Jekopuna azeri koro osuo, magore hunka havi keo, so'e keo huonto huno nasm'i'ne. **30** Nagra antahi'noe natrenka'ma

anana, na'ankure negafa nonku tusiza huno kvenesigenke.
Hianagi nahigenka anumzani'a noni'afintira kumzafa senka
e'nane? **31** Higeno Jekopu'a ana kemofo nona'a amanage huno
Lebanina asami'ne, Na'ankure nagrama antahuana hanavetinka
mofa trenka'a hanaregahane nehu'na koro hu'na oku'a e'no'e.
32 Aza'o mago'mo'ma ana anumzanka'a erino e'nesnimofona
hakrenka erifore hanankeno'a, anamo'a frigahie. Nege'nagenka
nagati'amofo zamufi mago'a kagri zama nagri fenompima
me'neniana erigahane. Hagi Resoli'ma musufa seno e'negura
Jekopu'a ontahi'neno, anahu kea hu'ne. **33** Lebani'a, Jekopu
seli nompi ome agafa huno hakreteno, Lia seli nompi ome
keteno, tare eri'za a' tremokizni seli nompi keme viana onke'ne.
Ananteria Lia seli nona atreno Resoli seli nompi umarer'i'ne.
34 Resoli'a ana havi anumza erino vuno kemorimofo agofetu
ante'za nemaniza tra'mofo agu'afinka ome anteteno, agofetu
manino rentrako hu'ne. Hagi Lebani'a hakreno vano hiana keno
eri fore osu'ne. **35** Resoli'a amanage huno nefana asami'ne,
O'maotisnua zankura ranimoka kea onasuo, ika kri'ma enerua
kna ege'na mani'noe. Lebani'a maka zampina hakreno keno
eviana ana havi anumzama'a before osu'ne. **36** Jekopuna asi
vazigeno ke ha' Lebanina renteno, Lebaninkura amanage hu'ne,
Nagra mago zanka'a eri haviza hu'nogenka amanahura nehano?
Naza mago havizana hugante'nogenka navaririnka ne-enka,
haha'ene kea hunenantane? **37** Nagri feno zama re'nanana,
naza magora kagri zana nonka'afintira eri'na e'nogenka hakrenka
erifore hane? Hakrenkama erifore hu'enunka, tavufi eri atru
hugeta, nagri vahe'ene, kagri vahe enena negeta eri fatgo
ha'mneno. **38** Hagi 20'a kafumofo agu'afima eri'za erigante'noana
a' sipisipimo'o, a' mememo'o magore huno anentara kase

havizana, nosige'na ve sipisipi afu zagaka'afintira magore hu'na
ahena one'noe. **39** Hanki afi zagamo'ma afu'zagama aheno
nege'na, kagira eme onkasami'na, ferupi kenagepi afu'zagafinti
kumazafa sazage'na, nona'a nagra'a suampinti avre'na kegina
ka'afi eme antetere hu'noe. **40** Ana nehu'na zage knafina zage
hara tusiza huno nave'nesigeno, kenagera tusiza huno zasimo'a
nazeri kragenefege'na, magore hu'na navura mase so'e hutere
osu'noe. **41** Hagi nagra kagri nompina e'inahu zana 20'a zagegafu
hu'noe. Nagra 14ni'a zagegafu tarega mofaka'ama eri'nakura
eri'zana eri'noe. 6si'a kafufina afu'zagaka'ama kegava hu eri'za
eri'noe. Ana nehugenka mizani'a 10ni'a zupa eri fenka anaga
hu'nane. **42** Hianagi nenageho Abrahamu Anumzama, nafa'nia
Aisaki'ma koro hunenteno mono'ma hunentea Anumzamo'ma
nagranema omani'nesina, antahuana kagra menina naza navapa
hunantanke'na osine. Hianagi narimpa knazampi mani'noa
zane hanave eri'zama eri'noa zanena Anumzamo'a nenageno,
kenagera hanavetino nanekea eme hugantene. **43** Lebani'a
ke nona amanage huno Jekopuna asmi'ne, Tare mofatrena
nagri mofatre mani'na'e. Hanki mofavre zaga nagri mofavre
zage, afu'zaga nagri afu'zage, maka zama neganana nagrike
zane. Hianagi mofatreni'ane mofavrema kase zamante'na'ana
menina nagra inankna huzmantegahue? **44** E'ina hu'negu
menina egeta, naneke huvempa huteta, have zogita emeri atru
huntesukeno amu'nonti'afi me'nena, henka ama ana avamezama
negenuta'a, amama huhagerafu'a zankura tagesa antahitere
hugahu'e. **45** Jekopu'a mago avame'za za'za have ome erino
anante retrureno asenenteno, **46** naga'a ke hige'za mago'ene
havea eri'za anante kevu vazintete'za, ana have kevumofo
tvaonte kave ne'naze. **47** Lebani'a ana havemofo agi'a Jegar-

sahaduta'e huno Aramea kefina nehuno, Ama have atrumo huragesa hugahie huno ante'ne. Hianagi Jekopu'a Hibru kefina Galitie huno agi'a nenteno, ama have atrumo hu tagesa hugahie huno ante'ne. **48** Lebani'a amanage hu'ne, amama eritru hu'a havemo menina avame'za amu'nonti'afina megahie. Hu'ne nehu'ne ana havemofo agi'a Galitie hu'ne ante'na'e. **49** Ete mago agi'a Mizpae hu'ne ante'na'e. Lebani'a amanage hu'ne. Tagra afete mani'neta oge age osuta mani'neta maka avu'ava'ma hanu'ana, Ra Anumzamo agrake tagegahie. **50** Hagi kagrama mofa'nimokizni hazenke ati zanamige, mago ru a'ne erige hananana, amunonti'afina magora vahera omani'hazanki Anumzamo agrake tagegahie. **51** Lebani'a mago'ene Jekopuna anage huno asami'ne, Antahio, za'za havema asento'a negenka, amama oti'no'a amu'nontiafima eri atru hu'a havea ko. **52** Amama mani'neta huvempa huta asento'a havemo, amu'nontiafi me'nena, nagra ama ana havea agatere'na krimpa eri haviza hu'zana osugahue. Hagi kagra eri atru hunto'a havene, asento'a havene agaterenka narimpa eri havizana osuo. **53** Hagi Abrahamu Anumzane, Nahori Anumzane, neznafa Anumzamo amu'nontiafina refko hurantegahie. Hagi Jekopu'a nefa Aisaki'ma koro hunenteno mono'ma hunentea Anumzamofonte huvempa hu'ne. **54** Jekopu'a e'i ana agonafi Kresramana vu ne'za kreno Anumzamofontega ofa hunenteno naga'a zamagi hutru hige'za nete'za, ana agonafi mase'naze. **55** Lebani'a nanterame otino mofatrema'ane, agehe'ine nezmatagino zamantako nehuno, asomu ke huzmante'ne. Ana huteno, Lebani'a kuma'arega ete vu'ne.

32 Jekopu'a kantega nevigeno, Anumzamofo ankeromo'za agrite efore hu'naze. **2** Hagi Jekopu'ma nezmageno'a amanage

hu'ne, Ama Anumzamofo nonkumare, nehuno agi'a Mahanaimie huno ante'ne. 3 Jekopu'a ke erino vu vahe huzmantege'za vugote'za nefu Iso mani'nere Idomu mopalrega, mago agi'a Seirie nehazarega vu'naze. 4 Hagi Jekopu'a mago'ene amanage huno huzmante'ne, Amanage huta ranimofa Isona ome asamiho, eri'za neka'a Jekopu'a anage hie, nagra Lebani mopafi mani'noreti menina neoe. 5 Nagra bulimakao afutaminki, donkiraminki, memeramine, sipisipi kevuzagane, eri'za veanine zamavare'na ne-ena ranimoka kagrama kasunku'ma hunantenka mago krimpama hunka antahinamisanku hunezmantoe, hie huta ome asmiho. 6 Hige'za kema eri'za vu'naza vahe'mo'za ete e'za Jekopuna amanage hu'za eme asmi'naze, Negafu Isona ome asamunanagi kantega tutagiha hugantenaku ne-ege'za, 400'a vahe'mo'za avega hu'za neaze. 7 Hazageno Jekopu'na tusi amano vazigeno agu'amo tare nehigeno, miko'a zama'ane vahe'ane, bulimakao kevune, memeramine, sipisipiramine, kemoriramina tarefi refko huno kevu huzmantene. 8 Amanahu agesa agra antahi'ne, Iso'ma, mago kevuma ha'ma eme huzmantesigeno'a, mago kevu'moza fresnaze, huno nehuno tare kevua refako hunte'ne. 9 E'ina nehuno amanage huno Anumzamofontega nunamuna hu'ne, Nenageho Abrahamu Anumzane, nafa'nimofo Aisaki Anumzana, Ra Anumzamoka Kagra nasaminka, ete kagra mopaka'are nagaka'arega vuge'na, kazeri knare hugantaneno hunka hu'nane. 10 Nagra knare osu vahe mani'nogenka vagaore kavesizane, kema hu'nante amage ante avu'avazanena Kagra eri'za vahekamo'na naveri' hu'nane. Hagi nagra magoke azompa eri'nena Jodani tina takahē'na vu'noe. Hanki menina nagra tare seli nonku'ma eme ki'na mani'noe. 11 Koro nagesa nehige'na, nagra nunamu nehuanki,

nenfu Iso azampintira, nagu'vazio. Na'ankure eme nenaheno, mofavre ni'ane, nezamareranena zamahegahianki naza huo. **12**
Na'ankure Kagra hunka, Nagra kazeri ra neha'nena kagehe'za hagerinkenafi kasepankna hanage'za, vahe'mo'zahampri hana hugara osugahaze, hunka ko nagrira hunante'hane. **13** Hagi ana kenagera anante maseteno, kotigeno otino mika'zama erino e'nefintira ase'ma hu'neama'a refko huno muse'za nefu Iso ami'za eri atru hu'ne. **14** 200'a a' memeraminki, 20'a ve memeraminki, 200'a sipisipiraminki, 20'a ve sipisipiraminena zamavarenenteno, **15** 30'a kemori afuzagane anenta'zmine, 40'a a' bulimakaoramine, 10ni'a ve bulimakao afuzagagi, 20'a a' donkiraminki, 10ni'a ve donki afutaminki huno zamarente'n. **16** Ana huteno eri'za vahe'amokizmi huzmantege'za afu'zaga kevure kevure refko hute'za rure rure zamavare'za nevazageno amanage huno zamasmi'n, navuga vugoteta nevuta rure rure zamavareta viho, **17** huno nehuno, kotama vaza nagamokimire'ma vugotama hia eriza nera, amanage huno hankave ke asmi'n, Nenfu Iso'ma eno emenegageno, igati vahe'moka, iga nevane, aza afu'zaga zamaregotenka neane? huno kantahigesigenka, **18** amanage hunka asmio, eri'za vahekamofo Jekopu afutamine. Muse'za ramofo nefu Iso ami'zane, hagi agra henka tamage'a ne-e hiho. **19** Hanki anante anante'ma hu'za henkama vutere hazza afu kevuraminte'ma kvama hu'zama vaza eri'za vahe'tmina kantegama Iso'na kesuta anankege ome asamiho, huno huzmante'n. **20** Anage nehuno mago'ene amanage huno huzmante'n, Eri'za vaheka'a Jekopu'a agra tamefiga'a ne-e huta hiho. E'i anankema hu'neana, na'ankure kote'na museza ami'enkeno e'nerino rimpa fru hutena, henka avufima ome negesugenogea muse huno navregahie huno Jekopu'a agesa

nentahino hu'ne. **21** Anage huno nentahino huzmantenge'za ana musezama amisia afu kevua zamavare'za vugota hu'za vazageno, ana kenagera seli noma ki'za mase'nare Jekopu'a anante mase'ne. **22** Ana kenage amu'nompi Jekopu'a otino a' trema'ane, eri'za mofatrene, **23** ni'a mofavre'ane zamavareno Jabok osi tina kagata hu'nere ome zamatrege'za takahē'za vu'naze. **24** Zamavreno ome zamatreteno eri'za vahe'a huzmantenge'za, maka afufenoma'a eri'za takahē'za vu'naze. **25** Anante Jekopu'a agrake mani'negeno, kenagera mago ne' anante ege'ne ogazafe agazafe hu'neke, oretufe aretufe nehakeno vuno kotu'za hu'ne. **26** Ana ne'mo'ma keama Jekopuma agate'marega osuno'a, amumazinare regri'nea zaferinare ahegeno Jekopuna amumazinamo'a avazu hurami'ne. **27** Ana higeno ana ne'mo'a amanage hu'ne, Kotu'za hianki natrege'na va'neno, huno ana ne'mo'a higeno, Jekopu'a ana nekura huno, Katra'nena ame hunka ovugahananki, asomu hunantetenkage vugahane, huno higeno, **28** ana ne'mo'a antahigeno, Kagi'a azage, higeno, Nagra Jekopu'nne huno asamigeno, **29** ana ne'mo'a huno, Mago'ene kagrikura Jekopu'e hu'za osugahaze. Na'ankure Anumzane, mopafi vahe'ene hara hunka agatere'hanku menina kagi'a Israelige. **30** Higeno Jekopu'a antahigeno, Muse (plis) hugantoanki kagika'a nasamio, huno antahigegeno, Na'anku Nagri nagigura nantahi negane? Nehuno anante asomu hunte'ne. **31** Penielie kumara agateretegeno, zagemo'a hanati anamifi tegeno, revazmu revazmu huno vu'ne. Na'ankure amumazinamo'a ruvazu hu'negu anara hu'ne. **32** Ana hu'negu menina Israeli vahe'mo'za zagagafamofo amumazinamo'ma

agezafima eme regri'nerema me'nea ame'a nonaze. Na'ankure
Jekopu amumzinama avako'ma hu'nea zanku hu'za nonaze.

33 Hagi Iso'a 400'a vahe'ane ne-egeno, Jekopu'a kesga huno negeno mofavre naga'a refko huzmantenge'za, nezmarera Liane, Resoline, tare eri'za a'trene zamavuga otitere hu'naze. **2** Ana huteno eri'za a'trema'ane mofavre'zanine huzmantenge'za vugota hu'za vu'naze. Ananteria Lia'ene mofavre naga'ane vazageno, Resoli'ene Josefekeia henka vu'na'e. **3** Hianagi Jekopu'a agra vugoteno vugofa nehuno, 7ni'a zupa rena ome reno mopafi kepri hume vuno nefu tava'onte uhanati'ne. **4** E'ina higeno Iso'a negeno agareno eno Jekopuna azante eme azerino agazafeno, azana anankempi rugagino antako hunentege'ne, zavi otente atente hu'na'e. **5** Ana huteke Iso'a ana a'nene mofavre ramine nezmageno anage hu'ne, Zamagra iza'za kagranena neaze? Huno antahigegeno, Jekopu'a amanage hu'ne, Anumzamo'a so'e hunanteno eri'za vahekamo'na nami'nea mofavreramine. **6** Anante Jekopu eri'za a'trene, mofavrezinine vu'za Iso agiafi ome zamarenare'za mopafi kepri hu'naze. **7** Anante Lia'ene mofavre naga'ane ne-eza anazanke hu'za Iso agiafi zamarena eme re'za mopafi kepri hazageno, Josefe'ene Resolike henka'a anazanke hune mopafi eme kepri hu'na'e. **8** Ana hutageno Iso'a amanage huno Jekopuna antahige'ne. Ese'ma afu'zaga avre'za e'naza vahe'ma zamage'noana nahigenka huzmantanke'za e'naze? Higeno Jekopu'a amanage hu'ne, ranimoka kazeri muse hunaku e'inara hu'noe. **9** Hianagi kenona Iso'a amanage hu'ne. Nagnanimoka, nagra hago rama'a feno ante'noanki, kagrama erinkama e'nana zanka'a kagra erio. **10** Hianagi Jekopu'a amanage hu'ne, A'o, muse (plis) hugantoanki nagri'ma kagu'reti'ma hunka antahi nenamisunka amama

negamua musezana (gift) nazampintira erio. Hagi musema hunka navrana zama koana, Anumzamofo avugosa keankna nehugenka nagrira krimpa naminka nenavrane. **11** Muse (plis) hugantoanki nagrama muse'zama (gift) negamuana eri'nanegu navenesie. Na'ankure Anumzamo'a avesi nenanteno naza huno hakare'aza nami'nege'na, knare hu'ne'na eme negamue. E'inage huno Jekopu'a hankavetino kehigeno Iso'a ana zantamina eri'ne. **12** Iso'a ana museza (gift) enerino amanage hu'ne, Nagra vugota'nena magoka vugahunanki otinketa vamneno. **13** Hianagi Jekopu'a amanage huno Isona asami'ne, ranimoka kama antahio, mofavrenimo'za hanave ot'inazageno, afu zagamo'za ami anuntage nehaze. Hagi magoke zagefinke'ma afu kevuma harita zaza kama vanunke'za, ufrigahaze. **14** E'ina hu'negu (plis) muse hugantoanki ranimoka, eri'za nekamo'na natrenka vugota huge'na, afu kevu zagane, a'mofavremo'zanema kama vanaza avamente akoheta nevuta, Seiri kumate (Idom) ranimokare uhnatigahue. **15** Iso'a ana kenona amanage hu'ne. Muse (plis) hugantoanki mago'a eri'za vaheni'a zamatra'nena kavega hu'za vugahaze, higeno Jekopu'a amanage hu'ne. Ko' ranimoka nazeri so'e hunananki na'ante anara hugahane? **16** Higeno Iso'a netreno, ana zupage Seiri (Idom) moparega ete vu'ne. **17** Jekopu'a Sukoti kumatega vuno, e'i ana mopare noma'a negino, afu kevumokizmi none kine. E'ina hu'negu menina ana kumamofo agi'a Sukotie hu'za nehaze. **18** Hagi Jekopu'a Padanaramu mopa atreno ne-eno Sekemu ehanatino, Kenani mopare ra kuma'mofo fegi'a nonkuma (kemi) eme anteno mani'ne. **19** E'i ana mopa Hamori amohe'impinti, Sekemu nefafa mopa 100'a silva zagoreti miza huno seli nona ki'ne. **20** Anante havere ita tro

hunteteno agi'a El-Elohe Israeli vahe Anumzane, huno agi'a antemi'ne.

34 Daina'a Jekopune, Liagizni mofakino mago kna a'ne zamagenaku Sekemu kumate vu'ne. **2** Ana higeno Hivi vahe kva ne' Hamori nemofo Sekemu'a negeno monko'za huntenuku hankavetino avazu huno kefo avu'avaza hunte'ne. **3** Sekemu'a Jekopu mofa Daina avesinenteno, akoheno masave kefinti kea humi'ne. **4** Sekemu'a amanage huno nefu Hamorina asmi'ne, Ama mofara a' erinaku nehuanki avre namio. **5** Jekopu'a mofa'amofo Dainama kefo avu'avazama hunte'nea ke nentahino, akoheno ke osu mani'nege'za, mofavre'amo'za afu kva nehzaregati e'naze. **6** Sekemu nefu Hamori'a Jekopuntega ana hazenke'mofo keaga hunaku vu'ne. **7** Jekopu amohe'za sipisipi afu kegava hu'za mani'ne'za ana hazenke zamofo kema nentahi'za, kumate ehanatizageno zamagu'amo'a kna nehigeno tusi zamsi vazi'ne. Na'ankure e'inahu kefo avu'ava zana Israeli vahepina osuga'za, Jekopu mofara hunte'naze. **8** Hianagi Hamori'a amanage huno zamasmi'ne. Sekemu'a agu'areti huno mofatamia avesinenteno, e'i ana avu'ava zana hu'negu, muse hurmantoanki aminkeno a' erinteno. **9** Mofane omi ami hugahunanki, atrenke'za namohe'za mofaneka'a a' erisageno, kamohe'za mofa'nenia a' erigahaze. **10** Tamagra, tagrane mani'neta mopatifina tamevesite vano nehutma, nazanoma tro'ma hunaku'ma hanutma amne tro nehutma mopane nonena miza hugahaze. **11** Hagi Sekemu'a Daina nefu Jekopune asarahehe'gizmia amanage huno zamasami'ne. Tamagrama knarere hanage'na, inankna zanku tamavesisia zana nagra tamamigahue. **12** Mofa tamimofonte zago fenonku'ma agima ahenantesazana, kema hanaza kante antena tamigahue. Hagi

mofa tamia naminke'na a' eri'neno. **13** Jekopu amohe'za Sekemune nefa Hamorigizni reznavatga hu'naze, na'ankure nezmasaro Daina azeri haviza hu'negu zamagesa nentahi'za, kea hufatgo osu'za havige hu'naze. **14** Zamagra amanage huza hu'naze, Oku avufga taga osu vahe'mo'ma nerasaroma a' erisigeno'a, tagaze hugahiankita tagra e'inahuzana osugahune. **15** Hianagi mago'zana oku kvufama taga osu'nana kazigati nehunanki, tagrama hu'nonankna hu'za, kagri naga'mo'za oku'a zamufga mika'moza taga hutesageta, hu izo hugahune. **16** Ana hanunketa tamagra tagri mofane ara erisageta, tagra tamagri mofane ara enerita magoke vahe trohuta manigahune. **17** Hianagi tamagrama ketima antahita oku tamufga taga osnageta, nerasarona avreta ama kumara atreta vugahune. **18** Anage hazageno Hamori'ene nemofo Sekemuke ana kema nentahike hugnare hu'na'e. **19** Sekemuna nefa naga'mo'za antahi nemiza nekino, anagema haza kea nentahino, Jekopu mofate agu'a me'negu hantaka huno ana kemofo amage' ante'ne. **20** Hamorike nemofo Sekemu'ene ran kumamofo kahante eke atru hu'za kenaneke eri fatgo nehaza kumate ana kea vahe eme zamaslike amanage hu'na'e. **21** Hagi knare knampa hurantaze, zamatre sunke'za mopatimo'a ra hu'neaki'za mani'neza, inankna'zana mizante tro nehuta, mofanetia omeri emeri hugahune. **22** Hianagi oku tavufga taga hutesunke'za, ana zanku mago zamarimpa hu'za tagrane, mago vahere hu'za mani'gahaze. E'ina hu'negu zamagrama hazankna huta maka'a vene'nemota oku tavufga taga hugahune. **23** Afu kevuzimine, feno zamimo'a tagri'za segahie. Hanki tagrama zamagri kemofoma avaririta oku tavufga taga hanunke'za, tagri'ene knare hu'za manigahaze. **24** Anage nehake'za hakare'a vahe'mo'za rankumamofo kahante

atirami'za, Hamori'ene, nemofo Sekemugizni ke nentahi'za,
mika rankumapi vene'nemo'za oku zamufgamofo anom'a taga
hu'naze. **25** Hagi tagufa zage agateregeno anama oku zamufga
taga hu'naza vahe'mo'za tusi zamatagu nehu'za mase'nageno,
Daina nesaro Simioni ene, Livaikea bainati kazi eri'ne, ana
kumapi vu'ne maka'a vahera antri hazaza hu'ne zamahe hana
hu'na'e. **26** Hamorine nemofo Sekemu'giznia bainati kazinknonu
zanahe nefri'ne, Sekemu nompinti neznasaro, Dainana nevre'ne
vu'naze. **27** Dainama kefo avu'ava'ma hunte'naza zanku, Jekopu
mofavre naga'mo'za ana kumapi mareri'za, maka'a knare'zana
eri vagare'naze. **28** Sipisipi afu kevuma, bulimakaoma, donkima,
kuma agu'afi me'nea zama fegi'a me'nea zanena maka eri hana
hu'naze. **29** Hakare'a razama, onensa zama, a' mofavrene
nompinti zane eri hana hu'za vu'naze. **30** Jekopu'a amanage
huno Simionine, Livaigiznia zamasmi'ne, Kenani vahe'ene,
Peresi vahe' amu'nompina knaza erita eme nenamita nagrira
nazeri hi'mnava'e. Tagra onensa'a vahe' mani'nonanki'za,
atru hu'za ha'ma eme hurantesu'za, nagri'ene maka zani'ane
nazeri haviza hugahaze. **31** Hianagi kenona'a anage hu'na'e,
hanki nahigeno nersarona, monko a'nemofoma hunenteankna
avu'avara hunte'ne?

35 Anumzamo'a amanage huno Jekopuna asami'ne, Ko'ma
negafu Isonku'ma koro frenka nevanke'ha kagrite efore
hugami'noa kumate otinka anagamu Beteli vunka anante
uman'i'nenka, anante Anumzamo'ha ita tro hunanto. **2** Higeno
Jekopu'a amanage huno naga'ane, Agranema nemaniza
naga'mokizmia zamasmi'ne. Maka havi anumzantmina netreta,
tamagu'a retro nehuta, agru kukena timia antaniho. **3**
E'ina hutenketa anagamu Beteli vuta, antahima nenamino

kna'zampinti'ma naza nehuno, hakare kazigama nevugeno
nagranema nemania Anumzamofo Kresramanavu ita, e'i anante
ome tro hugahue. 4 E'inage hige'za maka vahe'mo'za havi
anumzazamine, zamegesafi renentaza rinine eri'za Jekopu eme
amizageno erino Sekemu rankuma tava'onte oki zafa agafafi
keri kafino asente'ne. 5 Hagi Jekopu'ma karanka naga'anema
nevigeno'a Anumzamo'a Kenani kumapima nemaniza vahera
zamazeri koro hige'za, mago'zana huozamante'naze. 6
Jekopu'ene vahe'ane ana maka vu'za Lusi uhanati'naze. Mago
agi'a Beteligino ana mopa Kenani me'ne. 7 Jekopu'a havere
ita tro huntenu agi'a El Betelia hu'ne. Na'ankure nefu Isonku
koro'ma freno nevigeno, Anumzamo'a korapara anante fore
hum'i'neane. 8 Anante mani'nageno Rebekana avate eri'za
ara Debora'a frige'za oki zafa agafafi Betelia ohenkamu'a
asente'naze. Nehu'za agi'a Alon Bakutie hu'za ante'naze.
(Zamagra kefina, zavi zafe hu'naze.) 9 Hagi Padan-Aramuma
atrelo Jekopu'ma ete Kenani mopaquema egeno'a, Anumzamo'a
mago'ene efore humino, asomu hunte'ne. 10 Anumzamo'a
amanage huno asmi'ne, Menina kagi'a Jekopu'e huno me'ne.
Hianagi mago'enena Jekopu'e hu'za osugahazanki, Israeli'e
huno kagi'a megahie. Israeli'e huno Anumzamo'a Jekopu agi'a
antemi'ne. 11 Anumzamo'a mago'ene amanage huno asami'ne,
Nagra hihamu'ane Anumzane, mofavrea kasezmanege'za
kokankoka mopafina fore huhakare hu'za rukazi hu'za rankumara
ante'za nemaninage'za, mago'amo'za kini vahera efore hugahaze.
12 Abrahamune, Aisaki'gizni Nagra zanami'noa mopa kagrira
kamigahue. Hagi henka ama ana mopa Nagra kagehe'i
zamigahue. 13 Anage huteno Anumzamo'a Jekopu'enema
keagama ha'a kumara atreno ete mareri'ne. 14 Jekopu'a ra have

erino eme retru renenteno, ana haverera waini ti tagino ofa
nehuno, oliv masave erino eme ragi'ne. **15** Ana nehuno Jekopu'a
Anumzamo'enema keaga hu'nea kuma'mofo agi'a Betelie huno
ante'ne. **16** Hagi anantetira Jekopu'a naga'ane Betelia atre'za,
Efrata kumate vunaku nevazageno, kantega Resolina mofavre
ante kna'amo'a egofta higeno tusi atagu hu'ne. **17** Hagi Resolina
mofavre'za negegeno tusi atagu nehigeno anante mofavrema
aza huno kase aminaku'ma avega huno mani'nea a'mo'a
amanage huno asami'ne, mago' ne'mofavre kasentananki korora
osuo. **18** Resoli'a kasenteteno fri'za nehuno ana mofavre agi'a
Ben-oni'e nasunku mofavre huno ante'ne. Hianagi Jekopu'a
Benzameni'e nazantamaga mofavre huno agi'a ante'ne. **19**
Resoli'a frige'za Efrata vu kamofo ankenare asente'naze, (mago
agi'a Betlehemue.) **20** Jekopu'a ra have erino vuno Resolima
asente'nea kerimofo agofetu ome retru re'ne, menina Resoli
kerire retru re'nea havea amne me'ne. **21** Hagi anantetira Israeli'a
(Jekopu'a) viazamo mani'ne'za afu kva nehaza noma Ederi
kumate'ma me'neana agatereteno vuno ogantu'a seli nonku'mara
omegino mani'ne. **22** Anampi umani'nageno Israelina (Jekopu'na)
agonesa ne'amo Rubeni'a, nefana mago a'a, nenaro eri'za
erinente'a a' Bilhama anteno mase'nea kea Israeli'a antahi'ne.
23 Hagi ama'i Jekopuna 12fu'a ne' mofavre'amofo zamagi'e.
Lia'ma kasezmante'nea ne'mofavrea Rubeni'a Jekopuna zage'e,
anantera Simioni'e, Levi'e, Juda'e, Isaka'e, Zebuluni'e. **24** Hagi
Resoli'ma kasezmante'nea ne'mofavrea Josefe'ene Benzamenike.
25 Hagi Resoli eri'za a'mo Bilha'ma zanante'nea ne'mofavrea
Dani'ene Naftalike. **26** Hagi Lia eri'za a'mo Zilpama kase
zanante'nea ne'mofavrea Gati'ene Aselikie. Ana hu'neankino
Jekopu'a Padan-Aram mani'neno zamazeri fore hu'ne. **27**

Jekopu'a nefu hirega Mamre Kiriat-arba e'ne, e'i mago agi'e
Hebronie, ana kumara nefu Abrahamu'ene Aisakike zoka
umanina'a kumare. **28** Aisaki'a 180'a Zagegafu mani'ne. **29**
Aisaki'a za'za kna maniteno ozafa reteno renteramino, vagare
asimu anteteno frino agehe'zane agigomo'zama umani'nazarega
vu'ne. Jekopuke, Isoke eri'ne ome asente'na'e.

36 Ama'i Isompinti fore hu'za vu'naza naga'mokizmi zamagi'e,
Isona mago agi'a Idomu'e. **2** Iso'a Kenani vahe'mokizmi mofane
ara eri'ne, Ada'a Hiti ne Eloni mofare. Oholibama'a, agra Ana
mofakino Hivi ne' Zibeoni negeho'e. **3** Hanki mago a'mofo agi'a
Basemati'e, Ismaeli mofa, Nebaioti nesaro'e. **4** Ada'a Elifazi
kasentegeno, Basemati'a Reueli kase ante'ne, **5** Oholibama'a
Jesusima, Jalamura, Korama huno kase zamante'ne. Iso'ma
Kenani mopare mani'neno kasezmantane'nea ne'mofavreramimofo
zamagi'e. **6** Iso'a a'neane, ne'mofavre ane, mofa'neane,
maka noma'afi nemaniza naga'ane, memene, sipisipi kevune,
bulimakao kevune, mika fenona Kenani mani'neno erifore hu'nea
fenoma'ane enerino, negna Jekopuna atreno afete moparega
vu'ne. **7** Maka zazanimo'a hakare nehigeno, afu kevu zinimo'a
rukazi huno emanina'a mopamo'a avitegeno, Iso'a atreno vu'ne.
8 Higeno Iso'a Seiri agona moparega umani'ne. Isona mago agi'a
Idomu'e. **9** Iso'a Seiri agona kokampi nemaniza Idomu vahe'mofo
nezmageho'e. **10** Iso ne'mofavremokizmi zamagi'a, Elifazi'a
Iso nenaro Ada ne'mofavre, Reueli'a Iso nenaro Basemati
ne'mofavre. **11** Hanki Elifazi ne'mofavre zamagi'a Temani'ma,
Omari'ma, Zefo'ma, Gata'ma, Kenasi'ma hu'za mani'naze.
12 Iso nemofo Elifazina, mago kazokzo eri'za a'amofo agi'a
Timna'e. Timna'a mago ne'mofavre Elifazina kase ami'ne, agi'a
Amaleki'e. Iso nenaro Ada ana ne'mofavrea kase zamante'ne.

13 Hanki Reueli ne'mofavre zamagi'a, Nahati'e, Zera'e, Sama'e, Miza'e. E'i ne'mofavre nagara, Iso nenaro Basemati kase zamante'ne. **14** Isona mago a'amofo agi'a Oholibama'e. Ana mofakino Zibeon negeho'e. Ama Iso nenaro Basemati'ma kase zamante'nea ne'mofavre zamagi'a, Jeusi'e, Jalamu'e, Koranki huno Isona kase ami'ne. **15** Hagi Iso nagapinti kva eri'za eri'naza vahe zamagi'e. Isona agonesa ne'mofavre Elifasi ne' mofavre naga'mo'za kva eri'za eri'naza vahe zamagi'a Temani'e, Omari'e, Zefo'e, Kenazi'e, **16** Kora'e, Gatami'e, Amaleki'e. E'i'a kva vahe'tmina Idomu mopafi kegava hu'naze. Elifasi nagapinti, Isone nenaro Adakizni zanagehoze. **17** Hanki Isona mago a'amofo agi'a Basemati'e, nemofo agi'a Reuelie. Hagi Reueli ne' mofavre nagamoza kva eri'za eri'naza naga'mokizmi zamagi'a, Nahati'e, Zera'e, Sama'e, Miza'e. Reueli naga Idomu mopafi kva eri'za eri'naza naga'mokizmi nezmageho'a Basemati'e. **18** Iso nenaro Oholibama ne' mofavre nagapinti kva eriza eri'namokizmi zamagi'e, Jalami'e, Kora'e. Oholibama'a Ana mofakino, Isonteti kase zamante'nea tagufa mofavremo'za kva eri'zana eri'naze. **19** E'ina vahera Iso ne'mofavreraminki'za mago agi'a Idomu'e nehzankino agripinti fore hu'za kva eri'zana eri'naza vahe'mokizmi zamagi'e. **20** Ama Seiri ne'mofavre Horati ne' ko'ma ana mopa nafa'a hu'zama mani'naza vahepinti fore hu'za kva eri'za eri'za mani'naza vahe zamagi'e, Lotani'ma, Sobali'ma, Zibeoni'ma, Ana'ma, **21** Disoni'ma, Eseli'ma, Disani'ma hu'za zamagra kva eri'za eri'naza Horaet' vahe, Seiri ne' mofavre Idomu mopafi mani'naza kva vahe zamagi'e. **22** Lotani ne'mofavre agi'a Hori ene, Hemani'enene. Hanki Lotani nesaro'a Timna'e. **23** Sobali ne'mofavre naga zamagi'a Alvani'ma, Manahati'ma, Ebali'ma, Sefo'ma, Onami'e. **24** Zibeoni ne'mofavre nagara,

Aia'ene, Ana'enene. Ana'a agra amuho tinkeria ka'ma mopafina
keno eri fore hu'ne. Nefa Zibeoni donki kegava huno vano
nehuno ana tinkeria ke fore hu'neane. **25** Ana mofavrezaga
zamagi'a, Disoni'ma, Oholibama'e. Oholibama'a, Ana mofare. **26**
Disoni ne'mofavre zamagi'a Hemdani'ma, Esbani'ma, Itrani'ma
Kerani'e. **27** Eseli ne'mofavre zamagi'a Bilhani'ma, Zavani'ma,
Akani'e. **28** Disani ne'mofavre zamagi'a Usike, Aranike. **29**
Horaeti vahepi kva eri'za eri'naza naga zamagi'a, Lotani'ma,
Sobali'ma, Zibeoni'ma, Ana'ma, **30** Disoni'ma, Ezeri'ma, Disani'e.
Ama'i Horati vahepi fore hu'naza kva vahere. Seiri mopare
nagatenofite hu'za mani'neza kva eri'za eri'naza vahe zamagi'e.
31 Hanki ama'i Idomu mopafi kini vahe zamagi'e, Israeli ne'
mofavre'mo'za kini vahe fore osu'naza knafi, Idomu moperara kini
vahe fore hu'za mani'nazane. **32** Bela'a agra Beori nemofo kinia
manino Idomua kegava kri'ne, rankuma'amofo agi'a Dinhabae. **33**
Bela'ma nefrigeno'a, Zera nemofo Jobabu, Bozra kumate ne'mo
Bela nona erino kinia mani'ne. **34** Jobabu'ma nefrigeno'a, Temati
mopareti ne' Husamu kinia mani'ne. **35** Husamu'ma nefrigeno'a
Bedati nemofo Hadadi kinia manino kegava hu'neankino,
Midian vahe Moapu kumapi ha' huzamagatere'nea nekino,
rankuma'amofo agi'a Avitie. **36** Hadadi'ma nefrigeno'a Samla,
Masreka kumateti ne'mo, kinia manino kegava hu'ne. **37**
Samla'ma nefrigeno'a Sauli, Yufretis timofo tva'onte Rehoboti
kumate ne'mo agri nona eri'ne. **38** Sauli'ma nefrigeno'a Bal-hanan
Akbor nemofo Akbor'i'ma nefrigeno'a, Pao rankumateti ne'mo Hadari
kuma'a erino kini mani'neane, Nenaro agi'a Mehetabelikino,
Matreti mofa Mezahab negeho'e. **40** Isompinti'ma fore hu'za
kva eri'zama eneri'za nagatenofite'ma hu'za kuma ante'za

mani'naza naga'zmire'ma kva huterema hu'naza vahe zamagi'a,
Timna'ma, Alvani'ma, Jeteti'ma, **41** Oholiba'ma, Ela'ma, Pino'ma,
42 Kenazi'ma, Temani'ma, Mibzari'ma, **43** Megdili'ma, Irami'e. E'i
zamagra Idomu kva nagare, Iso'a Idomu vahe nezmafa'e. Ana
hu'neanki'za nonku'ma ante'za nemani'za mopare kva hutere
hu'za mani'naze.

37 Menina Jekopu'a agri nefu zoka mani'neno hu'nea mopare
Kenani mani'ne. **2** Ama'i Jekopu naga nofimofo naneke. Josefe'a
17ni'a zagegafu nehuno, nehaza ne' mani'neno nefu'zane
afutami kegava hu'ne. Bilhane, Zilpagizni nefu a'tremokizini
mofavre'mozane kegava hu'naze. Josefe'a nefu'za havizama
nehazankea erino nezmafana ome asami'ne. **3** Hagi Israeli'a
(Jekopu'a) miko ne'mofavre'afintira, Josefena tusiza huno
avesinte'ne. Na'ankure agra ravusefinka ante'neankino, agra
avasese'ane kena tro huno antaninte'ne. **4** Ana hige'za
Josefe nefu'za, kazama nezmafa'ma tusiza huno agri'ma
avesinentege'za nege'za, zamagra avesi nonte'za knare hu'za fru
keaga huomi'naze. **5** Hagi mago kenagera Josefe'a ava'na keteno,
afuhe'mokizmi ana avana kea zamasmige'za, zamagra mago'ene
tusiza hu'za zamarimpa ahente'naze. **6** Josefe'a amanage huno
zamasami'ne, Muse (plis) hurmantoanki ava'nama ke'noa zamofo
nanekea antahijo, **7** hozafi witi ananekunkeno nagri witimo'a oti
fatgo higeno, tamagri witimo'za regagi'za, nagri witirera kepri
hu'naze. **8** Anante nefu'za amanage hu'za antahige'naze, tagrira
tagaterenka kagra kini mani'za nehano. Tamage hunka kegava
hurante'za nehano, nehu'za mago'ene zamasigu hunente'za,
agri avana kene, ke'anena ontahi'naze. **9** Anante mago'ene
ava'na keteno afuhe'i amanage huno zamasami'ne, Antahijo,
mago'ene ava'nagoana, zagine, ikane, **11** ni'a ofumo'za nagrite

kepri hunante'naze. **10** Josefe'a anage huno nefane, afuhe'inena nezmasmigeno, nafa'amo'a amanage huno kesune, Kagra nankna ava'na negane? Nagrane, negrera'ene negafu'zanena tamage huta kagrite kepri hugahuno? **11** Agri afuhe'za amefi'a ke hunte'nazanagi, nef'a hakare'a nanekea antahi antahifi atre'ne. **12** Mago'zupa agri nefu'za, nezmafa afutami avre'za traza nehogu Sekemu vu'nazageno, **13** Israeli'a amanage huno Josefena asami'ne, Negafu'za afuzaga zamavare'za Sekemu traza me'nerega ome zamante'za mani'nazanki ege'na, huganta'nena vuo. Higeno Josefe'a amanage huno kenona hu'ne, Nagra vugahue. **14** Higeno nef'a amanage huno Josefena asmi'ne, Menina vunka negafuzane, afuzaganena knare hu'za mani'nafi ome ketenka, ete enka kea eme nasmio. Anage nehuno huntogeno Hebroni agupofinti vuno Sekemu uhanati'ne. **15** Anantega ome hakeno vano nehigeno mago ne'mo anampi negeno anage huno antahige'ne, na'anku kagra nehakrane? **16** Higeno Josefe'a anage hu'ne, Nagra nafuhemokizmigu nehakroanki, muse (plis) hugantoanki inantega afu'zmia kegava hu'za mani'nafi nasmio? **17** Higeno ana ne'mo'a anage huno asamine, Amafinti atre'za vunaku nehu'za, Dotani vanune nehazage'na antahi'noe. Higeno Josefe'a zamage zamavaririno vuno afuhe'ina Dotani ome zamageno erifore hu'ne. **18** Hagi Josefe'a afete ne-eno eravao osu'nege'za afuhe'za nege'za, ahe frigahune hu'za kea retro hu'naze. **19** Zamagra zamagra ke hugantugama hu'za amanage hu'naze, ava'na kege nera antu e! **20** Hanki menina enketa aheta keri kampi mate'vuta nevazita, amanage hugahune. Afi zagamo aheno ne'ne, nehuta avana ke'amo'a inankna hugahifi kesune! **21** Ana hianagi Rubeni'a ana naneke nentahino, aza hunaku anage hu'ne, atrenketa ahe

ofrisanune. **22** Rubeni'a mago'ene amanage huno zamagrira zamasami'ne, Aheta korana eri oragi'sunanki, amima ka'ma kopima me'nea kerifi oheta avre vazisanune. Ana hanageno agra aza huno avreno nefu ome amisigu hu'ne. **23** Hanki Josefe'ma eno afuhe'inte'ma ehanatige'za, zamagra azeriza, knare avasese'ane za'za kena nefu'ma antaninte'neana zafi netre'za, **24** zamagra azeri'za tinkeri kampi matevu atre'naze. Ana kerifina tina omnene. **25** Ana hute'za, zamagra mani'ne'za ne'za nenaku nehu'za, kesga hu'za zamavua kazana, avazu hunte'za Ismaeli vahe'mo'za Giliatiti ne-eza, kemorizmifi gamune, fukinkna masave tusa masave kregefe'neane (bam) mana'nentake'za mere'ne eri'za Isipi zagore ome atrenaku e'naze. **26** Juda'a amanage huno afuhe'mokizigura hu'ne, Neregnama aheta korama'a eri tagisuta nankna miza erigahune? **27** Agra tagri kora mani'negu ohesunanki, enketa Ismaeli vahete Josefena mizante atramneno. Hige'za nefu'za ana nanekere mago zamarimpa hu'naze. **28** Anante mago'a Midiani vahe'mo'za, fenozama zagore'ma netre'za eneri'za nehaza vahe'mo'za anante neazageno, zamagra Josefena kerifinti avazuhu naga'atre'za Ismaeli vahete 20'a sekel silva zagore atre'naze. Ana hazage'za Josefena avre'za Isipi vu'naze. **29** Rubeni'a keri avazare eno keana Josefe'a kerifi omani'negeno kukena'a sgane sagnu hu'ne. **30** Aganahe'inte agra uhanatino amanage hu'ne, Ana mofavre'a omani'ne. Hanki nagra inankna hugahue? **31** Hige'za zamagra Josefena avasese'ane kena eri'za, ve meme ahe'za ana za'za kena'a korama'afi re'za ti'za hute'za, **32** anante ana avasese'ane za'za kena, mago'amo'za eri'za nezmafante uhanatiza anage hu'naze. Amama kefore'ma hu'na kena muse (plis) hugantonanki, kagri negamofo za'za kenafi ko. **33** Hazageno keteno amanage

hu'ne, Ama'i nagri ne'mofavremofo za'za kene. Afi zagagafamo aheno ne'ne, tamage huno Josefena amprino anitraga trogo hutre'negahie! **34** Anage nehuno Jekopu'a kukena'a braro bruru huno tanefa kateno kukena'are nefreno za'za kna ne'mofonkura huno zavira ate'ne. **35** Ana hige'za mika ne'mofa'amo'za, oti'za azeri avavasenaku hu'nazanagi, azeri vava sezankura ave'osi'ne. Hagi agra amanage hu'ne, Nenamofonku zavi netena fri'na fri vahe kumapi umanigahue. Nehuno nef'a zavi ate'ne. (**Sheol h7585**) **36** Hagi Midiani vahe'mo'za Isipi uhanati'za Josefena mizante atrazageno, Isipi ne' Fero avate kva ne' Potifa miza se'ne.

38 Mago zupa Juda'a afuhe'ina nezamatreno Adulami kumate ne' Hira'e nehaza ne'ene umani'ne. **2** Juda'a anantega Kenani ne' Sua'e nehaza ne'mofo mofa keteno, a' erino anteno mase'ne. **3** Ana higeno amu'ene huno ne' kasentegeno, agra Eri'e huno agi'a antemi'ne. **4** Anante mago'ene amu'ene huno ne' kasenteno, Onani'e huno agi'a ante'ne. **5** Ana a'mo'a mago'ene ne' kasenteno Sela'e huno agi'a ante'ne. Juda'a Kezipi mani'negeno nenaro'a ne'mofavrea kase ante'ne. **6** Hanki Juda'a agonesa ne'mofavre'a Erina mago a' avre ami'ne. Ana a'mofo agi'a Tema'e. **7** Ana hianagi Judana agonesa mofavre'a Eri'a Ra Anumza'mofo avufi havi avu'avaza higeno, Ra Anumzamo'a ahe fri'ne. **8** Juda'a amanage huno Onanina asami'ne, Nempuka'amofo kento ate vunka, nefu a' eneriankna avu'ava hunka, negafu a' erigeno, negafu mofavre kasenteno. **9** Hianagi Onani'a antahi'ne, kento a'mo kasentesia mofavrea agri mofavre omanigahankino, nempu'amofo a' ene nemaseno'a avufga rina, nefu mofavre antemi'zanku mopafi atre'ne. **10** E'inama agra hiazanku Ra Anumzamo'a musena osuno, ahe fri'ne. **11** Anante Juda'a

nenofero Temana anage huno asmi'ne, Negafa nontega vunka kento a' umani'negeno, ne'niamo Sela'a ra hute'na'e. Higeno Tema'a vuno nefu nompi umani'ne. **12** Mago'a zagegafu evutegeno Sua mofa, Juda nenaro'a frigeno, zamasunku hu'za zavi atazageno ana kna vagaretegeno, Juda'a sipisipi azoka neharerega Timna kumate agrane, arone'a Adulamu kumateti ne' Hira'ene vu'na'e. **13** Mago'a vahe'mo'za Temana ome asami'za, Konkeno negnofero'a sipisipi'a azoka hareku Timna kumate evu'ne. **14** Hazageno ana a'mo kento kukena hate netreno amne kukena huno, avugosa refineteno, Enaim kuma'mofo kasante Timna vu kante emani'neno, amanage huno agesa antahine, Sela'a hago ra hu'neanagi, a' ka'e huno navre omi'ne. **15** Hagi Juda'ma ana a'ma eme negeno'a, monko a' mani'ne huno agesa antahi'ne. Na'ankure ana a'mo'a avugosa refiteno mani'negeno keso'e osu'ne. **16** Agra kana atreno ana a'mofonte vugantuteno amanage hu'ne, Menina knare kagranena umasegahuo? Agra mofavre'amofo are huno ontahi'ne. Tema'a amanage huno antahige'ne, Na'a namitenka nagra'nena umasegahane? **17** Higeno agra kenona'a huno, Afuzaga ni'afinti mago ve meme avrentegantegahue huno asmi'ne. Ana a'mo'a amanage huno asmi'ne, Knare mago kamente'zana avame'za naminanke'na azeri nenumenka, henka'a avrente nantegahampi? **18** Higeno ana ne'mo'a amanage hu'ne. Avame'zana nagra na'a kamigahue? Higeno ana a'mo'a anage hu'ne, rinine, knankempi kvasese nofi'ene, kazampima eri'nana azompa ka'ane namigahane. Higeno ana miko'za nemino ome anteno masegeno agriteti amu'ene hu'ne. **19** Anante otino vuno avugosafi refite'neaza eri netreno, kento kukena omeri hankre'ne. **20** Juda'a rone'a Adulami ne'te, kasefa ve meme avre amigeno ana a'ma ami'neaza

azampinti erinogu ome hakeana ana ara onke'ne. **21** Agra ana a'mofo kumate vahe zamantahigeno, Havi anumzamofo mono nompima monko a'ma Enaimima vu kantegama nemania ara ina'ne? Hige'za zamagra amanage hu'naze, Havi anumzamofo mono nompina, monko ara amafina omani'ne. **22** Ana ne'mo'a ete Judante vuno, amanage ome hu'ne, ana ara hake'na erifore osuge'za, ana kumapi vahe'mo'za amafina monko ara omani'ne hu'naze. **23** Anante Juda'a amanage hu'ne, Aru vahe'mo'za tagiza resagi atregeno ana a'mo erino. Hago ama'i ve meme avre kamugenka, ana ara ome hakenka eri fore osane. **24** Henka 3'a ikana evutegeno, Judana amanage hu'za asami'naze, neganofero Tema'a savri huno vano nehuno mofavre amu'ene hu'ne. Hazageno Juda'a anage hu'ne, Avre fegi atreta ana ara tevefi kre kasegeho! **25** Ana ara avazu hu'za fegi'a atirmizageno, ana a'mo'a huno, Nagrama namu'ene hu'noana ama zamofo nefanteti mofavrea eriri'noe. Nehuno ana zana zamige'za eri'za nenoferonte vu'za anage hu'za ome asami'naze, muse (plis) hugantoanki ko, ama rinine, anankempi avasese'zane, azompa aza suzane? **26** Higeno Juda'a ana zantmima keno antahino'ma nehuno'a amanage hu'ne, Tema'a nagrira nagatereno knare avu'avaza hu'ne. Haviza hu'na nagra nenamofo Selana avre omugeno anteno omase'ne. Nehuno Juda'a ete mago'ene ana a'enena uomase'ne. **27** Ana a'mo mofavre anteku nehigeno, keana kugave'za rimpafina mani'na'e. **28** Anante mofavre kasenentegeno mago'mo azana ante kamategeno, aza huno mofavre kasemi a'mo'a koranke osi nofi azante kinenteno, amanage hu'ne, Ama mofavremo koteno e'ne. **29** Hianagi eteno azana anamagi agu'ategeno, ete mago'mo atiramine. Ana a'mo'a anage hu'ne, Inankna hunka kagra anafe hunka agaterenka ane,

nehuno agi'a Peresi'e huno antemi'ne. 30 Hanki amefiga'a nefu osi koranke nofi'ma azante kinte'nemo atiramigeno, agi'a Zela'e huno antemi'ne.

39 Josefena avre'za Isipi mopare vazageno, Fero avate vugota huno kegava nehia ne' Potifa'a Ismael vahe'mo'za avre'za vu'naza vahepinti miza huno avrente'ne. 2 Ra Anumzamo'a Josefe'ene mani'negeno, maka eri'zama'amo'a knare'zanke hu'ne. Josefe'a ozafa'amofo nompi Isipi mani'ne. 3 Ozafa'amo'ma keana Ra Anumzamo'a Josefe'ene mani'negeno, eri'za kama'amo'a agri azantera knare zanke hu'ne. 4 Ana higeno, ozafa'amo'a Josefena antahimino, avate eri'za ne' azeri ot'i'ne. Ana nehuno noma'ane maka'zama'a Josefe azampi antegeno kegava krinte'ne. 5 Isipi ne'mo'ma ana'ma hianknareti agafa huno Josefe'ma noma'afi mani'negu huno Potifana mika nompi zane, fegi'a hozafi zanena Ra Anumzamo'a asomu hunte'ne. 6 Maka'zana Potifa'a Josefe azampi antegeno kegava krigeno, maka zankura agesa ontahi'neanki, kave'ma nesia zankuke hu'ne. Hagi Josefena agi'avugosamo'ene, agia azamo'enene, avufgamo'enena knare'za huno soe zanke hu'ne. 7 Anazama nehifina ozafa'amofo nenaro'a Josefena kesane nehuno anage hu'ne, Enka nagrane emaso. 8 Hianagi agra ana kegura i'o nehuno, ozafa'amofo nendarona anage huno asami'ne, Antahio, nagrama ama nompima mani'nogeno'a ozafanimo'a maka'zankura agesa nontahie. Maka'zama ante'nea zana nagri nazampi kegava kri'nuegu ante'ne. 9 Mago agateresa nera ama nompina omani'ne, nagrake mani'noankino, mikazana nagri nazampi anteno kegava huo hu'neanagi, kagri kaziga antenka mase huno hu izo huonantene. Na'ankure kagra nendaroga mani'nane. Inankna hu'na nagra tusi'a kefo'zana erifore

hu'na kumira Anumzamofo avufina hugahue? **10** Ana a'mo'ma maka knafima Josefenku'ma masesu'e huge, erava'o huoma nehigeno'a, ke'a antahi omi'nne. **11** Hagi mago zupa Josefe'a eri'za erinaku nompi marerigeno, ruga'a eri'za vahera ana nompina omani'hageno keteno, **12** ozafa'amofo nenaro'a nakre ku'are avazu nehuno anage hu'ne, Nagrane emaso, higeno ana nakre ku'a azampi zafi netreno, freno meg'i'a atiramino vu'ne. **13** Ozafa'amofo nenaro'ma keama Josefe'ma nakreku'ama azampi atreno freno fegi'a atiramigeno'a, **14** ana a'mo'a noma'afi eri'za e'neriza vahe ke hige'za eme atru hazageno anage hu'ne, Keho, Hibru ne'ma avrenoma eme ante'nea ne'mo, nagri zokago renanteku ege'na krafa hu'noe. **15** Antahige'na ranke hu'na krafama nehuana, nakre ku'a avateti zafitreno freno fegi'a vu'ne. **16** Anage huteno ana nakre ku'a ana a'mo'a tavaoma'are anteno mani'negeno neve'a nontega e'ne. **17** Anante Potifa'a egeno, nenaro'a amanage huno asmi'nne, Miza e'ori kazokazo Hibru eri'za ne' avrenka eme tam'i'nana ne'mo, nagrite eno zokago renantenaku nehige'na, **18** rankema hu'na krafage hugeno'a, nakre ku'a atreno atiramino fegi'a freno vu'ne. **19** Potifa nenaro'ma nevema asamino, miza e'ori kazokzo eri'za ne'kamo Josefe anahura nagrira hu'ne, hiankemo'a Potifa rimpamo'a teve re'ne. **20** Ana higeno Josefena ozafa'amo'a avreno kini ne'mo'ma eri'za vahe'ama kinama hunezamantea kina nompi ome ante'ne. **21** Ana hianagi Ra Anumzamo'a Josefe'ene mani'neno avesinteno azeri so'e nehigeno, kina nonte vugota hu'nea ne'mo'ma keana knare'za hu'ne. **22** Kina nonte'ma vugote'nea ne'mo'a Josefena maka'a kina vahe'mokizmire kegava krinogu kva azeri ot'i'ne. Hagi inankna zama anampima haniazana agri azampi ante'ne. **23** Kina nonte'ma vugote'nea

ne'mo'ma Josefe azampima ante'nea zankura agesa ontahine.
Na'ankure Ra Anumzamo'a agrane mani'negu huno, maka'zama
Josefe'ma hiazana, aza nehigeno knare'zanke hu'ne.

40 Mago'a kna evutegeno anante lsipi kini ne'mofo ti tafente'ene
breti kre'zante vugota hunaa ne'tremoke, ra zani lsipi kinimofona
rimpa eri haviza hu'na'e. 2 Fero'a tare vugotena'a eri'za
netrena, kinimofo tintfente'ene breti kre'zante vugota hu'na'a
ne'tremokiznia tusi'a rimpa ahezanante'ne. 3 Ana netrena
kinimofo avate kva hunente'nea ne' nompi, Josefe mani'nefi
magopi kina ome huznantene. 4 Rankva ne'mo'a, Josefe kegava
huznante'nogu ome zanantegeno, agra kegava kriznantegeke
mago'a zaza kna kinafina mani'na'e. 5 Hagi lsipi kinimofo
tinkapure azeri nentea ne'ene breti negrea ne'enena kinafi
mani'neke, tarega'moke rurerure ava'na ketere hu'na'e. Hianagi
ana ava'na zanimofa agu agesamo'a ru kante rugante vutere
hu'ne. 6 Nanterampi Josefe eno eme zanageana, zanagra
zanasu zampi mani'nakeno zanage'ne. 7 Fero eri'za netre'moke
kva'amofo kina nompi mani'nakeno zanantahigeno, Na'a higeta
menina tanasu'zampina mani'na'e? 8 Higeno zanagra kenona
anage hu'ne asami'na'e. Tagrama ava'na ke'noa ava'hamofo
agu'agesama huama huno tasami vahera magore huno omani'ne.
Hakeno Josefe'a ana kenona anage huno zanasami'ne,
Anumzamo Agrake ava'na ketani'a eri ama hugahianki ava'nama
kena'a zamofo naneke nasami'o. 9 Kini ne'mofo tinkapure
vugote'nea ne'mo'ma agrama ke'hea ava'na kea anage huno
Josefena asmi'ne, Nagrama ava'hafima koana, navuga mago
wainnofi me'ne, 10 ana waini nofitera 3'a azanku'ha me'neankino,
ani'na eri marenos amosrea aheno, raga'a reherafigeno knare'za
huno afu arente'ne. 11 Hagi Fero kapumo'a nazampi me'nege'na,

waini raga tagi'na eri rati'na Fero kapufi nente'na, ana kapua Fero azampi eri'na ome ante'noe. **12** Higeno Josefe'a anage huno asami'ne, Ava'nama ke'nana zamofo agu'agesamo'a amana hu'ne, 3'a azankunamo'a 3'a kna huvame huno me'neankino, **13** 3'a knama evutesigeno'a, Fero'a ete erizanka'are kavrentenkenka ko'ma nehanaza hunka Fero azampi ti kapu'a erinka ome antegahane. **14** Hianagi knare'ma hunka umanisunka, muse hugantoanki nagrikura kagesa antahinenaminka, nagri nagenkea Ferona asmigeno ama'i kina nompintira navre fegi'a natreno. **15** Na'ankure nagrira musufa ase'za, Hibru vahe mopafinti navre'za eme nante'nage'na, amafima ema mani'nofina magore hu'na antahi'na kena osu'noa zante navre'za eme kina hunante'naze. **16** Ana zanke huno kini ne'mofo bretima vugoteno negrea ne'mo'a, Josefe'ma knare'ma huno kini ne'mofo waini kapure'ma e'neria ne'mofo ava'na kema rukrahe humigeno nentahino'a, anage huno Josefena asmi'ne, Nagranena ana zanke hu'na ava'na koana, 3'a eka'eka kupi bretia zogirinte'naza nanunte me'ne. **17** Ana ekaeka kupina ruzahu ruzahu bretirami Fero suza nanunte me'nege'za namamo'za eme nenazage'na ke'noe. **18** Anage higeno Josefe'a kenona anage huno asmi'ne, Ava'nama kanazamofo agu'agesamo'a amana hu'ne, 3'a eka eka kumo'a, 3'a zagegna hu avame hu'neankino, **19** 3'a zagegnama agteresigeno'a, Fero'a kazerisga huno kagena rukafriteno zafare hantigantesige'za, namamo'za kavufga negahaze. **20** Hagi henka 3'a zagekna evutegeno, Feroma kasente'nea kna egeno maka eri'za vahe'amokizmia ra ne'za kre nezmanteno, vugoteno waini ti kapu'a erisga nemia ne'ene, bretima kre nentea ne'ene waini ti kapuama erino nemia ne'enena, ranra eri'za vahe'amofo zamavure, zanavre ama' hu'ne. **21** Ferona tinkapure vugoteno

erisga hunentea nera, eri'zama'afi avrentegeno agra Ferona kapu'a azampi antente'ne. 22 Hianagi breti kre'zante vugota hu'nea nera, Josefe'ma ava'na kezanimana zanasmi'nea kante ante'za zafare ahe'za hanti'naze. 23 Hianagi kinimofo kapu'are vugota hu'nea ne'mo'a Josefena antahi omino, agekani ante'ne.

41 Hagi tare zagegafu agateretegeno Fero'a ava'na keana, Naeli timofo ankenare oti'negeno, 2 ame huno Naeli timpintira 7ni'a masavenke huno afovage Bulimakao afu'tamimo'za hanati'za, tinnenafinti traza tragahu'za nenazageno ke'ne. 3 Anante'ma keana, ete 7ni'a zaferinage huno, vahe'mo kesane huga osu'nea Bulimakao afuzaga Naeli timpinti ehanati'za, tinnenafi ko'ma emani'naza bulimakane magopi oti'za mani'naze. 4 Haviza hu'za zaferinage hu'naza Bulimakao afumo'za, 7ni'a knare'ma hu'za afovage'ma hu'naza Bulimakao afutamina zamahe'za nehana hu'naze. Anazama keteno'a Fero'a avu'ma mase'nefintira oti'ne. 5 Ete mago'ene Fero'a mase'neno ava'nama keana, mago witi ramparera ome ahente eme ahente huno 7ni'a ranra nenage huno knare hu'nea witi me'negeno ke'ne. 6 Hanki ete henkama hanatia 7ni'a witi raga'amo'a osi higeno, zage hanatitegati ea zaho'mo azeri hagege higeno, nena'a fore hu so'e osu'ne. 7 Hagi osi witi ragamo'za 7ni'a ranra witi raga rente'neana asgahu nevazizageno ke'ne. Fero'a otino keana higeno ava'na koe huno hu'ne. 8 Hagi nanterame otino antahintahi hakare nehuno, vahe huzmantege'za kasnampa vahezagane antahi'zane vahezagama Isipima nemaniza vahe ome zamasamige'za eme atru hu'naze. Fero'a ava'na ke'ama zamasmiana mago'mo'a eriama huno Ferona asamigara osu'ne. 9 Hagi anante vugota huno Fero kapure kva hunentea ne'mo'a amanage huno Ferona asami'ne, Ko'ma nagrama ufre'noa knazamofo nanekea meni huama hu'na

kasamigahue. **10** Feroga eri'za vahe ka'a karimpa aherantenka, kavate kva ne'mofo nompi, nagri'ene vugota huno breti negrea ne'ene kina hurante'nane. **11** Magoke kerageke tarega'mota ava'na ke'noe. Agrane nagra'ene, ava'na ti'afina taregamota rurerure av'ana ke'noankino, agu'agesa'a metere hu'ne. **12** Hibru nehzana magora anampina tagra'enena mani'neankino, kinimofo avate'ma kvama nehaza sondia vahe'mokizmi kva ne'mofo eri'za ne'mo kina hu'neno, ava'na keti'a agri asamukeno huama huno ana avana ketiamofo agu'agesa'a tasami'ne. **13** Hagi huama'ma huno tasmi'nea kante anteno nagrira ete eri'zaniafi navrenenteno, agrira zafare aheno hanti'ne. **14** Hagi Fero'a huzmanteg'eza Josefena mopa agu'a kina nompi mani'hege'za ame hu'za ome avre'za ageno, agi azoka hareno kena'a eri vasiteno, Fero avuga uhanati'ne. **15** Fero'a amanage huno Josefena asami'ne, Nagrama ke'noa ava'namofo agafa'a, magore huno eriama huno nasmiga vahera omanitfa hu'ne. Hagi kagri kagenke nasami'za, ava'na kea eriama nehane hu'za hu'naze. **16** Higeno Josefe'a anage huno Ferona asami'ne, Nagra'a huamara osugahuanki, Anumzamo agrake Feroga ana avana keka'amofo agu'agesa'a eri ama huno kasamigahie. **17** Nehigeno Fero'a anage huno Josefena asami'ne, Ava'nama ke'nofina, Naeli timofo ankenare, **18** ot'i'nenet negogeno, masavenke huno ra avufgane bulimakaona 7ni'a Naeli timpinti hanati'za traza nenazage'na ke'noe. **19** Negogeno ana timpinti mago'ene 7ni'a zaferinage huno kesane osuga hu'nea bulimakao afutamina, magore hu'na lsipi mopafina kora onke'noa afuzaga ke'noe. **20** Ana zaferinage huno asane huga osu'nea bulimakao afu'zagamo'za koteno'ma 7ni'a masavenke avufgane bulimakao afu'tmina zamahe'za ne'naze. **21** Hianagi ana afu'zagamo'za kote'za mani'naza

kanteke vahe'mofo asane osu'are mani'nazage'na nege'na,
navu'ma mase'nofintira oti'noe. **22** Hagi ete mago'ane mase'nena
mago ava'na koana, mago witimofo rampa'arera, 7ni'a ranra nena
raga'a ome ahente eme ahente hu'negena, **23** negogeno henka
ete 7ni'a osasi rampa'ane witi hanatiana hagege hugege higeno,
zage hanatitegati ea amuho'ane zaho'mo temagigeno hanati
haviza hu'ne. **24** Ana osi rampane witimo 7ni'a ranra rampamo
nenage huno ahente'nea witi rampa'a, aga asgahu nakri'ne.
Hige'na ana ava'nagea kasnampa vahe'zaga zamasmuani
mago'mo'a huama huno onasmi'ne. **25** Josefe'a amanage huno
Ferona asami'ne, Feroga tare ava'nama ke'nana zamo'a magoke
kampi vu'ne, Anumzamo hania zamofo eri ama huno Agra'a
Feroga eri kaveri hu'ne. **26** Hagi 7ni'a knare zamavufagane
bulimakamo'za 7ni'a kafu hu avame hu'naze. Hanki 7 ni'a
nena'ane witi rampamo'za 7ni'a kafu hu avame hu'nazankino, ana
tarega ava'na kenamo'a magoke agu'agesage me'ne. **27** Hagi
7ni'a knare osu zaferinage Bulimakaomozama marerinagenka
ke'nanana, 7ni'a kafue. Hanki 7ni'a osasi huno hagege hu'nea
witi ramparamima zage hanatitegati amuhonentake zaho'moma
eme temagigenka ke'nanana, e'i 7ni'a kafufina tusi'a agatonto
kna fore hugahie. **28** Maka'zana meni fore hania zamofonku
nagra huama huna Feroga negasamuankino, ama anazana
fore'ma hania zamofo Anumzamo'a Agra'a eri ama huno Feroga
kaveri hu'ne. **29** Hagi 7ni'a kafumofo agu'afina, maka Isipi
mopafina, ne'zamo'a fore huhakare hugahie. **30** Hianagi 7ni'a
kafumofo agu'afina tusi'a agatonto kna egahiankino, ana agatonto
zamo'a Isipi mopafina kave'ma fore'ma hu'nea kna osanige'za,
rama'a ne'zama fore'ma hu'nea kafuraminkura vahe'mo'za
zamage kanigahaze. Hagi miko'zana ahe fanane hanigeno,

mopamo'a haviza hugahie. **31** Ana mopafina kave'ma fore
nehiaza osuno, agatereno tusi'a agate'za fore hanige'za, ko'ma
knare kafuma mani'naza zankura zamagesa ontahigahaze. **32**
Ete mago'ene Anumzamo'ma ana ava'na ke Ferogama tare
zupa kasmi'neana amanahu hu'ne, Anumzamo hanigeno ame
huno anazana fore hugahie. **33** Hanki Feroga mago knare
antahi'zane, agu'agesane ne' azeri otigeno Isipi mopa kegava
hino. **34** Feroga mago'a vahe zamazeri otige'za, 7ni'a kafufina
kegava hu'ne'za, ne'zamo'ma hakare hania knafina ne'zana eri'za
5fu'a kevu ante'ne'za anampinti mago kevua refko hu'za Isipi
mopafina mago'zahu hu'za ne'zana eritru hiho. **35** Ne'zamo'ma
hakare hania kafufina huge'za, maka'a ne'zana nompi eri tru
hiho. Ferogama kegava hu'nana ranra kumate witi ragane
ne'zanena eritru hute'za, vahe'mo'za kegava hiho. **36** Isipi
mopafina 7ni'a kafufima agatontoma fore'ma hania kna'afina, e'i
anama eritru hania nezamo zamaza hanige'za, zamagakura
hu'za ama ana mopafina ofrigahaze. **37** Hanki Fero'ene eri'za
vahe'amozama ana nanekema antahi'zana knare hu'ne. **38** Fero'a
eri'za naga'a zamasmino, Amanahukna huno, Anumzamofo
Avamu'ene nera magora hakreta kegahuno? **39** Anante Fero'a
anage huno Josefena asmi'ne, Anumzamo ana maka'zana kagri
kasmi'negu, magora knare antahi'zane vahera omani'naze. **40**
Kagra nagri nona kegava hunenankena, ran tratera nagrake'za
manisga hugantegahuanki, kema hanana kante vahenimo'za
antahi kami'za kesga hugantegahaze. **41** Anage huteno Fero'a
mago'ane anage huno Josefena asami'ne, Nagra mika Isipi
mopa kegava huogu kva kazeri otue. **42** Anage nehuno Fero'a
azampinti agra'a rinia zafino Josefe azampi vazinenteno, knare
kasefa kena eri vasinenteno, anankempi golire ananke nofi

hunte'ne. **43** Fero amagenare kva ne'mofo karisifi avrentegeno vano nehige'za, agri avufi kezati'za husga hunente'za, agrite zamarena re'haze! Nehuno maka Isipi mopa agri kvafi ante'ne.

44 Mago'ene, Fero'a Josefena anage huno asmi'ne, Nagra Fero'na huankino kagripinti'ma kema e'orinesuno'a, mago'mo'e huno azana erisga huno mago'zana huge, maka Isipi mopafina aga rentegera osugahie. **45** Nehuno Josefenkura Zafenat-panea'e huno Fero'a agi'a antemine. Ana nehuno Oni kumate pristi ne' Potifera mofa Asenati ara avremine. Higeno Josefe'a agra Isipi mopa agu'afi vano nehige'za ke'naze. **46** Hagi Josefe'a 30'a Zagegafu huteno, Isipi kini ne' Ferontera eri'zana eri'ne. Ana huteno Josefe'a Fero enema mani'neretira atreno maka Isipi mopafina vano hu'ne. **47** Hagi 7ni'a zagegafumofo agu'afina ne'zamo'a ana mopafina ampore'ne. **48** Hutegeno maka ne'zama 7ni'a kafufi Isipi mopafi fore'ma hiana eritru huno ranra kumapima me'nea nontamimpi ante'ne. Maka'a hozafinti ne'zama eri'za e'nazana, mago mago kumate'ma me'nea nompi eri atru hutere hu'ne. **49** Ana nehuno Josefe'a witi rgama eritru hu'neana, hagerinkenafi kasepankna huno zogi atru higeno, mago'ene sigerirera erinte'za hantigara osu'naze. Na'ankure nompina aviteno herafi ramigeno anara hu'ne. **50** Agate kna fore osu'negeno, tare ne'mofavre Josefena fore humi'ne. Oni kumate pristi ne' Potifera mofa Asenati ana mofavrerarena kase ami'ne.

51 Hagi Josefe'a zage ne'mofavre'amofo agi'a, Manase'e huno antenemino anage hu'ne, na'ankure knazama eri'noane, nenfa nonku'enena Anumzamo'a eri nagekani nante'ne. **52** Anantera mago ne'mofavre nenteno agi'a, Efraemi'e huno antenemino anage hu'ne, natazampi mani'hoa mopafi Anumzamo nazeri raga renante'ne. **53** Hagi 7ni'a kafumofo agu'afi Isipi mopafima

ne'zamo'ma ampomare'nereti vagaregeno, **54** Josefe'ma ke hu'nere, 7ni'a kafumofo agu'afina agate kna egeno miko'a mopa kaziga aga'zanku huva re'neanagi, Isipi mopamofo agu'afina ne'zana me'ne. **55** Tusi zamagazanku maka Isipi mopafina nehu'za, Ferontega nezanku zavike hazageno, Fero'a maka Isipi vahera zamasmino, Josefente vinkeno'ma na'ane nanekema tmasmisiana kema haniaza hiho. **56** Maka kaziga mopa kagi'afina zamagaku hazageno, Josefe'a mika feno nona anagige'za Isipi vahe'mo'za anampinti ne'zana miza se'naze. Ana nehigeno tusi'a agate'zamo miko Isipi mopafina fore hu'ne. **57** Zamagazamo maka kaziga mopafina hige'ze maka kaziga mopareti vahe'mo'za, Isipiti witi ne'zazmia Josefenteti eme miza hu'naze.

42 Jekopu'ma Isipi moparega witi me'ne hazankema nentahino'a, ne'mofavre naga'a anage huno zamasmi'ne, Na'a higeta ovufina nehaze? **2** Isipi mopafina witi ne'zana me'ne hazage'na antahuanki, ofrita manisunema hanuta vuta ana moparegati ne'zana ome mizaseta echo. **3** Hige'za Josefena 10ni'a afuhe'za witi miza senaku Isipi urami'naze. **4** Hianagi Jekopu'a Josefe negna Benzameni'ma hazenke erizanku koro nehuno, atregeno afuhe'zanena ovu'ne. **5** Hagi zamaga'zamo' a ana zanke Kenani mopafinena hige'za Israeli amohe'za ke hiaza hu'za witi ne'za miza senaku ruga'a vahe'ene urami'naze. **6** Hagi Josefe'a ana mopafina gavana manino kegava kri'nege'za agritetike maka ana mopafi vahe'mo'za ne'zana eme miza se'naze. Hagi Josefe afuhe'za agrite e'za zamarena re'za kepri mopafi hu'haze. **7** Josefe'a afuhe'i zamavugosafi nezmageno, onke vahekna nehuno hanave'ane ke huzmanteno anage hu'ne, tamagra igati e'naze? Hige'za zamagra anage hu'naze, Kenani mopalregati ne'za miza senaku e'none. **8** Josefe'a afuhe'ina zamageni'

hianagi, zamagra agrira keni' osu'naze. **9** Josefe'a ko'ma afuhe'inte ava'na kezamte'nea agesa nentahino anage huno zamasmi'ne, Tamagra mopati afureta kenaku e'naze. **10** Hianagi zamagra anage hu'naze, a'o, rantomoka kagri eri'za vahe'mota ne'za miza senaku e'none. **11** Tagra magoke ne'mofo mofavre nagakita, tamage vahe mani'none. Hagi eri'za nagaka'mota tagra mopa afure' vahera ome'none. **12** Anage hazanagi ke'zmi rezmanteno agra anage hu'ne, A'o, kegava osu'nona mopati afureta kenaku tamagra e'naze! **13** Hige'za zamagra anage hu'za asami'naze, Eri'za vahe'kamota maka 12fu'a vahekita magoke ne'mofo ne'mofavre naga mani'none. Hanki amitenamo'a Kenani mopare nerfa'ene manigeno, magotimo'a hago fri'ne. **14** Hianagi Josefe'a amanage huno rentase hu'ne, Tamagra mopati afure vahere hu'na neramasamue. **15** Tamagrama tamage nehaze hunama nagrama hanuana, amanahu hugahaze. Fero avufi hanave'ane ke huankita, ama kumara atreta ovu'nesageno, neramagna amare' e'nige'na kete'na, tamatrenueta mopatamirega vugahaze. **16** Hagi mago'mofo huntenkeno vuno neramagnana ome avreno eno. Hanki ruga'amota kinafi mani'nesageno, tamagenoka hugetama hunazana, tamagu'areti tamage hunafi kaneno. Havigema hanuta Fero avufina, tamage tamagra mopati afureta kenaku enaza vahere hu'na hugahue. **17** Ana nagara maka kina nompi 3'a zagegnafi zamavarentene. **18** Hagi namba 3ma hia zagegnarera Josefe'a amanage huno zamasmi'ne, Nagra Anumzamofonku koro nehugu amana'ma hanazana manigahaze. **19** Hagi tamage vahe'ma mani'nesuta, atrenkeno mago neramafu kina huno mani'nena, ruga'amotma witi ne'zantmia erita zamaga zanku'ma nehaza naga tamirega viho. **20** Hianagi neramagnana ome

avreta nagrite ehanatiho. Anama nehanageno ketamimo'a tamagesesigeta ofrigahaze. Hige'za kema zamasmiaza hu'naze.

21 Zamagra zamagra amanage hu'naze, tamage neragnana haviza hunte'none. Na'ankure negonkeno agra o'e nehigeta antahiomuna nona'a ana knazamo'a tagritera fore nehie.

22 Rubeni'a ke nona'a amanage huno zamasami'ne, Nagra ontamasami'nofi, ana mofavrea azeri havizana osiho nehugeta ke'nia antahi onami'naza nona'a, menina agri'ma ahe fri'nona zamofo nona'a knazana enerune. **23** Zamagrama antahi'zana Josefe'a ketia nontahie hu'za hu'nazanagi, agra antahine. Na'ankure Josefema kema rekrahe humi vahe'mo'a amu'nozamifi mani'neno, nanekea akrehe huno zamasmi'ne. **24** Josefe'a zamatreno vuno zavi ome atete'no, eno eme kema hunezmino'a, eri'za vahe'a zamasmige'za, Simeonina azeri'za negage'za azante nofi anakinte'naze. **25** Huteno Josefe'a hige'za witi ne'zana beki ku'zmifi eriri nezmante'za, zagozmia ana zanke hu'za beki kuzmifi eriri nezamante'za, kantega nevu'za nemema vanaza kave'ene eriri zamante'naze. **26** Hige'za donki afu'zmimofo agumpi witi ne'zama eririzmantaza erinte'za anantetira atre'za vu'naze.

27 Kantega umsenaku hazarega mago'mo donki afu'amofo ne'zama aminaku beki ku'a eriheta huno keana, beki ku'amofo avazare zago'a me'negeno ke'ne. **28** Afuhe'igizmia anage huno zamasami'ne, Beki ku'niafi zagonia eriri nante'nazanki keho. Hige'za zamahirahi nerege'za koro nehu'za rukre hu'za ovufi avufi nehu'za, anage hu'naze, Naza ama zana Anumzamo'a hunerante? **29** Hagi zamagrama Kenani mopare unehanati'za, maka'zama fore huzmi'nea nanekea nezmafa Jekopuna amanage hu'za asmi'naze. **30** Ana nera, ana mopa kegava kri'nea ra nekino, hanave kefintike kea huno, tamagra mopati afureta ke

vahē e'naze hu'ne. 31 Hianagi tagra anage huta asami'none,
Tagra tamage vahē mani'nonanki, afure vahera omani'none
huta asami'none. 32 Tagra 12fu'a kogna nagakita, magoke
ne'mofo mofavre nagare. Magotimo'a omanigeno, neragana'a
nerafa'ene menina Kenani moparega mani'ne. 33 Anage
hunkeno ana mopama kegava kri'nea ra ne'mo'a amanage huno
tasami'ne, Mago nermafuna nagrite netretma, witi ne'za eneritma
zamagaku'ma nehaza nagatamirega viho. E'inama hanage'na,
tamage vahē mani'naze hu'na nagra antahigahue. 34 Hagi
nagnatamimofona avreta enkena negena, tamagra tamage huta
mopa afureta ke vahera omani'naze hu'na antahi neramina,
neramafuna avreraminena ama mopafina amne vute'ete huta
ne'zana miza nehuta zagrera atregahaze huno hu'ne. 35
Anage hute'za beki ku'zmifinti ne'zama eri'za e'naza herafinaku
nehu'za kazana ana kognamokizmi zago'zmia kona anakinare
beki ku'zmifi metere hu'negeno, ana zagoma nezmafa'enema
nege'za tusi koro hu'naze. 36 Nezmafa Jekopu'a amanage
huno zamasmi'ne, Tamagra mofavre onte ne' kna hunenantaze.
Josefe fanane higeno, Simeon fanane higeno, Benzamenina
ana zanke huta avregahaze, ana maka zamo'a ha' renante. 37
Rubeni'a nefana anage huno asami'ne, Benzamenima avre'na
omesugenka tare ne'mofavreni'a zanahe frigahananki, nagri
nazampi antege'na avre'na vute'na avre'na aneno. 38 Nehigeno
Jekopu'a anage hu'ne, Nagri nenamofo'a kagranena uoramigahie.
Nankure nefu'a frigeno, agrake mani'ne. Kama nevnageno
kantegama hazenkema omeri'nige'na, efe nazokamate'nea
vahera nasuzamo nahefri'na fri'na fri vahē kumapi (Seol)
umanigahue. (Sheol h7585)

43 Ana knafina Kenani mopafina tusi zamagatontoza fore huno vu'ne. 2 Isipi mopareti'ma mizase'za eri'za e'naza ne'zama nehana hazageno, nezmafa'a amanage huno zamasmi'ne, Ete mago'ene vuta ne'zana ome mizaseho. 3 Hianagi Juda'a amanage huno nafa'amofona asami'ne, Ana kva ne'mo'a hankavenentake ke huranteno amanage hu'ne. Tamagra nagna tamimofoma avreta ome sanage'na tamavufina ontamagegosue huno higeta e'none. 4 Kagrama naganatima atresankeno'ma tagra'enema esaniana, tagra uramita nezanka'a ome miza huta egahune. 5 Hianagi kagrama Benzamenima atresnankeno'ma tagra'nema omesniana tagra ovugahune. Na'ankure ana Isipi kva ne'mo'a amanage huno tasami'ne, Tamagna timimofoma avretama omesazana nagri navumo'a ontamagegahie hu'ne. 6 Anage nehazageno Jekopu'a (Israeli) amanage hu'ne, Tamagra nahigeta ana kva nera magora naganatia mani'ne huta asmi'nageno anankea hu'ne? E'ina'ma hu'naza zamo'a nagrira tusi'a zampi nazeri haviza haze. 7 Hianagi zamagra asami'za, Ana kva ne'mo'a ana maka'mota tantahige tantahige huno tagriku'ene, vahetigu'ene, tantahigeno amanage hu'ne, Nermafa'a ofri amne mani'nefi? Hagi magora naganatamimo'a mani'neo? Huno higeta tamagra naganatamimofona avreta echo hani'a nanekea ontahineta kenona'a hu'none. 8 Hutazageno Juda'a nafa'amofo Jekopuna amanage huno asmi'ne, Ana ne'mofavre Benzamenina huntogeno nagrane vanigeta, tagrane kagrane mofavre'zagatine tagakura huta ofrita mani'mneno. 9 Nagrani'a huvempa huanki'na Benzamenina kegava krintegahue, hanki kvama hu'so'e osanugenoma hazenkema eri'na ana knazana nagra erigahue. Hagi kagri kavure'ma avre'na omesuna nagra ana knazana erigahue. Nehanugenoma ana knazamo'a nagrane

mevava hugahie. **10** Hianagi tagrama avega ontetasina, menina tagra tare zupa vuta ete huta ne'zana eruntesine. **11** Nezmafa Israeli'a amanage huno zamasami'ne, Tamagrama Benzamenima avreta vunaku'ma hanuta amana hiho, mago'a knare'nare zafa rgama mopatifima me'neana kutamifina erinerita mago'a tusa masevene (balm), tumemofo rima'ane, (honey) mananentake masavene, mananentake zafa rine, pistasios zafa ragane, almoni zafa raganena eri'neta vuta ana kva nera musezana ome amiho. **12** Ana nehuta mago'a zagoa eri aguheta tamazampina e'rinenta, zamage kaniza e'ririnegahazanki, kutamifima erarinagetama erita e'naza zagonena erineta vuta ome amiho. **13** Ana nehutma nagna tami'mofona otita ame huta avretma ete ana kva nete viho. **14** Hagi nunamu huankino hihamu'ane Anumzamo ana ne'mofo avure asunku huramantesuno'a, mago neramafune, Benzamenikiznia zanatre sanigeke ete egaha'e. Hagi nagrama mofavre ni'amokizmigu'ma nasunku'ma hanuna, nagra nasunku nehu'na manigahue. **15** Jekopu'a anage hige'za mofavre naga'amo'za ana muse'zana (gift) e'neri'za, mago'ane zagoa eriguhe'za zamazampi e'neri'za, Benzamenina nevre'za oti'za lsipi mparega vu'za ana kva ne' Josefe avure uoti'naze. **16** Hagi zamagranema nagana'amo Benzameni ne-egeno Josefe'ma negeno'a noma'afi eri'za ne'a amanage huno hunte'ne, Ama vahera zamavarenka nompi ome nezmanenka, mago afu ome ahenga krenka ne'zana retro huo. Na'ankure zamagra nagrane feru ne'zana negahune. **17** Eri'za ne'amo'a agrama ke hiaza huno zamavareno Josefe nompi ome zamante'ne. **18** Anama huno Josefe eri'za ne'mo'ma zamavareno nompi vige'za kore nehu'za amanage hu'za hu'naze. Ko'ma kutifima eriri rante'nea zagoreku huno tavre noma'afi tanteankino, tantahinegeno tazerino kazokzo

eri'za vahē'a trohu neranteno mika donkitinena avre vagaregahie.

19 Anage nehu'za Josefe nompi eri'za nete, Josefe no kasante vu'za ome asami'za, **20** amanage hu'naze, ra netimoke, tagra ko'ma amare e'tama nezama eme miza senona naga e'none.
21 Hianagi ne'zama miza huteta, kantega umsenaku hunte kutima eriheta huta konana, magoke magokemota ne'zama mizase'nona kante zagotia kutimofo avazare me'negeta keteta ama erita e'none. **22** Aza ana zago'a eririranteneo e'i ana vahera onke'none. Antahita keta osu'neta ana zagona ete mago'ane ne'za miza hanune huta eritru huna zagonena erineta e'none. **23** Anage hazageno Josefe eri'za ne'mo'a amanage huno zamasmi'ne, Knare huta manigahazanki koro osuta akoheta maniho. Tamagri Anumzane, neramafa Anumzamo kutamifina zagoa eriramante'negahie. Nagra zagotmia ko namizage'na eri'noe. Nehuno Simeoni ome avreno eme zami'ne. **24** Ana huteno Josefe eri'za ne'mo'a nompi zamavareno eno, tina tagi zamige'za zamaga sese nehazageno, donki zamimofona ne'zana zami'ne. **25** Ana nehazage'za Josefe'ma agra noma'afi ferura ne'za negahune hige'za antahi'nagu avega ante'za mani'ne'za musezana (gift) eri antente'naze. **26** Hagi Josefe'ma nontegama ne-ege'za nege'za, musezama eri'za e'naza zana eme nem'i'za mopafi zamarena re'za avuga kepri hunte'naze. **27** Anante Josefe'a knare huta mani'nazo huno hu so'e hunezmanteno, anage huno zmantahige'ne, Ko'ma neramafanku'ma ozafa reno mani'ne huta nasmi'nazana, agra menina knare huno mani'nefi? Ofri mani'neo? **28** Hige'za zamagra anage hu'za asmi'naze, Nerafa'a eri'za nekamo'a knare huno ofri mani'ne. Anage hu'za nesami'za agafi kepri hu'za razampi antahimi'naze.
29 Ana hunentageno kesga huno nagna'amofo Benzameni,

nerera mofavre negeno amanage huno hu'ne, Ama mofavrea neragana e'ma hutama nasm'i'naza mofavrefi? Josefe anage nehuno, Anumzamo'a knare huno mofavrenimoka kaza huno asomu hugantegahie hu'ne. **30** Josefe'a negna negeno zavi atesia agesa higeno, hantka huno zamatreno zavi ate'sia kumaku hakreno nemasefinka asafi (rum) ufreto zavi ome ate'ne. **31** Zaviteteno avugosa sese huteno asu'zana eri retrako nehuno, megi'a atiramino amanage huno zamasmi'ne, ne'za atinketa namaneno. **32** Josefe ne'zana arure atimi'za, zamagrira arure atinte zamante'za, Isipi naga'mo'za zamagrugu ne'zana ne'naze. Na'ankure Isipi vahe'mo'za Hibru vahe'enena magopina bretia onegahaze. Isipi vahe'mo'za Hibru vahe'enema magopi kave ne'zankura zamesra huno zamagotegahie. **33** Hagi pusa mofavrereti agafa huno fore hu'nare, ranteti vuno osite zamazeri rempi huzmantage'za mani'ne'za tusi'a zampi zamano nevazige'za zamagogogu nehu'za ovufi avufi hu'naze. **34** Josefe itareti eri'za vahe'mo'za ne'zana refko hu'za afuhe'i ome ante nezmante'za, Benzameni tafepina 5fu'a vahe'mo'za nega ne'za antente'naze. E'ina hige'za magopi mani'ne'za knare hu'za ne'zane, tine nene'za muse hu'naze.

44 Anante Josefe'a noma'afi eri'za ne'amofona anage huno asmi'ne, Beki ku'zmifina eri'zama vanaza avamente ne'zana erivite nezmanantenka, zago'zmia zamente zamente ku avazare eriri zamantetere huo. **2** Hagi Silvare kapuni'a nagana zami'mofo ku avazare eriri nentenka, witima mizase'nea zagonena eririnto, higeno eri'za ne'mo'a Josefe'ma asmiaza hu'ne. **3** Masa hu'za nehigeno, ana vahetmina huzmantenge'za donki zamine vu'naze. **4** Zamagra rankumara atre'za afete ovu'nageno, Josefe'a eri'za ne'amofona anage huno asami'ne, Otinka ana vahera

zamavaririnka ome zamazerisunka anage hunka zamasnio.
Na'a higeta knare'zama huma neramanteana havizana hunteta
silvare kapu'a erita e'naze? 5 E'i ana kapufintira ranimo'a tinkera
noneanki, henkama fore'ma hania zana ana kapufintike nege.
Tamagra e'inahu'ma hazana havi tamavu'tamava hu'naze hunka
ome zamasamio. 6 Higeno agra zamavaririno ome zamazerino,
Josefe'ma hia nanekea ome zamasamige'za, 7 Zamagra anage
hu'za asmi'naze, Na'a higeno rantimo'a amanahu kea nehie?
Eri'za vahe kamota amanahu'zana huga osu'none! 8 Hagi
beki ku avazare'ma me'negeta zagoma haketa eriteta Kenani
mopareti eritama kagrite'ma e'nonana ko. Inankna huta kagri
ramofo nompintira silivao, golia musufa segahune? 9 Ina eri'za
vahe kamofo beki kupinti'ma hakenka eri fore hanunka, ana
mofona ahe frisnanketa, tagra rantimofo kazokazo eri'za vahe
manigahune. 10 Agra anage hu'ne, Menina kema hazaza
hugahue, iza'o eri'nenige'na hakena eri fore hanumo nagri
kazokazo eri'za ne' manigahie. Hanki anazama osu'namota
knare hu'nazankita amne vugahaze. 11 Anage hige'za mago
mago'moza ame hu'za ku'zmia hanti mopafi ante'za, eri heta
hazageno, 12 Josefe eri'za ne'mo'a nempu'zmimofo kuteti agafa
huno haketeno vuno nagna zamimofo kute uhanatino, ana
kapua Benzameni beki kipi me'negeno keno eri fore hu'ne. 13
Anante zamagra kukena zamia sagne nehu'za, hakarezazmia
donki agumpi erinte'za ete rankumatega vu'naze. 14 Anante
Juda'a afuhe'zane Josefe nonte enehanati'za, Josefe'a nompinka
mani'nege'za avuga mopafi ruzagani'za mase'naze. 15 Josefe'a
afuhe'ikizmi anage huno zamasmi'ne, na'a higeta havizana
hu'naze? Tamagra ontahi'nazo, nagra kasnampa (divinesen) tro
hu'na oku me'enenia'zana ke'na eri fore osugahuo? 16 Higeno

Juda'a anage hu'ne, na'ané huta ranimoka hugahune. Inankna huta hazenkea osu'none huta hugahune. Anumzamo kagri eri'za vahe'mofo kumira keno eri fore hu'ne, Antahio, kapu eri'negenka kenka eri fore hu'namo'ene tagranena ranimofo kazokzo eri'za vahe manigahune. 17 Hianagi Josefe'a amanage huno zamasmi'ne, Nagra e'inahu'zana osugahue. Ina nemofo beki kupinti kapu ni'ama eri fore'ma hu'nemo, kazokazo eri'zana eri nantegahie. Hagi ruga'amota neramafa'ma mani'nerega tamarimpa frune vugahaze. 18 Juda'a Josefente erava'o huno anage hu'ne, ranimoke, muse (plis) hugantoanki, knare kagri eri'za vahe'mo'na kagesafinkea hugahuo. Kagra, Fero'enena mago'zahu hu'na'anki, krimpa kna eri'za vahe kamo'na huonanto. 19 rantimoka anage hu'nane, Tamagrira neramafa'ene neramagna enena mani'neo hunka eri'za vahekamota tantahige'nane? 20 Hanketa tagra rantimoka anage huta kasami'none, nerafa'a ranafa refinka neraganana ante'ne. Hagi nezanarera'a tare zanante'neankino nempu'amo'a frigeno, agrake mani'negeno, nefafa'tusiza huno avesinente. 21 Huta hunkenka kagra eri'za vaheka'motagura anage hu'nane, ana mofavrea avreta nagrite enke'na ka'neno hu'nane. 22 Hianagi tagra ranti'mokagura anage hu'none, osi ne'mo'a nefana otregahie. Hanki nefama atreno esigeno'a nefafa' frigahie huta kasmi'none. 23 Hianagi kagra eri'za vahekamotagura anage hu'nane, neramagnama avreta omesuta, nagri navufina onke'gosaze. 24 Anankema hutanketa tagra nerfa hirega kagri eri'za vhete uhanatita, rantimokama hana kea ome asmi'none. 25 Hagi mago'a kna evutegeno nerafa'a anage hu'ne, ete vuta mago'a ne'zana ome miza seho hu'ne. 26 Hianagi tagra anage hu'none, tagranema neragana'ma ovanigeta, tagra uoramigahune. Neragana'ma tagranema ovanigeta ana ne'mofo

avurera ovugahune hunkeno, 27 kagri eri'za vahe nerafa'a tagrikura anage hu'ne, a'nimo'ma tare ne'mofavrema kase nami'neana tamagra antahi'naze. 28 Mago'mo'a fanane hige'na nagra anage hu'noe, mago'a zagamo aheno tagana vazinegahie nehu'na, nagra mago'enena onke'noe hu'ne. 29 Nehuno mago'ene amanage hu'ne, Neganama avreta vanageno'ma, anahu hazenke erisigeta, nagrira efe nazokara nazeri ante henkma tesageno nasuzamo nahe frina, fri vahe kumapi (Seol) umanigahue huno hu'ne. (Sheol h7585) 30 E'inage hu'negu kagri eri'za vahe nenfante nagra vanugeno, ana mofavrema nagrane omesiana, nenfa'a agu'amena ana mofavrefi ante'neankino, 31 ana mofavrema nagranema ovanigeno'ma kesuno'a agra frigahie. E'inama eri'za vahe ka'mona hanuna, nenfana eri'za ne' ka'a efe azokara azeri ante henkma antesugenogeno asuzampi mani'neno, fri vahe kumapi (Seol) umanigahie. (Sheol h7585)

32 Hanki'na eri'za vahe'kamo'na anage hu'na ana nekura huvempa hu'noe, nenfaga nagrama avre'na omesugenogeno'a ana knazana nagrite mevava hugahie hu'na hu'noe. 33 E'ina hu'negu muse (plis) hugantoanki natrege'na nagra eri'za vahe kamo'na neragna nona hu'na kazo kazo eri'zana ranimoka eriganta'nena, neragnana atregeno nefuzane vino. 34 Na'ankure asuzamo nenfana azeri haviza huzanku nentahanagi, inankna hu'na nenfantera vugahue nenagnama ovanige'na?

45 Josefena asuzamo'a avitegeno asunku'zana azeriga osuno, anante oti'naza vahekura ranke huno anage hu'ne, Hakare'amota amafintira meg'i'a atiramaho, hige'za atiramizageno Josefe'a nefu'zane mani'neno huama huno, nagra Josefe'ne huno zamasi'ne. 2 Nezmasamino krafa huno zavi netege'za, Isipi vahe'mo'za nentahi'za vu'za Fero nompi nemaniza vahera ana

zamofo agenkea ome zmasamizage'za maka'moza antahi'naze.

3 Anante Josefe'a afuhe'mokizmia anage huno zamasmi'ne, nagra Josefe'ne! Hanki nenfa'a knare huno mani'nefi? Higeno afuhe'mokizmia tusi'a zamagogo fege'za magore hu'za kea osu'za mani'naze. 4 Anante Josefe'a afuhe'mokizmigu anage hu'ne, Muse (plis) hurmantoanki nagrite erava'o hiho. Zamagra anante erava'o hazageno anage huno zamasmi'ne, tamagrama zagore'ma natrage'za mizase'za Isipima e'naza ne' tamagri neramafu Josefe'ne. 5 Hianagi tamagrama mizante'ma natregenama e'noa zankura, tamagra ramagra tamarimpa ohe ahea osiho. Na'ankure tamagra'a natrage'na amafina eomani'noanki, Anumzamo hunantege'na egota hu'na vahe'mo'za ofri manisagu emani'noe. 6 Na'ankure agate'zamo'a tare kafu evigeno, 5fu'a kafua amne me'neanki'za hoza eri'za kri'za onkafigahaze. 7 Hagi Anumzamo hunantegena ofrita manisagu egote'na e'noe. Ama mopare tamazerise nehu'na, agate kna'afina tamagrira tamazama hanuana tusi'a knare kankamumpinti tamaza hugahue. 8 E'na hu'negu, tamagratmi hunantage'na amafina ome'noanki, Anumzamo hunantege'na e'noankino, Agra'a nazeri otige'na Ferona antahintahi nemi'na, noma'a kegava nehu'na, mika Isipi mopanena kegava hu'noe. 9 Hagi menina ame huta nenfa'ma mani'nerega vuta, anage huta ome asmiho, negamofo Josefena, Anumzamo'a rankva vahe Isipia azeri oti'neanki, hantka hunka eno, huta ome asmiho. 10 Hagi kagrane mofavre naga ka'ane, kagehe'inena nezmaurenka, sipisipine, meme kevune, bulimakao kevune, mika feno zanka'anena enerinka enka nagri tvaonte Goseni mopare emanigahane. 11 Anantega emani'nenage'na 5fu'a agatontoma hu kafumofo agu'afina, nagra ne'zana tamigahue. Hagi kagrane, mika nonka'afima

mani'naza vahe'taminema omesutma tamunte omnena tamagaku
hugahaze. **12** Hanki keho, tamagra negageno nagana'nimo
Benzameni enena negege'na, nagra'a nagipinti Josefe'na ama
kea tamagrira nerasmue. **13** Hagi Isipi mopafima ra nagima
eri'na mani'noa zankue'ene, mika knare'zama Isipi me'negeta
kaza zamofo nenekea nenfana ome nesamita, ko ame' hutma
avreta kama echo. **14** Anante negna Benzameni anankempi ome
azeri anukino zavi atentegeno, Benzameni'a ana zanke huno
zavi ate'ne. **15** Josefe'a miko nefugizmi zamantako nehuno
zavi atezamantetege'za, henka nefu'zane keaga hu'naze. **16**
Josefena nefu'za e'naze kema, Fero'ene eri'za vahe'amozanena
nentahiza muse hu'naze. **17** Anante Fero'a Josefekura anage
hunka negfu'gizmia zamasamio hu'ne, Kutuntamia donki afu
agumpi erinteta avreta Kenani moparega viho, **18** vutma
neramafane maka nontamifima nemaniza vahe'ene zamavareta
nagrite enke'na, so'e mopa Isipi nagra tami'nena anampi
maniho. **19** Menina nagra huneramantoe, karisia Isipiti erita
vuta osi mofavre tamine, a'ne tamine, nermafanena ome avreta
echo. **20** Tamagra miko zantamigura tamagesa ontahiho, Isipi
moparetira knare'za erigahaze. **21** Hige'za Israeli amohe'za
Fero'ma ke'ma zamasmiaza nehazageno, Fero'ma asamia kante
anteno Josefe'a karisia nezamino, kantegama nemema vanaza
ne'zanena zami'ne. **22** Mago mago'mofona Josefe'a magoke
kukena amitere nehuno, Benzamenina 5fu'a kukenagi, 300'a
silva zagone ami'ne. **23** Nefana ama'a zantami antente'ne, 10ni'a
donkimofo agumpina Isipi mopafima knare'nare zantamima
me'nea zantamina eri antenenteno, 10ni'a donkimofo agumpi witi
rgaramine, raisi rgaramine (grain) nezmino, nezmafa kantega ne-
eno neme esia kave'enena antentege'za eri'za vu'naze. **24** Anante

Josefe'a huzmantege'za atre'za vu'za nehazageno, anage huno zamasmi'ne, Kantegama nevuta ha' fra osiho! 25 Hagi zamagra Isipitira e'za Kenani mopare nezmafa Jekopunte ehanati'naze. 26 Zamagra anage hu'za nezmafana eme asmi'naze, Josefe'a ofri amne mani'ne, tamage agra Isipi mopa miko kegava kri'ne, nehazageno ana kegura agesa tra'hereno antahi ozami'ne. 27 Hianagi zamagra mika ke Josefe'ma huzmante'nea kea, nezmafa eme nesmizageno nentahino, karisima negeno'a, nezmafa Jekopu agu'amo'a kasefa higeno muse hu'ne. 28 Anante Israeli'a anage hu'ne, ha knarere, mofavrenimo'a ofri amne mani'ne. Nagra vu'na ome kete'na henka frigahue.

46 Hagi anagema huteno'a Israeli'a afufenoma'a miko enerino Isipi vunaku nevuno Bersebama unehanatino'a, nefu Aisaki Anumzamofontega ofa Kresramana vunte'ne. 2 Ana kenagera Anumzamo'a ava'nagna zampi Israelina amanage huno asmi'ne, Jekopuo, Jekopuo higeno, ama mani'noe. 3 Higeno Anumzamo'a anage hu'ne, Nagra Anumzamo'ne, nafakamofo Anumzane, Isipi vuzankura korera osuo na'ankure, nagaka'a Nagra zamazeri hakare hugahue. 4 Kagrane magoka Isipia uramitena, ete kavre'na marerigahue. Hagi Josefe'a kavurga erisu huno asegantergahie. 5 Anage higeno, Jekopu'a Bersebati otino nevige'za amohe'za Fero'ma ome avreta echo huno'ma zami'nea karisfi nezmafa Jekopune ne'onse mofavre nagazmine a'nane nagazmine, hu'za anampina zamavarente'za vu'naze. 6 Mika afuzagazmine, fenozminema Kenani mopareti'ma eritru hu'nazane eri'za Isipi e'haze. Jekopu'ene agehe'zane magoka maka erami'naze. 7 Maka mofavre'a zagane, agehe'zane, mofa'ne zaga'ane, agehemofone naga'ane, agripinti'ma fore hu'naza naga'ane zamavarenlo Isipi vu'ne. 8 Jekopu mofavre naga'ma

Isipima vu'nazana naga'mokizmi zamagi'a ama'ne, Rubeni'a Jekopuna agonesa mofavre. **9** Rubeni ne'mofavre naga'mokizmi zamagi'a, Hanoki'e, Palu'e, Hezroniki anantera Karmi'e. **10** Simioni ne'mofavre naga zamagi'a Jemueli'ma, Jamini'ma, Ohati'ma, Jakini'ma, Zohariki'ma, Sauriki'za, Kenani kumate a'mofo mofavre naga mani'naze. **11** Hagi Livae ne'mofavremokizmi zamagi'a, Gersoni'ma, Kohati'ma, Merari'e. **12** Hagi Juda ne'mofavre naga'mokizmi zamagi'a, Eri'ma, Onani'ma, Sela'ma, Perezi'ma, Zera'e. (Hianagi Erike, Onanikea Kenani mopare fri'na'e.) Hagi Perezi mofavrerarena Hezroni'ene Hamulike. **13** Hagi Isaka ne'mofavre naga'mokizmi zamagi'a, Tola'ma, Puva'ma, Iobu'ma, Simroni'e. **14** Hagi Zebuluni ne'mofavre naga'amokizmi zamagi'a, Seredi'ma, Eloni'ma, Jalili'e. **15** Ama'i Lia'ma Padan-Aram mani'neno Jekopunteti kase zmante'nea mofavreramine. Hagi mofara magoke anteneankino agi'a Daina'e. Hagi ana miko ne'mofavrene, mofa'ne naga'anena 33'a vahé forehu anante anante hu'naze. **16** Hagi Gati mofavre nagara, Zifioni'ma, Hagi'ma, Suni'ma, Ezboni'ma, Eri'ma, Arodi'ma, Areli'e. **17** Hagi Asa ne'mofavre nagara, Imna'ma, Isva'ma, Isvi'ma, Beria'e. Hanki nezmasaro agi'a Sera'e. Beria ne'mofavremokizni zanagi'a, Heberiki, Malkiel'i'e. **18** Hagi ama'i Lia kato mofa Zilpa'ma Jekopunteti'ma kasezmante'nea ne'mofavre naga'mokizmi zamagi'e. Zilpama kasezmantege'zama fore hu anante anante'ma hu'nazana 16ni'a vahetami fore hu'naze. **19** Jekopu nenaro Resoli ne'mofavrerarena Josefe'ene, Benzamenike. **20** Josefe'a Isipi mopare umani'negeno Manaseke, Efraemikea fore hu'na'e. Asenati'a Potifera Oni kumate (mago agi'a Heliopolis) mono kva ne'mofo mofa'mo, kase ami'ne. **21** Hagi Benzameni ne'mofavre nagara, Bela'ma Besa'ma, Asbeli'ma, Gera'ma,

Namani'ma, Ehi'ma, Rosi'ma, Mapimi'ma, Hapimi'ma, Ardi'e. **22**
Hagi ama'i Resoli'ma Jekopunteti'ma kase zamante'nea mofavre
nagamokizmi zamagi'e. Hagi Resolima kasezmante'nefinti'ma
fore hu anante anante'ma hu'nazana ana makara 14ni'a
vahé fore hu'naze. **23** Hagi Dani'a magoke ne'mofavrea
ante'neankino agi'a Husimi'e. **24** Hagi Naftali ne'mofavre nagara,
Jazili'ma, Guni'ma, Jezeri'ma, Silemi'e. **25** Hagi ama'i Lebani'ma
mofa'amofo Resoli'ma ami'nea kato mofa Bilha'ma Jekopunteti'ma
kasezmante'nea ne'mofavre naga'mokizmi zamagi'e. Bilha'ma
kasezmante'nea mofavre naga'pinti'ma fore'ma hu anante
anante'ma hu'nazana ana makara 7ni'a vahé fore hu'naze.
26 Ana maka Jekopu naga'ma Isipima e'nazana, agri'pintima
fore hunante anante hu'naza nagaki'za, ana makara 66'a
vahekino, anampina a'nene mofavreraminena ohampri'naze. **27**
Hagi Josefe'a Isipi umani'neno mofavre erifore hu'neana, tare
ne'mofavre kase zanante'ne. Ana hu'neankino Jekopu naga'ma
Isipima mani'nazana ana makara 70'a vahé mani'naze. **28**
Hagi Jekopu'ma eravaoma nehuno'a, Josefe'ma kama eme
averi hanigeno Goseni kumate'ma vanigu, Judana huntegeno
Josefentega vugota hu'ne. **29** Ana higeno Josefe'a hosi afu'a
retro huno karisifi marerino nefä Israeli ome kenaku Goseni
vu'ne. Hagi nefama eme negeno'a, anankempi azeri anukino
zavira zanra kna atente'ne. **30** Anante, Israeli'a amanage
huno Josefena asmi'ne, Ofrinka knare hunka mani'nanke'na
kvugosafina eme koanki menina natrege'na mani'nena fri'neno.
31 Higeno Josefe'a afuhe'inku'ene nefä nagaku'enena amanage
hu'ne, Nagra mareri'na Feronte vu'na amanage hugahue,
Nafuhe'zane, nafa'nimofo naga'enena, Kenani mopareti nagritega
e'naze hu'na ome asmigahue. **32** Hagi zamagra afuzaga

kva nehaza vaheki'za, sipisipizmine, memezmine, bulimakao kevuzmine nezmavre'za, maka feno zaminena eri'za e'naze, **33** hanugenoma Fero'ma nankna eri'za eneriza vahere huno'ma tamantahima kenigeta, **34** amanage hiho, Tagrane nerafa zanena eri'za vahe kamota, afu' kva huta korapa nehzave mani'nonte eta meninena e'none huta tamagrama hanageno'a, tamagrira tamatresigetma Goseni mopare umanigahaze. Na'ankure Isipi vahe'mo'za trazama nenaza afutamima kegavama nehaza vahekura, zamesra huzmante'za zamagote'nezmantaza vahe mani'naze.

47 Anante Josefe'a amanage huno Ferona ome asami'ne, Nafani'ane, nafuhe'zane maka sipisipi'zamine, Bulimaka'ozamine, maka zazmine Kenani mopa atre'za Goseni mopare eman'i'naze.
2 Anage huteno afuhe'impinti Josefe'a 5fu'a vahe zamavareno Fero avure vigeno, **3** Fero'a ana afuhe'mokizmia anage huno zamantahige'ne, Nankna eri'za e'neriza nagare? Hige'za Ferona anage hu'za asami'naze, Tagehemofonteti'ma eno nerafante'ma eno tagrite'ma e'neana eri'za naga kamota tagra sipisipi afu kva nehu'na naga mani'none, **4** nehu'za Feronkura anage hu'naze, Osi'a gna ama mopare maninaku tagra e'none. Eri'za vahekamota afu'mofo ne'zana, trazana omanegeno aga'zamo Kenani mopare forehigu, menina muse (plis) hugantonanki, eri'za vahekamota tatregeta Goseni mopare umani maneno. **5** Anante Fero'a Josefena anage huno asmine, Negafa'ene, kafuhe'zanena kagritega e'haze. **6** Hagi Isipi mopamo'a kegava hankeno me'neanki, negafane kafuhe'inena knare huno tre tre hu'nenia mopa zamige'za Goseni maniho. Hagi kegeno anampima knare vahe'ma mani'nesiana huge'za, nagri bulimakao afura kegava hiho. **7** Anage higeno Josefe'a nafa'amofo avreno Feronte

egeno, Jekopu'a asomu ke Ferona hunte'ne. **8** Fero'a anage huno antahige'ne, Kagra nama'a zagegafu hu'nane? **9** Higeno Jekopu'a Feronkura anage hu'ne, Nafahe'za zaza kna maniza e'nazanagi, nagra atupa'a knafi natagura huna ne-ena, 130'a zagegafu hu'noe. **10** Jekopu'a asomu ke Ferona hunteteno atreno vu'ne. **11** Higeno Josefe'a nafa'amofone, afuhe'inena zamavareno Isipi mopamo'ma knare huno tretre hu'nerega, Rameses kaziga Fero'ma hu'nere mopa ome regori zamige'za mani'naze. **12** Josefe'a nefane, afuhe'ine, nef a nompima nemaniza vahe'ene, osi mofavre naga'enena, mani'naza avamente ne'zana zami'ne. **13** Hianagi Isipi mopafine, Kenani mopare'enena tusi'a zagereno mikazana tefanane higeno, mika mopafina ne'zana omnetfa hu'ne. **14** Josefe'a Isipi mopareti'ene Kenani mopareti'ma maka zagoma eri'za ne'zama eme mizasaza zagoa eritru huteno, erino Fero nompima zagoma nentazafi ana mika ome ante'ne. **15** Hagi Isipi vahe'mo'zane Kenani vahe'mo'zama zagozmima ne'zante'ma maka atre'za eri hanama hutage'za, Isipi vahe'mo'za Josefente e'za anage hu'naze, zagotia hago atreta erihna hu'nonanki, frisunki ne'zanaramio. **16** Anante Josefe'a anage huno zamasami'ne, Zago tamima omanea nona'a, afu'zagatmi eme naminke'na afu tamimofo nona hu'na ne'zana refko hurami'neno. **17** Hige'za hosiramima, sipisipiramima, memekiramima bulimakaoramima, donki afu'zagaramima hu'za zamavare'za Josefena eme nemizageno nona huno, ana kafufima nesaza ne'zana zami'ne. **18** Ana kafuma vagarege'za mago zagegafurera Josefente ete e'za anage hu'naze, rantomoka kavurera fra okigahune. Zagotia hago kagrite atreta eri hana nehuta, mika afutamina ranti'moka kagrite atre vagare'none. Hagi rantomoka menina tagrane mopatige asizanke me'ne. **19**

Nahanigeta tagra frisunkeno mopatimo'a havizana hugahie?
Tagri'ene mopatinena nezanteti miza hugeta, tagra Feronte
kazokazo eri'za erinenteta manimneno. Nehunka avimza tamigeta
tagra ofrita mani'nesunkeno, ama mopamo'a, trankino megusa
avu'avara osino. **20** Hazageno Josefe'a mika Isipi mopa
ne'zanteti mizaseno Ferona eri ami'ne. Mika Isipi vahe'mokizmia
zamaga'zamo'a zamazeri havizantfa hige'za mopa zamia
ne'zante atrageno, ana mika mopamo'a Fero mopa sevare'ne.
21 Hagi Josefe'a ana mika vahetamina kazokazo eri'za vhahere
huno, Isipi mopamofo ruga raga atupa'aregati zamavareno,
ranra kumatmimpi ome zamante'ne. **22** Hianagi Josefe'a pristi
vahe'mokizmi mopa miza osegeno, Fero'a ana pristi vahera
ne'zana zamige'za nene'za mopa'zmia zagonera otre'naze.
23 Hagi Josefe'a amanage huno maka veara zamasmi'ne,
Keho, hago menina tamagri'ene mopatmi'nena Fero miza
semi'noe. Menina mago'a avimza timinena tamagra hoza
eritma hankregahaze. **24** Hagi ne'zama hamare knarera 5fu'a
ko'nama anaki'nuta, mago ko'na Fero nemita, 4'a ko'nafintira
hozafi avi krisaza zane, nontamifi naga'ene ne'onse mofavre
naga'mozanema nesazaza tamagra erigahaze. **25** Hige'za
anage hu'naze, Kagra knare kavukava hurantanketa ofrita
mani'none! Knare agampu ra'nimofo avurera hiankit, Fero
kazokzo eri'za vahe manigahune. **26** Anage hazageno, Josefe'a
Isipi mopamofo tra kea anage huno ante'ne, Hozafi kave'ma
hamare'za 5fu'a kevuma antesafintira mago kevua kini ne'mofo
amitere hugahaze hu'nege'za, ana hume neazageno eno
ama knarera ehanati'ne. Hagi pristi vahe'mo'zage mopazmia
otre zamagra'a eri'naze. **27** Menina Israeli vahe'mo'za Isipi
mopare, Goseni agu'afi mani'ne'za, mika zana erisanti nehare'za,

rama'a vahe fore hu'naze. **28** Jekopu'a Isipi moparera 17ni'a zagegafu mani'ne. Jekopu'ma manino'ma e'nea zagegafu'a ana maka'a 147ni'a zagegafu hu'ne. **29** Israeli'ma (Jekopu) frisnia knamo atupa higeno, mofavre'a Josefe ke huno amanage huno asmi'ne, Muse (plis) hugantoanki kagrama nagriku'ma kave'ma sinante'sunka, menina kazana fenka namopi antenka musezana hunaverinka tamage hunka huo. Muse (plis) hugantoanki Isipia ase onantegahane. **30** Hianagi nagrama frisnugenka, kagra Isipitira erinka vunka vahe'niama asema nezmantafi ome asenanto. Higeno Josefe'a huno, kema hanaza hugahue. **31** Agra anage hu'ne, Tamage hu'na hugahue hanunka, huvempa huo, higeno tamage hu'na ana hugahue huno Josefe'a asmi'ne. Anante Israeli'a (Jekopu) kepri huno sipare mani'neno Josefena muse hunte'ne.

48 Hagi mago'a kna evutegeno Josefena anage hu'za asmi'naze, Negafa'ma kri eri'nea nanekea antahinano, hu'za Josefe asmi'zageno, Josefe'a tare ne'mofavre'a Manasene, Efraemikizni neznavreno vu'ne. **2** Vahe'mo'za Jekopuna ome asami'za, konkeno negamofo Josefe'a kagenaku ne-e, hu'za hazageno Israeli'a hanave enerino otino sipa'are mani'ne. **3** Anante Jekopu'a anage huno Josefena asmi'ne, Tusi'a Hanave'ane Anumzamo Lusi mopare Kenani fore hunamino asomu kea hunenanteno, **4** amanage huno Agra nasmi'ne, Antahio, Nagra hanugeno kagripintira vahera fore hunakare hu'za kumara ante'za nemanisage'za, vahe'mo'za hamprigara osugahaze. Ana nehu'na ana mopa kagehe'mofo zamisuge'za, erisanti hare'za mani vava hugahaze huno nasami'ne. **5** Hagi menina kagra tare mofavre znante'nane, Kenani mopare mani'nogenka, kamama Isipi mopare mani'enka,

kase znante'nana mofavrea nagrire, Efraemike Manasekeea nagri mofavre manigaha'e. Rubeni'ene Simioni'enema mani'na'ankna hugaha'e. **6** Hanki henkama kasentesana mofavrea kagri mofavre manigahie, zamagra nezmafu zanagire makazana refko hu'za erigahaze. **7** Hagi korapara nagra Padan-Aramuti neogeno, Resoli'a frige'na nasunku hu'na afete Efrata me'nege'na, kantega Kenani mopafi Efrata vu kantega zavi eme nete'na asente'noe (E'i Betlehemie). **8** Anante Israeli'a Josefe ne'mofavrerarena neznageno anage hune, Ama aza mofavrerarene? **9** Higeno Josefe'a nefankura anage huno asmi'ne, Zanagra nagri mofavre'rarene Anumzamo'a amafi mani'nogeno nami'ne. Higeno Jekopu'a anage hu'ne, Zanavrenka nagrite egena asomu kea huznantaneno. **10** Hagi Israeli'a hago ozafareno avurga keso'e osu'ne. Ana higeno Josefe'a ne'mofavreararena zanavreno uravao higeno, zananukino antako huzanante'ne. **11** Ana huteno Israeli'a anage huno Josefena asmi'ne, Nagra kagrira kvugosafina onkagegahue hu'na nagesa antahi'noanagi, menina Anumzamo'a natrege'na kagri'ene, mofavreka'ararena tamagoe. **12** Anante Josefe'a nefä amoteti mofavre'a rarena neznavreno, avugati mopafi kepri hu'ne. **13** Ana huteno Josefe'a ana mofavre'ararena zanavreno uravao huteno, tamaga azanura Efraemina avreno, Israelina aza hogaziga nemino, hogaziga azanura Manasena avreno Israelina azan tamaga kaziga ami'ne. **14** Manase'a nempu'amo mani'neanagi, Israeli'a henka ne'mofo Efraemi asenire tamaga azana, nenteno hogaziga azana, nempu'amofo asenire anteno, azana anteganti antegma huno zananunte ante'ne. **15** Ana huteno asomu ke Josefena hunenteno amanage hu'ne, korapa'ma nenfa Abrahamu'ene Aisakike Anumzamofo avure vano huna'a kna

huno, nagrira Anumzamo mani'zaniafi sipisipi kva nehia kna
huno kva hunanteno menina amagnare ehanatie. **16** Havi
zampinti naza hu'nea ankeromo, asomura huranantegahie. Nagri
nagimo tanagripi me'nigeno, nenfa Abrahamune Aisakikizani
zanagimo'enena zanagripina meno vugahie. Hanki zamagra
tusi'a vahetami erifore hu'za miko mopafi manigahaze. **17** Hagi
Josefema kegeno nef'a'ma azan tamagama Efraemi asenire
nentegeno muse nosuno, nef'a azana Efraemi aseniretira erino
Manase asenire ante'ne. **18** Ana nehuno Josefe'a nefana anage
huno asmi'ne, Nenfaga e'inahura osunka, amamo kota fore
hu'neanki tamaga kazana amamofo asenire anto. **19** Ana hianagi
nef'a i'o nehuno anage hu'ne, Ne'nimoka nagra antahi'noe,
Manasempintira rama'a vahe fore nehinkeno, rukazi huno tusi'a
vahetami manigahie. Ana hu'neanagi Efraemipintira nefuna
agatereno tusi'a vahetami fore huno, miko mopafina rukazi hu'za
rankuma ante'za manigahaze. **20** Agra ana kna zupa asomu ke
huneznanteno anage hu'ne, Israeli vahe'mo'za vahe'ma asomu
kema huzmante'nakura anage hu'za hugahaze. Anumzamo'ma
Efraemine, Manasekiznima asomu'ma huzanante'neaza huno
Anumzamo'a asomura huramantegahie hu'za hugahaze! Nehuno
agra Efraemina, Manase avuga avrente'ne! **21** Ana huteno
Israeli'a Josefena anage huno asmi'ne, Kama nago! Nagra hago
fri'za huanagi Anumzamo'a tamagrane mani'neno, tamavreno
ete tamafahe'i mopare vugahie. **22** Hagi masavenke huno tretre
hu'nea Sekemu agona mopa bainati kazinkonteti'ene atireti'ene
Amori vahera zamahe'na hanare'noa mopagi'na kafuhe'ina
ozamigahuanki kagri negamue.

49 Jekopu'a amanage huno mika ne'mofavre'amokizmi
zamasmi'ne, Henkama tamagrite'ma fore hania zamofo nanekea

tamasamigahuanki, **2** Jekopu mofavre naga'nimota tamagra
eme atru huneta tamagesa anteta nerafa'na Israeli'na hanua
nanekea antahiho. **3** Rubeniga nagonesa mofavremoka, ese
hihamu ni'afinti kasegante'nogenka zamagaterenka mareri vahe
mani'nanku, hanave kamo asaga hu'ne. **4** Hianagi timo hageno
eviankna huno, nagakafina ran kagia omanegahie. Na'ankure
negafa sipare marerinka haviza hunka mago a'ni'a avazu
nehunka sipani'a eri hi'mna vu'nane. **5** Simioni'ene Livaikea kogna
mani'na'e. Bainati kazinkno zanimo'a, vahera zamazeri havizantfa
hugahie. **6** Nagri knare antahi antahimo'a, tanagri antahi
antahifina omanegahie. Nagra kema anakisapina omanigahue.
Na'ankure zanarimpa ahenke'ne vahera akafrigaha'e. Zanagra
musezampi vu'ne, Bulimakao agia agruna nofi akafrina'e. **7**
Tanarimpa ahe'zantera tusi huneranantoe. Na'ankure tanarimpa
ahezamo'a arava ohegahie. Tanarimpa nehena, hazenke
vahé manigaha'e. Jekopu'na nagri'pintira tanatufe atra'nena,
Israeli mopafina arure arure huta manigahaze. **8** Judaga
kafu kaganaza kagi erisga hugahaze. Kagri kazamo'a ha'
vahé ka'amokizmi zamanankempi megahie. Kagri negafa
ne'mofavremo'za kepri hu'za zamarena regahaze. **9** Judaga
laioni anenta kna hu'nane. Kagra nenamofoga laionimo ne'zaga
aheno nenaku kva hiankna hu'nane. Kagrikura vahé'mo'za
kagoro hugahaze. Mago vahé'mo'a kvako osugahie. **10** Judaga
kva vahé'mokizmi azompamo'a kagripi mevava hugahie. Kini
vahé azompamo'a agiararemofo amu'nompi me'nesigeno,
Nafa'amo'a henka Sailo kumate ehanatigahie. Hanige'za hakare
ranra kumate veamo'za agri kea erizafa hugahaze. **11** Donki
anentara krepirenofitenti rentesnankeno manigahie. Agaho
donkima avesi'nesia krepinofite'ma arentesigura antahi muhara

osugahie. Kukena'a waini timpi sese hu'ne, na'ankure ne'zamo'a amporegeno nehana huga osu'ne. **12** Agra rama'a waini tina nenegu huno tare avurgamo'a koranke hu'ne, agra afu'mofo amirina rama'a nenegu huno, ave'mo'a efenentake hu'ne. **13** Zebuluniga hageri ankenare umanigahane. Umani'nesanke'za vente'mo'za efre'za vu'za hugahaze. Mopa kamofo agemo'a Saidoni kuma atupare uhanatigahie. **14** Isakaga hankave donkie, tare fenonku'mofo amu'nompi manigsa hugahane. **15** Agrama kegeno knare manigsa kuma me'negeno, ana kumamo knare zantfa hu'negeno, hanave'a erigoteno eri'za eri'ne. Ana hu'neanagi henka'a kna'ane kazokzo eri'za erigahie. **16** Daniga kva (jas) vahe tro hunka vaheka'a kegava hugahane. Mago naga Israeli kevufi manigahaze. **17** Ha' osifavemo kamofo ankenare mani'neno, hosimofo agamerumpafi amprigeno, agumpifi vu'nea ne'mo amefigati asga hurami'ne. **18** Ra Anumzamoka nahoke ahesnanegu, kavega ante'na mani'noe. **19** Gatiga kumza vahe'mo'za kahegahaze. Hianagi rukrahe hunka, zamagumpi zamarotgo hugahane. **20** Asaga hentofa ne'za eri fore hugahane. Rankva vahe zame'nesia ne'za, hankregahane. **21** Naftaliga, afi a' afu dia atregheno agareno viankna nehunka, knare so'e nanekege hugahane. **22** Josefega zafa azankunamo raga renteankna hugahane, azankunamo ti ankenare me'neno raga reno, pagagi huno kegina refiteankna hugahane. **23** Ha' vahekamo'za atireti hanaveti'za hara hunegante'za, kevea negahe'za, kazeri haviza hugahaze. **24** Hianagi Jekopu Anumzamo'a Josefena hankavea aminkeno azamo'a oragesigeno, kevema ahesiana hantaga osugahie. Ana Anumzamo'a Israeli vahera sipisipi afu kegava hiankna nehuno, zamagu'vazi havegna hugahie. **25** Na'ankure Jekopu'na negafa'na Anumzamo kaza nehuno, hihamu'ane

Anumzamo asomu huneganteno, anagamu monafinkati asomu huneganteno, mopa agu'afinti tina hanati'nigenka asomura e'nerinanke'za, karimpafinti'ma fore hanaza mofavre'mo'zanena asomura erigahaze. **26** Kagri negafa'na asomumo'a nagri nagehe'i asomura agatereno mevava agonagna huno mareri'ne, ana asomumo'a, Josefega kokovite me'nenige'za, kafuhe'za kage anagamute'za kagegahaze. **27** Benzameniga afi ha' kragna (wolf) hugahane. Nanterampi freno zaga aheno traga hiankna nehunka, kinaga'afi refko huno erino ome'mi eme'mi hiankna hugahane. **28** Ama ana maka 12fu'a Israeli nagakino, nezmafa'a mago mago naga nofi'ma mani'naza avamente asomu kea huzmantetere hu'nea naneke. **29** Jekopu'a amanage huno mofavre naga'amokizmia zamasmi'ne, Nagrama fri'na vahe'ni'ane umani knanimo'a kofta nehie. Hagi nafahe'ima ase zamante'naza mopare, havegampi ome asenanteho. Hiti ne' Efroni mopama mizama se'nefi ome asenanteho. **30** Makapela havegampi Mamre kuma tvaonte Kenani mopa agu'afi, Abrahamu'ma ana mopane havegane vahe asente'zane huno Efroni'pinti'ma mizama se'nea mopafi ome asenanteho. **31** E'i anampina Abrahamune nenaro Serane ase'znante'naze. Aisakine nenaro Rebekagiznia anampi ase znante'nafi, anampinke a'ni'a Liana asente'noe. **32** Ana mopane havegane Hiti ne' mofavrefinti miza se'neane. **33** Anagema huno mofavre naga'amokizmi zamasmi vaga reteno, agiararena sipare asuteno vagare asimu atretno frino naga'ane umani'ne.

50 Anante Josefe'a nefä avugosafi umseno, zavi atenenteno antako hunte'ne. **2** Henka Josefe'a fri kerfare kva nehia eri'za vahe'a huzmanteg'eza, kehiazza hu'za avufgamo'ma kasri'zanku agu'afina mago'a marasini nente'za eri so'e hute'za, Israelina

(Jekopu) masave fre'za ante'naze. 3 40'a zage gnafi e'i anazana
huga hazankino, ana foti'a zagegnafina avufga eri so'e hu'naze.
Ana hazageno Isipi vahe'mo'za 70'a zagegnafi zamasunku hu'za
zavira ate'naze. 4 Anante zavi'ma atekna agateregeno, Josefe'a
anage huno Fero nompi eri'za vahera zamasmi'ne, Tamagra
menima nagri'ma antahi namisuta muse huramantoanki, Ferona
amanage huta ome asmiho, 5 Nenfa'a huvempa ke hunanteno
amanage hu'ne, nagra ha fri'za huanki, nagrama Kenani mopafi
kerigama kafinte'nofi anantega ome asenantegahane. Anage
hu'negu natrege'na avufga'a eri'na mareri'na ome asentete'na,
ete a'neno. 6 Higeno Fero'a amanage hu'ne, Anagamu vunka
negafa'ma huvempa huno kasmi'neaza hunka ome asento. 7
Hagi Josefe'a nef a senteku anagamu marerigeno, Fero eri'za
vahe'mo'zane, noma'afi kva vahe'ene, mika Isipi mopafi kva
vahe'ene, 8 mika Josefe naga'ene, nefu'zane, nef a naga'enena
vu'naze. Hianagi osi mofavre naga'zmine afu kevu zaminena
Goseni mopafi zamatre'za vu'naze. 9 Anama Josefe'enema
vu'hazana rama'a sondia vahe'ene vu'nazankino, mago'a karisifi
maniza nevazageno, mago'a hosi agumpifi mani'za vu'naze.
10 Hagi ana vahe'mo'za vu'za Jordani timofo kantu kaziga
ankenarega, witi honama neharaza kumate Atadi umani'naze.
Anante 7ni'a zage gna zamagra umanine'za, zamagrama
zamavuzmavapima nehzaza hu'za, nezmanfankura tusi zavi
ate'naze. 11 Ana mopafima nemaniza Kenani vahe'mo'za kazama
witi akru neharaza kumate Atadi mani"neza zavi netage'za
nezmage'za anage hu'naze. Ama'i Isipi vahe'mo'za tusi'a zavi
atetere, nehu'za agi'a Abel-mizraim hu'nazankino, zage hanati
kaziga Jodani me'ne. 12 Hagi Jekopu mofavre naga'mo'za
nezmafa'ma zmasami'neaza hu'naze. 13 Agri mofavre'mo'za

kerfa'a eri'za Kenani mopafi vu'za, Makapela havegampi Mamre kuma tvaonte ome asente'naze, ko'ma Abrahamu'ma vahe asente mopae huno Hiti ne' Efroninteti, miza hu'nea mopafi asente'naze. **14** Ana'ma huno Josefe'ma nefama asentetege'za, afuhe'zane nefama asenteku mareri'naza vahe'ene maka ete Isipi moparega vu'naze. **15** Hagi nezmafa'ma fritege'za, Josefe nefu'za anage hu'naze, tagrama havizama hunte'nona nona'a, tagrira na'a hurantegahie? **16** Nehu'za zamagra Josefena ke atrente'za anange hu'naze, Negafa'a frinaku nehuno, **17** anage huta Josefena asmiho hu'ne, muse (plis) hugantoanki, havi avu'ava hugante'nazana kumi zamia atre'zmanto. Menina muse (plis) hugantoanki, negafa Anumzamofo eri'za vahe'mota havi avu'ava hugante'none. Ana kema Josefe'ma nentahino'a zavi ate'ne. **18** Anante afuhe'za e'za Josefe avuga zamugosaregati umase'za anage hu'naze, Antahio, tagra kagri kazokazo eri'za vahere. **19** Hianagi Josefe'a anage huno zamasmi'ne, korora osiho, nagra Anumzana omani'nogu keaga huoramantegahue. **20** Tamagra nagrira nazeri haviza hu'nazanagi, Ra Anumzamo'a rama'a vahe zamaza hunaku nentahino anara hu'neankino, menina ana zamo'a fore nehie. **21** E'na hu'negu tamagra korora osiho, nagra tamagri'ene, neone mofavre naga'enena tamazeri knare hugahue. Nehuno zamanukige antege nehuno, knare kegaga huzami'ne. **22** Hagi Josefe'a Isipi mopare afu aganahezane mani'neno, 110ni'a zagegafu hu'ne. **23** Efraemi mofavremo mofavre antegeno negeno, Manase ne'mofavre'mo Makiri mofavre antegeno Josefe'a amote zamavarenteno keteno fri'ne. **24** Josefe'a amanage huno afuhe'ina zamasmi'ne, Nagra fri'za hue, Anumzamo tamagrira kegava huneramanteno, tamavreno ama mopafintira marerino Abrahamuma, Aisakima,

Jekopuma huvempa huzmante'nea mopare vugahie. **25** Anante Josefe'a Israeli ne'mofavre nagara amanage huno huvempa huno zamasmi'ne, Anumzamo tamagrira kegava huramante'nena zaferinani'a erita mareriho. **26** Hagi Josefe'a 110ni'a zagegafu maniteno frige'za, avufgamo'ma kasrizanku agu'afina mago'a marasini ante'za eri so'e hute'za masave freza, zavoafi eri antageno Isipi mopafi me'ne.

Zmavarene

1 Israeli ne' mofavre naga'mo'za a'mofavre zamine Isipima
nezmafa Jekopu'enema vu'naza naga'mokizmi zamagi'a ama'ne,
2 Rubeni'ma, Simioni'ma, Levi'ma Juda'ma, **3** Isaka'ma,
Zebuluni'ma, Benzamini'ma, **4** Dani'ma Naftali'ma, Gati ene
Asa'e. **5** Hagi Josefe'a ko Isipi umani'nege'za, Jekopumpinti
fore'ma hu'naza nagara maka 70'a naga'mo'za vu'naze. Hianagi
Josefe'a ko Isipi umani'ne. **6** Hagi Josefe'ene ana maka
afu'aganahe'zane ana knafima magokama vu'naza naga'a fri
vagare'naze. **7** Hianagi Israeli vahe'mo'za mofavrea kase'za
eri hakare hazageno, tusi hankvenentake vahe fore hu'za
Isipi mopa mani avite'naze. **8** Hagi henka Josefe'ma hu'nea
zantmima keno antahino osu'nea ne'mo, Isipia kasefa kini
efore huno kegava hu'ne. **9** Ana kini ne'mo'a vahe'agura
amanage huno zamasmi'ne, Keho, Israeli vahe'mo'za tagrira
tagatere'za, rama'a vahe fore nehazageno, hankave zamimo'a
tagatenere. **10** E'ina hu'negu enketa mago'a kanku haketa
zamazeri haviza hanunke'za vahera fore huhakarea osnaze.
Ha'ma fore hanige'za, ha' vahetirega ante'za ha' hunerante'za
kumatia atre'za vugahaze. **11** Anage hige'za, kazokzo eri'za
kva vahe zamazeri otizageno, Isipi kini ne' Fero'ma fenoma
antesnia rankumatre, Pitomu kuma'ene, Rameses kuma'enena
Israeli vahera zamazeri haviza nehazage'za ki'naze. **12** Tusiza
hu'za Israeli vahera zamazeri haviza hazanagi, mago'ane rupazi
hu'za rama'a nehazageno, Isipi vahe'mo'za Israeli vahekura koro
huzmante'naze. **13** Israeli vahera zamasunkura huozmantage'za
eri'zana hanaveti'za eri'haze. **14** Tusi'a eri'za fukinteti briki trohu
eri'zane, hozafi eri'zane mago'a eri'za zami'za, nomani'zazmia
tusiza hu'za zamazeri amuho hazage'za zamarimpa akahezampi

mani'naze. **15** Anante Isipi kini ne'mo'a, Hibru a'ne'mo'zama mofavre'ma kasenteku'ma nehzageno zamazama hukema kse nezmia Hibru a'trena, Sifrane Puagiznia amanage huno znam'i'ne, **16** Hibru ane'mozama mofavrema kasentenaku'ma nehanageta zamaza hutama kasezmantesuta, mofa'nema kasezmantesagetma, zmatrenke'za maniho, hagi ne'mofavrema kasezmantesageta zamahe friho. **17** Hianagi ana a'tre'mokea Anumzamofonku koro nehuke, Isipi kini ne'mo'ma hanave kema huno'ma ne' mofavre'ramima zamahe frihoma hu'neana, zamahe ofri zmatrege'za mani'naze. **18** Ana higeno Izipi kini ne'mo'a ana a'trena ke higeke akeno anage huno znantahige'ne, Na'a higetna ne' mofavre'rmina zamahe ofrita zmatrake'za mani'naze? **19** Mofavrema zamaza huke kasezmi a'tre'mokea amanage huke Ferona kenona'a hunte'na'e, Hibru a'ne'mo'za zamagra Isipi a'negrara osu'za hanavenentake hu'nazanki'za, uohanati'nonke'za hanatinonke'za ame'ama hu'za mofavrea kasezentaze. **20** Ana higeno Anumzamo'a mofavrema zamazama huke kasezami a'tre'na knare huznantegen, Israeli vahera kase hakare hazage'za hanavenentake vahetami rama'a fore hu'za vu'naze. **21** Ana a'tremokea Anumzamofonku koro nehaku huno Anumzamo'a asomu huznantegeke znagranena agafa huke mofavre kasente'na'e. **22** Anante Fero'a ana maka Isipi vah'e'a amanage huno hanavenentake ke huzmante'ne, Hibru a'nemo'zama ne' mofavrema kasezmantesazana, zmavaretma Naeli timpi matevu nezmatreta, mofa'nema kasezmantesagetma ozmahe zmatrenke'za maniho.

2 Ana knafina mago Livae nagapinti ne'mo'a, mago ara Livae nagapinti erigeno, **2** amu'ene huno ne' mofavre kscenteno, keana hiranto mofavre fore'ma higeno, **3**'a ikamofo agu'afi

frakino antegeno mani'ne. **3** Hianagi ana mofavre'mo ra huno
3'a ikama higeno mago'ane frakintega'ma nosuno'a, ekaeka
ku tro huno, kolta fukinuti renkanireteno, ana mofavrea ana
ekaekapi anteteno erino Naeli tinnenafi me'nea uha trazampi
ome frakino ante'ne. **4** Ana mofavremofo nesaro'a agrite'ma
fore haniaza kenaku ogantu'a mani'ne. **5** Fero mofa'mo ti
frenaku, eri'za mofa'nene Naeli tinte erami'za, ana tinnenare
nevu'za ekaekara uha trazampi me'negeno negeno, eri'za mofa'a
huntegeno omerino eme ami'ne. **6** Ana mofa'mo'ma ekaekama
erinagino keana, ana mofavremo'a zavitegeno, asuntagi nenteno
anage hu'ne, Ama Hibru vahe'mokizmi mofavre. **7** Anante
ana mofavremofo nesaro'a, Fero mofara antahigeno, Knare
vu'ha mago Hibru ara ome avre'na anenkeno mofavrea kegava
krigantegahifi? **8** Higeno Fero mofa'mo'a anage huno hu'ne,
Vunka kema hanaza hunka ome avrenka eno huno huntegeno,
ana mofa'mo'a vuno ana mofavremofo nerera ome avreno
e'ne. **9** Fero mofa'mo'a amanage huno ana ara asmi'ne,
Ama mofavrea avrenka ome kegava krinante'nege'na, miza
segantaneno, higeno ana mofavrea avreno kegava krinte'ne. **10**
Ana mofavre'mo'ma rama higeno avreno Fero mofate vigeno,
Fero mofa'mofo zage mofavre'aza higeno, timpinti avre fegu'a
atre'noe nehuno Mosese'e huno agi'a antemi'ne. **11** Hagi ana
knafina Mosese'ma nena huteno, mago zupa vahe'amo'zama
tusiza hu'za kazokzo eri'zama enerizarega nevuno keana,
mago Hibru nera, Isipi ne'mo nehegeno ome negeno, **12**
omege eme gemma hiana mago vahera omani'negeno keteno,
ana Isipi nera ahe frino ksepampi asente'ne. **13** Anante
knazupa Mosese'a nevuno keana tare Hibru ne'tremoke zanagra
zanagra ha' nehakeno ome neznageno, hazenkema agafama

hu'nea nera antahigeno, Na'a higenka negafuna nehane? **14**
Hianagi ana ne'mo'a ke'nona'a huno, Iza kvati'a maninenka
refko hurantegahane huno kazeriotine? Kagra Isipi ne'ma ahe
fri'nanaza hunka nahe frinaku nehano? Higeno Moses'e'a koro
nehuno antahintahima hiana, vahe'ma ahe fri'noa zana hago
e'ama hige'za antahi'naze hu'ne. **15** Fero'ma ana kema nentahino,
Mosesena ahe frinaku hianagi, Moses'e'a atreno freno Midiani
kumatega umaninaku vu'ne. Vuno mago tinkerire umani'nege'za,
16 mago Midiani pristi ne'mo'a 7ni'a mofa'ne zmante'neanki'za,
nezmafa sipisipine meme afu'tmimo'zama tima nesnagu tinkerire
neazageno, **17** ruga'a sipisipi afu kva vahe'mo'za eme zmahenati
trazageno, Moses'e'a otino ana mofa'nea ome zamaza huno
nezmafa sipisipi afutamine, meme afutamina ana tina afi
zamige'za netageno, **18** ana mofa'nemo'za nezmafa Ruelinte
(Jetro) uhanatizageno anage huno zmantahigene, nahigeta
menina hantaka huta aze? hige'za, **19** ruga'a sipisipi kva
vahe'mo'zama tahemanenatiza vahera, mago Isipi ne'mo taza
huno zmahenenatino, sipisipiti'anena taza huno tina afizmi'ne.
20 Anante Rueli'a (Jetro) zmantahigeno, ina ana nera mani'ne?
Nahigeta atreta e'naze? Ome kehinkeno kave emeneno, hige'za
ome avre'za azageno, **21** Moses'e'a zmagranema manisigu
mago arimpa higeno Rueli'a (Jetro) mago mofa'a, Zipora
amigeno a' eri'ne. **22** Zipora'a amu'ene huno ne' mofavre
ksentegeno, Moses'e'a rurega ne'mo'na kraga eman'i'nogu agi'a
Gesomu'e hu'na ante'mue. **23** Za'za kna evutegeno Isipi kini
nera fri'ne. Hianagi Israeli vahe'mo'za tusi'a knazama eri'za
kazokzo eri'za eneri'za, Anumzamofontega zavi krafa hu'naze.
Ana zavi krafa zimimo'a Anumzamofo avure marerigeno, **24**
Anumzamo'a ana zavi krafazamia antahinezamino, Abrahane,

Aisakine, Jekopunema huvempa huno huhagerafi'nea kegu
agesa antahi'ne. 25 Anumzamo'a Israeli vahera nezmageno,
knazampima mani'nazazana keno antahino hu'ne.

3 Mosese'a nenemo, Jetro Midiani pristi ne'mofo sipisipi afu
tamine meme afutami kva nehiankino, mago zupa, ana sipisipi
afutamine meme afutami zamavareno ka'ma mopamofona
mago kaziga asoparega afete vuno Anumzamofo agona, Horepi
mago agi'a Sainaie nehaza agonare uhanati'ne. 2 Anante
Anumzamofo ankeromo'a, mago zafafina tevemo hagana hagana
huno nerefi efore higeno, Mosese'ma keana tevemo'a hagana
hagana huno te'neanagi, ana zafa tevea ore'ne. 3 Ana higeno
Mosese'a amanage huno hu'ne, Ruzahu'za huno zafa tevea
oreanki, anante vu'na ome kesue nehuno vu'ne. 4 Hagi
Anumzamo'ma kegeno Mosese'ma kenaku vutava'o nehigeno'a,
ana zafafinti Anumzamo'a kezatino, Mosesewe! Mosesewe!
higeno Mosese'a ama mani'noe higeno, 5 Anumzamo'a asmino,
Mago'anena eravao osunka, kagia anona kazufe atro, na'ankure
menima ot'i'nana mopamo'a ruotage hu'nea mopare ot'i'nane. 6
Anante mago'ane Anumzamo'a amanage hu'ne, Nagra kafahe'i
Anumzane, Abrahamu Anumzane, Aisaki Anumzane Jekopu
Anumza mani'noe, huno higeno Mosese'a Anumzamofoma
ke'zanku koro huno avugosa refite'ne. 7 Ra Anumzamo'a
amanage hu'ne, tamage hu'na Isipi kumapi'ma vahe'hiamo'zama
mani'ne'za zmatazama e'neri'za zana, hago Nagra nege'na,
zavi krafama hazana antahi'noe. Na'ankure kazokzo eri'za
kva vahe zami'mo'za, zmatazama zamizazana ke'na antahi'na
hu'noe. 8 E'ina hu'negu, Nagra erami'na Isipi vahe hanavefinti
zamavre fegu'a zmatre'na, masavenke huno knare zantfa
hu'nea mopama, kaomofo amirine tumerimo'ma avi'mate'nea

mopa Kenani vahe mopama, Hiti vahe mopama Amori vahe
mopama Perisi vahe mopama, Hivi vahe mopama Jebusi
vahe mopa, ra mopa zamigahue. **9** Menina antahio, Israeli
vahe'mokizmi zavira nentahi'na, Isipi ma zamazeri havizama
haza zana hago ke'na antahia'na hu'noe. **10** E'ina hu'negu menina
ege'na huganta'nenkenka Feronte vunka, Israeli vahe'ni'a, Isipi
kumapintira zmavrenka atiramigahane. **11** Hianagi Moses'e'a
amanage huno Anumzamofona asmi'ne, Nagra iza'na Ferontera
vu'na Isipitira, Israeli vahera zamavare'na atiramigahue? **12**
Anumzamo'a anage hu'ne, Nagra tamage hu'na kagrane
manigahue. Nagrama Israeli vahe zmavrenka atiramiogu'ma
hugantoa zamofo avame'zana, Israeli vahe'ma Isipiti'ma
ome zmavrenka atiramisunka, Nagrira monora ama agonare
eme hunantegahaze. **13** Anante Moses'e'a amanage huno
Anumzamofona asmi'ne, Antahio, nagrama Israeli vahetegama
vu'na, anage hu'na ome zmasamigahue, tamafahe'i Anumzamo
tamagritega hunantege'na oema hanuge'zama nantahige'za,
agi'a iza'ema hanage'na? na'ane hu'na zamasamigahue? **14**
Higeno Anumzamo'a amanage huno Mosesena asmi'ne, Nagra
mani vava nehumo'na Nagrake Mani'noe, kagra amanage hunka
Israeli vahera ome zamasamio, Nagre nehia ne'mo, hunantege'na
tamagritega oe hunka huo. **15** Mago'ane Anumzamo'a Mosesena
asmino, Israeli vahera amanage hunka ome zamasamio,
Ra Anumzamo'na tamafahe'i Abrahamu Anumzane, Aisaki
Anumzane, Jekopu Anumzamo'a tamagritega hunantege'na oe.
Ama'i nagimo'a mevava hanigeno, henkama fore'ma hanaza
vahe'mo'za ama ana nagimofona ahentesga hu'za antahinami
vava hugahaze. **16** Israeli kva vahera ome zamazeri tru hunka
zmasmio, Ra Anumzamo'a tamafahe'i Anumzane, Abrahamune

Aisakine Jekopune Anumzamo efore huno amanage huno
nasami'ne, Nagra tamage hu'na tamagrikura nentahi'na, Isipi
vahe'mo'zama hurmantaza zana ke'noe. **17** Ana hu'negu Nagra
huvempa hu'noa ke amage ante'na Isipi kumapima mani havizama
hu'nazafinti tamavre fegu'ate'na tamavre'na Keneni vahe'ma, Hiti
vahe'ma, Amori vahe'ene, Perisi vahe'ma, Hivi vahe'ma Jebusi
vahe'mokizmi mopa masevenke huno knare zanfta hu'negeno,
kaomofo amirimo'ene tumerimo avite'nea mopafi tamavreno
vugahie hunka ome zamasamio. **18** Kema hananana, Israeli kva
vahe'mo'za ke ka'a antahigahaze. E'ina hnageta kagra Israeli
kva vahe zamavrenka Isipi rankva nete vuta amanage huta
asamiho, Ra Anumzana Hibru vahe'mokizmi Anumzamo tagrite
eama hu'ne. Hagi muse hugantonanki knare taternanketa tagufa
zagegnafina ka'ma kopina vuta Ra Anumzatimofontega ofa
ome kre sramana vuntamaneno hutma asamiho. **19** Hianagi
Nagra antahi'noe, Isipi kini ne'mo'a tamatresnigeta ovugosaze.
Hagi mago hankvenentake azamo'ma ha'ma rentesnigeno'a
tmatresnigeta vugahaze. **20** E'inama hanige'na Nagra nazana
erisga hu'na maka ruzahu ruzahu kaguvazana eri fore amu'no
zamifina ha'nenke'za, tamatresnigeta vugahaze. **21** Nagra Isipi
vahe zamufina rantamagi taminenketa Isipi vahe'ma zamatreta,
vanuta amne tamavapara ovugahaze. **22** Hu'neanagi maka
Israeli a'nemo'za no magote nemanisnaza a'nanene no zamifi
nemsesnaza a'ne'mokizmia silvane golire'ma tro'ma hu'nesaza
zantamine, kukenagu enena zmantahigesage'za tamisagetma,
ne' mofatmimofona eri hankre zmanteho. E'inama hanutma Isipi
vahe'mofona knare fenozazamia eri hana hutma vugahaze.

4 Mosese'a Ra Anumzamofo kenona hunteno, Ke'niama
antahi onamige, zamentintima osanageno'a nankna hugahie?

Na'ankure zamagra amanage hu'za Kagrikura hugahaze. Ra Anumzamo'a kagritera efore osu'n'e hugahaze. 2 Anante Ra Anumzamo'a anage huno antahige'n'e, Na'a kazampina me'n'e? huno antahigegeno Mosese'a azompani'e higeno, 3 Ana azompa mopafi atro, higeno Mosese'a mopafi atregeno, ana azompamo'a osifave fore higeno, Mosese'a atreno kore fre'n'e. 4 Hagi Ra Anumzamo'a anage huno Mosesena asami'n'e, Kazana antenka risonare azeri sga huo, higeno Mosese'a aza antegantuteno risonare azeri sga higeno, ete azompa fore hu'n'e. 5 Anumzamo asmino, e'inahu'za fore hanige'za, Ra Anumzana nezmafa Abrahamu Anumzane, Aisaki Anumzane Jekopu Anumzamo kagrite efore hu'n'e hu'za zamentinti hugahaze. 6 Mago'an Ra Anumzamo'a amanage huno asmi'n'e, Hagi menina nakre kuka'afi kazana vazio, higeno Mosese'a azana nekre ku'afi vaziteno erizafigeno, leprosi namumo ana azampina fore huno efenentake hu'n'e. 7 Anante Ra Anumzamo'a amanage hu'n'e, Hagi menina ana nakre kuka'afi kazana ete vazio, higeno Mosese'a ana azana ana nakre ku'afi eteno vaziteno erizafigeno, ana leprosi namuna fanane huno avufgamo'a knare huno ruga'a avufga'mo'ma me'neaza hu'n'e. 8 Ra Anumzamo'a Mosesenkura anage huno asami'n'e, Zamagrama kota avame'zamofonku'ma zamentinti osuge, antahi ogamisagenka, henka avame'za hnanke'za negesu'za zamentinti hugahaze. 9 Hu'neanagi tare avame'zamofonte'ma nege'za zamentinti nosu'za keka'a ontahisnagenka, Naeli timpinti mago'a tina afinka hagege mopafi tagi tro. E'ina'ma hanankeno'a ana timo'a hagege mopafina kora fore hugahie. 10 Mosese'a Ra Anumzamofona amanage huno asmi'n'e, Muse hugantoanki Ra Anumzamoka nagra kea huso'e nosu'na, korapa anahu hu'na mani'na e'noe. Meninena

nagrane kegaga hananagi nagefu'namo'a kema huzampina
knarera osige'na, kea hu so'e nosue. **11** Ra Anumzamo'a
kenona huno, Iza vahe zamagira tro huzmante'ne? Iza ke osu
vahero, zamagesa ankanire vahero, zamavu knarehu vahero,
zamavu suhu vahera zamazeri nese? Nagra Ra Anumzamo'na
e'inara hunezmantoe. **12** E'ina hu'negu menina kagra vuge'na,
Nagra kagrane mani'nena, kema hnana kea hugasmisnugenka
hugahane. **13** Hianagi Mosese'a amanage huno ke'nona hu'ne,
Ra Anumzamoka muse hugantoanki mago'a vahe huzmanto.
14 Anante Ra Anumzamo'a Mosesena rimpahenteno anage
hu'ne, Anantega negafu Livae nera Aroni'a omaninefi? Nagra
antahi'noankino agra knare zantfa huno kea hugahie. Hanki
agra kantega eme tutagiha hugantenaku ne-eankino, eme
kagesuno'a agu'areti huno musena hugantegahie. **15** Emema
kagesnigenka, kema hania kea retro humige'na, Nagrani'a kagri
kagite'ene agri agite'enena mani'nena inankna kea hugaha'e,
rempi huranamisnugeta kea hugaha'e. **16** Aroni'a kagri kagi
erino vahe'ma kema zmasami vahe mani'nigenka, kagra
Anumzankna hunka agritera mani'enka vahe'ma zmasamisia
kea asamigahane. **17** Hagi menina kagra kama vanohu azompa
ka'a, avame'zama erifore'ma hananku erio. **18** Anantetira
Mosese'a atreno nenemo ne' Jetronte vuno amanage hu'ne,
Muse hugantoanki natrege'na ete Isipima mani'naza nafu
nganaheintega vu'na, ofri mani'nazo ome zamaga'neno, higeno
Jetro'a krimpa frune vuo huno hunte'ne. **19** Mosese'a Midiani
kumate mani'negeno Ra Anumzamo anage huno asmi'ne, Etenka
Isipi vuo, na'ankure kahe fri'nakurema hu'naza vahe'mo'za
ko' fri'naze. **20** Anage higeno, Mosese'a tare mofavre'ane
nenarone zamavreno donki afu'mofo agofetu nezmaneten,

Anumzamofo azompa'a azampi azerige'za Isipi vunaku vu'naze.

21 Ra Anumzamo'a Mosesena anage huno asmi'ne, Isipima ete uhanatisunka, kaguvazama erifore huogu'ma hankvema kami'noa hanavereti Fero avuga maka kaguvazana erifore huo. Hu'neanagi Nagra arimpa azeri hankvetisugeno Israeli vahera zmatresnige'za ovugahaze. **22** Kagra anage hunka Ferona asamio, Ra Anumzamo'a amanage huno hu'ne, Israeli vahera kota ne' mofavre'ni'e. **23** E'ina hu'negu Nagra anage hu'na kasami'noe, Israeli vahera zmatrege'za vu'za monora ome hunanteho. Hianagi kagra ke'ni'a ontahinka zmatranke'za ovu'nazagu, antahio, Nagra kota ne' mofavreka'a ahe frigahue!

24 Mosese'ene naga'amo'za Isipi vunaku karanka nevu'za hani hige'za masenaku hazare, Ra Anumzamo'a Mosesena emegeno ahe frinaku hu'ne. **25** Hianagi anante Zipora'a mago asne'nea have kazi erino, nemofo oku avufamofo anoma'a taga huno, Mosese agiaifi ome netreno anage hu'ne, kagra tamagerfa hunka nagritera kora eri tagi nenavega mani'nane hu'ne. **26** Ana higeno Ra Anumzamo'a Mosesena ahe ofrigeno, Zipora'a amanage hu'ne, kora eri tagine'moka nenavezana hu'nane, na'ankure ne' mofavre'amofo oku avufga anoma'a taga hu'neazanku hu'ne. (Jen-Agf 17: 9-14). **27** Hagi Ra Anumzamo'a Aronina asmino, Ka'ma moparega vunka Mosesena omego, higeno Aronia vuno Anumzamofo agonare Mosesena omegeno agi antako nehuno, azeri frufra hu'ne. **28** Ra Anumzamo'ma maka kema Mosesema nesamino, avame'zantmima huvenerino, ana avame zantmima omeri fore huo huno'ma hunte'nea kante anteno, ana maka kene avame'zanena Aronina asami'ne. **29** Anante Mosese'ene Aronikea vuke maka Israeli vahe'mokizmi kva vahetmina ome zamazeri atru hu'na'e. **30** Anante Aroni'a

Ra Anumzamo'ma Mosesema asmi'nea kea ana maka Israeli
vahe'mokizmi nezmasamino, avame'zantamina zamavurera
erifore hu'ne. **31** Israeli vahe'mo'za zamentinti nehu'za, Isipima
zamazeri havizama hu'naza zama Anumzamo antahino keno'ma
hu'nea nanekema Aroni'ma zamasamige'za nentahi'za, Israeli
vahe'mo'za kepri hu'za Anumzamofo mono hunte'naze.

5 Henka Mosese'ene Aronikea Feronte vuke amanage huke
ome asmi'na'e, Ra Anumzana Israeli vahe'mokizmi Anumzamo'a
amanage nehie, zmatrege'za vahe'ni'amo'za vu'za kama mopafi
ranagima nami ne'za ome retro hu'za neho. **2** Hianagi Fero'a
ke'nona huno, Ra Anumzana i'za mani'nesigu ke'a antahi'na
Israeli vahera zamatresnuge'za vugahaze? Nagra Ra Anumzana
ke'na antahi'na osu'noanki'na, nagra Israeli vahera zmatresuge'za
ovugahaze! **3** Mosese'ene Aronikea huke, Hibru vahe'mofo
Anumzamo eme tagrite eama huno, ka'ma kopi 3'a zagegnafi
kana vuta, kresramna Ra Anumzantia hunteho hu'ne. Hanki
anama osanunkeno'a knazantetiro, kazintetiro tahe frigahie. **4**
Hianagi Isipi kinimo'a, ete kenona huznanteno, Na'ante Israeli
vahe'mokizmia eri'za zmifintira zmavre rurega atre'za neha'e?
Eteta eri'zantaniare vi'o! **5** Mago'ane Fero'a huno, ke'o, ama
Israeli vahe'mo'za rama'a nehzageta, tanagra eri'za zmifinti
zmaretre'za neha'e. **6** Fero'a ana zagefinke kazokzo eri'za
vahe'mokizmi Isipi kva vahe'ene, eri'za kva hu'naza Israeli vahera
zamasmino, **7** trazamofo rampa'a zamizage'zama mohanema
eri havia hu'ne'za heru'za briki'ma tro nehaza zana mago'ane
ozmiho, hagi zmatrenke'za trazamofo rampa'a, zamagra'a ome
eritru hu'za eri'za eho. **8** Hianagi korapara nama'a briki tro
hutere nehaze, e'i ana kanteke tro hutere hugahaze. Hagi
hinke'za erami'za osi'a trora osiho. Na'ankure zamagra feru

vahe mani'nazagu, tatregeta vuta Anumzamofona ofa ome kresramna vuntamaneno hu'za krafa nehaze. **9** Ama ana vahera mago'ane knama hu'neni'a eri'za zaminke'za eneri'za, ama havige kemofona ontahiho! **10** Kazokzo eri'za vahe'mokizmi kva ne, erizante vugagota hu'naza vahe'mo'za, Israeli vahete vu'za amanage hu'za zamasami'naze, Fero'a amanage huno hu'ne, Nagra magore hu'na trazamofo rampa'a ontamigahue.

11 Tamagra'a vuta inantegatiro trazamofo rampa'a ome haketa eriho. Hianagi korapa'ma tro'ma nehaza avamenteke brikia tro hinkeno brikimofo nampamo'a evuoramino. **12** Ana higeno Israeli vahe'mo'za ana maka Isipi mopa'afina briki'ma tro'ma hu'zana traza rampa eri atru hanagu, vu'za e'za hu'naze. **13** Kazokzo eri'za vahe'mokizmi kva vahe'mo'za, hu tutu huzmante'za, trazamofo rampama neramunketama mago zagefima eneriza avamente eri'zana eriho. **14** Isipi kva vahe'mo'za, Israeli eri'za kva vahete vu'za ome nezmahe'za anage hu'naze, nahigeta okine meninena ko'ma tro'ma nehaza avamentera brikia trora osu'naze? **15** Israeli eri'za kva vahe'mo'za Feronte vu'za krafage ome nehu'za, nahigenka eri'za vahekamota amanahu kavu kvara hunerantane?

16 Hanki eri'za vahekamota trazamofo rampa'a ontami'ne'za, brikia tro hihohuvava hunerantaze. Hanki ko, eri'za vahekamota sefu neramizanagi, hazenkea kagrika'a vahepi me'ne. **17** Hianagi Fero'a anage huno kenona huzmante'ne, Tamagra tusi'a tamavresrage vahere! E'ina hu'negu tamagra hutma, taternketa vuta Ra Anumzamofontera ome kresramna vuntamneno hutma nehaze. **18** Eteta eri'zantamirega ko viho. Magore hu'za trazamofo rampa'a ontamigosazanki, nama'a briki'ma troma huterema nehaze avamenteke maka brikia tro hugahaze. **19** Eri'zante'ma ugagota hu'naza Israeli kva vahe'mo'zama antahizageno,

magoke magoke knare'ma tro'ma nehzankna avamente brikia
tro hugahaze hige'za, hazenkefi manune hu'za hu'naze. **20**
Feroma atre'za nevu'za, Mosese'ene Aronikea zmavega anteke
oti'nake'za ome nezanage'za, **21** anante amanage hu'za
ome znamsmi'na'e, Ra Anumzamo neranegeno tanagrama ha'a
avu'ava zanterea kea huno refko huranantesie. Na'ankure tanagra
Fero avufine eri'za vahe'amokizmi zamavufina, tazeri himna
nevuta tazeri haviza huta, tahe frihogu zamazampi kazinkano
erinteankna hu'na'e. **22** Moses'e'a ete Ra Anumzamofonte
vuno amanage ome hu'ne, Ra Anumzamoka, na'a higenka
Israeli vahera hazenkefina zmavrentane? Na'a higenka vuo
hunka hunantanke'na e'noe? **23** Hanki Feronte'ma umahanati'na
Kagri kagima he'na kema humanantana kema huanknareti'ma
e'neana, agra Israeli vahera rama'a hazenkea zami'neanagi,
Kagra magore hunka ana knazampintira zamaza osu'nane.

6 Anante Ra Anumzamo'a anage huno Mosesena asmi'ne,
Kagra menina na'ano Feroma huntensua zana kegahane. Nagra
hankaveni'areti atufenugeno, Fero'a hankavetino hunezmanteno,
maka mopa'afinti'enena zamahenatisige'za vugahaze. **2**
Mago'ane Anumzamo'a Mosesena amanage huno asmi'ne,
Nagrake Ra Anumzana mani'noe. **3** Nagra Abrahamune Aisakine
Jekopukizmi zamavure'ma efore'ma hu'hoa hanavenentake
Anumzane, hianagi nagj'a Ra Anumzane hu'ha ozamasmi'noe.
4 Hanki zamagra ruregati vahekna hu'za Kenani mani'nazage'na,
Nagra huvempa ke huhagerafina Kenani mopa zamigahue
hu'na hu'noe. **5** Mago'ane Isipi vahe'mo'ma Israeli vahe'ma
kazokzo eri'zampi zmante'nazage'za kragi'ma neru'za krafrage'ma
nehzama'a nentahi'na huvempa hu'na huhagerafi'noa kegu
nagesa antahi'noe. **6** E'ina hu'negu amanage hunka Israeli

vahera ome zmasmio, Nagra Ra Anumzanki'na, Isipi vahe'mo'za kazokzo eri'zama tamigeta e'nerizafintira, Nagra'a nazana rusute'na rama'a hanave knazana Isipi vahera nezami'na, keaga huzmante'na Israeli vahera ete'na zamavaregahue. 7 Nagri vaheni'a mani'haze hu'na neramavrena, Nagra tamagri Anumza manisugeta, Isipi vahe'mofo kazokzo eri'za vahe mani'nonkeno tavreno atirami'nea Ra Anumzane hutma antahigahaze. 8 Nagra Abrahamu'ma Aisaki'ma Jekopuma zamigahue hu'na huvempama huzmante'noa mopare tamavre'na vugahue. Nagra ana mopa tamisugenno tamagri zane huno megahie. Nagra Ra Anumzamo'na hue! 9 Mosese'a ama ana kea Israeli vahe zmasmi'neanagi, kema hiana ontahi'naze. Na'ankure Isipi vahe'mo'za tutu huzmantage'zama hanavenentake kazokzo eri'zama eri'naza zamo antahintahi zmimofona ahe haviza hige'za ontahi'naze. 10 Ana higeno Ra Anumzamo'a Mosesena anage huno asami'ne, 11 Vunka Isipi kini ne' Ferona ome asamigeno, Israeli vahera agra zmatrenke'za mopa'afintira viho. 12 Hianagi kenona'a Moses'a Ra Anumzamofona anage huno asami'ne, Israeli vahe'mo'za kema hu'noa kea ontahi'nazanki, inankna huno Fero'a ke'ni'a antahi namigahie? Nagra kea hugara osu'noe. 13 Hianagi Ra Anumzamo'a Mosesene Aronigiznia ke huno, Isipi kini ne' Fero kvafintira, Israeli vahera zmavre'za Isipi mopa atre'za vnagu hanave ke huzanante'ne. 14 Ama'i Israeli naga nofi'mofonte ugagota hu'naza naga'mokizmi zmagi'e. Rubeni'a Israelina (Jekopu) kota mofavre'agino, Hanoku'ma Paru'ma Hesroni'ma Kami'ma, huno kasezmante'ne. 15 Hagi Simioni'a Keneni a'ma erino kasezmante'nea mofavre'rmina, e'i Jemueli'ma Jamini'ma Ohati'ma Jekini'ma Johari'ma Sauri'e. Zamagra Simioni naganofire hu'za mani'naze. 16 Hagi ama'i

Livae'ma kasezmante'nea naga nofi'mofo zamagi'e, Gesoni'ma Kohati'ma Merari'e. Livae'a 137ni'a kafu mani'ne. **17** Hagi Gesoni'ma kasezanante'nea mofavremokiznia znagi'a, Libini'ene Simeikegi'ne zanagra naga nofi zanirera ugagota hu'na'e. **18** Hagi Kohati ne'mofavreramimofo zamagi'a, Amrami'ma Izhari'ma Hebron'i'ma Uzieli'e. Hagi Kohati'a 133'a kafuzage mani'ne. **19** Merari ne' mofavre'mokizni znagi'a, Mali'ene Musike. Ama'i Livae naga nofi'mofo zmagi'a kasezmante'nereti agafa huno meno e'ne. **20** Amrami'a nefana nesaro Jokebetina ara erigeno, Aronine Mosesene kasezanante'ne. Amrami'a 137ni'a kafu mani'ne. **21** Hagi Izhari mofavreramina, Kora'ma Nefegi'ma Zikri'e. **22** Uzieli ne' mofavremokizmi zamagi'a, Misaeli'ma, Elzafani'ma Sitri'e. **23** Aroni'a Aminatapu mofa Erisebana Nasoni nesarona a' erigeno, Natapuma Abihuma Eriasama Itamama huno kasezmante'ne. **24** Kora ne' mofavremokizmi zamagi'a, Asiri'ma Erkana'ma Abiasavi'e. Zamagra Kora naga nofi mani'naze. **25** Aroni nemofo Eleaza'a Putieri mofa'nefinti mago mofa ara erino Finiasina kasente'ne. E'i naga'mokizmimpinti Livae nagara efore hu'naze. **26** Hagi ama ana Aroni'ne Mosesegizni Ra Anumzamo'a zinasmino, Israeli vahera Isipi mopafintira nagatenofite zmavreta atirami'o huno huzanante'nea ne'trene. **27** E'i ana ne'tremoke Israeli vahera Isipi mopafintira zamavareke atiraminaku, Isipi kini ne' Ferontera vu'ne ome keaga hu'na'e. **28** Hagi Ra Anumzamo'ma Isipi mopafima Mosesema kema asami'nea knafina, **29** amanage huno Ra Anumzamo'a Mosesena asmi'ne, Nagra Ra Anumzane, Isipi kini ne' Ferona maka amama kasamua kea ome asmio. **30** Hianagi Mosese'a Ra Anumzamofo avufi amanage hu'ne, Antahio, nagra kema hu'arera knarera osu'noankino, inankna huno Fero'a ken'i'a antahigahie?

7 Ana hutegeno Ra Anumzamo'a amanage huno Mosesena
asm'i'ne, Antahio, Nagra Fero avurera kazeri Anumzankna
hanugen, negafu Aroni'a kasnampa neka'a manigahie. **2** Ana
maka ke'ma Nagrama huoma hu'na hugantoa kea nehugeno,
Israeli vahe'ma Fero'ma zamatresnige'za mopa'afinti'ma atre'za
vanaza kea negafu Aroni'a kini nera asamino. **3** Hianagi
Nagra Fero antahintahia eri hanaveti'nugeno tamatrengita
novanage'na, ruzahu ruzahu kaguvazane avame zani'anena Isipi
mopafina erifore hugahue. **4** Hagi Fero'a keka'a ontahigahanki'na,
Nagra nazana rusute'na Isipi moparera ranra knazanteti
kegaga hunezmantena, Nagra Israeli vahe'ni'a zamavare'na
atiramigahue. **5** Nagra nazama rusute'na Isipi vahe'ma ha'ma
renezmante'na, Israeli vahe'ma amuno zmifinti'ma zmavre'na
atiramisuge'za, Isipi vahe'mo'za Ra Anumzamo'e hu'za ke'za
antahi'za hugahaze. **6** Mosese'ene Aronikea Ra Anumzamo'ma
hi'oma huno znamsmi'neaza hu'na'e. **7** Mosese'a 80'a kafu higeno,
Aroni'a 83'a kafu hu'neke Ferontera kea ome hu'na'e. **8** Anante
Anumzamo'a Mosesene Aronigizni amanage huno znamsmi'ne,
9 Fero'ma kaguvaza erifore hi'oma hanigetna'a, Aronina
asmigeno azompa'a matevuno mopafi Fero avuga atrenkeno,
ana azompamo'a osifave efore hino. **10** Mosese'ene Aronikea
Feronte vuke Ra Anumzamo'ma znamsmi'nea kante anteke
anazana hu'na'e. Aroni'a azompa Ferone eri'za vahe'amokizmi
zamavuga atregeno, ana azompamo'a osifave fore hu'ne. **11**
Higeno Fero'a agranena antahi'zane vahe'ene avotaga vahe'ene
Isipi kumapi kaguvaza erifore nehaza vahe'ene zamagi hige'za,
zamagranena ana zanke hu'za oku'a tro hu'za ante'ne'za
vahe'ma rezmatagama nehaza zantaminuti Aroni'ma hiaza
hu'naze. **12** Mago magomo'za azompazmia matevu mopafi

atrazageno, ana azompa zmimo'za osifavermi fore hazanagi,
Aroni azompamo'a ana osivafermina zmasgahu nakri'ne. **13**
Hianagi Fero antahintahimo'a hanavetigeno, Ra Anumzamo'ma
hu'nea kea ontahi'ne. **14** Hagi anante Ra Anumzamo'a Mosesena
asmino, Fero antahintahimo'a hanavetigeno kea antahino Israeli
vahera zmatrege'za ovu'naze. **15** Hagi oki nanterama Fero'ma
tintegama enevanire, osifavema fore hu'nea azompa kzampi
eri'enka Naeli tinkenare Ferona ome kenka, **16** amanage hunka
asmio, Ra Anumza, Hibru vahe'mofo Anumzamo kagrikura
amanage hunka ome asamio huno hu'ne. Vahe'n'i'a zmatrege'za
vu'za ka'ma mopafi monora ome hunanteho hu'ne. Hianagi kagra
eseteti'ma eno meninena ke'a ontahinka zmatranke'za ovu'naze.
17 E'na hanku Ra Anumzamo'a amanage hu'ne, amazama hanua
zamo hinkenka, Nagrikura Ra Anumzane hunka antahigahane.
Hagi nazampima azeri'noa azompanu, Naeli tina amasgisnugeno
timo'a kora fore hugahie. **18** Hagi Naeli timpima mani'naza
nozamemo'za frisnageno, ana timo'a hinimna vanige'za, Isipi
vahe'mo'za ana tina onegahaze. **19** Anante Ra Anumzamo'a
Mosesena asamino, Aronina amanage hunka asmio, azompaka'a
erinka kazana rusutenka Isipi tintega nentenka, mika ranra
tinte'ene, ne'one tintamintera kazana rusutegeno, timo'za kora
fore nehina, kerifima mare'ne'nia timo'ene, zafare kavofine
havere kavofinema me'neni'a timo'enena ana zanke huno
koranke hino. **20** Mosese'ene Aronikea Anumzamo hi'oma
huno huzanante'nea zana hu'na'e. Aroni'a azompa'a erisga
huno Fero avufine eri'za vahe'amokizmi zamufine, Naeli tina
amasgigeno, ana maka timo'a kora fore higeno, **21** ana timpima
mani'naza nozamemo'za frizageno, timo'a havizantfa huno
hinimana vige'za Isipi vahe'mo'za tina onazageno, ana maka

Isipi mopafima koramoke'za huvagare'ne. **22** Ana hianagi Isipi kumapi kaguvaza erifore nehaza vahe'mo'za, oku'a tro hu'za antene'za vahe'ma rezmatagama nehaza zantminuti Aroni'ene Moseseke'ma erifore ha'a kaguvazana, zm agranena ana zanke hu'za eri'fore hu'naze. E'i anama hazageno Ra Anumzamo'ma hu'nea kante Ferona antahintahi'amo'a hankvetigeno, ke'znia ontahino zmatrege'za ovu'naze. **23** Fero'a ana zantmima fore hiazankura ontahino, atreno rukrehe huno noma'rega vu'ne. **24** E'ina hige'za maka Isipi vahe'mo'za Naeli timpintira tina one'za tima nesagu Naeli ti ankenarega keria kafi'za tinkura hake'naze. **25** Hagi Ra Anumzamo'ma Naeli tirama amasagigeno, korama fore huteretira 7ni'a zagegna evu'ne.

8 Anante Ra Anumzamo'a Mosesena asmino, Feronte vunka amanage hunka ome asamio, Ra Anumzamo'a amanage hie, zamatrege'za vahe'nimo'za vu'za, monora ome hunanteho hu'ne hunka ome huo! **2** Hagi kagrama zamatresnanke'zama ovanage'ha maka Isipi mopatamifina, Nagra hogatmi huntanenke'za Isipi mopatamifina avite'za eri haviza hugahaze. **3** Naeli timpina hogamoke'za hugahaze. Ana hogamo'za timpintira atirami'za nonka'afi unefre'za nemsanpinkanena unefre'za nemsana sipaka'are enena umaneri'za nemaniza, eri'za vahe ka'amokizmi nompinena umaneneri'za vahe ka'amokizmi zmufgaregane umreneri'za, avenifinena unefre'za, witima krenaku'ma heneraza zompa'ramimpinena ufregahaze. **4** Ana hanigeno hogamo'za kagri kagofetu takaunere'za, eri'za vahekamofonera takau regahaze. **5** Anante Ra Anumzamo'a Mosesena asmino, amanage hunka Aronina asmio, tira tintamimofone karaho tintmimofone tinkeriramimofo agofetu azompa ka'a kazampi erinka rusutegeno, hogatmimo'za

emarer'i'za Isipi mopafina avitegahaze. **6** Anage higeno, Aroni'a Isipi tintamimofo agofetu azana rusutentere huno evigeno, Isipi mopafina hogatmimo'za tintamimpinti emrer'i'za avite'naze. **7** Hianagi Isipi kumapi kaguvazama nehaza vahemo'zanena, oku zama ante'ne'za vahe'ma rezmatga nehaza zantminuti, ana zanke hazage'za Isipi mopafina hogatmimo'za fore hu'za emrer'i'za. **8** Anante Fero'a Mosesene Aronigizni znagi huno amanage huno znasami'ne, Nunamu huta Ra Anumzamofona antahigekeno, noniafinti'ene vahe'niamokizmi nompintira, hogatamina Anumzamo'a zmavretrenke'na, Israeli vahera zmatranenke'za vu'za Ra Anumzamofonte ome Kresramana vugahaze. **9** Mosese'a amanage huno Ferona asami'ne, Kagra kna antege'na Ra Anumzamofontega nunamuna hanugen, nonka'afinti'ene eri'za vahe ka'amokizmi nompinti'ene vahe ka'amofo nompintira, ana hogatamina zamahe fanane nehuno, Naeli timpima mani'naza hogataminke zmatrenige'za manigahaze. **10** Fero'a okine higeno, Mosese'a amanage huno asmi'ne, kema hana kante anteno fore hanigenka, mago anumzamo'a tagri Ra Anumzanknara osu'ne hunka antahigahane. **11** Ana maka hogamo'za kagriteti'ene, nonka'afinti'ene, eri'za vahe ka'afinti'ene, vahe ka'afinti'enena omanisageno, Naeli timpinke manigahaze. **12** Ananteti Mosese'ene Aronikea Feroma atreke vute kea, hogama huntogeno Feroma azeri havizama hu'nea zanku, Mosese'a hanavetino Ra Anumzamofona antahige'ne. **13** Hagi Mosese'ma nunamuma huno antahigea kante anteno, Ra Anumzamo'a ana higeno, hogamo'za nontmimpinti'ene kumapinti'ene hozafinti'enena mika fri vagare'naze. **14** Ana hige'za Isipi vahe'mo'za kevure kevure ana hogatamina zogitru hazageza, kasri'za mika Isipi mopafina hinimna vu'naze. **15**

Hianagi Fero'ma kegeno hogatamimofo knazama evigeno'a,
Ra Anumzamo'ma Agrama hu'nea kante anteno, Ferona
antahintahi'a azeri hanavetigeno, Mosesene Aronigizni kea
ontahi'ne. **16** Anante Ra Anumzamo'a Mosesena asmino,
Aronina amanage hunka asmio, azompaka'a erinka kugusopa
amasagigeno, maka Isipi mopafina ana kugusopamo'a umpe
umpetmi fore hino hunka asamio. **17** Mosese'ene Aronikea
Ra Anumzamo'ma znamiaza hu'na'e. Aroni'a azompa'a erino
kugusopa amasagigeno umpe umpetmi ana kugusopamo'a
fore huno, vahe zamufgare'ene vahe'mo'ma kvama nehia
zagaraminte'ene maka Isipi kuma'afi mani'naza zagaramimofo
zmufgare'enena mani'naze. **18** Isipi kumapi kaguvara erifore
nehaza, oku'a tro hu'za antene'za vahe rezmatga nehaza zanteti,
ana zanke hu'za umpe umpe eri fore hunaku hu'nazanagi, erifore
hugara osazageno, umpe umpetmimo'za vahe zmufgare'ene
kegavama nehaza zagaramimofo zamufgarega mani'naze. **19**
Kaguvara erifore nehaza vahe'mo'za Ferona amanage hu'za
asm'i'naze, Anumzamofo azamo ama zana hunerante, hu'za
hazanagi Anumzamo hu'nea kante Ferona anthintahi'amo'a
hanavetigeno antahi ozami'ne. **20** Anante Ra Anumzamo'a
Mosesena asmino, Nanterame otinka Fero'ma tintegama
enevanire avure ome otinka amanage hunka asmio, Ra
Anumzamo'a huno zmatrege'za vahe'niamo'za vu'za, monora
ome hunanteho hunka asamio. **21** Hagi kagrama vahe'ni'ama
zmatresnanke'za ovanazana antahio, Nagra kagrite'ene, eri'za
vahe ka'are'ene, vahe ka'are'ene nonka'armimpine, Isipi vahe
nontamimpine, mopafinena ana zanke hu'za kosintamina
hunta'nena mani avitegahaze. **22** Hianagi Nagra Goseni
mopafima vahe'nima mani'naza kumara atresugenno ana

kosimo'za omanigahaze. E'ina hanugenka kagra kenka antahinka hananana, Ra Anumzamo ama mopa kegava hu'neno makazana nehie hunka antahigahane **23** Hagi mago avame'zanu vahe ka'ane, vahe'niamokizmi amuno zmifina, ante'na refko okina hugahue. **24** Hagi Ra Anumzamo'a kema hu'neaza higeno, kosintmimo'za Fero nompine, eri'za vahe'amofo nontmimpina tusi'za hu'za vazipanini hu'za kizakiza hu'naze. Ana maka Izipi mopamofona kosimoke'za higeno havizantfa hu'ne. Na'ankure ana maka mopafina kosintmimo'za vazipanini hu'za kizaki'za hu'naze. **25** Fero'a Mosesene Aronigizni zanagi huno anage huno znasm'i'ne, Isipi mopa'afi vutma Anumzantmimofontega ome Kresramana vunteho. **26** Hianagi Mosese'a asmino, e'inama hanunana knarera osugahie. Na'ankure Isipi vahe'mofo zmavurera zmagoteno zmavresra haniaza hugahunankino, have knonu tahe frigahaze. **27** Hagi Ra Anumzanti'mo hurante'nea kante anteta tagufa zagegna, ka'ma moparega vuta kre sramana vuntegahune. **28** Higeno Fero'a huno, Tamatranenketa ka'ma mopafi vuta Ra Anumzamofontera ome kresramna vuntegahazanagi, afetera ovutma, tavaonte nevutma nagrikura nunamu hutma antahigenkeno naza hino. **29** Mosese'a amanage hu'ne, kagritetira ufegu'a nevanu'na, Ra Anumzamofonte nunamu hane'na kagri'ene eri'za vahe'kane, vahekafintira kosina hunte'na okina omanigahaze. Hanki reravatga hunka Ra Anumzamofona ome kresramna vunteho hunka osuo. **30** Hagi Mosese'a Ferona atreno vuno Ra Anumzamofonte ome nunamu higeno, **31** Mosese'ma antahi'geaza huno, Ra Anumzamo'a Feronteti'ene eri'za vahe'areti'ene vahe'afintira ana maka kosintamina zamazeri atregeno magore huno omanitfa hu'ne. **32** Hianagi mago'ane

ko'ma hu'neaza huno Fero antahintahia eri hanavetigeno, Israeli
vahera zmatrege'za ovu'naze.

9 Anante Ra Anumzamo'a Mosesena asmino, Feronte vunka
amanage hunka ome asamio, Ra Anumzana Hibru vahe'mokizmi
Anumzamo amanage hie, zmatrege'za vahe'niamo'za vu'za,
monora ome hunanteho hu'ne. **2** Hagi kagrama huo zmantenkama
kazigazi hunkama zamazeri sanana, **3** antahi'o, Ra Anumzamofo
aza'mo'a tusi knazanteti, hosi afu'tamine tonki afu'tamine,
kemori afu'tamine kao afu'tamine meme afu'tamine sipisipi
afu'tminka'a zamazeri havi'za hugahie. **4** Hianagi Israeli
vahe'mokizmi sipisipiraminte'ene meme afutmimofone, Isipi
vahe'mokizmi afutamimofo amu'nompina mago avame'zama eri
fore'ma hanuana, Israeli vahe'mokizmi afu tamimo'za magore
hu'za ofrigahaze. **5** Ra Anumzamo'a e'i ana zama hania
kna huhamprinteno anage hu'ne, oki ana zana Isipi mopafina
hugahue. **6** Kema hu'nea kante, anteno, ana knarer Ra
Anumzamo'a anzana higeno, maka Isipi vahe'mokizmi afu
kevumo'za fri'nazanagi, Israeli vahe'mokizmi afu kevumo'za
magore hu'za ofri'naze. **7** Fero'a vahe'a huzmantege'za vu'za
ome kazana, magore huno Israeli vahe'mokizmi afu kevumo'za
ofri'nazanagi, Fero antahintahimo'a hanavetigeno zmatrege'za
ovu'naze. **8** Anante Ra Anumzamo'a Mosesene Aronigiznia
anage huno znsami'ne, Brikima kre teve tampinti tanefara
ome kateta, Fero'a negenkeno ana tanefara Mosese'a matevu
nagamu atreno. **9** Ana tanefamo'a mika Isipi mopa'afina
kugusopage fore huno, Isipi vahete'ene agigu'agigu afu'zagamofo
z mavufarera usge namu propru huno Isipi mopafina zamazeri
haviza hugahie. **10** Higeke zanagra brikima kre tampinti tanefa
kateke, Fero avure vuke, Mosese'a ana tanefara matevu

anagamu atregeno, Isipi vahe'ene agigu'agigu afuzmimofo zmufarera usage namuntami propru huno fore hu'ne. **11**
Isipi kumate havige kaguvazama nehaza vahe'mo'za Mosese avuga otigara osu'naze. Na'ankure zamagri zmauvfgare'ene, maka Isipi vahe'mokizmi zmauvfgare'enena usagentmi fore huno propru hu'ne **12** Hianagi Ra Anumzamo'ma ko'ma Mosesema asmi'nea kante anteno, Fero antahintahia Agra'a eri hanavetigeno, Mosesene Aroni'gizni kea ontahi'ne. **13** Anante Ra Anumzamo'a Mosesena asmino, Nanterame otinka Fero avure uhanatinka amanage huo, Ra Anumzana Hibru vahe'mokizmi Anumzamo amanage huno hie, vahe'nia zmatrege'za vu'za monora ome hunanteho hu'ne. **14** Anama osnanke'na Nagra menina eri'za vaheka'are'ene, vahekafinena, Nagra tusi'a knaza zami'na zamazeri haviza hanugenka, kagra antahinka kenkama hananana magore huno Nagri kna anumzana, maka mopafina omani'ne hunka antahigahane. **15** Na'ankure ama knare'ma ehanatiana Nagra nazana rusute'na knazanteti tmazeri havizana hugetma ama mopafina omanizasine. **16** Hianagi tamage hu'na ama agafare kagirira katrogenka mani'nane, hihamu hankveni'a kagrite eri'ama nehanugeno, maka mopafi vahe'mo'za nege'za Nagri Nagi'a huama hugahaze. **17** Kagra kazikzi hunka kagi'a erisga nehunka, vahe'ni'a ha' rezmantenka zmatranke'za novaze. **18** E'ina hanku antahio, okina ama ana knarera, Isipi kuma'ma fore huno meno menima e'neregatira oru'nea kna ko'mopa ko huntalnenkeno rugahie. **19** Ana hu'negu menina ame hunka huzmanteg'e'za sipisipine meme afu zagaka'ane fegu'ama kegavama nehanana zagaraminka'a ana maka zmavre nomofo agu'a zmanteho, na'ankure ko'mopa ko aruno fegu'ama mani'nesnaza vahe'ene sipisipine meme

afutamina zamahe frigahie. **20** Fero eri'za vahe'mo'za Ra Anumzamofo kegu'ma kore'ma hzamo'za, ame hu'za vu'za kazokzo eri'za vahe'zmine, sipisipine meme afu zminena z mavre nogu'a zmante'naze. **21** Hianagi Ra Anumzamofo kema nentahi'za zmefi'ma humi'za eri'za vahe'mo'za kazokzo eri'za vahe'zmine sipisipine meme afu'zmia zmatrage'za fegu'a mani'naze. **22** Anante Ra Anumzamo'a Mosesena asmino, Kazana rusute anagamu atregeno, vahete'ene zagagafare ene, ana maka Isipi hozaramipi hageno mane'nesnia zantera ko'mopa kora herafiramino runteno. **23** Mosese'a azompa'ama rusute nagamu atregeno'a, Ra Anumzamo atregeno monagea nehuno, ko'mopa kora herfineramigeno, kopsinamo'enena evuramino mika mopafina ru'ne. E'na huno Ra Anumzamo'a atregeno ko'mopa kora Isipi mopa'afina ru'ne. **24** Hagi Ko'mopa komo'ene herfi'neramigeno tusi kopsina eri'ne. Isipi kuma'ma fore huno e'neretira e'inahu ko'mopa kora oru'neankna ko ru'ne. **25** Ana maka Isipi mopa'afina ko'mopa komo'a, vahete ene zagagafanena, zamahe haviza nehuno, hozaramimpima nehagea zantamina, ana maka zamahe haviza nehuno zafaramina rukrara krarupe atre'ne. **26** Magoke kumatfama ko'mopa ko'mo'ma ruonte'neana, Goseni mopafi Israeli vahe'mo'zama nemaniza kumate ruonte'ne. **27** Anante Fero'a Mosesene Aronikizni ke higeke vakeno amanage huno z nasmi'ne, Menina hago nagra kumi hu'noe. Na'ankure Ra Anumzana Agrake fatgo hu'ne. Nagrane vahe'nianena kefo avu'ava nehuna vahe mani'none. **28** Hagi Ra Anumzamofontega nunamu ome hikeno, ko'mopa ko'ene monagenena eri amane hinke'na tamatra'nena viho. **29** Mosese'a kenona huno, Kumapinti'ma ufegu'ama nevanu'ha Ra Anumzamofonte nazana erintesaga hu'na nunamuna hanugeno,

monagema nehiazana vagarenkeno ko'mopago'ma neria ko'mo'a rusenkenka, maka mopa Ra Anumzamofo mope hunka antahigahane. **30** Hianagi nagra antahinoe, kagrane eri'za vahe ka'anena Ra Anumzamofonkura korora hunontaze. **31** Hagi e'i ana knafina (flax) kafinamo'ene balimo'enena, havizantfa hu'ne. Na'ankure bali ragamo'za ko' uzate'hazageno kafinamo'a amosre ahe'naze. **32** Hianagi witine speltie nehaza zamo'za havizana osu'naze. **33** Anante Mosese'a Ferona atreno ra kumamofo fegu'a vuno, Ra Anumzamofontega azantrena omeri antesga higeno, monagemo'a vagaregeno, ko'mopa komo'enena ruse'ne. **34** Fero'ma kegeno monagene ko'mopa ko'enema rusegeno'a, Agrane eri'za vahe'amo'za antahintahizmimo'a hanavetigeno Fero'a mago'ane kumi hu'ne. **35** Ra Anumzamo'ma Mosese agipima huvezino hu'nea kante anteno, Fero antahi'zamo'a hanavetigeno Israeli vahera zmatrege'za ovu'naze.

10 Ra Anumzamo'a Mosesena asmino, Menina Feronte vuo, amama zamagri amu'nompima erifore nehua avame zantmi kesazegu agri antahintahizane eri'za vahe'amokizmi antahintahizana zamazeri hankveti'noe. **2** E'ina hu'nesnugeta kamohe'mofone kagehe'mofonena zamasmige'za nentahi'za, Nagrama Izipi mopafi vahe'ma zamazeri zmazanava nehu'na avame zantamima amu'nozmifima erifore hu'noazana nezamasmita, Nagrikura Ra Anumza mani'he huta keta antahita hugahaze. **3** Mosese'ene Aronikea Feronte vuke amanage huke ome asmi'na'e, Ra Anumzana Hibru vahe'mokizmi Anumzamo'a amanage huno hie, nama'a zupa Nagri navufina kagra kavufga anteraminha nomanine? Zmatrege'za vahe'ni'amo'za vu'za, monora ome hunanteho. **4** Hagi kagrama ke'nia ontahinka Nagri vahe'ma zmatresnanke'zama ovanazana, antahio, okina

ana maka mopa ka'afina kenutmi huzmanta'nena efregahaze.

5 E'ina hanuge'za mopamofona ana kenutamo'za maka refite vagaresage'za, vahe'mo'za mopa kegara nosnageno, ana kenutmimo'za ko'mopa ko'mo'ma aru haviza osu'nea zafaramimofo asi'nane, kasefa'ma hagesia zafa ramina zamagra nevagaregahaze. 6 Ana kenutmimo'za nonka'armimpine, ana maka eri'za vahe ka'amokizmi nontmimpine, ana maka Isipi vahe'mokizmi nontmimpinena mani avitegahaze. E'inahu zana kagehe'mofonteti eno kafahemofonte eno'ma menima kagrite'ma e'neana, ama mopafina fore hige'za onke'nazaza fore hugahie. Anage nehuno Moses'a rukrahe huno Ferona atreno fegu'a vu'he. 7 Anante Fero eri'za vahe'amo'za amanage hu'za Ferona asmi'naze, Nama'a zupa Mosesena atrankeno mago karifugna huno mani'ne. Zmatrege'za vu'za Ra Anumzana zamagra'a Anumzamofona monora ome hunteho. Hagi kagra nonkano Isipi mopamo'ma havizama nehiana? 8 Fero'a ke hige'za Mosesene Aroni'giznia ete znavre'za agrite azageno amanage huno znam'i'ne, vuta Ra Anumzana tamagra'a Anumzamofona monora ome huntehol! Hianagi iza'za vugahaze? 9 Moses'a kenona'a huno, Kasefa vahe'ene tavava ozafane, ne' mofavrermine, mofa'neramine sipisipine meme afutamina zamavare vagareta vugahune. Na'ankure Ra Anumzamofontega ne'za ome kreta neneta monora huntiegahune. 10 Anante Fero'a amanage huno znam'i'ne, Tamatre'snugetama a'mofavretamine vanazana, Ra Anumzamoma kegavama huramantesigu kesue. Hanki tamagra kefo antahintahi retro nehaze. 11 E'inara osugahazanki, tamagri'ma tamavesia kante anteta vene'nemotage vutma Ra Anumzamofona monora ome huntiegahaze. Hutege'za Fero avuretira eri'za vahe'amo'za znatufe'za fegu'a eme znat're'naze.

12 Anante Ra Anumzamo'a Mosesena asmi'ne, Isipi mopafina kazana rusutegeno kenutmimo'za e'za ko' mopa ko'mo'ma ru havizama nehuno atre'nea trazana eme nevagareho. **13** Mosese'a azompa'a erino Isipi mopafina rusutegeno, e'i ana zagefine hanimpina, Ra Anumzamo'a zage hanatitegati zaho retufegeno maka Isipi mopa'afina efregeno nanterama ko'ma tigeno'a, kenutmi zamavreno efre'ne. **14** Ana kenutmimo'za ana maka Isipi mopa'afina emanı avite'naze. Ana kenutmina, hamprigara osu'naze. E'inahu kenutmina kora fore osu'nazanki'za henka'anena fore osugahaze. **15** Na'ankure ana kenumo'za Isipi mopafina mani vitazageno mopamo'a avugosa osuno haninke hu'ne. Hagi ko'mopa ko'mo'ma ahe havizama nehuno atre'nea zafa rgarmine trazantmina ne'za erivagara'zageno magore huno Isipi mopa'afina tra'za aninane zafani'nanena omnetfa hu'ne. **16** Anante Fero'a ame huno Mosesene Aronigizni ke higeke akeno amanage hu'ne, Hago tamagrite'ene Ra Anumzana tamagri Anumzamofontera kumi hu'noe. **17** E'na hunogu keke huanki kumi'ni'a meni mago'ene atrenanteta, Ra Anumzana tamagri Anumzamofontega nunamu hikeno, nahe fri knazampintira naza hino. **18** Higeno Mosese'a Fero nompinti atirmino Anumzamofona ome antahigegeno, **19** Ra Anumzamo'a zage fretegati hankavenentake zaho huntegeno eno, ana maka kenutmina Isipi mopa'afintira eme zmavrehna huno koranke hagerimpi ome zamatrege'za, magore hu'za maka Isipi mopafina omanitfa hu'naze. **20** Hianagi Ra Anumzamo'a Fero antahintahi'a azeri hankvetigeno, Israeli vahera zmatrege'za ovu'naze. **21** Anante Ra Anumzamo'a Mosesena asmino, Kazana rusute anagamu atregeno, Isipi mopafina kumazu hani huno vahe'mo avako huga hanintiri

hino. 22 Higeno Mosese'a azana rusute anagamu atregeno, 3'a zageknafi ana maka Isipi kokampi haninkino, tusi'a hanintiri hu'ne. 23 Isipi vahe'mo'za 3'a zageknafina magore hu'za no zmia atre'za fegu'a vano hu'za zamagra'a zamavufina oge'agea osu'naze. Hianagi Israeli vahe'mo'zama nemanizafina masa me'ne. 24 Anante Fero'a Mosesena ke higeno egeno amanage huno asami'ne, A'mofavretamine avreneta vuta Ra Anumzamofo monora ome huntegahazanagi, sipisipine meme afutamine ruga'a afutamina zmatrenke'za maniho. 25 Hianagi Mosese'a amanage hu'ne, Ra Anumzana tagri Anumzante'ma Kresramanavunte afutamine, tevefima krefnane hu ofa hanuna afutamina tatregeta avreneta vamneno. 26 E'ina hu'negu, maka afu kevuti'a magore huta ozmatreta zmavreha'na huta vugahune. Na'ankure tagra mago'a ana afutamimpintira zmavreta Ra Anumzamofonte monora ome huntegahune. Ina afutami aheta monora huntegahune ontahi'nonankita anante nevuta kegahune. 27 Hianagi Ra Anumzamo'a Ferona antahintahi'a azeri hankvetigeno zmatrege'za ovu'naze. 28 Anante Fero'a Mosesena asamino, Natrenka maniganenka vu! Mago'ane omo. Hagi henkama kagrama eme nagesanana kahe frigahue! 29 Mosese'a amanage hu'ne, Ha tamage hane, mago'anena kavufina eme onkegahue!

11 Anante Ra Anumzamo'a amange huno Mosesena asmi'ne, Nagra mago'ane Ferone Isipi vahe'enena knaza zami'na zamazeri haviza hugahue. Anama hutesugenno Fero'a tamatrenigeta kuma'afintira (kantri) atreta vugahaze. Tamage agra kazigazi huno tamahenatina vugahaze. 2 Hagi maka Israeli vahetamina zmasamige'za, silvareti'ene golireti'ma tro'ma hu'nesaza zantaminkura tava'ozmire nemanisaza Isipi

vahe'mokizmia, vemo'a vemofo antahigenkeno, a'mo'a, amofo
antahigenkeno amitere hino. 3 Hagi Ra Anumzamo'a Isipi
vahera zamarimpa zamazeri otige'za, Israeli vahetamina so'e
zamavu'zamava hunezmantageno, Fero eri'za vahe'amo'zane
Isipi vahe'mo'zanema ke'za antahi'zama hazana, Mosese'a
ra vahe mani'ne hu'za Isipi mopafina antahimi'naze. 4
Higeno Mosese'a amanage huno Ferona asami'ne, Ra
Anumzamo'a amanage hie, meni kenagera Nagra Isipi
vahe'mofo mopafi nevu'na, 5 maka Isipi vahe'mokizmi
zmagonesa mofavre'mokizmia zamahe frigahue. Fero'ma kini
trate'ma mani'nea ne'mofo agonesa ne' mofavrereti uramino,
witima neganaza kazokzo eri'za a'nemokizmi agonesa ne'
mofavreramimo'za fri vaganeresageno, anahukna huno maka
zagagafamofo agonesa anenta'mozanena frigahaze. 6 Anama
hanigeno'a tusi'a zavi maka Isipi mopafina ategahaze. E'inahu
zavira korapara ote'nazankna zavi ategahazanki'za, henkanena
otegahaze. 7 Hianagi Israeli vahepina magore huno agasasana
omnenkeno, kramofo ageru'nazana omanesigeta, tamagra Isipi
vahe'mota keta antahita hanazana Ra Anumzamo'a Israeli
vahera knare huzmanteno, tagripintira zamazeri ruotage hie
hutma hugahaze. 8 Hagi Feroga maka eri'za vahekamo'za e'za
nagrite zmarena eme nere'za anage hugahaze, maka kagri
kazigama mani'naza vahera zmavrenka vuo hanage'na, maka
zmavere'na atirami'na vugahue, nehuno tusi arimpa nehegeno,
Fero avugatira rukrahe huno Mosese'a atiramino vu'ne. 9 Ana
higeno Ra Anumzamo'a anage huno Mosesena asmi'ne, Fero'a
kagri kea ontahigahianki'na, mago'ene Isipi mopafina kaguva
zantamina eri fore hugahue. 10 Mosese'ene Aronikea maka
kaguvazana Fero avuga eri fore hu'na'anagi, Ra Anumzamo'a

Fero antahintahia eri hanavetigeno, Isipi mopafintira Israeli
vahera zmatrege'za ovu'haze.

12 Hagi Ra Anumzamo'a anage huno Mosesene Aronikiznia
Isipi mopafina znasami'he, 2 Tamagritera ama ikamo'a ese ika
eri agafa hiankino, mago kafumofona ese ika megahie. 3 Hagi
maka Israeli vahera anage hutma zmasamaho, ama ikamofo
10ni zupa magoke magoke naga'mofo amente nezmafa'a
sipisipi anenta avretere hino. 4 Hagi osi'a naga'ma mago
nompina manine'za mago sipisipi anenta'ma nehana huga'ma
osu'nesu'za, osi'a naga'ma tava'ozmire nemasaza naga'ene
refko hu'za neho. 5 Anama ahensaza ve sipisipio meme afu
anentamo'a, mago kafuma hu'nesigeno, afuhe afahe osu'nesia
su'za azerigahaze. 6 Hagi zamagra ana afutamina kegavahume
vu'za ama ana ikamofona 14ni knare'ma uhanatinu'za, maka
Israeli vahe'mo'za kinaga zagema unefrea knare ahegahaze.
7 Ana nehu'za ana afu'ma nesaza nozmimofo kantigma kafa
zafarera mago'a korana tagi'za nefre'za, anagamu kaziga kafa
zafarera fregahaze. 8 Zamagra ana kenageke afura tevefi kre'za
aka nasene nene'za, isti onte bretinena negahaze. 9 Hagi
onte'nenia afuro, kavofima kre'nesaza afura onetma, aseni'ane,
agigo'ane agusu agese zama'anena, maka tevefinke kregahaze.
10 Hagi ana afu'ma kreta neneta atresazama'a me'nenkeno masa
osino. Hianagi neneta atre'nazama'a, kora otu'nena tevefinke
kre vagareho. 11 Hagi ana ne'zama nenenutma, amanahu
hutma retrora hiho. Kukenatamia eri atupa nehutma, tamagia
anona nevazita, azompanena tamazampina eri'neta ame'ama
hutma ana ne'zana neho. E'i ana ne'zana Ra Anumzamo'na
ontamahe'na tamagateresua ne'zane. 12 Na'ankure Nagra maka
Isipi mopafi ana kenagera nevu'na, mago'mago nagapintira ese

zamagonesa ne' mofavrea zamahe nefri'na, maka afutamimofo
ese' ve anentara zamahe'noa Ra Anumza mani'noanki'na,
maka havi anumzantamina refko huzmante'na, zamazeri haviza
hugahue. **13** Hagi tamagrama manisaza nontera kafante
fre'naza koramo'a, mago avame'za me'nesige'na, Isipi vahe'ma
zamazeri havizama hu'na enevu'na, ana korama eme kesu'na
knazana tami'na tamazeri havizana osu'na tamagateregahue.
14 Menina magna Ra Anumzamo'na antahinamita, musema
hutma ne'zama nesaza kna me'nena, fore hu anante anante
hu'zama esaza vahe'mo'zanena trake me'nena, ama ana knarera
ne'zana kre'za nene'za musena hunante'za vugahaze. **15**
Hagi 7ni'a knamofo agu'afina zo-ore bretige negahazankita,
ese knazupa nompintira zore bretia eri atregahaze. Na'ankure
ana 7ni'a knamofo agu'afima zore bretima nesimofona, Nagri
vahepintira ahe meg'i a atregahaze. **16** Hagi ese kna zupa atru
hutma monora hunenanteta, nampa 7ni knare'enena monora
hunantegahaze. Ana tarega knarera eri'zana e'origahazanagi,
ne'zama nesaza zanke retrora hugahaze. **17** Hagi istima
onte bretima nenaza knagura antahita musenkase hugahaze.
Na'ankure ama ana knare tamagri Isipiti tamavre'na atirami'noe.
E'ina hu'negu ama ana knagura maka knafina fore hu anante
hunante hu'zama esaza vahe'mo'za tra kegura zmagera okanitfa
hiho. **18** Hagi ese ikamofo 14tini knamofo kinaga, isti onte bretia
agafa hutma nenenkeno vuno ana ikamofona 21ni knare kinaga
uhanatiho. **19** Ana 7ni'a knamofo agu'afina, magore huno zore
bretia nontamifina omaneno. Na'ankure istima ante bretima
Israeli vahepintiro meg'i a vahe'ma tamagranema mani'nesaza
vahepinti'ma nesimofona, vahe'ni'afintira zamahe anati atreho.
20 Tamagra zore bretia onegahaze. Hagi mika nompina zo-ore

bretige neho. **21** Anantero Mosese'a maka Israeli kva vahera zamagi huno anage huno zamasami'ne, Vutma naga tamimofo avamente Anumzamo ozmaheno zamagateresia ne'zama kre sipisipi anentara ome huhampriho. **22** Hagi hisopu zafa azankuna erita zompa fima taginte'naza korampi reteta, kafamofo kantigama zafare nefreta, anagami kaziga zafare'ene nefreta mani'naza nona atreta megi'a oviho. **23** Na'ankure Ra Anumzamo'a kenage'ma Isipi vahe'mokizmi zmahenaku'ma enevanuno'a, ana korama kantigama kafa zafare'ene, anagamu kafa zafare'ma ke'nuno'a, ana nona agatereno nevanigeno, vahe'ma zamahe fri ankeromo'a ana nompi vahera ozmaheno zmagatereno vugahie. **24** Hagi ama avu'avazamo'a mago kasege me'ne'na, tamagrane mofavretamine tamagehe'zanena amanahu avu'ava zana huvava huta vugahaze. **25** Hagi Ra Anumzamo'ma huvempama huno'ma taminaku'ma hu'nea mopafima umanisutma, Ra Anumzamo'ma ontameheno tamagatere'nea zankura ne'zana kretma nenetma muse nehutma tamagesa antahigahaze. **26** Hagi henkama mofavretamimo'zama tamantahige'za, ama ne'zama kretama neneta musema nehunana, na'a agafarere hu'za tamantahigesageta? **27** Tamagra anage huta zmasamiho, Isipi nontifima mani'nonkeno Ra Anumzamo'ma oraheno tagatereno enevuno, Isipi vahe'ma zamahe'negu antahimita musenkase huta nenona ne'zane hiho. Higeno vahe'mo'za antahite'za, mopafi zmare'nare'za Ra Anumzamofona mono hunte'naze. **28** Anante Israeli vahe'mo'za vu'za, Mosesene Aronikiznima Anumzamo'ma hihoma huno znasami'nea kante ante'za ome retrotra hu'naze. **29** Hagi ana kenage amu'nompina, Ra Anumzamo'a maka Isipi mopafi vahe'mofo zmagonesa mofavre'zmine, kini trate'ma mani'nea ne' Fero agonesa mofavrereti vuno, kina nompima

mani'naza vahe'mofo mofavrene, maka afu zagazmimofo ese anentatmintema vu'neana zamahe fri vagare'ne. **30** Hagi Fero'ene maka eri'za vahe'ane, maka Isipi vahe'mo'za ana kenagera oti'za tusi'a zavite'naze. Na'ankure mik a nompina zmagonesa mofavremo'za fri vagare'naze. **31** Ana kenage amu'nompi Fero'a Mosesene Aronikizni ke higeke akeno, Atreta otita vi'o. Vahe'ni'afintira maka Israeli vahera zmavreta kema huna'a kante anteta, Ra Anumzamofona monora ome hunteho. **32** Hagi maka afu'zaga taminena avreta nevutma, asomu kea hunanteho. **33** Hagi Isipi vahe'mo'za Israeli vahera tutu huzmante'za, ru maka vahe'mota frisunki tatareta ama mopafintira atiramita ko viho. **34** Hagi Israeli vahe'mo'za istima onte'naza flaua zompa fima herunte'nazana tavaravefi eri antegafi'za zamafunte erinte'naze. **35** Hagi Israeli vahe'mo'za Mosese'ma zmasami'nea kante ante'za, silvareti'ene golireti'ma tro hu'naza zantaminku'ene kukenagura Isipi vahera zmantahigazageno, **36** Ra Anumzamo'a Isipi vahe'mofo zmavurera Israeli vahera zamazeri knare hige'za, nazankuro ome zmantahima kazazana Isipi vahe'mo'za ana maka zami'naze. Ana hige'za maka Isipi vahe'mofo zana eri vagare'naze. **37** Hagi Israeli vahe'mo'za Ramasese kumara atre'za Sukoti kumate'ma uhanati'nazana, 600 tauseni'a naza vahera vu'naze. Anampina a'nene mofavreraminena ohampri'naze. **38** Hagi Israeli vahekera ovu'nazanki, rama'a ru vahe'ene afu'zagane vu'naze. **39** Israeli vahe'mo'za Isipiti'ma eri'za e'naza flauateti, zo-ore bretia kre'naze. Na'ankure Isipi vahe'mo'za tutu hu'za huzmantage'za, ne'zama retro'ma hukna omanege'za isti onte eri'za e'naza flauateti, zo-ore bretia kre'naze. **40** Hagi Israeli vahe'mo'za Isipima mani'nazana 430'a kafu mani'naze. **41** Hagi 430'a kafuma vagamarea

kna fatgore, Ra Anumzamofo vahe'mo'za Isipi mopa atre'za atirami'naze. **42** Hagi anama Isipitima zamavreno'ma atirami'nea kenagemo'a, Ra Anumzamofo kenage me'enkeno, mika Israeli vahe'mo'zane zamagripinti'ma fore hu anante anante'ma hu'zama vanaza vahe'mo'za, Ra Anumzamofo kenagere nehu'za, ne'zana kre'za nene'za monora huntegahaze. **43** Hagi Ra Anumzamo'a anage huno Mosesene Aronikiznia zanasami'ne, ontamahe'na tamagatere'noa ne'zama ne'knamofo kasegemo'a amana hu'ne, meg'i'a vahe'ma tamagranema emanine'naza vahe'mo'za ana ne'zana onetfa hugahaze. **44** Hianagi maka ve kazokzo vahe'ma mizasetma avre'nesaza vahe'mokizmima z mavufama taga hu'nesaza vahe'mo'za amne negahaze. **45** Hagi meg'i'a vahero, zago eri'zama tamagrite'ma emenerisaza vahe'mo'zanena, ana ne'zana onegahaze. **46** Hagi ana ne'zana ana nompinke neneta mago'a avufga'a eritma meg'i'a atioramige, ana afumofo zaferinanena rufu otagogahaze. **47** Mika Israeli vahe'mo'za ne'zana kre'za nene'za, ana knagura musenkase hugahaze. **48** Hianagi ru vahe'mo'zama tamagranema emani'nenamo'za, Ra Anumzamo'ma ontamahenoma tamagatere'nea knare'ma muse ne'zama nenaku'ma hanu'za, maka vene'nemo'za oku zmufga anoma'a tagahute'za, zamagra tamagrikna hu'za erava'o hugahaze. Hagi zamavufagama taga osu'nesaza vahe'mo'za, ana ne'zana onegahaze. **49** Hianagi meg'i'a vahe'ma tamagranema emani'nesaza vahe'mo'zane Israeli vahe'mo'zanena ana kasegea, amage antegahaze. **50** Anante Ra Anumzamo'ma Mosesene Aronikiznima hihoma huno maka kema z nasami'nea kante ante'za maka Israeli vahe'mo'za ana hu'naze. **51** Ana knazupage Ra Anumzamo'a Israeli vahera Isipi mopafintira nagatenofite, zamavareno atiramino vu'ne.

13 Ra Anumzamo'a Mosesena amanage huno asmi'ne,
2 Israeli vahe'mota mika tmagonesa ne' mofavrene, mika
zagagafa timimo'zama ese anenta'ma kase zmantesiana,
azeri otage hanageno, Nagrike su'za manigahaze. 3
Anante Mosese'a amanage huno veara zamasmi'ne, kazokzo
eri'zama e'nerita kinama hutma Isipi mopare mani'nazareti'ma
atiramita e'naza knagura timageha okaniho. Na'ankure Ra
Anumzamo'ma hanavenentake azanu Isipitira tamavre fegu'a
atre'negu, antahimita zore bretia onegahaze. 4 Ese ikamofona
(Abibie) amana knare tamagra atretma vugahaze. 5 Ra
Anumzamo'ma timagehe'mokizmima huvempa huzmanteno,
amirine, tumerimo'ma avite'nea mopama Kenani vahe'mokizmi
mopane, Hiti vahe'mokizmi mopane, Amori vahe'mopama,
Hivi vahe'mokizmi mopama tamigahuema hu'nea mopare'ma
tamavreno vanigeta, kafugu kafugura ana knagura nentahita
musenkase hoho. 6 Hagi 7ni'a zagemofa agu'afina zo-ore bretige
neta nevinkeno, 7ni knarera uhanatina ne'za trohuta neneta,
Ra Anumzamofona monora huntegahaze. 7 Zo-ore bretia
ana 7ni'a zage knamofo agu'afinke neta vugahaze. Hagi ana
knafina, zisti ante bretia nontimifine, kumapine non tva'ontamirera
ontheo. 8 Hanki kafune kafunena ama ana knarera mofavretimia
amanage hutma zmasmiho, Ra Anumzamo'ma Isipi mopare
kina huta mani'nonkeno tavreno e'nea knagura antahimita
musenkase nehune huta zmasmiho. 9 Ama ana knamo'a
tamazante'ene kokovite'ena avame'za me'nena, tamagera
okanitma tamagesa nentahinkeno, Ra Anumzamofa kasegemo'a
tamagipi meno. Na'ankure Ra Anumzamo'a tusi'a hanavenentake
azanu Isipitira tamavreno atirami'ne. 10 E'ina hu'negu mika
kafune kafune ama knama ne-ena, huhampriteneta ne'za kreta

neneta musenkase hugahaze. **11** Hanki Ra Anumzmo'ma tamagri'ene timagehemokizmi huvempa huno, zamigahue hu'nea Kenani mopare'ma tavreno'ma vanigeta, **12** mika tmagonesa ve mofavreramine, mika'a afu'zagama kegava nehaza afu'mo'zama kasezmantesaza ese' ve anenta'a, Ra Anumzamofo amiho. Na'ankure e'i ana ese anenta'a Ra Anumzamofo su'zane. **13** Hianagi ve sipisipi anenta aheta maka donki afutamimofo ve anentara nona hutma miza hugahaze. Ana'ma hutma mizama osenutma, ana ve donki afura ananke eri vamagita ahegahaze. Maka tmagonesa ve mofavreramina ete miza hugahaze. **14** Hagi mofavretamimo'zama henkama tamantahige'zama amazana nazane hanagetma, kina hu'neta kazokzo eri'zama e'nerunkeno, hanavenentake azanu Ra Anumzamo'a Isipi mopafinti tavreno atirami'ne hutma hugahaze. **15** Hagi Fero'ma tatregetama ovunkeno, Ra Anumzamo'ma Isipi vahe'mokizmi ese zmagonesa mofavreramine, maka afu'zagamofo anentara zamahe'ne. E'ina hu'negu maka ese ve anenta'ma kasentesazana Ra Anumzamofo kresramna vunentonanagi, tagonesa ve mofavretia ete nona huta miza nehune hutma hugahaze. **16** Ana hu'negu mago avame'za tazartera nofi anakinenteta kokovitera anakinenteta, Ra Anumzamo'ma hanavenentake azanu'ma Isipiti'ma tavreno'ma atirami'nea zankura antahimigahune. **17** Hagi Fero'ma Isipiti'ma zmatrege'za vu'nazana, Filistia mopafima vu kana tavaonte me'neanagi, Anumzamo'a zmatrege'za ana kantera ovu'naze. Na'ankure Israeli vhahera ha' huzmantesage'za rukrehe hu'za Isipi e'zanku Anumzamo'a zmatrege'za ovu'naze. **18** E'ina hu'negu ka'ma kokampi koranke hagerima me'nea kantega Anumzamo'a zamavreno kagino vige'za sondia vahe viaza hu'za vu'naze. **19** Hagi ko'ma Josefe'a Israeli nagara zamsamino,

Anumzamo'a Isipitira henka tamavreno vugahiankita zaferinani'a eri'neta vugahaze hige'za huvemapa hunte'nazare, amage anteno Mosese'a zaferina'a erino vu'ne. 20 Anante Sukoti kumara atre'za ka'ma kokamofo atumparega, Etamu seli nona ome ki'naze. 21 Hagi Ra Anumzamo'a hampompi manineno msarera zamavreno nevuno, hanimpina tevefi mani'neno zamavreno vu'ne. E'ina hige'za kenage'ene masare'enena amne vugara hu'naze. 22 Israeli vahe'mofo zmavugatira masarera hampomo'a zamatreno ovigeno, hanimpina tevemo'a zamatrenora ovu'ne.

14 Ra Anumzamo'a anage huno Mosesena asami'ne,
2 Zmasamige'za Israeli vahe'mo'za rukrehe hu'za vu'za,
Pihahiroti kumamofo avuga Mikdoli kuma'ene hagerinke'namofo amu'noznifi, nona ome kinkeno mago kaziga Ba'al Sifoni kuma meno. 3 Na'ankure Fero'ma agesama antahi'niana, Israeli vahe'mo'za ka'ma kokana agatere'za vugara osu'za, hazagre'za vano nehaze huno antahigahie. 4 Nagrani'a Fero antahintahia eri hanaveti'nena, agri'ene sondia vahe'anena zamahe vagaresuge'za, Isipi vahe'mo'zama antahi'za ke'za hanazana, Nagrikura Ra Anumza mani'he hu'za ra nagia namigahaze. Hige'za anante Israeli vahe'mo'za nona ki'za mani'haze. 5 Israeli vahe'mo'za hago atre'za vu'haze kema Isipi kini ne'mofoma eme asamizageno'a, Fero'ene eri'za vahe'amo'za antahi'zazmia ete rukrahe nehu'za, amazana naza hunke'za eri'zama erinerantaza zana zmatronke'za Israeli vahe'mo'za tatare'za vu'haze? hu'za hu'haze. 6 Anagema hute'za, kini ne'mo'a ha'ma hu'zana karisi'a retro nehuno, sondia vahe'a zamazeri retro, 7 nehuno 600'a knare'ma hu'nea karisiramina e'nerino, maka Isipi mopafima me'nea karesiramina erige'za, ana maka karisiramintera ugagota hu'naza sondia vahe'amo'za

mareri'za manitere hu'naze. **8** Hagi Ra Anumzamo'a Isipi kini ne' Ferona antahintahia eri hanavetigeno zmarotago huno vu'heanagi, Israeli vahe'mo'za korera osu muse hu'za vu'naze. **9** Anantero maka Isipi vahe'mo'zane, Fero karisi ramine, hosiramina e'neri'za nevazageno, sondia vahe'mo'zanena zamarotago hu'za Pihahirotine Ba'ale Zefone avuga, koranke hageri ankenarega Israeli vahe'ma mani'nazare vu kofta hu'naze. **10** Hagi Israeli vahe'mo'za kazageno'ma, Fero'ene sondia vahe'amo'zama vu tava'oma nehige'za, zamagra tusi zamagogogu nehu'za, zamazama hanigu Ra Anumzamofonku kezanke hu'naze. **11** Anantero anage hu'za Mosesena asami'naze, Isipia matira omnegenka frisunegura ama ka'ma mopafina tavrenka e'nano? Nagafare tavrenka ama ka'ma kopina e'nane? **12** Isipima mani'neta ko kasamita anage hu'none, tataregeta Isipi vahe kazokzo eri'za e'nerita manimneno hu'none. Na'ankure Isipi vahe'mokizmi kazokzo eri'zama e'nerita manusina knare hisinagi, ama ka'ma mopafima fri'zamo'a knarerera osu'ne. **13** Hianagi Mosese'a anage huno Israeli vahera zamasami'ne, Korora osuta Anumzamo'ma menima tamagu'ma vazisia zana oti hanavetineta keho! Na'ankure Isipi vahera menina nezmagazankita, mago'enena ozmagetfa hugahaze. **14** Hagi tamagra akoheta mani'nenkeno, Ra Anumzamo tamagritega anteno hara hugahie. **15** Anante Ra Anumzamo'a Mosesena anage huno asami'ne, Nahigenka Nagritega krafagea nehane? Zmasamige'za Israeli vahe'mo'za viho. **16** Hagi kagra azompaka'a erisga hunka, hagerintega kazana rusutegeno, hagerimo'a rupapa huno vuno eno hinkeno, hagege mopa fore hinke'za, Israeli vahe'mo'za viho. **17** Hagi Nagra Isipi vahe'mokizmi antahintahia eri hanavetisuge'za, tamarotago hu'za tamefi nevanage'na,

Ferone maka sondia vahe'ane, hosima e'neri'za vahe'ene, karisizmine, zamahe refitesua zanteti, Nagra Ra nagia erigahue.

18 Ana'ma hu'na Ferone maka sondia vahe'ane, hosima e'neri'za vahe'ene, karisizmine, zamahe refitesuge'za Isipi vahe'mo'za nege'za, Nagira Ra nagi namigahaze. **19** Anantero Anumzamofo ankeroma, Israeli vahe'ma ugagotama huzmanteno'ma nevia ankeromo'a zimagefi'ma evigeno'a, ana zanke huno ugagotama huno'ma nevia hampomo'a' zamagefi eme refite'ne. **20** Ana kenagera Israeli vahe'ene Isipi vahe'mokizmi amu'nompina ana hampomo'a me'neno, Isipi vahe'mokizmi kaziga rehani nehuno, Israeli vahe'mokizmi remsa huzmantegi'za Isipi vahe'mo'za erava'o osu'naze. **21** Anante Mosese'a hagerintega azana rusutegen, Ra Anumzamo'a zage hanatitegati zaho huntogen, ana kenagera zaho erino hagerina eri rupapa huno vuno eno higeno, mopamo'a hagege hu'ne. **22** Ana higeno hagerimo'a kantigma hihi huno vihu gna huno mreri'nege'za, Israeli vahe'mo'za ana hagerimofo amu'nompi hagege hu'nea mopare vu'naze. **23** Anante Isipi vahe'ma, Fero hosima e'neriza vahe'ma, karisima e'neri'za vahe'ma, sondia nena, zamazeri naku zimagefi zmarotago hu'za hagerimofo amu'nompi vu'naze. **24** Kotu masama nehigeno, Ra Anumzamo'a hampompine, tevefine mani'neno kefenkateno Isipi sondia vahe'ma nezmageno, antahintahizmia zamazeri savri hu'ne. **25** Ra Anumzamo'a karisizmia zamazeri ge'za rutizama vezankura mragu'zati'za nevu'za, Isipi vahe'mo'za anage hu'naze, atrenketa Israeli vahera zmatreta frammeno. Na'ankure Anumzamo'a zamaza huno ha' hunerante. **26** Hagi Ra Anumzamo'a anage huno Mosesena asami'ne, Kazana hagerintega rusutegen, hagerimo'a ete evuno Isipi vahe'ene karisizmine hosima eneri'za vahe'enana

refitezmanteno. 27 Higeno Moses'a ko'matigeno'a hagerintega azana rusutegeno, hagerimo'a evuno ru hamprigeno, Isipi vahe'mo'za ete rukrehe hu'za koro frenaku hazanagi hagerimofo agika frazageno, Ra Anumzamo'a hageri amu'nompi zmaheno refite'ne. 28 Hagi maka hosima e'neriza vahe'ene, maka Fero sondia vahe'ene karisi zminena hagerimo'a zmaherefitegeno, mago'mo'e huno omani'ne. 29 Hianagi Israeli vahe'mo'za hageri amu'nompina hagege hu'nea mopare vazageno hagerimo'a, kantigma kegina huzmantankna hige'za amu'nompi vu'naze. 30 Ana zupa Israeli vahera Isipi vahe'mokizmi zamazampintira Ra Anumzamo'a zmagu'vazino zamaza hige'za, Isipi vahe'ma hagerinke'nafima fri'naza vahera Israeli vahe'mo'za zimage'naze. 31 Hagi Ra Anumzamo'ma havenentake zama tro'ma huno Isipi vahe'ma ha'ma huzmantea zama, Israeli vahe'mo'za nege'za, Ra Anumzamofona kore hunte'za zamentinti hunente'za, eri'za vahe'a Mosesenena zamentinti hunte'naze.

15 Ana hige'za Moses'ene Israeli vahe'mo'za ama'na zagame Ra Anumzamofonte hu'za amanage hu'naze, Nagra Ra Anumzamofonte zagame hugahue, na'ankure Agra tusi'a ha' hu agatereneno, mareri sga hu'ne. Hagi hosi agumpi mani'za aza vahera zamasga huno hagerimpi matevutre'ne. 2 Ra Anumzamo'a hankveni'ane zagame'ni'a mani'neno, Agra nagu'vazi'ne. Agra nagri Anumza mani'negu, agi hentesga nehue. Nenfa Anumzamofona agi'a hentesga hugahue. 3 Ra Anumzamo'a harafa nere, Ra Anumzana agri agi me'ne. 4 Ferone sondia vahe'amokizmine karisi ziminena, hagerimpi zmamahere'ne. Ave'masinezmantea kva vahe'amo'za koranke hagerimpi ti nakri'naze. 5 Zamagra amefenkame hagerimofo agu'afina havemo hiaza hu'za urami'naze. 6 Kagri kzan

tmagamo'a Ra Anumzamoka hanavenentake hu'negeka, ha' vaheka'a zamahenati tre'nane. 7 Kagra himamuka'areti'ene fatgo kavukavaka'areti ha'ma hugante ku'ma haza vahera zamazeri agatenerane. Krimpa teveha'zamo'a, ha' vahe ka'a tevemo traza tefanene hiaza huno tefanane nehie. 8 Kagona gampinti himamu kasimu zaho'mo tina azerimohihi higeno marerigeno, tima enevia timo'a moriri huno mareri'ne. 9 Ha' vahetimo'za hu'za, zmarotago huta ome zamazeri ta feno zazmia refako hanune hu'naze. Zamagrama antahizaza hunerante'za, kazinteti tahe nefriza zmazanu tahe frinaku hu'naze. 10 Kagra zaho ka'a huhu hankeno hagerimo'a refite'zamante'ne. Zamagra tusi'a hanavenentake timofo agu'a tami'naze. 11 Iza anumza tamimpintira magora Kagrikna Anumzana mani'ne, Ra Anumzamoka? Iza magora Kagrikna huno Hankveka'ane Ruotgera hu'ne? Nagru hu'nanke'za Kagi hesga nehazagenka, Kagra kaguvaaza nehane? 12 Kagra tamaga kazana rusutankeno, mopamo'a zamazeri nakri'ne. 13 Kagrama vaheku'ma kavesi zmantenka kasuma tagizmante kavukava zanka'areti, mizasenka zmavre'nana vahera zmavrenka vu'nane. Kagraka'a hankave ka'afi kegava huzmantenka nagru hu'nea kumate ome zamante'nane. 14 Vahe'mo'za ana agenkema nentahi'za zmahirahiku hu'naze. Filistia vahe'mo'za tusi'a zamanogu hu'naze. 15 Itomu kumate ugagota hu'naza vahe'mo'za, tusi koro hu'naze, Moapu kumate kegava hu'naza vahe'mofona, tusi zamano vazi'ne, mika Keneni nemaniza vahe'mofa zamagu'amo'a, ti se'ne. 16 Ra Anumzamoka tusi'a hankave ka'a zamagra nege'za, tusi korozamo zmagrira refitezmanteg'eza, kaza osu'naze. Zamagra zafa mneankna hu'enageta, Kagri vahe'mota vugahune. Ra Anumzamoka isipiti tavrenka anketa kinafintira katufeta e'none. 17 Kagra

zamavarenka erisanti harerantenku'ma hu'nana kumakare
emetantegahane. Kagraka'a manigahue hunka kazanuma tro'ma
hu'nana kumapi, Ra Anumzamoka ome tantegahane. **18** Ra
Anumzamo'a kinia manivava hugahie. **19** Na'ankure hosifi
maniza nevaza Fero sondia vahe'mo'za hagerimpi ufrazageno,
Ra Anumzamo'a hagerina atregeno refitezmante'ne. Hianagi
Israel vahe'mo'za hagerimofo amu'nompi hagege hu'nege'za
vu'naze. **20** Kasnampa a' Miriamu, Aroni nesaro'a nase'nasepa
azampi erige'za, mika a'nemo'za nase'nasepa erihanati'za
nase'nasepa ati'za avo hage'naze. **21** Higeno Miriamu'a mago
zagame huno, Ra Anumzamofonku zagame hiho, na'ankure
Agra marerisga hu'ne. Hosi agumpi mani'naza vahe'ene
hosizmine hagerimpi zamasgahu re'ne. **22** Anantetii Moses'e'a
koranke hagerina atreno Israeli vahe'mo'za Sulue nehaza
ka'ma kopi zamavareno, 3'a zageferu nevige'za, tina ke'za
erifore osu'naze. **23** Zamagra Marae nehazare'ma ne-eza
tina Maratira one'naze. Na'ankure ana timo'a aka hu'ne, E'ina
hu'negu (aka hu'ne) Mare hu'za hu'naze, **24** Ana hige'za
vahe'mo'za Mosesena kehakare hunte'za anage hu'naze, ina'na
ti negahune? **25** Anage hazageno Moses'e'a Ra Anumzamofo
antahigegeno, Anumzamo'a mago zafa averi higeno hantagino
ana timpi atregeno, ana timo'a knare hige'za ne'naze. Anante
Ra Anumzamo'a mago'a tra kenenteno amage'ma antesagu
rezamaheno ke'ne. **26** Ana nehuno anante Ra Anumzamo'a
anage hu'ne, Rantimi Anumzamofo ageru'ma antahitama fatgo
zama Agri avufima nehutma, kasege'agu'ma tamagesa anteta
nentahitma, mika ke'ama amage'antesazana, magore hu'na
kria tamavatera ontegahue, Isipi vahe'ma zmi'noankna kria
ontamigahue. Na'ankure Nagra Ra Anumzamo'na, kritamima

eri netromo'ne. 27 Ananteti Elimie nehaza kumate 12fu'a ti nehanatigeno, 70'a tonazafa me'nere nona emeki'za tinkenare mani'naze.

16 Hagi menina nampa 2 ikamofo 15ni knazupa Israeli vahe'mo'za Isipima atre'za atirami'naza emaninaretira Elimia atre'za Sinie nehaza ka'ma kokampi, Elimine Sainai amu'nompi e'naze. 2 Hagi maka Israeli vahe'mo'za mago zamarimpa osu'za Mosesene Aronikiznia ka'ma kokampina ke hakare huznante'naze. 3 Hagi Israeli vahe'mo'za anage hu'za zanasami'naze, Isipima mani'neta tavesite afu kavone, bretinena neramu nehuta maninonte Ra Anumzamo'ma tahe fritesina knare hisine. Hianagi tagaku nehuta frisunegu ka'ma kokampina tavreta e'na'o. 4 Ananterea Ra Anumzamo'a anage huno Mosesena asami'ne, ko, Nagra maka kna monafinti bretia ko'mariaza hu'na tamagritega atresugeno eraminige'za, vahe'mo'za vu'za mago mago knamofo agu'afima nesaza avamente erisage'na, keni'a amagera antegahazafi rezmahe'na kegahue. 5 Hagi 6si knazupa, tare knamofo agu'afima nesaza avamente zogihio. 6 Ana higeno Mosesene Aronikea maka Israeli vahera zamasami'ne, meni kinagama ketma antahitama hanazana Ra Anumzamo Isipitira tavreno atirami'nne nehutma, 7 nanterana Ra Anumzamofo hanave'a kegahaze. Na'ankure Ra Anumzamofoma mago tamarimpama nosuta kehakrema huntazana antahi'ne, hagi tagra izagata mani'nonketa ke hakarea hunerantaze? 8 Anante Mosesena anage hu'ne, Ra Anumzamo'a nanterana neramu'ma hu'are bretia neramimino, afu ame'a erifore huno kinaga tamamigahie. Na'ankure Agri'ma ke hakarema hunentaza zana agra ko keno antahino hu'ne. Tagra izagata mani'nonketa ke hakarea hunerantaze. Tagri ke hakarea hunorantazanki,

Ra Anumzamofo kehakarea hunentaze. **9** Anante Moses'e'a anage huno Aronina asmi'ne, Maka Israeli vahe'mokizmia anage hunka zamasamio, Ra Anumzamofo tava'onte avuga eta antahih, na'ankure ke hakare'ma hazana Agra antahine.

10 Hagi Aroni'a maka Israeli vahe'mokizmima anankema nezmasamige'za, nentahi'za kegamute'za ka'ma kokantega kazana, Ra Anumzamofo msamo'a hampompinti remsa hu'ne.

11 Anante Ra Anumzamo'a anage huno Mosesenku hu'ne,

12 Nagra Israeli vahe'mo'zama ke hakare'ma hazana ko antahi'noanki anage hunka zamasamio, kinaga afu ame'a negahaze. Hagi nanterana bretia neramu nehuta, tamagra keta antahitama hanazana, Nagrikura, Ra Anumzana tagri Anumza mani'ne hugahaze. **13** Hagi ana zupa kinaga segeno'a, Hifa namazagamo'za e'za seli nomagi'za mani'naza kumara emani avinetazageno, nanterana ata ko aru'ne. **14** Ana ata ko'mo'ma hagegema higeno'a, ka'ma kokampina efeke huno breti retoza'agna'za fore huno mopa refite'ne. **15** Anante Israeli vahe'mo'zama ana zama nege'za, zamagra zamagra anage hu'naze, ama zana na'zane? Na'ankure anazana Israeli vahe'mo'za ke'za antahi'za osu'nazagu hu'naze. Anante Moses'e'a anage huno zamasami'ne, ama'i Ra Anumzamo bretima nesazaza tami'ne. **16** Hagi amanage huno Ra Anumzamo'a hanave ke hu'ne, tare lita tima afiga'ma hu'nesia kavofi, mago mago'mo'a seli nompima mani'nesaza avamente zogih. **17** Hagi Israeli vahe'mo'za kema zamasamiaza hu'za zogijnazana, mago'amo'za rama'a zonegizageno, mago'amo'za osia zogijnaz.

18 Henka ana ne'zana erinte'za refko hu'za kazana, rama'ama eri'namo'za agateorazageno, osi'ama eri'namo'za atupara osu'naze. Maka'mo'za ana ne'zana negnare hu'naze. **19** Anante

Mosese'a anage huno zamasami'ne, Mago'a ne'zana atrenkeno
me'enkeno nanterana oseno. **20** Hianagi zamagra Mosese'ma
hiankea ontahi'za, nene'za mago'a ante'nazageno ko'ma atigeno,
anampintira kani fore huno himna vigeno, Mosese'a rimpa
ahezmante'ne. **21** Maka nanterana Israeli vahe'mo'za nesaza
avamente zogi'nazanagi, mago'ama atrageno'ma meama'a
zagemo'ma amuhoma nehuno'a, teze'ze higeno fnanene hu'ne.
22 Hagi 6si knazupa tare lita tima afiga'ma hu'nesia kavofi,
mago mago'mo'a tare knafima nesaza avamente tare kavo eri
avitetere hino. Maka Israeli vahe'mokizmi kva vahe'mo'za e'za
anazama fore'ma hiazana Mosesena eme asmi'naze **23** Anante
Mosese'a anage huno zamagrira zamasmi'ne, Ra Anumzamo'a
amanage hie, okina mani fruhu (Sabat) knagino, Ra Anumzamofo
ruotage kne, tevefima kresazama'a tevefi negretma, kavofima
kresazama'a, kavofi kreho. Hagi mesiama'a eri otage hutma
ante'enkeno, ko atuno. **24** Hige'za meama'a ante'nageno ko
atuneanagi, ana ne'zampina knina fore osigeno, himna ovu'ne.
25 Mosese'a amanage huno zamasmi'ne, mani fru hu'zupagita
omnenketa e'origosaze. Krente hanaza ne'za neneta maniho.
26 Hagi 6si'a knafi ne'zana zogigahaze. Hianagi 7ni kna mani
fruhu knagino, ne'zana omanegahie. **27** Hagi mani fruhu knama
(sabat) ege'za, mago'a vahe'mo'za ne'za erinaku vu'za ome
hakazanagi, onke'naze. **28** Anante Ra Anumzamo'a anage huno
Mosesena asami'ne, Nama'a kna tamagra Nagri kasege hihoma
hua ke'nena amagera nontaze? **29** Hagi keho, Ra Anumzamo'na
mani fruma hanaza kna tami'noe. E'ina hu'negu ne'zama nesaza
zana, tare knamofo agu'afima nesaza avamente 6si knazupa
Nagra tami'noe. Hagi mago'mo'e huno mani fruma huknarera
meg'i'a nezankura hakeno ovuno, maka vahe'mo'za nozamire

manitere hiho. 30 Hige'za Israeli vahe'mo'za, 7ni knarera manigasa hu'naze. 31 Ana hige'za Israeli vahe'mo'za, ana ne'zankura manae hu'za agi'a ante'naze. Hagi ana manamo'a osisi huno kolianta zafa rgagna huno efeke higeno, haga'amo'a tumerima'reti tro hu'nea bisketigna hu'ne. 32 Anante Mosese'a anage huno zamasami'ne, Ra Anumzamo'a anage hie, tare lita tima afiga avamente mana antenkeno me'nena henkama fore hunante anante'ma hu'za esaza vahe'mo'za ana mana nege'za, lsipiti'ma tamavremegi atre'na tamavre'na ne-ena tami'noa mana kegahaze. 33 Hagi Mosese'a anage huno Aronina asami'ne, tare lita tima afiga avamente ana mana erivitenka Anumzamofo avure'ma ante'nea kavofina antegeno me'nena, henkama fore hunante ante'ma hu'zama esaza vahe'mo'za kegahaze. 34 Ra Anumzamo'ma Mosesema asmi'nea kante amage anteno, Aroni'a ana mana henkama fore hunante anante'ma hanaza vahe'mo'za nege'za antahimisagu antegeno me'ne. 35 Hagi Israeli vahe'mo'za 40'a kafufi ana mana ne'zana ne'za nevu'za, vahe'ma mani'naza mopafina uhanati'za, ana mana ne'za nene'za Keneni vahe'mokizmi mopafi ufre atuparega uhanati'naze. 36 Hagi ana knafima ne'zama refko'ma hu'zama negaza kavoa tare me'ne, (magora osikino oma tare lita ti afiga hu'ne. Hagi magora efetie nehaza rankavogino, 20'a lita tina afiga hu'ne.)

17 Ananteri maka Israeli vahe'mo'za Anumzamo'ma zmasamino, vihoma hige'za Sinie nehaza hagege ka'ma kokana atre'za, seli nona ome ki'za masete masete hu'za vu'naze. Hagi ana hu'za nevu'za henka Refitimie nehaza kumate uhanati'za seli nona ome ki'haze. Hianagi nesaza tina ana kumatera omane'ne.
2 E'ina hige'za Israeli vahe'mo'za Mosesena ke hara hunte'za, anage hu'naze. Tina tamigeta namneno, hazageno Mosese'a

anage huno zamasami'ne, nahigeta nagrira ke hara hunentaze?
Nahigeta Ra Anumzamofona rehetma negaze? 3 Hianagi
vahe'mokizmia tinkura tusiza huno zmagege'za, Mosesena
ke hakare hunte'za, nahigenka Isipitira tavrenka amafina
e'nanketa, tagrane maka mofavrezagatine, afu'zagatinena ti
ne'zankura nehuta frigahune? 4 Anama hazageno Mosese'a Ra
Anumzamofontega krafa huno nunamu nehuno, Hago haveknonu
nahe frigahazanki, na'a nagra ama vahera huzmantegahue huno
antahige'ne? 5 Anante Ra Anumzamo'a amanage huno asami'ne,
Naeli tima amasagi'nana azompa eri'enka, Israeli vahe'mokizmi
zmavuga kva vahezaga zamavarenka ugagota hutma viho. 6
Hagi antahio, Horepi agonafi havemofo agofetu Nagra otina
manigahuanki, kagra ana azompanu havea ome amasagigeno,
timo'a anampinti hanatina negahaze. Higeno Mosese'a Israeli
kva vahe'mokizmi zmavuga ana zana hu'ne. 7 Ana kumakura
Mosese'a Masaе nehuno, Meribae hu'ne, na'ankure Israeli
vahe'mo'zama haframa nehu'za, Ra Anumzamofona rehe'za
nege'za, Ra Anumzamo'a tagri amu'nompina mani'nefi omani'ne?
8 Ananter Ameleki vahe'mo'za e'za, Israeli vahera Refitimie
nehzafi hara huzmante'naze. 9 Ana hazageno Mosese'a
anage huno Josuana asmi'ne, Mago'a vahera tagripintira
huhamprizmantege'za Ameleki vahe'enena hara ome hiho. Okina
nagra Anumzamofo azompa nzampi eri'ne'na agonarera otigahue.
10 Mosese'ma asamia kante anteno, Josua'a Amaleki vahe'enena
hara nehige'za, Mosese'ma, Aroni'ma, Huri'ma hu'za agonarega
mreri'naze. 11 Hagi Mosese'ma azama erintesga hige'za, Israeli
vahe'mo'za hara Amaleki vahera huzmangatere'naze. Hagi
Mosese'ma aza'ma erinte fenka atrege'za, Ameleki vahe'mo'za
Israeli vahera hara huzmagetere'naze. 12 Hianagi Mosese

azamo'a arageramigeno, Aroni'ene Hurikea have erike, mopafi ante'nakeno anante mani'nege'ne, rugaraga mani'neke azana erisga hu'nakeno kinagaseno zagea urami'ne, **13** Josua'ene Israeli vahe'mo'za bainati kazinu Ameleki vahera zmahege'za kazimofo ne'za se'naze. **14** Ananter Ra Anumzamo'a anage huno Mosesena asami'ne, Ama ha'mofo agenke'a avontafepi kretenegeno avame'za me'nenke'za nege'za zmagera okaniho. Hagi Josuana hamprinka ama ana nanekea asamio, Nagra ama mopafintira Ameleki vahera zamahe fanane hanugenzo zmagi zImagenkea ama mopafina omanegahie. **15** Mose'se'a anante Kresramanavu ita tro huno, Ra Anumzamo'a nagri kraugefani'e (frekie) huno agia antemi'ne. **16** Mose'se'a anage hu'ne, Ra Anumzamofo hanave eritre'za hazankino, Amaleki vahera henkama fore hunante anante hu'za esaza vahera, Ra Anumzamo'a huvempa hu'neankino ha' huzmantegahue hu'ne.

18 Jetro'a Mitieni vahe'mokizmi pristi nekino, Mosesena
nenemo'e. Maka'zama Ra Anumzamo'ma Mosesene Agri'a
vahe Israeli vahe'ma huzmante'neazana Jetro'a antahi'ne.
Ra Anumzamo'ma Israeli vea'ene Mosesenema huzmanteno
Isipiti'ma zamavreno atirami'nea zamofo nanekea antahi'ne. 2
Mosese'a nenaro Ziporama huntogeno agranema umani'nenereti
Jetro'a nevreno, 3 tare ne' mofavre'ararena znavreno e'ne.
Mosese'a huno, Ru vahe'mofo mopafi eman'i'noe nehuno,
agonesa mofavre'amofo agi'a Gesomu'e huno ante'ne. 4 Hagi
Mosese'a anante mofavre'amofo agi'a Eliesa'e hu'ne. Na'ankure
nafa'nimofo Anumzamo naza higeno, Isipi kini ne'mofo bainati
kazimo'a onahe'negure hu'ne. 5 Hagi anantero Mosese nenemo
Jetro'a, Mosese nenarone mofavre'ararene nezamavreno, ka'ma
mopafi Mosese'ma Anumzamofo agona me'nerega seli noma

kino mani'nere vu'ne. **6** Jetro'a amanage huno Mosesentega kea
atrente'ne, Nagra neganemo'na aka'ane tare mofavreka'ane
zamavare'ha kagenaku neone. **7** Hagi Moses'a ana nanekema
nentahino vuno nenemo ome negeno, rena omenereno, otino
antako hunenteno, hu frufra huntetege'ne, Mosese seli nompinka
ufre'na'e. **8** Hagi Ra Anumzamo'a zamaza huno Isipi kini ne'
Fero azampinti'ene Isipi vahe zamazampinti'ma zamahokeno
zmavre fegi atre'nea nanekene, karanka zamavreno ne-ege'za
maka knazama eri'za neageno, Ra Anumzamo'ma Israeli
vahe'ma zamazama huno e'nea naneke'a Mosese'a nenemo
nera Jetrona asmi'ne. **9** Anumzamo'ma knare'zantfa huno
Isipi vahe'mokizmi zamazampinti zamahokeno zamavreno
atirami'nea nanekea Jetro'a nentahino, tusi'a muse hu'ne. **10**
Anante Jetro'a amanage hu'ne, Isipi vahe'mofo azampinti'ene
Fero azampinti'ene Isipi vahe'mofo kvafinti'ma tamahokeno'ma
tamavreno atirami'nea Ra Anumzamofona ra agi'a hentesga hue.
11 Hagi menina nagra antahi'noe, mika havi anumzantamina
agtereno, hihamu'ane Ra Anumzana tamage huno Agrake
mani'ne. Na'ankure Isipi kva vahe'mo'zama zmavufga ra nehu'za,
Agri vahe'ma Israeli vahe zamazeri haviza huzmante'naza
vahera, zamazeri haviza hu'ne. **12** Hagi Mosese nenemo
Jetro'a tevefima kre fananema hu ofa erino, Anumzamofo
Kresramana vunentegeno, anante Aroni zane, Israeli kva
vahe'mo'za Jetro'ene emetru hu'za Anumzamofo avurera ne'zana
ne'naze. **13** Hagi maseno nanterana Mosese'a keagama refkohu
trate mani'nege'za, Israeli vahe'mo'za emetru hu'za regagi'za
oti'nazageno, mago'magomofo nanekea refko huno nentahigeno,
vuno kinaga ome ase'ne. **14** E'inahu'zama Mosese'ma
vahe'mokizmima hunezmanegeno, nenemo Jetro'a negeno

amanage hu'ne, nankna'za ama vahe'mofona hunezmantane?
Na'a agafare kagrakera mani'eneka nanekea refko nehankeno,
ama vahe'mo'za oti'za mani'nazageno vuno kinaga omenese?
15 Mosese'a ana kemofo nona'a amanage huno nenemo Jetrona
asami'ne, Na'ankure zamagra Anumzamofo avesi'za antahinaku
nagritera emetru hu'za mani'naze. **16** Hagi tava'ozmire'ma
mani'naza vahe'enema zmagrama ha'frama nehu'za, nagrite
azage'na zamaza hu'na naneke'zimia antahi'na refko nehu'na,
Anumzamofo tra kene, kasegenena eri ama hu'na nezmasamue.
17 Higeno Jetro'a anage huno nenemo nera Mosesena
asami'ne. E'inahu zama nehanana knare zana nosane. **18**
Ama eri'zana kna'a me'neankinka, kagrakera e'origahane.
Kagrane vahe'ka'anena tamage huno tamavesra hugahie. **19**
Hagi menina ke'ni'a antahio, nagra antahintahia kamisugeno
Anumzamo'a kagrane manigahie. Kagra vahe'mokizmi zmagi
erinka Anumzamofo avure mani'eneka, vahe'mo'zama ha'frama
hanaza zana erinka Anumzamofo ome asamigahane. **20** Ana
nehunka kagra Anumzamofo tra kene kasegenena vahera rempi
hunezminka, mani'zazimi eri fatgo hu'za kama nevu'za, eri'zama
erisaza zamofona zmaveri hughane. **21** Hagi mago'ane Jetro'a
huno, Vahepintira tamagema huno eri'zama eriga'ma nehuno,
Anumzamofonku'ma kore'ma hunenteno, krunage'ma huno
fenoma eri'zanku avesra nehia vahe'ene, huhampri zamantege'za
1 tauseni'a vhete kva manina, 1 hantreti'a vhete kva manina,
50'a vhete kva manina 10ni'a vhete kva manitere hiho. **22** E'i
ana kva vahe'mokizmi zamatrege'za maka knafina, vahe'mokizmi
knazana refko huzmanteho. Hianagi ra hazenke'zana kagrite
eri'za esagenka refko huzmanto. Hianagi ne'one knazazamia ana
kva vahe'mo'za eri fatgo nehanageno, knama e'nerina zamo'a

osi'a o'za hugantegahie. **23** Amama negasmua kema amage nentesankeno, Anumzamo kama kaverima hanigenka kazikazi hunka mika eri'zana knare hunka e'nerisankeno, vahe'mo'za muse nehu'za zamarimpa fru'ne nozimirega vu'za e'za hugahaze. **24** Mosese'a, Jetro'ma asmi'nea kea antahino, ana maka kea amage ante'ne. **25** Hagi Israeli vahepinti knare'nare vahe'a Mosese'a huhampri zmantege'za, kva vahera mani'za 1 tausen'i a vahe'mokizmi kva nemanizageno, 100'a vahe'mokizmi kva nemanizageno, 50'a vahe'mokizmi kva nemanizageno, 10ni'a vahe'mokizmi kva manitere hu'za kegava hu'naze. **26** Ana kva vahe'mo'za maka knafina, refko'ma huga knazana zamagra'a refko hu'naze. Hianagi amuhoma hianknazamofo keaga eri'za Mosesente vu'naze. **27** Anante Mosese'a nenemo nera Jetrona hu frufra huntogeno mopa'arega ete vu'ne.

19 Israeli vahe'mo'zama Isipima atre'zama atiramiza e'nazana, 3 ikamofo ese knare ka'ma kokampi Sainai ehanati'naze. **2** Zamagrama Refitimi kuma'ma netre'za Sainai ka'ma kokampi e'za Sainai agonamofo agafi seli nozamia emegi'naze. **3** Hagi Mosese'a Anumzamofo ome kenaku agonafi mrerigeno, Ra Anumzamo'a agonafinti anage huno hu'ne, Menina amanage hunka Jekopu nagamofona Israeli vahe'mokizmia zamasamio, **4** Nagrama Isipi vahe'mofoma navu'nava'ma hunezmante'na tumpa namamo mofavre'a agekonare avrenteno avreno eaza hu'na, tamavre'na e'noazana tamagra'a ke'naze. **5** Hagi menima tamagra ke'nima nentahitma, huvempama hu'noake'ma tamage hutma amage'ma ante'nuta, maka mopane mopane vahepintira tamagrake Nagri vahera manigahaze. Na'ankure maka mopa Nagri mopa me'ne. **6** Tamagra Nagrini'a pristi eri'za eri vahe mani'netma, ruotage hu'neni'a kuma vahe manigahaze

huno hu'ne hunka Israeli vahera zmasamigahane. 7 Ana hutegeno Mosese'a agonafinti eramino, Israeli kva vahe'zaga eme zamagihu atru huno, Anumzamo'ma ome zamasamio huno hunte'nea nanekea zamasami'ne. 8 Hige'za maka vahe'mo'za kenona hu'za, Ra Anumzamo'ma hugantegenka eme hana kea maka amage antegahune hu'za hazageno, Mosese'a anankea erino Ra Anumzamofonte vu'ne. 9 Ra Anumzamo'a anage huno Mosesena asmi'ne, Antahio, Nagra hampogino antrako hu'ne'nia hampompi e'na kagranena keaga eme nehanuge'za, nentahi'za kagrama hana kerera maka knafina zamentintia huvava hugahaze. Anante Mosese'a Israeli vahe'mokizmi nanekea Ra Anumzamofona asami'ne. 10 Higeno Ra Anumzamo'a mago'ene Mosesena asamino, Menine okinena zamagra zamazeri ruotage nehu'za, kukena zimia sesehu agru nehu'za, 11 nampa 3 knarera retro hiho, na'ankure e'i ana knarera Ra Anumzamo'a maka vahe'mokizmi zmavuga Sainai agonafi eramigahie. 12 Hagi kagra avame'za agonamofo agafina anteganeginka anage huo, tamagra kva hu'netma agonafina agatereta ovutma, ana avame'zantema uravao huno avako huge, agonafima mrerige'ma hanimofona ahe frigahaze. 13 Tamazanura avako hutma anamofona ahe ofrita, have knonu matevutma ahefrige, kevereti aheho. Vahe'mozafi afu'zagamo'zama anama hanazana frigahaze. Hagi mememofo pazivenu'ma za'zate'ma ufemaresageta, agonarega mrerigahaze. 14 Anante Mosese'a agona atreno uramino zamazeri ruotage nehige'za, kukena zamia sese hu'naze. 15 Mosese'a anage huno zamasami'ne, Nampa 3 knama esigu retro hutma nemanitma, a'netaminena omaseho. 16 Hagi nampa 3knama eanknamofo nanterana, monage nehigeno kopsinamo'a trage huno enevigeno, antrako hu'nea hampomo

ana agona refitegeno, ufenkrafa nehigeno, nomaki'za maka mani'naza vahe'mokizmia tusi'a zmahirahitene. **17** Anante Ra Anumzamofo ome kehogu Mosese'a kumazmifinti zmavare fegi'a atreno zamavreno vige'za, agonamofo agiaifi oti'naze. **18** Hagi Sainai agonamofona tok'i'mo'a miko refitevagare'ne. Na'ankure Ra Anumzamo'a tusi'a tevefi eramino eman'i'hegeno, tuki'mo'a tusi'a tevefinti'ma nehiaza huno kamogamo nehigeno, tusi'a imi erino ana agona eri tore'vare hu'ne. **19** Hanki ufemofo agerumo'ma rura huno nevigeno'a, Mosese'ma kema nehigeno, Anumzamo'a monagema hiaza huno kenona'a humi'ne. **20** Ra Anumzamo'a Sainai agona morusate eneramino, Mosesena ke higeno mareri'ne. **21** Ananter Ra Anumzamo'a Mosesena anage huno asami'ne, uraminka vahe'mokizmia kore ke huzmantenge'za, avame'zama tafinte'za kagi'naza zana agatere'za emreoriho. Anama hanaza vahe'mo'za frigahaze. **22** Hagi pristi vahe'mo'zama Ra Anumzamo'nare'ma erava'oma hunaku'ma hanu'za, zamagra'a zamazeri ruotage nehu'za zamazeri agru hiho. Ana'ma osnage'na Nagra zamazeri haviza hugahie. **23** Mosese'a anage huno Ra Anumzamofona asami'ne, vahe'mo'za ama agonafina omegahaze. Na'ankure Kagra ko nasaminke'na avame'za ante'nogenka ana avame'zamofona agateretma emreoriho hunka hunagru hunte'nane. **24** Hagi Ra Anumzamo'a anage huno Mosesena asami'ne, Uraminka Aronina ome avrenka eno. Hianagi zmatrege'za pristi vahe'ene, mago'a vahe'mo'za avame'zana agatere'za agonafina Nagritega omeho. Hagi anama hanage'na, Nagra zamazeri haviza hugahue. **25** Mosese'a uramino ana vahetamina, Ra Anumzamo'ma huntea kea ome zamsami'ne.

20 Anante ana miko nanekea Ra Anumzamo'a amanage huno hu'ne. **2** Nagra Isipi mopafima kazokzo eri'za vahe'ma mani'nazage'na tamavre'na atirami'noa Ra Anumzanki'na, tamagri Anumza mani'noe. **3** Nagrake tamagri Anumzana mani'noanki, ru anumzatmintera monora huonteho. **4** Tamagra mago'azamofo amema'a antretma tro huntege, monafima me'ne'nia zamofo amema'a antretma tro huntege, mopa agu'a me'ne'nia zamofo amema'a antretma tro huntege, tigu'a me'nenia zamofo amema'a antretma kaza osu havi anumzana tro huntegera osiho. **5** Ana zantmintera monora huntege, tamarenaregera osiho. Na'ankure Nagra Ra Anumzana, tamagri Anumzana kanivere Anumza mani'noanki'na, zmafahe'mo'za zamavaresrama hunenante'za kumi'ma hu'ne'saza kumitera, mofavretamine agehe'mofone, agigomofonena knaza zamigahue. **6** Hianagi iz'a zo Nagri'ma zamavesinenante'za kasegeni'ama amage'ma ante'za vanaza vahe'mokizmia, vagaore navesi'zanteti zmavesinezmante'na, ana vahepinti'ma 1000ni'a zupama fore hunante anante'ma hu'za vnaza vahe'mokizminena zamavesi zmantegahue. **7** Nagra Ra Anumzana tamagri Anumza mani'noanki, amnenena nagi'a oheho. Na'ankure amnenema nagima ahesimofona Nagra azeri haviza hugahue. **8** Mani fruma hu knamofona (Sabatia) tamagesa are'are nehuta, ruotge hu'ne hutma kegava hiho. **9** Tamagra mago sontamofona 6si'a knafinke miko eri'zantmia erigahaze. **10** Hianagi 7ni knazupa Ra Anumzana tamagri Anumzamo'na mani fruhu kna (Sabati) me'negu ana knarera, kagrane neka'ane, mofaka'ane, ve kazokzo eri'za vaheka'ane, a' kazokzo eri'za vaheka'ane, afu kevuka'ane, eman'i vahemo'zanena eri'zana e'oriho. **11** Na'ankure Ra Anumzamo'a 6si'a knafi monane, mopane, hagerine miko zama ana agu'afima

me'nia zantamina tro huteno, 7ni knarera manigasa nehuno,
Agra ana kna erinte ruotge huno asomu hunte'ne. 12 Neramarera
nermafa ke'zni antahizmitma zmagorgama manisazana, Ra
Anumzana, tamagri Anumzamo'nama tami'noa moperara zazate
manitma vugahaze. 13 Tamagra vahera ahe ofriho. 14 Tamagra
aravema hu'nesaza vahe'motma, rumofo a'eneno rumofo
venena monkozana osiho. 15 Tamagra musufa oseho. 16
Tamagra tava'ontmire'ma nemanisia vahe'mo'ma keagare'ma
oti'nenigeta, osu'nesia zankura havigea huonteho. 17 Tamagra
tava'ontmire'ma nemanisaza vahe'mofo nonkuro, a'amofonkuro,
ve eri'za vahe'o, a' eri'za vahe'o, bulimakao afu'o, donki
afu'o, inankna inankna zantamima ante'nesniana keramasanea
osiho. 18 Hagi monagea nehuno, kopasi'na e'nerigeno,
ufenkrafa nehigeno, agonafinti'ma tevegumo'ma nehigeno'a,
miko vahe'mo'za nege'za zamahirahiku nehu'za, ogantu'a
oti'ne'za, 19 amanage hu'za Mosesena asmi'naze, kagra'a kea
hugeta antahimaneno. Hagi Anumzamo'a keaga ontasamino.
Na'ankure Agrama keagama hanigeta, tagra frigahune. 20
Mosese'a zmasmino, tamagra korora osiho. Na'ankure menina
Anumzamo'ma e'neana, reramaheno ke'nigetma, Agri'ma
kore'ma hunte'zamo'a tamagripi me'nenigetma kumira osanazegu
e'ne. 21 Anage hige'za ana veamo'za ogamu'a oti'nageno
Mosese'a, haninentake hampomagino antrako'ma hu'nefima
Anumzamo'ma mani'nerega vu'ne. 22 Anante Ra Anumzamo'a
amanage huno Mosesena asmi'ne, Israeli vahera amanage
hunka ome zamasnio, tamagratmia negazage'na monafintira
nankeea tamasami'noe. 23 Nagrake Anumzana mani'noanki,
tamagra magore hutma golire havi anumzano, silvarera
havi anumzantmina trorahunteta monora huonteho. 24 Hagi

Nagrite'ma Kresramanama vunantesaza ita mopareti tro huteta, ana itare sipisipi afu'ene bulimaka afu'nutira tamarimpa fruhu ofane, kre fnanene hu ofa Kresramana vugahaze. Hagi miko kazigama Nagrama hu'nama e'ire Nagrira antahinamita monora hunantegahaze hu'nama hanure, ana ita trohuta kre'sramna nevinke'na, Nagra eme asomura hurmanta'neno. **25** Hagi kresramnama vu itama havereti'ma tro hanutma, vahe'mo'ma tagama osu'nesia havereti tro hiho. Na'ankure vahe'mo'ma tagama hu havereti'ma Kresramana vu itama tro'ma hanazana, ana itamo'a ruotagera huno agru osugahianki, haviza hugahie. **26** Hagi Nagritegama kresramna vu itama tro'ma hanuta, zaza ita tro hu'neta lata anteta ofa hunakura mrenerinke'za, vahe'mo'za tamariga onkeho.

21 Mosesega ama'na kasegea Israeli vahe'mokizmi zamigahane. **2** Kagrama Hibru vahepinti'ma kazokzo eri'za vahe'ma mizama asenunka, 6si'a kafufinke kagri kazokazo eri'za vahera manite'na, 7ni kafurera atregeno mizana osu amne fru huno vino. **3** Ana kazokzo eri'za ne'mo'ma a'ma e'orinenigenka mizama hu'nenuka, anama hunte'nana kafurera atregeno agrake vino. Hianagi ko'ma a'ma ante'nenia ne'ma mizama se'nesunka, ana a'ene atregeno vino. **4** Hagi kazokzo eri'za ne'ma mizama se'ne'nia venafo'ma a'ma miza humi'nenigeno mofavrema ante'nenu'a, ana a'ane ne'mofa'anena ana venafo azampi netreno, agrake vugahie. **5** Hianagi ana kazokzo eri'za ne'mo'ma huama'ma huno, nagri'ma mizaseno nafa'a hunante'nemofonku'ene a'ni'agu'ene mofavreni'agura tusiza huno navenesiankina nagra zamatre'na fru hu'na amne ovugahue huno'ma hanigeno'a, **6** mizama hunte'nea kva'amo'ma avreno Anumzamofonte vuteno, ete avreno kafa zafarero ete kafantero

vuno hakare vahe avufi vahe'ma zamagesa rerapone zota
erino agesa reraponenkeno agri kazokzo eri'za vahe mani'neno
ufrigahie. 7 Mago ne'mo'ma, mofa'ama kazokazo eri'za mofa
manisie huno'ma zagore'ma atresige'noma mizamasesiana, ve
kazozko eri'za vahe'ma nehiaza huno, 7ni kafurera atresigenora
frua huno amnea ovugahie. 8 Ana mofa'ma a'nie huno miza
hu'ne'nia venafo'ma muse osania zama hanigeno'a, ana venafo'a
ana mofara atrenkeno ete nef'a'a miza hino. Hagi ana mofa'ma
miza hu'nenia venafo'ma mago'enena ru kaziga vahetera
mizantera ozmino, na'ankure, kva'amo'a agra'a ana mofa'mofo
so'e manizama'a eri haviza hu'ne. 9 Hagi ana mofa'ma miza
hu'nea ne'mo'ma, ne'mofonte'ma a'e huno huntenesuno'a,
agra mofa'ama kegava nehiaza huno kegava hunteno. 10
Hagi henka'ama, ana ne'mo'ma ru a'ma erisnuno'a, pusa
a'enena ko'ma nehiaza huno nemaseno, knare huno kukena'ane
kave'are'enena kegava huntegahie. 11 Hagi ana 3'a zama
huntega'zama, ana a'mofoma huontesigeno'a, ana a'mo'a zagoa
miza osu amne atreno vugahie. 12 Iza'o vahe'ma ahe frisia
nera, agri'enena ahe frigahaze. 13 Hianagi mago ne'mo'ma
mago'azama hanifi hantaga huno mago vahe'ma ahe frisiana,
Anumzamo atresigeno ana zana fore hugahiankino, agu'vazi
kuma'ma retro'ma huntenerega ana ne'mo'a freno vugahie.
14 Ana hu'neanagi mago ne'mo'ma vahe'ma ahe friku'ma,
oku'ama antahintahi retro huteno, ana ne'ma ahe frina, ana nera
Kresramana vu itareti'enena amne avazu huta ahe frigahaze.
15 Iza'o nefano nererano ahesia nera, ahenkeno frino. 16
Iza'o mago vahe'ma musufa avreno eme frakino antege,
zagore atrege'ma hania nera ahe friho. 17 Iza'o nererano
nefanoma huhaviza huntlesia nera ahenkeno frino. 18 Tare

netremoke'ma fra nevazisapinti'ma, mago'mo'ma azanknonuro have knonuro ahenkeno ofrigahianagi, ana zanku'ma krima erino'ma mani'nenigeno, **19** kri'amo'ma osi'a knare hinkeno'ma azompare meg'i'a vanoma hanigeno'a, ahe'nea nera kanazana omigahie. Hianagi krima maseneno kna'ama atre'nea zantera miza hunenteno kegava hunentenko kriamo'a knare ome huntiegahie. **20** Mago ne'mo'ma kazokzo eri'za ne'amofono, kazokzo eri'za a'amofoma kanonu'ma ahenkeno frisiana, ana kazokzo eriza vahe'mofo nafa'amofo kanazana amiho. **21** Hianagi ana kazokazo eri'za vahe'mo'ma mago kano, tare kanama manite'no'ma knamare'niana, anama ahe'nea kva nera kna omigahaze. Na'ankure ana kazokzo eri'za nera mizamase'nea ne'mofo su'za mani'ne. **22** Tare netremoke'ma ha' nehu'ne mago'ma amu'ene hu'nesnia a'ma ahesigeno nena osu'nesia mofavrema kasenenteno, ana a'mo'ma hazenke'ma e'orisigeno'a, ana a'mofo neve'ma zago agima ahentesiama'a miza neseno nanekema refkohu kva vahe'mo'ma e'i'a amio hanazama'a amino. **23** Hianagi ana a'mo'ma ra hazenke'ma erinkeno'a, anahukna hazenke agri'enena amigahaze. Ahe fri'nirera, agri'enena ahe frigahaze. **24** Hagi avurgama repro haniana, agri'enena avurga repro hiho. Hagi ave'ma ru tafrina, agri'enena ave ru tafriho, hagi agia azama ruhantgina, agri'enena anazanke huta agiazza ruhantgiho. **25** Tevefima kre kasage'na, agri'enena tevefi kre kasageho, avufga rutraga hu'nena, ana zanke huta agri'enena avufga rutraga hiho. Hagi aheno avufgama ru korampamagi'nena, ana nera aheta avufga ru korampagiho. **26** Kazokzo eri'za nero, kazokzo eri'za aro mizama sentenesia kva'amo avurgama repro hutrenkeno'a, agra ana nona'a atresigeno ana kazokzo eri'za vahe'mo'a zagoa miza osu fru huno amne vugahie. **27**

Hagi kazokzo eri'za ne'amofono, a'amofoma mizama se'nesia
venafo'ma aheno mago ave'ma ru tafrisiana, ana kazokzo
eri'za vahe'a ana nona'a atrenkeno mizana oseno fru huno
amne vino. **28** Mago ve bulimakao afu'mo'ma mago nero, aro
pazive anuti'ma ahe frinketa, ana ve bulimakao afura have
knonteti ahefrinkeno frina avufaga'a oneho. Hianagi ana ve
bulimakamofo venafona keaga hunteta kna omiho. **29** Hianagi
ana ve bulimakamo'ma vahe'ma nehe'nigenoma kegina huno
antenogu eme asamisage'noma, ana kema eritreno bulimaka'ama
keginafima avre onte'enigeno mago veo aro ahefrisigeno'a,
ana ve bulimakao'a havenkanonu ahenefritma, bulimakao
nefanena ahefriho. **30** Ana hugahianagi bulimakaomo'ma
ahefrinesia vahe'mofo nona hinogu'ma naga'amozama miza
ajima ahentesazama'a mizaseno. **31** Mago mofaro, ne'mofavreo,
bulimakao afu'mo'ma pazive'anuma ahe frinkeno'a anazanke
huno mizaseno. **32** Bulimakao afu'mo'ma mago kazokazo
eri'za aro veoma pazive'anuti'ma ahe frinkeno'a, ana eri'za
vahe'mofo kva nera bulimakaomofo venafo'a 30'a silva zago
nemino, ana bulimakao afura have knonu ahe frino. **33**
Mago' vahe'mo'ma keri kafinenteno'o kafinte'nesia kerima eri
hagaro huteno refi otenenige'noma mago' ne'mofo bulimakao
afumo'o donki afumo'ma ana kerifima uramina, **34** kerima
asente'nesnimo'a ana bulimakaono, tonki afutera nona huno
miza hinkeno, anama frisia zagamo'a agriza segahie. **35** Mago
ne'mofo bulimakao afumo'ma, mago ne'mofo bulimakao afu'ma
ahefrina, ana bulimakao afutremofo nafa'amokea amnema
manisia bulimakao afura zagore atreke ana zagoa amu'nompinti
refako nehuke, anama fri'nea bulimakao afura amu'nompinti
arutaneke refako hi'o. **36** Hianagi ko'ma pazive'anuti'ma ha'ma

nehania bulimakao afumofo venafo'ma antahi'neno keginafima
onte'nenigeno, rumofo bulimakao afu'ma ahefrisiana, anama
frisia bulimakao afu'mofo venafo'na ete bulimakao afuteti nona
huno miza senenteno fri'nesia bulimakao afura erigahie.

22 Mago ne'mo'ma ru vahe'mofo bulimakao afuro sipsipi
afu'ma kumzafa aheno tragahuge, kumzafa seno zagore
ome atrege'ma hu'enimo'a, mago bulimakao afu'ma kumzafa
asenenirera venafona 5fu'a bulimakao nona huno mizasenteno.
Mago sipsipi afu'ma kumzafa asenesirera 4'a sipsipi afu
venafona nona huno mizasentegahie. 2 Hagi mago kumzafa
ne'mo noma anafe huno ufreno kumzafa nesena, ageno erifore
huno ahe frisia, anama ahe frisia ne'mofo korankumimo'a
agritera omanegahie. 3 Hianagi ko'ma zagma hanati'noma
masama hu'nesifima kumzafa nesena nomofo venafo'ma
keno erifore huno'ma ahe frisia, agritera ana ne'mofo
korankumi'mo'a megahie. Hagi kumzafama nesenigeno keno
eriforema haniana ana mika zama kumzafa se'nenia zantera
mizaseno. Hagi ana zante'ma temaosinigeno'a, ana kumzafa
nera zagore atre'za ana zagoa eri'za kumzafama eri'nea zamofa
nona'a mizaseho. 4 Mago ne'mo'ma rumofo bulimakao afuro,
sipsipi afuro, donki afuro kumzafaseno ome ante'nenkeno
keno erifore'ma hina, anama kumzafa se'nenia ne'mo'a ana
nona'a ante tragoteno kumzafama ase'nenia zaga venafona
amino. 5 Mago ne'mofo sipsipi'amo'o bulimakao'ama atrenkeno
trazama neno vano haniregama rumofo kaziga traza omenegi,
waini hozafi vuno waini hoza ome eri haviza haniana, ana
bulimakao afu'mofo nafa'amo'a, knare hoza'areti'ene knare
waini'areti'ene anama hoza'ama eri haviza hu'nea nera nona'a
amino. 6 Hagi mago'mo'ma hoza'afima trazama negresigeno

tevemo'ma terakaheno rumofo witi hoza vasage ante'nenia
witima tena, tevema hugre'nenimo'a ana zantmintera nona'a huno
mizasenteno. 7 Mago ne'mo'ma tavaoma'are nemanisimofoma
zago'afi fenoma'ama, kegava huntenogu ami'nesigeno kegava
hunte'nesigeno, kumzafa ne'mo'ma anazama noma'afinti
musufama se'nenia ne'ma ke'za erifore hanageno'a ana kumazafa
ne'mo'a ante tragoteno miza seno. 8 Hanki kumzafa ne'ma keno
erifore'ma osina, nomofo nef'a keaga refkohu kva vahe'tmimofo
avuga eno eri'neo e'o'rimeo eme huama hugahie. 9 Hagi
mago'mo'ma bulimakao afuro, donki afuro, sipsipi afuro, kukeno,
mago'a zantmima fanane hu'nenia zantmima tavaoma'are
nemanisimo'ma ante'nenkeno, ama nagri suzane huno'ma ome
hanige'noma antahima omisigeno'a keaga refkohu kva vahete
e'nakeno keaga refkohu kva vahe'mo'ma, kagra havi kavukava
hu'nanema hanimo'a ante tragoteno mizaseno. 10 Mago
ne'mo'ma tava'oma'are'ma nemanisimo'ma donki afuro, bulimaka
afuro, sipsipi afuro, mago'a zagagafama kegava huntenogu'ma
ami'nesia zagamo'ma frige, hazenke erige, vahe'mo'ma
onkesigeno avreno frege'ma haniana, 11 ana zagarmima kegava
hu'nesnia ne'ene ana zagaramimofo venafokea Ra Anumzamofo
avuga vanakeno kegavama hu'nemo'a huvempa huno, tamage
hu'na nagra onke'noe hanigeno'a, venafo'ma mago rimpama
hanigeno'a ana zagaramintera miza osegahie. 12 Hianagi
tamagema huno musufama se'nesageno'a, fenozama'ama
kegava hu'nesimo venafona mizasenteno. 13 Hanki afi
zagamo'ma aheno'ma neneno, avufga'ama ani kafritre'neniama'a
erino, ana zagamofo venafoma ome averi'nuno'a ana zagarera
miza osegahie. 14 Hanki mago ne'mo'ma, tava'oma'are'ma
nemanisimofoma zagagafama avreno eme kegava hu'nenkeno'ma,

ana zagagafamofo venafo'ma omani'nensire'ma avufgare
hazenkema erige frige'ma hinkeno'a, ana zagma avreno
kegava hu'ne'nia ne'mo'a nona huno venafona mizasenteno.
15 Hanki ana zagmafo venafo'ma mani'neno negenkeno,
eri'za e'nerino hazenkema erinkeno'a, miza osegahie. Eri'zama
erinogu'ma zagma amino avre'neniana, e'i ana zagma aza
hugahie. **16** Mago'ma vene ovase'nesia mofa'ma mago ne'mo'ma
avreno ome anteno vase'nena afufeno huno mizasenko ana
mofamo'a agri a' manino. **17** Hanki ana mofo'mofo nefo'ma,
ana vere omanigahiema hinkeno'a, ana ne'mo'a afufenoma
nehaza avamente afufenona huno ana mofo'mofo nefana
amigahie. **18** Avuatgama nehania a'nea zamahe friho. **19**
Iza'o zagagafanema monko'zama hanimofona ahe friho. **20** Ra
Anumzamofonte'ma kresramna vuonteno, havi anumazante'ma
kresramnama vuntesimofona ahe friho. **21** Mago'ma ru mopareti
vahe'ma kagane emani'nena, azeri havi zana osuge knazana
omio. Na'ankure kotera kagranena Isipi moparera umani
vahe mani'nena hu'nane. **22** Mago'ma kento aro, megusa
mofavre mani'nesiana azeri haviza osiho. **23** Hagi zamazeri
haviza hanage'za, Nagritegama krafa hanage'na, Nagrama
tamage hu'na krafagezmi antahisu'na, **24** tusi nasivazinke'na
tamahe fanane hanenke'za a'netamimo'za kento mani'nageno,
mofavre tamimo'za megusa manigahaze. **25** Nagri vahe'mo'za
zamunte omanena atupa hu'ne'za zagma kagripinti nofi'ma
hu'enagenka, anante ante agofetu hunka namio hunka osuo. **26**
Tava'onkare'ma nemanisimo'ma zagma'ama nofi nehanigenka
huvempa hana'a avame'zana anakre ku'a eri'nesunka, zagea
uofre'nenkenka ana zupage amio. **27** Na'ankure agra magoke
nakreku ante'neankino, kenagera e'i ana anakre ku kofino zasi

korora vasegahie. Hagi ko'ma eme ominankeno'ma Nagritegama kezatina, Nagra nasunku Anumzanki'na nentahi'na eme aza hugahue. **28** Nagrira huhaviza hunantege, kva vahetamia huhaviza huntegera osiho. **29** Hozatamifinti'ma Nagri'ma ofama naminaku'ma vasagesaza ne'zano, zafa rgamofo tima'a za'za kna azerita oviho. Tamagonesa ne'mofavre'tamia Nagri namigahaze. **30** Anahukna hutma ese anenta'ma bulimakao afu'mo'ene sipisipi afu'mo'enema antenigeta Nagri avretma eme namiho. Nerera'ma ese anentama antena atrenkeno nerera'enena 7ni'a kna manite'na, 8ti knarerera avreta eme namiho. **31** Tamagra Nagri ruotge naga mani'nazagu, afi zagagafamo'ma aheno neneno'ma atre'nesia zaga onetma kra aminkeno neno.

23 Vahe'mo'ma osu'nesiazankura krunagea hutma vano osiho. Hazenke vahetega anteta havi kea keagafina huamara osiho. **2** Rama'a vahera avaririnka kefo avu'ava zana osuo. Hagi mago'mo'ma keagare'ma oti'nenama, rama'a vahe'mo'za havi kema hunente'hagenka kagranena zamavaririnka havi kea osuo. **3** Hanki mago zanarimpa osu'neke ke ha'ma nehanankenka, amunte omane nere hunka agri kazigagera onto. **4** Ha' vahekamofo bulimakao afuro donki afumo'ma hazagre'nena kesnunka, ete avrenka nafalamofo ome amio. **5** Avesinogantesnia ne'mofo tonki afumo'ma, tusi'a knaza erino nevanifintima ome traka huno'ma masenenkenka, ana nera aza hunka donki afu'a azeri otio. **6** Hanki amunte omne vahe'mo'ma keagafima oti'nesigenka amunte me'hea vahetega antenka azeri havizana osunka keaga antahi so'e huo. **7** Havigea hunka hazenkema osu'nesia vahera keagafina avrentege ahe frigera osunka ogantu'a manio. Na'ankure Nagra e'inama hanaza vahetamimofo kumira atre ozmantegosue. **8** Keagafima

mani'neno'ma aza huogu'ma masavema huno kamisia zana e'orio. Na'ankure masavema huno aza hinogu'ma ami zamo'a, keagama refkohu vahe'mofo avurga eri asu higeno, fatgo vahe'mofo kea eri rukrahe nehie. **9** Ru mopareima tamagranema emani'naza vahera zamazeri havi zana osiho. Na'ankure tamagrama Isipi moparema mani'netama eri'naza knazana antahi'naze. **10** Tamagra hoza 6si'a kafumofo agu'afi erita nenteta, ne'zama'a vasageho. **11** Hianagi 7ni kafurera ana mopafina hoza onteta atrenkeno manigsa hino. Hagi ana mopafima agra'ama hagesia ne'zana atrenkeno zamunte omane vahe'mo'za eri'za nenenko, mago'a afi zagagafamo'za neho. Ana zanke huta olivi zafa hozane waini zafa hozanena onkrita atrenkeno mopamo'a amne meno. **12** Miko erizantamia 6si'a zage knafi erigahaze. Hianagi 7ni zagekna zupa manigsa hinkeno bulimakao afutamimo'ene donki afutamimo'ene, tamagri kazokzo eri'za a'mofo mofavretamine, emani vahe'mo'zama eri'zama e'nerisaza nena manigsa hugahaze. **13** Nagrama huogu'ma kasami'noa kea antahi ankere'enka, havi anumazantmimofo agiramina ahege, ana anumzatmimofo agigenke'a huama osiho. Nehinke'za zamagra ontahaho. **14** Mago kafufina 3'a zupa atru huta ne'zana kreta neneta, monora hunantetere hiho. **15** Nagrama hurmantenoaza hutma ese ne'zama nesazana 7ni'a zageknafi zo-ore bretia neho. E'i ana ne'zana Avibi (March-April) ikante netere hiho. Na'ankure e'i ana ikante Isipitira atreta atiramita e'naze. E'ina hu'negu ana mika'mo'za amnea ome'za zamente zamente kresramna vu musezana eri'za echo. **16** Anantero ne'zama hamare'zamofo musema hu knarera, ese'ma hozafima nenama hania kavera emeritru hutma ne'zana neneta musena nehutma, ana hukna huta ne'zama vasage nompima

ante vagare knarerera, ne'zana neneta musena hugahaze. 17
Mago kafufina 3'a zupa mika venene'motma Hankavenentake Ra
Anumzamo'na navuga etere hiho. 18 Nagritegama kresramnama
vunantesaza zagamofo koranpina zistima me'nesiazana erinteta
Kresramana vuonanteho. Hianagi ana zagagafamofo afovamo'a
me'enkeno kora otino, hanki ana zupage tevefi kre fanane
hiho. 19 Ese ne'zama hozatamifinti'ma vasagesazana eritma
Rantami Anumzamofo nompi eme amiho. Hagi anenta meme
afura nerera ami rimpina onkreho. 20 Antahiho, Nagra ankero
vahe'ni'a huntoankino, ugota hurmanteno nevuno kantega
kegava hurmanteno retro'ma huramante'noa kumatera vugahie.
21 Ana ne'mo'ma mika'a kema kasmisiana, hara reontenka
ke'a antahinka erizafa huo. Na'ankure Nagri nagimo'a agripi
me'nena, ha'marentesanana kumika'a atreogantegosie. 22
Hianagi Nagrama asamisia kema tamasmi'na ke'ama antahita
avaririsage'na, Nagra ha' vahetamimofona ha' hunentena,
ha'ma rezmantesaza vahera ha' rezamantegahue. 23 Na'ankure
ankeronomo'a ugagota hurmanteno tamavreno Amori vahepine,
Hiti vahepine, Perisi vahepine, Kenani vahepine, Hivi vahepine,
Jebusi vahe'mofo mopafinena nevina, Nagra ana kumatmimpi
vahetmina zmahehana hugahue. 24 Zamagri anumzatmintera
tamarenarege monora huntege, zamavu'zmavara avaririta
osiho. Hagi mika havi anumzazmia erita rurako hutreho. 25
Hagi Anumza Rantamimofona Agrike monora hunertenke'na,
ne'zama nesaza zane, tima nesaza zana asomu huneramante'na
kria amu'notmifintira eritra'neno. 26 Hagi mofavrea kase ofri
knare hu'za kse nezmante'nageno, magore huno naravora
ana mopafina omanigahie. Hagi ana mopafina tamagra zaza
kna manitetma frigahaze. 27 Nagra vugota hu'na ana ha'

vahetimia zamazeri kore neha'nena antahintahi zamimo'a savri nehina rukrahe hu'za kore fregahaze. **28** Nagra tume hantanenkeno ugota hurmanteno Hivi vahe'ma, Kenani vahe'ma, Hiti vahera zmarotago hinke'za ana mopafina omanigosaze. **29** Hianagi magoke kafufinkera zamahe kaso'opegosue, na'ankure e'inama hanugeno'a, afi zagagafamo'a forehu hakare huno mikaziga avite'neno, tamazeri havizantfa hugahie. **30** E'igu akohe'na, ha' vahetimia osi'a zamazeri atretere nehanugeta, hakare vahe'ma fore huta miko mopa mani aviteghaze. **31** Mopatimimofo atupa'ama ometre emetrema hu'neana, koranke hgerinteti eri agafa huno vuno Medeterenia hagerinte ome atregahie. Hagi mago kaziga asopa'amo'a ka'ma mopareti erigafa huno vuno Yufretisi tinte ome atregahie. Hagi e'i ana mopafima nemaniza vahera Nagra tamaza nehane'na mopazmia zamaheta hanaregahaze. **32** Hanki mago huvempa kea ana mopare vahe'eneno, anumzazmirera huta eri hageorafiho. **33** Zamatreke'za tamagri mopafina omaniho. Na'ankure zamazeri savari hanageta havi anumzante monora hunenteta kumi hanageno, kukomo tamazeriankna hugahie.

24 Ra Anumzamo'a amanage huno Mosesena asami'ne, Kagrama, Eroni'ma, Natabu'ma, Abihu'ene 70'a Israeli kva vahe'enena Nagrama mani'noa agonare emarerita ana mikomota ogantu'a eman'i'neta monora hunanteho. **2** Hianagi Mosesega kagrake Ra Anumzamo'narera erava'oa hugahananki, kagranema maka e'naza kva vahe'mo'za ogantu'a maniho. Hagi magomo'e huno Mosese'enena emareorino. **3** Anante Mosese'a eazamo Ra Anumzamo'ma asamia nanekene, tra kea eme zamasamige'za maka veamo'za ot'i'za mago zamagi ante'za, maka kema Ra Anumzamo'ma Mosesema

asamino hihoma hiazana hugahune hu'za hu'naze. **4** Anantera
Mosese'a ana miko kema Ra Anumzamo'ma asmi'nea nanekea
avontafepi krente'ne. Nanterame otino ana agonamofo agafinka
12fu'a Israeli naganofi'mofo agire 12fu'a have eri atru huno
kresramana vu ita trohu'ne. **5** Ana huteno Israeli vahepinti
nehazavermi huzamantege'za tevefima kre fanane hu kresramna
negre'za, agaho ve bulimakao afu'nuti rimpa fru hu ofa Ra
Anumzamofona hunte'naze. **6** Anama hutageno'a Mosese'a ana
bulimaka afu'mofo korana amu'nompinti tagi fako huno mago'a
zuomparamimpi nenteno mago'a korana kre sramanama vu itare
aru tri hu'ne. **7** Ana'ma huteno'a Mosese'a eri hagerafi huvempa
kema krente'nea avontafe erino hampritege'za veamo'za,
nentahi'za amanage hu'naze, ana miko zama Ra Anumzamo'ma
hihoma hiazana amage nenteta, miko ke'a amage antegahune.
8 Anagema hazageno'a Mosese'a zuomparamipima taginte'nea
bulimaka afu korana reno ana vahetamimofo zamagofetu aru tri
nehuno amanage hu'ne, antahiho Ra Anumzamo'ma ke'anuti'ma
eri hagerafi huvempa kema hu'nea korane huno eri ama hu'ne.
9 Ana hutege'za Aroni'ma Nadabu'ma, Abihu'ma, 70'a Israeli kva
vahetamimo'zanena Mosese'ene agonafi mareri'za, **10** Israeli
vahemofo Anumzana ome ke'naze. Ana Anumzamo'ma agiama
reno'ma otineana safie nehaza havereti tro huntogeno pehe
huno hokonke huno mona kna hu'nea zante otinege'za ke'naze.
11 Hu'neanagi Agri'ma kazazankura, ana Anumzamo'a Israeli
kva vahetamina zamahe ofrige'za mani'ne'za ne'zane tinena
ne'naze. **12** Ana'ma nehazageno Ra Anumzamo'a amanage
huno Mosesenkura hu'ne, marerinka agonare'ma mani'nore
enka emani'nege'na, rempima huzami'nana kasegene hihogu'ma
havere'ma krente'noa nanekea kamii'neno. **13** Anage'ma higeno

Mosese'a otino eri'za vahe'a Josuana avregeke Anumzamofo
agonarega mareri'na'e. **14** Hianagi Mosese'a amanage huno
Israeli kva vahetminkura hu'ne. Ama anante tavega antetma
mani'nenketa vuteta ete a'mneno. Hagi amu'notmifima hafra
hu'zama fore'ma hanigeta, Aroni'ene Hurike manina'ankike
tamazeri fatgo hugaha'e. **15** Anage huteno ana agonafi Mosese'a
marerigeno hampomo'a ana agona refite'ne. **16** Ra Anumzamofo
hihamu masazamo'a Sainai agonare eramino me'negeno,
hampomo'a refite'negeno 6si'a zagegna evutegeno, 7ni knarera
ana hampompinti Mosesena kea humi'ne. **17** Hagi Israeli
vahe'mokizmi zamavurera Ra Anumzamofo himamu masa'amo'a
anamu ana agonafina keonke'za tefanane hu tevenefa kna hu'ne.
18 Hagi Mosese'a ana agona fima marerino tusi'a hampompi
ufreno 40'a zagegnagi 40'a keregeki huno umani'ne.

25 Hagi Ra Anumzamo'a amanage huno Mosesena asmi'ne.
2 Israeli veara zamasmige'za ofa eri'za eme namiho. Iza'o
ofama nami musezamo'ma agu'afima avitenkeno eme kamisia
ofage erio. **3** Ana ofama eri'za esazana amanahu'za eri'za
eho, golima silvama, bronsima, **4** hokonke nofi'ma, fitunke'ma,
koranke'ma efeke nofi'ma, meme azoka'ma, **5** eri korankre
hunte ve sipisipi akru'ama, hage rimpı bulimakaomofo frufru
huno zmana'zmana hu'nea ukri'ma akasia zafama, **6** tavi
taginte olivi masavema, knare mana neviazama masavefima
eri havia huno'ma vahe'ma asenire'ma taginteno asomu'ma
hunenteazama, tevefima kregenoma manavu'zama, **7** ugagota
pristi vahe'mo amega antani kukenare'ma ante'zana oniksi
nehaza haveramine, mago'a zago'amo mareri'nea haveramine
amimizare antani'za eri'za echo. **8** Hagi Israeli veamo'za ruotage
seli mono noni'a kinanteke'na Nagra zamagri amu'nompi

emani'neno. **9** Nagrama kaveri'ma hanua kante antenka, ana seli mono none maka agu'afima me'nia zantamina trohuo.

10 Hagi huge'za akasia zafareti mago vogisi tro hiho. Ana vogisimofona zaza'amo'a 110 sentimita hinkeno, atupa'amo'a 66 sentimita hinkeno, mareri'amo'a 66 sentimita hino. **11** Ana vogisimofo agu'afine fegi'anena golinutike'za eri anonevazita agema'aramintera golinutike eri avozaze hutma eri pehe hiho. **12** Hanki 4'a rinire golire tro huta fenkami kaziga agente agentera tare tare hutma ome rekamarente eme arekamarente hiho. **13** Ana nehuta Akasia zafa antrenteta tare zota trohuta golinuti eri ano vazinteho. **14** E'i ana tare zafa ana vogisima erisga huno vu'zana anama 4'a rekamarente'naza rinifinka antaninteho.

15 Hagi ana zotarerena, huhagerafi vogisimofo rinifinkatira avazuhu otreta atrenkeno anante meno. **16** Ana vogisima trohu vagaresnunka, tare havere'ma kasegema kregamisuana, ana vogisimofo agu'afi anto. **17** Hanki ana vogisimofona, asunku zamofo trare hutma avaza'a goliretike tro hinkeno, zaza'amo'a 110ni'a sentemita hinkeno, atupa kaziga'amo'a 66si'a sentemita hino. **18** Hanki hamantu golia ruguta huta tare serabimie nehaza ankerontre tro huteta, vogisimofo avaza'are asunku tra'mofo agofetu rugaraga agentera anteho. **19** Serabimie nehaza ankerontre'ma tro'ma hanazana, anama asunku zamofo tra'ma tro'ma hanaza golinutike, rugaraga agentera ana ankerontrena trohunteho. **20** Ana Serabim ankeroremokea zanavugosa ohumi ahumi nehuke, kepri huke asunku tra'mofo negenakeno zanageko'namo'a, rufanara huno ana vogisia refiteno. **21** Hagi tare havere'ma huhagerafi huvempahu kasegema kre tamami'noa erita ana vogisimofo agu'afinka nenteta, asunku tra'mofo avaza'a erita refiteho. **22** Nagra e'i ana asunku tra'mofo

agofetu'ma Serabim ankerontremofo amu'nompi eman'i'ne'na maka kasegeni'a negasm'i'nena, Israeli veara zamasmigahane.

23 Anantero mago tra akasia zafareti tro hih. Ana tra'mofona zaza'amo'a 88'a sentimita hinkeno, atupa'amo'a 44'a sentimita hinkeno, mareri'amo'a 66'a sentimita hugahie. **24** Ana tra'mofona golinutike eri ano nevazita agema'aramintera ana golinutike eri avozaze hutma eri pehe hutma avareho. **25** Hagi ana tra'mofa atumpa'are'ma eri agu'a huno rugagisiana 8'a sentimita hina, golinutike eri avozaze hutma avareho. **26** Ana huteta 4'a golire rini tro huta 4'a atuparera 4'a agamofo tavaontera mago mago rekamarenteho. **27** Ana 4'a rinima rekamarentesaza tra'mofona anagami rugaraga agentega rekamrente'nenkeno ana riniramimpina erisga huno vu'zana tare zota antanitegahaze.

28 Ana huteta akasia zafareti tare zotarare antreta tro huteta golinuti masavena frentenkeno, e'i ana zotarentet i ana trara zafa hu'za vugahaze. **29** Hanki tima taginte zuomparamine waini tima tagi'zama ofama hanaza tintafene kapunena golinutike'za tro huntenkeno ana tratera meno. **30** Hagi Nagri navure'ma antesageno me'nia bretia, ana trate antenkeno mika zupa meno.

31 Tavi'ma rekru hunte azota tro'ma hanazana, retarure agi'agi, rampa'agi, azankuna'araminki asina'agna'ma hutma tro'ma huntessazama'agi, amosre'agna'ma hutma tavi'ma rekruhunte'ama tro'ma hnazana hamanteti aruta magoke golinutike trohunteho.

32 Hagi ana tavi zotamofona 6si'a azankuna tro hunteho. Rugaraga 3'a azankuna metere hugahie. **33** Hagi ana zotamofa 6si'a tavi'ma rekru hunte azankunatamimofo atumparega, almoni zafamofo ani'na'ane amosare'agna hunka tavi'ma rekruhunte'a tro hunto. **34** Hanki amu'nompima mareri'nea zotarer, almoni zafamofo 4'a amosare'agna hutma tavi'ma rekruhunte'a tro

hunteho. 35 Hanki ana zotamofoma rugaraga azankunatrema
tro hunte'narera almoni zafamofo ani'na'a trohutere hiho. 36
Ana tavi zotama azankuna'aramima, anina'ama, mosare'anema
tro'ma hanazana magoke golinutike, arukuta huta trohiho. 37
Ana 7ni'a azotaramintera lamu tavi tro huta antenkeno, seli
nompina avuga remsa hino. 38 Hanki ana lamu tavimofo osama
hampage tu'zane osama erinte tafe'enena golinutike tro hiho. 39
E'i ana tavi zotamofoma mika zantamima'ama tro'ma hanaza
zana kna'amo'a 34'a kilo hu'nenia golireti tro hiho. 40 Hanki
e'i ana mika'zama tro'ma hanazana, Nagrama ama agonafi
kaveri'ma hu'hoa kante antenka tro hiho.

26 Hagi Seli mono nomo kisazana knare huno zmana zmanama
hu'nesia hokonkenofiki, fitunkenofiki, korankenofi avazu huno
zagi'nesia osinofiteti 10ni'a tavrave trohutenke'za, ana zama trohu
antahi'zama eri'naza eri'za vahe'mo'za, Serabimi ankeroramimofo
zamema'ana tavraveramintera hati'za tro hanageno, 2 ana
maka tavaravea mago avamentekenevuna, za'za amo'a 12fu'a
mita hanigeno, atupa'amo'a tare mita hutere hino. 3 5fu'a
erimagopinteta nehatita ruga'a 5fu'amofona anahutma magopi
erintetma rehatiho, 4 ana 5fu'a tavaravea erintetma rehatisaza
kevumofota atupa'arega, hokonke tavravereti erihagerafi atupa'a
tro nehutma, mago kevumofona meg'i'a atuparera anazanke
hugahaze. 5 Mago kevu tavravemofo atumparera 50'a eri
hagerafi atupa'a tro nehutma, mago kevumofonena anazanke
hutma trohinkeke, ana tarega tavravemokizni atumpa'amokea
zamavugosa ohumi ahumi hugaha'e. 6 Ana tare kevu tavravema
erinteno vazirusi hanigeno erintrako hu'zana, gorileti erikorave
huta 50'a rinia eri hagerafi atumparamintera tro hunte'nageno,
ana seli mono nomo'a magoke megahie. 7 Ana seli mono nomo

rufite tavravea meme afu'mofo azokateti maka 11ni'a tavrave tro hugahaze. **8** Ana maka 11ni'a tavravea mago avamenteke'za trohinkeno, zaza'amo'a 13ni'a mita hina, atupa'amo'a tare mita hutere hugahie. **9** 5fu'a tavravea erinteta rehati rehati hinkeno mago tavrave nesena, 6si'a travavemofona anazanke hutma rehatinkeno mago erisena, anampinti 6simofona repasi hinkeno ete eme ruhamprino seli nomofo avuga ufre kaziga, ana travavemo'a taparino meno. **10** Hanki eri mago hutama hatinte'naza travavemofona eri hagerafi atumpa'a, 50'a tro nehutma, mago'ma hatinte'naza travavemofonena anazanke hutma tro hugahaze. **11** Ananteri tare travavere'ma 50'a eri hagerafi atupa'ama troma hunte'nafima, erihagerafino eri ruhampri'zana bronsireti erikorave huta 50'a rini kana tro hutenenkeno, ana tare travavea erirusi hinkeke seli mono nomo'a erimago huno megahie. **12** Ana seli mono nomofo agofetu'ma refite'nia travavemo'ma agatereno vania atupa'a atrenkeno amefiga uramino ruhananeno. **13** Ana seli mono nomofoma rufite travavema tro'ma hanazana, rugaruga asoparega 50'a sentimita atrenkeno vugatereno tare kaziga asopa nomofona rufiteno. **14** Hanki ana nomofoma rufite selima tro'ma hanazana, ve sipisipi afumofo akrute erikoranke huta rufineteta, ana agofetura hagerimpi bulimakaomofo amega akru eritma rufite vagaregahaze. **15** Ana seli noma ki zafa akasia zafaraminteti tro hugahaze. **16** Ana seli noma eri otino ki'zafaramimofo zaza'amo'a, 4'a mita hina, kuta'amo'a 66'a sentimita hutere hugahie. **17** Ana seli mono noma vazisgama hania zafa zazate taga hutma tro hunte'nenkeno tra'afina ome rusi huno meno. Anazanke hutma maka asopa zafa tro hiho. **18** E'i anama hutama tro'ma hanaza zafaramimpintira 20'a zafaretira

seli nomofona sauti kaziga retrureho. **19** Hagi ana asopa zafaramimofo agafafima azerikona hina oti fatgo hania zana, mago zafamofo agafafina silvareti tare tra trohutere hinkeno, ana maka tra'mo'a 40'a fore hino. **20** E'i anahukna huta noti kaziga 20'a zafaretira seli noma azeri oti'zafa retrureho. **21** Hagi ana asopa zafaramimofo agafafima azerikona hina oti fatgo haniazana, mago zafamofo agafafina silvareti tare tra trohutere hinkeno, ana maka tra'mo'a 40'a fore hino. **22** Seli nomofo amefira zage fre kazigama vazisgamahu zafaramina 6'a tro nehutma, **23** seli nomofo amefi'ma ome renegente eme renagentehu tare atupatrentera retruresaza tare zafa tro hugahaze. **24** Anama renagentete'ma marerisa'a tare zafamokea, magoke trate regriteke anagamu atupa'amokea rinifinka ufre'nakeno znazeri tragotegahie. Mago kaziga renagentetera anazanke hiho. **25** E'inama hanageno'a makara 8'a zafa mena, ana zafa azeri oti trara silvareti mago mago zafarerera tare agi'a trohutere hinkeno ana makara 16ni'a tra megahie. **26** Ana zanke hutma seli mono nomofo asoparegama rugeku zafa akasia zafareti 5fu'a tro hiho. **27** Hagi mago kaziga (saut) asopareganena 5fu'a rugeka zafa tro nehuta, seli mono nomofo atupa kaziga zage fre (west) kaziganema me'nea zafarerera anazanke huta 5fu'a rugeka zafa tro hiho. **28** Amu'nompi rugeka'ma hanaza zafamo'a mago asopamofo atuparetira vuno, mago atupare uhanitino. **29** Ana zafaramimofona goliretike erinona vazinezamanteta, rugekama hanaza zafaramima erirusi hu'zana goliretike erikorave hutma retrure zafarerera tro huntegahaze. **30** Mosesega ama agonafima kaveri'ma huankante amage antenka ana seli mono nona azeri otio. **31** Seli mono nomofo hunaragisaza tavravema tro'ma hnazana knare huno zmana zmanama hu'nesia efekenofiki

hokonkenofiki, fitunkenofiki, korankenofi avazu huno zagi'nesia
osinofiteti tavravea tro huteneke'za, ana zama trohu antahi'zama
eri'naza eri'za vahe'mo'za, Serabimiankeroramimofo amema'a
anatavraveramintera hati'za tro huntaho. **32** Ana tavravema
hantisazana, 4'a akasia zafarera golireti eri ano nevazita, ana
zafarera golireti eri rusi hu'zana tro nehuta zafama retrure
trara silvaleti 4'a tro hiho. **33** Ana tavravea erirusihu rinire
hantinkeno evuno hunaragintena ana tavravemofo amefiga'a,
ruotagehuno ruotgetfa hu'nefinka huhagerafi huvempakasege
vogisia anampinka antenkeno meno. **34** Anama ruotagehuno
ruotagetfa hu'nea asama hunaragintepinka kasegema me'ne
vogisimofo agofetura asunkutra trohuta rufiteho. **35** Hanki
hunaragine tavaravemofo avuga ruotage'ma hu'nefina, noti
kazigamago Nagri navure'ma antesagenome'nia bretimofo
traranentetma, anaselimonomofo sauti kazigatavi'ma
rekaruhunte lambe tavi zota anteho. **36** Anaselimonomofo kahama
ufrete'matafi tavravema tro hanazana, hokonkenofiki, fitunkenofiki,
korankenofiki hutma, kapokureti'ene avazu huta osite
nekazareti hanetma tro hiho. **37** Kafante tavravema hanti'zana
5fu'a retrure zafa akasia zafare golireti ano nevazita, ana zafarera
golireti eri rusi hu'zana tro nehuta, zafama retrure trara bronsireti
5fu'a tro hiho.

27 Akasia zafareti'ma kresramnavuitama tro'ma hanazana,
mareriamo'a 1 mitagi 30'a sentemita hina, zaza'amo'ene
kahesa'amo'enena mago avamenteke 2 mitagi 20'a sentemita
hino. **2** Hanki 4'ama omerenagente emerenagentema hutera
mago pazive tro huntetere hinkeno, ana pazivetamimo'za ana
itare rutragote'za erimago zanke nehina, ana ita bronsireti
amega'a anovazinteho. **3** Ana itare'ma eri'zama eri'zantamina

bronsireti'ma tro'ma hanazana, tanefa'ma katetre kavoraminki,
osama kate sipetiraminki, ru tritri hu zuomparaminki, revazuhu
zotaraminki, tevema tagi osi zuomparaminki hutma tro hoho. 4

Bronsireti rama'a karami hagente'za strena tro hutma anaga
tevema hugre itamofo antenkeno agu'afi uramino amu'nompi
me'hena, anante 4'a bronsire rini tro huta zotama vazinteno erisga
hu'zana tro huta 4'a renagentetera rukamregahaze. 5 Anama
Bronsireti rama'a karami hagente'za strenama tro huta kresramna
vu itamofo amu'nompi fenka kaziga trate rukamrentenko
meno. 6 Ana kresramna vu itama vazino erisagahu azotarerena
akasia zafareti tro hutetma amega'a bronsireti anovaziho. 7

Ana azotarerena kresramna vu itamofo rugaraga asoparega
riniramima tro'ma huntepinka erita vazintenko, erisgama
huno vu'za meno. 8 Ana kresramna vu itarera kuta zafareti
tro hinkeno, agu'afina hagro huno mena, ana itama tro'ma
hanazana, Mosesega agonafima kaveri'ma hu'noa kante amage
anteta tro hoho. 9 Seli mono nomofo kuma keginama hanaza
tavravea, sauti kaziga zaza'amo'a 44'a mita hina, keginarera
osi nofiteti zagi'za hati'nesaza tavaravereti tafinteta eviho.

10 Keginama azeri oti zafaramina 20'a tro nehutma, kegina
zafamofo tra'a bronsireti 20'a tro nehutma, tavravema erirusi
huno tafinte'zantamine nofi'ma rente'zantamina silvareti ana
azeri oti zafamofo avozarera tro hunteho. 11 Ana zanke huno
noti kaziga keginahu tavravea azeri oti zafaramina 20'a tro
nehutma, kegina zafamofo tra'a bronsireti 20'a tro nehutma,
tavravema erirusi huno tafinte'zantamine nofi'ma rente'zantamina
silvareti ana azeri oti zafamofo avozarera tro hunteho. 12

Ana seli mono nomofo keginare tavravea zage ufre kaziga
kahesa'amo'a 22'a mita hina, keginama eri oti'zafa 10ni'ane

tra zamianena, 10ni'a tro hiho. **13** Hanki zage hanati kaziga avugosama hunte'nea kumamofo kahesa'amo'a 22'a mita hino. **14** Kama ufrete'ma tamaga kaziga hanti tavravea, zaza'amo'a 6 mitagi 60 sentimita hina, kegina retrure zafa 3'a tro nehuta tra'aramina 3'a tro huta anantera ana tavravea tafinteta eviho. **15** Hanki kama ufretema hog a kazigama tafi tavravemofona zaza'amo'a 6'a mitagi 60 sentimita hina, 3'a retrure zafagi 3'a tra'aramina tro nehuta anantera ana tavravea tafinteta eviho. **16** Hanki ana kumapima ufre kante'ma ruhi'zamahu tavaravema tro'ma hanazana, hokonke'ene, fitunke'ene, koranke nofiteti'ene, ana eri'zama eri antahi'zama eri'nesia vahe'mo osite zagino ana tavravemofona konariri'a hunentena, ana tavravemofona zaza'amo'a 9'a mita hina, 4'a retrure zafane 4'a trazamia tro huta ana tavravea kafanterea tafinteho. **17** Ana kuma'mofo maka kegina zafaramintera, erirusi hunte zantamine nofi'ma anaki'zana silvaretike tro nehuta, keginama eri oti tratamina bronsireti tro hugahaze. **18** Ana kumamofona zaza'amo'a 44'a mita hina, kahesa'amo'a 22'a mita hina, keginare'ma tafinte tavravea, knare huno osite zagi'nesia nofiteti trohinkeno mareri'amo'a 2'a mitagi 20'a sentemita nehina, bronsireti keginama retrure trataminena tro hugahaze. **19** Ana maka ruga'azama seli mono nompima eri'zama eri'zantamine, ruzahu ruzahu eri'zama eriterehu zantamine, seli nompi zantamine, meg'i'a tavravere'ma avazuhumpi huno rente zotane, seli mono nomofo tavaravema avazuhumpi huno rente azotaramina, ana maka zantaminena bronsiretike tro hugahaze. **20** Kagra hanavege Israeli nagara huzamantege'za olivima regatati hu'zama eri agruma hu'nesaza masavena lampe tavima tagintena tevava hania zana eri'za echo. **21** Ana seli mono nompima, huvempa huno huhagerafi

vogisima ante asama hunaraginte tavravemofo avuga, Aroni'ene ne' mofavre naga'amo'za Anumzamofo avurera kinagane nanteranena tavira tagintenkeno tevava nehina, ama'i ana avu'avara Israeli vahe'mota huvava hutma nevinke'za henkama tamagehe'za fore hanamo'za ana zanke hu'za vugahaze.

28 Hagi Mosesega negafu Aronine ne' mofavre naga'a Nadabuki, Abihuki, Eleazaki, Itamaliki, Israeli vahepintira ke huge'za kagrite e'za Nagri pristi eri'za vahe maniho. 2 Negafu nera Aronina ruotage huno avasese'amo'ma mareri'nen'i'a kukena tro huntenenkeno, vahe'mo'za kesga hunente'za antahimoho. 3 Anahu eri'zama erigahaze hu'nama knare antahi'zama zamuge'za e'neri'za vahera mika ke huge'za, Aroni'ma antani'nenigeno azeri ruotage hanigeno, pristi eri'zani'a erisia kukena'a tro hunteho. 4 Ana kukenama zagita tro'ma hnazana amanahu kukena tro hugahaze, amimizare'ma 12fu'a havema rekamre'nia tavravegi, amimizare'ma hania kukenagi za'za kukenagi, agu'afi avate kenagi, asenire naki travavene amu'nofi'ene trohinke'za, negafu ne' Aroni'ene ne' mofavre naga'amo'zanena antanine'za, pristi eri'zani'a erigahaze. 5 Ana kukenama tro hanaza nofitamina, hokonkenofiki, golirenofiki, fitunkeki, korankenofi'ene knare zantfa hu'za zagi'nesa nofiteti'ene tro hiho. 6 Amega amimizare'ma hania kukenama tro'ma hanazana, golirenofiki hokonkenofiki, fitunkenofiki, korankenofi'ene knare zantfa hu'za osite zagi'nesaza nofiteti hinke'za ana zante eri'za vahe'mo'za trora hugahaze. 7 Afumpinti'ma krerami'nigeno amefigama anakisnianofira anaga kaziga tare atumparega tafinteho. 8 Amu nofi'ma zagita tro'ma hnazana, golirenofiki, hokonkenofiki, fitunkenofiki, korankenofi'ene knare zantfa hu'za osite zagi'nesa nofiteti eri so'e hu'za tro hanageno, amimizare'ma hu kukenamo'enena

magoke fore hugahie. **9** Oniksie nehaza have tare eritma 12fu'a Jekopu ne' mofavre'mokizmi zamagi, ana haverarentera taga huta krenteho. **10** Ese'ma kase zamante'neregati vuno osite'ma vanigeta zamagima krentesazana, 6si'a zamagia mago havere krenteta, mago haverera 6si'a zamagi'a krenteho. **11** Ana tare haverera, tagama hu'za avame'zama havere'ma tro'ma nehazaza huta, Jekopu ne' mofavre'mokizmi zamagi'a taga huta krenenteta, golireti rinia tro hinkeno ana haverarena znazeri antrako hino. **12** Ana havererena ruga raga afunte'ma me' tavravere hagerafintenkeno antahizami avame zankna huno me'ne'nigeno, Aroni'a Jekopu ne' mofavre naga'mokizmima Ra Anumzamo antahizaminogu maka zupa Anumzamofo avurera vugahie. **13** Ana havererema znazeri antrakohu rinia golireti tro nehutma, **14** seninofikna hutma golireti hanetma eri hagerafi hagerafi hutma tarenofitre, tro hutma ana rinirarentera renteho. **15** Amimizare'ma hania kukenama tro'ma hanazankna hutma, asunte'ma hu'neno Anumzamofo avesi'zama kefore'ma hu'zana, ana zama trohu knare antahi'zama eri'naza vahe ke hinke'za, hokonke nofiki, fitunke nofiki, koranke tavravereti'ene knare hu'za zagi'nesaza osi nofiteti tro hiho. **16** Ana tavravemofo zaza'amo'a 44'a sentimita hina, atupa kaziga'amo'a 22'a sentimita hinketma erinteta repasi hinkeno, ana maka asopamo'a mago avamenteke vino. **17** Miza zama'amo'ma mareri'nesia have raminteti ana tavraverera 4'a isa'are rekamarenteta evugahaze. Hanki kotama evania isarera rubi havegi, topasi havegi, berilie nehaza have evina, **18** anante'ma evania isa'arera terkoise nehaza havegi, safaire nehaza havegi, emererie nehaza zafasi'nage havemo evina, **19** anante nampa 3 isare'ma evaniana, jasintie nehaza havegi, agatie nehaza havegi, ametistie nehaza have evina, **20** anante nampa

4 isa'ama evanirera, krisolaetie nehaza havegi, oniksie nehaza havegi, jaspe nehaza havemo ene evino. Ana maka haveramima regrinte anom'a aramina Goliletike tro huntenkeno azeri antrako hino. **21** Ana maka 12fu'a haverera Israelina (Jekopu) 12f'u'a ne' mofavre'mokizmire huhamprino magoke magoke have'a me'nena, ana havere mago magomokizmi zamagi'a anante taga hu'za krentegahaze. **22** Amimizare'ma 12fu'a havema ante'ne tavravema rentesaza seninofira goliretike haneho. **23** Hanki goliretike tare nofi'ma rente rinia ana tavravemofona anagamu atumpamofo ruga raga kaziga ometre emetrema hutega renteho. **24** Anama anakintesaza rinirarentera golire tare seni nofi'ma tro'ma hanaza nofinu anante hagerafinteho. **25** Hanki ana seni nofitremofo atupa'arera erita rugaraga azonare'ma ante havema eri anovazi'nea golire renteho. **26** Hanki mago ene tare golire rini tro hutma amimizare'ma 12fu'a havema ante'ne tavravemofo henkamu kaziga omete emete hutega, agu'afi amimizare'ma hu kukenamofo tvaonte tafinteho. **27** Hanki mago'ene golireti tare rinia tro hutma azonareti'ma kreramino amimizare tavravema hagerafi'nere ruga raga avasase'ane nofi'numa avamare'nere renteho. **28** Hanki hokonke nofi'nu amimizare'ma 12f'u'a havema me' tavravemofo fenkamu kaziga rugaraga atumparega me'nea rinirarente anakintenko, amimizare hu kukenare rukamreno meno. **29** Aroni'ma Ruotage'ma hu'nefinkama ufresuno'a Israeli ne' mofavre naga'mokizmi zamagia tumo'amofo agofetu amimizare'ma hu'neno ufresige'na, Ra Anumzamo'na nagerakni ozamante'noe hu avame'za meno vugahie. **30** Ana zanke hunka amimizare'ma 12fu'a havema me' tavravemofo kasagu'afinka, tare havemofo zanagi'a urimie nehaza havene, tamimie nehaza haverare eririgeno Aronina tumo'amofo agofetu

amimizare hanti'neno, Ra Anumzamo'na navure'ma vaniana,
e'i ana haveraremoke Nagri navesira eri ama' hugaha'e. **31**
Agu'afi antani'neno agofetu'ma amimizare kukena hania za'za
kukena, hokonke tavraveretike'za tro hiho. **32** Hanki ana
za'za kukenamofo ananke kana amu'nompi hagenentetma,
ana kamofoma hatigagisazana tavravea ante taparita zagita
hatinkeno tagatora osino. **33** Hanki ana za'za kukenamofo
agiaregama rugagi atumparega, pomigreneti zafa rgagna huta
hokonkenofiki, fitunkenofiki korankenofi'nuti tro hutetma
ana za'za kukenarera rentekagiteta, ana zantamimofo amu'no
zmifina golireti belotami tro huta renterente hiho. **34** Hanki
ana zantamima rente kagisazana, golireti'ma tro'ma hu'naza
belora renenteta, pomigreneti zafa rgama tro'ma hu'nazana
rente rente hutere hutma, ana kenamofona kagiho. **35** Seli mono
nompima hunaraginiogeno ruotage'ma hu'nefinkama Aroni'ma,
Ra Anumzamo'na navure'ma ruotagema hu'nefinka eri'za eri'naku
ana kukena hu'neno ufreno atiramino'ma nehanige'za, Ra
Anumzamo'ma ahe ofri'enigura ana arente'naza belotamimofo
agerura antahigahaze. **36** Hanki goliretike mago kuta preti
tro huteta anantera Ra Anumzamofontega ruotage hu'ne
hutma taga huta krenteho. **37** Anantera hokonkenofi'nu ana
nanekema krente'naza gorile pretia asenire'ma anaki tavravemofo
agofetu anakinteho. **38** Aroni'ma ana tavravema asenire
maka zupa anaki'nena, Israeli vahe'mo'zama ruotage hu'nea
musezama eri'zama eme namisafima hantagama hanazana,
Nagra Ra Anumzamo'na ana pretima nege'na hazenkezmia
atre zmantegahue. **39** Hanki agu'ama antani kukena knare
tavravenuti zagita tro nehuta, anunte'ma anaki tavravenena ana
zantetike tro hiho. Azonaregati'ma rugreramino asoparegama

evunofira konaririanenofitrohiho. **40** Hankizamazeri ruzahu'ma hu'nesige'za vahe'mo'za antahizami'za husga huzmantesaza kukena zamu'nofiki tavrave kankriki meg'iama antani kukena (tunik) Aroni ne' mofavre zagamo'za hanaza kukena tro hiho. **41** Mosesega ana kukenaramima negafu Aronine ne' mofavre naga'anema eri huzamantetenka, ananterazmanumpina masave taginka fre zmentetenka, huhamprizmantenka zamazeri ruotage nehunka, pristi vahe zamazeri otige'za Nagri eri'zana eriho. **42** Hankiefeke tavravereti zamagaze zmavufga eri frakisia atupa kena, zmaratimpareti urami fenkamuteno zamotega ome atre kena tro hiho. **43** Hanki Aroni'ene ne' mofavre naga'anema seli mono nompima ruotage'ma hu'nefinkama ufre'za Kresramanavuitare'ma eri'zama erinaku'ma vanu'za, zamagaze eri'za frizankura ama ana atupa kena antanine'za ufregahaze. Ama'i ana kasegemo'a mevava huno Aroninteti agafa huno zmagehe'inte meno vugahie.

29 Mosesega amanahu hunka Anumzamo'na Nagri pristi eri'zama erisagura Aronine ne' mofavre'aramima'a zamazeri ruotage hananke'za pristi eriza erisazana mago a' anenta ve agaho bulimakaogi, tare afuhe afahe osuve sipisipi afu anentatrenki, **2** knare'ma hu'nesia witi flauateti zo-ore bretia tro nehunka, zisti onte flauateti keikia, masavene eri havia hunka tro nehunka, olivi masavenu eri havia hunka zisti onte flauateti haganentake bisketiramina tro huo. **3** Anante mago ekaeka kupi ana zisti onte flauate'ma troma hu'nana zantamina eriritenka, ana eka eka kuki ve bulimakaonki, tare ve sipisipirerene erita Nagrira eme namiho. **4** Ana hutenga Aronine ne' mofavre naga'anena zamavarenka, seli mono nomofo kahante tina frezamantetenka, **5** ananterakukenaramimazaginka tro'mahunte'hampinti amega

kukena'a Aronina eri huntetenka anante zaza kena'a huntetenka
ana agofetura amimizare kukena huntetenka, ana agofetura
12fu'a havema me'nea tavrave antanitentenka hentofazama
huno tavraveretima tro'ma hu'nea amu'nofiteti erinka anakinto.
6 Aronima asenire anakinte tavravema tro'ma hunte'hazana
erintani nentetma, ana tavraverera ruotage'ma hu'nea golire
pretia rukamrenteho. **7** Anumpima taginte masave erinka
Aronina asenire taginka huhamprintegahane. **8** Aroni ne'
mofavre nagara hinke'za esagenka amega efeke kukena
erintani nezamantenka, **9** zamasenirera tavravereti anaki
nezmantenka, Aronine ne' mofavre nagara zamu'nofira anaki
zmantenke'za, Nagri pristi eri'za vahe zamagra manivava
hugahaze. Ana hukna kante Aronine, ne' mofavre'anena
huhampri zmantegahane. **10** Ve agaho bulimakao avrenka seli
mono nomofo avuga ege'za, Aroni'ene ne' mofavre naga'amo'za
asenire zamazana anteho. **11** Ana hutesagenka seli mono
nomofo kahama ufrete, Ra Anumzamofo avure ana bulimakaoa
aho. **12** Ana ve bulimakamofo korama'a kazankoreti erinka
kresramna vu itamofo pazivetamima tro'ma huntetera nefrenka,
mago'a korama mesiama'a erinka kresramna vu itamofo agafi
tagi netrenka, **13** agu'afinti maka afova'ane asumanane tare
kresoane anoma vazintenea afovanena erinka kresramna
vu itarera kregeno teveguna mrerino. **14** Hianagi kumi'mofo
ofama hnanana bulimakaomofo ame'agi, amega ukri'agi rimpa'a
erinka kumamofo meg'i'a ome krerasago. **15** Mosesega tare
ve sipisipifintira mago azerisanke'za Aroni ene ne' mofavre
naga'amo'za asenirera zamazana antetesagenka, **16** ahenka
korama'a taginka kresramna vu itamofona maka sopa'arega
rutri tri hunto. **17** Ana sipisipia tagarago hunka, rimpa'ane

ajazama'anena sese hunka aseni'ane ruga'a avufganena magopi erinto. **18** Ana hutenga ana maka zama'a kresramna vu itare krerasago. E'ina ofa tevereti'ma Ra Anumzamo'nare'ma kre mana vanageno Nagri navure'ma knare mnama vania ofe. **19** Mago sipisipi anenta'ma atre'nana su'ana Mosesega kagra azeri nesanke'za Aroni ene ne' mofavre naga'amo'za asenire zamazana antesnagenka, **20** ana sipisipia ahenka mago'a korama'a taginka Aronine ne' mofavre naga'amokizmia tamaga kaziga zamagesamofo atumparega frenezmantenka, tamaga kaziga zamazamofo zmazafa zamazankore fre frenezmantenka, tamaga kaziga zamagamofo zamagafa zamagigore frenezmantenka, mago'a korana taginka kresramna vu itamofo maka asoparega ru tri tri nehunka, **21** kresramna vu itareti mago'a korana e'nerinka, zamanunte'ma tagi masavenena erinka Aronine mofavre naga'a kukena zamirera, korane masavenena rutri tri hinkeno, ana kukenane zamagranena Nagri su'za meno. **22** Ana ve sipisipi anentamofo afova'ane, risonafi agusane agu'afinti afovama, azamopama eri anoma vazi'nea afovane, tare kreso'are'ma anoma vazi zanante'nea afova'ane, tamaga kaziga amumazina'ane erinka pristi vahe'ma Nagrite huhampri zamanteno zamazeri routage hu ofa eme huo. **23** Ra Anumzamo'na navure'ma zisti onte bretima eka ekapi kupima ante'nafintira mago ko'na e'nerinka, masavereti'ma kre'naza keikine, magora hagege bisketine erinka, **24** ana maka'zana bretine ame'anena Aronine ne' mofavre naga'amokizmi zamazampi antenke'za erisga hu'ne'za Ra Anumzamo'na navurera erivereve hu ofa hiho. **25** Anama hutesagenka, Mosesega zamazampintira bretine ame'a erinka Ra Anumzamofonte'ma kre fananene hu ofa kresramna vu

itare kregeno knare mana Nagri navurera vino. **26** Ve sipisipi
ahenka Aronima azeri ruotage'ma hu'naza sipisipimofo ahihiza'a
erinka, Ra Anumzamo'na navurera erisga hunka eri veravehu
ofa hutenga, ana ahihiza'a Mosesega nesana su'ane. **27**
Ana ve sipisipimofo amumazina'ane ahihiza'anema huhampri
zmanteku'ma erisga hunkama eri verave hankeno'ma ruotage'ma
hu'neana e'i, Aronine, mofavre naga'amo'zama nesaza su'ane.
28 Israeli vahe'mo'za Nagri'ma arimpa fru ofama, amumazina'ane
ahihiza'anena namisaza su'ana, Aronine mofavre naga'amokizmi
suzanki, maka zupa zamitere hiho. **29** Aronina ruotge hu'nea
pristi kukena'a ante'nenkeno, agri naga nofipima agri noma
erisimofona erita ana kukena antaninteta asomu huta, azeri
ruotage hiho. **30** Mago mofavre'amo'ma agri noma erino seli mono
nompima ruotage'ma hu'nefinkama pristi eri'zama erisimo'a, ana
kukena hu'neno 7ni'a zage knafina eri'zana erigahie. **31** Aronine
ne' mofavre naga'anema huhamprinka zamazeri ruotage hu
ofama hanana sipisipifintira, ame'a erinka seli mono nomofo
atruhu kumapi kavofi kregahane. **32** Seli mono nomofo kafantera
Aroni'ene ne' mofavre naga'amo'za sipisipi afu'mofo ame'ane eka
eka kupima bretima me'neanena eri'za negahaze. **33** Ana ne'zana
pristi vahe manihogu'ma huhampri zamante'naza zupama
zamagri'a kumiku'ma hu'naza ofagi'za zamagra'ake nesage'za,
ru vahe'mo'za oneho. Na'ankure e'i ruotagetfa hu'ne. **34** Anama
huhamprino zamazeri ruotage hu ofama hu'nea ve sipisipi
afu ame'afi, bretio me'nesigeno'ma nanterasenigeta, onetma
tevefi kre fanane hiho. Na'ankure e'i ana ne'zamo'a ruotage
hu'ne. **35** Seveni'a zagegnafi Aronine ne' mofavre naga'arema
huzmantoma hu'nama hugante'noa zantamina maka huzmante
vagaro. **36** Mago mago zagegnarera bulimakao ahenka kumi'ma

atre ofa hutere hutenga, Kresramana vu itama azeri agruma hu ofa nehunka, masevena frentenka eri ruotage hugahane. **37** Ama ana itarera 7ni'a zage knafi itama azeri agruma hu ofa nehugen, ana itamo'a me ruotageta huno me'nena, na'zamo'o ana itama avako'ma hania zamo'enena ruotage hugahie. **38** Mika zupama mago mago zage knare'ma ana itare'ma ofama hanunka, amanahu hunka ofa huo, tare sipisipirare mago zagegafu hu'nesa'a zanazerinka, **39** mago'mofona nantera ofa nehunka, hanki mago'mofona zagema ufrenaku'ma nehanigenka kinaga ofa huo. **40** Kota sipisipine ofama hananana, witi flauapintira mago kilo erinka, olivi masavea mago litafi eri hava hunka, ana sipisipinena ofa huo, ana nehunka mago lita wainia ofagna hunka tagi tro. **41** Hagi witigi, masavenki, waini tinema nanterama ofama hu'nanaza hunka, mago sipisipinena zagema ufrenaku'ma hanigenka Kresramana vuo. E'i ofa tevereti'ma kre fananehu ofa hunantage'na Ra Anumzamo'nama manama nentahi'na musema nehua ofae. **42** Menine henkama fore'ma hanaza naga'mo'za, maka zupa tevereti'ma kre fananehu ofa seli mono nomofo ufre kahantera Ra Anumzamo'na navurera kresramna vuvava nehanage'na, anante kegaga eme tamasamigahue. **43** E'inama hanage'na anante Israeli naga'enena emanisugeno Ra Anumzamo'na hankave masa'nimo anankumara azeri ruotage hugahie. **44** Ana hinke'na Ra Anumzamo'na nagra seli mono none, Kresramana vu itanena azeri ruotage nehu'na, Aronine mofavre naga'anena anahukna hu'na zamazeri ruotage ha'nena, nagri pristi eri'zana erigahaze. **45** Ana nehu'na Nagra Israeli vahe'mokizmi amu'nompi mani'ne'na, zamagri Anumza manisuge'za, **46** zamagra ke'za antahi'zama hanazana, nagrikura Ra Anumzanti mani'neno Isipitira tavareno e'neane

hu'za nehanage'na, naganena zamagri amu'nompi nemani'na
nagrake'za zamagri Ra Anumzana manigahue.

30 Mnama vu zantamima kre mnama vania ita, akasia zafareti
tro hoho. 2 Ana itamofo za'za'amo'a 45'a sentimita hina,
kahesa'amo'a 45'a sentimita huno, mika asopa'amo'a mago
avamentek mena, atrure'amo'a 90'a sentimita marerinkeno,
ana itamofona 4'ama renagentetera ana itama tro'ma banana
zafaretike pazivera tro huntetere huo. 3 Ana itamofona
agofetu'agi, maka asopa'agi pazivitaminena goliretike anovazi
nezmanteta, ana itamofo agema'aramintera goliretike avaretma
avasasea hu kaginteho. 4 Golireti'ma avasasema hunte'namofo
henka kaziga, golireti tare rinia vimago azotama vazino eri
sgama hu'zana ruga ruga asoparega tro huo. 5 Ana itama eri
sgama huno vu vimago azota akasia zafareti tro hutenga golireti
erinovazinto. 6 Ana itama antesazana seli mono nompima
kasege ante vogisimofo agofetu asunku tra'ma refko'ma hige'na,
Nagra'ma e'na nanekema eme hanua tra'ma refko hu'nea
tavravemofo avuga anteho. 7 Aroni'ma maka nanterama
lamu tavi'ma erinte fatgo hunaku'ma esuno'a, ana itarera
mnanentake zantamina kresnigeno knare mana vugahie. 8
Kinaga zagema ufre'za nehanigeno Aroni'ma ete tavi'ma eme eri
fatgo hunaku'ma esuno'a, ana itarera mnanentake zantamina
eme kreno. Ana mnanentake zana menine henkama mani'zama
vanaza vahe'mo'za kre'za nevinkeno, Ra Anumzamo'na navurera
ana mnamo'a mevava huno vugahie. 9 Anama mnanentake zama
kre mnama vu itarera, hu izo osu'nesua mana zano, kre fanana hu
ofafi, witifi waini ti ofa ana itarera osiho. 10 Mago kafufina magoke
zupa Aroni'a ama ana kre mnau itarera mago kafufima hu'naza
kumizmi atre'zmante ofama hanaza sipisipi afu'mofo koranteti

ana itamofo 4'a pazivetera frentena Ra Anumzamo'na navurera
ana itamo'a ruotage huno meno. Ama ana avu'avazamo'a
menine henkama fore'ma hanaza vahepinava mevava huno
vugahie. **11** Hagi anante Ra Anumzamo'a Mosesenku amanage
huno asami'ne, **12** Kagra Israeli naga'ma hamprinkama
zamagima erisana zupa mago mago'mo'za knare'ma hu'za
manisagura, Ra Anumzamo'narera mago'a zagoa miza hiho.
Anama osnageno'a, anama hamprisaza knazupa zamazeri
haviza hu'zamo'a zamagritera egahie. **13** Ko'ma ana maka
vene'nema zamagima ante'nesamo'za, silvamofo kna'amo'a
6'a gremi hu'nesia silvareti Ra Anumzamo'na ofa eri atru hu'za
eme namiho. **14** Kafu zamimo'ma 20reti mreri anagamate'nesia
vene'nema zamagi erisnamo'za ana ofa zagoa zamigahaze. **15**
Zmasimu'ma mizama hanazana, feno vahe'mo'za rugatere'za
otrenkeno, zamunte omane vahe'mo'za erami'za osi'a otreho.
Hagi mago'zahu avamente 6'a gremi hu'nesia silva eme atreho.
16 Israeli vaheteti'ma kumi'zamima apaseno mizase zagoma
erisana zagoretira, seli mono nomofo erizante atresageno, e'i
ana zamo'a Israeli vahe'mokizmi kumi atre'zmantena mizama
sezmantenoa avame'za Ra Anumzamo'na navurera me'nena
antahi zamigahue. **17** Ananter Ra Anumzamo'a Mosesena
amanage huno asami'ne, **18** Kagra zamasamige'za bronsireti
ra zuompa zamagia zamazama sese hu'zana tro nehu'za,
ana zuompamofo aga'ama tro'ma hanazana bronsireti tro
hu'za, seli mono nomofone kresramna vu itamofo amu'no
zanifi nente'za, anampina tina afinteho. **19** E'i ana zuompafina
Aroni'ene ne' mofavre naga'amo'zanena zamagia zamazana
sese hugahaze. **20** Aroni'ene ne' mofavre naga'mozanema Seri
mono nompima ufrekupi, Kresramana vunaku'ma vanu'za, ana

zuompafina zamagia zamazana sese hugahaze. Ana osanu'za frigahaze. **21** Zamagra zamagane zamazanema sese hanu'za ofrigahaze. Ama'i ana kasegemo'a Aroninteti agafa huno ne' mofavre naga'are vanigeno, henkama zamagripinti'ma fore'ma hnamozanena ama ana kasegea amege ante vava hugahaze. **22** Ananter Ra Anumzamo'a amanage huno Mosesena asami'ne, **23** Kasamisua kante antenka mnanentake zantamina, kna'amo'a 6si'a kilo hu'ne'nia mananentake meregi, 3'a kilo hu'nesia sinamoni pauragi, mana nentake kurumpa karamusie nehaza kurumpa e'nerinka, **24** kna'amo'a 6'a kilo hu'nesia kasia traza rafunareti trohu pauragi, ana maka'zana seli mono nompima erigahane hu'nama kasami'noa avamenteke'za erinka, olivi masavena 4'a lita taginto. **25** Anazama eri haviamma huno'ma vahe'ma frezmanteno zamazeri ruotage'ma hu masavema tro'ma hu' antahi'zama eri'nea vahe ke hugeno, ana maka zana erihavia hinkeno mnanentake hute'na, ana masavemo'a me ruotage huno Nagri eri'za erisu'a meno. **26** Hagi ana masaventetira taginka seli mono nonki, kasegema ante vogisirera frenentenka, **27** itane ana itare'ma eri'zama eri zantaminki, tavi'ma rekru hunte zotane ana tavi zotare'ma eri'zama erizantaminki, mananentake zantamima kre mana vu itagi, **28** tevefima kre fanane hu ofama hu itane, ana itare'ma e'rizama eri zantamine, zamagia zamaza sesezu zuompane agianena, **29** masave fre zamantenka eri ruotage huzamantegeno, me ruotage huno me'nena mago zamo'ma ana zantaminte'ma avako'ma hania zamo'enena ruotageke'za hugahie. **30** Aronine ne' mofavre naga'anena masave taginka fre zamantenka zamazeri ruotage huge'za Nagri pristi eri'za vahe maniho. **31** Israeli nagara amanage hunka zamasamio, ama'i masavema frentesigeno Nagrite'ma zamazeri ruotage hu

maseve menina me'neno, henkama fore'ma hanaza nagatera
mevava hugahie. **32** Amne vahe'mofo avufgarera freonuge,
Nagrama tamasamugeta tro'ma hazankna hutma tamagra'a
masavema trora osiho, agra ruotage hu'negu ruotage hu'ne hutma
antahiho. **33** Nagrama kasamua kante anteno iza'o mnanentake
masavema tro huge, tagino amne vahe'ma freonuge hanimo'a,
Israeli vahepintira maniganegahie. **34** Huteno Ra Anumzamo
Mosesena amanage huno asami'ne, Mnanentake paurama
tro'ma hu zantamima erisnanana, stetikie nehaza mnazanki,
onikae nehaza mana zanki, galbanamue nehaza mana zane
frenkinsesie nehaza mnazantamina mago avamenteke'za erio.
35 Anazama tro hu antahi'zama eri'nesia eri'za vahe huntogeno,
hagene ana paura ramina mago'za evu ofre zamagri'age eri hava
huno kre mana vu paura tro hina mane ruotage huno meno.
36 Ana mana zantamimpintira mago'a erinka kanegeno paura
forehina seli mono nompima, kasege ante vogisimofo avuga,
nagrama kagranema keagama hanure anto. E'i ana pauramo'a
ruotage hu'ne huta tamagra antahiho. **37** Ama'ima tamasamua
kante anteta tamagra'a amanahukna mana vu paurana trora
osutma, Ra Anumzamo'na navurera ruotage hu'ne hutma hiho.
38 Nagrama kasamua kante anteno iza'o mnanentake masavema
tro huge, tagino agra'a frege'ma hanimo'a Israeli vahepintira
maniganegahie.

31 Hagi Ra Anumzamo'a Mosesena asamino, **2** Ko,
Bezalelina, Uri nemofo Hurina negeho mofavre Juda nagapinti,
Nagra agiahe'na huhamprinte'na, **3** Nagra'a Avamuteti antevi
antetenogeno mika'zama tro'ma hu antahi'zana erineno, tro
hugara hu'neno, knare antahi'zanena eri'neankino, **4** goliretiki,
silvaretiki bronsireti'enema eri avugosa huno avasesezama

tro hu'zama, **5** havema taga hu eri'zane, regari tra'ma tro
hu eri'zane, zafareti'ma eri eri'zama, ruzahu ruzahu zama
azanuti'ma trohu antahintahia agu'afi ante avitente'noe. **6** Hanki
Dani nagapinti Ahisameki ne'mofavre Oholiapuna, Bezalelima
azama hanigura Ra Anumzamo'na huhamprinte'noe. Anahukna
hu'na Nagra mika zama zmazanuti'ma tro'ma hu vahetamina,
antahintahia nezami'na huhampri zmante'noankiza tro huo
hu'nama hugante'noazana mika tro hugahaze. **7** Seli mono
none, ruotage kasegema ante vogisine, asunku trarema nehaza
avaza'ane seli nompi zantamine, **8** itane ana itare'ma eri'zama eri
zantamine, goliretike trohu tavi azotane, ana azotare'ma eri'zama
eri zantamine, mnanentake zama kre mnavu itane, **9** kre fanane
hu ofama hu' itane, ana itare'ma mika eri'zama eri zantamine,
agazama sesehu zuompane ana zuompamofo aga'ane, **10**
zagi'zama tro'ma hu'naza kukenaramine, pristi ne' Aroni'ma
antanisia ruotage za'za kukenane, ne' mofavre'amoza
antanine'za pristi eri'zama eri'za vnaza kukenaramine, **11**
huhamprinteno frenentea masavene, ruotage hu'nefinka ante
mnavu zane, Nagrama tro hiho hu'na huramantoa kante anteta
tro hugahaze. **12** Anante Ra Anumzamo'a Mosesena asamino,
13 Israeli vahera zamasmige'za mani fruhu knani'a (Sabat)
kegava hiho. Na'ankure amu'nontinfina avame'za me'nena Ra
Anumzamo tazeri ruotage hu'ne hutma nentahisageno, henkama
fore'ma hu'za esaza vahe'mo'za ana zanke hu'za antahigahaze.
14 Hagi tamagra Sabatia ruotage hu'negu kegava hiho. Iza'o
Sabatima kegavama osanimofona ahenefrita, mani fru knani'ama
Sabati knare'ma eri'zama erisimofona naga'afintira ahenantitreho.
15 Eri'zama eri'sazana 6si'a zage knafi erigahazanagi 7ni kna
zupa mani fru hugahaze. Ra Anumzamofontera ruotage hu'nea

knagino, iza'o ana mani fruhu kna (Sabat) zupama mago eri'zama erisimofona ahe friho. **16** Israeli vahe'mo'za mani fruhu kna (Sabat) kegava nehanageno, henkama mani'zama esaza zamagehe'mo'za muse nehu'za ana mani fruhu huvempa knamofona kegava huvava hu'za vugahaze. **17** Ana Sabati knamo'a Nagri'ene Israeli vahe amu'nompine mevava avame'za megahie. Na'ankure 6si'a zagegnafi Ra Anumzamo'a monane mohanena tro huteno, 7ni kna zupa eri'zana atreno mani fru hu'ne. **18** Ra Anumzamo'ma nanekema Mosesema Sainai agonafina asami vagareteno'a, tare haverarente Anumzamo'ma azankonu erivakakino kre'nea kasege tafetrena Mosesena ami'ne.

32 Israeli vahe'mo'zama kazama Sainai agonaregati'ma koma Mosese'ma omeno za'za knama umanige'za, Aroninte emeri atru hu'za amanage hu'naze, ugota huno tavreno'ma vania anumzantia tro huranto. Na'ankure Isipiti'ma tavreno'ma atirami'nea nera Mosesena naza fore huntifi ontahune. **2** Aroni'a kenona huzmanteno, a'ne nagatamimo'zane ne' mofavretamimo'zane mofa'netamimo'za zamagesafima antani'nesaza golire rinia zafita nagrite erita echo. **3** Anagema hige'za mika vahe'mo'za zamagesare antani'naza golire rinia zafi'za Aroninte eri'za azageno, **4** ana golire riniramina zamazampinti erino kre ze'ze huno kaza osu havi anumza bulimakao afu tro hutege'za, anage hu'naze, Israeli vahe'mota Isipiti'ma tavre fegiteno e'nea anumzantie hu'naze. **5** Aroni'ma anazama keteno'a, Kresramana vu itare ana golire tro hu'naza bulimakao avuga tro huntetenno amanage hu'ne, okina Ra Anumzamofontega muse hunenteta ne'za negahune. **6** Mase'za nanterampina Israeli vahe'mo'za oti'za kre fanane hu ofa nehu'za,

zamarimpa fru ofa hute'za, mani'za ne'zane tine nene'za tusia
muse nehu'za, monko zamavu'zmava hu'naze. 7 Anante Ra
Anumzamo'a Mosesena asamino, Ame hunka uramio, na'ankure
Isipiti'ma zamavare atirami'nana vaheka'amo'za havi avu'ava
haze. 8 Nagrama zamasami'noa kasegea ame hu'za zamefi
hunemi'za, kaza osu anumzana golire kre ze'ze hute'za bulimakao
afu'mofo amema'a tro huntene'za, ana zante zamarena re'za
mono hunente'za Kresramana vunente'za amanage hu'naze,
Israeli vahe'mota ama anumzantimo Isipitira tamavre fegiteno
e'ne hu'za hu'naze. 9 Ra Anumzamo'a Mosesena asamino,
Israeli vahe'ma Nagrama zamagoana ke'ontahi vahe mani'naze.
10 Menina tusi narimpa aheanki'na natrege'na zamahe fanene
hute'na, kagripinti rankuma vahera azeri fore ha'neno. 11
Hianagi Ra Anumzama'amo asunku'ma hanigu Mosese'a
hanavetino antahigeno anage hu'ne, Ra Anumzamoka na'ante
tusi'a hanaveka'areti ene kaguvazanteti Isipiti zamavare fegi
atre'nana vaheka'a krimpa hezamantegahane? 12 Na'a hanige'za
Isipi vahe'mo'za Ra Anumzamo'a havi agu'agesaregati ama
mopafintira zamahe fanene hu'naku agonarega zamavare
fegi atreno vu'ne hugahaze? Nagaka'a krimpa heozmantenka,
krimpa fru hunezmantenka vaheka'a zamahe ofrio. 13 Eri'za
vaheka'aramima Abrahamuma, Aisakine, Israelima (Jekopu)
Kagraka'are'ma huvempa huzmantenka, tamagehe'mo'za rupazi
hu'za monare me'nea hanafitaminkna nehanage'na, ama mopa
huvempa hu'na zamisuge'za tamagehe'mo'za erisanti hare'za
manivava hugahaze hu'nana kegu kagesa antahio. 14 Higeno
Ra Anumzamo'a rimpa ahezmanteno zamahe fanane hugahue
hu'nea knazampintira antahintahi'a rukrahe huno vahe'a zamahe
fanane osu'ne. 15 Ana agonareti Mosese'a tare haverarente

tarega kaziga Ra Anumzamo avoma krente'nea kasege e'nerino
ete urami'ne. **16** Ana have tafetrena Anumzamo Agra'a trohu'ne.
Avoma kre'nea avona Anumzamo tagahuno ana have tafetrentera
krente'ne. **17** Israeli vahe'mo'zama rankegema haza zamagasasa
kema Joshua'ma nentahino'a, kumapina ha' nehugahaze
huno Mosesena asami'ne. **18** Mosese'a ke nona huno, Ha'
vahe'mokizmi ha'ma huzmante'za zamazeri zmagatere'naza
zmagasasa omane'ge no, ha' vahezmi'mo'za ha' huzmante'za
zamazeri zmagatere'naza zamagasasa omane'neanki zagame
nehaza zamagasasa nentahue. **19** Mosese'ma ana kumate
uravao nehuno, ana golire bulimakaonte'ma vea'mozama
avoma nehagazama'a ome negegeno, tusi rimp a hegeno
ana kasegema me'nea have tafetrena mate'vuno atregeno
ana agonamofo agafi ru frege'ne. **20** Anama tro'ma hu'naza
golire bulimakaona Mosese'a erino tevefi kreteno ana goli'a ru
fuza fupegeno tanefa setegeno, erino timpi rupopo hutreteno,
Israeli vaheku neho hige'za, ana tina ne'naze. **21** Anama
huteno Mosese'a Aronina antahigeno, Ama vahe'mo'za na'a
hugantazagenka tusi'a kumipina zamavarenka ufrane? **22** Aroni'a
kenona Mosesena hunteno, ranimoka krimpa heonanto, kefo
avu'avazanke hu vahe mani'nazagenka kagra antahi'nane. **23**
Na'ankure zamagra amanage hu'za nasami'naze, vugotama
huranteno vania anumzantamina tro huranto, Isipiti'ma tavre
fegi'a atreno e'nea nera Mosesena na'a fore hifi ontahi'none. **24**
Nagra zamasami'na golire riniramima hu'nesamota zafinamaho
huge'za zafinamizage'na tevefi krogeno, ana golire bulimakao
efore hu'ne. **25** Mosese'a keama ana Israeli vahe'ma Aroni'ma
kegava huso'e huozmanteno, zamatrege'za tusiza hu'za
avoma nere'za kefo zamavu'zmavazama nehazageno, ana

zamavu'zmavama hazazamo'a ha' vahe'mokizmi zmavurera
kiza zokago hu'za neginagi vahekna hu'naze. 26 Mosese'a ana
kumamofo efre kafante otino amanage hu'ne, Ra Anumzamofo
kazigama mani'nesamoka nagrite eno, higeno mika Livae
naga'mo'za Mosesente e'naze. 27 Anante Mosese'a Livae
nagara zamasmino, Israeli vahe'mokizmi Ra Anumzamo'a
amanage huno nehie, magoke magoke vahe'mota bainati
kazinknona anoma'afi vazinteta zmasoparega anakintenko
me'nena kumamofo atumparega vuta eta nehuta, magoke
magoke'mota neramafune knampatamine, tava'ontamire'ma
maninazamokizmia zamahe friho. 28 Mosese'ma huzmanteaza
hu'za Livae naga'mo'za, ana zupa 3 tauseni'a Israeli vahe
zamahe fri'naze. 29 Anama hutageno Mosese'a anage huno
zmasamine, menina Ra Anumzamo'a tamagrira tamazeri ruotage
hie. Na'ankure tamagra'a ne' mofavretamine nermafugazmine
zamahe fri'nazagu Ra Anumzamo'a menina asomu huramante.
30 Anante knazupa Mosese'a Israeli vahera zamasmino,
Tusi'a kumi hazanagi menina Ra Anumzamofonte vu'na
kumitamima atrermantesia zankura keaga ome hu'na kegahue.
31 Mosese'a Ra Anumzamofonte ete vuno anage hu'ne, Israeli
vahe'mo'za ana osuga vahe'mo'za tusi'a kumi hu'za golire
havi anumzazmia tro hu'naze. 32 Hianagi menina Kagrama
kasunku'ma huzmantesunka kumi'zmina atrezmanto, anama
osanunka avontafepima nagima krente'nanana rehanano. 33
Ra Anumzamo'a Mosesena kenona'a hunteno, iza'o kumi'ma
hu'nesimofonke avontafen'i'afintira agia rehanenegahue. (Rev-
Hufo Hu'ne 3:5) 34 Hagi menina vunka, kema hu'noa
kumatera zmavrenka nevugenno ankeronimo'a vugota hurmanteno
tamavreno vugahie. Hianagi zamazeri havizama hanuanknama

esige'na, kumi'ma hazarera nona hu'na zamazeri haviza hugahue.

35 Aroni'ma golire bulimakao tro'ma hunte'nege'za musenkasema
hu'naza zantera, Ra Anumzamo'a knazanteti Israeli vahera
zamahe'ne.

33 Anante Ra Anumzamo'a Mosesena asamino, Abrahamuma,
Aisakima, Jekopuma hvempa hu'na tamagehe'ima zamigahue
hu'noa mopa'rega, ama kumara atrenka kagranie Isipiti'ma
zamavare fegi atrenka e'nana vahe'enena viho. 2 Ankero
vahe huntesugeno vugota huramanteno Kenani vahe'ma, Amori
vahe'ma, Hiti vahe'ma, Perisi vahe'ma, Hivi vahe'ma, Jebusi
vahetamina ana mopa'fintira zamahe natitregahie. 3 Hagi
amirimo'ene tumerimo'ma avi'mate'nea mopa'rega mareroho.
Hianagi Nagra tamagranena ovugahue. Na'ankure tamagra
ke ontahi vahe mani'nazanki'na kantega tamahe frigahue. 4
Israeli vahe'mo'za ana zamazeri havizama hania nanekema
nentahi'za zavi krafa nehu'za mago'mo'e huno avufgarera
avasesezana osu'ne. 5 Na'ankure Ra Anumzamo'a Mosesena
asamino, Israeli vahera zamasamio, zamagra ke ontahi vahe
mani'nazanki'na Nagrama zamgranema vanu'na ame hu'na
tamahegahuanki menina tamavufgareti tamavasese zana
erinetrenke'na Nagrama huramante'nua zankura antahi'neno.
6 Hige'za Israeli vahe'mo'za zmavasesezama hu'naza zana,
Horepi agonafi zafitrete'za amane vu'naze. 7 Hagi Mosese'a
nehiaza huno kuma'mofo fegia ogantu mago seli no azeri otino
kinenteno, Ra Anumzane atruhu seli mono none huno agia
antemi'ne. Ra Anumzanema keaga hunaku hanimo'a, kumamofo
fegi'a ana seli nonte vugahie. 8 Ana seli nontegama Mosese'ma
nevigeno'a, mika Israeli vahe'mo'za seli nozamimofo kahante
otine'za negazageno, Anumzanema atru huno keagama hu

seli nompina ufretere hu'ne. **9** Mosese'ma ana seli nompima
anama ufreterema nehigeno'a vimago hampomo eramino seli no
kafante emani'negeno, Ra Anumzamo'a Moses enena keaga
hu'ne. **10** Israeli vahe'mo'za ana hampomo'ma Anumzanema
atruhuno keagamahu seli nomofo kafante oti'nege'za nege'za,
mika'mo'za oti'za seli nozamimofo kafante zamarena re'za
monora huntetere hu'haze. **11** Ra Anumzamo'a Moses ene oge
age nehuno rone'anema keaga hiankna huno nanekea hu'ne.
Mosese'a anama huteno eteno kumapi vugahianagi, azama
nehia nera, Nuni nemofo Josua'a ana seli nompina maka kna
nemanie. **12** Mosese'a Ra Anumzamofona asamino, Ko ama'i
vahetamina vugota huzamantenka zmavrenka mrerio hunka
Kagra nasami'nane. Hianagi iza'ene hurantegahane, Kagra
onasami'nane. Navesinegante'na kagika'a antahi'noe hunka
hu'none. **13** Kagrama tamage hunka kavesima nantesunka,
Kagraka'a kavukavara rempi hunamige'na nentahi'na kavesi
zankura hakevava haneno. Hagi Israeli vahera Kagri vaheki
kagesa antahizamio. **14** Ra Anumzamo'a kenona huno, Nagra
kagrane mani'na nevu'na manifrua kamigahue. **15** Hagi Kagrama,
tagranema ovanunka, tatregeta ama kumara atreta ovamnenno. **16**
Nagri'ene Israeli vahe ka'anema Kagrama ovananke'za, inankna
hu'za ru vahe'mo'za tavesinerantane hu'za antahigahaze?
Kagrama tagranema vananke'za mika ama mopafima mani'naza
vahe'mo'za tagrikura ruzahu vahe mani'naze hu'za hugahaze. **17**
Hagi Ra Anumzamo'a Mosesena asamino, Anama nantahigana
zana hugahue. Na'ankure Nagra muse hunegante'na kagika'a
antahi'noe. **18** Anante Mosesen'a huno, Menina hanave nentake
masaka'a naveri huo higeno, **19** Ra Anumzamo'a huno, maka
knare navu'nava zani'ane kavuga enevu'na, nagini'a huama

hu'na Ra Anumza mani'noe hu'na hugahue. Hagi nasuma
raginte'naku'ma hanumofona, nasu raginente'na, nasuma
raginte'na azama hunaku'ma hanumofona, agampu hunte'na
aza hugahue. 20 Hianagi Nagri navugosa kagra onkegahane.
Na'ankure nagesimo'a frigahie. 21 Hagi ko, antu have agofetu
oti'nesanke'na, 22 hanave nentake masani'ane kavuga evu
kagatenere'na enevu'na, have kankamunpinka kavre'na nazanu
rufitegante'nena kagatere'na enevu'na, 23 nazana erisga ha'nena
namefi'age kegahane. Hianagi navugosafina onagegahane.

34 Ra Anumzamo'a Mosesena asamino, Ese tare have
tafekna hunka tare have tafe taga huge'na, ese'ma tare have
tafete'ma me'nea nanekema rutamana'ma hu'nana nanekea
krentaneno. 2 Oki nanterana retro hunka Sainai agonafi
mani'nesurega emarerio. 3 Magomo'e huno kagranena ana
agonafina omege, bulimakao afu'zagane sipisipi afu'zaganena
ana agonamofo agafina trazana apri'za oneho. 4 Higeno Mosese'a
Ra Anumzamo'ma huo huno'ma hunteaza huno, ese tare
havegna have tafe taga huno azampi e'nerino, nanterampi Sainai
agonarega mareri'ne. 5 Anante Anumzamo'a hampompi eramino
Mosese ene eme oti'neno, Ra Anumza mani'noe huno agi'a
huama hu'he. 6 Mosese avuga Ra Anumzamo'a evu agatereno
nevuno, huama huno Nagra Ra Anumzane, Nagra Ra Anumzane,
vaheku nasuragine'ha zmazahu Anumzane. Ame hu'na narimpa
ohe'na, vaheku zmavesi zmante'na hugahuema hu'nama huaza
hufatgo hu'na nehua Anumzane. 7 Nagra rama'a tauseni'a vahe
zmavesi zmante'na, kefo avu'ava'ma nehu'za, kema nontahi'za
kumi'ma nehaza vahera kumi'zmia atrenezamantoa Anumzane.
Hianagi kefo zamavu'zmavama nehaza vahera ozamatre'na,
anama haza zantera kna nezami'na, mofavre'amokizmine

agehemofone agigomokizminena zmahegahue. **8** Moses'a ame
huno mopafi arena reno mono hunteno, **9** Ra Anumzamoke,
Kagri kavure'ma kavesi'hea navu'nava'ma nehanugenka, muse
hugantoanki tagranena vuo, ke ontahi vahe mani'nonanagi Ra
Anumzamoka kefozantine kumitinena atrenerantenka, kagraka'a
vaheka'agna hunka tavro. **10** Anante Ra Anumzamo'a huno,
Nagra kagrane huvempa nehue, mika Israeli vaheka'afina
korapara mika mopane mopane kumapina osu'noa kaguvaza
erifore hugahue. Tamagrane manisaza vahe'mo'za Nagrama Ra
Anumzamo'na hanuazana nege'za antahintahi hakare hu'za
koro hanazaza kagripina eri fore hugahue. **11** Menina huoma
hu'na hugantoaza amage anto. Nagra esera Amori vahe'ma,
Kenani vahe'ma, Hiti vahe'ma, Perisi vahe'ma, Hivi vahe'ma,
Jebusi vahera zamahenati atregahue. **12** Kva hu'neta anama
nevaza mopafi vahetaminena eri hagerafitma mani huvempa
kea osiho. Ana vahe'mo'za amu'nontamifina krifugna hu'za
tamazeri haviza hugahaze. **13** Hianagi kresramnavu itazmia
anafe nehuta ruotage'ma hu'nea havezmia rutamana nehuta
zafare antre'za tro huntene'za mono hunentaza asera zafaramina
antagitreh. **14** Ruga'a anumzantera monora huonteho, na'ankure
ru anumzante'ma mono'ma huntesageno'a Ra Anumzamofo
agia kanivere Anumzankino, kanive reramantegahie. **15** Ana
mopafi nemaniza vahetaminena eri hagerafino mani huvempa
kea osiho. Na'ankure anumzazmire'ma kresramna nevu'za, ru
vene ome savri hiankna hu'za havi anumzante mono hunente'za,
tamajima hanageta kresramna vanaza ne'za zamia negahaze.
16 Ana nehuta Israeli vahe'mota ne'mofavretamire'ma ana mopafi
a'nema erizamisaza a'nemo'za, ru vene savri hiankna hu'za
anumzazmire monora hunente'za, ana ne'mofavretamia zamazeri

savri hanage'za, ru vene savri hiankna hu'za zmagranena
Anumzamo'na natre'za ru anumzante monora huntegahaze. **17**
Kaza osu anumzantamina aenia kre mra'mra hutma trora osufa
hiho. **18** Zisti onte bretima nenaza knareratamagera okanitma
ne'za tro huta neneta musena hiho. Hanki 7ni'a zagegnafina
zisti onte breti neho hu'na huramante'noe. Na'ankure Abib
ikampi huhamprinte knare anara hiho hu'na huramante'noe.
Na'ankure ana ikampi Isipitira etirami'naze. **19** Ese'ma kasentesia
ne'mofavrene, ese'ma kasentesia bulimakao afuro sipisipi
afutamina, Nagri su'zane. **20** Ese'ma kasentesia ve donki afura,
sipisipi afu anenta aheta ofa hutma ete mizaseho. Hianagi aheta
ofa hutma miza osesuta, ana ve donki afura anankema'a eri
vamagita ahe friho. Hagi ana miko ese ne'mofavretamimofo
nona'a huta mizaseta zamavareho. Mago'mo'e huno Nagri
navurera aza avapakora omeno. **21** Hagi 6si zage knafi eri'zana
eroho. Hianagi 7ni zageknarera mani fru hiho. Hozama hagolino
ante knarero, ne'za hamare knare enena mani fru hiho. **22**
Ese ne'zama hamare musema hanaza knarera, ese witireti
ne'zana kreta neneta, musena nehuta kafumofo atuparega witima
hamare vagare ne'zana kreta neneta musena hiho. **23** Mago
kafufina 3'a zupa mika Israeli vene'nemo'za tusi'a hihamu'ane
Israeli Ra Anumzamofo avurera eho. **24** Tamagrama ana
huta mago kafumofo agu'afima 3'a zupama Ra Anumzamo'na
navure'ma vanage'na, Nagra mopatamia erira nehu'na, ana
mopafi vahe'mokizmia zamahe natitra'nena, mago vahe'mo'a
ana mopatamia kenunu nehuno, hara huramanteno mopatamia
e'origahie. **25** Hagi korane zistima me'nesia zanura Nagritera
ofa huta Kresramana oviho. Ra Anumzamo Israeli vahetamia
ozmaheno zamagatere'nea knagu antahimiza, muse ne'za

kre'za nesaza kenegera, nege'atrege'ma hanaza ne'zamo'a me'enkeno masa osino. **26** Ese zana Ra Anumzanka'amofo nontega ese'ma knare ne'zama mopafinti fore'ma haniana erinka vuo. Hagi meme afu anentara nerera amirimpina onkro. **27** Anante Ra Anumzamo'a Mosesena asamino, Ama nanekeramina krento, na'ankure ama ana nanekeraminteti kagri'ene Israeli vahe'enena eri hagerafi huvempa kea nehue. **28** Moses'a 40'a zagegnagi 40'a haninki huno nezane tinena oneno ana agonafi maninegeno, Ra Anumzamo'a 10ni'a kasegea tare have tafetera avona krente'ne. **29** Mosese'ma Sainai agonaregati'ma kasegema krente'nea tare have tafe'ma azampi eri'neno e'neramino'a, avugosamo'ma masanentike hu'nema'a antahinokenora osu'ne. Na'ankure Ra Anumzane keaga hu'ne. **30** Aroni'ene mika Israeli vahetamimo'zama Mosesema kazana, avugosamo'a masanentike hu'nege'za, ta va'oma'are'ma Israeli vahe'mo'za e'zankura kore hu'naze. **31** Hianagi Moses'a ke hige'za Israeli vahe'mo'za erava'o hazageno, Sainai agonafima Ra Anumzamo'ma mika ami'nea kasegea Mosese'a zamasami'ne. **32** Ana hutazageno, mika Israeli vahe'mo'za Mosesente erava'o hazageno, Sainai agonafima Ra Anumzamo'ma mika ami'nea kasegea Mosese'a zamasami'ne. **33** Mosese'ma nanekema zmasami vagarete'noa tavrave erino avugosa refite'ne. **34** Hianagi Ra Anumzamo'enema keagama hunaku'ma atruhu seli nompima Mosese'ma ufreterema nehuno'a, ana tavravea eritreteno unefreno, ete atineramino'a, Ra Anumzamo'ma ome zamasamio hu'noma asami'nea kea Israeli vahetamina nezmasamige'za, **35** avugosamo'ma masanentike hu'neama'a kazageno, ete tavravenuti avugosa refite'neno keaga huteno, ete Anumzanema keagama hunakura eri atre'ne.

35 Mosese'a mika Israeli vahera zamazeri atru huno zamasamino, Ra Anumzamo'a ama kasege amage anteho huno huramante'ne. **2** Sigisi'a zageknafi eri'zana eriho, hianagi **7ni** zageknarera Ra Anumzamo'ma mani fru hiho huno'ma huramante'nea ruotage hu'nea knagita mani fru hugahaze. Iza'o ana zageknafima eri'zama erisimofona ahe friho. **3** Mani fru knazupa Sabatirera nemaniza kumatamimpina tevea huonkreho. **4** Mosese'a mika Israeli vahera zamasmino, amanahu'za hiho huno Ra Anumzamo'a hurmante'ne. **5** Tamagra Ra Anumzamofontera ofa erita eho. Iza'o agu'areti'ma huno ofama hunaku'ma Ra Anumzamofonte'ma hanimo'a, goline, silvane bronsine, **6** hokonkenofiki, fitunkenofiki, korankenofiteene, zmanazmananofite tro hu'nesiatavravene, meme afu'mofo azoka'ene, **7** ve sipisipi afutamimofo akrutami eri korankre hu'nesazane, hagerimpi bulimakao afutamimofo akrutamine akasia zafane, **8** tavi'ma rekru hunte olivi masavene, vahe'ma huhamprinte masavempima antegenomnanentake nehia zantamine, kremnama vu'zane, **9** oniksie nehaza havene, pristi vahe'mo amega antani kukenane amimizare'ma antani kukenare'ma rekamrente havea ofa erita eho. **10** Amu'nontamifinti'ma mika'zama knare'ma huno trohu antahi'zama eri'naza vahe'mota eta Ra Anumzamo'ma mika zama tro hiho huno'ma huramante'nea zana eme tro hugahaze. **11** Hagi Seli mono none, ana nomofo refite tavraveramine, eri fagaginte'ne tavrave hanti riniramine, no zafaramine, rugeka zafaramine, retrure zafane, regrinte tra'ane, **12** kasegema ante vogisine, erisgama huno vu zafararene, ana vogisimofo avaza'a e'i asunku trarema nehaza avaza'ane seli nompima hunaragintegeno ruotage'ma hu'neama'ama refitenia tavravene,

13 bretima ante itane, erisgama huno vu azotararene, maka ana itare'ma eri'zama eri'zantamine, Anumzamofo avure'ma me' brette, **14** tavi'ma rekruhu azota'ane mago'a zantamima'ene tavitamine, tavi'ma rekruhu masavene, **15** mnanentike zantami kre itane ana itama erisgahu zafararene tagino frenteno huhamprinte masavene, kre mnavu zantamine, seli mono nomofo ufre kahante tafinte tavravene, **16** kresramnavu itane, bronsireti rama'a karami hagente'za strena knaza tro huta anaga tevema hugre'afina runekamareta erisgahu azotararene ana itare'ma eri'zama eri'zantemine agi'ama me'nne bronsire zuompane, **17** seli no kumamofo avazagi kagi tavraveramine, retrure zafaramine, ana zafaramima regri tra'aramine, seli nomofo kumapi ufre kafante tavravene, **18** seli mono nomofo tavravene, kuma'ma avazagi kagi keginamofo tavravema avazuhumpi huno anaki azotanenofi'ane, **19** pristi vahe'mo'za antanine'za ruotage hu'nefinka eri'za erisaza ruotage kukena haneta tro nehuta, Aronine ne'mofavre'aramimo'za antanine'za pristi eri'zama erisaza kukena tro hiho. **20** Anante mika Israeli vahe'mo'za Mosese'enema mani'nazaretira atre'za vu'za e'za hazageno, **21** mika zmagu'amo'ma otige'za amisunema hu'zama haza vahe'mo'za atrumahu seli mono noma kisaza zane, ruotage hu'nea kukenaramine eri'za Ra Anumzamofonte ofa e'naze. **22** Mika zmagu'amo'ma otia vene'nemo'zane a'nemo'zanena golireti ruzahu ruzahu avasase zama tro'ma hu'nea zantamina, zmanankempi antani'nazane, zimagesafi tafi'naza rinine, zamazampi antani'naza rinine, zamanankempi hu'zane, eri'za e'za Ra Anumzamofonte eri verave hu ofa hu'naze. **23** Mika hokonkero, fitunkero, korankenofiro knare huno zamana'zmana hu'nesianofiro, memekimofo azokaro,

ve sipisipi afu akru'mofo eri koranke hu'nesia akrutamino, hagerimpi bulimakao afu'mofo akrutamima ante'namo'za eri'za e'naze. **24** Mago'a vahe'mo'zama silvane bronsine ofa Ra Anumzamofo eri'za eme nemizageno, akasia zafama ante'naza vahe'mo'za eri'za e'naze. **25** Nofi'ma zamazanu'ma zagi'ama antahi'nesaza a'nemo'zama hokonkero fitunkero koranke nofi'ma zmanazmana nofiteti tro hunte'nesaza tavravea eri'za echo. **26** Nofi'ma zamazanu'ma zagi antahi'zama eri'naza a'nemo'zama, maka zmagu'amo'ma otinke'za nofi'ma zaginiaku'ma hanu'za meme afu'mofo azokatetinofira zagiho. **27** Hagi kva vahe'mo'za oniksie nehaza haveramine, mago'a zago'amo'ma marerisa haveramina pristi vahe'mo'zama amega antani kukenare'ene amimizare'ma antani kukenare'ma rekamrente'zana erita echo. **28** Ana kva vahe'mo'za mnama vu tanefatamine, tavi rekruhu olivi masavene, vahe'ma tagino frenteno huhamprinte masavene, kregeno mnama vu'zane eri'za e'naze. **29** Mika Israeli vene'nemo'zane a'nemo'zanema, zamagu'amo'ma oti'nea vahe'mo'za Ra Anumzamofonte ofa eri'za e'naze. Ra Anumzamo'ma eriho huno'ma huzmante'nea eri'za erisagu eri'za e'naze. **30** Anante Mosese'a Israeli vahera zmasamino, Keho, Ra Anumzamo'a Bezalelina Uri nemofo Huri negeho Juda nagapinti huhamprinenteno, **31** Anumzamofo Avamu antevitenenteno, knare antahi'zane, ama' antahi'zane, mika zama azanu'ma tro'ma hu antahi'zane, **32** golireti'ene, silvareti'ene, bronsireti'ma avasesezama trohu antahi'zana ami'ne. **33** Ana nehuno havema tagahuno eri ante fatgohu antahi'zane, zafare'ma hanagatino eri'zama eri antahi'zane, mika ruzahu ruzahu kasefa zantamima tro'ma hu antahi'zane ami'ne. **34** Bezaleline Ahisameki nemofo Oholiapu, Dani nagapinti ne'enena vahe'ma rempima huzami

antahi'zana Ra Anumzamo'a znam'i'ne. 35 Ra Anumzamo'a maka ruzahu ruzahu zante'ma azanu'ma hanagatino tro'ma hu antahi'zane, eri'zama retrohu antahi'zane, hokonke'ma, fitunke'ma koranke tavravere'ma hatino avoma kreno avasese zama'ama tro'ma hu antahi'zane, nof'nu'ma haneno zamana zamana tavravema trohu antahi'zana zanami'ne.

36 Hagi Bezalel'i'ene Oholiapu ene mago'a naga'enema Ra Anumzamo'ma antahintahima zamige'za seli mono noma ki' eri'zama antahi ankere'naza vahe'mo'za, Ra Anumzamo'ma hihoma huno hu'nea kante ante'za ana maka zana tro hugahaze. 2 Anante Mosese'a Bezaleline Oholiapune Ra Anumzamo'ma antahintahima zamige'za eri'zama antahi ankere'ne'za eri'zama eriku zame'nesia vahe'mokizmia zamagi huno eri'za erigafa hoho hu'ne. 3 Israeli vahe'mo'za Anumzamofo seli mono noma kisnazegu'ma eri'za eme ami'naza muse zantamina, Mosese'a ana maka'zana erino eri'zama eri vahera zami'ne. Hagi maka nanterana Israeli vahe'mo'za zmagu'amo'ma otimo'za zamesi zante musezana eri'za eme amitere hu'naze. 4 Anumzamofo seli mono noma ki eri'zama antahi ankere'naza vahe'mo'za mono noma ki eri'za zamia atre'za, 5 Mosesena eme asami'za, Ra Anumzamo'ma erita ehoma hu'nea avamena rugatere'za Israeli vahe'mo'za rama'aza eri'za azageno eri'zana eri vagarega hu'hege'za, ete mago'ane rama'a eri'za neaze. 6 Mosese'a amanage huno kea Israeli vahetega atre'ne, mago a'mo'o vemo'o Anumzamofo seli mono no ki'zane huno mago'ane musezana erino eme otreno, hige'za anankea Israeli vahe'mokizmi amu'hompi hugantigama hazage'za, mago'anena Israeli vahe'mo'za mono noma ki zantamina eri'za ome'naze. 7 Na'ankure, ko'ma Israeli vahe'mo'zama eri'za emetre

emetre hu'naza zantamimo'a Anumzamofo seli mono noma ki' avamentera ko agateregeno, mago'a zantamina amne mega hu'ne. **8** Tavravema hane antahi'zama antahi'naza vahe'mo'za 10ni'a tavrave hati'naze. Ana tavravenofi'nu avonkreno hati antahi'za eri'nea ne' Bezaleli'a ana tavraveramintera hokonke nofiki, fitunke nofiki, koranke nofinu'ene hatino seravimie nehaza ankeromokizmi zmema'a tro hunte'ne. **9** Ana maka tavravemofo zaza'amo'a 12 mita higeno, atupa'amo'a 2 mita higeno urefa erefa'amo'a mago zanke hu'naze. **10** Hagi 5fu'a atupa'aramina rehatigeno, magoke za'za tavrave fore higeno, anahukna huno ru 5fu'a tavravemofo atupa'aramina rehatigeno, magoke za'za tavrave fore hu'ne. **11** Anante ana za'za tavravereremofo tupa'arera tare tavravere'ma eri hagerafi atupa'ama tro'ma hu'neana hokonke tavravenuti tro hu'ne. **12** Mago za'za tavravemofo atupa'arera tavravereti tro hu'neana 50'a hagerafi atupa'ama tro'ma hu'neana, anakinte anakinte huno evu'ne. Ete mago zaza tavravemofo atupa'are enena ana zanke huno ru 50'a eri hagerfi atupa'ama tro hunte'nea anakinteno evigeno eri hagerafi atupa'aramina, rugaraga mago trente metere hu'ne. **13** Ananter a tare tavravere'ma 50'a eri hagerafi atupa'ama tro'ma huntenefina, eri hagerafino eri ruhamprigeno, golireti eri korave huno 50'a rini kana tro huteno, ana tare tavravea eri rusi higeno, ana tavraveraremokea erimago huke me'na'e. **14** Anante seli mono nomofo agofetu'ma refitesia zana, meme afu'mofo azokateti 11ni'a tavraverami tro hu'ne. **15** Ana 11ni'a tavraveramimofo zaza'amo'a 13 mita hazageno, atupa kizaga'amo'a 2 mita hu'za mago zanke hu'naze. **16** Ana 11ni'a tavravefintira 5fu'a tavraveramina erinte mago huno hatigeno magoke za'za tavrave fore higeno, ana zanke huno 6si'a

tavraveramina erinte mago huno hatigeno magoke za'za tavrave fore hu'ne. **17** Anante mago za'za tavravemofo atupa'arega eri hagerafi atumpa'a 50'a tavravereti trohu nenteno, ete mago za'za tavravemofo atumparega ana zanke hu'ne. **18** Anante 50'a eri hagerafino eri ruhampri'zana bronsireti eri korave huno 50'a rini kana tro huteno, ana tare tavravea eri rusi higeno ana tavraveraremokea erimago huke me'na'e. **19** Anante seli mono no refite tavravemofo agofetu mago'anе refite'zana ve sipisipi afutamimofo akrutami eri koranke hu'nea akru'anu refite'ne. Mago'anе ete ana agofetu'ma refite'neana hagerimpi bulimakao afutamimofo akruteti tro hu'nea zanu refite'ne. **20** Hagi seli mono nomofo retrure zafama tro'ma hu'neana, akasia zafareti tro hu'ne. **21** Ana seli noma eri otino ki'nea zafaramimofo zaza'amo'a, 4'a mita higeno, kahesa'amo'a 66si'a sentimita hutere hu'ne. **22** Ana seli mono noma vazisgama hania zafarera, tare rusima hu'zana taga huno tro huntegeno, tra'afina ome regrino rusi huno tragoteno me'ne. **23** E'i anama huno'ma tro'ma huteno'a 20'a zafaramina seli nomofona sauti kaziga retrure'ne. **24** Ana zafarmimofo tra'azmia silvareti 40'a tro hu'ne. E'i tare tra'mokea tare zafa znazeri tragotesakeno mago nozaferina fore hutere hu'na'e. **25** Ana hukna huno mago kaziga asoparega noti kaziga noma reharere zafaramina 20'a tro nehuno, **26** regri tra'zmia silvareti 40'a tro nehuno, mago zafamofona tare regri tra'a tro huntetere hu'ne. **27** Hagi ana seli mono nomofo amefi'a zage ufre kaziga reharere zafaramina 6si'a tro nehuno, **28** ana seli mono nomofona rugaraga kazigati renagentetera tare reharere zafarere tro hu'ne. **29** E'i ana renagente zafarerena, fenkama kaziga atupamokea magoke regri tra'afi regrike ruhamprikeno, anagamu kaziga atupa'araremokea magoke rini kampi ome

rusihuke ruhaprike eri magoke hu'na'e. Anazanke huno mago kaziga renagetetera tro hu'ne. **30** E'inama higeno'a ana makara 8'a zafa megeno ana zafaramima regri trara silvareti mago'mago zafarera tare tra trohutere higeno, ana makara 16ni'a tra me'ne.

31 Ana zanke huno seli mono nomofo rugekahu zafaramina, akasia zafareti 5fu'a tro hu'ne. **32** Hagi ana zanke huno mago kaziga asopareganena (saut) rugeka zafa 5fu'a tro nehuno, seli mono nomofo atupa kaziga zage fre kaziganema (west) me'nea zafarera ana zanke huno 5fu'a rugeka zafa tro hu'ne. **33** Ana 5fu'a rugeka zafaramimpintira amu'hompima rugeka'ma hu'nea zafamo'a, mago asopamofo atuparetira vuno, mago atupare uhanitine. **34** Ana zafaramimofona goliletike erino nevazino, goli rinima asopa zafafima tro'ma hunte'nenevi vazintegeno, mago atupareti mago atupare uhanatine. **35** Seri mono nona zamana zamana'ma hu'neanofiki, hokonke nofiki, fitunke nofiki, koranke nofi avazu huno zagi'nea osi nofiteti tro hu'nea tavravereti hunaragi'ne. Serabimie nehaza ankeroramimofo zmema'a hentofaza huno tavravere'ma nofiteti'ma avoma kre antahi'zana eri'neankino ana tavraverera hatino tro hunte'ne.

36 Ana tavravema hanti'zana, 4'a akasia zafa golireti eri ano vaziteno, ana zafarera eri rusihu rini'a golireti tro huteno, retrure tra'a silvaleti 4'a tro hu'ne. **37** Mago rantavravea knare'zantfa hu'nea tavravereti seli mono nomofo kahana tro huteno sipisipi zokateti tro hu'nea koranke ene hokonke treti nofi'nuti ene ruzahu ruzahu knare treti nofi'nuti avasese zama'a tro hunte'ne. **38** Ana 5fu'a retrure zafarera tavravema hanti'zana golireti eri fagigino tro hunenteno, ana zafaramimofo asenire ene rinire'enena golireti eri ano nevazino, retrure tra'zamia bronsireti 5fu'a tro hunte'ne.

37 Hagi Bezaleli'a akasia zafareti kasegema ante bokisia tro hu'ne. Ana bokisimofo zaza'amo'a 110ni'a sentimita higeno, atupa kaziga'amo'a 66si'a sentimita higeno, anagamuma mareri'amo'a 66si'a sentimita hu'ne. **2** Fegi'ane agu'afinena goliretike eri anovaziteno anagama avazarera goliretike avazareno kagi'ne. **3** Hanki 4'a golire rini tro huno fenkami kaziga agente agentera tare tare huno ome arekamarente eme arekamarente hunte'ne. **4** Ana huteno akasia zafa antreno tare zota trohuteno golinuti eri ano vazinte'ne. **5** E'i ana tare zafararena, ana vogisima erisga huno vu'zana 4'a rinima rekamarente'nefinka rugaraga vazinte'ne. **6** Hagi ana vogisimofona, asunku zamofo trare huno avaza'a goliretike tro huntogeno, zaza'amo'a 110ni'a sentemita higeno, atupa kaziga'amo'a 66si'a sentemita hu'ne. **7** Anante ana avaza'arera hamanu golia ruguta huno tare serabimie nehaza ankerontre rugaraga atupa'ararentera tro huzanante'ne. **8** Serabimie nehaza ankerontre'ma tro'ma hu'neana, ana asunku tra'ma tro'ma hu'nea golinutike, rugaraga agentera ana ankerontrena magoke golinutike tro huntogeno eri mago hu'ne. **9** Ana Serabimi ankeroraremokea zanavugosa ohumi ahumi nehuke, kepri hu'ne asunku tra'mofo negakeno zanageko'namo'a rufanara huno ana vogisia refite'ne. **10** Anantero Bezaleli'a akasia zafareti mago tra tro hu'ne. Ana tra'mofona zaza'amo'a 88'a sentimita higeno, atupa'amo'a 44'a sentimita higeno, mareri'amo'a 66si'a sentimita hu'ne. **11** Ana tra'mofona golinutike eri ano nevazino, agema'aramintera ana golinutike eri avozaze huno eri pehe huno ava regagi'ne. **12** Hagi ana tra'mofo atumpa'arema eri agu'a huno rugagi'neana 8'a sentimita higeno, golinutike eri avozaze huno eri pehe huno avarente'ne. **13** Ana huteno 4'a golire rini tro huno 4'a agamofo tavaonte agente

agentera rekamarente'ne. **14** Ana 4'a rinima rekamarente'neana ana tramofo anagami rugaraga agentega rekamrente'neankino ana riniramimpi erisga huno vu'zana tare zota vazinte'ne. **15** Ana tra'ma erisga huno vu'zana, akasia zafa antreno tare azota tro huteno, ana azotararena golireti eri anovazi'ne. **16** Hanki tima taginte zuomparamine waini tima tagi'zama ofa hu'zane tintafene kapunena golinutike'za tro huntegeno ana tratera me'ne. **17** Hagi tavi'ma rekru hunte azotama Bezaleli'a tro'ma hu'neana, hamanteti aruguta huno magoke golinutike, retrure'agi, nenarampa'agi, azankuna'ane asi'na'anena tro hunenteno, amosre'agna huno tavi'ma rekruhunte'a tro hunte'ne. **18** Hagi ana tavi zotamofona 6si'a azankuna tro hunte'ne. Rugaraga 3'a azankunakna huno tro hunte'ne. **19** Hanki ana azotamofo 6si'a tavi'ma rekru hunte azankunatamimofo atuparega, almoni zafamofo anina'ane amosare'agna huno tavi'ma rekruhunte'a tro hunte'ne. **20** Hanki amu'nompima mareri'nea zotarera, almoni zafamofo amosare'agna huno 4'a tavi'ma rekruhunte'a trohunte'ne. **21** Hanki ana zotamofoma rugaraga azankunatrema trohunteterema hu'nerera tare almoni zafamofo anina'a rugaraga trohuntetere hu'ne. **22** Ana tavi azotama, azankuna'aramima, ani'na'ama, amosare'anema tro'ma hu'neana magoke golinutike, arukuta huno tro hu'ne. **23** Ana 7ni'a zotarera lamu tavi tro huno nenteno, ana lamu tavimofo osama hampage tu'zane osama erinte tafenena maka golinutike tro hu'ne. **24** E'i ana tavi zotamofoma mika zantamima'ama tro'ma hu'neana kna'amo'a 34'a kilo hu'nea golireti tro hu'ne. **25** Ana huteno'a mnama vu zantamima kre snageno'ma mnama vania ita, magoke akasia zafaretike'za tro hu'ne. Ana itamofo zaza'amo'a 45'a sentimita higeno, kahesa'amo'a 45'a sentimita higeno,

mika asopa'amo'a mago avamenteke megeno, atrure'amo'a
90'a sentimita mrerigeno, ana itamofona 4'ama renagentetera
pazive tro huntetere hu'ne. **26** Ana itamofona agofetu'agi,
maka asopa'agi pazivetaminena goliretike erinovazinenteno,
ana itamofo agema'aramintera goliretike avareno avasase'a
hugagi'ne. **27** Kolireti'ma avasasema hunte'nemofo henka kaziga,
zotama vazino eri sgama huno'ma vu'zana golireti tare rinia
ruja ruga asoparega tro hunte'ne. **28** Ana itama eri sgama
huno vu'zana akasea zafareti tare azotarare tro huno golireti
erinovazinte'ne. **29** Anantero ruotage masavena pristi vahete'ene
mago'azante'ma tagi'za frenente'za huhampri nezmantaza
masavene, mnanentake zama tro'mahu antahintahima erine'zama
tro'ma nehazankna huno, mnanentake'zana tro hu'ne.

38 Hagi Bezaleli'a akasia zafareti kresramnavu itama tro
hu'neana, mareri'amo'a **1** mitagi 30'a sentemita higeno
zaza'amo'ene kahesa'amo'enena mago avamenteke 2 mitagi 20'a
sentemita hu'ne. **2** Hanki 4'a omerenagente eme renagente'ma
hutera mago pazive tro huntetere higeno, ana pazivetamina
itama tro'ma hu'neana zafareti tro higeno rutragote no erimago
zanke higeno, ana ita bronsireti amega'a anovazinte'ne. **3**
Ana itare'ma eri'zama eri'zantamina bronsireti tro'ma hu'neana,
tanefa'ma katetre kavoraminki, osama kate sipetiraminki, ru trtri
hu zuomparaminki, afu'ma revazuhu zotaraminki, tevema tagi
osi zuomparaminki huno tro hu'ne. **4** Bronsireti rama'a kantami
hagente'za strena tro huno tevema hugre itamofo anagati'ma
urami'nea agu'afi antegeno uramino amu'nompi me'ne. **5** Anante
4'a bronsire rini tro huno azotama vazinteno erisga huno vu'zana
4'a renagentetera rukamre'ne. **6** Hagi agra akasia zafareti
tare azota antreno tro huteno bronsireti eri anovazine. **7** Ana

azotarerena kresramna vu itamofo asoparega riniramima tro'ma huntepinka erino vazinte'ne. Ana vogisi'a kuta zafareti tro higeno, agu'afina hagro huno me'ne. **8** Anumzanema atruhu seli mono nomofo kafante'ma eri'zama e'neri'za a'nemo'za zmavugosa negaza bronsire kapo Bezaleli'a erino, ti fre zuompane aga'anena tro hunte'ne. **9** Anantera seli mono nomofo kuma keginama hu'neana, sauti kaziga zaza'amo'a 44'a mita higeno osi nofiteti zagino hati'nea tavaravereti keginarera tafinteno enevuno, **10** Keginama azeri oti zafaramina 20'a tro nehuno, kegina zafamofo regri tra'a bronsireti 20'a tro nehuno, tavravema erirusi huno tafinte'zantamine rininena silvareti tro hunte'ne. **11** Ana zanke huno noti kaziga keginahu tavravene seli mono noma azeri oti zafaramina 20'a tro nehuno, kegina zafamofo tra'a bronsireti 20'a tro nehuno, tavravema erirusi huno tafinte'zantamine nofi'ma rente'zantamina silvareti ana zafaramimofo avozarera tro hunte'ne. **12** Ana seli mono nomofo zage ufre kaziga tavravenu'ma keginama hu'neana kahesa'amo'a 22'a mita higeno, keginama eri oti'zafa 10ni'ane tra zamia, 10ni'a silvareti tro hu'ne. **13** Hanki zage hanati kazigama avugosama hunte'nea kaziga kuma'mofa kahesa'amo'a 22'a mita hu'ne. **14** Kama ufrete'ma tamaga kaziga hanti tavravea, zaza'amo'a 6gis mitagi, 60 sentimita higeno, kegina retrure zafa 3'a tro nehuno tra'aramina 3'a tro huno ana zafarerera tavravea tafinteno evu'ne. **15** Hanki kama ufrete'ma hoga kazigama tafi tavravemofona zaza'amo'a 6gis mitagi 60 sentimita higeno, 3'a retrure zafagi, 3'a regri tra'aramina tro huteno anante tavravea tafinteno evu'ne. **16** Ana kuma keginama maka hugagi'neana zmana'zmana nofiteti zagino tro hu'nea tavaravereti kegina huno kagi'ne. **17** Ana kumamofo maka kegina zafaramintera, erirusi hunte zantamine riniraminena

silvaretike tro nehuno, keginama regri tratamina bronsireti tro hu'ne. **18** Hanki ana kumapima ufre kante'ma ruhiza'mahu tavaravema haneno tro'ma hu'neana, hokonke'ene fitunke'ene koranke nofiteti'ene, tro hunte'ne. Ana tavravemofo zaza'amo'a 9ni'a mita higeno, kahesa'amo'a 2 mitagi 2'a sentamita higeno maka kaziganena ana zanke hu'ne. **19** Hagi 4'a retrure zafane regri tra'zamia bronsireti 4'a tro hunenteno tavravema erirusihu zantamine, ana zafaramimofo asenire ene rinire'enena silvareti tro hu'ne. **20** Kuma keginamofo tavraverarene seli mono nomofo tavravema avazuhumpi huno rente azotaramina bronsiretike ana maka tro hu'ne. **21** Anumzamofo seli mono noma kasegema ante noma kinaku eritru hu'naza zantamina, Mosesi'a Livae nagaku hampriho higeno, Aroni ne'mofo Itama ana eri'zantera vugota hu'nege'za hampri'naze. **22** Juda nagapinti ne' Bezaleli'a Uri ne'mofo Huri negeho ana maka zantmima Anumzamo'ma tro huo huno Mosese'ma hunte'nea zantamina tro hu'ne. **23** Hagi Dani nagapinti ne' Ahisamaki ne'mofo Oholiapu'a ruzahu ruzahu zante'ma azanteti'ma hanagatino tro'ma hu antahi'zane, hokonke'ma, fitunke'ma, koranke tavravere'ma hatino avoma kre antahi'zane, zmana'zmana nofinu'ma haneno tavrave'ma trohu antahi'zama eri'nea ne'mo aza hu'ne. **24** Anumzamofo seli mono noma kisazegu'ma eri vereve hu ofama eri'za azageno ana noma kivagare'nea golimofo kna'ama monompima refko'ma nehaza avamente'ma hampri'nazana, kna'amo'a 998'a kilogremi hu'ne. **25** Hagi silvama eri'za azageno'ma seli mono nompima kna'ama refko'ma nehaza avamente'ma refko'ma hu'naza, kna'amo'a 3tausen 4 hantre 30'a kilogremi hu'ne. **26** Hagi 20'a kafuma agatereno mareri anagamu atre'nea vene'neramimo'za, zamagire'ma eri'za e'naza silvamofo kna'ama mono nompima

refko nehaza avamente refko hu'za ke'nazana 6'a gremi hu'nea
silva eri'za eme atre'naze. Hagi ana makara 603, tausenigi
550'a vene'nemo'za eri'za e'naze. **27** Anumzamofo seli mono
nomofo retrure zafaramimofo regri tra'ama tro'ma hu'nazana,
100'a tro hazageno, ana tra'ma tro'ma hu'naza silvamofo
kna'amo'a 34'a kilogremi huterere hu'ne. **28** Kna'amo'ma 30'a
kilogremima hu'nea silvama amnema meama'reti, eri fagagi'za
tavravema tafinte'zane, rinine tro nehu'za retrure zafaramimofona
aseni'anena erinovaziza tro hu'naze. **29** Hanki Anumzamofoma
eri vereve hu ofama eme ami'naza bronsimofo ana maka
kna'amo'a 2 tausenigi 425fu'a kilogremi hu'ne. **30** E'i ana maka
bronsireti seli mono nomofo kahante retrure zafaramimofo regri
trazamine, bronsireti tro hu'nea Kresramanavu itane, rama'a
kantami hagente strenane, ana itare'ma eri'zama eri zantamina
tro hu'ne. **31** Ana bronsiretike seli mono nonkuma'mofo kegina
zafaramima regri tra zamine, kahama ufrete zafaramimofo tra
zami'ne, maka tvaravema avazuhumpi huno anaki azotaraminen
tro hu'ne.

39 Hagi Ra Anumzamo'ma Mosesema asami'hea kante ante'za
kukenama hatino tro hu antahintahima eri'naza vahe'mo'za,
hokonkeki fitunkeki koranke nofiteti tro hu'naza zmana'zmana
tavravereti, Aroni'ma antani'neno ruotage hu'nefinka eri'zama
eri'nia za'za kukena hati'za tro hu'naze. **2** Amega amimizare'ma
antanisia ku kenama tro'ma hu'neana, golire nofiki hokonke
nofiki, fitunke nofiki, koranke nofitetiki zmana'zamna hu'nea
tavravereti'ene tro hu'ne. **3** Hanki kukenama hatino tro hu
antahintahima eri'nea ne'mo, golia aruguta huno erita'ori huteno,
taga huno treti nofikna huteno hokonke ene fitunke ene koranke
treti nofiteti'ma tro'ma hu'nea tavravene, efeke zamana'zamna

tavravereti'ene tro hu'ne. 4 Amimizafima hania kukenamofo
nofi'mo'ma afumpinti'ma kreraminigeno amefigama anakisnia
nofira, anaga kaziga tare atumparega hatinte'ne. 5 Amu'nofi'ma
zagino'ma tro'ma hu'neana, golirenofiki, hokonkenofiki, fitunke
nofiki, korankenofi'ene knare zantfa hu'za zmana'zmana nofiteti
hati'naza tavaravereti Ra Anumzamo'ma Mosesema asami'nea
kante anteno tro hu'ne. 6 Anante tare oniksie nehaza have erino
12fu'a Israeli ne' mofavre'mokizmi zamagia, ana haverarentera
taga huno krente'ne. 7 E'i ana haverarena Ra Anumzamo negeno
Israeli (Jekopu) ne' mofavre nagare huno antahi'zmi have huno
afunte tavraverera Ra Anumzamo'ma Mosesema asami'nea
kante anteno renteno evu'ne. 8 Kukenama tro hu antahi'zama
eri'naza vahe'mo'za, amimizare kukenama tro'ma hu'nazankna
huno, hokonkenofiki, fitunkenofiki, koranke tavravereti'ene
knare huno zmana'zmana hu'nea nofiteti tro hu'nea amimizare
antani'nia kukenamofo agofetu'ma antani kukena tro hu'ne. 9
Ana tavravema za'za kazigati'ma erinteno repasi'ma higeno'a ana
miko asopa'amo'a 22'a sentemita huno mago avamenteke me'ne.
10 Mizama'amo mareri'nea haveraminteti ana tavraverera 4'a
isa'are rekamarenteno evu'ne. Hanki kotama evu'nea isarera rubi
havegi, topasi havegi, emerelie nehaza haverami rekamrenteno
enevuno, 11 anante isa'arera, tekuoisie nehaza havene, safai
hu'za nehaza havene, daimonie nehaza have rekamrenteno
evu'ne. 12 Hagi nampa 3 isarera jasintie nehaza havene, agaties
hu'za nehaza havene ametistie nehaza have rekamrente'za
evu'naze. 13 Hagi nampa 4 isarera berilie nehaza havene,
oniksie nehaza havene, jaspae hu'za nehaza have rekamre'za
evu'naze. Ana maka haveramima azeri anomama'ama troma
hu'nazana goliletike tro hu'naze. 14 Ana maka 12fu'a haverera

Israelina (Jekopu) 12fu'a ne' mofavremokizmire huhamprino magoke magoke havea me'negeno, mago mago mokizmi zamagi'a anante taga hu'za krente'naze. **15** Ana amimizare'ma 12fu'a havema ante'naza tavravema rente seninofira, goliretike tro hu'naze. **16** Hanki goliretike tare nofi'ma rente rinia ana tavravemofona anagamu ruga raga kaziga ometre emetrema hutega anakinte'naze **17** Ana amimizare antani tavravemofoma rugaraga atumpare'ma anakinte'naza rinirarentera, goliret'ma tare seni nofi'ma tro'ma hu'naza nofi'nu hagerafinte'naze. **18** Hanki ana seni nofitremofo tagina'rarena eritma rugaraga azonare'ma ante havema eri novazinea golire rentegahaze. **19** Hanki mago ene tare golire rini trohu'za amimizare'ma 12fu'a havema ante'naza tavravemofo henkamu kaziga ometre emetre hutega, agu'afi amimizare'ma hu kukenamofo tvaonte tafinte'naze. **20** Hanki mago'ene golireti tare rinirarena tro hu'za azo'nareti'ma kreramino amimizare tavravema hagerafi'nere ruga raga avasase'ane nofi'nu'ma avamare'nere anakinte'naze. **21** Hagi Ra Anumzamo'ma Mosesema asami'nea kante ante'za, mago'ene golireti tare rini tro hute'za, azonareti'ma kreramino amimizare tavravema avasase'ane nofi'nu avama are'nere ruga raga hokonke nofi'nu anakintazageno hanavetino me'ne. **22** Hagi antanine'zama amimizare kukenama ana agofetu'ma hania za'za kukena, hokonke tavraveretike'za tro hu'naze. **23** Hanki ana za'za kukenamofo ananke kana anagamu kaziga amu'nompi hagenente'za, ana kamofoma avazama regagi'nazana tavravea ante tapari'za zagi'za hatigagi'naze. **24** Hanki ana za'za kukenamofo agiaregama rugagi atumparega, pomigreneti zafa rgagna hu'za hokonke nofiki, fitunke nofiki, koranke nofinuti tro hute'za ana zaza kukenarera rentegagi'naze. **25** Ana pomigreneti

zafa rgaramimofo amu'nozmifina, golireti belotami tro hu'za
rentetere hu'naze. **26** Hanki Ra Anumzamo'ma Mosese'ma
asami'nea kante ante'za ana zantamima rente kagi'nazana,
golireti'ma tro'ma hu'naza belora renente'za, pomigreneti zafa
rgama tro'ma hu'nazana rentere hu'za ana kenamofona aga
kaziga atuparega rente kagi'nazana. **27** Hanki nofi'nu'ma kukena
hati eri'zama eri antahi'zama eri'naza antahi"zane vahe'mo'za
nehazaza hu'za Aronine mofavre na'agamo'zama agu'ama
antanisaza kukena zmana'zmana huno efeke tavravenuti
zagi'za tro hu'naze. **28** Ana zmana'zamana tavraveretike
zmanunte'ma anaki tavravene kankri'zamine agu'a kukena
zaminena tro hu'naze. **29** Hanki Ra Anumzamo'ma Mosesema
asami'nea kante ante'za, nofi'nu'ma kukena hati eri'zama eri
antahi'zama eri'naza vahe'mo'za nehazaza hu'za, azo'haregati'ma
rugreramino asoparegama evunofira zmana'zmana huno efeke
nofi'ene, hokonke nofi'ene, fitunke nofi'ene, koranke nofinuti
tro hu'naze. **30** Anante goliletike mago kuta zompa tro hu'za,
Ra Anumzamofontera ruotage hu'ne hu'za taga hu'za anantera
krente'naze. **31** Anantera Anumzamo'ma Mosesema asami'nea
kante ante'za hokonke nofi'nu ana nanekema krente'naza golire
zompa asenire'ma anaki tavravemofo agofetu kokovite avona
anakinte'naze. **32** Ra Anumzamo'ma Mosesema asami'nea kante
ante'za Israeli vahe'mo'za seli mono none Ra Anumzanema
atruhu seli nomofo eri'zana maka eri vagare'naze. **33** Ana
seli mono noma ki'naza zantamima tro'ma hunte'naza, eri'za
Mosesente'ma e'nazana, seli nomofo tavravema hanti zantamine,
retrure zafaramine, rugeka zafaramine, regri tra'aramine, **34** hagi
ana seli mono nomofoma rufite'zana, ve sipisipimofo akruteti eri
korankre hu'za tro hu'naza tavravene, hage rimpi bulimakaomofo

akruteti tro hu'naza tavravene, ruotage'ma hu'nefinka rente'za hunaragi tavravene, **35** kasegema ante vogisine ana vogisima erisga huno vu azotarerene, ana vogisimofo avaza'agu'ma asunku trarema nehaza avaza'ane, **36** Anumzamofo avure'ma bretima ante itane, ana itare'ma eri'zama eri'zantamine, Anumzamofo avure'ma ante brette, **37** goliretike tro hu tavi zotane, ana tavi azotare'ma tavi'ma rekru hunte'ama tro hunteterema higeno me' fatgoma hu'nea zane, ana tavi azotare'ma eri'zama eri zantamine, tavi'ma rekruma hu masavene, **38** golire tro hu'nea kresramna vu itane, tagino frenenteno Anumzamofo zanema huno huhamprinte masavene, knare mnanentake toki'ma hu' tanefa'ene, Anumzamofo seli mono nomofo kahante hanti tavravene, **39** bronsireti tro hu'naza kresramnavu itane, anaga tevema hugre'afima rekamrente zana bronsireti rama'a karami hagente'zana strenane, erisga huno vu azotararene, ana itare'ma eri'zama erizantamina bronsire tro nehu'za zuompane, aga'ane, **40** ana seli mono no kumamofo kegina hugagi tavraveramine, retrure zafarmine, regri trazmine, ana kumapima ufre kahante tafinte tavravene, renteno avazuhumpi hu nofitamine, ana nofi'ma avazuhumpi huno rente zotaramine, maka ana seli mono nompima eri'zama eri zantamine, **41** pristi vahe'mo'za antani'ne'za ruotage hu'nefinka eri'za erisaza ruotage kukenaramine, pristi ne' Aroni ruotage kukenaramine, ne'mofavre'aramimo'za antanine'za pristi eri'zama erisaza kukenane tro hu'naze. **42** Ana maka eri'zana Anumzamo'ma Mosese'ma hunte'nea kante ante'za Israeli vahe'mo'za eri vagare'naze. **43** Mosese'ma ana maka eri'zama eri'naza eri'zama keana Anumzamo'ma hu'nea kante ante'za eri vagarazageno, Mosese'a asomu kea huzmante'ne.

40 Ra Anumzamo'a amanage huno Mosesena asmi'ne, 2
Nagranema atruma hanaza seli mono nona, kasefa kafumofo
ese ikamofona ese zage knare azeri otiho. 3 Huhagerafi
huvempa kasege vogisia anampinka nentetma, tavravenuti
hunargintenko agu'afi meno. 4 Anampinka ita erinka ome
nentenka, ana itare'ma ante zantamina erinka ome antese
nehunka, tavi'ma rekru hunte zota erinka ome nentenka, ana
zotarera tavtamima rekru hunte'a retro huntetere huo. 5 Hanki
mnanentake zama kre mnavu golire ita Anumzane hagerafi
kasege ante vokisimofo avuga'a nentetma, ana seli mono
nomofo kahantera tavravea renteho. 6 Anumzane atruhu seli
mono nomofo avuga kahantera, kresramna vu ita nentenka, 7
bronsireti'ma ra tifre zuompa tro'ma hu'nazana, Anumzane atruhu
seli mono nomofone, Kresramanama vu itamofo amu'nompi
nentenka tina ana zuompafina taginto. 8 Hagi anante ana seli
mono nomofo meg'i'a kumara tavrave kegina huganeginka, ana
meg'i'a kumamofo kahantera tavravea hantinto. 9 Ana hutenga,
tagino frenteno Anumzamofo zanema huno huhamprinte masave
erinka ana seli mono none, ana seli mono nomofo agu'afima
me'nea maka zantamina ana masavea taginka frenezmantenka,
Anumzamofo zantamine hunka huhamprinezmantenka zamazeri
ruotage huge'za ana seli mono none, ana seli mono nompima
me'nea maka zantmimo'za me ruotage hu'za megahaze.
10 Anazanke hunka Kresramanama vu itane ana itare'ma
eri'zama eri zantaminena ana masave taginka frenezmantenka,
Anumzamofo zantamine hunka huhamprizmantenka zamazeri
ruotage hugeno, ana itamo'a me ruotage huno meno. 11 Anazanke
hunka tifre ra zuompane aga'anena ana masaveretike taginka
frenezmantenka, Anumzamofo zane hunka huhamprintegeno

meno. **12** Hagi anante Aronine, ne' mofavrermima'anena zmavrenka Anumzane atru hu seli mono nomofo kahante tina frezmanto. **13** Anante Aronina ruotage hu'nea pristi kukena eri hankrentenka, huhamprinte masave taginka frenentenka, Anumzamofo nere hunka huhamprintenka azeri ruotage hugeno mani ruotage huno mani'neno, Nagri pristi eri'zana erigahie. **14** E'ina nehunka Aronina ne' mofavrermima'a zmavrenka agu'afi avate antani kukena eri hankre zmanto. **15** Nezmafama hunte'nana kna hunka ana masave taginka frezmanenka, huhampri zmanteg'eza Nagri pristi eri'zana eriho. E'i ana zama hanana zamo'a henkama ana nagapinti fore hunante anante hu'za vanaza vahe'mo'za pristi eri'za, eri'za vugahaze. **16** Hagi Mosese'a Anumzamo'ma huoma huno'ma hunte'nea kante anteno, ana maka eri'zana eri'ne. **17** Hagi namba 2 kafumofona, ese ikamofo ese zage knare Anumzamofo seli mono nona azeri oti'za ki'naze. **18** Mosese'a ana seli mono noma azeri oti'nea regri zafarmimofo tra'zmia anteteno, retrure zafaramina regrinteteno, nomofo asoparegama rugekahu zafaramina erirusi hunteteno, no zaferina'a azeri retrurene. **19** Hagi Moses'i'a Ra Anumzamo'ma huoma huno hunte'nea kante anteno, seria eri atareno seli mono nona refiteteno, ana agofetura mago anteno refite'ne. **20** Hagi anante Mosese'a 10ni'a kasegema me'nea havererena erino Anumzane huhagerafi vogisimofo agu'afi anteteno, ana vogisima erisga huno vu azota zafararena ana vogisire me'nea riniramimpi vazinteteno, ana vogisimofo avaza'a asunku zamofo trarema nehaza avaza'a erino ana vogisia runkanire'ne. **21** Ana huteno Ra Anumzamo'ma huo huno'ma hunte'nea kante anteno Mosese'a vogisia erino ana seli mono nompinka ome nenteno, hunaragi tavrave hantintegeno ana vogisia azeri agu'a ate'ne.

22 Ra Anumzane atruhu seli mono nompima ana hunaragi tavravemofo meg'i'a noti kaziga ita erino ome nenteno, **23** Ra Anumzamo'ma huo huno'ma hunte'nea kante anteno Mosese'a Ra Anumzamofo avure'ma ante bretia ana itare ome ante'ne. **24** Anante seli mono nompima bretima ante itamofo kantu sauti kaziga, tavi'ma rekru hunte zota erino ome nenteno, **25** Ra Anumzamo'ma huo huno'ma hunte'nea kante anteno, Mosese'a tavi'ma rekru hunte zotama ra Anumzamofo avure me'nere tavitamina rekru hunte'ne. **26** Ra Anumzane atruhu' seli mono nompinka hunaragi tavravemofo avuga golireti'ma tro hu'nea ita erino ome anteteno. **27** Ra Anumzamo'ma huo huno'ma hunte'nea kante anteno Mosese'a, ana itarera mnanentake zana kre mana vu'ne. **28** Anante ana seli mono nomofo kahantera tavravea rente'ne. **29** Ana huteno kre fñanehu ofama kre ita Ra Anumzane atruhu seli mono nomofo kahante anteno ana itare Ra Anumzamo'ma huo huno'ma hunte'nea kante anteno Mosese'a kre fanene hu ofane witi ofanena hu'ne. **30** Anante tifre ra zuompa Ra Anumzane atruhu seli mono none kresramnama vu' itamofo amu'noznifi nenteno anampina tima fre'zana taginte'ne. **31** Ana hutege'za Mosese ene Aroni ene Aroni ne' mofavrermima'anena ana timpi zmazane zmagana sese hu'naze. **32** Ra Anumzane atruhu seli mono nompima ufregé Kresramana vu itare'ma vu tavao hunaku'ma hanu'za, Ra Anumzamo'ma huo huno'ma Mosesema hunte'nea kante ante'za zamagra ana timpi tina fregahaze. **33** Anante Mosese'a ana seli mono nomofo kuma kegina tavravea hantintegagi vagareteno ana kuma'mofo kahante tavravea hantinte'ne. E'inahu kna huno ana maka eri'zana eri vagare'ne. **34** Ana hutegeno hampomo ana atruhu seli mono nona eme refitegeno, Ra

Anumzamofo hanavenentake msaa'amo'a ana seli mono nona
eme avite'ne. **35** E'ina higeno Mosese'a ana seli mono nompina
uofregeno, Anumzamofo hanavenentake masa'amo'a avite'ne.
36 Israeli vahe'mo'za negageno seli mono noma eme refite'nea
hampomo'ma atreno marerige'za ana seli mono nona tagana
vazi'za renamagi'za e'neri'za, ana hampomo'ma virega avariri'za
vutere hu'naze. **37** Hianagi ana hampomo seli mono noma
refiteteno'ma mege'za, Israeli vahe'mo'za anama mani'naza
kumara atre'za ovu mani'nazageno, ana hampomo'ma vige'za
avariri'za vu'naze. **38** Ra Anumzamofo hampomo'a msarera
seli mono nona refiteno me'negeno, hanima higeno'a, ana
hampomo'a tevenefa higeno, ana maka Israeli vahe'mo'za
ke'naze. Israeli vahe'mo'zama ana mika kama vazafina e'i ana
hu'za fore huno vu'ne.

3 Mose

1 Ra Anumzamo'a atruhu seli nompinti Mosesenkura ke huno anage hu'ne, **2** Israeli vahe'mokizmia zamasamige'za Ra Anumzamo'nare'ma ofama kresramana vunante'naku hanu'za, kegavama nehania sipisipio meme afu kevufinti avreno kresramana vunanteno. **3** Kre fanane hu ofama hu'zama bulimakao afu'zamifinti'ma avre'za esu'za, ve bulimakao afu afuhe afahe osu'nesia su'za avre'za atru'ma nehaza seli mono nomofo kafante omentesageno, Ra Anumzamo'a antahimigahie. **4** Agra ana ofama hania bulimakao afu'mofo asenire kumi'amofo nonama hanigu azana antenkeno, Ra Anumzamo'a antahinemino kumi'a atrentegahie. **5** Hagi ana ve bulimakao anenta afura Ra Anumzamofo avuga ananke akafritesigeno, Aroni mofavremo'za pristi eri'zama e'nerizamo'za korama'a tagi'za vu'za seli mono nomofo avugama me'nea kresramana vu itare ome rutri rutri hugagiho. **6** Hagi anamo'a ana bulimakaomofona akru'a kararu vaziteno, avufga'a tagahu osi osi hutesigeno, **7** Aroni mofavre naga pristi eri'zama e'nerizamo'za kresramana vu itarera tevea erise hu'za agofetura ante fatgo hugahaze. **8** Anantero Aroni mofavreramima pristi eri'zama e'nerizamo'za kresramana vu itare'ma tevema hanavazisare, tagahu osi osi'ma hanaza ame'ane, aseni'ane, afova'anena, eri antefatgo hugahaze. **9** Agazama'ane agusu'agesezama'a timpi sese hutesigeno, pristi vahe'mo'a kre sramana vu itarera ome kresageno mana'amo'a marerinkeno, Ra Anumzamo'a knare mana nentahino muse hugahie. **10** Hagi sipisipio meme afu kevu'afinti'ma kresramana vunaku'ma hanimo'a, afuhe afahe'ma osu'nesia ve afu avregahie. **11** Kresramana vu itamofona noti kaziga Ra Anumzamofo avuga ana afura anankena akafrisigeno, Aroni mofavreramima

pristi eri'zama e'nerizamo'za korama'a tagi'za kresramna vu itamofona rutri tri hugagigahaze. **12** Agra tagahu osi osi hutenko, pristi vahe'mo'a erino kresramana vu itamofona agofetu tevema nerea trate omerintese huteno, anazanke huno aseni'ane afova'anena erino kresramana vu itare ome kregahie. **13** Agiazama'ane agusu agese'zama'a timpi sese hutesigeno, pristi vahe'mo'a kresramana vu itarera mika ome kresageno, manamo'a marerinkeno, Ra Anumzamo'a knare mana nentahino musena hugahie. **14** Hagi Ra Anumzamofonte'ma kre fanene hu ofama hu'zama namaramima avreno'ma esuno'a, maho namao kugofa kna namafinti, mago avreno kresramana vu itarera egahie. **15** Hagi pristi vahe'mo'a kresramna vu itare ana nama avreno vuteno, ananke eri vamagino eri akafritenko kresramana vu itare kresramana nevuno, korama'a erino kresramana vu itamofo asoparega tagitregahie. **16** Ana namamofona azoka'ane, azanku'anena kresramana vu itamofona zage hanati kaziga tanefama katenetrazafi atregahaze. **17** Hagi pristi ne'mo'a ana namamofona agekonare azeri'neno eri taganavazino erizuzu huteno, kresramana vu itare'ma tevema nerefi mika, ome kresigeno mana'a marerinkeno, Ra Anumzamo'a knare mana nentahino musena hugahiankino, e'i ana ofa tevefi kre fanene hu ofe.

2 Mago'mo'ma Ra Anumzamofonte'ma witi ofa'ma hunaku'ma erino esuno'a kaneno eri osi huteno, erino eno. Anampina masavene taginenteno frenkinsensi nehaza mnmanentake'zana erinteno, **2** erino Aroni mofavrermima pristi eri'zama e'neriza vahete vino. Ana masavene frenkinsensinema eri haviamu hu'nea witifintira mago aza huno, kresramana vu itare ome kresigeno Ra Anumzamo'a mana'a nentahino musena hugahie.

3 Hagi mago'ama mesia witia Aronine mofavre'amokizmi su'a megahie. Anama Ra Anumzamofonte'ma kre sramana vunente'za atresazama'amo'a ruotagetfaza hu'ne. **4** Avenifima kre'nesaza bretima ofama hunaku'ma erita esazana, zisti onte breti masaventeti eri havia huno kre'ne'nia kekio, hagege bisketire masave fre'ne'nia erita eho. **5** Kuta fraimpenifima kre'ne'nia witireti'ma ofama hunaku'ma hanutma, kaneosi'ma hu'nesia flaua'ene olivi masavenena erihavia nehuta, anampina zistia onteho. **6** Hagi ana bretia goli osi osi huteta, anampina masave taginteho. E'i witi ofa hugahaze. **7** Kresramana vu witi ofama kre hagage hu kavofima kresazana, kaneosi osi'ma hu'nesia flauateti masavene eri havia huteta kregahaze. **8** Hagi ama ana zantetima witi ofama kreta erita Ra Anumzamofonte'ma esuta, pristi vahe ome aminkeno, erino kresramna vu itarera vino. **9** Ana bretifintira pristi vahe'mo'za huvame hu'za mago zamaza hu'za eri'za kre manavu itare tevefi kresageno, Ra Anumzamo'a mana'a nentahino musena hugahie. **10** Hagi anama Ra Anumzamofonte'ma tevefima kresramana vunente'za atresaza bretimo'a, ruotgetfa hu'neankino Aronine mofavre'amokizmi su'a megahie. **11** Kresramana vu witima ofama erita vanazana, zistia onteho, na'ankure zistima antege tumerima antege'ma hu'nesia witiretira tevefina kreta Ra Anumzamofona ofa huontegahaze. **12** Hozafinti'ma e'sema ne'zama nenama hania ofama hanutma, zistine tumerinena amne tamagra erita Ra Anumzamofonte egahazanagi, e'i ana ofa kremnavu itarera Ra Anumzamo muse hanie huta onkregahaze. **13** Miko ofama hanaza witifina hagea antenageno, e'i ana zamo'a Anumzamo'enema huhagerafi huvempa ke'ma hu'naza kemofo huramagedes nehanigetma, tamagera okanigahazanki maka

ofama hanaza witifina hagea atintegahaze. **14** Ana nehuta ese'ma nena hania witi raga Ra Anumzamofonte'ma ofa huku'ma erita esutma, refuzafupeta eritma ege' tevefi kre hagage hutma erita egahaze. **15** Ana ne'zampina olivi masavene, mnanentake'za insensi antegahazankino, e'i witi ofa hugahaze. **16** Ana Witima kne'za masavene mnanentake'za insensinema eri haviam hunte'nazafinti osi'a eri'za, Pristi vahe'mo'za knare manavu ofa Anumzamofontega huntegahaze.

3 Hagi mago'mo'ma rimpa fru ofama bulimakao afu kevu'afintima hunaku'ma hanuno'a, afuhe afahe'ma osu'nesia ve bulimakao afuro, a' bulimaka afura avreno Ra Anumzamofo avuga vino.
2 Agra ana ofama hunaku'ma hania afu'mofo asenire azana anteteno, atrumahu seli nomofo kafante anankena akafrinkeno, Aroni mofavre'mo'zama pristi eri'zama e'nerizamo'za korama'a tagi'za, kresramna vu itamofona rutri tri hugagigahaze. **3** Anumzanema rimpa fru ofama hania afu'mofona, miko afova'ane, rimpama eri anovazi'nea afovane, **4** tare kreso'ane anante'ma eri anoma vazi'nea afova'ane, asumna'anena eritagatino erino, **5** Aroni mofavre'ramima Pristi eri'zama e'neri'za naga eme zaminige'za kresramna vu itare'ma tevema hanavazi'naza agofetu, kre fananehu ofane kresramana vanageno, Ra Anumzamo'a sramna mana nentahino musena hugahie. **6** Hianagi anazanke huno Anumzanema arimpa fru ofama mago'mo'ma sipisipi kevu'afinti'ma hunaku'ma hanuno'a, ve sipisipi afuro a' sipisipi afu'ma afuhe afahe'ma osu'nesia su'za azerino Ra Anumzamofontega ofa hugahie. **7** Hagi sipisipi afu anenta'ma ofa huno aminaku'ma hanuno'a, avreno Ra Anumzamofo avuga vino. **8** Agra ana ofama hunaku'ma avrenoma esia sipisipi afumofo asenire azana anteteno, atrumahu seli nomofo avuga

anankena tagahinkeno, Aroni ne' mofavre'mo'za pristi eri'zama e'neri'zamo'za korama'a tagi'za kresramna vu itamofona maka asoparega rutri tri hugagigahaze. **9** Rimpa fru ofama hunaku'ma hania afuteti'ma erisia, afova'ane risona agu'sama, amagenafinti ahe futagi'ane, rimpama eri anovazi'nea afova'ane, ana maka afova'ane, **10** tarega kreso'ane, anante'ma erino vazi'nea afova'ane, asumna'ane, kreso'anena ana maka tagatintenigeno, **11** pristi vahe'mo'za eri'za kresramna vu itare ne'zama ofama nehazaza hu'za Ra Anumzamofontega kresramana vuntegahaze. **12** Hagi meme afu'ma azerino ome ofama hunaku'ma hanuno'a, agra Ra Anumzamofo avuga erino vuteno, **13** atru'ma hu seli nomofo avuga agra ana ofama hu'naku'ma azerino esia meme afu'mofo asenire azana anteteno, anankena akafrinkeno, Aroni ne' mofavre'zamo'zama pristi eri'zama e'neri'zamo'za korama'a tagi'za erite'za kresramna vu itamofo maka asoparega rutri tri hugagigahaze. **14** Ana afupintira arimpama erinovazi'nea afovane, maka agusu agesezama'anena, tevefi negreno, **15** tare kreso'ane, erinoma vazi'nea afovane, asumnane, eri tagatino erino, **16** Pristi vahe amisigeno, ne'za ofama hiaza huno kresramna vu itare Ra Anumzamofontega tevefi kresramna vuntenigeno, Ra Anumzamo'a knare sramna nentahino muse hugahiankino, miko afova'amo'a Ra Anumzamofo su'a megahie. **17** Ama tra kea mevava trake me'nena, tamagri'ene ana miko fore hunante anante hu'za esaza vahe'mo'za, magore hu'za agusa'ane, korama'anena onetfa hugahaze.

4 Hagi Ra Anumzamo'a Mosesena asamino, **2** Mago vahe'mo'ma mago'azama hanifima, ana hugahuema huno ontahi'heno Ra Anumzamo'ma osihoma huno'ma hu'neazama hania kumimofonkura amanage hunka zamasamio. **3** Ugagota pristi

ne'mo'ma kumi'ma haniana, miko vahe'mokizmi zamazeri haviza
hugahie. Ana hugahiankino nagra mago agaho ve bulimakao afu
afuhe afahe'ma osu'nesia avreno, agrama hu'nenia kumitera
kumi ofa hugahie. 4 Hagi ana bulimakao afura avreno atruhu
seli nomofo ufre kafante Ra Anumzamofo avuga ome anteno,
azana asenire anteteno, anankena akafrigahie. 5 Anama hutena
ugagota pristi ne'mo mago'a korana erino atruhu seli nompi
ufregahie. 6 Hagi ana korampi azankoa reteno, Ra Anumzamofo
avuga hunaragini geno ruotage'ma hu'nea tavravemofo avuga,
7ni'a zupa rutri tri hugahie. 7 Hagi ana pristi ne'mo'a, mago'a
korana tagino atrumahu seli nompi Ra Anumzamofo avuga
mnanentake'za kresramana vu itamofo pazivetaminte ome
frentegahie. Hagi mago'a mesia korana, atru'ma hu seli nomofo
avuga me'nea kresramana vu itamofo agafi miko tagi atregahie.
8 Hagi kumite'ma ofama hunaku'ma hania bulimakaomofona
mika afovane, arimpama eri anovazi'nea afova'ane, 9 tarega
kreso'ane, eri anoma vazi'nea afovane asumnane, ana mika
kreso'anena eri tagatitregahie. 10 Ana huteno bulimakao
afovareti'ma arimpa fru ofama kresramna neviankna huno
ugagota Pristi ne'mo'a tevefi kre fanene hu ofama nehaza
itare kresramna vugahie. 11 Hianagi mika akru'agi, ame'agi
amumazina'ane, azonane aseni'ane agusu'agese zama'ane, 12
maka erino kuma'mofe fegi'a agruma hu'nea kumapi tanefa'ma
ome netrazafi, teve hanavazino kregahie. 13 Mika Israeli
vahe'mo'zama Ra Anumzamofo kemo'ma i'oma huno'ma hu'nesia
zama mago'azama hanaregama hantagama hu'za hanu'za
kumire hu'za ontahisazanagi, zamagra kumi hugahaze. 14
Zamagrama antahisazama kumi hu'nonema hanu'za, mago
ve agaho bulimakao afu avre'za kumizamiguma kresramana

vu'zana, Anumzanema atru'mahu seli nomofo avuga ome anteho. **15** Hagi kva vahe'zmimo'za ana bulimakao afu'mofo asenire zamazana antetenageno, Ra Anumzamofo avuga ana bulimakaona anankena akafriho. **16** Hagi ana hutesageno ugagota pristi ne'mo korama'a erino atrumahu seli nompi ufreno, **17** azankoa ana korampi reteno, tavaravema Ra Anumzamofo avugama hantintegeno me'nerega 7ni'a zupa rutri tri hugahie. **18** Hagi ana pristi ne'mo'a, mago'a korana tagino atrumahu seli nompi Ra Anumzamofo avuga mnanentake'za kresramana vu itamofo pazivetaminte ome frentegahie. Hagi mesia korana, atrumahu seli nomofo avugama me'nea kresramna vu itamofo agafi miko tagitregahie. **19** Hagi agra miko afova'a tagatino kresramana vu itare negreno, **20** kumi'mofo ofama hu'neaza huno, ugagota pristi ne'mo ana ve bulimakao erino, mika vahe'mokizmi kumizmimofo nona huno kresramna vanigeno, Ra Anumzamo'a kumizmia atrezmantegahie. **21** Anantera ana bulimakaona erino kumamofo fegi'a ese bulimakaoma hu'neaza huno ome kregahie. E'i mika vahe'mokizmi kumi atrezmante ofe huno kresramana vugahie. **22** Hagi Israeli kva vahe'mo mago'azama hanafima hantga huno Ra Anumzamo'ma osuoma hu'nea zama e'i kumire huno ontahi'enenoma hanuno'a, kumi hugahie. **23** Hagi kumi hu'noe huno'ma antahisuno'a, kumi'aguma kresramana vu'zana ve meme afu afuhe afahe osu'nenia avreno ofama hu'zana vugahie. **24** Ana ve meme afu'mofo asenire azana anteteno, Ra Anumzamofo avugama me'nea kresramana vu itamofo avuga, anankena akafrigahie. E'i kumi'ma hu'nea zamofonte ofa hugahie. **25** Hagi kumite kresramana vu mememofo korana pristi ne'mo'a azankoreti reno Ra Anumzamofo avuga kresramana vu itare'ma me'nea

pazivete ome frentegahie. Hagi mesia korana ana kresramna vu itamofo agafi miko tagitregahie. **26** Arimpa fru ofama kresramna vu'neankna huno afova'a miko kre vagareno. E'ina'ma pristi ne'mo'ma hanuno'a, ana ne'mofo kumi'mofo nonahina kumi'a atrentegahie. **27** Ra Anumzamo'ma osihoma huno hu'nea ke'ma Israeli vahepinti'ma mago'mo'ma mago'azama hanafima, e'i kumire huno ontahi'neno ana ke'ma runetagreno, kumira osu'noe huno antahigahianagi agra kumi hugahie. **28** Hagi agrama kumi hu'noema huno antahisuno'a, kumi'ma hu'nea zankura a' meme afuma afuhe afahe'ma osu'nesia avreno eno, kumi'arera ofa eme hugahie. **29** Hagi anama kumite'ma kresramna vunaku'ma hania meme afu'mofo asenire azana anteteno, kresramna vu afu'ma nehzare anankena akafrigahie. **30** Pristi vahe'mo'a azankoa ana korampi reteno, kresramana vu itare me'nea pazivetaminte ome frenenteno, mago'a mesia korana kresramana vu itamofo agafi mika tagitregahie. **31** Anantero arimpa fru ofama hu'neankna huno, maka afova tagatitregahie. Ana hanigeno pristi vahe'mo'za ana afova'a eri'za kresramna vu itare vu'za, Ra Anumzamofonte ome Kresramana vanageno, knare sramna nentahino muse hugahie. E'ina'ma pristi ne'mo'ma hanigeno'a, ana ne'mofo kumi'amofo nona hinkeno, Ra Anumzamo'a kumi'a atrentegahie. **32** Hianagi kumi'mofo ofama hunaku'ma sipisipi afu'ma avreno'ma esuno'a, a' sipisipi afu'ma afuhe afahe'ma osu'nesia su'za avreno eno, **33** ana sipisipi afu'mofo asenire azana anteteno, kresramna vu ofamahu afu'ma zmanankema nekafrizare, anankena akafrigahie. **34** Pristi ne'mo'a azankore mago'a korana reteno, kresramana vu itare me'nea pazivetaminte ome frenenteno, mesia korana kresramana vu itamofo agafi maka tagitregahie. **35** Ana'ma

hutenuno'a arimpa fru ofama hu'neankna huno, maka afova tagatitregahie. Ana hanigeno pristi vahe'mo'za ana afova eri'za kresranma vu itare vu'za, Ra Anumzamofonte ome kresramna vuntegahaze. E'ina'ma pristi ne'mo'ma hanigeno'a, anama kumi'ma hu'nea ne'mofo kumi'amofo nona huno krenkeno, Ra Anumzamo'a kumi'a atrentegahie.

5 Mago'mo'ma keno antahino hu'nesia zanku'ma huama hinogu ke refako hu trateti'ma antahigesigeno huama'ma osaniana, agra kefoza hugahiankino, anazamofo kna'a agra'a erigahie. 2 Hagi iz'a'o agruma osu'nesia zagama avako huge, agruma osu'nesia zagagafamo'ma fri'nesia avufgare'ma avako huge, fri'nenia afu'mofo avufgare avako huge, asiguregatima regraroheno vanoma nehania zagaramima fri'nениgeno avako'ma haniana, agrira azeri pehena hugahiankino, kna'a agra'a erigahie. 3 Huge vahe'mofo azeri pehenama nehiazama antahino keno osu'neno avako'ma huteno, henkama antahino keno'ma haniana, agrira azeri pehena hanigeno, ana kefozamofo kna'a erigahie. 4 Hagi mago vahe'mo'ma agesa antahi so'e osu'neno, ame'ama huno knare'zantero havizantero huvempama huteno, henkama ke'amama haniana, haviza hugahiankino, agra'a kna'a erigahie. 5 Hanki iz'a'o ama ana avu'ava'ma nehuno haviza hu'noe hanuno'a, agra kumi hu'noe huno huama nehuno, 6 kumi'ma hia zamofo nona'a, afuzaga'afinti a' sipisipio, a' meme afuro avreno Ra Anumzamofontera vanigeno, pristi vahe'mo'a agri kumitera nona huno kresramna vugahie. 7 Hagi agrama kumi'amofo nonama huno kresramna vu sipisipi afu'ma avrega'ma osanuno'a, agra tare maho namao, tare kugofa nama kumi'amofo nona huno Ra Anumzamofonte avreno vuno magora kumi'are ome Kresramana nevuno, magora tevefima krefanene hu ofa ome hugahie. 8

Agra pristi vahete tare namararena avreno vanigeno, ese nama kumi'agu huno kresramna vugahie. Hagi ana namamofona ananke erivamagasigeno frigahianagi, anankena tgahu otregahie.

9 Hagi anama kumite'ma ofama hania namamofo korana, mago'a erino kresramana vu itamofo asoparega, rutri tri hugahie. Hagi mesia korana ana kresramna vu itamofo agafi tagitregahie. E'i kumi'ma hu'nea zamofonku huno hu ofe. 10 Hagi tra kemo'ma hu'nea kante anteno, mago nama kre fananehu ofa hanigeno, pristi vahe'mo erino tevefi ana ne'mofo kumi nona huno, kresramna vanigeno Ra Anumzamo'a kumi'a atrentegahie.

11 Hagi agrama tare maho namao, tare kugofa nama erino ega'ma osnuno'a, kumi'agu nona huno kresramna vu'zana, 10ni'a kiloma knare hu'nenia flauama ante'nenifintira, mago kilo erino kresramna vino. Hagi agra ana flauapina masavena ontege, mnanentake'zana onteno. Na'ankure e'i kumite'ma hu ofe. 12 Hagi pristi vahete erino vanigeno, ana flauapinti huhamprino osi'a mago aza huno Ra Anumzamofontega tevefi kre mana vugahie. E'i kumite'ma kremana vu ofe. 13 E'inahukna kanteke kumi'ma hu'nesia zantera, pristi vahe'mo'a azahuno kumi'amofo nona huno kre mnana vanigeno, Ra Anumzamo'a ana ne'mofo kumi'a atrentegahie. Hagi mago'a mesiam'a, witi ofama hu'neaza huno pristi vahe'mo erigahie. 14 Hagi anantera Ra Anumzamo'a Mosesena asmino, 15 Mago vahe'mo'ma Ra Anumzamofo ruotage zama hanifima hantagama haniana, e'i kumi hugahiankino, ve sipisipi anentama afuhe afahe'ma osu'nesia avreniana, zago'amo'a seli mono nompi mago silva zagomofo kna'a avamente kumi'ma hu'nerera avreno egahie. 16 Mago vahe'mo'ma Ra Anumzamofonte'ma ruotage'ma hu'nea zama hanifima hantagama haniana, 5fu'a zama eri havizama

hu'nesuno'a, ana 5fu'a zana ami'neno, magora ante agofetu
huno 6si'a pristi vahera aminkeno, azahuno kumi'amofo nona
ana sipisipia kresramana vanigeno, Ra Anumzamo'a kumi'a
atrentegahie. 17 Ra Anumzamofo tra kemo'ma osuo hu'nenia
kema rutrageno kumi'ma haniana, agra antahino keno osu'neno
hugahianagi, agra haviza hugahiankino, kna'a erigahie. 18
Hagi kumi'ma hu'nea zankura afu zaga'afinti pristi vahe'mo'ma
hu'nenia avamente mago ve sipisipia afuhe afahe'ma osu'nenia
avreno vinkeno, pristi vahe'mo'a aza huno kumi'amofo nona
huno kresramna vinkino, ontahinenoma hu'nenia kumira, Ra
Anumzamo'a anamofona atrentegahie. 19 E'i Ra Anumzamofo
avufima havizama hu'nea zante hania ofagino, kumi ofa hugahie.

6 Ra Anumzamo'a amanage huno Mosesena asami'ne, 2
Mago'mo'ma Ra Anumzamofo kema amagema ante fatgo
nosuno, tava'oma'are'ma nemanisimofoma mago'azama kegava
hunantegahie huno antahimino ami'enkeno kegava huso'e
huontege, musufasege revatga huno omnene'nia miza agima
ahentege, 3 fanane hu'ne'nia zama hakeno eri'nenoma havigema
huno onketfa hu'noe huge, eme kamigahue huno eri'ne'nia
zama eme nomino, mago'a anahukna kumi'ma nehuno, 4
haviza hu'noe huno antahi'amama hanuno'a, agra kumzafama
se'nenia zano, kegava hunanto huno antahimino ami'enenzia
eri havia hu'neniano, havige huno eri'nenia zano, fanane
hu'nesiaza eri'nesia zantera ete nemino, 5 havige'ma huno
huvempa hu'noma mago'zama eri'nenia kumite'enena, ofama
hunaku'ma hania knarera 5fu'a zama eri'nenuno'a ana 5fu'a
ami'neno, magora ante agofetu hinkeno, 6si'a hina ana zamofo
venafona amino. 6 Hagi ana kumi'ma hu'nea zante'ma ofa'ma
Ra Anumzamofonte'ma hunaku'ma hanuno'a, kumi'amofo

avamente afu kevu'afinti ve sipisipia afuhe afahe'ma osu'nesia
avreno pristi vahete vina, 7 pristi vahe'mo'a aza huno ana
sipisipia erino kumi'amofo nona Ra Anumzamofo avuga ofa
hanigeno, kumi'a apasentegahie. 8 Ra Anumzamo'a anage huno
Mosesena asami'ne, 9 Aronine mofavre naga'a amana hiho
hunka zamasamio, kre fananema hu ofama hanaza zamofo
tra kea amanahu me'ne, ana ofamo'a kresramana vu itare
tevefi me'nenkeno, ana tevemo'a tevava nehinkeno vuno masa
hino. 10 Hagi pristi vahe'mo'a efeke za'za kukena nehuno,
agu'a avufa avatera efeke kukena nehuno, kresramna vanigeno
tevemo'ma tevagaresia tanefara erino, ana itamofona asoparega
ome anteno. 11 Hagi anantera anama antani'nea kukena
hatetretno, ru kukena nentanino ana tanefara kuma'mofo fegi'a
avusese huno agruma hu'ne hu'zama nehazafi ome atregahie.
12 Kresramna vu itare'ma nerea tevemo'a asura osuno, tevava
hino. Maka nanterana pristi vahe'mo'a teve erinegrenero, tevefima
kre fananene hu ofa nehuno, afova'a rimpafra ofa kresramna
vugahie. 13 Kresramna vu itarera, tevemo'a tevava nehuno
asura osino. 14 Hanki ama'i witi ofama kre mnauv zamofo
tra ke. Aroni ne' mofavre zagamo'za Ra Anumzamofo avuga
kremna vu itamofo avuga eri'za egahaze. 15 Pristi vahe'mo'a
flaua'ene masavene mnanentake insensine eri havia huteno
anampinti hu avame huno mago aza huno kresramna vu
itare, kre'nigeno sramna'amo'a marerinkeno, Ra Anumzamo'a
knare mana nentahino musena hugahie. 16 Kresramna
nev'u'za atresazama'a Aroni'ene mofavre'amo'za negahaze.
Hagi zisti onte kekia atru'ma hu seli nonkumapi ruotagema
hu'nefinke negahaze. 17 Ana flauapina zistia anteta onkreho,
nagri'ma Ra Anumzamona kremna vu nantesafinti zamagrama

nesazama'a zami'noe. Kumi'mofo ofamo'a, kefozamafo ofamo'ma hu'neankna huno ruotageta hu'ne. **18** Aronimpinti fore'ma hu'nesaza vene'ne'amozage ana ne'zana negahaze. Zamagra Ra Anumzamofonte'ma tevefima kremna vunte'nafinti'ma mesiama'a, e'i zamagri ne'za megahiankino, e'i ana zamo'a kasege me'henkeno henkama fore'ma hu anante anante'ma hu'za esaza vahe'mo'zanena negahaze. Ruotage'ma hu'nesia zama avako'ma hanimo'a ruotage hugahie. **19** Ra Anumzamo'a amanage huno Mosesena asami'ne, **20** Aroni mofavre naga'mo'za pristi eri'zama eri'nazegu'ma masavema frezmanter'za huhampri zmantesaza zupa, Ra Anumzamofontera ama'na kremna vu'za eri'za echo, knarema hu'ne'ni 10ni'a kilo flauapintira mago kilo refako hu'za maka zupama witi kremna nevazankna hu'za, amu'nompinti refako hu'za nanterana negre'za, kinaga mago'a kregahaze. **21** Ana ne'zama retro'ma hanazana heru so'e huteta, ana ne'zama kre sazana kuta fraipanire masavena tagita kreteta ana ne'zana erita Ra Anumzamofo avuga ome golita witi ofa krenkeno knare mana nentahino, Ra Anumzamo'a musena hugahie. **22** Nefa noma erino pristi ne'ma manigahie huno'ma huhamprintesia ne'mo'a Ra Anumzamofontera ofa hugahie. E'i Ra Anumzamo'ma erisiama'agi krenkeno tevefi tevagareno. Ama anahukna avu'avazamo'a trake me'nena fore hu anante anante'ma hanaza vahe'mo'za amage antevava hugahaze. **23** Pristi vahe'mo'zama miko witi ofama hanafintira, magore hu'za one'za, miko tevefi krenkeno tevagareno. **24** Ra Anumzamo'a Mosesena anage huno asami'ne, **25** Aronine ne' mofavre naga'a amanage hunka zamasamio, kumite'ma kresramna vu zamofo tra kea ama'ne, kresramna vu afu'ma avreno'ma esuno'a, Ra Anumzamofo avuga kresramna vu afu'ma zamanakema taga

nehazafi anankena eme tagahinkeno, ana zamo'a ruotageta
huno Nagri su'a megahie. **26** Ana afu'ma kresramana vania
pristi ne'mo, ana afu'ma kresramna vanifintira, mago'a amne
negahie. Ana ne'zama nesiana, ruotage'ma hu'nefi atruma
nehaza seli nomofo kumapinke negahie. **27** Iza'o anama
kresramna vania afute'ma avako'ma hanimo'a, agra ruotage
hugahie. Hagi ana afu'mofo koramo'ma ruotage'ma hu'nefima
za'za kukenare'ma akamrenkeno'a, anampinke sesera hino. **28**
Hagi pristi ne'mo'ma ana afu'ma mopa kavofima kresuno'a, ana
kavo'a rurako hugahie. Hianagi bronsire'ma tro'ma hu'nesaza
kavofima kresuno'a, ana kavoa vazagateno sese hino. **29**
Ana ne'zamo'a ruotageta hu'neankino, pristi naganofipintira
venene'amozage ana ne'zana negahaze. **30** Hianagi kumi'mofo
nona huno ofama hu'naku korama'a erino atru'ma nehaza
seli nompima ruotage'ma hu'nefinkama vania afu'mofo ame'a
mago'mo'a oneno. Hagi ana miko kre fanane hino.

7 Ama'i kefozama hu'nea zamofonku kresramna vu'zamofo
trakegino, ruotageta hu'ne. **2** Kefozama hu'nesire'ma erino esia
ofa, tevefima kresramna vu zagagafama anankema nekafrizafi
ananke'na eme akafriteno, korama'a erino kresramna vu itamofo
asoparega ome rutritri hugahie. **3** Anantero miko afova'a
kresramna nevuno, risonafima me'nea agusa'ane, rimpama
eri anovazi'nea afova'ane, **4** tare kreso'ane anante'ma eri
anoma vazi'nea afova'ane, asumna'ane, asumnare'ma erino
vazi'nea afovanena, maka eritagati atregahie. **5** Ana zana
pristi vahe'mo kresramna vu itamofo avuga Ra Anumzamofonte
tevefi kresramna vuntegahie. E'i kefozama hu'nea zanku'ma
kresramnama vania ofe. **6** Ana ne'zana ruotageta hu'neanki'za
ruotage'ma hu'nea kumapi, pristi nagapinti venene'amozage

negahaze. 7 Hagi kefozama hu'nere'ma kresramna vania ofamo'a, kumite'ma kresramna vu ofagna hu'neankino, trakezni'amo'a magoke trake me'neankino, ina pristi vahe'mo'ma kumi'mofo nona huno kresramna vania pristi vahe'mo, agra'ama nesia su'zana, anampintira erigahie. 8 Anahukna huno tevefima kresramna vu ofama eri'za esageno kresramna vania pristi ne'mo, ana afu'mofo akru'a erigahie. 9 Anahukna huno avenifi kre hagage hu'nesia witio, kuta kavofi kre'nesia witio, kuta fraipanire kre'nesia witima ofama eri'za esazana, ofama hania pristi vahe'mofo su'za megahie. 10 Hagi mika witi ofama masavene eri havia huge, hagage hu'nesia witia miko Aroni ne' mofavre'mokizmi su'za megahie. 11 Ama'i rimpa fru ofama Ra Anumzamofoma huntesaza zamofo trake. 12 Hagi mago'mo'ma Ra Anumzamofoma muse hunteno ofama huntenaku'ma hanuno'a, zo-ore bretima masavene eri havia huno kre'nenia bretine, masave frente bisketine, kne'nesia flauapima masavene eri havia huno krente'nesia kekine amigahaze. 13 Hagi Ra Anumzamofoma susu hunteno rimpa fru ofama huntесifina, zisti ante bretine kre mana vunteno. 14 Hagi breti ofama hunaku erino esifintira, Ra Anumzamofo suzane huno mago'mago'ma erinoma eme amisia bretimo'a, kresramana vu itare korama rutri tri hania pristi ne'mofo su'za megahie. 15 Hagi rimpa fru ofama susu'ma hunteno amite'noma atresia avufga'a, kresramnama vania zupage negahie. Hagi magore huno atrenkeno, mago'a avufgamo'a me'enkeno kora otino. 16 Hianagi huvempa hu'nesire'ma kresramna vu ofama huge, agra'a avesite'ma hania ofa, ana ofama kresramnama vania knare neneno, mesiam'a okina negahie. 17 Hianagi Kresramanama nevuno'ma atresageno 3'a zageknama ome haniana, ana avufga'a tevefi

kre fanane hino. **18** Hagi rimpa fru ofama kresramna vu afu'mofo ame'ama mesiama'a, namba 3 knazupama nesiana ana ofama haniazamo'a, amnezankna hugahie. Iza'o ana afu'ma nesimo'a kefoza hugahiankino, kna'a agra'a erigahie. **19** Hagi ana afu'mofo ame'amo'ma agruma osu'nesia zama avako'ma hania avufga'a onetma, tevefi kre fanane hiho. Hagi mago'a ame'ama mesiama'a agruma hu'nesaza vahe'mo'za negahaze. **20** Hagi iza'o agruma osu'neno, rimpa fru ofama Ra Anumzamofonte'ma hanifinti'ma nesiana, Anumzamofo vahepintira ahe natitregahaze. **21** Hagi mago'mo'ma vahe'ma azeri pehanama nehiazama avako huge, agruma osu'nesia zagagafa avako huge, agoteno agruma osu'nesia zama avako'ma nehuno, Ra Anumzamofontegama rimpa fru ofama kresramna vuntesnifinti'ma nesia vahera, Anumzamofo vahepintira ahe natitregahaze. **22** Anante Ra Anumzamo'a Mosesena asamino, **23** Israeli vahe'mokizmia anage hunka zamasnio, Magore huta Israeli vahe'mota bulimakao afumofono, sipisipi afumofono, meme afu'mofo afova'a onetfa hugahaze. **24** Anahukna huta fri'nesia zagagafao, mago'a zagagafamo aheno tapage hu'nesia zagagafanena, mago'a eri'za kante erinenteta, onetfa hiho. **25** Na'ankure Ra Anumzamofonte'ma tevefima kresramna vuntesaza zagagafamo afova'a nesia vahera, Anumzamofo vahepintira ahe natitregahaze. **26** Hagi tamagrama manitama vanafina, namamofone, mago'a zagagafamo korama'a onegahaze. **27** Hagi iza'o korama nesimofona, Anumzamofo vahepintira ahe natitregahaze. **28** Anante Ra Anumzamo'a Mosesena asamino anage hu'ne, **29** Israeli vahera anage hunka zamasnio, iza'o rimpa fru ofama kresramna vunaku'ma haniana, rimpa fru ofama Ra Anumzamofonte hunaku'ma hanifinti, mago'a erino

egahie. **30** Ra Anumzamofonte'ma tevefi kre fananehu ofa agra'a azampinti erino egahie. Agra afova'ane amimizane erino egahiankino, ana amimiza'a eri veravehu ofa Ra Anumzamofonte erino egahie. **31** Hagi pristi vahe'mo'za afova'a kresramna vu itare kregahazanagi, amimiza'a Aroni mofavre naga'mokizmi su'zane. **32** Hagi rimpia fru ofama hunaku'ma eri'noma esia afu'mofona, tamaga kaziga amumazina pristi vahe'mokizmi zamigahaze. **33** Hagi Aroni mofavre nagapinti pristi ne'mo'ma, rimpia fru ofama afova'ane, korama'ama hanimo, tamaga kaziga amumazina erigahie. **34** Na'ankure maka Israeli vahe'mo'zama rimpia fru ofama hu'naku'ma eri'zama esaza kresramna vu ofafintira, eri verave hu ofama hu amimizane, kresramna vu ofama hu tamaga kaziga amumazina Aronine mofavre naga'amokizmi Nagra zami'noanki'za, maka kna zamagrake nevava hugahaze. **35** Ra Anumzamofonte'ma kresramna vu ofama hanafintira, ana'ma'a Aronine mofavre'naga'amokizmi su'za megahiankino, e'i ana ne'zamo'a zamagri su'za megahie huno pristi eri'zama erisazegu'ma Mosese'ma masavema frezmanteno huhampria zupa, Ra Anumzamo'a erigahaze hu'neankino, zamagra erigahaze. **36** Hagi pristi vahe'ma huhampri zmanteno masavema frezmantenia zupa, Ra Anumzamo'a Israeli vahe'mokizmigura ofama hanafintira ama anama'a pristi vahera zamatere hugahaze huno huzmante'neanki'za, Israeli vahe'mo'za fore hu anante anante'ma hanaza vahe'mo'za ofama hanaza zupa, ama anama'a amitere hugahaze. **37** Ama'i kresramna vu'zamofo kasege, witima kre mana vu ofagi, kumite'ma kresramna vu ofagi, kefozama hu'nesire'ma Kresramana vu ofagi, masavema frezmanteno huhamprinte ofagi, rimpia fru ofama, **38** Israeli vahe'mo'zama Sainai hagage kokampima

mani'nazageno, Ra Anumzamo'ma kresramna vunanteho huno
nezmasamino, Sainai agonafi Mosesema ami'nea kasege.

8 Anantera Ra Anumzamo'a anage huno Mosesena asmi'ne, **2**
Menina Aronine mofavre naga'ane, efeke za'za kukena zamine,
huhampri nezmante'za tagi'zama frenezmantaza masavene,
kumite'ma ofama hanaza ve bulimakaone, tare sipisipine, mago
ekaeka kupi zo-ore bretia e'nerinka, **3** atrumahu seli nomofo
avuga, maka Israeli vahera ke hutru huo. **4** Mosese'a Ra
Anumzamo'ma asami'nea kante anteno, ke hige'za atruma
hu seli nomofo ufre kanfante omeritru hazageno, **5** amanage
huno Israeli vahera zamasami'ne, Ra Anumzamo'a amana
hiho huno hurante'ne. **6** Anage huteno Mosese'a Aronine,
mofavre naga'a zamavareno ome zmanteno tina frezamante'ne.
7 Ana huteno agra agu'a kukena Aronina antaninenteno, za'za
kukena hunenteno anazama tro'ma nehaza vahe'mo'za knare
hu'za tro hu'naza zaza nofi rugagino amunofira hunenteno,
amimizafina tavrave antaninenteno, ana tavravere efot'i'ema
nehazaza amimizarera anakinte'ne. **8** Hagi onasi tavrave
amimizafina anakinteteno, anantera Ra Anumzamofo avesizama
keno eri fore'ma nehia haverare urimi havene tamimi havene
rente'ne. **9** Hagi asenirera mago tavrave nofi anakinenteno, ana
nofimofo avuga golire kuta zoumpa tro hu'naza anakinenteno,
Ra Anumzamo'ma Mosesema asmi'nea kante anteno tavravea
anakinte'ne. **10** Anante Mosese'a tagino'ma frenezmanteno
zamazeri ruotage'ma nehia masavene erino seli none, hakare'a
zama agu'afima me'nea zantamina, masave frenenteno Ra
Anumzamofo zane huno azeri ruotage hunte'ne. **11** Hagi
mago'a masavene 7ni'a zupa kresramna vu itarera rutri tri
hunenteno, kresramnavu itane anampima ne'zama krezantamima

me'nea zana azeri ruotage nehuno, bronsire zuompane,
tra'anena azeri ruotage hu'ne. **12** Hagi mago'a masavena
Aroni asenifi frenenteno azeri ruotage hunte'ne. **13** Ana huteno
Aroni mofavre'mokizmia zamavreno kukena hunezmanteno,
zamu'nofira hunezamanteno, Ra Anumzamo'ma asmi'nea kante
anteno zamasenire tavravenofira anakizmantene. **14** Ana
huteno Mosese'a kumi'mofo ofama hu'zana ve bulimakao afu
avreno egeno, Aroni ene mofavre'amo'za ana bulimakaomofo
asenirera zamazana ante'naze. **15** Mosese'a ana bulimakao afura
ananke akafriten, mago'a korana erino Kresramana nevaza
itare me'nea pazivetaminte azankonu reno frenenteno, mago'a
korama meama'a ana kresramnavu itamofo agafi tagitreno azeri
ruotage hunte'ne. **16** Hagi rimpafima me'nea mika'a afova'ane,
asumnare'ma refite'nea afova'ane tarega kreso'anena Mosese'a
tagatino kresramna vu itare kresramna vu'ne. **17** Hianagi ana
bulimakaomofo avufagi, ame'agi, agruna nofi'a erino kumamofo
fegi'a Ra Anumzamo'ma asami'nea kante Mosese'a ome kre'ne.
18 Hagi ananter Mosese'a tevefima kresramna vu'zana ve
sipisipi afu avrezamige'za, ana sipisipimofo asenire Aroni'ene
mofavre'amo'za zamazana ante'naze. **19** Hagi Mosese'a ana
sipisipia ananke akafrino korama'a erino kresramna vu itamofo
maka asoparega rutri tri hu'ne. **20** Ana sipisipima tagahu osi osi
huteno'a aseni'agi, ameagi, afova'agi huno kre manavu'ne. **21**
Hagi agusu'agese zama'ane, agazama'anena tinu sese huteno,
Mosese'a Ra Anumzamo'ma asami'nea kante anteno, ana maka
kresramna vigeno Ra Anumzamo'a mana'a nentahino antahi
musena hu'ne. **22** Hagi Aronine mofavre'amokizmima huhampri
zamanteno zamazeri ruotage hunaku Mosese'a mago sipisipia
zamige'za asenire zamazana ante'naze. **23** Mosese'a ana

sipisipia ananke akafrino mago'a korama'a erino Aronina tamaga kaziga agesa atupare'ene, tamaga kaziga azafa azankore'ene, tamaga kaziga agafa agigore'ene frente'ne. **24** Mosese'a Aroni mofavre nagara kehige'za azageno anahu kna huno ana sipisipimofo korana tamaga kaziga zamagesa atupare'ene, tamaga kaziga zamazafa zamazankore'ene, tamaga kaziga zamagafa zamagigore'ene frezamante'ne. Hagi korama'a erino kresramana vu itamofo asoparega rutri tri hugagi'ne. **25** Hagi ana huteno afova'ane arisona afovane, maka arimpama erino vazi'nea afovane, asumnane, tarega kreso'ane erinoma vazi'nea afovane tamagakaziga amumazinane eri'ne. **26** Zisti onte bretima Ra Anumzamofo avugama ekaeka kupi antegeno me'nefinti, Mosese'a zisti onte kekia mago e'nerino, masavenema eri havia huno flauateti kre'nea brette, masave frente bisketine eriteno sipisipi afova'ane tamaga kaziga amumazinama me'nere ante'ne. **27** Ra Anumzamofonte'ma eri veravehu ofa huntehogu, ana zantamina Mosese'a erino Aronine mofavre'amokizmi zamazampi ante'ne. **28** Ana'ma huteno'a Mosese'a zamazampinti ana zantamina erino kresramna vu itare kresramna vu'ne. E'i pristi vahe'ma zamazeri otage hu ofagino, tevefi kregeno Ra Anumzamo'a mana'a nentahino musena hu'ne. **29** Anahukna huno Mosese'a Ra Anumzamofo avuga ana sipisipimofo ahihiza'a eriverave hu'ne. E'i Ra Anumzamo'ma asami'nea kante anteno anara hu'neankino Mosese'ma nesia ne'za megahie. **30** Hagi Mosese'a vahe'ma huhamprinte masavena mago'a erino, kresramna vu itareti korana mago'a erino Aroni za'za kukenaregane, mofavre'amokizmi za'za kukenaregane rutri tri hu'nezmanteno, Aronine kukena'ane, mofavreramima'ane, kukenazami'nena eri ruotage hu'ne. **31** Hagi Mosese'a Aronine

mofavre'aramina amanage huno zamasamine, Sipisipi afu
ame'a atruma hu seli nonte'ma ufre kahante kavofi kretetama,
zo'ore bretima zamazeri ruotage'ma nehia bretima ekaeka
kupima me'nea bretine Ra Anumzamo'ma hu'nea kante anteta,
negahaze. **32** Ana hute'hageno mesia bretine ame'anena tevefi
maka kre vagaregahaze. **33** Seveni'a zagegnamofo agu'afina
atruma nehaza seli nona atreta atioramiho, na'ankure 7ni'a
knamofo agu'afi, agra tamazeri ruotagera hugahie. **34** Ra
Anumzamo'ma zamazeri agrumahu avu'avazama hugahanema
hu'nea zana menina hago huvagarone. **35** Tamagra 7ni'a knafina
hanine zagenena atrumahu seli nomofo kafante mani'neta, Ra
Anumzamo'ma huramantesia zana nehuta, ofri kasefa huta
maniho. **36** Hige'za Aroni'ene mofavre'amo'za Ra Anumzamo'ma
Mosese'ma asamigeno zamasami'nea zana maka hu'naze.

9 Anazama hvarettageno 8ti knazupa Mosese'a Aronine mofavre
naga'ane Israeli kva vahetaminena ke hutru huteno, **2** amanage
huno Aronina asami'ne, Kumite'ma ofama hu'zana mago afuhe
afahe osu'nesia agaho ve bulimakao afu nevrenka, kre fananehu
ofama hu'zana mago ve sipisipia afuhe afahe osu'nesia avrenka
Ra Anumzamofona avuga ofa ome huntegahane. **3** Hagi Israeli
vahe'mokizmia kagra anage hunka zamasamio, kumizmigu'ma
kresramna vunakura, ve meme afu nevreta, tevefima kre
fananehu ofama hu'zana mago kafu huno afuhe afahe osu'nesia
agaho bulimakaone, mago sipisipi afuteti kresramna nevuta,
4 mago ve bulimakaone mago ve sipisipireti arimpa fru ofa
kresramana Ra Anumzamofo avuga nehuta, masavenu'ma
eri havia hu flauateti witi ofa hugahaze. Na'ankure menina
Ra Anumzamo'a tamagrite efore hugahie. **5** Hagi Mosese'ma
hu'nea zantamina Israeli vahe'mo'za eri'za atruhu seli nomofo

avuga Ra Anumzamofo avure eme oti'naze. **6** Anante Mosese'a amanage hu'ne, Ra Anumzamo'a huno amanahu'za hanageno Ra Anumzamofo masazamo'a tamagritera efore hugahie hu'ne. **7** Anante Mosese'a anage huno Aronina asami'ne, Kumite'ma nona huno kresramna vu ofaka'ane tevefima kre fanane hu ofaka'a erinka enka kagra'a kumitera nona hunka ofa nehunka, Anumzamo'ma hu'nea kante antenka ruga'amokizmi kumi'zamirera nona hunka kresramna vuzamantegahane. **8** Hagi Aroni'a kresramna vu itare vurava'o huno kumi'agu kresramna vanigu agaho bulimakao anankena akafri'ne. **9** Hagi anante mofavrezaga'amo'za korama'a eri'za ageno, azanko ana korampi reteno, kresramna vu itare'ma me'nea pazivetaminte frenenteno, mago'ama meama'a kresramna vu itamofo agafi tagitre'ne. **10** Hagi Ra Anumzamo'ma Mosesema asami'nea kante anteno afova'agi, tarega kresoagi, asumanama erinovazi'nea afova'a kresramna vu itare kumi'mofo nona huno tevefi kresramna vu'ne. **11** Ame'ane ukri'anena kumamofo fegi'a ome kre'ne. **12** Ananteria Aroni'a kresramna vu sipisipi afura ananke akafritege'za, mofavre'amo'za ana korana eri amizageno, kresramna vu itamofo asoparega rutritri hugagi'ne. **13** Hagi kresramna vu afu'ma tagahu osi osi'ma hunte'nefinti magoke magoke erinem'i'za asenianena erimizageno kresramna vu itarera kre'ne. **14** Hagi agusu agese zama'ane agazama'anena tinu sese huteno kresramna vu itare kre'ne. **15** Hagi ananteria Aroni'a veamokizmi ofa kresramna vu afura erino ome kresramna nevuno, agra veamokizmi kumite'ma kresramna vu meme afu avreno ananke akafrino ese'ma hu'neaza huno kresramna vu'ne. **16** Hagi kresramna vu'zana erino eno kresramna vu trake'mo'ma hu'nea kante anteno kresramna vu'ne. **17** Hagi mago'a witia azampina eriviteno eno, kre mna vu

itare nanterana eme kremna vu'ne. **18** Hagi agra veamozama Anumzanema mago zamarimpa hanaza ofa bulimakaone, sipisipi afu'enena anankena akafri'ne. Hagi Aronina mofavre naga'amo'za korama'a erimizageno, kresramna vu itamofo asoparega rutri tri hu'ne. **19** Hianagi bulimakaomofo afova'ane, sipisipimofo risonarega me'nea agusa'ane, tarega kreso'ane asumanama eri novazi'nea afovane, **20** ana afu'mofo amimizafi eri antageno Aroni'a kresramana vu itare kre'ne. **21** Aroni'a Mosese'ma hu'nea kante anteno amimiza'ane tamaga kaziga amumazinanena erino Ra Anumzamofo avuga eriverave hu ofa hu'ne. **22** Hagi Aroni'a kumite'ma kresramna vu ofane, kre fanane hu ofane, rimpa fru ofama huteno'a, veamokizmirega ana azana rusuteno asomu ke huzmanteteno, anantetira atreno erami'ne. **23** Mosese'ene Aronikea atruma nehaza seli nompi mareriteke atiramike eke veamokizmia asomu ke eme hunezmantakeno, Ra Anumzamofo masamo'a veamokizmire e'ama hu'ne. **24** Ra Anumzamo'a tevea atregeno eramino ana kresramna vu'zane, afova'a kresramana vu itaretira tefanane hu'ne. E'i anazama vahe'mo'za nege'za muse hu'za kezaneti'za, zamavugo saregati mopafi mase'za mono hunte'naze.

10 Natapu'ene Avihukea Aroni ne' mofavregi'ne, Ra Anumzamo'ma i'oma hu'nea kea rutagreke, mnanentake'zama insensima kre fraipanifi Ra Anumzamofontega ome kremna vu'na'e. **2** Ana hakeno Ra Anumzamo'a teve atregeno hagnahagna huno znavufga terasagegeke, Ra Anumzamofo avuga fri'na'e. **3** Ana hutakeno Mosese'a Aroninku anage hu'ne, Ra Anumzamo'a amanage hu'ne, nagrite'ma eravao'ma hanaza vahe'mo'za Nagrikura ruotage hu'ne hu'za nehanage'na, masani'a zamaveri hugahue hu'ne. Aroni'a anante kea osuno oti'ne. **4**

Hagi Mosese'a anage'ma huteno, Aroni nenogo Uzari mofavre
Miseline Elsafanikizanigu zanasamino, neranafu fri kerafa
emerita atruhu seli mono nomofo avugatira kuma'mofo fegi'a
afete ome atre'o, 5 anage higeke anama fri'na'a netre'na za'za
kukena znavufare me'negeke Mosese'ma zamasami'nea kante
anteke erike fegi'a vu'na'e. 6 Anante Mosese'a amanage huno
Aronine tare mofavre'arare Eleasane, Itamarinena zamasmi'ne,
Ama zankura tamasunkura huta tamazokate'ma refite'naza
tavrave eritrege, kukenatamia tagotora osiho, ru ete frisageno
Ra Anumzamo'a mika vahekura arimpa ahezamantegahie.
Hianagi mika Israeli vahe'mo'za Ra Anumzamo'ma tevereti'ma
znahe fri'nea netretrenkura amane zavira ategahaze. 7 Hagi
atrumahu Seli nompintira frigahazanki atiramita oviho. Na'ankure
Ra Anumzamo huhampitamanteno masavea freramante'ne.
Hige'za Mosesema hiankante ante'za anazana hu'naze. 8 Ana
hutageno, Ra Anumzamo'a anage huno Aronina asami'ne,
9 Aroniga kagrane mofavre nagaka'anema Atrumahu Seli
Nompima vunaku'ma hanaza knarera waini tina nege, hanave
tina neteta uofreho, ana'ma hanazana frigahaze. Hagi henkama
fore hunante anante'ma hu'zama vanaza vahe'mo'za anazana
hu'za vugahaze. 10 Hagi hanave tima oneta knare huta
manisuta, e'izamo'a ruotage higeno, e'izamo'a ruotagera osu'ne
nehuta, e'izamo agru higeno, e'izamo'a agru osu'ne huta
rezageneta kegahaze. 11 Ana nehutma Ra Anumzamo'ma
mika trakema Mosesema ami'neana, Israeli vahera rempi
huzamigahaze. 12 Mosese'a amanage huno Aronine tare
mofavre'ama ofri'ma mani'namokizni Eleasarine, Itamarinena
zamasmi'ne, Witi ofama nehzageno kre mana vu ita me'nere
zistima onte bretima me'neana erita neho, na'ankure e'i ruotage

hu'ne. **13** Hagi ruotage'ma hu'nea kumapi neho. Na'ankure Ra Anumzamofoma kresramna vuntenafintira kagrane kagripintima fore hanaza vahe'mo'za negahaze huno huramante'neankino, tamagri ne'za me'ne. **14** Hagi Israeli vahe'mo'zama eriverave hu ofama hanaza amimiza'ane, arimpa fru ofama hanaza amumazina'anena kagrane maka ne'mofakanena agruma hu'nea kumapinke amane negahaze. Na'ankure Ra Anumzamo'a negahaze huno huramante'neankino tamagri ne'za me'ne. **15** Hagi amo'ane amimiza'ane eri verave'ma hutesuta, afova'a tevefi kresramna nevuta Ra Anumzamo'ma hu'nea kante, amo'ane amimiza'anena kagri'ene mofavre nagakamofo suzankita, amne eri vava huta vugahaze. **16** Hagi Mosese'a kumite'ma ofama hu'na'a meme afu'mofo agenkema zamantahigeno keana, maka ana meme afura tevefi krevare'na'e hu'naze. Anankema Mosese'ma nentahino'a, Aroni nemofo Eleazane Itamalikiznia tusi arimpa aheneznanteno, **17** nahigeta kumite'ma kresramna vu afura ruotage'ma hu'nefina one'na'e? Na'ankure e'i ruotage hu'neankino, vahe'mofo kefovante nona huta kresramna vanageno, Ra Anumzamo'a kumizmia eritrezmantesiegu eri'za e'naze. **18** Hanki keho, ruotage'ma hu'nefinkama korama'a erita uofreneta huramante'noa kante ana ame'a nazasine. **19** Hianagi Aroni'a anage huno Mosesena asami'ne, Menina kumite ofane tevefima krefanane hu ofanena Ra Anumzamofo avurera kresramna vu'na'anagi, amanahu zana nagritera fore nehie. Kumite'ma kresramna vu'nesaza zama nesuana Ra Anumzamo'a menina musena hugahifi? **20** Anankema Mosese'a nentahino, Aroni'a tamage hie huno hu'ne.

11 Ra Anumzamo'a amanage huno Mosesene Aroninena zanasmi'ne, **2** Mopafima mani'naza maka zagagafafinti'ma

nesaza zagamofo tra kea Israeli vahera zamasmio. 3 Hagi agigomo'ma tarefi atanesigeno, trazama neteno, ete ome revarino nenesia zagagafa amane negahaze. 4 Mago'a zagagafamo'za revari'za ne'zana nenazageno, zamagigomo'a hatanara nosigeno, mago'a zagagafamofona zamagigomo'a hatnama hanigeno ne'zama revarino nenesia zagagafa onegahaze. E'i magora kemoli afure, ne'zana varino neneanagi agiamo'a tarefina hatnara osu'neankino agrua osu'ne. 5 Havefi krofamo'a anahukna huno ne'zana revarino neneanagi, tarefi agigomo'a ruotaneneankino agru osu'ne. 6 Rebitimo'a anahukna huno ne'zana revarino neneanagi, tarefina agigomo'a hatnara osu'neankino agru osu'ne. 7 Afu'mofona agigomo'a hatna hu'heanagi, ne'zana revarino noneankino, agru osu'ne. 8 Hagi tamagra ana zagagafaramima fri'nesiana avakora osuge ame'a onegahaze, na'ankure agrua osu'ne. 9 Hanki miko hagerimpine, amane timpinema nemanisia zagama iri'ane agekonanema hunte'nesiana amane negahaze. 10 Hianagi mika zagama hagerimpima nemania zagane, amane timpima iri'ane ageko'nanema huonte'nesia zagama mani'neniana, himnage huno havizantfa hu'neankita onegahaze. 11 Hagi e'i ana zagamo'za kasri'za havizantfa hu'nazanki, ame'a noneta fri'nesaza zamavufarera avakora osuta onegahaze. 12 Hagi timpima mani'nenaza zagamofoma iri'ane agekonanema huonte'neniana, tamagotenteta haviza hu'neankita onegahaze. 13 Mago'a nama haviza hu'neankita onegahaze. E'i ana namazaga tumpanki, zagagafama nenea namagi, haninke namama zagagafama nenea namagi, 14 korankre za'za agekonane tumpanki, kazi tumpanki, 15 haninke namaramima ra ageruma neria namagi, 16 mananinkna zaza arenane namagi, rankrafama nehia komutonki, hagerinkenafi nemaniza efeke

namazagagi, hagerinkena tumpanki, **17** osi komutonki, hagerimpi
hareno vano nehuno nozameza nehia namagi, ra komutonki, **18**
efeke komutonki, hagage kopi komutonki, kasari zama nenea
tumpanki, **19** za'za aginkunane efeke namagi, afi patonki, funtariki
tampranena onegahaze. **20** Tare ageko'nama hunte'nenigeno
agareti'ma mopafima regraroheno vanoma nehania ne'onse zaga
knarera osu'neankita onegahaze. **21** Agekona'ma huntogeno
mopafima vanoma nehu'za, takaire takaurema hu'zama vanoma
nehaza zagaramina amane negahaze. **22** E'i ranra kenuki,
asukenki, onensi kenura amane negahaze. **23** Hianagi mago'a
zagramima agiazama hunte'nenigeno ageko'nama me'nenia
zagaramina, tamagotenenteta onegahaze. **24** Amanahu'ma
hanuta tamagra'a tamavufga tamazeri pehana hugahaze.
Fri'nenia zagaraminte'ma avakoma hanimofona, azeri pehana
hanigeno, anazamo'a meno vuno kinaga ome vagaregahie.
25 Iza'o frizagama avakoma hanimo'a, kukena'a sese huteno
mani'enigeno, vuno kinaga senkeno anamo'a agrua hugahie.
26 Agigoma me'nenia zagramima, agigomo'ma hatanama
osu'nesigeno trazama revarino nonenia zagaramina agru osu'ne
huta hiho. Iza'o ana zagramima avako'ma hanimo'a agru
osugahie. **27** Rama'a agigoma hunte'nenigeno mopafima
vanoma nehania zagaramina, agrua osu'naze. Hagi fri'nesageta
zamavufarera avako osiho. Hagi avako'ma hanazana agru
osu mani'enageno vuno kinaga segahie. **28** Iza'o anama
fri'nesia zagamofo avufa'ama erisaga hanimo'a, kukena sese
huteno mani'enigeno vuno kinaga segahie. E'i ana zagamo'a
agrua osu'ne. **29** Hagi neonse zagramima, mopafi vano
nehaza zagaramimpinti'ma agruma osu'nazana, barenki, kafagi,
neonse'ene ranra tagovi zagarami'ne. **30** Hagi efeke tagovi

kekogi, pupukigi zampavenki, amuho kopi nemaniza tagoviki, sgoramure. **31** Hagi ana zagaramima mopafima vanoma nehia zagaramimpinti'ma agru'ma osu'nesia zagama, fri'nagenoma iza'o zamavufare'ma avako hanimo'a, agru osugahiankino, agru osu mani'nena vuno kinaga segahie. **32** Ana zagaramimo frino evuramino zafareti'ma tro hu'nesia zantero, kukenarero, zagagafamofo akrutero, tapa kukenare'ma evuramino avako'ma haniana, agru osanigeno ana'ma hania zantamina timpi reta sese hinkeno meno vuno kinaga senkeno agrua hugahie. **33** Ana zagagafafinti mago'mo'ma mopa kavofima evurami'niana ana kavofima me'nenia zantamimo'a agru osugahianki, ana kavoa rurako hutreho. **34** Hagi ana kavofinti'ma tima tagiramino avakoma hania ne'zamo'a agru osanigeno, ana kavofinti'ma tima ne'zamo'a, agru osugahie. **35** Hagi ana zagamofo fri avufgamo'ma evuramino avako'ma hania teve hugre stofumo'o avenimo'a agru osugahianki, rurako hutreho. **36** Hagi tinkampui nehantisirero tifi kerifi ana zagamofo fri avufamo'ma me'neniana amane agru hu'neanagi, iza'o azama avako'ma hanimo'a agru osugahie. **37** Hagi krinaku'ma ante'nenaza avimzampima fri'nesia zagamo'ma evuramisiana, ana avimazamo'a agru hugahie. **38** Hianagi fri'nenia zagamo'ma avimazama me'nenia timpima evuraminiana, ana avimzamo'a agrua osugahie. **39** Hagi negahazema hunama huramante'noa afuzagafintima fri'nenigeno avako'ma hanimo'a, agru osu mani'nena vuno kinaga segahie. **40** Hagi anama fri'nenia zagama nesimo'o, erisga hanimo'a agru osugahiankino kukena'a sese nehuno, agru osu mani'enigeno vuno kinaga segahie. **41** Hagi mparema vanoma nehia zagaramina agru osu'neankita, tamagotenteta onegahaze. **42** Hagi mopafima zamasaguregati vano nehaza zagaramine, rama'a agjaza

hunte'nenia zagamo mopafi vano nehania zagaramina agru osu
zagagita tamagotenenteta tamagra onegahaze. **43** Hagi ama ana
zagaramina avako nehutma, tamagra'a tamazeri pehana osiho.
44 Na'ankure Nagra Ra Anumzana tamagri Anumza mani'noanki,
tamagra'a tamazeri avusese nehutma, tamazeri ruotage hoho.
Na'ankure Nagra ruotage hu'nogu, zamasaguregati'ma vanoma
nehaza zaga avakora hutma tamazeri pehena osugahaze.
45 Nagra'a Ra Anumzamo'na Isipitira tamavre fegu'a atre'na,
tamavre'na e'noa tamagri Anumza mani'nogu, tamagra mani
ruotage hutma maniho. Na'ankure Nagra ruotage hu'na mani'noe.
46 Mopafima vanoma nehaza zagaramimofone namaramimofone,
miko timpima nemaniza zagaramimofone, mika mopafima
regrarohe'za vano nehaza zagaramimofo tra ke. **47** Hagi tamagra
rezaganeta negetma, e'izamo'a agru osu'neanki, e'izamo'a agru
hu'neanki nehutma, negahunanki, onegahunanki huta hugahaze.

12 Hanki anantera Ra Anumzamo'a Mosesena asamino, **2**
Amanage hunka Israeli vahera zamasamio, mago a'mo'ma ne'
mofavre'ma kasentenuno'a, namunkama freneno'ma nehiaza
huno 7ni'a zagegna maniteno agrua hugahie. **3** Hagi
ne' mofavremofona 8 zagekna zupa agoza anom'a taga
hutregahaze. **4** Hagi ana a'mo'a ne' mofavrema kasente'hea
zankura, 33'a zagegna agruma hanigura avega anteno
manigahie. Hagi ana a'mo'a ruotage'ma huno me'neazantamina
avakora nosuno, ruotagema hunefina ovuno mani'enigeno
agrumsa hu knamo'a egahie. **5** Hianagi mofa'ma kasentesigeno'a
ana a'mo'a tare sontamofo agu'afi agrua osuno maniteno, ete
mago'an 66'agna maniteno agrua hugahie. **6** Hagi ne'mofavre,
mofa mofavre'ma kasente'nesia zanku'ma azeri agruma hu
knama evutenkeno'a, tevefima kresramna vu ofa mago kafu

hu'nesia sipisipi nevreno, kumi ofama hu'zana maho namao
kugofa nama avreno pristi vahete seli nomofo avuga egahie.
7 Hagi ana nama pristi ne'mo'a avreno, ana a'mo'ma agruma
osu'nea zantera nona huno Ra Anumzamofontera ofa hina,
ana a'mo'ma mofavrema kasenteteno azeri agru hugahie. Hagi
ama'i a'mo'ma mofavrema kasentete'noma azeri agruma hania
zamofo trake. 8 Hianagi ana a'mo'ma sipisipima avrenoma
ega'ma osanuno'a, tare maho namao, tare kugofa nama avreno
e'nigeno, mago nama Ra Anumzamofonte kresramana nevuno,
mago nama ana a'ma azeri agru hu ofa pristi ne'mo'a hugahie.

13 Ra Anumzamo'a amanage huno Mosesene Aroninena
zanasami'ne, 2 Mago'mofo avufare'ma zorege, zuke namurege,
ahehema fore'ma hanigeno, anazamo'ma fugo namuma rege'ma
hanige'za avre'za pristi ne' Aroninte vuge, mofavre zaga'are
avre'za viho. 3 Hagi Pristi vahe'mo'za ana namuna rezagane'za
kesageno'ma, namuma me'nenifima azokamo'ma efeke'ma huno
ana namumo'ma hanagatino ufre'nesigeno, pristi ne'mo'ma
reprosi namune hanigeno'a, ana vahe'mo'a agru osugahie. 4 Hagi
ana namumo'ma efeke huno avufgare'ma fore'ma nehuno, rama
huno agu'a uofrenkeno namuma re'nere'ma me'nea azokamo'ma
efeke'ma osu'nena pristi vahe'mo'za ana nera 7ni'a zagegna
azeri frakiza antegahaze. 5 Hagi 7ni zupama pristi vahe'mo'ma
kesigeno ana namumo tera osuge, te osi osugema hu'nenkeno'a,
ete mago'ane 7ni'a zagegna azeri frakigahie. 6 Hagi 7ni zupama
kesigeno'ma ana namumo'ma tera osuno teganinkeno'a, pristi
ne'mo'a amne namune nehuno huntenkeno, kukena'a ome
sese nehuno, agra'a azeri agru hugahie. 7 Hianagi pristi
vahe'mo'ma ana namuma te onasima hanigeno agru hune huno
huntesige'noma umani'nenigeno, ana namumo tera hanigeno'a

eteno pristi vahete vino. **8** Hagi pristi vahe'mo'ma avonta huno rezaganeno keteno, ana namumo'ma terama hu'enkeno'a, agru osu'neankino fugo krie huno hugahie. **9** Hagi mago vahe'ma avufafima fugo namuma me'nенke'za, ko pristi vahete avre'za viho. **10** Hagi ana namuma pristi vahe'mo'za kesagenoma efeke hanigeno, azokamo'enema efeke'ma nehanigeno, avo timo'ma herafineramina, **11** e'i zazate meno vania fugo namunkino, pristi vahe'mo'a agra agru osune huno huama nehuno azeri fore hugahie. **12** Hagi pristi vahe'mo ana fugo ri'ma kesigeno tera huno asenireti agiare'ma uhanatisigeno'a, **13** pristi vahe'mo'a rezagane so'e huno kesigenoma ana fugo namumo'ma mika avufare'ma tenenkeno, avufamo'ma efeke hanigeno'a, agra agru hu'ne huno huntiegahie. **14** Hianagi kesigeno kasefa namuma avufafima fore'ma hanigeno'a, agra agru osugahie. **15** Hagi pristi vahe'mo'ma kesigeno avo'mo rupro hanigeno, agu'afinti ame'amo'ma etiramisigeno kesuno'a, agru osu'neankino fugo namune huno huntiegahie. **16** Hianagi ana namumo'ma fananema huno efeke'ma hanigeno'a, ete pristi vahete vino. **17** Hagi pristi vahe'mo'a kesigeno'ma, namumo'ma efeke hu'enkeno'a, namuma re'nesia vahekura agru hu'nane huno hunteno. **18** Usagema ahenesia vahe'ma vagamarentesigeno'a, **19** ana namumo efeke huge koranke huge, zomaoresigeno'a, agra'a avufa pristi vahete eme averi hino. **20** Hagi pristi vahe'mo'ma kesageno'ma ana namumo hanagatino fre'neno, ana namumpima me'nenia azokamo'ma efeke hu'enigeno kesuno'a, ana namunkura usagempinti fore hu'nea fugo namune nehuno, agru osu'nane huno hugahie. **21** Hianagi pristi vahe'mo'ma kesigeno, ana namumo efeke osuno hanagatino ofreno terama osanigeno'a, 7ni'a zagegna azeri frakinkeno manigahie. **22** Hagi ana 7ni'a

knama evutenkeno'ma ana namumo'ma rura huno avufafima vuno
enoma hanigeno'a, pristi vahe'mo'a ana nekura agru osu'nane
huno hugahie. **23** Hianagi ana namumo rura osuno me'nena,
pristi vahe'mo'a amane usagemo ana hu'neanki agru hu'nane
huno huntegahie. **24** Hagi tevemo'ma mago'mofo avufgama
terasgene'nigeno, namumo'ma avoke huno efeke'ma nehuno
koranke'ma hu'nena, **25** pristi vahe'mo'ma ana namumpima
me'nenia azokama kesigeno'ma efeke hanigeno, namumo'ma
ra huno hanagatino agu'ama ufre'nenkeno'a, agrua osu'nane
huno pristi vahe'mo'a hugahie. **26** Hianagi pristi vahe'mo'ma
kesigeno'ma, ana namumpima me'nenia azokamo'ma efeke'ma
osanigeno, ana namumo'ma hanagatino uofreno, teganzama
nehanigeno'a, 7ni'a zagegna azeri frakisigeno manigahie. **27**
Hagi 7ni kna zupa pristi vahe'mo'ma kesigeno'ma ana ne'mofo
namumo'ma avufafima terama hanigeno'a, ana nekura agru
osu'nane huno huntegahie. **28** Hianagi ana namumo'ma tera
huno avufafima vuno enoma osanigeno'ma, pristi vahe'mo'ma
kenuno'a, amane tevemo te'neazamo'e nehuno, agru hu'ne
huno huntegahie. **29** Hagi mago vemofono a'mofoma, zuke
namuma asenifi rege, ameragempima rege'ma hu'nenigeno'a,
30 ana zuke namuma pristi vahe'mo kesigeno'ma terama huno
hanagatino ufrigeno, azokamo'ma kaninkruke hu'nena pristi
vahe'mo'a ana vahekura, agru osu'nane huno huntegahie. **31**
Hianagi ana zuke namuma pristi vahe'mo'ma kesigeno'ma ana
namumo'ma terama huno hanagatino uofrenigeno, haninke
azokama anampima omanena, pristi vahe'mo'a ana nera 7ni'a
zagegna avre frakisigeno manigahie. **32** Hagi 7ni knare'ma pristi
vahe'mo'ma kesigeno ana zuke namumo'ma tera osanigeno,
azokamo'ma kaninkruke'ma osanigeno, ana namumo hanagatino

uofre'nenkeno'a, 33 ananterazokara haregahianagi, namuma
re'neniamama ohareno atrenenkeno, pristi vahe'mo'a mago'an
7ni'a kna avre frakinkeno ana vahe'mo'a manigahie. 34 Hagi 7ni
kna zupa pristi vahe'mo'a keteno, namumo'ma terama huno
hanagatino'ma uofre'nenkeno'a, agru hu'ne huno ana vahera
huntenkeno, kukena'a sese nehuno agru hugahie. 35 Hianagi
agru hu'nane huno'ma huntetesigeno, umani'nenigeno ana
zuke namumo'ma terama hanigeno'a, 36 pristi vahe'mo'ma
anamofoma kesigeno'ma, ana zuka namumo'ma tera huno vuno
enoma hanigeno, hago tera hu'neankino pristi ne'mo'a kanikruke
azokakura onkeno, agru osu'nane huno ana ne'kura huntegahie.
37 Hianagi pristi vahe'mo'ma kesigeno ana zuke namumo'ma
tera osanigeno, haninke azokama anampima me'nena pristi
vahe'mo'a agru hu'ne huno hugahie. 38 Hagi mago ne'mofono
a'mofoma efeke kiraremo'ma avufaregama hu'nesigeno'a, 39 pristi
vahe'mo'ma ana kirarema re'nea avufafima kesigeno efekema
hu'nea zamo'ma amanema hanigeno'a, amne namunkino, agru
hu'ne huno huntaghie. 40 Hagi mago ne'mofoma anumpi
azamoma erisiana, agra agru hu'ne. 41 Hagi mago ne'ma
tinke azokama pupusenigeno azokamo'ma omanesiana, agra
agru hu'ne. 42 Hianagi azamompima namumo'ma efeke
nehuno koranke'ma hu'neniana, e'i fugo namune. 43 Hagi pristi
vahe'mo'ma kesigeno'ma azamompino, kokovipima namumo'ma
efeke huge, koranke huge huno'ma fugo namunknama haniana,
44 ana ne'mofona fugo namu re'neankino, agru osu'ne. Hagi pristi
vahe'mo'a agru osu'ne huno huntegahie. Na'ankure asenifina
namu re'ne. 45 Hagi e'inahu fugo namuma re'nesia vahe'mo'a,
tagato'ma hu'nesnia kukena nehuno, azokara refiraoteno,
avugosa refiteno avugama'age netreno kezatino, nagra agru

osu'noe nagra agru osu'noe huno hino. **46** Hagi ana fugo namuma
avufare'ma me'nenigeno'a ana ne'mo'a agru osu'neakino, agraku
kumamofo fegi'a manigahie. **47** Hagi sipisipi azokateti tro
hu'nesia kukenarero, efeke kukenarero, **48** sipisipi azoka zagino
haneno tro hu'nenia kukenarero, efeke kukenama hanenifino,
bulimakao akrutema tro'ma hu'nesaza kukenare'ma, **49** zafa
sinage huge koranke avame'zama efore'ma ana kukenare'ma
hu'nena, e'i tontore zamofo avame'zanki, pristi vahe averi
hugahie. **50** Hagi ana kukena pristi vahe'mo'a keteno, erino
frakino ante'nenkeno 7ni'a zagegna megahie. **51** Hagi ana
kukenaramimo'ma meno vuno 7ni'zupama uhanatinigeno pristi
vahe'mo'ma kesigeno'ma sipisipi azoka zagino hanenenifino,
efeke kukenama hanenenifino, bulimakao akrutema tro'ma hu'nea
kukenare'ma tontomo'ma ra huno vuno eno'ma hu'nenkeno'a,
agru osu'ne huno hugahie. **52** Hianagi sipisipi azokate tro hu'nesia
kukeno, bulimakao akrute tro hu'nesia kukeno, kukenare'ma ana
avame'zama fore'ma hanigeno'a, tevefi krenkeno tevareno. **53**
Hianagi pristi vahe'mo'ma kesigeno kukenare'ma anazamo'ma
rama osu'nena, **54** pristi vahe'mo'a ana vahera zamasaminige'za
ana kukena sese hute'za, 7ni'a zagegna mago'ane fraki'za
antesageno megahie. **55** Hagi ana avame'zama sesema
hutesageno'a ete mago'ane kesigenoma ana kukenamofo
tontomo'ma vaga'orenigeno rura ana avamezamo osu'nenianagi,
agru osu'neanki amegao agu'afima tontoma re'nena tevefi kre
vagaregahie. **56** Hagi ana kukena sese'ma hanigeno, ana
zamo'ma sipisipi azokate kukenaretiro, efeke kukenaretiro,
bulimakao akrute kukenaretima fananema haniana, anama
havizama hu'nema'a tagato hutreno. **57** Hagi henkama ana tonto
fore'ma hina, ana kukenamofo nef'a tevefi krenkeno, te fanane

hino. 58 Hagi henka'ama anazama fore'ma osanigeno'a, ete
mago'ane sese hina agrua hugahie. 59 Ama'i tra kea sipisipi
azokateti zagino hane'ne'nia kukenama, efeke kukena hane'za
tro hu'ne'nazano, bulimakao akruteti hane'za tro hu'enaza
zama tontomo'ma eri havizama hu'nenia kukenamofoma pristi
vahe'mo'ma agru hu'ne, agru osu'nema huno'ma hania trake.

14 Ra Anumzamo'a Mosesena amanage huno asmi'ne,
2 Fugonkrima eri'nesaza vahe'mo'zama ana krimo'ma
atrezamantesige'za zamagra'ama zamazeri avusesema hanaza
zama eri'za pristi vahete'ma vanaza zamofo trake. 3 Hagi
Pristi vahe'mo'ma kumamofo fegia vuno, ana fugo namumo'ma
atrentesigura ana fugo vahe'ma ome kesigenoma, ana fugo
namumo'ma atrentesigeno'a, 4 pristi vahe'mo'a ana fugo vahera
asamisigeno, agruma hu'nesia namafinti tare namarare nevreno,
sida teve e'nerino, korankenofira e'nerino, hisopu zafa azankuna
e'nerino, pristi vahete esigeno ana nera azeri agru hugahie. 5
Hagi pristi vahe'mo'a zamasamisige'za enevania timpinti mopa
kavofi tina afi'za esageno, ana kavomofo agofeto mago nama
anankena akafrinigeno, koramo'a ana kavofi evuramigahie. 6
Hagi avu'agama mania namagi, sida tevegi, korankrenofiki,
hisopu zafa azankunaki huno ana korama rentenienia timpina
reteno atigahie. 7 Anama azeri agruma hania vahe'mofo
avufarega namamofo korana 7ni'a zupa pristi vahe'mo'a rutri tri
hunenteno, hago agru hane huno ana fugo nera hunenteno,
avuga'ma mani'nea nama atresigeno hareno vugahie. 8 Hagi
ana'ma agruma hania ne'mo'a, kukena'sese nehuno avufaretira
mika azokara vazagatenetreno, tina freno agrua hino. Ana'ma
hutesuno'a, agru hugahiankino kuma agu'afina ufregahianagi,
7ni'a kna maniteno seli noma'afina ufregahie. 9 Hagi ete 7ni

kna zupa agra'ama azeri agruma hania vahe'mo'a agi azokora
nehareno, avu azokara nehareno, maka avufga azoka'ene
nehareno, kukena'a sese nehuno, timpi tina freno agra'a avufga
sese huno azeri agru hugahie. **10** Hagi 8ti kna zupa afuhe afahe
osuno mago kafu hu'nesia tare ve sipisipigi, mago a' sipisipi
nevreno, 3'a kilo flaua olivi masavene eri havia hu'ne'nia witi
ofa e'nerino, mago kapu olivi masave kre sramanama vu'zana
erigahie. **11** Hagi azeri agruma hania pristi ne'mo'a, anama
agru'ma hania nera nevreno ofa'anena erino Ra Anumzamofo
avuga atru'ma hu seli nomofo kahante vugahie. **12** Hagi ana'ma
hutesuno'a, pristi vahe'mo'a kumi ofa mago ve sipisipine, olivi
masavene eri verave hu ofa Ra Anumzamofontega hugahie.
13 Hagi ana ve sipisipia ruotage'ma hu'nere'ma kumite'ma
hu ofane, kre fanane hu ofanema nehzare ome aheno.
Hagi kefozama hu'nere'ma kresramana vu'zane kumite'ma
kresramana vu'zana ruotage hu'neankino pristi vahe'mofoza
megahie. **14** Hagi kefozama hu'nere'ma erino e'nea sipisipi
afu'mofo korana, pristi vahe'mo'a mago'a erino ana vahe'mofo
tamaga kaziga agesare'ene, tamaga kaziga azafare'ene tamaga
kaziga agigore'ene frentegahie. **15** Hagi pristi vahe'mo'a mago'a
olivi masavene hoga aza agu'safi taginteteno, **16** tamaga kaziga
azankoreti ana masavempi reteno, Ra Anumzamofo avuga 7ni'a
zupa rutri trira hugahie. **17** Hagi mago'ama mesia masavene
pristi vahe'mo'a erino anama agruma hania vemofona, tamaga
kaziga agesa atupareki, tamaga kaziga azafa azankoreki,
tamaga kaziga agamofo agafa agigore frentegahie. **18** Hagi
pristi vahe'mo'a aza agu'safima mesia masavema'a erino azeri
agruma hania vahe'mofo asenirera frentegahiankino, e'i ana
ofama hania zamo'a kumi'amofo nona hinkeno, Ra Anumzamo'a

azeri agru hugahie. **19** Hagi anantera pristi vahe'mo'a kumitera kresramana nevuno, anama agruma osu'nesia vahera azeri agru hugahie. Ana'ma hutesuno'a, pristi vahe'mo'a tevefima kre fananehu kresramna vu sipisipi afura ahegahie. **20** Hagi pristi vahe'mo'a kre fanane hu ofane, witi ofanena kresramna vu itare kregahie. Pristi ne'mo'a e'ina hanigeno, anama kumi'ma hu'nesia vahe'mo'a agru hugahie. **21** Hagi amunte'ma omnennenkeno maka ofama erino'ma ega'ma osanuno'a, mago ve sipisipi nevreno, olivi masavene erihavia hu'ne'nia 1 kilo witi ofa e'nerino, mago kapu olivi masavenena kumite'ma nonama huno eri veravema hu ofa erino egahie. **22** Hagi erino ega'ma hu'ne'nia avamente tare maho namarareno, tare agaho kugofa namararena azerino eno, magora kumite Kresramana nevuno, magora tevefi kre fanane hu ofa hugahie. **23** Hagi 8ti knazupa anama azeri agruma haniazana erino pristi vahete atru'ma nehaza seli nomofo kahante Ra Anumzamofo avuga vino. **24** Ana'ma hanigeno'a, pristi vahe'mo'a ana ve sipisipi afu'ene mago kapu olivi masave erino Ra Anumzamofo avuga eri veravehu ofa hugahie. **25** Hagi pristi vahe'mo'a kefovama hu'naza zante kresramna vu ofa, ve sipisipi aheno korama'a tagino tamaga agesa atupare frenenteno, tamaga kaziga azafa azankore frenenteno, tamaga kaziga agamofo agigorera frentegahie. **26** Hagi pristi vahe'mo'a hogá kaziga aza agusafi olivi masavene taginteteno, **27** tamaga kaziga azankoreti ana masavempi aren 7ni'a zupa Ra Anumzamofo avuga rutri tri hugahie. **28** Hagi aza agusafima mago'a masavema me'nefintira ko'ma kefovama hu'nere'ma ofama hu'nea afumofo korama frentenere, tamaga kaziga agesamofo atumpareki, tamaga kaziga azankoreki, tamaga kaziga agafa agigoreki, huno frentegahie. **29** Hagi pristi vahe'mo'a aza agusafima

mago'ama me'nia masavema'a ana vahe'mofona kumimofo
nona huno asenifi frenteno Ra Anumzamofo avuga azeri agru
hugahie. **30** Hagi pristi vahe'mo'a ana tare namafinti'ma maho
namao, kugofa namama avreno esifinti kresramna vugahie. **31**
Mago nama kumite kresramana nevuno, magora tevefima kre
fananehu kresramna vu witine erinteno kregahie. E'inahukna
kante pristi vahe'mo'a agru'ma osu'nesia vahe'mofo agira erino,
Ra Anumzamofontera kumi nona hanigeno, anamo'a agru
hugahie. **32** Ama'i avufafima fugo namuma re'nesia vahe'mo'ma
ante'nesia avamente erino esigeno'ma azeri agruma hania
zamofo trake. **33** Ra Anumzamo'a anage huno Mosesene
Aroninena znasami'ne, **34** Tamagrama erisanti haregahazema
hu'na tamisua mopafi Kenenima vanage'na, mago'a nona
azeri haviza hanena ana nomo'ma tontore'na, **35** ana nomofo
nefa'a vuno pristi vahe ome zamasamino, noni'afina tontore
avame'za fore hu'ne huno hugahie. **36** Hagi pristi vahe'mo'a ana
nompina efreno rezaganeno onke'neno, ana nomofo venafona
hanigeno makazana eri fegi atretenkeno, pristi vahe'mo'a
henka ufreno ana nona kegahie. **37** Hagi pristi vahe'mo'a
ana nompima ufreno rezageno'ma kesiama zafaninage zano,
korankre zamo'ma fore'ma huno hanagatino fre'nesigeno'a,
38 ana nompintira pristi vahe'mo'a atiramino ana nonkafana
erigino, ahe kanirentesigeno 7ni'a zagegna megahie. **39** Hagi
7ni'a zage gnama manitesigeno'a, pristi vahe'mo'a ete eno eme
kesiama, ana tontomo'ma ana nomofo asoparegama rurama
huno vuno eno'ma hu'nena, **40** pristi vahe'mo'a mago'a vahe
huzmantesige'za ana tontoma manesi'a havea ana nontetira
eri keri'za kumamofo fegu'a agru'ma osu'nefi ome atregahaze.
41 Hagi ana tontomo'ma me'enenia nomofo asoparega havema

azerinogu'ma rukamarente'naza zantamina vazagate'za eri'za rankumofo fegi'a agruma osu'nefi ome atregahaze. **42** Hagi anama krima me'negeta eritraza haveramimofo nontera, ru have eri'za eme runekamare'za, ana havema azeri'zana kasefa hapa ati'za erihapa hu'za rukamrenteho. **43** Hagi anama hutesagenoma henkama ana tontoma fore'ma hina, **44** ete pristi vahe'mo'a vuno mago'ane omegeno. Ome kesigeno ana nonte'ma tontomo'ma rurama hu'nena, nomo'a haviza hu'neankino agru osu'ne huno hugahie. **45** Hagi ana noma ki'nesia havema, zafama, rekamre'nesaza zana tapage hu'za eri'za kumamofo fegi'a agruma osu'nefi ome atreho. **46** Hagi kahama eriginesia kna'afima ana nompima ufresimo'a, agru osu mani'enigeno vuno kinaga segahie. **47** Hagi anahunkna huno iza'o, ana nompima mase'nimo'a kukena'a sese nehanigeno, iza'o ana nompima ne'zama nesimo'a, kukena'a sese hino. **48** Hianagi ana noma eri fatgo hutesageno'ma pristi vahe'mo eme kesigeno, ana tontoma orenenigeno'a ana nonkura kria omane'neanki, agru hu'ne huno pristi vahe'mo'a hugahie. **49** Hagi ana noma azeri agruma hunakura, pristi vahe'mo'a tare namarare nevreno, sida zafa e'nerino, koranke nofi enerino, hisopu zafa azankunatetiki huno azeri agru hugahie. **50** Hagi mago nama zasi ti me'nenia mopa kavomofo agofetu agra ahnenigeno, koramo'a ana kavofi avitegahie. **51** Hagi anama hutesuno'a, sida teve zafa atupa'agi, hisopu zafa azankunaki, korankrenofiki, mago'ma kasefa huno mani'nea nama anama korama me'nea timpi reteno atisga huno, ana nomofona 7ni'a zupa rutri tri hugahie. **52** E'ina hukanama huno timpima me'nea namamofo korantetiki, kasefa'ma mani'nea namaretiki, sida zafaretiki, hisopu zafa azankunaki, korankre nofitetiki, huno

ana noma azeri agru hutesuno'a, **53** kasefa'ma huno mani'nea
nama avreno kuma'mofo fegia ometresigeno hareno vugahie.
E'ina huno pristi vahe'mo'a havizama hu'nesia nomofona nona
huno azeri agru hugahie. **54** Ama fugonkri eri'nesazo, zuka
kri eri'nesaza zamofo tra ke, **55** kukenare tontore'nesio, nonte
tontore'nesio, **56** zamavufagamo zorenegeno kirareki namu
fore hu'enio, efeke kirere eri'nesaza, **57** vahe'ma rempima
huzamisage'za zamagra'ama agru hu'neanki, agru osu'neanki
hu'zama rezagnezama kesaza zamofo tra ke. Ama'i fugo krimofo
tra ke.

15 Ra Anumzamo'a anage huno Mosesene Aroninena
znasami'ne, **2** Tanagra Israeli vahera zamasamaho, mago
ne'mofoma agozafinti'ma efeke avo'ma haniana, e'i agrua
osugahie. **3** Hagi vemo foma agozafinti avo'ma atirami vava
hanio, avimarekama renkaniresigeno avufarima eovaniana, agra
agru osu'ne. **4** Hagi ana krima eri'nesia ne'mo'ma masesia
tafemo'a maka agru osanigeno, maka manisia tra'mo'enena
agrua osugahie. **5** Hagi ana krima eri'nesia ne'mofo tafe'ma
avako'ma hanimo'a, agrua osugahiankino, kukena'a timpi sese
nehuno, tina freteno mani'nenigeno vuno kinagasegahie. **6**
Hagi iz'a ana kri ne'mo'ma mani'nesia zante'ma avako'ma
hania vahe'mo'a, agrua osugahiankino kukena'a timpi sese
nehuno, tina freteno mani'nenigeno vuno kinagasegahie. **7** Hagi
ana krima eri'nesia vahe'ma avako'ma hania vahe'mo'a, ana
zanke huno agrua osugahiankino, kukena'a timpi sese nehuno,
maninesigeno vuno kinaga segahie. **8** Hagi ana krima eri'nesnia
ne'mo'ma agruma hu'nenia vahe'ma avetu'ma ahentesiana,
anazanke huno agrua osugahiankino, kukena'a timpi sese
nehuno, tina freteno mani'nenigeno vuno kinagasegahie. **9**

Hagi ana krima eri'nesia ne'mo'ma hosi afu agofetu'ma ante'za manizama nevaza tafete'ma (satel) manino vanigeno'a, anazamo enena, agrua osugahie. **10** Hagi ana kri ne'mo'ma agofetu'ma mani'nenia zantamimo'a miko agru osu'ne. Iza'o avako'ma huno erino vanimo'a, agrua osugahiankino, kukena'a timpi sese nehuno, tina frete no mani'nenigeno vuno kinagasegahie. **11** Anahukna huno anankri'ma eri'nesia ne'mo'ma azama timpi sese osu'neno, agruma hu'nenia vahe'ma avakoma hanimo'a, agrua osugahiankino, kukena'a timpi sese nehuno, tina frete no mani'nenigeno vuno kinagasegahie. **12** Hagi ana krima eri'nenia ne'mo'ma avako'ma hu'nesnia mopa kavoa takohu netreta, ne'zama atino ne'zantamima zafare'ma tro hu'nesia zantamima avako hu'nesia zana timpi sese hiho. **13** Hagi ana ne'ma agozafintima namureno avo'ma nehiazama atrente'na, 7ni'a zagegnama evanigeno'a kukena'a enevania timpi sese nehuno, tina freno agrua hugahie. **14** Hagi 8kna zupa tare maho namarareno, tare kugofa namarare avreno atruhu seli nomofo kahante Ra Anumzamofo avuga, pristi vahe eme aminageno, **15** pristi vahe'mo'a ana namararena avreteno, magomofona kumite kresramna nevuno, mago'mofona tevefima kre fanane hu ofa hugahie. Hagi pristi vahe'mo'a ana krimofo nona huno Anumzamofo avuga ofa hugahie. **16** Hagi mago ne'mo'ma mase'nena agozarima esiana agru osugahiankino, ti frete no mani'nena vuno kinagasegahie. **17** Hagi ana ne'mofo avufga rimo'ma kukenare avako huge, bulimakao akruteti'ma tro hu'nesaza kukenare'ma avako'ma haniana, agrua osugahiankino, timpi sese huteno mani'nenigeno vuno kinagasegahie. **18** Hagi mago vemo'ma mago a'enema monko'zama hanuno'a, timpi tina freteke agru osu mani'nenakeno vuno kinagasegahie. **19**

Hagi mago a'mo'ma ikankrima eri'siana agru osu mani'nenigeno
7ni'a zagegna evugahie. Hagi iza'o ana ika krima eri'nesia a'ma
avako'ma hanimo'a, agru osu mani'nenigeno vuno kinagasegahie.
20 Ana a'mo'ma tafe'ma masino nemasesia zamo'o, tra'ma
anteno nemanisia miko zama'amo'a, agru osugahie. **21** Hagi
ana ikankrima eronesia a'mo'ma mase'nesia tafe'ma avako'ma
hanimo'a, agru osugahiankino kukena'a sese nehuno, ti frete
mani'nenigeno vuno kinagasegahie. **22** Hagi ana krima eri'nesia
a'ma nemanisia zama avako'ma hanimo'a, agrua osugahiankino,
kukena'a timpi sese nehuno, tina frete mani'nenigeno
vuno kinagasegahie. **23** Hagi ana krima eri'nesia a'mo'ma
nevasesia tafero, neman'i'nea tra'ma avako'ma hanimo'a agru
osugahiankino, agru osu mani'nenkeno vuno kinagasegahie. **24**
Hagi ikankrima eri'nesnia a'enema monko'zama hania ne'mo'a,
ana krimo azeri pehena hugahiankino, ana ne'mo'a 7ni'a
zagegnafi agru osu manigahiankino, ana mase'nea sipamo'enana
agrua osugahie. **25** Hagi ana ikankrima eri'nea a'mofoma ana
kri'amo'ma zazate'ma menoma ikankrima vagama nereanknama
agateresiana, ana a'mo'a agrua osu manino vugahie. **26** Hagi ana
korankri'ma eri'nенома manino vania kna'afima masesia tafero,
manisia tra'mo'enena agru osugahie. **27** Hagi anahukna huno
iza'o, ana krima eri'nesia a'mofo tafe'ma avako huge, nemanisia
zama avako'ma hanimo'a, agrua osugahianki kukena'a sese
nehuno, ti freno mani'nenkeno vuno kinagasegahie. **28** Hagi ana
a'mofoma kri'amo'ma atrentenkeno'a, krima atrentenia knaretira
7ni'a gna maniteno agrua hugahie. **29** Hagi 8 knazupa tare
maho namarareno, tare kugofa namararena avreno atruhu seli
mono nomofo kafante pristi vahe ome amigahie. **30** Hagi mago
nama pristi vahe'mo'a kumi' apase ofa nehuno, mago nama

tevefima krefanane hu ofa hugahie. E'inahu kante korankrima e'rinea zantera pristi vahe'mo'a aza huno Ra Anumzamofo avuga nona huno ofa hanigeno, azeri agru hugahie. 31 Hagi Israeli vahera zamazeri ruotage huge'za, agru osu zanena aru havia hu'za mani'ne'za seli mono nonimofona eri havizana osugahaze. Hagi zamagrama ana'ma hu'za mani'ne'za seli mono noni'a eri pehanama, hanage'na zamahe frigahue. 32 Hagi ama'i venenemofoma agozafinti'ma avufga rima esia zamo'ma azeri pehana haniazanki, 33 a'nemokizmi ikankrimo'ma zamazeri pehana hu'nesiazanki, a'nemofono venenemofono oku avufgafintima avoma nehania zamofone, ikankrima eri'nesia a'enema mase'nesia vahe'enema azeri pehanama hania zamofo trake.

16 Hagi Aroni ne' mofavre'moke'ma Ra Anumzamo'ma Mosesema asmi'nea kema rutagreke i'oma hu'nea teveretima ofama hakeno znahe friteno, 2 Ra Anumzamo'a amanage huno Mosesena asami'ne, Negafu Aronina asamigeno ruotagema huno ruotagetfama hu'nefinka hunaraginte'nea tavravemofo amefima huhagerafi huvempage vogisimofo avaza'a, asunku trarema nehaza tra'ma me'nerera ahe frigahuanki, amanenena agra'a avesitera omeno. Na'ankure Nagra ana asunku tratera hampompi eramina eama nehue. 3 Hagi ruotage huno ruotagema hu'nefinka Aroni'ma ufrenaku'ma hanuno'a, agaho ve bulimakao afu avreno kumitera ome kresramna nevuno, agaho ve sipisipi avreno tevefima kre fanane hu ofa ome hino. 4 Hagi anampinkama ufrenaku'ma hanuno'a, tifreno agra'a avufga sese huteno, ruotage'ma hu'nea efeke za'za kukena'a nehuno, agu'afima avufgare'ma antani efeke kukena'a nehuno, anantera afafafima amu'nofima hu efeke tavravereti afafafina ananekino, asenire'ma

ki efeke tavravereti asenirera kino. Hagi e'i ana kukena ruotage hu'neankino tifreteno antanigahie. **5** Hagi Israeli vahe'mo'za tare ve meme afutrena kumite'ma kresramna vu'zana nevre'za, mago ve sipisipi afu tevefima krefanane hu ofa hu'zana avre'za Aroninte echo. **6** Hagi Aroni'a agra'a kumite'ene, noma'afima nemaniza nagamofo kumite'enena mago ve bulimakao kresramna vugahie. **7** Anama hutesuno'a ana tare ve meme afura avreno Ra Anumzamofo avuga atrumahu seli mono nomofo kafante eno, **8** ana tare meme afutrentera taisi zokago reno kesigeno, Ra Anumzamofo agima me'nea suzama efore hanigeno'a, anama Ra Anumzamofo agima fore'ma hania meme afukura Ra Anumzamofo su'zane nehuno, magora Asaseli su'zane hugahie. **9** Hagi Ra Anumzamofo su'zanema hania meme afura, Aroni'a avreno Israeli vahe'mokizmi kumite ofa hugahie. **10** Hagi Asaseli su'zane huno'ma hu'nenia meme afura, avu'aga avreno Ra Anumzamofo avuga eno kumite nona huteno, ana meme afura avreno ome atrenkeno, ka'ma kopi Israeli vahe'mokizmi kumira erino vugahie. **11** Hagi anama hutesuno'a, Aroni'a agra kumite'ene naga'amofo kumite nonama hu ve bulimakao afura aheno kumite kresramna vu ofa hugahie. **12** Hagi Ra Anumzamofo avugama me'nea kresramna vu itareti tanknuza tevea kavofi hanagenenteno, manantenake'zana insensia tareaza huno erino, hunaraginte tavravemofo amefi'a ruotage'ma hu'nefinka vugahie. **13** Hagi Ra Anumzamofo avuga ana manantenake insensia tevefi krenkeno toki'amo'a huhagerafi huvempage vogisimofo avaza'a asunku trarema nehaza trara refitenkena ahe ofrineno. **14** Hagi ana ve bulimakao afu'mofo korampi azanko reteno, huhagerafi huvempage vogisimofo avazagu'ma asunku trarema nehaza tra'mofona, zage hanati

kaziga asoparega 7ni'a zupa rutri tri hugahie. **15** Ana huteno Aroni'a Israeli vahe'mokizmi kumite'ma kresramna vu meme afura aheno, korama'a tagino hunaraginte'nea tavravemofo amefi'a ruotage huno ruotagetafama hu'nefinka bulimakao afumofo korama hu'neaza huno, ana korana asunku tra'mofo avuga rutri tri hino. **16** E'inahukna kanteke ruotage huno ruotage'ma hu'nefinke hu'zama hunaraginte nona azeri agru hugahie. Na'ankure Israeli vahe'mokizmi kumizamimo ana nona eri haviza hu'ne. Ana hukna kanteke kumi'mo'ma amu'nontamifima atruhu seli mono'ma eri pehanama hu'neana eri agru hugahie. **17** Hagi ruotage huno ruotage'ma hu'nefinkama Aroni'ma, agra'a kumimofone, naga'amofo kumiku'ene, Israeli vahe'mokizmi kumimofonte'ma nona huno ofa hunaku ufre'nesigeno'a, mago vahe'mo'e huno atruhu seli mono nompina omani'enkeno, ofa ome huteno atiramino eno. **18** Hagi ana'ma hutesuno'a atiramino eno Ra Anumzamofo avugama me'nea kresramna vu itare, kumimofo nona huno ofa huteno, ve bulimakaomofo korane mememofo koranena erino kresramana vu itare me'nea pazivetamintera frentegahie. **19** Hagi Israeli vahe'mo'za haza kumimo'ma kresramana vu itama azeri pehana hu'nea zana, ana korampi azanko reteno, 7ni'a zupa ana itarerera rutri tri huno azeri agru hugahie. **20** Hagi ruotage huno ruotage'ma hu'nefinkane, atruhu seli mono none, kresramana vu itanema Aroni'ma azeri agru hutesuno'a, anama amnema mani'nea meme afura seli nomofo avuga avreno eno, **21** asenirera tarega azana Aroni'a anteno, Israeli vahe'mokizmi kumizmia ana afumofo agumpi hu hatazafenteteno, ana meme afura huhamprinte'nesia vahe aminkeno, avreno ome atrenkeno ka'ma kopi Israeli vahe kumira erino vugahie. **22** Hagi ana meme

afu'ma ka'ma kopima ome atresigeno vaniana, miko Israeli vahe kumira erino ka'ma kopi vugahie. **23** Aroni'ma ana eri'zama erivaretesuno'a, ete atruhu seli mono nompi ufreno ruotage huno ruotagetafama hu'nefinkama ufre'naku'ma antani'nea efeke kukena ome hatentegahie. **24** Hagi ruotage'ma hu'nefinka Aroni'a tina freteno, ko'ma antani'nea kukena eri huteno, atiramino eno agra'are ene Israeli vahe'mokizmi kumimofo nona huno kre fanene hu ofa hugahie. **25** Anantero kumi ofama hu'nea bulimakaone, meme afu'mofo afova'a kresramna vu itare kre fanane hu ofa hugahie. **26** Hagi Asaseli suzane huno ka'ma kopima meme afu'ma avreno vanimo'a, ti freno kukena'a sese huteno, henka kumapina efregahie. **27** Hagi korama'a tagino ruotagema huno ruotage'ma hu'nefinkama kumimofo ofama hu'nea bulimakaone, meme afu'mofo, akru'agi, ame'agi, rifa'anena kumamofo megi'a tevefi ome kreho. **28** Hagi ana zama eri'noma ome kresia vahe'mo'a, kukena'a sese nehuno timpi tina freteno kumamofo agu'afina efreno. **29** Hagi ama'i mevava hania trake, tamagrane emani vahe'enena kafugu kafugura 7ni ikamofona 10ni knazupa nezane makazana a'o nehuta eri'zana e'oriho. **30** Na'ankure ana knarera kumima apaseramanteno tamazeri agruma hu ofa hanigeno, tamazeri agru hina Ra Anumzamofo avufina agru huta manigahaze. **31** Hagi ana kna mani fruhu kna zupa Sabatigita ne'zane maka'zanena a'o huta mani'neta eri'zana e'origahaze. Ama mevava trake. **32** Hagi henkama fore hu anante anante hu'za esaza vahepinti, nefu noma erino pristi eri'zama erisiegu'ma huhamprinte'nimo, ruotage'ma hu'nea zaza kukena nentanino, kumite'ma nona hu ofa hugahie. **33** Hagi ruotage huno ruotage'ma hu'nefinkane, atruhu seli mono none, kresramana vu itane, pristi vahe'ene

maka Israeli vahe'mofo kumite nona huno ofa hugahie. **34** Ama'i
Israeli vahe'motama maka kafufima magoke knare'ma hanaza
zankino, mevava trake. Mosese'a miko Ra Anumzamo'ma
hunte'nea tra kea amage anteno huvare'ne.

17 Ra Anumzamo'a Mosesena asamino, **2** Aronine, mofavre
naga'ane, maka Israeli vahera Ra Anumzamo'a amanage hie
hunka zamasamio, **3** Mago Israeli vahe'mo'ma bulimakao
afupi, sipisipifi afu'ma, meme afu'ma kuma agu'afino, fegu'ama
aheno'ma kresramna nevuno, **4** ana bulimakao afupi, sipisipi
afupi, meme afuma erino atruhu seli mono nomofo kafante'ma
Ra Anumzamofo avugama omesiana, e'inahu vahe'mo'a kora
eritagino kumi hu'neankino, kuma agu'afintira ahenatitregahie.
5 Ama'na agafare ana zana hugahaze, Israeli vahe'mo'za
amanegi'a kokampi ofazimia kresramna nevazankiza, menina
kresramna vu ofazimia eri'za atruhu seli mono nomofo kafante
Ra Anumzamofo avuga pristi vahete esageno, agra erino arimpa
fru ofa Ra Anumzamonarega hugahie. **6** Hagi atruhu seli mono
nomofo kafante'ma kresramna vunte itama Ra Anumzamofo
avugama me'nere, pristi vahe'mo ana korana rutri tri hunenteno
afova'a tevefi kresigeno Ra Anumzamo'na mna'a nentahina
musena hugahue. **7** Zamagra meme afu havi anumzante
kresramna vunente'za, a'ne'mo'za savari hu'za monko avu'ava
nehazankna osugahaze. Hagi ama'i mevava trake me'nena
henkama fore hunante anante'ma hanaza Israeli vahe'mo'za
amage antegahaze. **8** Anantero anage hunka zamasamio,
Israeli vahepintiro ru vahe'ma tamagranema emani'enaza
vahe'mo'zama ofama nehu'za, **9** atruhu seli mono nomofo
kafante Ra Anumzamofonte'ma eme kresramna ovanimofona,
Israeli vahepintira ahenatitregahaze. **10** Israeli vahepintiro rurega

vahe'ma enemanisia vahe'mo'zo korama nesage'ha, Nagra
anama korama nesia vahera namefi hunemi'na vahe'niafintira
ahenatitregahue. **11** Na'ankure korampi asimu'ma erino mani'zana
me'ne. Ana hu'negu kumite'ma nona huno apasente'zana
koranuti Nagritera ofa hugahaze. E'ina hu'neankino koranuti
kumimofo nona huno asimura amigahie. **12** E'ina hu'negu
Israeli vahe'ene ruregati vahe'ma tamagranema eman'i'zana
vahe'motanena korana oneho hu'na nehue. **13** Israeli vahe'mo'zo
ruregati vahe'ma tamagranema eman'i'nesaza vahe'mo'zanema
zagagafao namama ahe'za nesu'za, korama'a mopafi tagitre'za
mopanu refiteho. **14** Na'ankure asimu'ma anteno mani'nea
zagaramimofona asimura korampi me'ne. E'i ana agafare Israeli
vahekura korana oneho hu'noankino, iza'o korama nesimofona
Israeli vahepintira ahegasopegahaze. **15** Hagi Israeli vahero,
ruregati vahe'ma tamagranema eman'i'nesaza vahe'mo'zama
fri'nesia zagagafao, afi zagagafamo aheno traga hu'nesia
zagagafama nesimo'a, kukena'a sese nehuno, timpi ti freteno
agru osu mani'enkeno vuno kinagassenkeno agrua hugahie.
16 Ana hu'neanagi kukena'ama sese osuno, timpima tima
ofresimo'a, agra'a anazamofo knazana erigahie.

18 Ra Anumzamo'a Mosesena anage huno asmi'ne, **2**
Israeli vahera zmasimio, Nagrake Ra Anumzana tamagri
Anumzana mani'noe. **3** Hagi ko'ma Isipi mani'nage'za Isipi
vahe'mo'zama hu'naza avu'ava zana osuge, menima Nagrama
Kenani tamavre'na vanugeta umani'naza mopafi vahe'mo'za
hanaza avu'avara zamavaririta oshiho. **4** Miko trakeni'a amage
nenteta, kegava hiho. Na'ankure Nagrake Ra Anumzana tamagri
Anumzana mani'noe. **5** Nagri tra kene kasegeniama amage'ma
tamagrama antesazana, anazamo'a tamasimu tamigahie. Nagra

Ra Anumzana mani'noe. 6 Tamagra'a kora naga nofipina monko
avu'ava zana osugahaze. Na'ankure Nagra Ra Anumzane. 7
Negrera'enena monko avu'ava zana osuo, agra kagri negrera'e.
Hagi e'inama hanunka negafana agaze erimigahane. 8 Negafa
a'enena monko avu'ava zana osuo, e'inama hanunka negafana
agaze erimigahane. 9 Hagi negasaro eneno, negafano negarera
mofa'eneno, negsaroma ru nagapima mani'nesia mofa'enena
monkozana osuo. 10 Hagi mofakamofo mofaro, ne'kamofo
mofa'enena negagehoki monko'zana osuo, e'inama hanana
kagraka'a kazeri haviza hugahane. 11 Negafa a'nemo'zama
kasezmante'nesaza mofananea, negasarozagi monkozana
huozamanto. 12 Negafa nesaro'enena monkozana osuo,
agra negafana nesarokino, negamomo mani'ne. 13 Negrera
anunkna he'zanena monko'zana osuo, na'ankure zamagra
negrerana korama'a mani'naze. 14 Negafa afu'aganahe a'enena
monkozana osuo, e'inama hananana negafa afu'aganahe'ina
zamagaze erizamigahane. 15 Negamofo a'enena monko'zana
osuo, na'ankura agra negamofo a'kino neganofero'e. 16
Nempukamofono negagna a'enena monkozana osuo, na'ankure
agra koranka'amofo a'kinka nempukamofono negagnana azeri
haviza hugahane. 17 Hagi mago a'ma erinenana a'mofo
mofa'enena monko'zana osuo. Hagi ana a'mofo agehe'inena
monko'zana osuo, na'ankure zamagra negagehozaginka
kefozantfa hugahane. 18 Mago a'ma antenankeno ofrino
mani'nena ana tapina, ete nenunknana ara e'orio krunoregaha'e.
19 Namunka mani'neno agru osu'nesia a'enena monko'zana osuo.
20 Ru ne'mofo a'enena monkozana hunka, kagra'a kazeri pehana
osuo. 21 Hagi Moreki havi anumzantera mofavreka'a ahenka
kresramna nevunka Anumzanka'amo'na nagi'a erihaviza osuo.

Na'ankure Nagra Ra Anumza mani'noe. **22** Hagi vene'nemo'a
vene'nenena monkozana osino, na'ankure kasrino himna
vu'nea kumi hugahaze. **23** Hagi zagagafanena monko'zana
vahe'mo'a osinkeno, a'nemo'za zamagra'a zamavufaga ve
zagagafa zaminage'za monkozana hu ozamanteho, haviza huno
kasri'nea kumi hugahaze. **24** Amanahukna tamavu tamava huta
tamagra'a tamazeri havizana osiho, Na'ankure ko'ma ama ana
mopafima mani'naza vahe'ma zamahenatisua vahe'mo'za ama
ana zamavu'zmavaza hu'za zamagra zamavufaga zamazeri
haviza hu'naze. **25** Na'ankure ama ana agafare mopamo'a
havizana hu'ne. E'ina hu'negu ama mopafinti vahera zamazeri
haviza hanena, mopamo'a amuti zamatregahie. **26** Hagi tamagra
miko'a kasegeni'ane, trakeni'a kegava hu'neta amage nenteta,
ama ana kasri avu'ava zana tamagrane, rurega vahe'ma
tamagranema emani'naza vahe'mo'zanena osiho. **27** Na'ankure
ko'ma ama mopafima mani'naza vahe'mo'za, ana kasri avu'ava
hazageno mopamo'a hi'mnavu'ne. **28** Tamagrama ama ana
mopama eri havizama hanageno'a, ko'ma ama ana mopafima
mani'naza vahe'mo'za mopama eri havizama hazageno amuma
atizamatre'nea kna huno amu ati zamatregahie. **29** Hagi ama
anahu kasri avu'ava'ma hania vahera, Israeli vahe'pintira zamahe
natitregahaze. **30** Anahu'negu kva huneta kasegeni'a amage
nenteta, ko'ma ama anampima mani'naza vahe'mo'zama hu'naza
kasri zamavu'zamavara nosuta, tamagra zamagranena ruhavia
huta mani'neta tamagra'a tamavufga eri pehena osiho. Nagrake
Ra Anumzana tamagri Anumzana mani'noe.

19 Ra Anumzamo'a amanage huno Mosesena asami'ne, **2**
Ama nanekea Israeli vahera zamasamio, mani ruotage huta
maniho, na'ankure Ra Anumzana tamagri Anumzamo'ha ruotage

hu'noe. 3 Mago magomota tamarera tamafa ke antahita
agoraga'a nemanita, Sabatia mani fruhu kna kegava hiho.
Nagra Ra Anumzana tamagri Anumzane. 4 Kaza osu havi
anumzantera tamentintia osuge, tamagra ainiretira kreta havi
anumzantamia trora osiho. Nagra Ra Anumzana tamagri Anumza
mani'noe. 5 Rimpa fru ofama Ra Anumzamofonte'ma kresramna
nevanutma, kasege avariritma fatgo huta ofa hinke'na musena
ha'neno. 6 Anama ofama hanaza ne'zana ana knare'ene
anante knareke neho. Hagi nege atrege'ma hanaza ne'zamo'ma
tagufa knama mesia ne'zana erita kre fanane hiho. 7 Hagi
tagufa knama mesia ne'zamo'a haviza hugahiankino, ana
ne'zama nesimo'a agru osugahiankino, Ra Anumzamo'a musena
huontegahie. 8 Iza'o ana ne'zama nesimo'a ruotage hu'nea
ne'zankino Ra Anumzamofo agi'a eri haviza hugahiankino,
vaheni'afintira ahenatitregahaze. 9 Hagi hozatamifinti'ma
ne'zama nehamaresuta refaregama me'nesiama'a netreta,
nehamaresage'noma evuraminiama'a zo'onkita atrenkeno meno.
10 Hagi waini rgama ko'ma tagita vutesuta, ete eta mago'anena
eme oragige, tagita nevanageno mopafima evuramisiama'a
zoraonkita, atrenke'za zamunte omane vahero, rurega vahe'ma
tamagranema enemanisaza vahe'mo'za zogihio. Nagra Ra
Anumzana tamagri Anumzamo'na nehue. 11 Tamagra kumazafa
oseta, havige havage huta rumofozana avazua osuta, rumokizmia
havige huozmanteho. 12 Hagi havige huta Nagri nagirera
huvempa huta kea osiho, ana'ma hanuta tamagra'a Anumzamofo
agi eri haviza hugahaze. Nagra Ra Anumzamo'na nehue. 13 Hagi
iza'o tavaontamire'ma nemanisimofona azeri havizana nehuta,
kumazafa seta nanazazmia e'oriho. Zagore'ma eri'za eri'nesia
ne'mofo zagoa azerigeno zazatera kagranena me'enkeno

hanina huno nanterana oseno. **14** Zamagesama ankanirenesia vahera huhavizana huozamantege, zamavu asuhu vahera zamazeri tanafa hania zane huta kampina onteho. Hagi tamagra'a Anumzamofo korora huntaho. Nagra Ra Anumzamo'na nehue. **15** Keagama refko hu trate'ma keagama refkoma hanazana afufenozimi omne nesnia vahetega antege, afufenozimi me'nesnia vahetega antegera osutma, mago avamentekе refko huzmanteho. **16** Ru vahe'mofo amefi agenkea huta vano osu tava'ontamire nemanisimofoma keagama hunentesagenka, azahunka keaga huga'ma hu'nesigenka amne aza hunka hugahane. Na'ankure Nagra Ra Anumzamo'na nehue. **17** Hagi negafuna kagu'afina antahi havizana huontenka, havizama nehanigenka ana havi avu'avazama'a eri ama hunka haviza nehane hunka azeri fatgo huo. Ru antahi haviza huntesunka kumi hugahane. **18** Hagi havi avu'ava'ma hugantesia zante'ma nonama hu kankura ohakenka, kagragu'ma kavesintanaza hunka rumofona kavesinto. Nagra Ra Anumzamo'na nehue. Hianagi tava'onkare'ma nemanisimofona kagragu'ma kavesintana kna hunka avesinto. Nagra Ra Anumzamo'na nehue. **19** Tamagra tra keni'a amage'anteta, magopina ruzahu ruzahu zagagafa kegava hu'nenko ru zagagafamo'a ru zagagafa oharareno. Magoke hozafina ru avimzana ru avimzana oseho. Tare nofitetima hatino tro'ma hu'nesia kukena ontaniho. **20** Hagi kazokzo eri'za mofa'ma mago nete'ma manigahiema hu'nesia mofa'ma anteno mase'nia ne'mofona, ahe ofriho. Na'ankure ana mofara miza osazageno, eri'zama'afintira katufeno fru huno omani'ne. **21** Hagi ana'ma hania ne'mo'a ve sipisipi afu avreno, atruhu seli mono nomofo kafante kefovzama hu'nea zantera Ra Anumzamofontera ome ofa hugahie. **22** Hagi anama avreno'ma esia sipisipia, pristi

vahe'mo'za ahe'za Ra Anumzamofontera kumi'a apasente ofa hinkeno, ana nera kumi'a Ra Anumzamo'a atrentegahie. **23** Hagi ana mopare'ma umanisuta, ese 3'a kafufina, rgama rente zafama krisaza zafamofo raga tagita oneho. **24** Hagi nampa 4 kafufima rentesia zafa rgaramina ruotage hugahiankita, mika erita Ra Anumzamofo Ra agi ami ofa hugahaze. **25** Hagi nampa 5fu kafufima rentesia zafa raga negahaze. E'inahu hanageno ne'zamo'a rama'a hugahie. Nagra Ra Anumzana tamagri Anumzamo'na nehue. **26** Korama me'nenia ame'a oneho. Zagoma reno ke avu'ava zana osuge, afa avu'ava zana osiho. **27** Hagi kagesa tavaonte'ma me'nea kazoka'ene kagemazampa kazokara ase rampagera osuo. **28** Hagi frisia vahetera kasunkura hunka kavufga taga osuo. Hagi kavufga taga hunka avona onkro. Nagra Ra Anumzamo'na nehue. **29** Mofanetami'a zamatreneke'za mizantera monko avu'ava zana osiho. Ana'ma hanazana monko avu'avazamo'a avitenkeno, ama mopamo'a haviza hugahie. **30** Hagi mani fruhu knani'a Sabatia kegava nehuta, seli mono noni'a kegava hiho. Nagra Ra Anumzamo'na nehue. **31** Hagi iza'o fri'nea vahe'enema keaga nehanaza vahetero, havi avamu'enema keagama nehanaza vahetera, vuta knare antahintahigura ome zamantahi onkeho. Tamagra'a tamazeri haviza hugahaze. Nagra Ra Anumzana tamagri Anumzamo'na nehue. **32** Hagi ranra vahe'mokizmi kea antahizamita eri'zafa nehuta, Nagri agorga'a maniho. Nagra Ra Anumzamo'na nehue. **33** Hagi tamagri mopafima rurega vahe'ma emani'ne'naza vahera, zamazeri havizana osiho. **34** Hagi miko vahe'ma antahi zaminankna hunka antahi neminka, kagra'agu'ma kavesinentanankna hunka avesinto Tamagesa antahihi, Isipia e'inahukna huta rurega vahe umani'nazane. Nagra tamagri Ra Anumzamo'na nehue.

35 Hagi vahe'mofozama sigerima huta kna'ama kesazano, zaza'ama mesarimima hanazano, afiviteta kesazana havige kazigatira anara osiho. 36 Hagi sigeritamimo'ene mesarimima hu zantamimo'a fatgo huno meno. Hagi ne'one zantamima refakohu tamavutamavamo'a, fatgo huno meno. Nagra Isipiti'ma tamavre'na e'noa Ra Anumzamo'na tamagri Anumzamo'na nehue. 37 Hagi miko tra keniane, kasegeni'anena amage anteho. Nagra Ra Anumzamo'na nehue.

20 Ra Anumzamo'a anage huno Mosesena asmi'ne, 2 Ama'na trakea Israeli vahe'mokizmia zamasimio, Israeli vahe'mo'o rurega vahe'ma tamagranema emani'nesaza vahe'mo'za, mofavrezmia Moreki havi anumzamofona omiho. E'inahuma hania vahera have knonu ahefriho. 3 Nagra ana vahera ha'renezmante'na, vahe zmifintira zamavare atregahue. Na'ankure agra mofavre'a havi anumzamofo ofa hunenteno ruotage'ma hu'nea noni'a eri haviza nehuno, Nagri nagi eri haviza hu'ne. 4 Hagi ana kumapinti vahe'mo'zama nege'zama havi anumzama Morekinte'ma mofavre'a kresramna vania nera ahe ofrisazana, 5 Nagra ana vahera ha'renente'na amage'ma ante'zama havi anumza Morekinte'ma mono'ma huntesaza vahe'enena vaheni'afintira zamahenatigahue. 6 Hagi amu'notamifintima mago'mo'ma antahiza aminogu'ma fri'nesia vahe'mofo hankro ene keagaga nehania vahete vuge, monko avu'avazama hiazza huno havi anumzante mono'ma hunentesia vahera, Nagra ha'arente'na vahe'niafintira ahenati atregahue. 7 Anahu'negu tamagra'a tamazeri agru huta mani ruotage huta maniho, na'ankure Nagra Ra Anumzana tamagri Anumzamo'na nehue. 8 Hagi miko kase keni'a kegava huta nevaririta, agoraga'a maniho, na'ankure Nagra Ra Anumzamo'na tamazeri ruotagera hu'noe. 9 Hagi iza'o nerera

nefama huhavizama huntesimofona ahefriho. Agra nererane
nefanema huhavizama huntlesia knazana agra'a erigahie. **10**
Hagi rumofo a'enema savri'ma hania nera, ana ne'ene anama
savri'ma hania a'enena zanahe friho. **11** Hagi nefafa neno enema
savrima hania nera, nefafa agi eri haviza hu'negu, anama savrima
hania ne'ene a'ene zanahe friho. **12** Hagi nenofero enema
savri'ma hania nera, anama savri'ma hana'a a'ene zanahe friho.
Na'ankure zanagra kefo zanavu'zanava ha'ankino anazamofo
nona'a zanagra'a knazama'a erigaha'e. **13** Hagi venenemo'ma
venenenema monkozama hania vahera, kefoza huno kasri'nea
kumi hugaha'anki, ana knazamofo kna'a zamahe frigahaze.
14 Hagi mago ne'mo'ma mago a'ene ana a'mofo mofa anema
monkozama huzanantesiana, e'inahu avu'ava'ma hu'zamo'a
tusi haviza hu'ne. E'i ana avu'ava'ma hanamokizmia tevefi kre
tasegenke'za frisageno anahukna avu'avazamo'a tamagripina
omaneno. **15** Hagi zagagafanema monko avu'ava'ma hania
nera, ahe nefrita ana zagagafa ahefriho. **16** Hagi mago a'mo'ma
monko'zama huntiesiegua'ma, ve zagafarema vanigeno'ma ana
zagagafamo'ma hararesiana, ana a'ene ana zaganena zanahe
friho. Na'ankure zanagra haviza hugaha'ankino knazana zanagra
'a erigaha'e. **17** Hagi iza'o nesaroma a'ma erintesimo'a, havizantfa
erifore hugaha'anki, vahenifintira znahe anati atregahaze. Agra
nesaro'ene monkoza higu, ana knazana agra'a erigahie. **18**
Hagi ikankrima eri'nesia a'enema monko'zama hania nera,
havi avu'avaza erifore hugahiankino, vahenifintira zanahenati
atregahaze. **19** Hagi negrera anunkna'hezaneno, negafa
asarahehezanena kamomohe'moki, monkozana osuo. E'inama
hana'ana havizantfa hugahiankino knazama'a erigaha'e. **20** Hagi
nenogo nenaro'enema monkozama hania ne'mo'a, nenogo a'mofo

kena'a hategahiankino, havi avu'ava nenogona huntegahie. Hagi ana ne'ene ana a'mo'enena mofavrea onte'neke frigaha'e. **21** Hagi nefu a'ma rehanaresia ne'mo'a, havi avu'ava huno nefu a'mofo kena'a hategahiankino mofavre ontegaha'e. **22** E'ina hu'negu kva hu so'e huneta, miko kasegeni'ane tra keni'a amagera anteta agorga'a maniho. Ana'ma osanageno'a anama tamavre'na vanua mopamo'a amu'ati tamatreankna hanigeta knarera huta ana mopafina omanigahaze. **23** Hagi anama vanaza mopafima ko'ma mani'naza vahe'ma zamahenati atresua vahe'mokizmi zamavu'zamava zana osiho. Na'ankure anama vanaza mopafi vahe'mo'za kefoza huno kasri'nea zamavu'zamava nehazage'na nagote'na navesra huzmante'noe. **24** Hianagi vahe'mokizmi amu'nompinti Nagra Ra Anumzana tamagri Anumzamo'na tamavre'na ko huvempa hurmante'na erisanti haregahaze hu'noa mopagino, ana mopafina tumerimo'ene amirimo'a avite'nea mopa erigahaze. **25** E'ina hu'negu refkohu so'e huta negeta, e'i zagagafamo'a agru hu'neanki, e'i zagagafamo'a agru osu'neanki, e'i namamo'a agru hu'neanki, e'i agru osu'neanki hiho. Hagi agruma osu'nesia zagagafo, namaramino, zmasaguregati'ma regrorohe'za vanoma nehaza zagaraminena, neneta tamagra'a tamazeri havizana osiho. **26** Tamagra mani ruotage huta Nagri vahe maniho, na'ankure Nagra Ra Anumzamo'na ruotage hu'nogu miko kokankoka vahepintira Nagri vahe maniho hu'na tamagrira tamazeri ruotage hu'noe. **27** Hagi mago ne'mo'o a'mo'ma fri'nea vahe'eneno kefo avamu'enema keagama hania vahera zamahe friho. Zamagri korankumimo'a zamagripi megahianki havenknonu zamahe friho.

21 Ra Anumzamo'a Mosesena amanage huno asmi'ne, Pristi ne' Aroni mofavre nagara amanage hunka zamasamio, pristi

vahe'mo'a vahe'afima mago vahe'ma frisigeno'a, vahe'ma frige'za
nehaza zana hu'za zamagra'a zamazeri pehana osiho. 2 Hagi
nerera'o nef'a'o ne' mofavre'o mofa'amo'o afu agana'o, 3 ve
e'orino vene omasenesia nesaroma agranema nemanisigeno
amema rentinti huno nemanisimo'ma frisigeno'a, amane ana
avu'avara avaririgahie. 4 Hagi a'amofo kazigati vahe'ma fri'na
ana avu'avara huno agra'a azeri havizana osino. 5 Hagi pristi
vahe'mo'za zmasunkura hu'za zamaseni zamazokara oharege,
zamagi zamazokara oharege, zamavufaga taga osugahaze. 6
Anumzamo'na nagi'a tamagra eri havizana osuta, mani ruotage
huta maniho. Na'ankure tamagra Anumzamo'na ne'zana tevefi ofa
kresramna vugahaze. 7 Hagi pristi vahe'mo'za savri huno vanoma
nehania a'neo, vema atre'nenia ara e'oriho. Na'ankure pristi
vahe'mo'za Anumzamofo avurera ruotage hu'naze. 8 Tamagra
pristi vahera Anumzamofo vahere hutma zamazeri ruotage hihio,
na'ankure zamagra Anumzamofo ne'za ofa hu vaheki, mani
ruotage hu'za maniho. Nagra Ra Anumzamo'na ruotage hu'nogu,
mani ruotage hutma maniho. 9 Anahukna huno mago pristi
vahe'mofo mofa'mo'ma savri avu'ava huno'ma vanoma haniana,
nefana azeri agaze hugahianki, azerita tevefi krefanane hihio.
10 Hagi mago'a pristi vahetaminte'ma ugagota hu'nesia pristi
ne'ma asenifi masave taginte'za azeri ruotage hanageno, za'za
pristi kukenama hu'nesia pristi ne'mo'a fri'nesia vahetera za'za
kukena'a tagatora osuno azokara ohareno. 11 Hagi Agra'a azeri
haviza hugahianki, fri vahe tava'ontera ovino. Nerera'o nef'a'enena
frisakeno'a ovutfa huge, 12 ruotge'ma hu'nea kumara atreno
ovino, na'ankure Anumza ma'amofo huhamprenteno masaventeti
asenirera frenteno huhampri ante'ne. Nagra Ra Anumzamo'na
nehue. 13 Vugota pristi vahe'mo'a venema omasenenia mofa

ara erigahie. **14** Hagi pristi vahe'mo'a kento aro, ve atre'nesia
aro, savri avu'ava nehania ara, ara e'orino pristi nagapinti vene
ovase'nesia mofa ara erigahie. **15** E'ina'ma hanuno'a agripinti'ma
efore hu anante anante'ma hu'za esaza vahera zamazeri
havizana osugahie. Na'ankure Ra Anumzamo'na azeri ruotage
hu'noe. **16** Ra Anumzamo'a Mosesena amanage huno asmi'ne,
17 Aronina asamio, agripintima forehu anante anante hanaza
vahepinti'ma zamavufagamo knare'ma osu'nesia vahe'mo'a
Anumzamofo ne'zana ofa kresramna ovugahie hunka asamio. **18**
Na'ankure avufgamo havizama hu'nesia vahe'mo'a, ruotage'ma
hu'nefinka pristi eri'zana e'origahie. Hagi avu asuhu vahe'ma,
agamo'ma havizama hu'nenia vahe'ma, avugosamo'ma havizama
hu'nesia vahe'ma, agazamo'ma havizama hu'nesia vahe'ma,
19 agamo'o azamo'ma fri'nenia vahero, **20** amage'na fagagi
vahero, atupa vahero, avu havizahu vahero, namunke namanke
vahero, agonknazamo haviza hu'nesia vahero, zmatrenke'za
pristi eri'zana e'oriho. **21** Hagi Aroni nagapinti fore hu'nesamoza
zamavufagamo havizama hu'nesigeno'a, Ra Anumzamo'narera
tevefina kresramna eme vuonanteho. Na'ankure agra avufgamo'a
haviza hu'neankino, Ra Anumzamo'narera ofa eme osugahie.
22 Hagi ana vahe'mo'za ruotage huno ruotage'tfama hu'nea
ne'zane, ruotage'ma hu'nenia ne'zanema Ra Anumzamonare'ma
eri'za esazana amane negahaze. **23** Hianagi avufgamo'a haviza
hu'nesimo'a, ruotage'ma hu'nefinka uravao osuge, kresramna
vu itarera uravao osugahie. Ana'ma hanuno'a Nagri mono
nona eri haviza hugahie. Na'ankure Ra Anumzamo'na zamazeri
ruotage hu'noe. **24** Mosese'a ana mika nanekea Aronine mofavre
naga'ane, miko vahe'enena zamasmi'ne.

22 Ra Anumzamo'a Mosesena amanage huno asmi'ne, 2
Aronine mofavre naga'anena zamasamio, Israeli vahe'mo'zama
nagrite'ma eri'za esaza ofa, ruotage hu'neanki kva hu'neza Ra
Anumzamo'na ruotagema hu'nea nagi'a eri havizana osugahaze.
Nagra Ra Anumzamo'na nehue. 3 Hagi anage hunka zamasamio,
Aroni nagapintima agruma osu'nesimo'a, Nagrite'ma Israeli
vahe'mo'zama ofama hunaku eri'za esaza ofamofo tava'ontera
erava'o osino, ana'ma hanimofona Nagri navure'ma pristi
eri'zama e'neria eri'zampintira ahenati atregahaze. Nagra Ra
Anumzamo'na nehue. 4 Hagi Aroni nagapinti pristi vahe'mofoma
fugo krima re'nesigeno'o, agoza krima eri'nesigeno avo'ma
enevania vahe'mo'a, Israeli vahe'mo'za ofama emema hanaza
ne'zana oneno mani'neno agrua hugahie. Hagi magomo'ma
fri'nenia zagama avako hanigeno azeri pehanama haniano,
mase'nenigeno avufga rima evuge haniano, 5 mopafima agruma
osu zagaramima regraroheno vanoma nehania zagaramima
avako'ma hanigeno azeri pehanama huge, agru'ma osu'nenia
vahe'ma avako'ma haniana, 6 e'i anzantamima avako'ma
hanimo'a, agru osuno, mani'nenkeno kinagassenkeno ti freteno,
ruotage'ma hu'nea ne'zama eme nami'naza ne'zana negahie. 7
Hagi mani'nenkeno zagma uramina, agru nehuno otage ofama
hanaza ne'zana negahie. Na'ankure e'i ana ne'zana agri'a ne'za
me'ne. 8 Hagi agra'a fri'nesnia zagafi, afi' zagamo'ma aheno traga
hu'enienia zagagafa ono. Ana zagama nesunka, Ra Anumzamo'na
navurera agru osugahane. Ra Anumzamo'na nehue. 9 Hagi
pristi vahera zamasamige'za miko tra keni'a avariri fatgo nehu'za,
kumi'zmimofo knazana eri'za ofriho. Nagra Ra Anumzamo'na
zamazeri ruotage hunomo'na nehue. 10 Hagi amne vahe'mo'o,
ru vahepinti pristi naga'ene emanil'nesimo'o, zagore eri'za

erinentesimo'a ruotage'ma hu'nea ofama hanaza ne'zana pristi
vahe'enena onegahie. **11** Hianagi pristi vahe'mo'ma agra'a
zagoreti'ma mizama se'nenia kazokazo eri'za vahe'mo'a, ana
pristi ne'mofo ne'zampintira amane negahie. Hagi ana kazokazo
eri'za ne'mo'ma kasente'nesia mofavre'mo'ma ante'nesigeno'a,
amanne ana mofavremo'a ana ne'zana negahie. **12** Hagi pristi
vahe'mofo mofamo'ma amne nagapima vema eri'nesuno'a,
ruotage'ma hu'nea ofama hanaza ne'zana onegahie. **13**
Hu'neanagi ana pristi ne'mofo mofa'ma neve'ma frisigeno kento
manige, neve'ma atresigeno mofavrema onteno mani'nesia
a'mo'a ete nefä nontega vuno umani'nenu'o'a, amane nefä
nezampintira negahie. Hianagi amne vahe'mo'za ana ne'zana
onegahaze. **14** Hianagi iza'o keno antahino osu'neno pristi
vahe ne'zama nesimo'a, hafu'ama ne'nesuno'a 5fu'a ami'neno
mago'ane ante agofetu huno 6si'a pristi vahera amino. **15** Hagi
Israeli vahe'mo'zama ruotage ofama Ra Anumzamo'naregama
eri'za esaza ofa, mago pristi vahe'mo'a eri havizana osino. **16**
Hagi ana ne'zama zamisage'zama nesu'za ana ne'zama nesaza
zamofo knazama'a eri'za mizaseho. Nagra Ra Anumzamo'na
zamazeri ruotage hu'noe. **17** Ra Anumzamo'a amanage huno
Mosesena asmi'ne, **18** Aronine mofavre naga'ane, mika'a Israeli
vahera amanage hunka zamasamio, Israeli vahemoto, rurega
vahe'mo'ma tamagranema emani'nenaza vahe'mo'zanema
huvempahu ofa hunakuro, amane musema huno ami ofama
Ra Anumzamofonte'ma hunakura, **19** afu kevu'afintira afuhe
afahe'ma osu'nenia ve bulimakao afuro, ve sipisipi afuro,
ve meme afuro, avreno vuno kresramna vino. Hagi ana'ma
osanazana ana ofagura antahi ozamigahue. **20** Hagi afuhe
afahe'ma hu'nesia su'ana avrenka omo. Na'ankure e'i ana ofa,

Ra Anumzamo'na antahi omigahue. **21** Hagi arimpa fru ofa afu kevu'afintima Ra Anumzamo'narega agra'a avesite ofa hunakuro, huvempa hu'nere ofama hunakura, bulimakao afu kevu'afintiro sipisipi afu kevu'afintira afuhe afahe'ma osu'nesia avreno ome ofa hinke'na, ana ofa'a antahimi'neno. **22** Hagi avusu hu'enianio, aga rehantagi'enianio, avufgamo knare osu'enienio, namu re'enienio, zukake hu'enenia zaga ahenka kresramnavu itarera Ra Anumzamo'narera kresramna oviho. **23** Hagi agiamo'ma zaza huge, agiamo'ma atupama hu'enenia ve bulimakano, ve sipisipiretira musema huta tamagra'a tamavesite hu ofa amne hugahaze. Hagi huvempama Nagrite'ma hu'nesaza ofa, e'inahu suzantetira osiho. **24** Hagi agonknazama pro hu'nesiano, agonknazama hari'nesia, sipisipio bulimakao afutetira Ra Anumzamo'narera ofa huonantegahaze. Hagi anahukna ofa tamagra mopafina osiho. **25** Hagi e'inahu sipisipi afuro bulimakao afura, megi'a vahepintira mizana huta Anumzamo'na ofa huonanteho. Na'ankure inahu zamo'a afuhe afahe huno haviza hu'neankina, tamage hu'na Anumzamo'na antahi ozamigahue. **26** Anante Ra Anumzamo'a anage huno Mosesena asami'ne. **27** Hagi sipisipi afuro, bulimakao afuro, meme afu'mo'ma anenta'ma ante'niana, ana anenta'amo'a nerera'enena 7ni'a zagegna manino. Hagi 8 knareti'ma vaniana, amane Ra Anumzamonarera ofa huonantegahaze. **28** Hianagi menima mofavrema antesia bulimakaono, sipisipi afura nererane anenta'anena magoka oznaheho. **29** Hagi Anumzamonare'ma susu nehuta musenkase ofama hunaku hanuta, ke'ma tamasamua kante anteta hanage'na, ana zankura muse nehu'na antahiramigahue. **30** Hagi ana zupage mika'a ana ofama hanaza ne'zana nehna nehuta, mago'a atrenkeno me'nenkeno vuno masa osino. Nagra Ra

Anumzamo'na nehue. **31** E'ina hu'negu kasegeni'a tamagra kegava nehuta amage anteho. Nagra Ra Anumzamo'na nehue. **32** Hagi ruotage'ma hu'nea nagi'a eri havizana osiho. Israeli vahe'mota nagrikura ruotage hu'ne huta nagi'a erisaga hiho. Nagra Anumzamo'na tamagrira tamazeri ruotage hu'noe. **33** Nagra tamagri Anumzama mani'naku'ma lsipiti'ma tamavre'na atirami'noa Ra Anumza mani'noe.

23 Ra Anumzamo'a amange huno Mosesena asami'ne, **2** Israeli vahera anage hunka zamasamio, ama'na knare mono'ma hunante'naza kna huhampruankita, ana knagura ruotage hu'ne huta nentahita atru huta monora hunanteho. **3** Sigisi'a zagegna eri'za kna meno, hagi 7ni zagegna manifru knagi mani fru hu'neta eme atru hutma monora hunanteho. Inaregama manita vanafina ana Sabati knarerera mago eri'zana e'orita, amane eritru huta maniho. **4** Mago kafumofo agu'afina eme atruma huta mono'ma hunteszazankna Ra Anumzamo'a ama'na knarami huhamprinte'ne. **5** Hagi ese ikamofona 14nigna zupa kinaga Ra Anumzamo'na Ontamahena tamagatere'noa knamo'a agafa hugahie. **6** Hagi ana ikamofo 15ni zupa zo-ore bretima nekna egahiankita, 7ni'a knafi zo-ore bretia negahaze. **7** Hagi ana sontamofo ese kna zupa atru huta monora nehinkeno mago'mo'e huno eri'zana ana knarerera e'o'rigahie. **8** Hianagi 7ni'a knamofo agu'afina tevefima kre fananehu ofa Ra Anumzamofona huntegahaze. Hagi 7ni knarerera atru huta monora hunenteta erizana e'origahaze. **9** Ra Anumzamo'a Mosesena asamino, **10** Israeli vahera zamasamige'za, zaminaku'ma hu'noa mopare'ma vanu'zama witima krisage'homa ese raga'ama rentesiana, mago kona anaki'za pristi vahete eri'za viho. **11** Hagi pristi vahe'mo'a mani fru knamofo amefi'a, Ra Anumzamo'ha navure

ana witi kona eri veravehu ofa hinke'na, Ra Anumzamo'na antahimigahue. **12** Hagi ana ne'zama eri veravemahu ofama hanaza zupa, mago kafu hu'nenigeno afuhe afahe osu'nenia ve sipisipi afu aheta tevefi kre fanenehu ofa Ra Anumzamofonte huntegahaze. **13** Hagi witima ofa eri'za esafinti 2'a kilo erifako hu'za, olivi masavene erihavia hute'za kre mna nevu'za, waini tinena eri'za 1ni'a lita tagi'za ofa hanageno Ra Anumzamo'a mna'a nentahino musena hugahie. **14** Hagi ese ne'zama hamaresazana Ra Anumzamonare erita etetma, tamagra henka breti tro hutma nege, kre hagage huge kasefara nege hugahaze. E'inahu avu'avara henkama fore hu'anante anantema hu'zama esaza vahe'mo'zanena trake me'nena manitama vanafina ana avu'avara huta viho. **15** Hagi anama witi ko'nama eri veravemahu ofama hanazana Sabati knaretira 7ni'a sonta hampriho. **16** Hagi 7ni'a mani fruhu knama Sabatima vagamaretesigeta, 50'a kna maniteta, Ra Anumzamofontera ru kasefa witi ofa hugahaze. **17** Hagi eri veravema hu ofama hu'zana, tare bretia erino eno tare kilo kna'amo'ma hu'nesiama'a flauara erita ana flauapina zisti anteteta, ana bretia tro hiho. E'i ese ne'zama hozafima nenama hania ne'zamofo ofa Ra Anumzamofontega hugahaze. **18** Hagi ana bretinema ofama hanazana, mago kafu huno afuhe afahe osu'nesia 7ni'a ve sipisipi anentataminki, bulimakao afu kevufinti mago ve bulimakao afuhe afahe osu'nesiane, tare ra ve sipisipi afutre afuhe afahe osu'nesia avreta Ra Anumzamo'narera kresramna viho. Hagi witi ofane, waini ofa krenkeno knare mana vanige'na nentahina antahi musena hugahue. **19** Hagi mago ve meme afura kumite ofa kresramna nevuta, tare ve sipisipi afutrena mago kafu hu'nesa'a zanavreta arimpa fru ofa hiho. **20** Hagi Pristi vahe'mo'a bretine ana tare sipisipia Ra

Anumzamo'nare eri verave hu ofane, ese ne'za rgamofo ofa eri verave hutena, e'i ana ne'zamo'a Ra Anumzamonarera ruotage hu'neankiza pristi vahe'mo'zage negahaze. **21** Hagi ana knarera maka eri'zana atreta omeri atru huta monora hugahaze. Ana knamo'a mevava tra ke me'nena henkama fore hu anante anante hu'zama vanaza vahe'mo'za avaririgahaze. **22** Hagi hozatamifinti ese ne'zama nehamaresuta, agentegama mesiama'a atrenkeno nemen, evuramisiama'a zo-ogiho. Ana hu'nenage'za zamunte omane vahe'ene rurega vahe'ma enemaniza vahe'mo'za ome zogih. Nagra Ra Anumzana tamagri Anumzamo'na nehue. **23** Mago'ane Ra Anumzamo'a Mosesena asmino, **24** Israeli vahera zamasamige'za 7ni ikamofona ese knarera manigasa hiho. Ana knarera ranknatamigi ufennereta atru huta monora hiho. **25** Hagi mago vahe'mo'a ana knarera eri'zana e'orino. Hianagi ana knarera tevefima kre ofa eri'za Ra Anumzamo'nare eme kresramna viho. **26** Ra Anumzamo'a Mosesena amanage huno asmi'ne, **27** 7ni ikamofona 10ni kna fatgorera kumi'mofo nonama hu ofa hugahaze. Ana knarera ne'zana a'o nehutma, eritru huta monora nehuta tevefima kre ofa Ra Anumzamo'nare hugahaze. **28** Hagi ana kna zupa mago vahe'mo'a eri'zana e'origahie, na'ankure Ra Anumzana tamagri Anumzamo'nare kumimofo nonama huno apaseramante ofa hugahaze. Ana hanage'na kumitamia atrezmantegahue. **29** Hagi ana knare'ma ne'zama nesaza vahera vahe'niafintira zamahe anati atregahue. **30** Iza'o e'i ana knare'ma eri'zama erisia vahera, Nagra vahe'niafintira ahe frigahue. **31** Hagi ana knarera mago eri'zana e'oritfa hugahaze. Ama tra kemo'a menine henkanema fore hu anante anante hu'zama esaza vahetera meno nevanige'za avaririgahaze. **32** Hagi anankna mani fruhu kna Sabatigita, mani fru hutma

nemanitma, ana ikamofona 9ni zupa kinaga ne'zana a'o hutma
mani'nenko vuno 10ni knamofona kinaga uhanatino. **33**
Mago'ene Ra Anumzamo'a amanage huno Mosesena asmi'ne,
34 Israeli vahera zamasamige'za, 7ni ikamofona 15tini knazupa
fugagi noma kiza maniza e'naza zamofo ne'zana kre'za nene'za,
7ni'a knamofo agu'afi Ra Anumzamo'na antahi namigahaze. **35**
Hagi ese kna zupa ruotage hu'nea knagita eri'zana e'orita eta
emeritru huta monora hugahaze. **36** Hagi ana 7ni'a knafina
tevefi kre fanene hu ofa Ra Anumzamo'narera hoho. Hagi 8
knazupa eri'zana atreta eme atru hutma monora hunenanteta,
tevefi kre fanene hu ofa Ra Anumzamo'nare hugahaze. **37** E'i
ana kna ruotage hu'ne huno Ra Anumzamo'a huhampri'nea
knagita, eme atru huta monora hunenteta mago mago knama
huhamprinte'nenia knarera kre fanane hu ofane, witi ofane,
kresramna vu ofane, waini ofa Ra Anumzamofontega hugahaze.
38 Hagi emeritru huta mono'ma hu knaramina amage'ma
nente'nuta, mani fru hu kna Sabatigura tamagesa nentahita,
muse'zana erita ne-eta, huvempa hu ofa nehuta, tamagra'a
tamavesite'ma hu ofanena Ra Anumzamo'narera hunantegahaze.
39 Hagi ne'zama eri tru huteta ana knamofo amefi'a, 7ni ikamofo
15ni knazupa 7ni'a knafi ne'zana kreta neneta monora Ra
Anumzamofona hunteta musena huntaho. Hanki ese knazupane,
8ti knanena manifru hu kna me'ne. **40** Hagi ese kna zupa muri
zafa azankunaki, tofe ani'nagi, ani'na kuronkuroma hu zafa
azankunaki, ankre huta e'nerita, amiramira huta Ra Anumzana
tamagri Anumzamofona 7ni'a zagegnafina musena hunanteho.
41 Hagi maka kafufina 7ni ikampi 7ni'a zagegnafi ne'zana
neneta musena hugahaze. Ama anahu avu'avazamo'a menina
me'nena henkama fore'ma hu anante anante'ma hu'zama vanaza

vahe'mo'za avririgahaze. 42 Hagi 7ni'a knamofo agu'afina Israeli
vahe'mota fugagi noma ki'nesaza nompi manigahaze. 43 E'i
anazama huterema nehanage'za henkama fore'ma hunante
anante'ma hu'zama vanaza vahe'mo'za nege'za, Nagrama
Isipiti'ma tamagehe'ima zamavare'na ne-eoge'zama fugagi'noma
ki'zama maniza e'naza zanku antahigahaze. Nagra Ra Anumzana
tamagri Anumzamo'na nehue. 44 Hanki Mose'se'a Israeli vahera
Ra Anumzamo'ma ne'za neneta mono hunanteta muse hutere
hugahazema hu'nea knaramina eriama huno zamasami'ne.

24 Ra Anumzamo'a amanage huno Mosesena asmi'ne, 2
Israeli vahera zmasamige'za agruma huno'ma knare'ma hu'nesia
olivi masavena eri'za esagenka, lamufina tagintenka rekru
huntegeno tavi'mo'a seli nompina asura osuno tevava hino.
3 Atruhu seli mono nompima hunaragi tavravemofo avuga,
ruotage hu'nefina Aroni'a tavima taginte zantamina eri ante fatgo
nehuno, kinaga tavira tagintenko asu osuno Ra Anumzamofo
avurera me'neno vuno kotugahie. Hagi ama anazamo'a mago
kasege me'nena tamagehezama fore hu anante anante'ma
hanaza vahe'mo'za amage antegahaze. 4 Hagi goliretike'ma
tro'ma hu'naza tavi rekruhunte azotarera, tavira me'nena Aroni'a
miko zupa ana tavimofo osa'a renkanufeno erise hugahie. 5
Hagi kaneno eri osi hanigeno fuzafupenenia flaua erinka 12fu'a
breti trohuo. Hagi tare kilo eri fako hutere hunka, mago mago
bretia trohuo. 6 Hagi ana bretia refako hunka golireti'ma tro'ma
hu'naza itama Ra Anumzamofo avugama me'nere tare isare
6si'a antetere huo. 7 Hagi tare isare'ma refko huta antesaza
bretire frenkinsensi mnanentake zana antekeno bretimofo nona
erinigeta Ra Anumzamofo ofa tevefi kre mna viho. 8 Hagi
mika mani fruhu Sabati knarera pristi vahe'mo'a bretia erino,

Ra Anumzamo'na navuga eme antetere hugahie. Hagi ama ana avu'avazamo'a, huhagerafi tra ke me'nena avaririgahaze.

9 Hagi ana ne'zana Aronine agripinti'ma fore hu'zama esaza naga'mokizmi ne'zankiza, ruotage'ma hu'nefinka negahaze.

Na'ankure ana ne'zana Ra Anumzamofonte ofa hazageno ruotage hu'ne. **10** Mago nera nerera'a Israeli a' manigeno, nef'a a Isipi ne' mani'ne. Hagi ana ne'mo'a Israeli vahe kumapi mago Israeli ne'ene hara hu'na'e. **11** Ana a'mofo agi'a Selomiti'e. Selomiti'a Dibri mofakino Dani nagapintire. Hagi ana Israeli a'mofo mofavremo'a Ra Anumzamofo agi huhaviza nehuno, Ra Anumzamofo agifi sifna ke huntege'za Mosesente avre'za vu'naze. **12** Hagi ana nera avre'za kina nompi ome ante'ne'za, Ra Anumzamo'ma kema Mosesema asaminigu avega ante'za mani'naze. **13** Anante Ra Anumzamo'a amanage huno Mosesena asami'ne, **14** nagima huhavizama hunante'nea nera kumamofo agu'afintira avrenka fegi'a vugeno, huhavizama nehanige'zama antahi'nesaza vahe'mo'za zmazana anunte antetesageno, miko vahe'mo'za have knonu ahe friho. **15** Hagi Israeli vahera zamasamio, iza'o Anumzamo'nama huhavizama hunantesimo'a, agra'a knazama'a erigahie. **16** Hagi iza'o Ra Anumzamo'na nagima huhavizama hanimofona ahe friho. Maka Israeli vahe'mo'zo eman'inenaza vahe'mo'zama huhavizama hanazana vahera havenknonu zamahe frigahaze. **17** Hagi vahe'ma ahe frisia vahera ahe friho. **18** Hagi mago'mo'ma rumofo zagagafama ahe frisiana, ana ne'mo'a, anama ahefrisia zagagafa nona huno agra'a zagagafa avremigahie. **19** Hagi iza'o tava'oma'are'ma nemanismofoma ina avufgarero kuzafa ahesigeno'a, ana zanke huta agri'enena ana avufgarera ahegahaze. **20** Hagi mago vahe zaferinama ruhantagisimofona, ana zanke huta agrira

zaferina'a ruhantagiho. Avuma ruproma hina, ana zanke huta avu rupro hiho. Ave'ma rutafrina, agri'enena ana zanke huta ave rutafriho. **21** Hagi iza'o mago vahe zagagafama ahesimo'a, nona huno mago avaremino. Hianagi vahe'ma ahe frisimofona, ahe friho. **22** Hagi ruregati'ma tamagranema emani'nesaza vahe'ene Israeli vahe'mo'zanena ama ana kasegea avaririho. Nagra Ra Anumzana tamagri Anumzamo'na nehue. **23** Hagi Ra Anumzamo'ma hu'nea kante anteno Mosese'a Israeli vahera huzmanteg'eza, Ra Anumzama huhavizama huntea nera ome avre'za kumamofo fegia havenknonu ome ahe fri'naze.

25 Ra Anumzamo'a Sainai agonare Mosesena asamino, anage hu'ne, **2** Israeli vahera amanage hunka zamasamio, Nagrama tamisua mopafima ufresuta 7ni kafurera atrenkeno mopamo'a manigasa hinketa, magozane huta mopafina onkrinkeno mopamo'a Ra Anumzamofo Sabati'e huno mane fru huno mago kafu meno. **3** Hagi 6si'a kafufina mopatamifina avimza neseta, waini azankunara akafrita erise nehuta, hoza hamaregahaze. **4** Hianagi 7ni kafua Sabati kafugino mopamo'a atrenkeno mane fruhu huno Ra Anumzamo'hare meno. Hagi ana kafufina hoza e'orige, waini azankunara akafrita eri fatgoa osugahaze. **5** Hagi ana kafufima agra'ama hageno raga'ama ahe'nesia witia akafrita nompina onteta, azanku'nama akafrita erise'ma osu'nesaza wainia tagita waini tina tro huta onteho. Hagi ana kafua mani fru hu kafugino, atrenkeno mopamo'a fru huno amne meno. **6** Hianagi tamagranate ve kazokzo eri'za vahe'ene, a' kazokzo eri'za vahe'ene, zagore'ma eri'zama erinermantesaza vahe'ene, ruregati vahe'ma tamagranema nemanisia vahe'mo'zanena amne anampintira eri'za negahaze. **7** Anahukna hu'za maka kegavama nehaza zagagafatamimo'zane, afi zagagafamo'zanena anampinti

ne'zana negahaze. **8** Hagi 7ni'a zupa 7ni'a kafu'a hamprinkeno ana maka kafumo'a 49'a kafu hino. **9** Hagi ana kafumofona 7ni ikamofo 10ni zupa, kumi'mofo nona huno apasezmane knagita mememofo pazivete ufe erita, ufenā omereta mopatamifina viho. **10** Hagi 50'a kafuma hanigeta e'i ana kafumo'a ruotage hu'neanki, huama huta eri'za vahera zamatrese'za fru hu'za nagazimirega vugahaze. Hagi mikamota mopatamirega vugahaze. **11** Hagi 50ma hania kafua eri'nesaza zama eteno ami kafugita, hoza ontege agra'ama hagesia witia akafrita eri ontege, waini azankuna'a akafrita erise osu'nesaza waniretira raga'a tagita waini tina trora huontegahaze. **12** Na'ankure e'i eri'nesaza zama etenoma omi ami hu kafugino, tamagritera ruotage hugahiankita ana hozafintira ne'zanke eritma negahaze. **13** Hagi eri'nesaza zama eteno'ma ami kafuma hanigeno'a, miko vahe'mo'a mopa agafarega miko zama'ama me'nerega vugahie. **14** Hagi mopatamima zagore atrazage'za mizase'nenaza vahero, mopazmima zamagripinti mizase'nesaza vahera rezmatga huta mopazmia eri savarira osiho. **15** Hagi tamagrama mopama mago'amokizmire'ma atrenesuta, nama'a kafu mani'nageno vuno mani fruhu kafurera uhanatine, ana kafu'amofo avamente zagoa mizana sentegahaze. **16** Hagi rama'a kafuma ana mopafima manitesageno eri'nesazazama eteno ami kafuma ena, zagoa eri antesga huta mizasegahaze. Hagi ana mopafima osi'a kafuma mani'tesageno eri'nesaza zama eteno ami kafuma ena, anteramita osi'a zago mizasegahaze. Na'ankure ne'zama ana mopafinti'ma erifore'ma hu'nesaza avamente mizasegahaze. **17** Mago'mofoma orevatage arevatage huta nanazama eri avu'avara zana osiho. Hagi atrenkeno Anumzamo'na kore'ma hunante zamo tamagu'afina meno. Hagi Nagra Ra Anumzana

tamagri Anumzamo'ha nehue. **18** Hagi Nagri tra kene kasegeni'a avaririsuta, knare huta ama mopafina nemanisageno, **19** ana mopafina ne'zana fore hanigeta neramamu nehuta hazenkea e'ori so'e hutma manigahaze. **20** Hianagi mani fruhu 7ni kafure'ma, hozama erita ontege, ne'zama eri atruma osanuta, na'a negahune? huta antahintahi hakarea osiho. **21** Hagi 6si kafufina Nagra asomu ha'nenkeno, 3'a kafufima ne'naza avamente ne'zamo'a amporegahie. **22** Hagi 8ti kafufima agafa huta hozama nentesuta, ko'ma 6si kafufima hamarente'naza ne'za me'nena nenesageno, 9ni kafufina ne'zamo'a nenahinketa vasagegahaze. **23** Hagi mopa zagrera erivaga rehogura otreho, na'ankure mopa Nagri mopa me'negeta, tamagra rurega vahemaniakna huta mani'naze. **24** Hagi ana mopama miza hanazegu'ma zagore'ma atresageno'a, ana mopamofo nafa'amo mizana hugahie. **25** Hagi mago Israeli vahem'o'ma amunte'ma omanenigeno mopa'ama zagore'ma atre'nesige'za, mizama hu'enageta, ana ne'mofa naga'afinti ana mopa ete mizasegahie. **26** Hagi naga'afinti'ma mago'mo'ma mizaseno ana mopama erigama osanigeno'a, me'nenkeno zagoa eritru huteno agra'a mizasegahie. **27** Hagi zagoma keno erifore huteno mizamasenaku'ma hanuno'a, nama'a kafufima ana mopafina hoza anteno ne'ne, hamprino eri fatgo huteno, hozama ante'nesia kafu'are mizasenenteno ete mopa erigahie. **28** Hianagi mopa nefam'a zagore'ma atre'nesia mopa'ama erinaku'ma hanianagi zago'ama omanesigeno'a, avega anteno mani'nenkeno eri'nesia zama eteno ami kafuma esigeno'a, ana ne'mofa azampintira amne mopa'ama mizama seneniamaa nemino erigahie. **29** Hagi mago ne'mo'ma kegina hugagi'nenia rankumapima me'nenia noma'ama zagore'ma atresigeno ru ne'mo'ma eri'nesigeno'a, ete

ana noma'a erinaku'ma hanuno'a, mago kafufinke mizasenenteno
ana nona erigahie. **30** Hianagi ana noma mago kafufima
mizase vaga'oresigeno'a, eri'nesia zama ami kafuma esigeno'a,
ana nomofo nef'a, ana nona e'origahie. **31** Hagi kegina
osu kumapima me'nenia nona mopama hu'nazankna hu'za
hugahazankita, zagoreti amne mizasege, eri'nesiazama ete
ami kafuma esigeta, amne ana nomofo nef'a erigahie. **32**
Hagi Livae naga'mofo rankumapima mago Livae ne'mo'ma
noma'ama zagore'ma atresigeno mizama se'nesage'za, agra
amne inaknarero ete'no noma'a mizaseno erigahie. **33** Hagi Livae
naga'mo'za nozamima zagore'ma atre'nesageno rumo'zama
mizasenenage'noma, eri'nesiazama eteno ami kafuma esige'za,
amanne nozmia erigahaze. Na'ankure zamagra mago'zana
onte'nazanki nonke'za ante'haze. **34** Hianagi Livae naga'mo'zama
afuzagama kegavama nehaza mopama kuma tavaonte'ma
me'nesige'za zagorera otreho, e'i ana mopa zamagri'a mopa
megahie. **35** Hagi Israeli vahepinti'ma mago'mo'ma amunte'ma
omanesigeno agra'ama aza huga'ma osanigeta, ruregati vahe'ma
mopatamifima emani'negeta azama nehzaza huta azahinkeno,
tamagranena manino. **36** Hagi mago'azama zagoretima
mizasenaku'ma hanigenka, Anumzamofo korozamo kagu'afi
me'enkenka, mago'a rukamrenka ra zago agia aheonto. Ana
hinkeno tamagrane ana vahe'mo'za manigahaze. **37** Hagi
zagoma amisunka, anante ante aguheno namisigure hunka
omige, ne'zama amisunka, ne'zama ante aguheno namisigure
hunka omio. **38** Nagra Ra Anumzana tamagri Anumzane,
Isipiti'ma tamavre'na e'na Kene ni mopama tami'noana, tamagri
Anumza mani'naku tamavre'na e'noe. **39** Hagi Israeli nagapinti
magotamimo'ma agra'a aza huga osuno, agra avufgama

zagore'ma atresigenka mizasenunka, kazokzo eri'za vaheknara hunka kva huonto. **40** Hagi agrira zagore'ma zamavrazage'za eri'za erige, ruregati vahe'ma emani'ne'za eri'zama e'nerizankna huno mani'ne'nigeno, eri'nea zama eteno nemino musenkasema hu kafurera uhanatigahie. **41** Hagi ana kafurera agri'ene mofavre'araminenam zamatrenke'za nagazmima mani'nare mopa agafare viho. **42** Na'ankure Israeli vahera Nagri'a eri'za vahe Isipitira tamavre'na e'noankita zagrora zmatrenage'za kazokzo eri'za vahera ozmavregosaze. **43** Hagi zamage fenkamu atreta zamazeri havizana osiho. Hu'neanagi Ra Anumzamofonku kore huntegahaze. **44** Kazokzo eri'za veo, kazokzo eri'za a'ma avre'sazana ru vahe'ma tava'ontamire'ma mani'nesaza kumapintike zamavareho. **45** Hagi rurega vahe'ma tamagranema enemani'naza vahepinti enena amne zamavaresage'za tamagri'za se'za manigahaze. **46** Hagi frisage'za ana kazokzo eri'za vahera mofavretamimo'za zamazeri santiharesageno tamagri eri'za vaher segahaze. Hianagi Israeli vahera anara huta kazokzo eri'za vahera ozamavaregahaze. **47** Hagi Israeli vahe'ma zamunte omanesige'za, rurega vahe'ma tamagrane emani'nenaza vahetema zamagra zamavufagama zagore'ma atresageta, **48** ete amne naga'amo'za mizaseza ana nera avregahaze. Hagi afu agana'o, **49** nenogo'o, nefo'amo'o korama'amo'a ana nera mizasegahaze. Hagi ana ne'mo'ma agra'ama mizasega hanuno'a, amne mizasegahie. **50** Agrane mizamase'nea ne-enena eri'zama erisia kafu'a hamprike nevikenno eri'neazama eteno nemino musenkasema hu kafure uhanatino. Hagi anama mani'nesia kafumofo avamente erinte'za mizama'a keho. Hagi ana knama refko huno keteno, mizamasentesiana zagore'ma hige'za vahe'mo'za eri'zama erige'zama mizama

senezmantazankna kante miza sentegahie. **51** Hagi eri'nesiazama etenoma ami kafuma zazate'ma me'nenko'a, ana vahe'mo'a kva'amofona agra'a avufgarera rama'a zago miza sentegahie. **52** Hagi eri'nea zama eteno ami kafumo'ma erava'o hunenkeno'a, ana avamente osi'a zago mizasegahie. **53** Hagi emani vahe'mofo eri'za vahe'ma mani'nenko'a, kafugu kafugu'ma zagore'ma avrazageno eri'zama erige'zama kegavama hunentazankna hu'za kegava hunteho. Hagi atrenke'za ana vahe'mo'za mopatamifina kazokzo eri'za vahe'ma zamazeri haviza hazankna hu'za kegava huozmanteho. **54** Hagi ana ne'mo'ma agra'ama mizasegama osanigeno eri'nea zama eteno nemino musenkase hu kafuma esigeno'a, ana ne'ene mofavre'zaga'anena zamatresige'za fru hu'za yugahaze. **55** Na'ankure Israeli vahe'mo'za Nagri eri'za vahe mani'nazage'na, zamavare'na Isipitira e'noe. Nagra Ra Anumzana, tamagri Anumzane.

26 Mago kaza osu anumzantero, zafa antreta mago anumzana trora huontegge, zaza havea retrurrente'neta monora huntege, havea antreta havi anumzamofo amema'a tro hunte'neta monora huonteho. Nagrake Ra Anumzana tamagri Anumzana mani'noe. **2** Mani fruhu knani'a Sabatia kegava huta manifru nehuta, mono noni'a kegava hiho. Nagra Ra Anumzamona nehue. **3** Tamagrama tra keni'ane kasegeni'ama kegava hu'neta nevaririta agorga'ama manisazana, **4** Nagra kora atre'nugeno neranigeno, mopamo'a ne'zana renentesigeno, hozafi zafamo'za raga'a rentegahaze. **5** Hagi witia vasageta nevanageno wainima tagi kna esigeta, wainia tagita nevanageno, hozama ante kna e'nigeta, miko ne'zana neramu nehuta mopatamifina knare huta manigahaze. **6** Hagi Nagra tamagrira tamarimpa fru tami'nena, masenuta mago vahekura korora

osugahaze. Mopatamifintira afi ha' zagagafa ahenatinetre'na, ha'
vahetamimo'za tamahe zankura kegava huramantegahue. 7
Hianagi ha' vahetamima ha'ma huzmantesazana, zamarotago
huta zamahe frigahaze. 8 Hagi 5fu'a vahe'mota 100'a ha' vahera
zamarotago hanage'za fresageno, 100'a vahe'mota 10 tauseni'a
ha' vahetamina zamarotago huta kazinteti zamahegahaze. 9
Nagra tamagrira navesineramante'na tamazeri hakare ha'nena
rama'a vahe fore nehanagena tamagranema huhagerafi
huvempa kema hu'noa keni'amo'a nena raga regahie. 10
Hagi ko kafufima eritruma hu'naza ne'zana nenesageno,
kasefa kafufina ne'zamo'a aviten, ko kafufima eritru hu'nenaza
ne'zana eritregahaze. 11 Nagra tamagrane nemanina, namefira
huoramigahue. 12 Nagra tamagrane vano nehu'na, tamagri
Anumza mani'nesugeta, tamagra Nagri vahe manigahze. 13
Nagra Ra Anumzana, tamagri Anumzamo'na lsipiti'ma tamavre'na
ogeta, mago'ane kazokzo eri'za vahera omani'naze. Hagi
agarenamare zafama tamanankempi anakinte'nazageta kazokzo
eri'zama e'nerizage'na, Nagra ana zafa eri atrogeta fru huta
e'naze. 14 Hianagi keni'a antahi onamige, kasegeni'amofo
amage ontege, 15 tra keni'a ovaririta, huhagerafino'a huvempa
ke'ma rutagresazana, 16 Nagra amanahu knaza tamigahue.
Ame hu'na ranknaza atre'na, tamazeri kore nehu'na, onkanamre
krine, avufga amuho krine atranena tamavurga azeri asu
nehina, tamatafi manime nevuta ufrigahaze. Hagi hozama
antesazana amne zankna hugahie. Na'ankure ha' vahetamimo'za
hamare'za negahaze. 17 Nagra namage'na hurami'nena
ha' vahetamimo'za hara huramagateregahaze. Tamavesrama
hunermantaza vahe'mo'za kegava hunermante'na, mago
vahe'mo tamarotago osu'nesianagi, tamagra kore fregahaze.

18 Hagi ana knazama tamisugetama ontahitama mago'anema
ana kumima huta vanazana, nona'a 7ni'a zupa agaterena
knazana tamigahue. **19** Nagra tamavufga rama nehaza
tamavutamavara tamahe pasaru nehu'na, mona azeri'nugeno
aenigna huno hanavetino kora norina, mopamo'a hanavetino
bronsigna hugahie. **20** Hanavetamimo'a amane zanka hugahie.
Na'ankure mopatamimo'a ne'zana ahe ontesigeno, zafamo'a
raga reontegahie. **21** Hagi ana knazama esigeta mago'anema
ana keni'ama rutagresazana, Nagra 7ni'a zupa agatere'na
kumi'ma hu'nesaza avamente knazana tamigahue. **22** Nagra afi
zagagafa huzmanta'nena mofavretamia zamahe nefrisageno,
afu zagatamia zamahe nefrina, tamazeri atupa hanugeta,
osia vahe manisageno, kampina vahe'mo'za vano osugahaze.
23 Hagi ana'ma hanua zama rempi hutama ontahita, ana
zanku'ma tamarimpama aheta keni'a hantagita vanazana, **24**
Nagra kumi'ma hanarerera narimpa ahe'na hara reramante'na,
kumi'ma hanaza nona'a knazana 7ni'a zupa agatere'na
tamigahue. **25** Ana nehu'na ha' vahetami huzamanta'nena
huhagerafi huvempa ke'ma hantagi'naza zantera ha' eme
huramantegahaze. Hagi fretama rankumapima ufresazana,
kri atra'nena anampinka tamahe nefrina, ha' vahetamimoza
hara hurmante'za hara huramagateregahaze. **26** Hagi ne'zama
e'neri'za kankamuna eri havizama ha'nena avenifima kresaza
bretia 10'a naga'mo'za nesageno tamura osina tamagaku
hugahaze. **27** Hagi ana'ma huramantesugeta, tamarimpa
ahenanteta, kenia ontahi ana zanke'ma huta vanazana, **28**
Nagra tusi'a narimpa aheneramante'na, kumi'ma hu'nesaza
avamente, agatere'na 7ni'a zupa knazana tamigahue. **29** Tamage
ana knafina, ne'zankura atupa nehuta ne' mofavre tami'ne

mofa'netaminena zamaheta negahaze. **30** Hagi agonaregama
havi anumzante'ma mono'ma hunentaza kumatamia Nagra eri
haviza nehu'na, mnanentake zama kre mnama kaza osu havi
anumzante'ma nevaza ita tamia tagnavazi netre'na, kaza osu
havi anumzana, eri haviza huntene'na ana agofetu tamahe'na
fri tamavufga eri agofetu agofetu hanugeno moriri huno
marerigahie. Na'ankure e'inahu tamavutavama hazazankura
nagote'zmante'na namefi huramigahue. **31** Nagra rankumatamia
eri haviza nehu'na, mono nontaminena eri haviza hugahie.
Hagi mnanentake zama kre mnama vnaza ofa, Nagra antahi
oramigahue. **32** Hagi nagra mopatamia eri haviza ha'nena,
mopatamima erisaza vahe'mo'za anazana nege'za, antri hu'za
zmagogogu hugahaze. **33** Nagra ha' vahetamia hanuge'za
tamahe savri hanageta, ru vahe kumapi savri huta umanisageno,
kumatamimo'a amne zankna hugahie. **34** Nagra tamazeri
panini hanugeta ru vahe kumapi umani'nenageno, Sabati
kafurema mopatamimofoma atrazage'noma mani fruma osu'nea
nona'a anantega umani'nenageno mopamo'a mani fru hugahie.
35 Hagi ana mopafima mani'neta atrageno'ma mopamo'ma
mani fruma osu'nea zankura mopamo'ma haviza huno mesia
knafina, mopamo'a fru huno megahie. **36** Hagi ana vahe
mopafima umanisamo'za tamagrira tamazeri kore ha'nena,
vahe'mo tamarotago osanianagi, zafaninamo tamage'ma hania
zankura kore fregahaze. **37** Ha vahe'mo'za zamavaririzage'za
ha'pima oretufe aretufema hu'za frazaza huta vahe'mo'za
ontamavariri nazanagi ozeri tanafa azeri tanafa huta fregahaze.
Hagi hanavetamia omnena oti hanavetineta ha' vahetamia hara
huozmantegahaze. **38** Hianagi ru vahe mopafi frisage'za, ha'
vahetamimofo mopafi aseramantegahaze. **39** Hagi manisamota

amanе zankna huta ha' vahetamimofo mopafi haviza hugahaze.
Na'ankure tamagra'a kumiku'ene neramafa kumiku anara
hugahaze. **40** Ana'ma hutesu'za manisamo'za kumizmigu'ene
zamagehe'i kumiku'ma zamagesa nentahi'za ana zanku'ma
zamasuku nehu'za, huhavizama hunante'naza zanku'ma huama
hu'za zamasunku'ma hanage'na, **41** Narimpa eri haviza
hazazanku ha' vahetamimofo mopafina tamatrogeta umani'haze.
Hagi tamagra'ama anteramita ana zanku'ma tamagu'ama
rukrahe'ma huta nemanita, kumi'ma hu'naza zankuma nonama
hanazana, **42** Jekopune, Aisakine Abrahamunema huhagerafi
huvempа kema Nagrama huzmantе'noa nankegu nagesa
nentahi'na, mopama zamigahuema hu'noa zanku'enena nagesa
antahigahue. **43** Hagi Sabati kafurema manigasama osu'nea
zanku mopamo'ma amnema menoma vania knafina mopamo'a
fru huno me'nena, tamagra Nagri kema rutagrenaza zantera
vahe mopafina kna erigahaze. **44** Hagi ana huta ha'
vahetamimofo kumapina manigahazanagi, Nagra zamaretufe
otre'na, zamazeri havi zantafana osu'na, huhagerafi'noa keni'a
ruotagregosue. Na'ankure Nagra Ra Anumzana, zamagri Anumza
mani'noe. **45** Hagi ko'ma zamagehe'inema huhagerafinoa kegu
nagesa nentahina, zamagri Anumza mani'naku ru vahe'mo'za
negazage'na Isipitira zamavare'na e'noe. Nagra Ra Anumza
mani'noe. **46** Ama tra kene kasegenenе Ra Anumzamo Sainai
agonafi Mosese asamigeno Israeli vahera zmasaminia naneke.

27 Mago'ane Ra Anumzamo'a Mosesena amanage huno
asami'ne, **2** Israeli vahera zamasamige'za Anumzamofoma
huvempа hu'za ami'nesaza vahe'ma mizama senaku'ma hanu'za,
vahe'mofo avamente nege'za mizasegahaze. **3** Mono nompima
erinte'zama refkoma nehaza kante anteta, kafuzamimo'ma

20tireti'ma vuno, 60re'ma ometre'nenia veneneramintera 50'a silva zago mizaseho. 4 Hagi kafuzmimo'ma 20reti'ma vuno 60re'ma vu'nesia a'mofara, 30'a silva zagoreti mizasegahaze. 5 Hagi 5fu'a kafuretimu vuno 20'a kafuma hu'nenia venene'a, 20'a silva zago mizase nezamanteta, 5fu'a kafuretimu vuno 20'a kafuma hu'nenia mofane zagarera 10ni'a silva zagoreti mizasegahaze. 6 Hagi mago ikama hu'neniretimu vuno 5fu'a kafuma hu'nenia ne mofavrerera, 5'a silva zago mizaneseta, mago ikama hu'neniretimu vuno 5fu'a kafuma hu'nenia mofanerera 3'a silva zago mizasegahaze. 7 Hagi 6'a kafuma agaterenenia venenerera, 15tini'a silva zago miza nehuta, 60'a kafuma agatere'nenia anerera 10ni'a silva zago mizasegahaze. 8 Hagi zamunte omane vahe'mo'zama huvempa hu'nenuzama zamagrama mizasega avamente zagoma e'ori'nesu'za, pristi vahete vanageno pristi vahe'mo zamagrama mizamasega avamente zago agi ahezamantesige'za mizasegahaze. 9 Hagi mago'mo'ma agruma hu'nenia zagagafafinti'ma Ra Anumzamonare'ma huvempa huno ofama hu'naku'ma hania zagagafamo'a ruotage hu'ne. 10 Hagi ana ruotage'ma hu'nea zagagafa haviza hu'neanki, knare hu'neanki nehuta ru zagagafa avreonteho. Hianagi anama hanageno'a, ana tarega zagagafamokea ruotage hugaha'e. 11 Hianagi agruma osu'nenia zagagafama Ra Anumzamona'ma antahimina e'orisua ofama huvempama hanuta, ana zagagafa erita pristi vahete viho. 12 Ana hanage'za knare hu'neo, haviza hu'neo pristi vahe'mo'za refako hu'za nege'za, mizama'amo'a e'inahu avamente me'ne hu'za tamasamigahaze. 13 Hagi ana zagama ete nona huta miza huku'ma hanuta, pristi vahe'mo'ma tamasamisia mizante 5fu'a kevurera mago kevune ante agofetu hutma

mizana aseghahaze. **14** Hagi mago ne'mo'ma noma'ama ruotage hu'ne huno Ra Anumzamo'na nazampima ante'nigeno'a, pristi vahe'mo'zage nege'za knare hu'ne huge, haviza hu'ne hu'za miza agia ahentegahaze. **15** Hagi ana noma Ra Anumzamo'na nazampima antesia ne'mo'ma eteno mizama senaku hanuno'a, pristi vahe'mo'zama ahentesaza 5fu'a kevua ante'neno, mago kevunena ante agofetu huno mizasegahie. **16** Hagi mago'mo'ma mopa'ama Ra Anumzamo'na nami'nenia mopamofo mizama'amo'a, bali avimzama ana mopafima negria avimzama 100'a kiloma hu'enirera 50tia silva zago miza hutere hugahie. **17** Hagi erinesiazama eteno ami kafumofo agu'afima huvempa huno mopa'ama Ra Anumzamofoma amisiana, anama agima ahente'naza kante ana mopa miza hugahie. **18** Hianagi eri'nenia zama eteno ami kafumo'ma vagareno evanigeno'a, Nagri'ma nami'nenia mopamo'ma nana kafu agri'enena me'nenigeno eteno eri'nenia zama ami kafua egahie, ana avamente pristi vahe'mo'a refko huno miza agi erinteramino ahentegahie. **19** Hagi agrama ana mopa'ama eteno miza huku'ma hanuno'a, pristi vahe'mo'ma ahentesia mizantera 5fu'a zagofintira mago zago ante agofetu huno ana mizantera mizana asenigeno, ana mopamo'a eteno agri mopa megahie. **20** Hagi anama Ra Anumzamofo ami'nenia mopa'ama eteno mizama osu'neno, ru vahetema atrenigeno mizama hu'nena, eteno ana mopa'a mizana osugahie. **21** Hagi eri'nesia zama ami kafuma esigeno'a, ana mopamo'a ruotage huno Nagri'za segahie. E'igu ana mopamo'a pristi vahe mopa megahie. **22** Hagi mago vahe'mo'ma mizama hu'nesia mopama agri mopa omanene'nianagi, Ra Anumzamo'na namiku'ma hanige'za, **23** pristi vahe'mo'za refko hu'za kete'za, nama'a kafu me'nenigeno eri'nesia zama eteno

ami kafua egahie, miza agima ahentesia kante mizasenigeno,
ana zagomo'a ruotge huno Ra Anumzamo'na zago megahie.

24 Hagi eri'neniazama eteno ami kafuma esigeno'a, ana
mopamo'a, mopa agafa ne'mofo azampi eteno vugahie. 25
Hagi mika'a zamofo miza agima ahentesazana, mono nompima
refko hu'za mizama nesaza avamente fatgo hu'za mizana
hugahaze. 26 Mika'a zagagafa tamimofo agonesa anentara
Ra Anumzamo'na su'za me'ne. E'igu' agonesa bulimakao
anentaro, sipisipi anentara ko Nagri su'a me'neanki huhampri
onantegahaze. 27 Hianagi agruma osu'nesaza afuka'amofo
agonesa anentara pristi vahe'mo'ma ahentesia mizantera 5fu'a
zagofintira mago zago ante agofetu hunka, ana afura ete miza
segahane. Hagi kagrama miza osenankeno'a, ru vahe'mo ana
miza fatgore mizasegahie. 28 Hianagi vahero, zagagafao,
mopao, maka'zama Ra Anumzamona'ma huvempa hunka
nami'enana zana, zagoreti mizasenka e'orige, ete zagonera
atregera osugahane. Hagi ana mika'zama eri ruotage'ma hunka
huvempa hunana zamo'a, ruotage huno Nagrike'za megahie. 29
Mago vahe'ma Ra Anumzamo'ma ahe frihoma hu'nesia vahera,
ete mizaseta ovregahazanki ahe friho. 30 Hagi hoza tamifinti'ma
witio, zafa rgama tagita eri atruma hinkeno 10ni'a kevuma
huterema hina, 10ni kevua ruotage hu'negu Ra Anumzamo'na
namigahaze. 31 Hagi ama ana ne'zama ete kagrama miza
hunaku'ma hanunka, pristi vahe'mo'ma miza agima ahentesire
mizanesenka 5fu'a zagofintira mago zago ante agofetu hunka
miza hugahane. 32 Hagi bulimakao afu'ene, sipisipi afu'ene,
meme afu ka'ama nehampri' nankeno'ma 10nima huterema
hanimofona ruotage hu'negu, e'i Nagri su'za megahie. 33
Hagi haviza hu'ne knare hu'ne hunka ru su'zana nona hunka

avre onto. Hagi nonama hunka ru su'zama avrentesankeno'a,
ana taregamokea ruotage hugaha'ankinka, ete mizasenka
ovregahane. **34** Ra Anumzamo'a amana kasegene tra kenena
Mosese'ma Sainai agonafi mani'negeno amigeno erino Israeli
vahe'ma ome zmasami'hea naneke.

4 Mose

1 Israeli vahe'ma Isipitima atre'za Sainai ka'ma kopima eman'i nazageno, tare kafuma enevigeno 2 ikana ese kna zupa atruhu seli nompinti Ra Anumzamo'a anage huno Mosesena asami'ne, **2** Kagrane Aroni'enena maka Israeli vahe'mokizmi zamagi'a nagate nofite kognare huta maka venenemokizmi zamagi'a krente'o. **3** Hagi sondia vahe'ma fore huga vahe'ma 20'a kafureti mareri nagamuteno Israeli vahepima iza'o hate vuga hu'nesiana, kagrane Aroni'enena hamprita sondia kevu'zmire zamantetere huta krente'o. **4** Ana nehuta, mago mago naga nofipinti kvazmia huge'za tanaza hutere hiho. **5** Tanagrima tanaza hu'za eri'zama erisaza vahe'mokizmi zamagi'a ama'ne, Rubeni nagapintira, Sedeu nemofo Elizuri'e, **6** Simeon nagapintira, Zurisadai nemofo Selumieli'e, **7** Juda nagapintira, Aminadab nemofo Nasoni'e, **8** Isaka nagapintira, Zuari nemofo Netaneli'e, **9** Zebulun nagapintira, Helon nemofo Eliabu'e, **10** Josefe amohe'i Efraemi nagapintira, Amihud nemofo Elisama'e. Manase nagapintira Pedasuri nemofo Gamalieli'e, **11** Benjamen nagapintira, Gideoni nemofo Abidani'e. **12** Dani nagapintira, Amisadai nemofo Ahieza'e. **13** Aseli nagapintira, Okran nemofo Pagieli'e, **14** Gati nagapintira, Deuel nemofo Eleasafi'e. **15** Nafatali nagapintira, Enan nemofo Ahira'e. **16** Amama zamagima fore hu'nemo'za, naga'zmire kva hutere hu'naza vaheki'za, Israeli vahepi vugote'za kevu'zmire kegava hutere hu'haze. **17** Hige'ne Moseseka Aronikea Ra Anumzamo'ma zamagi ahe zanasmia kante anteke zamavare atru hu'na'e. **18** Hagi 2 ikamofona ese zage gnare kema hiazza hu'ne, maka vahera zamavare atru hu'na'e. Zamagehonte zamagehonte, nagate, famote zamagima metere hu'nere, 20'a kafureti mareri anagate'nea vahera, mago

mago vahe'mofo zamagi kre'ne eri fatgo hu'na'e. **19** Hagi Ra Anumzamo Mosesema asami'nea kante anteno Sainai ka'ma mopafi hamprino zamagi'a kre'ne. **20** Israeli agonesa mofavre Rubeni, ne' mofavre nagara agehontetima eno, nezmafante e'nea vahe zamagi'ane magoke magoke hate vuga hu'nea vahe'ma, kafu'zmimo 20reti mareri anagate'nea, vahe zamagi kre'ne. **21** Rubeni nagapintima venenema hamprino kre'nea vahera 46 tausen 500'a vahere. **22** Simeoni, ne'mofavre agehontetima eno, nezmafante e'nea vahe zamagi'ane magoke magoke hate vuga hu'nea vahe'ma, kafu'zmimo 20reti mareri anagate'nea, vahe zamagi kre'neana, **23** maka Simeon naga'ma hampri'nazana 59 tausen 300ti'e. **24** Gati ne'mofavrea agehontetima eno, nezmafante e'nea vahe zamagi'ane magoke magoke vahe'ma hate'ma vuga hu'nea vahe'ma, kafu'zmimo 20reti mareri anagate'nea, vahe zamagi kre'neana, **25** maka Gati naga'ma hampri'nazana 45tausen 650ti'e. **26** Juda ne'mofavrea agehontetima eno, nezmafante e'nea vahe zamagi'ane magoke magoke vahe'ma hate'ma vuga hu'nea vahe'ma, kafu'zmimo 20reti mareri anagate'nea, vahe zamagi kre'neana, **27** maka Juda naga'ma hampri'nazana 74 tausen 600ti'e. **28** Isakar ne'mofavre age'hontetima eno, nezmafante e'nea vahe zamagi'ane magoke magoke vahe'ma hate'ma vuga hu'nea vahe'ma, kafu'zmimo 20reti mareri anagate'nea, vahe zamagi kre'neana, **29** maka Isakar naga'ma hampri'nazana 54 tausen 400ti'e. **30** Zebuluni nemofavre nagama agehontetima eno, nezmafante e'nea vahe zamagi'ane magoke magoke hate vuga hu'nea vahe'ma, kafu'zmimo 20retima mareri anagate'nea, vahe zamagi kre'neana, **31** maka Zebuluni naga'ma hampri'nazana 57tausen 400ti'e. **32** Josefe ne'mofavre Efraemi naga'ma agehontetima eno,

nezmafante e'nea vahe zamagi'ane magoke magoke hate vuga
hu'nea vahe'ma, kafu'zmimo 20reti'ma mreri anagate'nea, vahe
zamagi kre'neana, **33** maka Efraemi naga'ma hampri'hazana
40tausen 500ti'e. **34** Josefe ne' mofavre Manase naga'ma
age'honteti'ma eno, nezmafante e'nea vahe zamagi'ane magoke
magoke hate vuga hu'nea vahe'ma, kafu'zmimo 20reti mareri
anagate'nea, vahe zamagi kre'neana, 32 tausen 200ti'e. **35**
Maka Manase naga'ma hampri'hazana 32 tausen 200ti'e. **36**
Benzameni naga'ma agehontetima eno, nezmafante e'nea
vahe zamagi'ane magoke magoke vahe'ma hate vuga hu'nea
vahe'ma, kafu'zmimo 20reti'ma mareri anagate'nea, vahe zamagi
kre'neana, **37** maka Benjamen naga'ma hampri'hazana 35tausen
400ti'e. **38** Dani nagama agehontetima eno, nezmafante e'nea
vahe zamagi'ane magoke magoke vahe'ma hate vuga hu'nea
vahe'ma, kafu'zmimo 20reti'ma mareri anagate'nea, vahe zamagi
kre'neana, **39** maka Dani naga'ma hampri'hazana 62tausen
700ti'e. **40** Aseli naga'ma age'hontetima eno, nezmafante e'nea
vahe zamagi'ane magoke magoke vahe'ma hate vuga hu'nea
vahe'ma, kafu'zmimo 20reti'ma mareri anagate'nea, vahe zamagi
kre'neana, **41** maka Aseli naga'ma hampri'hazana 41tausen
500ti'e. **42** Nafatali naga'ma agehontetima eno, nezmafante e'nea
vahe zamagi'ane magoke magoke vahe'ma hate vuga hu'nea
vahe'ma, kafu'zmimo 20reti'ma mareri anagate'nea, vahe zamagi
kre'neana, **43** maka Naftali naga'ma hampri'hazana 53 tausen
400ti'e. **44** Ama'i Moseseseke Aronikema Israeli venenene 12fu'a
naga nofimokizmi kva vahe'ene hamprike zamagi'a kre'na'e. **45**
Hige'za maka Israeli vahe'mo'za kognare, famote kafuzmimo
20reti mareri anagatre'nea vahe'ma hate vuga hu'naza Israeli
vahe zamagi kre fatgoma hu'nazana, **46** maka eri mago huno'ma

hampriana 603 tausen 550ti'e. 47 Livae nagara zamagehe'inteti
eno nezmafante'ma ehnati'neana zamagi'a onkre'naze. 48
Na'ankure Ra Anumzamo'a Mosesena amanage huno asami'ne,
49 Israeli vahe'mokizmi zamajima kresampina, Livae nagara
zamagi'a hamprinka anampina onkregahane. 50 Kagra Livae
nagara zamazeri otige'za noni'afi eri'za eneri'za, maka'za agu'afi
me'nea zane, eri'zama eri nenantaza zante kegava hih.
Seli mono nomofo (Tabernacle) agu'afi me'nea zana eri'za
vano nehu'za, kegava hugahaze. Ana seli noni'amofo tvaonte
nozmia ki'neza kva krigahaze. 51 Hanki kama vunakura, seli
noni'a Livae naga'moza tagna vaziza repsi hu'za, umanisarera
ete'za azeri otigahaze. Ana eri'zante huhampri onte'nesia
vahe'ma ana tvaonte'ma esazana zamahe fri'gahaze. 52 Israeli
ne'mofavre'moza kumama antesazana mago mago naga kevumo
agraru agraru kumara nenteno, sondia vahe'zmine, krauefa
nerfi'za manitere hugahaze. 53 Hanki Livae naga'moza seli
mono noni'amofona tavaontera kumara ante kagigahaze. Hagi
Israeli vahe'mo'za efresage'na nasivazi zmante'zanku, Livae
naga'moza seli mono noni'a vugote'za kegava krigahaze. 54
Israeli ne'mofavre'mo'za Ra Anumzamo Mosese asmia kante
ante'za, maka'moza zamagra ana hu'naze.

2 Ra Anumzamo'a Mosesene Aroninena anage huno
zanasami'ne, 2 Israeli vahe'mo'za nagate nagate rure rure hu'za
nona negi'za, nezmageho krauefa (flag) avame'za zamente
rentetere nehu'za, atrumahu Seli mono noni'amofona ante
ogantute'za seli no kumazmia antegahaze. 3 Hanki zage
hanati kaziga Juda naga kuma menigeno, sondia vahe'zmine
Juda ne'mofavre nagapinti Aminadab nemofo Nasoni kegava
huzamantegahie. 4 Hagi sondia kevu'ane, ana miko zamajima

kre tru'ma hu'nazana 74 tausen, 600'a vahere. **5** Agri asoparema kisazana Isaka agehe'ze, Isaka nagate'ma kegava hu'neana, Zuar nemofo Netanieli'e. **6** Hagi sondia kevu'ane, ana miko zamagima kre tru hu'nazana 54 tausen 400'a vahere. **7** Anantera Zebuluni agehe'ze, Zebuluni ne'mofavrefinti Heloni nemofo Eliabu kva mani'ne. **8** Hagi sondia vahe'ane, ana miko zamagima kre tru hu'nazana 57 tausen, 400'a vahere. **9** Juda nagapima agrane mani'nazana ana mika 186 tausen, 400'a sondia vahere. Kama vunaku'ma hnageno'a, zamagra vugota hugahaze. **10** Henkamu sauti kaziga Ruben naga'mo'za krauefazamia ante'za kumara ante'za manigahaze. Rubeni nagama kvama humzantesiana Sedeur nemofo Elizuri'e. **11** Hagi sondia vahe'ane ana miko zamagima kre tru hu'nazana 46 tausen, 500'a vahere. **12** Hanki asoparegama mani'nazana Simeon agehe'ze, Simeon naga'ma kegava humzantesiana, Surisadai nemofo Selumieli'e. **13** Hagi sondia kevu'ane ana miko zamagima kre tru hu'nazana 59 tausen 300'a vahere. **14** Anantera Gati agehe'ze, Gati nagama kegava humzantesiana, Deuel nemofo Eleasafi'e. **15** Hagi sondia kevu'ane ana miko zamagima kre tru hu'nazana 45 tausen, 650'a vahere. **16** Rubeni agorga kuma ante'za agrane mani'nazana ana maka'a 151 tausen, 450'a sondia vahere. Juda naga'mokizmi zamefi zamagra vugahaze. **17** Hanki Livae vahe'mo'za kuma ante'za mani'nare atruhu seli mono nona amu'nompi kofi'za vugahaze, kuma ante'za mani'naza avamente avamente nevu'za mago mago'mo'za kumazmimofo krauefa amefiga eri'za vutere hugahaze. **18** Zage fre kaziga Efraemi krauefane, sondia vahe'zmine, kuma megahie. Ana agu'afi Efraemi ne'mofavremo Amihuti nemofo Elisama kvazmia manigahie. **19** Hagi sondia kevu'ane ana miko zamagima kre tru

hu'nazana 40 tausen, 500'a vahere. **20** Efraemi naga asoparema kuma ante'sazana, Manase agehe'ze. Manase nagama kegava huzmantesiana, Pedasuri nemofo Gamalieli'e. **21** Hagi ana miko sondia vahe zamagima kre tru hu'nazana 32 tausen, 200'a vahere. **22** Anante'ma esnazana Benjamen agehe'ze, Benjamen nagama kegavama huzmantesiana, Gideoni nemofo Abidani'e. **23** Hagi ana miko sondia vahe zamagima kre tru hu'nazana 35tausen, 400'a vahere. **24** Hagi anante'ma esnazana Efraemi nagare. Hagi ana miko sondia vahe zamagima kre'nazana 108tausen, 100'a vahere. Ama ana naga'mo'za nampa tire kevu hu'za vugahaze. **25** Anagamu noti kazigama kumama ante'za krauefa zaminema manisazana, Dani naga sondia vahe'mo'za kumara ante'za manigahaze. Dani nagatema kegava haniana, Amisadai nemofo Ahieza kvazmia manigahie. **26** Hagi ana mika sondia vahe zamagima kre tru hu'nazana 62tausen, 700'a vahere. **27** Dani asopare kumama antesazana Aseli agehe'ze, Aseli nagama kegava huzmantesiana, Okran nemofo Pagieli'e. **28** Hagi sondia vahe ana miko zamagima kre tru hu'nazana 41 tausen, 500'a vahere. **29** Anante'ma esazana Naftali agehe'ze. Naftali nagama kegava huzmantesiana, Enan nemofo Ahira'e. **30** Hagi ana maka sondia vahe zamagima kre tru hu'nazana 53 tausen, 400'a vahere. **31** Dani naga'ma mani'neregama kumama ante'za mani'naza vahe'ma zamagima kre'neana, ana maka 157tausen, 600'a vahere. Zamagra atuparega henka krauefa zamine vugahaze. **32** Ama'i Israeli vahe'ma nagate nagate, kumate kumate eri magoma hu'za hampri'nazana, ana maka vahera 603 tausen, 550'a vahere. **33** Ana hianagi, Ra Anumzamo Mosesema asmi'nea kasegere amage ante'za, Livae nagara Israeli vahepin eri mago hu'za ohampri'naze. **34** Israeli

vahe'mo'za Ra Anumzamo Mosesema asmi'nea maka kasegere
amage ante'za, kevure kevure krauefana (flag) nezamageho
avame'za renente'za, seli nonkuma antetere hu'za nagate nagate
eri zogiza vutere hu'naze.

3 Ama'i Mosesene, Aronikizni naga'mokizmi naneke, Ra Anumzamo Sainai agonafi Mosese asamigeno krente'nea naneke. **2** Ama Aroni ne'mofavre'mokizmi zamagi'e, Agonesa'a Nadabuki, Abihuki, Eliesaki, Itamari'e. **3** Anantera Aroni ne'mofavre zamagi eri otage huno huhampri zamantege'za, Ra Anumzamofo avufi veamokizmire te vugote'za mani'ne'za pristi eri'za eri'naze. **4** Hianagi Nadabu'ene Abihuhea Ra Anumzamofo avuga agra ragisa teve i'o hu'nea teve hegare amiteke, Sainai hagage mopafi zanagra mofavrea onte'neke Ra Anumzamofo avuga fri'na'e. Hakeno Eliesa'ene Itamarikea, Aroni pristia mani'negene neznafa azahuke maka zupa pristi eri'zana eri'na'e.
5 Ra Anumzamo Mosesena amanage huno asami'ne, **6** Livae nagara zamavarenka pristi ne' Aroninte egofa huge'za, aza hu'za mono eri'zana eriho. **7** Zamagra eri'zama hantagi zami'nere Aroni eri'zane, veamokizmi eri'zane eneri'za, seli mono nomofo fegi'a eri'zanena erigahaze. **8** Seli mono nomofo agu'afima me'nea maka'zana kegava nehu'za, Israeli vahe'mokizmi eri'za eri nezmante'za, seli mono nompima hantagi zami'nea eri'zana erigahaze. **9** Hanki kgra Livae nagara Aronine amohe'ine zami vagarenka Israeli vahepintira zamige'za eri'zana eriho. **10** Hagi kgra Aronine ne'mofavre naga'anena huhampri zamantege'za pristi eri'zana eriho. Hagi huhampri onte'nesia vahe'ma seli mono nonte eravao hanazana zamahe frigahaze. **11** Ra Anumzamo mago'ene Mosesena anage huno asami'ne, **12** Menina ko, Nagra Israeli vahepinti Livae nagara agonesa ne'mofavre'gna

hu'na zamavarena Nagrarega zamantoge'za nagri vahe fatgo mani'naze. **13** Na'ankure maka'a pusa ne'mofavrea Nagri zane, Isipi mopafi pusa ne'mofavre zamahe fri'noa zupa, Nagra su'zane hu'na pusa ne'mofavre Israeli vahepi fore haniane, zagagafanena huhampri'noe. Maka Nagri zane, Nagra Ra Anumzamo'na nehue. **14** Anante Ra Anumzamo Sainai ka'ma mopafi Mosesena anage huno asami'ne, **15** Levai ne'mofavre nagara nagate famote, maka venene mago ikanteti marerinesima'a hamprinka zamagia krento. **16** Higeno Ra Anumzamo asmia kante anteno Mosese'a venene'a zamagia kreno eri fatgo hu'ne. **17** Ama'i Livae ne'mofavre naga zamagie, Gersoni'e, Kohati'e, Merari'e. **18** Ama'i Gersoni ne'mofavre naga nofipintira Libnike, Simeike, **19** Kohati ne'mofavre naga'nofipintira Amramu'e, Izhari'e, Hebron'i'e, Usiel'i'e. **20** Merari naga nofipintira Malike, Musike. Livae nofipinti fore hu'naza naga nofi mani'naze. **21** Hagi Gersonimpinti fore hu'naza nagara Libni naga'ene, Simei naga'enemo'za, zamagra Gersoni vahere hu'za mani'naze. **22** Makama hampri'nazana venenema, mago ikanteti mreri anagate'neana, maka seven tausen 500'a vene'ne. **23** Gersoni vahe'mo'za zamagra seli mono nomofo amefiga'a zage fre kaziga seli nonkumara ante'za manigahaze. **24** Hagi Gersoni naga'mokizmi kvazamia Laeli ne'mofo Eleasafi manigahie. **25** Hagi Gersoni ne'mofavremokizmi eri'za kankamuna amana hu'ne, seli nomofo agu'afine, seli noma refimate'zane, kafa zafare refite'nea tvaravene, kegava hu'neza erigahaze. **26** Vahe atru hu kumapi, meg'i'a ruvanre'naza tvaravene, kahante seli nompi renentaza tvaravene, kresramna vu itare avuga me'nea tvaravene, nofitamine, agima hentea zama'a zamagrake kegava hu'neza erigahaze. **27** Hagi Kohati naga nofipintira, Amramu nagaki, Ishara nagaki, Hebron'i nagaki,

Usiel nagaki, **28** ana maka vene'ne mago ikanteti mareri anagate'nea hampri'nazana, 8tausen 600'a vahe'mo'za hunagru hunte tva'oma'arera kegava hu'neza eri'zana erigahaze. **29** Kohati nagapinti fore hu'naza naga'mo'za, seli mono nomofo sauti kaziga seli nonkumara ante'za manigahaze. **30** Hagi Kohati nagapintima kvaza erino kegava huzmante'neana, Uzieli nemofo Elizafani'e. **31** Eri'zama erisazana amanahu hu'za erigahaze, huhagerafi huvempage vogisine, teboleline, tevi rekru hunte zotane, Kresramana vu itaramine, kresramna vu eri'za zantamima kazima, kavoma, sipunima, foku'ma, zompama (utensils), nagru hu'nea agu'afi me'nea zantamine, tvaravene kema huntea zama'a kegava hugahaze. **32** Hagi Pristi ne' Aroni nemofo Eleasa vugoteno Levai nagate kva mani'neno, seli mono nomofo agu'afi eri'zana kegava huzmante'ne. **33** Merari naga'ene Musa naga'enena, zamagra Merari nagare hu'za mani'naze. **34** Hagi hampri'ma zamante'nazana, mago ikanteti mreri anagate'nea vene'nea 6 tausen 200ti'e. **35** Merari nagama kegava huzmante'neana, Abihail nemofo Zulieli'e. Zamagra seli mono nomofona noti kaziga kuma ante'za manigahaze. **36** Hagi Merari naga'mokizmi eri'zana, seli mono nomofo reharere zafarmine, arunkre hu zafagi, antani kantugma hu' zafarmine, azeri hanaveti zafane, eriza'zane kegava hu'neza eri'zama zami'nare eri'naze. **37** Hagi agu'afinka megagi'nea posi zafarmine, no azeri hanaveti zafarmine, seli no avazu huno nofi ome rentere hania azotaramine, nofi'ma rente'zantamine kegava hugahaze. **38** Hanki zage hanati kaziga seli mono nomofo avuga'a kuma ante'za mani'naza nagara, Moseseki, Aroniki, ne'mofavre naga'zniane mani'neza, hunagruma hu'nea nomofo agu'afina Israeli vahe'mokizmigu hu'za eri'zana eri nezmante'za

mani'naze. Hagi huhampri ozmantre vahe'ma ana tva'onte
esnimofona ahe frigahaze. **39** Livae naga'ma Ra Anumzamo
Mosesen'e Aronigizni znam'i'nea kasegere amage ante'ne,
mago ikanteti mareri anagate'nea naganofiteti, ese agonesa
mofavre nona huke hamprina'ana maka 22 tauseni'a vene'ne.
40 Hagi Ra Anumzamo Mosesena amanage huno asami'ne,
Israeli vahepi pusa ne'mofavre fore hanigeno mago ikanteti
mareri anagate'nesiana, erigafa hunka zamagi'a krento. **41**
Israeli vahe'mofo ese agonesa mofavrema avregazana netrenka
Livae nagara zamavare namio, Nagra Ra Anumzane, Livae
vahe'mofo bulimakao afuzmimo'ma pusama antesia anentara,
Israeli nagamokizmi pusa bulimakamofo nona hugahie. **42**
Ana higeno Israeli vahe'mokizmi maka pusa ne'mofavre'a Ra
Anumzamo asmi'nea kante anteno Mosesen'a hampri'ne. **43** Pusa
ne'mofavre mago ika agatereno mareri anaga te'nea naga zamagi
er'i'neana, 22 tausen, 273'a vene'ne. **44** Anante Ra Anumzamo'a
Mosesena anage huno asami'ne, **45** Israeli vahepintira pusa ne'
mofavre'mokizmi nona hunka, Livae vahera nezmaurenka, Israeli
vahe agonesa bilimakao nona hunka Livae naga bulimakaone
erio. Huge'za Livae vahera zamagra Nagri naga manigahaze.
Nagra Ra Anumzane. **46** Hagi 273'a Israeli vahe'mokizmi
pusa ne'mofavre'moza, Livae naga'ma zamagtere'nare miza
segahaze. **47** Seli mono nomofo zagomofo kna'a avamente kagra
5fu'a silva zago magoke magoke vahetera eritere hugahane. **48**
Livae naga zamagtere'naza nona huta miza sezmente zago,
Aronine ne'mofavre'ane zamio. **49** Higeno Mosesen'a zagoa
zogino Israeli vahe'mokizmi pusa ne'mofavre'mokizmi nona huno
Livae naga nona huno miza sezmente'ne. **50** Pusa ne'mofavre
Israeli vahepinti fore'ma hu'naza nagapintira Mosesen'a 1tausen,

365'a silva zagoa erino, hunagru hu'nea seli mono nomofo kna'amo hu'nea avamente ana zago'a zogite'no **51** Moses'e'a ana zagoma mizama sezmantesia zagoa erino Aroni'ne, ne'mofavre naga'a Ra Anumzamo'ma asami'nea kante erino zamazampi ome ante'ne.

4 Anante Ra Anumzamo'a amanage huno Mosesene, Aronikizni zanasmi'ne, **2** Kohati agehe'impinti fore hu'naza vahera nagate, famote, hamprinka Livae nagara zamagi'a krenka eri fatgo huo, **3** maka 30'a kafureti marerino 50'a kafuma hu'nesaza vahe'ma, seli mono nompima eri'zama eriga hu'nesaza venene'a hampri'o. **4** Hagi Kohati naga'moza seli nompina hakare zupa amanahu eri'za erigahaze, seli mono nompima, hunagru hunte nomofo agu'afi ruotgema hu'nea zantminte kegava hugahaze. **5** Hagi Israeli vahe'mo'za kumazmi atre'za vunaku hanageno'a, Aroni'a mofavre naga'ane mareri'za kafanteti tvarave hantiza huhagerafi huvempage vogisia ana tvaravereti eri ano vazigahaze. **6** Hagi anantero hagerimpi bulimakao akru'anu refinete'za, ana agumpina hokonke tvaravenu refinete'za, tare azota antanintegahaze. **7** Hagi ana'ma hutesu'za bretima nentaza itamofona hokonke tvarave eri'za tafera hute'za, ofama hu'zantamina ana agofetura nente'za zuompama, kavoma, tima tagi tafe taminena nente'za, bretinena antekeno maka zupa itamofo agofetura mevava hino. **8** Ana hute'za koranke tvarave reti ana makazana refiteho, ete'za ana agofetura hagerimpi bulimakao afu'mofo ukri'anu refinete'za, tare kaziga kampi erisgahu zota antanintegahaze. **9** Mago hokonke tvarave eri'za tavi'ma rekru hunte'zamofo zota'ane, lamune, teve anefa resu hu'zane, zuompane, tevemofo masave tintfene, eri'zama eneriza zanena refitegahaze. **10** Hagi ana maka'zana hagerimpi

bulimakao ukri'afi eri anakite'za afunte kofi azotare erinte'za anakintetere hugahaze. **11** Kolire itamofo agofetura hokonke tvaravenu refitete'za, hagerimpi bulimakaomofo ukrira ana agofetu erinte'za anakite'za, tare vimago zafa antanintegahaze. **12** Anantero hokonke tvarave masine'za ana maka agu'afi eri'za eneriza zantamina (utensils) anakite'za, ana agofetura hage rimpi bulimakaomofo ukri'areti refitete'za, tare vimago zafa, zafama hu'zana vazintegahaze. **13** Ana nehu'za, bronsire itaretira (alta) ta'nefara katenetre'za fitu tvarave eri'za ome refitegahaze. **14** Anazanke hu'za eri'zama eneriza zantamina antesazana tevefi kre kavoma, foku'ma, savolima, zompama, maka itare'ma (alta) me'nea zanena, hagerimpi bulimakao afumofo ukriteti agofetura refite'za anakite'za, zafama hu'za vanaza zafa antanintegahaze. **15** Aroni'ene ne'mofavre naga'amo'zane seli nomofo agu'afi maka ruotge'ma hu'nea zantamina anakiza erise hutesage'za, ana kumateti hage'za vunaku hanage'za, Kohati ne'mofavre'moza emergahaze. Hanki ruotge zantamina avako osugahazanki, avakoma hanazana frigahaze. Ama'i ruotge seli nompi me'nea zana, Kohati ne'mofavremoza zamagrake'za eri'za vugahaze. **16** Hagi pristi ne' Aroni nemofo Eleasa kva hania'zana tavi'mofo masavene, mnanentake zama kremna vu'zane, maka zupa ofa nemiza witi ragane, asomu huzmante'za frenezmantaza masavene, seli nomofo eri'za zantamine, agu'afima maka'za me'neane, hunagru hunte'nea nomofo agu'afi me'nea zanena agrake maka kegava hugahie. **17** Hagi Ra Anumzamo'a Mosesene, Aronikizni anage huno zanasmi'ne, **18** Livae naga nofipintira, Kohati ne'mofavre nagara zamatreke'za fri hana oshiho. **19** Kohati naga'mo'za ruotge hu'nea zama kege vu kofta hu'za avako huge, hanuza fri hana huzanku Aroni'ene,

ne'mofavre naga'amo'za mareri'za erise hutesage'za, eri'za kankamu zamire kofiza vugahaze. **20** Hu'neanagi Kohati naga'mo'za osi'a knafinena agu'afina mareri'za ruotge'ma hu'nea zantamina onkegahaze. Hanki anazantamima kesuza frigahaze. Ama'i Gersoni naga'moza eri'naza erizamofo naneke. **21** Hagi Ra Anumzamo amanage huno Mosesena asami'ne. **22** Gersoni ne'mofavre nagara anazanke hunka zamagia krenka nagate famote, eri fatgo huo, **23** maka 30'a kafureti marerino 50'a kafuma hu'nesaza vene'nea, seli mono nompima eri'zama eriga hu'nesaza venene'a hampri'o. **24** Hagi Gersoni naga'moza, seli mono nomofo agu'afi eri'za eneriza, eri'za vano hanazana amana hugahaze, **25** zamagra seli mono nomofo ra tavaravene, agofetu refite'nea tavaravene, hagerimpi bulimakao ukarinu agofetu refite'neane, seli mono nomofo kasante ra tvarave hanti'naza zama'a erigahaze, **26** meg'i'a refite kagi'naza tavaravene, mareri kahante'ene kresramna vu itare (alta) hanti'naza tavaravene, nofi tmine, ana miko eri'za zantamina Gersoni naga'mo'za erigahaze. **27** Hagi Gersoni naga nofi'mo'za maka'a zupa, Aroni'ene ne'mofavre naga'amozama hanaza kemofo amage ante'za kofi'za vutere hugahaze. **28** Gersoni naga'mokizmi ne'mofavre'moza seli mono nomofo eri'zama eri'sazana, pristi ne' Aroni nemofo Itamari Merari nagara kegava hu'nena ana eri'zana erigahaze. **29** Livae nagapinti Merari ne'mofavre nagara, kagra zamagi krenka nagate, famote, eri fatgo huo. **30** Maka 30'a kafuma hu'nesia vahetetima marerino 50'a kafuma hu'nesaza vahe'ma, seli mono nompima eri'za eriga hu'nesaza venene'a hamprio. **31** Zamagra amanahu eri'za erigahaze, maka seli mono noma ahegagi'naza zafane, zaza zafane, re trure zafane, rusihu (soket) zafane eri'za vugahaze. **32** Vahe'ma atru nehazafi

retrumare'nea zafane, rusihunte (soket) zafane, nofi tafinteno
omo azeri eme azeri hu zafane (pegs), nofi'tamine, maka'a
eri'za zane, zamagire zamagire kegava hu'nesaza zane eri'za
vugahaze. **33** Merari naga'mokizmi ne'mofavremo'za seli mono
nompi eri'zama zamasmia kante ante'za erigahaze. Hagi pristi
ne' Aroni nemofo Itamari kegava ana eri'zana hu'nena erigahaze.
34 Hige'za Mosese'ene, Aroni'ene, vahe kevure kva hu'naza
vahemo'zane, Kohati naganofira, nagate famote, **35** maka 30'a
kafureti marerino 50'a kafuma hu'naza vahe'ma, seli mono nompi
eri'zama eriga hu'naza vene'nea hampri'za eri fatgo hu'naze. **36**
Ana maka'ma nagate famote hampri'naza venene'a, 2 tausen
750'e. **37** Ama'i maka Kohati ne'mofavre, seli nomofo agu'afi
eri'zama eriga hu'naza vahe zamagi hamprike eri fatgo hu'na'e.
Mosese'ene Aronike hampri'ne Ra Anumzamo'ma Mosese
asm'i'nea kante anteke avaririna'e. **38** Gersoni ne'mofavrema,
nagate famote hamprina'ana, **39** maka 30'a kafureti marerino
50'a kafuma hu'nesaza vahe'ma, seli mono nompima eri'zama
eriga hu'naza vene'nea, **40** maka nagate famote zamagima
krene eri fatgoma hu'na'a vene'nea, 2 tausen 630ti'e. **41**
Ra Anumzamo'ma Mosese asmi'nea kante anteke Gersoni
ne'mofavre naga seli mono nompi ana maka eri'za eri'naza
vene'ne zamagi'a, Mosese'ene Aronike hampri'ne eri fatgo
hu'na'e. **42** Merari mofavre nagate famote hu'za zamagima
krente'nazana, **43** maka 30'a kafureti marerino 50'a kafuma
hu'nesaza vahe'ma, seli mono nompima eri'zama eriga hu'naza
vene'ne, **44** zamagima nagate famotema hu'za kre'nazana
3tausen 200ti'e **45** Ra Anumzamo'ma Mosesema asmi'nea
kante anteke Merari ne'mofavre naga seli mono nompima ana
maka eri'za eri'naza vene'ne zamagi'a, Mosese'ene Aronike

hampri'ne eri fatgo hu'na'e. **46** Higeno Mosese'ene, Aroni'ene, Israeli vahe'mokizmi kva vahe'mo'za Livae naganofira, hampri'za nagate famote eri fatgo hu'nazana, **47** maka 30'a kafureti marerino 50'a kafuma hu'naza vahe'ma, seli mono nompima eri'zama eneri'za, ana zantamima kofiza vuga vene'nerami hampri'na'e. **48** Maka Livae venene'a zamagima kre'nazana, 8 tausen 580'e. **49** Ra Anumzamo'ma Mosesema asmi'nea, kante anteke zanagra seli mono nompi eri'zama e'heriza zantamima kofizama vanaza vahe zamagi'a krente'na'e.

5 Anante Ra Anumzamo amanage huno Mosesena asmi'ne, **2** Israeli vahe'ma fugo namu kri eri'nesazane, avo' herafineramisiane, korankri eri'nesiane, fri' vahe avufgare avako hu'nesaza vahera, huzmantege'za kumamofo fegi'a umaniho. **3** Vene, a'nene huzmante'gahane, Nagra kumazmimofona amu'nozmifi nemanuankino, zamagra ana kuma eri kasri'zankura huzmante'geza fegi'a umaniho. **4** Israeli vahe'mo'za Ra Anumzamo'ma Mosesema asmia kante ante'za kri eri'naza vahera huzmantage'za kumamofo fegi'a umani'naze. **5** Anante Ra Anumzamo anage huno Mosesena asmi'ne, **6** Israeli vahera zamasamige'za vemo'o, a'mo'o vahe'mo nehiaza huno Ra Anumzamofo antahi omino rumofoma azeri haviza huno kumi hanimo'a, haviza hugahie. **7** Hagi vemo'a inazano hu'nesia kumira hufore nehuno, kumi'amofo mizana kna'amo nankna hu'nesio miza sevaga nereno, mago nazatigati mago kevu ruguheno ana agofetu kumi huntene'snimofona amigahie. **8** Hianagi kumi hunte'nea ne'mofo afu'agnama fri hana hu'nesigeno'a, miza senaku hu'nesia mizane, kumi atrente ve rama afura avreno Ra Anumzamofo aminkeno pristi ne'mo erigahie. **9** Israeli vahe'mo'za ruotge hu'nenia ofa hu'zama pristi nete

eri'za esazana, ana miko pristi ne'mo erigahie. **10** Maka ofama
vahe'mo'ma hanageno pristi ne'mo'ma erisiana agriza segahie.
Hagi mago a'mo'ma ru venema savri hania zamofo kasege. **11**
Ananter Ra Anumzamo'a anage huno Mosesena asami'ne, **12**
Israeli vahera ke hunka zamasmio, mago ne'mofo a'mo nevenku
ontahi havi avu'ava nehuno, **13** mago ve'ne ana a'mo monko'za
hu'nesigeno, neve keno erifore osanigeno vahe'mo'enena kefore
huno eri ama osnianagi, ana a'mo'a agra'a agu'a eri haviza
hugahie. **14** Hagi neve'ma ana a'mofoma hugofinte antahi
antahimo agateresigeno nenaro havi avu'ava hu'nesia zanku,
hu'neo osu'neo agenoka huno antahi anke'renaku, nenanroma
antahi havizama huntesuno'a, **15** ana ne'mo nenanrona avreno
pristi nete vuno, ofama hu'za witi flaua mago kilo erino, olivi
masvene, kremla vu pauranena ana agofetura ontelo, hugofinte
ofamofa witigino kumi' hu'neazamo agekni zanku, antahi antahi
hugeke hu'mofo ofe. **16** Anante pristi ne'mo ana ara avreno
eno Ra Anumzamo'na navuga eme azeri otinteno. **17** Hagi
pristi ne'mo ruotge hu'nea tine, mopare kavone erino, seli mono
nomofa agu'afinti kugusopa kateno ana timpina atregahie. **18**
Hagi pristi ne'mo'a ana ara Ra Anumzamo'na navuga azeri
otineno, hanigeno azokara vasane netreno, antahi antahi hu'mofo
witi ofa azampi erinenteno, nazinkere'ma hu ofa witi pristi ne'mo'a
akake ti tusi hunte tina azampina erigahie. **19** Pristi ne'mo'a
ana ara antahigeno, tamagema nehanunka huama huo, mago
ne'mo kagrane omse'nena havi avu'ava osu'nesunka, negave
kemofo amage antenka mani'nesunka, ama akake timo tusi
hugantenaku hniana agateregahane. **20** Hagi kagrama savri ka
nentenka, negave amage antenka omaninka, negave'ene hugaza
ru vene monko'zama hunesunka, kagra kagu'a azeri haviza

hu'nanankino Anumzamo kazeri haviza hugahie. **21** Pristi ne'mo'a ana ara huvempa hunteno anage hugahie, vahetamimo'ma keno antahinoma haniana, Ra Anumzamo'a kazusi hunteno mofavregura erigigeno amu'mo'a zore hu'za hugahaze. **22** Hankino ama timo tusi huganteno kagupafi ufrenero, ana timo eri'za erinkeno kamumo zonerena, kamo'ma osasi hugahie hanigeno, ana a'mo'a huno, ana hugahie. Ana hugahie. **23** Hagi pristi ne'mo'a anama kazusima huntlesia kea avompi krenteteno sese hinkeno ana timo'a akake timpi tagi ramigahie. **24** Anante pristi ne'mo'a tusi hunte'nea akake tina ana a'ra ami'nigeno, tusi huntenea akake tina nenkeno agu'afi aka hugahie. **25** Pristi ne'mo ana a'moma azampima eri'nea ofa erino, ana ofa Ra Anumzamo'na navure marerino amira amira nehuno, erino kresramna vu itare (alta) vugahie. **26** Anama hute'na pristi ne'mo ana ofahu witia, mago aza eri viteno antahi antahihu ofa Kresramana vu itare (alta) krenkeno kumpi marerino. Ana huteno henka ana a'mofo aminkeno ana tina negahie. **27** Ana tima aminkeno netena, ana a'mo monkoza huteno neve revatga hu'nesigeno'a, ana tusi hunte'nea (kes) tima nesnia timo'a akake agu'afina nehinkeno, amu'mo'a zorenkeno, amo'mo'a osasi hanigeno, ana a'mo'a vahe'amokizmi zamufina kefo a' manigahie. **28** Hianagi a'mo'ma agu'a eri pehena osu mani fatgo hu'nesnigeno'a, ana tusi (kes) hu'nenia kemo'a agaterenkeno, mago zamo avate osnigeno mofavre kasentegahie. **29** Ama'i nazinkemofo kasege, vere a'mo neve'ene mani fatgo osuno atreno vuno ru vene ome savri haniano, **30** neve'ma nenaro antahi haviza hunteno nazinke huntesuno'a, Ra Anumzamofo avure neve'a ana ara avreno vinkeno pristi ne'mo ana maka

kasegea a'mofona hantagi amigahie. **31** Hagi vemo'a hzenke osugahianki, a'mo agra'a ana kumi'mofo knazana erigahie.

6 Mago'ene Ra Anumzamo'a Mosesena anage huno asami'ne, **2** Israeli vhahera amanage hunka zamasnio, mago vemo'o, a'mo'o mani ruotge huno Ra Anumzamo'nare huvempa huno ruotge hu'na Nazareti vene a'ene manisue hanuno'a, **3** waini tine, hankave tine aka tine, waini reratiza hankave ti tro hunte'nesazo, grepimofo tima'o, nena raga'o, hagege hune'sia raga'anena onegahie. **4** Mani ruotge hugahue huno'ma hu'nesia kna'afina, krepiretim tro hu'nesia wainine, avima'ane ukri'anena onegahie. **5** Huvempama hu'nesia kna'afina maka zupa resanura anu azokara oharegahie. Ra Anumzamofonte huvempa hunte'nenia kna'afina ruotge huno mani'neno, anu azokara atrenkeno metoku aseno zaza hino. **6** Ra Anumzamofonte mani ruotge huno mani'nesia kna'afina, agra fri vahe tvaontera ovugahie. **7** Hagi nefo'o, nerera'o, nefu'o, nesaro'o frisigeno'a agrira azeri pehena hugahianki avakora osino. Na'ankure Anumzamofonku huno mani ruotge hu'nea avame'zana agri anunte me'ne. **8** Mani ruotge huno mani'nia kna'afina maka'a zupa, Ra Anumzamo'nare mani ruotge hugahie. **9** Hianagi mago vahe'ma tvaoma'are mani'neno antrima haniaza huno frino, huvempama hu'nea azokama eri pehanama hinkeno'a, **7**ni'a zagegna maniteno azeri agruma huknarera anu azokara haregahie. E'inama hanuno azeri agru huno manigahie. **10** Hagi anante nanterana **8** zage knarera tare hohopa namao, tare maho namo azerino pristi ne' avuga seli mono nomofo kahante vugahie. **11** Pristi ne'mo'a mago nama kumi'ma apasente ofa nehuno, mago nama kre fanene hu ofa hugahie. Na'ankure fri vahe tva'onte mani'neno kumi' hu'negu mizaneseno, ana zupa anunte azokara eri ruotge hanigeno

hagegahie. **12** Ana nehuno Ra Anumzamofonte ete agu'a nenteno, mani ruotge huno Nazareti ne'ma manisuema hanuno'a, mago kafu hu'nesia ve sipisipi anenta avreno kumi'mofo ofa hino. Na'ankure ko'ma mani ruotge hu'nea zama fri'zamo eri haviza hunte'negu, eteno mago'ene huvempa kea eri agafa hugahie. **13** Hagi mani ruotge huno Nazareti vahe tro huno mani'nea kna'ama vagare'na, agra seli mono nomofo kafante eno, **14** Ra Anumzamo'nare kre fanenema hu ofama eri'noma esiana, mago kafu hu'nesia ve sipisipi afuhe afuhe osu'nesia su'a avreno ne-eno, kumi'ma apasente ofama haniana, mago a' sipisipi mago kafu huno afuhe afahe osu'nesia avreno ne-eno, rimpa fru ofama haniana, mago kafu huno afuhe afahe osu'nesia sipisipine avre'no eme ofa hugahie. **15** Hagi witi ofama hu'zana, mago eka eka kupi, zo-ore breti krenenaza eri'za ne-eza kaneza eri knare hu'naza flaua masavene eri havia huza kre'naza kekine, waini ofanena hugahaze. **16** Hagi ana ofama pristi ne'mo'ma Ra Anumzamofo avuga erino eme haniana, esera kumi' apasente ofa huteno, ananter tevefi kre fanene hu ofa hugahie. **17** Ana nehuno rimpa fru ofa ve sipisipi Ra Anumzamofonte kresramna nevuno, zo-ore bretia eka eka kupi ante'nea ofa nehuno, pristi ne'mo'a anazanke huno witi ofane, waini ti ofanena hugahie. **18** Ana hutena Nazareti vahe manisuema huno'ma mani ruotagema hu'nea ne'mo anuntetira azokara seli mono nomofo kahante ome hareteno, ana azokara rimpa fru ofama kre'nenifi fenka kaziga krenkeno tegahie. **19** Hagi ana'ma hute'na pristi ne'mo'a ve sipisipimofo azona'a kavoma krenenafinti e'nerino, ekaeka kupinti zo-ore bretia mago e'nerino, mago zo-ore ta'ori kekine erino, azokama hare'nea ne'mofo azampi antegahie. **20** Anante pristi ne'mo'a erisga huno Ra

Anumzamonare eri veravema hu ofa hugahie. Hagi eri veravema hia ofane ve sipisipi ahihizane agianena ruotge hugahiankino pristi vahe'mo'zage eri'za negahaze. Pristi ne'mo'ma ana'ma hutena azokama hare'nea ne'mo'a waini tina negahie. **21**
Ama'i Nazareti vahe mani ruotge hu'na Ra Anumzamofo avufi manikurema huno'ma huvempama hania vahe'mofo kasege. Hagi anampima mago'a ofama eri agofetuma huza eriza ega'ma hanige'za amne eri'za egahaze. Nazareti vahe mani ruotge hugahune hu'za huvempama hu'nesaza kemofo amage ante'za anazana hugahaze. Ana'ma hanageno'a, Pristi vahe'mo'za asomu kea huramantegahaze. **22** Ra Anumzamo'a anage huno Mosesena asami'ne, **23** Aronine, ne'mofavre naga'anena amanage hunka zamasmio, Israeli vahe'ma asomu kema huzmantekura, amanage hunka asomu kea huzmanto. **24** Ra Anumzamo'a asomu huneramanteno, kegava huramantegahie. **25** Ra Anumzamo muse huneramanteno, tamazeri knare hugahie. **26** Ra Anumzamo'a rukrahe huno avugosa huramino tamazeri knare nehuno, Agra'a rimpa fruzana tamigahie. **27** Hagi Nagri nagifi Israeli vahera asomu kea hu'zmantenkena, Nagra'nia asomura huzmantegahue.

7 Mosese'ma seli noma ki vagareteno'a, ana nomofo agu'afi me'nea zane ana nonena eri fatgo huno hu ruotge hunteten, agu'afi me'nea (utensil) zane, kresramna vu itane, eri'za zanena masaveragino frententeno hunagru hunte'ne. **2** Hagi Israeli vahepinti'ma 12fu'a naga nofimokizmi kva vahe'ma huhampri zmantage'za vahe'ma hampri'zana kva vahe'mo'za ofazmia eri'za seli mono nonte e'haze. **3** Hagi ana makamo'za 6si'a refitente'nea karisine, 12fu'a bulimakaone avre'za seli mono nomofo avuga Ra Anumzamofonte e'haze. Hagi mago karisia tare

kva vahe'moke eri tragotetere huke erike neakeno, mago mago
bulimakaona mago mago kva vahe'mo erino etere hu'ne. **4** Ra
Anumzamo'a anage huno Mosesena asami'ne, **5** Anama eri'za
eme kami'naza zantamina erinka, eri'zama eneri'za avamente
Livae naga zamige'za seli mono nona tagana vazite'za eri'za
viho. **6** Higeno Mosese'a ana karisiramine, bulimakoa afu'zaga
Livae naga eri zami'ne. **7** Tare karisine, 4'a bulimakao afura
Gersoni ne'mofavre eri'za eneriza avamente eri'zami'ne. **8** Hagi
4'a karisine, 8'a bulimakao afu'zaga, eri'za eneriza avamente
Merari ne'mofavre naga eri zami'ne. Hagi pristi ne' Aroni nemofo
Itamari ana nagatera kegava huzmante'nege'za ana maka
eri'zana eri'naze. **9** Hianagi Kohati nagara mago zana Mosese'a
ozami'ne. Na'ankure zamagri eri'zana hunagru hunte'nea zama
seli mono nompi me'nea zantmima zamafunte kofi'za vanaza
eri'za me'ne. **10** Hagi kresramna vu itama hunagru'ma hunte'za
masavema frentaza zupa, Israeli kva vahe'mo'za muse ofazmia
eri'za vu'za kresramna vu itamofo avuga omente'naze. **11**
Hianagi Ra Anumzamo'a amanage huno Mosesena asmi'ne,
Huzmantegeno magoke kva ne'mo muse ofa'a erino mago mago
knarera etere hino. **12** Kagota huno ese zagegnare'ma agafa
huno'ma ofa'a erino vu'neana, Juda naga nofi'mokizmi kva ne'
Aminadabu nemofo Nasoni'e. **13** Agrama ofa hu'neana, mago
silvare kagata hu'nea zuompa kna'amo 130'a sekel (1.5 kilo)
hu'nea zuompane, mago silvare keri hu'nea zuompa hunagru
hu'nea seli mono nomofo zago miza nesaza avamente, 70'a
sekels (800 grems) hu'nea zoumpane erino e'ne. Hagi ana tarega
zoumpafina kaneza eri knare hu'naza flaua masavene eri havia
hu'nea witi ofa erino e'ne. **14** Hagi mago golire tro hu'naza kagata
hu'nea zuompa kna'amo'a 10ni'a sekel (110 grems) hu'nea

zuompafi mna nentake'za insensia ante aviteno erino e'ne. **15**
Ana nehuno tevefima kre fanenema hu' ofama hu'zana mago ve
bulimakao afu'ene, mago ve sipisipine, mago kafu hu'nea, sipisipi
anenta'ene avreno ne-eno, **16** kumi'ma apasente ofa mago ve
meme afu avreno e'ne. **17** Hagi rimpa fru ofama hu'zama avreno
e'neana, tare bulimakaone, 5fu'a ve sipisipine, mago kafu hu'nea
sipisipi anentataminena 5fu'a avreno e'ne. Ama'i Aminadabu
nemofo Nasonima erino e'nea ofaramine. **18** Hagi nampa 2
zagegnarera, Zuari nemofo Natanieli, Isaka naga'mokizmi kva
ne'mo, ofa erino e'ne. **19** Agrama ofa hu'neana, mago silvare
kagata hu'nea zuompa kna'amo 130'a sekel (1.5 kilo) hu'nea
zuompane, mago silvare keri hu'nea zuompa hunagru hu'nea
seli mono nomofo zago miza nesaza avamente, 70'a sekel
(800 grems) hu'nea zoumpane erino e'ne. Hagi ana tarega
zoumpafina kaneza eri knare hu'naza flaua olivi masavene
eri havia hu'nea witi ofa erino e'ne. **20** Hagi mago golire tro
hu'naza kagata zuompa kna'amo'a 10ni'a sekel (110 grems)
hu'nea zuompafi mnantakeza insensia ante aviteno erino
e'ne. **21** Ana nehuno tevefima kre fanenema hu' ofama hu'zana
mago ve bulimakao afu'ene, mago ve sipisipine, mago kafu
hu'nea, sipisipi anenta'ene avreno ne-eno, **22** kumi'ma apasente
ofa mago ve meme afu avreno e'ne. **23** Hagi rimpa fru ofama
hu'zama avreno e'neana, tare bulimakaone, 5fu'a ve sipisipine,
mago kafu hu'nea sipisipi anentataminena 5fu'a avreno e'ne.
Ama'i Zuari nemofo Natanieli'ma erino e'nea ofaramine. **24** Hagi
nampa 3 zagegnarera Zebuluni naga nofi'mokizmi kva ne' Heloni
nemofo Eliabu ofa erino e'ne. **25** Agrama ofa hu'neana, mago
silvare kagata hu'nea zuompa kna'amo 130'a sekel (1.5 kilo)
hu'nea zuompane, mago silvare keri hu'nea zuompa hunagru

hu'nea seli mono nomofo zago miza nesaza avamente, 70'a sekel (800 grems) hu'nea zuompane erino e'ne. Hagi ana tarega zompa fina kaneza eri knare hu'naza flaua masavene eri havia hu'nea witi ofa erino e'ne. 26 Hagi mago golire tro hu'naza kagata zuompa kna'amo'a 10ni'a sekel (110 grems) hu'nea zuompafi mnanentakeza insensia ante aviteno erino e'ne. 27 Ana nehuno tevefima kre fanenema hu' ofama hu'zana, mago ve bulimakao afu'ene, mago kasefa ve sipisipine, mago kafu hu'nea, sipisipi anenta'ene avreno ne-eno, 28 kumi'ma apasente ofa mago ve meme afu avreno e'ne. 29 Hagi rimpa fru ofama hu'zama avreno e'neana, tare bulimakaone, 5fu'a ve memene, mago kafu hu'nea sipisipi anentataminena 5fu'a avreno e'ne. Amai' Helon nemofo Eliabu, Zebuluni naga'mokizmi kva ne'mo erino e'nea ofe. 30 Hagi nampa 4 zagegnarera Rubeni naga nofi'mokizmi kva ne' Elizuri nemofo Sedeuri ofama erino e'neana, 31 mago silvare kagata hu'nea zuompa kna'amo 130'a sekel (1.5 kilo) hu'nea zuompane, mago silvare keri hu'nea zuompa hunagru hu'nea seli mono nomofo zago miza nesaza avamente, 70'a sekel (800 grems) hu'nea zuompane erino e'ne. Hagi ana tarega zompa fina kaneza eri knare hu'naza flaua masavene eri havia hu'nea witi ofa erino e'ne. 32 Hagi mago golire tro hu'naza kagata zuompa kna'amo'a 10ni'a sekel (110 grems) hu'nea zuompafi mnanentakeza insensia ante aviteno erino e'ne. 33 Ana nehuno tevefima kre fanenema hu' ofama hu'zana, mago ve bulimakao afu'ene, mago ve sipisipine, mago kafu hu'nea, sipisipi anenta'ene avreno ne-eno, 34 kumi'ma apasente ofa mago ve meme afu avreno e'ne. 35 Hagi rimpa fru ofama hu'zama avreno e'neana, tare bulimakaone, 5fu'a ve memene, mago kafu hu'nea sipisipi anentataminena 5fu'a avreno e'ne.

Amai' Elizuri nemofo Sedeuri Rubeni naga'mokizmi kva ne'mo erino e'nea ofe. **36** Hagi nampa 5 zagegnarera Simioni naga nofi'mokizmi kva ne' Selumieli nemofo Zulisadaima ofama erino e'neana, **37** mago silvare kagata hu'nea zuompa kna'amo 130'a sekel (1.5 kilo) hu'nea zuompane, mago silvare keri hu'nea zuompa hunagru hu'nea seli mono nomofo zago miza nesaza avamente, 70'a sekel (800 grems) hu'nea zoumpane erino e'ne. Hagi ana tarega zompa fina kaneza eri knare hu'naza flaua masavene eri havia hu'nea witi ofa erino e'ne. **38** Hagi mago golire tro hu'naza kagata zuompa kna'amo'a 10ni'a sekel (110 grems) hu'nea zuompafi mnanentakeza insensia ante aviteno erino e'ne. **39** Ana nehuno tevefima kre fanenehu ofama hu'zana, mago ve bulimakao afu'ene, mago ve sipisipine, mago kafu hu'nea sipisipi anenta'ene avreno e'ne. **40** Kumi'ma apasente ofa mago ve meme afu avreno e'ne. **41** Hagi rimpa fru ofama hu'zama avreno e'neana, tare bulimakaone, 5fu'a ve sipisipine, 5fu'a ve memene, mago kafu hu'nea sipisipi anentataminena 5fu'a avreno e'ne. Amai' Zuri Sadaia nemofo Serumieli Simioni naga'mokizmi kva ne'mo erino e'nea ofe. **42** Hagi nampa 6gisi zagegnarera Gati naga nofi'mokizmi kva ne' Deueli nemofo Eliasafu'ma ofama erino e'neana, **43** mago silvare kagata hu'nea zuompa kna'amo 130'a sekel (1.5 kilo) hu'nea zuompane, mago silvare keri hu'nea zuompa hunagru hu'nea seli mono nomofo zago miza nesaza avamente, 70'a sekel (800 grems) hu'nea zoumpane erino e'ne. Hagi ana tarega zompa fina kaneza eri knare hu'naza flaua masavene eri havia hu'nea witi ofa erino e'ne. **44** Hagi mago golire tro hu'naza kagata zuompa kna'amo'a 10ni'a sekel (110 grems) hu'nea zuompafi mnanentake'za insensia ante aviteno erino e'ne. **45**

Ana nehuno tegefima kre fanenehu' ofama hu'zana, mago agaho
ve bulimakao afu'ene, mago ve sipisipine, mago kafu hu'nea,
sipisipi anenta'ene avreno ne-eno, **46** kumi'ma apasente ofa
mago ve meme afu avreno e'ne. **47** Hagi rimpa fru ofama
hu'zama avreno e'neana, tare bulimakaone, 5fu'a ve sipisipine,
5fu'a ve memene, mago kafu hu'nea sipisipi anentatamina 5fu'a
avreno e'ne. Amai' Deueli nemofo Elisafu Gati naga'mokizmi kva
ne'mo erino e'nea ofe. **48** Hagi nampa 7ni zagegnarera Amihud
nemofo Elisama, Efraemi naga'mokizmi kva ne'mo'ma ofama
erino e'neana, **49** mago silvare kagata hu'nea zuompa kna'amo
130'a sekel (1.5 kilo) hu'nea zuompane, mago silvare keri hu'nea
zuompa hunagru hu'nea seli mono nomofo zago miza nesaza
avamente, 70'a sekels (800 grems) hu'nea zoumpane erino
e'ne. Hagi ana tarega zompa fina kaneza eri knare hu'naza
flaua masavene eri havia hu'nea witi ofa erino e'ne. **50** Hagi
mago golire tro hu'naza kagata zuompa kna'amo'a 10ni'a sekel
(110 grems) hu'nea zuompafi mnanentake'za insensia ante
aviteno erino e'ne. **51** Ana nehuno tegefima kre fanenema hu'
ofama hu'zana, mago agaho ve bulimakao afu'ene, mago ve
sipisipine, mago kafu hu'nea, sipisipi anenta'ene avreno ne-
eno, **52** kumi'ma apasente ofa mago ve meme afu avreno
e'ne. **53** Hagi rimpa fru ofama hu'zama avreno e'neana, tare
bulimakaone, 5fu'a ve sipisipine, 5fu'a ve memene, mago kafu
hu'nea sipisipi anentataminena 5fu'a avreno e'ne. Amai' Amihudi
nemofo Elisama Efraemi naga'mokizmi kva ne'mo erino e'nea
ofe. **54** Hagi nampa 8 zagegnarera Peduzuri nemofo Gamalieli,
Manase naga'mokizmi kva ne'mo'ma ofama erino e'neana,
55 mago silvare kagata hu'nea zuompa kna'amo 130'a sekel
(1.5 kilo) hu'nea zuompane, mago silvare keri hu'nea zuompa

hunagru hu'nea seli mono nomofo zago miza nesaza avamente, 70'a sekels (800 grems) hu'nea zoumpane erino e'ne. Hagi ana tarega zompa fina kaneza eri knare hu'naza flaua masavene eri havia hu'nea witi ofa erino e'ne. **56** Hagi mago golire tro hu'naza kagata zuompa kna'amo'a 10ni'a sekel (110 grems) hu'nea zuompafi mnanentake'za insensia ante aviteno erino e'ne. **57** Ana nehuno tegefima kre fanenema hu' ofama hu'zana, mago ve bulimakao afu'ene, mago ve sipisipine, mago kafu hu'nea, sipisipi anenta'ene avreno ne-eno, **58** kumi'ma apasente ofa mago ve meme afu avreno e'ne. **59** Hagi rimpa fru ofama hu'zama avreno e'neana, tare bulimakaone, 5fu'a ve sipisipine, 5fu'a ve memene, mago kafu hu'nea sipisipi anentataminena 5fu'a avreno e'ne. Amai' Peduzuri nemofo Gamalieli Manase naga'mokizmi kva ne'mo erino e'nea ofe. **60** Hagi nampa 9ni zagegnarera Gidioni nemofo Abitani Benzameni naga'mokizmi kva ne'mo'ma ofama erino e'neana, **61** mago silvare kagata hu'nea zuompa kna'amo 130'a sekel (1.5 kilo) hu'nea zuompane, mago silvare keri hu'nea zuompa hunagru hu'nea seli mono nomofo zago miza nesaza avamente, 70'a sekel (800 grems) hu'nea zoumpane erino e'ne. Hagi ana tarega zompa fina kaneza eri knare hu'naza flaua masavene eri havia hu'nea witi ofa erino e'ne. **62** Hagi mago golire tro hu'naza kagata zuompa kna'amo'a 10ni'a sekel (110 grems) hu'nea zuompafi mnanentake'za insensia ante aviteno erino e'ne. **63** Ana nehuno tegefima kre fanenema hu' ofama hu'zana, mago agaho ve bulimakao afu'ene, mago ve sipisipine, mago kafu hu'nea, sipisipi anenta'ene avreno ne-eno, **64** kumi'ma apasente ofa mago ve meme afu avreno e'ne. **65** Hagi rimpa fru ofama hu'zama avreno e'neana, tare bulimakaone, 5fu'a ve sipisipine, 5fu'a ve memene, mago kafu

hu'nea sipisipi anentataminena 5fu'a avreno e'ne. Amai' Gidioni
nemofo Abitani'ma Benzameni naga'mokizmi kva ne'mo'ma erino
e'nea ofe. **66** Hagi nampa 10ni zagegnarera Amisadai nemofo
Ahiezeri, Dani naga'mokizmi kva ne'mo'ma ofama erino e'neana,
67 mago silvare kagata hu'nea zuompa kna'amo'a 130'a sekel
(1.5 kilo) hu'nea zuompane, mago silvare keri hu'nea zuompa
hunagru hu'nea seli mono nomofo zago miza nesaza avamente,
70'a sekel (800 grems) hu'nea zoumpane erino e'ne. Hagi ana
tarega zoumpafina kaneza eri knare hu'naza flaua masavene
eri havia hu'nea witi ofa erino e'ne. **68** Hagi mago golire tro
hu'naza kagata zuompa kna'amo'a 10ni'a sekel (110 grems)
hu'nea zuompafi mnanentakeza insensia ante aviteno erino e'ne.
69 Ana nehuno tevefima kre fanenema hu' ofama hu'zana, mago
agaho ve bulimakao afu'ene, mago ve sipisipine, mago kafu
hu'nea, sipisipi anenta'ene avreno ne-eno, **70** kumi'ma apasente
ofa mago ve meme afu avreno e'ne. **71** Hagi rimpa fru ofama
hu'zama avreno e'neana, tare bulimakaone, 5fu'a ve memene
mago kafu hu'nea sipisipi anentataminena 5fu'a avreno e'ne.
Amai' Amisadai nemofo Ahiezeri Dani naga'mokizmi kva ne'mo
erino e'nea ofe. **72** Hagi nampa 11ni zagegnarera Okrani nemofo
Pekiel Asa naga'mokizmi kva ne'mo'ma ofama erino e'neana,
73 mago silvare kagata hu'nea zuompa kna'amo'a 130'a sekel
(1.5 kilo) hu'nea zuompane, mago silvare keri hu'nea zuompa
hunagru hu'nea seli mono nomofo zago miza nesaza avamente,
70'a sekel (800 grems) hu'nea zoumpane erino e'ne. Hagi ana
tarega zoumpafina kaneza eri knare hu'naza flaua masavene eri
havia hu'nea witi ofa erino e'ne. **74** Hagi mago golire tro hu'naza
kagata zuompa kna'amo'a 10ni'a sekel (110 grems) hu'nea
zuompafi mnanentakeza insensia ante aviteno erino e'ne. **75**

Ana nehuno tegefima kre fanenema hu' ofama hu'zana, mago ve bulimakao afu'ene, mago ve sipisipine, mago kafu hu'nea, sipisipi anenta'ene avreno ne-eno, **76** kumi'ma apasente ofa mago ve meme afu avreno e'ne. **77** Hagi rimpa fru ofama hu'zama avreno e'neana, tare bulimakaone, 5fu'a ve sipisipine, 5fu'a ve memene, mago kafu hu'nea sipisipi anentataminena 5fu'a avreno e'ne. Amai' Okrani nemofo Pekieli Asa naga'mokizmi kva ne'mo erino e'nea ofe. **78** Hagi nampa 12fu zagegnarera Enani nemofo Ahira Naftali naga'mokizmi kva ne'mo'ma ofama erino e'neana, **79** mago silvare kagata hu'nea zuompa kna'amo 130'a sekel (1.5 kilo) hu'nea zuompane, mago silvare keri hu'nea zuompa hunagru hu'nea seli mono nomofo zago miza nesaza avamente, 70'a sekel (800 grems) hu'nea zuompane erino e'ne. Hagi ana tarega zoumpafina kaneza eri knare hu'naza flaua masavene eri havia hu'nea witi ofa erino e'ne. **80** Hagi mago golire tro hu'naza kagata zuompa kna'amo'a 10ni'a sekel (110 grems) hu'nea zuompafi mnantakeza insensia ante aviteno erino e'ne. **81** Ana nehuno tegefima kre fanenema hu' ofama hu'zama erino'ma e'neana, mago ve bulimakao afu'ene, mago agaho ve sipisipine, mago kafu hu'nea sipisipi anenta'ene avreno ne-eno, **82** kumi'ma apasente ofa mago ve meme afu avreno e'ne. **83** Hagi rimpa fru ofama hu'zama avreno e'neana, tare bulimakaone, 5fu'a ve sipisipine, 5fu'a ve memene, mago kafu hu'nea sipisipi anentataminena 5fu'a avreno e'ne. Amai' Enani nemofo Ahira Naftali naga'mokizmi kva ne'mo erino e'nea ofe. **84** Hagi kresmana vu itama masavema freno eri otagema hianknarema Israeli vahe'mokizmi kva vahe'mo'za eri'zama e'nazana 12fu'a ra silvare kagata zoumpagi, 12fu'a silvare keri zoumpagi, 12fu'a golire kagata zuompagi hu'za, kresramna vu

ita masave frente'za eri otagema hazanknarea eri'za e'naze. **85**
Hagi mago mago silvare kagata hutere hu'nea zuompa kna'amo
130'a sekel (1.5 kilo) hu'nea zuompane, mago mago silva
zuompa keri hu'nea zuompamofo kna'amo'a hunagru hu'nea seli
mono nomofo zago miza nesaza avamente, 70'a sekels (800
grems) hu'nea zoumpane eri'za etere hu'naze. Hagi ana mika
silva zuomparamimofo kna'amo'a seli nomofo zago avamente 2
tauseni 400'a sekel hu'ne. **86** Hagi mago'mago 12fu'a golire
kagata zoumpa kna'amo'a seli nomofo zago avamente 10 sekeli
hu'nea zuompafi mnanentake'za insensia ante avite'za eri'za
e'naze. **87** Hagi tevefima kre fanenema hu' ofama eri'zama
e'nazana, 12fu'a ve bulimakaonki, 12fu'a ve sipisipigi 12fu'a
mago kafu hu'nea sipisipi anentataminki hu'za avre'za ne-e'za
anama huzmantenea kante ante'za witi ofa eri'za e'naze. Hagi
kumi'ma apasente ofa 12fu'a ve meme afu avre'za e'naze. **88**
Hagi rimpa fru ofama hu'zama avre'zama e'nazana ana makara
24'a bulimakaonki, 60'a ve sipisipigi, 60'a ve memenki, 60'a
mago kafuma hu'nea ve sipisipi anentataminki hu'za avre'za
e'naze. Amati kresramna vu itama masavema frente'za eri
otage'ma haza knare'ma eri'za e'naza ofaramine. **89** Anante
Mose'sma seli mono nompima ufreto Ra Anumzamo'enema
nanekema hunaku'ma nehigeno'a, Ra Anumzamofo huhagerafi
huvempage vogisimofo asunku trarema huza nehzare tare
ankeromofo zanamema'a tro hunte'naza amu'nozanifinti Ra
Anumzamo'a kea Mosesena humi'ne.

8 Anante Ra Anumzamo'a amanage huno Mosesena asmi'ne,
2 Amanage hunka Aronina asmio, 7ni'a tavi'ma retro huteno,
ruotgema hunefinkama tavima tagintesigeno'a, masa'amo'a ana
tavi azota'mofo avuga remsa hugahie. **3** Ra Anumzamo'ma

Mosesema asami'nea kante anteno Aroni'a tavi'ma retro hunte'nea tavira tagintegeno, masa'amo zota'mofo avuga remsa hutre'ne. 4 Tavi'ma rekruhu azotama tro'ma hu'nazana amana hu'naze, hama eri'za golia amasagiza lamu tavimofo zota'a tro nehu'za, azankuna'a tro nehu'za amina'anema troma hunazana, Ra Anumzamo'ma Mosesema asami'nea kante ante'za tro nehu'za, Livae nagara zamazeri otage hu'naze. 5 Ru'ene Ra Anumzamo'a amanage huno Mosesena asmi'ne, 6 Israeli vahepintira Livae nagara zamavarenka, zamazeri agru huo. 7 Hagi zamazeri agruma kagrama hananana anahu hugahane, agru hu'nesia ti erinka ru ani'ani hunezmantesanke'za, maka zamufa zamazokara resanu nehare'za, kukena zamia sese hute'za, zamagra avusese hugahaze. 8 Ana'ma hutenagenka huge'za mago bulimakaone witi ofa zami'ne, kanenea flaua masavempi erihavia hu'nesazane ofa nehu'za, mago bulimakao kumi'ma apasezamante ofa hugahaze. 9 Hagi Mosesega kehuge'za mik'a Livae vahera seli mono nonte etru nehanagenka, maka Israeli vea'ene zamazeri atru hugahane. 10 Livae nagara zamavarenka Ra Anumzamo'na navure vuge'za, Israeli vahe'mo'za Livae naga'mokizmi zamagofetu zamaza anteho. 11 Aroni'a Israeli vahepinti Livae nagra Ra Anumzamofo avuga aza ante'sga huno amira amira ofama nehiaza huzmantetena, Ra Anumzamo'na eri'zana erigahaze. 12 Henka'a Livae naga'mo'za tare bulimakaomofo agenopare zamazana antetesage'za, mago bulimakaona kumi'apase ofa nehu'za, mago bulimakaona kresramna vanage'na Ra Anumzamo'na Livae nagara kumizmifintira mizasezmanegahue. 13 Hagi Livae nagara huge'za Aronine, ne'mofavre naga'ane zamuga oti'nesage'za, amira amira ofama nehazaza hu'za Ra Anumzamo'na ofa hu'za

namigahaze. **14** E'ina hunka Israeli vahepintira Livae nagara zamazeri otage hananke'za Nagri vahera manigahaze. **15** Hagi anama huzmantetesunka, Livae naga'mo'za seli mono nompina eri'zana erigahazanki, zamazeri agru nehunka, kazana antesga hunka amira amira ofa huzmantegahane. **16** Israeli vahepinti'ma pusa ne' mofavrema antesazama onamisaza nona hu'na, Livae nagara maka Nagrani'a zamavare'noe. **17** Hagi Isipi vahe'mokizmi zamagonesa ne'mofavrema nezmahe'na, mika'a Israeli vahe'mokizmi zamagonesa mofavrene, zagagafa zimimofo ese anentara Nagri suzane hu'na zamavare otage hu'noe. **18** Hu'neanagi menina Israeli vahe'mokizmi pusa ne'mofavre nona hu'na, Livae nagara Nagra huhampri'na zamavare'noe. **19** Israeli vahepintira, Livae nagara muse'zane hu'na Aronine, ne'mofavre naga'a seli mono nompi Israeli vahe'mokizmi kumi' apaseza miza sezmante'saza eri'za eneri'za, seli mono nomofo tvaonte'ma Israeli vahe'mo'zama ne-esageno krimo zamazeri haviza huzanku kva krigahaze. **20** Mosese'ene, Aroni'ene mika Israeli vahe krerfamo'zanena Ra Anumzamo'ma Mosese asmi'nea kante ante'za Livae nagara anara huzmantegahaze. **21** Livae naga'mo'za zamagrazmi zamazeri agru nehu'za, kukena zmia sese hutazageno, Aroni aza ante sga huno Ra Anumzamofonte zamavareno amira amira hu ofa hunezmanteno, kumi apase ofa huzmante'ne. **22** Ana'ma hutege'za Livae vahe'mo'za seli mono nompina, Aronine, ne'mofavre naga'anena zamaza hu'za Ra Anumzamo'ma Mosesema asami'nea kante ante'za eri'zana eri'naze. **23** Ra Anumzamo'a amanage huno Mosesena asmi'ne, **24** Livae naga'mo'za amanahu hugahaze, **25**'a kafureti mareri'nesnamo'za, mareri'za seli mono nompina eri'zana erigahaze. **25** Hianagi 50'a kafuma nehanu'za eri'zampintira

vagare'za mago'ene eri'zana e'origahaze. **26** Hu'neanagi eri'zazamifinti vagaresu'za nezmafuna amne zamaza hu'za seli mono nompi eri'zana kankamu zamire erigahaze. Hagi mago eri'zana zamagra zamavesitera e'origahaze. Hagi Livae vahe'mo'za amage ante'za eri'za kankamu zamire erigahaze.

9 Israeli vahe'mo'za Isipi mopa atre'za Sainai ka'ma hagage kokampima emani'naza kafua tare agateregeno ese ikantera, Ra Anumzamo'a amanage huno Mosesena asmi'ne, **2** Menina Israeli vahe'mo'za Isipi mani'nageno knazamo zamagatere'nea knagu'ma antahimi'za ne'za (Pasova) nesaza knama ante knarerera, mani fru hu'neza ne'zana neho. **3** Hagi ese ikamofona 14ni zagegna zupa, hinki'za kinaga eri agafa hu'za Isipi mani'nageno knazamo zamagatere'nea knagu antahimi ne'zana (Pasova) retro nehu'za, muse hu'zamofo tra kema ante'noa kasege'mofo amage antegahaze. Maka zupa ana knama ne-ena ana knagu antahigahaze. **4** Higeno Moses'e'a Israeli vahera zamasmige'za Isipi mani'nageno knazamo zamagatere'nea knagu antahimi ne'zana (Pasova) retro hu'naze. **5** Sainai hagage ka'ma mopafi, pusa ikamofona 14tini zagegna zupa hanima hu'za nehigeno, Isipi mani'nageno knazamo zamagatere'nea knagu antahimiza nezama nenaza knazupa (Pasova) agafa hu'za musena hu'naze. Ra Anumzamo Mosesema maka kasegema asmi'nea kante ante'za Israeli vahe'mo'za anara hu'naze. **6** Hu'neanagi mago'a vahe'mo'za avu sese osu'nagu Isipi mani'nageno knazamo zamagatere'nea knagu antahimi'za nezama nenaza knazupa (pasova)ohanati'naze. Na'ankure fri vahe avufare avako hu'nazagu, ana zagegna zupage Mosesene Aronikiznire vu'za amanage ome hu'naze. **7** Hagi tagra fri'nea vahe'mofo avufare avako hu'neta avusese osu'nonanagi, na'anku

Ra Anumzamofonte ofa huntegahaze hu'za Israeli vaheku'ma
hu'naza knare'ma neonana kasea hunerantaze? **8** Hazageno
Mosese'a amanage huno zamasmi'ne, navega mani'nenke'na
Ra Anumzamo'a na'ane huno tamagrikura hugahifi seli mono
nompina vu'na ome antahiteno. **9** Hagi Ra Anumzamo'a
amanage huno Mosesena asmi'ne, **10** Israeli vahera amanage
hunka zamasamio, tamagro, nagatamifinti forehu anante anante
hana'mo'za fri vahe'mofo avufare avakoma hanu'za agru osuge,
mago kaziga afete kama vugema hu'nesu'za, Isipi mani'nageno
knazamo zamagatere'nea knagu antahimiza ne'za nenaza
knarera (Pasova) amne negahaze. **11** Hagi nampa 2 ikamofona
14tini zage knarera kinagama haninki'za nehanige'za, zamagra
erigafa hu'za Isipi mani'nageno knazamo zamagatere'nea knagu
antahimi (Pasova) ne'zana retro hugahaze. Hagi zamagra
nezama nesazana zo'ore bretine, akake ani'naza negahaze. **12**
Hagi zamagra ana ne'zana nege'za atrenkeno ru nanterana
omanoge, lama afumofo zaferina'a ruha'ontagihio. Hagi maka
kasegema tamasmua ke avaririho. **13** Hianagi mago'mo agru
huno mani'neno, afete nantu kama onte kumate mani'neno, Isipi
mani'nageno knazamo zamagatere'nea knagu antahimiza neza
nenaza (Pasova) knagu agesa ontahisimofona, huntenko
naga'afintira mani otage huno manino. Na'ankure agra Ra
Anumzamofona ana knarera ofa huonte'neankino, kumi'amofo
knazana agra'a erigahie. **14** Hagi ru mopareti eman'i'naza
vahe'mo'za Isipi mani'nageno knazamo zamagatere'nea knagu
antahimiza ne'za nenaza knare (Pasova) Ra Anumzamofo
muse hunte'nakura magoke kasegene tra kere eman'i' vahe'ene,
mopa agafa vahe'mo'zanena avaririgahaze. Hampomo seli
nona refite'ne. **15** Seli noma azeri ot'i'za zupage hampomo

ana seli nona refitegeno, zagma ufregeno'a ana hampomo'a teve anefa kna huno remsa kenagera hu'ne. **16** Ana zanke huno mika zupa hampomo zagefina refitegeno, hanimpina teve anefa huno remsa hu'ne. **17** Hagi ana hampomo'ma ruotge seli nomofo agofetuti atre'noma vige'za, Israeli vahe'mo'za hage'za rurega nevu'za, ete mago kaziga ana hampomo'ma umanige'za, anante Israeli vahe'mo'za seli nona ome ki'za mani'naze. **18** Hagi Ra Anumzamo'ma zamasamia kante ante'za Israeli vahe'mo'za kana nevu'za, Ra Anumzamo'ma zamasamia kante ante'za seli nonku'ma zamia ome ki'za mani'naze. Hampomo ruotge seli nomofo agofetu umanire, anante seli nona ome ki'za mani'naze. **19** Ana zanke'ma huno hampomo ruotge seli nomofo agofetu hakare gna mege'za, Israeli vahe'mo'za Ra Anumzamo'ma kema hanigu avega ante'za mani'naze. **20** Hagi mago'a knafina hampomo ruotge seli nomofo agofetu mege'za, Ra Anumzamo'ma zamasami'nea kante ante'za avega ante'za ana nonte mani'nazageno, hampomo'ma vige'za ete Ra Anumzamo'ma zamasami'nea kante ante'za hage'za vu'naze. **21** Hagi mago'a knarera hampomo'a kinagareti meno vuno nanterama uhanatisigeno, hampomo'ma vanige'za zamagra hage'za vugahaze. Hagi masarero hanimpino, ina knarema hampomo'ma vanige'za, zamagra ana hampo avriri'za hage'za vugahaze. **22** Tare zageo, mago ikano, mago kafuo hampomo ruotge seli nomofo agofetu'ma mege'za, Israeli vahe'mo'za seli no kumazmifintira hage'za ovu'za mani'naze. Hianagi hampomo'ma ana kuma'ma atreno'ma vige'za hage'za vugahaze. **23** Hagi Ra Anumzamo'ma zamasamia kante ante'za seli nona ki'za mani'naze. Ra Anumzamo zamasamia kante ante'za hage'za

vu'naze. Hagi Ra Anumzamo'ma Mosesema asami'nea kante ante'za amage ante'naze.

10 Hagi Ra Anumzamo'a mago'ene amanage huno Mosesena asmi'ne, **2** Tare ufena tamagra hamanteti amasagitma silvare tro huteta, uferenkeno vea kevu'moza nentahiza eritru hu'za seli nozmia taganaviza vugahaze. **3** Hagi tarega ufentetima resageta, maka vea kevu'moza kagrite e'za seli nomofo kahante eme atru hoho. **4** Magoke ufentetima resageta, Israeli kva vahe'ma, nagate nagate zamazeri ot'i'aza kva naga'mo'za kagri kavuga etru hugahaze. **5** Magoke ufenkrafa hina, zage hanati kaziga ki'nesaza naga'mo'za hage'za ot'i'aza vugahaze. **6** Anante ufema tare zupa rena, henkamu (saut) kaziga ki'naza vahe'mo'za hage'za ot'i'aza vugahaze. Hagi ufema re'zamo zamazeri otina hage'za vugahaze. **7** Vahe'ma zamazeri atruma hunakura, kema fore hanige'za ufema resaza agerumo'a zazate ufena re'za viho. **8** Aroni ne'mofavrema pristi eri'zama e'neriza naga'mo'za ufentera zamagrake'za azerine'za, ana ufena regahaze. Hagi maka knafina zamagripintima fore hu anante antante'ma hu'za vanaza vahe'mo'zage ana hugahaze. **9** Henkama mopatamirema umani'nesageno ha' vahe'mo'za ha'ma huramante'za tamazeri havizama hanageta, hazenkemofo ufe renage'na, Ra Anumzana tamagri Anumzamo'na nentahi'na, ha' vahe zamazampinti tamagu vazigahue. **10** Hagi muse nehuta, mago'a ranknama ante zupo, mika ikamofo ese zagegna zupama kresramna vu ofa nehanuto, rimpia fruhu ofa kresramna vanaza zupa, Anumzamo'narega ana ufe resage'na nentahi'na tamaza hugahue. Nagra Rana, tamagri Anumzane. Hagi Israeli vahe'mo'za Sainai agona atre'za e'naze. **11** Hagi tare kafuma evigeno, tu ikamofona, 20ti knazupa, seli mono nomofo agofetu'ma me'nea hampomo'a

atreno vu'ne. **12** Ana hige'za Israeli vahe'mo'za nege'za ka'ma hagage mopa Sainai atre'za hage'za nevu'za, kumara ante'za manite manite hu'za nevazageno, ka'ma hagage mopare Parani ana hampomo'a umani'ne. **13** Ra Anumzamo'ma Mosesesema pusante'ma asmi'nea kante ante'za atre'za vu'naze. **14** Hagi Juda naga'moza sondia vahe'zmine kota hu'za krauefa (fleg) zami'ne eri'za nevazageno, Aminadabu nemofo Nasoni kva huzmante'ne. **15** Hagi Zuari nemofo Natanieli Isaka sondia nagatera kva huzmante'ne. **16** Hagi Helon nemofo Eliabu, Zebulun naga'mokizmi sondia nagatera kva hu'ne. **17** Anante seli nona tapage hu mopafi atrageno, Gersoni naga'ene, Merari naga'mo'za ana seli nona kofi'za zamage'a vu'naze. **18** Ana zamage'a Rubeni naga'moza krauefa eri'za sondia vahe'zmine nevazageno, Sedeuri nemofo Elizur ana sondia vahera kva huzmante'ne. **19** Hagi Zurisadai nemofo Selumieli, Simeon sondia nagatera kva hu'ne. **20** Gati naga'mokizmi sondia nagatera, Deueli nemofo Eleasafu kva hu'ne. **21** Anante Kohati naga'ma nevu'za, seli nompinti ruotge hu'nea zana eri'za kantega nevzage'za, seli nona azeri ot'i'tage'za, anapinka ruotge zantamina eri'za ome ante'naze. **22** Hagi ana amagera Efraemi sondia naga'mo'za krauefa (fleg) zamine eri'za nevazageno, Amihud nemofo Elisama kegava huzmante'ne. **23** Hagi Pedasur nemofo Gamalieli, Manase naga'mokizmi sondia nagatera kva hu'ne. **24** Hagi Benzameni sondia nagatera Gideoni nemofo Abidani kva hu'ne. **25** Henka zamefiga'a Dani naga'moza vugote'za, zamagra krauefa (fleg) eri'za henka nevu'za, ha' vahe'ma zamefiti esagu kegava huzmante'za vu'naze. Hagi sondia naga'zamirera Amisadai nemofo Ahieza kva hu'ne. **26** Hagi Okran nemofo Pagiel, Aseli naga'mokizmi sondia nagatera

kva hu'ne. **27** Hagi Enan nemofo Ahira, Naftali naga'mokizmi sondia nagatera kva hu'ne. **28** Mika zupa Israeli vahe'mo'za noma hage'za kasefa kumate'ma nevu'za, ana kante ante'za sondia vahe'zmine vutere hu'naze. **29** Mosese'a anage huno Midieni ne' Reueli nemofo Hobabuna asami'ne, Ra Anumzamo'a Nagra ana mopa tamigahue huno huhampri tante'nea mopare nevunanki, tagrane egeta so'e tavutava huganteta vamaneno. Na'ankure Ra Anumzamo'a Israeli vahe'mofona knare'za huhampri zamante'ne. **30** Hianagi Hobabu'a amanage hu'ne, nagra ovugahuanki, areti rukrahe hu'na mopani'aregane, naga ni'arega vugahue. **31** Higeno mago'ene Mosese'a amanage hu'ne, muse hugantoanki (plis) taternka ovugahane. Na'ankure kagra ka'ma hagage mopafima nonkuma ante'zana antahinkakenka hu'nanku, tagrane nevunka kana taverigahane. **32** Hagi kagrama tagrane esnanketa, Ra Anumzamo'ma knare'zama tamisigeta, anazanke huta kagrira mago'a zana kamigahune. **33** Hagi anantetira Israeli vahe'mo'za erigafa hu'za Ra Anumzamofo agona Sainai atre'za tagufa zage gnamofo agu'afi kana vu'naze. Ra Anumzamofo huhagerafi huvempage vogisia kofi'za tagufa zagegnafi vugote'za nevzageno, kuma'ma ome ante'za manisare zameri hutere huno vu'ne. **34** Seli nonkumazmima atre'za nevzageno'a, Ra Anumzamofo hampomo'a zagegnafina turuna huzmante'ne. **35** Hagi huhagerafi huvempage vogisima kofi'za vunaku nehzageno'a, Mosese'a anage hu'ne, Ra Anumzamoka otinka ha' vahetia zamahe panini huge'za nefresage'za, kagrima ha'ma renegantaza vahe'mo'za koro freho. **36** Hagi huhagerafi huvempage vogisima inaregoma umanigeno'a, Mosese'a anage hutere hu'ne. Ohampriga'a Israeli vahe'motarera ete eno.

11 Hagi Israeli vahe'mo'za knazama eneriza zanku zamesra hige'za Ra Anumzamofo agesafi kehakare hazageno, Ra Anumzamofona tusi asi vazigeno mago'a atuparega meno evu'nea kumara teve tagintegeno teme vu'ne. **2** Ana'ma hige'za vea'moza nege'za, Mosesente taza huo hu'za zavi krafa eme hazageno, Mosese'a Ra Anumzamofontega nunamu higeno, ana tevemo'a asu hu'ne. **3** Hagi ana kuma'mofo agi'a Taberae hu'za agia ante'naze. Na'ankure zamagrama ke hakarema hazageno Ra Anumzamofo tevemo zamagri amu'nompi teve re'negu anage agia ante'naze. **4** Mago'a ru vahe'ma Israeli vahe'enema emeri havia hu'za vu'naza vahe'mo'za masave ne'za nenaza vaheki'za, ne'zama nesagu nehage'za, Israeli vahe'mo'zanena zamagranena ke hakare hu'za, tananke zana iza tamisnigeta negahune? **5** Tagra Isipi mani'neta nozama, konomia, merenima, aka osu ani'ani'ma (leek), ani'ani'ma, galikima miza oseta amne nenona zankura tagesa nentahune. **6** Hianagi menina hanavetia omanegeno, ne'zantia omnegeno, manage me'ne! **7** Manamo'a, ampori'e ragagna huno kani kruke hu'ne. **8** Hagi ana mana nantera ot'i'za eka eka kupi zogi ante'za, mago have tra ante'neza mago havenu atufe'za vu'za eza nehazageno refuzafupeno ta'nefa sege, magru riga onaginefi rentra hazageno tanefa asege'za kavofi krete'za, kuta keki tro hu'naze. Haga'amo'a olivi masavempi kre'naza kekimofo haga gna hu'ne. **9** Kenage'ma seli nonkumapima atako'ma eneramigeno'a ana manamo'a magoka herafirami'ne. **10** Israeli vahe'mo'za seli nozamimofo kahante mani'ne'za maka'mo'za zavi netageno, Ra Anumzamofo rimpa ahe'zamo otigeno, Mosese'a ana zama negeno musena huozmante'ne. **11** Anante Mosese'a amanage huno Ra Anumzamofona asmi'ne,

Na'ante Ra Anumzamoka kagri eri'za vahekamo'na ama zana
erifore hune nami'ne? Nagrira musena huonantenka, maka
vahe'mokizmi knazana nagrira eri kofi nenantano? **12** Ngrake
ama ana vahera kase zamante'nofi? Nagra nezmafana mani'nofi?
Kagra nagrikura hunka, kasumpinka zamanukinka, a'nemo'za
mofavre zamasunte zamanu'nekiza kna hunka, zamavarenka
zamafahe'i huhampri zamante'nana moperara vuo hankena neo?
13 Zamananke zana inantegati ama ana maka veara eri fore
hu'na zamigahue? Zamagra navufi zavi ate'za anage nehaze,
tananke zana tamigeta namneno hu'za nehaze! **14** Ama ana
eri'zamo'a tusi'a kna navenesiankina, mika'a veara nagrakera,
inankna hu'na kva huzmantegahue? **15** Amanahu hunka nagri'ma
nazeri haviza hunaku'ma hanunka, muse hugantoanki Kagri
kvufima knare'ma hu'nesugenka, ame' hunka nahe nefrinka,
atregeno ama knazamo'a nazeri haviza osino. **16** Hagi Ra
Anumzamo'a ana kema nentahino amanage huno Mosesena
asm'i'ne, Israeli vahe'ma kva eri'zama enerisaza vahepintira 70'a
vahe zamavarenka kagrane seli nomofo avuga eme otiho. **17** Hagi
anante Nagra eramina kagra'ene keaga eme nehu'na, kagripintira
mago'a Avamura eri zami suge'za, kaza hu'za veamokizmi
knazana mago'a erisagenka, mago'ene maka knazana kagrakera
e'origahane. **18** Veara zamasamige'za, okina zamananke'zana
(mit) negahazanki, zamazeri agru hu'za zamavufaga eri otage
hiho. Na'ankure zavi krafagema hazana Ra Anumzamo'na
antahi'noe. Iza magora tananke zana tamisigeta negahune! Isipi
mani'nonana knare'zantfa huta mani'nonane hutama hazankea,
Ra Anumzamo'na antahinoankina tmananke'zana taminugeta
negahaze. **19** Ne'zama tamagrama nesazana, magoke zagefino,
tare zagefino, 5fu'a zagefino 10ni'a zagefino, 20'a zagefino, **20**

mago ikampina tamagra nenesageno, tamagona kampinti katati
huno tamagoteno tamavresra hugahie. Na'ankure tamagrane
nemanua Ra Anumzamo'na tamage'na hunamita zavi neteta
anage hu'naze, Nahigeta Isipi'a atreta e'nesunane? huta hu'naze.
21 Hianagi Mosese'a ana kemofo nona'a amanage hu'ne,
600,000ni'a sondia vahe'ene menina nagra mani'nogenka, Kagra
anage hane, Nagra zamananke'za zamisanuge'za mago ikamofo
agu'afina negahaze nehane. **22** Sipisipi kevune, bulimakao
kevu aheta tragafeta zamsuna zamo'a, maka vahe'mokizmi
agu hezmanategahifi? Hifi maka hagerimpinti nozame azeri
atru huta zamsunazamo, agua ahezmanategahio? **23** Ra
Anumzamo'a amanage huno Mosesena ke nona'a asmi'ne,
Ra Anumzamo'na hanavemo'a atupa hu'nefi? Nagri kemo'a
tamage huno nena raga'a efore hugamigahio, huogamigahio
menina kagra kegahane. **24** Mosese'a vuno Ra Anumzamo'ma
asm'i'nea naneke'a ana maka veara ome nezamasamino, 70'a
kva vahe huhampri zamante'nea zamavareno seli nonte ome
zamante kagi'ne. **25** Hagi Ra Anumzamo'a hampompi eramino
keaga hunezamino, mago'a Mosesempi mani'nea Avamura
erino ana 70'a kva vahete ante'ne. Higeno ana Avamuma
zamagrite emanige'za zamagra kasnampa kea osi'a knafi
hu'naze. Hianagi ete anama hute'za mago'enena ana kasnampa
kea osu'naze. **26** Ana hianagi tare kva netrena seli mono
nompina mareorina'e, mago'mofo agi'a Eldati'e, hagi mago'mofo
agi'a Medati'e. Zanagra kumapi mani'nakeno, Ra Anumzamofo
Avamumo zanagrite emanige'ne, ana zanke hu'ne kasnampa
keaga ana kumapina hu'na'e. **27** Ana nehakeno mago nehzave
ne'kanomo agareno vuno Mosesena anage huno ome asami'ne,
Eldatike Medatikea kasnampa keagaga kumapina neha'e.

28 Nun ne'mofavremo Josua, nehazama'are Mosesena aza
nehia ne'mo huno, Mosesega ranimokagi zanatregeke ana
keaga osi'o. **29** Hianagi Mosese'a ke nona amanage hu'ne,
kagra nagritega antenka kasnampa kea osi'o nehampi? Ra
Anumzamofonte maka kasnampa vahera tro hanazegu nagesa
nentahuankino, Ra Anumzamo'a Avamura Agra'a zamigahie! **30**
Ana'ma hute'za ete Mosese'ene Israeli kva vahe'mo'zanena
kumapi vu'naze. **31** Mago zupa Ra Anumzamo'a hankavenentake
zaho huntogeno hagerintegati mika'a hifa' nama zaga renatigeno
hareno Israeli vahe'ma kuma kiza mani'nazarega emani avite'ne.
Mago zage gna anagamu (not) kazigane, henkamu (saut)
kazigane vuga'are kumamofona agofetu emani emani higeno,
ana hifa' namamo mopa aviteno mreri'neana tare kiubits (1 mita
gna hu'nea avamente emani'naze). **32** Hagi veamo'za mago
zagegi, mago kenageki, anante zagegi hu'za ana hifa nama
zogi'naze. (Iza'o osi'ama zogitere hu'nemo'a 1tauseni'a kilo mago
mago'mo'a zogitere hu'ne) ana hifa' nama zogite'za kumamofa
refarega zagere ante hagege hu'naze. **33** Hagi ana namama
agafama hu'za ani'za nakriku nehazegeno, Ra Anumzamofa
rimpa he'zamo'a mrerigeno, tusi kri vahe'mokizmi zamavate
atregeno eme zamazeri haviza hu'ne. **34** Hagi memema ase'za
zamagrugu'ma antahi'naza vahera zamahe hana hige'za
fri'naze. Ana vahera anampi asene zamante'za ana kuma
agi'a Kibrot-hatava hu'naze, (meme vahe asente kumare hu'za
agi'a ante'naze). **35** Kibrot-hatavatira Israeli vahe'mo'za atre'za
Hazeroti vu'za, anantega Hazeroti mopare zaza kna umani'naze.

12 Mosese'ma Kusa (Itiopia) kumate a'ma eri'nea zanku
huke Miriamuke, Aronikea kehakare hunteke, **2** zanagra
anage hu'na'e, Ra Anumzamo'a Mosesenke kegaga hunemifi?

Anazankera huno tagri'enena Agra kea huoramigahio? Anage
nehakeno Ra Anumzamo antahi'ne. **3** Moses'e'a menina
avufga antermino agazone huno mani nera mago'a nagara
zamagatereno agrake mani'ne. Magore huno agri kna vahera
ama mopafina omani'ne. **4** Ana'ma hakeno'a ame huno Ra
Anumzamo'a Mosesene, Aronine, Miriamunku'enena anage
hu'ne, ana maka **3'a** nagamota atiramita seli mono nomofo
avuga eho. Hige'za ana **3'a** naga'mo'za eme atru hu'naze. **5**
Hagi anante Ra Anumzamo'a vimago hampompi eramino seli
mono nomofo kasante eme otineno, Aronine, Miriamu kiznigu ke
higeke tarega'moke avuga akeno, **6** anante Ra Anumzamo'a
amanage huno zanasmi'ne, Menina Nagri nanekea antahi'o.
Tamagri amu'nompi mago kasnampa vahe'ma mani'negena
Nagra Ra Anumzamo'na ava'nafi efore hunemina, avanagna
zampi efore hu'na kea hunemue. **7** Hagi Nagri eri'za vahe
Mosesena anara huontegahue. Nagra antahi nemina hakare
eri'za zantera knare huno kva hugahie hu'na Ra Anumzamo'na
antahinemue. **8** Nagra fronka kea agri'enena osu'na, amate
tagipinti kea ohumi ahumi nehu'e. Tanagra nahigeta korora
nosuta, Nagri eri'za ne' Mosesena amefiga'a kea nehuta, hu
havizana hunenta'e? **9** Ra Anumzamo'a tusi rimpa nehegeno
zamatreno Agra vu'ne. **10** Ana'ma higeno'a seli mono nomofo
agofetuti hampomo atreno vigeno, keana fugo namu Miriamuna
re'geno efeke hu'ne. Aroni'a rukrahe huno'ma keana, Miriamuna
fugo namure'negeno ke'ne. **11** Anante Aroni amanage huno
Mosesena asmi'ne, ranimoke tusiza hu'na nasunku hue, ama'na
kumitera tagira tazeri haviza osuo, negi vahe kna huta hago
kumi hu'no'e. **12** Hagi Miriamu avufga atregeno haviza huno,
kase nefria mofavremofo avufgamo knopeneramia knara osino.

13 Anante Mosese'a zavi neteno ranke huno nunamuna Ra Anumzamofontega huno, muse hugantoanki Miriamuna kri'a eri atrento. **14** Hianagi Ra Anumzamo'a Mosesena anage huno ke nona'a hunte'ne, Nefa'ma avufima avetu ahentesigeno'a, 7ni'a zage gnafina agaze zana e'orisio? Atrenkeno 7ni'a zage gna kumamofo fegi'a umani'nena, ana kna vagarena ete avreta kumapina efreho. **15** Miriamuna kumamofo fegu'a 7ni'a zagegna atrazageno mani'nege'za, hage'za ovuza mani'nageno Miriamu'a ege'za ete avre'naze. **16** Henka'a, anazama vagarege'za, Israeli vahem'o'za Hazeroti'a atre'za ka'ma hagage mopafi Parani hage'za kumara ome ki'za mani'naze.

13 Anante Ra Anumzamo'a amanage huno Mosesena asmi'ne, **2** Nagrama Israeli vahem'o'za zamiku'ma hu'noa mopa, 12fu'a naga nofipinti magoke magoke kva vahezmi huzmanteg'e'za oku'a vu'za Kenani mopa ome afure'za keho. **3** Higeno Parani ka'ma hagege mopafi mani'nafintira Mosese'a Ra Anumzamofo ke amage anteno, Israeli vahepintira kva vahezmi huzmanteg'e'za vu'naze. **4** Anama vu'namokizmi zamagi'a ama'ne, Rubeni nagapintira, Zakuri nemofo Samua'e. **5** Simeon nagapintira, Hori nemofo Safati'e, **6** Juda nagapintira, Jefune nemofo Kalepi'e. **7** Isaka nagapintira, Josefe nemofo Iga'e, **8** Efraemi nagapintira, Nuni nemofo Hosea'e, **9** Benjamen nagapintira, Rifu nemofo Palti'e. **10** Zebuluni nagapinti, Sodi nemofo Gatieli'e, **11** Josefe ne'mofavre Manase nagapintira, Susi nemofo Gati'e, **12** Dani nagapintira, Gemali nemofo Amiel'i'e, **13** Aser nagapintira, Maikol nemofo Seturi'e, **14** Nafatali nagapintira, Vofsi nemofo Nabi'e, **15** Gad nagapintira, Masi nemofo Geuel'i'e, **16** Ama'i oku'a vu'za mopa afure'za kehogu huzmanteg'e'za vu'naza vene'ne zamagi'e. Hianagi Nun nemofo Hoseanku, Mosese'a Josua'e

huno agi'a antemi'ne. **17** Moses'e'a Kenani mopa vu'za ome afure'za kehogu, agra anage huno huzmante'ne, Anagamu Negev mareriteta, anantetira agona moparega marerih. **18** Mopamo'a inankna hu'nefi ome negeta, ana mopafima nemaniza vahera hanave vahepi hanavezamia omne'ne vahepi, osi'a mani'nafi, rama'a vahe mani'nafi ome keho. **19** Inankna hu'nea mopafi nemanizo, ana mopamo'a knare hu'nefi, haviza hu'nefi? Ranra kuma'zamimo'a inankna hu'ne, ruherafi'za kumara ante'za mani'nafi, hanave vihu kegina hu'nazafi keho? **20** Mopamo'a inankna hu'ne, masvema'ane mopafi hagege hu'ne? Anampina zafa me'nefi omane'ne? Ete eku'ma hanuta mago'a zafa raga eri'neta eho. Ana'ma huzmante'neana krepimo ese agafa huno afure'nea knafi huzmanteg'e'za vu'naze. **21** Zini ka'ma hagege kokampi mareri'za ana mopa oku'a afu omere'za nege'za, Rehob vu'za Lebo-hamati kaziga uhanati'naze. **22** Hagi Negevi mareri'za uhanatite'za, Anaki agehe'za Ahimanima, Sesai'ma, Talmai'zama hu'za, Hebroni mani'nazare vu'naze. (Hebroni kuma erifore hu'naza kna 7ni'a kafu agateretege'za, Zoan kumara Isipi'a erifore hu'naze). **23** Anantetira Eskol agupofi uhanati'za, anampinti krepimo mago azankunate manumanu huno te'nea akafr'i'za, zafare taremake zafa hutere nehu'za, mago'a pomigrenet ragane, fiki ragane eri'za e'naze. **24** Ana kokankura Eskol agupoe hu'za hu'naze. Na'ankure mago'pima (manu manuma huno zafa rgama re'nege'za Israeli vahe'mo'za akafr'i'za) eri'za e'nagu hu'naze. **25** Hagi 40'a zage gnamofo agu'afi mopa oku'a vano hu'za afure'za kete'za e'naze. **26** Mosesene, Aronine, maka'a Israeli vahe kevune Paran ka'ma hagege mopafi, Kades mani'nage'za, Kenani mopafima me'nege'za kete'za aza zamofo nanekea eme nezmasmi'za, ana mopafinti zafa ragama eri'za

e'nazana eme zamaveri nehu'za, **27** amanage hu'za Mosesena
asmi'naze, Hurantanketa vu'nona mopafina, tamage huno ami
rine, tume rinena avite'ne. Hagi anampinti'ma zafa rgama erita
e'nonana ama'ne. **28** Hianagi ana mopafina hanavenentake
vahé manine'za, ranra kuma'zamirera tusinasi vihu hu'naze.
Hagi anampina Anaki nezmagehoza mani'nageta zamage'none.
29 Ameleki vahera Negev mopafi mani'naze, Hiti vahé'ene,
Jebusi vahé'ene, Amori vahé'enena agona mopafi mani'naze.
Hagi Kenani vahera hageri ankenane, Jodani timofo ankenarega
mani'za evu'naze. **30** Hagi Mosese avuga, Kalepi'a otino
amanage hu'ne, Kea tagane'neta antahiho, inazano fore hania
zankura ontahita, otinketa marerita ana mopa omeri maneno.
Na'ankure tagra hara huzmagatereta mopa erigahune. **31** Hianagi
mago'a vahé'ma agrane vu'naza vahé'mo'za amanage hu'naze,
tagra ana vahera zamahega osu'none. Na'ankure hanave
zamimo'a tagri hanavea agatere'ne! **32** Ana mopa ome afure'za
kete'za e'naza vahé'mo'za, koro nehu'za Israeli vahera havige
rezmatga hu'za anage hu'naze, anama ome ke'nona mopamo'a
aza'o ana mopare umani'simofona aheno nehna hugahie. Hagi
ana mika vahé'ma zamage'nona vahera tusinasi vahé mani'naze.
33 Ana mopafinke Nefilim vahera nezmageta, Anaki vahera,
Nefilim vahé'mokizmi zamagehezagita, tagrama zamagonana
kenu kna tagra hu'none. Hagi zamagrama taga'zana ana zanke
hu'none.

14 Ana maka vahé kevu'moza ana nanekema antahite'za,
Israeli vahé'mo'za ana kenagera tusi zavi ate'naze. **2** Israeli
vahé'mo'za Mosesene, Aronikiznia keha' reznante'za maka
vahé'mo'za anage huznante'naze, Tagra Isipima mani'neta
frunte'sina knare hisine! Nahanigeta ama ka'ma hagege mopafina

frigahune! **3** Ra Anumzamo'a ama moperera kazinknonu tahe
frihogu tavreno e'nefi? A'nene, mofavretinena tahe'za hanaresagi,
eteta Isipima vanunkeno'a knare hugahie? **4** Zamagra zamagra
ke ohumi ahumi hu'za anage hu'naze, tagra'a tavesite mago
kva ne' azeri otisunkeno, ete tavreno Isipi mopare vanie!

5 Anante Mosese'ene Aronikea maka Israeli vahe'mokizmi
zamufi zanavugosaregati mopafi mase'na'e. **6** Ana hakeno
Nun nemofo Josua'ene, Jefune nemofo Kalepike, zanagra
ana mopa vu'ne ome ke'na'a netre'moke, kukenaznia vararo
varuru nehu'ne, **7** amanage hu'ne maka Israeli vahe kevua
zamasmi'na'e, Ana mopama ome ke'nona mopamo'a knare
zantfa hu'ne. **8** Ra Anumzamo'ma muse (plis) hurantesuno'a,
henka tagrira ana mopare tavreno vuno, ami rine tumemofo
rimo'ene avite'nea mopa ome tamigahie. **9** Ra Anumzamofo
kea magore huta ru ha'ontagijo. Ana mopafima nemaniza
vaheku'enena korera osiho, zamagra tagri nezasegahaze.
Zamagri'ma refiteno kegava krizmante'nea zana eri atregahie.
Hagi Ra Anumzamo'a tagrane mani'neanki zamagrikura korera
osiho, **10** Hianagi ana maka vahe'mo'za have kano eri'za
zanahe fri'za nehazageno, anante Ra Anumzamofo msazamo
seli mono nonte eramino Israeli vahe zamavuga efore hige'za
ke'naze. **11** Hagi Ra Anumzamo'a amanage huno Mosesena
asmi'ne. Nama'a zupa ama vahe'mo'za Nagrira zamagena
hunenami'za, zamesi nonantaze? Nenagage'na maka kaguvaza
amu'no zamifi eri fore hu'noa zankura, Nagrikura zamentintia
nosazo? **12** Nagra kri atrena zamahe fanane nehu'na, Mosesega
naga ka'afinti kazeri ra ha'nena zamagatere'za hanave'nentake
vahe fore hu'za, Israeli vhahera zamagatere'za manigahaze. **13**
Hu'neanagi Mosese'a ana kemofo nona'a Ra Anumzamofona

amanage huno asmi'ne, ana kea Isipi vahe'mo'za antahigahaze, na'ankure Kagra hanavefi ama vahera, Isipi vahe amu'no zamifinti zamarenka e'nane. **14** Isipi Kenani mopafima nemaniza vahera zamasamigahaze. Kagrama Ra Anumzamoka ama vahe amuno zamifima nemaninana, zamagra hago antahi'naze. Kagra Ra Anumzamoka zamufinti negagazagenka Kagra hamponu refite nezmantenka, Kagra Israeli vahe'mokizmi vugotezmantenka vimago hampompi nevunka, zagefina refite nezmantenka, hanimpina ana vimago hampompintira teve anefa hunka remsa huzmantenka nevane. **15** Menima Kagrama, magoke vahe aheaza hunkama ama vahe'zaga zamahe sanke'za, maka ama mopama megaginefinti Kagri kagenkema nentahi'za vahe'mo'za amanage hugahaze, **16** Ra Anumzamo huhampri zamanteno huvempa huzmante'nea mopare zamavareno vugara osuno, ka'ma mopafi zamahe fanane hie hu'za hugahaze. **17** Hianagi menina, nagra nunamu hue, Kagrama hunana kere, Ra Anumzamoka atregeno hihamu hanavekamo'a eama hino. **18** Ra Anumzamofo rimpa ahe'zamo'a ame huno oranotigeno, rimpa fru huno avesinte zamo'a mareri avitegeno, kumi'ene kefozantine eri atre'nerante. Hianagi aza'o kasege'ama agatere'simofona, kumi'mofo nona'a nezmafanteti vuno, nemofonte vuteno henkama fore'ma hu anante anantema huno 3'o 4'a vahe'enema fore hu anante anante'ma hanaza vahete ana havizamo'a meno vugahie. **19** Kagra vagaore kavesizanka'agu nentahinka nunamu huanki kumi'zmi ama vahera atrezmanto. Ama vahe'ma Isipima mani'hagenka Kagrama kumizamima eri atrenka menima e'nana kna hunka eri atre zamanto. **20** Anage higeno Ra Anumzamo'a amanage huno Mosesena asmi'ne, Nagra kema nasmi'naza hu'na kumi'zmia eri atre zamantegahue. **21** Hianagi tamage

hu'na Nagra kasefa hu'na mani'noa Anumzamo'na huankino,
Ra Anumzamo'na hihamune, msazamo e'nena maka mopafi
vuno eno huno avitegahie. **22** Tamage hu'za maka vahe'mo'za
Nagri masane kaguvazana Isipine, ka'ma hagege mopafine
eri fore huge'za nege'zagi, anazankura ontahi'za 10ni'a zupa
Nagrira renahe'za nege'za, Nagri kemofona amagera onte'haze.
23 Ana hu'nazagu tamage hu'za nezmafama huvempa hu'na
Nagrani'a zami'noa mopa, namefiga'a ke nehazamo'za onke'tfa
hugahaze. **24** Hianagi Nagri eri'za ne' Kalepi'a kegahie. Na'ankure
agripina ruzahu avamu me'negeno maka agu'areti huno Nagrira
maka zampina namage ante'negu ana mopare Nagra avre'na
vanugen, ana mopa agehe'za eri nafa'a hugahaze. **25** Menia
Ameleki vahe'ene Kenani vahe'mo'za ana aguporamimpina
mani'nazagu, okina rukre hunka ka'ma hagage mopafi ru
kitaginka Koranke Hageri me'nerega vuo. **26** Ra Anumzamo'a
anage huno Mosesene, Aronikizni znasami'ne, **27** Nama'a zupa
ama'i kumike vea kevumo'za, Nagri'ma huhaviza hunenantaza
vahe'mokizmi knazana erigahue? Israeli vahe'mo'za Nagri'ma
hunenantaza kea nentahue. **28** Menina zamasmio, tamage
hu'na kasefa hu'na mani'noa Ra Anumzamo'na nehue, nagesa
kami'nogenka hankena antahuankina inankna zanku'ma hana
zana amne hugahue. **29** Kagrama hampri'nana vahe'ene, maka
20'a kafureti mareri anagate'nesia vahe'ene, Nagri'ma namefi'age
hu'nesaza vahe'mo'za ka'ma hagege mopafi fregahaze. **30**
Tamage huvempa hurmant'e na tamagri tamamigahuema hu'noa
mopafina ovugahaze. Hianagi Jefune nemofo Kalepi'ene Nuni
nemofo Josuake, zanagrake vugaha'e. **31** Hianagi tamagrama
huta, mofavreti zamahe fanane hugahaze huta koro'ma hu'naza
mopare, ana mofavremokizmi Nagra zamavare'na vanuge'za,

i'oma hu'naza mopa ome erigahaze. **32** Hagi tamagra, ama ka'ma hagage mopafi frigahaze! **33** Hagi tamagrama Nagri kemofo amage onte'naza nona'a, mofavretmimo'za ama ka'ma hagage mopafi 40'a kafufina knazana eri'za vano nehu'za, anama maka'mo'za ama ka'ma hagage kokampi frigahaze. **34** Zamagrama ana mopafi 40'a zagegnafi vano nehu'za oku'a afure'za kenazankna huta, kumi'tmimofo nona mago mago knamo'a mago mago kafu huvame hanigeta, 40'a kafufi knazana erita vano hugahaze. Nagrama hurmantesua navu'navara kegahaze. **35** Nagra Ra Anumzamo'na kea nehue, kumike vahe'mo'za atru hu'za Nagri'ma hu haviza nehzana tamage hu'na kna zamigahue. Ama ka'ma hagage mopafi zamazeri haviza ha'nena fri hana hugahaze. **36** Mosese'ma huzmantenge'za oku'a vu'za mopa ome afure'za kete'za e'naza vahe'mo'za maka vahe kevu havige eme zamasmi'naze. **37** Hagi mopa afureho huno huzmantenge'za vute'za, ete eza havige eme hu'naza vahera, Ra Anumzamo'a kri atregeno zamahe fri'ne. **38** Hianagi huzamantege'za vuza mopama ome afure'za ome kete'za e'naza nagapintira, Nun nemofo Josuane, Jefune nemofo Kalepikizni znatregeke zanagrake mani'na'e. **39** Mosese'ma ana kema Israeli vahe'ma nezmasmige'za, vahe kevumo'za tusiza hu'za zavira nete'za zamasunku hu'naze. **40** Hianagi ame' nanterampi oti'za mika'zazimia tro hu'za agonarega mareri'za nevu'za anage hu'naze, Tagra ama one, tamage kumi' hu'nonanagi, Ra Anumzamo'ma huhampri tante'nea moparega vugahune. **41** Hagi Mosese'a amanage huno zamasmi'ne, Tamagri antahizamo'a eri'zana e'origahie. Tamagra Ra Anumzamofo ke ruha'nentagize. **42** Anantega Anumzamo'a tamagranena ovanigeno ha' vahetamimo'za tamahegahazanki tamagra

mareorigahaze. 43 Tamagri ha' vahe'mo'za Ameleki vahe'ene Kenani vahe'mo'zatamavuga mani'nazeanki'za kazinknonteti tamahegahaze. Hagi Ra Anumzamofo ke'a tamefi hunte'naza nona'a, Ra Anumzamo'a tamagra'hena ovugahie. 44 Hianagi mago'a Israeli vahe'mo'za Mosese kea eri amne nehu'za, agonarega mareri'za vu'haze. Ra Anumzamofo huhagerafi huempage vogisimo'a anampi me'negeno, Mosese'enena kumara atreno ovu'ne. 45 Hagi Ameleki vahe'ene Kenani vahe'ma ana agona mopafi nemaniza vahe'mo'za erami'za zamahe'za zamarotgo hazage'za fre'za Homa kumate ehanati'haze.

15 Ra Anumzamo'a amanage huno Mosesena asmi'ne, 2 Israeli vahera zamasmige'za taminaku'ma nehua mopafima umanisu'za avaririsaza kasegea ama'ne. 3 Hagi tamagratami tamavesite kresramna vu ofa hugahazo, huempa hunesare hu ofo, ranra knare'ma hu ofa hanazana, tamagra'a afu kevufinti bulimakaone, sipisipine, memene aheta kresramna tevefima nevazage'nama mna'ama nentahina Ra Anumzamo'na musema nehua ofa hugahaze. 4 Hagi mago'mo'ma sipisipio memema ofama erinoma Ra Anumzamo'narema esuno'a mago kilo hu'nesia witia 1lita olivi masavene eri havia huno herunesia witi ofama hu'zana erino egahie. 5 Hagi kresramna vu ofama hanazana, mago sipisipine 1lita wainine kresramna vugahaze. 6 Hagi ve sipisipima kresramna vunaku'ma hanuta, 2kilo hu'nesia witine 1litagi hafu'a lita olive masavene herugahaze. 7 Hagi waini ofama hanuta, 1litagi hafu'a lita waininu sipisipinena ofa hanage'na mna'ama nentahina musena hugahue. 8 Hagi agaho bulimakaoma aheta kre fanenema hu ofama hunakuma hanuto, huempama hunesarema ofama hunaku'ma hanuto, rimpfa fru ofama hunaku'ma hanuta, 9 witia 3'a kilo hu'nesia herafinteta,

2'a lita hu'nesia olivi masavene herugahaze. **10** Hagi 2 lita waini enerita mago ve bulimakaone erita eho. Nagra Ra Anumzamo'na e'ina hu ofamofo mna'a nentahina musena hugahue. **11** E'ina huta witima, olivi masavema, waini ofanena mago'mago ve bulimakaone, ve sipisipine, sipisipi anenta'ene meme anenta'ene ofa Nagritega hugahaze. **12** Hagi e'inahukna huta maka ofa hugahaze. **13** Maka Israeli vahepima kasezmantesaza vahe'mo'za kresramna vanage'na mana'ama nentahina musema hanua ofama hanuza anahukna hugahaze. **14** Hagi tamagranema emani'naza vahe' mo'za kremna vanagena mna'ama nentahina musema hanua ofama hanuza, ana zanke' hu'za ama kasegea avaririho. **15** Hagi magoke tra ke me'nena rurega vahe'ene Israeli vahe'motanena avaririgahaze. Ama'i ana tra kemo'a mevava huno vugahie. Na'ankure Nagra Ra Anumzamo'na Israeli vahe'ma tamagoana magoke avamenteke vahe mani'naze. **16** Hagi ama magoke tra ke me'nena rurega vahe'ma tamagranema emani'enaza vahe'mo'za avaririgahaze. **17** Ra Anumzamo'a anage huno Mosesena asami'ne, **18** ama nanekea Israeli vhahera zamasamio, nagrama taminaku'ma nehua mopafima uhanatita, **19** mopafima hozama ome antesageno ne'zamo'ma nenama hina, ese ne'zana refko huta ofa eme namiho. **20** Hagi witi hozama antesageno ese'ma nenama hania witia erita witima refuzafunepaza kumapi ome refuzafupeteta, kekia kreta eme namiho. **21** Hagi henkama fore hu anante anantema hu'za vanaza vahe'mo'za, ama ana tra ke avariri'za bretia kre'za ofa hugahaze. **22** Hagi Ra Anumzamo'nama Mosesema asami'noa tra kema mago vahe'mo'ma mago'azama hanirega hantga huno runetragenigeno, **23** henkama fore hu anante anantema hanaza vahe'mo'za Ra Anumzamo'na Mosesesema asami'noa tra kema

mago'a zama haniregama hantga huno runetragenigeno, **24**
ana mikamotama mago'azama hanaregama hantga huta tra
ke'nima ruhantagisuta, mago ve bulimakao afu kre fanene hu
ofa nehinkena mna'a nentahina musena haneno. Hagi ana
ofama hanazana witine, wainine nehuta mago ve memena
aheta kumima apasente ofa kresramna vugahaze. **25** Hagi pristi
vahe'mo ama ana ofa nehanige'na, Israeli vahe'mokizmi kumizmia
apasenezmantena kumizmia atrezmantegahue. Na'ankure
zamagra kumi hugahune hu'za ontahi'neza hu'naza kumite Ra
Anumzamonare'ma eme hanaza ofa hugahaze. **26** Ana hanagena
mika Israeli vahe'ene ruregati tamagranema enemaniza
vahe'mofo kumi'zmima apasezamantenu'a ofa hugahaze.
27 Hagi mago'moma kumi hugahuema huno ontahineno
mago'azama hanirega hantaga huno'ma hania kumitera,
magoke ve meme anenta aheta kresramna vanageno, **28** pristi
ne'mo'a kumi'ma hu'nesia nemofonteku huno krenkena, kumi'a
apasentegahue. **29** Hagi ama'i tra kea maka Israeli vahe'motane
rurega vahe'ma tamagranema enemaniza vahemo'zanena
avaririgahaze. **30** Hagi Israeli vahe'mo'o, rurega vahe'ma
tamagranema emani'enaza vahe'mo'za kumi'ma hanamo'za,
Anumzamofo huhaviza hunteankna hugahazanki'za, Israeli
vahepintira zamahe'natregahaze. **31** Na'ankure anamo'a amefi
hunamino agra'a avesite tra keni'a rufutagi'ne. Ana hu'negu
Sabati tra ke rufutaginea kumimo'a agrite megahianki, anamofona
ahe frigahaze. **32** Israeli vahe'mo'za mago Sabati knarera ka'ma
hagege kokampi mani'nazageno mago ne'mo'a teve'za nehige'za
ke'naze. **33** Ana nera azeri'za Mosesene Aronikiznire'ene
mika Israeli vahete vu'naze. **34** Hagi ana ne'mofona nankna
hazenke amigahaze ontahinazanki'za ana nera atrageno

ovu'neanki kina huntazageno man'iné. 35 Hagi Ra Anumzamo'a amanage huno Mosesena asmi'né, mika veara zamasmige'za kuma'mofona fegi'a avre'za vu'za have knonu ome ahe friho. 36 Ra Anumzamo'ma Mosesema asmia kante ante'za, ana nera avare'za seli no kumofona fegia vu'za haveknonu ome ahe fri'naze. Nofima kukenarema renentaza kasege. 37 Ra Anumzamo'a Mosesena amanage huno' asmi'né, 38 Israeli vahera zamasmige'za kenazmimofo agenteganofira rente'za eviho. Hagi kukenamofo agentega haninke nofi rente'za evugahazanki anazana mika knafima henkama fore hu anante anante'ma hu'za vanaza vahe'mo'za kukenazmimofo atuparega rente'za evugahaze. 39 Hagi ana nofi'ma negesuta Ra Anumzamo'nama tami'noa mika kasegegu tamagesa antahita nevaririta, tamagra'a tamavesizana avaririta havi tamavutamavara osugahaze. 40 Hagi ana nofi'ma negesageno huramagesa nehina kasege'ní'ane naneke'ní'anena avaririta mani ruotge huta manigahaze. 41 Nagra Ra Anumzamo'nama Isipiti'ma tamavre'na e'noana, tamagri Anumza maniku tamavre'na e'noa Anumza mani'noe.

16 Kora'a Iza nemofokino Kohati negeho, Livae naga nofipinti neki Datani'ene Abiramukea Eliabu nemofokegi Pereti nemofo Oni Rubeni nagapinti neki hu'za eri mago hu'za antahintahia retro hu'naze. 2 Hagi ana venenemo'za 250'a Israeli kva vahe'mo'zane eri mago hu'za Mosesena hararente'naze. 3 Hagi ana vahe'mo'za emeri atru hu'za Mosesene Aronikiznia keha'reznante'za anage hu'naze, Tanagrakera ugagota vahera omani'na'e. Hagi miko vahe'mo'za ruotage hu'naze. Hu'neankino Ra Anumzamo'a tagrane mani'ne. Tanagra hago havifi tavreta vu'na'e. 4 Mosese'ma ananke nentahino'a avugosaregati mopafi umase'né. 5 Ananteria Korane mika agri'enema

emehagerafi'naza naga'mokizmia Mosese'a zamasamino, Oki
nanterana Ra Anumzamo'a iza Agri nagara mani'neno, ruotagera
hu'nefi tamaveri hanigeta keta antahita hugahaze. Hagi
Ra Anumzamo'ma huhampri zamantesimo'za Agri tavaonte
ruotage'ma hu'nefina urava'o hugahaze. **6** Koraga, kagrane
kagri kamagema nentaza vahe'enena Mananentake paura
kremna nevaza taferora retro hiho. **7** Hagi okina tevea
hugreta mnanentake'zana Ra Anumzamofo avuga krenkeno,
Ra Anumzamo'ma huhampri zamante'nea vahe'mo'za, ruotage
hu'za agru hugahazanki, tamagra Livae nagamota havi avu'avara
huta havifi vu'naze! **8** Mosese'a Korankura anage hu'ne, Livae
naganofira antahihiho, **9** Israeli vahe Anumzamo'ma Israeli
naganofipinti tamagrira refako huno huhampiriramantegeta, Ra
Anumzamofo Seli mono nompima eri'zama'a enerita, Israeli vahe
zamavugama eri'zama eneri'za zamo'a knarera huoramanteneo?
10 Koragane maka kafuhe'za Livae nagamota Israeli vahepinti'ma
tamazeri ruotage huno'ma Agra'a tavaonte'ma tamavrente'nea
zankura ontahita, tamagra nahigeta pristi eri'zanena erinakura
nehaze? **11** E'ina hu'negu kagrane kamage'ma ante'naza
naga'enena eritru'ma hazana Ra Anumzamofo ha'renentaze.
Hianagi Aroni'a iza mani'negeta kehakerea hunentaze? **12**
Anante Mosese'a Eliabu nemofokizni Datanine Abiramunena
e'ogu ke hianagi zanagra omegahu'e nehuke, **13** tumerimo'ene
amirimo'ma avimate'nea mopafinti'ma tavrefegi atrenka e'nanana,
ka'ma kopi frisunegu anara hu'nano? Hagi kagra ranti
mani'enka, kva hurante'za nehano? **14** Hagi kagra tamage
hunka tumerine amirimo'ma avimate'nea mopafina tavrenka
omenka, erisantihare'saza zane hunka mopane waini hozanena
huorante'nane. Kagra ama vahera rezamatga hu'za nehampi?

I'o, tagra kagranena omegahune. **15** Anage'ma hazageno'a Mosesena tusi'a asivazigeno amanage huno Ra Anumzamofona asmi'ne, Ofama hanazana antahi ozamio. Hagi magore hu'na donki afura zamagripintira e'ori'noe. Nagra mago vahera havizana huozmante'noe. **16** Anante Mosese'a Korana anage huno asami'ne, kagri'ma kavaririza naga'ene, Aroni'enena okina Ra Anumzamofo avuga eme atru hiho. Kagrane maka ana vahe'ene Aroni'enana eme atru hiho. **17** Hagi mago magomota mananentake paurane erineta anampina mnanentake'za insensia eri havia huta erita Ra Anumzamofo avuga eho. Hagi mika 250'a mananentake paura kre manavu taferotamia erineta Aroni'enena magoka Ra Anumzamofo avuga erita egahaze. **18** Anage'ma hutege'za nanterana mago mago'mo'a mananentake paura kre mnavuza taferopi teve taginte'za paura kre mna vu'za, eri'za seli mono nompima ufre kafante Mosese'ene Aroni'ene oti'za mani'naze. **19** Hagi Kora'a agri'ma amage'ma antage'za Mosesene Aroninema ha'ma rezmante'naza vahera atruhu seli mono nomofo kafante zamazeri atru higeno, Ra Anumzamofo hihamu masa'amo'a ana miko Israeli vahetera efore hu'ne. **20** Anante Ra Anumzamo'a Mosesene Aronikiznia anage huno znasami'ne, **21** Hagi amama atruma hu'naza vahepintira tanagra ame huta maniganeta vike'na, zamahe fanane huvagaraneno. **22** Anage hu'neanagi Mosese'ene Aronikea zanavugosaregati mopafi maseke nunamu huke anage hu'na'e. Anumzana miko vahe'mokizmi zamasimu'ma nezamina Anumzamoka, magoke ne'mo'ma hu'nenia kumitera miko vahe'mokizmia karimpa ahezmanategahano? **23** Anante Ra Anumzamo'a Mosesena anage huno asami'ne, **24** Mika'a vahera zmasmige'za Korama, Tatania, Abiramukizmi seli no tava'ontetira maniganeho.

25 Anante Mosese'a otino Datanine Abiramu kizanirega nevige'za, Israeli kva vahe'mo'za avariri'za vu'naze. **26** Hagi Mosese'a miko vahera anage huno zamasami'ne, ama kumike vahe'mokizmi seli nozmimofo tava'ontetira atreta ogantu vuta eta nehuta, mago'a zazmirera avakora osiho. Hagi ana kema ontahita avako'ma hanazana zamagri kumimofo knaza erita frigahaze. **27** Anage hige'za Korama, Datanima, Abiramukizmi seli mono nomofo tava'ontetira atre'za ogantu mani'naze. Higeke Datani'ene Abiramukea seli nozanimofo kahante mika a'mofavre'znine oti'za mani'naze. **28** Anante Mosese'a amanage huno zamasami'ne, Amanahukna zama fore'ma hanigeta negesuta Ra Anumzamo huntogeno ama eri'zana e'nerie huta hugahaze. Na'ankure nagra'a navesi zantera ama ana eri'zana e'norue. **29** Hagi zamagra vahe'mo'zama nehzaza hu'za frige, knazama e'orisageta, nagrikura Ra Anumzamo'a eri'zama'a erinogura huhampri onte'ne huta hugahaze. **30** Hianagi Ra Anumzamo'a ruzahuma huno zamahe frisiana, mopamo'a ru aka huno maka zazimine zamasagahu vazisige'za, zamavu agama fri vahe kumapima uramisageta, tamagra antahi ama'ma hanazana ama vahe'mo'za Ra Anumzamofo kefenkami atre'naze huta hugahaze. (**Sheol h7585**) **31** Hagi anankema huvama neregeno amehuno anama oti'naza mopamo'a hagro huno keriga efore hu'ne. **32** Hagi anama oti'naza mopamo'a ru'aka huno mika Korane agranema hagerafi'naza naga'ene a'mofavrezmine, makaza zaminena zamasaga huvazi'ne. **33** Hagi zamavuaga mani'nageno mopamo'a zamasaga huvazino, maka'zazmine refite'zamantge'za mopafi fanane hazage'za Israeli vahe'mo'za ozamage'naze. (**Sheol h7585**) **34** Hagi miko manigagi'naza Israeli vahe'mo'za mopafima urami'za vahe'mokizmi zavi krafa

nentahiza, mopamo'a tasaga huvazi zankure nehu'za koro fre'naze. **35** Hagi Ra Anumzamo tevea atregeno hagana hagana huno eramino mika 250'a vahe'ma manamentake paurama kre'za ofa nehaza vahera terasage vagare'ne. **36** Ra Anumzamo'a Mosesena anage huno asami'ne, **37** Pristi ne' Aroni nemofo Eliazana asamigeno manamentake zama negraza taferote'ma tevema nereana hampageno. Na'ankure e'i ruotage hu'neanki eri ruotage nehuno, tevema nerea tankanuzanena eri faka hino. **38** Kumizmimofo nona'ama fri'za vahe'mo'zama manamentake paurama kremnamavaza taferozamia, erino hamanteti arukuta huteno, kresramna vu ita refitente'za tro hino. Na'ankure Ra Anumzamofo amizageno anazamo'a ruotage huno me'neanki'za Israeli vahe'mo'za nege'za koro hugahaze. **39** Higeno pristi ne' Eleasa'a tevemo'ma zamahe fananema hia vahe'mokizmi 250'a manamentake paurama kre manavu bronsire tafero zamia erino, ruguta huno kresramna vu itama refite'za tro hu'ne. **40** Ra Anumzamo'ma Mosesema asami'nea kante anteno, anazamo'a mago avame'za me'nena Israeli vahe'mo'za nege'za, Aroni nagamoke manamentake paurana kremana vugahazanki, Kora'ene naga'amo'zama hu'nazaza huta rumota ke rutagreta anara osugahune hu'za antahigahaze. **41** Hianagi anante knazupa Mosesene Aronikiznia Israeli vahe'mo'za ke hakare huznante'za, Tanagra Ra Anumzamofo vahe zamahe frie. **42** Hagi mika vahe'mo'zama atru hu'za Mosesene Aronikiznima ke ha'ma hunezanante'za rukrahe hu'za kazageno, hampomo'a atruhu seli nona refitegeno Ra Anumzamofo masamo efore hu'ne. **43** Anante Mosese'ene Aroni'enena atruhu seli nomofo kafantega vuke ome oti'hakeno, **44** Ra Anumzamo'a Mosesena anage huno asami'ne, **45** ama vahepintira maniganek'e'na

ame hu'na miko zamahe fanane huvagara'neno. Anage higeke
Mosese'ene Aroni'enena zanavugosaregati mopafi mase'na'e.

46 Anante Mosese'a Aronina asmino, mananentakezama kre
taferoka'a erinka antuma atruma hu'za mani'naza vahepi vunka,
zamagri kumitera nona hunka mananentake paurana kremana
vuo. Na'ankure Ra Anumzamofo rimpahé'zamo'a ama agafa
higeno hazenkezamo'a agafa nehie. **47** Higeno Mosese'ma
asamiaza huno Aroni'a agareno ana vahe amunompi vu'ne.
Hianagi ko zamazeri havizahu knazamo'a agafa huno ana
vahepina efore hu'negeno ome negeno, mananentake paurana
Ra Anumzamofontega kremna vunenteno, ama vahe'mokizmi
kumira atrezamanto huno hu'ne. **48** Hagi Aroni'a fri'naza
vahe'ene ofri'ma amnema mani'naza vahe'mokizmi amu'nompi'
kremna vu paurana azerineno ome otigeno ana knazamo'a
ame huno vagare'ne **49** Hianagi Kora'ene amage'ma ante'naza
vahe'ma fri'nare ete mago'ane Israeli vahera 14 tausen, 700'a
vahe ana knazamo'a zamahe fri'ne. **50** Hagi ana knazamo'ma
vagamaregeno'a, Aroni'a ete Mosese'ma atruhu seli mono
nomofo kafante'ma mani'nerega vu'ne.

17 Hagi Ra Anumzamo'a Mosesena anage huno asami'ne, **2**
Israeli vahera zamasamige'za mago'mago naga nofimofonte
kva vahe'mokizmi azompa zamente zamente 12fu'a eri'za
eme kaminagenka, zamagi'a krentetere ana azomparera
nehunka, **3** Livae naga'mokizmi azomparera Aroni agi
krento. Na'ankure mago'mago naga'nofitema ugota hu'naza
vahe'mokizmi azomparera zamagia krentegahane. **4** Hagi
mika ana azomparamina erinka atrumahu seli mono nompima
huhagerafi huvempage vogisimofo avuga keagama nehute
eme anto. **5** Hagi Nagrama huhamprintesugenro pristi eri'zama

erisia ne'mofo azomparera agata hagegahie. Hagi ana zama fore'ma haniretira mago'ene Israeli vahe'mo'zama ke hakare'ma hugantesazana kezmia ontahigahue. **6** Anage higeno Mosese'a miko Israeli vahera 2fu'a naga nofi'mokizmia zamasimige'za mago'mago naga nofimo'za vugotama huzmante'nemofo azompa eme nemiza, Aroni azompanena anampi eri'za eme ami'haze. **7** Mosese'a mika ana azomparamina erino atruhu seli mono nompi Ra Anumzamofo avugama ome ante'ne. **8** Hagi anante knazupa Mosese'a atruma hu seli mono nompima vuno ome keana, Livae nagapinti ne' Aroni azumparera agata hageno amosare'a ahenteno, almoni zafa raga rente'no uzate'ne. **9** Mosese'a Ra Anumzamofo avugatira ana azomparamina erino atiramino Israeli vhete vige'za, anampinti ke'za zamagra'a azompare eritere hu'naze. **10** Hianagi Ra Anumzamo'a Mosesena anage huno asmi'ne, Aroni azompa ete erinka huhagerafi huvempage vogisimofo avuga ome ante'negeno, ana azompamo'a avame'za me'nena Nagri'ma ke hakarema hunenantaza zana vagarenke'za, ofri maniho. **11** Higeno Mosese'a Ra Anumzamo'ma huoma huno asmi'nea zana amage anteno hu'ne. **12** Hagi Israeli vahe'mo'za Mosesena asami'za, mika vahe'mota frita fanane hu vagaregahune! **13** Hagi Ra Anumzamofo seli nomofo tava'onte'ma vanuta, tagra mika vahe'mota frita haviza hugahune.

18 Anante Ra Anumzamo'a amanage huno Aronina asami'ne, Kagrane Livae naga'mo'zane mofavre nagakamo'zanema ruotage'ma hu'nea seli mono noni'afima pristi eri'zama eriso'ema osnazana, kna'a tamagra'a erigahaze. **2** Hagi tamafuhe'i Livae nagara zamavareta enke'za, tamagrane erimago hu'za tamaza hanageta seli mono nomofo avuga eri'zana eriho. **3** Hagi zamagra maka tamagrama zamisaza eri'za e'heri'za,

seli mono nomofo eri'zana eriho. Hianagi ruotage'ma hu'nea zantaminte'ene, kresramna vu itarera erava'o osiho. Hagi erava'oma hanazana tamagrane, zmagranena frigahaze. 4 Livae vahe'mo'zage seli mono nompina eri'zana tamaza hu'za eriho. Hianagi ru vahe'mo'za erava'o osuge, eri'zana tamaza hu'za e'origahaze. 5 Hagi kagrake seli mono nompi eri'zane, kresramna vu itare'enena eri'zana erigahane. E'inahukna hanankeno Ra Anumzamo'a Israeli vahe'mota arimpa aheoramantegahie. 6 Hagi ko, Nagra'a Israeli vahepintira Livae nagara zamavare'na mago museza zamiaza hu'na negamina, zamazeri ruotage huge'za seli mono nompina eri'zana e'nerize. 7 Hianagi kagrane mofavreka'aramine pristi eri'zane, kresramna vu itare'ene, hunagru'ma hu'nefinka eri'zana erigahaze. Hagi muse'za tamiankna hu'na pristi eri'zana tami'noanki, ru vahe'mo'zama seli mono nomofo tavaonte'ma erava'oma hanazana zamahe friho. 8 Anante Ra Anumzamo'a anage huno mago'ane Aronina asmi'ne, Veamo'zama ofama eri'za esaza ofaramina kegavama hu eri'zana, kagri kamuankinka ruotage'ma hu'nea ofama Israeli vahe'mo'za eri'za esazana kagri'ene mofavre zagaka'ane tamamuankita anampintira tamagra'a suzana maka kna erigahaze. 9 Ama'i ruotage'ma hu'nea ofama tevefima negrenka atresanama'ane, muse ofane, witi ofane, kumizmire'ma hu ofane, hazenke'ma hu'nesaza zante'ma hu ofama eri'za eme namisazana, ruotage hu'neakino kagri'ene mofavre nagakamofo su'a megahie. 10 E'i ruotage hu'nea ofagita kagrane, ne' mofavre nagakamo'zane ruotage hu'ne hutma nentahita negahaze. 11 Hagi eri verave hu ofama Israeli vahe'mo'zama eri'zama esaza ofa kagri'ene ne'mofaka'ane miko nagaka'ane zamue. Hagi ana ne'zana, Nagri navure'ma agruma

hu'nesaza nagakamo'zage negahaze. **12** Hagi maka knare'ma hu'nea olivi masavene, knare'ma hu'nea wainine, knare'ma hu'nea witine, ese ne'zama hamare'za Ra Anumzamo'na eme namisazana, kagri kamue. **13** Hagi ese ne'zama afumaresige'za eri'za esazana, agruma hu'nesaza nagaka'amozage negahaze. **14** Maka'zama Ra Anumzamo'nama nami'nesaza zana, amne kagra erigahane. **15** Hagi ese mofavre'ma Israeli vahe'mozo, zagagafamo'zama kasentesage'za, Ra Anumzamonare ofa eme namisazana kagri'za megahie. Hagi Israeli vahe'mo'zane zmagonesa mofavrene, agruma osu'nesia zagagafarera nona hu'za mizaseza avreho. **16** Hagi Israeli vahe'mo'za mago ikama hu'nesia agonesa mofavrere'ma ete mizase'za zamavaresaza mizana, seli mono nompi zagomofo avamente erinte'za 5fu'a silva zagoa mizasegahaze. **17** Hianagi bulimakao'o, sipisipio meme afumo'zama ese kasezmantesa anentara, ruotage hu'neankino ete Israeli vahe'mo'za mizana osegahaze. Hagi kagra kresramna vu itare korazmia taginka ru tritri nehunka, afova'a tevefi kregeno, sramnamo'a kumpi marerinke'na Ra Anumzamo'na mna'a nentahina musena haneno. **18** Hagi ana ofama hu afumofo ame'a tamagri suza mesigeno, eri verave hu ofama nehaza ahihiza'ane, tamaga kaziga amo'anena tamagri su'za megahie. **19** Hagi meninteti'ma agafama huno'ma vaniana, Israeli vahe'mo'zama Ra Anumzamo'nare'ma eri'za esaza ofamo'a tamagri'ene, ne'mofatamimofo suza mevava hugahie. Hagi ama ana zamo'a mevava huhagerafi huvempage Nagrite'ene henkama tamagripinti fore'ma hanaza vahetera meno vugahie. **20** Hagi Ra Anumzamo'a Aronina amanage huno asami'ne, Israeli mopafina tamagra mago mopa erinafa'a osugahze. Tamagrama eri santima hare'nazazana Nagrake'za manigahue. **21** Hagi

Livae naga'nofimo'za atruma hu seli mono nompima eri'zama
erisa mizana, Israeli vahe'mo'zama 10ni'a kevu ante'nena finti
mago kevuma namisaza zantaminteti, ana eri'zama erisarera
erisantima hare'saza zana zamigahue. **22** Hagi meninteti'ma
agafama huno vaniana Israeli vahepinti'ma Livae naga'ma
omaninesimo'a, atruma hu seli mono nontera uravaaoa osino. Hagi
urava'oma hanimo'a kumi hugahiankino, ana nona'a frigahie. **23**
Hagi Livae naga'mozage atruma hu seli mono nompina vahe
kumima apasezmante eri'zana erigahaze. Hagi ama tra kemo'a
mevava hugahianki'za, henkama fore'ma hanaza vahe'mo'za
amage antegahaze. Hagi Israeli mopafina Livae vahe'mokizmia
mopazamia omanegahie. **24** Na'ankure Israeli vahe'mo'za 10ni'a
kevu antenenafinti mago kevuma ofama Ra Anumzamo'na
namisaza zantamina erisante'maharesaza zana zamigahue.
Hagi e'i ana agafare Israeli vahepina, Livae naga'mozama
erisantima haresaza mopa omanegahie. **25** Ra Anumzamo'a
Mosesena amanage huno asami'ne, **26** Kagra Livae nagara
ke hunka zamasamige'za Israeli vahe'mo'zama 10ni'a kevu
ante'nena finti mago kevuma eri'za emema namisafintira eri'na
tamagrira tamigahuanki, anampintira ete hamprinkeno 10nima
hania kevua namigahaze. **27** Hagi ana ofama hanage'na, Ra
Anumzamo'na nege'na, hoza tamifinti ese witi hamareta ofa
haze nehu'na, wainima regatitima nehazafinti ese waini ofa
nehaze hu'na hugahue. **28** E'inahu kante Israeli vahe'mo'zama
10ni'a kevuma ante'nafinti mago kevuma eme tami'nazana refko
huta Ra Anumzamo'na ofa hunantegahaze. Hagi ana ofama Ra
Anumzamo'nama namisazana pristi ne' Aroni erigahie. **29** Hagi
maka musezama taminafintira knare'zantfama hu'nesiama'a
Ra Anumzamo'na namigahaze. **30** Ana hu'negu Livae nagara

zamasamio, anama knare'ma hu'neama'ama ofama hanage'na,
Ra Anumzamo'na nege'na, hoza tamifinti witi hamareta ofa haze
nehu'na, wainima regatiti'ma nehazafinti waini ofa nehaze hu'na
hugahie. **31** Hagi Livae naga'mota seli mono nompi eri'zama
e'neriza zamofo mizama'agita, a'mofavre taminena inantegama
ana ne'zama nenaku'ma hanarega amne negahaze. **32** Hagi
knare'ma hu'nesia ne'zama ofama hanuta, kumira osugahaze.
Hianagi Israeli vahe'mo'zama eme tamisaza ruotage ne'zama
amnezane huta eri havizama hanuta, haviza hugahazankita
knazama'a tamagra'a erita frigahaze.

19 Ra Anumzamo'a Mosesene Aroninena anage huno
zanasami'ne, **2** Ama'na trakea Israeli vahera zamasaminke'za
korankre agaho bulimakaomofoma afuhe'afehe osu'nenigeno,
agumpina agare namare zafa reonte'nenaza su'za avre'za echo.
3 Hagi ana agaho bulimakaona pristi eri'za ne' Eliesa eme
amisageno, mago'a vahe'mo'za avre'za kumamofo fegi'a vu'za,
agri avuga anankena akafrigahaze. **4** Hagi pristi ne' Eliesa'a
ana bulimakaomofo korampi azankoreteno, atruma hu seli
mono noma me'nerega **7**ni'a zupa rutritrira hugahie. **5** Hagi
ana bulimakaomofo akruagi, ame'agi, korama'agi, rimp'anena
rifaga tevefi kregahaze. **6** Hagi ana pristi ne'mo'a, sida zafagi,
hisopu zafamofo azankunaki, korankre nofi'ene erino, ana tevema
nerea amu'nompi kregahie. **7** Hagi ana pristi ne'mo'a kukena'a
sese nehuno, tina fregahie. Ana'ma hutesuno'a kumapina
efregahianagi, Nagri navurera agrua osu mani'enigeno vuno
kinagasegahie. **8** Hagi ana bulimakaoma tevefima krenia
ne'mo'enena kukena'a sese nehuno, tina fregahie. Hianagi Nagri
navurera agrua osu mani'enigeno vuno kinagasegahie. **9** Hagi
Nagri navure'ma agruma hu'nenia ne'mo ana bulimakaomofo

tanefara erino, kumamofo fegia agruma hu'nefina ome antegahie.
Hagi Israeli vahe'mo'za ana tanefara tima fre'za zamazeri
agruma hanaza timpima atrenagu erintesageno megahie. E'inahu
hanageno kumizmia eritre zmantegahie. **10** Hagi ana ta'nefa'ma
kateno omema atrenia ne'mo'a agru osugahiankino kukena'a
sese nehuno, mani'enkeno vuno kinagasegahie. Hagi ama'i
mevava kasege Israeli vahete'ene emani vahete'enena megahie.
11 Hagi iza'o fri vahe avufgare'ma avako'ma hanimo'a, agra'a
azeri pehana hu'neakino, 7ni'a zageknafi agru osuno manigahie.
12 Hagi nampa 3 knare'ene nampa 7ni knarera tina freno agru
hugahie. Hianagi nampa 3 knare'ma nampa 7ni knare'enema tima
ofrenu'za agru osugahaze. **13** Hagi iza'o fri vahe avufgama avako
huteno, agra'ama azeri agruma osania ne'mo'a, Ra Anumzamo'na
seli mono nona azeri pehana hugahie. E'inama hania vhahera,
Israeli vahepintira ahenatitreho. Na'ankure agritera azeri agruma
hu tina ru triti huonte'neakino, agra agru osu'ne. **14** Hagi seli
nompima mago vahe'ma frisigeno'a, ana nompima mani'enaza
vaheki, efresaza vahe'mo'zanena agrua osu mani'enageno vuno
7ni'a zagegna evugahie. **15** Hagi ana nompima avaza'a eri onki
kavoramima me'enaza kavomo'za agru osugahaze. **16** Hagi
iza'o kazinkonteti ahe'nenia vahe avako hania vahero, agra'a
fri'nenia vahe avako hania vahero, fri vahe zaferinare avako
hania vahero, fri vahe mati mati'ma avako'ma hania vahe'mo'a,
7ni'a knamofo agu'afi agru osugahie. **17** Hagi agra'ama azeri
pehanama hu'nesia zama azeri agru'ma hunakura, kresramana
vu itareti tanefa kateno kavofi anteteno, enevania tinteti afino
anampina taginteno. **18** Hagi agruma hu'enenia vahe'mo'a hisopu
traza erino, ana tempireteno seli nonte'ene agu'afima me'enenia
zantamintera rutri tri hunenteno, anampima mani'enenia vahetera

rutri tri huntiegahie. Hagi ana zanke huno kazinknonteti ahe fri'nenia vahero, fri vahe zaferina avako hu'nenia vahero, fri vahe kerigante avako hu'nenia vahero, fri'nenia vahe avako hu'nenia vahera ana tinuti rutri tri huzmanteno. **19** Hagi agruma hu'nenia vahero, agruma osu'nenia vahera nampa 3 knare'ene nampa 7ni knareke ana tina rutri trira huzmanteno. Hagi agruma osu'nenia zankura kukena'a sese nehuno, tina freno mani'nenigeno vuno kinagasena, Nagri navurera agrua hugahie. **20** Hianagi agruma osu'nenia vahe'mo'ma agra'ama azeri agruma osu'nena, Israeli vahepintira ahenatitreho. Na'ankure Ra Anumzamo'na seli mono nona azeri pehana hugahie. Hagi azeri agruma hu tinutike rutri tri huntesageno, agru hugahie. **21** Hagi amanahu avu'avazamo'a mevava kasege me'nena, tima rutri tri huzmante'za zamazeri agruma hu eri'zama eri'naza vahe'mo'za, tina nefre'za, kukenazmia sese hih. Hagi zamazeri agruma hu tima avako'ma hanaza vahe'mo'za agru osu mani'nenageno vuno kinaga segahie. **22** Hagi agruma osu'nesia vahe'mo'ma, mago'za avako huge, mago vahe'ma avako'ma haniana, ana vahero ana zantamimo'a, agru osu me'nenigeno vuno kinagasegahie.

20 Hagi ese ikantera miko Israeli vahe'mo'za Zini hagege kokampi ehanati'za Kades kumate eman'i nazageno, Miriamu'a frige'za anante asente'naze. **2** Anampina tima ne'naza zana omanege'za, Israeli vahe'mo'za eritru hu'za Mosesene Aronikiznia kehakare huznante'naze. **3** Ana vahe'mo'za Mosesena ke ha'rente'za anage hu'naze, tagrira tatranketa Ra Anumzamofo avuga tafuhe'zane frutesina knare hisine! **4** Hagi nahigenka Ra Anumzamofo vahe'mota tavrenka hagege ka'ma kokampina anketa, tagrane zagagafatinena fri'zana nehune? **5** Hagi nagafare Isipitira tavrenka ama havizama hu'nea

kokampina e'nane? Fikima, wainima witi ragama, pomigreneti zafa ragama, tima nesunazanena amafina omane mopafina tavrenka e'nane. **6** Mosese'ene Aronikea seli nomofo avuga zanavugosaregati mopafi umaseke, Ra Anumzamofontega nunamu hakeno, Ra Anumzamofo hanavenentake msamo'a efore hu'ne. **7** Anante Ra Anumzamo'a Mosesena amanage huno asami'ne. **8** Azompaka'a enerinka mika vahera kehuge'za atru hanagenka negafu Aroni'enena ana vahe zamavuga havemofona nanekea asamigeno, ana havefinti tina herafiramino e'na, miko vahem'o'zane zagagafa zmimozanena tina negahaze. **9** Anage higeno Mosese'a Ra Anumzamofo avugama Aroni azompama me'neana erino, Ra Anumzamo'ma huoma huno hunteaza hu'ne. **10** Hagi anante Mosese'ene Aronikea havemofo avuga Israeli vahera zamazeri atru nehuke, Mosese'a anage huno hu'ne, kehakare'ma hu vahe'mota kama antahiho, ama havefinti tina erifore huramigahupi? **11** Anante Mosese'a azana erintesaga huno ana havere tare zupa azompa'aretira amasagigeno ana havefintira tina herafino ege'za vahe'mo'zane zagagafazaminena ne'naze. **12** Anante Ra Anumzamo'a Mosesene Aronikiznia zanasamino, Nagrikura antahionamitna, ruotge hu'ne huta Israeli vahe zmauvufina osu'naku, Nagrama tam'i'noa mopafina ama vahera zamavareta uofregaha'e. **13** E'ina tinkura Meribe hu'za nehaze. Na'ankure Israeli vahe'mo'za, tinkura kehakare hazageno Ra Anumzamo'a Agra'a ruotage hu'noe huno zamaveri hu'ne. **14** Hagi Mosese'a Kadesi kumate mani'neno Idomu kini ne'tega ke erino vu vahera huzmanteg'eza amanage hu'za ome asami'naze. Kafuhe'za Israeli vahe'mo'za kea hu'za, Knazama tagrite'ma e'neana, hago kenka antahinka hu'nane hu'za hu'naze. **15** Hagi neragehoza Isipi mopare

urami'za rama'a kafu umani'naze. Anantega umani'nonke'za
Isipi vahe'mo'zama tafahe'ine tagri'enena tazeri haviza hu'naze.
16 Hianagi tagrama Ra Anumzamofontega krafa huntonkeno
ana krafama huna ketia nentahino, ankero vahe'a huntegeno,
Isipitira tavreno atirami'ne. Hagi antabio, menina kagri mopamofo
agentega me'nea kumate Kadesi eman'i'none. **17** Hagi muse
hugantoanki tatregeta mopakafina ufretra vamaneno. Hagi
tagrama vanuta hozatamifine waini hozatamifinena ovugahune.
Anahukna huta tinkeri tamifintira tina onegosune. Hagi kini
vahe kanema nehaza karanka nevuta, rukrahe huganti hugama
osugahunanki, karanka fatgo huta nevuta mopatamia ome
agatereta vugahune. **18** Hianagi Idomu kini ne'mo'a kenona
huzamanteno, tamagra mopatifina eovugahaze. Hagi anama
hanageta, kazinteti hara eme huramantegahune. **19** Ete Israeli
vahe'mo'za mago'ane kenona hunte'za, tagra rankama avaririta
nevanunkeno zagagafatimo'zo, mago vahe'mo'ma tamagri
tinkerifinti'ma tima nesigeta, tagra miza hugahune. Hagi tarenketa
mopatamifi rankamofo avariri fatgo huta nevuta mago'zana
avakora osugahune. **20** Hianagi Idomu kini ne'mo'a kenona
huno, amafina eovugahaze, huno nehuno hanavenentake sondia
vahe zamavreno ha' eme huzmante'naku e'ne. **21** Hagi Idomu
kini ne'mo'ma mohanifima e'ovugahazema huno hiazanku, Israeli
vahe'mo'za atre'za, ru kampi vu'naze. **22** Hagi miko Israeli
vahe'mo'zama Kadesi kumara atre'za Hori agonarega vu'naze.
23 Hagi Idomu mopa atuparega Hori agonare Ra Anumzamo'a
Mosesene Aronikiznia zanasamino, **24** Aroniga Nagrama Israeli
vahe'ma zaminaku'ma hu'noa mopafina uofregahananki, kafu
kafahe'zama nehzaza hunka frigahane. Na'ankure e'ina hi'o
hu'na tanagri'ma hurananta kerera Meriba tintera avariri fatgo

osu'na'e. 25 Hagi Aronine ne' mofavre'a Elieasanena zanavrenka
Hori agonare mareri'o. 26 Hagi ana agonare Aronima antani'neno
pristi eri'zama eneria kukena'a, hatenka ne'mofo Elieasana
antanintegahane. Hanankeno Aroni'a anante frigahie. 27 Hagi
Ra Anumzamo'ma hunteaza huno Mosese'a ana famotrena
miko vahe'mo'za nezamageno agonarega zanavreno mareri'ne.
28 Hagi Mosese'a Aroni'ma antani'neno pristi eri'zama eneria
kukena'a hateno nemofo Elieasa antaninte'ne. Ana higeno Aroni'a
ana agonare frigeke, Moseseke Elieasakea ana agonaregati
erami'na'e. 29 Hagi Aroni'ma fri'nea zamofoma maka Israeli
vahe'mo'zama ke'za antahi'zama nehu'za, 30'a zage knafi
zamasunkura hu'za zavira ate'naze.

21 Hagi Kenani kumate kinia Arati kumate Negevi nemania
kini ne'mo antahiamma Israeli vahe'mo'za Atarimi karanka neaze
hazankema nentahino'a, ha' ome huzamanteno mago'a Israeli
vahera kina huzamanteno zamavareno vu'ne. 2 Anante Israeli
vahe'mo'za Ra Anumzamofonte huvempa ke hu'za, Kagrama
ana vahe'ma tagri tazampi zamavarentesanketa rankumazmia eri
haviza hugahune. 3 Hagi Ra Anumzamo'a Israeli vahe'mokizmi
ke antahizamino Kenani vahera avrezamigeno, kumazmine,
ana kumapi vahera zamahe fanane hu'haze. Ana hu'negu ana
kuma'mofo agi'a Homae nehaze. 4 Hagi Israeli vahe'mo'za Hori
agona atre'za koranke hagerintega nevaza kantega, Idomu mopa
rugagi'za vu'naze. Hianagi rama'a vahe'mo'za zaza ka nevu'za,
zamavaresragu hu'haze. 5 Hagi ana vahe'mo'za Anumzamofone
Mosesenena ke ha'reneznante'za anage hu'haze, Nahigeta
Isipitira tavreta ama hagege kokampina frisunegura e'na'e?
Bretima ne'zana omanegeno, tima ne'zana omanegeta ama
kefozama hu'hea mana nezankura tavresra hie! 6 Anage

hazageno Ra Anumzamo'a ha' osifave huntegeno rama'a vahe zamaprige'za fri'naze. 7 Hagi Israeli vahe'mo'za Mosesente e'za anage hu'naze, kagri'ene Ra Anumzamofonema huhavizama hunte'nonana, hago kumi hu'none. Hagi nunamu hugeno Ra Anumzamo'a osifavea tagripintira avretreno. Anage hazageno Mosese'a ana vahera nunamuna huzamante'ne. 8 Hagi Ra Anumzamo'a Mosesena anage huno asami'ne. Mago ha' osifave bronsireti trohunka zaza zafare hantintenege'za osifavemo'ma zamaprisia vahe'mo'za ana osifavema kesga hu'za kesamo'za ofri'za manigahaze. 9 Anage huno asamigeno Mosese'a bronsireti mago osifave tro huno za'za zafare ahekamarente'ne. 10 Israeli vahe'mo'za vu'za Oboti kumate seli nonkumara omeki'za mani'naze. 11 Hagi Oboti kumatetira atre'za vu'za Moapu mopamofo kama zage hanati kaziga hagege kokampi la-abarim seli nonkumara ome ki'za mani'naze. 12 Anantetira vu'za Wadi Zere agupofi seli nonkumara omeki'za mani'naze. 13 Hagi anantetira rugitagiza vu'za kantu kaziga Arnoni timofo Amori vahe'mokizmi hagage mopamofo agentega seli nonkumara ome ki'za mani'naze. Na'ankure Moapu vahe'mokizmi mopane, Amori vahe'mokizmi mopa Arnoni timo refko hu'nere seli nonkumara omeki'za mani'naze. 14 E'ina hu'negu Ra Anumzamofo hapisema hu'nea avontafemo'a huno, Wahepu Safa kaziga me'nea kumaku'ene tinkrahoku Arnoni tinku hu'ne. 15 Hagi ana karahomo'a Ari kumateti vuno, Moapu vahe kumate ome atre'ne. 16 Anantetira mago'ane vu'za Beri tava'onte me'nea tin kerire vazageno Ra Anumzamo'a Mosesena asamino, vahetamina kehutru huge'na tina zami'neno. 17 E'i anante Israeli vahe'mo'za anage hu'za zagamera hu'naze, henami ti kerimoka hanatinka marerio, tinkerimoka! Zgame hugantone! 18

E'ina tinkeria ranra kva vahe'mo'za kafinte'naze. Hagi rankva
vahe'mo'za avame'za me'nea azompareti'ene kama vanoma
nehaza azompareti anankeria hanagati'za kafinte'naze. Ana
hagege kokampintira Israeli vahe'mo'za atre'za Matana kumate
vu'naze. **19** Hagi Matanatira Nahaliel vute'za, Nahalielitira
Bamota vu'naze. **20** Hagi Bamotitira Moapu kaziga me'nea
agupofi Piska agonomo'ma hagege kokantega avugosama
hunte'nerega e'naze. **21** Israeli vahe'mo'za amanage hu'za
Amori kini ne' Sihonintega kea atrente'naze, **22** Tatregeta
mopakafina rugitagita vamaneno. Hagi tagra hoza tamifino, waini
hozatamifina ovuta, agentega nevuta, tinkeri tamifintira tina oneta
kinimofo rankantega nevuta, mopaka'a agatereta vugahune. **23**
Hianagi Sihoni'a Israeli vahe'mo'zama mopa'afima rugitagiza
evu'zankura i'o huno hunezmanteno, sondi'a vahe'a kehu atru
hige'za, ana hagege kokampi vu'za Israeli vahe'mokizmia Jehasi
kumate hara eme huzamante'naze. **24** Hianagi Israeli naga'mo'za
kazinteti hara huzamagatere'za, ana vahe mopama Amoni
tinte'ma vuno Jaboku tinteti'ma uhanati'nea mopa'zmia eri'naze.
Hagi Amoni vahe'mokizmi mopafina uofre'naze. Na'ankure Amoni
vahe'mo'za hanavenentake vihu hu'za mani'naze. **25** Hu'negu
Israeli vahe'mo'za ana mopafima me'nea ranra kuma'ene,
neone kumara eri'za ana kumatamimpi mani'naze. **26** Na'ankure
Hesboni rankumara Amori kini ne' Sihoni nemania rankumare.
Hagi ana mopa korapara Moapu kini ne'mo kegava hu'nea
mopa aheno hanare'neankino, ana mopamo'a meno Arnoni
uhanati'ne. **27** E'ina agafare zagamema hazafina hu'za, enketa
Hesboni kumara negita, Sihoni kumara erigafa hamaneno hu'za
nehaze. **28** Na'ankure Hesboni rankumateti tevea reno nevie.
Teve anefara Sihoni kumateti huno nevuno, Moapu mopafima

Ar kumama me'neana tefanane nehuno, teno vuno Arnoni
tintegama marerinerega ome atre'ne. **29** Moapu vahe'moka
nasunku hugantoe! Kemosi havi anumzamofo vahe'mota haviza
haze! Ne'mofavretami zamazeri haviza hige'za fre'za vano
nehu'za hazanke erinentazageno, mofanezmia Amori kini ne'
Sihoni'ma zamavareno kina huzmanteankna nehaze. **30** Hianagi
Hesboni kumatetima agafa huno vuno Dibonima uhanati'nea
kumatamimpi vahera tagra nezamaheta, kumazmia zamazeri
haviza hu'none. Hagi Nofa kuma'enena azeri havizantfa huta
vuta Medeba kumate uhanati'none. **31** E'ina hute'za Israeli
vahe'mo'za Amori vahe mopafina mani'naze. **32** Hagi Jazeri
kumama afure'za kesazegu Mosese'a huzmantege'za vute'za
ageno, Jazeri kuma tava'onte'ma Amori vahe'ma mani kagi'naza
vahera Israeli vahe'mo'za ha'huzamante'za zamahe natitre'naze.
33 Hagi anantetira rukrahe hu'za Basani kaziga karanka
mareri'za vu'naze. Hagi nevazageno Basani kini ne' Ogi'a
ha'huzamante'naku sondia vahe'a kehutru hige'za Ederi kumate
e'naze. **34** Hianagi Ra Anumzamo'a anage huno Mosesena
asm'i'ne, Ko agri'ene vahe'ane mopa'anena kagri kazampi
avrentoanki korera huonto. Kagra Amori vahe'mokizmi kinima
Sihoni'ma Hesboni kumate'ma nemania nete'ma hu'nanaza
hugahane. **35** Hu'negu Israeli vahe'mo'za Ogine ne' mofavre'ane
naga'ane vahe'anena ha'huzamante'za zamahe vagarazageno,
mago vahere huno ana mopafina omanige'za ana mopa eri'naze.

22 Hagi Israeli vahe'mo'za Jodani timofona kama zage
hanati kaziga Moapu agupofi, Jeriko kumamofo kama kaziga
emani'naze. **2** Hagi Balaki'a Zipori nemofookino Israeli
vahe'mo'zama Amori vahe'ma maka'zama huzmantaza zana
ke'ne. **3** Hagi Moapu vahe'mo'za tusi koro hu'naze. Na'ankure

Israeli vhahera rama'a vahekrefa mani'nagu koro hu'naze. 4
Hagi Moapu vahe'mo'za Midieni ranra vhahera zamasami'za,
ama tusi'a vhaher krefamo'za bulimakaomo traza neno revrino
neankna hu'za mika zantia eri havizahaze. Hagi ana knafina
Zipori nemofo Balaki'a Moapu vhaher kinia mani'nea knafi anara
hu'naze. 5 Hagi agri vhaheri Pethor Beori kumara Yufretis
rantimofo kantu kaziga me'nea kumatega, Balaki'a Beori nomofo
Balamuntega kea atrenteno anage hu'ne, ko, Isipitima e'naza
vhaher'mo'za mopani'afina emani avite'naze. 6 E'ina hu'negu
menina zamagra tagrira tagatere'za hanaveti'za tusi'a vhaher
mani'nazanki, eme naza hunka kazusi ke huzmantgeeta,
tagra zamarotago hamnena freho. Nagra antahi'noe, izano
sifanama ahentamo'a haviza nehigeno, asomu kema huntamo'a,
asomu e'nerimoka mani'nane. 7 Hagi Moapu kva vhaher'ene
Midiani kva vhaher'mo'za Balamuma miza sentesaza zagoa
eri'za vu'naze. Hagi Balamuma eme nege'za Balaki'ma hu'nea
nankeea asami'naze. 8 Hagi Balamu'a ana vhahera anage huno
zamasami'ne, meni kenagera mase'nenkena ana kemofo nona'a,
Ra Anumzamo'ma nasami'nia nankeea oki'na tamasami'neno,
hige'za ana ranra vhaher'mo'za ana kenagera agrane mase'naze.
9 Hagi ana kenagera Anumzamo'a Balamunte eno anage
hu'ne. Ama vhahera iga vhaher'mo'za kagranena emani'naze?
10 Balamu'a Anumzamofona anage huno asami'ne, Balaki'a
Zipori nemofo Moapu kini ne'mo ama vhahera huzmantge'za
nagritega ke eri'za e'naza vhaher mani'naze. 11 Hagi zamagra
anage hu'za nasami'naze, Isipiti'ma e'naza vhaher'mo'za mopa
mani avite'nazanki enka nagri kaziga eme antenka kazusi
huzmantgeeta ha'huzmanteta zamahe natitramnena atre'za
freho hu'naze. 12 Hianagi Anumzamo'a Balamuna anage

huno asami'ne, Zamagranena ovuo. Hagi e'i ana vahe'enena vunka Israeli vahera kazusi kea ome huo zmantegahane. Na'ankure nagra Israeli vahera asomu ke huzamante'noe.

13 Hagi nanterana Balamu'a otino Balakima huzmantege'za e'naza kva vahera anage huno zamasami'ne, tamagrake kumatamirega viho. Na'ankure Ra Anumzamo'a ovugahane huno hianki'na tamagranena ovugahue. **14** Anage higeno Moapu kini ne' Balaki'ma huzmantege'za e'naza kva vahe'mo'za ete vu'za Balamu'ma omegahuema hia nanekea Balakina ome asmi'naze. **15** Hagi Balaki'a mago'ene kote'ma huzamantege'za vu'naza ranra vahe'ma zmagatere'nea ranra vahetami rama'a huzmantage'za ete vu'naze. **16** Ete Balamunte e'za, amanage hu'za asmi'naze, Zipori nemofo Balaki'a anage huno hurantegeta one, muse hugantoanki nagritegama enoma huana atregeno mago'zamo'a kazerionte'na amne eno. **17** Na'ankure knare hu'na rama'a fenoza mizana negami'na, na'ankuro hananana amane hugantegahue. Hagi enka ama Israeli vahera kazusi kea eme huzamanto huno hu'ne. **18** Hianagi Balamu'a Balaki eri'za vahe'mokizmi kenona zamirera anage hu'ne, Silvane golinena avite'nenia noma'a Balaki'a amne namigahianagi, nagra Ra Anumzanimofona agatere'na razano osi'zano osugahue. **19** E'ina hu'negu muse huramantoanki kote'ma e'naza vahe'mo'za hu'nazaza huta meni kenagera nagrane mase'nenkena Ra Anumzamo'a na'ane hugahifi antahiteno. **20** Hagi ana kenage Ra Anumzamo'a Balamunte eno amanage huno asmi'ne, Ana kva vahe'mo'zama kagri'ma kema hunaku esagenka, otinka zamagrane vugahananagi, Nagrama hanua ke'age zmasamigahane. **21** Hagi Balamu'a nanterana otino donki afu'a retrotra nehuno, kini ne'mofo eri'za vahe'ane Moapu

vu'ne. **22** Hianagi Balamu'ma ana vahe'enema viazanku Ra Anumzamo'a rimp a ahentegeno, Ra Anumzamofo ankeromo'a ha'hunte'naku kampi eme oti'ne. Agra donki afu'amofo agumpi manino nevigeno, tare eri'za netremokea agrane vu'na'e. **23** Hagi Balamu donki afu'mo'ma Ra Anumzamofo ankeromo'ma azampi bainati kazinknoma eri'neno otinegeno ome negeno'a, ana donki afu'mo'a kana atreno trampi evu'ne. Hianagi ana donki afu'a kante evinogu Balamu'a ruharakimi'ne. **24** Higeno tare waini hozamofo keginamo kanti kamati eri onasi hu'nea kankamunte, ana ankeromo'a oti'ne. **25** Hagi donki afumo'ma Ra Anumzamofo ankeroma negeno'a, keginare Balamu agia eme runkasisino evigeno ete mago'ane Balamu'a ana donki afura ahe'ne. **26** Anantetira Ra Anumzamofo ankeromo'a atreno vuno keginagamo'ma ome ositfama higeno agaterenoma vuganti kamama osu'are umani hisa huno oti'ne. **27** Hagi donki afumo'ma Ra Anumzamofo ankeroma anante eme negeno'a, mopafi renarenno emanigeno, Balamu'a rimp a hegeno ana donki afura azompa'areti ahe'ne. **28** Anante Ra Anumzamo'a higeno ana donki afu'mofo Balamuna anage huno asami'ne, Na'a hugantogenka 3'a zupa nenahane? **29** Higeno Balamu'a ana donki afu'mofo kenona anage huno asmi'ne, Kagra nagrira nazeri neginagi vahe kna hu'nananki'na nazampima kazinknoma eri'noresina kagrira meni kahe frusine. **30** Hagi ana donkimo'a ana kemofo nona'a anage huno asami'ne, kagra nagumpima maninke'na kora kavre'na vano osu'nofi? Kora amanahu navu'navara hugante'noaza hunegantofi? Huno higeno, i'o kora e'inahu'zana osu'nanaza nehane. **31** Hagi anante Ra Anumzamo'a Balamuna avurga eri hari higeno, Ra Anumzamofo ankeromo'ma azampi kazinknoma eri'neno oti'nea zana negeno,

mopafi avugosaregati kepri hu'ne. **32** Hagi Ra Anumzamofo ankeromo'a Balamuna anage huno asami'ne, Nahigenka 3'a zupa donki afuka'a amasagi'nane? Nagra ha'hugante'naku e'noe. Na'ankure kagrama nevana kamo'a, Nagri navurera knarera nosie. **33** Hagi donki afumo'a 3'a zupa nageno rukagese'ne. Hagi anara osiresina nagra ko kagrira kahe nefri'na, ama ana donki afura ohe'na atrogeno manisine. **34** Anante Balamu'a Ra Anumzamofo ankeronkura huno, Nagra kumi hu'noe. Kampina ha hunantenaku mani'nane hu'na nagra kena antahi'na osu'noe. Hagi menina kagrama musema osnanke'na, nagra ete rukrahe hu'na kumanirega vugahue. **35** Hagi Ra Anumzamofo ankeromo'a anage huno asmi'ne, Ama ana venenezagane vugahananagi, nagrama kasamisua nanekege ome hugahane. Higeno Balakima huzmanteg'eza e'naza vahe'ene Balamu'a vu'ne. **36** Balamu'a ne-e kema Balaki'ma nentahino'a, Arnoni mopamo ometretega Moapu kumate ome tutagiha hunte'naku vu'ne. **37** Hagi Balaki'a amanage huno Balamuna antahige'ne, antahio, ame hunka enogu'ma kema hu'noana nahigenka ome'nane? Kagesama antahinana nagrikura mizana seonantegahie hu'nampi? **38** Higeno Balamu'a kenona huno, hago kagritega menina e'noanki natrenanke'na osia kegaga hugahufi? Hagi nagra nagesafintira mago nanekea osugahuanki, Anumzamo'ma huo huno'ma hania naneke'age hugahue. **39** Anante Balamu'a Balaki'ene vige'ne, Kiriat Huzoti kumate vu'na'e. **40** Hagi anante Balaki'a bulimakao afu'ene sipisipi afura aheno kresramna nevuno, ke'ma huzmanteg'eza vute'za e'naza vahe'ene Balamunena zami'ne. **41** Hagi anante nanterana Balaki'a Balamuna avreno Bamot-Baal kumate mrerino mago'a Israeli vahe'ma nemanizama'a ome averi higeno, ke henkamuteno ke'ne.

23 Balamu'a anage huno kini ne' Balakina asmi'ne, amare 7ni'a kresramnama vu ita tro hunentenka, 7ni'a bulimakao afu'ene 7ni'a ve' sipisipi afutamine uvrenka eno. **2** Higeno Balaki'a Balamu'ma asamiaza hu'ne. Higeke Balaki'ene Balamukea magoke magoke kresramna vu itarera mago bulimakaone mago ve sipisipine kresramna vutere hu'na'e. **3** Hagi Balamu'a anante Balakina asamino, ofaka'ama kresramna vunante otinka mani'nege'na, mago'a kaziga nagrake umani'nanenkeno Ra Anumzamo'a kea nasamigahifi emeriama hu'na anankea tamasami'neno. Anage huteno anantetira Balamu'a zamatreno mago'za omane agonarega marerine. **4** Hagi Anumzamo'a Balamuna tutagiha huntogeno, Balamu'a anage huno asami'ne, nagra 7ni'a kresramna vu itarera mago'mago kresramna vu itarera mago bulimakaone, mago ve sipisipine ahe'na kresramna vu'hoe. **5** Anante Ra Anumzamo'a Balamuna nanekea asamino, Ete vunka Balakina amama kasamu kea ome asamio. **6** Higeno Balamu'a rukrahe huno vuno, ome keana Balaki'a miko Moapu kva vahetamine kresramnama vu itare oti'negeno vu'ne. **7** Anante Balamu'a amanage huno kasnampa kea huama huno zamasami'ne, Aramu zage hanati kaziga agonafi mani'nogeno Moapu kini ne' Balaki'a Israeli vahe'mokizmi kazusi ke eme hunezmantenka, Jekopu nagara huhaviza huzmantogu kea hige'na e'noe. **8** Hagi nagra inankna hu'na Anumzamo'ma kazusima huontoma huno hu'nenia vhahera, kazusinkea hunentena, Ra Anumzamo'ma huhaviza huonto huno'ma hu'nenia vhahera, inankna hu'na huhaviza huntegahue? **9** Nagra have agonareti kefenkamu atre'na Israeli vhahera zamage'noe. Zamagra mani ruotage hu'za Anumzamofo vhahera mani'ne'za zamarimpa frune mani'naze. **10** Israeli agehe'za

hagera hu'za kahepankna hu'za rama'a vahe nemanisage'za,
4'afi refko hanage'za mago kevu manigahazanagi zamagrira
hamprigara osugahaze. Hagi ama mopafima nasimu'ma
eri'na mani'nenurera, nagra Anumzamofo agorga nemanina,
zamagrikna hu'na narimpa frune frizankura nave'nesie. **11**
Anante Balaki'a amanage huno Balamuna antahige'ne. Kagra
na'a hunenantane? Nagra ha' vahe'ni'a kazusi huzmantogu
kavrena amafina e'noe. Hagi ko! Kagra mani soe'ma hu'zama
manisagu asomu ke hunezmantane! **12** Hianagi Balamu'a
kenona hunteno, Ra Anumzamo'ma huoma huno hunantesia
ke'age nagra hugahue hu'ne. **13** Anante kini ne Balaki'a
Balamuna anage huno asmi'ne, Nagrane egeta Pisga agonare
umanineta rama'a Israeli vahera ozmagegahane. Hianagi osi'a
nezmagenka anama zamagesanama'a kazusi kea huzmanto, **14**
Huteno anantetira Balamuna avreno Zofim agupofi me'nea Piska
agonare, 7ni'a kresramna vu ita ome tro huno, ve bulimakaone
ve sipisipinen mago'mago kresramna vu itarera ofa hu'ne.
15 Hagi Balamu'a Balakina asamino, ama kresramna vu itare
mani'nege'na Ra Anumzamofona anturega vu'na ome tutagiha
hantaneno. **16** Anante Ra Anumzamo'a Balamuna tutagiha
hunteno amanage huno nanekea asami'ne, Ete vunka Balakina
ama ana naneke ome asamio. **17** Higeno Balaki'a anama ofama
hu'nere Moapu kva vahe'mo'zane otino mani'neno, na'ane huno
Ra Anumzamo'a kasami'ne huno Balamuna antahige'ne? **18**
Ra Anumzamo'ma asami'nea kasnampa nanekea Balamu'a
amanage huno asami'ne, Zipori nemofoga kama antahio,
19 Anumzamo'a tagrikna vahera omani'neankino, havigea
osugahie. Agra kema hia kere amage anteno anaza nehia
ne' mani'ne. Agrama kema nehuno'a, ana kemofo amage

anteno eri so'e nehia ne' mani'ne. 20 Hagi Ra Anumzamo'a ana vahera asomu ke huzamanto huno nasami'neanki'na, nagra ana kea eritrena ru kea osugahue. 21 Israeli nagapina koana mago havizana kena eriforera osugeno, mago zamazeri haviza hu'zana omanene. Hagi Ra Anumzamo'a zamagrane mani'nege'za, zamagra hu'za Ra Anumzana tagri kinie hu'za nehaze. 22 Ra Anumzamo Isipitira zamavareno atirami'neankino zamagripina afi' ve bulimakaomofo hanavegna hanave me'ne. 23 Ha' vahe'mo'zama Israeli vahe avuatga hu'zo, sankuma hu'za zamaheku'ma hanazana, anazamo'a amne'za segahie. Hanige'za menina Israeli vahe'mokizmi nezmage'za maka veamo'za, Anumzamo'a zamahoke neheno ruzahu'za erifore nehianki, keho hu'za hugahaze. 24 Hagi keho, Israeli vahe'mo'za laionimo eaza hu'za ne-eza, laionimo ahenaku hia zagama otre ronato huvava huno aheno asgahu nevazino korama'a neankna hute'za, manigsa hugahaze. 25 Hagi anante Balaki'a anage huno Balamuna asmi'ne, Kazusi kema huozamante'nunka asomu kea huozamanto. 26 Hianagi Balamu'a amanage huno Balakina asami'ne, Ra Anumzamo'ma huoma hunante'nia zana hugahue hu'na kasami'nofi onkasami'noe? 27 Hagi Balaki'a anage huno Balamunkura hu'ne, Antureti'ma Ra Anumzamo'a musema huno'ma kazusima huzamantenigu ege'na kavre'na vaneno. 28 Hagi Balamuna avreno Peori agonare vigeno, ka'ma kokana ke'ne 29 Balamu'a anage huno Balakina asmi'ne, amare 7ni'a kresramna vu ita tro hunentenka, 7ni'a bulimakao afu'ene 7ni'a ve sipisipi afutamine uvrenka eno. 30 Higeno Balamu'ma asmiaza huno Balaki'a, Ana 7ni'a itarera mago mago ve bulimakaone, mago mago ve sipisipine aheno kresramna vutere hu'ne.

24 Hagi Ra Anumzamo'ma Israeli vahe asomu kema huzamantea zama Balamu'ma keno antahino'ma nehuno'a, Agra mago'anena nehiaza osu'neanki, avugosa rukrahe huno hagege ka'ma kokantega hunte'ne. **2** Hagi Balamu'a anama Israeli vahe'mo'zama nagatenofite'ma seli nonkuma'ma antetere hu'naza kuma'ma negegeno, Ra Anumzamofo Avamumo agripi emanigeno, **3** amanage huno kasnampa nanekea huama hu'ne, ama nanekea Beori nemofo Balamu miko'zama keama huno negea ne'mofo kasnampa naneke. **4** Hagi ama Anumzamofo kea nentahina, hanave'ane Anumzamo'ma ava'nagna zana naverige'na nege'na, mikazana keama hu'na negoe. **5** Israeli naga'mota seli no kumatamimo'a knare'zantfa hu'ne. Jekopu nagamota nomani zantamimo'a knare zantfa hu'ne. **6** Hagi agupo kokamo me'no viankna nehigeno, tinnenare me'nea hozagna nehuno, Alovera traza Ra Anumzamo kriankna nehu'no, sida zafamo tinnenare hageanka hu'ne. **7** Timo'a zamagri tafempintira tagiramigahie. Zamagri mofavremo'za rama'a tina erigahaze. Tamagri kinima fore'ma hanimo'a Ameleki kini nera Agakina agatereno himamu hanave'ane kini ne manisige'za agrama kegavama hania kumara husga huntegahaze. **8** Hagi afi bulimakaomofo hanavemo'ma hiaza huno Ra Anumzamo'a lsipitira zamavareno atiramino e'ne. Hagi miko kumate vahera zamahe fananene nehu'za, ha' vahe'zamia kevereti zamaheno zaferinazamia rugorigahie. **9** Hagi Israeli vahe'mo'za laionimo avu mase'nege'za vahe'mo'za azeri oti'zanku kore nehazankna vahere. Hagi iza'o asomu ke'ma huzamantesimo'a, asomu erigahie. Hagi iza'o kazusi kema huzamantesimo'a, agra'a haviza hugahie. **10** Hagi Balaki'a ana nanekema nentahino'a tusi rimpa ahegeno agra'a azana rupro nehuno anage hu'ne,

antahio kagra ha' vaheni'a kazusi huzamantesanegu ke hugenka
amafina e'nananagi, 3'a zupa asomu kea huzamantane. **11**
E'ina hanku menina kagra amafintira maniganenka ame hunka
kumaka'arega vuo. Hagi rama'aza kaminaku huanagi, mizama
kaminaku'ma huazana Ra Anumzankamo asevazigantegu,
mizana onkamigosue. **12** Higeno Balamu'a ana kenona Balakina
asamino, kema huzamantanke'za ome nasami'naza vhahera
nagra anage hu'na zamasami'noe. **13** Balaki'a silvane golinema
avite'nenia noma'a namigahianagi, Ra Anumzamofona rimpa eri
haviza hu'na nagra navesitera ra zano osi'zano osugahuanki,
Agrama huo huno'ma hania ke'age hugahue. **14** Hagi nagra
menina vahe'nirega vugahuanki, ege'na henka'ama Israeli
vahe'mo'zama vahekama huzamantesaza zamofo nanekea
kasami'neno. **15** Hagi Balamu'a anage huno kasnampa kea
Balakina asami'ne, ama Beori nemofo Balamu avureti amate
keni'ma hu'nea ne'mofo kasnampa ke. **16** Hagi nagra Ra
Anumzamofo kea nentahina, Mrerisa Anumzamofo antahintahi'a
antahi ama nehu'na, Hankave'ane Ra Anumzamo ava'nagna
zampi naveri hige'na, keama nehu'na mopafi mase'noanagi
navumo'a hari hu'ne. **17** Hagi nagra ana avanagna zampina
mago vahe ke'noanagi, henka fore hugahie. Jekopumpinti
masanentake hanafira hanatino remsa hanigeno, kinimo'ma
e'neria azotamo'a Israeli vahepinti enkeno, Moapu vahe'mota
tamahe vaganereno, Seti mofavreramina zmasenia ruprorovazino
zamahegahie. **18** Hagi Israeli vahe'mo'za Idomu vhahera
hahuzamante'za mopazmia erinafa'a nehu'za, ha' vahe'zami
Seiri vahe'mokizmi mopa erinafa'a hugahaze. Ana nehu'za
Israeli vahe'mo'za hihamu vahe manigahaze. **19** Hagi Jekopu
nagapinti mago'mo ana mopa kva mani'neno, mago'ama mesia

rankumara erihaviza hugahie. **20** Hagi anante Balamu'a Ameleki
vahe'ma mani'nazarega nezmageno, anage huno kasnampa
kea hu'ne, Amelekia hanave kuma meno ugota hu'neanagi,
eri haviza hanigeno haviza hugahie. **21** Hagi anante Kin
vahe'ma mani'nazarega nezmageno kasnampa kea anage hu'ne,
tamagra vahemo tamazeri haviza osaniegu namamo'ma havefi
noma kiaza hu'naze. **22** Hianagi Asuri vahe'mo'zama eme
zamavare'za kinama ome hunezamantesageno, tamagerafa
huno Kin kumatamimo'a haviza hugahie. **23** Hagi Balamu'a
huvagare kasnampa kea anage hu'ne, Anumzamo'ma ama
zama erifore'ma nehanigeno'a, iza amafina manigahie? **24**
Hianagi Saiprusi kazigati ventemo'a eno Asuri vahe'ene, Eberi
vahera zamahe'nige'za fanene hugahaze. Hianagi zamagr'i'enena
zamahe fanene hugahaze. **25** Hagi anantetira Balamu'a oti'no,
kuma'rega vigeno, Balakia kuma'rega vu'ne.

25 Hagi Israeli vene'nemo'za Sitimima seli nonkuma ome ki'za
mani'ne'za, agafa hu'za Moapu a'hene monko'za hu'naze. **2**
Na'ankure ana a'nemo'za havi anumzazmire'ma kresramna
nev'u'za, Israeli vene'hea ke hazage'za anampina vu'za ne'zana
ome nene'za, ana havi anumzantera zmarenare'za monora
hunte'naze. **3** Hagi ana nehu'za Peori agonafi Bali havi anumzante
Israeli vahe'mo'za monora hunte'naze. Ana hazageno Ra
Anumzamo'a tusi'a rimpahenzante'he. **4** Hagi Ra Anumzamo'a
Mosesena asamino, Ama anazama nehaza vahe'mokizmi kva
vahera zamavarenka Ra Anumzamo'ha navuga vahe'mo'za
nezmagesageta amate ome zamahe nefrinke'na Israeli vahera
Narimpa aheozmantaneno. **5** Hagi Moses'e'a kema refako
hu Israeli kva vahe'mokizmia amanage huno zamasmi'ne,
Mago'magomota naga'tamifinti'ma Bali havi anumzante'ma Peori

agonafima mono'ma hunte'nenaza veneneramina maka zamahe friho. **6** Hagi Mosese'ene mika Israeli vahe'mo'za seli mono nomofo avuga zavinete'za zmasunku nehu'za negazageno, mago Israeli ne'mo'a Midieni ara naga'ama maninarega avreno vuno seli noma'afi ufre'ne. **7** Hagi pristi ne' Aroni negeho Elieaza nemofo Finiesi'a ana vene a'enena negeno'a vahepintira atreno vuno karugru kevea azampi omenerino, **8** ana nera amage vuno seli noma'afi ufreno ana kevereti matevuno vemofona renkro huno a'mofona rimpia retragufene. Ana higeno Israeli vahepina ana knazamo'a vagare'ne. **9** Hianagi ana knazamo'a **24** tauseni'a Israeli vahe ko zamahe fri'ne. **10** Ra Anumzamo'a Mosesena anage huno asmi'ne, **11** Eleasa ne'mofo Finiasi pristi nagapinti ne'mo, Nagri narimpa haviza hu'zana eri fru hu'ne. Na'ankure agrira Nagri'ma hiakna huno rimpahegeno anara hianki'na, Israeli vahera mago'ane kanivea razmante'na zamahe ofrigahue. **12** E'ina hu'negu antahio, Nagra agri'ene narimpa fru hu'na manisua huvempa kea hue. **13** Hagi Finiasi enena huvempa huankino agripinti'ma forehu anante anante hu'zama esaza vahe'mo'za pristi eri'zana erigahaze. Na'ankure Israeli vahe'mokizmi kumima atrezmantesugu kumite nona huno mizase'ne. **14** Hagi Midieni a' enema Israeli ne'ma ahfri'nea ne'mofo agi'a, Zimrikino Salu nemofo'e. Hagi Salu'a Simioni naga nofipina ugota kva nere. **15** Hagi ana ne'mo'ma avreno vu'nea Midieni a'mofo agi'a Kozbikino, Zuri mofare. Hagi Zuri'a Midieni vahepina ugota hu'naza nagapinti ne' mani'ne. **16** Anante Ra Anumzamo'a Mosesena asmino, **17** Midieni vahera ha' vahetami mani'nazanki zamahe friho. **18** Na'ankure zamagra ha' vahetamimo'za hazaza hu'za reramatga hazageta, Peori agonarera havi anumzantera monora hunentazageno,

anazanteku Finiasi'a keve'areti Midieni kva ne'mofo mofa Kozbina
karugru regeno fri'ne.

26 Hagi ana knazama evutegenoa Ra Anumzamo'a Mosesene
pristi ne' Aroni nemofo Eleasakiznia amanage huno zanasami'ne,
2 Menina Israeli vahepintira 20'a kafuma agaterenesia vahe'ma
ha'ma huga hu'nesaza vhahera hamprinka refako huzamantege'za
Israeli vahe'mokizmi sondia vahe maniho. 3 E'ina knafina
Israeli naga'mo'za Moapu agupofi Jodani timofo ankenarega,
Jeriko kantu kaziga me'nege'za kama kaziga kumara ome ki'za
mani'naze. Hu'negu Mosesake Pristi ne' Elieasakea Israeli kva
vahetaminkura anage huke zamasami'na'e, 4 Ra Anumzamo'ma
hu'nea kante anteta 20'a kafuma agatere'nesia vhahera hampriho.
Hagi Isipiti'ma atre'za e'naza vahe'mokizmi zamajima kreno
eri fatgoma hu'neana ama'na hu'ne. 5 Hagi Rubenimpinti'ma
forehu anante anante hu'za e'naza vhahera Hanoki nagatetira eno
Palu nagate eme atre'ne. 6 Hezroni naga'mofona nezmageho
agire, Hezroni naga nofire huno asamre'ne. Hagi Kami nagara,
nezmageho agire, Kami nagare huno asamre'ne. 7 Hagi
Rubenimpinti'ma forehu anante anante hu'zama mani'nazana 43
tausen 7 hantre 30'a vahe mani'naze. 8 Hagi Palumpinti'ma
fore hu'neana Eliapue. 9 Hagi Eliapumpintima forehu anante
anante hu'nazana Nemueliki, Dataniki, Abiramu'e. Hagi ana
nagapintira Abiramuke Datanike kva eri'zana eri'na'a netremoke
Mosesene Aroninena kehara rezanante'ne Ra Anumzamofo
kea rufutagi'na'e. 10 Hagi ana hakeno mopamo'a agira aka
huno zamasaga huvazigeno, anampina Kora'a fri'ne. Hagi
250'a vahe'ma zamagema ante'naza vene'nea Ra Anumzamofo
tevemo eme te fanane hu'ne. Hagi e'inazamo'a Israeli vahe
huzmagesa hu avame'za me'ne. 11 Hianagi Korampinti'ma fore

hu'naza vene'nemo'za ofri'naze. **12** Hagi Simionipinti'ma forehu
naza nagara ama'na hu'naze, Nemueli nagara, nezmageho agire
Nemueli nagare huno asanemreno, Jamini nagara nezmageho
agire Jamini nagare nehu'za, Jakini nagara nezmageho agire
Jakini nagare hu'za nehu'za, **13** Zera nagara nezmageho agire
Zera nagare hu'za asanemare'za, Sauli nagara nezmageho
agire asamre'za Sauli nagare hu'naze. **14** Hagi ama'i Simioni
nagaki'za ana miko'a 22tausen 200'a venene mani'naze. **15**
Hagi Gatipinti'ma fore hu'naza nagara ama'na hu'ne, Sefoni
nagara nezmageho agire Sefoni nagare hu'za asanemare'za,
Haggi nagamokizmia, nezmageho agire Haggi nagare hu'za
asanemare'za, Suni nagara nezmageho agire, Suni nagare
hu'za asanemare'za, **16** hagi Ozni nagara nezmageho agire
Ozni nagare hu'za asanemare'za, Eri nagara nezmageho
agire, Eri nagare hu'za asamre'naze. **17** Hagi Aroti nagara
nezmageho agire, Aroti nagare hu'za asanemare'za, Areli
nagara nezmageho agire, Areli nagare hu'za asamre'naze. **18**
Hagi Gatimpinti'ma fore'ma hu'nazana ana maka vahera 40
tausen 500'a vene'ne mani'naze. **19** Hagi Juda'a tare mofavrea,
Erine Onanine kasezanante'ne. Hianagi zanagra ko Kenani
mopafi fri'na'e. **20** Hagi Judampinti'ma fore'ma hu'naza nagara
ama'ne, Sela nagara nezmageho agire, Sela nagare hu'za
asanemare'za, Peresi nagara nezmageho agire, Peresi nagare
hu'za asamre'naze. Hagi Zera nagara nezmageho agire Zera
nagare hu'za asamre'naze. **21** Hagi Peresi mofavreramofo
zamagi'a ama'ne, Hezroni nagara nezmageho agire, Hezroni
nagare hu'za asamare'naze. Hagi Hamuli nagara nezmageho
agire, Hamuli nagare hu'za asamre'naze. **22** Hagi Judampinti'ma
fore'ma hu'naza naga'ma hampri'nazana 76 tausen 500'a vahe

fore hu'za mani'naze. **23** Hagi Isakapinti'ma forehu anante
anante'ma hu'naza nagara ama'ne, Tora nagara nezmageho
agire asamre'za Tora nagare nehu'za, Puva nagare nezmageho
agire asamre'za Puva nagare hu'za zamasamre'naze. **24**
Hagi Jasubu nagara nezmageho agire, Jasubu nagare hu'za
asanemare'za, Simroni nagara nezmageho agire, Simroni nagare
hu'za asamre'naze. **25** Hagi ana maka Isakampinti'ma fore
hu'naza vahera 64 tausen 300'a venene mani'naze. **26** Hagi
Zebulonimpiti'ma forehu anante anante'ma hu'za e'naza vahera
ama'ne, Seredi nagara nezmageho agire Seredi nagare hu'za
asanemare'za, Eloni nagara nezmageho agire Eloni nagare
hu'za asanemare'za Jeleli nagara nezamageho agire Jeleli
nagare hu'za zamasamre'naze. **27** Hagi ama'i Sebuluni naga
nofikiza zamagra 60 tausen 500'a venene mani'naze. **28** Hagi
Josefempinti'ma fore hu'na'ana Manase'ene Efremike fore
hu'na'e. **29** Hagi Manasempinti'ma fore hu anante anante'ma
hu'naza nagara Makirimpinti'ma fore hu'za Makiri nagare hu'za
mani'naze. Hagi Makirimpinti'ma fore hu'naza vahe'mo'za, Giliati
vahere hu'za mani'naze. **30** Hagi ama'i Giliatimpinti'ma fore
hu'nazana nagamofo zamagi'e, lezeri'e, hagi lezeri nagapinti'ma
fore hu'naza vahe'mo'za lezeri nagare hu'za mani'naze. Hagi
magora Helekokino, Heleki nagare hu'za mani'naze. **31** Hagi
Asirempinti fore hu'naza naga'mo'za Asiri nagare huza mani'naze.
Hagi Sekemimpinti fore'ma hunaza nagamoza, Sekemi nagare
hu'za mani'naze. **32** Hagi Semidapinti'ma fore'ma hu'naza
naga'mo'za Semida nagare hu'za mani'naze. Hagi Hefampinti'ma
fore hu'naza naga'mo'za Hefa nagare hu'za mani'naze. **33**
Hagi Hefa nemofo Zelofehadi'a mofavrea onte'ne. Hianagi
mofa'neraminke ante'neankino zamagi'a Malaki, Noaki, Hoglaki,

Milkaki, Tirsae hu'za mani'naze. 34 Hagi ama'i ana miko
Manasempinti'ma fore hu'naza vahera 52 tausen 700'a vene'ne
mani'naze. 35 Hagi Efraemimpinti'ma fore'ma hu'naza nagara
aman, Suterampinti'ma fore'ma hu'naza nagara, Sutera nagara
hu'za manizageno, Bekelimpinti'ma fore hu'naza nagara, Bekeli
nagare hu'za mani'zageno, Tahaniimpinti'ma fore'ma hu'naza
nagara, Tahani nagare hu'za mani'naze. 36 Hagi Sutelampinti'ma
fore hu'naza vahera ama'ne, Eranimpinti'ma fore hu'naza
nagara, Erani nagare hu'za mani'naze. 37 Hagi e'i maka
Efraemimpinti'ma fore hu'naza nagaki'za hapri'nazana 32 tausen
500'a vene'ne mani'naze. 38 Hagi Benzamenimpinti'ma fore hu
anante anante'ma hu'za e'naza vahera ama'ne, Belampinti'ma
fore hu'nazana nagara, Bela nagare hu'za manizageno,
Asbelimpintima fore'ma hu'naza nagara, Asbeli nagare hu'za
manizageno, Ahirimimpinti'ma fore'ma hu'nazana nagara, Ahiri
nagare hu'za mani'naze. 39 Hagi Sefufamumpinti'ma fore
hu'naza vahe'mo'za Sefufamu nagare hu'za mani'naze. Hagi
Hufamumpinti'ma fore hu'naza vahe'mo'za, Hufamu nagare hu'za
mani'naze. 40 Hagi Bela'a Adine Namakizni kasezanante'ne.
Hagi Adipinti'ma fore hu'naza vahe'mo'za, Adi nagare hu'za
mani'zageno, Namanimpinti'ma fore hu'naza vahe'mo'za, Namani
nagare hu'za mani'naze. 41 Hagi ama'i miko Bezamenimpinti'ma
fore hu'naza vene'negi'za zamagra 45 tausen 600'a vene'ne
mani'naze. 42 Hagi Danimpinti'ma fore'ma hu'naza vahera
ama'ne, Suhamupinti'ma fore'ma hu'nazana vahekura, Suhamu
nagare hu'naze. 43 Hagi suha naga'ma mani'nazana miko 64
tausen 400'a vahe mani'naze. 44 Hagi Asapinti'ma fore hu anante
anante'ma hu'za mani'naza nagara ama'ne, Imnampinti'ma
fore hu'naza naga'mo'za, Imna nagare hu'za manizageno,

Isvimpintima fore hu'naza naga'mo'za, Isvi nagare hu'za mani'naze. Hagi Beriampinti'ma fore hu'naza vahe'mo'za, Beria nagare hu'za mani'naze. **45** Hagi Beriampintima fore hu'anante anante'ma hu'nazana ama'ne, Hebapinti'ma fore hu'naza naga'moza, Heba nagare hu'za mani'zageno, Malkimpinti'ma fore hu'naza naga'mo'za, Malki nagare hu'za mani'zageno, magora Malkielkino, Malkiel nagare hu'za mani'naze. **46** Hagi Asa mofamofo agi'a Sera'e. **47** Hagi ama'i Asa nagamokizmima hampri'nazana 53 tausen 400'a vahe mani'naze. **48** Hagi Naftarimpinti'ma fore hu'naza nagara ama'ne, Jazerimpinti forema hu'naza naga'mo'za Jazeri nagare hu'za manizageno, Gunimpinti'ma fore'ma haza vahe'mo'za Guni nagare hu'za mani'naze. **49** Hagi Jezerepinti fore hu'naza vahe'mo'za, Jezeri nagare hu'za manizageno, Silemumpinti fore hu'naza vahe'mo'za, Silemu nagare hu'za mani'naze. **50** Hagi ama'i miko Naftarimpinti'ma fore hu'anante anante hu'naza vahe'ma hampri'nazana 45 tausen 400'a vene'ne mani'naze. **51** Hagi ama'i mika'a Israeli vahe'ma hampri'neana 601tausen 700 30'a vahe mani'naze. **52** Hagi anante Ra Anumzamo'a Mosesena asamino, **53** ama'i zamagima hampriza vahe'mofo avamente nagatenofite hunka ana mopa refako hunka erisintima haresazana zamatere huo. **54** Hagi mopama refkoma hananana, rama'a vahe'ma mani'nesamokizmia rama'a mopa refko hunka nezaminka, osi'a vahe'ma mani'nesamokizmia osi'a mopa zamatere huge'za erisantihare'za maniho. **55** Hianagi satu zokagore'za kesageno nezamageho zamagima efore'ma hania nagamofo mopa refko huzamatere huge'za erisantihare'za maniho. **56** Hagi miko mopa refkoma huzamisanana rama'a mani'naza nagateti vuno, osi'ama mani'naza nagate'ma vaniana satu zokago renka

negenka refako hunka mopa zamige'za erisantihare'za maniho.

57 Hagi Levai naga nofi'ma hampri'nazana ama'na hu'ne, Gesonimpinti'ma fore'ma hu'naza vahe'mo'za Gesoni nagare hu'za mani'zageno, Kohatimpinti'ma fore hu'naza vahe'mo'za, Kohati nagare hu'za manizageno, Merarimpinti'ma fore hu'naza naga'mo'za Merari nagare hu'za mani'naze. 58 Hagi ama'i mago'a Livae nagapinti'ma fore'ma hu'nazana, Libnikino, Libni nagare hu'za manizageno, Hebronimpinti'ma fore'ma hu'naza vahe'mo'za, Hebron nagare hu'za mani'zageno, Maharimpinti'ma fore hu'naza vahe'mo'za Mahari nagare hu'za mani'zageno, Musimpinti'ma fore hu'naza vahe'mo'za Musi nagare hu'za manizageno, Kora nagapinti'ma fore'ma hu'naza vahe'mo'za Kora nagare hu'za mani'naze. Hagi Kohati'a Livae nagapinti ne' Amrami nefae'. 59 Hagi Amrami nenaro'a Livae nagapinti a' Jokabetie. Hagi Isipi mani'ne'za Livae nagapinti ana ara ksentegeno, ana a'mo'a Mosesene Aroninena kaseneznanteno, magoke mofa Miriamunke kasente'ne. 60 Hagi Aroni ne' mofavreramina Natapu'ma, Abihu'ma, Ereasa'ma Itamarie. 61 Hu'neanagi Abihu'ene Natapu'enena Ra Anumzamo'ma e'ina hiho huno'ma hu'nea ke'a rutagreke Agri avuga mnanentake'za kre mnavakeno zanahe fri'ne. 62 Hagi Livae nagama mago ikama hu'nea mofavrereti'ma mareri'nea venenema hampri'nazana 23 tauseni'a venene mani'naze. Hianagi ana Livae nagamokizmia Israeli vahe'ma mopama zami'naku zamagima erinte fatgoma hu'za hamprizafina ohampri'naze. Na'ankure zamagra mopa erisanti oharegahaze. 63 Hagi Jodani tinte Jeriko kumamofo kanti kaziga Moapu agupofi mani'nageno Mosese'ene pristi ne' Eleasarikea Israeli vahera hampri'na'e. 64 Hu'neanagi Mosese'ene pristi ne' Aronikema ko'ma Sainai ka'ma kokampima

hamprina'a vahepintira magore huno omani'negene, menina hampri'na'e. **65** Na'ankure Ra Anumzamo'a anage huno ana vahekura hu'neane, tamagerfa hu'za zamagra kama kokampi frisageno, Jefuni ne'mofo Kalepi'ene Nuni nemofo Josua'enena ofri manigaha'e hu'ne.

27 Hagi Serofehati'a Hefa mofavre manigeno, Hefa'a Giliati mofavre manigeno, Makiri'a Manase mofavre manigeno, Manase'a Josefe mofavre mani'ne. Hagi Selofehati'a a' erino 5fu'a mofanege zmante'neankino zamagi'a ama'ne, Malaki, Noaki, Hoglaki, Milkaki Tirsa'e. **2** Hagi ana mofanemo'za Mosesene Pristi ne' Eleasane Israeli vahete kva vahe zagamofo zamavuga atrumahu seli mono nomofo kasante vu'za amanage hu'naze, **3** nerafa'ma ka'ma kopima fri'neana Kora naga'mo'zama Ra Anumzamofoma ha'ma rentazageno zamahe fri'nea vahe'enena ofri'neanki ne'mofavre'a kaseonte'neno agra'a kumi huno fri'ne. **4** Hagi nahanigeno nerafa agimo'a agri'a nagapintira fanane hugahie? Na'ankure agra ne'mofavrea kase onte'ne. Hagi nerafa nagamokizmi mopafintira mago'a mopa refako huramigahaze. **5** Hazageno Mosese'a ana kezamia erino Ra Anumzamofonte vigeno, **6** Ra Anumzamo'a amanage huno Mosesena asmi'ne, **7** Selofehati mofa'ne naga'mo'za fatgo kante kea nehaze. Hagi nezamafa nagapintira nezmafa mopama me'neniama'a erizamige'za, erisantihare'za nezmafa afuhe'zama manisafina maniho. **8** Hagi mago'ane Israeli vahera zamasamio, mago ne'mo'ma ne' mofavre ote'neno fri'nesigeta, ana ne'mofo mopa erita mofa'amofo aminkeno erisantihareno. **9** Hagi ana ne'mo'ma mofa'ma onte'neno frinige'za, afuhe'i erizamihio. **10** Hagi afuhe'zama omani'nenazana agrama erisantima harenia mopa, nef afa'agna eri zamigahaze. **11** Hagi ana ne'mofo

nefa afu'aganahe'zama omani'nesazana, agri'a nagapi vahe eri zamige'za erisantihareho. Ama anankemo'a Ra Anumza'mo'ma Mosesema hunte'nea kante Israeli vahepina trake megahie. **12**
Ra Anumzamo'a Mosesena amanage huno asami'ne, Abarimi agonare marerinka Israeli vahe'ma zami'noa kokana ko. **13**
Hagi ana mopama ketenunka negagana Aroni'ma hu'neaza hunka frigahane. **14** Na'ankure Zini ka'ma kopina Nagrama hi'oma hu'na tanasamu'a keni'a amagera onte'na'e. Hagi Israeli vahe'mo'zama zamarimpa knama hunenantageta'a, Nagrikura ruotage hu'ne huta Israeli vahepina erinte amara osu'na'e.
(E'ina tina Kadasi ka'ma kopi Meriba me'ne.) **15** Anante Mosese'a Ra Anumzamofona anage huno asami'ne, **16** Ra Anumzana maka'zama zamasimu'ma nezamina Anumzamoka, Israeli vahe'ma kegavama hania nera mago azeri otigeno, **17** ana ne'mo ugota huzmanteno zamavareno vuno eno nehanige'za, Ra Anumzamofo vahe'mo'za sipisipimo'za kegava huzmante vahe omani'nege'za savri hu'za manizanknara osugahaze. **18** Hagi Ra Anumzamo'a Mosesena anage huno kenona hunte'ne, Agripima avamu'ma mani'nea ne' Nuni nemofo Josuana asenira kazana antenka nunamuna hunto. **19** Hagi mika vahe zamavufi pristi ne' Eleasa avuga Josuana avrenka vunka eri'zama erisia eri'zana ome huhamprinto. **20** Anante eri'zama ener'i'na hihamu mago'a amige'za, mikro Israeli vahe'mo'za ke'a antahimi'za avariraho. **21** Hagi Josuama maka zampima Nagri navesi'ma kenaku'ma hanuno'a Eleasa pristi ne'mofo avuga vanigeno, Eleasa'a urimi havea erino Nagri navesi zana keno erifore hugahie. Hanigeno Eleasa'a mika nanekea Josuana asami'nigeno, Israeli vahera zamavareno vuno eno hugahie. **22** Hagi Ra Anumzamo'ma huoma huno hunteaza huno Mosese'a Josuana avreno pristi

ne' Eleasane Israeli vahe zamavuga vu'ne. 23 Hagi Mosese'a
Ra Anumzamo'ma hunte'nea kante anteno Josuana asenirera
azana anteno huhamprinte'ne.

28 Ra Anumzamo'a Mosesena amanage huno asmi'ne, 2
Israeli vahera zmasamige'za kegava hu'ne'za ne'zama ofama
hunaku'ma hanu'za huhamprinte'noa knarera eri'za tevefina
kresageno, knare mana vinke'na mna'a antahi'neno. 3 Hagi
kagra anage hunka zamasamio, ama anahukna huta Ra
Anumzamofontera ofama hanaza zana erita egahaze. Tare
ve sipsipima mago kafu huno afuhe afahe osu'nesia avreta
tevefina magoke magoke knarera eme kresramana vuvava
hugahaze. 4 Hagi mago ve sipsipia nantera ofa nehuta,
magora kinaga ofa hugahaze. 5 Hagi ana nehuta mago kilo
kane osi hu'nesia flaua'ene mago lita olivi masavene erihavia
huta witi ofa hugahaze. 6 Hagi ama ana ofama hanazana
ko'ma Sainai agonafima Ra Anumzamo'ma mnama nentahino
musema hanigu eri agafa huta hu'haza ofagita, maka knafina
huvara hugahaze. 7 Hagi ana kresramnama vanafina, waini tina
ofa hugahaze. Hagi anama ofa hunaku'ma hanaza waini tina
ruotage'ma hu'nefinka Ra Anumzamofontega waini ofe huta
ome tagitreho. 8 Hagi witine waini tima'a ofama nanterama
hu'nazankna huta kinagama ofa hanaza sipsipia tevefi kre fanene
hu ofa hinkeno, Anumzamo'a mna'a nentahino musena hino.
9 Hagi mani fruhu kna Sabati knarera mago kafu huno afuhe
afahe osu'nesia tare ve sipsipia nevarenka, mago kilo flaua olivi
masavene eri havia hu'nesiane, eri havia hunka waini ofanena
hugahane. 10 Hagi e'i mika mani fru Sabati knare'ma tevefima
kre fanenema hu ofagita, maka zupa waini ti ofane, tevefima
kre fanene hu ofama mika zupama nehzaza hugahaze. 11

Hagi mago'mago ikamofo ese kna zupa tare ve bulimakaogi,
mago ve sipisipigi, mago kafu hu'no afuhe afehe osu'nenia
7ni'a sipisipi anenta ana maka Ra Anumzamofonte'ma tegefima
kre fanene hu ofama hu'za avre'za egahaze. **12** Hagi ana witi
ofama hanazana mago mago bulimakaoma ofama hanarera, 3'a
kilo hu'nesia flauama masavenema eri havia hu'nesiane, mago
mago ve sipisipi ofama hanarera 2kilo hu'nesia flaua masavene
eri havia hu'nesiane, erinteta ofa hugahaze. **13** Hagi mago
kilo hu'nesia flaua masavene erihavia huta mago mago agaho
sipisipine tegefima kre fanenehu ofa hinkeno, Ra Anumzamo'a
mna'a nentahino musena hugahie. **14** Hagi ofama hunaku'ma
hanafima waini ofama hanuta, mago'mago bulimakaoma ofama
hanarera, 1 lita waini ofa nehuta, mago mago sipisipima ofama
hanarera, 1 litagi hafu'a waini tine erita ofa hugahaze. Ama
ana ofa mago mago ikamofona ese knazupa eme huterema
hanaza ofe. **15** Hagi mago ikamofona ese kna zupa, mago ve
meme kumi ofa Ra Anumzamofontera hiho. Hagi mika zupama
nehaza ofagino waini tine magopi erinteta ofa hugahaze. **16**
Hagi ese ikamofona 14ni zupa Ra Anumzamo'ma ozamahe
zamagatere'nea zanku'ma ne'zama retro hu'za nene'za antahimi
kne. **17** Hagi ana ikamofo 15zupa ne'zana kreza nene'za musena
nehu'za, zisti onte bretia 7ni'a knamofo agu'afi negahaze. **18**
Hagi ana ikamofo ese knazupa, mika vahera zamazeri atru
nehinke'za monora nehu'za, zamagra ana kna zupa eri'zana
e'origahaze. **19** Hagi Ra Anumzamofonte'ma tegefima kre
fanenehu ofa erita esazana, tare bulimakaogi, mago ve sipisipigi,
7ni'a sipisipi anentatami mago kafu huno afuhe afahe osu'nesia
zamavare'za egahaze. **20** Hagi mago'mago bulimakaonena
3kilo hu'nenia flaua masavene eri havia huta ofa nehuta, tare

kilo hu'nesia flaua masavene eri havia huta ve sipisipinena ofa hugahaze. **21** Hagi 7ni'a sipisipi anentatamima mago magoma ofama huterema hanarerera, masavenema erihavia hu'nenia flaua mago kilo ofa hutere hugahaze **22** Anahukna huta mago ve meme kumimofo nona huno apasente ofa Ra Anumzamofontera hugahaze. **23** Hagi ama ana ofa maka nanterama hutere'ma nehaza ofane, ana ofa hugahaze. **24** Ama ana kanteke avaririta 7ni'a zagegnamofo agu'afina tevefima kre fanene hu ofane, waini ofanena hanageno Ra Anumzamo'a knare mana nentahino musena hugahie. **25** Hagi 7ni knarera mani fru huta mono nehuta, ranra eri'zana e'origahaze. **26** Anahukna huta hozafinti ese ne'zama hamareno muse hu knamofona ese knazupa, Ra Anumzamofontera ese witi ragama nenama haniana erita ne-eta, mago'a knafima e'neri'za eri'zana ama ana knarera e'origahaze. **27** Hianagi tevefi kre fanenehu ofama hanageno Ra Anumzamo'ma knare mana nentahino musema nehia ofa, tare agaho bulimakaonki, mago sipisipigi, 7ni'a sipisipi anentatami mago kafu hunenia avreta tevefi kre fanenehu ofa ne-eta, **28** ana ofanema witi ofa hanazana, knare huno'ma kane osi'ma hu'nenia flaua masavene eri havia hu'nesiana, 3'a kilo hu'nenia flaua'ene mago mago bulimakonena tevefina kresramna nevunka, ve sipisipinena 2kilo hu'nesia flaua'ene kresramana vugahane. **29** Hagi 7ni'a sipisipi anentatamima mago mago'ma ofama hutere'ma hanarerera, masavenema erihavia hu'nenia flaua mago kilo hu'nesia ofa hutere hugahaze **30** Ana nehunka mago ve meme afuteti kagra'a kumimofo nona huno apasente ofa hugahane. **31** Hagi waini ofane eri mago hunka ana ofa retroma hanazana, witi ofane tevefi kre fanene hu ofa megahie. Hagi

mika ofama hanaza zagaramimofona afuhe afahera osu'nesia
su'zamu ofa hugahane.

29 Hagi 7ni ikamofo ese knarera mikomota eri atru nehuta,
mago'a knafima e'neri'za eri'zana ama ana knarera eorigahaze.
Na'ankure e'i ufere kna me'ne. **2** Hagi ana knarera Ra
Anumzamofonte'ma tevefi kre fanenema hu ofama hazageno
knare manama nentahino musema nehia ofama hanuta,
mago agoho bulimakaonki, mago ve sipisipigi, 7ni'a anenta
sipisipirami mago kafu hu'nenageno afuhe afahe osu'nenia
avreta ofa hugahaze. **3** Hagi ana ofa witi ofane magoka
erinteta hugahazankino, knare huno'ma kane osi'ma hu'nenia
flaua masavene eri havia hu'nesiana, 3 kilo hu'nenia flaua'ene
bulimakonena tevefina kresramna nevuta, 2 kilo hu'nesia
flaua'ene ve sipisipia kresramana vugahaze. **4** Hagi 7ni'a sipisipi
anentatamima ofama hanazana 1 kilo hu'nenia flauwa masavene
eri havia hu'nenia flauateti mago mago sipisipi anenta'enena
ofa hugahaze. **5** Hagi anampina mago ve meme avrenteta,
tamagra'a kumite'ma nona huno kre ofa hugahaze. **6** Hagi ama
ana ofama hanazana, mago mago ikante'ma tevefima kre fanene
hu ofama nehaza ofane, mago mago knare'ma nehaza ofane,
witi ofane, waini ofanena Ra Anumzamofontega tevefi kremna
vanageno Anumzamoma knare manama nentahino musema
nehia ofa hugahaze. **7** Hagi 7ni ikamofo 10ni knarera atru
huta monora nehuta, ana knafina ne'zana a'o huta mani'neta,
mago'a knafima e'neri'za eri'zana ama ana knarera e'origahaze.
8 Hagi ana knarera Ra Anumzamofonte'ma tevefi kre fanenema
hu ofama hazageno knare manama nentahino musema nehia
ofama hanuta, mago agoho bulimakaonki, mago ve sipisipigi,
7ni'a anenta sipisipi mago kafu hu'nenageno afuhe afahe

osu'nenia avreta ofa hugahaze. **9** Hagi ana ofa witi ofane magoka erinteta hugahazakino, knare huno'ma kane osi'ma hu'nenia flaua masavene eri havia hu'nesia, 3'a kilo hu'nenia flaua'ene bulimakaonena tevefina kresramna nevuta, 2 kilo hu'nesia flaua'ene ve sipisipia kresramana vugahaze. **10** Hagi 7ni'a sipisipi anentatamima ofama hanazana 1 kilo hu'nesia flaua masavene eri havia hu'nenia flauateti mago mago sipisipi anenta'enena ofa hugahaze. **11** Hagi maka zupama witi ofane, waini ofama hanafina, kumite nona huno apase ofa, mago ve meme afu avreta ome kre fanane hu ofa ome hugahaze. **12** Hagi 7ni ikamofona 14ni zupa erigafa huta atru huta monora nehuta, mago'a knafima e'neri'za eri'zana ama ana knarera e'origahaze. Hagi Ra Anumzamofonte'ma ne'za kreta neneta muse'ma hanazana 7ni'a knafi hugahaze. **13** Hagi tevefima kre fanenehu ofama hanazana, Ra Anumzamo'ma knare mana vanigeno nentahino musema hania ofama hanazana, 13ni'a ve bulimakaonki, tare sipisipigi, 14ni'a afuhe afahe osu'nenia ve sipisipi anentatami ofa hugahaze. **14** Hagi ana 13ni'a bulimakaoma ofama hanafima witi ofama hanaza, knare huno kaneno eri osi hu'za masavempi eri havia hu'ne'naza flauara 3 kilo erinteta mago bulimakaorera kresramna nevuta, tare ve sipisipima kresramnama vanarera, mago mago sipisipirera 2 kilo kretere hugahaze. **15** Hagi 14ni'a sipisipima ofama hanazana, mago mago sipisipirera kaneno eri osi hu'nenia flaua masavempi eri havia hu'nenia 1 kilo erinteta kresramna vugahaze. **16** Hagi maka zupama witi ofane, waini ofama hanafina, kumite nona huno apase ofa, mago ve meme afu avreta kre fanane hu ofa ome hugahaze. **17** Hagi anante knazupama ofama hanazana 12fu'a agaho bulimakaonki, tare sipisipigi, afuhe

afahe osu'nenia 14ni'a ve sipisipi anentera mago kafu hu'nenia
avreta egahaze. **18** Hagi ana bulimakaone sipisipinema ofama
hanazana, ko'ma e'ina hiho huno tra kefima hunenia avamente
waini ofane, witi ofanena kresramna vugahaze. **19** Hagi maka
zupama witi ofane, waini ofama hanafina, kumite nona huno
apase ofa, mago ve meme afu avreta kre fanane hu ofa ome
hugahaze. **20** Hagi nampa 3 knazupa 11ni'a bulimakaonki, tare
ve sipisipigi, 14ni'a anenta sipisipi afuhe afahe osu'nesiana ofa
hugahaze. **21** Hagi ana bulimakaone sipisipinema ve sipisipima
ofama hanazana, ko'ma e'ina hiho huno tra kefima hu'nenia
avamente waini ofane, witi ofanena kresramna vugahaze. **22**
Hagi maka zupama witi ofane, waini ofama hanafina, kumite
nona huno apase ofa, mago ve meme afu avreta kre fanane
hu ofa ome hugahaze. **23** Hagi nampa 4 knazupama ofama
hanazana, 10nia agoho bulimakaonki, tare ve sipisipigi, afuhe
afahe osu'nenia 14ni'a ve sipisipi anentera mago kafu hu'nenaza
avreta egahaze. **24** Hagi ana bulimakaone ve sipisipine sipisipi
anentatamima ofama hanazana, ko'ma e'ina hiho huno tra
kefima hu'nenia avamente waini ofane, witi ofanena kresramna
vugahaze. **25** Hagi maka zupama witi ofane, waini ofama
hanafina, kumite nona huno apase ofa, mago ve meme afu
avreta kre fanane hu ofa ome hugahaze. **26** Hagi nampa 5fu
knazupa 9ni'a bulimakaonki, tare ve sipisipigi, 14ni'a anenta
sipisipi afuhe afahe osu'no mago kafu hu'nesia ofa hugahaze.
27 Hagi ana bulimakaone ve sipisipine, sipisipi anenta'enema
ofama hanazana, ko'ma e'ina hiho huno'ma tra kefima hu'nenia
avamente waini ofane, witi ofanena kresramna vugahaze. **28**
Hagi maka zupama witi ofane, waini ofama hanafina, kumite
nona huno apase ofa, mago ve meme afu avreta kre fanane hu

ofa ome hugahaze. **29** Hagi nampa 6 knazupa 8'a bulimakaonki, tare ve sipisipigi, 14ni'a anenta sipisipi afuhe afahe osu'no mago kafu hu'nenia ofa hugahaze. **30** Hagi ana bulimakaone ve sipisipine, sipisipi anenta'enema ofama hanazana, ko'ma e'ina hiho huno tra kefima hu'nenia avamente waini ofane, witi ofanena kresramna vugahaze. **31** Hagi maka zupama witi ofane, waini ofama hanafina, kumite nona huno apase ofa, mago ve meme afu avreta kre fanane hu ofa ome hugahaze. **32** Hagi nampa 7ni knazupa 7ni'a ve bulimakaonki, tare ve sipisipigi, 14ni'a anenta sipisipi afuhe afahe osuno mago kafu hu'nesia ofa hugahaze. **33** Hagi ana bulimakaone sipisipinema ofama hanazana, ko'ma e'ina hiho huno tra kefima hu'nenia avamente waini ofane, witi ofanena kresramna vugahaze. **34** Hagi maka zupama witi ofane, waini ofama hanafina, kumite nona huno apase ofa, mago ve meme afu avreta ome kre fanane hu ofa hugahaze. **35** Hagi 8ti knazupa atru huta nemanita mago'a knafima e'neri'za eri'zana ama ana knarera e'origahaze. **36** Hagi ana knarera Ra Anumzamofonte'ma tevefi kre fanenema hu ofama hazageno knare manama nentahino musema nehia ofama hanuta, mago agoho bulimakaonki, mago ve sipisipigi, 7ni'a anenta sipisipi afuhe afahe osuno mago kafu hu'nenia avreta kresramna vugahaze. **37** Hagi ana bulimakaone sipisipinema ofama hanazana, ko'ma e'ina hiho huno tra kefima hunenia avamente waini ofane, witi ofanena kresramna vugahaze. **38** Hagi maka zupama witi ofane, waini ofama hanafina, kumite nona huno apase ofa, mago ve meme afu avreta kre fanane hu ofa ome hugahaze. **39** Hagi e'i ana zantamina huhamprinte knare Ra Anumzamofontera erita eme ofa nehuta, huvempama hanare'ma hanaza ofane, musema huta nemiza ofane, kre

fananehu ofane, witi ofane, waini ofane, tamarimpa fru ofanena
hugahaze. **40** Higeno Ra Anumzamo'ma asamia kante anteno
Mosese'a maka nanekea Israeli vahera zamasami'ne.

30 Hagi Mosese'a Ra Anumzamo'ma asamia kea Israeli
naganofite kva vahezaga zamasamino, amanage huno
Ra Anumzamo'a hunante'ne, **2** Mago ne'mo'ma Ra
Anumzamofonte'ma huvempa huge, e'ina hugahuema huno mago
kema eri anakisuno'a, ananke'are oti'neno hugahuema hu'nenia
zana amage anteno ana maka'zana hugahie. **3** Hagi mago
mofamo'ma nefagoragama mani'neno Ra Anumzamofonte'ma
huvempa huge, e'ina hugahuema huno mago kema eri
anakisuno'a, **4** nefaf'ma ana ke'ma nentahino mago kema
anante'ma huontesigeno'a, anama huvempa nehuno erinaki'nesia
kemo'a ana maka megahie. **5** Hu'neanagi nefaf'ma ananke'ma
nentahino i'oma huno huntessiana, anama huvempama hu'nea
kerera kna'a e'origahie. Hagi anama huvempama hu'nea
kemofo kinafintira Ra Anumzamo'a atrentesigeno amane fru
huno manigahie. **6** Hianagi mago mofamo'ma ontahi'neno
agiteti'ma ame'ama huno huvempa hu'nesia mofaf'mo'ma vema
omerisigeno'a, **7** neve'ma ananke'ma nentahino mago'zama
osanigeno'a, ana huvempa ke'amo'a megahie. **8** Hianagi
neve'ma ananke'ma nentahino, i'oma huno huntessiana, anama
huvempama hu'nea kerera kna'a e'origahie. Hagi Ra Anumzamo'a
kefrozama'a atrentenigeno ana huvempa ke'afintera amane fru
huno manigahie. **9** Hianagi kento a'mo'o, neve'ma atresigeno
mani'nenia a'mo'ma Ra Anumzamofonte huvempa hu'nesia,
mika huvempa kema hu'nenia ke'amo'a megahie. **10** Hianagi
vema eri'nesia a'mo'ma neve agorga mani'neno, Ramofonte'ma
huvempa hanigeno, **11** neve'ma ana nanekema nentahino,

mago nanekema osaniana, miko huvempa ke'amo'a megahie.

12 Hianagi neve'ma ana kema nentahino mago rimpama osanigeno'a, ana huvempa ke'amofo kinafintira Ra Anumzamo'a atrentegahie. **13** Hagi mago'a huvempa ke'ma hunaku'ma ana a'mo'ma hanigeno'a, neve'a antahino keno huntenkeno, huvempa hino. **14** Hianagi ana a'mo'ma huvempama hania zupama neve'ma ana huvempa ke'ma nentahino, mago kema osaniana neve'a ana huvempa ke'arera mago arimpa hugahie. **15** Hianagi neve'ma ana huvempama hania ke'ma antahiteno, mago arimpama osaniana neve'a ana knazana agra'a erigahie **16** Ama'i tra kea vene a'enema aravema hana'anki, mofamo'ma nef a nompima manizamofo trakema Ra Anumzamo'ma Mosesema hunte'nea naneke.

31 Hagi Ramo'a amanage huno Mosesena asmi'ne, **2** Hagi Israeli vahe'motama tamazeri savri hazageta havi anumzante'ma mono'ma hunte'narera nona huta Midieni vahera zamahe vagaregahaze. Hagi anama hutesunka kagra frinka naga ka'ama mani'narega vugahane. **3** Higeno Mosese'a vahera zamasamino, amu'nontamifinti mago'a veneneramina ha'zana eri retro huzmantenke'za, Ra Anumzamo'ma rimpama ahezmante'nea zamofo nona hu'za Midieni vahera hara ome huzmanteho. (Nam-Ham 25:16-17) **4** Hagi Israeli vahepintira magoke magoke naga nofipinti **1** tauseni'a vahe huzamantetere hinke'za hatera viho. **5** Hige'za Israeli vahepinti mago mago naga nofi'mo'za **1** tauseni'a vahe hu'zamantetere hazage'za ana makara **12** tauseni'a vahe'mo'za hatera vu'naku retro hu'naze. **6** Hagi Mosese'a magoke magoke nagapintira **1** tauseni'a venene hatera huzamante'ne. Hagi anampina pristi ne' Eleasa nemofo Finiasi'a ruotage'ma hu'nege'za seli mono nompima eri'zama e'heriza

zantamine, ufene eri'neno, vugoteno nevige'za vu'naze. **7** Hagi zamagra Ra Anumzamo'ma Mosesema asami'nea kante ante'za Midieni vahe hara huzmante'za, miko venenea zamahehana hu'naze. **8** Hagi ana vahepin 5fu'a Midieni kini vahe'ma zamahe'nazana, Evima, Rekemima, Zurima, Hurima, Rebama huza zamahe'naze. Hagi anampinke Beoli nemofo Balamuna kazinknonteti ahe fri'naze. **9** Ana nehu'za Israeli vahe'mo'za, Midieni vahe'mokizmi a'nene, mofavrene, bulimakao afuzagane, sipisipi afutamine, feno zazminena mika eri vagare'naze. **10** Hagi mika ranra kumazamine neone kumazamia teve taginte'za kre vagare'naze. **11** Hagi vahe'ene afu'zaga zaminena miko Israeli vahe'mo'za zamavare vagare'naze. **12** Anama zamavraza vahezagagi, afu feno zamigi, afuzagaramina zamavare'za Moapu agupofi Mosese'ene pristi ne' Eleasake'ma mani'natega Israeli vahe'mo'za seli nonku'ma ki'za mani'narega, Jeriko mopamofo kantu kaziga Jodani tinte mika eri'za vu'naze. **13** Hagi Moseseki Pristi ne' Eleasaki, Israeli kva vahe'zagagi hu'za ome tutagiha huzamantenaku seli no kumazmimofo fegi'a atirami'za vu'naze. **14** Hianagi 1tauseni'a sondia vahetema kvama hu'naza vahe'ene, 100'a sondia vahetema kvama hu'naza vahetamima hateti'ma azageno'a Mosese'a tusi arimpa ahezmante'ne. **15** Hagi Mosese'a anage huno zamasami'ne, Nahigeta tamagra maka a'neramina ozamahe zamatrage'za mani'naze? huno Mosese'a zamantahige'ne. **16** Zamagra e'i ana a'nemo'za Balamu kea antahi'za Peori agonafina tagri vahera zamazeri savri hazageno, Ra Anumzamofona hara rente'za zamefi humi'naze. Anama hazageno Ra Anumzamofo vahe'mo'za knazana eri'naze. **17** Menina miko ne' mofavre'zaga nezamaheta, venenezaganema monko'zama hu'nesaza a'nezaga miko zamahe friho. **18** Hianagi

venema monko'zama osu'nesaza mofa'nea mika zamatreneke'za tamagri su'za maniho. **19** Iza'o ana vahe'ma zamahe frige, fri'nesaza vahe'ma zamavako'ma hu'nesnamota, kumamofo fegi'a 7ni'a kna manigahaze. Hagi nampa 3 knare'ene, nampa 7ni knarerera tamagrane hapinti'ma zamavareta e'naza vahe'enena tamagra'a tamazeri agru hugahaze. **20** Hagi mika kukenama, bulimakao akruteti tro hunenia kukenama, sipisipi azokateti tro hu'nenia kukenanena, mika azeri agru hugahaze. **21** Anante pristi ne' Eleasari'a amanage huno hate'ma vu'naza vahera zamasami'ne, Ama tra kea hate'ma vute'za esaza vahe'mo'zama zamazeri agruma hanaza zanku Ra Anumzamo'ma Mosesema asami'nea naneke. **22** Hagi golireti'ma, silvaretima, aenireti'ma, bronsireti'ma, tinireti'ma, lediretimi, **23** tro'ma hu'nesaza zantamine, tevemo'ma tegama osune'nia aeniraminena miko tevefi kreta azeri agru hugahaze. Ana huteta ete timpi mago'ane sesehuta zamazeri agru hugahaze. Hianagi tevemo'ma te fanenema hugazantamina, tinteti sesehuta zamazeri agru hugahaze. **24** Hagi 7ni knarerera kukenatamia sese nehuta, tamagra'a tamazeri agru hugahaze. Hagi anama hutesutma seli nonkumapina ufregahaze hu'ne. **25** Ra Anumzamo'a Mosesena asamino, **26** Kagrane pristi ne' Eliasa'ene mike naganofipima vugote'naza kva vahe'mota, ha'ma ome hu'za eri'za e'naza zantamine, vahe'ene zagagafanena hamprigahaze. **27** Ana'ma huteta hapinti'ma eri'za e'naza feno zantamina tarefi refko huta, ha'ma ome hu'naza sondia vahera nezamita, mesiama'a mago'a vahetami zamiho. **28** Hagi vahero, bulimakaono, sipisipio, meme afuro donki afu'ma hamprisageno'ma 500tima huterema hanifintira, Ra Anumzamo'na suzana magoke namitere hugahaze. **29** Hagi Nagri'ma Ra Anumzamo'nama nami'naza

ofa erita pristi ne' Elieasa ome amigahaze. **30** Hagi Israeli vahe'ma refko huzamizage'za eri'naza zampinti'ma hamprisageno mago 50tima huterema hania vahero, bulimakaono, sipisipio, meme afu'tamimpintira mago avretere huta, livae nagama Ra Anumzamo'na seli mono noma kegava hu'naza nagara zamigahaze. **31** Hanki Mosesake pristi ne' Elieasakea Ra Anumzamo'ma huzanante'nea zana hu'na'e. **32** Hagi hapintima sondia vahe'mo'zama eri'za e'naza zantamima miko hampri'nazana 675 tauseni'a sipisipigi, **33** 72 tauseni'a bulimakaonki, **34** 61 tauseni'a donkigi, **35** 32 tauseni'a vene omase a'nennenena avre'naze. **36** Hagi hate'ma vu'naza vahe'mokizmi zantamima amu'nompinti'ma refko huzami'nazana, **37** 337 tausen 500'a sipisipifintira, **38** Ra Anumzamofo 675'a sipisipi nemiza, **39** 36 tauseni'a bulimakaoma avre'nafintira, Ra Anumzamofona 72'a nemiza, **40** 30tausen 500'a donki afutamima avre'nafintira 61ni'a Ra Anumzamofo ami'naze. **41** Hagi 16 tauseni'a vahe'ma zamavare'nafintira, 32'a vahe Ra Anumzamofo ami'naze. **42** Ana hazageno ana zantamina Moses'a erino Ra Anumzamo'ma asami'nea kante anteno, Ra Anumzamofo ofagino pristi ne' Eleasa ami'ne. **43** Hagi ha'ma ome hu'naza sondia vahe'mofo zampinti'ma, Israeli vahe'ma Mosesema refko huno zami'neana, **44** 337 tausen 500'a sipisipigi, **45** 36 tauseni'a bulimakaonki, **46** 30 tausen 500'a donki afuki, **47** 16 tauseni'a mofa'nema venema omase'naza mofa'negi huno refko huzami'ne. **48** Hagi Israeli vahe'ma refko huzamizage'za eri'naza zampinti'ma hamprizageno mago 50ma hutere'ma hia vahero, afuzagafintira mago avretere huno Ra Anumzamofo seli mono noma kegava nehaza Livae nagara Moses'a zami'ne. **49** Anante 1 tauseni'a sondia vahete ugota hu'naza kva

vahe'mo'zane, 100'a sondia vahete ugota hu'naza kva vahe'mo'za Mosesente e'za, **49** anage hu'naze, Eri'za vahekamotama sondia vahetima hampritama eri antefatgo hutama konana, mago'mo'e huno fanene osu'neanki miko mani'none. **50** Ana hu'negu mago mago sondia vahe'mo'za eri'naza zampintira, goliretim tro'ma hu'naza avasese zantaminki, zamazampasafima nehaza asagi, zamazampima nentaniza asagi zamazankofima huvame hu'za nentaniza rinigi, zamagesafima renentaza rinigi, zamanankempima nehaza pasesua Ra Anumzamofontega tagra'arema ete nona huta mizase ofa erita neone. **51** Moses'e'ene pristi ne' Eleasarika goliretim tro'ma hu'naza zantamina sondia vahete kva vahepintira, ana miko eri'na'e. **52** Hagi ana maka golima tausenia'a sondia vahete kva vahe'mo'zane, 100'a sondia vahete kva vahe'mo'zama ofama eme Ra Anumzamofonte'ma hu'naza golimofo kna'amo'a ana makara 190'a kilo hu'ne. **53** Hagi hapinti'ma eri'naza zantamipintira mago mago sondia vahe'mo'za eritere hu'naze. **54** Hagi Moseske Eleasarike ana goliramina 1 tauseni'a sondia vaheta ugota kva vahe'ene 100'a sondia vahete kva vahepintira eri'na'e. Ana huteke Ra Anumzamo'ma Nagri vahere huno antahizaminigu ana golia erike seli mono nompi ome ante'na'e.

32 Hagi Rubeni naga'ene Gati naga'mo'za tusi sipisipine bulimakaone ante'haze. Ana hu'nazanki'za Jaseli mopane Giriati mopane ke'nazana zagagafama kegava hu' mopa knare mopa me'nege'za ke'haze. **2** Hagi Gati naga'ene Rubeni naga'mo'za Mosesema pristi ne' Elieasama, Israeli ranra vahenena amanage hu'za eme zamasami'naze, **3** Atarotigi, Dibonigi, Jazerigi, Nimragi, Hesbonigi, Elealagi, Sibamugi, Nebogi, Beoni kumatamimofo tava'ontema me'nea moparamina,

4 Ra Anumzamo'ma ha'ma huno Israeli vahe'motama eritami'nea
mopamo'a zagagafama kegavama hanunana knare hu'ne. E'ina
hu'negu tagra tamagri eri'za vahekamota rama'a zagagafa
ante'none. 5 Ana hu'negu musema hunerantesunka ama ana
mopa atregeta kagri eri'za vahe'mota erisantihamneno. Hagi
tataregeta Jodani timofo kantu kaziga takaheta ovugahune.
6 Hagi Mosese'a Rubeni naga'ene Gati nagara zamasamino,
tamagra kama kaziga mani'nenage'za mago'a tamafuhe'za kantu
kaziga hara ome hanazegu nehazo? 7 Hagi Ra Anumzamo'ma
kantu kazigama tami'nea mopafina Israeli vahe'ma tima takahe'za
vu'zama nehazageta, tamagra na'a agafare kama kaziga
manita zamarimpa kna eri'zaminakura nehaze? 8 Hagi Kades-
Baneati'ma tamafahelima huzamantoge'za ama ana mopama
nege'za hu'nazankna huta tamagra ana nehaze. 9 Hagi
zamagra mareriza Eskoli agupo mopama ome kete'za, e'za
Israeli vahe'mofo antahintahi eme zamazeri savri hazage'za
amuhanazmia omnege'za Ra Anumzamo'ma zami'nea mopafina
uofre'naze. 10 Ana knazupage Ra Anumzamofona tusi
arimpa ahegeno, amanage huno huvempa kea hu'ne, 11
na'ankure Nagrira zamagu'areti hu'za namagera onte'nazagu,
Isipiti'ma e'naza vahepintira kafuzamimo'ma 20'a kafuma
agatere'nesia vahe'mo'za Abrahamuma, Jekopuma, Aisakima
huvempama huzmantenoa mopa ome onkegosaze huno hu'ne.
12 Hagi mago'mo'e huno agu'aretira namagera onte'neanki,
Jefune nemofo Kalepiki, Nuni nemofo Josuakea zanagrake
zanagu'aretira navesi nenanteke namagera ante'na'e. 13 Ana
hu'negu Ra Anumzamo'a Israeli vahera arimpa ahezamantege'za
40'a zagegafufina ka'ma kopina vanovano nehazageno, Ra
Anumzamofonte'ma kumima hu'naza vahe'mo'za fri 'naze. 14

Hianagi menina keho, kumike vahe'mokizmi mofavre'ramina,
tamagra neramafazama hu'nazaza huta kumira nehuta, mago'ane
Ra Anumzamofona azeri arimpahazageno Israeli vahe'motagura
rimpa aheneramante. **15** Hagi tamagra mago'anema Ra
Anumzamofoma tamage'nama humisaza zamo hanigeno, Ra
Anumzamo'a ka'ma kopina mago'ane tamatresigeta havizana
hugahaze. **16** Hianagi Mosesente e'za anage hu'naze, Tagra
amafi afu kevutima antesuna kumara negita, a'netine ne'one
mofavretinema mani'nuna kumara kigahune. **17** Hianagi
a'mofavretia hanave vihufi mani'enageta tagra ha'pina ugoteta
Israeli nagatia zamavareta nevamanena, erisanti haregahaze'ma
hu'nea mopa ome erigahaze. **18** Hagi tagra kumatirega
ometa mani'nesunke'za, mika Israeli naga'mo'za erisantima
haregahazema hu'nea mopa erivaretetesageta kumatirega
vugahune. **19** Hagi Jodani timofo kantu kazigama me'nea
mopafintira mago mope huta erisanti oharegahune. Na'ankure
kama zage hanati kazigama me'nea mopa ko erisantihare'none.
20 Anante Mosese'a zamasamino, Tamagrama kema hazaza
huta, ha'ma hunaku'ma Ra Anumzamofo avugama retro'ma
hanuta, **21** tamagra Ra Anumzamofo avuga Jodani tina takaheta
nevanageno, Ra Anumzamo agra'a hara huno ha' vahe'a
zamazeri agateregahie. **22** Hagi Israeli vahe'mo'zama ana
mopama erivagaretesageta eteta kuma tamirega e'nageno, kema
anaki'naza kemo'a vagaregahie. Hagi Jodani timofo zage hanati
kaziga mopa Ra Anumzamo taminigeta erisantihareta tamagra
kegava hugahaze. **23** Hianagi anazama osanazana tamagra
Ra Anumzamofontera kumi hugahazankino ana kumi'mofo
nona'a, tamagra knazama'a erigahaze. **24** Hu'negu a'netamine
mofavre'tamimo'za mani'naza ranra kumara kinezamanteta

afutamima antesaza kumara retro hiho. Hianagi huvempa
hu'naza zana huvareho. **25** Hige'za Gati naga'ene Rubeni
naga'mo'za Mosesena kenona hunte'za, Kagri eri'za vahe'mota
ramokama hanazana hugahune. **26** Hagi neone mofavrette
a'netine afu kevutia kama rankumapi Gileati manigahaze. **27**
Hianagi kagri eri'za vahetamimo'za Jodani timofo kantu kaziga
ha'zazmi eri'ne'za takahē'za vu'za Ra Anumzamofo avuga
ramokama banana kante ante'za hara ome hugahaze. **28**
Hazageno Mosese'a Elieasane Josuane mago'a Israeli naga
nofite'ma vugota huterema hu'naza vahera zamasmino, **29**
Rubeni naga'ene Gati naga'mo'zama ha'zama retro hu'za
Jodani tima takahē'zama Ra Anumzamofo hatema tamagranema
vu'za ha'ma ome hu'za mopama omeritamisageta erisuta,
Giliati mopa zamigahaze. **30** Hu'neanagi ana naga'mo'zama
ha'zazmima eri'ne'za tamagranema Jodani tima takahē'za ha'ma
ome osanazana, tamagra Giliati mopa ozamita, Kenenima
manisafi mopa zaminke'za maniho. **31** Anante Gati naga'ene
Rubeni naga'mo'za kenona hu'za, kagri eri'za vahe'mota Ra
Anumzamo'ma hu'neankea eri'zafa huta amage antegahune. **32**
Hagi tagra Ra Anumzamofo ha'ma hanuna zantia erineta, Jodani
tina rakaheta Ra Anumzamofo avuga Kenani mopafi vanunkeno,
erisantiharesu'na mopa Jodani timofo kama kaziga manegahie.
33 Higeno Mosese'a Gati nagaki, Rubeni nagaki, Josefe nemofo
amu'nompinti'ma refko hu'naza Manase nagara Amori kini ne'
Sihoni ranku'ma'ene Basani kini ne' Ogi rankuma'ene, mopane
megagi'nea kuma'enena zami'ne. **34** Hagi Gati naga'mo'zama
ki'naza kumatamina, Dibonima Atarotima, Aroelima, **35** Atrot-
Sofani kuma'ma, Jaseli kuma'ene, Jogobehati kuma'ene, **36**
Bet-Nimra kuma'ma Bet-Hara kuma'enena hanave ku'ma

negi'za sipisipi afu'ma kegava hanaza kegina hu'naze. **37**
Hagi Rubeni naga'mo'zama ki'naza kumatamina Hesbonima,
Elealema, Kiriataimima, **38** Neboma Bal-Meonima Sibma
kuma'ene negi'za ana kumatamimofo zamagia, ru zamagi
antemi'naze. **39** Hagi Manase nemofo Makirimpintima fore'ma
hu'naza naga'mo'za Giliati vu'za, ana kumapima nemaniza
vahera ha' ome huzmante'za e'neriza, anampima nemaniza
Amori vahera zamahenatitre'naze. **40** Ana hazageno Mosese'a
Giliati rankumara Manase nemofo Makiri naga zamige'za ana
kumapina mani'naze. **41** Hagi Manase nemofo Jairi'a osi
kumatamima Giliatima megagi'neana ha' huno ome'nerino,
Havot Jaire huno agi'a antemi'ne. **42** Hagi Noba'a Kenati
rankuma'ene neone kumatamima megagi'nea kumatamina erino
ana kumataminkura Nobae huno agra'a agire asamare'ne.

33 Hagi Mosese'ene Aronike'ma Israeli vahera Isipitira
zamavare atimaramike'za nagatenofite'ma hu'za e'nazana ama
kante vu'naze. **2** Hagi Ra Anumzamo Mosesena asamigeno
manite manite'ma hu'za vu'naza kumatamimofo zamagia ese'ma
atre'naza kumateti agafa huno krente'ne. **3** Hagi Israeli
vahe'mo'za Rameses kumama atre'za vu'nazana ese ikamofona
15tini zupa Anumzamo ozamahe zamagatere'nea ne'zama
nete'za nanterana, miko Isipi vahe'mo'za nezamagage'za Isipitira
atiramiza nevazageno, **4** Isipi vahe'mo'za Ra Anumzamo'ma
zmagonesa mofavrema kenagema zamahe fri'nea mofavreramina
asezmante'naze. Hagi ana nehuno Ra Anumzamo'a Isipi
vahe'mokizmi havi anumzantaminena zamahe fanene hu'ne. **5**
Hagi Israeli vahe'mo'za Rameses rankumara atre'za vu'za, Sukoti
seli nonkumara ome ki'za mani'naze. **6** Hagi anantetira hage'za
vu'za hagege mopamofo atumparega Etamu seli nonkuma

ome ki'za mani'naze. 7 Hagi anantetira ete rukrahe' hu'za Pi-Hahirotia vu'za Bal-Sefonia zage hnati kaziga seli nonkumara Migdori tava'onte ome ki'za mani'naze. 8 Hanki Pi-Hahirotia atre'za Koranke hagerina takahē'za, Etamu hagege mopafina 3'a zagegnafi vu'za, seli nonkumara Mara ome ki'za mani'naze. 9 Hagi anantetira hage'za vu'za Elimi seli nonkumara ome ki'za mani'naze. Hagi ana kumatera 12fu'a kampu'i tina megeno 70'a tofe zafa me'nere seli nonkumara eme ki'naze. 10 Hagi Elimia atre'za vu'za Korankre hageri ankenare seli nonkumara ome ki'za mani'naze. 11 Hagi korankre hagerina atre'za vu'za Sainai hagage kokamofona, zage ufre kaziga Seli nonkuma ome ki'za mani'naze. 12 Hagi Sainai hagege kokana atre'za Dofka seli nonkumara ome ki'za mani'naze. 13 Hagi Dofkatira atre'za Alusi seli nonkumara ome ki'za mani'naze 14 Hagi anantetira atre'za Refitim seli nonkumara ome ki'za mani'naze. Hagi e'i ana kumapina vahe'mo'zama tima nesaza zana omane'ne. 15 Hagi Refitimia atre'za Sainai hagage kokampi seli nonkumara ome ki'za mani'naze. 16 Hagi Sainai hagege kokampintira atre'za, Kibrot-Hatava seli nonkumara ome ki'za mani'naze. 17 Hagi Kibrot-Hatava atre'za Hazeroti seli kumara ome ki'za mani'naze. 18 Hagi Hazerotitira atre'za Ritma seli nonkumara ome ki'naze. 19 Hagi Ritmatira atre'za Rimon-Peresi seli nonkumara ome ki'za mani'naze. 20 Hagi Rimon-Peresitira atre'za Libna seli nonkura ome ki'za mani'naze. 21 Hagi Libnatira atre'za Risa seli nonkumara ome ki'za mani'naze. 22 Hagi Risa atre'za Kehelata seli nonkumara eme ki'za mani'naze. 23 Hagi Keheratitira atre'za Sefa agonare seli nonkumara eme ki'naze. 24 Hagi Sefa agonaretira atre'za Harada seli nonkumara ome ki'za mani'naze. 25 Hagi Haradatira atre'za Makhelot seli nonkumara

ome ki'za mani'naze. **26** Hagi Makherotitira atre'za Tahati seli nonkumara ome ki'za mani'naze. **27** Hagi Tahatitira atre'za Tera seli nonkumara ome ki'za mani'naze. **28** Hagi Teratitira atre'za Mitka seli nonkumara ome ki'za mani'naze **29** Hagi Mitkatira atre'za Hasmona seli nonkumara ome ki'za mani'naze. **30** Hagi Hasmonatira atre'za Moseroti seli nonkumara ome ki'za mani'naze. **31** Hagi Moserotitira atre'za Bene-Zakan seli nonkumara ome ki'za mani'naze. **32** Hagi Bene-Zakanitira atre'za Hor-Hagidgati seli nonkumara ome ki'za mani'naze. **33** Hagi Hor-Hagidgatira atre'za Jotbata seli nonkumara ome ki'za mani'naze. **34** Hagi Zotbatatira atre'za Abrona seli nonkumara ome ki'za mani'naze. **35** Hagi Abronatira atre'za vu'za Ezion-Geba seli nonkumara ome ki'za mani'naze. **36** Hagi Ezion-Gebatira atre'za vu'za Zini hagege kokampi Kadesi seli nonkumara ome ki'za mani'naze. **37** Hagi Kadesitira atre'za vu'za, Edomu mopa atuparega Hori agonare seli nonkumara ome ki'za mani'naze. **38** Hagi Isipitima Israeli vahe'ma atiramiza e'hazaza, 40'a kafu evigeno 5fu ikamofona ese knazupa Ra Anumzamo'a Aronina huntegeno Hori agonare marerino anantega ufri'ne. **39** Hagi Aronima fri'neana 123'a kafu huteno, Hori agonafina ufri'ne. **40** Hagi Aradi vahe kini nera Kenani ne'kino Kenani mopafi Negevi nemania ne'mo Israeli vahe'mo'za neaze kea antahi'ne. **41** Hagi Israeli vahe'mo'za Hori agonaretira atre'za vu'za Zalmona seli nonkumara ome ki'za mani'naze. **42** Hagi Zalmona atre'za vu'za Punoni seli nonkumara ome ki'za mani'naze. **43** Hagi Punonitira atre'za Oboti seli nonkumara ome ki'za mani'naze. **44** Hagi Obotira atre'za Moapu mopa atuparega Ie-Abarimi seli nonkumara ome ki'za mani'naze. **45** Hagi zamagra Ie-Abarimitira atre'za vu'za Dibon-Gati seli nonkumara ome ki'za

mani'naze. **46** Hagi Dibon-Gatitira atre'za vu'za Almon-Diblataimi seli nonkumara ome ki'za mani'naze. **47** Hagi Almon-Diblataimitira atre'za vu'za zage hanati kaziga Nebo tava'onte Abarimu agonare seli nonkumara ome ki'za mani'naze. **48** Hagi Abiramu agonaretira atre'za urami'za Jodani timofo kantu kaziga Jeriko megeno kama kaziga Moapu agupofi seli nonkumara ome ki'za mani'naze. **49** Hagi Moapu agupofi Jodani timofo akenare Bet-Jeshimotitira seli nonkumara ki'za Abel-Sitimi uhanati'naze. **50** Hagi Jodani timofo kantu kaziga Jeriko megeno, kama kaziga Moapu agupofi Ra Anumzamo'a Mosesena asamino, **51** Israeli vahera zamasamige'za Jodani tima takahē'za kantu kazigama Kenani vanu'za, **52** tamavugama me'nea mopafima mani'naza vahera maka zamahenati trevareho. Hagi zafare'ma antre'za tro'ma nehu'za, aeni krenare'za tro'ma hu'nenaza havi anumzantamina maka ruhantagita eri haviza nehuta, havi anumzante'ma mono'ma nehanaza kumazamia maka eri tapage hutreho. **53** Hagi tamagra ana mopa omerita maniho. Na'ankure Nagra ana mopa erita mani'nazegu neramue. **54** Hagi mopama refkoma huta erisanti haresazana, nagatenofite satu zokago reta kesageno, ina nagamofo agimo'ma eama'ma hanimo'a ana mopa eritere hino. Hagi rama'a vahe'ma mani'nenaza nagategati refako huta osi'ama mani'nenaza negate uhanatiho. **55** Hagi ana mopafima mani'naza vahe'ma zamahe onati'nage'za tamagrira tamavurgafi rampaza fre'neno tamata tamiaza nehu'za, ave'ave trazamo tamaopafi reankna hugahaze. **56** Hagi tamagrama zamahe onatinage'na zamagrime zaminaku'ma retro hunte'noa knazana tamagri tamigahue.

34 Hagi Ra Anumzamo'a amanage huno Mosesena asami'ne,
2 Amanage hunka Israeli vahera zamasamio, Israeli vahe'ma

erisanti haregahaze hu'noa mopafima Kenanima ufresaza
mopamofo ometre emetrema hu agema'amo'a amanahu hugahie.
3 Sauti kaziga mopamofo agema'amo'ma vu'neana, Zini hagege
mopafi vuno Idomu vahe mopa atupare ometre'ne. Hagi sauti
kaziga mopa agema'amo'a Fri Hagerimofona zage hanati kazigati
agafa hugahie. **4** Hagi anantetira Kades Bania mopamofona sauti
kaziga Skopion Pasi vuno Zini uhanatigahie. Hagi anantetira Haza
Ada vuno Azmoni uhanatigahie. **5** Hagi anantetira rugitagino
lsipi tinkrahote vuteno, Mediterenia Hagerinte uhanati'ne. **6** Hagi
zage fre kaziga mopa atupamo'a, Ra Hagerintetira vuno Hora
agonare uhanatigahie. **7** Hagi noti kaziga mopama nof'i'ma avazu
huta eri antefatgoma hanazana, Mediterenia hagerintetira Hora
agonare vugahie. **8** Lebo Hamati vuteno Zedati uhanatigahie.
9 Hagi anantetira Zifoni vuteno, Hazar-Enan kaziga vugahie.
E'ire noti kaziga mopamofo atupamo'a ome atregahie. **10**
Hagi zage hanati kaziga mopama eri ante fatgoma hanazana,
Hazaritira Sifami vuteno, **11** Riba uhanatiteno anantetira Aina
vuteno, uramino Kenareti hagerimofona (Galili) zage hanati
kaziga uhanatigahie. **12** Anantetira Jodani ti avaririno uramino
Fri Hagerima me'nea kaziga eri ante fatgo huno vugahie.
E'ire mopatamimofo agema'amo'a ome atregahie. **13** Hagi
Mose'sa mika Israeli vahera huzmanteno, Ra Anumzamo'a
9ni'agi hafu'a naga nofimota ana mopa erisantiharegahaze
huno hu'ne. **14** Na'ankure Rubeni naga'ene Gati naga'ene
amu'nompinti'ma refako hu'naza Manase naga'mo'za nezmafa
zamagire mopa eritere hu'naze. **15** Hagi Jerikoa kantu kaziga
megeno, Jodani timofo kama zage hanati kaziga mopa ana taregi
hafu'a naga nofimo'za erigahaze. **16** Ra Anumzamo'a amanage
huno Mosesena asami'ne, **17** Erisantiharesaza mopama refko

huzamisaza vahe zamagi'a, pristi ne' Eleasariki, Nuni nemofo Josuake mopa refako huke zamigaha'e. **18** Hagi mika' naga nofipintira mago mago kva vahe huhampri zamanenke'za zanaza hu'za erisantiharesaza mopa refko hiho. **19** Hagi ana netrema zanaza hu'za mopama refko hanaza vahe zamagi'a ama'ne, Juda nagapintira Jefune nemofo Kalepiki, **20** Simioni nagapintira Amihudi nemofo Semueliki, **21** Benzameni nagapintira Kisloni nemofo Elidadi'e. **22** Hagi Dani nagapintira Jogli nemofo Bukiki, **23** Josefe nagapintira Efoti nemofo Manaseki, **24** Efremi nagapintira Siften nemofo Kemueliki, **25** Zebuluni nagapintira Panaki nemofo Elizafaniki, **26** Isaka nagapintira Azani nemofo Paltieliki, **27** Asa nagapintira Selomi nemofo Ahihutiki, **28** Naftali nagapintira Amihuti nemofo Pedaheli'e. **29** Hagi Ra Anumzamo'a ama ana vahetami Kenani mopama ome erisantiharesaza mopama refako huzamisaza vahera huhampri'zamante'ne.

35 Hagi Jodani timofo mago kaziga Jeriko megeno kantu kaziga Moapu agupofi Ra Anumzamo'a amanage huno Mosesena asami'ne, **2** Israeli vahera huge'za erisanti haressaza mopafintira, Livae nagama mani'naza rankumatami'ne, tava'ozamire'ma me'nenia mopa sipisipine bulimakao afu'zamima kegava hanaza mopanena zamiho. **3** Hagi Livae naga'mo'za ana ran kumatamimpi nemani'za, tava'ozamire'ma me'nesia mopafi sipisipine bulimakao afu'zamia kegava hugahaze. **4** Hagi Livae nagama afu'zamima kegava hanaza mopama refko huzamisazana, rankuma keginaretira maka asoparega 450'a mita vuno eno hinkeno, ran kumamo'a amu'nompi megahie. **5** Hagi kuma keginamofo fegiat'i'ma nofi'ma avazu hanageno zage hanati kaziga vuno, zage fre kazigama vuno kazantamaga kaziga vuno, kaza hogo kazigama vaniana miko 900 mita hanigeno, e'i ana

mopa sipisipine bulimakao afutami kegava hu mopa menkeno,
rankumamo'a amu'nompi megahie. **6** Hagi 6si'a kuma'ma Livae
naga'ma zamisazana, mago vahe'mo'ma mago'azama hanirega
hantagama huno vahe'ma ahefriteno, agu'vazinigu freno umanisia
kuma nezamita, ana agofetura 42'a kuma'ene zamigahaze. **7**
Hagi Livae nagama zami'nazana maka 48'a rankumatamine,
afu'zamima kegavama hanaza mopagi huta refko huzamigahaze.
8 Hagi Israeli vahe'mo'zama erisantima hareshaza mopafintira
Livae nagara mopa eri zamigahane. Hagi rama'a mopama
eri'nesaza nagapintira, rama'a mopa eri'nezamita, osi'a mopama
eri'nesaza nagapintira osi'a mopa eri zamigahaze. **9** Anante Ra
Anumzamo'a amanage huno Mosesena asami'ne, **10** Israeli
vahera zamasmige'za Jodani tima takahe'za Kenani mopafima
unefresu'za, **11** mago vahe'mo'ma mago'azama haniregama
hantaga huno mago vahe'ma ahe frisuno'ma freno vuno
ome agu'ma vazisia kumatamina mago'a huhamprintesageno
megahie. **12** Hagi ana kumatamina tamagu'vazi kuma me'nena
anama ahe frisaza vahe'mofo naga'mo'za nona hu'za ahe
ofrisageno mani'neno keagarera otigahie. **13** Hagi ana 6si'a
kumatamina tamagu'vazi kuma megahie. **14** Hagi tamagu'vazi
kumara 3'a Jodani kaziga huhamprinteta, 3'a Kenani kaziga
huhamprintegahaze. **15** Hagi e'i ana 6si'a kumamo'a Israeli
vaheki, emani vaheki, mago'a erizante vanoma nehania
vahe'mo'ma mago'azama hanirega hantga huno vahe'ma ahe
friteno, freno ome agu'mavazi'nia kuma megahie. **16** Hianagi
aeni kanonteti'ma vahe'ma ahesigeno frisia vahera, agri'enena
ahe friho. **17** Hagi mago vahe'mo'ma have kanonuma vahe'ma
ahefrisia vahera, hazenke hugahianki agri'enena ahefriho. **18**
Hagi kanonteti'ma vahe'ma ahefrisia vahera, hazanke hugahianki

agri'enena ahe friho. **19** Hagi vahe'ma ahefrisia nera anama frisia
vahe'mofo korama'amo'za ana ne'ma kesu'za ahefriho. **20** Hagi
vahe'mo'ma magomofo arimpa ahenenteno retufetrege, agona
zantetima matevuno ahesigeno frisiana, agra hazenke hugahie.
21 Hagi mago vahe'mo'ma, mago'mofoma rimpa ahenenteno
azankanonu'ma ahesigeno frisiana, agra hazenke hugahianki,
ana zante'ma nona hu vahe'mo'za kesu'za ahe friho. **22** Hianagi
mago'mofoma arimpa aheonte'neno amne retufetresio, mago'a
agonazama mate vanirega hantaga huno ahenigeno frisiano,
23 ha' vahe'a omani'neanagi avu onkeno have atresigeno
ahefrisiana, agra antahino keno osu'neno anara hugahianki, **24**
kumapi vahe'mo'zane anama ahenageno frisia ne'mofo avate
korama'amo'za atruhu'za ana nanekea antahiza refko hugahaze.
25 Hagi ana kumapi vahe'mo'za, anama fri'nea vahe'mofo
naga'mo'zama ahefrizama nehanage'za, ana nera avre'za
agu'vazi kumatega ome atregahaze. Hagi ana ne'mo'a ana
kumapi mani'nesigeno, ruotage'ma hu'nea masavema anunte'ma
frente'nesia ugota pristi ne'ma fritesigeno, ete kuma'arega
vugahie **26** Hianagi ana pristi ne'ma ofri'nenigeno, ana ne'mo'ma
agu'vazi kumama atreno fegi'ama mani'nenigeno, **27** ahe
fri'nesia ne'mofo avate korama'amo'ma tutagiha'ma hunteno
ahefrisigeno'a keaga omanegosie. **28** Hagi ana hazenke'ma
hu'nenia vahe'mo'a agu'vazi kumapi mani'nenigeno ana pristi
nera fritenigeno kuma'arega vugahie. **29** Hagi tamagrane
henkama fore hu anante anante'ma huta vanaza vahe'mota,
ama ana nanekea kasege me'nena avariri vava hugahaze.
30 Hagi mago vahe'mo'ma vahe'ma ahe nefrisige'za tareo
tagufamo'zama kene'za huama'ma huntesage'za ana vahera ahe
frigahaze. Hianagi magoke vahe'mo'ma ke'neno'ma huamama

hania zantera, ahe ofrigahaze. **31** Ana hukna huno vahe'ma ahe fri'nenirera, fruma huno manizankura zagoretira mizaseno omanigahie. Anahukna huta vahe'ma ahe fri'nesirera, ana vahe ahefriho. **32** Hagi pristi ne'ma ofri'enkeno agu'vazi kumapintima atiramino fru huno mani'nakura, zago mizaseno kuma'arega ovugosie. **33** Hagi e'inama hanageno'a mopatamimo'a havizana osugosie. Na'ankure vahe'ma ahefrigeno korama tagirami zamo'a, mopa eri haviza nehie. Hagi ana nona'a, anama vahe'ma ahe fri'nesia vahe'mofo koramoke'za mopa eri agru hugahie. **34** Hagi ana'ma umani'naza mopa eri havizana osugahaze. Na'ankure Nagra Ra Anumzamo'na Israeli vahe'mokizmi amu'nompina manigahue.

36 Hagi Giliati nagara Makirimpinti fore hazageno, Makiri'a Manase ne'mofokino Josefe nagapinti fore hu'ne. Hagi mago zupa Giliati naga'mokizmi kva vahe'mo'za Mosesente'ene, Israeli vahe'mokizmi kva vahete'ene keaga hu'naku vu'naze. **2** Hagi zamagra amanage hu'za zamasami'naze, Ra Anumzamo'a kagrikura Israeli vahe'mo'za erisantima haresaza zana zamio hu'ne. Hagi rantimoka, Ra Anumzamo'a kagrira kasamino Serofehati'ma erisantima hare'nea mopa mofane zaga'a zamiho huno hunte'ne. **3** Hianagi ana mofanemo'za Israeli vahepima mago nagapi ne'ma vema erisageno'a, zamagra erisantihare'naza mopamo'a vema eri'saza venenemofo naganofipi mopamo'a vugahie. **4** Hagi vahe zama eri'nea zama ami kafuma esige'za vema eri'nea nagamofo mopasena mago'ane eri aguhesageno tagehe'i mopamo'a ana nagapi mevava huno vugahie. **5** Hagi Ra Anumzamo'ma huntea kante anteno Mosese'a amanage huno Israeli vahera zamasami'ne, Josefe naga'mozama ama kema nehzana tamage nehaze huno hu'ne. **6** Hagi Ra

Anumzamo'a amanage huno Jerofehati mofane nagakura hu'ne,
Zamavesite zamagra ina vema erinaku'ma hanu'za nezamafa
naganofipintinke erigahaze hu'ne. **7** Hagi e'inahu'ma hanageno'a
mago nagamofo mopamo'a ru nagapina ovugosie. Na'ankure
mika Israeli naga nofimo'za nezamafa mopa erisantiharetere
hugahaze. **8** Hagi Israeli naga nofipintima mago mofa'mo'ma
mopama erisanti hare'nesuno'a agra'a naga nofipi vea erisigeno
mopamo'a ru nagapina ovugahie. **9** Hagi mopatamia atrenkeno
ru nagapi ru nagapina huno vuno eno osino. Hagi tamagrama
erisantima hare'nesaza mopamo'a, tamagri mopa megahie. **10**
Ra Anumzamo'ma Mosesema asami'nea kante ante'za Zerofati
mofa'nemo'za anara hu'naze. **11** Hagi Zerofati mofa'nemokizmi
zamagi'a, Mahalaki, Tirsaki, Hoglaki, Milkaki, Noa'e. Hagi ana
maka'mo'za nezmafohemokizmi vea eri'naze. **12** Hagi zamagra
Josefe nemofo Manase nagapi vea erizageno, erisantima
hare'naza mopazmimo'a ru nagapina ovuno nezmafa nagapi
me'ne. **13** Hagi Jodani timofo kantu kaziga Moapu agupofi
emani'nageno, Ra Anumzamo'a ama ana tra kea Mosesena
asamigeno, Israeli vahera zamasami'ne.

Tiuteronomi Kasege

1 Ama avontafepi nanekea Mosese'a maka Israeli vahema Jodani timofo kantu zage hanati kaziga ka'ma kopi Jodani agupofi Sufu kuma tavaonte, Parani kumaki, Tofeli kumaki, Labani kumaki, Hazeroti kuma'ene Disahap kumatamimofo amu'nompi seli nozamia ome ki'za mani'nazageno zmasami'nea naneke. **2** Hagi Horepi agonareti'ma Kades-Barnea vunaku Seili agonama me'nea kante'ma vananana, 11ni'a zagegna vugahane. **3** Hianagi Israeli vahe'mo'zama Isipi mopama atre'zama vu'nazareti'ma, e'nea kna'a 40'a kafu manizageno, 11ni ikamofona ese knarera Ra Anumzamo'ma Israeli vahe'ma zamasamioma huno Mosesema asami'nea kante anteno, ana nanekea zamasami'ne. **4** E'i ana nanekea Hesboni kumate mani'neno, Amori mopama kegava hu'nea kini ne' Sihonine, Astarot kumate'ene, Edrei kumate'ma mani'neno Basani mopama kegavama hu'nea kini ne' Ogine hara huznagatereteno zamasami'nea naneke. **5** Joda timofona zage hanati kaziga, Moapu mopafima Israeli vahe'ma mani'nazageno'a Mosese'a Ra Anumzamo'ma asami'nea nanekea amanage huno eriama huno zamasami'ne. **6** Horepi agonafima mani'nonkeno'a Ra Anumzana Anumzantimo'a amanage hu'ne. Hago za'za kna ama agonafina manize. **7** Kama vanazana rukrahe huta Amori vahe'mofo agonage kokampine, tavaozmire'ma nemaniza vahe'mofo mopama, Araba agona mopafine, agupo mopafine, Negevi mopafine, hagerinkena mopafine, Keneni vahe mopafine, Lebanoni vahe mopafine, Yufretisi rantima me'neregane vugahaze. **8** Keho ama maka moparamina neramuanki, ufreta omeriho. Na'ankure Nagra tamagehe'ima Abrahamune, Aisakine, Jekopunema huvempa huzamante'na ama mopa tamagehe'i zamigahue hu'hoe. **9** Ana knazupa nagra

amanage hu'na tamasami'noe. Rama'a vahe mani'nazanki'na
nagrake knatamia eri'na tamavre'na vugara osu'noe. **10** Ra
Anumzana tamagri Anumzamo'a menina tamazeri rama'a higeta,
monafi hanafikna huta tusi vahekrefa fore huta mani'naze.
11 Hagi Ra Anumzana tamafahe'i Anumzamo'a huvempama
hu'nea kante tauseni'a zupa agatereno tamazeri rama'a nehuno,
asomura huramantesie. **12** Hanki inankna hu'na nagrakera
tamagri knazana e'neri'na, ha' frama hanaza zana tamazeri
fatgo hugahue? **13** Hagi naga nofitamifintira knare antahi'zane
vahe'ma, vahe'mo'zama kesga huzmantesage'za manine'za,
havi zanki knare zanki'ma hu'za knare antahi'zanteti'ma refkoma
huga vahe zamazeri otinke'na nagra huhampri zamantanena
kvatamia manigahaze. **14** Hagi tamagra amanage huta ana
ke'nirera nasami'naze, kagrama hana antahintahimo'a knare
hu'ne huta hu'naze. **15** Anagema hazage'na knare antahintahine
vahe'ma zamagesgama nehaza vahera mago'a zamavare'na
tauseni'a vahete kva vahe huhampri nezamante'na, mago'a
handreti'a vahete kva vahe huhampri nezamante'na, mago'a 50'a
vahete kva vahe huhampri nezamante'na, mago'a 10ni'a vahete
kva vahe huhampri nezamante'na, mago'ke mago'ke naganofipi
kva vahetami, huhampri zmantetere hu'noe. **16** Anagema hute'na
amanage hu'na ana kva vahetmina zamasami'noe, tamagra
keagama refko'ma hanazana, tamagra'a vahetmimofo kegaga
refko nehuta, ru vahe'ma tamagranema enemaniza vahe'mofo
kegaga refko hugahazanki, fatgo huta kegaga refko hiho. **17** Hagi
kegagama refkoma hanafina, magomofo kazigagera onteho. Agi
me'nea vahero, agi omane vahera mago'zanke hutma refkoa
hugahaze. Mago vahekura korera osiho, na'ankure fatgoma
huno refkoma hu'zana Anumzamofo avu'ava me'ne. Hagi

amu homa huramantenia kegaga nagrite erita e'nage'na nagra
refkoa hugahue. **18** Ana'ma hute'na maka tamagrama hanaza
zantamina, e'inahu'za hiho hu'na huhankaveti'na hurmante'noe.
19 Hagi anama huteta Horepia atreta Ra Anumzamo'ma hu'nea
kante anteta, Amori vahe agona kokampine, tusi'a hagage
ka'ma kokampi Kades Banea ehanati'none. **20** Hagi nagra
amanage hu'na tamasami'noe, Amori vahe agona mopama Ra
Anumzana tagri Anumzamo'ma tamigahuema hu'nea mopafi
ehanatize hu'na tamasami'noe. **21** Keho! Ra Anumzana tamagri
Anumzamo mopa tami'ne. Hagi korera osuta Ra Anumzana
tamafahe'i Anumzamo'ma zamasami'nea kante anteta mopa
omerita maniho. **22** Anante miko vahe'mota nagrite eta amanage
hu'naze, mago'a vahe huzmantesunke'za vu'za ana mopa ome
nege'za, inankante vuta, ina kuma kora omerigahune ome
kete'za eme tasamiho huta hu'naze. **23** E'i ana ketamima
antahuana knare hige'na, mago mago naga nofipinti mago vahe
avaretere hugeno, ana mika 12fu'a hazage'na, **24** ana vahera
huzmantoge'za agona kokantegati agafa hu'za mopa afure'za
vu'za, Eskoli agupofi uhanati'naze. **25** Hagi ana mopafintira
mago'a zafa raga tagiza e'za amanage hu'za eme tasami'naze,
Ra Anumzana tagri Anumzamo knare mopa neramie hu'naze.
26 Hianagi Ra Anumzana tamagri Anumzamo'ma hurmantea
kea rutagreta, ana mopafina ovu'naze. **27** Tamagra seli nontmifi
mani'neta ke hakare huta amanage hu'naze, Ra Anumzamo'a
avesra huranteno, Amori vahe'mofo zamazampi tatresige'za,
tazeri haviza hanazegu Isipi mopafintira tavreno atiramino e'ne
huta hu'naze. **28** Tagra iga vugahune? Nerafu'zama hu'za ana
mopafima mani'naza vahe'mo'za tagrira tagatere'za za'za hu'za
ranra vahe manizageno, ranra kumazamimofona hankavenentake

vihu hugagizageno, Anaki ranra vahetamimofo mofavrezaga
ke'hone hu'za eme tasami'naza kemo'a tagu'amofona tazeri fakro
fakro hu'ne. **29** Anante nagra amanage hu'na tamasami'noe,
ana vahekura antri huta korera osiho. **30** Ra Anumzana
tamagri Anumzamo'ma tamavugama nevia Anumzamo'a,
Isipima mani'neta negazageno ha'ma huno tamavareno'ma
e'neaza huno tamagritega anteno hara hugahie. **31** Hagi Ra
Anumzana tamagri Anumzamo'ma ka'ma kokampima, mago
ne'mo mofavrea avresga huno eankna huno tamavareno eno,
ama kumate'ma ehanati'neana hago ke'naze. **32** Hianagi anama
hu'nea zankura tamagra Ra Anumzana tamagri Anumzana
antahimita tamentintia hunonteta, **33** vugota huno hanimpima
tevefi manino tamavreno nevuno, masafina hampompi manino
tamavreno nevuno, seli noma kisaza kumara tamaveri nehuno,
kama vanaza kana tamaveri huno vu'nea Ra Anumzana tamefi
hunemize. **34** Hagi ke hakarema hu'naza kea Ra Anumzamo'a
nentahino, tusi rimpahegeno amanage huno huvempa kea
hu'ne. **35** Amama mani'naza vahe'motagura Ra Anumzamo'a
huno, Maka kefo tamavutmava'ene vahekitma, knare mopama
tamagehe'mofoma zamigahue hu'nama huhaprizamante'noa
mopafina, ovutfa hugahaze. **36** Hagi Jefune nemofo Kalepike'za
ana mopa ome kegahie. Agrama ome keteno'ma e'nea mopa
agri'ene mofavre naga'amokizmi zamigahue. Na'ankure agra
Ra Anumzamofo kea agu'areti huno avariri fatgo hu'ne.
37 Hagi tamagrama haza avu'avazante Ra Anumzamo'a
nagri'enena rimpahenanteno amanage huno nasami'ne,
kagranena ana mopafina uofregahane hu'ne. **38** Hagi Nuni
nemofo Josua'ma kazama huno eri'zama e'heria ne'mo, ana
mopafina ufregahie. Hanki antahintahia aminka azeri hanavetio,

na'ankure agra Israeli vahera zamavareno ufrenige'za, ana mopa omerigahaze. **39** Hagi havizane knare zanema antahi ama'ma osu'naza neonse mofavretami zamatresuge'za ana mopafina ufresage'na, ana mopa zamisuge'za eri'za manigahaze. **40** Hianagi tamagra rukrahe huta ka'ma mopafi koranke hagerima me'nea kantega vu'naze. **41** Anante tamagra amanage huta kenona hu'naze, tagra Ra Anumzamofontera kumi hu'nonanagi, Ra Anumzana tagri Anumzamo'ma hu'nea kante anteta hara ome hugahune. Anagema nehuta ha' zantamina retro huta fru hu'neankita amane hara ome huta agona mopa omerigahune huta hu'naze. **42** Hianagi Ra Anumzamo'a amanage huno nasami'ne, zamasamige'za mareri'za hara ome osiho. Na'ankure ha'ma ome hanazana Nagra zamagranena ovugahuankino, ha' vahe'zmimo'za hara huzmagateregahaze hige'na tamašami'noe. **43** Hianagi kea ontahita tamagra Ra Anumzamofo kea eri atreta tamagra tamavesi avaririta ha' ome hunaku agonage kokampina mareri'naze. **44** Hianagi Amori vahe'ma ana agona kokampima nemaniza vahe'mo'za, tumemo'ma erintaguma huno eaza hu'za Seiri kumateti tamahe'za tamarotgo hute'za Homa kumate uhanati'naze. **45** Anama hazageta ete etma Ra Anumzamofo avuga zavira eme ate'nazanagi, Ra Anumzamo'a ana zavi krafa tamia antahi ontami'ne. **46** E'ina higeta Kades Banea kumate zazakna mani'naze.

2 Anantetira Ra Anumzamo'ma nasami'nea kante anteta ete rukrahe huta, Koranke Hagerima me'nerega ka'ma kokampi vano vano nehuta, rama'a kna Seiri agonamofona kagikagia hu'none. **2** Hagi anante Ra Anumzamo'a amanage huno nagrikura hu'ne, **3** tamagra rama'a kna ama agonage kokampina kagikagi hazanki, rukrahe huta anagamu noti kaziga marerih. **4** Hagi

amanage hunka zamasamio huno nasami'ne, tamagra tamafuhe'i
Iso naga'ma nemaniza Seiri mopafi ufrera nevanage'za,
zamagra koro tamagrikura hugahazanki, kva hu'neta viho. 5
Hianagi tamagrafintira hara huozmanteho, na'ankure zamagri
mopafintira magore hu'na mopa ontamitfa hugahue. Na'ankure
Seiri agona mopa Isone hu'na ami'noe. 6 Hagi zamagri mopafi
ufrera nevanuta, ne'zane tinena zamagripinti mizasegahaze.
7 Na'ankure Ra Anumzana tamagri Anumzamo'a ama tusi
ka'ma kokampima vanazama'a antahi'neankino, maka zama
hu'naza zana asomu huramante'ne. Ama'i 40'a zage kafufina
Ra Anumzana tamagri Anumzamo'a tamagri'ene mani'negeta
mago zankura atupara osu'naze. 8 E'ina higeta Iso naga'ma
Seiri kumate'ma nemaniza tafuhe'ina ome zamagatereta Araba
kamo'ma Elatine, Ezion-Gebama vu'nea kana atreta noti kaziga
rukrahe huta Moapu ka'ma kokama me'nerega vu'none. 9
Hagi anante Ra Anumzamo'a amanage huno nasami'ne,
Tamagra Moapu vahera zamarimpa nereta, tamagraregatira hara
huozmanteho. Na'ankure Ar mopa Loti naga zami'noanki'na,
magore hu'na ana mopa ontamitfa hugahue. 10 (Hagi e'i
ana mopafima ko'ma Moapu vahe'ma omani'nazarera, Emi
vahe'mo'za Anaki vahekna hu'za za'za hu'za tusinasi vahe
rama'a fore hu'nazane. 11 Hagi Anaki vahe'ene Emi vahekura
mago'a vahe'mo'za Rafaimi vahere hu'za nehaze. Hianagi Moapu
vahe'mo'za, Emi vahere hu'za nehaze. 12 Hagi Seiri mopafina
Hori vahe kora nemanizane. Hianagi Ra Anumzamo'ma Israeli
vahe'ma zamige'za mopama eri'nazaza hu'za, Iso naga'mo'za
Hori vahe ome zamahenati'za, ana mopa omeri'za mani'naze.) 13
Hagi menina otita vuta Zareti agupofi viho, huno Ra Anumzamo
higeta vu'none. 14 Kades Baniama atreta e'nontetima eno

Zareti tima takahe'nonte'ma e'neana, 38'a zagekfu manita
ehanati'none. Ana hunkeno maka ha'ma huga vahe'tmina Ra
Anumzamo'ma huvempama hu'nea kante ante'za fri vagare'naze.
15 Tamage huno seli noma ki'zama maniterema hu'za neazafi,
Ra Anumzamo ha'rezamanteno ana vahera zamahetere hume
eno eme zamahe vagare'ne. **16** Ana'ma higeno'ma maka
ha'ma huga vahe'ma fri vagaregeno'a, **17** Ra Anumzamo'a
amanage huno nasami'ne, **18** Tamagra menina Ar rankumapinti
rugitagita Moapu vahe mopafi vugahaze. **19** Hagi Amoni vahe
mopafima ufresuta, zamazeri zamarimpamahe zana osinke'za,
hara huoramanteho. Na'ankure Amoni vahe mopa tamagrira
ontamigahue. Na'ankure e'i Loti mofavre naga zami'noa mopa
me'ne. **20** (Korapara ana mopafina Refaim vahe mani'nazageno,
Refaimi mopa vahere hu'za nehzane. Hianagi Amoni vahe'mo'za
ana vahekura Zamzumu vahere hu'za nehaze. **21** E'na Zamzumu
vahe'mo'za Anaki vahe kna hu'za zaza hu'za tusinasi vahetami
fore hu'za hanave vahe fore hu'za rama'a mani'naze. Hianagi Ra
Anumzamo'a zamahe hana hige'za Amoni vahe'mo'za menina
ana mopafina mani'naze. **22** Hori vahe'ma Ra Anumzamo'ma
zamahe hana hige'za, Iso naga'mo'za Seiri mopafima mani'naza
kna hu'za mani'naze. Hagi ananteti'ma emo'ma meninema
e'neana, ana mopafina Iso naga'mo'za mani'naze. **23** Hagi
Avi vahe'ma mani'za Gazama uhanati'naza vahera, Kaftori
vahe'ma Kritima nemaniza vahe'mo'za eme zamahe hana
hu'za ana mopafina mani'naze.) **24** Anante Mosese'a mago'ane
huno, Ra Anumzamo'a amanage huno nasami'ne, otita Anoni
agupofi viho. Keho, Hesboni kinia Amori ne' Sihonina tamazampi
avrenente'na, mopa'anena tamazampi nentoe. Hanki vuta
hara ome huzmanteta mopazamia eriho. **25** Ama knareti'ma

vaniāna agafa hu'na kokankokama mani'naza vahepina, koroza
anta'nenke'za tusi koro tamagrikura nehu'za, tamagenkema
antahisu'za zamahirahikura nehu'za, zamanogu hugahaze. **26**
Anante Ketemoti ka'ma kokampi mani'neta mago rimpama
nehuno, knare'ma huno mani nanekea Hesboni kumate kini ne'
Sihonintega anage hu'na kea atre'noe, **27** tatregeta mopaka'afina
rugitagita vamaneno. Kama nevanuta anteganti antegama osuta,
kante vu fatgo huta vugahune. **28** Ne'zane tinena zagore
atrenketa mizaseta neneta, mopatamifina ufreta amne vamaneno.
29 Iso naga'ma Seiri kumate'ma nemaniza naga'mo'zane, Moapu
vahe'ma Ari kumate'ma nemaniza vahe'mo'zama hu'nazaza huta
tatrenketa mopatamifina rugitagita vuta Jodani tina ome takaheta
Ra Anumzamo'ma tami'nea mopa omerimaneno hu'naze. **30**
Hianagi Hesboni kini ne' Sihoni'a mopa'afima rugitagitama
vuzankura i'o huno hurante'ne. Na'ankure Ra Anumzana
tamagri Anumzamo'a menima tazampima avrentesigeta ha'
hugateresunku antahintahi'a eri hanaveti'ne. **31** Anante Ra
Anumzamo'a amanage huno nasami'ne, Antahiho! Sihonine
mopa'anena tamazampi nentoe. Hanki ana mopa erita maniho.
32 Hagi anante Sihoni'ene naga'amo'zanena Zahasi mopafi
hara eme hurante'naku e'nazanagi, **33** Ra Anumzana tagri
Anumzamo'a Sihonine mofavre naga'ane, maka vahe'anena
avreramigeta, zamahe hana hu'none. **34** Hagi mika Sihoni'ma
kegavama hu'nea kumara eri haviza nehuta, mika vene'nene,
a'nene mofavreraminena magore huta ozmatreta zamahe
hana hu'none. **35** Anama ha'ma hupintira afu'zagane, mago'a
zantaminena eri'none. **36** Hagi Arnoni agupomofo atumparega
Aroeri kumateti vuno Kireatima uhanatigeno, ana amu'nompima
me'nea kumazmimofo vihumoa ha' vahe'timofona zamagura

ovazi'ne. Hagi Ra Anumzana tagri Anumzamo taza higeta zamahe vagare'none. 37 Hianagi Amoni vahe'mofo mopa tava'ontera, Jaboki ti ankenare'ene, agona kumatamimpinena Ra Anumzana tagri Anumzamo'a zamatreho hu'nea kante anteta ovu'none.

3 Hagi ananteti'ma rukrahe'ma huta Basanima vunaku'ma nevunkeno'a, Basani kini ne' Ogi'a mika sondia vahe'a zamavreno hara eme hurante'naku Edrei kumate e'ne. 2 Hianagi Ra Anumzamo'a amanage huno nasm'i'ne, Mosesega, Oginkura korora osuo. Na'ankure agri'ene, sondia vahe'ane mopa'anena Nagra ko kagri kazampi ante'noankinka, Hesbonima nemania Amori kini ne' Sihonima hu'nazaza hunka, agri'ene mika vea'enena zamahe vagaregahane. 3 Hagi Ra Anumzana tagri Anumzamo'a taza higeta Basani kini ne' Ogine mika vahe'anena avreramigeta magore huta ozmatreta, maka zamahe vagare'none. 4 Hagi Basani kini ne' Ogi'ma ana knafima 60'a ranra kumatmima miko Argob mopafima me'negeno kegava hu'nea kumatamine mohanena magore huta otreta, maka zamaheta hanare vagare'none. 5 Hagi e'i ana mika kumazmia tusinasi vihu hugagine'za, kaha hagente'za ana kahana aenireti resihuntetere hu'naza kumatami zamaheta nehanareta, rama'a kumatamine, vihuzmia omene neonse kumazmia hara huzmanteta eri'none. 6 Hagi Hesboni kumate'ma nemania Amori kini ne' Sihonima hu'nonaza huta, Basani kini ne'ene mika vene'nene, a'nanene mofavreramine mika zamahe vagare'none. 7 Hianagi maka zagagafa zamine mago'a zantaminena ana ha'ma hu'na kumazmifintira eri'none. 8 Ana knafima mopama eri'nonana, tare Amori vahe'mokizmi kini ne'tremofo zanazampintira mopaznia, Jodani timofona zage

hanati kaziga Arnoni tinteti erigafa huno vuno, Hermoni agonare vu'nea mopa ana mikä eri vagare'none. **9** Saidoni vahe'mo'za Hermoni agonagura Sirioni agone hu'za nehazageno, Amori vahe'mo'za Seniri agone hu'za nehaze. **10** Hagi avapafima maka me'nea kumatamine, maka Giliati mopareti vuno Sareka kuma'ene Edrei kuma'ma Basani me'nakeno Ogi'ma kegavama hu'nea rankumatrena eri vagare'none. **11** (Maka Refaimi ranra vahepintira Basani kini ne' Ogike'za agrake henkarfana fri'ne. Hagi agrama frige'zama erinte'naza sipa ainireti tro hu'neankino, upa'amo'a 2 mita higeno, zaza'amo'a 4 mita hu'ne. Hagi ana sipa Raba kumate me'nege'za, Amoni vahe'mo'za negaze.) **12** Ana'ma eri'nona mopa Arnoni agupomofo atumparega Aroeri kumateti agafa huno vuno, Giliati mopamofona amu'nompinti refko huno mago kazigane anampima me'nea ranra kumataminena, Rubeni naga'ene Gati nagamokizmi zami'noe. **13** Hagi Giliati mopama amu'nompinti'ma refko hutre'noa mago kaziga mopane, Basani kini ne' Ogima kegavama hu'nea mohanena, Manase nagara amu'nompinti refko hu'ne'na, magokaziga maniza naga zami'noe. Hagi maka Argopu mopa Basani kaziga me'nea mopagu Refaimi vahe mopae hu'za nehaze. **14** Hagi Manase nagapinti fore hu'nea kva ne' Jaeli'a Argopu mopa Basani kazigati agafa huno vuno, Kesuri vahe'ene Makati vahe mopa atupama eme atreteti maka mopa eri vagareteno, ana moparamina Havot Jaire huno agra'a agire asamre'nege'za meninena ana agi nehaze. **15** Hagi Giliati mopamofo noti kaziga'a Makiri naga zami'noe. **16** Hagi ana Giliati mopamofona Sauti kaziga mopa Rubeni naga'ene, Gati nagamokizmi zami'noe. E'ina mopamo'a Giliatitira vuno Arnoni agupofi uhnatiteno, ete rukrahe huno Amoni vahe mopa atupare Jaboku tinkenare uhanati'ne. **17**

Hagi Galili hagerinkenati'ma vuno fri'nea hageri ankenare'ma vigeno, Jodani timo'ma zage fre kaziga rugitagigeno, zage hanati kaziga Pisga agonamo rugitagigeno, Jodani agupoa ana nagamoke'za eri'naze. **18** Hagi anankna zupa Jodani timofo kantu kazigama manisaza nagara amanage hu'na zamasami'noe, Ra Anumzana tamagri Anumzamo'a ama mopa tamagra eriho huno tami'ne. Hagi maka ha'ma huga vahe'mota ha'zantamina eri'neta tina takaheta, ugagota huta tamafuhe'ina hara ome huzamaza hiho. **19** Hianagi a'netamine, mofavretamine zagagafatamimo'za zamavega ante'za Nagrama zami'noa kumatamimpi manigahaze. (Hagi rama'a zagagafa ante'nazana nagra antahi'noe.) **20** E'ina huta hara huta tamafuhe'ina zamaza nehanage'za, Ra Anumzamo'ma zamagri'ma Jodani timofo kantu kazigama zami'nea mopa eritesageta, tamagri'ma tami'noa moperera emanigahaze. **21** Hagi ana zupa nagra Josuana amanage hu'na asami'noe, Ra Anumzana tamagri Anumzamo'ma tare kini ne'trente'ma hu'nea zana hago kagra'a kavufinti ke'nane. E'ina hu'kna'za amama unefraza moparamimpi kini vahetmina huzmantegahie. **22** E'ina moparamimpi nemaniza vahetminkura korora osiho, na'ankure Ra Anumzana tamagri Anumzamo'a tamaza huno hara huzmantegahie. **23** Ana zupa nagra hankaveti'na nunamuna hu'na Ra Anumzamofona amanage hu'na antahige'noe, **24** Ra Anumzana kagra miko'zama kegavama hu'nana Anumzane, kagra agafa hunka eri'za vahé kamo'na himamu hankaveka'a naveri hane, na'ankure monafine ama mopafinena kagrama nehanankna zama huga anumzana omani'ne. **25** Ra Anumzamoka muse hugantoanki, natrege'na Jodani tina takahē'na kantu kaziga knare mopane, knare agona mopane Lebanoni mohanena ome ka'neno. **26**

Hianagi tamagrama ke'ama ontahi'naza zanku, Ra Anumzamo'a nagrira arimpa ahenanteno amanage hu'ne, ha'e! Keka'ama antahi'zankura navresrahianki mago'anena ama anankea osuo hu'ne. **27** Hagi Pisga agonare marerinka zage hanati kazigane, zage fre kazigane ruga raga kaziga omege emege huo. Na'ankure antu ana mopafina takahenka ovugahane. **28** Hianagi Josuana azeri hankavetike nesaminka huntogeno, Israeli vahera zamavareno Jodani tina takaheno vino. Na'ankure agra Israeli vahetera vugota hu'neno, kagrama kana mopa refko huno zamigahie. **29** Ana higeta Beti-Peori tavaonte me'nea agupofi mani'none.

4 Israeli vahe'mota ama kasegene tra kenema rempima huramisuana antahi so'e hiho. Hagi ama ana nanekema antahitama avaririsuta, knare huta nemanita, Ra Anumzana tafahe'i Anumzamo'ma huhampri ramante'nea mopa omerigahaze. **2** Hagi mago'a nanekea ama ana kasegerera erinte sotu huge, kasegefintira eritrege osuta, Ra Anumzana tamagri Anumzamofo kasegema avaririhoma hu'nama tamasamua kea avaririho. **3** Hagi Ra Anumzamo'ma Ba'al-Peori kumate'ma hu'nea zana tamavufinti ko ke'naze. Peori vahe havi anumza Balima mono'ma huntaza vahera tamagripintira Ra Anumzana tamagri Anumzamo'a zmahehana hu'ne. **4** Hianagi Ra Anumzana tamagri Anumzamofoma, azeri hanavemati'naza nagara maka tamatregeta menina mani'naze. **5** Keho, Ra Anumzana nagri Anumzamo'ma tamagrik'u'ma zamasmio huno'ma hu'nea kante ante'na kasegene tra kenena amama unefraza mopafima umani'neta avaririsagu rempi hunerami'noe. **6** Ana hu'negu ama ana kasegene tra kenena kegava nehuta avaririho. E'inama hanageno'a, knare antahi'zane maka'zama antahi

ani'hu antahizamo tamagripina eama nehinke'za, ana mopafi
vahe'mo'za ana kasegene tra ke'ma nentahi'za neramagesu'za
zamagra amanage hugahaze, tamage ama vahera, mareri
vaheki'za knare antahi'zane vahe mani'ne'za, maka zamofo
antahi ani'hu vahe mani'naze hu'za hugahaze. 7 Na'ankure ruga'a
vahe'mokizmi anumzamo'a tagri Anumzanknara osu'ne. Ra
Anumzana tagri Anumzamo'a tava'ontire mani'neno nunamuntia
nentahie. 8 Hagi ruga'a vahe'mokizmi tra kene kasegemo'a,
tagri tra kene kasegenemo'ma fatgo hu'nege'na menima
neramua kasegene tra kegnara osu'ne. 9 Hagi kva hu'neta, Ra
Anumzamo'ma huramante'nea zama zamagra tamavufinti'ma
ke'naza zana tamagera okaniho. Hagi manita vanafina,
anama ke'naza zana atrenkeno antahintahi tamifintira fananea
osina, maka zupa mofavretamine tamagehe'inena zamasmitere
hiho. 10 Hagi Sainai agonamofo agiafima Ra Anumzana
tamagri Ra Anumzamofo avugama oti'nazageno amanage huno
nasami'ne, Mosesega Israeli vahera zamavarenka amare ege'na
nankea zamasmi'nena antahite'za, Nagri'ma kore'ma hunanteno
nagoraga'ama mani zana rempi nehu'za, ete mani'zama vanafina
mofavre'zimia rempi huzamigahaze. E'i anagema hu'nea nankea
tamagera okaniho. 11 Anama Sainai agonamofo agafima eme
oti'nazageno'a, ana agonafina tusi teve nereno hagana hagana
nehigeno hokonke hampomo mona refite'negeno hanintiri hu'ne.
12 Anama oti'nageno'a, Ra Anumzamo'a ana tevefinti nanekema
neramasamigeta Agrira onke'nazanagi ageru'age antahi'naze.
13 Hagi Ra Anumzamo'a avaririhogu huhagerafi huvempa ke'a
e'i 10ni'a kasege tare have tafete'ma kre'neana huama hu'ne. 14
Hagi e'i ana knazupage Ra Anumzamo'a nasmino, Israel vahera
ama kasegene trakenena rempi huzamige'za omeriza manisaza

mopafima vanu'za avaririhō hūno nāsāmī'ne. 15 Hagi Ra Anumzamo'ma teve amu'nompi mani'neno Sainai agonafinti'ma nanekema neramasamigeta, Agrira onke'nazagu tamagra kva huneta, 16 havi anumzana tro hunteta monora hunenteta, tamagra'a tamazeri havizana osho. E'i ana havi anumzana vemofo amema'arero a'mofo amema'arero, 17 mopafi vanoma nehaza zagagafamofo amema'o, hareno vano nehia namamofo amema'o, 18 mopafi regraroheno vano nehia zagamofo amema'o, timpima nemania nozamemofo amema'a tro huonteho. 19 Hagi zagine ikane ofunema mika monafima me'neazama kesuta, monora huonteho. Ra Anumzana tamagri Anumzamo'a ruga'a vahe'mo'za monora huntehogu tro hunte'ne. 20 Hianagi Ra Anumzamo'a Isipi vahe'mofo kinafintira tusi'a aini teve amuhofinti tamavreaza hūno Agri vahe manihogu tamavreno atiramino egeta menina Agri vahe mani'naze. 21 Hianagi tamagrama hazazanku Ra Anumzamo'a tusi rimpa ahenenanteno, knare mopama tamagri'ma tami'nea mopafina Jodani tina takahenka ovugosane hūno huvempa hunante'ne. 22 E'na hu'negu nagra Jodani tina takahe'na ovu, ama mopafi frigahue. Hianagi tamagra vuta anama tami'nea knare mopa omerigahaze. 23 Hagi Ra Anumzana tamagri Anumzamo'ma huhagerafi huvempa kema tamagranema hu'nea zana, tamagekaninketa mago zamofo amema'are kaza osu havi anumzama tro'ma osihoma hu'nea havi anumzana kva huneta trora osho. 24 Na'ankure Ra Anumzana tamagri Anumzamo'a haganahagana hūno keonke'za tefananehu tevegino, Agra kanivere Anumza mani'ne. 25 Hagi ana mopafima zanra kna umani'nuta mofavrema kasezmante'nage'za tamagehe'ima kasezmante'nageta, kaza osu havi anumzana tro huta monora hunteta tamagra'a tamazeri havizana huta, Ra

Anumzana tamagri Anumzamofo avurera havi avu'ava zana
huta arimpa ahe'zana osinkeno arimpa aheoramanteno. **26** E'ina
hu'negu menina monane mopane ke hugeke negakena, ama
nanekea huama hue. Hagi tamagrama keni'ama ontahisuta,
Jodani tima takahetama ufresaza mopafintira ame huno tamahe
fanane hugahie. Osi'agna ana mopafina umani'nageno, ana
mika'a veara tamahe fanane hugahie. **27** Hagi Ra Anumzamo'a
tamazeri panini hanigeta, vahe mopafi freta osi'osi hutma umani
emani hugahaze. **28** E'ina moparega umani'netma vahe'mo'za
havereti'ene zafareti'ene tro huntazageno avu onke, agesa ontahi,
ne'za one, mna ontahi anumzantaminte monora huntegahaze.
29 Hianagi e'i anantegama mani'neta Ra Anumzana tamagri
Anumzamofonku'ma ana maka tamagu'areti'ma huta hakresuta,
Agrira hakreta erifore hugahaze. **30** Hagi hazanke knama
henkama efore'ma hina, tamagra ete rukrehuta Ra Anumzana
tamagri Anumzamofonte eta ke'a antahimigahaze. **31** Na'ankure
Ra Anumzana tamagri Anumzamo'a asunku Anumzankino,
amefira huoantamige, tamahe fanane osuge, huhagerafi
huvempa kema tamagehe'inema hu'neana agera okanigahie. **32**
Hagi ese'ma vahe'ma tro'ma hu'nea knareti'ma eno menima
ehanati'neana, amanahu knare hentofazana fore higeta ke'nafi?
Monane mopafinena maka haketa keho. **33** Hagi mago'a vahetera
anumzamo'a tevefintira kea huzamige'za tamagrama hazaza
hu'za mani'nazafi? **34** Hagi Ra Anumzana tamagri Anumzamo'ma
lsipima mani'nazageno knazane kaguvazanteti'ma ruzahu ruzahu
avame'zanteti'ma hapinti'ma korezampinti'ma hankavenentake
azanteti negazageno ha'ma huno tamavreno'ma atiramino
e'neaza huno, mago'a anumzamo'a anara hu'nefi? **35** Hagi
Ra Anumzamo'a Agrake Anumzana mani'ne huta antahihogu

e'i ana zantamina tamaveri hu'ne. Hagi magore huno Agrikna anumzana omanitfa hu'ne. **36** Monafinti'ma naneke'ma neramasmieta ageru'ma antahi'nazana, e'i tamazeri fatgo hunaku hu'ne. Hagi mopafina tusi teve neregeta, negazageno ana tegefinti nanekea neramasamigeta ageru'a antahi'naze.

37 Na'ankure Ra Anumzamo'a tamafahemofoma zamavesi zamante'neno zamagripinti'ma forehu anante anante'ma hu'za esaza vahera huhampri zamante'nea zanku huno Isipitira Agra'a himamu hankave'areti tamavreno atiramino ne-eno, **38** hanave'zmimo'ma tamagri hanavema agatere'nea kumatamina tamagrama erisantiharegahaze hu'nea mopafintira zamahe natitrenigeta, menina ana mopa erisintihareta manigahaze.

39 E'igu menina tamagera okanita Ra Anumzamo'a monafine mopafinena Agrake'za Anumzana mani'ne huta antahintahi tamifina maka zupa antahigahaze. Hagi magore huno Agrikna anumzana omanitfa hu'ne. **40** E'ina hu'negu Anumzamofo tra kene kasegenema avariraho hu'nama menima tamasamua kasegene trakenena nevaririnkeno tamagri'ene mofavretmimofonena tamazeri knare nehina, Ra Anumzana tamagri Anumzamo'ma tamisnia mopafina zaza kna manigahaze. **41** Hagi anante Mosese'a fra'makisaza kumara Jodani timofona zage hanati kaziga 3'a rankuma huhamprintegeno me'ne. **42** Iza'o ha' vahe'a omani'nesianagi mago'a zama haniregama hantga huno vahe'ma ahe frisuno'a, ana kumatamintega freno vuno aguravazigahie. **43** E'i anama huhamprinte'nea kumatmina, Rubeni naga'mokizmi agona mopafima me'nea kuma Beserigi, Gilieti kazigama Gati nagamokizmi mopafima me'nea kumara Ramotigi, Basani kazigama Manase nagamokizmi mopafima me'nea kuma Golanie. **44** Mosese'a ama'na kasege Israeli vahera

zami'ne. **45** Hagi Mosese'a ama'ha kasegene trakene mani'zama erizo'ema hu'za manisaza kenena Israeli vahera Isipima atre'za atirami'za azageno'a zamasami'ne. **46** Israeli vahe'mo'za Jodani agupomofona zage hanati kaziga Bet Peoria, Amori vahe kini ne' Sihonima Hesboni kumate mani'neno kegava hu'hea mopa, Mosese'ene Israeli vahe'mo'zanema Isipiti'ma atirami'za ne-eza eme zamahe'za hanare'naza mopare eman'inazageno ana nanekea Mosese'a zamasami'ne. **47** Kini ne' Sihoni mopane Basani kini ne' Ogi mohanena zanahe'za hanare'za erisanti hare'naze. E'i ana kini netrena Amori vahe kini netre Jodani timofo zage hanati kaziga mopa kva hu'na'ane. **48** Hagi Israeli vahe'mo'zama ana mopama eri'nazana Arnoni agupomofo atuparega Aroeri kumateti erigafa huno vuno Sirion agonare ome atre'nea mopa eri'naze. (Hagi Sirioni agonamofo mago agi'a Hemonie). **49** Hagi Jodani timofo zage hanati kaziga mopane, Fri Hagerimofo mago sopa'aregati vuno Pisga agonamofo agafi ome atre'ne mopane eri'naze.

5 Mosese'a mika Israeli vahera kehutru huno amanage huno zamasami'ne, Israeli vahe'mota ama kasegene trakenema tamasamisuana rempi huta antahini nehuta avariri so'e hiho. **2** Ra Anumzana tagri Anumzamo'a Sainai agonafi tagri'enena huhagerafi huvempa kea hu'ne. **3** Ana huhagerafi huvempa kema Ra Anumzamo'ma hu'neana tafahe'inena osu'neanki, tagra menima mani'hona vahe'motane hu'ne. **4** Ana agonare Ra Anumzamo'a teve anefapinti Agra'a kea tamasm'i'ne. **5** Hianagi tamagra ana tevenefakura koro nehuta, agonarega mareori'naze. E'ina' hazage'na ana zupa nagra Ra Anumzamofone tamagr'i'ene amu'nompi mani'nena Ra Anumzamo'ma hia nenekea eri'na tamasm'i'noe. Hagi Agra amanage hu'ne, **6** Nagra Ra

Anumzana tamagri Anumzane, Isipi mopafima kina huta
mani'neta kazokazo eri'zama e'nerizage'na tamavare atiramina
e'noa Anumzane. 7 Mago'a anumzantamintera monora huonteta
Nagrike monora hunanteho. 8 Hagi tamagra monafima
me'enenia zamofo amema'o, mopafi me'enenia zamofo amema'o,
timofo agu'afima me'enenia zamofo amema'o mago'zamofo
amema'arera kaza osu havi anumzana tro huonteho. 9 Hagi ana
kaza osu havi anumzantamintera monora huntege, tamarena
rentegera huozmanteho. Na'ankure Nagra Ra Anumzana
tamagri Anumzamo'na kanivere Anumzankina, afahe'mo'ma
hu'enenia kumitera mofavre'reti'ma vuno agigomofonte'ma
vaniana kna zamigahue. 10 Hianagi iz'a'zo Nagri'ma
zamavesi nenante'za kasegeni'ama nevariri'za vahera, navesi
nezamantesuge'za kasezamantesage'za forehu anante anante
hu'za 1,0000ni'a vanaza vhete enena navesi nezamante'na,
knare huzmantegahue. 11 Nagra Ra Anumzana tamagri
Anumaza mani'noanki Nagi'a amne zampina oheho. Na'ankure
amnezampima nagima ahesimofona agegena otregosue. 12
Mani fruhu kna Sabatia, Ra Anumzana tamagri Anumzamo'ma
tamasami'nea kante anteta kegava hinkeno ruotge huno meno. 13
Tamagra 6si'a zagegnafi miko eri'zantmia erigahaze. 14 Hianagi
7ni zagegna Ra Anumzana tamagri Anumzamofo manigsa
hu knagita, ana zagegnarera eri'zana e'origosaze. Kagrane,
neka'ane, mofaka'ane, ve eri'za vaheka'ane, a' eri'za vaheka'ane,
bulimakao afuka'ane, donki afuka'ane, ruga'a afuzagaka'ane,
rurega vahe'ma tamagrane enemaniza vahe'enena eri'zana
e'oriho. Hagi kazokazo eri'za vahetamia zamatreke'za ana
knarera eri'zana e'ori tamagrama hanazaza hu'za manigasa
hiho. 15 Hagi Isipima kazokazo eri'zama e'nerita mani'nazageno

Ra Anumzana tamagri Anumzamo'a hanavenentake azanuti'ma tamavreno'ma atiramino e'nea zankura tamagera okaniho. E'ina hu'negu Ra Anumzana tamagri Anumzamo'a mani fruhu kna Sabatia kegava hiho hu'ne. **16** Hagi Ra Anumzana tamagri Anumzamo'ma hihoma hu'nea kante anteta tamarera tamafana kesaga huta antahinezamita, ke'zamia antahizamiho. E'ina'ma hanuta Ra Anumzana tamagri Anumzamo'ma tamisia moparera knare huta za'zate manita vugahaze. **17** Tamagra vahera ahe ofriho. **18** Tamagra rumofo a'ene venenenena savri avu'vazana osiho. **19** Tamagra musufa oseho. **20** Hagi mago vahe'mo'ma keagare'ma ot'i'nenigeta tamagra havigea hutma huamara huonteho. **21** Tamagra ru vahe'mofo aro, noma'o, mopa'o, ve eri'za vahe'o, a' eri'za vahe'o, bulimakao afu'o, donki afu'o, maka nanazama'agura keramanunua osiho. **22** Hagi agonamofo agafima atru huta mani'nonkeno, Ra Anumzamo'a hanintiri hampomofo agu'a teve nefapi mani'neno ranke huno ama ana kasegea neramasamino, mago kea anantera hunonteno, tare kuta haverera kreteno nami'ne. **23** Hagi ana agonamofona hanintiri hampomo regajinte'negeno hagana hagana huno teve nerefinti ana kema hia kea nentahizageno kva vahe'tmimo'za nagrite erava'o hu'za, **24** amanage hu'naze, Antahio, Ra Anumzana tagri Anumzamo'a agra'a hankave'ane avasase'anena taveri nehuno hagana hagana huno nerea tevefinti keaga huramigeta antahi'none. Hagi menina Anumzamo'a vahe'mota keaga huramianagi tagra ofri'none. **25** Hianagi nagafare tagra frigahune? Hagi Ra Anumzana tagri Anumzamo'ma mago ane keagama huramisigeta tagra frigahune. Na'ankure e'i ana teve nefo'mo'a tagrira tefanane hugahie. **26** Hagi ina vahe'mo kasefa huno mani'nea Anumzamo'ma tevenefa'pinti'ma

ageru'marigeta antahiteta ofrita mani'nonaza huno Anumzamofo
agerura antahiteno mani'ne? 27 Mosesega kagrake vugeno
Ra Anumzana tagri Anumzamo'a nanekea kasaminkenka eme
tasamio. Tagra kema haniankea antahita avaririgahune. 28
Hagi tamagrama haza nanekea Ra Anumzamo'a antahiteno
amanage huno nasami'ne. Mosesega vea'mo'zama kagri'ma
kasamiza nanekea zamagra tamage hazage'na Nagra hago
antahi'noe. 29 Hagi Nagri'ma nave'nesiana, e'ina hu'za
Nagrira koro hunenante'za maka kasegeni'a avaririhogu hu'noe.
E'inama hanu'za zamagrane zamagripinti'ma fore hu'za vanaza
vahem'o'za maka zama hanafina knare hu'za mani vava
hu'za vugahaze. 30 Hagi menina ome zamasmige'za seli
nozimirega vu'za e'za hiho. 31 Hianagi kagra amare otinege'na
kasegeni'ane tra keni'anena kasami'neno. Hagi ama ana
kasegene tra kenena rempi huzamige'za antahite'za mopama
zami'nua mopama omerisantima hare'za umaninu'za ana tra
keni'ane kasegenianena avaririgahaze. 32 E'i ana hu'negu
Israel vahe'mota Ra Anumzana tamagri Anumzamofo kasegene
trakenena kegava huneta ufrege efregera osuta avariri so'e hiho.
33 Hagi Ra Anumzana tamagri Anumzamo'ma hihoma huno
huramantea kema avaririsuta, tamamisigeta omeri santimahareta
manisaza mopafina knare huta zazate manigahaze.

6 Ra Anumzana tamagri Anumzamo'a nasamino, Ama'na
kasegene trakenena rempi huzamige'za mopama zami'nua
mopafima umaninu'za avaririhon huno hunante'ne. 2 Hagi
Ra Anumzana tamagri Anumzamofona koro hunenteta,
agoraga'a mani'netma maka kasege'ane trake'anema avaririhon
hu'nama huneramantoa ke'a tamagrane mofavretamine
tamagehemozanena avaririhon. E'i anama hanutma knare hutma

za'zate ana mopafina manigahaze. 3 Hagi Israeli vahe'mota antahiho! Ama ana kasegene trakenena kegava nehuta avariri so'e nehinkeno, Ra Anumzana tamafahe'i Anumzamo'ma huhampri tamante'nea kante, amirine tume rimo'ma avite'nea mopafina knare hutma nemanita rama'a vahe fore hutma manigahaze. 4 Israeli vahe'mota antahiho! Ra Anumzana tagri Anumzamo'a agrake Ra Anumzana mani'ne. 5 E'ina hu'negu Ra Anumzana tamagri Anumzamofona mika tumotamireti'ene, mika tamagu tamenteti'ene, mika hanavetamireti avesinteho.

6 Hagi menima hihoma hu'nama tamasamua nanekemo'a antahintahitamifi me'nena, 7 nompi manisazano, kantesazano, masesazano, otisazano, ama ana nanekea mofavretaminena maka zupa huge antahige nehutma rempi huzami vava hiho. 8 Hagi huramagesa hanigu ama ana nanekea kretma tamazante'ene tamasenire'enena anakinteho. 9 Hagi no kafa zafatamire'ene kumapima ufre kafantaminte'enena ama ana nanekea kretma arukmarenteho. 10 Hagi Ra Anumzana tamagri Anumzamo'a tamagehemofo, Abrahamuma, Aisakima, Jekopuma zamigahue huno huhampri zmante'nea mopafi tamavareno ufregahie. E'i ana mopafina knare huno hentofaza hu'nea ranra kumatamina tamagra'a hanaveretira onki'naza kumatami me'nea mopa tamigahie. 11 Hagi nontamimpina fenomo'a avite'nen'i a nontami tamigahie. E'i ana fenona tamagra eri onte'naza feno tamigahie. Hagi tamagra aseonte'nesaza tinkerifinti tina nefita, ohankre'naza hozaramipinti wainine olivia tagita negahaze. Hagi ana kave'ma nesageno tamu'ma hanigeta,

12 Isipima kina huta mani'neta kazokazo eri'zama enerizageno tamavreno atiramino'ma e'nea Ra Anumzama tamage'ma akaninte zankura kva hu'neni hiho. 13 Hagi Ra Anumzana

tamagri Anumzamofo korora hunteta agoraga'a mani'neta,
Agrike monora hunteho. Hagi mago'a zanku'ma huvempama
hunaku'ma hanutma, Agri agifinke huvempa hiho. **14** Hagi
anama umani'naza mopafi vahe'mo'zama mono'ma hunentaza
havi anumzantamintera monora huonteho. **15** Na'ankure Ra
Anumzana tamagri Anumzamo'ma amu'nontamifima mani'nea
Anumzana kanivere Anumzankino, havi anumzante'ma mono'ma
huntesageno'a rimpa ahezama'amo'a tevereankna huno ana
mopafintira tamahe fanane hugahie. **16** Hagi Masa kumate'ma
hu'nazaza huta, Ra Anumzana tamagri Anumzamofona reheta
onkeho. **17** Ra Anumzana tamagri Anumzamo'ma tami'nea
kasegene tra kenena kegava huneta avariri so'e hiho. **18**
Hagi knare huno fatgo hu'nesia zanke Ra Anumzamofo
avurera nehinkeno, maka'zama hanaza zamo'a knarehina
tmafahe'imma knare mopama huvempa huno huhampri zmante'nea
mopa e'nerita, **19** Ra Anumzamo'ma hu'nea kante anteta
ha' vahe'tmia ana mopafintira zamahenati atregahaze. **20**
Hagi henkama mofavretamimo'zama tamantahige'za, Ra
Anumzana tagri Anumzamo'a nagafare ama kasegene tra
kenena tamigeta nevararune hu'za tamantahigenageta, **21**
tamagra amanage huta hiho, Fero kazokazo eri'za vahe tagra
Isipi mani'nonkeno, Ra Anumzamo'a hankavenentake azanuti
tavreno atiramino e'ne. **22** Hagi tagra tavufinti negonkeno
Isipi kuma'ene, Feronte'ene vahe'are'enena Ra Anumzamo'a
tusi'a kaguvazane hazenkezanutira zamazeri haviza hu'ne.
23 Hagi Agra Isipitira tavre atiramino'ma e'neana, tagehe'imma
huvempa huno huhampri zmante'nea mopa taminaku tavreno
e'ne. **24** E'ina hu'negu Ra Anumzana tagri Anumzamo'a huno,
Koro hunanteta maka kasegene tra ke'ninena amage'nenteta

agorga'a maniho huno hu'ne. Na'ankure tagrama e'ina'ma hanuta knare huta nemani'nunkeno, Agra menima nehiaza huno kegava hurantenketa knare huta manigahune. 25 Hagi Ra Anumzana tagri Anumzamo'ma avaririhoma hu'nea kasegema avaririsunkeno'a, fatgo vahere huno hugahie.

7 Hagi amama ufrenaku'ma nehaza mopafima Ra Anumzana tamagri Anumzamo'ma tamavreno'ma unefreno rama'a kumatmimpi mani'naza vahera zamahe natitregahie. Hagi e'i ana 7ni'a kumapi vahera, Hiti vaheki, Kirgasi vaheki, Amori vaheki, Kenani vaheki, Perisi vaheki, Hivi vaheki Jebusi vahe'mo'za rama'a vahe manizageno hanavezmimo'a tamagatere'ne. 2 Hagi Ra Anumzana tamagri Anumzamo'ma ana mopafi vahe'ma tamazampima zamavarentena ha'ma huzmagaterenuta, magore huta ozmatreta zamahehana nehuta, mago'a vahe'enena huhagerafi nanekea osuta, tamasunkura huozmanteho. 3 Hagi ana vahetera zamatreke'za mofanetmimo'za vea e'orinkeno, ne' mofavretmimo'za ana vahepintira ara e'oriho. 4 Na'ankure mofavretmia zamazeri rukrahe hanage'za, havi anumzamofo avaririgahaze. E'i ana'ma hanageno'a, Ra Anumzamo'a rimpa aheramanteno ame huno tamahe fanane hugahie. 5 Hianagi havi anumzante'ma Kresramanama vunentaza ita taganavazi netreta, mono'ma hunentaza haveramina ru fuzafupe netreta, Asera havi anumzamofo amema'ama me'nea zafaramima retruma re'nazana antaginetreta, havi anumzantmimofo amema'ama antre'za tro'ma hunte'nezama mono'ma hunentaza zana erita tevefi kreho. 6 Na'ankure Ra Anumzana tamagri Anumzamofontera ruotge hu'naza vahe mani'naze. Maka ama mopafima mani'naza vahe'pintira tamagra Ra Anumzana tamagri Anumzamofo Agri'a mareri fenozama'a manisaze huno huhampritamante'ne.

7 Hagi ra huta ruga'a vahera zmagatereta rama'a vahe
mani'naza zankure huno Ra Anumzamo'a avesiramanteno
huhampri oramante'ne. Hagi osi'a vahe mani'nazanagi, 8 Ra
Anumzamo'a avesi neramanteno tamafahe'ima huvempa huno
huhampri zamante'nea zanku huno, kazokazo eri'zama enerita
Isipima mani'nazageno'a hankavenentake azanura tamaza
huno Isipi kini ne' Fero azampintira tamavreno atirami'ne. 9
E'ina hu'negu tamagra antahini hiho, Ra Anumzana tamagri
Anumzamo'a Agrake Anumzana mani'neankino, kema hu'nea
kere oti Anumzankino huhagerafi huvempa ke'a nevaririno
Agri'ma avesinte'za kasege'ama avaririza vahera vagaore
avesi'zanu zamavesi nezmanteno, zamagripinti'ma fore hu
anante anante'ma hu'zama tauseni'a zupama vanaza vahe'enena
avesi zamantegahie. 10 Hianagi Agrima avesima nontaza
vahera, ame huno zamahe fanane hugahie. 11 E'ina hu'negu
maka kasegene tra kenema menima neramasmuana kegava
nehuta, avariri so'e hiho. 12 Hagi tamagrama ama ana
trakema antahiteta avariri so'ema hanageno'a, Ra Anumzana
tamagri Anumzamo'a tamavesiramante vava hugahue huno'ma
huhagerafi huvempa kema tamafahe'ima huhampri zamante'nea
kea avaririno avesi ramantegahie. 13 Agra avesi neramanteno,
asomura huneramanteno, tamaza hanigeta rama'a mofavrerami
kasentegahaze. Ana nehuno tamafahe'mofoma huhampri
zamante'nea mopamofona azeri knare hanigeno, witimo'ene
wainimo'ene olivi masavemo'enena rama'a nehinkeno, sipisipi
afu'mo'ene bulimakao afu'mo'ene meme afu'mo'zanena anentara
kase hakare hugahaze. 14 Hagi maka ama mopafi vahera
zamagatereno asomura huramantesigeno, magore huno naravo
ara omanigahianki, ana maka a'nemo'za mofavrege nentesageno,

a' afu'zagaramima kegavama hanaza afu'zagamo'za naravo
afura omani anentake'za antegahaze. **15** Hagi Ra Anumzamo'a
maka kriramina tamagripintira eritrenketa Isipima me'negetama
ke'nazankna kefo kriramina e'origahaze. Hianagi iza'zo
tamagri'ma ha'ma reramante'haza vahepi ana kria eri atrenkeno
zamazeri haviza hugahie. **16** Hagi Ra Anumzana tamagri
Anumzamo'ma tamazampima avrentesia ha' vahetmia, magore
huta tamasunkura huzmanteta ozamatretma zamahe fri vagareho.
Hagi ana vahe'mofo anumzantera monora huonteho. Na'ankure
krifufi zaga kafamo aheankna hugahaze. **17** Hagi tamagrama
tamagu'afima huta, ama mopafi vahe'mo'za tagrira tagatere'za
rama'a vahe mani'nazanki inankna huta zamahe natitregahune,
18 huta hugahazanagi, ana vahekura korora osiho. Ra
Anumzana tamagri Anumzamo'ma Feronte'ene Isipi vahete'ma
hu'neazana tamagera okaniho. **19** Hagi Ra Anumzana tamagri
Anumzamo'ma tusi'a knazane avu'avazane kaguvazanema
erifore'ma hankave nentake azanuti'ma nehuno, Isipiti'ma
tamavreno atirami'neana tamagra ke'naze. E'inahukna huno
Ra Anumzana tamagri Anumzamo'a amama koro'ma nehaza
vahera hara huzmantegahie. **20** Hagi mago'a vahe'ma fre'za ome
fra'makisaza vahera, Ra Anumzana tamagri Anumzamo tumerami
huzmantenke'za ome zamampri frigahaze. **21** E'i ana hu'negu
ama ana vahekura korora huozamanteho. Ra Anumzana tamagri
Anumzamo'a tusi'a himamu'ane Anumza amu'nontamifina
mani'ne. **22** Hagi ana mopafi vahera Ra Anumzana tamagri
Anumzamo'a akoheno osi'a zamahe natitretere hugahie. Hagi
ana maka vahera magoke knafinkera zamahe onatigahie.
Na'ankure anama hanageno'a, afi zagagafamo'za forehu
hakare hu'za tamagrira tamazeri haviza hugahaze. **23** Hianagi

Ra Anumzana tamagri Anumzamo'a ana mopafi vahetmina antahintahi zmia zamazeri savari hina tusi negi nagi nehanageno, tamazampi zmaurentenketa zamahe hana hugahaze. **24** Hagi ana mopafi kini vahetaminena tamazampi zmarentesigeta zamahe vagaresageno, ama mopafina zamagi'a omanesige'za fananehu vagaregahaze. Magore huno vahe'mo'a hara huramagate oregosianki, ana maka vahera zamahe hana hugahaze. **25** Hagi ana vahe'mokizmi havi anumzantamima antre'za tro'ma hunte'nazana tevefi krenkeno tefanene hino. Hagi goline silvanema ana havi anumzantminte'ma me'neana, e'i krifugna hu'neanki ke tamanunua huta e'oriho. E'ina zankura Ra Anumzana tamagri Anumzamofona agoteno avesra nehie. **26** Hagi anama kasrino havizama hu'nea zantamina, erita nontamifina eme onteho. Na'ankure e'ima hazaza huno tamagri'enena tamahe fanane hugahie. Hagi e'i ana zankura amu'tiaza huta tamefi huzamiho, na'ankure e'ina zantamina Ra Anumzamo'a fanane hanaza zane huno hunte'ne.

8 Ama maka kasegema menima neramuana kegavahu so'e huta avariraho. E'i anama hanutma vahera kase hakare nehuta, Ra Anumzana tamagri Anumzamo'ma tamagehe'ima huhampri zmante'nea mopa omerita mani avitegahaze. **2** Hagi ana nehuta Ra Anumzana tamagri Anumzamo'ma anteramino'ma mani avu'ava'ma hutamaveri hunaku'ma 40'a kafufima hagage kokampima tamavreno'ma ne-eno, kasege'a avaririgahazafi ovaririgahaze huno'ma reramaheno'ma ke'nea zankura tamagera okaniho. **3** Hagi anteramino'ma mani avu'ava'ma hu tamaveri hunakura tamatregeta tamagakura nehazageno, tamafahe'mo'ene tamagranena neta onke'naza ne'zana mana tamami'ne. E'i ana'ma hu'nea avu'avamo'a huno,

vahe'mo'za bretige nene'za zmasimura eri'za nomanizanki, Ra Anumzamofo agipinti'ma atirami'nia nanekereti'ene vahe'mo'za zamasimura eri'za manigahaze huta antahisagu anara hu'ne. 4 Hagi 40'a kafufima ka'ma mopafima e'nazana, kukenatamimo'a tamavugaretira tagatora huoramigeno, tamagamo'enena zoreno prora osu'ne. 5 Tamagrama antahisazana, arera afa'ma mofavre'ama aheno azeri fatgo nehiankna huno, Ra Anumzana tamagri Anumzamo'a tamazeri fatgo nehie. 6 E'ina hu'negu Ra Anumzana tamagri Anumzamofonku koro hunteta agoraga'a nemanita, avu'ava'a nevaririta, kasege'a avaririho. 7 Na'ankure Ra Anumzana tamagri Anumzamo'a rama'a tinkagomu megeno, agonafine agupofinena rama'a ti kampui hanatino enevia knare mopafi tamavreno unefre. 8 Hagi ana mopa witima, balima, waini ragama, fiki zafaramima, pomegreneti zafa rgaramima, olivi zafane, tumerimo'ma avite'nea mope. 9 Hagi ana mopafina ne'zamo'a avitegeno, ne'zanku atupa osu mope. Ana nehigeno ainima e'neri'za havemo'ene kopama e'neri'za havemo'a agonaramimpina me'neankita kafita erigahaze. 10 Hagi tamagrama ne'zama neramu'ma nehanuta, Ra Anumzana tamagri Anumzamofo agi'a erisga hiho. Na'ankure Agra knare mopa tami'ne. 11 Hianagi Ra Anumzana tamagri Anumzamofo kasegene tra kenema menima amage'ma antesazegu'ma neramasmua kema tamage'ma akanita rutagre zankura kva hiho. 12 Hagi knare nompi mani'neta hakare ne'za nenesnageno tamura nehina, 13 bulimakao afu'mo'zane sipisipi afu'mo'zanena anentara kase hakare nehanageta, silvane golinena rama nenteta maka fenoma antesaza fenomo'a ome rama'a hugahie. 14 Hagi ana zankura musena huta tamavufga ra nehuta, Ra Anumzana tamagri Anumzamo'ma Isipima kazokazo eri'zama e'nerita

mani'nazageno tamazama huno tamavreno'ma atirami'nea
Ra Anumzankura tamagera okaniho. **15** Agrama vugota
huramanteno hagage huno tusi amuho hu'nea ka'ma kokampima
ha' osifavemo'zane ha' segintavemo'zanena hakare hu'nefi
nevuno, havefinti'ma tima erifore'ma hurami'nea zanku'enena
tamagera okaniho. **16** Hagi ka'ma kokampima tamafahe'mo'za
ne'za onke'naza ne'za manama tami'neana, anteramino'ma mani
avu'ava'zane tamagramma knare huta manisagu reramaheno
kenaku anara hu'ne. **17** Hagi ru tamagra huta tagra hankavereti
ama fenona eritru hune hutama huzanku, e'i anara hu'ne.
18 Hu'neanagi Ra Anumzana tamagri Anumzamo hankavea
tami'nigeta feno vahera manigahazanki, tamagera akanionteho.
E'i ana'ma haniana tamafahe'ima huvempa huno huhageraf'nea
kea eri knare hugahie. **19** Hagi Ra Anumzana tamagri
Anumzamofoma tamagekani nenteta, havi anumzantamima
nevaririta, tamarenareta mono huzmantesazana, Ra Anumzamo'a
tamage huno tamahe fanane hugahianki, kva hiho hu'na
nehue. **20** Hagi Ra Anumzana tamagri Anumzamofo kema
ontahisageno'a, tamavugama me'nea mopafi vahe'ma zamahe
fananema hu'neaza huno, tamahe fanane hugahie.

9 Israeli vahe'mota antahiho! Menina Jodani tina takaheta rama'a
vahe mani'nazageno hankave zamimo tamagri hankavema
agatere'nea vahe'mokizmi mopa omerigahaze. Hagi ana
vahe'mo'za kumazmimofoma hugagi'nazana vihum'o'a za'za
huno mona avako hu'za nehigeno, **2** Hagi ana kumatmimpina
za'za hu'za tusinasi vahetami Anaki mofavrerami mani'nazanki,
ina vahemo knarerera hu'neno hara huzamantegahie higeta ko
antahi'naza vahetami mani'naze. **3** E'ina hu'negu menima keta
antahitama hanazana, Ra Anumzana tamagri Anumzamo'a Agra

ugota huno keonke'zama tefananehu tevegna huno ana mopafina nevuno, vahera zamahe rava nehanigeta, Ra Anumzamo'ma huhampri tamante'nea kante, ana mopafi vahe'tmina ame huta zamahe fanane hugahaze. **4** Hagi tagri fatgo avu'ava zanku huno Ra Anumzana tagri Anumzamo'a ana vahetmina zamahe natitregeta mopazmia erune huta tamagesa ontahiho. Hianagi Agra ana vahe'mokizmi kefo avu'avazamigu huno zamahe natitregahie. **5** Ana mopama omeri santima haresuta, tagri fatgo avu'ava zante Ra Anumzana tagri Anumzamo'a taza higeta erune huta tamagesa ontahiho. Agra zamagri kefo avu'ava zanku mopa zamifintira zamahe natinetreno, tamagehe'i Abrahamuma, Aisakima, Jekopunema huvempa huno huhampri zamante'nea kea eri knare hugahie. **6** Tamagrama antahisazana, tagri fatgo avu'avazante Ra Anumzana tagri Anumzamo'a ama knare mopa tamigeta erune huta tamagesa ontahiho. Na'ankure tamagra keontahi vahe mani'naze. **7** Ra Anumzana tamagri Anumzamofoma ka'ma kokampima azeri arimpama ahe avu'avazama huta e'nazazana tamagera okanita tamagesa antahiho. Isipiti'ma atiramitama e'naza knaret'i'ma eno amare'ma ehanati'nazana, Ra Anumzamofona hara rentevava huta neaze. **8** Hagi Sainai agonare'enena Ra Anumzamofo rimpa eri haviza hazageno, tusi arimpa aheramanteno tamahe fanane hunaku hu'ne. **9** Hagi anazama fore'ma hu'neana, Ra Anumzamo'ma tamagranema hu hagerafi huvempa kema have tafete'ma kre'nea kasege erinaku agonafima mreri'nogeta anara hu'naze. Ana agonafina 40'a zagegi 40'a haninki hu'na ne'zane tinena one umani'noe. **10** Hagi anante'ma umani'nogeno'a Ra Anumzamo'a tare have tafete'ma Agra'a azanuti'ma eri vakokino krente'nea kasegea nami'ne. Ana

maka kasegema agonamofo agafima mani'nazageno, teve
anefapinti'ma tamasami'nea kasegea ana have tafetrente
krente'ne. **11** Hagi 40'a zagegi 40'a hanima evigeno'a, Ra
Anumzamo'a anama huhagerafi huvempa kasegema krente'nea
haverarena nenamino, **12** amanage huno hu'ne, otinka ame
hunka uramio. Na'ankure Isipiti'ma zamavarenkama etiraminka
e'nana vahekamo'za kefo zamavu'zmava hu'za havia nehaze.
Zamagra avaririhoma hu'noa kemofona ame hu'za zamefi
hunami'za, golire havi anumza tro hu'naze. **13** Mago'ane
Ra Anumzamo'a amanage huno nasami'ne, Nagrama Israeli
vahem'a zamagoana, tamage huno zamagu'amo'a tusiza huno
hankaveti vahem'a mani'naze. **14** Hagi natrege'na zamahe hana
hu'na ame mopafintira zamagi'a eri fanane nehu'na, kagripinti
hankavenentake huno zamagri hankavema zamagatereno
tusi'a ohampriga'a vahera zamazeri fore ha'neno. **15** Hagi
ana agonafina tevenefamo'a hagana hagana nehige'na, have
tafetre'na nazampi eri'ne'na erami'noe. **16** Hagi enerami'na
koana tamagra Ra Anumzana tamagri Anumzamofo avurera
kumi hu'naze. Tamagra ame huta tamefi Ra Anumzamofona
hunemita, ke'a ovaririta, havi anumzana golireti bulimakao
anenta'mofa amema'a tro huntetma, monora hunte'naze. **17** E'na
hazage'na ana have tafetre'na negazage'na mate'vu'na atrogeno,
rufrage'ne. **18** Ana hute'na 40'a zagine, 40'a hanine ne'zana one
ko'ma hu'noaza hu'na Ra Anumzamofo avurera navugosaregati
mase'noe. Na'ankure tamagra maka kumi'ma hu'nazana Ra
Anumzamo'ma ago'netia avu'ava huta azeri arimpa ahe'naze.
19 Ana'ma hazage'na nagra tusi koro hu'noe. Na'ankure Ra
Anumzamo'a tusi arimpa ahe'neramanteno tamahe fanane hu'za
hu'ne. Hianagi Ra Anumzamo'a mago'ene nagri kea antahi'ne.

hankavekareti'ene hanavenentake kazanuti'ma Nagri vahe fatgo
manisaze hunka lsipiti'ma zamavarenka atirami'nana vaheka'a
mani'naze.

10 E'i ana knarera Ra Anumzamo'a amanage huno nasami'ne,
ese havema ko'ma kami'noankna hunka antrenka tro nehunka,
zafare vogisine trohuo. Hagi ana have tafetrena erinka
agonare'ma mani'nenure marerige'na, 2 Ese have tafetrente'ma
krente'nogenka arurakoma hu'nana nanekea krentanenkenka
ana zafare vogisifi ana have tafetrena anto huno nasm'i'ne. 3
Anagema hige'na akasia zafare vogisia tro hute'na, kote'ma
arurakoma hutre'noa kna have antre'na, eri pehe hunte'na, ana
have tafetrena eri'na ana agonarega mareri'noe. 4 Hagi Ra
Anumzamo'a mago'ane 10ni'a kasegea, agonamofo agafinkama
tevenefapinti'ma tamasamigetama antahi'naza kasegea ana have
tafetrentera krenami'ne. 5 Ana'ma hutege'na ete ana agonafintira
erami'na anama akasia zafare'ma trohunte'noa vogisifi ana
kasegema kre'nea have tafetrena Agrama nasm'i'neaza hu'ha
ome antogeno, meninena anante me'ne. 6 Hagi anantetira Israeli
vahe'mo'za Jakani vahe'mofo tinkeria atre'za Mosera mopafi
vu'naze. Aroni'a anante frige'za asentazageno, nemofo Eleasa
agri nona erino ugagota pristi eri'zana eri'ne. 7 Hagi anantetira
Mosera mopa atre'za Gudgota mopafi vute'za, Gudgotatira rama'a
ti me'nea kumate Jotbaha vu'haze. 8 Hagi Sainai agonamofo
agafima mani'nazageno'a Ra Anumzamo'a kasegema ante
vogisima zafama huno vu vahe'ene, Agri avugama mani'ne'za
eri'zama'ama eri vahera Livae naga zamazeri ruotge hige'za
Anumzamofo eri'zana eri'za amarera ehanati'naze. 9 E'ina
hu'negu Livae vahe'mo'za, zamafuhe'mozama mopama eri'zafina
zamagra mopa e'origahaze. Na'ankure Ra Anumzana tamagri

Anumzamo tamasami'nea kante anteno zamaza hanige'za manigahaze. **10** Nagra anante ese'ma hu'noankna hu'na, mago'ane 40'a zagegi, 40'a haninki hu'na ana agonafina manugeno, Ra Anumzamo'a keni'a antahino tamahe fananea osu tamatregeta mani'naze. **11** Anante Ra Anumzamo'a amanage huno nasami'ne, otinka Israeli vahera zamavarenka vugota hunka vuge'za zamagehe'mokizmima huhampri zamante'noa mopa omeriho. **12** Hagi menina Israeli vahera antahihi, Ra Anumzana tamagri Anumzamo'a amana hiho huno nehie. Ra Anumzana tamagri Anumzamofona koro hunteta agorga'a nemanita, Agri avu'ava nevaririta, avesinenteta, maka tamagu tamenteti huta monora huntaho. **13** Hagi tamagra knare'ma huta mani'naku'ma hanuta, Ra Anumzamofo kasegene trakenema menima nagrama neramasmuana antahita avariraho. **14** Hagi keho! Anami monafine onagamuma me'nea monafine, mopafinema maka zama me'neana Ra Anumzana tamagri Anumzamofo zanke me'ne. **15** Hagi Ra Anumzana tamagri Anumzamo'a mika ama mopafi vahepintira zamagehe'ina tusiza huno avesi nezmanteno, huhampri zamantege'za mani'neza kaseramantagetma menina manita neaze. **16** E'ina hu'negu ke ontahi tamavutamavara atreta tamagu'a rukrahe huta kea antahihi. **17** Na'ankure Ra Anumzana tamagri Anumzamo'a mika havi anumzantmimofo zamagatere'nea Anumzane mani'neno, ra vahetamimofona Ra zimi mani'ne. Agra Ra Anumzana tusi'a hihamu'ane vahe'mo'za koro huntega Anumzamo, maka vahera mago avamenteke zamaza nehia Ne' vahe'mo'a mago'a zanteti masave huno azeri savari huga Anumza omani'ne. **18** Agra megusa mofavreramine, kento a'hanea zamahokeno zamaza nehuno, kraga'ma enemaniza vahe'mofona ne'zane kukenanena

nezamie. **19** E'ina hu'negu tamagranema emani'naza kraga
vahera tamavesi zamanteho, na'ankure kotera tamagranena
Isipia ana huta kraga vahe mani'nazane. **20** Ra Anumzana
tamagri Anumzamofonke korora hunentetma, agorga'a mani'neta,
Agri monora hunentetma, azerikona hu'neta Agri agifinke
huvempa kea hiho. **21** Agrike ra agia amigahaze. Agrake
tamagri Anumzankino, hihamu'ane zama nehuno, ranra kaguva
zantmima hu'neana tamagra ke'naze. **22** Tamagehe'zama Isipima
urami'nazana, 70'a vahe vu'nazanagi Ra Anumzana tamagri
Anumzamo'a, monafi hanafitaminkna huno tamazeri rama'a
higeta, menia tusi'a vahe'krerafa fore huta mani'naze.

11 Hagi Ra Anumzana tamagri Anumzamofona tamavesi
nenteta kasege'ane, tra ke'anena amage antetma avariraho.
2 Hagi tamagesa antahihi, menina ama nanekea ke'za
antahi'za osu'naza mofavretamigura nosuanki, maka zama
Ra Anumzana tamagri Anumzamo'ma himamu hankave'ane
azanutu'ma tazeri fatgoma hia zama ke'naza vahe'motagu
nehue. **3** Hagi Isipi kini ne' Feronte'ene maka Isipi mopafinema
erifore'ma hu'nea avame'zane kaguvezanena tamagra ke'naze.
4 Hagi Isipi sondia vahe'mo'za hosi afu'zmine, karisi zaminema
eri'za tamavariri'za neazageno, Ra Anumzamo'ma Koranke
hagerimpi zamahe fanane hu'nea zana tamagra'a ko ke'naze.
5 Hagi ka'ma kokampima kegava huramanteno tamavreno
amare'ma e'neana ko ke'naze. **6** Hagi Rubeni nagapinti Eliapu
mofavrerare Datanine Abiramukiznima, Ra Anumzamo'ma
mopama eri aka'ma higeno maka a' mofavreznine fenoznine
seli nozninema mopa agu'ama fre'naza zana tamagra'a ko
ke'naze. **7** Hianagi tamagra'a tamavufinti, Ra Anumzamo'ma
hihamu'ane zama erifore hu'neazana ke'naze. **8** E'ina hu'negu

menima avaririhō hu'nama neramamua kasegea kegava nehuta,
avariri so'e hiho. E'ina hanutma tamagra hankavetita anama
omerinaku'ma nehaza mopa omerigahaze. **9** Kema antahitama
avaririsuta, amirimo'ene tumerimo'enema avite'nea mopama
Ra Anumzamo'ma tamagehe'ine, tamagri'enema tamigahue
huno'ma huhampri tamante'nea mopa omeritma za'zate manitma
vugahaze. **10** Na'ankure omeri santiharenaku'ma unefraza
mopa Isipi mopama atretma e'naza mopagna osu'neankita,
hozama antesaza hozafina ne'zamo'ma hagenogura tina afita
ontagigahaze. **11** Hianagi menima ufre'zama nehaza mopafina,
agonaramine aguporaminena me'negeno, kora runente. **12**
Hagi e'i ana mopa Ra Anumzana tamagri Anumzamo'a kafuma
agafa huno kafuma vagamareno'ma hania knafina, avunteno
kegava nehia mopa me'ne. **13** Hagi menima neramua kasegema
avariri so'e nehuta, Ra Anumzana tamagri Anumzamofoma
tamagu tamenteti'ene huta avesinteta mono'ma huntesageno'a,
14 Agra mopatamifina ko'ma ru knarera atresigeno kora rugahie.
Hagi ese' ko'ene henka kora nerinketma, witine wainine olivi
masavetaminena eri nompina antegahaze. **15** Ana nehuno
mopatamifina zagagafamo'zama nesaza trazana tami'nigeno
hage'za rama'a nehanageta, tamagra ne'zana neramu hugahaze.
16 Hagi antahintahitamimo'ma savari'ma hanigetama Ra
Anumzama atreta havi anumzama nevaririta mono hunte'zankura
kva hiho. **17** Hagi ana'ma hanuta Ra Anumzamofona azeri arimpa
ahesageno, mona kahana eriginkeno, kora orina, ne'zamo'a
fanane hinketa, Ra Anumzamo'ma knare mopama tami'zama
nehia mopafina ame huta frigahaze. **18** E'ina hu'negu amama
neramasmua nanekea antahintahi tamifine tamagu'afine eri
antenkeno meno. Ana nanekea tamazante'ene kokovite'ene

anakinte'nenkeno avame'za me'neno tamagemakani zankura,
mika zupa huramagesa huvava hino. **19** Mofavretmimofona
ama ana nanekea rempi huzmiho. Hagi nontmifi manisarero,
kama vano hanafino, mase'narerero, otisarera ama nanekea huge
antahige hiho. **20** Ama ana nanekea no kaha zafare'ene kuma
keginamofo kafante'ene krenteho. **21** E'i ana'ma hanageno'a,
Ra Anumzamo'ma tamagehe'ima huvempa huno zamigahue
huno'ma hu'nea mopafina, tamagrane mofavre nagataminena
za'za kna manitma vugahaze. Monamo'ma mesga huno
mopa agofetu meaza hutma manigahaze. **22** Hagi nagrama
menima avaririhoma hu'na neramua kasegema tamage hutma
nevariritma, Ra Anumzana tamagri Anumzamofoma avesinenteta,
avu'avazama'a nevaririta, Agri'ma azeri hankavematisageno'a,
23 Ra Anumzamo'a ana mopafi vahera zamahe natitresigetma,
tamagri'ma tamagatere'za rama'a hu'za tusi'a hankave vahetami
mani'naza vahe'mofo mopa omerigahaze. **24** Hagi maka
kumapima tamagiama rentesaza mopamo'a, tamagri mopa
megahie. Sauti kaziga ka'ma mopareti vuno noti kaziga Lebanon
agonare uhanatigahie. Hagi zage hanati kaziga Yufretisi tinteti
vuno, zage fre kaziga Mediterenia hagerinte uhanatigahie. **25** Hagi
mago vahe'mo'e huno hankavetino hara hu tamagateoregahze.
Na'ankure Ra Anumzana tamagri Anumzamo'a huvempama
hu'nea kante anteno mika vahera kama vanarega zamazeri koro
hinke'za, tamagrikura tusi koro hugahaze. **26** Hagi keho, menina
asomu'ma eri kane, sifnafima mani kane tamaveri nehue. **27**
Hagi tamagrama Ra Anumzana tamagri Anumzamofa kasegema
menima neramasamua kema avaririsuta, asomu erigahaze.
28 Hianagi Anumzamofo kema menima neramasamua kema
atreta havifima nevuta, keta antahita osu'nesaza havi anumzama

avaririsuta, kazusifi manigahaze. **29** Hagi Ra Anumzana tamagri Anumzamo'ma tamavreno ana mopafima ufrena, ana mopama omenerisuta, Gerisimi agonareti asomu kea huama nehutma, Ebali agonareti kazusi hunte kea huama hiho. **30** (E'ina agonararena Jodani timofo zage fre kaziga Araba, Kenani vahe'ma nemaniza mopamofo mago kaziga asoparega Gilgali Moreama me'nea oki zafaramimofo tava'onte me'na'e.) **31** Hagi kofa'a knafi Jodani tina takaheta, Ra Anumzana tamagri Anumzamo'ma tami'nea mopa omeriku nevaze. Hagi ana mopa omerita umanisuta, **32** amama neramasamua kasegene tra kenena avariri so'e nehutma, kegava hiho.

12 Ra Anumzana tamagehe'mofo Anumzamo'ma tami'nea mopafima umanisuta, ama'na kasegene trakenena avariri so'e hiho. **2** Hagi e'i ana mopafima mani'naza vahe'ma zamahe natitre'nuta, maka havi anumzama mono'ma hunentaza kuma'zmima, ra agonaramimpine, neone agonaramimpine zafarigane, me'enianana tagana taganu vazita eri haviza hutreho. **3** Hagi havi anumzante'ma Kresramanama vu itaramina tagana vazinetreta, mono'ma hunentaza haveramina rufuzafupenetreta, vimago zafama retrurente'ne'za Asera havi anumzama mono'ma hunentaza zafaramina antagitma tevefi kreho. Maka havi anumzantmimofo amema'ama zafare'ma antre'za tro'ma hunte'nesaza zana antagita kre fanane hinkeno, zamagi'a omneno. **4** Zamagrama nehazaza hutma, Ra Anumzamofona tamagra monora huontegahaze. **5** Hianagi tamagra ama nanekea erita tamagu'are'ene antahintahire'enena nenteta, kokovite'ene tamazante'ene anakinte'neta ama ana nanekegura tamagera okaniho. **6** E'ina kumateke tevefima kre fanane hu ofane, kresramna vu ofane, 10ni'a kevufinti

mago kevuma ami ofane (tait), ruga'a ofane, huvempahu ofane, avesite'ma ami ofane, bulimakaone sipisipi afutamimpinti'ma ese'ma kasentesia anenta'ma ami ofa avretma egahaze. 7 Hagi e'i ana kumateke tamagrane a'mofavrenena Ra Anumzana tamagri Anumzamofo avure ne'zana ome kretma nenetma, maka zama asomu huno eri'ampoma reramante'nea zankura musena hugahaze. 8 Hagi menima tamagra tamavesite mono'ma nehazaza huta, monora osugahaze. 9 Na'ankure manigasahu kuma'ma Ra Anumzana tamagri Anumzamo'ma erisantiharesaze huno'ma hu'nea mopafina zahufa uofre'naze. 10 Hianagi Jodani tina takahetma Ra Anumzana tamagri Anumzamo'ma erisantihareshogu'ma neramamia mopafina umanigahaze. Hagi ana mopafina Ra Anumzamo'a tamazeri fruhina hara osutma fru hutma umanigahaze. 11 Hagi Ra Anumzana tamagri Anumzamo'ma mono'ma huntehogu'ma huhampri'enenia kumate, ofama ome hihoma hu'nere tevefi kre fananehu ofane, kresramna vu ofane, 10ni'a kevufinti mago kevuma ami ofane (tait), tamagra tamavesite ami'ofane, mago'a zama huvempama huno hu ofa eritma ome huntaho. 12 Ana nehutma tamagrane, a'mofavretamine, ve eri'za vahetamine, a' eri'za vahetaminena, Ra Anumzana tamagri Anumzamofo avurera ne'zana nenetma musena nehutma monora huntegahaze. Hagi tamagri'enema mani'naza Livae nagara tamagerakani ozmanteho, na'ankure zamagra mago mopa e'ori'naze. 13 Hagi kva hu'netma kresramna vu ofama hanazana, tamagra'a tamavesitera rufi rufina kresramna oviho. 14 Hianagi tamagri amu'nompinti'ma mago naga nofi'mofo mopafima mono hunantegahaze huno'ma Ra Anumzamo'ma hania kumateke'za, nagrama tama'smi'noa kante avaririta kresramna vu ofa nehutma, maka'zama hugahazema hu'noaza

hutma monora huntegahaze. **15** Hianagi Ra Anumzana tamagri Anumzamo'ma asomu'ma huramante'nia kante ina kumatero afu'ma ahegita nenaku'ma hanutma ahegitama negahaze. Ana afu'ma ahegitama nesazana, afi zagakafama kezeline dianema nehzaza hutma agruma osu vahe'mo'ene agruma hu vahe'mo'enena amane ana ne'zana negahaze. **16** Hianagi korama'a onetfa nehuta, tima tagitreankna huta mopafi tagitreho. **17** Hianagi 10ni'a kevufinti mago kevuma ami ofama hunaku'ma witio, wainio, olivi masaveno, bulimakaone sipisipi afutamimo'ma ese'ma kasente'nia afu anenta'ma ofama eritma esazano, tamagrati tamavesite aminaku eritma esaza ofo, mago'a zante'ma huvempama huta ami ofa, ruga'a ofanema eritma esuta tamagrama nemaniza kumapina onetfa hugahaze. **18** Hianagi Ra Anumzana tamagri Anumzamo'ma hunte'ne'nia kumateke negahaze. Ana ne'zama nenetma musema hanazana tamagrane, a'mofavretamine, ve eri'za vahetamine, a' eri'za vahetamine, tamagranema nemaniza Livae naga'enena, Ra Anumzana tamagri Anumzamofo avurera ne'zana nenetma, musena hutma monora huntegahaze. **19** Hagi ana mopatamifima manita nevanutma, Livae nagara tamagera kaniozamanteta zamaza hih. **20** Hagi henkama Ra Anumzana tamagri Anumzamo'ma huvempama huramante'nea kante anteno, mopatmimofo agema'ama eri rama hania knafima, afuku'ma tamanankema hanigeta, afu negahune hanutma tamavemasi'nia knazupa amne negahaze. **21** Hagi Ra Anumzana tamagri Anumzamo'ma mono hunantegahaze hunte'nigeno me'ne'nia kuma'mo'ma afete'ma me'neniana, nagrama huramante'noa kante anteta Ra Anumzamo'ma tamami'nea bulimakao afutamifintiro, sipisipi afutamifintira kumatamifina amne ahetma negahaze. **22**

Hagi ana afu'ma ahetma nesazana, afi zagakafama kezeline
dianema nehzaza hutma, agruma osu vahe'motane agrumahu
vahe'motanena amne ana ne'zana negahaze. **23** Hianagi
korama'a me'ne'nia afura onetfa hiho, na'ankure koranpina
asimu me'neankitma, korama'a onegahaze. **24** Hagi korama'a
onegosazanki tima hiaza hutma mopafi tagitregahaze. **25**
Anama ahegisaza afu'mofo korama one'hageno'a, maka zama
hanazazamo'a tamagrite'ene mofavretmire'enena knare hugahie.
Na'ankure e'i Ra Anumzamo'ma musema nehia avu'avaza
hugahaze. **26** Hianagi ruotage'ma hu'nesia zantamine, Ra
Anumzamofo huvempa hunka aminakurema hu'ne'nana ofa,
Agrama hunte'nenia kumate eritma viho. **27** Hagi tevefima
kre fanenehu ofa ome hanazana, Ra Anumzana tamagri
Anumzamofonte kresramna vu itarera, avufgane korama'anena
eritma viho. Hagi mago'a Kresramanama vu afu'mofo korama'a,
Ra Anumzana tamagri Anumzamofo kresramna vu itamofo
asoparega taginetretama, ame'a negahaze. **28** Amama hihoma
hu'na neramasma nanekea kva hu'netma avariri so'e nehinkeno,
maka zama hanaza zamo'a tamagrite'ene mofavretmire'enena
knare huno vugahie. Na'ankure e'ina'ma hanazana Ra
Anumzana tamagri Anumzamofo avurera knare huno fatgo
hu'nesia avu'avaza hugahaze. **29** Ra Anumzana tamagri
Anumzamo'ma vugota huno ana mopafima mani'naza vahe'ma
zamahe fananema hanigeta, mopazmima eritma manisutma,
30 tamazeri savari'ma hanigetma zamagri zamavu'zamava
nezmavaririta, anumza zamigu'ma mono hunte'za nehunanki
inankna hu'za monora hunentaze hutama hu'zankura kva
hiho. **31** Hagi zamagrama havi anumza zamire'ma mono'ma
hunentazanknara huta Ra Anumzana tamagri Anumzamofona

monora huontegahaze. Na'ankure Ra Anumzamo'ma ago'mateno avesrama hunentea avu'ava hu'za monora nehu'za, havi anumza zimirera mofavrezmia tevefina ahe'za krerasage'za monora hunentaze. 32 Hagi maka avaririhoma hu'na tamasmua nanekea kegava hu'netma avaririhom. Hagi ana nanekerera agema'a aseta rukamrege eri tregera osiho.

13 Hagi kasanampa vahero, ava'nama ke vahe'ma amu'notmifima fore huno henkama fore'ma hania avame'zanku tamasamige, kaguvazanku tamasamige hanigeno, 2 ana avame'zano kaguvazama efore hina, ana ava'nama ke vahe'mo'zama tamagrama antahita keta osu'ne'naza anumzanku'ma enketa mono huntamneno hanagetma, 3 ana kasanampa vahe keo, ava'na vahe'mofo ava'na kea ontahiho. Na'ankure Ra Anumzana tamagri Anumzamo'a tumotamireti'ene tamagu'areti huta avesintegahazo, reramaheno kegahie. 4 Ra Anumzana tamagri Anumzamofona amage'nentetma, koro huntetma agorga'a nemanitma, kasege'a nevariritma, ke'a nentahitma monora hunentetma, Agrira azeri kona hoho. 5 Hianagi e'i ana kasanampa vahero ava'na kema nehaza vahe'mo'zama tamazeri savari'ma hanaza vahera, zamahe friho. Na'ankure Ra Anumzana tamagri Anumzamo'ma lsipima kazokazo eri'za e'neritma mani'nazageno tamavreno atirami'nea Anumzana ha'renente'za, Agrama avaririhoma hu'nea kefintira tamazeri rukrahe hu'za havigante tamavrente'za nehaze. E'ina hu'negu kefozana amu'ho tamifintira eritretma agru hoho. 6 Hagi negafu'o, neka'amo'o, mofaka'amo'o, kavesinente'hana a'ka'amo'o, tavaonte roneka'amo oku'ama eme kasamino, egeta ru anumzama kagri negageho'ma keno antahino osu'nenia anumzante'ma mono ome huntamneno hu'za

hanagenka, 7 e'i ana anumzantmina mago'a tavaontamire'ma manigagi'naza vahe'tmimofo anumzantminku hugahaze. Hagi mago'a anumzantmina afete moparega anumzantminku mono huzmante'nune hu'za hugahaze. 8 Hianagi kezmia ontahiho. Tamasunkura huzamanteta zamazeri frakinezmanteta zamagura ovaziho. 9 Hianagi tamagra zamahe friho. Ina a'mo'o ne'mo'ma tamavazuma hunaku'ma hanimofona tamagra ese havenknona zmahetenke'za, mago'a vahe'mo'za henka eme zamaheho. 10 E'ina hu'negu ana vahetmina havenknonu zamahe frinke'za friho. Na'ankure Isipima kazokazo eri'za e'nerita mani'nazageno tamavreno atiramino'ma e'nea Ra Anumzana tamagri Anumzamofontetira tamavre havifi netre. 11 E'ina hinkeno mago'a Israeli vahe'mo'zama ana nanekema antahisu'za, koro nehu'za mago'enena anahu kefo avu'ava zana amu'nontamifina osugahaze. 12 Hagi Ra Anumzana tamagri Anumzamo'ma neramia kumatamimpi umani'neta antahi'nazana, mago kea anage huta antahigahaze. 13 Hagi mago'a hazenke vahe'mo'za tamagri amu'nompinti oti'za ruga'a kumapi vu'za, enketa vuta ru anumzantami keta antahitama osu'nesaza anumzante monora ome huzmantamneno hu'za antahintahitamia zamazeri savari hugahaze. 14 Hagi e'inama hanaza kema antahisuta, havigefi tamagefi tamagra'a hakreta antahi so'e nehuta, kasri avu'avazama tamagema hu'ne'naza vahe'ma haketa erifore'ma hanuta, 15 ana kumapi vahe'tamine bulimakao afutaminena, kazinteti maka zamahe fri vagareho. 16 Maka ana kumapinti'ma erisaza zantamina ana kuma amu'nompi eritru hutetma, Ra Anumzana tamagri Anumzamofontega ofagna hutma ana kuma'enena krefanane hinkeno, mago'anena eri fatgo hu'za ana kumapina omaniho. 17

Hagi krefanane hihoma hu'nenia zana magore hutma e'oriho. E'ina hutama ana zantmima e'orisageno'a, Ra Anumzamo'a rimpa aheoramantegosianki, asunku huramantegahie. Agra asunku huramanteno, tamagehe'ima huhampri zamante'nea kante tamazeri ra hina, rama'a vahekrerfa fore hutma manigahaze. 18 Hagi Agra e'inama haniana tamagrama menima neramasma kema antahitama Ra Anumzana tamagri Anumzamofo kasegema nevariritma, Agri avure'ma fatgo hu'nesia avu'avazama hanageno'a, e'inhura hugahie.

14 Hagi Israeli vahe'motma tamagra Ra Anumzana tamagri Anumzamofo mofavre mani'nazagu, fri'nesia vahetera tamasunkura hutma tamavufgane tama senireti tinke tamazoka'enena taga osho. 2 Na'ankure Ra Anumzana tamagri Anumzamo'a ama mopafi vahe pintira tamazeri ruotge huno, Agri vahe manisaze huno higeta maka ama mopafima mani'naza vahe pintira tamagra Agri ruotge vahe mani'naze. 3 Kefoza huno agruma osu'nesia zagagafa oneho. 4 Hagi ama'na zagagafa negahaze, bulimakaoma, sipisipima, memema, 5 diama, gazelima, robakie nehaza diama, afi' memema, ibeksie nehaza afu'ene diagna afuku antiropue nehaza afu'ene agonafima nemania sipisipi afu'enena amne negahaze. 6 Hagi agigomo'ma tarefima hatna hu'nesigeno, ne'zama azanku'afinti'ma revrino nenesia zagagafane, amne negahaze. 7 Hianagi agigomo tarefi hatna hu'nesigeno azanku'afinti revrino'ma nonesia zaga, ete azanku'afinti revrino nenesia zagama agigomo hatna osu'nesiana onetfa hiho. Hagi kemorine, rebitine, havefima nemania varenena onetfa hiho. Na'ankure zamagra azanku'zmia huzamante nege'za revriza nenazanagi, tarefina zamagigomo'za hatnara osu'heanki'za agrua osu'naze. 8 Hagi afura magore

hutma oneho, na'ankure zamagigomo'a tarefi atne'neanagi,
azanku'a huonte'neankino agrua osu'ne. Avufga'a onetfa
nehutma, fri'nesia afu'mofo avufgarera avakora osih! 9
Hagi timpima nemanisia zagaramimpintira, iri'ama meno,
agekona'ama me'nesia zagaramina amne negahaze. 10
Hianagi iri'ane ageko'nanema omne'nesia zagaramina agru
osu'neanki, onetfa hiho. 11 Agruma hu'nea namaramina amne
negahaze. 12 Hianagi agru osu namaramima onesazana,
kazintumpaki, frizagma nenea tumpanki, osa tumpanki, 13
kenage'ma hare'za vanoma nehaza maka namaraminki, 14
haninke namaramima ra zamageru'ma neraza nama zagagi,
15 mananinkna za'za arenane nama zagagi, rankrafama
nehia komutonki, hagerinkenaf nemaniza efeke namazagagi,
hagerinkena tumpanki, 16 neonse'ene ranra komutone, efeke
maniravene, 17 hagerimpinti'ma nozamema aheno nenea ra
agi'ene nama zagagi, hagerimpi hareno vano nehia tumpaki,
hagerimpi ruga'a tumparaminki, 18 za'za agia hunte namane,
afi patone, tamprataminena oneho. 19 Hagi zamageko'na
me'nesia neonse zagaramina zamasaguregati'ma regrarohe'za
vanoma nehaza zaga maka oneho. 20 Hianagi agruma
hu'nesia namaramina maka amne negahaze. 21 Hagi agra'ama
fri'nesia zagaramina oneho. Hianagi tamagranema eman
vahera amne zamige, ru vahetera zagonera zamige hugahaze.
Na'ankure tamagra Ra Anumzana tamagri Anumzamofo ruotge
vah'e' mani'naze. Hagi meme anentara nerera amirimpina
onkregahaze. 22 Mika kafune kafunema hozatamifinti'ma
hamare'naza ne'zana, 10ni'a kevufintira refko hutma mago kevua
Anumzamofo amigahaze. 23 Hagi anama refkoma hanaza
kevua, Anumzamo'ma mono hunantegahazema huno hu'ne'nia

kumateke eritma egahaze. E'ina kevuma erita esaza witima, wainima, olivi masavema ese'ma kasentesia bulimakaone, sipisipi anenta'ene, avretma eta Ra Anumzana tamagri Anumzamofo avuga Agrama huhamprinte'nea kumapi, ana ne'zana neneta koro'ma hunteno agorga'ama hakaregnama manizana rempi hugahaze. **24** Hagi Ra Anumzamo'ma mono hunanteho huno hunte'ne'nia kuma'ma afete'ma me'nena, Ra Anumzana tamagri Anumzamo'ma asomu huramante'nigeno, 10ni'a kevuma hanifinti'ma mago kevuma refakoma hanaza zamo'ma rama'a hina erita vuga'ma osanutma, **25** ana zantamina zagore atrenkeno mizasesagetma, ana zagoa eritma Ra Anumzamo'ma mono hunanteho huno'ma hu'ne'nia kumate vugahaze. **26** Hagi mono hunanteho huno'ma hu'ne'nia kumate'ma ana zagoma eritma uhanati'nutma, ana kumapima zagore'ma atre'nesaza bulimakaono, sipisipi afuro, wainio, akatinena tamagra tamavesite mizasetma maka nagataminena Ra Anumzamofo avuga kreta neneta musena hugahaze. **27** Anama nehanutma tamagranema mani'naza Livae nagara mopazimia omneno nozamine mago'a zazmia omne'negu, tamagera akani ozmanteho. **28** Hagi maka namba 3 kafumofo atumparega ana kafufima 10ni'a kevuma eritruma hanaza zana maka eritma eta tavaontamire'ma me'nenia rankumate emeritru hugahaze. **29** Hagi Livae naga'ra mopazmi omne nagaki, kraka vahe'tmima tamagranema nemanisaza vaheki, megusa mofavreraminki, kento a'nema kumatamifima nemanisamo'za emeri atru hu'za ana ne'zana nezamamu hanageno, Ra Anumzana tamagri Anumzamo'a maka eri'zama erisaza zana asomu huramantegahie.

15 Hagi mago vahe'mo'ma mago'a zama tamagripinti'ma nofi'ma hu'nesaza zana 7ni kafurera, maka ana nofi'ma hu'nesia

zana atrentegahaze. 2 Hagi kagripinti'ma mago'mo'ma nofi'ma hu'nesia zama atrentesanana amana hugahane. Tamagri vahe'mo'zama tagripinti'ma zagoma nofi hu'za eri'nesaza vahera, atrenezmanetma mago'enena vuta ome zamantahi onkegahaze. Na'ankure Ra Anumzamo nofi'ma hu'naza zana ko katuferamante'ne. 3 Hagi ru vahe'mo'ma tamagripinti'ma nofi'ma hu'nesiana amne ome kehuta zagotamia erigahazanagi, tamagri vahe'ma Israeli vahe'mo'zama nofi'ma hu'nesageta atrezamantegahaze. 4 Hianagi amu'notamifina magore huno amunte omne vahera omanigahie. Na'ankure Ra Anumzamo'a mopama erisantiharegahaze huno'ma neramia mopafina asomu huramantegahie. 5 Hanki Ra Anumzana tamagri Anumzamofo kasegema menima neramamua kasegema kegavahu so'e hutma tamagrama avaririsuta, e'ina asomura erigahaze. 6 Hagi Agra huvempama huramante'nea kante anteno, Ra Anumzana tamagri Anumzamo'a asomu huramante'nigeno, vahe'mo'za tamagripinti zagoanofira eme hanageta, tamagra zamagripintira magore huta zagoanofira osugahaze. Hianagi tamagrira mago'a vahe'mo'za kegava huoramantesageta, tamagrake'za kegava zamagrira huzmantegahaze. 7 Hagi Ra Anumzana tamagri Anumzamo'ma tami'nia mopafima umani'ne'nageno, kumatmifima mago neramafu'ma amunte'ma omane'nesiana, tamage'na humitma zamage henkamia otreta zamaza hiho. 8 Hianagi tamazana reonamagitama, nazanoma atupa'ma hu'nesaza zana zamaza hiho. 9 Hagi 7ni kafumo hago atupa nehitma, amunte omne vahe'mo'ma tamagripinti'ma nofi'ma hunaku'ma esia vahe'ma zagoma ozamizankura kva hiho. Na'ankure amunte'ma omne vahe'mo'ma Ra Anumzamofontegama krafama hanagetma, tamagra kumi hugahaze. 10 E'ina hu'negu zamunte

omne vahe'mo'za atupa'ma hu'nesaza zana tamagu'areti muse
nehutma zamiho. Na'ankure Ra Anumzana tamagri Anumzamo'a
maka zama hanaza zana asomu huneramanteno, eri knare
huramantegahie. **11** Na'ankure ana mopafina zamunte omne
vahera manigahaze. E'ina hu'negu nagra ama nanekea hu'na,
tamazana reonamagitma, rusuteta mopatamifima mani'nesaza
zamunte omne vahera zamaza hiho. **12** Hagi tamagripinti mago
Hibru vemo'o a'mo'ma eno'ma agra'a avufgama zagore'ma
atresigetma kazokazo eri'za vahe'ma mizase'nesutma, 6si'a
kafufinke kazokazo eri'za vahetamia manigahazanki, 7ni kafurera
zamatrenke'za fru hu'za amne vugahaze. **13** Hagi ana kazokazo
eri'za vahe'ma fru huno mani'nogu huntesankeno vaniana,
amne aza avapakora atresankeno ovugahie. **14** Hagi Ra
Anumzana tamagri Anumzamo'ma asomu'ma huramante'nea
zampintira, sipisipi afu'ene, witine, waininena refko hutma
nemitma huntegahaze. **15** Tamagrama Isipi mopafima kazokazo
eri'za vahe'ma mani'nazageno, Ra Anumzana tamagri Anumzamo
tamavreno atirami'nea zankura tamagera okaniho. E'ina agafare
ama nanekea neramasamue. **16** Hianagi kazokazo eri'za
vahekamo'ma kavesi neganteno, katre'na ovugosue huno'ma
hanigeta, **17** ana kazokazo eri'za veo, aro avreta fegi'a kuma
kafante omenteta, agesama rerapoma neraza azotanu agesa
reraponesageno tamagri kazokazo eri'za vahe mani vava
hugahie. **18** Hagi kazokazo eri'za vaheka'a zamatrenanke'za
vanaza zankura krimpa havizana osuo. Na'ankure zagore'ma
eri'zama e'neriza vahera rama'a zago miza senezmantazanagi,
eramita osi'a zago 6si'a kafufina miza sente'nane. E'ina hu'negu
atresankeno'ma vanageno'a, Ra Anumzana tamagri Anumzamo'a
maka'zama hanafina asomu huramantegahie. **19** Hagi bulimakao

afu'mo'o sipisipi afu'mo'o meme afu'tmimo'ma ve zamagonesa anentama antenagetma, Ra Anumzana tamagri Anumzamofo su'a zamazeri ante ruotge hinkeno meno. Hagi bulimakamofo ve agonesa anenta'a eri'zana omitma, ve agonesa sipisipi anenta'mofo azokara ohareho. 20 Hagi maka kafurera ese anentara avretma, Ra Anumzamo'ma hunte'nia kumate vutma, kagrane maka nagaka'anena ana afura ome ahegitama Ra Anumzana tamagri Anumzamofo avuga negahaze. 21 Hianagi ana agonesa ve afu'mofo agiazamo haviza huge, avu asuhuge avufgamo'ma haviza huno afuhe afahe hu'nesia afura Ra Anumzana tamagri Anumzamofontega ofa huonteho. 22 Hagi ana afura tamagra'a kumatmifi ahegitama negahaze. Anama ahegisazana gezeline dia afu'ma nehzaza hu'za ahegisageno, agruma hu vahe'ene agruma osu vahe'mo'zanena amne negahaze. 23 Hagi anama hanaza afu'mofo korama'a onetfa nehutma, mopafi tima hiaza hutma tagitreho.

16 Hagi Abibi ikantera Ra Anumzana tamagri Anumzamo'ma ontamahe tamagatere'nea zanku antahimita ne'zana kreta nenetma musena huntaho. Na'ankure e'i ana ikante Isipitira Ra Anumzana tamagri Anumzamo'a kenagera tamavreno atirami'ne. 2 Hagi otamaheno tamagatere'nea knagu'ma antahimitama Ra Anumzana tamagri Anumzamofontega ofa hunaku'ma eritma esaza bulimakao afuro, sipisipi afuro, meme afuro avretma Agrama huno mono hunantegahazema hu'nesia kumate ome kresramna vuntegahaze. 3 Hagi ana ne'zama nesazana zisti onte bretine negahaze. Hagi Isipima knazampi mani'nazageno tamavreno atirami'nea zanku antahimitma 7ni'a knafi zisti onte bretia kreta nenetma tamagesa antahimigahaze. 4 Na'ankure ana 7ni'a knafina nontamifina zistia omnetfa hino. Hagi ese

knamofo kinagama ahegisaza afu'mo'a me'nenkeno koratuno
masa osino. 5 Hagi ontamaheno tmagatere'nea zanku'ma
antahimi ofama hanazana, Ra Anumzana tamagri Anumzamo'ma
tami'nigeta manisaza kumapina kresramna oviho. 6 Hianagi
Ra Anumzana tamagri Anumzamo'ma huno, Nagri'ma mono
hunantegahaze hu'nea kumateke ontamaheno tamagatere'nea
zanku'ma antahimino hu ofa, Isipima atretma e'naza knare
zagema ufresigetma kresramna viho. 7 Hagi ana ne'zana Ra
Anumzana tamagri Anumzamo'ma hunte'nia kumate kretma
nenetma, nanterana nontimirega viho. 8 Zisti onte bretia 6si'a
knafi negahaze, hagi 7ni knarera atru hutma Ra Anumzana
tamagri Anumzamofona monora huntegahaze. E'i ana knarera
mago eri'zana e'oriho. 9 Hagi ese witima agafa hutama
hamare'naza knareti agafa huta 7ni'a sonta hamprigahaze.
10 Ra Anumzana tamagri Anumzamofoma ne'zama kreno
neneno musema hunte sontaramimpina, ne'zana kreta neneta
musena hiho. Hagi ana'ma nehanuta tamagra tamavesite'ma
ami ofa Ra Anumzana tamagri Anumzamo'ma asomu'ma
huramante'ne'nia avamente eme amigahaze. 11 Hagi tamagrane
ne'mofavretamine mofa'netamine, ve kazokazo eri'za vahetamine,
a kazokazo eri'za vahetamine, tamagranema nemaniza Livae
vahetamine, ru vahe'ma tamagranema enemaniza vahetamine,
megusa mofavretamine, kento a'nenena Ra Anumzana tamagri
Anumzamo'ma mono hunantegahazema hunte'nenia kumate
ana ne'zana kreta neneta musena huntegahaze. 12 Hagi ko'ma
Isipima kazokazo eri'za vahe'ma mani'naza zanku tamagesa
nentahita ama trakeramina kegava huta avariri so'e hiho. 13 Hagi
seli nompima manita e'naza zamofo antahimita musenkasema
hanazana, mika'a hozafi ne'zama hamare vaganereta, krepima

eritru huta regatati huvagaresuta, 7ni'a knafi ne'zana kreta neneta
musena hugahaze. **14** Maka ne' mofavretamine mofanetamine,
ve kazokazo eri'za vahe'timine, a' kazokazo eri'za vahe'tamine,
Livae naga'ene, ruregati'ma tamagrane enemaniza vahe'ene,
megusa mofavreramine, kento a'nemo'zanena ne'zana neneta,
musena hugahaze. **15** Hagi Agrama hunte'ne'nia kumate
7ni'a knafi ne'zana kretma neneta, Ra Anumzana tamagri
Anumzamofona monora huntegahaze. Na'ankure Ra Anumzana
tamagri Anumzamo'a hozatamine, maka'zama hanazana asomu
huntesigeno knare hanigeta, makamota muse hugahaze. **16** Mika
kafufina 3'a zupa Ra Anumzana tamagri Anumzamo'ma mono
hunantegahaze huno'ma huhamprinte'nia kumate mika Israeli
vene'nemo'za ome atru hu'za monora hunteho. Ana 3'a zupama
atruma hanaza atrumofo zamagi'a zisti onte bretima neno
musema hu knagi, magora ne'zama hamareno musema hu knagi,
seli nompima manitma e'naza zamofo antahimita musenkasema
hanazana knae. Hagi ana knafina, Ra Anumzamofo avurera
mago'mo'e huno aza avapakora omeno. **17** Mago mago
vahe'mo'a Ra Anumzamo'ma asomu'ma hute'nenifintira, agrama
amiga hania avamente, musezana erino Ra Anumzana tamagri
Anumzamofona eme amigahie. **18** Ra Anumzana tamagri
Anumzamo tamisia mopafima umanisuta, mika rankumatera
mago mago naga nofimo'a nanekema refko'ma hu kva vahe'ene
ugagota kva vahetima zamazeri otitere hinke'za mani'ne'za,
fatgo hu'za mago avamenteke'za vahe'mofo keaga refko hih.
19 Hagi keagama refko'ma hanuta, fatgo huta tarega kaziga
refko hih. Mago'mo'ma agritega antenka keaga refko huogu'ma
masavema huno mago'a zama eme kami'niana, ana zana
e'orio. Na'ankure mago'azama hunte'nogu'ma masavema huno

ami'zamo'a, knare antahi'zana eritrenkeno haviza huno keaga refko hugahie. **20** Maka knafima fatgo huta keagama refkoma hanuta, Ra Anumzana tamagri Anumzamo'ma tami'nia mopa erisantihareta manigahaze. **21** Hagi Ra Anumzana tamagri Anumzamofo kresramna vu itamofo asoparega, Asera havi anumzamofo amema'a antre'za tro hunte zafa retru reontheo. **22** Hagi mono hunte'zane huta havea retru oreho. Na'ankure Ra Anumzana tamagri Anumzamo'a e'i anahu zankura tusiza huno agoteno avesra nehia Anumza mani'ne.

17 Hagi Ra Anumzana tamagri Anumzamofontegama kresramna vuntesazana, kri e'ori afuhe afahe osu'nesia bulimakaono, sipisipio, aheta kresramna vuontheo. Na'ankure kri erino afuhe afuhe'ma hu bulimakaono, sipisipima kresramnama vuntezankura Agrira agoteno avesra nehie. **2** Hagi Ra Anumzana tamagri Anumzamo'ma tamisia rankumapima amu'nontamifinti mago vemo'o, a'mo'ma kefo avu'ava'ma huno, Ra Anumzamo'enema huhagerafi huvempa kema runetagreno, **3** mono huontheoma hu'ne'nua zante'ma vuno havi anumzantero, zagerero, ikantero, monafi hanafitamintero, mono ome huntenia kema, **4** mago'a vahe'mo'ma eme kasami'nigenka, hakenka antahigeso'e hutenga, tamage ana kasri avu'ava'ma Israeli vahe amu'nompima hu'enkenka, **5** ana a'ro veo avreta kumamofo kafante havenknou ome zamahe frinkeno frino. **6** Hagi havi avu'ava'ma nehanigeno tare tagufa vahe'mo'zama kete'zama huama'ma huntasagetage, ahe friho. Hagi magoke vahe'mo'ma keteno huama'ma hania zantera vahera zamahe ofrigahaze. **7** Hagi kefo avu'ava'ma nehanigeno ke'nesimo, ese havenknona ana vahetera atretenkeno, anante miko vahe'mo'za havenknona atre'za ahefrigahaze. E'ina hanuta kefo zana amu'notmifintira

eri atregahaze. 8 Hagi mago'a ranra knazamofo nanekeo, vahe'ma ahe fri'zamofo nanekeo, vahe'mofo zama eri savri hu'zamofo nanekeo, ha'ma huno keonke'zama eri havizama hu'nesia zante refko huno antahi kemo'ma amuhoma hanigeta, erita ana knazana Ra Anumzana tamagri Anumzamo'ma huhamprinte'nenia kumate viho. 9 Hagi Livae naga'ma pristi eri'zama e'neriza vahetero, kema refko'ma hu kva vahete ana knazana omeriama hinkeno, zamagra naneketmia refko hu'za eri fatgo huramanteho. 10 Ra Anumzamo'ma hunte'nenia kumate ana nanekema refko hute'za, hazenkemofo avamente e'ina huo huno'ma asami'nia nanekea avariri fatgo hiho. 11 Nanekema refko hute'za, ana hazenkemofo agofetu'ma na'anema hanaza nanekea avariri fatgo hiho. Hagi kva vahe'mo'zama hanaza nanekea ame'a aseta rukamarege, mago'a kea eritregera tamagra tamavesitera osiho. 12 Hagi mago'mo'ma avufga ra nehuno, Ra Anumzana tamagri Anumzamofo avugama mani'ne'nia pristi vahe'mo'o, kva vahe'mo'ma hania kema ontahi'nia vahera ahe frinkeno frino. E'inama hanuta kefo zana amu'nontmifintira eri atregahaze. 13 Hagi e'inama hanageno'a mika vahe'mo'za nentahi'za koro nehu'za, mago'enena ana avu'avara osugahaze. 14 Hagi Ra Anumzana tamagri Anumzamo'ma neramia mopama omerisantihareta umanisuta amanage hugahaze, mago'a kuma'ma manigagi'naza kuma'mozama hazaza huta kini azeri oti'nune huta hugahaze. 15 E'inagema hanutma Ra Anumzana tamagri Anumzamo'ma kini manigahie huno'ma hania ne'kinia azeri otiho. Tamagra vahepintike kinia azeri otigahaze. Hagi ruregati vahe'ma tamagranema enemanisia vahera kinia azeri oraotigahaze. 16 Hagi ana kini ne'mo'a rama'a hosi afutamina ontege, vahera huzmantenko hosi afukura hakre'za

Isipia oviho. Na'ankure Ra Anumzamo'a huno, e'i kantega ru'enena rukrahe hutma oviho huno hu'ne. **17** Hagi rama'a a'nea ana kini ne'mo'a onteno, ru agu'a azeri rukrahe hinkeno Ra Anumzamofo amefi humigahie. Hagi rama'a silvane golinena onteno. **18** Ana kini ne'mo'ma kini trate'ma umanisuno'a, Livae nagate vuno negesageno, ama avontafepinti kasegea erino agra'a avontafepina krenteno. **19** Ana huteno ana avontafera erino ome ante'neno maka kna hampri vava nehuno, Ra Anumzana Anumzama'amofoma koro'ma hunte'zana rempi nehuno, kasege'ane tra ke'anena nevaririno, **20** avufga ra huno afuhe'ina kefenkamia otено, kasegemofona ha'ontagino, kasegemo'ma hu'nea kante mani fatgo hugahie. E'ina hanuno'a za'zate kini tratera manino nevina, agripinti'ma fore hu anante anante'ma hu'za vanaza vahe'mo'za ana kini tratera mani'za vugahaze.

18 Hagi maka Israeli ma mopama erisantimaharesafintira Livae pristi naga'mo'za mago mopa erisanti oharegahaze. Hagi tamagrama Ra Anumzamofonte'ma ofama eritama esaza ne'za nene'za manigahaze. **2** Hagi zamafuhe'zama mopama eri santima haresafintira zamagra mopa e'origahaze. Na'ankure Ra Anumzamo'ma huhampri zmante'nea kante zamagra Agri pristi eri'za vahe mani'nenageno, Agra'a kegava huzamantegahie. **3** Hagi amanahu hutma pristi vahera ne'zana zamigahaze. Bulimakao afuro, sipisipi afu'ma ahetma kresramna vanuta, azona'ane, tarega ameragema'ane agupa'anena pristi vahe zamigahaze. **4** Hagi ese'ma hamaresaza witio, wainio, olivi masaveno, ese'ma haresaza sipisipi azokara pristi vahe erita eme zamigahaze. **5** Na'ankure Ra Anumzana tamagri Anumzamo'a tamagripintira Livae naga'nof'mofo huhampri zmante'neanki'za,

maka knafina oti'za Agri eri'zana eri vava hu'za vugahaze. 6
Hagi Israeli agu'afima ina kumapima Livae ne'mo'ma mani'nesia
kuma'ma atreno agra avesite'ma Ra Anumzamo'ma mono
hunanteho huno'ma hu'nenia kumatera amne umani'neno,
7 ruga'a Livae afuhe'zama nehzaza huno Ra Anumzana
Anumzama'amofo avuga Agri eri'zana erigahie. 8 Hagi nef
fenozama zagore'ma atreno erinia zagoa eri'ne'nianagi, ofama
hanaza ne'zana ruga'a pristi vahe'enena mago avamente
refko huno erigahie. 9 Ra Anumzana tamagri Anumzamo'ma
neramamia mopafima vanutma, ana mopafi vahetmimo'zama
kasrino hi'mnama vu'nea avu'ava zama nehaza avu'avara
ovaririh. 10 Hagi amu'nontmifintira magomo'e huno ne'afi,
mofa'a aheno ofagna huno kresramna ovino. Havi kasnampa
kema hu'zampi, avu'ataga zampi, zagoma re'zampi, fri vahe'ene
keagama hu'zane, 11 mago'a zampima huvazino kaguvaza fore
hugahiema huno'ma hu'zampi, fri vahe hankro'enema keaga
hu'zampi, havi avamu'eneno, ko vahe'enena keaga osutfa hiho.
12 Iza'o ana avu'ava'zama hanimo'a Ra Anumzamofontera
kasrino hi'mnage avu'ava hugahie. Na'ankure e'ina hi'mnage
avu'ava zanku, Ra Anumzana tamagri Anumzamo'a ana mopafi
vahera zamahenati atregahie. 13 Hianagi Ra Anumzana tamagri
Anumzamofo avurera e'inahu avu'ava'zana osuta, agru huta
maniho. 14 Na'ankure anama omeri'naza mopafima mani'naza
vahe'mo'za, zamagra havi avamu'ene nanekea nehu'za, havi
kasnampa vahe'mokizmi ke nentahiza vahe mani'naze. Hianagi
Ra Anumzana tamagri Anumzamo'a e'inahura osiho hu'ne. 15
Hagi Ra Anumzana tamagri Anumzamo'a tamagri amu'nompinti
mago nagri kna kasnampa ne' azeri otigahianki, ke'a antahihi.
(Aposolo 3:22, 7:37) 16 Na'ankure Sainai agonamofo agafima

ome atruma haza zupa Ra Anumzana tamagri Anumzamofonkura amanage hu'naze, tagra fri'nunki kagerura ru'enena nontahita, mago'anena teve anefaka'a onke'nune huta hu'naze. **17** Anante Ra Anumzamo'a amanage huno nasami'ne, zamagra tamage nehaze. **18** Hagi zamagripinti mago kagri kna kasnampa ne, Nagra azeri oti'na naneke'n'i'a huo hu'nama hanua nanekege huama huno tamasamigahie. **19** Ana'ma asami'nua nanekema nehinama mago vahe'mo'ma ke'ama ontahina, Nagra e'i ana vahera kegahue. **20** Hianagi iz'a'o Nagri nagifi havige kasanampa vahe fore huge, havi anumzantmimofo agifi kasnampa vahe'ma fore'ma hania vahera zamahe friho. **21** Hagi antahintahi tmifima tamagra anage hutma antahigahaze, inankna huta, e'i Anumzamofo kasnampa vaheki, havige kasanampa vaheki huta antahigahune? **22** Mago kasnampa ne'mo'ma mago'za fore hugahie huno hinkeno, ana zama fore'ma osina, e'i nanekeia Anumzamo'a osu'neanki kasnampa ne'mo'a agra agesafinti kea hugahianki, korora osiho.

19 Ra Anumzana tamagri Anumzamo'ma tami'nia mopafi
vahe'ma zamahehana hanigetma kuma'zmifine nozmifinema
umani'nuta, **2** hazenkema hanaza vahe'mo'zama zamagu'ma
vazisaza kumara tagufa kuma huhamprintenkeno meno.
3 Ra Anumzana tamagri Anumzamo'ma tami'nia mopa
tagufa'afi rehantagitma, agu'vazi kumara ana mopafina mago
kuma tro huntetere nehuta, kana anantero varita viho. E'i
ana hu'enkeno, mago vahe'mo'ma mago'azama hanifima
ahefrigahue huno'ma ontahi'neno hantga huno vahe'ma ahefrisia
vahe'mo'a, ana kumapi freno vuno ome frakigahie. **4** Hagi
mago vahe'mo'ma mago'azama hanifima ahefrigahue huno'ma
ontahi'neno hantga huno vahe'ma ahefrisia vahe'mo'a, freno

vuno agu'mavazisia kumapi ufregahie. 5 Hagi vahe'mo'ma zafafi zafa ome antagisirega sau'me rugatitre'nigeno mago tavaoma'are maninesimofo ahe frisigeno'a, agra freno ana kumatmimpi ufreto agura vazigahie. 6 Hagi agu'vazi kuma'ma afetema me'nena, ana vahe'ma hantga huno ahefrisia ne'mo'a, karanka zahufa nevinke'za hazenkea osu'nesianagi frisia ne'mofo naga'amo'za ome azeri'za ahegahaze. Ana nera hazenke'a omne'ne. Na'ankure ahenakure huno ahefria nera ohe'neanki, ru eri'za erirega ruhantga huno ahefri'ne. 7 E'ina hu'negu agu'vazi kumara tagufafi retro huntaho hu'na huramantoe. 8 Hagi tamagehe'ima huvempa huno huhampri zamante'nea kante'ma Ra Anumzana tamagri Anumzamo'ma tami'nia mopama erirama hina, 9 tagufa agu'vazi kuma'ma me'nerera mago'ene tagufa agu'vazi kuma tro hugahaze. Na'ankure nagrama tamasamua kasegea amage anteta nevaririta, Ra Anumzana tamagri Anumzamofo avesinenteta, Agri avu'ava'ma avariri'nazagu anara hugahie. 10 E'ina hanageno Ra Anumzana tamagri Anumzamo'ma tami'nia mopafina hazenke'a omne vahera amane zampina ohe'hageno, agri korankumi'mo'a maka vahe'motarera omegosie. 11 Hianagi mago'mo tava'oma'are'ma nemanisimofoma antahi haviza hunenteno, kafonteno mani'neno ahefriteno freno ama ana kumapima ufrisigeno'a, 12 ana hazenke ne'mofo kumapinti kva vahe'mo'za vahe huzmantesage'za vu'za ome avre'za esage'za, anama ahe fri'nea vahe'mofo vahe'amo'za ana nera ahefrigahaze. 13 E'i ana hazenke nera tamasunkura hunteta atrenkeno amanea omanino. Hanki ahe frinkeno Israeli mopafina hazenkea omnena, vahe'ma ahefri vahera omani'nageta knare hutma manigahaze. 14 Ra Anumzana tamagri Anumzamo'ma tamisia mopafima umanisutma, tamagehe'mozama kri'nesaza

kanagi kana eri havia huta tava'ontmire'ma nemanisamokizmi mopa e'oriho. **15** Hagi mago'mo'ma hazenke hu'enkeno magoke vahe'mo'ma ke'neno, huama hanirera knazana omiho. Hagi hazenke vahe'ma knama amisazana, tare tagufa vahe'mo'zama ke'ne'za huama'ma huntesageta, knazana amiho. **16** Hagi mago'mo'ma, magomofoma azeri haviza hunaku'ma, havige huno kasege ru hantgi'ne huno huntessiana, **17** ana knare'ma pristi eri'zama eri'naza vahete'ene, keagama refko hu kva vahete Ra Anumzamofo avuga ana taregamoke vugaha'e. **18** Hagi kva vahe'mo'za nanekeznima refko hu'za kesageno, havigema ana ne'ma hunentena, **19** nefuma havigema huntessigeno aminaku'ma hanaza knazana, agri amiho. E'ina'ma hanutma kefo avu'ava zana amu'notmifintira eritregahaze. **20** E'inahu hinkeno mago'amo'za antahi'za koro nehu'za, anahukna havi avu'ava zana amu'nontamifina osugahaze. **21** Hanki tamagra tamasunkura huozmantegahaze. Vahe'ma ahe frisia vahera, ahe nefritma, avuma rupro'ma hania vahera, agri'enena avu rupro nehuta, ave'ma rutafrisia vahera, agri'enena avera runetafrita, azama rukafrisiana agri'enena aza runekafrita, agiama ru kafrisiana, agri'enena agia rukafrifo.

20 Hagi ha' vahetaminema ha'ma hunaku'ma vanuta, hosi afuzmine, karisizmine, rama'a ha' vahetamima mani'nesageta kesuta, korora osiho. Na'ankure Ra Anumzana tamagri Anumzamo'ma Isipiti'ma tamavre atiramino tamavreno'ma e'nea Anumzamo'a tamagrane mani'ne. **2** Hagi ha'ma hunaku'ma urava'oma hanageno'a, pristi vahe'mo eramavugateno amanage huno tamasamino, **3** Israeli vahetamimota antahiho, ha' vahetamine ha'hunaku erava'o hazanki atrenkeno tamasumnamo'a fakroa fakroa osina, tamahirahikura huta ha'

vahetamigura korora osiho. 4 Na'ankure Ra Anumzana tamagri Anumzamo'a tamagrane nevuno, tamagri kaziga anteno ha' vahetmia hara huzmantesigeta hara huzmagateregahaze. 5 Hagi sondia vahete (ofisa) kva vahe'mo'za sondia vahera amanage hu'za zamasamigahaze, kasefa noma kinte'neta ana noma nunamuma huta Anumzamofo azampima onte'nesuta, ete nontega viho. Na'ankure ha' kampima tamahena frisageno'a, tusi'a amuho huta kinte'nesaza nona, ru vahe'mo'za ana nompina manigahaze. 6 Hagi kasefa waini hoza kri'neta, ana hozafinti tagita one'nesamota, ete kumatega viho. Ha'ma hanafima tamahesageno ru vahe'mo'zama ana waini hozatamifinti'ma tagi'za nesageno'a, knarera osugahie. 7 Hagi izano a' erigahane hu'za huhampri' tamante'nesimota ete kumatega vuta umani'neta ana ara eriho. Ru ha'pima tamahesageno ru vahe'mo'za ana a'ma erisageno'a, haviza hugahie. 8 Hagi mago'ane sondia vahe'mofo kva vahe'mo'za amanage hiho, koro'ma hanankeno kasumnamo'ma fakro fakroma hanimoka, mago'a tagri sondia vahetimofo zamazeri koro hugahazanki, ete kumatega viho. 9 Hagi vugota sondia kva vahe'mo'za nanekema huvaretenu'za, sondia vahera kevure kevure refko hunezmante'za kva vaher zamazeri ot'i'nage'za, mago mago kevurera kegava hugahaze. 10 Hagi mago kumate'ma ha'ma hunaku'ma vurava'o hanuta, ese'zana tamarimpa fruge huta hara huormantesunanki amne kumatmia tamigahazo huta zamantahigeho. 11 Hagi zamagrama ana kema antahi'za mago zamarimpa hu'za kuma kafazmima anagisageta ufresuta, ana kumapi vahera maka'mokizmigura hinke'za kazokazo eri'za vaher mani vagareho. 12 Hianagi ana kumapi vaher vahe'mo'zama i'o nehu'za ha'ma huramantena, ana kumapi vahera ha' huzmanteho. 13

Hagi ana'ma hanageno'ma Ra Anumzana tamagri Anumzamo'ma
ana kuma'ma tamazampima antena, maka venene'age bainati
kazinteti zamahe frivagareho. **14** Hianagi maka a'nene,
mofavreramine, zagagafane, maka zantamina ana kumapinti'ma
erisaza zantamina tamagri su'an. Hagi Ra Anumzana tamagri
Anumzamo tamigahiankita, e'nerita musena hugahaze. **15**
Hianagi tamagri kuma'mofo afete'ma me'nenia kumatmi anara
hiho. Hanki anama ufre'haza mopafi kumatmina anara osiho.
16 Hianagi Ra Anumzana tamagri Anumzamo'ma tamami'nia
mopafima me'nea kumatamimpima vahe'ene zagagafane
zmasimu'ma eri'za nemanisaza zagaramina, magore hutma
ozmatreta zamahehna hiho. **17** Hagi Ra Anumzana tamagri
Anumzamo'ma hu'nea kante anteta, mika Hiti vahe'ma, Amori
vahe'ma, Kenani vahe'ma, Perisi vahe'ma, Hivi vahe'ma,
Jebusi vahera zamahe hana hiho. **18** E'ina hinke'za kasrino
havizama hu'nea avu'ava'ma hu'za havi anumza zmimofoma
mono hunentaza zamavu'zmavara rempia huoraminketa, Ra
Anumzana tamagri Anumzamofo avurera kumira osugahaze. **19**
Mago kuma'ma za'zate'ma avazagi kagita ha'ma huzmantesuta,
nezafa ragama renentea zafaramina raga'a negahazanki amne
zampina sa'umenura antagi otreho. Na'ankure zafaramina e'i
tamagri ha' vahera omani'naze! **20** Hagi zafama antagisazana
raga'ama one' zafage antagita hagina tro nehutma, hara hutma
ana kumara erigahaze.

21 Hagi Ra Anumzana tamagri Anumzamo'ma tamami'nia
mopafima umani'nenageno mago vahe'ma ahetre'nesageta
haketa erifore hugahazanagi, anama ahe'nesia vahe'ma
onkesageno'a, **2** ranra vahe'mo'zane kva vahe'mo'za e'za,
e'ina kuma tava'onte ana vahera ahe fri'ne hu'za rezagane'za

keho. 3 Hagi rezagane'za kesageno, ina kuma'mo ana vahe'ma ahefrinea tavaontera me'ne, ana kumate kva vahe'mo'za eri'zama e'ori'nesia a' bulimakao afu ome avre'za, 4 tima enevanigeno, hozama eri'za onte'nesaza agupofi vu'za, ana bulimakao afura anankena omeri vamagi'za ahegahaze. 5 Anama hanageno'a pristi vahe Livae ne' mofavre naga'mo'za e'za mago'a kea eme hanageno, vahe'ma ahe'nea knazamo'a vagaregahie. Na'ankure Ra Anumzana tamagri Anumzamo eri'zani'a eneri'za Nagri nagifi vahera asomu kea huzmantegahaze huno huhampri zamante'ne. 6 Hagi ana kumate kva vahe'mo'za anankema eri vamagi'za ahe'naza bulimakao afu'mofo agofetu zmazana sese nehu'za, 7 tagri tazamo'a amama fri'nea vahe'mofo korana erifegira otege, aheno korama'ama erifegi'mate'nea vahera tavumo'a onke'ne hugahaze. 8 Hagi Ra Anumzamoka vaheka'a Israeli vahe'ma zamagu'mavazinka ete zamavare'hana vahera kumi'zmia atrezmanto. Hanki hazenke'a omne vahe'ma ahe fri'nea vahe'mofo kora kumira eri zamagofetu onto. E'i anagema hanageno'a, vahe'ma ahe fri'nea knazana tamagripintira Anumzamo'a eritregahie. 9 Hagi ama ana nanekema antahita avaririsuta fatgo avu'ava Ra Anumzamofo avufina nehanageno, vahe'ma ahe fri knazana tamagripina omnegahie. 10 Hagi hate'ma vanageno Ra Anumzana tamagri Anumzamo'ma ha' vahetmima tamazampima zamavarentena, kina vahe zamavareho. 11 Hagi anama kina vahe'ma zamavaretma e'nafima, mago knare a'ma kesageno tamanunuma hina, a'ma erinaku'ma hanutma, 12 avreta nontamirega vinkeno, aseni azokara neharenko, azankoa neharenko, 13 antani'negeta kinama hunteta avreta e'naza kukena hatenetreno, mago ikamofo agu'afi nefane nerera kizinigura zavira neteno asunkura hugahie. Anama hinkeno

mago ikama evina, ana ara a' eri'hankeno kagri a' manigahie.

14 Hanki henkama, ana aku'ma kavesra hinkenka, huntegeno amne inantegama avesi'nirega vino. Hianagi zagrera ana ara otrege, kazokazo eri'za a'nema hunentanankna avu'avara huonto. Na'ankure kagra ko antenka mase'nane. **15** Hagi mago' ne'mo'ma tare a'ma ante'neno, mago'mofonku avesi nenteno, mago'mofoma avesi nontesigeno, ana taregamokema ne' mofavrema antesa'ana, avesi nontesimo'ma agonesa ne' mofavre'ma antenkeno'a, **16** fenoma'ama refko'ma hania knarera, henka a'ma avesimanentea a'mofo agonesa mofavremofona, kota a'mofo agonesa mofavre'mo'ma eriga fenona e'origahie.

17 Hianagi ave'masinontea a'mofo agonesa ne' mofavrea maka fenoma'afintira ante agofetu huno tare vahe'mo'ma eriga avamente amino. Na'ankure agonesa mofavregino, e'inahu avamente nefä fenona eriga hu'ne. **18** Hagi mago ne'mo'ma ke ontahi hazenke ne' mofavrema ante'enkeno, nerera nefä kema nontahisigeno, kanoma amino azeri fatgoma nehanigeno kema ontahisiana, **19** nerera'ene nefä'enena ana ne' mofavrea avreke kumamofo kafante'ma ranra vahetmima mani'nare vuke, **20** amanage huke ana kva vahera zamasamigaha'e, ama mofavretimofona asenimo'a hankavetigeno ha'reneranteno keti'a nontahino ne'zana nehana nehuno, aka tinte nehie. **21** Anagema hanakeno'a ana mofavrea maka ana kumapima nemaniza venenemo'za have knonu ahe frigahaze. E'inama hanuta kefo avu'ava zana amu'notmifintira eritresageno, e'i ana zamofo kema maka Israeli vahe'mo'za nentahisu'za, korora hu'za ana z mavu'zamavara osiho. **22** Hagi mago vahe'mo'ma hania hazenkemo'ma ahefrigahie hu'ne'ni'a avamente'ma vu'nenigetma, ana vahera ahe friteta, avufga'a zafare hantiho. **23** Hagi anama

aheta hanti'nageno'a avufga'amo'a me'enkeno hani huno kora otino. Hianagi ana avufga'a ko erita anama ahetama hanti'naza knafinke asenteho. Na'ankure Ra Anumzamo'a havi avu'avazamigu kazusi huzmante'nea vahe zafarera zamahe'za nehantize. Ana hu'negu Ra Anumzana tamagri Anumzamo'ma eri santihareho huno'ma tamamisia mopa eri pehana osiho.

22 Negafu bulimakao afuro, sipisipi afuro, meme afu'mo'ma hazamagreno meg'i'ma vano nehinama kesunka, kegenka otrenka avrenka negafuna ome amio. 2 Hagi ana afu'mofo nef'a'ma tava'onka'are'ma omanige, ete ana afu'mofo nefama kenka antahinka osu'nesunka ana afura avrenka, keginaka'afi ome ante'negeno iza'o afu venafo'ma eno'ma eme hakesigenka avremio. 3 Hagi tava'onka'are'ma nemanisimofo donki afuro, kukena'o, inankna zama'ama fanane hu'nenama kesunka kegenka otrenka, ana zanke huo. 4 Hanki tava'onka'are'ma nemanisimofo donki afu'mo'o, bulimakao afu'mo'ma traka huno mase'nena kesunka, kegenka otrenka aza hunka ana afura azeri otio. 5 A'nemo'a venenemofo kukena osinkeno, venenemo'a a'nemofo kukena osino. Na'ankure iza'o e'inahu avu'ava'ma hania vahe'mo'a Ra Anumzana tamagri Anumzamofo avufina kasrino havizantfa hu'nea avu'ava hugahie. 6 Hagi namamo'ma zafarero, mopafino nomagino amu'arero, anenta'are'ma anukino mase'nesigenka, nererane anenta'anena aze'orio. 7 Hagi amne anenta'aramina azergahazanagi, arerana atrenkeno freno. E'ina'ma hanageno'a Ra Anumzamo'a asomu hurmantena za'zate manitma vugahaze. 8 Hagi kasefa noma kisuta ana nomofo agofetura, vahe'ma mani'afina kegina hugagiho. Hagi keginama hugagi'nesageno mago vahe'mo'ma takigureno'ma fri'niana, ana knazamo'a tamagritra omegahie. 9 Wainima

kri'nesana kankamumpina ru avimzana ohankro. Hagi ana huta wainima kri'ne'naza kankamumpima ru avimzama hankresuta, ana avimzama hankresaza avimzamofo raga'ane, waini zafa raganena hamareta onegahaze. **10** Bulimakao afu'ene donki afu'enena magoke karenamare zafarera reznantenegeke hoza reko'ori'o. **11** Hagi sipisipi azokateti'ene, efeke tavravereti eri havia huno tro'ma hu'ne'nia kukena ontaniho. **12** Zamanunte'ma antazage'no'ma uneramia tavravema tro hanunka, 4'a agentera avasese'a tro huntaho. **13** Hagi mago ne'mo'ma a'ma erino anteno maseteno'ma ana a'ma avesionteno, **14** havige hugofinteno, ama a'mo'a vene mase'nea a' eri'noe huno'ma hi'na, **15** ana a'mofo nerera'ene nef'a'enena venema omase'nea nanekea ranra vahe'mokizmi zmavuga kuma'mofo kafante vu'ne ome eri'ama hi'o. **16** Ana nehuno ana a'mofo nef'a' amanage hino, nagra mofa'ni'a ama ne'mo erisie hugeno eri'neanagi, menina avesinonteno avesra hunenteno, **17** vene mase'nea mofa ara eri'noe huno nehie. Hianagi agra havige nehianki, ama'na tamage zana me'ne huno nehuno, ranra vahe zamavuga ese zupama ana mofa'ene nevekema masike mase'na'a tvaravea eri rutaregahie. **18** Anama hanigeno'a anante ranra vahe'mo'za ana nera azeri'za sefu amiho. **19** Anama hutenko'a ana a'mofo nefana 100'a silva zago amigahie. Na'ankure agra Israeli mofa'mofona havi agi eri ami'ne. Hagi ana ara otregahianki, a' erintegahie. **20** Hianagi tamagema huno ana mofa'mo'ma venema maseteno'ma emare'nenigeno'a, **21** ana ara avre'za nef'a nonkahante vu'za ana kumapi venenemo'za have knonu ome ahe friho. Na'ankure Israeli vahepina knare osu hazenke eri fore huno nerera nef'a nompima mani'neno venena mase'ne. E'i ana hutma amu'notmifintira kefo avu'ava zana eri atregahaze. **22** Hagi ru

ne'mofo a'enema mago ne'mo'ma savri avu'ava'ma nehanige'za
ke'za erifore hanazana, ana taregamokizni zanahe frisageke
frigaha'e. Einahu avu'ava'ma hanuta Israeli vahé amu'nompintira
kefo avu'avara eritregahaze. **23** Hagi vene omase mofa'ma mago
ne'mo a' erigahie huno huhampri ante'nesia mofa'ma kuma'mofo
agu'afima, ru ne'mo'ma azeri savri'ma huno monko'zama
nehanakeno'ma zanageno eri fore'ma hina, **24** anantarega
zanavreta kuma'mofo kafante vuta, have knonu ome zanahe
friho. Na'ankure mofa'mo'a aze'manerigeno'a krafa osu'ne.
Hagi vemo'a ru ne'mofo a'ene monko'zana hu'ne. E'ina'ma
hanuta amu'nontmifintira kefo avu'ava zana eri atregahaze. **25**
Hianagi vene omase'nesia mofa'ma mago ne'mo a' erigahie
huno huhamprinte'nesia mofa'ma, ru ne'mo'ma kuma'mofo fegi'a
kazigazi huno azerino monkozama hunte'nenigeno keno eri
fore'ma haniana, ana ne'mofonke'za ahe friho. **26** Hianagi ana
mofara mago'zana huonteho, agra vahe'ma ahefriga hazenkea
osu'ne. Na'ankure ama ana hazenkemo'a, mago ne'mo'ma
tava'onte'ma nemanimofoma hafra hunteno ahe nefriankna
hu'ne. **27** Na'ankure ana a'mo'a kumamofo megia agrake vahe
omani'afi vano nehigeno, ana ne'mo'a keteno aze'nerigeno
krafage hu'neanagi, azahu vahera omani'neno vuno aza osu'ne.
28 Hagi vene omase mofa'ma mago vere'ma huhampri onte'nesia
mofama, mago ne'mo'ma azerino monko'zama hunentesigeno
keno eri fore'ma haniana, **29** ana ne'mo'a ana mofo'mofo nefana
50'a silva zago mizasenenteno, ana mofara a' erintegahie.
Na'ankure agra ko anteno maseno azeri haviza hu'ne. Hagi
manino vanifina ana ara otrefta hugahie. **30** Hagi mago ne'mo'a
nefa ara azeri savrira huno nefana agaze eri omino.

23 Hagi agonkna'za harige, agoza akafrige'ma hu'nesia ne'mo'a,
Ra Anumzamofo vahe'ma atruma hu'ne'nafina omanigahie.
2 Hagi havi kankamuntet'i'ma fore'ma hu'ne'ni'a vahe'mo'a,
Ra Anumzamofo vahe'ma atruma hanafina omanigahie. Hagi
agripinti fore hu anante anante hu'za 10ni'a zupa fore hanaza
vahe'mo'zanena Ra Anumzamofo vahera omanigahaze. 3
Amori vahe'ene Moapu vahe'mo'zanena Ra Anumzamofo
vahe'mo'zama atru'ma hanafina eofregosaze. Hagi zamagripinti
fore hu anante anante hu'za 10'a zupa fore hanaza
vahe'mo'zanena, Ra Anumzamofo vahera omanigahaze. 4
Na'ankure Isipiti'ma neageno'a ne'zane tinena eme ontami'naze.
Hagi zamagra Beori nemofo Balamu Mesopotamia kaziga
Petori kumateti ne' tamagri'ma kazusi ke huno tamazeri
haviza hinogura ke hu'naze. 5 Hianagi Ra Anumzana tamagri
Anumzamo'a Balamunkea ontahino, tamagri'ma kazusima
huramantea zana eri rukrahe higeno, asomu efore hu'ne.
Na'ankure Ra Anumzana tamagri Anumzamo'a tusiza huno
avesi tamante'ne. 6 E'ina hu'negu manitama vanafina, Moapu
vahe'ene Amori vahe'enena mago tamarimpa huta nomanita
zamaza osinke'za, maka zampina knarerera osiho. 7 Hagi Idomu
vahera tamavresra huozamanteho. Na'ankure zamagra tamagri
neramafuze. Hagi Isipi vahera tamavresra huozamanteho.
Na'ankure zamagri mopafi umani vahera mani'neta hu'naze. 8
Hagi fore hu anante anante hu'za 3'a zupama fore'ma hanaza
vahe'mo'za, Ra Anumzamofo vahe'ma atruma hanafina amne
efregahaze. 9 Hate'ma vuta seli noma ome kita mani'nesuta,
maka tamazeri pehanama hu'zankura kegava hihio. 10 Hagi
kenage'ma mago ne'mo'ma mase'neno'ma ava'nama negeno
avufgarima tagi atreno agra'ama azeri pehanama hanuno'a, seli

nonkumapintira atreno fegi'a mago zagegna umanigahie. **11**
Hagi eofre meg'i'a mani'nenigeno, zagea freno kinaga senkeno,
tina freno agru huteno, seli nonkumapina egahie. **12** Hagi seli
nonkuma'mofo fegi'a avirifa hu kumara tro hunte'neta, anampi
avirifa ome hiho. **13** Hagi sondia vahe'mo'zama hate'ma vu'za
fenozama erisafina, sipetine erine'za vano nehu'za, arifagu'ma
zamavesina arifama resu'za keri kafi'za asenteho. **14** Na'ankure
Ra Anumzana tamagri Anumzamo'a seli nonku'ma amu'nompi
vano nehuno, kegava huneramanteno tamaza hanigetma ha
vahe'tmia hara huzmagateregahaze. E'ina hu'negu mika zupa
seli nonkuma'mo'a ruotge hina, Ra Anumzamo'a kumatmifina
tamagazema hu'zana onkeno, tamefira huoramigahie. **15** Hagi
ru vahe'mofo kazokazo eri'za vahe'mo'ma, agu'vaziogu'ma
kagritegama freno enkenka, ana vahera ete avrenka nafa'ama
hu'ne'nimofona ome omio. **16** Hagi atrenkeno tamagrane
ina kumate manisuema hanirera mani'nena, havi avu'avara
huonteho. **17** Israeli vahe'mota mono nompina monko avu'ava
zana osiho. **18** Hagi a'mo'o vemo'o monko avu'avazanteti'ma
eri'nia zagoa Ra Anumzana tamagri Anumzamofo mono nompina
erino eno, amigahue huno huvempama hu'nenia zantera ofa
eme omigahie. Na'ankure e'inahu avu'ava zamo'a Ra Anumzana
tamagri Anumzamofo avurera kasrino hi'mna vu'ne. **19** Hagi
zagofi ne'zampi, mago'a zama negafu'ma kagripinti'ma nofi'ma
huno emeri'neno, ana nofi'ma hu'nea zama eme apasenaku'ma
nehanigenka, ananteria ante agofetu hunka namio osuo. **20**
Ru mopafi vahe'mo'ma kagripinti'ma nofi'ma hu'enigenka
amne hanankeno, ante agofetu huno kamigahie. Hianagi Israeli
vahepinti'ma mago negafu'ma nofi'ma hu'enigengetma, ante agofetu
hunka eme apaso hunka huonto. E'ina'ma hanageno'a amama

unefraza mopafina maka zama hanaza zana Ra Anumzana
tamagri Anumzamo'a asomu huramantegahie. **21** Hagi Ra
Anumzana tamagri Anumzamofonte'ma mago'a zanku'ma
huvempama hu'ne'nutma, za'zatera avazu huta ovuta ame
hutma anama huvempama hu'ne'naza zana hih. Na'ankure Ra
Anumzana tamagri Anumzamo'a ame hunka anzana huo huno
antahigahiankino, ko'ma anzama osnutma kumi hugahaze.
22 Hianagi mago'za hugahue hunka Ra Anumzamofonte'ma
huvempama osnunka, kumira osu knare hunka manigahane. **23**
Hagi huvempama hu'nenana nanekea kva hu'nenka ana nanekea
avaririo. Na'ankure kagra'a kavesite Ra Anumzana tamagri
Anumzamofontera huvempa hu'nane. **24** Hagi tava'onka'are'ma
nemanisimofo waini hozafima vanunka, amne grepri raga taginka
negamu hugahananagi, magore hunka kuka'afina tagi orio. **25**
Hagi tava'onka'are'ma nemanisimofo witi hozafima vanunka,
amne witia kazanutira eri akafrigahane. Hianagi magore hunka
sekeli kazinura witia okafrigahane.

24 Hagi mago ne'mo'ma mago a'ma eri'ne'nigeno, ana a'mo'ma
agri'ma azeri musema osinkeno, ana a'mofoma havizama'ama
neve'ma keno erifore hanuno'a, aravema atane avonkreno ana
ara azampi nenteno, noma'afintira huntegahie. **2** Hagi ana
a'mo'ma noma'a atreno vuno, ru vema omerinkeno, **3** ana
vemo'ma avesima ontesuno'a, ete ese ve'amo'ma hu'neaza
huno'ma, aravema atane avonkreno azampi nenteno noma'afinti
huntege, agrama frige'ma hinkeno'a, **4** ese ve'amo'a ana
ara e'origahie. Na'ankure agra ru vene maseno agra'a azeri
pehenage hu'neankino, ese ve'are'ma esiana, Ra Anumzamofo
avurera kasrino haviza hu'nesia avu'ava nehuno, kumi avreno
Ra Anumzana tamagri Anumzamo'ma tamami'nia mopafina

egahie. 5 Hagi menima zahufama a'ma eri'nesia nera, sondia manige, kamani eri'za kva omiho. Hanki atrenkeno menima eri'nea a'enena musena huno mago kafu kuma'are manino. 6 Mago vahe'mo'ma tamagripinti'ma nofi'ma nehanigetma, eme nenaminka eri'nana avame'zane hunka witima refuzafu'mape havea e'oriho. Na'akure ne'zama retro'ma hu'za ne'zankura hakegahaze. 7 Hagi mago'mo'ma Israeli vahe'ma musufaseno kazokazo eri'za vahekna huno kegava huge, zagore'ma avreno ome atrege'ma hania nera, ahenkeno frino. E'ina'ma hanutma amu'notmifintira kefo avu'ava zana eri atregahaze. 8 Fugo krima erisutma kvahu so'e huneta, Pristi vahe'mo'zama tamasamisaza kea avaririho. Kema zamasami'noa kema tamasamisageta avaririso'e hiho. 9 Hagi Isipiti'ma neageno Ra Anumzana tamagri Anumzamo'ma Miriamuma hunte'nea zankura, tamagera okaniho. 10 Hagi tava'onka'are'ma nemanisimo'ma mago'a zama nofi'ma hu'nena, kagra kavesitera anamofo nompina vunka anama nofi'ma hu'nea zante eme nenamino eri'nia avame zane hunka mago zana noma'afintira ome e'orio. 11 Hagi fegi'a mani'negen, ana avame'zana agra'a eme kamino. 12 Hagi tava'onka'are'ma nemanisimofoma amunte omne'nenama eme negami'na erisua avame'zane huno'ma nakre ku'ama erino eme kamina, ana nakre kura erinka ome ante'negen hani huno kora otino. 13 Ana nakre ku'a zagea uofre'nena erinka eme amigeno, zasi'ma avesi'zankura kofino nemaseno, Anumzamofona antahigenkeno asomura huganteno. E'ina'ma hanunka Ra Anumzana tamagri Anumzamofo avurera fatgo kavukva hugahane. 14 Hagi zamunte omne vahe'ma Israeli vahepintiro, emani vahepinti'ma kema hananke'za zagore'ma eri'zanka'ama emeri negantesagenka, zamazeri havizana osuo. 15 Ana zupage zagea uofre'nena

eri'zama erisaza mizazamia zamio. Na'ankure zamagra zamunte omne'neanki'za avega ante'za manigahaze. Hagi ame hunka ko'ma mizazmima ozamisanke'za, Ra Anumzamofontega krafa hanagenka, kagra kumi hugahane. **16** Hagi mofavre'aramimofo kumitera arera afana zamahe ofriho. Hagi ana zanke hutma zamarera zamafa kumitera mofavreramina zamahe ofriho. Hagi iza'o kumi'ma hanimofo ahenkeno, agra'a kumitera frino. **17** Hagi tamagranema ru mopafi vahe'ma emanı vahe'ene, megusa mofavrenena knare hutma kegava huzmanteho. Hagi kento a'mo'ma mago'a zama tamagripinti'ma nofi'ma hanigetma, anama nofi'ma hu'nere'ma eme neramino erisia avame'zane hutma kukena'a e'oriho. **18** Hianagi Isipima kazokazo eri'za vahe'ma mani'nazageno, Ra Anumzana tamagri Anumzamo'ma ana kazokazo eri'zampinti'ma tamavreno'ma atirami'nea zankura tamagera okaniho. E'na hu'negu kasegema tamasamuana avaririho. **19** Hagi hozatamifinti'ma witima nevasagesutma evurami'nia witima tamagemakanita esunka, ete vuta ome zo'ogiho. E'ima evurami'nia witia, ru vahe'ma tamagranema emanı vahe'mofone, megusa mofavreramimofone, kento a'nemofo ne'za megahie. E'inama hanageno'a maka zama hanafina, Ra Anumzana tamagri Anumzamo'a asomu huramantegahie. **20** Hagi olive zafa ragama tagisutma, ete mago'enena vutma zafare'ma mesiama'agura ome ohakeho. Hagi tagisageno zafare'ma mesia raga, ru mopafinti'ma enemanıa vahe'mofone, megusa mofavreramimofone, kento a'nemofo ne'za megahie. **21** Hagi krepi ragama waini hozaka'afinti'ma tagisunka, magoke zupa tagio. Hagi ete vunka mago'enena ome ontagio. Hagi tagitesankeno e'ima zafare'ma mesia raga, ru mopafinti'ma enemanıa vahe'mofone, megusa mofavreramimofone, kento

a'nemofo ne'za megahie. 22 Hagi ko'ma lsipima kazokazo eri'za
vahe'ma tamagrama mani'naza zankura tamagera okaniho. E'ina
hu'nagu ama ana nanekea amage anteho hu'na neramasmue.

25 Hagi tare netremoke'ma mago zante'ma haframa hanukea,
ana knazaznia keaga refkohu kva vahete erike ekeno, iz
hazenkea higeno, izaz harenkea osu'ne, refko huno negeno, 2
hazenkema hu'nea ne'mo'ma sefu'ma eriga hazenkema hu'ne'na,
keagama refkohu kva ne'mo'a ana nekura prihuo hanigeno, pri
hu'ne'nigeno hazenke'amofo avamente sefura amigahaze. 3
Hianagi 40'a zupa sefura agatere'za omiho. Hagi rama'a sefu'ma
amisankeno vahe'mo'za ana nera kefenkamitesageno agazegu
hugahie. 4 Hagi bulimakao afu'mo'ma witimofo anom'a'ama
refuzafu'nepena, agiteranofira anaki onteho. (1 Korinti 9:9, 1
Timoti 5:18). 5 Tare koganamoke magoke mopafi mani'nenakeno,
mago'mo'ma ne' mofavrema onte'heno frisigeno'a, anama frisia
ne'mofo a'mo'a vuno ru nagapina vea ome e'origahie. Hagi anama
frisia ne'mofo nefu, ana kento ara erinte'neno, neve'ma huntega
avu'avara huntegahie. 6 Hagi ana a'mo'ma ese ne' mofavrema
ante'niana, anama fri'nea ne'mofo no erinkeno, agimo'a Israeli
vahepintira fanane osugahie. 7 Hagi fri'nea ne'mofo nefu'ma ana
kento aku'ma avesra hunteno e'origahue huno'ma hinkeno'a, ana
kento a'mo'a ranra vahete ra kuma'mofo kafante vuno, amanage
huno ome zamasmino, nenave nefu'a a'ma erinante'nige'ha
mofavrema ante'nugeno nefu agima erino mani'zankura avesra
nehie. 8 Hagi anagema hanigeno'a kumapi ranra vahe'mo'za
ana nera kehanageno esige'za, mago'ane antahigesageno'ma
ana kento a'ma e'origahue huno'ma hanigeno'a, 9 ranra
vahe'mo'za negesageno zamavufi ana kento a'mo'a, ana ne'mofo
aganona agafintira ome nezafino, avufi avetura ahenenteno, nefu

mofavrema erifore hu'zanku'ma i'o huno'ma hia ne'mofo amanara
huntoe huno hugahie. **10** E'ina hanigeno Israeli vahe'mo'za
ana ne'mofo agima ahesazana, agafinti agano kazufetre'nea
ne'mofo nagare hu'za hugahaze. **11** Hagi tare netre'mokema
ha'ma nehanankeno, mago ne'mofo a'mo'ma neve aza huno ha'
nehuno, nevema nehea ne'mofo agonknazama azeri promahina,
12 ana a'mofona kasunkura huontenka azana rukafri atro. **13**
Hagi mago'azama zagoreti'ma atesinaku'ma hanuta, vahera
zamazeri savira osuta, ana zamofo kna'a avamente fatgo huta
mizaseho. **14** Hagi zagore'ma atre'nezama refko huno'ma ke
tafena, nonka'afina osi tafene rantafenena ontegahane. **15**
Hagi ana maka zamofo kna'ama fatgo huta refko hu so'ema
nehuta, mago vahe'mofo zama eri savari'ma osanuta, Ra
Anumzana tamagri Anumzamo'ma tamisnia mopafina za'zate
manigahaze. **16** Na'ankure zagore'ma atre'zamofoma fatgo
huno refko osuno, vahe'ma azeri savri'ma hu'zamo'a, Ra
Anumzana tamagri Anumzamofo avurera kasarino hi'mna
vu'nea avu'ava hugahaze. **17** Isipiti'ma atiramita neazageno
karankama Ameleki vahe'mo'zama hu'naza avu'avakura
tamagera okaniho. **18** Hagi kama neageno tusi tamesra kosrama
nehazafina, Ameleki vahe'mo'za Anumzamofonkura korora osu,
tamefi'ma zaferina omne amnema hu'za aza vahera, hara
huzmante'za zamahe'naze. **19** E'ina hu'negu Ra Anumzana
tamagri Anumzamo'ma tamaza hinketa tamisia mopafi vahe'ma
zamahehana huta, ana mopama erisantiharesuta Ameleki vahera
zamahe hana hinkeno, ama mopafina zamagimo'a fananehino.
Hagi amama tamasmua kea tamagera okaniho.

26 Hagi Ra Anumzana tamagri Anumzamo'ma erisanti
haregahaze huno'ma hu'nea mopama neramia mopafima,

ha'ma hutma omeri santiharetama umanisuta, 2 anama
Ra Anumzamo'ma tami'nia mopafinti'ma ese'ma nenama
hania ne'zana, mago ekaeka kupi eraritma, Rana tamagri
Anumzamo'ma e'i kumate monora hunantegahazema huno'ma
hu'ne'nia kumate erita vuta, 3 ana knare'ma eri'zama e'herisia
pristi vahe ome nemitma amanage hiho, menima nagra Ra
Anumzamofo avugama huama'ma huana, tagehe'mofoma
huvempama huzmante'nea kante anteno, Ra Anumzamo'ma
ama mopafima navareno emenantea zankura tusi muse hu'noe
hugahie. 4 Hagi anante pristi ne'mo'a, ana ekaeka kura
tamazampintira erino, Ra Anumzana tamagri Anumzamofonte
kresramna vu itamofo avuga antegahie. 5 Hagi anante oti'eneka
amanage hunka Ra Anumzana tamagri Anumzamofo avuga
hugahane, nenageho'a Aramia nekino kanke kanke nere, osi'a
naga'a zamavareno Isipi vu'za umani'ne'za, tusi'a vahekrerfa
fore nehu'za, hanavenentake vahe fore hu'za mani'naze. 6 Isipi
vahe'mo'za knare zamavu'zamavara huorante'nazanki, tazeri
haviza nehu'za tutu hazageta kazokzo eri'za erizmante'none. 7
Ana nehuta taza hinogura Ra Anumzana tagehe'i Anumzantega
krafa hunkeno, Ra Anumzamo'a krafagetia nentahino, tata
huzama nerami'za tazeri havizama nehaza zana keteno, 8
Ra Anumzamo'a hankavenentake azanteti, azana rusuteno
ranra knazanteti'ene ruzahu ruzahu kaguvazane avamezanteti
tavreno ne-eno, 9 tumerine amirimo'enema avi'mate'nea
mopafina, Agra tavreno eno ana mopa emerami'ne. 10
Menina Ramoka nami'nana mopafintira ese ne'zana ama eri'na
oe hunka nehunka, Rana tamagri Anumzamofo avuga ana
ne'zana nentenka monora huntegahane. 11 Ana hutetma
Rana tamagri Anumzamo'ma knare'zama huramante'nea

zankura tamagrane nagatamine, Livae naga'ene, ruregati'ma
amu'notamifima enemaniza naga'enena musena hugahaze. **12**
Hagi 10ni'a kevufinti mago kevuma refko'ma huno ami ofama
hutma ne-esareti'ma, nampa 3 kafure'ma ana ofama erita
esuta, kumatamifima Livae naga'ene, ruregati'ma enemaniza
naga'ene, megusa mofavreramine, kento a'nennenana ana ne'zana
zamisage'za nezamu hugahaze. **13** Ana hutetma amanage huta
Rana tamagri Anumzamofona asamigahaze, Ra Anumzamoka
keka'a naganera okani'na, Kagrama hu'nana kante ante'na
ruotge'ma hu'nea ne'zana noniafintira hago eri'na Livae naga'ene,
ruregati'ma enemaniza naga'ene, megusa mofavreramine, kento
a'nennenana ne'zana zamivagare'noe hutma hugahaze. **14** Nagra
nasuzampima mani'ne'na magore hu'na amama ruotge'ma
hu'nea ne'zana onege, pehenama hu'neana eriotre'noe. Ama ana
ne'zampintira magore hu'na fri vahetera ofa osu'noe. Ramoka
nagri Anumzamokama hu'nana kemofo amage'a ante'na,
kagrama huo hunkama hana kante ante'na mika'zana hu'noe.
15 Hagi ruotge hu'nea kumaka'a monafinkati, kefenkama atrenka
amirine tumerimo'enema enevia mopama tagehe'mokizmima
huvempa huzmantenka zamigahue hu'nana mopafina neragenka,
Israeli vahekamota asomura huranto. **16** Hagi menina Rana
tamagri Anumzamo'a ama kasegene tra kea avaririho huno
hu'ne. E'ina hu'negu ama kasegene, tra kenena kegava huso'e
hu'netma, maka tumotamireti'ene tamagu'areti'ene huta avaririho.
17 Hagi tamagra menina huama hutma Rana tagri Anumzane
nehuta, Agri avu'avara nevaririta maka kasege'ane trake'anena
avaririgahune huta hu'naze. **18** Hagi anagema hazageno'a,
Ramo'a huvempama hu'nea kante anteno, huama huno tamagra
Nagri vahe manita, marerisa fenozani'a mani'nazanki kasegeni'a

kegava hiho huno hu'ne. 19 Hagi e'i anama hanageno'a, tamazeri sga huno rantamagi tamamino mika ama mopafi vahe'ma tro'ma huzmante'nea vahepintira tamazeri sga hina, huvempama hu'nea Ra Anumzana tamagri Anumzamofo ruotge vahe manigahaze.

27 Anante Mosese'ene Israeli kva vahe'mo'zamika Israeli vahetmina amanage hu'za zamasami'naze, Menima neramasmu kasegea maka avaririh. 2 Hagi Jodani tima takaheta kantu kazigama Ra Anumzana tamagri Anumzamo'ma tamamisia mopafima vanaza zupa, ranra haverami omerita retrurente'neta higo mopa kateta erikaroro hunteho. 3 Jodani tima takaheta kantu kazigama amirine tumerimo'ma avite'nea mopama Rana tamagri Anumzamo'ma tamagehe'ima zamigahue huno huvempama hu'nea mopafima vanuta, ana higo hapanu'ma erikaroroma hunte'ne'naza haverera maka ama ana kasegea krenteho. 4 Hagi Jodani tima takaheta kantu kazigama Rana tamagri Anumzamo'ma tamamisia mopafima vanuta, amama tamasamu kante anteta ranra haverami omerita Ebeli agonare retrurente'neta, higo hapa katetma erikaroro hunteho. 5 Hagi e'i ananteria havereti Rana tamagri Anumzamofo kresramna vu ita tro hunteho. Ana kresramna vu itama tro'ma hanazana, aeniretira taga huta ana ita trora osiho. 6 Hagi aenireti'ma tagama osu haveraminteti tro'ma hu'nesaza itareke'za, tevefi kre fananehu ofa Rana tamagri Anumzamofontega hunteho. 7 Hagi e'i ana nehuta rimpfa fru ofanena anante nehuta, ne'zana neneta, Ra Anumzana tamagri Anumzamofo avuga musena hugahaze. 8 Hagi higoreti'ma anama eri karoroma hunte'naza haveraminte, maka kasegefima me'nea nanekea krente so'e hu'nenke'za keho. 9 Mosese'ene pristi kva vahe'mo'zanena amanage hu'za Israeli vhahera zamasami'naze, Akoheta mani'neta kama

antahiho! Menina Rana tamagri Anumzamofo vahe mani'naze.

10 E'ina hu'negu Rana tamagri Anumzamofo kea amage nenteta, menima Agri kasegene tra ke'anema neramasmuana kegava huta avaririho. **11** Ana zupa Mosese'a amanage huno Israeli vahera zamasm'i'ne, **12** Jodani tima takaheta kantu kazigama vanuta, Simioni naga'ene, Livae naga'ene, Juda naga'ene, Isaka naga'ene, Josefe naga'ene Benzameni naga'mo'enena Gerisimi agonare oti'ne'za asomu kea huama hugahaze. **13** Hagi Rubeni naga'ene, Gati naga'ene, Asa naga'ene, Zebuluni naga'ene, Dani naga'ene, Naptali naga'mozanena Ebali agonarega oti'ne'za, vahe'ma zamazeri havizahu kazusi kea huamara hugahaze. **14** Hagi anante Livae naga'mo'za ranke hu'za Israeli vahera kenona huzamantegahaze. **15** Hagi mago vahe'mo'ma zafare antreno kaza osu havi anumza tro huge, tevefi aeni kreno mago'azamofo amema'ama tro huno oku'ama ante'nia vahe'mo'a, kazusifi manigahie. Na'ankure e'inahu zankura Ramofona agoteno amuti'agesa nehie. Anagema hanigeno'a, maka tamage hu'za hihio. **16** Hagi iza'o nerera nefo kema ontahi'nia vahera kazusi huntone hu'za hanageno, maka vahe'mo'za tamage hu'za hihio!

17 Tava'onte'ma nemanisimofo kanagi kama akasino mopa'ma eri havia hanimofona, kazusi huntone hu'za hanageno, tamage hu'za mika vahe'mo'za hugahaze. **18** Hagi avu asuhu vahe'ma havi kante'ma avreno vania vahera, kazusi huntone hu'za hanageno, maka vahe'mo'za tamage hu'za hugahaze. **19** Hagi ruregati eman'i vahero, megusa mofavreo, kento a'nemofo zama eri savari hania vahera, kazusi huzamantone hu'za hanageno, maka vahe'mo'za tamage hu'za hugahaze. **20** Nefo nenanroma anteno masesimofona kazusi huntone, na'ankure agra nefo a'ene maseno nefo agia eri haviza hu'ne hanageno, maka tamage

hu'za hugahaze. **21** Afu' kranema monko zama hania vahera, kazusi huzamantone hu'za hanageno, maka vahe'mo'za tamage hu'za hugahaze! **22** Nesaroma anteno masesia vahera kazusi huzamantone hu'za hanageno, maka vahe'mo'za tamage hu'za hugahaze! **23** Nenemo a'ma anteno masesia vahera kazusi huzamantone hu'za hanageno, maka vahe'mo'za tamage hu'za hugahaze! **24** Hagi tava'oma'are'ma nemanisimofoma oku'ama frakino ahe frisia vahera kazusi huzamantone hu'za hanageno, maka vahe'mo'za tamage hu'za hugahaze! **25** Hagi zagoma ami'nigeno vahe'ma ahe frisia vahera, kazusi huzamantone hu'za hanageno, maka vahe'mo'za tamage hu'za hugahaze! **26** Hagi kasegema ke fenkami netreno, ana kasegema ovaririsia vahera, kazusi huzamantone hu'za hanageno, maka vahe'mo'za tamage hu'za hugahaze!

28 Hagi tamagra Ra Anumzamofo ke'ama nentahita, menima nermasamua kasege'ama kvahu so'e hutama avaririsageno'a, Rana tamagri Anumzamo'a ama mopafi vahepintira rantamagi tami'nigeta mareri vahe manigahaze. **2** Hagi Rana tamagri Anumzamofo kema avaririsageno'a, ana maka zama hanafina asomura huramantegahie. **3** Hagi rankumatamifine, hozatamifinena asomura huramantegahie. **4** Hagi mofavretamine, hozatamine, sipisipi afutamine, bulimakao afu'taminena asomura huramantesigeno, rama'a fore hugahaze. **5** Hagi ne'zama erineriza ku'ene, ne'zama negraza zantaminena asomu huntesigeno, ne'zamo'a rama'a hugahie. **6** Hagi maka'zama hanaza zana, Ra Anumzamo'a asomu huntegahie. **7** Hagi ha' vahetimo'za magoke kampinti e'za hara eme huramantegahaze. Hianagi Ramo'a tamaza hina, hara huzmagateresage'za korora **7**ni'a kampi panini hu'za fregahaze. **8** Hagi hozama vasageta

nentaza nontamia, Ra Anumzana tamagri Anumzamo'a asomu huneramanteno, tamamisia mopafina asomura huramantegahie.

9 Hagi Rana tamagri Anumzamofo kasegema kegava nehutma, avaririso'ema hanageno'a, Agrama huvempama hu'nea kante anteno, Agra'a vahe tamazeri ruotge hugahie. 10 Ana'ma hanigeno'a anante maka vahe'mo'za Ramo ke hu'nea vahere hu'za ke'za antahi'za nehu'za, tamagrira kesga huramantegahaze.

11 Tamagehe'ima zamigahue huno'ma huhampri zamante'nea mopafina Ramo'a maka zantamia eri ampore nentenigeno, maka zama hanaza zamo'a knare zanke hugahie. Mofavretamine, bulimakao afuzagatamine, hozataminena eri amporegahie. 12 Hagi Ramo'a monafima fenozama nentea nona anagino eri ruhagar oinkeno, mopatamifina ko'ma nerianknarera kora nerinkeno, maka'zama hanaza zana asomu huramante'nigeta, mago zankura vahepintira memea osugahazanagi, vahe'mo'za tamagripinti memea eme hu'za erigahaze. 13 Hagi tamagrama menima avaririhu'nama neramasma kasegema, kegava nehuta avariri so'ema hanageno'a, Ramo'a tamagrira tamaza hina henka omegosazanki, ugagota nehuta mareri vahe manigahaze. 14 Hagi menima neramasma kasegea avariri fatgo hu so'e nehuta, tamaga kaziga rukrahe huge, hogakaziga ome rukrahe hugera nehuta havi anumza tamimofontera monora huontegahaze. 15 Hianagi Rana tamagri Anumzamofo kema ontahita, menima neramasma kasegene, trakenema ovvarisageno'a, amana kazusi kemo'a tamazeri haviza hugahie.

16 Hagi rankumatamine hozataminena Ra Anumzamo'a kazusi huntenkeno, haviza hugahie. 17 Hagi ne'zama erineriza ku'ene, ne'zama kreta nenaza zantaminena Ramo'a kazusi huntenkeno haviza hugahie. 18 Hagi mofavretamine, hozatamine,

bulimkaone sipisipi afu'zagatamia Ramo'a kazusi huntenkeno
haviza hugahaze. **19** Hagi inantegama vuta eta nehutma,
nazanoma hanazana Ramo'a kazusi huramantegahie. **20**
Maka zama hanaza zana Ramo'a kazusi huramantenkeno,
antahintahitamimo'a savri nehinkeno tamarimpa nehenigeno
tamahe fanane hina, ame huta fanane hugahaze. Na'ankure
tamagra kefo avu'ava nehutma, Nagrira tamefi hunami'naze. **21**
Hagi Ramo'a kri atrenkeno tamazeri haviza hinketa, magore
hutma amama vutama omeri santihare'zama nehaza mopafina,
omanitfa hugahaze. **22** Ana nehuno Ra Anumzamo'a ruzahu
ruzahu krinuti, tamazeri havizantfa nehuno, amuho krinu'ene
tamavufga zore krinu'ene, zage atrena amuhonentake huno
maka zana tefanane nehina, ne'zantera kria fore nehina, ne'za
aninarera kravara azeneri'na, vahera fri vagaregahaze. **23**
Hagi kora orinkeno monamo'a hanavetino bronsi havegna
hinkeno, mopamo'a aenigna huno tusi hakavetigahie. **24** Hagi Ra
Anumzamo'a kora eri rukarehe hinkeno, monafintira kugusopane
kasepane eramino, maka vahera tamahe frigahie. **25** Hagi Ra
Anumzamo'a tamatre'nigeno ha' vahé' timimo'za tamahegahaze.
Hagi magoke kazigati vuta hara ome huzamantegahazanagi,
tamahe panani hanageta, panani huta 7ni'a kampi fregahaze.
Anama hanageno kokankoka vahe'mo'zama tamagrite'ma
havizama fore'ma haniazama kesu'za, zmagogogu hugahaze. **26**
Hagi fri'nageno'a tamavufgamo'a namamofone afi' zagagafamofo
ne'za sampregahie. Ana namaramine afi' zagagafama aru hari tre
vahera magore huno omanigosie. **27** Hagi Isipi mopafima me'nea
usge namune, hoga asi namune, hagave namuntminu Ramo'a
tamazeri haviza hinkeno, ana namuntmimo'a tusi'a hagahaga
nehu'za vagaoregahaze. **28** Ra Anumzamo'a antahintahi

tamimofona tamazeri savri nehuno, tamavurga tamazeri asu hinketa neginagi nehuta, **29** avu asuhu vahe'mo hanimpi kanku hakea kna huta zage ferupina kankura haketa neginagi nehuta, maka zama hanaza zamo'a knarera osugahie. Maka zupa keonke zantamia musufa nesena, tamaza huno tamahoke ahe vahera omanigahie. **30** Hagi e'ina a' erigahane hu'za hugantegahazanagi, ru vemo ana ara anteno masegahie. Nona kintegahananagi, ana nonka'afina ovasesankeno, ru vahe'mo masegahie. Waini hoza antegahananagi, ana hozaka'afintira raga taginka onenankeno, ru vahe'mo tagino negahie. **31** Hagi kavu negesanke'za bulimakao afuka'a ahiegigahazanagi, magore hunka ame'a onegahane. Donki afuka'a kavu negesanke'za eme rente'za avazu hu'za vute'za, ete eme onkamigahaze. Ha' vaheka'amo'za kavu negesanke'za, sipisipi afuka'a eme avregahazanagi, mago vahe'mo'a kaza osugahie. **32** Hagi kavu negesankeno ru kumate vahe'tmimo neka'ane mofaka'anena eme avre'za nevnageno, tumoka'amo'a atanegahianagi, mago'zana osugahane. **33** Kamu'nama nehagenigenka ante'ne'nana hozaka'a, antahinka kenka osu'nesana kumateti vahe'mo'za ne'za erihana nehu'za, maka zupa kazeri haviza huvava hugahaze. **34** Maka kaziga hazenke zantmimo kagigatenkenka, hazenke zanke negesankeno antahintahi ka'amo'a savri hugahie. **35** Hagi kagiareti'ma marerino kasenire'ma uhanati'niana, Ramo'a usge namunu kazeri havizahina, tusanamasama hananana ana namumo'a teoganigahie. **36** Hagi Ra Anumzamo'a tamatrema tamagrane kini ne' timineni kina hurmant'e'za tamagehe'izane tamagranema onke'nesaza moparega tamavre'za vanageta, anantega havere'ene zafare'enema tro hunte anumzantami monora ome huntegahaze. **37** Ana'ma Ra Anumzamo'ma tamatrenigeno

tamavre'za vanaza kumate vahe'mo'za nege'za tusi antri nehu'za,
tamagizanere'za, kizazokago ke huramantegahaze. **38** Rama'a
hozafina avimza hankregahazanagi, kenutamimo'za ana hoza
ne'za erihana hanageta, osi'a hamaregahaze. **39** Hagi waini hoza
anteta kegava hugahazanagi, havi kafamo'za nehana hinketa,
waini tine krepi raganena onegosaze. **40** Hagi olivi zafamo'a
mopatamifina rama'a hugahianagi, raga'amo'a nena osu'neno
tagiraminketa olivi masavena erita ofregosaze. **41** Hagi ne' mofara
kase zmantegahazanagi, tamagri'enena omanigahaze. Na'ankure
ana mofavreramina ha' vahe'mo'za eme zamavare'za kina ome
huzmantegahaze. **42** Hagi maka zafa ani'nane, hozataminena
kenutamimo'za ne'za eri hana hugahaze. **43** Hagi ruregati
vahe'ma tamagranema enemaniza vahe'mo'za, maka zama
hanaza zamo'a knare hinke'za, hankaveti'za marenerinageta,
tamagrama maka'zama hanaza zamo'a havizanke huno
uramigahie. **44** Hagi zamagripintike maka zananofira huta
erigahaze. Hanki tamagripintiranofira hu'za e'origahaze. Zamagra
aseni manisageta, tamagra zamarisona manigahaze. **45** Hagi
Rana tamagri Anumzamo'ma avariraho huno'ma huramante'nea
kasege'ane, trake'anema ovaririsageno'a, maka ama ana kazusi
zamofo knazamo'a tamavaririno nevuno tamahe frigahie. **46**
Hagi ana kazusi zamofo knazamo'a tamagrite'ene henkama
tamagripinti fore hunante anante'ma hu'za esaza vahetera mago
avame'za me'nena Ramofo rimpahet'zane hu'za ke'za antahi'za
hugahaze. **47** Hagi rama'azama neramia zanku'ma tamagrama
tamagu'areti huta Rana tamagri Anumzamofoma musema
huontesazana, **48** ha' vahe'timi huzmante'na tamavre'za kina ome
hurmantesageta, zamagri eri'za vahe umanigahaze. Anantega
tamagakura nehuta, tinkura tamavenesina, kukenagura upa

nehutma, maka zankura upa hugahaze. Anama nehanageno'a
Ramo'a kare namare zafa tamagumpi anakinteno, tamazeri
haviza nehina frigahaze. **49** Ra Anumzamo'a ha' vahera
afete moparegati ru zamageru neranaza vahe zamavreno
e'nige'za, tumpamo'ma hiaza hu'za eme tamavre'sga hu'za
vugahaze. **50** Hagi ana ha' vahe'ma esazana vahe'mofonku
zmasunku osu' vahe egahazanki'za, tavava ozafane ne'one
mofavreraminena zamasunkura huozmantegahaze. **51** Hagi mika
zagagafatimine, hoza timinena eri haviza hanageno, magore huno
witine, kasefa wainine, olivi masavene, bulimakao anenta'ene,
meme anenta'enena omanitfa hinketa tamagaku hutma
frigahaze. **52** Hagi Rana tamagri Anumzamo'ma tamami'nea
mopafima tagu'vazigahie hutama nehaza kuma vihutamia
ha' vahetamimo'za avazagigagi'ne'za, tapage hugahaze. **53**
Hagi ha' vahe'mo'za kumatamimofoma avazagi kagiza ha'ma
huramantesageta, ne'za ne'zanku hugeta Rana tamagri
Anumzamo'ma tamami'nea ne'ene mofa'enena zamaheta
negahaze. **54** Hagi amu'nontamifima mago knare ne'ma
vahe'mofa knare'za hunente'nia ne'mo'agi, nefuno, avesinentesia
a'amofono, fri vaganerenigeno magoke mani'nesia mofavre'anena
ne'zana omitfa hugahie. **55** Hagi ha' vahe'mo'ma avazagi
kagi'nenigeno ne'zana omnetfa hugahiankino, ana ne'mo'ma
mofavre'ama aheno nene'nuno'a, magore huno naga'a omitfa
hugahie. **56** Hagi fenoma'amo agatere'nigeno agia avapara
vano nosuno, mago'zanku upama osu marerisa a'nemo'za
nevene, ne'ane mofa'anena ne'zana ozamitfa hugahie. **57**
Hagi ha' vahe'mo'ma kuma'ma avazagi kaginigeno, ne'zama
omnetfa hanigeno'a, ana a'mo'a kasema ante'nia mofavrene, ana
mofavre noma'anena frakino ante'neno agrake oku'a negahie.

58 Hagi tamagrama ama avontafepima krente kasegema ovariritma, Rana tamagri Anumzamofo hihamu masa'ane agi'agu'ma koro'ma huontesazana, **59** Ramo'a tamagrite'ene mofavretamirera vagaore kri atrenkeno, me'neno tamazeri haviza huvava hugahie. **60** Hagi Isipi mopafima fore higetama negeta kore'ma hu'naza krimo tamagritera ekamaregahie. **61** Hagi Ramo'a ruzahu ruzahu krima kasege avontafepima omne'nea kria atreno, tamata hoza neramino tamahe frigahie. **62** Rana tamagri Anumzamofo kea ontahi'nazagu, monafi hanafira agatereta rama'a vahe manigahazanagi, tamahe hana hinketa osi'a vahe manigahaze. **63** Hagi Ra Anumzamo'a tamagri'ma tusi'a musema huramanteno knare'ma huramantegeta, rama'a vahe'ma fore'ma hu'nazaza huno hazenkezama tamino tamahe fananema huzankura muse hugahie. Amama ufreta omeri santiharesaza mopafintira tamazeri vatitregahie. **64** Hagi Ramo'a tamazeri panani hinketa, mago mago huta ru vahe'mokizmi mopafi afete umani emanı hu'neta, anantega havere'ene, zafare anumzantmina tamafahemo'zane tamagrane keta antahita osu'nezasa havi anumzante monora huzmantegahaze. **65** Ana kumategama manisazana mika zupa tamarimpa fru zana omnena manigsa osugahaze. Ra Anumzamo'a maka zupa tamazeri koro nehina, tamavuma ke'zamo'a knarer a nosina, manizantmimo'a knare osugahie. **66** Hagi antahintahitamimo'a savri hinketa feru'ene hanimpinen a antahintahia huvava nehuta, frigahumpi manigahune huta antahigahaze. **67** Hagi nanterama asesigeta amanage hugahaze, hanima huno kenege'ma sesiana knare hugahie huta nehuta, kinagama senigetama mani'neta nanterama sesiana knare hugahie huta hugahaze! Na'ankure mika'zama kesazazamo'a havizantfa hinkeno tusi tamagogogou

hugahaze. **68** Anante mago'anena onkegosanema hu'noa kumatega ventefi Ra Anumzamo'a huramantesigeta ete Isipi vugahaze. Anama hina kazokazo eri'za vahe manisune huta tamagra'a zagore atregahazanagi, tamagrira mizana osegahaze.

29 Hagi Sainai agonare'ma mani'nageno'ma Ra Anumzamo'a huhagerafi huvempa kema Israeli vahe'ma zami'nerera, Moapu mopafima umani'nageno'a, ama'na huhagerafi huvempa kea mago'ane zamio huno Mosesena asami'ne. **2** Hagi Mosese'a Israeli vhahera maka kehu tru huno amanage huno zamasmi'ne, Ramo'ma Isipi mopafima Feronte'ene, eri'za vahe'are'ene, mopa'afinema, **3** maka hankave'ane avame'zane, kaguvazanema erifore'ma hu'nea zana ko' ke'naze. **4** Hianagi manita ama knare'ma ehanatizana, Ramo'a antahintahitamia eri amara osigeta, ana zana keta antahita nosuta, tamavurga eri hari higeta nonkazageno, tamagesa erinkro higeta nontahize! **5** Hagi Ramo'a huno, 40'a kafufi ka'ma kokampina tamavare'na e'noanagi, kukena tamimo'ene tamagia anomo'enena tagatora huno havizana osu'ne. **6** Hagi Nagriku'ma Rana tagri Anumzane huta keni'ma hanagu, bretine wainine aka tinena one'naze. **7** Hagi ese'ma ama mopare'ma neonke'za, Hesboni kini ne' Sihoni'ene Basani kini ne' Ogikea eke hara eme hurante'nazanagi, tagra hara huzamagatere'none. **8** Ana kini netremokizni mopa hanareta Rubeni naga'ene, Gati naga'ene, Manase naga'ma amu'nompinti refko hu'naza naga'enena, ana mopa refako huzami'none. **9** E'ina hu'negu ama ana huhagerafi huvempa kea kegava hu'neta nevararinkeno, maka zama hanaza zamo'a knarerera hino. **10** Hagi menina Ra Anumzana tamagri Anumzamofo avuga Israeli naga nofite kva vahe'ene, ranra vahe'ene, sondia kva vahe'ene, maka Israeli vene'nene, **11** a' mofavrene, ruregat'i'ma tamagr'i'enema

enemaniza vahe'ene, tintevema hurami vahe'enena, **12** Ra Anumzana tamagri Anumzamo'ma tamagranema huhagerafi huvempa ke hanigeta avararigahune huta huvempa hanagu menina eme oti'naze. **13** Hagi tamagehe'i Abrahamuma, Aisakima, Jekopunema huvempama huzamante'nea kante anteno, Agra tamagri'ene eri hagerafi huvempa ke hinketa tamagra menina Agri vahe' mani'nageno, Agra tamagri Anumza manigahie. **14** Hianagi Ramo'na tamagrikukera ama huhagerafi huvempa kea nosuanki, **15** Rana tamagri Anumzamo'na navugama menima oti'naza vahe'ene, henkama fore hu anante ante'ma hanaza vahe'enenku nehue. **16** Hagi Isipima mani'nonteti'ma ana kuma'ma atreta ne-eta ha' vahetimofo mopafima e'nonana, tamagra ko keta antahita hu'naze. **17** Kasrino hi'mnage'ma hu'nea avu'ava'ma nehu'za, zafare'ene havere'ene, silvare'ene, golire'enema kaza osu' anumzama amu'no zamifima trohuntenazana ko ke'naze. **18** Hagi ama huhagerafi huvempa kema tamagri'enema nehuana, mago vemo'o a'mo'o naga'mo'ma, Rana tamagri Anumzamofoma amagena hunemino ana havi anumzantamima mono hunte'niana kefo zafamo agata hageno aka' zafa raga rentea kna amu'nontamifinti hugahie. **19** Hagi izago ama kazusi kema antahimoka kagraka'agura humusena nehunka, nagra navesi'zama avaririsuana mago zana nagritera fore osugosie hunka kagesa ontahio. Kagra rama'a hazenke zampi maka vahera zamavarenka ufregahane. **20** Ramo'a e'inahu vahe'mofo kefozama'a atreontegosianki, tusi arimpa ahenenteno kanive renentenkeno, ama avontafepima me'nea kazusi kemo'a ana vahe'mofo agofetu me'nenkeno Ra Anumzamo'a ama mopafintira agi'a eri fanane hugahie. **21** Hagi ana'ma hania vahera Ramo'a Israeli naga'nofipintira azeri

arure atreno, kasege avontafepima huhagerafi huvempa kema hu'nea knazana ana vahete atre'nigeno evugahie. **22** Hagi kagripinti fore hania vahero, ruregati'ma e'mani vahepinti forehu anante anante hu'za esaza vahe'mokizmia, Ra Anumzamo'ma mopatamima krinuti'ene hazenke'za nuti'ene eri havizama hania zana nege'za, **23** amanage hu'za krafa hugahaze, Ramo'ma Sodomune, Gomorane, Atmane, Zeboimi kuma'ma arimpa ahezama'areti eri havizama hu'neaza huno maka mopa fina salfa havemo'ene hagemo'ene aviteno mopa eri haviza higeno, hoza antegara osigeno trazana magore huno ohagetfa hie hu'za hugahaze. **24** Ana hanige'za ru mopafi vahe'mo'za amanage hugahaze, nahigeno Ramo'a amanara huno ama mopa eri haviza nehuno, na'amo higeno tusi arimpa ahenezamante hu'za antahigahaze. **25** Anante amanage hu'za hugahaze, na'ankure Rana zamagehe'i Anumzamo'ma Isipiti'ma zamavareno neeno huhagerafi huvempa kema hu'neana zamagra zamefi humi'zageno, anara hu'ne hu'za hugahaze. **26** Hagi ke'za antahi'za osu'naza havi anumzantami nevariri'za monora hunte'naze. E'i ana havi anumzantmina monora huonteho huno Ramo'ma hu'nea anumzantami monora ome hunte'naze. **27** E'ina higeno Ra Anumzamofo arimpa he'zamo'a marerigeno, ama avontafepima me'nea knazana atregeno ama mopa fina me'ne. **28** Hagi e'ina hazageno Ramo'a tusi arimpa ahezamanteno, ama mopa fintira Israeli vahera zamazeri vatitrege'za menina ru mopafi umani'naze. **29** Hagi Ra Anumzana tagri Anumzamo'a oku'ma me'nea kea ontasami'ne. Hianagi tagrite'ma erifore'ma hiankea tagrane mofavretimozanena avarari vava hugahune.

30 Hagi menina tare kantre tamaveri nehuanki, mago kana Rana tamagri Anumzamo'a tamazeri so'e hugahanki,

mago kana Ramo'a tamazeri haviza hugahianki, tamagra'a inankante vugahaze huhamprigahaze. Hagi maka ama ana knazamo'ma Rana tamagri Anumzamo'ma huramante'nigetma umanisaza vahe'mokizmi kumapima tamagrite'ma fore'ma hanigetma, amana tare kantrema tamaveri'ma huankanku tamagesa antahigahaze. 2 Tamagrane tamagripinti'ma fore hanaza vahe'ene rukrahe huta Rana tamagri Anumzamofonte eta, tumotimireti'ene tamagu'areti'ene huta Rana tamagri Anumzamofonkea maka menima tamasamua kante anteta avaririho. 3 Ana'ma hanageno'a, Rana tamagri Anumzamo'a ete tamazeri knare nehuno, asunku huneramanteno, tamahe panani'ma hignetama ufre efrema hu'naza moparegatira tamavre atru hugahie. 4 Hagi mopa atumparega afete umanigahazanagi, Rana tamagri Anumzamo'a ete tamavre atruhuno tamavreno egahie. 5 Hagi Rana tamagri Anumzamo'a ete tamavreno ko'ma tamafahe'zama erisantima hare'naza mopafi enigetama ana mopa erisintihareta mani'ne'nageno maka'zama hanaza zampina, tamazeri knare nehina tamafahe'ina zamagatereta rama'a vahe fore huta manigahaze. 6 Ana nehuno Rana tamagri Anumzamo'a tamagri'ene mofavretimimofo zamagu'a eri rukrahehinketa tamagu'areti'ene tumotamireti'ene huta, Rana tamagri Anumzamofona avesinenteta za'zatera manita vugahaze. 7 Hagi Ra Anumzana tamagri Anumzamo'a ha' vahetimo'zama tazeri havizama nehaza vahete ama ana maka knazana zaminio zamazeri haviza hugahie. 8 Ana hanigeta ete Ramofo kea nentahita, maka menima neramasamua kasege'a avaririgahaze. 9 Ana'ma hanageno'a Rana tamagri Anumzamo'a maka zama hanaza zana erimporeno eri knare hinketa, maka zampina knare hugahaze. Ramo'a mofavreramina rama'a neramamino,

bulimakao afutamina zamazeri hakare nehuno, nezantamina erimporenenteno, hozatamia eri knare hinketa rama'a hoza vasagegahaze. Na'ankure Rana tamagri Anumzamo'a tamagrikura tusi muse huneramanteno, tamagehe'ima hu'neaza huno tamazeri knare hinketa, maka zampima knare nehutma,
10 ke'ama nentahita, ama avontafepima krente'nea tra ke'ane kasege'anena nevariritma, tamagu'areti'ene tumotmi'areti'enema hutma Rana tamagri Anumzamofonte'ma esageno'a, Agra muse huramanteno avesiramantegahie. **11** Amama menima neramamua kasegemo'a amuhoa osu'nenkita amane antahi ama nehuta, tavaontamire me'neankita kegahaze. **12** Hagi ama ana kasegea monafina omneneankita, iza marerino omerino eme tamisigeta antahigahune huta osugahaze. **13** Hagi ete ama ana kasegemo'a hagerimofo kantu kaziga omne'neankita, iza hagerina takaheno omerino eme tami'nigeta antahigahune huta osugahaze. **14** I'o, ama ana kasegemo'a tava'ontmire'ene tamagipine, tamagu'afine me'neankita amane avaririgahaze.
15 Hagi antahihio, menina asimu'ma erino mani'zane, knare nomani'zana tamaveri nehu'na, fri'zane tamazeri havizama hania zanena tamaveri nehuankitma tamagra'a huhamprigahaze. **16** Hagi nagra menima hiho hu'nama nehuana, Ra Anumzana tamagri Anumzamofa avesinenteta kasege'ane, tra ke'ane Agri avu'ava'ene avaririhio hu'na huneramantoe. E'i anama hanutma amama unefraza mopafina knare huta mani'neta vahera kasepazi nehanageno, Rana tamagri Anumzamo'a asomu huramantegahie. **17** Hianagi tamagu'amo'ma rukarahe'ma nehina, kema ontahita atreta ru anumzantamima ome nevaririta mono'ma hunteszazana, **18** tamage hu'na menina huama hu'na neramasamuankita frigahaze. Hagi Jodani tima takaheta vuta

ome eri'zama nehaza mopafina za'zatera omanigahaze. **19**
Hagi menina monane mopane kehugeke negake'na, asimu'ma
erino mani'zane knare nomani'zana nente'na, fri'zane tamazeri
havizama hania kanena me'negu tamagrane mofavretiminena
asimu erino mani'za e'nerita knare huta maniho. **20** Hagi
Rana tamagri Anumzamofona avesinenteta, ke'a nevaririta
azeri antarako hiho. Na'ankure asimu'ma erino mani'zana
Agra neramamino kafu zagetimia eri za'za hina tamagehe'i,
Abrahamuma, Aisaki'ma Jekopukizmima Ramo'ma huvempa
huno huhampri zamante'nea mopafina zazate manigahaze.

31 Mosese'a mago'ene Israeli vahera nanekea zamasmino, **2**
Nagra 120'a kafu hu'na ozafaroanki'na mago'enena vugota hu'na
tamavre'na vugara osugeno, Ra Anumzamo'a huno, Jodani tina
takahenka kantu kaziga ovugosane huno nasami'ne. **3** Hianagi Ra
Anumzana tamagri Anumzamo'a Agra'a vugota huramanteno tina
takaheno kantu kaziga nevuno, maka ana mopafima mani'nea
vahetamina zamahe hana hanigeta, ana mopazmia erigahaze.
Hagi Rana tamagri Anumzamo'ma hu'nea kante Josua'a vugota
hurmanteno, tamavreno tina takaheno vugahie. **4** Hagi Amori
vahetamina ne'tre Sihonine Oginema hu'neaza huno Rana tamagri
Anumzamo'a ana mopafi vahera zamahehna hugahie. **5** Hagi
ana mopafi vahera Ramo'a tamazampi zamavarente'na, hihoma
hu'na tamasamua zana ana vahera huzamantegahaze. **6**
Hagi oti hankavetita mani'neta ana vahetminkura korora huta
tamagogogura osiho. Na'ankure Rana tamagri Anumzamo'a,
tamagrane nevuno vugota huramanteno vugahie. Hagi Agra
amefira huoramige, tamatrege osugahie. **7** Hagi anante Mosese'a
Israeli vahetmokizimi zamavufi Josuana kehuno amanage huno
nasami'ne, Josuaga korora osunka oti hankavetio. Na'ankure

ama vahera zamavarenka Ramo'ma zamigahue huno'ma zamagehe'ima huhampri zamante'nea mopafi vunka ana mopa omeri zamisanke'za erisantiharegahaze. **8** Hagi korora huge, kahirahikura osuo. Na'ankure Ra Anumzamo'a ogatregosianki, kagri'ene mani'neno vugota huganteno vugahie. **9** Anante Mosese'a ana kasege kreno Ra Anumzamofo huhagerafi huvempa kema me'nea vogisima eneriza Livae pristi vahetamine, Israeli ranra kva vahe'taminena zami'ne. **10** Ana nehuno Mosese'a zamasmino, Mika namba 7 kafumofo atumparega vahe'mofa zama eri'nesia zama eteno nemino, seli nompima manita e'naza zamofo antahimita musenkasema hu knarer, **11** Rana tamagri Anumzamofo avugama mono hunantegahazema hania kumapima maka Israeli vahe'tmima etruma hanaza knare ama ana avontafera nentahisageta hampriho. **12** Hagi maka vene'nema, a'ne'ma mofavreramima, ruregati'ma tamagri kumapima eman'i'naza vahe'taminena kehutru huta ama avontafepima me'nea kasegea hamprinke'za nentahi'za, Rana tamagri Anumzamofona korora hunente'za maka tra kea kva hune'za avariraho. **13** Ana huta nehamprinke'za ontahi'ne'naza mofavretamimo'za nentahi'za Rana tamagri Anumzamofona korora huntegahaze. Hagi Jodani tima takaheta kantu kazigama umani'naza mopafina, ama ana zana huvava hiho. **14** Anante Ra Anumzamo'a Mosesena amanage huno asmi'ne, Kagrama fri'nana knamo'a hago kofta hianki, Josuana kehunka atruhu seli mono nompi vuge'na eri'zana ami'neno. Anagema higekea Mosese'ene Josuakea atruhu seli mono nontega vu'na'e. **15** Anama vakeno'a Ra Anumzamo'a vimago hampompi eramino atruhu seli mono nompi emanigeno, ana hampomo'a kafante atrureno me'ne. **16** Hagi Ramo'a amanage huno Mosesena

asami'ne, menina frinka kagehe'mo'zane manigasa hugahane.
E'i anama hanankeno'a ama vahe'mo'za natre'za amama
unefraza mopafi, ru anumzantminte monora ome huntegahaze.
Hagi Nagrira zamagena hunenami'za zamagranema huhagerafi
huvempa kema hu'noana rutagregahaze. **17** E'i ana'ma
hanageno'a, Nagrira tusi narimpa ahenke'na zamatre'na namefi
hunezami'na ozamagesuge'za havizantfa hugahaze. Hagi rama'a
havi zamo'ene hazenke zamo'ene zamagratera e'nige'za amanage
hugahaze, Anumzana amu'nontifina omaninegeno hazenke
zamo'a tavatera ne-efi? hu'za hugahaze. **18** Hagi tamage
hu'na e'i ana knarera rukrahe hu'na ozamagegahue. Na'ankure
zamagra maka havi avu'ava nehu'za ru anumzantaminte
monora ome hunte'naze. **19** E'ina hu'negu amama kasamisua
zagamemofo nanekea krenka Israeli vahera rempi huzamio.
Henka ama ana zagame'mo me'neno keaga huzamantegahie.
20 Na'ankure tumerimo'ene amirimo'enema avite'nea mopama
zamagehe'ima zamigahue hu'nama huhampri zamante'noa
mopafina Nagra zamavare'na vugahue. E'ina mopafi zamavare'na
vanuge'za maka zampina knare nehu'za, ne'zana ne'zamu
hugahazanagi, Nagrira zamefi hunenami'za ru anumzantami
monora ome hunente'za, zamagranema huhagerafi huvempa
kema hu'noana ruhantagigahaze. **21** Hagi ana'ma hanageno'a
havi zamo'ene, hazenke zamo'enema zamagrite'ma e'nigeno'a,
ama zagame'mo avame'za me'nena ana zagamema nehanu'za
zamagesa antahigahaze. Na'ankure fore hunante anante'ma
hanaza vahe'mo'za ama ana zagamera zamagera okani huvava
hugahaze. Na'ankure zamigahue hu'nama hu'noa mopafima
ome hanaza zamavu'zamava zana Nagra menina ko antahi'na
ke'na hu'noe. **22** Ana higeno Moses'e'a ana knazupage ana

zagamera kreno Israeli vhahera rempi huzami'ne. **23** Hagi anante Ramo'a Nuni nemofo Josuana huhamprinenteno amanage huno eri'zana ami'ne, korera osunka oti hankavetio! Na'ankure Israeli vahe'ma zamigahue hu'nama huhampri zamante'noa mopafina, kagra Israeli vhahera zamavarenka ufregahane. Anama nehananke'na Nagra kagrane manigahue. **24** Hagi Mosese'ma ana kasegema avontafepima krente vagaretenu'a, **25** huhagerafi huvempa kemofo vogisima zafama huno vu Livae nagara amanage huno huzmante'ne, **26** Ama'i kasege avontafera erita Ra Anumzana tamagri Anumzamofo huhagerafi huvempa vogisimofo asoparega antenkeno me'neno, Israeli vahe'mokizmi kefo zamavu'zmava eriama hu'za meno. **27** Na'ankure Nagra tamantahina ke'na hunoankita, keontahi hankave antahintahine vahe mani'naze. Hagi antahih, meninena amama ofri'na mani'norera Ra Anumzamofona ha'renentazankita, fri'nugeta menima nehaza zana agatereta ha'rentegahaze. **28** E'ina hu'negu mika Israeli ranra vahe'ene, vugota eri'za vahe'enena kehuta emetru hanage'na, monane mohanena keha'ne'na tamagri'ma tamavumro'ma antesua nanekea monane mohanemokea antahigaha'e. **29** Na'ankure Nagra tamantahina ke'na hu'noankita, nagrama fri'nugeta keontahi tamavutamava nehuta, nagrama avaririh, hu'nama huramantoa kana atreta haviga avariri'nageno'a, havizamo tamagrifera egahie. Na'ankure Ra Anumzamofo avufina havi avu'ava nehuta, havizama tro'ma hanaza zamo'a Ra Anumzamofona azeri arimpa ahegahie. **30** Anante Mosese'a ama ana zagamera maka Israeli vahe'tmimo'za nentahizageno zamasami vagare'ne.

32 Monane mohanemokea, nagrama hanua nanekea tanagesa anteneta antahih. **2** Nagrama rempima hurami'nua nanekemo'a,

ko'ma riankna nehina, nanekema hanua naneke'nimo'a, ata
aheankna nehina, kopaga ko'mo trazante runteankna nehuno,
menima nehagea trazante kopaganko riankna hugahie. 3
Na'ankure nagra Ramofo agi ahentesga hugahue. Hagi
tamagranena himamu masa'ane Anumzanti mani'ne huta
agi'a ahentesga hiho. 4 Ra Anumzamo'a ra havegino, Agri
eri'zankamo'a knarezantfa hu'ne. Maka'zama nehia zamo'a
fatgo higeno, Agra hugahuema nehiaza nehia Anumzankino,
mago havizana osuno, fatgo avu'ava zanke hugahie. 5 Hianagi
zamagra havige avu'ava nehaza vahe agri avufina mani'naze.
Zamagra havige zamavu'zamava nehaza vahe mani'nazanki'za
zamagra agri mofavrea omani'naze. Fatgo osu havige avu'ava
nehaza vahe mani'naze. 6 Tamagra antahintahitami omne
neginagi vahe mani'nazanki, Ra Anumzamo'ma knare'ma
huramante'nerera e'inahu tamavu'tamavateti atesi'za nehazo?
Agra tamagrira trora huoramanteno, tamazeri rana osu'nefi? 7
Korapa'ma evu'nea knaraminkura tamagera okaniho. Vahe'ma
forehu anante anante'ma huno e'nea kafuraminku tamagesa
antahiho. Tamafahe'ine, ranra vahe'tamine zamantahigenke'za
tamasamaho. 8 Hagi Marerirfa Anumzamo'a mika kokankoka
vahera mopa zami'ne. Agra vahera refko nehuno, ana avamente
ankero vahera refako huno zami'ne. 9 Hianagi Israeli vahera
Ramofo vahe mani'naze. Jekopu'a Ramofo vahe mani'ne. 10
Agra vahe'omani zaho'mo avite'nea ka'ma kokampinti ome keno
avre'ne. Agra mani kaginteno, Agra'a avuragama kegavama
hiankna huno kegava hunte'ne. 11 Agra tumpamo'ma anenta'ama
hareno vano hinogu'ma noma'afinti avretregeno takau'nereno
ana'ana nehigeno agekona rufranara huno avreankna huno Ra
Anumzamo'a zamavareno zamagura vazi'ne. 12 Ra Anumzamo

agrake kegava huzmanteno, zamavareno vu'ne. Ru anumzamo'a
kegava huzmanteno zamaza osu'ne. **13** Agra zamaza hige'za
agona mopafi vano hu'naze. Ana mopafina hoza ante'za nene'za,
havefintira tumerina eri'za nene'za, havege mopafina olivi
zafa kri'za masavema'a eri'naze. **14** Agra meme afu'mofo
amirinki, bulimakao afu'mofo eri kregefe'nea amirinki, afovage
sipisipigi huno zami'ne. Hagi ana agofetura Basani mopafi
ve sipisipi afu'taminki, meme afu'taminki, kaneno eri osi
higeno knare hu'nea witigi, grepireti tro higeno knare'zantfa
hu'nea waini tinki huno zami'ne. **15** Hianagi Israeli vahe'mota
afovage huta maka zampina knare nehuta, tamazeri fore'ma
hu'nea Anumzamofona tamefi hunemize. Tamagu'ma vazi'nea
Havea huhaviza hunenteta atre'naze. **16** Zamagra havi
anumzantminte monora hunte'za Ra Anumzamofona arimpa
azeri ot'i'zageno, kanive renezmanteno rimpa ahezmante'ne.
17 Zamagra tamage anumzana omani'neanangi, havi hankrote
kresramana vunente'za, zamagehe'mo'za ke'za antahi'za
osu'naza kasefa anumzante monora hunte'naze. **18** Tamagra
tamazeri fore'ma hu'nea hanave Havegura tamagesa ontahi'naze.
Kasema tamante'nea Anumzankura tamagekaninte'naze. **19**
Ramo'a anama hazazama negeno'a, tusi avesra huzmanteno
amefi huzami'ne. Na'ankure Agri'a ne'mofavre'amozone
mofane'amozanena havi zamavu'zmava hu'za azeri rimpa
ahe'naze. **20** Agra amanage hu'ne, Nagra namefi huzami'na
mani'nena atuparega na'a ome kegahazafi zamagegahue.
Na'ankure zamagra akrahe akrahu zamavu'zmava nehu'za, kema
hazare o'oti vahe mani'naze. **21** Zamagra amnezanku anumzane
hu'za monora hunente'za, narimpa azeri ot'i'zage'na, kanive
renezamante'na, kaza osu amnezantamima tro hunte'naza

zantaminkura narimpa ahenezamantoe. E'ina hu'negu ru vahe
asomura huzmantenuge'za kanive rezmantegahaze. Neginagi
vahe huzmante'suge'za e'za, zamarimpa ahe avu'avara eme
hugahaze. **22** Na'ankure narimpahe zamo'a, tevenefa kna
huno maka'zana mopafintira tefanane hugahie. Ana tevemo'a
mopa teno uramino mopa agu'a fri' vahe kuma'enena tefanane
hugahie. (*Sheol h7585*) **23** Miko hazenkezanu keve zamaheaza
hu'na knazana zamagumpina anta'nena zamazeri haviza
hugahie. **24** Agatontozane, ruzahu ruzahu kriraminteti'ene
ha' osifavereti'ene, afi' zagaraminuti'ene, zmasaguregati'ma
regraro he'za mopafima vanoma nehaza zagaraminuti'ene,
zamazeri haviza hugahue. **25** Hagi kumapima mani'naza
vahe'tmina ha' vahe'mo'za bainati kazinteti zamahesageno,
nomofa agu'afima mani'nesaza nehzavene, mofa'nene ranra
vahe'ene ne'one mofavremo'zanena tusi zamagogogu hugahaze.
26 Nagra zamazeri panani hu'na vahe mopafi mago mago
hu'na zamatroge'za, mago vahe'mo'e huno antahi ozamizasine.
27 Hianagi ana hanua zanku'ma ha' vahe zamimo'zama
hu'za, Ra Anumzamo'a mago zana osigeta zamahone
hu'za hu'zanku, anara osu'noe. **28** Hianagi Israeli vahera
knare antahintahi omne neginagi vahe, zamagesa antahi
ama' osu vahe mani'naze. **29** Hagi knare antahintahima
zamagri'ma me'neresina, henkama zamagri zamavate'ma
fore'ma hania knazana ke'za antahi'za hazasine. **30** Hagi
nankna huno magoke ne'mo'a, 1tauseni'a Israeli vahera
zamarotgo hanige'za fresageno, tare netremokea inankna huke
10 tauseni'a Israeli vahera zamarotago hanage'za fregahaze?
Ra Anumzamo'a Hanave havezmimo'ma zamatre'nigeno,
e'inahu'zana fore hugahie. **31** Hianagi zamagra antahi'za ke'za

hu'naze, zamagri havi anumzamo'a, tagri Anumzama hanave
Havegna'ma hu'nea Anumzankna osu'ne. **32** Na'ankure zamagri
wainimo'a Sodomu vahe'ene, Gomora vahe'mofo hozafinti
e'neankino, ana wainimofo raga'amo'a avuatagaza me'neankino,
ne'nanana aka kavesigahie. **33** Hagi zamagri waini timo'a ha'
osifa'vemofo agregna higeno, ha' osifa'vemo'ma regatatima
hunetrea avua tagankna hu'ne. **34** Ra Anumzamo'a huno,
Maka'zama huzmantesua zana mareri fenoma nentofi ante'na
renkanirentogeno me'ne. **35** Nonama hu'zana Nagri zane,
mizama ami'zana Nagri'za me'neanki'na, kofta knafi nona hu'na
zamigahue. **36** Hagi Ra Anumzamo'ma kesiama naga'amofo
hanavemo'ma evurami'nigeno kazokazo eri'za vahero, amne
vahe'ma osia manisageno'a, antahintahi'a rukrahe nehuno,
asunku hunezamanteno fatgo avu'ava huzmantegahie. **37**
Hagi Agra amanage hugahie, fra'maneki'za havi anumzazimia
iga mani'ne? **38** Kre sramnama nevaza afu'mofo afovane,
ofama haza waini tinema nenaza anumzantmina iga mani'naze?
Atrenkeno ana anumzantmimo eme tamaza nehu'za kegava
huramanteho! **39** Menina keho, Nagrake Ra Anumzana mani'noe.
Mago anumzana Nagri namefira omani'ne. Nagrake vahera
ahenefri'na, asimura nemue. Hagi zamavufaga eri haviza nehu'na,
zamazeri negnamaroankino mago vahe'mo'o, mago anumzamo'e
huno nazampintira zamazeri otregahie! **40** Na'ankure Nagra
nazana ante anagamu atre'na huvempa huankino, Nagrama
manivava hu'na vanufina, **41** Nagrama teve nefal'ene bainati
kazini'ama kume'ma kanetesu'na, fatgo hu'na refko nehu'na,
ha' vaheni'a nezamahe'na zamavaresrama hunantaza vahera,
Nagra nona hu'na zamazeri haviza hugahue. **42** Keveni'amo'a
vahe korana neno neginagi nehina, bainati kazini'amo'a vahe

avufga nenena, e'ima ne'neana hapima ahenia vahe korane, kina vahe korane, ugagota sondia kva vahe'tmimofo agenopama nesiazanku hu'ne. **43** Monamoka Agri'ene musena hugeno, maka anumzantmimo'a kepri huno Agrike monora hunteno. Na'ankure Agri mofavre'aramimo korama tagia nona huno, ha' vahe'a zamahe'ne. Agra nona huno vahe'amofo mopafintira zamavaresrama huntaza vahera zamahehana nehuno, Israeli vahe'amokizmi kumi'zmi nona huno atrenezmaneno mopazmia eri agru hugahie. **44** Anante Mosese'ene Nuni nemofo Josuakea eke, mikä Israeli vahera ama ana zagamera eme zamasamizage'za antahi'naze. **45** Hagi Mosese'ma, maka ama ana nanekeramima maka Israeli vahe'tmima zamasami vagareteno'a, **46** amanage huno zamasami'ne, ama koro kema neramasamuana kegava huta tamagu'afi erinte'neta mofavretimia zamasaminke'za maka ama ana kasegea avariraho. **47** Na'ankure ama ana nanekea amne nanekea omne'heanki, kagrama kasimu'ma erinka mani'nana naneke. Ama ana naneke amagera nentenka Jodani timofo kantu kazigama umanisunka za'zatera manigahane. **48** Hagi ana kna zupage Ra Anumzamo'a amanage huno Mosesena asami'ne, **49** Moapu mopamofo zage hanati kaziga vunka, Abarim agonaramimpi uhanatinka, Nebo agonafi marerinka morusapi uhanatitenka, Jodani timofo kantu kaziga Jeriko kuma'ma me'nea kaziga Kenani mopama Israeli vahe'ma zamisua mopa ome kegahane. **50** Ana mopama kegantutenka ketesunka negafu Aroni'ma Hori agonare frino agehe'mo'ene umani'neaza hunka e'i ana agonare frinka kagehe'mo'ene umanigahane. (Vahe hampri Namba 20:22-29) **51** Na'ankure tanagra Sin hagage kokampi, Meriba tinte Kadesi kumatera, Israeli vahe amu'nompina tanamentintia huonanteta

ke'ni'a ontahi'na'e. Na'ankure tanagra Israeli vahe amu'nompina Nagrikura ruotge hu'ne huta nagesga huonante'na'e. (Namba 4 Mosese 20: 1-13) **52** E'ina hu'negu kagra kavu'age kegahananki, ana mopafima Israeli vahe'ma zamavare'nama ufresufina uofregosane.

33 Ama'i Anumzamofo eri'za ne' Mosese'ma, Israeli vahe asomu ke huzmanteteno fri'nea naneke. **2** Hagi Mosese'a amanage hu'ne, Ramo'a Sainai agonareti eno Seiri agonarera zage hanatiankna huno eme remsa huneranteno, Parani agonaretira remsa nehuno kopasi'namo tamaga kaziga azampi me'negeno rumarave nehigeno, **10** tauseni'a ruotge hu'naza ankero vahe'aramine e'ne. **3** Agra'a vahe'ma ruotge'ma hu'naza vahera Ra Anumzamo'a, avesi nezmanteno, aza agusafi zamavarente'nege'za, Agri nanekea nentahi'za, Agri agaka nevaririze. **4** Hagi Ra Anumzamo'ma kasegema tami'neana, mago mareri fenoza Israeli vahe'mota tami'ne. **5** Hagi ugagota kva vahe'tmimo'zama atruma hazageno, maka Israeli naga'mo'za magopi atruma hazageno'a, Ra Anumzamo'a zamagri kini mani'ne. **6** Nagra anage hu'na Rubeni nagakura nehue, Rubeni nagara kasefa hu'za manigahazanagi, atrege'za fanenea osiho. **7** Hagi Juda nagakura amanage hu'ne, Ra Anumzamoka Juda agerura antahinka, vahe'afi avarenka efro. Hankave zaminka zamaza huge'za, ha' vahezmia hara huzamanteho. **8** Hagi Livae nagakura amanage hu'ne, Ra Anumzamoka kentahi eri'za nagaka'a, Livae nagara Tamimi havene Urimi havene kagri kavesi'zama hakeno, erifore'ma hu'zana zami'nane. Masa kumate'ene Meriba tint'e'ene rezamahenka ke'nane. **9** Ana'ma hanke'za zamagra keka'a antahi'za amage nente'za, huhagerafi huvempa kasegea kegava hu'naze.

Nezmarerama nezamafama mofavrezmima zamafuhe'ima zamasarahehe'i kema antahiza nevaririza avamena agatere'za, Kagri kea avariri'naze. **10** Zamagra tra keka'a Jekopuna rempi humigahaze. Zamagra kasegeka'a Israelina rempi humigahaze. Zamagra mnanentake'za kavuga nente'za, kre fanane hu ofa Kresramana vu itaka'are kregahaze. **11** Ra Anumzamoka Livae nagamofo eri'zana asomu hunezamantenka, zamazanu'ma avako hu'za eri'naza eri'zanena muse hunka antahizamigeno knare hino. Ha' vahe'zmia zamatama kri'are zamazeri haviza nehunka, zamavaresrama huzmanteno antahi havizama huzamante'nia vahera o'oti'are zamahetrege'za maseho. **12** Hagi Benzameni nagakura huno, Anumzamo'a avesi zamante'neanki'za knare hu'za agrane manigahaze. Agra maka kna hankozmi mani'neno afunte zamavarentegahie. **13** Hagi Josefe nagakura amanage hu'ne, Josefe naga'mofo mopa, Ra Anumzamo'a marerisa zana monafinkati ata ko'ene mopa agu'afinti tinuti'ene asomura huntiegahie. **14** Hagi hozatamifina zogema rentesigeno'a ne'zamo'a knare nehina, ikama ementena ne'zana knare huta hamaregahaze. **15** Hagi korapa me'nea agonaramimpima antesaza hozamo'a knare hugahie. Mevava neonse agonaramimpintira knare huta hiranto ne'za hamaregahaze. **16** Hagi ama mopafina hentofa zantaminu anteviteno asomura hunezamantenka, zafafima tevema neregeno nagrite'ma efore'ma hu'nea ne'mofo avesi'zamo'a, agrite megahie. Hagi Josefe nagara kini fetorimo zmasenire meankna huno asomu'mo'a me'nena, afuhe'mokizmi amu'nompina kva vahe manigahaze. **17** Hagi Josefena, hanave'amo'a agonesa ve bulimakamofo hanavemo'ma hiazza hugahie. Hagi hanave'amo'a, afi' ve bulimakao afu'mofo pazine'agna huno

hanavenentake hugahie. Agra ha' vahē'aramina zamavaririsige'za mopa atumparega vnageno, Efraemi naga'mo'za 10 tauseni'a agatere'za manisageno, Manase naga'mo'za 1 tauseni'a agatere'za manigahaze. **18** Hagi Zebuluni nagaku'ene Isaka naga'enenkura amanage hu'ne, Zebuluni nagara kama ante'naza zamo'a knare huno hageno marenerina muse hiho. Hagi Isaka naga'mota seli nontimifima mani'neta hanaza zamo'a, knare huno nehagena muse hiho. **19** Zanagra vahetmina ke hanake'za agonare esage'za, e'i anante fatgo ofa Kresramana vugaha'e. Na'ankure zanagra hagerimpinti'ene, kasepampintira tusi zago feno eri fore hu'na'e. **20** Hagi Gati nagakura amanage hu'ne, Gati naga'mofo mopama erira huzmante'nimofona, ra agi amigahaze. Gati'a laionimo'ma mago'a zagagafama aheno avufgama asenima tagana vazinaku'ma pri hu'neno kva huno mani'neankna hu'ne. **21** Agra kva vahē'mo'za eriga mopa, knare'ma hu'nea mopa eri'ne. Hagi kva vahē'timima atruma hu'nafina Ra Anumzamofo fatgo avu'avara nehuno, tra ke'a amage'ante'ne. **22** Hagi Dani nagakura amanage hu'ne, Dani naga'mo'za kasefa laionigna hu'za Basani kumatetira akasi hu'za hara eme hugahaze. **23** Hagi Naftali nagakura amanage huno hu'ne, Naftali naga'mo'a Ra Anumzamofo avu'ava zampine asomupine aviteno nemanino, hagerinkaziga mopane, sauti kaziga mohanena eri'ne. **24** Hagi Asa nagakura amanage hu'ne, Asa naga'mo'za mago'a nagara zamagatere'za tusi'a asomupi nemanisage'za zamafuhe'mo'za zamagrikura tusiza hu'za zamavesi zmantegahaze. Hagi olivi masavemo'a rama'a hanige'za tagi'za zamaga sese hugahaze. **25** Hagi kuma'zmimofo kafama erigino rentrakoma hu'zana, ainireti'ene bronsireti'ene tro hunente'za, mago zankura ontahi knare hu'za manigahaze.

26 Israeli vahe'mota, tagri Anumzankna anumzana magora omani'ne. Hagi tagri'ma taza huku'ma ne-egeno'a, hampomo'a karisi'agna huno hanavenentake masa'ane avreno ne-e. **27** Manivava Anumzamo'a fraki kumatie. Mevava azampi Agra zamavareno vano nehuno, ha' vahetamia azeri ante'nena, zamahe fri vagareho! **28** Hagi Israelina kva huntesigeno knare huno manigahie. Hagi Jekopuna ha' vahe'amo'za azeri havizana osanageno, wainine witinema avi'mate'nea mopafi mani'nenko, monafintira ata kora runtegahie. **29** Israeli vahera muse hiho, ina vahe Ra Anumzamo'a tamagri'ma tamagu'ma vazi'neaza huno zamagura vazi'nea vahera mani'naze? Agra tamazama nehia hankone, tamazama hignetama ha'ma azerita agatemaneraza bainati kazi mani'ne. Ha' vahe'mo'za tamagafi evasesageta zamagumpi tamaga reneta avoa hagegahaze.

34 Anante Mosese'a, Moapu agupoa atreno Nebo agonamofona Pisge nehaza morusapi uhanati'ne. Ana agona Jeriko kuma'mofona zage hanati kaziga'a me'ne. Ana agonamofo morusapi uhanatigeno, Ramo'a maka Giliati agonareti vuno Dani kumate vuno, **2** maka Naftali mopane, Efraemine Manasekizni mopane, maka Juda mopa meno zage fre kaziga hageri ankena mopare uhanatiteno, **3** Negevi mopane, Jeriko kuma'mofo tava'onte'ma me'nea agupoma, tofe aninagna zafamo'ma tusi'zama hu'nea agupomo'ma vuno Zoama uhanati'nea mopa averi hu'ne. **4** Hagi ana mopama Ra Anumzamo'ma Mosesema averi'ma huteno amanage huno asami'ne, e'ina mopa Abrahamuma, Aisakima, Jekopuma huvempa hu'na huhampri zamante'na, tamagehe'mofona zamigahue hu'na hu'noa mopa, kaveri hugenka kagra kavufinti kananagi, ana mopafina uofregahane. **5** E'ina hutegeno Ra Anumzamofo

eri'za ne' Mosese'a Ra Anumzamo'ma hu'nea kante Moapu
mopafi fri'ne. **6** Ra Anumzamo'a Bet-Peori kuma tava'onte
Moapu mopafi Mosesena asente'neanagi, anama asentea
mati'a mago vahe'mo'a onkegeno meno menina ama knarera
ehanati'ne. **7** Hagi Mosese'a 120'a zage kafu huteno fri'neanagi,
hankave'a megeno, avurgamo'a knare hu'negeni fri'ne. **8** Anama
Mosese'ma frigeno'a Israeli vahe'mo'za 30'a zage knamofo agu'afi
Moapu agupofina zavira nete'za, zamasunkura hu'naze. **9** Hagi
Mosese'ma ofri'neno, Nuni nemofo Josua anunte azana anteno
nunamu huntogeno, knare antahintahima ami' avamumo'a agripi
aviteno mani'ne. Hagi Ra Anumzamo'ma Mosese'ma hunte'nea
nanekema Josua'ma Israeli vahe'ma zmasamiana antahinemi'za
avariri'naze. **10** Ana higeno ana knaret'i'ma eno meninena, Israeli
vahepin Ra Anumzamo'enema znavufi oge'agema nehukema
nanekema hu'na'a ne' Mosese kna kasnampa nera eforera
osu'ne. **11** Na'ankure Ra Anumzamo'a Mosese azante higeno,
Isipi mopafina Feronte'ene mika eri'za vahe'are'ene, maka
mopa'afinena maka kaguvezane, avame'zanena erifore hu'ne. **12**
Israeli vahe'mokizmi zamavufima hankavenentake hihamu'anu,
Isipi vahe'ma zamazeri koro'ma hu'nea kna vahera eforera
osugahaze.

Zosua

1 Ra Anumzamofo eri'za ne' Mosese'ma frigeno, Nuni nemofo Josuana Mosesema aza huno eri'za e'neria ne' Ra Anumzamo'a anage huno asami'ne. **2** Nagri eri'za ne' Mosese'a hago fri'ne. E'ina hu'negu menina kagra ama Israeli vahera zamavarenka Jodani tina takaheta kantu kaziga zamiku'ma hu'noa mopare uhanatiho. **3** Hagi Nagra Mosese'ma huvempama hunte'noa kante ante'na, ina mopare'ma tamagiama rentesaza mopa maka tamamigahue. **4** Ana mopamofo ometre emetre hu'amo'a, sauti kaziga ka'ma mopareti vuno, noti kaziga Lebanoni vuteno, Yufretisi rantinte evanigeno, ana maka Hiti vahe mopane, Jodani tinteti vuno zage fre kaziga Mediterenieni ra hagerimofo ankenare uhanatigahie. **5** Hagi Josuagama maninka vanana kna'afina, Mosesema hu'noaza hu'na Nagra kagrane mani'ne'na namefira huogamisugeno, mago vahe'mo'e huno hara huno kazeri kageteoregahie. **6** Hagi kagra korora osunka oti hanavetio, na'ankure Nagrama huvempa hu'na Israeli naga'mokizmi zamafahe'ima zamigahue hu'nama hu'noa mopare zamavarenka vugahane. **7** Hanki korora osunka oti hankavenentinka, eri'za vaheni'amo Mosese'ma kasami'nea kasegeni'a kamefira huminka ufrege efregera osunka, amege ante fatgo huo. E'inama hanankeno'a, maka zama banana zamo'a knare'zanke hugahie. **8** Ama ana kasegema me'nea avontafera kagenera okaninka, feru'ene kenege'enena rempi huvava hunka antahio. E'inama nehunka anampima krente'nea kema amage antesankeno'a, maka'zama banana zamo'a knare'zanke hugahie. **9** Hagi Nagra ko' huhankaveti'na hugante'nogu korora osunka oti hanaveti'enka, kamanogura hunka kahirahikura osuo. Na'ankure Ra Anumzana kagri Anumzamo'na maka kazigama vanantega

kagrane vugahue. **10** Higeno Josua'a amanage huno Israeli kva vahe'mokizmia zamasami'ne, **11** Seli noma ki'za mani'naza kuma'mofo amu'nompi nevuta, Israeli nagara amanage hutma zamasamiho. Ne'zama nesaza zana retro hiho. Na'ankure tagufa kna evutesigeta Jodani tina takaheta kantu kaziga Ra Anumzana tamagri Anumzamo'ma tamigahue huno'ma hu'nea mopa ome erigahaze. **12** Hagi Josua'a Rubeni naga'ene Gati naga'ene, Manase naga'ma amu'nompinti refkoma hu'naza naga'enena amanage huno zamasmi'ne, **13** Maka nanekema Ra Anumzamofo eri'za ne' Mosese'ma tamasami'nea kegura tamagera okaniho. Ra Anumzana tamagri Anumzamo'a mani fru hiho huno ama mopa tamagrira neramie. **14** Hagi Jodani timofo kama zage hanati kaziga Mosese'ma tamagri'ma tami'nea mopare a' mofavre'tamine, memene sipisipine bulimakao afuzagatamine manigahaze. Hianagi tamagripinti'ma ha'ma nehaza vene'ne'amo'za tina takahe'zma kantu kaziga vu'za, zamafuhe'ina ugota hu'za zamazahu'za hara ome hugahaze. **15** Hanki tamafuhe'ina zamaza nehinke'za hara hu'za mopa erisageno, tamagri'ma hu'neaza huno Ra Anumzana tamagri Anumzamo mani fru nezamino mopama nezamia moperera umanitesageta, ete etma Jodani timofo kama kaziga Ra Anumzamofo eri'za ne'mo Mosese'ma tami'nea moperera emanigahaze. **16** Josua'ma anagema hutege'za, agri kemofo nona'a amanage hu'naze, nazano hihoma hunka hana zana nehuta, inantego vihoma hunka hurantesantega vugahune. **17** Hagi tagra ana maka Mosese'ma hiankema antahita amage ante'nonaza huta, kagri kea amage antegahune. Ra Anumzana kagri Anumzamo Mosese'ene mani'neaza huno kagrane manigahie. **18** Hanki iz'a'o kagri kema

ontahino ha'ma regantesia vahera ahe frigahune. Hagi korera osunka, oti hankavetio.

2 Hagi anante Sitimima manine'za Nuni nemofo Josua'a tare afureno ke netre'na oku'a huznanteno, amanage huno zanasami'ne, Kantu kaziga Kenani mopafi vutna Jeriko kumara ome afuretna keso'e hi'o. Higeke vuke mago monko a' agi'a Rehapu'e nehaza a'mofo nompi ana kenagera umase'n'a'e.
2 Hianagi mago'a vahe'mo'za vu'za Jeriko kumate kini nera amanage hu'za ome asami'naze, kva huo, meni kenage mago'a Israeli naga'mo'za mopati afure'za kenaku e'naze. **3** Hagi Jeriko kini ne'mo'a anankema nentahino'a, amanage huta Rehapuna ome asamiho huno vahera huzmante'ne. Maka tagri mopama afure'zama kenaku'ma kagritegama e'za nonka'afima emani'naza vahera, zamavare meg'i'a zamatro. **4** Hianagi Rehapu'a ana netre'na zanavre franekino amanage huno zamasami'ne, Tamage nagritera e'na'anagi zanagra inantegati e'na'e nagra ontahi'noe. **5** Hagi kinagama rankumamofo kahama erigi knama koftama nehigeke vu'na'anagi, iga vu'na'e nagra ozanage'noe. Hagi ame huta zanavaririta vanuta, ome zanazerigahaze. **6** Hianagi Rehapu'a ana ne'trena zanavreno noma'amofo agofetu kukenama tro'ma nehaza traza anakino ante'nefi ome frakizanante'ne. **7** Anagema hige'za ana netrema zanazerinaku zamagare'za Jodani tintega vahe'mo'zama taka'ma nehzarega nevazageno'a, rankumamofo kahana erigi'naze. **8** Hagi ana afure ne'tremoke ko'ma masezanku Rehapu'a nomote marerino, **9** amanage huno ome zanasami'ne, Nagra antahi'noe, ama mopa ko Ra Anumzamo tamagri tami'ne. Ana higeta tagra tamagrikura tusi'a koro nehunkeno, maka ama mopafima mani'naza vahe'mo'zanena tamagrikura koro

nehu'za tusi'a zamahirahiku nehaze. **10** Na'ankure Isipiti'ma atreta azageno Ra Anumzamo'ma tamagri tamavufima koranke hagerima erineraneno, mopama eri hagagema higetama e'naza zana, tagra ko antahi'none. Hagi Jodani timofo kantu zage hanati kaziga Amori vahe'mokizmi kini netre zanagi'a Sihonine Oginema zanahe fri'naza zanku'enena ko antahi'none. **11** Tagrama ana kema nentahita, tamagrirkura tusi koro hu'none. Na'ankure Ra Anumzana tamagri Anumzamo'a monane mohanema tro'ma hu'nea Anumza mani'ne. **12** E'ina hu'negu menina muse huranantoanki, Ra Anumzamofo avufi huvempa hutna, nagrama so'e navu'nava'ma huranantoankna hutna, nagri naga'ma so'ema huzmantesu'ema hanuta'a, mago avame'za nami'o. **13** Hagi nenfa'ma nenarera'ma nasarehe'ima nanunknahe'ine naga zami'nena, zamaza hinke'za, Israeli vahe'mo'za tahe ofriho. **14** Anante ana ne'tremokea Rehapuna amanage huke asami'na'e, Na'a agafare tagra amafina e'no'e, kagra vahe'ma ozamasamisanana, henkama Ra Anumzamo'ma ama mopama tamisia zupa antahigamigahune. Tagra huvempa hu'ankino anama osanukeno'a, Ra Anumzamo'a tazeri haviza hugahie. **15** Anante Rehapua nomofona zaho eri kampintinofite zanatregeke kuma keginamofo meg'i'a urami'na'e. Na'ankure noma'amo'a kumamofo keginare rehe'negu anara hu'ne. **16** Ana nehuno amanage huno zanasami'ne, Tanagriku'ma nehakaza vahe'mo'za tutagiha huznantegahazanki agonarega freta vuta tagufa kna umani'neke'za etesageta, ete e'natega vi'o. **17** Higeke ana netremokea Rehapuna amanage huke asami'na'e, hanki kagrama hanketa huvempa hugante'noa kea tagrama kasamu'a kema amage'ma antesanketa'a, ana huvempa keti'a eri otregahu'e. **18** Hanki menina antahio, ama zasi'ma eri kama atiramu'a

kantera, kagra ama korankenofira anakinte'nenka, negafama
negrerama kasarehe'ima maka nagaka'anena zamavaretru
hunka nonka'afi mani'enketa tagra Israeli vahe'enena ama
mopafina egahune. **19** Hagi naga'kafinti'ma magomo'ma kagri
noma atreno, megi'a kumamofo kampima vano nehanige'zama
ahe frisageno'a, e'i tagri hazenkeompage agri'a hazenke.
Hianagi magomo'ma kagri nompi mani'enige'za eme ahe
frisageno'a, e'i tagri knaza megahie. **20** Hianagi tagrama e'no'a
eri'zamofo nanekema vahe'ma zamasamisankeno'a, kagrama
hanketama huvempama hu'no'a kemofo nona'a tagra hazenkea
e'origahu'e. **21** Hanki Rehapua ke zanirera amanage hu'ne,
Mago narimpa huanki kema ha'a kante anteno anzazana fore
hino, nehuno huzanantegekema nevakeno'a ana korankenofira
noma'amofo zaho'ma eri kahante anakinte'ne. **22** Hagi ana
netremokea atreke agonarega vuke tagufa zagegna fraki'nake'za,
zanagenema re'naza vahe'mo'za karanka hake vagare'za
vu'hazanagi ozanage'za, ete rukrahe hu'za Jeriko e'naze. **23** Ana
agonafintira ana netremokea uramike Jodani tina ome takaheke
vuke ana maka'zama zanagrite'ma fore'ma hu'nea zana, Nuni
nemofo Josuana ome asami vagare'na'e. **24** Anage nehuuke
Josuana asamike, tamagerafa huno Ra Anumzamo'a ana maka
mopa tagri tazampi ante'ne. Na'ankure ana mopafima mani'naza
veamo'za tagriku'ma nehu'za, zamahirahi nerege'za tusi koro
nehaze.

3 Hagi Sitimima mani'nazaretira Josua'ene maka Israeli
vahe'mo'za nanterame ot'i'za Jodani tinte e'za, seli nonkuma
eme ante'za mani'naze. **2** Anante tagufa zage kna evutegeno,
kva vahe'mo'za kuma'ma ante'za mani'nafi vano nehu'za, **3**
amanage hu'za zmasami'naze, Tamagrama kesanageno'ma

Ra Anumzana tamagri Anumzamofo huhagerafi huvempage vogisima Livae naga'pinti pristi vahe'mo'zama erisga hu'zama vanagetma, mani'naza kumara atretma otitma zamavaritma viho. 4 E'ina nehutma kama vanaza kana keso'e hiho. Na'ankure omenare kasefa kante neaze. Hianagi tamagra huhagerafi huvempage vogisimofo tavaontera ovutma, 1kilomita naza kankamu amitama, afete eho. 5 Anante Josua'a Israeli vhahera amanage huno zamasami'ne, tamagra'a tamazeri agru hiho. Na'ankure Ra Anumzamo'a tamagri amu'nompi ruzahu kaguvaza okina erifore hugahie. 6 Hagi Josua'a pristi vhahera amanage huno zamasami'ne, tamagra huhagerafi huvempage vogisia eritma vahe'mokizmi zamavuga vugoteho, hige'za ke amage ante'za eri'za vahe zamavuga vugota hu'naze. 7 Hagi Ra Anumzamo'a Josuana amanage huno asami'ne, Nagra menina agafa hu'na Israeli vahe zamavufi kagi'a erisga hanuge'za, zamagrama ke'za antahi'zama hanazana, Mosese'enema mani'neaza huno Anumzamo'a kagri'enena mani'ne hu'za antahigahaze. 8 Hagi menina huhagerafi huvempage vogisima erisaza pristi vhahera amanage hunka zamasamio, tamagrama Jodani timofo ankenare'ma vanutma, ti amu'nompi vutma ome oti fatgo hiho. 9 Higeno Josua'a Israeli vhahera amanage huno zamasami'ne, amare erava'o huta Ra Anumzana tagri Anumzamo'ma hiankea eme antahiho. 10 Nehuno Josua'a amanage huno Israeli vhahera zamasami'ne, ko'ma mani'naza Kenani vahe'ma, Hiti vahe'ma, Hivi vahe'ma, Peresi vahe'ma, Gilgasi vahe'ma, Amori vahe'ma, Jebusi vahe'ma zamahe panini hanigeta, kasefa huno mani'nea Anumzamo'a amu'nontifi mani'ne hutma keta antahita hugahaze. 11 Keho, maka mopama kegava hu'nea Ra Anumzamofo huhagerafi huvempage vogisimo'ma, vugota huno Jodani tima

takahe'nigeta, **12** menina Israeli vahe'mota mago'mago naga nofipintira mago vahe huhamprita zmavaretere hinke'za 12fu'a vahe eho. **13** Hagi Ra Anumzama maka mopama kegava hu'nea Anumzamofo Agri huhagerafi huvempage vogisima erisaza pristi vahe'mo'zama zamagama Jodani timpima ome resageno'a, tima ne'eazamo'a taneno kamanu kaziga magopi ante hihihuno marerigahie. **14** Anante pristi vahe'mo'za huhagerafi huvempage vogisia eri'za vugota nehazage'za, Israeli vahe'mo'za ana pristi vahe'mokizmi zmavariri'za Jodani tina takahenaku seli nozamia tagana vazi'za e'neri'za maka'za zamia retro hu'naze. **15** Hagi maka kafufina ne'zama hamare knarerera Jodani timo'a tusi ti hagetere nehiane. Hagi e'i ana knarekino timo'a amutu'amutu nehifi pristi vahe'mo'za huhagerafi huvempage vogisia eri'za Jodani timofo ankenare ehanati'za zamagia timpi eme razageno, **16** kamaniti'ma e'nea timo'a taneno ogamanu afete Zaretani tavaonte me'nea rankuma Adamua, magopi ome ante hihi huno agonagna huno marerigeno, kami kazigama fri'nea hagerintegama evia timo'a tane vagarege'za hagage mopare vu'za kantu kaziga Jeriko tava'onte uhanati'naze. **17** Hagi Ra Anumzamofo huhagerafi huvempage vogisima zamafunte'ma kofi'naza pristi vahe'mo'za, timofo amu'nompima hagegema hu'nere oti hanaveti'nage'za, ana maka Israeli vahe'mo'za Jodani timo'ma hagagema hu'nea moperara evu vagare'za kantu kaziga vu'naze.

4 Hanki maka Israeli vahe'mo'za Jodani tima takahe vagaretazageno, Ra Anumzamo'a Josuana amanage huno asami'ne, **2** Israeli vahepintira 12fu'a vahe zamagi hinke'za eho. Hagi mago'mago naga nofipintira magoke etere hanagenka, **3** Jodani timofo amu'nompima pristi vahe'mo'zama zamagama

re'za oti'nareti 12fu'a zamente zamente havea ome erita vuta,
seli nomi kita meni kenage'ma masesaza kumate omenteho
hunka zamasamio. 4 Higeno Josua'a Israeli naga nofipinti
mago mago zamagi hutere huno 12fu'a vahe'ma huhampri'nea
nagara kehige'za e'naze. 5 Hagi Josua'a amanage huno
zamasami'ne, Ete Jodani timpi uramita Ra Anumzana tamagri
Anumzamofo huhagerafi huvempage vogisima eri'za oti'naza
pristi vahe'mokizmi zamajafinti 12fu'a naga'motma naga
nofitamire huhampritere hutma mago'mago havea atita tamafunte
erita eho. 6 Hanki henkama tamagripinti'ma fore'ma hanaza
mofavremo'za ana haveramima nege'za, ama avame'zana
nagafare me'ne? hu'za tamantahigesageta, 7 tamagra amanage
hutma zamasamiho, Ra Anumzamofo huhagerafi huvempage
vogisima eri'za Jodani tempima azageno'ma tanege'zama
hagege mopare'ma takahenazagu, Israeli vahe'mo'zama nege'za
antahimi vava hanaza avame'za me'ne huta zmasamigahaze. 8
Hanki Ra Anumzamo'ma Josua'ma asami'nea kante ante'za,
Jodani timofo amu'nompinti Israeli naga'nofite huhampri'za
mago'mago have atitere hu'za ana maka 12fu'a havea eri'za,
vu'za kuma'ma ome ante'za masazare anante ome ante'naze.
9 Hanki Josua'a agranena 12fu'a have erino Jodani timofo
amu'nompima Ra Anumzamofo huhagerafi huvempage vogisima
pristi vahe'mo'zama eri'ne'zama oti'nazare magopi ante atru
higeno meno eno ama knarera ehanati'ne. 10 Hagi Ra
Anumzamofo huhagerafi huvempage vogisima eri'naza pristi
vahe'mo'za Jodani timofo amu'nompi oti'nazageno, ana maka
zama Ra Anumzamo'ene Mosese'enema Josuama asamike,
huo huke hunte'na'a zana, ana maka huvagare'naze. Hige'za
Israeli naga'mo'za ame'ama hu'za Jodani tina takahenazku

kaziga vu'naze. **11** Hanki maka Israeli vahe'mo'za Jodani tima takahe'za kama kazigama eme oti vagarazage'za, timpintira Ra Anumzamofo huhagerafi huvempage vogisia pristi naga'mo'za eri'za ome zamagatere'za zamavuga evu oti'naze. **12** Hagi Rubeni naga'ma Gati naga'ma Manase naga'ma amu'nompinti refko hu'naza naga'mo'zane ha'ma huga vahe'amozage Israeli naga'mokizmi zamavuga ha'zana tro tra hu'za, Mosese'ma zamasami'nea kante ante'za ugote'za vu'naze. **13** Anampina 40 tauseni'a naza ha'ma huga vahera Ra Anumzamofo avurera vu'za, Jeriko tavaonte mago agupo me'nefi vu'naze. **14** Ana knazupa Ra Anumzamo'a Israeli vahe zamavufi Josuana azeri ante'ama hige'za, Mosesenkema antahimi'nazaza hu'za Josu'ana ke'a antahimi'naze. **15** Anante Ra Anumzamo'a Josuana amanage huno asami'ne, **16** Zamasamige'za huhagerafi huvempage vogisima e'neri'za pristi vahe'mo'za Jodani timpintira atre'za ankenarega emarerih. **17** Higeno Josua'a pristi nagara huzamanteno, Jodani timpintira atreta ankenarega atiramita eho. **18** Anagema hige'za Ra Anumzamofo huhagerafi huvempage vogisima eri'za oti'naza pristi vahe'mo'za, Jodani timofo amu'nompintira atre'za ankenarega e'za, timpinti'ma zamagiama erisga hu'za mopare'ma razageno'a, Jodani timo'a ete hageno ko'ma hu'neaza huno evu'ne. **19** Hagi Israeli vahe'mo'za ese ikamofona 10ni knazupa Jodani tina takamahe'za kantu kazigama vute'za, Jeriko kuma'mofona zage hanati kaziga Gilgalie nehzare ome kumara ante'naze. **20** Hanki 12fu'a havema Jodani timpinti'ma ati'zama eri'za e'naza haveramina, Gilgalie nehzare ana haveramina Josua'a magopi eri ante atru hu'ne. **21** Ana nehuno Israeli vahe'mokizmia amanage huno zamasami'ne, henkama fore'ma hanaza mofavremo'zama

zamafahe'ima zamantahige'zma, ama haveramina nagafare
mane'ne? hu'zama zamantahigesage'za, **22** amanage hu'za
zamasamiho, Israeli vahe'mo'za Jodani timo'ma hihima huno
marerigeno mopamo hagegema hu'nege'za takahe'za e'naza
zanku negeta antahimi avame'za me'ne hu'za zmasamigahaze.

23 Na'ankure Ra Anumzana tamagri Anumzamo Koranke
Hagerima hu'neaza huno Jodani tina eri hagege higeta,
hagege mopare takaheta evagare'none. **24** E'ina hu'negu
ama mopafi maka vahe'mo'zama ke'za antahi'zama hanazana,
Ra Anumzamofo azamo'a hanavenentake hu'ne nehanageta,
tamagra Ra Anumzana tamagri Anumzamofonke maka zupa
korora huntevava hiho.

5 Amori Kini vahe'ma Jodani timofo zage fre kazigama
nemanimo'zane, Kenani Kini vahe'ma Meditereniani hagerimofo
ankenaregama nemanimo'za, Ra Anumzamo'ma Jodani tima eri
hagegema hige'za Israeli vahe'mo'zama Jodani tima takama
he'naza kema nentahi'zageno, hanave'zamia omanege'za
koro hu'za ha'ma hanaza zamagesa osu'naze. **2** Hagi ana
knafina Ra Anumzamo'a amanage huno Josuana asami'nne,
Havereti asane kazina trohunka vene'heramine ne'mofavre
naga'ma zamagoza anoma tagama osu'hesaza nagara taga
huzamanto. **3** Higeno agra'a Josua'a havereti kazina trohuteno,
ana vene'nene ne'mofavre nagara Ha'alotie nehaza osi agonare
zamagoza anona taga huzmante'ne. **4** Hagi ha'ma huga
vene'nema Isipiti'ma etirami'naza vahe'mo'za 40'a kafufima
ka'ma kopima ne-eza fri vagare'nazagu Josua'a e'inahu zana
huzamante'ne. **5** Hanki ana maka vene'nema Isipiti'ma atre'zama
etirami'naza vahe'mo'za zamagoza anona tagahute'za e'naze.
Hianagi karankama ka'ma kopima ne-ezama kasezamante'naza

vene'ne'a zamagoza anona taga osu'naze. **6** Israeli vahe'mo'za
40'a kafufi ka'ma kopina e'naze. Ha'ma huga vene'nema Isipiti'ma
etirami'naza vahera e'ina knafi fri vagare'naze. Na'ankure Ra
Anumzamofo kea amage ontenagu, Agra amanage hu'ne,
ana vene'nefintira magomo'e huno zamafahe'ima zamigahue
hu'na amirimo'ene tumerimo'ma avite'nea mopama huvempama
hu'zmante'noa moperara ovugahaze. **7** Ka'ma kopima zamagri
noma erisagu'ma kasezmante'naza ne'mofavre'ramina Josua'a
zamagoza anona taga huzamante'ne. Na'ankure karankama
ne-eza zamagoza anona taga huozmante'nagu anara hu'ne. **8**
Ana maka Israeli vene'nemo'za zamagoza anoma taga hute'za,
kuma'ma ante'zama mani'nare mani'nageno, namuzmimo'a
tegani'ne. **9** Anante Ra Anumzamo'a Josuana amanage huno
asami'ne, ko'ma tamagra Isipima mani'neta kazokzo eri'zama
eneritma tamagazegu hu'nazane. Hianagi Nagra menina tamagri
tamagaze zana eri netroe. Hige'za ana kumakura Gilgalie hu'za
agia antemi'nageno, ana agimo'a meninena meno e'ne. **10** Hanki
Israeli vahe'mo'za Jeriko agupofi Gilgali kumate mani'ne'za,
ese ikana 14ni knamofo kinaga Ra Anumzamo'ma ozamahe
zamagatere'nea zanku antahimi'za ra ne'za kre'za nene'za
musena hu'naze. **11** Ana ne'zama nete'za, anante knazupa
Kenani mopafinti ne'zana agafa hu'za zo'ore bretine, kre hagege
hu witinena ne'naze. **12** Israeli naga'mozama Kenani mopafinti
ne'zama agafama hu'za naza knazupage, mana ne'zamo'ma
monafinti'ma eneramiazana vagare'ne. E'ina hige'za Israeli
vahe'mo'za ana kafufina mana ne'zana e'ori'nazanki, Kenani
mopafinti ne'zanke ne'naze. **13** Mago zupa Josua'a Jeriko kuma
tvaonte emani'neno keana, mago ne'mo'a bainati kazina azampi
eri'neno, avuga ot'i'negeno negeno urava'o huno, Kagra tagri

vahepi, ha' vaheti mani'nane? 14 Higeno ana ne'mo'a huno, A'o nagra kagri kaziga vahera omani'na, ha' vahet kagri vahera omaninoanki, nagra Ra Anumzamofo sondia vahete ugota kva ne' e'noe. Higeno Josua'a avugosaregati kepri huno agiafi renarenan amanage hu'ne, Eri'za vahekamo'na na'a hugahufi nasamio. 15 Higeno Ra Anumzamofo sondia vahete ugota kva ne'mo'a Josuana amanage huno asmi'ne, Kagra kaga nona katufe tro. Na'ankure amama oti'nana mopamo'a ruotage hu'ne. Higeno Josua'a kema hiaza huno agia nona katufetre'ne.

6 Hagi Jeriko kumapi vahe'mo'za Israeli vahe'mokizmigu koro nehu'za kumapima ufre kafantamina erigi vagarazageno, mago'mo'e huno fegira atiramige, marerigera osu'ne. 2 Hagi Ra Anumzamo'a amanage huno Josuana asami'ne, Antahio! Jeriko kuma'ene, kini vahe'ane, hanave sondia vahe'anena ko kagri kazampi ante'hoe. 3 Hanki kagrane maka sondia vahe'zaganena, Jeriko kumamofona mago mago zagefina magoke zupa kagitere nehinkeno, vuno 6si zage knare uhanatino. 4 Hagi 7ni'a pristi vahe huzamantege'za 7ni'a ufema ve sipisipimofo pazivete'ma tro'ma hu'naza ufena e'neri'za huhagerafi huvempage vogisimofo avuga viho. Hanki 7ni zage knarera kagrane sondia vahe'enena Jeriko kumamofona 7ni'a zupa kaneginke'za pristi vahe'mo'za ufena reho. 5 Hagi pristi vahe'mo'zama erivazu hu'zama zazate'ma ufema resagenkama nentahinka, ana maka vahera zamasamige'za ivimo agazamo nehu'za rankegege hiho. Anama hanagen'a, Jeriko rankumamofo have keginamo'a fragu vaziramina, ana makamotma kefatgo hutma ana kumapina ufreho. 6 Hagi Nuni nemofo Josua'a pristi vahera kehige'za azageno anage huno zamasami'ne, Ra Anumzamofo huhagerafi huvempage vogisia

erisga hutma nevinke'za, 7ni'a pristi vahe'mo'za 7ni'a ufema ve
sipisipimofo pazivenuti'ma tro'ma hu'nazana eri'za, huhagerafi
huvempage vogisimofo avuga vugoteho. 7 Anante Josua'a Israeli
vahera zamasamino, Vuta Jeriko rankumara ome kagigahaze.
Hianagi zamatreke'za sondia vahe'mo'za Ra Anumzamofo
huhagerafi huvempage vogisimofo avuga vugoteho. 8 Anante
Josua'ma kema zamasamitege'za, 7ni'a pristi naga'mo'za ve
sipisipimofo paziveteti'ma 7ni'a ufema tro'ma hu'naza eri'za
Ra Anumzamofo avure ufena re'za nevazageno, zamefira Ra
Anumzamofo huhagerafi huvempage vogisia eri'za vu'naze. 9
Hanki mago'a sondia vahe'mo'za pristi vahe'mokizmi zamavuga
nevzage'za, mago'amo'za huhagerafi huvempage vogisimofo
amefiga'a neage'za, ufena re'za e'naze. 10 Hianagi Josua'a
anage huno vahera zamasami'ne, Mago'mo'e huno rankea
osuno, mago agerura orutfa hino. Hagi nagrama ranke hihoma
hu'nama hanugeta, rankea hugahaze. 11 Anante Josua'a pristi
nagara huzamanteg'eza Ra Anumzamofo huhagerafi huvempage
vogisia erisga hu'za, magoke zupa Jeriko rankumara kagite'za,
atre'za kuma'ma omente'za mani'nafi ana kenagera emase'naze.
12 Hanki anante knazupa nanterampi Josua'a otige'za, pristi
naga'moza'nena Ra Anumzamofo huhagerafi huvempage vogisia
erisga hu'za vu'naze. 13 Hagi 7ni'a pristi naga'ma 7ni'a ufema
eri'naza naga'mo'za Ra Anumzamofo huhagerafi huvempage
vogisimofo avuga ugote'za nevu'za, ufenare'za nevazageno,
sondia vahe'mo'za ana pristi vahe zamavuga nevzage'za, mago'a
sondia vahe'mo'za ana huhagerafi huvempage vogisima eri'zana
vahe'mokizmi zamefiga'a ne-eza ufenare'za vu'naze. 14 Hanki
anante zage knarera ko'ma hu'nazaza hu'za, magoke zupa Jeriko
rankumara kagite'za atre'za vu'za kuma'ma emente'za mani'nafi

emase'naze. Ana avu'ava zanke 6'a zage knafina hu'za vu'naze.

15 Hanki 7ni zagekna zupa nanterampi oti'za ko'ma hu'nazaza hu'za Jeriko kumara kagi'naze. Hianagi ana knarera 7ni'a zupa Jeriko ran kumara kagi'naze. **16** Hagi 7nire'ma kamanegi'za, pristi vahe'mo'za ufe nerazageno Josua'a vahera amanage huno zamasami'ne, ra tamageru rutma ivimo agazamo hiho. Na'ankure Ra Anumzamo Jeriko rankumara ko tamagri tamazampi ante'ne.

17 Hanki Jeriko kuma'ene anampima me'nea zantamia ana maka Ra Anumzamofontega mago ofa amiankna hutma eri haviza hugahaze. Hianagi afure vahe'ma huzmantoke'zama e'naza naga'ma zamavare frakinegu monko a' Rehapune noma'afima mani'naza naga'anenke zamahe ofriho. **18** Hianagi kva hiho, Jeriko kumapintira magore hutma mago'zana e'oriffa hiho. Mago'zama erisutma Israeli naga'ma nemanuna kumapina hazenke avreta efregahaze. **19** Hianagi silvaretiro, goliretiro, bronsiretiro aenireti'ma tro'mahu zantamima Jeriko kumapinti'ma erisutma, e'i ruotage huno Anumzamofoza me'negu, ana maka eritma Ra Anumzamofo zagoma nentafi omenteho. **20** Hanki pristi vahe'mo'za ufema ete nerage'za vahe'mo'zama nentahi'za, ana ufenkrafamofo avariri'za ivimo agazamo huza rankege nehazageno, rankumamofo have keginamo'a fragu vaziramige'za, maka vahe'mo'za zamavune ante'za miko kazigati ufre'za Jeriko rankumara ome eri'naze. **21** Mareri'za vea'ene mofavrene zamahehana nehu'za bulimakaone, sipisipine, tonkinena, anazanke hu'za zamahohana hu'naze. **22** Anante Josua'a ko'ma afure netrema mopama ome ke'ogu'ma huzanante'nea netre'na zanasamino, tanagrama huvempa huntena'a kante antetna, ana monko a'mofo nompi umarerita agri'ene naga'anena ome zamavareta atiramaho huno huznantene. **23** Hanki ana

tare afure ne'tremokea umarerike Rehapune nererane nefane,
asarehe'ine ana maka naga'a zamavare'za Israeli naga'ma seli
noma emegi'za mani'naza kumamofo meg'i'a eme zamante'naze.

24 Anante ana ran kuma'ene ana maka'zana teve tagintazageno
te'ne. Hianagi silvaretiro goliretiro bronsiretiro aenireti'ma tro'ma
hu'naza zantamina eri'za Ra Anumzamofo nompima zagoma
nentafi ome ante'naze. **25** Hagi Rehapune ana maka naga'a
Josua'a ozmahe zamatrege'za mani'naze. Na'ankure tare
afure netrema Josua'ma huznantegekema Jeriko kumate'ma
vakeno'ma Rehappu'ma zanavre fra'ma ki'negu anara hu'ne. Hanki
Rehappu nagapinti'ma fore'ma hu'naza vahera Israeli nagapine
meninena mani'naze. **26** Anante Josua'a hanavenentake kazusi
kea amanage huno vea nagara zamasami'ne, Mago ne'mo'ma
ama Jeriko rankumama azeri otisia ne'mofona, Ra Anumzamo'a
azeri haviza hugahie. Hanki agrama eri'zama eri agafama
hania knazupa, zage ne'mofavre'a frisigeno, kuma keginamofo
kafaramima hagentesia zupa amite'namo'a frigahie. (1 King
16:34) **27** Ra Anumzamo'a Josua e'ne mani'negu agri agimo'a
anama mani'naza mopafina haruharu huno vuno eno hu'ne.

7 Hagi kuma'ma eri havizama hanafintira mago'zana e'oritfa hiho
huno Ra Anumzamo'a Israeli nagara zmasami'neana, zamagra
Agri kea eritre'za amagera onte'naze. Juda naga nofipinti nera
Akanina Kami kasentegeno, Kamina Zimri kasentegeno, Zimrina
Zera kasentegeno hu'nea ne'mo Ra Anumzamo'ma Israeli nagara
e'oriho huno'ma hunagru'ma huzmante'nea zana e'rinegeno Ra
Anumzamo'a Israeli vahera tusi arimpa ahezmante'ne. **2** Hagi
Jerikoma mani'hazareti Josua'a mago'a vahera huzmanteg'eza
Ai kumate vu'naze. Ana kumara Bet-aven kuma tavaonte, Betel
kumamofo zage hanati kaziga me'negeno, amanage huno

huzmante'ne, frakita vuta ana kumara ome afureta keho. Hige'za
kema hiaza hu'za Ai kumara ome afure'za ke'naze. 3 Hanki
ana vahe'mo'za vute'za eza Josuana amanage hu'za eme
asm'i'naze, rama'a vhahera zamatrege'za Ai kumate vhahera hara
ome huozamanteho. Na'ankure rama'a vhahera omani'nazanki,
ana maka vhahera huzmantenka zamazeri amuhoa osunka,
2 tauseni'o 3 tauseni'a vahe'naza huzmanteg'e'za vu'za hara
ome huzmanteho. 4 Anante 3 tauseni'a vahe naza mareriza Ai
kumate vhahera hara ome huzmante'naze. Hianagi Ai kumate
vahe'mo'za Israeli vhahera zamahe'za zamagene rage'za fre'za
e'naze. 5 Ai vahe'mo'zama Israeli vahe'ma zamagenema
re'nazana, Ai rankumamofo kahanteti agafa hute'za, zamagene
re'za agonaregati urami'za havema nefragazare urami'naze.
Ana zupa 36si'a Israeli vhahera zamahe frizageno Israeli
naga'mo'za tusi'a koro hu'naze. 6 Josua'a ana zanku antahintahi
hakare nehuno, kukena'a tagato nehuno, Ra Anumzamofo
huhagerafi huvempage vogisimofo avuga avugosaregati umseno
mani'negeno kinaga se'ne. Hagi miko Israeli kva vahe'mo'za
Josua'ma hiaza nehu'za zamagra zamanunte kugusopa
eri'za nefre'za, Josua'ene zmasunku nehu'za mani'nageno
vuno kinga se'ne. 7 Hanki anante Josua'a amanage hu'ne,
Hanavenentake Ra Anumzamoka kagra Jodani timofo kama
kaziga Amori vahe'mo'za tazeri haviza hanazegu tavrenka
e'nampi? Tagrama timofo kantu kazigama manisune hutama
hu'nontegama manusina, amanahu zana forera osigeta knare
huta manusine. 8 Israeli sondia vahe'mo'za ha' vahezmimofo
zamagoro rukrahe hu'zma atre'za fre'za azanki, nagra na'ane
hu'na Ra Anumzamoka hugahue? 9 Hanki Kenani vahe'mo'zane
ama ana mopafima nemaniza vahe'mo'za ama anazamofo kema

nentahi'za tagrira tavazagikagi'za tahe fanane hanageno, ama
mopafina tagia omanegahie. Hanki kagri rankagima huhavizama
osnagura kagra na'a hugahane? **10** Higeno Ra Anumzamo'a
Josuana amanage huno asami'ne, Na'a higenka mopafina
kavugosaregatira masetenka mani'nane, otio. **11** Hanki kotazana
ko huvempa hu'na, Jeriko kumapima me'nea zantamina nagrike
zanki maka eri havizama hiho hu'na huhagerafi huvempa kema
hu'noana, Israeli naga'mo'za keni'a rutagre'za kumi hu'naze.
Zamagra mago'azana musufase'za, zamagra'a fenozampi
erinte havia hu'naze. **12** E'ina hu'negu Israeli naga'mo'za oti
hanaveti'ne'za ha' vahe'zaminena hara osu'za, rukrahe hu'za
ha' vahe'zmi koro fre'naze. Hanki eri haviza hiho hu'nama
hunagru'ma huramante'noa zantamima erihavizama osnazana,
Nagra tamagranena omanitfa hugahue. **13** Otinka Israeli vahera
zamazeri agru nehunka zamasamio, zamagra'a zamazeri agru
hiho. Na'ankure okina Ra Anumzamo'na tamagrane eme keaga
hugahie. Ra Anumzana Israeli vahe'mokizmi Anumzamo'na
amanage nehue, maka eri havizama hiho hu'noa zantamina
eri'za e'naze. E'ina hu'negu tamagra ana zantamina eritre hana
hutetage ha' vahetamia hara hu zamagateregahaze. **14** Hagi
oki nanterana maka'motma eme atru hutetma taisi zokago reta
kenkeno, ina nofipinti Ra Anumzamo'a huhamparigahie ana
nofipintira nagate nagate etere nehanageno Ra Anumzamo'ma
huhampri'nia nagapinti magoke magoke vene'ne etere hiho.
15 E'ina hanageno'a maka'zama eri haviza hihoma hu'noa
zantamima erino e'nesimo'a eama hanigeta, anamofona, agri'ene
naga'ane ana maka zama'anena tevefi krerasageho. Na'ankure
agra Ra Anumzamo'nema huhagerafi huvempa kema hu'naza
kea rufutagino Israeli vahera tusi'a zamagaze eri'zami'ne.

16 Higeno Josua'a nanterampi otino Israeli vahera kehige'za
nofitenofite neazafinti, Juda naga nofi zamazeri'ne. **17** Anante
Josua'a Juda naganofira zamavareno Ra Anumzamofonte e'ne,
ana higeno Zera naga zamazeri fore hige'za ana nagapintira
vene'ne'age'za neage'za Zabti azeri'ne. **18** Hagi anante Zabti
nagapinti vene'neneraminke ageno Josua'a zamazeri otiteno,
anampinti Akani avazu hu'ne. Hagi Akanina Karami kasentegeno,
Karamina Zapiti kasentegeno, Zaptina Zera kasente'ne. Hagi
Zera'a e'i Juda naga nofipinti ne' mani'ne. **19** Anante Josua'a
Akaninkura amanage hu'ne, Ne'nimoka Ra Anumzana Israeli
vahe'mokizmi Anumzana ra agi neminka agi'a ahentesga huo.
Hanki kagra na'a hu'nampi nasmio, nagri navufina mago'zana
erifrara okio. **20** Anante Akani'a Josuana amanage huno asami'ne,
Tamage hu'na nagra Ra Anumzana Israeli vahe'mokizmi
Anumzamofo avurera kumi hu'noe. Hagi nagra na'a hu'nofi
kagrira kasmigahue. **21** Jeriko rankuma'ma ha'ma huzamagatere
nompintira, kogeno mago knare zantfa hu'nea Babiloniti za'za
kukenane, mago'a silva kna'amo'a 4'a kilogi, golia kna'amo'a
mago kilo hu'neana kogeno nanunu hige'na, eri'na e'noe. Ana
zantamina erina seli noni'afi mopa kafi'na silva antete'na ana
agofetu mago'azana ante'ha asente'noe. **22** Higeno Josua'a kato
vahe huzmantenge'za zamagare'za vu'za Akani seli nompima ome
kazana, Akani'ma hu'nea kante anteno ana silva frakino fenamete
megeno, mago'azana anaga me'nege'za ome ke'naze **23** Hagi
zamagra ana maka zana ana seli nompintira eri'za Josuane maka
Israeli vahe'mokizmi zamavuga Ra Anumzamofo avure eme
herafi'naze. **24** Anante Josua'ene ana maka Israeli vahe'mo'za
Zera nemofo Akanina nevre'za, ana silvama, zaza kenama,
ana golima, ne'mofavre naga'ama, mofane naga'ama, ana

maka bulimakao afu'ama, tonki'ama, sipisipine, seli noma'ane
ana maka zama'anena eri'za, Akorie nehaza agupofi avre'za
vu'naze. **25** Anante Josua'a Akanina amanage huno asami'ne,
Na'a higenka tagrira hazenkefina tavrentane? Ra Anumzamo
menina kagri'enena hazenkea kamigahie. Anante maka Israeli
vahe'mo'za have kanonteti Akanine ana maka naga'anena
zamahe frite'za zamagri'ene ana maka zazminena tevefi kre
fanane hu'naze. **26** Ana hute'za rama'a haveraminu Akani
agofetura ante hihi hu'naze. Ana haveramina meninena me'ne.
Anante Ra Anumzamofoma arimpa ahe'zamo'a amne hu'ne. E'na
hu'negu ana kumamofo agi'a Akori agupoe huno me'nege'za
meninena agi'a nehaze.

8 Hanki anante Ra Anumzamo'a Josuana amanage huno
asami'ne, Korora osuge, atregeno kagu'amo'a kna osino.
Maka sondia vahera zamavarenka marerinka Ai kumara hara
ome huzamanto. Na'ankure Nagra Ai kuma'mofo kini ne'ma,
vahe'ama, ran kuma'ane, mopa'anena ko kagri kzampi ante'noe.
2 Kagra Jeriko kini ne'ene rankuma'anema hu'nanaza hunka, Ai
rankuma'mofo kini ne'ene ana maka'zana eri haviza huo. Hianagi
ana kumapinti'ma maka tamavesisia zantamine bulimakao
afutaminena tamagra'a suza avreta viho. Hanki menina ha'ma
hanagu tro nehuta, mago'a sondia vahera huzmantenke'za
rankumamofo mefiga'a kafona omenteho. **3** Anagema hige'za
Josua'ene maka sondia vahe'mo'za Ai kumate vahera ha'
huzmantenaku vu'naze. Hanki koro osu'za hanaveti'za ha'ma
nehaza vahe Josua'a **30** tauseni'a huzmantege'za kenageke
vu'naze. **4** Hagi nevzageno Josua'a amanage huno huzmante'ne,
Ama nanekea tamagesa anteta antahiho, tamagra rankuma'mofo
tvaonte amefiga'a kafo ome anteta hahu'are tro huta umaniho. **5**

Hanki nagranema mani'naza sondia vahe'enena rankuma'mofona avugati vugahune. Hanki Ai rankumapi vahe'mo'zama ko'ma hu'nazaza hu'za ha'ma hurante'naku atiramiza esnageta, tagra ese knazupama hu'nonaza huta zamimi huta koro freta egahune.

6 Tagra zami'mi huta freta esunke'za, rankuma'zmia atre'za trotago hu'za afete'ma esu'za zamagra amanage hugahaze, ko'ma hu'nazaza hu'za tagri koro fraze nehanageta, tagra zami'mi huta afete kna egahune. 7 Anama hanunketa tamagra kafoma antetama mani'nafintira atretma vutma, Ai rankumara ome eriho. Ra Anumzana tamagri Anumzamo'a ana rankumara tazampi antegahie. 8 Hagi tamagrama ana rankuma'ma ome eritesuta, teve tagintenkeno teno. Ra Anumzamo'ma nasamige'na tamasami'noa kante antetma anazana hiho. 9 Nehuno Josua'a ana sondia vahera huzmantenge'za vu'za zagema ufre kaziga Ai rankuma'ene Beteli rankuma'mofo amu'nozanifi ome kafona ante'naze. Hianagi agra Josua'a ruga'a sondia vahezagane kumama ome ante'za mani'narega ana kenagera mani'ne. 10 Hanki Josua'a nanterampi otino sondia vahe'zaga kehu tru huteno, Israeli ranra vahera zamavareno ugota hige'za sondia vahe'ane Ai kumate vu'naze. 11 Josua'enema vu'naza sondia vahe'mo'za rankumamofona avuga kazigati vurava'o hu'naze. Anante Ai rankumamofona noti kaziga mago agupo amu'nozamifina me'negeno kantu kaziga Ai rankuma me'nege'za, kamakaziga kumara omente'naze. 12 Hagi Josua'a sondia vahera 5 tauseni'a naza ko huzamantenge'za vu'za, Ai rankumamofa zage fre kaziga Ai kuma'ene Beteli kumamokizni amu'nompi kafona omente'naze. 13 Hanki ha'ma hanaza kankamuna amanahu hu'za retrora hu'naze. Ai rankumamofa noti kazigama tro'ma hu'za mani'naza sondia vahera rama'agna

hu'za mani'naze. Ana hazage'za mago'a sondia vahera zage ufre kaziga kafonte'za mani'naze. Hanki Josua'a ana kenagera agra agupofi uramino umani'ne. **14** Hanki Ai kumate kini ne'mo'ma agra anama hazazama negeno'a, agrane maka vahe'ane, maka ana kumapi vene'nemo'za Israeli naga Jodani agupofi ha' huzmanteku nanterampi ame hu'za kumara atre'za atirami'za e'naze. Hianagi Ai kumate kini ne'mo'a kuma'amofo amefi'ama mago'a Israeli vahe'mo'zama kafoma omente'zama mani'nazana onke'ne. **15** Anante Josua'ene maka sondia vahe'amo'za Ai kumate kini nera revatga hu'za ami'mi hu'za hagege kokama me'nerega fre'za vu'naze. **16** Hagi Ai kini ne'mo'ma zamagege'za Israeli naga'mo'zama zami'mi hu'za koroma frazageno'a, maka venenema ana rankumapima mani'naza vahera ke hige'za, Israeli vahera zamarotago hu'za vu'naze. Ana hige'za kumazamia atre'za Josuane Israeli vahetamina zamarotgo hu'za afete vu'naze. **17** Hanki Ai kumate'ene Beteli kumate vene'nea magore hu'za kumazmia kegava hu'za omani'za, ana maka'mo'za atre'za Israeli vahe zamarotago hu'za vazageno, kuma kahamo'a hagro huno me'ne. **18** Anante Ra Anumzamo'a amanage huno Josuana asami'ne, Karugru keveka'a erisga hunka Ai kumatega agona'a hunto, na'ankure Ai kumara kagri kzampi Nagra menina antegahue. Anage higeno Josua'a krugru keve'a erisga huno Ai kumatega agona'a hunte'ne. **19** Hanki Josua'a karugru keve'ama erisgama hige'za kafoma ante'naza sondia vahe'mo'za nege'za, kafoma ante'naretira ame hu'za oti'za zamagare'za Ai rankumapina ufre'za, kuma'ma maka erivagamanere'za ame hu'za ana kumara teve taginte'naze. **20** Hanki Ai kumate vene'nemo'zama rukrahe hu'zama kazana kuma'zamifintira tevegumo'a vemagu vemagu

huno mareri'ne. Hanki Israeli vahe'mo'zama zami'mi hu'za koro'ma fre'za nevazaretira rukrahe hu'za, Ai nagara hara hu'zamante'za azageno, koro'ma fre'naza kazamia omnene.

21 Anante Josua'ene mikä Israeli vahe'mo'zama zami'mi hu'za Ai vahe'ma nevazareti'ma, kageno Ai rankumapinti'ma teve kumo'ma vemagu vemagu huno monaregama marerige'za nege'za ete rukrahe hu'za zamarotagoma hu'za nevaza Ai vahera zamahe'naze. **22** Hanki Israeli sondia vahe'ma Ai rankumapima mani'naza naga'mo'za atiramiza Ai vahera zamefiti hara eme huzmante'naze. Ana hu'za Israeli vahe'mo'za Ai vahera zamazeri amu'no hute'za magore hu'za ozamatre'za, ana maka zamahe hana hu'naze. **23** Hianagi magoke Ai kini ne'ke ahe ofri avre'za Josuante vu'naze. **24** Hanki Israeli vahe'mo'za ha' vahezmima, ka'ma kokampi ome zamahe vaganere'za ete rukrahe hu'za vu'za, Ai rankumapima mani'naza vahera bainati kazinteti ome zamahe vagare'naze. **25** Hanki ana zupa 12 tauseni'a Ai kumate vene'nene a'nene zamahe fri'naze. **26** Hianagi Josua'a karugru keve'ama erisga huno agona'ama Ai kumategama hunte'nea azana erinte orami erisga hu'nege'za, maka Ai kumapima mani'naza vahera zamahe vagare'naze. **27** Hanki Ra Anumzamo'ma Josuama asmi'nea kante ante'za, zamagra'a suza bulimakao afutaminke nevre'za, Ai kumapintira mago'a zantaminena eri'naze. **28** Ana hutegenosu Josua'a Ai rankumara teve tagintegeno tevemo te osavazigeno ana zantamimo'a hihi huno meno ama knarera e'ne. **29** Anante Josua'a Ai kini nera anankempi nofi harari vazino mago zafare anakintegeno frino avufga'amo'a meno vuno kinaga ome se'ne. Hagi zagea tamifretegenosu, Josua'a vahe huzmantegena avufga'a eri'za Ai rankumamofu ufre kafante ome netre'za, ana agofetura have

eri'za antehihi hazageno, ana haveramimo'a meno ama knarera
ehanati'ne. **30** Anante Josua'a Ebali agonafi mago kresramna vu
ita Ra Anumzana Israeli vahe Anumzantega tro hu'ne. **31** Ra
Anumzamofo eri'za ne' Mosese'ma Israeli vahe'ma zamasami'nea
kea amage nenteno, Mosese kasegefi me'nea kante'ene amage
anteno aenireti taga hu'za eri fatgo osu'naza haveraminteti, mago
kre fananema hu ofama hu ita trohu'ne. Ana itamofo agofetura
tevefi kre fananehu ofane, Anumzanema mago zamarimpa hu
ofa hu'naze. **32** Anante ko'ma Mosese'ma kre'nea kasegea Israeli
vahe'mokizmi zamavure Josua'a mago'a havemofo agofetu ete
krente'ne. **33** Ana maka Israeli vahe'ma ranra vahetamima
keagama refkoma nehaza vahe'ma, sondia vahete kva vahe'ma,
rurega vahe'ma zamagranema nemaniza vahe'mo'za tare kevu
vahera refko hu'naze. Ana hute'za mago kevu vahe'mo'za
Gerisim agona tava'onte manizageno, mago kevu vahe'mo'za
Ebeli agona tvaonte mani'naze. Ana hazageno Ra Anumzamofo
huhagerafi hvempage vogisimo'a amu'nozamifi me'ne. Hige'za
ana vogisima pristi vahe'mo'zama erisgama hu'za vazazana
maka veamo'za ke'naze. Ra Anumzamofo eri'za ne' Mosese'ma
zamasamino, Kenani mopafima umaniteta tamazeri so'e hanigu
Ramofontega hihoma hu'nea zana hu'naze. **34** Anante maka
asomu'ma humzantesia ke'ne, zamazeri havizama hu kema
Mosese'ma kasege avontafepima krente'neana maka vahe
zamavuga Josua'a hamprine. **35** Josua'a ana maka kasegema
Mosese'ma kre'neana magore huno otreno hampri vagarege'za,
maka Israeli vahe'mo'za antahi'naze. Hanki a'ne'ma, mofavre
zagama, ruregati vahe'ma zamagranema nemaniza nena ana
kea antahi'naze.

9 Hanki Jodani timofo kantu zage fre kaziga agonaregama nemaniza kini vahe'ma, agonamofo asoparega nemaniza kini vahe'ma, agupofima nemaniza kini vahe'ma, Mediterenia ra hagerimofo ankinaregati vuno anagamu noti kaziga Lebanoni mopare nemaniza kini vahe'ma, Hiti vahe'ma Amori vahe'ma, Kenani vahe'ma, Peresi vahe'ma, Hivi vahe'ma Jebusi kini vahe'mo'zama antahi'zama Josua'ma Jeriko vahe'ene Ai kumate vahe'ma ha'ma huzamagaterea agenkema nentahi'za, 2 ana maka'mo'za eri mago hu'za Josuane Israeli vahera ha' huzmante'naku hu'naze. 3 Hianagi Gibioni vahe'mo'za Josuama Jerikone Ai rankuma'enema zamazeri havizama hu'nea zamofo agenkema nentahi'za, 4 mago'a vene'ne nagara huzmantage'za haviza hu'za afete moparegati Israeli vahete naneke eri'za e' vahekna hu'za e'naze. Ana vahe'mo'za atafareno tagatoma hu'nea meme akrute waini tintafempi rehati rehati hu'za waini tina afineri'za, atafama re'nea kuzamia donki afumofo agumpi nente'za, 5 tagoto hu'nea zamaga ano rehati rehati hu'za nentani'za, atafare'nea kukena nentani'za, hagege huno tontore'nea breti eri'za vu'naze. 6 Anante kuma'ma eme ante'za Gilgalima mani'nazare Josuante e'za, agri'ene Israeli vahera amanage hu'za eme zmasami'naze, tagra afete moparegati e'nonku tamagrane mago tarimpa huta manisuna zamofo kea huvempa huranteho. 7 Hianagi Israeli vahe'mo'za ana Hivi vahe'mokizmia amanage hu'za zamasami'naze, Na'a agafare tamagranena tarimpa fru huta manisunku, huvempa huramantegahune? Na'ankure tamagra afeti vahera omani'negahaze. 8 Hianagi Hivi vahe'mo'za Josuana asami'za, kagri eri'za vahe mani'none hazageno, Josua'a zamantahigeno, tamagra izagata, igati e'naze? 9 Hige'za Josuana

kenona'a hunte'za, kagri eri'za vahe'mota afete mopareti e'none. Na'ankure Ra Anumzana tamagri Anumzamofo hihamu'amofo agi agenkemo'ma marerigeno, ana maka zama lsipi vahete'ma tro'ma nehuno, **10** tare Amori kini ne'ene Jodani timofo kantu kaziga nemania kini nete'ma tro'ma hu'nea zane, Hesboni kini ne' Sihoninte tro hu'nea zane, Basani kini ne' Ogi'ma Astoroti nemania nete'ma tro'ma hu'nea zamofo agenkea antahi'none.

11 Hagi kva vaheti'mozane mopatifi'ma ana maka nemaniza vahe'mo'za hurante'za, mago'a ne'zama erinetama vanaza ne'zana tro hu'neta, nevuta ana vahe'ma ome nezamagenutma amanage huta zamasamaho hu'naze, tagra tamagri eri'za vahe mani'nonanki, trimpa fru huta manisunku tamagra huvempa kea huranteho. **12** Amama erita e'nona bretiramina keho, kantega ne-eta nesunazane huta kumati'ma atreta ne-eta ana zupa amuho hu'negeta erita e'none. Hianagi menina keho, hago hagege huno angra kruhe'ne. **13** Hanki mememofo akruteti tromahu tintafena keho, kasefa me'negeta waini tina afirita e'nonane. Hianagi menina keho, hago ampamu hu'ne. Ana nehigeno kukenane taga anonema antani'nona zamo'enena za'za kama e'nona zamo higeno tagatotagatu hu'ne. **14** Anante Israeli vahe'mo'za ana nezantamina eri'za ke'nazanagi, Ra Anumzamofona antahige'za knare antahi'zana e'ori'naze. **15** Hanki Josua'a ana vahera zamazeri fru nehuno, ozamahe zamatresage'za zamagranema mago zamarimpa hu'za manisaza zanku huvempa hunezmanteg'eza, Israeli kva vahe'mo'zanena hu'za amama huhagerafuna huvempa kea eri otregahune hu'naze. **16** Ana huvempa kema Israeli vahe'mo'za huzamantetageno'a tagufa zagegna evutege'za, henkama antahi'zana afeteti vahera zamagra ome'nazanki, tva'ozamire nemaniza vahe e'naze. **17**

Hige'za Israeli vahe'mo'za oti'za tagufa zagegnafi kana vu'za ana
vahe'mokizmi kumatmintera uhanati'naze. Ana ran kumatmina,
Gibionima, Kefirama, Birotima, Kiriat Jearimi kumapinti vahere.

18 Hianagi Israeli vahe'mo'za hara huozamante'naze. Na'ankure
Israeli kva vahe'mo'za, Ra Anumzana Israeli vahe'mokizmi
Anumzamofo avufi mago zamarimpa hu'za manisaza zamofo
kema huvempama hu'naza kegu antahi'za ozamahe'naze. Ana
hazage'za maka Israeli vahe'mo'za kva vahe'zamigura mago
zamarimpa huozamante'za ke hakare hu'naze. **19** Hianagi
mika Israeli kva vahe'mo'za amanage hu'za zamasami'naze,
Mago tarimpama huta manigahune huta huvempa kea, Ra
Anumzana Israeli vahe'mota Anumzamofo avufi huvempa
hu'nonanki menina zamagritera mago'zana osugahune. **20** Hanki
tagra amanahu huzmantegahune, ozamahe zamatresunke'za
manigahaze. Na'ankure tagrama huvempa huzmante'nona kema
eri atresunana Anumzamo'a tazeri haviza hugahie. **21** Hianagi
kva vahe'mo'za Israeli vahera mago'ene zamasami'za amanage
hu'naze, Zamatrenke'za mani'ne'za Israeli vahera tevene tine
kato huzami vahe maniho. Hagi kva vahe'mo'zama huvempama
huzmante'naza kante ante'za ozamahe zamatrage'za mani'naze.

22 Anante Josua'a Gibioni vahera kehige'za azageno amanage
huno zamasami'ne, tamagra na'ante tagrira reravatga hutma,
tvaontirema nemaniza naga'mota, afete kotegati e'none hutma
hu'naze? **23** Tamagra havige hu'nagu Anumzamo'a tamazeri
haviza hugahie. Ana hanigetma maka zupa nagri Anumzamofo
mono nompi kazokzo eri'za vahe mani'neta, tinteve hurami vava
hugahaze. **24** Hanki Gibioni vahe'mo'za amanage hu'za Josuana
asami'naze, tagrama antahunama Ra Anumzana tamagri
Anumzamo eri'za ne'a Mosesena asami'no, ama ana mopa miko

zamigahuanki ana mopafima ufresutma anampima mani'naza
vahera maka zamahe vagareho huno hu'negu, tamagrikura
tusi koro nehuta ana havigea hu'none. **25** Ana hu'nonanagi
menina kagri kzampi mani'nonku, nazano hurante'naku'ma
hanana zana amne huranto. **26** Hanki Josua'a Gibioni vahera
zamaza hige'za, Israeli naga'mo'za ozamahe zamatre'naze. **27**
Hianagi Josua'a ana Gibioni vahera huzmanteno menintetima
agafama hanazana, Israeli vahe'mokizmi tintevema katoma
huzmi vahe nemanita, inantego Israeli vahe'ma vanaregama Ra
Anumzamo'ma huhamprino amare monora hihoma hanire'ene
tintevea huzamigahaze. Hige'za Gibioni vahe'mo'za ana
zamavu'zamavara meninena hu'za neaze. (2 Sam 21).

10 Hanki Jerusalemi kini ne' Adonizedekima antahiamma,
Josuama Jeriko kumate'ma hu'neaza huno Ai rankuma'ene ana
kumate kini ne'ene, ha'ma hu agatereno zamahe hanama nehuno
kumazmima eri havizama hu'nea ke'ne, Gibioni vahe'mo'zama
Israeli naga'enema mago zamarimpa hu'za manisaza zamofo
ke'ma huvempama hu'naza kema nentahino'a, **2** agrane
vahe'amozanena ana zankura tusi'a zamagogogu hu'naze.
Na'ankure Gibioni kumamo'a mago'a kumara agatereno agi
me'nea rankumakino, Ai rankuma'enena rugaterene. Hagi ana
rankumapina hanavenentake sondia veneneraminke mani'naze.
3 E'ina hu'negu Jerusalemi kini ne Adonizedekia **4**'a rankumate
kini vahetega kea atrezamante'ne. Ana vahera Hebroni kini
ne' Hohamuma, Piramu kini ne' Jarmutima, Jafia kini ne'
Lakisima, Debiri kini ne' Eklonima huno kea atre'zamante'ne.
4 Ana kini nagakura amanage hu'ne, tamagra etma eme
naza hinketa Gibioni nagara hara huzmantaneno. Na'ankure
zamagra Josuane Israeli vahe'enena huvempa hu'za hara osu'za,

mago zamarimpa hu'za manisnaza naneke huhagerafi'naze.

5 Hanki 5fu'a Amori kini vahe'ma eme eri atruma hu'nazana, Jerusalemi kini neki, Hebronni kini neki, Jarmuti kini ne'ki, Lakisine Ekloni kini netre'ne hu'za sondia vahe'zamia eri tru hu'za seli nona ome ki'za avazagigagi'za manine'za, Gibioni vahera hara huzmante'naze. 6 Anante Gibioni vahe'mo'za Israeli vahera hara huzmante'naze. 7 Anante Gibioni vahe'mo'za Gilgalima kuma eme ante'za mani'nare Josuantega kea atrente'za amanage hu'naze, eri'za vahekamota kamefira huoraminka ame hunka emrerinka tagu'vazinka taza huo. Na'ankure Amori kini vahetamima agonamofo asoparegama nemaniza kini vahe'mo'za eri tru hu'za ha' eme hurante'za nehaze.

7 Hanki Josua'ma ananke'ma nentahino'a, sondia vahe'ane knare'ma hu'za ha'ma nehaza vahera maka zamavareno Gilgalia atreno Gibioni vahe'mokizmia zamaza hunaku marerino vu'ne.

8 Hanki Ra Anumzamo'a Josuana amanage huno asami'ne, Kagra korora zamagrikura osuo. Na'ankure zamagrira ko kagri kazampi zamavare ante'nogu, mago ne'mo'e huno kagrica hara hu kagateoregahie. 9 Anante Josua'ene ana maka sondia vahe'mo'za ana kenageke vu'za Amori vahe'ma eritru hu'zama mani'nafe antri hazaza hu'za ame hu'za hara ome huzmante'naze.

10 Ana'ma hazageno'a Ra Anumzamo Israeli naga'mokizmi zamavufi Amori vahera zamazeri neginagi hige'za, rama'a vaher Gibioni kumatera zamahete'za, mago'a vahera zamarotago hu'za Bet-horonima mareneri'za karanka zamaheme vu'za Azekane, Makeda kumate'ene uhanati'naze. 11 Hanki Israeli vahe'mokizmi zamagoro'ma hu'za Amori vahe'mo'za Bet-horoniti'ma fre'za Azekama urami'nea kantega nevazageno, Ra Anumzamo'a tusinasi ko'mopa ko atregeno havegna huno herafiramino, Amori vahera zamahe fri'ne. Hagi Israeli vahe'mo'zama bainati

kazinteti'ma zamahe fri'nazama'a ruzamagatereno haveretira
zamahe fri'ne. **12** Hagi Ra Anumzamo'ma Israeli vahe'ma zamaza
hige'za, Amori vahe'ma ha'ma hu zamagateraza knazupa Josua'a
Israeli vahe'mokizmi zamufi Ra Anumzamofona amanage huno
asami'ne, zagemoka uoraminka Gibioni megeno, ikamoka
Azaloni agupofi megahane. **13** Higeno zagemo'a anante megeno,
ikamo'enena ohanatine. Ana hu'nege'za Israeli naga'mo'za ha'
vahezamia hara huzmagatere'naze. Ana zupa zagemo'a uofreno
anuntumpi me'nege'za hara hu'naze. Hagi ana'ma hu'naza
zamofo agenkea Jashariema nehaza avontafepi krente'naze.
(Jasahariema hu'neana fatgo vahe'mokizmi avontafere hu'ne.)

14 Korapa knareti'ma eno meninte'ma ehanati'neana, Ra
Anumzamo'a nunamuna antahizamino e'inahukna zana erifore
osu'neankna kna efore hu'neankino, henkanena anara osugahie.
Na'ankure Ra Anumzamo'a magoke ne'mofo ke antahimino
Israeli vahetega anteno Agra hara hu'ne. **15** Hagi ha'ma
huvagarete'za Josua'ene ana maka Israeli sondia vahe'mo'za
Gilgalima kuma'ma eme ante'za mani'narega ete vu'naze. **16**
Anama hutazageno'a 5fu'a kini vahe'mo'za koro fre'za vu'za
Makida kuma tavaonte mago havegampi ome fraki'naze. **17**
Hanki mago'a vahe'mo'za ana 5fu'a kini vahe'ma Makida
havegampi fra'maki'nazana kete'za, Josuana eme asamizageno,

18 Josua'a sondia vahera zamasamino, ranra haverami
atufetma ana havegana renkanineretma, mago'a sondia vahera
huzmantenke'za anante kva hu'za maniho. **19** Ana'ma nehutma
tamagra manigasa osutma, ha' vahetamia zamefi zamarotgo
hutma kuma'zmifina uofre'nesagetama hara ome huzmanteho.
Na'ankure Ra Anumzana tamagri Anumzamo ana vahetamina
ko tamazampi zamavarente'ne. **20** Hanki Josua'ene Israeli

ha' vahe'zamia zamarotgo hu'za zamahe hana hu'za kantega
vazage'za, osi'a naga'mo'za koro fre'za rankuma zamimofo
vihufi ufre'naze. **21** Ana'ma hute'za ana maka Israeli sondia
vahe'mo'za zamavufarera hazenkea e'ori, Makida kuma'ma
omente'zama mani'nare Josua'a mani'nege'za ete e'naze.
Ana'ma hazage'za magore hu'za Kenani mopare vahe'mo'za
Israeli vahetega mago kea huozmante'naze. **22** Anante Josua'a
amanage hu'ne, Havegama renkanimare'naza haveramina eri
atretma ana 5fu'a kini vahera havegampintira zamavareta nagrite
eho. **23** Hanki kema hia ke amagente'za ana kini vahera
havegampintira ome zamavaremegi atre'za zamavare'zama
e'nazana, Jerusalemi kinigi Hebronii kinigi, Jarmuti kinigi,
Lakisi kinigi, Ekloni kini neki hu'za zamavare'za Josuante
e'naze. **24** Ana kini vahera zamavare'za etageno, Josua'a maka
Israeli vahera kehu tru huteno, sondia vahete kva vahe'ma
agranema ha'ma ome hu'naza vahe'mokizmia amanage huno
zamasami'ne, amare etma tamaganuti ama kini vahe'mokizmi
zamanankena rentroko hiho, hige'za Josuankea amage ante'za
ana hu'naze. **25** Hanki Josua'a Israeli vahe'mokizmia amanage
huno zamasami'ne, Tamagra korora huge, antahintahi hakarea
osiho. Na'ankure Ra Anumzamo'a amama hiaza huno maka ha'
vahetamima ha'ma huzmante'nazana anahu zanke hugahie. **26**
Anage huteno Josua'a ana kini vahera zamahe friteno, 5fu'a
zafare zamufga hantintegeno me'negeno vuno kinaga zagea
ufre'ne. **27** Hagi zagema ufregeno'a Josua'a huzmanteg'e'za ana
vaher zamavufaga zafaretira erifenka atre'za, ko'ma fra'makiza
mani'naza haveganpi ome zamatrete'za ana havegantera
ranra havenuti renkani razageno meno eno, ama knarera
ehanatine. **28** Hagi ana zupage Josua'a Makida rankumara

hara hu zamagtereno kini ne'zamine ana maka vahera kazinteti zamahe fri vagare'ne. Ana kumapina mago'zane huno otreno ana maka'zana eri haviza nehuno, mago vahera atregeno omani'ne. Hagi Jeriko kini ne'ma hunte'neaza huno, Makida kumate kini nera ana zanke hunte'ne. **29** Hanki Makida rankumama ha'ma huzamagaterete'za, Josua'ene sondia naga'mo'za Makida atre'za vu'za Libna kumate vahera hara ome huzmante'naze. **30** Hanki Ra Anumzamo anahukna huno Israeli vahera zamaza hige'za, Libna kini ne'ene ana maka vahe'anena kazinteti zamahe vagare'naze. Ana kumapina Josua'a mago'zane huno otreno, ana maka'zana eri haviza nehuno mago vahere huno atregeno omani'ne. Hagi Jeriko kini ne'ma hunte'neaza huno, Libna kini nera ana zanke hunte'ne. **31** Ana'ma hute'za, Josua'ene Israeli sondia naga'mo'za Libna kumara atre'za vu'za, Lakisi kumara ome avazagigagi'za mani'ne'za hara huzmante'naze. **32** Hanki Ra Anumzamo Israeli vahe'mokizmia zamaza huno hara higeno, nampa 2 knarera Josua'a Lakisi vahera hara hu zamagaterege'za, ana maka vahera Libna kumate vahe'ma hu'nazaza hu'za bainati kazinteti zamahe fri vagare'naze. **33** Anante Gezeri kini ne' Horamua Lakisi vahetami hara huzmaza hu'naku mrerino egeno, Josua'a ana kini ne'ene naga'anena hara nehuno, mago vahere huno ozmantre'neanki zamahe fri vagare'naze. **34** Ana'ma huteno'a Josua'a miko Israeli vahe'ene Lakisia atre'za Ekloni vu'za, kafo ome ante'za mani'ne'za avazagi kagiza hara huzmante'naze. **35** Ana zupage Ekloni kumara hara hu zamagtere'za eri vaganere'za, maka zantamina eri haviza nehazageno, Josua'a Lakisi kumapi vahe'ma hu'neaza huno maka vahera kazinteti zamahe fri vagare'ne. **36** Ana'ma huteno'a Josua'a miko Israeli vahe'ene Ekloni kumara atre'za

Hebroni vu'za hara ome huzmante'naze. **37** Ana kumara omeneri'za ana kumate kini ne'ene maka vahera kazinknonu zamahe fri vaganere'za, ana kuma tavaonte'ma nemaniza vahe'ene kuma'zminena, Ekloni kumate vahe'ma hu'nazaza hu'za bainati kazinkonteti maka zamahe fri vagare'naze. **38** Ana'ma hute'za Josua'ene miko Israeli vahe'mo'za ete rukrahe hu'za vu'za Debiri kumate vahera ha' ome huzmante'naze. **39** Ana'ma huteno Josua'a ana kumate kini ne'ene, ana kumapi vahetamina zamahe fri vaganereno, tavaozmire'ma me'nea kumatamina Hebroni kumate vahe'ene Libna kumate vahe'ene, kini vahetaminte'ma hu'neaza huno Debiri kumate vahera magore huno ozamatreno bainati kazinteti zamahe fri vagare'ne. **40** Ana higeno Josua'a ana mopafima me'nea rankuma'tamina hara hu zamagaterevaga nereno, agonaregama me'nea kumatamine, kini zamine, Nigevi kazigama me'nea kumatamine, kini zamine, zage fre kaziga me'nea agonaramimofo agiafi me'nea kumatamine kini zamine, Jodani agupofima nemaniza vahe'ene kini zamia, Ra Anumzama Israeli vahe'mokizmi Anumzamo'ma huo huno'ma hunte'nea kante anteno, Josua'a magore huno ozamatreno, ana maka zamahe fri vagare'ne. **41** Hagi Josua'ma ha'ma hu zamagatere vagamare'neana, sauti kaziga Kedes Baneati agafa huno marerino, hageri ankena tavaonte Gaza eteno, noti kaziga ana maka Goseni mopa'a eri vagareno vuno Gibioni rankumate anagamu uhanati'ne. **42** Higeno ana mopafima nemaniza kini vahe'ene mopa'zaminena, Israeli vahe'mokizmi Ra Anumzamo zamaza huno hara huzmantegeno, Josua'a ana knafinke hara huno zamazeri atre vagare'ne. **43** Ana'ma hute'za Josua'ene Israeli sondia vahe'mo'za atre'za Gilgalima kuma'ma eme ante'zama mani'narega ete vu'naze.

11 Hanki Josua'ma hahuzmagaterea kema Hazori kini ne' Jabini'ma nentahino'a, Madoni kini ne' Jobabune, Simroni kini ne' Aksafuntegane kea atrezmante'ne. 2 Ana zanke huno vahe'ma kema hu'neana, noti kaziga agona ramimpima nemaniza kini vahetamine, Galili timofo sauti kaziga Araba kinima, zage ufre (westi) kaziga agona ramimpine Nafot-Dorinema nemaniza kini vahera ke hu'ne. 3 Ana'ma hiaza huno, zage hanati kazigane, zage ufre kazigama nemaniza Kenani vahe'ene, Amori vahe'ma, Hiti vahe'ma, Perizi vahe'ma, agona ramimpima nemaniza Jebusi vahe'ene, Hivi vahe'ma Mizpa kaziga Hemoni agona tvaonte'ma nemaniza vahera kea hu'ne. 4 Hagi ana kuma tamimpi kini vahe'mo'zama anankema nentahi'zama e'nazana, maka sondia vahe'zmia tusi'a kasepankna hu'za hampriga osuga'are vahera nezamavare'za, rama'a hosi afu zamine, ha'ma hanaza karisi zamine eri'za e'naze. 5 Hanki ana maka kini vahe'mo'za mago zamarimpa hu'za sondia vahezmia Meromu tinte eme zamazeri atru hu'za, Israeli vahera ha' huzmanteku kuma eme ante'naze. 6 Ana hazageno Ra Anumzamo'a Josuana amanage huno asami'ne, Zamagrikura korora osuo. Na'ankure ama ananknare okina Israeli vahera zamaza ha'nena ha' vahe'zamia maka zamahe fri vagaregahaze. Ana'ma nehutma hosi afutamimofo agigruna runekafrita, karisi zamia teve hanavazita kregahaze. 7 Anage hutege'za Josua'ene sondia naga'mo'za ha' vahe'zamimo'za antri hazaza hu'za, Meromu tinteti agafa hu'za hara eme hu'zmante'naze. 8 Hagi Ra Anumzamo'a Israeli vahera zamaza hige'za, ha' vahezamia zamahete'za zamagenere'za vu'nazana, anagamu noti kaziga Saidoni rankuma'ene Misrefot-Maim vute'za, zage hanati kaziga Mispa'e nehaza aguporegane hara huzmantel'za vu'za ana maka

vahera zamahe fri vagare'naze. **9** Hanki Ra Anumzamo'ma hunte'nea kante Josua'a hosi afutamimofo agigrunaramina taga nehuno, maka karisiramina teve hanavazino krevagare'ne.

10 Ana zupage Josua'a rukrahe huno Hasori rankumara ha'ome huzmanteno zamazeri zamagatenereno, Hasori kini nera bainati kazinteti ahe fri'ne. Ana knafina Hazori rankuma'mo'a anampima me'nea kumatamimofo vugota huzmante'nea rankuma eri haviza hu'ne. **11** Hanki Israeli vahe'mo'za Hazori kumapima mani'naza vahera magore hu'za ozmatre'za ana maka bainati kazinteti, zamahe vagare'naze. Ana nehazageno Josua'a Hazori rankumara teve tagintegeno te'ne. **12** Ana nehuno Josua'a ana maka marerisa kumatamina erivaga nereno, kini vahe zaminena kazinteti zamahe vagarene. Ra Anumzamofo eri'za ne' Mosese'ma asmi'nea kante amage anteno, Josua'a mago zane huno otreno ana maka zantamina eri haviza hu vagare'ne. **13** Hanki ko'ma ki'naza kumama tapage hutrageno moriri huno'ma marerinere'ma ki'naza kumatmina Israeli vahe'mo'za tevea tagi onte'nazanagi, Josua'a agra Hazori rankumara teve tagintegeno te'ne. **14** Ana ranra kuma tamimpinti'ma Israeli vahe'mo'za ha'ma hu'za eri'naza zantamine, bulimakaoramine, sipisipiramine, meme afutamina zamagra'a su'za eri'za vutere hu'naze. Hianagi magore hu'za vahera ozmatre'za ana maka bainati kazinteti zamahe fri vagare'naze. **15** Hanki ko'ma Ra Anumzamo'ma eri'za ne'a Mosesema asmigeno, ete Mosese'ma asami'nea kante anteno magore huno otreno ana maka'zana Josua'a huvagare'ne. **16** Hanki ne'onse agonafima me'nea mopama, maka Negevi kaziga mopama, Koseni mopama, zage fre kaziga ne'onse agona mopama, Jodani tima enevia agupoma, Siferane Araba mopama, ana maka agona mopane agupo

mopama Israelima me'neana, maka Josua'a eri vagare'ne. 17
Ana mopama agafa hu'neana, fenkamu sauti kaziga Idomu
tvaonte Haraki agonareti agafa huteno, vuno anagamu noti
kaziga Hemoni agonamofo agiafi Lebanoni aguporega Ba'algati
rankumate uhanati'ne. Hagi Josua'a ana kumatamimpi kini
vahera ko hahu zamagatereteno ana maka zamahe fri vagare'ne.

18 Ana kini vahetamina Josua'a za'zate hara huzmanteno
vu'ne. 19 Hanki mago rankumate vahe'mo'e huno Israeli
vahe'enena frua huno omani'ne. Hianagi magoke Gibionima
nemaniza Hivi vahe'mo'zage Israeli vahe'enena fru hu'za
mani'naze. Hagi ana maka zana ha' huzage eri'naze. 20 Hagi
Ra Anumzamo'a agra'a ana vahera zamagu'a eri hanavetige'za
Israeli vahera hara huzmante'naze. Na'ankure ana hanige'za
kazigazi hu'za Israeli vahera hara hunezmantesage'za zamahe
vagaresaza kazigati anara hu'ne. Hanki Ra Anumzamo'ma
Mosesema ko'ma asami'nea kante ante'za Israeli vahe'mo'za
mago vahekura zamasunkura huozmante'za, ana maka vahera
zamahe fri vagare'naze. 21 Ana zupa Josua'a vuno ranra
zaferinagrarfane Anaki vahe'ma agona ramimpima nemaniza
vahera ha' huzmanteno zamahehana hu'ne. Ana vahe'ma
nemaniza kumatamina, Hebronima, Debirima, Anabuma, Judama
me'nea agona ramimpine Israelima me'nea agona ramimpima
nemaniza vahera Josua'a ana maka zamahe vaganereno,
rankuma zaminena eri haviza hu'ne. 22 Hanki Israeli mopa'afina
zaferinage Anaki vahera omani'naze. Hianagi Gaza kumate'ma,
Gati kumate'ma, Asdoti kumate'ma hu'za osi'a Anaki vahera
manitere hu'naze. 23 Higeno Ra Anumzamo'ma Mosesema
asm'i'nea kante anteno, Josua'a ana maka mopa eri vagare'ne.
Ana huteno Josua'a ana maka Israeli vahera erisantihare'za

manisagu nagatenofite mopa refko huno zamitere hu'ne. E'ina hutegenana mopafina magore huno ha'ma hu'zana omanetfa higeno, mopamo'a fru huno me'ne.

12 Hanki amai'a Israeli vahe'mo'zama ha'ma hu zamagtere'za Jodani timofo kantu zage hanati kaziga mopane, fenkamu Arnoniti marerino anagamu Hermoni agonare marerigeno, zage ufre kaziga Araba mopane ana maka kini vahe'zaminena hara huzamagatere'naze. 2 Hanki Amori vahe kini ne' Sihoni'a Hesboni rankumate mani'neno, kegavama hu'nea mopa, Aroeli mopareti vuno Arnoni agupoma eme atrete uhanatiteno, ana agupomofona amu'nompinti rukitagino Jaboku osi tinte Amoni vahe'mokizmi mopa atumpare uhanati'ne. Ana higeno ana mopamo'a Gileati kaziga me'ne. 3 Hanki agrama mago'a mopama kegavama hu'neana, Jodani timofona zage hanati kaziga agupo mopane, Galili tinnenareti uramino fenkamu sauti kaziga Bet Jesimotine Fri'nea hagerinte uramiteno, sauti kaziga vuvava huno Pisga agonamofo agiaifi vu'ne. 4 Ana hige'za Israeli vahe'mo'za Basani vahera hara huzmante'za kini ne' Ogina hara hugatere'haze. Hagi Ogi'a Rifaimi nagapinti nere, kora ana vahera rama'a vahe mani'nazane. Hianagi osia naga Astarotine, Edrei rankumatera mani'naze. 5 Hanki Ogi'ma kegavama hu'nea moparamina, Hermoni agonareti vuno, Saleka mopalvigeno, ana maka Basani kazigati vuno Gesu vahe'ene Ma'aka vahe mopalvigeno, ana maka Basani kazigati vuno Gesu vahe'ene. Hanki mago'a mopama kegava hu'neana, Giliatimopa amu'nompinti rugitagino vuno Hesboni kini ne'mofo mopalvigeno, ana maka Basani kazigati vuno Gesu vahe'ene. 6 Hanki Ra Anumzamofo eri'za ne' Mosese'ene Israeli naga'mo'za kora tare kini netrena Ogine Sihoni kizania hara huzanagatere'naze. Anama hute'za Anumzamofo eri'za ne' Mosese'a ana kini

netremokizni mopa, Rubeni naga'ene Gati naga'ene Manase
nagara amu'nompinti refko huno zami'ne. 7 Hanki Josua'ene
Israeli vahe'mo'zama Jodani timofo zage ufre kaziga me'nea
kumatamimpi kini vahe'ma ha'ma hu zamagaterete'za eri'naza
mopa, Lebanoni agupoa Ba'al-Gatiti agafa huteno vuno Seiri
kaziga avugosama hunte'nea Halaki agonare vu'ne. Hagi
ana mopa Josua'a refko huno Israeli vahera nagatenofite
hu'za erisantihare'za manisaza mopa zami'ne. 8 Hagi agona
mopama zage ufre kaziga agonaramimofo agiafima me'nea
mopa Alabama agonaramimofo asopa mopama, ka'ma mopama,
Negevi mopama, Hiti vahe'ma, Amori vahe'ma Kenani vahe'ma,
Perisi vahe'ma, Hivi vahe'ene, Jebusi vahe'mokizmi mopa,
Josua'a refko huno Israeli vahera nagatenofite huno zami'ne. 9
Hanki kini vahe'ma ha'ma huzmagatere'naza Jeriko kini nera
magore, Beteli kumamofo tavaonte me'nea kumate Ai kini nera
magore, 10 Jerusalemi kini nera magoki, Hebron kini nera
magore, 11 Jarmuti kini nera magoki, Lakisi kini nera magore.
12 Hagi Ekloni kini nera magoki, Gesa kini nera magore. 13 Hagi
Debiri kini nera magoki, Gedari kini nera magore. 14 Horma kini
nera magoki, Aradi kini nera magore. 15 Hagi Libna kini nera
magoki, Adulam kini nera magore. 16 Makeda kini nera magoki,
Beteli kini nera magore, 17 Tapua kini nera magoki, Hefa kini
nera magore. 18 Hagi Afeki kini nera magoki, Lasharoni kini
nera magore. 19 Hagi Madoni kini nera magoki, Hazori kini
nera magore. 20 Simronmeron kini nera magoki, Akasafi kini
nera magore. 21 Hagi Ta'anaki kini nera magoki, Megido kini
nera magore. 22 Hagi Kadesi kini nera magoki, Jokneamu kini
ne'ma Karmelima nemaniana magore. 23 Hagi Dori kini ne'ma
Nafdorima nemaniana magoki, Goimi kini ne' Gilgalima nemania

kini nera magore. 24 Hagi Tirza kini nera mago higeno, ana makara 31ni'a kini vahe hara huzamagatere'naze.

13 Hanki Josua'a rama'a kafu huno ozafaregeno, Ra Anumzamo'a amanage huno asmi'ne, Kagra ozafa rankeno rama'a mopama eriga mopa e'ori'naze. 2 Ana'ma e'orinaza mopa'a Filistia kazigane, Gesu vahe mohanena e'ori'naze. 3 Ana mopama agafa hu'neana, Isipi mopamofo zage hanati kaziga Sihoriti agafa huteno, noti kaziga marerino E kroni mopama ometete uhanati'ne. Hagi Kenani mopa'afima 5fu'a Filistia kini vahe'mokizmi kuma'ma me'neama'a Gazama, Asdotima, Askelonima, Gatima, E kronine sauti kaziga mago'a Avi vahe mopa me'ne. 4 Hagi fenkamu sauti kaziga maka Kenani vahe mopa, Saidoni kumate vahe'ma Arama nemanireti agafa huno vuno, ogantuma Amori vahe mopamo'ma Afekima uhanati'nea mopa e'ori'naze. 5 Hagi Gebali vahe mopane, ana maka zage hanati kaziga Lebanoni mopane, Ba'al-Gati fenka kaziga Hemoni agonareti vuno Lebo Hamatima vu'nea mohanena e'ori'naze. 6 Hanki Lebanoniti vuno Misrefot Maimima vigeno, agonafima nemaniza vahe'ene ana maka Saidoni kumate vahe'enena, Israeli vahe'mo'za negesage'na Nagrani'a zamahe natitregahue. Hagi ko'ma hugante'noa kante atenka, ana mopa Israeli vahera refko hunka zamisanke'za erigahaze. 7 E'ina hu'negu ama ana mopa refko hunka erisantima hare'za manisaza mopa 9ni'a naganofira nezaminka, Manase naga'ma amu'nompinti refko hu'nea, naga'mokizminena ana mopa zamisanke'za erigahaze. 8 Hanki ruga'ama Manase naga'ma refko'ma hutre'nea naga'ene, Rubeni naga'ene Gati naga'mo'za Mosese'ma zamagri su'zane hu'noma zami'nea mopa Jodani zage hanati kaziga mopa Ra Anumzamofo eri'za ne' Mosese'ma huzmante'nea

kante ante'za eri'haze. **9** Ana mopama agafama hu'neana, Arnoni agupofima tima eneviregati Aroeriti agafa huteno, ana agupomofo amu'nompima me'nea rankuma'ene, ana maka Medebama me'nea agupo mopareti vuno, Diboni rankumate uhanati'ne. **10** Hige'za Amori vahe kini ne' Sihoni'ma kegava hu'nea rankumatamina maka eri vagare'haze. Hagi kora Sihoni'a Hesboni kumate mani'neno ana maka rankumatamina kegava huzmante'ne. Hanki ana mopamofo agema'amo'a Amoni vahe mopa atuparega ome atre'ne. **11** Hanki Giliati vahe mopane, Gesuri vahe kazigane, Makati vahe mopane, ana maka Hemoni agonane, ana maka Basani kazigati vuno Saleka rankumate uhanati'neana, **12** ana maka kumatmia eri mago huno Basani mopae higeno, Ogi'a Astarotine Edreine mani'neno ana maka kumara kegava hu'ne. Hagi Ogi'a Refai kumate ne'kino, agrira maka naganofi'a fritageno agrake mani'ne. Hanki Refai vahera Mosese'a kora ha' huzmagatereno ana mopazamia hanare'nea mopa me'ne. **13** Hianagi Geshuri vahe'ene Ma'aka vahe'enena Israeli vahe'mo'za hara huzmante'za zamazeri otre'nagu, Israeli vahepin meninena ana vahera mani'naze. **14** Hianagi Livae nagatfana erisantihare'za manisaza mopa Mosese'a ozami'ne. Hagi vahe'mo'zama Ra Anumzana Israeli vahe'mokizmi Anumzamofontegama tevefima kresramna vanaza ofama huntesafinti, Ra Anumzamo'ma Mosesema asmi'nea kante ante'za zamagra suzana erigahaze. **15** Hanki Mosesea'ko'ma Rubeni naga'ma nagatenofite huno mopama refko huno zami'neana amana hu'ne, **16** Hagi mopazmimo'a Aroeria Arnoni tinkrahopinti agafa huteno, eno ana agupomofo amu'nompima me'nea rankuma'ene, ana maka Madebama fatgoma huno agupoma hu'nea mopa zami'ne. **17** Hagi Hesboni mopane ranra

kumazamima ana fatgo hu'nea agupo mopafima me'nea kumatmi
zamagi'a, Dibonima Batmot-Ba'alima, Ba'al-Bet-Meonine, **18**
Jahazine Kedemané, Mefatine, **19** anagamu kaziga agupofima
ne'onse kumatamimpima nemaniza vahera Kiriati vaheki, Sibma
vaheki, anagamu agonafima me'nea agupofima nemaniza Zeret-
Shahari vaheki, **20** Pisga agona asoparega me'nea kumatre'na
Bet-Peorine, Bet-Jesimotinene. **21** Hanki mago'a mopama
Rubeni naga'mo'zama eri'nazana, ana agupofima me'nea maka
rankumatamine, Amori vahe kini ne' Sihoni'ma Hesboni mani'neno
kegava hu'nea kumatamine eri'naze. Hagi Sihoni kini ne'ene
Midieni kva vahetami Evima, Rekemu'ma, Zuri'ma, Huri'ma
Reba'ma ugagota hu'nea ne'ene, Sihoni'ene eri mago hu'naza
nagara Mosese'a hara huzamagatere'ne. **22** Hagi anampina
Beori nemofo Balamuna havige kasnampa ne' Israeli vahe'mo'za
bainati kazinteti ahe fri'naze. **23** Hanki Rubeni naga'mo'zama
erisantima hare'naza mopamofo agema'amo'a, Jodani tinte
ometrene. Hagi ana mopafima me'nea rankumatamine ne'onse
kumataminena, Rubeni naga'mo'za nagatenofite refko hu'za
erisantihare'naze. **24** Hanki Gati nagara Mosese'a nagatenofite
mopa refko huno zamitere hu'ne. **25** Hanki mopazamimofo
agema'amo'a Jazeri kumara erigamateno, ana maka Giliati
rankumatamine, Amori vahe'mokizmi mopa amu'nompinti refko
huno Raba kumamofo zage hanati kaziga Aroeri vigeno, **26**
Hesbonitira Ramat Mizpane, Betonimi uhanatiteno, anantetira
Mahanaimi vuno Debiri mopa agentega uhanati'ne. **27** Hanki
Gati naga'mo'zama mago'a mopama eri'nazana, Jodani tima
enevia agupomofona amu'nompinti refko hu'za zage hanati
kaziga eri'naze. Ana mopa Hesboni kini ne' Sihoni'ma kegava
hu'neankino, ana mopamo'a Galili timofo noti kazigati agafa

huteno, Bet-Haramu me'nea rankumatamine, Bet-Nimrane, Sukotine, Zafonia erigu'a atre'ne. **28** Ama ana rankumatamine ne'onse kumatamia Gati naga'mo'za nagatenofite refko hu'za erisantihare'naze. **29** Hanki Manase naga'ma amu'nompinti'ma refko hu'naza nagara Mosese'a nagatenofite huno mopa zamatere hu'neana, amanahu hu'ne. **30** Mahanaimi rankumateti agafa huteno, ana maka Basani kaziga mopa ko'ma Basani kini ne' Ogi'ma kegava hu'nea mopane, ana maka Basani kaziga 60'a rankumatmima Jair me'neana Manase naga'mo'za eri'naze. **31** Ana mopamo'a Giliati kaziga mopa amu'nompinti erigama neteno, Basani kini ne' Ogi'ma nemania kumatmina, Astarotine Edreinena erigamate'ne, ana mopa'a Mosese'a amu'nompinti Manase nemofo Makiri ne'mofavre nagara nagatenofite refko huno zami'ne. **32** Hanki Jeriko rankuma'ene Jodani timofo kantu zage hanati kaziga, Moapu agupofi Mosese'ma mani'neno refko huno zami'nea kante ante'za ana mopa eri'naze. **33** Hianagi Livae naga nofimofona Mosese'a erisantima haresaza mopa ozami'neanki, Ra Anumzana Israeli vahe'mofo Anumzamo huvempama huzmantenea kante ante'no zamagrama erisantima haresaza zana agra Ra Anumzamo mani'ne.

14 Hanki ama'i Israeli vahe'mo'zama Kenani mopama refko hu'za erisantihare'naza zamofo naneke. Hagi pristi ne' Eleazaki, Nuni nemofo Josuaki, mago'mago naganofite'ma ugota hutere hu'naza vahe'mo'zane ana mopa refko hu'za zamizage'za erisantihare'naze. **2** Ana mopama refko hu'za eri'nazana 9ni'a naganofiki 10nima hia nagara amu'nompinti refko hu'ne'za, ana mopa satu zokago re'za Ra Anumzamo'ma Mosesema asmi'nea kante ante'za mopa refko hu'naze. **3** Hanki tare naganofiki mago'ma amu'nompinti refko'ma hutre'nea naga

nofimo'za Mosese'ma ko'ma hu'nere ante'za, Jodani timofo zage hanati kaziga mopa erisantihare'naze. Hianagi ana mopama ruga'amo'za refkoma hanafintira Livae naga'mo'za erisantiharegahaze huno Mosese'a osu'ne. 4 Hanki Josefe nagara tare naga'nofi efore hu'nazana, e'i Manasene Ifraemikizni nagare. Hagi Livae nagara magore hu'za mopa ozami'naze. Hianagi sipisipima, memema, bulimakao afuzmima, kegavama hu mopane rankuma'ene zamizage'za mani'naze. 5 Ana hige'za Israeli vahe'mo'za Ra Anumzamo'ma Mosesema asmi'nea kea maka amage ante'za, Kenani mopa refko hu'za nagatenofite hu'za eri'naze. 6 Anante Juda naga'mo'za Josuante Gilgalia ageno, Kenaziti ne' Jefune nemofo Kalepi'a Josuana anage huno asmi'ne, Ra Anumzamo'ma Mosese'ma Anumzamofo Vahe'ma asamigeno, Kades Banea kumate'ma nagriku'ene kagriku'ene hu'nea nanekea kagra ko antahi'nane. 7 Hanki ana knafina nagra 40'a kafu hu'nogeno Kades Banea kumatetira frakita vuta mopa ome kehogura Ra Anumzamofo eri'za ne' Mosese'a hunantege'na vutena e'noana, havigea nagra osu'na nagrama ke'noa zanku nagu'areti hu'na tamage naneke eme asmi'noe. 8 Hianagi nafuhe'za nagranema vu'namo'za koro ke nehu'za, vahera zamagu'a zamazeri karogro ki'naze. Ana hu'nazanagi nagra maka nagu'areti hu'na Ra Anumzana Anumzanimofona amage ante'noe. 9 Higeno ana zupa Mosese'a huvempa huno anage hu'ne, tamagerfa huno ina mopalma kagiama rente'nana mopa kagrane mofavre nagaka'ane erisantihareta manisaza mopa mevava hugahie. Na'ankure kagra nagri Anumzana kagu'areti hunka amage ante'nane. 10 Hanki Kalepi'a mago'ane huno, Antahiho, maka Israeli vahe'mo'ma ka'ma mopafima mani'za neageno'ma, Ra Anumzamo'ma ama ana zanku'ma

Mosesema asmi'nereti'ma e'neana, 45'a kafu evu'ne. Hanki nagira natrege'na ana knafina ofri'noanki menina kafunimo'a 85'a kafu nehie. **11** Hu'neanagi Mosese'ma hunantege'nama vu'hoa yupama me'neankna hankave menina hankaveni'a zahufa me'neanki'na, amne vu'na e'na hu'na hara hugahue. **12** Hagi ana yupama Ra Anumzamo'ma hu'nea kante antenka menina agonamofo asopa kaziga mopa namighane. Hanki kagra ana zupa mani'enka antahi'nanke'za fraki'tama vuta ana mopama ome ke'nona vahe'mo'za ana agonamofo asoparegama me'nea mopagura hu'za, tusinasi Anaki vahe'mo'za ran kuma'zamimofona hankave have kegina hu kagi'za mani'naze hu'za hu'naze. Hianagi Ra Anumzamo'ma nazama huku'ma hanuno'a naza hanige'na, agrama hu'nea kante ante'na ana vahera zamahe natitregahue hu'noe. **13** Anante Josua'a Jefune nemofo Kalepina Anumzamo aza hinogu asomu ke hunenteno, erisantiharenogu Hebroni kaziga mopa Kalepina ami'ne. **14** E'ina hu'negu Hebroni mopamo'a Kenazi ne' Jefune nemofo Kalepine agripinti'ma fore'ma hanaza vahe'mokizmi mopa me'ne. Na'ankure agra maka agu'areti huno Ra Anumzana Israeli vahe'mokizmi Anumzana amage ante'negu anara hu'ne. **15** Higeno korapara Hebroni kumamofo agi'a Kiriat-Arbae hu'za nehzane, tusinasi Anaki vahepinti ne' Arba'e nehaza ne'mofo agire asamare'naza kumare. Higeno ana maka mopafina hara forera osigeno, mopamo'a fru huno me'ne.

15 Hanki Juda naga'ma nagatenofite'ma hu'za mopama refko'ma huzami'nazana, fenkamu sauti kaziga Idomu vahe mopama ometete uramino, vuvava huno sauti kaziga Sinie nehaza ka'ma kotega vu'ne. **2** Hanki mopazmimofo agema'amo'a fenkamu sauti kazigati'ma agafama hu'neana, fri hagerimofo

ankenaregati agafa huteno, **3** anantetira vuno Akrabimie nehaza
agonaregama mareneriza kana agatereno, kantu kaziga Sinie
nehaza ka'ma kokantega vuteno, Kades Banea mopamofo
sauti kazigati marerino vuno, Hezroni rankumara agatereno
Ada rankumatega anagamu uhanatiteno, ananteti rukrahe huno
Karka rankumate vu'ne. **4** Hagi anantetira vuno Asmoni kumate
uhanatiteno, Isipi mopama emete'nere'ma osi tinkraho me'nea
avaririno Mediterenieni ra hagerinte uhanatine. Ana higeno Juda
nagamokizmi sauti kaziga mopamo'a anante ometre'ne. **5** Hagi
zage hanati kaziga mopamofo agema'amo'a Fri Hagerimpima
Jodani timo'ma enefrerega vu'ne. Higeno noti kaziga mopamo'a
Fri Hagerimpima Jodani timo'ma enefrereti agafa hu'ne. **6**
Hanki anantetira ana mopamofo agema'amo'a marerino zage fre
kaziga Bet-Hoglen uhanatiteno, vuno anagamu noti kaziga Bet-
Araba Bohani Rubeni nemofo havema me'nere uhanati'ne. **7**
Hagi mopamofo agema'amo'a Akhori aguporegati marerino vuno
Debiri uhanatiteno, rukrahe huno noti kaziga Gilgali agonamo'ma
sauti kaziga Adumimi agonamofo asoparega vuteno, anantetira
vuvava huno En-Semesima tima nehanatire vuno, En Rogeli
ome atre'ne. **8** Hanki anantetira marerino Ben Hinomu agupoma
emetre'nerega Jerusalemi kumamofona sauti kaziga me'nea
agonamofo asoparega vu'ne. Anantetira Hinomu agupomofona
zage fre kazigati, ana agonamofo morusapi marerino, Refaimi
agupomofo noti kazigama ometretegati vu'ne. **9** Hagi ana
agonamofo morusapintira vuno mopamofo agema'amo'a Neftoa
tinkeriramima me'nere vuteno, vuno Efroni agona tvaonte
me'nea rankumatminte uhanatiteno, anantetira rukrahe huno
Ba'alala rankumate vu'ne. Hagi ana kumamofo mago agi'a
Kiriat Jearimie hu'za menina nehaze. **10** Hanki Ba'alatira

zage fre kaziga rukrahe huno vuno Seiri agonare uhanatiteno, Jearimi agonamofo [e'i Kesalonie] noti kaziga asoparega vuteno vuvava huno Bet Semesi rugitagino Timna vu'ne. **11** Hagi anantetira ana mopamofo agema'amo'a vuno Ekroni noti kaziga ne'one agonaramintega vuteno, rukrahe huno Sihikeroni vuteno, anantetira Ba'ara agona erigama neteno Jabneli uhanati'ne. Higeno ana mopamofo agema'amo'a Mediterenia ra hagerinte ome atre'ne. **12** Hagi Juda naga'mokizmi zage fre kaziga mopamofo agema'amo'a, Mediterenia ra hagerimofo ankenare me'ne. Hagi Juda naga'mo'za ana mopafi nagatenofite hu'za mani'naze. **13** Ko'ma Ra Anumzamo'ma asami'nea kante anteno, Josua'a Jefune nemofo Kalepina Juda nagamokizmi mopafinti mago mopa refko humi'neana Kiriat Arbae, e'i menina Hebron me'ne. (Arba'a Anaki tusinasi vahe'mokizmi nezamageho'e). **14** Hagi Kalepi'a Hebroniti'ma 3'a Anaki mofavrerami zamahe natitre'neana Sesaiki, Ahimaniki, Talmaima huno zamahe natitre'ne. **15** Hanki Kalepi'a Debiri rankumapima mani'naza vahera marerino hara ome huzamante'ne. Hanki kora ana kumakura (Kiriat Sefa nehzane). **16** Hanki Kalepi'a amanage hu'ne, ina ne'mo'o Kiriat sefa vahe'ma ha'ma huzamagateresia nera mofani'a Aksana amisnugeno a' erintegahie. **17** Higeno Kalepi nefu Kenasi mofavremo Otnielki Kiriat Sefa kumara hara huzmagateregeno, Kalepi'a mofa'a Aksana amigeno ara erinte'ne. **18** Hagi Aksama Otnielinte'ma marea knazupa, Aksa'a nefu Kalepina mopagu ome antahigenaku Otnielina tutu hunte'ne. Hagi donki afu'mofo agumpinti'ma Aksa'ma anama takau neregeno'a, Kalepi'a antahigeno, na'a hugante'nuegu kave'nesie? **19** Higeno Aksa'a nefana amanage huno asmi'ne. Asomu hunantenka Kagra Negevi kaziga hagege mopa hago nami'nananki, mago'a kampu'i

tinena namighane. Higeno anagamune fenkma kaziganema
me'nea kampui tina Kalepi'a ami'ne. **20** Hanki Juda naga'mo'zama
rankuma'ene mohanema nagatenofite'ma hu'za erisantihare'naza
kumatamimofo zamagi'a ama'ne, **21** Sauti kaziga Idomu vahe
mopa eme atretegama Juda naga'mokizmi rankumatmima
me'neana, Kebzilima, Ederima, Jagurima. **22** Kinama, Dimonama,
Adadama, **23** Kedesima, Hazorima, Itanima, **24** Zifima,
Telemita, Bearotima, **25** Hazor-Hadatama, Keriot-Hezronima,
(e'i Hazorie hu'za nehaza kumare), **26** Amamura, Semama,
Moladama, **27** Hazar-Gadama, Hesmonima, Bet-Peletima, **28**
Hazar-Sualima, Besibama Biziotama, **29** Ba'alama, Imima,
Ezemima, **30** Eltoladima, Kesilima, Homama, **31** Ziklagima,
Madmanama, Sansanama, **32** Lebaotima, Silhimima, Ainima,
Rimoni kuma'enene. Hagi ana makara **29ni'a** ranra kumatmi
me'negeno, ne'onse kumazmia megagitere hu'ne. **33** Hanki zage
fre kazigama ne'onse agonaramimofo asoparegama me'nea
kumataminena Juda naga'ma zami'neana, Estaolima, Zorama,
Asnama, **34** Zanoama, En-Ganimima, Tapuama, Enamuma, **35**
Jarmutima, Adulamuma, Sokoma, Azekama, **36** Sa'araimima,
Atithaimima, Gederama, Gederotaimima huno me'ne. Ana
makara **14ni'a** ranra kumatmi me'negeno, ne'onse kumazmia
megagitere hu'ne. **37** Hagi mago kazigama metru hu'nea
ranra kumatmimofo zamagi'a, Zenanima, Hadassama, Migdal-
Gatima, **38** Dileanima, Mizpama, Joktelima, **39** Lakhisima,
Bozkatima, Eklonima, **40** Kabonima, Lamamura, Kitlisima, **41**
Gederotima, Bet-Dagonima, Na'ama, Makeda kuma'enene. Hagi
ana makara **16ni'a** ranra kumatmi megeno, ne'onse kumazmia
megagitere hu'ne. **42** Hagi mago kazigama metru hu'nea ranra
kumatmimofo zamagi'a, Libnama, Etama, Asanima, **43** Iftama,

Asnama, Nezibima, **44** Keilama, Akzibima, Maresa kumaki huno megeno, ana makara 9ni'a ranra kumatmi me'negeno, ne'onse kumazmia megagitere hu'ne. **45** Hanki E kroni ran kuma e'neri'za ne'onse kumazmima megagi'nea kuma'taminema Juda naga'mo'zama eri'nazana, **46** E kroni rankuma e'neri'za, Asdoti rankuma'ene e'neriza, vu'za hagerinkenaregama me'nea neonse kumataminena eri'naze. **47** Asdotima me'nea ranra kuma'ene ne'onse kumatamine, Gaza rankuma'ene tvaoma'are'ma me'nea neonse kumatamima, fenkamu sauti kaziga Isipi mopama eme atretegema me'nea tinkagomute vigeno, Mediteterenia ra hageri ankenare ome atre'ne. **48** Hagi agonaramimpima me'nea kumatmina, Samirima, Jatirima, Sokoma, **49** Danama, Kiriat-Sana [mago agi'a Debirie]. **50** Hagi Anabuma, Estemoma, Animima, **51** Gosenima, Holonima, Giloma huno megeno ana makara 11ni'a ranra kumatmi me'negeno, ne'onse kumazmia megagitere hu'ne. **52** Hanki mago kaziga metru hu'nea ranra kumatmimofo zamagi'a, Arabuma, Dumama, Esanima, **53** Janimima, Bet-tapuama, Afekama, **54** Humtama, Kiriat-Arbama, (e'i menina Hebronie nehaze), Ziorima huno megeno, ana makara 9ni'a ranra kumatmi me'negeno ne'onse kumazmimo megagitere hu'ne. **55** Hanki mago kaziga metru hu'nea ranra kumatmimofo zamagi'a, Maonima, Kamelima, Zifima, Juttama, **56** Jezrielima, Jokdeamuma, Zanoama, **57** Kainima, Gibeama, Timna kumaki huno megeno, ana makara 10ni'a ranra kumatmi me'negeno, ne'onse kumazmia megagitere hu'ne. **58** Hanki mago kaziga metru hu'nea ranra kumatmimofo zamagi'a, Halhulima, Bet-Zurima, Gedrima, **59** Ma'aratima, Bet-Anotima, Eltekonima huno megeno, ana makara 6si'a ranra kumatmi megeno, ne'onse kumazmia megagitere hu'ne. **60** Hanki mago kaziga

me'nea rankumatremokizni zanagi'a, Kiriat-Ba'aline, (mago agi'a Kiriat Jearimie), Raba kuma'ene me'nakeno, ne'onse kumatmimo'a megagitere hu'ne. **61** Hagi ka'ma mopama me'nefima me'nea kumatmimofo zamagi'a, Bet Arabama, Midinima, Sekakama, **62** Nibsaninma Hage rankuma'ma En-Gedi kumaki hu'za me'naze. Hagi ana makara 6si'a ranra kumatmi me'negeno, ne'onse kumazmia megagitere hu'ne. **63** Hianagi Jebusi vahe'ma Jerusalema ko'ma mani'naza vahera, Juda naga'mo'za zamahenati otre'za, zamatrazage'za zamagrane magopi Jerusalemi kumapi mani'za e'za meninena mani'naze.

16 Josefe agehemokizmima mopama refkoma huzmi'nazana, zage hanati kaziga Jeriko tavaonte Jodani tinteti agafa huteno, vuno ka'ma mopamofo amu'nompinti rugatagino marerino Beteli kaziga me'nea agonaramintega mareri'ne. **2** Hagi Beteltila Luzi vuteno anantetira vuvava huno Ataroti kaziga Arkatai vahe kumate uhanati'ne. **3** Hagi anantetira zage fre kaziga uramino Jefleti vahe mopama omete'hene uhanatiteno, vuvava huno fenkama kaziga me'nea Bet Horoni aguporega vuno, Gezeri vuteno, anantetira Mediterenia hagerinte ometre'ne. **4** Hagi Josefena agehe'za Manase naga'ene Efraemi naga'mo'za ama ana mopa erisantihare'haze. **5** Hanki Efraemi naga'mo'zama mopazamima nagatenofite'ma refko'ma hu'za eri'nazana amanahu hu'ne, zage hanati kaziga mopamofo agema'amo'a agafama hu'neana Atarot Ada rankumateti agafa huteno, vuno anagamu kaziga me'nea Betoroni ran kumate uhanati'ne. **6** Hagi anantetira mopamofo agema'amo'a vuvava huno Mediteterenia ra hagerinte uhanati'ne. Hanki noti kaziga Mitmetat kumatetira rukrahe huno zage hanati kaziga Ta'anat Siloa vuteno, ana kumara agatereno zage hanati kaziga Janoa ran kumate uhanati'ne. **7** Hanki

isagamo'a anantetira uramino Atarotine, Na'ara ran kumatrente
uhanatiteno, vuvava huno Jeriko rankumate vuteno, vuno Jodani
tinte ome vagare'ne. **8** Hanki Tapua rankumatetira mopamofo
agema'amo'a zage fre kaziga Kana tinkazonture vuno agatereno
Mediterenia ra hagerinte uhanati'ne. Hanki ama ana mopa
Efraemi naga'mo'za nagatenofite refko hu'za erisantihare'naze.
9 Hanki Efraemi naga'mokizmia mago'a ranra kuma'ene ne'onse
kumazamia Manase naga'mo'zama erisantihare'naza mopafi
me'ne. **10** Hanki Kenani vahe'ma Gezeri kumate'ma nemaniza
vahera zamagra zamahenati otre, zamatrage'za magoka maniza
e'za amagnarera e'naze. Hianagi Efraemi naga'mo'za tutu
huzmantage'za zamagri kazokzo eri'zanke eri'naze.

17 Hanki Josefena zage mofavre'amofo Manase naganofira
mago mopa refko huzami'naze. Hagi Manasena zage mofavre'a
Makirikino Gileati vahe'mokizmi nezmafa'e. Na'ankure agra
korapara harfa ne' mani'negu Giliatine Basani mopa agri nagara
refko huzami'naze. **2** Hagi amu'hompinti'ma mago'a Manase
naga'ma refkoma hu'za mani'naza nagara, nagatenofite hu'za
mopama refko huzami'nazana, Abiesama, Helekima, Asrielima,
Sekemima, Heferine Semitane huno refko huzami'naze. Hanki
ama ana nagara Josefe mofavre Manase nagapinti efora
hu'naza vene'negi'za, mago mago naga'nofite'ma ugota hu'naza
vahe'mokizmi zamagi'a me'ne. **3** Hagi Serofehati'a Heferi
mofavre manigeno, Heferi'a Gileati mofavre manigeno, Gileati'a
Makiri mofavre manigeno, Makiri'a Manase mofavre mani'ne.
Hianagi Zelofehati'a mago ne' mofavrea onte'neanki, mofanege
zmante'neankino zamagi'a amanahu hu'ne, Malaki, Noaki,
Hoklaki, Milkaki Tirsaki huno zamante'ne. **4** Hanki ana
mofa'nemo'za zamagra pristi ne' Eliesane, Nuni nemofo

Josuane, mago'a Israeli kva vahete vu'za amanage hu'naze,
Ra Anumzamo Mosesena asamino, tasarehe'zama mopama
erisafintira mago'a tagrikura mopa zamiho huno hunte'ne.
E'ina hu'negu Josua'a Ra Anumzamo'ma hu'nea kante anteno
mopazamifinti zamasarerehe'mokizmia mago'a mopa zami'ne.

5 Hagi Manase naga'mo'za Jodani timofo zage hanati kaziga
Gileati mopane Bashani mohanena eri'ne'za, mago'ane 10niafi
refkoma huzami'naza mohanena eri'naze. 6 Hagi Manase
nagapinti mofa'nemo'za, vene'nemo'zama mopama erizafintira
zamagranena anampinti mago'a mopa eri'naze. Hanki Gileati
mopa mago'a Manase mofavremokizmi mopa me'ne. 7 Hanki
Manase naga nofi'mofo mopamo'a, Aseriti agafa huteno Sekemu
zage hanati kaziga Mikmetati vu'ne. Hagi anantetira mopamofo
agema'amo'a henkamu sauti kaziga uramino En-Tapuama
nemaniza vahera zamazerigu'a ate'ne. 8 Tapua mopa Manase
naga nofi'mofo mopa megeno, Tapua rankumara Manase
naga'mofo mopa agema'arega me'neanagi, Efraemi naga'mofo
mopa me'ne. 9 Hagi anantetira mopamofo agema'amo'a
fenkamu sauti kaziga uramino Kana osi tinte uhanati'ne.
Ana timofo sauti kazigama me'nea rankuma tamina, Efraemi
naga'mofo kumatamine. E'ina rankumatamimo'a Manase naga
rankumatamimofo amu'nompi me'ne. Hianagi Manase naga'mofo
mopa agema'amo'a Kana osi tinkagomu'mofo noti kaziga
evuteno, vuno Mediterenia ra hagerintega uhanati'ne. 10 Hanki
Sauti kazigama me'nea mopa Efraemi naga'mokizmi mope. Hagi
noti kazigama me'nea mopa Manase naga'mokizmi mopagino
zage fre kaziga Mediterenia ra hagerikenare ome atre'ne.
Hagi Manase naga'mofo mopa agema'amo'a rugitagigeno,
Aseli nagamofo mopa noti kaziga megeno, Isakar naga'mofo

mopa zage hanati kaziga me'ne. **11** Hanki Manase naga'mofo
mopa Isaka naga'ene Aseli naga'mokizmi mopafina me'neana,
Betsani rankuma'ene ne'eonse kumatamima tavaoma'are'ma
me'nea kumatamine, Ibliamu rankuma'ene, ne'onse kumatamima
tava'oma'are'ma me'nea kumatamine, Nafat Dori rankuma'ene,
Endori rankuma'ene, Tamak rankuma'ene, Megido rankuma'ene
ana maka ra kumatamimofo tavao zamire'ma me'nea neonse
kumatamia Manase naga'mo'za eri'naze. **12** Ana hu'neanagi
Manase naga'mo'za ana rankumatamimpintira Kenani vahera
zamahenati otre zamatrage'za ana mopafi mani'naze. **13** Hianagi
Israeli vahe'mo'zama hankave nentake'ma nehu'za, Kenani
vahera zamahenatitre vagaore'nazanki, mago'a zamatrage'za
manine'za Israeli vahe'mokizmi kazokzo eri'za eri zamante'naze.
14 Henka Josefe naga'mo'za Josuankura amanage hu'naze, Ra
Anumzamo tagri nagara asomu hurantegeta rama'a vahe fore
huta mani'nonanki, na'a higenka magoke mopagera tami'hane?
15 Hagi Josua'a ke nonazmia amanage hu'ne, Tamagrama tusi'a
vahe'ma fore hu'ne'nageno Efraemi agona mopamo'ma osi'ma
huramante'nigeta, Perisi vahe'ene, Refaimi vahe mopafi anagamu
zafa tanoparega marerita kumara ome eriamma huta maniho. **16**
Hige'za Josefe naga'mo'za amanage hu'naze, agona mopamo'a
knarera huorantegahie. Hianagi agupofima Kenani vahe'ma
nemaniza vahe'ene, Bet Sani ran kumate'ene, ne'onse kuma'ma
tava'oma'are'ma me'nea kumatamimpine, Jezrili agupofima
nemaniza ha'ma hu'zana aenire karisi ante'naze. **17** Hianagi
Josua'a amanage huno Josefe mofavrerate Manasene, Efraemi
naga'mokizmia zamasami'ne, Tamagra tusi'a vahe fore hutma
hankavenentake hu'nazankita magoke mopafina omanigahaze.
18 Hagi agonarega zafa mopa me'neanagi, tamagra amane ome

eriamma huta erigahaze. Inante zafa mopamo'a ome atre'neo, anama'a eriamma hanazama'amo'a tamagri mopa manegahie. Hanki Kenani vahe'mo'za aenire karisi ante'ne'za hanvenentake hu'nazanagi, tamagra amne zamahe natitregahaze.

18 Hanki Israeli vahe'mo'za mago'a mopama omerite'za Sailo kumate omeritru hu'za, atruma hu'za mono'ma hu seli nona ki'haze. 2 Hianagi Israeli naga'pintira 7ni'a naga nofi'mo'za mopa erisanti ohare'nazageno, 3 Josua'a Israeli vahera amanage huno zamasami'ne, Ra Anumzana tamafahe'i Anumzamo mopa ko tami'neanki, na'anku avega anteta mani'neta ufreta mopa e'norize? 4 Hanki mago'mago naga nofipintira 3'a vene'ne hu hamprizmantenke'na nagra hu zamantesuge'za vu'za ana mopa inankna mopao ome nege'za, mago mago'mo'ma erisantima haresia avamente avon tafepi krenente'za ete'za nagrite eri'za echo. 5 Hagi tamagra mopa 7ni'afi refko huntenkeno, Juda naga'mo'za sauti kaziga zamagra'a mopafi manisage'za, Josefe naga'mo'za noti kaziga zamagra'a mopafi mani fatgo hugahaze. 6 Anama hutetma ana 7ni'a mopamofo naneke'a avon tafepi kretetma, nagrite eritma enke'na mago mago nagamo'a ina mopa erigahifi, Ra Anumzana tagri Anumzamofo avure satu zokagoreta izi mopa erigahifi kegahune. 7 Na'ankure Livae naga'mo'za mopa e'ori'nazanki, Anumzamofo eri'zama erisnafinti erisantiharegahaze. Hagi Gati nagaki, Rubeni naga'ene, Manase nagara amu'nompinti refko hazage'za, Jodani timofo kantu zage hanati kaziga, Ra Anumzamofo eri'za ne' Mosese'ma zami'nea mopa eri'naze. 8 Hagi mopamofo agema'ama avontafepi krente vahe'mo'za otizageno, Josua'a amanage huno zamasami'ne, ana maka mopafi vutma vararetma ketetma, inankna mopa me'nehi agi agenkea avompi krentetetma ete nagrite Sailo

enke'na, Ra Anumzamofo avure satu zokagore'na, ina mopa zamigahifi ka'neno. **9** Hige'za zamagra anantetira atre'za vu'za ana mika mopa ome vano hu'za kete'za, ana moparamimofo nanekea avontafepi krente'naze. Ranra kumatmina agateore ana maka 7ni'afima regitagi'naza mopa ke vagarete'za, Josua'ma kuma'ma anteno Sailoma mani'nere ete'za e'naze. **10** Anante Silo kumate Josua'a Ra Anumzamofo avure satu zokago reno keteno, anante Israeli vahe'mokizmia nagatenofite huno mopa refko huno zami'ne. **11** Hanki Benzameni naga'mo'zama nagatenofite hu'zama mopama refko hu'za eri'nazana, Juda naga'ene Josefe naga'mokizmi mopamofo amu'nozmifi me'nea mopa erisantihare'naze. **12** Noti kaziga mopazmimofo agema'amo'a Jodani tinteti agafa huteno vuno, Jeriko noti kaziga me'nea agonaramimofo asoparega vuno, agatereno zage ufre kaziga me'nea agonaramimpi ufreno ka'ma mopafi Bet Aveni uhanati'ne. **13** Anantetira mopamofo agema'amo'a rugitagino fenkamu sauti kaziga Luzi (menina Betelie nehaze) ran kumatega ne'onse agonarami me'nerega uramiteno, vuno sauti kaziga Bet Horon rankuma'mofo fenka kaziga tava'oma'are mago agonamofo agofetu me'nea rankuma Atarot Ada uhanati'ne. **14** Hagi anantetira mopamofo agema'amo'a rukrahe huno ana agonamofo zage ufre kaziga Bethoroni vu'ne. Anantetira mopamofo agema'amo'a sauti kaziga vuno Kiriat Ba'al (mago agi'a Kiriat Jearim) rankumate uhanati'ne, ana kumara Juda nagamokizmi ran kumare. E'i zage ufre kaziga ome atre'nea mopamofo agema'e. **15** Hagi sauti kaziga mopamofo agema'amo'ma agafama hu'neana, Kiriat Jearimi tavaonte zage ufre kazigati agafa huteno, eno Neptoa kampu'i tinte uhanati'ne. **16** Hagi anantetira mago'ene isagamo'a uramino vuno Refaimi agupomofo

noti kaziga Ben Hinomu aguporegama avugosa hunte'nea
agonarega uramiteno, anantetira mopamofo agema'amo'a
Jebusi vahe rankuma'mofo sauti kaziga agona tava'onte
Hinomu agupofi vuvava huno En-Rogel uhanati'ne. **17** Hanki
anantetira mopamofo agema'amo'a rukrahe huno noti kaziga
vuno En-Semesi uhanatiteno, vuvava huno Adumimi agonarega
avugosama hunte'nere Geliloti kumate uhanatiteno, anantetira
vuvava huno Rubeni nemofo Bohani havere urami'ne. **18**
Anantetira mago'ene mopamofo agema'amo'a vuvava huno
noti kaziga Bet Araba me'nea agonarega vuteno, vuno Jodani
tima enevia agupofi urami'ne. **19** Hagi anantetira mopamofo
agema'amo'a vuno Bet-Hogla noti kaziga me'nea agonarega
vuteno, ugatereno kame kaziga Fri Hagerimofo noti kaziga
ankenare Jodani timo'ma unefrere sauti kaziga uhanati'ne.
20 Hanki zage hanati kaziga omete mopamofo agema'amo'a,
Jodani tinte uhanatine. E'i Benjamin naga'ma nagatenofite
hu'zama erisantimahare'naza mopa ometre emetrema hu'nea
agema'e. **21** Hanki ama'i Benjamini naga'mo'zama nagate
nofite'ma hu'za eri'naza rankumatamimofo zamagi'e, Jerikogi,
Bet-Hoglagi, Emek-Kezizigi, **22** Bet-Arabama, Zemaraimima,
Betelima, **23** Avimima, Parama, Oframa, **24** Kefar-Amonima,
Ofninima Gebane huno me'ne. Higeno ana makara 12fu'a
rankumatami megeno, ne'onse kumatamimo megagi zmantetere
hu'ne. **25** Hagi ruga'a Benzameni naga'mo'zama mani'naza
rankumatamimofo zamagi'a, Gibionima, Ramama, Birotima,
26 Mispama, Kefirama, Mozama, **27** Rekemima, Irpelima,
Taralama, **28** Zelama, Jebusi vahe rankuma (menina Jerusalemie
nehaze) Ha-Elefima, Gibeane Kiriati rankuma'enene, ana makara
14ni'a rankumatami megeno, ne'onse kumatamimo megagi

zamante'tere hu'ne. E'i Benzameni naga'mo'zama nagate
nofite'ma hu'zama erisantimahare'naza mopa me'ne.

19 Hanki nampa 2 mopare'ma satu zokago'ma re'za kazana,
Simioni agi efore hige'za, Simioni naga'mo'za nagatenofite hu'za
refko hu'za erisantihare'naze. Ana mopama erisantimahare'naza
mopamo'a Juda naga'mokizmi mopamofo amu'nozamifi me'ne.
2 Simioni naga'mozama erisantimahare'naza kumatmimofo
zamagi'a ama'ine, Bersebama, mago agi'a (Sebae) Moladama,
3 Hazar-Sualima, Balama, Ezemima, **4** Eltoladima, Bethulima,
Homama, **5** Ziklagima, Bet-Makabotima, Hazar-Susama, **6** Bet-
Lebaotine, Saruheni kuma me'ne. Hagi ana makara 13ni'a ranra
kumatmi megeno, ne'onse kumatamimo megagi zamantetere
hu'ne. **7** Hanki mago'an 4'a ranra kumatami megeno, ne'onse
kuma'ma megagiterema hu'nea kumatamima eri'nazana, Ainima,
Rimonima, Eterima, Asani kuma'ene eri'naze. **8** Ana nehu'za
ranra kuma'ene ne'onse megagi zmante'nea kumatamina miko
eri vagarazageno vuno, fenkamu sauti kaziga Ba'alat Bea
mago agi'a Nigevi kaziga Rame nehaza kumate uhanatige'za
Simioni naga'moza nagatenofite hu'zama erisantimahare'naza
mope. **9** Hanki Juda nagara ra mopa refko huzami'nagu, Simioni
naga'mo'za Juda naga'mokizmi mopafinti mago'a eri'naze. Ana
hu'negu Simioni naga'mo'za Juda naga'mokizmi mopafi mago'a
mopa erisantihare'za mani'naze. **10** Hanki nampa 3 mopare'ma
satu zokago'ma re'za kazana, Zebuluni agi efore higeno, Zebuluni
naga'mo'za nagatenofite refko hu'za eri'naza mopazamimofo
agema'amo'a vuno, Saridi rankumate uhanati'ne. **11** Hagi zage
fre kaziga mopamofo agema'amo'a Marala uhanatiteno, vuno
Dabeseti tavaonte vuteno, vuno Jokneam kumamofo zage hanati
kaziga osi ti me'nere uhanati'ne. **12** Hanki Sarititira mopamofo

agema'amo'a rukrahe huno zage hanati kaziga Kislot-Tabori kaziga uhanatiteno, vuno Daberati uhanatino, Jafia mareri'i'ne. **13**
Anantetira mopamofo agema'amo'a zage hanati kaziga vuvava huno Gat Hefarine, Et Kazini rankuma trente vuteno, anantetira Rimmoni uhanatiteno, rukrahe'ma hiana Nea kaziga avugosa hunteno vu'ne. **14** Hanki noti kaziga mopamofo agema'amo'a rugagino, Hanaton rankumate uhanatiteno, vuvava huno Ifta-El agupoma ome atrete ome atre'ne. **15** Hanki ana maka Zebuluni naga nofi'moza'ma eri'naza ranra kumatamimofo zamagi'a amanahu me'ne, Katatima, Nahalalima, Simronima, Idalane, Betlehemu kuma'enena eri'naze. Hagi ana makara **12** fu'a rankumatamine ne'onse kumatamima megagi zamanteterema hu'nea kumara erivagare'naze. **16** Hanki ama ana ranra kumatamine tavao zamire'ma me'ne'a neonse kumatamina Zebuluni naga'mo'za nagatenofite refko hu'za zamagra'a mopa erisantihare'naze. **17** Hanki nampa 4 mopalrema satu zokagoma re'za kazana, Isaka agi efore hige'za, Isaka naga'mo'za nagatenofite hu'za mopa refko hu'za erisantihare'naze. **18** Hagi Isaka naga'mo'za eri'naza ranra kumatamimofo zamagi'a amanahu me'ne, Jesrilma, Kesulotima, Sunemima, **19** Hafaraimima, Sionima, Anaharatima, **20** Rabitima, Kisionima, Ebezima, **21** Remetima, En-Ganimima, En-hadama, Bet-Pazezima hu'za eri'naze. **22** Hagi Isaka naga'mo'zama eri'naza mopalromofo agema'amo'a Tabori agonare vuteno, vuno Sahahazumane Bet-Semes rankuma trente uhanatiteno, vuno Jodani tinte ome atrege'za Isaka naga'mo'zama eri'nazana, **16** ni'a ranra kuma'tamine tavaozamire'ma me'nea neonse kumataminena eri vagare'naze. **23** Ama ana ranra kuma'tamine ne'onse kumatamina Isaka naga'mo'za nagatenofite hu'za zamagra'a suza refko

hu'za erisantihare'naze. 24 Hanki nampa 5fu mopare'ma satu zokagore'za kazana, Asa agi efore hige'za, Asa naga'mo'za nagatenofite hu'za mopa refko hu'za erisantihare'naze. 25 Hagi Asa naga'mo'zama eri'naza mopa'afima me'nea ranra kumatamimofo zamagi'a amanahu hu'ne, Helkatima, Halima, Betenima, Aksafama, 26 Alamelekima, Amadine, Misali ran kuma'ene, zage fre kaziga mopamofo agema'amo'a Kameli agonane Siho Libnat rankuma tavaonte ome antre'ne. 27 Hanki anantetira mopamofo agema'amo'a ome rukrahe huno zage hanati kaziga Bet-Dagoni rankumate vuteno, Zebuluni naga mopane Ifta-El agupo tavaonte vuteno, uvavahuno noti kaziga Bet-Emekine, Neiel rankumate uhanatiteno, agatereno noti kaziga uvavahuno Kabuli rankumate uhanati'ne. 28 Hanki anantetira Ebronima, Rehobuma, Hamonine, Kana kumatamina agatereno ogantu Saidon rankumate uhanati'ne. 29 Hanki anantetira mopamofo agema'amo'a rukrahe huno Rama rankumate vuteno, Tairi rankuma'ma hanavenentake have kegina hugagi'naza kumate uhanati'ne. Anantetira mopamofo agema'amo'a rukrahe huno Hosa rankuma me'nerega avugosa hunteno vuno, Akzib kaziga Mediterenia ra hageri me'nere ome atre'ne. 30 Hanki Asa naga'mo'zama mago'a mopama eri'nazana, Umane, Afekine, Rehobu rankuma'ene erizageno, ana makara 22'a ranra kuma me'negeno ne'onse kumatamina megagizmanteterema hu'neana, ana maka eri 'naze. 31 Hanki ana ranra kumatamine ne'onse kumatamina Asa naga'mo'za nagatenofite refko hu'za erisantihare'naze. 32 Hanki nampa 6si mopare'ma satu zokagoma re'za kazana, Naftali agi'a efore higeno, Naftali naga'mo'za nagatenofite hu'za mopa refko hu'za eri'naze. 33 Hagi mopazamimofo agema'amo'a

Herefi rankuma'ene Za'ananimima ko zafama me'nereti agafa huteno, vuno Adami Nekebi rankuma'ene Jabnili kumatrena agatereno vuteno, uvava huno Lakumi rankumate uhanatiteno, Jodani ti ankenare ome vagare'ne. **34** Hagi ana mopamofo agema'amo'a rukrahe'ma hiana, Aznot-Tabor rankumamofo zage fre kazigati rugitagino Hukok rankumate uhanati'ne. Higeno Zebuluni naga'mofo mopa sauti kaziga megeno, Asa naga'mofo mopa zage fre kaziga megeno, Jodani tina zage hanati kaziga me'ne. **35** Hanki hankavenentake vihuma havereti'ma hu'naza rankumatamimofo zamagi'a amanahu me'ne, Zidimima, Zerima, Hamatima, Rakatima, Kineretima, **36** Adama, Ramama, Hazorima, **37** Kedesima, Edreima, En-Hazorima, **38** Ironima, Migdal-Elmama, Horemima, Bet-Anatine Bet-Semesine megeno ana makara, Naptali naga'mo'za 19ni'a ranra kumatamine ne'onse kumatamima tavao zamire'ma megagiterema hu'neana ana maka eri vagare'naze. **39** Hagi ama ana ranra kumatamine ne'onse kumatamina Naftali naga'mo'za nagatenofite hu'za refko hu'za eri'naze. **40** Hanki nampa 7ni mopare'ma satu zokagoma re'za kazana Dani agi efore higeno, Dani naga'mo'za nagatenofite hu'za mopa refko hu'za eri'naze. **41** Hanki ranra kumama eri'naza kumatamimofo zamagi'a amanahu me'ne, Zorama, Estaolima, Ir-Semesima, **42** Sa'alabinima, Aijalonima, Itlama, **43** Elonima, Timnama, Ekronima, **44** Eltekema, Gibetonima, Ba'alatima, **45** Jehudima, Bene-Berakima Gat-Rimonima, **46** Mejakonima, Rakonima, Jopa ranku tavaonte'ma me'nea kumatamina ana maka Dani naga'moza eri'naze. **47** Hianagi Dani nagara henka ha' vahe'zamimo'za mopazamifintira zamahenati atre'naze. Ana hazage'za mareriza Lesemi vahera ha' huzamante'za ana maka vahera bainati kazinteti zamahe vaganere'za Lesemi

rankumara Dani naga'moza eri'naze. Hagi Lesemi rankumapima manite'za ana kuma agi'a rekrahe hu'za nezamageho agire asamre'za Dani'e hu'za agi'a ante'naze. **48** Hanki ama ana ranra kumatamine, neonse kumatamina Dani naga'mo'za nagatenofite hu'za refko hu'za erisantihare'naze. **49** Hanki Israeli vahe'mo'za mopama refko hu'za nagatenofite hu'za erite'za, anampintira mopa refko hu'za Nuni nemofo Josuana ami'naze. **50** Ra Anumzamo'ma hu'nea kante ante'za Efraemi naga'mokizmi mopamofo agona asoparega Timnat-Sera me'nea rankuma Josua'a namiho hige'za, amizageno ana kumara eri kasefa huno rankuma kino mani'ne. **51** Hanki pristi ne Eleazaki, Nuni nemofo Josua'ene ana maka naga'nofipinti'ma vugota hutere hu'naza kva vahe'mo'za Silo kumate atruhuza seli nomofo avuga manine'za, Ra Anumzamofo avure satu zokago re'za eri ama hu'za ana maka mopa nagatenofite refko hu'zmi vagarazage'za erisantihare'naze.

20 Ana hutageno Ra Anumzamo'a amanage huno Josuana asami'ne, **2** Israeli vahe'mokizmia zamasamige'za vahe'mo'zama koro fre'za zamagu'ma ome vaz'i'naza rankumatamina Mosesema asamugenno tamasami'nea kante ante'za mago'a huhamprinteho. **3** Hanki mago'mo'ma, vahe ahefri antahintahi omne'nena hantagama huno vahe'ma ahe frisuno'a, agra koro freno ana aguvazi kumatamimpi vuno umanisige'za, anama ahe fri'nesia vahe'mofo naga'mo'zama ahenaku'ma hanazana ohegahaze. **4** Hagi ana ne'mo'ma koro'ma freno mago kuma'mofo ufre kahante'ma vanuno'a, agra ana kumamofo ufre kahante umani'neno, ana kumate ugota vahe'ene, agrama hu'nea zankura keaga eri fatgo hino. Anama hutesige'za atresageno ufreana kumapina zamagrane umanigahie. **5** Hanki agrama hu'nea

hazenkere'ma nona hunaku mago vahe'mo'ma rotagoma huno
ana kumate'ma esige'za, ana kumate'ma ugota hu'naza kva
vahe'mo'za anama hazenkema hu'nea nera avre omigahaze.
Na'ankure agri ha' vahera omani'ne. Hianagi ahe frisue huno
oheneanki, amne hantaga huno ahe fri'negu, ana kumapi
vahe'mo'za ana nera kegava huntaho. 6 Hanki agra ana
kumapinke'za mani'nesige'za, ana kumapima nemaniza maka
vahe zamavure keaga'a refko hugahaze. Hanki keaga'ama
refko'ma hanageno'ma hazenkema omane'nesigeno'a, agra ana
kumapinke mani'nesigeno, ana knafima ugagotama hu'nesia
pristi nera fritesigeno, mopa agafa'arera ete vugahie. 7
Hanki Ra Anumzamo'ma anankema hiana antahite'za, Naftali
naga'mokizmi mopamofo agona asoparega, Galili kaziga me'nea
kuma Kadesima, Efraemi naga mopamofo agonamofo asoparega
me'nea kuma Sekemine, Juda nagamokizmi mopamofo agona
asoparega me'nea kuma Kiriat-Arba (mago agi'a menina
Hebronie nehaze) ana kumatami hu hampri'naze. 8 Hanki
Jeriko kumamofo zage hanatitega, Jodani timofo kantu kaziga,
ka'ma mopama me'nerega Rubeni naga'mofo agupo mparega
me'nea kumara Bezerima, Gileati kaziga Gati naga'mofo mopa
me'nea kuma Ramotima, Basani kazigama Golani mopa Manase
naga'mofo mopafima me'nea rankuma huhampri'naze. 9
Hanki Israeli vahepinti mago'mo'o, ru vahe'ma tamagranema
emani'nesaza vahepinti, mago'mo'ma, vahe ahefri antahintahima
omne'ne'nigeno hantaga huno mago vahe'ma ahe frisuno'a,
anama huhamprinte kumatamimpi koro freno umani'nesigeno,
nona huno ahe frisue huno rotago huno'ma esimo'a, ahe
ofrigahie. Na'ankure agra maka vahe zamavurera keagafina
oraoti'ne.

21 Hanki Livae nagate vugota hu'naza vahe'mo'za, pristi ne'
Eleazane, Nuni nemofo Josuane Israeli vhete ugota hu'naza
kva vhete, **2** Sailo kuma'ma Kenani mopafi me'nere e'za
amanage hu'za zmasami'naze, Ra Anumzamo'a Mosesema
asamino tagrikura rankuma'ene masave nentake tra'zama
me'nesia mopane zaminke'za tra'zama nenaza afu zaminena
maniho hu'ne. **3** Ana hu'negu Ra Anumzamo'ma hu'nea kante
ante'za, Israeli vahe'mo'za zamagrama erisantimahare'naza
mopafinti, tra'zamo'ma masavenentake hu'nea mopane, mago'a
ranra kumara Livae nagara zami'naze. **4** Hanki ese'ma satu
zokago re'za kazana Kohati naga'mo'za erisaza rankuma
ke'za erifore hu'naze. Hagi anama hute'za Juda naga'ma,
Simioni naga'ma, Benzameni naga'mo'za 13ni'a ranra kuma
refko hu'za, Livae naga'ma pristi ne' Aronimpinti'ma efore
hu'naza Kohati nagara zami'naze. **5** Hanki Efraemi naga'ma,
Dani naga'ma, amu'nompinti'ma refkoma hu'naza Manase
naga'mo'za mopama e'ori'naza Kohati nagara 10ni'a ranra
kumatami refko huzmi'naze. **6** Hagi Isaka naga'ene, Asa
naga'ene, Naftali naga'ene, Basanima nemaniza ruga'a Manase
naga'mokizmi mopafinti 13ni'a rankumatami refko hu'za Gesoni
nagara zami'naze. **7** Hagi Rubeni naga'ene, Gati naga'ene,
Zebuluni naga'mokizmi mopafinti 12fu'a ranra kumatamina
refko hu'za Merari nagara, nagatenofite hu'za zami'naze. **8**
E'ina hu'negu Ra Anumzamo'ma Mosesema asamine'a kante
ante'za, Israeli vahe'mo'za, ana rankumatamine, tra'zama nenaza
afutamima ante mohanena Livae nagara satu zokago re'za
eri ama hu'za zami'naze. **9** Hagi Juda naga'ene, Simioni
naga'mokizmi mopafima me'nea rankumatamima refko hu'naza
kumatamimofo zamagi'a amanahu me'ne. **10** Hagi Livae naga'ma

pristi ne' Aronimpinti'ma efore'ma hu'naza Kohati naga'mo'za
kotazama satu zokago'ma razana, zamagri zamagimo efore
hige'za ana rankuma'tamina eri'naze. **11** Hagi mago ran
kuma'ma Israeli vahe'mo'zama Aroni naga'ma zami'nazana,
Juda nagamokizmi mopamofo agona asoparega me'nea
kuma Kiriat-Arbane (mago agia Hebronie) ana kuma'mofoma
trazamo'a masavenke hukagi'nea mopa tra'zama nenaza
afuzamima antesagu zami'naze. (Hagi Arba'a Anaki naga'mokizmi
nezamageho'e.) **12** Hianagi Israeli naga'mofo rankumamofo
tavaonte'ma me'nea ne'onse kumatamine mohanena, Jefune
nemofo Kalepi agri mopa ko ami'naze. **13** Hagi Aroni agehe'mo'za
pristi eri'zama e'neriza nagara, kore fre'za vu'za zamagu'ma
nevaziza Hebroni kuma'ene tra'zama nenaza afuzminema
kegava hanaza mopane Libna kuma'ene, tra'zama nenaza
afuzmima kegava hanaza mopane, **14** Jatiri rankuma'ene
tra'zama nenaza afuzminema kegava hanaza mopane, Estemoa
rankuma'ene, tra'zama nenaza afuzminema kegava hanaza
mopane, **15** Holoni rankuma'ene, tra'zama nenaza afu'zminema
kegava hanaza mopane, Debiri rankuma'ene, **16** Ainine,
Jutane, Betsemes rankuma'ene zami'naze. Ama ana 9ni'a
rankumara, afu'zamimo'zama tra'zamanesaza mohanena Simioni
naga'ene Juda naga'mo'za zamagra'a mopafinti Aroni nagara
refko huzmi'naze. **17** Hagi Benzameni naga'mofo mopafintira,
Gibionima, Gebama, **18** Anatotine, Almoni rankumaki hu'za ana
makara 4'a ranra kumatamine, tava'ozamire'ma me'nea mopa
tra'za nenaza afu zamimo'zama tra'zama nesaza mopa Aroni
nagara refko huzmi'naze. **19** Hanki Aroni naga'ma pristi eri'zama
eneriza naga'mo'za ana makara 13ni'a ranra kumatamine, tavao
zamire'ma me'nea mopa afu zamimozama tra'zama nesaza

mopanena ana maka eri'naze. **20** Hanki Livae naga'pintira
mago'a Kohati nagara, Efraemi naga mopafinti mago'a ranra
kumatmina refko huzmi'naze. **21** Hanki Israeli vahe'mo'za 4'a
ranra kuma'ma zami'nazana, Efraemi naga'mokizmi agona
asoparegama, koro fre'za ome zamagu'ma nevaziza rankuma
Sekemima, Gezama **22** Kibzaimima, Bet Horonine ana maka
tavao zamire'ma me'nea mopa afu'zamimozama tra'zama
nesaza mopane ana 4'a ranra kumazminena eri'naze. **23**
Hanki ana zanke hu'za Dani naga mopafinti'ma Kohati naga'ma
ranra kuma'ma refko huzami'nazana, Eltekema, Gibetonima,
24 Aijaronima, Gat-Rimonine, tavaozamire'ma me'nea mopa
afu zamimo'zama tra'zama nesaza mopanena ana maka
eri'naze. **25** Hanki Manase nagara tare mopa eri'nazankino,
mago mopafi naga'mokizmi mopafintira, Ta'anakine, Gat Rimoni
rankumatrene tava'ozanire'ma me'nea mopa afu zamimo'zama
tra'zama nesaza mopanena Kohati nagara zami'naze. **26**
Hanki Kohati naga'mo'za ana makara 10ni'a ranra kumatamine,
tavao zamire'ma me'nea mopane afu zamimo'zama tra'zama
nesaza mopanena ana maka eri'naze. **27** Hanki Livae naga'pinti
mago nagara Gesomu nagokino, tare rankuma'ma zami'nazana,
Manase naga'ma amu'nompinti refkoma hu'naza naga'mokizmi
mopafinti refko hu'za, kore fre'za zamagu'ma ome nevaziza
rankumara Basani mopafi me'nea Golani rankuma'ene, Be-
Estarane tava'ozanire'ma me'nea mopa tra'zama nenaza
afu zamimo'zama tra'zama nesaza mopanena ana maka
Gesomu naga'mokizmia zami'naze. **28** Hanki Isaka naga
mopafinti'ma Gesomu naga'ma 4'a ranra kuma'ma zami'nazana,
Kishionima, Daberatima, **29** Zarmutima, En-Ganimine, ana
maka tava'ozamire'ma me'nea mopa, afu zamimo'zama tra'zama

nesaza mohanena ana maka zami'naze. **30** Hanki Asa naga
mopafinti'ma Gesomu naga'ma 4'a ranra kuma'ma zami'nazana,
Misalima, Abdonima, **31** Helkatima, Rehobune ana maka
tava'ozamire'ma me'nea mopa, afu zamimo'zama tra'zama
nesaza mohanena, 4'a ranra kuma'ene zami'naze. **32** Hanki
Israeli vahe'mo'za Naftali naga'mofo mopafinti 3'a ranra kuma
Gesomu naga'ma refko huzami'nazana, zamagu'ma vazinagu
kore freno ome fraki rankuma Galili mopafi me'neana Kades ran
kumaki, Hamot-Dori kumaki, Katan rankuma'ene, ana maka
tava'ozamire'ma me'nea mopa, afu zamimo'zama tra'zama
nesaza mopa zami'naze. **33** Hanki Gesomu naga'moza ana
makara 13ni'a ranra kumatamine, tavaozamire'ma meterema
hu'nea mopa, afu zamimozama tra'zama nesaza mohanena ana
maka eri vagare'naze. **34** Hanki Livae naga'pinti mago nagara
Merari nagakiza Israeli vahe'mo'za Jebuluni naga mopafinti ranra
kuma'ma zami'nazana, Jokneamuma, Katama, **35** Dimnama,
Nahalali rankuma'ene zami'naze. Hagi ana maka 4'a ranra
kumatamine tava'ozamire'ma me'nea mopa afu zamimo'zama
tra'zama nesaza mohanena ana maka Merari naga zami'naze.
36 Hanki Rubeni naga mopafinti Israeli vahe'mo'za Merari
nagama ranra kuma'ma zami'nazana, Bezerima, Jahazima,
37 Kedemotima, Mefa'ati rankuma'ene zami'naze. Hagi ana
makara 4'a ranra kumatamine afu zamimo'zama tra'zama nesaza
mohanena ana maka Merari naga zami'naze. **38** Hanki Gati
naga mopafinti'ma Israeli vahe'mo'zama Merari naga'ma ranra
kuma'ma zami'nazana, kore fre'za zamagu'ma ome nevaziza
rankuma Giliati kazigama me'neana Ramotima, Mahanaimima,
39 Hesbonima, Jazeri rankumatre'na zami'naze. Hagi maka
ana 4'a ranra kumatamine afu'zamimozama tra'zama nesaza

mopanena ana maka Merari naga zami'naze. **40** Hagi Livae
naga'mo'za mopama erizage'za mopama e'ori'naza nagara
Merari nagakiza zamagra 12fu'a ranra kumatami eri'naze. **41**
Hanki Israeli vahe'mo'zama maka mopama eri'nafintira 48'a
ranra kuma'ene afu'zamimo'zama tra'zama nesaza mopanena
Livae nagara zami'naze. **42** Hanki ana maka mago mago
ranra kumatamimofona tava'ozamirera Livae naga'mo'zama
afu'zamima antesaza mopa megagitere hu'ne. **43** E'ina huno
Ra Anumzamo'a zimagehe'ima huvempa huno zamigahue
hu'nea mopa ana maka Israeli vahera zamige'za, erisantihare'za
ana mopafi mani'naze. **44** Ra Anumzamo'a Israeli vahera
zamaza huno ha' vahe'zamia zamazampi zamavarentege'za,
Israeli vahe'mo'za hara huzmagaterageno mago'mo'e huno hara
huzmagateore'ne. Ana higeno Ra Anumzamo'a zamagehe'ima
huvempama huzmante'nea kante anteno, maka kazigatira
hara huozmantage'za mani fru hu'za mani'naze. **45** Hanki
Ra Anumzamo'ma Israeli vahe'tema knare huvempa kema
huzamante'nea ke'mo'a magore huno hantaga osuno, ana
maka'zamo'a nena raga'a efore hu'ne.

22 Anante Rubeni naga'ma Gati naga'ma, amu'nompinti refko
hu'naza Manase nagara Josua'a kehige'za eme eri tru hazageno,
2 amanage huno zamasami'ne, Ra Anumzamofo eri'za ne'
Mosesem'a hihoma huno'ma huramante'nea zana ana maka
hago huvagare'naze. Ana nehutma nagrama hihoma hu'na
huankea ana maka amage ante'naze. **3** Hanki korapa knareti
eno menima ama knare'ma egetma, tamagra tamafuhe'ina
zamatreta ofretma, Ra Anumzana tamagri Anumzamo'ma e'ina
hugahaze huno'ma tami'nea eri'zana ana maka erivagare'naze.
4 Hanki menina Ra Anumzana tamagri Anumzamo huvempama

hu'nea ke'a amage anteno tamafuhe'ina manigsa zami'ne. E'ina
hu'negu Ra Anumzamofo eri'za ne' Mosese'ma tami'nea mopa
zage hanati kaziga Jodani timofo kantu kaziga nonkumatamima
mane'nea mopare vugahaze. **5** Hianagi Ra Anumzamofo eri'za
ne' Mosese'ma tami'nea kasegene tra kenena kegava huso'e
hu'netma amage anteho. Ra Anumzana tamagri Anumzamofo
avesinenteta, Agri avu'ava nevaririta, kasege'a amage nenteta,
Agrane tragoteta mani'neta, maka tamagu tamenteti hutma Agri
eri'zana erinteho. **6** Anante Josua'a asomu ke huzamanteteno
huzmantenge'za seli nonkuma zamirega vu'naze. **7** Hanki
amu'nompinti'ma refkoma haza ruga'a Manase nagara Mosese'a
Basani kazigati mago mopa ko zami'ne. Hanki Manase naga'ma
amu'nompinti'ma refkoma hu'naza nagara Israeli vahe'mo'za'ma
Jodani timofo zage fre kaziga mopama erinafinti Josua'a mopa
zami'ne. Anama huteno'a Josua'a asomu ke huzamanteteno
huzmantenge'za seli nonkuma zamirega nevzageno, **8** amanage
huno zamasami'ne, tamagra rama'a feno zantamine bulimakao
afu kevutamima, silvama, golima, bronsima, aenine, rama'a knare
kukenanema, ha'ma hu zamagatereta eri'naza zantamina erita
menina seli nonkuma tamirega vuta tamafuhe'zanena ome refko
huta eriho. **9** Ana hutege'za, Rubeni naga'ma, Gati naga'ma,
ruga'a Manase naga'mo'za Israeli vhahera Kenani kaziga Sailo
kumate zamatre'za, Ra Anumzamo'ma Mosese asami'nea kante
ante'za eri'naza moparega Gileati vu'naze. **10** Hanki Rubeni
naga'ma, Gati naga'ma, ruga'a Manase naga'mo'zama Kenani
Mopa atre'za Jodani ti tava'onte Geliloti ete'za, anante tusi'a
kresramna vu ita tro hu'naze. **11** Hagi anama hazazana mago'a
vahe'mo'za kete'za vu'za Israeli vahe'mokizmia ome zmasami'za,
Rubeni naga'ma, Gati naga'ma, ruga'a Manase naga'mo'za

vu'za Kenani mopama ome atretega Gelilotia, Jodani timofo tavaonte tagri mopa kaziga, Kresramana vu ita ome tro hu'naze hazage'za, **12** ana zamofo nanekeema nentahi'za ana maka Israeli vahe'mo'za oti'za ha' huzmante'naku Sailo kumate eri tru hu'za trotra hu'naze. **13** Hagi Israeli vahe'mo'za pristi ne' Eleazar nemofo Fineasina huntazageno, Rubenima, Gatima, amu'nompinti'ma refko hu'za vu'naza Manase naga'ma Gileatima mani'narega vu'ne. **14** Hanki Finiasi'enena 10ni'a vugagota kva vahetamine huzmantazage'za vu'naze. Ana vahera tauseni'a Israeli vahepima mago'mago naga'nofi'ma mani'hafintira vugagota hu'naza vahe'age, mago'mago huhamprintetere hazage'za vu'naze. **15** Hanki Rubeni naga'ma, Gati naga'ma, ruga'a Manase naga'ma hu'za Gileati kumate'ma mani'nare e'za amanage hu'za eme zamasmi'naze, **16** ana maka Ra Anumzamofo kevu naga'mo'za amanage hu'za hu'naze. Na'ahigeta amanahu tamavu tamavara huta Ra Anumzamofona antahi omi'naze. Na'ahigeta Ra Anumzamofona tamefira humita ke'a rutagreta menina ama kresramna vu ita Ra Anumzamofoma ha'marente'zana tamagra tro hu'naze. **17** Kora Peori kumate'ma, mani'neta kumi hunkeno Ra Anumzamo'a mago kri atregeno vahe'a eme zamazeri haviza hu'neane, hagi meninena ana kumimo'a tatreno ovu'ne. Tamagrama antahi'zana ana hazenke zamo'a knare hu'nefi, ana hu'negeta mago'ene ru hazenkea nehazo? **18** Hagi menina Ra Anumzamofona tamamefira hunemize, menima Ra Anumzamofoma Agri kema ontahita ha'ma rentesageno'a, okina Agra ana maka Israeli vahe'mota rimpa aherantegahie. **19** Hagi mopa tamimo'ma Anumzamofo avure'ma havizama hu'ne hutama hanuta, tamagra eta tagri mopalima Ra Anumzamofo seli mono noma me'nere, Agri mopa fatgofi tagrane emanaho. Hanki

tamagra na'a hu'negeta Ra Anumzamofona ke'a antahi nomita
tagrira tatreta vuta, Ra Anumzana tagri Anumzamofo Kresramana
vu itama ko'ma me'neana atreta, ru kresramna vu ita tro
nehaze. **20** Hagi Ra Anumzamo'ma i'o hu'nea zantamima, Zera
nemofo Akani'ma Jeriko rankumapinti'ma Ra Anumzamofo ke'ma
ru tagreno'ma eri'nea kumi'amofo kna'a agrakera ofri'neanki
mago'a nema agri kumimofo kna'ama eri'za fri'naza zana
tamagera okaniho. **21** Anante Rubeni naga'ma, Gati naga'ma,
ruga'a amu'nompinti refkoma hu'naza Manase naga'mo'za oti'za
Israeli vahepima nagatenofite'ma ugagota hu'naza vahera
amanage hu'za zamasmi'naze, **22** hankavenentake Anumzana
Ra Anumzana Agrake mani'ne, magoke hankavenentake hu'nea
Ra Anumzamo Agra antahi'ne, hu'negu Israeli vahe'motanena
antahihi, tagrama Ra Anumzamofo kema rutagrege, Agri
kasegema ovariri nesunketa menina oratreta tahe friho. **23** Hanki
tagrama Ra Anumzamofoma tamefi humi kazigati'ma kresramna
vu ofama huge, witi ofa huge, mago tarimpa hu ofama hu
kresramna vu itama tro'ma hu'nesunkeno'a, Ra Anumzamo'a
Agra'a tagrira tazeri haviza hugahie. **24** Hianagi tagrama ana
itama tro'ma hu'nonana, henkama tamagri tamagehe'za, tagri
tageheinku hu'za, tagri Ra Anumzantera monora huontege,
amagera ontegahazema hu'za hu'zanku koro huta tro hu'none. **25**
Hanki tagri'ene, tamagri'ene amu'nompina Ra Anumzamo Jodani
tinte mopamofo agema'a ante'neankita, tamagra Rubeni naga'ene
Gati nagara tagri naga omani'naze nehu'za, Anumzana tamagri
Anumza omani'neankita monora huonteho hu'za hu'zanku koro
huta ana ita tro hu'none. **26** E'ina agafare amanage hu'none,
kresramna vu itama tro'ma hu'nonana tevefima kresramna
vu ofa hu ito, mago'a zama kresramna vu ofa hu ita trora

osu'none. 27 Hagi tamagri'ene tagri'enena ama anazamo'a mago
avame'za mane'neno, tagehezama henkama fore'ma hanaza
vahera zamaveri huno, tagranena Ra Anumzana Agriteke
monora hunentone hugahaze. Ana hanige'za tamagranena Ra
Anumzamofo avurera tevefi kresramna vu ofane, ruzahu ruzahu
ofaramine, rimpa fru ofanena mono noma'afina hunentaze
hugahaze. Ru ete henka tamagri tamagehe'za tagri tagehe'inku
hu'za tamagra Ra Anumzamofo vahe omani'naze huzanku
anara hu'none. 28 E'ina hu'negu tagra amanage huta hu'none,
tamagrama amanahu kema tagritero, tagehe'inte'ma hanageta
amanage huta zamasigahune huta hu'none, Ra Anumzamofo
kresramna vu itama tafahezama tro hazageno me'neana keho,
mago kresramna vu ofa huge, ruzahu ruzahu ofa hu ita trora
osu'nonanki tamagri'ene tagri'ene amu'nompina, ama ana
itamo'a mago avame'za me'ne huta hugahune. 29 Tagrama
ama ana itama tro'ma hu'nonana, tevefi kre fanane hu ofa
huge, witi ofa huge, ruzahu ruzahu ofama hu ita trora osu'none.
Tagra e'inama hanuta, Ra Anumzamofona tamefi humita
ke'a rutagregahune. Hagi Ra Anumzana tagri Anumzamofo
itama seli mono nomofo avugama me'nea kresramna vu
itamofo noma eri'nigure huta trora huonte'none. 30 Hanki
pristi ne' Fineasi'ene Israeli vahepima mago mago naga
nofite'ma ugagota hutere hu'naza vahe'mo'za, Rubeni naga'ma,
Gati naga'ma, Manase naga'mo'zama hazankema nentahi'za,
zamagra zamarimpa fru nehu'za muse hu'naze. 31 Hanki anante
pristi ne' Eleazari nemofo Finiasi'a, Rubenima, Gatine, Manase
nagara amanage huno zamasami'ne, menina tagrama keama'ma
hunana Ra Anumzamo'a tagrane mani'ne. Na'ankure tamagra
Ra Anumzamofo ke'a tamefira huonte'naze, e'inama hazana

maka Israeli vahe'mota Ra Anumzamofo azampintira tagu'vazize.

32 Ana keagama hute'za pristi ne' Eleaza nemofo Finiasi'ene Israeli nagapi nagatenofite ugagota hu'naza kva vahe'mo'za ete Kenani e'za Rubenine, Gati, naga'enema keagama hu'naza zamofo agenkea Israeli vahera Gileati kumate mani'nage'za eme zamisami'naze. **33** Hanki anazamofo agenkema Israeli naga'mo'zama nentahi'za muse hu'za Anumzamofo ra agi nemi'za, Rubenine, Gati naga'ma nemaniza mopama ha' huzamanteta mopazamima eri haviza hugahunema hu'naza ke'a eri atre'naze. **34** Hanki Rubenine, Gati naga'mo'za ana itamofonkura hu'za Amu'hontifi Avame'za me'nena Ra Anumzana tagri Anumza mani'ne huta antahi amigahune hu'za agi'a antemi'naze.

23 Hanki Ra Anumzamo'a Israeli vahera mani fru zamige'za ha' vahe'zaminena hara osu rama'a kafu amane mani'naze. Ana knafina Josua'a rama'a kafu maniteno ozafare'ne. **2** Anante Josua'a maka Israeli vahe'ma, ranra vahe'ma, ugagota kva vahe'ma, naneke refko hu kva vahetamine, vahete ugagota hu'naza vahe'tamina ke hige'za azageno amanage huno zamasami'ne, Nagra rama'a kafu manite'na menina ozafaroe. **3** Hanki Ra Anumzana tamagri Anumzamo'ma tamaza huno tamagu vazi'nea zana tamagra'a hago ke'naze. Na'ankure Ra Anumzana tamagri Anumzamo Agra'a tamaza huno ha' vahetamia hara huzmante'ne. **4** Hanki menina ama kea antahi ankereho, ha'ma huzamanteta e'ori'nona mopane, ko'ma hahu zamagatereta eri'nona mopama, Jodani tinteti agafa huteno vuno zage ufre kaziga Mediterenia hagerinte'ma uhanati'nea mopa, ana maka hago refko hu'na nagatenofite hu'na tamugeta erisantihare'naze. **5** Ra Anumzana tamagri

Anumzamo tamavugatira ha' vahe'tamia zamahe'natitresigeta,
Ra Anumzamo'ma huvempama huramante'nea kante anteta
mopazamia erigahaze. **6** E'ina hu'negu Mosese'ma kasege
avontafepima krente'nea nanekemofona kva hu'neta hankavetita,
avariri fatgo nehuta, rukrahe hu kanti kama osho. **7**
Hanki amama emani'naza mopafi vahe'enena taragoteta
omanita, zamagri anumzamofo agi'a amu'nontamifina oheta,
ana anumzantamimofo zamagirera huvempa osutma, eri'zana
erinozmanteta, tamarenareta monora huozamanteho. **8**
Hu'neanagi tamagra ko'ma hutma neazaza hutma, Ra Anumzana
tamagri Anumzamofona otretma azeriko'na hiho. **9** Na'ankure
tusi'a hankavenentake ranra kumapi vahe'tamina Ra Anumzamo
zamahenatitre'ne. Ana higeno mago vahe'mo'e huno tamagrira
tamazeri otrageta manita menina ama knarera ehanati'naze. **10**
Hagi magoke magokemoka 1tauseni'a vahera amne zamorotgo
hugahane. Na'ankure Ra Anumzana tamagri Anumzamo'a
huvempa hu'nea kea amage anteno hara tamaza huno nehie.
11 Ana hu'negu tamagra kva hunetma Ra Anumzana tagri
Anumzamofona tamagu'areti hutma avesinteho. **12** Hianagi
tamagrama tagri Anumzama atretma, ama emani'nona mopafi
vahe'enema ru tragoteta manige, zamagripinti'ma a'ma erige'ma
hanazana, **13** tamagra antahi'naze, Ra Anumzana tamagri
Anumzamo'a tamaza huno hara ana vahera huzmanteno,
zamahenati otregahie. Hagi ana hanige'zma tamagrane
mani'ne'za mago krifugna nehu'za, sefu kanonu vahe'mofo
amagenafi rutraga huno ata amiakna hu'za tamata nerami'za,
ave've tra'zamo zamavufi azeriakna nehanigeta, ana maka'mota
knazampi mani'neta ama ana knare mopama Ra Anumzana tagri
Anumzamo'ma tami'nea mopafina frigahaze. **14** Hanki nagra

kofa huna fri'nugu, tamagra tamagu'areti huta hago antahi'haze,
Ra Anumzana tagri Anumzamo'ma tamigahue huno huvempama
hu'nea zantamina ana maka tamivagare'ne. Hagi magore huno
huvempa hu'nea kemo'a hantaga osutfa hu'ne. 15 Tamage, Ra
Anumzamo'ma huvempama hu'enunoo'a, kea amage anteno
kema hu'nea zana tro nehie. Anahukna huno Ra Anumzamo'ma
kore kema huramanteno tamigahue huno'ma hu'nesia knazanteti,
knazana tamino tamazeri haviza hanigeta, ama knare mopama
tami'nea mopafina omanita fri vagaregahaze. 16 Hanki
tamagrama Ra Anumzana tamagri Anumzamo'ma huvempama
huramante'nea kasegema agatenereta ke'ama rutagreta vuta havi
anumzamofo eri'za vahe manige, tamarenareta mono huntege'ma
hanazana, Ra Anumzamofo rimpaher'zamo'a tamagrile ena,
ama knare mopama tamigeta mani'naza mopafintira frita
omanigahaze.

24 Hanki Josua'a ana maka Israeli vahera nagatenofite
huno Sekemu kumate zamavaretru hu'ne. Anante ranra
vahe'ma, ugagota kva vahe'ma, keaga refkohu kva vahe'ma,
avoma kreno eri antefatgoma hu eri'za vahera kehige'za vu'za
Anumzamofo avure ome atru hu'naze. 2 Anante Josua'a
ana maka veara amanage huno zamasami'ne, Ra Anumzana
Israeli vahe'mota Anumzamo amanage huno hu'ne, Korapara
neramageho'za Yufretisi timofo kantu kaziga mani'ne'za havi
anumzantaminte monora hunteeme azageno eno, neramageho
Abrahamune Nahori kizani neznafa Tera knafina ehanati'ne.
3 Hianagi neramafa ne' Abrahamuna Yufretisi timofo kantu
kaziga me'nea moparegati avrete'na vugota hunte'na maka
Kenani mopafina vano nehu'na, agehe'mokizmia zamazeri
rama'a nehu'na, zage mofavrea Aisakina ami'noe. 4 Ana

hute'na Aisakina tare ne' mofavrea Jekopune, Isone ami'noe.
Hanki Seiria agona mopa Isona ami'noanagi, Jekopu'ene
mofavre naga'amo'za Isipi moparega urami'haze. 5 Hanki
anantera Mosesene Aroninena huzanantogeke Isipi vake'na,
tusia knazanteti Isipi vahera zamazeri haviza nehu'na, tamagrira
anampinti Nagra'a tamavre'na atiramino'e. 6 Hanki Nagra
tamafahe'ina Isipiti zamavare'na atirami'na hagerinkenare
oge'za, Isipi vahe'mo'za karisine hosi afu agumpi mani'ne'za
zamarotgo hu'za korankre hagerinte e'naze. 7 Hianagi Ra
Anumzamo'narega zamaza hanugu zavi krafage nehazage'na,
zamagri'ene Isipi vahe amu'nozamifina haninku hugeno
haninkino refko huzmante'ne. Hageri huntogeno Isipi sondia
vahera maka zamaherefite'ne. Hanki ana'ma Isipi vahete'ma
huazana tamagra tamavufinti ke'naze. Hanki tamagra za'zate
ka'ma kokampina manita vano hu'naze. 8 Hanki Nagra
zamavare'na Jodani timofo kantu zage hanati kaziga, Amori vahe
mopare vuge'za, hara huramante'nazanagi Nagra tamazampi
zamavarentogeta hara huzamagtere'naze. Hanki negazage'na
zamazeri haviza hugeta, mopazamia eri'naze. 9 Hagi henka
Moapu kini ne' Zipori nemofo Baraki'ma Israeli vahe'ma ha'ma
huzmanteku'ma nehuno'a, Beori nemofo Balamuna Israeli
vahe kazusi ke huzmantenogu kea atrente'ne. 10 Hianagi
Nagra Ra Anumzamo'na Balamu'ma hiankea antahiomi'na,
nagra hugeno asomu ke huramante'ne. Hige'na Nagra Balaki
azampintira tamagu'vazi'noe. 11 Hanki tamagra Jodani tima
takahetama Jerikoma azage'za, Jeriko kumate vahe'mo'za hara
hurmante'naze. Ana zanke hu'za Amori vahe'ma, Perisi vahe'ma,
Kenani vahe'ma, Hiti vahe'ma, Girgasí vahe'ma, Hivi vahe'ma,
Jebusi vahe'mo'zanena hara hurmante'nazanagi, Nagra tamaza

hu'na tamazampi zamavarentogeta hara huzmagatere'naze.

12 Hagi Nagra'a tamagriteru vugote'na nevu'na ha' vahe'tmia zamatazamina, zamazeri koro hu'noe. Ana'ma huazamo higeke tare Amori kini netremokea korora fre'na'e. Tamagra'a bainati kazinteti'ene ati keve tamiretira hara huznanteta zanavre otre'naze. **13** Hanki tamagra'a eri'zana e'ori'naza mopane, tamagra'a onki'naza ranra kumatamugeta nemanita, tamagra'a tamazampinti onkri'naza waini hozafinti'ene olivi hozafintira tagitma ne'naze. **14** E'ina hu'negu menina Ra Anumzamofona koro huntetma tamagu'areti tamage hutma monora hunenteta eri'zana erinteho. Hagi timofo kantu kaziga Isipima tamagehe'zama mani'ne'za mono'ma hunte'naza havi anumzantamintera monora huonteta, Ra Anumzamofonke monora hunteho. **15** Hagi Ra Anumzamofo mono'ma hunenteta eri'zama erinte'zanku'ma tamavesrama hanigeta menina iza monora huntawahazafi huama hiho. Tamahahe'zama Yufretisi timofo kantu kaziga Mesapotomia mopare mono hunte'naza havi anumzante monora huntawahazafi, Amori vahe'ma mopazamifima eman'i'naza vahe'mokizmi havi anumzantaminte monora huntawahazo? Hianagi nagrane a'mofavre ni'anena, Ra Anumzamofo tagra monora hunenteta eri'zana erintegahune. **16** Anante ana maka vea kevumo'za kenona'a amanage hu'naze, tagra tamagerafa huta Ra Anumzana atreta mago'a havi anumzantera monora huozmantegahune. **17** Na'ankure Agra Ra Anumzana tagri Anumzamo Agra'a, tafaher'ine tagri'enena Isipi vahe kazokzo eri'zama erinezmantompintira tavreno etirami'ne. Ana huteno tavufinti negonkeno, ana maka kaguvazana eri fore nehuno, kama e'nompina hakare'a kuma vahe mani'nazanagi Anumzamo'a kva hurantegeta amu'nozmifina e'none. **18** Hanki ko'ma ama

mopafima mani'naza vahe'ene, Amori vahe'enena negonkeno
Ra Anumzamo'a zamahenati atre'ne. E'ina hu'negu tagranena
Ra Anumzamofo monora hunenteta eri'zama'a erintegahune.
Na'ankure Agrake tagri Anumzana mani'ne. **19** Hanki Josua'a
amanage huno zamasami'ne, Tamagra Ra Anumzamofona
monora hunenteta eri'zana eriontegahaze. Na'ankure Agra
ruotage hu'neno, kanivere Anumza mani'neankino, tamagri
kumi'ene, hazenkema hu'naza kumira apase oramantegahie.
20 Hanki tamagrama Ra Anumzamofo tamefi hunemita, ru
vahe'mofo havi anumzantaminte mono'ma hunteszazana, Agra
knare huno kegava huramanteno e'neanagi, rukrahe huno
rimpa aheneramanteno knazanteti tamagrira tamahe fanane
hugahie. **21** Hianagi vea kevumo'za Josuana amanage hu'za
asm'i'naze, i'o tagra Ra Anumzana Agrike monora huntegahune.
22 Anante Josua'a anage huno vea kevua zamasami'ne,
tamagra'a huama nehutma, huvempa hutma Ra Anumzana
Agrike monora hunenteta eri'zama'a erintegahune nehazo?
Hige'za, izo tagra'a tagipinti huama huta nehune. **23** Hanki Josua'a
mago'ane zamasamino, ru vahe'mokizmi havi anumzantamima
tamagranema me'neana eri netreta, Rana Israeli vahe'mota
Ra Anumzante tamagu'a rukrahe huta amage anteho. **24**
Hanki vea kevumo'za Josuana asami'za, Ra Anumzana tagri
Anumzamofo monora hunenteta, eri'zama'a erinenteta, Agri
kemofo amage'a antegahune. **25** Hanki ana zupa Josua'a
Sekemu kumate vea nagara Anumzanema huhagerafi huvempa
kea nezamasamino, kasegene tra kenena amage antehogu
zamasami'ne. **26** Hanki ana nanekeramina Ra Anumzamofo
kasegema me'nea avontafepi Josua'a krente'ne. Ana huteno,
anante Josua'a mago ra have erino Ra Anumzamofo seli

mono noma me'nea tavaonte oki zafa agafare retrure'ne.

27 Anama huteno Josua'a maka vea kevumofona amanage huno zamasami'ne, keho, maka zupa ama havema negeta tagrama huvempama hu'nona kegu tagesa antahigahune. Ra Anumzamo'ma tasamia nanekea ama havema negesuta, ama ana havemo mago avame'za me'eneketa Anumzamofo nanekea ruotagregahune. **28** Anagema huteno Josua'a ana maka veara huzamantege'za erisantimahare'za nemaniza kumatega vu'za e'za hu'naze. **29** Hanki anazama huvagareteno zaza kna omani'neno Ra Anumzamofo eri'za ne' Nuni nemofo Josuana, kafu'amo'a 110ni hutegen fri'ne. **30** Hige'za Gasi agonamofo noti kaziga Efraemi naga'mokizmi agona mopamofo asoparega, Timnat Sera rankumate agra'ama erisantimahare'nea mopafi asente'naze. **31** Hanki Israeli vahe'mo'za Josua'ma kasefa huno mani'nea knafine, agranema ranra vahe'mo'zama Ra Anumzamo'ma mikazama hiazama ke'naza vahe'mokizmi knafina Israeli vahe'mo'za Ra Anumzamofona monora hunte'za eri'zana erinte'naze. **32** Hanki Israeli vahe'mo'zama Josefe zaferinama Isipiti'ma eri'zama e'nazana Sekemu asente'naze. Anama asente'naza mopa Hamori vahe'mokizmi nezamafa Sekemuna 100'a silva zago nemino Jekopu'a mizase'nea mopafi asente'naze. Hanki Israeli vahe'mo'zama Josefe zaferinama asentete'za, ana mopa Josefe naga'mokizmi su'zane hu'za refko huzmi'naze. **33** Hanki Aroni nemofo Eleaza'ma frige'za Gibea kumate asente'naze. Ana Gibea rankumara Efraemi naga'mokizmi agona moparega Eleazari nemofo Finiasi ami'naza rankumate asente'naze.

Jasi Vahere

1 Hagi Josua'ma fritege'za Israeli vahe'mo'za amanage hu'za
Ra Anumzamofona antahige'naze. Menina ina naga nofi'mo'za
amu'nontifintira esera vugota hu'za mareriza Kenani vahera hara
ome huzmantegahaze? **2** Hu'za hazageno, Ra Anumzamo'a
kenona amanage huno zamasami'ne, Antahiho, Nagra ko'
ana mopa Juda naga zami'noanki zamagra mareri'za Kenani
vahera hara ome huzmantegahaze. **3** Anante Juda naga'mo'za
nezmafu Simioni nagakura amanage hu'za zmasami'naze, eta
eme taza hinketa tagri'ma hurante'nea mopafima mani'naza
Kenani vahera hara ome huta zamaheteta, ete tamagrira tamaza
hanunketa tamagri mopafima mani'naza vahera hara huta
zamahegahaze. E'inage hazageno Simioni naga'mo'za Juda
naga'ene vu'naze. **4** Hagi Juda naga'mo'za mareri'za hara ome
hazageno, Ra Anumzamo'a Kenani vahe'ene Peresi vahe'enena
Juda naga'mofo zamazampi zamavarentege'za 10 tauseni'a
vahe Beseki kumapina ome zamahe'naze. **5** Ana Beseki
kumapi Adoni-Bezekina ke'za erifore hu'za, agri'ene Kenani
vahe'ene Perisi vahe'enena hara huzmagatere'naze. **6** Hianagi
Adoni-Beseki'a nefrege'za rotago hu'za ome azeri'za azafa
azantrena tarega kazigatira runekafriza, tare agafa agiararena
rukafri'naze. **7** Ana'ma hazageno'a Adoni-Beseki'a amanage
hu'ne, nagra 70'a kini vahe'mokizmia zamazafa zamazane,
zamagiafa zamagiane akafruge'za, ne'zama nenoa itamofo fenka
kaziga mani'ne'za, ankrahe'a zogi'za ne'naze. E'inama hu'noa
avu'ava zante menina Anumzamo'a mizana namie. Anage
hutege'za avre'za Jerusalemi vazageno anantega ufri'ne. **8** Hagi
Juda naga'mo'za Jerusalemi vahera bainati kazinteti zamahe
frivaganere'za, ana kumara teve taginte'naze. **9** Hagi ana'ma

hute'za Juda naga'mo'za urami'za, Kenani vahe'ma agonafine
Negevine, agupo mopafinema nemaniza vahera hara ome
huzmante'naze. **10** Ana'ma hute'za Hebronimopafima nemaniza
Kenani vaheku'ma kora Kiriat-Arba hu'zama nehaza vahera,
hara ome huzmante'za Sesai naga'ene Ahimani naga'ene
Talmi nagara hara zamagatere'naze. **11** Hagi anantetira vu'za
Debirima nemaniza vahetmina hara ome huzamante'naze.
Debiri kumamofo agi'a korapara Kiriat-Sefa hu'za nehzane.
12 Hagi Kalepi'a amanage hu'ne, izao Kiriat-Sefa vahe'ma
ha'ma huzmanteno ana kumama erisimofona mofa'ni'a Aksana
ami'nenkeno ara erigahie. **13** Anagema higeno'a, Kalepi negna
Kenazi nemofo Otniel ana vahera ha'huzmanteno ana kumara
erigeno, Kalepi'a mofa'a Aksana amigeno Otniel'i'a ara erinte'ne.
14 Hagi Aksa'ma Otnielinte'ma ne-eno'a amanage huno asami'ne,
nenfa Kalepina antahigegeno mopa kamino huno hu'ne. Hagi
Aksama donki agumpinti'ma taka'uma neregeno'a, Kalepi'a
amanage huno antahige'ne, na'anku kave'nesie? **15** Higeno
Aksa'a kenona amanage hu'ne, asomu hunantenka Negevi mopa
ko nami'nananki, kampu'i tima nehanatia tintaminena musezana
namio, higeno Kalepi'a anagamu kaziga me'nea kampui tine,
fenkma kaziga me'nea kampu'i tinena ami'ne. **16** Hanki Kenazi
vahera Mosese nenemo nagaki'za Juda naga'mo'zama tofegna
zafamo hu'nea Jeriko kumara atre'za nevazage'za, zamagrane
magoka vu'za Juda vahe'ma hagege kokampi, Arad tava'onte
Negevi nemaniza vahe'ene umani'naze. **17** Hagi Juda naga'mo'za
zamafuhe'i Simioni naga'ene vu'za, Sefatima nemaniza Kenani
vahera ome zamahe vaganere'za ana rankuma'zmia eri
haviza hutre'naze. E'ina hu'negu ana kuma'mofo agi'a Home
hu'za agia nehaze. **18** Hagi Juda naga'mo'zama mago'a

kuma'enema ha'ma hu'za eri'hazana, Gaza rankumaki, Askeloni rankumaki, E kroni rankuma'ene megagi'nea mopazminena zamahe'za hanare'naze. **19** Hagi Ra Anumzamo'a Juda naga'ene mani'nege'za hara hu'za maka agona mopa eri'haz. Hianagi agupofima mani'naza vahera zamahenati otre'naze. Na'ankure zamagra aenireti tro hu'naza karisi ante'naze. **20** Hagi Mosese'ma huempama huzmante'nea kante ante'za Juda naga'mo'za Hebron mopa Kalepi ami'naze. Ana hazageno Kalepi'a 3'a Anaki mofavreramina ana mopalima nemanizana zamahenati atre'ne. **21** Hianagi Benzameni naga'mo'za Jebusi vahe'ma Jerusalemima mani'naza vahera zamahenati otre'naze. E'ina hazageno Jebusi vahe'mo'za Benzameni naga'ene Jerusalemia meninena mani'naze. **22** Hagi anahukna huno Ra Anumzamo'a Josefe naga'ene mani'nege'za mareri'za Beteli vahera hara ome huzamante'naze. **23** Hagi Josefe naga'mo'za afure venenerami huzmantage'za vu'za Beteli kumakura kora Lusie nehaza kumara ome afure'za ke'naze. **24** Anama afure'za kenaku'ma vu'naza vene'nemo'za mago ne' ana kumapintira atiramino ne-ege'za amanage hu'za asami'naze, muse hugantonanki ama kumapima ufre kana taveri huo, ana'ma hananketa kagrira kazeri havizana osugahune. **25** Anagema hazageno'a, ana kumapima ufre kana zamaveri hutege'za, ana kumapi ufre'za ana maka vahera bainati kazinteti zamahe vagare'naze. Hianagi kama zamaveri'ma hu'nea ne'ene naga'anena ozamahe, zamatrage'za so'e hu'za mani'naze. **26** Hagi anama ohe'ma atraza ne'mo'a Hiti vahe mopafi vuno, mago rankuma omegino ana kuma'mofo agi'a Lusie huno antemi'ne. Ana knareti'ma eno menima e'neana ana agige'za nehaze. **27** Hagi Betsani kumapine, Tanak kumapine, Dori kumapine Ipleamu kumapine,

Megido kumapine maka megagiterema hu'nea kumapi vahera
Manase naga'mo'za zamahenati otre'naze. Na'ankure Kenani
vahe'mo'za hanaveti'za hara nehu'za, zamatrage'za mopazmia
Manase naga'mo'za e'ori'naze. **28** Israeli vahe'mo'zama ome
hankavemaneti'za Kenani vahetmina zamahenati atrevaga
ore'nazanki, kazokazo eri'za vahe zamavrazage'za, kazokazo
eri'za vahezmi mani'naze. **29** Hagi Efraemi naga'mo'za
Geserima nemaniza Kenani vahera zamahenati otre'nazanki,
zamatrazage'za zamagrane magopi mani'naze. **30** Hagi Kitroni
kumapine Nahaloli kumapinema nemaniza Kenani vahera
Sebuloni naga'mo'za zamahenati otre'nazanki, zamatrage'za
magopi zamagrane mani'naze. Hianagi Kenani vahe'tmina
kazokzo eri'za vahe zamazeri tro hazage'za kazokzo eri'za
vahe mani'naze. **31** Hagi Ako kumapine, Saidoni kumapine,
Alapu kumapine, Aksipi kumapine, Helba kumapine, Afeki
kumapine, Rehopu kumapinema nemaniza Kenani vahera
Aseli naga'mo'za zamahenati otre'za zamatrage'za zamagrane
magopi mani'naze. **32** Ana hazageno Aseli naga'mo'za Kenani
vahe'ene magopi mani'naze. Na'ankure Kenani vahera hara
hu'za zamahenati otre'naze. **33** Hagi Bet-Semesi kumapine, Bet-
anati kumapinema nemaniza Kenani vahera Naftali naga'mo'za
zamahenati otre'nazanki, zamatrage'za zamagrane magopi
mani'naze. Hagi ana kuma'trempinti vahe'tmina kazokazo eri'za
vahe'zmi zamavare'naze. **34** Hagi Amori vahe'mo'za Dani
naga'mo'zama agupo mopafima eramizankura hankaveti'za hara
huzmante'za zamahenati atrege'za agona kokampi vu'naze.
35 Amori vahe'mo'za hankaveti'za Heresi agonafine, Aijaloni
agonafine, Salpim agonafine mani'hazanagi, Josefe naga'mo'za
tusi hankaveti'za kazokzo eri'za vahe zamazeri tro hu'naze.

36 Hagi Amori vahe'mofo mopa atupamo'a eramino, Akrabimi
agonaregama mareneriza kanteti agafa huteno marerino Sela
kumate mareriteno, vuvava huno agona moparega mareri'ne.

2 Hagi Ra Anumzamofo ankeromo'a Gilgali kumatetira atreno
Bokimi kumate marerino vuno Israeli nagara amanage huno ome
zamasami'ne. Isipiti'ma tamagehe'ima zamavare'na atinerami'na,
mopama zamigahue hu'nama huvempama huzamante'noa
kea ruha ontagigahue. **2** Hagi tamagra ama ana mopafi
vahe'enena huhagerafi huvempa kea nosuta, Kresramanama
nevaza ita'zamia tagana'vazitreho hu'na hu'noanagi, ana keni'a
ontahi'naze. Nahigeta amanara nehaze? **3** E'ina hu'negu
amanage hu'na nehue, Nagra ama ana mopafi vahera zamahenati
otre'nuge'za tamagrane mani'ne'za, ave'ave tamazeriankna
nehanage'za anumzazmimo'za tamagritera karifu anaginteankna
hu'za tamentintia reramahe'za kegahaze. **4** Ra Anumzamofo
ankeromo'ma ama ana nanekema huvagama neregeno'a, mika
Israeli veamo'za zamazantre kofi'za tusi zavite'haze. **5** Hagi ana
kuma agi'a Bokimie hu'za agi'a nente'za, Ra Anumzamofontega
Kresramana vunte'haze. **6** Hanki Josua'ma huzamantege'za vu'za
e'zama nehu'za, mago mago Israeli naga'mo'za erigahazema
hu'nea mopa, eri santiharetere hu'haze. **7** Hagi Josua'ma manino
e'neankna'afine, agranema mani'za ne-ezama mika kaguvezama
Ra Anumzamo'ma Israeli vahete'ma erifore'ma hige'zama ke'naza
ranra vahetamima mani'naza knafina, Ra Anumzamofonke Israeli
vahe'mo'za monora hunte'za vu'haze. **8** Nuni nemofo Josua'a
110ni'a zagekafu huteno frige'za, **9** agrama erisantima hare'nea
Efraemi agona kaziga Gasi agonamofo noti kaziga Timnat-Sera
kumate ome asente'haze. **10** Hagi Ra Anumzamo'ma Israeli
vahete'ma kaguvezama eri fore hige'zama ke'naza vahe'tmina

maka fri vagaregeno, ana zantmima onke'naza vahe'tmi efore hu'naze. **11** Hagi Israeli vahe'mo'za Ra Anumzamofo avufi havi zmavuzmava hu'za Bali havi anumzantamimofo monora huzmante'naze. **12** Hagi Isipiti'ma zamagehe'ima zamavareno'ma atiramino e'nea Ra Anumzana, Israeli vahe'mo'za atre'za amefi humi'naze. Anama umani'naza mopafi vahe'tmimofo anumzantminte zamar'e'nare'za monora hunte'naze. Hagi havi anumzamofo Bali amema'are'ene Astaroti havi anumzamofo amema'are'ene monora huntogeno, Ra Anumzamo'a tusi rimpa ahe'zamante'ne. **13** Na'ankure Ra Anumzamofona atre'za zamafi hunemi'za, Bali havi anumzante'ene Astaroti havi anumzamofo amema'are'ene monora hunte'naze. **14** Anama hazageno'a Ra Anumzamo'a tusi arimpa ahezmantero, zamazeri havizama hu' vahe huzmantege'za mika'zazmia emeri'naze. E'ina nehuno ha' vahe zamazampi zamavarentege'za ha' vahe'mo'za kegava huzmante'naze. **15** E'ina nehazageno inantego hate'ma vu'za e'zama hazarega Ra Anumzamo'ma huvempama hu'nea kante anteno havi zamavu'zamazama hu'naza zantera ha'rezamantageno nomani'zazimimo'a havizantfa hu'ne. **16** Anante Ra Anumzamo'a ke refkohu kva vahe zamazeri otige'za Israeli vahe'ma zamazeri havizama nehaza vahera zamahe'za Israeli vahera zamagu vazi'naze. **17** Hianagi Israeli vahe'mo'za kema refkohu kva vahe'mokizmi kea ontahi'za, Ra Anumzamofona atre'za savri a'negna hu'za havi anumzantamimofonte monora ome hunte'naze. Ko'ma zamagehe'mo'zama Ra Anumzamofo kasegema avariri'naza kana ame hu'za atre'za, havi kante vu'naze. **18** Hagi Ra Anumzamo'ma keagama refko hu vahe'tmima zamazeri omanetino'a, zamagrane mani'nege'za keaga refko hu kva

vahe'mo'za ha' vahe zamazampintira Israeli vahera hara
hu'za zamavaretere hu'naze. Na'ankure Agri vahe'mo'zama
knafima nemanizageno'a, Ra Anumzamo'a asunku huzmantene.

19 Hianagi keagama refko hu kva vahe'ma nefrizage'za
Israeli vahe'mo'za ete rukrahe hu'za korapa zamavu'zamava
zamifi vu'za zamafahe'mo'za hu'naza havi zamavu'zamavara
zamagatere'za tusi kefo zamavu'zamava hu'za zamare'na re'za
monora hunezamante'za eri'zana eri'zamante'naze. Magore
hu'za kefo zamavu'zamavara otre'naze. **20** E'ina hazageno
Ra Anumzamo'a tusi arimpa ahenezamanteno anage hu'ne,
na'ankure ama vahe'mo'za zamafahe'inema huhagerafi'noa
kasegea runetagre'za ke'ni'a ontahizagu, **21** Josuama zamahenati
otre'neno'ma fri'nea vahe'tmina, Nagra zamaza osanuge'za,
zamahenati otregahaze. **22** Zamagehe'za hu'nazaza hu'za Ra
Anumzamo'na navu'navara avaririgahazafi Nagra rezamahe'na
zamage'noe. **23** E'igu Israeli vahe mopafima mani'naza vahera
Ra Anumzamo'a ame hunora zamahe kasopeno Josua azampina
zamavarente vaga'ore'ne.

3 Hagi ko'ma Kenani mopafima ha'ma hu'naza zama onke'naza
Israeli vahetmima rezamaheno kenaku, Ra Anumzamo'a mago'a
vahera zamatrege'za Kenani mopafina mani'naze. **2** Hagi
Israeli vahe'ma efore hutere hu'za henkama esaza vahetami
Ra Anumzamo'a ha'ma hanaza avu'avaza rempi huzaminaku
Kenani mopafi vahera zamahenatitre vagaore'ne. **3** Ama'na
kumatmimpi nemaniza vahetami zamatrege'za mani'naze. Faifu'a
kumapima nemani'za Filistia vaheki, maka Kenani vaheki,
Saidoni vaheki, Hivi vahe'ma Lebanoni agonomofoma Bal-
Hermoniti'ma vuno Hamat kumate'ma uhanati'nea vahe'mokizmi
ozamahe zamatrege'za mani'naze. **4** Hagi Ra Anumzamo'ma

Mosesema ami'nea kasegea avaririgahazafi ovaririgosazafi
huno Israeli vahe'ma rezamaheno kesigu Ra Anumzamo'a ana
vahera zamatrege'za mani'naze. **5** E'ina hazageno Kenani
vahe'ene, Hiti vahe'ene, Amori vahe'ene, Perisi vahe'ene
Hivi vahe'ene, Jebusi vahe'mokizmi amu'nompi Israeli vahera
mani'naze. **6** Ana'ma nehu'za Israeli vahe'mo'za zamagri
mofa'ne ara e'neri'za, ete zamagra mofa'nea zamatrassage'za
zamagri mofavreramintera vea omeneri'za unemrazageno, havi
anumzazmirera monora ome hunte'naze. **7** Israeli vahe'mo'za
Ra Anumzamofo avufina kefo zamavu'zmava nehu'za, Ra
Anumzamofona zamagekani nente'za, Bali havi anumzante'ene
Asera havi anumzamofo amema'are monora hunte'naze. **8** E'ina
hazageno Ra Anumzamo'a Israeli vahe'tminkura tusi arimpa
ahezamanteno Mesopotemia Kini ne' Kusan-risataimi azampi
zamavarentegeno ha' eme huzamanteno zamazeri haviza
nehuno, zamavareno kina ome huzmantege'za **8'a** zagegafufi
Kusan-risataimi kazokzo eri'za vahe umani'naze. **9** Hianagi Israeli
vahe'mo'za Ra Anumzamofontega zamazama hinogura krafa
hazageno, Ra Anumzamo'a zamazama hu' nera, Kalepi negana
Kenazi ne'mofo, Otnielina azeri oti'ne. **10** Ra Anumzamofo
Avamumo'a agri'ene eman'i'negeno, Israeli vahe'mokizmi keaga
refko hu kva vahera mani'ne. Hagi Otniel'i'ma Mesopotemia
vahe'ene ha' ome nehigeno, Ra Anumzamo'a kini ne' Kusan-
risataimina azampi avrentegeno aheno hara azeri agatere'ne.
11 Ana higeno 40'a kafufina ha'huzana omanege'za, fru hu'za
Israeli vahe'mo'za mani'nazageno, Kenazi ne'mofo Otniel'i'a
fri'ne. **12** Ete mago'ene Israeli vahe'mo'za Ra Anumzamofo
avufina kefo avu'avara hazageno, Ra Anumzamo'a Moapu
kini ne' Eklonina hankavea amigeno Israeli vahera hara eme

huzmagatereno kegava huzmante'ne. Na'ankure zamagra Ra Anumzamofo avufina kefo zamavu'zamava hu'naze. **13** Hagi Ekloni'a Amoni vahe'ene Ameleki vahe'enena kehige'za azageno Israeli vahera hara ome huzamante'za tofegna zafamoke hu'nea Jeriko rankuma zamahe'za hanare'naze. **14** Hagi ana hazageno Israeli vahe'mo'za 18ni'a kafuzagefi Moapu kini ne' Ekloni kazokzo eri'za vahera mani'naze. **15** Hianagi Israeli vahe'mo'zama Ra Anumzamofontegama zamaza hinogu'ma krafagema hazageno'a, ha' vahe zamazampinti'ma zamazama hu' nera Benzameni nagapinti Gera nemofo hoga azane ne' Ehuti azeri ot'i'ne. Hagi Israeli vahe'mo'za kafure kafure'ma kini ne'ma takesi zagoma nemizaza huno Moapu kini ne' Ekloni ome ami'nogu ana zantamina Ehutina nemi'za huntazageno erino vu'ne. **16** Ana higeno Ehuti'a tarega kaziga asane bainati kazina zaza'amo'a 50'a sentemita hu'nea tro huno tamaga kaziga amote anakiteno za'za ke'na'a antanino refite'ne. **17** Hagi Ekloni'a ra avugane ne' mani'neankino, Ehuti'a ana takesi zagone maka zantamina erino Eglonina ome ami'ne. **18** Hagi ana takesi zantamima amiten'o, ana zantamima azama hu'za eri'za vu'naza vahera eme huzamantege'za vu'naze. **19** Hianagi Ehuti'a Gilgali tavaonte'ma havi anumzama tro'ma hunte'nazareti ete rukrehe huno Ekloninte eno amanage hu'ne, Ekloniga oku'a nanekeka'a erigante'na oe, higeno Ekloni'a eri'za vahe'agura huno, amafintira maka atiramaho, hige'za maka eri'za vahe'amo'za atirami vagare'naze. **20** Hagi Eglonima zasi'ma e'neria noma'afi agrake'ma manigeno'a, Ehuti'a amanage hu'ne, Anumzamofontegati oku nanekeka'a eri'na e'noe. Anage higeno tra'aretira ot'i'ne. **21** Hagi Ehuti'a tarega kazigama asane bainati kazima tamaga kaziga amote'ma anakinte'nea

kazina avazu huno, Ekloni rimpa reragufe'ne. **22** Ana bainati kazimofo nena'amo'ene asana'amo'enena Eglonina rimpafi ufrresupanegeno afovamo'a herafiramino bainati kazina refite'ne.

23 Ehuti'a ana kazina eriokasi Ekloni avufgafi me'negeno netreno, agu'ati kafana erinegino, marerino nomofo agofetu'ma zasi'ma e'nerizareti takaureno fre'ne. **24** Ehuti'ma vutegenen'a, Ekloni eri'za vahe'mo'za eme kazana anaga kaziga nomofo kafana erigi'negeno, zamagesama antahi'zana agu'afinka rifa nereno mani'ne hu'za hu'naze. **25** Anage hu'za nentahiza kafante avega ante'naze. Hianagi kafana ame huno onagige'za kafante kinofira eri'za ana kafana anagi'za kazana, kvazmimo'a frino mopafi mase'nege'za ke'naze. **26** Hagi kini ne' eri'za vahe'mo'zama kafante avega ante'za mani'nazageno, Ehuti'a freno havere taga hu'za trohunte'naza havi anumzamofo amema'a me'nea kumara agatereno Seira vu'ne. **27** Hagi ana'ma huteno'a Israeli vahe'mofo mopafima ufreno Efraemi agonafima nevuno'a, ufe rege'za Israeli vahe'mo'za nentahi'za eme atru hazageno, ha' hunaku zamavareno ugota huno agra urami'ne.

28 Anama uneramino'a amanage huno hu'ne, navaririta viho, na'ankure Ra Anumzamo'a ha' vahetamia Moapu vahera tamagri tamazampi avrente'neankita zamahegahaze. Anage hige'za Israel vahe'mo'za Ehutina avariri'za Jodani tima takama nehazare Moapu vahe'enena hara ome hu'za magore hu'za ozamatre zamahehana hu'naze. **29** Ana hapina Moapu hankavenentake ha' vahe'tmina Israeli vahe'mo'za 10tauseni'a vahe zamahehna nehu'za zamatrage'za ofre'naze. **30** E'ina hu'za Israeli vahe'mo'za Moapu vahera, zamahe vagarazageno 80'a kafufina hahu'zana omanege'za, Israeli vahe'mo'za knare hu'za mani'naze. **31** Ehuti amefira Anati nemofo Samgari efore huno bulimakao afu

reneharia ronku hu'nea azotareti 600'a Filistia vahera zamahe
hana huno Israeli vahera zamagu'vazi'ne.

4 Hagi Israeli vahe'mo'za Ehuti'ma fritege'za Ra Anumzamofo
avurera mago'ane ete kefo avu'ava zana hu'naze. **2** Anama
hazageno'a, Ra Anumzamo'a Hazori kuma kegava hu'nea
Kenani kini ne' Jabini azampi Israeli vahera zamavarente'ne.
Hagi ana kini ne'mofa sondia vahete kegavama hu'nea nera
Haroset-Hagoimie nehaza kumate nemania nekino agi'a Sisera'e.
3 Hagi Sisera'a 900'a ainire karisirami ante'neankino Israeli
vahera 20'a kafufina arohura zamareno zamazeri haviza hige'za,
zamaza hinogura Ra Anumzamofontega krafa hu'naze. **4**
Hagi ana knafina kasnampa ara Debora'a Lapidoti nenarokino,
Israeli vahe'mo'zama keagare'ma azageno'a keagazmia refko
huno antahi'ne. **5** Hagi Debora'a Rama kuma'ene Beteli
kuma'ene amu'nompi Efraemi agona mopafi, tofegna zafa
agafarere nehzare Debora mani'nege'za, Israeli vahe'mo'za
knazazimia eri'za azageno keagazmia refko huno antahi'ne. **6**
Hagi mago zupa Debora'a Kedes-Naftali kumate ne' Abinoamu
nemofo Barakintega kea atrentegeno vigeno, anante'ma egeno'a
amanage huno asami'ne, Israeli vahe'mofa Ra Anumzamo'a
kagrikura amanage hu'ne, Vunka Naftali nagapinti'ene Zebuluni
nagapintira 10tauseni'a venene zamavarenka Tabori agonare
omeri atru hiho huno hu'ne. **7** Ana huge'na kini ne' Jabini sondia
vahete'ma vugotama hu'nea kva ne'ene, aini karisiramine, ha'
vahe'taminena zamavare'na Kisoni tinte e'na kazampi eme
antegahue. **8** Anagema higeno'a Baraki'a amanage huno
Deborankura hu'ne, Kagrama nagri'enema vanankena vugahue.
Hianagi kagra nagri'enema ovnanana, nagra ovugahue. **9**
Higeno Debora'a amanage huno hu'ne, Tamage nagra kagrane

vugahue. Hu'neanagi amama vanana kamo'a, kagra ra kagia e'origosane. Na'ankure Ra Anumzamo'a Siserana mago a'mofo azampi avrentegahie. Anage nehuno Debora'a Barakina avaririno Kadesi kumatera vu'ne. **10** Hagi Barakia Zebuluni naga'ene Naftali nagara ke hige'za Kedesi vu'naze. Hagi 10tauseni'a sondia vahe'mo'za mareriza vazageno Debora'a zamagrane vu'ne. **11** Hagi ana knafina kin nagapinti ne' Heberi'a mago seli nona Kadesi kuma tavaonte oki zafa me'nere ki'ne. Korapara Kenasi kumateti, Mosese nenemo Hobabu nagapinti ne'kino agehemokizmia zamatrevo vu'nea ne'mo ki'ne. **12** Hagi Abinoamu nemofo Baraki'ma Tabori agonare'ma marerie kema Siserama asamizageno nentahino, **13** Sisera'a 900'a ainire karisi ke hige'za eri'za neazageno, maka sondia vahetamina ke hutru hutege'za, Haroset-Hagoimitira Kisoni tinte vu'naze. **14** Anante Debora'a Barakinkura amanage hu'ne, Otio! Na'ankure menina ama knarera Ra Anumzamo'a vugota huganteno, Siserana kagri kazampi avrente'ne. Anage higeno Baraki'a 10tauseni'a sondia vahera zamavareno, Tabori agonamofo asoparega urami'naze. **15** Hagi Barakima ha'ma eri agafama higeno'a, Ra Anumzamo'a Siserane karisma eri'za vanoma nehaza maka sondia vahe'aramineno antahintahi zimia zamazeri savari nehuno, zamazeri koro higeno Sisera'a karisi'afintira mopafi takaureno koro fre'ne. **16** Ana higeno Baraki'a karisifi vanoma nehu'za ha'ma nehaza vahe'tmina zamavaririno Haroset-Hagoimi vuno magore huno ozmatreno, ome zamahe hana hu'ne. **17** Hianagi Sisera'a mopafi freno vuno Kenasi ne' Heberi nenaro, Jaeli seli nontega vu'ne. Na'ankure Hazori kini ne' Jabinine Kenasi ne' Heberi kizani amu'nompina hafra osu'na'e. **18** Hagi Jaeli'a seli noma'afinti'ma atiramino Siserama eme negeno'a amanage

hu'ne, korora osunka seli noni'afi emarerinka emanio. Anage higeno Jaeli seli nompi Sisera'a umarerino umasegeno, franke erino kofinte'ne. **19** Anama nehigeno'a Sisera'a amanage hu'ne, nanankemo'a hagage hianki osi'a tina afinamige'na na'neno, higeno zagagafa akru'areti tro hu'nea tintafempinti mememofo amirina tagi amigeno netegeno, ete frankera eri kofintegeno mase'ne. **20** Nemaseno amanage hu'ne, Seli nomofo kafante oti'enka mago'a vahe'mo'ma eno'ma eme kantahigeno, mago'a vahera amafina mani'neoma hanigenka, i'o amafina mago'a vahera omani'ne hunka huo. **21** Hianagi Sisera'a asafe'atagu mase himre'negeno, Jaeli'a hamane seli no avazuhumpi huno negia azota eriteno, akoheno vuno Siserana ana frankepi taponeno asenia runagino aheno mopafi ahenarentegeno fri'ne. **22** Anama nehigeno'a Baraki'a Siserana avaririno ne-egeno'a Jaeli'a viazamo amanage ome hu'ne, ege'na avaririnkama neana nera ome kaveri ha'neno, higeno Baraki'a amage vuno ome keana seli no avazuhumpi huno arenentea azotareti asenia renagino ahentenegeno ome ke'ne. **23** E'i ana zupage Israeli vahe zamavufi Anumzamo'a Kenani kini ne' Jabinina hara hu agatere'ne. **24** Hagi ana hige'za Israeli vahe'mo'za tusiza hu'za hankaveti'za Kenani kini ne'mofo sondia vahetamina hara huzmante'za zamazeri haviza hu'naze.

5 Hagi ana knazupa Debora'ene Abinoamu nemofo Barakikea ha'ma vagaregekeaa amanage huke muse zagamera hu'na'e, **2** Ra Anumzamo ragi erisie! Israeli kva vahe'mo'za vugota hu'za hara hazageno, Israeli vahe'mo'zanena zamagesa ontahi antahi hu'za zamagranena hara hu'naze. **3** Kini vahe'mota nentahinkeno, kini vahe'tmimofo mofavremota antahio, Ra Anumzamofontega zagamera hugahue, Ra Anumzana Israeli vahe Anumzantega

zavena ahanenkeno knare ageru rugahie. 4 Ra Anumzamoka Seiri kumara atrenka nevunka, Idomu agupofima nevankeno'a mopamo'a momi'momi nehigeno, monafina hampona negigeno, hampopintira kora tagiramino ru'ne. 5 Ra Anumzamofo avuga agonaramimo'a momi nehigeno, Sainai agonamo'enena momi nehie. Israeli vahe'mota Ra Anumza Kagra mani'nane. 6 Hagi Anati nemofo Samgari knafine, Jaeli knafinena vahe'mo'za koro hu'za ra kampina vano osu, osi' kampinke vano hu'naze. 7 Israeli vahe kumatamimpina knare nomanizana omanege'za maniza neazage'na Deborana nagra Israeli vahe'mofona nezamarera kna hu'na efore hu'noe. 8 Hagi Israeli vahe'mo'zama ru anumzama avaririzageno'a, rankuma'mofo kafanterha ha' fore hige'za ha' hu'naze. Hu'neanagi magore huno 40 tauseni'a Israeli sondia vahe'mo'za hankone kevenena zamazampina e'ori'naze. 9 Israeli sondia vahete'ma vugota hu'naza kva vahe'mo'zama zamavesite'ma ha'ma ome nehaza vahetega nagu'amo'a vu'ne. Ra Anumzamo'a ra agi erisie! 10 Hagi efeke donki afu' agumpima vanoma nehaza vahe'ene frufru huno marerirfa tafete'ma nemanina vahe'ene, karankama vanoma nehana vahe'moka ama ana zankura antahio. 11 Hagi timafi kerire mani'ne'za zavenama nehe'za Ra Anumzamo'ene Israeli vahe'mo'zanema fatgo kazigati'ma ha'ma azeri agatere'naza zanku'ma zagame'ma nehzana antahio. Hagi Ra Anumzamofo vahe'mo'za rankuma'mofo kafante urami'naze. 12 Otio, otio, Deboriga! Otio, otio, zagame huo! Otio, Barakiga, Abinoamu nemofo, kinama hu'naza vahera zamavarenka vuo. 13 Manizama'amo'za kva vahe'zamine erimago hu'za erami'naze. Ra Anumzamofo vahe'mo'za nagri kaziga ante'za hanavenentake ha' vahera hara huzmante'naze. 14 Hagi Efraemi naga'mo'za

Ameleki vahe mopafinti neazage'za Benzameni naga'mo'za zamavariri'za hatera erami'naze. Hate'ma vugotama hu kva vahe'tmina, Makiri nagapinti e'naze. Zebuluni nagapintira hate'ma ugotama hu vahe'mofa zantamima erino vu vahe e'naze. **15** Hagi Isaka nagapinti ugagota kva vahe'tmimo'za Deborane Barakine zamagefi vu'naze. Baraki amefi zamavunente'za agupofina vu'naze. Hianagi Rubeni naga'mo'za tare antahintahi nehu'za ovu'naze. **16** Nahigeta sipisipi afu naga'mofa amu'nompina kazara osu' mani'naze. Sipisipi afu kva vahe'mo'zama hogema hanazama'a antahinakupi? Tamage Rubeni naga'mo'za razampi antahintahi hakarea nehaze. **17** Gati naga'mo'za Jodani timofo zage hanati kaziga mani'naze. Na'a hige'za Dani naga'mo'za ventenena mani'naze? Asa naga'mo'za kaza osu zamagraku hageri ankenare mani'naze. **18** Zebuluni naga'mo'za frizankura ontahi'za hanavetiza hara hu'naze. Naftali naga'mo'zanena ha'mo'ma tevenefama nehifina zamavufagagura ontahi'za hara hu'naze. **19** Hagi Kenani kini vahe'mo'za Tanaki kumate e'za Megido tinkenafi hara hu'nazanagi, magore hu'za silva fenona eri'za ovu'naze. **20** Hagi monafinti ofumo'za hara hunte'naze. Zamagrama vanoma nehaza kamofo avaririza Siserana hara hunte'naze. **21** Kisoni timo'a ti hageno zamavareno vu'ne, Kisoni tina korapa me'nere me'nea tine. Nagra korora osu hankaveti'na vugahue. **22** Hagi Sisera hosi afutamimo'za vagri vagri hu'za zamagareti mopa rentunkafiza vu'naze. **23** Hagi Ra Anumzamofo ankeromo'a amanage hu'ne, Merosi kumara atrenkeno kazusifi meno. Maka ana kumapima mani'naza vahera kazusifi manigahaze. Na'ankure zamagra e'za Ra Anumzamofona aza hu'za hara osu'naze. Zamagra e'za Ra Anumzamofona aza hu'za hankave ha' vahetmina hara huozmante'naze. **24** Maka

a'nefintira Kin kumate ne' Heberi nenaro Jaeli rama'a asomura erigahie. Seli nompima nemaniza a'neramina zamagatereno, agra ugota asomura erigahie. **25** Sisera'ma tinku'ma antahima negegeno'a Jaeli'a knarezantfa huno marerirfa kapufi mememofo amirima eri kragemafente'naza amirina tagimi'ne. **26** Ana a'mo'a hogá azantetira antegantuteno seli noma avazuhumpi huno anakinte azota e'nerino, tamaga kaziga azana antegantuteno hama kano erino, Siserana to'mamuna runagino ana zotanura ahe'ne. **27** Sisera'a kuraramperami'ne, agra traka huno mase'ne, agra kaza osu mase'ne, agra trakama huno masere frinte'ne. **28** Sisera nerera'a nomofo zahoma eri avo kampinti nege. Agra Sisera'ma esigu nomofo zahoma eri avo kampinti negeno amanage hu'ne. Na'ahigeno karisi'amo'a ame hunora nome? Na'ahigeta agri karisimo'ma bagri bagrima huno e'nia zamofo agasasa nontahune? **29** Knare antahintahima nemia a'mo'a kenona hunte'ne. E'i ana a'mo'a agra'a kenona hu'ne. **30** Ha'ma hu'za eri'za kumapinti feno refko nehugahaze. Mago'mago sontia vahe'mo'za mago magoro tare tarero hu'za a'neramina nevare'za, knare'ma huno avasesema'amo'ma hu'nea kukena nagri su'ane, Sisera su'ane megahie. **31** E'igu Ra Anumzamoka ha'ma aregantesamo'za Siserama friaza hu'za frisaze! Hianagi iza'zo kavesigantesamo'za zagema hanatino hanave'anema remasama hiankna hugahaze. E'ina hazageno 40'a kafufina ha'zana omanege'za Israeli vahe'mo'za zamarimpa fru hu'za mani'naze.

6 Hagi 40'a kafuma evigeno'a ete Israeli vahe'mo'za Ra Anumzamofa avurera havi zamavu'zamava hu'naze. E'ina hazageno'a Ra Anumzamo'a Midieni vahe zamazampi Israeli vahera zamavarentegeno, 7ni'a kafufi kegava huzmante'haze.

2 Ana'ma higeno'a Midieni vahe'mo'za hanavenentake hu'za
Israeli vahera zamazeri havizantfa hazageno, Israeli vahe'mo'za
agona agona franeki'za, havegampine, vihuma hunte'nazafine
fraki'naze. **3** Hagi Israeli vahe'mo'zama hozama antazageno'a,
Midieni vahe'ma, Ameleki vahe'ma, zage hanati kazigati vahe'ma
hu'za eme hara huzamante'naze. **4** Ana mopafi seli nona eme
ki'za mani'ne'za maka hozazimia agu'za ru'za vu'za Gaza mopare
ome atre'naze. Magore hu'za Israeli vahe'mofo zana otre'za
maka sipisipi afu'ma, meme afu'ma, bulimakao afu'ma, Donki
afutaminena avre vagare'za vu'naze. **5** Hagi ana ha' vahetmima
e'nazana, maka afu'krazmine seli nona eme ki'za mani'ne'za
Israeli vahe hoza otre'za ne'za eri hana hu'haze. Kenumo'za
hare'za azankna hu'za ohampriga'a vahe'mo'za Israeli vahe
mopafina emanine'za maka tra'zana vatri'za nevagarazageno
rampa'age hu'ne. **6** E'ina hu'za Israeli vahera zamazeri haviza
hazage'za, Israeli vahe'mo'za tusi zamagaku nehu'za zamazama
hinogura Ra Anumzamofontega zavi krafage hu'naze. **7** Hagi
Midieni vahe'mo'zama zamazeri havizama hazageno'a Israeli
vahe'mo'za zamazama hanigura Ra Anumzamofontega krafagea
hazageno, **8** Ra Anumzamo'a kasanampa ne' huntegeno Israeli
vahetega eno amanage eme hu'ne, Ra Anumzana Israeli vahe
Anumzamo'a amanage hie, Isipima kazokzo eri'zama e'nerita
mani'nazage'na, Nagra ana kazokzo erizampintira tamavre'na
atirami'noe. **9** Isipi vahe'mofo zamazampinti'ene knama tamiza
tamazeri havizama nehaza vahe'mokizmi zamazampintira Nagra
tamagura vazi'ha tamavre'na e'na ama mopafima mani'naza ha'
vahetimia eme zamahe kasopenetre'na, ama mopa eri tami'noe.
10 Hagi amanage hu'na neramasamue, Nagra Ra Anumzana
tamagri Anumza mani'noanki, ama mani'naza mopafi Amori

vahe anumzantaminkura korora osiho hu'na hu'noanagi, Nagri
kea ontahita ke'ni'a rutagre'naze huno hu'ne. **11** Anante Ra
Anumzamofo ankeromo'a eno, Ofra kumate oki zafa agafare
emani'ne. Hagi Abiezeri nagapinti ne' Joasi nemofo Gidioni'a
Midieni vahe'mo'zama witi'ama erizanku koro huno wainima
regatati'ma nehaza kerifi mani'neno, witi hona'a refuzafupe'ne.
12 Ra Anumzamofo ankeromo'a Gidioninte ehanatino amanage
hu'ne. Hankavenentake sondia nera, Ra Anumzamo'a kagri'ene
mani'ne. **13** Anante Gidioni'a kenona huno, ramoke, Ra
Anumzamo'ma tagranema mani'negeno'a nahigeno amanahu
zana tagritera efore nehie? Hagi Ra Anumzamo'ma erifore hige'za
tagehe'zama tasami'naza kaguva zana iga me'ne? Isipitira Ra
Anumzamo'a tavreno e'neanangi, menina Ra Anumzamo'a
avresra huranteno Midieni vahe zamazampintira tavrente'ne.
14 Anante Ra Anumzamo'a rukrahe huno amanage huno
asami'ne, Midieni vahe zamazampintira hankavema eri'nana
hankavenu ome ha' hunka Israeli vahera zamagu'vaziogu
Nagra hunegantoe. **15** Hianagi Gidioni'a amanage huno kenona
hu'ne, Ra Anumzamoka, inankna hu'na Israeli vahera zamagura
vazigahue? Manase naga'nofipina nagri nagara zamigi omane
naga'manizageno, nentfa mofavreramimpina nagra amite'na
mofavre mani'noe. **16** Higeno Ra Anumzamo'a amanage huno
asami'ne, Nagra kagrane mani'nugenka, Midieni vahera
magoke vahe'ma aheaza hunka zamahehana hugahane. **17**
Anagema higeno'a Gidioni'a amanage huno Ra Anumzamofona
kenona hunte'ne, Nagra kagri kavurema knare'ma hu'nugenka
tamage hunka nazama hunaku'ma hanunka, mago avame'za
naveri huge'na tamage Ra Anumzamoka nehane hu'na ha'neno.
18 Muse hugantoanki natrenka ovunege'na ofani'a eri'na

eme kami'neno, higeno Ra Anumzamo'a huno, ama anante mani'nenugenka etesanke'na vugahuanki vuo. **19** Anage'ma higeno'a Gidioni'a ame'ama huno nontega vuno, agaho meme afu ome aheno negreno, zisti onte bretine kre'ne. Hagi ana meme afu'ene zisti onte bretinena ekaeka kupi erinerino afu'ma kre'nea tima'a kavofi tagino e'nerino eazamo ra zafamofo agafafi ana ankeromofo avugaeme ante'ne. **20** Hagi anante Ra Anumzamofo ankeromo'a anage huno asmi'ne, Amu ana afu'ene zisti onte bretinena erinka have agofetu ante'enka afu tima'a ana agofetu tagitro, higeno Gidioni'a ana hu'ne. **21** Anante Ra Anumzamofo ankeromo'a azampima eri'nea azotareti ana afu'ene bretinena avako higeno, ana havefintira teve rukru huno ana maka ne'zana tefanane hu'ne. Ana higeno ana ankeromo'a agranena rufanane hu'ne. **22** Hagi Gidioni'ma Ra Anumzamofo ankerone huno keno antahinoma nehuno'a, amanage huno ran ke hu'ne, Ra Anumzamoka nagra frigahue! Na'ankure Ra Anumzamoka ankero ke'noe. **23** Hianagi Ra Anumzamo'a amanage huno asmi'ne, ofrigosananki korora osunka krimpa frune akohenka manio. **24** Anage higeno Gidioni'a anante kresramna vu ita tro huno agi'a Ra Anumzana Rimpa Fru Nere (Yawe-Shalom) huno ante'ne. Hagi ana kresramna vu ita Abiesa nagamofo mopafi Ofra kumate menina otino me'ne. **25** Hagi ana kenagera Ra Anumzamo'a Gidionina amanage huno asmi'ne, Negafa bulimakao afu kevufintira mago nevrenka namba 2 bulimakao afu'ma avre'nanana 7ni'a kafu hu'nesia afu avro. Hagi negafa'ma Bali havi anumzante'ma kresramna vunte itama tro'ma hunte'neana tapage hunetrenka, Asera havi anumzamofo amema'ama zafama antre'za ana tava'onte'ma retru re'nazana antaginka kitaginkotago hutro. **26** Hagi Ra

Anumzamofo kresramna vu ita haverera tro hutenga, ana
Asera havi anumzama retrure'ne'za mono'ma hunentaza zafama
antaginkama kitagi'nana zafareti ana kresramna vu itare tevea
hanavazinka, namba 2 bulimakao afura ahenka, tevefima kre
fananehu ofa hugahane. **27** Anage higeno Gidioni'a 10ni'a
eri'za vahe'a nezamavreno Ra Anumzmo'ma asamiaza hu'ne.
Hianagi nefu nagaku'ene ana kumapima nemaniza vaheku
koro nehuno ferura anazana osu'neanki, kenage ana zana tro
hu'ne. **28** Hagi ana'ma hutegen'o'a ana kumapi ma nanterama
oti'zama kazana, Bali havi anumzante'ma kresramnama nevaza
ita taganavazi netreno, Asera havi anumzamofo ame'ma'a
zafare'ma tro hu'za retrurent'e'nezama mono'ma hunentaza
zafaramina maka antagi atrevaga nere'za kasefa kresramna vu
ita trohu'za namba 2 bulimakao afura kresramna vu'nazage'za
ke'haze. **29** Anazama nege'za ana vahe'mo'za ontahige antahige
hu'za, i'za ama zana tro hu'ne? hu'za hu'naze. Hagi henkama
rezagane so'e hu'za hake'za erifore'ma hazana, Joasi nemofo
Gidioni anara hu'ne, hu'za hu'naze. **30** Anante ana kumapima
nemaniza vahe'mo'za amanage hu'za Joasina asami'naze,
Negamofona avrenka egeta ahamanenkeno frino. Na'ankure agra
Bali anumzante'ma kresramna nevuna ita tagnavazi netreno,
Asera anumzante'ma mono'ma hunentona zafa antagi tre'ne.
31 Hianagi Joasi'a ranke huno ana vahetmina amanage huno
zamazerikori'ne, Nagafare Bali havi anumzana ahora nekaze?
Bali havi anumza aza hu'za nehazo? Bali havi anumzama
ahomake'naza vahera nanterama komatinigeta fri vagaregahaze.
Hagi agra anumzama mani'nenu'no'a, agra'a ahora kegahie.
Na'ankure agrite'ma kresramnama nevaza ita tagana vazitre'naze.
32 E'ina hige'za ana knazupa Gidioni agi'a Jerub-bali'e hu'za

antemi'naze. Hagi ana agimofo aguagesa'amo'a amana hu'ne, atregeno Bali anumzamo'a agra'a ahora keno, na'ankure agri Kresramana vu ita tagana vazitre'ne. **33** Hagi Midieni vahe'ma, Ameleki vahe'ma zagehanati kazigati vahe'ma hu'za, Israeli vahe ha'huzamante'naku erimago hute'za Jodani tina takahe'za Jezril agupofi seli nona eme ki'naze. **34** Hianagi Ra Anumzamofo Avamu'mo Gidionintera eman'i'negeno ufena rege'za, Abieseli naga'mo'za hate avaririza vu'naku e'naze. **35** Hagi Manasema, Aserima, Zebulonima, Naftali nagateganena kea atrezamantage'za ana makamo'za ha'ma huga vahetamina agritega emareri'naze. **36** Hagi anante Gidioni'a amanage huno Ra Anumzamofona asami'ne, Kagrama huhamprinante'nana kante'ma tamage hunka nagri'ma naza hanankena ha'ma hu'na Israeli vahe'ma zamaguvazinaku'ma hanugenka, **37** amana huge'na ka'neno. Meni kenagera witima neharaza kumapina sipisipi afu azokara antegahue. Hanki tamage hunkama naza hananke'na ha'ma hu'na Israeli vahe'ma zamagu'vazinaku hanugenka, ana sipisipi afu azokatera atregeno atara runentena, mopamo'a hagege hu'nena ka'neno. Nanterama ke'nuama sipisipi afu azokate'ma ata'ma ahenenigeno mopamo'ma hagagema hunenige'na, huhamprinante'nana kante antenka naza hunka Israeli vahera zamagu vazigahane hu'na antahi'neno. **38** Hagi Gidioni'ma nanterama otino ome keana anaza fore hu'negeno ke'ne. Ana Sipisipi afu azokara omerino tatiana, timo'a mago zuompa avite'ne. **39** Anante Gidioni'a Anumzamofona amanage huno asami'ne, Mago'ene kantahige'za huanki krimpa aheonanto. Ete ama ana sipisipi afu azokara ome antegahuanki, mopafinke ata kora runentenko, sipisipi afu azokatera ruontenke'na ka'neno. **40** Anage higeno Ra Anumzamo'a ana kenagera higeno

mopafina ata kora runte'ne. Hianagi ana sipisipi afu azokamo'a hagage huno me'ne.

7 Hagi anante Jerubali'ene (Gidioni mago agi'e) sondia vahe'anena nanterame oti'za Harodi tinkenafi seli nona ome ki'naze. Hagi Midieni sondia vahe'mo'za noti kaziga, Morea agonamofo agafima me'nea agupofi seli nona ome ki'naze. **2** Hagi Ra Anumzamo'a Gidioninkura amanage huno asami'ne, Tamatre'nugeta rama'a sondia vahe'mota Midieni vahera hara huozamantegahaze. Ana maka'motama ha'ma hanazana, Israeli vahe'mo'za tagra hankavere Midieni vahera zamaheta taguravazune hu'za zamavufa ra hugahaze. **3** E'ina hu'negu menina huama hunka mika vahera zamasamio, izago koroma hunka kahirahima resimoka, Giliati agona atrenka nontega vuohunka huzamanto. E'inage higeno 22 tauseni'a vahe'mo'za atre'za nontega vazageno, **4** 10 tauseni'age mani'naze. Hianagi Ra Anumzamo'a amanage huno Gidionina asami'ne, Zahufa rama'a vahe kagri'enena mani'naze. Hagi ana maka zamavarenka timpi uramige'na rezamahe'na nege'na, e'i'a vahe vugahie hu'nama hanua vaheke vugahazanki, e'i'a vahera ovugahazema hanua vahe'mo'za kagri'enena ovugahaze. **5** Anage higeno Gidioni'a ana maka sondia vahera zamavareno timpi uramigeno, Ra Anumzamo'a amanage huno Gidionina asami'ne, Kramo'ma nehiaza hu'zama zamazantet'i'ma tima ankehi'za zamagefunareti'ma nesaza vahe kevua mago kaziga zamavarentenka, zamarena re'za pri'ma hu'za tima enevanifinti'ma nesaza vahera mago kaziga zamavarento. **6** Hagi ana'ma higeno'a 300'age vahe'mo'zage zamazantetira tina ankehi'za kramo'ma nehiaza hu'za zamagefunaretira ne'naze. Hianagi ana maka vahe'mo'za zamarenare'za pri hu'za tima

enevifinti ne'haze. 7 Hagi anante Ra Anumzamo'a amanage huno Gidionina asami'ne, Ama 300'a nagapi kaza hu'na Midieni vahera avre kazampi anta'nena hara hu zamagateregahane. Hanki mago'a vahera huzamantenge'za nozmirega viho. 8 Anagema higeno'a Gidioni'a ruga'a sondia vahe'mokizmi nanazantamine ufentaminena e'nerino huzmantenge'za seli nozmirega nevazageno, 300'a vaheke zamavarege'za agri'enena vu'naze. Hagi Midieni vahe'mokizmi seli nonkumara fenkamu agupofi me'nege'za, Gidioni naga'mo'za anagamu emani'haze. 9 Hagi ana kenagera Ra Anumzamo'a amanage huno Gidionina asami'ne, Otinka Midieni vahe seli nonkumapi uraminka hara ome huzmanto! Na'ankure Nagra ko Midieni vahera kagri kazampi zamavarente'noe. 10 Hianagi fenamu anampima urami zanku'ma koro'ma hanunka, eri'za vaheka'a Pura'ene uraminka, 11 na'aneoma hanazankea antahitenka e'ire hankavea erinka hara huzmantegahane. Anagema higeno'a Gidioni'a eri'za vahe'a Purana nevreno uramino ha' vahe'amo'za seli nonku'ma kiza mani'naza kuma atuparega vu'na'e. 12 Hagi Midieni sondia vaheki, Ameleki sondia vaheki, zage hanati kazigati sondia vaheki hu'za tusi kenutamimo agofetu agofetu huno mani'negeno hampriga osiakna hu'za ana vahe'mo'za ana agupofina emani avite'haze. Hagi tusi kemori afutami avre'za e'nazankino ana kemoli afutamimo'za hagerinkenafi kasepankna hu'za ana agupoa mani avite'haze. 13 Hagi Gidioni'ma eramino'ma antahiana, mago ne'mo'a ava'na ke'nea nanekea rone'amofona amanage huno nesamigeno antahi'ne. Avana kogeno ana ava'nafina mago bali ragareti tro hu'nea bretimo'a zahe'zahe huno eramino seli nona eme rutagana'vazitregeno, ana nomo'a mopafi kriteno mase'nege'na ke'noe. 14 Ana ava'na kema nentahino'a

rone'amo'a amanage hu'ne, e'i mago'a vahe enaku higenka
ava'na onke'nananki, Israeli ne' Joasi nemofo Gidioni bainati
kazinkomo enaku higenka kanankino, Anumzamo'a mika Midieni
vahe'motane, tagri'ma eme tazama hanaza vahe'enena Gidioni
azampi tavrente'ne. **15** Hagi ana ava'na kene, ana ava'nama
eri ama hianke'ma Gidioni'ma nentahino'a, Ra Anumzamofo
avuga renareno mono hunte'ne. Ana huteno ete Israeli vahe
seli nonkumatega vuno amanage huno ome kezatine, otiho!
Na'ankure Ra Anumzamo'a ko Midieni sondia vahetamina
tagri tazampi hago zamavarente'ne. **16** Hagi Gidioni'a ana
300'a vahera 3'afi refko huno magoke magoke vahera ufmare
pazive'ene mopa kavofi tavira anteno zamatere hu'ne. **17**
Ana huteno amanage huno zamasami'ne, Tamavua nagrite
keteta mani'nenke'na, seli nonkumamofo atuparega e'nama
na'anoma hanuazana ana zanke'za hiho. **18** Nagri'enema vanaza
naga'ene ufema re'nunketa, seli non kuma'ma avazagi'gagi'naza
vahe'mota ufenetra amanage huta ke'zana atiho. Tagra Ra
Anumzamofo vahe'ene Gidioni vahe mani'none huta hiho. **19**
Hagi kenage amu'nona Midieni vahe seli nonkumate'ma kvama
hu'naza sondia vahe'mo'za vazageno, kasefa vahe'ma eme
zamazama hazageno'a, Gidioni'ene 100'a vahe'enena Midieni
vahe seli nonku'ma atuparega e'naze. Anante antrihaza'za
hu'za magoka ufenetra nere'za zamazampima eri'naza mopa
kavoa rupraro vazi'naze. **20** Ana'ma hazage'za ana maka
3'a kevuma hu'za mani'naza vahe'mo'za, ana zanke hu'naze.
Hoga'a zamazampina tavi azeneri'za, tamaga zamazampina
ufema resaza pazive eri'ne'za amanage hu'za kezati'naze, Ra
Anumzamofone Gidionigizni bainati kazinknone! **21** Anagema
hu'za ke'zama neti'za, oti'za manigagine'za nezmagage'za

ana seli nonkumapima mase'naza Midieni vahe'mo'za oti'za
tusi zamanogu nehu'za, krafage hu'za koro fre'naze. **22** Hagi
300'a Israeli vahe'mo'zama ufema razageno'a Midieni vahe
antahintahia Ra Anumzamo'a zamazeri savari hige'za, zamagra
zamagra bainati kazinkno ha' hu'naze. Hagi ana ha'ma hazafima
hazenkema e'ori'za sondia vahe'mo'za fre'za Bet-Sita kumate
Zerera kaziga Abel-mehola mopa atumpare Tabati kuma tavaonte
vu'naze. **23** Hagi Gidioni'a Israeli vahepintira Naftali naga'ma,
Aseli naga'ma, Manase naga'ma huno kehige'za e'za emeri mago
hute'za, Midieni vahera zamarotago hu'naze. **24** Hagi Gidioni'a
Efraemi naga'ma agona mopafima nemaniza naga'enenkura
amanage huno kea atrezmante'ne, eramita Midieni vahe'mo'zama
Jodani timo'ma kahesama hu'nere'ma Bet-Bara kumate'ma
taka nehazare eme zamavagta huta hara eme huzmanteho.
Anagema higeno'a Efraemi naga'mo'za anama hiaza hu'naze.
25 Hagi ana nehu'za tare Midieni kva netrena Orebine Zibi
kizania zanazeri'za, Orebina Oreb havere ahenefriza, Zibina
Zibi kumate wainima regatati'ma nehazafi ahefri'naze. Ana'ma
hute'za Midieni vahera zamarotgo hazage'za nefrage'za ana
netremokizni zanasenia eri'za Gidioni'ma mani'nerega Jodani
tina takahē'za kantu kaziga vu'naze.

8 Anante Efraemi naga'mo'za Gidionina amanage hu'za
antahige'naze, Nagafare amanahu kavukavara hurantane?
Nahigenka esera hurantanketa Midieni vahe'enena hara ome
osu'none? hu'za Gidioni'enena tusi fravazi'naze. **2** Hianagi
Gidioni'a amanage huno kenona huzmante'ne, Tamagrama
hu'naza zama negeta, nagrama hu'noa zama kesazana,
nagra naza hu'nofi keho? Efraemi naga'mo'zama krepi
ragama otre'zama tagi vagarezamo knarera hu'nefi? Abiesa

naga'mo'zama ontagi hozafinti ana maka krepi ragama tagi
vagare'zamo knarera hu'neo? 3 Anumzamo'a Midieni sondia
kva netrena Orebine Zebanena tamazampi zanavrentegeta
zanahe'naze. Nagra tamagrama hazazana osu'noe. Anagema
hige'za frama vazinentazaretira kea tagane'naze. 4 Hagi
Gidioni'ene 300'a vahe'mo'zanena Jodani tina takahe'za
zamasafera nehianagi, ha' vahezmia zamarotago hu'naze. 5
Hagi Sukoti kumate'ma ne-eno'a Gidioni'a amanage huno ana
kumate kva vahetmina zamantahige'ne. Muse huramantoanki,
Nagri'enema aza vahetamina bretia zaminke'za neho. Na'ankure
zamagra tusi zamasafeku nehu'za, nagranena neazage'na
nagra Midieni kini netre Zebane Zalmunakizni zanaratago
hu'na neoe. 6 Hianagi Sukoti kumate kva vahe'mo'za
amanage hu'za kenona asmi'naze, Zebane Zalmunanema
zanazeritesanketa sondia vaheka'a ne'zana zamigahune. 7 Ana
kema hazageno'a Gidioni'a anage hu'ne, Ra Anumzamo'ma
Zebane Zalmunanema nazampi'ma znavrentenama zanahesu'na,
ka'ma kopima nemanea ave'ave nofinu, sefura eme tami'na
tamavufa eri hazrohazru hugahue. 8 Hagi anantetira Penieli
kumate marerino vuno ana hukna kege ana kumapi vahete
ome hu'ne. Hianagi Sukoti kumate vahe'mo'zama hu'nazankna
ke hu'naze. 9 Hagi anagema hazageno'a Gidioni'a Penieli
kumate vahera amanage huno zamasami'ne, nagrama ha'ma
ome huzamagaterete'na esu'na, ama za'za nona eme tapage
hutregahue. 10 Hagi Seba'ene Zalmunakea 15 tauseni'a sondia
vahe'ene Karkori kumapi ufre'naze. Hagi eri mago'ma hu'naza
sondia vahe'ma zamahe hanama hige'zama mani'nazama'e.
Na'ankure 120 tauseni'a kazinteti'ma ha'ma nehaza vahera ko
zamahe 'naze. 11 Hagi Gidioni'a marerino Nobane Jokbeha

kumatrema me'nea kantega rugagino Midieni sondia vahe'mo'za
ha' vahera omegahaze hu'za ontahi'za mani'nazageno, antri
hazaza huno hara ome huzamante'ne. **12** Hagi anama higeno'a,
Midieni kini netre Zeba'ene Zalmunakea freke vakeno, Gidioni'a
zanarotago huno ome zanazerigeno, ana kini netremofo sondia
vahe'mo'za tusi zamagogogu hu'haze. **13** Hagi Joasi nemofo
Gidionima ha'ma huvagareteno'a ana kumara atreno, Heresi
agonama me'neregama e'nea kamofo avaririno e'ne. **14**
E'inama huno ne-eno'a mago Sukoti kumate nehaza ne'eme
azerino antahigegeno, Sukoti kumate mani'naza kva vahetmina
77ni'a kva vahe'mofo zamagia Gidionina kremi'ne. **15** Ana'ma
higeno'a Gidioni'a Sukoti kumate eno amanage huno kva
vahetmina eme zamasami'ne, Keho, Zebane Zalmunanena
ama zanazer'i'na oe, amare'ma enevu'na sondia vahe'ni'a
breti zaminke'za neho hu'nama nehugeta, nazanavanke huta
Zebane Zalbunane kazampima zanazerite'nanketa henka sondia
vaheka'a bretia zamigahune hu'haze. **16** Hagi Gidioni'ma
anagema nehuno'a, ka'ma kopima me'nea ave'ave nofitami
erino ana kumate kva vahetamina anagema hu'naza zantera
sefu zami'ne. **17** Ana nehuno Peniel kumate mani'n'e'zama
kuma'ma kegava nehaza za'za nozmia taganavazinetreno
ana rankumapi vahera zamahe fri vagare'ne. **18** Ana huteno
Gidioni'a Zebane Zalbunakiznia zanantahigeno, Tabor kumate'ma
zamahe'na'a vahetmina, inankna vahe zamahe'na'e? Huno
zanantahigegeke amanage hu'na'e, Kagri kavugosagna vahe
zamahe'no'e. Ana maka'mo'za kini ne'mofo nemofo avugosagna
hu'haze. **19** Anagema hakeno'a anante Gidioni'a amanage hu'ne,
E'i nagri nenarera mofavrerami zamahe'na'e. Tamage mani'nea
Ra Anumzamofo avufima tanasamisuana, tanagrama ana

nafuhe'ima ozamahena'asina menina tanagrira ontanahosine.

20 Anage nehuno zage mofavre'a Jetarinkura huno, otinka zanahegeke fri'o! Hianagi ana nehzamo'a otinora ozanahe'ne. Na'ankure agra osi mofavregino, koro hu'ne. **21** Anage higeno Zeba'ene Zalmunakea amanage huke Gidionina asmi'na'e, Vema mani'nesunka kagraka'a otinka tahe frio. Anagema hakeno'a, Gidioni'a otino ana netrena zanahe nefrino, kemolizinimofo zananankente'ma hu'znante'na'a avasase'zana eri'ne. **22** Anama higeno'a Israeli vahe'mo'za amanage hu'za Gidioninkura hu'naze, Kagrane, negamofo'ene negageho'enena kvati mani'neta kegava huranteho. Na'ankure kagra Midieni vahe zamazampinti tagu'vazi'ne. **23** Hianagi Gidioni'a amanage huno kenona huzmante'ne, Nagra kvatimia mani'nena kegava huoramantegosue. Ana hukna hu'za mofavrenimo'za kvatimia mani'za kegava huoramantegahaze. Hagi Ra Anumzamoke kvatimia mani'neno kegava huramantegahie. **24** Hianagi magoke zanku tamantahigegahue. Ha' vahe'mo'zama zamagesafima renentaza golire rinima zamaheta eri'nazana mago magomota nemitere hoho. Na'ankure zamagra Ismaeli nagaki'za zamagesafi golire rini rente vahe mani'nazageno hu'ne. **25** Anagema higeno'a, amanage hu'za kenona hunte'naze. Amane tagra kamigahune, hu'za nehu'za nakre ku eri'za tafera nehu'za, korire riniramina ana makamo'za eme atre'naze. **26** Hagi ana golire rinima eritruma hazageno'a kna'amo'a 25'a kilo hu'ne. Hagi e'i ana zankera eritru osu'nazanki, pasesuma, agesafi avasesezama, Midieni kini vahe'mo'ma nevasia fitunke za'za kukenama, kemorimofo zmanankempima hunentaza avasase zanena anampinke emeritru hu'naze. **27** Hagi Gidioni'a ana koria erino rankuma'are Ofra viazamo pristi vahe'mo'zama zamimizare'ma

nentaniza avasese'za ome tro huntenegeno, monko a'nemo'za hazaza hu'za Israeli vahe'mo'za Ra Anumzamofona zamage'na hunemi'za, ana zante agafa hu'za monora hunte'naze. Gidionine naga'amofontera anazamo'a mago krifugna huno zamazeri'ne.

28 Hagi Israeli vahe'mo'za Midieni vahera zamahe'za zamazeri havizanfta hazageno, mago'anena hara eme huozmante'naze.

E'ina hazageno Gidioni'ma kvama mani'nea knafina Israeli vahe'mo'za 40'a kafua hara osu amne fru hu'za mani'naze.

29 Hagi Joasi nemofo Gidioni'a ete kuma'arega vu'ne. **30** Hagi Gidioni'a rama'a a'nane zmante'negu 70'a ne'mofavrerami zamante'ne. **31** Hagi Sekemu kumate nemania a'amo'a ne'mofavre antegeno, agi'a Abimeleki'e huno ante'ne. **32** Hagi Joasi nemofo Gidioni'a ozafa omereno frigeno, nefo Joasima asente'naza matipi Abiesa naga nofimofo mopafi Ofra kumate asente'naze. **33** Hagi Gidioni'ma fritege'za, Israeli vahe'mo'za ete mago'ane Ra Anumzamofona zamefi hunemiza Bal-Beriti havi anumza tro hunente'za, Bali havi anumzante monora hunte'naze.

34 Ana nehu'za Israeli vahe'mo'za Ra Anumzana zamagri Anumzamo'ma ha' vahezimimo'za mika kampinti e'za ha'ma eme hunezmantegeno zamagu'ma vazi'nea Ra Anumzana zamage akaninte'naze. **35** Hanki Gidioni'ma knare'zama huzamante'nea zankura Israeli vahe'mo'za agri naga'mofona humusenkea hu'za susu huozamante'naze.

9 Hagi mago kna Gidioni nemofo Abimeleki'a anokahe'mofo ome zamagenaku Sekemu vuno, amanage huno anokahemofone nerera naga'enena zamasami'ne. **2** Mika Sekemu kumate kva vahetamima mani'naza vahe'motafi ama nanekea nehue, Gidionina ana mika 70'a mofavre'aramimo kegava huramante'nie nehazafi, magokemo kegava huramantenigeno knarer hugahie

huta nehaze? Tamagra tamagesa antahiho, nagara tamagri kora mani'noe. 3 E'inage hige'za Abimeleki anokahemo'za agri agi eri'za maka Sekemu kumapima mani'naza vahetega kea atrazageno vuno eno hu'ne. Hagi ana kumapi vahe'mo'zama ana nanekema nentahiza Abimeleki'a tagri kora mani'ne nehu'za agri kaziga mani'naze. 4 Anama nehu'za Bal-Berit havi anumzamofo mono nompintira 70'a silva zago Abimelekina erimi'naze. Hagi ana zagoa Abimeleki'a erino hazenke vahetami mi'za huzmanteno zamavarege'za agri amage ante'za avariri'za vu'haze. 5 Hagi Abimeleki'a nefä kumate Ofra vuno 70'a Jerubali ne' mofavre zagaramina magoke have agofetu ome zamahe'ne. Hianagi amite'na ne'amo Jotamu'a koro freno ome fraki'ne. 6 Hagi anama higeno'a Sekemu kumateti'ene Beth-Milo kumateti kva vahe'mo'za Sekemu kumate vu'za, oki zafa agafare'ma zafa retruma rente'ne'za mono'ma hunentazare omeri atru hute'za, Abimelekina kinia azeri oti'naze. 7 Hagi Jotamu'ma anazama haza zmagenkema nentahino'a, Gerisimi agonare marerino amanage huno kezana ati'ne. Sekemu kumate kva vahe'mota keni'a antahiho. Anumzamo'ma ketimima antahinie hanuta nagri kea antahiho. 8 Hagi mago zupa zafamo'za kinizmi azeri otinaku amanage hu'naze. Olivi zafamoka kiniti mani'enka kegava huranto hu'za hu'naze! 9 Hianagi olivi zafamo'a anage huno zamasami'ne, Nagra olivi masavema tro'ma hute'na Anumzane vahe'mokizmi nezamuge'za musema nehaza eri'zana atre'na amne oti'nena, vuge ege nehu'na zafamota naza atrezamante vava hanuo? 10 Anagema hige'za zafamo'za amanage hu'za fiki zafagura hu'naze, Kiniti mani'enka kegava huranto! 11 Hianagi fiki zafamo'a anage huno zamasami'ne, Nagra haganentake zafaragama renentoa eri'zana atre'na amne

oti'nena vuge ege nehu'na, zafamota nazana atreramante vava hanuo? **12** Hige'za zafamo'za amanage hu'za waininofikura hu'naze, Waini nofi'moka kiniti mani'enka kegava huranto! **13** Hianagi waini nofi'mo'a anage hu'ne, Nagra kasefa waini rgama trohu'na Anumzane vahe'mofonema nezamua eri'za atre'na amne oti'nena vuge ege nehu'na, naza atreramante vava hanuo? **14** Hagi anagema hige'za ave'ave nofikura amanage hu'naze, Ave'ave nofimoka kiniti mani'enka kegava huranto! **15** Anage'ma hu'za antahigazageno'a, ave'ave nofi'mo'a amanage huno kenona hu'ne, Tamagema huta tamagu'areti'ma kinima nazeri otisuta, eta nagri turunampinka emanaho. Hagi ana'ma osanazana ana ave'ave trazampinti tevemo'a eno Lebanonisida zafaramina teno erihana hugahie! **16** Anante Jotamu'a mago'ane amanage huno hu'ne, Abimelekima kinima azeri oti'zana tamagra knare'za huta azeri onetizo? Hagi Jerubali'ene naga'amo'zanena tamagrira knare'za hu'za tamaza hu'nazanagi, tamagra knare'za huntazafi haviza huntaze? **17** Na'ankure nenfa Jerubali'a agra avufgagura ontahi hara huno Midieni vahe zamazampinti tamagu'vazi'ne. **18** Hianagi menina nenfane naga'anena hara rezamanteta 70'a ne' mofavreramima'a magoke have agofetu zamahe vagare'naze. Ana nehuta eri'za a'amofo mofavrea Abimelekina Sekemu kinia azeri oti'naze. Na'ankure agra tamagripinti fore hu'negu anara hu'naze. **19** Hagi menima tamagrama hazavu'avamo'a Jerubaline naga'are'enema knare'ma huno fatgoma hu'ne'nigeta, Abimeleki'enena musena nehinkeno, agra'enena musena tamagri'enena hino. **20** Hianagi tamagrama knare huno fatgo osu' avu'ava'ma hu'nena zana Abimelekimpinti tevemo'a atiramino Sekemu kumate kva vahe'ene Bet-Milo kumate kva vahetmina tehana nehanigeno,

Sekemu kumate kva vahe'tamimpinti'ene Bet-Milo kumate kva
vahepinti tevemo'a atiramino Abimelekina tegahie. **21** Hagi
Jotamu'ma anagema huteno'a, koro freno Beri kumate umani'ne.
Na'ankure Abimeleki'ma ahezanku koro freno vu'ne. **22** Ana'ma
hutegen'o'a Abimeleki'a 3'a kafu Israeli vahe kinia mani'ne.
23 Hagi Anumzamo'a havi avamu huntegeno Abimelekine
Sekemu kumate kva vahe'mofo amu'nompi emaninege'za,
Sekemu kumate kva vahe'mo'za Abimelekina azeri amuho
hu'naze. **24** Anumzamo'a knazana atregeno Abimelekinte'ene
Sekemu kumate kva vahetaminte'ene e'ne. Na'ankure Sekemu
kumate kva vahe'mo'za Abimelekina aza hazageno, Gidionina
afuhe'ima 70'a ne'mofavre'zaga zamahenegu anara hu'ne. **25**
Hagi Sekemu kumate kva vahe'mo'za mago'a vahera agonafi
Abimelekima esigura kankafo ome ante'za mani'ne'za, ami'mi
hu'za kante'ma enevaza vahera keonkezazmi zamahe'za
hanare'naze. Hianagi anazama haza nanekea Abimelekina
eme asami'naze. **26** Hagi mago zupa Ebedi nemofo Gali'a
afu'aganahe'zane Sekemu kumate vu'ne. E'inama higeno'a
Sekemu kumate kva vahe'mo'za Galina antahimi'za amage
ante'naze. **27** Hagi ne'zama vasage knare'ma musema hu knafina
Sekemu vahe'mo'za waini raga tagi'za rerati'za tima'a eri'za havi
anumzazmimofo mono nompi vu'za, ana tine ne'zanena nene'za
Abimelekina huhaviza hunte'naze. **28** Hagi Ebedi nemofo Gali'a
amanage hu'ne, Sekemu vahera Hamori tazeri fore hu'ne. Hagi
Abimeleki'a agra inanknahu ne' mani'nesigeta tagra Sekemu
vahe'mota agri kvafina manigahune? Hagi Abimeleki'a Jeru-
Bali nemofo manigeno eri'za vahe'a Zebuli mani'ne. Tagra
Sekemu kumamofo nefä, Hamori mofavrerami mani'nonanki,
nagafare Abimeleki eri'za vahera manigahune? **29** Hagi nagrama

ama Sekemu vahe'ma kegavama huresina Abimelekina ahe kasonepe'na amanage hu'na huntegahue, sondia vaheka'a ome avrenka ha'eme hunanto hu'na huresine. 30 Hianagi ana rankumate kva ne' Zebuli'ma, Ebedi nemofo Gali nanekema nentahino'a, tusi arimpa ahe'ne. 31 Anama higeno'a eri'za vahe oku'a huzmantege'za vu'za anage hu'za Abimelekina ome asmi'naze, Ebedi nemofo Gali'a afu'aganahezane eno, Sekemu kumate vahera ha'huzamantenogu zamarimpa eme nere. 32 E'ina hu'negu sondia vaheka'ane kenage eta kankafona eme hu'enkeno, 33 nanterama rumasama huno zagema hanati'nigeta tamagareta ana kumapina vinkeno, ana kumapinti vahe'ma ha'ma huramantenaku'ma esazana anante tamagrama tamagesama antahisaza zana hugahaze. 34 Hagi Abimeleki'a ana kenageke sondia vahe'a 4'afi refko huno Sekemu kumara avazagigagi'ne. 35 Hagi nanterama Ebedi nemofo Galima kuma'mofo kahante uoma'netige'za, Abimeleki'ene sondia vahe'amo'zama fraki'nazafintira atre'za e'naze. 36 Hagi Gali'ma ana vahe'tmima nezmageno'a Zebulinkura amanage hu'ne, Agonaregatira vahera eneramizanki ko. Anage'ma higeno'a Zebuli'a amanage huno kenona hu'ne, amne agonaramimofo amema'aramimo vahe knara nehie. 37 Hianagi Gali'a mago'ane amanage huno hu'ne, agonaregatira vahe'tmi eneramizanki ko. Hagi mago'a vahera zamavune vahe'ma mani'ne'za henkama fore'ma hania zanku'ma, havi kasnampa kema nehaza oki zafa agafama me'nea kantegati neaze. 38 Anante Zebuli'a otino Galina amanage huno asami'ne, ina kagipinti kagra ama ana kea hu'nane. Iza'e Abimeleki'a, agra iza mani'nenige'na nagra agri eri'za vahera manigahue? E'inage hunka huhavizama hu'nana vaheki vunka hara ome huzamanto.

39 Hagi anagema higeno'a Gali'a Sekemu kumate vahera nezamavreno, agra vugota huno Abimeleki naga'enena hara ome hu'ne. **40** Hianagi Abimeleki sondia vahe'mo'za Galina arotago nehu'za, vahera ome zamahetre eme zamahetre hu'za rankumamofo kahante ehanati'naze. **41** Ana huteno Abimeleki'a Aruma kumate umanigeno, Zebuli'a Galine afu'aganahe'ina zamahe kasopeno agra Sekemu kumatera umani'ne. **42** Hagi hanima huno ko'matigeno'a, Sekemu kumate vahe'mo'za hozafi vu'naku atirami'za vazageno, Abimelekina mago'a vahe'mo'za ome asami'naze. **43** Abimeleki'ma ana nanekema nentahino'a, 3'afi vahe'a refko huno kankafona ante'ne. Hagi Abimeleki'ma kegeno'ma ana ha' vahetmima kumapinti'ma atirami'za azageno'a, agrane naga'amo'zama framaki'nazafintira oti'za zamahe'naze. **44** Hagi 3'a kevu vahepintira Abimeleki'a mago kevua avreno kuma'mofo kafante ome ankanire'za mani'nazageno, tare kevu vahe'mo'za megij'ama mani'naza ha' vahera zamahe vagare'naze. **45** Hagi Abimeleki'a ana kumapi vahera ana zage ferupinke hara huno zamahe hana nehuno, ana kumara tapage huno eri pehe nehuno, hage atinteno vano hu'ne. **46** Hagi zaza nompima mani'ne'za kuma kegavama nehaza kva vahe'mo'za Abimeleki'ma ha'ma eme huzamantea nanekema nentahi'za, ana nanteranke Bal-Beriti havi anumzamofo mono nomofo vihufi ufre'za mani'naze. **47** Ana'ma hazageno'a mago'a vahe'mo'za Abimelekina eme asami'za, Sekemu kumate'ma za'za nompima manine'za kuma'ma kegavama nehaza kva vahe'mo'za maka magopi eritru hu'za mani'naze hu'za asami'naze. **48** Hagi Abimeleki'a sondia vahe'a zamavareno Zalmoni agonafi mareriteno, sa'ume erino zafa azankuna'aramina antagi atreno afunte e'nerino, zamavarenoma vu'nea vahetmina amanage huno

zamasami'ne, Ame'ama huta amama huaza hiho. 49 Anagema higeno'a, ana maka vahe'mo'za ana zafa azankunatmina antagi'za Sekemu vahetmimofo vihurera retrure kagite'za teve tagintazageno ana vihufima mani'naza vahe'ene zaza nonte'ma kegavama nehaza vahetaminena miko 1tauseni'a venenene a'nenena fri'naze. 50 Hagi anama huteno'a Abimeleki'a Tebezi kumate vuno ana kumapi vahera hara ome huzamanteno, ana kumara zamaheno hanare'ne. 51 Hianagi ana kumapi kva vahe'mo'za vihufinke ufrevgare'za ufraki'naze. Ana vihua zaza no ki'za mareri'naza nomofo agofetu fre'za umani'naze. 52 Hagi Abimeleki'a ha' hunaku ana zaza nonte eno, ana nomofo kahante teve taginte'za nehigeno, 53 mago a'mo'a witi neharaza havenkno atregeno tamino asenia ru prarovazino ahetre'ne. 54 Anama higeno'a Abimeleki'a amanage huno hanko'ama erinentea nehaza nera asami'ne, a'ne'mo ahe frine hu'za hanagi, ame hunka kazinka'a erinka nahe frio, huno higeno ana nehzamo'a kazi regeno fri'ne. 55 Abimeleki'ma frige'za kazana hige'za, Israeli vahe'mo'za atre'za nozimirega vu'naze. 56 Hagi Abimeleki'ma kefo avu'ava'ma huno 70'a afu'aganahe'ima zamahe frino nefama agima eri haviza hu'nea zantera, e'ina hukna huno Anumzamo'a nona huno azeri havizana hu'ne. 57 Ana hukna huno Sekumu kumate vahe'mo'zama kefozama hu'naza zantera Anumzamo'a nona huzmante'ne. E'inama hu'neana Jerubali nemofo Jotamu'ma zamazeri haviza hu kasnampa ke'ma huno kazusima huzmante'nea zamo'a zamagrite efore hu'ne.

10 Hagi Abimeleki'ma fritegeno'a Pua nemofo Tola'a Dodo negehokino Israeli vahe'mokizmi kva vahe efore huno hara huno zamagu'vazine. Hagi Tola'a Isaka nagapinti fore hu'neankino, Efraemi agona moparega Samiri rankumate mani'ne. 2 Hagi

agra 23'a kafufi Israeli vahe'mofo kva mani'neno kezamia antahino refko huzamante'ne. Ana huteno frige'za Samir kumate asente'naze. 3 Hagi Tola'ma fritegeno'a Giliatiti ne' Jairi'a 22'a kafufi Israeli vahe kva mani'neno, ke'zamia antahino refko huzmante'ne. 4 Jairi'a 30'a ne' mofavrerami zmante'neankiza ana mofavreramimo'za 30'a donki agumpi maniza vano nehu'za, Giliati kaziga 30'a kumatami kegava hu'nazankino, ana kumatmimofo agi'a Havot-Jaire hu'za agi'a ante'nazankino, meninena ana zamagige nehaze. 5 Hagi Jairi'ma frige'za Kamoni kumate asente'naze. 6 Hagi Israeli vahe'mo'za mago'ane Ra Anumzamofo avurera kefo zamavuzmava hu'za, Baline Astaroti havi anumzante'ene, Siria vahe havi anumzante'ene, Saidoni vahe havi anumzante'ene, Moapu vahe havi anumzante'ene, Amoni vahe havi anumzante'ene, Filistia vahe havi anumzante monora hunte'naze. Ana nehu'za Ra Anumzamofona zamefi hunemi'za, eri'zana eri onte'naze. 7 Ana'ma hazageno'a Ra Anumzamo'a tusi rimpa ahenezmanteno, Amoni vahe'mokizmi zamazampine, Filistia vahe'mokizmi zamazampi zamavarente'ne. 8 Hagi Giliati kazigama Amori vahe mopafi Jodanima nemaniza Israeli vahera, 18ni'a kafufi tusi'a knaza zami'za zamazeri havizantfa hu'naze. 9 Hagi Amoni vahe'mo'za Jodani tina takahē'za Juda naga'ma, Benzameni naga'ma Efraemi nagara hara ome huzamantege'za Israeli vahe'mo'za tusi antahintahi nehu'za rama'a knazampi mani'naze. 10 Ana'ma hige'za Israeli vahe'mo'za amanage hu'za Ra Anumzamofontega krafagea hu'naze. Tagra kumi hu'none, na'ankure Anumzamoka tagra tamefi hunegamita, Bali havi anumzamofo eri'zana erinezmanteta monora hunte'none. 11 Hagi anagema hazageno'a Ra Anumzamo'a amanage huno kenona hu'ne, Isipi vahe'ene, Amori vahe'ene, Amoni vahe'ene

Filistia vahe zamazampintira Nagra tamagura ovazi'nofi? **12** Hagi anahukna huna Saidoni vahe'mo'zane Ameleki vahe'mo'zane Maoni vahe'mo'zama ha'ma huramante'za tamazeri havizama nehazagetama krafama hazage'na, Nagra tamaza hu'na tamaguravazi'noe. **13** Hianagi tamagra natreta tamefi hunenamita, ru anumzamofo eri'za erinenteta monora hunte'naze. E'ina hu'negu menina tamagura ovazigahue. **14** Hagi tamagra'ama anumzantie hutama huhamprinaza anumzante vuta krafa ome hinkeno, knazantimifintira tamaza huno tamaguravazino. **15** Hianagi Israeli vahe'mo'za amanage hu'za Ra Anumzamofona asami'naze, tagra kumi hu'nonanki nazano hurante'naku'ma hananazana amne hurantegahane. Hianagi muse hugantonanki, ha' vahetimofo zamazampintira menina tagu'vazinka taza huo. **16** Anage nehu'za ru anumzantminte'ma eri'zama erinente'za mono'ma nehazazana atre'za Ra Anumzamofonte monora hunte'naze. Hagi ana'ma hazageno'a, Ra Anumzamo'a Israeli vahe'mo'zama knama eri'naza zankura tusi asunku hu'ne. **17** Ana'ma hutegen'o'a Amoni vahe'mo'za seli nona Giliati eme kizageno Israeli vahe'mo'za Mispa kumate emeri tru hu'za seli nona ki'naze. **18** Hagi Giliati kumate kva vahe'mo'za zamagra zamagra amanage hu'za hugantugama hu'naze, iza'o ese'ma ha'ma agafama huno Amoni vahe'ma ha'ma huzamantesia ne'mo, Giliati vahe'mofo kva manigahie.

11 Hagi Jepta'a Giliati kumatera tusi'a hankavenentake ha' ne' mani'ne. Hianagi agra monko a'mofo mofavregino Giliati nemofo'e. **2** Hagi Gilieti nenaro'a rama'a ne' mofavrerami ante'ne. Hagi ana mofavreramimo'za rama nehu'za, Jeptankura amanage hu'naze, ru a'mofo mofavre mani'nanankinka nerafa zana erisanti oharegosane, nehu'za mopazmifintira ahegasopetre'naze. **3**

E'inama hazageno'a Jepta'a afu'aganahe'ina nezamatreno, freno Tobu kumate umani'nne. Ana kumate'ma unemanigeno'a hazenkema eri hakarema nehaza vahe'mo'za agrane eme tragote'za vano hu'naze. 4 Hagi mago'a kna evutegeno Amoni vahe'mo'za Israeli vahera agafa hu'za hara huzmante'naze. 5 Hagi Amoni vahe'mo'zama Israeli vahe'ma ha'ma eme huzamantageno'a Giliati kumate ranra vahe'mo'za Jepta ome avrenaku Tobu kumate vu'za amanage ome hu'naze, 6 kvati eman'i'negeta Amoni vahera hara huzamantamneno. 7 Hianagi ana ranra vahetmina Jepta'a amanage huno zamasami'nne, Tamagra nagrikura tamavresra higeta nenfa nompintira naheta navazuhu atre'naze. Hagi knazampima nemanita nahigeta nagrikura menina haketa neaze? 8 Anagema hige'za amanage hu'za kenona hunte'naze, Ama'na agafare tagra one. Menina tagri'ene vunka Amoni vahera hara ome huzamantenka Giliati kumate kva manigahane. 9 Hagi Jepta'a amanage huno ana ranra vahera kenona huzamante'nne, Menima kumaniregama navreta vanage'na Amoni vahe'ma ha'ma ome huzamante'nugeno, Ra Anumzamo'ma nazama hinke'na, ana vahe'ma zamahe vagamarenu'na, tamagerfa hu'na nagra kvatimia manigahuo? 10 Hige'za ana ranra vahe'mo'za amanage hu'za kenona hu'naze, ama'na kema rutrage zankura tagri'ene kagri'enena tamage huno amu'notifina Ra Anumzamo mani'neno keno antahino hurantesie. 11 Hagi anante Jepta'a ana ranra vahe'ene vige'za Giliati vahe'mo'za kva azeri ot'i'naze. Anama hazageno'a Jepta'a ko'ma hu'nea nanekea Mispa kumate Ra Anumzamofo avuga ete mago'ene zamasami'nne. 12 Hagi anante Jepta'a Amoni kini ne'mofontega amanage huno antahige kea atrentege'za, ke eri'za vu vahe'mo'za amanage hu'za ome asami'naze,

Nagafare nagri mopafi vahera hara eme renezmantane? **13** Hagi Jeptama atregenoma viankerera Amoni kini ne'mo'a amanage hu'ne, Israeli vahe'mo'zama Isipiti'ma ne-eza Arnonitima vuno Jaboki vuteno Jodanima uhanati'nea mopatia eme hanare'haze. E'ina hu'negu fruhuta ete ana mopatia tamiho. **14** Anagema higeno'a Jepta'a Amoni kini netega ete mago'ane kea atregeno kema erino vu' ne'mo'a ome asamino, **15** Jepta'a amanage hu'ne, Israeli vahe'mo'a Moapu vahe mopane, Amoni vahe mopa kumazafa osene. **16** Hianagi Isipiti'ma mareri'za ne-eza hagage mopafi vu'za korankre hagerinte vute'za, Kadesi kumatera ehanati'naze. **17** Hagi anante Israeli vahe'mo'za Idomu kini netega amanage hu'za kea atrazageno vu'ne. Tatregeta mopaka'afi rugitagita vamaneno. Hianagi Idomu kini ne'mo'a kea ontahine. Hagi Moapu kini ne'mofona anahukna naneke atrentazageno vu'ne. Hianagi ana kini ne'mo'a kea ontahi'ne. Ana'ma hige'za Israeli vahe'mo'za anante Kadesia eman'i'naze. **18** Hagi anantetira Israeli vahe'mo'za hagage mopafi ufre'za nevu'za Idomu mopane, Moapu mohanena rugagiza Moapu mopamofona zage hanati kaziga, Arnoni timofona kantu kaziga seli nona omeki'za mani'naze. Hianagi Moapu vahe mopafina uofre'naze. Na'ankure Arnoni tinte Moapu mopamofo atupamo'a eme atre'ne. **19** Hagi Amori kini ne' Sihoni'a, Hesboni kumateti neki'za, agritega amanage hu'za Israeli vahe'mo'za kea atrazageno vu'ne. Muse hugantonanki tatregeta mopaka'afina rugitagita mopatirega vamneno hu'za hu'naze. **20** Hianagi Sihoni'a Israeli vahera antahinozamino zamatrege'za mopa'afina eovu'naze. Hianagi maka sondia vahe'a zamazeri atru huno Jahas kumate seli nona kino mani'neno, Israeli vahera hara huzamante'ne. **21** Hianagi Ra Anumzana Israeli vahe

Anumzamo'a Sihonine maka vahe'anena Israeli vahe zamazampi zmavrentegeno, ana mopafima mani'naza Amori vahera hara huzamagatere'za maka mopazamia eri'naze. **22** Ana'ma hute'za Amoni vahe'mokizmi mopama eri'nazana, Arnoni tinteti'ma vuno noti kaziga Jaboku tinte uhanatiteno, ka'ma kokampinti vuno Jodani tinte'ma vu'nea mopa eri'naze. **23** Hagi Ra Anumzana Israeli vahe Anumzamo'a Israeli vahe zamavuga Amori vahera zamahenati netreno mopazami hanareno Israeli vahe'mokizmi erizami'ne. Hagi kagra ama ana mopa eri'za nehano? **24** Hagi tamagri havi anumza Kemosi'ma tamisia zantamina tamagra eriho. Hagi Ra Anumzana tagri Anumzamo'ma zamahe kasopenetreno erirami'nesia zana erigahune. **25** Hagi kagra Sipori nemofo, Moapu kini ne' Baraki kna hunano? Hagi agra hafra huoranteno, hara huorantenefi? **26** Hagi Hesboni kuma'ene ana tava'onte'ma megagi'nea ne'one kumatamine, Aroel kuma'ene, ana tava'onte'ma megagi'nea neonse kumatamine, Arnoni tinte'ma meno vu'nea kumatamimpinema Israeli vahe'mo'zama 300'a kafufima mani'nazana, nahigenka kora ana knafina ama ana mopa e'ori'nanane? **27** E'ina hu'negu nagra mago havizana huogante'noe. Hianagi kagra haviza hunka hara eme hunenantane. Kagra tamage nehampi, nagra nehufi Ra Anumzamoke refko'a hurantegahie. **28** Hianagi Amoni kini ne'mo'a Jepta'ma huzmanteg'e'zama vaza vahe'mokizmi nanekea ontahi'ne. **29** Ana'ma higeno'a Ra Anumzamofa Avamu'mo'a Jeptante egeno Jepta'a sondia vahe'a nezmareno Giliati mopafine Manase mopafine Giliati kaziga Mispa kumate uhanatiteno, Mispatira Amoni kumate vuno Amoni vahera hara huzmante'naku vu'ne. **30** Hagi Jepta'a Ra Anumzamofona amanage huno huvempa hunte'ne, Amoni vahe'ma kagrama

nazampima zamavarente'nanke'na zamahe hnاما hute'na,
31 hazenkema e'ori'na narimpa frunema ete kumate'ma
vanugenoma nonifinti'ma mago zagamo'ma ese'ma atiramino'ma
eme tutagihama hunante'nia zaga, e'i Ra Anumzamoka suza
megahianki'na, ahe'na kre fanane hu ofa kagritega hugahue.
32 Anagema huteno'a Jepta'a sondia vahe'a nezmavreno tina
takaheno Amoni vahe'ene hara ome higeno, Ra Anumzamo'a
aza higeno Amoni vahera hara huzamagatere'ne. 33 Hagi 20'a
kuma'ma ha'ma hunte'neana, Aroeri kumateti agafa huno vuno
Miniti kumate vuteno, Abel-keramimi kumate'ma mani'zama
vu'naza Amori vahera rama'a nezamaheno kuma'ziminena
erihaviza hu'ne. 34 Hagi Jepta'ma kuma'are'ma Mispama
egeno'a, mofa'amo'a tamborini neheno zagamera huno avoa
reno amarara hu'ne. E'ina mofara magoke ante'nea mofakino, rua
mago nero mofaro onte'ne. 35 Hagi Jepta'ma mofa'ama negeno'a
kukena'a tagato nehuno, tusi krafa huno amanage hu'ne,
Mofanimoka tusi'a hazenke erinaminkeno tumonimo'a atane.
Na'ankure Ra Anumzamofonte'ma huvempama hu'noa kea
eriotregosue. 36 Anagema higeno'a Jepta mofamo'a amanage
hu'ne, Nenfaga, Ra Anumzamofoma kagi'ma reakama hunka
asami'nana kante antenka nagritera anzana huo. Na'ankure
Ra Anumzamo'a kaza higenka ha' vaheka'a Amoni vahera
zamahe vagare'nane. 37 Hianagi ese'zana natrege'na tare
ikampina agonarega mofane zagane vano nehu'na, vema
e'ori'na frisua zankura nasunkura nehu'na zavira ata'neno. 38
Anagema mofa'amo'ma higeno'a Jepta'a vuo huno huntogeno,
mofane zagane agonarega marerino vema e'ori'neno frisia
zankura tare ikampi asunkura huno zavira ate'ne. 39 Hagi
tare ikama evigeno'a ana mofamo'a nefante egeno nef'a Ra

Anumzamofoma huvempa hunte'neaza hu'ne. Ana mofamo'a
vea e'ori'neno fri'neankino anazamo'a, Israeli vahepina mago
zamavu'zamava me'neanki'za, **40** kafune kafunena ana knama
ege'za Israeli mofa'nemo'za agonarega mareri'za 4'a zagegnafi
Giliati ne' Jepta mofakura zavira ometetere nehaze.

12 Hagi Efraemi vahe'mo'za sondia vahe'zmia nezmvare'za
Jodani tina takahe'za Safoni nevu'za amanage hu'za
Jeptantega kea atrageno vu'ne. Jodani tima takahenka Amoni
vahe'ma hahuzmante'naku'ma nevunka, nahigenka kea hanketa
kagra'enena vuta hara ome osu'none? Hagi e'inama hu'naku
menina nonka'ane kagri'enena teve taginteta hvazisunkenka
tasagegahane. **2** Anagema hazageno'a Jepta'a amanage
huno kenona hu'ne, Amoni vahe'mo'zama tazeri havizama
nehazageta hazenkefima mani'neta eme taza hihoma hunketa,
tamagra eta Amoni vahe'mokizmi zamazampintira eme tagura
ovazi'naze. **3** Anagema nehu'nama koama tamagrama etama
eme tazama osnazazama hazageta, tagra tavufa eri amanezaseta
Amoni vahe'enena hara nehunkeno, Ra Anumzamo'a taza
higeta zamahe vagare'none. Hagi nagafare marerita hara eme
hurantekea nehaze? **4** Anagema hige'za Efraemi naga'mo'za
amanage hu'haze, Tamagra Giliati vhahera Efraemi nagapinti'ene
Manase nagapinti tagrira tatretma fre'naza vahe mani'naze.
Anagema hazageno'a, Jepta'a maka vahe'a zamavareno
Efraemi nagara hara eme huzamanteno zamahe vagare'ne. **5**
Hagi Giliati vahe'mo'za Jodani tima takamahe'zama nevazare
kva hu'za mani'ne'za, ana tima takahe'zama vaza vhahera
zamantahige'za, tamagra Efraemi vhahera, hazageno'ma i'oma
hia vhahera, **6** sihibolet hunka huo higeno'ma, sibolet huno'ma
huhavizama hia vhahera azeri'za akafrinaze. Na'ankure Efraemi

vahe zamanankemo'a ruzahu hu'ne. E'ina hu'za 42 tauseni'a
Efraemi vahera zamahe'naze. 7 Hagi Jepta'a 6si'a kafufi
Israeli vahera kegava huzmanteno mani'neno, keaga refko
hu'ne. Hagi Jepta'ma frige'za Giliati mopafi asente'naze. 8
Hagi Jepta'ma frigeno'a Betlehemuti ne' Ipsan Israeli vahera
kegava huzmanteno mani'neno keaga refko huzmante'ne. 9 Hagi
agra 30'a ne' mofavre zamanteno, 30'a mofane zamante'ne.
Hagi ana maka mofane'a ru naganofipi masinezmanteno,
ne' mofavreararainteru ru naga nofipintike ara hagezamine.
Hagi Ipsani'a 7ni'a kafufi Israeli vahera kegava huzmanteno
mani'neno, keagazmia refko hu'ne. 10 Hagi Ipsanima frige'za
Betlehemu kumate asente'naze. 11 Hagi Ipsani'ma frigeno'a,
Zebuluni nagapinti ne' Eloni 10ni'a kafufi Israeli vahera kegava
huzmanteno mani'neno keaga refko hu'ne. 12 Hagi Zebuluni ne'
Eloni'ma frigeno'a, Aijaloni kumate Zebuluni mopafi asente'naze.
13 Hagi Eloni'ma frigeno'a, Piratoni kumateti ne' Hileli nemofo
Abdoni Israeli vahera kegava huzmanteno mani'neno keagazimia
refko huzmante'ne. 14 Hagi Abdoni'a 40'a ne'mofavrerami
antegeno agehe'za 30'a ne' mofavrerami fore hu'nazankino,
70'a donki afu agumpi vano hu'naze. Hagi Abdoni'a 8'a kafufi
Israeli vahera kegava huzmante'nenno keagazimia refko hu'ne.
15 Hagi Piratoni kumate ne' Hileli ne'mofo Abdoni'ma frige'za,
Efraemi mopafi Piratoni kumate Ameleki vahe agona kokampi
asente'naze.

13 Hagi Israeli vahe'mo'za ete mago'ane Ra Anumzamofo
avurera kefo zamavu'zmava hazageno, Ra Anumzamo'a
zamavareno Filistia vahe zamazampi zamantegeno, 40'a kafufi
Filistia vahe'mo'za Israeli vahera kegava huzamante'ne'za
zamazeri haviza hu'naze. 2 Hagi ana knafina mago nera Dani

nagapinti ne' Zora kumate nemania ne'mofo agi'a Manoa'e.
Hagi nenaro'a mofavre onte naravo a' mani'ne. 3 Hagi Ra
Anumzamofo ankeromo'a Manoa nenanente ehanatino amanage
hu'ne, kagra Mofavrea onte naravo a' mani'nananagi, kamu'ene
hunka ne' mofavre kasentegahane. 4 E'ina hu'negu waini tine,
hankave tine, agruma osu'nesia ne'zanema ne'zankura kva
hu'enka onegahane. 5 Hagi antahio, kagra kamu'ene hunka
ne' mofavre kasente'gahananki, ana mofavrea azokara taga
osutfa huo. Na'ankure ana mofavrea krimpafi mani'negen,
Anumzamo'a otage eri'za vahere huno huhamprintegahiankino,
Filistia vahe zamazampintira agra agafa huno Israeli vahera
zamagu'vazigahie. 6 Anagema higeno'a ana a'mo'a eno nevena
eme asamino amanage hu'ne, Anumzamofo vahe'mo'a nagrite
eama hu'ne! Avu'ava'amo'a Anumzamofo ankeronkna huno so'e
zantfa hu'ne. Igati e'ne, antahionkogeno agra agi'a onasami'ne. 7
Hianagi amanage huno nasami'ne, kamu'ene hunka ne' mofavre
kasentegahananki, waini tine, hankave tine, agruma osu'nesia
ne'zanena onetfa huo huno nasami'ne. Na'ankure ana mofavrea
kasema onte'nenankeno'a Anumzamofo eri'za vahere huno
huhamprinte'nigeno mani'neno ufrigahie huno nasami'ne. 8
Anagema higeno'a Manoa'a Ra Anumzamofontega amanage
huno nunamuna hu'ne, Ra Anumzamoka muse hugantoanki,
vaheka'a mago'ene huntogeno kasemantenu'a mofavremofoma
hunte'nua avu'ava zana eme rempi huramino. 9 Anage higeno
Anumzamo'a Manoa nunamu kea nentahino, anker'o'a huntogeno
Manoa nenaro'a hozafi mani'nere e'ne. Hianagi ana a'mofo
neve Manoa'a anantero nenaro'enena omani'ne. 10 Ana'ma
higeno'a, ana a'mo'a agareno nevente vuno amanage ome
hu'ne, Oki'ma e'nea ne'mo'a ete e'ne. 11 Higeno ana kema

nentahino'a Manoa'a ame huno nendarona avaririno vuno ana
nete uhanatino amanage ome hu'ne, Kagra ama'na a'enema
nanekema hu'nana nero? huno antahigegeno, Nagra ana nere. **12**
Higeno Manoa'a amanage hu'ne, Kema hu'nana kemo'ma nena
rgama fore'ma hina, inankna tra ke ana mofavremo'a amagera
nenteno, nanknahu eri'za erigahie? **13** Higeno Ra Anumzamofo
ankeromo'a amanage huno Manoa ke'nona hu'ne, Maka kema
aka'amofoma asami'noa kea kegava hu'neno avararino. **14**
Hagi krepireti'ma tro'ma hanaza tine, waini tine, hankave tine,
agruma osu'nesia ne'zanena onetfa hino. **15** Anage higeno,
Manoa'a amanage huno Ra Anumzamofo ankerona asami'ne,
Muse hugantoanki mani'negeta meme afu anentara ome aheta
kregantamnenetena vu. **16** Hagi anagema higeno'a Ra
Anumzamofo ankeromo'a amanage huno Manoana asami'ne,
Nazerinte'nankena manigahuanagi, nezanka'a onegosue. Hianagi
retrotra hunka Ra Anumzamofontega kre fananehu ofa hunto.
Na'ankure Manoa'a Ra Anumzamofo ankerone huno antahino
keno osu'ne. **17** Anante Manoa'a amanage huno Ra anumzamofo
ankerona antahige'ne? Ama ana kemo'ma nena raga'a efore'ma
hanigetama kagima erisgama hanunkura, kagi'a azage huta
ahegahue? **18** Higeno Ra Anumzamofo ankeromo'a amanage
huno Manoana asami'ne, Nagafare nagigura nantahinegane?
Nagri nagimo'a knarezantfa hu'neankinka, antahi ani hugara
osu'nane. **19** Anagema higeno'a Manoa'a meme anenta
azenerino, witine erinteno have agofetu Ra Anumzamofontega
ofa eme higeno, Ra Anumzamo'ma ruzahukna kaguva zama
hiazana ke'na'e. **20** Hagi teve anefamo'ma hagana haganama
huno Kresramanama vu itareti'ma kumo'ma monafi marerigeno'a,
Ra Anumzamofo ankeromo'a ana tevegumpi mareri'ne. Hagi

Manoa'ene nenaro'enema ana zama negekea zanavugosaregati
mopafi mase'na'e. 21 Hagi Ra Anumzamofo ankeromo'ma ete
ru'enena Manoante'ene nenarontera omegeno, Manoa'a Ra
Anumzamofo ankerone huno keno antahino hu'ne. 22 Hagi
Manoa'a amanage huno nenarona asami'ne, Tamage tagra
frigahu'e. Na'ankure tagra Anumzamofo ke'no'e. 23 Hianagi
nenaro'a amanage hu'ne, Ra Anumzamo'ma tahe frinaku'ma
hiresina kre fananehu ofane, witi ofanema hu'a ofa antahi
noramino kaguvazana erifore higeta nonkokeno, amama eme
tasamia nanekea ontasamisine. 24 Hagi ana a'mo'a ne' mofavre
kasenteno agi'a Samson'i'e huno ante'ne. Hagi ana mofavremo'ma
nenama nehigeno'a, Ra Anumzamo'a asomu hunte'ne. 25 Hagi
Zora kuma'ene Estaoli kumatremofo amu'nompima me'nea
kumate Mahane-dani Samson'i'a mani'negen, Ra Anumzamofo
Avamu'mo'a agafa huno agu'afina eri'zana eri'ne.

14 Hagi Samson'i'a mago zupa Timna kumate vuno Filistia
vahe mofa ome keteno, 2 ete kuma'arega eazamo nererane
nefanena amanage huno eme zanasami'ne. Timna kumatera
Filistia mofa'nefinti mago mofa kentete'ha oanki avrenamike'ha
a' eri'neno. 3 Hianagi nererake nefakea amanage huke
kenona hu'nale, Tagri nagapine Israeli vahepinena a'hea
omani'negenka, agoza anoma taga osu Filistia vahepintira
ara eri'za nehano? Hianagi Samson'i'a amanage huno nefana
asami'ne, Ome avrenka eme namio. Na'ankure nagri navurera
knare agi agonane mofa mani'ne. 4 Hagi e'i ana knafina Filistia
vahe'mo'za Israeli vahera kegava huzamante'nageno, Filistia
vahe ha' huzmantesiegu Ra Anumzamo mago kankamu eri fore
hianagi, nerera'ene nefae'nenen aantahi amara osu'na'e. 5 Hagi
Samson'i'ene nerera'ene nefae'nenem Timna vunaku nevu'za,

waini hozama me'hea tava'onte azageno, mago laionimo'a
amprinaku krafa huno e'ne. **6** Ana'ma higeno'a Ra Anumzamofo
Avamu'mo'a ame huno himamu hanavea Samsonina amigeno,
azampina mago zana e'ori'neanagi ame' huno meme afu
anenta aheno rutagana vazitreankna huno ana laionia aheno
eritagna vazitre'ne. Hianagi ana'ma hiazana nererane, nefanena
ozanasami'ne. **7** Hagi Timna kumate'ma uhanatino'ma ana
mofa'enema nanekema ome nehuno keana, ana mofa'mo'a
Samsoni avurera hentofaza hu'ne. **8** Hagi mago'a kna evutegeno,
ana mofara a' avrenaku Timna kumate ete nevuno, laionima
ahentegeno kasrinefina tumemo'a ana laioni avufgafina karegre
nehigeno, tumerimo'a avite'negeno ome ke'ne. **9** Hagi ana
tumerina varagofino tare azampi erineno nemeneme vu'ne. Hagi
etema ne-eno'a mago'a erino nererane nefane eme zanamigeke
ne'na'e. Hianagi fri'nea laionimofo avufgafinti varagofina e'noe
huno ozanasami'ne. **10** Hagi nef'a'ma vuno'ma Samsoni'ene
ana a'enema aravema hana'a kema eri fatgoma nehigeno'a,
zamavuzmavapima nehzaza huno Samsoni'a aravema hu kave
retrotra hu'ne. **11** Hagi ana a'mofo naga'mo'za kazana hige'za
30'a nehzave huzamantege'za Samsoni'ene eman'i'zaze. **12**
Hagi Samsoni'a anage huno ana nehzavea zamasami'ne,
7ni'a knafima kavema trohuta nesuna knafina, mago fronka ke
tamasamigahunki rezaganeta kegahaze. Huama'ma hanage'na
30'a efeke zaza kukenane, 30'a knare kukenanena tamigahue.
13 Hianagi ana fronka kema huama osanazana, 30'a efeke
kukenane 30'a knare kukenanena tamagra namigahaze. Anage
hige'za amanage hu'naze, Tamage hananki ana fronka keka'a
hugeta antahimaneno. **14** Anagema hazageno'a amanage hu'ne,
Ne'zama tragafeno nenea zagafintira ne'za fore hu'ne. Hanki

hankave zaga fintira haganentake'za efore hu'ne. Hianagi 3'a zagegnamofo agu'afina ana fronka kea refko hu'za huamara hugara osu'naze. **15** Hagi namba 4 knarera Samsoni nenanrona amanage hu'za asami'naze, Negavena azeri masave hugeno fronka ke'a huama huno tasamino. Hagi ana'ma osananketa kagri'ene negafa naga'enena tevefi krefanane hugahune. Hagi tagrira tazeri tamunte omanenanku tanagra kea haketa e'nono? **16** Hagi anagema hazageno'a, Samsoni nenererane nenfanena zavi ome neteno amanage hu'ne, Nagrira kavresra hunantenka kavesinonantane. E'ina nehunka vahe'ni'amofona fronka kea eri amara nosunka ana kemofo agafa'a nagrira onasami'nane. Anage higeno Samsoni'a amanage hu'ne, Nagra nenererane nenfanena amana fronka kemofo agafa'a ozanasami'noanki, nahانige'na kagrica kasamigahue? **17** Hagi anagema higeno'a, Ne'zama kreno nenenno musema hu 7ni'a knamofo agu'afina, ana a'mo'a zavira neteno tutu huno antahige vava higeno, Samsoni'a antahi avesra nehuno, 7ni knare ana fronka kemofo agafa'a huama huno nenanrona asamigeno, ete vuno ana nehazaveramina ome zamasami'ne. **18** Hagi ana kumapi vene'nemo'za ana nanekema nentahi'za, 7ni knarera zagemoa'uofre'nege'za Samsoninte ana nanekea eri'za e'za amanage eme hu'naze, Na'amo tumerimofo haga'a agateregeno, na'amo laionimofo hanavea agatere'ne? Anagema hazageno'a, Samsoni'a amanage huno zamasami'ne, Nagri a' bulimakao anentateti'ma hozama e'orizaresina fronka keni'amofo agafa'a keta eriforera osazasine. **19** Hagi anante Ra Anumzamofo Avamumo'a himamu'ane Samsoninte egeno Askeloni kumate vuno 30'a vahe ome nezamaheno, keonke'zazimine, kukenaziminena erino fronka kema huama'ma haza vahera eme zami'ne. Ana huteno tusi

arimpa nehegeno nefä nontega vu'ne. 20 Hagi anama higeno'a, Samsoni nenarona, anama aravema hia zupama avegama hu'za mani'naza nehazavefinti mago ne'mofo avremizageno ara eri'ne.

15 Hagi mago'a kna evutegeno, witima vasage knama ne-egeno'a, Samsoni'a mago meme anenta azenerino nenaro kenaku vu'ne. Hagi kumate'ma unehanatino'a, ana a'mofo nefana amanage huno ome asami'ne, A'nimo'ene umasenaku nehue. Hianagi ana a'mofo nefä'a atregeno nenarona ome anteno omase'ne. 2 Hagi ana a'mofo nefä'a amanage hu'ne, Nagrama nagesama antahuana aka'agura kavesra hunte'nane nehu'na ne'zama krenka musema hampima kavegama hu'nea ne' huntogeno, a' eri'ne. Hianagi ko, negna'a nuna'amofona agatereno knare agi agonane mofa mani'neankinka amne ara erintegahane. 3 Anagema higeno'a Samsoni'a amanage hu'ne, Menina nazanoma hu'na Filistia vahe'ma zamazeri havizama hanua knazana nagripina omnegasie. 4 Anage nehuno viazamo 300'a afi krarami ome azerino tare eri tragoteno zanarisonare tevema tagintesia zana anakintetere hu'ne. 5 Hagi ana'ma huteno'a, ana teve ko'haraminte teve taginenteno afi kraramina zamatrege'za nevu'za amnema me'nea witi hozane, ko'ma akafrinte witine, olivi zafa hozanena teve taginte'za vu'naze. 6 Ana'ma hige'za Filistia vahe'mo'za amanage hu'haze, Iza e'inara hu'ne? hu'za hazage'za, Timna kumateti ne'mofo nenemo Samsoni anara hu'ne. Na'ankure Samsoni'ma aravema hunaku'ma hianknare'ma avegama hu'nea ne' ana ara avremigeno'e. Hu'za hazage'za Filistia vahe'mo'za vu'za ana a'ene ana a'mofo nefanena ome zanazeri'za tevefi krerasage'naze. 7 Ana'ma hazageno'a Samsoni'a amanage hu'ne, Tamagrama e'inama hazana tamage hu'na, e'ina'ma

hazarera tamahetenage mani frua hugahue. **8** Anage nehuno Samsoni'a ana vahera tusi rimpa henezmanteno tusi'a vahe zamaheno erivazi'ne. Ana huteno vuno Etamu havegampi umani'ne. **9** Ana'ma hige'za Filistia vahe'mo'za Juda mopafi seli nona eme ki'za mani'ne'za, Lehi kumate vahera hara huzamante'naze. **10** Hagi ha'ma eme hunezamantage'za Juda vahe'mo'za amanage hu'naze, Nagafare tamagra emereritma hara eme hunerantaze? Anagema hazage'za Filistia vahe'mo'za amanage hu'za kenona hu'naze, tagri'ma ha'ma hurante'neaza huta Samsonina aheta anakinaku e'none. **11** Anagema hazage'za Samsonina ome avrenaku 3 tauseni'a Juda vahe'mo'za Etamu havegante vu'za amanage ome hu'naze, Filistia vahe'mo'zama kegavama hurante'nazana kagra ontahi'nano? Nahigenka kagra e'inahura tagrira hurantane? Anage hazageno Samsoni'a amanage huno kenona huzamante'ne, Na'ano zamagrama nagri'ma hunantazaza huzamante'noe. **12** Anagema hige'za amanage hu'za asami'naze, Tagra kazerita anakita Filistia vahe ome zaminaku erami'none, hazageno Samsoni'a amanage huno kenona hu'ne, Tamagra kahe ofrigahune huta huvempa huta nasamiteta anara hiho. **13** Anagema hige'za amanage hu'za kenona hu'naze, Kahe ofrigosunanki amne kagare'ene kazante'ene nofi anakita Filistia vahe ome zamigahune, hu'za nehu'za tare kasefa nofitrenu anakintete'za havegampintira avre'za atirami'naze. **14** Hagi Samsoni'ma Lehi kumate'ma ehanatige'za, Filistia vahe'mo'za kezaneti'za Samsonintega zamagare'za e'naze. Hianagi Ra Anumzamofo Avamumo'a himamu'ane Samsoninte egeno, azante'ma anaki'naza nofi'mo'a tevefima kre'nazageno'ma hiaza huno mramra huno evurami'ne. **15** Ana higeno kasefa kasefa hu'nea donki afu'mofo agemazampa

zaferina'a erino ana zaferinaretira 1tauseni'a vahe zamahe fri'ne. **16** Ana huteno Samsoni'a amanage hu'ne, Donki afu'mofo agemzampa zaferinaretira vahera ahena kevure erivazue. Donki afu'mofo agemzampa zaferinaretira 1tauseni'a vahe zamahoe! **17** Anagema huvanereno'a, donki afu'mofo agemzampa zaferina matevu atre'ne. Ana hige'za ana kumakura Rama-lehie hu'za agi'a ante'naze. **18** Ana'ma hutegen'o'a Samsonina tusiza huno tinkura avesigeno amanage huno Ra Anumzamofontega krafa hu'ne, Kagra eri'za vahekamonafi efrenka hara azeri agaterane. Hanki nagra tinku nefrisuge'za agozano taga osu vahe'mo'za nagrira nahefrisazo? **19** Anagema higeno'a Anumzamo'a mopa eri aka higeno, Lehi kumapina tina hanatigeno Samsoni'a tina neno hanavea eri'ne. Ana kumakura En-hakore huno agia antegeno Lehi kumatera ana tina meninena me'ne. **20** Hagi Filistia vahe'mo'zama Israeli vahe mopama eri'za kegavama hu'naza knafina, Samsoni'a 20'a kafufi Israeli vahe'mokizmi keagama refkoma hu kva vahera mani'ne.

16 Mago zupa Samsoni'a Filistia vahe kumate Gaza vuno mago savri a' mani'negeno ome keno ana a'ene umase'ne. **2** Hagi Gaza kumate vahe'mo'zama Samsoni'ma ana a'enema emase'ne naneke'ma nentahi'za, ana kumara avazagi kagi'za ana kumamofo kafantera kafona ante'za kenagera mani'naze. Ana kenagera ranke'nankea osu akohe'za mani'ne'za amanage hu'naze, Kafonteta mani'nesunkeno ko'matanigeno esnigeta ahegahune. **3** Hianagi Samsoni'a kenage amu'nompi otino vuno rankuma'mofo vihu kafane, kafama azeri'nea zafanena maka akasi zuzu huno afunte eri konefino Hebron tava'onte me'nea agonafi mareri'ne. **4** Hagi anama huteno'a mago'a kna evutegeno Soreki agupofi nemania a' agi'a Dilailae nehaza a' kenunu huno

avesinte'ne. **5** Ana'ma higeno'a Filistia kumate kva vahe'mo'za ana a'te e'za amanage eme hu'naze, Samsonina inampi hanave'a me'nefi masavenke hunka revatga hugeno negasamino, inankna huta azerita anakigahumpi kasamina azerita anakimneno. Hagi e'inama hananketa magoke magokemota 1tausen 100'a silva zago kamitere hugahune. **6** Hagi Dilaila'a amanage huno Samsonina antahige'ne. Muse hugantoanki nasamio, inampi hanaveka'a me'ne? Inankna hanageno hanaveka'a omnesige'za kazeri'za anakigahazafi nasamio? **7** Anagema higeno'a Samsoni'a amanage huno kenona hu'ne, Atima negraza kasefanofi'ma 7ni'a eri'za nagare nazante'ma anakinageno'a hankaveni'a omnesige'na, amne vahekna hugahue. **8** Anagema higeno'a Filistia kumate kva vahe'mo'za atima negrazanofira kasefa 7ni'a eri'za Dilailana eme amizageno, Samsonina agare azanteru rugagi rugagi huno anakinte'ne. **9** Ana huntenu ana a'mo'a mago'a vahera zamavareno ana nomofo agu'a hunaragine'nefinka frakizamanteteno, amanage huno Samsoninkura hu'ne, Samsoniga Filistia vahera ama aze! Hianagi Samsoni'a ananofira tevefima krenegeno'ma temramrama hiaza huno rukampru hutre'ne. Ana higeno hankave'ama me'neama'a ke'za eriforera osu'naze. **10** Hagi anante Dilaila'a amanage huno Samsonina asami'ne, Ko kagra kizazokogo ke hunantenka havige hu'nane. Hagi muse hugantoanki, inankna hu'za anaki kantegahazafi nasamio? **11** Anagema higeno'a Samsoni'a amanage huno kenona hu'ne, Mago'a kasefa nofinu'ma anaki antrokoma hunante'hageno'a hankaveni'a omnesige'na amne vahekna hugahue. **12** Anage higeno mago'a vahe'mo'za nompi frakiza mani'nazageno, Dilaila'a kasefa nofitami erino agare azanteru anakinteteno amanage hu'ne, vali Samsoniga, Filistia

vahe'mo'za kahenaku aze, higeno'a, Samsoni'a kukena hati
nofi'ma erikano hiankna huno ananofira rukano hutre'ne.

13 Anante Dilaila'a anage huno Samsonina asmi'ne, Kagra
renevatga hanke'na nagazegu hue, hagi menina tamage
hunka nasamio, higeno Samsoni'a huno, Kagra 7ni'a za'za
nazokama erinka strini nofi'ma nezagi'za masinifi rusi nehunka
nilima erinka ahentrakoma hanankeno, hanaveni'a omnena,
amne vahekna hu'na manigahue. **14** Anagema higeno'a,
Samsoni'ma mase'neama'agu azokara erino 7ni'a aragafa
hanenteno, azoka'ma anaki nilinu eri hankavenetino amanage
hu'ne, va'i Samsoniga Filistia vahe'mo'za kahenaku aze, higeno'a
Samsoni'a mase'nefintira otino ana nofi'ene nilinenazokapintira
eri avazu hutre'ne. **15** Ana'ma higeno'a Dilaila'a amanage
hu'ne, Kagu'amo'ma nagri'enema omne'negenka nahigenka
kavesinegantoe hunka nehane? Kagra 3'a zupa kizazokago kea
hunantenka hankaveka'a inampi me'ne nagrira onasami'ne. **16**
Hagi Dilaila'ma maka knama anagema huva huvama higeno'a,
Samsoni'a anankema antahizankura tusi avesra nehuno, **17**
anante hufra'ma nekiazana maka hufore huno Dilailana amanage
huno asami'ne, Kasema nantetegati'ma e'neana nazokara taga
osu'noe. Na'ankure Anumzamofo eri'za vahe manigahane huno
nenrera rimpafima mani'nogeno ko huhamprinante'ne. Hagi
nazoka'ma tagama hanugeno'a hankaveni'a omanesige'na amne
vahekna hugahue. **18** Hagi Dilaila'ma kegeno'ma Samsoni'ma
agu'areti'ma huama'ma huno maka oku'ama me'neazama
asamigeno'a, amanage huno Filistia kva vahe'tamintega kea
atregeno vu'ne. Ete mago'ane eho. Na'ankure agra hago agu'areti
huno maka oku'zama'a huama huno nasami'ne. Anagema higeza
Filistia kva vahe'tmimo'za zagone zamazampina eri'ne'za ete

emareri'naze. **19** Hagi Dilaila'a amote Samsonina azeri avukoko higeno mase'negeno, mago ne'ku higeno eazamo 7ni'a ragafa'a eme taga huno vazagetetre'ne. E'inama hutegeno'a, Dilaila'a Samsonina ata hoza nemigeno hankave'a omane'ne. **20** Hagi Dilaila'a amanage hu'ne, va'i Samsoniga Filistia vahe'mo'za kahe'naku aze, huno'ma higeno'a, Samson'i'a mase'nefintira otino, ko'ma nehuaza hu'na ruvakanegahue huno hu'ne. Hianagi Ra Anumzamo'ma agri'ma atre'no vu'nea zana ontahi'ne. **21** Hagi ana'ma hige'za Filistia vahe'mo'za azeri'za tarega avurga reragati atrete'za avre'za Gaza kumate vu'za bronsire seni nofi'nu agare azanteria anakintazageno kina nompi witi refuzafu nepeno mani'ne. **22** Hianagi ana azoka'ma vazagatetre'naza azokamo'a ete agafa huno hage'ne. **23** Hagi Filistia kva vahe'mo'za emeritru hu'za Dagonie nehaza havi anumzazimirera ofa nehu'za musena hu'za amanage hu'naze, Tagri anumzantimo'a ha' vahetia Samsonina tazampi avrente hu'za hu'naze. **24** Hagi Filistia vahe'mo'za Samsonima nege'za anumzazimimofo agi erisga nehu'za amanage hu'naze, Vahe'tima zamahe hana'ma nehuno mopatima eri havizama hu'nea nera Samsonina anumzantimo avreramigeno menina tagri hanavefi mani'ne. **25** Hagi aka tima nenazageno antahintahi zamimo'ma savari'ma hige'za amanage hu'naze, Samsonina avre atiraminkeno mago'aza huno tazeri musena hino, hu'za hazageno Samsonina kina nompintira avre atirami'za noma azeri'nea zafaramimofo amu'nompi ome antageno ot'neno mago'azana huno zamazeri musena hu'ne. **26** Hagi ana'ma hazageno'a azante'ma azeri'nea nehaza ne'kura Samson'i'a amanage hu'ne, Navrenka noma azeri'nea zafare vuge'na nazana avako hu'na namagena renti ha'neno. **27** Higeno ana nompina Filistia kva vahe'mo'zane veamo'za

avite'hageno, nomofo agofetura 3 tauseni'a vea'naza mani'ne'za negazageno, Samsoni'a zamazeri musena hu'ne. **28** Hagi Samsoni'a amanage huno Ra Anumzamofontega nunamuna hu'ne, Ra Anumzamoka mago'ene antahinaminka hanavea namio, muse hugantoanki hankavea namige'na Filistia vahera zamahe'na navurgama reragati'nazarera nagonagea haneno. **29** Hagi Samsoni'a anagema nehuno'a noma vazisga hu'nea zafararemofo amu'nompi otino azana kantigama ana zafararente rentinti nehuno, **30** Samsoni'a amanage hu'ne, Filistia vahe'ene frisue, huno nehuno ana zafararena hanavetino retufegeno ana nomo'a pasaru huno maka kva vahe'ene, ana nompima mani'naza vahera zamahe vagare'ne. Ana higeno nefrino'ma zamahe'nea vahe'mofo nampamo'a, amanema mani'neno'ma zamahe'nea vahe'mofo nampana agatere'ne. **31** Hagi ana'ma hutege'za, afuhezane naga'amo'za vu'za avufga'a omeri'za mareri'za Zorane Estaoli kumatremofo amu'nompi nefa Manoa matipi eme asente'naze. Hagi Samsoni'a 20'a kafufi kva mani'neno Israeli vahera keagazimia refko huzmante'ne.

17 Hagi mago nera Efraemi agona kokampi nemania ne' agi'a Maika'e. **2** Mago kna nererankura amanage hu'ne, nagra nentahugenka 1tausen 100'a silva zagoma musufama erizagenka kazusi ke huzamante'nane. E'ina zagoa nagra musufa eri'noe. Higeno nerera'a kenona huno, hufore'ma hantera Ra Anumzamo'a asomu hugantesie, **3** higeno'a ana 1tausen 100'a silva zagoa erino nerera ome amigeno nerera'a amanage hu'ne, Menina nagra ama'na zagoa nemafonku hu'na Ra Anumzamofo amuanki'na kaza osu havi anumzamofo amema'a tro'ma nehaza vahe zaminuge'za tro hute'za eme kamigahaze. **4** Anage nehuno nerera'a 200'a silva zagoa erino zafare'ma

antre'zama silvama rukamre'za keonke'zama tro'ma nehaza
vahe ome zamizage'za, eri'za vahe amema'a tro nehu'za,
magora silvaretike tro hu'za eme amizageno erino Maika nompi
ome ante'ne. **5** Hagi Maika'a osi mono noma'a me'neankino,
pristi vahe kukena tro huno efotie nehaza amimizare rente'za
trohunteno mofavreramima'afinti mago'mofo pristi manisie huno
huhamprinte'ne. **6** E'ina knafina Israeli vahepina mago kinia
omani'neankino mago mago vahe'mo'a agra'a avesite kegeno
avure'ma fatgoma hiazana hutere hu'ne. **7** Hagi mago knazupa
Juda nagapinti mago Livae nehaza ne'mo'a Betlehem kumate
Juda mopafi nemaniane. **8** Hagi Juda mopafinti Betlehemu
kumara atreno kuma'ma manisia kumaku hakeno vu'ne. Hagi
anama nevuno'a Efraemi agona kokampi vuno Maika nonte
uhanati'ne. **9** Anama uhanatigeno'a Maika'a amanage huno
hu'ne, kagra igati ane? Huno antahigegeno amanage huno ana
ne'mo'a hu'ne. Nagra Livae ne' Juda mopafi Betlehemu kumate
nemanua ne'mo'na mani'nua kumaku hake'na neoe. **10** Higeno
Maika'a amanage hu'ne, Nenfa kna hunka nagri'ene mani'enka,
pristi eri'za vaheni'a manio. Hagi mago mago kafufina **10ni'a**
Silva zagine kukenane ne'zanena kamigahue, higeno ana
ne'mo'a ufre'ne. **11** Hagi Livae nehazamo'a muse nehuno
Maika nemofoza higeno, **12** Maika'a ana Livae nehazavea
pristi mani'nie huno azeri ruotage higeno, Maika nompi pristi
eri'za ne' mani'ne. **13** Ana nehuno Maika'a anage hu'ne, nagra
menima nagesama antahuana, Livae ne' pristia azeri otuankino
Ra Anumzamo'a asomu hunantegahie hu'ne.

18 Hagi ana knafina Israeli vahe'mokizmi kinia omuni'nege'za
Dani naga'mo'za manisaza mopagu hake'za vano hu'naze.
Na'ankure Israeli vahe'mo'zama mopama erizafina zahufa

zamagra mopa e'ori'naze. 2 E'ina hu'negu Dani naga'mo'za 5fu'a hankavematiza ha'ma nehaza vahetamina huzmantazage'za Zora kumate'ene Estaoli kumateti'enena manisaza mopagu afure'za kenaku vu'naze. Hagi Efraemi agona kokampima nevu'za, Maika nompi umase'naze. 3 Hagi zamagrama Maika nonte'ma erava'oma nehu'za, Livae nehaza ne'mofo ageru nentahi'za vugantite'za amanage hu'za antahige'naze. Iza kavreno amafina e'ne? Na'a ama kumapina emenerine? Nankna eri'zanka'a amafina me'ne? 4 Anage hazageno amanage huno ana ne'mo'a zamasami'ne, Maika'a amanage huno hunante'ne, mizasegantegahuanki pristi vaheni'a manio huno hige'na, pristi ne'a mani'nogeno mizasenenante. 5 Hagi anante amanage hu'za hu'naze, Amama nevuna kamo'a knare hurantegahifi Ramofona antahigenka ko. 6 Anagema hazageno'a pristi ne'mo'a amanage huno zamasami'ne, Ramo'a vugota huramantegahianki tamarimpa frune viho. 7 Anagema hige'za ana 5fu'a vene'nemo'za ana kumara netre'za Laisi kumate vu'naze. Ana kumate'ma vu'za ome kazana, ana kumapi vahe'mo'za Saidoni vahe kna hu'za magozankura zamagesa ontahi zamarimpa frune mago zankura koro osu' mani'naze. Hagi ana vahe'mo'za mago zankura upara osu feno vahe mani'naze. Na'ankure mopazmimo'a knare'za hu'ne. Hagi Saidoni vahera afete'are mani'nazageno mago vahe'mo'e huno zamagri tavaontera omani'naze. 8 Hagi ana 5fu'a vahe'mo'zama nagazmirega Zora kumate'ene Estaoli kumate'enema azageno'a, zamafuhemmo'za amanage hu'naze. Na'a ome ketma erifore hu'nazafi huama hoho? 9 Hu'za zamantahigazageno, ana vahe'mo'za anage hu'naze, otinketa vuta ome zamaheta mopazmia hanaramneno! Na'ankure mopama ke'nonana knare'zantfa hu'nea mopa me'ne.

Na'anku aveganentaze? Ana mopama omerizankura korora
huta rege'regera osiho. **10** Hagi ana kumate'ma vu'nanana ana
mopafi vahe'mo'za mago'zankura zamagesa ontahi zamarimpa
fru hu'za mani'naze. Na'ankure ana mopa ra huno mikazamo'a
avite'nea mopa Anumzamo'a ko tami'ne. **11** Hagi anagema
hazageno'a Dani nagara 600'a venenemo'za Zora kumateti'ene
Estaoli kumatetira ha'zana retro hu'za hatera vu'naze. **12** Hagi
Kiriat-jearimie nehaza kumate zage fre kaziga Juda mopafi
seli nona ome ki'za mani'naze. Hagi e'ina kumakura menina
Mahane-Danie hu'za agia nehaze. **13** Hagi anantetira atre'za
Efraemi agona kokampi e'za, Maika nonte ehanati'naze. **14** Hagi
5fu'a vene'nema Laisi mopama afure'za ke'naza vene'nemo'za
ruغا'a naga'mokizmia amanage hu'za zamasam'i'naze. Pristi
vahe'mo'zama zamimizare'ma nehaza kukena efotigi, nompima
nentaza havi anumzantaminki, antre'zama tro'ma hu'naza
amema'agi, aenima kre'za tro'ma hu'naza amema'ama ama
nontamimpima me'neana ontahi'nazo. E'ina hu'negu menina
na'a hugahazafi tamagesa antahiho? **15** Anage nehu'za ana
5fu'a vene'nemo'za kana atre'za, Maika nompima ana Livaie
ne'ma nemanifinka ufre'za musenkea ana nera ome hunte'za,
hufrufra kea hunte'naze. **16** Hagi Dani nagapinti ana 600'a
sondia vahe'mo'za maka ha'zazmia eri'za ana kumamofo kafante
oti'za mani'ne'za, **17** ana pristi ne'ene nanekea nehazageno, ana
5fu'a venenemo'za Maika naga'mo'zama mono'ma nehazafinka
vu'za pristi vahe'mo'zama zamimizare'ma nehaza kukena efotigi,
nompima nentaza havi anumzantaminki, antre'zama tro'ma
hu'naza amema'agi, aenima kre'za tro'ma hu'naza amema'anena
omeri'za atirami'naze. Ana nehazage'za pristi ne'ene 600'a sondia
vahe'mo'za ha'zana eri'ne'za kuma kafante otine'za ke'naze. **18**

Hagi ana venenemo'zama Maika nompima umrer'i'zama pristi
vahe'mo'zama zamimizare'ma nehaza kukena efotigi, nompima
nentaza havi anumzantaminki, antre'zama tro'ma hu'naza
amema'agi, aenima kre'za tro'ma hu'naza amema'anena eri'za
atiramizageno'a, ana pristi ne'mo'a amanage hu'ne, na'a nehaze?
Huno zamantahigege'za, **19** amanage hu'naze. Taganenka
kea osu tavaririnka enka tagri nerafaza nehunka, pristi vaheti
emanio. Magoke naga'mofo pristima mani zamo knarera hu'nefi,
maka Israeli vahepima mago naga nofimofo pristima mani'zamo
knarera hu'noe? Hu'za hu'naze. **20** Anagema hazageno'a pristi
ne'mo'a muse nehuno ana pristi kukenane, havi anumzane,
antre'za trohunte amema'anena erino ana vahe'tamine vu'ne.
21 Hagi ana vahe'mo'za anantetira antre'za mofavrezmine
afuzagazmine zamazerigota hu'za fenozazminena eri'za vu'naze.
22 Hagi Maika noma agatere'za afete'ma vutazageno'a, Maika
no tavaonte'ma noma ki'naza vahe'mo'za emeritru hu'za Dani
nagara zamavariri'naze. **23** Hagi ana vahe'mo'za rankege
hu'za vazageno Dani naga'mo'za rukrahe hu'za amanage hu'za
Maikankura hu'naze, Nagafare vahera zamavaretru huntenka,
rankegera hunka neane? Hu'za antahigazageno, **24** Maika'a
amange huno kenona hu'ne, anumzantamima tro'ma hunte'noa
anumzantamini'a maka eri vaganereta pristi ne'nianena avreta
neaze. Hagi mago zani'a otreta eri hana huta neazanki, nahigeta
e'nahura nehaze? **25** Hige'za Dani naga'mo'za amanage
hu'naze, Kva hunenka e'inagea huo! Amama neompina ame
arimpama ahe vahera neankino, zamarimpama ahenige'za
nagaka'ane kagri'enena tamahe frigahaze. **26** Anage nehu'za
Dani naga'mo'za vu'naze. Hagi Maika'ma keama Dani naga'mo'za
rama'a vahe'ma vazageno ha'ma huzamantega'ma nosuno'a

ete rukrahe huno noma'arege vu'ne. **27** Hagi Maikama tro'ma hunte'nea kaza osu anumzatamine, Dani naga'mo'za e'neriza pristi ne'anena nevre'za eza mago zanku'ma zamagesa ontahi fruma hu'za mani'naza vahe kumapi Laisi e'naze. Hagi eza ana kumapi vahera eme zamahehna nehu'za, kumazimia teve taginte'naze. **28** Hagi Laisi kumate vahera mago'mo'e huno eme zamaza osu'ne. Na'ankure Saidoni vahera afete manizageno, Laisi vahe'mo'za mago vahe'enena tragote'za omani'naze. Ana zana Beth-Rehob kuma tava'onte me'nea agupofi fore hu'ne. **29** Hagi Dani naga'mo'za ana agupofi ete kumara trohuza agima anteminazana Dani kumare hu'za Israeli nemofo nezimageho agire asamre'naze. Hagi ana kumakura kora Laisie hu'za agia nehzane. **30** Hagi Dani naga'mo'za ana kaza osu havi anumzana azeri retrurente'za, Gesomu nemofo Mosese negeho Jonatani azeri otizageno pristi ne'zimia mani'ne. Hagi Dani nagapina Jonatanimpinti'ma fore'ma haza vahe'mo'za pristia maniza neazageno, ha' vahe'mo'za eme zamahe'za zamavare'za kina ome huzamante'naze. **31** Hagi Anumzamofo seli mono nomo'ma Sailoma me'nea knafina, Dani naga'mo'za Maika'ma tro hunte'nea kaza osu havi anumzante monora hunte'naze.

19 Hagi Israeli vahe'mofo kinima omani'nea knafina mago Livae nagapinti nera Efraemi agona kokampi mani'ne. Hagi ana ne'mo'a mago kna Juda mopafi vuno, Betlehemu kumateti nampa 2ara a'tampi ome avreno e'ne. **2** Hianagi ana a'mo'a mago'a vene'nene savari huteno, nevena atreno kuma'arega 4'a ika umani'ne. **3** Ana'ma higeno'a neve'a nenaro arimpa omeri fru huno avreno enaku eri'za ne'ane, tare donki afu'ane nevreno vu'ne. Hagi ana kumate'ma uhanatigeno'a, ana ne'mofo nenaro'a avreno nefä nonte vigeno, nefä'a tusi muse nehuno

avrente'ne. 4 Hagi ana ne'mofo nenemo'a osi'a manigenka vuo higeno, ana ne'mo'a nenemo nompina ne'zane tinena neneno 3'a kenage manino maseno hu'ne. 5 Hagi namba 4 knarerera nanterame otino noma'arega vunaku keonke'zana retro hu'ne. Hianagi nenemo'a huno, Bretia netenka vugahane. 6 Anagema nenemo'a higeno'a ana netremokea ete manike ne'zane tinena ne'na'e. Ana ne'zama nenakeno'a nenemo'a otiazamo amanage hu'ne, Muse hugantoanki mago kenage'ene maseneta ne'zana neneta musena huteta vi'o. 7 Hianagi Livae ne'mo'a vunaku keonke'zama'a enerino otigeno, nenemo'a tutu huno, Mago kenagera masetenka vuo, higeno mase'ne. 8 Hagi maseno namba 5fu knarerera nanterame otino vunaku retrotra higeno, nenemo'a otiazamo amanage hu'ne, ne'zana krenka nenenka mani'negeno kinagasena vuo, huno higeke ete mago knane mani'neke ne'zana kreke ne'na'e. 9 Hagi ana'ma hute'za agrama, nenaro'ma eri'za ne'ama hu'za vunaku tro hu'za ot'izagano, ana a'mofo nef'a amanage hu'ne, Keho, hago kinagaseanki, meni kenage'enena maseta musena huteta, okina nanterame otita vugahaze. 10 Hianagi ana ne'mo'a ru'enema masezankura avesra nehuno, donki afutrema'amofo agumpi mani'noma vu'zana retro hunenteno, nenaronena nevreno Jebusi kumakura menina e'i Jerusalemie nehazankino ana kantega vu'ne. 11 Hagi Jebusi kumate'ma azageno'a kinagasegeno, eri'za ne'amo'a amanage hu'ne. Jebusi vahe ran kumapi umasenune. 12 Anagema higeno'a kva'amo'a amanage hu'ne, Ru vahe kumapina Israeli vahe'ma omani'nesia kumapina uomasegosunanki, nevuta Gibeal uhanatigahune. 13 Anage nehuno ana nehaza nera amanage huno asami'ne. Enketa ko nevuta Gibeal kumatero Rama kumatero umasamneno. 14 E'i

anage nehu'za vuvava hu'za Benzameni naga'mofo mopafi
Gibea kuma tava'onte uhanati'zageno zagemo'a uramige'za, **15**
ana kumapi masenaku kuma amu'nompi umani'hazanagi, mago
vahe'mo'a zamavare nompina ontege'za mani'nazageno, **16**
mago ranafamo hoza'aregatira kinaga e'ne. Ana nera Efraemi
agona kokampinti ne' Benzameni naga'ene Gibea kumate zoka
emani'nea nere. **17** Hagi ana ranafa ne'mo'ma ne-eno'ma
eme kesaga huno keama ana naga'ma kuma amu'nompima
mani'nazageno'a anage huno zamantahige'ne, Igati e'neta
iga vunaku emani'naze? **18** Higeno ana ne'mo'a amanage
huno hu'ne, Efraemi agona kokampi kumanirega vunaku Juda
kaziga Betlehemu kumateti eta emani'nonanagi, vahe'mo'za
nozamifina tavreontazageta mani'none. **19** Hagi donkitimofo
ne'zane, nagrama nesua wainine bretine, a'nimofo ne'zane
eri'za vahe'nimofo ne'zanena eri'nonankita mago zankura upara
osu'none. **20** Anage'ma hazageno'a ana ranafa ne'mo'a amanage
hu'ne, knarekita nagri nontega vanage'na maka'mota kegava
huramantegahue. Hianagi amafina omasegahaze. **21** Anage
nehuno zamavareno noma'afi vuno donkizmimofo ne'zana
nezamige'za zamagra zamaga ome sese hute'za ne'zane tinena
ne'naze. **22** Hagi ne'zama nene'za musema nehazageno'a,
ana kumapi'ma hazenkema nehaza vene'nemo'za anama
mani'naza nona eme avazagigagiza kafantera vagare vagare
hu'za nemasagiza, ana ranafagura amanage hu'naze, E'ima
nonka'afima avrente'nana nera avreramigeta monko zana
huntamneno. **23** Hagi ana ranafamo'a atiramiazamo amanage
huno zamasami'ne, Nafuheta, amanahu kefo avu'ava zana
osiho. Na'ankure ama ne'mo'a ko noniaifi emani'ne. **24** Hagi
keho, vene omase mofani'ane ana ne'mofo a'enena ama

mani'na'anki zanavreta vuta nazano huzanante'naku'ma hanaza
zana ome huznanteho. Hianagi ama ne'mofona kefo avu'avara
huonteho. **25** Hianagi ana vene'heramimo'za ke'a ontahizageno,
Livae ne'mo'a nenanrona kaha anagino retufezamige'za ana
vene'nemo'za ana ara monkozana hunte'za azeri haviza hu'za
vano nehazageno kotige'za atrazageno e'ne. **26** Hagi ana
a'mo'a eazamo neve'ma mase'nea nomofo kahante eme traka
huno mase'negeno rumasa hu'ne. **27** Hagi neve'ma vunaku'ma
nanterama otino'ma kafama anagiana nenaro'a, kaha tra
zafare azeriteno mase'negeno negeno anage hu'ne, **28** otigeta
havamneno. Hianagi ana a'mo'a kea osigeno donki afu'amofo
agumpi avufga'a erinteno noma'arega vu'ne. **29** Hagi ana
ne'mo'ma noma'arema uhanatino'a, kazi erino ana ara 12fu'afi
taga huteno, 12fu'a Israeli naga'nofi'ma mani'nazarega mago
mago huno ana a'mofo avufga atregeno vuno eno hu'ne. **30** Hagi ana
zama kaza vahe'mo'za amanage hu'naze, Isipiti'ma e'nona
knareti'ma eno ama knare'ma ehanatiana Israeli vahe'mota
amanahu kefo hazenkezana onke'nonaza fore hianki, ama ana
zankura na'ane huta tamagesa antahize?

20 Hagi anante noti kaziga Daniti vuno Berseba uhanatigeno
sauti kazigati'ene, Jodani timofo kantu kaziga Giliatiti'ene maka
Israeli vahera emeri tru hu'naze. Hagi ana maka Israeli vahera Ra
Anumzamofo avuga Mispa kumateke ome atru hu'naze. **2** Hagi
Israeli naga'mofonte'ma ugagota hu'naza maka kva vahetmimo'za
Anumzamofo vahe'mo'zama atruma hazafi umani'naze. Hagi
anampina kazinteti'ma ha'ma hu sondia vahe'tmina 400 tausenia
vahe mani'naze. **3** Hagi Israeli naga'mo'za Mispa kumate'ma
atruma haza nanekemo'a ko Benzameni nagatera vu'ne. Hagi
Israeli vahetmimo'za amanage hu'naze. Inankna huno ama ana

kefo avu'ava zana fore hu'nefi hugeta antahimneno. **4** Hazageno
nenaroma ahe fri'naza Livae ne'mo'a amanage huno kenona
hu'ne, Benzameni nagamofo kumate Gibeal masenaku a'ni'ane
nagranena emani'no'e. **5** Hianagi ana kenagera Gibeal kumate
vahe'mo'za eme tavazagigagi'za nahe'za nehu'za, a'ni'a avre'za
monko'zana hunentazageno fri'ne. **6** E'ina hazage'na ana a'mofo
avufga'a taga hu'na 12fu'a Israeli naga nofima mani'nazarega,
atrogeno vuno eno hu'ne. Na'ankure Israeli mopamofo agu'afina
kasrino havizantfa huno zamagazegu huga monko avu'avaza
hu'naze. **7** Hagi menina maka Israeli vahe'motma na'a
hugahumpi nanekea hiho. **8** Hagi anagema hige'za, maka
Israeli vahe'mo'za magoke zamagi ante'za amanage hu'naze,
Mago'mo'e huno seli noma'arega ovuge, noma'arega ovuge
hugahie. **9** Hianagi amanahu'za Gibeal vahera huzamantegahune.
Satu zokagoreta kesunkeno, zamagimo'ma efore'ma hania
vahe'mo'za hatera vu'za hara ome hugahaze. **10** Hagi 100'a Israeli
vahepintira 10ni'a vaheke nezamavareta, 1tauseni'a vahepintira
100'a vahe nezamavareta, 10 tauseni'a vahepintira 1tauseni'a
vahetami zamavaresunke'za Gibeal kumate vahe'mo'zama
Israeli vahe amu'nompima kasrino havizantfama hu'nea monko
avu'avazama hu'nazare'ma ha'ma ome huzmante'za zamavu'za
zamagesazama hanaza sondia vahe'mokizmi ne'zana eri'za
vugahaze. **11** E'ina hige'za maka Israeli emerimago hu'za Gibeal
kumate vahera hara ome huzmante'naze. **12** Ana nehu'za
Israeli vahe'mo'za Benzameni nagatega amanage hu'za kea
atrazageno vu'ne. Nankna kefo avu'avaza amu'nontamifina
fore hu'ne? **13** E'ina hazenke vahetmina Gibeal kumapintira
avre taminketa zamahe frisunkeno, Israeli mopamo'a agru hino.
Hianagi zamafuhe'zama Israeli vahe'mo'za hazankea Benjamen

naga'mo'za ontahi'naze. **14** Ana nehu'za maka Benzameni
mopafima me'nea ranra kumatamimpinti vahe'mo'za Israeli
vahera hara huzamantenaku Gibea kumate emeritru hu'naze.
15 Hagi Benzameni naga'mofo kumatamimpintira kazinteti'ma
ha'ma hu vahera 26 tauseni'a vahe eritru hazageno, Gibea
kumatetira anampina 700'a hankave sondia vahetami eritru
hu'naze. **16** Hagi e'i ana 700'a ha' vahetmina hoga kazigati
hara hu vahetminkino, kumi atifima havema ante'zama osi'zama
ahesazana hantaga osugahaze. **17** Hagi kazinteti'ma ha'ma
hu vahera 400 tauseni'a Israeli vahera eritru hu'za, Benzameni
nagara hara huzmante'naku hu'naze. **18** Hagi Israeli vahe'mo'za
henka hara ome hugahunanki hu'za nehu'za, esera Beteli kumate
vu'za Anumzamofona amanage hu'za ome antahige'naze. Ina
naga nofimo'za vugota hurantesageta Benzameni nagara hara
ome huzmantegahune? Hu'za hazageno, Ra Anumzamo'a
amanage huno zamasami'ne, Juda naga'mo'za vugota hu'za
vugahaze. **19** Hagi anagema hutege'za Israeli vahe'mo'za
nantera otiza Gibea kuma tava'onte vu'za seli nonkumazmia ome
ki'za mani'naze. **20** Hagi anante Israeli vahe'mo'za Benzameni
nagara ha' ome huzamante'naku Gibea kumate ome erimpi hu'za
oti'naze. **21** Hagi anama hazageno'a Benzameni naga'mo'za
Gibea kumapintira atiramiza Israeli vahe'enena hara eme
nehu'za, ana zupa 22 tauseni'a Israeli sondia vahera zamahe
fri'naze. **22** Hianagi Israeli vahe'mo'za ana zankura zamagesa
ontahi ko'ma hate'ma vunaku'ma emeritru hu'naza kumapi
ete hate vunaku atruhu'za mani'ne'za nanekea hu'za ozeri
hankaveti azeri hankaveti hu'naze. **23** Ana hute'za Israeli
vahe'mo'za Beteli kumate mareri'za, Ra Anumzamofontega
zavi krafa ome nehazageno vuno kinagase'ne. Hagi zavima

nete'za amanage hu'za Ra Anumzamofona antahige'naze.
Tafuhe'mofona Benzameni nagara ete hara ome huzmantenumpi
atrenune? Hu'za hazageno, Ra Anumzamo'a amanage huno
hu'ne, Vuta hara ome huzamanteho. **24** Anagema hige'za
mase'za anante nanterana vu'za Benzameni nagara hara
ome huzamante'naze. **25** Hagi Benzameni naga'mo'za ete
mago'ane Gibeal kumapintira atirami'za 18 tauseni'a Israeli
vahetamina kazinteti'ma ha'ma nehaza vahera zamahe fri'naze.
26 Hagi anama hige'za maka Israeli vahe'mo'za arimpa fru ofane
kresramnama vu ofanena e'neriza, Beteli kumate marer'i'za
ofa ome nehu'za, ne'zana a'o hu'za mani'ne'za tusi zavi
Ra Anumzamofontega netazageno vuno kinagase'ne. **27**
Hagi Israeli vahe'mo'za Ra Anumzamofo antahintahi'a erinaku
Beteli vu'naze. Na'ankure e'ina knafina Ra Anumzamofo
huhagerafi huvempage vogisimo'a Beteli kumate me'nege'za
anara hu'naze. **28** Aroni negeho Eleaza nemofo Finiasi ana
knafina pristia mani'ne. Hagi Israeli vahe'mo'za amanage hu'za
Ra Anumzamofona antahige'naze. Tafuhe'mofona Benzameni
nagara hara ome huzmantenumpi atrenune? Hu'za hazageno
Ra Anumzamo'a amanage huno hu'ne, Okina zamavarena
tamazampi antegahuanki vuta hara ome huzamanteho. **29**
Anagema hige'za Israeli vahe'mo'za Gibeal Kumate vu'za kafona
ome antegagi'naze. **30** Hagi ana'ma hute'za namba 3 knarera
ko'ma nehzaza hu'za hahunaku Gibeal kumate vu'naze. **31** Hagi
anante Benzameni naga'mo'za kumazmifintira atirami'za Israeli
nagara hara eme huzamantage'za Israeli naga'mo'za zamimi
hu'za kumazmimofona afete vu'naze. Hagi Israeli vahera 30'a
vahe Betelima vu kantegane Gibealma vu kanteganena zamahe
fri'naze. **32** Hagi Benzameni naga'mo'za amanage hu'naze,

kote'ma hu'nonaza huta Israeli vahera zamahone. Hianagi Israeli vahe'mo'za amange hu'naze, Atreta nefreta zami'mi huta karanka vanunke'za, kumazmia atre'za afete egahaze. **33** Hagi anagema hute'za, maka Israeli vahe'mo'za Ba'al-tamar kumate unehanati'za ete rukrahe hu'za ha'huzamanteku ha'zana ome retro hu'za manizageno, mago'a Israeli vahe'ma Ma'ar-Geba kumate'ma kafoma ante'za mani'nazaretira hahunaku kafona hage'za atirami'naze. **34** Hagi 10tauseni'a Israeli sondia vahe'ma knare'ma hu'za ha'ma nehaza vahe'mo'za, Gibea kumatera hara eme hu'naze. Hagi ha'mo'a tusiza huno hankavetino vu'neanagi, Israeli vahe'mo'zama zamahe hana'ma huzankura Benzameni naga'mo'za ontahi'naze. **35** Ana'ma hazageno'a Ra Anumzamo'a Israeli vahera zamaza hige'za' Benzameni nagara 25tausen 100'a kazinteti'ma ha'ma hu'ama antahini'ma hu'naza vahera zamahe'naze. **36** Hagi ana'ma hazage'za Benzameni naga'mo'za kazana Israeli vahe'mo'za hara huzmagatere'naze. Na'ankure kafoma ante'naza nagaku Israeli vahe'mo'za zamagesa nentahi'za Benzameni nagara zami'mi hu'za Gibea kumara atre'za afete e'naze. **37** Hagi ana'ma hazageno'a, kafoma ante'za mani'naza Israeli sondia vahe'mo'za zamagare'za Gibea kumapi ufre'za, ana kumapima mani'naza vahera kazinteti zamahehana nehu'za, **38** ana kumara teve tagintazageno teve kumo'a vemagu vemagu huno marerige'za, mago'a Israeli sondia vahe'mo'za nege'za hara agaterone hu'za hu'naze. **39** Hagi Israeli vahe'mo'zama ana tevegu'ma nege'za ete rukrahe hu'za Benzameni nagara zamarotgo hu'naze. Hagi ana zupa Benzameni naga'mo'za 30'a Israeli vahe nezmahe'za amanage hu'naze. Ko'ma hu'nonaza huta Israeli vahera hara hago huzmagaterone. **40** Hianagi Benzameni naga'mo'zama

rukrahe hu'zama kazana teve kumo'a kumazmifintira vemagu
vemagu huno hampompi marerige'za ke'naze. **41** Ana'ma
hige'za Israeli vahe'mo'za rukrahe hu'za Benzameni nagara
hara huzamantage'za, Benzameni naga'mo'za tusi koro hu'naze.
Na'ankure zamagrama antahi'za ke'zama hazana ra hazenkefi
ufrone hu'naze. **42** Hagi anantetira rukrahe hu'za ka'ma kokampi
Israeli vahe'mokizmi korora fre'naze. Hianagi kumazmima omeri
havizama hute'za aza vahe'mo'za zamavatga hu'naze. **43** Hagi
Benzameni nagara Noha kumateti agafa hute'za zamaratgo hu'za
manigasa osu Gibea kuma'mofona kantu zage hanati kaziga
vu'naze. **44** Hagi ana knarera Benzameni nagara hankavetiza
ha'ma huga sondia vahetamina, 18tauseni'a vahe zamahe'naze.
45 Hagi maniza naga'mo'za hagage kokampi Rimon havema
me'nerega fre'za nevazageno 5tauseni'a vahera karanka ome
zamahe'naze. Hagi mago'a vahera zamarotgo hu'za Gidomu
kumate 2tauseni'a vahe ome zamahe'naze. **46** Hagi ana maka
vahe'ma ha'ma huga vahem'a zamahe'neana 25tauseni'a vahe
Benzameni nagara zamahe'naze. **47** Hianagi 600'a vahe'mo'za
rukrahe hu'za fre'za hagege kokampi vu'za Rimon havefi 4'a ika
umani'naze. **48** Hagi Israeli vahe'mo'za Benzameni nagamofo
kumatamimpintira maka vahe'ene bulimakao afu'zaminena
zamahe vaganere'za ana kumatmina teve taginte vagare'naze.

21 Hagi Israeli vahe'mo'za Mizpa kumate omeri atru hu'za
amanage hu'za huvempa hu'naze, Magore huno magotimo'a
mofa'a atresigeno Benzameni nagatera uomaregosie. **2** Hagi
ana'ma hute'za Israeli vahe'mo'za Beteli kumate Ra Anumzamofo
avuga vu'za tusi zavi krafa nehazageno vuno kinaga omeseg'e'za,
3 zamagra amanage hu'naze, Ra Anumzana Israeli vahe
Anumzamoka nahigeno Israeli vahepintira mago naga'mo'za

fananea hu'za nehaze? 4 Hagi mase'za anante knarera
nanterame oti'za kresramna vu ita trohu'za, anante kresramnama
vu ofa nehu'za, zamarimpa fru ofanena hu'naze. 5 Hagi
anante amanage hu'naze, Israeli vahepintira ina naga'mo Ra
Anumzamofo avugama atruma nehumpina atrua osu'haze?
Na'ankure zamagra kora huvempa hu'za amanage hu'naze, Iza'o
Ra Anumzamofonte'ma Mispama omesimofona ahe friho. 6 Hagi
Israeli vahe'mo'za nezamafunkura Benzameni nagara zamasunku
hunezamante'za amanage hu'naze, menina Israeli vahepintira
mago nagamo'a fanane hie. 7 Hagi tagra Ra Anumzamofonte
huvempa huta mofa'netia ozamigosune huta hunonanki, inankna
huta a'ne zamigura hakegahune? 8 Hagi amanage hu'naze,
Israeli vahepintira ina naga'mo'za Ra Anumzamofo avuga Mispa
kumatera ome'naze? Hagi keho Jubes-Gileatitira mago vahera Ra
Anumzamofo avuga ome'ne. 9 Na'ankure Israeli vahe'mo'zama
vahe'ma hamprizafina Jubes-Giliati vahera ana zupa omani'naze.
10 Hagi e'ina hu'nazagu koro osu'za hanaveti'za ha'ma
nehaza vahera, Israeli vahe'mo'za 12tauseni'a hunezamante'za
amanage hu'naze, vuta Jubes-Giliati kumate vahera maka a'
mofavre'zamine zamahe hana hiho. 11 Hagi tamagra amanahu
hugahaze, maka vene'nene, vene'nenema mase'nesia a'nenena
zamahehna hiho. 12 Hagi Jubes-Gileati vahepintira 400'a
venema omase mofa'neramina hake'za zamavare'za seli noma
ki'za mani'naza kumate Kenani mopafi Sailo e'naze. 13 Hagi
ana'ma hazage'za maka Israeli vahe'mo'za Benzameni naga'ma
Rimoni havekampima fraki'zama mani'naza nagatega kea
atre'za amanage hu'naze, Menina tamagri'enena hara osuta fru
huta manigahune hu'za hu'naze. 14 Hagi anagema hazage'za
Benzameni naga'mo'za kuma'zmirega ete vazage'za Jubes-

Giliatiti'ma zmavre'naza a'nea zami'naze. Hianagi ana maka
vene'nemo'za ana a'nea erizamentera osu'nazanki mago'amo'a
amne mani'ne. **15** Hagi Benzameni nagakura Israeli vahe'mo'za
zamasunku hu'naze. Na'ankure Israeli vahepina Ra Anumzamo'a
zamatrege'za fanane hazageno kankamu fore hu'ne. **16** Hagi
anante Israeli kva vahe'mo'za amanage hu'naze, Benzameni
nagapintira ko a'nezmia zamahe hana hu'nonanki, a'ma e'ori'naza
vene'neramina igati a'neramina haketa avrezamigahune? **17**
Hagi amanage hu'naze, Zamahe hanama hunke'zama osi'ama
maniza Benjamen naga'mo'za mofavre ante'nageno Israeli
vahepintira zamagia fanane osanie. **18** Hianagi mofa'netia
zaminunke'za ara e'origosaze. Na'ankure ko Israeli vahe'mo'za
huvempa hu'za Benzameni nagara mofatia ozamigosune
hu'naze. Hagi iza'oma mofa'ama amisimofona Anumzamo'a
kazusi huntegahie hu'za nehu'za, **19** amanage hu'naze, Keho
maka kafumofona Sailo kumatera Ra Anumzamofoma musema
hunteno ne'zama kreno nekna etere nehie. Hagi ana kumara
Beteli kuma'mofo noti kaziga megeno, Betelitima marerino
Sekemuma vu'nea kamofona zage hanati kaziga megeno, Lebona
kuma'mofona sauti kaziga me'ne. **20** Hagi anage hu'za Benzameni
naga'ma a'ma e'ori'naza nagakura huzmante'naze, Vuta waini
hozafi kafona ome anteta, **21** mani'neta negenkeno Sailo
kumateti'ma avoma renaku'ma atirami'za e'naza mofa'neramina
fraki'nesafintira ame huta atiramita zamavazu huta freta
kumatmirega eta ara emeri zamanteho. **22** Hagi anama
hanageno'ma zamafahe'zane zamaserahen'zanema tagrite'ma
e'za fragema hanageta, amanage huta zamasamigahune. Muse
huramantonanki tamasunku hunezamanteta zamatrenke'za
ara zamavareho. Na'ankure Jabes-Giliati vahe'ma zamaheta

a'nema avre zamunana erizamentera huvaga ore'naze. Hianagi ana mofa'nea tamagra'a ozami'nazankita huvempama hu'naza zantera knazana e'origahaze. **23** Anage hazage'za Benjamen naga'mo'za anama zamasamizaza hu'za avoma renakuma Sailo kumapinti'ma atirami'za aza mofa'nea zamavare'za fre'za erisantima hare'naza mopazmirega vu'za ara omeri zamante'za havizama hu'nea kumazmia omeri so'e hutere hu'za ki'za mani'naze. **24** Hagi ana knazupa Israeli vahe'mo'za ana kumara atre'za erisantima hare'naza mopazmirega, naga nofi zamirega vu'za e'za hu'naze. **25** Hagi ana knafina Israeli vahe'mokizmia kinia omani'neanki'za, mago'mago'mo'a kegeno'ma avure'ma knare'ma hiazana hutere hu'ne.

Rut

1 Korapa'ma keaga refakohu vahe'mo'za (jasi) mopa kva hu'naza knafi, tusi'a zamagate'za Juda mopare fore higeno, mago nera Betlehemu, Juda mopareti ne'mo, osi'agna Moapu umaniku nenanrone, tare ne'ane zamavareno vu'ne. **2** Ana ne'mofo agi'a, Elimeleki'e, nenaro agi'a Naomi'e, hagi tare ne'amokizni znagi'a, Maloni'ene, Kilionike. Efrata naga nofipintira Betlehemu Juda mopafinti Moab mopare e'za eman'i'naze. **3** Ana mopare mani'nageno, Naomi neve, Elimeleki'a frigeno, Naomi'a tare ne'mofavre'ane zamagraku mani'naze. **4** Higeno tare ne'amokea Moapu mopareti mofatre ara eri'na'e. Mago'mofo agi'a, Opa'e, hanki mago'mofo agi'a Ruti'e. Ana nehu'za 10'i'a Zagegafu naza anantega mani'naze. **5** Anante mani'nageno Naomina, tare mofavre'a Maloni'ene, Kilionikea anazanke hu'ne fri'na'e. Ana hzageno, Naomina, tare mofavre'ane, neve'ene, fri'zageno, zavi neteno agraku mani'ne! **6** Moapuma mani'neno antahiamma Ramo'a asomu huntogeno, agri'a vahepina ne'zamo'a avitema higeno'a, Naomi'a mopa'are vunaku retro nehigeno, nenoferokea, agrane vunaku tro hu'na'e. **7** Nenofero a'trene, agrane (Naomi) nemaniza mopa atre'za vu'za Judama nevaza kante uhanati'naze. **8** Anante Naomi'a tarega nenoferokiznigu anage hu'ne, Taregamotna'a kama antahi'o, antatani'amofo nontega vi'o. Fri'naza nagate'ene, nagrite'enema tanagrama ha'a avu'ava zantera, Anumzamo'a tanagrira ana huno knare avu'ava huranantesie. **9** Kasefa ve eritna nonkuma huta manisapina Anumzamo'a knare'za huno kegava huranantegahie huno neznasmino, zanagi antako nehige'za krafa hu'za zavi ate'naze. **10** Hianagi zanagra anage hu'na'e. O'e, tagra kagri vahetega kagrane vugahu'e, huke asmi'na'e. **11** Hu'heanagi,

Naomi'a kenonazni'a anage hu'ne, Kuma tani'arega etetna
vi'o, mofa'nimotna'a, Judama nagranema vana'a zamofona
knare kegafa omane'ne. Nagra knare osu'noanki'na, mofavrea
kasentesnugeno, ana mofavremo'a nernave zana osugahie. **12**
Kuma taniarega etetna vi'o, mofa'nimotna'a! Nagra ko tavava
te'noanki'na ete'na aravea osugahue. Hagi nagrama meni
kenage'ma ve eri'na mofavre zaga kasezamantegahue huasina,
13 tanagra knare zanavega ante'nesanke'ne, rave huga kantera
ra hate'sino? Tanagra knare vea e'oritna ana kna'afina amnea
mani'tesino? O'e, mofa'trenimotna'e, nagranena ovu tfaza
hugaha'e. Na'ankure tanagrama eri'a knazana agtere'na nagra
eri'noe, Ramo'a nagrira nazeri haviza hu'ne. **14** Tusi krafa
hu'za mago'ene zavira ate'naze. Anante Opa'a nenoferona
azerino antako nehuno ete vu'ne. Hianagi ana huo huno
huma nenteana, Ruti'a tusi'za huno Naomina agzafeno anuki
hampo'na hu'ne. **15** Naomi'a anage hu'ne, Ko, neganunkna'a,
vah'e'ane, anumzama'a nehirega eteno nevie. Neganunkna
amage antenka kumaka'arega vuo, huno asmi'ne. **16** Hianagi
Ruti'a ke'arera amanage hu'ne, Natrenka vuo hunka kagra tutura
huonanto. Na'ankure, kagrama inantega vusanana, anantega
nagra vugahue. Inante manisanana, nagra anante umanigahu'e.
Kagri vahe'mo'za, nagri vahe manigahaze. Kagri Anumzamo'a,
nagri Anumza segahie. **17** Inante'ma kagrama fri sナーera, anante
nagra frisnuge'za ase nantegahaze. Anumzamo'a nagrira tusi'a
kna namigahie, nagrama nehua kema amage'ma osnugeno'a,
magoke'zana fri'zamoke tazeri pasegahie. **18** Naomi'ma kegeno
Ruti'ma hampo'natino agrane vugahue'ma higeno'a, tutu'ma
huno'ma huma nenteretira anante atre'ne. **19** Higeke ana
tarega'moke vuvava hu'ne Betlehem uhanatina'e. Betlehemi

ufrake'za, ana kumapi miko vahe'mo'za uma hnatina'a zankura
tusi muse hu'naze. Ana nehu'za kumate a'ne zagamo'za anage
hu'naze, Ama ara Naomio? 20 Hianagi, Naomi'a ke nonazmi
huno, Naomi'e (knaremo'e) hutma nagia ohetma, Mara'e (aka
he'ne) huta nagia aheho, na'ankure Miko'zante Kva Hu'nea
Hanave Anumzamo (Sovren) knare'zana huonante'ne. 21
Amareti'ma atre'na vu'noana maka'zampina avite'na vu'noe,
hianagi Ramo'a nazampi omane kno eteno navareno e'ne.
Na'a higetma Naomi'e huta nagia nehaze, negazo Ramo'ma
nagri'ma ha'ma renenanteno, Miko'zante Kva Hu'nea Hanave
Anumzamo (Sovren) nagri'ma nasuzane, natazama nemamiana?
22 E'ina higeno, Naomi'a nenofero Moabuti a' Rut'i'e. Moabuti'ma
Betlehemima ehanati na'ana, bali hoza agafa hu'za traga nehaza
knavi e'na'e.

2 Hagi ana knafina Naomina neveragapinti nera mani'neankino
agi'a Boasi'e. Agra Elimeleki naga nofipinti afufeno ne'
mani'nege'za, rama'a vahe'mo'za ke'za antahi'za hu'naze. 2
Mago zupa Rut'i'a Moaputi a'mo, Naomi asmino, Natrege'na
hozafi vu'na atresaza bali raga knarerema hunantesage'na
tragama hanaza naga zamage nevu'na zogi'neno. Higeno
Naomi'a mofa'nimoka, tagri tavutvakinka amne vugahane huno
hunte'ne. (Diut 24: 19) 3 Higeno Rut'i'a vuno bali raga traga
nehaza vahe zamage nevuno evuramiam'a zogi atru huno vu'ne.
E'i ana eri'zama eri'neana Elimeleki nagapinti ne' Boasi hozafi
eri'zana eri'neankino agra Boasi hoze huno ontahi'ne. 4 Anama
nehia knavi Boasi'a Betlehem kumateti eno, hoza traga nehaza
vahe'agu kezatino Ra Anumzamo'a tamagrane manigahie,
hige'za zamagra nona'a, Ra Anumzamo'a asomu hugantesie,
hu'za hu'naze. 5 Boasi'a, hoza traga nehaza vahe'mokizmi

kva ne' antahigeno, Amu zahufa ara aza naganofipinti a'
emani'ne? 6 Hagi bali traga nehaza vahe'te kva ne'mo anage
hu'ne, Agra Moabuti zahufa are, Moabu kumateti Naomi'ene
magoka ena'e. 7 Rut'i'a eme nantahigeno, Knare bali tragahu
vahe'mokizmi zamage nevu'na, bali raga ko'nama ananekisafinti
evu ramisiama'a zogi atru hutere hugaho? Huno hige'na, knarere
hunte'noe. E'neregati nantera agafa huno hamponatino tusi eri'za
manigsa osu enerino, tona nompina osi'a kna manigsa hu'ne. 8
Higeno Boasi'a anage Rutinku hu'ne, Mofanimoka antahi ankero,
mago hozafina atrenka vunka bali raga ome zogi atru osutfa
huo. Kagra ama'na hozafinti'ra, atrenka ru hozafina ovugahane.
Eri'za a'ne nagani'ane tragotenka eri'zana erigahane. 9 Ke
ankerenga vene'nemo'za e'ina hozafi eri'zana eri'zanki nechunka,
eri'za a'ne naga zamage huo. Vene'nemo'za kvako osiho hu'na
nagra zamas migahue. Kagri'ma tinku kavesisnigenka, vunka
vene'nemo'za ome afi'za eme ante'naza kavofinti afinka no. 10
Rut'i'a agiafi rena reno avugosa mopafi hunteno, agrikura anage
hu'ne, Nahigenka nagrira knare'zana hunantenka, nagrikura
kagesa antahi nenamine, nagrama ru mpareti a'ma mani'noana?
11 Higeno, Boasi'a nona'a Rutinku anage hu'ne, Maka'zama
negave'ma fri'nereti'ma negnoferoma huntenka e'nana'zane,
negafane, anta'kane, mopaka'anema atretenka kora antahinka,
kenka osu'nana vahe'enena emani'nana kagenke ka'a ko nagrira
nasmige'na antahi'noe. 12 Anama hu'nana nona'a, Ramo mizana
kamisie. Knare kvukva zantera Israeli Ra Anumzamo nona
huno ante avitegantesie, kagrama kva hunante'snie, hunkama
hu'nana Anumzamo asomu hugantesie. 13 Anante Rut'i'a anage
hu'ne, Kagra knare'za nagrira hunenantane ramoka, na'ankure
nagra mago kagri eri'za ara omani'noanagi, kagra nazeri so'e

nehunka, knare keaga hunami'nane. **14** Henka ne'za nenaza knare, Boasi'a Rutinku anage hu'ne, Amare enka breti eme nenenka, hagi breti ka'a vinega timpi refru hunka no! Higeno bali tragahu vahe'mokizmi zamasoparega umani'negeno tevefi kre hagege hu'naza bali raga refko humigeno Ruti'a neteno amu higeno mago'a eriri'ne. **15** Anante Ruti'a otino bali raga eri atru hunaku nevigeno, Boasi'a eri'za vahe'a zamasmino, Atrenkeno ama a'mo'a bali raga ko'na'ma anakinte'naza amu'nompi vano nehuno zoneginigeta ahe onatiho. **16** Anahu kna hutma agri tfana, ko'na anakintepintira raga'a rmina avazuhu atre'nenkeno agra zogirino, hagi i'o hutma huonteho. **17** Ana higeno Ruti'a hozafinti bali raga zogi atru nehigeno vuno kinaga se'ne. Anante agrama zogi atru huno hareno eriri'nea bali rgamofo kna'amo'a 10ni'o, 13ni'a kilo naza fore hu'ne. **18** Hagi Ruti'a zogirino, erino rankumate vigeno, nenofero'a nama'a zogirino e'neo ke'ne. Agra mago'a kre hagegehu balima feru nenegeno amu'ma higeno eriri'nea bali raga ne'zana Naomina hefimi'ne. **19** Naomi'a, nenoferona amanage huno antahige'ne, Inante menina bali raga eritru hu'nane? Iza hozafi eri'zana eri'nane? Aza'o kagriku'ma agesa antahino kza hu'nesimofona asomu huntegahie. Higeno Ruti'a nenoferona aza'ene eri'zana eri'neo, nesmino anage hu'ne, Nagrama menima eri'zama erinte'noa ne'mofo agi'a, Boasi'e huno asmi'ne. **20** Naomi'a nenoferonku anage hu'ne, Ra Anumzamo'a agrira asomu huntegahie. Na'ankure Ramo fri'naza nagakura age okanino, mani'nona nagara so'e hunerante. Anante Naomi'a, Rutina asmi'ne, Ama'na nera tagri tvate kora mani'neankino, agra tagri kegava hurantegahie. **21** Ruti, Moapu a'mo ke nona'a anage hu'ne, Mago'ané nagriku anage hu'ne, Kagra eri'za vaheni'a mokizmi zamate manitere nehnanke'za nagri hozafinti

ne'zana tragahu vagaregahaze huno nasm'i'ne. 22 Naomi'a, anante nenofero Rutina anage huno asmi'ne, Mofa'nimoka agri eri'za mofa'nene tragotenka eri'zante vnanana knare hugantegahie. Na'ankure ru vahe hozafi'ma eri'za omerisanana, hazenkezamo kvufare egahie. 23 Ana higeno Ruti'a, Boasi eri'za mofane zagane tragoteno bali raga zogino eritru nehigeno, bali hozama tragahu eri'zamo'a vagaregeno, witi hozama tragahu eri'zamo'enena anante vagare'ne. Ana eri'zama vagaregeno'a Ruti'a nenofero'ene mani'ne.

3 Hagi mago zupa Naomi'a nenofero Rutinkura amanage huno asmi'ne, Mofa'nimoke, venema tragotenka noma mani'sana vahera nagra hakre'na kegantesugeno kagrira kegava huganteno kagu vazisigenka knare hunka manigahane. 2 Menina Boasi eri'za mofa'ne zagane tragotenka eri'za eri'nana nera, tagri tvate knampatie. Ko! Meni keragera, bali raga hare kuma tro hunte'nere bali raga akru haregahie. 3 Hagi kagra ti fretenka, mna nevia msave kvufarera nefrenka, knare kukenaka'a kvate eri hutenga, bali rgama hare kumate uraminka vuo. Hianagi, ana ne'mofo avurega osunka ufraki'hegeno ne'zane, tinena nevaga reno. 4 Hagi agra retro huno vaseku'ma hanigenka, vsesia kumara ke ankerenka, inante masesifi kavua ketenka, agiarega omeri vakarenka umase'hegeno, mago'azama husana zana kasamigahie. 5 Ruti'a, ke nona huno Naomina asmi'ne, Hakare kema nasmina zana, nagra amne hugahue. 6 Higeno Ruti'a, bali raga hare kumate vuno nenofero'ma maka asmino, e'ina huo huno asmi'nea kante ana hu'ne. 7 Boasi'a ne'zama'a nehna huteno muse nehuno, bali rgama eri kevu vazinte'pinka mago asoparega umse'ne. Anante Ruti'a tkaureno ako heno, Boasi agarega frankera omeri zakeno umase'ne. 8 Mase'nereti kerage

amu'nompi mase rukrahe huku nehuno, anante keana mago a'mo agri agiarega mase'negeno keteno antri hu'ne. **9** Boasi'a anage hu'ne, Kagra azage? Huno antahigegeno, ke nona'a anage hu'ne, Nagra Ruti'ne, kagri eri'za aki, a' navrento, na'ankure tagri naga nofi'mokizmi zamesi'zana, kagra Elimelekina mago korankinka, kagrake taza hugahane. **10** Boasi'a anage hu'ne, Mofa'nimoka Anumzamo'a asomu hugantegahie. Kagra vagare museza hu'naverina zamo'a, pusante musezana agatere, kasefa verero, fenoma'a me'nea netero, fenoma'a omne netera, a' erigantenogura zamaririnka vono osu'nane. (Diut Kas 25:5-10) **11** Menina mofa'nimoka korera osuo, maka zanku'ma nantahigesanke'na, nagra amne hugantegahue. Na'ankure hakare ra kumapi vahe'nimo'za hago knare kavukva ene a' mani'nane hu'za kage'za antahiza hu'naze. **12** Menina tamage, nagra kvate vaheka'a mani'noe. Hianagi, nagrira nagatereno magora tamazahu nera mani'ne. **13** Hagi meni kenagera ama anante masenegeno, masa hinkena nanterampi a' erigantegahue haniana knare hugahianki, atregeno agra ana hino. Hianagi anama osugahue'ma haniana, nagra tamage hu'na huvempa nehue, Ra Anumzama mani'negu nagra ara erigantegahue. Amare mase'negeno ko atino. **14** Higeno Ruti'a agafi mase'nereti, masa osu'negeno ko'atu hanimpi vahe'mo onke'are vu'ne. Boasi'a otino amanahu ke asami'ne, mago a'mo bali raga hare kumapi eno emasenereti vie, kea ontahitfa hiho. **15** Nago'anе agra anage hu'ne, amega kavufare'ma ruvanare'nana kena eritarenka azeri hampona huo, higeno azerigeno, 6si'a zupa balia herfi anteno anakino afunte kofi ante'ne. Ana huteno Boasi'a ra kumapi ufre'ne. **16** Ruti'a menoferontega uhanatigeno, Naomi'a antahige'ne, Mikazamo'a inankna hugante'ne, mofa'nimoka? Higeno Ruti'a,

maka'zama Boasi'ma hunte'nea zana asmi'ne. 17 Ruti'a anage hu'ne, Ana bali rgamofona, 27ni'a kilo naza kna'amo'a hu'nea, herfinteno nenamino anage hu'ne, Neganoferontega vusunka, kza avapara ovugahane hu'ne. 18 Hagi anante Naomi'a anage hu'ne, Akohenka mofa'nimoka avega ante'nenka ko, naza fore hugahifi. Na'ankure ana ne'mo'a mani fru osu'neno ana kna'zana mensi eri ante fru hugahie.

4 Boasi'a marerino ana kumate kasante umani'ne. Anante Boasi'a keana, Rutima asmino kva huntegahie hu'nea ne' egeno, anage hu'ne, Nenfuga amare enka emanio, higeno anante emani'ne. 2 Ana hutegen Boasi'a 10ni'a ranra kuma kva vahe, zamare atru huno anage hu'ne, amare emanaho hige'za zamagra emani'naze. 3 Anante Boasi amanage huno ana nera asami'ne, Naomi'a Moabu mopareti e'neno, tagri vahe'mofo Elimeleki mopa mizante atrenaku nehige'na negasmue. 4 Hige'na nagra tamage kazigati kasami fatgo hunaku nagesa nentahue. Amama mani'naza vahe'ene, ranra kva vahe'nimokizmi zamufi, kagrama miza sena aza hugahue hanunka, amne ana huo. Hagi ana osugahue hanunka, nasmige'na antahi'neno. Na'ankure kagra kagota hanke'na, nagra kagri kamage hu'noe. Ana ne'mo'a kenona huno, Nagra mizasena aza hugahue huno hu'ne. 5 Higeno Boasi'a anage hu'ne, Ana mopa Naomi azampinti miza sesana zupa, Moabuti a'ma fri'nemofo kento a' Rutina nafa'aza hunenka, fri'nea ne'mofo naga zamagima erifore hananke'za, ana naga'mo'za ana mopa erigahaze. 6 Avate korama kvama huntega ne'mo'a anage hu'ne, Nagra mizase'na azahuga osu'noe. Na'ankure e'ina hanu'na nenfa'ma namige'na erisanti hare'noa zana eri haviza hugahue. E'ina hu'negu nagrama huga'zana kagra huo. Na'ankure nagra mizase'na azahuga osu'noe. 7 Hagi

amanahu avu'avara, korapa knafi'na Israeli vahepi me'neane.
Mago vahemo'ma mago'zama mizasekuro, azahukura, mago
agia ano zafino mago'mofo nemia zane. Higeno amanahu
antahi'zamo'a mani'zamofo kankamu erifore huno Israeli vahera
aza nehia zane. **8** Ana higeno, Rutima kegava huntega ne'mo'a,
Boasinku anage hu'ne, Kagraka'a suza miza'so, nehuno aga
nona zafi'ne. **9** Anante Boasi'a ranra vaheku'ene, mika vaheku
anage hu'ne, Tamagra negesage'na tamagri tamufi menina
Naomi azampintira, Elimelekima, Kiloni'ma, Maloni zantamima
me'neana, nagra miza segahue. **10** Nagra ana zanke hu'na,
Moaputi a' Rutina azeri nafa'a nehue, Maloni kento a'mo nagri a'
mani'neno, fri'nea ne'mofo agi fanane hu'zanku zamagia erifore
hanige'za ana mopare ene, vahe'afine, kuma'afinena fanane
osugahie. Mika vahe'mota menina amazana tamufinti negaze,
11 huno higeno ana kumamofo kasante mani'naza vahe'ene,
kumate ranra vahe'ene mika'moza hu'za, Tagra negone, Ra
Anumzamo azeri so'e hanigeno nonka'afima esnia a'mo'a,
Resoli'ene, Liakema, Israeli vahe kse hakare huna'a kna hugahie.
Hanigenka kagra Efrati naga nofipi ra kagi erinka Betlehemia
feno ne' manigahane. **12** Mago'ene nagakamo'za, Peresi naga
kna huza, Judanteti Tamari'ma kasente'nea ne'mofo nagapinti,
Ra Anumzamo ama a'pinti mofavre zaga kamigahie. **13** Higeno
Boasi'a, Ruti a' avregeno nenaro'za higeno, anteno mase'ne.
Ramo azeri knare huntogeno agra amu'ene huno ne'mofavre
ksente'ne. **14** Anante a'nemo'za Naominku anage hu'naze, Ra
Anumzamofo agi'a erisga hanune, na'ankure meni ama knafina
kzahu vahera omani'ne huno onkatre'ne. Ama mofavremo
Israeli vahe motafina ragi erigahie. **15** Agra nomani zanka'a
kzeri muse nehuno tavava'ma resankeno'a knare huno kegava

hugantegahie, na'ankure neganofero'a, seveni'a ne'mofavre zaga
zamagatere'no, agra avesi kantega'hie! **16** Anante Naomi'a ana
mofavre avreno, agra'a asumpi anukino kegava hu'ne. **17** Magopi
nemaniza a'nemo'za, anage hu'naze, Mago ne'mofavre Naomi'na
fore humie! Obeti'e hu'za agi'a antemi'haze. Obeti'a raseno Jesi
ksentegeno, Jesi'a, Deviti nefaza hu'ne! **18** Ama'ne e'i Peresi
naga'nofimokizmi zamagi'e, Peresi'a, Hesroni ksente'ne, **19**
Hesroni'a, Rami ksentegeno, Rami'a, Aminadabu ksente'ne. **20**
Aminadabu'a, Nasoni ksentegeno, Nasoni'a, Salmoni ksente'ne.
21 Salmoni'a, Boasi ksentegeno Boasi'a, Obeti ksente'ne. **22**
Obeti'a, Jesi ksentegeno, Jesi'a, Deviti ksente'ne.

1 Samue

1 Hagi mago nera Elkana'e nehia ne' mani'ne. Hagi ana nera Rama kumateti Efraemi naga'pinti nekino, nef a agi'a Jerohamu'e. Hagi negeho agi'a Elihu'e, agigomofo agi'a Tuhu'e. **2** Hagi Elkana'a tare a' zanante'neankino magomofo agi'a Hanaki, magomo'a Penina'e. Hagi Penina'a mofavrea ante'neanki, Hana'a mofavre onte'ne. **3** Hagi mago mago kafurera Elkana'a a' mofavre'a zamavareno atruhu seli mono noma Sailo me'nerega vuno, Hanavenentake Ra Anumzamofontera monora ome nehuno kresramana vutere hu'ne. Hagi ana knafina Ra Anumzamofo pristi nera Eli mani'neankino, tare mofavre'amokizni zanagi'a Hofanie'ene Finiasike. Hagi zanagra neznafana aza huke ana knafina pristi eri'zana eri'na'e. **4** Hagi Elkana'ma ofama erino'ma egezama kresramnama vazanknarera Peninane maka ne'mofa'anena ana ofafintira ame'a refako huno zamitere hu'ne. **5** Hianagi Hanana Ra Anumzamo'a rimpa erigigeno mofavrea onte'neanagi, Elkana'a avesinteno ante agofetu huno ofama nehifintira rama'a zantami amitere hu'ne. **6** Hagi Ra Anumzamo'ma Hanama rimpama erigigeno mofavrema onte'nea zankura Penina'a kiza zokago ke hunteno, maka knafina azeri haviza hutere higeno, rimpamo'a ata negrigeno asunku zampi Hana'a manitere hu'ne. **7** Hagi kafune kafunema Ra Anumzamofo seli mono nontegama vuterema nehazageno'a, Penina'a Hanana ana kege huntetere nehuno, arimpa eri haviza nehigeno Hana'a zaviraneteno ne'zana onetere hu'ne. **8** Ana'ma higeno'a neve' Elkana'a amanage hu'ne, Nahigenka ne'zana a'o nehankeno krimpa haviza nehigenka zavira netane? Kagra 10ni'a Mofavre antegahananagi antahintahikafina nagrikura kavesinantegahane. **9** Hagi mago zupa Sailo kumate mani'ne'za ne'zane tinema

nevagaretazageno, Hana'a otino nunamu hunaku mono nontega vu'ne. Hagi ana knarerera pristi ne' Eli'a Ra Anumzamofo seli mono nonpima ufre kahante pristi vahe'ma nemaniza trate mani'ne. **10** Hagi Hana'a rama'a asunku nehuno zavira neteno agu'areti huno Ra Anumzamofontega nunamuna nehuno, **11** Ra Anumzamofontega amanage huno huvempagea hu'ne, Ra Anumzana hanavenentake hu'namoka eri'za akamo'na natazana negenka, kasunku hunantenka ne' mofavrea nami'nanke'na, ete ana mofavrea Ra Anumzamoka kagri kaminenkeno, mika zupa kagrane manigahie. Hagi ana mofavrema Ra Anumzamokare'ma azeri ruotge hu avame'zama mesiana, azokara oharetfa hugahie. **12** Hagi Hanama antahintahifima nunamuma huno Ra Anumzamofoma antahinegegeno'a Eli'a ana a'mofo agipi keteno mani'ne. **13** Hana'a antahintahifi nunamuna nehigeno, agi'mo'a kaza hianagi nunamuma hia agerura Eli'a ontahi'ne. Ana'ma hia zankura Eli'a agesama antahiana Hana'a akati ne'neno negi ne'negahie huno hu'ne. **14** Anage nehuno Eli'a amanage hu'ne, Aka ti nenenka neginenananki aka tima nenanzana atro. **15** Hianagi Hana'a kenona'a amanage hu'ne, ra ne'moka nagra anara osu'noanki, nagu'afina knaza me'nege'na ana knazani'a eri'na Ra Anumzamofontega eme huama nehue. **16** Hagi nagrikura havi are hunka kagesa antahionamio, nagra nasuzampine, nata zampi mani'ne'na nunamuna nehue. **17** Higeno Eli'a kenona amanage hu'ne, Israeli vahe Anumzamo'a antahigana zana amane kamigahianki, krimpa fru nehunka vuo. **18** Higeno Hana'a huno, ra ne'moka eri'za akamo'na antahinamio, huno Elina nesamino vuno ne'zana ome nenen, mago'ene asuzampina omani'ne. **19** Hagi anante nanterana maka naga'mo'za oti'za Ra Anumzamofo avuga monora hute'za, ete kumazamirega Rama

vu'naze. Hagi Elkana'a nenaro Hanana anteno masegeno, Ra Anumzamo'a Hana'ma nunamuma hu'nea zanku antahimi'i'ne. 20 Ana higeno Hana'a amu'ene huno ne' mofavre kasenteno, Ra Anumzamofo antahigogeno namie nehuno, Samueli'e huno agi'a antemi'i'ne. 21 Hagi anante kafurera Elkana'a a' mofavre'ane kafugu kafugu'ma Ra Anumzamofontega kre sramana nevazaza hu'za kresramana nevu'za, huvempa kema hu'nea kema eri knare hanagu Sailo kumate vu'naze. 22 Hianagi Hana'a zamagranena marerino ovu nemanino amanage huno nevena asami'ne, Mofavremo'ma amima atresanige'na avre'na vanugeno Ra Anumzamofo nompi umani vava hugahie. 23 Higeno Elkana'a kenona'a hunteno kagrama antahisankeno knare'ma haniaza hunka maninenka mofavre amina neminka azeri ra huo. Hagi mani'negeno Ra Anumzamofonte'ma huvempage hu'nana zana kazeri knare hanie. Higeno Hana'a ovu mani'neno mofavrea kegava huso'e nehigeno, ra huno amina atre'ne. 24 Hagi ana mofavremo'ma rama huno amima netregeno'a osi mofavre mani'neanagi nerera'a nevreno, 3'a kafu hu'nea bulimakaonki, 10ni'a kilo hu'nea flauaki, mago tafempi waini tina e'nerino, ana mofavrenena avreno Ra Anumzamofo nontega Sailo kumate marerino vu'ne. 25 Hagi ana bulimakaoma ahegis'e'za, ana mofavrea avre'za Elinte vu'naze. 26 Hana'a amanage huno Elina asami'ne, ranimoke, ko'ma tava'onire'ma amare'ma mani'nankena'ma, Ra Anumzamofoma antahige'noa a' oe. 27 Ama mofavrea nunamu hu'na Ra Anumzamofo antahigogeno nunamuni'ama antahinamino nami'nea mofavre. 28 Ana hu'negu menina ama mofavrea Ra Anumzamofo ami vagaroankino mani'noma vania knafina Ra Anumzamofo vahere huno manino vugahie. Na'ankure ana mofavremo'a Ra Anumzamofo nompi

mika kna mani'neno, Ra Anumzamofo eri'zana erigahie. Higeno
agra anampi Ra Anumzamofo agi erisga hu'ne.

2 Hagi Hana'a amanage huno nunamuna hu'ne, Ra Anumzamoka nagu'areti hu'na rama'a muse hugante'na kagi ahentesga hue. Kagra'a hanavea naminka nazeri sga hu'nane. Na'ankure naza hunka knazaniafintira navrananki'na, ha' vaheni'amofona agizaregahue. Na'ankure nagu'mavazinka navrana zankura muse hugantoe. **2** Hagi Ra Anumzamoka mago'mo'e huno kagri kna huno ruotagera osigeno, mago havemofo hanavemo'a tagri Anumzamoka hankavegnara osu'ne. **3** Hagi avufga rahu kea mago'ane osuno, kagra'ama kazerisga hu kea kagipintira atioramino. Na'ankure Ra Anumzamo'a mika'zama banana zana ko ke'neankino, kavukava'ma banana kante anteno, refko hugantegahie. **4** Hagi hanavenentake vahe mani'nonema nehaza vahe'mokizmi atia eri futagi netreno, hanavezmi omne vahera zamazeri hanavetige'zma hanave vahe nemanize. **5** Hagi ne'zama nezamu'ma nehaza vahe'mokizmia, zamaga netenigeno, ne'zanku'ma zamaga'ma netenia vahe'mo'za nezamu hugahaze. Hagi naravo a'mo'a 7ni'a mofavre antegahie. Hianagi rama'a mofavrema ante'nea a'mo'a ontegahie. **6** Hagi Ra Anumzamo vahera ahenefrino, vahera asimura amigeno nemanigeno, Agra vahera huntegeno fri vahe kumatega nevigeno, vahera anampintira azeri onetie. (**Sheol h7585**) **7** Hagi Ra Anumzamo vahera azeri amunte noamaneno, feno vahera azeri retro nehie. Agrake vahera azeri anteneramino, vahera azeri antesga nehie. **8** Hagi amunte omane vahe'ene mika zanku'ma upa'ma nehaza vahe'enena kugusopafintira zamavaresga huno ra zamagi zamige'zma marerisa vahe'enena nemanize. Na'ankure Ra Anumzamo'a ama mopamofo trara tro

huteno, mopamofona anante megahane huno higeno me'ne.

9 Hagi fatgoma hu'zma Agri'ma amage'ma ante'za kama vanoma nehaza vahe'mokizmia kegava hunezamanteanagi, kefo zamavu'zmava'ma nehaza vahera zamatrege'za hanimpi fanene hugahaze. Na'ankure mago vahe'mo'a agra'a hanaverera knarera huno omanigahie. 10 Hagi Ra Anumzamofoma ha'ma rentesnaza vahera, Ra Anumzamo'a zamazeri haviza hugahie. Hagi monage huno monafintira nezamaheno, Ra Anumzamo'a miko mopafi vahe'mokizmia kegaga huzamantegahie. Hagi Agra kini ne'a hanavea nemino, masavema frentenoma huhamprima ante'nea nera hihamu hanavea amino azeri antesga hugahie. 11 Anante Elkana'ene Hanakea ete kumazanirega Rama vu'na'e. Hianagi Samueli'a pristi ne' Eli aza huno Ra Anumzamofo eri'zana eri'ne. 12 Hagi Eli mofavre'amokea kefo zanavu'zanava nehuke, Ra Anumzamofona Ra mani'ne huke antahi omi'na'e. 13 Hagi ana pristi ne'tremokea vahe'mo'zama ofama eri'za e'za eme kresramana nevazafintira, eri'za vahe huntakeno 3'a ave me'nea fokureti kavofima krazageno'ma nerea afupintira ome revazu huno eme zanamitere hu'ne. 14 Hagi ana eri'za ne'mo'a afu'ma kre'naza kavofima ana fokureti'ma reno avazuma hia afura, erino Eli mofavrerarena eme zanami'ne. Israeli vahe'mo'zama mika zupa Sailo kumate'ma ofama eme nehazageno'a, e'inahukna zanavu'zanava hutere hu'na'e. 15 Hagi mago'a zupa pristi vahe'mo'za afova'a onkre'nazageno ana eri'za ne'mo'a emenerige'za, pristi vahe'mo'za amanage hu'naze, kretesunkenka erigahane hu'zama nehazageno'a, kavofima kraza afura onegaha'anki zanagra'a tevefi kreke negaha'e. 16 Hagi anama ofama hunaku'ma nehia pristi ne'mo'a amanage hu'ne, natrege'nna afu afova'a kretanena, henka

kavesiniama'a erinka vuo, higeno'a pristi ne'mofo eri'za ne'mo'a amanage hu'ne, kagrama namizanku'ma menima kave'ma osiniana, nagra'a erigahue. **17** Hagi Ra Anumzamofo avufina ana netremokea tusi'a kumi hu'na'e. Na'ankure zanagra Ra Anumzamofonte'ma eri'za aza ofa kefenkami atreke tusi'a kefo zantfa hu'na'e. **18** Hianagi Samueli'a pristi vahe'mo'zama nehaza efeke zaza kukena hu'neno, eri'zana Ra Anumzamofo avuga eri'ne. **19** Hagi kafugu kafugu'ma nehazaza huke ofama huku'ma nererake nefake'ma ne-ekea, Samuelina nerera'a osi za'za kukena'a tro huno erinte'neno etere hu'ne. **20** Hagi anama huteke kuma zaniregama vu'zama nehakeno'a, Eli'a nunamuna huno Elkanane nenaronena asomu kea huznanteno amanage hu'ne, Ra Anumzamo'a ama mofavrema ami vagamarena'a zantera, nona huno mofavreramina tanamigahie, higeke ete kumazanirega vu'na'e. **21** Hagi Ra Anumzamo'a Hanana azeri so'e huntegeno amu'ene huno 3'a ne'mofavregi tare mofaki huno kasezmante'ne. Hianagi Samueli'a Ra Anumzamofo avuga Sailo manineno nena hu'ne. **22** Hagi Eli'a ananknafina ozafa re'neanagi tare ne'mofavre'amokea maka Israeli vahe'ma huzamanta'a zanavu'zanava zamofo agenkea antahine. Hagi ana netremokea seli mono nomofo kafante'ma eri'zama eneri'za a'nene monko'za hu'na'e. **23** Hu'negu Eli'a ana mofavre'amokiznigura amanage hu'ne, na'ahigeta e'inahu kefo tanavu'tanava'ma neha'a zamofo tanagenkea miko vahe'mo'za eme nenasamize? **24** Hagi mofavrenimota'a e'inahu tanavu'tanavara osi'o. Na'ankure Ra Anumzamofo vahe'mo'zama huganti kamama nehaza kema nasamiza kemo'a havizantfa nehie. **25** Hagi mago vahe'mo'ma mago vahe'ma kefo avu'ava'ma huntesiana Anumzamo amu'nompina mani'neno eri ante fatgo hugahie. Hagi

Ra Anumzamofonte'ma kefo zama haniana, i'za erinte fatgo
hugahie? Hianagi Eli mofavreraremokea nezanafama zanasamia
nanekea ontahi'na'e. Na'ankure ko' Ra Anumzamo'a zanahe
fri'naku antahi'ne. **26** Hagi Samuel'i'a mofavrema mani'neno'a Ra
Anumzamofo avure'ene vahe'mofo avure'enena so'e avu'avaza
hige'za avesinentazageno Ra Anumzamo'enena avesinte'ne. **27**
Hagi mago knazupa Anumzamofo eri'za vahe'mo'a Elinte eno
amanage huno eme asami'ne, Ra Anumzamo'a amanage hu'ne,
Isipima Fero agoragama kagehe'zama mani'nage'na zamagritera
Nagra'a nazeri ante amara osu'nofi? **28** Hagi neramageho
Aronina maka Israeli naga nofipintira Nagra'a huhampri antogeno
pristi vahe zaza kukena hu'neno, Nagri navuga pristi eri'zana
kresramna vu itarera marerino e'nerino, mananentake'zana
kremna vu'ne. Hagi mika Israeli vahe'mo'zama ofama tevefima
haza ne'zana, miko kagri kagehe'i pristi naga zami'noe. **29** Hagi
nahigeta Nagrite'ma Israeli vahe'mo'zama kresramnama hihoma
hu'na huzmante'noa kante ante'za noniafima ofama eme haz
ofa antahi onamike, renkrerera nereke eri havizana hu'na'e.
Hagi nahigenka tare mofavreka'a ra zanagia nezanaminka,
Nagria ra nagia onami'ne? Na'ankure knare afu'ma Nagrite'ma
ofama eme hazana, tamagragukera antahita neneta afovagera
hu'naze. **30** E'inahu zama hanku Israeli vahe Ra Anumzamo'a
anage huno hu'ne, Kagri naga'ene kagehe'i naga'mo'za pristi
eri'zana erivava hugahaze hu'na hu'noanagi, anara osugahaze.
Na'ankure Nagri'ma ra nagima namisamokizmia, ra zamagi
zamigahue. Hagi Nagri nagima eri haviza hanamokizmia,
zamazeri henkami atregahue. **31** Hagi antahiho, mago kna ne-
eankina hanavetamia erinetrena, tamafahe'i hanavea eritra'nena
tamagri naga'pina magore huno ranra vahera omanigahie.

32 Hagi tamagra negetma kanive neresage'na Israeli vahera asomura huzamantegahue. Hianagi tamagri naga'pina, magore huno ozafareno ranra vahera mani'enageta ke vava osugahaze.

33 Hagi ana hutesuge'zama ofri'zama magoke magoke'ma manisaza vahe'mo'za zamasuzampi nemanisage'za, mofavrema kasezamantesaza mofavremo'za, ozafa ore'ne'za ame hu'za frigahaze. **34** Hagi tare mofavreka'a Hopni'ene Finiasikea magoke zupage frisakenka, ana maka ke'nimo'a tamage hu'ne hunka antahigahane. **35** Hianagi nagri kema antahinamisia pristi ne' azeri oti'nena, Nagri nagu'afine antahizampima me'nea kemofo amage anteno eri'zana enerino, miko zupa Nagrama huhamprinte'nua kini vahe'mofo avuga eri'zana erivava huno vugahie. **36** Hianagi kagri naga'pinti'ma ofri'ma mani'namo'za miko zupa ana pristi ne'te e'za zamare'na emere'za, ne'zama nesunazana omaneanki hurantegeta pristi eri'zana enerita, breti ankrahe'a erita namneno hugahaze.

3 Hagi Samuel'i'a mofavre mani'neno Elina aza huno Ra Anumzamofo avuga pristi eri'zana eri'ne. Hagi ana knafina rama'a kafufi Ra Anumzamo'a Israeli vahera keaga huozami'ne. Hagi magoke magoke knazupa, ava'nagna zana zamaveri hutere hu'ne. **2** Hagi Elina avumo'a agafa huno asu higeno keso'e osuno, mago kinaga Ra Anumzamofo nompi tafe'are mase'ne. **3** Hagi Ra Anumzamofo nompima lamu tavi'ma rekruma hunte'naza tavi'mo'a asura osu'negeno, Samuel'i'a Hanavenentake Ra Anumzamofo huhagerafi huvempage ante vogjisima me'nea seli mono nompi mase'ne. **4** Anante Ra Anumzamo'a Samuelina agihegen, Samuelia kenona huno, Ama mani'noe. **5** Nehuno anampinti Samuel'i'a otino Elinte vuno, na'anku hanke'na oe, higeno Eli'a huno, Kagira kea osu'hoanki ete vunka umaso.

6 Hagi ete mago'ane Ra Anumzamo'a Samuelina agi higeno,
Samueli'a otino Elinte vuno, Ama mani'noanki na'anku hankena
oe, higeno Eli'a huno, Nagra kea osu'noanki mofavrenimoka
vunka umaso. **7** Hagi Samueli'a Ra Anumzamofona keno
antahinora osu'ne. Na'ankure Ra Anumzamo'a kora agritera
eama huno keaga higeno keno antahino osu'nego, anara hu'ne.

8 Hagi nampa 3 zupama Ra Anumzamo'a kema higeno'a,
Samueli'a otino Elinte vuno, Kagrama kema hanana ama
mani'noe huno ome asami'geno anante Eli'a antahi ama nehuno,
Ra Anumzamo ama ana risera kea hunemie huno antahi'ne.

9 Hagi Eli'a anage huno Samuelina asami'ne, Ete vunka
umasenegeno mago'enema kagima hanigenka, kenona huntenka
Ra Anumzamoka eri'za vahekamo'na nentahuanki nasamio
hunka huo, huno nesamino ete huntogeno Samueli'a vuno tafe'are
umase'ne. **10** Hagi Ra Anumzamo'a tavaonte eme otino ko'ma
hu'neaza huno, Samueliwe, Samueliwe higeno Samueli'a huno,
Ra Anumzamoka eri'za vahekamo'na nentahuanki nasamio. **11**
Higeno Ra Anumzamo'a Samuelina asamino, Antahio Nagra
menina Israeli vahepina, antari hanazaza eri fore hugahuankino
iza'o ana zamofo agenkema antahisimo'a antri nehuno na'a
fore nehie huno hugahie. **12** Hagi Eli naga'ma zamazeri haviza
hugahuema hu'na koro ke'ma huzmante'noa kemofona amage
ante'na agafareti eri agafa hute'na zamazeri haviza hume
vu'na, ome vagaretega zamazeri haviza hu vagaregahue. **13**
Hagi Eli naga'ma zamazeri haviza hugahuema hu'na kore
kema huzmante'noa kemo'a mevava huno vugahie. Na'ankure
agri mofavre'mokea kefo zanavu'znavama nehake'na, zanazeri
haviza hugahuema huankea, agra antahino keno hu'neanagi,
haviza neha'e huno znazeri fatgohu kea ozanasami'ne. **14**

E'ina hu'negu Nagra huvempage huankino Eli naga'mo'zama kresramna hanaza ofaretiro, witi ofaretira nona hu'za kumi'zmia apaosegahaze. **15** Hagi anagema hutegen'a Samueli'a vuno umase'negeno vuno ko'atune. Hagi nanterana Ra Anumzamofo mono nomofo kafana ko'ma nehiaza huno anagi'neanagi Ra Anumzamo'ma ava'hagna zampima asami'nea nanekema Elimas ami'zankura Samueli'a koro hu'ne. **16** Hianagi Eli'a kezatino, Nenamofo Samueliwe, higeno Samueli'a kenona huno, Ama mani'noe. **17** Higeno Eli'a Samuelina antahigeno, Na'ane huno Ra Anumzamo'a kasaminefi ana nanekea magore hunka eri fra'okinka nasamio? Hagi kagrama ana mika nanekema eri frakisankeno'a Ra Anumzamo'a kagrira mago'ene knazana erinte agofetu huno kazeri haviza hugahie. **18** Anage higeno Samueli'a Ra Anumzamo'ma asami'nea nanekea maka asami vagaregeno, Eli'a ana kenona huno, Atregeno Agra'a Ra Anumzamoke agri'ma avesi'nia zana hino. **19** Anama hutegen'o Ra Anumzamo'a Samueli'ene mani'negeno nena huno rana nehigeno, maka nanekema Samueli'ma hu'nea nanekemo'a amnezanknara osu'ne. **20** Hagi noti kaziga Dani kumateti agafa huteno, vuno sauti kaziga Bersiva kumate'ma mani'za uhanati'naza maka Israeli vahe'mo'za Samuelinkura Ra Anumzamofo kasnampa ne' efore hie hu'za hu'naze. **21** Hagi Ra Anumzamo'a Sailo kumatera seli mono nompi mago'ene Samuelintera efore huno kea eme asamitere hu'ne.

4 Hagi Samuelima miko ke'ma Israeli vahe'ma zmasamige'za antahite'za hatera vu'naze. Hagi ana knafina Israeli vahe'mo'za Filistia vahe ha' huzmante'naku Ebenesa kumate seli no ome ki'za mani'nage'za, Filistia vahe'mo'za Afeki kumate seli nona eme ki'za mani'naze. **2** Hagi Filistia vahe'mo'za rama'a sondia

vahe zamazeri retrotra hute'za, avazuhumpi hu'za nevu'za, Israeli
vahera tusi'a ha' ome huzamante'za 4 tauseni'a sondia vahe
ana zupa zamahe fri'naze. 3 Hagi Israeli sondia vahe'mo'zama
ha'tetima azage'za kva vahe'mo'za hu'za, na'a higeno Ra
Anumzamo'a tatregeno Filistia vahe'mo'za hara hutagateraze?
Hagi tagra Ra Anumzamofo huhagerafi huvempage vogisia
Sailo kumatetira omerineta hatera nevanunkeno, ha' vahetimo'za
tahe'zankura ana zamo tagu'vazigahie. 4 Anagema hute'za
sondia vahe huzmantage'za Sailo kumatetira Ra Anumzamofo
huhagerafi huvempage vogisima tarega kazigama Serobimi
ankerontrema mani'nakeno Anumzamo'ma amu'nompima
nemania vogisia ome eri'naze. Hagi Elina tare mofavrearare
Hofani'ene Finiasikea ana hugagerafi huvempage bogisine e'na'e.
5 Hagi seli nonkuma'ma ome ante'za mani'nafima ana huhagerafi
huvempage vogisima eri'za ehanatizage'za, Israeli vahe'mo'za
kezanke hu'za rankema hu'naza agasasamo'a mopa azeri tore
hu'ne. 6 Hagi ana agasankema Filistia vahe'mo'zama nentahi'za,
Hibru vahe seli nonkumapina naza fore nehie, hu'za hu'nazanagi
henkama antahi'zana Ra Anumzamofo huhagerafi huvempage
vogisi Hibru vahe'mo'za eri'za e'nazanke antahi'naze. 7 Hagi
Filistia vahe'mo'za tusi koro nehu'za amanage hu'naze, Israeli
vahe'mokizmi mago anumzazamimo seli nonkuma zamifina e'ne,
hu'za nehu'za e'inahukna zana kora nonkonaza forehie. 8 Tagra
tusi'a hazenkefi manigahu'ne, iza taza huno hankavenentake
anumzazmimofo azampintira tavretregahie? E'i ruzahu ruzahu
knazanteti ka'ma kopima Isipi vahe'ma zamazeri haviza hu'nea
anumzane. 9 Hagi Filistia vahe'mota ru Hibru vahe'mo'zama
tagri kazokzo eri'zama eri'nazankna huta, tagra zamagri kazokzo
eri'za erisunki, vene'ne mani'nonanki oti hanaveti'neta hara

huzmantesune. **10** Hagi ana zupa Filistia vahe'mo'za hanavetiza
hara hu'za Israeli vahera zamarotago hu'za rama'a vahe 30
tauseni'a zamahe fri'zageno manizama'amo'za atre'za fre'za seli
nonkuma zamirega vu'naze. **11** Hagi ana zupage huhagerafi
huvempage vogisia Filistia vahe'mo'za zamahe'za nehanre'za,
Elina tare ne' mofavre'ararena Hopnine Finiasinena zanahe
fri'naze. **12** Hagi ana zupage Benzameni nagapinti mago
ne'mo ha'ma nehazafinti atreno agareno Sailo kumate vuno
kukena'a ome tagoto tagatu nehuno, kugusopa kateno anumpi
netreno, asunkura hu'ne. **13** Hagi Eli'a nemania tra'a erino eme
anteno kante mani'neno negeno, Ra Anumzamofo huhagerafi
huvempage vogisigura tusi agesa nentahino asunku nehigeno,
ana ne'mo'a kumapina ufreto ana nanekea zamasamige'za ana
rankumapi vahe'mo'za tusi zavi krafa hu'naze. **14** Hagi ana
kumapinti'ma zavi krafagema hazanke'ma Eli'ma nentahino,
nazafore nehie? Huno nehigeno ana ne'mo'a ame huno eno ana
nanekea eme asami'ne. **15** Hagi ana knarer Eli'a 98'a kafu
higeno, avumo'a asu hu'negeno keso'e osu'ne. **16** Hagi ana
ne'mo'a Elina asamino, Nagra ha'pintira meni ama e'noe, higeno
Eli'a huno, mofavrenimoka inankna ha'mo'a nehifi nasamio? **17**
Higeno ana kema erino e'nea ne'mo'a Elina asamino, Israeli
vahe'mo'za kore atre'za frageno, Filistia sondia vahe'mo'za tusia
vahe zamahazageno, anampina tare ne' mofavreka'ararena
Hopnike Finiasikea frikeno, hago huhagerafi huvempage
vogisia Filistia vahe'mo'za eri'naze. **18** Hagi Anumzamofo
huhagerafi huvempage vogisima eri'naze ke'ma Eli'a nentahino'a
amagenaregati traka huno umasegeno, rankumamofo kafante
aheno ananke rehantagigeno fri'ne. Na'ankure agra ranafaregeno
avufamo'a kna hu'ne. Hagi Eli'a 40'a kafufi Israeli vahe kva

mani'ne. **19** Hagi Finiasi nenaro'a amu'ene hu'neno mofavre ante'za nehia knafi anzana fore higeno, ana a'mo'ma antahama Ra Anumzamofo huhagerafi huvempage vogisi'a ha' vahe'mo'za erizageno, nenofero ne'ma frigeno, neve'ma fria kema nentahino'a ame huno ata negrigeno renareno mofavrea kasente'ne. **20** Hagi mofavrema kasenenteno fri'zama nehigeno'a, mofavrema azahuno antenemia a'mo'a asamino, ne' mofavre kasentananki korora osuo, huno asamianagi, ana kenona'a osu'ne. **21** Ana higeno ana mofavremofo agi'a lkabotie huno antemineankino, ana agimofo agafa'a Israeli vahe'mota Anumzamofo hanavemo'a hago tatre'ne hu'ne. Na'ankure Anumzamofo huhagerafi huvempage vogisia erizageno, nenanofero nera hago fri'geno neve'enena fri'negeno'e. **22** Hagi ana amo'a huno, Anumzamofo hanavemo'a hago Israeli vahera tatre'ne. Na'ankure Anumzamofo huhagerafi huvempage vogisia hago ha' vahe'mo'za eri'naze.

5 Hagi Filistia vahe'mo'za Anumzamofo huhagerafi huvempage vogisia ha'ma hu'za Ebeneza kumatetima erite'za, eri'za vu'za Asdoti kumate uhanati'naze. **2** Anama hute'za Filistia vahe'mo'za Anumzamofo huhagerafi huvempage vogisia eri'za havi anumzazimimofo Dagoni mono nompi mareri'za, ana havi anumzazamimofo asoparega tava'oma'are ome ante'naze. **3** Hagi Asdoti kumate vahe'mo'za nanterama ot'i'za eme kazana Dagoni havi anumzamo'a mopafi traka huno avugati Ra Anumzamofo huhagerafi huvempage vogisimofo avuga mase'nege'za eme ke'za antri nehu'za, ete eri'za noma'are ome retrrente'naze. **4** Hianagi ete'za anante nanterama ot'i'za eme kazana ete mago'ane Dagoni havi anumzamo'a traka huno Ra Anumzamofo huhagerafi huvempage vogisimofo avuga avugosaregati mase'nege'za ke'haze. Hagi ana

Dagoni havi anumzamofo aseni'ane azantremokea ruhantagike kahantrate me'nazageno avufga'amoke me'ne. 5 E'ina agafare meninena Dagoni havi anumzamofo pristi vahe'mo'zane amane vahe'mo'zama ana Dagoni havi anumzamofo mono no kafante'ma unefre'za, ana kaha tratera zamaga ore'za takauneraze. 6 Hagi Asdotima mani'naza vahe'ene, tva'ozamire'ma me'nea kumatamimpi vahe'enena Ra Anumzamo'a azana rusuteno usgenkna namunteti zamazeri haviza hu'ne. 7 Hagi anazama fore'ma hiazama Asdoti vene'nemo'za nege'za amanage hu'naze, Israeli vahe Anumzamofo huhagerafi huvempage vogisia tagranena omanenianki, erita ome atresune. Na'ankure Agra azana rusuteno hara huneranteno, Dagoni havi anumzantinena hara hunente. 8 Hagi Filistia mopafima mika 5fu'a kuma'ma kvama hu'naza vahezaga ke hutru hu'za amanage hu'naze, ama Israeli vahe Anumzamofo huhagerafi huvempage vogisia na'a hugahune? Hazageno ana ranra kva vahetamimo'za kenona hu'za, Israeli vahe Anumzamofo huhagerafi huvempage vogisia Gati kumate erita viho, hazage'za Israeli vahe Anumzamofo huhagerafi huvempage vogisia eri'za Gati kumate vu'naze. 9 Hianagi ana huhagerafi huvempage vogisima eri'za Gati kumate'ma vazageno'a, ana kumapi vahera ositeti'ma vuno ra vahete'ma vu'neana Ra Anumzamo'a azana rusuteno usagenkna ranra namunteti zamazeri haviza nehige'za tusi zamagogogu hu'naze. 10 Ana hige'za ana huhagerafi huvempage vogisia huzmantazage'za eri'za rankumate Eroni vu'naze. Hianagi Eroni vahe'mo'za rankege hu'za amanage hu'naze, Israeli vahe Ra Anumzamo'a vahetia zamahe friku higeta ama huhagerafi huvempage vogisia erita neaze. 11 Hagi miko Filistia ranra kva vahetamina ete ke hutru hu'za amanage hu'za zamasami'naze,

amafintira Israeli vahe Anumzamofo huhagerafi huvempage vogisia huzmantenke'za eri'za kuma'arega ometreho. Ana'ma osanazana tagri vahe'mo'za rama'a frigahaze. Na'ankure Ra Anumzamo'a azana rusuteno hara hunezmantege'za, ana kumapi vahe'mo'za fri'zankura tusi koro hu'naze. **12** Hagi zamaahema ofri'nea vahera usagenkna namunteti zamazeri haviza hige'za zamaza huzankura krafage hazageno anagamu monarega mareri'ne.

6 Hagi 7ni'a ikampi Filistia vahe'mokizmi mopafina Ra Anumzamofo huhagerafi huvempage vogisimo'a me'ne. **2** Filistia vahe'mo'za pristi vahe'ene avune vahe'zamia kehazage'za age'za amanage hu'za zamantahige'naze. Inankna huta Ra Anumzamofo huhagerafi huvempage vogisia atre'nunkeno kuma arega vugahie? **3** Hazageza ana pristi vahe'ene avune vahe'mo'za zamasami'za, Israeli vahe'mokizmi Anumzamofo huhagerafi huvempage vogisia amnea atresage'za eri'za ovugahazanki, kumi ofama huzantamine eri'neta erita viho. Hagi anama hanageno ana knazamo'ma vagaresigeta, ama knazana Anumzamo neramie huta antahigahaze. **4** Hagi ana kenona zamire zamantahige'za, inankna zantimi kumi ofa eri'neta vugahune? hu'za hazage'za, golireti 5fu'a usagenkna namu tro nehuta, 5fu'a kfa golireti tro huta erita viho. Na'ankure anahu knazamo'a tamagri'ene 5fu'a kini vahetaminte'enena efore hu'ne. **5** Hagi mopatami tamazeri haviza hu'negu 5fu'a usgenkna namuna golireti tro nehuta, ne'zama neno erivagarea kafaramina 5fu'a golireti tro huta Israeli vahe'mofo Anumzamofoma ami'nageno'ma ra agima erisuno'a, azama rusuteno tamagri'ene anumzatamine mopatamia azeri havizama nehiazana osugahie. **6** Hagi nahigeta Isipi vahe'mo'zane Ferozama hu'nazaza huta tamagu'a

azeri hankavenetize. Zamagra Israeli vahe'ma zamazerizana Anumzamo'a antahintahi zami'a zamazeri savri huno knazana zamige'za zamatrazage'za vu'naze. E'ina hu'negu tamagra e'izanku nentahita amefira huomiho. 7 Hagi menina kasefa karisi retro nehuta, anenta'ma antekema amima nemisia tare bulimakao afutrema kora zanagumpina agare namara zafa erinteno reonte'nesia suzantre zanavreta zanarente tragotenteta anenta'a ramina zamavareta kegina agu'afi ome zamatreho.

8 Hagi ana karisifi Ra Anumzamofo huhagerafi huvempage vogisia eri nenteta kumi'ma apasente ofe hutama golireti'ma kfane usagenkna namuma tro hu'naza zantamina mago vogisifi anteta erinenteta, ana bulimakaontrena zamatrenkene ana karisia avazuhuke vi'o. 9 Hagi kva hu'neta negenkeno ana bulimakaomokema Bet-Semesi mopa kazigama vanigeta, e'i Ra Anumzamo ama knazana neramie huta antahigahune. Hagi ana'ma osina, agraragisa fore nehie huta antahigahune.

10 Hagi ana vahe'mo'zama ana kema nentahi'za tare a' bulimakaontrena zanavre'za karisire renente'za, anentazani'a zamavare'za bulimakao kegina agu'afi ome atre'haze. 11 Hagi Ra Anumzamofo huhagerafi huvempage vogisine anama golireti'ma tro hu'naza kafane usagenkna namunema ante'naza vogisia karisifi erinte'haze. 12 Hagi ana bulimakaomokea kana atre'ne vugantigama osu Bet-Semesima me'nea kazigama vu'nea kante vufatgo hu'ne nevu'ne krafa hume vu'na'e. Hagi anama huke nevakeno'a Filistia kva vahe'mo'za zanavariri'za Bet-Semesi mopa atupare ome zanatre'haze. 13 Hagi ana knazupa Bet-Semesi vahe'mo'za hoza agupofi witi hoza nehamare'za kesga hu'za huhagerafi huvempage vogisima nege'za, tusi'a muse hu'naze. 14 Hagi ana bulimakaomokea Josua hozafi

Bet-Semesi ehanatike ra have me'nea asoparega eman'i'na'e.
Hagi ana karisia taganavazi'za Ra Anumzante kresramana
vunte teve eri'za, ana tare bulimakaontrena znahe'za Ra
Anumzamofonte kresramana vu'naze. **15** Hagi pristi vahe'mo'za
Ra Anumzamofo huhagerafi huvempage vogisine, golireti'ma
tro'ma hu'naza kfane usagenkna namunema ante'naza vogisia
eri'za ra have agofetu ante'naze. Ana hute'za ana zupa Bet-
Semesi vahe'mo'za Ra Anumzamofontega kre fanane hu ofa
nehu'za mago'a ofanena kresramna vu'naze. **16** Hagi 5fu'a Filistia
kva vahe'mo'za anazama hazazana kete'za ete ana zupage
kuma'zamirega Eroni vu'naze. **17** Hagi Filistia vahe'mo'za
mago mago kumazamire Gazagi, Asdotigi, Askelonigi, Gatigi
Ekrongi hu'za zamente zamente golireti usgenkna namuna
tro hu'za Ra Anumzamofontega kumizmima apasezmante ofa
ante'naze. **18** Hagi 5fu'a golireti'ma kfa tro'ma hu'za ante'nazana
5fu'a kva vahe'mo'zama kegava hu'naza rankumatamima Ra
Anumzamofo huhagerafi huvempage vogisima antazageno'ma
me'nea kumataminte huhampri'za tro hunte'naze. Hagi ra
havema Josua hozafima me'nea havemo anazama fore'ma
hu'nea zamofo avame'zana me'neankino meninena me'ne. **19**
Hianagi Ra Anumzamo'a 70'a Bet-Semesi vahera zamahe'ne.
Na'ankure Ra Anumzamofo huhagerafi huvempage vogisimofo
agu'afinka ke'naza zante anara hige'za 50 tauseni'a vahe'mo'za
rama'a vahe'ma fri'naza zanku tusi zamasunku hu'za zavira
ate'naze. **20** Hagi Bet-Semesi vahe'mo'za amanage hu'naze, iza
ruotgema hu'nea Ra Anumzamofo avurera otigahie nehu'za, iga
ama huhagerafi huvempage vogisia atre'nunkeno vugahie. **21**
Anage nehu'za ke erino vu vahera huzmantage'za vu'za Kiriat
Jearimi vahera amanage hu'za ome zmasami'naze. Hago Filistia

vahe'mo'za Ra Anumzamofo huhagerafi hvempage vogisia
eri'za eme atrazanki emerita kumatamirega viho, hu'za kea atre
zamante'naze.

7 E'ina hige'za Kiriat Jearimi vene'nemo'za ana huhagerafi
hvempage vogisia eme eri'za kuma'zamirega vu'za, Aminadapu
noma agonare me'nere ome ante'naze. Ana nehu'za ana ne'mofo
nemofo Elisana pristi azeri otizageno pristia manino kegava
hu'ne. **2** Hagi 20'a kafunaza za'zate huhagerafi hvempage
vogisimo'a Kiriat Jearimia me'negeno, Israeli vahe'mo'za
Ra Anumzamo'a tatre'ne hu'za krafagea hu'naze. **3** Hagi
Samuel'i'a miko Israeli vahekura amanage hu'ne, Tamagrama Ra
Anumzamofonte'ma tamagu'areti huta tamagu'ama rukrahe'ma
nehuta, miko ru anumzantamine Astaroti havi anumzamofo
amema'ama amu'nontamifima me'neana eri netreta Agriteke'ma
mono'ma huntesageno'a, Agra Filistia vahe zamazampintira
tamaza huno tamavregahie. **4** Hige'za Israeli vahe'mo'za Bali
havi anumzane Astaroti havi anumzana amu'nozamifintira
erinetre'za Ra Anumzanke monora hunte'naze. **5** Hagi Samuel'i'a
Israeli vahera amanage huno zamasami'ne, Mika'mota Mispa
omeri atru hinke'na tamagri tamagi eri'na Ra Anumzamofontega
nunamuna ha'heno. **6** Hagi Mispama emetru hute'za, tinkerifinti
tina ome afi'za Ra Anumzamofo avuga eme tagi'naze. Hagi ana
knazupa ne'zana a'o nehu'za, nunamuna hu'za kumi'ma hu'naza
zanku huama hu'za zamasunku nehu'za amanage hu'naze,
tagra Ra Anumzamofontera kumi hu'none. Hagi Samuel'i'a Mispa
mani'neno Israeli vahera keaga refko huzmante kva vahera
mani'ne. **7** Hagi Israeli vahe'mo'za Mispama emeri atru nehaze
kema Filistia kva vahe'mo'zama nentahi'za, Israeli vahe ha'
huzamantenaku sondia vahera zamavare'za e'naze. Hagi ana

nanekema Israeli vahe'mo'zama nentahi'za, tusi koro nehu'za zamagogogu hu'naze. **8** Hagi Israeli vahe'mo'za Samuelina asami'za, ontaganenka Ra Anumzana tagri Anumzamofontega mago'ene hanavetinka nunamuna nehugen, Filistia vahe zamazampintira tagu'vazino. **9** Anage hazageno Samueli'a mago ami'nenea anenta sipisipi aheno Ra Anumzamofonte maka kresramana nevuno, Israeli vahe'mokizmi zamagi erino hanavetino nunamuna higeno, Ra Anumzamo'a antahimi'ne. **10** Hagi ana'ma huno kresramana nevige'za, Filistia vahe'mo'za Israeli vahera ha' huzamante'naku e'naze. Hianagi ana zupa Ra Anumzamo'a monagemo hiaza huno kea nehige'za Filistia vahe'mo'za savri nehu'za na'a fore nehie hu'za neginagi nehazageno, Israeli vahe'mo'za hara huzamagatere'naze. **11** Hagi Israeli vahe'mo'za Filistia vahera zamorotago hu'za Mispa atre'za Bet-kar kumapi nevu'za Filistia sondia vahetamina zamazeri'za zamahe fri'naze. **12** Hagi Samueli'a Mispa kuma'ene Seni kuma'mofo amu'nozanifi have erino asenenteno amanage hu'ne, Amarera Ra Anumzamo taza hu'nerere, nehuno Ebenize huno agi'a antemi'ne. **13** Hagi Filistia vahe'mo'za mago'ane Israeli vahera hara eme huozamante'naze. Hagi Samueli'ma kvama mani'nea knafina, Ra Anumzamo'a azana rusuteno Israeli vahera zamaza huno Filistia vahera hara huzamante'ne. **14** Hagi Israeli vahe kumatamina, Ekroniti vuno Gatima ome atre'nea kumatamima Filistia vahe'mo'zama ko'ma zamahe'za hanare'za eri'nazana, ete Israeli vahe'mo'za eri'naze. Ana hazageno Israeli vahe'mo'za Amori vahe'enena hara osu fru hu'za mani'naze. **15** Hagi Samueli'ma mani'nea knafina Israeli vahetera kva mani'neno, keaga refko nehuno kegava huzmanteno ne-eno efri'ne. **16** Hagi kafure kafurera Samueli'a Betelima, Gilkalima,

Mispa kumatamimpi kagino vano nehuno, vahe'mokizmi kea antahino refako huzmantetere hu'ne. 17 Hagi ete kuma'aregama Ramama nevuno'a, anazanke huno vahe'mofo keaga refako hu'ne. Hagi Rama kumate Ra Anumzamofo kresamana vu ita tro hunte'ne.

8 Hagi Samueli'ma ozafama nereno'a keaga refakoma hu kva vahera nemofokizni huhampri zanante'ne. 2 Hagi ese ne' mofavre'mofo agi'a, Joeli'e. Hanki henka ne'mofo agi'a, Abija'e. Zanagra Berseba kumate keaga refako hu kva vahetre mani'na'e. 3 Hianagi ana netremokea neznafa'ma hu'neaza huке kva eri'zana e'ori'na'e. Zanagra tamage huке eri'zana e'orina'anki, havi kazigati oku'a zagoreti'ma masavema zanamiza hazankaziga anteke keaga refko huке zamaza hu'na'e. 4 Ana'ma hake'za miko Israeli ranra vahe'mo'za eri hantage'za Samuelinte Rama kumate vu'za, 5 amanage ome hu'naze, Kagra hago ozafare'nane, tare negamofokea kagrama nehanaza huке eri'zana e'ori'anki, mago'a kumapi vahe'mo'zama nehzaza hunka kini huhamprinogeno tagrira kegava huranteno. 6 Hianagi kini vahe azeri otigeno kegava hurantenoma hu'za hazankegura Samueli'a musena osuno, Ra Anumzamofontega nunamuna higeno, 7 Ra Anumzamo'a Samuelina asamino, na'anema hu'za vahe'mo'za hanaza kante antenka amane anazana huo. Na'ankure zamagra kagri zamefira hunogamizanki, Nagri zamefira hunenami'za, Nagrikura kinitia omanisie hu'za nehaze. 8 Hagi Isipitima zamavare atiramina e'noregati anazana hu'za ne-eza Nagrira zamefi hunenami'za ru anumza avariri'za monora hunente'za eri'zama'a erinte'za e'nazanki'za, anahukna kagri'enena hunegantaze. 9 Hagi kagra ke zamia amage antenka kini ne' azeri otigeno, kegava huzmanteno. Hianagi

kini ne'mo'ma kegavama huzmanteneno'ma maka avu'avazama
huzmantesia zamofo nanekea zamasamio. **10** Higeno Samueli'a
kini vaheku'ma eme antahigaza vahera, Ra Anumzamo'ma
asamia nanekea miko zamasami vagare'ne **11** Hagi Samueli'a
zamasamino, Amanahu'za kinima manino kegava huramantesia
ne'mo'a hugahie. Agra miko mofavretamia avreno hosi afu'ama
eri'zama ha'ma ome hanaza vaher nezamanteno, karisima
eri'za nevu'za ha'ma hu vaher zamavarentesige'za mago'amo'za
agri karisimofo avuga ugote'za Yugahaze. **12** Hagi mago'a
zamavareno 1tauseni'a sondia vahete kva nezamanteno, mago'a
zamavareno 50'a sondia vaher kva vaher nezamanteno, mago'a
zamavareno hozama erino ante vaher nezamanteno, mago'a
zamavareno hozama hamare vaher nezamanteno, mago'a vahera
zamavareno ha'zane kevema trohu vaher nezamanteno, mago'a
zamavareno karisimofo mikazama tro hu vaher zamantegahie.
13 Hagi mofa'netamia mago'a zamavareno mananentake zama
retro'ma hanagu nezamanteno, mago'a zamavareno ne'zama
kre vaher nezamanteno, mago'a zamavareno bretima kre vaher
zamantegahie. **14** Hagi knare hu'nenia witi hozama, knarema
hunenia waini hozama, knare'ma hunenia olivi hozanena erino
agra'a eri'za vaher zamigahie. **15** Hagi 10ni'a kevuma witine
wainima ante'nenafintira mago kevu erino eri'zama'a kegava
nehaza vaher'ane eri'za vaher'ane zamigahie. **16** Anahunkna huno
ve kazokzo eri'za vaher'ene a' kazokzo eri'za vaher'ene, hanave
nehazavene, knare'ma hu'nenia donkiramine bulimakaotamia
zamavareno agra'a eri'za kante zamantegahie. **17** Hagi agra
10ni'a bulimakao afu kevu ante'nesafintira mago kevua agra
nevreno, tamagria kazokzo eri'za vaher tamavrentegahie. **18** Hagi
ana'ma hanigeta Ra Anumzamofona krafage hunteta tamagrama

huhampri'naza kini ne'mofo azampintira tazahunka tavro huta
nunamuna hugahazanagi, Ra Anumzamo'a tamaza osugahie.

19 Anagema Samueli'ma hige'za, ana ke'a ontahi'za zamagra
hu'za, tagrira kini ne'mo kegava hurante'niegu tave'sie. **20** E'ina
hanigeta ruga'a kumate vahe'mo'zama nehazaza huta kinimofo
kvafi mani'nunkeno agra'a vugota huranteno, hatera tavreno
vugahie. **21** Hagi ana miko kema hazana Samueli'a antahiteno
ana miko kea Ra Anumzamofo ome asami'ne. **22** Hagi Ra
Anumzamo'a amanage huno Samuelina asami'ne, zamagri
ke antahinka mago kini zamio. Anage higeno Samueli'a miko
vahera huzmantege'za kuma'zamirega vu'za e'za hu'naze.

9 Hagi magora rama'a feno ante'nea nera Benzameni naga
nofipinti ne'mofo agi'a Kisi'e. Hagi Kisina Abieli kasentegeno,
Abielina Zerori kasentegeno, Zerorina Bekorati kasentegeno,
Bekoratina Afia kasente'ne. Ana hu'neankino Kisi'a rama'aza
anteno agi me'nea ne' mani'ne. **2** Hagi Kisi'a ne' mofavre
ante'neankino, hentofa nehazavegino agra za'za huno maka
Israeli vahera zamagatere vagare'neankino, agi'a Soli'e.
Israeli vahe'mokizmi amu'nompina magore huno agrikna nera
omani'ne. **3** Hagi mago knafina Kisi donki afutamimo'za
fanene hu'nazageno nemofo Solina asamino, mago eri'za
vahe nevrenka vunka ana donki afuzagagu ome hako. **4**
Higeno Soli'ene eri'za ne'anе hakeke Efraemi agona kokampina
nevune, Salisa uhanati'na'anagi magore huke hakeke eriforera
osu'na'e. Anantetira hakeke Salimi vuna'anagi hakeke eri
fore osuke netreke, Benzameni naga'mokizmi kumatamimpi
vu'na'anagi onketfa hu'na'e. **5** Hagi anantetira hakeke Sufu
kaziga uhanatiteke, Soli'a eri'za ne'a asamino, Ru nenfa'a
donki afuku'ma agesa antahintahima nehiama'a agatereno

tagrikura agesa antahinigi egeta ete kumatega va'maneno.

6 Hianagi eri'za ne'mo'a amanage hu'ne, Ko, antu kumatera magora Ra Anumzamofo eri'za nera mani'nearkino vahe'mo'za kesaga hunentaza nere. Hagi mika zanku'ma fore hugahiema nehiazamo'a fore nehia neki, egeta antu ana nete va'manenko, amaretira inante vugahu'e agra tasamigahie. 7 Hagi Soli'a eri'za ne'amofona amanage huno kenona hunte'ne, Tagra knare Ra Anumzamofo eri'za netera vugahuanagi, naza muse zana eri'neta omenemita hugahue. Hagi hago ne'zama eri'no'a zana nevagare'noe. Hagi tavatera musezama amisu'azana omane'ne. 8 Anage higeno ete eri'za ne'amo'a Solina kenona hunteno, Ko, ama kunifina osi'a silva zagoa eri'noankita Ra Anumzamofo vahe'mofona aminukeno inante tagra vugahu'e agra tasamigahie. 9 (Hagi ana knafina Israeli vahe'mo'za Anumzamofontegati'ma keagama erinakura, enketa avune vahe ome kamaneno nehaze. Hagi korapara avune vahere hu'za nehazanagi, menina Anumzamofo kasnampa vahere hu'za nehaze). 10 Hagi Soli'a eri'za ne'agura anage hu'ne, Knare ke hananki vanu'e. Anage higeke Anumzamofo vahe'ma nemanirega vu'na'e. 11 Hagi agonarega umarerike rankumatega nevakeno ana kumapinti tifinaku atineramiza mofa'nezaga ome zamantahigeke anage hu'na'e, avune nera mani'neo? 12 Hakeno ana mofa'nemo'za kenona hu'za, izo meni avune nera tagri kumapina e'neno kresramana vu ofa nehu'za ruotge ne'za nenaku nehaza vahe zamavareno agonarega vu'za nehianki, ame huta ko vi'o. 13 Hagi ne'zama nenaku agonarega mareorinesigeta kumapima ufresuta'a ome tutagiha huntegaha'e. Hagi zamagima hu'nea vahe'mo'za ne'zana one avega ante'zma mani'enageno uhanatino asomu kea ome hutena negahaze. Hagi hantaka huta

vanuta'a ome kegaha'e. **14** Hagi zanagra kumapi ufreke nevuke, Samueli'a agonarega mono'ma nehaza kumatega vunaku ne-egeke ome ke'na'e. **15** Hagi Soli'ma ome'negeno ko oki Ra Anumzamo'a Samuelina asamino, **16** okina ama ana knare Benzameni mopafinti mago nera huntanenkeno kagrite egahie. Hagi kagra masave frentenka azeri ruotage hugeno Israeli vaheni'arera kva mani'neno Filistia vahe'mo'zama zamazeri havizama nehaza zamazampintira zamagu vazigahie. Na'ankure zavi krafagezmia Nagra nentahi'na vaheni'a antahinezamue. **17** Hagi Samueli'ma Solima negegeno'a Ra Anumzamo'a Samuelina asamino, E'i'na neku kasami'noankino agra vahe'nirera kegava hugahie. **18** Higeno Soli'ma kuma kahante Samuelima tutagiha hunenteno'a antahigeno, Inantega avune ne'mofo nona me'ne huno Samuelina antahige'ne? **19** Higeno Samueli'a kenona hunteno, Nagra ama'na avune nera mani'noanki, ete vugeta agonarega marerimaneno. Hagi menina nagrane ne'zana nenenga oki nantera katra'nena vugahane. Hagi kagra'ma kagesa antahi'nana zantamina kasamivaregahue. **20** Hagi donkima fananema higeno 3'a knama evu'nea zankura kagesa ontahio, ko hake'za erifore hu'naze. Hagi menina Israeli vahe'mo'za kagri'ene negafa nagaku'ene amuhara nehaze. **21** Hagi Soli'a kenona amanage hu'ne, Israeli naga nofipina Benzameni nagara osi naga manizageno, ana agau'afina nagri naga'mo'za osi'a naga mani'none. Hagi nahigenka e'inahu kea nehane? **22** Hagi Samueli'a, Soline eri'za ne'anena nezanavreno vuno vahe'ma kehige'za eman'i'nazza nompi ufreke, ese trate ome zanante'ne. Hagi anampinka 30'a vahe naza mani'naze. **23** Hagi Samueli'a ne'zama negrea nera asamino, rure antese huo hu'nama kasami'noa afu ame'a erinka eme namio. **24** Higeno

ne'zama negrea ne'mo'a afu aga'a erino Soli avuga eme ante'ne. Hagi Samueli'a Solina amanage huno asami'ne, Vahetamima kema nehu'na, kagri suzane hu'na antegante'noanki, amama zamajima huge'za aza vahe'ene ne'zana no. Higeno Soli'a ana zupa Samueli'ene ne'zana ne'ne. 25 Hagi anantetira kumate'ma eramizageno'a Samueli'a nomofo agofetu Soli'enena keaga huteno, noma mase'niazana retro huntegeno mase'ne. 26 Hagi kotu avame Samueli'a otino Solina kehuno, Otige'na kazeri retrotra hanena kumakarega vuo. Higeno Soli'a otino Samueli'ene magoka kantega vu'na'e. 27 Hagi kumapinti'ma utiraminaku'ma nehu'za Samueli'a Solina amanage huno asami'ne, ko huntegeno eri'za nekamo'a tatreno vugoteno nevina, kagra amare osi'agna nagrane mani'nege'na Ra Anumzamo nasami'nea kea huama hu'na kasami'neno.

10 Anante Samueli'a masave tafena erino masavena Soli anumpi taginteteno, antako hunenteno anage hu'ne, Amanahu'zama huana, Israeli vahe'a kegava hanane huno Ra Anumzamo'a kini kazeri otie. 2 Hagi menina natrenka vunka Reselima asente'naza mopamofo agente'ma Zelza Benzameni naga'mofo moparega uhanati'nunka, tare netre ome zanagenakeno, zanagra kasamike hakenkama vu'nana donki afura hago hake'za eri fore hu'naze huke kasamigaha'e. Hagi negafa'a donki afutaminkura agesa ontahino, kagriku tusi agesa nentahino, nankna hu'na mofavreni'a kegahue huno nehuno mani'ne. 3 Hagi anantetira vunka Taboria ra oki zafa agafare uhanatigahane. Hagi ananteria 3'a vene'nemo'za Anumzamofo mono ome hunte'naku Beteli nevanagenka ome zanagegahane. Magomo'a 3'a agaho meme afu'zaga avrena, magomo'a 3'a breti erina, mago'mo'a waini tintafe eri'ne'za

mareri'za nevanagenka ome zamagegahane. 4 Hagi ana
venenemo'za negagesu'za kazeri frufra hunegante'za tare bretia
kamigahazanki, ana tare bretia erio. 5 Hagi anantetira Filistia
sondia vahe'mo'zama Ra Anumzamofo agonare Gibeama kuma
eme ante'za mani'nare vugahane. Hagi ana kumapima ufrununka
mago'a kasnampa vahezaga agonaregati ne-eza zamagra
zamazampina laire nehaza zavenane hapue nehaza zavenane,
nase'nasepana, konkene, eri'ne'za ahe'za ne-eza kasanampa
kea hu'za ne-esaza vahe ome tutagiha huzmantegahane. 6
Hagi anante Ra Anumzamofo Avamu'mo kagripi hanavenentake
huno efresigenka, kagranena kasanampa ke nehunka, ruzah
hunka ruzahu vahe efore hugahane. 7 Hagi kagrite'ma ana
avame'zama efore'ma hanigenka ketesunka, inankna hu'na
vahera zamazama hanugen knare hugahie hunka kagesama
antahi'nana zana, amane hugahane. Na'ankure Ra Anumzamo'a
kagrane mani'neno kza hugahie. 8 Hagi anantetira Gilgali
vugotenka uraminka nevuge'na, Nagra anantega eme kagranena
kre fanane hu ofane, rimpa fru ofanena kresramana vugahue.
Hagi 7ni'a zagegna navegantenka mani'nege'na kagritega e'na
nazanoma banana zana eme kasamigahue. 9 Hagi Soli'ma
rukrahe huno Samuelima atreno nevigeno'a, Anumzamo'a Soli
agu'a azeri ruzah hu'ne. Ana higeno ana zupage ana maka
avame'zamofo kema asami'nea kemo'a rgare'ne. 10 Hagi Soli'ene
eri'za ne'anema Gibiama ehanatikeno'a, mago'a kasnampa
vahe'mo'za tutagiha huznante'za kasnampa ke nehazageno,
Solina Anumzamofo Avamu'mo agrite hanavetino egeno, ana
vahe'ene eri mago huno kasnampa kea hu'ne. 11 Hagi Solima
ko'ma ke'za antahi'za hu'naza vahe'mo'za kageno kasnampa
vahe'ene erimago huno kasnampa kema nehige'za nege'za,

zamagra zamagra amanage hu'naze, Kisi nemofontera na'a fore nehie? Agranena kasnampa vahe fore nehie. **12** Hu'za hazageno mago ana kumate ne'mo mani'nereti otino amanage hu'ne, Mago'a vahe'mo'a amne kasnampa vahera fore hugahie. Iza agri nef'a mani'ne. Hagi e'i ana agafare anagea nehaze, Soli'a agranena kasnampa vahe mani'ne? hu'za nehaze. **13** Hagi Soli'ma kasnampa kema huvagareteno'a, mono'ma ome nehaza agonarega marerino vu'ne. **14** Hagi anante Soli nenogo'a Soline eri'za ne'anena zantanahigeno, iga vuteta nea'e? Higeno Soli'a kenona huno, tagra donki afuku ome hako'ana onketa atreta Samueli ome kenaku vu'noane. **15** Huke hakeno Soli nenogo'a huno, muse huranantoanki na'ane huno tanasami'nefi nasami'o. **16** Higeno Soli'a nenogona kenona hunteno, donki afu'tamina fanane hu'neana hago ke'za erifore hu'naze huno agra tasami'ne. Hianagi kini manigahanema huno asami'nea nanekea osami'ne. **17** Hagi henka Samueli'a Israeli vahera ke hige'za Ra Anumzamofo avuga Mispa kumate e'naze. **18** Hagi anante agra Israeli vahera zamasamino, Ra Anumzana Israeli vahera Anumzamo'a anage huno huama hie, Isipi vaher zamazampintira tamavre atiramina mareri'na ne-ena, mika knama tamamiza kuma'tamimofo hanavefintira tamavre'na atirami'noe. **19** Hianagi tamagra menina hazenke zampinti'ene knazampinti'ma tamagu'vazi'nea Anumzana atreta tamage'na humi'naze. Hagi tamagra huta kini vaher huhamprintegeno kva huranteno hu'naze. Hagi menina Ra Anumzamofo avuga nagate nofite omeritru emeri tru hiho. **20** Hagi Samueli'a Israeli naga nofira miko kehige'za erava'o hutazageno, Ra Anumzamofo avesi kenaku taisi zokago reno kegeno Ra Anumzamo'a Benzameni naga zamazeri fore hu'ne. **21** Hagi anama hute'za ete

Benzameni nagate ana taisi zokago re'za kazageno, Matri naga
huhampri zamante'ne. Hutegeni anampinti Kisi nemofo Soli
huhamprinte'ne. Hianagi Soli'a anampina omani'nege'za ke'za
erifore osu'naze. **22** Ana hige'za Ra Anumzamofona zamagra
antahige'za, iga Soli'a mani'ne, hazageno Ra Anumzamo'a
huno, fenozantamima ante'nafi kankamumpi frakino mani'ne.
23 Hige'za ananke'ma nentahi'za zamagare'za vu'za Solina
anampinkati ome avre'za ageno, ana vahe'enema eme oti'neana
agra za'za hu'negeno miko vahe'mo'za agri afunteke eme
atre'naze. **24** Hagi anante Samueli'a maka vahera zamasamino,
Ra Anumzamo'ma huhamprintea nera hago kazo? Hianagi
miko vahe'mota atupa hu'nazanki ana ne'mo'a za'za huno
tamagatere'ne, hige'za miko vahe'mo'za ranke hu'za, za'zate
kinia manino vugahie. **25** Hagi Samueli'a kini ne'mo'ma eri'zama
erisia ke'a miko vahera nezamasamino, ana naneke avontafepi
krenteno Ra Anumzamofo avuga ante'ne. Anama huteno'a miko
vahera kuma'zmirega huzmantege'za vu'za e'za hu'naze. **26**
Hagi Soli'enena kuma'arega Gibea nevige'za, Anumzamo'ma
zamarimpama zamazeri otia hanavenentake sondia vahe'mo'za
agrane vu'naze. **27** Hianagi mago'a hazenke vahe'mo'za hu'za,
inankna huno ama ne'mo'a tagu'vazigahie. Hagi ana vahe'mo'za
huhaviza hunente'za musezana eri'za eme omi'naze. Hianagi
Soli'a ana vahekura mago kea osu'ne.

11 Hagi mago'agna evutegeni, Amoni kini ne' Nahasi'a sondia
vahe'a zamavarege'za, Israeli vahepi me'nea kuma Jabes-
Kiriati ome avazagi kagizageno, ana kumapima mani'naza
Jabesi-Kiriati vahe'mo'za Nahasina asami'za, kagrane huhagerafi
huvempage hanunkenka kegava hurante'nanketa kagri eri'za
vahe manigahune. **2** Hagi Nahasi'a kenonazmirera anage

hu'ne, tamagranema huhagerafi kema hanuana, nagra maka
vahe'mota tamaga kaziga tamavurga tagati atregahue. Ana
hanugenno Israeli vahe'mo'za zamagazegu hugahaze. 3 Hagi
Jabesi kumate ranra vahe'mo'za ananke nona'a Nahasina
amanage hu'za asami'haze, 7ni'a zagegna tavega ante'nenketa,
Israeli vahe'mo'zama eme taza hu'za tagumavazi'nagura kato
vahera huzmantamnena kea eri'za vu'za Israeli vahera ome
zamasamaho. Hagi zamagrama eme taza osanazana, nazano
tamagrama hurantenaku'ma hazazana tamagrite maka'mota
esunketa hurantegahaze. 4 Hagi Nahasi'ma ana kere'ma hu
izo'ma hige'za, Jabesi vahe'mo'za mago'a vahe huzamantage'za
Soli kumatega Gibea kea eri'za vu'naze. Hagi ana ke'ma ome
nezamasamige'za, miko vahe'mo'za nentahi'za ranke hu'za
zavira ate'naze. 5 Hagi anama hu'za zavi krafama nehazageno'a,
Soli'a hozaregati eri'zama e'neria bulimakaoma'ane ne-eno eme
nezamageno anage hu'ne, naza fore hu'negeta miko vahe'mota
zavira netaze, huno zamantahigege'za? Jabesi vahe'mo'za
hu'naza kea agrira asami'haze. 6 Hagi Soli'ma anankema
nentahigeno'a Ra Anumzamofo Avamu'mo'a agritera hanavetino
egeno, Solina tusi arimpa ahe'ne. 7 Hagi Soli'a tare bulimakao'a
aheno tagarago huno eri nezamino, ama ame'a erita nevuta,
mika Israeli vahera amanage huta nanekea ome zamasamaho.
Iza'o Soline Samuelinema amage'ma ontesimofona, ama
bulimakaonte'ma fore'ma hianknaza fore humigahie. Hige'za
ana nanekema nentahizageno'a Ra Anumzamo'a zamazeri
zamagogofege'za miko vahe'mo'za eri mago hu'za eme atru
hu'naze. 8 Hagi ana vahe'mo'za Bezeke kumate'ma azageno
Soli'ma zamazeri ante fatgoma huno'ma hampri'neana, Israeli
sondia vahera 300 tauseni'a sondia vahe manizageno, Juda

sondia vahera 30 tauseni'a sondia vahe mani'naze. **9** Hagi anama hute'za kema eri'za e'naza vahera amanage hu'za huzmante'naze, oki'na zagma hanatino mareri'enigeno tamaza hu'zana fore hugahie huta Jabel vahera ome zamasamaho. Hagi ana nanekema eme zamasamizage'za Jabeli vahe'mo'za tusi muse hu'naze. **10** Anante Jabeli vahe'mo'za Nahasina asami'za, okina tagra atramisunketa nazano hurantenaku'ma hanaza zana hurantegahaze. **11** Hagi kora otu'negeno nanterame Soli'a sondia vahera 3'a kevu refako hige'za, Amori vahe kumapi ufre'za ha' huzmante'za bainati kazinknonteti zamahe'za rukafri makafri nehazageno vuno feruse'ne. Ana hazage'za osi'ama maniza Amori vahe'mo'za panani hu'za ufre efre hu'naze. **12** Hagi ana hute'za Samuelina antahige'za, ina vahe'mo'za hu'za Soli'a kva huorantegahie hu'za hu'naze? Zamavreta amare enketa zamahe frimmeno. **13** Hianagi Soli'a kenona huno, magore huta Israeli vahera zamahe ofrigahune. Na'ankure menina Ra Anumzamo'a Israeli vahera zamahokeno zamavare'ne. **14** Hagi Samueli'a huno, enketa Gilgali vuta ete mago'ane hu'ama huta Soli'a kini mani'ne huta eri hanavetiita vahera zamasamisune. **15** Hige'za miko vahe'mo'za Gilgali vu'za Ra Anumzamofo avuga Soli'a kini mani'ne hu'za mago'ene azeri hanaveti kea hu'naze. Hagi anantega arimpa fru ofa nehu'za, Soli'ene mika Israeli vahe'mo'za tusi musenkase hu'naze.

12 Hagi Samueli'a miko Israeli vahera amanage huno zamasami'ne, Miko kema nasamiza ketami antahirami'na kegavama huramantesia kinia azeri otue. **2** Hagi keho, vugotama huramante'nia kinia hago azeri otue. Hagi nagra hago ozafarogeno, tu'nazoka tagigeno mofavre'nimo'za ama tamagrane mani'naze. Hagi mofavrema mani'noretii kva

huramante'na neogeno menina ama knare ehanatie. 3 Hagi menina ama Ra Anumzamofo avure'ene kini ne'mofo avurera ama otuanki, mago'a zama tamagri tamavufima hu'nesua zana huama hunanteho. Nagra mago vahe bulimakao o donki afu kumzafa ase'nofi? Hifi iza havizana hunte'na knazana ami'noe? Hagi keagama refko hu'nofina iza zago eri'nena, agri kaziga mani'na keaga refako hu so'ea osu'noe. Nasaminke'na anazama hu'ne'nua zantera nona hu'na mizasa'neno. 4 Anage hige'za Israeli vahe'mo'za kenona hu'za, Kagra tazeri havizana osunka, reravatga osunka, masavema hu kazigati'ma kamiza zantamina mago vahe'mofo zampintira e'ori'nane. 5 Hagi anante Samueli'a amanage huno zamasami'ne, Mago havizana tagri tavufina osu'nane hutama haza ketamia, Ra Anumzamo'ene menima azeri otua kini ne'mo'a nentahigeta anagea nehaze, hige'za zamagra kenona'a hu'za, Izo agra keno antahino hu'ne hu'za hazageno, 6 Samueli'a mago'ane Israeli vahera zamasamino, Ra Anumzamo'a Mosesene Aronikizni huhampri zananteteno, Isipitira tamagehe'ina zamavareno fegi atiramino e'ne. 7 Hagi otita mani'nenke'na knare huno fatgoma hu'nea zama Ra Anumzamo'ma tamagri'ene tamagehe'inema huramante'nea zamofo nanekea tamasami'neno. 8 Hagi Jekopu'ma Isipi vutegenoa, tamagehe'za Ra Anumzamofonku tazahuo hu'za krafage huntazageno, Mosesene Aronikiznia huznantege'ne vugota huzamante'za amama menima mani'naza mopafina zamavare'za e'haze. 9 Hianagi zamagra Ra Anumzana zamagri Anumzamofona zamage kanintazageno, Hazori sondia vahete vugagota sondia ne' Siserane, Filistia vahetamine, Moapu kini ne' zamazampi Ra Anumzamo'a zamavarentege'za, ha' huzmagatere'za kegava huzmante'naze. 10 Anama hige'za ete

Ra Anumzamofontega zavi krafa hu'za ana zankura zamasunku
nehu'za anage hu'naze, tagra kumi huta Ra Anumzana atreta
tamefi hunemita, Ba'ali havi anumzane, Astaroti havi anumzamofo
amema'are monora hunteta eri'zana erinte'none. Hagi menina
tagu'vazinka ha' vahetimofo zamazampintira tavaregeta kagritera
monora huneganteta erizanka'a erigantamaneno. **11** Anage
hazageno Ra Anumzamo'a Gidionima, Bedama, Jeptama,
nagri Samuelinagi huno hurantegeta, ha' vahe tamimofo
zamazampintira tamagu'vazita tamaza hunketa, so'e huta
mani'naze. **12** Hianagi kazageno Amori vahe kini ne'
Nahasi'ma ha' eme huramante'za nehigeta, Ra Anumzamo
kinitamia ko mani'neanagi nagrira nasamita, kinigu tavesie
huta nantahige'naze. **13** E'ina hu'negu kini neku'ma hu'hazana
ama'ne. Tamagrama nantahi ke'nazana, Ra Anumzamo'a ama'na
ne' kinia neramiankino kegava huramantegahianki keho. **14** Hagi
tamagrane kinitaminema Ra Anumzamofonku'ma koro hunenteta,
mono hunenteta eri'zama'a erinteta agoraga'a nemanita,
agri kasegema amage'ma ante'nazana Anumzamo'a tamaza
hanigeta tamagra knare huta manigahaze. **15** Hagi tamagrama
Ra Anumzamofo tra kema ontahisazana, Ra Anumzamo'a
tamagehe'imma ha'ma rezmante'neaza huno tamagri'enena hara
reramantegahie. **16** Hagi menina oti'neta Ra Anumzamo'ma
tamagri tamavufima razama erifore hu'zama nehia zana keho.
17 Hagi menina witima vasage knafi manunkeno, ko'ma ru
kna zahufa ome'ne. Hianagi Ra Anumzana antahiga'nenkeno
kopasina e'nerina, kora atre'nigeno eramigahie. E'inama hanigeta
antahiamama hanazana Ra Anumzamofo avufina haviza
huta kinia azeri otune huta antahigahaze. **18** Hagi Samuel'i'a
nunamu huno Ra Anumzamofona antahigegeno, ana zupa Ra

Anumzamo'a atregeno monagea nehigeno, kora ru'ne. E'ina hige'za Ra Anumzamofone Samuelikiznigura miko vahe'mo'za tusi koro hu'naze. **19** Hagi miko vahe'mo'za Samuelina antahige'za, tagrikura Ra Anumzana kagri Anumzamofontega nunamu hunka antahigegeno tahe ofrino. Na'ankure ko'ma hu'nona kumitimofo agofetura kinigu'ma antahigona zamo'a, mago'ane rama'a kumi hu'none. **20** Hagi Samueli'a huno, Tamagra korora osiho, miko kumira hunazanagi, Ra Anumzana atreta tamagena huomihio. Hianagi maka tamagu'areti huta monora hunenteta eri'zama'a erinteho. **21** Hagi tamagra mago'a havi anumzantera rukrahera huta amagera ontegahaze. Zamagra amnezanki'za tamaza huge tamagura vazige osugahie. **22** Hagi Ra Anumzamo'a vahe'a amagena huoramigahie. Na'ankure Agra'a ra agigu agesa nentahino, Agri'a vahe tamazeri retro hugahie. **23** Hagi nagra mago'ane Ra Anumzamofontega tamagriku hu'na nunamuma huvava nehua zana otregosue. Ru atresu'na Ra Anumzamofontera kumi hugahue. Ana nehu'na fatgo huno knare'ma hu'nea avu'ava'mofo nanekea rempi huramigahie **24** Hianagi Ra Anumzamo'ma ra zankrefama huramante'nea zanku tamagesa nentahita, koro hunteta tamage huta tamagu'areti monora hunenteta eri'zama'a erinteho. **25** Hagi tamagrama kumi'ma huta vanazana, ti hageno miko'za erino viaza huno miko tamagri'ene kini ne' taminena harafi huno vanigeta, vahe kokampi kazokazo vahe umanigahaze.

13 Soli'a 30'a kafu hu'neno Israeli vahe kinia mani'ne. Hagi Israeli vahe'mokizmi kinima mani'neana 42'a kafufi kinia mani'ne. **2** Hagi Soli'a 3 tauseni'a Israeli vene'nea sondia vahe mani'nazegu huhampri zmante'ne. Anampintira **2** tauseni'a vene'nea zamavarege'za Mikmasi kumate agrane mani'nazageno,

1 tauseni'a vene'nea huzamantege'za Jonatani'ene Gibea kumate'ene Beteli agona kumate Benzameni naga'mokizmi mopafi umani'naze. 3 Hagi anama hute'za Jonatani'ene sondia vahe'amo'za Filistia vahera Geba kumapi ha' ome huzamante'za hara huzamagatere'naze. Hagi ana nanekea mago'a Filistia vahe'mo'za antahi'naze. Hagi Israeli vahe'mo'za ke'a eme antahisazegu, Soli'a eri'za vahe'a huzamantege'za maka Israeli vahe kumapi ufenare'za vu'naze. 4 Hagi Soli'ma ha'ma Filistia vahe'ma huzmante nanekema miko Israeli vahe'mo'za nentahi'za, Israeli sondia vahe'mo'za eri hantage'za Solina Giliati ome age'naze. 5 Ana'ma hazage'za Filistia vahe'mo'za Israeli vahe'ma ha' huzmantenakura, 30 tauseni'a karisi e'neri'za, hosifima nevu'za ha'ma nehaza vahera 6 tauseni'agi, sondia vahera rama hu'za hagerinkenafi kahepankna hige'za haprigara osuga'a vahe Mikmasi mareri'za zage hanati kaziga Bet Aven seli nona emeki'za mani'naze. 6 Hagi Israeli vahe'mo'za anazama nege'za antahi'zana, rama'a Filistia vaheki'za hara huragateregahaze'ma nehu'za, mago'amo'za havegampi ufrakizageno, mago'amo'za trampi ufrakizageno, mago'amo'za ranra havegampi frakizageno, mago'amo'za tinkerifi fraki'naze. 7 Hagi mago'amo'za Jodani timofo kantu kaziga takahē'za Gatine Giliati mopafi vu'naze. Hianagi Soli'a Gilgali kumate mani'nege'za agranema mani'naza sondia vahe'mo'za tusi koro nehu'za zamahirahiku hu'naze. 8 Hagi ana kumatera 7ni'a zagegna Samuelima navega antenka manio hu'negu Soli'a avega anteno 7ni'a zagegna mani'ne. Hianagi Samueli'a ana kumatera omege'za Soli sondia vahe'mo'za atre'za vu'za e'za hu'naze. 9 Ana hazageno Soli'a huno, Kre fananehu ofane rimpa fru ofane erita eho, hige'za eri'za ageno, anante agra'a kre fanane hu ofa hu'ne.

10 Hagi Soli'a ana ofama huvaneregeno, Samueli'a egeno
Soli'a azeri frufra huno avrenaku vu'ne. **11** Hianagi Samueli'a
antahigeno, Na'a amazana nehane, huno Solina antahige'ne.
Higeno Soli'a kenona huno, Nagra koge'za sondia vahe'mo'za
atre'za vu'za e'za nehazageno, kagra kema hu'nana knarera
ehanatinke'za, Filistia ha' vahe'mo'zama Mikmasima eri atruma
hazage'na, **12** meni Filistia vahe'mo'za Gilgalia erami'za hara eme
hunantegahaze hu'na nagra nagesa antahi'noe. E'ina hu'negu
nagra'a Ra Anumzamofona antahi onke'nena ofa hanue hu'na
ofa hu'noe. **13** Higeno Samueli'a huno, Kagra neginagi vahekna
hunka Ra Anumzana kagri Anumzamofo kasege'a ovaririne.
Kagrama kasege'a avaririnka vantesina, Israeli vahe'mokizmi
kinia kagrane naga'kamo'zane manivava huta vazasine. **14**
Hianagi kagri nagapima kini eri'zama me'neana amare menina
eme vagaregahie. Na'ankure kagra Ra Anumzamofo kasegea
rutagre'nane. Hagi Ra Anumzamo'a ko mago nera Agri avesizama
nevariria nera ko huhampri ante'neankino, ana ne'mo Ra
Anumzamofo vahetera kinia manigahie. **15** Hagi Samueli'a
ana huteno Gilgalia atreno vigeno, Soli'a agranema mani'naza
sondia vahe'ma hampriana 600'a vaheke mani'naze. **16** Hagi
Soliki nemofo ne' Jonataniki, anama agranema mani'naza
sondia vahe'mo'zanena Benzameni naga'mofo mopafi Geba
kumate mani'nazageno, Filistia vahe'mo'za Mikmasi kumate seli
nonku'ma eme ante'za mani'naze. **17** Hagi Filistia vahe'mo'za
kuma'ma ankanire'za ha'ma hu vahera 3'afi refako hute'za,
seli nonkuma'ma ante'za mani'nafintira atirami'za vu'naze.
Hagi mago sondia kevumo'za Ofra kumara Suali mopa kaziga
zamavugosa hunte'za vazageno, **18** mago kevumo'za Beta
Horonima vu'nea kantega vazageno, mago kevumo'za ana

mopa atuparegama vu'nea kantega vu'za Zeboimi agupofima hagage kokantega urami'nea avaparega urami'naze. **19** Hagi ana knafina Israeli vahepina aenireti'ma ha'zantamima trohu vahera omani'naze. Filistia vahe'mo'za ha'zama aeniretimi tro'ma hu'zana rempi huozamaho hu'za hunagru Israeli vahera huzmante'naze. **20** Hu'negu Israeli vahe'mo'za hozama e'neri'za zantamina, witi hoza tinkama nesaza aenima, kazintamima, sa'umema, witi tagahu agena fagigi kazima, pikiruma kume'ma kanenakura, eri'za Filistia vahete vutere hu'naze. **21** Hagi Israeli vahe'mo'zama ana zantamima kume'ma kanenakuma vazageno'a, Filistia vahe'mo'za 6gis kine hu'za miza agi ahezamante'naze. **22** Hagi ha'ma hunaku'ma hazankna zupa Israeli sondia vahe'mo'za bainati kazine karugru kevenena e'ori'nazanki Soli'ene Jonatanike zanagrake ha'zana e'ri'na'e. **23** Hagi Filistia vahe'mo'za Mikmasima uhanati'nea kama amago'nama hu'nere seli nonkumara ome ante'za mani'naze.

14 Hagi mago zupa Jonatani'a hanko'are'ma erinentea nehaza ne' nevreno anage hu'ne, Egeta Filistia sondia vahe'ma eman'i'aza kumapi va'maneno, huno higene vu'na'e. Hianagi Jonatani'a vania zamofona nefana osami'ne. **2** Hagi ana zupa Soli'a sondia vahe'ane Migroni kuma'mofo fegi'a Gibeatava'onte pomegreneti zafa agafati seli nonkuma ome ante'za mani'naze. Anampina 600'a sondia vahe naza mani'naze. **3** Hagi anampina mago nera pristi kukena hu'nea ne' mani'ne. Ana ne' agi'a Ahiza mani'neankino, nefu'a Ahitupu'e. Hagi Ahitupu nefu'a Ikabotie. Hagi Ahiza'a Ahitubu kasentegeno, Ahitubuna Finiasi kasentegeno, Finiasina Eli kasente'ne. Higeno Eli'a za'za kukena hu'neno Ra Anumzamofo pristi eri'za e'nerino Sailo kumate mani'nea nere. Hagi mago vahe'mo'e huno

Jonatanima kumama atreno hate'ma viazana keno antahinora
osu'ne. 4 Hagi Filistia vahe'ma krerami'za vu'za e'zama nehaza
mehinteti Jonatani'a kreramino Filistia vahe kumapi vunaku agesa
antahi'ne. Hagi kantigamama me'na'a mehintremofo zanagi'a,
Bozezine Senene. 5 Hagi mago mehina noti kaziga Mikmasi
marerigeno, magora Sauti kaziga Geba avuga mareri'ne. 6 Hagi
Jonatani'a hanko'ama erinteno nevia nehaza nera asamino,
Egeta oku zamavufaga taga osu vahe mopafi va'maneno. Ra
Anumzamo agra'a hara taza huno hugahie. Hagi Ra Anumzamo'a
rama'a vahekuro, osi'a vahekura agesa nontahianki, amne
hara hugateregahie. 7 Hagi hanko'ama e'neria nehaza ne'mo'a
Janataninkura anage hu'ne, Nagra nazanoma hana zana, amane
kamage ante'na hugahue. 8 Higeno Jonatani'a huno, Egeta
rugreramita amate va'manena Filistia vahe'mo'za tageho. 9 Hagi
zamagrama tagriku'ma hu'za anante mani'neketa va'mnenoma
hanageta'a, zamagritega marerita ovugahuanki, ama anante
otita manigahu'e. 10 Hianagi zamagrama hu'za emareriom
hanageta'a tagra marerigahu'e. Na'ankure Ra Anumzamo'a
e'i ana vahera tagri tazampi zamavarentegahue huno mago
avame'za taveri hugahie. 11 Anage nehuke ana taregamoke
Filistia vahe'mo'zama kumapinti'ma zanage'are amate ome
oti'na'e. Anama hake'za Filistia vahe'mo'za neznage'za amanage
hu'naze, Hibru vahe'ma kerifima fraki'naza vahe'mo'za atirami'za
azanki, keho. 12 Hagi Filistia vahe'mo'za Jonatanine hanko'are'ma
e'neria ne'enema nezanage'za kezanke hu'za, emareriketa
mago'azana rempi huranamisune. Anage'ma hazageno'a
Jonatani'a hanko'are'ma e'neria nehaza nera asamino, namefi
navaririnka marerio. Na'ankure Ra Anumzamo'a Israeli vahe
zamazampi anamu vahera zamavarentegahie. 13 Hagi ana

mehimpi Jonatani'a azanteti azerino aganuti omere emere
huno marenerigeno, hanko'are'ma e'neria nehaza ne'mo'a
agumpi avaririno marerigeke, hara ome huke ana vahera
zamahe'n'a'e. **14** Hagi Jonatani'ene hanko'are'ma e'neria nehaza
ne'enena, ese hapina 20'a vahera 30'a mita naza hu'nea mopafi
ome zamahe'n'a'e. **15** Hagi anama higeno'a Filistia sondia
vahemokizmi kumapima mani'nazane, fegu'ma mani'nazane,
kumate kumate'ma nevu'za ha'ma nehaza sondia vah'e'ene, miko
Filistia vahemokizmi mopafina imi erige'za, tusia zamagogogu
hu'naze. E'ina korozana Ra Anumzamo eri fore hu'ne. **16**
Hagi Benzameni mopa kazigama Soli naga'ma vah'e'ma esagu
kegava hu'za mani'naza naga'mo'za, kazana Filistia vahе kevu
krefamo'za miko kaziga panani hu'za nefrage'za zamage'naze.
17 Ana zama fore higeno'a Soli'a sondia vahе huzmanteno,
tamagra sondia vahera hamprita zamazeri antefatgo nehutma,
iza amafina omaninefi keho. Hagi ana'ma hu'za hampriza
kazana Jonatani'ene hanko'ama e'neria ne-enena omani'hake'za
ke'naze. **18** Hagi Soli'a Ahizana amanage huno asami'ne,
Ra Anumzamofo huhagerafi huvempage vogisia erinka eno.
(Na'ankure ana knarerla Israeli vah'e'ene ana huhagerafi
huvempage vogisia me'negeno hu'ne.) **19** Hagi pristi ne'enema
kegagama anante'ma nehakeno'a, Filistia vahе kumapima
panini hu'zama ufre efreme nehu'za rankege'ma nehaza zamo'a
omerura hu'ne. Hianagi Soli'a pristi ne' Ahizana asamino, knareki
atregeta hate vanune. **20** Anama hige'za Soli'ene miko sondia
vah'e'ane eri atru hute'za hatera vu'naze. Hagi Filistia vahem'o'za
neginagi hu'za zamagra zamagra bainati kazinkonteti ome
zamahe fri eme zamahe fri nehazage'za ke'naze. **21** Hagi
ko'ma Filistia vah'e'enema umani'naza Hibru sondia vahem'o'za

Jonatanine Solikizanirega ante'za Filistia vahera zamahe'naze.

22 Hagi mago'a Israeli vahe'ma Efraemi agona kokampima fraki'za mani'naza vahe'mo'za Filistia vahe'ma atre'za fraze kema nentahi'za, atirami'za zamagranena zamarotgo hu'za hara hu'naze. **23** Hagi Ra Anumzamo'a ana zupa Israeli vahera zamaza hige'za, Bet-Avenia hara hugatere'za vu'naze.

24 Hagi ana zupa Israeli vahe'mo'za ne'zana onazageno hanavezami omane amne hu'ne. Na'ankure Soli'a hanavenentake ke huno, ha' vahe'ni'a nona hu'na zamahe'za huankita menina ne'zana oneta mani'ne'nunkeno kinaga omasegahie. Hagi iza'o ne'zama nesimo'a, sifna huntankino Anumzamo'a azeri haviza hugahie. **25** Hagi miko sondia vahe'mo'za zafafi ufre'za kazana tumerima'amo'a aviteno mopafina me'nege'za ke'naze. Hianagi mago'mo'e huno ana tumerina afino one'ne. **26** Hagi tume rimo'a aviteno varehirami'neanagi Soli'ma hanave sifna kema hu'nea kegu kore nehu'za magore hu'za eri'za one'naze. **27** Hagi hanave kema nef'a'ma hu'nea kea Jonatani'a ontahi'neankino, azompa'areti tumemofo rima'a reno neneno ame huno ete hanavea erino ruvunase'ne. **28** Ana'ma higeno'a mago sondia ne'mo Jonatanina asamino, Negafa'a hanavege huno menina ne'zana oneho hu'ne. Hagi nesimo'a sifnafi manino haviza hugahie hu'negu ne'zana ama vahe'mo'za one mani'nageno hanavezamia omnegeno zamu evu evu nehie.

29 Hagi Jonatani'a huno, Nenfa'ma hu'nea kemo'a mikomota tazeri haviza hu'ne. Hagi keho, osi'a tumerima'ama noana hanave erina runavunase'noe. **30** Hagi ne'zana neho hige'za ha'ma hazafinti'ma eri'za ne'zama ne'nazaresina, rama'a Filistia vahe zamahontesine. **31** Hagi Israeli vahe'mo'za ana zupa ha'ma hu'nazana Filistia vahera Mikmasiti zamahe'za Aijaloni

uhanatizageno, tusi zamavaresa higeno zaferina omane amne hu'ne. 32 Hagi ana kinaga zamagare'za vu'za hapinti'ma eri'za e'naza sipisipima agonknaza hari'naza ve bulimakao afu'ma anenta bulimakao afu'enena ome ahe'za kre onte'ante hu'za korana me'nege'za ne'naze. 33 Hagi anama hazage'za mago'a vahe'mo'za Solina eme asami'za, kora me'nea ame'a nene'za Ra Anumzamofo avufina kumi nehazanki ko, hu'za hazageno Soli'a huno, mikomota tra kea rutagrazanki menintafa vuta have rezahe huta amare ementeho. 34 Hagi vuta ome zamasaminke'za sipisipi afu'zamine bulimakao afu'zamia ru kora me'nesige'za nene'za kumi hanagi, amare eme aheho. Ana hazageno ana kenagera ana maka sondia vahe'mo'za bulimakao afu'zmia avare'za eme ahegi'naze. 35 Anante Soli'a Ra Anumzamofonte'ma kresramana vunte ita tro hu'ne. E'i ana ita kora tro huno oke'neaza ese kna'a tro hu'ne. 36 Hagi Soli'a sondia vahera amanage huno zamasami'ne, Enketa hanimpi vuta Filistia vahera hara ome hu'nezmantamanenkeno masa huno feruseno. Hagi magore huta ozamtregahunanki zamahe vagaregahune, hige'za sondia vahe'mo'za amanage hu'naze, Nazano huzmante'naku'ma hanana zana amane hugahane. Hianagi pristi ne'mo'a kenona huno, amare Anumzamofona antahigeta kesune. 37 Higeno Soli'a Ra Anumzamofona antahigeno, knare natre'nanke'na Filistia vahera hara ome huzmantenugenka zamagrira Israeli vahe zamazampina zamavarentegahano? Hianagi ana zupa Ra Anumzamo'a kenona huonte'ne. 38 Ana higeno Soli'a sondia kva vahetamina kehu tru huno, Iza kumira hu'negeno Ra Anumzamo'a kea osifi, refako huta kesune. 39 Hagi Israeli vahe'ma zamavare'nea Ra Anumzamofo Agifi huvempage huankino, iza'o ana kumi'ma hu'nesimo'a frigahie. Hagi nenamofo Jonatanima

ana kumi'ma hu'nenu'na frigahie. Hianagi mago'mo'e huno
ana hazenkegura kea osu'ne. **40** Hagi Soli'a mika Israeli vahera
amanage huno zamasami'ne, Nagrane ne' mofavreni'anena
amare otigahuanki, tamagra anture uotiho, huno zamasamige'za
zamagra hu'za, kagri'ma kavesi'niazza huo. **41** Anage hutazageno
Soli'a amanage huno Ra Anumzamofontega nunamuna hu'ne,
Israeli vahe'mokizmi Anumzamoka ama ana kumi'ma nagrane
ne' mofavreni'anema hu'ne'nunkenka, pristi vahe'ma keno erifore
hu zagoma reno kenigenka, Urimi erintegeno keno. Hagi Israeli
vahe'mo'zama kumi'ma hu'ne'nagenka, Tamimi erintege'za
keho. Anante ana zokagoma re'za kazana, Soline nemofo
Jonatani suzamo e'ama higeno, Israeli vahe'mokizmi su'zamo'a
e'amara osu'ne. **42** Ana'ma higeno'a Soli'a huno, Nagri'ene
nenamofo Jonataninte taisi zokagora reta keho, hige'za ana
zokago'ma reza kazana, Jonatani su'amo e'ama hu'ne. **43**
Ana higeno Soli'a nemofo Jonatanina antahigeno, nankna kumi
hu'nampi nasamio, higeno Jonatani'a huno, Nagra azompanireti
tumerina re'na ne'noe. Hagi nagrikura frigahie hananki, nahe
frige'na fri'neno! **44** Higeno Soli'a anage hu'ne, Ozo Jonataniga
frigahane. Hagi kahe ofrisugen'o'a Anumzamo'a nahe frigahie.
45 Hianagi sondia vahe'mo'za Solinkura hu'za, Ra ha'ma huno
Israeli vahe'ma tavre'nea ne' Jonatani ahefrigahue nehano? Ra
Anumzamofo agifina Jonatanina avufarera avako huge, ahe
ofrigera osugahane. Na'ankure Ra Anumzamo'ene tragoteno
mani'neno hanavetino hara hu'neankinka, ohegosane. Anage
nehu'za Jonatanina agu'vaziza avrazageno, Soli'a ahe ofri'ne **46**
Hagi ana zama hutegen'o'a Soli'a Filistia vahe'ma zamarotagoma
nehiretira zamatreño marerige'za, Filistia vahe'mo'za, ete kuma
zamirega vu'naze. **47** Hagi Soli'ma eama huno Israeli vahe kinima

maniteno'a, maka kazigama Israeli vahe'mokizmi ha' vahe'ma mani'naza vahera hara huzamante'ne. Moapu vahe'ma, Amoni vahe'ma, Edomu vahe'ma, Zoba kini vahe'ma, Filistia vahera miko hara huzamanteno zamazeri haviza hu'ne. **48** Hagi hanavetino Amaleki vahera hara hunezamanteno, zamagri zamazampinti'ene ha'ma huzmante'za zamazeri havizama nehaza vahe'mokizmi zamazampintira Israeli vahera zamavare'ne. **49** Hagi Soli ne' mofavreramina, Jonataniki, Isviki Malkisue. Hagi tare mofa zanante'neankino zage mofa'amofo agi'a Merabuki, henkamofo agi'a Mikeli'e. **50** Hagi Soli nenaro agi'a Ahinoamukino, Ahimasi mofare. Hagi Soli sondia vahetema ugota hu'nea nemofo agi'a, Abnakino Neri nemofo'e. Hagi Neri'a, Solina nenogo'e. **51** Hagi Kisi'a Soli nefa manigeno, Neri'a Abna nefa mani'neankinke, zanagra kogna mani'na'e. Hagi nezanafa'a Abiel mani'ne. **52** Hagi Soli'ma kinima manino e'nea knafina, Filistia vahe'enena rama'a zupa hara nehuno, koro'ma osu'za hanaveti'zama ha'ma haza Israeli vahera zamavareno agra'a sondia vahe zamantege'za mani'naze.

15 Hagi mago zupa Samueli'a amanage huno Solina asami'ne, Ra Anumzamo'a nagri hunantege'na Israeli vahe kinima mani'hankura masavena eme fregante'na huhampri kante'noe. Hagi menina Ra Anumzamo'ma kasami'nia nanekea antahise huo. **2** Hagi amanage huno hanavenentake Ra Anumzamo'a hie, Israeli vahe'ma Isipinti'ma neage'za zamazeri haviza hu'naza zantera, Nagra Ameleki vahera zamazeri haviza menina hugahue. **3** Hagi menina vuta Ameleki vahera ha' ome huzmanteta mika zazimia eri haviza nehuta, zamahe fanane hu vagareho. Hagi vene'nema, a'nema, mofavrema, meni kasente'nenia mofavrema bulimakaoma, sipisipima, kemolima, donkinena mika'a zamahe

friho. 4 Higeno Soli'a Israeli sondia vahera Telaimi kumate zamazeri atru huno zamazeri antefatgo huno keana, 200 tauseni'a Israeli vahe manizageno, Juda vahera 10 tauseni'a sondia vahe mani'naze. 5 Hagi Soli'a sondia vahe'ane Ameleki vahe ha' huzmantenaku kafo ome ante'za timo'a ko hagage hu'nea karahopi ome fraki'za mani'naze. 6 Anante Soli'a Kenaiti vahekura huno, Ameleki vahera zamatreta viho. Hagi ana'ma osnazana ana vahe'ene tamahe hana hugahue. Na'ankure Israeli vahe'mo'zama Isipima atre'za karankama neageta tamagra knare tamavutamava huzmanteta zamaza hu'naze. Anage hige'za Kenaiti vahe'mo'za Ameleki vahera zamatre'za vu'naze. 7 Ana hutazageno Soli'ene sondia vahe'amo'zanena Ameleki vahera hara Havira kumateti huzmante'za vu'za Isipi mopamofo zage hanati kaziga Suri kumate uhanati'naze. 8 Hagi kini ne'zamia Agakina ahe ofri amne aze'neri'za, maka vahera bainati kazinkonteti zamahe fri'naze. 9 Hagi Soli'ene sondia vahe'amozanena Agakina nohe'za, knare'ma hu'nea sipisipi afutamine, knare'ma hu'nea bulimakao afutamine, agaho sipisipine, agaho bulimakaone marerirfa fenozanena eri havizana osu'naze. Hianagi haviza huno knare'ma osu'nea zantamina miko zamahe frivaga nere'za eri haviza huvagare'naze. 10 Anante Ra Anumzamo'a Samuelina amanage huno asami'ne, 11 Solina otroanki kinima azeri ot'i'noa zankura, narimpamo'a haviza hie. Na'ankure agra amagena hunenamino, osuoma hu'na hunte'noaza nehie. Anagema huno asamigeno'a, Ra Anumzamofontega Samueli'a krafage huno nunamuna huno nevigeno kotu'ne. 12 Hagi Samueli'a nanterame otino Soli ome kenaku nevigeno, mago'a vahe'mo'za asami'za, Soli'a ha'ma hugatere'nea zante'ma nege'za antahimi haverami Karmel

kumate ome retru renteteno, anantetira atreno Gilgali vu'ne.

13 Higeno Samueli'ma Solinte'ma ehanatigeno'a Soli'a huno, Ra Anumzamo'a asomu hugante'nie. Hagi Ra Anumzamo'ma ome hugahane huno'ma hunante'nea kante ante'na maka zana huvagare'noe. **14** Hianagi Samueli'a huno, Na'a hige'na sipisipi ageru'ene bulimakao agerura nentahue? **15** Anage higeno Soli'a kenona huno, Sondia vahe'mo'za Ra Anumzana kagri Anumzamofontega kresramna vunte'za Ameleki vahe'mokizmi knare'ma hu'hea Sipisipine bulimakaonena avre'za e'nazanki, mikä zana zamahe vaganereta eri haviza hu'none. **16** Hagi Samueli'a huno, Taganenka mani'nege'na Ra Anumzamo'ma oki kenage'ma nasami'nea kea kasamineno, huno Solina azeri korigeno Soli'a huno, na'ane hu'nefi nasamio, huno Soli'a hu'ne. **17** Higeno Samueli'a asamino, Kagra kora kagi omane vahé mani'noe hunka kagesa antahi'nananagi, Ra Anumzamo Agra'a Israeli vahe kinia kazeri oti'ne. **18** Ana nehuno Ra Anumzamo'a amanage huno eri'zankea hugante'ne, kumi zamavu'zamava nehaza Ameleki vahera ha' ome huzamantenka mikä zamahe fri vagaro huno hu'ne. **19** Hagi nahigeta Ra Anumzamofo ke'a amagera onteta, knare'nare'zana ha'ma hazafintira ame'amara huta omenerita Ra Anumzamofo avufina havi avu'avara hu'naze? **20** Higeno Soli'a amanage huno Samuelina asami'ne, Hianagi nagra Ra Anumzamofo ke amage ante'na Ra Anumzamo'ma ome hugahanema hunanteazana ome hu'noe. Nagra maka'zana ome zamahe vaganere'na Kini ne' Agakina avre'na e'noe. **21** Hianagi knare'nare'ma hu'nea sipisipi afutamine, meme afutamine, bulimakao afutamina Gilgali Ra Anumzana kagri Anumzamofontega kresramna vunte'zane hu'za sondia vahe'mo'za avre'za e'naze. **22** Hianagi Samueli'a

kenona huno, Ra Anumzamo'a ofama hu'zane kresramna
vuzanku musena hugahifi, ke'ama amage'ma ante'zanku
musena hugahie? Ra Anumzamofo kema antahino amage
ante'zamo'a, ofama hu'zana agateregeno, sipisipi afovama
erino eme kresramna vu'zana, Anumzamofo kema antahi'zamo
agatere'ne. **23** Hagi kema rutagre avu'avazamo'a zagoaren
ke avu'avazamofo kumi kna higeno, kema ontahi'zamo'a,
havi anumzante mono hunentea kumikna hu'ne. Kagra Ra
Anumzamofo ke rutrage'nanku, Ra Anumzamo'a kini tratetira
kagria kazeri atre. **24** Higeno Soli'a huno, Ra Anumzamo'ma
kasamigenka nasami'nana kea nagra rutagre'na kumi hu'noe.
Na'ankure sondia vaheku koro hu'na ana hu'noe. **25** Hagi nagra
nasunku huanki kumi'n'i'a atrenenantenka, nagrane ege'na Ra
Anumzamofona monora ome huntaneno. **26** Hianagi Samueli'a
kenona huno, Nagra kagranena ovugahue. Na'ankure kagra
Ra Anumzamofo ke rutagrarkeno Israeli vahe kinia mago'ene
omanisane huno kazeri atre'ne. **27** Hagi Samueli'ma rukrahe
huno Solima atreno vu'za higeno, Soli'a Samuelina za'za
kena'amofo atupa'are azerinegeno viana tagato hu'ne. **28** Hagi
ana'ma higeno'a Samueli'a Solina asamino, Ra Anumzamo'a
menina kinima mani'enka Israeli vahe'ma kegavama hu'nana
trara erimarenko kagrima kagetere'nea ne' ami'ne. **29** Hagi Israeli
vahe'mofo Hanavenentake Anumzamo'a, kema hia kemofona
ruotagreno, antahi'zama'a ruzah osu Anumzankino, Agra
vahera omani'neankino antahintahi'a zahera osugosie! **30** Hagi
Soli'a mago'ene inene huno Samuelinkura anage hu'ne, Kumi
hu'noanagi antahinaminka nagrane egeta, vahe'nimokizmine
kva vahe zamavugane, Israeli vahe zamavuga Ra Anumzana
kagri Anumzamofona monora ome huntaneno. **31** Anage

higeno Samueli'a avaririno vigeno Soli'a Ra Anumzamofona monora ome hunte'ne. **32** Hagi Samueli'a huno, Ameleki kini ne' Agakina avreta eho, huno Samueli'a hige'za avre'za e'naze. Hagi Agakima avre'za ne'ageno'a, hago hara vagareankino nahe ofrigahaze huno agesa antahi'ne. **33** Hagi Samueli'a Agakina asamino, Kagra rama'a vahe zamahanke'za mofavrezamia omani aneramina rama'a mani'hazankino, kagri'enena negrerana mofavre'a omanigahie. Anage huno nehuno Ra Anumzamofo avuga Samueli'a Agakina aheno Gilgali kumate rukafri makafri hutre'ne. **34** Ana huteno Samueli'a atreno Rama vigeno, Soli'a kuma arega Gibea vu'ne. **35** Hagi mago'ane Solina onke mani'neno Samueli'a fri'ne. Hagi Samueli'a Solinkura rama'a asunku hu'ne. Hagi nahigena Israeli vahe'mofo kinia Solina azeri ot'i'noe huno nehuno, Ra Anumzamo'a asunku hu'ne.

16 Hagi Ra Anumzamo'a Samuelina amanage huno asami'ne, Nama'agna Solinkura kasunkura nehane? Israeli vahe kinima mani'neana hago Nagra azeri atre'noe. Hagi pazivepi olivi masavena taginka e'nerinka, Betlehemu Jesi nagatega vuo. Na'ankure Nagra agri mofavre nagapinti mago'mofo kinia manigahie hu'na huhamprinte'noe. **2** Anage higeno Samueli'a huno, Soli'a nahe frigahianki nagra inankna hu'na vugahue? Higeno Ra Anumzamo'a huno, Anenta onte'ne'nia a' bulimakao mago avrenenka vunka, Ra Anumzamofontega kresramana vuku neoe hunka ome huo. **3** Hagi ome kre sramanama vanantera Jesina hugeno ena, Nagri eri'zama erisia mofavre'a kaveri ha'nena masavena taginka frentenka huhamprinto. **4** Hagi Ra Anumzamo'ma asamia kante anteno Samueli'a Betlehemu nevige'za, ana kumate kva vahe'mo'za tutagiha'ma hunente'za antri nehu'za amanage hu'naze, Kagra tarimpa fru naneke erinka

neano? 5 Anage hu'za antahigazageno Samueli'a huno, izo
nagra Ra Anumzamofontega kresramana vuntenaku neoe. Hagi
tamagra'a tamazeri agru nehuta, nagrane enketa kresramana
vamaneno, nehuno Samueli'a Jesine mofavrezaga'a zamazeri
agru nehuno zamagi hige'za kresramna vutera e'naze. 6
Hagi anama hute'za Jesi'ene mofavre naga'ama azageno'a,
kotamofo Eliabuma negeno'a Ra Anumzamo'a tamage huno
amamofo huhamprine huno Samueli'a antahi'ne. 7 Hianagi
Ra Anumzamo'a Samuelina amanage huno asami'ne, Amega
avufgare'ene za'za'ma huno hentofazama hu'nenia zantera,
kenka huhampri onto. Na'ankure nagra agrira huhampri onte'noe.
Hagi Nagra vahe'ma huhamprima nezmantoana, vahe'mo'zama
nehazaza hu'na amega zmavufgarera nege'na hunohampruanki,
zamagu'are nege'na hunehamprue. 8 Anage higeno Jesi'a
anante'mofo Aminadapu huntogeno Samueli avuga e'ne. Hianagi
Samueli'a huno, Amamofonena Ra Anumzamo'a huhampri
onte'ne. 9 Anage higeno Jesi'a mago mofavre'a Sama huntogeno
Samueli avuga e'neanagi Samueli'a huno, amamofonena Ra
Anumzamo'a huhampri onte'ne. 10 Higeno Jesi'a 7ni'a mofavre
zaga'a kea hige'za Samueli avuga e'nazanagi Samueli'a Jesina
asamino, Ra Anumzamo'a ama anampintira mago'mofona
huhampri onte'ne. 11 Hagi anante Samueli'a Jesina anage
huno antahige'ne, Ama'age mofavreka'a mani'nafi mago'a
omani'nazo? Huno antahigegeno Jesi'a huno, magora amiten
mofavrea mani'neanagi sipisipi afu kva huno mani'ne huno
asamigeno Samueli'a huno, Ne'zana one otiteta mani'nenuanki
mago'a vahe huzamantege'za vu'za ome avre'za eho. 12 Higeno
vahera huzamantege'za vu'za ome avre'za azageno, ke'neana
hentofa vahekino avurgamo rumsa huno anefa hu'ne. Anante Ra

Anumzamo'a huno, e'ina neki masavena taginka frenentenka
huhamprinto. **13** Ana higeno Samueli'a afuhe'mofo zamavufi ana
pazive erino masavena tagino frenenteno huhamprinte'ne. Hagi
ana knareti'ma e'neana Ra Anumzamofo Avamu'mo'a hanave'ane
Devitintera emani'neno agrane maka kna manino e'ne. Hagi
anama Samueli'a huteno'a ete Rama kuma'arega vu'ne. **14** Hagi
anama hutegeno'a Ra Anumzamofo Avamu'mo'a Solina atreno
vigeno, Ra Anumzamo'a havi avamu huntogeno Soli agu'afina
efreno antahintahi'a azeri haviza nehigeno koro hu'ne. **15** Hagi
Solina eri'za vahe'amo'za asami'za, Antahio, Ra Anumzamo'a
havi avamu huntogeno kazeri haviza nehie. **16** Hagi rantomoka
eri'za vahe'kama amama kavugama oti'nonana hurantegeta
hapue nehaza zavenama ahe vaheku ome haketa avreta
amneno. Hagi inanknarero Ra Anumzamo'ma havi avamu'ma
huntesigeno ena ana vahe'mo'za zavena nehehanagenka
knarera hugahane. **17** Higeno Soli'a eri'za vahe'a huzmanteno,
Vuta hapu zavenama knare'ma hu'za nehesaza vahe ome
haketa avreta eho. **18** Higeno mago eri'za ne'mo'a kenona
huno, Mago Betlehemu ne' Jesi nagapinti risera ke'noana
knare huno hapue nehaza zavena nehege'na ke'noe. Hagi
agra hentofa agi agonane neokino, koro osu harafa ne' mani'ne.
Na'ankure Ra Anumzamo'a mani'ne. **19** Anante Soli'a kato
vahera huzmanteno, Jesina ome asaminkeno ne' mofavre'a
Devitina huntenko sipisipi kvama huno mani'neregatira atreno
nagritega eno. **20** Higeno Jesi'a donki afu agumpi bretine, waini
tintafenena erinenteno, mago agaho sipisipinenavrenenteno
huzmanteg'e'za Devitinena avre'za Solintega vu'naze. **21** Hagi
Deviti'a Soli eri'za agafa huno emergeno, Soli'a tusiza huno
avesinentege, agra Solina hanko'ama eri eri'za vahe mani'ne.

22 Hagi Soli'a Jesina ke atrenteno, Muse hugantoanki atregeno Deviti'a nagri eri'za vahe manino. Na'ankure agra knare huno eri'zana erige'na muse huntroe. 23 Hagi Ra Anumzamo'ma havi avamu'ma huntogeno Solinte'ma egeno'a, Deviti'a hapu zavena'a erino eme nehegeno, Soli'a nentahino ete knare antahi'zana e'nerigeno, havi avamu'mo'a atreno nefre.

17 Hagi Filistia vahe'mo'za hahunaku Soko kumate Judia mopafi sondia vahezmia zamazeri atru hu'naze. Hagi Sokone Aseka kumatremofo amu'nozanifi me'nea kumate Efes-Damimi seli nonkumara ome ante'za mani'naze. 2 Hagi Soli'ene Israeli sondia vahe'mo'za Ela agupofi seli nonkumara ome ki'za mani'ne'za, Filistia vahera hara huzmante'naku manimpi hu'za vu'naze. 3 Hagi mago agonarera Filistia vahe'mo'za eme otizageno, mago kaziga agonarega Israeli vahe'mo'za eme oti'zageno amu'ho zamifina agupo me'ne. 4 Hagi ha'pina agimo marerisa nera Gati nagapinti ne' Goliati'a Filistia vahe seli nonkumapinti atiramino e'ne. Ana nera zaza amo'a 2mitagi 75 sentimita hu'ne. 5 Hagi agra bronsireti tro hu'naza fetori asenirera nentanino, nozame ahehemo'ma hu'heaza hu'za ha' kukena bronsireti tro hu'nazana kna'amo'a 57ni'a kilogremi hu'nea kukena antanine. 6 Hagi amoteti urami'hea aga nona bronsire tro hu'naza nentanino, bronsireti tro hu'naza krugru keve afumpina eri'ne. 7 Hagi ana keve'amofo asanalamo'a kukenama tro'ma nehaza masinimofo zafa'agna higeno, atohe'nea keve agona'amofo kna'amo'a 7 kilogremi hu'ne. Hagi hanko'ama erino vu ne'mo avuga vu'ne. 8 Hagi Goliati'a eme otino anage huno Israeli vahera kezati zami'ne, Tamagra na'ante hara hunakura manimpia huta mani'naze? Tamagra Soli eri'za vahe manizage'na, nagra Filistia sondia ne' mani'noe. Hagi tamagra mago ne' huntenkeno

eramino hara nagranena eme hino. **9** Hagi ana ne'mo'ma ha'ma
eme hunanteno nahe frisigeta, tagra tamagri kazokzo eri'za
vahe umanigahune. Hagi nagrama ana ne'ma ahe frisugeta,
tamagra tagri kazokzo eri'za vahe manigahaze. **10** Anante
Goliati'a huno, Menina Israeli vahe'mota hara huramante'na
ke'za huanki, mago ne' huntenkeno ena, hara ha'mneno! **11**
Hagi Soli'ene mikä Israeli vahe'mo'za anankema nentahi'za,
zamagogogou nehu'za tusi kore hu'naze. **12** Hagi Deviti'a Jesi
nemofo Efrata nagapinti Betlehemu kumate ne'kino, Judia
mopafinti nere. Hagi Jesi'a 8'a mofavre zamante'neankino, agra
Soli'ma kini mani'nea knafina ozafare'ne. **13** Hagi Jesina kota 3'a
mofavrezaga Eliabuki Abinadapuki Samaki hu'za Filistia vahe'ene
ha' hunaku Soli sondia vahe'ene umani'naze. **14** Hagi ana 3'a kota
mofavreramimo'za Soli avariri'za hate vu'naze. Hagi Jesi mofavre
nagapina Deviti'a henka amitena ne' mani'ne. **15** Hagi Deviti'a
Soli eri'zama e'neriretira nefantega Betlehemu vutere nehuno,
nefa sipisipia ome kegava hu'ne. **16** Hagi Goliati'a 40'a zagegnafi
nanterane kinaganena eme otino Israeli vahe'mo'za mago ne'ma
hunte'nageno e'nigeno ha'ma hanakura ke'zankea hutere hu'ne.
17 Hagi mago kna Jesi'a anage huno Devitina asami'ne, Ama
10ni'a kilogremi witi ragama kre hagage hunte'ene, 10ni'a breti
kona erinka nempukamo'za sondia vahe'enema seli nonkuma
ome ante'za mani'nazarega ame hunka vunka ome zamio. **18**
Hagi eri karagefe amirinena 10ni'a erinenka, sondia vahete
kva nemofona ome neminka, nempukamo'za inankna hu'za
mani'navi ome zamagetenka eme nasamio. **19** Hagi zamagra
Soli'ene mikä Israeli sondia vahe'enena Ela agupofi Filistia vahe
ha'huzmante'naku umani'naze. **20** Hagi nanterana Deviti'a otino
kegavama hanaza vahe zamazampi sipisipi kevu'a netreno,

Jesi'ma asamia kante anteno maka'zana e'nerino vu'ne. Hagi ana seli nonkuma'ma ante'za mani'nare uhanatiana, miko sondia vahe'mo'za ha' ome hunaku rankege hu'za vu'naze. 21 Hagi Israeli sondia vahe'ene Filistia sondia vahe'mo'zanena ha'hunaku rugaraga umanimpi emanimpi hu'naze. 22 Hagi Deviti'a fenoma kegava nehia nete nanazama'a ome netreno, ana ha'ma hu'za nehzarega vuno nempu'amokizmi ome hu frufra huzmantenaku vu'ne. 23 Hagi Deviti'a anama nempu a'mozanema keagama ome nehigeno, Gati nagapinti ha'pima agima me'nea Filistia ne' Goliati'a eno ko'ma kema nehiaza huno Israeli sondia vahekura kea eme nehigeno, Deviti'a antahine. 24 Hagi mika Israeli sondia vahe'mo'zama ana ne'ma nege'za, zamagogogu nehu'za atre'za fre'za e'naze. 25 Hagi Israeli sondia vahe'mo'za zamagra zamagra hu'za, E'i ne'ma, Israeli vahe'ma zamazeri zamarimpa ahenaku'ma eterema nehia ne'ma ahelia ne'mofona kini ne'mo'a rama'a fenzana nemino, mofa'anena aminkeno, a' erintena naga'amo'za takisi zagoa mi'zana osugahaze. 26 Hagi Deviti'a anante ot'i'naz sondia vahera zamantahigeno, Antu Filistia ne'ma aheno Israeli vahe'ma zamazeri zamagaze nehiazama eritresia nera na'a kini ne'mo'a huntiegahie? Hagi oku avufga taga osu Filistia vahe'mo'a mani'nea Anumzamofo sondia vahera huhavizana huontegahie. 27 Hige'za kenona hunte'za, E'ima kasamiza kante anteno, ana ne'ma ahe frisia vahera kini ne'mo'a huntiegahie. 28 Hagi ana vahe'enema Deviti'ma kegaga nehigeno nempu'amo Eliabu'ma nentahino'a, tusi arimpa Devitina ahenenteno anage hu'ne, Na'ante amafina e'nane? Iza sipisipi nagara kegava higenka trampina zamatreka e'nane? Nagra antahi'noe, kefo antahi'zankamo higenka kagra kavufgara ra hunka ha'mofo uruha

hunaku amafina e'nane. 29 Higeno Deviti'a kenona hunteno, Nagra amne zamantahinegoanki, na'a hu'noe? 30 Anage nehuno ete rukrahe huno mago'amokizmi ome zamantahigege'za, ko'ma hu'naza kante ante'za ana nanekege asami'naze. 31 Hagi Deviti'ma hu'nea nanekea mago'a vahe'mo'za nentahi'za Solina ome asamizageno, Sol'i'a vahe huzmanteno ome avreta echo hige'za, vu'za ome avre'za azageno, 32 Deviti'a Solina asamino, Mago vahe'mo'a antu ana Filistia nekura korera osino, nagra eri'za ne'kamo'na hara ome huntgahue. 33 Higeno Sol'i'a kenona hunteno, Kagra mofavre mani'nanankinka antu ana nera hara ome huontegahane. Agra nehazavema mani'neregati hara huno manino e'nea ne' mani'ne. 34 Anage higeno Deviti'a kenona huno, Nenfa sipisipima kvama hu'na eri'za vahekamo'na mani'nogenoma, sipisipi kevufinti'ma laionimo'o Beamo'ma mago'ma eme avreno nevige'na, 35 rotago hu'na agipinti ome ahena avre'na e'noe. Hagi rukrehe'ma huno nampri'zama hige'na agemazampa azokate vamagi'na azeri'nena ahe fri'noe. 36 Hagi kinimoka nagra laionine beanema ahenoankna hu'na, agoza ano taga osu Filistia nera ahegahue. Na'ankure agra mani'nea Anumzamofo sondia vahe huhavizana hunte'ne. 37 Mago'ane Deviti'a huno, beane laionimofo azampinti'ma nazama hu'nea Ra Anumzamo naza huno antu Filistia ne'mofo azampintira nagu'vazigahie. Anage higeno Sol'i'a huno, Ra Anumzamo'a kagrane manigahianki vuo. 38 Nehuno Sol'i'a agra'a kukena hunenteno, bronsireti tro hu'naza fetori'a Devitina antaninenteno, ha' kukena hunte'ne. 39 Hagi Deviti'a ana kukena huno onke'neankino, za'za kukenare bainati kazina renenteno, vuno eno huno ke'ne. Hianagi knarera huontegeno Solina asamino, nagra ama'na kukena hu'na onke'noa zanki'na, antanina hara

ome osugahue, nehuno Deviti'a ana zantamina zafitre'ne. 40
Anantetira azompa'a enerino, osi kraho timpinti 5fu'a pehe
hu'nea haverami ome zogino ku'afi erinerino, azampina kao
akrutetima tro'ma hu'ne'za havema erinte'za mate'ma vu'za
nehaza ati'a e'herino, ana Filistia ne'ma mani'nerega vu'ne.
41 Hagi Goliatina hanko'ama e'neria ne' egota higeno, agra
amefi'a Devitintega e'ne. **42** Hagi ana ne'mo'ma Devitima keana,
avufgamo'a knare huno masamasa huno hentofaza hu'nea
nehaza ne' negeno, hara huga osu'ne huno Devitina kefenkami
atre'ne. **43** Hagi ana Filistia ne'mo'a Devitina asamino, Nagra
kra mani'nogenka azomparetira hara hunante'naku ne'ano?
Nehuno agra'a anumzamofo agifi Devitima azeri haviza hanigu
kazusi ke hunenteno, **44** amanage hu'ne, Kagra are ege'na
kagrira kahena kavufga harezama vanoma nehaza namazagane,
mopafima vanoma nehaza afi zagane zami'nena negahaze.
45 Higeno Deviti'a kenona'a huno, Kagra nagri'ma nahenakura
bainati kazine, karugru kevene hankone erinenka ne'ane.
Hianagi nagra kagri'ma ha'ma hugante'naku'ma neona, Israeli
sondia vahetamimofo Hanavenentake Ra Anumzama huhaviza
hunentana Anumzamofo agifi hara hugante'naku neoe. **46** Hagi
menina Ra Anumzamo'a kagrira nazampi kavrentenkena, kahena
knankena akafrigahue. Hagi Filistia sondia vahera menina
zamahe'na zamavufaga hare'za vanoma nehaza namaramine,
mopafi vanoma nehaza afi zagagafa zami'nena negahaze.
E'ina hanuge'za mika kokankoka vahe'mo'za antahi'za ke'zama
hanazana, Israeli vahe'mota Anumzana tamage Anumza mani'ne
hu'za hugahaze. **47** Hagi ana hanuge'za amama mani'naza
vahe'mo'za Ra Anumzamo'a bainati kazinteti'ene keveretira
tagura ovazigahie hu'za hugahaze. Na'ankure Ra Anumzamofo

hakino, Agra'a hara huramanteno tamagrira tagri tazampi tamavrentegahie. **48** Hagi Goliatima Deviti'ma ahenaku'ma erava'o nehigeno, Deviti'a agareno tava'oma'are nevuno, **49** ku'afinti mago have hefino kao akruteti'ma tro'ma hu'ne'za havema erinte'za mate'ma vu'za nehaza ati'afi erinteno, eri kagigagi huteno matevuno ana Filistia nera aseni rurako huno ahegeno, ana havemo'a asenifi hanagatino ufregeno, avugosaregati mopafi traka huno umasene. **50** Hagi Deviti'a kao akruteti'ma tro'ma hu'ne'za havema erinte'za mate'ma vu'za nehaza atifinti Filistia nera ahefrino hara hugatere'ne. Hagi Deviti'a magore huno azampina bainati kazina e'ori'ne. **51** Hagi Deviti'a agareno agofetu ome oti'neno, Goliatina bainati kazima'a ku'afinti ome avazu huno ahenefrino, agenopa akafritre'ne. Hagi Filistia vahe'mo'zama kageno hanavenentake ha' ne'ma frige'za zamagra rukrahe hu'za kore fre'naze. **52** Hagi ana'ma hige'za Israeline Juda sondia vahe'mo'za rankezaneti'za Filistia vahera zamarotago hu'za ome zamahetre eme zamahetre hu'za E kroni kuma kafante uhanati'naze. Hagi ana Filistia vahe'mokizmi zamavufagamo'a Saraimine Gatine E kroni agupo kantega meno vu'ne. **53** Hagi Israeli vahe'mo'za zamarotago hu'za Filistia sondia vahera ome zamatrete'za, ete e'za ana Filistia vahe'mo'zama seli nonkuma'zmia atre'za fre'naza kumapima me'nea zantamina eme eri vagare'naze. **54** Hagi Deviti'a Goliat agenopa erino Jerusalemi vu'ne. Hianagi ana ne'mofo ha' zana erino seli noma'afi ome ante'ne. **55** Hagi Devitima Goliat'i'ma ha' hunte'naku'ma nevigeno, Soli'ma negeno'a sondia vahete kva ne' Abnana antahigeno, Ami iza mofavre? huno antahigegeno, Abna'a kenona hunteno, kini ne'moka tamage hu'na ami ana risera ke'na antahi'na osu'noe. **56** Higeno Soli'a huno, Iza

mofavre mani'nefi vahe ome zamantahigenka go. 57 Hagi Deviti'ma Goliat'i'ma ome ahetoana ne'mofo agenopama azampi e'rineno ne-egen'o'a, Abna'a ame huno Devitina avreno Solinte vu'ne. 58 Hagi Soli'a Devitina antahigeno, Kagra iza mofavre mani'nane? Higeno Deviti'a kenona huno, Betlehemu kumateti kagri eri'za ne'mofo Jesi mofavre mani'noe.

18 Hagi Deviti'ma Soli'enema ke'ma huvagaretegeno'a, henka Jonatani'a Devitina avesinenteno, agra'agu'ma avesinenteaza huno tusiza huno avesinte'ne. 2 Hagi ana knareti'ma vu'neana Soli'a Devitina atregeno nefo nontega ovu'neanki, azerigeno agrane mani'ne. 3 Hagi Jonatani'a hanavenentake huvempage Devitina hunte'ne. Na'ankure agra'aguma avesinenteaza huno tusiza huno Devitina avesinte'negu anara hu'ne. 4 Hagi Jonatani'a za'za kukenama amegama antani'neana, Deviti hatenemino, ana agofetura ha' kukena'ane, bainati kazima'ane ati'ane amu nofi'anena ami'ne. 5 Hagi nazankuro Soli'ma Devitinku'ma hugahane huno hiazana Deviti'a knare huno anazana higeno, Soli'a azeri antesga huno sondia vahete kva ante'ne. Hagi ana zankura maka vahe'mo'zane Soli eri'za vahe'mo'zanena muse hu'haze. 6 Hagi Deviti'ma Filistia ne'ma ahetege'za ha'ma huzmagaterete'za ete kumategama azageno'a, maka Israeli kumapinti a'mofa'mo'za nasenasepane, hapu zavenane eri'za ahe'za muse hu'za avo nehage'za Solina amarara hu'haze. 7 Hagi ana a'mofa'mo'za zavena nehe'za anage hu'za zagamera hu'haze, Soli'a 1tauseni'a ha' vahe zamahegeno, Deviti'a 10tauseni'a ha' vahe zamahe'ne. 8 Hagi ana zagamema Soli'a nentahino'a, tusi arimpa ahegeno amanage hu'ne, Zamagra zagamema hazana Devitinkura rama'a 10tauseni'a aheneanki, nagrikura 1tauseni'a ahene hu'za nehaze. Hagi agra maka

zantamina erineno, nagri no erino kini mani'naku hige'za
e'inahu zagamera hu'naze. 9 Hagi ana knareti'ma vu'neana
Deviti'ma kini tra'ama erizanku Soli'a kaniverenteno vu'ne. 10
Hagi anante knazupa Anumzamo'a havi avamu huntogeno
Solintera hanavetino eno eme azeri haviza higeno, noma'afi
mani'neno neginagi nehuno azampina karugru keve e'rinezgeno,
Deviti'a nehiaza huno zavena azampi azeri'neno ahe'ne. 11
Hagi Soli'a karugru kevereti Devitina nozafare renarente'nue
huno nentahino, karugru keve matevuno reana hantaga higeno,
Deviti'a atreno fre'ne. Hagi e'inahu'zana tare zupa hu'ne. 12 Hagi
Soli'a Devitinkura koro hu'ne. Na'ankure Ra Anumzamo'a Solina
atreno Deviti'ene mani'ne. 13 Hagi Soli'a Devitina tavaoma'aretira
azeri netreno 1tauseni'a sondia vahe kva manio huno huntogeno,
sondia vahe zamavareno hate vu'ne. 14 Hagi hakarezama
Deviti'ma hu'nea zamo'a knare ke'za hu'ne. Na'ankure Ra
Anumzamo'a agrane mani'negeno'e. 15 Hagi Soli'ma keno
antahino'ma hiama Deviti'ma hiazamo'ma knare zanke higeno'a,
Soli'a mago'ane tusi koro hu'ne. 16 Hianagi miko Israeli vahe'ene
Juda vahe'mo'za Devitina zamavesinte'naze. Na'ankure agra
knare huno sondia vahera hatera zamavareno vuno eno hu'ne.
17 Hagi mago zupa Soli'a anage huno Devitinkura hu'ne, Kota
mofa'ni'a Merapuna kaminugenka a' erintegahane. Hianagi
kotazana kagrama hanavetinka Ra Anumzamofo ha'ma hanunka,
ana ara erigahane. Na'ankure Soli'a antahi'zama'afina Devitina
nagra'a nazanura ahe ofrisuanki, Filistia vahe'mo'za hara hunte'za
ahe frisaze huno antahi'ne. 18 Hagi Deviti'a kenona hunteno,
Nagra knarerera osugeno, Israeli vahepinna naga'nimokizmia
zamagia omene vahe mani'nazanki'na, kini ne'moka mofara ara
erigara osu'noe. 19 Hagi Soli'a Merapuna Deviti ara erintegahie

huno hu'neanagi, anama zanazeri aravema hunaku'ma hia zupa,
Soli'a mofa'a Merapuna omi netreno, Mehola kumate ne' Adrieli
avremigeno ara eri'ne. 20 Hagi ana knafina Mikeli'a Solina mago
mofa'agino, Devitima avesintea kea Solina eme asamizageno'a
muse nehuno, 21 Anage hu'ne, nagra ana mofania Devitina
aminugeno ara erino, nenanemo'zana hanige'na, huntenugeno
vuno Filistia vahe'ene hara ome nehanige'za ahegahaze.
Nehuno Soli'a Devitina asamino, Menina mago'ene nagri
mofara erinka nenanemo'zana hugahane. 22 Hagi Soli'a eri'za
vahe'a huzamanteno anage hu'ne, vuta Devitina agrake'ma
mani'enigeta ome asamita, Soli'a agrane mika eri'za vahe'anena
muse hugantazanki, kagra mofa'a a' erintenka nenemo'za
huo huta ome asamiho. 23 Higeno ana nenekea Devitina
ome asamizageno, Deviti'a anage huno kenona huzamante'ne,
Tamagra tamagesa antahi'zana kini ne'mofo nenemozama
hu'zana osi'za me'ne hutma nehazo? Nagra nagi omne namunte
omane ne' mani'noe. 24 Hagi Soli eri'za vahe'mo'zama
Deviti'ma hu'nea nanekema eri'za ome nesamizageno'a, 25
Soli'a mago'ane eri'za vahe'a huzamanteno, amanage huta
Devitina ome asamiho, Mofanima mizama hunaku'ma haniana
100'a Filistia venenemokizmi zamagoza anom'a zamaheno
taga huno egahie huno hu'ne huta ome asamiho. Hianagi
Solima agesama antahiana ha' ome nehanigeno ahesaze huno
antahi'ne. 26 Hagi Soli eri'za vahe'mo'zama ana nanekema
Devitima eme asamizageno'a Deviti'a muse ana nanekerera
hu'neanagi, anama knama ante'nea kna eohanati'negeno, 27
Deviti'ene sondia vahe'amo'za vu'za 200'a Filistia vene'ne
ome zamahe'za, zamagoza anoma taga huno erino kini ne'
eme ami'ne. Ana higeno kini ne'mo'a mofa'a Mikelina amigeno

Deviti'a ara erino kini ne'mofo nenemo'za hu'ne. 28 Hagi Soli'ma antahino kenoma hiama Ra Anumzamo'ma Deviti'ene manigeno, mofa'amo Mikeli'ma Devitima avesintegeno'a, 29 Soli'a mago'ane tusi koro Devitinkura nehuno, hara renteno vu'ne. 30 Hagi Filistia sondia vahe'mofo kva vahe'mo'za sondia vahera rama'a zupa zamavare'za e'za Israeli vahera hara eme huzamante'naze. Hianagi ana'ma hu'za Soli sondia vahe'ma ha'ma eme hunezamantageno'a, Deviti'a knare huno hara huzamagatenerge'za maka vahe'mo'za antahi'za ke'za nehu'za, Devitina ra agi ami'naze.

19 Anante Soli'a nemofo Jonatanine mika eri'za vahe'aramina Devitina ome ahe friho huno huzmante'neanagi, Soli nemofo Jonatani'a Devitina tusiza huno avesinte'ne. 2 Ana hu'neankino Jonatani'a Devitina eme asamino, Nenfa Soli'a kahe fri'naku nehianki, oki nanterana kegava hu'enka meg'i'a ufrakinka manio. 3 Hagi anama fraki'nenante nenfa'enena ome otita mani'neta kagriku'ma antahige'na kesugenoma, na'ane huno kagrikura nasamigahie ananke eme kasamigahue. 4 Hagi anante nanterana Jonatani'a nefi Solina ome asamino, kinimoka eri'za vaheka'a Devitima ahenka kumima hanankeno'a knarera osugahie. Na'ankure agra mago havizana kagrira huoganteno kumira osu'ne. Hagi agra rama'a knare avu'avara huno kaza hu'ne. 5 Hagi agra'a avufgagu agesa nontahino Goliatina hara ome hunteno ahe frigeno Ra Anumzamo'a Filistia vahe'mofo zamazampintira Israeli vahera zamagu'vazine. Hagi nagafare hazenke'a omane ne' Devitina ahenka kumira hu'za nehane? 6 Hagi Soli'a nemofo Jonataninkea antahimino anage huno hanave huvempagea hu'ne, Kasefa huno mani'nea Ra Anumzamofo agifi huvempage huoanki'na, Devitina ahe ofrigahue. 7 Anage

hutegenon Jonatani'a Devitina ke higeno egeno, nef'a'enema
hu'na'a maka nanekea asamiteno, avreno Solinte vigeno ko'ma
nehiaza huno eri'zama'a omerinenteno mani'ne. 8 Hagi henka
Filistia vahe'mo'za ha' eme huzmantageno, Deviti'a ana vahera
hanavenentake huno ha' ome huzmanteno rama'a vahe zamahe
frige'za, mago'a Filistia vahe'mo'za atre'za fre'naze. 9 Hagi
mago zupa Sol'i'a karugru keve'a azampi azerineno noma'afi
mani'negeno, Devitia zavena nehenon mani'nere Ra Anumzamo'a
azeri haviza hu havi avamura mago'ene huntogeno Solina
agu'afi efregeno, 10 Sol'i'a karugru kevereti Devitina no zafare
renarentenaku matevuno re'neanagi, mani'ganegeno kevemo'a
nozafafi anirigeno, ana kenageke Deviti'a atiramino fre'ne. 11 Hagi
Soli'a mago'a vene'ne huzamanteno, Deviti nonte ome kvagrita
mani'neta nanterama senigeta aheho huno huzamante'ne.
Hianagi Devitina nenaro Mikeli'a asamino, Meni kenage atrenka
amafintira fro, ofresanana oki nanterana eme kahefrigahaze. 12
Anage nehuno Mikeli'a nomofo zaho eri kampinti avretregeno
Deviti'a uramino fre'ne. 13 Hagi Mikeli'a antre'za vahe amema'a
tro hunte'nazaza erino Deviti'ma nemasea tafete nenteno meme
azoka erino asenia antegsa nehuno, tavrave erino refitente'ne.
14 Hagi Devitima azeriho huno'ma Solima huzamantege'za aza
vahe'mokizmia Mikeli'a zamasamino, Deviti'a kri erino mase'ne.
15 Hige'za ana kea ome asamizageno, Sol'i'a ana vahera
ete huzmanteno, Tafe'arema mase'nena ana tafe'aga avreta
emarerinke'na ahe fri'neno. 16 Hagi anama huzmantage'za
vu'naza vene'nemo'zama nompima efre'za tafete'ma eme
kazana, vahe amema'a antre'za tro hu'naza vahe meme azokateti
asenia antegsa hu'nege'za ke'naze. 17 Anama higeno'a Sol'i'a
Mikelina asamino, nahigenka nagrira renavatga hunka ha'

vahe'ni'a avretrrankeno fre'ne? Higeno Mikeli'a kenona huno, nagri'ma naza hunka navre otre'nanke'na kahe frigahue huno hia zanku avre atrogeno fre'ne. **18** Hagi Deviti'a freno Rama kumate Samuelinte uhanatino, maka zama Soli'ma hunteazamofo nanekea ome asami'ne. Anantetira Samueli'ene Devitikea atre'ne Naioti kumate umani'na'e. **19** Hagi mago'a vahe'mo'za Solina eme asami'za, Deviti'a Rama kaziga Naoti kumate mani'ne. **20** Hagi Soli'a Deviti ome azerihogu mago'a kato vahe huzmantege'za vu'naze. Hianagi ana vahe'mo'zama ome kazana kasnampa vahe kevumo'za Samueli'ene ot'i'ne'za kasnampa ke nehazage'za ome nentahizageno, Ra Anumzamofo Avamumo'a zamagritera hanavetino ege'za zamagranena ana hu'za kasnampa ke hu'naze. **21** Hagi anagema eme asamizageno'a, Soli'a mago'ane rama'a vahe huzamante'heanagi ana vahe'mo'zanena kasnampa kege'za ome hu'naze. Hagi nampa 3 zupa ana zanke huno mago'ane kato vahera huzmantege'za vazanagi, ana zanke hu'za kasnampa ke ome hu'naze. **22** Hagi anama huvagareteno'a Soli'a agra'a Rama mopafima rantinkerima me'nerega Seku vuno anage ome hu'ne, inantega Samuelike Devitikea mani'na'e? Anage hige'za zamagra asamiza, Rama kaziga Naioti kumate mani'na'e hu'za asami'naze. **23** Anage hazageno Soli'a Rama kaziga Naioti kumate vu'ne. Hagi karankama nevigeno Ra Anumzamofo Avamumo'a hanavetino Solintera egeno, agranena kasnampa ke hume nevuno Naioti kumatera uhanati'ne. **24** Hagi Soli'a za'za kukena'a hatenetreno Samueli avuga kasnampa kea nehuno, avufga avapako mase'negeno vuno kotuno hanina ome hu'ne. E'ina hu'nea agafare Solinkura kasnampa kema hazafina, agranena kasnampa vahe mani'neo hu'za nehaze.

20 Hagi Devitia Rama kaziga Naioti kumatetira freno Jonataninte eno, amanage huno Jonatanina eme antahige'ne. Nagra na'a hu'noe, nahavizana nehu'na, nankumi negafana hunte'nogeno, nagrira nahe frinakura nehake? **2** Hagi Jonatani'a kenona hunteno, Nenfa'a osizano ra zana magore huno nagritera eri frara nokiankino, kahe ofrigahie. Hagi na'a hanigeno nenfa'a kagri'ma kahe nanekea eri frara kigahie? A'o anara osugahie! **3** Hianagi Deviti'a hanave huvempage huno, Kagrama nagri'ma kavesinenantana zana negafa'a keno antahino hu'neno, agra nemamofo Jonatanina ama ana kema asaminugeno'a arimpamo'a knarera osugahie huno antahi'ne. Hianagi tamage huno kasefa huno mani'nea Ra Anumzamofo avufine kagri kavufinena huvempage huankino, nagrira ame huno nahe frigahie. **4** Higeno Jonatani'a Devitina asamino, Nazano hunanto hunka hanana zana, amane hugantegahue. **5** Hagi Deviti'a Jonatanina asamino, Antahio, okina kasefa ika eme antegeno ne'zama nenaza knagi, nagra kini ne' ene ne'zana nosinagi natrege'na trampi ufraki'na mani'nanenko 3'a zagegnamo'a nagatereno evino. **6** Hagi negafa'ma onagesuno'ma kantahigena kagra amanage hunka asamio, Devitina naga'amo'zma Betlehemu kumate atru hu'za kfugu kfugu'ma nehzaza hu'za kresramama vanarega anantega vugahue huno eme tutu huno nantahigege'na huntogeno vu'ne hunka asamio. **7** Hagi anagema hanankeno'ma knarere'ma hanigenka, eri'za vahekamona knare hu'na manigahue hunka antahio. Hianagi ananke'ma asami'nankeno arimpama ahe'na, eri'za vahekamo'na nahe frigahie hunka antahio. **8** Hagi kagra eri'za vahekamo'na knare kavukva hunante'nane. Na'ankure kagra Ra Anumzamofo avufi eri'za vaheka'amo'na so'ema huta manisu'a huvempagea

hunante'nane. Hagi kagra navrenka negafantera ovunka, nagrama mago havizama hu'nenugenka, kagraka'a nahe frio.

9 Higeno Jonatani'a huno, i'o anara osugahue. Nenfa'ma kahekema hanige'na ame' hu'na kasamigahue. 10 Anante Deviti'a Jonatanina asamino, Ana nanekema negafama asami'nankeno arimpama ahenantenia nanekea iza erino ome nasamigahie?

11 Anagema higeno'a Jonatania Devitinkura huno, Egeta hoza agupofi magoka va'mneno, huno Jonatani'a higeke, magoka vu'na'e. 12 Anante Jonatani'a anage huno Devitina asami'ne, Ra Anumzana Israeli vahe Anumzamofo avufi huvempage huankino, tare knama evanige'na, nenfa'ma kahekema hania nanekea antahigahoanki'na, arimpa fruma hugante'nia kea eme kasamigahue. 13 Hianagi nenfa'ma kahenaku'ma hanige'na, eme okasami'nugenka frenka kagu'ma ovazisankeno'a, Ra Anumzamo'a nagrira nona hunanteno nahe frigahie. Hagi Ra Anumzamo'a nenfa'enema nemaniaza huno kagri'enena manigahie. 14 Hagi kagrima Ra Anumzamo'ma knarema hugantenigenka maninka vanunka, nagrira knare hunantenka nahe ofriho. 15 Hagi Devitiga ha' vahekamofoma ama mopafinti'ma Ra Anumzamo'ma zamahe vagamaresigenka, nagri nagara knare kavukva huzmantenka vuo. 16 Anante Jonatani'a Devitinkura amanage hu'ne, kagrane amama huvempa kema hu'a nanekea kagrane nagakanena tamagera okaniho. Hagi nagri'ma navesiana ha' vaheka'a Ra Anumzamo'a Agra'a hara huzmantesie. 17 Hagi Jonatani'a mago'ane tragoteke manisa'a huvempage Devitina hunte'ne. Na'ankure Jonatani'a agra'agu'ma ave'nesiaza huno Devitina tusiza huno avesi ante'negu anara hu'ne. 18 Anante Jonatani'a Devitina asamino, Okina kasefa ikante'ma musenkase hu'za ne'za nenaza knagino,

ana musenkasema hanafina kagri tramo'a amane megahie. **19**
Hagi nampa 3 knazupa kinaga, ko'ma frakinkama mani'nana have
kevuma me'nerega ame hunka umanio. **20** Hagi nagra 3'a kevea
mafe'ante'na ana haverega ahetregahue. **21** Hagi mago eri'za
rise'ma hunte'na kamakaziga keveme'neanki ome hakenka erinka
eno hu'na huntesogenka, amne egahane. Na'ankure tamage
huno Ra Anumzana mani'negu mago kazeri haviza hu'zana
kagritera forera osugahie. **22** Hianagi ana riseku'ma hu'na kevea
kame kaziga me'neanki ome erio hanugenka, e'i ame hunka
atrenka vuogu hugahue. Na'ankure Ra Anumzamo omenka vuo
huno hugantegahie. **23** Hagi kagrane nagranema huvempa kema
hu'noa zamofona Ra Anumzamo'a agrake keno antahino hu'negu
kagra ana kemofona amage'anto. **24** Hagi Deviti'a anantega
frakino mani'negeno, kini ne'mo'a kasefa ikante'ma musenkase
hu'za ne'zama nenaza knarera ne'zama nenaza tratera eman'i'ne.
25 Hagi kini ne'mo'a ne'za nenaku ko'ma nehiaza huno nomofo
asarega amagen a renteno rutragoteno emanigeno, mago kaziga
Jonatani mani'geno, mago kaziga Abna mani'neanagi Devitima
nemania trara amne me'ne. **26** Hagi Soli'a ana zupa nanekea
osu'ne. Na'ankure agrama agesama antahiana Deviti'a mago'aza
huno agra'a azeri pehana hu'neno ome'ne huno antahine. **27**
Hianagi nampa 2 kna zupanena Deviti'ma nemania tramo'a
amne me'ne. Ana higeno Soli'a nemofo Jonatanina asamino,
Devitima nemania tramo'a amne me'neana na'agafare Jesi
nemofo Deviti'a okine meninena ne'za ne'tratera ome'ne? **28**
Higeno Jonatani'a kenona huno, Deviti'a Betlehemu vunaku
tutu huno nantahigeno, **29** natrege'na va'neno, na'ankure
naga'nimo'za rankumapi kresramana nevazageno, nafuhe'za
ke hazanki'na ame hu'na vugahue. Hagi navesi nante'nunka

hunantege'na nafuhe'i'na ome zamage'hue hige'na, huntogeno vu'ne. E'i ana agafare ama tratera omani'ne. **30** Hagi Soli'a Jonatanina tusi arimpa ahenenteno anage hu'ne, Kagra keontahi savri a'mofo mofavre mani'nananki, Devitima kagri noma erino kinima manino kazeri kagaze nehuno, negrerama agazema eri amisia zankura ontahinka Devitina aza hu'nano? **31** Na'ankure Jesi nemofo'ma ofri'noma mani'enigenka, tamagerafa hunka kinia omanigahane. Hagi mago'a vahe huzmanteg'e'za vu'za ome avre'za esnage'na ahe fri'neno. **32** Hianagi Jonatani'a huno, Naza agra havizana hu'ne? Nagafare agra frigahie? **33** Anagema higeno'a Soli'a Jonatanina ahe frinaku karugru kevereti re'neanagi, mani'ganegeno hantga hu'ne. E'inama higeno'a tamage nenfa'a Devitina ahe frigahie huno Jonatani'a antahi'ne. **34** Hagi Jonatani'a nefana tusi arimpa ahenenteno ese ikamofona nampa 2 knarerera, ne'zana oneno otino atreno vu'ne. Na'ankure nef'a'ma Deviti agima eri havizama hiazanku anara hu'ne. **35** Hagi anante nanterana Jonatani'a mago eri'za rise nevreno Deviti'ene keaga ome hunaku kema hunte'nate hoza agupofi vu'ne. **36** Hagi ana eri'za risera asmino, Kagarirenka vunka kevema ahettrenua kevea ome hakenka erio, higeno ana rise'mo'a agareno nevigeno Jonatani'a kevea ana risera ahe agatereno ogamanu'a avuga ahe'ne. **37** Hagi ana eri'za rise'mo'ma kevema ome akasinaku anante'ma vigeno'a, Jonatani'a ke'zatimino, Kevemo'a ogamu'a me'neanki, **38** omaninka ame hunka vuo! Hagi Jonatani eri'za rise'mo'a ana kevea ome erino ete rukrahe huno kva'amofontega e'ne. **39** Hagi e'i ana mikozama hiazamofo agafa'a ana eri'za risemo'a antahi amara osu'neanki, Jonatanike Devitike zanagrake antahi'na'e. **40** Hagi Jonatani'a ati'ane keve'anena ana eri'za risemofo nemino, erinka kumatega

vuo. 41 Higeno ana eri'za rise'ma vutegen'o'a, Deviti'a have kevumofo amefima fraki'nefintira atiramino eno Jonatanina agafi eme arena reno, 3'a zupa kepri hu'ne. Hagi zanagra onuki, anuki huke zanagi ohene ahene nehu'ne, taregamokea zavi ate'na'e. Hianagi Deviti'a tusiza huno zavira ate'ne. 42 Hagi Jonatani'a amanage huno Devitina asmi'ne, Karimpa frune vuo. Na'ankure Ra Anumzamofo avure huvempage hu'noankita ronema huno'azana, Ra Anumzamo amu'nontifina mani'neno maka knafima kagripinti'ma fore'ma hania vahe'ene nagripinti'ma fore'ma hania vahera keno antahino hanie. Hutegeno Deviti'a nevigeno, Jonatani'a ete kumatega vu'ne.

21 Hagi Nopu kumate pristi ne' Ahimelekintega Deviti'a vu'ne. Hagi Ahimeleki'a Deviti'ma negeno'a antri nehuno, Nahigenka kavega vahera ovarenka kagrakera neane. 2 Higeno Deviti'a ana pristi nera kenona hunteno, Kini ne'mo'a mago'a eri'zanke hunanteno anage hu'ne, Amama hugantoa zamofo kea mago'mo'a ontahino huno hu'ne. Hagi sondia vaheni'a huzamante'noanki'za emanihoma huzamante'nore eman'inenage'na vugahue. 3 Hagi mago'a ne'zama ante'nenunka 5fu'a breti kona namige, mago'a ne'zama me'neniana amne namigahane. 4 Hianagi Pristi ne'mo'a Devitina kenona hunteno, Nagra mago'a amane bretia onte'noanki, ruotage'ma hu'nea bretige me'neanki sondia vahekamo'zama ama kenage'ma a'nenema omase'nesnagenka amane ome zami'hanke'za negahaze. 5 Higeno Deviti'a kenona'a amanage huno asami'ne, Kagesa ontahio, maka zupa hate'ma nevuta sondia vahe'nimo'za a'nanenena nomasazanki'za agru hu'haze. Ana hu'neankita menina e'nonana ruotge eri'zante enonankita, agru hu'none. 6 Hagi ne'zana omanegeno ana pristi ne'mo'a seli mono nompima

Ra Anumzamofo avugama amuhoma hu'nea bretima erinenteno, zasi'ma hia ruotge bretima eri ante'neana Devitina eri ami'ne (Matiu 12:3-4, Maki 2:25-26, Luku 6:3). **7** Hagi ana zupa ana seli mono nompina Idomu ne' Doekie nehaza ne' Soli bulimakao afute kegavama nehaza vahe'mokizmi ugota kva ne'mo ofa hu'naku umani'neno negegeno, ana zana pristi ne'mo'a hu'ne. **8** Hagi Deviti'a amanage huno Ahimelekinkura hu'ne, Bainati kazinknone kevenena ontенampi? Kini nemo'a ame hunka vuo hige'na bainati kazinknone kevenena e'ori e'noe. **9** Hagi pristi ne'mo'a asamino, Magore huno omaneneanki Filistia ne' Goliatima Ela agupofima ahe'nana nemofo bainati kazinke me'ne. Tavravefi antegafite'na pristi vahe'mo'zama zamamizare'ma nentaniza kukenamofo amefi antogeno me'ne. Hagi kagrama erinaku'ma hanunka erio huno higeno, Deviti'a kenona huno, Mago'a bainati kazimo'a amanahura osu'neanki amne erinamio. **10** Hagi ana knazupa Deviti'a Solinku kore huno freno Gati kini ne' Akisinte vu'ne. **11** Hianagi Akisi eri'za vahe'mo'za Deviti'ma nege'za, Ama nera kini ne' Devitimpi, avoma re'za zagamema nehu'za, Soli'a 1 tauseni'a vahe zamahegeno, Deviti'a 10 tauseni'a vahe zamahe'ne hu'zama hu'naza nere hu'za hu'naze. **12** Hagi ana nanekema Deviti'ma nentahino'a Gati kini ne' Akisi'ma ahe zankura tusi'a koro hu'ne. **13** Ana hu'negu Devitia ana kini ne'ene eri'za vahe'amokizmi zamavufina haviza huno negi vahe sampreno ufre kafantera azanu avona negreno, agipintira agrena ampritregeno agi azokatega zuzu huno afra afra hu'ne. **14** Hagi kini ne' Akisi'ma negeno'a amanage huno eri'za vahe'a zamasami'nne, Na'a higeta tamagra neginagi vahera avreta nagritega e'naze? **15** Hagi rama'a amanahu negi

vahera mani'nazanki'na, na'a hanige'na noni'afina atre'nugeno
manigahie? Nehuno Akisi'a atregeno Deviti'a vu'ne.

22 Hagi Deviti'a Gati kumatetira freno Adulamu have kantega
vuno umani'ne. Hagi ananke'ma nefae'ene afuhe'zama nentahi'za
anantega vu'naze. **2** Hagi vahe'mo'zama knama nezamiza
vahe'mo'zane, zamarimpa knazampima mani'naza vahe'mo'zane,
nofi'ma hu'naza vahe'mo'za maka Devitinte e'za eme eri
atruma hu'nazana 400'a vahe eme atru hazageno Deviti'a
kegava huzmante'ne. **3** Hagi anantetira Deviti'a Moapu kaziga
Mizpa kumate vuno, ana kumate kini nera ome antahigeno,
muse hugantoanki knare nenfane nenereranena kegava
huzanante'nesankeno mani'nenake'na, nagritera Ra Anumzamo'a
na'a hunantegahifi ka'neno, **4** higeno ana kini ne'mo'a izo hu'ne.
Hagi Deviti'a nererane nefanena zanavreno Moapu kini ne'mofo
kvafi eme neznanteno, agra have kampi ufrakino umani'ne. **5**
Hianagi mago zupa kasnampa ne' Gati'a Devitina asamino,
Kagra ama have kana atrenka Juda kaziga vuo. Higeno Deviti'a
anampintira atreno Hereti zafafi vu'ne. **6** Hagi mago zupa Soli'a
Gibea agonare tamaris zafamofo tonapinka keve'a erineno
mani'nege'za, eri'za vahe'amo'za manigagi ante'naze. Anante
mago'a vahe'mo'za Deviti'ma ke'za eri fore'ma hu'nazankea
Solina eme asami'naze. **7** Hagi Soli'a ana kema nentahino'a ana
vahezaga zamasamino, Benzameni naga'mota antahilo, Jesi
nemofo'a witi hoza tamigahifi, waini hoza tamamigahio? Hifi agra
amne 1tauseni'a sondia vahete kvao, 100'a sondia vahete kva
vahe manigahaze huno nagrama nehuaza huno huvempagea
huramantegahio? **8** Hianagi ha'ma renantea ne' Deviti'enema
nenamofo Jonatanima huvempagema hia nanekea nahigeta
tamagranena onasami'haze. Tamage magomoke hunka nagrikura

tamagesa antahinamita tamasunkura huonanteta, Deviti'ma kafonteno'ma vano nehia nanekea onasami mani'nageno, eno ama knarera ehanatie. **9** Hagi Edomu nagapinti ne' Doeki'a ana vahepinti otino ranke huno, Nagra Nobi kumate mani'nena negogeno, Deviti'a pristi ne' Ahitupu nemofo Ahimeleki'ene nanekea nehige'na ke'noe. **10** Hagi Ahimelekia Deviti agi erino Ra Anumzamofona nazanoma hania zankura antahinegeno, Filistia ne' Goliatyi bainati kazine ne'zanena erimi'ne. **11** Anage higeno kini ne'mo'a Ahitubu nemofo Ahimelekine maka agri naga'ma Nobu kumate'ma seli mono nompima pristi eri'zama eneri'za naga'anena, zamavareta eho huno huzmante'ne. Hige'za miko'mokizmia kini nete zamavare'za e'naze. **12** Anante Soli'a huno, Ahitubu nemofoga antahio. Ahimeleki'a huno, ramoka nentahue. **13** Higeno Soli'a asamino, Na'a higeta kagrane Jesi ne'mofo'enena nahenakura nanekea retro nehutna, na'a agafare Jesi nemofona ruotgema hu'nea bretia eri neminka, bainati kazina eri neminka, Deviti'ma azama hanigura Ra Anumzamofona antahige'nane? E'ina hunka azahankeno kafona anteno vano nehigeno, eno ama knarera ehanatie. **14** Hianagi Ahimeleki'a kini ne'mofo kenona huno, Iza kagri eri'za vahepintira mago'mo'a knarera huno negagaru Deviti'ma nehiaza huno fatgo eri'za vahe ka'a mani'neno, kagrira kamage ante'ne? Agra kavate'ma kegava hunegantaza sondia vahe'mokizmi kva mani'nege'za, maka vahe'ma nonkafima nemaniza vahe'mo'za antahimiza ra agi nemiza ne' mani'ne. **15** Hagi ese knani'a amanara hu'na Devitima azama hanigura Ra Anumzamofona antahigenofi? l'o. Hagi kini ne'moka, nagri'ene naga'nimofona ama ana kegagafina tavrentenka kna oramio. Tagra mago nanekea retro huta kagrira kazeri haviza hu nanekea osuta, ama anazana keta antahita

osu'none. 16 Hianagi kini ne'mo'a huno, Ahimelekiga kagrane
mika nagaka'anena frigahaze. 17 Anante kini ne'mo'a avate'ma
kegava hunentaza sondia vaheku huno, Ra Anumzamofo pristi
eri'za vahera zamahe friho, na'ankure zamagra Deviti kaziga
mani'ne'za, Devitima freno vu'nea zamofona antahi'za ke'za
hu'nazanagi, eme onasami'naze. Hianagi kini nemofo eri'za
vaheremo'za Ra Anumzamofo pristi vahera ozmahe'naze. 18 Hagi
ana hazageno kini ne'mo'a pristi vahera zamahe frio huno Idomu
ne' Doekina huntogeno, Doeki'a ana miko pristi vahera za'za
kukenama hu'naza pristi vahera 85fu'a zamahe fri'ne. 19 Hagi
pristi vaheremakima Nopuma mani'naza vahera, veneneo,
a'neo, mofavre, bulimakao afuro donki afuro sipisipi afura bainati
kazinknonteti maka zamahe fri vagare'ne. 20 Hianagi Ahimeleki
nemofo Ahitubu negeho Abiata'a anampintira freno Deviti'ene
umani'ne. 21 Hagi Soli'ma Ra Anumzamofo pristi vaheremakima
zamahe fri'nea nanekea Abiata'a Devitina eme asami'ne. 22
Hagi Deviti'a ana nera asamino, Idomu ne' Doekima anampima
mani'nege'na nege'na, tamage Solina ome asamigahie hu'na
nagra ko antahi'noe. Hagi negafa naga'ma mika frizana, nagri
knaza eri'za fri'naze. 23 Hagi korora osunka nagrane manio.
Kagri'ma kahe'zama nehia nemo'a nagri'ene nahe'naku nehie.
Hagi nagrane emaninankinka, knare hunka manigahane.

23 Hagi Devitina eme asami'za, Keila kumate vahera Filistia
vaheremo'za ha' eme huzmante'za witima neharazafima eri
atru hu'naza witizamia eri vagare'naze. 2 Hagi Deviti'a Ra
Anumzamofona antahigeno, Knare vu'na Filistia vahera hara
ome huzmantegahuo, higeno Ra Anumzamo'a Devitina asami'no,
Amne vunka hara ome huzmantenka Keila vahera zamagu
vazigahane. 3 Hianagi Deviti'enema mani'naza vaheremo'za

amanage hu'naze, Antahio, tagra Judama manineta Filistia
vahekura korora nehunankita, tagra Keila kumatera vuta rama'a
Filistia vahera hara ome huozamantegosune. 4 Hagi Deviti'a
mago'ene Ra Anumzamofona antahigegeno, Ra Anumzamo'a
asamino, Otinka Keila kumate uraminka Filistia vahera hara
ome huzamanto. Na'ankure Nagra Filistia vahera kazampi
zamavarentesugenka hara ome huzmagateregahane. 5 Higeno
Deviti'ene sondia vahe'anena Keila urami'za Filistia vahera
ome nezamahe'za mika afuzamia nevre'za Keila vahera
zamagu'vazi'za zamavare'naze. 6 Hagi pristi ne' Ahimeleki
nemofo Abiata'a freno Devitintegama Keila kumategama
nevuno'a, pristi vahe'mo'zama antanine'za Anumzamofo
avesi'zama hake'za eri fore'ma nehaza kukena ifoti erineno, Ra
Anumzamo'ma nanekema asami'nigu vu'ne. 7 Hagi Deviti'ma
Keila kumate mani'nea nanekema mago'a vahe'mo'za Solima
eme asamizageno'a Sol'i'a huno, Ra Anumzamo'a nazampi
avrente. Na'ankure Deviti'a agra'a avreno kinafi ufreankna
huno hanave keginamo kagi'nea ra kumapina ufre'ne. 8
Anage higeno Sol'i'a maka Sondia vahezaga'a zamazeri atru
huno nezamavareno, Devitine sondia vahe'ane avazagigagino
zamahenaku Keila kumate urami'ne. 9 Hagi Deviti'ma antahiamma
Soli'ma ha'ma eme hunte'naku'ma kema retro'ma nehigeno'a,
agra pristi ne' Abiatana asamino, 12fu'a havema me'nenege'za
pristi vahe'mo'zama nentaniza kukena ifotia omerinka amare eno.
10 Hagi Deviti'a anage huno nunamuna hu'ne, Ra Anumzana
Israeli vahe Anumzamoka kagri eri'za vahe'mo'na antahuana
nagrama eman'i'noa zanku huno Sol'i'a Keila kumara eme
erihaviza hu'naku ke retro nehia naneke nentahue. 11 Hagi Keila
kumate vahe'mo'za nagrira navre'za Soli ome amigahazafi?

Hagi tamage huno Soli'a eri'za nekamo'na antahua kante
anteno egahifi? Ra Anumzana Israeli vahe Anumzamoka muse
hugantoanki eri'za nekamo'na nasamio. Higeno anante Ra
Anumzamo'a huno, agra eramigahie. **12** Hagi mago'ane Deviti'a
Ra Anumzamofona antahigeno, Keila vahe'mo'za nagri'ene
eri'za vahe'nianena tavre'za Soli azampina ome antegahazafi?
Higeno Ra Anumzamo'a huno, Ozo e'inara hugahaze. **13** Hagi
Deviti'ene mika 600'a sondia vahe'anena Keilatira atre'za kumate
manitere hu'za vu'naze. Hagi Soli'ma antahama Deviti'a Keilatira
atreno ko fre'ne ke'ma nentahino'a anantega ovu'ne. **14** Hagi
Deviti'a Sifi kaziga me'nea ka'ma kopi ome frakino mani'ne.
E'i ana kaziga umaninegeno Soli'a Devitina ahe'naku hakeno
mika kna vano hu'neanagi, Ra Anumzamo'a atregeno Soli'a
Devitina aze'ori'ne. **15** Hagi mago zupa Soli'a Horasi kaziga
Sifi hagege kokampi frakino mani'nerega Soli'a ahe'naku nevia
nanekea Deviti'a antahi'ne. **16** Hagi Soli nemofo Jonatani'a
Horesi kaziga vuno Devitina ome negeno Ra Anumzamofonte'ma
hanavetino amentintima hu nanekea ome asamino azeri
hanavenetino anage hu'ne, **17** Kagra nenfankura korora osuo,
na'ankure kagrira hakeno eriforera osugahie. Hagi kagra Israeli
vahe kini mani'nanke'na, nagra ehenka hugantegahue. Hagi
ama anazana nenfa'a ko keno antahino hu'ne. **18** Hagi ana
huvempa kema Ra Anumzamofo avufima hutekea Deviti'a
Horesi mani'geno, Jonatani'a noma'arega ete vu'ne. **19** Hagi
mago'a Sifi kumate vahe'mo'za Solina ome asami'za, Hakila
agonafi Horesi kumamofo sauti kaziga Jesimoni Deviti'a frakino
mani'ne hu'za hu'naze. **20** Hagi Kini ne'moka kagrama hana
kante antenka eramigeta kazampina tagra'a avrentegahune. **21**
Hagi Soli'a amanage huno zamasmi'ne, Ra Anumzamo asomu

huramantesie, na'ankure tamagra tamasunku hunantaze. **22** Hagi
vuta mago'ene ome haketa e'ire mani'ne huta keho. Na'ankure
nagra antahi'noe, agra ruzahu ne'kino reravatga hugahie. **23**
Hagi mika framakino nemania kuma'a haketa erifore huso'e
huteta, ame huta keaga atrenantenke'na eramineno. Hagi Juda
kaziga inama'are manigahie nagra ome hake'na azerigahue.
24 Anage huzmantege'za zamagra Solina vugota hunte'za Sifi
kumatega vu'naze. Hagi ana'ma nehazage'za Deviti naga'mo'za
anampintira atre'za Jesimoni kumara sauti kaziga me'nege'za
Maoni hagege kokampi Araba agupofi vu'naze. **25** Hagi Soli'ene
sondia vahe'amo'za agafa hu'za Devitinku hake'naze. Hagi
anama agriku'ma hakaza nanekea mago'a vahe'mo'za Devitina
eme asmizageno, agra mago'ene vuno havege hu'nea kokampi
Maoni ufrakino mani'ne. Hagi ana'ma hiazamofo nanekema
Soli'ma nentahino'a otreno, avaririno anantega vu'ne. **26** Hagi
Soli'a mago agonamofona mago kazigama hakeno eneviana,
Deviti'ene naga'amo'za ana agonamofona mago kaziga vu'naze.
Hianagi Soli'a erava'o huno Devitina azeri'za hu'ne. **27** Hagi
ana'ma hu'zama nevazageno'a kema eri'za vu vahe'mo'za Solina
eme asami'za, Filistia vahe'mo'za ha eme hurante'za ku'ma eme
ankanirazanki ame hunka eno hu'za hu'naze. **28** Hagi Soli'ma
Devitima avaririno nevia zana ome netreno, Filistia vahe ha'
ome huzmante'naku vu'ne. E'ina agafare ana mopagura Sela
Hamalekotie hu'naze. (Sela Hamalekotie hu'nazana Hibru kefina,
atreno fre'nea have hu'ne). **29** Anama huno Soli'a neviana,
Deviti'ene naga'amo'za atre'za Engedi have kampi umani'naze.

24 Hagi Soli'ma Filistia vahe'ma ome zamarotago hige'za
vazageno'a, henka mago'a vahe'mo'za eme asami'za, Deviti'a
Engedi hagege kokampi frakino havegampi mani'ne hu'za

hu'naze. 2 Hagi Soli'a anankema nentahino'a, mika Israeli
vahepintira 3 tauseni'a sondia vahe nezamavareno, Devitinku
hake'naku Engedi hagege kokampina Afi Meme Afu'mofo Have
nehazarega vu'naze. 3 Hagi Soli naga'mo'za mago havegana
me'negeno sipisipi kegava nehaza keganagante uhanati'naze.
Hagi Solina rifagu avesigeno, arifa ome renaku ana have
kampi ufre'ne. Hagi ana have kampina Deviti'ene agranema
vanoma nehaza vahe'mo'za ogamanu'a mani'nageno Soli'a
ufre'ne. 4 Ana hige'za Deviti'enema vu'naza vahe'mo'za nege'za
anage hu'za Devitina asami'naze, Ama Ra Anumzamo'ma ha'
vaheka'a mago kankamu retro huno kazampi avrentegahuema
hu'nea kna fore nehie. Hazageno anante Deviti'a rerakaureno
viazamo, Soli'a keno antahino osiaza, zaza kukena'amofona
atupa'a ome taga hu'ne. 5 Hagi anama huno Soli kukenama
Deviti'a taga huteno'a, tusiza huno agesa nentahino asunku
hu'ne. 6 Hagi Deviti'a agranema vu'naza vahera zamasamino,
Ra Anumzamo'a hunagru huno anara osuo hu'neazanagi, Ra
Anumzamo huhamprinte'nea ne' ranimofa kukena tagahue. 7
Anage nehuno Deviti'a agranema vu'naza vahera zamazeri
korige'za, Solina hara hunte kea osu'naze. Hagi Soli'a otino
ana havegana atreno atiramino nevigeno, 8 Deviti'a otino ana
have kampinti atiramino Solina kezatimino, ranimoka kini nere,
higeno Soli'a rukrahe huno kegeno Deviti'a avugosaregati mopafi
umaseno agi'a erisga hu'ne. 9 Hagi Deviti'a keza atimino,
Na'a higenka kagra Deviti'a hazenke kamiku neheke hu'za
kasamiza vahe kea nentahine? 10 Hagi havegampi kagrira
menintfaza Ra Anumzamo'a nagri nazampina kavrenteanki
ko. Mago'a nagrane mani'namo'za kagrikura ahefrio hu'za
hazanagi, nasunku hugantena, ranimofona ohegosue hu'noe.

Na'ankure Ra Anumzamo huhamprinte'nea neki'na avakora osugahue hu'na hu'noe. **11** Hagi nafanimoka antahio, zaza kukenakamofo atupa'a taga hu'na nazampi e'nerina kahe ofri'noanki ama ko. E'inama hu'noa zamo'a nagra hararegante'na kahenakura nosue. Nagra mago kumira hu'na kagrira havizana huogante'noanagi, kagra nahenakura kafona antenka navaririnka vano nehane. **12** Hagi Ra Anumzamo agrake taregamota'a refako huranteno, izo havizana nehie taregamota tagegahie. Hianagi nagra nazana erisga hu'na mago'zana kagri kavufarera osugahue. **13** Hagi koknafi knare antahi'zamofo nanekefina huno, kefo avu'vaza hu vahepintira kefo avu'avazamo efore hugahie huno hu'ne. Hianagi nagra nazana erisga hu'na mago'zana kagri kavufarera osugahue. **14** Hagi nagra izo'na mani'nogenka, Israeli vahe kinimoka hara hunante'naku nehane? Na'ante knaka'a atrenka fri'nea kragna nehu'na, harukna hu'nomonagura nehakrane? **15** Atregeno Ra Anumzamo Agrake taregamota'a haviza hane, knare'za hane huno refko hurantegahie. Agrake ke'ni'a antahinenamino, tamage hunka fatgo hunane huno kagri kazampintira nagu'vazi'nie. **16** Hagi Deviti'ma ana nanekema hvaretegeno'a Sol'i'a huno, ne'nimoka Devitiga kageru nentahufi? Anage nehuno Sol'i'a krafage huno zavi ate'ne. **17** Ana huno zavitetenno Sol'i'a Devitinkura huno, Kagra nagaterenka fatgo kavukava hu'nananagi, nagra havi navu'nava hu'na kahe frinaku hu'noe. **18** Hagi knare zama hunenantana zamofona menintfa eri ama hane. Ra Anumzamo'a nahe friogu kagri kazampima navrentegenka knare kavukava hunka nahe ofri'nane. **19** Hagi mago vahe'mo'ma ha' vahe'ama keno'a amane atregeno novianki ahenefrie. Hagi kagrama nagri'ma menima hunantana kavukavatera Ra Anumzamo asomura knare

huno hugantesie. 20 Hagi nagrama tamage hu'na antahuana kagra kini mani'nankeno, Israeli vahe'mo'za kagri kazampi manigahaze. 21 Hagi Ra Anumzamofo agifi huvempage hunka, henkama kini mani'nunka nagri nagara zamahe fanene nosu'na, kagripinti'ma fore hu anante anante'ma hanaza vahera zamahe fanane osugahue hunka nasamio. 22 Higeno Deviti'a Solina huvempage huntetegeno, Soli'a kuma'arega vu'ne. Hianagi Deviti'ene agranema vu'naza vahe'mo'za fra'maki'za mani'naza havegantega ete vu'naze.

25 Hagi Samuel'i'a frige'za Israeli vahe'mo'za eme atru hu'za zavi krafa nehu'za Rama kumate norava'oma'are asente'haze. Anante Deviti'a Paran Maoni hagege ka'ma kokantega urami'ne. Hagi Soli'a antahiamma Deviti'ma Paran Maoni umani'ne hazageno'a anantega avaririno urami'ne. 2 Hagi Maoni kaziga Kameli kumatera tusi'a feno ante'hea nera magora mani'neankino, ana ne'mo'a 3 tauseni'a sipisipi afu anteno, 1tauseni'a meme afu ante'he. Hagi mago zupa sipisipi afu'amofo azoka neharen mani'ne. 3 Hagi ana ne'mofo agi'a Nebali'e. Hagi nenaro agi'a Abigelikino, agra hentofa a'kino knare antahi'zane a' mani'ne. Hianagi Nebali'a Kalepi nagapinti ne'kino, havi avu'ava ene' ne' mani'ne. 4 Hagi Deviti'ma hagege kokampima mani'heno antahiamma, Nebali'ma sipisipi afu'amofo azoka neharen kema nentahino'a, 5 10ni'a nehzavate huzamanteno anage hu'ne, Kameli kumate vuta, nagri nagifi knare kne huta Nebalina ome humuse hunenteta, 6 anage huta asamiho, Kagra knare hunka za'za kna nemaninka, kagrane nagakane maka zanka'anena tamarimpa frune maniho, 7 Hagi menina antahuana sipisipi azoka neharana kna me'ne hu'za nasami'naze. Hagi sipisipi afukama kegavama nehaza vahe'mo'zama Kemoli kumate'ma

tagranema emani'naza knafina, zamazeri havizana nosuta,
mago'a zazmia kumazafa ose'none. 8 Hagi anankea eri'za
vaheka'a zamasamiske'za, tamage hu'za kasamigahaze. Hagi
antahiraminka so'e kavukva huranto. Na'ankure menina ne'za
kreno neneno muse hukna me'ne. Hagi muse hugantonanki,
ne'zama ante'nesaza zana Deviti'a mofavreka'agna higeta
tagra eri'za vaheka'a mani'nonanki aza hunka ne'zana menina
tamio huta asmiho. 9 Hagi ana nehazavemo'za Nebalinte'ma
unehanati'za Deviti'ma zamasami'nea nanekea agri agi eri'za
ome asamite'za, kenonama huzaminigu avega ante'za mani'haze.
10 Hianagi Nebali'a ana kemofo nona'a amanage hu'ne, Jesi
ne'mofo Deviti'ema nehazana izanku nehaze. Nagra ke'na
antahi'na osu'noe? Meni ama knafina hakare'a eri'za vahe'mo'za
kva'zimia atre'za nefraza knagino, agra mago kazokzo eri'za
vahe mani'negahie. 11 Na'ante antahi'na ke'na osu'nesoa
vahera, bretiniane, tini'ane, afu'niane sipisipi azoka'ma haresaza
vahe'ma zaminaku'ma hanua ne'zana tamigahue? Tamagra
igati e'haze nagra kena antahina osu'noanki'na ontamigahue.
12 Hagi Devitima huzmantenge'za e'naza nehazavemo'za ete
rekrahe hu'za vu'za ana miko kema Nebali'ma hiankea Devitina
ome asami'haze. 13 Hagi Deviti'a sondia vahe'a anage huno
zamasami'ne, Bainati kazinkontamia tamavate eriho hige'za
eri'zageno, agranena ana huno bainati kazinknoma'a e'nerino,
400'a sondia vahera zamavareno nevuno, 200'a sondia vahera
huzmantenge'za fenozamire kegava hu'haze. 14 Hianagi mago
kato ne'mo Nebali nenaro Abigelina ome asamino anage hu'ne,
Deviti'a ka'ma kokampi mani'neno, kvatimofona kea atrenteana
ana kea huhaviza nehuno, ke'a antahi omi'ne. 15 Hagi ana
vahe'mo'za anantegama umanuna kna'afina knare zamavuzmava

hurante'za, tazeri havizana osu'za, mago zantia kumazafa ose'za
kegava hurante'naze. **16** Hagi anantegama umanuna knafina
hanine zagenena ana vahe'mo'za vihugna hu'za manigagine'za
kegava hunerantageta sipisipia kegava hu'none. **17** Hagi ama
anankea nentahinka, nazano huzmantenaku'ma banana zana
huzamanto. Na'ankure kvatimofone noma'afima nemaniza vahera
Deviti'a eme zamazeri haviza hu'naku kea retro nehie. Nebalia
knare nera omani'neankino, mago vahe'mofo kea ontahigahie.
18 Hagi Abigeli'a ana nanekema nentahino'a, ame huno 200'a
bretigi, meme akrute tro hu'naza tafentrempo wainia tagino
e'nerino, 5fu'a krente'naza sipisipi afuki, 20 kilo kre hagege hunte
witigi, 100'a waini araga antehagege hu'za regripe ante'nazanki,
200'a fiki araga regripe ante'nazana donki afutamimofo agumpi
erinte'ne. **19** Hagi Abigeli'a eri'za vahe'a anage huno zamasmi'ne,
Ko vugota hinke'na tamage tamavaririna va'neno. Hianagi
ana'ma hiazana nevena Nebalina osami'ne. **20** Hagi ana
a'mo'a donki afu'afi manino ana agonamofo krahopi nevigeno,
Deviti'ene sondia vahe'anena anantega eramigeno, ana a'mo'a
ome tutagiha huzmante'ne. **21** Hagi Deviti'a anage hu'ne,
Maka'zama ama ana ne'mo'ma ka'ma kopima ante'neana
tamage hu'na kegava hugeno mago'zana kumazufa osege,
fanenea osuge hu'ne. Hagi knare navu'nav'a'ma hunte'norera
nona huno haviza hunante'ne. **22** E'ina hu'negu ana ne'mofo
nagara kenageke zamahe fri hana hugahue. Hagi ana'ma
osu'na atrenugenno anampinti mago vahe'mo'ma amnema
mani'nesigeno nanterama uhanatina, Anumzamo'a nahe frigahie.
23 Hagi Abigeli'ma Devitima negeno'a ame huno donki afu'afinti
eramia zamo, Devitina agafi kepri hu'ne. **24** Hagi ana a'mo'a
agafi kepri huneno Devitina asamino, Mago vahera knazana

ozaminka, ranimoka nagripi ana miko knazana anto. Hagi muse
hugantoanki nagra eri'za vahekamo'nama hanua kea antahio.
25 Devitiga ranimoka Nebali'a kefo avu'ava'ene ne' mani'neanki
ke'a antahiminka mago'zana huonto. Agra'a agimo'ma hu'neaza
huno negi vahe mani'ne. Hianagi nehazavema huzmantanke'za
vu'nazana zamage'na antahina osu'noe. **26** E'ina hu'negu
menina ranimoka tamage huno Ra Anumzamo'a mani'neankino,
kataregenka kagra kazanutira vahera zamahe frinka kumira
osane. Ana hu'negu kagri'ma ha'ma regantesaza vahera
zamatrege'za Nebali'ma hiazza hu'za neginagi hiho. **27** Hagi
menima eri'za vahekamo'na eri'na e'noa ne'zana erinka, vaheka'a
zamige'za neho. **28** Hagi nagrama hua navu'navamo'ma
kazeri havizama hanigenka, kumi'n'i'a atrenanto. Na'ankure Ra
Anumzamo'a kinima mani trara kagri nagapi antesigeta kinia
manivava huta vugahaze. Na'ankure kagra Ra Anumzamofo
ha' nehunka, maninkama ampina, mago havizana osu'nane.
29 Hagi ha' vahekamo'zama kahe friku'ma nehageno'a, Ra
Anumzana kagri Anumzamo'a knare huno kva hunegante. Hianagi
Anumzamo'a ha' vaheka'a kumi atifi have erinteno ahetreankna
huno zamahenati atresige'za ame hu'za fanane hugahaze.
30 Hagi Ra Anumzamo'a kagrima ranimoka huvempagema
hugante'neazama huvamaretesuno'a, Israeli vahete kva kazeri
otisanigenka kva manisanunka, **31** ama anazamo'a kazeri
haviza hugahianki, ranimoka kagra kazampintira nona hunka
vahera zamahenka kagra kagia eri havizana osuo. Hanki Ra
Anumzamo'ma ana mika'ma huvempage hugante'nea zama
hugantesigenka, nagrira kagesa antahinamio. **32** Hagi Deviti'a
amanage huno Abigelina asmi'ne, Ra Anumzana Israeli vahe
Anumzamo'a ra agi erisie! Menina Agra'a hugantegenka nagrira

nagekura e'nane. 33 Hagi kagri'enena muse hugantoe, kagri so'e antahi'zamo naza huno knare antahi'zana namige'na, nona hu'na kezmi omane vahera ozamahegahue. 34 Hagi menina nagritega amera hunka omantesina, Ra Anumzana Israeli vahe Anumzamofonte ko huvempage hu'noanki'na, oki nanterana Nebali'ene veneneraminena magore hu'na ozamatrosine. 35 Anante Deviti'a, Abigeli'ma erino vu'nea ne'zana e'herino amanage hu'ne, Keagama nasami'nana hago antahoanki, kagrama nasamina kante ante'na anazana hugahuanki, krimpa fru e'nerinka nontega vuo. 36 Higeno Abigeli'a anama huteno nontegama vuno ome keana, Nebali'a kini vahe'mo'za nehazaza huno tusi'a ne'za kreno neneno musenkase nehigeno ome ke'ne. Abigeli'a ana zamofo nanekea magore huno osami'ne. Na'ankure ana keragera Nebali'a tusi'a negi ti neno musenkase nehigeno nanterase'ne. 37 Hagi nanterama segeno Nebali antahintahimo'ma ama'ma higeno, ana nanekea Abigeli'a asami'ne. Hagi anankema Nebali'ma nentahino'a tusi agesa nentahigeno, agazamo'a hapu higeno kaza osu havegna huno mase'ne. 38 Hagi 10ni'a zagegna naza evutegeno, anante Ra Anumzamo'a Nebalina ahegeno fri'ne. 39 Hagi Nebali'ma fri'nea nanekema Deviti'a nentahino amanage hu'ne, Nagra Ra Anumzamofo agi'a hentesga hanue, Nebali'ma nagri'ma nazeri haviza hu'nemofo nona hunte. Hagi eri'za vahe'amo'ma vahe'ma ahe frizanku Ra Anumzamo'a Agra'a ahe frie. Anage nehuno Deviti'a Abigelina ke atrenteno, a' erigantegahue hu'ne. 40 Hagi Deviti eri'za vahe'mo'za Kameli kumate urami'za Abigelina ome asami'za, Deviti'a ome avreta enkena a' erintaneno huno hurantegeta e'none. 41 Abigeli'a mopafi kepri nehuno amanage hu'ne, Nagra Deviti' eri'za vahe mani'ne'na eri'za vahe'amofo

zamagia sese hu'zankura nave'nesie. 42 Anage nehuno Abigeli'a
ame huno agra donki'amofo agumpi marerige'za 5fu'a eri'za
a'ne'amo'za avega hazageno, Deviti eri'za vahé'ene vazageno,
Deviti'a a' avrente'ne. 43 Hagi Deviti'a Jezriri kumateti a'
Ahinoamu ara erinte'nere, Abigeli'ma egeno'a ana taregamokea
Deviti atre mani'na'e. 44 Hianagi anama hianknafina Soli'a
mofa'a Mikelina Deviti nenario mani'neanagi, Gilim kumate ne'
Lais nemofo Paltiel hanare ami'ne.

26 Hagi mago zupa Soli'a Gibea kumate mani'nege'za, Sifi
kumate vahé'mo'za eme asami'za, Deviti'a Hakila agonafi
Jesmonima avugosama hunte'nea kaziga frakino mani'ne.
2 Hazageno Soli'a 3 tauseni'a hanave Israeli sondia vahé
zamavareno, Sifi ka'ma kokampi Devitinku hakenaku vu'ne. 3
Hagi Soli'a Jesmoni tava'onte Hakila agonafi seli nonku'ma ome
kino mani'ne. Hianagi Deviti'a ka'ma kopi mani'neno, Soli'ma
agriku'ma hakeno eazamofo kea nentahino, 4 mago'a afure
vahé huzamantege'za, Soli'ma emanínenigura ome ke'naze.
5 Hagi anantetira Deviti'a otino Soli'ma seli nonkuma eme
anteno mani'nerega vu'ne. Hagi Soli'ene sondia vahete kva
ne'a Neri nemofo Abnakea Sondia vahé'mo'za masegagizageno
amu'nompi masenakeno, Deviti'a ana kenagera rerakaurenō ome
zanage'ne. 6 Hagi Deviti'a Hiti ne' Ahimelekine, Zeruia nemofo
Joapu nefu Abisaikizni zanantahigeno, Iza navega hanige'na
Soli'ma seli noma eme kino'ma mani'nerega uramigahue.
Anage higeno Abisai'a huno, Nagra kagrane uramigahue. 7
Higeno Deviti'ene Abisiakea ana kenagera Soli'ma seli nonku'ma
anteno mani'nefi ufre'na'e. Anampima ufrene ome ka'ana, Soli'a
kuma amu'nompi karugru keve'a asenirega retru renenteno,
masenegeno, Abna'ene mago'a sondia vahé'mo'zanena Solina

mase kagi ante'nage'za ome ke'na'e. **8** Hagi Abisai'a Devitina
asamino, Menina Anumzamo'a ha' vaheka'a kazampi avrenteanki,
natrege'na krugru kevereti magoke zupa reharuharu hu'na mopare
rekamarenta'neno. **9** Hianagi Deviti'a Abisaina asamino, Ohenka
atro. Na'ankure Ra Anumzamofonte'ma masavema frenteno
huhamprinte'nea vahe'ma ahesuta'a, hazenkefi manigahue.
10 Deviti'a mago'ane huno, Ra Anumzamo Agra'a ahe frise.
Hagi ozafama resuno frige, hapi uraminige'za ahe frige
hugahaze. **11** Hianagi Ra Anumzamofonte'ma masavema
frenteno huhamprinte'nea nera ahefrio huno hu izora huonante'ne.
Hagi menina Soli keve'ane tintafema'ane aseniregama me'neana
erigeta amafintira atiramita va'maneno. **12** Hagi Soli asenirega
me'nea kevene, tintafema'anena Deviti'a erigeke vu'na'e.
Hagi anama ha'azana mago vahe'mo'e huno keno antahino
osu'ne. Na'ankure Ra Anumzamo'a ana miko vahera zamazeri
zamavutoko hige'za, mase himre'nazageke anara hu'na'e.
13 Hagi Deviti'a vuno mago agona kantu kaziga me'nea
agonare afete ome oti'ne. **14** Ananteti Deviti'a Abnane sondia
vahe'anena kezana atizamino, Abnaga antufina mani'nano,
higeno Abna'a huno, Kagra izaga kini nemofonkura kezankea
nehane. **15** Higeno Deviti'a huno, Abnaga kagri'ma kagatere'nea
harafa vahera Israeli agu'afina iza mani'ne? Na'a higenka
kini nera kegava huontankeno, ahenaku'ma nehia vahe'mo'a
ahe'zana hu'ne? **16** Kagra knare kavukavara osane. Na'ankure
kagrane sondia vahekanena Ra Anumzamofonte'ma masavema
frenteno huhamprinte'nea vahe'ma kegava huontazankita
tamagra frigahaze. Hagi kini ne'mofo aseniregama me'nea
keve'ane tintafema'iga me'nefi keho? **17** Higeno Soli'ma
Deviti ageru'ma nentahino'a kezatino, nenamofoga Devitiga

nehano. Higeno Deviti'a kenona huno, ranimoka, kini nera
nagri nageru nentahine. **18** Deviti'a Solina asamino, Na'ante
ranimoka eri'za vahekamo'na narotago nehane? Na'a nagra
hugante'noe? Nagra na'a havizana hu'noe? **19** Hagi kininimoka
eri'za vahekamo'na hanua nanekea antahinamio, kagrima Ra
Anumzamo'ma kazeri oti'nigenkama ha'ma renenante'hankeno'a,
ofama hananana antahigamigahie. Hianagi vahe'mo'ma kazeri
otisigenkama ama anazama nehanankeno'a, Ra Anumzamo'a
kazusi huzmantegahie. Na'ankure Ra Anumzamo'ma erisintima
haregahane hu'nea mopafintira naratogo nehu'za, ru anumzante
mono ome hunto hu'za hu'naze. **20** Hagi atregeno koranimo'a,
Ra Anumzamofo tava'ontetira atreno ru mopafina tagi oramino.
Hagi Israeli vahe kinimoka, kagra na'ante hinimagu hakeankna
hunka nagrikura nehakenka, agonafi namagu hakeanknara
nehane? **21** Anante Soli'a huno, Nagra kumi huanki nenamofo
Divitiga mago'anе kagrira kazeri havizana osugahuanki ete eno.
Na'ankure ko nahantesinagi, nagrira antahinaminka onahenka
natre'nane. Nagra tamage hu'na neginagi'za hu'na havi avu'ava
zantfa hu'noe. **22** Hagi Deviti'a huno, kini ne'moka kevea ama
me'neanki, mago nehaza ne' huntegeno eme erino. **23** Hagi
fatgo zamavu'zmava nehu'za, kazigazi hu'za ke'ama amage'ma
nentaza vahera, Ra Anumzamo'a ana zamavu'zamavatera
mi'zana nezamie. Hagi menina Ra Anumzamo'a kagrira nazampi
kavrenteanagi, kahe ofri'noe. Na'ankure Ra Anumzamo masave
freganteno kazeri oti'ne. **24** Hagi menina kagri'ma antahigami'na
onkahorera, Ra Anumzamo'a antahinamino onaheno, miko
hazenke zampintira naza hugahie. **25** Anante Soli'a Devitinku
huno, Mofavrenimoka, Ra Anumzamo'a asomu hugante'nigenka

ranraza nehunka, hara agateregahane. Anage huteke Deviti'a neviana, Soli'a kuma'arega ete vu'ne.

27 Hagi anante Deviti'a amanage huno agesa antahi'ne, Mago'a knafi Soli'a nahegahianki'na Filistia vahe kumate'ma fre'na vanuana, nagra knare hu'na umanigahue huno antahine. E'ina hanena Solina avesra hinkeno, nagrikura mago'ane ohakrena knare hu'na umanigahue. 2 Huno nentahino Deviti'a agranema vanoma nehaza 600'a sondia vahe'ene, Gati kini ne' Maoka nemofo Akisi'ene umani'naku rugitagi'za vu'naze. 3 Hagi Deviti'a agranema vano nehaza vene'nene a'mofavre'zaminena zamavareno Gati mopare Akisi'ene umani'naze. Hagi Deviti'a tare atrema'ane vu'neankino, mago'mofo agi'a Ahinomukino, agra Jezreri kumateti a' mani'ne. Hagi mago'mofo agi'a Abigeli'e. Ana ara Kameri kumateti Nebali kento a'ma eri'nea a'e'ne zanavreno vu'ne. 4 Hagi Deviti'ma Gati moparega vu'nea nanekema Solima eme asamizageno nentahino'a, Devitina ahenakura mago'anena rotagoa osu'ne. 5 Hagi mago zupa Deviti'a amanage huno Akisina asmi'ne, Kagrama nagri'ma kavesi nante'nunka, mago osi kumaka'a namige'na anampi naga'ninena umani'neno. Eri'za vahekamo'na kini ne'moka rankumapina omanigahue. 6 Huno higeno, ana knazupa Akisi'a Zoglak kuma ami'ne. (E'inagafare Zoglak kumamo'a Juda vahe kinimofo kuma meno menina ama knarerera ehanati'ne.) 7 Hagi Deviti'a Filistia mopafina mago kafugi 4'a ika mani'ne. 8 Ana huteno Deviti'ene sondia vahe'amo'za vu'za, Gesuri vahe'ma Kirzeti vahe'ma Ameleki vahe'enena hara ome hu'naze. Ana vahera za'za kna e'i ana mopafina mani'naza vaheki'za, ana mopazmimofo agema'amo'a Suriti vuno Isipi tva'onte ome atre'ne. 9 Hagi Deviti'ma ha'ma ome hunezmanteno'a, maka venenene a'nenena zamahehna nehuno,

sipisipi afuma, bulimakao afu'ma, donki afu'ma, kemori afuma
kukenanena e'nerino ete kini ne' Akisima mani'nerega e'ne. 10
Hagi Akisi'a antahigeno, Kagra menina iga hara ome nehane?
Higeno'a Deviti'a amanage huno kenona'a hu'ne, Juda vahe'ene
Negevi mopamofo mago asoparega hara ome huge, mago
kaziga asoparega Jerami vahe'ene hara ome huge, mago kaziga
asoparega Kenaiti vahe'ene hara ome huge nehue. 11 Hagi
Deviti'a ha'ma ome nehuno'a, magore huno vene'nene a'nennen
ozmatreno zamahe fri vagare'ne. Agrama agesama antahiana,
mago vahe'ma atresugeno'a, Deviti'a vahera ahe fri vagare'ne
huno Gati kumate vahera ome asamigahaze huno agesa
antahine. Hagi Deviti'a Filistiaman i'ne knafina, e'inahu'za
huwava huno vu'ne. 12 Hagi Akisi'ma agesama antahiana Deviti'a
tamage nehie nehuno, amanage huno antahi'ne, Agra'a naga
Israeli vahe hara ome hunezamante huno agesa antahi'ne. Hagi
meninteti'ma vaniana nagri eri'za vahe manino vugahie huno
antahi'ne.

28 Hagi ana knafina Filistia vahe'mo'za Israeli vahe ha' ome
huzamante'naku sondia vahe zamia zamavare atru hu'naze.
Hagi Akisi'a Devitina asamino, Kagrane sondia vahekanena
nagrane magoka vuta hara ome hugahane. 2 Hagi Deviti'a
kenona huno, E'ina'ma hanunka henka eri'za vahekamo'na
eri'zana kenka antahinka hugahane. Anage higeno Akisi'a huno,
Nagrani'a navufare kva vahe kavrane'na maka kna nagri kegava
hunantegahane. 3 Hagi Samueli'a frige'za miko Israeli vahe'mo'za
zavi krafa hute'za, Rama agri kumate ome asente'naze.
Hagi ana knafina Soli'a fri vahe hankro'enema nanekema
nehaza vahe'ene zamavune vahe'enena zamahenatitrege'za
anampina omani'naze. 4 Hagi Filistia vahe'mo'za eza Sunemu

seli nonkumara eme ki'za manizage'za, Soli'ene mika sondia
vahe'amo'za Gilboa seli nonkumara eme ki'za mani'naze. 5
Hagi Soli'ma Filistia sondia vahe'ma nezmageno'a tusi koro
nehuno ahirahiku hu'ne. 6 Ana nehuno Soli'a Ra Anumzamofo
antahige'neanagi Ra Anumzamo'a magore huno ava'hafino, urimi
zokago'ma rezagafino, kasnampa vahepinu huvazino osamitfa
hu'ne. 7 Higeno Soli'a eri'za vahe'aramina huzamanteno, Vuta
fri vahe'enema keaga nehania a' ome avreta enke'na, nagra
antahige'na ka'neno. Hige'za zamagra kenona anage hu'naze,
Magora e'inahu'zama nehia ara Endor kumate mani'ne. 8 Hagi
Soli'a agri'ma keama'ma osania kazigati kini kukena'a hunetreno,
amanekukena eri nentanino, tare netrene kenage vu'naze.
Hagi Soli'a ana ara antahigeno, Avamura antahigesankeno
kenonani'a huno nagrama antahigesua vahera avrenamigahio?
9 Hianagi ana a'mo'a Solina asamino, Kini ne' Soli'ma fri
vahe hankro'enema nanekema nehaza vahe'ene zamavune
vahe'enena zamahenatitre'neana kagra ko antahi'nane. Hagi
kagra havige hunka nahe frinogu renavataga nehane. 10 Higeno
anage huno Soli'a asami'ne, Ra Anumzamofo agifi huvempage
huankino ama anazama hanantera mago'mo'a onkahegahie.
11 Higeno ana a'mo'a antahigeno, Izanku kea hanugeno otino
esiegu nehane, higeno Soli'a kenona huno Samueline. 12 Anage
higeno ana a'mo'a Samuelima negeno'a ranke huno, Kagra
Soliga mani'nananki nahigenka kagra renavataga nehane? 13
Anage higeno kini ne'mo'a huno, Korera osunka na'a negane?
Huno antahigegeno ana a'mo'a huno, nagra negogeno mago
hankro mopafintira atineramige'na negoe. 14 Higeno Soli'a
antahigeno, Agra inankna nere? Higeno ana a'mo'a huno, Mago
ranafa za'za kukena hu'nea ne' negoe. Anagema higeno'a Soli'a

keno antahino'ma hiana Samueli'e nehuno, mopafi renareno
ra agi Samuelina ami'ne. **15** Hagi Samueli'a Solina anage
huno asami'ne, Na'a higenka matipintira nazeri otinkena neoe?
Higeno Soli'a kenona huno, Filistia vahe'mo'za ha' hunante'za
nehazageno, Anumzamo'a amagena hunamino, ava'nafine
kasnampa vahepina huvazino kenona huonamige'na, kagrira ke
hanena nagrama ome hanua zana nasamisane hu'na nagra
e'noe. **16** Higeno Samueli'a kenona huno, Hago Ra Anumzamo'a
amagena hugamino kagri ha' vahe mani'neanki, na'a higenka
nagrira nantahinegane? **17** Hagi nagri'ma nasamige'na kasnampa
kema hu'noa kante anteno, Ra Anumzamo'a kagri kazampintira
kini trara hanareno tava'onkare'ma nemanimofo Deviti ami'ne. **18**
Na'ankure kagra Ra Anumzamo'ma Ameleki vahe'ma tusi rimpa
ahezmantero, zamahe frio huno'ma hiana kagra ke'amofona
rutagrenka anara osankeno, amanahu'zana menina hugante.
19 Hagi kagri'ene Israeli vahe'enena Ra Anumzmo'a oki'na
Filistia vahe zamazampi tamavrentegahie. E'ina hanigeno oki'na
kagrane kamohe'zanena nagrane emanigahaze. Hagi tamage
huno Ra Anumzamo'a Israeli Sondia vahetamina Filistia vahe
zamazampi zamavarentegahie. **20** Hagi Samueli'ma asamia
kea Soli'a nentahino tusi kore nehuno, avugosaregati mopafi
masegeno hanave'a omane amane hu'ne. Na'ankure agra
feru'ene kenage enena ne'zana one'ne. **21** Hagi ana a'mo'ma
ome keana, Soli'ma tusi'a kore huno amanogu'ma nehigeno'a
amanage huno asami'ne, Nagra kagri eri'za akamo'na kagrama
hana eri'za nagra navufagura nagesa ontahi'na, hago ana
eri'zana eri'noe. **22** Hagi menina muse hugantoanki eri'za
akamo'na ke antahinaminka natrege'na, osi'a bretika'a reraro
hanena nenka hanavea eritenka kana vuo. **23** Hianagi Soli'a

onegahue huno hu'ne. Hianagi eri'za vahetamima'amo'ene ana a'mo'enena tutu huntazageno, kezmia antahino mopafima mase'nefintira otino tafete mani'ne. 24 Hagi ana a'mo'a afovage bulimakao anenta ome aheno kreno noma'afi eme nenteno, ame huno zisti onto bretia krente'ne. 25 Hagi ana a'mo'a ana ne'zana erino Soline eri'za vahe'anena eme zamige'za nete'za, oti'za ana kenageke ete vu'naze.

29 Hagi Filistia sondia vahera Afeke kumate emeri atru hazage'za, Israeli vahe'mo'za Jesrili kuma tva'onte kampui ti me'nere seli nonkumara ante'za mani'naze. 2 Hagi Filistia rankva vahe'mo'za sondia vahera 100'afine, tauseni'afine refko hu'za kevure kevure nevazageno Deviti'ene sondia vahe'amo'zanena Akisi'enena zamagefi vu'naze. 3 Hagi Filistia sondia kva vahe'mo'za Devitine eri'za vahe'anema nezamage'za amanage hu'naze, Hibru vahetamimo'za na'a amafina emenerize? Hazageno Akisi'a ana kva vahe'mokizmi kenona huno, Ama nera Israeli kini ne' Solina vugota eri'za ne'a Deviti'e. Hagi ama ana ne'mo'ma Solima atreno nagri'enema rama'a kafu emanige'na, anama emania knareti'ma eno menima amare'ma ehanatineana, mago hazankea agripina kena eriforera osu'noe. 4 Hianagi Filistia sondia kva vahe'mo'za Akisina tusi zamarimpa ahenente'za amanage hu'naze, huntegeno kuma'ma ami'nantega umanino. Hagi atregeno agra tagranena hatera ovino, ha'ma ome nehanunkeno'a rukrahe huno hahurantegahie. Na'ankure e'i mago knare kankamu fore hugahiankino, ha' huranteno sondia vahetia tahesigeno, Solima antahisuno'a ete avregahie. 5 Hagi Israeli a'nemo'za zagame hu'za avo nere'za, Sol'i'a 1 tauseni'a vahe zamahe'neanki, Devitia agatereno 10 tauseni'a vahe zamahene hu'zama hu'naza ne' Devitipi hu'za hu'naze? 6

Anage hazageno Akisi'a Devitina agi higeno egeno, amanage
huno asmi'ne, Kasefa huno mani'nea Ra Anumzamofo agifi
huvempage huankino, eman'i'nantegati'ma e'noma menina ama
knare'ma eana, kagra fatgo ne' mani'nanke'na nagesa antahuana
kagra nagrane ha' ome hugahane hu'na huanangi, mago'a Filistia
sondia vahete kva vahe'mo'za ana kegura musena osu'naze.

7 E'ina hu'negu ana sondia kva vahera zamarimpa kna eri
ozaminka, akohenka krimpa fru hunka ete kumatega vuo. 8
Higeno Devitia ana kenona Akisina asamino, nagra na'a hu'noe?
Eri'za vahekamonafina na'a hazenke kenka eri fore hu'nanku
kini ne' ranimoka, ha' vahekanena hara ome osugahue huno
Devitina antahige'ne. 9 Hianagi Akisi'a ke nona'a amanage huno
Devitina asmi'ne, Nagra'ma kagoana, kagra mago Anumzamofo
ankeronkna hunka mani'nenka, mago hazenke ka'a omane
nere. Ana hu'nananagi sondia vahete kva vahe'mo'za amanage
hu'naze, Kagrikura tagranena hatera ovugahie hu'naze. 10
Hu'negu kagra mika kagranema e'naza vahe'enena okina
anama rumasama nehanigeta, mopama tami'noa moparega
amafintira atreta ete vugahaze. 11 Anage higeno Deviti'a sondia
vahe'ane nanterame ot'i'za Filistia moparega nevazage'za, Filistia
vahe'mo'za hate Jezrili vu'naze.

30 Hagi 3'a zage kna evutege'za Deviti'ene sondia
vahe'amo'zanena Ziklag kumate uhanati'za ome kazana, Ameleki
vahe'mo'za ha'eme hu'za, Ziklagi kuma'ene Negevi kuma'enana
teve taginte'za kre'haze. 2 Hagi Ameleki sondia vahe'mo'za
ana kumate a'mofavrene maka vahe'enena zamahe ofri amne
zamavare'za vu'haze. 3 Hagi Deviti'ene sondia vahe'anema
Ziklagi kumate'ma ehanati'za kazana, kumazmia teve taginente'za
a'mofavrene mofa'nene ne' mofavrezamia mika zamavare'za

vu'nage'za eme ke'naze. 4 Ana'ma hazazanku Deviti'ene sondia vahe'anena tusiza hu'za zavira netageno hankave'zimia omanege'za mago'anena zavira ote'naze. 5 Hagi anampina ana vahe'mo'za Devitina tare a'trema'a, Jezrili kumateti a' Ahinoamune, Kameli kumateti Nebali kento a'ma eri'nea a' Abigelinena zanavre'za vu'naze. 6 Hagi Deviti'a ranknazampi mani'ne. Na'ankure agranema vanoma nehaza vene'nemo'za a'mofavre zamigura tusiza hu'za zamasunkura nehu'za Devitina havenkno ahegahune hu'naze. Hianagi Deviti'a Ra Anumzana Anumzama'amofontega nunamu higeno, Anumzamo'a hanave ami'ne. 7 Anante Deviti'a pristi ne' Ahimeleki nemofo Abiata asamino, muse hugantoanki 12fua havema me'nea kukenama pristi vahe'mo'za zamimizare'ma nentaza kukena erinka eno, higeno Abiata'a ana kukena erino e'ne. 8 Anante Deviti'a Ra Anumzamofona amanage huno antahige'ne, Knare ana vahera zamarotgo hu'na ome zamazerigahufi? Higeno Ra Anumzamo'a asamino, Kagra amane ome zamazerinka ana maka vahe'ene a'mofavrenena zamagu vazigahananki zamarotgo hunka vuo huno asami'ne. 9 Hagi Deviti'a 600'a sondia vahe'a zamavareno Besori tinkrahopi uravao hu'naze. 10 Hanki ana tinkrahopina 200'a sondia vahe'mo'za zamavaresragu hu'za umanize'za, Deviti'enena 400'a sondia vahe'mo'zaana vahera zamarotago hu'za vu'naze. 11 Hagi sondia vahe'amo'za, mago lsipi ne' ome nege'za, avre'za Devitinte e'naze. Hagi ana nera zamagra bretine tinena amizageno ne'ne. 12 Hagi mago'a fiki raga'a regripe'za eri'nazane, waini raga eri'nazana ana nera ami'naze. Na'ankure agra ne'zane tinena 3'a zagene hanine oneneanki'za ami'zageno neno hanavea eri'ne. 13 Hagi Deviti'a ana nera antahigeno, Kagra igati ne' mani'nane?

Higeno ana ne'mo'a kenona huno, nagra Isipi neki'na, Ameleki
vahe'mokizmi eri'za ne' mani'noe. Hagi kvanimo'a kri erugen
eme natreno vige'na 3'a kna mani'noe. **14** Tagra Negevi kaziga
vuta Kereti vahe'ene Juda vahe'ene Kalepi vahe ha' ome
huzamanteteta, Ziklag kumara teve ome taginteta negreta e'none.
15 Hagi Deviti'a ana nera antahigeno, Kagra knare navrenka
ana Ameleki vahetera vugahano? Higeno ana ne'mo'a huno,
Kavre'na vugahuanagi, kagra Ra Anumzamofo agifi huvempage
hunka nagrira nahe ofrige, kvani'amofo azampi navrenka
ome ogantegahue hunka huvempage hutege'na, kavre'na
va'neno. **16** Hagi ana Isipi ne'mo'a, Devitina avreno Ameleki
vahe'ma mani'narega vigeno ome keana, Ameleki vahe'mo'za
umani emani hu'neza ne'za kre'za nene'za musenkase nehu'za
mani'naze. Na'ankure Filistia vahe mopafinti'ene Juda vahe
mopafinti'ma rama'a zama eri'za e'naza zanku musenkase
nehazageno zamage'ne. **17** Hagi Deviti'a sondia vahe'ane
ana kumate umani'nageno rehana hiama'a hara erigafa
hu'za nehzageno, vuno kotuno anante knamofona kinaga
omese'ne. Hagi ana ha'pina maka Ameleki vahera zamahe fri'ne.
Hianagi 400'a vahe'moke'za kemori afutamimofo zamagumpi
mani'za koro atre'za fre'naze. **18** Hagi Deviti'a tare atrema'a
neznavreno Ameleki vahe'mo'za eri'za e'naza zana maka ete eri
vagare'ne. **19** Hagi mago zamo'a fanane osu'neanki, osi'zama
razama mofa'nema nemofavreramina nezamavareno, maka
zazmima eri'za e'nazana eri vagareno Deviti'a vu'ne. **20** Hagi
maka bulimakaone, sipisipi afutaminema Ameleki vahe'mo'zama
avre'za vu'naza zana maka Devitia erino ne-ege'za ha'ma
ome hu'za eri'za bulimakaone sipisipi afutaminena avregota
hu'za ne-eza amanage hu'naze, Deviti'ma ha'ma huno eri'nea

zantamine. **21** Higeno Besori tinte'ma 200'a vahe'ma hankavezimi
omaneg'e'za emeni'nare uhanatige'za, ana vahe'mo'za Devitine
agri'enema aza vahera nezamage'za hu frufra ke huzamantageno,
Deviti'enena muse nehuno hu frufra huzmante'ne. **22** Hagi
Deviti'enema hate'ma vu'naza vahepintira mago'a hazenke
vahe'mo'za, anage hu'naze, Zamagra tagri'enena ovu'nazankita
ha'pinti'ma eri'nona zantamina refko huta ozamigahunanki,
a'mofavre'zimige zaminunke'za zamavare'za vugahaze. **23**
Hu'neanagi Deviti'a amanage hu'ne, Nafuheta Ra Anumzamo
tami'nea zantamina anara osugahune. Agrake taza nehigeta
kumatima eri haviza hu'naza vahera zamaheta ete mikazana
erita e'nonku, tagragukera ontahigahune. **24** Hagi iza tamagri
kegura tamage huno hugnarera hugahie? Hagi fenotire'ma
kegava hu'za hate'ma ovu'naza vahe'ene hate'ma vu'naza
vahe'enena, maka zana ana avamenteke refko huta erigahune.
25 Hagi Devitima e'ina'ma hu'nea zamo'a mago kasegegna huno
Israeli vahepina me'negeno eno, meni ama knarera ehanati'ne.
26 Hagi Deviti'ma Ziklag kumate'ma unehanatino'a hapinti'ma
eri'nea zantamina rone'amokizmi Juda ranra vahe'mokizmi
refko huntenezmanteno, ana vahera anage huno zamasami'ne,
Ama muse zana Ra Anumzamofo ha' vahe'mokizmi zantami
erita e'nonaza, mago'a refko huta eme neramune. **27** Hagi
ana'ma eri'nea zantamima musezane huno refko'ma huzami'nea
kumatamimofo zamagi'a amana hu'ne, Betelima nemaniza
vahe'ma, Negevi ka'ma kokampi nemaniza vahe'ma Ramuti
kumate'ma nemaniza vahe'ma, Jatiri kumate'ma nemaniza
vahe'ma, **28** Aroeri kumate'ma nemaniza vahe'ma, Sifmoti
kumate'ma nemaniza vahe'ma Estemoa rankumate'ma nemaniza
vahe'ma, **29** Rakali kumate'ma nemaniza vahe'ma Jerameri

rankumapi nemaniza vahe'ma, Kin rankumapi nemaniza vahe'ma,
30 Homa kumate'ma nemaniza vahe'ma, Bor-asani kumate'ma
nemaniza vahe'ma, Ataki kumate'ma nemaniza vahe'ma, 31
Hebronni rankumate'ma nemaniza vahetega ana zantamina
refako hutregeno vu'ne. Ana nehuno koma sondia vahe'anema
vano hu'nea kaziga maka ana fenozana refko huno zami'ne.

31 Hagi Filistia vahe'mo'za eza Israeli vahera hara eme
huzmante'za zamarotago hazage'za fre'za vu'haze. Hagi rama'a
vahera bainati kazinkonteti zamahage'za Gilboa agonafi
fri'naze. 2 Hagi Soli'ene mofavrezaga'amo'za fre'nazanagi,
Filistia vahe'mo'za hanaveti'za zamarotago hu'za, mika
Soli mofavrezaga'a Jonatanima Abinadabuma Malkisuanena
zamahe'naze. 3 Hagi Solina tusi'a ha' hugagintazageno ha'mo'a
hanavetigeno, mago'a vahe'mo'za kevea ahazageno ra hazenke
eri'ne. 4 Ana'ma higeno'a hankoare'ma eneria nera asamino, Ru
oku zamavufaga taga osu Filistia vahe'mo'za esu'za kiza zokago
ke eme hunante'za nata nenami'za nahe frisagi, bainati kazinka'a
erinka nare frio. Hianagi hazama'are erinentea ne'mo'a tusi koro
nehuno, ahe ofrine. Ana higeno Soli'a bainati kazima'a erino
ana kazinte agra'a taruheno fri'ne. 5 Hagi Solina hankoare'ma
azerinentea ne'mo'ma keama Soli'ma frigeno'a, agranena
kazima'a erino agra'a kazinte taruheno Soli'ene fri'na'e. 6 Ana
higeno Solima, 3'a mofavre'ama, ha'zama'are'ma azerinentea
ne'ma, miko Israeli sondia vahe'ma Soli'enema vu'naza
vahe'mo'za ana zupage fri vagare'haze. 7 Hagi Israeli vahe'ma
agupofima nemani'za vahe'mo'zane, Jodanima mani'za vu'naza
vahe'mo'zama kazama, Israeli sondia vahe'mo'za frazageno,
Soli'ene maka mofavre'aramine, hanko'are'ma azerinentea ne'ma,
agranema vu'naza vahetamima fri vagarazage'za, kumazamia

atre'za frazageno, Filistia vahe'mo'za ana kuma'zmia eme eri'za mani'naze. **8** Hagi ha'ma haza knamofo anante knazupa Filistia vahe'mo'za Israeli vahe ha'zane kukenazami zoginaku ha'ma hu'nazafi e'za eme kazana, Soli'ene 3'a mofavre'aramina Gilboa agonafi fri'nage'za eme ke'naze. **9** Hagi zamagra Solina agenopa nekafri'za ha' kukena'a hate'za eri'naze. Hagi anama nehu'za zamagra ke erino vu vahe huntageno mika Filistia kokampine, havi anumzamofo mono hunentafi Soli'ma fri'nea zamofo musenkea ome hu'ama hu'za zmasami'naze. **10** Hagi Solina ha'zama'a Astaroti havi a' anumzamofo mono nompi ome nente'za, avufga'a eri'za Bet-seni rankuma keginare ome hanti'naze. **11** Hagi Jabel-giliati kumate'ma nemaniza vahe'mo'zama, Filistia vahe'mo'zama Soline mofavre'amokizmima humzantaza zamofo ke'ma nentahi'za, **12** maka hanave vahe'amo'za kenage Bet-seni kumate vu'za, Soline mofavre'arami zamavufaga ome eri'za, Jabeli kumate eme krerasage'naze. **13** Ana'ma hute'za zaferinazami eri'za tamaris zafa agafafi asenente'za, 7ni'a zagegnafi ne'zana a'o hu'za zamasunkura hu'naze.

2 Samue

1 Hagi Soli'ma fritegeno'a, Ameleki vahera Deviti'a hara huzmagatereteno, tare zagegna Ziklaki kumatera eman'i'ne.

2 Hagi nampa 3 knazupa mago nehaza ne'mo kukena'a tagato nehuno, asenifina kugusopa kateno freteno, Soli sondia vahe'mokizmi seli nonkumapinti atreno freno e'ne. Hagi ana ne'mo'ma Devitinte'ma enehanatino'a, Deviti agafi avugosaregati emase'ne. **3** Hagi ana nera Deviti'a anage huno antahige'ne, Kagra igati e'nane? Higeno ana ne'mo kenona huno, Nagra Israeli vahe seli nonkumapinti fre'na e'noe. **4** Higeno Deviti'a antahigeno, Muse hugantonki na'a fore hu'nefi nasamio, higeno ana ne'mo'a kenona huno, rama'a vahera hapintira atre'za fri'zageno, rama vahetamine, Soline, nemofo Jonataninena zamahe fri'naze. **5** Hagi Deviti'a ana nehaza nera antahigeno, Soli'ene nemofo Jonatanikema fri'na'e nanekea inankna hunka antahi'nane? **6** Ana nehaza ne'mo'a kenona huno, Nagra Gilboa agonare mani'nena kogeno, Soli'a karugaru keve'are rentinti huno oti'ne. Hagi ha' vahe'mofo karisimo'za eme azeri'za nehazage'na ke'noe. **7** Hagi agra rukrahe huno nenageno, kezanke hige'na voe hu'na hugeno, **8** agra anage hu'ne, Kagra izage huno hige'na, nagra kenona'a hu'na, Ameleki ne' mani'noe hu'na asami'noe. **9** Anage hugeno, agra anage hu'ne, Muse hugantonki amare enka eme nahefrio. Na'ankure nagra ofri amane mani'noanagi tusi nata negrige'na maraguzanetuanki eme nahe frige'na, fri'neno huno hu'ne. **10** Hige'na nagra agrite uravao hu'na ahe fri'noe. Na'ankure nagra kena antahi'nama huana agra ra hazenke eri'neankino manigara osu'nege'na, ahe nefri'na, kini fetori'a e'neri'na, azampinti asama'a katufe'na ama eri'na ranimokarega neue. **11** Hagi ana ke'ma Deviti'ene

mika sondia vahe'amo'zama nentahi'za zamasunku nehu'za,
kukenazamia tagato hu'naze. **12** Hagi Soline Jonatanine, Ra
Anumzamofo sondia vahetamine, rama'a vahetamine Israeli
vahetamima fri'naza zanku zamasunku nehu'za, zamagra zavi
krafa nehu'za ne'zana one mani'nageno vuno kinagase'ne.
Na'ankure rama'a vahetamina bainati kazinkonteti'ma zamahe
fri'naza zanku anara hu'naze. **13** Hagi kema erino e'nea nehaza
nera Deviti'a antahigeno, Kagra iga rise mani'nane, higeno
ana risemo'a huno Nagra Ameleki vahe'ma kagri mopafima
emani'naza vahe'mokizmi mofavre mani'noe huno hu'ne. **14**
Hagi ana risera Deviti'a antahigeno, nahigenka masavema
frenteno Ra Anumzamofonte'ma huhampri ante'nea nera korera
osunka ahe fri'nane? **15** Huteno Deviti'a mago sondia ne'
ke higeno egeno, ana nera bainati kazinknoteti ome akafrio,
huno higeno ana nehaza nera ome ahe fri'ne. **16** Ana higeno
Deviti'a ana Ameleki ne'mofo avufga negeno anage hu'ne,
kagra'a hu'nana hazenke zamofo nona'a frine. Kagraka'a
huama hunka nagra Ra Anumzamo'ma huhamprinte'nea
kini ne' ahe fri'noe hunka hu'nane. **17** Hagi Deviti'a Soline
Jonatanikiznigura asunku nehuno zavi asunenteno, **18** Judia
vahekura ana zagamera rempi huzaminke'za hihohuno hu'ne.
Hagi ama ana zagamera atimofo zagamere hu'za nehzankino,
Jasari avontafepi krente'naze. Amanage huno ana zagamera
Deviti'a hu'ne, **19** Israeli vahe'mota tamagimo'ma mareri'nea
vahetamimotma agonaramimpi frizageno, himamunentake
sondi'a vahetamimo'zanena fri'naze. **20** Ana zamofo agenkea
Gati kumapina ome huama nosuta, Askeloni kumapinena ome
hu amara osiho. Ru Filistia vahe'mokizmi mofa'nemo'za muse
hugahaze. Hagi oku zamavufaga taga osu Filistia vahe'mokizmi

mofa'nemo'za antahisu'za muse nehu'za tagizaregahaze. 21
Gilboa agonarera atara ohesigeno, kora ruontena, hozafima
ofama hu witi raga reontesie. Na'ankure hanave ne'mofo hankoa
azeri pehana higeno, Solina mago'ane hankoarera masavena
freontegosie. 22 Jonatani atia vahe ahe vagare ati me'neankino
hatetira amane omegosie. Hagi Soli bainati kazimo'a,
amanne nomaneanki hanave sondia vahe nezamahegeno, ha'
vahe'zamimofo koramo'a ana kazintera avite'ne. 23 Soli'ene
Jonatanikea kasefa'ma huke mani'natera, vahe'mo'za zamavesi
neznante'za knare huznante'naze. Zanagra kasefa'ma hu'ne
maninatera tagrote'ne mani'nene, fri'an magoka frie. Zanagra
tumpa namamo'ma ame huno eankna nehuke, laionimofo
hanavegna hanavezanimo'a hu'ne. 24 Hagi Israeli mofanemota
Solinkura tamasunku nehuta, zavira ateho. Agra marerirfa
korankre kukena huneramanteno, golire pasesu kukenatamirera
rekamrente'ne. 25 Hagi ana hapina hanavenentake sondia
vahera frizageno, Jonatani'enena fri'negeno, avufgamo'a agonafi
me'ne. 26 Hagi nenu Jonataniga kagrikura tusiza hu'na zavi
krafa nehu'na, kagrira tusiza hu'na navesigantoe. Kagrama
nagri'ma kavesinante'nanana vene'nemo'ma a'nema avesinentea
avamena agaterenka, kavesinante'nane. 27 Hanavenentake
sondia vahera ha'pi zamahe vagarazageno, ha'zazmimo'a haviza
hu'ne.

2 Hagi ana knazama fore'ma hutegen, Deviti'a Ra
Anumzamofona antahigeno, Nagra knare Juda vahe'mokizmi
mago rankumapina vugahufi? Higeno Ra Anumzamo'a asamino,
Umarerio higeno Deviti'a mago'ane antahigeno, Ina kumate
nagra vugahue? Higeno Ra Anumzamo'a kenona'a huno,
Hebron vugahane. 2 Higeno Deviti'a tare a'trema'a Jezrieli

kumati a' Ahinoamune, Karmeli kumate ne' Nebali kento a'ma
eri'nea Abigeline nezanavreno vu'ne. 3 Hagi Deviti'a agranema
mani'naza vene'nene, a'mofavre'zaminena zamavarege'za
magoka mareri'za Hebron kumate megagi'nea kumatamimpi
uman'i'haze. 4 Hagi anantega umani'hazage'za, Juda vahe'mo'za
e'za Devitina masavena eme tagi'za frenente'za Juda vahe kinia
azeri oti'naze. Hagi mago'a vahe'mo'za Devitina eme asamiza,
Jabesh-Giliat vahe'mo'za Soli avufga eri'za ome asente'haze. 5
Hazageno Deviti'a Jabel-Giliati vahetega kema erino vu vahera
anage huno huzmante'ne, Ra Anumzamo'a knare tamavutamava
huta rankvatamimofo Soli avufgama erisentazarera, asomu
huramante'nie. 6 Hagi menina Ra Anumzamo'a vagaore
avesizanteti avesineramantena, knare tamavu'tamava'ma
hazarera nagranena tamagrira knare navu'nava huramantegahue.
7 E'ina hu'negu menina tamagra oti hanavenetita, koro osu
hanavetita maniho. Na'ankure rantimo Soli'a hago frigeno,
Juda vahe'mo'za kini maninka kegava huranto hu'za masave
frenante'za kinia nazeri oti'naze. 8 Hu'neanagi ana'ma nehigeno'a,
Soli sondia vahete kva ne' Neri nemofo Abna'a Soli nemofo
Is-bosetina avreno Mahanaimi kumate vu'ne. 9 Hagi ana
kumatega agra huama huno, Giliati vahete'ene, Asuri vahete'ene,
Jezrili vahete'ene, Efraemi vahete'ene, Benzameni vahete'ene
Asuri mopafima nemaniza vahe'ene mika Israeli vahe kini
manisie huno Is-bosetina azeri oti'ne. 10 Hagi Soli nemofo Is-
boseti'a 40'a kafu hu'neno, Israeli vahe kinia mani'ne. Hagi agra
Mahanaimi mani'neno tare kafufi kini eri'zana eri'ne. Hianagi Juda
vahe'mo'za Deviti amage ante'naze. 11 Hagi Deviti'a Hebron
kumara rankuma'a tro huno mani'neno, 7ni'a kafugi 6'a ikampi
Hebron kumatera Juda vahe kinia mani'ne. 12 Hagi Neri nemofo

Abna'a Soli nemofo ls-boseti eri'za vahetami nezamavareno,
Mahanaimi kumara atreno Gibeoni kumate vu'ne. **13** Hagi
anama nehiana Zeruia nemofo Joapu'a Deviti sondia vahera
nezamavareno Gibeoni tinkerire ome tutagiha huzmante'naze.
Hagi ana vahe'mo'za ana tirumofo kantugama umani eman
hu'naze. **14** Anante Abna'a Joapuna asamino, Nehazaveramina
hanunke'za zamazankno ha' hanaze huno higeno Joapu'a ana
kerera, knarere huno hu'ne. **15** Higeno 12fu'a vahera Benzameni
nagapinti vahe Soli nemofo ls-boseti kaziga huhampintageno,
Deviti sondia vahepintira 12fu'a vahe huhampri zamante'naze.
16 Hagi ana'ma hutage'za ana vahe'mo'za zamazeri zamente
hute'za, ha'hu'za bainati kazinteti zamasoparega orefri are
fri hu'za tarega kaziga vahe'mo'za ufrinte efrinte maka'mo'za
hu'naze. Ana hu'nagu e'i ana Gibioni kumakura, bainati kumare
hu'za nehaze. **17** Hagi ana zupa ha'mo'a ra higeno, Deviti sondia
vahe'ene, Abna sondia vahe enena ra ha nehzageno, Deviti
naga'mo'za ana hara huzamagatere'naze. **18** Hagi ana hapina
3'a Jeruia mofavrezaga, Joapuki, Abisaiki, Asaheliki hu'za Deviti
sondia vahera mani'naze. Hagi Asaheli'a dia afukna hu'neankino,
agamareno vaniana ame huno vugahie. **19** Ana hu'negu Asaheli'a
keganti kegama osu Abnana rotago huno nevigeno, **20** Abna'a
freno nevifinti rukrehe huno, Kagra Asaheligo? Higeno agra
kenona huno, Izo nagre. **21** Higeno Abna'a anage huno asami'ne,
Rukrahe hunka mago'a sondia vahe zamahenka ha'zazmia
erio, hu'neanagi Asaheli'a ananke'a ontahi rotago huno vu'ne.
22 Ana higeno Abna'a Asahelina asamino, Narotogoa osunka
natrenka vuo. Hagi anama osanankena kagri'ma kahezankura
navesra hie. Hagi kagri'ma kahesu'na nankna hu'na negafu
Joapu avurera vugahue? **23** Hu'neanagi Asaheli'a ana ke'a

ontahino, rotago huno vigeno Abna'a krugru keve'areti regeno amagenafinti uhanatigeno, anante frino traka hu'nege'za maka sondia vahe'mo'zama anante'ma ne-eza eme oti'naze. **24** Hianagi anama hige'nea Joapuke Abisaikea zagema ufre'zama nehigekea Abnana rotago huke, Gia tavaonte Amae nehaza agonare zage hanati kaziga Gibeoni ka'ma kokantega vu'nea kante e'na'e. **25** Anante Benzameni nagapinti vahe'mo'za omeri atru hu'za eri mago hute'za, Abna amagenare hu'za mago agonare ha' hunaku oti'naze. **26** Hagi Abna'a Joapuna ke'zanke humino, tagra amanara huta hara huvava huta vugahupi? Henka ra knazampima ufresuna zankura kenka antahinkara nosampi? Hagi nankna zupa sondia vaheka'a zamasamisanke'za zamafuhe'imma zamarotagoma nehaza zana atregahaze? **27** Higeno Joapu'a kenona huno, Tamage mani'nea Anumzamofo avufi kasamuanki, kagra e'inahu kea osantesina nagri vahe'mo'za tamarotago huvava hu'za nevazageno masa hisine. **28** Hagi anante Joapu'a ufe rege'za zamarotagoma nehaza vahe'mo'za umani'za, mago'ane hara osu'naze. **29** Hagi ana kenageke Abna'a sondia vahe'ane Araba vu'za Jodani agupofi vute'za, ti rakahe'za Bitroni vute'za, Mahanaim uhanati'naze. **30** Hagi Joapu'ma Abnama rotagoma nehiretira atreno, vuno sondia vahetamina ome zamazeri atru huno keana, Asaheli'ene 19ni'a Deviti sondia vahera omanni'nazageno ke'ne. **31** Hianagi Deviti sondia vahe'mo'za, Abna sondia vahe'ma Benzameni naga'ma e'nazana 360'a vahe zamahe'naze. **32** Hagi Abna'ene sondia vahe'amo'za Asaheli avufga eri'za nefama asente'naza havegampi Betlehemu ome asente'naze. Ana hute'za Joapu'ene agranema vu'naza sondia vahe'mo'za ana kenageke eva eva hu'za, Hebronii ehanatizageno kora eme atumasa hu'ne.

3 Hagi anantetira Deviti naga'ene Soli naga'mo'zanena za'zate
hara hu'za vu'naze. Deviti naga'mo'za mago'ane hanaveti'za
vazageno, Soli naga'mofo hanavemo'a ome osi osi huno
vu'ne. **2** Hagi Deviti'a Hebronima mani'neno'a, ne' mofavrezaga
zamante'ne. Hagi zage mofavremofo agi'a Amnonikino, Jezrili
kumateti a'mo Ahinoamu kasente'ne. **3** Hagi nampa 2 mofavrea
Kiliabukino, Karmeli kumateti ne' Nebali kento a'ma Abigelima
eri'nea a'mo kasente'ne. Hagi nampa 3 mofavre'a Absalomukino,
Gesuri kumate kini ne'mofo mofa'mo Maka kasente'ne. **4** Hagi
nampa 4 mofavre'a Adonijakino Hagiti kasentene. Hagi nampa
5fu mofavrea Sefatiakino, Abitari kasente'ne. E'i ana mofavrezaga
Deviti'a Hebroni mani'neno kasezamante'ne. **6** Hagi ha'ma Deviti
naga'ene Soli naga'enema nehaza knafina, Abna'a hanave
sondia ne' Soli sondia vahepina mani'ne. **7** Hagi Soli'ma mago
a'ma eri'neana, Aia mofa Rizpa eri'ne. Hagi Is-boseti'a Abnankura
huno, nahigenka nenafa ara antenka mase'nane? **8** Hagi Is-
boseti'ma hiankegura Abnana tusi arimpa ahogeno amanage
hu'ne, Juda vahe'mokizmi zukake kra nagra mani'nogenka
nagrira balia rugantugma nehano? Hagi maka'zama negafa
Soline, naga'ane, roneanema navesinezmante'na kagri'ma
kavre'na Deviti azampima ome onte'noa zante miza naminaku
nehunka, ama ara azeri savri hu'nane hunka nehano? **9** Hagi Ra
Anumzamo'ma Devitima huvempa hunte'nesia zama nagrama
osanugen'o'a, Anumzamo'a nagrira nazeri haviza hugahie. **10**
Hagi nagra Abna'na Soli kini trara Deviti eri amisugen, Israeli
vahe'ene Juda vahe'ene Dani vahera noti kazigati vuno sauti
kaziga Berseba uhanatisigeno agrake kegava hugahie. **11**
Hagi Is-boseti'a mago kea osu'ne. Na'ankure Abnankura tusi'a

koro hu'ne. **12** Anante Abna'a ke erino vu vahete kea Devitina
atrenteno anage hu'ne, Ama mopa kagri mopa me'neanki,
nagri'ene kea eme huhagerafinka huvempa huge'na, nagra
miko Israeli vhahera zamazeri rukrahe hanena kagrite eho. **13**
Higeno Deviti'a ana kerera anage hu'ne, Knarekita huvempa huta
huhagerafigahue. Hianagi Soli mofa Mikelima kagra avrenka
eme namisunka, nagri navufina kegahane. **14** Huteno Deviti'a
ke erino vu vahete Is-bosetina kea atrenteno anage hu'ne,
A'ni'a Mikelina avrenka eme namio. Na'ankure nagra 100'a
Filistia vahe zamahe'na ko oku zamavufa anonteti mizase'noa
a' mani'ne. **15** Hagi Is-boseti'a ana nanekema nentahino'a
mago'a vahe huzamantege'za, Laisi nemofo Paltia nenaro
Mikelina ome avre'za e'naze. **16** Hianagi ana ara avre'za
neageno, neve'a zavineteno avaririno Bahurimi kumate egeno,
Abna'a huntegeno, ete rukrahe huno kuma'arega vu'ne. **17**
Hagi Abna'a Israeli ranra vhahera zamavare atru huno anage
huno zamasami'ne, Kotera Devitinku kinitia manigahie huta
tamagra hu'naze. **18** Hagi menina ana ketamire otita anaza hiho.
Na'ankure Ra Anumzamo'a Deviti huvempa huntenu, Filistia
vahe zamazampinti'ene ha' vahe'tamimofo zamazampintira,
Israeli vhahera eri'za ne'n'i'a Deviti zamagu'vazigahie hu'ne. **19**
Hagi anante Abna'a viazamo Benzameni nagara ome ana kea
nezamasamino, ete ana kea erino Devitinte Hebronu vuno, hago
maka Israeli vahe'ene Benzameni naga'mo'za mago zamarimpa
hu'naze huno ome asami'ne. **20** Hagi Abna'a 20'a vahe'ene
Deviti'ma mani'nerega Hebronu kumate egeno, Deviti'a rama'a
ne'za krezmante'ne. **21** Hagi ne'za nete'za Abna'a Devitina
anage huno asami'ne, Natrege'na vu'na miko Israeli vhahera rani
kinimokare ome zamazeri atru hanuge'za, zamagra huvempa

hu'za kagrira kini kazeri otisagenka, kagri'ma kavesiniaza hunka
kegava huzamantegahane. Higeno Deviti'a Abnana atregeno
rimpa frune vu'ne. 22 Hagi Abna'ma Hebron'i kuma'ma anama
atreno'ma nevigeno'a, Deviti sondia vahe'ene Joapu'enena
ha'ma nehazaregatira hapinti'ma eri'naza zantamina rama'aza
eri'za e'naze. Hianagi Abna'a Deviti'enena Hebron'i kumatera
omani'ne. Na'ankure Deviti'a ko Abnana huntogeno rimpa frune
vu'ne. 23 Hagi Joapu'ene sondia vahe'enema ehanatizage'za
mago'a vahe'mo'za Joapuna asami'za, Neri nemofo Abna'a
kini nete egeno, kini nemo'a magozana huonteno atregeno
rimpa frune vu'ne. 24 Higeno Joapu'a ame huno kini nete
vuno amanage ome hu'ne, Na'a hu'nane? Abna'ma kagrite'ma
egenka, nahigenka amnea atrankeno agra vu'ne? 25 Hagi
kagra antahi'nane, Neri nemofo Abna'a regavatga huno maka
zama nehanaza ke'naku e'ne. 26 Anante Joapu'a Abnana
ke atrentege'za Sira tinkerire nevige'za ome ke'za avre'za
e'naze. Hagi e'i ana zama hiazana Deviti'a antahino keno
osu'ne. 27 Hagi Abnama ehanatigeno'a, Joapu'a avreno rankuma
kafante agri'akema kema asaminaku'ma hiaza huno avreno
viazamo, negana Asahelima ahe fri'nea zanteku huno bainati
kazi ome erino rimpa retragu fegeno fri'ne. 28 Hagi henkama
ana ke'ma Deviti'ma nentahino anage hu'ne, Nagrama kegava
hu'noa vahe'mo'zane nagranena Ra Anumzamofo avufina keta
antahita osu'nonankita, Neri nemofo Abna'ma fri'nea zamofo
kora kumi'mofo knazamo'a tagritera omenetfa hugahie. 29 Hagi
Abnama ahe fri'nea zamofo knazama'a Joapu'ene mika nef
naga'amo'zane erigahaze. Hagi Joapu'ene agripinti'ma fore'ma
hanaza vahe'mofona namu zamarege, fugo kri erige, azompare
vano huge, bainati kazinu zamahe frige, nezanku zamagatege

hanige'za frigahaze. 30 E'ina hu'negu Joapu'ene nefu Abisaikea
Abnana ahe'na'e. Na'ankure agra nezanafu Asahelima Gibioni
kumate'ma hapima ahe'nea zanku huke ahe'na'e. 31 Hagi
anante Joapune maka agranema mani'naza vahera Deviti'a
zamasamino, Kukenatamia tagato nehuta, tamasunku kukena
huta tamasunku huta Abnankura zavira ateho. Hagi kini ne'
Deviti'a vahe'ma eri'zama nevaza vahe zamefi e'ne. 32 Hagi
Abnana Hebron ome asentageno, keri'arera kini ne'mo'a tusi
zavi ome ategē'za, mika'mo'za Abnankura zavi ate'naze. 33
Hagi kini ne'mo'a amanage huno asunku zagamera Abnantera
hu'ne, Abna'a negi vahera omani'neanagi, na'a higeno neginagi
vaheknara huno frie? 34 Kazanteranofira kionte'za seni nofiteti
kagarera kionte'naze. Hagi kagrira kefo vahe'mo'za kahe frize.
Hige'za miko vahe'mo'za Abnankura tusi zavi ate'naze. 35
Anante hanina osunege'za miko vahe'mo'za e'za Devitinkura
ne'zana no hu'za hu'naze. Hianagi Deviti'a huvempage huno,
Zagemo'ma uoram'i'enke'na ne'zama nenugeno'a, Anumzamo'a
nahe frigahie. 36 Hagi miko vahe'mo'za anazama kini ne'mo'ma
hiazama nege'za muse nehu'za, ko'ma hu'nea zanku'enena muse
hu'naze. 37 Anama hige'za miko vahe'mo'za antahi ama nehu'za,
Abna'ma fri'nea zamofona kini ne' Deviti'a antahino keno osu'ne
hu'za hu'naze. 38 Hagi anante kini ne'mo'a eri'za vahe'aramina
zamasamino, menina Israeli vahepima rankva vahe'ma fri'neana
tamagra antahita keta osu'nazo? 39 Hagi Ra Anumzamo'a
kini manio huno huhampri nante'neanagi, nagrira hanaveni'a
omane'ne. Hagi ama Zeruia nemofo Joapu'ene Abisai'enena
hanave nentake netre mani'na'ankina, nagra zanazeri rava
hegara osu'noe. Hagi havi avu'ava hu'nemofona Ra Anumzamo
azeri havizana hanie.

4 Hagi Abna'ma Hebroni kumate'ma fri'nea nanekema Soli nemofo Is-boseti'ma nentahigeno'a, hanave'a omnegeno agra tusi koro nehige'za, Israeli vahe'mo'za zamagogogu hu'naze.

2 Hagi Soli nemofo Is-boseti sondia vahepima ugota huneke rohu'ma vahe'ma re'zama vanoma nehaza sondia vahete kva hu'na'a netre zanagi'a Bana'ene Rekapuke. Hagi zanagra Beroti kumate Benzameni nagapinti netrenkike Rimoni mofavre mani'na'e. **3** Na'ankure Beroti mopa agafa vahe'mo'za fre'za vu'za Gitaimu kumate kraga vahe umani'nazageno, eno ama knarera ehanati'ne. **4** Hagi Soli nemofo Jonatani'a mago mofavre ante'neana, ana mofavremofo agamo'a haviza hu'ne. Hagi ana mofavremo'a 5fu'a kafu nehige'za Soline Jonataninema zanahaza zanagenkea ehanatigeno, mofavrema kegava nehia a'mo'a ana mofavrea avreno fre'ne. Hianagi ana mofavrema avreno nefreno ome ahentegeno, ana risemofo tarega aga hantagi'ne. Hagi ana rise'mofo agi'a Mefiboseti'e. **5** Hagi mago zupa ferura Is-boseti'a noma'afi maseno mani'negeno, Beroti kumateti Rimoni mofavremoke Banake Rekapukea ome ke'naku vu'na'e. **6** Hagi zanagra witima erinaku'ma hiaza huke nomofona agu'afinka ufre'ne Is-bosetina kazinteti amupi ome rakeno fri'ne. Hagi vahe'mo'a ozanageama'a zanagra ananke akafrike agenopa e'nerike, ana kenagera atiramike frene vu'na'e. **7** Hagi zanagrama nompima ufrinema ka'ana agra tafe'are mase'negene ome negeke, kazina amupi reke ahe nefrike agenopa akafrike erike, ana kenageke Jodani agupofi freke vu'na'e. **8** Hagi ana agenopa erike Hebroni kumate Devitinte uhanati'ne anage hu'na'e, Ha'ma regante'nea ne' Soli nemofo Is-boseti agenopa amanagi ko. Hagi menina Ra Anumzamo'a kagrima ha'ma hugante'naza vahera rankva nimoka kaza huno nona huzamante.

9 Hianagi Beroti kumateti ne' Rimoni ne'mofavrerarena Rekapune Banakiznia Deviti'a anage huno kenona huzanante'ne, Maka hazenkema nagrite'ma ne-egeno'a mani'nea Ra Anumzamoke naguranevazie. **10** Hagi kora mago ne'mo'a Solima fri'nea nanekea erino eme nenasamino, agesama antahiana knare naneke nasamigahie huno antahi muse hu'neanagi, nagra ana nera Ziklaki kumate ahe fri'noe. Ana nanekema eme nasamia zamofonte mizama'a ami'noe. **11** Hagi mago hazenke'ama omne fatgo ne'ma noma'afima masenegeno ome ahe fria hazenke vahera, na'a huntegahue? Ana nona'a nagra tanahe frinugeta ama mopafina omanigaha'e. **12** Huno nehuno Deviti'a agranema nemaniza sondia vene'ne huzamantege'za, ana netrena zanahe nefri'za zanagia zanazana nekafri'za zanavufga'a eri'za Hebronia mago tiru me'nea ankenare ome hantinte'naze. Hianagi Is-boseti aseni'a eri'za Abnama asente'naza havegampi Hebroni ome asente'naze.

5 Hagi miko Israeli naganofi'mo'za Hebroni kumate Devitinte e'za anage hu'haze, Tagra mago kora mani'nonanki ko. **2** Hagi kote'ma Sol'i'ma tagri kinima mani'negenka kagra sondia vahete kva mani'enka, hatera zamavarenka vunka enka nehankeno, Ra Anumzamo'a amanage hu'ne, Kagra sipisipima kegava hiazza hunka Israeli vahete kva mani'enka, Israeli vahe'ni'a kegava huzmantegahane hu'ne. **3** Hagi mika Israeli ranra kva vahe'mo'za Devitimka kenaku Hebronima ageno'a, Deviti'a Ra Anumzamofa avure zamagranema knare'ma hu'za manisazanke huvempa hige'za, masave frentea'za Israeli kini ne' azeri oti'naze. **4** Hagi Deviti'a 30'a kafu hu'neno kinia efore hu'neankino, 40'a kafufi kinia manino kegava hu'ne. **5** Hagi Hebronima mani'neno'a, 7ni'a kafugi 6'a ikampi Juda vahe kinia mani'ne. Hagi Jerusalemima

emani'neno'a 33'a kafufi maka Israeli vahete'ene Juda vahetera
kinia manino kegava huzmante'ne. 6 Hagi henka kini ne' Deviti'a
Jebusi vahe ha' huzamantenaku sondia vahe zamavarege'za
Jerusalemi vu'naze. Hagi anante'ma uhanatizage'za Jebusi
vahe'mo'za Devitina kiza zokago ke hunte'za anage hu'naze,
Zamagama haviza hu vahe'mo'zane zamavu asuhu vahe'mo'za
kama vanana kana renkani regante'sagenka kagra amafina
omegahane. Hagi zamagrama antahi'zana Devitinkura kumatia
tahenoohaneregahie hu'za hu'naze. 7 Hianagi ana kezamimo'a
amne zankna higeno, Deviti'a Saioni rankumara ha' huno
eri'nege'za menina ana rankumakura Deviti rankumare hu'za
nehaze. 8 Hagi anama ha'ma hu'naza zupa Deviti'a sondia
vahe'a zmasamino, zamagia haviza huno, zamavu asuhu
Jebusi vahekura nagu'areti hu'na nagote'zamantoe. Hagi ana
rankumapima tima avre'za vu'naza kampinti rankumapina ufrera,
ana zamavu havizahu vahe'ene, zamaga havizahu vahera
zamaheta kumazamia eri haviza hugahune. Hagi zamaga
haviza huno, zamavu suhu vahere huno'ma Deviti'ma hu'nea
kegu, menina zamaga havizahu, zamavu asuhu vahe'mo'za kini
ne'mofo nompina uofregahaze hu'za nehaze. 9 Hagi Deviti'a ana
rankuma'ma ome erino Saionima unemanino'a, ana kumakura
Deviti rankumare huno agi'a antemi'ne. Hagi ana kumamofo zage
hanati kazigama urami eramima hu'nea kumara mopa kateno
anteviteno kumara erira hu'ne. 10 Hagi Deviti'a mago hihamu'ane
ne' efore huno mani'ne. Na'ankure monafi ohampriga'a sondia
vahetamimofo Anumzana Ra Anumzamo agrane mani'negeno'e.
11 Hagi Tairi kini ne' Hiramu'a kema eri'zama vu vahete
Devitina kea atrenenteno, Noma negiza vahe'ene, sida zafane,
havereti'ma eri'zama e'neri'za vahe'ene Devitina noma'a kinteho

hige'za eme kinte'naze. **12** Hagi anazama fore hiaza Deviti'a negeno, tamage huno Israeli vahe'mokizmi kini manio huno Ra Anumzamo'a huhampri nante'ne huno antahi'ne. **13** Hagi Deviti'ma Hebronima atreno Jerusalemima ne-eno'a, mago'a a'nea e'nerino, henka a'nea rama'a ome erino rama'a ne'mofara kasezmante'ne. **14** Hagi Deviti'ma Jerusalemima mani'neno kasezamante'nea ne' mofavre zagarimofo zamagi'a, Samuaki, Sobabiki, Neteniki, Solomoniki, **15** Ibhariki, Elisuaki Nefekiki, Jafiaki, **16** Elisamaki, Eliadaki, Elifeleti'e. **17** Hagi Filistia vahe'mo'zama antahizama Deviti'na Israeli vahe'mo'za masave frente'za kini azeri ot'i'nazem hazankema nentahi'za, maka Filistia vahe'mo'za Devitina ha'hunte'naku mareri'za ome hake'naze. Hianagi Deviti'ma anankema nentahino'a, atreno uramino frama ki'zama nemaniza havegantega vu'ne. **18** Hagi ana Filistia vahe'mo'za Refaimi agupofi emanimpi hu'naze. **19** Hagi Deviti'a Ra Anumzamofo antahigeno, Nagra amane marerina Filistia vahera hara ome huzamantegahufi? Kagra ana vahera nazampina zamavarentegahano? Higeno Ra Anumzamo'a huno, Izo Nagra Filistia vahera kagri kazampi zamavarentegahuanki amne marerio. **20** Higeno Deviti'a marerino Ba'al-Perazimi kumate Filistia vahera hara eme huzamanteno, hara huzamagatere'ne. Ana'ma huteno Deviti'a anage hu'ne, Tima hageno mika'zama eri harafi'ma huno eviankna huno Ra Anumzamo'a ha' vahe'ni'a zamahe panani hu'ne. Ana hu'negu ana kumamofo agi'a Ba'al Perazimie hu'za nehaze. **21** Hagi Filistia vahe'mo'zama nefre'za havi anumzantamina atre'za frage'za, Deviti'ene sondi'a naga'amo'za ana zantamina ome eri'za vu'naze. **22** Hagi mago'agna evutegeno, Filistia vahe'mo'za Refaimi agupofi e'za hahunaku emanimpi hu'naze. **23** Hagi mago'ane Deviti'a Ra

Anumzamofona antahigeno, Na'a huzamantegahue, higeno
Ra Anumzamo'a asamino, zamavugatira hara huozmantenka,
zamefiti zamavazagi kagitenka balsama zafa avo'nomofo
avuga hara huzamanto. **24** Hagi kagrama balsama zafa
amumpafintima antahisankeno rama'a vahe agazamofo agasasa
knama hanigenka, nentahisunka kagra ame hunka ha' ome
huzamanto. Na'ankure Ra Anumzamo'na nagra'a vugota hu'na
Filistia vahera zamahegahue. **25** Hagi Ra Anumzamo'ma anama
huo huno'ma hunteaza huno Deviti'a Filistia vahera Gibionitira
zamaheteno vuvava huno Gezeri kumate uhanati'ne.

6 Hagi Deviti'a ete Israeli agu'afintira 30 tauseni'a hanavenentake
sondia vahe'aramina zamavare atru hu'ne. **2** Hagi ana
vahetamine Deviti'a Ra Anumzamofo huhagerafi huvempage
vogisia Juda kaziga Ba'alati kumateti ome eri'za enaku vu'naze.
Hagi ana vogisirera hanavenentake Ra Anumzamofo agi
me'nea vogisigino, ana huvempage vogisimofo agofetura tare
ankerontremofo zanamema'a tro hu'za antagene kantigama
me'nakeno, amu'nompina Anumzamo nemanie. **3** Hagi ana
huvempage vogisia Abinadapu nompi agonafi me'nege'za
omeri'za kasefa karisifi erintageke, Abinadapu mofavrea Uza'ene
Ahio'ene ana karisia kegava hake'za eri'za e'naze. **4** Hagi
Ahio vugota huno nevige'za, ana huhagerafi huvempage
vogisia eri'za e'naze. **5** Hagi anama hu'za eri'za nevazage'za
Deviti'ene maka Israeli vahe'mo'za hu'za musenkase nehu'za,
zavenane, konkene, tamborima, zozopama hu'za nehe'za
musena hu'naze. **6** Hagi Nakoni'ma witi honama neharere
ehanatizageno, Anumzamofo huhagerafi huvempa vogisima
erino ne-ea bulimakaomo'a tnafa eme higeno, Uza'a ana
vogisima evurami'za higeno azana antegantuteno azeri'ne.

7 Hagi anazama higeno'a Ra Anumzamofona tusi'a arimpa
ahegeno, Uzana ahetregeno huhagerafi huvempage vogisimofo
tava'onte fri'ne. Na'ankure avako osiho huno'ma hu'nea vogisi
avako higeno, anara hu'ne. 8 Hagi Ra Anumzamo'ma Uzama
ahe frigeno Deviti'ma negeno'a, tusi'a rimpa ahogeno ana
kumakura Perez-Uza'e huno agi'a antege'za, meninena ana
agige'za nehaze. 9 Hagi ana zupa Deviti'a Ra Anumzamofonkura
tusi koro nehuno anage hune, inankna hu'na Ra Anumzamofo
huhagerafi huvempage vogisia eri'na nagra ome antegahue. 10
Nehuno Deviti'a ana huhagerafi huvempage vogisima erino Deviti
ran kumate Jerusalemi vezankura avesra nehuno, Gati kumate
ne' Obed-edomu nonte erino ome ante'ne. 11 Hagi anante
Ra Anumzamofo Huhagerafi huvempage vogisia eri'za ome
antazageno, Obed-edomu nompina 3'a ika me'ne. Hagi anama
higeno'a, Obed-edomune maka naga'amofona Ra Anumzamo'a
rama'a asomu huzmante'ne. 12 Hagi kini ne' Devitina anage
hu'za eme asami'naze, Obed-edomune maka naga'ane maka
zazminena Ra Anumzamo'a asomu huzamante'ne. Na'ankure Ra
Anumzamofo huhagerafi huvempage vogisia agri'ene me'negu
anara hu'ne. Higeno Deviti'a vuno Obed-edomu nompintira
Anumzamofo huhagerafi huvempage vogisia ome erige'za
tusi'a musenkase nehazageno, Jerusalemi rankumapina erino
ufre'ne. 13 Hagi ana huhagerafi huvempage vogisima eri'naza
vahe'mo'zama 6si'a zupama zamagama renakere'za vazageno'a
Deviti'a mago ve bulimakaonki mago anenta bulimakaonki
huno aheno kresramana vu'ne. 14 Hagi Deviti'a pristi vahe
efeke za'za kukena hu'neno Ra Anumzamofo avuga avoreno
musenkase hu'ne. 15 Hagi Deviti'ene mika Israeli vahe'mo'za
tusi musenkase hu'za kezanke nehu'za ufena nere'za, Ra

Anumzamofo huhagerafi huvempage vogisia eri'za mareri'naze.

16 Hagi Ra Anumzamofo huhagerafi huvempage vogisima eri'za Deviti rankumapima efrageno'a, nomofo zaho eri kampinti Soli mofa'mo Mikeli'a ke'ne. Hagi kegeno Ra Anumzamofo avure'ma Deviti'ma haru huno marerino tamino huno nehuno, avona reno musenkasema huno ne-egeno negeno'a, Devitina antahi haviza hunte'ne. **17** Hagi Ra Anumzamofo huhagerafi huvempage vogisia eri'za Deviti'ma kinte'nea seli nompi ome ante'naze. Hagi anante Deviti'a kre fanane hu ofane, arimpa fru ofanena Ra Anumzamofo avurera hu'ne. **18** Hagi Deviti'a kre fanene hu ofane arimpa fru ofanema huvagareteno'a, miko Israeli vahera Hanavenentake Ra Anumzamofo agifi asomu kea huzmante'ne. **19** Hagi agra mika Israeli vahera vene'nene a'nema musezana, bretine zagagafa ame'ane, waini ragama regripe'nazana mago mago vahera zamitere hu'ne. Ana hutege'za ana mika vahe'mo'za nozmirega vu'za e'za hu'naze. **20** Hagi Deviti'a anama huvareteno naga'amofo asomu kema ome huzmantenaku'ma noma'are nevigeno'a, Soli mofa Mikelia etiramino Devitinkura anage hu'ne, Israeli vahe kini ne'mo'a amne vahe'mo'ma hiaza huno, eri'za vahe'amofo kazokzo eri'za mofa'nemofo zamavufina takaure takaure huno avufa avapa avo hageno evu'ne. **21** Higeno Deviti'a Mikelina kenona hunteno, Kagri negafane, nagaka'ane azeri atreno kini mani'enka, mika Israeli vahe'nire kegava huzmanto huno huhampri nante'nea Ra Anumzamofo avuga musenkase hu'na ra agi'a erintesaga nehue. **22** Hagi nagra mago'ane amane vahekna hu'na kagri kavufina navufa erinteramigahue. Hianagi amama kema hana kazokazo eri'za mofa'nemo'za nagrira nagesga hu'za ra nagia

namigahaze. 23 Hagi Soli mofa Mikeli'a anagema hiazamofo nona'a, mofavre onte naravo a' mani'neno fri'ne.

7 Hagi kini ne' Deviti'ma kini noma'afima manitegeno'a, Ra Anumzamo'a manifru amigeno mika ha' vahe'amo'za hara eme huontazageno fru huno mani'ne. 2 Hagi kini ne'mo'a kasnampa ne' Netenina asamino, Ko, sida zafareti knare no kintenafi nagra nemanugeno, Ra Anumzamofo huhagerafi huvempage vogisimo'a seli nompima me'nea zamo'a fatgoa osie. 3 Higeno Neteni'a kenona huno, Nazano antahizanka'afima esanigenka hunakurema banana zana, miko ana zana amane hugahane. Na'ankure Ra Anumzamo'a kagrane mani'ne. 4 Hianagi ana kenagera Ra Anumzamo'a Netenina anage huno asami'ne, 5 Vunka eri'za vahe'ni'a Devitina ome asaminka, amanage huno Ra Anumzamo'a hie hunka asamio, Nagrama maninua nona kagra onkigahane. 6 Nagra Israeli vahe'ma Isipiti'ma zamavarena atiraminoregati'ma eno menima ehanatiana, nompina omani'noe. Hianagi seli nompi nagra manite manite hu'na zamagranena e'noe. 7 Hagi Israeli vahe'enema maka kumate'ma manite manite'ma hu'na ne-ena, mago kva vahe'ma huhamprizamantoa vahera sida zafareti noni'a kiho hu'na zamantahi onke'noe. 8 E'ina hu'negu eri'za vahe'ni'a Devitina amanage huno Hanavenetake Ra Anumzamo'a hie hunka ome asamio, Kagra sipisipi kegava hunka mani'nanke'na, Israeli vaheni'a kegava hugahane hu'na huhamprigante'noe. 9 Hagi inantego vunka enkama hu'nanana kagrane vano nehu'na ha' vaheka'a zamahogenka ke'nane. Hagi menina kagika'a eriraha'nena ama mopafima zamagimo'ma mareri'nea vahe kna hugahane! 10 Hagi Nagra vaheni'a Israeli vahera mago kuma zaminena anampi mani'nenageno, mago vahe'mo'a eme zamazeri havizana osugahie. Hagi kote'ma

hu'naza kna hu'za havi vahe'mo'za mago'anena eme zamazeri havizana osugahaze. **11** Hagi kema refko hu kva vahe'ma huhampri zamantoge'zama Israeli vahe'ni'a kegava'ma hu'naza knafina, ha' vahe'mo'za tamazeri haviza hu'naze. Hianagi Ra Anumzamo'na Nagrani'a huama hu'na mani fru kaminugenka mani'nesankeno, kagehemo'za kini vahera manigahaze huno hu'ne. **12** Hagi fri knakama esigenka frinka kagehezanema umanisankena, kagri mofavreramimpinti magomofo kini azeri oti'nugeno, agra hanavenentake kini mani'nesigeno, mago'zamo'a azeri otregahie. **13** Hagi e'i ana ne'mo Nagri nagima erisgama hanaza nona kisige'na Nagra, kini eri'zama'a eri hanavetinena kini tramo'a agri nagapi mevava huno vugahie. **14** Hagi Nagra agri nef'a'na mani'nena, agra mofavreni'a manigahie. Hagi agrama kumi'ma hanige'na, Nagra nef'a'na mofavre'ama sefu'ma amino azeri antefatgoma hiaza hu'na azeri antefatgo hugahue. **15** Hagi negankena Solinteti'ma navesi'zama kote'ma eritre'noa knara osugahuanki, nagra navesinte vava hugahue. **16** Hagi naga'kamo'za vagaoresage'na, Nagra tamaza ha'nena tamagri naga'pinti kinia mani'za nevanageno, kini tramo'a tamagri nagapi mevava huno vugahie. **17** Hagi Ra Anumzamo'ma miko nanekema avanagna zampima Netenima asmia nanekea, vuno Devitina ome asami'ne. **18** Anante Deviti'a Ra Anumzamofo avuga nunamuna ome huno, Hanavenentake Ra Anumzamoka nagra iza'na mani'noe, naga'nimo'za inankna vahe mani'nazagenka Kagra navrenka amarera ehanatine? **19** Hagi Hanavenentake Ra Anumzamoka mago'a zama hunante'nana zanteke onatrananki, Kagri eri'za vahe'mo'na nagapinti'ma kinima mani'za vugahazema hanana nagra amne vahetfa mani'noe. Hagi Ra Anumzamoka kagra mago'a vahe'enena anara nehana zampi? **20** Hagi na'ane

hu'na mago'anena eri'za vahekamo'na hugahie? Na'ankure kagra
Ra Anumzamoka eri'za vahekamo'na ko, nagenka antahinka
hu'nane. 21 Na'ankure kagrama huvempama hu'nana kegu'ene,
kagra'a kavesite ama ana miko zana nehunka eri'za vahekamo'na
eri naveri hane. 22 Hagi Kagra hanavenentake hunka marerisa
Ra Anumza mani'nane. Hagi mago'mo'a kagriknara osu'ne.
Hagi magora Kagriknar anumzana omanigeta keta antahita
osu'none. 23 Hagi ama mopafina ina vahe'mo'za Kagri vahe
Israeli vahe knara hu'naze? Hagi ama mopafina ina vahe'mokizmi
kazokazo eri'zampintira zamagu'vazinka Kagra vahere hunka
zamante'nane? Kagra Isipiti'ma vaheka'ama zamagu'vazinanana
Kagraka'a kagia eri ra hu'nane. Hagi Kagra tusi'a kaguvaza hunka
vahe'ene havi anumzantaminena zamahe natitre'nane. 24 Hagi
Israeli vahera maka knane knanena zamavarenka Kagraka'a vahe
zamantanke'za manizagenka, hanavenentake Ra Anumzamoka
zamagri Anumza mani'nane. 25 Ana hu'negu menina Ra
Anumzamoka, eri'za vaheka'a mani'nogu Kagrama huvempa
hunka nagriku'ene naga'nimofoma huzmanteku'ma hanazana
hugeno, keka'amo'a mevava huvempa ke megahie. 26 Ana
hanigeno Kagri kagimo'a rura huno vuvava hugahie. Ana nehina
hu'za Hanavenentake Ra Anumzana Israeli vahe Anumzane
hugahaze. Hagi eri'za vahekamofo nagapinti kinia manivava
hu'za vugahaze. 27 Hagi Hanavenentake Ra Anumzana, Israeli
vahe'mota Anumzamoka, korora osu ama nunamuna Kagritega
nehue. Na'ankure Kagra maka'zana nagrite eri ante ama hunka
anage hu'nane, knane knanena kini vahera kagri nagapinti
zamazeri otigahue hu'nane. 28 Hagi menina Anumzamoka, Kagra
Ra Anumza mani'nane. Hagi keka'amo'a tamage ke me'ne. Kagra
knare huvempa ke eri'za vaheka'amo'na hunantane. 29 E'ina

hu'negu kagra muse hunka eri'za vahekamo'na naga'mokizmia
asomu huzmantesanke'za, Kagri kavurera manivava hu'za
vugahaze. Na'ankure Anumzamoka, Kagra Ra Anumza
mani'nananki, eri'za vahekamo'na huvempa hunantanankinka,
naga'nimofona asomu huzmante vava hugahane.

8 Ana'ma hutegeno mago zupa Deviti'a Filistia vahe'mokizmi
hara huzamagatereno kegava hunezamanteno, ugotama hu'nea
Meteke-ama rankuma'zminena erino kegava huzmante'ne.
2 Hagi Deviti'a Moapu vahe'enena ha' huzamanteno ha'ma
huzamagatenereno, ana vahera mopafi maseho hige'za masempi
hu'za vazageno, nofiteti avazuhuno mesarimi huno ke'ne. Hagi
3a kevu vahepintira tare kevu vahera zamahe vaganereno, mago
kevu vahera ozamaheno zamatrege'za agri agoraga mani'naze.
Hagi Moapu vahe'ma ozmahe zamatreva vahe'mo'za agri agorga
mani'za takesi zagoa Devitina ami'naze. **3** Hagi Zoba kini ne'
Rehobu nemofo Hadadezeri'ma sondia vahe'anema Yufretis
tintega vuno mopa'a ome hahuno eri'naku nevigeno, Deviti'a
hara hunteno hara hugatere'ne. **4** Hagi Deviti'a 1tausen 700'a
hosifima vanoma nehaza sondia vahetaminki, 20 tauseni'a
mopafima vanoma nehu'za ha'ma nehaza sondia vahe zamaheno
nezmavreno, maka hosi afutamina zamagigruna taga nehuno
100'a karisma avazu huno vuga hosi afutaminke zamatre'ne. **5**
Hagi ana knafina Damaskasi kumateti Aramu sondia vahe'mo'za
vu'za, Joba kini ne' Hadadezeri ome aza hu'za hara nehazageno,
Deviti'a ana ne'mofo sondia vahera 22 tauseni'a vahe zamahe'ne.
6 Hagi Deviti'a sondia vahe'aramimofo kumatamina Aramu
vahe'mofo mopafi Damasakasi kumapi retro huno zamantege'za
mani'neza kegava hu'nazage'za, Aramu vahe'mo'za Deviti
agorga mani'ne'za takesi zagoa ami'naze. Ana nehazageno Ra

Anumzamo'a Deviti'ma vuno eno'ma huno'ma ha'ma hirega,
hanave amigeno hara huzmagatere'ne. 7 Hagi Hadadezeri
sondia vahe'mo'za golireti'ma tro'ma hu'naza hankoramina
Devitia erino Jerusalemi vu'ne. 8 Hagi Hadadezeri'ma kegava
hu'nea tare rankumara Beta kuma'ene Berotai kumapintira
Deviti'a rama'a bronsi eri'ne. 9 Hagi Hamati kumate kini
ne' Toi'ma antahiamma Deviti'a Hadadezeri sondia vahe hara
huzmagatere'ne hazanke nentahino'a, 10 Toi'a nemofo Joramuna
huntegeno Deviti ome musenke hunte'naku vu'ne. Hagi Toi'ene
Hadadezeri'enena zanagra za'zate hara hu'na'a netre'ne. Hagi
Joram'u'a musezana silvane, goline bronsinena erineno Devitina
aminaku vu'ne. 11 Hagi kini ne' Deviti'a miko ha' vahe'amokizmi
ha' huzmanteno eri'nea zantamimpinti ko'ma hu'neaza huno,
ana musezantamina Ra Anumzamofo zane huno erinte otage
huno Ra Anumzamofo ami'ne. 12 Hagi ana zantamima Ra
Anumzamofoma eri otage huno ami'neana, Idomu vahe zanki,
Moapu vahe zanki, Amoni vahe zanki, Filistia vahe zanki Ameleki
vahe zanki huno eri'ne. Hagi Rehopu nemofo Soba kini ne'
Hadadezeri zantaminema eri'nea zanena Ra Anumzamofo eri
otage huno ami'ne. 13 Hagi Deviti'a Hage nehaza agupofima
18tauseni'a Idomu sondia vahe'ma ome zamaheteno ege'za,
ra agi amizageno agimo'a mareri'ne. 14 Hagi Deviti sondia
vahe'mo'za manisaza kumatamina Idomu mopafi tro huno
zamantege'za umani emanu hu'ne'za kegava hazage'za, Idomu
vahe'mo'za Deviti agoraga mani'naze. Hagi inantego Devitima
vunoma ha'ma ome hirega, Ra Anumzamo'a aza huno hanave
amigeno hara agatere'ne. 15 Ana huteno Deviti'a fatgo avu'ava
huno Israeli vhahera knare'za huno kegava huzamante'ne. 16
Hagi Seruai nemofo Joapu'a Sondia vahe kva mani'geno, Ahiluti

nemofo Jehosafati'a maka'zama nehazazamofo avonkreno
eri fatgo hu eri'za vahe mani'ne. 17 Hagi Ahitubu nemofo
Zadoki'ene, Ahimeleki nemofo Abiatakea pristi netre manikeno,
kini ne'mo'ma hiazantamima avonkreno eri fatgo hu eri'za nera
Seraia'a mani'ne. 18 Hagi Jehoiada nemofo Benaia'a kini ne'mofo
avate kva nera mani'ne. Hagi Deviti ne'mofavremo'za pristi eri'za
vahete kegava huzmante'naze.

9 Hagi Deviti'a mago'a vahe zamatahigeno, Soli nagapintira
mago'a vahera mani'nafi? Mani'nenigeta keta antahita hu'nenuta,
nasaminke'na Jonatani'ma knare avu'ava'zama hunante'nere
nona huntegahue. 2 Hagi Siba'a korapara Soli eri'za ne'
mani'neankino, kini ne' Deviti'a kehigeno egeno Sibana
antahigeno, Kagra Sibago? Higeno agra huno, Izo ramoka nagre
kagri eri'za vahere. 3 Hagi kini ne'mo'a antahigeno, Mago'a
Soli nagapinti vahera mani'nafi? Mago'ma mani'nenigenka
nasamige'na, knare avu'ava'zana hunte'na Anumzamofo avesi
averi ha'neno. Anage higeno Siba'a kenona huno, Izo magora
Jonatani nemofo'a mani'neanagi tare agiamo'a haviza hu'negen
kana vano nosie. 4 Higeno kini ne'mo'a antahigeno, Ana
risera iga mani'ne? huno kini ne'mo'a antahigegeno Siba'a
huno, Ammieli nemofo Makiri nompi Lodeba kumate mani'ne.
5 Anage higeno kini ne' Deviti'a huzamantge'za vu'za ana
risera Lodeba kumateti Ammieli nemofo Makiri nompintira
ome avre'za e'naze. 6 Hagi Mefiboseti'a Jonatani nemofo Soli
negehokino, kini ne' Devitinte'ma ehanatino'a avugosaregati
mopafi emasegeno, Deviti'a huno, Mefibosetigo? Huno higeno,
izo eri'za vahekamo'na nagre. 7 Higeno Deviti'a asamino, Korera
osuo. Na'ankure negafa Jonatani'enema huvempa hu'nogu
kagrira knare navu'nava hunegante'na, negageho Soli mopa

ete kamigahue. Ana hanugenka kagra maka zupa nagrane ne'zama nenoa tratetira ne'zana negahane. **8** Hagi Mefiboseti'a mago'ane avugosaregati umaseno nahigenka kini ne'moka eri'za vahekamo'na fri'nea kraganama hu'noa vahera e'inahu knare kavukavara hunantane huno hu'ne. **9** Hagi Deviti'a Soli eri'za ne' Sibana kehigeno egeno amanage huno asami'ne, Mika Soline naga'amofo mopane maka zazamia ete kvakamofo Soli negeho Mefiboseti ami vagaroe. **10** Hagi kagrane mofavre raminka'ane eri'za vahekane ana mopafina hoza anteta erita eme amigahaze. Hianagi kvakamofo negeho Mefiboseti'a nagrane maka zupa ne'zane tratera mani'neno ne'zana negahie. Hagi Sibana 15ni'a ne' mofavre'a manigeno, 20'a eri'za vahe'a mani'ne. **11** Hagi Siba'a kenona'a huno, Rana kini nimoka mikazama huo hunka hunantana zana hugahue. Hagi ana knaretima agafa hiana Mefiboseti'a kini ne'mofo mofavregna huno ne'zane trate ne'zana ne'ne. **12** Hagi Mefiboseti'a ne' mofavre mago ante'ne, agi'a Mika'e. Hagi maka Siba naga'mo'za Mefiboseti eri'za vahe mani'naze. **13** Hagi Mefiboseti'a Jerusalemi kini ne'ene mani'neno, nezama nenea tratetira maka zupa ne'zana ne'ne. Na'ankure tarega agiamo'a haviza hu'ne.

10 Hagi mago'a knama evutegenoa Amoni kini ne' Nahasi'a fritegeno, nemofo Hanuni agri nona erino kinia mani'ne. **2** Hagi Hanuni nefo Nahasi'ma frigenoa Deviti'a agesama antahiana, knare avu'ava hunante'nere, nagra knare navu'nava huntegahue huno nentahino, Deviti'a asunku ke atrentege'za Hanunina ome asami'naku Deviti eri'za vahe'amo'za vu'naze. Hianagi Deviti eri'za vahe'mo'zama Amoni mopafima unefrageno'a, **3** Amoni kumate kva vahe'mo'za ra zamimofo Hanunina asami'za, Kagrama kagesama antahinana Devitia negafanku antahinemino

asunku ke atregantege'za tamage hu'za eri'za e'nafi? l'o zamagra rankumatifi efre'za afure'za nege'za, ke eri'za vanage'za, ha'eme huragatere'za mopati erinaku e'naze. 4 Hagi anagema hazageno'a Deviti eri'za vahetamina Hanuni'a zamazeriteno, zamagi zamazokara hare atupa hunezamanteno, kenazamia zamariga avamenteti aheragato huteno, huzmanteg'e'za ete vu'naze. 5 Hagi ana kema Deviti'ma nentahino'a, eri'za vahe'a huzmanteno anage hu'ne, Tusi'a zamagaze hugahianki ome zamasaminke'za Jeriko mani'enkeno zamagi zamazokara hagetenke'za eho. 6 Hagi Deviti'ma arimpama ahea kema Amoni vahe'mo'zama nentahi'za, mopafi vanoma hu'za ha'ma nehaza Aramia sondia vahera Bet-rehobu kumateti'ene Zoba Kumaretira 20 tauseni'a zagoreti mizase'za nezamavare'za, 1tauseni'a sondia vahe Ma'aka kini ne'mofa sondia vahepintira nezamavare'za, 12 tauseni'a sondia vahe Tob mopafintira zamavare'naze. 7 Hagi Deviti'a anankema nentahino'a Joapune, mika hanavenentake sondia vahe'a huzmanteg'e'za ha' ome huzamantenaku vu'naze. 8 Hagi Amoni sondia vahe'mo'za ha' hunaku ranku'ma zamimofo kahante emeri atru nehzageno, Aramu sondia vahe'ma Zoba kumate'ene, Rehobu kumate vahe'mo'zane, Tob kumate ne, Ma'aka kinimofo sondia vahe'mo'za ha' hunaku kuma'mofe feg'i agupofi emanimpi hu'naze. 9 Hagi Joapuma ome keama ha' vahe'mo'zama tarefima avugane amefi'enema manimpima hunazageno negeno'a, Israeli sondia vahe'mokizmi agu'afinti hanave sondia vahetamina ha'ma hanagu zamazeri retro nehuno, Aramu vahe'moki'zmima ha'ma huzmante'nagu agra'a ugota huzmanteno zamavareno vu'ne. 10 Hagi maka sondia vahera Joapu'a nefu Abisai azampi antegeno, kegava huzmanteg'e'za Amoni vahe ha' huzamantenaku vu'naze. 11 Hagi Joapu'a nefuna

asamino, Aramu vahe'mo'zama hanaveti'za ha'ma hurantesageta, tamagra eta eme taza hugahaze. Hianagi tamagri'ma Amoni vahe'mo'zama hanaveti'za ha'ma huramantesageta, tagra vuta ome tamaza hugahune. **12** Hagi korora osu hanavetinketa vahetigu'ene Ra Anumzantimofo rankumaku'ene hara hamneno. Hagi Ra Anumzamofo agri'a avesizamo efore hanie. **13** Hagi anagema huteno'a Joapu'a sondia vahe'ane vu'za Aramu vahe'ma ha'ma ome huzmantage'za ana vahe'mo'za atre'za fre'za vu'naze. **14** Hagi Amoni vahe'mo'zama kageno, Aramu vahe'mo'zama atre'za frazageno'a, zamagranena Abisaianku koro fre'za rankuma'mofo agu'afinka ufre'naze. Hagi ha'ma vagaregeno'a, Joapu'a ete Jerusalemi vu'ne. **15** Hagi ana hutege'za Aramu vahe'mo'za kazama, Israeli vahe'mo'zama ha'ma huzmagaterazage'za maka sondia vahera zamazeri atru hu'naze. **16** Hagi kini ne' Hadadezeri'a mago'a vahe huzmanteg'e'za vu'za, Aramu vahe'ma Yufretisi timofo kantu kazigama nemaniza vahera ome ke hige'za e'naze. Hagi ana sondia vahe'mo'za Helamu emeri atru hazageno, Hadadezeri sondia vahete ugota kva ne' Sobaki'a ana sondia vahetera ugagota huzmante'nne. **17** Hagi ana'ma hazanke'ma Deviti'ma nentahino'a Israeli sondia vahera zamavarege'za Jodani tina takahе'za kantu kaziga Helamu vu'naze. Hagi Aramu vahe'mo'za ha' hunaku ome retro hu'za manimpi hute'za, Devitine Israeli vahera hara huzmante'naze. **18** Hianagi Israeli vahe'mo'za hara huzmagatere'za, ana zupa Deviti'ene sondia vahe'amo'za, karisifima vano nehu'za ha'ma nehaza sondia vahera 700'a nezamahe'za, mopafima vanoma nehu'za ha'ma nehaza sondia vahera 40 tauseni'a nezamahe'za, ugagota sondia nera Sobakina ahe'naze. **19** Hagi Hadadezerima eme azama hu'za

ha'ma hu'naza kini vahe'mo'zama kazageno, Israeli sondia
vahe'mo'zama ha'ma huzmageterage'za, ana kini vahe'mo'za
hara erifru hu'za Israeli vahe'mokizmi zamagorga mani'naze.
Ana hazageno Aramu vahe'mo'za Amoni vahe'ma zamaza hu'za
ha'ma huzankura koro hu'haze.

11 Hagi mago mago kafumofo agu'afina zasi koma atu
knamo'ma vaganerege'za kini vahe'mo'za ha' vahe'zami'a ha'
ome hunezamantaza kanagino, Deviti'a Joapune mika Israeli
sondia vahetaminena hate viho huno huzmanteg'eza, zamagra
vu'za Amoni vahera ome zamahe'za zamazeri haviza nehu'za,
Raba kuma ome avazagi kagi'naze. Hianagi Deviti'a ana hatera
ovuno, Jerusalemi mani'ne. **2** Hagi mago kinaga Deviti'a tafe'are
mase'nereti otino noma'amofo agofetu vano nehuno keana,
mago hentofa a'mo'a ti nefregeno ke'ne. **3** Hagi Deviti'a keteno
mago vahe hunteno amanage hu'ne, Fenamu ara izapi ome
ketenka eme nasamio, higeno ome keteno ete eme asamino,
Eliamu mofa Batsiba Hiti ne' Uriā nenaro'e. **4** Anante Deviti'a
eri'za vahe huzamanteg'eza vu'za ana ara ome avre'za ageno,
anteno mase'ne. (Hagi e'inama hu'neana namunka mani'nereti
vagarentegeno ti ome freno agra'a azeri agru nehigeno ke'ne.)
Hagi Deviti'enema maseteno'a ete noma'arega vu'ne. **5** Hagi ana
a'mo'ma keama amu'enema nehuno'a, Devitina kea atrenteno
anage hu'ne, Namu'ene hue huno hu'ne. **6** Higeno Deviti'a
Joapuna ke atrenteno, Hiti ne' Uriana huntogeno eno, higeno
Joapu'a Uriana huntogeno Devitintega vu'ne. **7** Hagi Uriā'ma
Devitinte'ma ehanatigeno'a Deviti'a asamino, Joapuzane sondia
vahera inankna hu'za mani'ne'za hara nehaze nehuno, **8** anante
Deviti'a Uriana hunteno, Vunka umani fru huo, huno huntogeno
nevigeno'a, mago'a musezana antentege'za eri'za ome ami'naze.

9 Hianagi Uri'a noma'arega ovu'neanki kini ne'mofo eri'za
vahe'ene kini ne' ku'ma kahampi umaseno mani'ne. **10** Mago'a
vahe'mo'za Devitina eme asami'za, Uri'a noma'arega uoram'i'ne,
hu'za hazageno Deviti'a kehigeno Uri'a egeno anage huno
asami'ne, za'za kna umani'nanteti e'nananki na'a higenka
nonka'arega ovu'nane? **11** Anage higeno Uri'a Devitina kenona
hunteno, Ra Anumzamofo huhagerafi huvempage vogisigi, Israeli
sondia vaheki, Juda vahe'mo'za seli nompi manizageno, rankva
vahe'ni'a Joapu'ene sondia vahete kva vahetamina ha' kampima
seli nomaki'za mani'nenafina nagrama noniaregama vu'na ne'za
ome nenena, a'ninema mase so'e huzamo'a knarera osu'ne. Hagi
tamagerafa hu'na e'ina huzana osutfa hugahue. **12** Anage higeno
Deviti'a Uriana asamino, Meni kenagera are mase'negena,
okina huganta'nena ete hate vuo. Higeno Uri'a Jerusalemi
ana kenagera maseno magokna mani'ne. **13** Hagi Deviti'a ke
higeno noma'afi Uri'a eno Deviti'ene ne'zana nenegeno, akatina
rama'a ami'geno neno neginagi hu'ne. Hu'neanagi ana kinaga
Uri'a noma'arega vunora a'anena uomase'neanki, Deviti eri'za
vahe'ene ko'ma mase'nere umase'ne. **14** Hagi nanterana Deviti'a
mago avona Joapuntega krenenteno, Uriana huntogeno erino
vu'ne. **15** Hagi ana avompina amanage huno krente'ne, Uriana
ha'ma hanavemati'za nehanafi avuga avrenentenka sondia
vahera kehuge'za atre'za esageno, anampi Uriana ahesageno
frino. **16** Higeno Joapu'a hara nehuno negegeno ha'mo'ma
ra higeno, hanave ha' vahe'mo'zama ha'ma nehaza kaziga
Uriana avrentegeno hara hu'ne. **17** Hagi rankuma agu'afinti
vahe'ma e'za hara eme huzmante'za mago'a Deviti sondia vahera
zamahage'za frizageno, anampina Hiti ne' Urianena ahegeno
fri'ne. **18** Ana higeno Joapu'a ana miko'zama ha'pima fore'ma

hiazana kema erino vu vahe huzmanteg'e'za Devitina ome
asami'naze. **19** Hagi Joapu'a kema erino vu vahera hunteno, Ama
miko'zama fore'ma hia zamofo nanekea kini nera asami vagaro.
20 Hagi agra arimpama ahesigeno'a, amanage hugahie, nahigeta
rankuma keginamofo tavaontera vu'naze? Zamagrama kuma
keginamofo agofetuti'ma kevema tamahesaza zana tamagra
ontahi'nazo? **21** Hagi ko'ma Abimelekinte'ma fore'ma hu'nea
zana tamagekaninefi? Hagi Abimeleki'a Gidioni nemofokino,
Tebesi kuma'mofo tava'onte oti'negeno, mago a'mo ku'ma
keginamofo agofetu oti'neno witima refuzafu nepaza ra havenu
erino ahegeno fri'ne. E'ina hu'negu nahigeta tamagra ana kegina
tava'ontera vu'naze? Huno kini ne'mo'ma kantahigesigenka,
anampina Uria'ene fri'ne hunka asamio. **22** Higeno ana kema
erino vu vahe'mo'a vu'ne. Hagi ana miko kema Joapu'ma
huntea kea Devitina eme asami vagare'ne. **23** Hagi ana eri'za
nemo'a Devitina asamino, Ko agupofi hara hanavetiza eme
hurante'nazanagi tagra inene huta rankuma'mofo kafante hara
huta vu'none. **24** Hagi mago'a Amoni sondia vahe'mo'za kuma
keginamofo agofetu manine'za kevereti tahazage'za kini ne'moka
mago'a eri'za vaheka'a fri'naze. Hagi anampina Hiti ne' eri'za
neka'a Uria'a fri'ne. **25** Hagi Deviti'a kema erino vu'nea nera
asamino, Joapuna asamigeno ama ana zankura agesa ontahino,
na'ankure mago ne'mo'a hapima fri'nia zana antahino keno
osu'negu, ome asamigeno hanavetino hara nehuno, ana kumara
erino. Amama kasamua kereti azeri hankanavetio. **26** Hagi
Uria nenaro'ma antahiamma nevema hapima ahe'naze higeno'a,
asunku huno zavi ate'ne. **27** Hagi asunku'ma huvaregeno'a,
Deviti'a huzamantege'za ana ara avre'za ageno a' avrentegeno

mani'neno ne' mofavre kasente'ne. Hianagi Deviti'ma hu'nea
zankura Ra Anumzamo'a musena osu'ne.

12 Hagi Ra Anumzamo'a Netenina huntegeno Devitintega
vu'ne. Hagi Neteni'ma Devitinte'ma eno'a amanage eme huno
asami'ne, Mago rankumapina tare netre mani'na'ane, mago
nera fenone ne' manigeno, magomo'a amunte omane ne'
mani'ne. 2 Hagi feno ne'mo'a rama'a sipisipi kevune rama'a
bulimakao kevune ante'ne. 3 Hianagi amunte omane ne'mo'a
magoke osi a' sipisipi anenta ate'ne. Hagi agra ana osi sipisipi
anentara kegava hu'negeno, mafavre zaga'ane magoka nena
hu'naze. Hagi ana sipisipimo'a ana ne'mofo zuompafinti ne'zana
neneno, kapu'afinti tina ne'neno afumpi masetere hu'ne. Hagi
ana sipisipi anentamo'a mofa'agna hu'negeno avure anteneno
kegava nehiane. 4 Hagi mago zupa feno ne'mofona mago
nantu vahe noma'arega egeno, feno ne'mo'a afu kevu'afintira
sipisipia ome ohe netreno, amunte omane ne'mo'ma magoke
a' sipisipi anenta'ma ante'nea ome aheno ana nantu vahera
krente'ne. 5 Hagi ana nanekema Deviti'a nentahino'a tusi'a
arimpa ahegeno amanage hu'ne, Kasefa huno mani'nea Ra
Anumzamofo avufinki, tamage huno anazama hu'nea ne'mo'a
frigahie. 6 Na'ankure agra amunte omane ne'mofo zama
kumazafa neseno, asunkura huonte anara hu'negu, anama
eri'nea zantera 4'a zupa ante agofetu huno amigahie. 7 Hagi
Neteni'a Devitina asamino, E'i ana feno nera kagra mani'nane.
Hagi Ra Anumzana Israeli vahe Anumzamo'a amanage hie,
Nagra masavena fregante'na huhampri kantogenka Israeli
vahe kinia mani'nanke'na, Soli'ma kahe'za nehige'na Nagra'a
agri azampintira kaguravazi'noe. 8 Hagi Nagra'a kvakamofo
Soli naga'ene avrenegamina, a'ne'aramina avrenegamina,

Israeli vahe'ene, Juda vhete kva Nagra huhampri kante'noe.
Hagi e'ina zamo'ma knare'ma huoganteresina, Nagra rama'a
zantamina mago'ana amne kamusine. **9** Hagi nahigenka Ra
Anumzamo'na kea kefenkami natrenka, Nagri navufina havi
kavukvara hane? Hagi Hiti ne' Uriana Amoni vahe'mokizmi
bainati kazinteti kagra ahe nefrinka, a'a kumazafa avre'nane.
10 Hagi antahio, kagra nagefenkami atrenka Hiti ne' Uria a'
avrenanku, ama knareti'ma manita vanazana kagri nagara
bainati kazinteti hara huzmante vava hu'za vugahaze. **11**
Hagi amanage huno Ra Anumzamo'a hie, kagrama hana
kavukavate kagri'a naga'mo'za oti'za hafra hugantegahaze.
Hagi a'neka'aramina tava'onkare nemaninimofo avreminugeno,
negesanke'za zage ferupi amate zmanteno masegahie. **12**
Hagi kagra oku'a ana kavukvara hu'nananagi, Nagra zage
ferupi amate mikä Israeli vahe zamufi ana zana erinte ama
hugahue. **13** Anage higeno Deviti'a huno, Nagra Ra Anumzamofo
avufina kumi hu'noe, higeno anante Neteni'a asamino, Ra
Anumzamo'a kumika'a atreganteankinka, ana kumikura kagra
ofrigahane. **14** Hianagi e'ina kavukava'mo'a Ra Anumzamofo ha'
vahera zamaza hige'za Ra Anumzamofona azanavanke hu'za
huhaviza huntegahazankino, ana mofavrekamo'a frigahie. **15**
Hagi Netenima noma'arega vigeno, Uria kento a' Batsiba'ma
Devitinteti'ma ante'nea mofavrerer Ra Anumzamo'a rankri
atregeno kri eri'ne. **16** Hagi ana mofavregura Deviti'a ne'zana a'o
huno mopafi maseno Ra Anumzamofontega nunamuna nehigeno
kora atune. **17** Hagi anama nehige'za, ranra eri'za vahe'amo'za
otino ne'zama zamagranema nenogu azeri oti'nazaragi, agra
otino ne'zama zamagranema ne'zankura avesra hu'ne. **18** Hagi
7ni knazupa ana mofavrea frige'za eri'za vahe'mo'za Devitima

asamizankura koro nehu'za anage hu'naze, Ana mofavrema
ofri mani'negeta, tagra kema hunana ontahi'neankino menima
fri'nea kema asaminunana, agrazante hazenke erigahanki, tagra
na'a hugahune? **19** Hianagi eri'za vahe'mo'zama zamagrage
zamagrageda hu'za sumi'sumima hazazama negeno'a, hago
mofavreni'a fri'ne huno Deviti'a antahi'ne. Hagi Deviti'a eri'za
vahe'a zamantahigeno, Mofavrea fri'neo? huno hige'za zamagra
kenona hu'za, Izo hago fri'ne hu'za hu'naze. **20** Hagi Deviti'a
mopafintira otino ti freteno, azokara erise nehuno, masave freteno
kukena'a eri nentanino Ra Anumzamofo seli nontega vuno Ra
Anumzamofo monora ome hunte'ne. Ana huteno noma'arega
vuno ne'zanku hige'za eri'za eme amizageno ne'ne. **21** Hagi
eri'za vahe'amo'za Devitina antahige'za, Kagra nankna kavukva
hunka mofavrema ofri mani'negenka, ne'zana atrenka zavira
ate'nane? Hianagi menima mofavrema frigenka, ete otinka ne'za
ne'hane. **22** Anage hazageno Deviti'a kenona huno, Ne'zana a'o
hu'na nasunku'ma hu'noana, na'ankure Ra Anumzamo asunku
hunante'nigeno mofavrea ofrisiegu ne'zana atre'na nunamuna
nehu'na zavira ate'noe. **23** Hianagi agra fri'negu na'ante ne'zana
a'o hu'na nunamuna hugahue? Nagra asimura aminugeno
oraotigahie. Hagi nagra agritera vugahuanagi, agra nagritera
omegahie. **24** Anante Deviti'a nenaro Batsibana azeri avava
seno, azeri fru nehuno, Deviti'a agrane masegeno, amu'ene
huno ne'mofavre kasentegeno, Deviti'a ana mofavre agi'a
Solomoni'e huno antemi'ne. (Solomoni'ema hu'neana rimpa frue
hu'ne.) Hagi Ra Anumzamo'a ana mofavrea avesinte'ne. **25**
Hagi Ra Anumzamo'a ana mofavrea avesintegu kasnampa ne'
Neteni huntogeno Devitinte vuno mofavremofo agi'a Jedidia Ra
Anumzamo avesinte'ne hu'ne hunka antemio huno asami'ne. **26**

Hagi anama nehigeno'a, Joapu'a Amoni vahe'mokizmi ugagota
hu'nea kuma Raba rankuma ha' huzamanteno mago kuma
eri'ne. 27 Hagi Joapu'a kema erino vu vahe huzamanteno, hago
Raba rankumara ha'huzamateno tima nenaza tina zamaheno
hanarene huta Devitina ome asamiho. 28 Ru menina nagra
ha' hu'na Raba kuma erisuge'za ana kumamofo agia nagri
nagire asamaresagi, mago'a sondia vahera zamavarenka Raba
rankumara ome zamahenka erio huta asamiho. 29 Higeno
Deviti'a maka sondia vahera nezamavareno Raba kumatega
vuno, ha ome huno ana rankumara eri'ne. 30 Hagi Raba kini
ne'mofa kini fetorira kna'amo'a 35 kilogremi hu'neankino, ana
fetoritera zago'amo'a mareri'nea have me'nea fetori omeri'za
Devitina asenifi antaninte'naze. Hagi Deviti'a ha'ma huno eri'nea
zantamina rama'a eri'ne. 31 Ana nehuno Raba kumate vahera
zamavarege'za kazokzo eri'za vahé mani'ne'za, so eri'zanki,
saumenteti eri erizanki, piki tunteti eri'zanki, brikima kreno trohu
eri'za zamige'za eri'naze. Maka Amoni rankumatamimpi vahera
ana erizanke'za zami'ne. Ana huteno Deviti'a maka sondia
vahé'za zamavarege'za ete Jerusalemi vu'naze.

13 Hagi ana knafina Deviti nemofo Apsalomuna nesaro
Tamari'a hentofa mofa mani'ne. Hagi Deviti nemofo Amnoni'a
ana mofakura tusiza huno kenunu hunte'ne. 2 Hianagi Tamari'a
vene omase mofa mani'negeno, Amnoni'a ana mofate'ma
erava'o huno mago'azama hunte kankura hakeno eri forera
osu'ne. Ana higeno ana zamo'a kri ami'ne. 3 Hagi magora
Amnoni nefu'a mani'neana agi'a Jonadabukino, agra knare
antahi'zane ne' mani'ne. Hagi ana nera Deviti nefu Simea
nemofo'e. 4 Hagi mago zupa Jonadabu'a Amnonina asamino,
Kagra kini ne'mofa nemofoga maka nanterana kri kavukava

nehanana, na'a hu'nefi nasamio? Higeno Amnoni'a asamino,
Nagri nenufu Apsalomu nesaro Tamarinku nave'nesige'na
anara nehue. 5 Hagi Jonadabu'a Amnonina asamino, Kagra
vunka tafete kri vahe kna hunka umase'negeno negafa'ma
kageku'ma esigenka amanage hunka asamio, nagri nensaro
Tamari asamigeno ne'zana erino eme namino. Hagi negenugeno
emani'neno ne'zana retro hunaminke'na, azama'afintira naneno
hunka hugahane. 6 Anage hutegen Amnoni'a kri vahekna
huno umase'negeno nefu Deviti'ma kenaku efregeno Amnoni'a
asamino, Muse hugantoanki nensarona Tamarina asamigeno
ne'zana negane'na eme krenke'na azama'afintira na'neno.
7 Higeno Deviti'a Tamarina eme huntenu, Vunka negasaro
Amnoni'a kri erino mase'neanki, ne'zana noma'afi ome kremio. 8
Higeno Tamari'a nesaro nonte'ma vuno ome keana Amnoni'a
tafe'are kri erino mase'ne. Hagi Tamari'a mago'a flaua erino
heruno negregeno, Amnoni'a mase'nefintira ke'ne. 9 Hagi ana
ne'zama kreno erino zuompaufima eme nemiana navresrahie huno
nehuno, miko vahera huzmanteno, Amafintira atreta viho. Huno
hige'za miko vahe'mo'za atirami'za vu'naze. 10 Anante Amnoni'a
Tamarina asamino, Ana ne'zana nemasofinka efrenka kazampinti
eme namige'na na'neno, higeno Tamari'a anama retro hu'nea
ne'zana erino nemasefinka vu'ne. 11 Hagi ana ne'zama erino
eme nemigeno'a, Amnonia azeri anunekino, Nensaroga nagrane
mase'nanegu nehue. 12 Hianagi Tamari'a huno, nensaroga
nazeri havizana osuo. E'inahu zana Israeli vahe agu'afina
osuo. Kagra haviza huno neginagi hu'nea avu'ava zana osuo.
13 Hagi kagra e'ina hu'zama hanankeno'a nagaze hanige'na,
vahe zamavufina vano osugahue. Hagi Israeli agu'afina kagra
neginagi vahera zamagaterenka, kefo vahe manigahane. E'ina

hu'negu muse hugantoanki kini ne' asamigeno, hugnarere
hugante'na nagrira ara erigahane. **14** Higeno Amnoni'a ana
ke'a ontahi hanavetino Tamari'na, avazu huno havi avu'ava
hunte'ne. **15** Anama hutegeno Ammonina ame huno Tamarima
avesinte'nea zamo'a fanane higeno, Tamarina tusiza huno avesra
hunenteno, otinka amafintira vuo, huno Tamarina hunte'ne. **16**
Higeno Tamari'a kenona huno, Nagri'ma amafinti'ma vuoma
hunkama humanantana zamo'a, ko'ma hu'nante'nana hazenke
zana agaterenka tusi'a hazenke hugahane. Hianagi Amnoni'a
ke'a ontahi'ne. **17** Hagi avate eri'za vahe asamino, Ama ara
amafintira avreta atineramita kafana erigiho. **18** Higeno ana
eri'za vahe'amo'a fegu'a avre netreno, kahana erigi'ne. Hagi
kini vahe'mofa mofa'nemo'zama za'za kukenama antani'nage'za
vahe'mo'za nezmage'za venema omase mofa'ne hu'za nehaza
za'za kukena Tamari'a antanineno, Amnoni nontega vu'neankino,
19 Tamari'a ana za'za kukena'a tagoto tagatu nehuno tanefa
kateno nefreno, asenirera azana refiteno zavira neteno vu'ne.
20 Hagi Absalomu'a nesaro Tamarima negeno antahigeno,
Negasaro Amnoni'a nankna huno amanahu havi avu'ava zana
hugante. Hianagi agra negasaroki anazana mago vahera
osaminka atrenka manio. Hagi Tamari'a Apsalomu nompi
mani'neanagi, asunku zampi mani'ne. **21** Hagi ana mika zamofo
nanekema kini ne' Deviti'ma nentahino'a, tusi'a arimpa ahe'ne.
22 Hagi Absalomu'a Ammonina magokea huomi'ne. Na'ankure
nesarona azeri haviza hu'negu tusiza huno antahi haviza
hunenteno anara hu'ne. **23** Hagi Tare kafu evutege'za Absalomu
eri'za vahe'mo'za sipisipi azoka harenaku Balhasori kumara
Efraemi kuma tava'onte me'nere vu'naze. Hagi Absalomu'a
kini ne'mofa mofavre zaga kehige'za utru hu'naze. **24** Hagi

Absalomu'a kini ne' Devitinte vuno anage hu'ne, Sipisipi afu'mofo azokama hare eri'za vahe'nimo'za sipisipi azoka nehare'za menina ne'zana kre'za nene'za musenkase nehazanki, knare kini ne'moka eri'za vahekanena anante esanketa musenkasea hugahuno? **25** Hianagi kini nemo'a ke'hona huno, Mofavrenimoka tagra ovugahune. Na'ankure tagrama vanunkenga kagra ne'zama krerante zankura rankna erigahane. Hagi anagema higeno'a, Absalomu'a inene hu'neanagi, kini ne'mo'a maka'mota ovugahune nehuno, Absalomuna asomu ke hunte'ne. **26** Anante Absalomu'a kini nera antahigeno, Muse hugantoanki kagrama ovanunka, nenfu Amnonina huntogeno nagrane vino? Higeno kini ne'mo kenona huno, Na'ante Amnonina huntanenkeno kagranena vugahie? huno hu'neanagi, **27** Absalomu'ma inene huno kema hiazanku kini ne'mo'a huzmantenge'za, Amnoni'ene mika kini ne'mofo mofavremo'za agrane vu'naze. **28** Hianagi Absalomu'a eri'za vahe'a zamasamino, Amnoni'ma waini tima neno neginajima hanigeta ahe friho. Hagi Amnonima ahe fri zankura korora osiho. Nagra ahe friho hu'na huramantoanki, ahe friho. **29** Higeno Absalomu eri'za vahe'mo'za Absalomu'ma hu'nea kante ante'za, Amnonina ahe fri'naze. Hagi kini ne'mofona maka mofavre'amo'za anazama nege'za, miulie nehaza donkizami'a eri'za panani hu'za fre'naze. **30** Hagi ana mofavre'mo'za zahufa kantega neage'za, mago'a vahe'mo'za kini nera eme asamiza, Absalomu'a kini ne'moka mofavre zaga maka zamahe vagare'ne. **31** Hagi anankema nentahino'a, kini ne'mo'a otino kukena'a tagato tagatu nehuno mopafi maseno krafa hu'ne. Hagi mika eri'za vahe'mo'zanena kukenazamia tagato nehu'za krafa hu'naze. **32** Hianagi Deviti nefu Simea nemofo Jonadabu'a Devitina eme asamino, ranimoka antahintahi hakarea osuo, ana miko mofavre

zaga ozamahe'neanki Amnoninke ahe'ne. Hagi ama anazama fore hu'neana Amnonima nesaroma Tamarima havi avu'ava'ma hunte'nea zante Absalomu'a anara hu'ne. 33 E'ina hu'negu kini ne' ranimoka, ana kegura antahintahi hakarea osuo. Amnoni agrake fri'ne. 34 Hagi anama nehuno'a Absalomu'a atreno fre'ne. Hagi avuma anteno kuma kegava nehia sondia vahe'mo'ma keana Horonaimia zage fre kaziga agonafinti rama'a vahe e'naze. 35 Ana hazageno Jonadabu'a kini nera asamino, Ko nagrama huankante kini ne'moka mofavre zagamo'za neaze. 36 Hagi kema huvaganeregeno'a kini ne'mofo mofavre'zagamo'za anante ehanati'za tusi zavi atage'za, kini ne'ene mikä eri'za vahe'mo'za zavi ate vagare'naze. 37 Hagi Deviti'a nemofo Ammoninkura rama'a knafi zavira ate'ne. Hagi Absalomu'a freno negeho Talmaintega vu'ne. Hagi Talmaia Amihudi nemofokino Gesuri kumate kini ne' mani'ne. 38 Hagi Absalomu'a freno 3'a kafu Gesuri kumatera umani'ne. 39 Ana'ma higeno'a Deviti'a Ammoninku'ma asunku hu'nea zana atreno ete Absalomunku asunkura hu'ne.

14 Hagi Zeruia nemofo Joapu'ma antahiamma kini ne'mo'ma Absalomuma kenigu tusizama higeno'a, 2 Joapua mago'a vahe huzamantege'za Tekoa kumate vu'za, mago knare antahi'zane a'ome avre'za e'naze. Hagi Joapu'a ana ara asamino, Zamasunku hu'zama nentanizankna kukena haviza hunka, masavena ofrenka, ko'ma vahe frinegeno asunku huno za'zakna mani'nea a'mo'ma nehiaza huo. 3 Ana hutesunka kini nete vunka ama hanua kea ome asamio, anage nehuno Joapu'a kini ne'ma asaminia nanekea ana ara asami'ne. 4 Higeno Tekoati a'mo'a kini netema uhanatino'a, ome kepri humino avugati mopafi umase'heno amanage hu'ne, Muse hugantoanki kini ne'moka

naza huo! 5 Higeno kini ne'mo'a antahigeno, nankna hazenke
me'negeka nehane? Higeno ana a'mo kenona huno, Nagrira
neneve'a frige'na kento a' mani'noe. 6 Hagi eri'za a'kamo'na tare
ne' mofavre zanante'noankine hoza agupofi ha' ome nehakeno,
vahe'mo'a zanazeri amnea osigeke, mago'mo'a mago'mofona
ahe fri'ne. 7 Hagi anama higeno'a maka tagri naga'mo'za
oti'za nefuma ahe fria zante, ana risera ahe frisunkeno,
nefazana erisanti oharegahie hu'za hu'naze. Hagi zamagra
magoke mofavreni'a ahe fri'za nehzankino, nenave agine,
naga'amofo zamagima erino maniga vahera ama mopafina
omanigahie. 8 Hagi kini nemo'a ana ara asamino, Nagra ama
ana kegaga eri ante fatgo hugahuanki, kumakarega vuo. 9
Hianagi Tekoati amo'a kini nera asamino, Kini ne' ranimoka,
atregeno ana knazamo'a nagrite'ene nenfa nagate'ene meno.
Hagi kagrane naga ka'anena knazana e'origahaze. 10 Hagi kini
ne'mo'a huno, Iza'o ana nanekema hugantenumofona avrenka
nagrite egeno, mago'enena ke hakarea huoganteno. 11 Hagi
ana a'mo'a kenona huno, Muse hugantoanki, kini ne'moka
Ra Anumzana kagri Anumzankamofo agifi huvempa hunka
hugeno, vahe'mo'za mofavre'nia ahe ofriho. Hagi kini ne'mo'a
kenona huno, Tamage hu'na kasefa'ma huno'ma mani'nea
Ra Anumzamofo agifi huankino mago'mo'a ana mofavrea
mago'azana huontegahie. 12 Anante ana a'mo'a huno, Natrege'na
mago'ane kini nemoka kantahiga'neno, higeno kini ne'mo'a
huno, Amne huo. 13 Higeno ana a'mo'a kini ne' Devitina eri ante
ama huno asami'ne, Nahigenka Anumzamofo vahetera e'inahu
antahintahia retro hu'nane? Hagi menima nagri'ma nasami'na
nanekea, kagraka'a havizama hu'nana zana eri ama hunka
keaga hugantane. Na'ankure negamofoma kuma'ma atre'noma

fregenka omesiema hu'nana mofavrea, ete avrankeno ome'ne. **14**
Na'ankure mopafima tima tagiramige'za ete ana tima e'orizankna
huta frigahune. Hu'neanagi vahe'mota havizama hunkeno'a,
Anumzamo'a tahenofrianki, mago'a kanku hakeno atre'zama
frazage'za omesnazema hu'naza vahera, ete agrarega zamavare
tava'o nehie. **15** Hagi kini ne' ranimoka, naza hugahane hu'na
kagrite e'noe. Na'ankure vahe'mo'za nazeri kore hazage'na, kini
ne'mo'a naza hugahie hu'na nagra hu'noe. **16** Hagi kini ne'moka,
eri'za a'kamo'na kea antahinaminka Anumzamo'ma tamigeta
erisantima hare'nona mopafintira nagri'ene nemafonema tahe
fanenema hu'za nehaza vahe zamazampintira tagu'vazigahane.
17 Hu'negu kini ne' ranimoka kemo'a narimpa fru namigahie.
Na'ankure kini ne'moka kagra Anumzamofo ankero kna hu'enka,
havizane knare'zanena refako nehane. Hagi Ra Anumzana,
kagri Anumzamo'a kagri'ene manisnie. **18** Higeno kini ne'mo
huno, nagra mago zanku kantahige'za huanki kagra mago'zana
erifra okinka nasamio, higeno ana a'mo'a huno, kini ne' ranimoka
amanane nantahigo. **19** Hagi kini ne'mo huno, Kagrira Joapu
hugantegenka nagritera enampi? Higeno ana a'mo kenona
huno, Kini nera ranimoka, nankna hu'na eri frakigahue? Hagi
kagrama kasefa'ma hunka mani'nenkeno'a, mago'mo'e huno
mago'azana kagritera eri fraraokigahie. Tamage, eri'za nekamo
Joapu ome asamio huno hunantea ke eme kasami'noe. **20** Hagi
agra amne anara osu'neanki, Absalomu'ma hu'nea hazenki eri
fru hunaku hu'ne. Hianagi kini nemoka, Anumzamofo ankero
vahekna hunka, knare'nare antahintahine vahe mani'nenka,
maka'zama mopafi'ma fore'ma hiazana antahinka kenka nehane.
21 Higeno kini ne'mo'a Joapuna asamino, Knareki kema
hanazana hugahuanki vunka Absalomuna ome avrenka eno. **22**

Hagi Joapu'a avugosaregati mopafi umaseno, ra agi nemino
anage hu'ne, Kini ne' ranimoka, menina eri'za ne'kamo'na
kema antahinaminka knare kavukvama hunantana zana menina
antahiamama hue. Na'ankure ke'n'i'a antahinka hu izo hunantane.

23 Anante Joapu'a Gesur vuno Absalomuna ome avreno
Jerusalemi e'ne. **24** Hianagi kini ne'mo'a anage huno hanave
kea hu'ne, Absalomu'a noma'arega umanigahianki, nagri
navurera omegahie. Anage higeno Absalomu'a agra'a noma'afi
umani'neno, kini nera eme onke'ne. **25** Hianagi Absalomuna Israeli
vahe'mo'za husga hunte'naze. Agra asenireti'ma vuno agiare'ma
urami'neana, afuhe afahera omanegeno, hentofa avufgane
ne' mani'ne. Hagi magora agrikna vahera Israeli vahepin
omani'naze. **26** Agra maka kafurera magoke zupa azokara
haretere hu'ne. Na'ankure ana azokamo'a kna hu'negeno'e.
Hagi ana azokama erinte'za kna'ama refkoma hu'za kazana,
2 kilogremi hu'ne. **27** Hagi Absalomu'a tagufa ne' mofavre
nenteno, magoke hentofa mofa anteno agi'a Tamari'e huno
ante'ne. **28** Hagi Absalomu'a tare kafu Jerusalemi kumatera
mani'ne. Hianagi agra vuno kini nemofo avufina ome onke'ne. **29**
Hagi Absalomu'a agri agi erino kini ne' ome keniegua Joapuna ke
atrente'ne. Hianagi Joapu'a omegeno, mago'ane eri'za vahera
huzmantegge'za vu'nazanagi Joapu'a avesra huno ome'ne.
30 Hagi Absalomu'a eri'za vahe'a huzamanteno, Joapu bali
hozamo'a nagri hoza tava'onte me'neanki, teve ome taginteho
huno huzmante'ne. **31** Anante Joapu'a Absalomu nontega eno,
Nahigenka eri'za vaheka'a huzamantanke'za hozani'a teve ome
taginteho? **32** Higeno Absalomu'a kenona huno, Nagra ke
atregante'na, are ege'na hugantanena kini ne' ome ko hu'na
huana kagra ome'nane. Hagi kagra na'ante knare'ma hu'na

mani'noana kea hanke'na Gesuritira e'noe huno nagrikura hie
hunka ome antahigo. Hagi anantega manuresina knare hiresine.
Hagi menina natrege'na kini ne ome ka'nenkeno hazenkema
hunenugeno'a nahe frino. 33 Higeno Joapu'a kini nete vuno ana
nanekea ome asamigeno, kini ne'mo'a Absalomuna ke higeno
eno avugosaregati mopafi umasegeno, kini ne'mo Absalomuna
antako hunte'ne.

15 Hagi mago'a kna evutegeno Absalomu'a mago karisine hosi
afu'ene nevreno, vugotama hunte'za kegavama hu'za vu vahera
50'a mizasezmaneno huzamantege'za vugota hu'naze. 2 Hagi
mika zupa nanterame otino rankumapi ufre'nea kante umani'neno,
kini ne'mo'ma knaza zamima eri fatgo huzmantenigu'ma vaza
vahera, Absalomu'a zamantahigeno, Tamagra ina kumapinti
vahere huno zamantahigege'za, tagra Israeli nagapinti vahere
hazageno'a, 3 ana kema antahiteno'a Absalomu'a amanage
hu'ne, Keho knazantamia amne eri fatgo hugahianagi, kini
ne'mo'a kema refko'ma hu' eri'zana mago vahera omi'neankino,
ketamia refko osugahie. 4 Hagi Absalomu'a huno, Nagrama ke
refko hu kva vahe manisuge'za, vahem'oz za knaza zamia eri'za
nagrite esage'na fatgo hu'na kezamia refko hugahue. 5 Hagi
mago'a vahem'za enevu'za eme kepri'ma humiza nehazageno'a,
Absalomu'a zamazante zamavazu hugantiteno zamantako
huzmantene. 6 Hagi Absalomu'a e'inahu avu'ava'ma hia zamo
mika Israeli vahem'za zamagu'a avazuhu agrarega zmante'ne. 7 Hagi
4'a kafu evutegeno Absalomu'a kini nera asamino, natrege'na
Hebronu vu'na huvempama hu'nore Ra Anumzamofontega
ome ofa huntaneno. 8 Na'ankure Aramia kaziga Geshuri'ma
mani'ne'na huvempa hu'na Ra Anumzamo'ma natrenige'na ete
Jerusalemi kumate'ma vanu'ha, Hebronu kumate monora ome

huntegahue hu'na hu'noe. **9** Hagi kini ne'mo'a kenona huno, Kagra krimpa frune vunka, huvempama hu'nana kemofona omeri knare huo, higeno Absalomu'a Hebronu vu'ne. **10** Hianagi anantega umani'neno, Absalomu'a kema erino vuno eno hu vahera huzamanteno anage hu'ne, Maka Israeli vahetamima mani'nazarega vuta amanage ome hiho, ufema resageta mikomota kezanke huta, Absalomu'a kinia Hebronu kumate efore hu'ne huta hiho. **11** Hagi agra 200'a vahe Israelitira nezamavareno vu'neanagi, na'ante zamavareno vu'ne zamagra ke'za antahiza osu'naze. **12** Hagi Absalomu'a ofama nehuno'a mago'a vahe huzamantege'za Gilo kumateti ne' Ahitofelina ome avre'za e'naze. Hagi Ahitofeli'a Devitima knare antahizama nemiza vahepinti mago zami'mo'e. Hagi Absalomu kazigama vaza vahe'mo'za rama'a hu'naze. **13** Hagi kema eri'za vu vahe'mo'za e'za kini ne' Devitina eme asami'za, Rama'a vahe'mo'za Absalomuna avariri'za kini azeri oti'za nehaze. **14** Hazageno Deviti'a agranema Jerusalemi mani'naza eri'za vahera zamazeri atru huno anage huno zamasmi'ne, Ru Absalomu'a mika tamagri'ene nagri'ene tahe vagaresigi ame huta Jerusalemi kumara atreta fresune. Hagi anama osanunkeno'a ame hu'za Absalomu naga'mo'za eza eme nerahe'za, ama kumapi vahe'enena zamahe vagaregahaze. **15** Hagi kini nemofo eri'za vahe'mo'za hu'za, kini ne'mokama hana kea erizafa hugahune. **16** Hige'za kini ne'ene eri'za vahe'amo'za atre'za vu'naze. Hagi kini ne'mo'a 10ni'a henka ane'a zaga'a huzamantege'za kuma'a kegava hu'za mani'naze. **17** Hagi kini ne'ene mika Jerusalemi kuma'ma atre'za atirami'za nehu'za, ana kumamofo refarega mago no me'nere umani'naze. **18** Hagi anante kini ne'mo'a ome oti'nege'za, naga'amo'za vugota hazageno, mika Kereti vahe'ma, Paleti kumateti vahe'ma, Getiti'ma Deviti'enema

e'naza 600'a vahe'mo'zanena agatere'za vu'haze. **19** Hagi kini ne'mo Geti vahe'mokizmi kva ne' Itaina asamino, nahigeta tamagra tagranena neaze? Rurega vahe tagrane emani'nazanki, ete vuta kasefa kini ne' Absalomu'ene umaniho. **20** Hagi tamagra kofa'a knafi tagranena emani'nazanki, tagrane vu'za nehazo? Hagi sondia vaheka'a nezamavarenka ete viho. Na'ankure tagra iga vugahune ontahi'none. Hagi Ra Anumzamo'a knare huno asunku huneramanteno fatgo avu'ava huramanteno kegava huramantesie. **21** Hianagi Itai'a kenona huno, Kini ne' ranimoka kasefa huno mani'nea Ra Anumzamofo agifi tamage hu'na huanki, kagrama kasefa hunka mani'enka inantegama vananana kagrane nevanunkeno, kagri'ma kahe frisuza tagri'enena tahe frigahaze. **22** Hagi Deviti'a Itaianku huno, Knareki eviho, hige'za sondia vahe'ane mika a'mofavre zamine vu'naze. **23** Hagi Deviti'ene naga'anema nevage'za, maka Jerusalemi vahe'mo'za tusi zavi atezmante'naze. Hagi kini ne'mo'a Kitroni krahopi nevige'za, maka vahe'mo'za hagege ka'ma kokampima vu'nea kantega vu'naze. **24** Hagi Zadoku'ene agranema mani'naza Livae naga'mo'za Anumzamofo huhagerafi huvempage vogisia eri'za eme antageno, Abiata'a ofa nehige'za, miko vahe'mo'za rankumara atre'za vu vagare'naze. **25** Hagi Deviti'a Jadokina asamino, Ra Anumzamofo huhagerafi huvempage vogisia ete erinka rankuma agu'a ufro. Hagi Ra Anumzamo'ma arimpa fruma hunantesuno'a, Agra natrenige'na ete e'na huhagerafi huvempage vogisia eme nege'na, seli mono nonena eme kegahue. **26** Hagi Ra Anumzamo'ma musema huonantesuno'a, Agri'ma avesi'niazza hunantesie. **27** Hagi Deviti'a pristi ne' Zadokina asamino, Amanahu antahintahi reraro hue, kagra kasnampa ne' mani'nanku kagrane ne' mofavreka'a Ahimane, Abiata nemofo

Jonataninena zamavarenka tamarimpa frune rankuma agu'afi ete ufreho. **28** Hagi nagra hagege kopi vu'na tima taka nehare ome tamavega ante'na mani'negahuanki, Jerusalemima fore'ma hania zamofo nanekea atrenantenke'za, anantega eme nasamaho. **29** Higeno Zadoki'ene Abiatakea Ra Anumzamofo huhagerafi huvempage vogisie erike, ete Jerusalemi rankumapi ufre'ne umani'na'e. **30** Hianagi Deviti'a tusi zavi neteno Olivi agonare mareri'ne. Hagi agra zamasunku'ma nehu'za nehzaza huno, asenirera refineteno agia nona ovazi aga avapa vu'ne. Hagi agranema vu'naza vahe'mo'za ana zanke hu'za zamasenirera refi'nete'za zavi ateme agona mareri'naze. **31** Hagi mago'a vahe'mo'za Devitina eme asami'za, Ahitofeli'a Absolamuntega ante, hu'za hazageno Deviti'a Ra Anumzamofonte nunamu huno, Ra Anumzamoka Ahitofelina azeri havia hugeno, neginagi antahintahi Absalomuna amino. **32** Hagi vu'zama agonafima mono'ma nehzare uhanati'zageno'a, Devitina nefu Akaiati ne' Husai'a zamasunku avu'ava'ma nehzaza huno kukena'a tagato nehu'na, kugusopa kateno anumpi nefreno, anante eme tutagiha hunte'ne. **33** Hagi anante Deviti'a asamino, Kagrama nagranema vananana kna namigahane. **34** Hianagi ete rankumapi vunka Absalomuna ome asmio, kini ne'moka negafa eri'za vahe korapara mani'noanki'na menina kagri eri'za vahe manigahue hunka ome nehunka, antahintahia amigeno Ahitofeli antahintahia eri atregahie. **35** Hagi pristi netre Zadoki'ene Abiatakea kagrane Jerusalemi manigaha'e. Hagi kini ne' nompima nanekema retro'ma hanaza nanekea, maka zanagri zanasamio. **36** Hagi zanagra mofavre'zani'a Jonatanine, Ahimasakizni huznantenageke kagrama mika kema zanasami'nana kea eme nasamigaha'e. **37** Hagi Deviti nefu

Husai'a Deviti'ma hianke antahino, ete kumapi unefregeno
Absolamuenena Jerusalemi kumapina ufre'ne.

16 Hagi Deviti'a ananteti onasi'a vugamanu ategeno, Mefiboseti eri'za ne' Siba'a Devitina tutagiha hunte'naku eme avega antenegeno ome ke'ne. Hagi agra tare donkifi 200'a breti konagi, fiki raga 100'a konagi, ante hagage hu'nea waini raga'a 100'a konagi huno erineno meme afumofo akru'are tro hu'naza tintafempi waini tina erino eman'i'ne. **2** Hagi kini ne Deviti'a Sibana antahigeno, amazana na'a hu'zane? Higeno Siba'a kenona huno, ama donki afutrena naga kamo'za zanagumpi mani'za vugahaze. Hagi bretine zafa raganena venenemo'za negahaze. Hagi ama waini tina hagage kopima nevanageno tamavresrama hanigeta negahaze. **3** Hagi kini ne'mo ete antahigeno, inantega kva vahekamofo negeho Mefiboseti'a mani'ne? Higeno Siba'a huno, Agra agesama antahiana menina negeho kini trara namigahaze huno Jerusalemi mani'ne. **4** Hagi kini ne'mo'a Sibana asamino, E'i menina maka Mefiboseti zantamina ete'na kagri kamue. Higeno Siba'a kenona huno, kini ne' ranimoka kagri'ma kavesisia zana amne hugahue. **5** Hagi anama hute'za kini ne'mo'a Bahurimi kumate'ma vigeno, mago ne'mo tutagiha hunte'ne. Ana nera Soli nagapinti ne' Gera nemofo Simeikino ne-eno Devitina kesuno e'ne. **6** Hagi Simei'a have knonu matevuno Devitina neheno, mika Deviti'enema vu'naza vahera nezamaheno, Devitima kegavama hunte'za kanti kamama vu'naza avate hanave sondia vahe'enena zamahe'ne. **7** Hagi Simei'a Devitima kema nesuno'a amanage hu'ne, Kagra vahe ahe fri vava hunka vahe kora eri taginka haviza hu'nana vahe mani'nananki, amafintira maniganenka vuo. **8** Hagi kagra Soli naga'ma zamahe frinka, Soli kini trama eri'nana zante menina Ra Anumzamo'a kagrira nona hunegante. Hagi

menina negamofo Absalomu kini eri'zana hanare amigenka, frenka ne'ane. Na'ankure kagra vahe zamahe frinka vahe kora eritagi ne' mani'nanku, e'inahu hazenkea eri'ne. **9** Anante Zeruia nemofo Abisai'a kini ne' asamino, nahigeno ami fri'nea kramo'a kini ne'moka e'inahu kea kasuno ne-e! Natrege'na ome ahena agenopa akafrineno. **10** Hianagi kini ne'mo huno, Ra Anumzamo'ma huntenigeno huhavizama hunenante'na Zeruia nemofoga antahio, tagra magozana hugara osu'none. **11** Anante Deviti'a Abisaine mika eri'za vahe'anena zamasamino, Nagra'ama kasente'noa mofavremo Absalomu'ma nahe'za nehanigeno'a, Benzameni naga'mo'za amane nahegahaze. Hagi Ra Anumzamo asamigeno nehianki, mago'zana osu atrenkeno huhavizana hunanteno. **12** Hagi nagriku'ma haviza hunane huno'ma huhavizama hunanterera, Ra Anumzamo'a nenageno, Agra'a nona huno asomura hunante'nie. **13** Hagi Deviti'ene naga'amo'za nevazageno Simei'a anagami kaziga nevuno, Devitina kea nesuno kugusopa kateno avufina netreno have kanona atreno aheno vu'ne. **14** Hagi kini ne'ene agranema vu'naza vahe'mo'za zamavaresra hige'za Jodani tinte unehanati'za anante umanigasa hu'naze. **15** Hagi ana'ma nehazageno'a, Absalomu'ene maka eri'za vahe'anema Jerusalema ehanati'zageno'a Ahitofeli'a agrane e'ne. **16** Hagi Deviti rone'a Akati kumateti ne' Husai'a Absalomuna eme tutagiha hunteno anage hu'ne, Kini nera kagra zazate kinia manigahane! **17** Hianagi Absalomu'a Husaina antahigeno, Deviti nefuga mani'nananki, kagra nahigenka agranena ovu mani'nane? E'i knare kavukvara negafuna huontane. **18** Higeno Husai'a kenona huno, Ra Anumzamo'ene maka Israeli vahe'mo'za huhamprintesaza kini nemofo agoraga nagra manigahue. **19** Hagi nagra negafa antahintahima ami

eri'za vahe mani'noankna hu'na kagri eri'za vahe manigahue.

20 Hagi Absalomu'a Ahitofelina asamino, Na'a hugahumpi antahi'zana namio. **21** Higeno Ahitofeli'a Absalomuna hunteno, negafana henka a'nezaga'ane umaso. Na'ankure agra nonku'ma kegava hanazegu zamatrevo vu'ne. E'inama hananke'za Israeli vahe'mo'za antahisu'za, tamage hunka negafana ha'renentane nehu'za, kagranema mani'naza vahe'mo'za hanaveti'za kagritega antegahaze. **22** Higeno nomofo agofetu seli no Absalomuna kintageno, nefama zamatrevo vu'nea a'nenea mika Israeli vahe zamavuga zamanteno mase'ne. (2 Samuel 12:11-12.) **23** Hagi ana knafina Ahitofeli'a Ra Anumzamofontegati'ma antahintahima erinoma hiankna ke nehigeno Absalomu'a kote'ma Deviti'ma hu'neankna huno amagera ante'ne.

17 Hagi henka Ahitofeli'a Absalomuna asamino, natrege'na 12tauseni'a sondia vahe zamavare'na meni kenagera vu'na Devitinku ome hakena hara huntaneno. **2** Hagi agra menina kasaro kasara huno ana'ana huno nevanige'na ome azerigahue. Hagi nagra antri hanazaza hu'na va'nena, mika vahe'mo'za atre'za fresage'na kini ne'ke ahegahue. **3** Hagi menina nagra maka vahera zamavarena kagrite egahue. Hagi zamagra zahufa a'mo neve atreno frenereti ete eankna hu'na, ana miko vahera ozamahe zamavare'na kagrite egahue. Hagi Devitinke ahesankeno frinigenka kagra krimpa fru hunka manigahane. **4** Hige'za Absalomu'ene mika Israeli kva vahe'mo'zama ana nanekema antahi'zana knare hu'ne. **5** Hagi Absalomu'a huno, Akai nagapinti ne' Husaina kehinkeno agranena antahi'zama'a eme huama hina antahimaneno. **6** Hagi Husai'a Absalomunte egeno Absalomu'a asamino, Ahitofeli'a ama naneke tasami'neanki agrama tasamia naneke amagera antegahumpi? Hagi i'oma

hanunka antahintahi ka'a kagra hu ama huo. 7 Hagi Husai'a kenona huno, Menima Ahitofeli'ma tamia antahi'zamo'a knarera osie. 8 Hagi kagra antahi'nane, negafa'ene sondia vahe'amo'za hanavenentake vahe mani'nazageno zamarimpama ahe'zamo'a Beamofo anenta'ama vahe'mo'za nevrazageno arimpa aheankna vahe mani'naze. Hagi negafa'a harafa vahekino, kenagera sondia vahe'anena omasegahie. 9 Hagi agra ko mago'a kumatego, have kampino frakino mani'ne. Hagi agrama kagri sondia vahe'ma ese'zana ha'ma huzmantesniana rama'a vahe zamahe frigahiankino, vahe'mo'zama anankema antahisnu'za Absalomu nevaririza sondia vahera zamahe fri vagaraze hu'za hugahaze. 10 Hagi mago'a laionigana hu'za koro osu sondia vahe'kamo'za anankema antahisnu'za koro hugahaze. Na'ankure mika Israeli vahe'mo'za antahi'naze, negafa'a tusi hihamu ne' mani'nege'za, agranema mani'naza sondia vahe'mo'za hanavenentake vahe mani'naze. 11 E'ina hu'negu noti kaziga Dani kumateti vuno sauti kaziga Bersebama uhanati'nea vahe'ma mani'naza Israeli sondia vahera, kagra mika zamavarenka Devitima ha'ma huntenakura eritru hugeno hagerinkenafi kasepakna hanigenka, zamavarenka hara ome hunto. 12 Hagi inantego Devitima ome keta erifore'ma hanuta, ata komo eramino mikaza refiteaza huta, Devitine mika sondia vahe'anena zamahe fri vaga regahune. 13 Hagi agrama mago kumapima ufrenketa ana kumofo vihu keginare nofi renteta avazu huta agupofi ome atregahune. Ana nehanunkeno ana kuma'mo fanane huvagaregahie. 14 Anante Absalomu'ene mika Israeli vahe'mo'za hu'za, Arkiti ne' Husaia tamia antahizamo'a knare huno Ahitofelima tamia antahi'zana agatere. Na'ankure ana hanigeno Ra Anumzamo'a Absalomuna azeri haviza hunaku ana antahi'zana zamige'za Ahitofeli

antahi'zana eri atre'naze. **15** Hagi ana huteno Husai'a Zadokune
pristi ne' Abiatakizania amanage huno zamasami'ne, Ahitofeli'a
Absalomune Israeli kva vahe'tamina antahintahi zamige'na
nagra amanahu antahi'za zami'noe. **16** Hagi menina ame
hutna Devitina ke atrentekeno, tima takahe'za kantu kazigama
nevarera uomaseno, ru agri'ene agranema maka vu'naza
vahetamina eme zamahesagi ame hu'za freza hagege kokampi
viho. **17** Hagi Jonatani'ene Ahimasikea Jerusalemi vahe'mo'za
zanage'zanku frakike Enrogeli mani'nakeno eri'za mofamo kea
erino Devitima ome asaminogura ome zanasami'ne. **18** Hianagi
mago nehaza ne'mo ana netrena zanageteno Absalomuna ome
asami'ne. Ana higeno ana netremokea ame huke freke Bahurimi
kumate mago ne'mofo kumapi me'nea ti kerigampi uramine ome
fraki'na'e. **19** Hagi ana ne'mofo nenaro'a tavrave rutareno anama
mani'na'a kerirera refi'neteno ana agofetu witi kanara huno
zanazeri frakizanante'ne. **20** Hagi Absalomu eri'za vahe'mo'za
ana a'ma kuma'afi mani'nege'za eme antahige'za, Ahimas'iene
Jonatanikea iga mani'na'e? Hazageno ana a'mo'a kenona huno,
zanagra tina takahene hago vu'na'e. Hagi Absalomu eri'za
vahe'mo'za ome hakazana ozamage'za ete atre'za Jerusalemi
vu'naze. **21** Hagi ana vahe'ma vutageke anama framaki'napinkati
atiramine Deviti ome asaminaku vu'na'e. Hagi Devitina ome
asamine, kagra menina amafintira atrenka tina takahenka ko vuo.
Na'ankure kagri'ma eme kazerisania kea Ahitofeli'a Absalomuna
retro huno asami'ne. **22** Hagi Deviti'ene agranema vu'naza
vahe'mo'za maka ana kenageke Jodani tina takahe'za kantu
kaziga vu'naze. Hagi ko'ma atiana mago vahera timofo kama
kaziga omani'naze. **23** Hagi Ahitofeli'ma keno antahino'ma
hiama Absalomu'ma ke'ama ontahigeno'a, donkiafi marerino

kuma arega vuno, mika'zama omerintese nehuno, agra kana
aheno frige'za naga'ama asenentaza matipi ome asente'naze.

24 Hagi Deviti'a Mahanaimi vigeno, Absalom'u'a mika Israeli
sondia vahera zamavareno Jodani tina eme takahe'ne. **25** Hagi
Absalom'u'a Joapu noma erino sondia vahe'ma kvama hania nera
Amasa huhamprinte'ne. Hagi Amasa'a Jeta nemofokino Israeli
nagapinti ne'mo Nahasi mofa Abigeli ara eri'ne. Hagi Abigelina
nuna'amo Seru Joapu'na kasente'ne. **26** Hagi Giliati mopafi
Israeli sondia vahe'ene Absalomu'enena seli nonku'ma eme
ki'za mani'naze. **27** Hagi Deviti'ma Mahanaimima ehanatigeno'a,
Nahasi nemofo Sobi'a Amoni kaziga Rabati kumateti ne'ki, Amiel
nemofo Makiri Lodeba kumateti ne'ki, Giliati ne' Barsilaiki hu'za
mussenkea hufuru hu'za avre'naze. **28** Hagi zamagra tafe'ma
masiza mase zanki, ne'zama kreno atino huzanki, kave'ma ati'za
nesaza zuomparamima, mago'a witigi baligi flaua'ene kre hagege
hunte witi aragane, rentori koheki, koheki, **29** tume rima'agi,
batagi, sipisipigi memegi sipisipimofo amiri eri kragefinteki hu'za
Devitine naga'ane ne'zana eri'za e'naze. Na'ankure zamagra
hu'za maka'mota za'za ka ka'ma kokampina azageno tamavesra
nehigeno, tamagara netegeno, tinkura tamavenisigeno hu'ne
hu'za hu'naze.

18 Hagi Deviti'a agranema vu'naza sondia vahete'ma
ugagota hu'za kegavama hanaza sondia vahe'ma huhampri
zamante'neana 1tauseni'a sondia vahete kva vahe huhampri
nezamanteno, mago'a 100'a sondia vahete kva huhampri
zamante'ne. **2** Hagi 3'a kevuma sondia vahe'ma refako
hu'nefintira, mago kevua Joapu kegava higeno, mago kevua
Joapu nefu Abisai kva higeno mago kevu'a Gatiti ne' Itaia
kegava hu'ne. Ana hazageno kini ne'mo'a sondia vahetamina

zamasamino, nigrane hatera vugahue. 3 Hianagi sondia
vahe'mo'za anage hu'naze, Kagra tagranena hatera ovugahane,
tagrama hapinti'ma atreta frege, amu'nompinti'ma refko
hu'za mago'a vahetima zamahesu'za, ana zankura zamagra
ontahigahaze. Hagi kagrama vananke'za kahesu'za 10 tauseni'a
vahe'ma zamahe'za musema nehzankna hugahaze. Hagi kagra
atrenka kumate mani'enka vaheku'ma upa hanuno, neone zanku
upa'ma hanunkena taza hananana knare hugahie. 4 Hagi kini
ne'mo'a amanage hu'ne, Tamagrama antahisageno'ma knarema
haniazana nagra hugahue. Hagi kini ne'mo rankumamofo
kahante uotino mani'nege'za sondia vahe'mo'za 1tauseni'a
sondia vahete kvao, 100'a sondia vahe'ma refko'ma hunteterema
hu'naza kevu nevazageno, 1tauseni'a sondia vahe'ma refko'ma
hunteterema hu'naza kevumo'za vu'naze. 5 Hagi kini ne'mo'a
amanage huno Joapunki, Abisainki, Ittainena zamasami'ne,
Nagri'ma antahinamisuta Absalomuna agazone huntaho. Hagi
ana nanekema 3'a kva vahe'ma zamasamiana mika sondia
vahe'mo'za nentahizageno zamasami'ne. 6 Anante Deviti sondia
vahe'mo'za vu'za Efraemi zafafi Israeli sondia vahe'ene hara
ome hu'naze. 7 Hagi Deviti naga'mo'za Israeli vahera hara
huzamagaterage'za, ana zupa 20 tauseni'a vahe zamahe fri'naze.
8 Hagi ana zupa ha'mo'a ra huno maka kaziga vuno eno higeno,
ana zafafima savri hu'za hazenkema eri'za fri'naza vahe'mofo
nampamo'a kazinteti'ma zamahe'naza vahe'mokizmi nampana
agatere'ne. 9 Hagi ana ha'ma nehzageno'a, Absalomu'a
Deviti sondia vahe mani'narega e'ne. Hagi eme zamageno
miuli nehaza donkifi frenaku freno viana oki zafa azankuna'afi
azokamo'a rusi huno azeri sga higeno miuli donkimo'a atreno
fre'ne. 10 Hagi mago sondia ne'mo'a ana zana negeno vuno

Joapuna ome asamino, Absalomuna azoka'mo'a oki zafafi
rusi huno azeri sga higeno mani'ne. **11** Ana'ma hutegen'o'a
Joapua ana nera asamino, nahigenka agrira ahe ofri'nane,
kagrama ahe frintesina nagra silvane harafa ma nentaniza amu
nofira kamuresine. **12** Hianagi ana sondia ne'mo kenona huno,
1tauseni'a silva nenaminka ome ahe frio hunka hugahananagi,
nagra anara osugahue. Hagi tagra nentahukeno kini ne'mo'a
kagri'ene tare kva netrena Abisaine Ittainena tamasamino
Absalomuna ahe ofriho hu'ne. **13** Hagi nagra ana nera ahoresina,
kini ne'mo'a keno eri fore hisine. Na'ankure maka'zama fore
hiazana agra ko nentahie. Hagi agra keagare'ma nazeri otino
nazeri havizama hanifintira, kagra naza osugahane. **14** Hagi
Joapu'a ana nekura amanage hu'ne, Kea osunka tagano,
nehuno oki zamofo azanku'nate Absalomu'a hantiteno ofri
mani'negeno 3'a karugru keve erino vuno, Absalomuna tumo
ruragino regeno fri'ne. **15** Hagi Joapu hankore'ma e'neri'za
10ni'a vahe'mo'za Absalomuna ome regagi'za ahe'naze. **16** Hagi
ana huteno Joapu'a uferege'za agri sondia vahe'mo'za Israeli
sondia vahe'ma zamarotagoma nehazaregatira atre'za e'naze.
17 Hagi Absalomuna avufga'a eri'za mago keri kampi nevaziza,
ana agofetura have eri'za rentrako huntazageno hihi huno
mareri'ne. Hagi ana'ma hige'za mika Israeli sondia vahe'mo'za
kumazamirega vu'za e'za hu'naze. **18** Hagi Absalomu'a kasefa
huno'ma mani'neno'a, mago havea eri retru renenteno nagra
mofavre onte'noankino, ama havemo'a nagri nagi erino avame'za
megahie, huno hu'neankino menina ana havea me'nege'za
nege'za Absalomu have hu'za nehaze. **19** Anante Zadoki nemofo
Ahimas'i'a Joapuna asamino, natrege'na nagarena vu'na amama
fore'ma hia zamofo musenkea kea Devitina ome asamina, Ra

Anumzamo'a ha' vahekamofo azampintira kaguvazie hu'na ome
asamineno. **20** Hagi Joapu'a kenona huno, Kagra menina ama
museンke erinka kini netega ovugahane. Hagi henka museンke
erinka vugahane. Na'ankure menina agri'a mofavre fri'ne. **21**
Hagi Sudaniti (Itiopia) ne'mofo Joapu'a hunteno anage hu'ne,
Kagra knazamofo nanekea Devitina ome asamio, ana ne'mo'a
Joapu avuga renareno kepri huteno agareno vu'ne. **22** Hianagi
Zadoki nemofo Ahimasi'a hanavetino Joapuna asamino, Nazano
navufgare'ma fore'ma hania zankura kagesa ontahi natrege'na
nagranena kini nete vaneno. Higeno Joapu'a huno, Mago
mizana e'origahananki, na'agafare vunaku nehane? **23** Hianagi
Ahimasi'a huno, Nazano nagrite'ma fore'ma hania zankura
ontahuanagi nagrira natrege'na va'neno. Higeno Joapu'a knareki
vuo huno hunte'ne. Hagi Ahimasi'a Jodani agupofinti Mahanaimiti
rugitagino Sudani (Itiopia) nera ovu'negeno uhanati'ne. **24**
Hagi Deviti'a ran kuma'mofona tare kahantremofo amu'nompi
mani'negeno, anaga mani'neno avunteno kuma kegava nehia
ne'mo marerino kuma kegina agofetuti ome keana, mago ne'mo'a
agra'ake agareno ne-egeno ke'ne. **25** Hagi anaga mani'neo
avunteno kuma'ma kegava nehia ne'mo'a kezatino, mago ne'mo
agareno ne-ege'na negoe, huno kini nera asmigeno, Kini ne'mo'a
kenona huno, agra'akema ne-esiana e'i knare museンke erino
ne-e. Hagi anama agarenoma nea ne'mo'a erava'o hu'ne. **26**
Higeno avunteno kuma'ma kegava nehia ne'mo'a kezatino,
Anama agareno ne-ea nemofo amefira mago vahe agareno
ne-e, huno kafante'ma kegava nehia netega kezatimine. Hagi
anagama mani'neno avunteno kuma'ma kegavama nehia ne'mo'a
kafante'ma kegava nehia nera kezatimino, Kotama e'nea ne'mofo
amefira mago ne' ne-e, higeno kini ne'mo'a huno, agranena

knare musenke erino ne-e. 27 Hagi anaga mani'neno avunteno kuma'ma kegava nehia ne'mo'a huno, Ese'ma ne-ea ne'ma koana Ahimasikna hu'ne. Hagi kini ne'mo'a kenona huno, agra knare nekino knare musenke erino ne-e. 28 Hagi Ahimasi'a kini ne'mofona anage huno kezatimi'ne, Mikazamo'a knare hu'ne, nehuno eme kepri huno Ra Anumzana kagri Anumzamofo ragi amisune. Na'ankure kini ne'mokama ha'ma renegantea nera hago ahe'naze. 29 Hagi kini ne'mo'a kenona huno, Absalomu'a knare mani'negenka nehampi? Higeno Ahimasi'a kenona huno, Joapu'ma nagri'ene eri'za neka'anema hunerantegeno'a vahem'o'za atru hu'ne'za ranke ranke hu'nazanagi, na'a fore hu'ne nagra ke'na antahi'na osu'noe. 30 Higeno kini ne'mo'a huno, antire evu mani'nenga avega anto, higeno Ahimasia anante ot'i'no mani'ne. 31 Hagi Sudaniti (Itiopia) ne'mo ehanatino anage hu'ne, kini ne' ranimoka knare musenke eri'na neoe. Hagi menina Ra Anumzamo'a kahe'zama nehie vahem'zamazampintira kazeri atre. 32 Hagi ana kema kini ne'mo'ma nentahino'a, ne'ni'a Absalomu'a knare huno mani'nefi? Higeno Sudaniti (Itiopia) ne'mo'a kenona huno, Kini ne'moka kagri ha' vahete'ene ha'ma renegantaza vahetera, Absalomunte'ma fore'ma hianknaza fore hugahie. 33 Hagi kini ne'mo'a tusi asunku nehuno kuma kafamofo agofetu me'nea nonte marerino hunaragintepinka zavi ome ate'ne. Hagi agra zavi'neteno anage hu'ne, Absalomuga mofavre'nimoke, mofavre'nimoke, Absalomuge, kagri noma eri'na nagrama frisuana knare hugahie, Absalomuga mofavre'nimoke, mofavre'nimoke huno zavira ate'ne.

19 Hagi kini ne'mo'ma Absalomunku'ma asunku huno zavi'ma ateankea mago'a vahem'o'za Joapuna eme asmi'naze. 2 Hagi kini ne'mo'a, nemofonku zavi ate'ne hazanke'ma nentahiza,

mika sondia vahe'mo'zama ha'ma huzamagateraza musezamo'a
rukrahe hige'za, mikomo'za zavi ate'naze. **3** Hagi ana hige'za
ha'ma huzmageterazage'za musema osu'zama zamagazegu'ma
hu'za azaza hu'za mika sondia vahe'mo'za akohe'za rankumapina
efre'naze. **4** Hagi kini nemo'a asenire azana refiteno nemofo
Absalomunkura rankrafage huno, nemamofo Absalomu, nemamofo
Absalomuo huno zavira ate'ne. **5** Hagi Joapu'a kini nemofo
nonte vuno kini nera ome asamino, Menina mofavre zagakane
mofane zagakane a'nekane, henka a'nekanema zamagu'ma
vazuna zankura ontahinka amanahu'za hunka tagazea eriramine.
6 Hagi kagri'ma kahe'za haza vahe zamavesi nezamaneka,
kagri'ma kavesi kantaza vahera zamavaresa huzmantane. Hagi
e'ina'ma hana kavukvamo'a sondia vahete kva vahekane, sondia
vahekanena zamage amne hane. Na'ankure Absalomuma ofri
manigeta tagra maka'mota frutesina, kagra muse hasine. **7**
Hagi menina otinka megia vunka sondia vaheka'a kasunku kea
ome huzamanto. Hagi e'i anama osananana, Ra Anumzamofo
avufi huvempa huankino, mago vahe'mo'e huno meni kenagera
kagranena omanigahaze. Hagi kasefa kareti'ma maninka
enantegati'ma erinka e'nana knazana, meni knazamo'a agatereno
havizantfa hugahie. **8** Anage higeno kini nemo'a vuno kuma
kahante'ma nemania trate umani'negen, kini ne'mo'ma kuma
kahante manine kema mika vahe'mo'za nentahi'za, eza eme
ke'naze. Hianagi anama hige'za Absalomu avaririza vu'naza
sondia vahe'mo'za atre'za seli nonkuma zamirega vu'naze. **9** Hagi
miko Israeli naganofi'mo'za amanage hu'za ke hakarea hu'naze,
kini ne'mo'a ha' vahe timofo zamazampintira tagunevazino, Filistia
vahe zamazampintira taza hu'neanagi menima Absalomunku
koro huno kini ne'mo'a kumara atreno fre'ne. **10** Hianagi

tagra Absalomu kinia azeri otunaganagi, hapi ahazageno fri'ne.
Hagi nahigeta kini ne' Devitina ke hazageno kini trara eme
erino omani'ne? **11** Hagi kini ne'mo'a anage huno pristi netre
Zadokine Abiatanena kea atrezanante'ne, nahigeta kini nera kea
hazageno noma'arera e'ne huta Juda vahera zamasamio. **12** Hagi
tamagra nagri naga manita nagri kora mani'nazanki nahigeta
kea huta onavreta natrageno, aru vahe'mo'za navre'haze?
13 Hagi Amasana ome asami'o, agra nagri kora manine,
nagra huhamprigante'nugenka Joapu nona erinka sondia
vahetera kegava hugahane, nagrama havigema hanugeno'a
Ra Anumzamo'a nahegahie. **14** Hagi Juda nagara Deviti'ma
hiankemo zamagu'a zamazeri rukrehe hige'za, Devitina kea
atrente'za, kagrane maka sondia vahekane ete Jerusalemi eho.
15 Hagi Deviti'a Jerusalemi enaku Jodani tinte ne-ege'za Juda
vahe'mo'za Gilgali kumate ome tutagiha hu'za azahu'za avre'za
Jodani tina eme takahe'za enaku vu'haze. **16** Hagi Gera nemofo
Simei'a Benzameni nagapinti nekino Devitima eme negeno'a,
mago'a Juda naga'ene kini ne' Devitintega ame hu'za urami'naze.
17 Hagi Simei enena rama'a Benzameni nagapinti ne urami'naze.
Hagi anampina Siba'a Soli eri'za ne-ene **15**ni'a ne' mofavre
zaga'ane, **20**a eri'za vahe'ane vu'naze. Hagi kini nemofo avuga
ame hu'za Jodani tina takahe'za vu'naze. **18** Hagi tina takahe'za
vute ete hu'za Deviti nagara zamaza hugantu atre'naze. Hagi kini
ne'mo'ma tima takaheno kantu kazigama vu'zama nehigeno'a,
Gera nemofo Simei'a agafi eme kepri hu'ne. **19** Hagi Simei'a
Devitina amanage huno asmi'ne, Jerusalemi kuma'ma atrenka
nevanke'na hu'noa zankura nagra nasunku huanki ramoka, ana
hazenkeni'a atrenanto. **20** Hagi antahio, nagra kefo navu'nava
hu'na kumi hu'noe. E'ina hu'negu mika Josefe nagapintira

nagra egota hu'na eme hufrufra hugantoe. **21** Hagi Zerua nemofo Abisai'a amanage huno hu'ne, Nahigenka Anumzamo'ma huhamprin'e'ne a nera huhavizana hu'nane? Hagi Simeiga frigahane. Na'ankure Ra Anumzamo'ma huhampri'nea kini nera huhaviza hunte'nane. **22** Higeno Deviti'a Abisaikiznine Joapukiznia amanage huno kenona hu'ne, ama tanagri' zana omne'ne. Hagi na'a higeta nagrira kehara hunenanta'e? Ama'na kna vahe ahefri kna omaneneanki, muse hukna me'ne. Na'ankure nagra menina Israeli vahe kini mani'noanki, mago vahera zamahe ofrigahaze. **23** Hagi Deviti'a rukarehe huno Simeina anage huno asami'ne, onkahegahue. **24** Hagi Soli negeho Mefiboseti'a, Deviti kenaku urami'ne. Hagi Deviti'ma Jerusalemima atreno viregatira Mefiboseti'a agia sese osuno, kukena'a sese osuno, agi'zokara ohareno atregeno me'ne. **25** Hagi Mefiboseti'ma kini ne'ma eme tutagiha huntogeno'a, kini ne'mo agenoka huno, Kagra nahigenka nagranena ovu'nane? **26** Higeno agra kenona huno, ranimoka kagra antahi'nane, nagria nagiamo'a haviza hu'ne. Hagi Jerusalema atrenka vana zupa donkini'a azeri retro hunantenke'na va'neno hu'na eri'za vaheni'gu huana, anara osu'za renavatga hu'naze. **27** Hagi Siba'a natreno vuno kagrira havige ome kasamino, nagrira nazeri haviza hu'ne. Hianagi nagra antahi'noe, kagra Ra Anumzamofo ankero vahe kna hunananki, nazano kagri'ma kavesi'nea zana amne hunanto. **28** Hagi kagra nenfa nagara maka tahe frintesine. Hianagi kagra nagrane ne'zana eme no hunka hanke'na, kagrane ne'zana ne'noe. Hagi ranimoka na'ante mago'a zankura kagrira kantahige'na erigahue. **29** Hagi Deviti'a ana kemofo nona'a huno, Hago rama'a keaga hananki tagano. Soli mopa kagrane Siba'ene amu'nompinti refko huta erigaha'e. **30** Hagi Mefiboseti'a ana kemofo nona'a amanage

hu'ne, Agrake Siba'a ana maka'zana erino. Hagi kagrama mago
hazenkema e'orinka knare'ma hunka kumate'ma anazankura
nagra muse hue. **31** Hagi Bazilai'a Gileati kazigati ne'kino
Rogerimi kumateti Devitina kenaku eramino Jodani tinte eme
tutagiha hunteno, kegava hunteno vu'ne. **32** Hianagi Bazilai'a
80'a kafu huno ozafare'ne. Hagi agra feno nekino Deviti'ma
Mahanamima umanigeno'a, kva hunteno upa'ma hia zana aza
hu'ne. Na'ankure agra tusi'a feno ne' mani'negu anara hu'ne.
33 Anama higeno'a Deviti'a amanage huno Bazilaina asmi'ne,
Tina takahenka nagrane Jerusalemi vananke'na, ome kegava
hugantegahue. **34** Hagi Bazilai'a kenona huno, ramoka, nagra
na'ante Jerusalemia vugahue? Nagra ozafa re'noanki'na za'za
kna ama mopafina omanigahue. **35** Hagi nagra 80'a zagekafu
hugeno, navufgamo'a so'e osu'ne. Hagi kave'ma nene'na e'iza
nenoe hu'na haga'a nontahue. Hagi zagamema hu vahe'mo'zama
zagamema nehazage'na, nagra antahi so'e nosue. Hagi kini
ne'moka nagra eri'za vahekamo'na na'ante kna kamigahue. **36**
Kini ne'moka kagrane Jodani tina takahenka vugahuanagi, za'za
kana ovugahuanki, kagra mago knare kavukva zana huonanto.
37 Hagi natrege'na ete nagra kuma'nirega vu'na ufri'nena,
nenrera nenfa matipi ome asenanteho. Hagi ama'ne eri'za neka'a
Kimhamu'a, atregeno kagrane tina takaheno vinkenka nazano
nagri'ma hunante'naku'ma hanana zana, agri ome hunto. **38**
Hagi Deviti'a kenona huno, Nagra Kimhamu'na avrenugen
Jodani tina takaheno nevanige'na, kagri'ma kavesinia zana amne
huntegahue. **39** Hagi mika vahe'mo'za Jodani tina takahenka
kantu kaziga vazageno'a Deviti'a Basilaina antako hunenteno
asomu ke huntetegeno, ete kuma'arega vu'ne. **40** Hagi Deviti'a
Kimhamu'na avreno ete ti takaheno Gilgali nevige'za, mago'a

Israeli vahe'ene sondia vahe'mo'za avega hu'za vu'naze. **41** Hagi Israeli vahe'mo'za Devitinte e'za amanage hu'naze, nahige'za Juda tafuhe'za katrazagenka, kagra'ene nagaka'anena Jodani tina takaheta neaze? **42** Hige'za Juda vahe'mo'za Israeli vahe'mokizmi ke nona'a hu'za, tamagria nahigeno tamasia nevazie? Tagra rankini nemofona, agri naga mani'none. Hianagi tagrira kini nemo'a mago zana amnea tamigeta nononkeno mago'zana amnea ontami'ne. **43** Anante Israeli vahe'mo'za Juda vahe'mokizmi kenona hu'za, Tagra rama'a tamagrira tamagatereta 10ni'a naganofa mani'nonankita, tagra rama'aza Devitimpintira erigahune. Hagi na'a hu'negeta e'inahu knara hunerantaze? Hagi tagra ese'zana ama kini nera ome avreta e'none. Hianagi Juda naga'mo'za mago'ane hanaveti'za Israeli nagara kehara rezamante'naze.

20 Hagi Benzameni nagapintira mago nera Sibakino, kefo avu'ava'ene ne' mani'ne. Ana nera Bikri nemofokino miko Israeli vahe'mo'za antahisazegu ufe nereno amanage hu'ne, Israeli veamota, Deviti'a tagri nagapinti nera omani'neanki, atreta nontamirega vuta eta hiho. Ama Jesi nemofo'a magore huno erisantima haresuna zana ontamigahie. **2** Hige'za Israeli vahe'mo'za Devitina atre'za Siba'ene vu'naze. Hianagi Juda vahe'mo'za Jodani tintetira Devitina avariri'za Jerusalemi vu'naze. **3** Hagi Deviti'a Jerusalemima uhanatino noma'ama ome enerino nemanino'a, 10ni'a henka a'nema'ama kuma kegava hiho hige'za Jerusalemima mani'naza a'heramina zamavareno mago nompi zamantege'za mani'nageno ne'zane mago'azana nezamino mago'a vahe huzmanteg'za kegava huzmante'naze. Hianagi ana a'nea ome zamanteno omasege'za, ana a'nemo'za kento ane manizaza hu'za mani'ne'za ufri'naze. **4** Hagi Deviti'a amanage

huno Amasana asmi'ne, 3'a knamofo agu'afi kagrane Juda
vene'nea ke hunka amare eme atru hiho! 5 Higeno Amasa'a
vuno mika Juda vene'nea ome kehu atru hu'neanagi, ana
eri'zama ome eriana kini ne'mo'ma hu'nea kna agatereno za'zate
ana eri'zana eri'ne. 6 Hagi Deviti'a amanage huno Abisaiana
asm'i'ne, Absalomu'ma hurante'nea hara agatereno Bekri nemofo
Siba'a menina ra ha' hurantegahie. E'ina hu'negu ru tatreno
mago'a hanavenentake vihu me'ne'nia rankumapi ufre'nigi,
hankave sondia vaheni'a zamavarenka arotago hunka vuo.
7 Hagi Abisaia'ene Joapukea mika sondia vahe'zniane, kini
ne'ma kegavama hunentaza hanavenentake sondia vahe'ene
Kireti vahe'ene Peliti vahe'enena nezamavareke, Jerusalemi
kumara atre'za Bikri nemofo Sibanku ome hakeku vu'naze.
8 Hagi ra have me'nere Gibioni kumate vazageno, anante
Amasa'a ome tutagiha' huzamante'ne. Hagi Amasama azeri
frufra hunaku Joapuma nevigeno'a, ha' kukena atanineno
zaza bainati kazina amu nofipi rusi hu'nea bainati kazimo'a
evurami'ne. 9 Hagi Joapu'a Amasana musenke hunteno,
nenafuga kagra knare hu'nano? Nehuno Joapu'a ome agazafeno
antako hunte'naku'ma hiazza huno tamaga azanura agi' azokate
azeri'ne. 10 Hagi Joapu'ma osi kazima azampima eri'neana
Amasa'a onkeno, kegava osigeno Joapu'a ana osi kazinu rimpa
reraragufegeno rimpamo'a mopafi herafirami'ne. Hagi Joapu'a
ru'enena akasino ore'neanki, magoke zupa Amasana kazina
regeno fri'ne. Joapu'ene negna Abisaikea Bikri nemofo Sibana
rotago huke vu'na'e. 11 Hagi Joapu kazigati mago sondia
ne'mo otino, Amasa'ma frino me'nere oti'neno kezatino, Joapune
Devitintegama ante'naku'ma hanamoka Joapu avaririo. 12 Hagi
Amasa'a ka amu'nompi mase'neno, agra'a kora timpi maseno

hana nerege'za, sondia vahe'mo'za, anante eme oti'ne'za uruha
nehazageno, kezamatia ne'mo'a Amasana kampinti avazu huno
hozafi ome netreno, nakare ku erino refitente'ne. **13** Hagi Amasa
avufgama kampinti'ma eri atrege'za, maka vahe'mo'za Joapuna
avariri'za Bikri nemofo Sibana ahenaku vu'naze. **14** Hagi Siba'a
mika Israeli naganofi'mofo mopafi vugatereno, Abel-Betmaka
vu'ne. Hagi Beriti nagara agri nagaki'za agrane hagerafi'za kuma
agu'a ufre'naze. **15** Hagi Joapu sondia vahe'mo'za Abeli kumara
avazagi kagite'za, kumamofo have kegina tavaontera mopa
kate'za ante marerite'za, anante mani'ne'za ana have kegina
nefragazageno, **16** ana kumapinti mago knare antahintahine
a'mo kezanke huno, Tamagesa anteta antahihi, nagra Joapu'ene
keaga hugahuanki kehinkeno erava'o hino. **17** Higeno ana kema
nentahino, Joapu'ma erava'o higeno, ana amo antahigeno,
Kagra Joapugo higeno Joapu'a kenona huno, Izo nagre. Higeno
ana a'mo'a asamino, eri'za a'kamo'na hanua nanekea antahio,
higeno Joapu'a huno, Izo nentahue. **18** Hagi ana a'mo huno,
Korapara amanage hu'za nehzane, mago'a hazanke'zama
eri antefatgoma hunakura, Abeli kumate kva vahete vunka
keaga eri antefatgo hugahane hunege'za ana hu'za keaga
erinte fatgo nehzane. **19** Hagi tagra Israeli vahe'mota ha'
osu fru vahe mani'nonanki, nahigeta Israeli mopafima agima
me'nea rankumara eri haviza hu'za nehaze. Na'a higeta Ra
Anumzamofo zana eri haviza hu'za nehaze? **20** Higeno Joapu'a
kenona huno, l'o, nagra ama kumara eri haviza hu'za nosue.
21 Hagi Efraemi agona mopafinti ne' Bekri nemofo Siba'a kini
ne' Devitina ha'renteteno freno kumatamifi eman'i'ne. Hagi e'ina
neke avrenamige'na atre'na va'neno. Hagi ana a'mo Joapuna
kenona hunteno, Menintfa ana ne'mofo agenopa akafrita kuma

keginamofo fegi'a mate vanunketa kegahaze. **22** Anante ana a'mo'a knare antahizama'a mika vahe ome zamasamige'za, ana vahe'mo'za Bekri nemofo Sibana ahe'za agenopa'a akafri'za Joapu ome mate vumi'naze. Ana higeno Joapua ufereno sondia vahe'a zamazeri atru huteno huzmanteg'e'za nozmirega nevazageno, Joapu'a kini netega Jerusalemi vu'ne. **23** Hagi Joapu'a ete mika Israeli sondia vahe'mokizmia vugote kvazimi manigeno, Jehoiata nemofo Benaia'a, Kereti vahe'ene Peleti vahe'ma Devitinte'ma kva hunentaza hanavenentake sondia vahe'tamimofo kva ne' mani'ne. **24** Hagi Atoramu'a kazokzo eri'zama e'neri'za vahete kva mani'ne. Hagi Ahiruti nemofo Jehosafati'a kamani avontafe kegava hu'ne. **25** Hagi Siba'a avoma kreno eri fatgo hu eri'za kegava hu'ne. Hagi Abiatake Zadokukea pristi netre mani'na'e. **26** Hagi Jaira nagapinti ne Ira'a, Devitina agri'a pristi ne' mani'ne.

21 Hagi Deviti'ma kini mani'nea knafina, Israeli mopafina 3'a kafumofo agu'afi agatonto kna fore hu'ne. Higeno Deviti'a Ra Anumzamofona nunama huno antahigegeno, Ra Anumzamo'a Deviti nunamuma'arera kenona hunteno, e'inahu zama fore nehiana Soli'ene naga'amo'zama Gibioni vahe'ma zamahe fri'haza zante nona huno ama ana knazana efore nehie. **2** Higeno Gibioni vahera Deviti'a kehige'za agrite azageno kea zamasami'ne. Hagi ana Gibioni vahera zamagra Israeli vahera omani'nazanki Amori vahe'mokizmi zamagehe'za mani'naze. Hagi Israeli vahe'mo'za kora huvempa hu'za Amori vahera ozmahegosune hu'za hu'nazanagi, Soli'a agra zamahe vagare'ne. Na'ankure agra Israeli vahe'ene Juda vahe mopama mika kegava hania kazigati anara hu'ne. (Josua 9:3-27) **3** Hagi Deviti'a Gibioni vahe'mokizmia zamantahigeno, Soli'ma hu'nea zantera nagra

inankna hu'na Soli kumimofo nona hu'na apasentanenkeno
Ra Anumzamo'a asomura hurantegahie? 4 Higeno Gibioni
vahe'mo'za amanage hu'naze, Soline agri nagapintira silvane
golinena e'orige mago vahera Israeli nagapintira ahe frigera tagra
osugahune. Anage hazageno Deviti'a ete zamantahigeno, Hagi
nagra na'a mago'a zana huramantegahue? 5 Hige'za zamagra
kinimofo kenona hu'za, Soli ana zana huranteno ama mopafintira
tahe fanene hanigeta Israeli vahe mopafina omanisunegu ana
antahintahia retro hu'ne. 6 Ana hu'negu Soli nagapima mofavre'o,
negeho'ma mani'ne'niana 7ni'a avreramigeta, Soli kumate Gibioni
Ra Anumzamofo avuga ome zamaheta hantimaneno. Hazageno
kini ne'mo'a zamasamino, Nagra avre tamigahue. 7 Hagi Deviti'a
Jonatani'ene huvempa hu'negu nentahino, Jonatani ne'mofo Mefi-
boseti'na avre franokino Amori vahera avre ozami'ne. 8 Hianagi
Aia mofa Rispama Solinte'ma mani'neno, tarema zanante'nea
mofavrererare Armonine ru Mefibosetinena avre'zami'ne. Ana
nehuno Mehola kumateti ne' Barzilai nemofo Adrielinte'ma Soli
mofamo'ma Merabu'ma mani'neno kasezmante'nea 5fua ne'
mofavrereramine zamavareno, 9 ana 7ni'a vahera Gibioni vahera
avrezamige'za, Ra Anumzamofo avuga zamanankempi nofi
hararivazi'za agonafi zamahe fri'zage'za, bali ne'zama hamare
knama erigafa haza knare fri'naze. 10 Hagi tare mofavrereremofo
nezanarerera Rispa'a asunku kukena erino vuno ana tva'onte
me'nea have agofetu ome rutareno tafe hu'ne. Hagi bali ne'zama
hamare knareti vuno ko knafima ufre'neana hanine zagenena
agra ana vahe'mokizmi zmauvufaga kegava hu'neno, atrege'za
namazagane afi zagagafamo'za zamavufaga eme one'naze. 11
Hagi Solina henka nenaro Aia mofa Rispama hiazamofo kema
Devitima nentahino'a, 12 agra Jabase kumate Giliati kaziga vuno,

kora Filistia vahe'mo'za Soline nemofo Jonatanigizani Gilboa
agonafi znahete'za, zanavufga eri'za maka vahe'mo'zama atruma
nehazafi Jabes-Giliati ome hanti znante'naze. Henka Jabesi
vahe'mo'za oku'a vu'za zanavufama ome eri'za asente'nafinti
zaferina zani'a omerinaku vu'ne. **13** Hagi Deviti'a eri'za vahe'a
huzmantege'za vu'za, Soline nemofo Jonatanigizni zaferinane,
Gibioni vahe'mo'za zamahe'naza 7ni'a vahe zaferina omeri'naze.
14 Ana hute'za Benzameni naga mopare vu'za Soli naga'ma
asezmante'naza mopa agentega Zela kumate nefä Kisima
asente'nefi ome asezmente'naze. Hagi ana maka kema kini
ne'mo'ma zamasamia zama huvarageno'a, Ra Anumzamo'a
nunamuzamia antahizamino, ana mopafima zamaga tontozama
me'neana eri atre'ne. **15** Hagi ete mago'ané Israeli vahe'mo'za
Filistia vahe'enena hara hu'naze. Hagi hara hu'za nevazageno,
Deviti'a asafeku huno zaferina omne amne hu'ne. **16** Hagi
mago Filistia ha' nera agi'a Isbibenobu'e. Agra tusinasi Refaimi
vahe'mokizmi nezamagehokino, agra Deviti ahenaku hu'ne.
Hanki ana ne'mofa keve agona'a bronsireti tro higeno, kna'amo'a
3kilo naza hu'nea eri'neno, kasefa bainati kazine eri'ne. **17**
Hianagi Abisaia'a Devitina eme aza huno ha' huno ana Filistia
ha' nera ahe'ne. Ana hutege'za sondia vahe'mo'za Devitina
hanave huvempa ke hunte'za, kagra hatera tagranena vano
osugahane. Hagi kagra Israeli vahe'motarera lampe tavi kna
hunka mani'nananki, atre'nankeno ana tavimo'a asura osugahie.
18 Hagi ete henka mago Filistia vahe'enena Gobi kumate
hara ome hu'naze. Hagi ana hapina Sibekai'a, Husa mopareti
ne'mo, Refaimi tusinasi nagapinti nera Sapuna ahe'ne. **19**
Hagi ete mago'ané Gobi kumate Filistia vahe'enema ha'ma
ome hazana, Elihanani'a Zaeli nemofo Betlehemu kumateti

ne'mo Gati nagapinti Goliati nefuna ahe fri'ne. Hagi ana nemofo kevemo'a kukena hati masinimofo zafa'agna hu'ne. **20** Hagi ete'za mago hara Gati kumate ome hu'naze. Hagi anampina Goliati kna ne' krefa mani'neana 6'a agigogi, azankogi huno hunte'neankino miko 24'a agigo azankone me'ne. Hagi agranena Refaimi tusinasi vahe'mokizmi nezmageho'e. **21** Ana ne'mo'a Israeli vahera kiza zokago ke hunezamantegeno, Deviti nefu Simei nemofo Jonatani ana nera ahe fri'ne. **22** Hagi e'i ana 4'a vahera Gati kumateti Refaimi tusinasi nagapinti vaheki'za Deviti'ene, sondia vahe'amo'za zamahe fri'naze.

22 Hagi Ra Anumzamo'ma maka ha' vahe'a zamazampinti'ene Soli azampinti'enema aguma'vazigeno'a, Deviti'a ama zagame huno Ra Anumzamofona agi'a hentesaga hu'ne. **2** Amanage huno zagamera hu'ne, Ra Anumzana nagri hanave havene, nagri vihune, nagri naza huno naguvazi nere. **3** Ra Anumzanimo'a nazeri frakino nagu'vazi haveni'a mani'neno, hankoni'a mani'ne. Agrake hanave kuma'n'i'a mani'neno, fraki kuman'i'a mani'ne. Agrake nagria nahokeheno nagu'vazi nere. Nagri nahokenka naguvazi ne'moka hazenke zampintira nagura vazi'nane. **4** Ra Anumzama ra agima eriga Ra Anumzamofontega nazama hinogura kezanke hugeno, ha vahe'mokizmi zamazampintira naza hu'ne. **5** Fri'zamo'a tusi'a hagerimo kranto kranto nehuno eme rugaginantea kna nehigeno, knazamo'a ti hageno ne-eno nazeri anakriaza nehie. **6** Hagi frizamo'a nokfna huno nazeri anakriaza nehuno, krifumo nazeria kna hu'ne. (**Sheol h7585**) **7** Narimpa knazampi mani'nena Ra Anumzamofona naza hinogu krafage huntogeno, Agra noma'afi mani'neno krafa ke'ni'a antahino naza hu'ne. **8** Hagi mopamo'a imi erino tore higeno, monamofo tra'mo'a tore huno kaneki'voki hu'ne. Na'ankure Ra Anumzamofona rimpa

ahe'ne. 9 Agona kampintira toki higeno, agipintira tevemo hagna
hagna huno maka'za tefanene nehigeno, rimpama ahezamo'a
tankanuzare'ma tevema teankna hu'ne. 10 Hagi mona eri anagino
eramigeno, haninentake hampomo agamofo fenka kaziga me'ne.
11 Haren vano nehia hanavenentake Serabim ankeromofo
agofetu manino eankna nehuno, zahomofo agekonare manino
ne-e. 12 Hanimo'a nonka'agna higeno, koma avrenoma ne-ea
tapari hampomo'a kazeri anovazi'ne. 13 Hagi mani'nampintira
masanentake higeno, tevemo ruragareno vuno eno nehie. 14 Ra
Anumzamo'a monafinka mani'neno kema hiazamo'a monagemo
hiaza nehigeno, Marerisa Ra Anumzamo'a ke'a huama nehie.
15 Kopsina kevereti ha' vaheka'a zamahe panani nehunka,
kopsinareti rumarave hunka ha' vaheka'a zamahanke'za panini
hu'za fre'naze. 16 Hagi Ra Anumzamo'a ha' vahera arimpa
ahezamanteno zamazeri korigeno, agonagampinti asimumo'a
hagerina aheranegeno mopamofo agafa'ama azeri'nea zamo'a
ama hu'ne. 17 Hagi agra monafinkati azana antehenkateno ti
amu'ompinti navre'ne. 18 Hagi zamavesra hunante'za hanavema
ati'za ha'ma hunenantaza vahepintira naza hugara osugeno,
nagu'vazino navre'ne. 19 Hanaveni'a omanegena knazampima
ufroa knafina, ha' vahe'nimo'za hara eme hunantageno, Ra
Anumzmo'a nagu'vazino navre'ne. 20 Agra naza higena
knare hu'na mani'noe. Agra avesinante'negu huno nagura
vazino navre'ne. 21 Nagra fatgo navu'navma huazante Ra
Anumzamo'a avesinante'ne. Nagrira hazenkeni'a omnenegu
huno Ra Anumzamo'a mizana nami'ne. 22 Na'ankure nagra
Ra Anumzamofo ka nevariri'na, kefo avu'avara hu'na Ra
Anumzamofona namage'na huomi'noe. 23 Na'ankure kasege'a
nasenifi ante'ne'na, ana kasege'ane tra ke'anena rutagre'na

namagena huomi'noe. **24** Ra Anumzamofo avurera nagra mago hazenkea osu'na, kumi'ma huzankura kegava nehu'na kumira osu'noe. **25** E'ina hu'na fatgo hu'na nagra manua zante Ra Anumzamo'a mizana nenamino, agri avure'ma mani fatago hu'na manua zante knare avu'avara hunante'ne. **26** Kagri kema amage antaza vahera knare hunezmantenka, mani fatgoma Kagrite'ma haza vahera, knare kavukva hunezamantane. **27** Fatgo zamavu'zamava'ma haza vahera, fatgo kavukava hunezamantane. Hianagi kefo zamu'zamavama nehaza vahera, zamazeri henkami neutrane. **28** Kagra zamufga anteramiza maniza vahera zamagu nevazinka, zamufga ra nehaza vahe'mokizmia, zamazeri anteneramine. **29** Ra Anumzamoka Kagra nagri tavi masani'e. Kagra remsa hunantenka, hanizana nagritetira eri neutrane. **30** Kagri hanavefi ha' vaheni'a hara huzmageteregahue. Kagri hanavefi rankumofo kegina haguteregahue. **31** Ra Anumzamoka Kagri kavukava zamo'a fatgo higeno, mika kagrama huvempa hu'nana kemo'a tamage naneke me'ne. Hagi iza'zo kagripima efraki'za vahera hankozami nemanine. **32** Na'ankure magora kagrikna Anumzana omani'neanki Kagrake Ra Anumzana mani'nane. Kagrake hankave havea mani'nane. **33** Anumzamoka Kagra fraki havegani'a mani'nanankinka, makazampina naza hanke'na fatgo kantera nevue. **34** Kagra nagri nagia azeri dia afumofo agiagana nehunka, nazahankena mareri saga huno roro hunte'nea agonarega vano nehue. **35** Kagra ha'ma hanugura nazamofo rempi hunaminke'na, bronsireti'ma tro hu'naza atia amne avazuhu kararapena nehoe. **36** Kagra nagu'vazi hankoni'a mani'enka, Kagra vahenimofo zamavufina nazeri ra vahera nante'nane. **37** Kagrake kama vu'noa kana eri ra hankeno, nagiamo'a tanafara osu'ne. **38** Nagra ha' vaheni'a kazigazi hu'na

zamarotago hu'na hara huzamante'na zamahe vagare'noe. 39
Nagra kazinteti zamahe nefrina, naganu zamare hapa atuge'za
oraoti'naze. 40 Kagra naza hunka hanave nemaminka, ha'
vahe'ni'a nazampi zamavarentanke'na ha' huzamante'na hara
huzamagatere'noe. 41 Kagra ha' vahe'nimokizmia zamazeri
rukrahe hanke'za atre'za nefrage'na, ha'marenantaza vahera
zamazeri havizana hu'noe. 42 Zamagra zamazahu vaheku
kea nehazanagi mago'mo'e huno eme zamaza osu'ne. Hagi
zamagra Ra Anumzamofonku tazahuo hu'zma antahige'nazanagi,
Agranena zamaza osu'ne. 43 Nagra zamarehapatuge'za zamagra
kugupa se'naze. Nagra zamazeri'na zamareentrako huge'za,
hana kna hu'naze. 44 Vahe'nimozama haframa hunantaza
vahepintira, naza hu'nane. Kagra kva ne' nazeri ontinke'za,
vahe'mo'za nagri kvafi manizageno, ke'na antahi'na osu'noa
vahe'mo'zanena nagri kvafi mani'naze. 45 Rurega vahe'mo'za
nagri nagenkema nentahi'za, koro hu'za nagri agoraga mani'naze.
46 Rurega vahe'mokizmia hanavezami'a omaneno zamahirahi
nerege'za, frama'ki'za mani'naza kumazamia atre'za e'naze.
47 Ra Anumzamo'a kasefa huno manine. Nagra agi'a erisga
hugahue. Agra naguvazi hankave haveni'e. Agri agi ahentesga
hanune. 48 Agra nahokeno havizama hunantaza ha' vaheni'a
zamahe'ne. Hagi ruga'a kumara nagri kvafi ante'ne. 49 Kagra
ha' vahe'mokizmi zamazampintira nagu'vazinka navre'nane.
Hanavenentake ha' vaheni'amofo zamazampintira Kagra naza
hunka nagu'vazi'nane. 50 E'ina hu'negu ruga'a vahe'mokizmi
amu'nompina muse hu'na Ra Anumzamoka Kagri kagia hentesga
hugahue. 51 Agra'a kini manio huno huhamprinantege'na
tusi'a hatamina agatere'na kinia mani'noe. Maka knafina Agra

avesinante'neankino, henkama nagripinti fore'ma hanaza vahera
zamavesinte vava hugahie.

23 Hagi Deviti'na huvagare naneke'a ama'ne, Nagra Jesi
nemofo Devitina Ra Anumzamo'a knare hunanteno ra
najima nami'nemo'ne. Jekopu Anumzamo masave frenanteno
huhampri nantenemone. Nagra rama'a knare'nare zagametamina
krente'noge'za Israeli vahe'mo'za zagamema nehaza ne' Devitine.

2 Hagi Ra Anumzamofo Avamumo nagripi huvazino keaga
nehigeno, Ra Anumzamofo kemo nagitera me'ne. 3 Hagi
Israeli vahe'mota Ra Anumzamo'a frakirante havegino, amanage
huno nasami'ne, mago vahe'mo'ma fatgoma huno'ma vahe'ma
kegava huzmantesiana, Anumzamofonku koro hunenteno,
vahera kegava huzmantegahiankino, 4 ana avu'avazamo'a
nanterama zage hanatino marerino remsa hiankna nehuno,
nanterama monare'ma hampoma omnegeno, ko'ma ruteno
rusegeno zagemo'ma remsama higeno, agata tra'zamo'ma
mopafinti tretre huno hageankna nehie. 5 Tamage huno Ra
Anumzamo'a nagri nagamokizmia zamazeri hanavetigahie.
Na'ankure nagrira mevava hania hanave huvempa ke Agra
hunanteneankino, agra ana huvempa kea ruotagreno, makazana
erinte fatgo nehuno, kegava hu'nenigeno makazamo'a knare
hugahie. 6 Hagi kefo zama nehaza vahe'mo'za ave'ave
trazankna hu'nazage'za vahe'mo'za zanefi atrazankna hugahaze.
Na'ankure ave'ave trazana mago vahe'mo'a azantetira azeriga
osu'ne. 7 Hianagi ana ave'ave trazama avako'ma hanimo'a,
aeniretiro azotareti rezanefino eri atru huteno, tevefina kre fanane
hugahie. 8 Hagi ama'i Devitina harafa sondia vahe'amokizmi
zamagi'e, Josef Basebeti'a Takemoni nagapinti nekino 3'a sondia
vahe'mokizmi kvazmi mani'ne. Hagi mago hapina agra 800'a ha'

vahe'a kevenura zamahe fri'ne. **9** Ana 3'a sondia vahe'mokizmi zamefira anante kvama mani'neana, Eliesakino, agra Ahohi nagapinti ne' Dodo nemofo nekino, mago kna Filistia vahe'ene Israeli vahe'enena hara hu'za nehazageno, Israeli vahe'mo'za koro atre'za nefrageno, agra ana zupa Deviti'ene oti'neno hara hu'ne. **10** Hagi Filisti'a vahera hara hunezmanterego azamo'a karokino bainati kazinte azeri antarako hu'ne. Hagi ana zupa Ra Anumzamo'a ra hanave amigeno hara Filistia vahera huzamagatere'ne. Hagi koroma fre'naza Israeli sondia vahe'mo'za ete e'za, zamahege'za fri'naza Filistia sondia vahe'mokizmi fenozana eme zog'i'naze. **11** Hagi mago sondia kva nera Harariti ne' Age nemofo Samakino, mago zupa Filistia vahe'mo'za sondia vahemzi Lehie nehazafi zamazeri atru hu'naze. Hagi anama zamazeri atru hu'nafina tusi'a lentoli kohe hoza me'ne. Hagi anama hazage'za Israeli vahe'mo'za atre'za Filistia vahe'mokizmi koro fre'naze. **12** Hianagi Sama'a ana hozamofo amu'nompi oti'neno hara huno Filistia vahera zamahe'ne. Hagi ana zupa Ra Anumzamo zamaza higeno, tusi'a hara agetere'ne. **13** Hagi ne'zama vasage knafina 30'a hanavenentake sondia vahepinti 3'a kva vahe'mo'za Devitima mani'nerega Adulamu havegama me'nerega vu'naze. Hagi Filistia sondia vahe'mo'za Refaimi agupofi seli nona ki'za mani'naze. **14** Hagi Betlehemu kumara Filistia ha vahe'mo'za eriza mani'nazageno, Deviti'a frokino havegampi mani'ne. **15** Hagi Deviti'a anampinka frokino mani'negeno tinkura tusiza huno avesigeno amanage huno hu'ne, Betlehemu kuma'mofo kahanteti mago'a vahemo tina afino eme namige'na nosina knare hisine! **16** Hige'za 3'a hanave sondia vahe'mo'za oku'a kafona ante'za nevu'za Filistia vahera ha'huzamante'za vu'za, Betlehemu ku'ma kegina tva'onteti

tina ome afi'za e'naze. Ana tima afi'za eri'za Devitinte'ma ageno'a, agra ana tina oneno, erino Ra Anumzamofontega ofa huno mopafi tagitre'ne. **17** Ana nehuno amanage hu'ne, Ra Anumzamoka ama timo'a, frizankura ontahiza tima ome afi'za e'naza vahe'mokizmi korankna hu'neankina onegahue. Anage nehuno Deviti'a ana tina onene. Hagi e'ina hu'za vahe'mo'zama osugazana, 3'a sondia vahe'mo'za hu'naze. **18** Hagi Zeruia'e nehaza a'mo'a Joapune Abisaine kasezanante'neankino, Joapu nefu Abisai ana 30'a sondia vahe'mokizmi kva'zimia mani'ne. Mago ha'pina agra 300'a ha' vahe keve'anura zamahe fri'ne. Hagi agri agi agenkemo'a ana 3'a vahe'mokizmi zamaginena magokna hu'ne. **19** Hagi ana 30'a vahepin agra ugota huzmanteno rankva mani'ne. Hianagi ana 3'a vahepin agrira ohampri'naze. **20** Hagi Jehoiada nemofo Benaia'a agra Kabziri kumateti kore osu rama'a zupa hanavetino ha' nehia nere. Hagi agra Moapu sondia vahepi vugota hu'na'a netre nezanaheno, hampo ko' atuno krari'nea knafi kerifi uramino raioni ahe'ne. **21** Hagi agra mago zupa Isipi ha' nera marerisa ne' ahe fri'ne. Hagi ana Isipi nera vimago knonu aheno keve'a hanareno, ana kevenu ahe fri'ne. **22** Hagi ama'nazana Johoda nemofo Benaia hu'nea zamo agimo'a 3'a sondia vahe'mokizmi zamagimo'ma hu'neaza huno magozahukna hu'ne. **23** Hagi 30'a sondia vahepintira agri agimo'a marerine. Hianagi agrira 3'a nagapina avre onte'naze. Hagi Deviti'a agra'a avufgare kegava hania ne' avrente'ne. **24** Hagi ama'i 30'a vahe'mokizmi zamagima krente'nazana ama'ne, Joapu nefu Asaheliki, Betlehemu kumateti Dodo nemofo, Elhaniki, **25** Harodi kumateti netrena Samake Elikake, **26** hagi Heresi'a Palti kumateti ne'ki, Ikesi nemofo Ira'a Tekoa kumateti neki, **27** Abiezzeri'a Anatoti kumateti neki, Mebunaia

Husatati kumateti nere. **28** Hagi Zalmoni'a Ahohaiti kumateti neki, Mahalai'a Netofa kumateti nere. **29** Helebi'a Ba'ana nemofokino Netofa kumateti neki, Itaia'a Ribai nemofokino, Benzameni nagapinti nere. **30** Hagi Benaia'a Piratoni kumateti neki, Hidai'a Gasi agona krahopinti nere. **31** Abialboni'a Arapu kumateti neki, Azmaveti'a Bahurimi kumateti nere. **32** Hagi Eliaba'a Salboni kumateti neki, Jaseni mofavrezagagi, Jonataniki, **33** Harari kumateti ne' Sara nemofo Ahiamuki, **34** Makati kumateti Ahasbai nemofo Eliferetiki, Giloni kumateti ne' Ahitoferi nemofo Eliamuki, **35** Kameri kumateti ne' Hezroki, Arba kumateti ne' Paraie. **36** Zoba kumateti ne' Natani nemofo'e Igaliki, Gati kumateti ne' Baniki, **37** Amoni kumateti ne' Zelekiki, Beroti kumateti ne' Neharaikino agra Zeruia nemofo Joapu hanko'a reheneria neki, **38** Itri kumateti netrena Irake Garepikegi, **39** Hiti kumateti ne' Uriaki hu'za maka 37ni'a sondia vahemani'naze.

24 Hagi mago'ane Ra Anumzamo'a Israeli vahera arimpa ahenezamanteno, Devitina antahintahi amino Israeli vahene'ene Judia vahera nama'a mani'nafi ome hamprio hu'ne. **2** Higeno kini ne'mo'a sondia vahete kva ne Joapuna hunteno, kagra ana mikä Israeli naga'mokizmi nompi vunka noti kaziga Dani kumateti eri agafa hutenga, saoti kaziga Berseba kumate vunka vahera hamprige'na nama'a vahera mani'nazafi ke'na antahil'ha ha'neno. **3** Hianagi Joapu a kenona huno, Kini ne'moka nagri'ma navesiana Ra Anumzankamo'a vahera zamazeri rama'a hanige'za 100'a zupa rama'a hu'za amama mani'nazaza hu'za fore hanaze. Hagi anazama fore'ma haniazana kagra kasefa hunka mani'nenankeno fore huzanku nave'hesie. Hagi na'a agafare amanahu zana kagra hu'za nehane? **4** Hianagi kini ne'mo'a ana ke'a refako huno onke ome hampriho hige'za

Joapu'ene sondia vahe'mo'za vahe ome hamprinaku vu'naze. 5
Hagi zamagra Jodani tina takahē'za Aroeri kuma'mofo sauti
kaziga agupofi seli no ome ki'za mani'ne'za Gati vu'za rugitagi'za
Jazeri vu'naze. 6 Hagi zamagra Giliati vute'za anantetira Hiti
vahe mopafi Kadesi vu'za Dani ehanatite'za, Danitira rugagi'za
Saidoni vu'naze. 7 Anantetira rukrahe hu'za vihuma me'nea
kumate Hivine Kenani kumate ete'za, henka sauti kaziga Judane
Bersibanena vu'naze. 8 Hagi 9ni'a ikanki, 20'a zage knafi
maka kaziga vano huza vahera hamprite'za ete Jerusalemi
vu'naze. 9 Hagi Joapu'a anama ome hampri'nea vahe'mokizmi
kea Devitina asamino, Kazinteti'ma ha'ma huga vahera 800
tauseni'a Israeli vahepina manizageno, 500 tauseni'a vahe Juda
nagapina mani'naze. 10 Hagi Deviti'a vahe'ma hamprite'noa
arimpagna hu'ne. Ana huteno Ra Anumzamofona antahigeno,
Nagra vahe'ma hampruana tusi'a kumi hu'noe. Hagi eri'za
vahekamo'na nagra neginagi navu'nava hu'noanki kumini'a eri
atrenanto. 11 Hagi Deviti'a masenefinti anante nanterana otigeno,
Ra Anumzamo'a Deviti kasnampa ne Gatinte eno, anage huno
kea atrenteno, 12 Ra Anumzamo'a amanage hie hunka Devitina
ome asamio, Kazeri havizama hanua kea 3'a kankamumpi
kasamiga huanki, anampinti mago'mofo huhamprige'na kazeri
havizana ha'neno. 13 Anage huno asamigeno Gati'a Devitina
ome asamino, 7'a kafufi agatonto kna fore haniegua kavesifi?
3'a ikampi ha' vahe'mo'za ha'huramanteno kna tamisifi, 3'a
zageknafi kria atrenugenno tamazeri haviza haniegua kavenesie?
Hagi e'i anampinti mago knazamofo huhamprigena, anama
hanamofo Ra Anumzamofona ome asamigahue. 14 Hagi
Deviti'a Gatina asamino, nagra tusi'a narimpagna huanki, Ra
Anumzana asunku Anumza mani'neanki atregeno nazano

hunaku'ma hanuno'a, agra'a tazeri havizana hino. Hagi ha'
vahe'mokizmi zamazampina tavarente'na tazeri havizana osiho.

15 Hagi Ra Anumzamo'a ana nanterana tusi'a hazenke atregeno
3'a zage knafi noti kaziga Daniti agafa huteno, vuno sauti
kaziga Berseba vigeno ana maka mopafina 70 tauseni'a vahe
zamahe fri vagare'ne. **16** Hagi vahe'ma zamahe fri ankeromo'ma
Jerusalem kuma'ma erihaviza hunaku retro nehigeno, Ra
Anumzamo'a asunku nehuno, antahi'zama'a eri rukrahe huno,
ana ankeroa asamino, kazana atro huno hu'ne. Ana zupa ko
ankeromo'a Jerusalem tavaonte Jebusi ne' Araunama witi
akruma neharere mani'negeno anage hu'ne. **17** Hagi Devitima
ankeromo'ma vahe'ma nezamahegeno negeno'a, anage huno Ra
Anumzamofona asami'ne, Nagra'a kumira hu'na havi navunavara
hu'noe. Hianagi ama'na vahe'mo'za sipisipigna huza kezmia
omne'neanki nankna hazenke hu'nazagenka zamahe'za nehane?
Muse hugantoanki nagri'ene nagani'ane tazeri haviza huo. **18**
Ana higeno Gati'a ana kna zupa Devitinte eno anage huno
asami'ne, marerinka Jebusi ne'ma Arauna'ma witi akru'ma
neharere Ra Anumzamofono kresramnavu ita ome retro huo.

19 Anage higeno, Ra Anumzamo'ma Gati'ma asamia kante
anteno anaza ome retro hunaku, Deviti'a marerino vu'ne. **20**
Hagi Arauna'ma kegeno kini ne'mo'ene vahe'amozama agrama
mani'neregama azageno'a, Arauna'a uramino kini ne'mofo avuga
avugosaregati mopafi upri huno ra agi ami'ne. **21** Ana huteno
Arauna'a anage hu'ne, na'a higenka rana kini nemoka eri'za
vaheka'monarega neane? Higeno Deviti'a kenona huno, witi
akaru'ma neharana mopa mizasena Ra Anumzamofontega
Kresramanavu ita tro hanugen, amama zamazeri haviza nehia
hazenkea omnegahie. **22** Anante anage huno Arauna'a Devitina

asami'ne, ranimoka amne ama ana mopa erinka kagrama antahinankeno knare'ma haniazana hugahane. Hagi kresramna vu zana kaona megeno, rezahema huza witima refuzafunepaza zafane, kaomofo anankempima nentaza karenamare zafanena erinka tevea kregahane. **23** Hagi kini ne'moka ama mika zantamina nagra negamue, nehuno Arauna'a mago'ane anage huno kini nekura hu'ne, Ra Anumzana, kagri Anumzamo'a kagrama banana ofarera muse nehuno antahigamisie. **24** Hianagi kini ne'mo'a anage huno Araunana asami'ne, Nagra mizasena kagripintira erigahue. Hagi miza ose'nenua mopafina Ra Anumzana nagri Anumzamofona kre fanene hu ofa amnea huontegahue. Anage nehuno Deviti'a witima neharea mopane bulimakaonena 50'a silva zagoreti mizase'ne. **25** Ana huteno Deviti'a anante kresramna vu ita tro huteno, kre fanene hu ofane, rimpa fru ofanena hu'ne. Ana higeno Ra Anumzamo'a nunamuzmia nentahino, ana mopafintira knazana eri amne hu'ne.

1 Kva

1 Kini ne' Deviti'ma ozafa regeno avufamo'a tusi zasi higeno, rama'a franke eri'za eme kofinte'nazanagi, ana franketamimo'a azeri amuhoa osu'ne. **2** Ana'ma higeno'a eri'za vahe'amo'za amanage hu'za asami'haze, Vene omase'nesia mofa avreta esunkeno kegava huneganteno, kasumpina mase'neno kazeri amuho hanie. **3** Anage nehu'za Israeli mopamofona mika kaziga knare mofa'nema kesagu hake'za vano hu'naze. Hagi Abisagi'e nehaza mofa Sunemi kumate ome kefore hute'za, avre'za kini nete e'naze. **4** Hagi ana mofara hentofa mofakino, kini nera kegava hunte'neanagi, kini ne'mo'a ana mofara monko'zana huonte'ne. **5** Hagi ana knafina Deviti nemofo Adoniza'a Hagiti'e nehia a'mo kasente'nea mofavremo kini mani'nakure huno agra'a erintesga nehuno, karisiramine hosi afu agumpima vanoma nehaza vahe'ene, 50'a vahe'enena ugotama hunte'za kvama huntесagu zamazeri retro hu'ne. **6** Hagi Kini ne' Deviti'a magore huno Adoniza'ma havizama nehigeno'a azeri fatgohu kea huno, Nagafare ama zana nehane huno antahi onke'ne. Hagi Adoniza agi'agonamo'a fana ohesa nekino, Absalomu kasenteteno, ana amefi'a kasente'nea ne' mani'ne. **7** Hagi Adoniza'a azama hanakeno'ma kinima mani'sigura, Zerua nemofo Joapune, pristi ne' Abiatanena oku'a nanekea retro hute'za Adonizana nevaririke aza hu'na'e. **8** Hianagi pristi ne' Zadoki'ma, Jehoiada nemofo Benai'ma, profeti ne' Neteni'ma, Simeima, Reima, Deviti avufgare kva nehaza sondia vahe'mo'zanena Adonizana aza osu'naze. **9** Hagi En-Rogeli nehaza tinkenare Zoheletie nehaza havere Adoniza'a sipisipi afu'tamine, ve bulimakao afutamine, afovage bulimakao afu anentataminena aheno kre sramana nevuno, afu'aganahe'ine,

Deviti mofavreramine, maka Juda kumate kva vahetamine, kini ne'mofo eri'zama e'neriza vahetaminena kehige'za omeritru hu'naze. **10** Hianagi kasnampa ne' Neteni'ma Benaiama, kini ne'mofo avufgare kva vahe'ma, nefu Solomoninena kea hige'za anama Kresramanama virera ome'haze. **11** Hagi Adoniza'a ana'ma nehigeno'a, Neteni'a Solomoni nerera Batsebante vuno amanage huno ome antahige'ne? Hagiti nemofo Adoniza'a kinima mani'neana, rantimo Deviti'a antahigeno, kagranena antahinano? **12** E'ina hu'negu menina nagrama kasaminua ke'ma antahinka amagema antesunka, kagra kagu nevazinka negamofo ne' Solomoninena agu'vazigahane. **13** Hagi Kini ne' Devitinte ame hunka vunka amanage hunka ome asamio, ranimoka kini nera kagra ko huvempa hunka amanage hu'nane, negamofo Solomoni nagrama frisugeno'a kinia manineno kini trairera manigahie hunka hu'nane. Hagi nahigeno menina Adoniza'a kinia fore nehie? **14** Hagi anagema hunka kini ne'ma nesaminanke'na, nagra kamefi efre'na, ana nanekeka'a eri hankaveti kea hugahue. **15** Hagi anagema higeno'a Batseba'a kini ne'mo'ma nemasefinka umarer'i'ne. (Hagi kini ne'mo'a ozafaregeno Sunemu kumateti a'mo Abisaki kegava hunte'ne.) **16** Hagi Batseba'a umarerino kini ne'mofo avuga avugosaregati umase'ne. Anama higeno'a kini ne'mo'a amanage huno antahigene, Na'anku kavenesie? **17** Anagema higeno'a Batseba'a amanage huno kenona hu'ne, ranimoka kagra Ra Anumzana Anumzanka'amofo avufi ko huvempa hunka amanage hu'nane, Negamofo Solomoni kinia mani'neno, kini tra'nirera manigahie hunka hu'nane. **18** Hianagi antahio, menina Adoniza'a ko' kinia fore huno mani'negenka, ranimoka kagra ontahinane. **19** Hagi agra ko rama'a bulimakao afutamine, afovage bulimakao anentatamine, sipisipi afutaminena

aheno kre sramana nevuno, maka kini ne'moka mofavreramine, pristi ne' Abiatane, sondia vahe'mofo ugagota kva ne' Joapunena zamagia hige'za anampina ne'zana ome nene'za musena nehaze. Hianagi eri'za neka'a Solomonina agia osu'ne. 20 Hagi menina kini ne' ranimoka antahio, iza kinia azeri otisankeno kagri nona erigahie hu'za nehu'za, maka Israeli vahe'mo'za kagri kavufi kete'za mani'naze. 21 Hagi menima kagrama ana'ma osu'nenka frisankeno'a nenamofo Solomonine nagri'enena kumazaza vahekna hu'za tahe frigahaze. 22 Hagi Batseba'ma ana nanekema zahufama nesamigeno'a kasnampa ne' Neteni'a kini ne'ma nemasefinka efre'ne. 23 Hagi Neteni'ma efregeno'a eri'za ne'mo'a kini nera asamino, Kasnampa ne' Neteni'a kagenaku ama'na ne-e huno asamigeno, Neteni'a eazamo kini ne'mofo avuga avugosaregati enemaseno, 24 amanage hu'ne, Rania kini ne'moka, kagra hunka kini trandrera Adoniza kinia manigahie hunka hu'nano? 25 Na'ankure Adoniza menina uramino ve bulimakao afutamine, afovage bulimakao anentatamine, sipisipi afutaminena rama'a aheno kresramana nevuno, kini ne'moka mofavreramine pristi ne' Abiatane, sondia vahe'mofo ugagota kva ne' Joapunena kehige'za avuga umanine'za ne'zane tinena nene'za zazakna kini manino vugahie hu'za nehaze. 26 Hianagi nagri'ene, pristi ne' Zadokine, Jehoiada nemofo Benaiane, eri'za neka'a Solomoninena tagia osu'ne. 27 Hagi kini ne' ranimoka kagra hankeno ama'na zana fore hu'neo? Hagi nahigenka eri'za vaheka'amota kagri noma erino kini traka'are'ma kinima manisia vahera ontasami'nane. 28 Anagema higeno'a kini ne, Deviti'a amanage hu'ne, Batsebana kehinkeno eno, higeno ke hazageno eazamo kini ne'mofo avuga eme otigeno, 29 kini ne'mo'a huno, Kasefa huno mani'nea Ra Anumzamo'ma

mika hazenke zampinti'ma nagu'ma vazi'nea Anumzamofo agifi
huvempa huankino, Solomoni kinia manigahie. **30** Hagi ko'ma
Ra Anumzana Israeli vahe Anumzamofo agifima huvempama
hu'noa kante anteno, menina negamofo Solomoni nagri nona
erino kini trairera kinia manigahie. **31** Hagi Deviti'ma anagema
higeno'a, Batseba'a avugosaregati kini ne'mofo avuga nemaseno
amanage hu'ne, Kini ne' ranimo Deviti'a manivava hanie. **32**
Hagi Deviti'a eri'za vahe'a amanage huno zamasami'ne, Vuta
pristi ne' Zadokine, kasnampa ne' Netenine, Jehodaia nemofo
Benaianena kehinke'za echo, hige'za ome ke hazage'za avuga
e'za eme ot'i'zaze. **33** Anama eoti'zageno'a amanage huno
zamasami'ne, Eri'za ne'n'i'a Solomonina nagri miulie donki afu'
agumpi ome avrenteta avreta Gihoni tintega uramaho. **34** Hagi
e'i anantega pristi ne' Zadoki'ene, kasnampa ne' Netenikea
masavena Solomoni anumpina taginteke, Israeli vahe kinia
azeri ot'i'o. Hagi e'ina'ma hute'nigeta ufena nereta amanage
hiho. Kini ne' Solomoni'a zaza kna kinia manivava hugahie huta
hiho. **35** Hagi tamagra avaririta amefi ne-enkeno eno nagri kini
tratera emanino. Na'ankure nagra agri huhampri'noankino kini
mani'neno Israeli vahe'ene Juda vahera kegava hugahie hu'na
hu'noe. **36** Hagi anagema higeno'a Benaia'a amanage huno
kenona kini nera hunte'ne, Tamage! Ra Anumzana rani kini
ne'mofo Anumzamo'a ke'ma hiazana hugahie. **37** Hagi ranimoka
kini ne' Devitiganema Ra Anumzamo'ma mani'neaza huno
Solomoni'enena mani'neno aza nehinkeno, kagrira kagatereno
agi'amo'a agatererfa kini ne' manigahie. **38** Hagi anagema
hutegeno'a pristi ne' Zadokiki, kasnampa ne' Neteniki, Jehodaia
nemofo Benaiaki, kini ne' kva netre Kereti'ene Peretiki hu'za
Solomonina Kini ne' Deviti miuli donki afu agumpi avrente'za

Gihoni tinte vu'naze. **39** Hagi anante pristi ne' Zadoki'a seli mono nompinti pazivepima ante'naza olivi masave erino Solomoni anumpi taginteno kini azeri otige'za, maka vahetmimo'za ufe nere'za anage hu'naze, kini ne' Solomoni'a zazate kinia mani vava hugahie! **40** Hagi maka vahe'mo'za konke nere'za mopamo'a tore huga kante ante'za tusi avoge hu'za zagamera nehu'za, musena hu'za Solomonina avaririza mareri'naze. **41** Hagi Adonizama kema hige'za ne'zama nene'za musema hunaku'ma enaza, vahe'mo'za ne'zama ne'za musema huvagama nere'za Solomoni naga'mo'zama musema nehu'zama hazama'a antahi'naze. Hagi Joapu'ma ufenkrafama nentahino'a, amanage hu'ne, na'a nehu'za Jerusalemi rankumapintira rankea nehu'za ke hakarea nehaze? huno zamantahige'ne. **42** Hagi Joapu'a zahufa anankea huvaga ore'negeno, Abiata nemofo pristi ne' Jonatani'a uhanati'ne. Hagi anama uhanatigeno'a Adoniza'a amanage hu'ne, Kagra so'e ne' mani'enka knare musenke erinka neananki emarerio. **43** Hianagi Jonatani'a amanage huno Adoniza kenona hu'ne, l'o, rantimo kini ne' Deviti'a Solomoni kinia azeri oti'ne! **44** Hagi pristi ne' Zadoki'ma, kasnampa ne' Neteni'ma, Jehoiada nemofo Benaia'ma kini nete kva netrene Kereti vahe'ene Pereti vahera Deviti'a huzmantege'za miuli donki afu'amofo agumpi Solomonina avrente'naze. **45** Hagi pristi ne' Zadoki'ene, kasanampa ne' Netenikea Gihoni tinte Solomonina masavena asenifi tagintekе kinia azeri oti'nake'za vahetmimo'za musena hu'za avoa nehage'za Jerusalemi rankumapina azageno, rankumapima mani'naza vahe'mo'zanena musena nehu'za avoa nehagaza agasasanke kagra nentahine. **46** Ana nehazageno menina Solomoni'a kini trate mani'ne. **47** Hagi ana'ma higeno'a kini ne' Deviti eri'za vahe'mo'za avuga

vu'za humusena hunte'za amanage hu'naze, Anumzanka'amo'a Solomonina azahanigeno agi'amo'ene hankave'amo'enena kagrira agatereno marerisie. Anage hazageno kini ne' Deviti'a tafe'are mani'neno kepri huno Anumzamofona ra agi ami'ne.

48 Anagema hazageno'a kini ne'mo'enena amanage hu'ne, Ra Anumzana Israeli vahe Anumzamo'a ragi erigahie. Na'ankure menina Agra mago vahe azeri otigeno kini trairera manige'na nagra navufinti koe huno hu'ne. **49** Hagi Adonizama zamagi hige'za emani'neza ne'zama nenaza vahe'mo'za Jonatani'ma hiankema nentahi'za, zamagogofege'za panani hu'za fre'naze.

50 Hagi Adoniza'a Solomoninkura tusi kore nehuno, freno ruotge'ma hu'nea seli mono no kumapi vuno kre sramnamavu itamofo pazivete ome azeriteno mani'ne. **51** Hagi Solomonina ome asamiza amanage hu'naze, Adoniza'a kagrikura tusi koro hu'ne. Na'ankure agra kre sramnavu itamofo pazivete anukineno amanage nehie, Atrenkeno kini ne' Solomoni'a huvempa huno ese'zana nagrikura eri'za vahe'amo'na bainati kazintetira ahe ofrigahue huno hino. **52** Hagi Solomoni'a amanage hu'ne, agrama knare ne'ma mani'nenigeno'a, magore huno avufgarera hazenkezana ometfa hugahie. Hianagi agrama hazenke ne'ma maninesuno'a frigahie. **53** Anage nehuno Solomoni'a vahe huzamantege'za Adonizana kre sramnamavu itama anukino mani'neretira ome avrefenka atre'za azageno, avugosaregati emasegeno, Solomoni'a amanage hu'ne, nonka'arega vuo.

2 Hagi Devitima fri kna'amo'ma egoftama nehigeno'a, amanage huno nemofo Solomonina asami'ne, **2** Kofta hu'na nagra frigahue. Hagi ve mofavremo'ma nehiaza hunka oti hanavetenika, **3** Ra Anumzana kagri Anumzamo'ma huoma hania zana nehunka, maka avu'ava'a avaririo. Hagi Mosese avontafepima krente'nea

tra ke'ane, kasege'anema kegava hunka avaririsankeno'a, maka zama hanana zamo'ene, kama vanana kamo'a knare hugahie. 4 Hagi ana'ma hanankeno'a Ra Anumzamo'ma huhamprinante'nea kemo'a nena raga regahie. Agra amanage huno hu'ne, Ne' mofavreka'amo'zama vahe'ma maniga kante nemaniza, maka zupa kazigazi hu'za miko tumozimireti'ene, zamagu zamenteti'ma hu'za navaririsazana Israeli vahete'ma kinima mani vahekura ohakegosazanki, kagri mofavre nagapinti mago zimimo kinia otitere hugahie huno nasami'ne. 5 Hagi Zeruia nemofo Joapu'ma hunante'nea avu'avazamofo kea antahi'nane. Agra tare Israeli sondia kva netrena, Neri nemofo Abnane, Jeta nemofo Amasakigiznia zanahe fri'ne. Hagi anama zanahe'neana hapina ozanahe'neanki, fru hu'ne amne mani'na'a knafi zanaheno korazani'a eri tagi'nea koramo'a amu'nofimofone agia anomofonte me'ne. 6 Hagi kagra knare antahintahika'a avaririnka e'ina zanter a nona hunto. Hagi atregeno amanea mani'neno ozafa reno rimp a frunena ofrino. (Sheol h7585) 7 Hagi Giliati ne' Basilai ne'mofavreramina zamatrege'za kagranema nezama nenaza traka'areti'ma nenaza naga'ene neho. Na'ankure negafu Absalomunkuma koro'ma fre'na nevugeno'a, zamagra knare zamavu'zamava nagrira hunante'naze. 8 Hagi Bahurimi kumateti Benzameni nagapinti ne' Gera nemofo Simeinkura kagera okanio. Agra Mahanaimi kumate'ma nevugeno'a kazusi ke hunanteno nazeri haviza hu'ne. Hianagi Jodani tinte'ma eme nege'na Ra Anumzamofo avufi huvempa hunte'na amanage hu'noe, Kahe ofrigosue hu'na hu'noe. 9 Hianagi atregeno e'ina kemo'a hazenke'a erifrara okino. Hagi kagra knare antahintahika'a avaririnka e'ina zanter a nona hunto. Hanki atregeno amanea mani'neno ozafa reno ofri'nianki, ahenka

korama'a eri tagigeno frino. (Sheol h7585) 10 Hagi anante Deviti'a
frige'za agri rankumapi Jerusalemi asente'naze. 11 Hagi Deviti'a
40'a kafufi kinia mani'neno, Israeli vahera kegava hu'ne. Hagi
ana 40'a kafuma mani'nefina 7ni'a kafua Hebron maniteno,
33'a kafua Jerusalemi umani'ne. 12 Hagi anama higeno'a
Solomoni'a nefa nona erino Deviti kini tratera kinia mani'ne. Hagi
Solomoni'a hankave kini ne' fore huno hanavenentake higeno
magozamo'a azeri atregara osu'ne. 13 Mago zupa Hagiti ne'mofo
Adoniza'a Solomoni nerera Batseba kenaku e'ne. Hagi anama
egeno'a, Batseba'a amanage huno antahige'ne. Kagra knare
kazigati ampi? huno higeno, Adoniza'a amanage huno kenona
hu'ne, Knare naneke kasaminaku oe nehuno, 14 amanage
hu'ne, Nagra mago'a ke kasaminaku e'noe, higeno Batseba'a
amanage hu'ne, Huge'na antahi'neno huno hu'ne. 15 Higeno
Adoniza'a amanage hu'ne, Kagra antahi'nane, esera mika Israeli
vahe'mo'za nagriku kini manigahie hu'za hu'naze. Hianagi ana
kini tramo'a ete nenu azampi vigeno, nenagna kinia manie.
Na'ankure ko Ra Anumzamo agri huhamprinte'ne. 16 Hanki
nagra menina magoke zanku kantahigegahue. Muse hugantoanki
ama ana keni'a antahinamio, higeno Batseba'a amanage huno
hu'ne, Hugena antahineno huno hu'ne. 17 Anagema higeno'a
Adoniza'a amanage huno asami'ne, Muse hugantoanki kini ne'
Solomonina antahigegeno, Sunamiti a' Abisakina naminkena
a' eri'neno. Na'ankure kagrama hananankea antahigahie. 18
Higeno Batseba'a amanage huno asami'ne, Knareki'na kagri
kea eri'na kini nera ome antahigegahue. 19 Anage nehuno
Batseba'a Adoniza agi erino Solomonina ome antahigenaku
vu'ne. Hagi kini ne' Solomoni'ma Batsebama negeno'a, otino
arena reno kepri nehuno, eri'za vahe'a kehige'za mago trara

eri'za azantmaga kazigaeme antazageno, nerera'a ana trate mani'ne. **20** Hagi Batseba'a ana trate'ma maniteno'a amanage hu'ne, Nagra mago osi zanku kantahigegahue, hanki ana keni'a eri otrenka antahinamio. Anante kini ne'mo'a amanage hu'ne. Antanimoka amne nantahigo, na'ankure kagra antahi'nane, nagra keka'arera i'o hu'na osugahue. **21** Hanki Batseba'a amanage hu'ne, Atregeno negafu Adoniza'a Sunemiti ara a' avrenteno. **22** Anagema higeno'a kini ne' Solomoni'a amanage hu'ne, Nagafare Sunemiti ara Abisakina Adonizana amio hunka eme nantahinegane? E'ina'ma hunaku'ma hanunka fatgo hunka nantahigege'na atranenkeno nagri no erino kinia manino. Na'ankure agra nempuni'a manigeno agri kaziga pristi ne' Abiata'ene, Seruia nemofo Joapukea mani'na'e. **23** Anage nehuno Solomoni'a Ra Anumzamofo avufi amanage huno huvempagea hu'ne. Adoniza'ma amanahu ke'ma hire'ma ahe ofrisugen'o'a Anumzamo'a nagrira nahe frigahie! **24** E'ina hu'negu menina Ra Anumzamo'ma naza huno hankave naminege'na nenfa Deviti kini trate'ma nagri naga'ma huhampri'nea kante'ma ante'na kini tratera mani'ne'na mani vava Anumzamofo agifi huankino, Adoniza'a meninke frigahie. **25** Anage nehuno kini ne' Solomoni'a Jehoiada nemofo Benaia huntegeno vuno, Adonizana ome ahegeno fri'ne. **26** Hagi kini ne'mo'a pristi ne' Abiatana amanage huno asami'ne, kagra ete mopakarega Anatoti vuo. Hianagi menina kagrira kahe ofrigahue. Na'ankure kagra nenfa Deviti'ene mani'nenka Ra Anumzana hankavenentake Anumzamofo huhagerafi huvempage vogisi e'nerinka, nenfa'ma hazenke knafima mani'negenka aza hunka nenfa knazana eri'nane. **27** E'inage nehuno kini ne'mo'a Ra Anumzamo'ma Sailo kumate Eli naga'ma kasnampa ke huzamante'nea kante anteno

Abiatana pristi eri'zama'afintira ahenati'ne. **28** Hagi Joapu'a Absalomu'ma kinima mani'naku'ma nehigeno'a agri'enena tragoteno mani'neno aza osu'ne. Hianagi Adoniza'ma kinima mani'zama nehigeno'a, Adoniza'ene ome tragoteno mani'neno aza hu'ne. E'ina hu'neankino Adonizama ahaza nanekema nentahino'a, freno vuno ruotge seli mono nompi Ra Anumzamofo kre sramnavu itare'ma me'nea pazivetaminte ome azeriteno mani'ne. **29** Hagi kini ne' Solomonina ome asami'za amanage hu'naze, Joapu'a freno vuno Ra Anumzamofo seli mono no kumapi kre sramnavu itare'ma me'nea pazivete ome azerintrako huteno mani'ne. Hagi ana nanekema nentahino'a Solomoni'a Jehoiada nemofo Benaia hunteno, Joapuna ome ahegeno frino! **30** Anagema higeno'a Benaia'a Ra Anumzamofo seli nompi eazamo amanage huno Joapuna eme asami'ne, Kini ne'mo'a fegi atiramio huno hianki fegia atiramio. Hianagi Joapu'a amanage huno hu'ne, l'o nagra ama anante frigahue. Hagi agrama hia nanekea erino vuno Joapu'a anage hie huno kini nera ome asami'ne. **31** Kini ne'mo'a amanage huno kenona hu'ne, Knareki agri ke avaririnka anante ome ahegeno frina asentegeno Joapu'ma hazenke'a omane vahe'ma zamahe'nea kanazamo'a tagritera omaneno. **32** Hagi hazenkezani omne netrema zanahe'nea zantera, Ra Anumzamo agrake Joapuna nona huntegahie. Na'ankure agra hazenkezni omne netre Israeli vahe sondia kva ne' Neri nemofo Abnane, Juda vahe sondia vahetaminte kva ne Jetari nemofo Amasanena nenfa'a keno antahino osu'negeno zanahe'ne. **33** E'ina hu'negu ana netremofo knazamo'a Joapunte'ene agripinti'ma forehu anante anante hu'zama vanaza vahepi mevava huno vugahie. Hianagi Devitinte'ene agripinti'ma forehu anante anante'ma hu'za vanaza

vahe'ene, naga'are'ene, kini tra'are mani'za esaza vahetera maka zupa Ra Anumzamofo arimpa fruzamo mevava huno vanie. **34** Hagi anante Jehoiada nemofo Benaia'a vuno ruotge seli mono nompi Joapuna ome ahe frigeno, avufa'a eri'za hagege kokampi noma'afinka ome asente'naze. **35** Hagi ana nehuno kini ne'mo'a Joapu nontera Benaiana azeri otigeno sondia vahetera ugota kva manigeno, pristi ne' Abiata nontera, Zadoki azeri otigeno pristia mani'ne. **36** Hagi anante kini ne'mo'a Simeintega amanage huno kea atrente'ne, kagra Jerusalemi nona ome kinka manio. Hianagi ana kumapintira atrenka rurega vunka enka osufa huo. **37** Hanki ana kuma'ma atrenka Kidroni kraho'ma agaterenka nevanunka, nagra frigahue hunka kagesa antahio. Hagi anama hunka kagrama frisankeno'a, fri'nana knazamo'a kagrite megahie. **38** Hanki Sime'i'a amanage huno kini ne'mofo kerera hu'ne, kini nera nanekema refko'ma hunka ketenka hunantana kemo'a fatgo hianki'na rana kini nimokama hanankemofona, eri'za nekamo'na avaririgahue. Anage nehuno Sime'i'a zaza kna Jerusalemia mani'ne. **39** Hianagi 3'a kafuma enevigeno'a, Simei eri'za netremokea atrene freke Gati kini ne' Maka nemofo Akisi'ene Gati kumate umani'na'e. Hagi Simeina mago'a vahe'mo'za asami'za, Eri'za neka'araremokea freke Gati kumate umani'na'e huza asamizageno, **40** Sime'i'a tonki afu'a retro huteno agumpi marerino eri'za netrema'agu hakeno Gati kumate Akisinte vu'ne. Hagi ana eri'za netre'na ome zanageno, Gati kumatetira ete zanavreno e'ne. **41** Hagi Simei'ma Jerusalemima atreno Gatima vuteno eankema Solomoni'ma nentahino'a, **42** kini ne'mo'a amanage huno kea atrente'ne, Nagra Ra Anumzamofo avufi huvempa hu'na Jerusalemi kuma'ma atrenka ru kumate'ma vanunka frigahane hu'na hu'noe. Hagi

anagema hugenka, kagra amanage hu'nane, kini nera nanekema
refko'ma hunka ketenka hunantana kemo'a fatgo hianki'na
ana kemofo avaririgahue hu'nane. **43** Hagi nahigenka Ra
Anumzamofo avufima hvempama hunka avaririgahue hu'nana
kea rutragenane? **44** Hagi kini ne'mo'a Simeinkura mago'ane
amanage hu'ne, kefo kavukava'ma nenfa Devitima hunte'nana
zana kagra'a antahi'nane. E'ina hu'negu Ra Anumzamo'a ana
knazamofo nona'a kagrira kazeri haviza hugahie. **45** Hianagi Ra
Anumzamo'a nagrira asomu hunante'nigeno, Ra Anumzamofo
avurera Deviti kini tramo'a agripintima fore hunante anante'ma
hu'za vanaza vahepi mevava huno vugahie. **46** Ana huteno
Jehoiada nemofo Benaia huntogeno, Simeina ome ahe fri'ne.
Ana huteno Solomoni'a hankavenentake kini fore huno vahera
kegava hu'ne.

3 Hagi Solomoni'a Isipi kini ne' Fero mofa'a ara erigeke, hara
osuke mago zanarimpa huke manisaku kea huhagerafi'na'e.
Hagi ana ara agra avreno Deviti rankumapi Jerusalemi ome
ante'neno, noma'ane, Ra Anumzamofo none, Jerusalemi
kumamofo vihunena trohu vagare'ne. **2** Hagi ana knafina
Israeli agonaramintega mareri'za ofa ome Ra Anumzamofontega
kresramna vu'naze. Na'ankure e'ina knafina Ra Anumzamofo
agirera mono nona onki'nazage'za anara hu'naze. **3**
Hagi Solomoni'a Ra Anumzamofona Deviti'ma hu'neaza
huno avesinenteno trakea avaririneanagi, agonarega vuno
Anumzamofontega ofa'a ome kresramna vu'ne. **4** Hagi kini
ne'mo'a Gibioni kumate ofa ome Kresramana vuku vu'ne.
Na'ankure Gibioni agonaramimpina mareri agatereno agi me'nea
kre sramnavu ita me'negeno vu'ne. Hagi e'i ana kre sramnavu
itarera Solomoni'a 1tauseni'a bulimakaone sipisipi afuzaga

tevefina kre fananehu ofa hu'ne. 5 Hagi Gibioni kumate Ra Anumzamo'a Solomonina ava'nafi efore huno amanage huno asami'ne, Kavesinia zanku nantahigege'na kami'neno. 6 Higeno Solomoni'a amanage huno asami'ne, Kagri eri'za vaheka'a nenfa Devitina mevava kavesi'zanteti avesinte'nane. Na'ankure agra fatgo avu'ava nehuno tamage huno tumo'areti huno kavariri'ne. Hagi kagra vagaore kavesizanteti ne' mofavrea aminkeno menina agri nona erino kini tra'arera mani'ne. 7 Hagi nagra osi mofavregi'na vahe'ma kegavama hu'zana ontahi'noanagi, menina Ra Anumzana nagri Anumzamoka eri'za neka'a kinia nazeri otinke'ha nenfa Deviti nona eri'noe. 8 Hagi nagri vahere hunkama huhamprinana vahe amu'nompi menina nagra eri'za vahekamo'na mani'noe. Hagi e'i ana vahera rama'a vahekrerfa mani'nage'za, hamprigara osu'ne. 9 E'ina hu'negu muse hugantoanki vahe'ma kegavama hu knare antahi'za namige'na vahera kegava hu'ne'na havi zane knare zanena refko hu'na kegava ha'neno. Na'ankure nagra knarera osu'noanki'na ama vahekrerfa kegava osugahue. 10 Hagi Solomoni'ma knare antahi'zanku'ma antahigegeno'a Ra Anumzamo'a tusi muse nehuno, 11 amanage huno asami'ne, Kagra kafuni'a erizaza huo hunka osuge, fenozankura nantahionkege, naza huge'na ha' vaheni'a zamaha'neno hunka osananki, knare antahi'za naminege'na havi zane knare zanena refko ha'neno hunka hananki'na, 12 menina Nagra kema hana kante ante'na knare antahi'zana kamigahue. Hagi havi zane knare'zane refkohu knare antahi'zana ko'ma mani'za e'naza vahe'mo'za e'orinazankna antahi'za kamisugeno, ete henka kagrikna antahintahine vahera forera osutfa hugahie. 13 Hagi nantahima onke'nana zana fenone, ra agima ami'zanena antegofetu hu'na kaminena,

maninkama vanampina mago kini ne'mo'a kagateoregahie. **14**
Hagi negafa'ma hu'neaza hunka Nagri navu'navma nevaririnka,
trake'ni'ane kasege'ni'anema kegavama hunka avaririsankena,
kafuzageka'a eri za'za ha'nena zazate manigahane. **15** Higeno
anante Solomoni'a mase'nefintira antri huno otino keana amne
ava'na ke'ne. Hagi anantetira atreno Jerusalemi kumate vuno
Ra Anumzamofo huhagerafi hvempage bogisimofo avuga
kre fananehu ofane, rimpa fru ofanena ome nehuno, eri'za
vahenena ra ne'za kreno ne'ne. **16** Hagi mago zupa savri
atremokea Solomoni avuga eoti'na'e. **17** Hagi mago a'mo'a
otiazamo amanage hu'ne, ranimoka, ama a'ene nagranena mago
nompi nemanu'ankita, ama a'mo'a magoka nompi mani'hege'na
mofavrea kasente'noe. **18** Hagi 3'a zagegna evutegeno ama
a'mo'a, mofavrea kasente'ne. Hagi ana nompina tagrake
mani'noanki, mago vahera omanitfa hu'ne. **19** Hianagi agra
kenage mase'neno, mase rukrahe hirega mofavre'a rehapatigeno
fri'ne. **20** Ana'ma nehuno'a mase himamrenoama'a agra kenage
otiazamo nagri mofavrea eme avreno asumpinka agra aminte
ome nenteno, fri'nea mofavre'a avreno nagri nasumpinka
aminte eme ante'ne. **21** Ana'ma hutege'na nanterama otina
mofavreni'ama amima ami'za nehu'na koana, agra ko fri'ne.
Hianagi ana mofavrema nanterama masama hige'na oti'na
amima aminaku'ma koana, nagrama kasente'noa mofavrea
omani'ne. **22** Hianagi mago a'mo'a ke'amofona anintaka huno
amanage huno hu'ne, l'o mani'nea mofavrea nagri mofavregi,
fri'nea mofavrea kagri mofavre. Anagema higeno'a, ese'ma
nanekema hu'nea a'mo'a amanage hu'ne, l'o fri'nea mofavrea
kagriki, mani'nea mofavrea nagri mofavre. Anage huke kini
ne'mofo avuga fravazi'na'e. **23** Hagi kini ne'mo'a amanage

hu'ne, Tanagra huta nagri mofavremo kasefa huno mani'neanki, kagri mofavremo fri'ne, higeno, ete mago'mo'a huno, l'o kagri mofavremo fri'neanki, nagri mofavremo kasefa huno manine huta ha'e. **24** Ha knareki bainati kazi erinka eme namio, huno kini ne'mo'a eri'za ne'agura higeno, bainati kazina erino avuga egeno, **25** amanage hu'ne, Kasefa huno mani'nea mofavrea amu'nompinti rutanerare hunka mago kaziga magomofo aminka, magokaziga magomofo amio. **26** Anagema higeno'a ana mofavremofo nerera fatgo'amo'a tusiza huno avesi nenteankino amanage hu'ne, l'o ranimoka muse hugantoanki ohenka, agri amio huno hu'ne. Hianagi mago a'ma havigema nehia a'mo'a amanage hu'ne, Tamage hananki agri mofavrea omanige nagri mofavrea omanige hanianki, rutnerare huramio huno hu'ne. **27** Hagi anante kini ne'mo'a amanage huno kenona hu'ne, Ese a'mo'ma ahe ofrita antu a' amiho huno'ma hia a'mo ana mofavremofona nerera fatgo mani'neanki ahe ofrita agri amiho. **28** Hagi kini ne'mo'ma knare'ma huno kema refko'ma hianke'ma maka Israeli vahe'mo'zama nentahi'za, kini nera koro hunte'naze. Na'ankure Anumzamofo knare antahizama me'negeno knare'ma huno nanekema refkoma hu'neazana zamagra ke'za antahiza hu'naze.

4 Hagi kini ne' Solomoni'a mika Israeli mopa kegava hu'ne. **2** Hagi vugota kva vahetamimofo zamagi'a amane, Zadoki nemofo Azaria pristi nera mani'ne. **3** Hagi Sisa nemofokea Erihorefike, Ahizakea mika zante'ma avoma kreke eri fatgohu eri'za netre'ha mani'na'e. Hagi Ahiluti nemofo Jehosafati'a maka'zama kini ne'mo'ma hiazama avompima krenentea ne' mani'ne. **4** Hagi Jehoiada nemofo Benaia'a sondia vahete vugagota huno kegava higeno, Zadoki'ene Abiatakea pristi eri'za netre mani'na'e. **5**

Hagi Neteni nemofo Azaria'a kiapu vahete vugota huno kegava higeno, Netenina mago nemofo agj'a Zabudikino, agra pristi ne' mani'neno kini ne'mofona knare antahintahia ami'ne. **6** Hagi kini ne'mofa nompima me'nea zantamima kegavama hu nera Ahisari manigeno, Abda nemofo Adoniram'u'a kazokazo eri'za vahetaminte kegava hu' nera mani'ne. **7** Hagi Solomoni'a 12fu'a kumapintira mago'mago kva vahe zamazeri otige'za maka Israeli vahera kegava hu'neza kini ne'mofone, naga'anena ne'zana eri'za eme zamatere hu'naze. Hagi ana 12fu'a vahepintira mago ikante ikantera mago'mo ne'zana erino kini ne'ene naga'anena eme zamatere hu'naze. **8** Hagi ana 12fu'a kva vahetmimofo zamagi'a ama'ne, Efraemi agona kukampi me'nea kumatera Ben-huri kegava higeno, **9** Makazi kuma'ma, Salbimi kuma'ma, Betsemesi kuma'ma, Elonbet-hanan kuma'enena Ben-dekeri kegava hu'ne. **10** Hagi Aruboti kuma'ene Soko kuma'enena Ben-heseti kegava nehuno, Sokoti kuma'ene maka Heferi mohanena agra kegava hu'ne. **11** Hagi Ben-abinadapu'a maka Nafat-dori mopa kegava nehuno, Solomoni mofa Tafati ara eri'ne. **12** Hagi Ahiludi nemofo Bana'a, Tanaki kuma'ene Megido kuma'ene kegava nehuno, Betsin mopane Zaretani kuma tavaonte'ma Jesrili kumamofo fenka kaziga me'nea mopa maka kegava nehuno, Betsani mopama Abel-mehola kumateti agafa huteno vuno Jokmeamuma vu'nea mohanena maka kegava hu'ne. **13** Hagi Ben-geberi'e nehaza ne'mo Ramot-gilead kuma'ene Gilietima me'nea kumara kegava higeno, Manase nagapinti ne' Jairi Manase nagara kegava hu'neno, Argobi kaziga Basani mopalina 60'a kuma'ma ranra vihumu megagigeno Bronsireti kafama hagente'nea kumatmina kegava hu'ne. **14** Hagi Ido nemofo Ahinadapu Mahanaimi kumara kegava hu'ne. **15** Hagi

Ahimasi'e nehaza ne'mo Naftali nagamofo kumara kegava hu'neno, (Solomoni mofa Basematina ara eri'ne.) **16** Husi nemofo Bana'a Asa nagamofo mopane, Bealoti kuma'enena kegava hu'ne. **17** Hagi Parua nemofo Jehosafati'a Isaka nagamofo mopa kegava hu'ne. **18** Hagi Ela nemofo Sime'i'a, Benzameni naga'mofo mopa kegava hu'ne. **19** Hagi Uri nemofo Gebari'a Giliati mopa kegava hu'neno, Amori vahe kini ne' Sihoni mopane, Basani vahe kini ne' Ogi mohanena kegava hu'ne. Hagi ana mopa magoke kva ne'mo kegava hu'ne. **20** Hagi Juda vahe'ene, Israeli vahe'mo'zanena ra hu'za hageri ankenafi kasepankna hu'naze. Hagi ana vahe'mo'zane'zane tinena nene'za musena nehu'za mani so'e hu'naze. **21** Hagi Solomoni'ma kegavama hu'nea mopa, Yufretis tinteti vuno Filistia mopare vuteno, Isipi mopa atupare ome atre'ne. Hagi anampima nemaniza vahe'mo'za agri agorga maka knafina mani'ne'za, takesi zagoa nemi'za, eri'zama'a erinte'naze. **22** Solomoni'ene agri nompima nemaniza vahe'mo'zama mago knamofo agu'afima nesaza ne'zama eri'za e'nazana, 30'a donki afumo'ma eriga avamente knare'ma huno kane witine, 60'a donki afumo'ma eriga avamente kane so'ema hu'nea witia eri'za e'naze. **23** Hanki witire'ma negriza bulimakao afutamina 10ni'agi, trazante'ma negriza bulimaka afutamina 20'agi, 100'a sipisipi afutamine ruzahu ruzahu dia afutamine, afovage kokoreramine avre'za e'naze. **24** Na'ankure Solomoni'a Yufretisi timofona zage fre kaziga Tifsa kumateti agafa huteno vuno, Gazama uhanati'nea mopane, ana mopafi kini vahetaminena kegava huzmante'ne. Hagi kegavama hu'nea mopamofo atumpama ome atre eme atrema hu'nerega ha'zana omanege'za fru hu'za mani'naze. **25** Hanki Solomoni'ma kinima manino vu'nea knafina, maka Juda vahe'mo'zane Israeli

vahe'mo'zanena ha'ma hu avu'ava zana omnege'za knare
hu'za mani'naze. Hagi Dani mopareti'ma vuno, sauti kaziga
Beseba kumate'ma uhanati'neana, wainine fiki zaferamina
mago mago nagamofona metere hige'za ana zafamofo tonapi
manitere hu'naze. **26** Solomoni'a karisima renteno avazuma
huno vanoma nehia hosi afutamimofo nona 40ti tauseni'a no
kintegeno, hosi agumpima vano hu vahera 12tauseni'a vahezaga
mani'naze. **27** Hagi 12fu'a vugota kva vahe'ma zamazeri otia
vahe'mo'za Kini ne' Solomonine, maka agri nompinti'ma ne'zama
nenaza vahetmimofo ne'zana mago mago ikantera eri'za etere
hazage'za magore hu'za ne'zankura atupara osu'naze. **28**
Hagi Kini ne'mofo hosi afutamine karisima rentenoma vanoma
nehia hosi afutamimofo ne'zana baline, trazanena ana knareke
eri'za eme zami'naze. **29** Hagi Anumzamo'a Solomonina
rama'a knare antahi'zane, antahiamama'ma hu antahi'zanena
amigeno, ana antahi'zamo'a hageri ankenafi kahepankna hu'ne.
30 Hagi tamage huno Solomoni knare antahi'zamo'a, maka
knare antahi'zane vahe'ma zage hanati kazigane, Isipinema
mani'naza vahe'mokizmi antahintahi'zana zamagatere'ne. **31**
Na'ankure agri knare antahintahizamo'a maka vahe'mofo knare
antahintahi'zana zamagatenereno, Ezra nagapinti ne' Maholi
mofavreramina Etani'ma, Hemeni'ma, Kalkolima, Dadanima,
Maholi amohe'mokizmi knare antahintahizanena zamagatere'ne.
32 Hagi Solomoni'a 3tauseni'a knare antahizamofonkea kreno,
1tausen 5fu'a zagamera kre'ne. **33** Hagi nanekema hu'neana ra
zafa sida zafareti agafa huteno, vuno osi hisopu trazama have
keginafintima nehagea trazante uhanati'ne. Hagi zagagafagu'ene
namaraminku'ene zamasaguregati'ma regarorohe'za vanoma
nehaza zagaramine, nozamegu'ene nanekea hu'ne. **34** Hagi maka

kokantegati vahe'mo'zane, maka ama mopafi kini vahe'mo'nena
Solomoni knare antahintahima antahinakura agrite e'naze.

5 Hagi Tairi vahe'mofo kini ne' Hiramu'a kora Deviti'ene tragoteno mani'nea nekino, Deviti nemofo Solomonima kini azeri oti'za kema nentahino'a, vugota eri'za vahe'arami huzamantege'za humuse hunte'naku e'naze. **2** Hagi Solomoni'a amanage huno Hiramuntega kea atrentegeno vu'ne, **3** Kagra antahi'nane, nenfa Deviti'a Ra Anumzamofo agima erisgahu nona onki'ne. Na'ankure agra amama manigagi'naza ha' vahe'aramimo'za maka zupa hara eme hunteva hunteva nehazageno, Ra Anumzamo'a aza higeno hara huzmagatere'ne. **4** Hianagi menina Ra Anumzana nagri Anumzamo'a maka kaziga ha'ma hu'zana eritregeno, hara eme huonantazageno, mago knazana forera osigena so'e hu'na mani'noe. **5** E'ina hu'negu Ra Anumzana nagri Anumzamo'ma nenfa Devitima asamino, kagri trate'ma kinima azeri otisua mofavremo, Nagri nagima erisga hu nona kigahie huno'ma hu'nea kante ante'na Ra Anumzamofo agima erisgahu mono nona kinaku nehue. **6** E'ina hu'negu huge'za Lebanonitira sida zafa antagi'za eme namiho. Eri'za vahe'nimozane, kagri eri'za vahe'mo'zane ana eri'zana eneri'nage'na nama'a zago agima ahesanana, kagri eri'za vahera zagoa tesizamantegahue. Hagi kagra ko antahinka kenka hu'nane, mago'a tagri vahe'mo'za Saidoni vahe'motama zafama nentagi'za zana hu'za zafa ontagigahaze. **7** Hagi Solomoni'ma atrenteal ke'ma Hiramu'ma nentahino'a, tusi muse nehuno amanage hu'ne, Ra Anumzamo'a Devitina knare antahi'zane mofavre amigeno hanavenentake Israeli vahe'mofo kinia manie! **8** Anage nehuno Hiramu'a amanage huno Solomonintega kea atregeno e'ne, Nagritegama kema atrankeno'ma eana hago antahuanki'na, maka sida zafane

saipresi zafanena antagi'na atresugeno egahie. **9** Hagi nagri eri'za vahe'mo'za Lebanonitira ana zafaramina antagi'za eri'za hagerintera erami'nage'na magokepi eritru hu'na anaki'nugeno hagerimpi eri'za e'za kema hunante e'zanofira eme ahekampru hanagenka ana zafaramina erigahane. Hagi ana zafamofo mizama'a nagrira ne'zanku navesiankinka, nonifima nemaniza naganimofo ne'zana namigahane. **10** Anage Hiramu'a nehuno, sida zafane saipresi zafanena Solomoni'ma hia kante anteno, maka antagino erino eme amigeno, **11** ana nona'a Solomoni'a kna'amo'a 20 tauseni'a donki afumo'ma eriga avamente knare'ma huno kane witia nemino, 20 tauseni'a donki afumo'ma eriga avamente olivi masavenena Hiramu nagara ami'ne. Hagi e'ina avamente maka kafune kafunena Solomoni'a Hiramu nagara ne'zana zamitere hu'ne. **12** Hagi Ra Anumzamo'a kema huvempama hu'nea kante anteno Solomonina knare antahi'zana ami'ne. Hagi Solomoni'ene Hiramukea zanarimpa fru hu'nema manina'a nankeea huhagerafiteke, fru huke mani'na'e. **13** Hagi Solomoni'a ana eri'zama erisaza vahera, Israeli mopafintira 30 tauseni'a vahe zamazeri oti'ne. **14** Hagi ana erizantera 10 tauseni'a vahe mago ikanterea huzamantetere hu'ne. Hagi mago ikampi Lebanonia ana eri'zana omerite'za, tare ikana kumazamire emanitere hu'naze. Hagi ana eri'zanterea Adoniramu kegava hu'nege'za ana eri'zana eri'naze. **15** Hagi Solomoni'a havema eri'za esaza vahera 70 tauseni'a nezamavareno, agonafinti'ma havema tagahu vahera 80 tauseni'a nezamavareno, **16** ana erizante'ma kegavahu kva vahetmina 3tausen 300'a vahe zamavare'ne. **17** Hagi Solomoni'a huzamanteg'e'za zago'amo'ma mareri havema me'neregati vu'za ranra have ome tagahu'za azageno, ana mono nomofo trara agafa huno ante'ne. **18** Hagi

Gebali rankumateti vahe'mo'za Solomoni eri'za vahe'ene Hiram
eri'za vahe'enena zamaza hu'za ana noma ki'zana havea taga
nehu'za zafa antagi'naze.

6 Hagi Israeli vahe'mo'za lsipima atre'za e'nazareti'ma mani'za
e'nazana 4hantret 80'a kafu manitageno, Solomoni'ma kinima
efore'ma huno 4'a kafuma kinima nemanino'a, namba 2 ikana
Zivie nehaza ikante agafa huno Ra Anumzamofo mono nona
ki'ne. **2** Hagi Ra Anumzamofo noma kini ne' Solomoni'ma
ki'neana zaza'amo'a 27 mita higeno, atupa'amo'a 9 mita higeno,
atrule'amo'a 13 mita hu'ne. **3** Hagi mago noma ana nomofo
avugama hunaraginte'neana zaza'amo'a 9 mita huno ra nomofo
atupa kaziganena magozanke higeno, atupa'amo'a 4'agi hafu'a
mita hu'ne. **4** Hagi Solomoni'a ana nomofo zaho'ma eri kama
hagente'neana agu'a ra higeno, megira osi hu'nea zahoka
hagente'ne. **5** Hanki ana nomofo asoparega mago nona
kikamrenteno hunaragino kagine. Ana nehuno ana asoparega
agu'afina neone no hunaragintetere hu'ne. **6** Hagi ana ne'one
nona 3'a agofetu agofetu huno ki'ne. Hagi mopa avate nomofo
zaza'amo'a 2mitagi 20sentimita higeno, nampa 2 agofetu
nomofo zaza'amo'a 70sentimita higeno, nampa 3 agofetu
nomofona zaza'amo'a 3 mitagi 10ni sentimita hu'ne. Hagi
ana osi nontmina mono nomofo asoparega tra ante'neno aru
hamprino ki'neankino mono nomofo asoparega kana hageno
ana osi nomofo trara onte'ne. **7** Hagi ana mono nomofo
agu'afina noma negi'za hama ageru'ma, sasume ageru'ma, aini
agerura ontahi'naze. Na'ankure havema anama fragenazarega
frage'za eriso'e hute'za eri'za e'naze. **8** Hagi anaga kaziga
nontrempima marerinakura, ana nomofona sauti kaziga kafana
me'heankino, ana kafante vuteno marerigahie. **9** Hagi Solomoni'a

ana nona kivagareteno, nomofo agu'afina anagami kaziga
(silinia) sida zafareti aheno evu'ne. **10** Hagi ana mono nomofo
3'a asoparegama neone noma kimahampri'neana, atrure'amo'a
2 mitagi 20sentimita hu'neankino, sida zafaretike ki'ne. **11** Hagi
anante Ra Anumzamo'a amanage huno Solomonina asami'ne,
12 noma negina nomofo keaga hu'za hue, Kagrama maka
nanekenine, tra ke'ni'ane, maka kasegeni'anema avaririsanke'na,
negafa Devitima huhamprinte'noa zana kagrite hugahue. **13**
Hagi Israeli vahe amu'nompi mani'nena magore hu'na vaheni'a
namefira huzami'na ozamatregahue. **14** Hagi Solomoni'a ana
mono nona kivagareteno, **15** ana nomofo agu'afina anagami
kazigane, rugaraga asopareganena sida zafanuke'za ahe
fankanine. Hagi fenkami kaziga manizana saipresi zafanu
ahe'ne. **16** Hagi ana mono nomofo turenkazigama ruotge'ma
huno ruotgema hu'nea asama hunaragi'neana, zaza'amo'a 9mita
hu'ne. Hagi floa'ene, rugaraga asopane, silininena sida zafaretike
ahe anknire'naze. **17** Ruotge'ma hu'nea nomofo avugama me'nea
kuma' nomofo zaza'amo'a 18 mita hu'ne. **18** Hagi ana noma
havenu'ma ki'nea zana maka sida zafanu aheno erinovaziteno,
ana zafamofona hanagatino, zafa amosrerami krenteno evu'ne.
19 Hagi ana nomofoma agu'afina atumparega Ra Anumzamofo
huhagerafi huvempage vogisima ante'zana hunaraginte'ne. **20**
Hagi anama hunaraginte nomofo zaza'amo'ene atupa'amo'ene
atrure'amo'enena 9 mitage'za hu'neankino, maka golinuke'za eri
anovazi'ne. Hagi sida zafare'ma tro'ma hu'naza Kresramana vu
itanena golinutike'za erinovazi'ne. **21** Hagi ruotge'ma hu'nea
nomofo agu'afinka golinuti sida zafa aheneazana erinonevazino
hunaraginenteno, ruotge hunefima mareri kahantera golireti
tro hu'naza seni nofiteti anakinte'ne. **22** Hagi ana nomofo

agu'afinka miko golinutike eri anovazinenteno ruotge'ma hu'nefima mnanentakezama kre mnama vu itanena golinutike eri anovazi'ne. **23** Hagi ruotage huno ruotge'ma hu'nefinka olive zafareti serabimie nehaza ankerontre'na tare trohuno, retrurente'ne. Hagi ana ankerontremofo zazaznimo'a 5mita hu'ne. **24** Hagi mago ankeromo'ma ageko'nama rufana'rama hiana, 2mitagi 25sentimitare uhanatigeno, mago ankeromo'ma ageko'na rufanara'ma hu'neana 4mitagi hafu'are uhanatine. Hagi mago ankeromofo agekona atumpareti'ma vuno mago'mofo agekona atumpare'ma vaniana, 4mitagi hafu hugahie. **25** Hagi ana ankerontrena za'zaznimo'ene zanavufagamo'enena magozahu hu'ne. **26** Hanki ana tarega ankerontremofo za'za zanimo'a 5mita hutere hu'ne. **27** Hagi ana ankerontrema agu'a nompima retruma regeno'a, zanageko'namo'a rufanara huno magomofo ageko'namo'a kanti kaziga zafa avako higeno, magomofo agekonamo'a kama kaziga zafa atupa'a avako hu'ne. Hagi mago kaziga zanageko'namo'a amu'nompi eme ruhampri'na'e. **28** Hagi ana ankerontrena goliretike'za eri anovazi'ne. **29** Hagi serafimi ankeromofo amema'ane, tofe anina'agna zafamofo amema'ane zafa amosre'amofo amema'a ruotge'ma hunefinkane ruotge'ma huno ruotgetfama hunefinka nomofo agu'afina ahe'zama evu'naza zafarera antreno tro hunte'ne. **30** Hagi ana nomofo ruotge'ma hu'nefine, meg'i'ane mopafinena golireti eri'novazi'ne. **31** Hagi ruotge'ma hu'nea nomofo agu'afima, hunaraginte'negeno ruotgema huno ruotge'ma hu'nefinkama ufre kafana olivi zafareti tare hagenenteno, ana kafanteria 5fu'a kafa zafa ahekamre ahekamre huno ahente'ne. **32** Hagi serafimi ankeromofo amema'ane tofe anina'agna zafamofo amema'ane zafa amosreamofo amema'a ana kafararente antreno

tro huteno, ana makazana golireti eri anovazinte'ne. 33 Hagi ana ra mono nomfo kafa zafama retrure'neana, 4'a kafa zafa ahekamre ahekamre huno olivi zafareti ahente'ne. 34 Hagi saipresi zafareti tare kafana hagente'neakino, ana kafama anagi'nigeno'ma repsi'ma hu kafa tare hagente'ne. 35 Hagi serafimi ankeromofo amema'ane tofe anina'agna zafamofo amema'ane zafa amosreamofo amema'a ana kafararente antreno tro huteno, golireti eri anovazino erimasave hunte'ne. 36 Hagi ana mono nomofo kuma keginama hu'neana, 3'a have anteno marenerino sida zafa trara rugeka nehuno, 3'a have nenteno, sida zafa trara nenteno kino mareri'ne. 37 Hagi 4'a kafuma Solomoni'ma kinima nemanigeno, Zivie nehaza ikante Ra Anumzamofo mono nona eri agafa hu'za ki'naze. 38 Hagi 11ni'a kafuma Solomoni'ma kinima nemanigeno'a, Bulie nehaza ikante ana mono nona ki vagare'naze. Hagi ana mono noma ki'nazana, 7ni'a kafufi ki'naze.

7 Hagi Solomoni'ma noma'ama ki'neana 13ni'a kafufi kivagare'ne. 2 Hagi Solomoni'a ra nonkrerfa ki'teno, ana nomofo agi'a Lebanoni afuza zafe huno agi'a antemi'ne. Hagi ana nomofo zaza'amo'a 45 mita higeno, atupa'amo'a 23 mita higeno, anagamima mreri'amo'a 14 mita hu'ne. Hagi ana nomofo azeri'nea zafama reharare'neana, 4'a kankamumpi tusinasi sida zafa reharereno vuteno anama reharere'nea zafa agofetura sida zafaretike vazisga hu'ne. 3 Hagi ana maka 15ni'a zafareti runkre hu'naze. Hagi agofetu'ma rugeka'ma hu'neana 45fu'a sida zafanu rugekara hu'ne. 4 Hagi ana nomofo kanti kama asoparega 3'afi zaho eri kana (windua) hagentetere huno kanti kama asoparega vigeno avugosa ohumi ahumi hu'ne. 5 Hagi kanti kaziga kafane, kama kaziga kafamo'ene zahoma eri

kamo'enena (windua) 4'a agema'a huntegeno, ana makamo'a avugosa ohumi ahumi hu'naze. **6** Hagi Solomoni'a mago ra nonkrerfa kino, ranra retrure zafamofo none huno agi'a ante'ne. Hagi ama ana zafamofo zaza'amo'a, 23 mita higeno, atupa'amo'a 14 mita hu'ne. Hagi ana nomofo ko'hona ana hukna huno tusinasi zafareti ki'ne. **7** Hagi mago nona kini tra'ma mesia no ki'ne. Hagi ana nompi mani'neno keaga refkoma hania nonkino, keaga refko hu none huno agi'a ante'ne. Hagi ana nomofo agu'afina fenkamiti anagamima mareri'neana, sida zafareti ke ahe fankani'ne. **8** Hagi Solomoni'ma manisia nona keaga refkohu nonkumamofo amefi'a rure kegina huno anahu no kinte'ne. Hagi anahu kna huno lsipi kini ne' Fero mofa'ma eri'nea a'mofo nona kinte'ne. **9** Hagi ana maka noma ki'neana, zago'amo'a mareri havereti ranra zante havea frageno eri avozaze huteno ki'ne. Hagi fenkami noma erigafama hu'neretima anagami ome atre'neana, megia nomofone keginanena ana havenu ki'ne. **10** Hagi nomofo trama anteno agafama huno ki'nea haveramima tagama hu'neana, zaza'amo'a 5mita higeno mago'a havemo'a 4mitagi hafu hu'ne. **11** Hagi ana agofetura zago'amo mareri'nea haveramine, sida zafaramine, avamente avamente taga huno ante'ne. **12** Hagi ana maka nontamimofo zaho noma ki'neana, Ra Anumzamofo mono nomofo keginama hu'neaza huno 3'a have anteno marenerino, sida zafa rugeka nehuno, 3'a have anteno marenerino, sida zafa rugeka huno kino mareri'ne. **13** Hagi kini ne' Solomoni'ma anama huteno'a, Huramu'e nehaza ne' Tairi kumateti kehigeno e'ne. **14** Hagi ana ne'mofo nerera'a Naftali nagapinti kento are. Hagi nef'a Tairi kumateti nekino, bronsireti'ma keonke'zama tro'ma hu'arera knarezanfta hu'ne. Hagi Hiramu'a bronsi havereti'ma keonke'zama tro'ma hu'arera

agatereno knarezanfta hu'neankino, Kini ne' Solomoni eri'zama
bronsireti'ma tro'ma hu' eri'zana maka agrake eri'ne. **15** Hagi
Huramu'a bronsiretike tare ra vimago zafagna huno tro hu'ne.
Hagi ana vimago bronzi zafararemofo zazaznimo'a 8 mita higeno,
rama huno kagi'neana 5mitagi 30 sentemita hutere hu'ne. **16** Hagi
ana bronzi zafararemofo agofetu'ma kankri'ama tro hunteterema
hu'neana, zaza'amo'a 2 mitagi 20sentemita hu'ne. **17** Hagi
ana bronzi zafararente'ma kankri'ma tro'ma huntetera, avonkre
nankre huno, 7ni'a seninofi tro huntetere hu'ne. **18** Hagi ana tare
zafare'ma avonkre nankre'ma hunte'nefina, tarefi pomigreneti
zafaragamofo amema'a krenteno evutere hu'ne. **19** Hagi ana
bronsire zafararemofo kankri'amokea liliema nehaza trazamofo
amosre'agna huna'ankino 2mita hutere hu'ne. **20** Hagi ana
bronzi zafararemofo kankrite'ma avonkre nankre'ma hu'nefina,
tare kankamu tro hunteno 200'a pomigreneti zafa ragamofo
amema'a tro hunte'ne. **21** Hagi ana'ma huteno'a Huramu'a ana
zafararempintira magora erino ra mono nomofo kafante sauti
kaziga asenteno retrunereno, magora noti kaziga asente'ne. Hagi
sauti kazigama asente'nea zafagura, Jakimi'e huno agi'a nenteno,
noti kazigama asentea zafagura Boasi'e huno agi'a ante'ne.
22 Hagi ana zafararemofo anaga zanasenirera liliema nehaza
trazamofo amosre'amofo amema'a tro hu'za ante'naze. Hagi
ana'ma higeno'a anante zafama tro'ma huno asente eri'zamo'a
vagare'ne. **23** Hagi Huramu'ma ana'ma huteno'a tima afinte
zana bronsireti mago tenki tro huno tirure huno agia antemi'ne.
Hagi ana tenkimo'a tupo hu'neankino, 2 mitagi 20sentemita
hanagatino agu'a ufregeno, 4mitagi 40ti mita megia kagigeno,
rama hu'amo'a 13mita huneno hafu'a sentemita hu'ne. **24** Hagi
ana tenkimofona avaza avamentera, 45 sente mitamofo agu'afina

hagonefaramimofo amema'a 10ni'a tarefi trohunteno avasese'a huntetere huno kagi'ne. **25** Hagi Huramu'a bronsire ve bulimakao afutami 12fu'a tro huteno ana 12fu'a bulimakao afu agumpi tima afinte'zana tenkia ante'ne. Hagi ana bronsire bulimakao afutmima tro'ma hunte'neana zamarigamo'a magopi ruhampri'hazageno, 3'amo'za noti kaziga zamavugosa huntazageno, 3'amo'za zage ufre kaziga zamavugosa huntazageno, 3'amo'za sauti kaziga zamavugosa huntazageno, 3'amo'za zage hanati kaziga zamavugosa hunte'naze. Hagi ana tenkimo'a ana ve bulimakao afutamimofo zamagumpi megeno, ana tenkimofo fenka kaziga mani'naze. **26** Hagi ana tenkimofo tapa'amo'a 10 sentimita higeno, agi'amo'a kapugna nehuno liliema nehaza trazamofo amosre'agna huno rutare'ne. Hagi ana tenkimofo agu'afima tima afinte'niana 40 tauseni'a lita afintegahie. **27** Hagi Huramu'a tenkifima tima afino retrurenteno retufeno vu'zana, bronsireti 10ni'a wili tro hu'ne. Hagi ana zamofona zaza'amo'a 2mita higeno, atupa'amo'a 2 mita higeno, atrumare'amo'a 2 mita hu'ne. **28** Hagi anama tro'ma haza zamofona rugeka rugeka hu'za ahentetere hu'naze. **29** Hagi ana tenkima retufeno vu'zama tro'ma hu'naza zantera Laionine bulimakao afu'ene Serabimie nehaza ankeromofo amema'ane tro huntetere hu'ne. Hagi anama tro'ma hunte'nea zagaramimofo fenkamu kazigane, anagama kaziganena zafa amosre'arami trohu korave huntetere hu'ne. **30** Hagi ana tenkima retufeno vu'zamofo wili'ane wilima azeri akarehehu zotaramina, 4'a bronsireti tro hunte'ne. Hagi ana zotaramintera tupoza metere hu'ne. **31** Hagi ana zamofo agi'arera neone tenkima retrumare avamente bronsireti erikorave huntetere higeno, zaza'amo'a 45sentimita higeno atupa'amo'a 65 sentimita hu'ne. Hagi anama tro'ma huntea zantera zafa

amosrearami trohu korave huntetere hu'ne. Hagi 4'a bronsire zafamofo eri koravema hunte bronsia azeri'ne. **32** Hagi 4'a wilia bronsire zafama retrumare'nere trohuntetere hu'ne. Hagi wilima azeri'nea bronsimofo zaza'amo'a 67 sentimita hu'ne. **33** Hagi ana tintenkima erino vu'zamofo wiliramia karisi wiliramigna huno tro hu'ne. Hagi ana wiliramima azeri zotaramina bronsire tro hu'ne. **34** Hagi tenkima hagazama ami zana 4'a bronzi zafa 4'a agentera krekanarentegeno, anante mekna hu'ne. **35** Hagi agitera bronsinu eri korave huno krekanarentegeno, zaza'amo'a 20sentimita hu'ne. Hagi 4'a bronzi zafama 4'a agente'ma krekanarente'nerera 4'a bronzi krekanarenteno, ana 4'a bronsire zafa azeri hanavetine. **36** Hagi ana maka brosiramintera serabimie nehaza akeromofo amema'ama laioni amema'ama tofe aninagna zafamofo amema'ama tro hunenteno, zafa amosrea tro huno avasese'a huntetere hu'ne. **37** Hagi ana ti tenkima retufeno vu'zana anahukna huno 10ni'a tro hu'ne. Hagi ana makazamofo zaza'amo'ene, atupa'amo'ene atrure'amo'enena magozanke hu'ne. **38** Hagi tima afi tenkia 10ni'a tro hu'ne. Hagi ana tenkiramimofo atupa kaziga'amo'a 1 mitagi 80 senti mita higeno, magoke magoke tenkimo'a 800 lita tina azeriga hu'ne. **39** Hagi ana tenkiramina ra mono nomofona sauti kaziga 5fu'a anteno, noti kaziga 5fu'a ante'ne. Hagi ra mono nomofona sauti kazigane, zage hanati kazigamofo amu'nompina ran tenkima tirurema huno agima antemi'nea tenkia ante'ne. **40** Hagi anama huteno'a Huramu'a tima fre zuompane, sipetine, mago'a zuomparamineno tro hu'ne. Huramu'a kini ne' Solomoni'ma Ra Anumzamofo nompima me zantaminku'ma trohuo huno'ma hia zantamina, maka trohu vagare'ne. **41** Hagi bronsire tare vimago zafarare tro huno ana vimago zafararemofo

asenirera zuompagnaza tro huno resi hunenteno, tare seninofi
tro huno hagerafi hagerafi huno avasese'a hunteno kagine.

42 Hagi ana seni nofitera 400'a pomigreneti zafa raga tro
huntegeno, ana bronsire vimago zafararemofo aseniretira erami
erami hu'ne. **43** Hagi tima afinteno erino vuno eno'ma hu'zana
10ni'a tro huno ana zamofo agu'a 10ni'a ne'onse ti tenkirami
retruretere hu'ne. **44** Hagi tima afinte zana mago ainire tro
huno, agi'a tirure huno nenteno, ana tenkimofo fenka kaziga
12fu'a bronsire ve bulimakao afutami tro huno antegeno, ana
afutamimofo zamagofetu tirurema nehaza tenkia me'ne. **45**
Hagi Huramu'a kavone savorine, zuomparaminena tro huno
bronsireti eri masave hunteteno, Ra Anumzamofo mono nompina
ante'ne. **46** Hagi Jodani agupofi higo hapa me'nere Sukoti
kuma'ene Zaretani kuma amu'nompi kini ne'mo'a ana zantamina
tro huo higeno, Huramu'a tro hu'ne. **47** Hagi Solomoni'a ana
zantmimofo kna'a sigerirera erinteno refko hunora onke'ne.
Na'ankure rama'a zantminkino bronsimofo kna'a refko huno
onke'ne. **48** Hagi Solomoni'a Ra Anumzamofo nompima me
itaramima tro'ma hu'neana, kre sramnavu ita golireti tro nehuno,
bretimofo ita, golireti tro hunte'ne. **49** Hagi hunaragintegeno
ruotge'ma hu'nea asamofo avuga, goliretike'za 10ni'a tavi azota
tro hutegeno, 5fu'a tavi azota sauti kaziga retrurenteno, 5fu'a
tavi azota noti kaziga retrurente'ne. Hagi zafa amosre'agi, tavi
azotagi, osama hampage tu'za azotanena knare goliretike'za
tro nehuno, **50** kapuraminki, tavi'ma resu'ma hu tu'za azotagi,
zuomparaminki, mnanentake'za kre mnavu zuompagi, ruotge'ma
huno ruotgetfama hu'nefinkama ufre kafantremofo insigi, ra
mono nomofo kafante'ma hagente insinena maka goliretike'za tro
hu'ne. **51** Hagi kini ne' Solomoni'a Ra Anumzamofo ra mono nona

ki vagareteno, nefা Deviti'ma Ra Anumzamofo suzanema huno
ami'nea zantamina silvama, golima, mono nompima eri'zama eri
neonse zantamina maka erino, Ra Anumzamofo mono nompima
feno ante'zanema huno hunaragintepi eme ante'ne.

8 Hagi Solomoni'a maka Israeli ranra vahe'tamine, mago mago
naga'nofimofo kva vahe'tamine, nagazamire'ma ugagotama
hu'naza vahetamina mika kehige'za agri avuga Jerusalemi
kumate etru hu'naze. Hagi ke'ma hige'zama eme atru'ma
hu'nazana, huhagerafi huvempage vogisi Deviti rankuma
Saioni agonare'ma me'nereti omeri'za ra mono nompi eme
antehogu kehu tru hu'ne. **2** Hagi maka Israeli vene'nemo'za
kini ne' Solomoni avuga ka'ma kokampima fugagi'noma ki'za
mani'zama e'naza zanku'ma antahimi'za ne'zama kre'za nene'za
musemahu knare Etanimie nehaza 7ni ikante, eme atru
hu'naze. **3** Hagi ana maka Israeli ranra vahe'ma emeri
atruma hutazageno'a, pristi vahe'mo'za huhagerafi huvempage
vogisia erisga hu'naze. **4** Hagi ana pristi vahe'mo'zane, Livae
vahe'mo'za huhagerafi huvempage vogisine, atruhu seli none,
ana seli nompima ruotge'ma hu'nea zantaminena maka eri'za
mareri'naze. **5** Hagi Solomoni'ene maka Israeli vahetmima
emerি atruma hu'naza vahe'mo'zanena sipisipi afutamine,
bulimakao afutamina ohampriga'a ahe'za huhagerafi huvempage
vogisimofo avuga kresramna vu'naze. **6** Ana nehzageno pristi
vahe'mo'za huhagerafi huvempage vogisia eri'za, ra mono nomofo
hunaragintazageno ruotge'ma huno ruotagtfama hu'nefinka
serabimi ankerontrema tro huntazageno zanageko'namoke'ma
kantu kamati rufanara huntenapi henka kaziga ome ante'naze.
7 Ana'ma hazageno'a, ana ankerontremofo zanageko'namo'a
kantu kamati rufanara huke ana huhagerafi huvempage vogisine,

zafama hu'za eri'zama vu'naza zafararena refitente'na'e. **8** Hagi ana zafararemokea za'za huke agaterena'ankino ruotge'ma hu'nea mono nompintira amne ana zafararemofo atumpa kegahazanagi, mono nomofo megitira onke'naze. Hagi ana zotararena meninena anante me'na'e. (Ko'ma avontafema kre'hea knagu menine hu'ne). **9** Hagi ana huhagerafi huvempage vogisimofo agu'afina mago zana omane'neanki, Isipiti'ma atirami'za neazageno'ma, Ra Anumzamo'ma Israeli vahe'enema huhagerafi huvempage nehuno, Sainai (Horepi) agonare'ma Mosesema have tafetrente'ma kreteno ami'nea kasege me'ne. **10** Hagi ana huhagerafi huvempage vogisima eri'za ufraza pristi vahe'mo'zama hunaragintageno ruotge'ma hu'nea mono nompinti'ma ete atiramizageno'a, hampomo Ra Anumzamofo mono nompina avite'ne. **11** Hagi pristi vahetmimo'za mono nompina eri'zazmia e'ori'naze. Na'ankure hampomo'ene Ra Anumzamofo hihamu masa'amo'enena Ra Anumzamofo mono nompina avite'ne. **12** Anante Solomoni'a amange hu'ne, Ra Anumzamo'a huno, Agra hanintiri hampompi manigahue hu'ne. **13** Hagi nagra menina Ra Anumzamokama mani vavama hanana zana marerisa ra mono nonka'a kintoe. **14** Anage nehuno kini ne'mo'a rukrahe huno, maka oti'zama mani'naza Israeli vahera asomu kea huzmante'ne. **15** Hagi agra amanage hu'ne, Ra Anumzana Israeli vahe'mofo Anumzamo'ma nenfa Devitima huhamprinte'nea zamo'ma efore'ma hiazankura Agra'a ra agi erisie. **16** Ra Anumzamo'a amanage hu'ne, Israeli vahe'ma Isipiti'ma zamavare'na e'noret'i'ma eno menima ehanatiana, Nagra mago kumara maka Israeli naga nospintira noni'ama kisageno nagi'ni'ama erisgama hanaza kumara huhampri onte'noe. Hianagi Nagra Israeli vahe'niamofo kini manigahie

hu'na Deviti huhamprinte'noe. **17** Hagi nenfa Deviti agu'afi Ra Anumzana Israeli vahe Anumzamofo agi'ma erisgahu mono noma ki' antahintahia me'neane. **18** Hianagi Ra Anumzamo'a nenfa Devitinkura amanage huno asami'ne, Nagri nagima erisgahu noma ki' antahintahia kagua'afina nentahine. E'i knare antahintahi kagu'afina antahi'nane. **19** Hianagi ana nona tamage hunka kagra onkigosane. Hagi negamofo, kagrama kasente'nana mofavremo nagima erisga nehu'za, mono'ma hunantesaza nona kigahie huno hu'ne. **20** Hagi menina Ra Anumzamo'a huvempama hu'nea nanekea eri knare hie. Na'ankure nagra nenfa Deviti tra eri'na Ra Anumzamo'ma huvempama hu'nea kante ante'na, Israeli vahe kinia mani'nena Ra Anumzana Israeli vahe Anumzamofo agi'ma erisgahu nona kue. **21** Hagi ana nompina Ra Anumzamo'ma tafahe'mokizmima lsipiti'ma zamavare atiramino zamavareno ne-eno'ma huhagerafi huvempa kema huzmante'nea vogisima ante nona kintoe. **22** Hagi Solomoni'a anage nehuno, Israeli vahe zamavufi kre sramnavu itamofo avuga monafinka azana rusute anagamu neteno, **23** amanage huno nunamuna hu'ne, Ra Anumzana Israeli vahe'mota Anumzamoka kagri kna Anumzana monafine, ama mopafinena omani'ne. Kagra huhagerafi huvempage amage nentenka, tamagema huno agu'areti'ma huno kavariria vahera vagaore kavesizanu kavesi nezamantane. **24** Kagra eri'za vaheka'a nenfa Devitima huhamprinte'nana keka'a avariri'nane. Kagra kagipinti'ma huvempa hunte'nana zana, kagra'a kazanuti menina anama huhampri'nana zana hane. **25** Hagi menina Ra Anumzana Israeli vahe'mota Anumzamoka amanage hunka eri'za vaheka'amofo nenfa Devitina huvempagea hunte'nane, kagripinti'ma forehu anante anante hu'zama vanaza

vahe'mo'zama zamavu'zamavama kegava hu so'e nehu'za,
kagrama hu'nanaza hu'za fatgoma hu'za navaririsageno'a,
mago'zimimo Israeli vahe'mokizmi kinia manitere hugahie
hunka hu'nane. **26** Hagi menina Israeli vahe Anumzamoka
eri'za vaheka'a nenfa Devitima huvempama hunte'nana keka'a
avaririnka ana zana huo. **27** Hianagi tamage hunka eraminka ama
mopafina emanigahampi? Ko, anami monamo'ene onagamuma
me'nea monamo'a rankrerafa hu'neangi mani avitegahane.
Hagi inankna huno amama kintoa nomo'a kagrira knarera
hugantegahie? **28** Ana hu'neanagi Ra Anumzana nagri
Anumzamoka nunamu keni'a antahio. Eri'za vaheka'amo'na
menima kavugama mani'nena nehua krafa keni'ane, nunamu
keni'anena antahinamio. **29** Hagi kenage'ene feru'enena kavua
antenka mani'nenka, Nagri nagi me'nena mono hunanteho
hunkama hu'nana nontegama tavugosama hunteteneta nunamuma
hanunkenka antahiramio. **30** Hagi eri'za vahe'kamo'nane,
Israeli vahekamozanema ama ana nontegama tavugosama
hunteneta nunamuma hanunana antahio. Hagi nemanina mona
kumaka'afinti nentahinka kumitia eri atreranto. **31** Hagi
mago'mo'ma tavaoma'are'ma nemanisimofoma azeri havizama
huteno, ama ana nompima kresramna vu itamofo avugama
eno, nagra mago havizana osu'noe huno'ma huvempama hina,
32 monafinkati nentahinka eri'za vaheka'aramimofo kea fatgo
hunka refko hunka, havizama hu'nenimofona mizama'a neminka,
hazenkema osu'nesimofona knare hunto. **33** Hagi kagri vahe
Israeli vahe'mo'za kagri kavure'ma kumi'ma hu'nenageno ha'
vahe'zmimo'za ha'ma huzmagateresage'za ete kagrite'ma ama
ana nompima e'za kagima eme nehe'za nunumuma hanagenka,
34 monafinkatira nunamuzmia nentahinka vaheka'a Israeli

vahe kumira atre'zmantenka ete zamavarenka zamagehe'ima
zami'nana mopafi eno. **35** Hagi kagri vahe Israeli vahe'mo'zama
kumi'ma hu'enageno, ko'ma orina kumi zamavu'zmavama
atre'za rukrehe hu'za ete kagrite'ma e'za zamavugosama ama
nontegama hunte'nezama zamazeri havizama banana zanku'ma
kajima nehe'za nunamuma hanagenka, **36** monafinkatira
nunanuzmia nentahinka eri'za vaheka'aramina Israeli vahera
kumizmia eri atre'nezmanenka, knare kana zamaveri nehunka,
erisantima hare'za manisaza mopa ka'ama zami'nampina kora
atregeno runteno. **37** Hagi agatonto knama mopazmifima
fore huge, krima fore huge, hozafima ruzahu ruzahu kri fore
huge, neone kafaramimo'za hozama eri havizama huge, ha'
vahe'zmimo kuma kafazamire ankanirege'ma hanage'za, **38**
mago Israeli vahemo'o, rama'a Israeli ma ana hazenke zanku'ma
zamavugosa ama nontegama hunente'za nunamuma hanagenka,
39 mona kuma ka'afintira nunamuzmia antahizaminka kumizmia
eri atre' zamantegahane. Hagi mago mago'mo'ma agra'ama
hu'enenia avu'ava zante'ma nunamuma hanigenka nunamu
ke'a antahimitere hugahane. Na'ankure Kagrake'za vahe'mofo
tumora kenka antahinka hu'nanankinka, mago mago'mo'ma
hu'enenia avu'avate antenka mizana amigahane. **40** Hagi ana'ma
hananke'za zamagehemofoma zami'nana mopafima maka knama
mani'zama vanaza knafina, kagrikuke korora hunegante'za, kagri
agorga manigahaze. **41** Hagi henka Israeli vaherompage meg'i'a
vahe'mo'za kagri kagi kagenkea antahigahaze. Ana nehu'za Kagri
kagigura afeteti kumazmia atre'za egahaze. **42** Na'ankure hihamu
hanavekareti'ma kzama rusutenga ranra avu'avazama erifore'ma
hu'nana kagi kagenkea antahigahaze. Hagi ana kagi kagenkema
nentahiza e'za zamavugosa ama nontegama hunte'za nunamuma

hanagenka, 43 mona kuma ka'afintira nunamuzmia nentahinka, nazankuro rurega vahe'mo'zama kantahima kesaza zana huzmanto. E'ina'ma hananke'za, maka ama mopafi vahe'mo'za, Israeli vahe'mo'zama nehazaza hu'za kage'za antahi'za nehu'za, korora hunegante'za kagorga'a manigahaze. Ana nehu'za ama kagri noma kintoa nonkura, mono hugante'za kagi erisga hu no kinte'ne hu'za ke'za antahi'za hugahaze. 44 Hagi vaheka'ama huzamantesanke'za ha' vahe'zaminema ha'ma ome hunaku'ma nevu'za, mono'ma hunanteta nagima erisga hihoma hunkama hanke'nama ki'noa noma me'nea rankumategama zamavugosa hunte'za nunamuma hanagenka, 45 monafinkatira nunamuzmia nentahinka zamaza hananke'za, ha' vahe'zmia hara huzmagateregahaze. 46 Hagi maka vahera kumi vahe mani'nonanki, henkama kumi'ma hanagenka krimpa ahezmanantenka ha' vahe'zmia huzmante'nanke'za eme zamahe'za kina huzmante'za zamavare'za mopazmirega afetero tava'ontero vugahaze. 47 Hianagi ana mparega umani'ne'za zamagu'a rukrahe hu'za kagrite ne-eza, nunamu hu'za tagra kefo avu'ava huta, kumi hu'none hu'za nehu'za, 48 ha' vahe'zmimofo mopafima manine'za maka antahintahi zamireti'ene, tumozmireti'ene, zamagu'areti'enema hu'za kumi zamigu'ma zamasunku'ma nehu'za, tagehe'ima zami'nana mparegane, huhampri zmante'nana rankumategane, mono hunegante'za kagi erisga hihoma hu'nama kintoa nonteganema zamavugosa hunte'ne'za nunamuma hanagenka, 49 monafinkatira nunamuzmia nentahinka, knazazmia eri oza nehunka zamaza huo. 50 Hagi ana nehunka vaheka'amo'zama inankna kumi'ma kagrite'ma hu'nenazana kumizamia atre'nezmantenka, ha' vahe'zamimofo antahintahia eri rukrahe huge'za, zamasunku huzmanteho. 51

Na'ankure zamagra kagrika'a vahe mani'nazankinka Isipitira
aenima krefizoma nehiankna tevefinti zamavarenka atiraminka
e'nane. **52** Hagi eri'za vahe'kamona krafa kere'ene Israeli
vahe'ka'amofo krafa kere'enena, kavu antenka mani'nenka
kagesa antetenka manio. Hagi kagritegama inanknarero
nunamuma hanagenka antahizamio. **53** Na'ankure kagra ama
mopafi vahe'pintira nagri vahe fatgo manisaze hunka, Mosesema
huama'ma hunka asami'nana kante antenka zamazerinte
ruotge hunka tagehe'mofoma Isipitira zamavare atiraminka
e'nane. Kagra Ra Anumzana hihamu hankavekane Anumza
mani'nane. **54** Hagi Solomoni'ma Ra Anumzamofontegama ana
maka nunamuma huvgareteno'a, Ra Anumzamofontegama
kre sramnavu itamofo avugama rena reno azantre'ma rusute
anagamuma atre'neretira oti'ne. **55** Hagi anante otino maka
Israeli vahera ranke huno asomu kea huzmante'no amanage
hu'ne, **56** Ra Anumzamo'a huhampri tante'nea kante'ma
Israeli vahe'motama manigasama tamia zankura ragi amisune.
Eri'za ne'a Mosesema huhamprinthe'hea ke'amo'a magore huno
amnezanknara osie. **57** Hagi Ra Anumzana tagri Anumzamo'a
amefira huramige, tatregera osanianki, tafahe'mo'enema
mani'neaza huno tagri'enena manisie. **58** Hagi agra kante tazeri
ante fatgo hanigeta kasegene, trakene ke'anema tagehe'mofoma
zami'nea kea avaririgahune. **59** Hagi menima Ra Anumzamofo
avugama krafama hua nunamu ke'ni'amo'a Ra Anumzana tagri
Anumzamofo tava'onte me'nenkeno, hanine, zagenena eri'za
vahekamo'nane Israeli vahe'kamofona maka zupa fatgo avu'avara
hurantesane. **60** Hagi ana'ma hanigeno'a maka ama mopafi
vahe'mo'za ke'za antahi'zama hanazana, mago Anumzana ama
mopafina omani'neanki Ra Anumzamo'a agrake Anumzana

mani'nie hu'za ke'za antahiza hugahaze. **61** Hagi tamagra Ra Anumzana tamagri Anumzamofona tamage huta tamagu'areti nevaririta trake'ane, kasege'anena menima hazaza huta avariraho.

62 Hagi anante kini ne' Solomoni'ene maka Israeli vahe'mo'zanena Ra Anumzamofontega ofa kresramna vunte'naze. **63** Hagi Solomoni'a 22tauseni'a bulimakao afuki, 120tauseni'a sipisipi afutminki huno aheno Ra Anumzamofontega rimpa fru ofa kresramna vunte'ne. E'ina bulimakaone sipisipi afutminteti kini ne'mo'ene maka Israeli vahe'mo'zanena Ra Anumzamofo nona kafana renagiza, Anumzamofontega hunagrura hunte'naza ami vagarenaze. **64** Hagi ana kna zupage Solomoni'a Ra Anumzamofo mono nomofo avugama me'nea kumara Ra Anumzamofontega hunagru huntenu ami vagare'ne. Na'ankure e'ina kumapi me'nea bronsire kre sramnavu itamo'a osi hu'neankino tevefima kre fananehu ofane, witi ofane, afova'aretimu arimpa fru ofa hugara osu'ne. **65** Hagi Solomoni'ene Israeli vahe'mo'za ne'zana kre'za nene'za musena Ra Anumzana tagri Anumzamofo avuga hu'naze. Hagi noti kaziga Lebo-hamatiti evuno sauti kaziga lsipi tinte'ma evigeno, tusi vahekrfamo'za atru hu'za 7ni'a knafi kre sramnavu itamofona musena hunte'za ne'zana kre'za nene'za, 7ni'a knafina ko'ma fugagi noma ki'za mani'za e'naza zankura ne'zana kre'za nene'za antahimi'naze. Hagi ana makara 14ni'a knafi ne'zana kre'za nene'za musenkase hu'naze. **66** Hagi musema hu knamo'ma vagaregeno'a Solomoni'a ana vahe'tmina huzmantege'za agrira asomuke hunente'za nozmirega tusi muse nehu'za vu'za e'za hu'naze. Na'ankure Ra Anumzamo'a eri'za ne'a Devitine, maka Israeli vahe'enena eri knare huzmante'ne.

9 Hagi Ra Anumzamofo mono none, agra'a nonema Solomoni'ma ki vaganereno, maka zama hugahuema hu'nea

zamo'ma vagamaretegeno'a, 2 Gibioni kumate'ma mani'negeno
Ra Anumzamo'ma agrite'ma efore hu'neaza huno efore hu'ne. 3
Hagi Ra Anumzamo'a anage huno asami'ne, Mono nonku'ma
nunamuma banana Nagra antahi'noankino Nagri'ma mono'ma
hunantesaza no me'nena maka knafina veamo'za Nagrira
monora eme hunenantesage'na, maka knafina ama ana
nonte navua kete'na mani'nena nagesa antahigahue. 4 Hagi
kagra negafa Deviti'ma hu'neaza hunka fatgo kavukva hunka
kagu'a anteraminka, maka kema kasamua kea nevaririnka
kasegeni'ane, trake'ni'ane amage'ma antesanke'na, 5 maka
zupa kagri nagapintike Israeli vahe kinia azeri fore hutere
hugahue. Na'ankure negafa Devitina amanage hu'na huvempa
hunte'noe. Kagri nagapintike Israeli vahe'mofo kinia manino
vugahie hu'na hunte'noe. 6 Hianagi kagrane kagripinti'ma forehu
anante anante'ma hu'zama vanaza vahe'mo'za amama avaririo
hu'nama nehua kasegene, tra kenema ovaririza atre'za ru
anumzamofo ome nevariri'za mono'ma hunteszazana, 7 Israeli
vahera amama zami'noa mopafintira zamazeri vati atregahue.
Ana nehu'na mono hunanteho hu'nama eri ruotge'ma hua mono
nona atre'na namefi humigahue. Hagi Israeli vahera kiza zokago
hu'zanknaza zamazeri tro ha'nena, kokankoka vahe'mo'za
kizazokago ke huzmante'za zamagiza regahaze. 8 Hagi ama
avasase'ane mono nomo'a havizantfa hinkeno, kante'ma evanaza
vahe'mo'za nege'za antri nehu'za, zamagena neru'za amanage
hugahaze, nahigeno Ra Anumzamo'a ama mopane, ama
mono nonena amanara hie hu'za hugahaze. 9 Hagi amanage
hu'za kenona hugahaze, na'ankure Isipiti'ma zamagehe'mofoma
zamavareno'ma e'nea Ra Anumzana zamagra atre'za, ru
anumzantami nevaririza monora ome hunte'naze. E'ina hu'nazagu

Ra Anumzamo'a amanahu hazenkea zami'ne hu'za hugahaze.

10 Hagi Solomoni'a 20'a kafufi mono none agra'a nonena kivagare'ne. Hagi ana nontrema ki vagamare'neana, **11** Tairi kini ne' Hiramu'a maka sida zafane saipresi zafane, golinena Solomoni'ma kema hiama'a amigeno ki'ne. Hagi ana'ma hirera kini ne' Solomoni'a 20'a rankumatmi Hiramuna Galili mopafina ami'ne. **12** Hianagi Hiramu'ma Tairi kumateti'ma eno Solomoni'ma ami'nea kumatmima eme negeno'a, musena osu'ne. **13** Ana nehuno amanage huno antahige'ne? Nenfuga nanknahu kumatmi namine? huno nehuno ana kuma'ma me'nea mopagura Kabulie (eri'zama'a omne'ne) huno agia antegeno, ana knaret'i'ma eno menima ehanati'neana ana mopagura Kabulie hu'za agi'a nehaze. **14** Hagi kna'amo'a 4'a tani agatere'nea goli Hiramu'a Solomonina atrentege'za eri'za e'naze. **15** Hagi ama'i Solomoni'ma eri'za vahe'ma zamavarege'za Ra Anumzamofo none, agri none negi'za Jerusalemi kuma'ma tami'nea kaziga mopa kate'za ante avite'nente'za, Jerusalemi kuma'mofone Hazori kumamofone, Megido kuma'mofone Gezeri kuma keginama hu'naza zamofo naneke. **16** Na'ankure Isipi kini ne' Fero'a Gaza kumate vahe ha'eme huzmanteno kina hunezmantero, Kenani vahera rama'a nezamaheno, kumazmia teve taginte'ne. Hagi mofa'amo'ma Solomoninte nemaregeno'a, e'i ana kumara muse'za mofa'amofo ami'ne. **17** Ana higeno Solomoni'a Gezeri kumara eriso'e hu'ne. Hagi ana nehuno fenka kaziga Bet-horoni kuma'ene, **18** Ba'alati kuma'ene tro nehuno, Juda ka'ma kokampina Tamari kumara tro hu'ne. **19** Hagi Solomoni'a maka karisiramima antesia kuma'ane, hosi afutmima antesia kuma'ane, mago'a zantmi antesia kumatmina Jerusalemine, Lebanonine maka agrama kegavama hu'nea mopafi tro hu'ne. **20** Hagi Israeli

mopafina mago'a Amori vahe'ene Hiti vahe'ene Perizi vahe'ene
Hivi vahe'ene Jebusi vahe'enena mani'naze. **21** Hagi e'ina
vahetamina Israeli vahe'mo'zama zamahe hanama osu'naza
vahe'tmimofo zamagehemo'ze. Hagi Solomoni'a e'ina vahetmina
zamavarege'za, agri kazokazo eri'za vahe manine'za eri'zana
erime e'za menina ehanati'naze. **22** Hianagi Solomoni'a magore
huno Israeli vhahera zamavarege'za kazokazo eri'zana e'ori'naze.
Hagi sondia vahetmima, kva vahe'tmima, sondia vahete vugota
kva vahetmima, karisima eri'za ha'ma nehaza vahete kva
vahetmima, hosi afutmima eri'za ha'ma hu vahe'tmina Israeli
vhahera zamazeri oti'ne. **23** Hagi 5 hantret 50'a vugota kva
vahe'tmi Solomoni'a huzmanteg'e'za eri'za vahetera vugota hu'za
kva huzmant'e'za, eri'zankea ana vahetamina huzmant'e'naze.
24 Hianagi Fero mofa'ma Solomoni nenaro'a Deviti rankumara
atreno, Solomoni'ma kintea nompi umani'ne. Hagi Solomoni'a
Jerusalemi kuma'ma tami'nea kaziga eri'za vahe'agu hige'za,
mopa kafi'za atre'za eri agupo tro hu'naze. **25** Hagi Ra
Anumzamofo kresramna vu itama tro'ma huntetera mago
kafumofo agu'afina Solomoni'a 3'a zupa kre fananehu ofane,
arimpa fru ofanena nehuno, anahukna huno mnanentake'zana
Ra Anumzamofontega kremna vu'ne. Ana nehuno mono nona
ki vagare'ne. **26** Hagi ana huteno kini ne' Solomoni'a Edomu
mopafina Eloti kuma tava'onte, Koranke hageri ankena, Ezion-
gebe kumatera rama'a venterami tro hunte'ne. **27** Hagi kini ne'
Hiramu'a ventema erino vanoma hu'ama antahini'ma hu'naza
eri'za vahe'a huzmanteg'e'za Solomoni eri'za vahe'tamine ventefi
erizana ome eri'naze. **28** Hagi ana vahe'mo'za vente eri'za Ofiri
moparega hagerimpi vu'za kna'amo'a 16ni'a tani hu'nea goli
omeri'za Solomonina eme ami'naze.

10 Hagi Siba mopama kegava hu'nea kuini a'mo'ma Anumzamo'ma Solomonima azama higeno'ma knare'ma hiazamofo agenkema nentahino'a, amuhoma hu'nea agenoka kea antahigeno reheno ke'naku, Jerusalemi kumate e'ne. (Luk 11:31)

2 Hagi ana kuini a'mo'a eri'za vahe'arami hige'za aza hazageno mnanentake zantamine, rama'a goline, zago'amo marerirfa haveraminena, kemoli afu agumpi erinte'za Jerusalem kumate e'naze. Hagi ana kuini a'mo'a Solomoninte ehanatino maka antahintahi'afima me'nea nanekea eme asami'ne. 3 Hagi ana a'mo'ma agenoka'ma hirera Solomoni'a mago zana agateoreno ana maka eriama huno kenona hunte'ne. Hagi ana a'mofoma kenonama hunte'neana, mago zamo'e huno Solomonina amuhoa huonte'ne. 4 Hagi Siba kuini a'mo'ma Solomoni knare antahintahi zama keno antahi'no'ma nehuno, noma ki'nea noma negeno, 5 ne'zama nenaza trate'ma me'nea ne'zama negeno, eri'za vahe'ama eri'za kante'ma zamantege'za marerirfa kukenama hu'naza zana negeno, kinimofo waini tima tro hu eri'za vahe'ma negeno, tevefima kre fananehu ofama Ra Anumzamofo nompima nehiazama negeno'a, ke'a omne'ne. 6 Hagi anante ana a'mo'a kini nekura amanage hu'ne, Kagri kagenkene knare antahizanka'amofo agenkenema kuma'niregama mani'nena antahi'noana tamage! 7 Hianagi kuma'niregama mani'nena kagri kagenkema nentahi'na, havige hu'na hu'noane. Hagi menina nagra navufinti nege'na nagra nagesafinti antahue. Hagi antahintahi kamo'ene, knare'ma hunka hagenkama marerina zamofo kagenkema antahi'noa zana agatere'ne. 8 Hagi kagri vahe'mo'zane, eri'za vahe'kamozanema, maka knama kavugama mani'ne'za knare antahizanka'ama nentahiza muse hugahaze. 9 Hagi Ra Anumzana kagri Anumzamo'ma musema huganteno

Israeli vahe' kini trate'ma kavrente'nea Anumzamo'a, ragi erigahie. Na'ankure Agra Israeli vahera zmavesinte vava nehuno, fatgo hunka refko nehunka fatgo kavukava hunka Israeli vahera kegava huzmanto huno kinia kazeri oti'ne. **10** Anage nehuno ana a'mo'a Solomonina kna'amo'a 4tani hu'nea goline, mnanetake zantmanine, zago'amo marerirfa haveraminena rama'a ami'ne. Hagi Siba kuini a'mo'ma erino'ma e'nea avamentera, mnanentake zantamina Solomonina mago'mo'e huno erino eme omi'ne. **11** Hagi Hiramu venteramimo'a Ofiri kumatetira goline, rama'a alamuk zafaramine, zago'amo mareri haveraminena erino e'ne. **12** Hagi kini ne'mo'a ana zafaraminuti Ra Anumzamofo mono none, agra nonena negino, hapue nehaza zavenama mago'a zavenane tro hu'ne. Hagi venteramimo'ma erino'ma e'neankna zafa mago'mo'e huno erinora ome'ne. **13** Hagi ana'ma higeno'a kini ne' Solomoni'a musezantamima amia agofetura Siba kuini a'mo'ma nazankuro antahigea zana amne ami'ne. Hagi ana'ma higeno'a Siba kuini a'mo'a eri'za vahe'ane ete mopa zimirega vu'naze. **14** Hagi Solomoni'a mago'mago kafufina kna'amo'a 23tani hu'nea goli eritere hu'ne. **15** Hagi zagore'ma fenoma netraza vaheteti'ene, Arabia kini vahetaminteti'ene, Israeli mopama refko hu'za kvama huterema hu'naza vahetaminteti takesi zagomo'a anampina eofre'ne. **16** Hagi Solomoni'a goli ruguta huno 200'a ranra hanko tro hu'ne. Hagi kna'amo'a 7 kilo naza hu'nea golireti mago'mago hankoa trohutere hu'ne. **17** Hagi ne'one hankoramina hamanteti golia ruguta huno 300'a tro hu'ne. Hagi kna'amo'a 2kilo hu'nea golireti mago'mago hankoa trohutere hu'ne. Ana huteno Lebanoni afuza zafema huno kinte'nea nompi ana zantamina ante'ne. **18** Ana nehuno kini ne'mo'a kini tra'a razankrerfa trohuteno, elefantimofo zaza aveteti

(ivory) ana trara avasesea hunteteno, knare zantfa hu'nea golireti erino vazinte'ne. **19** Hagi ana kini trate'ma agama reno mareri trara 6si'a ahenteno mrenerino, ana tra'mofo amefiga'a golireti amagenama ante'zana eri fagigi nenteno, bulimakao anenta afu'mofo agenopa tro hunenteno, azama ante harage'ma hu zafa ana tratera ahenenteno, tare laioni amema'a tro huno ana tra'mofona kantigama retrurente'ne. **20** Ana nehuno 6'a tra'ma ahenoma marerinerera, kantigama mago'mago Laionimofo amema'a tro huno antetere huno mareri'geno ana makara 12fu'a laioni amema'a me'ne. Hagi e'inahu kini trara mago kini ne'mo'e huno ama mopafina trora osu'ne. **21** Hagi maka Solomoni'ma tima nenea kapuramine Lebanoni afuza zafe huno'ma noma'agu'ma agima antemi'nea nompima me'nea zuomparamina goliretike tro hu'ne. Hagi Silvaretira trora osu'naze. Na'ankure Solomoni knafina silvamofo kna'amo'a evurami'ne. **22** Hagi kini ne'mo'a rama'a vente ante'negeno, Hiram uenteramine hagerimpina vano hu'ne. Hagi 3'a kafufina magoke knazupa ana venteramimo'a elefanti afumofo zaza ave'ma (ivory) golima silvama, monkima ranra namaraminenava're'za etere hu'naze. **23** Ana higeno ama mopafi kini vahe'mokizmia, kini ne' Solomoni'a feno zampine knare antahintahifina zamagatere'ne. **24** Hagi maka kokankoka vahe'mo'za Solomoninte e'za Anumzamo'ma amia knare antahintahia eme antahi'naze. **25** Hagi kafune kafunena mago'mago vahe'mo'zama Solomonima agenaku'ma aza vahe'mo'za silvane, goline, kukanane, ha' zantamine, mere nehaza mnamentake pauranena eme nemiza, hosi afutamine, miulie nehaza donki afutaminena avre'za musezana eme ami'naze. **26** Hagi Solomoni'a ha'ma hu'zantamina 1tausen 4 hantreti'a karisirami eri tru nehuno, 12 tausen'i'a hosi afutami

eritru hu'ne. Hagi karisima ante kumatmima tro'ma huntenefine, Jerusalemi kumapinena, ana zantamina zamante'ne. **27** Hagi kini ne'mo'a rama'a silva eritru higeno havemo'ma hiaza huno Jerusalemi kumapina amne zankna nehigeno, rama'a sida zafa eritru higeno, sikamo zafamo'ma Juda neone agonafima hiaza huno amne zankna hu'ne. **28** Hagi Solomoni'a hosi afutamina lsipiti'ene Kue kumateti'ene mizase'ne. Hagi Kue kumateti'ma hosi afu'tamima mizanesaza zago avamenteti, Solomoni eri'za vahe'mo'za hosi afutamina Kue kumatetira mizana hu'naze. **29** Hagi ana knafina lsipitira mago'mago karisiramina 600'a silva zagoreti (6.8 kilo) mi'za nese'za, mago'mago hosi afu'tmina 150'a silva zagoreti (1.7 kilo) mizasetere hu'naze. Hagi Hiti kini vahetaminte'ene, Siria kini vahe'mokizmire'ene ana zantamina zagorera atre'naze.

11 Hagi Solomoni'a Fero mofa'ma eri'nefina, rama'a meg'i'a a'nema avesizamanteno eri'neana Moapu a'nene, Amoni a'nene Edomu a'nene, Saidoni a'nene, Hiti a'nenena eri'ne. **2** Hagi Ra Anumzamo'a amanage huno Israeli vhahera kora zamasami'ne, E'i ana mopafintira aneramina e'oriho. Na'ankure tamagu'a tamazeri arukrahe hanageta zamagri anumza avaririgahaze huno hu'ne. Hianagi Solomoni'a anankea ontahi ana a'neramina tusiza huno avesizmante'ne. **3** Hagi kini vahe'mokizmi mofanea Solomoni'a 700'a ese a'nea nezmanteno, 300'a henka a'nea eri'zmante'ne. Hagi tamage hu'za ana a'nemo'za Ra Anumzamofonte'ma mani'neazana agu'a azeri rukrahera hu'naze. **4** Hagi Solomoni'ma ozafama nerege'za ana a'neramimo'za agu'a azeri rukrahera hazageno, nefo Deviti'ma agu'areti huno Ra Anumzamofoma avesinteno avariri'nea zana osu'ne. **5** Na'ankure Solomoni'a Saidoni vahe'mofo a' anumza

Astoretine, Amori vahe anumza agoteno hi'mnage hu'nea
anumza Molekine, zanavaririno monora huzanante'ne. **6** E'ina
nehuno Solomoni'a Ra Anumzamofo avurera kefo avu'ava
nehuno, nefo Deviti'ma agu'areti huno Ra Anumzamofoma
avariri'nea zana osu'ne. **7** Ana nehuno Solomoni'a Jerusalem
kuma'mofona zage hanati kaziga agonare, Moapu vahe hi'mnage
anumza Kemosine, Amori vahe hi'mnage anumza Molekinema
mono hunte kumara tro hu'ne. **8** Ana nehuno Solomoni'a
mago'mago meg'i'a a'ne'aramimo'ma havi anumzama'are'ma
ofa nehuno, Kresramanama nevuno, mnanentake zama kre
mnama vanaza kumara tro huzmantetere hu'ne. **9** Hagi tare
zupama Solomoninte'ma efore'ma humino ru anumzantera mono
huontoma huno asami'nea Ra Anumzamofona atreno amefi
humigeno, Anumzamo'a tusi arimpa Solomonina ahente'ne.
Na'ankure Ra Anumzana Israeli vahe Anumzamofona amefi
humigeno'e. **10** Hagi havi anumzantamimofoma ovaririnka,
monora huonto huno'ma Ra Anumzamo'a avumarora ante'ne.
Hianagi Solomoni'a Ra Anumzamo'ma osuoma huno asmi'nea
kea rutarage'ne. **11** E'ina higeno Ra Anumzamo'a amanage huno
Solomonina asmi'ne, kagra kasege'nine trake'ninema kegava huo
huana, ontahinka rutraganku kumama kegavama hu'nampintira
kazeri atre'na eri'za vaheka'a atrenugen kegava hugahie. **12**
Hianagi negafa Deviti'ma hu'nea avu'ava zanku nentahi'na
kagrama mani'nenana knafina kagrira anara osugahuanki,
kagrama fitesanke'na negamofo anara hu'na kini tratetira
avretre'na eri'za vahe'a kini tratera avrentegahue. **13** Hianagi
Deviti'ma hu'nea avu'ava zanku'ene Jerusalemi kuma'ma
huhampri'noa zanku'enena nentahi'na, negamofona kini tratetira
azeri atre vagaoregahuanki, magoke naga nofi ami'nenkeno

kegava huzmantegahie. **14** Anage nehuno Ra Anumzamo'a Idomu kini ne'mofo nagapinti Hadati'e nehaza ne' azeri otigeno, Solomonina ha'rente'ne. **15** Na'ankure kora Deviti'ma Edomu vahe'ma ha'ma ome hunezmantea knafina, Sondia vahete vugota kva ne' Joapu'a marerino Israeli sondia vahe'ma hapinti'ma zamahe'naza vahetmina ome asenezmanteno, maka Idomu vefamora zamahe hana hu'ne. **16** Hagi Joapu'ene Israeli sondia vahe'mo'za 6si'a ika Edomu kumatera mani'ne'za maka vefamora zamahe hana hu'naze. **17** Hianagi ana'ma higeno'a Hadati'a nef ari'za vahe'tamine freno Isipi vu'ne. Hagi ana knafina Hadati'a osi mofavre mani'negeno anara hu'ne. **18** Hagi Midieni mopaintira atre'za Parani e'za Paranitira mago'a vahe eme zamavare'za Isipi kini ne' Feronte ehanatizageno none ne'zana nezamino, mopa zamige'za mani'naze. **19** Hagi Fero'a Hadatina tusiza huno avesinenteno, nenaro kuini a' Tapenesi negna amigeno ara eri'ne. **20** Hagi Tapenesi negna'a Hadatintetira mago ne' mofavre anteno Genubati'e huno agia antemi'ne. Higeno ana mofavrea Tapenesi avreno kegava higeno, Fero nompi Fero mofavreramine mani'ne. **21** Hagi Deviti'ene sondia vahete kva ne' Joapu'enema fri'na'ema hiankema Hadati'ma nentahino'a, amanage huno Ferona antahige'ne, natrege'na mohanirega vaneno. **22** Hianagi Fero'a huno, Na'anku atupara amafina hunenka mopakarega vunakura nehane. Higeno Hadati'a huno, ana hu'neanagi natrege'na va'neno. **23** Hagi ana hukna huno Anumzamo'a Eliada nemofo Rezonina azeri otigeno, Solomonina ha'rente'ne. Hagi Rezoni'a Zoba kumate kini ne' Hadadezeri eri'za nekino kva'amofona atreno freno vuno, **24** kini ne'ma ha'ma hunentaza vahe'mofo kva umani'ne. Hagi Deviti'ma Hadadezerine Zoba kumate sondia vahe'anema aheno'ma eri

hana'ma higeno'a, Rezoni'a kvama huzmante'nea vahe'tmina nezmavremo, fre'no vige'za Damaskasi kumate kinia ome azeri oti'naze. **25** Hagi Solomoni'ma kinima mani'nea knafina Israeli vahe'mofona Rezoni'a hankvenentake ha' vahe'zmi mani'neno, Hadadi'ma hu'neaza huno tusi hazenke hunezamino Israeli vahetminkura agra tusiza huno agotezmanento, Siria vahera kegava hu'ne. **26** Ana hukna huno mago ne'ma Solomonima ha'ma rente'nea nera, Nebati nemofo Jeroboamu'e. Agra Efraemi nagapinti ne' Zereda kumate nemania nekino, Zerua'e huno nehia kento a'mofo mofavre. **27** Hagi ama'na agafare Jeroboamu'a Solomonina hararente'ne. Jerusalemi rankuma'mo'ma urami eramima hu'nea zama Solomoni'ma mopa katenteno eri agupo nehuno, nefa Deviti'ma hu'nea vihu keginama eri fatgoma hu'nea zanku anara hu'ne. **28** Hagi Jeroboamu'a maka eri'zana antahi ani hu'nea nehazavegino, Solomoni'ma keama maka eri'zama eriga'ma higeno'a, kva azeri otigeno Josefe nagatera agra kegava hu'nege'za eri'zana eri'naze. **29** Hagi ana knafina Jeroboamu'a Jerusalemi kumara atreno nevigeno, Silo kumateti kasnampa ne' Ahiza'a karanka eme keno eri fore higeke vahe omanipi vu'na'e. Ahiza'a kasefa nakreku antanineno vu'ne. **30** Hagi Ahiza'a Jeroboamuma eme keno eri fore'ma nehuno'a, kasefa nakreku'ma antani'neana eme azerino amu'nompinti eri vararo higeno 12fu'a efore nehigeno, **31** amanage huno asami'ne, Nakre kuka'ama 10ni'ama eri tagato'ma hutroana kagra erio. Na'ankure Ra Anumzana Israeli vahe Anumzamo'a amanage hie, ko, nagra Solomoni'ma kegavama hu'nea mopa hanare'na 10ni'afima naganofira kami'nugenka kegava hugahane. **32** Hianagi eri'za vahe'nemifo Devintinku'ene Jerusalemi kumaku'ma, maka Israeli naga'nofipinti'ma huhampri'noa kumaku'ene nentahina

Solomonina atre'nugeno magoke naga'mofo kinia manigahie.

33 Na'ankure zamagra zamefi hunami'za, Saidoni vahe'mofo a' havi anumza Astoretinte'ene, Moapu vahe havi anumza Kemosinte'ene, Amori vahe havi anumza Morekinte monora hunente'za, nagrira namagera nonte'za, nagri navurera knare zamavu'zmavara nosu'za, Solomoni nefafa Deviti'ma hu'neaza hu'za kasegeni'ane trakeni'a ovariri'naze. **34** Hianagi Solomoni'ma ana maka mopama kegavama hu'nea mopa ru vahera hanare omigosuanki, atresugenno kini mani'neno ufrigahie. Na'ankure eri'za ne'ni'a Devitinku nagri eri'za vahe mani'ne hu'na hugeno kasegeni'ane tra keni'ama avrirri'nea zanku hu'na anara hugahue.

35 Hianagi Solomoni nemofo azampintira kegavama hu'nea 10ni'a naganofira hanare'na kagri kaminugenka kegava huzmantegahane. **36** Hianagi nemofona magoke naga nofi amisugenno kegava nehina, eri'za ne'ni'a Deviti nagapintike nagima erisga hugahazema hu'noa kumapina, Jerusalemia tavi kna hu'za mani'za vugahaze. **37** Hagi kagrira Israeli vahe kini trate kavrenta'nena, maka kagri'ma kavesinia mopa kegava hugahane. **38** Hagi eri'za ne'ni'a Deviti'ma hu'neaza huo hu'na kasamisua kema kagrama antahinka nagri navu'navama nevaririnka, fatgo avu'ava'ma nehunka tra ke'ni'ane kasegeni'anema avaririsanke'na, maka zupa kagri'ene mani'nena Devitima hu'noaza hu'na kagri nagapintike Israeli vahe kinia azeri onetina, Israeli mopa kagri kamigahue. **39** Ana nehu'na Solomoni'ma hu'nea kumitera Devitipinti'ma fore'ma hanaza vahera hazenkezanu zamazeri haviza hugahuanagi, zamazeri haviza hu vava hu'na ovugahue. **40** E'inama higeno'a Solomoni'a Jeroboamuna ahenaku hu'neanagi, Jeroboamu'a freno Isipi kini ne' Sisaki'ene umaninegeno, Solomoni'a fri'ne. **41** Hagi

Solomoni'ma kinima mani'nea knafima fore'ma hu'nea zantamine,
Solomoni'ma knare antahintahi'areti'ma hu'nea zantamina
Solomon agi agenkema krenentaza avontafepi krente'naze. **42**
Hagi Solomon'i'a Jerusalemi kumate kinia mani'neno 40'a kafufi
Israeli vahera kegava hu'ne. **43** Hagi Solomoni'ma frigeno'a,
Deviti rankumapi Jerusalemi afahe'mofoma asente'nazafi
asentazageno, nemofo Rehoboamu'a agri nona erino kinia
mani'ne.

12 Hagi Rehoboamu'a Sekemi kumate vu'ne, na'ankure maka
Israeli vahe'mo'za agrira kini azeri oti'naku ana kumate omeri
tru hu'nazageno'e. **2** Hagi Nebati nemofo Jeroboamu'ma ana
nanekema nentahino'a, Solomoninku'ma koro'ma huno Isipima
umani'neregatira atreno e'ne. **3** Hagi Israeli kva vahe'mo'za
Jeroboamuna ke hazageno ege'za, maka Israeli vahe'tamine
vu'za Rehoboamuna amanage hu'za ome asami'naze, **4**
negafa'a ra erizanke'za tamigeta amuho huta eri'zana erita
e'none. Hagi menina kagra ana knatia eri oza hugeta fru
huta eri'zanka'a erigantamneno. **5** Anagema hazageno'a,
Rehoboamu'a amanage huno kenona hu'ne, vuta eta huta
3'a kna umaniteta ete echo, hige'za vu'za e'za hu'naze. **6**
Hagi vu'za ezama hazageno'a, Rehoboamu'a nefa Solomon
tavaonte'ma mani'nezama antahintahima nemiza ranra vahetami
zamavare atru huno amanage huno zamantahige'ne, na'ane
hu'na ama vahetmina kenona huzmantegahufi antahintahia
namiho. **7** Hige'za amanage hu'za kenona hunte'naze, Kagrama
menima ama vahe'tmimofo eri'za vahe'ma mani'naku'ma hanunka
knare kema hunezaminka zamagrama kantahige'naza zama
hananke'za kagri eri'za vahe mani vava hu'za vugahaze. **8**
Hianagi Rehoboamu'a ana ranra vahetamimofo kea ontahi

erinetreno, magokama fore'ma hu'naza vahetmima agri eri'zama e'neriza vahe'mokizmi antahintahi eri'naku, **9** amanage huno zamantahige'ne, Tamagra antahintahitmia hinke'na antahineno. Na'ané hu'na ama vahetmimo'zama hu'za negafa'ma knanentake eri'zama tamigetama e'neruna eri'zana eri oza huranto hu'zama hazá vahe'tmina kenona huzmantegahufi antahintahia namiho, huno zamantahigege'za, **10** agri'enema magoka zomare'naza vahe'mo'za amanage hu'za kenona hu'naze, Amanage hunka ana vahe'tmina zamasamio, katre nazamo'a nenfa amora agatere'ne. **11** Hagi nenfa'a tamage huno knanentake eri'za tami'neanagi, anante antegofetu hu'na mago'ane knanentake eri'zana tamigahue. Hagi nenfa'a sefu knonu kema ontahizageno'a tamazeri fatgo hu'neanagi, nagra segintave sefu tamigahue, hunka zamasamio hu'za antahintahia ami'naze. **12** Hagi kini ne'mo'ma hu'nea kante ante'za 3'a knama evutege'za, Jeroboamu'ene maka Israeli vahetaminena Rehoboamunte e'naze. **13** Hianagi kini ne'mo'a ranra vahe'mo'zama amiza antahintahia eri netreno, ana vahetamina knanentake ke hunezamanteno, **14** kasefa vahe'mo'zama amiza antahintahi avaririno amanage hu'ne. Nenfa'a kna eriza tamami'neanagi, nagra anante antegofetu hu'na mago'ane knanentake eri'za tamigahue. Hagi nenfa'a sefu knonu kema ontahizageno'a tamazeri fatgo hu'neanagi, nagra segintave sefu tamigahue. **15** Ana nehuno kini ne'mo'a ana vahe'mokizmi nanekea ontahi'ne. Hagi ana'ma hu'neana Ra Anumzamo'ma Silo kumateti ne' Nebati nemofo Ahi'zama asamigeno Jeroboamuma eme asami'nea kemo'a nena rgare'ne. **16** Hagi Israeli vahe'mo'zama kazama kini ne'mo'ma ke'zimima ontahige'za, amanage hu'za kenona hunte'naze. Deviti nagapintira, tagra na'a eri'none? Tagra Jesi

nemofo zana erisantia ohare'none. Hagi Israeli vahemota nontamirega vuta eta hiho. Hagi Deviti nagamota tamagra'a kegava hiho, hu'za nehu'za nozimirega vu'za e'za hu'naze.

17 Hianagi mago'a Israeli vahe'ma Juda kumatamimpima nemaniza vahete Rehoboamu'a kegava huzmante'ne. **18** Anante Kini ne' Rehoboamu'a eri'za vahete kva ne'a Adoramuna huntegeno vige'za Israeli vahe'mo'za havenknonu ahe fri'naze. Ana'ma hazageno'a Rehoboamu'a ame'ama huno karisi'a erifatgo nehuno, Jerusalemi freno vu'ne. **19** Ana higeno ana knareti'ma eno menima ehanati'neana, Israeli vahe'mo'za Deviti nagapinti'ma fore'ma hu'naza vahe'mo'zama kegavama huzmante'zankura zamavaresra nehu'za ha'rezmanente'naze. **20** Hagi Israeli vahe'mo'zama Jeroboamu'ma Isipiti'ma e'nea kema nentahi'za, ke hazageno atru'ma hu'za mani'nazafi ege'za, maka Israeli vahete kini azeri oti'naze. Ana hazageno Deviti naga'mo'za Juda nagake'za kegava hu'naze. **21** Hagi Solomoni ne'mofo Rehoboamu'a Jerusalemi kumate'ma enehanatino'a, Israeli vahe'ma ha'ma huzmanteno mopama ete erino kegavama huzmante'nakura 180 tauseni'a sondia vahe Juda nagapinti'ene Benzamini nagapintira zamazeri atru hu'ne. **22** Hianagi Anumzamo'a amanage huno kasnampa ne' Semaiana asami'ne, **23** Juda kini ne' Solomoni nemofo Rehoboamune, maka Juda naga'ene, Benzameni naga'ene mago'a vahetaminena amanage hunka zamasamio, **24** Ra Anumzamo'a amanage hie, tamagra nagatami'a hara huozmantetma atreta kumitmirega viho. Na'ankure anazama fore'ma nehiana Nagra hugeno fore nehie! Hige'za Ra Anumzamo'ma hiankante ante'za kumazmirega vu'naze. **25** Ana higeno Jeroboamu'a Efraemi agona kokampi vuno Sekemu ku'mamofo kegina ome azeri

hankavetino tro nehuno, ana kumapi mani'ne. Hagi anantetira vuno Penueli kuma kegina azeri hanavetino ki'ne. **26** Hagi ana'ma nehuno'a, Jeroboamu'a amanage huno agu'afina antahintahia antahi'ne, Nagrama kvahu so'ema osnugeno'a amama kegavama hu'noa vahe'mo'za ete Deviti nagatega vugahaze. **27** Hagi ama vahetamimo'za Jerusalemima Ra Anumzamofo mono nontegama ofama ome kresramnama vunaku'ma nevanageno'a, antahintahi zamimo'a rukrahe hinke'za ra zamimofo Juda kini ne, Rehoboamuntega ome ante'za nagrira nahe fri'za agri agiaifi umanigahaze huno agu'afina antahi'ne. **28** Hagi ana antahintahima nentahino'a antahintahima ami vahe'mofo antahintahi erino tare golire bulimaka afu anentatre tro hunenteno, amanage huno vahetmina zamasmi'ne, Hago rama'agna Jerusalemia marerize. Hagi Israeli vahe'ma Isipiti'ma tamavre atiramino'ma e'nea anumzana ama'nagi keho nehuno, **29** ana golire bulimakao afu anentatrema tro'ma hu'neana magora Beteli kumate nenteno, magora Dani kumate ante'ne. **30** Ana'ma hiana tusi kumi erifore hu'ne, na'ankure Israeli vahe'tmimo'za afeteragi, Dani kumatera vu'za ana kaza osu havi anumzana monora ome hunte'naze. **31** Hagi Jeroboamu'a agonaramimpina havi anumzamofo mono hunte nontmina kinenteno, Livae nagapintira zamazeri oranotino, ru nagapinti pristi vahe'tmina zamazeri ot'i'ne. **32** Hagi ka'ma kokampima seli noma ki'za mani'zama e'naza zanku'ma antahimi'za ne'zama kre'za nene'za mono'ma nehazazamofo avaharo huno Jeroboamu'a 8ti ikamofo 15ni knazupa Beteli kumatera monora nehuno, ne'zana kreno ne'ne. Ana nehuno bulimakao afutamina aheno golire bulimakao anentama troma hunte'nerera Kresramana vunenteno, havi anumzantmimofo mono kuma'ma tro'ma hunteterema hu'nere'ma

kegavamahu vahera, pristi vahetami zamazeri oti'ne. 33 Hagi Jeroboamu'ma agra agesafinti'ma eri fore'ma hu'neana 8ti ikamofona 15 knazupa Beteli kumate'ma tro'ma hunte'nea kresramna vu itarera mareri'ne. Hagi ne'zama kreno neneno musema huno mono'ma hu kna erifore nehuno, ana itare marerino ofa hu'ne.

13 Hagi Anumzamofo eri'za ne'mo'a Ra Anumzamofo ke antahino Juda kumara atreno Beteli kumate vuno Jeroboamu'a Kresramana vu itare mnanentake'za krenaku oti'negeno uhanati'ne. 2 Anama unehanatigeno'a Ra Anumzamo'a agipi huvazino amanage huno kezati'ne, kresramna vu itamoke, kresramna vu itamoke! Amanage huno Ra Anumzamo'a hie, Deviti nagapintira mago ne'mofavre fore hanige'za Josaia'e hu'za agia ahegahaze. Hagi ana mofavremo'a kagri agofetura agona agonama havi anumzamofonte'ma mono'ma hunentaza pristi vahe'tmina aheno kresramna vanigeno, kagofetura vahe zaferinaramimo'a tevea regahie. 3 Anage nehuno ana knareke Anumzamofo eri'za ne'mo'a ke'ama eri tamagema hunakura, avame'zana amanage huno hu'he, ama avame'zamo hugasamino ama kea Ra Anumzamo hu'ne hugahie, ko, kresramna vu itamo'a tagana vaziraminigeno, tanefamo'a herafiramigahie. 4 Hagi Kini ne' Jeroboamu'ma Anumzamofo eri'za ne'mo'ma Betelima me'nea kresramna vu itagu'ma, kasnampa kema higeno, ana nanekema hiankema nentahino, kre sramnavu itare'ma Jeroboamu'ma mani'nereti azana rusuteno amanage hu'he, amu nera azeriho, higeno ana zamo'a ru fatgo higeno, ete renamagi zankura tusi amuho hu'he. 5 Ana'ma nehigeno'a Ra Anumzamo'ma ke'ama eri tamagema hu avame'zama Anumzamofo eri'za ne'mofo agipi huvazino hu'nea kante anteno kresramna vu

itamo'enena fragu vaziramigeno tanefa'mo'a herafirami'ne. **6** Hagi
kini ne'mo'a amanage huno Anumzamofo eri'za ne'mofonkura
hu'ne, muse hugantoanki, Rana kagri Anumzamofo nunamuna
hunka antahigegeno nazana eriso'e hino, higeno Anumzamofo
eri'za ne'mo'a Anumzamofo antahigegeno, ete ana azana
eriso'e higeno ko'ma me'neankna hu'ne. **7** Anante kini ne'mo'a
amanage huno Anumzamofo eri'za nera asami'ne, enka noni'afi
ne'zana eme nenege'na musezana kami'neno. **8** Hianagi
Anumzamofo eri'za ne'mo'a amanage huno kini nera asami'ne,
Maka nonka'afima me'neazana amu'nompinti refko hunka
kamigahue hugahananagi, nonka'arega kagranena ovugahue.
Hagi ama kumapina ne'zana nege, tina negera osugahue. **9**
Na'ankure Ra Anumzamo'a amanage huno hunagru hunante'ne,
Ana kumapima vanunka magore hunka tina nege, bretia
nege, nehunka ete vu'nana karanka rukrahe hunka omo
huno hunante'ne. **10** Anage nehuno Beteli kumara atreno ru
kante avaririno kuma'arega vu'ne. **11** Hagi ana'ma higeno'a,
Beteli kumatera mago ranafa kasnampa ne' nemania ne'mofo
mofavre'aramimo'za, maka zama ana knare'ma Beteli kumapima
Anumzamofo eri'za ne'mo'ma eri fore'ma nehuno, kini ne'ma
asamia kea eme asami'naze. **12** Hagi ana nanekema nentahino'a
nezamafa'a amanage huno zamantahigene, ina kantega vu'ne?
Hige'za mofavre naga'amo'za Anumzamofo eri'za ne'mo'ma Juda
kumate'ma eteno'ma nevige'noma ke'naza kana averi hu'naze.
13 Ana'ma hazageno'a amanage huno mofavre naga'agura
hu'ne. Ame hutma donki afu'nimofonofira renteta azeri retro
hiho, huno hige'za mofavre naga'amo'za donki afura azeri retro
hazageno, ana donki afu agumpi marerino vu'ne. **14** Hagi ana
kasnampa ne'mo'a Anumzamofo eri'za nera avaririno vuno mago

oki zafa agafare umaninegeno, ome negeno amanage huno antahige'ne. Kagra Juda kumateti'ma Anumzamofo eri'za ne'ma e'nana nero? Huno antahigegeno, Izo nagra ana nere huno hu'ne. **15** Anagema higeno'a, amanage huno ranafa kasnampa ne'mo'a hu'ne, Noni'arega nagrane enka tine bretinena eme no. **16** Higeno Anumzamofo eri'za ne'mo'a amanage huno kenona hu'ne, I'o kagri'enena ete vu'na ama kumapina bretia nege, tina negera osugahue. **17** Na'ankure Ra Anumzamo'a amanage huno hunagru hunantene. Ana kumapina bretia nege tina negera nosunka, ete katima esanana, kamati'ma vu'nana kantera omenka ru kantega eno huno hunante'ne. **18** Anagema higeno'a ranafa kasanampa ne'mo'a amanage huno asami'ne, Kagrama hanaza hu'na nagra'enena kasnampa ne' mani'noankino, Ra Anumzamo'a ankeroma'a huntogeno amanage huno eme nasami'ne, Ete avrenka nonka'arega egeno ne'zane tinena eme neno huno nasm'i'ne. Hianagi havige huno revatga hu'ne. **19** Hagi ranafa kasnampa nemo'a revatgama higeno'a, Anumzamofo eri'za ne'mo'a, ana ranafa kasanampa ne'ene ne'zane tinena noma'afi ome ne'ne. **20** Hagi ne'zama nenaza trate'ma umani'nakeno revatgama huno avreno'ma e'nea ranafa kasnampa nera Ra Anumzamo'a asamigeno, **21** Juda kumateti'ma e'nea kasnampa nera ranke huno amanage huno asmi'ne, Ra Anumzamo'a amanage hie, Na'ankure kagra Ra Anumzamofonkea rutagrenka trake'a avaririo huno'ma hiana ovaririnka, **22** Ra Anumzamo'ma ne'zane tinema ono huno'ma hu'nea kumapina ne'zane tinena ete enka eme ne'nane. E'ina hu'negu fri kerfaka'a kagehe'ima asezamante'naza matipina aseogantegahaze. **23** Hagi Anumzamofo kasnampa ne'mo'ma bretine tinema netegen'o'a, ana ranafa kasnampa ne'mo'a

agra'a donki afu'anofi renteno retro hunte'ne. 24 Ana higeno Anumzamofo eri'za ne'mo'a ana donki agumpi nevigeno, laionimo'a karanka eme keno ahe fri'ne. Ana ne'ma ahe frigeno'a, avufgamo'a kampi me'negeno, ana laionimo'a anante otino donki afu'ene mani'ne. 25 Hagi karankama enevaza vahe'mo'zama kazana, ana nera laionimo ahetreteno anante otino mani'nege'za kete'za Beteli kumate vu'za mikazama fore'ma hu'nea zamofo nanekea ome zamasami'naze. 26 Hagi ome revatgama huno avreno'ma e'nea ranafa kasnampa ne'mo'ma ana nanekema nentahino'a amanage huno hu'ne, Anumzamofo eri'za ne'ma Ra Anumzamofo ke'ma rutagre'nea nera, Ra Anumzamo'a kema hu'nea kante anteno laioni huntogeno ome ahe'ne. 27 Nehuno anante mofavre naga'agura donki afuranofira renteta azeri retro hoho, hige'za donki afuranofira rente'za azeri retro hu'naze. 28 Ana hazageno, ana donki afu agumpi nevuno ome keana ana ne'mofo avufga kampi me'negeno donkine lionimokea ana ne'mofo avufgama me'nere otinakeno ome ke'ne. Hagi Laionimo'a ana ne'mofo avufga nege, donki afura aheno negera osu'ne. 29 E'ina hu'negeno ana ranafa kasnampa ne'mo'a, Anumzamofo eri'za ne'mofo avufga donki afu agumpi ome erinenteno, asunku huno zavira neteno asente'naku kuma'arega erino vu'ne. 30 Hagi ana ranafa kasnampa ne'mo'a, nafu nagnanimoke huno krafa huno zavira neteno, agra'a matipi eme asente'ne. 31 Hagi Anumzamofo eri'za ne'ma asenteteno'a amanage huno mofavre naga'a zamasami'ne, henkama nagrama frisugeta, Anumzamofo eri'za ne'ma asente'noa matipi, nagri zaferina agri zaferinama eritruma hanare eritru hunteho. 32 Na'ankure Ra Anumzamo'ma asamigeno'ma Beteli kumate'ma me'nea kresramna vu itagu'ma eri haviza hugahue huno nehuno, Sameria

kumapima agona agonama havi anumzante'ma mono'ma hunte
kumatmima me'nea kumatmina eri haviza hugahiema hu'nea
ke'mo'a nena avufga'a efore hugahie. 33 Hianagi ana zama
fore'ma hutegenoa, Jeroboamu'a kefo avu'ava zama'afintira
agu'a rukrahera osu'neanki, havi anumzamofo mono noma
agona agonama kinte'haza mono nompina pristi vahetmina,
amne vahepinti zamazeri oti vava nehuno, iza'oma pristima
mani'nuema hia vahera pristi vahe azeri otitere hu'ne. 34 Hagi
e'ina zamo'a ra kumi Jeroboamu nagapina fore higeno, maka
Jeroboamu nagara ama mopafintira Ra Anumzamo'a zamahe
hana hu vagare'ne.

14 Hagi ana knafina Jeroboamu nemofo Abiza'a kri eri'ne.

2 Ana'ma higeno'a Jeroboamu'a nenarona amanage huno
asami'ne, Kukena hunka ru a'negna hutenka, vahe'mo'a nagri
are huno keno antahinora osina Sailo kumate vunka nagri'ma kini
manigahane hige'nama kinima mani'noa kasnampa ne' Ahizante
vuo. 3 Hagi musezama erinte'enkama vananana 10ni'a bretine,
mago'a kekine, tumerima'a me'nea tafenena erinka vunka ama
mofavremofontera naza fore hugahifi, ome kenka antahigegeno
kasamino. 4 Anagema higeno'a Jeroboamu nenaro'a kema
hiaza huno ru a'negna huteno, Sailo kumate Ahiza nonte vu'ne.
Hagi Ahizana avumo'a haviza hu'ne, na'ankure agra ko ranafa
re'ne. 5 Hagi Ra Anumzamo'a Ahizana amanage huno asami'ne,
Jeroboamu nenaro'a ru a'negna huno mofavre'amo'ma krima
eri'nea zanku kantahi kenaku neanki, kva huo. Hagi esanigenka
Nagrama kasamuanke asamio. 6 Hagi ana a'mo'ma kahante'ma
ne-egeno agagema nentahino'a, Ahiza'a ranke huno amanage
hu'ne, Jeroboamu nenanoga emarerio. Hagi na'a higenka ru
a'negnara hunka neane? Kagrite'ma havizama fore'ma hania

nanekeka'a eri'noe. 7 Hagi vunka negave Jeroboamuna ome asamio, Ra Anumzana Israeli vahe Anumzamo'a amanage hie, na'ankure vahe amu'nompintira kavre'na, Israeli vaheni'are kva manio hu'na hugante'noe. 8 Hagi kini eri'zana Deviti nagamofo zamazampintira refko hu'na eri kami'noe. Hianagi eri'za ne'ni'a, Deviti'ma hu'neaza hunka kasegeni'a nevaririnka, kagu'areti hunka nagrira namagera nentenka, fatgo kavukava'ma huoma hua avu'avara osu'nane. 9 Hianagi kote'ma mani'naza maka vahera zamagaterenka kefo avu'avara nehunka, ru anumzantamine golire Bulimakao anenta'ma tro'ma hanazamo Nagrira nazeri narimpah'e'ne. Ana hunka kamefi hunami'nane.

10 Einahu hanku kagri nagapina hazenke'za atrena maka kagripinti'ma fore'ma hu'naza vene'nema, kazokzo vahe'ma amne vahe'enena zamahe hana hugahue. Hagi arifama kre fananema hiaza hu'na, Jeroboamu nagamokizmia kre fanane hanugeno, maka fanane hugahaze. 11 Hagi Jeroboamu naga'ma rankuma agu'afima fri'nazana, kramo'za zamavufaga traga hugahaze. Hagi rankumamofo megi'ama frisazana, namaramimo'za zamavufaga traga hugahaze. Na'ankure Ra Anumzamo ama anankea hu'ne.

12 Anage nehuno Ahiza'a amanage huno mago'ane Jeroboamu nenarona asami'ne, Kagrama rankumofo agu'afima kagiama renka ufresankeno'a, ana mofavrekamo'a frigahie. 13 Ana'ma hanigeno'a, maka Israeli vahe'mo'za zamasunkura hu'za zavira nete'za asentegahaze. Na'ankure Jeroboamu nagapintira agrike mopafina asentegahaze. Na'ankure Jeroboamu nagapina e'ina mofavremoke Ra Anumzana Israeli vahe Anumzamofo avurera knarera hu'neankino atrenige'za azeri so'e hu'za asentegahaze.

14 Hagi Ra Anumzamo'a mago kini ne' azeri otinkeno, Jeroboamu nagara zamahe hana hugahie. Hagi e'i ana zana ama knare

meni fore hugahie. **15** Ana nehuno Ra Anumzamo'a timo varoza eri toretore hiankna huno Israeli vahera zamahegahie. Hagi Ra Anumzamo'a knare mopama zamagehemofoma huhampri zmante'nea mopafintira, zamazeri vatitre'nige'za Yufretesi tinkena kaziga mago'mago hu'za manigahaze. Na'ankure Asera a' anumzamofo amema'ama zafare'ma antre'za zamagra retruma re'naza zamo azeri arimpa ahenigeno, Ra Anumzamo'a anara hugahie. **16** Jeroboamu'a kumi nehuno, Israeli vahe'ma zamazeri kumipi zamante'negu huno Ra Anumzamo'a Israeli vahera amefi huzamigahie. **17** Hagi anagema higeno'a, Jeroboamu nenaro'a ete Tirza kumate vuno, non kahama'rema ne-egeno'a ana mofavre'amo'a fri'ne. **18** Ana'ma higeno'a maka Israeli vahe'mo'za Ra Anumzamo'ma kasnampa ne' Ahizama asamigeno'ma hu'nea kante ante'za zamasunkura hu'za zavira nete'za asente'naze. **19** Hagi Jeroboamu'ma kinima mani'negeno'ma fore'ma hu'nea zantamine, Jeroboamu'ma kinima manineno'ma ha'ma nehuno, Israeli vahe'ma kegavama hu'nea agenkea Israeli kini vahetmimofo agenkema krenentaza avontafepi krente'naze. **20** Hagi Jeroboamu'a 22'a kafu zage kinia maniteno frige'za afahemofoma asente'naza matipi asentazageno, nemofo Nadapu agri nona erino kinia mani'ne. **21** Hagi Juda vahe kinia Solomoni nemofo Rehoboamu mani'ne. Hagi Rehoboamu'a 41ni'a kafu nehuno, Juda vahe kinia mani'neankino, Ra Anumzamo'ma Israeli naga nofipinti huhamprino agima erisga hugahazema hu'nea rankumapina Jerusalemia 17ni'a kafu kinia mani'ne. Hagi Rehoboamu nerera'a Amori akino agi'a Na'ama'e. **22** Hagi Rehoboamu'ma kinima mani'nea knafina, Juda vahe'mo'za Ra Anumzamofo avurera zamafahe'mozama hu'naza kefo avu'avara zamagatere'za kefo zamavu'zmava

nehu'za, kumi hu'za Ra Anumzamofona azeri arimpa hazageno
kanive rezmante'ne. **23** Na'ankure havi anumzantaminte'ma
mono'ma hu kumatmina agona agona tro hunente'za Asera a'
havi anumzamofo amema'a zafarera tro hu'za maka agonafine,
maka ranra zafa riga retrurentene'za monora hunte'naze.
24 Hagi ana mono kumatmimpima monko avu'ava'ma hu
veneneramimo'za ana mopafina avite'naze. Hagi ana mopafima
mani'nageno Ra Anumzamo'ma zamahenati atre'nea vahe'mofo
kasri zamavu'zamava Juda vahe'mo'za zamavariri'za hu'naze. **25**
Hagi Rehoboamu'ma 5fu'a kafuma kinima manigeno'a, Isipi kini
ne' Sisaki'a Jerusalemi kumate vahera hara eme huzmante'ne.
26 Ana nehuno Ra Anumzamofo mono nompinti'ene, kini ne'mofo
nompintira maka zago'amo'ma marerirfa zantamina eri'ne.
Hagi anampintira maka zana eri vaganereno, Solomoni'ma
goliretimi tro'ma hunte'nea hankoraminena eri vagare'ne.
27 Hagi ana'ma hutazageno'a kini ne' Rehoboamu'a golire
hankoramima eri'za vu'nazarera henka bronsire hankorami tro
huno noma'amofo kafante'ma kegavama hu'za nemaniza sondia
vahe'tmina zami'ne. **28** Hagi kini ne'mo'ma Ra Anumzamofo
mono nontegama nevigeno'a, ana hanko eri'ne'za avre'za
vute'za, ete kvama hu'zama nemaniza nontera etere hu'naze. **29**
Hagi Rehoboamuma kinima mani'negeno'ma fore'ma hu'nea
zantamine, Rehoboamu'ma kinima mani'neno'ma ha'ma nehuno,
Juda vahe'ma kegavama hu'nea agenkea Juda kini vahetmimofo
agenke'ma krente'naza avontafeipi krente'naze. **30** Hagi
Rehoboamu'ene Jeroboamukea hara hu vava huke vu'na'e. **31**
Hagi Rehoboamu'ma frige'za, agehe'mofoma asezmantene'za
matipi Deviti ran kumapi asente'naze. Hagi nerera'a Amoni akino

agi'a Na'ama'e. Hagi ana'ma higeno'a, nemofo Abija agri nona
erino kinia mani'ne.

15 Hagi Jeroboamu'ma 18ni'a kafuma Israeli vahe kinima
nemanigeno'a, Nebati nemofo Abizamu'a Juda vahe kini efore
huno kegava huzmante'ne. **2** Hagi 3'a kafufi Jerusalemi kumatera
kinia mani'neno kegava hu'ne. Hagi nerera'a Abisalomu mofakino,
agi'a Maka'e. **3** Hagi agra nef'a'ma hu'neankna kumitami
nehuno, negeho Deviti'ma hu'neaza huno agu'aretira huno Ra
Anumzama'amofona ovariri'ne. **4** Hianagi Deviti'ma hu'nea knare
avu'avaku huno Ra Anumzana agri Anumzamo'a nentahino,
negehona avrentegeno agri nona erino kinia Jerusalem kumapina
manigeno, Deviti nagamofo tavimo'a asura osu'ne. **5** Na'ankure
Deviti'a Ra Anumzamofo avurera fatgo avu'ava nehuno, Ra
Anumzamo'ma huo huno'ma hia zantamina maka kna hu vava
huno e'ne. Hagi magoke zama havizama hu'neana, Hiti ne' Uraia
a'enema hu'nea hazenkege me'ne. **6** Hagi Abizama kinima mania
knafina Jeroboamu'enena hara hu vava hu'na'e. **7** Hagi Abizama
kinima mani'negeno'ma fore'ma hu'nea zantmimofo agenkea,
Juda kini vahetmimofo agenkema krente'naza avontafepi
maka krente'naze. Hagi Abizamu'ma kinima mania knafina
Jeroboamu'enena hara hu vava hu'na'e. **8** Hagi Abizamu'a
frige'za agehemofoma asente'naza matipi Deviti rankumapi
asente'naze. Ana hutazageno ne'mofo Asa agri nona erino
kinia mani'ne. **9** Hagi Jeroboamu'ma 20'a kafuma Israeli vahe
kinima nemanigeno'a, Asa'a Juda vahe kini efore huno kegava
huzmante'ne. **10** Hagi Asa'a 41ni'a kafu Jerusalemi kumapina
kinia mani'ne. Hagi nerera'a Abisalomu mofakino agi'a Maka'e.
11 Hagi negeho Deviti'ma hu'neaza huno Asa'a Ra Anumzamofo
avurera fatgo avu'ava hu'ne. **12** Havi anumzamofo mono

kumapima monko avu'ava zama nehaza vahera ana mopafintira
zamahe fanane nehuno, kaza osu havi anumzantamima nef'a'ma
tro'ma hunte'nea zantamina eritre vagare'ne. **13** Hagi negeho
a' Makama kuinima mani'nea tratetira azeri atre'ne. Na'ankure
agra kasrino hi'mnage hu'nea avu'ava huno Asera a' havi
anumzamofo amema'a tro hunte'ne. Hagi Asa'a ana a' havi
anumzamofo amema'a antagino apapu huno Kidroni agupofi
teve hanavazino kre'ne. **14** Hianagi agona agonama havi
anumzamofo mono kumatmina eri havizana osu'ne. Hagi Asa'a
maka knafina Ra Anumzamofo avesinenteno agorga mani'ne. **15**
Hagi Ra Anumzamofoma nef'a'ma ami'nea zantamine, agranema
ami'nea zantamine, goline, silvane, mago'a zantaminena erino
Ra Anumzamofo mono nompi vu'ne. **16** Hagi Asa'ene Israeli
vahe kini ne' Ba'asakea kinima manike vu'na'a knafina, maka
zupa hara hu vava huke vu'na'e. **17** Hagi Israeli vahe kini ne'
Ba'asa'a Juda vahera ha' huzmanteno Rama kumara omerino,
ana kumara hankave vihu higeno, vahetmimo'za ana kumapintira
Juda mopafina atiramiza vu'za eza osu'naze. **18** Hagi Asa'a
maka goline, silvanema Ra Anumzamofo nompima me'neane
kini ne'mofa nompima me'neanena erino eri'za vahetami'amofo
zamazampi nenteno, huzmantege'za Siria kini ne' Hezioni negeho
Tabrimoni nemofo Damaskasi nemania nete Ben-hadadinte
eri'za nevazageno, Ben-hadadintega amanage huno kea
atrentege'za eri'za vahe'aramimo'za vu'naze. **19** Hagi nerfakema
hu'na'aza huta kea eri hagerafita rone huta manisu'egu ama
musezana goline silvanena atregantoe. Hagi vunka Israeli kini
ne' Ba'asa'enema huhagerafi'na'a kea omeritrenka ha'huntegeno
kumani'a atreno vino. **20** Hagi Ben-hadati'a kini ne' Asa'ma hianke
antahino sondia kva vahetami huzmantege'za vu'za Israeli vahe

kumatmina, Izoni kumaki, Dani kumaki, Abel-bet-ma'aka kumaki, Kenoreti kumaki, maka Naptali mopa hara ome huzmante'za zamahe'za hanare'naze. **21** Hagi Israeli kini ne' Ba'asa'ma ana nanekema nentahino'a, Rama kuma keginama nehiretira atre'no Tirza kumate umani'ne. **22** Hagi ana'ma higeno'a kini ne' Asa'a maka Juda vahetmina ke higeno mago'mo'e huno omani ana makamo'za e'za Ba'asa'ma Rama kuma'ma negiretira atreno'ma via havene zafanena emeri'za vazageno, ana zantaminu Benzameni mopafima me'nea kuma Geba kuma'ene Mizpa kuma'enena ki'naze. **23** Hagi Asa'ma kinima mani'negeno fore'ma hu'nea zantamine, hihamu'ama eriamama hu'neane, maka zama nehuno kumatmina tro'ma hu'nea kumatamimofo aginena Juda kini vahetmimofo agenkema krententaza avontafepi krente'naze. Hianagi Asa'a ranafa regeno, aga agusafina kri fore hu'ne. **24** Hagi Asa'ma frigeno'a agehe'mofoma asente'nea matipi, Deviti rankumapi asente'naze. Hagi ana'ma higeno'a, nemofo Jehosafati agri nona erino kinia mani'ne. **25** Hagi kini ne' Asa'ma tare kafuma Juda vahe kinima nemanigeno'a, Jeroboamu nemofo Nadapu Israeli vahe kinia efore hu'ne. Hagi Nadapu'a tare kafufi kinia mani'neno, Israeli vahera kegava hu'ne. **26** Hianagi agra nefa Jeroboamu'ma kefo avu'ava'ma nehuno Israeli vahe'ma zamavare kumipima zamante'nea avu'ava avaririno Ra Anumzamofo avurera kefo avu'ava hu'ne. **27** Hagi ana'ma nehigeno'a Isaka nagapinti ne' Ahiza nemofo Ba'asa'a Nadapuna ahe fri'naku mago'a kankamunku hakene. Hagi Nadapu'a Israeli sondia vahe'ene Filistia vahe mopafi Gibeton kuma vahe ha' huzmante'naku kumazimi ome avazagigaginafi, Ba'asa'a Nadapuna ome ahe fri'ne. **28** Hagi kini ne' Asa'ma 3'a kafuma Juda vahe kinima nemanigeno'a, Ba'asa'a Nadapuna

ahe nefrino Israeli vahe kinia agra mani'ne. 29 Hagi agrama kinima nemanino'a, maka Jeroboamu nagapinti'ma fore'ma hu'naza vahera zamahe hana higeno, Ra Anumzamo'ma Sailo kumate kasnampa ne' Ahizama Jeroboamunte'ma fore'ma hania zamofo kema asami'nea kante anteno magore huno kini ne'mofo nagara ozmatre zamahe vagare'ne. 30 Hagi Jeroboamu'ma kumi'ma nehuno, Israeli vahe'ma kumipima zamavarentegeno'ma Ra Anumzamofoma azeri arimpama ahe'nea zante, ana zana fore hu'ne. 31 Hagi Nadapu'ma kinima mani'neno'ma hu'nea zantmimofo agenkea, Israeli kini vahetmimofo agenkema krente'nea avontafepi krente'ne. 32 Hagi Juda kini ne' Asa'ene Israeli kini ne' Ba'asakea kinima mani'na'a knafina hara hu vava huke vu'na'e. 33 Hagi Asa'ma 3'a kafuma Juda vahe kinima nemanigeno'a, Ahiza nemofo Ba'asa'a Israeli vaher kinia efore hu'ne. Hagi Ba'asa'ma Tirza kumate'ma Israeli vaher kinima mani'neana 24'a kafu mani'ne. 34 Hianagi agra Ra Anumzamofo avurera kefo avu'ava nehuno, Jeroboamu'ma Israeli vahe'ma zamazeri kumipima zamante'neaza huno agri avu'ava avariri'ne.

16 Hagi Ra Anumzamo'a kini ne' Ba'asante'ma fore'ma hania zamofo nanekea, kasnampa ne' Hanani nemofo Jehuna anage huno asami'ne, 2 Nagra kugusopafinti kavre'na Israeli vahe'ni'a kegava huo hu'noanagi, kagra Jeroboamu'ma hu'nea avu'ava avaririnka Israeli vahera zamazeri kumipi nezmanrena, Nagrira nazeri narimpa hane. 3 E'ina hanku Nagra Nebati nemofo Jeroboamu nagate'ma huzmante'noaza hu'na Ba'asagane maka nagaka'anena zamahe hana hugahue. 4 Hagi Ba'asampiti'ma fore'ma hanaza vahera rankuma agu'afima fri'hageno'a, kramo'za negahaze. Hagi megi'ama fri'hazana

vahera namaramimo'za negahaze. **5** Hagi Ba'asa'ma kinima mani'neno'ma hu'nea zantamine, hanave zantamima tro'ma hu'nea zamofo agenkea Israeli kini vahetmimofo agenkema krenentaza avontafepi krente'ne. **6** Hagi Ba'asa'ma frigeno'a Tirza kumate asentazageno, nemofo Ela agri nona erino kinia mani'ne. **7** Hagi Ra Anumzamo'ma Ba'asane naga'anema hazenke zamisia zamofo nanekea kasnampa ne' Hanani nemofo Jehunte hunte'ne. Na'ankure maka havi avu'ava'ma nehuno, maka'zama tro'ma hu'neazamo Ra Anumzamofona azeri arimpa ahogeno, Jeroboamu naga'ma zamahe fananema hu'neaza huno Ba'asa nagara zamahe fri vagare'ne. **8** Hagi kini ne' Asa'ma 26si'a kafuma Juda vahe kinima nemanigeno'a, Ba'asa nemofo Ela'a Israeli vahe kinia efore hu'ne. Hagi Ela'a tare kafu Tirza kumatera kinia mani'neno, Israeli vahera kegava hu'ne. **9** Hianagi karisi eri'za vano nehaza sondia vahera amu'nompinti refko huno kva nehia ne' Zimri'a Ela ahenaku kankamunku hake'ne. Hagi mago zupa Ela'a Tirza kumate mani'neno, noma'ama kegava nehia ne' Arza nompi aka ti neneno neginagi nehigeno, **10** Zimri'a eno eme ahe fri'ne. Hagi kini ne' Asa'a 27ni'a kafu Juda vahe kinia nemanigeno, Zimri'a Elana ahe nefrino, agri nona erino Israeli vahe kinia mani'ne. **11** Hagi Zimri'ma anama kinima nemanino'a, maka Ba'asa nagapinti'ma fore'ma hu'nea vahera zamahe hana nehuno magore huno ne' mofavrea ozamatre'ne. Ana nehuno maka keonke zaga'ane, rone'araminena magore huno ozamatreno zamahe hana hu'ne. **12** Hagi Ra Anumzamo'a Ba'asama hazenkema ami kema kasnampa ne' Jehuma asami'nea kante anteno, maka Ba'asa nagapinti'ma fore'ma hu'naza vahetmina zamahe hana hu'ne. **13** Na'ankure Ba'asa'ene nemofo Ela'enena kumi nehuke,

Israeli vahe'enena zamazeri kumipima nezmantreke, kaza osu
havi anumzana tro hunte'neke, mono'ma hunt'a'azamo'a Ra
Anumzamofona azeri arimpa ahe'na'e. **14** Hagi Ela'ma kinima
mani'negeno'ma fore'ma hu'nea zantamine, maka zama agrama
hu'nea zamofo agenkea Israeli kini vahetmimofo agenkema
krente'naza avontafepi krente'naze. **15** Hagi kini ne' Asa'ma
27ni'a kafuma Juda vahe kinima nemanigeno, Zimri'a Israeli vahe
kinia 7ni'a zagegnafi Tirza kumatera mani'ne. Hagi Israeli sondia
vahe'mo'za Filistia vahe kumara Gibetonia avazagigagi'naze.
16 Hagi ana kuma'ma avazagigagi'naza sondia vahe'mo'za
Zimri'ma Elama ahea nanekema nentahiza, sondia vahete
kva ne' Omrina ana zupage Israeli vahe kinia azeri oti'naze.
17 Hagi ana'ma hutazageno'a, Omri'a Israeli sondia vahera
Gibetoni kumateti zamavareno marerino Israeli vahe rankumapi
Tirzama mani'naza vahera hara ome huzmante'ne. **18** Hagi
Zimri'ma keama ha'ma eme hu'za ana kuma'ma emerizageno'a,
kini ne'mofo nompi ufreto ha'ma hanigeno fraki'naza noma
hunaragine'nefi umaniteno, ana nona teve tagintegeno nereno
agri'enena terasge'ne. **19** Na'ankure Jeroboamu'ma kumi'ma
nehuno, Israeli vahe'ma zamazeri kumipima zmante'neaza
huno, agra Ra Anumzamofo avurera kefo avu'ava nehuno,
Israeli vahera zamazeri kumipi zamatre'ne. **20** Hagi Zimri'ma
kinima mani'neno'ma hu'nea zantmimofo agenkene, Elama
ahenea agenkea Israeli kini vahetmimofo agenkema krenentea
avontafepi krente'naze. **21** Hagi ana'ma hazageno'a, Israeli
vahe'mo'za tarefi atane'za magokaziga Ginati nemofo Tibni kinia
azeri otizageno, mago kagiza Omri avariri'naze. **22** Hianagi
Omrima avaririza hanaveti'za Ginati nemofo Tibnima avariri'naze
vahera hara huzmagatere'za, Tibnina ahe nefriza Omrina kinia

azeri oti'naze. **23** Hagi kini ne' Asa'ma 31ni'a kafu Juda vahe kinima nemanigeno'a, Omri'a Israeli vahe kinia 12fu'a kafufi mani'ne. Hianagi 6si'a kafufi Tirza kumatera Israeli vahe kinia mani'ne. **24** Hagi Sameria agona mopamofo nefo Semantetira, Omri'a 70 kilo hu'nea silva zagoreti ana mopa mizaseno rankuma tro huteno, ana mopa agafa ne' agire asamareno, Samarie huno ana kumamofo agi'a ante'ne. **25** Hagi ko'ma maniza e'naza kini vahetmina Omri'a zamagatereno, rama'a kefo avu'ava Ra Anumzamofo avurera hu'ne. **26** Na'ankure Nebati nemofo Jeroboamu'ma Israeli vahe'ma zamazeri kumipima nezamanteno Ra Anumzana Israeli vahe Anumzamofoma azeri arimpama ahe'nea avu'ava avaririno, Omri'a kaza osu havi anumzantmina tro hunte'neno mono'ma huntea zamo Ra Anumzamofona azeri rimpah'e'ne. **27** Hagi Omri'ma kinima mani'nea knafima fore'ma hu'nea zantamina Israeli kini vahe'mokizmi zamagi zamagenkema krenentaza avontafepi krente'naze. **28** Hagi Omri'a frigeno Sameria asentazageno, nemofo Ahapu agri nona erino kinia mani'ne. **29** Hagi Kini ne' Asa'ma 38'a kafuma Juda vahe kinima nemanigeno'a, Omri nemofo Ahapu Israeli vahe kinia efore huno mani'ne. Hagi Omri nemofo Ahapu'a 22'a kafu Sameria kumatera kinia mani'neno Israeli vahera kegava hu'ne. **30** Hagi ko'ma maniza e'naza kini vahetmina zamagatereno, Omri nemofo Ahapu'a rama'a kefo avu'ava Ra Anumzamofo avurera hu'ne. **31** Hagi Ahapu'a knare navu'navu nehue huno antahi amne nehuno, Nebati nemofo Jeroboamu'ma hu'nea kefo avu'avara agatereno, Saidoni kini ne' Etba'ali mofa' Jesebelina ara omenerino, Bali havi anumzamofonte monora hunte'ne. **32** Hagi Ahapu'a Sameria kumatera Bali havi anumzamofo mono no kino, agu'afina kresramna vu ita tro hunte'ne. **33** Hagi anantera

Asera a' havi anumzamofo amema'ama me' zafarami retru
rentetere hu'ne. Hagi e'ina'ma hia zamo'a, ko'ma maniza e'naza
kini vahetmimo'zama hu'naza kefo avu'avara agatereno, rama'a
kefo avu'ava huno Ra Anumzana Israeli vahe Anumzamofona
azeri arimpa ahe'ne. **34** Hagi Ahapu'ma kinima mani'nea knafi,
Beteli kumateti ne' Hieli'a Jeriko kumara ete eri agafa huno ki'ne.
Hagi Ra Anumzamo'ma Nuni nemofo Josuama asami'nea kante
anteno, ana kuma'ma eri agafa huno negigeno'a, ese mofavre'a
Abiram'u'a fri'ne. Hagi ana kumama kivagareno, ana kumamofo
rankafama hagenentegeno'a, henka mofavre'a Segupu'a fri'ne.
(Josua 6:26)

17 Hagi Giliati mopafi, Tisbe kumate nemania kasnampa
ne' Elaija'a amanage huno kini ne' Ahapuna asami'ne, Ra
Anumzana Israeli vahe Anumzama kasefa huno mani'nea
Anumzamofo avufi Agri eri'za ne'mo'na huankino, mago'a
kafumofo agu'afina magore huno atara ahege, kora rugera
osugahianki, nagrama hanugenoke atara ahege, kora rugera
hugahie. **2** Anagema hutegeno'a, Ra Anumzamo'a amanage
huno Elaijana asami'ne. **3** Amaretira atrenka rukrahe hunka
Jodani timofona zage hanati kaziga vunka, Keriti tinkagomupi ome
frakinka umanio. **4** Hagi ana tinteti tina nenege'na, Nagra kotkoti
namazaga huzmanta'nenkeno ne'zana eri'za eme kamigahaze.
5 Anagema higeno'a, Ra Anumzamo'ma asamia kante anteno
Elaija'a Jodani timofona zage hanati kaziga Keriti tinkagomupi
umani'ne. **6** Hagi anampinkama mani'negeno, maka nanterane
kinaganena kotkoti namazagamo'za bretine ame'anena eri'za
eme nemizageno, ana tinteti tina ne'ne. **7** Hianagi osia knama
nemanigeno'a, ana timo'a tane'ne. Na'ankure ana mopafina kora
oru'negeno'e. **8** Ana'ma higeno'a, Ra Anumzamo'a amanage

huno Elaijana asami'ne, **9** Otinka Saidoni mopafi vunka Zarefati kumapi umanio. Nagra ko kento a'mofo hunte'noankino, ne'zana negamino kegava hugantegahie. **10** Hagi anagema higeno'a, otino Zarefati kumatega vuno, ana kumamofo kafante'ma unehanatino keana, ana kento a'mo'a tevesesa zonegino mani'negeno omege'ne. Hagi ana a'ma negeno'a, amanage huno ke'zana tino asami'ne, Muse hugantoanki tina tafempina afinka eme namige'na naneno, huno higeno, **11** ana a'mo'ma ana tima ome afinaku'ma neviana ete mago'ane amanage huno ranke huno asmi'ne, Osi'a kazampina bretinena eri'enka eno. **12** Hianagi amanage huno ana a'mo'a hu'ne, Tamage Ra Anumzana mani'nea Anumzanka'amofo avufinki, bretima kreno eme kami flauara omne'neanki, mago naza huga'a osi'a kavofina megeno, tafempina osi'a ro'afinka masavena me'ne. Hagi ne'zana omne'neankita nagrane nenianena anama'a kreta neteta mani'neta fri'nuegu tevesesa eme zonegue. **13** Anagema higeno'a, Elaija'a amanage huno ana a'mofonkura hu'ne, Korora osunka vunka kema hanaza ome huo. Hianagi ese'zana osi'a nagrira bretia krenka eme namitenka, henka kagra su'ane negamofo su'anena ome kro. **14** Na'ankure Ra Anumzana Israeli vahe'mofo Anumzamo'a amanage hu'ne. Kavofina flauamo'a vagaoren me'nena tafempinen masavemo'a vagaore me'nenkeno vuno Ra Anumzamo'ma ama mopafima ko'ma atresigeno arania knare uhanatigahie. **15** Hagi anankema nentahino'a vuno Elaija'ma hiazza ome hu'ne. Ana higeno ana kento a'mo'ene Elaija'ene, ana a'mofo naga'mozanena nezankura atupara osu rama'a knafi ne'zana ne'za vu'naze. **16** Hagi Ra Anumzamo'ma Elaija'ma asamigenoma hu'nea kante ante'no ana kavofima me'nea flauamo'ene tafempima

me'nea masavemo'enena vagaore'ne. **17** Hagi mago'a kna evutegeno, ana a'mofo mofavremo'a kri erigeno ana kri'amo'a ome ra higeno fri'ne. **18** Hagi ana'ma higeno'a, ana a'mo'a amanage huno Elaijana asami'ne, Anumzamofo eri'za ne'moka naza amazana hunantane? Nagrama kumi'ma hu'noa zante hunagesa nehunka nenamofo ahe fri'naku kagra e'nano? **19** Hianagi Elaija'a amanage huno ana akura hu'ne. Negamofona namio, huno nehuno ana a'mofo azampintira ana mofavrea avreno nomofo anaga kaziga nemasefinka marerino nemasea sipare ome ante'ne. **20** Hagi ana nehuno ranke huno amanage huno Ra Anumzamofontega nunamuna hu'ne, Ra Anumzana nagri Anumzamoke, nahigenka knare'ma huno noma'afima navrentege'nama manua kento ara amanahu hazenkea avrenka ankeno mofavre'amo'a frie? **21** Anage nehuno 3'a zupa ana mofavremofo agofetu maseno amanage huno Anumzamofontega nunamuna hu'ne. Ra Anumzana nagri Anumzamoka ama mofavremofo asimura ete aminka azeri otio. **22** Hagi Ra Anumzamo'a Elaijama hia nunamuna nentahino, ana mofavrea asimura amino azeri ot'i'ne. **23** Hagi frinefinti'ma otigeno'a Elaija'a nomofo anaga kazigama nevasefintira ana mofavrea avreno eramino nerera eme nemino amanage hu'ne, negamofo'a ofri amne mani'neanki ko. **24** Higeno ana zama negeno'a ana a'mo'a amanage huno Elaijankura hu'ne. Tamage nagra menina kena antahi'nama huana, kagra Anumzamofo eri'za vahe mani'nankeno, Ra Anumzamo'ma kagri kagipima huvazino'ma nehia nanekemo'a tamage naneke.

18 Hagi ko'ma oruno zagma reno e'nea knamofo namba 3 kafurera, Ra Anumzamo'a amanage huno Elaijana asami'ne, vunka kini ne' Ahapuna kavugosa ome averi nehunka, ama

mopafina Ra Anumzamo'a kora atrenigeno hago rugahie hunka
ome asamio. 2 Ananke'ma nentahino'a, Ahapu avure vunaku
Elaija'a vu'ne. Ana knafina Sameria kaziga tusi agatontonkna fore
hu'ne. 3 Hagi Ahapu'a noma'amofo kva ne' Obediana kehigeno'
e'ne. Obedia'a Ra Anumzamofona koro hunteno, agorga'a
nemania nere. 4 Hagi Jesebeli'ma Ra Anumzamofo kasnampa
vahetmima zamahe vagamaneregeno'a, 100'a kasnampa vahera
zamavareno 50'a mago havegampi nezmanteno, 50'a mago
havegampi frakizmanteneno, tine ne'zanena zamitere hu'ne.
5 Hagi Ahapu'a amanage huno Obadiana asami'ne, Maka
tinkrahopine aguporampinena knare trazama me'nenigura
haketa, ama hosi afutamine, donki afutamimo'zama fri'zankura
zamaza hanunke'za manisageta zamahe ofrisune. 6 Anage
nehuke mago kaziga moparega Ahapu'a agraku vigeno, mago
kaziga moparega Obadia'a agraku vu'ne. 7 Hagi Obadia'a agraku
nevuno, Elaijana ome tutagiha hu'ne. Hagi Obedia'ama Elaijama
keno antahinoma nehuno'a, avugosaregati mopafi umaseno
amanage hu'ne, ranimoka, kagra tamage Elaijago? 8 Higeno
Elaija'a amanage hune, Izo nagragi, vunka kvaka'amofona
Elaija'a hago e'ne hunka ome asamio. 9 Anante Obedia'a
amanage hu'ne, Eri'za vahekamo'na nagra na'a kumi hugenka,
Ahapu'ma nahe frinogura hunenantane? 10 Na'ankure Ra
Anumzana kasefa huno mani'nea Anumzanka'amofo avufi
tamage hu'na huvempa huankino, kini ne'mo'a maka ama
mopafima me'nea kumatmimpina kagrikura hake vagare'ne. Ana
nehuno mago mago kumate'ma hakeno'ma nevuno'a, ana kumate
kini vahetmima zamantahigege'za, i'o omani'nema hazageno'a,
kini ne' Ahapu'a huvempa huta tamage hiho higeno, tamage huta
onke'nona hu'za hu'naze. 11 Higenka menina nagrikura amanage

nehane, Elaija'a ne-e hunka ranka'amofona ome asamio hunka
nehane. **12** Hianagi katre'nama amaretima nevanugeno'a,
Ra Anumzamofo Avamu'mo'a onkenurega kavresga huno
vugahie. Ana'ma hanigeno'ma Ahapuma ome asamisugeno
eno eme kesiama omani'nesankeno'a, nagra ositeti'ma manina
e'noana, Ra Anumzamofonku korora hunte'na agoraga'a mani'na
e'noanagi, nahe frigahie. **13** Hagi Jesebeli'ma Ra Anumzamofo
kasnampa vahe'tmima zamahe hana'ma nehigenama hu'noa
zana, ranimoka onkasami'nazo? Nagra 100'a kasnampa vahetami
refko hu'na 50'a mago havegampi fraki zamante'na, mago
50'a mago havegampina fraki zamante'nena ne'zane tinena
zamami'noe. **14** Hagi menina kagra hunka Elaija'a hago e'ne
hunka ome asamio nehanankina, nagrama ome asami'nugeno
eme hakesiama omani'nenankeno'a nahe frigahie. **15** Hagi
anagema higeno'a, Elaija'a amanage huno asami'ne, Amage'ma
nentoa Ra Anumzana kasefa huno mani'nea Hihamu'ane
Anumzamofo avufi tamage hu'na huvempa huanki'na, menina
Ahapuna ome kegahue. **16** Higeno Obadia'a Ahapu ome kenaku
vuno ome keno eri fore huteno, ana nanekea asamigeno
Ahapu'a Elaija ome kenaku vu'ne. **17** Hagi Ahapu'ma Elaijama
ome negeno'a amanage hu'ne, Israeli mopafima hazenkema
eri fore nehana nera kagro. **18** Anagema higeno'a, Elaija'a
amanage huno ke nona hu'ne, Nagra Israeli vahera hazenkea
eri ozmi'noe. Hianagi kagrane nagakamo'zane Israeli vahetera
hazenkea eri'za e'naze. Na'ankure kagra Ra Anumzamofo
kasegea atrenka kamefi huneminka, Bali havi anumzantami
monora ome hunentenka avariri'nane. **19** Hagi menina huge'za
maka Israeli vahera Karmeli agonare'ma mani'nenure omeri tru
nehuta, 450'a Bali havi anumzamofo kasnampa vahe'ene, 400'a

Asera havi anumzamofo kasnampa vahetamima Jesebeli'ma neza agampu'ma nehia vahetaminena zamavareneta eviho.

20 Hagi anagema higeno'a, Ahapu'a ke atrege'za maka Israeli vahe'ene, ana kasnampa vahe'mo'zanena Karmeli agonare omeri atru hu'naze. **21** Ana hutageno Elaija'a maka vahe zamavuga otino amanage huno hu'ne, Nama'a zupa tare antahintahirera otineta kantu vuge kama egera nehaze? Ra Anumzamo'ma tamage Anumzama mani'nena, Agri avaririho. Hianagi Bali havi anumzamo'ma tamage Anumzama mani'nena agri avaririho.

Anagema hige'za ana vahe'mo'za kea osu'naze. **22** Anage huteno Elaija'a ana vahetminkura amanage huno zamasami'ne, Ra Anumzamofo kasnampa nera nagrake mani'noe. Hianagi Bali havi anumzamofo kasnampa vahetmina 450'a vahe mani'nazagu,

23 menina tare bulimakao afu avreta eho. Hagi ana tare bulimakao afutrepintira Bali havi anumzamofo kasnampa vahe'mota tamavesinia su'a aheta taganavazita kre sramnavu itare'ma tevema hanavazi ante'nazarera nenteta tevea tagi onteho. Hagi nagra mago bulimakao afu ahe'na taganavazina kre sramnavu itare'ma tevema hanavazi antenurera nente'na tevea tagi ontigosue. **24** Hagi ana'ma huteta tamagra anumzantmimofo agi aheta nunamuna hanage'na, nagra Ra Anumzamofo agihe'na nunamuna hugahue. Hagi ina Anumzamo'ma nunamuma antahino tevema tagintesigeno ama ana ofama tesigeta e'i tamage Anumza mani'ne huta hugahune. Anagema higeno'a, maka vahetmimo'za tamage hane hu'za hu'naze. **25** Hagi ana'ma hazageno'a, Elaija'a amanage huno Bali havi anumzamofo kasnampa vahetminkura hu'ne. Ese'zana tamagra mago bulimakao afu aheta taganavazita kresramna vu itarera anteta anumzantmimofo agia aheta nunamuna hiho. Na'ankure tamagra

rama'a mani'naze. Hianagi tevema hanavazi ante'nazarera tevea tagi onteho. **26** Hagi anagema hige'za mago bulimakao afu ahe'za taganavaziza kresramna vu itare antete'za, nanterama agafama hu'nazana nunamuna hu'za Bali havi anumzamofo agia nehe'za, kezati'za Bali anumzamoka ketia antahiramio hu'za nehu'za, krafa nehazageno zagemo'a anuntupi evuno feru omese'ne. Hianagi ana nunamu zimirera kenona huozmantegeno, mago zana forera osu'ne. Hagi ana'ma higeno'a, anama tro'ma hu'naza kre sramna vu itamofo tavaonte haruhu'za mareriza tam'i'za nehu'za avore'za kagi'naze. **27** Hagi zagemo'ma marerino feru'masegeno'a, Elaija'a agafa huno kiza zokago kea amanage huno huzmante'ne. Ranke huta kezatiho. Na'ankure agra anumza mani'ne. Agra feru avana negeno manige, kerirega vuge, kanteno vano huge, avu masege hu'negahianki azeri otiho. **28** Anagema hige'za ranke hu'za kezaneti'za mono zmimofo avu'avamo'ma hu'neaza hu'za kazinteti'ene agona zanteti'enena zamavufaga taga hazageno koramo'a herafirami'ne. **29** Hagi ana nehu'za ranke hu'za avore'za kanegi'zageno, zagemo'a evutragiseno kinaga ofama nehaza knarera evu'ne. Hianagi ana anumzazmimo'a magore huno ke'zazmia antahizamino kenona huozami'ne. **30** Hagi ana'ma higeno'a Elaija'a amanage huno ana maka vahekura hu'ne, Amare erava'o hiho, higeno erava'o hazageno, Ra Anumzamofo Kresramana vu itama eri havizama hutre'nazana eriso'e huno tro hu'ne. **31** Hagi Ra Anumzamo'ma Jekopuma asamino, kagri kagia Israelige hu'za hugahazema huno'ma hu'nere, 12fu'a naga'nofimofo huhamprino 12fu'a have erino, **32** Ra Anumzamofo agifi ana kre sramnavu ita tro huteno, ana itamofona 14ni'a lita tima marevaziga avamente tinkana aseno kagi'ne. **33** Ana nehuno ana

Kresramanavu itamofo agofetura teve hanavaziteno, bulimakao afura aheno taganavazino ana teve agofetu nenteno amanage hu'ne, ama ana ofama hu bulimakao afute'ene tevere'enena 4'a ranra tintafe afita tagi kasriho, huno hige'za, 34 ana hu'za 4'a ranra tintafe afiza bulimakoa ofane tevenena tagi pasuki'naze. Ana'ma hazageno'a, mago'ane ana hiho huno higeza, ete mago'ane ana hazageno, namba 3 zupa ana hiho huno hige'za ete mago'ane tina afi'za bulimakao ofane tevenena tagi pasuki'naze. 35 Hagi ana'ma hazageno'a timo'a ana Kresramana vu itafintira hatihati huno tinkama asente'nefina marevite'ne. 36 Hagi kinagama ofama Kresramanama vu knama egeno'a, kre sramnavu itare Elaija'a erava'o huno amanage huno nunamuna hu'ne, Ra Anumzana, Abrahamune, Aisakine, Israeli Anumzamoka, Israeli mopafina Nagrake Anumzana mani'noe hunka nehunka, eri'za vahekamo'nagura Nagra huntogeno maka ama zantamina nehie hunka eriama huo. 37 Ra Anumzamoka nunamuni'a antahinamio! Nunamuni'a antahinamige'za ama vahetmimo'za Ra Anumzamoka kagrake Anumzana mani'nenka, tagu'a eri rukre hunka kagrarega tavrentane hu'za ke'za antahiza hugahaze. 38 Anagema nehigeno'a monafinkati hantaka huno Ra Anumzamofo tevemo'a hagna hagna huno eramino, ana bulimakaoma tagnavazino'ma ante'nea afu'ene tevema hanavazi'nea tevene, kresramnavu itama tro hu'nea haveramine, kugusopane, tinkampima marevazi'nea tinena ana maka tevemo'a teno eri hana hu'ne. 39 Hagi maka vahe'mo'za ana zama nege'za zamavugosaregati mopafi mase'za amanage hu'naze, Ra Anumzamo'a Agrake tamage Anumzana mani'ne! Ra Anumzamo'a Agrake tamage Anumzana mani'ne! hu'za hu'naze. 40 Hagi ana'ma higeno'a Elaija'a amanage hu'ne,

Bali havi anumzamofo kasnampa vahetami fresagi, ana maka zamazeriho, hige'za ana maka zamazerizageno Elaija'a ana Bali havi anumzamofo kasnampa vahetmina zamavareno vuno Kisoni timpi ome zamahe fri vagre'ne. **41** Ana huteno Elaija'a amanage huno Ahapuna asami'ne, Marerinka ne'zane tinena ome no. Na'ankure rankokrerfa ne-ege'na agasasankea nentahue. **42** Anagema higeno'a, ne'zane tine ome nenaku Ahapu'a mareri'ne. Hagi Elaija'a Karmeli agona morusapi marerino arena omereno tare arenararempi asenia ante pri huteno mani'ne. **43** Hagi Elaija'a eri'za ne'agura amanage hu'ne, Marerinka hagerima me'nerega omega. Higeno eri'za ne'amo'a marerino ome keteno, ete Elaijante eno amanage eme hu'ne. Mago zana onkoe, huno higeno, Elaija'a 7ni'a zupa vute ete hunka ome ko huno hunte'ne. **44** Hagi namba 7ni zupa vuno ome keteno eno amanage eme hu'ne, Vahe'mofo azagusagna huno osi hampomo hageri me'nerega efore hige'na koe. Anagema higeno'a, Elaija'a amanage huno hunte'ne, Marerinka Ahapuna amanage hunka ome asamio, Ko ruhiza hanigenka ovnanki karisika'a retro hunka uramio hunka ome asamio. **45** Hagi osi'a kna manigeno monafina hampomo'a ome rehanintiri higeno, zahomo'a hampona atufeno ne-egeno, tusi ko aru'ne. Hagi Ahapu'a karisi agumpi ame'ama huno marerino, Jezreli kumate vu'naku vu'ne. **46** Ana higeno Ra Anumzamo'a Elaijante azana anteno hanavea amigeno, zaza kena'a repasi hunaga atreno amunofipi ahenevazino, tusi agareno Ahapuna ome azeri agatenereno Jezreli kumate vu'ne.

19 Hagi Ahapu'ma nonte'ma unehanatino'a, maka Elaija'ma hia zantamina Jesebelina nesamino, Bali kasnampa vahetmima kazinteti'ma maka zamahehna'ma hia kenena asami'ne. **2** Anagema Jezebeli'a nentahino'a, amanage huno Elaijantega kea

atregeno vu'ne. Ama knaretima agafa huno vuno oki'ma ama ana knare'ma vanige'na, kasnampa vahetmima zamahana hanankna hu'na nagrama kahe ofrisugeno'a, anumzantmimo'za nagrira nahe frigahaze. 3 Higeno anankema Elaija'a nentahino'a, koro nehuno otino freno Juda mopafi Berseba vuno, anante eri'za ne'a ome netreno, 4 agrake ka'ma kokampi mago zage knamofo agu'afi vuno, brumue nehaza zafa agafafi umani'neno amanage huno nunamuna hu'ne, Ra Anumzamoka nagehezagna vahera nagra omni'noanki, ha'anki nasimura erige'na fri'neno. 5 Anage huno nehuno ana zafa agafafi mase'negeno ankeromo'a eazamo eme azeri o'netino amanage hu'ne, otinka ne'zana no, huno hu'ne. 6 Anage higeno Elaija'a otino asenirega keana amuho hu'nea have agofetu kre'naza kekine, tintafena me'negeno erino neteno mase'ne. 7 Ana'ma higeno'a ete mago'ane ana ankeromo'a eazamo eme azeri otino amanage hu'ne, Afete kana vugahananki otinka ne'zana no, huno hu'ne. 8 Anage higeno otino ana kekine tinena erino netegeno, ana ne'zamo azeri hankavetinegeno 40'a zagine haninemofo agu'afi kana vuno, Anumzamofo agonare Horepia uhanati'ne. 9 Ana huteno mago have kampi umaseno mani'negeno Ra Anumzamo'a amanage hu'ne, Elaijaga amafina na'a eme nehane? huno antahige'geno, 10 Elaija'a amanage huno kenona hu'ne, Ra Anumzana hihamu'ane Anumzamoka, nagra hanaveti'na kamage ante'noe. Hianagi Israeli vahe'mo'za huhagerafi huvempa keka'a ruhanentagi'za, Kresramana vu itaka'a tagana vazitre'naze. Ana nehu'za maka kasnampa vaheka'a kazinteti zamahe vagarage'na nagrake mani'noge'za nahe fri'naku nehakaze. 11 Anagema higeno'a Ra Anumzamo'a amanage huno asami'ne, Atiraminka agonare navuga ome otio, higeno Elaija'a ome otigeno Ra

Anumzamo'a agatereno enevigeno, hankave zaho'mo'a ana
have agona erifrage mafrege hu'neanagi, ana zahopina Ra
Anumzamo'a omani'ne! Hagi ana hutegeno tusi imi eri'neanagi,
ana imimpina Ra Anumzamo'a omani'ne. **12** Hagi imima
eritegeno'a, teve anefa'mo hagnahagna huno evu'neanagi, ana
teve nefapina Ra Anumzamo'a omani'ne. Hagi teve anefa'ma
evutegeno'a akoheno osi agerupinti sumi huno hiankna ageru
ru'ne. **13** Hagi Elaijama ana ageru'ma nentahino'a, nakre ku'anu
avugosa refineteno, atiramino ana havegamofo kafante oti'ne.
Hagi anama uotigeno'a mago ageru'mo'a amanage huno hu'ne.
Elaijaga amafina na'a eme nehane? **14** Higeno Elaija'a amanage
huno kenona hu'ne, Nagra hanaveti'na Ra Anumzana Monafi
sondia vahetamimofo Anumzamoka kamage ante'noe. Hianagi
Israeli vahe'mo'za huhagerafi huvempa keka'a ruhanentagiza,
Kresramana vu itaka'a tagana vazitre'naze. Ana nehu'za maka
kasnampa vaheka'a kazinteti zamahe vagarazage'na nagrake
mani'noge'za nahe fri'naku nehakaze. **15** Anagema higeno'a
amanage huno Ra Anumzamo'a asami'ne, E'nana kantega
ete rukrahe hunka Damaskasi ka'ma kokama me'nea kantega
vunka, anante'ma uhanati'nunka, Hazaelina anumpi masavena
ome tagintenka Siria vahe kini azeri otio. **16** Hagi Nimsi
nemofo Jehuna masavena anumpi ome tagintenka Israeli vahe
kinia azeri onetinka, Abel-meholati kumateti ne' Safati nemofo
Elisana anumpi masavena ome tagintenka kasnampa nera
kagri noma erino eri'zama erisia nera azeri otigahane. **17**
Hagi Hazaelinku'ma koro hu'za fresaza vahera Jehu zamahe
frigahie. Hagi Jehunkuma koro hu'za freza esaza vahera Elisa
zamahe frigahie. **18** Hianagi 7tauseni'a Israeli vahetmima Bali
havi anumzante'ma zamare'na re'za mono huntege, antako

huntege'ma osu'naza vahetmina ofri amne mani'naze. **19** Higeno
ananke'ma nentahino'a, Elaija'a viazamo Safati nemofo Elisa'a
bulimakao afutamina 12fu'a kevu tro huteno, agra 12fuma
hiankevufi mani'neno hozafina hoza e'nerigeno ome keno eri
fore hu'ne. Hagi ana ne'ma Elaija'a ome negeno'a, viazamo
nakreku'a Elisa afumpi ome netreno vu'ne. **20** Hagi ana'ma
higeno'a, Elisa'a ana bulimakao afutmima'a netreno, Elaijana
avaririno nevuno amanage ome huno asami'nne, Natrege'na ete
vu'na nenrerane nenfanena ome hufru huzmantete'na ete e'na
eme kavaririneno huno higeno, Elaija'a amanage huno kenona
hu'ne, Nagra i'o huogantegahuanki knareki vunka anara ome
huo. **21** Anagema higeno'a Elisa'a ete vuno ana bulimakao
afutmima'a ome aheno zamafumpima kare namarema nehaza
zafarami ante'neana apapu huno ana bulimakao afutamina kreno
ana kumapi vahetami ome zami, eme zami hige'za nenazageno,
agra netreno vuno Elaija eri'za vahe umani'ne.

20 Hagi ana knafina Aramu vahe kini ne' Ben-hadati'a maka
sondia vahe'a zamavare atru nehuno, 32'a kini vahetamine
erihagerafino hosi afutamine, karisiraminena eri anteraro hu'ne.
Hagi ana'ma hutege'za ana maka'moza vu'za Sameria kumate
vahera hara ome huzmante'naze. **2** Hagi ana'ma nehuno'a
Ben-hadati'a amanage huno Israeli kini ne' Ahapuntega kea
atregeno ana rankumapina ufre'ne. Amanage huno kini ne'
Ben-hadati'a hie, **3** Silvane golinema ante'nanana nagri su'a
megeno, hentofa a'neka'ane mofavreraminka'anena nagri su'a
mani'naze. **4** Hagi anagema higeno'a, Israeli kini ne'mo'a
amanage huno kenona hu'ne, kema hana kante ranimoka kagri
suza manugeno, maka zama ante'noana kagri su'a me'ne. **5**
Hagi Ben-hadati'ma kema erino vuno eno'ma hu vahe'mo'a,

ete mago'ane eno amanage eme hu'ne, Ben-hadati'a amanage huno hie, Nagra ko amanage hu'na huntogeno vu'ne, silvane golinema antenanana nagri su'a megeno, maka a'neraminka'ane mofavreraminka'anena nagri su'a mani'naze. **6** Hianagi oki'na ama ana knarera, eri'za vahe'ni'aramina huzmantenuge'za vu'za nonka'afinti'ene eri'za vaheka'amofo nontmimpinti'enena maka knare'nare zantamina ome erigahaze. **7** Anagema higeno'a, Israeli kini ne'mo'a maka Israeli ranra vahetmina kehutru huno amanage huno zamasami'ne, ama ne'mo'ma hazenkema eri fore'ma nehiana keho! Kema hirera Nagra i'o osu'na, ko hu izo huntena silvane goline a'neramini'ane, mofavre naga'nianena amigahue, hu'na hu'noe. **8** Hagi anagema hige'za maka ranra vahetamine, maka vahe'mo'za amanage hu'za antahintahia ami'naze, kezmia ontahio. **9** Hagi anagema hazageno'a, Ahapu'a amanage huno Ben-hadati'ma hianke'ma erino vuno eno'ma hu vahera zamasami'ne, ranimo kini ne'mo'ma, ese'ma nantahigea zantamina kamigahue hu'na hu'noe. Hianagi henkama nantahigeno huoma hiazana osugahue. Hige'za ana vahe'mo'za Ahapu'ma zamasamia kea Ben-hadatina ome asami'naze. **10** Anagema hazageno'a, Ben-hadati'a amanage huno kea atregeno ete vu'ne. Nagrama Sameria kuma'ma eri haviza hanugeno'ma kugusopanema fananema osanigeno'a, anumzantmimo'za nahe frigahaze. **11** Hagi anagema higeno'a, Israeli kini ne' Ahapu'a amanage huno kea atregeno vu'ne, zahufama ha' kukenama eri renehankrea ne'mo'a, ko'ma ha'ma hugatere'nenia vahe'mo'ma, ha kukenama nehate'noma hiankna kea huno puhaha agerura orugahie. **12** Hagi Ben-hadati'a mago'a kini vahetamine seli nompi aka ti neneno mani'nere Ahapu'ma hiankea eri'za uhanati'naze. Hagi Ben-hadati'ma anankema nentahino'a, sondia

vahe'araminkura amanage hu'ne, Ha' hugahunanki retro hiho,
hige'za ana Sameria kumapi vahe ha' huzmante'naku retrotra
hu'naze. **13** Hagi ana'ma nehazageno'a kasnampa ne'mo'a
Israeli kini ne' Ahapunte erava'o huno amanage eme hu'ne, Ra
Anumzamo'a amanage huno hie, ha' vahekamo'za tusi'a vahe'ma
mani'nazana kagra ke'nano? Menina Nagra ana maka ha'
vaheka'aramina kazampi zamavarentenugenka nezamahenka
Nagrikura Ra Anumza mani'ne hunka kenka antahinka hugahane.
14 Anagema higeno'a, Ahapu'a kasnampa nera amanage huno
antahige'ne, inankna huno anara hugahie, higeno ana kasnampa
ne'mo'a amanage huno kenona hu'ne. Magoke magoke provinsifi
sondia vahete'ma kvama hu'naza kasefa sondia vahe'mo'za
anara hugahaze. Higeno, iza ana hara agafa hugahie, huno
higeno, kagra agafa hugahane huno hu'ne. **15** Hagi anankema
Ahapu'ma nentahino'a maka ana provinsiramima kvama hu'naza
vahetmimofo kasefa sondia vahetmina kehutru higeno, 232'a
vahetami atru hu'naze. Hagi ana amefira 7tauseni'a Israeli
vahetmina kehuno eritru hu'ne. **16** Hagi ferutregema segeno
Ben-hadati'a 32'a kini vahetaminena seli nompi mani'ne'za
aka tina nene'za agafa hu'za neginagi hu'za mani'naz. **17**
Hagi ana'ma nehu'za mani'nageno'a, provinsifima kvama
hu'naza vahetmimofo sondia vahetamimo'za hahunaku esera
Sameria rankumapintira atirami'za erimpi hu'za e'naze. Hagi
anama neageno'a, Ben-hadati'ma huzmantege'za kankavama
hu'naza, vahe'mo'za sondia vahetamina Sameria ra kumapintira
atirami'za neaze hu'za Ben-hadati'na ome asami'naze. **18**
Hagi anagema hazageno'a, Ben-hadati'a amanage hu'ne, ha
hunaku ege, amnema ege'ma nehanazana zamahe ofri amne
zamazeriho. **19** Hagi provinsima kvama hu'nea vahetmimofo

sondia vahetmimo'za egota hazageno, ana zamefira Israeli
sondia vahetami e'naze. **20** Hagi ha'ma agafama higeno'a mago
mago Israeli sondia vahe'mo'a mago mago ha' vahezmimo'ma
ha'ma eme huzmantaza vahetmina zamahe vagare'naze.
Ana'ma hazageno'a, Siria sondia vahe'mo'za atre'za frazageno,
Israeli sondia vahe'mo'za zamavariri'naze. Hianagi Siria kini ne'
Ben-hadati'ene karisma eri'za ha'ma nehaza vahe'mo'zanena
hosi agumpi mareri'za fre'naze. **21** Hianagi Israeli sondia
vahetmimo'za vu'za hosi afutamine karisiramine, Siria sondia
vahetaminena tusi'a vahе zamahe fri'naze. **22** Hagi ana'ma
hutazageno'a kasnampa ne'mo'a kini ne' Ahapunte erava'o
huno amanage hu'ne, menima ha'ma hanana antahintahia retro
nehunka manio. Na'ankure Siria kini ne'mo'a anaga'a kafufima
tra'zamo'ma ete hage knare eno hara eme hugantegahie. **23**
Hagi anagema hutege'za Siria kini ne'mofo eri'za vahe'mo'za
amanage hu'naze, Israeli vahе anumzantmimo'za agonafi
anumzantami mani'nazankiza hankavezmimo'a tagri hankavea
azeri agatere'za hara tagateraze. Hianagi agupofima ha'ma
hanunana zamagateregahune. **24** Hagi amana huo, esera
32'a kini vahetmina zamazeri atrenka, zamagri nontera sondia
vahetmimofo kva vahetami zamavarento. **25** Ana nehunka
zamahe hana'ma hu'nazankna sondia vahetami nezamavarenka,
hapima zamahe'nazankna hosи afutamine, karisiramine tamigeta
agupofi hara ome huzmantamneno. Hazageno Ben-hadati'a ana
antahintahima amiza antahintahirera, knarera huno anaza hu'ne.
26 Hagi ete mago kafufima trazama hage knarera, Ben-hadati'a
Siria sondia vahetmina zamavareno Afeki kumate Israeli vahе
ha' huzmante'naku vu'ne. **27** Hagi ana'ma hazageno'a, Israeli
sondia vahetami ke hutru hu'za keonke zazmia retro hute'za

Siria sondia vahe'mokizmi ha' huzmante'naku vu'naze. Israeli vahe'mo'za osi'a sipisipi afu kevumiza eri atruma nehazaza hu'za tarefi seli no ome ki'za mani'naze. Hianagi Siria sondia vahe'mo'za ana agupofina mani vite'naze. **28** Hagi ana'ma hazageno'a, Anumzamofo eri'za ne'mo'a Israeli kini ne' tava'onte eno amanage eme hu'ne, amanage huno Ra Anumzamo'a hie, Siria sondia vahe'mo'za amanage haze, Ra Anumzamo'a agupofi anumza omani'neanki, agonafi anumza mani'ne hu'za hazankina, ama tusi'a sondia vahera zamahe hana hanugenka, Nagrikura Ra Anumzane hunka kenka antahinka hugahane huno hu'ne. **29** Hagi 7ni'a knamofo agu'afina Siria sondia vahe'mo'za kantu kaziga seli nona ki'za manizageno, Israeli sondia vahe'mo'za kama kaziga seli nona kiza mani'naze. Hagi namba 7nima hiankna zupa hara agafa higeno, Israeli sondia vahe'mo'za mopafima nevu'za ha'ma nehaza Siria sondia vahera 100 tauseni'a zamahe fri'naze. **30** Hagi mago'a sondia vahe'mo'za fre'za Afeki rankumapi ufrazageno, ana kumate'ma vihuma hu'za mareri'naza havemo fraguvaziramino 27 tauseni'a sondia vahera zamahe vagare'ne. Hagi Ben-hadati'enena freno viazamo ana kumapina mago nomofona, vahe frakizane huno agu'afinka hunaragintenevi ome fraki'ne. **31** Hagi Ben-hadatina ugota eri'za vahetmimo'za amanage hu'za asami'naze, Israeli kini vahetmina vaheku zamasunku hu kini vahe mani'naze hu'za hazageta antahinone. E'ina hu'negu tagra zmasunkuma hu'zama nentaniza atafa kukena tafafafina ruganegita tanunteranofi ruganegita Israeli kini netera vanune. Hagi e'ina'ma hanunkeno'a ontahet tatrenigeta manigahune. **32** Anage nehu'za zamasunku'ma nehu'zama nentaniza atafa kukena zmafafafina rugagi'za nentaniza, zamanunteranofi

ruganegi'za Israeli kini nete vu'za amanage ome hu'naze, Ben-hadati'a eri'za neka'amo'a amanage hie, muse hugantoanki onahenka natregena mani'neno huno hie. Anagema hazageno'a Israeli kini ne'mo'a amanage hu'ne, Agra nenfuki ofri amne mani'negeta eme nehazo? huno zamantahige'ne. 33 Hagi anankema nentahiza e'i knare ke hie hu'za nehu'za amanage hu'naze, Izo Ben-hadati'a negafu'e, hu'za hazageno amanage huno Israeli kini ne'mo'a hu'ne. Hagi vuta ome avreta eho, huno huzmante'ne. Hagi Ben-hadati'ma atiramino egeno'a, (Ahpapu'a) higeno karisifi mareri'ne. 34 Hagi ana karisifi mareriteno'a amanage huno Israeli kini nera asami'ne, Nenfa'ma kagri negafama aheno hanare'nea kumatmina ete maka kaminugenka, nenfa'ma Sameria kumate'ma hu'neaza hunka fenoma mizaseno ete fenoma zagore'ma atre kumara Damaskasi kumate ana zana tro hugahane. Anagema higeno'a, Ahapu'a amanage huno asami'ne, E'ima kema hana antahintahire menina katresugenka vugahane. Anage nehuno erihagerafike manisa'a huvempagea huteno, atreno vu'ne. 35 Hagi ana'ma hutakeno'a, kasnampa vahe kevufinti Ra Anumzamo'a mago kasnampa ne' asamigeno otino mago kasnampa nekura naho huno hu'neanagi, ana ne'mo'a ohe'ne. 36 Ana'ma higeno'a ana kasnampa ne'mo'a kema ontahia kasnampa nekura amanage hu'ne, na'ankure kagra Ra Anumzamofo kea ontahi'nankino, menima amareti'ma atrenkama nevnankeno'a laionimo kahe frigahie. Anagema higeno, ana ne'mo'a nevigeno laionimo ahe fri'ne. 37 Hagi ana'ma hutegeno'a, ete ana kasnampa ne'mo'a mago ne' ome keno amanage hu'ne, Naho, huno higeno ana nera ahe kuzafa hu'ne. 38 Hagi ana'ma higeno'a ana kasnampa ne'mo'a vahe'mo'ma kezankura tavravenu avugosafina anakino antene hananeno kante kini ne

avega ome anteno mani'ne. **39** Hagi kini ne'ma eneviana ana kasnampa ne'mo'a amanage huno asami'ne, Eri'za vahekamo'na tusi'a hapi mani'nogeno mago sondia ne'mo'a mago ha' ne' azerino avreno eme nenamino amanage hu'ne, Ama nera kegava huso'e huo. Hagi kegava huso'e osnankeno'ma katreno'ma fresige'na eme kahe frige, hanugenka kna'amo'a 30 tauseni'a kilo hu'nesnia silva zago mizasegahane, **40** Hagi anagema higena ke'onke zamofoma urimete erimetema nehuama'a, ana ne'mo'a natreno fre'ne. Anagema higeno'a, Israeli vahe' kini ne'mo'a amanage hu'ne. E'ina hu'negu anazamofo mizama'a kagrama kema hana kante antenka erigahane. **41** Anagema nehigeno'a, ana kasnampa ne'mo'a ame'ama huno ana tavaravea avugosafintira eritregeno, Israeli vahe kini ne'mo'a kasnampa vahetmimpinti mago zamimo'e huno keni hu'ne. **42** Hagi kini ne'mo'ma ana kasnampa ne'ma keni'ma higeno'a amanage huno asami'ne, Ra Anumzamo'a amanage huno hie. Ahe frio hu'nama hua nera amne atrankeno vu'ne. E'ina hu'negu agri no erinka kagra frisankeno, vahekamo'za agri vahe'mokizmi no eri'za haviza hugahaze. **43** Hagi Israeli vahe' kini ne'mo'ma anankema nentahino'a, avugosamo'a evuramigeno tusi rimpagna nehuno noma'rega Sameria vu'ne.

21 Mago'a kna evutegeno Jezrieli kumate ne' Naboti'a Jezrieli kumatera, Sameria kini ne' Ahapu nomofo tavaonte waini hoza'a me'negeno kegava hu'ne. **2** Hagi mago zupa kini ne' Ahapu'a amanage huno Nabotina antahige'he, Waini hozakamo'a kuman'i'a tava'onte me'negu, namige'na nani'za hoza nentena, ana nona'a ete mago hoza knarema hu'neania kamige, mizanku'ma hananke'na mizasege haneno. **3** Hianagi Naboti'a amanage hu'ne, Ra Anumzamo'a negafampinti'ma

erisantima hare'nenana zana, vahera omio huno hu'neanki'na onkamigahue. 4 Higeno'a Ahapuna avugosamo'a evuneramigeno tusi rimpa neheno nom'a'rega vu'ne. Na'ankure Naboti'a huno, nenfampinti'ma erisantima hare'noa zana onkamigosue, huno hu'neazanku anara hu'ne. Anama higeno'a Ahapu'a kavera oneno avugosa rukrehe huno tafe'are mase'ne. 5 Hianagi nenaro Jesebeli'a eazamo amanage huno eme antahige'ne, na'anku kavugosamo'a evuneramigenka kavera nonane? 6 Higeno amanage huno kenona hu'ne, Na'ankure Jezrieli kumateti ne' Naboti'na amanage hu'na antahige'noe, waini hozaka'a namige'na hoza nentena, ana nona'a ete mago hoza kamige, mizanku'ma hananke'na mizasege haneno hu'na huana, i'o onkamigosue huno hu'ne. 7 Higeno nenaro, Jesebeli'a amanage huno asami'ne, kagra Israeli kinia mani'nenka Israeli vahera kegava huzmantenananki, otinka ne'zana nenenka atregeno karimpamo'a kna osino. Jezrieli kumateti ne' Naboti waini hoza omeri kamigahue. 8 Anage nehuno Naboti'ma nemania kumate ranra vahetamintegane kva vahe'teganena mago avo kreno Ahapu azanko avo rukamare nenteno atregeno vu'ne. 9 Hagi ana avompinga amanage huno krente'ne. Ne'zana atreta nunamu hu kne huta maka vahetamina kehu atru hinke'za atruma hanageta, Nabotina agesga huta ese trate hinkeno, vahetmimofo zamavuga manino. 10 Ana nehuta mago kaziga kefo netre huznantenko, umanineke Nabotinkura, Anumzamofone kini ne'enena huhaviza hu'ne huke hunte'o. Hagi anagema hanageta, Nabotina avre atiramita have knonu ahe friho. 11 Hagi anankema nentahi'za ana kumapi ranra vahe'ene, kva vahe'mo'za Jesebeli'ma avoma krezzamino'ma hiho huno'ma hiaza hu'naze. 12 Hagi ne'za atreno nunamu hu kna erintazageno, vahe'ma atruma haza

vahetmimofo zamavuga Nabotina ese trate avrente'naze. **13**
Hagi tare kefo netremokea Nabi'tma mania tra'mofo kantikaziga
emanike amanage huka Nabotina havigea hunte'na'e. Nabi'ta
Anumzamofone, kini ne'enena huhaviza huzanante'ne. Hagi
anagema hakeno'a, Nabotina rankumapintira avre'atirami'za
havenknonu ahe fri'naze. **14** Hagi ana'ma nehu'za ana kumapi
kva vahe'mo'za Jesebelintega amanage hu'za kea atre'naze,
Nabotina hago havenknonu ahe frunkeno fri'ne, hu'za kea
atrete'naze. **15** Hagi Jesebeli'ma ana kema nentahino'a,
amanage huno Ahapuna asami'ne, Jezrieliti ne' Nabi'tma
zagore'ma kami zanku'ma i'o huno'ma hu'nea ne'mofo waini
hoza otinka omerio. Na'ankure agra omani'neanki, hago fri'ne.
16 Hagi Nabi'tma frie nanekema Ahapu'ma nentahino'a, ana
waini hoza omeri nafa'a hunaku urami'ne. **17** Hianagi Ra
Anumzamo'a amanage huno Tisbe kumateti kasnampa ne'
Elaijana asami'ne, **18** Otinka vunka Israeli kini ne' Ahapu'a
Sameriama nemania ne'mo, Nabot waini hoza erinaku ana
hozafi umani'neanki uraminka ome negenka, **19** amanage hunka
ome asamio, Ra Anumzamo'a amanage huno hie, kagrama
Nabotima ahenka hoza'ama enerinka korama'a eriraginanku,
kramo'zama Nabot korama hu'zama naza kumate, anahukna
hu'za kramo'za kagri korana hu'za negahaze hunka ome asamio.
20 Higeno vigeno Ahapu'a amanage huno Elaijankura hu'ne,
Ha' vahenimoka nagrira eme nagenka erifore hane. Anage
higeno Elaija'a amanage huno kenona hu'ne, Izo kagriku hake'na
e'noe. Na'ankure kagra Ra Anumzamofo avurera kefo kavukava
hu'nane. **21** E'ina hu'negu Ra Anumzamo'a amanage huno hie,
Kagrira rama'a hazenke kamigahue. Hagi Ahapuga kagripinti'ma
fore'ma hanaza vahera amne vahe'ene, kazokzo vahe'enena

maka zamahe vagaregahue. **22** Hagi Nebati nemofo Jeroboamu naga'ene, Ahiza nemofo Ba-asa naga'enema hu'noaza hu'na kagri nagara zamahe hana hugahue. Na'ankure kagra tusiza hunka nazeri narimpa nehenka, Israeli vahera zamazeri kumipina zamante'nane. **23** Hagi Jesebelinkura amanage huno Ra Anumzamo'a hu'ne, Jesebeli avufga kramo'za Jesrieli kuma keginamofo agu'afi negahaze. **24** Hagi Ahapu nagapinti'ma rankuma agu'afima frisaza vahera kramo'za nesageno, megi'ama frisnaza vahera namamo'za negahaze. **25** Hagi Ahapu nenaro Jesebeli'ma havi antahintahi amino azeri savari'ma Ahapu'ma higeno, Ra Anumzamofo avure'ma havi avu'ava'ma hu'neankna avu'avara mago vahe'mo'e huno kora osu'neaza hu'ne. **26** Hagi ko'ma Israeli vahe'ma ome'nazageno ana mopafima Amori vahe'ma mani'nezama haviza huno kasrino agote avu'ava'ma nehazageno, Ra Anumzamo'ma zamahe natitre'neankna huno kaza osu havi anumzantaminte Ahapu'a monora ome hunte'ne. **27** Hianagi Ahapu'ma ana nanekema nentahino'a, kukena'a tagato huno zamasunku'ma nehu'za atafa kukenama nehaza kukena eri nehuno, kavera a'o huno mani'ne. Hagi kenage'enena ana kukena antanino mase'neno, tusi asunku hu'ne. **28** Hagi ana'ma nehigeno'a, Ra Anumzamo'a amanage huno Tisbe kumateti ne' Elaijana asami'ne, **29** Nagri navugama Ahapu'ma agu'ama erinteramino asunku'ma hiazana hago kano. Na'ankure agra agu'ama erinteramino navuga asunku hianki'na agri knafina ana hazenke zana eriforera osugahuanki, mofavre'amofo knafi ana hazenke zana eri fore hugahue.

22 Hagi 3'a kafumofo agu'afina Siria vahe'ene Israeli vahe'enena hara osu mani'naze. **2** Hianagi namba 3 kafurera Juda kini ne Jehosafeti'a Israeli kini ne' kenaku e'ne. **3** Hagi Israeli kini ne'mo'a

ugota eri'za vahe'araminkura amanage huno zamasami'ne,
Ramot-gileati kumara tagri kuma'ma me'negeta Siria vahe kini
nemofo azampinti'ma e'ori'nonana tamagra ontahi'nazo? 4
Hagi Ahapu'a rukrahe huno Jehosafetina antahige'ne, kagra
naza hanankena hara hu'na Ramot-gileati kumara erigahufi?
Anagema higeno'a, Jehosafeti'a Israeli kini nekura amanage
hu'ne, sondia vahe'niaramine hosi afuni'amozanena tro hu'za
mani'nazanki na'a huogu nehane? 5 Hianagi Juda kini ne'
Jehosafati'a huno, ese'zana Ra Anumzamo'a na'ané hugahifi
antahigeta keteta'e huno hu'ne. 6 Hagi anagema higeno'a, Israeli
vahe kini ne'mo'a 400'a kasnampa vahetami kehige'za etru
hazageno amanage huno zamantahige'ne, Ramot-Gileati vahera
marerina hara ome huzmantenufi ome huozmante'nue, huno
zamantahigege'za amanage hu'naze, amne marerinka hara ome
huzmanto. Na'ankure Ra Anumzamo'a kazampi zamavarentena
hara huzmagateregahane. 7 Hianagi Jehosafeti'a amanage
hu'ne, mago kasnampa vahera mani'nefi, asi'age mani'naze huno
zamantahige'ne. 8 Anagema higeno'a, Israeli vahe kini ne'mo'a
amanage huno hu'ne, Ra Anumzamofo antahintahima erisunana
mago kasnampa nera Imla nemofo Mikaia'a mani'ne. Hianagi
nagra nagote'nentoa nere. Na'ankure agra knare kasanampa kea
nosianki, havi kasnampa kege nagritera hutere nehie. Anagema
higeno'a, Jehosafeti'a amanage huno hu'ne, kini ne'moka
e'inagea osunka na'ané agra hugahifi antahisu'e. 9 Anagema
higeno'a, Israeli vahe kini ne'mo'a eri'za vahe'a kehigeno egeno
amanage huno hunte'ne, Imla nemofo Mikaiana ame hunka ome
avrenka eno. 10 Higeno Israeli vahe kini ne' Ahapu'ene Juda
vahe kini ne' Jehosafetikea kini kukenazini huteke Sameria kuma
kafamofo tava'onte witi neharaza kumapi kini trate mani'na'e.

Hagi maka kasnampa vahetmimo'za zanavuga mani'ne'za
kasnampa kea hu'naze. **11** Hagi mago'zmimo Kenana nemofo
Zedekaia'a ainire pazine tro huno eri'neno amanage hu'ne, Ra
Anumzamo'a huno ama'na pazivenu Siria vahera nezamarenka,
zamaretufenka nevunka zamahe hana hugahane huno hie. **12**
Anagema higeno'a, ana maka kasnampa vahe'mo'za mago
zamarimpa nehu'za amanage hu'naze, marerinka Ramot-giliati
vahera hara ome huzmagatero. Na'ankure Ra Anumzamo'a
ana maka vahera kini ne'moka kazampi zamavarentegahie. **13**
Hagi Mikaiama avrenaku'ma vu'nea ne'mo'ma ome avrenoma
ne-eno'a amanage huno kasnampa ne' Mikaiana asami'ne,
antahio, kini ne'mo'ma zamavare atruma hu'nea kasnampa
vahe'mo'za knare kege kini nera asami'naze. Hagi kagrama
vanunka, ana hunka knare kege kini nera ome asamio. **14**
Hianagi Mikaia'a amanage huno kenona hu'ne, Nagra kasefa
huno mani'nea Ra Anumzamo'ma nasami'nia kege'za hugahue,
huno hu'ne. **15** Hagi Mikaia'ma kini ne' Ahapu avugama
ehanatigeno'a, Ahapu'a amanage huno antahige'ne, Mikaiaga
Ramot-giliati vahera marerina hara ome huzmantenufi hara ome
huozmantenu? Higeno Mikaia'a amanage huno kenona hu'ne,
vunka hara ome huzmanto. Na'ankure Ra Anumzamo'a ana
maka vahera kazampi zamavarentegahie. **16** Hianagi kini ne'mo'a
amanage huno kenona hu'ne, nama'a zupa Ra Anumzamofo
kema huvempsa hunka tamagea nasamiogura kantahia negoe?
17 Anagema higeno'a, Mikaia amanage huno hu'ne, Israeli
vahe'mo'za kvazmimo'ma omani sipisipimo'zama nehazaza hu'za
agonaramimpina panani hu'za vu'za eza nehazage'na ke'noe.
Ana'ma hazageno'a, Ra Anumzamo'a amanage huno hu'ne,
kvazmimo'a omani'neanki huzmanteg'e'za nozmirega zamarimpa

frune vu'za e'za hiho huno hu'ne. **18** Anagema higeno'a Israeli
vahe kini ne'mo'a amanage huno Jehosafatina asami'ne, Nagra
ko'ma kasami'na, nagritera knare kasnampa kea osugosianki,
havi kasnampa kege hugahie hu'na kasami'noe. **19** Hagi Mikaia'a
amanage huno hu'ne, E'ina hu'negu Ra Anumzamo'ma hiankea
kama antahiho. Hagi kogeno Ra Anumzamo'a kini tra'are monafi
mani'negeno monafi Sondia vahe'amo'za tamaga kazigane,
hoga kaziganena mani kagi'nazageno, **20** amanage hu'ne,
Iza Ahapuna ami'mira hanigeno'a, Ramot-giliatia vanige'za
ahegahaze? Hagi anagema higeno mago'mo'a ru antahintahi
nenteana, mago'mo'a ru antahintahi nenteana hu'naze. **21** Hagi
ana'ma nehazafintira mago avamu'mo Ra Anumzamofo avuga
eazamo, nagra ami'mira hugahue. **22** Anagema higeno'a, Ra
Anumzamo'a amanage huno asami'ne, Inankna hunka anara
hugahane, huno antahigegeno agra ana avamu'mo'a amanage
huno hu'ne, nagra ana maka kasnampa vahe zamagipi huvazina
havige hugahue. Anagema higeno'a, tamage hunka revatga
hanankeno keka'a antahigahianki, vunka ana ome huo. **23** E'ina
hu'negu ko, Ra Anumzamo'a menina kazeri haviza hunaku havige
avamutmi ama kasnampa vahe'mofo zamagipina antenege'za,
hazenke kampi kavrententaze. **24** Hagi anagema higeno'a
Kenana nemofo Zedekaia'a eazamo Mikaiana ameregente eme
rupro huno neheno amanage hu'ne, inankna huno nagripintira Ra
Anumzamofo avamu'mo'a natreno kema ome hugaminakura vie?
25 Anagema higeno'a, Mikaia amanage huno asami'ne, nompima
hunaragima ante'nafima ome framakisana zupa e'ire antahi ama
hugahane. **26** Hagi anagema higeno'a, Israeli vahe kini ne'
Ahapu'a amanage huno hu'ne, Mikaiana azerita rankumamofo
gavana ne' Amoninte'ene, kini ne'mofo mofavre Joasinte avreta

vuta, **27** kini ne'mo'a amanage hie huta ome asamiho, ama nera avreta kina hunte'neta tine bretinena osi'a amitere nehinke'na hatetira a'neno, huno hie huta ome zanasamiho. **28** Hianagi Mikai'a amanage huno kenona hu'ne, Kagrama knare'ma hunka hatetima esunka, nagrikura Ra Anumzamofo kea erino eme osune hunka hugahane. Anage nehuno manigagi'naza vahera amanage huno zamasami'ne, Amama huankeni'a antahinteta maniho. **29** Hagi ana'ma hutegen'o'a, Israeli vahe kini ne' Ahapu'ene, Juda vahe kini ne' Jehosafetikea hahunaku Ramot-giliati kumate mareri'na'e. **30** Hagi Israeli vahe kini ne'mo'a amanage huno Jehosafatinkura hu'ne, Hate'ma vanu'ana, nagra ru kukena hu'na ru vahe kna hu'na vugahuanki, kagra kini kukenaka'a hunka vuo. Anage nehuno Israeli vahe kini ne'mo'a amne kukena nehuno, ru vahe kna huno hatera vu'ne. **31** Hagi Siria kini ne'mo'a, karisima erino'ma ha'ma nehia sondia vahetmima kegavama nehaza vahera **32**'a kva vahe amanage huno huzmant'e'ne, ha'ma hanazana sondia vahero zamagima me'nesia kva vahetminkura tamagesa ontahita, Israeli kini neke'za hara huntaho. **32** Hagi anagema higeno'a karisima eri'za ha'ma nehaza sondia vahetaminte'ma vugagotama hu'naza sondia vahe'mo'za Jehosafetima nege'za amanage hu'naze, Israeli vahe kini nera antu'ne hu'za nehu'za rukrahe hu'za avariri'naze. Hianagi Jehosafeti'a ranke huno kezana atigeno, **33** karisima eri'za ha'ma nehaza sondia vahete'ma vugotama hu'naza Sondia vahetmimo'za kazana Israeli kini nerompage ru ne' rotago hu'za nevazaretira atre'za rukrahe hu'za e'naze. **34** Hianagi mago ne'mo'a fatufatu huno Israeli Sondia vahera kevea zamaheno virega, Israeli kini nera ha' kukena'amo'a emete'nea kampi mago kevea ahe'ne. Ana'ma higeno'a, karisima erino

avreno'ma nevia nekura amanage hu'ne, Tavata kevea hago
nahazanki hapintira navrenka rukrahe hunka atiraminka vuo. 35
Higeno ana kini nera karisifi retru rentene'za Siria vahetaminena
hara nehazageno kinaga ome segeno fri'ne. Hagi ana kini
ne'mofa koramo'a ana karisifina avite'ne. 36 Hagi zagema
ufre'zama higeno'a mago'a vahe'mo'za kezati'za amanage
hu'naze, hagi hara atreta maka vahe'mota kumatamirega vuta
etma hiho, hu'za hu'naze. 37 Ana higeno kini nera frige'za
Sameria eri'za e'za eme asente'naze. 38 Ana nehu'za Sameria
me'nea tirute kini ne'mofa korana karisifintira sese nehazageno
Ra Anumzamo'ma hu'neankante anteno kramo'za korama'a hune
hane nehazageno savri a'heramimo'za ana tirupina tina fre'naze.
39 Hagi Ahapu'ma kinima mani'nea knafima fore'ma hu'nea
zantamine, agrama kinima mani'neno'ma hu'nea zantamine,
elefanti afu'mofa zaza aveteti (ivory) konaririma hunte'nea
nomofa agenkene, rankumatmima tro'ma hu'nea agenkenena
Israeli kini vahetmimofo agenkema krente'naza avontafepi
krente'naze. 40 Hagi Ahapu'a frigeno nemofo Ahazia nefo nona
erino kinia mani'ne. 41 Hagi kini ne' Ahapu'ma 4'a kafuma
kinima manigeno'a, Asa nemofo Jehosafati'a Juda vahe kinia
efore huno mani'ne. 42 Hagi Jehosafati'a 35'a kafu hu'neno,
kinia efore huno mani'neno, 25'a kafufi Jerusalemi kumatera
kinia mani'ne. Hagi nerera'a Silhi'e nehaza ne'mofa mofakino
agi'a Azuba'e. 43 Hagi Jehosafati'a, nafa'amo'ma Asa'ma
hu'nea avu'ava avaririno knare kini mani'ne. Ra Anumzamofo
avurera knare avu'ava hu'ne. Hianagi kinima mani'neno'a havi
anumzante'ma mono hunentaza kumara eri havizana osu'ne. Ana
hu'negu vahetmimo'za havi anumzantera kresramna vunente'za
mnanentake zana kre mnanevu'za monora hunte'naze. 44 Hagi

Jehosafati'a Israeli vahe' kini ne'enena hara osuno eri mago arimpa huno fru huno mani'ne. **45** Hagi Jehosafeti'ma kinima mani'negeno'ma fore'ma hu'nea zantamine, hanavenentake zama nehuno, ha'ma hu'nea agenkenena Israeli kini vahetmimofo agenkema krenentaza avontafepi krente'naze. **46** Hagi havi anumzama mono'ma hunentaza kumapima monko'zama nehaza vene'nene, a'enenena Jehosafati nefä, Asa'ma zamahe hana'ma hige'za mago mago'ma vahe'ma mani'nazana, Jehosafati'a zamahe hana hu'ne. **47** Hagi e'i ana knafina Idomu vahe kinia omani'neankino, kini ne'mofo amefiga'ama hu'nea ne' Jehosafati'a huntogeno Idomu vahera kegava huzmante'ne. **48** Hagi Jehosafati'a hagerimpima vuno Ofiri kumatetima golima omerino'ma esia venteramina tro hu'neanagi, ana kumatera ovu'haze. Na'ankure ana venteramimo'za Ezion-geber kumate haviza hu'za me'naze. **49** Hagi ana'ma higeno'a, Ahapu nemofo Ahazia'a amanage huno Jehosafatinkura hu'ne, atrege'za eri'za vahe'nimo'za venteka'afina viho huno hu'ne. Hianagi Jehosafati'a ke'a ontahi'ne. **50** Hagi Jehosafeti'a frige'za agehe'mofoma asezmente'naza matipi negeho Deviti kumapi asente'naze. Hagi nemofo Jehoramu agri nona erino kinia mani'ne. **51** Hagi Jehosafati'ma 17ni'a kafuma Juda vahe kini nemani'negeno'a, Ahapu nemofo Ahazia'a kinia efore huno Sameria kumate mani'neno tare kafufi Israeli vahe kinia manino kegava hu'ne. **52** Hianagi Ahazia'a Ra Anumzamofo avufina nerera nefä avu'ava avaririno kefo avu'ava nehuno, Nebati nemofo Jeroboamu hu'nea avu'ava avaririno Israeli vahera zamazeri kumpina zamatre'ne. **53** Hagi nefä'ma hu'neaza huno Ahazia'a Bali havi anumzamofo avaririno monora hunenteno, Ra Anumzana Israeli vahe Anumzamofona azeri arimpa ahe'ne.

2 Kva

1 Hanki Israeli vahe'mokizmi kini ne' Ahapu'ma fritegeno, Moapu vahe'mo'za zamagra'a zamagiare oti'naku, Israeli vahera ha'huzamante'za hu'naze. **2** Hagi Ahasia'a Sameria kumate mani'neno mago zupa zare noma'amofo meg'i'a husga hunte'neno zaho'ma enerire enevuno, ananteti evuramino ra hazenke eri'ne. Anama huteno'a kato vahe'a zamasmino amanage hu'ne, E kroni vahe'mofo anumza Balsebabunte vutma hazenkema erua hazenkefintira kanamregahufi ome antahigetma keho. **3** Hianagi Ra Anumzamofo ankeromo Tisbe kumateti kasnampa ne' Elaijana amanage huno asmi'ne, Otinka Sameria kini ne'mo'ma huzmantege'za neaza kato vahe'ma ome nezamagenunka amanage huo, Israeli kumatera Anumzana omani'negeta E kroni vahe havi anumzana Balsebabuntegatira antahintahia ome erikura nevazo hunka zamantahigo? **4** E'inahu avu'avazama Ahaziama hiazanku Ra Anumzamo'a huno tamagerfa huno hazenkema erino mase'nea tafetetira oraotino frigahie! Higeno Elaija'a vuno kini ne'mofo kato vahera, anankea ome zamasami'ne. **5** Elaijama hiankema antahite'za ana kato vahe'mo'za ete'za kini nete vazageno, kini ne'mo amanage huno zamantahige'ne, na'ahigetma ame hutma aze? **6** Anage hige'za agri kemofo nona'a amanage hu'za asmi'naze, Mago ne'mo kampi eme tutagiha huranteno amanage huno tasami'ne, huramantegeta e'naza kini nera amanage huta ete ome asamiho, Ra Anumzamo'a amanage huno hu'ne, Israelia Anumzana omani'negenka E kroni vahe havi anumzana Balzebabunteti antahintahia erikura huzmantanke'zma e'hazo? E'inahu kavukvama hu'nana, hazenkema erinka tafete'ma mase'hampintira onkanamrenka tamage hunka frigahane huno

hu'ne. 7 Anankema kini ne'mo'ma nentahino'a amanage huno zamantahige'ne, inanknahu ne'mo eme tutagihara huramanteno anankea tamasami'ne? 8 Hige'za kini ne' Ahazia ke'mofo nona'a amanage hu'za asami'naze, Ana ne'mofo avufarera azokamoke higeno, agra zagagafamofo azokateti tro hu'naza kukena antani'neno, zagagafamofo akruteti tro hu'naza amu'nofi afafafina hu'ne. Anankema kini ne'mo'ma nentahino'a, e'i Tisbe kumateti ne' Elaija'e. 9 Anante kini ne'mo'a 50'a sondia vahete ugote'nea ne' mago avrenteno 50'a sondia vahe'ene huzamantege'za Elaija avrenaku vu'naze. Hagi Elaija'ma mani'nea osi agonare vute'za, sondia vahete ugote'nea ne'mo'a ana agonafi marerino Elaijanku amanage hu'ne, Anumzamofo eri'za ne'moke, kini ne'mo'a kagrikura eraminka eme nago hu'ne. 10 Higeno Elaija'a ana sondia vahete kva nera amanage huno asmi'ne, Nagrama Anumzamofo eri'za ne'ma mani'nesugen'o'a, monafintira tevemo'a eramino kagri'ene 50'a sondia vaheka'a terasgesie. Higeno monafinti tevemo'a eramino ana sondia vahete kva ne'ene, 50'a sondia vahe'enena te fanane hu'ne. 11 Anama higeno'a ete mago'ene kini ne' Ahazia'a sondia vahete ugagota hu'nea nera mago avrenteno 50'a sondia vahe'ene huzamantege'za Elaijana ete ome avre'za enaku vu'naze. Hagi anante uhanatite'za sondia vahete kva ne'mo'a amanage huno hu'ne, Anumzamofo eri'za ne'moka, kini ne'mo'a ame hunka eraminka eme nago huno hu'ne! 12 Hianagi Elaija'a kezmimofo nona'a amanage huno zamasami'ne, Nagrama Anumzamofo eri'za ne'ma tamage hu'na mani'nesugen'o'a, monafinti tevemo'a eramino, kagri'ene 50'a sondia vaheka'a te vagaresie. Higeno monafinti Anumzamofo tevemo eramino ana sondia vahete kva ne'ene 50'a sondia naga'anena te fanane hu'ne. 13 Hanki anante nampa 3rera kini

ne'mo'a ru'ene sondia vhete ugagote'nea ne' mago avrenenteno,
50'a sondia vahe'ene huzamantege'za Elaijana ete ome avre'za
enaku vu'naze. Hanki ana sondia vhete kva ne'mo'a Elaija'ma
agonafima mani'nere vuno agiafi rena omereno amanage
huno asmi'ne, Anumzamofo eri'za ne'moka muse hugantoanki,
nagri'ene sondia vahe'ni'anena, antahiraminka kasunku huranto.

14 Hanki kote'ma monafinti tevemo'ma eramino, ugagota sondia
netrene, sondia vahe zani'anema te fanenema hu'neana nagra
antahi'noe. Hanki menina antahinaminka kasunku hunanto. **15**
Higeno anante Ra Anumzamofo ankeromo Elaijana amanage
huno asmi'ne, Korora osunka agrane amne uramio. Higeno
Elaija'a otino ana sondia vhete kva ne'ene uramino, kini nete
vu'ne. **16** Hanki Elaija'a kini nera amanage huno asmi'ne, Ra
Anumzamo'a amanage hu'ne, Israelia Anumzama mani'neana
Agripintima antahi'zana eri'zankura na'ante kato vaheka'a
huzmantanke'za Ekonvi vahe anumzana Balsebabunegatira
antahintahia ome erikura vu'naze. E'inahu kavukvama hu'nana
zantera tamagerfa hunka hazenkema erinkama tafete'ma
mase'nampintira onkanamrenka frigahane. **17** Hagi henka Ra
Anumzamo'ma Elaijama asami'nea kante anteno, Ahazia'a fri'ne.
Hagi Ahazia'a ne' mofavrea onte'negu huno agri negna Joram
agri nona erino kinia mani'ne. Ana knafina Jehosafati nemofo
Jehoramu'ma Juda naga'mokizmi kini fore huno nampa 2 kafu
mania knafi ana zana fore hu'ne. **18** Hanki Ahazia'ma kinima
mani'nea knafima fore'ma nehigeno, agranema tro'ma hu'nea
zantamimofo agigenkea, Israeli kini vahe'mokizmi zamagenkema
krenentaza avontafepi krente'naze.

2 Hanki Ra Anumzamo'ma Elaijama hanavenentake kagigagi
zahopima avreno'ma monafinkama vania knamo'a egofta hu'ne.

Ana hu'negu Elaija'ene Elisakea Gilgali kumara atreke vu'na'e. 2
Anama huke nevakeno Elaija'a amanage huno Elisana asmi'ne,
Muse hugantoanki, Ra Anumzamo nagrikura Beteli vuo hige'na
vu'za huanki amare kagra manio. Hianagi Elisa'a ke nona'a
amanage hu'ne, Kasefa huno mani'nea Ra Anumzamofo avufine,
kagri kavufine huvempa huanki'na, kagrane Betelia vugahue.
Anage higeke Betelia magoka vu'na'e. 3 Hanki Betelia mago'a
kasnampa vahe mani'nazanki'za, ana kasnampa vahe'mo'za
tutagiha huznante'za Elisana amanage hu'za asmi'naze, Ra
Anumzamo'ma kva neka'ama menima avresiana antahi'nampi?
Hu'za hazageno ananke nonazmia amanage huno zamasami'ne,
Hago antahi'noanki ana zankura keaga osiho. 4 Hanki zanagra
Betelima mani'nekea Elaija'a amanage huno Elisana asmi'ne,
Nagrikura Ra Anumzamo'a Jeriko vuo huno nasamianki', Elisaga
muse hugantoanki kagra amare manio. Hianagi Elisa'a amanage
hu'ne, kasefa huno mani'nea Ra Anumzamofo avufine, kagri
kavufine huvempa huanki'na, kagrane Jerikoa vugahue. Anage
higeke magoka Jeriko kumate vu'na'e. 5 Hanki Jerikoa mago'a
kasnampa vahera mani'nazanki'za, ana kasnampa vahe'mo'za
Elisante e'za amanage hu'za asmi'naze, Ra Anumzamo'ma kva
neka'ama menima avresiana antahi'nampi, hu'za hazageno ana
kenonazmia amanage huno zamasami'ne, Hago antahi'noanki
ana zankura mago'ene keaga osiho. 6 Hanki zanagra Jerikoma
mani'nekea Elaija'a amanage huno Elisana asmi'ne, Nagrikura
Ra Anumzamo'a Jodani tintega vuo huno nasamigu, muse
hugantoanki kagra amare manio. Hianagi Elisa'a amanage hu'ne,
Kasefa huno mani'nea Ra Anumzamofo avufine, kagri kavufine
huvempa huanki'na kagrane Jodani tintega vugahue. Anage
higeke magoka Jodania vu'na'e. 7 Hanki Elaijake Elisakea Jodani

timofo ankenare uoti'nake'za, 50'a kasnampa vahe'ma zanamage vu'naza vahe'mo'za afete oti'ne'za zanage'naze. 8 Anante Elaija'a amega antani'nea za'za nagreku'a zafino eri vamagiteno, ana nakre ku'areti Jodani tina amasagigeno, timo'a rupapa huno tare kaziga vuno eno higeno, mopamo'a hagage higeke, kantu kaziga takaheke vu'na'e. 9 Hanki tima takaheke kantu kazigama vutekea, Elaija'a amanage huno Elisana asami'ne, Ra Anumzamo'ma navresnige'nama katre'na vanua knamo'a hago kofta hianki, na'a kagrira hugantesufi nasamio, higeno Elisa'a kenona'a amanage hu'ne, Muse hugantoanki kagripima me'nea avamura nami'enka, mago'ene ante agofetu hunka namio. 10 Higeno ana kemofo nona'a Elaija'a amanage huno Elisana asmi'ne, Kagra tusi'a amuho hu'nea zanku nantahigane, hu'neanagi kagrama nenagesankeno Ra Anumzamo'ma navresigenka ana hanave'a amne erighane. Hianagi onagesanana e'origahane. 11 Hanki magoka keaga huke nevakeno, anante ame huno monafinti tevenefake hosi afutamimo'za tevenefake karisi avazu hu'za amu'nozanifi erami'za zanazeri kantugama hazageno, hankave nentake kagigagi zahomo Elaijana eme avregeno monafinka marerino vu'ne. 12 Anazama Elisa'a negeno'a kezatino amanage hu'ne, Nafanimoke, nafanimoke, kagra Israeli vahe'mokizmia hosi agumpi manine'za ha'ma nehaza vahekna hunenka karisiraminkna hu'nane. Hagi Elaija'a hago vigeno Elisa'a mago'ene onke'ne. Anante Elisa'a amegama antani'nea nakre ku'a tarefi eri tagato tagatu hu'ne. 13 Hagi Elaijama zaza nakre ku'amo'ma mopafima erami'neana, Elisa'a e'nerino vuno Jodani tinkenare ete ome oti'ne. 14 Anante Elaija nakre kuma mopafima evuramiana Elisa'a erino tina nemasagino amanage hu'ne, inantega Ra Anumzana, Elaija Anumzana mani'ne, higeno

timo'a rupapa huno rugaraga vuno eno higeno, kantu kaziga vu'ne. **15** Hanki Jerikoma 50'a kasnampa vahe'ma mani'naza naga'mo'za anazama nege'za amanage hu'naze, Elaijampima me'hea avamumo'a Elisante me'ne, nehu'za vu'za ome nege'za, agiafi zamarena re'za ra agi amiza hu'naze. **16** Anante zamagra amanage hu'za Elisana asami'naze, tagra Kagri eri'za vahe'mota 50'a hankave vahe mani'nonku tatregeta vuta kva neka'agura ome haketa kamneno. Na'ankure Ra Anumzamofo avamu'mo avreno agonarego, agupofi ome atrege hunegahie. Hazageno ana kezamirera Elisa'a zamasamino, i'o huzamantenke'za oviho. **17** Hianagi zamagra tusi'za hu'za kazingazi hazageno, i'oma huzankura agaze higeno anage hu'ne, hanki huzamantenke'za viho. Anage hige'za 50'a vahe huzmantage'za vu'za tagufa zage knafi ome hake'naze. Hianagi zamagra onketfa hu'naze. **18** Hanki Elisa'ma Jeriko mani'nere zamagra ete azageno, amanage huno zamasami'ne, nagra na'ane hu'na tamasamuane, oviho hu'nama huana nahigeta nagri kea ontahi'naze? **19** Hanki mago zupa Jeriko rankumapi vahe'mo'za Elisana amanage hu'za asmi'naze, kva vahe'timoka ko, ama kuma'ma me'neana knare zantfa huno me'ne. Hianagi timo'a havizantfa hu'negeno, avimzama mopafima hankronana nena rente so'ea nosie. **20** Anante Elisa'a amanage huno zamasami'ne, vuta mago kasefa zuompafi hagea anteteta erita amare eho. Hige'za kema hiaza hu'za eri'za e'naze. **21** Anante Elisa'a vuno timo'ma kampu'ima nehanatifi ana hagea ome netreno amanage hu'ne, Ra Anumzamo'a amanage huno hie, Nagra ama tina eri so'e huankino mago'ene vahera zamahe ofrigahie. Hagi hankrisaza ne'zamo'a havizana osuno, knare huno nena rentegahie. **22** Higeno ana timo'a Elisa'ma hiankante anteno, knare huno meno eno, menina ama knarera

ehanati'ne. **23** Hagi Jerikotira Elisa'a atreno Beteli marerino vu'naku vu'ne. Karankama nevige'za mago'a mofavre naga'mo'za ran kumapinti atirami'za ranke hu'za azanvankea amanage hunte'naze, Kazamonke ne'moka maniganenka vuo, kazamonke ne'moka maniganenka vuo. **24** Anage hazageno Elisa'a rukrahe huno ana mofavre naga'ma nezamageno'a Ra Anumzamofo agifi (sifna kea) zamazeri havizahu kea huzamantegeno, Ame huke tare a' beamoke tva'onte me'nea zafa tanopafinti atiramike eke ana 42'a mofavreramina zamaheke tapagetapagu hu'na'e. **25** Anantetira Elisa'a atreno Karmeli agonarega vuteno, ete anantetira rukrahe huno Sameria vu'ne.

3 Hagi Jehosafati'ma Juda naga'mokizmi kinima mani'negeno vuno 18nima hia kafufina, Ahapu nemofo Joram'u'a Israeli vahe kinia fore huno Sameria kumatera mani'neno 12fu'a kafufi Israeli vahera kegava hu'ne. **2** Ra Anumzamofo avurera Joram'u'a havi avu'avaza hu'ne. Hianagi nefake nererake'ma tusi'a havi zanavu zanava'ma hu'na'a avamentera osu'ne. Nefake nererakema Bali havi anumzamofo amema'ama havere'ma tro'ma hunte'na'ana eri haviza hutre'ne. **3** Agra e'ina hu'neanagi Nebati nemofo Jeroboamu'ma Israeli vahe'ma huzamaveri nehuno, zamavareno vu'nea kumi avu'ava hu'ne. Jeramu'a ana havi avu'ava zana atreno amefira huomi'ne. **4** Hagi Israeli vahe'mo'za hakare'a kafuma evu'nea knafina Moapu vahera kva huzmante'naze. Hagi Moapu kini ne' Mesa'a 100 tauseni'a anenta ve sipisipi afutami Israeli kini nera nemino, azoka'ama hareno eri'zana 100 tauseni'a sipisipi afutamimofo azokatami Israeli kini nera maka kafurera amitere hu'ne. **5** Hianagi Israeli kini ne' Ahapu'ma fritegeno'a, Moapu kini ne'mo'a Israeli kini ne'mofonkea ontahino takisia zagoa omi'ne. **6** Higeno kini ne' Joram'u'a Sameria

kumara atreno maka Israeli sondia vahera zamazeri retro hu'ne.

7 Anante Joram'u'a Juda kini ne' Jehosafatina amanage huno
nanekea atrente'ne, Moapu kini ne'mo'a keni'a ontahigu, kagra
knare eme naza hananketa hara marerita ome huntegahufi!
Higeno amne kagranena vugahue. Hagi na'anema hnanana kagri
kamage antegahue. Nagri sondia vahe'ene hosi afutaminu'enena
kagria kaza hugahue. 8 Hianagi ina kazigati vuta hara ome
huntegahu'e, higeno Joram'u'a ke nona'a huno, Idomu hagege
ka'ma kokampima vu'nea karanka vugahune. 9 Hige'za Israeli kini
neki, Juda kini neki, Idomu kini ne'ma hu'za sondia vahe'zamia
zamavare'za vu'naze. Hagi anankama vu'naza kamo'a zaza
hu'nege'za 7ni'a zagefi vazageno, ti zamimo'a vagarege'za
sondia vahe'ene afutamimo'za tima nezanku tusiza hu'naze. 10
Anama hazageno Israeli kini ne' Joram'u'a amanage hu'ne, Ra
Anumzamo'a tagrira 3'a kini vahe'mota, Moapu kini ne' azampi
tavrentenaku tazeri atru nehifigure huno hu'ne. 11 Hianagi
Jehosafati'a Joramuna amanage huno antahige'ne, Amafina
magora Ra Anumzamofo kasnampa nera mani'nefi omani'ne,
kesnunkeno Ra Anumzamofona antahigenigeno na'a hiho huno
asminigeno eme tasamigahifi antahisanune. Anage higeno
Israeli kini ne'mofo eri'za ne'mo'a, ana kemofo nona'a amanage
hu'ne, Korapara kasnampa ne' Elaijama azama huno katoma
hunemia nera Safati nemofo Elisa'a mani'ne. 12 Hagi Jehosafati'a
ana kema nentahino'a amanage hu'ne, Ra Anumzamo'ma
hanianke tasamigahie hige'za, Juda kini ne' Jehosafatiki, Israeli
kini ne' Jehoramuki, Idomu kini ne'ma hu'za Elisana ome
kenaku urami'naze. 13 Anante Elisa'a Israeli kini nera amanage
huno asmi'ne, Na'a kagrira hugantenaku hugenka amarera
neane? Negafane negreragizni kasnampa vahetega vuo. Hianagi

Israeli kini ne' Jehoram'u'a amanage hu'ne, Tagrama e'nonana,
Ra Anumzamo'a ama ana maka 3'a kini nagara tavre atru
huteno Moapu kini ne'mofo azampi tavrentenaku higeta kagrite
neone. **14** Anante Elisa'a Israeli kini ne' Jehoramuna amanage
huno asmi'ne, Nagrama eri'zama erinentoa hankvenentake Ra
Anumzama ohampriga'a sondia vahetamimofo Anumzamofo
avufi tamage huank'i'na, Juda kini ne' Jehosafati'ma kagranema
omesina kagri kavufina onketfa husine. **15** Hanki menina vuta
knare'ma huno zavenama nehesia ne' ome avreta echo. Hige'za
ana ne' ome avre'za azageno zavena nehegeno, Ra Anumzamofo
hanavemo Elisante e'ne. **16** Anante Elisa'a amanage hu'ne, Ra
Anumzamo'a amanage hie, ko'ma tima evuteno hagegema hu'nea
tinkagomupina rama'a keri kafintetere hiho hie. **17** Na'ankure Ra
Anumzamo'a amanage huno hie, Kora neranigeno zaho'enena
e'nerinigeta tamagra onkegahaze. Hianagi ama tinkagomupina
timo'a avitegahie. Ana hanigetma tamagrane, bulimakao afu
zagatamine, mago'a zagagafa tami'nena timo'a avite'nenigetma
negahaze. **18** Hanki ama anazana Ra Anumzamo'a amne tro
hugara hu'neankino, amne tro hugahie. Ana nehuno Moapu kini
ne'ene sondia vahe'anena tamagri tamazampi zanavrentena
hara hu zamagateregahaze. **19** Ana nehutma hankave nentake
vihureti'ma hu kaginte'naza rankumatamine, agima marerisa
kumatmina hahu zamagateretma e'nerita, knarenare zafaramina
antagi netretma, tinkeriramina renagreta, knare'ma huno hozama
antega moparamina havereti ante avitegahaze. **20** Anage
hutegeni haninkino komatigeno'a nantera ofama huknare ame
huno Idomu kazigati timo'a hageno eno, ana mopafina eme
marevite'ne. **21** Hanki zamagra maka Moapu vahe'mo'zama
antahizama, 3'a kini vahe'mo'zama ha'ma eme huzmanteku'ma

aze ke'ma nentahi'za, ranra vaheteti vuno kasefa vahetema
vigeno ha'ma huga vahe'a maka zamagi hutru hu'za hahunaku
Moapune, Idomu mopama eme atre agentega eme trotra
hu'naze. 22 Ana kna evutegeno anante nanterana Moapu
vahe'mo'za mase'nareti'ma oti'zama kazana, zagemo'ma tinte'ma
zagemarentea zamo'a koranentike huno korankna hige'za,
ogantu mani'ne'za ke'haze. 23 Anama nehu'za amanage
hu'za hu'naze, keho koranki, ana 3'a kini naga'mo'za zamagra
zamagra ha' hu'za ohefri ahefri hu'negahazanki, otinketa vuta
maka zazamia ome zogisune hu'naze. 24 Hianagi Moapu
vahe'mo'za Israeli sondia vahe'mo'zama kuma'ma eme ante'za
mani'nafima azage'za, Israeli vahe'mo'za oti'za Moapu vahera
ha' huzamante'za zamarotgo hazage'za, mopa zamirega fre'za
nevazage'za Israeli sondia vahe'mo'za Moapu vahera rama'a
zamahe fri'naze. 25 Hanki Israeli naga'mo'za Moapu vahe ranra
kumatmina eri haviza nehu'za, knare'nare zafaramina antagi
netre'za, tinkeri ramina renkaninere'za, knare'ma hu'nege'za
hozama nentaza agupo moparamina havereti antevite'naze.
Hianagi Moapu vahe rankuma'ma magoke atre'nazana Kir-
heresi kumake atre'naze. Ana hazage'za nofi atifi have rusi
hu'za ahe sondia vahe'mo'za ana kumara mani kagintete'za,
havereti ahazageno ana kumapina ufre ufre hu'ne. 26 Hanki
Moapu kini ne'mo'ma keana ha'ra hugatereza hazageno, agra
700'a sondia naga'ma bainati kazima eri'za ha'ma nehaza naga
zamavarege'za, rankumapintira atirami'za koro fre'za Idomu kini
ne' mani'nerega vuku hu'nazanagi, anara osu'naze. 27 Higeno
agri kuma'ma erino kinima maniga zage mofavrea Moapu kini
ne'mo'a aheno rankumamofo have kegina agofetu, tevefi kre
fanane huno ofa Moapu vahe havi anumzantega hunte'ne.

Anazama Israeli sondia vahe'mo'zama nege'za tusi zamagogogu
nehu'za, hara atre'za mopa zamirega vu'naze.

4 Hanki mago zupa Ra Anumzamofo kasnampa vahepinti mago
kasnampa ne' fri'nea ne'mofo kento a'mo Elisana amanage huno
eme asmi'ne, Muse hugantoanki nenave'ma ko'ma fri'neana kagra
ko antahi'nane. Hagi ofri'ma mani'neno'a kamage nenteno, Ra
Anumzamofona monora hunte'ne. Hianagi mago ne'mofontegati
zagoanofi hu'neankino, ana ne'mo'a eno eme tare ne'mofavre
ni'ararena zanavreno vanigeke kazokazo eri'za omerintegaha'e.

2 Anage higeno ana ara Elisa'a amanage huno asmi'ne,
Inankna hu'na nagra kaza hugahue? Nonka'afina na'a ante'nane,
higeno ana a'mo'a ke nona'a huno, Muse hugantoanki mago'a
zana onte'noe. Hianagi osi'a olivi masave antogeno taferopina
me'ne. **3** Higeno Elisa'a ana ara asmino, Vunka tvaonka'arema
nemaniza vahera zamantahigenka kavoramina osi'a e'orinka
rama'a erio. **4** Hanki anama hute'nunka, kagrane tare mofavre
ka'anena nompi ufretat kafana erigita nemanita, ana maka kavofi
masavena taginte vagareho. Anama nehanankenoma mago
kavomo'ma aviteterema haniana, rure erintetere huo. **5** Ana kema
Elisa'ma hiana ana a'mo'a antahiteno, vuno vahe kavoramina
zamantahigeno eritru huteno, tare ne'ararene noma'afi ufreto
kahana erigiteno, tare ne'ararena ke higeke kavoa eri amitere
hakeno masavena tagintetere huno evu'ne. **6** Hanki ana
a'mo'ma ana maka kavoramimpima masavema tagintegeno
avite vagaretegeno, mago mofavre'agu huno, Mago'a kavoma
me'nesiana eri namio, huno higeno mofavre'amo'a kenona'a
huno, Magore huno kavoa omne'neanki hago vagare. Higeno
masavemo'ma ne-eretira anante vagare'ne. **7** Anante ana
a'mo'a Ra Anumzamofo kasnampa ne' Elisana anazama fore'ma

hiazana ome asamigeno, Elisa'a ana ara asmino, Vunka ana masaveramina ome zagore atrenka zagoma erisunka, negave'ma nofi'ma hu'neana zagoa apanesenka, mago'a mesia zagoa kagrane mofavre ka'ararene ne'zana mizaseta neneta maniho huno hu'ne. 8 Hanki mago zupa Elisa'a Sunemi rankumate vigeno, ana kumapina mago feno ara mani'neankino, ana a'mo'a kehigeno noma'afinti ne'zana ome ne'ne. Ana hu'neankino Elisa'ma Sunemi kumate'ma mago'a zupama eterema nehuno'a, ana a'mofo nompintike ne'zana eme ne'ne. 9 Hanki mago'a kna evutegeno, ana a'mo'a nevena amanage huno asmi'ne, Ama ne'ma eno'ma tagranema ne'zama eme neterema nehia nera, nagrama antahi'noana Ra Anumzamofo ruotge kasnampa ne' mani'ne. 10 E'ina hu'negu tagra nonti'amofo agofetu Elisa'ma masesia nona mago hunaraginteteta, anampinka mase sipane, ne'zama anteno nesia tra'ene, manisia tra'ene tro hunteteta, lamu tavi'ene anampinka antente'nesukeno, tagri'ma tageku'ma eterema hania zupa, anama hunaragintepinka umrerino umasegahie. 11 Hanki mago zupa Elisa'a Sunemi kumate eno, anama hunaragintepinka evumarerino umaseno mani'ne. 12 Ana huteno Elisa'a kato ne'a Gehasina amanage huno hunte'ne, Ama noma retro'ma hunte'nea ara ome kehugenno eno, higeno Gehasi'a vuno ana ara ome kehigeno e'ne. 13 Anama higeno'a Elisa'a amanage huno Gehasina asmi'ne, Vunka ana ara na'a kagrira mago so'ezana hugantegahu'e hunka ome antahigo. Hagi kagrama hu izo hanankeno'a, amne Elisa'a vuno kini netero, sondia vahete ugota hu'nea nera ome zamageno kavesisia zanku'ma hnana, ome zamasaminege'za amne trohugahaze hunka asmio. Higeno Gehasi'a ana ara anankea ome asmigeno, ana amo'a kenona huno, Nagra vahe'ni'ane knare

hu'na mani'noanki'ha mago'zankura atupara osu'noe. **14** Higeno ana ke'ma Gehasi'ma eno Elisama eme asmigeno'a Elisa'a huno, Knare avu'avazama ana a'mo'ma hurante'herera na'a huntegahu'e? Higeno Gehasi'a amanage hu'ne, Ne' mofavrea onte'negeno neve'a ko ranafa re'ne. **15** Anage higeno Elisa'a ana ara ome kehugenno eno higeno, Gehasi'a ome kehigeno eno kahante eme oti'ne. **16** Ana hutegeno Elisa'a ana ara amanage huno asmi'ne, Anaga'a kafufina meni amana knare, ne' mofavreka'a kazampi avaregahane. Higeno ana a'mo'a ke nona huno, kvanimoka Ra Anumzamofo eri'za vahe mani'hanki havigea osuo. **17** Hianagi ana a'mo'a henka mofavre amu'ene huno, Elisa'ma hu'nea kante anteno anaga'a kafufina, ana kna fatgore ne' mofavre kasente'ne. **18** Hanki henka ana mofavremo'a ra huteno mago zupa, nef'a'hozafi eri'za vahe'anema witi nevasgazafi vu'ne. **19** Hanki anampi mani'neno nefana asmino, Nase'nimo'a tusi natagrie, natagrie, huno higeno, nef'a' mago eri'za vahe hunteno, avrenka nerera'ma mani'nerega vuo. **20** Higeno eri'za ne'mo'a ana mofavrea avresga huno nerera ome ami'geno, nerera asumpi maseno mani'negeno vuno ferusegeno fri'ne. **21** Ana higeno ana a'mo'a anama fria mofavre'a erino marerino, Anumzamofo eri'za vahe Elisa'ma nemasea sipay ome antemaseteno, kafa erinegino atreno atirami'ne. **22** Anante ana a'mo'a nevena kezatimino anage hu'ne, Muse hugantoanki mago eri'za ne'ene mago donki afura namige'na Ra Anumzamofo kasnampa ne' ame hu'na ome kete'na a'neno. **23** Anage higeno ana a'mofo neve'a huno, Menina kasefa ikana omnege, mani fruhu kna Sabatia omne'neanki, na'a higenka menina vu'za nehane? Hianagi ana a'mo'a huno, E'ina hu'neanagi knare hu'neanki'na amne vugahue. **24** Anante ana a'mo'a

donki afura azerinte fatgo nehuno, eri'za ne'agura huno, avazu
hunka ame'ma hunka vuo. Hanki donkimo'ma akoheno vinogura
nagrake'za kasamigahue. **25** Hanki anage hutegeke, ana a'ene
eri'za ne'anena, Ra Anumzamofo kasnampa ne' Elisa ome keku
Karmeli agonare vu'na'e. Hanki zanagra afete nevakeno Elisa'a
nezanageno kato ne'a Gehasina asamino, antu Sunemiti a' ne-
eanki ko. **26** Hanki kagra kagarenka vunka ana a'ra ome negenka,
kagrane, negave'ene, mofavreka'anena knare huta mani'nazo?
hunka antahigo. Higeno Gehasi'a anankema ome asmigeno'a,
ana a'mo'a kenona'a huno, mago kea omne'neanki knare huta
mani'none. **27** Hanki ana a'mo'ma Ra Anumzamofo eri'za ne'ma
agonafima mani'nere uhanatino, Elisana agiafi rena nereno,
agiare azeri antroko hu'ne, anama hiaza Gehasi'ma negeno'a,
ana ara retufe ogantu atreku hu'neanagi, Elisa'a Gehasina
asmino, Agra tusi'a knazampi mani'negahianki atrenenka ko.
Hagi agrama knafima mani'neazana Ra Anumzamo'a knafi
mani'ne huno onasami'ne. **28** Anante ana a'mo'a anage
hu'ne, Kva vahe'ni'a Ra Anumzamofo eri'za vahe'moka, nagra
ne'mofavregura kantahi onkenoanki, kagrama hana kante anteno
Anumzamo mofavrea nami'ne. Hianagi nagrama hu'noana
renavataga osuo hu'na hu'noe. **29** Ana ke'ma Elisa'ma
nentahino'a, Gehasina anage huno asmi'ne, Zaza kenaka'a
kamunofipi eri pasihunka ahenevazinka kazampina azompani'a
enerinka kagarenka Sunemi rankumate vuo. Hanki kantegama
vahe'ma nezmagesunka keaga huozaminka, keagama hunegami
sagenkanena kenona osunka, vuvava hunka ana a'mofo nompi
umarerinka ana mofavremofo avugosafi azompania omento.
30 Hianagi ana mofavremofo nerera'a amanage hu'ne, Kasefa
huno mani'nea Ra Anumzamofo avufine kagri kavufine tamage

hu'na nehuankina, nagra katre'na ovugahue, higeno Elisa'a
otino ana a'ene Sunemi ete vu'ne. **31** Hanki Gehasia vugota
huno Elisa azompa ana mofavremofo avugosafi ome ante'ne.
Hianagi tamage huno mago'zana forera osu'ne. Ana higeno
Gehasia ete vuno Elisa'ma kantegama ne-egeno ome asmino,
Kema nasm'i hazana ome huanagi ana mofavremo'a oraoti'ne.
32 Higeno Elisa'a nonte uhanatiteno umarerino keana, agrama
nemasea sipare, anama fri'nea risera mase'negeno ke'ne.
33 Hagi hunaragintepinka umarerino kahana erigiteno, Ra
Anumzamofontega nunamuna hu'ne. **34** Anante ana rise'ma
mase'nea sipare marerino ana rise'mofo agofetu unemaseno,
agira agite nenteno, avurga avure nenteno, azana azante
ante'ne. Ana higeno ana rise'mofo avufgamo'a osi'a amuho
hukna hu'ne. **35** Amuho higeno otino osi'a ana nompi vano
huteno ete mago'ene ana huno avufgare mase'ne. Mase'negeno
seveni'a zupa kasera ruteno avurga ruhari hu'ne. **36** Ana'ma
nehiana Elisa'a Gehasina kehigeno egeno anage huno asmi'ne,
vunka nererana ome kehugenno eno, higeno kema hiaza huno
Gehasi'a ana ara ome kehigeno emarerigeno, Elisa'a huno,
ne'mofavreka'a ete avro. **37** Higeno ana a'mo'a anampinka
emarerino Elisana agafi avugosaregati emeseno kepri huno
humuse hunenteno, ana mofavre'a avreno meg'i'a atiramino
vu'ne. **38** Mago'a kna evutegeno Elisa'a eteno Gilgali vu'neana
ana mopafina ne'zana fanane higeno tusi'a zamaga tonto hu'ne.
Hanki anampima mago'a nemaniza kasnampa vahe'mo'za
agrane mago zupa eme eritru hu'za mani'naze. Ana hazageno
Elisa'a kato ne'a amanage huno asmi'ne, Rankavo erinka ana
kasnampa vahera ne'zana krezamanto. **39** Higeno kasnampa
vahepinti mago'mo vuno kamo'za ome huno eme kreku nevuno

ome keana, afi hagonefa rente'negeno ome keteno, e'i afi hagonefa me'ne huno ontahineno, mago'a tagiazamo zaza kena'afi erinteno e'ne. Eteno anante eme akrakru hiazamo ana kamo'ene kavofina kre'ne. **40** Hanki ana ne'zama tafepi atintete'za, ana kasnampa vahe'mo'za agafa hu'za nene'za krafa hu'za, Ra Anumzamofo vahe Elisaga ama ne'zamo'a tusi akaheankino vahe tahe frigahie nehu'za one'za atre'naze. **41** Hanki anama hazageno Elisa'a zamasamino, witireti trohu flaua erita eho, hige'za eri'za azageno ana kamo'ma kre'naza kavofi ana flauara netreno kato ne'agu huno, refko hunka tafepi zamige'za neho. Higeno kema hiaza huno eri'za ne'amo'a maka kasnampa vahera atino zamige'za ne'nazanagi, ana ne'zamo'a zamazeri havizana osu'ne. **42** Mago zupa Ba'al-Salisa rankumateti e'nea ne'mo'a, ese hamre'naza bali ragareti tro hu'naza bretiramina 20'a enerino, mago'a kasefa bali raganena ku'afi erarineno Ra Anumzamofo eri'za ne' Elisante egeno, Elisa'a kato ne'a asmino, Ama ne'zana ama vahera zamige'za neho. **43** Anage higeno kato ne'amo'a Elisana antahigeno, lnankna hu'na ama 100'a vahera, asama ne'zana zamisuge'za negahaze. Higeno Elisa'a ana kemofo nona huno, Zaminke'za neho. Na'ankure Ra Anumzamo'a huno, nenesageno mago'a amne megahie hianki zaminke'za neho. **44** Anante Elisana kato ne'amo'a ana ne'zana zamige'za nenageno, Ra Anumzamo'ma hu'nea kante anteno mago'a amne me'ne.

5 Hanki Neman'i agra Siria sondia vahete kva ne' mani'ne. Ana hu'neno agri kva ne'amofo avurera knare ne' mani'negeno kva ne'amo'a muse hunentea ne' mani'ne. Na'ankure Ra Anumzamo'a agrira aza hige'za Siria vahe'mo'za ha' vahe'zmia hara huzmagatere'nagu anara hu'ne. Neman'i hanave sondia

netfa mani'neanagi, agrira fugo namumo azeri haviza hu'ne. 2
Hanki mago kna Siria sondia vahe'mo'za Israeli vahera rohu ome
renezmane'za, anampinti mago osi mofara avre'za vu'naze. Ana
hazageno ana mofa'mo'a Nemani a'mofo eri'za mofa umani'ne.
3 Henka ana mofa'mo'a Nemani nenanrona amanage huno
asmi'ne, Sameriamama mani'nea kasnampa ne'ma negave'ma
vuno ome kesiana, amne fugo kri'a azeri so'e hugahie. 4
Anankema Nemani'ma nentahino'a, kva ne'are vuno, ana Israeli
mofa'mo'ma hiankea ome asmi'ne. 5 Higeno kini ne'mo'a ame
huno Nemanina asmino, Israeli kini netega nagra mago avo
krenta'nena erinka vunka ome amigahane, nehuno kema hiaza
higeno ana avona enerino kna'amo'a 340 kilo hu'nea silva
zagone enerino, kna'amo'a 60 kilo hu'nea goli enerino, knare'nare
kukena 10ni'a e'nerino vu'ne. 6 Hanki ana Israeli kini netegama
krente'nea avona amanahu avo krente'ne. Nagra eri'za vaheni'a
Nemanina ama avona kre'na huntogeno kagritega vianki, fugo
kri'a azeri so'e hunto. 7 Hanki anante Israeli kini ne'mo'ma ana
avoma hampriteno'a, zaza kukena'a tagato nehuno amanage
hu'ne, Nagra Anumza mani'ne'na vahera ahe nefri'na, vahera
fripintira azeri oti'naku hugeno hio. Ama ne'mo'a fugo krima
eri'nea nera azeri so'e huogura huntogeno ome'neanki, nagrama
antahuana ha'eme hurante'naku mago'a kankamunku hakeno
anara hu'ne. 8 Hianagi Ra Anumzamofo kasnampa ne' Elisa'ma
antahiamama Israeli kini ne'mo'ma za'za kukena'ama tagato'ma
hiankema nentahino'a, kato ne'a huntogeno vuno amanage
hu'ne, Na'ane hunka za'za kukenaka'a tagatora hu'nane? Hagi
ana nera atregeno nagrite ena Israelia mago kasnampa nera
mani'ne hu'na averira hanena keno antahino hugahie. 9 Higeno
Nemani'a hosi afutamine, karisiramima'ane vuno, Elisa nomofo

kafante umani'naze **10** Anante Elisa'a mago kato vahe hunteno, Nemanina amanage hunka ome asamio, kagra vunka 7ni'a zupa Jodani timpi tina ome fregeno, kavufamo'a so'e hina agru hugahane huno hie hunka ome asamio. **11** Hianagi Nemanina tusi arimpahegeno nevuno amanage hu'ne, Nagrama antahuana atiramino eme otine'no, Ra Anumzana agri Anumzamofo agi neheno, azana rusuteno veraveverave nehuno fugonkrini'a nazeri so'e hugahie hu'na huanagi anara osie. **12** Hanki Damaskasia tare tintrena Abana tine Farpari timokea ana maka Israelima me'nea tintamina zamagaterena'e. Ana hu'neanki'na anampi tina fre'na so'ea hugare, nehuno tusi arimpa nehegeno rukrahe huno atreno vu'ne. **13** Hianagi Nemanina eri'za vahe'amo'za eza amanage hu'za asmi'naze, kva ne'moka kasnampa ne'mo'ma mago'ma amuhoma hu'nea zama tro huo huno'ma hiresina, amne ana zana tro hasine. Hu'negu agrama hiaza hunka vunka tina ome fregeno fugo namumo'a atregantena agru huo. **14** Higeno Neman'i'a ana vaheke antahiteno vuno, Jodani timpi 7ni'a zupa tina ome fre'ne. Ra Anumzamofo kasnampa ne' Elisa'ma hu'nea kante anteno tina fregeno fugo kri'amo'a atrentegeno, avufgamo'a osi mofavremofo avufgamo'ma hiaza huno agrunentake hu'ne. **15** Ana hutege'za Neman'i'ene eri'za vahe'amo'za ete Ra Anumzamofo kasnampa nete e'naze. Anama hute'za Neman'i'a Elisa avuga ome otino amanage hu'ne, Menima nagrama antahuana maka ama mopafina mago anumzana omani'neanki, Israeli vahe'motma tamagri Anumzamo agrake maka vahe Ra Anumzana mani'ne. E'ina hu'negu muse hugantoanki kvanimoka ama kamua musezana erio. **16** Anagema higeno'a, Elisa'a kenona'a amanage hu'ne, Ra Anumzama kasefa huno mani'nege'nama Agri eri'zama enerua Anumzamofo

agifi tamage hu'na huankina, mago musezana e'origahue. Anage higeno Neman'i'a tutu huno erio hu'neanagi, Elisa'a e'oritfa hu'ne. **17** Anagema higeno'a, anante Neman'i'a Elisana asmino, Kagra musezama e'oriku'ma hanunka, kvanimoka natrege'na mago'a Israelitira mopa kate'na tare miuli donki afu tre'mokema eriga avamente eri'na kumanirega va'neno. Hanki kvanimoka meninteti'ma vanige'na mago'a anumzantera Kresramana vuontege, ofanena huontegahue. Hianagi Ra Anumzamofonteke kresramna vunente'na, ofanena huntegahue. **18** Hianagi eri'za vahe'kamo'na Ra Anumzamo'a magoke zantfante kumi'ni'a atrentegahie. Kva ne'nimo'ma Rimoni havi anumzamofo mono nompima nevuno'a, nazante azerineno mono'ma hunte'naku'ma kepri'ma hige'na, nagrane prira nehue. E'na hu'negu eri'za vaheka'mo'na Ra Anumzamo'a kumin'i'a atrenantesie. **19** Anage higeno Elisa'a asmino, antahintahi hakarea osunka krimpa frune vuo. Hianagi Neman'i'a zazatera ovu'negeno, **20** Ra Anumzamofo eri'za ne' Elisa kato ne'mo Gehasi'a amanage huno agesa antahi'ne, Kvani'mo'a Nemanina amne atregeno vu'ne. Na'ahigeno Neman'i'ma musezama amiku'ma hiazana e'ori'ne. Kasefa huno mani'nea Ra Anumzamofo avufi tamage huanki'na, nagra Neman'i amage taragi'na vu'na ana zantamia mago'a ome erigahue. **21** Anage nehuno Gehasi'a agareno Nemanina avaririno vu'ne. Hanki Gehasi'ma avaririno eazama Neman'i'ma negeno'a, Gehasina agenaku karisi'afinti takureno Gehasina anage huno antahige'ne, Mago'a hazenke me'negenka neano? **22** Higeno Gehasi'a kenona huno, Mago'a kea omne'neanki, kva ne'nimo'a amanage huo huno hunante'ne. Efraemi naga agona mopafima mani'naza kasnampa vahepinti menina tare netrena e'na'e. Ana hu'naku kagra mago silva zagone kukena

tare zanamiogu hunantege'na e'noe. **23** Higeno Neman'i'a kenona'a huno, I'o silva zagoa mago kura e'origahananki, tare ku erigahane huno nehuno, Gehasina tutu huno erio higeno, Gehasi'a antahi fru huno eri'ne. Ana nehuno Neman'i'a kna'amo'a 68 kilo hu'nea silva zago refko huno tare kupi eraritere nehuno, kukena tare erinteno eri zanamigeke tare eri'za vahe'amokea Gehasina azahuke erike vu'na'e. **24** Hanki agonare'ma ete'za, Gehasia ana zantamina tare eri'za netremokizni zanazampintira erino noma'afi erinenteno, ana netrena huznantegeke ete vu'na'e. **25** Ana huteno Gehasia ufreno Elisa avure uotigeno, Elisa'a huno, Iga vu'nanane, huno antahigegeno Gehasi'a kenona huno, Kva vahe'nimoka mago'arega vu'na e'na osu'noe. **26** Hianagi Elisa'a amanage huno asmi'ne, Mago vahemo'ma kagrane keaga huku'ma karisiafinti'ma erami'neana, nagra avamupina kagrane mani'nena kagenoana ontahi'nampi? Menina zago erige, kukena erige, olivi hoza erige, waini hoza erige, sipisipi afutami erige, bulimakao afu tami erige, eri'za veneneramine, eri'za a'neneramina zamavare kna omane'ne. **27** E'ina hu'negu Neman'i fugo krimo'a takaireno kagrite'ene kagripinti'ma fore'ma hanaza vahete'ene maka kna mevava huno vugahie. Anage hutegeno Elisa avugati'ma Gehasi'a atreno nevigeno, fugo krimo'a azeri haviza higeno maka avufgamo'a efenentake huno hamponkna hu'ne.

6 Mago zupa kasnampa naga'moza Elisanku amanage hu'haze, Tagrama eta kagranema eme atru huta nemanuna nomo'a osi hu'negeta titipa nehune. **2** Hagi kagra amne tatresanketa Jodani tintega vuta tamente tamente zafa ome antagitere huta, eme atruma huta manisuna nona kasefa kigahumpi? Hazageno Elisa'a kenona huno, Knareki kema hazaza huta viho. **3** Anante

mago kasnampa ne'mo'a Elisana amanage huno antahige'ne,
Muse hugantoanki tagranena amne egahampi? Higeno Elisa'a
huno, Izo amane tamagranena vugahue. 4 Anagema huteno'a
Elisa'a zamagrane vige'za, Jodani tinte'ma vute'za, agafa
hu'za zafaramina antagi'haze. 5 Hianagi kasnampa vahe'pinti
mago'zamimo'a zafa nentagigeno sa'ume'amo'a katiramino
Jodani timpi fre'ne. Ana higeno kezatino, Oho, kva vahe'nimoka,
vahe sau'me zamantahige'na eri'na e'noa saumemo katiramino
timpi fre'ne. 6 Hanki anante Ra Anumzamofo eri'za ne' Elisa'a
amanage hu'ne, Inante saumemo'a ufre'ne, higeno ufre'neama'a
asami ankeretegeno, Elisa'a osi zafa azanku'na rukafrino anama
ufrenere atregeno ana sasumemo'a timofo avozare mareri'ne.
7 Anama higeno'a Elisa'a huno, Hanki erio, huno higeno ana
kasnampa ne'mo'a azana ante henkamuteno ana sa'umena
eri'ne. 8 Hanki knane knanena Siria kini ne'mo'ma Israeli vahe'ma
ha'ma eme huzamanteku'ma nehuno'a, e'ire e'ire seli nonkumara
ome anteta mani'neta Israeli vahera hara huzmantegahune huno
sondia vahete kva vahe'age zamavaretru huno kea anaki'ne. 9
Hianagi Ra Anumzamofo eri'za ne' Elisa'a Israeli kini netega
anage huno kea atrente'ne, Siria vahe'mo'za hahuranteku
seli nonkuma eme antazanki kva hu'enka e'irega ovuo huno
asamitere hu'ne. 10 Anagema higeno'a, Israeli kini ne'mo'a
sondia vahe'a huzmanteg'e'za vu'za Elisa'ma zamasamirera
ome kva hutere hu'naze. Rama'a zupa ana hutere hu'naze. 11
Anama nehazageno'a, Siria kini ne'mofona tusi rimpah'e'ne. Ana
higeno Siria kini ne'mo'a, sondia vahete ugagota kva vahera
kehige'za azageno amanage huno zamantahige'ne, ina ne'mo
Israeli kini netega anteno, tagrama huna kea ome nesamifi
nasamaho? 12 Higeno mago eri'za vahe'amo'a asmino, a'o tagra

ome nosamunanki Israelima mani'nea kasnampa ne' Elisa agra
Israeli kini nera nesamiankino, nemsampinkama oku'ama hana
nanekenena nentahino agra nesamie. **13** Anagema higeno'a, kini
ne'mo'a eri'za vahe'a zamasamino, inantega Elisa'a mani'nefi
ome haketa ketenke'na sondia vahe huzmanta'nena vu'za ome
avre'za amare eho. Hige'za vu'za ome hake'za kefore hute'za
e'za anage hu'naze, Agra Dotani kumate mani'ne. **14** Higeno kini
ne'mo'a tusi sondia vahe krerafane, hosi afutamine, karisiramine
zamatrege'za kenage Dotani vu'za ana rankumara kafo ome
ante'za avazagi kagi'naze. **15** Hanki Anumzamofo eri'za ne'
Elisa kato ne'mo'a nanterana atiramino keana, Siria sondia
vahe'mo'za karisine, hosi afu'zmine eman'i'ne'za ana kumara
avazigagine'nageno zamage'ne. Ana huteno otino anage hu'ne,
Oho kva vahe'nimoka, Siria vahe'mo'za tavazagi kagi'nazanki,
tagra na'a hugahune? **16** Higeno Elisa'a amanage huno asami'ne,
Kagra korora osuo. Na'ankure tagri kazigama mani'namo'za
zamagrira zamagatere'za rama'a mani'naze. **17** Anante Elisa'a
nunamuna amanage huno hu'ne, Ra Anumzamoka muse
hugantoanki avua erihari hugeno keno, higeno Ra Anumzamo'a
avua erihari higeno keana, mani'nampi me'nea agonaramimpina
tusi'a hosi afutamimo'ene, tevenefake karisiramimo Elisana
megaginte'negeno ke'ne. **18** Hagi anante Siria sondia vahe'mo'za
agrama mani'neregama erami tava'oma nehzageno'a, Elisa'a
amanage huno Ra Anumzamofontega nunamuna hu'ne, Ra
Anumzamoka ama sondia vahe'mokizmia zamavua erisu huo,
huno higeno Elisa'ma hia kante, Ra Anumzamo'a sondia
vahe'mokizmi zamavua erisu hu'ne. **19** Higeno Elisa'a amanage
huno ana sondia vahe'mokizmia zamasami'ne, Kana hazagreta
ru kumate e'naze. Hu'negu namage navaririta enke'na anama

kenaku'ma aza ne'mofonte tamavre'na va'neno. Anage hige'za
Elisana amage vazageno zamavareno Sameria rankumate vu'ne.
20 Hagi anama Sameria rankumapima ufretazageno'a, Elisa'a
amanage hu'ne, Ra Anumzamoka ama sondia vahe'mokizmi
zamavua erihari huge'za ete keho. Higeno Ra Anumzamo'a
zamavua ete erihari hige'za kazana zamagra Sameria kumamofo
amu'nompi mani'naze. **21** Anama hazazama Israeli kini ne'mo'ma
negeno'a, Elisana amanage huno asami'ne, Nenfaga hu i'zo
huge'na ama vahera zamahe fri'neno? **22** Higeno Elisa'a
kenona'a amanage hu'ne, kagra ozamahegahane. Na'ankure
kazinuti'ene atireti'ma ha'ma hunka zamavrana vahera, zamahe
nofrine. E'ina hu'negu ne'zane tine nezaminka zamatrege'za
kinizmima mani'nerega ete viho. **23** Higeno Israeli kini ne'mo'a
tusi'a ne'za ana sondia vahera krezmantage'za, ana ne'zane
tinena nevagama retazageno, huzmantenge'za ete kini zamimo'ma
Siriama mani'nerege vu'naze. Ana hige'za Siria sondia vahe'mo'za
mago'enena e'za Israeli vahera rohura eme ozami'naze. **24**
Hanki henka, mago'a kafua evutegeno, Siria kini ne' Ben-Hadati'a
maka sondia vahe'a zamazeri tru hutege'za, vu'za Sameria
kumara ha' huzamantenaku ome kafonte'za avazagigagi'naze.
25 Hagi za'za kna Siria vahe'mo'za Sameria kumara kafo ante'za
avazagigagi zamantazage'za, vu'za e'za hu'za ne'zama eri'za
nekana omanegeno, Sameria kumapina tusi'a zamagatontoza
fore hu'ne. Higeno mago vahe'mo'ma tonki afu'mofo aseni'ama
mizama hu'naku'ma hu'neana, kna'amo'a 0.9kilo hu'nea silva
zagoreti miza nehu'za, namamofo rifa'a kna'amo'ma 63gremi
hu'neana, kna'amo'a 57gremi hu'nea silva zagoreti mizase
avamente vu'ne. **26** Ana'ma higeno mago zupa Israeli kini ne'mo'a
have keginamofo agofetu enevigeno mago a'mo'a kezatino,

kini'nimoka muse hugantoanki, naza huo. **27** Anage higeno kini ne'mo'a amanage huno asmi'ne, Ra Anumzamo'ma kazama nosanige'na, nagra nankna hu'na kaza hugahue? Kagrama antahinana witima neharaza kumapinti witia eri kamige, wainima regatatima nehaza kumapintira wainia eri'na kaza hugahuo? A'o anara osugahue. **28** Anante ana kini ne'mo'a ana ara antahigeno, Nagra na'a hugante'nuegu nehane? Higeno ana a'mo'a kini nera asmino, Ama a'mo'a nagriku huno, ne'mofavreka'a menina ahegeta neteta, okina nagra ne'mofavreni'a ahesugeta negahu'e hu'ne. **29** Hige'na nagra mofavre'ni'a ahogeta kavofi kreta neteta, anante knazupa agri nonte vu'na, kagra mofavre'ka'a ahegeta na'mneno hu'na huana, agra mofavre'a azeri fraki'ne. **30** Higeno ana a'mofo kema kini ne'mo'ma nentahino'a, avatera asunku kukena hu'neno, amegama antani'nea kini zaza kukena'a tagato tugutu nehuno, ana have keginamofo agofetu nevige'za, ke'naze. **31** Anante kini ne'mo'a amanage hu'ne, Amama e'neruna knazamofo agafa'a Elisa mani'ne. E'ina hu'negu nagra menina Sarafati kumateti ne' Elisana ananke akafrigahue. Ana'ma osanugen'o'a, Anumzamo'a ama ana knare okina nagrira nazeri havizantfa hugahie. **32** Hagi kini ne'mo'ma anagema huteno'a, mago eri'za vahe huntegeno Elisa'ma mani'nerega vu'ne. Hanki ana zupa Elisa'a noma'afi Israeli ranra kva vahe'ene atru hu'za mago'a zanku keaga nehu'za mani'nazageno, kini ne'mo'ma huntegeno ugota huno vu'nea eri'za nera uohanati'negeno, Elisa'a ana ranra kva vahetamina amanage huno zamasami'ne, Vahe'ma zamahe fri kini ne'mofo mofavremo'a, nagri nananke akafrinogu mago vahe huntegeno ne-e. Hianagi ana ne'ma esanigeta, kafa erigita rentrako hinkeno, nompina emareorino. Anama hanageno'a, kini ne'mo'a agra'a ana nera avaririno

egahie. 33 Hagi Elisa'a ana keaga huvaga orenegeno, kini ne'mofo kema erino vuno e'noma hu eri'za ne'mo'a agrite eramino e'ne. Hagi anante kini ne'mo'enena eno amanage hu'ne, Ra Anumzamo'a ama knazana atregeno tagritera efore nehie. Ana nehigu mago knare'zana Ra Anumzamo'a tagrira taza osugahiankina agrira mago'enena avegante'ha omanigahue.

7 Hianagi Elisa'a amanage huno hu'ne, Ra Anumzamo'a amanage huno hianki antahio, knare witireti trohu flauara, kna'amo'a 3'a kiloma hu'nesiana, balia kna'amo'a 6si'a kiloma hu'nesiana Sameria rankumamofo kafanteria, ama ana knare okina kna'amo'a 11ni'a gremi hu'nesia silva zagore atresage'za mizasegahaze. 2 Hagi anagema higeno'a, kini ne'mofo avate'ma kva nehia eri'za ne'mo'a, Elisa ke nona'a amanage hu'ne, Nagrama antahuana Ra Anumzamo'ma mona kahama erinagi hagaro hanigeno, ko'ma riaza huno nezamo'a tamisnianagi magoke zupagera ame huno ana ne'zamo'a aviraotegahie. Hianagi Elisa'a ana nera asmino, kagra kavufinti ana ne'zana kegahananagi, tamage hunka ana nezampintira magore hunka onetfa hugahane. 3 Hanki ana knafina, Sameria rankumamofoma ufre kafanteria fugo kri eri'naza vahera 4'a nemani'zanki'za, zamagra'a amanage hu'za hu'haze, Nahanigeta tagra amarera mani'neta frigahune? 4 Hagi Sameria kumapina ufrete ne'zankura hakosinagi, zamaga tonto higeno ne'zana kumamofo agu'afina omne'neankita ufresuta ufrigahune. Hagi ama anante'ma manisunana ana zanke huta frigahune. E'na hu'negu otinketa Siria vahe'mo'zama seli nonkuma'ma eme ante'za mani'nafi vanunke'zama tahe frisazana knare hugahie. Hagi ontahe'zama tatresazana knare hugahie. 5 Anage hute'za kinaga rehanima hiama'a oti'za, Siria vahe'ma seli nonkuma'ma

eme ante'za mani'nafi vu'naze. Hanki ana kuma'ma ome
atretegama unehanati'zama kazana, ana kumapina magore
hu'za vhahera omani'hage'za ke'naze. 6 Na'ankure ana maka Siria
vahe'mo'zama koro'ma fre'nazana, ana kinaga Siria vhahera Ra
Anumzamo'a zamagesa eri hagro hige'zama antahi'zana, tusi'a
sondia vahe krefamo hosi afu agumpine, karisifine mani'ne'za ha'
eme huzmanteku eri'za neaza agasasagna agasasa nentahi'za,
amanage hu'za hu'naze, Keho Israeli kini ne'mo'a, Hiti kinine, Isipi
kinine zago misa sezmantageke erimago hu'za ha' huranteku
neaze hu'naze. 7 Hagi ana Siria vahe'mo'za anagema nehu'za,
ame hu'za ana kinagage, seli nozamima, hosi afu'zamima,
tonki afu'zamine, ana maka zazmia fragu vazitre'za zamavapa
atre'za korora fre'naze. 8 Hanki zamagra ana 4'a fugo namuma
zamarenea vahe'mo'zama Siria vahe kumapima ehanatite'za,
mago seli nompi ufre'za kazana, ne'zane tine me'nege'za ome
eri'za nene'za, silvane, goline tavaraveraminena eri'za ome
fraki'naze. Ete mago'ene e'za mago seli nompi umarereri'za
mago'a zantamina eme eri'za ome fraki'naze. 9 Anama hute'za
anante zamagra'a amanage hu'naze, Amanahu'ma hunana
knare tavu'tavara osune. Hanki menina musema hanuna kna
efore hu'negu, tagraguke'ma nentahita atre'nesunkeno'ma
meno ko'mataniana, tagra knazana erigahunanki, otinketa vuta
kinimofo nagara ama ana zamofonkea ome zamasamimneno.
10 Anagema hute'za vu'za Sameria rankuma kafante'ma kvama
nehaza vhahera kezanke hu'za zamasmi'za, Siria vahe'mo'zama
seli noma eme ki'za mani'naza kumapima uhanatitama konana,
tamage huta mago vhahera onketa, mago vahe'mofo ageru'enena
ontahi'none. Hagi hosi afu'ene, tonki afu'ma rente'naza zanke
megeno, seli nontamimpina maka zamo'a anante me'ne 11

Hagi rankumamofo kafante'ma kvama nehaza vahe'mo'za anankema nentahi'za, agu'afima mani'naza vahera kezati'za zamasamizage'za, kini ne'mofo nontega vu'za naga'amofona anazamofo agenkea ome asami'naze. **12** Hagi ana kenageke kini ne'mo'a ana nanekea nentahino, ot'i'no eri'za vahe'a amanage huno zamasami'ne, Siria vahe'mo'za e'inahu'ma hazana antahihio, zamagrama ke'za antahi'zama hazana tagra tagazanku frunanki'za, zamagra amanahu zamagesa antahigahaze, trampi vuta ome frakinesunke'za zamagra rankuma'zamima atre'zama fegi'ma esageta, ome zamazenerita, rankumazaminena erigahune hu'za fraki'naze. **13** Hagi ana kema hia kemofo nona'a, kini ne'mofo eri'za vahepinti mago eri'za ne'amo'a anage huno asmi'ne, 5fu'a hosi afutaminke mani'nazanki zamatrege'za eri'za vu'za Siria vahetera naza fore hu'nefi ome keho. Hanki Siria vahe'mo'zama ana vahe'ma zamahe frisazana, e'i knare hugahie. Na'ankure tagrama ama rankumapima mani'nona vahe'motanena, anazanke huta frigahune. **14** Hanki tare karisi'ma me'ne hosi afutrena avrenezamino, kini ne'mo'a Siria vahetera naza fore hu'nefi vuta ome keho huno huzmante'ne. **15** Anage hige'za Siria vahera zamavariri'za vuvava hu'za Jodani tintegama nevu'za kazana, koro'ma fre'za nevu'za, karankama kukenafi, ha'zampi mago'azama atrete atretema hu'za vu'naza zana ome nege'za, ete vu'za kini nera ome asmi'naze. **16** Hagi Sameria vahe'mo'zama ana kema nentahi'za, Siria vahe'mo'zama kuma'ma eme ante'za mani'naza kumapi ame hu'za vu'za, ana kumapima atre'za vu'naza zantamina maka ome eri'naze. Hagi anampintira tusi'a bali raisine, rama'a flaua'ene erite'za, Ra Anumzamo'ma hu'nea kante ante'za, kna'amo'a 3'a kilo hu'nea flauate'ene, kna'amo'a 6si'a kiloma hu'nea balia, kna'amo'a 11ni'a

gremi hu'nea silva zagoreke atre'naze. **17** Hagi kini ne'mo'a avate kva nera huntogeno vuno, rankumamofo kafante'ma kvama nehaza sondia vahe' ome kegava huzmante'ne. Hagi ana ne'mo'a kahamofo tava'onte oti'nege'za, erintagu hu'zama fegi'ma vaza vahe'mo'za reraraka hutre'za rerari hazageno fri'ne. E'inama hu'neana Anumzamofo eri'za ne' Elisa'ma kini ne'ma asami'nea kasnampa kemo'a nena'a efore hu'ne. **18** Hagi Ra Anumzamofo eri'za ne' Elisa'ma kini ne'ma asmino, amana knare oki'na, Sameria rankuma'mofo kafantera, knare witireti trohu flauara, kna'amo'a 3'a kiloma hu'nesiane, bali raisia kna'amo'a 6si'a kiloma hu'nesiana **11**ni'a gremi hu'nea silva zagoreke atregahazema hu'nea ke'mo'a, nena'a efore hu'ne. **19** Hagi kora anama rerari'ma hazageno'ma fria eri'za ne'mo'a, Elisana kenona'a amanage hu'neane, Nagrama antahuana Ra Anumzamo'ma mona kahama erinagi hagro hanigeno, ko'ma riaza huno ne'zamo'a herafiramigahianagi magoke zupagera ame huno ana ne'zamo'a avira otegahie hu'ne. Hianagi Elisa'a ana nera asmino, kagra kavufinti ana ne'zana kegahane. Hianagi tamage hunka ana ne'zampintira magore hunka onetfa hugahane huno, **20** Elisa'ma asmi'nea kemo'a nena'a efore higeno, ana nera ran kuma'mofo kahampi zamagareti rehapati'za rerari hazageno fri'ne.

8 Hanki fri'negeno Elisa'ma azeri oti'nea rise'mofo nererana, Elisa'a mago zupa vuno nanekea amanage huno ome asami'ne, Otinka nagaka'a zamavarenka ina moparega atupa knafi umaniku'ma hanana moparega umanio. Na'ankure Ra Anumzamo'a huno, amama mani'hona mopafina **7**ni'a kafufi ne'zana omanenesigeno zamaga tontozanku hugahaze huno hu'ne. **2** Higeno ana a'mo'a otino Ra Anumzamofo eri'za

ne' Elisa'ma hianke antahino, naga'a zamavareno Filistia
vahe'mokizmi moparega vu'za, anantega 7ni'a kafu umani'naze.
3 Anante ana 7ni'a kafua evuvagaretegeno, ana a'mo'a Filistia
mopa atreno, Israeli mopare eteno, mopa'ane noma'ane ete
erinaku kini ne'mofonte vuno keaga ome hu'ne. 4 Hagi ana
knarera kini ne'mo'a Anumzamofo eri'za ne' Elisama azama
nehia ne' Gehasina asmino, Elisa'ma maka ranra eri'zama
eri'nea zamofo agenkea nasmio. 5 Higeno Elisa'ma mago
rise'ma fri'nefinti azeri ot'i'nea zamofo agenkea Gehasi'a kini
nera nesamigeno, anante ana mofavremofo nerera'a, mopa'ane
noma'anenku kini ne' antahigeno erisigu e'ne. Anante ana ara
egeno Gehasi'a kini nera asmino, kema hua a'ene, fri'nefinti'ma
azeri ot'i'nea mofavre'anena amu nea'anki ko. 6 Hanki anante
kini ne'mo'a Elisa'ma tro'ma hu'nea zanku ana ara antahigegeno,
ana a'mo'a maka nanekea asmi vagare'ne. Ana hutegen
anante kini ne'mo'a mago eri'za vahe'a asmino, inazano
agri'zama mene'niazane, mopa'ama atreno vu'nenia knareti'ma
eno meninte'ma esnigeno'ma, ana mopafinti zama zagore'ma
atreno eri'nesia zagone, ana maka mohanena ome eri amio.
7 Hanki mago zupa Elisa'a Siria vahe'mokizmi rankumate
Damaskasi vu'ne. Ana zupa Siria kini nera Ben-Hadati'a kri
eri'nege'za, ana kini nera eme asami'za, Anumzamofo eri'za
ne' Elisa'a ama emarerie. 8 Higeno kini ne'mo'a mago eri'za
ne'a Hazaelina asmino, Mago musezana eri'enka vunka
Anumzamofo eri'za nera ome asamigeno nagra krifintira
kanamregahufi, Ra Anumzamofona ome antahigeno keno. 9
Anage higeno Hazaeli'a ome amisia muse zantamima eri'neana,
40'a kemolimofo agumpi Damaskasiti maka knare'nare feno
zantamina erinteno erino Elisante vu'ne. Anante uhanatiteno

Elisana anage huno asmi'ne, Kagri eri'za ne' Ben-Hatati'a hunanteno, kri'afintira kanamregahufi ome antahigenka ko hige'na e'noe. **10** Higeno Elisa'a kenona'a amanage huno asmi'ne, Vunka ome asmio, kri'afintira knamaregahie. Hianagi Ra Anumzamo'ma naveri hu'neana tamage huno frigahie. **11** Anante Elisa'ma ana nanekema asmiteno'a, Hazaeli avufi keteno mani'negeno anama hiazanku Hazaeli'a agazegu higeno, anante Elisa'a zavi ate'ne. **12** Ana zavi'ma ateazanku, Hazaeli'a antahigeno, Kva vahenimoka na'a agafare zavira netane, huno higeno Elisa'a kenona'a huno, Zavi'ma toana na'ankure henka'a kagra Israeli vhahera tusi hazenke nezaminka, kuma kejina'zamia anafenafu hunka teve negrenka, nehazaveramina kazinteti zamahe nefrinka, ne'onse mofavreramina zamazerinka mopafi ruhapatinka nezamahenka, zamu'enema hu'nenaza a'nea kazinteti zamarimpa retragufegahane. **13** Hagi ana kema Hazaeli'ma nentahino'a kenona'a huno, Nagra kragna hu'na nagi omne vahe mani'noanki, inankna hu'na e'inahu zantamina hunaku hugenka nehane. Higeno anante Elisa'a asmino, Kagrikura henka'a Siria vahe kini fore hugahane huno Ra Anumzamo'a naveri hu'ne. **14** Anagema hutegeno'a, anantetira Hazaeli'a atreno kini ne' Ben-Hadati'ma mani'nerega vigeno, kini ne'mo'a antahigeno, Na'ane huno Elisa'a kasami'ne. Higeno Hazaeli'a asmino, Elisa'a kagrikura huno, tamage hunka knamregahane hu'ne. **15** Hianagi ana knamofo anante knazupa, Hazaeli'a kini ne ahefrinaku, mago franketa erino timpi rerinke huteno, erino vuno kini ne'mofo avugosafi ome rufiteno rentrako higeno fri'ne. Ana higeno Hazaeli'a agri kuma erino kini fore huno mani'ne. **16** Hanki Ahapu nemofo, Joram'u 5fu'a kafuma Israeli vahe kinima nemanigeno'a, Jehosafati nemofo Jehoram'u'ne nef

no erino, agafa huno Juda vahe'mokizmi kinia mani'ne. **17**
Hanki Joram'u'a 32'a kafu hu'neno kinia efore huno, 8'a kafufi
Jerusalemi kumatera kinia mani'ne. **18** Ana huteno Joram'u'a,
Ra Anumzamofo avure'ma kumi'ma hu'neana, Ahapu mofa ara
eriteno, Ahapu naga'mo'zama nehaza havi zamavu'zmava'ene,
Israeli kini vahe'mo'zama nehaza havi zamavu'zmavara zamage
anteno hu'ne. **19** Hianagi Ra Anumzamo'a eri'za vahe'a Devitina
antahinemino, Juda vahera zamazeri havizana osu'ne. Na'ankure
Agrama huvempa huno, Deviti naga'pintike maka zupa kinia mani
anante nante hu'za nevanageno, Deviti nagamofo lamu tavimo'a
asu osugahiema huno hu'nea kegu agesa nentahino anara
osu'ne. **20** Hanki Jehoram'u'ma Juda vahe kinima mani'neno
kegavama huzmante'nea knafina, Idomu vahe'mo'za Juda vahe
kinimofo kea ontahi'za zamagra'a kini azeri oti'zageno kegava
huzmante'ne. **21** Hanki anama hazageno'a, Jehoram'u'a karisifima
mani'ne'za ha'ma nehaza sondia vahe zamavareno, Zairi kumate
Idomu vahe ha' huzmanteku vu'ne. Anantega vutazage'za Idomu
vahe'mo'za e'za kafona eme regagi zamante'naze. Anama
hazage'za, kenage Jehoram'u'ene karisire ugota hu'naza sondia
vahe'mo'za hara hanaveti'za hu'naze. Hianagi Idomu vahe'mo'za
hara huzmagaterage'za atre'za koro fre'za nozamirega e'naze.
22 Ana hazage'za Juda vahera, Idomu vahe'mo'za hara hu
zamagatere'ne'za zamagra'a kegava hu'za mani'ne'za meninena
mani'za neaze. Hanki ana knafina Libna ran kumate'ma nemaniza
vahe'mo'za anahukna hu'za Juda vahe'mokizmi kea ontahi'za
ha' rezmante'za zamagra'a zamagiare oti'naze. **23** Hanki ruga'a
zantamima Jehoram'u'ma kinima mani'neno tro'ma hu'nea
zamofo agenkea, Juda kini vahe'mokizmi zamagi zamagenkema
krenentaza avontafepi krente'naze. **24** Hagi Jehoram'u'a frige'za,

Deviti rankumapi agehemozama frizage'zama asezmane'nafi
ome asente'naze. Ana hutegeno nemofo Ahazia'a agri no
erino kinia mani'ne. **25** Hanki Ahapu nemofo, Joram'u'ma
12fu'a kafuma Israeli vahe'mokizmi kinima nemanigeno'a,
Jehoram u nemofo Ahazia'a agafa huno Juda vahe'mokizmi
kinia mani'ne. **26** Hagi Ahazia'a 22'a kafu nehuno, kinia efore
huno, magoke kafufi Jerusalemi kumatera kinia mani'ne. Ahazia
nerera agi'a Atalia'kino agra Ahapu mofa mani'neankino, Israeli
vahe'mokizmi korapa kini ne' Omri negeho mani'ne. **27** Hanki
Ahazia'a Ahapu naga'mo'zama nehaza zamavu'zmava huno, Ra
Anumzamofo avurera havi avu'avaza hu'ne. Na'ankure agra
Ahapu naga'pinti ara eri'negu zamage anteno anara hu'ne. **28**
Hanki mago zupa Ahazia'ene, Ahapu nemofo Israeli kini ne
Joramukea, Giliati kaziga Ramoti kumate vuke, Siria kini ne'
Hazaelina ha' ome hunte'na'e. Ana hu'na'anagi Siria sondia
vahe'mo'za Joramuna keve aheguzafa ante'naze. **29** Hanki
Ramoti kumate'ma ha'ma nehigeno Siria vahe'mo'zama kevema
ahe'haza zampinti knamrenigu kini ne' Ahapu nemofo Joram'u'a
atrevo vuno Jezrili kumate umani'negeno, Juda vahe kini ne'
Jehoram u nemofo Ahazia'a ome kenaku anantega urami'ne.

9 Hagi mago zupa Elisa'a, kasnampa vahepinti mago kasefa
ne' kehigeno egeno amanage huno asami'ne, Kenaka'a eritupa
hunka nemasinka, ama masave tafena erinka Ramot-Giliati
rankumate vuo. **2** Hanki kagra Ramot-Giliati vute'nunka, Nimsi
negeho, Jehosafati nemofo Jehuna, ome hakenka erifore huo.
Anama hute'nunka, naga'anema mani'nesifintira agri'ake avrenka
noma hunaragintepinka vuo. **3** Hanki anante ama ana maseve
tafena erinka asenifi neraginka amanage huo, Ra Anumzamo'a
amanage huno hu'ne, Menina Israeli kini manio huno huhampri

negante. Anama hutenga kafana eri anaginetrenka atiraminka
ame hunka kagarenka fro! 4 Hanki ana kasefa kasnampa
ne'mo'a, otino Ramot Giliati rankumate vu'ne. 5 Hagi anante'ma
uhanatino'ma keana, sondia vahete ugagota hu'naza kva
mani'neza keaga nehazageno ome nezmageno anage hu'ne,
Ugagotama hu'nana nera kagritega mago naneke eri'na neoe.
Higeno'a Jehu'a otino anage hune, izanku nehane, higeno
ugagotama hu'nana sondia ne'moka kagriku nehue. 6 Higeno
Jehu'a anante otino nompinka umrerino umanitegeno, anante ana
kasefa kasnampa ne'mo'a Jehu asenifi masavena taginenteno
amanage hu'ne, Ra Anumzana Israeli vahe Anumzamo amanage
huno hu'ne, Nagri vahe Israeli naga'mokizmi kini maniogu menina
huhampri negantoe hie. 7 Hanki kva neka'a Ahapu nagara
maka zamahe vagaro. E'inama hananana, Jesebeli'ma ko'ma
Nagri kasnampa vahe'ene eri'za vahe'ma zamahe fri'nea kora
kumitera, Nagra nona huzmantegahue. 8 Hagi Ahapu nagapina,
maka kazokzo vene'nene amne vene'neramine mofavreraminena
Nagra maka zamahe fanene ha'nena Israeli vahepinam zamaia
omanegahie. 9 Hanki Nebati nemofo Jeroboamu naga'ene,
Ahija nemofo Basa naga'ma ko'ma zamahe fananema hu'noaza
hu'na, Ahapu naga nofira zamahe fananene hugahue. 10 Hanki
Jesebeli'a Jezrili kaziga mopafi fri'enige'za kramo'za avufga'a
negahazanki, mago'mo'e huno avufga'a erino aseontegahie
huno Ra Anumzamo'a hie. Anagema huteno'a, ana kasnampa
ne'mo'a kafana eri anaginetreno atiramino agareno fre'ne. 11
Anante Jehu'a atiramino mago'a eri'za vahe'ma mani'nare vige'za
antahige'za, Mago'aza fore hu'nefi? E'i neginagi ne'mo'a na'ane
huno eme kasami'ne. Anage hazageno Jehu'a huno, E'inahu
vahera havige havage hantage vahekita ko tamagra keta antahita

hu'naze. **12** Hige'za zamagra hu'za, Reravatga osunka tamage hunka tasamio hu'naze. Anagema hazageno'a Ra Anumzamo'a nagrikura Israeli vahe'mokizmi kini ne' manio huno huhampri nante'ne huno Jehu'a hu'ne. **13** Hanki anama hiankema ana eri'za vahe'mo'ma nentahi'za, ame hu'za zaza kukanazamia hate'za, nonteti'ma agijama renoma atiramisirera tafe hu'za erami'naze. Anama hute'za ufe eri'za nere'za anage hu'naze, menina Jehu'a kini fore hie. **14** Anama hutazageno Nimsi negeho Jehosafati nemofo Jehu'a Joramuma ahefrisia naneke retro hu'ne. Hagi ana knafina Joram'u'ene maka Israeli sondia vahe'mo'za Siria kini ne' Hazaeli'a Ramot-Giliati kumate ha' eme hu'nezmantege'za kegava hu'za mani'naze. **15** Hianagi kini ne' Joram'u'ete Jesrili vuno, Siria kini ne' Hazaeli naga'ane ha'ma nehigeno kevema ahe'naza namumo'ma teganinigu umani'ne. Hagi anama nehigeno'a Jehu'a Ramot-Giliati kumate mani'neno eri'za vahe'a amanage huno zamasami'ne, Nagriku'ma kini manino kegava hurantesie hutama antahisuta, mago'mo'e huno ama kumapintira atreno Jesrilia vuno Joramuna ama anazamofo agenkea ome osamino. **16** Anagema huteno'a, Jehu'a karisi'afi marerino Jesrili vu'ne. Na'ankure Joramuna kevema ahe'naza namumo'a tegani onte'negeno maseno mani'negeno, Juda kini ne' Ahazia'a vuno ome negegeke mani'nakeno anantega vu'ne. **17** Hanki kuma'ma kegava nehia ne'mo'a, Jesrili kuma have keginamofo agofetu mani'neno, Jehu naga neazageno nezmageno rankumapima mani'naza vahera anage huno kezatizamine, Ha' vahe neazage'na nezamagoe. Higeno ana kema Joram'u'ma nentahino'a, mago vahe hunteno, ame hunka mago hosi afu erinka vunka, ana vahe'ma ome zamagenunka amne neazafi ha' eritma neaze? hunka ome zamantahigo. **18**

Anage hutegeno, mago sondia ne'mo hosi afu agumpi mani'neno
ame huno vuno ome nezamageno, Jehuna amanage huno
asmi'ne, kini ne'mo'a huno ha' erinka neampi krimpa frune
neane huno hu'ne. Anagema nehiana Jehu'a asmino, Rimpa
fruma huno mani'zana kagriza omne'neanki tamefi eramage
antenka eno, higeno kuma'ma kegava hu'nea ne'mo'a keama
kinimo'ma huntogeno'ma via ne'mo'a ko uhanati'neanagi, eteno
omegeno anankea kini nera asmino, Hago kema erinoma
via ne'mo'a uhanatianagi ete nome. **19** Higeno anante kini
ne'mo'a ru'ene mago sondia ne' huntogeno hosi afu agumpi
manino vuno, Jehu nagara ome nezamageno anage hu'ne,
Kini ne'mo'a huno tamagra ha' eritma neazafi tamarimpa
frune neaze hu'ne. Anagema nehiana Jehu'a asmino, Rimpa
fruma huno mani'zana kagriza omne'neanki tamefi eramage
antenka eno. **20** Hagi anante kuma'ma kvama hu'nea ne'mo'a
kini nera asamino, Henkama huntana ne'mo'a ana vahetera
uhanati'neanagi, ete rukrahera huno nome. Hagi egote'noma
ne-ege'na koa ne'mo'a Nimsi nemofo Jehu'ma nehiaza huno
tusi avunenteno karisia erino ne-e. **21** Higeno anante kini ne'
Joramu'a huno, Hosi afu'ene karisinena retro hunanteho, hige'za
retro huntazageno, ana karisifi marerigeno ana zanke huno
kini ne' Ahazia'a agranena mago karisifi marerige'ne, Jehu
kenaku vu'na'e. Hanki zanagra vuke Jesriliti ne' Naboti mopa
tava'onte Jehuna ome ke'na'e. **22** Hanki anante Joramu'a Jehuna
negeno, amanage huno antahige'ne, Karimpa frune neampi
kea huo. Anagema higeno'a Jehu'a ke nona'a huno, negrera
Jesebeli'ma hige'zama havi anumzante mono'ma hunte'naza
avu'avazamo'ene, avu'atagazama hihoma hige'zama hu'naza
avu'ava'mo'a ome rama nehiana, nankna hu'na narimpa frunena

esue hu'ne. **23** Anante Joram'u'ma ana kema nentahino'a, karisi'a azeri rukrahe huno nevuno, Ahaziankura ranke huno, Ama ne'mo'a nagri nami'mi huno nahenaku ne-eanki kagranena fro.

24 Anagema nehiana Jehu'a otino keve'a eri krino Joramuna ruga raga azo'ha amunompi amagenafi ahegeno, ana kevemo'a tumo'a azerigeno, karisi'afi evuramino fri'ne. **25** Hanki anante Jehu'a tva'oma'are nemania eri'za ne'a Bitkarina asmino, Joramuna erisga hunka Jesriliti ne' Naboti mopama me'nefi ome asagafetro hu'ne. Na'ankure kagranema karisiti'afima mani'neta nefi Ahapu enema neonkeno, Ra Anumzamo'ma Ahapunte'ma fore'ma haniazankuma kasnampa ke'ma hunte'nea nanekegu kagesa antahio. **26** Hagi Ra Anumzamo'ma Ahapunku huno, kagra hanke'za Nabotine mofavre'amokizmi korana okina eri tagi atre'naze. E'ina hu'negu, anazamofo nona'a Naboti mopa fatgofi nona hugahue. Hu'negu Ra Anumzamo'ma hu'nea kante antenka Joramu avufga erisga hunka Naboti mopafi omeri atro.

27 Hanki Juda kini ne' Ahazia'a, Joram'u'ma friaza negeno, Bet Hagani rankumategama vu'nea karanka koro freno vu'ne. Anama nehigeno'a Jehu'a amage rotago huno nevuno, sondia vahe'agu huno, agri'enena kevea aheho, hige'za sondia vahe'mo'za rotago hu'za Guri agonarega Ibleami kuma tva'ontega karisi'afi mani'neno koro freno nevige'za, kevea ome ahe'naze. Ana hazageno Ahazia'a koro freno vuno, Megido rankumate vuteno anantega fri'ne. **28** Ana hige'za Ahazia avufga, eri'za vahe'amo'za karisifi erinte'za Jerusalemi vu'za agehe'ima asenezmantazafi, Deviti rankumapi ome asente'naze. **29** Hanki Ahapu nemofo Joram'u'ma, 11ni'a kafuma kinima nemanigeno, Ahazia'a Juda vahe kinia efore hu'ne. **30** Hagi anante Jehu'a Jesrili kumate e'ne. Higeno Jehu'ma ne-e kema Jesebeli'a nentahino, avurera

konaririza freno erikaruvi hunenteno, azokatera avasase nehuno,
mani'nea nomofo zaho eri kanteti kefenkamuteno ke'ne. **31**
Kehenkamuteno keana Jehu'a rankuma'mofo kafante efregeno,
Jesebeli'a amanage hu'ne, Zimri, kva vahe'ka'a ahe fri ne'
mani'nananki, karimpa frune neano? **32** Higeno Jehu'a nentahino,
kesga huno ana nomofo zaho'ma eri kante negeno amanage
hu'ne, Iza nagri kaziga mani'ne huno kezati'ne. Anagema hige'za
zmagonknazama hari'naza vahe'ma ana nompima eri'zama
eneri'za vahe'mo'za e'za ke fenkate'za Jehuna ke'naze. **33**
Anama hazageno'a Jehu'a zamasamino, ana ara azeri atrenkeno
eramino, hige'za azerite'za atrageno erami'ne. Ana higeno
Jehu'a hosi afutamine karisine erino ana ara rehapati atregeno,
hosи afutamire'ene kuma'mofo have keginarega koramo'a
tusiza hu'ne. **34** Anama huteno Jehu'a kini ne'mofo nompi
umarerino ne'zane tinena neteno, vahetamina huzmanteno,
amama Anumzamo'ma azeri havizama higeno fria ara erita
ome asenteho. Na'ankure agra kini ne'mofo mofa mani'negu
anara hugahaze. **35** Hianagi ana vahe'mo'zama vu'za ome
kazana, mago'a avufga onke'nazanki, aseni zaferinane tare
agiane azane me'nege'za ke'naze. **36** Hagi ana ome kete'za
e'za Jehuna eme asamizageno, Jehu'a amanage hu'ne, Ra
Anumzamo'a eri'za vahe'a Tisbeti ne' Elaija agipi huvazino
amanage hu'ne, Jesebeli'a Jesrili kumapi fri'nigeno, kramo'za eri
hantage'za avufga'a negahaze hu'ne. **37** Anama nehazageno
anitraga tragoma hutresaza zamavufaga'amo'a, rifamo'ma hiaza
huno Jesrili mopafina me'nenige'za kegahazanagi e'i Jesebeli
avufage hu'za ke'amara osugahaze huno Ra Anumzamo'ma
hu'nea kemo nena raga efore hu'ne.

10 Hanki Ahapu ne'mofavreramine, mago'a agri agehe'za 70'a venene Sameria rankumapina mani'naze. Ana hu'nageno Jehu'a, Sameria rankumate ranra vahe'ene, kva vahete'ene, Ahapu ne'mofavre nagate'ma kegavama hunezmante'za vahetega amanage huno avona kretre'ne. 2 Menina tamagra hanave have kegina agu'afi mani'netma, hosi afutamine karisine, ha'zantaminena antazageno, kva ne'tami Ahapu ne'mofavre naga'mo'zanena tamagra mani'naze. E'ina hu'negu tamagrama ama nagri avoma hamprita antahisutma, 3 kva ne'tmimofo Ahapu ne'mofavre naga'pinti'ma mago knare huno kinima maniga'ma hu'nesia ne' azeri otinkeno kinitamia manino. Ana hu'nesigeta nef a gima fanane hu'zankura, aza hara hara nehinkeno kinia manino vino. 4 Hianagi ugagota vahe'ene, ranra kva vahemo'zanena ana avoma hampri'za nege'za tusi zamagogogou nehu'za, amanage hu'za hu'naze, Jehu'a ko tare kini netre'na hara hu zanagatere'ne. E'ina hu'negu tagra amuhara osu'nonankita, hara huontegahune. 5 Hanki kini ne'mofo nonte'ma kvama hu'nea neki, rankumate'ma kvama hu'nea neki, mago'a ugota kva vaheki, Ahapu mofavre nagate'ma kvama hu'naza vahe'mo'zanena amanage hu'za Jehuna kea atrente'naze. Tagra kagri eri'za vahe mani'nonankita kagrama hana nanekege'za antahigahune. Tagra mago kini nera azeri oraotigahune. E'ina hu'negu nazanoma huku'ma hananazana amne hugahane. 6 Anagema hazageno'a, mago'ene anante avona Jehu'a amanage huno kretre'ne. Hanki tamagrama nagri kazigama mani'neta nagri kema antahinaku'ma hanuta, okina ama ananknare Ahapu mofavre nagamokizmi zamasenia akafrita erita Jesrili kumate eho, huno kea atrezmante'ne. Hanki Ahapu ne'mofavre'ramine, mago'a agri agehe'mozanena

70'a venene mani'nage'za, Sameria rankumapi ranra kva
vahe'mo'za rempi hunezmi'za kegava huzmantage'za mani'naze.
7 Hanki ana kva vahe'mo'za Jehu'ma kretre'nea avoma erite'za,
Ahapu ne'mofavreramina 70'a zamahe fri'naze. Anama hute'za
zamanankena kitagiza ekaeka kutamimpi eririte'za atrazage'za
Jehu'ma Jesrili kumate mani'nerega eri'za vu'naze. 8 Hanki
kema erino e'nea ne'mo'a Jehuna eme asamino, hago Ahapu
ne'mofavre'ramimofo zamasenia eri'za neaze huno asmi'ne.
Anagema higeno'a, Jehu'a asamino, erita vutma kuma kafante
tarefi kevu ome antenkeno me'nenigeno vuno nanteraseno hu'ne.
9 Hanki ko'matigeno'a Jehu'a atiramino ome oti'neno, ana maka
vahera amanage huno zamasami'ne, nagra kva ne'ni'a Joramuna
azeri atresue hu'na antahintahi hu'ne'na ahe fri'noankino,
tamagripina keaga omne'ne. Hu'neanagi ama vahetamina iza
zamahe fri'ne? 10 Anage nehuno Jehu'a zamasamino, Menina
antahihio ana maka kema Ra Anumzamo'ma eri'za vahe'a
Elaija agipima huvazino'ma Ahapu nagaku'ma huama'ma hu'nea
kemo'a, ana maka nena raga fore hie. 11 Nehuno Jehu'a Ahapu
naga'nofima mago'a Jesrilima mani'naza naga'ene, Ahapu eri'za
vahe'ene, knare rone'aramine, agri pristi eri'za vahe'anena,
magore huno zamatrege'za ofre'nazanki, ana maka zamahe fri
vagare'ne. 12 Hanki Jehu'a sondia naga'ane Jesrilitira atreno
otino Sameria vunaku karanka nevuno, mago kumara sipisipi kva
vahe'mo'za atru nehaza kuma agi'a, Bet-Eketi vu'ne. 13 Anante
nevuno Jehu'a Juda kini ne' Ahazia naga ome nezamageno
anage hu'ne, tamagra iza nagare, huno zamantahige'ne. Hanki
zamagra kenona'a hu'za, tagra Ahazia nagamota Jesrili vuta
kini ne' Joramune, agri nerera kuini a' Jesebeli naga ome
zamagenaku neone. 14 Anagema Jehu'a nentahino'a naga'amofo

zamasamino, zamazeriho hige'za zamazerite'za zamavare'za vu'za Bet-Eketi tinkeri tva'onte ana maka 42'a vahera magore hu'za ozmatre'za zamahe vagare'naze. **15** Hagi ananteti'ma atre'za nevu'za, Rekabu nemofo Jehonadabu'a Jehu keku ne-ea ne' ome negeno, Jehu'a hu frufra kea amanage huno hunte'ne. Nagra kagrira mago narimpa hugante'noanki, kagra mago krimpa nagrira hunenantano? Higeno Jehonadabu'a huno, Izo nagra mago narimpa hunegantoe. Anage higeno e'inama hu'nesiana kza ante'nagamato higeno, azana ante anagamutegeno Jehu'a azante avazuhu anagama karisi'afi atre'ne. **16** Anante Jehu'a amanage huno asami'ne, Nagrane ne-enka Ra Anumzamofoma hanavematina amage'manentoa avu'avara ko, huno higeke, magoka karisifi vu'na'e. **17** Hagi Sameriamma ete'za, anampima Ahapu naga'ma mago'a mani'naza vahera Jehu'a eme zamahe vagare'ne. E'inama hu'neana Ra Anumzamo eri'za ne'a Elaija agipima huvazino huama hu'nea kemo nena raga'a fore hu'ne. **18** Anante Jehu'a ana maka vahe zamavare atru huteno amanage huno zamasami'ne, Ahapu'a avamente havi anumza Balintera monora hunte'ne. Hianagi nagra rugatere'na havi anumza Balintera monora huntegahue. **19** E'ina hu'negu menina havi anumza Balimofo kasnampa vaheki, pristi eri'za vahe'agi, ana maka Balinte'ma mono'ma hunentaza vahe'enena kehinke'za evagareho. Na'ankure nagra Balintega tusi'a ofa kresramna vunte'za nehue. Hanki omesimofona ahe frigahue. E'inagema hu'neana Jehu'a havige huno Bali havi anumzante mono'ma hunentaza vahe zamahe friku anagea hu'ne. **20** Anante Jehu'a zamasamino, Hanki Bali havi anumzamofo agifi mago kna erinteta monora huntesune, huno hige'za mago kna erintete'za ana knagura maka vahe zamasami vagare'naze.

21 Hagi Jehu'a maka Israeli mopalima havi anumza Balima mono hunentaza vahera ke hige'za, mono no zmifina eme mani avite'naze. **22** Hagi anante antanine'za Balima mono'ma hunentaza kukenama nentaza bogisire'ma kvama nehia nera Jehu'a asamino, Bogisifintira kukena erinka Balinte'ma mono'ma hunentaza vahera zamio, higeno ana ne'mo'a kema hiaza huno ana kukenaramina eri fegi atre'ne. **23** Anante Jehu'ene Rekabu nemofo Jehonadabukea ana havi anumza Balimofo mono nompi ufreteke, Jehu'a amanage huno Bali havi anumzante mono'ma hunentaza vahera zamasami'ne. Tamagrake'za amafina manigahaze. Hanki amu'nontamifima Ra Anumzamofoma mono'ma hunentesaza vahe'ma mani'nesagura haketa ke so'e hoho. **24** Anagema hutekea Jehu'ene Jehonadabukea umrerike havi anumza Balimofoma kresramnama vunentaza itare tevefima kre fanenehu ofane, mago'a ofanena Balintega ofa hunte'na'e. Hanki korapara ana vahe'ma nompima emareorinageno, meg'i'a kva hoho huno, 80'a sondia vahe Jehu'a huzamantge'za kva nehazageno, amanage huno zamasami'ne, Balinte'ma mono'ma hunentaza vahera ana maka zamahe fri vagareho. Hagi iza'o mago vahe'ma atresigeno'ma koro fre'nia nera, anama fre'nia ne'mofo nona'a huno agra frigahie. **25** Anante Jehu'ma tevefima kre fanenehu ofama huteno'a, sondia vahe'ane kva vahe'anena huzamanteno, nompi ufretu magore huta ozamatreta ana maka zamahe vagareho. Anagema hige'za ufre'za ana maka vahera kazinteti zamahe vagarete'za, zamavufaga'a eri'za kumamofo fegi'a ome atre'naze. Anama hute'za ete e'za Balima mono hunentaza nomofo agu'afi ufre'naze. **26** Hanki ana mono nompi ufre'za, zafare'ma antre'za antene'za mono'ma hunentaza zafa ome eri'za, meg'i'a teve eme hanavazi'za

kre'naze. **27** Ana nehu'za Bali havi anumzamofo amema'ama tro'ma hunte'naza zane, mono'ma hunentaza nonena tapage tapagu huza eri havizantfa hazageno, rifa kerigna huno me'neno eno meninte'enena ehanati'ne. **28** Hanki Jehu'ma e'inama hiazamo higeno, Israeli mopafintira Bali havi anumzante'ma mono'ma hunentaza zamo'a vagare'ne. **29** Hianagi Nebati nemofo Jeroboamu'ma Beteline Dani kumatrete'ma, golireti bulimakao anentatrena havi anumzama tro huntege'za Israeli vahem'o'za mono hunte'za kumi hu'nazaza huno, Jehu'a anazanke huno havi anumzana monora huntenu vu'ne. **30** Ana hutegeno Ra Anumzamo'a Jehuna asmino, Nagri navesiza'ma amage antenka Ahapu naganofi'ma zamazeri haviza hu'nanku, kagri nagapintira zamatresuge'za 4'a zupama fore hu anante ante'ma hu'za vanaza vahepina Israeli vahem'o'za maniza vugahaze. **31** Hianagi Jehu'a agu'aretira huno, Ra Anumzana Israeli vahemokizmi Anumzamofo kasegea amagera onte'ne. Ana nehuno ko'ma Jeroboamu'ma Israeli vahem'o'za zamavazu hige'za havi anumzante mono hunte'za kumi'ma hu'nazaza huno, Jehu'a ana avu'avaza hu'ne. **32** Hanki Jehu'ma kinima mani'nea knafina, Ra Anumzamo'a Siria kini ne' Hazaeli atregeno Israeli vahemokizmi mopa mago'a eri'ne. Siria kini ne' Hazaeli'a Israeli vahera ha'huzmagatereno, ana mopazamia eri'ne. **33** Anama eri'neama'a, Jodani timofo zage hanati kaziga, Gati mopama, Rubeni mopama, Manase mohanena eri'ne. E'ina mopa Anoni ti kazontu me'nea tva'onte, Aroeri kumateti agafa huteno vuno, sauti kaziga Giliatine Basani kaziga vu'nea mopa eri'ne. **34** Hanki ruga'a zantamima Jehu'ma kini mani'neno tro'ma hu'nea zamofo agenkea, Israeli vahem'o'za maniza zamagenkema krenentaza avontafepi krente'naze. **35** Anante Jehu'a frige'za,

agehem'o'zama frizagezama asezmane'naza matipi Sameria
asente'naze. Ana hazageno ne' mofavre'amo, Jehoahazi agri
kumara erino kinia mani'he. 36 Hanki Jehu'a 28'a kafufi kinia fore
huno Sameria mani'neno, Israeli vahera kegava huzmante'ne.

11 Hanki kuini a' Atalia'ma kegeno nemofo kini ne' Ahaziama
frigeno'a, sondia vahe huzamantege'za Juda vahe'mokizmi
nagapima, kinima fore huga vahe'ma mani'nazana maka
zamahe vagare'ne. 2 Hianagi kini vahe mofavrezagama
nezamahazageno'a kini ne' Joram mofa, Ahazia nesaro
Jehoseba'a, Joasina avre frakino, agrama nemasefinka kegava
higeno mani'ne. Hagi mase tafetamima nentafinka kvama
huntesia a'ene zanatregeke anampinka mani'nakeno Atalia'a ahe
ofri'ne. 3 Hanki Jehoseba'a Ra Anumzamofo mono nompinka
Joasina 6si'a kafufi kva huntegeke frakike mani'nakeno, Atalia'a
Juda vahe'mokizmia ana knafina kegava huzmante'ne. 4 Hianagi
Atalia'ma kvama manino egeno 7nima hia kafufina, pristi ne'
Jehoida'a, 100'a sondia vahe'ma kuini a'mofo kva nehaza sondia
vahete kva vahe'ene, kinimofo nontema kvama nehaza vahera
Ra Anumzamofo mono nonte echo huno kea atrezmante'ne. Hanki
anante Ra Anumzamofo mono nompi etazageno, Jehoida'a
mago huvempa kea zamagrane huhagerafiteno, anage huno
zmasamine, Inazano tamasami'nua zana tamage huta anaza
hugahazo, hige'za huvempa hu'za izo hu'naze. Anage hutazageno
Ahazia ne'mofavrea Joasina avreno eme zamaveri hu'ne. 5
Hagi anante Jehoida'a amanage huno zamasami'ne, Nagri'ma
navenesiana amanahu hugahune. Sabatima mani fruhu kna
zupa 3'afi sondia vahera refko huteta, mago kevumo'a kinimofo
nonte kva hina, 6 mago kevumo'a Surie nehaza kafante manina,
mago kevumota kinimofo no kafante kvama nehaza vahe'mofo

zamefi kva hu'neta, kinimofo nontera kva hugahaze. **7** Anama
nehanage'za tare kevumo'za mani fruma hu (Sabat) knazupama
manigasa hanamo'za Ra Anumzamofo mono nompina kini
ne' Joasina eme kva huntegahaze. **8** Hanki inantego kini ne'
Joasi'ma vanoma hanigeta, kazina tamazampi erineta kvahu
so'e nehinkeno, iza'o tva'oma'arema esimofona ahe friho. **9**
Anante pristi ne' Jehoida'ma zamasamiaza hu'za 100'a sondia
vahete kva hu'naza vahe'mo'za manigasama hu kna (Sabati)
zupama manigasama hanaza sondia vahe'ene, zamagri noma
eri'za eri'zama erisaza sondia vahe'ene zamavare'za Jehoida'ma
Ra Anumzamofo nompima mani'nere e'naze. **10** Anante pristi
ne'mo'a kini ne' Deviti hankoramine keveramima Ra Anumzamofo
mono nompima me'neana erino 100'a sondia vahete'ma kvama
huterema hu'naza vahera zami'ne. **11** Ana hutege'za ana
maka sondia vahe'mo'za ha'zana zamazampi eri vaganere'za
kini ne' nomofo tamaga kazigati vuno hoga kaziga evigeno
kresramna vu itane, ana mono nonena kegava hu'naze. **12**
Hanki sondia naga'mozama tro'ma hu'za otitageno'a, anante
pristi ne' Jehoida'a ana kini nemofo mofavre Joasina avreno,
atiramino kini fetori asenirera antente'ne. Ana nehuno azampina
kasege krente'naza avontafe amigeno eri'neno ne-ege'za huama
huza, kini ne'mo'a zaza kna kinia manigahie. Ananteria anumpi
olivi masavena tagiza frenentage'za vahe'mo'za zamaza nehe'za
ranke hu'za, Joasi'a zazate kinia manigahie! **13** Hanki sondia
vahe'ene, vahe kevumo'za'ma haza zamagasasa kema, kuini
a' Ataliama nentahino'a, Ra Anumzamofo ra mono nompima
vahe'ma atruma hu'za mani'nazarega vu'ne. **14** Anante'ma
vuteno keana, kasefa kini nera zamagra zamavuzmavapima
nehazaza huno, ra mono nomofo avuga noma vazisgama

hu'nea zafamofo tva'onte oti'nege'za, ana tvaoma'arera ufema
neraza vahe'ene, sondia kva vahe'ene oti'za mani'nage'za maka
vahe'mo'za ufe nere'za musenkase nehazageno zamage'ne.
Anama nezmageno'a anante Atalia'a kukena'a tagatotagatu
nehuno anage huno kezatine, tamagra havi vahe'mota komoru
huta nagri nazeri atre'za nehaze. **15** Higeno pristi ne' Johoiada'a
100'a sondia vahetema kvama hutere'ma hu'naza kva vahetmina
zamasamino, Ataliana azeriteta avreta sondia vahe amu'nompi
vuta mono nomofo meg'i'a viho. Anama nehutma agri'ma
amage'ma nentaza vahera kazinteti zamaheho. Anage nehuno
pristi ne' Jehoiada'a zamasamino, ana a'ra Ra Anumzamofo
mono nompina ahe ofrita meg'i'a avreta viho hu'ne. **16** Hanki
anagema hutege'za ana a'ra avazu hu'za kini ne'mofa nonte'ma
hosi afutamimoza'ma nevaza kafante vu'za ome ahe fri'naze.
17 Anante Pristi ne' Jehoiada'a kini ne' Joasine, vea kevu
naga'ene Ra Anumzamofonte'ene, mago huvempa kasege
hugagerafino, Ra Anumzamofo vahake manisune huno hu'ne.
Ana zanke huno zamasamige'za vea kevune kini ne'enena
mago huvempa kasegea huhagerafi'naze. **18** Anama hute'za
ana maka vahe'mo'za oti'za vu'za Bali havi anumzamofo mono
nona ome tapage hunetre'za, Kresramanama vu itaramine,
Bali havi anumzamofo amema'ama tro'ma hunte'nazana rutako
hutre'naze. Ana nehu'za Bali havi anumzamofo pristi ne'
Matanina Kresramana vu itaramimofo avuga ahe fri'naze. Anante
pristi ne' Jehoiada'a mago'a sondia vahera huzamantge'za
Ra Anumzamofo mono nona ome kva hu'naze. **19** Anama
huteno 100'a sondia vahete'ma kegava huterema hu'naza
kva vahe'ene, kini nete'ma kvama hanaza sondia vahe'ene,
kinimofo nonte'ma kvama hanaza sondia vahera. Jehoiada'a

huzmantege'za, Ra Anumzamofo mono nompintira kini nera avre'za kinimofo nontega nevazageno, ana maka zamagefi zamavaririza vazageno, sondia vahe kafanema nehaza kafanteti ufreno Joasi'a kini tratera umani'ne. **20** Anama hutege'za ana maka vahe'mo'za muse hu'naze. Hagi Ataliana kazinteti kinimofo no tva'onte ahe frizageno, Jerusalemi rankumapina mago'a agasasana omnegeno zamarimpa fru hu'za mani'naze. **21** Hanki Joasina kafu'amo'a 7nima nehigeno, kinia azeri ot'i'naze.

12 Hanki Jehu'ma 7ni'a kafuma Israeli vahe kinima nemanigeno'a Joasi'a Juda vahe kinia efore huno, Jerusalemi kumatera 40'a kafufi kinia mani'ne. Joasi nerera'a Besiba kumateti akino agi'a Zibia'e. **2** Hagi Joasi'ma kinima efore huno mania knafina maka zupa Ra Anumzamofo avurera fatgo avu'avazanke tro hu'ne. Na'ankure pristi ne' Jehoiada'a antahintahi amino azeri fatgo higeno, anara hu'ne. **3** Hianagi mono'ma hunentaza agona kumatmina Joasi'a eri havizana osu'ne. Ana hige'za vahetmimoza ana kumatminta vu'za Ra Anumzamofontera ofa ome nehu'za, mnanentake zanena kremna vu'naze. **4** Hanki mago zupa Joasi'a pristi vahera amanage huno zamasami'ne, monote'ma ne-eza eri'za esaza ofane, huvempama hu'enare'ma aminaku'ma eri'za esaza ofane, zamavesite'ma ami ofama veamo'zama eri'za ra mono nompima e'naza zagoa eritru hiho. **5** Hagi kenkeno'ma Ra Anumzamofo mono nomo'ma havizama haniana, zagoma kegavama hu'naza vaheteti pristi vahe'mo'za mago'a zagoa eri'za ana mono nona eri fatgo hiho. **6** Hianagi pristi vahe'mo'za Ra Anumzamofo mono noma havizama hiana eri fatgo osu'za mani'hageno eno Joasi'ma kinima manino egeno 23ma hia kafure ehanati'ne. **7** E'ina hu'negu pristi ne' Jehoiadane, mago'a pristi vahera kini ne' Joasi'a kehige'za azageno amanage

huno zamasami'ne, Nahigeta Ra Anumzamofo mono noma havizama hu'neana eriso'ea osu'naze? Hagi ana zagoa erinteteta omanita, noma negi'za vahe'mokizmi eri'zaminke'za ra mono nona eri fatgo hiho. **8** Hige'za pristi naga'mo'za, Joasi'ma hiankere ana hugahune hu'za mago zamarimpa hute'za, mono nomo'ma havizama hanigeta eri so'ema hanuna zagoa mago'ene vahepintira zo-ogigahune. Ana nehuta mono noma havizama haniana tagra'a eri fatgoa osugahune hu'naze. **9** Hanki anante pristi ne' Jehoiada'a mago vogisi erino avaza'arera mago ka hagenteteno, ana vogisia kre sramnavu itamofo tva'onte, tamaga kaziga vahe'ma unefrare ante'ne. Hanki Ra Anumzamofo nompima vahe'mo'zama zagoma ome netrageno'a, kahama ufrete'ma kvama hu'nea pristi ne'mo anama ome atraza zagoa erino vogisifina atre'ne. **10** Hanki kazageno'ma ana vogisifima zagomo'ma avimatege'za, vugota pristi ne'ene kinimofo eri'za vahe'mo'za e'za ana zagoa Ra Anumzamofo mono nompintira eme hampari'za kupina eriri'naze. **11** Anama hute'za ra mono noma havizama hunenige'za eriso'ema hanaza vahe'mokizmi kva nemofo azampi, ana zagoa antegahaze. Hagi Ra Anumzamofo noma eri fatgoma hanaza kamunta vahe'ene noma kisaza vahe'ene, **12** havereti'ma noma negi'za vahe'ene, noma negi'za vahe'ene, asopa noma kiza vahe'enena ana zagoretira mizana sezamante'naze. Hanki mago'a zagoretira, zafa mizanese'za havea mizanese'za, mago'a zanena mizase'za Ra Anumzamofo mono noma havizama hu'neana maka eri fatgo hu'naze. **13** Hanki anama eri'za e'naza zagoretira, Ra Anumzamofo mono noma eri fatgohu eri'zanteke atre'naze. Ana nehu'za silvareti trohu zuomparamine, tavi'ma erisuhi zotaramine, tima runi runimahu zuomparamine, uferamine, mago'a goliretiro silvareti'ma tro'ma

hu'naza zantamina Ra Anumzamofo mono nompima eri'zama eri zantaminena ana zagofintira mizana ose'naze. **14** Hianagi anama Ra Anumzamofo mono nompima eri'za aza zagoa, mono noma eri fatgo haza vahe miza huzmante'naze. **15** Hanki zamagra eri'zama kvama hu'ne'za, eri'za vahe'ma zagoma mizama senezmantaza vahe'mo'za fatgo zamavu'zmava hu'za zagoa erihava osu'naze. E'ina hazage'za ugagota kva vahe'mo'za ana zagogura zamantahia onke'naze. **16** Hianagi hazenke'ma eri fatgohu ofane, kumi ofama hunaku'ma eri'za aza zagoa, Ra Anumzamofo mono nompi zagoma nentafina ome onte'nazanki, eri'za pristi vahe ome zami'naze. **17** Hanki ana knafina Siria kini ne' Hazaeli'a, Gati rankumara hara huzamagatereno eri'ne. Anama huteno'a rukrahe huno Jerusalemi kuma ha' huntoku ke'ne. **18** Hagi anama huteno'a Jerusalema ehanatigeno'a, korapa Jehosafati'ma, Jehoram'u'ma, Ahazia'ma hu'za Ra Anumzamofoma ami'naza maka zantamine, Joasi'ma ante'nea zantamine, ra mono nompine, kinimofo nompima ante'naza golia ana maka Joasi'a eritru huno Siria kini ne' Hazaelina muse'za ami'ne. Ana musezama Hazaelia enerino'a, Jerusalemi kumara hara huonteno atreno vu'ne. **19** Hanki Joasi'ma kinima mani'nea knafima tro'ma hu'nea zamofo, agigenkene, mago'a zama hu'neazamofo agenkea, Juda kini vahe'mokizmi zamagenkema krenentaza avontafepi krente'naze. **20** Hanki mago zupa Joasina agri eri'za vahe'mo'za ahenaku ot'i'za kea retro hute'za, Sailo kumategama urami'nea kantega Bet-Milo kumate ome ahe fri'naze. **21** Hanki Joasi eri'za netrena Simiati ne'mofo Jozabadi'ene, Soma ne'mofo Jehozabatikea Joasina ahe frikeno frige'za, Deviti rankumapi agehe'ima asezmantae'nazafi ome

asente'naze. Ana hazageno Joasi nemofo Amasia nefा nona
erino kinia mani'ne.

13 Hanki Ahasia nemofo Joasi'ma 23'a kafuma, Juda
vahе kinima nemanigeno'a, Jehu nemofo Jehoahasi'a Israeli
vahе'mokizmi kinia efore huno Sameria mani'heno, 17ni'a kafufi
kegava huzmante'ne. 2 Hagi Jehoahasi'a Ra Anumzamofo avufi
havi avu'avaza nehuno, Nebati nemofo Jeroboamu Israeli vaheku
hiho huno hige'za hu'naza kumira amefira huomino avaririno
anahukna kumi hu'ne. 3 Ana higeno Ra Anumzamo'a tusi arimpa
Israeli vahera ahe'zamanteno, Siria kini ne' Hazaeline, nemofo
Ben-Hadatikizni zanazampi Israeli vahera zamavarentege'za
kegava huzamante'naze. 4 Hagi anante Siria kini ne'mo'ma
Israeli vahе'ma zamazeri havi'zama hiazanku Jehoahasi'a Ra
Anumzamofontega nunamu higeno, Ra Anumzamo'a nunamu'a
antahimi'ne. Na'ankure Siria kini nemo'ma zamazeri havizama
hiazana Ra Anumzamo'a ko ke'ne 5 Higeno Israeli vahе'ma
zamaho'ma keno zamazama hania nera mago, Ra Anumzamo'a
hu hamparintegeno Siria vahе zamazampintira Israeli vahera
zamagu vazi'ne. Ana hige'za Israeli vahе'mo'za ko'ma nehazaza
hu'za seli nompi so'e hu'za mani'naze. 6 Hianagi ko'ma
Jeroboamu naga'mozama nehazage'zama, zamavarizama
hu'naza kumira Israeli vahе'mo'za otre'naze. Ana zamavu'zmava
zana huvava nehu'za, havi a' anumza Asera amema'ama
zafereti'ma troma hu'za Sameria kumate'ma ante'nezama
mono'ma hunentaza zana eri otre'naze. 7 Hagi ana knafina
Siria vahе'mo'za Israeli sondia vahera zamahe vagarageno,
Jehoahasi'ma ante'neana, karisiramina 10ni'a anteno, hosi
agumpima mani'ne'za ha'ma hu sondia vahera 50'a naza
mani'zageno, mopafima vanoma hu'za ha'ma hu sondia vahera

10 tauseni'a naza mani'naze. **8** Hanki Jehoahasi'ma kinima mani'nea knafima hankave eri'zama enerino, ruga'a zantamima tro'ma hu'nea zamofo agenkea, Israeli vahe'mokizmi kinimofo zamagi zamagenkema krente avontafere nehaza avontafepi krente'naze. **9** Hanki anante Jehoahasi'a frige'za afu afahe'ima asenezmantafi Sameria asente'naze. Ana hutazageno nemofo ne' Jehoasi'a nef a nona erino kinia mani'ne. **10** Hanki Joasi'ma 37ni'a kafuma Juda vahe'mokizmi kinima nemanigeno'a, Jehoahasi nemofo Joasi'a Israeli vahe kinia efore huno Sameria mani'neno 16ni'a kafufi kva huzamante'ne. **11** Hagi Joasi'a Ra Anumzamofo avurera havi avu'avaza nehuno, Nebati nemofo Jeroboamu Israeli vahe zamavazu hige'za hu'nazankna kumi, agranena hu'ne. **12** Hanki maka zama Joasi'ma kinima mani'nea knafima tro'ma hu'nea zamofo agenkene, Juda kini ne' Amasiam ha'ma hunte'nea zamofo agenkenena, Israeli vahe kini vahe'mokizmi zamagi zamagenke'ma krenentaza avontafepi krente'naze. **13** Hanki afahe'zama friza nevazaza huno Joasi'a frige'za Israeli kini vahe'ma Sameriam asenezmantafi asente'naze. Ana hutazageno nemofo ne' Jeroboamu'a nef a nona erino kinia mani'ne. **14** Hanki Jehoasi'ma kinima mani'nea knafina, kasnampa ne' Elisa'a rankri erino fri'za hu'ne. Higeno kini ne' Jehoasi'a uramino vuno Elisana avuga zavi ome neteno amanage hu'ne, nafanimoke, nafanimoke, kagra ha'mahu karisigna nehunka, hosi afu agumpima mani'neza ha'ma nehaza vahekna hu'nenka, Israeli vahera hanavetinka zamaza nehana nere. **15** Higeno Elisa'a Jehoasina asmino, Atine keve zagane erio. Anagema higeno'a Jehoasi'a atine mago'a keve zagane eri'ne. **16** Ana hutegeno Elisa'a Jehoasina asmino, kevea atifi erintenka erigrio, huno higeno ana hutegeno, Elisa'a

Israeli kini ne'mofo azante azana agofetu ante'ne. **17** Ana huteno asamino, Zagema hanati kazigama me'nea zaho kahana erinagio, huno higeno eri nagi'ne. Anama hutegen'o'a, Elisa'a asamino, Kevea aho, huno higeno Jehoasi'a keve ahogeno, Elisa'a huno, Ama kevea Ra Anumzamofo kevegino Siria vahe'ma ha'ma huzmagateresia keve. E'ina hu'negu kagra Siria vahe'ma Afeki rankumate'ma ha'ma huzmantesanana, ana maka vahera zamahe vagaregahane. **18** Anante Elisa'a kini nera asmino, Keveramina erio, huno higeno eritegeno keveramintetira mopa amasagio huno higeno Jehoasi'a keveramintetira 3'a zupage mopa amasagiteno atre'ne. **19** Anama hutegeno Ra Anumzamofo kasnampa ne' Elisa'ma negeno'a kini nera arimpa ahenenteno amanage huno asmi'ne, Na'a higenka 5fu'a o 6si'a zupa naza mopa omasagine. E'inama hantesina Siria vahera ana maka zamahe hana hasine. Hianagi menina Siria vahera 3'a zupage'za hara huzamagteregahane. **20** Hagi henka Elisa'a frige'za asente'naze. Anante ana maka kafufina Moapu vahe'mo'za tra'zamo'ma agatama nehagea knafina e'za Israeli vahe'mokizmi eme rohu rezmante'za zamazeri haviza hutere hu'naze. **21** Mago zupa mago'a Israeli naga'mo'za fri'nea ne' asenteku hu'naze. Hianagi kazama Moapu vahe'ma azage'za nezamage'za, anama fri'nea nera eri'za Elisa'ma frige'za asente'naza havegampi matevu netre'za koro fre'naze. Anama hazageno'a, Elisa zaferinamo anama fri'nea ne'mofo avufga avako higeno, fri'nefintira oti'ne. **22** Hanki Jehoahasi'ma Israeli kinima mani'nea knafina, Siria kini ne' Hazaeli'a Israeli vahera maka zupa eme zamazeri haviza huvava hu'ne. **23** Hianagi Ra Anumzamo'a Israeli vahera asunku huzmanteno, zamazeri so'e huzmante'ne. Na'ankure zamagehe'i Abrahamuma, Aisakima,

Jekopunema huhagerafi huvempa kema huzmantene'nea zanku
agesa nentahino, amefira huozamino zamatrege'za havizantfa
osu'za mani'za menina e'naze. **24** Hagi henka Siria kini nera
Hazaeli'a frigeno, nemofo ne' Ben-Hadati nefna nona erino
Siria vahe kinia mani'ne. **25** Anante Israeli kini ne' Jehoasi'a
Siria kini ne' Ben-Hadatina hara hugatereno, ko'ma Siria kini
ne' Hazaeli'ma, nefna ne' Jehoasima ha'ma hugatereno'ma
Israeli vahe ranra kumatamima eri'neana eteno eri vagare'ne.
Hagi Jehohasi'a Ben-Hadatina 3'a zupa hara hunteno azeri
agatere'ne.

14 Hanki Jehohasi nemofo Jehoasi'ma tare kafuma Israeli
vahe kinima nemanigeno'a, Juda vahe kini ne' Joasi nemofo
Amasi'a Juda vahe kinia efore huno mani'ne. **2** Amasia'a
25fua kafu nehuno kinia efore huno, Jerusalemia mani'neno
29ni'a kafufi kini eri'zana eri'ne. Hagi nerera agi'a Jehoadinikino
Jerusalemiti a' mani'ne. **3** Hanki Amasia'a Ra Anumzamofo
avurera fatgo avu'avaza hu'ne. Hianagi negeho Devitima
hu'nea knara osu'neanki, maka zama tro'ma hu'neana nefna
Joasi'ma hu'nea avu'avaza amage anteno hu'ne. **4** Ana
nehuno havi anumzama mono'ma hunentaza agona kumatamina
eri havizana osu'nege'za, anantega vu'vava hu'za ofa ome
Kresramana nevu'za, mnanentake zana tevefi kremna vu'naze.
5 Hanki henka Amasia'ma kinima mani hankavema netino'a,
nefama ahe fri'naza vahera, zamahe fri'ne. **6** Hianagi anama
zamahe fri'za vahe'mokizmi mofavre nagara zamahe ofri'naze.
Na'ankure Ra Anumzamo'ma Mosese'ma asamigeno kasege
avontafepima krente'neana, nefna'ma hu'nesia kumitera mofavre'a
ahe ofrisigeno, mofavre'amo'ma hu'nesia kumitera nefana ahe
ofrigahie. Hianagi magoke magokemo'ma agra'ama hu'nesia

kumite zamahe fritere hugahaze hu'ne. 7 Hanki mago zupa Amasia'ene sondia naga'amo'za, hage nehaza agupofi Idomu sondia vahera 10tauseni'a hara huzmagatenere'za, Selae nehaza rankumara eri'haze. Ana hute'za ana rankuma'ma kasefa agima ami'nazana Joktelie hazage'za, meninena ana agi nehaze. 8 Mago'a kna evutegeno Amasia'a mago'a vahe huzmanteg'e'za ke eri'za Jehu negeho Jehoahasi nemofo Israeli kini ne' Jehoasintega vu'naze. Ana vahe'mo'za Joasinte vu'za amanage hu'za ome asmi'naze, Kini ne' Amasia'a tamagri Israeli nagamotma ha' eme huramantegahue huno hu'ne. 9 Hianagi Israeli kini ne' Jehoasi'a amanage huno Juda kini ne' Amasia kerera kenona huno kea atrente'ne, Mago Lebanoniti ave've trazamo amanage huno kea atrentegeno mago Lebanoni me'nea sida zafarega vu'ne. Kagra mofaka'a atregeno nagri ne'mofavremo a' avreno hu'ne. Hanki ave've trazamo'ma anagema hutegeno'a, Lebanoniti mago afi zagamo eno, ana ave've trazana agiareti retrako higeno haviza hu'ne. 10 Anagema huteno'a Amasia kerera mago'ene amanage huno kea atrente'ne, Kagrama Idomu vahe'ma ha'ma huzmagatere'nana zanku musenkase hunka rankagia enerine. E'ina hu'negu nonka'afi mani'nenka ana musenkasea huo, kagrama ha'ma eme hurantesunka, kagra haviza nehananke'za, Juda vahe'mo'zanena haviza hugahaze. 11 Hianagi Amasia'a anankea ontahi'ne. Ana higeno Israeli kini ne' Jehoasi'a sondia naga'ane vuno, Juda vahe'mokizmi mopafi me'nea rankuma Betsemesi kumate Amasiane sondia naga'anena hara ome huzmanteg'e'za. 12 Hanki ana hapina Israeli naga'mo'za Juda nagara hara huzmagatere'naze. Anama hazage'za maka Juda sondia vahe'mo'za atre'za koro fre'za seli nonkuma zamirega ete'za vu'naze. 13 Hanki Israeli kini ne'

Jehoasi'a Juda kini ne' Ahasia negeho Joasi nemofo Amasiana
Betsemesi rankumate azerino kina hunte'ne. Anama huteno'a
Jehoasi'a sondia naga'ane Betsemesitira atre'za Jerusalemi
rankumate uhanatite'za, Jerusalemi rankumamofo have kegina,
Efraemi rankafanteti agafa huteno vuno ome renagentetema
me'nea kahante vu'neana, 184'a mitanaza ana kegina ru faragu
farage vazi'za eri haviza hutre'naze. **14** Ana'ma huteno Jehoasi'a
Ra Anumzamofo mono nompi umarerino ana maka goline
silvane, anampima me'nea zantamina, ana maka enerino,
kinimofo nompima zagoma nentafima marerisa fenozama
me'nea zantaminena eri vagare'ne. Ana nehuno mago'a vahera
zamahe ofri zamavareno Sameria vu'ne. **15** Hanki Israeli kini
ne' Jehoasi'ma kinima mani'nea knafima hankave eri'zama
enerino, ruga'a zantamima tro'ma hu'nea zamofo agenkene,
Juda kini ne' Amasiama ha'ma hugatere'nea zamofo agenkenena
Israeli kini vahe'mokizmi zamagi zamagenkema krenentaza
avontafepi krente'naze. **16** Hanki Jehoasi'a frige'za Israeli kini
vahe'ma asenezmantafi Sameria asente'naze. Ana hutazageno
Jeroboamu'a nefu nona erino kinia mani'ne. **17** Hagi Israeli kini
ne' Joasi ne'mofo Jehoasi'ma fritegeno'a, Juda kini ne' Jehoasi
nemofo Amasia'a 15ni'a kafu maniteno henka fri'ne. **18** Hagi
Amasiama mago'a zama tro'ma hu'nea zamofo agi agenkea, Juda
kini vahe'mokizmi zamagi zamagenkema krenentaza avontafepi
krente'naze. **19** Hagi Amasia'ma Jerusalema mani'nege'za
mago'a vahe'mo'za ahe frinaku kea retro hu'naze. Ana naneke
Amasia'ma nentahino'a, atreno koro freno Lakisi rankumate vu'ne.
Hianagi mago'a vahe huzmantage'za vu'za Lakisi rankumate
ome ahe fri'naze. **20** Anama hute'za Amasia avufga hos
afu agumpi erinte'za eri'za e'za, Jerusalemi Deviti rankumapi

afahē'ima asenezmantazafi asente'naze. **21** Anante maka Juda
vahe'mo'za oti'za Amasia nemofo Azariana nefā no erino kini
mani'nogu azeri oti'naze. Hagi 16ni'a kafu nehige'za Azariana
kinia azeri fore hu'naze. **22** Hagi Amasia'ma fritegeno'a henka,
Azaria'a kinima nemanino'a, ete Elati rankumara eriteno, ana
kuma'ma havizama hu'neama'a eriso'e hu'ne. **23** Hagi Joasi
nemofo Amasia'ma Juda vahe kinima manino egeno 15nima hia
kafufi, Jehoasi nemofo Jeroboamu'a Israeli vahe'mokizmi kinia
fore huteno, 41ni'a kafufi Sameria kinia manino kegava hu'ne.
24 Hagi agra Ra Anumzamofo avurera havi avu'avaza huno,
Nebati nemofo nampa 1ni Jeroboamu'ma kumi nehuno Israeli
vahe zamatufge'za hu'naza kumira, amefi huomino, ana kumira
agranena zamavaririno hu'ne. **25** Hagi Israeli vahe mopama ha'
vahe zamazampima me'nea mopama nampa 2 Jeroboamu'ma
ete eri'nea mopamofo agema'amo'a noti kaziga Lebo-Hamatiti
agafa huteno, uramino fenkamu sauti kaziga fri hagerintega vu'ne.
Hagi ana mopama eri'neana Ra Anumzana Israeli vahe'mokizmi
Anumzamo'ma, Kathefa kumateti kasnampa ne' Amitai nemofo
Jona agipima huvezino hu'nea nanekemo nena'a efore hu'ne.
26 Hagi Israeli vahe'mo'zama tusi zamatazampima mani'naza
zana Ra Anumzamo'a keno antahino hu'ne. Hagi kazokzo eri'za
vahero, amne vahero ana knazampike manizageno mago'mo'e
huno zamazama huga vahera omanigeno, Ra Anumzamo'a
Jeroboamu aza higeno anara hu'ne. **27** Hanki Ra Anumzamo'a
Israeli nagara ama mopa agofetutira zamahe vagaregahue
hunora osu'neankino, Joasi nemofo Jeroboamumpi sotu huno,
Israeli nagara zamagu'vazi'ne. **28** Hagi Jeroboamu'ma kinima fore
huno mani'nea knafima fore hu'nea zane, mago'a zama tro'ma
hu'nea zamofo agenkene, Damaskasine Hamati rankumatrema

ha'ma huno ete eri'nea zamofo agenkea Israeli kini vahe'mokizmi zamagi zamagenkema krenentaza avontafepi krente'naze. **29**
Hagi nampa 2 Jeroboamu'a frige'za afahe'ima asenezmantazafi asentazageno, nemofo Zekaraia'a nefo no erino Israeli vahe kinia mani'ne.

15 Hagi nampa 2 Jeroboamu'ma Israeli vahe kinima manino vigeno 27nima hia kafufina, Amasia nemofo Azaria'a Juda vahe kinia agafa huno mani'neno kegava hu'ne. **2** Azaria'a 16ni'a kafu nehuno, kinia fore huno Jerusalemi kumatera 52'a kafufi kinia mani'ne. Nerera agi'a Jekoliakino Jerusalemiti a' mani'ne. **3** Azari'a nefo'ma Amasiama hu'neaza huno Ra Anumzamofo avurera fatgo avu'avaza hu'ne. **4** Hianagi havi anumzante'ma mono'ma nehaza kumatmina Azaria'a eri havizana osu'ne. Ana hu'nege'za veamo'za ana kumatmintega vu'za ofa ome Kresramana nevu'za, mnanentake zantamina tevefi kremna vu'naze. **5** Anama hazageno'a Ra Anumzamo'a Azariana fugo kireti azeri haviza higeno, ana krifi mani'neno fri'za hu'ne. Anama higeno'a kini vahe'ma nemani'za nompintira atreno vuno mago nompi umani'ne. Ana hutegeno Azaria nemofo Jotamu'a nefo nona erino, kinimofo none ana mopafima mani'naza vahe'enena maka kegava hu'ne. **6** Hagi Azariama kinima mani'nea knafima fore hu'nea zantamine, ana maka zama tro'ma hu'nea zantamimofo agenkea, Juda vahe'mokizmi kinimofo agigenkema krenentaza avontafepi krente'naze. **7** Hagi Azaria'a frige'za, Deviti rankumapima afahe'ima asezmantenazafi asente'naze. Ana hutazageno nemofo Jotamu'a nefo nona erino Juda vahe kinia mani'ne. **8** Hanki Juda vahe kini ne' Azaria'ma kinima fore huno 38'a kafuma nemanigeno'a, Joram u nemofo Zekaraia'a Israeli vahe'mokizmi kinia fore huteno Sameria kumate

mani'neno 6si'a ikampi Israeli vahera kegava huzmante'ne. 9
Hagi afahē'zama hu'nazaza huno Zekaraia'a Ra Anumzamofo
avurera havi avu'ava hu'ne. Ko'ma Nebati nemofo Jeroboamu'ma
kumi'ma nehuno, Israeli vahe'ma zamatufege'za hu'naza kumira,
amefira huomino ana kumira agranena zamavaririno hu'ne.
10 Anante Jabeli nemofo Salumu'a mago'a vahe zamavare
atru hige'za Zekaraiama ahesaza naneke retro hu'naze. Ana
huteno henka Salumu'a vahe zamavufi Zekeraiana ahe friteno,
agra'a kinia mani'ne. **11** Hagi Zekaraia'ma kinima mani'neno
ruga'azama tro'ma hu'nea zantamimofo agenkea, Israeli kini
vahe'mokizmi zamagi zamagenkema krenentaza avontafepi
krente'naze. **12** E'inama hu'neana Ra Anumzamo'ma Jehuma
asmino, kagripinti forehu anante anante'ma hu'zama vanaza,
vahe'mo'za 4'a zupa kinia manigahaze huno'ma asmi'nea
kemo'a nena raga'a efore hu'ne. **13** Hagi Uzia'ma 39ni'a kafuma
Juda vahe kinima nemanigeno'a, Jabeli nemofo Salumu'a
Israeli vahe kinia fore huno mago ikampi Sameria kumatera
kinia mani'ne. **14** Hagi ana knafina Gati nemofo Menahemu'a
Tirza rankumateti Sameria kumate marerino Salumuna ome
ahenefrino, agri kumara erino kinia mani'ne. **15** Salumu'ma
kinima mani'nea knafima fore'ma hu'nea zantamine, kini ne'
Zekaraiama mago'a vahe'ene kema anakiteno'ma ahe' nefrino,
agri noma erino kinima mani'nea zamofo agenkenena, Israeli
kini vahe'mokizmi zamagi agenkema krenentaza avontafepi
krente'naze. **16** Hagi Menahemu'a Tirsa rankumateti agafa
huteno vuno Tipsa rankumate vahera hara ome hunezmanteno,
ana kumamofo tavaoma'rema megagi'nea ne'onse kumapi
vahera zamahe vaganereno, zam'u'enema hu'naza a'henea
zamazerino kazinu zamarimpa reraragufe'ne. E'inama hu'neana

i'oma hazageno kumazmifima uofre'nea zante anara hu'ne. **17**

Hagi Azaria'ma Juda vahe kinima 39ni'a kafuma nemanigeno'a,
Gati nemofo Menahemu'a Israeli vahe kinia fore huteno Sameria
kumate mani'neno 10ni'a kafufi Israeli vahera kegava hu'ne.

18 Menahemu'a ana maka knama kinima mani'nea knafina
Ra Anumzamofo avurera havi avu'ava hu'ne. Nebati nemofo
Jeroboamu'ma ko'ma kumi nehuno, Israeli vahe zamatufege'za
hu'naza kumira, amefi huomino ana kumira agrane avaririno
hu'ne. **19** Hagi Menahemu'ma kinima mani'nea knafina, Asiria
kini ne' Tiglat Pilesa'a Israeli vahera eme ha' huzmante'ne.
E'inama higeno'a Israeli kini ne' Menahemu'a, hara osanu'anki
natrenige'na Israeli kinia mani'nue hiankazigati, 34 tauseni'a kilo
hu'nea silva zago erino Asiria kini ne' Tiglat Pilesana ami'ne. **20**
Anante ana zagoma Asiria kini ne'ma aminakura, Menahemu'a
Israeli vahepinti takisi zagoa zogi'ne. Maka feno vahepinti
kna'amo'a 570'a gremi hu'nea silva zago eritere huteno, Tiglat
Pilesana ana zagoa ami'ne. Ana hutegen Tiglat Pilesa'a Israeli
mopafina omani atreno vu'ne. **21** Hagi Menahemu'ma kinima
mani'nea knafima fore'ma hu'nea zamofo agenkene, maka zama
agrama tro'ma hu'nea zamofo agenkea, Israeli kini vahe'mokizmi
zamagi zamagenkema krenentaza avontafepi krente'naze.
22 Anante Menahemu'a frige'za afahe'ima asemazmantenafi
asente'naze. Hagi anante nemofo Pekahia'a nef a nona erino
Israeli vahe kinia mani'ne. **23** Hagi Azaria'ma Juda vahe kinima
50'a kafuma nemanigeno'a, Menahemu nemofo Pekahia'a Israeli
kinia fore huteno Sameria kumate mani'neno tare kafufi Israeli
vahera kegava hu'ne. **24** Hagi Pekahia'a Ra Anumzamofo
avurera havi avu'avaza hu'ne. Nebati nemofo Jeroboamu'ma
kumi'ma ko'ma nehuno, Israeli vahe zamatufege'za hu'naza

kumira, amefi huomino ana kumira zamavaririno agra hu'ne. **25**
Anante Pekahia sondia vahete ugota hu'nea kva ne' Remalia
nemofo Peka'a otino Giliati kazigati 50'a vahe zamavarege'za
Pekahiamma ahefrisaza kea retro hu'naze. Hagi Pekahia'a
kini nompi mago hunaragintageno hanavetinefi mani'nege'za
anafe hu'za anampinka mareri'za nehe'za, Agrobune Arienena
magoka zamahe'naze. Anama hutazageno Pekahia no erino,
Peka'a Israeli vahe kinia mani'ne. **26** Hagi Pekahia'ma kinima
mani'nea knafima fore hu'nea zamtamine, ana maka zama
tro'ma hu'nea zantamimofo agenkea, Israeli kini vahe'mokizmi
zamagi zamagenkema krenentaza avontafepi krente'naze.
27 Hagi Azaria'ma Juda vahe kinima manino egeno 52ma
hia kafufi, Remalia nemofo Peka'a Israeli kinia fore huteno,
Sameria kumate mani'neno 20'a kafufi Israeli vahera kegava
hu'ne. **28** Hagi Peka'a Ra Anumzamofo avurera havi avu'ava
hu'ne. Ko'ma Nebati nemofo Jeroboamu'ma kumi nehuno
Israeli vahe zamatufege'za hu'naza kumira amefi huomino, ana
kumira agra zamavaririno hu'ne. **29** Hagi Peka'ma Israeli vahe
kinima mani'nea knafi, Asiriati kini ne' Tiglat Pilesa'a ha' eme
huzmanteno Ijoni kuma'ma, Abel-Betmaka kuma'ma, Janoa
kuma'ma, Kadesi kuma'ene, Hazori kuma'enena e'nerino Giliati
kazigane Galili kaziganena enerino, ana maka Neftali naga'mofo
mopanena erivagare'ne. Ana nehuno ana kumatmimpi vahetmina
zamavareno Asiria mopare ome kina huzmante'ne. **30** Hagi
Juda kini ne' Usia nemofo Jotamu'ma 20'a kafuma kinima
nemanigeno'a, Ela nemofo Hosea'a mago'a vahe zamavare
atru huno Remalia nemofo Pekama ahesaza nanekea retro
hu'naze. Ana huteno henka Hosea'a Pekana ahenefrino agri
nona erino kinia mani'ne. **31** Hagi Peka'ma kinima mani'nea

knafima fore'ma hu'nea zamofo agenkene, maka zama agrama tro'ma hu'nea zamofo agenkea, Israeli kini vahe'mokizmi zamagi zamagenkema krenentaza avontafepi krente'naze. **32** Hanki Remalia nemofo Peka'ma Israeli vahe kinima tare kafuma nemanigeno'a, Usia nemofo Jotamu'a agafa huno Juda vahe kinia fore huno mani'ne. **33** Jotamuna kafu'amo'a 25fu nehigeno kinia fore huteno, Jerusalemi kumate mani'neno Juda vahera 16ni'a kafufi kegava hu'zmante'ne. Hagi nerera agi'a Jerusakino Zadoku mofare. **34** Hagi Jotamu'a Ra Anumzamofo avurera nefu Usia'ma hu'neaza huno maka fatgo avu'avaza hu'ne. **35** Hanki Jotamu'a hige'za Ra Anumzamofo ra mono no kumapima ufre kahama, anagamu kazigama me'nea kahana tro hu'naze. Hianagi havi anumzante'ma mono'ma nehaza kumatamina eri havizana osu'nege'za, anantega vahe'mo'za vuvava hu'za ofa ome kresramna nevu'za mnanentake pauranena tevefi kremna vu'naze. **36** Hagi Jotamu'ma kinima mani'nea knafima fore hu'nea zamtamine, ana maka zama tro'ma hu'nea zantamimofo agenkea, Juda vahe'mokizmi kinimofo zamagi zmagenkema krenentaza avontafepi krente'naze. **37** Hagi Jotamu'ma Juda vahe kinima mani'nea knafina, Siria kini ne' Rezinine, Israeli kini ne' Ramalia nemofo Pekanena Ra Anumzamo'a zanatregeke Juda vahera hara eme huzmante'na'e. **38** Hanki Jotamu'a frige'za afahe'ima asenezmantazafi, nefu Deviti rankumapi asente'naze. Ana hutazageno nemofo Ahasi'a nefu nona erino kinia mani'ne.

16 Hanki Remalia nemofo Peka'ma 17ni'a kafuma Israeli vahe kinima nemani'geno'a, Jotamu nemofo Ahasi'a Juda vahe kinia agafa huno mani'ne. **2** Ahasi'a 20'a kafu nehuno kinia fore huteno, Jerusalemi rankumapi mani'neno Juda vahera 16ni'a kafufi kegava hu'ne. Hagi Ra Anumzana agri Anumzamofo

avufina havi avu'avaza nehuno, negeho Deviti'ma hu'nea
avu'ava zana osu'ne. 3 Agra Israeli kinimoza'ma hu'naza
havi avu'avaza zamavaririno nehuno, ko'ma ana mopafima
mani'naza vahe'ma, Israeli negazageno Ra Anumzamo'ma
zamahe natitre'nea vahe'mokizmi kasrino havizantfa hu'nea
zamavu'zmavaza nehuno, ne'mofonena aheno tevefi kresramna
vu'ne. 4 Ana nehuno agra mono'ma nehaza kumatmimpine,
agonaregane ranra zafaramimofo agafine vuno, Kresramana vu
ofa nehuno mnantake paurana tevefi kre mna vu'ne. 5 Hagi
Ahasi'ma Juda kinima mani'negeke, Siria kini ne' Rezini'ene
Israeli kini ne' Remalia nemofo Peka'enena Ahasina ha' eme
hunenteke Jerusalemi kumara eme avazagi kagi'na'anagi azeri
agateore'na'e. 6 Hagi ana knafina Siria kini ne' Resini'a Juda
vahera Elati rankumapintira hahuzamagatereno ete ana kumara
agrarega erinenteno, zamavare atrege'za vu'naze. Anama
hige'za Idomu vahe'mo'za ana kumapina ufre'za umani'ne'za
meni'nena mani'naze. 7 Hagi Ahasi'a amanage huno Asiria kini
ne' Tiglat-Pilesantega nanekea atrente'ne. Nagra kagri eri'za
vahe mani'nena kagri kagorga manigahuanki, Siria kini ne'ene,
Israeli kinimoke'ma eke ha'ma hunenanta'ana eme hara hunka
naza huo. 8 Ahasi'ma anagema huteno'a, Ra Anumzamofo ra
mono nompine, kinimofo nompima zagoma nentafima me'nea
silvane goliraminena erino, Asiria kinirega museza atrente'ne.
9 Anama higeno'a Asiria kini ne' Tiglat-Pilesa'a Ahasi'ma
hiankea antahinemino, sondia vahe'a zamavarege'za e'za Aramu
vahe rankuma Damaskasi ha' eme hu'za ana kumara eri
zamagrarega atre'naze. Anama huteno anante Asiria kini ne'
Tiglat-Pilesa'a Siria kini ne' Resinina ahe nefrino, ana maka
Damaskasima nemaniza vahera zamavareno Kiri rankumate ome

kina huzmante'ne. **10** Anama hutegeno henka kini ne' Ahasi'a Damaskasi vuno Asiria kini ne' Tiglat-Pilesa ome kenaku vu'ne. Hagi Ahasi'ma Damaskasima mani'neno'a kresramna vu ita mago me'nea keteno, ana itamofo amema'a krenenteno, inankna huno anahukna itama tro'ma hania zamofo naneke'a ana maka krenteteno, atregeno pristi ne' Uria'ma Jerusalema mani'nerega vu'ne. **11** E'ina higeno pristi ne' Uria'a avompima kretregeno e'nea kante anteno Damaskasima me'nea kresramnavu itagna ita tro hu'ne. Hagi Ahasi'a Damaskasia atreno Jerusalemia viana ana ita pristi ne' Uria'a ko tro huvagarente'nego ome ke'ne. **12** Hagi kini ne' Ahasi'a Damaskasiti eno, ana ita eme negeno erava'o huno, ana itare ofa hunaku mareri'ne. **13** Hagi Ahasi'a ana itarera tevefi kre fanane hu ofane, witi ofane, tima tagi tre ofanena nehuno, kora rutritri huno rrimpa fru ofa kresramana vu itamofo agofetu hu'ne. **14** Ahasi'ma ofama huteno'a, ko'ma bronsiretimu tro'ma hu'naza kresramna vu ita, Ra Anumzamofo mono none, kasefa'ma tro'ma hu'nea itamofo amu'nozanifima me'neana erino kasefa'ma tro'ma hu'nea itamofo noti kaziga erinte'ne. **15** Hagi kini ne' Ahasi'a amanage huno pristi ne' Uriana asmi'ne, kasefa'ma trohu kresramna vu itarera, nanterana tevefi kre fanane hu ofa nehunka, kinaga witi ofa nehunka, kinimofo kre fanane hu ofa nehunka, witi ofa'anena nehunka, maka vahe'mokizmi tevefi kre fanane hu ofazamine witi ofazamine tima tagitre ofazaminena nehunka, ana maka tevefima kre fananehu ofama hanaza ofamofone ruga'a ofama hanaza ofamofo korana erinka itamofo agofetu runi'ni huo. Hianagi bronsireti'ma trohu ita, nagri su'za me'nenige'na ana itare nagra ofa nehu'na, nanknazama nagripima hania zamofona Ra Anumzamofona antahigegahue. **16** Hagi kini ne'

Ahasi'ma asamia nanekea pristi ne' Uria'a amage anteno ana maka'zana tro hu'ne. **17** Hagi kini ne' Ahasi'a Ra Anumzamofo mono nompintira bronsireti'ma tro huntene'za erigantugmama nehaza tra'mofo asoparegati timafinte kavoa ome enerino, ana itare'ma me'nea osi zuomparamina eri'ne. Ana nehuno timafinte rankavoma, bronsireti'ma trohu bulimakaomo'ma vazisgama hunte'neana ana bulimakaona eritreno havereti tra'a trohuno ana timafinte rankavoa ana agofetu retrure'ne. **18** Ana nehuno Ahasi'a Sabati zupama retaneraza seli nona ra mono no tvaontetira erinetreno, kinimofo nonteti'ma ra mono nomofo kumapima nevaza kahana renkanire'ne. E'na maka'zama hu'neana, Asiria kini ne' Tiglat-Pilesa antahintahi avaririno anara hu'ne. **19** Hagi Ahasi'ma kinima mani'nea knafima fore hu'nea zamtamine, ana maka zama tro'ma hu'nea zantamimofo agenkea, Juda vahe kinimofo agigenkema krenentaza avontafepi krente'naze. **20** Hanki Ahasi'ma frige'za afahel'ima asenezmantazafi, Deviti rankumapi asente'haze. Anama hutazageno nemofo Hezekaiia nefra nona erino kinia mani'ne.

17 Hagi Ahasi'ma Juda vahe kinima 12fu'a kafuma nemanigeno'a, Ela nemofo Hosea'a Israeli vahe kinia fore huno Sameria kumate mani'neno, 9ni'a kafufi Israeli vahera kegava hu'ne. **2** Hosea'a Ra Anumzamofo avurera havi avu'avaza hu'ne. Hianagi ko'ma Israeli vahe'mo'za kinima mani'za e'naza kini vahe'mo'zama hu'naza havi zamavu zamavara zamagatereno osu'ne. **3** Hagi Hoseama Israeli kinima mani'nea knafina, Asiria kini ne' Salmanese'a Israeli vahera eme hahu zamagatere'ne. Ana higeno Hosea'a Asiria kini nete huvempa huno, agri agorga mani'neno maka kafufina takisi zagoa amino vu'ne. **4** Hianagi Hosea'a ko'ma kafugu kafugu'ma nehiaza huno, Asiria kini nera

takisi zagoa omi'ne. Ana nehuno eme aza hinogu Hosea'a Isipi kini ne' Sontega kea atrentege'za mago'a vahe'mo'za eri'za vu'naze. Hagi ananke'ma kini ne' Salmaneserima nentahino'a, ome azerino kina hunte'ne. **5** Hagi ana'ma huteno'a Asiria kini ne' Salmaneseli'a, sondia vahezaga'a zamavareno vuno Israeli vhahera ha'huzmanteno ana maka mopa erivareteno, eno 3'a kafufi Sameria kumara hara eme huzmante'ne. **6** Hagi Hosea'ma Israeli vahe kinima 9ni'a kafuma nemanigeno'a, Asiria kini ne'mo'a Sameria kumara hara eme huzmagatereno enerino, Israeli vhahera zamavareno Asiria vuno, mago'a vhahera zamatrege'za Hala kumate nemanizageno, mago'a Habori ti tva'onte Gosani kaziga nemanizageno, mago'a Midia vahe'ma nemaniza ranra kumatmimpi zamatrege'za mani'naze. **7** Hagi ana maka knazama Israeli vahete'ma fore hu'neana, zamagra Ra Anumzana zamagri Anumzamo'ma, Isipi kini ne' Fero hankavefinti'ma zamavareno'ma Isipi mopafinti'ma atirami'nea Anumzamofo avurera kumi nehu'za, havi anumzantamimofo koro hunezmante'za mono huzmantazagu, anazana fore hu'ne. **8** Ana nehu'za Ra Anumzamo'ma negazageno'ma anama mani'naza mopafinti vahe'ma zamahenati tre'nea vahe'mokizmi havi zamavu zamavara nevariri'za, Israeli kini vahe'mo'za eri agafama hu'naza havi zamavu zamava'enena zamavariri'naze. **9** Ana nehu'za Israeli vahe'mo'za oku'a mago'a zamavu zamava hazazamo Ra Anumzana zamagri Anumzamofo avurera knarera osu'ne. Zamagra osi kumateti vuno ranra kumate'ma vigeno havi anumzante'ma mono'ma hunte kumatmina tro hunte vagare'naze. **10** Ana maka ranra agona ramimpine, maka ranra zafa agafafina Asera havi anumzante'ma mono'ma hunte havene, Asera amema'ama me'nea zafaramina asente vagare'naze. **11** Anama

havi anumzante'ma mono'ma hunte kuma'ma tro'ma huntaza
kumatmintera, anama umani'naza mopafi vahe'ma negazageno
Ra Anumzamo'ma zamahenati atre'nea vahe'mo'zama hu'nazaza
hu'za mna nentakezana kre mna vu'naze. Ana havi zamavu
zamava'ma hazazamo Ra Anumzamofona azeri arimpa ahe'haze.

12 Hagi ko'ma Ra Anumzamo'ma huno, kaza osu havi
anumzantera monora huonteho huno'ma zamasami'neana,
ke'a rutagre'za ana zantaminte monora hunte'naze. **13** Ra
Anumzamo'a kasnampa vahe'ene mago'a kva vahe'enena
huzmantege'za, Israeli vahe'ene Juda vahera koro kea amanage
hu'za zamasami'naze, havi tamavu tamava'ma nehaza zana
atretma, Nagri kasegene, tra kenena amage anteho. E'i
ana kasegea tamagehe'inku amage anteho hu'na zami'noa
kasege, eri'za vahe'nia kasnampa vahe zamagipi huvazi'na
zamasami'noe huno hu'ne. **14** Hianagi Israeli vahe'mo'za
Ra Anumzamofo kea ontahi'za zamasenimo'a hanavetige'za,
zamafahe'zama Ra Anumzana zamagri Anumzama antahiomiza
mono'ma huonte'nazaza hu'za monora huonte'naze. **15** Hagi
Israeli vahe'mo'za Ra Anumzamofo tra kema, zamafahe'inema
huhagerafi huvempa kema hu'nea ke'ne, mago'a koro ke'ma
huzmante'nea kegura zamefi humi'naze. Hagi havi anumzana
amnezante monora ome hunente'za, zamagranena amne'za
se'haze. Hagi kora Ra Anumzamo'a Israeli vahera zamasamino,
ru kumate vahe'mo'zama hanaza zamavu'zama zana zamavaririta
osiho huno zamasami'ne. Hianagi Ra Anumzamofo kea rutagre'za
ana havi zamavu'zmavazana hu'naze. **16** Ana nehu'za Israeli
vahe'mo'za Ra Anumzana Anumzazamimofo kasegea ana
maka runetagre'za, ainireti kre'za tare bulimakao anentatre
tro nehu'za, Asera havi anumzamofo amema'a antre'za tro

hunente'za, monafi hanafitamine Bali havi anumzante'ene monora
huzamante'naze. **17** Ana nehu'za zamagra ne'mofa'zamia
zamahe'za tevefi Kresramana nevu'za, zamene vahete'ene, fri
vahé hankro'enema keaga nehaza vahetega, zamaza hanazegu
nevu'za, Israeli vahé'mo'za Ra Anumzamofo avurera monko
a'nemo'zama nehazaza hu'za zamagra'a zagore ome atre'za
havi zamavu'zmavaza hazazamo Anumzamofona azeri arimpa
ahe'ne. **18** E'ina hu'negu Ra Anumzamo'a Israeli vahera
tusi rimpa hezamanteno, amefi hunezamino, mopazamifintira
zamaretrege'za afete vu'naze. Ana higeno magore huno
Israeli vahera mopa zamifina omanizage'za, Juda naga'mo'za
zamagrake mopafina mani'naze. **19** Hianagi Juda naga'mo'za
zamagranena ana zanke hu'za, Ra Anumzana Anumzazamimofo
kasegea amagera onte'naze. Zamagra Israeli vahé'mo'zama
hu'naza havi zamavu zamavaza zamage'ante'za hu'naze. **20**
E'ina hu'negu Ra Anumzamo'a ana maka Israeli vahera agri
avugatira zamefi hunezamino, zamatrege'za ha' vahé'mo'za eme
zamazeri haviza hu'naze. **21** Hagi korapara Israeli vahé'ene Juda
vahé'enena kini ne' Deviti kegava huzmanteg'eza mani'nazane.
Hianagi henka Anumzamo Deviti nagapintira Israeli vahera
refko hutrege'za zamagra'a zamagiare oti'naze. Anama nehu'za
Israeli vahé'mo'za Nebati nemofo Jeroboamuna kini'zamia
azeri oti'naze. Hianagi Jeroboamu'a Israeli vahera zamavazu
hige'za, Ra Anumzana zamefi humi'za rama'a kumi hu'naze. **22**
Hagi Israeli vahé'mo'za Jeroboamu'ma hu'nea kumira zamefira
huomi'za, kazigazi hu'za ana maka kumira hu'naze. **23** Hagi
Israeli vahé'mo'za ana zamavu zamavara hu'za neazageno,
Ra Anumzamo'ma eri'za vahé'a kasnampa vahé zamagipi
huvazino koro kema huzamante'nea nanekemo'a nena raga'a

efore hu'ne. Ana hutege'za Asiria vahe'mo'za Israeli vahera
eme ha'huzamante'za zamavare'za Asiria moparega kina ome
huzmantazage'za anantega umani'ne'za meni'nena mani'naze.
24 Hagi anante Siria kini ne'mo'a Babiloni rankumate'ene Katama
kumate'ene Avama kumate'ene Hamati kumate'ene Sefarvaimi
kumate'ma hu'za nemaniza vahera zamavareno, Sameriam
me'nea kumatamimpina Israeli vahe'ma nomaniza nompi eme
zamatrege'za ana kumatmimpi mani'naze. Ana nehu'za Sameria
rankuma'enena eri'za mani'naze. **25** Hagi ana Israeli vahe
kumapima emaniza vahe'mo'za Ra Anumzamofona korora
hunte'za monora huonte'naze. E'ina hazagu Ra Anumzamo'a
laioni huzamantege'za e'za ana vahera mago'a eme zamahe
fri'naze. **26** Hagi ana higeno mago'a vahe'mo'za vu'za Asiria kini
nera amanage hu'za ome asami'naze, Kagrama zamavarenka
Sameria kumatmimpima ome zamante'nana, vahe'mo'za ana
mopafima nemania Anumzamofo kasegea ontahi'naze. E'ina
hu'negu ana mopafi Anumzamo'a laioni huzamantege'za eza
ana vahera eme zamahe fri'naze. **27** Hagi anante Asiria
kini nemo'a amanage huno vahera huzamante'ne, Israeliti'ma
zamavaretama eme kinama huzamante'nona pristi nagapinti
vutma mago ome avreta Sameria ome antenkeno mani'neno,
ana mopafi Anumzamofo kasegea vahera rempi huzamino. **28**
Hagi anante Israeliti pristi naga'ma eme kinama huno Asiriama
mani'nazafinti mago avare'za vu'za Sameria ome atrazageno
Beteli kumate umani'neno, ana vahera Ra Anumzamofoma koro
hunte'za mono'ma hunte'naza avu'ava zana rempi huzami'ne. **29**
Hianagi ru vaheru vaheru vaheru vaheru vaheru vaheru vaheru
enemaniza vahe'mo'za zamagra'a anumza tro hutere hu'za
nemaniza kumate kumatera antetere hu'naze. Ana nehu'za havi

anumzazamimofo amema'a tro hu'za, Israeli vahe'mo'zama havi
anumzamofonte mono'ma hunte kuma'ma tro'ma hunte'naza
kumatmintera antevare'naze. **30** Hagi Babiloni vahe'mo'za Sukot-
Benotie nehaza havi anumzamofo amema'a tro hazage'za, Kuta
vahe'mo'za Nergalie nehaza havi anumzamofo amema'a tro
hazage'za, Hamati vahe'mo'za Asimae nehaza havi anumzamofo
amema'a tro hazage'za, **31** Avate vahe'mo'za Nibfazie nehaza
havi anumzane, Tartakie nehaza havi anumzantremokizni
zanamema'a tro hazage'za, Sefarvaimi vahe'mo'za Adramelekie
nehaza anumzane, Anamelekie nehaza havi anumzantrente
ne'mofavrezamia zamahe'za ofa kresramna vu'naze. **32** Hagi
zamagra ana nehu'za, Ra Anumzamofona Agri'enena monora
hunte'naze. Hianagi zamagra'a vahepinti pristi vahera huhampri
zamantage'za ofama hu kumatera mani'ne'za, ofama eri'za
aza zantamina kresramna vu zamante'naze. **33** Hagi zamagra
Ra Anumzamofona koro hunte'naze. Hianagi zamagra mopa
zamiregama mani'nezama ko'ma nehaza zamavu'zamavaza
amage ante'za anumzazamire monora huntetere hu'naze. **34**
Hagi meninena ana vahe'mo'za ko'ma nehaza zamavu zamavara
otre'za huvava hu'za neaze. Ana nehu'za Ra Anumzamofona
monora hunonte'za, kasegene, tra kea amagera nonte'za,
Jekopunku'ma mago agi'a Israeli'e huno'ma antemi'nea ne'mofo
naga'ma zami'nea kasegene tra kenena amagera onte'naze. **35**
Hagi Ra Anumzamo'ma Israeli naga'enema huhagerafi huvempa
kema hu'neana amanage huno huzamante'ne, tamagra mago
anumzantera monora huntege, kepri huta tamarenarege, eri'zana
erintege, ofa kresramna vugera osutfa hiho. **36** Hianagi Ra
Anumzamona tusi'a hankavenireti nazana rusutena, Isipitira
tamavre'na etirami'noa Anumza mani'noanki, Nagriteke kepri

hutma tamarenareta monora hunenanteta, ofa kresramna vunanteho. **37** Hagi maka tra ke'ne kase keni'anema amage anteho huno'ma krerami'nea kemofona kva hu'neta, maka zupa avariri fatgo hiho. Ana nehutma mago'a havi anumzamofonkura korora huta monora huozmanteho. **38** Hagi tamagranema huhagerafi huvempa kema hu'noankegura tamagesa nentahitma, mago'a havi anumzamofonkura korora hunteta monora ome huonteho. **39** Hianagi Ra Anumzana tamagri Anumzamonage monora hunenantekena maka ha' vahe'zamazampintira tamagu vazi'neno. **40** Ra Anumzamo'a anage hianagi anankea ontahi'za, ko'ma hu'za e'naza zamavu zamavara kazigazi hu'za huvava hu'naze. **41** Hagi ana vahe'mo'za Ra Anumzamofona koro hunte'za monora hunte'nazanagi, zamagra havi anumza zamire'enena monora hunte'naze. Ana hazage'za mofavre zamimo'zane zamagehe'izanena zamafahe'mokizmi zamavu zamava zamavariri'za ana zanke meninena nehaze.

18 Hagi Ela ne'mofo Hosea'ma Israeli vahe kinima 3'a kafuma nemanigeno'a, Ahasi nemofo Hezekai'a agafa huno Juda vahe kinia fore huno mani'ne. **2** Hagi Hezekaiana kafu'amo'a 25fu nehigeno kinia fore huteno, 29ni'a kafufi Jerusalemia kinia mani'neno kegava hu'ne. Nerera agi'a Abijakino Zekaraia mofo mani'ne. **3** Hagi Negeho ne' Deviti'ma hu'neaza huno Hezekaia Ra Anumzamofo avurera maka fatgo avu'avaza hu'ne. **4** Hagi havi anumzante'ma mono'ma hunentaza kumatmina Hezekai'a eri haviza hunetreno havema asente'nezama mono'ma nehaza havea ru tamana hunetreno, Asera havi anumzamofo amema'ama zafare'ma antre'za tro'ma hunte'nazana rukafri atre'ne. Ana nehuno Mosese'ma bronsireti osifavema tro'ma huntenege'za, Nehustani'ema nehaza osifavere'ma mnantentake zantamina kre

mna nevu'za mono'ma hunentaza zana erino ru tamanahu osi osi hutre'ne. **5** Hezekai'a Israeli vahe Ra Anumzantera hanavetino amentintia hu'ne. Hagi ko'ma Juda vahe kinima mani'za e'naza kini vahe'ene, agriteti'ma henkama fore'ma hu'naza kini vahepintira magore hu'za agrikna kinia forera osu'naze. **6** Agra Ra Anumzamofona maka kna azeri antrako nehuno, amefira huomi'ne. Ana nehuno Ra Anumzamo'ma Mosesema ami'nea kasegea amage ante'ne. **7** Anama higeno'a Ra Anumzamo'a Hezekai'ene mani'negeno, maka'zama agrama hiazamo'a knare'zanke hu'ne. Hagi Asiria kinimofo kema antahino agri agoragama mani'neno eri'zama'ama erinte'zankura aveosi'ne. **8** Hagi ne'onse kumapine hankave keginama hu'naza ranra kumapima nemaniza Filistia vahera ogantu Gaza rankumateti agafa huteno, ana kuma tva'onte'ma me'nea ne'onse kumapima nemaniza vahera, Hezeika'a ana maka hara huzmagatere'ne. **9** Hagi Hezekai'ama kinima manino egeno 4ma hia kafurera, Ela nemofo Hosea'ma Israeli kinima mani'neana kafu'amo'a 7ni hu'ne. Ana kafufina Asiria kini ne' Salmaneseli'a sondia vahezaga'ane eno ha'huzmante'naku Sameria kumara eme avazagi kagi'ne. **10** Hagi Asiria vahe'mo'za Sameria rankumara avazagikagiza hara hume nevazageno 3'a kafu evutege'za, ana kumara hara huzmagatere'za eri'naze. Higeno ama ana kafumo'a Hezekaima kinima manino e'nea kafua 6si higeno, Hosea'ma kinima manino'ma e'nea kafua 9ni hu'ne. **11** Anama huteno Asiria kini ne'mo'a Israeli vahera zamavareno Asiria vuno, mago'a ome zamatrege'za Hala kumate nemanizageno, mago'a Habori ti tvaonte Gosani kaziga nemanizageno, mago'a Midia vahe'ma nemaniza ranra kumatmimpi zamatrege'za mani'naze. **12** Na'ankure ana maka knazama Israeli vahete'ma fore hu'neana,

zamagra Ra Anumzana Anumza zamimofo nanekea amage
nonte'za, Ra Anumzamo'ma zamagranema erihagerafi huvempa
kema hu'neana rutagre'za, Ra Anumzamofo eri'za ne' Mosese'ma
zami'nea kasegenena zamefi huminagu, anara hu'naze. **13** Hagi
Hezekai'a Juda vahe kinima mani'negeno 14nima hia kafufina,
Asiria kini ne' Senakeripi'a Juda vahera eme hahuzmanteno ana
maka ranra kuma'ma hankave keginama hu'naza kumatmina
erivagare'ne. **14** Hagi Asiria kini ne' Senakeripi'ma Lakisi
kumate'ma mani'negeno'a, Juda kini ne' Hezekai'a amanage
huno kea atrentegeno vu'ne, Nagra hazenke hu'noe. E'ina
hu'negu kagra natrenka rukrahe hunka vuo. Anama hnanke'na
nagra nazano mizasenantoma hunka hanana zana amne
kamigahue. Higeno Asiria kini ne'mo'a Hezekaiankura asamino,
silva zagoa kna'amo'a 11tausen kilo hu'nesia nenaminka, golia
kna'amo'a 1tausen kilonaza hu'nenia namigahane huno hunte'ne.
15 Hagi anagema higeno'a, Ra Anumzamofo mono nompima silva
zagoma me'neama'ane, kini ne'mofo nompima zagoma nentafima
silva zagoma me'neama'a ana maka Hezekai'a erivagaren
ami'ne. **16** Hagi Ra Anumzamofo mono nomofo kafaraminte'ene
kafa zafare'ma, Hezekai'a anoma vazinte'nea golinena ana
zupa, agra'a maka kanopevareno Asiria kini nera ami'ne. **17** Hagi
Asiria kini ne'ma Lakisi kumate'ma mani'neno, sondia vahete'ma
ugagota hu'naza 3'a kva vahera huzmantege'za, tusi sondia
vahet'zagane Hezekai'ma Jerusalemi mani'nerega vu'naze.
Hagi ana vahet'mo'za Jerusalemi uhanatite'za, anaga kazigama
me'nea tirutegati'ma kerima ase'za tima avre'za Jerusalemi
kumapima urami'nazare vu'za ana tvaonte umani'naze. Ana
tima avre'naza kerimo'a tavravere'ma penima fre'za tro'ma
nehaza kumategama vu'nea kamofo tvaonte me'ne. **18** Hagi ana

kini ne' Hezekaianku ke hazageno, agri nonte'ma kegavama
nehia ne' Hilkia nemofo Eliakiminki, avontafe'ma kreno eri
fatgoma nehia ne' Sebnanki, kini ne'mo'ma ana maka'zama
hiazama avompima krenentea ne', Asapu nemofo Joanki huno
huzmantege'za vu'naze. **19** Hagi ana 3'a Hezekaia eri'za vahe'ma
uhanatizageno'a, Siria sondia vahete ugota kva ne' Rabsake'a
amanage huno zamasami'ne, Asiria kumate hanavenentake kini
ne'mo'a amanage huno hie, Kagra ina hankveka'agu nentahinka
nagri nagorga mani'nakura nosane hanki Hezekaiana ome
asamiho. **20** Kagrama nehanana ha'ma hu antahintahine sondia
vahe'enena knare hu'noe hunka nehananagi, kekamo'a nena'a
forera osugahie. Ina vahe'mo kzahuku higenka, kagra nagri
nagorga nomani'ne. **21** Hagi menina kagra Isipi vahe'mo'za
naza hanage'na hara hugahue hunka kavua nentane. Hianagi
Isipi kumamo'a ketamo rufutagiankna hu'ne. E'ina hu'neankinka
ana ketama erinkama azompama renka'ma vnanana kzampi
kregahie. Hagi Isipi kini ne'mofo avu'ava'amo'a e'ina ketakna
hu'neankino, agrama tamazama haniana e'ina hugahie. **22**
Hianagi kagrama hunka, Israeli vahe'mota Ra Anumzana
tagri Anumzamofonte tamentinti nehunankino, taza hugahie
hunka hugahananagi, tamaza osugahie. Na'ankure Hezekaiaga
kagra mono'ma hunentaza kumatamine Kresramanama nevaza
itaramina ana maka eri haviza huvaganerenka, Juda vahe'ene
Jerusalemi vahekura zamasaminka, Jerusalemige eta magoke
kresramna vu itama me'nereke monora eme huntaho hunka
hu'nane. **23** Hagi Hezekaiagagura Asiria kini nemo'a amanage
huno hu'ne, Kagrama hu izo hunka mago krimpama hnanke'na,
kagri sondia vahe'ma knare huno rama'ama mani'nesazana
amne 2tauseni'a hosi afura kamisnuge'za agumpina mani'za

vugahazanagi nagrama antahuana e'inahu avamentera sondia
vaheka'a omani'naze. **24** Hagi kagrama Isipi vahe'mokizmi
karisine, hosi afu agumpima mani'za ha'ma nehaza sondia
vaheku'ma antahinezaminana, inanka hunka tagripintira mago
agi omaneno, amne sondia vahera hara hugateregahane? **25**
Hagi mago'anena nagra navesite e'na hara eme hugante'na
mopaka'a eri haviza hunakura ome'noe. Ra Anumzamo
hunanteno vunka ha' ome huzmantenka mopazamia eri haviza
huo huno hige'na e'noe. **26** Hagi Hilkiia nemofo Eliakimi'ma,
Sebna'ma, Joasi'ma hu'za anankema nentahi'za, Asiria sondia
vahete'ma ugota hu'nea sondia ne' Rabsakena amanage
hu'za asmi'naze, tagra kagri eri'za vahe mani'nonanki Asiria
vahe'mokizmi zamagerupinti tasamio. Na'ankure tagra ana
tamagerura antahinone. Hagi Hibru tagerupintira ontasamio,
kagrama anama hnanke'za kuma keginamofo agofetu'ma
mani'naza vahe'mo'za hanana nanekea antahigahaze hu'za
hu'naze. **27** Hianagi ana sondia vahete kva ne'mo'a amanage
huno zamasami'ne, Kvani'amo'ma hunantege'na e'noana
tamagri 3'a nagate'ene kini tamimofontegagera ama nanekea
atreramanterge'na eri'na ome'noanki, anama kegina agofetu'ma
mani'naza vhemo'zanena amne ananke'a antahighaze.
Na'ankure ha'ma erita eme kumatmima avazagi kagisunke'za,
kegina agofetu'ma mani'naza ne'za nesazazanku huge'za
rifa'zami nene'za abire'za nenesageta, tamagranena ana zanke
hugahaze. **28** Hagi anante ana sondia vahete kva ne'mo'a
otino Hibru vahe'mokizmi zamagerupinti kezatino amanage
huno zamasami'ne, tamagra amarega tamagesa ante'neta
hankave kini ne' Asiria kini ne'mofonkea antahih! **29** Hagi
Asiria kini ne'mo'a amanage huno hu'ne, Tamagra atrenkeno

Hezekaia'a reramatga osino, agra muhara osu'neankino nagri nazampintira tamagura ovazigahie. **30** Hagi Hezekaia'ma huno Ra Anumzamo'a taza hanigeta knare huta manisunke'za Asiria vahe'mo'za Jerusalemi rankumara hara huragatere'za e'origahazanki Ra Anumzamofontega tamentinti hihoma huno tutu huramantesia kegura antahiomaho. **31** Hagi tamagra Hezekaia nanekea antahimita ha'mahu tamagesa ontahoho. Asiria kini ne'mo'a huno tamagrama natresage'nama kumatmima erisu'na, nagra amne tamatresugetma, waini hozatmifintira wainia tagita nenetma, fiki zafa ragatamia tagitma nenetma, tinkeri tamifintira tina afitma negahaze. **32** Hagi ana hutma kofta kna'afi mani'nesnage'na, nagra eme tamavre'na vu'na tamagri mopagna mopama, witi ragane waini timo'ene, bretine waini hozamo'ene, olivi zafamo'ene tumerimo'ma tusizama hu'nea mopa ome tamihanugeta ofrita umanigahaze. E'ina hu'negu Hezekaiama huno, Ra Anumzamo tagu'vazigahie huno havigema nehia kagura ontahoho. **33** Hagi mago kaziga mopare anumzamo'a vahe'a zamagu vazige'za Asiria kinia hara hu'za agaterenazafi? A'o mago kuma'mo'e huno anara osu'ne. **34** Hagi Hamati rankuma'ma, Arpati rankuma'ma, Sefarvaimi rankuma'ma, Hena rankum'ma, Iva rankuma'enema, tagrama vuta ha'ma huzmante'nonana anumza zamimo'za iga mani'ne'za zamaza osu'naze. Hagi Sameria kuma'ma ha'ma huzmante'nonana anumzazmimo'a zamagura ovazi'ne. **35** Hagi mago'a kuma'ma ha'ma huzmante'nonana anumza zamimo'a mago kumare huno zamaza hige'za hara huragateore'haze. E'ina hu'negu inankna huno Ra Anumzamo'a tamazahina tagrira hara huragatereta Jerusalemi kumara agura vazigahaze? **36** Hagi ana Asiria sondia vahete kva ne'mo'ma keagama hu'neana zamagra akohe'za

mani'ne'za keaga'arera magore hu'za kenona'a osu'naze.
Na'ankure kini ne' Hezekaia'a zamasamino, Keaga'arera mago
kea nona oshiho huno huzmante'nege'za anara hu'naze. 37
Anante kini ne'mofo nonte kva nehia ne' Hilkia nemofo Eliakimiki,
avontafe'ma kreno eri fatgoma nehia ne' Sebnaki, Asapu nemofo
Joa'ma kini ne'mo'ma ana maka'zama hiazama avompima
krenentea neki, hu'za kukenazamia tagoto tagutu hute'za kini
ne' Hezekaiantera e'za Asiria sondia vahete kva ne'mo'ma hia
nanekea eme asmi'naze.

19 Hagi Hezekaia'ma ana nanekema nentahino'a ame huno
kukena'a tagato tagatu huno asunku kukena nehuno, Ra
Anumzamofo mono nompi umarer'i'ne. 2 Hagi kini ne'mofo
nonte kva nehia ne' Eliakiminki, avontafe'ma kreno eri fatgoma
nehia ne' Sebnanki, mago'a ugagota hu'naza pristi vaheki
huno Hezekai'a huzmanteg'eza zamasunku kukena hute'za
kasnampa ne' Amosi nemofo Aisaia mani'nerega vu'naze. 3
Hagi Aisaia'ma mani'hene vute'za Hezekaia'ma hu'nea nanekea
amanage hu'za ome asami'naze, Asiria vahe'mo'za tazeri
haviza hu naneke hazageno tagira tusi tagaze higeta tusi'a
knafi mani'none. Ana hunkeno mago a'mo mofavre ante
kna'amo eraval'o hu'neanagi, hankave'a omnegeno mofavrea
ame huno'ma onteaza huno, tagira hankavetia omne'ne. 4
Hagi Asiria kini ne'mofo sondia vahete kva ne'ma huntegeno
eno Ra Anumzana kasefa huno mani'nea Anumzamofoma
huhavizama hunteankea, hago antahinegahianki nunamuna
hunka Ra Anumzana kagri Anumzamofona mago'azana
huntegahifi antahigo. Ana nehunka tagrama ofri'ma mani'hona
naga'amotagura Ra Anumzamofontega nunamuna hunka
antahigo. 5 Hagi kini ne' Hezekaia eri'za vahe'mo'zama

Aisaiante'ma azageno'a, **6** Aisaia'a amanage huno zamasami'ne,
Ra Anumzamo'a amanage hianki vuta kini ne' Hesekaiana
ome asmiho, Asiria kini ne'mofo eri'za vahe'mo'zama Nagri'ma
huhavizama hunantaza kea kagra nentahinka korora osuo. **7**
Hagi antahio! Nagra mago avamu Asiria kini nera antente'na
antahintahi'a azeri savri ha'nena, kantegati mago'a naneke
nentahino, mopa'arega ete rukrahe huno vanige'za bainati
kazinteti ahe frigahaze. **8** Hagi anante Asiria sondia vahete
kva ne' Rabsakima antahiamma, Asiria kini ne' Senakeripima
Lakisi kuma'ma atreno vuno Libna kumate vahe'ma ha'ma
ome hunezmantea nanekema nentahino'a, agra Jerusalemi
rankumara atreno vuno Asiria kini nera anantega ome ke'ne.
9 Hagi Asiria kini ne' Senakeripi'ma ha'ma nehuno antahiana,
Kusiti ne' Isipi kini ne'ma Tirhaka'ma hahuganteku ne'e hu'za
eme asami'naze. E'ina higeno Asiria kini ne'mo'a Hezekaiantega
amanage huno kea atrente'ne. **10** Amanage hutma Juda kini
ne' Hezekaiana ome asmiho, kagrama kamentintima nehana
Anumzamo'ma kasamino, kza hanugeno Asiria kini ne'mo'a hara
huganteno Jerusalemi kumara e'origahie huno'ma regavatgama
hiankegura ontahio. **11** Hagi tagra Asiria kinimotama ha'ma
huzmantona kuma'ma zamazeri havizantfama nehunana kagra ko
antahi'nane. Kagrama antahisanana nagri kumara anara osugahie
hunka nentahino? **12** Hagi korapara nagri nafahe'za, Gosani
rankuma'ma, Harani rankuma'ma, Rezefi rankumapima nemaniza
vahe'ene, Ideni vahe'ma Tel-Asa rankumate'ma nemaniza
vahe'enema ha'ma huzmante'nazana anumza zamimo'a zamaza
osu'ne. **13** Hagi Hamati rankumate kinima, Arpa kumate kinima,
Sefarvaimi kumate kinima, Hena kumate kinima, Iva rankumate
kininena menina iga mani'naze? Ana maka hago zamahe

vagaronke'za fri'naze. **14** Hagi anante Asiria kini ne' Senakeripi'ma huzmantege'za e'naza vahe'mokizmi zamazampinti, Hezekaia'a ana avona erino hampriteno, ana avona erino Ra Anumzamofo mono nompi marerino, Ra Anumzamofo avure ana avona eritareno ante'ne. **15** Ana huteno Hezekaia'a amanage huno Ra Anumzamofontega nunamuna hu'ne, Ra Anumzana Israeli vahe'mota Anumzamoka, Kagri tra'mo'a zamagekona retare'naza ankerontami amu'nompi me'ne. Kagrake ama mopafi maka vahe'mokizmi Ra Anumzana mani'nane. Kagrake monane mohanena tro hu'nane. **16** Hagi Ra Anumzamoka kagesa antenka nunamuni'a nentahinka, Ra Anumzamoka kavua antenka negenka, Asiria kini ne' Senakeripi'ma kasefa hunka mani'nana Ra Anumzamoka kagima huhavizama hiana antahi'nane. **17** Hagi tamage, Ra Anumzamoka Asiria kini vahe'mo'za rama'a vahe'ma zamahe nefri'zama, kuma'zamima eri havizama hu'nazana tagra antahi'none. **18** Hagi ana nehu'za, anama zamazeri havizama haz a vahe'mokizmi anumzazamia tevefi hanavazi'za kre'naze. Na'ankure zamagra kaza osu havi anumza zafareti'ene, havereti tro huntene'za mono hunentaza zantami Asiria vahe'mo'za anara hu'naze. **19** Hianagi kagra menina tagri Ra Anumza mani'nanku hunka Asiria kini ne'mofo azampintira tagu'vazinka taza hananke'za, ama mopafima maka kaziga mani'naza ke'za antahi'za hanazana, Ra Anumzana kagrake tamage Anumza mani'nane hu'za hugahaze. **20** Hagi anante Amosi nemofo Aisaia'a amanage huno Hezekaina kea atrente'ne, Ra Anumzana Israeli vahe'mota Anumzamo'a amanage huno hie, kagrama Asiria kini ne' Senakeripinku'ma hana nunamuna hago nagra antahi'noe. **21** Hagi Ra Anumzamo'a Asiria kini ne' Senakeripinkura amanage huno huhaviza hunte'ne. Jerusalemi

kumamo'a mago vene omase'nea mofakna hu'neankino, koroma nefresankeno'a kamage nevuno kagiza nereno, zokago ke huneganteno, agena rugahie. **22** Hagi kagra Senakeripigama huhavizama nehunka, zokago kema nehunka, kagima erisgama nehunka, kavuvgama atare'banana, izante anara hu'hoe hunka kagesa antahi'nane? E'ina'ma hu'nanana Nagra Ra Anumzana Israeli vahe'mokizmi ruotage hu'hoa Anumzamo'nare anara hu'nane. **23** Hagi kagra kato vaheka'amokizmi zamagite nanekea antanke'za Ra Anumzamo'na nagia huhaviza hu'naze. Ana higenka kagra amanage hunka kagia erisga hu'nane. Nagra karisiramini'a eri'na Lebanoni kaziga mareri agatere'nea agona morusapi vano nehue hu'nane. Ana nehu'na Lebanonia tusi'a zafa ta'hopa me'nefi ufre'na, vahe vano nosazama'afinti, zaza'ma hu'nea sida zafaramine, knarenare'ma hu'nea saipresi zafaramina antagi'na e'noe hu'nane. **24** Anage nehunka amanage hu'nane, Nagra Isipi mopafina nagiareti ana maka tintamina reho'mu nehu'na, ru vahe'mokizmi mopafina nagrani'a tinkeria kafi'na tina ne'noe hunka hu'nane. **25** Hagi Senakeripiga kagra ontahi'nane, korapa ana zana forera osu'nege'na, Nagra ru knafi huvame hunte'noa zamofo menina eriama nehu'na hankavea negamugenka, kagra hankave nentake have keginama hugagi'naza ranra kumatmina, hara huzmagaterankeno, have kegina zamimo'a fragu vaziramino mopafina hihi huno mareri'ne. **26** Hagi ana kumatmimpi vahe'mokizmi hankavea omnege'za, antahintahi hakare nehzageno tusi zamagaze hu'ne. Anama hazazamo'a mopafi tra'zamo kasefa kasefa huno marenerigeno, trazamo nomoteti hageno marenerigeno zagemo'ma rentegeno hagegema hiaza hu'naze. **27** Hianagi kagra menina inante mani'nano, inantegati ano, inantega vano nehunka, menima

krimpama ahenantanana ko antahi'na ke'na hu'noe. **28** Hagi kagrama kavufga erisga nehunka, krimpa ahenantana zamo'a Nagrite ege'na antahi'noe. E'ina hu'negu menina Nagra hosimofo agipima renentaza ani atupa eri'na kagipi antete'na, kazeri rukrahe ha'nena e'nana kantega ete vugahane. **29** Hagi Aisaia'ma Sinakeripinku'ma asamia kemo'ma tamage huno efore hanigenoma kesigura, Hezekaiana amanahu avame ke asmi'ne, meni kafufina hozafima agraragisama hagesia ne'za hamareta nenetma, anante kafufina anampinti'ma rutri hanifinti'ma hageno mrerino raga rentesia ne'za hamareta negahaze. Hianagi nampa 3 kafufina tamagra'a ne'zana krita nenetma, tamagra'a waini hoza antetma raga'a tagitma negahaze. **30** Ana nehanageno Juda nagapima ha' vahe'mo'zama ozmahage'za osi'ama mani'naza naga'mo'za ete zamagra hozafi avimzamo rafu'na atregeno mopafi uneramigeno, hageno raga renteankna hugahaze. **31** Hagi Ra Anumzana hankavenentake Anumzamo Jerusalemi kumapine, Zaioni agonafima osi'a naga'ma mani'naza nagara, ofri mani'ne'za hagegahaze. Ana nehanageno Ra Anumzamo'a hankave agu'agesa antahi'neankino, anazana huzmantegahie. **32** E'ina hu'negu Ra Anumzamo'a Asiria kini nekura amanage hu'ne, agra Jerusalemi kumapina enofreno, kevea magore huno ahetresigeno omegahie. Hanko'a erino erava'ona nosuno, kuma keginamofo tvaontera marerino ha'ma hu'zana mopa eritru huno trora osugahie. **33** Hagi Nagra Ra Anumzamo'na huama huankino, Jerusalemi rankumapina eofretfa nehuno, agrama e'nea kantega ete rukrahe huno vugahie. **34** Hagi Nagrama e'inama hanuana Nagri'ma ra nagima namisagu anara nehu'na, eri'za vaheni'a Devitima huvempama hunte'noa kegu ene anara hugahue. **35** Hagi ana kenagera Ra Anumzamofo ankeromo

Asiria sondia vahe'ma seli noma eme ki'za mani'nafi vuno, sondia vahe'zaga 185 tauseni'a zamahe fri'ne. Anama hutege'za nanterama oti'zama kazana ana kumapina maka fri'naza vahe zamavufagamoke'za avite'nege'za ke'naze. **36** Anama higeno'a Asiria kini ne' Senakeripi'a seli nonkuma'ma eme ante'zama mani'naza kumara atreno Ninive rankumate vuno umani'ne. **37** Hagi mago zupa Senakeripi'a Nisroku havi anumzama'amofo mono nompi mono hunentegeno, tare ne'mofavre'a Adramelekike Sareserikea eke bainati kazinteti eme ahe friteke, freke Ararati moparega umanikeno, nemofo Esarhadoni'a nefa nona erino kinia mani'ne.

20 Hagi ana knafina Hezekai'a kri erino fri'za hu'ne. Ana higeno kasnampa ne' Amosi nemofo Aisaia'a vuno ome negeno amanage huno asami'ne, Ra Anumzamo'a kagrikura amanage hu'ne, kagra krika'afintira onkanamrenka frisanku, mika zanka'a erinfatgo huo. **2** Hagi Hezekai'ma anankema nentahino'a avugosa rukrahe huno noma hunaragi asantega hunenteno, Ra Anumzamofontega nunamuna amanage huno hu'ne, **3** Ra Anumzamoka muse hugantoanki, maka zupama Kagri kema ruotagre'nama, maka nagu'reti'ma hu'na Kagri kavure'ma knare avu'ava'ma hu'noa zankura Kagra kagesa antahinamio. Anage nehuno Hezeikaia'a krafage huno tusi zavite'ne. **4** Hagi Aisaia'a kinimofo nona atreno meg'i'a atirami'neanagi, kumara atreno ovu'negeno Ra Anumzamo'a ete nanekea amanage huno asmi'ne, **5** ete rukrahe hunka vahenimofo kva ne' Hezekai'ante vunka, Ra Anumzana negageho Deviti Anumzamo'a amanage hie hunka ome asamio, kagrama hana nunamunka'a hago antahi'na, zavi'ma atana kavunura hago ke'hoe. E'ina hu'neanki'na Nagra kazeri kanamresugenka, tagufa

zage kna manitenka, marerinka Ra Anumzamo'na mono nompi monora ome hunantegahane. 6 Hagi Nagra knaka'a erinte za'za ha'nena 15ni'a kafu manigahane. Ana nehu'na Asiria kini nera atra'nena kagrira hara hugagetereno Jerusalemi kumara e'origahie. Hagi Jerusalemi rankuma'ma kegavama hanuana, Nagri'ma ra nagima namisagu anara nehu'na, eri'za vaheni'a Devitima huvempama hunte'noa kegu'ene anara hugahue. 7 Hagi anagema hutegen'o'a, Aisaia'a amanage huno kini ne'mofo eri'za vahera zamasami'ne, tamagra vutma hagagema hu'nesia fiki zafa raga ome erita echo, hige'za ome eri'za ete'za Hezekaia usge namuntera regripe'za rekamrentazageno namu'amo'a tegani'ne. 8 Anante Hezekaia'a amanage huno Aisaiana antahige'ne, Ra Anumzamo'a nagriku'ma huno kazeri kanamresugenka tagufa zage kna manitenka, marerinka mono noma'afima mono'ma ome hunantegahanema hu'neana ina avame'za nagritera eriforera hanige'na nege'na, Ra Anumzamo'a tamage hu'ne hu'na hugahue? 9 Higeno Aisaia'a kenona'a amanage huno asami'ne, Ra Anumzamo'ma hu'nea naneke'ama eri hankavema atinakura, ama avame'za kaveri hugahie. Nonte'ma mareneri'za latare'ma zagemo'ma rentesigeno amema'amo'ma 10ni'a zupa renakereno ana latarera avugatira vanigu kave'nesifi, 10ni'a zupa renakereno amefitira e'niegu kavenesie? 10 Higeno Hezekai'a amanage hu'ne, Amne amuhoa osu'neankino zagemo'ma rentesigeno'a latamofo amema'amo'a 10ni'a zupa renekereno avugatira vugahie. E'ina hu'neanagi atregeno ana latamofo amema'amo'a ame huno 10ni'a zupa amefira eno. 11 Hagi anante kasnampa ne' Aisaia'a Ra Anumzamofontega hanavetino nunamuna higeno, Ahasi'ma korapa tro'ma hu'nea latarera Ra Anumzamo'a higeno zagea rentegeno amema'amo'a ame huno

10ni'a zupa amefi urami'ne. **12** Hagi ana knafina Baladani nemofo Merodak-Baladani Babiloni kini nemo'a, Hezekaia'ma krima eri'nea ke'ma nentahino'a, mago musezane avone krenezamino eriza vahe'a huzmantege'za Hezekaia eme kenaku e'naze. **13** Hagi ana vahe'mo'za Hezekaia'ma eme ketageno'a, zamavareno vuno fenoma nentea nompi vuno, silvama golima, mnanentake zantamine, knare zantfama hu'nea masaventamima, ha'ma hu'zantaminena zamaveri hu'ne. Hagi kini nompima me'nea zantamine, ana maka mopa'afima me'nea zantamina magore huno erifra okino ana maka zamaveri huvagare'ne. **14** Hagi anante kasnampa ne' Aisaia'a Hezekaiante eno amanage huno antahige'ne, Amama e'naza vahera igati e'ne'za, zamagra na'ane hu'za eme nehaze? Anage higeno Hezekai'a asamino, Zamagra Babilonia afete moparegati e'naze hu'ne. **15** Hagi Aisaia'a antahigeno, Zamagra naza kagri nompima me'nea zana ke'naze? Anage higeno Hezekai'a huno, Zagoma nentoa nompima ana maka zantamima me'nea zantamina magore hu'na erifrara oki'na, ana maka zamaveri huvagare'noe. **16** Higeno anante Aisaia'a amanage huno Hezekaiiana asami'ne, Ra Anumzamofonkea kagesa antenka antahio. **17** Mago kna ne'eankino ana knama esigeno'a, kagri nompima ana maka fenoma me'nea fenone, kafahe'zama korapa eritruma hu'naza fenozanena, magore hu'za otre'za ana maka eme erivagare'za Babiloni moparega vugahaze huno Ra Anumzamo'a hie. **18** Ana nehina kagrama kasezamante'nana ne'mofavre nagara mago'a eme zamavare'za vu'za, zamagonknaza ome harisage'za, Babiloni kini ne'mofo nompi eri'za vahe umanigahaze. **19** Hagi anagema higeno'a Hezekaia'a amanage huno Aisaiana asami'ne, Kagrama Ra Anumzamofo nanekema hanana knare hu'ne.

Hezekaia'ma e'inahu kema hiana, nagrama kinima manisua knafina hara osuta, mani fru huta manigahune huno nentahino anankea hu'ne. **20** Hagi Hezekaia'ma kinima mani'nea knafima fore'ma hu'nea zantamine, agrama mago'azama hu'nea zamofo agenkene, tiru'ma henkaniteno mopama kafino agu'afima tima avreno Jerusalemi rankumapima e'nea zamofo agenkenena, ana maka Juda vahe kini vahe'mokizmi zamagenkema krentaza avontafepi krente'naze. **21** Hagi henka Hezekai'ama fri'ge'za afahe'mokizmima asenezmante'nazafi asente'naze. Ana higeno nemofo Manase agri nona erino kinia mani'ne.

21 Hagi Manase'a 12fu'a kafu nehuno, agafa huno kinia mani'ne. Ana huteno Jerusalemi rankumate mani'neno 55'a kafufi Juda vahera kegava hu'ne. Nerera agi'a Hefziba'e. **2** Hagi Manase'a Ra Anumzamofo avurera havi avu'avaza tro hu'ne. Ko'ma ana mopafima mani'naza vahe'ma Ra Anumzamo'ma Israeli vahe zamavufima zamahe natitre'nea vahe'mokizmi kasrino zamagote zamavu zamavara zamage anteno hu'ne. **3** Hagi havi anumzante'ma mono'ma hunentaza kumatmima nefi' Hezekai'ama eri havizama huneana, ete eri kasefa huno tro huvagare'ne. Hagi Israeli kini ne' Ahapu hu'neaza huno, havi anumza Balinte'ma kresramnama vu itaramina tro nehuno, havi anumza Asera amema'a zafare antreno trohu'ne. Ana nehuno monafi me'nea hanafitaminte rena reno monora huzmante'ne. **4** Hianagi Ra Anumzamo'ma huno, Jerusalemi kumapina Nagri nagimoke me'nesige'za Nagia erisga hugahaze huno hu'neanagi, Manase'a Ra Anumzamofo mono nompina havi anumzante'ma mono'ma huntasaza itaramina tro hunte'ne. **5** Ana nehuno Manase'a Ra Anumzamofo mono nompima, tarefima atruma nehaza kumapina, monafi hanafitaminte mono'ma huntasaza

itaramina tro hunte'ne. 6 Hagi Manase'a ne'mofavre'a aheno tevefi havi anumzamofontega kresramna nevuno, antahintahima erikura, fri vahe hankro'enema nanekema nehaza vahete nevuno, henkama fore'ma haniazanku havi zamema nentaza vahete nevuno, ha' avu'atgaza nehaza vahete'ma viazamo'a, Ra Anumzamofo avurera havizantfa higeno, Ra Anumzamo'a tusi arimpa ahente'ne. 7 Hagi Ra Anumzamo'ma Devitine ne'mofo Solomonikiznima zanasamino, ana maka Israeli naga nofipima me'nea kumatamimpintira, ama mono none Jerusale kuma'enena huhamprintoankino, Nagri nagimo me'nesige'za maka zupa monora hunantegahazema hu'nea mono nompina, Manase'a Asera havi anumzamofo amema'ama antreno'ma tro'ma hunte'neana erino ome ante'ne. 8 Hagi Ra Anumzamo'a huno, Tamagrama tamagu'areti huta nagri kema nentahita, eri'za vaheni'a Moses'e'ma tami'nea kasegema amage'ma antesazana, Nagra tamafahe'ima huvempama hu'na zami'nogeta menima mani'naza mopafintira tamazeri otregahue. 9 Hianagi Juda vahe'mo'za kea ontahi'naze. Ana hazageno Manase'a zamavareno havi kante vige'za, ko'ma ana mopafima mani'naza vahe'ma, negazageno Ra Anumzamo'ma zamahenati atre'nea vahe'mo'zama hu'naza havi zamavu zamavara zamagtere'za tusi kumi hu'naze. 10 Ana hazageno Ra Anumzamo'a eri'za vahe'a kasnampa vahe zamagipi huvazino amanage huno zamasami'ne, 11 Juda vahe kini ne' Manase'a, ko'ma ana mopafima mani'naza Amori vahe'mo'zama hu'naza havi zamavu zamavara zamagatereno kasrino zamagote avu'avaza nehuno, Juda vahera zamatu fege'za, agrama tro'ma hunte'nea havi anumzante monora hunte'za kumira hu'naze. 12 E'ina hu'negu Ra Anumzana Israeli vahe'mokizmi Anumzamo'a amanage hu'ne,

Nagra Jerusalemi vahe'ene Juda vahera mago knaza zami'na zamazeri haviza ha'nena, ana ke'ma ru vahe'mo'zama antahisuza koro nehu'za antahintahi hakare hugahaze. **13** Hagi Nagra Sameria kumate'ene, Ahapu nagate'enema hu'noaza hu'na, Jerusalemi kumara eri haviza hanugeno, mago vahe'mo'ma zuompama sese huteno eri rukrahe hu'negeno hagegema hiaza hugahie. **14** Hagi anampima osi'a naga'ma nagri nagarema hu'za manisaza naga'enena namefi hunezami'na, ha' vahe zamazampi zamatre'nuge'za, ha' vahe'zamimo'za ha' huzmante'za zamazeri haviza nehu'za, maka zazamia erigahaze. **15** Na'ankure zamafahe'za Isipiti'ma etiramiza aza knaret'i'ma hu'naza havi zamavu zamava zamo'a meme eno ama knarera egeta, tamagranena ana havi avu'avazanke nagri navufi hazageno, Nagrira tusi narimpa ahe'ne. **16** Hagi Manase'ma havi avu'avaza nehuno, Juda vahe'ma zamatu fege'za Ra Anumzamofo avure'ma, agrama hia kumi'ma haza agofetura, ru'ene ke'zamima omne vahe'ma Jerusalemi kumapina nemaniza vahera, mago kazigati agafa huteno vuno mago kazigama vigeno'a, zamaheno korana eri tagitre'ne. **17** Hagi Manase'ma kinima mani'nea knafima fore'ma hu'nea zantamine, ana maka zama agrama tro'ma hu'nea zantamine, kumi'ma hu'nea zamofo agenkenena, Juda vahe kinimofo agenkema krenentaza avontafepi krente'naze. **18** Hagi anante Manase'a frige'za kinimofo nonkumapi, Uza hoze nehaza hozafi asente'naze. Ana hazageno nemofo ne' Amoni nefi nona erino kinia mani'ne. **19** Hagi Amoni'a 22'a kafu nehuno agafa huno kinia fore huteno, Jerusalemi ran kumate mani'neno tare kafufi Juda vahera kegava hu'ne. Nerera'a Haruzi mofa Mesulemetikino, Jotba ran kumateti a' mani'ne. **20** Hagi Amoni'enena Ra Anumzamofo avurera, nefi Manase'ma

hu'neaza huno, havi avu'avaza hu'ne. **21** Amoni'a nef'a'ma
hu'nea zana ana maka nehuno, nef'a'ma mono'ma hunte'nea
havi anumzantaminte rena reno monora huzmante'ne. **22** Agra
Ra Anumzana afahe'mokizmi Anumzana amefi hunemino, Ra
Anumzamofo avesi'zana amagera onte'ne. **23** Anante mago
zupa Amonina eri'za vahe'amo'za, atru hu'za ahe frisaza kanku
hake'za erifore hute'za, kini nompi mani'nege'za ome ahe fri'naze.
24 Hianagi atru hu'za kema retro'ma hute'za ana kini ne'ma ahe
fri'naza vahera, Juda vahe'mo'za ana maka zamahe fri'naze.
Ana hute'za Amoni nemofo Josaiana kini azeri oti'naze. **25** Hagi
Amoni'ma kinima mani'nea knafima fore'ma hu'nea zantamine,
mago'a zama tro'ma hu'nea zantamimofo agenkea, Juda vahe
kinimofo zamagenkema krenentaza avontafeperi krente'naze. **26**
Hagi Amonima asente'nazana, Uza hoze hu'za nehaza hozafi
agri'a matipi asente'haze. Ana hutazageno nemofo Josaia nef'a
nona erino Juda vahe kinia mani'ne.

22 Hanki Josaia'a 8'a kafu nehuno, Juda vahe kini efore
huteno, 31ni'a kafufi Jerusalemi rankumatera kinia mani'ne.
Nerera'a Adaia mofa, Jedidakino Bozkati rankumateti a' mani'ne.
2 Hagi Josaia'a Ra Anumzamofo avurera fatgo avu'avaza
nehuno, negeho Deviti'ma Ra Anumzamofo nanekema amage'ma
ante'neaza huno, avua keganti kegma osuno, Ra Anumzamofo
nankeea ana maka amage ante'ne. **3** Hagi Josaia'ma Juda vahe
kinima 18ni'a kafuma nemanino'a, avontafe negrea ne' Azaria
nemofo, Mesulamu negeho Safanina, Ra Anumzamofo mono
nontega vinogu anage huno hunte'ne, **4** Kagra vunka ugagota
pristi ne' Hilkiaina ome asamigeno, Ra Anumzamofo mono no
kafante'ma kvama nehaza vahe'mo'zama mono no kahanteti'ma
zonegiza zagoa hamprino. **5** Hagi Hilkiaina asamigeno ana

zagoa erino, Ra Anumzamofo mono nonte'ma eri'zama eneriza
vahete kva vahe zamino. Anama hani'ge'za ana vahe'mo'za
eri'za vahera miza senezmantesage'za Ra Anumzamofo mono
noma havizama hu'nenia zana eri fatgo hugahaze. **6** Hagi
kamunta vahe'ene kva vahe'zamine, havereti'ma noma eri
fatgoma hu'za negiza vahe'ene, havema taga hu'za noma
eri fatgohu eri'zama erisaza vahera, ana zagonu mi'zana
huzmantegahaze. Ana nehu'za Ra Anumzamofo mono noma
eri fatgo hu'za kisaza zafane, ko'ma taga huno eri pehe hunte
haveramina ana zagoretike mizasegahaze. **7** Hagi ana zagoma
zamisaza kva vahera, inankna hutma zagoa netraze hutma
zamantahi onkeho. Na'ankure zamagra fatgo hu'za eri'za eri
vahe mani'naze. **8** Hagi anankema asamitegeno'a, ugagota pristi
ne' Hilkia'a amanage huno avontafe'ma negrea ne' Safanina
asami'ne, Nagra Ra Anumzamofo mono nompinti kasegema
me'nea avontafera kena eri'noe, huno nehuno ana avontafera
Safanina amigeno hampri'ne. **9** Anama huteno'a avontafe'ma
negrea ne' Safani'a vuno kini ne' Josaiana amanage huno
ome asami'ne, Eri'za vahekamo'za ana zagoa eri vgrare'za
Ra Anumzamofo mono noma eri fatgo hu erizante'ma kegava
hu'naza kva vahe zamazampi ante'naze. **10** Anage nehuno
avontafe'ma negrea ne' Safani'a mago'ane kini nera amanage
huno asami'ne, Pristi ne' Hilkia'a mago avontafe namige'na eri'na
e'noe, nehuno ana avontafera kini ne'mofo avuga hampri'ne.
11 Hagi kini ne' Josaia'ma kasege avontafepinti nanekema
nentahino'a, zaza kukena'a tagato tagutu hu'ne. **12** Hagi anante
Pristi ne' Hilkiama, Safani nemofo Ahikamuma, Makaia nemofo
Akborima, avontafe'ma negrea ne' Safanine, kini ne'mofo eri'za
ne' Aisaianena kehige'za azageno hankave nanekea amanage

huno huzmante'ne. **13** Ra Anumzamo'a nagri'ene ana maka Juda vahe'motagura tusi arimpa aherante'negahie. Na'ankure tagrira tagehe'za ama kasege avontafepima tagriku'ma huno krente'nea nanekea amagera onte'naze. E'ina hu'negu tamagra vutma Ra Anumzamofontega nunamu hinkeno, maka kasegemo hu'nea kante amage anteta na'a hugahumpi tasamino. **14** Hagi pristi ne' Hilkia'ma, Ahikamu'ma, Akbori'ma, Safani'ene Asaia'ma hu'za, kinimofo kukenama nentaza nonte kva nehia ne' Harhasi negeho Tikva nemofo Salumu nenaro kasnampa a' Hulda'ma mani'nerega, kenaku Jerusalemi kumamofona mago kaziga vu'naze. **15** Anante Hulda'a amanage huno zamasami'ne, Ra Anumzana Israeli vahe'mota Anumzamo'a amanage huno hie. Tamagri'ma huramantegetama nagrite'ma e'naza nera amanage hutma ome asamiho, **16** Ra Anumzamo'a huno, Nagra ama avontafepima kre'naza nanekema Juda kini ne'mo'ma hampri'nea nanekea, ana maka amage ante'na, amama mani'naza kuma'ene, vahe'enena tusi'a knazanteti zamazeri havizantfa hugahue. **17** Na'ankure zamagra Juda vahe'mo'za Nagrira zamefi hunami'za, havi anumzante monora hunente'za, zamagrama zamazanteti tro hu'naza zantaminte mnanentake'za kre mna vunte'naze. Anama hazazamo nazeri narimpa hazankino, ana narimpa ahezamo'a vagaoregahie. **18** Hagi Ra Anumzamofo antahintahigu'ma huramantegetama e'naza Juda kini nera, avontafepinti nanekema hamparizageno'ma antahi'nea zamofo kaziga, Israeli vahe Ra Anumzamo'a amanage hie hutma ome asamiho. **19** Nagra amama mani'naza kuma'ene vahe'enena, knazanteti zamazeri haviza nehu'na, kazusi huntegahuema hu'noa nanekema nentahinka, Ra Anumzamo'na navure'ma kavufga anteneraminka, zaza kukenakama tagato tagutu nehunka

zavi'ma ate'nana kavunura tamagerfa hu'na hago ke'noe huno
Ra Anumzamo'a hu'ne. 20 E'ina hu'negu kagrira katrenugenka
kafahe'zama nehzaza hunka frigahane. Anama hananke'za
karimpa frune asegentesnagenka, ana knazama Juda vahe'ma
zamisua knazana kagra onkegahane. Hagi ana kasnampa
a'mo'ma anankema hutege'za, anankea eri'za kini nete vu'naze.

23 Hagi anante kini ne' Josaia'a Jerusalemiti'ene Juda
kumati'ene ana maka ranra vahetmina kehige'za eme atru
hu'naze. 2 Ana hutazageno, ana maka Juda vahe'ma, Jerusalemi
kumateti vahe'ma, ana maka pristi vahe'ene kasnampa
vahe'tamine, ana maka agima me'nea vaheteti vuno agima
omne vahete vige'za, Josaia'ene Ra Anumzamofo mono nompi
marerite'za, huhagerafi huvempage me'nea avontafe'ma Ra
Anumzamofo mono nompinti'ma ke'za erifore'ma hu'naza
avontafepinti nanekea Josaia'a nehamprige'za antahi'naze.
3 Anante kini ne'mo'a noma vazisgama hu zafa tavaonte
otiheno, hugagerafi huvempagea Ra Anumzamofo avuga huno,
tagra kasegene trake'anena maka tagu'areti huta amagera
antegahune hige'za, ana maka vahe'mo'za hu'za, izo tagra
ana hugahune hu'za huvempa hu'naze. 4 Anante kini ne'
Josaia'a ugagota pristi ne' Hilkiane, agri agoragama mani'naza
pristi vahe'ene, mono no kafante'ma kvama nehaza vahera
huzmanteg'eza, Ra Anumzamofo mono nompintira, Bali havi
anumzane, Asera havi anumzane, monafi hanafitaminte'enema
mono'ma hunentaza zantamina, ana maka eritre vagare'naze.
Ana hutazageno kini ne'mo'a huzmanteg'eza anama eritraza
zantamina eri'za rankumamofo meg'i'a Kidroni agupofi teve
ome hanavazi'za kre'naze. Anama hute'za ana zantamimofo
osa'a eri'za Beteli rankumate vu'naze 5 Hagi kotama

mani'za enaza Juda kini vahe'mo'zama huhampri zmantage'za mani'ne'za, Jerusalemine Juda kumapine, tvaozanire'ma me'nea kumatamimpima havi anumzante mono'ma hunte kuma'ma tro'ma hunte'naza kumapinema, havi anumzante kresramna nevu'za, Bali havi anumzante'ene, ikante'ene zagere'ene maka monafi hanafitaminte'enema mnanentake'zama kretnama nevaza pristi vahera, Josaia'a zamazeri atre vagare'ne. 6 Ana nehuno Asera havi anumzamofo amema'ama zafare'ma antre'za tro hute'za, Ra Anumzamofo mono nompima ante'nazana, Josaia'a eritrege'za eri'za Jerusalemi kumamofo meg'i'a Kidroni agupofi ome tevefi krete'za, osa'a eri'za knazageno osi osi hutege'za zamajima omne vahe'ma asenezmantaza matipi vu'za ome rupopo hutre'naze. 7 Ana nehuno Ra Anumzamofo mono nompima hunaragintene'za vene'nemo'za monko'zama nehaza nona Josaia'a tapagehu atre'ne. Ana nona Asera havi anumzamofo tvaravema tro'ma nehaza a'nemema nemaniza tvaonte me'ne. 8 Hagi ana maka Judama me'nea ranra kumapintira, pristi vahera Josai'a kehige'za Jerusalemi azageno, ana kumapima havi anumzante'ma kresramnama nevaza kumatmina eri haviza nehuno, noti kaziga Geba ran kumateti agafa huteno vuno Sauti kaziga Beseba ran kumate uramigeno, ana kumatmimpima havi anumzante'ma Kresramanama nevaza kumatmina vahe zamavufi eri pagehena hu'ne. Ana nehuno Jerusalemi rankumamofo gavana ne' Josua kafa tva'onte'ma hoga kaziga me'nege'za havi anumzante'ma Kresramanama nevaza itaramineni eri haviza hutre'ne. 9 Hagi kini ne'mo'ma kehige'zama e'naza pristi vahe'mo'za zo'ore bretima mago'a pristi vahe'mo'zama nazafintira amne ne'naze. Hianagi zamagra Ra Anumzamofonte Kresramana vunte itama Jerusalema me'nea itarera kresramna

ovu'naze. **10** Hagi havi anumzante'ma mono'ma hunentaza kuma'ma, Hinomu agupo tvaonte Tofetima me'neana, vahe zamavufi Josaia'a eri haviza higeno pehenage hu'ne. Ana higeno mago'mo'e huno ana kumatera Moleki havi anumzantega ne' mofavre'a kresramna vuntegara osu'ne. **11** Hagi kotama mani'za e'naza Juda kini vahe'mo'za mago'a hosi afu'ma havi anumza zage anumzamofontegama ami'naza hosirami amema'ma, Ra Anumzamofo mono no kafa tvaonte atruma nehaza kumapi ante'nazana Josaia'a eri atre'ne. Ana hosi afutamima ante'nazana, kini nemofo mago eri'za ne' Natanmeleki no tvaonte ante'naze. Hagi ana karisiramima zage anumzamofoma ami'naza karisia Josaia'a erino tevefi hanavazino kre'ne. **12** Hagi ko'ma maniza e'naza Juda kini vahe'mo'zama, mago kresramna vu itama trohu'za Ahasi nomofo agofetu'ma ante'nazana, Josaia'a eri netreno, Ra Anumzamofo mono nompima tare kuma'ma me'nege'za atruma nehazafima, Manase'ma kresramna vu itararema tro'ma hunte'neana eritreno ru tamana tamanu huteno, erino Kidroni agupofi ome atre'ne. **13** Anama huteno'a Jerusalemi kumamofo zage hanati kaziga, Olivi agonamofo sauti kazigama, agoteno havizama hu'nea Saidoni vahe anumza Astoretine, Moapu vahe havi anumza Kemosine, Amoni vahe havi anumzama Molekinte enema kresramna vu itaramima, kini ne' Solomoni'ma tro'ma hunte'neana Josaia'a eri haviza hu'ne. **14** Hagi have retru re'neza Asera havi anumzante mono'ma hunentaza havea erino rutamna tamanu hunetreno, zafare antre'za Asera havi anumzamofo amema'ama trohu'za retruma re'nazana akasinetreno, ana zafama akasima atraza kerifina, Josaia'a vahe zaferinareti antevite'ne. **15** Hagi ko'ma Nebati nemofo Jeroboamu'ma, Beteli ran kumate'ma havi anumzante'ma

mono'ma hunte kuma'ene Kresramanama vu itama tro'ma
hunte'neno, mono'ma hunenteno Israeli vahe zamatufege'za
kumi hu'naza kumatmina ana zanke huno, Josaia'a eri haviza
hu'ne. Ana nehuno havi anumzante'ma mono'ma hunentaza
kumate'ma tro'ma hunte'naza zantamina erino tevefi kregeno
tetegen, osa'a erino kane osi osi hu'ne. Ana nehuno Asera havi
anumzamofo amema'ama antre'zama tro hunte'nazana erino
tevefi anazanke huno kre'ne. **16** Hagi Josaia'a anante oti'neno
osi agonamofo asoparega keana, vahe'ma asenezmantaza
havega me'negeno negeno, vahe huzmantenge'za vu'za vahe
zaferinaramina anampinti ome eri'za azageno, Jeroboamu'ma
tro'ma hunte'nea itare ana zaferinaramina kreno ana ita, vahe
zamavurera eri haviza hu'ne. Hagi e'i anazama Josaia'ma
tro'ma hu'nea zamo'a, Ra Anumzamofo eri'za ne'mo'ma korapa
kasnampa ke hunte'nea zamo nena raga'are'ne. **17** Hagi
anazama Josaia'ma huteno'a mago mati me'negeno negeno
amanage hu'ne, Ama matira iza matire? Anagema hige'za
Beteli rankumate vahe'mo'za asamiza, Juda kumateti mago
kasnampa ne' eno, menima ama itare'ma tro'ma hana zamofonku,
kasnampa kema hunte'nea ne'mofo mati me'ne. **18** Hagi
anante Josaia'a amanage huno zamasami'ne, Mago vahe'mo'e
huno zaferina'a avako osina atrenkeno meno. Anagema
hige'za ana kasnampa ne'mofo zaferinane, mago'a Sameria
kumateti kasnampa vahe zaferinanena atrazageno me'ne.
19 Hagi Israeli kini vahe'mo'zama Sameriamma me'nea ranra
kumatmimpima, havi anumzante'ma mono'ma hunentazageno,
Ra Anumzamo'ma rimpama ahezamante'nea kumatmina, Beteli
rankumate'ma hiazza huno Josaia'a eri haviza hu'ne. **20** Hagi
havi anumzante'ma mono'ma hunentaza kumapima eri'zama

eneri'za pristi vahera, Josaia'a ana maka zamaheno kresramna vu itazamire nenteno, fri vahe zaferina zamagofetu anteno teve hanavazino kre'ne. Anama huteno'a Josaia'a ete Jerusale kumate vu'ne. **21** Hagi anante kini ne' Josaia'a amanage huno maka vahera zamasami'ne, Ama hugagerafi huvempage avontafepima hu'nea kante anteta Ra Anumzamo'ma Israeli vahem'a ozmahe zamagtere'nea knagura antahimita ne'zana kreta neneta musena huntaho. **22** Hagi kema refko'ma hu kva vahem'o'zama kegavama huzmante'nareti'ma eno Jerusalemine, Juda kini vahem'o'zama kvama huzmante'nare'ma egeno'a, Ra Anumzamo'ma Israeli vahem'a ozmaheno zamagtere'nea zankura antahimi'za magore hu'za ne'zana kre'za nene'za musena huonte'naze. **23** Hianagi Josaia'ma 18ni'a kafuma kinima maninege'za, ana maka vahem'o'za Jerusalemi kumate e'za, Israeli vahem'a Ra Anumzamo'ma ozamahe zamagtere'nea zankura antahimi'za ne'zana kre'za nene'za, Ra Anumzamofona musena hunte'naze. **24** Hagi fri vahe hankro'enema keaga nehaza vahem'ene, havi avamu'mofo eri'zama e'neriza vahem'ene, nozamifima havi anumzama tro hunte'neza mono hunentaza zantamine, havi anumzamofo amema'aramine, maka agotega zantamima Jerusalemi kumate'ene Juda kumapinema me'neana, Josaia'a ana zanke huno ana maka eritre vagare'ne. E'inama hu'neana pristi ne' Hilki'a'ma Ra Anumzamofo mono nompinti'ma keno eri'nea avontafepima me'nea kasege avaririno anara hu'ne. **25** Hagi Josaia'ma frige'za ko'ma mani'za e'naza kini vahem'ene henkama fore'ma hu'naza kini vahem'o'za Josaia'ma maka agu'reti'ene, agu'amententi'ene, hankave'reti'enema huno Ra Anumzamo'ma Mosesema ami'nea kasegefima me'nea nanekema amage'ma ante fatgoma hu'neazana huno, mago

kinimo'a anara osu'naze. **26** Hianagi ko'ma Manase'ma havi avu'avazama nehuno Ra Anumzamofoma azeri arimpama ahogeno'ma Juda vahe'ma tusi arimpama ahezamante'nea arimpa ahe'zamo'a vaga'ore'ne. **27** Hagi Ra Anumzamo'a amanage hu'ne, Nagra ko'ma Israeli vahe'ma hu'noaza hu'na, Juda vahera mopa zamifintira zamazeri atresuge'za afete mopare vugahaze. Ana nehu'na Jerusalemi kuma'ma Nagri su'ane hu'nama huhampari'noa kumara namefi hunemi'na, Nagri nagi me'nesigetama monora hunantegahazema hu'noa mono nonena, nagra namefi humigahue. **28** Hagi mago'a zama Josaia'ma kini mani'nea knafima efore'ma hu'nea zantamine, agrama tro'ma hu'nea zantamimofo agenkea, Juda kini vahe'mokizmi zamagi zamagenkema krenentaza avontafepi krente'naze. **29** Hagi Josaia'ma kinima mani'nea knafina, Isipi kini ne' Fero Niko'a sondia vahe zaga'a zamavareno, Yufretisi tintega Asiria kini ne' ome aza hunaku vu'ne. Anama nehigeno'a, kini ne' Josaia'a avatga huno ha' huntoku sondia vahe'a zamavareno nevigeno, Isipi kini ne' Fero Niko'a Megido kumate eme tutagiha hunteno Josaiana ahe fri'ne. **30** Ana hutazage'za Josaiana eri'za vahe'amo'za Megidotira avufga'a karisifi erinte'za vu'za Jerusalemi kumapi, agri'a matipi ome asente'naze. Hagi ana kumapi, Josaia nemofo Jehoahasina, avre'za masave frentete'za huhamprintazageno nefa nona erino kinia mani'ne. **31** Hagi Jehoahasia 23'a kafu nehuno kini efore huno, Jerusalemi kumatera 3'a ikampi kinia mani'ne. Nerera'a Libna ran kumateti, Jeremaia mofakino agi'a Hamutali'e. **32** Hagi agehe'zama hu'nazaza huno Jehoahasi'a Ra Anumzamofo avurera havi avu'avaza hu'ne. **33** Hagi Isipi kini ne' Fero Niko'a, Jehoahasina azeriteno Hamati mopafina Ribla kumate kina hunte'ne. Ana

higeno Jehoahasi'a Jerusalemi kumatera mago'ene kinia omani'ne. Ana higeno Isipi kini ne Fero Niko'a Juda vahekura huno, silvama kna'amo'ma 3,400 kiloma hu'nesiane, golima kna'amo'ma 34 kiloma hu'nesia namigahaze hu'ne. **34** Hagi Isipi kini ne' Fero Niko'a, Josaiana mago ne' mofavre'a, Eliakimina nefä no erino Juda vahe kinia maninogu azeri o'netino, agi'a Jehoiakimi'e huno ru agi antemi'ne. Hianagi Jehoahasina avreno Isipi mopare umani'negeno anantega fri'ne. **35** Hagi Isipi kini ne' Fero Niko'ma huhampari'nea silvane, golinema Jehoiakimi'ma aminakura, vahepinti hige'za mani'naza avamente takisi zagoa eme amitere hazageno, erino Isipi kini netega atregeno vu'ne. **36** Hagi Jehoakimina kafu'amo'a 25fu nehigeno agafa huno kinia mani'ne. Ana huteno Jerusalemi mani'neno 11ni'a kafufi Juda vahera kegava hu'ne. Nerera'a Ruma ran kumateti, Pedaia mofakino agi'a Sebida'e. **37** Hagi agehezama hu'nazaza huno Jehoakimi'a Ra Anumzamofo avurera havi avu'avaza hu'ne.

24 Hagi Jehoiakimi'ma Juda vahe kinima mani'nea knafina, Babiloni kini ne' Nebukatnesa'a Juda vahera ha' eme huzmagatere'ne. Ana huteno Jehoiakimina atregeno agri agorga mani'ne. Hianagi 3'a kafuma evutegeno'a Jehoiakimina antahintahi'amo'a rukrahe higeno Nebukatnesana ha' renteno agri agorga omani'ne. **2** Hagi anama higeno'a Babiloni vahe'ma, Aramia vahe'ma, Moapu vahe'ma, Amoni vahe'mokizmia Ra Anumzamo'a huzmanteg'e'za e'za, Juda vahera eme zamazeri haviza hu'naze. E'ina'ma hu'nazana Ra Anumzamo'a eri'za vahe'a kasnampa vahe zamagipi huvazige'za kore ke'ma huama hu'naza kemofo nena'a efore hu'ne. **3** Tamagerfa huno Ra Anumzamo huzmanteg'e'za e'za Juda vahera zamazeri havizana hu'naze. Na'ankure Manase'ma hu'nea kumi ku'ene ana maka

havizama hu'nea zanku Ra Anumzamo'a avugatira zamazeri
atre'naku anara hu'ne. 4 Hagi hazenkezmi omane vahe'ma
Manase'ma zamaheno korazamima eri tagitregeno Jerusalemi
kumapima avi'mate'nea zanku Ra Anumzamo'a nentahino,
Manasena kumi'a atreonte'ne. 5 Hagi Jehoiakimi'ma kinima
mani'nea knafima fore'ma hu'nea zantamine, agrama tro'ma
hu'nea zantamimofo agenkea, Juda vahe kinimofo zamagenkema
krenentaza avontafepi krente'naze. 6 Hagi Jehoiakimi'a frigeno
afahe'mofoma asezmant'e'naza matipi asentetageno, nemofo ne'
Jehoiakini'a nefu nona erino kinia mani'ne. 7 Hagi ana knafina
Isipi kini ne'mo'ma kegavama hu'nea kumatmina, ana mika
Babiloni kini ne'mo kegava higeno, Isipi kini ne'mo'ma eno Juda
vahe'ma ha'ma hunezmanteazana osu'ne. Ana higeno Babiloni
kini ne'mo'ma kegava hu'nea mopamofo agema'amo'a, Isipi
tinteti agafa huteno vuno, Yufretisi rantinte uhanati'ne. 8 Hagi
Jehoiakini'a 18ni'a kafu nehuno kinia efore huno Jerusalemi
kumatera 3'a ikampi Juda vahe kini manino kegava hu'ne.
Nerera'a Jerusale kumateti Elnatani mofakino, agi'a Nehusta'e.
9 Hagi Jehoiakini'a nefu'ma hu'neaza huno Ra Anumzamofo
avurera maka havi avu'avaza hu'ne. 10 Hagi Jehoiakini'ma kini
mani'nea knafina, Babiloni kini ne' Nebukatnesa'ene sondia kva
vahe'ene, sondia naga'amo'za mareri'za Jerusalemi kumara
ha'huzmantenaku ome avazagi kagi'naze. 11 Hagi Babiloni
sondia vahe'mo'zama, Jerusalemi kuma'ma avazagigagiza
mani'nageno'a Babiloni kini ne' Nebukatnesa'a zamagenaku
Jerusalemi rankumate e'ne. 12 Hagi kini ne' Jehoiakini'ma
kegeno Nebukatnesa'ma egeno'a, nererama eri'za vahe'ama,
sondia vahete kva vahe'ene, kinimofo nompima eri'zama
eneri'za vahe'mo'zanena kumara atre'za ana maka atirami'za

vu'za Nebukatnesa'ene hara osanune hu'za hu'naze. Anama hazageno'a Nebukatnesa'a Jehoiakinina kina huntuku azeri'ne. Hagi anazama fore'ma hu'neana, Jehoiakinima Juda vahe kinima 8'a kafuma nemanigeno anara hu'ne. **13** Hagi Ra Anumzamo'ma huama hu'nea kante anteno, Ra Anumzamofo mono nompine, kini ne'mofo nompima knare'nare zama me'nea zantamina Nebukatnesa'a e'nerino, Solomoni'ma golireti tro'ma hu'nea zantamima antagino ruprorovazi netreno, Ra Anumzamofo mono nompima me'nea ana maka golia erivagare'ne. (Jeremaia 20:5) **14** Ana nehuno Jerusalemi mani'naza vahe'ene, kinimofo er'i'za vahera ana maka nezamavareno, hankavenentake sondia vahera 10tauseni'a nezmareno, zamazanteti ruzahu ruzahu zama tro'ma nehaza vahe'ene, ainireti'ma keonke'zama tro'mahu antahi'zama eri'naza vahera ana maka Nebukatnesa'a zamavareno Babiloni vuno kina ome huzmante'ne. Hagi zamunte omnege'zama havizama hu'naza vahe'age, zamatrege'za Juda mopafina mani'naze. **15** Hagi Jerusalemitira Jehoiakinima nererama, a'nhaneramima'ane, eri'za vahe'ane, Juda kumate ranra kva vahezaganena Nebukatnesa'a zamavareno Babiloni ome kina huzmante'ne. **16** Hagi hankavetino ha'ma huga sondia vahera Babiloni kini ne'mo'a 7tauseni'a nezamavareno, zamazanteti ruzahu ruzahu'zama tro'ma nehaza vahe'ene, ainireti'ma keonke'zama tro'mahu antahi'zama eri'naza vahera ana maka 1tauseni'a vahe zamavare'ne. **17** Hagi Jehoiakinina onasi nefu Mataniana, Jehoiakini no erinka Juda vahe kini manio huno Nebukatnesa'a huhamprinenteno, Mataniana kasefa agi'a Zedekaia'e huno antemi'ne. **18** Hagi 21ni'a kafu nehuno Zedekaia'a agafa huno kinia mani'ne. Ana huteno Jerusalemi mani'neno 11ni'a kafufi Juda vahera kegava hu'ne. Nerera'a

Libna kumateti Jeremaia mofakino, agi'a Hamutali'e. **19**
Hagi Jehoiakini'a nef'a'ma hu'neaza huno Ra Anumzamofo
avurera maka havi avu'ava zana hu'ne. **20** Hagi Jerusalemi
vahe'mo'zane, Juda vahe'mo'zama haza havi zamavu zamavaku,
Ra Anumzamo'a rimpa ahezamanteno, zamefi hunezamino
mopazamifintira zamavare atrege'za, afete moparega vu'naze.
Hagi Zedekaia'a Babiloni kinimofona ha'arenteno agri agorga
omani'ne.

25 Hagi Zedekai'ma kinima manino egeno 9nima hia kafufina,
10ni ikamofona 10ni zupa, Babiloni kini ne' Nebukatnesa'a
ana maka sondia vahe'a zamavareno Jerusalemi kumara eme
hahuzmanteku e'ne. Anama hute'za Jerusalemi ran kuma'mofo
meg'i'a kuma eme ante'za mani'ne'za, kuma keginamofo
tva'ontera ot'i'ne'za ha'ma hanaza zana mopa kate'za ante
hihi hu'za mareri'naze. **2** Hagi Babiloni vahe'mo'za Jerusalemi
rankumara avazagi kaginte'za mani nazageno, mago kafugi
6si'a ika evigeno, Zedekai'ma kinima manino egeno 11nima
hia kafurera ehanati'ne. **3** Higeno ana kafufina 4 ikamofo
9ni zupa, Jerusalemi rankumapima mani'naza vahera ne'za
zamimo'a vagaregeno, tusi zamagaku nehazageno ne'zama
nesazazana omne'ne. **4** Ana hige'za Babiloni sondia vahe'mo'za
Jerusalemi kuma kegina tapage hu'za ufre'naze. Hagi Babiloni
sondia vahe'mo'za Jerusalemi kumara avazagi kagi'nazanagi,
Zedekaia'ene ana maka sondia vahe'mo'za kenage atirami'za,
kini ne'mofo hozama me'nerega tare kazigati keginamokema
eme reh'e'na'a amu'nompima me'nea kahanteti atirami'za Araba
kaziga vu'naze. **5** Hianagi Babiloni sondia vahe'mo'za kini nera
rotago hu'za vu'za Jeriko agupofi ome azerizageno, sondia
vahe'amo'za atre'za panani hu'za fre'naze. **6** Anama hute'za

Babiloni sondia vahe'mo'za Zedekaiana avre'za Babiloni kini ne'ma Ribla kumate'ma mani'nere azageno, keagafi avrente'za knama amisia keaga erinte fatgo hu'naze. 7 Hagi Zedekai'a negege'za ne'mofavre naga'a zamahe fri vagare'naze. Ana nehu'za Zedekaiana tarega avurga repro hunetre'za, bronsireti seninu azanteria anakinte'za avre'za Babiloni rankumate vu'naze.

8 Hagi Nebukatnesa'ma kinima manino egeno 19nima eme hia kafufina, 5fu ikamofona 7ni zupa, kini nete'ma kvama nehaza sondia vahe'mokizmi kva nera Nebusaradanikino mago zupa Jerusalemi rankumate e'ne. 9 Hagi Ra Anumzamofo mono nonki, kini ne'mofa nonki, ana maka Jerusalema me'nea nontamine, agima me'nea nontaminena Nebusaradani'a teve tagintegeno te'ne. 10 Hagi Nebusaradani'ma Babiloni sondia vahe'ma kegava huno zamavareno'ma vu'nea vahera huzmantge'za Jerusalemi rankuma'mofo have kegina, maka ru tamana tamanu hutre'naze.

11 Hagi Jerusalemi vahe'ma zamavare'za Babilonima nevu'zama mago'ama zamatre'naza vahera, Babiloni sondia vahete kva ne' Nebusaradani'a kina ome huzmanteku zamavareno Babiloni vu'ne. Ana nehuno mago'a Juda vahe'ma ha' knafima kora atre'za vu'za Babiloni sondia vahe'ma ha' kuma'ma emente'za mani'nafima umani'naza vahe'enena zamavareno Babiloni kina ome huzmanteku vu'ne. 12 Hianagi mago'a zamunte'ma omne'nea vahera, Nebusaradani'a zamatrege'za Juda mopafina mani'neza hoza nente'za waini hozanena kegava hu'naze.

13 Hagi Babiloni sondia vahe'mo'za Ra Anumzamofo mono nompi umarer'i'za, noma vazisgama hu (fumza) anumza zafama Bronsireti'ma tro'ma hu'naza zafa e'neri'za, tusi'a zuompama bronsireti'ma tro hu'za tima afinte'ne'za tirurema nehaza zuompane, aga'araminenetra tagana vazi'za eri'za Babiloni vu'naze.

14 Hagi Babiloni vahe'mo'za ana zanke hu'za, bronsireti'ma tro'ma hu'naza kavoma, savorima tavi'ma erisuhu azotama, zuomparamine, ana maka zama brosireti'ma tro'ma hu'naza zantamima Ra Anumzamofo mono nompima me'neana eri vagare'haze. **15** Hagi golireti'ene silvareti'ma tro'ma hu'naza zuompama tankanuzama hampagenente'za zuompane, korama taginte'za ru tri tri'ma nehaza zuompanena Babiloni sondia vahete kva ne' Nebusaradani'a erino vu'ne. **16** Hagi noma vazisgama hu (fumza) anumza zafararente'ma anomava zazi'naza bronsine, ra zuompama tima afintene'za tirurema nehaza zuompane, aga'araminema bronsiretimu tro'ma hu'nazana, kna'amofona refko hu'za kegara osu'naze. **17** Hagi ana tarega zafamokea magozahu hakeno za'za zaniamo'a 8'a mita hutere higeno, ana zafararente'ma anagami asenire'ma fetori'ma tro'ma hu'za ante'nazana 1mitagi 30'a sentamita hu'ne. Hagi tare zafamofo fetorite'ma avonkre avankre'ma hunte'nafina, tarefi pomigreneti zafa ragamofo amema'a krente'za evutere hu'naze. **18** Hagi Babiloni kini ne'mofo sondia vahete kva ne' Nebusaradani'a, ugagota pristi ne' Seraiane, agri amefima hu'nea pristi ne' Zefanaiane Ra Anumzamofo mono nomofo kahante'ma kvama nehaza 3'a vahe'ene, kina ome huzmanteku zamazeri'ne. **19** Hagi Jerusalemi kumapima maniza sondia vahete'ma kvama nehia neki, kini ne'ma antahintahima nemiza vahera 5fu'a Jerusalemi mani'nazageno Nebusaradani'a zamazeri'ne. Ana nehuno sondia vahe'ma zamagima kreno erinte fatgo nehia ne'enena azeri'ne. Ana nehuno 60'a vahera mago'a Jerusalemi kumapintira zamazeri'ne. **20** Ana'ma huteno'a Nebusaradani'a ana vahera zamavareno Babiloni kini ne'ma Ribla kumate'ma mani'nere vu'ne. **21** Hagi ana huntegeno

Babiloni kini nemo'a ana vahera Ribla kumate Hamati mopafi zamahege'za fri'naze. Anama hute'za Juda vahera zamavare'za afete mopalrega vu'za kina ome huzmante'ne. **22** Hagi Babiloni kini ne' Nebukatnesa'a mago'ama zamatre'za Judama aza vahem'a kegavama huzmantesia nera, Safani negeho Ahikamu nemofo Gedalia gavana huhamprinte'ne. **23** Hagi Juda sondia vahem'e, kva vahem'zamimo'zama fre'za umani'nazaregati'ma antahi'zama, Babiloni kini ne'mo'a Gedaliama Juda gavana ne' azeri ot'i'ne hazananekema nentahi'za, Gedalia'ma Mizpama mani'nere e'naze. Anama e'naza nagamokizmi zamagi'a, Netania nemofo Ismaeliki, Karea nemofo Johananiki, Netofa kumateti ne' Tanhumeti nemofo Seraiaki, Makati kumateti ne' Zesaniaki hu'za e'naze. **24** Hagi Gedalia'ma ana vahem'a nezamageno'a amanage huno huvempa huno zamasami'ne, tamagra Babiloni kva vahekura korora osiho. Ana nehutama ama mopalafina amne mani'neta nazano Nebukatnesa'ma haniazana amage anteta tro nehuta, knare hutma manigahaze. **25** Hianagi 7ni ikampina Elishama negeho Netania nemofo Ismaeli'a kinimofo naga'pinti nekino, 10ni'a vahem'ene eno Gedaliana ahe nefrino, mago'a Juda vahem'ene, mago'a Babiloni vahem'ma Mizpa kumate'ma mani'naza vahera zamahe fri'ne. **26** Hagi anama hutegen'o'a Juda vahera ranteti vuno osite vigeno, sondia vahete kva vahem'enema Mizpa kumate'ma mani'nazaretira atre'za Babiloni vahem' koro hu'za Isipi mopalrega vu'naze. **27** Hagi Juda kini ne' Jehoiakini'a 37ni'a kafufi Babilonia kina hu'ne. Hagi anama 37nima hia kafufina Evil-Merodaki'e nehaza ne'mo Babilonia kasefa kinia efore hu'ne. Hagi anama kafufina 12fu ikamofo 27ni zupa Evil-Merodaki'a Jehoiakinina asunku hunteno kinafintira katufente'ne. **28** Hagi Evil-Merodaki'a Jehoiakinina azeri so'e huno knare avu'avaza hu'nenteno mago'a

kina vahe'ma Babilonima kina hu'za mani'naza vahe'ma kini
ne'mo'ma zamazeri so'e nosia avamente Jehoiakinina azeri so'e
hu'ne. **29** Ana higeno Jehoiakini'a kina vahe kuke'na mago'ene
ontani'ne. Anama mani'nea kna'afina kinimofo nompinti ne'zana
neneno manino vu'ne. **30** Hagi Babiloni kini ne'mo'a, Jehoiakinina
nazano avesi'nia zama erisigura mika zupa zagoa amitere huno
nevigeno, manime vuno ome fri'ne.

1 Kroniku

1 Adamu'a Seti nef'a'e. Hagi Seti'a Enosi nef'a'e, **2** Enosi'a Kenani nef'a'e. Hagi Kenani'a Mahalaleli nef'a'e. Mahalaleli'a Jareti nef'a'e. **3** Hagi Jareti'a Inoku nef'a'e, Inoku'a Metusela nef'a'e. Metusela'a Lemeki kasentegeno Lemeki'a, **4** Noana kasentegeno, Noa'a 3'a mofavre zamante'neankino zamagi'a, Semiki, Hamuki, Jefetie. **5** Hagi Jefeti ne' mofavreramimofo zamagi'a, Gomaki, Magokiki, Mataiki, Javaniki, Tuvariki, Misekiki, Tirasi'e. **6** Hagi Goma'a, Askenasi vahe'mokizimine, Rifati vahe'mokizimine, Togarma vahe'mokizimi zamagigomo'e. **7** Hagi Javani'a Elisa vahe'mokizimine, Tasis vahe'mokizimine, Kitimi vahe'mokizimine, Rodanimi vahe'mokizimi zamagigomo'e. **8** Hagi Hamu ne' mofavreramimofo zamagi'a, Kusiki, Misraimiki, Putiki, Kenani'e. **9** Kusi ne' mofavreramimofo zamagi'a, Sebaki, Havilaki, Sabtaki, Ramaki Sebteka'e. Hagi Rama'a Sebane, Dedanine kasezanante'ne. **10** Hagi Kusi'a hankavenentake ha' ne'ma ama mopafima efore'ma hu'nea ne' Nimroti kasente'ne. **11** Hagi Misraimi'a Ludi vahe'mokizmine, Anami vahe'mokizmine, Lehabi vahe'mokizmine, Naptu vahe'mokizimine, **12** Patrusi vahe'mokizimine, Kaslu vahe'mokizimine zamagigomo'e. Hagi Filistia vahe'ma e'nazana Kaslu vahepinti fore hu'naze. **13** Hagi Kenanina ese ne' mofavre'a Saidoni'e. Hagi Kenani'a Saidoni vahe'ene Hiti vahe'ene, **14** Jebusi vahe'ene, Amori vahe'ene, Girgasi vahe'ene, **15** Hivi vahe'ene, Arka vahe'ene, Sini vahe'ene, **16** Arvati vahe'ene, Zemari vahe'ene, Hamati vahe'mokizmi zamagigo'mo'e. **17** Hagi Semi ne' mofavreramimofo zamagi'a, Elamuki, Asaki, Arfaksatiki, Lutiki, Aramu'e. Hagi Aramumpinti'ma fore'ma hu'naza vahera, Uziki, Huliki, Geteriki, Miseki'e. **18** Hagi Arfaksati'a Sela kasentegeno, Sela'a Eber kasente'ne. **19**

Hagi Eberi'a tare ne' mofavre zanante'ne, ese ne'amofo agi'a
Peleki'e hu'ne, na'ankure agri knafi ama mopafi vahe'mo'za fako
hu'za zamagerute zamagerute umani emania hu'naze. Hagi
mago ne' mofavre'amofo agi'a Joktani'e. **20** Hagi Joktani'ma
kasezamante'nea ne' mofavreramina Almodatima, Selefima,
Hazamavetima, Jerama, **21** Hadoramuma, Uzalima, Diklama, **22**
Ebalima Abimaelima, Sebama, **23** Ofirima, Havilama, Jobabuma
huno kasezamnte'ne. **24** Hagi Semipinti'ma fore'ma hu'naza
vahera amana hu'ne, Semi'a Arpaksati nef'a'e, Arpaksati'a,
Sela nef'a'e. **25** Hagi Sela'a Eber nef'a'e, Eberi'a Peleki nef'a'e,
Peleki'a Reu nef'a'e. **26** Hagi Reu'a Seruku nef'a'e, Seruku'a
Nahori nef'a'e. Nahori'a Tera kasentegeno, **27** Tera'a Abram
kasente'ne. Hagi Abramuna henka kasefa agi'a Abrahamu'e
huno antemi'ne. **28** Hagi Abrahamu nemofokea Aisakike
Ismaelike. **29** Hagi Ismaelipinti'ma fore'ma hu'nea vahera, ese
mofavrea Nebaioti'e. Hagi ana maka ne' mofavreramimofo
agi'a Nebaioti'ma, Ketari'ma, Adberi'ma, Mibsama'ma, **30**
Misima'ma, Duma'ma, Masa'ma, Hadati'ma, Tema'ma, **31**
Jeturi'ma Nafisi'ma, Kedema'e. Hagi ama ana makara Ismaeli
mofavrerami mani'naze. **32** Hagi Abrahamuna henka nenaro
Ketura'ma kasezmante'nea ne' mofavreramimofo zamagi'a,
Zimrani'ma, Joksani'ma, Medani'ma, Midieni'ma, Isbaki'ma,
Sua'e. Hagi Joksani nemofokea Sevake, Dedanike. **33** Hagi
Midieni ne' mofavreramina Efama, Eferima, Hanoki'ma, Abidama,
Eldama huno kasezamante'ne. Hagi ama ana makara Abrahamu
nenaro Keturama kasezmante'nefinti fore hu'naze. **34** Hagi
Abrahamu'a Aisaki kasentegeno, Aisaki'a Isokizni Israelikizni
kasezanante'ne. **35** Hagi Iso ne' mofarveramimofo zamagi'a
ama'ne, Elifasi'ma, Reueli'ma, Jeusi'ma, Jalami'ma, Kora'e. **36**

Hagi Elifasi ne' mofavreramimofo zamagi'a ama'ne, Temani'ma, Omari'ma, Zefo'ma, Gatami'ma, Kenasi'ma, Timna'ma, Amaleki'e.

37 Hagi Reueli ne' mofavreramimofo zamagi'a ama'ne, Nahati'ma, Zera'ma, Sama'ma, Misa'e. 38 Hagi Seiri ne' mofavreramimofo zamagi'a ama'ne, Lotani'ma, Sobali'ma, Zibioni'ma, Ana'ma, Disoni'ma, Eseli'ma, Disani'e. 39 Hagi Lotani nemofokea Horike, Homamike. Hagi Lotani nesaro agi'a Timna'e. 40 Hagi Sobali ne' mofavreramimofo zamagi'a ama'ne, Alvani'ma, Manahati'ma, Ebali'ma, Sefo'ma, Onami'e. Hagi Zibeoni nemofokea Aia'ene Anake. 41 Hagi Ana nemofo'a Disoni'e. Hagi Disoni ne' mofaveramimofo zamagi'a ama'ne, Hemdani'ma, Esbani'ma, Itrani'ma, Kerani'e. 42 Hagi Ezeri ne' mofavreramimofo zamagi'a ama'ne, Bilhani'ma, Zavani'ma, Akani'e. Hagi Disani nemofokea Usike, Aranike. 43 Hagi Israeli vahe kinima efore'ma huno Israeli vahe'ma kegavama osu'nerera, ama'na kini vahe'mo'za Idomu mopafina kinia mani'naze, Beori nemofo Bela'e. Hagi rankuma'amofo agi'a Dinhabae. 44 Hagi Bela'ma frigeno'a, Zera nemofo Bozra kumateti ne' Jobapu agri nona erino kinia mani'ne. 45 Hagi Jobapu'ma frigeno'a, Teman mopafinti ne' Husamu agri nona erino kinia mani'ne. 46 Hagi Husamu'ma frigeno'a, Bedati nemofo Hadati agri nona erino kinia mani'ne. Hagi rankuma'amofo agi'a Avitie. Hagi agra Moapu mopafina Midieni vahera zamahe vagare'ne. 47 Hagi Hadati'ma frigeno'a, Masreka kumateti ne' Samla agri nona erino kinia mani'ne. 48 Hagi Samla'ma frigeno'a, Yufretisi tinnenare, Rehoboti kumate ne' Sauli agri nona erino kinia mani'ne. 49 Hagi Sauli'ma frigeno'a Akbobi nemofo Bal-hanani agri nona erino kinia mani'ne. 50 Hagi Bal-hanani'ma frigeno'a, Hadati agri nona erino kinia mani'ne. Rankuma'amofo agi'a Paie. Hagi Matreti mofa Mezahapu

negeho, Mehetaberi ara eri'ne. **51** Hagi Hadati'a fritegeno, Idomu kumate'ma vugotama hu'naza kva vahe'mofo zamagi'a ama'ne, Timna'ma, Alva'ma Jateti'ma, **52** Oholibama'ma, Ela'ma, Pinoni'ma, **53** Kenazi'ma, Temani'ma, Mibzari'ma, **54** Magdieli'ma Iramu'e. Hagi ama ana vahetamina makara Idomu kumate ugagota kva vahetami mani'naze.

2 Hagi Israeli ne' mofavreramimofo zamagi'a ama'ne, Rubeni'ma, Simeoni'ma, Livae'ma, Juda'ma, Isaka'ma, Sebulunu'ma, **2** Dani'imma, Josefe'ma, Benzameniki, Naftaraki, Gatiki magora Asa'e. **3** Hagi Juda'a Kene ni kumateti a' Betsua ara erino, **3'a** ne' mofavrerami zmante'neankino zamagi'a, Eri'ma, Onani'ma, Sela'e. Hagi Judana agonesa ne'a Eri'a Ra Anumzamofo avufina kefo avu'ava higeno, Ra Anumzamo'a ahe fri'ne. **4** Hagi Juda'a nenoferona Temana a' erinte'negeno, Peresine Zerakizania kasezanante'ne. Ana higeno ana maka ne' mofavreramina, Juda'a 5fu'a zamante'ne. **5** Hagi Peresi'a, Hesronine Hamulikizni kasezanante'ne. **6** Hagi Sera ne' mofavreramimofo zamagi'a amane, Zimri'ma, Etani'ma, Heman'i'ma, Kalkoli'ma, Darda'e. Hagi ana makara 5fu'a mofavrezaga Sela'a kasezamante'ne. **7** Hagi Karmi'a Israeli vahe'mo'zama Ra Anumzamofozane hu'zama eri ruotge'ma hu'naza zama eritenoma, Israeli vahe'ma hazenke'ma eri zami'nea nere. **8** Hagi Etani'a magoke mofavre Azaria kasente'ne. **9** Hagi Hesroni ne' mofavreramimofo zamagi'a ama'ne, Jeramel'i'ma, Ramu'ma, Kalepi'e. **10** Hagi Ramu'a Aminadapu nef'a'e. Aminadapu'a Juda nagapima ugotama hu'nea ne' Nasoni nef'a'e. **11** Hagi Nasoni'a Salmoni nef'a'e. Salmoni'a Boasi nef'a'e. **12** Boasi'a Obeti nef'a'e, Obeti'a Jesi nef'a'e. **13** Hagi Jesi'ma ese ne'ma ante'neana Eliapu'e, namba 2 mofavrea Abinadapu'e, namba 3 mofavrea Simea'e, **14**

namba 4 mofavrea Netaneli'e, namba 5 mofavrea Radai'e.

15 Hagi namba 6 mofavrea Ozemu'e, namba 7 mofavrea Deviti'e. **16** Hagi Jesi'a tare mofatre zanante'neankino, zanagi'a Zeruiake Abigelike. Hagi Zeruia ne' mofavrereramimofo zamagi'a ama'ne, Abisai'ma, Joapu'ma, Asaheli'e. **17** Hagi Abigeli'a Ismaeli nagapinti ne' Jeterinte mani'neno, Amasana kasente'ne.

18 Hagi Hesroni nemofo Kalepi'a, tare a' zanante'neankino zanagi'a Azubai'ene Jeriotike. Hagi Jerioti ne' mofavrereramimofo zamagi'a amane, Jeseli'ma, Sobapi'ma, Aradoni'e. **19** Hagi Azuba'ma frigeno'a, Kalepi'a Efrati'e nehia a' erigeno, Huri kasente'ne. **20** Hagi Huri'a Uri nefae. Uri'a Bezaleli nefae. **21** Hagi Hesroni'ma 60'a kafuma huteno'a, Makiri mofa Gilieti nesaro ara erigeno, Segupuna kasente'ne. **22** Hagi Segupu'a 23'a rankuma'ma Giliati mopafima kegavama hu'nea ne' Jairi nefae.

23 Hianagi Gesuri'ene Aramukea Jairina ha' eme hunteke, Jairi'ma kegavama hu'nea kuma'ene Kenati kuma'ene, 60'a kuma'ma megagi'neana eri'na'e. Hagi ana maka vahera Giliati nefae Makiri negehoza mani'naze. **24** Hagi Abiza'a amu'ene hu'negeno neve Hesroni'a Kalepi Efrata kumate'ma fritegeno, Abiza'a Asurina kasentegeno, Asuri'a Tekoa rankumara azeri otino kine. **25** Hagi Hesroni agonesa mofavre Jeramel'i'ma kasezmante'nea neana, esetegati'ma agafama huno vu'nea nagamofo zamagi'a ama'ne, Ramu'ma, Buna'ma, Oreni'ma, Ozemi'ma, Ahiza'e.

26 Hagi Jeramel'i'a tare a' ante'neankino, Atara'e nehia a'mo, Onamuna kasente'ne. **27** Hagi Jeramelina ese ne'amofo agi'a Ramukino, Ma'azima, Jamini'ma, Ekerima huno kasezmante'ne.

28 Hagi Onamu nemofokea Samaike, Jadake. Hagi Samaia nemofokea, Nadapu'ene, Abisurike. **29** Hagi Abisuri nenaro agi'a Abihailikino, Abanikizni Molidikizni kasezanante'ne. **30** Hagi

Nadapu nemofokea, Seletike, Apaimikegino, Seleti'a mofavrea
onte'neno fri'ne. **31** Hagi Apaimi nemofo'a Isi'e. Isi nemofo'a
Sesani'e, hagi Sesani nemofo'a Alai'e. **32** Hagi Samai nefu,
Jada nemofokea Jeterike, Jonatanike. Hagi Jeteri'a mofavrea
onte'neno fri'ne. **33** Hagi Jonatani nemofokea Peletike, Zazake.
Hagi zamagra Jerameli agehe'za mani'naze. **34** Hagi Sesani'a
ne mofavreramina ozmant'e neanki, mofanege zamante'ne.
Hianagi Isipi eri'za ne' ante'neankino agi'a Jarha'e. **35** Ana
hu'negu Sesani'a mofa'a amigeno, Isipi kumateti kazokzo
ne'amo'a ara erino ne'mofavre Atai kasente'ne. **36** Hagi Ataia'a
Neteni nef'a'e, Neteni'a Zabati nafa'e. **37** Hagi Zabati'a Epaftali
nefa'e, Epaftali'a Obeti nef'a'e. **38** Hagi Obeti'a Jehu nef'a'e.
Jehu'a Azaria nef'a'e **39** Hagi Azaria'a Helezi nef'a'e, Helezi'a
Eleasa nef'a'e. **40** Hagi Eleasa'a Sismai nef'a'e, Sismai'a
Salum nef'a'e. **41** Hagi Salumu'a Jekamia nef'a'e, Jekamaia'a
Elisama nef'a'e. **42** Hagi Jerameli nefu Kalepi'a ese mofavrea
Maresa kasentegeno, Maresa'a Zifi kasentegeno, Zifi'a Hebron
kasente'ne. **43** Hagi Hebron ne' mofavremokizimi zamagi'a,
Kora'ma, Tapua'ma, Rekemu'ma, Sema'e. **44** Hagi Sema'a
Rahamu nef'a'e, Rahamu'a Jorkeamu nef'a'e. Hagi Rekemu'a
Samai nef'a'e. **45** Hagi Samai'a Maoni nef'a'e, Maoni'a Bet-zuri
nefa'e. **46** Hagi Kalepina henka a'amofo agi'a Efakino, Haranima,
Mozama, Gazezima huno kasezmante'ne. Hagi Harani'a Gazezi
nefa'e. **47** Hagi Jadai ne' mofavreramimofo zamagi'a ama'ne,
Regemi'ma, Jotami'ma, Gesani'ma, Peleti'ma, Efa'ma, Safu'e.
48 Hagi Kalepina nampa 3 akanomofo agi'a Makakino Seberine
Tirhanakizni kasezanante'ne. **49** Hagi ana nehuno Madmana nefu
Safunena kasente'ne. Hagi mago ne'amofo agia Seva'e. Seva'a
Makbenakizni Gibakizni neznafa'e. Hagi Kalepi'a magoke mofa

ante'neankino agi'a Aksa'e. **50** Hagi ama'i Kalepi agehemofo zamagi'e, Huri'a Efratana ese mofavre'amo'e. Hagi Huri'a Sobali nef'a'e. Sobali'a Kiriat-Jearimi kuma eri fore hu'ne. **51** Hagi Salma'a Betlehemu kumara agra eri fore hu'nea nere. Hagi Harepi'a Betgaderi kumara agra erifore hu'neankino, Betgaderi kumamofo nef'a'e. **52** Sobali'a Kiriat-Jearimi kuma'ma erifore hu'nea nere. Hagi Menuhoti nagara mago'a amu'nompinti'ma refko'ma hu'naza vahe'mokizmigu'ma Haroe nagarema nehaza vahe'mokizmi nezmageho'e. **53** Hagi Kiriat-Jearimi kumapinti'ma fore'ma hu'naza vahera, Itri vaheki, Puti vaheki, Sumati vaheki, Misra vahe mani'naze. Hagi ana vahepinti Zorati vahe'ene Estaoli vahe'enena fore hu'za mani'naze. **54** Hagi Salma agehe'mo'za ama'ne, Betlehemu vaheki, Netofa vaheki, Atrot-bet-Joapu vaheki, mago'a Manahati nagama amunompintima refkoma hu'naza vaheki, Zori vaheki hu'za mani'naze. **55** Hagi mago'a vahera avonkre eri'za e'neriza Jabesi kumate mani'naze. Hagi ana vahetmimofo zamagi'a amane, Tira vaheki, Simea vaheki, Suka vaheki hu'za mani'naze. Hagi e'i ana maka vahera, Keni vaheki'za, Hamati negehoze. Hagi Hamati'a Bet-Rekapu nagamofo nezmageho'e.

3 Hagi Deviti'ma Hebroni kumate'ma mani'neno'ma kasezamante'nea ne' mofavreramimofo zamagi'a ama'ne, Ese mofavrea Amoni'e. Amoni nerera'a Jezril kumateti akino, agi'a Ahinoamu'e. Hagi namba 2 ne' mofavre'a Danieli'e. Hagi Danieli nerera'a, Kameli kumateti akino agi'a Abigeli'e.
2 Hagi namba 3 ne' mofavre'a Absalomukino, nerera agi'a Maka'e Gesuri kumateti kini ne'mofo mofare. Hagi namba 4 mofavre'amofo agi'a Adoniza'e. Hagi nerera agi'a Hagiti'e. **3** Hagi namba 5fu mofavremofo agi'a Sefati'e. Hagi Sefati nerera

agi'a Abitali'e. Hagi namba 6 mofavremofo agi'a Itreami'e. Hagi Itreami nerera agi'a Eglae. 4 Hagi Deviti'ma Hebron kumate'ma 7ni'a kafugi 6si'a ikama kinima mani'nea knafi kasezmante'nea 6si'a mofavreramine. Anama huteno'a Deviti'a mago'ane 33'a kafu Jerusalemi kumatera kinia mani'ne. 5 Hagi Deviti'ma Jerusalemi kumate'ma mani'neno kasezmante'nea mofavreramina amane, Simea'ma, Sobabu'ma, Neteni'ma, Solomoni'e. Hagi nezmarera'a Ameli mofakino, agi'a Batseba'e. 6 Hagi Deviti'a 9ni'a mofavrerami henka kase zmante'neankino zamagi'a amane, Ibari'ma, Elisama'ma, Elifeleti'ma, 7 Noga'ma Nefeki'ma, Jafia'ma, 8 magora ru Elisama'ma, Eliada'ma, Elifeleti'e. Ana makara 9ni'a mofavreramine. 9 Hagi e'i ana makara Deviti mofavreramine. Hagi nezamasaro agi'a Tamari'e. Devitina henka a'nearamimo'za ante'naza mofavreramina ama anampina ohampri'naze. 10 Hagi Solomoni'a Rehoboamu nefae, Rehoboamu'a Abiza nefae, Abiza'a Asa nefae, Asa'a Jehosofati nefae, 11 hagi Jehosofati'a Joram nefae, Joram'a Ahazia nefae, Ahazia'a Joasi nefae, 12 hagi Joasi'a Amasia nefae, Amasia'a Azaria nefae, Azaria'a Jotamu nefae. 13 Hagi Jotamu'a Ahasi nefae, Ahasi'a Hesekaia nefae, Hesekaia'a Manase nefae, 14 hagi Manase'a Amoni kasentegeno, Amoni'a Josaia kasente'ne. 15 Hagi Josaia'a esera Johanan kasenteno, anantera Jehoiakimi kasenteno, namba 3 mofavrea Zedekaia kasenteno, namba 4 mofavrea Salumu kasente'ne. 16 Hagi Jehoiakimi'a Jekoniane Zedekaiakizni kasezanante'ne. 17 Hagi ha' vahe'mo'zama avre'za Babilonima kinama ome hunte'naza kini ne' Jehoiakini mofavreramimofo zamagi'a ama'ne, Sealtiel'i'ma, 18 Malkiramu'ma, Pedaia'ma, Senazari'ma, Jekamaia'ma, Hosama'ma, Nedabia'e. 19 Hagi Pedai'a Zerubabeline Simeikizni

zanante'ne. Hagi Zerubabeli'a Mesulamune Hananiakizni zanante'ne. Hagi neznasaro agi'a Selomiti'e. 20 Hagi Pedai'a anahukna huno 5fu'a mofavrerami zamante'neankino zamagi'a ama'ne, Hasuba'ma, Oheli'ma, Berekia'ma, Hasadaia'ma, Jusap-heseti'e. 21 Hagi Hananaia'a Pelataiane, Jesaiakizni kase zanante'ne. Hagi Jesaia'a Refaia nef'a'e, Refaia'a Arnani nef'a'e, Arnani'a Obadaia nef'a'e, hagi Obadaia'a Sekanaia nef'a'e. 22 Hagi Sekanaimpintira 6si'a vahe forera hu'naze. Hagi Sekanai'a Semaia kasentetegeno, Semaia'a Hatusi'ma, Igali'ma, Baraia'ma, Nearia'ma, Safatima huno kasezmante'ne. 23 Hagi Nearia'a 3'a ne' mofavrerami zmante'neankino, zamagi'a ama'ne, Eliona'ma, Hizkaia'ma, Azrikamu'e. 24 Hagi Elionai'a 7ni'a ne' mofavrerami zmante'neankino, zamagi'a ama'ne, Hodavia'ma, Eliasibi'ma, Pelaia'ma, Akupu'ma, Johanani'ma, Delaia'ma Anani'e.

4 Hagi mago'a Juda naga'mofo zamagi'a ama'ne, Peresi'ma, Hesroni'ma, Karmi'ma, Huri'ma, Sobali'e. 2 Hagi Sobali'a Reaia nef'a'e. Reaia'a Jahati nafa'e, Jahati'a Ahumaine Lahatikizni neznafa'e. Hagi ama ana nagara Zora kumate'ma nemaniza vahepinti fore hu'naze. 3 Hagi Etamu ne'mofavremofo zamagi'a ama'ne, Jezril'i'ma, Isma'ma, Idbasa'e. Hagi nezmasaro agi'a Hazelelponi'e. 4 Hagi magora Penuelikino Gedori nef'a'e. Magora Ezerikino Husa kuma eri fore hu'he. Hagi magora Hurikino Betlehemu Kuma azeri ot'nea nere. Hagi Huri'a Efratana ese mofavre'e. 5 Asuhuri'a Tekoa kuma'ma eri fore'ma hu'hea nekino, tare a' zanante'neana zanagi'a Hela'ene Narake. 6 Hagi Nara'a Ahuzamima, Heferima, Temenima, Hahastarima huno kasezmante'ne. 7 Hagi Hela'a Zeretima, Izarima, Etnanima huno kasezmante'ne. 8 Hagi Kozi'a Anupune, Zobebakizni kase

zanante'neankino, agripinti Harumu nemofo Aharheli nagara
efore hu'naze. **9** Hagi Jabesi'a afuhe'ina zmagatere'nea nekino
vahe'mo'za kesga hu'za ragi nemiza nere. Hagi nerera'a, tusi'a
nata negrige'na kasente'hoe huno nehuno, Jabesi'e huno agi'a
antemi'ne. **10** Hagi mago zupa Jabesi'a Israeli vahe'mofo
Anumzantega amanage huno nunamuna hu'ne, Anumzamoka,
asomu hunenantenka, mopanimofo agema'ama ome atre,
eme atrema hu'neama'a eri ra nehunka, muse hugantoanki
tava'onire mani'enka hazenke zama navate'ma ezankura
kegava hunantegeno, natama namizamo'a navatera omeno.
E'inage huno nunamuna higeno, Anumzamo'a nunamu ke'a
antahimino, nunamuma hiazana ami'ne. **11** Hagi Suha nefu
Kelupu'a Mehiri' nef'a'e, Mehiri'a Estoni nef'a'e, **12** hagi Estoni'a
Bet-rafane, Paseane, Tehinama huno kasezmante'ne. Hagi
Tehina'a Ir-nahasi nef'a'e. Hagi ama ana veneneramina Reka
kumate venene mani'naze. **13** Hagi Kenazi'a, Otnielikizni,
Seraiakizni neznafa'e. Hagi Otniel'i'a Hatatikiznine Meonotaikizni
neznafa'e. **14** Hagi Meonotai'a Ofra nef'a'e. Hagi Seraia'a Joapu
nefa'e, Joapu'a Ge-harasim kasente'ne. Hagi Ge-harasimi'ema
hu'neana, na'ankure maka'zama zamazantetima tro'ma nehaza
vahera agripinti efore hu'naze. **15** Hagi Jefune nemofo Kalepi ne'
mofavre'ramimofo zamagi'a ama'ne, Iruma, Ela'ma, Na'amu'e.
Hagi Ela'a Kenazi nef'a'e. **16** Jehaleleli ne' mofavreramina
ama'ne, Zifi'ma, Zifa'ma, Tiria'ma, Asareli'e. **17** Hagi Ezra
ne' mofavremokizimi zamagi'a, Jeteri'ma, Meredi'ma, Eferima,
Jaroni'e. Hagi Meredi'a Fero mofa Bitia ara eri'ne. Hagi ana
a'mo'a Miriamuma, Samaima, Isbama huno kasezmante'ne.
Hagi Isba'a Estemoa kuma azeri otine. **18** Hagi Mereti'a Juda
kumateti a' erineno Jereti kasentegeno, Jeretia Gedori kuma

azeri oti'nea nere. Hagi Heberi'a Soko kuma azeri oti'nea nere.
Jekutieli'a Zanoa kuma azeri oti'nea nere. **19** Hodia nenaro'a
Nahamu nesaro'e. Hagi e'i ana veatremokea tare mofavre
zanantena'ankino mago nemofo'a Keila kumara azeri otigeno,
agripinti Garmi vahera efore hazageno, mago nemofo'a Estemoa
kuma azeri otigeno, Ma'aka vahera agripinti efore hu'naze.
20 Hagi Simeoni ne' mofavremokizmi zamagi'a, Amnonima,
Rina'ma, Ben-hanania, Tiloni'e. Hagi Isi'a Soheti naga'ene
Ben-soheti nagamofo nezamageho'e. **21** Hagi Juda nemofo
Sela ne' mofavreramimofo zamagi'a, Erikino Leka kuma azeri
otigeno, Maresa kumama azeri oti'nea nera Lada mani'ne. Hagi
Lada naga'mo'za Bet-Asbea kumate mani'ne'za efeke huno
knare'ma hu'nea tavravema tro'ma nehaza naga mani'naze.
22 Hagi mago mofavrea Jokimikino, Koseva vahe'ene Joasi
vahe'ene Sarafu vahe'enena agripinti efore hu'za mani'neza,
Moapu mopane Jasuvi-Rehemu mohanena kegava hu'naze.
(Ama ana zamagi zamagenkema krente'nazana korapa knafi
krente'naze.) **23** Hagi ama ana vahetmina Netamu kumate'ene
Gedera kumate'ene mani'ne'za, mopa kavo tro nehu'za, kini
ne' eri'za eneriza nemaniza vahetami mani'naze. **24** Hagi
Simioni ne' mofavreramimofo zamagi'a, Nemueli'ma, Jamini'ma,
Jaribi'ma, Zera'ma, Sauli'e. **25** Hagi Sauli'a Salumu nefae'e,
Salumu'a Mibsamu nefae'e, Mibsamu'a Misma nefae'e. **26** Hagi
Misma agehemokizmi zamagi'a ama'ne, Misma'a Hamueli nefae'e,
Hamueli'a Zakuri nefae'e, Zakuri'a Simei nefae'e. **27** Hagi Simei'a
16ni'a ne' mofavreraminki 6si'a mofanegi huno zamante'ne.
Hianagi afuhemo'za mofavrea rama'a onte'nazageno, mago'a
Juda naga'mozama hazaza hu'za Simeoni naga'mo'za rama'a
vahera forera osu'naze. **28** Hagi Simioni naga'mo'za Berseba

kumapima, Molada kumapima, Hazar-Sual Kumapima, **29** Bilha
kumapima, Ezemi kumapima, Toladi kumapima, **30** Betueli
kumapima, Homa kumapima, Ziklagi kumapima, **31** Bet-Makaboti
kumapima, Hazar-Susim kumapima, Bet-Biri kumapima, Saraim
kumapima hu'za mani'naze. Hagi Simeon naga'mo'za ama ana
kumatminte mani'nazageno Deviti'a kinia efore hu'ne. **32** Hagi
mago'a zamagehemo'za 5fu'a neonese kumapi mani'naze. Ana
kumatmimofo zamagi'a, Etamu kuma'ma, Aini kuma'ma, Rimoni
kuma'ma, Tokeni kuma'ma, Asani kumapima hu'za mani'naze.
33 Hagi neone kumatmima ana rankumatmimofoma megagitere
huno Balatima ome atre'nea kumatmimpine mani'naze. E'ina
maka Simioni nagamofo kumataminkino, mika zamagehemofo
zamagiramine zamagri zamagiraminena, avontafepi krente'naze.
34 Hagi mago'a Simeonimpinti'ma fore'ma hu'naza vahetmimofo
zamagi'a, Meshobapu'ma, Jamleki'ma, Amasia nemofo Josa'e.
35 Joeli'ma, Josibia nemofo Jehu'ma, Jehu nemofo Seraia'ma,
Seraia nemofo Aserima, **36** Elioenai'ma, Jakoba'ma, Jesohaiama,
Asaia'ma, Adiel'i'ma, Jesimieli'ma, Benaia'ma, **37** Sifi nemofo
Siza'ma, Aloni nemofo Jedaia'ma, Jedaia nemofo Simri'ma,
Simri nemofo Semaia'e. **38** E'i ama ana vahetamina Simioni
naganofite'ma ugota huterema hu'naza vahe'mofo zamagi
krente'naze. Hagi ana naga'nofimo'za rama'a vahe fore hu'naze.
39 Hagi sipisipi afutamine bulimakao afuzagamofo trazankura
agupomofo zage hanati kaziga Gedori mopafi hake'za vu'naze.
40 E'ina mopama ome kazana trazamo'a knare hu'ne. Hagi ana
mopamo'a kahesa huno ra higeno, ana kumapi vahe'mo'za
hafra osu fru hu'za knare hu'za mani'naze. Na'ankure ana
agupofina Hamu nagake kora mani'nazane. **41** Hianagi Juda
ne' Hezekaia'ma kinima mani'nea knafi Simioni naga'mo'za

vu'za, Hamu naga'ene Meuni naga'enena ome ha' huzmante'za nonkumazmia taganavaziza maka zazmia eri haviza nehu'za zamahe vagare'naze. Na'ankure ana mopafina trazamo'a avitegeno sipisipi afu'ene, bulimakao afutaminema kegavama hu'arerera knare hu'ne. **42** Hagi Simioni nagapinti'ma 500'a vahe'ma zamavare'za Seiri agona kokantegama Idomu kaziga vu'naza kva vahera Iyi mofavreraminki'za Pelatiama, Neariama, Refaiama, Uzieli'e. **43** Hagi korapama Amaleki vahera Israeli vahe'mo'zama zamahe vagarazageno osi'a naga'ma koro frezama ana kazigama umani'naza vahera Simioni naga'mo'za ome zamahe vagare'za ana mopafi mani'za e'za ama knarera menina ehanati'naze.

5 Hagi Israelina ese mofavre'a Rubeni'e. Hianagi Rubeni'a nefana mago a'amofo anteno maseno nefu agia eri haviza hu'ne. E'ina hu'negu ese mofavremofo asomura agra e'ori'neanki, negna Josefe mofavreramimo'za eri'naze. E'i ana agafare Israeli mofavreramofo zamagima krente avontafepina esera Rubeni agia omneneanki, Josefe agi me'ne. **2** Hagi Juda naga'mo'za hankavenentake vahe fore hazageno, Israeli vahe kva zamagripinti fore hu'nazanagi, ese mofavremofo asomura Josefe nagapi me'ne. **3** Hagi Israelina ese mofavre'a, Rubenikino agri mofavreramimofo zamagi'a, Hanoki'ma, Palu'ma, Hesroni'ma, Karmi'e. **4** Hagi Joelimpinti'ma fore'ma hu'nazana, Joel'i'a Semaia'a nefu'e, Semaia'a Gogi nefu'e, Gogi'a Simei nefu'e, **5** hagi Simei'a Maika nefu'e, Maika'a Reaia nefu'e, Reaia'a Ba'ali nefu'e, **6** hagi Ba'ali'a Bera nefu'e. Hagi Asiria kini ne' Tiklat-pilesama zamaheno kinama ome huzmantea knafi Bera'a Rubeni nagatera vugota huzmanteno kva mani'ne. **7** Hagi Bera nagamofo zamagia Rubeni nagamofo zamagima krente'naza

avontafepi krente'naze. Hagi Jeili'a ugota higeno Zekaraia
ehenka higeke kva mani'na'e. **8** Hagi Asasi nemofo'a Bela'e,
Bela nemofo'a Sema'e, Sema nemofo'a Joel'i'e. Hagi Rubeni
naga'ma mani'naza mopa Aroeri kumateti evuno, Nebo kumate
uhanatiteno, Bal-Meoni kumate ometre'ne. **9** Hagi mago'amo'za
zage hanati kaziga Yufretisi timofo kama kaziga ka'ma kokampi
mani'naze. Na'ankure Sipisipi afu'zamimozane Bulimakao
afuzmimozanena Gileati mopafina anentara kasepazi hu'za mani
avite'nazageno'e. **10** Hagi Soli'ma kinima mani'nea knafina,
Rubeni naga'mo'za Hagar kumate vahera ha' huzamagetere'za
Giliati mopamofona zage hanati kaziga ana vahe'mokizmi kumapi
mani'naze. **11** Hagi Gati naga'mo'za mago kaziga asoparega
Basani kumateti agafa hute'za mani'za vu'za Saleka kumate
ome atre'naze. **12** Hagi Basani mopafina Joel'i vugota huno kva
mani'negeno, Safamu anante kva manigeno, Safamu amefira
Janai manigeno, Janai amefira Safati kva mani'ne. **13** Hagi Gati
nagapina 7ni'a naganofi mani'nazankino ana naga nofimofo kva
vahetmimofo zamagi'a, Maikoli'ma, Mesulamu'ma, Seba'ma,
Jorai'ma, Jakani'ma, Zia'ma, Eberi'ma hu'za maka'a seveni'a
mani'naze. **14** Hagi ama nagara Abbihaili agehememo'ze. Abbihailia
Huri nemofo'e, Huri'a, Jaroa nemofo'e, Jaroa'a Gileati nemofo'e,
Gileati'a Maikoli nemofo'e, Maikoli'a Jesisai nemofo'e, Jesisai'a
Jado nemofo'e. Hagi Jado'a Buzi nemofo'e. **15** Hagi Ahi'a ana
nagamofo ugagota kva mani'ne. Hagi Ahi'a Abdieli nemofo'e,
Abdielina Guni kasente'ne. **16** Hagi Gati naga'mo'za Giliati
mopafine Basani kumate'ene mago'a neone kumatmimpine,
knare'ma huno tretre'ma hu'nea Saroni mopamofo agentega
mani'za vu'naze. **17** Hagi Juda kini ne' Jotamu knafine, Israeli
vahe kini ne' Jeroboamu knafi ana maka nagamofo zamagia

avontafepina maka krente'naze. **18** Hagi 44 tausen 760'a hankavematinō ha'ma huga vahera Rubeni nagapine, Gati nagapine, Manase nagama amu'nompinti'ma refkoma hu'za mago kaziga mani'naza nagapine mani'naze. Hagi e'i ana vahe'amo'a hankoma erineno kazintetima ha'ma hu'are'ene, kevema ahe'arera knare zantfa hu'naza vahe mani'naze.

19 Hagi ana vahe'mo'za, Hagari vahe'ma, Jeturi vahe'ma, Nafisi vahe'ma Nodapu vahe'mokizmi hara huzmante'naze.

20 Hagi ha'ma nehu'za Anumzamofontega nunamuna hu'za krafa hazageno, Anumzamo'a nunamu kezmia antahizmino zamaza hige'za, Hagar vahe'ene zamagenaregama eme ante'za ha'ma huzamantaza vahe'enena zamahe vagare'naze. Na'ankure zamagra Anumzamofonte zamentinti hu'nazagu Anumzamo'a zamaza hu'ne. **21** Hagi Israeli vahe'mo'za Hagar vahe'ma zamahe'zama eri'naza zantamina 50 tauseni'a kemoli afutminki, 250 tauseni'a Sipisipi afutminki, 2 tauseni'a tonki afutminki, 100 tauseni'a vahetamine kina huzmante'za zamavare'za e'naze. **22** Hagi ana hapina rama'a Hagar vahera zamahe'naze. Na'ankure Anumzamo Agra'a hara huzmante'ne. Hagi ana hute'za Rubeni naga'ma Gati naga'ma mago'a Manase naga'mo'za ana mopafi mani'nazageno Asiria vahe'mo'za eme zamahe'za kina huzmante'za zamavare'za vu'naze. **23** Hagi mago'a amu'nompinti'ma refkoma hu'naza Manase naga'mo'za rama'a vahe fore hu'za Basani kumatetira maninime vu'za Bal-hermoni kumate uhanati'za, Bal-hermoni kumatetira Senir kumate uhanatite'za, maniza Hermoni agonare uhanati'za rama'a vahe mani'naze. **24** Hagi ana naga nofipima harafa vahe'ma mani'nazageno zamagima me'nege'za nagazmire'ma ugagotama hu'naza vahetmimofo zamagia, Eferi'ma, Isi'ma,

Elieli'ma, Azrieli'ma, Jeremaia'ma, Hodavia'ma, Jadieli'e. **25**
Hianagi ana naga'mo'za monko a'nemo'za ve'a atreno ru vene
savri hiaza hu'za zamagehemofo Anumzantera mani fatgo hu'za
mani'ne'za zamentintia nosu'za ovariri'naze. Hagi ana mopafi
vahe'ma Anumzamo'ma zamahe fananema hu'nea vahetmimofo
havi anumzantami nevaririza monora huzmante'naze. **26** E'ina
hazageno Anumzamo'a Asiria kini ne' Pulina (mago agi'a
Tiglat-pileser) arimpa azeri otigeno Rubeni naga'ene Gati
naga'ene amu'hompinti refkoma hu'naza mago'a Manase nagara
eme zamaheno kina huzmanteno zamavareno vuteno Hala
kumate'ma, Habori kumate'ma, Hara kumate'ma, Gosani tinte
ome zamantege'za mani'za e'za meninena mani'naze.

6 Livae ne' mofavrерамимоfo zamagi'a, Gersonima, Kohati'ma,
Merari'e. **2** Hagi Kohati ne' mofavrерамимоfo zamagi'a,
Amramu'ma, Izari'ma, Hebroni'ma, Uzieli'e. **3** Hagi Amramu
mofavrерамимоfo zamagi'a, Aroni'ma, Mosesi'ma, Miriamu'e.
Hagi Aroni ne' mofavrерамимоfo zamagi'a, Nadapu'ma, Abihu'ma
Eleaza'ma, Itamari'e. **4** Hagi Eleaza'a Finiasi nef'a'e, Finiasi'a
Abisua nef'a'e, **5** hagi Abisua'a Buki nef'a'e, Buki'a Uzi nef'a'e.
6 Hagi Uzi'a Zerahia nef'a'e, Zerahia'a Meraioti nef'a'e, **7** hagi
Meraioti'a Amaria nef'a'e, Amaria'a Ahitupu nef'a'e, **8** Ahitupu'a
Zadoki nef'a'e, Zadoki'a Ahima'azi nef'a'e, **9** Ahima'azi'a Azaria
nefa'e, Azaria'a Johanani nef'a'e, **10** Johanani'a Azaria nef'a
mani'ne. Ana hu'neakino Solomoni'ma Jerusalemima ra mono
noma ki'nea knafina Azaria ugagota pristi nera mani'ne. **11**
Hagi Azaria'a Amaria nef'a'e, Amaria'a Ahitupu nef'a'e, **12**
hagi Ahitupu'a Zadoki nef'a'e, Zadoki'a Salumu nef'a'e, **13**
Salumu'a Hilkia nef'a'e, Hilkia'a Azaria nef'a'e, **14** Azaria'a Seraia
nefa'e, Seraia'a Jehozadaki nef'a'e. **15** Hagi Ra Anumzamo'ma

Juda vahe'ene Jerusalemi vahe'enema Nebukaneza azampima
zamavarentegeno'ma kinama huzmanteno zamavarenoma
vu'nefi, Jehozadakina avreno Babiloni vu'ne. **16** Hagi Livae ne'
mofavreramimofo zamagi'a, Gesoni'ma, Kohatima, Merari'e. **17**
Hagi Gesoni ne' mofavreraremofo zanagi'a, Libnike, Simeike.
18 Hagi Kohati ne' mofavreramimofo zamagi'a, Amramu'ma,
Izari'ma, Hebron'i'ma, Uziel'i'e. **19** Hagi Merari ne' mofavreraremofo
zanagi'a, Malike, Musike. Hagi ama ana makara Livae
nagapinti'ma fore hu'naza naganofite'ma ugotama huterema
hu'naza vahe'mokizmi zamagi'e. **20** Hagi Gesonimpinti'ma
fore'ma hu'nea vahera, Gesoni'a Libni nef'a'e, Ribni'a Jahati
nefa'e, Jahati'a Zima nef'a'e, **21** hagi Zima'a Joa nef'a'e, Joa'a
Ido nef'a'e, Ido'a Zera nef'a'e, Zera'a Jeaterai nef'a'e. **22** Hagi
Kohatipinti'ma fore'ma hu'nea vahera, Kohati'a Aminadapu
nefa'e, Aminadapu'a Kora nef'a'e, Kora'a Asiri nef'a'e, **23** hagi
Asiri'a Elkana nef'a'e, Elkana'a Ebiasapu nef'a'e, Ebiasapu'a ru
Asiri nef'a'e, **24** hagi Asiri'a Tahati nef'a'e, Tahati'a Uriel nef'a'e,
Urieli'a Uzia nef'a'e, hagi Uzia'a Sauli nef'a'e. **25** Hagi Elkana
ne' mofavreraremofo zanagi'a, Amasaike, Ahimotike. **26** Hagi
Elkanampinti'ma fore'ma hu'naza vahe zamagi'a, Elkana'a Zofai
nefa'e, Zofai'a Nahati nef'a'e, **27** hagi Nahati'a Eliapu nef'a'e,
Eliapu'a Jerohamu nef'a'e, Jerohamu'a Elkana nef'a'e. **28** Hagi
Samueli ne' mofavreraremofo zanagi'a, ese mofavrea Joel'i'e,
hagi anante'mo'a Abija'e. **29** Hagi Merarimpinti'ma fore'ma
hu'naza vahe'mofo zamagi'a, Merari'a Mali nef'a'e, Mali'a Libni
nefa'e, Libni'a Simea nef'a'e, Simea'a Uza nef'a'e, **30** Uza'a Simea
nefa'e, Simea'a Hagia nef'a'e, Hagia'a Aisaia nef'a'e. **31** Hagi
Deviti'ma huhagerafi huvempage vogisima Ra Anumzamofo
seli mono nompima erinoma omenteteno'a, zavenama aheno

zagame'ma hu vahetmina, ama'na vahetami zamazeri oti'ne.

32 Hagi ana vahe'amo'za seli nompima zavenama aheno
zagamema hu zantera kegava hu'ne'za ana eri'zana e'nerizageno
vuno Solomoni'ma Ra Anumzamofo ra mono nona Jerusalemi
kumate kige'za, rempima hu'naza kante ante'za mono nompina
maka zana hu'naze. **33** Hagi ana vahezagane mofavrezmimofo
zamagi'a ama'ne, mago'ma zavenama aheno zagamema nehia
nera Hemani'e. Agra Kohati nagapinti nere. Hagi Hemani'a
Joeli nemofo'e, Joeli'a Samueli nemofo'e, **34** hagi Samueli'a
Elkana nemofo'e, Elkana'a Jerohamu nemofo'e, Jerohamu'a
Elieli nemofo'e, Elieli'a Toa nemofo'e, **35** hagi Toa'a Zufu
nemofo'e, Zufu'a Elkana nemofo'e, Elkana'a Mahati nemofo'e,
Mahati'a Amasai nemofo'e. **36** Hagi Amasai'a Elkana nemofo'e,
Elkana'a Joeli nemofo'e, Joeli'a Azaria nemofo'e, Azaria'a
Zefania nemofo'e, **37** hagi Zefania'a Tahati nemofo'e, Tahati'a
Asiri nemofo'e, Asiri'a Ebiasapu nemofo'e, Ebiasapu'a Kora
nemofo'e. **38** Hagi Kora'a Izari nemofo'e, Izari'a Livae nemofo'e
hagi Livae'a Israeli nemofo'e. **39** Hagi Hemanima azama hania
ne'ma Deviti'ma azeri oti'neana, Gesoni nagapinti ne' Asapu
azeri oti'ne. Hagi Asapu'a Bereki'a nemofo'e, Berekia'a Simea
nemofo'e. **40** Hagi Simea'a Maikoli nemofo'e, Maikoli'a Basea
nemofo'e, Basea'a Malkia nemofo'e. **41** Hagi Malkia'a Etni
nemofo'e, Etni'a Zera nemofo'e, Zera'a Adaia nemofo'e. **42**
Hagi Adaia'a Etani nemofo'e, Etani'a Zima nemofo'e, Zima'a
Simei nemofo'e, **43** hagi Simei'a Jahati, nemofo'e, Jahati'a
Gesoni nemofo'e, Gesoni'a Livae nemofo'e. **44** Hagi Hemanima
azama hania ne'ma mago'ma azeri oti'neana Merari nagapinti
ne' Etani'e. Etani'a Kisi nemofo'e, Kisi'a Abdi nemofo'e, Abdi'a
Maluku nemofo'e. **45** Hagi Maluku'a Hasabia nemofo'e, Hasabi'a

Amasia nemofo'e, Amasia'a Hilkia nemofo'e. **46** Hagi Hilkia'a
Amzi nemofo'e, Amzi'a Bani nemofo'e, Bani'a Semeri nemofo'e.
47 Hagi Semeri'a Mali nemofo'e, Mali'a Musi nemofo'e, Musi'a
Merari nemofo'e. Hagi Merari'a Livae nemofo'e. **48** Hagi
mago'a Livae vahetamimo'za Anumzamofo nompi eri'za maka
eri'naze. **49** Hianagi Aroni'ene mofavrezaga'amo'zanena kre
sramnamavu itare'ma ofama hu eri'zanki Ruotgema huno
Ruotgema Hu'nefinkama mnanentake'za insensima kre mnamatavu
eri'zanki hu'za eri'naze. Hagi Anumzamofo eri'za ne' Moses'e'ma
hihoma huno huzmante'nea kante ante'za Israeli vahe'mofo
kumizmiguma nona huno apasezmante eri'zana eri'naze. **50**
Hagi Aronimpinti'ma fore'ma hu'naza vahera, Aroni'a Eleaza
nefa'e, Eleaza'a Finiasi nefae, Finiasi'a Abisua nefae. **51** Hagi
Abisua'a Buki nefae, Buki'a Uzi nefae, Uzi'a Zerahia nefae.
52 Hagi Zerahia'a Meraioti nefae, Meraioti'a Amaria nefae,
Amaria'a Ahitubu nefae. **53** Hagi Ahitubu'a Zadoku nefae,
Zadoku'a Ahimasi nefae. **54** Hagi Israeli vahe'mo'zama, ese satu
zokagoma re'za nege'za, mopama refkoma hu'za Aronimpinti'ma
fore'ma hu'naza Kohati naga nofi'ma zami'zage'za eri'nazana
amanahu hu'ne. **55** Juda naga'mofo mopafi Hebron kuma'ene,
tra'zamo'ma knare'ma hu'nea mopama ana kumamofoma
megagi'nea mopane zami'naze. **56** Hianagi hoza mopane
Hebron kuma tavaonte'ma me'nea neonse kumataminena Jefune
nemofo Kalepi ami'naze. **57** Hagi Aroni nagara ama'na mopane,
sipisipi afu'ene bulimaka afu'enema kegavama hu mopa zamitere
hu'ne. Hebron kuma'ma, Libna kuma'ma, Jatiri kuma'ma,
Estemoa kuma'ma, **58** Holoni kuma'ma, Debiri kuma'ma, **59**
Asan kuma'ma, Beth-semesi kumama Juda kumare. **60** Hagi
Benzameni nagamofo mopafima, mopama refko hu'zama Aroni

naga'ma zami'nazana, Gibioni kuma'ene, afu'ma kegavama
hu mopane, Gebane afu'ma kegava hu mopane, Alemeti
kuma'ene sipisipine bulimakao afuma kegavama hu mopane,
Anatoti kuma'ene afu'ma kegavama hu mopane zami'naze.
Hagi ana nagara 13ni'a kuma ana maka Israeli mopafina
zami'naze. **61** Hagi mago'a Kohati naga'ma mani'naza naga'ma
kumama zami'nazana, Manase naga'ma amu'nompintima
refkoma hu'naza nagamofo mopafinti satu zokago re'za nege'za
10ni'a kuma refko huzami'naze. **62** Hagi Basani mopa agu'afima
me'nea kumatamimpintira Gesoni nagama, nagatenofite hu'za
zami'nazana, Isaka naga mopafine, Aseli naga mopafine,
Naftali naga mopafine, Manase naga mopafintira 13ni'a kuma
zami'naze. **63** Hagi Merari naga nofima 12fu'a kuma'ma
refkoma hu'za zami'nazana, Rubeni naga mopafine, Gati naga
mopafine, Zebuluni naga mopafine zami'naze. **64** E'ina hu
hu'za Israeli vahe'mo'za Livae nagara kuma'ene, sipisipizmine
bulimakao afu'zmima antesaza mopa zamitere hu'naze. **65**
Hagi Juda naga mopafima, Simioni naga mopafima, Benzameni
naga mopafinema, me'nea kumatamima zamajima krente'haza
kumatamina satu zokago re'za nege'za, zamitere hu'naze. **66**
Hagi mago'a kumatamima Kohati naga'mo'zama eri'nazana,
Efraemi naga mopafi me'nea kumatami eri'naze. **67** Hagi
Israeli vahe'mo'za zamagu'vazi kumarema hu'za tro'ma hu'naza
kumatmima Efraemi agona kokampi me'neana Sekemu kuma'ene
Sipisipine bulimakao afuzmima antesaza mopane, Gezeri
kuma'ene zagagafa zamima antesaza mopane, **68** Jokmeamu
kuma'ene sipisipine bulimakao afu'zamima antesaza mopane,
Bet-horoni kuma'ene sipisipine bulimakao zamima antesaza
mopane, **69** Ajjaloni kuma'ene sipisipine bulimakao zamima

antesaza mopane, Gat-rimoni kuma'ene sipisipine bulimakao zamima antesaza mopa zami'naze. 70 Hagi mago'a Kohati naga'mo'zama kuma'ene sipisipine bulimakao zamima antesaza mopanema eri'nazana, amu'nompintima refkoma hu'naza Manase nagamokizmi mopafinti Aneri kuma'ene sipisipine bulimakao zmima antesaza mopane, Bileamu kuma'ene sipisipine bulimakao zmima antesaza mohanena zami'naze. 71 Hagi amu'nompinti'ma refko'ma hu'naza Manase nagamofo mopafinti'ma Gesomu naga nofi'ma kuma'ene mohanema refko huzami'nazana Gorani kuma'ene sipisipine bulimakao zamima antesaza mopa refko hunezamiza, Astaroti kuma'ene sipisipine bulimakao zamima antesaza mohanena refko huzami'naze. 72 Hagi Isaka nagamokizmi mopafina mago'a kuma'ene sipisipine bulimakao zamima antesaza mopa me'ne. Hagi ana kumatmimofo zamagi'a, Kedesi kuma'ene sipisipine bulimakao zamima antesaza mopane, Daberati kuma'ene sipisipine bulimakaoma antesaza mopane, 73 Ramoti kuma'ene Anemi kuma'ene sipisipine bulimakao zamima antesaza mohanena eri'naze. 74 Hagi mago'a kuma'ene sipisipine bulimakao zamima antesaza mohanema zami'nazana, Aseli naga'ma mani'naza mopafi zami'naze. Hagi ana kumatmimofo zamagi'a, Masali kuma'ene sipisipine bulimakao zmima antesaza mopane, Abdoni kuma'ene sipisipine bulimakao'zmima antesaza mopane, 75 Hukoki kuma'ene sipisipine bulimakao'zmima antesa mopane, Rehobu kuma'ene sipisipine bulimakao'zmima antesaza mopane zami'naze. 76 Hagi mago'a kumama zami'nazana, Galili kaziga Naftali naga mopafi zami'nazankino, Kedesi kuma'ene sipisipine bulimakao zmima antesaza mopane, Hamoni kuma'ene, sipisipine bulimakao zamima antesaza mopane, Kiriataimi kuma'ene sipisipine bulimakao zmima antesaza

mopa zami'naze. **77** Hagi mago'a Merari naga'ma maniza
naga'ma kuma'ene sipisipine bulimakao zmima antesaza mopa
zami'nazana, Zebuluni nagamofo mopafi zami'naze. Hagi ana
kumatremofo zanagi'a, Rimono kuma'ene sipisipine bulimakao
zmima antesaza mopane, Tabori kuma'ene sipisipine bulimakao
zamima antesaza moapanena zami'naze. **78** Hagi Rubeni
nagamofo mopa Jodani timofo zage hanati kaziga Jeriko
kuma'mofa kama kaziga me'ne. Hagi ana naga'mofa mopafima
kuma'ene sipisipine bulimakao zamima antesaza mopama
zami'naza kumatamimofo zamagia, ka'ma kopima me'nea
Bezeri kuma'ene sipisipine bulimakao zmima antesaza mopane
Jaza kuma'ene sipisipine bulimakaozmima antesaza mopane,
79 Kedemoti kuma'ene sipisipine bulimakao zmima antesaza
mopane, Mefati kuma'ene sipisipine bulimakao zmima antesaza
mopane zami'naze. **80** Hagi Gati nagamofo mopafintira Giliati
kaziga Ramoti kuma'ene sipisipine bulimakao zmima antesaza
mopane, Mahanaimu kuma'ene sipisipine bulimakao zmima
antesaza mopane, **81** Hesboni kuma'ene sipisipine bulimakao
zmima antesaza mopane, Jazeri kuma'ene sipisipine bulimakao
zmima antesaza mopane, zami'naze.

7 Hagi Isakana 4'a ne' mofavreramimofo zamagi'a, Tola'ma,
Pua'ma, Jasupu'ma, Simroni'e. **2** Hagi Tola ne' mofavreramimofo
zamagi'a, Uzi'ma, Refaia'ma, Jeriel'i'ma, Jamai'ma, Ipsamu'ma,
Samueli'e. Hagi ama ana vahetamina Tola nagapina mago
mago naga nofimofo ugagota kva vahetami ana knafina
mani'naze. Hagi ana nagapinti'ma hankavenentake sondia
vahetmimofo zamagima Deviti'ma kini mani'nea knafima kre'za
eri fatgoma hu'nazana, 22tausen 600'a vahetami zamagi
avontafepina krente'naze. **3** Hagi Uzia nemofo'a Izrahia'e. Hagi

Izrahia ne' mofavrermimofo zamagi'a, Maikoli'ma, Obadaia'ma, Joel'i'ma, Isia'e. Hagi ana maka 5fu'amo'za nagazmirera ugagota kva vahe manitere hu'naze. 4 Hagi ana nagapintira, ha'ma huga vahetamina 36 tauseni'a sondia vahetami fore hu'naze. Na'ankure ana naga'mo'za hakare'a a'neramine ne' mofavrermamine zamante'naze. 5 Hagi Isaka nagapintima zamagima kre'za eri fatgoma hu'nazana 87 tauseni'a sondia vahetmimofo zamagi kre'za eri fatgo hu'naze. 6 Benzameni'a 3'a ne' mofavrermami zamante'neankino zamagi'a, Bela'ma, Beker'i'ma, Jediaeli'e. 7 Hagi Bela'a 5fu'a ne' mofavrermami zamante'neankino, zamagi'a, Ezbonima, Uzi'ma, Uzieli'ma, Jerimoti'ma, Iri'e. Hagi mago'magomo'a naga'amofonte ugagota kva vahe manitere hu'naze. Hagi ana nagapinti'ma sondia vahetmimofo zamagima kreza eri fatgoma hu'nazana 22tausen 34'a sondia vahetmimofo zamagi kre'za eri fatgo hu'naze. 8 Hagi Beker'i'ma ne' mofavrermimofo zamagi'a, Zemira'ma, Joasi'ma, Eliezer'i'ma, Elioenai'ma, Omri'ma, Jeremoti'ma, Abiza'ma, Anatotima, Alemeti'e. E'i ana maka Beker'i'ma ne' mofavrermamine. 9 Hagi e'i ana nagamofo zamagima kasente kasentema huno e'neregatima kreno eri fatgoma hu'neana 20 tausen 200'a hankave sondia vahetmimofo zamagi'a kre'za eri fatgo hu'naze. 10 Hagi Jediali nemofo'a Bilhani'e. Hagi Bilhani ne' mofavrermimofo zamagi'a, Jeusi'ma, Benzameni'ma, Ehuti'ma, Kenana'ma, Zetani'ma, Tasisi'ma, Ahisahari'e. 11 Hagi mago'magomo'a naga'amofonte ugagota kva vahe manitere hu'naze. Hagi ana nagapintima ha'ma huga sondia vahetamimofo zamagima kreza eri fatgoma hu'nazana 17 tauseni 200'a sondia vahe zamagi kreza eri fatgo hu'naze. 12 Hagi Iri nemofokea Supimike, Hupimike. Hagi Husimi'a Aheri nemofo'e. 13 Naftali ne' mofavrermimofo

zamagi'a, Jazieli'ma, Guni'ma, Jezeri'ma, Salumu'e. Hagi
ama ana nagara, Jekopu'ma eri'za a' a'ma eri'nea a'mofo
Bilha agehe'mo'ze. **14** Manase ne' mofavrerarena, Asrielike,
Makirike. Hagi ana mofavrerarena, henka a'ma Manase'ma
Aramu a'ma eri'nea a'mo kasezanante'ne. Hagi Makiri'a Giliati
kasente'ne. **15** Hagi Makiri'a Hupimina mago a' avrenemino,
Supimina mago a' avremi'ne. Hagi nesaro agi'a Maka'e. Hagi
Makirimpinti Selofehati'a fore hune. Hagi Selofehati'a nera
onte'neankino, mofanege ante'ne. (Num 27:1-11.) **16** Hagi Makiri
nenaro'a Ma'akakino tare ne' mofavrerare zanante'ne. Hagi ana
mofavrerarena zanagi'a, Peresi'ene Seresike. Hagi Seresi'a tare
ne' mofavrerare zanante'neankino zanagi'a, Ulamuke Rakemike.
17 Hagi Ulamu nemofo'a Bedani'e. Hagi ama ana nagara Giliati
nagare. Hagi Giliati'a Makiri nemofo'e, hagi Makiri'a Manase
nemofo'e. **18** Hagi Hamoleketi'a Giliati nesarokino Isotima,
Abiezerima, Malama huno kasezamante'ne. **19** Hagi Semida ne'
mofavreramimofo zamagi'a, Ahiani'ma, Sekemu'ma, Likhi'ma,
Aniamu'e. **20** Efraemimpinti'ma fore'ma hu'naza vahera, Efraemi
nemofo'a Sutela'e, Sutela nemofo'a Bereti'e, Bereti nemofo'a,
Tahati'e, Tahati nemofo'a Eliata'e, Eliata nemofo'a mago Tahati'e
21 Hagi Tahati nemofo'a Zabati'e, Zabati nemofo'a Sutela'e,
Sutela nemofo'a Ezeri'e. Hagi Ezerike Elatikea Gati kumateti
bulimakao afu musufa omenesake'za, Gati vahe'mo'za zanahe
fri'naze. **22** Hagi ana'ma hu'za ana netrema nezanahazageno'a
nezanafa Efraemi'a tusi asunku huno zavinetoge'za afuhe'za
e'za eme azeri avavase'naze. **23** Hagi ana'ma hutegen'o'a,
Efraemi'a nenaro'ene masegeno, amu'ene huno mago nemofavre
kasenteno agi'a Beria'e huno antemi'ne. Na'ankure ra hazenkefi
naga'amo'a ufre'negeno'e. **24** Hagi Efraemi'a mago mofa

ante'neankino agia Sera'e. Hagi Sera'a anagamu Bet-horoni kuma'ene, fenkamu Bet-horoni kuma'ene, Uzen-Sera kuma'ene erifore hu'ne. **25** Efraemi'a Refa nef'a'e, Refa'a Resefu nef'a'e, Resefu'a Tela nef'a'e, Tela'a Tahani nef'a'e. **26** Hagi Tahani'a Ladani nef'a'e, Ladani'a Amihudi nef'a'e, Amihudi'a Elisama nef'a'e. **27** Hagi Elisama'a Nuni nef'a'e, hagi Nuni'a Josua nef'a'e. **28** Hagi Efraemi naga'ma mani'naza mopane kuma'enena amana hu'ne, sauti kaziga Beteli kuma'ene megagi'nea kumatamine megeno, zage haniti kaziga Naran kuma' megeno, zage fre kaziga Gezeri kumatmi megeno, noti kaziga Sekemu kumatamine Aia kumatamine me'ne. **29** Hagi Manase naga'mofo kumatmina Bet-sani kuma'ene ana tavaonte'ma me'nea kumatamine, Tanaki kuma'ene ana tavaonte'ma me'nea kumatamine, Megido kuma'ene ana tavaonte'ma me'nea kumatamine, Dori kuma'ene ana tavaonte'ma me'nea kumatmi me'ne. Hagi e'ina kumatmimpi Israeli nemofo Josefe mofavreramina mani'naze. **30** Hagi Asa ne' mofavreramimofo zamagi'a, Imna'ma, Isva'ma, Isvi'ma, Beria'e. Hagi nezmasaro agi'a Sera'e. **31** Hagi Beria ne' mofavreramimofo zamagi'a, Heberi'ma, Malkiel'i'e. Hagi Malkiel'i'a Birizaiti kasente'ne. **32** Hagi Heberi ne' mofavreramimofo zamagi'a, Jafleti'ma, Someri'ma, Hotamu'e. Hagi nezamasaro agi'a Sua'e. **33** Hagi Jafleti ne' mofavremofo zamagi'a, Pasaki'ma, Bimhali'ma, Asvati'e. **34** Hagi Someri ne' mofavreramimofo zamagia, Ahi'ma, Roga'ma, Jehuba'ma, Aramu'e. **35** Hagi Someri nefu, Helemu ne' mofavreramimofo zamagia, Sofa'ma, Imna'ma, Selesi'ma, Amali'e. **36** Hagi Zofa mofavreramimofo zamagi'a, Sua'ma, Haneferi'ma, Suali'ma, Beri'ma, Imra'ma, **37** Bezeri'ma, Hod'i'ma, Sama'ma, Silsa'ma, Itrani'ma, Bera'e. **38** Hagi Jeteri ne' mofavreramimofo zamagia, Jefune'ma, Pisp'a'ma, Ara'e. **39** Hagi

Ula ne' mofavreramimofo zamagi'a, Ara'ma, Hanieli'ma, Riza'e.

40 Hagi ama ana maka vahera Asampinti fore hu'nazankino, nagazmimofonte ugagota kva vahe manitere hu'naze. Hagi e'i ana nagamofo zamajima kasente kasentema huno e'neregatima kre'za eri fatgoma hu'nazana, 26 tauseni'a hankave sondia vahetamimofo zamagi kre'za eri fatgo hu'naze.

8 Hagi Benzameni'a ese mofavrea Bela kasenteno, anantera Asbeli kasenteno, namba 3 mofavrea Ahara kasenteno, 2 namba 4 mofavrea Noha kasenteno, namba 5 mofavrea Rafa kasente'ne. **3** Hagi Bela ne' mofavremofo zamagi'a, Adari'ma, Gera'ma, Abihuti'ma, **4** Abisua'ma, Namani'ma, Ahoa'ma, **5** Gera'ma, Sefufani'ma, Hurami'e. **6** Hagi Ehuti ne' mofavreramina zamagra mago mago naga kegava hutere hu'naza vahetminkino, Geba kumate mani'nazageno ha' vahe'mo'za eme huzamante'za zamavare'za Manahati kumate kina ome huzmante'naza vahe mani'naze. **7** Hagi ana mofavreramimofo zamagi'a Namani'ma, Ahiza'ma, Gera'e. Hagi Gera'a Heglamu nefae, hagi Heglamu'a Uzakizni Ahihudikizni kasezanante'ne. **8** Hagi Saharaimi'a tare a'ararema Husimine Baranema huznanteteno Moapu mopafima mani'neno'a, mago a' erino rama'a ne' mofavrerami zamante'ne. **9** Hagi e'i ana ne'mofavreramina henka a'a Hodessinteti kase zmante'nea ne' mofavreramina, Jobabu'ma, Zibia'ma, Mesa'ma, Malkamu'ma, **10** Jeusi'ma, Sakia'ma, Mirma'e. Hagi e'ina maka ne' mofavreramimo'za nagazmimofo ugagota kva vahe manitere hu'naze. **11** Hagi Saharaimi nenaro Husimi'a ne' mofavrerarena Abitubukizni Elpa'alikizani kasezanante'ne. **12** Hagi Elpali ne' mofavreramimofo zamagi'a, Eberi'ma, Misamu'ma, Semeti'e. Hagi Semeti'a Ono kuma'ene Lodi kuma'ene, tava'onte'ma me'hea kumatamina eri fore hu'ne. **13** Hagi Beria'ene Semakea

Aijalon kumate'ma nemaniza nagamofo kva netrenkike, Gati kumate'ma nemaniza nagara zanagra zamahe natitre'na'e. **14**
Hagi Beria ne' mofavreramina, Ahio'ma, Saka'ma, Jeremoti'ma,
15 Zebadaia'ma, Aradi'ma, Ederi'ma, **16** Maikeli'ma, Ispa'ma,
Joha'e. **17** Hagi Elpal'i'a ne' mofavreramina, Zebadaia'ma,
Mesulamu'ma, Hizki'ma, Heberi'ma, **18** Ismerai'ma, Izlia'ma,
Jobabu'e. **19** Hagi Simei ne' mofavreramina, Jakimi'ma, Zikri'ma,
Zabdi'ma, **20** Elienai'ma, Zilatai'ma, Elieli'ma, **21** Adaia'ma,
Beraia'ma, Simrati'e. **22** Hagi Sasaki ne' mofavreramina,
Ispani'ma, Eberi'ma, Elieli'ma, **23** Abdoni'ma, Zikri'ma, Hanani'ma,
24 Hananaia'ma, Elamu'ma Antotiza'ma, **25** Ifdeia'ma, Penueli'e.
26 Hagi Jerohamu ne' mofavreramina, Samserai'ma Seharaia'ma,
Atalia'ma, **27** Jaresaia'ma, Elaija'ma, Zikri'e. **28** Hagi e'ina
vahetmina naga zmimofonte ugagota kva vahetaminkiza
zamagima krente avontafepi zamagia krente'naze. Hagi ana
maka'mo'za Jerusalemi kumate mani'naze. **29** Hagi Gibioni
nefa. Jeieli'a Gibioni kumate nemania nekino, nenaro agi'a
Maka'e. **30** Hagi Gibionina ese ne' mofavre'a Abdoni'e'. Hagi
ana amefi'ma kasezmante'neana, Zurima, Kisima, Balima
Nadapuma, **31** Gedorima Ahioma, Zekerima, **32** Mikloti'e.
Hagi Mikloti'a Simei nef'a'e. Ana naga'mofona zamafuhe'za
Jerusalemi kumamofona kantu kaziga manizage'za, zamagra
kama kaziga mani'naze. **33** Hagi Neri'a, Kisi nef'a'e, Kisi'a
Soli nef'a'e. Hagi Soli ne' mofavreramina, Jonatani'ma, Malki-
sua'ma, Abinadapu'ma, Esbali'e. **34** Hagi Jonatani'a Merib-
bal nef'a'e, hagi Marib-balina mago agia Mefibosetikino Maika
nefa'e. **35** Hagi Maika ne' mofavreramina, Pitoni'ma, Meleki'ma,
Tarea'ma, Ahasi'e. **36** Hagi Ahasi'a Jehoada nef'a'e, hagi
Jehoada'a Alemetima, Azmavetima, Zimrikizmi nezmafa'e.

Hagi Zimri'a Moza nef'a'e. **37** Hagi Moza'a Binea nef'a'e, Binea'a Rafali nef'a'e, Rafali'a Eleasa nef'a'e, hagi Eleasa'a Azeli nef'a'e. **38** Azeli'a 6si'a ne' mofavrerami zamante'neankino zamagi'a, Azrikamu'ma, Bokeru'ma, Ismaeli'ma, Searia'ma, Obaidia'ma, Hanani'e. Ama ana makara Azeli mofavrerami mani'naze. **39** Hagi Azeli nefu Eseki ne' mofavreramina, ese mofavrea Ulamu'e, anantero Jeusi'e, hagi namba 3 mofavrea Elifeleti'e. **40** Hagi Ulamu mofavreramina hankavenentake sondia vahetamink'i'za ati'ma ahe'arera knare hu'naze. Hagi ana naga'mo'za rama'a mofavrerami kasezmantage'za nezamageho zanena mani'nazankino, namba zamimo'a 150'a mani'naze. Hagi ana nagara maka Benzamenimpinti'ma fore'ma hu'naza naga mani'naze.

9 Hagi e'ina hu'za nagatenofite maka zamagi'a kre'za eri fatgo hazageno, Israeli kini vahetmimofo avontafepina kre'za eri fatgo hunte'naze. Hagi Juda vahetmina zamavare'za Babiloni kina ome huzmante'naze. Na'ankure Ra Anumzamofona ovariri zamage'na humi'nazagu anara hu'naze. **2** Hagi kinama ome hu'nazaregati'ma ese'ma e'za mopa'zamima emeri'naza vahera, Pristi vahetmima, Livae vahetmima, mono nompi eri'za vahetamine mago'a Israeli vahem'o'zanena e'za mopazmia emeri'naze. **3** Hagi mago'a vahera Juda nagapinti'ma Benzameni nagapinti'ma, Efraemi nagapinti'ma, Manase nagapintiki hu'za e'za Jerusalemi kumatera emani'naze. **4** Hagi anampima mago'a naga'ma e'nazana, Utai naga e'naze. Hagi Utai'a Amihudi nemofo'e, Amihudi'a Omri nemofo'e, Omri'a Imri nemofo'e, Imri'a Bani nemofo'e, hagi Imri'a Perezi nagapinti fore hu'ne. Hagi Perezi'a Juda nemofo'e. **5** Hagi mago'a vahe'ma anampima e'nazana, Sela nagapinti Asaia'ene ne' mofavreramima'ane e'naze. **6** Hagi Zera

ne'mofavre nagapinti'ma mago'a vahetmina e'nazana, e'i ana
nagara Jueli'ene naga'ane e'nazankino ana maka vahera 690'a
vahet e'naze. 7 Hagi Benzameni nagapinti vahet'ma e'nazana,
Mesulamu nemofo Salu e'ne. Hagi Mesulamu'a Hodavia
nemofo'e, Hadavia'a Hasenua nemofo'e, 8 hagi Hasenua'a
Ibneia nemofo'e, Ibneia'a Jerohamu nemofo'e, Jerohamu'a Ela
nemofo'e, Ela'a e'i Uzi nemofo'e, Uzi'a Mikri nemofo'e, Mikri'a
Mesulamu nemofo'e, Mesulamu'a Sefataia nemofo'e, Sefataia'a
Reueli nemofo'e, hagi Reueli'a Ibnaiza nemofo'e. 9 Hagi ama ana
vahetmina maka naganofizmimofonte ugagota kva vahetminkino,
kasezmanente kasezmanente huno e'neregati zamagia kre'za eri
fatgo hu'za avontafepina krente'naze. Hagi ana maka Benzameni
nagapinti fore hu'naza vaheki'za, 956'a vahet'mo'za mopazmia
emer'i'za mani'naze. 10 Hagi pristi vahetmina, Jedaia'ma,
Jehoiaribi'ma, Jakini'e. 11 Hagi Hilkia nemofo'a Azaraia'e. Hagi
Hilkia'a Mesulamu nemofo'e, Mesulamu'a Sadoku nemofo'e,
Sadoku'a Meraioti nemofo'e, Meraioti'a Anumzamofo mono
nonte'ma ugagota huno'ma kvama hu'nea ne' Ahitubu nemofo'e.
12 Hagi mago pristi ne'ma anampima e'neana Adaia'e. Hagi
Adaia'a Jerohamu nemofo'e, Jerohamu'a Pasuri nemofo'e, hagi
Pasuri'a Malkija nemofo'e. Hagi mago pristi nera Masai'e. Hagi
Masai'a Adiel i nemofo'e, Adiel'i a Jazera nemofo'e, Jazera'a
Mesulamu nemofo'e, Mesulamu'a Mesilemiti nemofo'e, hagi
Mesilemiti'a Imeri nemofo'e. 13 Hagi ana maka vahet'ma
e'nazana 1tausen 760'a pristi vahetami ete mopa zimirera
e'naze. Hagi e'i ana vahetmina naga'zmimofonte ugagota kva
vahetami mani'ne'za, Anumzamofo nomo nompi hankaveti'za
eri'za e'neriza vahetami e'naze. 14 Hagi Livae naga'ma e'nazana,
Hasubu nemofo Semaia'e. Hagi Hasubu'a Azrikamu nemofo'e,

Azrikamu'a Hasabaia nemofo'e, Hasabaia'a Merari nagapinti fore hu'ne. **15** Hagi mago'a Livae vahe'mofo zamagi'a, Bakbakari'ma, Heresi'ma, Galali'ma, Mika nemofo Matanaia'e. Hagi Mika'a Zikri nemofo'e, Zikri'a Asapu ne'mofo'e. **16** Hagi mago Livae ne'ma e'neana, Semaia nemofo Obadaia'e. Hagi Semaia'a Galali nemofo'e Galali'a Jedutuni nemofo'e. Hagi mago ne'ma e'neana, Asa nemofo Berekaia'e. Hagi Asa'a, Elkana nemofo'e. Hagi ama ana vahe'mo'za Netofa vahetamimofo kumatamimpi nemaniza vahe mani'naze. **17** Hagi kinama hu'naregati'ma mono no kafantema kvama hanaza Livae vahe'ma Juda mopare'ma e'naza vahe zamagia ama'ne, Salumu'ma, Akubu'ma, Talmoni'ma, Ahimani'e. Hagi ana naga'mo'za zamagrakera ome'nazanki mago'a naga'zamine e'naze. Hagi anampina Salumu ugota kvazimia mani'naze. **18** Hagi korapara Jerusalemi kumamofona zage hanati kaziga kini vahe kafane nehaza kuma kafante kegava hu'nazane. Hagi ka'ma kopima e'naza knafina, Livae nagamofo kuma kafante kegava hu'za maniza e'naza nagare. **19** Hagi Salumu'a Kore nemofo'e, hagi Korena Abiasapu kasente'ne. Hagi Abiasapu'a seli mono no kafante'ma kegavama nehaza naga, Kora nagapinti' nere. Hagi Kora naga'mo'za zamafahe'mozama ka'ma kokampima Ra Anumzamofo seli mono nonkafama kegavama hu'nazaza hu'za kegava hu'naze. **20** Hagi kora Eleaza nemofo Finiasi' ugota huno kegava huzmantegeno, Ra Anumzamo'a agrane mani'neane. **21** Hagi ananteria Meselemaia nemofo Zekaraia atruhu seli mono nontera kva hu'neane. **22** Hagi ana eri'zama eri'naza vahetmina ana maka 212fu'a vahetaminkino, kasezmante kasezamantema hu'za eneregati eri fatgo huno kuma'ma maniterema hu'nazare zamagia krentetere hu'naze. Hagi Deviti'ene kasnampa ne'

Samuelike ama ana eri'zana zamike'za eri'naze. **23** Hagi
ama ana vahe'tmina Ra Anumzamofo no kafante kegava hu
eri'zama eneriza vahere. Hagi zamagrane kasema zamantaza
vahemo'zanena ana eri'zana seli mono nompina erime ne-
eza ra mono nompinena eme eri'naze. **24** E'i ana vahe'mo'za
mono'ma nehaza kumamofo zage hanati kazigagi, zage fre
kazigagi noti kazigagi, sauti kazigagi hu'za 4'a kaziga kuma
kafante kegava hu vahetamine. **25** Hagi ana vahetmimofona
nagazmimoza kumara atre'za 7ni'a zagegnafina ana eri'zana
eme zamaza hute'za vutere hu'naze. **26** E'ina hu'neanagi, Livae
nagapintira 4'a veneneramimo'za vugota hu'za Ra Anumzamofo
mono noma hunaragine nontamine, fenoma ante nontaminena
kegava hu'naze. **27** Hagi kenagera Anumzamofo nonte kegava
hu'za mani'ne'za nanterana kafana anagitere hu'naze. **28** Hagi
mago'a Livae naga'mo'za kavo zuomparami kegavama hu
eri'za eri'naze. Ana kavo zuomparamima mono nompintima
eri'za atiramige, eri'za marerigema hazage'za hampriza erifatgo
huntetere hu'naze. **29** Hagi mago'a Livae naga'mo'za mono
nompi itarami kegava nehu'za, witine, wainine, olivi masavene,
mnanentake'za frenkisensine, mago'a mnanentake zantmima
eri'za aza zantamina kegava hu'naze. **30** Hianagi ana zantmima
eri haviamma higeno knare mnama vu zantmima tro hu eri'zana,
pristi vahe'mo'zage eri'naze. **31** Hagi Livae nemofo Kora nagapinti
ne' Sulamuna ese ne' mofavre'a Matitiakino ofama hu bretima
kre eri'zana agra eri'ne. **32** Hagi Livae vahepinti mago'a Kohati
naga'mo'za maka Sabatima mono nehaza knare'ma Anumzamofo
avure'ma ante bretima kre eri'zana eri'naze. **33** Hagi Livae
naga'ma ugagotama hu'za kegavama hu'naza vahemo'zane
naga'zmimo'zanena mono nompima zavenama aheno zgame'ma

hu eri'zantera vugota hu'naze. Hagi ana naga'mo'za mago'a
eri'zana e'ori'nazanki, ana eri'zanke eri'naze. Na'ankure maka
kna ana mono nompi nemase'za kinagane, nanteranena ana
eri'zanke eri'naze. **34** Hagi ama ana vahetmina Livae nagapina
mago mago nagate ugagota hu'za kegava hu'naza vahetamine.
Hagi ana vahe'mofo zamagi'a avontafepina krentenaze. Hagi
ana vahe'mo'za zamagra Jerusalemi mani'naze. **35** Hagi Gibioni
kuma'ma eri fore'ma hu'nea nera Jeielikino nenaro Ma'aka'ene
Gibioni kumate mani'na'e. **36** Hagi kota mofavre'amofo agi'a
Abdoni'e. Hagi Jeielina mago'a ne'mofavre'amokizmi zamagi'a,
Zuri'ma, Kisi'ma, Ba'ali'ma, Neri'ma, Nadapu'ma, **37** Kedor'i'ma,
Ahio'ma, Zekaraia'ma, Mikloti'e. **38** Hagi Mikloti'a Simeamu
nefa'e. Hagi ama ana naga'mo'za mago'a nagazmima mani'naza
tava'onte Jerusalemi kumate mani'naze. **39** Hagi Neri'a Kisi
nefa'e, Kisi'a, Soli nefae, hagi Soli ne'mofavre'mokizimi zamagi'a,
Jonatani'ma, Malki-sua'ma, Abinadapu'ma, Esba'alie. **40** Hagi
Jonatani'a Merib-ba'ali nefae, hagi Merib-ba'alina mago agia
Mefibosetikino Maika nefae. **41** Hagi Maika ne' mofavremokizmi
zamagi'a, Pitoni'ma, Meleki'ma, Taharea'ma, Ahasi'e. **42** Hagi
Ahasi'a Jara nefae. Hagi Jara ne' mofavremokizmi zamagi'a,
Alemeti'ma, Azmaveti'ma, Zimri'e. Hagi Zimri'a Moza nefae. **43**
Hagi Moza'a Binea nefae, hagi Binea'a Refaia nefae, Refaia'a
Eleasa nefae, hagi Eleasa'a Azeli nefae. **44** Hagi Azeli'a 6si'a ne'
mofavre zamante'neankino zamagi'a, Azrikamu'ma, Bokeru'ma,
Ismaeli'ma, Searaia'ma, Obadaia'ma, Hanani'e.

10 Hagi Filistia vahe'mo'za Israeli vahera ha' eme
huzamantage'za fre'za vazage'za rama'a vahera Gilboa agonafi
ome zamahe fri'naze. **2** Hagi Filistia vahe'mo'za Solina 3'a ne'
mofavre'aramina, Jonatanima, Abinadapuma, Malki-suanena

zamarotgo hu'za ome zamahe fri'naze. 3 Hagi ha'mo'a ome hankavetino nevinfinti Solina ome azeri kagige'za Soli'na kevea ahe'naze. 4 E'ina higeno Soli'a atagu huno maraguzanetino hanko'are'ma azeneria nera asamino, zamago'za noma taga osu Filistia vahe'mo'za eme nazanava hu'za nata hoza namisagi, bainati kazinka'a erinka nahe frio. Hianagi hanko'are'ma azeneria ne'mo'a tusi kore nehuno anara osu'ne. E'ina higeno Soli'a agra'a bainati kazinte taru aheno fri'ne. 5 Hagi hanko'are'ma azeneria ne'mo'ma keama Soli'ma frigeno'a, agra'enena bainati kazima'are taru aheno agra zante ahe fri'ne. 6 E'ina higeno, Soli'ene maka 3'a ne'mofavre naga'enena fri vagarazageno, maka agri naga'mo'za fri vagare'naze. 7 Hagi maka Israeli vahe'ma Jezrili agupofima mani'naza vahe'mo'zama kazageno, Soli'ene maka ne'mofavre naga'anema fri vagarazageno, maka sondia vahe'zmimo'zama koroma hu'za frazage'za Filistia vahe'mo'za ana kumazmia emeri'za manite'za, 8 anante kna zupa Filistia Israeli vahe'ma zamahazage'zama fri'naza vahe'mokizimi kukena hate'za eri'za enevu'za, Gilboa agonafi Soline ne'mofavre'aramimofo zamavufaga ome kefore hu'naze. 9 Hagi Solina kukena'ane hanko'ane, e'neriza aseni'anena rukafri'za erite'za, maka Filistia moparega Soli'ma fri'nea kea atrazageno vuno eno nehige'za, anazamofo agenkea eri'za kaza osu havi anumzazmirega vu'naze. 10 Hagi Filistia vahe'mo'za Soli ha' kukena'a havi anumzazmimofo mono nompi ome nente'za, Soli agenopa eri'za havi anumzazmi Dagoni mono nompi ome hantinte'naze. 11 Hianagi Filistia vahe'mo'zama maka zama Solima huntazazana Jabes-giliati kumate'ma nemani'za vahe'mo'za nentahi'za, 12 hankavenentake ha' vahe'mo'za vu'za Soli avufane, ne' mofavreramima'amofo avufganena ome eri'za

Jabes kumate oki zafa agafafi ome asezamantete'za, 7ni'a knafi ne'zana a'o hu'za zamasunkura hu'naze. **13** Hagi Soli'ma fri'neana, na'ankure agra Ra Anumzamofona tamage huno agu'aretira huno ovaririno, kasege'amofona amagera onte'no, fri vahe hankro'enema keagama nehia ara mago'a zankura ome agenoka huno antahintahia e'herino, **14** agra Ra Anumzamofo knare antahintahigura antahionke'ne. E'ina hu'nea zante Ra Anumzamo'a ahenefrino, Jesi nemofo Deviti kinia azeri ot'i'ne.

11 Hagi anante mika Israeli vahe'mo'za Deviti'ma mani'nere Hebronii kumate omeri tru hu'za amanage hu'za asami'naze, ko tagra kagri kora mani'none. **2** Hagi koma Soli'ma kinima mani'nea knafina kagra Israeli sondia vahera vugota huzmantenka hatera zamavarenka vunka enka hu'nane. Hagi Ra Anumzana kagri Anumzamo'a amanage huno kasami'ne, kagra Nagri vahe'mofona sipisipi afute'ma kegavama hiakna hunka ugagota huzmantenka kva huzmantegahane hu'ne. **3** E'ina hu'negu maka Israeli ranara vahe'mo'zanena Deviti'ma Hebronii kumate mani'nerega azage'za, Ra Anumzamofo avufi huhagerafi huvempa kea hute'za, Ra Anumzamo'ma Samuelima asami'nea kante ante'za Devitina kinia azeri ot'i'ne. **4** Hagi ana hute'za Deviti'ene maka Israeli vahe'mo'za Jebusi vahe'ma nemaniza kumate Jerusalemia kora Jebusie hu'za nehaza kumate vu'naze. **5** Hianagi Jebusi kumate'ma nemaniza vahe'mo'za Devitinkura amanage hu'naze, kagra amarera omegosane. Hianagi Deviti'a ana vahetamina ha' huzmanteno Saioni kuma'ma hankave vihu keginama hu'naza kumara eri'ne. Hagi meni ana kumakura Deviti rankumare hu'za nehaze. **6** Hagi ha'ma hu'zama Devitima nehuno'a amanage hu'ne, iza'o Jebusi vahe'ma ese'ma ha'ma huzmantesia ne'mo sondia vahe'niarera ugagota huno kva huzmantegahie, higeno

Zeruaia nemofo Joapu anara higeno, Sondia vahe'amofo ugagota kva azeri oti'ne. 7 Hagi ana vihu kumara Deviti'a agra kuma erisegeno, e'i ana agafare Deviti rankumare hu'za nehaze. 8 Hagi Deviti'a ana kumamofona urami'nea kazigati kumara agafa huno eri so'e huno ki'no evu'ne. Ana higeno mago'a ana kumara Joapu eri ante fatgo huno evu'ne. 9 Hagi Deviti'a maka zampina hageno marenerino ome hankavetino vu'ne. Na'ankure Hanavenentake Ra Anumzana Monafinka Ohampriga Sondia Vahete kva nemo'a agrane mani'negeno anara hu'ne. 10 Hagi ama'i ugagota hu'za hankavenentake sondia vahetamima Deviti'ma aza hu'za Israeli vahete kvama azeri oti'naza vahetamine. Hagi Ra Anumzamo'ma Israeli vahete kini manigahie hu'nea kante ante'za ama ana hankavenentake sondia vahetmimo'zane maka Israeli vahe'mo'zanena mago zamarimpa hu'za Devitina kinia azeri oti'naze. 11 Hagi Devitina hankavenentake sondia vahetmimofo zamagi'a amane, ese nera Hakmoni nagapinti nekino agi'a Jasobeamu'e. Agra Hankmoni nagapina ugagota sondia ne' mani'neankino, mago hapina 300'a vahе kevenutira zamahe fri'ne. 12 Hagi ana 3'a hanavenentake sondia vahepintira anante'ma eme hu'nea nera Ahoa nagapinti Dodo nemofo Eleaza'e. 13 Hagi Eleaza'a mago zupa Deviti'ene Pas-damimi kumate mani'nakeno Filistia vahe'mo'za bali hozafi Israeli vahera hara eme huzmantegе'za atre'za kore fre'naze. 14 Hianagi Eleaza'ene Deviti'enena ana hoza amunompi oti'neke Filistia vahera hara hunezamantakeno Ra Anumzamo'a zanaza higeke Filistia vahera razampi hara huzamagatere'na'e. 15 Hagi Filistia sondia vahe'mo'zama Refaimi agupofima seli noma ki'zama mani'nazageno'a, 30'a ugagota sondia vahepintira 3'amo'za Deviti'ma Adulamu havegampima mani'nerega vu'naze.

16 Hagi e'i ana knafina Deviti'a ana havegampi mani'negeno, mago'a Filistia sondia vahe'mo'za Betlehem kumate mani'na'ze.

17 Hagi anama higeno'a Deviti'a tinku avesigeno Betlehemima me'nea tinkura agesa nentahino amanage hu'ne, Betlehem kumamofo kafante'ma me'nea tinkerifintima tima afino eme namige'na noasina knare hisine. **18** Hagi anagema higeno'a, ana 3'a hankave sondia vahe'mo'za vu'za Filistia vahe vihua ome tapage hu'za ufre'za Betlehem kumamofo kafante'ma me'nea tinkeriretira tina afi'za Devitina eme ami'naze. Hianagi Deviti'a ana tina oneno Ra Anumzamofontega ofa huno tagitre'ne. **19** Ana tima taginetreno'a Deviti amanage hu'ne, Anumzamof agire tamage nehue, ama'i tina onegahue. Hagi ama ana timo'a mago'a tinknara osu'neanki agatereno, ama ana vahe'mofo korankna hu'neanki'na onegahue. Na'ankure ama ana tima ome afi'naza vahe'mo'za fri'zankura ontahi zamavufaga eri amne hu'za tina ome afi'za e'naze. E'inage nehuno ana tina Deviti'a one'ne. Hagi e'i ana 3'a hanavenentake sondia vahe'mo'za ana zana hu'naze. **20** Hagi Joapu nefu Abisai'a 30'a sondia vahete kva nekino, 3'a vahe'mo'zama eri'zankna ra agima eri'nea nera, 300'a ha' vahetami kevea zamahe friteno, ana ra agia eri'ne.

21 Hagi Abisai'a ana 3'a vahe'mokizimia zamagetereno ra avo erino, kvazimi mani'ne. E'ina hu'neanagi, agra ana 3'a ranra vahepin mago'zamia omani'ne. Hagi agra 30'a vahe'mokizmi kva mani'ne. **22** Hagi Kapzeli kumateti mago nera Johoiada nemofo Benaia'a hankavenentake sondia ne' mani'neankino, agra harafa vahe'mo'zama nehaza zana ranra zantmi nehuno, tare Moapu harafa netrena neznaheno, ko'mopa ko'ma rianknafina kerifintira laionia ahe'ne. **23** Hagi magora Isipiti tusizankna nekrefa zaza'amo'a 2mitagi hafu hu'nea ne' ahe fri'ne. Hagi ana Isipi

ne'mofo karugru keve'amo'a tavrave trohu masinimofo aini'agna
hu'neanagi, Benaia'a ana karugru keve'a hanareno, agri karugru
kevereti ana Isipi nekrefa arefri'ne. **24** Hagi Benaia'a e'inama
hiazante 3'a hanavenentake sondia vahe'mo'zama eri'nazankna
agia eri'ne. **25** Hagi agra 30'a sondia vahe'tmina zamagatereno
ra agi eri'neanagi, 3'a vahepina mago'zamia omani'ne. Hagi
Deviti'a avate kvama hunentaza sondia vahetmimofo kva ne'
Beniana azeri oti'ne. **26** Hagi Devitina hankavenentake sondia
vahetmimofo zamagi'a, Joapu nefu Asaheli'ma, Dodo nemofo
Betlehemu kumateti ne' Elhanani'ma, **27** Harori nagapinti ne'
Samoti'ma, Peloni nagapinti ne' Helesi'ma, **28** Tekoa kumateti
ne' Ikesi nemofo Ira'ma, Anatoti kumateti ne' Aviezeri'ma, **29**
Husa nagapinti ne' Sibekai'ma, Ahoa nagapinti ne' Zalmoni'ma,
30 Netofa nagapinti ne' Maharai'ma, Netofa nagapinti ne' Bana
ne'mofo Heledi'ma, **31** Gibea kumateti, Benzameni nagapinti
ne' Ribai nemofo Itai'ma, Piratoni nagapinti ne' Benaia'ma, **32**
Gasa tinkrahopinti ne' Hurai'ma, Araba nagapinti ne' Abiel'i'ma,
33 Baharumu nagapinti ne' Azmaveti'ma, Salboni nagapinti ne'
Eliaba'ma, **34** Gizoni nagapinti ne' Hasemi'ma, Harari nagapinti
ne' Sage nemofo Jonatani'ma, **35** Harari nagapinti ne' Sakari
nemofo Ahiamu'ma, Uri nemofo Elifari'ma. **36** Mekera nagapinti
ne' Heferi'ma, Peloni nagapinti ne' Ahizama, **37** Kameri nagapinti
ne' Hezro'ma, Ezbai nemofo Narai'ma, **38** Neteni nefu Joeli'ma,
Hagri nemofo Mibhari'ma, **39** Amoni nagapinti ne' Zeleki'ma,
Joapu hankoma e'neria ne' Beroti nagapinti ne' Zeruia nemofo
Naharai'ma, **40** Jatiri nagapinti ne' Ira'ma, Jatiri nagapinti ne'
Garepi'ma, **41** Hiti nagapinti ne' Uria'ma, Alai nemofo Zabati'ma,
42 Rubeni naga kva ne'ma 30'a sondia vahe'enema vanoma
nehia ne' Siza nemofo Adina'ma, **43** Maka nemofo Hanani'ma,

Mitan nagapinti ne' Josafati'ma, **44** Astaroti nagapinti ne' Usia'ma,
Aroeli kumateti Hotamu ne' mofavrerare Sama'ene Jeielikegi,
45 Tizi nagapinti netre Simri nemofokea Jediaeli'ene nefu ne'
Joha'ma, **46** Mahava nagapinti ne' Elieli'ma, Elnamu nemofoke
Jeribai'ene Josavia'ene, Moapu nagapinti ne' Itma'ma, **47**
Erieli'ma, Obeti'ma, Mezoba nagapinti ne' Jasieli'e.

12 Hagi Deviti'ma Ziklagima frakino Kisi nemofo Soli koroma
mani'negen'a ama'na sondia vahe'mo'za agritegama eme
antenakura e'haze. Hagi ana sondia vahetmina hankavenentake
sondia vahetmima agri'enema tragote'za ha'ma nehaza vahetami
mani'naze. **2** Hagi ana sondia vahera atifima keve'ma erinteno
ahe'are'ene, kumi atifima havema erinteno ahe'are'enena knare
zantfa hu'nazankino, amne hoga kazi zamazanteti'ene tamaga
kaziga zamazanteti'enena atireti'ene, kumi atireti'enena hara
hugahaze. Hagi e'ina ana sondia vahetmina Soli nagaki'za,
Benzameni nagapinti vahetamine. **3** Hagi ana vahetema ugota
kva netrena Gibea kumateti ne' Sema nemofokea Ahiezeri'ene
Joasike. Hagi mago'a sondia vahe'mokizmi zamagi'a amane,
Azmaveti nemofokea Jezieli'ene Peretikegi, Anatoti kumati netre
Beraka'ene Jehuke. **4** Hagi Ismai'a Gibioni nagapinti harafa
ne'mo'ma 30'a sondia vahe'ma kegava hu'neana, Jeremaiaki,
Jahzieliki, Johananiki, Gedera nagapinti ne' Jozabadiki, **5**
Eluzaiki, Jerimotiki, Bealiaki, Semariaki, Herufu nagapinti
ne' Sefatiaki, **6** Elkanaki, Isaiaki, Azareliki, Joezeriki, Kora
nagapinti ne' Jasobeamuki, **7** Gedoriti ne' Jerohamu nemofoke
Joelakike, Zebadaiake. **8** Hagi Gati nagapintira hankave sondia
vahetmima ha'ma hu'zama antahi ani hu'neza hankoma eri'neza
kevema ahe'are'ma vugota hu'nazankino ha'ma nehazageno'a,
zamugosamo'a laioni avugosagna nehige'za, zamagamare'amo'a

agonafi nemaniza dia afukna hu'za zamaga neraza vaheki'za Solina atre'za ka'ma kopima hankavenentake vihu'afima Deviti'ma mani'nerega vu'za agrane umani'naze. 9 Hagi ana vahe'mokizmi zamagi'a ama'ne, vugota kvazmia Ezeri'e, hagi namba 2'a Obadia mani'geno, namba 3a Eliapu manigeno, 10 hagi namba 4a Mismana manigeno, namba 5fu'a Jeremaia mani'ne. 11 Hagi namba 6 nera Atai manigeno, namba 7nia Elieli manigeno, 12 hagi namba 8'a Johanani manigeno, namba 9nia Elzabati mani'ne. 13 Hagi namba 10nia mago Jeremaia mani'geno, namba 11nia Makbanai mani'ne. 14 Hagi e'i ana vahetmina Gati nagapinti'ma Deviti Sondia vahetaminte'ma ugotama hu'naza Sondia vahe mani'naze. Hagi anampinti'ma hanave'amo'ma erami'nea sondia kva vahe'mo'za 100'a sondia vahetamina amne zamahe frigahaze. Hagi hanavezmimo'ma zamagatere'nea vahe'mo'za amne 1tauseni'a sondia vahera hara huzmante'za zamahe frigahaze. 15 Hagi e'i ana vene'neramina ese ikante'ma Jodani timo'ma tima hageno enevuno mikazama ante hananeno'ma enevigeno takamahe'nea vahetamine. Hagi ana vene'neramimo'za Jodani tina takahē'za kantu kaziga agupofima mani'naza vahetmina ome zamahe'nat'i'za zage hanati kazigane zage fre kaziga ome zamatre eme zamatre hu'naza vahe mani'naze. 16 Hagi mago'a Juda naga'ene Benzameni nagapinti vene'neramimo'za hankavenentake vihufima Deviti'ma frakino mani'nerega vu'naze. 17 Hagi ana vahetmima nevazageno'a Deviti'a ana vihu'afintira atiramino ome nezmageno amanage hu'ne, tamagrama nagri rone mani'neta naza hunaku'ma ne-esuta, nagra tamagri'ene mago narimpa hugahue. Hianagi mago hazenke'ma osu'nenure'ma tamagrama komoru huta ha' vahe zamazampima navrente'naku'ma ne-esageno'a, tagehemofo

Anumzamo'a negeno knazana tamagrira tamigahie. **18** Anagema higeno'a Anumzamofo Avamu'mo'a ana 30'a veneneramimofo kva ne' Amasainte egeno amanage hu'ne, Devitiga kagri vahe mani'none. Jesi nemofoga, tagra kagri kaziga mani'none. Hagi arimpa fru zamo'ene maka zampima knare'ma hu'zamo'a kagrane nemanesigeno, kazama hanaza vahe'mo'za hara huzmagatenere'za zamagranena knare hu'za manigahaze. Na'ankure Anumzanka'amo'a kaza huno vugahie. Hagi anagema higeno'a, Deviti'a mago rimpa nehuno sondia vahe'mofo kva zamazeri oti'ne. **19** Hagi Soli'ma Devitine Filistia vahe'enema ha'ma huzmante'naku'ma ne-egeno'a Manase nagapinti'ma Israeli sondia vahepima mani'naza nagapinti mago'amo'za atre'za Deviti kaziga e'naze. Hianagi Filistia kva vahe'mo'za Devitina huntazageno nemanirega ete Ziklaki kumatega vu'ne. Na'ankure zamagesama antahi'zana Deviti'ma Solima ome kenuno'a, ete agri kaziga ome anteno tagrira tahegahie hu'za zamagesa antahi'naze. **20** Hagi Deviti'ma ete Ziklaki kumategama nevigeno'a, Manase nagapinti sondia vahe'tmina ama'na vahe'mo'za avaririza vu'naze, Adna'ma, Josabadi'ma, Jediael'i'ma, Maikeli'ma, mago Josabadi'ma, Elihu'ma, Zileta'i'e. Hagi ana Manase nagapintira 1tauseni'a sondia vahete kegava hutere hu'naze. **21** Hagi e'ina sondia vahe'mo'za Devitina aza hu'za ha' vahetmimo'zama ha'ma eme hu'za keonke'zama eri havizama nehaza vahera hara huzmante'naze. Na'ankure zamagra hankavenentake sondia vaheki'za, mago'a sondia vahete vugota huzmante'naze. **22** Hagi mika knafina Devitima aza hunakura rama'a vahetami agritega etere nehazageno, Anumzamofo sondia vahetminkna huno rama'a vahekrerfa efore hu'naze. **23** Hagi Deviti'ma Hebronii kumate'ma mani'negeno'a,

ama'na Solinkura zamavaresra hunente'za Ra Anumzamo'ma hu'nea kante ante'za Deviti kinia mani'nie hu'za agritega ome ante'naze. **24** Juda nagapintira 6tausen 800'a sondia vahe'mo'za hanko'zimine karugru keve'ziminena eri'ne'za vazageno, **25** Simeon nagapintira 7tausen 100'a sondia vahe vazageno, **26** Livae nagapintima vu'nazana 4 tausen 600'a sondia vahe vu'nazankino, **27** ama'na hu'ne, Jehoiada'a Aroni nagamofonte kva nekino agranena 3 tausen 700'a sondia vahetami zamavareno vu'ne. **28** Hagi magora hanavenentake nehazave ne' Zadokukino naga'afintira 22'a ugagota hankave sondia vahe zamavareno evufre'ne. **29** Hagi Benzameni nagapintira 3tauseni'a sondia vahetami e'naze. Hagi anampina Soli afu agnazama agri kazigama mani fatgo hu'za mani'naza sondia vahe'mo'zane e'naze. **30** Hagi Efraemi nagapintira, zamagesga nehaza hankavenentake sondia vahetmina 20tausen 800'a e'naze. **31** Hagi amu'nompinti refko hu'nea Manase nagapintira, 18 tauseni'a vahe huhamprizage'za e'za Devitina kinia eme azeri oti'naze. **32** Hagi Isaka nagapintira 200'a ugagota kva vahe'zagane nagazminena e'naze. Hagi ana kva vahe'mo'za, e'ina hu'za fore hugahie hu'zama knamofoma antahini'ma nehu'za, Israeli vahe'tmima antahintahima nezmiza ranra vahetami'ne. **33** Hagi Zebuluni nagapintira 50tauseni'a sondia vahe'mo'za ha'ma nehaza 'zantami eri'za retro hu'za magoke antahintahire Devitima azu hunakura e'naze. **34** Hagi Naftali nagapintira Sondia vahete'ma kegavama hu vahera 1tauseni'a kva vahe azageno, 37tauseni'a sondia vahetmimo'za hankone karugru kevezmi'ne e'naze. **35** Hagi Dani nagapintira 28 tausen 600'a sondia vahetami e'naze. **36** Hagi Aseli nagapintira ha'ma hu'zama rempi hu'za antahi'naza sondia vahetmina, 40 tauseni'a sondia

vahe'mo'za hazazmia retro hu'za Devitina eme aza hu'naze.

37 Hagi Jodani timofo kantu zage hanati kazigama mani'naza Rubeni nagapinti'ma, Gati nagapinti'ma, amu'nompinti'ma refko hu'nea Manase nagapintira ruzahu ruzahu ha'zazmia eri'ne'za ana makara 120tauseni'a sondia vahetami e'naze. **38** Hagi ama ana maka sondia vahe'mo'zama ha'zazminema eri'za e'nazana magoke antahi'zante e'naze. E'i ana antahi'zana Devitima kini azeri oti'nageno maka Israeli vahe'ma kegavama hania antahizante Hebronii kumatera e'naze. Anahukna hu'za maka vahe'mo'za Israeli kinia Deviti manisie hu'za antahi'naze. **39** Hagi ana sondia vahe'mo'za Deviti'ene 3'agna Hebronii eman'i'naze. Ana hazageno nagazmimo'za ne'zana retro huzmantage'za ne'naze. **40** Hagi ana zanke hu'za afete'are'ma nemaniza Isaka naga'ma, Zebuluni nagama, Naptali naga'mo'za donki agumpima, kemoli agumpima, hosi agumpima bulimakao agumpima witima, fikima, ante hagagehu krepima, wainima hu'za erinte'za eri'za ne-eza bulimakao afu'ene sipisipi afu'ene avre'za e'naze. Na'ankure maka Israeli mopafina vahe'mo'za tusi muse hu'naze.

13 Hagi Deviti'a 1tauseni'a sondia vahetema kegavama hu'naza kva vahe'ene 100'a sondia vahetema kegavama hu'naza kva vahe'ene, maka ugagota kva vahetmina zamavare atru huno keaga huno antahintahizmia eri'ne. **2** Ana'ma nehuno'a amanage huno Israeli vahera zamasami'ne, Tamagramma hugnarerema nehanageno, Ra Anumzamofo avesi'ma me'nena maka Israeli vahetegane, kumazmifine, trazama nenaza afutamima kegavama nehaza mopafima nemaniza pristi vaheteganena kea atresunke'za maka vahe'mo'za e'za eme atru hugahaze. **3** Hagi enketa Ra Anumzamofo huhagerafi huvempage vogisi ete omerita esune. Na'ankure Soli'ma kinima mani'neno kegavama

hu'nea knafina, ana zankura tagra tagesa ontahi mani'none.

4 Hagi anagema hige'za, atruma hu'naza maka vahe'mo'za
mago zamarimpa hu'za kema hanazana hugahune hu'za
hu'naze. Na'ankure antahintahima retro'ma hazazamo'a maka
vahe'mofo zamavurera fatgo hu'ne. 5 E'ina higeno Deviti'a
Anumzamofo huhagerafi huvempage vogisima Kiriat-Jearimi
kumateti'ma omerinaku'ma Israeli vahe'ma zmvare atru'ma
hu'neana Isipia sauti kaziga Sihori tinteti agafa huno manino
vuno noti kaziga Lebo-hamati kumate'ma uhanati'nea Israeli
vahera maka zamavare atru hu'ne. 6 Ana huteno Deviti'ene maka
Israeli vahe'enena Anumzamofo huhagerafi huvempage vogisi
omerinaku Juda nagamofo moparega Kiriat-Jearimi vu'naze.
Hagi ana vogisimofo agofetura tare ankerontre trohuntenegeno,
ana ankerontremofo amu'nompi Ra Anumzamomofo kini trara
mani'nege'za agia nehaza vogisie. 7 Hagi Abinadapu nompintira
kasefa karisifi Anumzamofo huhagerafi huvempage vogisi
erinte'za eri'za e'naze. Hagi ana karisia Uzake Ahioka kegava
huke e'na'e. 8 Hagi eri'zama nevazageno'a Devit'ene Israeli
vahe'mo'zanena Anumzamofo avuga maka hankavezmireti hu'za,
hapue nehaza zavenane, lairiema nehaza zavenane konkena
nere'za zozopanetiza, nasenasepa nehe'za ufena re'za zagamera
hu'za musena hu'naze. 9 Hagi ana hume eza Kidonima witi
honama refuzafu'ma nepea kumapima azageno'a, Uza'a azana
ante kantuteno Anumzamofo huhagerafi huvempage vogisia
azeri'ne. Na'ankure ana huhagerafi huvempage vogisima eri'nea
bulimakao afu'mo'a tanafa huno maseza higeno anara hu'ne.

10 Hagi ana'ma higeno'a Ra Anumzamo'a Uzana tusi arimpa
ahenenteno, ahe fri'ne. Na'ankure Uza'a huhagerafi huvempage
vogisi avako hu'negenole. Ana higeno Uza'a Anumzamofo

avuga fri'ne. 11 Ana'ma higeno'a Ra Anumzamo'ma Uzama ahe
fria zankura Deviti'a tusi arimpa ahenenteno, ana kumakura
Perez-uzae huno agia antemigeno meno eno, ama knarera
ehanati'ne. 12 Hagi ana knarera Deviti'a Anumzamofonkura
koro nehuno amanage hu'ne, inankna hu'na Anumzamofo
huhagerafi huvempage vogisia eri'na noniarega vugahue? 13
E'inage nehuno Deviti'a ana huhagerafi huvempage vogisia erino
noma'arega ovu'neanki, Gati kumate ne' Obed-Edomu nompi eri
kantiteno ante'ne. 14 Hagi Anumzamofo huhagerafi huvempage
vogisimo'a, Obed-Edomu nompina 3'a ika me'ne. Hagi ana'ma
higeno'a, Ra Anumzamo'a Obed-Edomune naga'ane maka
zantmima'a asomu hunte'ne.

14 Hagi anante Tairi kumate kini ne' Hiramu'a kato vahe
huzmanege'za sida zafa e'neriza, have eri'zama eri vahe'ene,
noma negiza vahe'enena nezmavareno Deviti hirega kini noma'a
ome kinaku vu'naze. 2 Hagi ana'ma higeno'a Deviti'ma antahino
keno'ma hiana Ra Anumzamo'a Israeli vahe' kini nazeri otino,
Israeli vahe'agu huno maka mopama kegavama hanua mopa
asomu hunante huno antahi'ne. 3 Hagi Deviti'a Jerusalemi
kumate mani'neno mago'ane a'nanea erino rama'a ne'mofara
zamante'ne. 4 Hagi Jerusalemi kumate'ma mani'nenoma
kasente'nea mofavreramimofo zamagi'a ama'ne, Samuama,
Sobabuma, Netenima, Solomonima, 5 Iparima, Elisuama,
Elpeletima, 6 Nogama, Nefekima, Jafiamma, 7 Elisamama,
Beliadama, Elifeletima huno zamante'ne. 8 Hagi Filistia
vahe'mo'zama antahi'zama, Devitima Israeli vahe kinima azeri
otizageno'a, maka Filistia vahe'mo'za erimago hu'za Devitina
hahunte'naku hake'za mareri'naze. Hianagi ana kema Devitima
asamizageno nentahino, ha' huzmante'naku vu'ne. 9 Hagi Filistia

vahe'mo'za Refaimi agupofi e'za ana kumate vahetmina eme
zamarotgo hu'za rohu nezamare'za mika zazmia eri'naze. **10**
Hagi Deviti'a Anumzamofo antahigeno, Filistia vahera vu'na
hara ome huzmantenugenka, nzampina zamavarentegahano?
Huno higeno amanage huno Ra Anumzamo'a kenona hu'ne,
Marerige'na Filistia vahera kazampi zamavarentaneno. **11** Anage
higeno Deviti'a sondia vahe'anena marerino Filistia vahera hara
ome huzamagatereno amanage hu'ne, Ti hageankna huno
ha' vahe'nia Anumzamo'a hara huzmante'ne. E'ina hu'negu
ana kuma'mofo agi'a Ba'al Perazimie huno agi'a antemi'ne.
12 Hagi Filistia vahe'mo'zama koroma nefre'za atre'za fraza
havi anumzazimia, teve hanavazita kreho huno Deviti'a hige'za,
teve hanavaziza kre'naze. **13** Hagi Filistia vahe'mo'za osi'a
kna umanite'za ete e'za Refaim agupofi vahera zamaratgo
hu'za rohura eme zamare'naze. **14** Hagi Deviti'a mago'ane
Anumzamofona antahigegeno, Anumzamo'a asamino, marerinka
ome ozmahegosananki, rugaginka balsamu zafaramima
me'neregati enka eme hara huzmantenka zamahegahane. **15**
Hagi kagrama antahisankeno'ma zafaramimofo amuzafima
sondia vahetamimo'ma agatre azatrema huno esia agasasama
antahisunka, Filistia vahera vunka hara ome huzamanto.
Na'ankure Anumzamo'a vugota huganteno nevuno, Filistia
sondia vahera zamahegahie. **16** Hagi Anumzamo'ma asami'nea
kante anteno Deviti'a nevuno Filistia vahera Gibionitira agafa
huno zamarotgo huno hara huzmanteno vuno, Gezeri kumate
ome atre'ne. **17** Hagi ana'ma higeno'a Deviti agenkemo'a
maka kokantega vuno eno higeno, Ra Anumzamo'a maka
mopafi vahera zamazeri zamagogofege'za Devitinkura tusi koro
hu'naze.

15 Hagi Deviti'a rankuma'afina Jerusalemi noma'aramina kivatu huteno, Anumzamofo huhagerafi huvempage vogisimofo kumara retrotra huno seli noma'a kinte'ne. **2** Ana huteno Deviti'a amanage huno hu'ne, Mago'a naga'mo'za huhagerafi huvempage vogisia eri'za omegosazanki, Livae nagamozage eri'za egahaze. Na'ankure Ra Anumzamo'a huhagerafi huvempage vogisima eri'za vano nehu'za, eri'zama'ama eri vahera zamagri huhampri zamante'neankiza zamagrake ana eri'zana eri vava hugahaze. **3** Hagi Ra Anumzamofo huhagerafi huvempage vogisima ante kuma'ma retro'ma huntenevi ana vogisia erino emareriku Deviti'a mika Israeli vahera Jerusalemi kumate ke hutru hu'ne. **4** Hagi ana nehuno Deviti'a Aroni naga'ene Livae naga'enena zamavare atru higeno nampa zamimo'a amanahu hu'ne. **5** Kohati nagapina 120'a vahe manizageno, kvazmia Urieli mani'ne. **6** Hagi Merari nagapina Asaia kvazmia manigeno 220'a vahe e'naze. **7** Hagi Gesomu nagapintira Joeli kvazmia manigeno 130'a vahe e'naze. **8** Elizafani nagapintira Semaia kvazmia manigeno, 200'a vahe e'naze. **9** Hagi Hebronii nagapintira Eli'i kvazmia manigeno, 80'a vahe e'naze. **10** Hagi Uzieli nagapintira Aminadabu kvazmia manigeno, 112'a vahe e'naze. **11** Hagi Deviti'a tare pristi netrena Zadokine Abiatarinena ke nehuno Livae nagapinti kva vahetmina Urielima, Asaiama, Joelima, Semaiaama, Elielima, Abinadapuma huno ke hutru huteno, **12** amanage huno zamasami'ne, Tamagra Livae nagapinti kva vahetami mani'naze. Hagi tamagra'a tamazeri agru nehuta, ruga'a Livae naga'enena zamazeri agru huteta, Ra Anumzana Israeli vahe Anumzamofo huhagerafi huvempage vogisia omerita kuma'ma retrotra'ma huntofina eme antegahaze. **13** Na'ankure ese'ma vuta huhagerafi huvempage vogisima omenerunketa

Livae naga'mota tamagra ana vogisia vuta ome e'ori'naze.
E'inama hu'naza zanku Ra Anumzana tagri Anumzamo'a tusi
arimpa aherante'ne. Na'ankure Anumzamofona inankna huta
ama ana vogisia erigahune huta antahi onketa, e'ina huta
erigahazema hu'neankea avaririta ana huhagerafi huvempage
vogisia e'orinone. **14** Anage higeno Livae naga'ene pristi
vahe'mo'za Ra Anumzana Israeli vahe Anumzamofo huhagerafi
huvempage vogisi omerinaku zamazeri agru hu'naze. **15** Ana
hute'za Livae naga'mo'za huhagerafi huvempage vogisia Ra
Anumzamo'ma Mosesema asamigeno zamasami'nea kante
ante'za, vimago zafare eri'zafa hu'za zamafunte kofi'za e'naze.
16 Hagi, hapue nehaza zavenama, lailiema nehaza zavenama,
nasenasepama, zavenane nehesage'za zagame'ma hu'za
musenkasema hanaza vahera Deviti'a Livae nagamofo kva
vahe huzmanteg'e'za nagazamifinti zamazeri oti'naze. **17** Hagi
Joeli nemofo Hemani azeri oneti'za, mago'a afuhe'ima zamazeri
oti'nazana, Berekia nemofo Asapuma, Merari nagapinti Kusaia
nemofo Etamura, **18** mago'a zamazama hanaza vahe'ma
zamazeri oti'nazana, Zekaraiama, Jazielima, Semiramotima,
Jehielima, Unima, Eliapuma, Benaiama, Maseama, Matitiamma,
Elifelehuma, Mikneiama huno huhampri nezmanteno, kuma
kahante kva netrena Obed Idomune, Jeielikizni zanazeri
oti'naze. **19** Hagi zagamema nehu'za bronsiretimu tro'ma hu'naza
nase'nasepama ahesaza vahera, Hemanima, Asapuma, Etanima
huno zamazeri oti'ne. **20** Hagi Lairie nehaza zavenama ahesaza
vahera, Zekaraiama, Azielima, Semiramotima, Jehielima, Unima,
Eliapuma, Maseama, Benaiama huno zamazeri oti'ne. **21**
Hagi hapuema nehaza zavenama ahe vahera Matitiamma,
Elifelehuma, Mikneia'ma, Obed-Idomuma, Jeielima, Azazaiama

hu'za ugotama hu'zama vanaza vahera zamazeri oti'naze.
22 Hagi Livae nagapinti ne' Kenenai'a zagamema hu vhete
ugota hu'neankino, agra zagamema hu'zana rempi huzamigahie.
Na'ankure agra zagamema hu'zana antahini hu'nea ne' mani'ne.
23 Hagi Ra Anumzamofo huhagerafi hvempage vogisima
ante nomofo kafante'ma kegavama hu netrena, Belekiane
Elkanakizni zanazeri oti'naze. **24** Hagi Ra Anumzamofo
huhagerafi hvempage vogisimofo avugama ufema re'za vanaza
pristi vahe'ma zamazeri oti'nazana, Sefaniama, Joshafatima,
Natanielima, Amasaima, Zekaraiama, Benaima, Eliezerima
hu'za zamazeri oti'naze. Hagi Obed Idomune, Jehiakiznia
huhagerafi hvempage vogisima ante kumamofo kahante kegava
hu netre zanazeri oti'naze. **25** Hagi Deviti'ene maka Israeli
kva vahe'mo'zane, 1000ni'a sondia vhete kva vahe'mo'za Ra
Anumzamofo huhagerafi hvempage vogisima musenkase hu'za
Obed Idomu nompinti omeriza marerinaku vu'naze. **26** Hagi
Anumzamo'ma Livae nagama zamaza hige'za Ra Anumzamofo
huhagerafi hvempage vogisima zamafunte'ma eri'za e'naza
zanku hu'za 7ni'a ve bulimakaone, 7ni'a ve sipisipine, ahe'za
kresramna vu'naze. **27** Hagi Deviti'a efeke za'za kukena
nentanigeno, ana zanke hu'za huhagerafi hvempage vogisima
eri'za neaza pristi vahe'mo'zane, zagamema nehaza vahe'ene,
zagame'ma nehaza vahetema ugotama hu'nea ne' Kenenai'enena
anahukna kukena hu'naze. Hagi Deviti'a efeke za'za kukenama
hu'nea agofetura pristi vahe'mo'zama zamimizare'ma nentaniza
kukena efotema nehaza kukena antani'ne. **28** Ana hute'za
Israeli vahe'mo'za nase'nasepana nehe'za, hapuema nehaza
zavenane, Lairiema nehaza zavenanena nehe'za musena hu'za
Ramofo huhagerafi hvempage vogisia eri'za vu'naze. **29**

Hianagi Ra Anumzamofo huhagerafi huvempage vogisima Deviti rankumapima enefregeno'a, Soli mofa Deviti nenaro Mikali'a noma'afi mani'neno zaho eri kampinti kefenkateno ke'ama, kini ne' Devitima musema nehuno haru huno takaure takaure'ma huno avoma hagenoma nevigeno'a, agu'afina antahi haviza hunte'ne.

16 Hagi Anumzamofo huhagerafi huvempage vogisia eri'za e'za Deviti'ma seli no kinte'nefinka eme nente'za, tevefima kre fananehu ofane, arimpa fru ofanena Anumzamofontega kre'naze. 2 Hagi Deviti'ma tevefima kre fananehu ofane arimpa fru ofanema Kresramanama vuteno'a, Ra Anumzamofo agifi Israeli vahetmina asomu kea huzmante'ne. 3 Ana nehuno maka Israeli vahetmina mago mago vene a'enena, bretine afu ame'anena nezamino kre hagegema hu'nea bretinena refko huno zami'ne. 4 Ana nehuno mago'a Livae vahetmina Ra Anumzamofo huhagerafi huvempage vogisire'ma mono eri'zama eri kva vahetami zamazeri o'netino, Ra Anumzana Israeli vahe Anumzamofoma susu hunenteno agima erisgama hu' vahetamina zamazeri oti'ne. 5 Hagi ana vahetmimofo ugotama huzmante'nea kvazmia Asapu'e. Hagi Asapu amefira Zekaraia'e, hagi Zekaraia amefira Jeiel'i'ma, Semiramoti'ma, Jehiel'i'ma, Matitia'ma, Eliapu'ma, Benaia'ma, Obed-Idomu'ma Jeiel'i'e. E'i ana vahetmimofo eri'zana Hapuema nehaza zavenane, Laierima nehaza zavenane, nase'nasepama ahe vahe mani'naze. Hagi Asapu'a ra ageruma neria nase'hasepama nehea ne' mani'ne. 6 Hagi Anumzamofo huhagerafi huvempage vogisimofo avugama maka zupama ufema nera'a pristi netrena Benaiake Jahzielike mani'na'e. 7 Hagi anankna zupa Deviti'a Asapune mago'a Livae afuhe'inena Ra Anumzamofoma susuma hunenteno agima

erisgama hu zagamera ama'na zagame huntege'za esera
agafa hu'za hu'naze. **8** Ra Anumzamofo susu hunenteta, agi'a
aheta knare avu'ava'amofona huama hanunkeno, kokankoka
vahe'mo'za antahisaze! **9** Zgame huta agi'a erisga nehuta,
maka ruzahu ruzahu knare avu'ava'ma hu'nea zamofo nanekea
huama hanune. **10** Zgame huta ruotge'ma hu'nea agia husga
nehanunkeno, zamagu'reti'ma hu'za Ra Anumzamofonku'ma
nehakaza vahe'mo'za muse hugahaze. **11** Ra Anumzamofone
hihamuagu'ene nehaketa, Agri avufima kesaza zanku maka zupa
hakeho. **12** Hagi avamezantamine kaguva zantaminema erifore
nehuno, fatgo avu'ava'ma huno refkoma nehia zankura maka
zupa tamagesa antahiho. **13** Agri eri'za ne' Israeli agehemota
Jekopu ne' mofavreramina, Agra'a huhamprinte'nea vahetami
mani'naze! **14** Agra Ra Anumzana tagri Anumzane. Agra
maka ama mopafi vahe'ene maka zana refko nehie. **15** Hagi
huhagerafi huvempa ke'agura tamagera okanita maka zupa
tamagesa antahi vava hiho. Tauseni'a zupa kasente kasentema
hanigeno fore'ma hunante hunante'ma huno esia vahetminku'ene
Agra ana nanekea hu'ne. **16** Agra Abrahamu'ene huhagerafi
huvempage nehuno, Aisaki'ne huvempagea hunteno, **17** Israeli
vahepina mevava hania kasegea Agra Jekopunte eri kasefa
nehuno, **18** amanage huno asami'ne, erisantima haresanazana
Kenani mopa kamigahue huno hu'ne. **19** Kenani mopafima
osi'a vahe'ma mani'neta emani vahekna huta mani'neta, **20** ru
kumate ru kumate'ma manita vano nehuta, ru vahepi ru vahepi
huta manita vanoa hu'naze. **21** Hianagi agra zamatregeno
mago vahe'mo'a zamazeri havizana osu'ne. Hagi zamazeri
havizama huzankura kini vahetmina hankave naneke zmasamino,
22 amanage hu'ne, zamazeri ruotge'ma hu'noa nagamofo

zamavufagarera zamavakora osiho. Nagri kasnampa vahera
hazenkea ozamiho hu'na hu'noe. **23** Maka mopafi vahe'mota
Ra Anumzamofontega zagamera huta tamagu'ma vazi'nea
zankura knane knanena agi'a erisga hugahaze. **24** Maka
mopafi vahetera, hihamu hankave'ane avu'ava'agura huama
nehuta, ruzahu ruzahu knare avu'ava'ma hu'nea zankura maka
vahera zamasamaho! **25** Na'ankure Ra Anumzana marerisa neki,
Agrike'za ragia amigahaze. Hagi maka havi anumzantamima
mani'nazafina Agrake'zage marerisa Anumzana mani'neankita,
Agrike korora hunenteta agoraga'a manigahune. **26** Na'ankure
maka kumate anumzantamima vahe'mo'za mono'ma hunentaza
anumzantamina vahe'mo'za zamazanteti antre'za tro hu'naza
anumzantami mani'naze. Hianagi Ra Anumzamo monaramina
tro hu'ne. **27** Hagi Agrira marerisa hentofa konariri masa'amo'a
arugagintegeno, hanave'amo'ene masazamo'enena kuma'afina
avite'ne. **28** Hagi maka naga nofimota Ra Anumzamofona
huama nehinke'za keama hiho. Ra Anumzamofo hihamu
masa'agu huama nehinke'za keama hiho. **29** Ra Anumzamofona
keama huta ragia nemita, ofa tamia erita Agri avuga echo. Ra
Anumzamofona ruotge hihamu masa'afi monora hunenteta,
30 maka mopafi vahe'mota Agri avuga tamahirahikura hiho.
Ama mopamo'a hanavetino me'neankino, momira osugahie. **31**
Monamo'a musena nehinkeno, mopamo'enena musena nehu'za
amanage hu'za kokankoka vahera zamasamaho. Ra Anumzamo'a
Agra'a kinia mani'ne hiho! **32** Hagi hagerimo'a kranto kranto
nehi'na, anampima nemaniza maka zagaramimo'za agi'a erisga
nehinkeno, hozamo'ene anampima me'nea kavemo'za agi'a
erisga hiho. **33** Hagi zafafi zafaramimo'za Ra Anumzamofona
muse hunte'za agia erisga hiho. Na'ankure Ra Anumzamo'a

maka ama mopafi zana keagare avrenteno refko hunaku egahie.

34 Ra Anumzamofo musena huntesune, na'ankure Agra knare ne' mani'neankino, maka zupa avesirante vava nehie. 35 Hagi kezatita mago'ene amanage hanune, tagu'ma nevazina Anumzamoka tagrira tagu'vazio. Vahe kokampintira tavre tru hunka tazahugeta susu huneganteta, musena huta ruotge kagika'a erisga huta rankagia kamimneno. 36 Manivava Ra Anumzana Israeli vahe Anumzamofona ragi amisunkeno, ra agia eri vava huno vanie. Anagema hutege'za maka vahe'mo'za tamage hu'za nehu'za, Ra Anumzamofo agi erisga hu'naze.

37 Ana huteno kasegemo'ma hu'nea kante'ma ante'za Ra Anumzamofo huhagerafi huvempage vogisimofo avuga magoke magoke knare'ma eri'zama erisagu Deviti'a Asapune mago'a Livae naga'enena zamazeri ante fatgo hu'ne. 38 Hagi ana vahepina Jedutuni nemofo Obed-Idomune, 68'a naga'ane Hosanena seli mono no kafante'ma kegavama hu vahetami zamazeri oti'ne. 39 Hagi ugota pristi ne' Zadokine afu'aganahe'ina Gibioni kumate Ra Anumzamofo mono'ma hunentazare seli mono nonte'ma kegavama hu vahera zamazeri oti'ne. 40 Hagi ana naga'mo'za Ra Anumzamofo kasegemo'ma hu'nea kante ante'za kinagane nanterananena Kresramanama vu itarera Ra Anumzamofontega Kresramana vutere hugahaze. 41 Hagi ana nagapina Hemanine, Jedutune mago'a zamagima kreno zamazeri oti'nea nagara Ra Anumzamo'ma maka zupama avesizmante vavama nehia zanku'ma humuse hunente'za zagame'ma hu'za agi'ma erisga hu vahetami zamazeri oti'ne. 42 Hagi Heman'ene Jedutunikea ufene, nasenasepane, zavenaramine mago'a zavenama ahe'za Anumzamofoma ajima erisgama nehaza zavena kegava hu'na'e. Hagi Jedutuni amohe'ina kuma

kafante'ma kegavahu vahetami zamazeri ot'i'ne. 43 Hagi ana maka zama vagaregeno'a, maka vahe'mo'za nozmirega vu'za e'za hazageno, Deviti'a agra'a naga'amofo asomu ke ome huzmante'naku noma'arega vu'ne.

17 Hagi Deviti'ma kasefa noma ki'nea nompima agafa huno nemanino'a amanage huno kasnampa ne' Netenina asami'ne, Ko, nagra sida zafanu knare no kinte'na mani'noanagi, Ra Anumzamofo huhagerafi huvempage vogisimo'a seli nompi me'ne. 2 Anage higeno Neteni'a Devitina amanage huno kenona asamine, Na'anoma hunaku'ma kagu'afima antahisana zana amne huo. Na'ankure Anumzamo'a kagri'ene mani'ne. 3 Hianagi ana kenagera Anumzamo'a amanage huno Netenina asamine, 4 Vunka eri'za vaheni'a Devitina omesamio, Nagrama manisua nona Devitiga kagra onkigahane. 5 Israeli vahe'ma Isipiti'ma zamavare atirami'na enoreti'ma eno amare'ma ehanati'neana, magore hu'na nompina Nagra omani'noe. Hianagi Nagra seli nompi manite manite hu'na e'noe. 6 Hagi mago mago kumate'ma Israeli vahe'enema manitere hu'nama e'noana, magore hu'na keagama refko hu kva vahe'ma vaheniare'ma kegava hiho hu'nama huhamprizmante'noa kva vahera noni'a sida zafareti kinanteho hu'na huozmante'noe. 7 E'ina hu'negu menina eri'za vaheni'a Devitina amanage hunka ome asamio, Hankavenentake Ra Anumzamo'a amanage hie, sipisipi afu kva hunka trazama ne'za vanoma nehzarega zamavaririnka vano nehanke'na, Israeli vaheni'are ugota hunka kegava huzmantesane hu'na kavre'noe. 8 Ana hute'na maka kazigama vanoma hanana, Nagra kagrane mani'nena ha' vaheka'a zamahe hana hu'noe. Hagi menina kagri kagia erira hanenkenka ama mopafima zamagima eri'haza vahe kna hugahane. 9 Hagi

Israeli vahe'nia kumara nezami'na zamagrira zafama kriankna hu'na kri'nena zamazeri hanavetisuge'za, zamagra'a kumapi mani'nesageno, mago'a havi vahe'mo'za ko'ma hu'nazaza hu'za eme zamazeri havizana osugahaze. **10** Hagi ke refkohu kva vahe'ma zamazeri ot'noa knafima ko'ma hu'nazaza hu'za, mago'a kumate vahe'mo'za keonkezantamia emeri havizana nehu'za hazenkea ozamigahaze. Hagi maka ha' vaheka'a zamahehna nehu'na, kagri nagara zamazeri hankavetina zamazeri ra ha'nena, kagri nagapinti kva vahera mani'za vugahaze. **11** Hagi kagrama frinka kagehe'zama mani'nazaregama vanankena, kagri mofavreramimpinti magomofo kinia azeri ot'nenkeno hankave kinia manino vugahie. **12** Ana hanugeno ana ne'mo noni'a kigahie. Hagi agripinti'ma fore'ma hania vahake nagra kinia azeri otinena kinia mani vava huno vugahie. **13** Hagi Nagra nefaza hanugeno, agra mofavreniaza hanige'na koma mani'nea kini neteti'ma navesizaniama eri atre'noa zana hu'na ana kini netetira eri otregosuanki avesinte vava hugahue. **14** Hianagi agri azeri otisnugeno, Nagri vahete'ene kuman'i'arera kinia manino kegava hu vava huno vugahie. **15** Anage hutegen Neteni'a vuno Ra Anumzamo'ma ava'nafima asmi'nea kante anteno Devitina ana maka nanekea ome asmi'ne. **16** Hagi kini ne' Devitima ana kema antahiteno'a, seli nompi Ra Anumzamofo avuga ufreto umaniteno amanage huno nunamuna hu'ne, Ra Anumzamoka, nagra i'zana manugeno, Nagani'amo'za nanknahu naga mani'nazagenka nagrira navrenka amarera ehanatine. **17** Hagi Anumzamoka rama'aza hunante'nananagi, e'i ana zamo'a amneza segenka nagra mareri vahe'ma mani'nogeno'ma hiaza hunka nagripinti'ma fore'ma hania vahetema huzmantesana zanku'ma huamama hanazankura muse hugantoe. **18** Hagi eri'za

vaheka'amo'nama nagesgama hunka antahinamina zankura
mago kea osugosue. Na'ankure kagra ko eri'za vaheka'amo'na
nagenka antahinka hu'nane. **19** Na'ankure Ra Anumzamoka
eri'za vaheka'amonagu hunka kagra kavesite razankrerfa tro
hunante'naku eme nasami'ne. **20** Ra Anumzamoka kagrikna
vahera omani'ne. Hagi kagrikna Anumza mani'ne hu'za hazageta
ontahi'none. **21** Hagi ama mopafima mani'naza vahepintira,
ina vahe'mo'za kagri vahe Israeli vaheknara hu'naze? Hagi
Anumzamoka kagri vahe'ma maninogura ina vahe'mo'za kazokzo
eri'zana eneri'za lsipia mani'nazagenka vahe'mo'zama rankagima
kaminagu hunka zamagura vazinka zamavare'nane? Hagi
kagra tusi'a hanavenentake kaguvaza hunka Israeli vahe'ma
nezmahazagenka ha' vahezamia zamahenati atre'nane? **22**
Hagi Kagra Israeli vahera nagri vahe mani' vava hanaze hunka
nehunka, Ra Anumzamoka zamagri Anumza mani'nane. **23** Hagi
menina Ra Anumzamoka atregeno eri'za vahekamonagu'ene
naga'nimofonku'ma hu'nana kemo'a, huvempama hu'nana
kemofo kante anteno, anazamo'a efore huno mevava huno
meno nevinkeno, **24** kagimo'a eama nehina, maka ama
mopafi vahe'mo'za rankagi negami'za amanage hugahaze,
Hankavenentake Ra Anumzana, Israeli vahe Anumza mani'ne
hu'za hugahaze. Hagi eri'za vahekamo'na Deviti'na naga'mo'za
kinia mani vava hu'za kagri kavuga vugahaze. **25** Na'ankure Kagra
Anumzanimoka, eri'za nekamo'na naveri hunka nagripinti'ma
fore'ma huza vnaza vahe'mo'za kinia mani'za vugahaze hunka
hu'nane. E'ina hu'negu eri'za nekamo'na korora osu kagritega
hanavetina nunamuna nehue. **26** Hagi Ra Anumzamoka kagrake
Anumzana mani'enka ama'inahu knare'zana hunante'naku
huvempa kea hunante'nane. **27** Hagi menina kagri kavurera

knare higenka eri'za vahekamo'na naga'mofonku hunka kagri
kavuga kinia mani vava hanaze hunka asomu kea huzmantane.
Na'ankure kagra Ra Anumzankinka asomu ke'ma hana asomu
kemo'a mevava huno vugahie.

18 Hagi henka Deviti'a Filistia vhahera hara huzmagatenereno,
Gati rankumazmia enerino, neone kumazminena Filistia vahe
zamazampintira eri vagare'ne. 2 Hagi anahukna huno Deviti'a
Moapu vahetaminena hara huzmagateregeno, Moapu vahe'mo'za
Deviti eri'za vahe fore hu'za takisi zagoa eri'za etere hu'za eme
ami'naze. 3 Hagi Zoba-Hamati kumate kini ne' Hadadezeri'ma
Zufretesi tima me'neregama mani'naza vahe'ma kegavama
hu'nea kumara Deviti'a hara ome hugatereno eri'ne. 4 Hagi
Deviti'a 1tauseni'a karisigi, 7tauseni'a karisifima vano nehu'za
ha'ma nehaza sondia vahetaminki, 20tauseni'a mopafima vano
nehu'za ha'ma nehaza sondia vahetminki huno zamavaririno
zamazeri'ne. Ana nehuno maka hosi afutamina zamagigr'u'na
taga nehuno, 100'a karisima avazuhuga avamente hosi afutamina
atre'ne. 5 Hagi Siria vahe'ma Damaskasi kumate'ma nemaniza
vahe'mo'za kazana hige'za Zoba kini ne' Hadadezeri eme
aza hu'za ha'ma hunaku'ma azana, Deviti'a 22tauseni'a vahe
zamahe fri'ne. 6 Hagi Deviti'a ana huteno mago'a sondia
vahe'a zamatrege'za Damaskasi kumapina umani'nazageno,
Siria vahe'mo'za Deviti eri'za vahe mani'ne'za takisi zagoa eri'za
eme amitere hu'naze. Hagi Devitina Ra Anumzamo'a hankave
amigeno, maka kazigama ha'ma ome hiana ha' vahe'a hara
ome hu zamagatere'ne. 7 Ana nehuno Hadadezeri sondia
vahe'mo'zama golireti'ma tro'ma hu'naza hankoma eri'hazana,
Deviti'a erino Jerusalemi kumate vu'ne. 8 Hagi Tibhatine,
Kuni kumatrena Hadadezeri kumatrenkino ana kumatrem pintira

Deviti'a rama'a bronsi eri'ne. Hu'neankino Solomon'i'a ana
bronsireti hagerinema huno'ma hu'nea ti tenkia tro nehuno,
mono nomofoma vazisgama hu zafane, mono nompima eri'zama
eri'naza zantamina trohu'ne. **9** Hagi Deviti'ma Zoba kumate kini
ne' Hadadezeri Sondia vahe'tmima zamahehna hiankema Hamati
kumate kini ne' Tou'ma nentahino'a, **10** Deviti'ma ha'ma huno
ha' vahe'ama zmahehna'ma hiazante'ma humuse huntenuogu
nemofo Hadoramuna huntogeno e'ne. Hagi Hadadezerike Toukea
zanagra ha' netrenkike hara hutere neha'a netre mani'na'e.
Hagi Hadoramu'a Devitintega goline, silvane mago'a bronsine
atrentege'za eri'za musezana vu'naze. **11** Hagi Deviti'a ana
zantamina Idomuti'ma, Moaputi'ma, Amoni vahepinti'ma, Filistia
vahepinti'ma, Ameleki vahepinti'ma silvane golinema eri'nea
zantamina Ra Anumzamofo su'ane huno eri ruotge hu'ne. **12**
Hagi Zeruia nemofo Abisai'a Hage nehaza agupofi Idomu vahera
hara ome huzmanteno, 18tauseni'a sondia vahe zamahe fri'ne.
13 Ana hutegeno Deviti'a mago'a sondia vahe'a huzmantenge'za
Edomu kumate umanize'za, Edomu vahe'mo'za Deviti eri'za
vahe mani'ne'za takisi zagoa eri'za eme ami'naze. Hagi Devitina
Ra Anumzamo'a hankave amigeno maka kazigama ha'ma ome
hiana, ha' vahe'a hara hu zamagatere'ne. **14** Hagi Deviti'a ana
huteno maka Israeli vahe kini mani'neno ana maka vahe'a
magozanke huno fatgo avu'avaza huno kegava huzmante'ne. **15**
Hagi Zeruia nemofo Joapu'a, Sondia vahetmimofo ugagota kva
manigeno Ahiludi nemofo Jehosafati'a maka'zama avontafepima
kreno eri fatgo hu eri'za ne' mani'ne. **16** Hagi Ahitubu nemofo
Zadoku'ene, Abiatari nemofo Abimelekike pristi netrena mani'na'e.
Hagi avoma kreno eri fatgoma hu' vahera Savsa'e. **17** Hagi
Deviti avufgare kva vahetmimofo kva nera Jehoiada ne'mofo

Benaia'e. Ana higeno Deviti amohe'mo'za Deviti tavaontera
mani'ne'za ranra eri'zana eri'naze.

19 Hagi mago'a kna evutegeno, Amoni vahe kini ne' Nahasi'a frigeno nemofo Hanuni agri nona erino kinia mani'ne. **2** Hagi Deviti'a amanage hu'ne, nagra Hanunina knare avu'avaza huntesnue, na'ankure nafa'amo Nahasi'a nagrira knare avu'ava kora hunante'ne. Anage nehuno Hanunina nef'a'ma fri'nea zante Hanuni zamasunku ke ome huntehogu kato vahera Deviti'a huzmante'ne. Hagi ana'ma hige'za Deviti eri'za vahe'amo'za nef'a'ma frigeno'ma mani'nea zante Hanuni kenaku Amoni vahe mopafi e'naze. **3** Hianagi Amoni kumate kva vahe'mo'za amanage hu'za Hanunina asmi'naze, Kagrama antahinana ama'i vahe'tmima Deviti'ma huzmantege'zma azana, negafa'ma fri'nea zante zamasunku ke hugantenaku aze hunka kagesa antahino? I'o, ha' eme hurante'naku mopalatia afure'za kenaku e'naze. **4** Hazageno Hanuni'a Deviti'ma huzmantege'zama e'naza vahetmina zamazerino zamagi zamazokara harenezmanteno, zamariga avamenteti kenazmia ahe vatro hutere huteno huzmantege'za ete vu'naze. **5** Hagi ana nanekema Devitima eme asamizageno'a, eri'za vahe'arami huzmantege'za e'za amanage hu'za ana vahetmina eme zamasami'naze, kini ne'mo'a amanage hie, Jeriko kumate mani'nenkeno tamagitamazoka'mo'a hagetena echo huno hu'ne. Na'ankure zamagrira tusi'a zamagazema hu avu'ava'ma huzmantegeno zamagazema hiazanku anagea hu'ne. **6** Hagi Amoni vahe'mo'zane, Hanuni'enema ke'za antahi'za hazama zamagrama haza avu'avamo'ma Devitima azeri arimpama nehegeno'a, karisifima mani'neza zamaza hu'za Devitima ha'ma hunte'naza vahetamine karisiraminema mizasenazana Messopotamia kumateti'ene, Aram-ma'aka

kumateti'ene, Zoba kumaretira, kna'amo'a 30 tausen hu'nea silva
zagoreti ome mizase'naze. 7 Hagi ana zago'a ome zami'za
32tauseni'a karisiraminki, Ma'aka kumate kini ne'ene maka
sondia vahe'araminenam zamavare'za e'za, Medeba kumate
seli nona eme ki'za mani'naze. Hagi anama nehazage'za
Amoni sondia vahe'mo'za zamagra rankumapinti Israeli vahe
ha' huzmante'naku atiramiza e'naze. 8 Hagi Deviti'ma ana'ma
haza nanekema nentahino'a, Joapune maka hankave sondia
vahetmina huzmanteg'e'za ha' ome huzmantenaku vu'naze. 9
Hagi Amoni kumate sondia vahe'mo'za rankumapintira etirami'za
rankumamofo kafante emanimpi hu'za ha hunaku otizageno,
mago'a kini vahe'mo'zama zamazama hunaku'ma e'naza kini
vahe'mo'zane, sondia vahe'mo'zanena hahunaku zamagranena
hofa agupofi eme retro hu'za oti'naze. 10 Hagi Joapu'ma
keama ha' vahe'amozama amigane avuganema maninpi hu'za
otizageno, knare'ma hu'za ha'ma nehaza hankave sondia
vahetmina huzmanteg'e'za Aramu sondia vahe'ene hara ome
hunaku manimpi hu'za oti'naze. 11 Hagi mago'ama maniza
sondia vahetmina negna Abisai azampi antegeno, Abisai'a
zamavareno Amoni vahe'mokizmi hara huzmantenaku manimpi
hu'naze. 12 Ana nehuno Joapu'a negna Abisaina amanage
huno asmi'ne, Siria ha' vahe'mo'zama tusiza hu'za hankavema
tiza ha'ma hunante'snageta eta eme naza hiho. Hagi Amoni
vahe'mo'zama kagri'ma hankavetiza ha'ma hugantesnagena,
nagra e'na eme kaza hugahue. 13 Hagi korora osunka
hankavetigeta, vahetiagu'ene Anumzanti'amofo rankumaku'ene
ha' vaheti'aramina hara huzmantamnena, Ra Anumzamo'ma
kesigenoma knare'ma haniazana amne agra hugahie. 14
Hagi Joapu'ene sondia vahe'amozama Siria sondia vahetmima

ha'ma ome huzmantage'za, ana Siria vahe'mo'za atre'za fre'naze. **15** Hagi Amoni sondia vahe'mo'zama kazama Siria sondia vahe'mo'zama koro'ma frage'za, zamagranena atre'za Abisainku koro hu'za fre'za rankumamofo agu'afi ufre'naze. Anama hazageno'a Joapu'a atreno Jerusalemi kumate vu'ne.

16 Hagi Siria sondia vahe'mo'zama kazama, Israeli sondia vahe'mo'zama ha'ma huzmagaterage'za, Yufretisi timofo kantu kazigama mani'naza sondia vahetmintega eme zamazama hanagura kato vahe huzmantazage'za kea eri'za vu'naze. Hagi e'i ana sondia vahetmimofo ugota kva vahezmia Sofakikino, agra Hadadezeri sondia vahetamintera ugota kva ne' mani'ne.

17 Hagi anankema Deviti'ma nentahino'a, mika Israeli sondia vahetmina zamazeri retru nehuno zamavareno Jodani tina takaheno kantu kaziga ha' ome huzmante'naku vu'naze. Hagi Deviti'ma kantu kazigama vigeno'a, Siria sondia vahe'mo'za hahunte'naze. **18** Hagi Siria sondia vahe'mo'za Israeli sondia vahetminkura koro frazageno, Deviti sondia vahe'mo'zama karisifima vano nehu'za ha'ma nehaza vahera 7tauseni'a vahe nezamahe'za, mopafima vano nehu'za ha'ma nehaza vahera 40tauseni'a nezmahe'za, ana sondia vahetmimofo kva ne' Sofakinena ana hapi ahe'naze. **19** Hagi Hadadezeri eri'za vahe'mo'zama kazama Israeli sondia vahe'mo'zama ha'ma huzmagaterazage'za, Devitinte e'za zamarimpa fruma hu'za manisaza naneke eme nehu'za agri agorga'a mani'zageno, Siria vahe'mo'za ru'enena Amoni vahetega eme ante'za zamaza osu'naze.

20 Hagi aisimo'ma vagaregeno trazamo'ma agatama nehagea knarerera kini vahe'mo'za ha' ome nehaza knagino, ana knama egeno'a Joapu'a Israeli sondia vahetmina zamavareno Amoni

vahe' mopafi hara ome hu'naze. Hagi ana hapina Amoni
vahera hara huzmagatere'za Raba rankumazmia zamahe'za
hanare'naze. Hianagi Deviti'a ana hatera ovu Jerusalemi
kumate mani'ne. 2 Hagi Deviti'ma Raba kumate'ma ne-eno,
Amoni vahe kini ne'mofo kini fetorira emerino agra asenire
antani'ne. Hagi ana fetorira 34 kilo hu'nea golinu tro huno
agu'afina zago'amo marerirfa haverami ante'ne. Hagi ana
rankumapintira eri havizama haza zantamina rama'a zagone
fenonena Deviti'a eri'ne. 3 Ana nehuno Raba kumate vahetmina
kazokzo eri'za vahe zamavarege'za so nuti'ma piki tunteti'ma,
saumereti'ma eri'zama eri vahe zamavarentege'za eri'zana
eri'naze. Hagi maka Amoni vahetmimofo rankumapi vahetmina
ana zanke huzmanteteno, Deviti'ene maka sondia vahe'anena
ete Jerusalemi kumate vu'naze. 4 Hagi ana'ma hutegen'o'a,
Israeli sondia vahe'mo'za Gezeri kumate Filistia vahetamina
hara ome huzmante'naze. Hagi ana ha'ma hazafi Husa nagapinti
ne' Sibekai'a Refaimi nagapinti Sipa'ema nehaza nera ahe
fri'ne. Hagi Sipai'a tusinasi vahetmimofo zamagehe'mokino
agri'ma ahete'za Filistia vahetmina hara huzmagatere'naze. 5
Hagi ru zupa ete mago'ane Israeli sondia vahe'mo'za Filistia
vahera hara ome huzmantazageno, Jairi nemofo Elhana'a
Gati kumateti ne' Goliati nefu Lamina ahegeno fri'ne. Hagi
ana nekrerfamofo karugru zotamo'a tavaravema troma nehaza
masinimofo zafa'agna hu'ne. 6 Hagi mago'ane Israeli sondia
vahe'mo'za Gati kumatera hara ome nehu'za, 6si'a azankogi,
6si'a agigo huntegeno ana maka 24'a agigo azanko hunte'nea
nekrerfa ke'za erifore hu'naze. Hagi ana nera Rafa vahepinti
tusinasi vahetmimofo zamagehe'mo'e. 7 Hagi ana ne'mo'a Israeli
vahera huprihuno ki'za zokagoke huzmantegeno Deviti nefu

Simea nemofo Jonatani ana nekrerfa ahegeno fri'ne. 8 Hagi e'i ana maka vahetmina tusinasi vahetmimpinti fore hu'za e'naza vahetminkino, Deviti'ene sondia vahe'aramimozane zamahe vagare'naze.

21 Hagi Israeli vahe zamazeri haviza hunaku Sata'a antahintahi huteno, Israeli vahe hampri antahintahia Devitina ami'ne. 2 Ana higeno Deviti'a Joapune sondia vahetema ugote'naza kva vahetaminena amanage huno zamasmi'ne, maka Israeli vahetmima sauti kaziga Besebati'ma evuno noti kaziga Dani mopare'ma mani'naza vahetmina hamprita nampazmia erita eme naminke'na nama'a vahe mani'nazafi kaneno. 3 Hianagi Joapu'a amanage huno ana kenona hu'ne, Ra Anumzamo'a vahe'a mago'ane 100'a zupa zamazeri rama'a hanigeno, rama'a vahe fore hu'za manigahazanki, rania kini ne'moka nagafare ama zana hu'za nehaze? Zamagra kagri eri'za vahe mani'nazanki, nahigenka Israeli vahera zamavarenka kumipina zamante'za nehane? 4 Hianagi Deviti'a ana kea ontahi tutu huno huntogeno, maka Israeli mopafi Joapu'a vano nehuno vahera hamprino nampana eriteno, ete Jerusalemi kumatera e'no, 5 ana vahe nampana Devitina eme ami'ne. Hagi maka Israeli agu'afima bainati kazinknoma erino ha'ma huga vahetmima hampri'neana 1milien 100tauseni'a vahetminki, Juda mopamofo agu'afina bainati kazinknoma erino ha'ma huga vahetmima hampri'neana, 470tauseni'a vahetami hampri'ne. 6 Hianagi ana vahe'ma hamprifina Livae naga'ene Benzameni nagara ohamprine. Na'ankure kini ne' Devitima hia kegura Joapu'a musena osuno anara hu'ne. 7 Hianagi Anumzamo'a vahe'ma hampri'naza zankura musena osuno, Israeli vahetmina knazana zamoto zamazeri haviza hu'ne. 8 Ana higeno Deviti'a

amanage huno Anumzamofona asmi'ne, nagrama vahe'ma hamprua zamo'a kagri kavurera rankumi hu'noe. Hianagi menina muse hugantoanki eri'za nekamo'na kumira eritrenanto. Na'ankure nagra negi nagi navu'nava hu'noe. **9** Anagema higeno'a, Ra Anumzamo'a amanage huno Deviti kasnampa ne' Gatina asmi'ne, **10** vunka Ra Anumzamo'a amanage hie hunka Devitina ome asamio, 3'a zantmi kaveri hugahuanki, anampinti mago huhamprio. **11** Hagi anagema hutegeno'a Gati'a Devitinte eno amanage eme hu'ne, Ra Anumzamo'a amanage hie, kagri'ma kavesinia sua mago huhamprio, **12** 3'a kafufima agatontoma hu'za huhamprigahampi, 3'a ikampima ha' vahe'mo'za kazinteti'ma ha'ma eme hutamagatere zampi, 3'a knafima Ra Anumzamo'ma ankero vahe'ama huzmantesige'za Israeli mopafima vahe'ma knazama eme zami'niaza huhamprigahampi kagesa antahitenka, anampinti kavesi'nia su'a mago huhamprike'na Ra Anumzamofona ome asami'neno. **13** Anagema higeno Deviti'a amanage huno Gatina asmi'ne, kema nasamina kegura nagra tusigna huanki, atregeno Ra Anumzamo'a agra'a azanuti nazano hunanteku'ma hania zana hunanteno. Na'ankure Agri asunku zamo'a ra hu'neanki, natrenigeno ama mopafi vahe'mo'a nazeri havizana osino. **14** E'inage higeno Ra Anumzamo'a Israeli vahepin, kefo kri atregeno 70tauseni'a Israeli vene'ne zamahe fri'ne. **15** Hagi ana nehuno Anumzamo'a Jerusalemi kumara eri haviza hinogu, ankero huntogeno vu'ne. Hianagi ana ankeromo'ma Jerusalemi kuma'ma eri haviza hunaku'ma nehigeno'a, vahe'amofoma zamatama zamiaza Ra Anumzamo'ma negeno, asunku nehuno ana ankerona asmino, hago rama'a knaza zaminanki, ozamahenka zamatro! Hagi ana kema asmi'neana Jebusi

vahepinti ne' Onani'ma witi neharea kumapi ana ankeromo'a otinegeno asmi'ne. **16** Hagi Deviti'a avuma kesga huno keana Ra Anumzamofo ankeromo'a monane mohanemofo kankamumpi otineno, bainati kazima'a azampi erineno Jerusalemi kumatega azana rusute'negeno ke'ne. E'i ana'ma higeno'a Deviti'ene maka ranra vahe'tmimo'zanena zamasunku kukenazmi hu'ne'za zamavugosaregati mopafi mase'naze. **17** Hagi Deviti'a Anumzamofona amanage huno asami'ne, Nagra huge'za vahera hampri'zage'na, nagra kagri kavurera tusi'a kefo navu'nava hu'na kumira hu'noe. Hianagi sipisipi afu'mo'ma hiaza huno ama vahemokizmia hazenkezmia omane'ne. Zamagra nahazenke hu'naze? Ra Anumzamoka karimpahezana atregeno nagrite'ene naganire'ene eno. Hianagi ama vaheka'a mago hazenkea osu'nazanki zamahe ofrio. **18** Anagema higeno'a Ra Anumzamofo ankeromo'a Gatina amanage huno asmi'ne, kagra vunka Devitina amanage hunka ome asmio, Jebusi ne' Onani'ma witi honama neharea kumapi marerinka Ra Anumzamofo kresramna vu ita ome tro huo hunka ome asamio. **19** Higeno Deviti'a Ra Anumzamo'ma Gati'ma asamigeno'ma Ra Anumzamofo agifima eme asmia kea amage anteno, ana zana ome tro hunaku mareri'ne. **20** Hagi Onani'a witi hona'a refuzafupeno neharereti ana ankerona rukrahe huno ke'ne. Hagi 4'a ne' mofavre'ramima'amo'zama agri'enema mani'ne'za witima nehararetira ana ankeroma nege'za koro fre'za ome fraki'naze. **21** Hagi Onani'ma mani'nere Deviti'a egeno, Onani'a negeno witima nehareretira atreno vuno avugosaregati mopafi umaseno ragi ami'ne. **22** Hagi anante Deviti'a amanage huno Onanina asmi'ne, witi honama neharana kumaka'a namige'na, knare mizanteti miza hu'na Ra Anumzamofontegama kresramnavu ita tro hanenko, kireti'ma

vahe'ma zamazeri havizama nehia knazana eri atreno. 23
Higeno Onani'a Devitina amanage huno asmi'ne, kini nera
ranimoka, amne erinka nazano hunaku'ma banana zana huo.
Hagi Kresramanama vanana zana nagra bulimakao afura
negami'ha, witi honama refuzafu'nepoa zafaramina kamisugenka
tevea hanavazinka Kresramana vugahane. Hagi witi ofama
banana witiramina nagrake'za maka kamisugenka ofa hugahane.
24 Hianagi Deviti'a amanage huno Onanina asmi'ne, i'o, nagra
knare mizanteti mika zanka'a mizasegahue. Hagi nagrama
amuho hunama eri fore'ma osu'nesua zana kagripintira erige,
amnea anazana eri'na Ra Anumzamofontega tevefima kre
fananene hu ofa osugahue. 25 Anage nehuno Deviti'a kna'amo'a
7kilo hu'nea goli Onanina amino witi honama neharea kuma'a
mizase'ne. 26 Hagi ana kumapi Deviti'a Ra Anumzamofo kre
sramnavu ita trohuno tevefima kre fananehu ofane, arimpa fru
ofanena kresramna vu'ne. Hagi Deviti'ma nunamuma higeno'a,
Ra Anumzamo'a Deviti nunamuna nentahino, monafinti teve
atregeno eramino ana ofama kre sramnavu itare'ma me'neana
eme tefanane hu'ne. 27 Ana hutegeno Ra Anumzamo'a
ankeromofona asamigeno, bainati kazima'a anom'aafi ete
vazinte'ne. 28 Hagi Deviti'ma keama Jebusi ne' Onani'ma
witima neharea kumapima Ra Anumzamo'ma nunamuma'ama
antahino nonama huntogeno'a, anante ofaramina kresramna
vu'ne. 29 E'ina knafina Ra Anumzamofo seli mono noma
Moses'e'ma hagege kokampima ki'nea mono none, Kresramana
vu itanena mono'ma nehaza kumate Gibioni me'ne. 30 Ana
hu'negu Deviti'a Gibonia vuno Anumzamofona avesizana ome
antahigeno onke'ne. Na'ankure Ra Anumzamofo ankeromofo
bainati kazinku koro huno ovu'ne.

22 Hagi anante Deviti'a amanage hu'ne, Ra Anumzamofo
ra mono nona amare me'nigeno Israeli vahe'mo'zama
Kresramanama vanaza ita ama ananteke megahie. **2** Hagi
Deviti'a megi'ati ru vahetmima Israeli mopa fima enemaniza
vahera ke hige'za azageno, mono noma kisaza havema tagahu
eri'zana zami'ne. **3** Hagi Deviti'a kahante'ma ahe nirine insinema
tro'ma hu aeniramina rama'a eritru nehuno, bronisinena rama'a
eri atru higeno, kna'a erinte'za kegara osu'naze. **4** Hagi Tairi
vahe'mo'zane Saidoni vahe'mo'zanena rama'a sida za fara mina
antagi'za eri'za Devitina eme ami'naze. **5** Hagi Deviti'a amanage
hu'ne, nenamofo Solomoni'a kasefa vahe mani'ne ankino noma
ki'zana ontahi'ne. Hanki Ra Anumzamofo noma Solomoni'ma
kisiana marerifa no kisigeno, agenke'amo'a maka kokantega
haruharu haniaza retrotra menina nehue. Anage nehuno
Deviti'a noma kizantmina ofri'neno tusi zantmi retrotra hunteteno
fri'ne. **6** Ana huteno Deviti'a nemofo Solomonina kehigeno
egeno Ra Anumzana Israeli vahe Anumzamofo noma kisia
naneke aamanage huno asmi'ne, **7** Ne'nimoka Ra Anumzana
Anumzanimofoma mono'ma huntesaza nona kisue hu'na nagra
nagu'afina nagesa antahanagi, **8** Ra Anumzamo'a amanage
huno nasmi'ne, Devitiga kagra rama'a ha' nehunka, rama'a vahe
ana hapina zamahenka korazmia eri tagi'nane. E'ina hu'negu
mono'ma hunantesaza mono nona onkigosane. Na'ankure kagra
rama'a vahe zamahenka korana nagri navurera eri tagi'nane. **9**
Hianagi kagra mago ne'mofavre kasentenanke'na, Nagra aza
hanena ha' vahe'amo'za hara eme huontegosaze. Na'ankure
ana mofavremofo agi'a Solomonikino, agrama kegavama hania
knafina Israeli vahera hara osu knare hu'za zamarimpa fru hu'za
manigahaze. **10** Hagi nagri'ma mono'ma hunantesaza nona agra

kigahie. Ana nehuno agra nagri mofavre manisige'na, nagra agri nefaza hu'nena Israeli vahepina kini azeri otinenkeno, agri nagapinteke kinia maniza Israeli vahera kegava huzmante vava hu'za vugahaze huno hu'ne. **11** Hagi menina ne'nimoka Ra Anumzamo'a kagrane mani'neno maka zama banana zampina kazeri knare nehina, Ra Anumzanka'amofo ra mono nona kema hu'nea kante antenka kigahane. **12** Ra Anumzamo'a knare antahi'zane, antahi ama'ma hu antahi'zana kaminkenka, Israeli vahem'a kegavama nehanunka Ra Anumzana Anumzanka'amofo kasegea amage antegahane. **13** Hagi Ra Anumzamo'ma Israeli vahem'o'zama amage'anteho huno Mosesema ami'nea tra ke'ne kasegenema kegava nehunka, amage'ma antesunka maka zama banana zamo'a knare'zanke hugahie. Hagi kahirahikura osunka oti hankavetinka mani'enka, korora osuo. **14** Hagi nagra tusi amuho huna eri'zana eri'na Ra Anumzamofo ra mono noma ki'zantamina, 3tausen 750'a tani hu'nea goligi, 34tausen 500'a tani hu'nea silvagi, kna'amo'a mareri'nea aenine, bronsinena eritru hu'noe. Hagi zafane havenena ana noma ki'zana ko eritru hu'noanki, mago'ene eri atru hugahane. **15** Hagi kagrira rama'a eri'za vahe mani'nazanki'za havema tagahu eri'za vahe'ma, brikima tro hu eri'za vahe'ma, noma negiza vahe'ma, zamazantetima eri avasesema huno eri'zama eri antahi'zane vahetamina rama'a manizageno, **16** golireti'ene silvareti'ene bronsireti'ene aenireti'enema eri'zama eri vahera rama'a mani'naze. Hagi otinka eri'zana agafa hunka erio. Na'ankure Ra Anumzamo'a kagrane manigahie. **17** Hagi Solomonima azama hanagura Deviti'a maka Israeli vahete kva vahetmina amanage huno zamasami'ne, **18** Ra Anumzana tamagri Anumzamo'a, tagranena mani'neankino ha'ma hu'zana

eri atregeta mani fru hu'naze. Na'ankure Agra ama mopafi vahetmina tamazampi zamavarentegeta Ra Anumzamofo avuga hara agatereta mopazmia eri'naze. **19** Hagi menina Ra Anumzana tamagri Anumzamofona tumotamireti'ene tamagu'areti'ene huta hakeho. Ra Anumzana tamagri Anumzamofo mono nona kita Ra Anumzamofo huhagerafi huvempage vogisine, eri ruotage'ma hu'naza zuomparaminena erita Ra Anumzamofo agima erisgahu mono noma kinte'nafi eme anteho.

23 Hagi Deviti'ma ozafama nereno'a, nemofo Solomoninku Israeli vahe'mokizimi kini manigahie huno huhamprinte'ne. **2** Hanki maka Israeli vahe kva vahetamina zamavare atru nehuno, Pristi vahetamine, Livae vahetaminena Deviti'a zamavare atru hu'ne. **3** Ana hutege'za 30'a kafuma agatere'nea Livae vene'nema hampri'nazana 38tauseni'a vahetami hampri'naze. **4** Hagi Deviti'a amanage hu'ne, ama 24tauseni'a vahe'mo'za Ra Anumzamofo mono nompi eri'zana erigahaze. Hagi ama 6tauseni'a vahe'mo'za mono nonte'ma ugagotama hanaza eri'zane, vahe keagama refkohu eri'za erigahaze. **5** Hagi 4tauseni'a vahe'mo'za kuma kafante kvahu eri'za eri'nageno, mago 4tauseni'a vahe'mo'za Devitina'ma tro'ma hunte'noa zavena nehe'za zagame'ma hu'za Ra Anumzamofoma agima erisgahu vahe manigahaze. **6** Ana huteno Deviti'a Livae nagapina 3'a nofi'ma mani'nazare vahera refko hu'ne. E'i ana 3'anofira Livaena 3'a mofavre naga'afinti fore hu'nazankino, zamagi'a Gesoni'ma, Kohati'ma, Merari'e. **7** Hagi Gesoni'a Ladanine Simeikizni kasezanante'ne. **8** Hagi Ladani'a 3'a ne' mofavrerami zamante'neankino zamagi'a, ese mofavre'a Jehiel manigeno, ananteria Zetami mani'geno henkamo'a Joeli mani'ne. **9** Hagi Semei'a 3'a ne' mofavrerami kasente'neankino zamagi'a,

Selomoti'ma, Hazieli'ma, Harani'e. Hagi Ladani nagapina ama ana 3'a vahe'mo'za kva mani'naze. **10** Hagi Simei'a mago'a ne' mofavrerami zmante'neankino, ana ne'mofavreramimofo zamagi'a, Jahati'ma Ziza'ma Jeusi'ma, Beria'e. Hagi ana makara 4'a ne' mofavrerami Simei'a kasezmante'ne. **11** Hagi Jahati'a ana nagamofo kva manigeno, Zizati agri amage'a nampa 2 kva mani'ne. Hagi Jesusike Beriakea rama'a ne' mofavrea ontena'ankino zanagri nagara zanazeri mago hu'za hampri'naze. **12** Hagi Kohati ne' mofavreramina, Amramu'ma, Izari'ma, Hebroni'ma, Uzielikino, ana makara 4'a mofavrerami kasezmante'ne. **13** Hagi Amramu'a Aronine Mosesekizni kasezanante'ne. Hagi Aronimpinti'ma fore'ma hu'naza vahera nagru huno ruotge'ma hu'nea zantminte kegava hugahaze huno Ra Anumzamo huhamprizmante'ne. Ana hu'neankino zamagra Ra Anumzamofo eri'zana eri'za ofa kresramna vunente'za, Agri agifina asomu kea Israeli vahera huzmante vava hugahaze. **14** Hianagi Anumzamofo eri'za ne' Mosese ne'mofavre'mo'za Livae naganofire hu'za mani'naze. **15** Hagi Mosese'a Gesomune Eliezarikizni kasezanante'ne. **16** Hagi Gesomu ne' mofavreramimpina ese mofavre'a Subaelikino, agra vugota huno naga'a kegava huzmante'ne. **17** Hagi Eliezari'a magoke ne' mofavre nenteno mago'a onte'neankino, agi'a Rehabia'e. Hianagi Rehabia'a rama'a mofavre zamantegeno, hamprigara osu'ne. **18** Hagi Izari'a ese ne' mofavrea Selomiti kasente'geno agra ugota huno naga'afina kegava huzmante'ne. **19** Hagi Hebroni'a esera Jeria kasenteno, Jeria amefira Amaria kasenteno, Amaria amefira Jahazieli kasenteno, Jahazieli amefira Jekamiamu kasente'ne. **20** Hagi Uzieli'a esera Maika kasenteno, Maika amefira Isia kasente'ne. **21** Hagi Merari'a Maline Musikizni

kasezanante'ne. Hagi Mali'a Eleazarine Kisikizni kasezanante'ne.

22 Hagi Eleazari'a ne'mofavrea onte mofanege anteneno frige'za,
ana mofanemo'za, nefu Kisi mofavreraminte mare'naze. **23** Hagi
Musi'a 3'a ne'mofavrerami zmante'neankino zamagi'a, Mali'ma,
Ederi'ma, Jeremoti'e. **24** Hagi ama ana vahera Livae nagapinti'ma
fore'ma hu'naza vaheki'za, magoke magoke naga nofizmire
ugota hutere hu'nazageno zamagi kreno eri fatgo hu'nege'za
20'a kafuma agatere'naza vahe'mo'za Ra Anumzamofo mono
nompina eri'zana enerize. **25** Hagi Deviti'a amanage hu'ne, Ra
Anumzana Israeli vahe Anumzamo'a vahe'a manigasa nezmino,
Agra Jerusalemi kumapina mani vava hugahie. **26** Hagi menina
Livae naga'mo'za, Seli mono none ana nompima eri'zama
e'neriza zantaminena eri'za vu'za e'za osugahaze. **27** Hagi
Deviti'ma e'ina hiho huno'ma huvagare kema zamasami'nea
kante ante'za, 20'a kafuma agatere'nea vahetami mono nompima
eri'zama eri vahera zamagia krente'naze. **28** Hanki Livae
vahe'tmimofo eri'zana, Aroni naga'mokizmi zamaza hu'za Ra
Anumzamofo nompima eri'zama erisaza eri'za me'ne. Hagi
mago'a eri'zana mono nonkuma'ma kegava nehu'za, mono
nompima eri'zama e'neriza zantamima zamazeri agruhu eri'zane,
Anumzamofo nompima eri eri'zane, mago'a eri'zanena eri'naze.

29 Hagi ruotgema hu'nea bretima itare'ma eme antaza bretteine,
witi ofama eme haza ofane, zo'ore breti ofane, olivi masavenema
erihavia huno kre'nea kekine, anazantamima sigerirema erinteno
kna'ama refko huno ke eri'zane kegava hu'naze. **30** Hagi
mika nanterane kinaganena Ra Anumzamofo avuga otine'za
zagamera hu'za susu hunente'za, agia erisga hu'naze. **31** Hagi
Sabati knare'ene kasefa ika ementegeno musema hu knare'ene
mono'ma hu knare'ma zamaza hu'za Kresramana vanaza vahera,

e'i'a vahe manine'za eri'zana erigahazema hu'enenia kante ante'za anama'a namba mani'neza, Ra Anumzamofo avuga ana eri'zantamina maka zupa erigahaze. 32 Hagi zamafuhe'za pristi naga'mo'za kegava huzmante'nage'za, Livae naga'mo'za maka eri'zana seli nompima ruotage'ma hu'nefina Ra Anumzamofo avuga eri'zana eri'naze.

24 Hagi Aroni mofavreramina, pristi eri'zama erihogura amana huno refko hu'ne. Hagi Aroni'a Nadapuma, Abihuma, Eleazarima Itamarima huno kasezmante'ne. 2 Hianagi Nadapu'ene Abihukea ne' mofavrea onte'neke, neznafa Aroni'a ofrinegeka ko zanagra frikeno, Eleazari'ene Itamarike pristi eri'zana zanagrake eri'na'e. 3 Hagi Eleazari nagapinti ne' Zadoki'ene Itamari nagapinti ne' Abimelekike Devitina aza hakeno, Aroni nagara refko huno eri'zana zami'ne. 4 Hagi Eleazari naga'mo'za refko hu'za 16ni'a kevufi omeri atru emeri atru hu'ne'za anampina rama'a kva vahe manizageno, Itamari naga'mo'za 8'a kevufi omeri atru emeri atru hu'za mani'hazafina osi'a kva vahe mani'naze. 5 Hagi satu zokago re'za magoke avamente eri'zana refko hu'za zami'naze. Na'ankure zamagra Eleazeri naga'ene Itamari naga'enenkino Anumzamo'a mono nompi ruotge eri'za erigahaze huno huzmante'ne. 6 Hagi avonkre eri'zama eneria Livae ne' Netaneli nemofo Semaia kini ne'mofo avonkre eri'za vahera mani'negeno, pristi ne' Zadoku'ma Abiatar nemofo Ahimeleki Livae naga'ma pristi eri'zama eneriza naga'mofo zamavuga Eliezarine Itamali nagamokizmi zamagia maka kreno erifatgo hu'ne. 7 Hagi ese'ma reza kaza satu zokagomo'a Jehoiaribi nagate takauregeno anante'ma reza kaza satu zokagomo'a Jedaia nagate takaure'ne. 8 Hagi namba 3 satu zokagomo'a Harimi nagate takauregeno, namba 4 satu zokagomo'a Seorimi

nagate takaure'ne. **9** Hagi namba 5 satu zokago'ma re'za kazana
Malkia nagate takauregeno, namba 6 satu zokago'ma re'za
kazana Mizamini nagate takaure'ne. **10** Hagi namba 7ni satu
zokagoma re'za kazana Hakosi nagate takauregeno, namba
8ti satu zokagoma re'za kazana Abiza nagate takaure'ne. **11**
Hagi namba 9ni satu zokagoma re'za kazana Jesua nagate
takauregeno, namba 10ni satu zokagoma re'za kazana Sekania
nagate takaure'ne. **12** Hagi namba 11ni satu zokagoma reza
kazana Eliasipi nagate takauregeno, namba 12fu satu zokagoma
re'za kazana, Jakimu nagate takaure'ne. **13** Hagi namba 13ni
satu zokagoma re'za kazana, Hupa nagate takauregeno, namba
14ni satu zokagoma re'za kazana Jesebeapu nagate takaure'ne.
14 Hagi namba 15ni satu zokagoma re'za kazana Bilga nagate
takauregeno, namba 16ni satu zokagoma re'za kazana Imeri
nagate takaure'ne. **15** Hagi namba 17ni satu zokagoma re'za
kazana Heziri nagate takauregeno, namba 18ni satu zokagoma
re'za kazana Hapisesi nagate takaure'ne. **16** Hagi namba 19ni
satu zokagoma re'za kazana Petahaia nagate takauregeno,
namba 20ti satu zokagoma re'za kazana Jehezkeli nagate
takaure'ne. **17** Hagi namba 21ni satu zokagoma re'za kazana
Jakini nagate takauregeno, namba 22 satu zokagoma re'za
kazana Gamuli nagate takaure'ne. **18** Hagi namba 23 satu
zokagoma re'za kazana Delaia nagate takauregeno, namba 24
satu zokagoma re'za kazana Ma'azia nagate takaure'ne. **19**
Hagi Ra Anumzamofo nompima eri'zama erinaku'ma hanazana
amama refkoma huzmantere avariri'za eri'zana emeriterema
hanazana, Israeli vahe Ra Anumzamo'ma nezamageho Aronima
asami'nea kante ante'za Ra Anumzamofo mono nompina eri'zana
erigahaze. **20** Hagi mago'a Livae nagapima naganofizamirema

ugota hu'naza vahe'mokizmi zamagia ama'ne, Amrami nagapina
Subaeli kva manigeno, Subaeli nagapina Jedeia kva mani'ne. **21**
Hagi Rehabia nagapina Isia kva mani'ne. **22** Hagi Isia nagapina
Selomoti kva manigeno, Johati'a Selomoti nagapi kva mani'ne.
23 Hagi Hebronni ne' mofavreramimpina ese mofavrea Jeriaki,
namba 2 mofavrea Amariaki, namba 3 mofavrea Jahasieliki,
namba 4 mofavrea Jekameamu'e. **24** Hagi Uzieli nagapina Maika
ugota huno kva manigeno, Maika nagapina Samiri ugota huno
kva mani'ne. **25** Hagi Maika negna Isia'a mago'a mofavreramina
zamante'neankino, Isiana ese mofavre'a Zekaraia mani'neno,
agri nagapina kva mani'ne. **26** Hagi Merari mofavrerarena
Malike, Musikegine zanagra Merari nagapina kva mani'na'e.
Hagi Jazia mofavreramimpina ese mofavrea Benokino, agra
Jazia nagapina kva mani'ne. **27** Hagi Merari nemofo Jazia'ma
kasezmante'nea vahera, Benoma, Sohamuma, Zakurima, Ibrima
huno kasezmante'ne. **28** Hagi Mahali'a Eleazari kasentegeno,
Eleazari'a ne' mofavrea kaseozmante'ne. **29** Hagi Kisi nemofo'a
Jeramelikino, Kisi nagapina agra kvazmia mani'ne. **30** Hagi
Musi ne'mofavre'mokizimi zamagi'a Mali'ma, Ederi'ma Jerimot'i'e.
E'i ana maka kva vahetmina mago mago Livae naganofite
huhampritere hu'za azage'za zamagia krente'naze. **31** Hagi kini
ne' Devitine, Zadokine, Ahimelekine, mago mago nagamofo kva
vahetamine, pristi vahetamine, Livae vahetamimofo zamavuga,
Aroni naga'ma hu'nazaza hu'za agi me'neo agi omane vahero
anankanteke ante'za satu zokago re'za nege'za, mago mago
eri'zana zamitere hu'naze.

25 Deviti'ene sondia vahete'ma vugotama hu'naza kva
vahe'mo'za hapuema nehaza zavenane, lariema nehaza
zavenane, nase'nasepa nehe'za kasnampa kema hanaza

vahetmima zamazeri oti'nazana, Asapuma, Hemanima Jedutuni mofavreramimpinti zamazeri oti'naze. Hagi ana vahetmina ama vahetami zamazeri oti'naze, 2 Asapu mofavre nagapintira Zakurima, Josefema, Netaniama, Asarela'e. Hagi Asapu vugota huno mofavreramima'a ana erizantera kegava huzmantegeno, agri'ma kini ne'mo'ma antahintahima ami'nere anteno kasnampa kema huama hu eri'zana eri'ne. 3 Hagi Jedutuni mofavreramimpintira 6si'a mofavrerami zamazeri oti'neankino zamagi'a Gedaria'ma, Zeri'ma, Jesaia'ma, Simei'ma, Hasabia'ma, Matitia'e. Hagi ana maka mofavreramina nezmafa Jedutuni kegava huzmante'nege'za, hapanema nehaza zavena ahe'za kasnampa kea nehu'za, Ra Anumzamofona susu hunte'za agia erisga hu'naze. 4 Hagi Hemani mofavre nagapintira, Bukiama, Mataniama, Uzielima, Sebuelima, Jerimotima, Hananiama, Hananima, Eliatama, Gidaltima, Romamti-Ezerima, Josbekasama, Malotima, Hotirima, Mahazioti'e. 5 Hagi ama ana maka mofavreramina kini nemofo avate kasnampa ne' Hemani mofavreramine. Hagi Anumzamo'a Hemanina ragi amigahue huno huvempa hunte'nere ama ana mofavreramina ami'neankino, Hemani'a 14ni'a ne' mofavrerami nezmanteno, 3'a mofanerami zamante'ne. 6 Hagi ana makamo'za nezmafa kavafinke mani'ne'za Ra Anumzamofo mono nompina zavena neheza nase'nasepana nehe'za ruzahu ruzahu zavena ahe'za monora hu'naze. Hagi Asapuma, Jedutunima, Hemanima huno kini ne' Deviti'a kegava huzmantenege'za mani'ne'za eri'zana eri'naze. 7 Hagi ana maka zavenama ahe vahetamine, mago'a zamafuhe'inema zavenama ahe'zama rempi huzamige'zama antahini' hu'ne'za zavenama ahe'za Ra Anumzamofoma agima erisgama nehaza vahetmina, 288'a vahe mani'naze. 8 Hagi ra

vaheteti vuno kasefa vahete uhanatino, rempima humi vaheteti
vuno avo nomu nehaza vahete'ma vu'neana satu zokago re'za
nege'za eri'zama erisaza eri'zana refko hu'za zami'naze. **9**
Hagi ese'ma satu zokagoma re'za Asapu nagapima kazana,
Josefe nagate takaure'ne. Hagi namba 2 satu zokagoma re'za
kazana Gedaliante'ene, mofavre naga'are'ene agri nagate'ene
takaure'ne. Hagi ana makara 12fu'a naga mani'naze. **10**
Hagi namba 3 satu zokagoma re'za kazana Sakurinte'ene,
mofavre naga'are'ene agri nagate'ene takaure'ne. Hagi ana
maka 12fu'a naga mani'naze. **11** Hagi namba 4 satu zokagoma
re'za kazana Izrinte'ene, mofavre naga'are'ene agri nagate'ene
takaure'ne. Hagi ana maka 12fu'a naga mani'naze. **12** Hagi
namba 5fu satu zokagoma re'za kazana Netaniante'ene, mofavre
naga'are'ene agri nagate'ene takaure'ne. Hagi ana maka 12fu'a
naga mani'naze. **13** Hagi namba 6si satu zokagoma re'za
kazana Bukiante'ene, mofavre naga'are'ene agri nagate'ene
takaure'ne. Hagi ana maka 12fu'a naga mani'naze. **14** Hagi
namba 7ni satu zokagoma re'za kazana Jesarelante'ene, mofavre
naga'are'ene agri nagate'ene takaure'ne. Hagi ana maka 12fu'a
naga mani'naze. **15** Hagi namba 8ti satu zokagoma re'za
kazana Jesaiante'ene, mofavre naga'are'ene agri nagate'ene
takaure'ne. Hagi ana maka 12fu'a naga mani'naze. **16** Hagi
namba 9ni satu zokagoma reza kazana Mataninte'ene, mofavre
naga'are'ene agri nagate'ene takaure'ne. Hagi ana maka 12fu'a
naga mani'naze. **17** Hagi namba 10ni satu zokagoma re'za
kazana Simeinte'ene, mofavre naga'are'ene agri nagate'ene
takaure'ne. Hagi ana maka 12fu'a naga mani'naze. **18** Hagi
namba 11ni satu zokagoma reza kazana Azarelinte'ene, mofavre
naga'are'ene agri nagate'ene takaure'ne. Hagi ana maka 12fu'a

naga mani'naze. **19** Hagi namba 12fu satu zokagoma re'za kazana Hasabiente'ene, mofavre naga'are'ene agri nagate'ene takaure'ne. Hagi ana maka 12fu'a naga mani'naze. **20** Hagi namba 13ni satu zokagoma reza kazana Subaelinte'ene, mofavre naga'are'ene agri nagate'ene takaure'ne. Hagi ana maka 12fu'a naga mani'naze. **21** Hagi namba 14ni satu zokagoma reza kazana Matitiante'ene, mofavre naga'are'ene agri nagate'ene takaure'ne. Hagi ana maka 12fu'a naga mani'naze. **22** Hagi namba 15ni satu zokagoma reza kazana Jeremotinte'ene, mofavre naga'are'ene agri nagate'ene takaure'ne. Hagi ana maka 12fu'a naga mani'naze. **23** Hagi namba 16ni satu zokagoma reza kazana Hananiante'ene, mofavre naga'are'ene agri nagate'ene takaure'ne. Hagi ana maka 12fu'a naga mani'naze. **24** Hagi namba 17ni satu zokagoma reza kazana Josbekasante'ene, mofavre naga'are'ene agri nagate'ene takaure'ne. Hagi ana maka 12fu'a naga mani'naze. **25** Hagi namba 18ni satu zokagoma reza kazana Hananinte'ene, mofavre naga'are'ene agri nagate'ene takaure'ne. Hagi ana maka 12fu'a naga mani'naze. **26** Hagi namba 19ni satu zokagoma reza kazana Malotinte'ene, mofavre naga'are'ene agri nagate'ene takaure'ne. Hagi ana maka 12fu'a naga mani'naze. **27** Hagi namba 20ti satu zokagoma reza kazana Eliatante'ene, mofavre naga'are'ene agri nagate'ene takaure'ne. Hagi ana maka 12fu'a naga mani'naze. **28** Hagi namba 21ni satu zokagoma reza kazana Hotirinte'ene, mofavre naga'are'ene agri nagate'ene takaure'ne. Hagi ana maka 12fu'a naga mani'naze. **29** Hagi namba 22 satu zokagoma re'za kazana Gidaltinte'ene, mofavre naga'are'ene agri nagate'ene takaure'ne. Hagi ana maka 12fu'a naga mani'naze. **30** Hagi namba 23 satu zokagoma reza kazana Mahaziotinte'ene, mofavre naga'are'ene agri nagate'ene

takaure'ne. Hagi ana maka 12fu'a naga mani'naze. 31 Hagi namba 24 satu zokagoma rezama kazana Romamti-Ezerinte'ene, mofavre naga'are'ene agri nagate'ene takaure'ne. Hagi ana maka 12fu'a naga mani'naze.

26 Hagi mono kumamofo kafantaminte kvama hanaza vahetamima refkoma huterema hu'naza vahetmimofo zamagia ama'ne, Kora nagapintira Asapu mofavrermimpinti Kore nemofo Meselemia'e. 2 Hagi Meselemia ne'mofavrermami zamagi'a, ese mofavrea Zekaraia'e, anantera Jediaeli'e, namba 3 mofavrea Zebadaia'e, namba 4 mofavrea Jatnieli'e. 3 Hagi namba 5fu mofavrea Elamu'e, namba 6si mofavrea Jehohanani'e, namba 7ni mofavrea Eliehoenai'e. 4 Hagi Obed-Edomu mofavrermimofo zamagia ama'ne, ese mofavremofo agi'a Semaia'e, anantera Jehozabadi'e, namba 3 mofavrea Joa'e, namba 4 mofavrea Sakari'e, namba 5fu mofavrea Netaneli'e. 5 Hagi namba 6si mofavrea Amiel'i'e, namba 7ni mofavrea Isakari'e, namba 8ti mofavrea Peuleta'i'e. (Na'ankure Anumzamo'a Obed-Edomuna knare huno asomura hunte'ne.) 6 Hagi Obed-Edomuna ese mofavre'a Semaikino, agra mago'a mofavrermami zamante'heanki'za naga'zamire kva manitere hu'naze. Na'ankure zamagra hanavenentake hu'za makazana huga vahe mani'nage'za, vahe'mo'za zamagesga hu'naze. 7 Hagi Semaia mofavrermimofo zamagi'a ama'ne, Otni'ma, Refaeli'ma, Obedi'ma, Elzabadi'e. Hagi Elihuke Semakiakea Semaia nefukegine zanagranena hanavenentake netre mani'nake'za antahi nezanamize. 8 Hagi Obed-Edomu mofavrermamine, mofavre naga'zmine zamafuhe'zanena hanavenentake hu'za maka'zana huga vahe mani'nage'za, antahinezamiza vahera 62'a vahe mani'naze. 9 Hagi Meselemi mofavrermamina mago'a

manizage'za nagazamia mani'nazankino, miko eri'zama antahi
ani hu'naza vahera ana makara 18ni'a vahe mani'naze. **10**
Hagi Merari nagapinti ne' Hosa ne'mofavreramina amane, ugota
huno kvazmima mani'neana Simri'e. Hagi Simri'a ese mofavrea
omani'neanagi nef'a, naga'amofo kva azeri oti'ne. **11** Hagi
anante mofavrea Hilkia'e, namba 3 mofavrea Tebalia'e, namba
4 mofavrea Zekaraia'e. Hagi maka Hosa ne' mofavreramine,
naga'anema mono no kuma kafante'ma kva hugahazema
hu'zama huhampri zmante'nazana 13ni'a vahe mani'naze. **12**
Hagi ama ana kva vahetmima mono kumamofo kafante kva
hugahaze huno'ma zamazeri oti'nea vahetmimofo eri'zamo'a, Ra
Anumzamofo mono nompima Livae zamafuhe'zama eneriza
kna eri'za erigahaze. **13** Hagi nagatenofite hu'za satu zokago
re'za nege'za mago mago kuma kafante kvama hu vahera, ra
vahetetima vuno kasefa vahete'ma vige'za zamazeri oti'naze. **14**
Hagi zage hanati kaziga kafantema kegava hanaza vahe'ma
huhamprinaku'ma satu zokago re'za kazana Selemaia agi efore
hige'za agri huhampri'naze. Hagi knare antahi'zama nezamia
ne'mofo Sekariante'ma satu zokago re'za kazana, noti kaziga
kafamofo agimo eama hige'za, ana kafante kva azeri oti'naze. **15**
Hagi sauti kaziga kafante'ma kegava hu vahe'ma huhamprinaku
satu zokago reza kazana Obed-Edom agi efore hige'za agri
huhamprinte'naze. Hagi fenoma ante nonte kva hu vahera
Obed-Edomu ne'mofavre zaga huhampri zamante'naze. **16**
Hagi Supimine Hosakiznia zage fre kaziga kuma kafane, ra
mono nontegama mareri kante'ma me'nea kafante kva vahe
huhampriznante'naze. **17** Hagi mika kna zage hanati kaziga kuma
kafanter 6si'a huzmantenge'za kegava hutere hu'naze. Hagi noti
kazigane, sauti kazigane kuma kafanter kegavama hanaza

vahera 4'a huzmantetere hige'za kegava hu'naze. Hagi fenoma ante nontaminte'ma, kegava hania vahera tare huzmantetere hige'za kegava hu'naze. **18** Hagi zage fre kaziga mono kuma'ma kegavama hu vahera 6si'a huzmantege'za 4'amo'za kante kva hazageno, tare'mokea ana kuma kegava hu'na'e. **19** Hagi e'i ana vahetamina Korane Merarikizni nagapintintikino kuma kegina kegava hanazana vahetami zamazeri oti'naze. **20** Hagi mago'a Livae naga'mo'za Anumzamofo mono nompima me'nea feno zantaminte'ene vahe'mo'zama musezama Anumzamofoma eme ami'za zantaminte kegava hu'naze. **21** Hagi Gersoni naga'nofipina, Ladani mofavre nagapinti Jehiel kva mani'ne. **22** Hagi Jehiel ne'mofavre nagapintira, Zethamuke, Joelike Ra Anumzamofo nompima fenoma nentaza nontera kegava hu'na'e. **23** Hagi Amramu nagaki, Izari nagaki, Hebron nagaki, Uzieli naga'mozanena ana eri'zana eri'naze. **24** Hagi Moses negeho Gesomu nemofo Sebueli ana fenoma nentaza nontera kva mani'neno kegava hu'ne. **25** Hagi Gesomu nefu Eliazari'a Rehabia nef'a'e, Rehabia'a Jesaia nef'a'e, Jesaia'a Joram nef'a'e hagi Joram'a Zikri kasentegeno Zikri'a Selomiti kasente'ne. **26** Hagi Seromiti'ene naga'amo'zanena, kini ne' Deviti'ene, mago mago nagamofo kva vahe'mo'zane, sondia vahetmimofo kva vahe'mo'zanema Ra Anumzamofoma ami'naza zantmima ante'naza nontaminte kegava hu'naze. **27** Hagi zamagra ha' vahezmima ha'ma hu zamagatere'za knare fenozmima eri'nazana Ra Anumzamofo noma eriso'ema hu'za kisaza zantami eme ami'naze. **28** Hagi ana zanke hu'za kasnampa ne' Samueli'ma, Kisi nemofo Soli'ma, Neri nemofo Abna'ma, Zeruia nemofo Joapu'ma hu'za Ra Anumzamofoma maka zantmima ami'naza zantminte Salomiti'ene afuhe'zanena kegava hu'naze. **29** Hagi

Izari nagapintira Kenaniane ne' mofavre naga'anena huhampri zamantazage'za mono nomofo megia eri'zantminte'ene Israeli vahe nanekema antahiza refkoma hu eri'zanena zami'naze.

30 Hagi Hebroni nagapintira Hasabiane, naga'anena eri'zama hanaveti'za eriga vahetmina 1tausen 700'a zamazeri otino eri'zana zamige'za, Ra Anumzamofone kini ne'mofo eri'zana Jodani timofo zage fre kaziga omeri'naze. **31** Hagi zamagima kre'za eri fatgo hu'za avontafepima krenazana, Jeria'a Hebroni nagamofo kva mani'ne. Hagi Devitima kinima mani'no'ma e'nea kafumo'ma 40'a kafuma nehigeno'a, vahe zamagima kre'nea avontafepima ke'za erifore'ma hazana, marerirfa antahi'zane vahera, Hebroni vahetami Jazeri kumate Giliati mopafi mani'naze. **32** Hagi Jeria nagapima knare'ma huno eri'zama eriga vahetamima mani'nazana, 2tausen 700'a vahetami mani'naze. Hagi kini ne' Deviti'a ana vahetmina Rubeni nagate'ma, Gati nagate'ma Manase nagama amu'nompinti'ma refkoma hu'naza nagate kva vahetami zamazeri otige'za Anumzamofo eri'zane, kini nemofo eri'zama eri'zantera kegava huzmante'naze.

27 Hagi ama'i vahe zamagia, Israeli vahetamimofo nagate, nagate'ma kegava hutere hu'naza vahetamine, 1 tauseni'a sondia vahete'ene, 100'a sondia vahetaminte'ma kegava hu'naza vahetamine, kini ne'mofo eri'zama erinentaza vahetamine. Hagi ana vahetmina 24tauseni'a vahe refko huntetere hu'neankino mago kevumo'a mago ikampi eri'zana eritere hu'naze. **2** Hagi ese ikante'ma ese kevufima mani'naza vahe'ma eri'zama erisaza vahetmimofo kva nera Zabdieli nemofo Jasobiamu'e. Hagi ana kevufina 24tauseni'a vahe mani'naze. **3** Hagi Jasobiamu'a Perezi nagapinti fore hu'neankino, maka sondia kva vahe'taminte kegava hu'ne. Hagi agra maka ese ikampina eri'zana erigahie.

4 Hagi namba 2 ikante'ma eri'zama erisaza vahe'ma refkoma
huntea kevurera, Ahohiti nagapinti ne' Dodai kegava higeno
Mikloti anante kva nera mani'nne. Hagi ana kevufina 24tauseni'a
vahe mani'naze. 5 Hagi namba 3 ikante'ma refko'ma hunte'nea
vahe kevure'ma kegavama hu'nea kva nera, ugagota pristi ne'
Jehoiada nemofo Benaia mani'nne. Hagi ana kevufina 24tauseni'a
vahe mani'naze. 6 Hagi Devitina 30'a hankavenentake sondia
vahepinna Benaia'a mago'zimimokino, agra ugota huno kegava
huzmante'ne. Hagi Agri'ma refko'ma humiza kevurera nemofo
Amizabadi nampa 2 kva nera mani'neno kegava huzmante'ne. 7
Hagi namba 4 ikante'ma nampa 4 kevuma refkoma hunte'nea
kevure'ma kegavama hu'nea kva nera Joapu nagna'amo Asaheli
kegava hu'ne. Hagi agri noma henka erino kegavama hu'neana,
nemofo Zebadia ana vahera kegava higeno, ana kevufina
24tauseni'a vahe mani'naze. 8 Hagi namba 5fu ikantema, nampa
5fu kevuma refkoma hunte'nea kevure'ma kegavama hu'nea
kva nera Izrahi nagapinti ne' Samhuti'e. Hagi ana kevufina
24tauseni'a vahe mani'naze. 9 Hagi namba 6si ikante'ma
nampa 6si kevuma refkoma hunte'nea kevure'ma kegavama
hu'nea kva nera Tekoa kumateti ne' Ikesi nemofo Ira'e. Hagi
ana kevufina 24tauseni'a vahe mani'naze. 10 Hagi namba 7ni
ikante'ma nampa 7ni kevuma refkoma hunte'nea kevure'ma
kegavama hu'nea kva nera Peloni kumateti, Efraemi nagapinti
ne' Helezi'e. Hagi ana kevufina 24tauseni'a vahe mani'naze. 11
Hagi namba 8ti ikante'ma nampa 8ti kevuma refkoma hunte'nea
kevure'ma kegavama hu'nea kva nera Husa kumateti, Zera
nagapinti ne' Sibekai'e. Hagi ana kevufina 24tauseni'a vahe
mani'naze. 12 Hagi namba 9ni ikante'ma nampa 9ni kevuma
refko'ma hunte'nea kevure'ma kegavama hu'nea kva nera

Anatoti kumateti, Benzameni nagapinti ne' Abiezeri'e. Hagi ana kevufina 24tauseni'a vahe' mani'naze. **13** Hagi namba 10ni ikante'ma nampa 10ni kevuma refko'ma hunte'nea kevure'ma kegavama hu'nea kva nera Netofa kumateti, Zera nagapinti ne' Maharai'e. Hagi ana kevufina 24tauseni'a vahe' mani'naze. **14** Hagi namba 11ni ikante'ma 11ni kevuma refko'ma hunte'nea kevure'ma kegavama hu'nea kva nera Piratoni kumateti, Efraemi nagapinti ne' Benaia'e. Hagi ana kevufina 24tauseni'a vahe mani'naze. **15** Hagi namba 12 ikante'ma 12fu kevuma refko'ma hunte'nea kevure'ma kegavama hu'nea kva nera Netofa kumateti, Otniel nagapinti ne' Heldai'e. Hagi ana kevufina 24tauseni'a vahe mani'naze. **16** Hagi Israeli vahetamimofoma mago'mago nagate'ma ugotama hu'za kegavama hu'naza vahetamina ama'ne, Zikri nemofo Eliezeri'a Rubeni nagate kva manigeno, Simioni nagatera Ma'aka nemofo Sefataia kva mani'ne. **17** Kemueli nemofo Hasabia Livae naga'mofontera kva manino kegava huzmantegeno, Aroni naga'mofontera Sadoki kva manino kegava huzmante'ne. **18** Hagi Deviti negana Elihu Juda nagamofo kva manigeno, Maekoli nemofo Omri Isaka naga kva mani'ne. **19** Hagi Obadaia nemofo Ismaia Zebuluni nagate kva mani'geno, Azerieli nemofo Jeremoti Naftali nagate kva manino kegava huzmante'ne. **20** Hagi Azazaia nemofo Hosea Efraemi nagate kva manigeno, Manase nagama amunompinti'ma refkoma hu'nea nagara Pedaia nemofo Joeli kvazmia mani'ne. **21** Hagi Zekaraia nemofo Ido Manase naga'ma amu'nompintima refko hu'za Giliatima nemaniza nagara kegava huzmante'ne. Hagi Ja'asieli nemofo Abna Benzameni nagamofo kva mani'ne. **22** Hagi Jerohamu nemofo Azareli Dani naga kva mani'ne. Hagi ama'i Israeli vahe'mokizmima ugota huzmante'naza vahetami

mani'naze. **23** Hagi kafu'amo'ma 20reti'ma erami'nea vahera Deviti'a ohampri'ne. Na'ankure Ra Anumzamo'a huvempa huno Israeli vahera azeri rama'a hanugeno monafi ofugna hugahie, huno hu'ne. **24** Hagi Zeruia nemofo Joapu'a agafa huno vahera hampri'neanagi, ana eri'zana eri vagaore'ne. Hagi e'i ana zankura Anumzamo'a Israeli vahera tusi arimpa ahezmante'ne. E'ina higeno anama hampria nambana kini ne' Deviti'ma eri'zama eri'nea agenkema krente'nea avontafepina kre onte'naze. **25** Hagi Adieli nemofo Azmaveti'a kini ne'mofo feno nontera kegava hu'ne. Hagi Uzia nemofo Jonatani'a Israeli agu'afima afete'ma me'nea feno nontaminte'ene, rankumatmimpi me'nea feno nontaminte'ene, neone kumatmimpima me'nea feno nontaminte'ene, zaza nontaminte'ene kegava hu'ne. **26** Kalubi nemofo Ezri hoza eri'zama eri vahetera kegava huzmante'ne. **27** Hagi waini hozaramintera Rama kumateti ne' Simei kegava hu'ne. Hagi nomofo agu'afima keri asentene'za wainima vasagenentaza nontera, Sefamu kumateti ne' Zabdi kegava hu'ne. **28** Hagi agupofima me'nea olivi zafaraminte'ene, sikamo zafaramintera Gederi kumateti ne' Ba'al-Hanani kegava hu'ne. Hagi Joasi olivi masavema ante nontera kegava hu'ne. **29** Hagi Saroni kumateti ne' Sitrai Saroni agupofi bulimakao afutamintera kegava hu'ne. Hagi mago'a agupofima mani'nea bulimakao afutamintera Adlai nemofo Safati kegava hu'ne. **30** Hagi Ismaeli nagapinti ne' Obili maka kemoli afutamintera kegava hu'ne. Hagi Meronoti kumateti ne' Jedeia donki afutamintera kegava hu'ne. **31** Hagi Hagri nagapinti ne' Jazizi maka sipisipi afutamintera kegava hu'ne. E'i ama ana maka vahera Kini ne' Deviti fenonte'ma kegavama hutere hu'naza vahetami mani'naze. **32** Hagi Devitina anenta nafa'amo Jonatani'a maka avoma kre'zana antahi

ani' hu'neankino, agra knare antahi'zama Devitima ami' nera mani'ne. Hagi kini ne'mofo ne' mofavreramima rempi huzami nera Hakmoni nemofo Jehiel mani'ne. **33** Hagi Ahitofeli'a kini ne'mofoma knare antahintahima nemia ne' mani'ne. Hagi Aka nagapinti ne' Husai'a kini ne'mofo avate rone'a mani'ne. **34** Hagi Ahitofeli'ma frigeno'a, Benaia nemofo Jehoiata'ene Abiatake agri nona eri'n'a'e. Hagi Joapu maka sondia vahetamina kegava hu'ne.

28 Deviti'a maka Israeli kva vahetmima, mago mago naganofite kvama hu vahetmima, kevure kevure'ma refkoma hunte sondia vahete kva vahetmima, 1tauseni'a sondia vahete'ene 100'a sondia vahetema kegavama hu'naza kva vahetmima, keonke fenoraminte'ma kegavama hu'naza vahetmima, afutmima'arema kegavama hu vahetmima, kini nemofo noma kegavama hu'nea vahetmima, hankavenentake sondia vahetmima maka zama trohu antahintahima eri'nea vahetmima, maka Jerusalemi kumate zamavare atru hu'ne. **2** Ana huteno Deviti'a otino amanage huno zamasmi'ne, nafuhetane vahe'nimotanena kama antahihio, nagrama hankave antahintahima antahi'noana Ra Anumzamofo huhagerafi huvempage vogisire'ma Anumzamo'a aga tra'ma antenia no kinakure hu'na retrotrara hu'noe. **3** Hianagi Anumzamo'a amanage huno nasm'i'ne, Devitiga kagra nagrima mono'ma hunante'za nagima erisgahu nona onkigahane. Na'ankure kagra harafa nekinka, rama'a vahe zamahenka korana eri taginane huno nasm'i'ne. **4** Hagi Juda naga'mo Israeli vahepinu vugota hugahie huno Ra Anumzamo'a huhampri'ne. Hagi Juda nagapina nenfa naga'mo vugota hugahie huno huhampri'ne. Hagi nenfa nagapintira nagriku Israeli vahe kinia manigahane huno nehuno, nagripinti'ma fore'ma hania mofavreramimo Israeli

vahē kinia mani vava hūno vugahie hūno huhamprinante'ne.

5 Hagi Ra Anumzamo'a rama'a mofavrerami nami'neanagi,
ana maka mofavrefintira Solomoni kinia mani'neno Israeli
vahera kegava hugahie hūno hu'ne. 6 Hagi Ra Anumzamo'a
amanage hūno nasmī'ne, negamofo Solomoni'a Nagri nona
negino, mono kuma'nianena tro hugahie. Na'ankure agra
nenamofoza hanige'na, Nagra nefaza hugahue hūno hu'ne.

7 Hagi menima nehiaza hūno Nagri kasegene tra kenema
hankavetinoma avaririsiana, agri nagapintike mikā knafina kinia
forehu vava hūno vugahie hūno hu'ne. 8 E'ina hu'negu menina
maka Israeli vahera, Ra Anumzamofo kevumota tamavufi
Anumzamo'a nentahige'na amanage hu'na neramasmue, Ra
Anumzana tamagri Anumzamofo kasegema kegava nehuta,
avariri so'ema hanuta ama hento fa mopa erisantihareta
mani'neta frinaku'ma hanuta mofavretamimofo zamisage'za,
mofavretmimo'za erisantihare'za mani'za nevu'za, henkama
frisu'za ana zanke hu'za vugahaze. 9 Hagi mofavrenimoka,
Solomoniga, negafa Anumzana kenka antahinka nehunka, maka
kagu'areti'ene antahintahi ka'areti'ene hunka eri'zama'a erinto.
Na'ankure Agra maka vahē'mofo antahi'zana refko hūno negeno,
agu'afima antahia antahintahia antahino keno nehie. Kagrama
kagu'aretimma hunka hakenka kesunka, Agrira kenka eri fore
hugahane. Hianagi kagrama kamefima humisankeno'a, Agra
kamefi hugamigahie. 10 Hagi menina antahi ankero, na'ankure
Ra Anumzamo'a kagriku mono nona kigahane hūno huhampri
negante. Hagi hankanavetinka ana eri'zana erio. 11 Hagi ana
nanekema huteno'a, anante Deviti'a ana noma kisia amema'ama
tafete'ma krente'nea amema'a Solomonina ami'ne. Hagi ana
tafetera, mono nomofo megia nonki, mono nonki, fenoma ante

nonki, anaga kaziga nonki, agua nonki, asunku tra'ma me'nia
nonki, **12** meg'i'a Ra Anumzamofo mono kumamofo amema'ama
krente'nea avontafera ami'ne. Hagi Ra Anumzamofo zagoma
ante none, eri ruotgema hu'za Anumzamofoma eme amisaza
zantmima ante nomofo amema'ama antahintahifima egeno
retro'ma hunte'neana anante ami'ne. **13** Hagi Deviti'a pristi
vahe'ene Livae vahe'enema refkoma hanige'za eri'zama Ra
Anumzamofo nompima eri'naza zama krente'nea avontafe'ene,
Ra Anumzamofo nompima eri'zama erisaza zantmima krente'nea
avontafe'enena ami'ne. **14** Hagi mago mago ruotge zantmima
tro'ma hania silvane, golimofo kna'a eri fatgo huno negeno
krente'neana, **15** golire tavi azotane, lamuma tro'ma hania
golimofo kna'ane, mago mago azankuna'ama tro'ma hania
golimofo kna'ane eri fatgo nehuno, mago'mago azankunate'ma
ante'nia lamu tavima tro'ma hanaza silvamofo kna'anena
eri fatgo hu'ne. **16** Hagi zo-ore bretima ante itama tro'ma
hanaza golimofo kna'ane, silvaretimma tro'ma hanaza itaramimofo
kna'ane, **17** goliretimma troma hanaza foku'ma, tintafetamima,
zuompama tro'ma hanaza kna'ane, silvaretimma tro'ma hanaza
zuompamofo kna'anena erifatgo hu'ne. **18** Hagi mnanentake
zama kremnama vu golire itama tro'ma hanaza amema'ane
kna'ane, asunku tratema tro'ma huntenigeno zanagekonamo'ma
rutareno Anumzamofo karisignama hania ankerontremofo
amema'ane, ana ankeroma tro'ma hania golimofo kna'anena
krenteteno ami'ne. **19** Hagi anante Deviti'a amanage hu'ne,
ama ana maka zantmimofo amema'a, Ra Anumzamo'ma
nasmia kante antena avontafepina krente'noe. **20** Hagi Deviti'a
nemofo Solomonina amanage huno asmi'ne, korora hunka
kahirahikura osunka hankvetinka ama ana eri'zana erio. Korora

huge kahirahikura osuo, Ra Anumzana, nagri Anumzamo'a kagrane manigahie. Agra noma vagama orenenifina amefira hugamige katregera osugahianki, kagrane mani'nenigenka noma'a ki vagaregahane. 21 Hagi antahio, pristi vahetamine Livae vahetmimo'za kazahu'za Anumzamofo nona kigahaze. Hagi maka ruzahu ruzahu eri'zama eri antahizama eri'naza vahetmimo'za kaza hu'za ana eri'zana enerinagenka, maka eri'za vaheka'ane, zamagra zamavesite'ma eri'zama eri vahe'mo'za kagria keka'a antahi'za eri'zana erigahaze. Hagi maka ugagota kva vahe'mo'zane, maka vahe'mo'zanena ke'ma hanana kea antahi'za ana eri'zana erigahaze.

29 Ana huteno Deviti'a mika vahe kevua amanage huno zamasami'ne, Nenamofo Solomoni Anumzamo'ma huhampri ante'nea ne'mo'a osi mofavregino eri'zama eri'zana ontahi'negeno eri'zamo'a rankrerfa hu'ne. Na'ankure ama ana nompina vahe'mo'a omanigahianki, Ra Anumzamo manisia no kigahie. 2 E'na hu'negu nagrama hugazana hu'na Anumzanimofo noma kizantmina golima, silvama, bronsima, ainima, zafama onksi haveramima, mago'a ruzahu ruzahu zago'amoma mareri haveramine, alabastanena eri atru hu'noe. 3 Hagi nagrama Anumzanimofo noma ki antahizama eri fore'ma hutena, ana noma kizama eri atruma hu'noa agofetura, nagra'a goline, silvanena mago'anе Anumzamofo ruotge mono noma ki'zana antoe. 4 Hagi golima aminuana kna'amo'a 100tausen kilo hu'nea knare goligi, ana nomofoma masavema freno eri avugosama hu'zana 240tausen kilo hu'nea knare silva amigahue. 5 Hagi keonke zama trohu antahi'zama eri'naza vahe'mo'za ama ana goliretira golire zantamina tro nehu'za ama ana silvareti silvare zantamina tro hugahaze. Hagi tamagripintira iza

Anumzamofo noma ki zantamine, agra'ama ofama aminakura
agesa nentahie? **6** Anage higeno mago mago nagamofo
kva vahetmima, mago'mago nofimofo kva vahetmima, 100'a
sondia vahetaminte kva vahetamima, 1tauseni'a sondia vahete
kva vahetamima, kini ne'mofo fenonte'ma kegavama hu'naza
vahetamozanena, zamagra'a zamavesite ana mono noma
kizantamina emeri atru hu'naze. **7** Hagi ana maka Anumzamofo
noma ki zantmima eme ami'naza zamofo kna'amo'a 170tausen
kilo hu'nea goligi, 340tausen hu'nea silvagi, 620tausen hu'nea
bronsigi, 3million 400tausen hu'nea ainigi hu'za emeri atru
hu'naze. **8** Hagi zago'amo'ma marerirfa havema antenemo'a
erino eme amigeno, Anumzamofo zagoma nentaza nompi
eme ante'ne. Hagi ana nontera Gesoni nagapinti ne' Jehiel
kegava hu'ne. **9** Ana nehu'za vahetamimo'za tusi muse
hu'naze. Na'ankure zamagra zamavesite zamagu'areti hu'za Ra
Anumzamofona ofa eme ami'naze. Kini ne' Deviti'enena tusi'a
muse hu'ne. **10** E'inama hutazageno Deviti'a mika vahetmimofo
zamavuga Ra Anumzamofona agia erisga nehuno amanage
hu'ne, Ra Anumzana nerfa Israeli Anumzane, maka knane
knanena vahetmimo'za kagi erisga huvava hugahaze. **11**
Kagrira hankavekamo'ene hihamuka'amo'ene masazankamo'a
agatere'neankinka, maka hara hugatenerane. Na'ankure monane
mopanena, kagri zanke'za me'ne. Kagra maka zana kegava
hunanankinka, mika zana mani agaterenka onaga'a mani'nane.
12 Hagi feno vahera kagra'a azeri retro nehunka, vahe'moma ra
agima ami'zana kagraka'a vahera nemine. Kagrake'za mika'a
zantera kegava hu'nane. Kagri kazampinke vahe'ma hihamune,
hankavenema ami'zana mika me'ne. **13** Menina Anumzantimoka
susu huneganteta, hihamu masa'ane kagia erisga nehune. **14**

Hianagi nagrane vea'ninena tagra izagata tagra'a tavesitera ofa
eme negamune? Na'ankure maka zama ante'nona zantamina
kagritegatike ne-egeta kagri kazampinti maka zana eriteta, ete
negamune. **15** Tagra Kagri kavurera tagehezama hu'nazaza
huta ruregati emani vahe'ene kankekanke vahe'ene mani'none.
Ama mopafi manizantimo'a vahe amema'agna huno amuhazana
omane'ne. **16** Ra Anumzana tagri Anumzamoka, ama tusi'a
zantmima ruotge kagima erisga hu noma kinaku'ma emeri atruma
huna zantamina, maka Kagritegati e'neankino, ana maka zana
Kagrike zanke me'ne. **17** Anumzantimoka, kagra mika vahe'mota
tamarimpa rezaganenka negenka, knare hu'za fatgo avu'avazama
nehaza vahera muse hunezmantane. Nagra fatgo hu'na
nagu'areti navesigante'na ama maka zantamina eme negamina,
menina negogeno vaheka'amo'za eme atru hu'za musezampinti
zamagra'a zamavesite mika ofazamia eme negamize. **18** Ra
Anumzana, tafahe'i Abrahamuma, Aisakima, Israeli Anumzamoka
vaheka'a zamaza hunka kagrarega zamagu'a zamazeri rukrahe
huntege'za maka knafina kavesinegante'za keka amage anteho.
Ana nehuge'za Kagrira kavesi negante'za kagrite rukrahe hu'za
eho. **19** Nenamofo Solomonina knare antahintahi amigeno,
kasegeka'ane kavukvaka'ane, tra keka'anena maka amage
nenteno, nonka'a kino. Na'ankure noma ki'nia zantamina ko
retro hunte'noe. **20** Hagi anante Deviti'a maka atruma hu'naza
vea kevua amanage huno zamasmi'ne, Hagi Ra Anumzana tagri
Anumzamofo agia erisga hiho. Higeno ana maka vahe'mo'za
Ra Anumzana zamafahе'i Anumzamofo agia erisga nehu'za,
kepri hu'za kini ne'mofo avuga zamavugosaregati mopafi
mase'haze. **21** Ana hute'za mase'za anante knarera 1tauseni'a
bulimakao afutminki, 1tauseni'a ve sipisipigi 1tauseni'a anenta

ve sipisipi afutminki hu'za Ra Anumzamofontega ofa eme hu'za kresramna vunte'naze. Ana nehu'za waini ofane mago'a ofanena maka Israeli vahe'mo'za eme hu'naze. **22** Hagi ana zupa Ra Anumzamofo avuga ra ne'za kre'za nene'za, tina nene'za musena hu'naze. Ana nehu'za anante Deviti nemofo Solomonina ete mago'ene kinia azeri oti'za Ra Anumzamofo avuga masavena frenente'za Zadokina pristi azeri oti'naze. **23** Hagi Solomoni'a nafa'amofo Deviti no erino kinia mani'neno Ra Anumzamofo vahera kegava hu'ne. Hagi maka zama hia zampina knare huno hageno marerigeno, maka Israeli vahe'mo'za ke'a antahimiza amage ante'naze. **24** Hagi maka kva vahetamima, hankave sondia vahetamima, kini ne' Deviti ne' mofavreramimo'zanena Solomoni agoraga'a manigahune hu'za huvempa hu'naze. **25** Ana higeno Ra Anumzamo'a Solomonina maka Israeli vahe zamavurera azerisga huno ragi amigeno, magora e'ina hu kini nera korapara Israeli mopafina fore osu'neankna kini fore huno kinia mani'ne. **26** Hagi ana'ma higeno Jesi nemofo Deviti'a maka Israeli vahe'mofo kinia mani'ne. **27** Hagi 40'a kafufi Deviti'a Israeli vahe kinia mani'ne. Hebron kumatera 7ni'a kafu kinia maniteno, Jerusalemia 33'a kafu kinia umani'ne. **28** Ana huteno ozafama ome nereno'a, veamokizmi zamavurera feno'amo agatere'nea ne' manino, ra agi erino mani'neno frigeno, nemofo Solomoni agri nona erino kinia mani'ne. **29** Hagi Kini ne' Deviti'ma tro'ma hu'nea zamofo agenke'a, eseteti agafa huno vuno uvagarete'ma vu'nea agenkea kasnampa ne' Samueli avontafepine, kasnampa ne' Neteni avontafepine, kasnampa ne' Gati avontafepi krente'naze. **30** Hagi e'i ana avontafepina Deviti'ma kinima mani'nea agenkene, hihamu'amofo agenkene, agrama kinima mani'nea knafima Isareli vahete'ene agrama

kegavama hu'nea mopafima maka'zama fore'ma hu'nea zamofo
agenkea krente'naze.

2 Kroniku

1 Hagi Deviti nemofo, Solomoni'a maka mopa agrake erino vahera kegava higeno, agri kvafinke maka vahera mani'naze. Na'ankure Ra Anumzana agri Anumzamo'a hihamu hankavea amino, azerisga higeno agimo'a marerirfa kini ne' mani'ne. **2** Hagi maka Israeli vahepintira, 1tauseni'a sondia vahetema kvama hu'nea sondia vahetmima, 100'a sondia vahete'ma kegavama hu'nea vahetmima, kema refkoma hu kva vahetmima, Israeli vahetmimofo kva vahetmima, mago mago nagate'ma vugotama hu'nea kva vahetmima huno Solomoni'a ke hutru huteno nanekea zamasami'ne. **3** Hagi ana huteno Solomoni'ene maka vahе kevumo'zanena mono'ma nehaza agona kumate Gibioni vu'naze. Na'ankure Ra Anumzamofo eri'za ne' Mosese'ma ka'ma kopima Anumzanema atruhu seli noma tro'ma hu'nea seli mono nomo'a anantega me'nege'za vu'haze. **4** Hianagi Deviti'a Anumzamofo huhagerafi hvempage vogisima Kiriat-Jearimi kumate'ma me'neana ko erino eno kuma'ma tro'ma hunte'nefi Jerusalemi eme ante'ne. Na'ankure Jerusalemi kumate ana huhagerafi hvempage vogisima ante seli nona kinte'nefi eme ante'ne. **5** Hianagi Uri nemofo, Huri negeho Bezaleli'ma kre sramana vu itama bronsiretimma tro'ma hu'nea itamo'a Gibioni kumate seli mono nomofo avuga me'nege'za, Solomoni'ene maka vahе'mo'za Ra Anumzamofo vahе'mo'za monora ome hunte'naze. **6** Hagi Solomoni'a ana bronsire kre sramnavu itare marerino Ra Anumzamofo avuga atruhu seli noma me'nere, 1tauseni'a tra'zama nenaza afura aheno tevefi kre fananehu ofa hu'ne. **7** Hagi ana kenagera Anumzamo'a Solomoninte ava'nafi efore huno amanage huno asami'ne, nazanku kavenesifi nasamige'na kami'neno, **8** higeno Solomoni'a amanage huno

Anumzamofona asami'ne, nenfa Devitina tusiza hunka Kagra
kavesintenka knare'za hunentenka, nagrira kinia nazeri otinke'na,
agri nona eri'ha kinia manue. **9** Ra Anumzana Anumzanimoka,
ko'ma nenfa Devitima huhamprinte'nana kemo'a menina nena'a
efore hie. Na'ankure ama mopafi kugusopagna huno ohompriga'a
vahete kinia mani'nenka kegava huo hunka kinia nazeri otine.
10 Hagi knare antahintahine, ama' antahi'zanena namige'na,
kagri vahekrerfa kegavahu so'e ha'neno. Na'ankure nagra
hanaverera kagri vahekrerfa kegava hugara osu'noe. **11** Anage
Solomoni'a higeno, Anumzamo'a amanage huno kenona'a
hunte'ne, na'ankure kagra vaheka'a kegava hu antahintahi
me'negenka, feno vahe'ma maninka ra kagima eri'zanku'ene, ha'
vaheka'a zamazeri haviza huo hunka nantahinogenka, kafuni'a
eri'zaza huge'na mani'neno hunka nantahi onke'nane. Hianagi
nagri vahe kegava hu so'e hanue hunka knare antahizanku'ene
ama' antahi'zanku'ene nantahige'nane. **12** E'ina hu'negu menina
knare antahintahi'zane, ama' antahi'zanena amne kamigahue.
Hagi ana agofetura ama mopafima ko'ma efore'ma hu'naza kini
vahe'mo'zama onte'nazankna zagofenone, ragima eri'zanena
kamigahuanki, henkama fore'ma hanaza kini vahe'mo'zanena,
anara hu'za kagrikna kinia eforera osugahaze. **13** Hagi
anante Solomoni'a Gibeoni kumate'ma me'nea agonarema Ra
Anumzanema atruma nehaza seli nomofo avugatira atreno,
Jerusalem kumate vuno kinia umani'neno, Israeli vahera kegava
hu'ne. **14** Hagi Solomoni'ma karisiramine hosi afu agumpima
vanoma hu vahetmima zamavare atruma hu'neana, 1tausen
400'a karisiraminki, vahe'mo'zama mani'ne'za ha'ma nehaza
hosiramina 12tauseni'a hosiramine, ana hosirami erinoma
vanoma nehia vahetamine, hosinema nente'za manisaza

kumama tro'ma hunte'naza ran kumatmimpine, agrama nemania
ran kumapi Jerusalemia ante'naze. **15** Hagi kini ne' Solomoni'a
rama'a goline silvane Jerusalemi kumapina eritru higeno,
havegna huno amne zankna hu'ne. Ana nehuno sida zafaramina
rama'a Jerusalemi kumapina eri tru higeno, agupofi sikamo
zafagna huno amne zankna hu'ne. **16** Solomoni'a eri'za vahe'a
huzmantege'za vu'za Kue mopafinti'ene lsipi mopafinti'ene hu'za
hosi afutamina ome mizase'naze. **17** Hagi Solomoni eri'za
vahe'mo'za 600'a silva zagoreti lsipitira karisiramina mizanese'za,
150'a silva zagoreti hosi afutamina mizase'naze. Ana hute'za
hosi afutamine karisiraminena Hiti kini vahete'ene, Siria kini
vahete'ene zagore atrege'za mizase'naze.

2 Hagi Solomoni'a Ra Anumzamofo agima erisgahu mono
none, kinima mani'neno manisia noma'a kinaku antahintahi
retro hu'ne. **2** Hagi knanentake zantamima eri'za esage'za
noma kisaza vahetmina Solomoni'a, 70tauseni'a huhampri
nezmanteno, agonafinti'ma havema frage vahetmina 80tauseni'a
huhampri nezmanteno, ana eri'za vahetmima kegavama hu
vahetmina 3tausen 600'a vahetami huhampri zamante'ne. **3** Hagi
Tairi kumate kini ne' Hiramuntega amanage huno Solomoni'a
kea atregeno vu'ne. Nenfa Deviti'ma noma kinogu'ma sida
zafa'ma aza hu'nanaza hunka naza huo. **4** Hagi ko, Ra
Anumzana Anumzani'amofo agima erisga hu nonki'na Agrite
eri ruotge hanugen, Agri avuga mnanentake'za frenkinsensia
kremna nevu'za, maka kna zisti onte bretia eri'za ana nompi
eme nente'za, kinaga nanterana tevefi kre fananehu ofa eme
nehu'za, Sabati knare'ene, kasefa ikante'ene, mago'a knama
Ra Anumzana tagri Anumzamo'ma hunte'nea knare'enena
ne'zana eme kre'za nene'za musena hugahaze. E'ina hu

avu'avazamo'a mago kasegegna huno me'nenige'za Israeli
vahe'mo'za miko kna huvava hu'za vugahaze. 5 Hagi ama ana
mono noma kisua nona konaririmo'a agatereno marerirfa no
kigahue. Na'ankure tagri Anumzamo'a maka'a anumzatmina
zmagatere'nea Anumza mani'ne. 6 Hagi iza Anumzamofo
nonkrerfa kintegara hu'ne? Monaramimo'a rankrerfa hu'neanagi
anampina Anumzamofona avrentegara osu'ne. Hagi nagra
iza'na Agri mono nona kigahue? Hagi mono noma kisuana,
ofama Agritegama Kresramanama vanua no kigahue. 7
Ana hu'negu golileti'ma, silvareti'ma, bronsiretimi, ainireti'ma,
fitunke'ene koranke'ene hokonke tavravere'enema eri'zama
eri antahi'zama antahini'ma hu'naza vahe'ene, azanteti'ma
antreno maka'zama tro'ma hu antahintahima eri'naza vahe'enena
huzmantege'za e'za, Juda kumate'ene Jerusalemi kumate'ma
keonke'zama tro hu'zama antahi ani'ma hu'nenia vahe Deviti'ma
zamazeri retro'ma hunte'nea vahe'ene zamagra eri'zana
emerigahaze. 8 Hagi sida zafane, saipresi zafane, agalumu
zafanena Lebanonitira atrege'za eri'za echo. Na'ankure nagra
antahi'noanki'za kagri eri'za vahe'mo'za Lebanoniti'ma zafama
antagi'a antahi ani' hu'nazanki'za, nagri eri'za vahe'mo'za kagri
eri'za vahetmina zamaza hanage'za, 9 ana zafaramina rama'a
antagi'za eme namigahaze. Na'ankure ana noma kisuana
konaririmo'a agaterene'nia no, ra nonkrerfa kigahue. 10 Hagi
kagri eri'za vaheka'ane, zafama antagi vahetaminema nagrama
mizama huzmantesuana, kna'amo'a 2tausen tani hu'nenia witine,
2tausen tani hu'nenia baline, 400tauseni'a lita hu'nenia wainine,
400tauseni'a lita hu'nenia olivi masavene zamigahue. 11 Hagi Tairi
kumate kini ne' Hiram'u'a amanage huno Solomonintega avona kre
atre'ne. Na'ankure Ra Anumzamo'a vahe'agura zamavesinenteno

zamagri kinia kagrira kazeri oti'ne. **12** Hagi mago'ane Hiramu'a amanage hu'ne, Ra Anumzana Israeli vahe'mofo Anumzama monane mohanema tro'ma hu'nea Anumzamofo agi'a erisga hanune. Agra kini ne' Devitina knare antahi'zane mofavrea ami'ne. Ana ne' mofavrea knare antahi'zane, ama' antahi'zanena ami'neankino Ra Anumzamofo mono none, agrama kinima mani'nia nonena kigahie. **13** Hagi maka eri'zama eri antahi'zama antahini'ma hu'nea ne' Huram-Abi nagra huntesugeno vugahie. **14** Hagi ana ne'mofo nerera'a Dani nagapinti Israeli are, hagi nef'a Tairi kumateti ne' Hiram-Abikino golireti'ma, silvareti'ma, bronsireti'ma, ainireti'ma, havereti'ene zafareti'ene fitunke'ene koranke'ene hokonke tavravereti'ma eri'zama eri'zante'ma antahi ani' nehuno, havema taga huno vahe amema'ama tro'ma hu'ama antahi' ani hu'neankino, kagri eri'za vahe'ene, Deviti'ma zamazeri retroma huzmante'nea eri'za vahe'enena eri'zana erigahie. **15** E'ina hu'negu witine, baline, olivi masavene waininena ranimoka kema hana kante antenka eri'za vaheka'amotarega atreranto. **16** Hagi kagra inankna zafagu'ma hananana Lebanonitira antagita, ventefi erinteta avazu huta erita Jopa kumate e'nunketa, ananteti emerita Jerusalemia marerigahaze. **17** Hagi nef a Deviti'ma vahe'ma hampri'neaza huno Solomoni'a ruregati'ma Israeli mopafima eman'i'nazva he'ma maka hampri'neana, ana vahe'mofo nampamo'a 153tausen 600ti hu'ne. **18** Hanki havene zafaraminema eri'za esaza vahetamina 70tauseni'a huhampri nezmanteno, agonafinti'ma havema tagahu'za eri fatgoma hu vahetmina 80tauseni'a huhampri nezmanteno, ana maka eri'za vahetmima kegavama hu kva vahetmina 3tausen 600'a zamazeri oti'ne.

3 Ana huteno Solomoni'a agafa huno Moraia agonare Jerusalemi kumapi Ra Anumzamofo mono nona ki'ne. E'i ana agonarera korapara Jebusi ne' Onani'ma witi honama neharea kumate'ma, Ra Anumzamo'ma Devitinte'ma efore'ma hu'minere ana nona ki'ne. 2 Solomoni'ma 4'a kafuma kinima nemanino'a, ana kafumofo namba 2 ikamofona nampa 2 knazupa agafa huno ana mono nona ki'ne. 3 Ana nomofo tra'ama (foundation) ki'neana zaza'amo'a 27mita higeno, atupa'amo'a 9mita hu'ne.

4 Hagi ana nomofona avuga kazigama zasi'ma eri noma ki kamare'naza nomofo zaza'amo'ene, atupa'amo'enena 9mita higeno, anagamuma mareri'amo'a 54mita hu'ne. Hagi ana nomofo anagami kazigane agu'afi asopareganena knare'zantfa hu'nea goli eri'za ana nomofona eri anovazi'za eri masave hu'naze. 5 Hagi ana nomofo agu'afine maka asoparega saipresi zafa retrureno aheno evuteno, golireti eri anovazino eri masave nehuno, tofe zafamofo amema'ane, seni nofi'mofo amema'ane ana zafarera kreno eri avasesea hunte'ne. 6 Hagi ana nomofo avasase'ama tro'ma hu'neana, zago'amo'a marerirfa haveraminteti'ene Parvaim kumateti'ma mizase'nea haveraminteti avasese zana tro huno konariri'a ana nomofo agu'afina hunte'ne. 7 Hagi anagamima ana noma prohu zafane, kafa zafaramine, agu'afima maka asoparegama ahekamre'zama evu'naza zafaramintera maka golireti eri anovazino enevuno, asoparegama ahekamre'nea zafaramintera serabimie nehaza ankerontamimofo amema'a tro huntetere huno evu'ne. 8 Hagi ana nomofo agu'afima hunaragintegeno ruotage'ma huno ruotagetfama hu'nea nomofo zaza'amo'ene atupa'amo'enena 9mita higeno, kna'amo'a 23 tani hu'nea golireti agu'afina eri anovazinteno eri masavea hu'ne. 9 Hagi kna'amo'a 570'a gremi

hu'nea golireti, nilima ahegeno ufre'nea kana eri masave huno
eri hananeno evu'ne. Ana nehuno ana nomofo asoparegama ki
kamre'naza nomofo anaga kazigama hunaraginte'nafina, golireti
eri masave huno evu'ne. **10** Hagi hunaragintegeno ruotagema
huno ruotagetfama hu'nefinka Solomoni'a tare ankeromofo
amema'a zafareti antreno tro huteno, golireti eri anovazino eri
masave huteno anampinka ante'ne. **11** Hagi ana ankeromoke'a
asamofo amunompi otineke zanageko'na rufranara hakeno'a
mago'mago zanagekonamofo za'za zani'amo'a 2.25mita hutere
hu'ne. Hagi ana asamofo zaza'amo'a 9mita hu'nea asagino ana
ankeromokea zanageko'na rutarakeno kantu atuparetira kama
atuparerera e'ne. **12** Anahukna huno mago ankeromofo mago
kaziga ageko'namo'a 2.25mita huno nomofo areharare zafa avako
higeno, mago kaziga agekonamo'a ese ankeromofo agekonare
avako hu'ne. **13** Hagi ana ankerontremokea oti fatgo huneke
zanavugosa agu'afi kafantega hunteneke zanagekona rufanara
hakeno kantu kaziga asoparegati eno, kama kaziga asoparegama
e'nea, zanageko'namofo zaza'amo'a 9mita hu'ne. **14** Hagi
hunaragintegeno ruotage huno ruotagetfama hu'nefinkama
ufre kafante'ma tafinte tavravere'ma avasesema hunte'nazana,
kunke'ene fitunke'ene koranke'ene efeke nofiteti rehati'za, ana
ankeromofo amema'aramina tro hunte'za evu'naze. **15** Ana
nomofo avuga tare zafarare retrurente'ne. Hagi ana zafararemofo
zaza'amo'a 2.5 mita higeno, kankri'ama tro huno'ma ana
zafararemofo aseni'are'ma resima hu'neana zaza'amo'a 2.5 mita
hu'ne. **16** Hagi seni nofiteti avasesezana tro huntene evuteno,
ana seni nofipina pomigreneti zafa raga 100'a tro huno ana
seni nofipina rusi huteno, ana zafararentera anagamu asenifina
rusi hunte'ne. **17** Hagi ana zafararena mono nompima ufre

kafante kini ne'mo'a sauti kaziga mago retrunereno, Jakini'e huno agi'a nenteno, magora noti kaziga retrureno Boasi'e huno agi'a ante'ne.

4 Hagi Solomoni'a bronsireti Kresramana vu itama tro'ma hu'neana, zaza'amo'a 9 mita higeno, atupa'amo'enena 9mita higeno, anagamuma mareri'amo'a 4.5mita hu'ne. **2** Ana nehuno bronsireti ra zuompakrerfa tro huteno, ana zuompamofona agi'a hagerine huno antemi'ne. Hagi ana zuompamofo rugagi'amo'a 13.5mita higeno, urami'amo'a 2.5mita higeno, kahesama hu'neama'amo'a 4.5 mita hu'ne. **3** Hagi ana zuompamofo avaza avamentera, 45 sentemitama huterema hu'nea kankamuntera tarefi bulimakaomofo amema'agnaza 10ni'a tro huntetere huno kagi'ne. Hagi ana avasesezama tro'ma hu'neana, zuompama tro'ma hunte'nea bronsiretike tro hunte'ne. **4** Hagi ana zuompamo'a 12fu'a bronsireti'ma tro'ma hu'naza bulimakao afutamimofo zamagumpi me'negeno, 3'a bulimakao afutamimo'za noti kaziga zamavugosa huntazageno, 3'amoza zage ufre kaziga zmavugosa huntazageno, 3'amoza zage hanati kaziga zamavugosa huntazageno, 3'amoza zage hanati kaziga zamavugosa hunte'naze. **5** Hagi ana zuompamofo tapamari'amo'a 8 sentimita higeno, agi'amo'a kapugna huno kagigeno, rutareno rugahesa hu'nema'amo'a flauamo amosre ahenteno rutareankna hu'ne. Hagi ana zuompafima tima afinte'niana 60ti tausen lita afintega hu'ne. **6** Hagi 10ni'a ne'one zuomparamina tro huteno, 5fu'a sauti kaziga keginarega nenteno, 5fu'a noti kaziga keginarega ante'nege'za, e'ina zuomparamimpina tevefima kre fananehu ofama nehaza zantmi sese nehaze. Hianagi ra zuompafina pristi vahe'mo'za tina nefraze. **7** Hagi kema hu'nea kante anteno, 10ni'a lamu tavi zotarami tro huteno,

mono nomofo agu'afina tamaga kaziga 5fu'a anteno, hoga kaziga mago 5fu'a ante'ne. **8** Hagi ana zanke huno ne'zama ante itaramina 10ni'a tro huteno, 5fu'a sauti kaziga nenteno, mago 5fu'a noti kaziga nenteno, 100'a neone zuomparamina golireti tro huteno mono nompina ante'ne. **9** Ana nehuno mono nomofo kumara tare tro hu'ne. Hagi agu'afima pristi vahem'a mani'saza kumara osi tro nehuno, megia rankumama tro hu'nefima ufretera kafa hagenteteno bronsireti erinovazinteno eri pehe hunte'ne. **10** Hagi bronsireti'ma tro'ma huteno hagerine hu'noma agima ante'nea zuompa erino mono nomofo sauti kazigane zage hanati kaziganema renagente'nea amu'nompi ome ante'ne. **11** Hagi Huram-Abi'a anazanke huno kavoma, savoruma, zuompanena trohunte'ne. Hagi Solomoni'ma Anumzamofo mono nomofo eri'zama Huramu-Abi'ma ami'nea eri'zana ana maka eri vagare'ne. **12** Tare zafararema retruma rente'nea zafararentera, zuompagna kankri trohuno ana zafararemofona zanuntupina antani nezanteno, ana kankritera avonkre avankre huno avasesena hunte'ne. **13** Hagi ana avonkre avankre'ma hunte'nerera seninofira tarefi evu'neankino 400'a pomigreneti zafa raga trohuno ana tare seni nofi'ma evu'nefina tafintetere huno evu'ne. **14** Hagi agra anazanke huno tra'tamina tro nehuno, zuomparaminena tro huteno, ana agofetu antetere hu'ne. **15** Hagi bronsiretim 12fu'a bulimakaoma tro'ma hunte'nea afutamimofo agofetura ra zuompa Hagerinema huno agima ante'nea zuompa ante'ne. **16** Hagi Ra Anumzamofo mono nompima antezantamima Solomoni'ma higeno'ma Huramu'ma tro'ma hu'neana, kavoma, savoruma fokunena tro nehuno, maka zantaminena bronsiretike'za tro hu'ne. **17** Hagi kini ne'mo'a Huram-Abi'ma huntege'za ana zantmima tro'ma hu'nazana, higo

mopafi anama tro'ma hunaku'ma haza zamofo amema'a tro
hunte'ne'za bronsia kre mara'mara hu'za, anampi tagitre'za tro
hu'naze. Hagi ana zantmima tro'ma hu'naza kumara Jodani
agupofi Sukoti kuma'ene, Zareda kuma'mofo amu'nompi ana
zantamina tro hu'naze. **18** Hagi Solomoni'a ama ana zantamina
rama'a tro hu'neankino, bronsimofo kna'a hamprigara osu'ne. **19**
Hagi Solomoni'a Anumzamofo mono nompima ante zantamina
maka tro hu'ne. E'i ana zantamina golire kre sramnavu itagi,
Anumzamofo avugama nentaza bretimofo itaraminki, **20** e'ina
hunka tro hugahanema hu'zama hu'naza kante anteno ruotagema
huno ruotagetfama hu'nefinkama tavi'ma rekruma hunte azotane,
ana tavi azotare'ma rekruma hunte lamuramina goliretike tro
hunte'ne. **21** Hagi ana tavi zotamofo amosre'araminki, lamugi,
tu'zama hu zotanema tro'ma hu'neana, goliretike tro nehuno, **22**
tavima rusu'ma hu azotaraminki, korama ru tritri'ma hu zuompagi,
mnanentake'za insensima kre zuompagi, zuomparaminki, mono
nomofo kafane, ruotage'ma hu'nefinkama vu kafanena goliretike
tro hu'ne.

5 Hagi Solomoni'ma Ra Anumzamofo mono noma kihanama
huntegeno'a, ko'ma nefa Deviti'ma Ra Anumzamofoma
musezama amigeno ruotage'ma hu'nea zantamina, silvagi,
goligi, mago'a eri'zama e'heri'za zantaminena erino Anumzamofo
nompima fenoma nentazafi eme ante'ne. **2** Ana huteno
Solomoni'a mika Israeli ranra vahetamine, maka naga nofimofo
kva vahetaminena, Ra Anumzamofo huhagerafi huvempage
vogisima, Jerusalemi kumaku'ma Deviti kuma Saionema nehaza
kumapinti'ma eri'za mareri'za mono nompima eme antesazegu
zamavare atru hu'ne. **3** Hagi hagege kokampima fugagi noma
ki'za mani'za e'naza zanku'ma antahimi'za kafugu kafuguma 7ni

ikante, ne'zama kre'za nene'za musema nehaza knarera maka
Israeli vene'neramimo'za kini ne'mofo avuga eme atru hu'naze.
4 Hagi ana maka Israeli ranra vahetmima etruma hutazageno,
Livae vahe'mo'za ana huhagerafi huvempage vogisia erisga
nehazage'za, **5** mago'a Livae vahe'mo'zane pristi vahe'mo'za Seli
nomofo agu'afima ruotge'ma hu zantmima me'nea zantamine,
ana seli nonena maka eri'za mareri'naze. **6** Hagi ana huhagerafi
huvempage vogisima Livae vahe'mo'zama eri'za nevazageno'a,
Solomoni'ene mikä Israeli vahe'mo'za huhagerafi huvempage
vogisimofo avuga vugote'za sipisipi afutamine, bulimakao
afutaminena ohampriga'a ahe'za kresramna vu'naze. **7** Ana
hutazageno pristi vahe'mo'za Ra Anumzamofo huhagerafi
huvempage vogisia eri'za vu'za, Ra Anumzamofo mono nompi
hunaragintegeno ruotge'ma huno ruotagetafama hu'nefinkama tare
ankeromoke'ma zanageko'nama rutare'nampinka ome ante'naze.
8 Hagi ana tare ankerontremokea zanageko'na rufanara huke
ana huhagerafi huvempage vogisima antesaza kankamuma'a
rufinetekе, huhagerafi huvempage vogisine erisgama huno
vu azotararena rufite'na'e. **9** Hagi ana vogisima erisgahu
zota'araremokea za'za hu'na'ankino, meg'i'a nompintira amne
atumpa'ararena kegahaze. Hianagi ana nomofo meg'i'atira
onkegahaze. Hagi ana zotararemokea meninena anante me'na'e.
10 Hagi ana vogisimofo agu'afina mago'azana omne'neanki,
ko'ma Isipiti'ma zamavareno ne-eno'ma Sainai agonafima Ra
Anumzamo'ma Israeli vahe'enema huhagerafi'nea huvempagema
tare have tafete'ma Mosesema kremigeno'ma ante'nea have
tafetre me'ne. **11** Ana hute'za maka pristi vahe'mo'za mono
nompima ruotage huno ruotagetafama hu'nefintira atre'za
atirami'naze. Hagi e'i anampima mani'naza pristi vahe'mo'za

ru kevufinti ru kevufinti e'nazanagi, ana maka vahera ko' zamazeri agru hu'naza vahe'mo'za e'naze. **12** Hagi Livae nagapima zagamema nehaza vahe'ene, Asapu'ene Hemeni'ene Jedutuni'ene mofavre naga'zmine, naga'zamimo'zanena efeke kukena hu'ne'za nasenasepane hapue nehaza zavenane, Lairie nehaza zavena nehe'za kresrama vu itamofo zage hanati kaziga oti'naze. Ana nehazage'za 120'a pristi vahe'mo'zanena ufena re'naze. **13** Ana hu'za ufema neraza vahe'mo'zane zagamema nehaza vahe'mo'za magoka runknana hu'za zagamera nehu'za, Ra Anumzamofona agi'a erisga hu'naze. Anama nehazage'za mago'a ufema neraza vahe'mo'zane, nase'nasepama nehaza vahe'mo'zane, magoka ruknana hu'za zagamera nehu'za Ra Anumzamofona agi'a erisga hu'za, tamage huno Agra knare hu'ne. Na'ankure Agra vagaore avesizanteti avesi nerante. Anagema hu'za zagame'ma hazageno'a, hampomo'a Ra Anumzamofo mono nona eme ruvit'e'ne. **14** Hagi pristi vahe'mo'za ana nompina eri'zana e'ori'naze. Na'ankure ana nompina hampomo'ene Ra Anumzamofo himamu masa'amo'ene Anumzamofo mono nona ru vite'ne.

6 Anante Solomoni'a amanage huno nunamuna hu'ne, Ra Anumzamoka hanintiri hu'nea hampompi nemanue hunka hu'nane. **2** Hianagi nagra menina konariri'ane hentofa mono no kigantoankinka, kagra anampi emanı vava hugahane. **3** Anage nehuno kini ne' Solomoni'a rukrahe huno, anante'ma oti'naza Israeli vea kevua asomu kea huzmante'ne. **4** Ana nehuno amanage hu'ne, Ra Anumzana Israeli vahe Anumzamo'a ra agi erisie. Na'ankure Agra ajipinti'ma nenfa Devitima huhamprinte'nea zantamina eri nendaraga nereno, anage hu'ne, **5** Nagrama Israeli vahe'ma Isipiti'ma zamavare'na atiramua

kna zupa, Israeli naga nofimofo kumapintira mago kuma
huhampri'na e'ina kumapi mono noni'a kinantegahaze hu'na
osu'noe. Ana nehu'na nagri vahera kegava hugahane hu'na
mago kinia huhampri onte'noe. **6** Hianagi menina Nagri nagima
me'nesige'za mono'ma hunantesaza mono nona Jerusalemi
kumate kigahaze hu'na huhamprinentoe. Ana nehu'na Israeli
vahen'i'ama kegavama hania nera Deviti huhamprinte'noe
huno hu'ne. **7** Hanki nenfa Deviti'a Ra Anumzana Israeli
vahen Anumzamofo Agima erisgahu noma kinakura tusiza huno
avesi avesi hu'ne. **8** Hianagi Ra Anumzamo'a amanage huno
nenfa Devitina asmi'ne, Kagra fatgo kagukasareti Nagri nagima
erisgama hu nona kinakura kavesi kavesi hu'nane. **9** Hianagi
kagra ana mono nona onkigosananki, kagrama kasente'nana
mofavrefinti mago mofavremo, Nagri nagima erisgahu mono
nona kigahie, huno hu'ne. **10** Hagi menina Ra Anumzamo'ma
huvempama hunte'nea kea eri ragarege'na, Ra Anumzamo'ma
huhamprinte'nea kante ante'na nenfa Deviti kini trara nagra
eri'na Israeli vahen kini mani'nena, Ra Anumzana Israeli vahen
Anumzamofo agima erisgahu mono nona kintoe. **11** Ana nehu'na
Ra Anumzamo'ma have tafete'ma kreno Israeli vahen enema
huhagerafi huvempa kema hu'nea haverarema ante'naza vogisia
ana mono nompinka ante'noe. **12** Anage nehuno Solomoni'a Ra
Anumzamofontega Kresramanama nevaza itamofo avuga, maka
Israeli vahen'mo'za negazageno, oti'neno azana erisga hunagamu
atre'ne. **13** Hagi Solomoni'a vahen'ma oti trara bronsire tro
hu'neankino, atupa kazigamo'a 2mitagi 20sentimita higeno, zaza
kazigamo'a anahu huno 2mitagi 20sentimita higeno, anagamima
mareri'amo'a 1mitagi 30sentimita hu'ne. Hagi maka Israeli vahen
zamavuga Solomoni'a vahen'ma o'neti'za trate eme otiteno, tarega

azantre'na monarega rusu'neteno arena nereno, **14** amanage hu'ne, Ra Anumzana Israeli vahe Anumzamoka magore huno kagri kna Anumzana monafine ama mopafinena omanitfa hu'ne. Maka zamagu'aretima hu'za kamage'ma nentaza eri'za vaheka'a, huvempama hu'nana kasegea runotagrenka, vagaore kavesi zanteti kavesi nezmantane. **15** Hagi eri'za vaheka'a nenfa Devitima kagra kagipinti'ma huvempama hunte'nana kea ruotagre'hane. Kagra'a kagipinti nenfama huvempama hunte'nana kea menina eri nena ragarane. **16** Hagi Ra Anumzana Israeli vahe Anumzamoka, eri'za vaheka'a nenfa Devitina huvempa huntenga amanage hu'nane, kagrama kasezmantesana mofavremo'zama, kagrama hu'nanaza hu'za nagri kasegema amage antesage'na, zamatre'nugeno mago'mo Israeli vahe kinia manitere huno vugahie hunka hu'nane. **17** E'ina hu'negu menina Ra Anumzana Israeli vahe Anumzamoka, atregeno eri'za vaheka'a Devitima huvempama hunte'nana kemo'a tamage huno nena raga'a efore hanie. **18** Hianagi tamagerfa hunka Anumzamoka ama mopafina vahe'enena emanigahano? Monaramimo'a rankrerfa hu'neanagi, anampina Anumzamoka mani avitegahane. Hagi ama mono noma ki'noa nomo'a ositfa hu'neanki, Ra Anumzamoka ama mono noma kua mono nomo'a, kagrira osi hugantegahiankinka emanigara osu'nane. **19** Hianagi Ra Anumzana nagri Anumzamoka, eri'za vahekamo'na nazama huogu'ma nunamuma hu'na kantahigesugenka, nunamuni'a antahinaminka kasunku hunanto. **20** Hagi zagine haninemna nagima erisgama hugahazema hunka hu'nana mono nontera kavua antenka mani'nenka, eri'za vahekamo'nama nunamuma ama kumapima eme hanuana, monafintira antahinaminka nona'a hunanto. **21** Hagi Israeli vahe'ene eri'za vahekamo'nanema ama

ana nontegama tavugosama hunte'neta nazankuro nunamuma
huta kantahigesunkenka, nemanina kumaka'a monafinkatira
nunamuntia nentahinka kumitia atreranto. **22** Hagi mago
vahe'mo'ma havigema huno tava'oma'arema nemanisimofoma
mago'a hazenke hunantene huno huntenigeno, anamo'ma eno
nagra mago'a hazenkea tamagerfa hu'na osu'noe huno'ma,
kresramna vu itamofo avuga eme hanigenka, **23** monafintira
nentahinka fatgo hunka ke'zani'a refko hugahane. Hagi ana kema
antahitesankeno'ma havigema hu'nenigenka, kagraka'a ana
zantera kna nezaminka, tamagema hu'nenigenka ana zantera
mi'zana amigahane. **24** Hagi Israeli vaheka'amota kumi'ma
hanunkeno, ha' vahe'timo'za ha'ma emehu tagaterenageta,
ete rukrahe huta kagritega nunamuma ama mono nonka'afima
hanunkenka, **25** monafintira Israeli vaheka'mota nunamuntia
antahiraminka kumitia atrenerantenka, tagri'ene tafahel'inema
tami'nana moperara ete tavarenka eno. **26** Hagi tagrama kumi'ma
hanuna zanku'ma hunka, mona kafama eriginakeno ko'ma
orina, ete rukrahe huta ama ana noma me'neregama tavugosama
rukrahe huntetama kagima neheta kumi avu'ava zantima netreta
nunamuma hanunkenka, **27** monafintira nunamuntia antahinka
eri'za vahe'kamota Israeli vahe'mota kumitia eri atrerantegahane.
Ana nehunka fatgo kavukvara taveri hananketa nevanunkenka,
rempi huneraminka, erisantihareho hunkama vaheka'amotama
taminana mopafina kora atrenankenno runtegahie. **28** Hagi
ama ana mopafima agatontoza fore hanio, hozafi nezante
kri fore hanio, kenutmimo mika hoza neno erihna hanio, ha'
vahetimo'za kuma kafantire'ma eme runkninere'za avazagi
kaginazo, kri fore huno tazeri haviza hanio, inankna knaza fore
hanigeno, **29** mago ne'mo'o, maka Israeli vaheka'amotama

knazantifine tasunku zampinema mani'neta, ama ana mono
noma me'neregama tazama rusuteta tazama hananegu'ma
nunamuma huta krafagema hanunkenka, 30 mona kumaka'afintira
nentahinka kumitia atrenerantenka, mago mago'mo'ma hu'nenia
avu'avate antenka nona huzmantetere huo. Na'ankure Kagra
mika vahe'mofo agu'agesa kenka antahinka hu'nane. 31
E'ina hananketa, tafahe'ima zami'nana mopafima tagrama
maka knama manita vanumpina, Kagrikura koro nehuta keka'a
amage'anteta vugahune. 32 Hagi meg'iati ru vahe'mo'zama e'za
kagrama, kazama rusutenka hanavenentake ranra avu'avazama
hu'nana zante'ene kagri kagigu'ene nentahi'za e'za ama ana
mono nontegama zamavugosama hunte'ne'za nunamuma
hanagenka, 33 mona kumaka'afintira ana vahe'mokizmi
nunamuzmia nentahinka zamaza huo. E'ina'ma hananke'za,
maka ama mopafi vahe'mo'za, Israeli vahe'mo'zama nehzaza
hu'za kagrikura koro hunegante'za ama mono noma ki'noa
nonkura, kagri rankagi kami'none hu'za ke'za antahi'za hugahaze.
34 Hagi mago kazigama kagra vahekamofoma huzmantesanke'za
ha' vahezmima, ha'ma ome huzmante'naku'ma nevu'za, ama
rankuma'ma kagrama huhampr'i'nana kumategane, kagri kagima
erisgama hu mono noma ama kintoa nontegama zamavugosama
hunte'ne'za nunamuma hanagenka, 35 nunamuzmia monafinkati
nentahinka, kasunku huzmantenka zamaza huo. 36 Hagi maka
vahera kumike vahe mani'nonankino, vaheka'amozama kagri
kavure'ma kumi'ma hanagenkama krimpa ahenezmantenka,
ha' vahe zamazampima zamavare ante'nanke'za zamavare'za
afete mopalero, tva'onte mopalergama vu'za, 37 anantegama
kinama ome hu'za mani'ne'za zamagu'a rukrahema
nehu'za kasunku huzmantogu'ma nunamuma hu'za, kana

hazagreta havi avu'ava nehuta, kumi hu'none nehu'za,
38 anama kinama ome hu'za mani'nenaza moparegati'ma
zamagu'areti'ene tumozmireti'ene hu'za zamagu'ama rukrahe
hu'za kagritegama ne-eza, zamafahe'ima zami'nana moparegane,
kajima erisgahu mono noma kinte'noregane, kagrama
huhampri'nana rankumateganema zamavugosama hunte'ne'za
nunamuma hanagenka, **39** mona kumaka'afintira nunamuzmia
antahizaminka, zamaza nehunka, vaheka'amo'zama kagri ke'ma
rutagre'za kumi'ma hu'naza kumizmia atrezmanto. **40** Hagi menina
Anumzanimoka, kavune kagesanena ama kumapi antenka
mani'enka, nunamuma hanunkenka nunamuntia antahiramio.
41 Menina Anumzana Ra Anumzamoka otinka mani fruhu
kumaka'afi huhagerafi huvempage vogisine umanigahane. Hagi
ana vogisia hanaveka'amofa avame'za me'ne. Ra Anumzamoka
kasunku pristi vahera huzmantenka maka zupa zamaza
nehuge'za zamagu'areti'ma hu'za kagri'ma kamage'ma nentaza
vahe'mo'za knare kavukva zankura muse hugahaze. **42** Hanki
Ra Anumzana kagra Anumza mani'nananki, kagrama huhampri
nante'nana kini ne'mo'na kamefira huonamio. Ko'ma eri'za
vaheka'a Devitima mevava kavesi zanteti'ma kavesinentenka
huvempama hunte'nana kegura kagera okanio.

7 Hagi Solomoni'ma nunamuma huvagaregeno'a, monafinti
tevemo'a eramino kre fananehu ofane, kre sramanama
vu zantaminena tefanane higeno, Ra Anumzamofo hihamu
masa'amo'a ana mono nona ruvitente'ne. **2** Hagi ana'ma hige'za
pristi vahetmimo'za ana nompina umreori'naze, na'ankure Ra
Anumzamofo hihamu masa'amo'a ana mono nona ruvitente'ne.
3 Hagi maka Israeli vahe'mo'za tevene, Ra Anumzamofo hihamu
masa'anema ana mono nonte'ma nege'za, zamavugosaregati

mopafi mase'za Ra Anumzamofona monora hunente'za, susu hunte'za amanage hu'naze, Ra Anumzamo'a Agra knare hu'ne. Na'ankure marerirfa avesi'zamo'a vagaore mevava huno vugahie. 4 Ana hute'za, kini ne'ene maka vahe'mo'zanena Ra Anumzamofo avuga ofaramina kresramna vu'naze. 5 Hagi kini ne' Solomoni'a ofama kresramnama vu'neana 22 tauseni'a bulimakao afutminki, 120 tauseni'a sipisipi afutminki huno kresramna vu'ne. E'ina hu'za kini ne'ene, maka Israeli vahe'mo'zanena Anumzamofo mono nona eri ante ruotagera hu'naze. 6 Hagi pristi vahe'mo'za otigahazema hu'nea kankamunte otizageno, Livae naga'mo'zanena ana zanke hu'za kanti kaziga otine'za, Deviti'ma Ra Anumzamofo vagaore avesi zanku'ma agima ahentesga nehu'za, ahesnaze hu'noma tro'ma hunte'nea zavenaramina eri'neza oti'naze. Hagi kanti kaziga pristi naga'mo'za ufenerage'za mikha Israeli vahe'mo'za oti'naze. 7 Hagi Ra Anumzamofo mono nomofo avugama me'nea mono kumamofo amu'noma'a, Ra Anumzamofo suzane huno Solomoni'a hunte ruotage hu'ne. Hagi e'i anante kre fananehu ofane, rimpa fru ofamofo afova'anena kresramna vu'ne. Na'ankure kresramna vu itama bronsire'ma tro'ma hu'nea itamo'a, osi hu'neankino tevefi kre fanane hu ofane, witi ofane afova'anena ana itarera avitegeno kregara osu'ne. 8 Hagi ana knafina Solomoni'ene maka Israeli vahetmimo'zane 7ni'a zagegnafi ne'zana kre'za nene'za musena hu'naze. Hagi ana knare'ma atruma hu'naza vahera, noti kaziga Lebo-Hamati kumateti agafa huteno vuno, sauti kaziga lsipi tinte'ma mani'zama vu'naza vahete uhanati'nea kazigati vahe'mo'za eme atru hu'naze. 9 Hagi 8ti kna zupa emeritru hu'za mono hu'naze. Na'ankure kresramnama vu ita 7ni'a knafi Anumzamofontega erinte ruotge nehu'za, 7ni'a knafi ne'zana

kre'za nene'za musena hu'naze. **10** Hagi seveni ikamofona
23knazupa, Solomoni'a ana maka vahetmina huzamantege'za
kumazmirega muse nehu'za vu'za eza hu'naze. Na'ankure
Ra Anumzamo'a, Devitine, Solomonine, Israeli vahe'ama
knare'zama huzmante'nea zanku anara hu'naze. **11** Hagi
Solomoni'a Ra Anumzamofo ra mono None, agra'a nonena ki
vagare'ne. Hagi anama hu'neana Solomoni'a mika zama Ra
Anumzamofo Ra Mono none, agra'a nonema kigahuema huno
antahintahima retro'ma hu'nea eri'zana, ana maka eri vagare'ne.
12 Ana hutegen Ra Anumzamo'a Solomoninte kenagera
efore huno amanage huno asmi'ne, Nagra nunamunka'a
antahi'na ama nona nagri none nehu'na nagritegama kresramna
vanaza none hu'na huhamprintoe. **13** Hagi Nagrama mona
kahama erigi'na ko'ma azerige, kenutmi huntanenkeno maka
trazantami neno eri hana huge, kri atresugeno vahe'nima
zamazeri haviza hanige'za, **14** Nagri vaherema hu'noa
vahe'mo'zama zamagu'a erinterami'za, nunamuma nehu'za,
nagri navugosagu'ma nehake'za, kefo avu'ava'zama nehaza
zama atresage'ha, monafintira nunamu'zmia nentahi'na kumizmia
atre'nezmante'na, mopazmia eri knare hugahue. **15** Hagi menina
ama mono nompima hanaza nunamunku navua nente'na
nagesa antete'na manigahue. **16** Na'ankure menina ama mono
nona Nagra huhampri'na erinte ruotge huankino, nagri nagimo
ama mono nompina mevava huno nevanigeno, navumo'ene
nagu'amo'enena mika kna ama anampi mevava hugahie. **17**
Hagi kagra ko'ma negafa Deviti'ma hu'neaza hunkama Nagri
navure'ma mani fatgo nehunka, maka zantmima huoma hu'nama
kasamua zantmima nehunka, maka tra ke'niane, kasegeni'anema
avariri fatgoma hananke'na, **18** negafa Devitima huvempama

hu'na huhamprinte'na, kagri nagapintike kinia mani'neno Israeli
vahera kegavama hugahie hu'na hu'noa kante ante'na, kagri
nagapintike maka knafina kinia azeri oti vava hugahue.

19 Hianagi kagrama rukrahe hunka kamefi hunenaminka,
trake'ni'ane, kasegeni'anema ovaririnka, ru anumzantmimofo
eri'za ome'nerinka, ana anumzantamima mono'ma huntesanana,
20 Nagrama tami'noa mopani'afintira tamazeri vatinetre'na, ama
ra mono noma Nagri nagi ahentesga hugahazema hu'nama
erinte ruotage'ma hu'noa mono nona namefi humigahue. Ana
hanugenno mago avame'za meankna hu'nenige'za maka kaziga
ama mopafima mani'naza vahe'mo'za nege'za, ama ana mono
nonkura kizazokago ke huntegahaze. **21** Hagi menina ama
Mono nomo'a marerirfa konariri'ane no me'nege'za negazanagi,
henkama havizama hanige'za karankama evanaza vahe'mo'za
eme negesu'za, antri hu'za amanage hugahaze, nahigeno Ra
Anumzamo'a ama mopane ama mono nonte'enena amazana hie
hu'za hugahaze. **22** Anagema hanage'za mago'amoza amanage
hugahaze, na'ankure zamagra Ra Anumzana zamafahe'i
Anumzamo'ma Isipiti'ma zamavareno'ma atiramino'ma e'nea
Anumzana atre'za zamefi hunemi'za, havi anumzantmimofo
eri'za omeneri'za, monora hunte'nazagu Ra Anumzmo'a knazana
zamino zamazeri havizana hu'ne huza hugahaze.

8 Hagi Solomoni'a mono none agra'a nonema ki'neana **20'a**
kafumofo agu'afi kivagare'ne. **2** Hiramu'ma ami'nea ranra
kumatamina Solomoni'a eri so'e huno kiteno, anampi Israeli
vahera zamavarentege'za mani'naze. **3** Hagi Solomoni'a Hamat-
Zoba kumara ome ha huzmanteno eri'ne. **4** Hagi ka'ma
kokampina, Tadmori kuma tro hunenteno, maka zantmima ante
rankumatamina Hamati kaziga tro huntetere hu'ne. **5** Hagi

anagamu kaziga Bet-Horoni kuma'ene, fenkma kaziga Bet-Horoni
kumatremofo kuma kegina eri hanavetino tro nehuno, kumamofo
kafaraminte'ma agu'atima erigino rentrokoma hu azotanena
aenireti tro hu'ne. **6** Anazanke huno Ba'alati kumara kinenteno,
maka fenoma ante kumatminki, karisiramine hosi agumpima vano
hu vahetmima mani'naza kumataminena ki'ne. Hagi Solomoni'a
maka'zama Jerusalemi kumapine, Lebanoni kumapine, ana
maka agrama kegava hu'nea mopafima kigahuema huno
antahintahima retro'ma hu'nea zana ana maka trohu vagare'ne.
7 Hagi Israeli vaherompge meg'i'a vahetmima ha'ma nehu'za
ozmahe'ma zamatre'naza vahera, Hiti vahe'ma, Amori vahe'ma,
Perisi vahe'ma, Hivi vahe'ma Jebusi vahera, **8** Israeli vahe'mo'za
zamahe vagaore'nazanki, mago'a zamatrage'za mani'naze.
Hagi e'i ana vahera Solomoni'a kazokazo eri'za vahe retro hu
zamantege'za, agri kazokazo vahe mani'za e'za ama knarera
ehanati'naze. **9** Hianagi Solomoni'a Israel vahera kazokazo
eri'za vahere huno ozmavre'neanki, sondia vahetamine, sondia
vahetema ugotama hanaza vahetamine, karisma erino vanohu
vahetamine, hosi afu agumpima manino vanoma hu vahetami
zamazeri ot'i'ne. **10** Hagi 250'a ugagota kva vahetami zamazeri
otige'za, vahetamintera kegava hu'naze. **11** Hagi ana nehuno
Solomoni'a Fero mofa'ma a'ma eri'nea ara, Deviti rankumapintira
avreno menima kinte'nea noma'afi vu'ne. Na'ankure agra
amanage hu'ne, Nagri a'mo'a Deviti nompina omanigosie.
Na'ankure Ra Anumzamofo huhagerafi huvempage vogisima
me'nea kuma'mo'a ruotge hu'ne. **12** Anage nehuno Solomoni'a,
Ra Anumzamofo kresramna vu itama mono nomofo avuga'ama
tro'ma hunte'nere kre fananehu ofa Ra Anumzamofontega
hu'ne. **13** Hagi Sabatima manigsa hu knare'ma nehaza ofane,

mago'mago ikamofo ese knare'ma musema nehaza ofane, zo-
ore bretima nenaza knare'ma nehaza ofane, kave'ma vasage
knamofo musema hu knare'ma nehaza ofane, fugagi noma
ki'zama mani'nezama Anumzamofoma antahimi knare'ma nehaza
ofanena, Kresramanama vu kasegema Mosese kasegefima
krente'nea kante amage anteno kresramna vu'ne. **14** Hagi
nefa Deviti'ma hunte'nea eri'zamofo kasege'a amage anteno,
Solomoni'a pristi vahetmina mago'mago eri'zama e'neri'za
kankamunte refko hunezmanteno, Livae vahetmina mago'mago
knare'ma zavenama nehe'za zagame'ma hu zante'ene, pristi
vahetmima zamazama hu'zante refko hunezmanteno, kuma
kafante'ma kegavama hu vahetmina refko huno mago'mago
kafanteria zamantetere hu'ne. Na'ankure Ra Anumzamofo
vahet Deviti'ma e'ina huo huno hunte'nere anara hu'ne. **15**
Ana higeno pristi vahe'ene Livae vahe'mo'zanena Deviti'ma
hu'nea kante ante'za, maka zana nehu'za fenozama nentaza
nonena anahukna hu'za kegava hu'naze. **16** Solomoni'ma
Ra Anumzamofo Mono Noma eri agafa huno ki'nereti vuno
vagarete vigeno, maka eri'zama eri'nea eri'zamo'a vagare'ne.
E'ina huno Ra Anumzamofo Mono Nona kivagare'ne. **17** Ana
huteno Solomoni'a hagerinkena Idomu vahe mopafi, Ezion-
Geberi kumate'ene, Eloti kumategane vu'ne. **18** Hagi Hiramu'a
hagerimpima vanoma hu'ama antahi ani'ma hu'naza eri'za
vahe'ane, Solomoni eri'za vahetaminena huzmanteg'e'za agri
venteramimpi vu'za Ofiri kumateti 17ni'a tani hu'nea goli omeri'za
kini ne' Solomoninte e'naze.

9 Hagi Siba kumateti kuini a'mo'ma Solomoni agi agenkemo'ma
vuno'eno'ma hiankema nentahino'a, amuhoma hu'nea agenoka
kea Solomonina eme antahigeno reheno kenaku Jerusalemi

kumate e'ne. Hagi anama e'neana mnanentake zantamine tusi'a goliramine, zago'amo'a marerirfa haveramine, erino rama'a kemoli afutamimofo agumpi e'ne. Hagi Solomoninte'ma ana zantmima erino eteno'a ne-eno'a antahintahi afima me'nea nanekea maka Solomonina eme antahige'e. 2 Hagi maka agenoka kema antahima ke'nea kemo'a magore huno Solomonina amuhoa huonte'ne. 3 Hagi Siba kumate kuini a'mo'ma Solomoni knare antahintahi'ama negeno, kini vahe kuma'ma ki'nea zama negeno, 4 ne'zama nenea zama negeno, eri'za vahe'aramine, kukenazminema negeno, kinimofo waini tima afinemiza eri'za vahe'ane kukena zminena negeno, mono nompima Ra Anumzamofontega marerino kresramna nevia zantaminema negemo'a, ra asimu nenteno kea osu'ne. 5 Ana nehuno ana kuini a'mo'a amanage huno kini nera asmi'ne, Keka'agu'ene, knare antahizanka'agu'ma nanekema hazage'nama kumanirega mani'nena antahi'noana tamage hu'naze. 6 Hianagi ana nanekema nentahi'na havige nehe'za hu'na nagesa antahi'noanagi, menina nagra navufinti eme koana tamage huno knare antahintahi kamo'a, kumanire'ma mani'nенама antahi'ноа kea agateretfa hu'nege'na nagra navufinti koe. 7 Hagi maka vahekamo'za muse nehazageno, eri'za vaheka'aramimo'zama maka knama kavugama mani'nezama knare antahintahi zanka'ama nentahisnaza vahe'mo'za, tusi muse hugahaze. 8 Kagri'ma kavesineganteno Israeli vahe kinima kazeri oti'nea Ra Anumzana kagri Anumzamo'a, ra agi erisie. Na'ankure kagri Anumzamo'a, Israeli vahera ozmatretfa hugahue huno avesi zmante'neankino, ozmatretfa hugahie. Kagra fatgo hunka keagazmia nentahinka, fatgo hunka keagazmia refko huzmantogu, kinizmi manio huno kazeri oti'ne. 9 Anage

nehuno Seba kumate kuini a'mo'a Solomonima ami'neana, kna'amo'a 4'a tani agatere'nea goline, rama'a mnanentake zane, zago'amo'a mareri'nea mnanentake paurana, rama'a nemino, zago'amo marerirfa haveraminena ami'ne. **10** Hagi Hiram eri'za vahetamine Solomoni eri'za vahetmimo'za Ofiri kumateti golima eri'zama e'nazana vahe'mo'za algamu zafane, zago'amo marerirfa haveramine eri'za e'naze. **11** Hagi kini ne' Solomoni'a algamu zafareti Ra Anumzamofo mono nonte'ene agra nonte'enena lata ahenenteno, ana zafaretike mago'a zavenaramina tro nehuno, hapue nehaza zavenaraminena tro hu'ne. Hagi e'inahu hentofa zana kora Juda vahe mopafina fore hige'za onke'nazaza eri fore hu'ne. **12** Hagi kini ne' Solomoni'a Seba kumateti kuini a'mo'ma mago'a zanku avesigenoma antahigea zana, ana maka amigeno, agrama erino'ma e'nea fenona agatereno tusi feno erino eri'za vahe'ane kuma'arega ete vu'ne. **13** Hagi mago mago kafufima Solomonima golima eme amizageno eritruma huterema hu'neana, kna'amo'a 25tani hu'nea goli eri atru hutere hu'ne. **14** Hagi feno vahetegati'ma takisi zagoma eri'nea zagoa, anampina erinte'za ohampri'naze. Ana zanke hu'za Arebia kini vahe'mo'zane, Israeli mopafima kegava hu'naza gavana vahe'mo'zanena goline silvanena eri'za Solomonina eme ami'naze. **15** Hagi Solomoni'a ranra hankoa golireti 200'a tro hu'neankino, mago mago hankoma tro'ma hu'neana kna'amo'a, 7 kilo hu'nea golireti ruguta huno trohutere hu'ne. **16** Hagi anazanke huno goliretike neone hankoa 300'a hamanteti ruguta huno tro hu'neankino, mago'mago hankoma tro'ma hu'neana, kna'amo'a 3.5kilo naza hu'nea golireti tro hu'ne. Hagi ana hankoramima tro'ma huteno'a, kinimofo nompima Lebanoi afu'za zafe huno agj'a nehea nompi ante'ne. **17** Ana

nehuno kini ne' Solomoni'a kini tra'a elefentimofo zaza aveteti
avasesea hunteteno, golinutike rekamreno eri anovazinte'ne.

18 Hagi kini tra'ma me'neregama marerinaku'ma agjama reno
mareri lata, 6si'a tro hunenteno, kini trate'ma mani'neno agjama
antesgama hu trara golinutike tro hunte'ne. Hagi ana kini tra'mofo
kantigama azama ante harage'ma hu'zana tro hunenteno, ana
tava'ontera tare laioni amema'a tro huno kantigma retrurente'ne.

19 Hagi kini tra'ma me'neregama marerinaku'ma agjama reno
mareri lata 6si'ama tro'ma hunte'nerera, kantigama mago mago
laioni tro huntetere higeno, ana makara 12fu'a laioni oti'naze.

Hagi mago kinimo'e huno e'ina hukna kini trara trora osu'neaza
huno tro hunte'ne. **20** Hagi Solomoni'ma tima nenea kapuramina
goliretike tro hu'ne. Hagi mago noma kino Lebanoni afuza
zafe huno'ma agima antemi'nea nompima me'nea zuompo,
keonke zantamina maka goliretike tro hu'ne. Hagi mago zana
silvaretira trora osu'ne, na'ankure Solomoni knafina silvamofona
ke amneza se'naze. **21** Na'ankure Solomoni venteramimpina
Hiramu eri'za vahe'mo'za, Tasisi kumate vu'za 3'a kafuma
evuterema nehige'za golima, silvama elefentimofo zaza ave'ma,
monkitmima, ranra namaramine avre'za etere hu'naze. **22** Ana
higeno Solomoni'a feno zampine knare antahintahi zampinena,
maka ama mopafi kini vahetmina zamagatere'ne. **23** Hagi maka
ama mopafi kini vahe'mo'za Solomoninte e'za Anumzamo'ma
knare antahintahima ami'nea antahintahia eme antahi'naze. **24**
Maka kafune kafunema Solomonia kenaku'ma aza vahe'mo'za
musezama eriza e'nazana silvane, goline kukenane, mnacentake
zantamine, hosi afutamine, miulie nehaza donki afutaminena
avre'ne'za eme ketere hu'naze. **25** Hagi Solomoni'a karisima
renteno vanoma hu hosi afutamimofo nona 4tauseni'a kinteno,

12tauseni'a hosi afutamina ante'ne. Hagi ana hosiramima ante'neana zamagri kuma'ma tro'ma hunte'nea kumatmimpine Jerusalemima agrama nemania kumate'ene zamantege'za mani'naze. **26** Hagi Yufretisi tinteti agafa huteno vuno Filistia mopafi vuno, Isipi mopa atupare'ma manino uhanati'nea kini vahetmina Solomoni kegava huzmante'ne. **27** Hagi Solomoni'a rama'a silva eritru higeno, Jerusalemi kumapina havegna huno amne zankna nehigeno, rama'a sida zafa eritru higeno agupofima sikamo zafamo hageno amnezankna hiaza hu'ne. **28** Hagi Solomoni hosiramima mizama se'nazana, Isipiti'ene mago'a kumategati'ene mizase'naze. **29** Hagi Solomoni'ma kinima mani'nea knafima mago'azama tro'ma hu'nea zamofo agenkea eseteti'ma agafa huno atumpare'ma vu'neana, kasnampa ne' Neteni agenkema krenentaza avontafepine, Silo kumateti kasnampa ne' Ahija agenkene, kasnampa ne' Ido'ma Nebati nemofo Jeroboamu avontafema krentenafi krente'naze. **30** Hagi Solomoni'a 40'a kafufi kinia Jerusalemia mani'neno, Israeli vhahera kegava huzmante'ne. **31** Hagi anante Solomoni'a frige'za, nefo Deviti kumapi Jerusalemi asente'naze. Hagi anama hutazageno'a nemofo Rehoboamu agri nona erino kinia mani'ne.

10 Hagi maka Israeli vahe'mo'za Rehoboamuna kini azeri oti'nageno kini mani'niegu Sekemu kumate omeri atru hu'nazarega, Rahoboamu'a anantega vu'ne. **2** Hagi Nebati nemofo Jeroboamu'ma Solomoninku koro freno Isipima umani'neregatira Rehoboamuma kinima azeri oti'za nehaza agenkema nentahino'a, Isipitira atreno ete e'ne. **3** Hagi vahe huzmantege'za Jeroboamuna ome avre'za azage'za, agrane Israeli vahe'mo'za Rehoboamunte ehanati'za amanage eme hu'naze, **4** korapara negafa'a karenamare zafama bulimakao

anankempima nentazankna huno ra eri'za tamigeta tusi
amuho huta eri'zana eri'none. E'ina hu'negu menina negafa'ma
tami'nea kna eri'zana ontaminka, eri'zama erioza'ma hunka
tami'nanketama erisuta kagri kagorga mani'neta eri'zanka'a
erigantegahune. 5 Anage hazageno Rehoboamu'a amanage
huno kenona hu'ne, vuta 3'a zagegna umaniteta ete eho, hige'za
ana vahetmimo'za vu'za e'za hu'naze. 6 Ana'ma hazageno'a,
Rehoboamu'a ko'ma nefu Solomoni'enema mani'nezama
antahintahima ami'naza ranra vahetami zamantahigeno amanage
hu'ne, na'ane hu'na ama vahetmina kenona huzmantegahufi
antahintahia namiho? 7 Anage hige'za amanage hu'za asmi'naze,
kagrama knare'zama hunezmanenkama, zamazeri muse hunka
knare nanekema zamasamiske'za, zamagra kagri eri'za
vahetmimo'za amanage hu'za asmi'naze, 8 Hianagi Rehoboamu'a
ranra vahetmimo'zama ami'naza antahintahia eri netreno,
kasefa vahetmima agranema magoka nenama hu'naza vahetmimo'za
agri eri'zama e'neriza vahetami zamantahigeno, 9 amanage
hu'ne, negafa'ma karenamare zafama bulimakao anankempima
nentazankna huno knanentake eri'zama tami'neana eri
ozahuranto hu'zama ama vahetmimo'za nantahige'nazana,
na'ane hu'na kenona huzmantegahufi antahintahia namiho?
10 Hagi anante kasefa vahetmima agranema magokama
nenama hu'naza vahetmimo'za amanage hu'za asami'naze,
negafa'ma knanentake eri'zama tami'nea eri'zana eri o'za hunka
osi'a eri'za tamio, hu'zama haza vahetamina, katre nazamo'a
nenfa afafa agatere'ne hunka zamasamio. 11 Hagi nenfa'a
amuho eri'za tami'neanki'na anante antegofetu hu'na mago'ene
rama'a knaza tamigahue. Nenfa'a kanonu sefura tami'neanki'na,
nagrama sefu'ma tami'nua zamo'a segintavemo tamampriankna

hugahie hunka zamasamio. **12** Hagi ana'ma hutazageno'a kini ne'mo'a huno, 3'a knama umaniteta ehoma hu'nea knare Jeroboamu'ene maka vahe'mo'za kini ne' Rehoboamuntega ete e'naze. **13** Hagi kini ne'mo'a ranra vahetmimofo kea eri netreno, hanavegefinti kenona huzmante'ne. **14** Hagi kini ne' Rehoboamu'a ana kasefa vahetmima agri'enema magokama rama hu'naza vahetmimo'zama asamiza kante anteno amanage hu'ne, nenfa'a kna eri'za tami'ne. Hianagi nagra mago'ane ante agofetu hu'na eri'zana tamigahue. Nenfa'a sefu kanonteti tamaheno tamazeri fatgo hu'neanagi, nagrama tami'nua sefu'mo'a segintavemo tamampriankna hugahie. **15** E'inage nehuno vahetmimo'zama hazankea kini ne'mo'a ontahi'ne. Na'ankure Anumzamo'a Silo kumate kasnampa ne' Ahijama asamigeno, Nebati nemofo Jeroboamuma asami'nea kemo nena rgare'ne. **16** Hagi Israeli vahe'mo'za kazama kini ne'mo'ma kezmima ontahige'za kini nera amanage hu'za kenona hunte'naze, Deviti nagapintira tagra mago'zana e'origahune! Jesi nagapintira tagra mago'zana e'origahune. E'ina hu'negu Deviti nagamota tamagra'a ome kegava hihio, nehu'za Israeli vahe'mo'za atre'za nozmirega vu'za e'za hu'naze. **17** Hianagi mago'a Israeli vahe'ma Juda rankumatamimpima mani'naza vhete, Rehoboamu'a kini mani'neno kegava huzmante'ne. **18** Hagi kini ne' Rehoboamu'a kazokzo eri'za vhete'ma kegava nehia ne' Hadoramuna eri'za vahe ome kegava huo hunogeno zamefi vu'ne. Hianagi Israeli vahe'mo'za havenknonu ahe frizageno fri'ne. Hagi anama hazageno'a kini ne' Rehoboamu'a ame huno karisi'afi takaireno freno Jerusalemi vu'ne. **19** E'ina hu'negu Israeli vahe'mo'za, Deviti nagamokizmi kvafina omani'za hara rezmanteme e'za ama knarera ehanati'naze.

11 Hagi Rehoboamu'ma Jerusalemi kumate'ma ne-eno'a,
Israeli vahe'ma ha'ma huzmanteno ana maka Israeli mopama
erino kinima mani'nakura, ha'ma hu antahi'zama eri'naza
vahera 180tauseni'a vahetami Juda nagapinte'ene Benzameni
nagapintira ke hutru huno, Israeli vahera agrarega zamavarenteno
kegava huzmantenaku hu'ne. **2** Hianagi Ra Anumzamo'a
kasnampa ne' Semaiana anage huno asami'ne, **3** Kagra
vunka, Juda kini ne' Solomoni nemofo Rehoboamune,
maka Israeli vahetamima Judama nemaniza vahetamine,
Benzameni naga'enena, **4** Ra Anumzamo'a amanage hie
hunka ome zamasamio, tamagra marerita tamafuhe'zanena
hara ome osugahazanki, makamota nontamirega vuta eta hiho.
Na'ankure Nagra e'ina zana fore hugahie hu'na hu'noazamo
fore nehie. Anage hige'za Ra Anumzamofonke antahi'za
Jeroboamuna hara ome huonte atre'za vu'za e'za hu'naze.
5 Hagi Rehoboamu'a Jerusalemi kumate mani'neno ha'ma
hanigeno fraki rankumatamima Juda mopafi me'neana ete
eri hanavetino kintetere hu'ne. **6** Hagi ana rankumatamina
Betlehemu kumaki, Etam kumaki, Tekoa kumaki, **7** Bet-
zuri kumaki, Soko kumaki, Adulamu kumaki, **8** Gati kumaki,
Maresa kumaki, Zifi kumaki, **9** Adoraimi kumaki, Lakisi kumaki,
Azeka kumaki, **10** Zora kumaki, Aijaloni kumaki Hebron
kuma'enene. Hagi ama ana mika rankumatamina Judane,
Benzameni mopafi me'ne. **11** Hagi hankavenentake vihuma hunte
kumamatimpina sondia vahete kva vahetami zamavarenenteno,
ne'zane olivi masaventamine, waini tinena anampina ante'ne. **12**
Hagi anazanke huno ana ranra kumamatimpina hankoramime,
karugru keveramine, refko huno antetere nehuno, ana kuma
keginaramina eri hanavetino tro hu'ne. E'ina huno Juda naga'ene

Benzameni naga'enena kegava hu'ne. **13** Hagi Israeli mopaſima maka noti kazigama me'nea kumatamimpi nemani'za maka pristi vahe'mo'zane, Livae vahe'mo'za Rehoboamu kazigage ante'naze. **14** Hagi Livae vahe'mo'zane kumazamine, ſipisipi afu'ene bulimakao afu'enema kegavama nehaza kuma'enena atre'za, Juda kumate'ene Jerusalemi kumate e'naze. Na'ankure Jeroboamu'ene ne' mofavre'amoza Ra Anumzamofo pristi vahera omanigahaze hu'za huzmante'nazagu arara hu'naze. **15** Hagi agra'a pristi vahetami zamazeri otige'za mono'ma nehaza agona kumatamimpina meme afu'mofone bulimakao anentamofo amema'a tro hunte'nege'za monora hunte'naze. **16** Hagi maka Israeli vahe'mo'za naga nofipinti'ma Ra Anumzana Israeli vahe Anumzamofona hanaveti'za mono'ma huntenaku'ma nehaza vahe'mo'zane, pristi vahetamine Livae nagara zamavariri'za Ra Anumzana zamafahe'i Anumzante kresramna vunaku Jerusalemi vu'naze. **17** Hagi 3'a kafufina Juda vahe'ene umani'neza Solomoni nemofo Rehoboamuna aza hu'za Juda kumara eri hanaveti'naze. Na'ankure ana 3'a kafufina zamagra Deviti'ene, Solomonikema kinima manineke knare zanavu'zanava hu'na'a zanavu'zanava avariri'za, Rehoboamuna aza hu'naze. **18** Hagi Rehoboamu'a, Deviti nemofo Jerimoti mofa Mahalati ara eri'ne. Hagi Mahalati nerera agi'a Abihailikino agra Jesi nemofo Eliapu mofa mani'ne. **19** Hagi Mahalati'a Rehoboamunte mani'neno, Jeusima, Semariama Zahamuma huno kasezmante'ne. **20** Henka ara Jehoboamu'a Absalomu mofa Ma'aka ara eri'ne. Hagi Rehoboamuntet'i'ma Ma'akama kasezmante'nea mofavreramina Abijama, Ataima, Zizama, Selomitima huno kasezmante'ne. **21** Hagi Rehoboamu'a maka ane'aramimpinti'ene henka a'nema erinefintira zamagatereno Absalomu mofa Ma'akana rama'azampi

avesinte'ne. Hagi ana maka 18ni'a ese a'negi henka a'nea
60'a zamante'ne. Hagi ana a'nemo'za ne' mofavreramina
28'a kasezmant'eza 60'a mofane kasezamante'haze. 22 E'ina
hu'negu Rehoboamu'a Ma'aka nemofo Abija kva azeri otigeno,
zamafuhe'ina kegava huzmante'ne. E'ina hu'neno henka kini
azeri otisigu anara hu'ne. 23 Rehoboamu'a knare antahintahi
erino mago'a ne' mofavre naga'a eri'zana refko huno nezamino,
mago'a ne'mofavre naga'a huzmantege'za Juda naga mopafine,
Benzameni naga mopafi'ma me'nea ranra kumatamima eri
hankavematis kumatamina kegava hutere hu'haze. Ana nehuno
rama'a feno nezmino, rama'a a'ne hagezami'ne.

12 Rehoboamu'ma kinima manino maka zama kegavama
huno hanave kinima efore'ma nehige'za, agrane maka Israeli
vahem'o'za Ra Anumzamofo kasegea zamagena humiza
ovariri'naze. 2 Hagi 5fu'a kafuma, Rehoboamu'ma kinima
nemanigeno'a, Isipi kini ne' Sisaki'a eno Jerusalemi kumapi
vahera hara eme huzmante'ne. Na'ankure zamagra Ra
Anumzamofona tamage hu'za ovariri'nazagu anara hu'ne. 3
Sisaki'a 1tausen 200'a karisiraminki, hosi agumpima mani'ne'za
ha'ma hu vahetmina 60 tauseni'agi, Isipiti'ma, Libiat'i'ma,
Sukimut'i'ma Itiopiat'i'ma hu'za tusi vahekrerfa mopafima
vanoma nehu'za ha'ma nehaza vahera hampriga osuga'a
zamavareno e'ne. 4 Anama huteno Juda mopafi me'nea hankave
rankumatamina zamaheno hanare vagareno eno Jerusalemi
kumate ehanati'ne. 5 Hagi Sisaki'ma ha'ma eme huzmantea zanku
hu'za Rehoboamu'ene ne'mofavre'amo'za koro hu'za Jerusalemi
mani'nazageno, kasnampa ne' Semaia'a eno amanage hu'ne, Ra
Anumzamo'a amanage hie, tamagra Nagrira tamefi hunamizagu,
Nagranena namefi hunerami'na Sisaki azampi tamavrente'noe.

6 Anagema hige'za Israeli vahe'mokizmi kva vahe'mo'zane
kini ne'mo'enena zamagu'a eri ante'nerami'za anage hu'naze,
Ra Anumzamo'a fatgo avu'avaza huranteno amanahu zana
hurante. 7 Hagi Ra Anumzamo'ma keama zamagu'ama
anteramizageno'a, amanage huno Semaina asami'ne, Zamagu'a
anteramizanki'na zamahe fanane osugosuanki, ame hu'na
zamaguvazigahue. Narimpa ahe'na Sisakina huntenugeno
Jerusalemi vahera hara huozmantegahie. 8 Hianagi Nagra
zamatrenuge'za Sisaki kazokzo eri'za vahe mani'ne'za, Nagrama
hunezmantoa navu'navamo knarera hu'nefi, ru kini vahe'mo'zama
huzmante'naza zamavu'zmavamo knarera hugahifi, zamagra'a
refko hu'za kegahaze. 9 E'inage higeno Isipi kini ne' Sisaki'a
marerino Jerusalemi vahera hara eme huzmanteno, Ra
Anumzamofo feno nompinti'ene kini ne'mofo nompintira marerirfa
fenozana maka eri hana huno vu'ne. Hagi Solomoni'ma
golire hankoramima tro'ma hunte'neana, maka eri hana hu'za
Isipi vu'naze. 10 Hagi Isipi vahe'mo'zama eri'za vu'naza
hankoramintera, ete Rehoboamu'a bronsire hanko tro huno,
kini ne'mofo kafante'ma kvama hu sondia kva vahetmina
zami'ne. 11 Hagi inanknarero kini ne'mo'ma Ra Anumzamofo
nontegama nevige'za, ana kva vahe'mo'za e'za eme kva
hunte'za vute'za, ete atiramino'ma noma'aregama nevige'za
ana hankoramina eri'za nompinka eme antetere hu'naze. 12
Na'ankure Rehoboamu'a agu'a anteramino mani'negu, Ra
Anumzamo'a rimpama neheazana atreno maka zama'a eri
havizana huvaga ore'ne. Ana'ma higeno'a Juda mopafina
knare'za fore hu'ne. 13 Hagi Rehoboamu'a Jerusalemi kumate
kinia mani'me vuno hankave kini omese'ne. Hagi Rehoboamu'a
41'a kafu nehuno kinia mani'neankino, Ra Anumzamo'ma

Israeli mopa fima me'nea kumatamimpinti Jerusalemi kuma
huhamprino nagima ahentesgama hanaze huno'ma hu'nea
kumapina 17ni'a kafufi kinia mani'ne. Hagi Rehoboamu
nerera agi'a Na'amakino Amoni kumateti a'mo kasente'ne. **14**
Hianagi Rehoboamu'a kefo avu'ava hu'ne. Na'ankure agra Ra
Anumzamofontera maka agu'aretira huno amagera onte'negu
anara hu'ne. **15** Hagi Rehoboamu'ma hu'nea zantmimofo agenkea
eseteti'ma agafa huno atumpare'ma uhanati'neana, kasnampa
netremokizni Semaiane Idokizni znagenkema krente'nea
avontafe pi krente'naze. Hagi Rehoboamu'ene Jeroboamu'enena
hara huvava huke vu'na'e. **16** Hagi Rehoboamu'a frige'za, Deviti
rankumapi Jerusalemi asentazageno, nemofo Abija agri nona
erino kinia mani'ne.

13 Jeroboamu'ma 18ni'a kafuma Israeli vahe kinima
nemanigeno'a, Abija'a Juda vahe kinia agafa huno mani'ne. **2**
Hagi Abija'a 3'a kafu Jerusalemia kinia mani'ne. Nerera'a Gibea
kumateti Urieli mofakino agi'a Mikai'a'e. Hagi Jeroboamu'ene
Abijakea ana knafina tusi ha' hu'na'e. **3** Hagi Abija'a 400
tauseni'a hankavenentake sondia vahe'aramina zamavareno
Jeroboamuna hara hunte'naku vigeno, Jeroboamu'a 800
tauseni'a hankavenentake sondia vahe zamavareno Juda
vahera hara hu'zman tenaku e'ne. **4** Hagi Abija'a Efraemi agona
kokampi Zemaraimi agonare ot'i'nen omanage huno kezanati'ne,
Jeroboamugane, maka Israeli vahe'mota kama antahiho! **5**
Ra Anumzana Israeli vahe Anumzamo'ma hanavenentake
huvempage huno, Israeli vahe kini trara Devitine agripinti'ma
fore hunante anante'ma hanaza vahe'mokizmi kini tra mevava
hugahie huno'ma hu'neana ontahi'nazo? **6** Hianagi korapara
Nebati nemofo Jeroboamu, Deviti eri'za nemo otino Deviti

nemofo kva ne'a Solomonina hararente'ne. 7 Ana'ma nehige'za mago'a kumazafa vahe'mo'za Solomoni nemofo Rehoboamu'na hararente'naze. Hagi ana knafina Rehoboamu'a osi mofavre mani'neankino, ana kezmirera mago zana osu'ne. 8 Hagi kagri'ma ohampriga'a hanave sondia vaheka'a manizageno, havi anumzama golire bulimakao anentama Jeroboamu'ma tro hugami'nea anumzama ante'nana zanku nentahinka, Ra Anumzamo'ma Deviti naga'ma huvempa huno ami'nea kini tra eri atregahue hunka nehano? 9 Hagi kagra Aroni naga'ene, Livae nagapinti Ra Anumzamofo pristi vahera zmehenatinka, ru mopafi vahe'mo'zama nehzaza hunka, kagra'a pristi vahetami zamazeri ot'i'none. Hagi iza'oma mago agaho bulimakaogi, 7ni'a ve sipisipima avrenoma agra'ama azeri ruotge'ma hunaku'ma e'nea vahera, zamavarenka havi anumzamofo pristi vahe zmantanke'za manitere hu'naze. 10 Hianagi tagra, Ra Anumzana Anumzantimofona tamagena huomi'none. Aroni mofavremo'za pristi eri'zana erizageno, Livae naga'mo'za Ra Anumzamofo eri'zana zamaza hu'za e'nerize. 11 Hagi zamagra mika kna nanterane, kinaganena tare zupa Ra Anumzamofontega ofane mnanentake insensinena kre mna vuntetere nehu'za, Anumzamofo avugama ante bretia goli itare nente'za, golire tro hunte'nea tavi azotare mika kinaga tavira rekrus huntetere nehzaze. Tagra Ra Anumzamofo amage anteta nevarurunketa, tamagra tamefi agrira humi'naze. 12 Hagi menina antahiho, Anumzamo'a tagri kaziga mani'neankino, pristi vahe'mo'za ha'ma huramante ufe renaku retro hu'za mani'naze. Israeli vahe'mota Ra Anumzana tamafahe'i Anumzamofona ha' reontheho. Na'ankure hara hu ageteoregahaze. 13 Hagi Jeroboamu'a sondia vahetmina huzmanteg'eza zamefiti hara eme huzmant'e naku kafona ome

ante'naze. Hagi mago'a sondia vahe'mo'za Juda sondia vahe zamavuga manizage'za, mago'amo'za zamefi kafona eme ante'naze. **14** Hagi Juda vahe'mo'zama kazana ha' vahe'mo'za zamavugati'ene zamefikati'ene e'naze. Ana'ma hige'za Ra Anumzamofontega zamazama hanigura krafage hazageno, pristi vahe'mo'za ufere'naze. **15** Ana'ma hute'za Juda sondia vahe'mo'za ha'mahu kezati'naze. Hagi Juda vahe'mo'za hahu kezati'za krafagema nehazageno'a, Jeroboamune maka Israeli vahera Anumzamo'a hara huzmanteno, Abijane Juda vahe zamavuga hara huzmagatere'ne. **16** Ana'ma higeno'a, Israeli vahe'mo'za koro frazageno, Anumzamo'a Israeli vahera Juda vahe zamazampi zamavarente'ne. **17** Hagi Abija'ene Juda vahe'mo'za hanavenentake Israeli sondia vahera tusi vahekrerfa zamahe'nazankino, ana zupa 500 tauseni'a sondia vahe zamahe fri'naze. **18** E'na hu'za Juda vahe'mo'za Israeli vahera hara huzmagatere'naze. Na'ankure Juda vahe'mo'za zamagra Ra Anumzana zamafahē'i Anumzante zamentintia hu'nazagu anara hu'naze. **19** Ana higeno Abija'ene sondia vahe'amo'za Jeroboamune sondia vahe'a zamahe'za zamarotgo hazage'za nefrage'za mago'a ranra kuma'zmia zamahe'za hanare'ne. E'i ana kumatmina, Beteli rankumaki, Jesana rankumaki, Efroni rankumaki, maka neone kumatmima ana rankumataminte'ma megagi'nea kumatmina zamahe'za hanare'naze. **20** Hagi Abija'ma hanaventino kinima mani'neno'ma kegava hu'nea knafina, Jeroboamu'a mago'enena hihamua erino kinia omanigeno, Ra Anumzamo'a henka ahe fri'ne. **21** Hianagi Abija'a tusiza huno hankavenentake kini efore nehuno, 14ni'a a'ne anteneno, 22'a ne' mofavreraminki, 16ni'a mofanegi huno zamante'ne. **22** Hagi

maka'zama Abijama hu'nea zamofo agenkea kasnampa ne' Ido
avontafepi krente'naze.

14 Hagi kini ne' Abija'ma frige'za Deviti rankumapi
afahe'mokizmima asente'nafi Jerusalemi asente'naze. Hagi
nemofo Asa, nefo nona erino kinia manigeno, ana knafina
ha'zana omnegeno, 1Oni'a kafufina fru hu'za mani'naze. 2
Hagi Asa'a fatgo avu'ava Ra Anumzana Anumzama'amofo
avurera hu'ne. 3 Na'ankure Asa'a havi anumzama mono'ma
hunentaza kre sramnavu itane, mono'ma hunentaza kuma'ma
agonaregama me'neana taganavazitreno mono'ma hunentaza
havene, havi anumza asera amema'ama antrente'nezama
mono'ma hunentaza zafaraminena antagi atre'ne. 4 Ana nehuno
Asa'a maka Juda vahera amanage huno zamasami'ne, Ra
Anumzana tamafahe'i Anumzamofo monora hunenteta Agri
kasegene, tra ke'ane amagera anteho huno hu'ne. 5 Hagi
maka Juda rankumampintira agonaregama havi anumzante'ma
mono'ma hunentaza kumatamine, mnanentake'zama kre mna
nevaza itanena tagna vazinetreno, Juda vahera kegava
huzmanteg'eza hara osu fru hu'za mani'naze. 6 Hagi ana
knafina ha'zana omnegeno, Asa'a Juda mopafima me'nea
ranra kumatamimofo kuma kegina eri hankavetino ki'ne. E'ina
kafu'afina ha'ma hu'zana omnene. Na'ankure Anumzamo'a mani
fru ami'negu anara hu'ne. 7 Hagi Asa'a amanage huno Juda
vahemokizmia zamasami'ne, Ranra kumatmi kita vihurami tro
huganegita, kvama hu'za mani'naza nontamine, kuma kafane
hagentesune. Na'ankure Ra Anumzana Anumzantimofo amage
antonkeno, maka kaziga mopa tamigeta hara huta eri'none.
Anage nehige'za ranra kumatmina negizageno maka zama
hazazamo'a knareke'za hu'ne. 8 Hagi Asa sondia vahera Juda

nagapina ranra hankoramine karugru keveraminema eri sondia
vahetmina 300tauseni'a manizageno, Benzameni nagapina
osi hankoramine atine kevene eri sondia vahetamina 280
tauseni'a vahe mani'naze. **9** Hagi Itiopia ne' Zera'a 1milioni'a
sondia vahe nezmavreno, 300'a karisine erino hara eme
huzmante'naku Juda mopafina, Maresa kumate ehanati'ne. **10**
Anama higeno'a Asa'a ha' ome hunte'naku sondia vahe'ane
vuno, Maresa kuma tava'onte Zefati agupofi ome avazuhumpi
hu'za ot'i'naze. **11** Anama nehazageno'a Asa'a Ra Anumzana,
agra'a Anumzamofontega anage huno nunamuna hu'ne, Ra
Anumzamoka, sondia vaheni'ane nagranena hankavetia omne
vahe manunkeno, Zerana rama'a sondia vahetami mani'naze.
Hianagi Kagra hankavezmima omne sondia vahe zamaza
nehanke'za, hanave sondia vahera hara hu'za zamagateneraza
Anumza mani'nane. Kagri kagire tamentinti hunankino, mago
vahe'mo'e huno hara Ra Anumzamoka hu kagateoregahie. **12**
Anagema hutegeno, Ra Anumzamo'a Asane Juda vahetmimofo
zmavuga, Itiopia sondia vahera hara hu zmagaterege'za, Itiopia
sondia vahe'mo'za atre'za koro fre'naze. **13** Hagi Asa'ene sondia
vahe'amo'za zamagenere'za zamaheme vu'za Gerari kumate
Itiopia vahera ome zamahage'za rama'a vahe fri'naze. Na'ankure
Ra Anumzamofone sondia vahe'amofo avuga panani hu'za
fre'naze. Ana nehu'za Itiopia vahe keonke'zana tusi'a zantmi
eri'za e'naze. **14** Hagi Gerari tva'onte'ma megagi'nea kumatmina
ha' huzmante'za kumazmia eri haviza hu'naze. Na'ankure tusiza
huno Ra Anumzamo'a zamazeri koro hu'ne. Ana nehu'za ana
kumatamimpintira fenona eri'naze. Na'ankure ana kumatmimpina
tusi'a feno me'nege'za anara hu'naze. **15** Hagi sipisipi afutamine
meme afutaminte'ma kegavama nehaza vahetmimofo seli nona

zamahe'za tagana nevazi'za sipisipi afutamine, meme afutamine,
kemoli afutaminena zamavare'za Jerusalemi e'haze.

15 Anumzamofo Avamumo'a Obeti nemofo Azariante emanigeno, **2** Asante vuno amanage huno ome asmi'ne, Asagane maka Judane Benzameni nagamotanena antahiho, Ra Anumzamo'a, Agri'enema mani'nazageno'a tamagrane mani'ne. Tamagrama Agriku'ma hakenutma Agrira haketa eri fore hugahaze. Hianagi tamagrama tamagenama humisageno'a, Agranena ana zanke huno amagena huramigahie. **3** Hagi za'za kna Israeli vahe'mo'za tamage Anumzanena omanizageno, pristi vahe'mo'za zamagri'enena manine'za rempia huozmizageno, kasegemo'a zamagri'enena omne'ne. **4** Hianagi knazampima unefre'za Ra Anumzana Israeli vahe Anumzamofonku rukrahe hu'za eme nehake'za, Agrira ke'za eri fore hu'haze. **5** Hagi ana knafina Israeli mopamofo agu'afina hazenke zamo'a avitegeno, kama vanoma hu'zamo'a amuho hige'za kana vanoa osu'haze. **6** Hagi mago kumamo'a otino mago kumara ha'rentegeno, ranra kumapi vahe'mo'za ha orente arente hu'za umani emani hu'haze. Na'ankure tusi hazenke maka kaziga Anumzamo'a atregeno hazenkemo kagi'ne. **7** Hianagi tamagra korora osuta hankavetitma eri'zana eriho. Na'ankure eri'zama erinesaza kante mizana erigahaze. **8** Hagi kasnampa ne' Odeti nemofo Azaria'ma hiankema Asa'ma nentahino'a, hankave e'nerino Judama, Benzamenima, Efraemi agona kokampima me'nea rankumapima ante'naza kaza osu havi anumzatmina maka eri netreno, Ra Anumzamofo kresramna vu ita Ra Anumzamofo mono nomofo avugama me'neana, eri so'e hu'ne. **9** Asa'a mika Juda vahe'ene Benzameni naga'enena zamavare atru nehuno, Efraemi naga'ma Manase naga'ma Simeoni naga'ma

Juda mopafi nemaniza vahe'enena kehu atru hu'ne. Na'ankure
Ra Anumzana Asa Anumzamo'a agri'ene mani'nege'za kazana
hige'za, rama'a Israeli vahe'mo'za Asa'ene emani'naze. **10**
Asa'ma kinima manino egeno 15nima hia kafumofo 3 ikantera,
ana vahe'mo'za Jerusalemi kumate emeri atru hu'naze. **11**
Hagi ha'ma hazafinti'ma zamavare'zama e'naza afutmimpintira
700'a bulimakao afutamine, 7tauseni'a sipisipi afutamine ahe'za
Ra Anumzamofontega Kresramana vu'naze. **12** Ana nehu'za
Ra Anumzana zamafahe'i Anumzamofona zamagu'zmenteti
amage antegahune hu'za huhagerafi huvempagea hu'naze. **13**
Hagi mago mofavremo'o, ra vahe'mo'o, vemo'o, a'mo'ma Ra
Anumzamofoma ovararohana ahe frigahune hu'za kea anaki'naze.
14 Ana maka vahe'mo'za ranke hu'za kezaneti'za, ufena nere'za
Ra Anumzamofona avaririgahune hu'za huvempa kea hu'za eri
hankaveti'naze. **15** Hagi Juda vahe'mo'za tusi muse hu'naze.
Na'ankure zamagra hu'za tagu'areti huta amage antegahune
hu'za huvempa nehu'za Anumzamofona antahigazageno, Ra
Anumzamo'a kezmia antahi'ne. E'ina hazageno Ra Anumzamo'a
mika kaziga ha'zana eri atrege'za, fru hu'za mani'naze. **16**
Ma'aka'ma kuinima mani'neana kuini tra'aretira negeho Asa'a
azeri netreno, havi anumza Asera amema'ama antreno tro'ma
hunte'nea zafaramina antagino kitaginkotago huno Kidroni
agupofi teve hanavazino kre fanane hu'ne. Na'ankure Ma'aka'a
kasrino hi'mnage avu'ava huno, zafa antreno Asera havi
anumzamofo amema'a tro hunte'negu anara hu'ne. **17** Hagi Asa'a
maka havi anumzama mono'ma hunentaza kumatmina Israeli
mopafintira eri havizana osune. Hianagi Asa'ma kinima mani'nea
knafina tamage huno maka agu'areti huno Ra Anumzamofona
amagera nenteno mago havizana osu'ne. **18** Hagi nefalene

agranema Anumzamofo suzanema huke eri atru hu'na'a silvane
goline mago'a zantaminena, erino Anumzamofo mono nompi
ome ante'ne. 19 Hagi Asa'ma 35'a kafufima kinima mani'neno'ma
kvama hu'nea knafina, ha'zana omane'ne.

16 Asa'ma 36si'a kafuma Juda vahe kinima nemanigeno'a,
Israeli vahe kini ne' Basa'a Juda vhahera hara eme huzmanteno,
Rama kumate sondia vahe'amofo kumara eme kinteg'e'za
sondia vahe'mo'za mani'ne'za kegava hazageno, Juda kini
ne' Asa mopafina mago vahe'mo'e huno ufrege, atiramigera
osu'ne. 2 Ana'ma higeno'a Asa'a Ra Anumzamofo nompinti'ene
agra nompintira goline mago'a silvanena erino Siria kini ne'
Ben-Hadati'ma Damaskasima nemanirega atregeno nevigeno,
amanage huno hu'ne, 3 Amanahu nagesa nentahue, ko'ma
nerfakema hu'na'aza huta mago trimpa huta maninu'a ke
huvempa huta huhagerafinu'egu silvane golinena kagritega
atregantogeno vie. Hagi vunka Israeli kini ne' Basa'enema
huhagerafina'a nanekea ome vakonetregeno natreno vino. 4
Hagi Ben-Hadati'a Asa'ma hiankea nentahino, sondia vahe
kva vahetami huzmantege'za Israeli rankumatmimpi vahetmina
hara huzmant'e'za Ijoni rankuma'ma, Dani rankuma'ma, Abel-
Maimi rankuma'enena e'nerino, ne'zama eritruma nehaza
rankumatmima Naftali mopafima me'neana maka zamahe'za
hanare'naze. 5 Hagi ana nanekema Ba'asa'ma nentahino'a,
Rama kuma'ma negia eri'zana atregeno anante me'ne. 6 Ana
higeno kini ne' Asa'a maka Juda vahetaminku ke hige'za, Rama
kuma'ma eri hanavetino kinaku'ma haveramine zafaraminema
eri atruma hu'nea zantamina, eri'za vazageno ana havereti'ene
zafareti Geba kuma'ene Mizpa kuma'enena eri hanavetino
ki'ne. 7 Hagi ana kna zupa kasnampa ne' Hanani'a Juda kini

ne' Asante eno amange huno eme asmi'ne, Ra Anumzana kagri Anumzamofontera kamentintia osananki, atrenka Siria kini ne'mofonte kamentintia hankeno, Siria kini ne'mofo sondia vahe'mo'za katre'za fraze. **8** Hagi Itiopia vahe'ene Libia vahemo'zanena rama'a sondia vahe nezmante'za rama'a karisine hosifima mani'ne'zama ha'ma hu vahera rama'a zamante'naze. Hianagi kagra Ra Anumzamofonte kamentinti hu'nanku, Ra Anumzamo zamavare kazampina zamante'genka hara huzmagatere'nane. **9** Na'ankure Ra Anumzamo'a ama mopafina maka kaziga avua anteno omege emege nehuno, i'zano agu'amo'a knare huno Agrite'ma rutragote'nesia vahe zamaza nehuno zamazeri hanavetinaku tro huno mani'ne. Hagi kagra neginagi'za hananki'za, ha' vahe'mo'za hara eme huramante vava hu'za vugahaze. **10** Anage higeno Asa'a ana kasnampa nekura tusi rimpia ahenenteno, azerino kina nompi ante'ne. Na'ankure ana ke'arera tusi arimpa ahente'ne. Ana nehuno tusiza huno mago'a Juda vahetmina Asa'a zamazeri haviza hu'ne. **11** Hagi Asa'ma kinima mani'neno'ma hu'nea zantmimofo agenkea, agafama hu'nereti'ma vuno atumpare'ma uhanati'neana maka Juda kini vahe'ene Israeli kini vahetmimofo zamagenkema krenentaza avontafepi krente'naze. **12** Hagi Asa'ma 39ni'a kafuma kinima nemanino'a, agafi kria efore higeno ana kri'amo'a ome ra hu'ne. Hagi ana krimo'ma ome rama nehigeno'a, Ra Anumzamofona antahigeno azahu zana e'orineanki, dota vahetegatike zmantahigeno azama hu zana eri'ne. **13** Ana nehuno Asa'a 41ni'a kafu kinia maniteno frige'za afahe'ima asezmente'nazafi asente'naze. **14** Hagi anama asemante'nazana agra'a hanagatinte'nea havegampi Deviti rankumapi Jerusalemi asente'naze. Hagi havegampina mnanentake'za atre'za eri mana

nevu'za meg'i'a tusi teve hugre'za mani'neza zamasunkura
hu'naze.

17 Hagi Asa nona nemofo Jehosafati erino Juda vahe
kinia mani'neno, Israeli vahe'mo'za ha'ma eme huzmante
zankura kuma'a eri hankaveti'ne. **2** Hagi sondia vahe'aramina
huzmanteg'e'za Juda mopafima me'nea ranra kumatmina ome
kva hu'za nemani'zageno, mago'a sondia vahera huzmanteg'e'za
ko'ma nefo Asa'ma Efraemu mopafi me'nea kumatmima ha'ma
huno hanare'nea kumatamina ome kegava hu'naze. **3** Hagi Ra
Anumzamo'a Jehosafeti'ene mani'ne. Na'ankure agra kinima
nemanino'a, negeho Deviti'ma agafa huno kinima nemanino
knare avu'ava'ma hu'neaza huno, Bali havi anumzantera monora
huonte'ne. **4** Hianagi Jehosafati'a Israeli vahe avu'avara amagera
onteno, negeho Anumzamofo amage'nenteno kasege'a kegava
huno amage'ante'ne. **5** E'na hu'negu Ra Anumzamo'a kinima
mani'zana agri azampi anteno azeri hankavetigeno, mika Juda
vahe'mo'za musezana eri'za eme ami'naze. Ana'ma hazageno'a
Jehosafati'a tusi feno antegeno, agimo'a mareri'ne. **6** Hagi
agra hankvetino Ra Anumzamofona amage'nenteno mika
Juda mopafintira havi anumzamofonte mono'ma hunentaza
agona kumatmina erihaviza nehuno, Asera havi anumzamofo
amema'ama antre'za tro huntene'zama mono'ma nehaza
zafaramina antagi atre'ne. **7** Hagi Jehosafati'ma 3'a kafuma kinima
nemanino'a, eri'za vahe'aramina Ben-hailimima, Obadiama,
Zekaraiama, Netanelima, Makaiama huno huzmanteg'e'za, Juda
rankumatamimpi Ra Anumzamofo kasege ome rempi huzami'za
vano hu'naze. **8** Hagi ana kva vahetamima zmazamahu
Livae vahetmina, Semaia'ma, Netanaia'ma, Zebadaia'ma,
Asaheli'ma, Semiramoti'ma Jehonatani'ma, Adonija'ma, Tobia'ma,

Tob-Adonija'e. Hagi pristi netre'na Elisa'ene Jehoramuke anampina vu'na'e. **9** Hagi ana vahetmimo'za Ra Anumzamofo kasege avontafe eri'neza maka Juda mopafima me'nea ranra kumatamimpi vano nehu'za, vahera rempi huzmi'naze. **10** Hagi Juda mopamofo tavaonte'ma manigagi'naza vahetmimo'za Ra Anumzamofonkura tusi koro nehu'za, Jehosafatina hara eme huonte'naze. **11** Hagi mago'a Filistia vahe'mo'za musezane silva zagonena takisi eri'za eme nemizageno, Arabia vahe'mo'zanena 7tausen 700'a ve sipisipi afutminki, 7tausen 700'a ve meme afutminki hu'za avre'za eme ami'naze. **12** Hagi Jehosafati'a hankavenentake kini fore nehuno, maka Juda mopafima me'nea ranra kumatamimpina vihu kegina nehuno, kave'ma ante kumataminena kinenteno, **13** nezantmina ana kumatmimpina ante avitente'ne. Hagi koro osu'za hankavematiza ha'ma nehaza sondia vahetmina, Jerusalemi kumapi zamavare atru hige'za mani'naze. **14** Hagi ana sondia vahetmima nagatenofite'ma hu'zama zamagima kre'za eri fatgoma hu'nazana vahete kva vahe'mo'za 1tauseni'a sondia vahet kegava hazageno, Juda nagapima 300 tauseni'a sondia vahe'ma kegavama hu'naza sondia kva vahete, Adna'a kva higeno, **15** ananteria Jehohanani'a 280 tauseni'a sondia vahete kva higeno, **16** ananteria Zikri nemofo Amasia'a agra'a avesite Ra Anumzamofo eri'za erinakure huno 200 tauseni'a hanavenentake sondia vahete kva hu'ne. **17** Hagi Benzameni nagapintira, Eliada'a atine kevene hankonema erino ha'ma hu sondia vahetmina 200 tauseni'a vahete kva higeno, **18** ananteria Jehosabeti'a 180 tauseni'a sondia vahetmima hate'ma vunaku'ma tro'ma hu'naza vahetami kva hu'ne. **19** Hagi ama ana maka vahera kini ne'mofo eri'za vahetamine. Hagi mago'a

vahetmina maka Juda mopalima me'nea ranra vihu kumatmimpi
manitere hu'naze.

18 Hagi Jehosafati'a tusi feno ne' nemanige'za ra agi nemizageno, agra Ahapu mofa nemofonte ara erinemino, Ahapu'enema tragoteno mani'nia kea huhagerafi'ne. **2** Hagi mago'a kafu evutegeno, Jehosafati'a Ahapu ome kenaku Sameria kumate vigeno Ahapu'a rama'a sipisipi afutamine bulimakao afutamine aheno Jehosafatine, agri'enema vaza vahetmina ne'zana krezzamente'ne. Ana nehuno Ahapu'a Ramot-Gileati vahe'ma agranema eme tragomate'nageno ha' ome huzmantesigu Jehosafetina masavenke asami'ne. **3** Israeli kini ne' Ahapu'a Juda kini ne' Jehosafatina antahigeno, Nagri'enena vananketa Ramot-Gileati kumate vahera hara ome huzmantegahu'o? higeno kenona huno, Nagrane sondia vahe'nimozanena kagri vahe mani'nonankita, tagra amne kagrira ome kaza huta hara hugahune hu'ne. **4** Hianagi Jehosafeti'a huno, Kotazana amama ha'ma hunaku'ma nehu'azana Ra Anumzamo'a na'ane hugahifi antahigeta keteta'e huno Israeli vahe kini ne' Ahapuna asami'ne. **5** Anage higeno Israeli vahe kini ne' Ahapu'a 400'a kasnampa vahetami zamavare atru huteno amanage huno zamasami'ne, Ramot-Gileati vahera hara ome huzmantenumpi, ome huozmante'nune? Anage'ma hige'za zamagra hu'za, Anumzamo'a kini ne'moka kazampi zmavrentegahianki, marerinka ome hara huzmanto hu'za hu'naze. **6** Hianagi Jehosafati'a mago'ene huno, Ra Anumzamofo kasnampa vahera ama'age mani'hazafi, mago'a mani'hazagu zmantahigegahune huno hu'ne. **7** Anage higeno'a, Israeli vahe kini ne' Ahapu'a huno, Mago kasnampa nera Imla nemofo Mikaiia mani'neankita antahigenunkeno, Anumzamofo avesira

antahigeno kegahie. Hianagi Imala nemofo Mikaiana tusi
navaresra hunentoa kasnampa ne' mani'ne. Na'ankure agra
kasnampa kema hiana, nagri'ma nazeri havizahu kege nehie.
Higeno Jehosafeti'a huno, Kini ne'moka, e'inahu kea osunka
atregeno agra na'ane hugahifi antahimneno. **8** Anage higeno
Israeli vahe kini ne' Ahapu'a eri'za vahe'a hunteno, Ame hunka
Imla ne'mifo Mikaiana ome avrenka eno. **9** Hanki Israeli kini ne'
Ahapu'ene Juda kini ne' Jehosafatikea kini vahe zaza kukena
huke tra'znire Sameria kuma kafante witi akru neharazare
mani'nake'za, zamavuga ana kasnampa vahetmimo'za kasnampa
kea hu'naze. **10** Hagi Kenana nemofo Zedekai'a ainireti
pazivetamina tro huteno amanage hu'ne, Ra Anumzamo'a
amanage hie, Siria vahera ama'na pazivetaminteti zamahenka
zamaretufenka nevunka, ome zamahe fri vagaregahane hie. **11**
Anage hige'za mika kasnampa vahe'mo'za magozahu kasnampa
kege nehu'za amanage hu'naze, marerinka Ramot-Giliati vahera
hara ome huzmagatero. Na'ankure Ra Anumzamo'a kini ne'moka
kazampi zamavarentegahie. **12** Hagi Mikaiama asminaku'ma via
eri'za ne'mo'a, Mikaiana asmino, ko, mika kasnampa vahe'mo'za
Ahapuna knare kasnampa kegege'za eme asmi'naze. Hanki
menina antahio, mago'a kasnampa vahe'mo'zama hu'nazankna
hunka kini ne'moka hara agateregahane hunka ome asmio. **13**
Hianagi Mikai'a amanage hu'ne, Nagra kasefa huno mani'nea Ra
Anumzamo'ma nasami'nea kege'za hugahue. **14** Hagi Mikai'a
kini ne' Ahapunte'ma ehanatigeno'a Ahapu'a antahigeno,
Mikaiaga Ramot-Gileati kumate vahera hara ome huzmantegahufi
hara ome huozmantegahue huno Ahapu'a antahigegeno,
Mikai'a huno, Vunka hara ome huzmanto. Na'ankure Ra
Anumzamo'a ana maka vahera kazampi zamavarentegahie. **15**

Hianagi kini ne' Ahapu'a Mikaiana asmino, Nama'a zupa Ra Anumzamofo agifina tamage hunka huvempa hunka nasamio nehugenka, kagra havige kasnampa kea nehane? **16** Huno higeno Mikaia'a anage hu'ne, Israeli vahe'mo'za kvazmimo omani sipisipimozama nehaza hu'za agonaramimpina panini hu'za vu'za eza nehazage'na ke'noe. Ana nehazageno Ra Anumzamo'a huno, Kvazmia omani'neanki, zamatrege'za nozmirega zamarimpa frune vu'za e'za hiho hu'ne. **17** Anagema higeno'a Israeli kini ne'mo'a, Jehosafatina asmino, ko'ma kasmi'na ama ne'mo'a knare kasanampa kea osugahianki, nagri'ma nazeri havizahu kasnampa kege hugahie hu'na kasami'noe. **18** Hagi anagema nehakeno'a Mikaia'a huno, Ra Anumzamofonkea antahio, Ra Anumzamo'a kini tra'are monafina mani'negeno, maka monafinka ankero vahe'mo'za Anumzamofona tamaga kazigane, hoga kaziganena mani'nazage'na ke'noe. **19** Ra Anumzamo'a amanage hu'ne, Iza Israeli kini ne' Ahapuna ome revatga hanigeno Ramot-Gileatia marerinige'za ahegahaze? Anage higeno magoke magokemo'a agra'a antahintahi'a huama hutere hu'ne. **20** Anage hazageno, mago avamu'mo'a Ra Anumzamofo avuga eotino amanage hu'ne, Nagra ome revatga hugahue higeno, Ra Anumzamo'a huno inankna hunka ome revatga hugahane? huno antahigegeno, **21** agra amanage hu'ne, nagra vu'na maka kasnampa vahetmimofo zamagipina havige naneke ome antegahue. Anagema higeno'a Ra Anumzamo'a huno, revatgama hanana kegura tamage hane huno hugahianki, vunka kema hanazana ome huo huno hunte'ne. **22** E'ina hu'negu menina antahio, Ra Anumzamo'a havigema hu vahe'ma revatga hu avamu maka kasnampa vaheka'aramimofo zamagipina ante'ne. Na'ankure Ra Anumzamo'a kagrikura hazenke erigahane huno

hunte'ne. **23** Anage'ma higeno'a, Kenana ne'mofo Zedekaia'a eno Mikiana ameragente eme rupro hunemino amanage hu'ne, Inankna huno Ra Anumzamofo Avamu'mo'a nagrira natreno kagritega vuno nanekea ome kasami'ne? **24** Higeno Mikai'a kenona huno, Antahio, henkama ha' vahe'mo'zama ha'ma eme hurante'nagenka nomofo agu'afi hunaragintepinka ome frakinka umani'enka, tamage hu'ne hunka antahigahane. **25** Anagema higeno'a, Israeli vahe kini ne' Ahapu'a huno, Mikiana avreta rankumama kegavama hu'nea gavana ne' Amoninte'ene nenamofo Joasainte vuta, **26** kini ne'mo'a amanage hie huta ome hiho, Ama nera kinafi avrenteneta mago zana omitta bretine tinke'za aminkeno neneno mani'nena, hara ome hute'na ete a'neno huno hie huta ome asamaho. **27** Anante Mikai'a amanage hu'ne, Hapinti'ma onkahesagenkama kagrama knare hunka esanke'na Ra Anumzamo'a nagripina huvazino kasnampa kea osu'ne hu'na hugahue. Hagi ama nanekea maka vahe'mota antahio! **28** Higeno Israeli vahe kini ne' Ahapu'ene Juda vahe kini ne' Jehosafatikea sondia vahe'zania zamavareke Ramot-Gileati mareri'na'e. **29** Hagi Israeli vahe kini ne' Ahapu'a amanage huno Jehosafatinkura hu'ne, Nagra amne vahe kna hu'na ha' kukena hu'na hapi ufregahue. Hanki kagra kini vahe kukena hunka vuvo, huno nesmino agra amne kukena huno hapina ufre'ne. **30** Hagi Siria vahe kini ne'mo'a, karisifi maniza ha'ma nehaza sondia vahete kva vahetminkura huno, Ruga'a vahe'enena hara osuta, Israeli kini ne'ke'za hara huntaho. **31** Anage'ma hige'za nevu'za Jehosafatima ome nege'za Israeli vahe kini nere hu'za nehu'za rukrahe hu'za avariri'naze. Hianagi Jehosafati'a kezatino, Ra Anumzamoka naza huo higeno, Anumzamo'a aza huno zamazeri rukrahe hige'za atre'za rurega vu'naze. **32** Hagi

karisifima mani'za e'naza sondia vahe'mo'zama kazama Israeli kini nerompage ru ne'ma nege'za, avarari'zama nevazaretira ome atre'za rukrahe hu'za e'naze. 33 Hianagi mago sondia ne'mo'a fatufatu huno kevea ahetrenero nevuno, mago kevema ahetreana nozame ahehe kna ha kukenamofo kankmumpinti aheraponeno Israeli vahe kini nera amimizafi ahe'ne. Ana higeno kini ne'mo'a karisma erino'ma nevia nekura huno, hago ra hazenke eruanki hapintira ete rukrahe hunka navrenka vuo. 34 Ana knazupa hara hu'za nevazageno, Israeli kini nera karisifi amagena rentinti huntazageno Siria vahe'ma mani'nazarega avugosa hunte'neno mani'negeno vuno kinaga omesegeno fri'ne.

19 Hagi ana'ma higeno Juda kini ne' Jehosafati'a, hazenkea e'ori knare huno ete noma'arega Jerusalemia e'ne. 2 Hianagi kasnampa ne' Hanani nemofo Jehu'a, anante ome keno kini ne' Jehosafatina amanage huno asmi'ne, Kagra kefo avu'ava'ma nehuno, Ra Anumzamofoma avresrama hunentaza kefo vahe zamaza nehunka kavesizmante'nane. Ana hanku Ra Anumzamo'a tusi rimpa ahegante'ne. 3 Hianagi kagripina mago'a knare zana me'ne. Na'ankure kagra mika Asera havi anumzamofo amemalamama antre'za tro'ma hunte'nazana antagitrenka mika kagu'reti hunka Anumzamofona amage ante'hane. 4 Hagi Jehosafati'a Jerusalemi kumate mani'neno, Beseba kumateti agafa huteno vuno Efraemi agona moparegama uhanati'nea kumatmimpina vano nehuno, Ra Anumzana zamafahe'i Anumzamofoma avararihogura veamokizmia zamazeri hankavetino vano hu'ne. 5 Hagi maka Juda mopafima hanave vihuma hugagiterema hazageno me'nea ranra kumapina, nanekema refkoma hu kva vahetmina

zamazeri otitere nehuno, **6** amanage huno zamasmitere hu'ne, Kva hu'neta vahetmimofo keaga refko hiho. Na'ankure tamagra vahe'mofo eri'zana e'horizanki, Ra Anumzamofo eri'za e'nerizankino, Agra tamagrane mani'nena keaga refko huta vahera zamaza hugahaze. **7** Hagi menina atrenkeno Ra Anumzamofoma koroma hunenteno fatgo huno'ma refkoma hu avu'avamo tamagranena meno. Na'ankure Ra Anumzana tagri Anumzamo'a magomofontega anteno, magomofo azeri havizahu Anumza nera omani'ne. Hagi Agra vahe'mo'zama zamaza hinogu'ma masavema hu'za amisaza zana e'ori Anumza mani'ne. **8** Ana nehuno Jerusalemia Jehosafati'a mago'a Livae vahe'ene, pristi vahetamine, Israeli vahepima mago mago nagate'ma ugotama hu'ne'za keagama refkoma hanaza kva vahe zamazeri otige'za, ranra keagama Jerusalemi kumapima fore'ma hige'za keaga refko nehu'za, Ra Anumzamofo eri'zana eri'naze. **9** Hagi agra amanage huno kea zamasmi'ne, Ra Anumzamofonku koro hunteta agorga'a mani'neta, tamagu'areti huta eri'zana eriho. **10** Hagi tamagri vahe'ma rankumapima nemaniza naga'mo'zama, vahe ahefri ke'ma eri'za ege, mago'a kasegeo, trake'ma hantagi'nenaza keagama eme hanageta, zamavumro zmantenke'za Ra Anumzamofo avurera kumira osiho. Hagi ana'ma osnazana Anumzamofo rimpavezamo'a tamagrite'ene tamafuhe'int'e'ne egahie. Hagi kema antahitama ana'ma hanazana, nagatmimofo knazana tamagra e'origahaze. **11** Hagi antahihiho, ugagota pristi ne' Amaria'a maka zama Ra Anumzamofonte'ma hanaza zantera kegava hugahie. Hagi Ismaeli nemofo Zebadaia'a Juda vahe'mokizmi rankva mani'neno maka keagama kini netegama erita esazana refko hugahie. Hagi Livae naga'mo'za eri'za vaheka'arami mani'neza kagri

eri'zana erigahaze. Hagi hankavetita eri'zana e'nerinkeno, Ra Anumzamo'a fatgoma hu'za eri'zama erisaza naga'ene manigahie.

20 Hagi ana'ma hutegeno'a, Moapu vahe'ma, Amoni vahe'ma, mago'a Meuni vahe'ma hu'za Jehosafatina hara eme hunte'za hu'naze. 2 Hagi mago'a vahe'mo'za Jehosafatina amanage hu'za eme asami'naze, Tusi'a vahekrfamo'za ha' hugante'naku hagerimofo kantu kaziga Edomuti e'za Hazazon-tamari eman'i'naze hu'za eme asmi'naze. (Hazazon-tamaria mago agi'a Engedi'e). 3 Ananke'ma Jehosafati'a nentahino'a, tusi koro nehuno Ra Anumzamofo avesi'zankura nunamuna huno antahinegeno, mika Juda vahera ke hige'za ne'zana a'o hu'za Ra Anumzamofontega nunamu hu'naze. 4 Hagi mika Juda vahetmimo'za emeri atru hu'za Ra Anumzamo'ma zamaza hanigura antahige'haze. Mika Juda rankumapintira Ra Anumzamofontega nunamu hu'za antahige'naku eme atru hu'naze. 5 Hagi mika Juda vahe'ene Jerusalemi vahetmimofo zamavugane Ra Anumzamofo mono nomofo avuga kasefa kuma'ma tro'ma hunte'nazafi Jehosafati'a oti'neno, 6 amanage huno nunamuna hu'ne, Ra Anumzana Kagra tafahe'i Anumzamoka kagra monafi Anumzana mani'nane. Kagrake'za maka ama mopafi kumatmina kegava hu'nane. Kagri kazampinke maka hihamu hankavea me'neankino, mago vahe'mo'e huno hara hugageteoregahie. 7 Kagra Anumzantimoka, Israeli vaheka'a zamavufi ama mopafima ko'ma mani'naza vahera zmahenatitrenka, kanampaka'a Abrahamu agehemofa ama mopa zamogra mopa mevava hugahie hunka zami'nane. 8 Hagi zamagra ama ana mopafi mani'ne'za mono'ma hugantesaza mono nona kintete'za amanage hu'naze, 9 ha' eme hurante'hazo, hazenke'za

fore hanio, ruzahu ruzahu kri fore hanio, agatonto kna fore haniana
ama Kagri kagima erisgahu mono nomofo avuga otita Kagritega
krafagema hanunkenka, krafagetia antahiraminka knazanpintira
tagu'vazigahane hu'none. **10** Hagi tagehemofo Israeli vaheku'ma
hanke'za Isipitima ne-eza Moapu vahe'ma, Amoni vahe'ma'
Seiri agonafima nemaniza vahera ha'ma huozmante'za
zamagatere'za e'naza vahe'mo'za menina ha' hurantenaku
neaze. **11** Hagi e'i anahu avu'ava'ma huzmante'nonte, miza
neramiza erisantihareho hunkama tami'nana mopafintira eme
tahenatitre'za ama mopa eri'naku neazafi ko? **12** Hagi
Anumzantimoka nahaniigenka kagra refko hunka keaga ana
zantera hunezmanterka hazenkea ozamigahane? Na'ankure
tagra ama tusi vahekrfama neazana knarerla osu'nonankita,
hara huozmante'gahune. Hagi antahintahi timo'a savari
higeta, tazama hanankura kagri kavufinke keteta mani'none.
13 Anage'ma nehigeno'a, mika Juda venenemo'za ne'one
mofavrezmine, a'nezamine, mofavre'zmine Ra Anumzamofo
avuga oti'za mani'nazageno, **14** ana vahe amu'nompi Zekaraia
nemofo Jahzielinte Ra Anumzamofo Avamumo'a e'ne. Hagi
Zekaraia'a Benia nemofo'e, Benia'a Jeieli nemofo'e, Jeieli'a
Matania nemofo Livae nekino, Asapu ne' mofavreramimpinti
ne' mani'ne. **15** Hagi Jahziel'i'a amanage hu'ne, Mika Juda
vahe'ma, Jerusalemi kumapima nemaniza vahe'motane kini
ne' Jehosafetiganena antahilo, Ra Anumzamo'a amanage hie,
ha'ma huramante'naku'ma, tusi'a sondia vahekrfamo'zama
aza vahekura tamahirahikura huta korora osiho, na'ankure ama
hara tamagri hara omne'neanki, Anumzamofo ha' me'ne. **16**
Oki'na uramita hara ome huzmanteho. Zamagra Zizi krahopinti
marerigahazankita Jerueli hagege kokamofo zage hanati

kaziga ome zamagegahaze. **17** Tamagra ama ana hapina
hara osugahazanki, oti hankavetita retrohuta manineta Ra
Anumzamo'ma tamagritegama anteno tamagu'ma vaziniana
keho. Juda vahe'ene Jerusalemi vahe'mota korora nehuta
tamahirahikura osiho. Ra Anumzamo'a tamagrane manigahianki,
okina hara ome huzmanteho. **18** Anage'ma higeno'a, Jehosafati'a
mopafi renaregeno, Juda vahe'mo'zane, Jerusalemima nemaniza
vahe'mo'zanena Ra Anumzamofo avuga zamarena re'za kepri
hu'za Ra Anumzamofona monora hunte'naze. **19** Ana hazageno
Kohati nagapinti Livae vahe'mo'zane, Kora naga'mo'zanena
oti'za Ra Anumzana Israeli vahe'mofo Anumzana ranke hu'za
zagamera hu'za agi'a ahentesga hu'naze. **20** Hagi nanterame
oti'za hagege kokampi Tekoa vu'naze. Hagi anama nevazageno'a,
Jehosafati'a otino amanage hu'ne, Juda vahe'ene Jerusalemima
nemaniza vahe'enena kama antahiho, Ra Anumzana tamagri
Anumzamofonte tamentintia hinkeno tamagu vazino tamaza
nehina, Agri kasnampa vahetmimofo kere tamentinti nehuta,
knarera huta manigahaze. **21** Hagi zamavare atru huno
ana nanekema zmasamiteno'a, ruotge'ma hu'nea kukena
hu'neza vugote'za nevu'za zagamera hu'za Ra Anumzamofoma
agima ahentesgama hanaza vahetami zamazeri oti'ne. Hagi
anama hutege'za amanage hu'za ana zagamera hu'naze,
Ra Anumzamofona susu huntone, na'ankure avesirante'nea
zamo'a mevava huno vugahie. **22** Anagema hutege'za agafa
hu'za zagamera ranke hu'za nehzageno Amoni vahe'ma,
Moapu vahe'ma, Seiri agonafima nemaniza vahetaminena Ra
Anumzamo'a agafa huno zamazeri savri hige'za, hara zamagra
zamagra hu'za ohefri ahefria hu'naze. **23** Amoni vahe'ene
Moapu vahe'mo'zanena rukrahe hu'za, Seiri agonafi vahera hara

huzmante'za zamahe'naze. Hagi Seiri agonafi vahe'ma zamahe vagamarete'za, ete Moapu vahe'mo'zane Amoni vahe'mo'za oti'za zamagra zamagra ohefri ahefri hu'naze. **24** Hagi hagege kokamofoma uruha'ma nehaza agonare Juda vahe'mo'za emarerite'za, kegamanute'za hagege kokantegama kazana mago'mo'e huno atre'nora ofre'neanki ana maka vahetmimo'za fri'za uvase evase hu'nazage'za ke'naze. **25** Hagi kini ne' Jehosafati'ene vahe'amo'zanema ana vahetmimofo fenoma erinaku'ma e'za eme kazana, ana fri vahetmimofo fenoma, ne'zama, kukenama, zago'amo mareri zantaminena, tusi feno me'nege'za eri vagaregara osu'naze. Ana fenoma eri'nazana tusi'a fenonkino, 3'a zage knafi fenona hantage'naze. **26** Hagi namba 4kna zupa Beraka agupofi emeri tru hu'za muse nehu'za, Ra Anumzamofo agi'a ahentesga hu'naze. E'ina hu'negu ana agupomofo agia Berake (Berakaema hu'nena asomure hu'ne) hu'za hazageno meno eno menina ama knarera ehanati'ne. **27** Ana hutazageno Jehosafati'a vugota huzmanteg'e'za maka Juda vahetamine, Jerusalemima nemaniza vahe'mo'zanena Ra Anumzamo'ma ha' vahe'zmima ha'ma huzmagaterea zanku zagame nehu'za tusi muse hume Jerusalemi vu'naze. **28** Hagi Jerusalemi kumapima enefre'za, hapu zavenama, laerie nehaza zavenama nehe'za, ufenena nere'za Ra Anumzamofo nompina musenkase hu'za ufre'naze. **29** Hagi Ra Anumzamo'ma Israeli vahe'ma zamaza huno ha' vahezmima zamaheankema ruga'a kumatmimpi vahe'mo'zama nentahi'za, Anumzamofonkura tusi koro hu'naze. **30** E'ina higeno Jehosafeti'ma kinima mani'noma vu'nea knafina, agri Anumzamo'a ha'zana eri atrege'za maka kazigatira hara eme huozmantage'za fru hu'za mani'naze. **31** Hagi Jehosafati'a 35'a kafu hu'neno Juda vahe kinia efore

huno mani'neankino, 25'a kafufi Jerusalemi kumatera kinia mani'ne. Hagi nerera agia Azubakino, agra Silhi mofa mani'ne.

32 Hagi Jehosafati'a ko'ma nefo Asa'ma fatgo avu'ava'ma hu'neaza huno, Ra Anumzamofo avurera fatgo avu'ava hu'ne.

33 Hianagi havi anumzante'ma mono hunentaza kumatmina eri haviza osu'neanki'za, vahe'mo'za zmafahemofo Anumzantera zamagu'aretira hu'za amagera onte'naze. **34** Hagi Jehosafati'ma agafa huno kinima mani'neretima vuno vagamaretema vu'nea knafima tro'ma hu'nea zantmimofo agenkea, Hanani nemofo Jehu avontafepi krentegeno, Israeli kini vahetmimofo agenkema krentenazafi me'ne. **35** Hagi henka Juda kini ne' Jehosafati'a havi avu'avazama nehia Israeli kini ne' Ahasia'ene eri hagerafino mani'ne. **36** Hagi ana kini netremokea vente trohuke Tasisi vunaku mago zanarimpa huteke, ana venteramina Ezion-Geba kumate trohu'na'e. **37** Ana'ma nehakeno'a higeno'a Maresa kumateti ne' Dodavahu nemofo Eliezeri'a anage huno Jehosafatina kasnampa kea hunte'ne, Na'ankure kagra Ahasia'ene kea hagerafinankino, tro'ma hana venteramina Ra Anumzamo'a eri haviza hugahie. Higeno ana venteramimo'za haviza hazage'za, Tasisia ovu'naze.

21 Hagi Jehosafati'a frige'za Deviti rankumapi agehemokizmima asezmantehaza matipi ome asente'naze. Higeno nemofo ne' Jehoram agri nona erino kinia mani'ne. **2** Jehoram'a Jehosafati mofavregino, 6si'a afu aganahe'mokizmi zamagi'a, Azaria'ma, Jekiel'i'ma, Zekaraia'ma, Azariahu'ma, Maikoli'ma, Sefataia'e. Ama ana maka Juda vahe kini ne' Jehosafati ne' mofavrerami mani'naze. **3** Hagi nezmafa Jehosafati'a silvama, golima, zago'amo'ma marerisa zantamine, Juda mopafima hanave vihu keginama hugagi'naza rankumataminena refko huno mofavre'zaga'a zami vagare'ne. Hianagi Jehoramuna kini tra'a

amigeno kinia mani'ne. Na'ankure agra ese ne' mofavre'a mani'ne.

4 Hagi Jehoramu'ma kini trate'ma umani hankavenetino'a, maka aganahe'ine, mago'a Israeli kva vahetaminena bainati kazinteti zamahe fri vagare'ne. 5 Hagi Jehoramu'a, 32'a kafu hu'neno kinia efore hu'neankino, 8'a kafufi Jerusalemi kumatera kinia mani'ne. 6 Hagi Jehoramu'a Israeli kini vahe'mo'zama hu'naza zamavu'zmava nezmavaririno Ahapu naga'mo'zama hu'nazankna kumi Ra Anumzamofo avurera hu'ne. Na'ankure agra Ahapu mofa ara eri'neno, Ra Anumzamofo avurera kumi hu'ne. 7 Hianagi Ra Anumzamo'a Deviti nagara zamahe ofri'ne. Na'ankure Agra Deviti'ene huhagerafi huvempage huno kagripinti'ma fore hu anante anante'ma hu'zama vanaza vahe'mo'za tavikna hu'za kinia mani vava hugahaze huno hu'ne.

8 Hagi Jehoramu'ma kinima mani'nege'za Idomu vahe'mo'za Juda vahera hahunezmante'za atre'za vu'za zamagrazmi kini ome azeri oti'naze. 9 Ana'ma hazageno'a, Jehoramu'a sondia vahete kva vahetamine, karisifima vanoma nehu'za ha'ma hu sondia vahetaminena zamavareno Idomu vu'ne. Anama hige'za kenagera Idomu vahe'mo'zama agri'ene karisifima maniza ha'ma nehaza sondia vahe zmahenaku'ma eme avazagi kaginafinti hahu'za kenageke zamatre'za fre'naze. 10 E'ina higeno ananteti agafa hu'za Idomu vahe'mo'za Juda vahera hara renezmante'za, zamagra hankavere oti'naze. E'ina knafinke Libna Jehoramuna hara rente'za agri kvafintira atre'za vu'naze. Na'ankure Jehoramu'a Ra Anumzana zamagehe'i Anumzamofona atreno amefi humi'negu anara hu'ne. 11 Ana nehuno Jehoramu'a Juda mopafima me'nea agonaramimpi havi anumzama mono'ma hunte nontamina kinenteno, Jerusalemi kumate'ma nemaniza vahetmina hige'za havi anumzante monora

hunentazageno, agranena Juda vahera zamavare hazagrege'za
Ra Anumzamofona atre'za zamefi humi'naze. **12** Hagi kasnampa
ne' Elaija'a mago avona Jehoramuna amanage huno kremi'ne,
Ra Anumzana negafa Deviti Anumzamo'a amanage hie, negafa
Jehosafetima Juda vaher kini ne' Asa'ma hu'neaza hunka
kagra Ra Anumzamofona amagera ontananki, **13** Israeli kini
vahem'o'zama hu'nazaza hunka Juda vaher'ene Jerusalemi
kumapima nemaniza vahemokizmia antahintahi zaminke'za,
Ahabu nagamofo avu'avaza avaririza monko a'nemo'zama
nehazaza hu'za havi anumzantera monora hunentaze. Ana
nehunka kagri'ma kagatere'za soe'ma hu'naza kaganahel'inena
zamahe fri vagare'nane. **14** E'ina hu'nanku ko, vaheka'ane,
mofavre'raminka'ane, a'neka'ane, maka feno zanka'anena Ra
Anumzamo'a eri haviza hugahie. **15** Ana'ma hanigenka kagra
kefo kri erigahanankino, krimpamo'a kata negrinigeno uravemo'a
akoheno kasonepena krimpamo'a fragu vaziramina katagu
nehunka frigahane. **16** Hagi Filistia vaher'ene, Itiopia vaher
tva'onte'ma nemaniza Arapu vaher'enena Ra Anumzamo'a
zamarimpa zamazeri otige'za, Jehoramuna ha' rente'naze. **17**
Ana nehu'za Juda vahera ha' eme huzmante'za maka kini ne'mofo
nompima me'nea fenoramina e'neri'za, ne' mofavre'ramima'ane,
a'ne'anena zamavare hana nehu'za, amitenan'e'a (Jehoa'asi)
Ahazianke atre'naze. **18** Ana'ma huteno'a, Ra Anumzamo'a
Jehoramuna rimpafi krima ami'neana tusagino azeri onkanamre
kri ami'ne. **19** Hagi Jehoram'u a tare kafu anankrifina manigeno,
uravemo'a tagatiramigeno tusi atagu nehuno fri'ne. Hagi
afahe'zama nefrizage'za antahizamiza tevema hunegrazaza
hu'za, agrama frige'za naga'amo'za tevea huonkre'naze. **20**
Jehoram'u a 32'a kafu huteno, kini efore huno Jerusalemi

kumatera 8'a kafu kinia maniteno fri'neanagi, vahe'mo'za zavira
nete'za zamasunkura huonte'naze. Hagi anama hige'za kini
vahe'ma Deviti kumapima asemanezmantazafi aseote'nazanki,
rurega asente'naze.

22 Hanki Jerusalemi kumate'ma nemani'za vahe'mo'za
Jehoramuna amite'na mofavre'a Ahasiana kinia azeri otizageno,
nefa Jehoramu nona erino kinia mani'ne. Na'ankure Arabia
vahe'mo'za ha'ma eme huzmante'za maka Ahasi afuhe'ina
zamahe vagare'naze. E'ina higeno Jehoramu nemofo Ahasi'a
Juda vahe kini manino kegava huzmante'ne. 2 Hagi Ahasia'a
22tu'a kafu hu'neno kinia efore hu'neankino, magoke kafu
Jerusalemi kumatera kinia mani'ne. Hagi nerera agi'a Ataliakino
negeho'a Israeli kini ne' Omri'e. 3 Hagi Ahapu nagamo'ma hu'naza
avu'ava Ahasia'a avariri'ne. Na'ankure nerera'a antahintahi
amigeno kefo avu'ava hu'ne. 4 Ahasia'a Ahapu naga'mo'zama
hu'nazaza huno Ra Anumzamofo avufina kefo avu'ava hu'ne.
Na'ankure Ahasia'a nef'a'ma fritegeno'a Ahapu nagapinti
vahetmimo'za antahintahia ami'zageno havi avu'avara hu'ne.
5 Ahasia'a ana vahe'mokizmi ke antahino Israeli kini ne'
Ahapu nemofo Jehoramu avaririno Siria vahe kini ne' Hazaeli
ha' ome hunte'naku Ramot-Gileati kumate vigeno, ana hapi
Siria vahe'mo'za Joramuna ahe kuzafa antazageno, 6 ete
rukrahe huno eno namuma'ama teganinogura Jezrili kumate
emani'ne. Hagi Juda kini ne' Jehoramu nemofo Ahasia'a Ahapu
nemofo Joramuna kenaku Jezrili kumate urami'ne. Na'ankure
Joramuna hapinti ahe kuzafa antazageno umase'negeno'e. 7
Hianagi Anumzamo'a Ahasiana azeri haviza hunaku higeno,
Joramuna ome kenakura vu'ne. Na'ankure anante'ma nevuno'a
Jehoramu'ene vuno Ra Anumzamo'ma Ahapu nagama zamahe

hana hinogu'ma Nimsi nemofo Jehu'ma masavema frete'nea ne'
ome ke'naku vu'na'e. 8 Hagi Jehu'ma Ahapu naga'ma zamazeri
havizama nehireti'ma Juda kva vahetamine, Ahasia afuhe'ima
ome tutagija'ma hunezmanteno'a, ana maka zamahe fri'ne.
9 Ana nehuno Ahasianku nehakege'za, mago'a vahe'mo'za
Sameria kumateti Ahasia'a frakinege'za ome ke'za avre'za
Jehuna eme amizageno, ahe fri'ne. Ana hige'za Ahasiana
kerifi asente'naze. Na'ankure negeho Jehosafati'a agu'areti
huno Ra Anumzamofona amagera ante'ne. Ana hazageno
Ahasia nagapina hanavetino mani'neno Ahasia noma erino
kinima maniga vahera omani'ne. 10 Hagi Atalia'ama antahiam
nemofo Ahasia'ma fria nanekema nentahino'a, maka Juda
nagapinti'ma kinima maniga vahetamina zamahe hana hu'ne. 11
Hagi Ahasia nemofo Joasina ahenaku neageno, kini ne'mofo
mofa Jehosabeti'a ana mofavrea oku'a avreno nemasefinka ome
frakino ante'negeno mago a'mo kegava hu'ne. Hagi Jehosabeti'a
kini ne' Jehoram mofakino pristi ne' Jehoaida nenaro'e. Hagi
Jehosabeti'a Ahasiana nesarokino Atalia'ma Joasima ahe
fri'zanku avreno ome frakinte'negeno Atali'a ana mofavrea ahe
ofrine. 12 Hagi Atalia'ma Juda mopama kegavama hu'negeno'a,
6si'a kafufi Ra Anumzamofo mono nompi Joasina avre frakine'za
kegava hazageno mani'ne.

23 Hianagi pristi ne' Jehoiada'a korora osu 100'a sondia
vahete'ma kegavama nehaza sondia kva vahetamine kea
uhhagerafi'ne. Ana kva vahetmimofo zamagi'a, Jerohamu
nemofo Azaria'ma, Jehohanani nemofo Ismaeli'ma, Obeti nemofo
Azaria'ma, Adaia nemofo Maseia'ma, Zikri nemofo Elisafati'e. 2
Ana hute'za Livae vahetamine, mago mago Israeli naga nofimofo
kva vahetmina maka Juda mopafima me'nea rankumatmimpi

vano hu'za zamavare'za Jerusalemi kumate zamavare atru hu'naze. 3 Hagi maka atruma hu'naza vahe'mo'za Anumzamofo nompi vu'za kasefa kini ne'ene huhagerafi huvempa kea hu'naze. Hagi Jehoiada'a amanage hu'ne, kini ne'mofo Deviti mofavremo kinia manigahie huno Ra Anumzamo'a hu'ne. 4 Hagi tamagra amana hugahaze, 3'a kevu pristi vahe'ene Livae vahepintira, mago kevuma Sabatire'ma eri'zama eneriza kevumo'za mono nomofo kafanteria kegava hugahaze. 5 Hagi mago kevumo'za kini ne'mofo nonkumate kegava hanageno, mago kevumo'a mono nonkuma kafante kegava hugahaze. Hagi maka vahe'mo'za Ra Anumzamofo mono no kumapi manigahaze. 6 Hagi atrenkeno mago vahe'mo'a Ra Anumzamofo mono nompina marerino atiraminora osutfa hino. Pristi vahetamine ana nompima eri'zama eri'naza Livae vahe'mo'zage mareri'za atiramiza hugahaze. Na'ankure zamagra agru hu'naze. Hianagi maka vahetmina Ra Anumzamo'ma eri'zama zami'nere manitere hugahaze. 7 Hagi mago mago Livae vahemota tamazampina ha'zantmia erineta kini ne' Joasina manigaginteneta kegava huntegahaze. Hagi iza'oma mono nompima efresia vahera ahefriho. Ana nehuta inantegoma kini ne'mo'ma vanirega avaririta vano hiho. 8 Anage hige'za Livae vahe'ene maka Juda vahe'mo'zanena pristi ne' Jehoiada'ma zamasamia kante ante'za Sabati knazupa eri'zama e'neri'za vahetamine ete zamazama hunaku'ma aza vahetaminena, maka zamavarente'ne. Na'ankure pristi ne' Jehoiadama eri'zama refkoma huno koma zami'nea vahera huozmante zamatrege'za mani'naze. 9 Ana nehuno pristi ne' Jehoiada'a kini ne' Deviti'ma Anumzamofo mono nompima ante'nea karugru keveramine, ranra hankoramine, neone hankoraminena 100'a sondia vahete kva vahetamina erizmi'ne. 10 Ana huteno kini ne'mo'a kva vahera

zamazeri otige'za maka ha'ma huzantamina zamazampina erieri
hu'neza kre sramnavu itareti vuno, ana mono nomofo sauti
kaziga evuteno, noti kazigama evige'za oti'za manigaginte'naze.

11 Ana hute'za kini ne'mofo nemofona avre'za atineramiza kini
fetorira asenirera antaninente'za kasegema me'nea avontafera
ami'naze. Ana nehu'za kini nere hu'za huama nehazageno,
pristi ne' Johoiada'a olivi masavena anumpi taginte'no kinia
azeri oneti'za anage hu'naze, Kini ne'moka zazate kinia maninka
vugahane. **12** Hagi vahe'mo'zama zamagamare'za musema
hu'za kini ne' Joasima amrarama hu'za nevaza zamagasasama
Atalia'ma nentahino'a, Ra Anumzamofo mono nOMPI ana
vahetmima mani'nazafi ufre'ne. **13** Hagi ana nompima marerino
keana, ra zafama retrurente kafanteria kini vahe'ma oneti'zare
kini ne' Joasi'a oti'negeno ome ke'ne. Hagi sondia vahete
kva vahetamine, ufema neraza vahetaminena kini ne'mofo
asoparega kantigma otizageno maka vahe'mo'za ufena nere'za,
zavena nehe'za musena hu'za zagamera nehazageno ome
nezamageno, kukena'a tagato nehuno krafa huno amanage
hu'ne, tamagra nahenaku komoru hutma renavatga hu'naze.
14 Anagema higeno'a, anante Jehoiada'a 100'a sondia vahete
kva vahetmima zamazeri oti'nea vahera ke hige'za azageno
amanage huno huzmante'ne, Mono no tava'ontetira avretma
sondia vahetmimofo amunompi nevinkeno agri'ma avariri'zama
vanaza vahetmina maka zamahe friho. Na'ankure pristi ne'mo'a
huno Ra Anumzamofo mono nompina ahe ofriho hu'ne. **15**
Anage higeno Ataliana ome azerite'za kini ne'mofo kuma kafanku
Hosi afu kafane nehaza kafante avre'za ome ahe fri'naze. **16**
Ana huteno Jehoiada'a agrane, maka vahetami'mozane, kini ne'
Joasi'enema Ra Anumzamofo vahe'ma manisaza kea huvempa

huno huhagerafi'ne. 17 Ana'ma hutege'za maka vahe'mo'za vu'za
Bali havi anumzamofo mono nona ome taganavazi netre'za,
kre sramnavu itaramimofo, amema'araminena tapage tapagu
hunetre'za, ana kre sramnavu itaramimofo avuga, Bali havi
anumzamofo pristi ne' Matanina ahe fri'naze. 18 Ana huteno
Deviti'ma ko'ma mono nompi eri'zama refkoma hu'neaza huno
Jehoiada'a pristi vahetamine, Livae vahetaminena mono nompi
eri'zana refko huno zami'ne. Hagi ana vahe'mo'za Mosese
kasegemo'ma hu'nea kante ante'za Ra Anumzamofontega
kresramna nevu'za Deviti'ma e'ina hihoma hu'nea kante ante'za
zagamera nehu'za musena hu'naze. 19 Hagi zamagra'ama
zamazeri agru osu vahe'ma Ra Anumzamofo mono nompima
marerizanku'ma kafante'ma mani'ne'za kegava hu vahera
Jehoiada'a zamazeri ot'i'ne. 20 Ana nehuno Jehoiada'a sondia
vahete kva vahe'ma, gavana vahe'ma, vahete'ma kvama hu'naza
vahetmima, maka vahetmima huno kehige'za kini nera avre'za
Ra Anumzamofo mono nontegatira urami'naze. Hagi anaga
kaziga kafanteti umarer'i'za kini nera noma'afina ome antazageno
kini trate umani'ne. 21 Ana nehu'za ana maka vahe'mo'za tusi
muse nehu'za, zagamera hu'naze. Hagi Jerusalemi kumapina
mago zamo'a agasasa oru'ne, na'ankure Ataliana bainati kazinteti
ahazageno fri'ne.

24 Hagi Joasi'a 7ni'a kafu hu'neno Juda vahe kini efore
hu'neankino, 40'a kafufi Jerusalemi kumatera kinia mani'ne.
Hagi nerera agi'a Sibiakino agra Beseba kumateti a' mani'ne.
2 Hagi pristi ne' Jehoiada'ma mani'nea knafina, Joasi'a Ra
Anumzamofo avurera fatgo avu'avake hu'ne. 3 Hagi Jehoiada'a
tare atre Joasina avre amigeno, ne'mofara kasezmante'ne. 4
Hagi ana'ma hutegenoa, Joasi'a Ra Anumzamofo mono no

eri so'e huno kinaku agesa antahi'ne. 5 Ana nehuno pristi vahetamine Livae vahetaminena kehu atru huno amanage huno zamasami'ne, Maka Juda mopafima me'nea rankumatmimpi vuta Israeli vahepintira kafune kafunema Ra Anumzamofo mono noma eriso'e huta ki'nuna silva zagoa zogita egahaze. Hagi anagema huteno'a, ame huta viho huno huzmante'ne. Hianagi Livae vahe'mo'za kema hiazana hu'za ame hu'za ovu'naze. 6 E'inama hazageno'a kini ne'mo'a ugota pristi ne' Jehoiadana amanage huno antahige'ne, Nahigenka Livae vahetmina ame hunka huozmantanke'za Juda mopafinti'ene Jerusalemi kumapintira Ra Anumzamofo eri'za vahe Moses'e'ma hu'nea kantera ante'za takesi zagone, kasegema ante nomofo zagoa zogiza nomaze? 7 Na'ankure kefo avu'ava'ene a' Atalia mofavre'ramimo'za Anumzamofo mono nona tapage hu'za ufre'za, Ra Anumzamofo zanema hu'za eri ruotge'ma hunte'naza zantamina eri'za, Bali havi anumzamofonte mono hunte zantami ome ante'naze. 8 Anage nehuno kini ne' Joasi'a ke hige'za mago vogisi tro hu'za Ra Anumzamofo mono kuma kafante ante'naze. 9 Hagi Israeli vahetmima hagege kokampima mani'nazageno Anumzamofo eri'za ne' Moses'e'ma hige'zama takisima zogi'za eme ami'nazaza hu'za, Judane Jerusalema nemaniza vahetega takisi zagoa erita echo huno kea atregeno vuno eno hu'ne. 10 Higeno maka kva vahe'mo'zane, maka vahe'mo'zanena muse nehu'za ana vogisifina zagoa eri'za eme nentazageno avite'ne. 11 Hagi Livae vahe'mo'zama ana zago vogisima eri'za kini ne'mofo eri'za vahete'ene, zago'are'ma kegavama nehaza vahetema azage'za, ana vahe'mo'za ana zagoma ante vogisima kazama silva zagomo'ma avi'mateneg'e'za ana zagoa ruherafi nente'za, ete eri'za ana

kuma kafante ome antetere hu'naze. Maka kna ana huvava
nehu'za tusi silva zago zogi'naze. **12** Hagi kini ne' Joasi'ene
Jehoiadakea ana zagoa erike Ra Anumzamofo mono noma eri
so'ema hu' vahe zamazampi ante'na'e. Ana nehuke noma ki
vahetamine, zamazanteti'ma keonkezama tro hu vahe'ene, ainine
bronsinema kreno ke'onkezama trohu vahetaminena zagoa
mizasezmantazage'za Ra Anumzamofo mono nona eri so'e
hu'za ki'naze. **13** Hagi ana eri'za vahe'mo'za hanaveti'za eri'zana
e'nerizageno, eri'zamo'a ome vagarege'za ko'ma hu'hazaza
hu'za Anumzamofo mono nona eri hanavetiza eri so'e hu'za
ki'naze. **14** Hagi ana eri'zama eri vagamarete'za amnema
me'nea zago'a eri atru hu'za eri'za kini ne'ene, Jehoiadakizni
eme znamizageke, ana zagoa erike Ra Anumzamofo nompima
antesaza golire zantamima silvare zantamine tro hu'na'e. Hagi
Jehoiadama pristima mani'nea kna'afina, Ra Anumzamofo mono
nompina vahe'mo'za ofa eri'za eme kresramna vu vava hu'naze.
15 Hianagi Jehoiada'a 130'a kafu huteno ozafareno fri'ge'za, **16**
kini vahetmima asenezmantazafi Deviti rankumapi asente'naze.
Na'ankure agra Israeli vhete'ene, Anumzamofonte'ene mono
nompine agra nagate'enena knare avu'avaza hu'ne. **17** Hagi
Jehoiada'ma fritege'za Juda kumatamimpinti kva vahe'mo'za kini
ne' Joasinte eza eme kepri hu'za ra agi nemi'za antahintahia eme
amizageno, ana antahintahi zamia amage ante'ne. **18** Ana'ma
hige'za kini ne'mo'ene vahetamimo'za Ra Anumzana zamagehe'i
Anumzamofo mono nona atre'za, zafare'ma antre'za Asera havi
anumzamofo amema'ama tro'ma hunte'naza zante'ene, kaza
osu havi anumzantminte monora hunte'naze. E'ina hazageno
Juda vahe'ene Jerusalemi vhahera Anumzamo'a tusi arimpa
ahezmanente'ne. **19** Ra Anumzamo'a antahintahi zamima zamazeri

rukrahe hanige'za Agritega ehogu'ma, kasnampa vahetmina
huzmanteg'e'za kefo avu'ava zana atretma Anumzamofonte
eho hu'za ome zmasamizanagi, ana kezmia ontahi'naze. **20**
Ana hazageno Ra Anumzamofo Avamu'mo'a pristi ne' Jehoiada
nemofo Zekaraiente hanavetino egeno, ana vahetmimofo
zamavuga otino amanage huno zamasmi'nne, Anumzamo'a
amanage hie, Nahigeta Ra Anumzamofo kasegea amagera
nontazageno, maka zama hazazamo'a knarera nosie? Na'ankure
tamagra Ra Anumzamofona tamagena humizageno, Agranena
ana zanke huno amagena tamagrira hurami'nne. **21** Hianagi
ahe frinaku kea retro hutazageno, kini ne'mo'a ahe friho
hige'za Zekaraiana Ra Anumzamofo mono nonkumapi have
knonu ahe fri'naze. **22** Hagi Joasi'a Jehoiada'ma knare'zama
hunte'nea zankura agesa ontahi, nemofo Zekaraiana ke'a
omne vahera ahe fri'ne. Hagi havenknonu'ma Zekaraiana
ahazagenoma nefrino'a amanage hu'ne, Amama haza zana
Ra Anumzamo'a negeno, Agra'a nona huzmantesie. **23** Hagi
ana kafumo'ma vagamaneregeno kasefa kafuma agafama
nehigeno'a, Siria sondia vahe'mo'za Juda vahe'ene Jerusalemi
kumapima nemaniza vahe'enena ha'eme huzmante'za, maka
ranra kva vahetmina zamahe hana nehu'za, maka fenozmia
eri'za Damaskasi kini netega atrazageno vu'ne. **24** Juda
vahera rama'a sondia vahe manizageno, Siria sondia vahera
osi'a vahe' e'nazanagi, Ra Anumzamo'a Siria sondia vahe
zamazampi Juda sondia vahera zamavarentege'za hara
huzmagatere'naze. Na'ankure Juda vahe'mo'za Ra Anumzana
zamafahe'i Anumzamofo zamagena humi'naze. E'i ana agafare
Joasina hazenkea ami'naze. **25** Hagi ha'ma huvagamanere'za,
Joasina ahe kuzafa nente'za atre'za vu'naze. Ana'ma hazage'za

priсти ne' Jehoiada nemofo Zekaraiama ahe fri'nea zante eri'za
vahe'aramimo'za ke hugantugma hu'za tafe'are'ma masenere
ahe frite'za, Deviti rankumapi ome asente'nazanagi, kini vahe'ma
asezmane matipina aseonte'nazanki, rufi ome asente'naze. **26**
Hagi kema hugantugama huke Joasima ahe fri'na'a ne'trena,
Amoni a'mo Simeati kasente'nea ne' Zabadi'ene, Moapu a'mo
Simireti'ma kasente'nea ne' Jehozabatike ahe fri'na'e. **27** Hagi
kini vahetmimofo zamagenkema krente'naza avontafepi, Joasi
mofavrerami zamagenkene, kasnampa vahe'mo'zama agrikuma
kasnampa kema hu'naza nanekea krente'naze. Hagi anama
hutegen'o'a nemofo Amasia Joasi nona erino kinia mani'ne.

25 Amasia'a 25'a kafu hu'neno Juda vahe kinia efore huteno,
29ni'a kafufi Jerusalemi kumatera kinia mani'ne. Hagi nerera'a
Jerusalemi kumateti akino, agi'a Jehoadini'e. **2** Hagi Amasia'a Ra
Anumzamofo avurera knare avu'ava hu'neanagi, tamage huno
agu'aretira amagera onte'ne. **3** Hagi Amasia'ma kini trate'ma
umani hankavenetino'a, ko'ma ne'fama kinima maninege'za ahe
fri'naza eri'za vahetamina, zamahe fri vagare'ne. **4** Hianagi Ra
Anumzamo'ma Mosesema asamigeno kasege avontafepima
krente'nea kante anteno, ana eri'za vahe'mokizmi mofavreramina
ozamahe zamatre'ne. Hagi ana kasege avontafepina amanage
hu'ne, mofavre'amo'ma hania hazenkerera nefana ahe ofrige,
nefa'ma hu'nenia hazenkerera nemofona ahe ofriho. Hianagi iza'o
kumima hanimo'a, agra'a kumimofo knazana erino fritere hugahie
hu'ne. **5** Amasia'a Juda naga'ene Benzameni naga'enena
kehige'za, kafu'zimimo'ma 20'a kafuma agatere'nea vahetmina,
nagatenofite hu'za 300tauseni'a vahetami eri atru hu'naze.
Hagi ana 300tauseni'a vahetmina kasefa vahetminki'za, hanko
eri'za ha'ma huga vahetami zamavare atru hutegen'o, ana vahe

kevurera 100'a vahete kva vahe azeri onetino, 1 tauseni'a vahetema kegavahu kva vahe zamazeri otitere hu'ne. **6** Ana nehuno Amasia'a 100tauseni'a hanavenentake Israeli sondia vahetmina, kna'amo'a 3tauseni'a kilo hu'nea silva zagonuti azama hu'za ha'ma hanagura mizasege'za e'naze. **7** Hianagi Anumzamofo kasnampa ne'mo'a eno amanage huno Amasiana eme asami'ne, Kini ne'moka ama Israeli sondia vahe'ma e'naza vahera atrege'za hatera kavaririza oviho. Na'ankure Ra Anumzamo'a Israeli vahe'enena nomanino, nomanino, maka Efraemi vahe'enena omani'ne. **8** Kagra korora osu hankavetinka hara ome hugahananagi, Anumzamo'a katrehanigeno ha' vahekamo'za hara hugateregahaze. Na'ankure Anumzamo'a agrake vahera zamaza hige'za hara hu agatenerazageno, Agrake'za vahera zmatrege'za hapina evuneramize. **9** Higeno Amasia'a amanage huno Anumzamofo kasnampa nera asmi'ne, ana hu'neanagi 3tauseni'a kiloma hu'nea silva zagoma Israeli sondia vahe'ma mizama sezmantenoana inankna hugahie? Higeno Anumzamofo kasnampa ne'mo'a kenona hunteno amanage hu'ne, E'ima atre'nana zagoa Ra Anumzamo'a ru agatereno rama'a zago kamigahie. **10** Anage higeno Amasia'a Efraemiti'ma e'naza sondia vahetmina huzmanteg'e za nozmirega vu'naze. Ana higeno, Efraemi sondia vahe'mo'za Juda vahetaminkura tusi zamarimpa ahenezmante'za nozmirega vu'naze. **11** Hianagi Amasia'a korora osuno, sondia vahe'a zamavareno Hage Agupoe nehaza agupofi vuno 10tauseni'a Seiri sondia vahetmina ome zamahe fri'ne. **12** Ana nehu'za Juda sondia vahetmimo'za 10tauseni'a ha' vahetmina zamavuaga zamazerite'za e'za have zavateti eme zamaretufe atrazageno havere zamaheno ru tagnatagnu vazige'za fri'naze. **13** Ana'ma

nehazageno'a, Amasia'ma huzmanteg'e'zama ha'ma osu nontega
vaza sondia vahe'mo'za, Juda mopafima me'nea rankumatamina
Sameria kumati eri agafa huteno vuno Bet-Horoni kumate'ma
uhanati'nea kumatamimpi vahetamina, ha'eme huzmante'za
3tauseni'a vahe zamahe nefri'za, tusi'a fenozmi eri'za vu'naze. **14**
Hagi Amasiama Idomu vahe'ma ha'ma ome huzmanteno zamahe
fri vagamareteno ne-eno'a, Seiri vahe anumzana erino eazamo
agra'a anumza eri'neseno, kepri huno monora hunenteno,
ofa kremna vunte'ne. **15** Ana'ma higeno'a, Ra Anumzamo'a
Amasiana tusi arimpa ahenenteno, kasnampa ne'a huntogeno
amanage huno ome asami'ne, nagafare vahe'ama kagri
kazampinti'ma zamagu'ma ovazia havi anumzana nevaririnka,
monora hunentane? **16** Hianagi kasnampa ne'mo'a ana nanekea
huvaga ore'negeno, kini ne'mo'a amanage hu'ne, kagrira kini
vahe'ma antahintahizmi ne' kazeri oti'nazo? Kahesugenka
frigahananki kasnampa kea osunka taganenka vuo. Higeno
kasnampa ne'mo'a tagneana higeno anage hu'ne, Anumzamo'a
kahe frinaku nehige'na nagra antahi'nena nehue. Na'ankure
knare antahintahima kamuana ontahinka kagra amazana nehane.
17 Ana hutogeno, Amasia'a antahintahima nemiza Juda kva
vahetmina kehu tru huno keaga retro huteno, keagama erino
vuno eno'ma hu vahera huntogeno Israeli kini ne' Jehoahasi
nemofo Jehu negeho Joasintega vu'neana, hapi oge agea
hanu'e huno kea atrente'ne. **18** Anankema nentahino'a Israeli
kini ne' Joasi'a amanage huno fronka kea Juda kini nera
asami'ne, Lebanoni zafafinti ave'ave trazamo'a Lebanoni zafafi
sida zafagura huno, nemamofona mofaka'a amigeno a' erinteno
hu'ne. Hianagi Lebanoni zafafinti afi'zagamo eno ana ave'ave
trazana eme reprigeno haviza hu'ne. **19** Hagi Amasiaga hunka

Idomu vahe hara huzmagateroe hunka kavufga ra hane. Hianagi kagra omenka, nonka'are manio. Hagi kagrama hazenkema eri fore'ma hanunka, kagrane Juda vahe'enena frigahaze. **20** Hianagi Anumzamo'a zamavareno ha' vahe'mokizmi zamazampi ome ante'naku Amasiana antahintahi'a erigigeno anankea ontahi'ne. Na'ankure zamagra Idomu vahe anumzama monora hunente'za amage'ante'nazagu anara hu'ne. **21** E'ina higeno Israeli kini ne' Jehoasi'a marerino Juda vahe mopafi Bet-Semesi kumate, Juda kini ne' Amasia'ene ome tutagiha hu'na'e. **22** Hagi Israeli vahe'mo'za Juda vahera hara huzmagaterazage'za, koro fre'za kumazmirega vu'za e'za hu'haze. **23** Hagi Israeli kini ne' Jehoasi'a, Juda kini ne' Joasi nemofo Ahazia negeho Amasiana Betsemesi kumateti azeriteno, avreno Jerusalemi kumate vu'ne. Ana huteno Jehoasi'a Jerusalemi kuma vihua Efraemi kafanteti eri agafa huno, tapage huno vuno Konae nehaza kafante ome atre'neankino, 180'a mita tapage hu'ne. **24** Hagi Jehoasi'a maka goline silvane maka zantamima Anumzamofo mono nompima Obed-edomu'ma kegavama hu'neana e'nerino, kini ne'mofo nompintira maka fenone zagonena e'nerino, vahe'enena kina huzmanteno zamavareno Sameria vu'ne. **25** Hagi Israeli kini ne' Jehoahasi nemofo Joasi'ma fritegeno'a, Juda kini ne' Joasi nemofo Amasia'a 15ni'a kafu mani'ne. **26** Hagi mikazama Amasia'ma kinima mani'neno hu'nea zantamina, esetetima vuno atumpare'ma vu'neana mika Juda vahe kinine Israeli vahe kini vahetmimofo zmagenkema krenentea avontafepi krente'ne. **27** Hagi Amasia'ma Ra Anumzamofoma amagena humigeno, mago'a vahe'mo'za Jerusalemi kumapi oku'a kea retro hute'za ahe'za hazage'za, freno Lakisi kumate vige'za, anantega avaririza ome azeri'za ahe fri'naze. **28** Hagi avufga'a

hosí afutamimofo agumpi erinte'za eri'za vu'za, Deviti rankumapi
Jerusalemima agehe'mokizmima asente'naza matipi Juda vahe
mopafi eme asente'naze.

26 Hagi maka Juda vahe'mo'za Usia'a 16ni'a kafu hu'nege'za
kinia azeri otizageno, nafa'amofo Amasia no erino kinia mani'ne.
2 Hagi nefá Amasia'ma agehe'mo'zama hu'nazaza huno'ma
fritegeno'a, Usia'a Eloti kumara eri so'e higeno Juda vahe
kuma me'ne. 3 Hagi Usia'a 16ni'a kafu hu'neno kinia efore
hu'neankino 52'a kafu Jerusalemi kumatera kinia mani'ne. Hagi
nerera'a Jerusalemi kumateti akino, agi'a Jekolia'e. 4 Hagi
agra nefá Amasia'ma hu'neaza huno Ra Anumzamofo avurera
fatgo avu'ava hu'ne. 5 Hagi Zekaraia'ma mani'nea knafina
Usia'a Anumzamofona knare huno amagera ante'ne. Na'ankure
Zekaraia'a Anumzamofoma koro'ma hunteno, agoraga'ama mani
avu'avara rempi humi'ne. Hagi kini ne'mo'ma Ra Anumzamofoma
kazigazi huno'ma amage'ma nentegeno'a, Ra Anumzamo aza
higeno maka zama hiazamo'a knare'zanke hu'he. 6 Hagi Usia'a
vuno Filistia vahe'ene hara ome nehuno Gati kumate have
keginama, Jabne kumate have keginama, Astodi kumate have
keginanena taganavazino zamahe'ne. Ana huteno agra ran
kumatami Astodi kumapina negino, Filistia vahe kumapinena ana
zanke hu'ne. 7 Hagi Anumzamo'a aza higeno Filistia vahe'ene,
Arapu vahe'ma, Gur-Ba'ali kumapima nemaniza vahera hara
hunezmanteno, Meuni vahe'enena hara huzmante'ne. 8 Hagi
Amoni vahe'mo'za takisi zagoa eri'za Usiana eme nemizageno,
agenke'amo'a Isipi mopa atumparega vuno eno hu'ne. Na'ankure
agra tusi hihamu'ane kini efore huno mani'ne. 9 Hagi Usia'a
Jerusalemi kumapina Kona kafane nehaza kafante'ene Agupo
Kafane nehaza kafante'enema mani'neza vaheku'ma kegavama

hu za'za nontamina kinte'ne. **10** Hagi Usia'a ka'ma kokampima manine'za kuma'ma kegavama hu nontmina negino, tinkeriramina kafintetere hu'ne. Na'ankure agra Sefela kokampine, agupofinena tusi'a bulimakao afu kevu ante'negu anara hu'ne. Ana nehuno tusi eri'za vahetami zamavarege'za hozafine, waini hozafinena eri'zana eri'naze. Na'ankure agra hozama ante'zanku avesi avesi nehia ne' mani'ne. **11** Hagi Usia'a himamutino ha'ma huga sondia vahe'tmina, refko huno kevure kevure zmanteg'e'za hate vunaku retro hu'za mani'naze. Hagi sondia vahe'ma refko huno kevure kevure'ma zmante'neana, kini ne'mo'ma huntegeno'ma sondia vahete'ma kegavama hu'nea ne' Hanania'a huznantegeke Jeieli'ene Maseiake vugota huke ana eri'zana eri'na'e. **12** Hagi koro osu hankavenentake sondia vahetmima mago mago naganofipima ugotama huterema hu'naza vahe'ma mani'nazana 2tausen 600'a vahe mani'naze. **13** Hagi ana sondia vahe'mo'zama kegavama hu'nazana 307tausen 500'a sondia vahem Hankavematino ha'ma huno, kini ne'mofoma azama huga sondia vahetamina mani'naze. **14** Hagi ana sondia vahe'mo'zama ha'ma ome hanaza ha' zantamina, Usia'a mika sondia vahe'amofo hankoma, kevema, ainire kankri'ma, amimizare'ma antani hankoma, atima, kumi atifima anteno ahe havenena mika retro huzmante'ne. **15** Hagi Jerusalemi kumapina Usia'a higeno antahi'zama eri'naza zaza nonte'ma mani'neza kevene ranra haveraminema erirusi hu'za ahetre masinirami tro hu'naze. Ana hazageno, kini ne'mofo agimo'a mareri'ne. Na'ankure Ra Anumzamo'a knare huno aza higeno tusi'a hihamu'ane kini ne' before hu'ne. **16** Hianagi Usia'ma tusi'a hanavenentake kinima before'ma nehuno'a, agra avufga ra huno agra zante azeri haviza hu'ne. Na'ankure agra Ra Anumzana agra'a Anumzamofona

ovaririno, osuga avu'ava huno Ra Anumzamofo mono nompi
mnanentake zama kremla vu itarera ome kre mna vunaku
ufre'ne. **17** Hianagi Anumzamofo pristi ne' Asaria'a, 80'a koro
osu hankave pristi vahetami zamavarege'za amefira avaririza
ana mono nompina ufre'naze. **18** Hagi ana pristi vahe'mo'za Usia
avuga vu'za amanage ome hu'naze, Usiaga mnanentake zama
Ra Anumzamofontegama kre mnama vu eri'zana kagri eri'zana
omne'ne. Hagi pristi vahetmima Aronimpinti'ma fore'ma hu'naza
vahe'mo'zage ama eri'zana erigahaze huno zamazeri ruotge
hu'ne. Hagi kumi hananki mono nompintira atrenka atiramio.
Na'ankure Ra Anumzamo'a, ama ana zama hana zankura antahi
onkamigahie. **19** Anagema hazageno'a, Usia'a kre mna vu
zana azampi eri'neno kre mna vu'za nehireti tusi arimpagu
hu'ne. Hagi Usia'ma ana pristi vahetaminku tusi rimpama
nehegeno, Ra Anumzamofo nompi kre mnauv itama me'nere
ana pristi vahetmimofo zamavuga ame huno fugo namuna
kokovipi fore hu'ne. **20** Hagi ugagota pristi ne' Asaria'ene,
mago'a pristi vahe'mo'zama kazama fugo namuma kokovitema
fore'ma hige'za, ame hu'za avre'za mono nompintira atirami'naze.
Ana'ma hazageno'a, agranena ame huno atirami'ne. Na'ankure
Ra Anumzamo'a ana kireti hazenke amino azeri haviza hunaku,
atregeno avufgarera efore hu'ne. **21** E'ina higeno Usia'a ana
fugonkrine mani'neno ufri'ne. Hagi ana krifima mani'neno'a,
agraku ru nompi mani'ne. Na'ankure Ra Anumzamofo nompintira
ahe megi atre'naze. Hagi nemofo Jotamu avrentageno kini
ne'mofo kuma'ene maka vahetaminena kegava hu'ne. **22** Hagi
Usia'ma kinima mani'neno hu'nea zantamina, Kasnampa ne'
Amosi nemofo Aisaia ana mika nanekea avontafepina krente'ne.
23 Hagi Usia'ma frige'za, agra fugo kri eri'ne hu'za nehu'za,

agehemokizmima asenezamantazafi matipima kini vahetmima
asenezmantazafi asente'naze. Anama hutazageno'a, nemofo
Jotamu agri nona erino kinia mani'ne.

27 Hagi Jotamu'a 25'a kafu hu'neno Juda vahe kinia efore huno
mani'neno, 16ni'a kafufi Jerusalemi kumatera kinia mani'ne. Hagi
nerera'a Zadoki mofakino agi'a Jerusa'e. 2 Hagi Jotamu'a, ko'ma
nefa Usia'ma hu'neaza huno Ra Anumzamofo avurera fatgo
avu'ava hu'neanagi, Ra Anumzamofo mono nompina uofre'ne.
Hianagi vea kevumo'za kumi avu'avara hu vava hu'za vu'haze. 3
Hagi mono nomofo kuma kafanku'ma Anagamu Kaziga Kafane
hu'zama nehaza kafana Jotamu'a eri so'e nehuno, Ofeli agona
kazigama me'nea kuma vihua rama'a eri'za ete erino eri so'e
hu'ne. 4 Hagi Juda agona kokampina rama'a rankumatmi negino,
zafama me'nea Juda agonaramimpina mani'ne'za ha' vaheku'ma
kesaza zaza nontamine, bihuraminena trohundetere hu'ne. 5
Hagi Jotamu'a kinima mani'nea knafina Amoni vahera ha' ome
huzmanteno hara huzmagatere'ne. Hagi e'ina'ma higeno'a,
Amoni vahe'mo'za 3'a kafufi Jotamuna takisima ami'nazana,
kna'amo'a 4 tani (3,400 kilo) hu'nea silva zagogi, 480 tani hu'nea
witigi, 480 tani (1,820 kilo lita) hu'nea baligi hu'za mago mago
kafurera eri'za eme amitere hu'haze. 6 E'ina hazageno, Jotamu'a
hankvenentake kini efore hu'ne. Na'ankure agra maka zama
hifina Ra Anumzana Anumzama'amofona amagera antefatgo
hu'ne. 7 Hagi Jotamu'ma kinima mani'neno hu'nea zantmimofo
agenkene, ha'ma hu'nea zamofo agenke'anena Israeli kini
vahetamine Juda kini vahe'tmimofo zmagenkema krenentaza
avontafepi krente'naze. 8 Hagi Jotamu'a 25'a kafu hu'neno, kinia
efore huno 16ni'a kafu Jerusalemi kumatera kinia mani'ne. 9 Ana

huteno Jotamu'ma frige'za, Deviti rankumapi ome asentazageno,
nemofo Ahasi agri nona erino kinia mani'ne.

28 Hagi Ahasi'a 20'a kafu hu'neno, Juda vahe kinia efore huno
Jerusalem kumatera 16ni'a kafufi kinia mani'ne. Hagi agra negeho
Deviti'ma fatgo avu'ava'ma hu'neaza huno Ra Anumzamofo
avurera fatgo avu'avara osu'ne. 2 Hianagi agra ko'ma Israeli kini
vahe'mo'zama hu'naza zamavu'zamava nezmavaririno, Bali havi
anumzante'ma mono'ma hunte'naza zana ainireti kremramra
huno amema'a tro hunte'ne. 3 Hagi ana mopafima mani'naza
vahe'ma Ra Anumzamo'ma zamahekaspetreno Israeli vahe'ma
mopazmima erizmi'nea vahetmimofo kefo hi'mnage avu'ava huno
Ahasi'a Hinomu agupofi ofa nehuno, ne' mofavre naga'anena
zamaheno tevefi Kresramana vu'ne. 4 Hagi Ahasi'a havi
anumzama mono'ma hunentaza agona kumatmimpine, zafa
agafafine, havi anumzamofonera ofa nehuno, mnanentake zana
kremna vu'ne. 5 E'ina higeno Ra Anumza agri Anumzamo'a Siria
kini ne'mofo azampi Ahasina avrentegeno hara hu agatereno,
rama'a vahekrerfa kina huzmanteno zamavareno Damaskasi
kumate ome nezmantegeno, ana zanke huno Ra Anumzamo'a
Israeli kini ne'mofo azampi Ahasina avrentegeno hara hunteno,
rama'a sondia vahe'a hazenkea zami'ne. 6 Hagi Israeli kini ne'
Remalia nemofo Peka'a magoke knafina, 120tauseni'a koro
osu hankavenentake Juda sondia vahetmina zamahe fri'ne.
Na'ankure zamagra Ra Anumzana zamagehe'i Anumzamofona
zamefi humi'nazagu anara hu'ne. 7 Hagi kini ne'mofona mofavre'a
Maseiama, kini ne'mofo kuma'ma kegavama hu'nea sondia ne'
Azrika'ma, kini ne'mofoma eme amefi'ma hu'neno'ma vahe'ma
kegavama nehia ne' Elkananena, maka magoke kna zupage
Efraemi kumateti harafa sondia ne' Zikri'a zamahe vagare'ne. 8

Hagi Israeli sondia vahe'mo'za Juda vahera zamafuhe'i a'nene, ne' mofavreramine, mofo'nezminena 200tauseni'a zamavare'za, ha'pinti'ma eri'za zantamina tusi zantamine eri'za Sameria rankumate vu'naze. **9** Hianagi Ra Anumzamofo kasnampa ne' Odeti'a ana Israeli sondia vahetmima hateti'ma Sameria kumate'ma neaza vahetmina amanage huno ome zamasami'ne, Keho, Ra Anumzana tamagehe'i Anumzamo'a Juda vahekura tusi arimpa ahenezmanteno, zamavare tamazampina antegeta zamaheta hara huzmagateraze. Hianagi tamasunkura osu kefo'za huta zamahazageno ana zamo'a Anumzamofo avure vigeno keno antahino hu'ne. **10** Ana huteta menina Juda kumate'ma nemaniza vene'nene a'nanene Jerusalemi kumate vene'nene a'nanena kazokzo vahe zamazeri tro hunaku tamagesa nentahize. Hianagi tamagra'enena Ra Anumzana tamagri Anumzamofo avurera kumi hu'naze. **11** Hagi menia ke'n'i'a antahita kinama huzmanteta zamavaretama aza tamafu tamagnana ete huzmantenke'za viho. Na'ankure menina Ra Anumzamo'a e'inahu tamavutamavama hazza zankura tusi arimpa aheramante'ne. **12** Anankema nehigeno'a, Efraemi kva vahetmima, Jehonani nemofo Asaria'ma, Mesilemoti nemofo Berekia'ma, Salumu nemofo Jehizkaia'ma, Hadlai nemofo Amasa'ma hu'za kasnampa ne'mofo kerera mago zamarimpa hute'za ot'i'za, **13** ana sondia vahetminkura amanage hu'naze, tamagra kinama huzmanteta zmavreta aza vahetmina zamavareta amarera omegahaze. Na'ankure Ra Anumzamofo avurera kumitimo'a ko marerino ra hu'neanki, mago'ene erinte agofetu huta kumira nehazageno, Israeli vahe'mota Ra Anumzamo'a tusi arimpa ahenerante. **14** Anage hazage'za ana sondia vahe'mo'za kinama huzmante'za zamavare'za aza vahetmina, ana kva vahetmimofo zamavugane, vahe'mokizmi

zamavuga eme nezmatre'za, hapinti'ma eri'za aza zantaminena maka eme ante'naze. **15** Hagi sondia vahe'mo'za ha'pinti'ma eri'za e'naza kukenaramine, zamaga nonena ana kva vahetmimo'za e'za emeri'za zamavufaga zamavapama zamavare'za e'naza kina vahetmina zamizage'za kukena nehzageno, nezane tinena zamizage'za nenazage'za zamavufagama tga hunerera masavena frezmante'naze. Ana hute'za kama vuga'ma osaza vahetmina, donki agumpi zamavarenente'za amne vahe'enena zamavare'za zamafuhe'zama mani'narega tofenke kumapi Jeriko kumate ome zamatrete'za, ete Sameria kumate e'naze.

16 Hagi ana knafina kini ne' Ahasi'a Asiria kini netega eme aza hinogu kea atre'ne. **17** Hagi Edomu vahe'mo'za ete mago'ane Juda vahera hara eme huzmante'za hara huzmagatere'za kina huzmante'za zamavare'za vu'naze. **18** Hagi Filistia vahe'mo'za Juda agonaramimofo agafine, Negevi kazigama me'nea kumatmina arohu eme zamare'za, Bet-semesi kumapi vahetamine, Ajalon kumapi vahetamine, Gederoti kumapi vahetamine, Soko kumapima nemaniza vahetamine, tavaonte'ma megagi'nea kumatmimpi vahetamine, Timna kuma'ma, tavaonte'ma megagi'nea kumatmimpi vahetamine, Gimzo kuma'ma, tavaonte'ma megagi'nea kumapi vahetamine maka ha eme huzmante'za zamahe'za hanare'za, ana kumatmimpi mani'naze. **19** Kini ne' Ahasi'ma hia avu'avaku huno Ra Anumzamo'a Juda vahera zamazeri anterami'ne. Na'ankure agra hige'za Juda vahe'mo'za kefo kumi avu'avara nehu'za, Ra Anumzamofona zamagu'aretira huza amagera onte'za zamefi humi'naze. **20** E'ina hu'negu Asiria kini ne' Tiglat-Pilesa'a eme aza hugaragi hara eme hunte'ne. **21** Ahasi'a agra nompinti'ene, eri'za vahe'aramimofo nompinti'ene, Ra Anumzamofo mono

nompintira zago'amo'ma marerinea zantamina erino Asiria
kini nera takisia eme ami'neanagi, ana zama hia zamo'a aza
osu'ne. **22** Hagi Ahas'i'ma ana hazenke knafima mani'neno'a,
Anumzamofona antahinomino mago'ane kefo avu'avara nehuno,
Ra Anumzamofontera mani fatgo osu'ne. **23** Hagi Ahas'i'a
huno, Damaskasi kini vahetmima zamazama hige'za ha'ma
hunagatere'naza havi anumzantaminte ofa kresramana vanuge'za
nagrira naza hugahaze, nehuno ana havi anumzante ofa
kresramana vu'ne. Hianagi agra zante hazenkea avreno egeno,
mika Israeli vahe'mo'zanena hazenkefi ufre'naze. **24** Hagi Ahas'i'a
Anumzamofo mono nompinti kavo zuomparamina erino emeri
atru huteno, takoraku hunetreno Ra Anumzamofo mono no
kafana ahe ankaninereno, Jerusalemi kumapina maka kaziga
havi anumzante'ma Kresramana vu ita tro hu'ne. **25** Hagi Juda
mopafima me'nea ranra kumatamimpina havi anumzantaminte'ma
ofama hanaza kumatami'ma troma huntetere'ma hiazamo higeno,
Ra Anumzana agehe'i Anumzamo'a tusi arimpa ahente'ne. **26**
Hagi Ahas'i'ma kinima agafa huno mani'nereti'ma vuno ome
vagare'nea knafima maka zama hu'nea zamofo agenkea, mika
Juda kini vahe'ene, Israeli kini vahetmimofo zamagenkema
krenentaza avontafepi krente'naze. **27** Hagi Ahas'i'a frige'za
Jerusalemi rankumapi asente'naze. Na'ankure avufga'a eri'za
kini vahe'tmimofo matipina ome ase onte'naze. Hagi anama
hutegen'o'a, nemofo Hezekai'a agri nona erino kinia mani'ne.

29 Hagi Hezekaia 25'a kafu hu'neno Juda vahe kini efore huno
29ni'a kafufi Jerusalemi kumatera kinia mani'ne. Hagi nerera'a
Zekaraia mofakino agi'a Abija'e. **2** Hagi agra Ra Anumzamofo
avurera negeho Deviti'ma hu'neaza huno fatgo avu'ava hu'ne. **3**
Hagi Hezekaima kinima agafa huno nemanino'a ese kafumofo ese

ikantera Ra Anumzamofo mono nonkafantamima ahenkanima
re'nazana anagino eri hagro nehuno eri so'e hu'ne. 4 Hagi
pristi vahe'ene Livae vahe'enena mono kumamofona zage
hanati kaziga kehige'za eme atru hazageno, 5 amanage
huno zamasmi'ne, Nagrama hanua kea Livae nagamota kama
antahiho, menina tamagra'a tamazeri agru nehuta, Ra Anumzana
tamagehe'i Anumzamofo mono nona azeri agru nehuta, ana
mono nompima agru osu zantmima me'neana eri atreho. 6 Hagi
tagehe'za Ra Anumzana tagri Anumzamofona netreza, amagera
onte kefo avu'ava hu'naze. Zamagra Ra Anumzamofone, Agrama
nemania mono noma'anena zamagena humi'naze. 7 Hagi ra
mono nonkafana eriginente'za, zotare'ma tavima nereana husu
hunente'za, mnanentake zane kre fananehu ofanena Israeli
vahe Anumzamofo mono nompina kresramana ovu'naze. 8
E'ina hazageno Juda vahe'ene Jerusalemi kumate vahe'enena
Ra Anumzamo'a tusi arimpa ahenezmanteno, zamazeri haviza
hige'za vahe'mo'za nege'za kizazokago kema huzamante'naza
zana tamagra tamavufintira ke'naze. 9 E'ina agafare tafahe'ina
bainati kazintetira zamahe nefri'za, ne mofavrette, mofanette,
a'netinena kina huzmante'za zamavare'za vu'naze. 10 Hagi nagra
menina nagu'areti hu'na Ra Anumzana Israeli vahe Anumzane eri
hagerafi huvempage huankino tusi rimpama ahenerantea zamo'a
rurava hegahie. 11 E'ina hu'negu namoheta erizantmia otreho,
na'ankure Ra Anumzamo'a agri avugama eri'zama enerita ofama
hanaza eri'za vahera ko tamagri huhampri tamante'ne. 12
Anagema hige'za ot'i'za ana eri'zama eri'naza Livae vahera,
Kohati nagapinti Amasai nemofo Mahati'ma, Azaraia nemofo
Joeli'e. Hagi Merari nagapintira, Abdi nemofo Kisi'ma, Jehaleleli
nemofo Azaraia'e. Hagi Gesoni nagapintira, Zima nemofo

Joa'ma, Joa nemofo Edeni'e. **13** Hagi Elisafani ne' mofavrerarena Simri'ene Jeuelike. Hagi Asapu ne' mofavrerarena Zekaraia'ene Matanaiake. **14** Hagi Hemani nagapintira, Jahiel'iene Simeike. Hagi Jedutuni nagapintira Semaia'ene Uzielike. **15** Hagi ana Livae vahe'mo'za zamafuhe'ina zamagna kehu atru hu'za zamazeri agru hute'za, kini ne'mo'ma Ra Anumzamofo kasegema avaririno zamasmia kante ante'za mono nona eri agru hu'naze. **16** Hagi ana pristi vahe'mo'za Ra Anumzamofo mono nompi mareri'za maka pehenama hu'nea zantamina kaza zantamina eri fegi'a mono kumapi atre'naze. Ana hutazage'za anantetira Livae vahe'mo'za eri'za Kidroni Agupofi vu'naze. **17** Hagi ana vahetmimo'za ese ikamofona ese knazupa eri'zana agafa hu'za eri'za nevazageno 8ti knazupa Ra Anumzamofo mono nompima ufre kafanterea ehanati'naze. Hagi mago 8'a knafi mono noma eri agruhu eri'zana eri'za vu'za ese ikamofona 16ni knazupa ana eri'zana eri vagare'naze. **18** Ana hute'za vu'za Kini ne' Hezekaiana amanage hu'za ome asmi'naze, Hago tagra ana maka Ra Anumzamofo mono nona eri agruhu vagareteta, kresra mnama vu itane maka anante'ma eri'zama e'neriza zantamine, ruotge bretima ante itane, anante'ma eri'zama eri zantaminena maka eri agru huvagare'none. **19** Hagi kini ne' Ahasi'ma Ra Anumzamofoma amefi'ma hunemino mono noma'ama eri'negino, maka eri'za zantmima ana nompinti'ma eritrerema hu'nea zantamina eritru huta eri ante fatgo nehuta eri agru huteta Ra Anumzamofonte'ma kre sramnavu itamofo avuga antonkeno me'ne. **20** Anagema hazageno'a, Hezekaia'a anante knazupa nanterame otino rankumapi eri'za vahe'aramina kehige'za atru hazageno, Ra Anumzamofo mono nontega zamavareno mareri'ne. **21** Ana'ma higeno'a ana vahe'mo'za 7ni'a bulimakaonki,

7ni'a ve sipisipi afutminki, 7ni'a ve sipisipi afu anentatminki,
7ni'a meme afutminki hu'za, kini ne'mo'ma kegavama hu'nea
mopare'ene, mono nonte'ene, Juda vahete'enema kumi ofama
hu'zana avre'za vu'naze. Ana hazageno kini ne' Hezeikaia'a
Aronimpinti'ma fore'ma hu'naza pristi vahekura huno, Ra
Anumzamofo kresramana vu itare afutamina aheta kresramana
vihō hu'ne. **22** Hige'za pristi vahe'mo'za ana bulimakao afutamina
ahe'za korama'a tagi'za kresramana vu itare rutritri hunte'naze.
Ana nehu'za ve sipisipi afutamina ahe'za korama'a tagi'za
kresramana vu itare rutritri hunte'naze. Hagi anantera sipisipi
afu anentatmina ahe'za korama'a tagi'za kresramana vu itare
rutritri hunte'naze. **23** Ana hute'za kumite'ma ofama hu meme
afutamina kini ne'mofo avugane maka vahetmimofo zmavugane
zamavare'za azage'za, kini ne'ene maka vahe'mo'zanena
zamazana ana meme afutami agofetu ante'naze. **24** Ana
hutazageno, ana pristi vahe'mo'za ana meme afutamina aheza
korama'a tagiza maka Israeli vahe'mofo kumi nona huza
Kresramana vu itare rutritri hu'naze. Na'ankure kini ne'mo'a
huno, Maka Israeli vahete kre fanane hu ofane, kumite ofanena
hiho huno huzmante'ne. **25** Ana nehuno kini ne' Hezeikaia'a Livae
nagara zamazeri otitere hige'za Ra Anumzamofo mono nompi
nase'nasepane, hapu zavenane, lairiema nehaza zavenane eri'za
otihoma hire otitere hu'naze. Na'ankure e'i ana'ma hu'nazana
Devitine, Anumzamofo kasnampa ne' Gatine, kasnampa ne'
Neteninema Ra Anumzamo'ma zamasamige'za hu'naza kante
anteno zamazeri otitere hu'ne. **26** Hagi ko'ma Deviti'ma ruzahu
ruzahu zavenaramima tro'ma hunte'neana Livae vahe'mo'za
eri'neza retrotra hu'za otitere hu'naze. Hagi pristi vahe'mo'zanena
ufena eri'za otitere hu'naze. **27** Ana hutazageno Hezeikaia'a

Kresramana vu itare Kresramana viho hige'za, tegefima kre fananehu ofama nehzageno'a, Ra Anumzamofo agima erisgama hu zagamera agafa nehzageno, ufenazera, Israeli vahe kini ne' Deviti'ma tro'ma hu'nea zavenaramima eri'naza vahetmimo'zanena ana zavenaramina nehe'za zagamera hu'naze. **28** Ana'ma nehzageno'a maka vahe'mo'za Ra Anumzamofona monora hunentazageno, zagame'ma nehaza vahe'mo'za zagamera nehzageno, ufe'na neraza vahe'mo'za ufenazera. Hagi e'na hu'za zagamera nehu'za monora nehzageno kre fanane hu' ofama kre'naza ofamo'a tefanane hu'ne. **29** Hagi ana ofamo'ma tefananema hutege'za, kini ne' Hezekaia'ene mika anampima mani'naza zamare'na re'za Ra Anumzamofona monora hunte'naze. **30** Hagi kini ne' Hezekaia'ene vugota eri'za vahe'amo'zanena Livae vahe'tmina zamasmi'za, Devitine kasnampa ne' Asapukizni nehuta, Ra Anumzamofo agia erisga hiho hu'za zamasmi'naze. Anage hazage'za musezampinti nehu'za kepri hu'za Ra Anumzamofona monora hunte'naze. **31** Ana hutazageno, Hezekaia'a anante huama huno, Menina Ra Anumzamofonte tamagra'a tamazeri ruotge hazanki, Kresramana vu ofane, Ra Anumzamofoma susu hunte ofenena erita Ra Anumzamofo nompi echo. Anage hige'za ana vahetmimo'za kre fanane hu' ofama susu'ma hunte ofenena eriza neazageno, izano agu'amo'ma musema himo'a agra avesite musema huno'ma hu ofa erino etere hu'ne. **32** Anama hazage'za Ra Anumzamofontegama tegefima kre fanane hu' ofa hu'zama vahe'mo'zama eri'za e'nazana, 70'a ve bulimakao afutmink, 100'a ve sipisipiafutmink, 200'a sipisipi anentatamink, hu'za avre'za e'naze. **33** Hagi ana nehu'za erinte ruotge'ma hu'naza ofama eri'zama e'nazana, 600'a

bulimakao afutminki, 3tauseni'a sipisipi afutami avre'za e'naze.

34 Hianagi ana mika afutmima aheno kararuvasi pristi vahera rama'a omani'naze. E'ina hu'negu zamafuhe'za Livae naga'mo'za zamaza hu'za ana eri'zana enerizage'za rama'a pristi vahe'mo'za zamagra'a zamazeri agru hute'za eri'za zimirera e'za eme zamaza hu'za ana eri'zana eri vagare'naze. Na'ankure Livae vahe'mo'za ana eri'zama eri'nazana zamagu'areti hu'za pristi vahera zamagatere'za zamagra'a zamazeri agrua hu'naze. **35** Hagi rama'a kre fanane hu ofama hazafina, arimpa fruhu ofama haza bulimakao afumofo afova'ane, waini ti ofanena hu'naze. E'ina hazageno Ra Anumzamofo mono nompima mono'ma hu'zana agafa hu'ne. **36** Hagi Anumzamo'ma zamaza hige'za ame hu'za maka zama huvagama raza zankura Hezekaia'ene mika vahe'mo'zanena tusi muse hu'naze.

30 Ra Anumzamofo nonte Jerusalemi e'za, Ra Anumzana Israeli vahe' Anumzamo'ma Ozmahe Zamagatere'nea zanku eme antahimiza musenkase hihogu, maka Israeli vahetegane, Juda vahetegama kema erino vuno enoma hu vahera Hezekaia'a huzmanteg'e'za nevazageno, ana zanke huno Efraemi nagategane Manase nagateganena avona kretregeno vu'ne. **2** Hagi kini ne'ene, eri'za vahe'aramine, maka Jerusalemi kumapima nemiza vahe'mo'zanena, namba 2 ikante eme atru hu'za ne'zana kre'za nene'za Anumzamo'ma Ozmahe Zamagatere'nea zanku'ma antahiminaku antahintahia retroma haza zamo'a knare hu'ne. **3** Ana kna fatgorera ne'zana kre'za nene'za musena osu'naze. Na'ankure ana knarera rama'a pristi vahe'mo'za zamazeri agrua osazageno, Jerusalemi kumapina vahera eme atrua osu'naze. **4** Hagi Ozmahe Zamagatere'nea zanku'ma antahimiza ne'zama kre'za nene'za antahimi antahintahima

retro'ma hazazamo'a, kini ne'mofo avure'ene maka vahetmimofo
zamavurera fatgo hu'ne. 5 Ana hige'za mika Israeli mopafima
sauti kaziga Besebat'i'ma marerino noti kaziga Dani moparegama
mani'naza vahetmintega kea atre'za, maka vahera Jerusalemi
kumapi eme atru huta Ra Anumzana Israeli vahet Anumzamo'ma
Ozmahe Zmagatere'nea zanku'ma antahimiza kre'za nenaza
ne'za kreta neneta antahimihio hu'za hu'naze. Na'ankure
kasegefima krente'nea kante ante'za ana maka vahem'o'za ana
kna kegava hu'za ovariri'nazanki, osi'a vahem'o'za kegava hu'za
avariri'naze. 6 E'ina hu'negu kini ne'mo'a maka Israeli vahetegane,
Juda vaheteganena amanage huno avona kreteno zamige'za
avoma erino vuno eno'ma hu vahem'o'za eri'za vu'naze. Maka
Israeli vahemota ete rukrahe huta Ra Anumzana Abrahamune,
Aisakine, Israeli vahet Anumzamofonte enkeno, osi'a nagama Siria
kini ne'mo'ma tamavararigetama fre'naza nagara Ra Anumzamo'a
rukrahe huno eno tamagrane emanigahie. 7 Hagi kote'ma
tamagehe'zane tamafuhe'zanema Ra Anumzana tamagehe'i
Anumzamofoma zamefi'ma humiza azeri arimpama hazageno,
zamahe frigetama ke'nazazana osiho. 8 Tamagehe'zama hu'naza
zana huta Anumzamofo kegura tamagu'a azeri hankave otita,
Ra Anumzamofo agoraga nemanita, eri ruotge'ma hu'nea mono
noma'afi eta Ra Anumzana tamagri Anumzamofo monora
eme huntenkeno arimpama aheneramantea zamo'a ome amne
hino. 9 Na'ankure Ra Anumzana tamagri Anumzamo'a rimpa
fru huno asunku Anumzankino tamagrama ete rukrahe'ma
huta Agritegama esageno'a avresra huramanteno amagena
huoramigahie. 10 Higeno ana avona, avoma erino vuno eno hu
vahem'o'za eri'za kumate kumate Efraemi mopafine, Manase
mopafine, Zebuluni mopafi vahetmina zamiza vu'nazzanagi,

ana kegura hunte'za kiza zokago ke hu'naze. **11** Hianagi Asa nagapinti'ene Manase nagapinti'ene Zebuluni nagapinti'enena osi'a naga'mo'za anankema nentahi'za zmavufga anteramiza, Jerusalemi kumatera e'naze. **12** Ana'ma nehazageno'a, Anumzamo'a Juda naga'mofonte azana anteno zamagua eri mago hige'za Ra Anumzamo'ma kini ne'ene eri'za vahe'araminemama zamasamige'za ome zamasmiza zana amage ante'za ana zana hu'naze. **13** Hagi namba 2 ikantera tusi'a vahe'mo'za Zo-ore Breti kre'za nene'za musenkase hu'naku Jerusalemi kumatera eme atru hu'naze. **14** Hagi mika havi anumzante'ma Kresramana vu itaramine, mika mnanentake'za kre mnama vu itaramima Jerusalemi kumapima me'neana eri'za vu'za Kidroni agupofi ome atre'naze. **15** Hagi namba 2 ikamofo 14ni zupa Ozmahe Zamagatere'nea zanku'ma antahimi'za, sipisipi anentatamina ahe'naze. Ana'ma hazage'za pristi vahe'mo'za zamagazegu nehu'za zamagra'a zamazeri ruotge hute'za, kresramanama vu ofa eri'za Ra Anumzamofo nompi vu'naze. **16** Hagi Anumzamofo eri'za vahe Moses kasegefima me'nea kante ante'za, pristi vahetamine Livae vahe'mo'za eri'za kankamuzmire otitere hu'ne'za, Livae vahe'mo'za korana eri'za pristi vahe'ma eme zamizage'za eri'za kre sramnavu itarera ru tritri hu'naze. **17** Na'ankure ana vahe kevufina zamazeri agruma osu vahetmina rama'a mani'naze. E'ina hu'negu Livae vahe'mo'za Ozmahe Zmagatere'nea zanku'ma antahimiza nehaza sipisipi anentatamina mago mago vahe'mofo amente amente ahe'za zamazeri agru hu'naze. Na'ankure ana maka vahe'mo'za agrua osu'nazankiza Ra Anumzamofontera sipisipi afu anentamina ohe'naze. **18** Hagi Efraemi nagapinti'ene, Manase nagapinti'ene Isaka nagapinti'ene Zebuluni nagapinti'enema e'naza vahera, kini

ne' Hezekai'a nunamuna huzmantetege'za, kasegea amagera ante'za zamagra'a zamazeri agru osu'nazanagi, Ozamahe Zmagatere'nea zanku'ma antahimi'za nenaza ne'zana amne ne'naze. Na'ankure Hezekaia'a amanage huno nunamuna hu'ne, Knare Ra Anumzamoka magoke magoke vahe'mofo kumira apasezmanto. **19** Hagi mono nomofo kasegema amage antezamo azeri agru osugahianagi, iza'o, Anumzamofonte'ma agu'ama anteno Ra Anumzana agehe'i Anumzamofoma amagema antesia vahera kumi'a apasento. **20** Anage higeno Ra Anumzamo'a Hezekaia nunamuna antahimino vahetmina zamazeri knare nehuno, kumizmia atrezmante'ne. **21** Hagi Israeli vahetmima Jerusalemi kumate'ma atruma hu'naza vahe'mo'za 7ni'a knafi Zore Bretima nenaza knaguma antahimi ne'zana kre'za nene'za, musena nehazageno Livae vahe'ene, pristi vahe'mo'za maka kna zavenaramina nehe'za zagamera hu'za Ra Anumzamofona maka hanavezmireti hu'za agi'a erisga hu'naze. **22** Hezekai'a knare antahintahima ante'za Ra Anumzamofo eri'zama eri'za Livae vahetmina zamazeri hankavetike zamasami'ne. Anagema hutege'za Israeli vahe'mo'za 7ni'a knama huhampri'naza knafi ne'zana kre'za nene'za zamarimpa fru ofa nehu'za, Ra Anumzana zamagehe'i Anumzamofona susu hunte'naze. **23** Ana hute'za maka vahe'mo'za mago zamarimpa hu'za mago'ene 7ni'a zagegna erinte'za, Ozmahe Zmagatere'nea zankura ne'zana kre'za nene'za antahimi'naze. E'ina hige'za 7ni'a zagegnafi ne'zana kre'za nene'za musenkase hu'naze. **24** Hagi kini ne' Hezekai'a Juda vahetmina, ofama hu'zana 1tauseni'a bulimakao afutminki, 7tauseni'a sipisipi afutminki huno zamigeno, kini ne'mofo eri'zama e'neriza kva vahe'mo'za 1tauseni'a bulimakao afutminki, 10 tauseni'a sipisipi afutminki hu'za zami'naze. Hagi

rama'a pristi vahe'mo'za zamagra'a zamazeri agrua Anumzamofo avurera hu'naze. **25** Hagi maka Juda vahe'mo'zane, maka vahetmima Israeli mopafinti'ma e'naza vahe'mo'zane, pristi vahe'mo'zane, Livae vahe'mo'zane, maka ruregati'ma Juda mopafima enemaniza vahe'mo'zanena musenkase hu'naze. **26** E'ina higeno Jerusalemi kumapina vahe'mo'za tusi muse hu'naze. Na'ankure Israeli kini ne' Deviti nemofo Solomoni knareti'ma eno ana knare'ma ehanati'neana, e'inahu'zana Jerusalemi kumapina fore osu'nea knaza fore hu'ne. **27** Hagi anante pristi vahe'mo'zane Livae vahe'mo'zanena oti'za ana vahetmina asomu ke humzantageno, Anumzamo'a nunamu zamia antahi'ne. Na'ankure nunamu zamimo'a monafinka Ra Anumzamo'ma nemania ruotge kumapi mareri'ne.

31 Hagi ana maka musenkase'zamo'ma vagamaregeno'a, Israeli vahe'ma anampima mani'naza vahe'mo'za atirami'za Juda rankumatamimpi vu'za havi anumzante'ma mono'ma hunentaza zafaramine, Asera havi anumzamofo amema'ama zafare'ma antre'za tro hunte'neza mono'ma hunentaza zafaraminena maka Juda mopafine, Benzameni mopafine, Efraemi mopafine, Manase mopafima, havi anumzama mono'ma hunentaza itane, agonafima havi anumzantema mono'ma hunentaza kumatmima me'neana ana maka taganavazi atre'naze. Ana hute'za maka Israeli vahe'mo'za ete nozmima me'nea rankuma zamirega vu'naze. **2** Hagi pristi vahe'mo'zane Livae vahe'mo'zama Ra Anumzamofo mono nonkumapima ufre kafaraminte'ma eri'zama eri'nagura, Hesekai'a refko huno Kresramanama vu eri'zane, arimpa fru ofama hu eri'zane, kafante'ma manine'za susu hu'za zagame'ma hu eri'zana kevure kevure zamitere hu'ne. **3** Hagi kinagane nanterane, maka mani fru hu Sabati knare'ene, kasefa ikante'ene,

Ra Anumzamofo kasegefima huno ne'zama kreta neneta muse
hugahazema hu'nea knare'enema Kresramanama vu zana kini
ne' Hesekai'a agra'a afu keginafintira zami'ne. 4 Hagi kini ne'mo'a
Jerusalemi kumapima nemaniza vahetminkura huno, pristi
vahe'ene Livae vahe'enena, ana ne'zana zamigahazema hu'nea
kante anteta ne'zana eme zaminke'za nene'za, Ra Anumzamofo
kasegefima hu'neaza hu'za zamagu'areti hu'za eri'zana eriho. 5
Hagi Hesekaia'ma hia nanekema Israeli vahe'mo'zama nentahi'za
ese ne'zama hozafima nenama hu'nea ne'zana tusi ne'za eri'za
e'naze. 6 Hagi Israeli vahetamine Juda vahetamimo'zama
Juda rankumatamimpima nemaniza vahe'mo'za bulimakao
afuzmine, sipisipi afuzmine hampriza nevazageno, 10nima
hia bulimakao afutamine sipisipi afutaminena avre'za e'naze.
Ana nehu'za Ra Anumzana zamagri Anumzamofonte'ma eri
ruotgema hu'nea zantamina hampriza nevazageno 10nima hia
zantamina eri'za eme kevure kevure antazageno agonagna
huno hihi huno mareri'ne. 7 Hagi namba 3 ikante agafa
hu'za ana ne'zana eri atru hu'za nevazageno, 7ni ikante
ome vagare'naze. 8 Ana'ma nehazageno Hesekai'ene vugota
kva vahe'mo'zanema eme kazama ana neza kevuramimo'ma
agonagna'ma huno mareri'nege'za, Ra Anumzamofona agia
erisga nehu'za, asomu kea Israeli vahetmina huzmante'naze. 9
Ana huteno Hesekai'a pristi vahetamine Livae vahetaminena
ana ne'za kevuraminkura zamagenoka huno, Igati ama ne'za
kevuramina eri atru hu'naze? 10 Higeno Zadoku nagapinti
ugagota pristi ne' Azaraia'a kenona huzmanteno ne'zama eri'za
e'naza knareti'ma eno amare'ma ehanati'neana, nezantimo'a
hakare higeta nenonkeno rama'a ne'zamo'a amne aviteno me'ne.
Na'ankure Ra Anumzamo'a tusi'a zampi Agra'a vahetmina

asomura huzmante huno hu'ne. **11** Hagi Hesekai'a kave'ma ante nontamina, Ra Anumzamofo nompi retro hiho hige'za, zamagra retro hunte'naze. **12** Ana hige'za vahe'mo'za kentahiza ne'zana hamprizageno 10nima hia ne'za kevuramine, eri ruotgema hu'naza ofaraminen a eri'za ana nompi eme ante'naze. Hagi ana maka zantmintera Livae nagapinti ne' Konani vugota huno kva mani'neno kegava higeno, nefu Semei agri amefi'a kva mani'ne. **13** Hagi kini ne' Hesekai'ene Anumzamofo mono nonte kva ne' Azariake'ma huzmante'naza kante ante'za Konanine nefu, Simeinema zanaza hu'zama ana nompima eri'zama eri'naza vahetmina, Jehiel'i'ma, Azazia'ma, Nahati'ma, Asaheli'ma, Jerimoti'ma, Jozabati'ma, Elieli'ma, Ismakia'ma, Mahati'ma, Benaia'e. **14** Hagi Livae ne' Imna nemofo Kore'a, zage hanati kaziga kuma kafante kva hu'neno vahe'mo'zama zamagra'a zamavesite'ma Anumzamofonte'ma eri'za aza ofane, Ra Anumzamofoma eme ami'za zantamine, eri ruotge hu'neza eri'za aza ofanena kegava hu'neno refko huno pristi vahe'ene Livae vahera zami'ne. **15** Hagi Edeni'ma, Miniamini'ma, Jesua'ma, Semaia'ma, Amaraia'ma, Sekeniaki hu'za Korena aza hu'za ana ofaramima eri'zama azana pristi vahe'ma nemaniza ran kumatamimpima nemaniza zamafuhe'ina, ra vahetetima vuno mofavrere'ma vu'neana, ana ne'zantamina refko hu'za zamente zmente zomitere hu'naze. **16** Ra Anumzamofo nompima eri'zama zamige'za eri'zama eneri'za vahera ana zantamina refko hu'za maka 3'a kafuma hu'nea ne' mofavreramintetima mareri anagamuma atre'nea venenema zamajima avontafepima krente'nea vahetmina ana ne'zana refko hu'za zomitere hu'naze. **17** Hagi pristi vahetmimofo zamajima kre'nazana, nagate nagate negre'za 20'a kafuma agatere'naza Livae vahetmimofo zamagia

eri'zama zamiterema hu'nere zamagi'a krentetere hu'ne. **18**
Hagi ana kva vahe'mo'za ne'one mofavrezmine, a'nezmine,
ne' mofavrezmine, mofa'nezminena zamagima krentaza
avontafepina maka zamagia krente'naze. Na'ankure zamagra'a
hankavetiza Anumzamofo avurera zamazeri agru hu'naze. **19**
Hagi pristi vahetmima Aroni agehem'o'zama ranra kumatamimofo
hozafu hu mopama megagi'nea mopafima nemaniza vahe'mo'za,
mago'a vahetami huhampri zamante'nege'za ne'zazmia eri'za
ome zami'naze. Hagi ana ne'zana pristi nagapine, Livae
nagapinema maka venenema zamagima avontafepima me'nea
naga'mo'zage eri'naze. **20** E'inahu huno maka Juda mopafina
Hezekaia'a agu'areti huno Ra Anumzana Anumzama'amofo
avurera knare huno fatgo avu'ava hu'ne. **21** Hagi Hesekai'a
agu'areti huno Anumzamofo mono nomofo eri'zana enerino,
kasegea kegava nehuno, Anumzamofona avaririne. E'na higeno
maka zama hia zamo'a knare'zanke hu'ne.

32 Hagi Hesekia'ma agu'areti'ma huno Ra Anumzamofo kema
antahino maka eri'zama eri vagama neregeno'a, Asiria kini ne'
Senakeripi'a Juda vahera hara eme huzmanteno, hanavenentake
vihu kegina me'nea kumatamina zamaheno hanareno kegava
huzmanteku hu'ne. **2** Hagi Hesekai'ma keama Senakeripi'ma
Jerusalemi rankuma'ma ankanireno ha'ma huzmantenaku'ma
egeno'a, **3** megiasi'ma Jerusalemi rankumapima enefrea tima
rurega humitre antahintahi retro higeno, koroma osu hanave
sondia vahe'amozone, ugota eri'za vahe'amo'za aza hu'za
megiamma me'nea tine, tinkeria renkanire'naze. **4** Ana'ma
nehazageno'a, tusi'a vahe'mo'za eme atru hu'za osi tintamine,
ranra tintaminema maka anama'afima me'neana rurega ome
humitre eme humi atre nehu'za amanage hu'naze, Asiria kini

vahe'mo'za rama'a tina me'nenige'za eme nesagi renkaniresune.

5 Ana nehuno Hesekai'a Jerusalemi rankuma keginamo'ma havizama hu'neama'a eri so'e nehuno, kuma'ma kegavama hu zaza nona ana agofetu negino, ana have keginamofo amefira mago have kegina nehuno, Deviti kumapima mopamo'ma uraminerega tukeheno mopa kateno ante aviteno evu'ne. Ana nehuno ha'ma hu'zantamine, hankoraminena rama'a tro hu'ne.

6 Hagi sondia vahete kva vahera Jerusalemi rankumamofo kafante atruma nehazafi Hesekai'a zamazeri atru huno zamazeri hankaveti naneke amanage huno zamasami'ne, **7** korora osuta hankavetita otiho. Asiria kini ne'ene rama'a sondia vahe'araminkura korora huta tamahirahikura osiho. Na'ankure tagri kazigama mani'nea ne'mofo hankavemo'a, agri kazigama mani'naza vahe'mofo hankavea razampi agatere'ne. **8** Asiria kini ne'mofo kazigama mani'naza sondia vahera amne vahetfanke mani'naze. Hianagi Ra Anumzana tagri Anumzamo tagri kaziga mani'neankino, taza huno ha' vahetia hara huzmantegahie. Hagi Juda kini ne' Hesekai'ma hiankema sondia vahe'mo'zama nentahi'za hankave eri'naze. **9** Hagi mago'a kna evutegeno, Asiria kini ne' Senakeripi'a sondia vahe'ane vuno Lakisi kumate vahe'ene hara ome nehuno, Juda kini ne' Hesekaiantegane maka Juda vahetmima Jerusalemi kumapima nemaniza vahetmintega amanage huno kea atrezmante'ne, **10** Nagra Asiria kini ne' Senakeripi'na amanage hu'na tamantahigoe, tamagra nazante tamenarentinti hu'neta, Jerusalemi kumama avazagi kaginoana, ontahegahie huta mani'nazo? **11** Tamagri kini ne' Hesekaia'a huno, Ra Anumzana tagri Anumzamo'a Asiria kini ne' azampintira tamaguvazigahie huno nerasmie. Hianagi reramavatga nehiankita, nezanku'ene tinku'enena frigahaze. **12** Hagi Hesekai'a

agonafima mono'ma nehaza kumatamina eri haviza nehuno,
kresramanama nevaza itaramina taganavazi netreno, Juda
vahe'motane Jerusalemi vahe'mota magoke Kresramana vu
itareke ofa eme Kresramana nevuta, monora hihonu'ne. **13** Hagi
mago'a kumate vahetaminte'ma ko'ma nagehe'mo'zama hu'naza
zane, nagrama menima nehua zana tamagra ontahi'nazo?
Hagi ana vahetmina anumzazmimo'za zamaza hu'za nagri
hanavefintira zamagura vazi'nazafi? **14** Hagi magore huno ana
havi anumzamo'za nagri nazampintira zamagura ovazi'naze. Hagi
inankna huno nagri nazampintira, tamagri Anumzamo'a tamagura
vazigahie? **15** E'ina hu'negu atrenkeno Hesekaia'a amanara
huno reramavatga osino. Hagi agri kerera tamentintia osiho,
na'ankure magore huno mago kumate vahera anumzazmimo'a
nagri nazampinti'ene, nafahe'mokizmi zamazampintira zamagura
ovazi'ne. E'ina hu'neankino tamagri Anumzamo'a nagri
nazampintira tamagura ovazigahie. **16** Anagema nehige'za,
Senakeripi eri'za vahe'mo'za Ra Anumzamofone eri'za
ne'a Hesekainena ke ha'rezanante'naze. **17** Ana nehuno
Senakeripi'a mago'a avonkreno Ra Anumzana Israeli vahe
Anumzamofona kiza zokago kea amanage huno hu havizana
huno hufenkamitre'ne, Mago'a kumate vahe anumzamo'za
zamazama osu'nazaza huno, Hesekaia Anumzamo'a nagri
nazampintira tamagura ovazigahie. **18** Anagema huteno'a,
Jerusalemi rankumamofo have kegina agofetuma mani'naza
vahe'tmima Senakeripi eri'za vahe'mo'za zamazeri koro hu'za,
ana rankuma'ma zamahe'za hanarenakura, Hibru vahe kefinti
ranke hu'za kezati'zami'naze. **19** Ana vahe'mo'za mago'a
kumate vahe'mo'zama zamazanteti'ma tro'ma hu'naza havi
anumzantaminku'ma hu'nazankna ke Jerusalemi kumate

nemaniza vahe'mo'zama mono'ma hunentaza Anumzamofonkura hu'naze. **20** Hagi anankema nentahikea, kini ne' Hezekai'a ene kasnampa ne' Emosi nemofo Aisaia'enena zanazama hanigura Ra Anumzamofontega nunamuna hu'na'e. **21** Ana'ma hakeno'a, Ra Anumzamo'a mago ankero huntogeno, maka sondia vahetamine, sondia vahete ugagota kva vahetmina Asiria kini nemofo seli nonkumapintira zamahe hana hu'ne. Ana higeno Sinakeripi'a agazegu nehuno atreno mopa'arega vuno havi anumzama'amofo nompima unefregeno'a, mago'a ne' mofavre naga'amo'za bainati kazinteti eme ahe fri'naze. **22** Ana higeno Asiria kini ne' Senakerepi azampinti'ene, mago'a ha' vahetmimofo zamazampintira Hesekaiane, Jerusalemi kumapima nemaniza vahetmina Ra Anumzamo'a zamagu nevazino, maka'zama hazazampina kegava huzmantenge'za fru hu'za mani'naze. **23** Ana higeno rama'a vahe'mo'za Ra Anumzamofontega musezana eri'za Jerusalemi kumatera ne-eza, zago'amo marerisa muse zana Juda kini ne' Hesekaiana eri'za eme ami'naze. Ana'ma hutege'za mika kumate vahe'mo'za Hesekaiana ra agi amiza husga hunte'naze. **24** Hagi ana knafina Hesekaia'a kri erino fri'za hu'ne. Hagi ana'ma nehuno'a, Hesekaia'a Ra Anumzamofontega nunamu higeno, kri'amo'ma vagamarenogura Ra Anumzamo'a mago avame'za eri averi hu'ne. **25** Hianagi Hesekai'a avufga ra nehuno, Ra Anumzamo'ma knare'ma hunteno azama hia zankura, musena huonte'ne. E'ina higeno Ra Anumzamo'a agri'ene Juda vahetminku'ene, Jerusalemi kumate'ma nemaniza vahetminkura tusi arimpa ahezmante'ne. **26** Ana hu'neanagi Hesekaia'ene Jerusalemi kumate'ma nemaniza vahe'mo'zanena zamagu'a anteramiza manizageno, Hesekaia'ma kinima mani'nea kna'afina Ra Anumzamo'a arimpa ahe ozmante'ne. **27** Hesekaia'a tusi

zagofeno ne' mani'nege'za vahe'mo'za husga hunte'naze. Hagi Hesekaia'a silvama, golima zago'amo'ma marerisa haveramima, mnanentake zama, hankoramima, mago'a zago'amo marerisa zantaminema antesia nona ki'ne. **28** Hagi hozafi ne'zantamina, witima, wainima, olivi masavema, antenia nona negino, bulimakao afutamine, sipisipi afutaminema ante'nia keginane nontaminena tro huntetere hu'ne. **29** Ana nehuno rankumatmi tro huno sipisipi afutamine, bulimakao afutaminena zamante'ne. Na'ankure Ra Anumzamo'a Hesekaina tusi afu kevune, zagofenone amigeno tusi zagofeno ne' mani'negu anara hu'ne. **30** Hagi Hesekai'a Kihoni tina mopa agu'a avreno Deviti rankumamofona zage fre kaziga e'ne. Hagi Hesekai'a maka zama hia zamo'a knare zanke hu'ne. **31** Hagi Babiloni kumate kva vahe'mo'zama antahizama Anumzamo'ma Juda kumate'ma kaguvazama hiankema nentahiza, mago'a vahe humzantazage'za ana kaguvazanku Hesekaia eme antahige'za kenaku e'naze. Hagi Anumzamo'a Hesekaiana agu'a reheno kenaku agrira atreneno ke'ne. **32** Hesekaia'ma kinima mani'neno hu'nea zantmimofo agenkea kasnampa ne' Amosi nemofo Aisaia'ma, Judane Israeli kini vahetmimofo zamagenkema krente'nea avontafepi krente'ne. **33** Hagi Hesekai'ma frige'za, Deviti naga'mofo matipi agonafi asente'naze. Hagi anama asente'nazana maka Juda vahetamine, Jerusalemi kumapima nemaniza vahe'mo'za marerisa vahe'ma asenezamantaza'za hu'za asente'naze. Ana hazageno, Manase nefä nona erino kinia mani'ne.

33 Hagi Manase'a 12fu'a kafu nehuno Juda vahe kinia efore huno, 55'a kafu Jerusalemi kumatera kinia mani'ne. **2** Hagi Manase'a Ra Anumzamofo avufina ko'ma ana mopafima mani'naza vahe'mo'zama agoteno himnagema hu'nea avu'ava'ma

nehazageno zamahe natitre'neankna kefo kumi hu'ne. 3 Hagi
nefa Hesekaia'ma havi anumzamofo mono kumatmima taganama
vazitre'neana ete eri so'e huno negino, Bali havi anumzante'ma
kre sramnavu ita tro nehuno, Asera havi anumzamofo
amema'ama antre'za tro'ma hunte'naza zafaramina retrurentetere
hu'ne. Ana nehuno maka monafima me'nea zantmintera rena reno
monora huzmante'ne. 4 Hagi Ra Anumzamo'ma huno, Jerusalemi
kumapi Nagri nagi me'nena, monora hunante vava hugahazema
huno hu'nea mono nompina, Manase'a havi anumzamofo kre
sramnavu ita tro hunte'ne. 5 Hagi Ra Anumzamofo mono
nonkumapima, meg'i'ane agu'afinema me'nea kumatremrina,
monafima me'nea zantmimofonte'ma kresramanama vu itarami
tro hunte'ne. 6 Ana nehuno Ben-Hinomue nehaza agupofi ne'
mofaveramima'a aheno kresramana nevuno, fri vahe hankro'ene
nankeea huno antahintahia e'nerino, avu'ataga avu'ava zana
nehuno, tusazane safezanena nehuno, amene vahetegatira
antahintahia eri'ne. E'ina nehuno Ra Anumzamofo avurera
tusi kumi'ma hiazamo higeno, Ra Anumzamo'a tusi rimpa
ahente'ne. 7 Ana nehuno azanteti'ma antreno tro'ma hu'nea
havi anumzamofo amema'a erino, Anumzamofo ra mono
nompi ome ante'ne. E'ina mono nona Anumzamo'ma Devitine,
nemofo Solomoninena anage huno znasami'ne, Israeli naga
nofipintira Jerusalemi kuma huhampuankino, Nagri nagimo'a
ama anampi me'enke'za, monora hunante vava hugahaze.
8 Ana nehuno, Nagrama huanke'ma zamagrama neveririza
Mosesema ami'noa kasegene, tra kenema kegava nehu'zama,
amage'ma antesnag'e'na, zamafahelima huhampri zmante'noa
mopafima mani'nafintira zamahenati otretfa hugahue. 9 Hianagi
Manase'a Juda vahetamine Jerusalemi kumapima nemaniza

vahetaminena zmavreno havigampi frege'za, Ra Anumzamo'ma
ama mopafinti'ma zamahenati tre'nea vahe'mo'zama hu'naza kefo
avu'avara agatere'za hu'naze. **10** Ana hazageno Ra Anumzamo'a
Manasene, Agri vahe'enena nanekea zmasami'neanagi, zamagra
ke'amofona antahiza amagera onte'naze. **11** E'ina hu'negu
Ra Anumzamo'a Asiria sondia vahete kva vahe'mokizmi
zamazampi Manasena avrentege'za azeriza, bronsire seni
nofinu kina rentete'za, agonagampi hukunu vazirusi hu'za
avre'za Babilonia vu'naze. **12** Hagi Manase'ma tusi atagu'ma
nehuno'a, Anumzama'amofo avuga razampi agu'a anteramino,
aza hinogura afahe'i Anumzamofona antahige'ne. **13** Hagi
Manase'ma asunku'ma huno Anumzamofoma nunamuma huno
antahigegeno'a, Anumzamo'a asunku hunenteno aza huno
avreno, agrama kegavama hu'nea mopafi Jerusalemi e'ne.
E'ina higeno Manase'a Anumzamofonkura Ra Anumza mani'ne
huno keno antahino hu'ne. **14** Hagi anama huteno'a Manase'a
Jerusalemi kumamofona zage hanati kaziga, Gihoni agupoma
me'nea kaziga have keginamofona amefi'a, mago zaza have
kegina huno nozame kuma kafane nehzare uhanatiteno, Oferie
nehzare agonarega ana kegina huno mareri'ne. Hagi sondia
vahete kva vahetmina tusinasi vihuma me'nea rankumatmima
Juda mopafima me'nea rankumatmimpi zamantetere hu'ne. **15**
Ana nehuno Manase'a havi anumzantmimofo amema'aramima
zafarema antreno tro'ma hunteterema hu'neana, Ra Anumzamofo
mono nompintira erinetreno, ana havi anumzantmintem'a
kresramana vu itaramina taganavazino Jerusalemi ran
kumamofona fegi'a ome atre'ne. **16** Ana huteno Ra Anumzamofo
kresramana vu ita ete tro huno, ana agofetu arimpa fru ofane,
susu hunteno ami ofanena Ra Anumzana Israeli vahe'mofo

Anumzamofontega kre'sramna vu'ne. **17** Ana'ma hige'za
vahe'mo'za agona agona mono'ma nehazafina kresramana
vu'hazanagi, Ra Anumzana Israeli vahe'mofo Anumzamofonteke
kresramna vu'naze. **18** Hagi mago'a zantmima Manase'ma kinima
mani'neno hu'nea zantamine, Ra Anumzamofonte'ma nunumuma
hu'nea nunamune, kasnampa vahetmimozama Ra Anumzana
Israeli vahe Anumzamofo agifima asami'naza nanekenena, Israeli
kini vahe'mofo zamagenkema krenentaza avontafe pi krente'naze.
19 Hagi Manase'ma havi anumzantmimofo mono kuma'ma
tro nehuno, Asera havi anumzamofo amema'ama zafare'ma
antreno tro nehuno, Anumzamofonte'ma mani fatgoma osu'nea
zamofo agenkene, agra'ama anteramino Ra Anumzamo'ma
aza hinogu'ma nunamuma higeno Ra Anumzamo'ma aza
hu'nea zanena kasnampa vahe'mofo agenkema krente'naza
avontafe pi krente'naze. **20** Hagi Manase'ma frige'za, agri
nonkuma'afi asentageno, nemofo Amoni agri nona erino kinia
mani'ne. **21** Hagi Amoni'a **22**'a kafu nehuno, kinia efore huno
tare kafu Jerusalemi rankumatera kinia mani'ne. **22** Hagi
Amoni'a Ra Anumzamofo avufina nefafa Manase hu'neaza huno
kefo avu'ava nehuno, ne'fama antreno tro'ma hunte'nea maka
havi anumzantmimofo amema'araminte kresramana nevuno,
monora hunenteno, eri'zana erinte'ne. **23** Hianagi Amoni'a,
nefa Manase'ma hu'neaza hunora Ra Anumzamofontera agu'a
anteramino asunkura osu'neanki, mago'ane rama'a kumi huno
vu'ne. **24** Hagi Amoni'ma ana'ma huno'ma vige'za kege'za, agri
eri'za kva vahe'amo'za, ahe frinaku oku'a antahintahia retro
hute'za, agri nompi ahe fri'naze. **25** Hianagi Juda vahe'mo'za
hugantigama hu'za, kini ne' Amonima ahe fri'naza vahetamina

zamahe nefri'za, nemofo Josaia kinia azeri otizageno, agri nona
erino kinia mani'ne.

34 Hagi Josaia'a 8'a kafu hu'neno Juda vahe kinia efore huteno, 31'a kafu Jerusalemi kumatera kinia mani'ne. **2** Hagi Josaia'a Ra Anumzamofo avurera fatgo avu'ava huno ufrege efregera osuno, negeho Deviti'ma hu'nea avu'ava avariri'ne. **3** Hagi Josaia'a 8'a kafuma kinima nemanino, 15ni'a kafu hu'neno agafa huno negeho Deviti'ma hu'neaza huno Anumzamofona monora hunte'ne. Hagi namba 12fu kafurera Juda mopafine, Jerusalemi kumapinena vano nehuno, maka havi anumzama mono'ma hunentaza kumatmina tapage hunetreno, Asera havi anumzamofo amema'ama zafare'ma antre'zama tro'ma hu'naza zantamina antagi netreno, zafare'ma antre'za kaza osu havi anumzamofo amema'aramima tro'ma hunte'naza zantamina rutmanatmanu hunetreno, kre mramrama hu'za havi anumzamofo amema'ama tro'ma hunte'naza zantaminena rutmana tamanu hutre'ne. Hagi Josaia'a e'inahu huno Juda mopane, Jerusalemi kuma'enena azeri agru hu'ne. **4** Ana nehuno Josaia'a hige'za Bali havi anumzamofonte'ma kresramana vu itaramina negege'za tagnavazi netre'za, mnanentake'za insensima kre mnama nevaza itaraminenaga vazitre'naze. Ana nehuno Asera havi anumzamofo amema'ama me'nea zafaramine, kaza osu havi anumzamofo amema'ama antre'za tro'ma huntenaza zantamine, kre mramrama hu'za havi anumzamofo amema'ama troma hunte'naza ame'ma'aramina rutmana hu'za rufuzafupete'za, ana anumzantminte'ma mono'ma hunentaza vahe'mokizmi matipi atre'za vano hu'naze. **5** Ana nehuno Josaia havi anumzantmimofo pristi vahe'mokizmi zaferinaramina Kresramana vu itazmire kreno Juda mopane, Jerusalemi kuma'enena eri agru hu'ne. **6** Hagi

anazanke huno Manase nagamokizmi rankumapine, Efraemi
nagamokizmi rankumapine, Simioni nagamokizmi rankumapine,
Nafatari nagamokizmi rankumapine, tava'ozmire'ma me'nea
kuma'ma havizama hu'nea kumatamimpinena vuno, 7 havi
anumzamofonte'ma kresramana vu itaramine, Asera havi
anumzamofo amema'ama me'nea zafaramina maka antagino
kitagi kotago hunetreno, havi anumzamofo amema'aramima tro
hunte'nazana rutamna huno ru fuzafulenetreno, mnanentake'za
insensima kre mnama nevaza itaramineni Israeli mopafintira
maka tagna vazitreteno, ete Jerusalemi kumate vu'ne. 8
Josaia'ma 18ni'a kafuma kinima nemanino'a, havi anumzama
mono'ma hunentaza zantamina eri haviza huno Juda mopane,
ran mono nonena eri agru huteno, Azalia nemofo Safanima,
rankumamofo kva ne' Ma'aseiama, avonkre eri'za e'neria ne'
Joahazi nemofo Joanki huno Ra Anumzana Anumzama'amofo
no eriso'e hiho huno huzmante'ne. 9 Hige'za e'za Manase
nagama, Efraemi nagama, mago'a Israeli naga'ma, maka
Juda mopafinti vahetmima, Benzameni naga'ma, Jerusalemi
kumapima nemaniza vahe'mo'zanema Anumzamofo mono
nompima ne-eza, zagoa eri'za Livae vahetami eme zami'zage'za,
eri'za ugagota pristi ne' Hilkaiana ome ami'naze. 10 Hagi
ana zagoa erino mono noma eri so'e nehaza vahe'mokizimi
kva vahe zamige'za, ana zagoa eri'za mono noma eriso'ema
nehaza vahe'mokizmi miza sezmente'naze. 11 Hagi ana
zagoma zami'nazana, zamagra ana zagoa eri'za noma negi'za
vahe'ene ke'onkezama tagama hunte haverami miza nese'za,
zafarami mizase'za Juda kini vahe'mo'zama eri so'ema osu'za
atrazageno'ma havizama hu'nea nomofo zafaramina eri fatgo
hu'naze. 12 Hagi ana vahe'mo'za eri'zana hankaveti'za eri'naze.

Ana eri'za vahetmima kegavama huzmante'naza vahetmina,
Merari nagapinti Livae netre Jahati'ene, Obadaiakegi, Kohati
nagapinti netre Zekaraiake Mesulamuke. Hagi ana maka
Livae nagaki'za zavenama ahe'za zagame'ma hu zana antahi
ankere'naza vaheki'za, **13** eri'za vahetmina kegava nehu'za,
erizante'ma vugote'zama kegavama hu'naza vahera e'ina hiho,
amana hiho hu'za antahintahi zami'naze. Hagi mago'a Livae
vahe'mo'za avonkre eri'za e'nerizageno, mago'amo'za Kasegema
kreno eri fatgoma hu eri'za enerizageno, mago'amo'za kafante'ma
kegava hu eri'za eri'naze. **14** Hagi Ra Anumzamofo nompima
ana zagoma eri'za e'naza zagoma eri'za atineramizageno'a,
pristi ne' Hilkaia'a Ra Anumzamo'ma Mosesema ami'nea
Kasege Avontafera keno eri'ne. **15** Hagi Hilkaia'ma ana kasege
avontafema hakreno enerino'a, kasegema kreno eri fatgo nehia
ne' Safanina amanage huno asmi'ne, Kasege avontafera Ra
Anumzamofo mono nompinti kena erue, nehuno ana avontafera
Safari ami'ne. **16** Ana higeno Safari'a ana avontafera erino
kini ne' Josaia ome nemino, eri'zamofo agenkea anage huno
asm'i'ne, Eri'za vaheka'ama maka eri'zama zami'nana eri'zana
knare hu'za e'nerize. **17** Hagi Ra Anumzamofo mono nompima
me'nea zagoa eri'za, eri'zante'ma vugote'za kegavama hu'naza
vahetami zami'naze. **18** Hagi mago'ane Safari'a kini nera
asmino, Ama avontafera pristi ne' Hilkaia nam'i'ne, huno nesmino
ana avontafera kini nemofo avuga hampri'ne. **19** Hagi kini ne'
Josaia'ma kasegefima me'nea nanekeramima nentahino'a, zaza
kukena'a tagato hu'ne. **20** Ana nehuno kini ne'mo'a Hilkaiaama,
Safari nemofo Ahikamuma, Maika nemofo Abdonima, avon
kre eri'za ne' Safanima, kini ne'mofo eri'za ne' Asaianena
amanage huno zamasami'ne, **21** Hagi nagrane maka Israeli

vahe'ene, Juda vahe'motanena ama avontafepima me'nea
nanekerera na'a hugahumpi, vuta Ra Anumzamofona ome
antahigeta keho. Na'ankure tagehe'mo'za ama avontafepima
me'nea kasegea ovaririnazageno, Ra Anumzamo'a tagrira
tusi arimpa aherante'ne. **22** E'inage higeno Hilkai'aene kini
ne'mo'ma huzmantea vahe'mo'zanena, kasnampa a' Hulda
kenaku Jerusalemi kumapina, noti kaziga mago kuma me'nea
kumapi vu'naze. Hagi ana a'mofo neve'a, Salumukino Tokhati
nemofo Hasra negeho'e. Hagi agra kukena nonte kva ne' mani'ne.
Hagi ana kini ne'mo'ma hiankea ana vahe'mo'za kasnampa ara
ome asami'naze. **23** Hagi ana kasnampa a'mo'a amanage huno
zamasami'ne, Ra Anumzana Israeli vahe Anumzamo'a huno,
huramantegeta e'naza nera amanage huta ome asamaho, **24** Ama
kumate'ene ama ana kumapi vahete'enena, Juda kini ne'mofo
avugama nehampri'za avontafepima me'nea hazenkezane, maka
kazusizanena atrenugenego egahie. **25** Na'ankure zamagra Nagrira
zamefi hunami'za, ru anumzantminte Kresramana nevu'za,
monora hunente'za, havi zamavu'zmava'ma hazazamo'a, tusiza
huno Nagrira nazeri narimpa ahe'ne. E'na hu'negu ama kumapi
vahetmima narimpama ahezmanente'noa zana, mago zamo'a
eri amne hugara osu'ne. **26** Hianagi Juda kini ne'mo'ma
Ra Anumzamofoma ome agenoka huta antahiho huno'ma
huramantegetama e'naza nera, Ra Anumzana Israeli vahe
Anumzamo'a ko'ma hamprizagenka antahi'nana kerera amanage
hie huta ome asamaho, **27** Na'ankure nagra ama kumate'ene, ama
kumapi vahetema hunaku'ma hua nanekema nentahinka, kagu'a
anteraminka Anumzamo'na navuga nemaninka, kukenaka'a
tagato hunka kasunkura nehunka, zavira atanke'na antahue
huno Ra Anumzamo'a hie huta ome asamaho. **28** Hagi menina

ama kumate'ene ana kumapi vahe'ma zamazeri havizama
hanuazana onkenenka knare hunka mani'nenga frigahane.
Anage hige'za ana vahe'mo'za atre'za vu'za, Hulda'ma hiankea
kini ne' Josaiana ome asmi'naze. **29** Higeno kini ne' Josaia'a
mika Juda kumapi ranra vahetamine, Jerusalemi kumapi ranra
vahetamine kehu atru hu'ne. **30** Ana huteno vuno maka Juda
vahetamine, Jerusalemi vahetamine, pristi vahetamine, Livae
vahetaminena Ra Anumzamofo mono nompi zamavare atru
higeno, ositeti'ma vuno ra vahetema vu'neana maka atru
hu'naze. Ana hutazageno, Ra Anumzamofo mono nompinti'ma
ke'za eri'naza avontafepima me'nea nanekea ranke huno
maka hampri vagare'ne. **31** Ana huteno kini ne' Josaia'a kini
vahe'mo'zama oneti'zare otino, Ra Anumzamofo kasege'ane,
avu'ava'ane, tra ke'anema ama avontafepima krente'neana,
maka nagu namenteti hu'na avaririgahue huno huvempa hu'ne.
32 Ana nehuno miko Jerusalemi kumapima nemaniza vahe'ene,
Benzameni naga'enena hige'za agri'ene oti'naze. Ana hazageno
Jerusalemi kumapi vahe'mo'za Anumzamofo huhagerafi huvempa
kemo'ma hu'nea kante ante'za, zamafahe'mofo Anumzanera
huvempa hu'naze. **33** Hagi mika Israeli mopa agu'afima
kaza osu havi anumzantmimofo amema'aramina Josaia'a ru
takoraku hunetreno, maka vahetmina hige'za Ra Anumzana
zamagehe'mokizmi Anumzante monora hunte'naze. Hagi
Josaia'ama kegavama hu'nea knafina Israeli vahe'mo'za Ra
Anumzana atre'za ru anumzantmina monora huonte'naze.

35 Hagi Josaia'a ke hige'za Ra Anumzamo'ma Isipima ozamahe
zamagatere'nea knaguma antahimiza ne'zama nenaza knare
Jerusalemi kumate etru hu'naze. Hagi ese ikamofo 14ni zupa
ozamahe'ma zamagatere'nea zanku'ma antahimiza sipisipiramina

ahegi'naze. 2 Ana nehuno ana zupage Josaia'a Pristi vahetmina huzmanteg'e'za, eri'zazmia enerizageno zamazeri hanaveti nanekea zamasmige'za, Ra Anumzamofo mono nompina eri'zana eri'naze. 3 Hagi Livae nagama zamazeri ante ruotage'ma hige'za mani'ne'za Israeli vahetmima kasegema rempima hunezmiza Livae nagara, ke hutru huno amanage huno zamasmi'ne, menina Anumzamofo huhagerafi hvempage vogisia Deviti nemofo Israeli vahe kini ne' Solomonima kinte'nea mono nompi anteho. Mago'enena huhagerafi hvempage vogisia zafa huta vuta eta osugahaze. Tamafuntera erita vano osiho. Ra Anumzana tamagri Anumza Israeli vahe'mota monora hunenteta eri'zama'a erinteho. 4 Israeli vahe kini ne' Devitine, nemofo Solomoni avontafepinema, krente'nea kante anteta nagatenofite trora hoho. 5 Hagi mago mago nagamota, nagatenofite huta ruotgema hu'nea kumapina Livae naga'ene otita maniho. 6 Hagi Ozamahe'ma zamagatere'nea kanagu'ma antahimiza nehaza sipisipi anentatami, aheta tamagra'a tamazeri agru nehuta, retrotra nehinkeno ruga'a tamafuhe'za Ra Anumzamo'ma Mosesema asami'nea kante ante'za anara hoho. 7 Hagi ozamahe'ma zamagatere'nea zanku'ma antahimi ofama hanaza zana, sipisipine meme amentatamina Josaia'a agra'a keginafintira 30tausenia nezmino, 3tauseni'a ve bulimakao afutamina maka eme atruma hu'naza vahe'mokizmia zami'ne. 8 Ana hige'za kini ne'mofo eri'za vahe'amo'za zamagranena mago'a sipsipine bulimakao afutaminena zamavesite avre'za Israeli vahetamine, pristi vahetamine, Livae naga'enena eme zami'naze. Hagi Anumzamofo mono nonte kva vahera Hilkia'a'ma, Zekaraia'ma, Jehiel'i'ma hu'za zamagranena ozamahe'ma zamagatere'nea zanku'ma antahimiza ofama hanaza zana,

2tausen 600'a sipisipine meme afutaminki, 300'a bulimakaogi
hu'za pristi vahe'mokizmia zami'naze. **9** Hagi Livae kva
vahera Konanaia'ma, neganakea Semaia'ene Netanelikegi,
Hasabaia'ma, Jeieli'ma, Jozabadi'ma hu'za zamagranena,
ozamahema zamagatere'nea knaguma antahimi ofama huzana,
sipisipine meme afutamina 5tauseni'agi, 500'a bulimakao
afutminki hu'za Livae nagara zami'naze. **10** Hagi ana zantmima
retro'ma hute'za, pristi vahe'mo'za zamagra'a eri'za kankamunte
oti'zageno, Livae naga'mo'za kini ne'mo'ma kevure kevure'ma
refkoma huzmante'nea kante ante'za oti'naze. **11** Hagi ozmahe'ma
zamagatere'nea zanku'ma antahimiza ofama hu sipisipiramina
ahe'za korama'a tagi'za pristi vahetami zamizage'za, pristi
vahe'mo'za eri'za Kresramana vu itarera rutritri nehazageno, Livae
naga'mo'za ana sipisipi afutamimofo akrura kararuvazi'naze. **12**
Hagi Moses avontafepima hu'nea kante'ma ante'za mago mago
naga'mo'zama Ra Anumzamofonte tevefima kre fananehu ofama
hanaza sipisipi afutamine, bulimakao afutaminena anampinti
Livae naga'mo'za eritru hunte'naze. **13** Hagi tra kemoma
hu'nea kante ante'za Ozmahe'ma zmagatere'nea zanku'ma
antahimi sipisipia ahe'za tevefi negre'za, zamazeri ruotgema
hu ofanena kavoramimpine ranra kavofinena ti taginte'za
kre'za ame hu'za ati'za zamizage'za maka vahe'mo'za ne'naze.
14 Hagi anama hute'za Livae naga'mo'za zamagra'a sipisipi
afutamine, pristi vahe'mokizmi sipisipi afutamina retrotra hu'naze.
Na'ankure pristi vahera, Aroni amohe'za kre fananemahu
ofane, afova'anena Kresramana nevazageno vuno hani ome
hu'ne. E'ina hu'negu hu'za Livae naga'mo'za zamagra'a sipisipi
afutamine, pristi vahe'mokizmi sipisipi afutaminena retrotra
hu'naze. **15** Hagi zavenama ahe'za zagame'ma hu vahetmina

Asapumpinti'ma fore'ma hu'naza vaheki'za, Devitima Asapuma
Hemanima kini ne'mofo kasnampa ne' Jedutuni'ma hu'za
huzmante'naza kante ante'za eri'za kankamuzmire otitere
hu'naze. Hagi kuma kafante kva vahe'mo'za, kuma kafana
atre'za ovu'za kafante kva hute'za mani'naze. Na'ankure mago'a
Livae naga'mo'za makazazmia retrotra huzmante'naze. **16**
E'ina hige'za Israeli vahe'mo'za Ra Anumzamo'ma ozmahe'ma
zamagatere'nea zankura antahinemiza ne'zana kre'za nene'za
musena nehu'za, kini ne' Josaia'ma hu'nea kante ante'za
Ra Anumzamofo Kresramanavu itarera, kre fanane hu
ofa hu'naze. **17** Hagi Israeli vahe'tamima atru'ma hu'naza
vahe'mo'za ozmahe'ma zamagatere'nea zankura antahinem'i'za
zisti onte bretia 7ni'a knafi nene'za musena hu'naze. **18**
Hagi kasnampa ne' Samueli knareti'ma e'neana mago kini
ne'mo'a e'inahukna zana Israeli vahepinna eri fore osu'nea
kna hu'za, ozamahe'ma zamagatere'nea knaguma antahimi'za
ne'zama kre'za nene'za musenkasea osu'nazankna hu'za pristi
vahetmima, Josaia'ma Livae vahetmima, maka Judane Israeli
vahetmima, Jerusalemima nemaniza vahe'mo'zanena ne'zana
kre'za nene'za tusi musenkase hu'naze. **19** Hagi Josaia'a
18ni'a kafuma kinima nemanige'za, ozmaheno zamagatere'nea
zanku'ma antahimi knarerera ne'zana kre'za nene'za ama ana
musenkasea hu'naze. **20** Hagi Josaia'ma mono nompi zama
eri fatgoma hutegen'o'a, Isipi kini ne' Niko'a hara erino Yufretisi
Tinte Kakemisi kumate egeno, Josaia'a ha' ome huzmantenaku
vu'ne. **21** Hianagi Niko'a amanage huno Josaintega kea
atregeno vu'ne, Juda kini ne'moka, na'ante kagra hara hunante'za
nehane? Nagra kagrira hara hugantenakura nomoanki, nagrama
ha'ma hunezmanta vahe'ene hara hunaku neoe. Anumzamo'a

ame hunka vuo huno hunantegena neoanki, ru nagranema mani'nea Anumzamo kahe frisigi hara reonanto. **22** Hianagi Anumzamo'ma Niko'ma asmigeno'ma hiankea Josaia'a antahi amne nehuno, ru kukena huno agra'a azeri frakino ru vahekna nehuno, Megido agupofi ha' ome hunaku vu'ne. **23** Hagi ha'eme nehige'za, keve ahazageno Josaia'a eri'za vahe'araminkura huno, hago hazenke eruanki navreta viho. **24** Anage hige'za eri'za vahe'amo'za Josai'ana karisi'afintira avre'za ru karisi'afi ante'za avre'za Jerusalemi vazageno ufri'ne. Anama frige'za, maka Juda vahetamine, Jerusalemi kumate vahe'mo'zanena afahe'mofo matipi eri'za ome asenente'za, tusi zamasunku hu'za zavira ate'naze. **25** Ana'ma higeno'a, kasnampa ne' Jeremaia'a, Josaia agire vare zagame asunte'nege'za, zagamema hu vahe'mo'za ana zagamera hu'za meninena zavira netaze. Hagi ana zagamera zavi zagamema krentataza avontafepina krentazageno me'nege'za zagamera hu'za zavira netaze. **26** Hagi Josaia'ma agafama huno kinima mani'neretima vuno vagaretema vu'hea knafima hu'nea zantamimofo agenkene, Ra Anumzamofo kasegema avariri'nea avu'avamofo agenkenena, **27** Israeli kini vahetamine Juda kini vahetmimofo zamagenke'ma krente'naza avontafepi krente'naze.

36 Hagi Josaia'ma nefrige'za Juda vahe'mo'za nefo nontera nemofo Jehoahasi kasefa kinia Jerusalemi kumatera azeri oti'naze. **2** Hagi Jehoahasi'a 23'a kafu hu'neno, kini efore huno 3 ikamofo agu'afi Jerusalemi kumatera kinia mani'nne. **3** Hagi Isipi kini ne' Niko'a Jehoahasina kini tratetira azeri netreno, Juda vahekura kna'amo'a 4tausen kilo hunesia silvane, 34 kilo hunesia golinena takisia miza hugahaze hu'ne. **4** Ana nehuno Isipi kini ne' Niko'a Jehoahasi negna Eliakimina Juda vahe

kini azeri onetino, Jehoiakimi'e huno kasefa agia antemi'ne.
Hianagi Niko'a Jehoahasina kina hunteno avreno Isipi vu'ne. 5
Hagi Jehoiakimi'a 25'a kafu hu'neno, Juda vahe kini efore huno
11ni'a kafu Jerusalemi kumatera kinia mani'ne. Hagi agra Ra
Anumzana agri Ra Anumzamofo avufina, havi avu'ava hu'ne. 6
Ana higeno Babiloni kini ne' Nebukatnesa'a Jehoiakimina ha' eme
hunteno azeriteno, bronsireti tro hu'nea seni nofinu kina renteno
avreno Babiloni vu'ne. 7 Hagi Nebukatnesa'a mono nompintira
mago'a marerisa zantamina erino, agra nompi ome ante'ne. 8
Hagi Jehoiakimi'ma kinima mani'neno hu'nea avu'avazamofo
agenkene, kasrino himanage'ma hu'nea avu'ava'ma hu'nea
zamofo agenkea, Israeli kini vahe'ene Juda kini vahe'mokizmi
avontafepi krente'naze. Higeno nemofo Jehoiasini agri nona
erino kinia mani'ne. 9 Hagi Jehoiasini'a 8'a kafu hu'neno
Juda vahe kini efore huteno, 3'a ikanki 10ni'a kna Jerusalemi
kumatera kinia mani'ne. Hagi Jehoiasini'a Ra Anumzamofo
avurera havi avu'ava hu'ne. 10 Hagi kafu'mofoma trazamo'ma
agatama nehagea knafina, Babiloni kini ne' Nebukatnesa'a
mago'a vahe huzmantege'za e'za Jehoiasina eme azerite'za
kina hunte'za, avre'za Babiloni nevu'za, Ra Anumzamofo mono
nompintira mika'a marerisa zanena emeri'za vu'naze. Ana
nehu'za agri nagapinti ne' Zedekaiana kini azeri oti'zageno,
Jehoasini nona erino kinia mani'neno, Juda vahe'ene Jerusalemi
kumate vahera kegava huzmante'ne. 11 Zedekai'a 21ni'a kafu
huneno Juda vahe kinia efore huteno, 11ni'a kafu Jerusalemi
kumatera kinia mani'ne. 12 Hagi Zedekai'a Ra Anumzana
Anumzama'amofo avufina kefo avu'ava huno, kasnampa ne'
Jeremaia'ma Ra Anumzamoma asami'nea nanekema eme
asamiana agu'a anteramino mani'neno, ke'a ontahi'ne. 13 Ana

nehuno Babiloni kini ne' Nebukatnesana Anumzamofo agifima
huvempama hunteno kagri kagorga manigahuema hu'nea nera
ha' arente'ne. Hagi agra agu'a eri hankave netino, Ra Anumzana
Israeli vahe Anumzamofonte'ma ezankura avresra hu'ne. **14**
Hagi maka pristi vahe'mofo ugota kva vahe'mo'zane, Juda
vahe'mo'zanena Ra Anumzamofona novaririza zamagena humiza
kasarino havizama hu'nea avu'ava nehu'za, Ra Anumzamo'ma
noma'ama eri ruotge'ma hu'nea nona, eri pehana hu'naze. **15**
Hianagi Ra Anumzana zamagehe'i Anumzamo'a, ana avu'ava'ma
atresazegura kema erino vu vahe'aramintera huzmanteg'e'za,
kea eri'za vu vava hu'naze. Na'ankure Agra vahe'agu'ene,
Agrama nemania noma'agu'enena tusiza huno asunkura hu'ne.
16 Hianagi ana vahe'mo'za Anumzamo'ma huzmanteg'e'za
e'naza kasnampa vahe'mo'zama hazankea ontahi'za, hu haviza
hunezmante'za, kiza zokago ke hunezmante'za zamagiza re'naze.
Ana hazageno Ra Anumzamo'a tusi rimp ahezmanterego,
ana arimpa ahe'zana mago zamo'a eri amne hugara osu'ne. **17**
Ana hageno Ra Anumzamo'a Babiloni kini ne' Nebukatnesa
huntegeno Jerusalemi kumate vahera ha' eme huzmanteno,
kasefa nehazaveramina mono nompintira kazinteti nezmaheno,
kasefa vahe'ene, vene omase mofanema, a'nenema, tavava
ozafanena zamasunkura huozmante zamahe vagare'ne. Hagi
Ra Anumzamo'a, Babiloni kini ne' Nebukatnesa azampi miko
zamavare ante'ne. **18** Hagi kini ne' Nebukatnesa'a mono
nompinti ranra zuomparamine, neonse zuomparamine, Ra
Anumzamofo feno nompinti fenone, kini nemofo nompinti fenone,
ugagota eri'za vahe'aramimofo nompinti fenonena maka eri
hana huno Babiloni vu'ne. **19** Hagi Anumzamofo mono nona
teve taginente'za, Jerusalemi Nkumamofo have kegina tapage

hunetre'za, maka kini ne'mofo nonkuma'enena teve taginte'za negre'za, maka marerisa fenoma'anena eri haviza hu'naze.

20 Hagi hapintima ozamaheno zamatreah vahera, zamavareno vige'za kini ne'mofo eri'za vahetamine, amohe'mofo eri'za vahetami umani'nazageno, vuno Pesia kamanimo'ma efore huno Babiloni kamanima agatere'nea knare uhanatine. **21** Ana higeno Israeli vahe'mo'za sevenima hia kafufina, mopatamia atrenkeno manisga hinoma huno'ma Ra Anumzamo'ma hu'neana atrazageno Sabatia erino manigasa osu'ne. E'ina hu'negu maka kinama hu'za maniza kafu'afina, mopamo'a manigasa hu'negeno, Ra Anumzamo'a kasnampa ne' Jeremaiama asami'nea kante 70'a kafua evu'ne. **22** Hagi Sairusi'ma Pesia kinima efore'ma huno mania knafina, ese kafurera Ra Anumzamo'ma kasnampa ne' Jeremaiama asami'nea kante anteno, Ra Anumzamo'a azeri otigeno, mago avona kre atregeno agrama kegavama hu'nea mopa'afina vuno eno hu'ne. **23** Hagi Pesia kini ne' Sairusi'a amanage huno ana avona kre atre'ne, Monama kegava hu'nea Ra Anumzamo'a mika mopa kegava huo huno nehuno, noma'a Juda mopafi Jerusalemi ome kigahane huno hunante'ne. Hagi Ra Anumzamofo vahetmima ru vahepima mani'naza vahera, Ra Anumzana zamagri Anumzamo'a zamagrane mani'neno kegava huzmantenesnige'za ete Jerusalemi kumatera marerigahaze.

Ezra

1 Hagi Sairusi'ma ese agafa huno Pesia mopare kinima mania kafufina, Ra Anumzamo'a kasnampa ne' Jeremaia agipi huvezino kasnampa kema Israeli vaheku hu'nea nanekemo'a avufga'a efore hanigu, Pesia kini ne' Sairusina Ra Anumzamo'a antahintahi'a azeri otigeno, ana makama kegava hu'nea mopafi vahetera huama huno nezamasamino, avompinena krenenteno anage hu'ne, **2** Pesia kini ne' Sairusi'a amanage huno hie, Ra Anumzana monane mohanema tro huteno kegavama hu'nea Anumzamo maka mopa kva huo huno nami'neno, nagrira huhamprinanteno Juda mopafina Jerusalemi kumate nagri mono nona kinanto huno hunante'ne. **3** Hagi Israeli vahe'ma amu'nontamifima tamagranema mani'nesazana, Anumzazmimo'a Israeli vahe'ene manigahianki zamatreke'za Juda mopafi Jerusalemi kumate mareri'za, Israeli vahe Anumzama Jerusalema mani'nea Ra Anumzamofona mono noma'a ome eri kasefa hu'za kinteho. **4** Hagi ina kumapino Israeli vahe'ma mani'nesia kumapi vahe'mota, tamagra'a silvama golima, mago'a knare'hare zantamine nezamita, bulimakaone memene sipisipi afutaminena avre nezamita, Jerusalema Ra Anumzamofo mono nompima zamavesite ofama hunesaza zantaminena zaminke'za eri'ne'za viho. **5** Hagi anante Judane Benzamenine Livae nagate'enema ugotama hu'naza vahe'ene pristi naga'ene, izano Ra Anumzamo'ma rimpama azeriotia vahe'mo'zanena Jerusalemi mareri'za Ra Anumzamofo mono no ete ome azeri oti'za kinaku trotra hu'naze. **6** Hagi anante tvaozamire'ma nemaniza vahe'mo'za Israeli vahe'mokizmia, silvareti'ene golireti'ma tro'ma hu'naza zantamine, mago'a ne'zane, bulimakaone, memema, sipisipi

afutamine, mago'a marerifa knare'nare zantaminena nezami'za,
ana agofetura mago'a musezana Ra Anumzamofo mono
nompima kresramnama vanaza zantamina zamizage'za eri'ne'za
vu'naze. 7 Hagi kota kini ne' Nebukatnesa'ma Israeli vahe'ma
hahuzamagatereno Jerusalemi ra mono nompi zantamima
erino eno agrama mono'ma hunentea havi anumzantamimofo
mono nompi eme ante'nea zantamina kini ne' Sairusi'a erimegi
atre'ne. 8 Hagi Pesia kini ne' Sairusi'a agri zagore'ma ugagota
huno kvama hu'nea ne' Mitredatina hamprio higeno ana
zantamina hampriteno, Juda vahete'ma ugota huzmanteno
zamavareno esia ne' Sesbazarina ana zantamina ami'ne. 9 Hagi
anazantamina amanahu huno eri'ne. Golireti'ma tro'ma hu'naza
zuompa 30'agi silvareti'ma tro'ma hu'naza zuompa 1 tauseni'agi,
mago'a zantamima silvareti'ma tro'ma hu'naza 29ni'agi, 10
mago'a zuomparamima golireti'ma tro'ma hu'naza zuomparamina
30'agi, mago'a zuomparamima silvareti'ma tro'ma hu'naza
zuomparamina 410ni'agi, ruga'a zantamima Ra Anumzamofo
mono nompi ante zantamina 1tauseni'agi hu'za zami'naze. 11
Hagi golireti'ene silvareti'enema tro'ma hu'naza zantamine, ruga'a
zantamima Ra Anumzamofo mono nompi ante zantaminema
eri atruma hazageno'a ana makara 5tausen 400'a zantami
efore hu'ne. Higeno Israeli vahe'ma Babilonima kina hu'za
mani'naregati'ma atre'za Jerusalema mareri'za nevazageno'a,
Sesbazar'i'a anazantamina erige'za vu'naze.

2 Hagi Babiloni kini ne' Nebukatnesa'ma Juda vahe'ma
zamavareno Babilonima kinama huzmante'nea vahe'mo'zama
Babiloni mopama atre'za Jerusalemi vute'za, mago mago
vahe'mo'a Juda mopafima kuma'ama meterema hu'nere vuno
eno hu'ne. 2 Hagi anampina kegava huzmante'za magokama

e'nazana kva vahe'mokizmi zamagi'a, Jerubabeliki, Jeshuaki,
Nehemaiaki, Seraiaki, Rilaiaki, Modekaiki, Bilshaniki, Mispariki,
Bigvaiki, Rehumi'ene Ba'anaki hu'za e'naze. Hagi Israeli
venenema e'nazana ama hampri'za krente'naze. 3 Hagi
Parosimpinti'ma fore hu'naza venenea 2tausen 172'a e'naze.
4 Sefatiampinti'ma fore'ma hu'naza venenea 372'a e'naze. 5
Aramumpinti'ma fore hu'naza venenea 775'a e'naze. 6 Hagi
Jeshuane Joapu naga'ma Pahat-Moapumpinti'ma fore hu'naza
venenea 2tausen 812'a e'naze. 7 Elamumpinti'ma fore'ma
hu'naza venenea 1tausen 254'a e'naze. 8 Hagi Zatumpinti'ma
fore'ma hu'naza venenea 945'a e'naze. 9 Zakaimpinti'ma
fore'ma hu'naza venenea 760'a e'naze. 10 Banipinti'ma fore'ma
hu'naza vene'nea 642'a e'naze. 11 Hagi Bebaimpinti'ma fore'ma
hu'naza venenea 623'a e'naze. 12 Hagi Azagatimpinti'ma
fore'ma hu'naza venenea 1tausen 222'a e'naze. 13 Hagi
Adonikamumpinti'ma fore'ma hu'naza venenea 666si'a e'naze.
14 Hagi Bigvaimpinti'ma fore'ma hu'naza venenea 2tausen
56si'a e'naze. 15 Adinimpinti'ma fore'ma hu'naza venenea 454'a
e'naze. 16 Atana mago agi'a Hezekaiakino, agripinti'ma fore
hu'naza venenea 98'a e'naze. 17 Bezaimpinti'ma fore hu'naza
venenea 323'a e'naze. 18 Jorapinti'ma fore hu'naza venenea
112fu'a e'naze. 19 Hashumimpinti'ma fore hu'naza venenea
223'a e'naze. 20 Gibarimpinti'ma fore hu'naza venenea 95'a
e'naze. 21 Hagi Judama me'nea kumatamimpima, kumate
kumate'ma vanaza vahe'ma hampri'za krente'nazana, Betlehemu
kumate vahera 123'a venene e'naze. 22 Netofa rankumate
vahera 56si'a venene e'naze. 23 Anatoti rankumatetira 128'a
venene azageno, 24 Azmaveti rankumatetira 42'a venene e'naze.
25 Hagi Kiriat-arimi rankumateti'ene Kefira rankumateti'ene

Beroti rankumati venenea 743'a e'naze. **26** Hagi Rama rankumati'ene Geba rankumatetira 621ni'a vene'ne e'naze. **27** Hagi Mikmasi ran kumatetira 122'a venene e'naze. **28** Hagi Beteli rankumati'ene Ai rankumatetira 223'a venene e'naze. **29** Nebo rankumatetira 52'a vene'ne e'naze. **30** Hagi Magbisi ran kumatetira 156si'a venene e'naze. **31** Hagi Elamu rankumatetira 1tausen 254'a vene'ne e'naze. **32** Hagi Harimi ran kumatetira 320'a venene e'naze. **33** Hagi Lodi kumateti'ene Haditi kumateti'ene, Ono rankumatetira 725'a venene e'naze. **34** Hagi Jeriko rankumatetira 345'a venene e'naze. **35** Hagi Sena rankumatetira 3tausen 630'a venene e'naze. **36** Hagi pristi eri'zama eneri'za vahe'ma eterema hu'nazana, Jeshua naga'nofipima Jedaia ne' mofavre naga'ma pristi eri'zama eneriza nagara 973'a venene azageno, **37** lmeri nagapima pristi eri'zama eneri'za venene nagara 1tausen 52'a azageno, **38** Pashuri nagapima pristi eri'zama eneriza venenea 1tausen 247ni'a azageno, **39** Harimi nagapima pristi eri'zama eneriza venenea 1tausen 17ni'a venene e'naze. **40** Hagi Livae nagara, Hodavia naga'nofipinti, Jeshuane Katmielikizni ne' mofavre nagara 74'a e'naze. **41** Hagi Asapu nagapintima zagame'ma nehaza venenea 128'a venene e'naze. **42** Hagi Salumuma Aterima, Talmionima, Akubuma, Hatitama, Sobai naga'pintira ra mono nonkafante'ma kvama hanaza vene'nea 139ni'a e'naze. **43** Hagi ra mono nompima eri'zama erisaza vahe'ma e'nazana, ama'i naga'nofipinti e'naze. Zihama, Hasufama, Tabaotima, **44** Kerosima, Siahama, Padonima, **45** Lebanama, Hagabama, Akubuma, **46** Hagabuma, Salmaima, Hananima, **47** Gidelima, Gaharima, Reaiama, **48** Rezinima, Nekodama, Gazamuma, **49** Uzama, Paseama, Besaima, **50** Asnama, Meunimima, Nefusimima, **51** Bakbukima,

Hakufama, Harhurima, **52** Bazlutima, Mehidama, Hashamama,
53 Barkosima, Siserama, Temama, **54** Neziane, Hatifa naga
nofipinti'ene hu'za e'naze. **55** Hagi kini ne' Solomoni eri'zama
eri'naza vahepinti'ma e'naza vahe'mokizmi naga nofi'mofo
zamagi'a amanahu me'ne, Sotaima, Hasofereti'ma, Perudama,
56 Ja'alama, Darkonima, Gidelima, **57** Sefatiama, Hatilima
Pokeret-Hazebaime, Ami nagapinti'ene hu'za e'naze. **58**
Hagi ra mono nompima eri'zama eri'naza vahe'ene, Solomoni
eri'zama eri'naza vahepinti'ma fore hu'naza vahe'ma e'nazana
ana makara 392'a venene e'naze. **59** Hagi mago'a vahe'ma
Tel Mela ran kumateti'ene Tel Harsa rankumatei'ene Kerubine,
Adanine, Imeri rankumateki hu'za e'naze. Hianagi Israeli
vahepina ina naga nofipinti e'nazafi zamagra erinte'amara
osu'naze. **60** Hagi ana vahera, Delalama, Toblama, Nekodakizmi
ne' mofavre nagaki'za 652'a venene e'naze. **61** Hagi pristi
eri'zama e'neriza nagapintima Jerusalemima age'zama refako
hu'za zamage'nazana Habaiama, Hakozima, Barzilai nagaki'za
zamagia omnenege'za, pristi vahera fore hugara osu'naze. Hagi
Barzilai naga nofi'mokizmi nezamageho'a, Gileadi ran kumateti
Barzilai mofa ara eri'neanki'za, e'inahu hu'za naga nofi'zamimofo
zamagia nehaze. **62** Hianagi ana 3'a vahe'mokizmi nagara
Israeli vahepina ina naga'nofipinti e'nafi zamagia onke'naze. Ana
hu'negu agru osu'naze hu'za zamatrazage'za, pristi eri'zana
e'ori'naze. **63** Hagi Juda vahe'mokizmi gavana ne'mo'a ana
vahekura i'o huzamantege'za Ra Anumzamofonte'ma ofama
eri'za e'naza ne'zampintira one mani'nazageno pristi vahe'mo'za
Urimie nehaza havene Tamimie nehaza havereti Ra Anumzamofo
avesi'zama kenakura satu zokago re'za ketesage'za, ana ne'zana
negahaze. **64** Hagi ana maka Israeli vahe'ma mopa zamire'ma

ete'za e'nazana 42tausen 360'a vahe e'naze. **65** Hagi ana agofetura eri'za veara ana makara 7tausen 337ni'a azage'za, zagame'ma nehaza vahera venenene a'nenena ana makara 200'a e'naze. **66** Hagi hosi afuzmia 736si'agi miulie nehaza donki afura 245fu'agi, **67** 435fu'a kameli fu'taminki, tonki afura 6 tausen 720'a afutaminki hu'za zamavare'za e'naze. **68** Hanki Israeli vahe'mo'zama Ra Anumzamofo mono noma ko'ma Jerusalema me'nere'ma etage'za, mago'a naganofite'ma ugota hu'naza vahe'mo'za Ra Anumzamofo mono noma ko'ma oti'nea nomarure'ma ete mono noma azerioti'zama kisaza zantamina, zamavesite ofa ami'naze. **69** Hagi rama'ama ante'nemo'a rama'a nemigeno, osi'ama ante'nemo'a osi'a amitere higeno ana maka golimofo kna'amo'a 500'a kilo higeno, silvamofo kna'amo'a ana makara 2tausen 800'a kilo hu'nea nemi'za pristi vahe kukena 100'a ami'naze. **70** Hagi pristi vahe'ma Livae naga'ma zagame'ma hu vahe'ma ra mono nonkafante'ene, ra mono nompima eri'zama eneriza vahe'mo'zane mago'a vahe'mo'zanena ran kumazamire vu'za umani emani hu'naze. Anama hazage'za ruga'a Israeli mopafima ranra kumatamima me'nea kumazmirega vu'za umani emani hu'naze.

3 Hanki Israeli vahe'mo'za ko nonkuma zamire umani emani hutage'za henka, 7ni ikana agafa hu'ne. Anante maka vahe'mo'za erimago zamavugosa hu'za Jerusalemi kumate atru hu'naze.
2 Ana hutazageno Jozadaki nemofo Jeshua'ene afuhe'zane agranema pristi eri'zama eneriza naga'ene, Sealtiel nemofo Jerubabeli'ene naga'amozone agafa hu'za Israeli vahe'mokizmi Ra Anumzamofonte'ma tevefi kre fnanehu ofama huntesaza ita ete tro hu'naze. Ana itama tro'ma hu'nazana Ra Anumzamofo eri'za ne' Mosese kasege avontafepi krente'naza kante ante'za

tro hu'naze. 3 Hanki zamagra anama mani'naza mopafi vahekura koro hu'nazanagi, ana zankura ontahi'za ko'ma kresramna vu itama me'nea nonte ete ita tro hute'za, anante maka nanterane kinaganena Ra Anumzamofontega tevefi kre fanane hu ofa hu'naze. 4 Ana hute'za Fugagi Nompima mani'za e'naza zanku'ma antahimiza musenkasema nehaza knarerera, avontafepima hu'nea kante amage ante'za, mago mago knarerera tevefi kre fanane hu ofa kre srama vutere hu'naze. 5 Hanki anama hute'za maka zupama tevefi kre fananema nehaza ofaramina nehu'za, kasefa ikama eme antegeno'ma nehia ofa nehu'za, Ra Anumzamofoma mono'ma hunenteno musema hu knama huhamparinte'naza knaramintera kresramna nevu'za musenkasea hu'naze. Ana nehazage'za mago'a vahe'mo'za, zamagra'a zamavesite'ma Ra Anumzamofoma ami ofanena eri'za azage'za ofa hu'naze. 6 Hanki 7ni ikamofona ese knazupa agafa hu'za, Ra Anumzamofontega tevefi kre fanane hu ofa hunte'naze. Hianagi Ra Anumzamofo mono noma agafa hu'za azeri retrure trara zahufa azeri oraoti'naze. 7 Hanki anante Pesia kini ne' Sairusi'a amne sida zafa Lebanonitira ome erigahaze huno Israeli vahekura hu knare huzmante'ne. E'ina hu'negu Israeli vahe'mo'za ne'zane waini tine olivi masavenena Saidoni vahe'ene Tairi vahe'enena miza sezmantazage'za Lebanonitira hagerimpi sida zafa eri'za Jopa ehanati'naze. Ana nehu'za Israeli vahe'mo'zama havema tagahu vahe'ene noma kisaza vahera zagoa miza sezmant'e'naze. 8 Hanki Israeli vahe'mo'zama Babiloniti'ma atre'za Jerusalema e'naza knareti'ma egeno 2ma hia kafumofo nampa 2 ikantera agafa hu'za Ra Anumzamofo mono nona ki'naze. Seatieli nemofo Zerubabeliki Jozadaki nemofo Jeshua'ene zamafuhe'za pristi vahe'mo'zane Livae

naga'ene, ana maka vahe'ma kinafinti'ma atre'za Jerusalema
e'naza vahe'mo'zane eri'zana eri agafa hu'naze. Hanki Ra
Anumzamofo mono nonte eri'zama kvama hu'nesage'za erisaza
Livae vahera, kafu zamimo'ma 20ti reti'ma menagate'nea
vaheke zamazeri oti'naze. **9** Hanki ana mono no eri'zama
kvama hu'naza Livae vahera, Jeshua'ene ne' mofavre naga'ane
afu'aganahe'zane, Kadmieli'ene ne' mofavre naga'ane Juda ne'
mofavre naga'ene, Ra Anumzamofo mono nomofonte eri'zana
kva hu'nage'za eri'naze. Ana nehazage'za Henadadi ne' mofavre
naga'ene zamafuhe'za Livae naga'mo'zane zamaza hu'za ana
eri'zana kegava hu'naze. **10** Hanki nomagi vahe'mo'zama Ra
Anumzamofo mono noma azeri oti tra'ma ki vagamaretazage'za,
pristi naga'moza pristi kukena eri nentani'za, ufena enerizage'za,
Asapu ne' mofavre Livae naga'mo'za nase'nasepa eri'zage'za,
Israeli kini ne' Deviti'ma krente'nea kante amage ante'za Ra
Anumzamofo agi ahentesga hunaku oti'naze. **11** Anante muse
zagame hu'za Ra Anumzamofona agi'a ahentesga nehu'za,
Ra Anumzamo'a knare hu'neankino Israeli vahe'motarera Agri
avesizamo'a mevava huno nevie hu'za hu'naze. Anagema
nehazage'za maka vahe'mo'za zamagerura erinte mago hu'za,
ranke hu'za Ra Anumzamofona agia ahentesga nehu'za, susu
hunte'naze. Na'ankure Ra Anumzamofo mono noma azeri oti
tra'ma erinte fatgoma hu'naza zanku anara hu'naze. **12** Hianagi
hakare'a ozafama re'naza pristi vahe'ene Livae vahe'ene naga
nofite'ma ugotama hu'naza vahe'ma, ko'ma me'nege'zama
Ra Anumzamofo mono noma ke'naza vahe'mo'za zamagesa
antahi'naze. Ana nehu'za mono nomofo tra'ama ki vagama
nerazage'za tusi zavi krafa nehazage'za, rama'a vahe'mo'za tusi
muse hu'naze. **13** Hanki tusia zavi krafagemo'ene musenkasema

haza agasasankemo'enena havia higeno krafamo'a mago avamenteke vige'za, e'i zavi krafa nehzanki, e'i musenkase nehzanki hu'za antahi amara osu'naze.

4 Hanki Judane Benzameni naga'mokizmi ha' vahe'mo'zama antahizama, kinafinti'ma atre'za e'naza vahe'mo'za Ra Anumzana Israeli vahe'mokizmi Anumzamofo mono noma ete eme negize nanekema nentahi'za, 2 zamagra Zerubabelinte'ene Israeli naganofite'ma ugagotama hu'naza vahete vu'za amanage hu'naze, Asiria kini ne' Esarhadoni'ma tavreno ama mopafima eme tantegetama mani'nonteti'ma eno meninte'ma eana, tamagrama nehzaza huta tamagri Anumzantera monora hunenteta, Kresramana vunentonanki, tatkrenketa tamaza huta mono nona kimaneno. 3 Hianagi Zerubabeli'ene Jeshua'ene Israeli naganofite'ma ugota hu'naza kva vahe'mo'zanena amanage hu'za zamasami'naze, tagri Ra Anumzamofo mono nona taza huta onkigahaze. Pesia kini ne' Sairusi'ma hurante'nea kante amage anteta, Ra Anumzana Israeli vahe'mota Anumzamofo mono nona tagrake'za kigahune. 4 Hagi anagema hazage'za ana mopafima ko'ma mani'naza vahe'mo'za, Juda vahera zamarimpa eri haviza hu naneke nehu'za, mono no onkisazegu zamazeri koro hu naneke agafa hu'za hu'naze. 5 Ana nehu'za Pesia kini ne' Sairusi'ma kinima manino egeno, Dariusi'ma agri noma erino kinima efore'ma hia knare'ma ege'za, Juda vahera antahintahi zami'za erizazmia eri savri hanazegu, Pesia kamani eri'za vahera masave hu kazigati zago zamiza zamavare'naze. 6 Hagi Ahasuerusi'ma agafa huno kinima mania knafina, ha' vahe'zamimo'za Judama nemaniza vahe'ene Jerusalema nemaniza vahekura mago havige avonkre'za kini ne' Ahasuerusina ami'naze. 7 Hanki

henka Pesia kini ne' Artserksisi'ma kinima mania knafina, Bislamu'ma Mitredati'ma Tabeli'ene, zamagranema magokama eri'zama eneriza naga'enenki hu'za, kini ne' Artserksisina mago avonkremi'naze. Ana avoma kre'nazana Aramu zamagerupi kre'nage'za, hamprima amiza vahe'mo'za, Pesia vahe'mokizmi zamagerupi rekrahe humi'naze. **8** Hagi ana mopama ugagota huno kegavama hu'nea gavana ne' Rehumu'ene avoma kre eri'zama eneria ne' Simsaikea Jerusalema nemaniza vahe'ma keagama huzmante avona amanage huke kre atrakeno Pesia kini ne' Artserksisintega vu'ne. **9** Nagra gavana kva ne' Rehumu'nane, avoma kre eri'zama eneria ne' Simsai'ene, kema refkohu vahe'ene mago'a kagri eri'za vahe'ma tagranema eri'zama eneriza vahe'ene, Ereki vahe'ma Babiloni mopafima nemaniza vahe'ene, Elamu vahe'ma Susa ran kumate'ma nemaniza vahe'ene, **10** ko'ma hanavenentake kini ne' Asurbanipali'ma mago'a vahe'ma zamavareno Sameria ran kumapima eme zamantege'zama nemaniza vahe'ene, Yufretisi timofo kantu kazigama nemaniza vahe'mo'zane, ama avona kre atronkeno kagritega nevie. **11** Hanki anama kremi'naza avona amanage hu'za kremi'naze, Kini ne' Artserksisiga kagri eri'zama eneruna vahe'ma Yufretisi timofo kantu kazigama nemanuna vahe'mota musenkea atrenegantone. **12** Kinimoka amana nanekea antahio, Juda vahe'ma kagri kumatmimpima mani'nareti'ma atre'za aza vahe'mo'za ko'ma Jerusalemi kumapima mani'ne'za kema nontahi'za, havi z mavu'avazama hu'naza vahe'mo'za e'za Jerusalemi ran kumapina nona eme ki'naze. Noma azeri oti'za tra'ama kivagama nere'za, ku'ma kegina hago huvagare'za nehaze. **13** E'ina hu'negu kinimoka amagea antahio, ama ana vahe'mo'za Jerusalemi ran kuma'ma keginama

huvgaresu'za takisi zagoa onkamigahaze. Ana hanageno'a zagoma nentana nompina zagoa omnena zagogura atupa hugahane. **14** Kagrama maka zampima tazama nehana zanku tagesa nentahita, vahe'mo'zama kagri'ma kagefenkamima atre'zankura tavenosigeta ana kazigati kinimoka amana nanekea negasamune. **15** Kafahe'za ko'ma tro hu'naza zama krente'naza avontafepima kesanana, Jerusalema nemaniza vahe'mo'za kea ontahi vahe mani'neza, kini vahera ha renezmantazage'za, e'i ana zamavuzmava zanku kumazmia eme eri havizantfa hageno vahera omanitfa hu'naza kuma me'ne. **16** E'ina hu'negu kinimoka ama'na nanekea negasamune, zamagrama Jerusalemi ran kuma'ma eriso'ema nehu'za, kuma keginama huvgama resnagenka, Yufretisi ran timofo kantu kazigama me'nea kumatmina mago'ene kegava osugahane. **17** Hanki kinimo'ma ana avoma keteno'a, amanage huno nona'a avona kre atre'ne. Kavana ne' Rehumugane avontafe'ma kre eri'zama eneria ne' Simsaigne Sameriamma mani'ne'za eri'zama zamazama nehaza vahe'ene, Yufretisi rantimofo kantu kazigama nemaniza vahera musenke atreramantoe. **18** Hanki tamagrama kre atre'naza avona nagri navure hamprite'za rekrahe hazage'na antahi'noe. **19** Anama hute'na eri'za vahe huge'za, korapa'ma fore'ma hu'nea zama krente'naza avontafepima hake'zama ke'nazana, ko'ma maniza enazaregatira kini vahe'mofo kema ontahino zamagorgama omani zamavu'zmava zamo'a meno e'nea vahe mani'naze. Hankino meninena tamagerfa huno havi vaheke ana kumapina avite'naze. **20** Hanki korapara hankave kini vahe'mo'za Jerusalemi kumara kegava nehu'za, Yufretisi ran timofo kantu kazigama me'nea kumatmina maka kva huzmante'nage'za, ruzante ruzante takisi zagoa zami'naze. **21** E'ina hu'negu ana

vahera hanavetita zamasaminke'za Jerusalemi rankuma'ma eri
oti'zama negi'za zana atre'za amne mani'nesage'na, nagrake
hu izo huge, i'o hu'na anazantera hugahue. 22 Hanki tamarga
ame huta vutma ome ke hinke'za ana eri'zana e'ori atreho.
Na'ankure tamagrama anama osnage'zama, zamagrama ome
knare'ma hanageta tagra kegava huzmantegara osugahune.
23 Hanki kini ne' Artserksisi'ma krema atre'nea avona eri'za
vu'za, gavana ne' Rehumune, avontafe kre eri'zama eneria ne'
Simsainte'ene, magoka eri'zama eneriza vahete'ene ana avona
ome hamprizami'naze. Anama hazage'za ha'zana eri'ne'za ame
hu'za Jerusalemi vu'za Juda vahemota nona onkita atreho hu'za
hanaveti'za ome huzmante'naze. 24 Anante Juda vahe'mo'za Ra
Anumzamofo mono noma Jerusalema negiza eri'zana e'ori'za
atrageno me'no eno, Pesia kini ne' Dariusi'ma kinima manino
egeno nampa 2ma hia kafure ehanati'ne.

5 Hagi ana knafina kasnampa netre Hagai'ene Ido nemofo
Zekaraiakea Israeli vahe Anumzamofo agifi kasnampa
kea Jerusalemi vahete'ene Juda vahetera huama huke
zamasami'na'e. 2 Hagi ana ke'ma hutake'za, Sealtiel i nemofo
Zerubabeli'ene Jozadaki nemofo Jeshuakea otike Jerusalemi
kumate'ma Anumzamofo mono noma eme atre'naza eri'zana
ete eri agafa huke enerike'za, Anumzamofo kasnampa
vahe'mo'zanena zanaza hake'za ana eri'zana eri'haze. 3
Hanki anama nehazage'za, Yufretisi rantimofo kantu kazigama
me'hea kuma'ma kegavama hu'hea gavana ne' Tetanai'ene,
eri'za ne'a Setar Bozenai'ene zanagranema eriza'ma eneriza
vahe'mo'zanena Israeli vahete Jerusalemi vu'za amanage
hu'naze, iza huramantegeta amanage mono nona eri ante fatgo
hutama negize? 4 Anage nehu'za mago'ene amanage hu'za

zamantahige'naze, Iza'za ama mono nom a ki eri'zana enerizafi
zamagi'a tasamiho? 5 Hianagi zamagri Anumzamo'a avunteno
Juda ranra vahera kegava huzmante'ne. Ana hige'za Pesiati'ma
e'nea kva ne'ene eri'za vahe'amo'za, Juda nagara eri'za
zamia asevazi ozmantage'za eri'za nevu'za, Tatenai'ma avoma
kremisigenoma kini ne' Dariusi'ma, ana avonte'ma kenonama
hanigu avega ante'naze. 6 Hanki Yufretisi ran timofo kantu
kazigama me'nea kumama kegavama hu'nea gavana ne'
Tatenai'ene eri'za ne'a Setar Bozenai'ene zanagranema eri'zama
magokama eneriza, kini ne' Dariusina amanage hu'za avona
kre'za atrente'naze. 7 Ana avoma kremi'naza avomo'a amanahu
hu'ne. Kini ne' Dariusiga musenke atregantonanki krimpa
fru'ne manigahane. 8 Kini ne'mokama menima kasamisunana,
tagra Juda mopare vuta ome konana, Ra Anumzamofo mono
nona negizageta ke'none. Ana mono nona tusinasi have taga
hu'za negi'za, nom a vazisgama hania zana zafareti kitagi'za
asoparega nona azeri oti'naze. Mika vahe'mo'za kva hu'ne'za
ana eri'zana hankaveti'za enerizageno, eri'zamo'a ame huno
nevie. 9 Anante amanage huta ranra vahera zamantahige'none.
Iza hu' izoa huramantegetma ama mono nona ete erinte fatgo
huta negize? 10 Ana nehuta avompima zamagima kreta kagri'ma
kasamisnunkura, vugotama hu'nage'zama eri'zama eneriza
vah e zamajigu zamantahige'none. 11 Anagema nehunke'za
amanage hu'za tasami'naze, Anumzana monane mohanem a
tro'ma huno'ma kegavama hu'nea Anumzamofo eri'za vah tagra
mani'nonankita, korapara Israeli vahe'mota hankavenentake
kini ne'mo, ama mono nona ki'nea no, ha' vahetimo'za eme
eri haviza hu'naza no, ete azeri otita negune, 12 na'ankure
Monafima mani'nea Anumzamofona tagehe'za rimpah e avu'avaza

hazageno, Kaldiati ne' Babiloni kini ne' Nebukatnesana atregeno
eno Anumzamofo mono nona eme eri haviza nehuno, ana
maka vahera zamavareno Babiloni vuno kina ome huzmante'ne.

13 Hianagi Babiloni kini ne' Sairusi'ma agafa huno kinima
mania kafufina, kini ne' Sairusi'a mago huvempage huno, Ra
Anumzamofo mono nona ete kihonu hu'ne. **14** Anage nehuno
ko'ma Nebukatnesa'ma Jerusalemi kumateti'ma Anumzamofo
mono nompinti golireti'ene silvareti'ma tro'ma hu'naza zantamima
me'neana erino Babiloni vuno, havi anumza'amofo mono
nompima ome ante'nea zantamina, kini ne' Sairusi'a erino,
Sesbasari'e nehaza ne' Juda mopare gavana mani'nogu kini ne'
Sairusi'a agrama huhamparinte'nea ne' ana zantamina nemino,
15 amanage huno asami'ne, vunka Jerusalemi ra mono nompi
amana zantamina ome nentenka, Anumzamofo mono noma
ko'ma me'nere ete anante azeri otinka kio huno hunte'ne. **16** Ana
hu'negu Sesbasari'a Jerusalemi eno ama Anumzamofo mono
noma ki tra'a ki'ne. Hianagi ana knareti'ma eno ama knare'ma
egeta, ana nona ki vava hu'nonanagi, ki vagaore'none huza
tasami'naze. **17** Juda vahe'mo'za e'inahu ke hazagu, Babiloni
vahe'mo'zama fenozama nentaza nompima me'enigura, kini
ne'moka eri'za vaheka'a huzmante'snanke'za, ko'ma tro'ma
hu'naza zantamimofo agenkema krente'naza avontafera hake'za,
kini ne' Sairusi'ma Ra Anumzamofo mono noma Jerusalema ete
kihoma huno huzmante'nesia kegura, Juda vahe'mo'za tamage
hazafi hake'za eri fore hiho. Anama hutesanagenka, ana zankura
na'ane huta huzmantegahumpi, kini ne'moka tasamio.

6 Hanki anante kini ne' Dariusi'ma ana avoma keteno'a, eri'za
vahe'a huzmanteno, Babiloni vuta marerisa fenozama nentaza
nompi, Sairusi'ma hu'nea ke'ma krente'nesaza avontafuku

ome hakeho hige'za vu'naze. 2 Hagi ana avontafera Babiloni
kumatera onke'naze. Hianagi Midia kaziga Ekbatana ran
kumate mago avontafepi ana nanekea me'nege'za ome hake'za
eri fore hute'za kazana, ana avontafepina amanahu naneke
me'ne. 3 Kini ne' Sairusi'ma eri agafa huno kinima mania
kafufina, Ra Anumzamofo mono nona ete Jerusalemi kigahaze
huno kini ne' Sairusi'a huvempa kea hu'ne. Ana nehu'za ana
mono nompina, tevefi kre fananehu ofane, mago'a ofanena
hugahaze. Hagi kotazana noma retrure tratamina, have tagahu'za
asentegahaze. Ana mono nomofona soparega mareri'amo'a
27ni'a mita hina, asoparega zaza'amo'a 27ni'a mita hugahie.
4 Hagi asopa noma azeri otisaza zana, tusinasi havea taga
hu'za 3'afi erinte agofetu agofetu hu'za erinte fatgo hu'za
mareneri'za, ana agofetura zafa erintetere hu'za mareri'naze.
Ana mono nonte maka'zama mizaneseta eri'za vahe'ma mizama
sezmantesazana, kini ne'mofo nompima zagoma nentafinti eritma
mizana sezmantegahaze. 5 Ana nehu'za Anumzamofo nompima
eri'zama eri zantamima silvareti'ene golireti'enema tro'ma hu'naza
zantamima Jerusalemima Anumzamofo mono nompinti'ma
Nebukatnesa'ma erino Babilonima vu'nea zantamina ete eri'za
Jerusalemi vu'za, Anumzamofo mono nompi ko'ma me'nere
ome antegahaze. 6 E'ina hu'negu Yufretisi rantimofo kantu
zage fre kazigama kegavama hu'nana gavana ne' Tatenaigane,
Setar Bozenaigane, eri'zama tanaza hu'za eneriza vahe'mo'zane
mago'zana huo zmanteta zamatreke'za, Ra Anumzamofo
mono nona kih. 7 Hagi Juda vahe'mo'zama Anumzamofo
mono noma negisnagetma mago'zana hutma eri'zana asevazi
ozmantetma, zamatreke'za Juda mopare gavana ne'ene,
Juda kva vahe'mo'zanena zamagra'a Anumzamofo mono

noma ko'ma me'nea marurera ete erioti'za kihō. 8 E'ina
hu'negu mago'ene huvempa hu'na tamasamisuana, Juda kva
vahera zamazahinke'za ana eri'zana enerisageta, Yufretisi
rantimofo zage fre kazigama me'nea kumatamimpinti'ma,
takisi zagoma zogita kinimofo nompima erintesaza takisi
zagoreti, Ra Anumzamofo mono noma kisaza zantera mizase'za
neginkeno eri'zamo'a vino. 9 Hanki monafinkama mani'nea Ra
Anumzamofoma, Jerusalemima mani'naza pristi vahe'mo'zama
tevefi kre fanane hu' ofama hunte'zanku'ma hanagetma, ve agaho
bulimakaono rama sipisipi afuro, ve anenta sipisipi afura avre
nezamitma, witifi, hagegupi, wainigupi, tine masave nazanku'ma
hanagetma, kema hanaza avamente maka zupa zamiho. 10 Ana
nehinke'za, monafinkama mani'nea Ra Anumzamofona avesisia
ofa nehu'za, Ra Anumzamofontega nunamuna hanageno,
nagri'ene ne' mofavre nagani'a kegava huranteno. 11 Hanki
mago'enema hankave nanekema hanuana, mago vahe'mo'ma
ama nanekema amage ontésiana, ana vahe'mofo noma'areti
mago zafa avazu hu'za antregona hute'za, avufgafi resageno
frigahie. Ana nehu'za ana ne'mofo nona eri taganavaziza magopi
erintesageno moriri huno marerigahie. 12 Hanki Anumzamo
Agra'a Jerusalemi kumakura huhamprino Nagri nagimoke
me'nesige'za eza monora hunantegahazema huno'ma hu'nea
kumakino, mago kinimo'o mago vahe'mo'ma nagri ke'ma eri
atreve, azana erisga huno Jerusalemima me'nea mono nona
eri havizana osugahie. Nagra Dairusi'na ama huvempa kea
nehuanki ama anankea avariri fatgo hiho. 13 Hanki Yufretisi
rantimofo kantu kazigama me'nea kuma'ma kvama hu'nea
ne' Tetanai'ene eri'za ne'a Setar Bozenai'ene zanagranema
magokama eri'zama eneriza vahe'mo'zanena, kini ne' Dariusi'ma

huvempama huno kre'nea avoma hampari'za kete'za, avariri
fatgo hu'naze. **14** Hanki Juda kva vahe'mo'za Ra Anumzamofo
mono no eri'zana knare hu'za eri'za vu'naze. Ana nehazageke
tare kasnampa netre'na Hagai'ene Ido ne'mofo Zekaraiakea
knare naneke zanasamike zamazeri hankave netike'za, eri'zana
hankaveti'za eri'naze. Ana hume nevu'za Israeli vahe'mokizmi Ra
Anumzamo'ma hu'nea kante amagenente'za, Pesia kini vahezaga
Sairusi'ma, Dariusi'ma, Artaseksiski hu'zama hu'nazankea amage
ante'za ana mono nona kivaga re'naze. **15** Hanki Dariusi'ma
kinima manino egeno 6sima hia kafumofona, Adarie nehaza
ikamofona 3zupa, ana mono nona kivaga re'naze. **16** Ana hute'za
maka Israeli vahe'ma, pristi vahe'ma, Livae naga'ene mago'a
kinafinti'ma e'naza Israeli vahe'mo'zanena musenkase nehu'za,
Anumzamofo mono nona nunamu hu'za erinte ruotge hu'naze.
17 Hanki Ra Anumzamofo mono noma musenkase nehu'za
nunamuma hu'za renagi'za erinte ruotge'ma haza zupa, 100'a
ve bulimakaogi, 200'a rama sipisipi afu'ene, 400'a ve sipisipi
anentatami avre'za ana maka Ra Anumzamofona ofa hunte'naze.
Ana nehu'za Israeli naganofite mago meme huhamprintetere
hu'za, 12fu'a ve meme afu avre'za mago mago naga nofi'mofo
kumi'ma eri atre ofa hu'naze. **18** Hanki ana nehu'za pristi naga'ene
Livae nagara huhampri zmante'naza knare'ma, Ra Anumzamofo
mono nompi Jerusalema eri'zama eriterema hanagu Moses'e'ma
krente'nea avontafepima me'nea kante amage ante'za huhampri
zamante'naze. (Litikitak-Pristi Eri'zane 8:1-36, Exo-Utirami
29:1-37). **19** Hanki Babilonima kina hu'za mani'naza vahe'ma
enaza vahe'mo'za, Ra Anumzamo'ma zamavareno atirami'nea
(pasova) knagu antahimi'za, ana maka vahe'mo'za ese ikamofona
14ni zupa, ne'zana nene'za musenkasea hu'naze. (Ekso-

Utiramine 12:1-28) 20 Hagi pristi vahe'mo'zane Livae naga'mo'za, Ra Anumzamofo avure'ma agruma hu' avu'avaza tro hu'za zamazeri agru hu'naze. Anama hute'za Livae naga'mo'za, Ra Anumzamo'ma ozmahe'ma zamagtere'nea knare'ma, ahe sipisipi afura ahe'za, zamagrare'ene pristi nagate'ene, ana maka vahe'ma Babiloni kinafinti'ma e'naza vahete'enena ofa hu'naze. 21 Hanki ana maka Israeli vahe'ma kinafinti'ma e'naza vahe'mo'za, anama ofama haza afura nevagare'naze. Ana nehazage'za meg'i'a vahe'ma ana mopafima mani'naza vahe'mo'za, agru osu tavu tva'ma nehuna zana netreta, Ra Anumzana Israeli vahe'mokizmi Anumzama amage'ma antesunema haza vahe'mo'zanena, ofama haza afu'mofo ame'a ne'naze. 22 Hanki Israeli vahe'mo'za 7ni'a zagemofo agu'afina zo-ore bretima nenaza knagura tusi'a musenkase hu'naze. Na'ankure Ra Anumzamo'ma Siria kini ne'mofo antahintahima eri rukrahe higeno, zamaza hige'za Israeli vahe'mo'za Ra Anumzana zamagri Anumzamofo mono noma ete ki'naza zanku tusi musenkase hu'naze.

7 Hanki ama ana zantamima fore hutegeno henka mago'a kna evutegeno, Artserksisi'ma Pesia kinima mani'nea knafina, Ezra'a Babilonia atreno Jerusalemia mareri'ne. Ezra nef'a'a Seraia'e. Seraia nef'a'a Azaria'e, Azaria nef'a'a Hilkia'e. 2 Hanki Hilkia nef'a'a Salumu'e, Salumu nef'a'a Zadoku'e, Zadoku nef'a'a Ahitubu'e. 3 Hagi Ahitubu nef'a'a Amaria'e, Amaria nef'a'a Azaria'e, Azaria nef'a'a Meraioti'e, 4 Meraioti nef'a'a Zeraia'e, Zeraia nef'a'a Uzi'e, Uzi nef'a'a Buki'e, 5 Buki nef'a'a Abisua'e, Abisua nef'a'a Finiasi'e, Finiasi nef'a'a Eleazari'e, Eleazari nef'a'a ugagota pristi ne' Aroni mani'ne. 6 Hagi Ra Anumzana Israeli vahe'mokizmi Ra Anumzamo'ma Mosese'ma amigeno Israeli vahe'ma zami'nea kasegea Ezra'a antahi ankere'neno, rempi

hunezamia nekino, Babilonia atreno Jerusalemi mareri'ne.
Na'ankure Ra Anumzamo'a agrane mani'negeno'e. 7 Hanki kini
ne' Artaserksisi'ma kinima manino egeno 7nima hia kafufina,
Ezra'ene mago'a Israeli vahe'ene, pristi vahe'ene Livae naga'ene,
zagame'ma nehaza vahe'ene, ra mono no kafante'ma kvahu
vahe'ene, ra mono nompi eri'za vahe'mo'zanena Ezra'ene
Babilonia atre'za Jerusalemi mareri'haze. 8 Hanki Artaserksisi'ma
kinima mani'no egeno 7nima hia kafumofona 5fuma hia
ikantera Ezra'a Jerusalemia ehanati'ne. 9 Ezra'ma Babiloni
kuma'ma atre'neana, ese ikamofona ese zupa atreno, Jerusalemi
kumatera 5fu ikamofona ese zupa ehanati'ne. Na'ankure
Ra Anumzamo'a agrane mani'neno knare hunte'negu huno
anara hu'ne. 10 Ezra'a maka knafina agu'areti huno Ra
Anumzamofona kasegea rempi huno nentahino, ana kasegea
agu'areti huno amage ante'ne. Ana nehuno Israeli vahera
ana kasegene tra kenena rempi huzami'ne. 11 Hagi Israeli
vahe Ra Anumzamofo kasegene tra kenena, Ezra'a pristi ne'
mani'neno, Israeli vahera rempi hunezamia ne' mani'neankino,
kini ne' Artaseksisima huvempama huno mago avoma kreno
Ezrama ami'nea avomo'a amanage hu'ne. 12 Nagra hakare'a
kuma'ma kvama hu'noa kini ne' Artaserksisi'na ama avona kre'na,
pristi ne' Ezraga Anumzamofo kasegema antahini hu'nenka,
monafima mani'nea Ra Anumzamofo kasegema rempima
hu'nezamina ne'moka kre negami'na, musenke atregantoe. 13
Nagra menina huvempa naneke huankino, nagrama kvama
hu'noa Israeli vahepi, pristi vahepi, Livae naga'ma mani'nezama
kagranema Jerusalemi vunaku'ma hanamo'za, amne vugahaze
huzmantoe. 14 Hanki nagra kini ne'mo'nane antahintahima
nenamiza 7ni'a vahe'mo'zane, kagrira hu izo hugantonankinka

amne vunka Jerusalemi kumate'ene Juda mopare'ma mani'naza
vahe'mo'zanena Ra Anumzanka'amofo kasege avontafe'ma
kzampima eri'nana kasegea, amagera nentazafi ome kegahane.

15 Hanki nagra kini ne'mo'nane antahintahima nemamiza
vahe'mo'zanena tavesite musezana silvane golinena Israeli
vahe'motma Ra Anumzamofona amunanki, erinka vunka
Jerusalemima Agrama nemania mono nompi ome anto. **16** Hanki
Babiloni kumatmimpinti'ma zogj'nana silvane golinena ana zanke
hunka erinka vuo. Ana nehunka Babiloni mopafima mani'naza
Israeli vahe'ene, pristi vahe'mo'zama, Ra Anumzazmimofo mono
noma Jerusalemima me'nefima, ofama huogu'ma zamavesite
kami'naza ofanena eri'enka vuo. **17** Hagi ana zagoa kvahu
so'e hu'enka, Jerusalema kagri Ra Anumzamofo mono
nompima me'nea kresramna vu itare'ma kresramnama vanana
zantamina, ve bulimakaonki, sipisipi afuki, ve anenta sipisipi
afuki hunka miza nesenka, ofama hu'zanena witigi waini
tinki hunka ana zagoretira mizaso. **18** Hanki ana zantamima
miza setenankeno'ma mago'ama mesia silvane golinena Ra
Anumzamofo avesi avaririta knare'ma hania zana, kagrane
kafuhe'zanena tamagri Ra Anumzamofona huntaho. **19** Hanki
Ra Anumzamofo mono nompima eri'zama erisia zantamima
kami'naza zana, erinka Anumzamofo mono nompi Jerusalemi
omento. **20** Hanki anama nehunkama, Anumzankamofo mono
nompima ante'zanku'ma mago'a hanunka, kinimo'na zagoma
nentaza nompinti, zagoa erinka atupa'ma hanana zana miza
hugahane. **21** Hanki nagra kini ne' Artaserksisi'na menina
huvempa hu'na huanki Yufretisi rantimofo kantu kazigama
me'nea kumatmimpima mani'netma zagoma kegavama nehaza
vahera amange hu'na neramasamue, pristi ne' Ezra'a monafinka

mani'nea Ra Anumzamofo kasege'a rempi hunezamia ne'
mani'neanki, Anumzamofo mono noma kinaku'ma mago'a
zanku'ma tamantahigesigeta, ame hutma ana zana amiho. **22**
Hianagi ana zantamima amisnazana ama avamena agateretma
omiho. Silva 3400'a kiloa agateretma omiho. Hagi witia 13 tausen
500'a kiloa (500 kura) agateretma omiho, ana nehutma waini
tina 2000ni'a lita agateretma omiho, olivi masavena 2000ni'a lita
agateretma omiho. Hagi hagegura nama'agu avesigahie anama'a
amigahaze. **23** Hanki monafinkama mani'nea Anumzamo'ma
mono noma'ama ki'zanku'ma huramante'nia zana kegava
hunetma avariri fatgo hiho. E'ina'ma osnageno'a Anumzamo'a
nagri kini ne'monane, ne' mofavre naga'niama henkama kinima
fore'ma hanaza naga'enena arimpa aherantegahie. **24** Hagi
mago'enema tamasamuana antahihi, Pristi vaheteti'ene Livae
nagateti'ene zagame'ma hu' vaheteti'ene, mono nonkafante'ma
kvama nehaza vaheteti'ene, mono nompima eri'zama eneriza
vaheteti'ene, mago'a Anumzamofo mono nompima eri'zama
eneriza vaheteti'enena ruzahu ruzahu takisi zagoa e'oriho. **25**
Hanki Ezraga antahio, Anumzankamo'a tusi'a knare antahi'zana
kami'nea antahizanteti, Yufretisi rantimofo kantu kazigama
me'nea kumatmimpima keagama refko hu kva vahera zamazeri
otinke'za mani'ne'za, ana vahera kva huzmanteho. Hagi mago'a
vahem'a Anumzamofo kasegema antahi so'ema osu'nesaza
vahem'a mani'nesazana kagra rempi huzamio. **26** Hanki mago
vahem'o'ma kagri Anumzamofo kasegema amage ontege,
kini ne' Artaserksisi'na nagri kasegenema amage'ma ontisia
vahera tamagerfa hu'za ahe frisageno frige, ahenatisageno ru
moparega vuge, fenozama'a erige, kina huntege hugahaze.
27 Hanki nagra Ezra'na Ra Anumzana tagehe'mokizmi Ra

Anumzamofona muse hunte'ha agj'a ahentesga nehue. Na'ankure
Ra Anumzamo'a kini ne'mofona antahintahi'a azeri otigeno
Jerusalemia Ra Anumzamofo mono nona eri avasase nehie. **28**
Hanki Ra Anumzamo'a asunku hunanteno, kini ne'ene agri'ma
antahintahima nemiza vahe'ene, hankave eri'za vahe'amokizmia
antahintahi zamige'za nagrira nazeri so'e nehaze. E'ina hu'negu
Ra Anumzana tagri Anumzamo'a nagrane mani'neno hankavea
nenamianki'na, Israeli vahepima ugotama hu'naza vahe'a amne
zamavare'nugeta Jerusalemia marerigahune.

8 Hanki Artaserksisi'ma kinima mani'nea knafima, mago mago
naganofite'ma ugotama hu'naza vahe'ma, Babiloniti'ma atre'za
Jerusalema nagranema vu'naza vahe'mokizmi zamagia amanahu
hu'ne, **2** Finiasi nagapintira Gesomuki, Itamari nagapintira
Danieliki, Deviti nagapintira Hatusiki, **3** Parosi nagapintira
Sekenaia'ene 150'a vahe agranema vu'naza vahe'mokizmi
zamagi me'ne. Ana nehu'za zamagehe'i zamajima krente'naza
avontafe'ene eri'he'za vu'haze. **4** Hanki Pahatmoapu nagapintira,
Serahia mofavre Elioenai'ene 200'a vahe agranena vu'naze.
5 Hanki Zatu nagapintira Jahazieli nemofo Sekania'ene,
300'a venene agranena vu'naze. **6** Hanki Adini nagapintira
Jonatani nemofo Ebet'ene, 50'a venene agranena vu'naze.
7 Hanki Elamu nagapintira Atalia nemofo Jesaia'ene, 70'a
venene agranena vu'haze. **8** Hanki Sefatia naga'pintira Maikeli
nemofo Zebadaia'ene, 80'a venene agranena vu'haze. **9**
Hanki Joapu naga'pintira Jehieli nemofo Obadia'ene, 218ni'a
venene agranena vu'naze. **10** Hanki Bani nagapintira Josifia
nemofo Selomiti'ene, 160'a venene agranena vu'haze. **11**
Hanki Bebai naga'pintira Bebai nemofo Zekaraia'ene, 28'a
venene agranena vu'naze. **12** Hanki Azagadi naga'pintira

Hakatani nemofo Johanani'ene, 110ni'a venene agranena vu'naze. **13** Hanki Adonikamu naga'pintima henkama fore'ma hu'naza nehzavea, Elifeleti'ma, Jeuelima, Semaiaiki hu'za 60'a venenene vu'naze. **14** Hanki Bigvai naga'pintira Utai'ene Zakurike 70'a venene vu'naze. **15** Hanki Ahava kumapima enevia rantimofo ankenare 3'a zage knafi kumara ementeta manineta nagra Ezra'na ana maka vahera zamavare tru nehu'na vaher'ene pristi vaher'ene rezaganena koana, anampina Livae nagapintira magore hu'na onke'noe. **16** E'ina hu'negu 9ni'a kva vaher'ene ke'ma huge'za e'naza vaher'mokizmi zamagi'a amanahu hu'ne, Eliezeriki Arieliki, Simaiaki, Elnataniki, Jaripiki mago ru Elnataniki, Nataniki Zekaraiaki, Mesulamu'ene, knare antahi'zama erina'a netrena zanagi'a Joiaripi'ene Elnataninena ke huge'za e'naze. **17** Ana hute'na Livae vahete ugagota kva ne' Idontega nagra huzmantoge'za Kasefia kumate vu'za, agri'ene naga'ane ra mono nompima eri'zama e'neriza vaher'ene ome zamasamisage'za, Jerusalemima Ra Anumzamofo mono nompima eri'zama erisaza vahera huzmantesige'za esaze hu'na huzmantehoe. **18** Ra Anumzamo'a so'e avu'ava huranteno, maka eri'zama eri antahintahima eri'nea ne' Serebia atrageno e'ne. Hanki Serebia'a Mali negehokino Livae ne' Israeli nagapinti ne' mani'neankino, agranema e'nazana, ne' mofavre naga'ane afu aganahe'za ana makara 18ni'a venene e'naze. **19** Ana zanke hu'za Merari nagapintira Hasabiane Jeshaiane huznante'naze. Ana hazageke mofavre naga'zanine, naga'zani fatgone e'nazana 20'a venene zanagranena e'naze. **20** Hagi mono nompima eri'zama e'neriza vahera, 220'a vaher huzmanteg'e'za e'naze. Ana vahera korapa'ma zamagehe'ima kini ne' Deviti'ene ugota eri'za vaher'amo'za Livae naga'ma Ra Anumzamofo mono nompi eri'za

zamaza hihoma hu'zama, huhamprima zamante'naza nagapinti
vahe mani'nazankino, zamagi'a mago avontafepi me'ne. **21**
Hanki Ahava tinnenare mani'neta amanage hu'na vea kevua
zamasami'noe, Ne'zana a'o huta Ra Anumzamofo avurera tavufga
anteramita, antahigesanunkeno, tagri'ene mofavre nagatine,
feno zantinena taza huno kegava hurante'nesigeta Jerusalemia
vugahune. **22** Hanki nagrama kini ne'ma antahigesugeno hosi
agumpima mani'za nevaza sondia vahe'ene mopafima vu sondia
vahe'ma huzmantesige'za kvama hurante'za vu'zankura nagaze
hu'ne. Na'ankure kini ne'enema mani'nena amanage hu'na
asami'noe, Iza'o tagri Ra Anumzamofoma amage'ma antesia
vahera, ha'ma hurante'naku'ma hanaza vahera Agra'a kegava
hurantegahie hu'na asami'noe. Hianagi Agri'ma amefima humisia
vahera, Agra arimpa ahenezmanteno ha'rezmanegahie hu'na
hu'noe. **23** Ana hu'negu ne'zana a'o huta Ra Anumzantimo'ma
kegavama huranteno'ma vanigu hanavetita nunamuna hanune
nehuta, nunamuna huta antahigonkeno, Ra Anumzamo'a
nunamuntia antahino kegava hurante'ne. **24** Anantera pristi
ne' Serebia nagapinti'ene pristi ne' Hasabia nagapintira 12fu'a
ugagota pristi vahe huhampri nezmante'na, pristi eri'zama eri'naza
venenea 10ni'a huhampri zmante'noe. **25** Hanki kini ne'mo'ene
antahintahima nemiza vahe'ene ugota eri'za vahe'ane Israeli
vahe'mo'zama tagri Ra Anumzamofo mono nompi zantamine
hu'zama ofama tami'naza zantamina, nagra Ezra'na eri'na 12fu'a
ugagota pristi vahe'ma huhampri zamante'noa vahe kegava hiho
hu'na refko hu'na silvane golinena zami'noe. **26** Ana'ma hu'na
zami'noa zantamimofo kna'amo'a amanahu hu'ne, silvamofo
kna'amo'a 22 tani higeno, golimofo kna'amo'a 3tausen 400'a
kilogremi higeno, silvareti'ma tro'ma hu'nea zantamina 100'a

zuompagino, mago mago zuompamofo kna'amo'a 34 kilogremi hutere hu'ne. **27** Hanki golireti'ma tro'ma hu'naza zuompa 20'agino, mago mago zuompamo'a 8'a kilogi 400gremi hutere hu'ne. Hanki bronsireti'ma tro'ma hu'naza zuompa taregino, miza zaniamo'a tare golire zuompama mizama nesaza avamente vu'ne. **28** Hagi anante ana pristi nagakura amanage hu'na zamasami'noe, Tamagrane ama zantaminena Ra Anumzamofo avurera ruotage hu'naze. Hagi silvane golinena, Ra Anumzana tamogra tamafahel'i Ra Anumzamofo vahe'mo'za amavesite ami'naza ofe. **29** Hanki ama ana zantamina kegava hu'neta erita vuta Jerusalemia, Israeli naga'nofite'ma ugota hu'naza vahe'ene ugagota pristi vahe'ene Livae naga'mokizmi zamavuga Ra Anumzamofo mono nompima hunaragintene'za fenozama nentazafi, ome anteta kna'a refko huta keho. **30** Hanki anante pristi vahe'mo'zane Livae naga'mo'za ana maka silvane goline mono nompima ante zuomparaminena eri'za kna'amofona refko hu'za kete'za, Ra Anumzamofo mono nompi Jerusalemi omente'naku eri'za vu'naze. **31** Hanki ese ikamofona 12fu zupa Ahava tin ankenare'ma mani'nontetira atreta Jerusalemia vu'none. Ra Anumzamo'a tagrane mani'neno, knare huno kva huranteno vigeno, ha' vahe'mo'zane kumazufa vahe'mo'za karankama nevunke'za mago'zana osu'naze. **32** Hagi Jerusalemia uhanatiteta 3'a zage knafi mani frua hu'none. **33** Hanki mani fruma huteta 4ma hia zage zupa Ra Anumzamofo mono nompi vuta, silvane goline mago'a zantamima eritama vu'nona zantamina, sigerile ome hantita kna'a refko huta negeta, pristi ne' Meremoti Uria nemofoki pristi ne' Eleazar Finiasi nemofoki, tare Livae netre Jeshua nemofo Josabati'ene Binui nemofo Noadia'ma hu'za mani'nageta ome zami'none. **34** Hagi ana maka zantamimofo

kna'amofona hampri'za erinte fatgo nehu'za sigerire erinte'za kna'a erite'za, ana maka zantamimofo kna'amofona mago avontafepi krente'naze. **35** Hagi anante kinafinti'ma Babilonima atre'zama e'naza naga'mo'za Israeli Ra Anumzamofontega tevefi kre fanane hu ofa hu'naze. Ana maka Israeli vaheteku hu'za 12fu'a ve bulimakao aheza kresramana nevu'za, ve sipisipi afura 96si'a aheza kresramna nevu'za ve anenta sipisipi afura 77ni'a ahe'za kresramna vu'naze. Ana nehu'za kumi zamima eritre ofa 12fu'a meme afutami aheza kresramna vu'naze. Hagi ama ana maka afutamina tevefi kre fanane hu ofa Ra Anumzamofontega hu'naze. **36** Hanki kini ne'mo'ma kre'nea avona eri'na, Yufretisi rantimofo kantu kazigama me'nea kumatamima kvama hu'nea Gavana ne'ene kva vahete'ene, eri'za vahetera atronkeno vuno eno hu'ne. Hagi ana avoma kete'za, tagrira tazeri so'e nehu'za, Ra Anumzamofo mono nompi eri'zanena taza hu'naze.

9 Hanki anama hutonke'za henka mago'a kva vahe'mo'za nagrite e'za amanage hu'naze, Israeli vahe'mo'zane pristi vahe'mo'zane Livae naga'mo'zanena, ko'ma ama mopafima mani'naza vahe'mo'zama hu'naza kasrino haviza hu'nea havi zamavu zamavara zamavariri'za nehaze. Ana havi zamavu zamaval'ma nehaza vahera Kenani vahe'ma, Hiti vahe'ma, Perizi vahe'ma, Jebusi vahe'ma, Amoni vahe'ma, Moapu vahe'ma, Isipi vahe'ma, Amori vahek'i hu'za mani'naze. **2** Na'ankure mago'a Israeli vahe'mo'za ana meg'i'a vahepintira a'nanea enerige'za, mofavre zamimo'za anazanke hu'za ara eri'naze. Ana nehu'za Ra Anumzamo'ma nagri vahe fatgo mani'nazema hu'neankea eri havia hu'naze. Ana kumira ugota kva vahe'mo'zane, eri'za vahe'mo'za ugota hu'za nehazage'za, vea kevumo'za zamage ante'za ana kumira hu'naze. **3** Hanki nagra Ezra'na

anankema nentahi'na kukenanine, amega nakre ku'ninena tagato
nehu'na, naseni nazoka'ene nagi nazoka'enena vararete'na,
antahintahinimo'a haviza hige'na, akohe'na mani'noe. 4 Anante
mago'a vahe'ma, Israeli vahe Ra Anumzamofo nankegu'ma
koroma hunentaza vahe'mo'za eme nagagi'naze. Zamagra Ra
Anumzamo'ma kumi'ma nehaza vahe'ma zamazeri havizama
nehia zankura koro nehu'za, Babilonima kinafinti'ma e'naza
vahe'mo'zama nehaza havi zamavu zamava nege'za, e'za
nagrama akohe'nama mani'nore eme atru hu'za mani'nageno
kinaga ofama hukna ehanati'ne. 5 Hanki kinaga ofama hu
knama ege'na, kukenanine nakre ku'ninema tagato'ma hute'na
mani'noretira ot'i'na nare'na nere'na, Anumzana Ranimofontega
nzantre'na erisga nehu'na, 6 amanage hu'na nunamuna hu'noe,
Ra Anumzanimoka nagrama kagri kavure'ma e'zankura tusi
nagaze hie. Na'ankure tagra tusi kumi hunkeno, kumitimo'a
tagatereno monafi mareri'ne. 7 Korapa tagehonteti eno meni
tagritema egeta tusi'a kumi hu'none. E'ina hu'negu Kagra
ha' vahetia zamatranke'za e'za tagri'ene kini vahetine pristi
vahetinena ha' eme hurante'za tagatere'naze. Ana nehu'za
mago'a vahera eme zamahe nefri'za mago'a vahera eme
tavre'za kina ome hurante'naze. Ana nehu'za feno zantia
eneri'za tatarazageta tagazegu nehuta mani'none. 8 Hianagi
Ra Anumzamoka menina ete kasunku hurantenka, osi'a naga
tatranketa kinafintira atreta knare kumaka'afi Jerusalemia e'none.
Ana nehunka Kagra hankave ka'areti kinafintira taza hanketa,
kora kazokazo eri'za vahe mani'nonanagi, menina fru huta knare
huta mani'none. 9 Tagra kazokzo eri'za vahe mani'nonanagi
Rana tagri Anumzamoka kamefira huorami'nane. Kagra kavesi
nerantenka, kasefa asimu tamiaza hunka, Pesia kini vahera

hanke'za tazeri so'e nehu'za, tatarazageta mono noma ko'ma havizama hu'neana ete eme kiteta, Jerusalene Juda mopafina menina so'e hunka kva hurantanketa mani'none. **10** Hianagi menina tagri Ra Anumzamoka mikazama tro'ma hurantenantera na'ane huta kasamigahune? Kagra ana maka knare zantami tro hurante'nane. Hianagi Kagri kasegea tamefi humita amagera onte'none. **11** Hagi eri'za vaheka'a kasnampa vahe'mokizmi zamagipi hvuzinka ana nanekea amange hu'nane, Amama unefreta erisantima hare'naza mopamo'a nagri navurera agru osu'ne. Na'ankure ana mopafima mani'naza vahe'mo'za havi zamavu zamava hu'za ana maka mopa eri himna vu'naza mopafi unefraze. **12** E'ina hu'negu mofo'nanetamia zamatrenke'za ana vahetera nomanisageta, ana vahepintira ne' mofavretamirera ara avre ozamaho. Ana vahe'enena mago tamarimpa hutma nomanita, mago'a zama tro'ma hunaku'ma hnageta zamaza osiho. Hagi ama ana nanekema amagema antenuta ana mopafina knare hutma mani'neta, hankavenentake vahe manigahaze. Ana hu'nesage'za henka ana mopa tamagehe'za erisanti hare'za mani vava hu'za vugahaze. **13** Hagi kagri kea amagera onteta tusi'a kumi huta hazenke hunonanagi, Ra Anumzamoka kagra ana kumitimofo nona'a tusi'a knaza tamisinagi, osi knaza neraminka, tatranketa menina ofri osia nagara mani'none. **14** Tagra na'ane huta Ra Anumzamoka kasegea ete rutagreta megi'a vahe'ma haviza huno agoterfa avu'avazama nehaza vahetera mofavre nagatia zamatre'sanunke'za vea erige, ara erige hugahaze? Tagra antahi'none anama hanunkenka'a, Kagra karimpa ahenerantenka ana maka tahe fanane hananketa magore huta omanigahune. **15** Ra Anumzana Israeli vahe Anumzamoka, kagrake fatgo kavukvazana nehane. E'ina hu'negu

ko'ma tazeri havizama nehunka menina osi'a nagara tatranketa mani'none. Tagra kumike vahe mani'nonankita, Kagri tava'ontera manigara osu'none.

10 Hanki Ezra'a Ra Anumzamofo mono nomofo avuga, avugosaregati umaseno nunamu nehuno zavira neteno Israeli vahe'mokizmi kumi'ma huama'ma nehige'za, Israeli vene'nema a'nanema ne' mofavre naga'ma hu'za tusi'a vahekerfamo'za Ezra'ma mani'nere e'za, zamagranena tusi zavi emete'naze. 2 Anante Elamu nagapinti Jehieli nemofo Sekania'a Ezrante eno amanage huno hu'ne, Tagra Anumzantimofo kea rutagreta megi'a vahepintira a'nea eri'none. Hianagi mago kankamuna me'neankita ana hazenke zama atresanunkeno'a, Ra Anumzamo'a tazeri havizana osugahie. 3 Hanki menina Ra Anumzantimofo avure mago huvempa ke huta, megi'a a'nanetine mofavre naga'zaminena huzmantenunke'za mopa zamirega vugahaze. Hanki Ezragane Anumzamofo ke'ma amage'ma nentaza vahe'mo'zanema tasamisnaza kante anteta anara hugahune. E'inahu'ma hanunana Anumzamofo kasegefima hu'nea kante amage anteta anara hugahune. 4 E'ina hu'negu Ezraga kagri eri'zanki otinka ama ana knazana eri fatgo huo. Tagra keka'a antahigamita nazanoma hanana zana tro hugahunanki, korora osunka oti hanavetinenka ana eri'za erio. 5 Anagema higeno Ezra'a otino ugota pristi vahe'ene Livae naga'ene ana maka Israeli vahe'mokizmia zamasamino, Huvempa kema hutma Sekania'ma hia kea amage antegahune hutma huvempa hiho hige'za ana hu'naze. 6 Hanki Ezra'ma Ra Anumzamofo mono nomofo avugama mani'neretira atreno vuno, Eliasipi nemofo Jehohanani'ma nemasefinka vu'ne. Anampinka ne'zane tinena a'o huno mani'neno, Israeli vahe'ma kinafintima e'naza vahe'mo'zama

hu'naza kumikura tusi zavi neteno asuzampi mani'ne. 7 Hanki anante Juda kva vahe'mo'zane eri'za vahe'mo'zanema Babiloni kinafinti'ma atre'za e'za Jerusalemi kumapine Juda kumapima emani'naza vahera, Jerusalemi kumate maka eme tru hiho, hu'za kea atre'zmante'naze. 8 Hanki iz'a'o 3'a zagemofo agu'afima omesia vahe'mofona, ranra vahe'mo'zane kva vahe'mo'zama hanaza kante ante'za, fenozama'a eri hana nehu'za, kinama hute'za e'naza Israeli naga'pintira ahenatitregahaze. 9 Hanki 3'a zagemofo agu'afi ana maka Juda naga'ene Benjamini naga'moza Jerusalemi kumate eme tru hu'naze. Ana'ma eme atru hu'nazana 9ni ikamofona 20ti zupa maka Anumzamofo mono nomofo avuga eme atru hu'za mani'nazageno, ana zupa tusi'a ko nerigeno, atru'ma hu'nafima efore'ma hanige'za antahisaza kegu'enena tusi zamahirahite'ne. 10 Hanki anante pristi ne' Ezra'a otino amanage huno zamasami'ne, Tamagra Ra Anumzamofo tra kea tamefi humita, megi'a a'nanea erita Israeli vahe'mota kna eriramize. 11 Hanki menina Ra Anumzana tamagehe'i Anumzamofonte kumitamia huama nehutma, Agri avesi'za amage anteho. Amama emani'naza mopafi vahe tvaontera omanitma afete nemanitma, megi'a a'nanema eri'nazana zamatreho. 12 Anante ana maka vahe'mo'za ranke hu'za, Kagra tamage hanankita kagrama hana nanekea amage antegahune. 13 Hianagi tusi'a koneriankitama ama vahe krerfamota magoke knafino tare knafina otita manineta ama ana kea eri fatgo hugara osu'none. Na'ankure rama'a vahe'mota megi'a a'nanea erita tusi'a kumi hu'none. 14 E'ina hu'negu kva vahetimo'za Jerusalemi mani'neza ama ana knazana taza hu'za erigahaze. Hanki kumatifima iz'a'o megi'a a'nanema eri'nesia vahe'ma mani'nesimo'a, huhampri'ma ante'nesaza knarera, kuma'afinti kva vahe'ene keagama refko'ma nehaza vahe'ene

zamavare'nenno ana zupa eno ana knazana emeri fatgo hugahie.
E'inama hanunkeno'a Anumzamo'a arimpa aheorantegahie.

15 Anage'ma hazage'za maka ana kerera mago zamarimpa hu'naze. Hianagi Asaheli nemofo Jonatani'ene Tikva nemofo Jazeiakea ana nanekerera mago zanarimpa osu'na'e. Ana nehake'za Livae nagapinti netre Mesulamu'ene Sabetaikea zanagritega eme anteke zanaza hu'na'e. **16** Hanki kva vahe'ma huhamprisage'za mani'neza ana knazana erigahaze hu'zama haza kerera, Babiloni kinafinti'ma ana maka e'naza vahe'mo'za mago zamarimpa hu'naze. Anante pristi ne' Ezra'a, Israeli naganofite'ma ugagota hutere hanaza vahera huhampri nezmanteno, avontafepi zamagi'a krente'ne. Hagi 10ni ikamofona ese knazupa agafa hu'za meg'i'a a'nanema eri'naza vahera ke hazage'za e'za ana knazana eri fatgo hu'naze. **17** Hanki meg'i'a a'nanema eri'naza ve'nenemokizmi knazana 3'a ikampi eri'za vu'za, ese ikamofona ese zupa ome vagare'naze. **18** Hanki pristi nagapinti'ma meg'i'a a'nanema eri'naza ve'nenemokizmi zamagi'a amanahu hu'ne, Jozadaki nemofo Jesuane afu'agna he'zama mani'naza nagapintira, Maseianki Elieserinki Jaribinki Gedalianki hu'za hake'za zamazeri fore hu'naze. **19** Anama hazage'za hago haviza hu'none hu'za nehu'za huvempa hu'za meg'i'a a'nanema eri'naza a'nanea nezmatre'za, mago ve sipisipi afu azeri'za kumi ofa hu'naze. **20** Hanki Imeri nagapintira Hananiki Sebadaia'e. **21** Hagi Harimi nagapintira Ma'aseiaki Ilaijaki Simaiaki Jehieliki Usia'e. **22** Hagi Pasuri nagapintira Elioenaiki Maseiaki Ismaeliki Netaneliki Jozabadiki Elasa'e. **23** Livae nagapintira Jozabadiki Simeiki Kelaiaki (mago agi'a Kelita'e) Petahiaki Judaki Eliezeri'e. **24** Hanki zagame'ma hu nagapintira Eliasibi'a agrakere. Ra Anumzamofo mono no kafante'ma kvama

nehaza nagapintira Salumuki Telemiki Uri'e. **25** Hanki mago'a
Israeli vahepinti'ma meg'i'a a'nanema eri'naza ve'nenemokizmi
zamagi'a amanahu hu'ne. Parosi nagapintira Ramiaki Iziaki
Malkijaki Mijaminiki Eleasariki magora ru Makiaki Benaia'e. **26**
Hagi Elamu nagapintira Mataniaki Zekaraiaki Jehieliki Abdiki
Jeremotiki Elaija'e. **27** Zatuni nagapintira Elioenaiki Eliasibiki
Mataniaki Jeremotiki Zabadiki Aziza'e. **28** Bebai nagapintira
Jehohananiki Hananiaki Zabaiki Atlai'e. **29** Hagi Bani nagapintira
Mesulamuki Malukiki Adaiaiki Jashubuki Sialiki Jeremoti'e. **30**
Hagi Pahat-Moapu nagapintira Adnaki Kelaliki Benaiaki Maseiaki
Mataniaki Bezaleliki Binuiki Manase'e. **31** Hagi Harimi nagapintira
Eliezeriki Isijaki Malkiaki Simaiaki Simioniki, **32** Benjaminiki
Malukiki Simaria'e. **33** Hasumu nagapintira Matenaiki Matataki
Zabadiki Elifeletiki Jeremaiaki Manaseki Sime'i'e. **34** Hagi Bani
nagapintira Madaiki Amramuki Ueliki, **35** Benaiaki Bedeiaki
Keluhiki, **36** Vaniaki Meremotiki Eliasibiki, **37** Mataniaki Matenaiki
Ja'asuki, **38** Baniki Binuiki Simeiki, **39** Silemiaki Neteniki Adaiaiki,
40 Maknadebaiki Sasaiki Saraiki, **41** Azareliki Silemiaki Simariaki,
42 Salumuki Amariaki Josefe'e. **43** Hagi Nebo nagapintira Jeieliki
Matitiaki Zabadiki Zebinaki Jadaiki Joeliki Benaia'e. **44** Ama ana
maka ve'nenemo'za meg'i'a a'nane eri'haze. Hanki ana a'nefintira
mago'amo'za mofavrea zamante'haze.

Nehemaia

1 Hanki Hakalia nemofo Nehemaia'a amanage huno naneke'a krente'ne, Pesia kini ne' Artserksisi'ma kinima manino egeno 20tima hia kafufina, Kislevie nehaza ikampina nagra Nehemaia'na hankavenentake vihu me'nea ran kumapi Susa mani'noe. **2** Hanki ana zupa mago nenufu ne' Hanani'a mago'a venene'zagane Judatira nagritega azage'na, amanage hu'na zamantahige'noe, Jiu vahe'ma Babiloni kinafinti'ma atre'za vu'naza nagara knare huza mani'zageno, Jerusalemi kuma'mo'enena knare huno me'neo hu'na zamantahigoge'za, **3** zamagra amanage hu'za nasami'naze, Babiloni kinafinti'ma atre'zama vu'naza naga'mo'za tusi'a knafi nemanize. Ana nehazage'za tva'ozamire'ma nemaniza vahe'mo'zanena huhaviza huzmantazage'za zmagazegu hu'naze. Jerusalemi rankumamofo have kegina ahe fragu vasinetre'za, kuma kegina kafaramina teve tagintazageno te fanane hu'ne. **4** Hagi anankema nentahi'na, mopare mani'na tusi zavi nete'na mago'a zage knafi ne'zana a'o hu'na mani'nena, monafi Anumzamofo avurera zavira netena nunamuna amanage hu'na hu'noe. **5** Ra Anumzana monafi Anumzamoka hankavenentake hu'nenka marerigaterenana Anumza mani'nane. Ana hu'nenka iza'o kagri'ma kavesi neganteno kagri kasegema amage'ma nentea vahera, vagaore kavesizanu navesi zamantegahue hunka huhagerafi huvempa keka'a amage antenka zamavesi nezamantana Anumza mani'nane. **6** Muse hugantoanki kavua antenka nenagenka, eri'za vahekamo'nama kagri kavure'ma Israeli vahekagu'ma, feru'ene kenage'enema nunamuma nehuana kagesa antenka antahinamio. Ana nehu'na Israeli vahe'motama kagri kavure'ma hu'nona kumiku'ene, nagra kumiku'ene, nenufa naga'mozama hu'naza kumikura kagri

kavure huama nehue. 7 Kagri kavurera kefo tavutva nehuta, havizantfa hu'none. Ana nehuta amage'ma anteho hunkama eri'za vaheka'a Mosesema ami'nana kasegene tra kekanena amagera onte'none. 8 Hianagi muse hugantoanki eri'za vaheka'a Mosesema amanahu ke'ma hunte'nana kegu kagesa antahio. Tamagra Israeli vahe'motama Nagrite'ma mani fatgoma osutma tamefi'ma hunamisage'na, tamagrira tamazeri panani hanugetma kokankoka vahe moparega vuta eta huta umani emani hugahaze. 9 Hianagi tamagrama Nagrite'ma eta kasegeni'ama amage'ma antesage'na, mopama omete emete hutegama kinama ome hu'nesaregatira tamavre'na Nagri nagima hentesga hugahazema hunama huhampri ante'noa kumate tamavre'na egahue hunka'ma hu'nana kegura kagesa antahio. 10 Hanki tagra Israeli vahera Kagri vahe mani'neta Kagri eri'za vahe mani'none. Kagra tusi'a hankaveka'areti'ene, hankavenentake kzanteti taguvazinka kinafinti tavre'nana vahe mani'none. 11 Ra Anumzamoka muse hugantoanki eri'za vahekamo'nama nunamuma huana kagesa antenka antahi nenaminka, mago'a eri'za vaheka'ama Kagri kagima ahentesgama nehaza eri'za vahe'kamozanema nehaza nunamune nentahinka, muse hugantoankinka menina eri'za vahekamo'na, waini tima tro'ma hu'nama nemua kini ne'mofona arimpa azeri otisankeno asunkura hunanteno, inazanku'ma hanua zana amne tro hanigeno knare'zantfa hino.

2 Hanki Artserksisi'ma kinima manino egeno 20tima hia kafumofona Nisani ikampina, ko'ma nehuaza hu'na kini ne'mofa waini tina tagi'na eme ami'noe. Hianagi mago'a zupama nehuazana hu'na ana zupa musena osugeno navugosamo'a evurami'ne. 2 Ana'ma higeno'a kini ne'mo'a nantahigeno, Kagra kria e'ori'nananagi na'a higeno kavugosamo'a evuneramigenka

musena nosane? Mago'a zamo higeno krimpamo'a musena
nosifi? Anagema hige'na nagra tusi koro nehu'na, 3 kini ne'mofo
ke'arera amanage hu'na kenona'a hu'noe, kini ne'moka knare
hunka za'zate kinia maninka vugahane. Nagrama musema
nosuana na'ankure, nagehe'mokizmima asezamante'haza
rankuma'mo'a tusi'a zampi havizantfa huno me'negeno, ana
kuma'mofo kafana tevemo tefanane hu'negu anara nehue. 4
Anagema hugeno'a kini nemo'a amanage huno nasami'ne,
Na'a kagrira hugantesuegu kave'nesie, hige'na anante ame
hu'na monafi Anumzamofontega nunamuna hu'noe. 5 Nehu'na
amanage hu'na kini ne'mofona antahige'noe, kagrama antahi
musema hunantesnanke'na Juda mopare mopa agafa'nire vu'na
ome kete'na, maka'zana ome eri so'e hanue. 6 Hanki kini ne'mofo
nenaro kuini a'mo'a kini nemofo tava'onte mani'negeno kini
ne'mo'a nantahigeno, nama'a kna umanitenka etema esanana
ina zupa egahane? Anage nehuno amne vugahane huno hu
izo hige'na, etema esanua kna fatgogura asami'noe. 7 Hagi
anante mago'ene kini nera amanage hu'na antahige'noe, Kini
ne'mokama antahi so'ema hunantesnunka, Yufretisi rantimofo
kantu kazigama me'nea kumatmimpima kva hu'naza vahetega
knare mago'a avona kre namisnanke'na, nevu'nama ana
kumapi gavana vahetamina ana avona ome zamisanuge'za,
nege'za mago'zana osu natresage'na Juda moperara vu'na
uhanatigahue. 8 Hanki kini ne'mofo zafa tanopare'ma kvama
hu'nea ne' Asapuna, zafama naminige'nama ra mono no
tvaonte'ma, sondia vahe'ma mani'nezama kvama hanaza
nomofo kafama tro'ma hu zafaramine kuma keginare'ma
eri'zama erisanuna zafane nagrama masesanua noma kisanuna
zafaramima namisigura, mago avon krento hu'na antahige'noe.

Hanki Ra Anumzamo'a nagrane mani'negu nazanoma kini ne'mofonku'ma antahigoa zana amne tro hunante'ne. **9** Hanki sondia vahete ugota hu'naza vahe'ene hosi afu'mofo agumpima mani'nezama ha'ma nehaza sondia vahera kini ne'mo'a mago'a huzmantege'za nagrane vu'haze. Ana higeta Yufretisi rantimofo kantu kazigama me'nea kumatmima kvama hu'naza vahera vu'na kini ne'mo'ma krenami'nea avona ome zami'noe. **10** Hianagi Bet-Horoni kumateti kamani eri'zama eneria ne' Senbalati'ene, Amoni kumateti kamani eri'za eneria ne' Tobia'enema nagrama oanke'ma nentahikea zanarinpamo'a haviza hu'ne. Na'ankure zanagrama antahi'ana Israeli vahe zamaza hunaku neaze nehuke anara hu'na'e. **11** Hanki Jerusalema uhanati'na 3'a zagegna umanite'na, **12** kenagera otina osi'a venene zamavrogeta vu'none. Hianagi Jerusalemi kuma'mofonte'ma nazano tro hugahane huno'ma Anumzamo'ma nagu'afima ante'nea zana mago vahera osami'noe. Hanki nagrake tonki afu'mofo agumpina mani'na vu'noanki, mago'a vene'nea mopafi vu'naze. **13** Hanki ana kenagera kuma keginamofona, Agupo Kafanema nehaza kafanteti atirami'na, Ra Osifave tinkerima nehzarega vute'na, Mikazama Harafi hu'zama ome netraza kafanema nehaza kafama me'nerega vu'noe. Hanki tonki afu'mofo agumpima mani'na nevu'na, Jerusalemi kuma'mofo have keginama ahefragu vazi'naza zantamine, kuma kafaramine tevemo'ma te havizama hu'nea zana keso'e hu'na vu'noe. **14** Anantetira Kampu'i Tine nehaza kafante'ene, Kini Nemofo tirure nehaza tirute uhanati'noe. Hianagi ufre kafampina have keginama fragu'ma vazirami'nea havemo'a hihi huno mareri'negeno tonkimo'a ufregara osu'ne. **15** Anama hige'na Kidroni agupofi enevu'na ran kuma kegina ke'na evute'na, masa osu nege'na ete rukrahe hu'na Agupo Kafanema

nehaza kafanteti emarer'i'na ran kumapina ufre'noe. **16** Hanki ana kenage'ma vanoma nehu'nama hu'noa zamofo nanekea, Jerusalemima mani'naza kva vahe'mo'za ontahi'naze. Na'ankure magore hu'na Jiu vahepi, pristi nagapi eri'za vahepi mago'a eri'zama zamazama hu'za erisaza vahe'enena ozamasami'noe.

17 Hianagi anante amanage hu'na zamasami'noe, Tagrama knazampima mani'nonana tamagra ko keta antahita hu'naze. Jerusalemi kuma'mo'ma havizantfa higeno, kumamofo rankafana tevemo teno eri haviza hu'ne. E'ina hu'negu enketa Jerusalemi kuma'mofo kegina ete eriso'e huta hamaneno. Hagi e'inama hanunke'za mago'enena tazeri tagazea osugahaze. **18** Anage nehu'na Ra Anumzamo'ma azama anteno nazama hu'nea zamofo kea nezamasami'na, kini ne'mo'ma hu'nea nanekenena zamasami'noe. Anankema huge'za zamagra amanage hu'naze, Knarekita hago eri'zana agafa huta erisune, nehu'za, ana kere eri'zana agafa hu'za eri'naze. **19** Hianagi Horoni kumateti ne' Sanbalati'ma, Amoniti ne' Tobiaki, Araputi ne' Gesemi'ma hu'za amana eri'zama eriku'ma huna nanekema nentahi'za, tusi tagiza nere'za zokago kea amanage hu'za hurante'naze, tamagra ama na'a hu'za nehaze? Tamagra kuma kegina ete azeri o'netitma, kini ne'mofona ha' hunte'za nehazo? **20** Hagi anante nagra amanage hu'na zamasami'noe, tagra monafi Anumzamofo eri'za vahe mani'nonankita ama ana eri'zana enerisanunkeno, taza huno tazeri so'ea hugahie. Hianagi ama Jerusalemi kumapina tamagrira tamagia omame'ne. Ana higeno tamagehe'zanena kora ama kumapinena zamagia omame'nea vahe mani'naze.

3 Hagi anante ugota pristi ne' Eliasibi'ene mago'a afu aganahe'zama pristi eri'zama eneriza naga'mo'za oti'za vu'za Sipisipi Afu Kafane hu'za nehaza kafana ome tro hu'naze.

Ana kafana trohu vagare'za hagema antete'za, nunamu hu'za Anumzamofo azampi nente'za, ananteti'ma kuma keginama hu'nazana vuvava hu'za, sondia vahe'mo'zama manisgama hu'nezama kvama nehaza nontre'ma zanagi'a, 100tine Hananeli'ema nehaza nontre'ma me'nere uhanati'naze. E'ina kankamumpima me'nea kegina huvagarete'za, ana za'za nontrene keginanena nunamu hu'za Anumzamofo azampi ante'naze. 2 Hagi anama ome atrazaretira Jeriko kumate vene'nemo'za kuma kegina hu'za vazage'za, anante zamefiga'a Imri nemofo Sakuri'ene mago'a naga'moza kegina eri'zana eri'za vu'naze. 3 Hanki Hasena ne'mofavre naga'mo'zama Nozame nehaza kafama hagente'nazana, kafama hagente zafa nomu'are erinte fatgo hu'za kafama hagenente'za, kafama erigino rentrakoma hu' aeni zafanena tro hunte'naze. 4 Hagi ome atrazaretira Uria nemofo Meremoti'a Hakozu negehokino anantetira agra kegina huno vu'ne. Hagi agrama erino ome atreretira, Berekia nemofo Mesulamu'a agra Mesezabeli negehokino anantetira kuma kegina huno vu'ne. Hagi agrama ome atreretira Bana nemofo Zadoku ananteti kegina huno vu'ne. 5 Hagi anantetira Tekoa kumate vene'nemo'za kuma kegina hu'za vu'naze. Hianagi Tekoa kumate kva vahe'mo'za kuma kegina eri'zante'ma kvama hu'naza vahera mago zamarimpa huozamante'za ana eri'zana zamaza hu'za e'ori'naze. 6 Hanki Pesea nemofo Joida'ene Besodeia nemofo Mesulamukea, Korapa Kuma Kafane nehaza kafana kantigma eri ante fatgo huke ahenenteke kafanrena ana trate hagenenteke, kafama erigino rentrakoma hu' aenine zafanena tro hunte'na'e. 7 Hagi Gibioniti ne' Melatiaki, Meronotiti ne' Jadoniki, mago'a Gibioni venene zagane Mizpati venenemo'za anantetira kuma

kegina hu'naze. E'i ana vahetamina Yufretisi timofo zage
fre kazigama me'nea kumatamima kegavama hu'nea gavana
ne'mofo nagaki'za agri nonena eri fatgo hu'naze. **8** Hagi
golire zantamima trohu eri'zama antahi'nea ne' Harhaia nemofo
Uzieli'a ananteti kuma kegina agafa huteno erino vuno ome
atregeno, anantetira mna nentake masavema tro'ma nehia
ne' Hanania'a kuma kegina huno vu'ne. Ana keginama huke
vuna'ana, Fatgo huno za'zate'ma vu'ne hu'zama nehaza keginare
uhanati'na'e. **9** Hagi ananteti'ma kuma keginama eri ante
fatgoma huno vu'neana, Jerusalemi kuma'ma amu'nompinti
refko hazageno mago kazigama kvama hu'nea ne' Huri nemofo
Refaia eri so'e huno ome atre'ne. **10** Hagi anama ome atreretira
Harumafu nemofo Jedaikino noma'amofo tvaontekino agra
erino vuno ometregeno, anantetira Hasabneia nemofo Hatusi eri
antemino ana kuma kegina huno vuno ome atre'ne. **11** Hagi
Harimi nemofo Malkija'ene Pahat-Moapu nemofo Hasubikea
anantetira kuma kegina zanagra erike vu'na'e. Ana nehuke
sondia vahe'ma manisga hu'za mani'ne'za kegavama nehaza
noma agi'a Witima Kre nonema nehaza nonena ki'na'e. **12** Hagi
Jerusalemi kuma'mofona amu'nompinti refko hazageno, mago
kazigama kvama hu'nea ne' Halohesi nemofo Salumu'a, mofa'ne
naga'amo'za aza hazageno anantetira kuma kegina huno vu'ne.
13 Hagi Hanunu'ene Zanoa rankumate'ma nemaniza vahe'mo'za
Agupo Kafanema nehaza kafana tro hu'naze. Ana kafamofo zafa
erinte fatgo nehu'za, kafanena tro hunente'za, kafama erigino
retrakkoma hu' aenine zafanena tro hunte'naze. Zamagra ana
nehu'za anantetira kuma kegina hu'za Mikazama Harafi hu'zama
ome netraza kafanema nehaza kafante uhanati'naze. Ana
hazageno ana keginama eri fatgoma hu'za vu'naza keginamofo

zaza'amo'a, 440ti mita naza hu'ne. **14** Hagi Bet-Hakerem kazigama kvama hu'nea ne' Rekabu nemofo Malkija'a, mikazama harafima hu'zama ome netraza kafama erinte fatgo nehuno kafaraminena hagenenteno, kafama erigino rentrakoma hu' aenine tro hunte'ne. **15** Hagi Mizpa kazigama kvama hu'nea ne' Kol-Hoze nemofo Saluni'a, Kampui Tine nehaza kafana eri so'e hu'ne. Ana kafamofona anaga kaziga nona kinenteno, kafanena tro nehuno, kafama erigino rentrakoma hu' aenine zafanena tro hunte'ne. Ana nehuno kini ne'mofo hozaregama Sela tiru'ma me'nerega kuma keginanena erino vuteno, vuvava huno Deviti ran kumategati'ma latama tro hunte'nezama marenerizarega uhanati'ne. **16** Hagi Bet-Zuri kazigama kvama hu'nea ne' Azbuku nemofo Nehemaia'a anantetira kuma kegina huno marerino kini ne' Devitima asente'naza mati tvaonte uhanatiteno, vuvava huno vuno Harfa Sondia vahe'mokizmi None nehzare vuteno, vahe'mo'zama tro'ma hunte'naza tiru'ma me'nere uhanati'ne. **17** Hagi ananteti'ma kuma kegina eri'zama eri'za vu'naza Livae nagara, Bani nemofo Rehumu erino vuno ometregeno, anantetira Keila kaziga kuma'ma kvama hu'nea ne' Hasabia'a agri kumakino agra'a eriso'e huno vu'ne. **18** Hagi Hasabia'ma erino ome atreretira, Keila kuma'mofo mago kazigama kvama hu'nea ne' Henadati nemofo Bavai'ene mago'a agri naga'mo'zane kuma kegina eri so'e hu'za vu'naze. **19** Hagi Bavai'ma erino ome atreretira, Jesua nemofo Ezeri Mizpa kuma'ma kvama hu'nea ne'mo anantetira kuma kegina huno maremanerizarega vuno, ha'zama nentaza nonte uhanatiteno renagentete ome atre'ne. **20** Hagi anantetira agri amagenarera Zabai nemofo Baruku'a, keginama renagentageno roroma hu'hereti agafa huteno, kazikazi huno kuma kegina huno ugota pristi ne' Eliasibi nomofo kafante

uhanati'ne. **21** Hagi Baruku'ma ome atreretira Uria nemofo Meremoti'a Hakozi negehokino, Eliasibi nomofo kafa avamenteti kuma kegina eri agafa huteno vuno ana nomo'ma ome atre'nere, ana kegina eri so'e huno ome atre'nere. **22** Hagi Meremoti'ma keginama huno ome atrege'za, anantetira Jerusalemi kumamofo tvaonte'ma megagi'nea kumatmimpi pristi vahe'mo'za e'za kuma kegina hu'za vu'naze. **23** Hagi pristi vahe'ma eri'zama eri'za vahe'mo'za eme atrazaretira Benzamini'ene Hasubuke no zanimofa avuga kuma kegina huke vu'na'e. Zanagrama erike ome atratetira, Ma'aseia nemofo Anania negeho Azaria, agra'a nomofo tva'ontera kuma kegina hu'ne. **24** Hagi Azaria nontetira Henadati nemofo Binui kuma kegina huteno vuno Kegina Renagentetere nehzare uhanati'ne. **25** Hagi anantetima eri agafama huno keginama eri so'ema hu'neana, Uzaia nemofo Palali renagentetetira agafa huno eri fatgo huno vuno sondia vahe nomofo tavaonte'ma kini nemofo nonteti'ma za'za noma mareri agatere'nea nonte vu'ne. Agrama erino ome atreretira, Parosi nemofo Pedaia kegina huno vu'ne. **26** Hagi anantetira mono nompi eri'za vahe'ma Ofeli agonafima nemaniza vahe'mo'za agafa hu'za kegina hu'za zage hanati kaziga Tima Afi Kafanema nehaza kafantega za'za noma me'nerega uhanati'naze. **27** Hagi ana za'za nontetira Tekoa kumateti vahe'mo'za kuma kegina hute'za vu'za Ofeli kuma kazigama hu'naza keginare uhanati'naze. **28** Hagi Hosi Kafanema nehaza kafama me'nereti mareri'nea kazigama vu'neana, mago mago pristi naga'mo'za noma kiterema hu'nazare eri so'e hutere hu'za vu'naze. **29** Hagi anama ome atraretira Imeri nemofo Zadoku'a noma'amofo tvaonte'ma meno'ma vu'nea kegina eri so'e huno vu'ne. Hagi Zadoku'ma ome atreretira Zage Hanati Kaziga Kafanema

nehaza kafante'ma kegavama nehia ne' Sikania nemofo Simaia
anantetira kegina eri so'e huno vu'ne. **30** Hagi Simaia'ma erino
ome atreretira, Silemia nemofo Hananaia'ene Zalafuna nampa
6gis mofavre Hanuni'ene anantetira kegina huke vu'na'e. Hagi
zanagrama ome atratetira Berekia nemofo Mesulamu'a agrama
nemania no tvaontera kegina hu'ne. **31** Hagi Mesulamu'ma
erino ome atreretira, golire zantamima tro'ma nehia ne' Malkija
anantetira kegina huno vuno, mono nompima eri'zama eneriza
vahé none, feno vahé'mokizmi noma me'nere eteno rukitagino
Atruhi Kafanema nehaza kafante eteno, anantetira vuvava
huno renagentetema anaga kazigama za'za noma kinte'nazare
uhanati'ne. **32** Hagi keginama renagentete'ma anaga agofetu'ma
noma kinte'nareti'ma vuno Sipisipi Kafanema nehaza kafante'ma
vige'za keginama hu'nazana, golire zantamima tro'ma nehaza
vahé'ene fenozama zagore'ma netraza vahé'mo'za kegina
hu'naze.

4 Hanki tagrama Jerusalemi rankuma'mofo kegina ete azeri
otuna zamofo nanekema Sameria kazigama kvama hu'nea
ne' Senbalati'ma nentahino'a, tusi arimpa aheneranteno, Jiu
vahé'mota ki'za zokago ke hurante'ne. **2** Agra eri'za vahé
zamavufine, Sameria sondia vahé'mokizmi zamavufina amanage
hu'ne, Zamagra hanavezmima omne Jiu vahé'mo'za na'a
nehaze? Zamagrama antahi'zana kuma kegina eri so'e hugahune
hu'za nehazafi? Zamagra ana maka ofa Kresramana vunaku
nehazafi? Zamagra magoke zage ferupina, kegina huvagare'za
nehazafi? Tevemo'ma te fragu vazirami'nea haveramina inankna
hu'za eri'za kuma kegina eri so'e hunakura nehaze? **3** Anankema
nehigeno'a, Amoni vahepinti ne' Tobia'a Senbalati tava'onte
oti'neno amanage hu'ne, Zamagra na'a tro nehazafi keho, afi

kramo'ma ana keginare'ma takau resiana have keginazamia
renafe hutregahie! 4 Hanki anankema hazama nentahi'na,
amanage hu'na nunamuna hu'hoe, Anumzantimoka nunamuntia
antahiramio. Na'ankure ama vahe'mo'za tagrikura ki'za zokago ke
hunerantaze. E'na hu'negu atregeno ana nanekemo'a zamagri'a
zamavufare fore hino. Ana hanige'za ha' vahe'zamimo'za ha' eme
huzamante'za zamavarezza ru moparega kina ome huzamanteho.
5 Havi avu'ava'ma hu'za kumi'ma hu'naza zana keamnea nosunka
kumi'zamia eri atreozmanto. Na'ankure keginama nehaza
vahe'mokizmi zamavufina, zamagra kiza zokago ke hunerante'za
Kagrira kazeri krimpa nehaze. 6 Hanki ana nunamuma hutogeta,
maka'mota tagu'areti huta hanavetita eri'zana erita, kankamuna
rehiza huvaga ronkeno kuma keginamo'a marerino amu'nompi
vu'ne. Na'ankure mika vahe'mota mago tarimpa huta eri'za eri
antahintahi huteta ana eri'zana eri'none. 7 Hianagi Senbalati'ma
Tobia'ma Arapu vahe'mo'zane Amoni vahemozane, Asdoti
vahe'ma antahizama Jerusalemi kuma keginama kazigazi huta
erita nevuna nanekene, kuma keginamofo ne'onse kankamuma
rehiza'ma nehuna nanekema nentahi'za, tusi zamarimpa
aherante'naze. 8 Ana nehu'za zamagra Jerusalemi kumate naga
ha' eme hunerante'za, eri'zama e'neruna eri'za eri haviza hunaku
kea retro hu'naze. 9 Ana hu'neanagi tagra Anumzantimofontega
nunamuna nehuta, kegavama hu vahera huzamantonke'za
feru'ene kenage'enena ha'ma eme hurante zankura kegava
hu'naze. 10 Hianagi Jiu vahe'mo'za amanage hu'za nehaze,
eri'za vahe'mokizmi hankavemo'a hago vagare'za hie. Ana
higeno fragu vaziramino'ma hihima hu'nea haveramina rama'a
me'neankita eri'zana eri vaga oregahune. 11 Ha' vahetimo'za
amanage hu'naze, Jiu vahe'mo'za tagrira ke'za antahi'za

osu'nesageta, ame huta vuta ha' ome huzamanteta zamahe vaga
resanunkeno, ana eri'zamo'a amne zankna hugahie. **12** Hanki
ana vahe'mokizmi tva'onte'ma nemaniza Jiu vahe'mo'za 10ni'a
zupa naza agatere'za eme tasami'za, maka asoparegati hara
eme huranteke nehaze. **13** Anagema hazage'na mago'a vahera
huzamantoge'za vu'za, keginamo'ma urami'nea kaziga ome
kegava nehazage'na, mago'a vahera huzmantoge'za kankamuma
maneterema hu'nere bainati kazitamine, karugru kevene, ati
kevene eri'ne'za nagate nagate otitere hu'haze. **14** Ana'ma
hutoge'za veamo'zama koro'ma hazazama nezamage'na, kva
vahe'ene eri'za vahe'ene ana maka vahetamina amanage
hu'na zamasami'noe, tamagra ha' vahekura korora osho. Ra
Anumzana hankavenentake huno marerisa Anumza mani'neanki
tamagera okanita, tamafuhe'inku'ene ne' mofavre tamigu'ene
mofa'nane tamigu'ene a'nane tamigu'ene nonkuma tamigu'ene
tamagesa nentahita korora osu hankavetita hara hoho. **15** Hanki
ha' vahetimo'zama ha'ma eme hurante kema anakiza nanekema
tagrama antahuna nanekea zamagra antahi'naze. Hianagi ha'ma
eme hurante nanekema anaki'nazana Ra Anumzamo zamazeri
havia higeno hara eme huorantazageta, mago'magomota kegina
hu eri'zantirera vu'none. **16** Hagi ana knareti agafa huta,
amu'nompinti vahera refko hunke'za mago'amo'za kegina eri'zana
eri'naze. Hige'za mago'amo'za atine kevene zamimizare'ma
nentaniza ha' kukenane, hankone zamazampina eri'ne'za oti'za
kegava hu'haze. Hagi ana nehazage'za, erizante'ma ugota
hu'za kegavama nehaza vahe'mo'zane ana maka Juda vahe'ma
keginama nehaza vahe'mokizmi zamefi otitere hu'haze. **17**
Hagi keginama haza vahe'mo'za mago kaziga zamazanteti
eri'za eneri'za, mago kaziga zamazampina ha'za eri'naze.

18 Ana nehu'za eri'zama eri'za vahe'mo'za bainati kazina atrazageno zamasoparega urami'nege'za eri'zana eri'naze. Hianagi paziveteti'ma ufema neraza vahe'mo'za nagrane mani'naze. **19** Anama hutazage'na kva vahe'tamine ugotama huzmante'naza kva vahetamine mago'a vahetaminena amanage hu'na zamasami'noe, Kegina hu za'za huta vahera afete umani emani huneta eri'zana enerune. **20** E'ina hu'negu ina knare'ma ufenkrafama antahisutma, ame hutma nagra mani'nore eme eri tru hiho. Anumzantimo'a tagritega anteno ha' vahetia hara huzamantegahie. **21** Hagi anagema hutogeta mika zupa nanterantet'i'ma vuno kinagama monafima hanafi'mo'ma ehanatia knare'ma vigeta, kegina eri'zama erita vu'nonana vahera amu'nompinti refko hu'neta mago'amo'za karugru kevea zamazampi eri'ne'za kva nehazageta, mago'amota kuma kegina eri'zana eri'none. **22** Hanki ana zupa mago'ene amanage hu'na vahera zamasami'noe, Eri'zama eri vagama resutma mago mago vahe'moka eri'za vahekane Jerusalemi kumara atreta megi'a ovuta, agu'afi mani'neta kenagera kegava huneranteta, msama hanigeta kuma kegina eri'zana erigahaze. **23** Hagi ana knafina nagrane nafuhe'zane nagri eri'za vahe'mo'zane nagri'ma kvama hunenantaza vahe'mo'zanena kukenatia hate otre'none. Makamota ha'zana tazampi me'negeta otreta, tinteganema vunana tazampinke me'negeta vu'no'ne.

5 Hanki anante mago'a Jiu venenemo'zane a'nene zamimo'zanena Jiu naga'zamigura tusiza hu'za ke hara rezmante'naze. **2** Anama keha'maraza naga'moza amanage hu'naze, Tagra tusi mofavrezaga zamante'none. E'ina hu'negu tagrama witima erita nesuta ofri manigahaze. **3** Hanki mago'amo'za amanage hu'naze, tagatontoma hia knafina

tagra mago'a ana vahepinti zagoa nofi huta enerita, mago tarimpa huta kea anakita ana nofi'ma apa'ma osesunana, waini hozati'ma witi hozati'ma nontinena erigahaze huta kea anaki'none. 4 Hagi mago'a vahe'mo'zanena amanage hu'naze, Tagra waini hozatine, mopatimofo takisima kini ne'mofoma aminakura vahepinti zagoa nofi huta ami'none. 5 Hagi tagranena zamagrama hazaza huta Juda vahe mani'none. Tagri mofavre naga'mo'za zamagri ne'mofavre naga'mo'zama nehazaza hu'za knare hu'naze. Hianagi mofavre nagatia zamatresanunke'za kazokazo eri'za ome erigahaze. Hagi mago'a mofa'netimo'za hago vu'za kazokazo eri'zana ome enerize. Hianagi tagrira hankavetia omane'ne, na'ankure mopatine waini hozatinena hago rumo'za eri'naze. 6 Hanki ana vahe'mo'zama haza nanekene krafa ke'zamima nentahugen'o'a nagrira tusi narimpa ahe'ne. 7 Ana hige'na ana nanekea antahintahinifi atrogeno me'nege'na refko hute'na, kva vahe'tamine erizante'ma ugotama hu'naza vahetaminena amanage hu'na zamasami'noe, tamagra magoke vahe mani'nazanki na'agafare nofi'ma hu'naza zagorera amema'a ante marerita enerize. Anage hute'na ana vahera zamuvufintanke huku, ana maka vahe kuhuge'za eme eri tru hu'naze. 8 Hagi anante amanage hu'na zamasami'noe, Ko'ma meg'i'a vahe'mo'zama mago'a nagatima zagoreti'ma mizase'za ome kinama huzmante'nazana maka ete mizama huta zamavare meg i atreku maraguzana netune. Hianagi zamagra zamafuhe'ina meg'i'a vahete zagorera netrazanki'za ete ana vahera tagrite zagore atregahaze. Anankema huge'za kva nagara ke'zamia omanege'za akohe'za mani'naze. 9 Anama hazage'na mago'ene amanage hu'na zamasami'noe, Tamagra e'inahu tamavutamaya'ma nehaza zamo'a knarera osu'neanki,

tagri Anumzamofonku korora hunenteta, Agri agorga nemanita fatgo avu'avazama'a amage anteho. E'ina tamavu'tamavama hanage'za meg'i'a tamefi'a nanekea osugahaze. **10** Hagi nagrane nafuhe'zane eri'za naga'ninena ana zanke huta zagone witinena nofi'ma hu'za erinaku'ma hazageta nezamune. Hianagi nofi'ma hu'nazare'ma apasehogu'ma rama'a zago agima ahezmante'zana atresune. **11** Hanki waini hoza zamifi, olivi hoza zamifi, no zamifi hozama ante mopa'zaminema eri'nesazana meninke'za ete ame huta zamiho. Ana zanke hutma zagofi, witifi, wainifi olivi masavenema zamagripinti'ma nofi'ma hu'nesazana amema'a zamagripintira ante marerita e'oritma atreho. **12** Anante kva vahe'mo'za kenona hu'za, Kema hana kea amage anteta ana maka zama eri'nona zantamina ete zamigahune. Ana nehuta zamagripintira mago zana kea huta e'origahune. Anagema hazage'na kva naga'ene ugota kva vahera zamasami'na, kema haza nanekerera pristi vahe zamavufina mago huvempa ke hutma ana osugahune hutma hiho huge'za ana osugahune hu'za huvempa hu'naze. **13** Anagema nehu'na nakre kuni'mofo kasagura eriherahe nehu'na, amanage hu'na hu'noe, Amama huvempama hazankema, amage'ma ontsemofona Anumzamo'a anamofo noma'afintira ama avame'zama huaza huno, ana maka vahe'mo'za fenozama'a eri herahe hutregahie. Ana hanigeno anamofona mago'a zama'a omanegahie hu'na huge'za, ana maka tamage hu'za nehu'za Ra Anumzamofona agi'a ahentesga nehu'za, huvempama hu'naza ke amage ante'naze. **14** Hagi Pesia kini ne' Artserksisi'ma kinima manino egeno 20ma hia kafufi, nagrira huhampari nantage'na Juda mopare'ma kva mani'noreti'ma eno, Artserksisi'ma kini manino egeno 32ma hia kafumofo amu'nompina nagra 12fu'a kafufi gavana eri'zana

eri'noanagi, gavana ne'mo'ma ne'zama miza huno negahie
hu'nea zagofintira mago zagoe hu'na e'oritfa hu'noe. **15** Hianagi
Juda mopare'ma ko'ma gavana mani'za e'naza, vahe'mokizmia
tusi'a kna nezami'za, ne'zane waini tinema eriza agofetura,
40'a silva zagona eri'naze. Hagi ana kva vahe'ma zamaza
hu'za eri'zama eri'za vahe'mo'zanena, vahera tusi'a knaza
zami'naze. Hianagi nagra Anumzamofonku koro hunente'na
e'inama hazazana osu'noe. **16** Nagra Jerusalemi kuma keginama
hu' eri'zanke nagu'areti hu'na e'neri'na mopa miza ose'noe. Hagi
nagranema eme atru hu'za eri'zama eri'za vahe'mo'zanena, ana
zanke hu'za mopa miza ose'naze. **17** Hianagi nagri nompintira Jiu
vahe'ene ugota kva vahetamina 150'a vahe'mo'za ne'zana eme
nenageno, anampina tvaontire'ma me'nea mopafima nemaniza
vahepintira mago'amo'za nagri nompinti tagrane ne'zana eme
ne'naze. **18** Hanki mago mago zupama nagri nompima ne'zama
kre terema hu'nazana vahe'mo'za mago bulimakaogi, 6si'a
knare'ma hu'nea sipisipi afutaminki, mago'a kokore raminki
hu'za ana vahera ne'zana kretramanttere hu'naze. Hagi 10ni'a
zage kna'ma evuterema nehige'za, eri'za waini tina eri'za
eme zamizage'za, ana netere hu'naze. Ana ne'zantamimpina,
magore hu'na gavana ne'mofo ne'zanema hu'za huhampari'naza
ne'zampinti'enena erinteta erita echo hu'na huozamante'noe.
Na'ankure eri'zama zami'noa eri'zamo'a ranknaza zaminogu
anara hu'noe. **19** Anama hute'na nunamu hu'na, Anumzanimoka
ama vahe'mokizmima zamaza hu'na maka knare eri'zama
eri'noazamofona kagera akanionantenka asomura hunanto hu'na
hu'noe.

6 Anante Sanbalati'ma, Tobia'ma, Araputi ne' Gesemu'ene
mago'a ha' vahetimo'za, nagrama mago kankamuma otre'nama

kuma keginama huvagaroa nanekea antahi'naze. Hianagi
kuma keginamofo kafaramintera kahana hageonte'noe. 2
Sanbalatike Gesemukea amanage huke kea atrenantena'e,
Kagra enketa Keferimie nehaza kumama Ono agupofima
me'nere atru hanune huke hu'na'e. Hianagi zanagra nagri
nazeri haviza hunaku havige hu'na'e. 3 Anagema hake'na ana
kezani'amofo nona'a amanage hu'na kea atrezamantoge'za,
mago'a vahe'mo'za eri'za vu'naze. Nagra ra eri'za eri agafa
hunte'nena e'neruanki'na ana eri'zana atre'na uoramigahue.
Na'agafare eri'zana atresanugeno me'nesige'na tanagritega
uramigahue? 4 Hianagi zanagra ana netremokea anahukna
nanekea 4'a zupa atrenantakeno e'ne. Hige'na anama
atrenantakeno'ma eterema hia knarera, ko'ma ese zupama
kezanire'ma ke nonama hu'noa nanekege'za atrezanante'noe.
5 Anama hugeno'a 5 furera, ko'ma atrenanta'a nanekegna
kea Sanbalati'a avontafete kreteno, fukina reokamarenō amne
amigeno eri'za vahe'amo erino e'ne. 6 Ana avompina amanage
huno krente'ne, Nagra Sanbalati'nama zaho kema antahuana
tvaontire'ma mani'naza kumapi vahe'mo'za nehzageno,
Gesemu'enema hiana, kagrane Jiu vahe'mota kuma kegina
nehuta, kini ne'mofo agorga omaniku nehaze. Ana nehanagenka
kagra Nehemaiaga kini zamia maniku nehane. 7 Ana nehunka
kasnampa vahe huhampri zamantanke'za Jerusalemi kumapi
huama hu'za, Juda moperara mago kini mani'ne hu'za nehaze.
Ana hu'neankino ana kemo'a Pesia kini nete vugahie. E'ina
hu'negu kagra egeta, ana zamofo nanekea erinte fatgo
ha'maneno. 8 Hagi Sanbalati kerera nona'a amanage hu'na
avona kre'noe. Amama hana nanekemo'a magore huno tamagea
omne'neanki, kagra'a antahintahifinti eri fore nehane. 9 Na'ankure

ha' vahetimo'za amanage hu'za antahi'naze, nanekefinti zamazeri koro hanunke'za, zamesra hu'za eri'zana eri vagaoresaze hu'za anara hu'naze. Hianagi Anumzamoka nazana eri hankavetige'na eri'zana eri'neno hu'na nunamuna hu'noe. **10** Anante mago zupa Mehetabeli negeho ne' Delaia nemofo Simai'a noma'a kafana erigino mani'nere nantu antente'na vugeno, amanage huno hu'ne, Anumzamofo mono nompima ruotage'ma hu'nefinka ome franekita, mono no kafana erigisanu'e. Na'ankure meni kenagera ha' vahekamo'za eme kahe friku keaga hu'naze. **11** Hianagi nagra amanage hu'na kenona hu'noe, Nagra amanahu vahe'mo'na korora fregahufi? Inankna hu'na kva vahe'mo'na korora frena vu'na mono nompina ome frakina nagura vazigahue? I'o, nagra anara ovutfa hugahue. **12** Nagrama antahi ama'ma huana ama ana nanekea Anumzamo asamigeno onasami'ne. Hianagi Tobiake Sanbalatike zago nemike hakeno, havi kasnampa ke nagritera hu'ne. **13** Hanki nagri'ma nazeri koro'ma hanake'na koroma fre'na vu'na mono nompima ome frakisua zamo'ma hanige'na kumi'ma hanugeke, havi nagi nemike huhaviza hunantesnanku, zanagra zago nemike huntakeno koro kea hunante'ne. **14** Hige'na zanazeri haviza hinogu Anumzamofontega nunamuma hu'na nagri Anumzamoka ko, Tobiake Sanbalatikema nagri'ma hunante'na'a zanavu zanavara negenka, kasnampa a' Naodia'ene mago'a kasnampa vahe'mo'zanema nazeri kore'ma hunaku'ma nehaza zana hago zamage'nane. **15** Hanki Elul ikamofona 25 zupa Jerusalemi kuma keginama nehuna eri'zana erivaga re'none. Ana eri'zama eri'nonana 52'a zagegnamofo agu'afi eri'none. **16** Ana hunke'za tva'ontire'ma me'nea mopafima mani'naza ha' vahetimozama ana nanekema nentahi'za tusi koro hazageno, amuha zazamia omane'ne. Na'ankure zamagrama

antahi'zana tagri Anumzamo taza higeta kuma kegina huvaga
re'none. **17** Hagi ana knafina Juda ranra vahe'mo'za Tobiana
rama'a zupa avona kre'za atrente'haze. Ana hazageno Tobia'a
agranena anazanke huno avona atrezamantege'za avona
omi ami hu'naze. **18** Ana hige'za Juda vahepintira hakare'a
vahe'mo'za Tobiana kza hugahune hu'za kea hu hagerafite'za
aza hu'naze. Na'ankure Tobia'a Ara negeho Sikania mofa ara
erigeno, Tobia nemofo Jehohanani'a Berekia nemofo Mesulamu
mofa eri'negu hu'za anara hu'naze. **19** Ana hige'za ana ranra
vahetamimo'za Tobia'ma hia knare avu'ava zama'agura eme
nenasami'za, nagrama hua nanekenena ome asami'naze. Ana
hazageno Tobia'a nazeri koro hunaku nagritega avona kre
atrevava hu'ne.

7 Hanki kuma kegina eri'zamo'ma eme vagarege'na, anantera
kuma kafaramina hagente vaganere'na, kafante'ma kvama
hanaza vahe'ene zagame'ma hu vahe'ene Livae naga'enena
huhampari zamante'noe. **2** Ana nehu'na nenfu ne' Hananine, kini
ne'mofa nonte'ma kvama nehia ne' Hanania kiznia huhampari
zanantogeke Jerusalemi kumara kegava hu'na'e. Na'ankure
Hanania'a sondia vahe'mokizmi hanave vihuma kegava hu'nea
ne'kino agu'areti huno maka'zana fatgo huno nehia ne'
mani'neno, mago'a vahera zamagatereno Anumzamofona koro
hunenteno agorga nemania ne' mani'ne. **3** Hanki anante
ana netrena amanage hu'na zanasami'noe, Jerusalemi kuma
kafantamina onagita atrenkeno me'nenigeno vuno zagemo'ma
hanavema ometitesigeta anagaho. Hagi kafante'ma kegavama
nehaza vahe'mo'za atre'za nozamirega ovu'neza kafana erigi'za
agu'ati retrako hute'za viho. Hagi Jerusalema nemaniza
vahera huhampri zamantesanke'za kegavama hanazana

vahera huzmantenke'za mago'amo'za kuma keginarera otitere
nehanageta mago'amokizmia huzmantenke'za nozamimofo
tva'ontera kegava hutere hiho. 4 Hanki Jerusalemi rankuma'mo'a
rankrefa higeno rama'a kankamuna me'ne. Hianagi anampima
mani'nazana osi'a vahe mani'nazageno, anampina nontamina
onki'naze. 5 Ana hu'negu nagri Anumzamo antahintahi namige'na,
ugota kva vahe'ene amne vahe'enena nagatenofite hu'na
zamagia krena erinte fatgo huku ke huge'za eme atru hu'naze.
Hanki anama hute'na, Babiloni kinafinti'ma atre'za ese'ma e'naza
vahe'mokizmi zamagima krente'naza avontafe kena erifore
hu'noe. Amanahu hu'za ana avontafepina zamagia krente'naze. 6
Hanki ama mago mago kuma'ma Judama me'nea kumatmimpinti
vahe'ma, Babiloni kini ne' Nebukatnesa'ma zamavareno
kinama ome huzmante'nea vahe'mo'zama ete Jerusalemi
kumate'ene, Juda moparema ete'za, kuma zamire uvu evu
hu'naze. 7 Hanki ana vahe'ma kegava huzmante'za zamavare'za
e'naza kva vahe'mokizimi zamagia, Zerubabeliki, Jesuaki,
Nehemaiaki, Azariaki, Ra'amiaki, Nahamaniki, Modekaiaki,
Bilsaniki, Misperetiki, Bigvaiki, Nehumuki, Ba'anaki hu'za
e'naze. Hagi kvama krizmante'za zamavare'za e'naza Israeli
vahe'mokizmi zamagi'a ama'ne, 8 Parosi nagapintira 2 tauseni
172'a venene e'naze. 9 Sefatia nagapintira 372'a venene
e'naze. 10 Ara nagapintira 652'a venene e'naze. 11 Pahatmoapu
vahepintira Jesua naga'ene Joapu nagapintima e'nazana 2
tausen 818ni'a venene e'naze. 12 Elamu nagapintira 1 tausen,
254'a vene'ne e'naze. 13 Hagi Zatu nagapintira 845fu'a vene'ne
e'naze. 14 Zakai nagapintira 760'a venene e'naze. 15 Binui
nagapintira 648'a vene'ne e'naze. 16 Bebai nagapintira 628'a
venene e'naze. 17 Azagadi nagapintira 2 tausen, 322'a vene'ne

e'naze. **18** Adonikamu nagapintira 667ni'a venene e'naze. **19** Bikvai nagapintira 2 tausen, 67ni'a vene'ne e'naze. **20** Adini nagapintira 655'a vene'ne e'naze. **21** Hagi Hezekaiampinti fore'ma hu'nea ne' Ateria nagapintira 98'a venene e'naze. **22** Hasumu nagapintira 328'a venene e'naze. **23** Bezai nagapintira 324'a venene e'naze. **24** Harifi nagapintira 112'a vene'ne e'naze. **25** Gibeoni nagapintira 95'a vene'ne e'naze. **26** Hanki Betlehemu kuma'ene Netofa kumate vahe'ma kinafintima e'nazana 188'a vene'ne e'naze. **27** Hanki Anatoti kumate vahera 128'a vene'ne e'naze. **28** Bet-Azmaveti kumate vahera 42'a vene'ne e'naze. **29** Kiriat-Jearimi kuma'ma Kefira kuma'ma Biroti kumate vahera 743'a venene e'naze. **30** Rama kuma'ene Geba kumate vahera 621ni'a vene'ne e'naze. **31** Hanki Mikmasi kumate vahera 122'a venene e'naze. **32** Hanki Beteli kuma'ene Ai kumate vahera 123'a vene'ne e'naze. **33** Mago Nebo kumate vahera 52'a vene'ne e'naze. **34** Mago Elamu kumate vahera 1 tausen 254'a vene'ne e'naze. **35** Harimi kumate vahera 320'a vene'ne e'naze. **36** Hanki Jeriko kumate vahera 345'a vene'ne e'naze. **37** Hanki Lotine Haditine Ono kumate vahera 721ni'a venene e'naze. **38** Sena'a kumate vahera 3 tausen 930'a vene'ne e'naze. **39** Hanki pristi eri'zama eneriza vahe'ma kinafintima e'nazana, Jesua naga'nofipinti Jedaia nagara 973'a vene'ne e'naze. **40** Hagi Imeri nagapintira 1 tausen 52'a venene e'naze. **41** Pasuri nagapintira 1 tausen 247ni'a vene'ne e'naze. **42** Harimi nagapintira 1 tausen 17ni'a vene'ne e'naze. **43** Hanki Livae vahe'ma kinafintima e'naza vahera, Hodaviampintima fore'ma hu'neana Jesua naga'ene Kadmieli nagaki'za 74'a vene'ne e'naze. **44** Hanki Asapu nagapinti'ma zagamema nehaza vahe'ma kinafinti'ma e'nazana 148'a vene'ne e'naze. **45** Hanki ra mono

no kafante'ma kvama nehaza vahe'ma e'nazana, Salumu'ma
Ateri'ma Talmoni'ma Akubi'ma Hatita'ma Sobai nagapintiki hu'za
ana makara 138'a vene'ne e'naze. **46** Hanki ra mono nompima
eri'zama eneriza vahe'ma e'nazana, amama zamagima me'nea
vahe'mokizmi nagapinti e'naze. Ziha'ma, Hasufa'ma, Tabaoti'ma,
47 Kerosi'ma, Sia'ma, Padoni'ma, **48** Lebana'ma, Hagaba'ma,
Salmai'ma, **49** Hanani'ma, Gideli'ma, Gahari'ma, **50** Reaia'ma,
Rezini'ma, Nekoda'ma, **51** Gazamu'ma, Uza'ma, Pesea'ma, **52**
Besai'ma, Meaunimi'ma, Nefusimi'ma, **53** Bakbuku'ma Hakufa'ma
Harhuri'ma, **54** Bazluti'ma, Mehida'ma, Harsa'ma, **55** Barkosi'ma,
Sisera'ma, Tema'ma, **56** Nezia naga'ene Hatifa nagapintiki
hu'za mika e'naze. **57** Hagi Solomoni eri'za vahe'mokizmi naga
nofipinti'ma e'nazana, amama zamagima me'nea vahe'mokizmi
nagapinti etere hu'naze. Sotai'ma Sofereti'ma Perida'ma, **58**
Ja'ala'ma, Darkoni'ma, Gideli'ma, **59** Sifatia'ma, Hatili'ma,
Pokeret-Hazebaimi e'ne Amoni nagaki hu'za e'naze. **60** Hagi
ra mono nompi eri'za vahe'ene, Solomoni eri'za vahe'mokizmi
nagapinti vahe'ma kinafinti'ma e'nazana ana maka 392'a venene
e'naze. **61** Hagi mago'a vahe'ma e'nazana ama kumatamimpinti
e'naze. Tel-Melagi Tel-Hasarigi Kerubigi Adonine Imeri kumate
venenegi hu'za e'naze. Hianagi zamagra Israeli vahepina ina
naga nofipinti e'nafi hake'za eriforera osu'naze. **62** Hanki ana
vahera Delaiane Tobiane Nekoda nagapintiki hu'za e'nazankino,
ana makara 642'a venene e'naze. **63** Hanki mago'a pristi
vahe'ma e'nazana, Hobαι'a Hakozi'ma Bazilai nagapintiki
hu'za e'naze. Bazilai'a Giliatiti ne' Bazilai mofa a' erige'za,
a'amofo naga'moza zamagra'a nagapi nehaza zamagi Bazilai'e
hu'za antemi'naze. **64** Ana hige'za ana 3'a nagara ina naga
nofipinti e'nafi hu'za zamagigura hake'nazanagi, zamagima

kriventaza avontafepina hakazanagi ke'za eri forera osu'naze. E'ina hu'negu agru osu'naze nehu'za, zamatrage'za pristi eri'zana e'ori'naze. **65** Ana higeno Juda mopare'ma ugotama hu'nea gavana ne'mo'a zamasamino, Anumzamofontegama ofama huntasaza ne'zampintira onetma amne mani'enkeno, Urimine Tamimiema nehaza havema eri'nesia pristi ne'mo, pristi eri'zana erigahazafi Anumzamofo avesira keno eri fore hugahie. **66** Hagi Israeli vahe'ma e'nazana ana makara 42 tausen 360'a vahe e'naze. **67** Ana hazage'za ve kazokzo eri'za vahe'ene a' kazokzo eri'za vahera ana makara 7 tausen 337ni'a vahe azageno, anampina zagamema nehaza vene'nene a'enenen 245'a vahe e'naze. **68** Hanki hosi afutamina 736agi, miulie nehaza tonki afutamina 245 fu'agi, **69** kemoli afutamina 435fu'agi, donki afutamina 6 tausen 720'a afu taminki hu'za zamavare'za e'naze. **70** Hanki ra mono noma ki zantamima, mago'mago naganofite'ma ugota hu'naza vahe'mo'zama eri truma hu'nazana amanahu hu'ne. Juda mopare'ma ugotama hu'nea gavana ne'mo'a, 1 tausenia golire zagogi, 50'a golire zuompagi, pristi vahe kukena 530'agi huno eme atre'ne. **71** Hagi mago mago naganofite'ma ugotama hutere'ma hu'naza vahe'mo'za 20 tauseni'a golire zagogi, silva 1 tausen 325fu'a kilogi hu'nea eme atre'naze. **72** Hagi mago'a vahe'mo'za golire zagoa 20 tauseni'agi, Silva 1 tausen 330'a kilone, pristi vahe'mo'zama antanisaza kukena 67ni'agi hu'za eme atre'naze. **73** Hanki pristi vahe'ma, Livae naga'ma, mono no kafante'ma kvama nehaza vahe'ma, zagame'ma nehaza vahe'ma, mono nompima eri'zama eneri'za vahe'ene, mago'a amne vahe'ene ana maka Israeli vahe'mo'za ne'onse kumazmire umani emani huvagare'naze.

Ana hu'za Israeli vahe'mo'za ko'ma mani'naza nonku'ma zamire
umani emani huvaga retazageno, 7ni ikana emente'ne.

8 Hanki Tima Afi Kafanema nehaza kafamofo avugama me'nea
kankamumpi ana maka Israeli vahe'mo'za eri mago zamavugosa
hu'za eme atru hu'naze. Anama hute'za avoma kre eri'zama
e'neria ne' Ezrana asami'za, Ra Anumzamo'ma Israeli vahe'ma
zamasamio huno, Mosesema huntogeno krente'nea avontafera
erinka eno hu'za hu'naze. **2** Anage hazageno 7ni ikamofo
ese knazupa, pristi ne' Ezra'a ana kasege avontafera erino,
venenene a'nene kema antahini'ma huga mofavreramima
mani'naza zamavuga e'ne. **3** Anante Ezra'a ana avontafera
erino nanterampi tima nefiza kafamofo avugama me'nea
kumapi, ana maka Israeli vahe zamavuga oti'neno, ana
kasege avontafepinti nehamparige'za vene'nene a'nanene,
kema antahi ani'ma huga mofavreramimo'za nentahizage'za,
ana maka vahe'mo'zanena zamagesa ante so'e hu'neza
nentahizageno vuno feruse'ne. **4** Hanki Ezra'a manisga
hu'neno keagama hu tra'ma tro hunte'naza trate mani'nege'za
azantmaga kaziga, Matitia'ma, Sema'ma, Anaia'ma, Uri'a'ma,
Hilkia'ene Ma'aseiaki hu'za oti'naze. Ana hazageno hoga kaziga'a
Pedaia'ma Misaeli'ma Malkija'ma Hasumi'ma Hasbadana'ma
Zekaraia'ene Mesulamuki hu'za oti'naze. **5** Hagi anante Ezra'a
kasegema hamprinaku manisga hu trate mani'nege'za ana
maka vahe'mo'za negageno, ana avontafe'ma erivakama
rege'za, ana maka vahe'mo'za oti vagare'naze. **6** Ana
hazageno Ezra'a Ra Anumzana tusi'a Anumzamofona agi'a
ahentesga hu'ne. Ana hige'za ve'a kevumo'za zamazana erisga
huvagare'za, Tamage, Tamage nehu'za, zamarena re'za mopafi
zamavugosaregati kepri hu'za Ra Anumzamofona monora

hunte'naze. 7 Anante anama hutazage'za, Livae nagara Jesua'ma
Bani'ma Serebia'ma Jamin'i'ma Akubu'ma Sabetia'ma Hodia'ma
Ma'aseia'ma Kelita'ma Azaria'ma Josabati'ma Hanani'ene
Pelaia'ma hu'za, otii'naza vahera kasegea eriama hu'za
zamasami'naze. 8 Zamagra Anumzamofo kasege avontafepinti
hamparite'za, agu'gesa'a eriama hu'za vahe'mo'zama antahi
ani'ma hu'are zamasamizage'za antahi ama' hu'naze. 9 Hagi
anante Juda mopare gavana ne' Nehemaiaki, Pristi eri'zama
enerino avontafe'ma negrea ne' Ezra'ene Livae naga'ma
vahe'ma rempima hunezamiza naga'mo'zanena amanage hu'za
maka vahera zamasami'naze, Menina amagnamo'a tamagri
Anumzamofo avurera ruotge hu'neanki tamaSunkura huge,
zavirategera osiho. Na'ankure zamagrama ana kasegema
nentahi'za maka vahe'mo'za zavi krafage nehazage'za anankea
hu'naze. 10 Anante Nehemai'a anage huno zamasami'ne,
Vutma knare'nare ne'zane haganentake tinena ome neneta,
musenkase nehuta ne'zama trotra'ma huonte'nesaza vahera
mago'a zamigahaze. Amagnamo'a tagri Ra Anumzamofo avurera
ruotage hu'neanki, tamaSunkura osutma muse hiho. Na'ankure
Ra Anumzamo'ma neramia musezamo'a tamagri hankave
me'ne. 11 Hanki Livae naga'mo'za vahe'ma zamazeri fru hu kea
amanage hu'naze, Akoheta maniho, na'ankure amagnamo'a
ruotge hu'nea kna me'ne. E'ina hu'negu tamaSunkura osiho. 12
Hanki maka veamo'za no zamirega vu'za e'za hu'za, ne'zane
tinena ome nene'za, ne'zankuma atupa'ma hu'naza vahera
ne'zana nezami'za tusi musenkase hu'naze. Na'ankure kasegema
hampari zamiza kemofo agafa'a antahi ama hu'nazagu anara
hu'naze. 13 Hanki 7ni ikamofona nampa2 knazupa, ana maka
naganofite'ma ugagotama huterema hu'naza vahe'ene pristi

vahe'mo'zane Livae naga'moza, kasegefima me'nea naneke
rempi huzami'niegu avontafe'ma negrea ne' Ezrante e'za
emeritru hu'naze. **14** Ana hute'za Ra Anumzamo'ma Mosesema
ami'nea Kasege avontafepina amanahu ke me'nege'za ke'za
erifore hu'naze. Israeli vahe'mota 7ni ikampima musenkasema
hu knarera fugagi nompi mani'neta ne'zana kreta neneta
musena hugahaze huno hu'nea naneke me'nege'za ke'naze. **15**
Ana hu'negu ne'onse kumatmimpine Jerusalemi kumapinema
mani'naza vahetega amanage huta kea atre zamanteho,
avontafepina amanage huno krente'ne, agonarega zafa tanopafi
mareritma ani'namoke'ma hu'nenia olivi azankuna'ene, afi
olivi zafa azankuna'ene tofe ani'nane Maitilesi zafa (myrtle)
azankuna'ene mago'a ani'nage'ma hu'nea zafa azankuna'enena
erita eta fugagi nona eme kineta kasegemo'ma hu'nea kante
anteta ne'zana kreta neneta, musena hugahaze huno krentene.
16 Ana hu'negu veamo'za vu'za zafa azankuna'a ome eri'za e'za
nozamimofo agofetu'ene kumapinena fugagi nona eme negi'za,
Anumzamofo mono no kumapine, Tima afi Kafanema nehaza
kafamofo avugane, Efraemi kafanema nehaza kafamofo avuga
fugagi nontamina ki'naze. **17** Hanki ana maka vahe'ma Babiloni
kinafinti'ma atre'za e'naza fugagi no ki'za mani'naze. Hagi Nuni
nemofo Josua knareti'ma eno ana knare'ma ege'za, e'inahu zana
hu'za musenkasea osu'nazanki'za, tusi musenkase hu'naze. **18**
Ana nehu'za mago mago zupa Anumzamofo nanekea mago'ane
Ezra'a hamprige'za antahi'naze. Nentahi'za seveni zagekna zupa
mani'ne'za muse hu'naze. Hagi ana'ma hute'za Anumzamo'ma
kema hu'nea za hu'za eme atru huvagarete'za vu'za e'za
hu'naze.

9 Ana ikamo'ma 24ma hiankna zupa Israeli veamo'za ne'zana
a'o nehu'za, hapa frete'za eri tru hu'naze. **2** Hagi ana Israeli
vahe'mo'zama megi'a vahe'enema rutrago'ma ate'nazana, ana
vahera zamatre'za e'naze. Ana nehu'za oti'za kumi'zamigura
zamasunku nehu'za, korapa zamagehe'zama hu'naza havi
zamavu zamava zanku'enena zamasunku hu'naze. **3** Hagi 3'a
auamofo agu'afi oti'ne'za Ra Anumzana zamagri Anumzamofo
kasege avontafepinti'ma hampri zamiza nanekea antahi'naze.
Ana hute'za ete 3'a auamofo agu'afina kumi'zami huama
nehu'za, Ra Anumzamofona monora hunte'naze. **4** Hanki Livae
naga'mo'zama manisga hu'nezama nenekema nehaza tratera,
Jesua'ma Bani'ma Katmieli'ma Sebania'ma Buni'ene Kenani'ma
hu'za ana tratera mani'ne'za ranke hu'za Ra Anumzana zamagra'a
Anumzamofontega nunamuna hu'naze. **5** Anante Livae nagara
Jesua'ma Kadmieli'ma Bani'ma, Hasabneia'ma, Serebia'ma,
Hodia'ma, Sebania'ene Petahiaki hu'za amanage hu'za vea kevua
zamasami'naze, otita Ra Anumzana tamagri Anumzama mani
vava Anumzamofo agi'a hentesga hih. Hagi Ra Anumzamoka
so'e Kagika'a ahentesga hune, tagrama keagafinti'ma huta e'inahu
Anumza mani'nanema huta hu'zamo'a amuho hie. **6** Kagrake Ra
Anumzana mani'nane, Kagra monaramina tro nehunka, anazanke
hunka onaga'ama me'nea monaramina tro nehunka, hanafi
taminena tro hu'nane. Ama mopa tro nehunka, mopa agofetu'ma
me'nea zantaminena tro hu'nane. Hage rintamina tro nehunka,
hageri agu'afima me'nea zantaminena tro nehunka, maka
zamofona zamasimura nezamine. Ana hu'nanke'za hampriga
osu ankerontamima monafinkama mani'naza ankeromo'za
zamare'nare'za Kagia ahentesga nehaze. **7** Kagrake Ra
Anumzana mani'enka, Babiloni mopafi me'nea kuma Kaldia

kaziga Uri mopareti Abramuna huhamprinka avre tiraminka ne-enka, Abrahamu'e hunka agia antemi'nana Anumza mani'nane.

(Gen-Agaf 11:31, 17:5) **8** Na'ankure agra maka agu'areti fatgo huno kavesigantegenka Kagra agrira hu hagerafi huvempage huntenka, kagripinti'ma henkama forehu nante anante'ma hu'za esaza vahera, Kenani vahe'ma, Hiti vahe'ma, Amori vahe'ma, Perizi vahe'ma, Jebusi vahe'ene Girkasi vahe'mokizmi mopa zamigahue hunka hunte'nane. Kagra fatgo Anumza mani'hanku, huvempama hu'nana keka'a eri otre'nane. **9** Tagri tagehe'zama Isipima mani'nazage'za Isipi vahe'mo'zama tusi'a knazama zami'nazana zamage'nane. Zamagra koranke hagerinte'ma eman'i'ne'za zamazama hananegu'ma Kagritegama zavi krafama hazagenka, Kagra antahi zami'nane. **10** Kagra ruzahu ruzahu kaguvasane avamezane hunka Feronte'ene eri'za vahe'are'ene ana maka Isipima mani'naza vahe'enena zamazeri haviza hu'nane. Na'ankure zamagrama Israeli vahe'ma zamazeri havizantfama hazazanku anara hu'nane. Ana nehunka Kagia erinte ama hu'nankeno, vahe'mo'za meninena Kagia ahentesga nehaze. **11** Zamagra negazagenke hagerina refko hugantigama hankeno, amu'nompina ka fore hige'za hagege mopare vu'naze. Hianagi zamarotgoma hu'za aza vahera havema hiazza hunka timo'ma hankavemanetifi zamazeri atranke'za urami'naze. **12** Ferura hampompi mani'nenka vugota huzmantenka vu'nane. Hagi kenagera tevenefake hampompi mani'nenka, remsa huzmantenka kana zamaveri hanke'za vu'naze. **13** Hagi Sainai agonarera eraminka monafintira kea hunezaminka, fatgo huno knare'ma hu'nea tra ke'ne, kasegenena Kagra zami'nane. **14** Kagra ruotage'ma hu'nea Sabati knaka'a zamagridera emeri ante ama' nehunka, amage anteho hunka tra kene

kasegeka'a, eri'za vaheka'a Mosesena ami'nane. (Eks-Uti 20:8)

15 Ne'zama ne'zanku'ma zamaga'ma netegenka monafinkati bretia nezaminka, tinku'ma zamavenesigenka, tina hankeno havefinti ege'za ne'naze. Hagi huvempama huzamantenka zamigahue hunkama hu'nana mopafi ufre'za erisanti hare'za mani'naze. Hanki tina omne'nege'za tinku zamave'nesigenka knare hunka havefinti tina erifore huzmi'nanke'za ne'naze. **16** Hianagi tagehe'mo'za zamavufaga ra nehazageno zamagu'amo'a hanavetige'za, kagri kasegea amagera onte'naze. **17** Zamagra keka'a zamagesa ante'za nontahi'za, zamagri amunompima kaguva zantamima eri fore'ma hu'nana zankura zamagane kani'naze. Ana nehu'za zamefi hugami'za kea nontahi'za, ete kazokzo eri'zampi Isipi vanune hu'za mago kva ne' azeri oti'naze. Hianagi Kagra kumi atrente Anumza mani'enka, kasunku hunezmanantenka krimpa fru Anumza mani'nanankinka, kasunku hunezmanantenka so'e kavukva nehunka, ame hunka krimpa ohenka mevava kavesizanu vahera kavesinentana Anumza mani'nane. E'ina hu'negu zamefira Kagra huozami'nane. **18** Hagi Sainai agonafima mani'ne'za goli eri'za bulimakoa tro hu'za anange hu'naze, ama anumzana tagri anumzane hu'za nehu'za, Isipitima tavre'noma e'nea anumzane hu'za hu'naze. Ana nehu'za Anumzamoka kagi'a eri haviza hu'naze. **19** Hianagi tusi'a kasunku huzmantenka hagege kokampina kamefira huzminka zamatranke'za ofri'naze. Feru'ma kama zamaveri huno nevia hampomo'a zamatreño ovigeno, kenage'ma remsa huno kama zamaveri'ma huno nevia teve nefake hampomo'a asura osu'ne. **20** Kagra knare Avamuka'a huntankeno antahintahia zami'ne. Kagra mana ne'zana zaminke'za nevava nehazagenka, tinku'ma hagegema hazagenka tina zaminke'za ne'naze. (Eks-Uti 16,

17:1-7) 21 Hanki 40'a kafumofo agu'afina hagege kokampina
kegava huzmante'nanke'za mago zankura atupara osu'naze.
Kukena zamimo'a tagato tagutura osigeno, zamagamo'a zoreno
prora osu'ne. (Diu-Kas 8:4) 22 Kagra zamaza hanke'za
kini vahera hara hu zamagtere'za afete'ma mani'naza vahe
mopazamia eri'naze. E'ina hu'negu Hesboni kini ne' Sihoni
mopane Basani kini ne' Ogi mohanena eri nafa'a hu'naze.
23 Ana nehunka zamagrira tusi mofavre naga zaminke'za,
monafi hanafikna hazage'za hamprigara osu'naze. Ana nehunka
zamafahe'ima huhampri zmante'nana mopafi zamavarenka
ufre'nane. 24 Hagi zamagehemo'za ufre'za Kenani mopa ome
eri nafa'a hu'naze. Kagra zamaza hanke'za Kenani mopafima
nemaniza vahera zamavaretre'naze. Kini vahe'zamine, ana
mopafima nemaniza vahe'ene Kenani vahe'enena zamazampi
zamavare antanke'za, nazanoma huzamanteku'ma hazazana
amne huzamante'naze. 25 Hagi hankavenentake keginama
hu'naza ranra kumatamine, knare zantfama hu'nea mohanena
hahu'za eneri'za, knare'nare zantamimo'ma avite'nea nontamine,
ko'ma kafinte'naza tinkerinena eri nafa'a nehu'za, waini hozane,
olivi zafa hozane, mago'a zafa raga hozanena rama'a eri nafa'a
hu'naze. Zamagra tusi ne'za nene'za afovage nehu'za, tusi'a
asomu'ma zamina zankura musenkase hu'naze. 26 Hianagi
zamagra keka'a nontahi'za ha' renegante'za, kasegeka'a zamefi
umi'naze. Kagritegama ete rukrahe hu'za ehogu'ma hankave
keagama zamasami'za kasnampa vaheka'a zamahe fri'naze.
Ana nehu'za Kagri kagia tusiza hu'za huhaviza hu'naze. 27
E'ina hu'nazagu ha' vahe'zami zamazampi zamavare antanke'za
zamazeri haviza hu'naze. Hagi zamagrama zamatama e'neri'za,
Kagritega krafage hazagenka monafinkati antahinezaminka, tusi

kasuntagi zamantenka zamagu'ma vazi vahera huzmantanke'za
e'za ha' vahe zamazampintira eme zamagu vazi'naze. 28
Hianagi zamagrama mani fruma nehu'za, Kagri kavurera
havi'zama hu'nea avu'ava zana ete hu'naze. Anama hazagenka
zamatranke'za ha' vahezamimo'za kegava huzmantage'za
ete Kagritegama krafagema hazagenka, Kagra monafinkati
krafa ke'zamia nentahinka kasunku huzmantenka, maka zupa
zamavaretere hu'nane. 29 Hagi zamagrama rukrahe hu'za
kasegeka'a amage antehogura hankave ke huzmante'nane.
Hianagi zamavufaga ra nehu'za zamarimpamo'a hankavetige'za,
keka'a ontahi'naze. Ana nehu'za vahe'mo'zama amage'ma
ante'za so'e huzama maniga tra keka'a zamefi hunemi'za kumi
hu'naze. Zamarimpamo'a hankavenetige'za zamefi hunegami'za,
haviza hu'za keka'a amagera onte'naze. 30 Hanki rama'a kafufina
akohenka fru hunezmantankeno Avamuka'amo'a kasnampa
vahe zamagipi huvazino zamasami'neanagi, ana nanekerera
tagehe'za zamagesa ante'za ontahi'naze. E'ina hu'negu ha'
vahe'mokizmi zamazampi zamavare ante'nane. 31 Hianagi
tusi'a kasunku hunezmantenka zamahe fananea nosunku,
kamefira huozami'nane. Na'ankure Kagra fru hunka kasunku
Anumza mani'nane. 32 Hanki e'ina hu'negu tagri Anumzana
tusi hihamukane hentofaza hunka hankavenentake Anumza
mani'enka, maka zupa kagrama huvempama hu'nana kegu
kagesa nentahinka, kavesirante vava nehana Anumza mani'nane.
E'ina hu'negu muse hugantonanki, ko'ma Asiria kini vahe'mo'zama
tazeri havizama hu'naret'i'ma eno meninte'ma egeta, kini nagatine
kva vahetine pristi vahetine kasnampa vahe'ene tafahel'ine,
ana maka vaheka'amota tusi'a knazamo eme tazeri havizantfa
hu'ne. 33 Hianagi e'i ana maka knazama tagrite'ma e'nea

knafinia Kagra fatgo kavukvaza hurante'nane. Hagi tagrama kumi'ma nehunkanka'a, huvempama hu'nana keka'a amage ante fatgo hunka taza hu'nane. **34** Hagi kini vahetimo'zane kva vahetimo'zane pristi nagatimo'zane, tafahe'mozanena Kagri kasegea amagera onte'naze. Kagrama hihoma hunka huzamante'nana nanekene, koro kema huzamante'nana nanekea zamagesa ante'za ontahi'naze. **35** Ana hu'nazanagi asomu huzamantenka kini vahera zaminke'za kegava huzamante'naze. Ana nehunka knare huno masavenkema hu'nea ra mopakrerfa zami'nane. Hianagi ana zankura zamagesa nentahi'za, Kagrira monora hunegante'za kefo zamavu zamavama nehaza zana netre'za ete rukrahera hu'za Kagritera ome'naze. **36** Hianagi menina knare huno masavenentake mopa tafahe'ina zaminke'za mani'ne'za zafa rgaramine knare'nare ne'zana ne'nazanagi, ama ana mopafina tagra kazokzo eri'za vahe menina mani'none. **37** Na'ankure tagra kumi hu'nona nona'a, ru vahe kinima huzamantanke'zama ezama eme kegavama hurante'naza kini vahe'mo'za, mopatifinti'ma knare'nare ne'zama hamarona ne'zana zamagrake'za eri'naze. Hagi tagri'ene afu nagatinena kegava hurante'neza, nazano tagritema hunaku'ma haza zana, amne hu'naze. Ana hazageta tusi'a knazampi mani'none. **38** Hanki ama ana zantamima refko'ma huta kevagamareteta, mago tarimpa huta Ra Anumzamofo kasege amage antegahune huta mago kea anakiteta avompi krente'none. Ana hunke'za kva vahetimo'zane Livae nagatimo'zane pristi nagatimo'za ana avomofo agofetura zamagi krentetere hu'za ana avona eri hankaveti'naze.

10 Hanki ana avomofo agofetu'ma zamazanko avoma ante'naza vahe zamagia ama'ne. Kavana ne' Hakalia nemofo Nehemaiaki,

Zedekaiaki, **2** Seraiaki, Azariaki, Jeremaiaki, **3** Pasuriki, Amariaki, Malkijaki, **4** Hatusiki, Sibaniaki, Malukiki, **5** Harimiki Meremotiki Obadiaki, **6** Danieliki Ginetoniki Barukiki, **7** Mesulamuki Abijaki Mijaminiki, **8** Ma'aziaki Bilgai'ene Simaia'enenki hu'za pristi eri'zama eneriza naga'mo'za zamagia krente'naze. **9** Hanki ana avomofo agofetu'ma zamazanko avoma ante'naza Livae nagamokizmi zamagia ama'ne, Azania nemofo Jesuaki, Henadati nagapinti ne' Binuiki, Katmieli'ene, **10** afuagnahe'za Sebaniaki, Hodaki, Kelitaki, Pelaiali, Hananiki, **11** Mikaki, Rehopuki, Hasabiaki, **12** Zakuriki Serebiaki Sebaniaki, **13** Hodaki, Bani'ene Beninu'enene. **14** Hanki ugota kva vahe'ma ana avomofo agofetu'ma zamazanko avoma ante'naza vahe'mokizmi zamagia ama'ne, Parosiki Pahat-Moapuki, Elamuki, Zattuki, Baniki, **15** Bunniki, Azagatiki, Bebaiki, **16** Adonijaki, Bigvaiki, Adiniki, **17** Ateriki, Hezekaiaki, Azzuriki, **18** Hodaki Hasumiki, Bezaiki, **19** Harifiki, Anatotiki, Nebaiki, **20** Makpiasiki, Mesulamuki, Heziriki, **21** Mesezabeliki, Zadokuki, Jaduaki, **22** Pelatiaki, Hananiki, Anaiaki, **23** Hoseaki, Hananiaki, Hasubuki, **24** Halohesiki, Pilhaki, Sobekiki, **25** Rehumuki, Hasabnaki, Ma'aseiaki, **26** Ahiaki, Hananiki, Ananiki, **27** Malukiki, Harimi'ene Ba'ana enene. **28** Hanki mago'a vahe'ma anampima mani'naza vahera pristi vahe'ene Livae vahe'ma mono no kafante kva vahe'ene zagame'ma nehaza vahe'ene, mono nompi eri'za vahe'ene, Ra Anumzamofo kasegema amage'na nente'za zamagra'ama zamazeri ruotge'ma hu'zama nemaniza vahe'ene a'nezamine mofavre naga'zamine kema zamagesama ante'zama antahi so'e huga naga'mozane, **29** ana maka vahe'mo'za e'za zamafu zamaganaha'e'zane kva vahe'zamine eme eri atru hu'za mago hankave naneke huhagerafi'za, Ra Anumzama tagri

Anumzamo'ma eri'za vahe'a Mosesema ami'nea kasegene,
trake'anena maka zupa amage antegahune hu'za kea anaki'naze.
Anage nehu'za zamagra amanage hu'naze, Huvempama
huna ke'ma amage'ma ontesanunkeno'a Anumzamo'a tazeri
haviza hugahie. **30** Tagra huvempa hunankita mofa'netia
zamatresunke'za meg'i'a veneneramina vea enorisageta, ne'
mofavretirera meg'i'a vahepintira mofa'ne zamia ara avare
ozamigahune. **31** Hagi meg'i'a vahe'ma tva'ontire'ma nemaniza
vahe'mo'zama Sabati manifru hu knarero, mago'a knama
huhampri antegeno ruotgema hu'nea knare'ma zagore'ma
atreku mago'a zazmima eri'za ege, witi nazama eri'zama
esnageta tagra mizana osegahune huta huvempa hu'none.
Anage nehu'za hampritama nevanunkeno 7nima hutere hania
kafurera, mopatifina eri'zana e'ori atresanunkeno mopamo'a
manigsa nehanigeta, Jiu vahe'motama nofi'ma ohu ahuma
hu'nesuna nofi'enena maka otrente atrente hugahune. **32**
Hanki huvempa hunankita mago mago kafufina magoke zupa,
Ra Anumzana tagri Anumzamofo mono nompima eri'zama
erisnaza zama mizase zana, osi'a silva zagoa refko huta eme
atretere hugahune. **33** Hanki ana zagoretira, Ra Anumzamofo
avure'ma mono nompima me'nea trate'ma ante bretia miza
nese'za, maka zupama witi ofama hu' witine, maka zupama
tevefima kre fanane hu ofama hu sipisipio kao afutamine, Sabati
zupama kresaza ofaramine, kasefa ikama ementegeno'ma
musema hu knare'ma ofama hu zantamine, mago'a ranra
knare'ma ofama huzantaminena miza segahaze. Ana zanke huta
Israeli vahe'mota kumi'mofo nona, ofama hanageno kumitima
atrerantesia zantaminena ana zagoretira miza nesetma, tagri
Anumzamofo mono nompima ana maka eri'zama erisaza

zantaminena mizasegahaze. **34** Hanki tagra pristi naga'motane, Livae naga'motane, maka vahe'motanena taisi zokago reta kesanunkeno, ina naga'mo mago kafufina Ra Anumzantimofo mono nompima kresramnama vu itare'ma tevema hugare tevea haretere hugahifi, kasegefima krente'naza kante anteta huhampari zamantetere hugahune. **35** Tagra anazanke huta kea anakunankita mago mago kafufina hozatifinti'ma ese ne'zama hamaresuna ne'zane, maka zafa rgatimo'ma ese uza'ma resanigeta tagisunana erita Ra Anumzamofo mono nompi egahune. **36** Hanki ana zanke huta kasegefi hu'nea kante anteta ese zage ne' mofavrette, esema kasentesia ve bulimakao anenta'ene sipisipi anenta'ene meme afu anenta'ene avreta Ra Anumzana tagri Anumzamofo mono nompima eri'zama eneri'za pristi vahe'ma mani'nazare vugahune. **37** Ana nehuta Ra Anumzana tagri Anumzamofo mono nompima fenozama nentaza nompima antesnaza zantamima pristi vahete'ma eritama vanuna zantamina, ese'ma rentrama ahesuna witifinti, witi ofama hu'zana osi'a enerita, zafa ragafinti'ene wainifinti'ene olivi masavenena erita vugahune. Ana nehuta hozatifinti'ma hamparisanunkeno 10nima hutere hania kevua erita ne'onse kumate'ma mani'neta eri'zama eneruna kumapima huhampri zamantage'za ana zantamima zonegi'za Livae naga'mokizmi erita ome zamigahune. **38** Hanki Aroni nagapinti'ma pristi eri'zama e'nerisnaza naga'mo'za mago'a Livae naga'ene mani'ne'za nege'nage'za, 10ni'a kevufinti'ma mago kevuma Livae naga'ma eme zamitere hanaza kevu ne'zana erigahaze. Ana hute'za ete kevuma ante'za hamparsnageno 10nima hutere hania kevua ete eri'za Ra Anumzana tagri Anumzamofo mono nompi vu'za fenozama nentazafi ome antegahaze. **39** Hagi ana ofama

hu'zana witiramine kasefa wainine olivi masaveramina erita tagra maka Israeli vahe'motane, Livae naga'enena, Ra Anumzamofo mono nompima eri'zama e'neri'za zuomparamima nentazage'za, ana tava'onte'ma pristi vahe'ene mono nomofo kafante'ma kvama nehaza vahe'ene, zagamema nehaza vahe'ma nemasafinka erita ome antegahune. Ana nehuta Anumzantimofo mono nona tagerakanita tamefira huomigosune huta hu'none.

11 Hagi ana vahe'mokizmi kva vahe'mo'za Jerusalemi rankumapi mani'naze. Hianagi Juda nagapinti'ene Benzameni nagapinti vahe'mo'za, iza ruotge'ma hu'nea kumapi Jerusalemia ufregahifi taisi zokago re'za kazageno 10nima eme hutere himofona huzmantage'za Jerusalemi ran kumapi umani'naze. Hagi ruga'a 9ni'a vahe'mo'za ne'onse kumazamifi ete'za umani emanu hu'naze. 2 Anante iza'zo zamarimpamo'ma otige'zama Jerusalemi rankumapima umaniza vahera, Israeli vahe'mo'za asomu ke huzmante'naze. 3 Hanki provinsirema kvama huterema hu'naza Jerusalemi rankumapi eman'i'naze. Hagi Pristi naga'ene Livae naga'ene, mono nompima eri'zama erisaza vahe'ene Solomoni eri'za vahe'mokizmi naga nofipinti vahe'ma Juda mopafima me'nea ne'onse kumatamimpima nemaniza vahe'mo'zanena kumazamifi mani'ne'za mopazamine rankumazmia zamagra'a kegava hutere hu'naze. 4 Hianagi mago'a Juda nagapinti'ene Benzameni nagapintira Jerusalemi ran kumapi mani'naze. Hagi Juda nagapinti vahe zamagi'a ama'ne, Uzzia nemofo Ataia'e. Hanki Uzziana Zekaraia kasentegeno, Zekaraiana Amaria kasentegeno, Amariana Sefatia kasentegeno, Sefatiana Mahalaleli kasentegeno, Mahalalelina Perezi kasentegeno, Perezina Juda kasente'ne. Hagi Ataia'a Perezi nagapinti efore hu'ne. 5 Hagi Juda nagapinti mago

nera Ma'aseiakino, Ma'aseiana Baruku kasentegeno, Barukuna
Kol-Hose kasentegeno, Kol-Hosena Hazaia kasentegeno,
Hazaiana Adaia kasentegeno, Adaiana Joiaribi kasentegeno
Joiaribina Zekaraia kasentegeno, Zekaraiana Sela kasentegeno,
Sela'a Juda nagapinti efore hu'ne. **6** Hagi Perezipinti'ma
efore'ma hu'naza vahe'ma Jerusalemi rankumapima mani'nazana
hanave vene'nea makara 468'a mani'naze. **7** Hanki
Benzameni nagapinti'ma Jerusalemi rankumapima mani'naza
vahe zamagia ama'ne, Benzameni nagapintira mago nera
Salukino, Saluna Mesulamu kasentegeno, Mesulamuna Joedi
kasentegeno, Joedina Pedaia kasentegeno, Pedaiana Kolaia
kasentegeno, Kolaiana Ma'aseia kasentegeno, Ma'aseiana Itieli
kasentegeno, Itielina Jesaia kasente'ne. **8** Ana hu'neankino
Salu afu'aganaha'zama vu'nazana, Gabaike Salaike vu'na'e.
Higeno Benzamenimpinti'ma efore'ma hu'naza vahe'ma
Jerusalemi rankumapima mani'nazana, ana makara 928'a
venene mani'naze. **9** Higeno Zukri nemofo Joeli ugota kva
vahe'zamia manigeno, Hasenua nemofo Juda'a nampa 2 kva
mani'ne. **10** Hanki pristi vahepinti'ma Jerusalemi rankumapima
mani'naza vahe zamagia ama'ne, Joaripi nemofo Jedaia'a
Jakini negehokino agra kva mani'ne. **11** Hagi mago nera
Seraiakino Seraiana Hilkia kasentegeno, Hilkiana Mesulamu
kasentegeno, Mesulamuna Zadoku kasentegeno, Zadokuna
Meraioti kasentegeno, Meraiotina Anumzamofo mono nonte'ma
kegavama hu'nea ne' Ahitubu kasente'ne. **12** Higeno ana
nagapinti'ma mono nompima eri'zama eri'naza vahera ana
makara 822'a venene. Hagi mago nera Adaikino, Adaiana
Jerohamu kasentegeno, Jerohamuna Pelalia kasentegeno,
Pelaliana Amzi kasentegeno, Amzina Zekaraia kasentegeno,

Zekaraiana Pasuri kasentegeno, Pasurina Malkija kasente'ne.

13 Higeno Adaia naga nofipinti'ma naga zamire'ma ugotama hutere hu'naza kva vahera, ana makara 242'a vahe mani'naze.

Hagi mago nera Amasaikino, Amasaina Azareli kasentegeno, Azarelina Azai kasentegeno, Azaina Mesilemoti kasentegeno, Mesilemotina Imeri kasente'ne. **14** Higeno Amasai naga nofipinti'ma hankaveti'za ha'ma huga vene'nea 128'a vahe vu'naze. Ana hazageno Hagedolimi nemofo Zabdieli ugota huno kva vahezamia mani'ne. **15** Hanki Livae nagapinti'ma Jerusalemi rankumapima mani'naza vahe zamagia ama'ne, mago nera Semaiakino, Semaiana Hasubu kasentegeno, Hasubuna Azrikamu kasentegeno, Azrikamuna Hasabia kasentegeno, Hasabiana Buni kasente'ne. **16** Hagi Livae nagapima ugota hu'neke kvama hu'nakezama Ra Anumzamofo mono nomofo meg'iama eri'zama eneriza kva netrena, Sabetaike Jozabatike. **17** Hagi anantera Mataniakino Mataniana Mika kasentegeno, Mikana Zabdi kasentegeno, Zabdina Asapu kasente'ne. Ana hu'neankino Matania'a, Ra Anumzamofo mono nompima zagame'ma nehaza vahetema ugota huzmante'nege'za Anumzamofoma susu hunte mono'ma nehaza zupama nunamuma hutege'za mono'ma nehaza ne' manine. Higeno agri'ma azama nehia ne' Bakbuki'a agranena Jerusalemi kumapi mani'ne. Hagi anantera mago nera Abdakino Abdana Samua kasentegeno, Samuana Galali kasentegeno, Galalina Jedutuni kasente'ne. **18** Ana hige'za Jerusalema ruotage'ma hu'nea kumapima Livae naga'ma umani'nazana ana makara 284'a vahe umani'naze. **19** Hagi kuma kegina kafante'ma kvama hu vahera Akubu'ene Talmoni'ene zanafu zanagnahe'zane kva hu'naze. Ana hu'neankino ana makara 172'a vahe mani'naze. **20** Hagi mago'a Israeli

vahe'ene, pristi vahe'ene, Livae vahe'mo'za Juda mopafima ne'onse kumatamima me'nefi umani emanı nehu'za, erisantima hare'naza mopa zamire umanitere hu'naze. **21** Hianagi mono nompima eri'zama e'neri'za vahera, Jerusalemi kumapina mago kaziga Ofeli nehaza osi agonare mani'naze. Ana hazageke Ziha'ene Gispake kvazamia mani'na'e. **22** Hanki Bani nemofo Uzzi'a, Livae vahe'ma Jerusalema mani'naza vahe'mokizmi ugota kva mani'ne. Higeno Bani nemofo Uzzina Hasabia kasentegeno, Hasabiana Matania kesentegeno, Mataniana Mika kasentene. Ana hu'neankino Asapu naga'ma Ra Anumzamofo mono nompima zagame'ma nehaza naga nofipinti ne' Uzzi'a mani'ne. **23** Hanki zagame'ma hu vahera kini ne'mo'ma maka zupa e'ina huta zagamera hiho huno huzmante'nea kante mago mago zupa zagamera hutere hu'naze. **24** Hagi Juda nemofo Zera nagapinti ne' Mesezabeli nemofo Petahia'a, kini ne'mofo tva'ontera mani'neno vahe'mokizmi zamagira erino kini nera keaga nesamia ne' mani'ne. **25** Hagi mago'a Juda vahe'ma Kiriat Arba rankuma'ene tva'oma'are'ma megagi'nea ne'onse kumatamine, Diboni rankuma'ene tva'oma'are'ma megagi'nea ne'onse kumatamine, Jekabzeli rankuma'ene, tva'oma'are'ma megagi'nea ne'onse kuma tamimpinena mani vagare'naze. **26** Ana hazage'za mago'a naga'mo'za Jesua rankumapine, Molada rankumapine, Betpeleti rankumapinena mani'naze. **27** Hazar-suali rankumapine, Beseba rankumapine tva'oma'arema me'nea ne'onse kumatamimpinena manizage'za, **28** mago'a naga'mo'za Ziklagi rankumapine, Mekona rankumapine tva'oma'arema megagi'nea ne'onse kumatamimpi manizage'za, **29** mago'amo'za Enrimoni rankuma'ene Zora rankuma'ene Jarmuti rankumapi manizage'za, **30** mago'amo'za Zanoa

rankuma'ene Adulamu rankuma'ene tvaoma'arema megagi'nea
ne'onse kumatamine, Lakisi rankuma'ene tva'oma'arema
megagi'nea moparamine, Azeka rankuma'ene tva'oma'are'ma
megagi'nea ne'onse kumatamimpina mani vagare'naze. Hagi
ana hute'za Berseba rankumateti agafa hu'za manite'za vuvava
hu'za Hinomu agupore uhanati'naze. **31** Hagi Benzameni
naga'mozama mani'naza kumatamina, Geba rankuma'ma,
Mikmasi rankuma'ma, Aija rankuma'ma, Beteli rankuma'ene
tva'ozamire'ma me'nea kumatamimpina ana makamo'za mani
vagare'naze. **32** Ana nehazage'za mago'amo'za, Anatoti
rankuma'ene Nobu rankuma'ene, Anania rankuma'ene, **33**
Hazori rankumapima Rama rankumapima Gitaimi rankumapima,
34 Haditi rankumapima, Zeboimi rankumapima, Nebalati
rankumapima, **35** Lodi rankumapima Ono rankumapinki hu'za
nemani'za, tuzampazama zamazantet'i'ma tro'ma nehazema
nehaza agupofinena mani'naze. **36** Hanki mago'a Livae
naga'ma Juda naga'mokizmi mopalima nemaniza nagara
huzamantazage'za vu'za Benzameni naga'ene umani'naze.

12 Hanki Sealtieli nemofo Zerubabeli'ene Jesua'enema
Babiloniti e'naza pristi vahe'ene Livae vahera Seraia'ma,
Jeremaia'ma, Ezra'ma, **2** Amaria'ma, Maluku'ma, Hatusi'ma, **3**
Sekania'ma, Rehumu'ma, Meremoti'ma, **4** Ido'ma, Ginetoni'ma,
Abija'ma, **5** Mijamini'ma, Ma'adial'ma, Bilga'ma, **6** Semaia'ma,
Joiaribi'ma, Jedaia'ma, **7** Salu'ma, Amoki'ma, Hilkia'ene
Jedaia'enena, zamagra pristi nagate'ene nagazmire kva vahe
e'naze. Hagi ana maka vahe'ma Babiloniti'ma e'nazana
vahe'mo'za Jesua'ma pristi nagamokizmi ugota kvama mani'nea
knafi e'naze. **8** Hanki Livae nagara, Jesua'ma Binui'ma
Katmieli'ma Serebia'ene Juda'ene Mataniakizmia zamafuhe'za

zamaza hazage'za, muse zagamera hu'za Anumzamofona susu
hunentaze. 9 Hagi anama nehazage'za Bakbuki'ene Uni'ene
zamafuhe'zanena, zamavugosa ohumi ahumi hu'za oti'ne'za
mono'ma hu knarera zamaza hu'za muse zagamera hugahaze.
10 Hanki ugota pristi ne' Jesua'a Joiakimi kasentegeno, Joiakimi'a
Eliasibi kasentegeno, Eliasibi'a Joiada kasentegeno, 11 Joiada'a
Jonatani kasentegeno, Jonatani'a Jadua kasente'ne. 12 Hanki
Joiakimi'ma ugota pristima mani'nea knafina, amama zamagima
me'nea pristi vahe'mo'za naga'zamirera ugagota huzmantetere
hu'naze. Seraia nagatera Meraia ugota higeno, Jeremaia
nagatera Hanania ugota higeno, 13 Ezra nagatera Mesulamu
ugota higeno, Amaria nagatera Jehohanani ugota higeno, 14
Maluki nagatera Jonatani ugota higeno, Sebania nagatera
Josefe ugota higeno, 15 Harimi nagatera Atna ugota higeno,
Meraioti nagatera Helkai ugota higeno, 16 Ido nagatera Zekaraia
ugota higeno, Ginetoni nagatera Mesulamu ugota higeno,
17 Abija nagatera Zikri ugota higeno, Miniamini nagate'ene,
Moadia nagatera Piltai ugota kvazamia manigeno, 18 Bilga
nagatera Samua ugota higeno, Simaia nagatera Jehonatani
ugota higeno, 19 Joiaribi nagatera Matenai ugota higeno,
Jedaia nagatera Uzzi ugota higeno, 20 Salai nagatera Kalai
ugota higeno, Amoku nagatera Eberi ugota higeno, 21 Hilkia
nagatera Hasabia ugota higeno, Jedaia nagatera Netaneli
ugota hu'ne. 22 Hagi Eliasibi'ma, Joiada'ma, Johanani'ma,
Jaduakima, hu'za pristi eri'zama eri'naza knafi Livae nagate'ma
ugota huterema hu'naza kva vahe'mokizmi zamagine, pristi
eri'zama eri'naza naga'mokizmi zamagia mago avontafepi
krente'naze. Hagi anazanke hu'za Dariusi'ma Pesia kinima
mani'nea knafina ete mago'anane ana vahe'mokizmi zamagia kre'za

erinte fatgo hu'naze. **23** Hagi Livae nagate'ma ugotama hu'naza kva vahe'mokizmi zamagia, zamagi zamagenkema krenentaza avontafepi krenteme neazageno eno, Eliasibi nagapinti pristi ne' Johanani'ma fria knare emetre'ne. **24** Hagi Anumzamofo eri'za ne' Deviti'ma hiho huno'ma hu'nea kante ante'za, Hasabiaki Serebiaki, Katmieli nemofo Jesua'ene nagazmimo'zanena, tarefi refko hu'za zamavugosa ohumi ahumi hune'za muse zagamera hu'za Anumzamofona susu hunte'naze. **25** Hanki Mataniaki, Bakbukiaki, Obadiaki, Mesulamuki, Talmoni'ene Akubuki hu'za kuma kafantera fenozama nentaza nontaminte kegava hu'naze. **26** Hagi Jesua nemofo Jozadaki negeho, Joiakimi'ma ugota pristima manigeno, Juda moparera Nehemaia'ma gavana manigeno, kasegema rempima hunezamia ne' Ezra'ma hu'za mani'naza knafi ana Livae naga'mo'za ana eri'zana eri'naze. **27** Hagi Jerusalemi kuma keginama nunamu hu'za Anumzamofoma amiza zupa, musenkase nehu'za nasenasepane laeriema nehaza zavenaramine, hapuema nehaza zavenaramine nehe'za, muse zagame hihogu maka Juda mopafima mani'naza Livae nagara ke hazage'za Jerusalemi e'naze. **28** Ana zanke hu'za Jerusalemi kuma tvaonte'ma megagi'nea kumatamimpinti'ma zagame'ma hu Livae vahe'ma e'nazana, Netofa vahe'mokizmi kuma'ma, **29** Bet-Gilgali kuma'ene, Geba kuma'ene Azmaveti kumatamimpinti e'naze. Na'ankure zagamema hu vahe'mo'za zamagra Jerusalemi kuma tva'onte nonkumara ante'za mani'nagu anara hu'naze. **30** Hagi pristi vahe'mo'zane Livae naga'mo'zama zamagra'a zamazeri agruma hute'za vahe'zagane kuma kafaramine, kuma keginanena zamazeri agru hu'naze. **31** Hagi nagra Nehemaia'na kva nagara, kuma keginamofo agofetu zamazeri atru hute'na, Ra Anumzamofontegama muse zagamema hu'za agima hentesgama

hanaza vahera tarefi refko hu'noe. Hagi ana hutogeno mago kevumo'a nazantmaga kaziga kegina agofetu vu'za Kumapinti zama harafima hu'zama ome atre kafanema nehaza kafante vu'naze. **32** Hagi Hosaia'ene amu'nompinti Juda kva vahera refko hu'ne'za, ana vahe zamefira vu'naze. **33** Hagi ana zamage'ma pristi naga'ma vu'nazana, Azaria'ma, Ezra'ma, Mesulamu'ma, **34** Juda'ma, Benzamini'ma, Semaia'ma, Jeremaiaki hu'za nevu'za, **35** ana maka'mo'za ufe re'za vu'naze. Ana zamefira mago'a pristi vahe'mo'zane, Jonatani nemofo Zekaraia'ene, Simei negehoza, Mataniaki, Mikaiaki, Zakuriki, Asapu nagapinti ne' Jekaraia'ene, **36** mago'a agri nagapinti vahe'ene vu'nazankino, ana vahe'mokizmi zamagi'a, Semaia'ma, Azareli'ma, Milalai'ma, Gilalai'ma, Ma'aima, Netaneli'ma, Juda'ene Hananiki hu'za vu'naze. Ana nehu'za Anumzamofo eri'za ne' Deviti'ma ahe'nea zavenaraminteti nehe'za, kasegema rempi hunezamia ne' Ezra ugota hige'za amefi vu'naze. **37** Hagi anante Tinkapu'i kafane nehaza rankafante uhanatite'za, latama hunte'hare mareri'za, Deviti rankumapi marerite'za, kini ne'mofo nona agatere'za vu'naze. Ana hute'za Jerusalemi kumamofo kuma keginarega ete vu'za, zage hanati kaziga Tima Afi kafanema nehaza rankafante uhanati'naze. **38** Hagi zagame'ma hu vahe'ma refko'ma hutre'naza nampa 2 kevu vahe'mo'za, rukrahe hu'za kuma keginamofo agofetu nevazage'na, nagra zamefi vu'noe. Ana nehuge'za mago'a nena azageta avenima me'nea zaza nona agatereta vuta Tusizankna Keginema nehzare uhanati'none. **39** Anantetira Efraemi Rankafanema nehzare vuteta, anantetira Jesana kafane huge korapa kafanema nehaza rankafante vuteta, anantetira Nozame kafante vuteta, anantetira Hananeli za'za nonte vuteta, anantetira 100'a sondia vahe'ma nemaniza za'za

nonte eteta, evava huta Sipisipi Kafanema nehaza kafante eteta, evava huta kegavama hu kafanema nehaza kafante ehanati'none. **40** Hagi zamagra ana tare kevu vahe'ma, muse hu'za zagamema nehaza vahe'mo'za, Anumzamofo mono nompi umani'naze. Hige'za kva vahetamimo'za tarefi refko hune'za mago kevumo'za nagrane mani'naze. **41** Hagi anampima mago'ama mani'naza pristi vahera, Eliakimiki, Ma'aseiaki Miniaminiki, Mikaiaki, Elioenaiki Zekaraia'ene Hananiama hu'za anampina ufena re'naze. **42** Hanki Ma'aseia'ma, Simaia'ma, Eleazari'ma, Uzzi'ma, Jehohanani'ma, Malkija'ma, Elamu'ene Ezeriki hu'za anante ot'inazageno, Jezrahia'a ugota huzmantge'za zagamera hu'naze. **43** Ana hu'neankino ana zupa tusi'a Kresramana vu ofa nehu'za, tusi musenkase hu'naze. Na'ankure Anumzamo ra muse'za zamige'za anara hu'naze. A'nene mofavre zagamo'za zamagranena tusi muse hu'naze. Ana nehazage'za Jerusalemi kumapima musenkasema hazazamofo agasasana, afete'ma mani'naza vahe'mo'zanena antahi'naze. **44** Hanki ofama hanaza zantamine hoza'zamifinti ese ne'zama hamaresaza ne'zane 10nima hania kevuma eri'za Anumzamofoma eme ami'naza zantaminema antesaza nonte'ma kegava hanaza vene'nea ana kna zupa huhampri zamante'naze. Hagi venenemo'za kuma tvaonte'ma me'nesia mopafima antesaza hozafintira kasegemo'ma pristi vahe'ene Livae naga'ma zamihoma huno'ma hu'ne'nia avamente, pristi vahe'ene Livae nagamokizmi su'za ana nompina erita ome antegahaze. Hige'za ana maka Juda naga'mo'za pristi vahe'ene Livae nagakura muse hunezmante'za, eri'za zamigu'enena tusi muse hu'naze. **45** Hanki pristi vahe'mo'zane, Livae naga'mo'za Anumzazamimofo eri'zana eneri'za, vahe'ma zamazeri agruhu eri'zanena enerizage'za,

zagame'ma hu vahe'mo'zane mono no kafante'ma kvama
hu vahe'mo'za zamagranena ana zanke hu'za, Deviti'ene
ne'mofo ne' Solomonike'ma hu'na'a kante ante'za eri'za zamia
eri'naze. **46** Hanki korapara Devitike Asapukema mani'na'a
knafina, Anumzamofontegama muse zagame'ma huno agima
hentesgama hu vahe'ma kegavama hu vahera kora mani'nazane.
47 Hagi Zerubabeli'ene Nehemaiakema mani'na'a knafina, mago
mago zupa Israeli vahe'mo'za zamazankakuti ne'zana eri'za
zagamema hu vahe'ene mono nonkafante'ma kvama hu vahera
eme zamatere hu'naze. Ana hazage'za ana ne'zantamina Livae
naga'moza refko hu'neza, Aroni naga'ma pristi eri'zama eneriza
vahera zami'naze.

13 Hanki ana zupa Mosesese kasege avontafepinti ranke hu'za
nehamparizage'za mika vahe'mo'za antahi'naze. Hagi ana
avontafepina amanage huno krente'hege'za hampri'naze, Amoni
vahe'mo'zane Moapu vahe'mo'za Anumzamofo vahe'ma atruma
hanafina magore hu'za eofregahaze hu'ne. **2** Na'ankure zamagra
Israeli nagara ne'zane tinena nozami'za, kazusi ke huzmantenogu
Balamuna zago ami'haze. Hianagi tagri Anumzamo'a ana
kazusi kea eri rukrahe huno asomu hurante'ne. **3** Hagi Israeli
vahe'ma Mosesese kasegema hamprizage'zama nentahi'za,
fegi'ati'ma zamagranema emani'naza vahera agafa hu'za
huzmante'haze. **4** Hagi pristi ne' Eliasibi'a Tobiana naga'agino,
kora Anumzamofo mono nompima fenozama nentaza nonte
kva hino hu'za huhamparinte'naza nere. **5** Ana hu'neankino
Eliasibi'a Tobiana huntegeno, Anumzamofo mono nompima ra
zantema hunaragintene'za, witi ofama hu zantamine, mnamentake
insensine mono nompima eri'zama eneriza zantaminema
nente'za, kasegemo'ma huno Livae naga'ma zamihoma hu'nea

zantamina, hozafi zama 10ni'a kevuma eritruma hu'nafintima
mago kevuma zamiza zantamine, kasefa wainine, masavenema
eri'za azage'za nente'za Livae nagamokizmine, zagamema
hu vahe'ene, mono no kafante'ma kvama nehaza vahe'ene,
pristi naga'mokizmi musezama ko'ma eme anteterema nehaza
nona amigeno mani'ne. 6 Hagi ana zama fore'ma hia knafina
nagra Nehemaia'na Jerusalemi kumapina omani'noanki, Pesia
kini ne' Artaserksisi'ma kinima manino egeno 32ma hiakafure
Artaserksisina ome kenaku Babiloni vu'noe. Hagi mago knama
evutege'na, Kini ne'mo'ma natre'nige'na ete Jerusalemima esugu
antahige'noe. 7 Anama hute'na Jerusalemi oge'za nasamiza
Eliasibi'a havi avu'avaza huno, Anumzamofo ra mono nompima
hunaraginte'naza nona Tobia'na amigeno mani'ne hu'naze. 8 Hagi
ana kema nentahugen'o'a, tusi narimpahege'na, Tobia fenozana
ana nompintira maka eri fegi atre'noe. 9 Hagi anante vahe
huzamantoge'za hunaraginte'naza nona Anumzamofo avure
harafi hu'za eri agru hutazage'na, mono nompi zuomparamine
ofama hu witine, mnanentake zantamina insensinena ete eri'na
anampinka ome ante'noe. 10 Hagi anahukna hu'na ke'na eri
fore'ma huana, hozama vasagazafintira, Livae naga'mozama
eri'ga ne'zana, eriza eme ozami'naze. E'ina hu'negu ana
maka Livae naga'ene zagame'ma hu vahe'mo'za mono nompi
eri'zazamia atre'za mopa zamirega ete vu'naze. 11 Hagi anante
kva vahera amanage hu'na zamasami'noe. Na'ahigeta Ra
Anumzamofo mono nona tamefira humi'naze. Anagema hute'na
Livae vahetamine zavenama aheno zagamema hu vahera ke
hutru hu'na, eri'za kankamu zamire zamazeri otitere hu'noe. 12
Anante ana maka Juda witi zamifinti'ene, waini zamifinti'ene,
masave zamifinti'ma, hamprizageno vuno 10nima hia kevua

eri'za mono nompima fenozama nentafi eme ante'naze. **13**
Hagi anante pristi ne' Selemianki avontafete'ma ugagota'ma
hu'nea ne' Zadokunki Livae nagapinti ne' Pedaiama hu'na
huhampari zamantoge'za, ana fenozama ante nona kegava
hu'naze. Hagi zamazama huno kegavama hania nera, Matania
negeho ne' Zakuri nemofo Hanani huhampri ante'noe. Na'ankure
zamagra knare'za hu'za eri'zana eri'naza vaheki'za, kegava
hu'neza zamafuhe'ina fatgo hu'za refko huzamisaze hu'na
antahinezami'na huhampari zamante'noe. **14** E'ina hu'negu
Anumzanimoka ama ana eri'zama eri'hoa zankura kagesa
antahinamio. Ana nehunka Anumzanimoka mono nonte'ene,
mono nompima eri'zama erisaza zama nagu'areti'ma hu'na erinte
fatgoma hu'noa navu'navazana Anumzanimoka kagerakani
onanto. **15** Hanki e'ina knafima zamagoana Juda vahe'mo'za
Sabati mani fruhu knarera, waini zafa raga regatati hu'za
tima'a eri'naze. Ana nehu'za donki afu'mofo agumpina witi
kutamine wainine, grepine, fiki zafa raganena erinente'za mago'a
nezantaminena, mani fru kna Sabati zupa Jerusalemi vu'za zagore
ome atre'naze. Ana hu'negu ana Sabati knarera ne'zana zagorera
otreho hu'na asevazi zamante'noe. **16** Hanki Tairi vahe'ma
Jerusalema nemaniza, nozameramine mago'a zantaminena,
eri'za mani fruhu kna Sabati zupa Juda vahete zagore ome
atre'naze. **17** Anama hazageno'a tusi narimpa hege'na, Juda
vahe'mokizmi kva vahera amanage hu'na zamasami'noe, ama
havi tamavu tamava'ma hazazamo'a Sabati mani fruhu kna
erihaviza nehaze hu'na hu'noe. **18** Tamagrira tafahe'za amanahu
zamavu zamava hazazamo higeno, tagri Anumzamo'a tagrite'ene
ama rankuma'enena knazana tami'ne. Hanki menima Sabati mani
fruhu knama eri pehanama hazazamo higeno Israeli vahe'mota

Anumzamo'a tusi'a rimpa ahenerante. **19** Hanki kinaga nesegeno Sabatima eofre'negeno, Jerusalemi kuma kafantamina ana maka eriginenkeno Sabatia evute'na erinagiho hu'na huzamante'noe. Hanki ana nehu'na, mago'a zama eri'za Sabati zupama efre zankura kafante'ma kegavama nehaza eri'za vaheni'a mago'a huzamantoge'za kuma kafaramintera kva hu'naze. **20** Hagi zagore'ma nanazama eme netraza vahe'mo'za tareo mago kenage naza Jerusalemi rankumamofo kafantera meg'i'a emase'naze. **21** Hianagi ana vahe'ma nezamage'na amanage hu'na hankave kea hu'noe, na'ahigetma kuma keginamofo meg'i'a emase'naze. Hagi amanahu zama henka'anema hanazana, tamazeri'na kina huramantegahue. Hagi anankema hu'noreti'ma agafama hiana ana vahe'mo'za mago'ene e'za Sabati zupa nanazana zagorera eme otre'naze. **22** Anante Sabati knagu'ma ruotage hu'ne hu'zama antahinagura, Livae nagara huzamante'na tamagra'a tamazeri agru huteta vuta kuma kegina kafantera kva hiho hu'na huzamante'noe. Hagi Anumzanimoka ama ana avu'ava zama tro'ma hu'noa zankura kagesa antahinamio, ana nehunka vagaore kavesi zanteti, zamavesi zamante vava hugahue hunkama hu'nana keka'a amage antenka kasunku hunanto. **23** Hagi ana knafima koana, mago'a Juda vene'ne naga'mo'za Astoti kumatetiki, Amoni kumatetiki, Moapu kumatetiki hu'za a'nea eri'naze. **24** Hagi mago'a mofavre nagazamimo'za, Astoti vahe zamagerura antahi'neza zamagerura ru'naze. Ana nehazage'za mago'amo'za ruga'a vahe zamageru ru'naze. Hianagi Juda vahe zamagerura oru'naze. **25** Hagi ana vahera zamazeri koneri'na kazusi ke huzamante'noe. Mago'a nagara sefu nezami'na zamazokara eri varare'noe. Hagi Anumzamofo agifi huvempa kea amanage hiho hu'na huzmante'noe. Tamagra

ne' mofavretamirera meg'i'ati a'nenea zamavare ozamigahaze. Ana zanke huta mofa'netamia zamatresage'za meg'i'a vene'nea e'origahaze. **26** Hige'na amanage hu'na zamasami'noe, Solomoni'a Israeli kini ne' mani'neanagi agranena a'neneramima erino amanahu kumi'ma hu'neana ontahi'nazo? Ama mopafima me'nea kumatmimpina magore huno Solomonikna kini nera omani'ne. Agri Anumzamo'a avesinteno kinia azeri otigeno, ana maka Israeli mopa kegava hu'ne. Hianagi meg'i'ati'ma eri'nea a'nemo'za avre'za kumpipina vu'naze. **27** Hagi ana havi tamavu tamava zama tagrama amage'ma anteta, meg'i'ati a'enemera erisunana, tagra Ra Anumzamofonkea rutagreta, tusi'a kumi hugahune. Hagi tamagrama antahi'zana tagrikura ana hanaze hutma nentahizafi? **28** Hagi pristi ne' Eliasibi nemofo Jehoiada ne'mofavre nagapinti mago'mo, Heroni kumateti ne' Sanbalati mofa ara erineanki'na, ana nera ahe'ha rotago hugeno fre'ne. **29** Ana hu'negu Anumzanimoka pristi vahe'mo'zama hu'naza havi zamavu zamava zankura kaganera okanino. Na'ankure zamagra pristi vahe'ene Livae naga'enema huhagerafi'nana kasegea runetagre'za zamagra'a zamazeri haviza hu'naze. **30** E'ina hu'negu meg'i'a zantamimo'ma zamazeri pehanama hu'neana zamazeri agru hu'noe. Ana hute'na Livae naga'ene pristi nagara eri'za zamire huhampari zamantetere hu'noe. **31** Nagra anazanke hu'na, mago mago zupama tevema hare'zama kresramnama vu itare'ma esnaza vahe'ene, ese ne'zama hozafinti'ma hamare'za eri'za esaza vahe'ene, ese zafa rgama tagisaza zama Ra Mono nompima eriza esaza vahe'enena huhampari zamante'noe. Ana maka zama hu'noa zanku antahi nenaminka Anumzanimoka nazeri so'e hunanto.

Esta

1 Hagi Serksisima (Ahasurusi'ma) kinima mani'neana India mopareti eri agafa huteno, vuno Itiopia (Cush) mopare ome atre'nea kumatmima 127ni'a provinsirami kegavama hu'nea knafina, amanahu'za fore hu'ne. **2** Hagi ana knafina kini ne' Serksisi'a kini tra'are ran kumapi Susa mani'ne. **3** Hagi 3'a kafuma kinima nemanino'a, ranra kva vahetamine eri'za vahe'aramimofona tusi ne'za krezmante'ne. Hagi Pesiane Media sondia vahete kva vahetamine, ranra eri'za vahetamine, gavana vahe'mo'zanena anampinke mani'naze. **4** Na'ankure 6si'a ikamofo agu'afi agrama kegavama hu'nea mopafi zago-fenona eriama nehuno, hihamu konariria erinte ama huno zamaveri hu'ne. **5** Hagi ana knaramima evutegeno'a, kini ne'mo'a Susa rankumapima atru hu'nea vahetmimofo ne'zana tusi ne'za kreno retro huzmante'ne. Na'ankure ana maka vahe'ma atruma hu'nazana, osi eri'za vaheteti vuno ra eri'za vahete vu'ne. Hagi ana ne'zana kini ne'mo'a agra kumapima me'nea knagune hozafi retro hige'za 7ni'a knamofo agu'afi nene'za musena hu'naze. **6** Hagi ana knagune hozafima konaririma hunte'neana, efeke'ene fitunke tavraverami renteno evu'ne. Hagi ana tavraveramina efeke'ene fitunke nofitminu silvare rinifi alabasta have posirera ru marave'marave nehia haverami renteno evu'ne. Hagi mopafima ruzahu ruzahu havema rekamrente'za evu'naza agofetura golireti'ene silvareti'ma tro'ma hu'naza tratami ante'naze. **7** Hagi golireti'ma tro'ma hu'naza kapufi waini tina tagiza ru avamente avamente vahera nemizageno, kini ne'mo'a wainiramina rama'a ana vahera zami'ne. **8** Hagi zamagima hige'za e'naza vahe'mo'za zamagra zamavesite waini tina ne'naze. Na'ankure waini tima tagino veva'ma hu vahetmina kini ne'mo'a zamasmino, mago

magomofoma avesi'nia avamente waini tina tagita zamiho
huno huzmante'ne. **9** Hagi kini ne' Serksisima venenezagama
zamazeri musema nehigeno'a, anahukna huno kini ne' kumapina
kuini a' Vasti'a agranena zamazeri muse huno tusi'a ne'za
a'neramimofona krezmante'ne. **10** Hagi namba 7ni kna zupama
waini timo'ma kini ne' Serksisi antahintahima azeri negima
nenegeno'a, Mehumanima, Bazitama, Habonama, Bigtama,
Abagtama, Zetarima, Kakasima huno zamagonknazama hari'nea
7ni'a eri'za vahe'aramima ana ne'zama nenaku'ma etruma
hu'naza vahetmina huzmanteno, **11** kuini a' Vastina ome
avre'za esageno kuini fetori antanineno kini ne'mofa avuga
enogu huzmante'ne. Hagi kuin' Vasti'a hentofa agi agonane
a mani'neankino, kini ne'mo'a eri'za vahetmima'a zamaveri
hunaku kuini a' Vastina kea hu'ne. **12** Hianagi ana nanekema
kini ne'mofa eri'za vahe'mo'zama ome asamizankea kuini a'
Vasti'a ontahi'ne. Hagi ana'ma higeno'a, kini ne'mofona tusi
rimpa ahegeno arimpama ahezamo'a agu'afina tevere'ne. **13** Ana
higeno kini ne'mo'a, kuini a' Vasti'ma hunte'nea zanku nentahino
antahintahi eri'naku knare antahintahine vahetami zmantahige'ne.
Na'ankure kini vahe' zamavu'zmavara knare antahintahine
vahe'ma antahigeno antahintahima eri zamavu'zmava me'negu
anara hu'ne. **14** Hagi knare antahi'zane vahetmima kini
ne'mofa tava'oma'are'ma nemaniza vahetmina Kasenaki, Setaki,
Adamataki, Tasisiki, Meresiki, Masenaki, Memukani'e. Hagi
ama ana 7ni'a vahetmina Pesiane Media kamanimofo ranra
kva vahetminkino, maka zupa kini ne' eme ketere nehaza
vahemani'zaze. **15** Hagi kini ne' Serksisi'a anage huno ana
vahera zamasami'ne, eri'za vahe'niaramima huzmante'na Kuini
a' Vasti'ma kehinkeno enoma huge'za ome asamizageno'a,

kuini a' Vasti'a ke'ni'a ontahianki, na'a huntegahufi kasegefina keta nasamaho. **16** Higeno kini ne'mofo avugane ranra kva vahetmimofo zamavuga Memukani'a kenona huno, kuini a' Vasti'a kini ne'tekera ama ana avu'avara huonteaniki, maka ranra kva vahetamine, maka vahetmima kini ne'mo'ma kegavama hu'nea mopafima mani'naza vahete'ene ama ana avu'avara huzmante. **17** Na'ankure ama ana kema vuno eno'ma hina maka a'nemo'zama antahinu'za, kuini a' Vasti'a kini ne' Serksisi'a ke hiana ke'a antahino ome'ne hu'za nehu'za, zmavenanehe'mofona zamage fenkami netre'za kezmia ontahigahaze. **18** Hagi menima Pesiane Media ranra kva vahetmimofo a'nemo'zama kuini a' Vastima kini ne'ma huntea avu'avazamofo agenkema antahisu'za, ana zanke hu'za kini ne'mofo ranra kva vahetmina zamage fenkami netre'za, kezmia ontahisage'za tusi zamarimpagu hugahaze. **19** E'ina hu'negu ama ana kere'ma kini ne'mokama muse hanunka mago kasege krenka, kuini a' Vasti'a nagri navuga omegahie, hunka negrenka mago knare aku kenka erigeno kuini Vasti nona erino kuinia manino. **20** Hagi e'inama hunka kasegemtro hanankeno ana nanekemo'ma maka kagrama kegavama hu'nana mopa atupare'ma vuno eno'ma hinkeno, maka agima omne' a'nereti vuno agima me' nea a'neraminte'ma vaniana a'nemo'za, zmavenanehe'i kea nentahiza zamage sga hugahaze. **21** Hagi kini ne'ene ranra eri'za vahetmimo'za Memukani'ma hia antahintahirera mago zamarimpa hu'za muse hu'naze. Ana hazageno Memukani'ma antahintahima amia kante anteno kini ne'mo'a ana zana hu'ne. **22** Hagi kini ne'mo'a avona kreno maka agrama kegavama hu'nea kumatmintega atregeno vuno eno hu'ne. Hagi mago mago kumategama avoma kre atre'neana zamagrama negraza avompinti kre atre'ne. Hagi ana

avompina amanage huno krente'ne, mago mago naga'mofona
vemo vugota kva manigahie huno kretre'ne.

2 Hagi ana zama huvagaregeno'a kini ne' Serksisina arimpa
ahe'zamo'ma uramigeno'a, Vasti'ma hu'nea zanku agesa
nentahino, Vasti'a kuinia omanigahie huno'ma huvempama hu'nea
zanku agesa antahi'ne. **2** Hagi kini ne'mofo tava'oma'are'ma
mani'ne'za knare antahintahima nemiza vene'nemo'za anage
hu'naze, huge'za venema ovase'ne'nia hentofa agi agonane
mofa'nerami hake'za avre'za eho hu'za hu'naze. **3** Hagi
kini ne'moka mago mago kumatera ranra kva vahetami
zamazeri otitere huge'za venema omasenenia knarenare
mofaneramina zamavare'za rankumate Susa enkeno, kini
ne'moka eri'za ne' Hegai kegava huzmant'e'nenozamavufagama
eri so'ema hanaza zana nezaminige'za zamavufaga eri so'e
nehu'za knare'nare mofa'nea zoregahaze. **4** Ana nehu'za
mani'nenagenka anampinti'ma kini ne'moka kenankeno kavesi'nia
mofa avrenankeno Vasti nona erino kuinia manigahie. **5**
Hagi ananknafina mago Jiu nera Simei nemofo Kisi negeho
Benzameni nagapinti ne' agi'a Modekaiakino Susa rankumapina
kini ne'mofo ra nompi nemania nere. **6** Hagi korapara Babiloni
kini ne' Nebukatnesama Jerusalemi kumapinti'ma vahe'tmima
kinama huzmanteno zamavare'noma vu'nefi, Modekaiane Juda
vahe kini ne' Jehoiakininena zanavre'za vu'naze. **7** Hagi
Modekaia'a mago mofara nesaro kegava hu'neankino, ana
mofamofo agi'a Hadasha'e, mago agi'a Esta'e. Na'ankure
Estana nerera nef'a ko fri'ne. Hagi ana mofara avufgamo'ene
agi'agonamo'a hentofaza hu'ne. Hagi nerera afa'ma nefrigeno'a,
Modekai'a avreno agra mofa'agna huno kegava hu'ne. **8**
Hagi kini ne' Serksisima kema atreno, knare'nare mofa'nema

haketa zamavareta Susa rankumate ehoma higeno'a, rama'a
mofa'nerami zamavare'za neazafi Estanena anampi avre'za
Susa kumate Hegai azampi eme ante'haze. 9 Hagi Hegai'ma
Estama negeno'a, tusiza huno musena hunteno avesinte'ne.
Ana'ma nehuno'a, ame huno Estana avufgama eri so'ema hu
zantamine ne'zanena nemino, kini ne'mofo kumapinti 7ni'a eri'za
mofanerami huzmantge'za kini ne'mofona marerirfa nompi
Estana avre'za ome kegava hunte'naze. 10 Hagi Esta'a kuma'ane
vahe'amofo agia ahe forera osu'ne, na'ankure Modekaia'a anara
osuo huno hunte'negu anara hu'ne. 11 Hagi Modekaia'a maka
zupa Esta'ma mani'nea nomofo avuga vano nehuno, Estana
na'anoma huntesnagura keno vano hutere hu'ne. 12 Hagi ana
maka mofa'nema kini ne'mofo avugama vanagura 12fu'a ikampi
zamavufaga kegava hu'za erifatgo hute'za vugahaze. Hagi 6'a
ikampina mere nehaza masave freno nevnigeno 6si'a ikama
vagamare'nigeno'a, mago 6si'a ikampina mnanentake zama
eri haviamma hu'nea masave freno nevnigeno ana 6si'a ikamo'a
ome vagaregahie. 13 Hagi kini ne'mofo avugama vunaku'ma
hanigeno'a, kukeno avasesezano inankna zanku'ma avesi'nia
zana anama mase'nenia nompintira amisageno eri'neno kini
ne'mofo avuga vugahie. 14 Hagi kinagama sesigeno'a, kini
ne'mofo nompi kini ne'ene umani'enigeno komatanigeno'a,
ete mago nompi vanigeno agonknaza hari'naza ne' Sasgasi'e
nehia ne'mo kegava huzmantegahie. 15 Hagi Abihaili mofa
Esta'a Modekaina nenogokino agrama kini ne'ma ome ke
knama egeno'a, mago kukenaguro avasase zankura zamantahi
onke'neanki kva'amo Hegai'ma huhamprinte'nea zantami eri
hankre'ne. Hagi Estama ke'naza vahe'amo'za muse hunente'za
mago zamarimpa hunte'naze. 16 Hagi Serksisima 7ni'a kafuma

kinima nemanige'za ana kafumofona, 10ni ikana Tebetie nehaza ikante Estana avre'za noma'are eme ami'naze. **17** Ana higeno kini ne'mo'a mago'a mofa'heramima avesizmante'neama'a agatereno Estana tusiza huno avesinte'ne. Hagi Esta'a vene omase mofa'nea mika zamagatereno kini ne'mofo avesira eri knare higeno, kini ne'mo'a tusi muse hunenteno kuini fotorira antaninteno, Vasti nontera Estana kuinia azeri oti'ne.

18 Ana huteno kini ne'mo'a Estana ne'za krenenteno azeri musena nehuno, ranra kva vahe'ane eri'za vahe'anena kehige'za ana ne'zantera e'naze. Ana nehuno kini ne'mo'ma kegavama hu'nea kumatamimpi vahekura ananknarera manigasa hiho nehuno maka vahera musezana zami'ne. **19** Hagi vene omase mofa'nemo'za mago'enema emeri atruma nehazageno'a, Modekai'a kini ne'mofo kuma kafante mani'ne. **20** Hagi Modekai'ma asami'nea kante anteno Esta'a agra igati mofa mani'ne mago vahera erinte amara huno osami'ne. **21** Hagi Modekai'ma kini ne'mofo kuma kafante'ma nemania knafina, kini ne'mofo eri'za netrena Bithanake Teresikea tusi zanarimpa kini ne' Serkisisina ahenenteke ahe frinaku oku'a nanekea retro hu'na'e. **22** Hianagi Modekaia'a ana oku nanekezni'a antahiteno, vuno kuini a' Estana ome asamigeno Esta'a Modekai'ma hia nanekea erino kini nera ome asami'ne. **23** Hagi ana nanekema hake'za erifore'ma hazageno'ma tamagema me'nege'za nege'za, ana netrena zanazeri'za vahe'ma zamahe'zama nehanti'za zafare hantizageke fri'na'e. Hagi ama ana agenkea kini vahe'mofo agenkema krenentaza avontafepi krente'naze.

3 Hagi ana knama evutegeno'a, kini ne' Serkisi'a Agagi nagapinti ne' Hamedata nemofo Hemanina eri'zama'afintira azeri anaga atregeno maka agranema eri'zama e'neriza eri'za

vahetmina zmagatereno rankva manino kegava huzmantene. 2
Hagi maka ranra kva vahe'ma kini ne'mofo kuma kafante'ma
mani'naza vahe'mo'za zamare'na re'za ra agia Hemanina
ami'naze. Na'ankure kini ne'mo'a, e'ina hiho huno huzmante'negu
anara hu'naze. Hianagi Modekai'a ana nera antahiminora arena
reno ra agia omi'ne. 3 Anante kini ne'mofo eri'za vahe'ma kini ne'
kuma kafante'ma nemani'za vahe'mo'za Modekaina antahige'za,
nahigenka kini ne'mo'ma hiankea rutagre'nane? 4 Hagi maka
knane knanena Modekaina nanekea asami'hazanagi, kezmia
ontahige'za ana zantera Hemani'a na'a huntegahifi ke'nune
nehu'za Hemanina ome asmi'naze. Na'ankure Modekaia'a huno
nagra Jiu vahe mani'noanki'na Hemanintera narena oregosue
huno hu'ne. 5 Hagi Hemani'ma keama Modekaia'ma arenama
reno ragima omigeno'a, tusi arimpa Modekaina ahente'ne. 6
Hianagi Modekai'ma agriake'ma ahe frizankura avresra Hemani'a
hu'ne. Na'ankure Modekai'a Jiu ne' mani'noema huno'ma
higenoma keno antahinoma nehuno'a, Jiu vahetmima Serksisima
kegavama hu'nea maka mopafima mani'naza vhahera maka
zamahe fanene hu vagarenaku agesa antahi'ne. 7 Hagi kini
ne' Serksisi'ma 12fu'a kafuma kinima nemanigeno'a, ese ikana
Nisanie nehaza ikantera Hemanima Jiu vahe'ma zamahenia
kna erintenaku hige'za agri avuga satu zokago re'za ke'naze.
Hagi satu zokagoma re'za kazana 12fu ikana Adarie nehaza
ikamofonte efore hu'ne. 8 Hagi anante Hemani'a kini ne'
Serksisinte vuno amanage huno ome asmi'ne, Kegavama hu'nana
mopafina mago'a vhahera ruzahu vahetami mani'naze. Zamagri
zamavu'zmavamo'a ama mopafi vahe'mokizmi zamavuzmava
knara osu'ne. Hagi kasegezmimo'a ruzahu hu'neankino, kagri
kasegea novaririze. E'ina hu'negu zamatresanke'za amafina

omanitfa hanaze. 9 Hagi kini ne'moka ama ana kere'ma musema hanunka, ana vahetmima zamahe friho hunka huvempa hunka avona krenanke'na kna'amo'a 375 tani hu'nenia silva zago, feno zanka'arema kegavama hu'naza vahera zamisuge'za fenoma nentana nompina ome antegahaze. 10 Hagi ana kema kini ne'mo'ma nentahino'a, avonkreno hu izoma huno renekamrea rini azampinti zafino Agati nagapinte ne' Hamedata nemofo Jiu vahe ha' ne' Hemanina nemino, 11 amanage hu'ne, Zagoma naminaku'ma hanana kagraka'a enerinka, na'anoma hunaku'ma hanana zana amne ana vahetmina huzmanto. 12 E'inage higeno ese ikantera 13ni kna zupa Heman'i'a kehige'za kini nete'ma avonkre eri'zama e'neri'za vahe'mo'za eme atru hu'naze. Hagi maka kema zamasamia kea mago mago kumate vahe'mofo agerupinti'ene avompinti avona krete'za kini nemofo rinireti avame'za ana avontera rekamrentete'za ranra kva vahetegane (Satraps), gavana vahetamintegane atrazageno mago mago provinsifima mani'nazarega vuno eno hu'ne. 13 Hagi avoma atrazageno maka kumategama vuno eno'ma hu'nea avomo'a anage hu'ne, 12fu ikamofona 13ni knazupa magoke knafinke Jiu vahera mofavrereti vuno tavava ozafare'ma uhanati'neana zamahe hana hinkeno, kini ne'mo'ma kegavama hu'nea mopafina miko omanitfa hina, maka zazmi eriho huno kretre'ne. 14 Hagi maka kumate vahe'mo'za ana avona eri'za kasege me'nenige'za amage antegahaze hu'za nehu'za, ana knama esigu tro hu'za manigahaze. 15 Hagi kini ne'mo'a hankave ke huzmantge'za ana avontafera maka kumatega ame hu'za eri'za vu'za eza hu'naze. Hagi vihuma hugagi'naza rankumapima Susama nemani'naza vahera ama ana nanekea eriama hazage'za maka vahe'mo'za antahi'naze. Hagi anama huteke kini ne'ene kea waini

tina nenekema mani'nakeno'a Susa kumapi vahera antahintahi
zamimo'a savri hige'za tusi koro nehu'za antahitahi hakare
hu'naze.

4 Hagi ana maka zama hazza nanekema Modekai'ma nentahino'a,
kukena'a tagato tagatu nehuno, tanefa kateno nefreno rankuma
amu'nompi nevuno ranke huno tusi zavi krafa huno vu'ne. 2
Hianagi kini ne'mofo kuma agu'afina uofre'neanki, ana kuma
kafante umani'ne. Na'ankure zamasunku kukenama hu'ne'naza
vahe'mo'za kini ne'mofo kumapina uofregahaze. 3 Hagi kini
ne'mo'ma hiankemo'ma maka kumate'ma vuno eno'ma hige'za Jiu
vahe'mo'zama nentahi'za, ne'zana a'o hu'za nemani'za tusi zavi
krafa hu'naze. Rama'a vahe'mo'za zamasunku kukena antanite'za
taneffa kate'za nefre'za mani'naze. 4 Hagi ana nanekema Esta
eri'za mofa'nene, eri'za vene'ne'amo'zama eme nesmizageno'a,
Esta'a tusi antahintahi huno ome ru emeru nehuno, kukena
antentegeno vu'neanagi Modekai'a ana kukena ontani'ne. 5
Anante Esta'a, kini ne'mo'ma huntogeno'ma eme kegavama
hunte'nea eri'za ne' Hatakina hunteno, Modekaia'ma zavi'ma
netea zamofo agafa'a ome antahigenka ko hu'ne. 6 Higeno
Hataki'a Modekaima rankuma amu'nompima kini ne'mofo kuma
kafante'ma mani'nere vu'ne. 7 Anama huno vigeno'a Modekai'a
maka zama agrite'ma fore'ma hu'nea zamofo nanekea nesmino,
Jiu vahe'ma zamahesire'ma Hamani'ma mizama sesigeno kini
ne'mofo feno nompima ome antesaza zagomofo kea asami'ne. 8
Ana nehuno Susa rankumapima mani'naza Jiu vahe'ma zamahe
hana'ma hanaza avoma kre'naza avontafe'enena Hatakina
nemino anage hu'ne, erinka ama avontafera vunka omeri ani
hunka Estana asmigeno, Esta'a vahe'amota tagri tagira erino
kini netera vuno tazama hanigura nanekea ome huranteno. 9

Hagi Hataki'a Estante vuno Modekai'ma hiankea ome asmi'ne.

10 Higeno Esta'a Hatakina asmino, Amanage hunka Modekaina ome asmio. **11** Kini ne'mofo eri'za vahe'mo'o, kini ne'mo'ma kegavama hu'nea kumateti vemo'o a'mo'ma, kini ne'mo'ma kema osunenifima kenaku'ma agri nompima esaza vahe'mofona magoke kasegege'za me'ne. E'i ana vahera ahe frigahaze. Hagi anama umrenerinigeno kini ne'mo'ma gorire azota'ama rusute amisia vahe ahe ofrigahie. Hagi kini ne'mo'a nagrikura eme nago huno osige'na hago 30'a kna mani'noe. **12** Hagi ana nanekea Modekaina ome asamizageno, **13** Modekai'a amanage huno kenona'a hu'ne. Kagra kini ne'mofo nompi mani'noankino mago zana navatera forera osugahie hunka kagesa ontahio. Maka Jiu vahe'motane kagri'enena tahe frigahaze. **14** Hagi kagrama kema osuma mani'nankeno'a, Jiu vahe'ma zamazama hu'zamo'a ruregati egahie. Hianagi kagri'ene nagakanena otrekano tamino tahe vagaregahaze. Hagi kagra amanahu knafima tazama hananku kuinia mani'nane. **15** Anagema nentahino'a, Esta'a amanage huno Modekaina kenona hunte'ne, **16** Vunka Susa rankumapima mani'naza Jiu vahetmina ome zamavare atru hunka kini ne'ma ome kesuazankura 3'a knafina ne'zane tinena a'o huta mani'neta kenage'ene feru'enena nunamuna hihio. Nagri'enema nemaniza mofa'neramine nagranena anazanke huta ne'zana a'o hu'neta nunamuna hugahune. Ana hute'na kasegemo'a i'o hu'neanagi, vanugenoma nahe frisiana ha nahe frisianki, kini netera vugahue. **17** Anage higeno Modekai'a vuno maka Estama huntea kante anteno ana ome hu'ne.

5 Ana higeno namba 3 knareresta'a kuini kukena'a eri nentanino, kini ne'mofo kumapi ufreno kini ne'mofo noma me'nea avuga tava'onte uoti'ne. Hagi kini ne'mo'a kafantega avugosa

hunteno kini tra'are mani'ne. 2 Hagi kini ne'mo'ma keama Esta'ma kafante'ma uotigeno negeno'a, muse hunenteno golire azotama azampima eri'neana rusute amigeno, Esta'a umrerino ana azota agonare avako hu'ne. 3 Higeno kini ne'mo'a antahigeno, Kuini a' Estaga na'anku kave'nesie? Na'anku nantahige'za nehane? Kegavama hu'noa mopama amu'nompinti'ma refko hunamio hunkama hananke'na amne anara hugahue. 4 Hagi Esta'a kenona huno, Kini ne'moka musema hanunka, kagrane Hemani'enena kagri ne'zama retro'ma hunte'nore menina evi'o. 5 Hagi kini ne'mo'a huno, Ame huta Hemanina avreta enketa Esta'ma hirega va'mneno. Hige'za Hemanima avre'za azageno kini ne'ene Hemanikea Esta'ma retro'ma hu'nea ne'za ome nenaku vu'na'e. 6 Hagi ne'zama nete'za waini tima nenazageno'a, kini ne'mo'a Estankura huno, Nazankuroma nantahigesanke'na ana zana amne kamigahuanki nantahigo. Hagi kegavama hu'noa mopama amu'nompinti'ma refko hunamio hunkama hanankena, amne anara hugahue. 7 Higeno Esta'a kenona huno, Nagra ama zanku kantahigegahue, 8 kini ne'mokama kavesinantenka musema hunka kantahima ke'nuazama hunaku'ma hanunka, muse hugantaonki retro'ma hanua nezantera okina Hemanina avreta eke'na kini ne'mokama hana kerera kenona hugantaneno. 9 Hagi ana kna zupa Hamani'a tusi muse nehuno, agu'amo'a knare nehigeno vu'ne. Hianagi Modekaiaama kini ne'mofo kuma kafante'ma mani'negeno ome negeno'a, tusi arimpa ahente'ne. Na'ankure Hamani'ma nevigeno'a, Modekaia'a rankva vahe'ma ne-egeno'ma nehiaza huno antri huge otinora ra agi omi'ne. 10 Hianagi Hamani'a arimpa he'zana eria amara osu agu'afi netreno, noma'arega vuno arone'aramine nenaro Zeresinena ome kehutru huno, 11 fenoma ante'nea zanku'ene ne' mofavreramima ante'nea

zanku'ene, kini ne'mo'ma ra agima amino eri'zampima avre
onagamuma netreno, mago'a eri'za vahetmima zamagaterea
zanku'ene ra agima eria zankura ome zamasami'ne. 12 Hagi
Hemani'a huno, E'ikerompage mago'a eri'za vahera nezmatreno
kuini a' Esta'a nagri'ene kini ne'ene kehigeta kini ne'mofo
ne'zama retro'ma hu'nea nezantera vu'no'e. Ana nehuno oki'nena
nagrike'za kea hu'neanki'na kini ne'ene vuta ne'zana ome
negahu'e. 13 Hianagi Jiu ne'ma Modekai'ma kini ne'mofo
kuma kafante'ma mani'negenama negogeno'a, ana knare'zama
hunante'nea zantmimo'a amnezankna nehie. 14 Higeno Hemani
rone'amo'zane nenaro Zeresi'ene amanage hu'za asmi'naze,
Za'za'amo'a 22mita hu'nesia za'za zafa huge'za eri'za eme
retru renesagenka, oki nanterana kini neku hugeno Modekaiana
aheno hantino. Ana hanigenka muse nehunka, kini ne'enena
vunka ne'zana ome negahane. Higeno Hemani'ma antahiana
ana antahi'zamo'a knare higeno, za'za zafa retro hunte'ne.

6 Hagi ana kenagera kini ne'mo'a avura masegara osuno ko'ma
fore'ma hu'nea zantmimofo agenkema krente'naza avontafe
omerita navuga eme hamprinke'na antahi'neno huno hu'ne. 2
Anagema hige'za vu'za ana avontafera omeriza, zanagonknaza
hari'nea netrema kini nemofo kuma kafante'ma eri'zama e'neria
netrena, Biktana'ene Teresikema ko'ma kini ne' Serksisima
ahenaku oku'a naneke retro nehakeno, Modekai'ma keteno,
ana nanekema huama'ma hu'nea naneke hampri ami'naze.
3 Ana nanekema nentahino'a kini ne'mo'a amanage hu'ne,
E'ina'ma hu'nerera Modekaina na'a hunte'none? Higeno ana
avontafema hampri ami'za vahe'mo'za amanage hu'haze, Mago
zana huonte'none. 4 Higeno kini ne'mo'a huno, Iza kumapina
menina mani'ne? huno nehigeno'a, Hemani'a zafama tro'ma

hunte'ner'e'ma Modekaima aheno hanti'nia naneke kini ne' ome
asaminaku, kini ne' kumapina ana umarer'i'ne. **5** Higeno kini
ne'mofo eri'za ne'mo'a kini nera asamino, Hemani'a kumapi
eme oti'ne higeno, kini ne'mo'a huno, Kehugenno efreno huno
hu'ne. **6** Higeno Hemani'a emarerigeno kini ne'mo'a amanage
huno hu'ne, Nagra mago nera mani'neanki'na ragi ami'na husga
huntegahue? Higeno Hemani'a agra'agura amanahu antahintahi
antahi'ne, mago'a vahe'ma kini ne'mo'ma ana'ma huntega
vahera omani'neanki, nagrake'za mani'noe huno antahi'ne. **7**
Ana antahintahi nentahino Hemani'a amanage huno hu'ne,
Kini ne'mokama ragima aminka azeri sgama hana nera, **8** ke
huge'za kini ne'moka kukena eri'za eme nemiza, kini ne'mokama
vanoma nehana hosi afuma kagri kavasese zantetima asenire'ma
avasesema hunte'naza hosi afu avre'za eme amiho. **9** Ana
nehanigenka mago ugagota eri'za neka'agu hugeno, kini
ne'moka za'za kenaka'a erino ana nera kukena hunenteno,
hosoi afuka'amofo agofetu avreno kumapina vano nehuno ana
eri'za ne'mo'a ranke huno, ama nera kini ne'mo'a ragi amino
knare avu'ava hunte huno hino! **10** Anage higeno, Knare ke
hananki kema hanankante antenka ame hunka vunka ana
kukena omenerinka hosi afura nevrenka enka kuma kafante'ma
kvama huno nemania Jiu ne' Modekaina ana maka zana hunto.
Hagi mago zane hunka kagera okanio! **11** Higeno Hamani'a
kini kukena omerino Modekaiana eme hunenteno, kini ne'mofo
hosoi afu agumpi avrenteno kuma amu'nompina ana hosi afura
avazu huno vano nehuno, ranke huno amanage hu'ne, ama nera
kini ne'mo'a ragi amino knare hunte'ne huno vano hu'ne. **12**
Ana'ma hutegen'o'a, Modekaia'a kini ne'mofo kuma kafante ete
emani'ne. Hianagi Hamani'a asenire arefiterino rimpagna nehuno

noma'arega vu'ne. 13 Hagi Hamani'a maka zama agrite'ma fore'ma hia zamofo nanekea rone'aramine nenaro Zeresinena ome zamasami'ne. Higeno nenaro'ene knare antahi'zama nemiza vahe'mo'za amanage hu'za asami'haze, azeri havizama nehana ne' Modekaia'a. Jiu nekino agri'ma ahe kema retro'ma nehana zamo'a eri'zana e'origosie. Hagi kagri kazeri haviza hugahie. 14 Ana nanekea zahufa nesmizageno, kini ne'mofo eri'za ne'ma agonknazamo hari'nea ne'mo'a ame huno vuno Hemanina ome avreno Esta'ma ne'zama retro'ma hu'nerega vu'ne.

7 Ana higeno kini ne'ene Hemanikea kuini a' Esta'ma retro'ma hu'nea ne'za ome nenaku vu'na'e. 2 Hagi namba 2 zupama krentea ne'zane waini tinema neneno'a, kini ne'mo'a ete mago'ane Estana amanage huno antahige'ne, Kuini a' Estaga nazanku kave'nesifi nasmio? Na'ankuro nantahima kesana zana amne kamigahue. Kegavama hu'noa mopagu'ma nantahigesanke'na amne amu'nompintira refko hugamigahue. 3 Higeno anante kuini a' Esta'a kenona'a huno, kini ne'moka musema hunantenka kavesi nantenunka, kantahigoanki nagri'ene vahe'ni'anena tahe ofrio. 4 Na'ankure nagri'ene vahe'ni'anena ko tahe'za akafri kafro nehu'za tazeri havizama nehu'za tahe vagamaresageta frisuna vahe zamazampi zagore tatre'naze. Hagi kazokzo eri'za vahe'ma tavarenaku'ma hiresina, nagra amanahu kea hu'na kna onkamusine. Hianagi nagri'ene naga'hi'anena mika'a tahe vagareke hu'naze. 5 Higeno kini ne' Serksisi'a kuini a' Estankura amanage hu'ne, Iza e'inahu kea hu'ne? Iga ana nera mani'hea ne'mo e'inahu zana huke hu'ne? 6 Higeno Esta'a kenona'a huno, E'i ana kefo avu'ava'ma nehuno ha'ma renerantea nera Hemanikino ama mani'ne. Anage higeno Heman'i'a kuini a'mofo avugane, kini ne'mofo avuga tusi agogogu nehuno ahirahiku

hu'ne. 7 Anage higeno kini ne'mo'a, tusi arimpa ahegeno otino atiramino knagune hozafi vu'ne. E'inama higeno'a, Hemani'a mani'neno kuini a'mo'ma asunku'ma huntesigu amesumesu hu'ne. Na'ankure agrama antahiana, kini ne'mo'ma eme ahe frizanku anara hu'ne. 8 Hagi kini ne'mo'ma knagune hozafinti'ma eno'ma eme keana Hemani'a kuini a'mofo tava'onte agafi mase'za nehigeno eme ke'ne. Hagi anante kini ne'mo'a huno, Ama ne'mo'a navufi kuini a' anteno vase'za nehifi? Anagema nehigeno'a, kini ne'mo'ma vahe'ma ahe frinaku'ma nehigeno'ma nehiaza hu'za eri'za vahe'amo'za ame hu'za Hemani agenopa tavravenu refite'naze. 9 Ana higeno anante kini ne'mofo eri'za ne'ma agonknazama hari'naza ne' Habona'a amanage hu'ne, 22mita hu'nea za'za zafa kuma'afina retrurente'neno, kini ne'mokama kahenaku'ma nehzageno hufore'ma huno kagu'ma vazi'nea ne' Modekaima aheno hanti'niazza retro hunte'ne, huno higeno kini ne'mo'a huno, Hemanina azerita ana zafare ome aheta hantiho. 10 Hige'za Modekaima aheno hantinaku'ma Hemani'ma retro'ma hunte'nea zafare ahe'za hanti'naze. Ana hazageno kini ne'mofo arimpa ahe'zamo'a evurami'ne.

8 Hagi ana knazupage kini ne' Serksisi'a Jiu vahe'ma ha'ma rezmantea ne'mofo mopa'ama, noma'ama maka zama'anena kuini a' Esta eri nemino, Modekaina avate eri'za vahe avre'ne. Na'ankure kuini a' Esta'a kini nera asamino Modekaia nensaro mani'ne huno hu'ne. 2 Ana nehuno kini ne'mo'a amiteno ete eri'nea rinia Modekai ami'ne. Higeno Esta'a Modekaina nonku'ma kva vahe azeri oti'ne. 3 Ana huteno Esta'a mago'ane kini nete vuno, zavi ome neteno agafi umaseno kini nera agesu huno, Agagi ne' Hemani'ma Jiu vahe'ma zamahe hana'ma hunaku'ma retro'ma hu'nea nanekea eri atro huno hu'ne. 4 Hagi anante

kini ne'mo'a golire azota arusute amigeno Esta'a kini ne'mofo
avuga oti'no, 5 amanage huno hu'ne, Kini ne'mokama musema
nehunka, kavesi nantenka, kagesama antahisankeno kagri
kavure'ma fatgoma hanigenka, Agati ne' Hemani'ma huno, Jiu
vahem'a maka kumapinti'ma zamahe hanama huke hu'nea
naneke eri atregeno kagrama kegava hu'nana mopafina ana
zana forera osino. 6 Na'ankure nagrama nege'nugeno'ma
vahenimo'ma e'inahu hazenkema erisage'na inankna hu'na frua
hu'na manigahue. Hagi naga'ni'ama zamahesage'na haviza
hugahue. 7 Higeno kuini a' Estane Jiu ne' Modekainena amanage
huno kini ne' Serksisi'a znsmi'nne, Hemani nonkumara ko
Esta amugen, Hemanina zafare ahe'za hanti'naze. Na'ankure
agra Jiu vahetmina zamahe fanane huke hu'negu anara
hu'noe. 8 Hagi menina ama'na avona kini ne'mo'na nagire
kreta avame'zana rinini'a rekamareta Jiu vahetega atrenkeno
maka kaziga vuno eno hino. Na'ankure ko'ma kini ne'mo'na
nagire'ma avoma kreno, nagri avame'zama rinima rekamrente
avontafera eri otregahaze. 9 Higeno 3 ikanku'ma Sivanie
nehaza ikamofo 23 zupa kini ne'mofo avoma kre eri'za neku
higeno, Modekaima hia kante anteno, Jiu vahetegama, ugota
kva vahetegama, ranra kva vahetegama gavana vahetegama,
mareri eri'za vaheteganena kreno atregeno maka 127ni'a
provinsia Indiatu vuno (Kus) Itiopia ome atre'nea kumatamintega
vuno eno hu'ne. Hagi mago mago provinsifi vahetmintega
zamagri'a zamagerupinti kretere nehuno, Jiu vahetega zamagri
zamagerupinti kretere'ne. 10 Hagi ana avona kini ne' Serksisi
agifi kreno, avame'zana agri rinireti rekamarente'ne. Ana huteno
ana avontafe tamina avoma erino vuno eno'ma hu vahetami
huzmantenge'za kini ne'mofo erizante'ma agamaren vuno eno'ma

nehia hosi afutamimpi ana avona ame hu'za eri'za vu'za eza
hu'naze. 11 Hagi ana avontafepina kini ne'mo'a Jiu vahera hu
izo huzmanteno, magokepi ome atru hutma manitere hu'neta
ha'ma vahe'mo'zama huramantesageta tamagra amne hara
huzmanteta fenontamine a'netamine mofavre'taminena tamagura
nevazita, ha' vahetamimofo fenozana erigahaze huno krentene.
12 Hagi ana'ma hanaza zamofo knama kini ne' Serksisima
erinte'neana Adarie nehaza ikana 12fu ikankino, 13 knazupa ana
zama hanazankna erinte'ne. 13 Hagi ana nanekema kre'neana
maka provinsifina kasegegna hu'za huama hanageno, ana
knama esige'za Jiu vahe'mo'za trotra hu'za mani'ne'za ha'
vahe'zamimo'za ha'ma eme huzmantesnage'za, nona hu'za
hara huzmantegahaze. 14 Hagi kini ne'mo'a avoma erino vuno
eno'ma hu vahetami huzmanteg'e'za kini ne'mofo erizante'ma
agamareno vuno eno'ma nehia hosi afutamimpi, ana avona
ame huza eri'za vu'za e'za hu'naze. Hagi anahu nanekege
Susa rankumapinena huama hu'naze. 15 Hagi Modekai'a kini
vahe'mo'zama nentaniza za'za kukena hokonke'ene efeke
kukena nentanino, golire fetori asenirera nentanino, fitunke
nakre ku'a amega antanino kini ne'mofo avugatira atreno vige'za
Susa rankumapina ana avoma kre'nea zanteru musenkasena
hu'naze. 16 Hagi Jiu vahe'mokizmia, zamagu'afina muse zamo'a
avitegeno, maka kaziga ra zamigi zami'naze. 17 Hagi maka
kazigane maka rankumapinena Jiu vahe'mo'za kini ne'mo'ma
hiankema nentahi'za mago mani fruhu kna erinte'za ne'za kre'za
nene'za, tusi musenkase nehazageno rama'a vahe'mo'za Jiu
vahekese'naze. Na'ankure zamagra Jiu vahekura tusi koro
hu'naze.

9 Hagi 12fu ikana Adarie nehaza ikamofo 13ni kna zupa kini ne'mo'ma huno Jiu vahera zamahe vagaregahaze hu'neana, ete rukrahe hu'za Jiu vahe'mo'za ha' vahe'zmia zamahe'naze. **2** Hagi Jiu vahe'mo'za maka kumatmimpina ha'ma huzmante'nia vahe'ma nona hu'za ha'ma huzmante'nagu eritru hu'za mani'haze. Hianagi mago'mo'e huno hara huozmante'naze. Na'ankure maka vahe'mo'za Jiu vahekura tusi koro hu'naze. **3** Higeno mago mago provinsifima zamagima me'nea vahe'mo'zane, ranra kva vahe'mo'zane, gavana vahe'mo'zane, kini ne'mofo agi'ma eri'za ru kumate'ma nemaniza kva vahe'mo'zanena Jiu vahetega ante'naze. Na'ankure zamagra tusiza hu'za Modekainkura korora hu'naze. **4** Na'ankure Modekaina kini ne'mo'a ragi amino avregeno kini ne'mofo kumapi umanigeno, agi agenkemo'a maka kaziga haruharu higeno, maka kna tusi himamu'ane ne' efore hu'ne. **5** Hagi Jiu vahe'mo'za ha'marezmantea vahera bainati kazinteti maka zamahe hana nehu'za, ha'marezmantea vahera na'anoma huzmante'naku'ma haza zana amne huzmante'naze. **6** Hagi hanave vihuma hugagi'naza Susa rankumapina 500'a vahe Jiu vahe'mo'za zamahe fri'naze. **7** Ana nehu'za Parsandatama, Dalfonima, Aspatama, **8** Poratama, Adaliama, Aridatama, **9** Parmastama, Arisaima, Aridaima, Vaizatama hu'za, **10** Jiu vahe'ma ha'marenentea ne' Hamedata nemofo Hemanina 10ni'a ne' mofavreramina zamahe fri hana hu'naze. Hianagi Jiu vahe'mo'za anama zamahaza vahe'mofo fenona e'ori'naze. **11** Hagi ana kna zupama hankave vihuma hugagi'naza Susa rankumapima vahe'ma zamahaza agenkea kini ne'ma ome asamizageno'a, **12** kini ne'mo'a anage huno kuini a' Estana asami'ne, Hanave vihuma hugagi'naza Susa rankumapina 500'a vahe'ene 10ni'a

Hemani ne'mofavreraminena Jiu vahe'mo'za zamahaze. Hagi e'ina'ma ama kumapima hazana mago'a kumapina hago rama'a vahe zamahe fri'negahaze. Hianagi menina na'anku mago'enena kavenesifi nantahigege'na kami'neno? Nazankuroma nantahima kesana zana amne kamigahuanki nasamio. **13** Higeno Esta'a kenona huno, Kini ne'mokama antahi'nanama knare'ma hina musema hanunka, menima hankezama hazaza hunka, okina Susa kumate'ma mani'naza Jiu vahetmina huizo huzmanteg'e'za vahera nezamahe'za, Hemanina 10ni'a ne'mofavreramina zafare zamavufaga'a eri'za hantiho. **14** Anage higeno kini ne'mo'a ana hiho nehuno, kasege retro hige'za Hemanina 10ni'a ne'mofavreramina zafare zamavufaga'a eri'za hanti'naze. **15** Ana nehu'za Adarie nehaza ikamofona 14ni zupa Jiu vahe'mo'za mago'ene 300'a vahe Susa rankumapina zamahe'nazanagi, kote'ma zamahe'naza vahetmimofo fenoma e'ori'nazaza hu'za e'ori'naze. **16** Hagi ana'ma nehazageno'a kini ne'mo'ma ruga'ama kegavama hu'nea provinsifima nemani'za Jiu vahe'mo'za emeri atru hu'za zamagranena hahu'za zamagra'a zamagu'vazi'naze. E'inama hazafina ha'marezmantea vahetmina 75tauseni'a vahe zamahe fri'naze. Hianagi zamagranena anama zamahe friza vahe'mokizmi fenozana e'ori'naze. **17** Hagi Adarie nehaza ikamofona 13ni zupa, e'i ana zana hu'za vahera zamahete'za, 14ni knazupa manigsa hu'za mani'ne'za tusi ne'za kre'za nene'za musenkasea hu'naze. **18** Hianagi Susama nemaniza Jiu vahe'mo'za 13nine 14ni kna zupaga ha' vahezminena hara hute'za, 15ni kna zupa tusi ne'za kre'za nene'za musena hu'naze. **19** E'ina agafare osi kumatmimpima nemaniza Jiu vahe'mo'za Adariema nehaza ikamofona 14ni knazupa manigasa hu'za ne'zana kre'za nene'za musenkasea hu'za musezana omi

ami nehaze. **20** Higeno Modekai'a ama ana zamofo agenkea avontafepi kreno kini ne' Serksisi'ma mika kegavama hu'nea provinsifima nemaniza Jiu vahetmintega atregeno vuno eno hu'ne. **21** Hagi ana avona kreno Adari ikamofona 14nine 15ni kna zupaga maka kafufina ne'zama kreta neneta musenkasema hu kna erinteho. **22** Hagi e'i ana knarera ne'za kreta neneta musenkase nehuta, musezana omi ami nehuta, zamunte omne vahetaminena ana huzmanteho. E'ina huta knazampinti'ene ha' vahetimofo zamazampinti'ene tasunku zampinti'ma atreta atiramita e'nona zankura antahimigahune. **23** Ana hige'za Jiu vahe'mo'za hu'za, Amama eri agafama hu'nazana hu vava huta vugahune nehu'za, Modekaia'ma hiankegura mago zamarimpa hu'naze **24** Na'ankure korapara Agati ne' Hamedata nemofo Heman'i'a Jiu vahe zamahe hana hunaku antahintahia retro hu'neane. Ana antahintahima retro'ma nehuno'a, purie nehaza satu zokago reno ke'negu anara hu'naze. **25** Hianagi kini ne'mofo avugama Esta'ma ne-egeno'a, Jiu vahetmima zamahenaku'ma Hemanima kefo antahi'zama retro'ma hu'neana, eri arukrahe hu'za agri ahe fri'naze. Ana nehu'za 10ni'a ne'mofavre'a zamahe'za zafare hanti'naze. **26** E'ina agafare ne'zama kre'za nene'za musema nehaza knagura Purimie hu'za satu zokago agire asamre'naze. **27** E'ina avu'ava zana Jiu vahe'mo'za kasege eri retro hazageno zamagripinti'ma fore'ma hanaza vahete'ene ru vahe'mo'zama Jiu vahe'enema mani'naku'ma hanaza vahete'enena kasegegna huno me'nena avaririgahaze. Hagi Jiu vahe'mo'za huama hu'za, maka kafua mani okanegosunanki ama ana tare knarera ne'zana kreta neneta musena hugahune hu'za hu'naze. **28** E'ina hu'negu mago mago nagapinti'ma forehu anante anante'ma hu'za vanaza

vahe'mo'za maka kumatmimpina ama ana tare knarareke
ne'zana kre'za nene'za musenkase hutere hu'za vugahaze. Hagi
maka kafufina ama ana Purimi knama fore'ma hanige'za, mika
Jiu vahe'mo'za zamageraokani manigasa antahitere hugahaze.

29 Ana higeno Abihaili mofa kuini a' Esta'ene Modekaike henka
mago avona kreke Purimi knama kegava hu nanekea eri
hankaveti'na'e. **30** Ana huteke ha'zama omnesige'za zamarimpa
fruma hu'zama mani'naza nanekema kre'na'a avontafera 127ni'a
provinsima kini ne' Serksisi'ma kegavama hu'nea kumatmimpima
Jiu vahe'ma nemanizarega atrakeno vuno eno hu'ne. **31** Hagi Jiu
ne' Modekai'ene kuini a' Esta'enema hu'na'a kante ante'za ana
avoma kre atrakeno vuno eno'ma hia avomo'a Purimi knama
ne-esige'zama kegavama hana zamofo ke eri hankaveti'ne.
Hige'za Jiu vahe'mo'za ne'zama a'oma hu'za zavi krafama
hu'naza zanku nentahi'za zamagragu'ene zamagripinti'ma
fore'ma hanaza vahe'nenku hu'za ana knamo'a meno vugahie
hu'za eri hankaveti'naze. **32** Hagi Purimi knama kegava hu
kasegema kuini a' Esta'ma eri hanavetigeno kasegema fore'ma
hu'nea agenkea ranra zantamima fore'ma nehige'za krenentaza
avontafepi krentazageno me'ne.

10 Higeno kini ne' Serksisi'a agrama kegavama hu'nea
mopafine, hageri ankenaregama meno vu'nea mopafima
nemaniza vahetminku'enena hige'za, takisi zagoa eri'za e'haze.
2 Hagi kini ne'mo'ma ranana zantmima erifore nehuno, mago'a
zama hu'nea zantmimofo agenkene Modekaia'ma marerirfa
vahe'ma efore'ma hu'nea zamofo agenkea Mediane Pesia kini
vahetmimofo agenkema krenentaza avontafepi krente'naze. **3**
Hagi Jiu ne' Modekaia'a kini ne'mofo amagenare eme hu'ne.
Hagi Jiu vahe zamavurera mareri vahe manige'za ra agi

ami'naze. Na'ankure agra maka eri'zama eri'neana, agra'a vahe
Jiu vaheku'ene henkama fore'ma hunante anante'ma hanaza
vahe'mokizmi knare nomanizanku agesa nentahino, kini netera
keaga hu'ne.

Jovu

1 Korapara mago nera Jopu'e nehaza nekino Usi mopafi mani'ne. Agra hazenke'a omne ne' maka zampina mani fatgo huno nemanino, Anumzamofonku korora nehuno kefo avu'ava'zana amefi hunemia ne' mani'ne. **2** Jopu'a 7ni'a ne' mofavreraminki 3'a mofa'neraminki huno zamante'ne. **3** Hagi fenoma ante'neana 7tauseni'a sipisipi afutaminki, 3tauseni'a kemoli afutaminki, hozama eri bulimakao afutamina 500'agi, 500'a a' donki afutaminki huno nenteno, rama'a eri'za vahetamima'a mani'neankino, maka vahe'ma zage hanati kazigama mani'naza vahera Jopu'a zamagatereno tusi'a feno ne' mani'ne. **4** Hagi Jopu ne' mofavreramimo'za zamasarahehe'ina kehazage'za e'za, magomofo nompi atru hu'za tusi'a ne'zana kre'za nene'za musenkasea hutere hu'naze. **5** Hagi ana'ma hu'za ne'zama kre'za nene'za musenkasema huvagama retazageno'a, mofavre'amo'za ne'zama kre'za nene'za musenkasema hazafina kumima nehu'za Anumzamofoma huhaviza hunte'nesagura, nanterana Jopu'a ana maka mofavreramima'a kehutru huno zmente zmente sipisipi afura aheno tevefi kre fananehu ofa huno zamazeri agru Anumzamofo avurera hutere hu'ne. **6** Hagi mago zupa Anumzamofo ankeru vahe'mo'za Ra Anumzamofo avuga atru hunaku neazageno, Sata'a anampina egeno, **7** Ra Anumzamo'a antahigeno, Kagra igati ane? Higeno Sata'a amanage huno kenona hu'ne, Nagra mopafi vano vano nehuregati oe. **8** Anage higeno Ra Anumzamo'a amanage huno antahige'ne, Eri'za vahe'ni'a Jopu'a maka zampina mani fatgo huno nemanino, Anumzamo'nagu korera nehuno, kefo avu'ava zana amefi hunemia ne' mani'neanki kagra ke'nano? **9** Huno antahigegeno Sata'a amanage huno Ra Anumzamofona kenona

hunte'ne, Kagra tamage hananagi, Jopu'a agafa'a me'nere
agra Anumzamokagura korora hunegante. **10** Kagra vihugna
hu'enka mika kaziga agri'ene a' mofavre'ane mika'zama'anena
kegava hunte'nane. Hagi agrama mani'nea mopafina mika zama
hiazana asomu hunentankeno afufeno zama'amo'a ome ra
huno mika zampina avite'ne. **11** Hianagi kzama rusutenka mika
zama'ama ahe fananema hanankeno'a, kavu negesankeno
huhaviza hugantegahie. **12** Higeno Ra Anumzamo'a huno, Nagra
hu izo hugantoanki, vunka Jopu'ma ante'nea zantmintera amne
avako hunka eri haviza hugahane. Hianagi Jopu avufgarera
avakora osutfa huo. Anage higeno Ra Anumzamofo avugatira
Sata'a atreno vu'ne. **13** Hagi mago zupa Jopu ne'mofamo'za
nempu'zimimofo nompi ne'zana kre'za nene'za waini tina nene'za
musenkase nehu'za mani'nazageno, **14** eri'za ne'mo'a Jopunte
eno amanage eme hu'ne, Hozama eri bulimakao afutmimo'za
hoza enerizageno, donki afutamimo'za trazana ana hoza tavaonte
nene'za mani'nazageno, **15** Sabea kumateti vahe'mo'za e'za ha'
eme hurante'za, ana maka eri'za vahetmina bainati kazinteti
zamahe hana nehu'za, bulimakao afutamine donki afutaminena
maka zamavare hana hu'za vazage'na, nagrake'za mani'nena
ana naneke kasminaku fre'na oe. **16** Anage huno ana nanekema
asmi vagaore'negeno ete mago eri'za ne'mo'a, agareno eno
amanage eme hu'ne, Anumzamofo tevemo monafinti eramino
mika sipisipi afutaminka'ane mika sipisipi afu kva vahetaminena
teno eri hana hige'na anampintira nagrake mani'nena ana
naneke kasminaku fre'na oe. **17** Anage huno ana nanekea
asmi vagaore'negeno, ete nampa 3 eri'za ne'mo'a agareno eno
amanage eme hu'ne, 3'a kevu hu'za e'naza Kaldia vahe'mo'za
eri'za vaheka'a mika bainati kazinteti eme zamahe hana nehu'za,

mika kemori afuka'aramina musufase'za vazage'na, anampintira
nagrake frena ana naneke kasminaku oe. **18** Anage huno ana
nanekea asmi vagaore'negeno, ete mago eri'za ne'mo'a agareno
eno amanage eme hu'ne, Ne'mofaka'amo'za nempu'zmimofo
nompi ne'zana kre'za neneza waini tina nene'za musenkase
nehu'za mani'nazageno, **19** ame huno ka'ma kokampinti tusi'a
zaho erino eno, anama mani'naza nomofona mika kaziga
asoparega eme amino ahe pasru hutregeno, ana nomo'a pasru
huno ana maka ne'mofaka'a zamahe fri vagarege'na, ana
knazampintira nagrake atiramina fre'na kasaminaku oe. **20**
Higeno Jopu'ma ana nanekema nentahino'a, tusi asunku nehuno
otino zaza kukena'a tagato nehuno, aseni azokara hareno
eri rampage nehuno, mopafi maseno Anumzamofona mono
hunenteno, **21** amanage hu'ne, Nenarera arimpafintira kukena
osu navufa navapake e'noanki'na, fri'na vanuana navufa navapa
vugahue. Agra Ra Anumzamo namiteno, ete Agra'a e'nerie.
E'na hu'neanki'na, Ra Anumzamofo ra agi amue. **22** Hagi ama
ana mika knazampima Jopu'ma unefreno'a, Ra Anumzamofona
kna amino huhaviza hunteno kumira osu'ne.

2 Hagi mago zupa Anumzamofo ankeromo'za ete Ra
Anumzamofo avugama eme atru hunaku'ma neazageno'a, Sata'a
anampi e'ne. **2** Ra Anumzamo'a amanage huno antahige'ne,
Kagra igati ane? Higeno Sata'a amanage huno kenona hu'ne,
Nagra mopafi vano vano nehureti oe. **3** Ra Anumzamo'a ete
mago'ane Satana antahigeno, Eri'za vaheni'a Jopuna kenampi
onke'nane? Mopafina agrikna vahera omani'neankino maka
zampina mani fatgo huno nemanino, hazenke'a omanegeno
Anumzamo'nagu korera nehuno, kefo avu'ava zana nosia
ne' mani'ne. Agra mago hazenkea osu'nea zante, rehe'na

kesue hanke'na hugantogenka maka zama'a omeri haviza
hu'nananagi, agra ko'ma mani'nea kante mani fatgo huno
mani'ne. 4 Hianagi Sata'a ana kemofo nona'a amanage huno
Ra Anumzamofonkura hu'ne, Avufgare'ma hazenkema fore'ma
hinkeno'a, mika zama'a atreno agra'a avufga agura vazigahie.
5 Hianagi Jopu avufgare'ma krima neminka zaferina'ama eri
havizama hanankeno'a negesnankeno huhaviza hugantegahie.
6 Anage higeno Ra Anumzamo'a huno, Knareki amne kavesinia
zana Jopu avufgarera hugahananagi, asimu'a e'orio. 7 Higeno
Sata'a Ra Anumzamofo avugatira atreno vuno Jopuna mika
avufafina usage namu omeri fore humigeno, aga agusareti'ma
vuno asenire'ma uhanati'neana usage namumo'a avite'ne. 8 Ana
higeno Jopu'a tanefapi mani'neno, tako hu'nea mopa kavo atupa'a
erino namuma'afina zuke nehateno mani'ne. 9 Ana'ma nehigeno'a
nenaro'a huno, Amanahu zama nehigenka kagra nagafare fatgo
kavukvara hunka neane? Ama atrenka Anumzamofona huhaviza
huntegeno kahe frina frio. 10 Hianagi Jopu'a kenona huno, Kagra
negi nagi a'nemo'ma nehiankna ke nehane! Anumzamo'ma
knare'zantamima tamisnigeta e'nerisuta'a, na'a hanigeta havi
zanena e'origahu'e. Anage nehuno ana maka zama avufgare'ma
fore'ma hia kna'afina, Jopu'a mago kumira keaga'afina osu'ne. 11
Hagi Jopu avufgare'ma hazenkema fore'ma hiankema nentahi'za
3'a arone'amo'za kea hu'za antahi'za hute'za, nozmia atre'za
zamasunku'ma hunente'za azeri hanaveti kema asaminagura
e'naze. Ana vahe'mokizmi zamagi'a, Temani vahepinti ne'
Elifasi'ma, Suhi vahepinti ne' Biltati'ma, Na'ama vahepinti ne'
Zofari'e. 12 Hagi afeteti'ma Jopuma eme nege'za ru vahe mani'ne
hu'za kesavri hu'naze. Ana nehu'za erava'oma hu'za nege'za
tusi krafa hu'za zavira nete'za tanefara hatregonefi'za tusi

zamasunku hunte'naze. 13 Ana hute'za 7ni'a knafi Jopu'enena
mopafina mani'naze. Hagi ana knafina mago'mo'e huno Jopuna
kea huomi'ne. Na'ankure Jopu'a tusi'a atazampi mani'neankino
kea humigara osu'nege'za anara hu'naze.

3 Ana'ma hutegen'o'a Jopu'a agira reaka huno nerera'ma
kasente'nea knamofona hu haviza hunteno, 2 amanage huno
hu'ne, 3 nenarera'ma kasenante'nea knamo'a omanegeno,
ese'ma nenarera arimpafima fore'ma nehugen'o ne' fore hugahie
hu'nea kenagemo'a omaneasina knare hisine. 4 Hagi atregeno e'i
ana knamo'a hani fore nehigeno, zagem'o'a remsa hunontegeno
Anumzamo'enema ana knama kegavama osiresina knare
hisine. 5 Hagi e'i ana knama kumazu hanimo'ma kintrako
nehigeno, hampoma kino refitentegeno hanintirima huno ana
knama azeri koroma hiasina knare hisine. 6 Hagi e'i ana
kenage'ma fore'ma hu'noa kenage'ma fore osigeno, mago
kafumofo knaramima nehamprizafina ohamprike, ikamofo knama
hamprizafina ohamprizaresina knare hisine. 7 Hagi e'i ana
kenagera kasefa mofavrea forera osigeno, vahe'mo'za musena
osazasina knare hisine. 8 Hagi kazusima huzante'ma ugotama
hu'naza vahe'mo'zama kazusima hazageno, hagerimpima
tusizaga krokotairima azeri onet'i'za ana knama kazusima
huntazaresina knare hisine. 9 Hagi ko'matu hanafimo'a remsa
huontegeno, masagura amuhara hugahianagi, amnezampi
amuhara nehuno nanterama segeno'ma ko'manetia zana
onkeresina knare hisine. 10 Hagi ana knarerera nenerana arimpa
erigigeno, kaseonantege'na ama hazenkeramina onkoasina
knare hisine. 11 Hagi nagra nerera agu'afima fri'hogeno
kasenantege, kasemanantea kna zupama fruresina knare hisine.
12 Nahigeno nenerera'a amotera navrenteg'e'na mani'hogeno

ami'na nami'ne? **13** Hagi nenrera'ma kasemanantea knazupama frusina, menina mago knazana onke fri'na knare hu'na mani fru husine. **14** Kini vahetamine, mago mago mopare'ma kegavama hu'naza vahetamima frizageno'ma knare nonkumazmimo'ma menima havizama huno me'nea vahetaminema frina umanigasa huresina knare hiresine. **15** Ana nehu'na goline silvanema nozmifima antevite'naza ugagota kva vahetmimo'zama fri'naza vahe'enema menina manigasa huresina knare hisine. **16** Hagi nahigeno nena'rera'a fri mofavrea kasenantege'na masa onke'na ofri'noe? **17** Na'ankure kefo avu'ava'ma nehaza vahe'mo'zane nomani zampima amuhoma nehu'za maraguzamat'i'za e'naza vahe'mo'zanena fri vahe kumapina mani fru nehaze. **18** Hagi kazokzo eri'zama e'neriza vahe'mo'zama fri'za fri vahe kumapima vazana, kegava huzmante vahera omanizage'za knare hu'za ana kumapina mani fru nehaze. **19** Feno vahe'ene zamunte omne vahe'enena anampi manizageno, kazo kazo eri'za vahetmina kvazmia omani'ne. **20** Nagafare knazampima mani'naza vahe'ene hazenkefima nemaniza vahera tavira nezaminka nomanizazmimo'ma amuhoma nehia vahera zamatranke'za zamasimura eri'za nemanize? **21** Fri'zanku'ma avega antaza vahe'mo'zanofrize. Hagi knare zama mopa agu'afima me'nege'za keri kafi'za hakazaza hu'za fri'zankura nehakraze. **22** Hagi ana vahe'ma frizage'za asezmantage'za tusi muse nehaze. **23** Nagafare nomani zamo'ma amuhoma huntea vahera remsa hunteno Anumzamo'a asimura amigeno mani'negeno, hazenkezanura azeri kanegie? **24** Ra nasimu'ma nente'na kragi'ma neruna zavi'ma atoazamo'a tinkna huno navunumo'a herafiramige'na ne'zana one'noe. **25** Koro'ma hunentoa zamo navatera ne-egeno, nagogogu'ma nehua zamo

nagritera fore huno nazeri haviza nehie. **26** Nagra mani fru hu'na manirava nohe'na manigasa nosuanki, hazenkefi manivava nehue.

4 Hagi anante Temani mopafinti ne' Elifasi'a amanage huno kenona hu'ne, **2** Mago vahe'mo'ma kagri'enema nanekema hu'zama nehanigenka akohenka mani'enka ontahigahano? Hagi nagra nagitera aze'ori'na hunaku'ma hanua nanekea amne kasmigahue. **3** Rama'a vahe antahintahia nezminka, hankavezmi omne vahera zamazeri hankaveti'nane. **4** Tanafa'ma hu'za mase'zama nehaza vahetmina, nanekeka'amo'a zamazeri hankavenetino, zaferina omne amnema hia vahera hankavea nezamie. **5** Hianagi menima knazampi nemaninkeno'a krimpamo'a haviza nehie. Hazenke zamo'ma kavate'ma egenka kagogogu nehane. **6** Anumzamofonku'ma koro hunentenka fatgo hunka nemaninazanku kamentintia nehunka, Anumzamo naza hugahie nehano? **7** Kagesa antahigo, hazenke'a omne vahe'mo'a amnea frigahifi? Hagi fatgo avu'ava'ma nehia vahera inantega ahe fri'negenka ke'nane? **8** Hagi nagrama ke'na antahi'nama hu'hoana, hozama eri'za avimzama hankre'za hamarazankna hu'za kefo avu'avazama nehaza vahe'mo'za hazenke'za nehamaraze. **9** Anumzamofo rimpa ahezamo'a, zaho'mo'ma maka'zama eri haviza hiaza huno, Agra asimu'ma antea zantetira zamahe fanane nehie. **10** Zamagra ha' laionimo'ma ha' hunaku nehiaza hu'za krafa nehu'za, rekazigazi hugahazanagi, hanave laionimofona aheno avera rutafrigahie. **11** Hagi ana ha' laionimo'za ahe'zama nenaza zaga omanisige'za zamagaku nehu'za mofavrezmia atresage'za panini hu'za hazagre'za vu'za e'za hugahaze. **12** Hagi tamage nanekea oku'a sumi sumi hu'za eme nasmizage'ha antahi'noe. **13**

Vahē'mo'za mase himrenagēno, kenage ava'nafi ana nanekea
eme nasmizage'na anhintahi hakare nehugenō, **14** tusi nagogo
nefegēno, zaferinani'a omne amne nehige'na, tusi nahirahiku
hu'noe. **15** Mago zaho erino navufi evigeno, navufga nazokamo'a
harahara huno oti vagare'ne. **16** Hagi ana zaho'ma erino'ma
evigenama koana, mago zamofo amema'a fore huno oti'neanagi,
avufga'a onke'noe. Anama nehigeno agasasama omanenefintira
mago agerumo'a anage hu'ne. **17** Anumzamofo avurera mago
vahē'mo'a fatgo osu'ne. Tro'ma hurante'nea Anumzamofo
avurera magora agru vahera omanifta hu'ne. **18** Anumzamo'a
eri'za vahē'anena antahi nozmino ankero vahē'amofo havi
zamavu'zmava zana refko huno nezamage. **19** Hagi vahera
Anumzamo'a mopareti eri kripeno tro hunteneankino (moth)
afovage brebrema rehapatiaza hugahie. **20** Hagi trazamo'za
nantera fore hute'za, kinaga sege'za frizankna hu'za ana fri
fanane hazage'za antahi nozamize. **21** Seli nozmimofonofira
katufe atrazageno pasru hiānkna hu'za knare antahintahi omne
vahē nefrize.

5 Jopuga menina mago'a vahē'mo'za kazama hanagura krafagea
hunka ko? Ina ankeromo eme kaza hugahie? **2** Amne zampima
arimpama ahe'zamo neginagi vahera ahenefrigeno, arumofo
zanku'ma kenunuma nehuno amefikema hu'zamo antahintahima
omne vahera azeri haviza nehie. **3** Neginagi vahē'mo'za osi'a
knafi feno vahera manizage'na nagra ketogeno, hazenkemo'a
ame huno zamazeri haviza nehie. **4** Mago'a vahē'mo'za
mofavrezimia zamaza hu'za keagafina zamagura ovazizage'za,
kuma kafanteria zamazeri haviza nehaze. **5** Zamagaku'ma hu'za
friza vahē'mo'za ana vahē'mofo hozafintira ne'zana vasage'za
nene'za ave'ave trazampinti'enena ne'zana vasage'za nenaze.

Ana nehazage'za, tinku'ma zamavesige'za nehazaza hu'za
feno zanku'ma nehakaza vahe'mo'za fenozama'a e'nerize. 6
Knazamo'a mopafintira hanatino marenorigeno, hazenkezamo'a
mopafintira aru banana huno nohage. 7 Tevemo'ma teragareno
mareriankna huno, vahe'ma fore'ma hianknaretira agafa huno
hazenkezamo'a forera nehie. 8 Hianagi Jopuga kagrama
hanaza hu'na nagra knazama eruasina, knazani'a Anumzamofo
antahigogeno naza hisine. 9 Agra tusi'a ruzahukna kaguva
zantami erifore nehuno, ohampriga'a kaguvazantmina erifore
nehiankita, tagra keta antahita osugahune. 10 Agra higeno
mopafina kora runentegeno, hozafinena tina nemie. 11 Agra
amunte omane vahera zamaza hige'za, mani'zazmifina knarer
nehazageno, zavi'ma netaza vahera zamahokeno zamagu
nevazie. 12 Hagi vahe'ma zamazeri havizama hu kazigati'ma
knare antahi'za retro nehune nehu'za, havi antahi'zama retro'ma
nehaza vahe'mofo antahi'zazmia eri ama higeno, ana antahi'za
zamimo'a amane zankna nehie. 13 Hagi vahe'ma zamazeri
havizahu kazigatima knare antahi'za retro nehune nehu'za, havi
antahizama retroma nehaza vahe'mofo antahizazmia eriama
higeno, ana antahi'za zmimo'a amnezankna nehie. 14 Hagi ana
vahe'mo'za ferura hanimpima vanoma hazankna hu'za vano
nehu'za, kinagama omeseg'e'za kenage'ma inkonkima erino'ma
viaza hu'za vano nehaze. 15 Hianagi ana vahe'mo'zama zamunte
omne vahetmima huhavizama hunezmantazageno'a, zamaza
nehuno hanave vahe'mo'zama zamazeri havizama nehazageno'a
zamaza nehie. 16 Hagi zamunte'ma omne vahe'mo'za
Anumzamo'ma zamazama hanigu amuhara nehazageno, kefo
zamavu'zmava'ma nehaza vahe'mokizmi zamagira Anumzamo'a
ru hamunkige'za kea tagane'za nemanize. 17 Anumzamo'ma

azeri fatgoma hania vahe'mo'a muse hugahie. E'ina hu'negu kefo avu'ava'ma nehankeno Himamu'ane Anumzamo'ma kazeri fatgoma nehanigenka kavresra hunka kamefira huomio. **18** Hagi Anumzamo'a atrenigeno namumo'a kavufgarera fore huno kazeri haviza hugahianagi, ete kazofeno kazeri so'e hugahie. **19** Hagi 6'a zupama hazenkefima ufresankeno'a, Agra kaza hu'neno, 7ni hazenke zama esigeno'a kagu'vazinigeno ana hazenke zamo'a kazeri haviza osugahie. **20** Agra agatonto knama esigeno'a, kazahina nezankura nofrisankeno, ha'ma hu knafina katreseigeno bainati kazintetira kahe ofrigahaze. **21** Hagi vahe'mo'zama kefinti'ma kazeri havizama hu'zankura, Anumzamo'a kazeri frakigahianki, hazenke zamo'ma keonke'zama eri havizama huno ne-enigenka korora osuo. **22** Ana hanigenka hazenke zamo'ma keonke'zama eri havizama hania zanku'ene agatonto zankura ki'za neranankeno, afi zagagafamo'za kazeri korora osugahaze. **23** Hagi havege mopamo'a knare hinkenka hoza nentesankeno, afi zagagafamo'za hara reogantegahaze. **24** Hagi hazenke zana omnennenko nonkumaka'amo'a knare huno mesigeno, sipisipi afuzagaka'ama hamprinka kesanana mago'mo'e huno fananea osugahie. **25** Hagi henkama kenka antahinkama hananana mofavreraminka'amo'za rama'a ome hanageno kagehemo'za rama'a ome hu'za ama mopafi tra'zankna hugahaze. **26** Hagi witimo'ma kna fatgo'are'ma nenama hige'zama vasagazaza hunka, kagra ozafa omeretenka renteraminka frigahane. **27** Hagi keho, tagra ama ana zana rempi hutu keta antahita hu'nonankino, tamage ama ana zana fore hugahianki antahi ani' huo.

6 Elifasi'ma anagema hutegeno Jopu'a amanage huno kenona hunte'ne. **2** Hagi nasuzampima mani'noa zamofo kna'ane hazenke zani'amofo kna'anema sigerire'ma erinte'za

kazasina, 3 maka hagerinkenafi kaseparamimofo kna'a agateresine. E'inama hu'nea zankura nagra nagesa antahi so'e osu ame'ama hu'na rama'a kea hu'noe. 4 Na'ankure Hihamu'ane Anumzamo'a keve nahetrege'na masenogeno ana keveraminte'ma fre'nea avuatga zamo'a nazeri haviza nehie. Ana nehigeno nazeri koro'ma hu'zantamima Anumzamo'ma huntegeno e'nea zamo'a navuga emanimpi huneno nazeri korora nehie. 5 Hagi afi donki afu'mo'zane bulimakao afu'mo'za trazama me'nege'zama nene'za krafa nosaze. 6 Hagi hagema ontogeno'ma hagama osu ne'zana vahe'mo'za amnea negahazafi? Nama amu'amofo efeke'amo'a haga hugahifi? 7 Nagra e'inahu' ne'zama avako'ma hu'zankura navresra nehie. E'inahu ne'zama nenogeno'a, amuti nagesa nehige'na ana nezama ne'zankura tusi nagonete. 8 E'igu Anumzamo'a nunamuni'a nentahino, nagesama nentahua zana hunantesiegu nave'nesie. 9 Anumzamo'a nare hapati'nige'na fruresina knare nehigeno, Anumzamo'a azana rusuteno nahege'na fruresina knare hisine. 10 Knazampi mani'ne'na natagura nehuanagi, nazeri knare hugahie. Na'ankure knazampima mani'ne'na Ruotge'ma Hu'nemofona kea huhavizana huonte'noe. 11 Hankave'ni'a omne'neanki'na hanaveti'na mani'ne'na ama ananknazana eri'na ovugosue. Akohena mani'ne'na ama ana knafima ufre hankaveni'a omnetfa hie. 12 Hanavenimo'a havegna huno hanavenentake higeno, navufgamo'a bronsimo'ma hiaza hu'nefi? 13 Hagi nagra'a naza hugara nosugen, ama ana knazama agatere kankmuna omnetfa hie. 14 Hagi Hihamu'ane Anumzamofoma korora hunontesnia vahe'mo'agi, rone'amo'ma knafima mani'nenigeno'a knare avu'ava huntegahie. 15 Hagi nena fugatma tamagra, hagegema hu'nea tinkagomupi ko'ma

rigeno tusi tima hageno eteno, ko'ma rusegeno'ma ame huno'ma
taneankna vahe mani'naze. **16** Hagi zagemo'ma aisima teze'ze
higenoma, tima hageno'ma eviakna vahe mani'naze. **17** Hianagi
ana timo'a ra zagma regeno'a neranegeno, tusi amuhoma
higeno'a, tima eneviretira taneno hagege nehie. **18** Hagi
fenzama zagorema netraza vahe'mo'za (Karivani) hagege
ka'ma kokampima enevu'za tiku'ma zamavesige'zama umani
fru hu'zama tima nenaku'ma hazana, timo'a tanenege'za tinkura
huge'za fri'naze. **19** Hagi Tema kumateti fenzama zagore'ma
netraza vahe'mo'zama enevu'za ana krahopima tiku'ma kazana
tina omnene. Hagi Siba kumateti vahe'mo'zanena enevu'za
ana tina negahune hu'za amuhara hu'nazanagi onke'naze.
20 Hagi zamagra ana tina enevifi hu'zama ome kazana ana
timo'a tanegeno, ana tima negahunema hu'za amuha'ma hu'za
e'naza zamo'a amnezankna hu'ne. **21** Hagi menina tamagoana
timoma taneaza huta naza hugara osaze. Na'ankure nagri'ma
eme nagazana, tusi knaza eri'na mani'nogeta, tusi tamagogogou
nehaze. **22** Nagra mago'mokagura hu'na nagri nagi erinka
muse'za amio hu'na huge, magomokagura hu'na fenonka'afintira
mago'azana erinka knazampintira atesinka navro hu'na hu'nofi?
23 Hagi ha' vahe'nimofo zamazampintira nagu'vazio hu'na
huge, kefo vahetmimofo zamazampintira nagu'vazio hu'na
mago'mokagura osu'noe. **24** Hagi akoheno'ma mani'zana rempi
hunaminke'na kea osu'akohe'na mani'neno. Hagi havizama
hu'ne'nua zana naveri hiho. **25** Tamage nanekema hu'zamo'a
tusi katagrigahie. Hianagi keha'ma rezamo'a, nanknare'za erifore
hugahie? **26** Tamagrama tamagesa antahi'zana, tagrama huna ke
antahino amage antegahie huta nehuta, knazampima mani'ne'na
nazama huzanku'ma nehakoa vahe'mo'na nanekea eri amne

hazageno zahoknara nehio? 27 Ana nehutma satu zokago
reta negeta, megusa mofavreramine, ronetaminena zagore
zamatregahaze. 28 Hianagi menina muse nehuta kama nageho,
tamagri tamavufina nagra havige nehufi? 29 Tamagra havigea
huta kumi hune huta nazeri haviza hu kea osiho. Na'ankure
nagra mago hazenkea osu'noe. 30 Tamagrama tamagesama
antahi'zana, nagra havige nehufi? Nagra fatgo zane knare
zanena ke'na antahi'na osugahufi?

7 Vahe'mofo nomani'zamo'a ama mopafina amuho nehie.
Hagi nomani zantimo'a, vahe'mo'ma amuhoma huno zago
eri'zama eriankna huno tusi amuho nehie. 2 Nagafare
nomani'zantimo'a kazokzo eri'za vahe'mo'za zagefi eri'za e'neri'za
tonaku hakrazankna nehigeno, eri'za vahe'mo'za mizazmi
e'ori'ne'za miza zimigu avega ante'za manizanknara nehie. 3
E'ina hu'negu Anumzamo'a natrege'na rama'a ikampina knare
osu nomani'zana mani'na ne-e'na maka kenagera narimpagna
nehu'na nasu zampinena mani'na neoe. 4 Hagi kenage'ma
mase'ne'na, inankna huno ame huno masa hugahie ha hu'na
mase rukrahe rukrahe hu'noe. Hianagi ana hanimo'a, ame
hunora masa huno kora otu'ne. 5 Hagi navufafina kanimo'a
nehigeno namu rifamo'a hantohanto hu'negeno hagege huno
hananahanunu hu'ne. Ana nehigeno namumo'a navufafina pro
nehigeno avo'mo'a ana namuntamimpintira tusi'za hu'ne. 6
Hagi knama mani'na oanknamo'a ame huno evuevu nehuno,
kukenama nehatia nekazamo'ma ame huno'ma kukenafima
marerino atiramino'ma nehiazza huno enevige'na, knamaregahue
hu'na ontahi'noe. 7 Anumzamoka kagera okanio, nasimu'ma
eri'na mani'zamo'a asimu'ma anteankna higeno knare muse
zana mago'ane onkegahue. 8 Menima nenagaza vahe'mo'za

zazakna onagegosaze. Nagrikura hakegahazanagi, nagra omani
ko' vugahue. **9** Hampoma kiteno'ma kiragama hiankna hu'za
fri'za fri vahe kumapima vanaza vahe'mo'za ome fanane
hugahaze. (**Sheol h7585**) **10** Hagi mago'anena noma'arega
ome'nige'za, vahe'mo'za onkegahaze. **11** E'ina hu'negu nagra
najira hamunki'na omanigosuanki, nagu'afima me'nea nata zana
huama nehu'na, narimpa haviza hu'zana huama hugahue. **12**
Nagra hageri mani'nena, hagerimpi tusi zaga mani'nogenka
kegava hunantetenka mani'nano? **13** Hianagi nagrama antahuana
tafe'niare'ma masenua zamo'a nazeri knare nehanigeno, navu'ma
mase'zamo narimpa knama hu'na ke hakarema nehuazana
eritregahie hu'na nagesa antahi'noe. **14** Hianagi ava'nanifina
nazeri nagogonefenka, avanagna zampina nazeri koro hane. **15**
E'ina higu nata e'ori snuanki nanankena nazeri porari hanage'na
fri'neno. **16** Nasimu'ma eri'na mani'zankura tusiza huno navresra
hianki, natrege'na zazatera mani'na ova'neno. **17** Vahera nankna
zaga mani'nonkenka, hakare zupa vahe'motagura kagesa
are'arerara nehane? **18** Nagafare Kagra mika nanterane, mika
knama enevigenka ame hunka rerahenka ketere nehane? **19**
Kagra amnerega kavua keamne hunka negenka, osi'a kna
natresanke'na nagrena nakrigahufi? **20** Maka vahete'ma kavuma
antenka negana ne'moka, kagri kavure'ma nagra kumi'ma
hu'ne'nuana, na'a kumi hu'nogenka ke'nane? Nagafare kagra
kavua nagritera antetenka mani'nane? **21** Nahigenka Kagra
kumi'ni'a atre nonantenka, kefo avu'ava zani'a eri notrane?
Na'ankure nagra kofa hu'na fri'na kugusopafina mase'nugenka
nagrikura hakegahananagi, nagra ko vanugenka onagegosane.

8 Hagi anante Sua kumateti ne' Bildati'a amanage huno
Jopuna kenona hunte'ne, **2** Hago zazate ama nanekea

hane. Kagipinti'ma atiramia nanekemo'a, tusi'a zahokna hie.

3 Anumzamo'a fatgo huno refkoma hu avu'ava zana eri arukrahera huno havi avu'ava zana hugahifi? Hihamu'ane Anumzamo'a fatgoma hu'nenia zana, eri arukrahera hugahifi?

4 Hagi mofavre nagatamimo'zama Anumzamofo avure'ma kumi'ma hazageno'a, ana kumi'zmimofo nona'a ana hazenkefi zamavarenente. 5 Hianagi kagrama Anumzamofontegama nunamuma hunka Hihamu'ane Anumzamo'ma asunku'ma hugantesigu'ma antahinegenka, 6 kavukva zampina fatgo hunka nemaninka, fatgo zanke'ma hanankeno'a, Anumzamo'a tamage huno tra'aretira otino ete kazeri so'e hanigenka, ko'ma mani'nana kante manigahane. 7 E'ina hanigenka ko'ma ante'nanazana agaterenka rama'a zantami antegahane. 8 Hagi korapa knafima mani'zama e'naza vahetami zmantahigenka negenka, tagehe'zama mani'zama e'naza nomani'zana negenka rempi hunka antahio. 9 Na'ankure tagra meni vahe mani'nonkeno, knatimo'a atupa hu'neankita, mago zana antahita keta osu'none. Ana hu'neankino zagemo'ma rentegeno amema'amo'ma fore huteno ame huno'ma fanenema hiankna huta frigahune. 10 Hianagi ko'ma mani'za e'naza vahe'mo'za rempi hugamigahaze. Zamagra korapa vahetmimofo knare antahintahi eri'nazanki'za ana antahintahia rempi hugamigahaze. 11 Varozamo'a (Papyrus) hapa'ma hu'nesia mopafina knare huno hagegahie. Hagi hapapi uha trazamo'a tima omnennenifina knare huno hagegahio? 12 Hagi hapapi varozamo'a zahufama amosrema nehenigeno ana mopafima me'nenia timo'ma hagegema hinkeno'a, ame huno hagege hugahianagi mago'a trazamo'za ame hu'za hagegea osugahaze. 13 Anumzamofoma zamage'nama hunemiza vahe'mokizmire'ma, amuha'ma nehaza zamo'a amane zankna

hugahie. 14 Hagi hankave'a omne zante'ma, amuha'ma nehaza
vahe'mo'za pamponkemofonofiteti eri anafru hu'za eramiza
haviza hugahaze. 15 Nontimo tagu'vazigahie hu'za zamagra azeri
akona hugahazanagi, ana zamo'a za'zatera menora ovugahie.
16 Hagi Anumzamofoma amagema nontaza vahe'mo'za zagema
ohanatinegeno, timo'ma avite'nea mopafi me'nea tra'zamo'ma
hozafima agatama reno vuno eno'ma hiaza zamagra nehaze. 17
Hagi ana trazamofo arafu'namo'a hageno havere ome azeri
antrako nehie. 18 Hianagi ana tra'zama eri vatitresageno'a, ana
mopamo'a avresra hunenteno nagra kagrira onkage'noane huno
hugahie. 19 Hagi havi avu'ava'ma nehaza vahe'mo'za osi'a knafi
musena hute'za frisageno, ru vahe'mo'za ana mopafina fore hu'za
zamagri nona eri'za manigahaze. 20 Ana nehuno tamage huno
Anumzamo'a hazenke'ama omene vahera amefira huomigosie.
Hianagi tamagerfa huno kefo avu'ava'ma nehia vahera aza huno
azeri hankavea otigahie. 21 Hagi Anumzamo'a kazeri knare
hina kagipintira kiza zokago kege nehunka, musenkege hunka
manigahane. 22 Ha' vahekamo'zama kavresrama hunegantaza
vahera zamazeri zamagaze nehuno, kefo vahera zamazeri
haviza hugahie.

9 Hagi Jopu'a amanage huno kenona hu'ne, 2 Kagrama hanana
tamage hane. Hianagi inankna huno Anumzamofoma avurera mago
vahe'mo'a fatgo vahera manigahie? 3 Hagi mago vahe'mo'ma
Anumzamofoma tauseni'a zupa keagarera avrenteno keaga
huntegahianagi, magore huno keagafina agateoretfa hugahie. 4
Na'ankure Anumzamofona knare antahi'zamo'a avite'nenkino
tusi'a hihamu'ane Anumza mani'ne. Hagi Anumzamofoma
ha'ma rentaza vahe'mo'za zamagra'a zamavate hazenkea
eri'za ketere hu'naze. 5 Agra arimpama ahegeno'a, kea

osu'neno antri hazaza huno agonaramina zamatufe zamatrege'za
haviza nehaza Anumza mani'ne. **6** Agra mopa eri kaza huno
atufetregeno noma'a atreno arufi nevigeno, mopamofo tra'a eri
kaza nehia Anumza mani'ne. **7** Hagi Agrama zagegu'ma huno,
hanatinka mareorio huno'ma hanigeno'a, zagemo'a hanatino
mareorisnigeno, ofunku'ma remsa osuo huno'ma hinkeno'a,
ofumo'a remsa osugosie. **8** Agrake haroma hiaza huno mona eri
rutarenenteno, hagerimo'ma krantonkrantoma hifina agofetura
agatre azatre huno vano nehie. **9** Agrake ofuntamina tro
huno kankamunte kankamunte zamantege'za kevure kevure
mani'nazankino zamagi'a Beama, Orioma, Pleiadesima, sauti
kaziga monafima metruma nehaza hanafitaminena tro hunte'ne.
10 Agra ruzahu ruzahu zantmi tro huntogeno knare zantfa
hu'neankino, ana zantamina hamprigara osu'ne. **11** E'na
hu'neanagi Agrama erava'oma nehige'na nagra nonkogeno,
enagatereno'ma eviama'a kena antahi'na nosue. **12** Hagi
Agrama nazanoma erinaku'ma haniazama e'nerisigeno'a, mago
vahe'mo'a azeorige, na'a nehane hunora antahi onkegahie. **13**
Hagi Anumzamo'a rimpia ahe'zana azeorigosiankino Rehapue
nehaza osifaveramina hagerimpintira amne zamazerino aganutira
zamarehapatigahie. **14** E'na hu'negu nagra iza'na Anumzanena
keaga huge, mago'a zamofo nanekea hu'na eri fatgo hugahue?
15 Hagi nagrira hazenkeni'a omne'nesianagi nagra iza'na
Anumzamofona ke hakarea huntegahue? Hagi magoke'zana
Agrama asunku'ma hunantesigu antahigegahue. **16** Hagi
nagrama keagare'ma avre'na e'na keagama eme huntasuana,
nagrama antahuana, tamage huno Agra ke'ni'a antahi onamigahie
hu'na nagesa nentahue. **17** Na'ankure Agra ununko'nu hara
renenanteno agafa'a omne zante nazeri havizantfa huno nataza

nenamie. **18** Agra natrege'na nasimura e'noruanki, hazenke namino nasimu kana renkrirege'na natagura nehu'na nasimu ante'zanku nehue. **19** Hagi nagrama Anumzamofo hanavema rehe'na kenaku'ma hanuanana, nagri hanavea agatereno hanavenentake hu'ne. Hagi keagama erifatgoma hunaku'ma hanuana, keagafina agateregara osu'noe. **20** Nagra hazenkea osu'noanagi, nagra hu'nesua kere anteno hazenke hu'nane huno hunantegahie. Nagra mago havizana osu'noanagi nagrama hu'nesua kemo, kefo avu'ava'ene vahere huno hunantegahie. **21** Nagrira mago hazenkeni'a omne'neanagi, nagragura nagesa nontahue. Nagra nasimu'ma eri'na mani'zankura navresra nehie. **22** Hazenke osu vahero, hazenke vahero, Anumzamofo avurera magozahu vahe mani'none. Agra hazenke osu vahe'ene hazenke vahe'enena zamahe fanane nehie. **23** Hagi antrima hazaza huno'ma hazenke zamo'ma hazenke'ama omne vahe'ma ahe frigeno'a Anumzamo'a ana knazankura ki'za nere. **24** Mago vahe'mo'ompge Anumzamo keagama refkoma nehaza vahera zamavua eri sukigeno, kefo avu'ava'ma hu vahe'mofo azampi mopamo'a nevie. Hagi Anumzamo'ma ana'ma osanigeno'a, iza anara hugahie? **25** Zamagama neraza vahe'mo'zama zamagama nerazama'a zamagatereno knanimo'a tusiza huno aganere. Ana hu'neanki'na knare'zana fore hanige'na onkegahue. **26** Knanimo'a ventemo hagerimpi agasasa oruno agareankna nehuno, tumpamo ne'zaga'a aheno nenaku eri kafagino hareno takzureankna huno knamo'a tusi aganere. **27** Hagi nagrama knama nehuazama nage'nekani'na, nasunku'ma nehua zana atre'na muse navugosa nehue. **28** Hianagi nagra maka nata zankura tusi koro nehue. Na'ankure kagra kefo zani'a nagenka erifore hugahane. **29** Ko'ma nageno antahino'ma hige'na kumi vahe' mani'noanki,

nagafare nagra amne zampina fatgo vahe'ma mani'zantera maraguzatigahue. 30 Hagi sopenutira tina fre'na nazeri agru nehu'na, hankave marasinireti'ma tro'ma hu'naza soperetira nazana sese hugahuanagi, 31 Anumzamo'a hapake kerifi nasaga hutrena, hapake hu'na hi'mnage ha'enkeno, kukenanimo'enena tusiza huno agote nantegahie. 32 Anumzamo'a mopafi vahe knara osu'neanki'na, nagra Agri'enena fravazige, avre'na keaga huntegera osugahue. 33 Hagi amu'nonte vahera magora mani'neresina keagati'a eri fatgo huno tazeri mago hiresine. 34 Agra amu'nonte ne'mo'a Anumzamofona asmigeno kanoma nemania zana atrege'na ru'enena agrama knazama naminu nazeri koro nehia knazankura korora osu'na manusine. 35 Ana hige'na korora osu knazani'amofo keaga Anumzamofona asamusinagi nagra hankaverera e'inara osugahue.

10 Nasimu'ma eri'na mani'zankura tusiza huno nagoteno navresra nehige'na Anumzanimofontega narimpa haviza hu'zana huama hu'na asamigahue. 2 Nagra Anumzamofona asmi'na, Kagra nazeri haviza hu keaga huonanto. Hagi keagama hunanteku'ma nehana ke agafa'a eri ama huo hu'na hugahue. 3 Hanki nazeri havizama nehampintira nankna knare'za erigahane? Kagraka'a kazanuti tro hunante'nana vahe mani'noanki, nagafare kavresra hunenantenka, kefo avu'ava'ma nehaza vahe'mo'zama antahintahima retro'ma haza antahintahirera musena nehane? 4 Hagi kagrama kavuma kanana, vahe'mo'zama zamavuma negazaza hunka nonkane. Hagi vahe'mo'zama keonke'zama kazaza hunka, kagra nonkane. 5 Huge mopafi vahe'motama atupa knama nemanunaza hunka atupa kna nemanimpi? Vahe'mota kofa'a kafuma nemanunaza huno, Kagri kafumo'a kofa hu'nefi? 6 E'inama osu'nena nahigenka Kagra kefo

navu'navanigu'ene kumi'niagu'enena hanavetinka nehakane? 7
Kagra hazenkea osu'nogenka kenka antahinka hu'nananagi,
mago'mo'e huno Kagri kazampintira nagura ovazigosie. 8 Kagra
kazampinti eri kripenga trohunantetenka menina nazeri havizantfa
nehane. 9 Hagi Kagra kageraokaninka antahio, nagrira hapa
eri kripenga tro hunante'nane. Hanki Kagra ete ame hunka
nazeri kugusopase'za nehano? 10 Kagra nagrira bulimakaomofo
amirima reratiteno, eri kragefeno sisima tro'ma hiakna
hunka nenrera arimpafina tro hunante'nane. 11 Hagi kukena
ataninanteaza hunka nagu'a navufga amega navufgareti eri ano
nevazinka, name'ane zaferinani'anena nagrunanuti hatinka eri
rehampri rehampri hunante'nane. 12 Hagi Kagra nasimu'ma
nenaminka mani'zana nenaminka, vagaore kavesi'zana naveri
hu'nane. Hagi kagra kegava hunantanke'na ofri'na mani'noe.
13 Hianagi Kagrama nazeri havizama nehana zana, kagu'afi
eri fraki'nane. Kagra nazeri haviza hunaku, e'inahura hu'nane.
14 Kagra nenaganke'nama nagrama kumi'ma huasina Kagra
kumi'ni'a atre onantasine. 15 Nagra kumi'ma huresina havizantfa
hisine. Hagi nagri'ma hazenkenima omaneresina, nasenia erisga
osu nagazegu nehu'na haviza huresine. 16 Hagi nagrama navufga
rama hanugenka, laionimo'ma afi'zagama aheno nenaku'ma
nevaririankna hunka tusi'a hihamuka'anu hara hunantegahane.
17 Hagi maka zupa havizama nehua zana eri ama hunante vava
nehunka, Kagra tusi krimpa ahenenantenka sondia vahetmina
huzmantanke'za e'za hara eme hunenante'za tusi nata nami'za
nazeri haviza nehaze. 18 Hagi natrankena nenrera agu'afi
fruge'za vahe'mo'za onagazanki, nagafare natrankeno nenrera'a
kasenante'ne. 19 Nagrira nenanera'ma kaseonantege, narera'ma
kasemanenantege'na fruge'za ome asenantazaresina knare

hisine. 20 Hagi knanimo'a atupa hianki natrege'na osi'a knafina
musena hu'na mani'nena, 21 hanintiri huno knare osu kuma'ma,
vahe'mo'zama vute'za ete nomaza moparega fri'na va'neno. 22
E'i ana mopamo'a kenage hanimo'ma hiaza huno tusi hanintiri
huno knarera osu maka zamo'a savri higeno, ana hanimpina
tavira re'neanagi ana tavimo'a hanintiri hu'ne.

11 Hagi anante Na'ama kumati ne' Sofari'a amanage
huno Jopuna kenona hunte'ne, 2 Rama'a nanekema hana
nanekemofona kenona hugante'za hue. Mago vahe'mo'ma
rama'a nanekema hania nanekemo'a agrira hazenke'a omne
vahere huno aza osugahie. 3 Hagi agafa'a omne nanekema hana
nanekegura mago vahe'mo'a kea osugahie hunka nehano? Hagi
Anumzamofoma huhavizama hunte'hankeno'a mago vahe'mo'a
kazeri kagazea osugosie. 4 Kagra hunka, nagrama namentintima
nehua zamo'a agru hu'heanki'na, Anumzamofo avurera agru
hu'noe hunka nehane. 5 Hianagi Anumzamo'ma nanekema
kasamiresina, antahintahi'afima me'hea nanekea kasamisine. 6
Agrake'za knare antahi'zane ani antahi'zanena kasamigahie.
Na'ankure tamage antahi'zamofona rama'a antahi'zama'a
me'ne. E'ina hu'negu ana maka kumi'ma hu'nana avamentera
Anumzamo'a knazana nogamianki, osi'a negamie. Na'ankure
mago'a kumika'a atreneganteno anara hu'ne. 7 Hagi kagra
Anumzamofona oku'a antahi'zama'a antahi ama' hugahano?
Kagra Hihamu'ane Anumzamofo antahintahi'zana, antahi ani'
hugahampi? 8 Anumzamofo antahi'zamo'a mona agatereno
amenametega marerigeno, fri vahe kumara agatereno (Sheol)
amefenkame tami'neankinka kagra ana maka antahintahizama'a
kenka antahinka osugahane. (Sheol h7585) 9 Hagi Anumzamofo
antahintahi zama'amo'a mopamo'ma ome atre eme atre'ma

hu'neama'a agatereno rankrefa nehuno, hagerimo'ma ome atre
eme atre'ma hu'neama'a agatereno rankrerfa hu'ne. 10 Hagi
Anumzamo'ma eme kavreno kinama hugantege keagafima
kavrenteno keagama hugantena iza Anumzamofona i'o huno
huntegahie. 11 Na'ankure Agra havigema nehaza vahera
zamageno antahino nehuno, kumi'zminena antahino keno
hu'neankino tamage nanekema erinakura vahera zamantahinoge.
12 Hianagi afi donki afumo'a vahe anentara kaseontegahie. Ana
hukna huno knare antahi'zama omne vahe'mo'a antahi amahu'
antahi'zana e'origahie. 13 Hagi kagu'ama retrotra'ma nehunka
kazama erintesga hunka Anumzamofontegama nunamuna
nehunka, 14 kazampima kumi'ma me'nesiana atregamu
atrenka netrenka, vahe'ma havigema huno azeri haviza hu'
avu'ava'zana atro. 15 E'inama hanankeno'a kavugosafintira
masa nehinkeno, mago hazenkeka'a omnesigenka mago
zankura korora osu hankavetinka manigahane. 16 Hagi
hazenke zanka'amo'a tima hageno evu kagatereankna
hanigenka, ana hazenkeka'agura kageknigahane. 17 E'ina
hanigeno nomizankamo'a rumasa huno zage ferukna nehina,
nomanizanka'afima hanima hu'nea zamo'a, nantera zogema
hanatino rumsama hiankna hugahie. 18 Ana'ma hanigenka
mago zankura korora osugosane, na'ankure knare'zankura
amuha nehunka, korora osunka fru hunka manigahane. 19 Hagi
kavu'ma masesanana korora osu nemasesankeno, vahe'mo'za
kagesga nehu'za zamazama hanankura kagritega egahaze. 20
Hianagi havi zamavu'zamava'ma nehaza vahe'mofo zamavumo'a
asu nehinkeno, kama frekazmia omnena frizankuke avega
antegahaze.

12 Anage higeno Jopu'a amanage huno Sofarina kenona
hunte'ne, 2 Tamagrama antahi'zana tamagrake maka zana
antahita keta hu'nazankino frisageno'a, knare antahi'zamo'a
fanane hugahie huta nehaze. 3 Hianagi nagra'enena
kagrama hanaza hu'na ama' antahi'zane vahe mani'noe.
Iza kagri negi vahera mani'neno, kagrama hanana nanekea
nontahie? 4 Nagra fatgo vahe mani'nena Anumzamofontega
nunamuna nehugenonunamuni'a antahinenamia vahe
mani'noanagi ronenimota hunanteta nagiza neraze. 5
Hagi knare'ma hu'zama nemaniza, knazampima mani'naza
vahera huhaviza huzmante'za, kiza nere'za tanafa'ma haza
vahera zamaretufenetraze. 6 Hianagi kumzafa vahe'ene
Anumzamofoma amage'ma nontaza vahe'mo'za fru hu'za
nemani'za, zamagra'a hanavegu antahizageno anumzazmi
asenezmanteanagi Anumzamofo Hihamu hanavefi nemanize. 7
Hianagi afi zagagafa zmantahigege'za rempi hunegaminagenka,
anami kankamumpima hare'za vanoma nehaza namaramina
zmantahigege'za kasamaho. 8 Huge mopamofo antahigegeno
rempi hunegamina, atregeno hagerimpi nozamemo'za kasamaho. 9
Na'ankure nagritegama maka hazenkezama neiana, Anumzamo
atregeno neie hu'za ana zagaramimo'za ke'za antahi'za hu'naze.
10 Na'ankure mika zagagafamofo asimura Anumzamofo azampi
megeno, mika vahe'mofo asimu'mo'enena Agri azampinke me'ne.
11 Hagi ne'zama neneno'ma haga'ama antahiaza huta tagra'a
tagesafinti kea nentahita, kea refko huta nentahune. 12 Ranra
vahepi knare antahi'zana megeno, antahi ama'ma hu' antahi'zana
ozafanafafi me'ne. 13 Hianagi knare antahi'zane hihamunena
Anumzamofompi me'negeno Agripinke knare antahi'zane,
antahi ama'mahu antahi'zanena me'ne. 14 Anumzamo'ma eri

haviza hu'nesia zana mago vahe'mo'a eri so'e hugara osu'ne.
Hagi Agrama kinama huntlesia vahera mago'mo'a kinafintira
katufetregara osu'ne. **15** Anumzamo'ma ko'ma neriazama
azerinigeno'a, mopamo'a hagage koka megahie. Hagi Agrama
tima azerinenireti'ma atresanigeno'a ti hageno mopa refitegahie.
16 Hagi hihamune knare antahi'zanena Agripi me'neankino,
vahe'ma revatgama nehia vahe'ene, anama rezmavatgama
nehaza vahe'mo'zanena Agri hanavefi mani'naze. **17** Hagi
knare antahi'zama vahe'ma nezmiza vahera knare antahi'zazmia
erihana nehuno, keagama refkoma nehaza vahera, zamazeri
neginagi vahe kna nehie. **18** Hagi Agra kini vahe'mokizmia kini
kukena'zmia hateno zamafafafi rugagi zmantege'za, kazokzo
eri'za vahe kna nehaze. **19** Hagi Agra pristi vahera kukenazmia
hatege'za amne vahekna nehazageno, za'za knama kvama
mani'za e'naza kva vahe'tmina knare antahizazamia eri
netrege'za amne vahekna nehaze. **20** Hagi vahe'mo'zama
antahinezmizage'za knare antahi'zama nezmiza vahe'mokizmi
zamagira Agra ru hamunenkino, ranra vahe'mokizmi knare
antahi'zana erinetre. **21** Hagi Agra ugagota kva vahetmina
zamazeri zamagaze nehuno, hankave vahe'mokizmi ha'zana
zamazampintira eri hanarenetre. **22** Hagi Agra hanimpima
framaki'nea zana eri ama nehuno, hanintirima hu'nea zana remsa
higeno rumsa huvaganere. **23** Hagi Agra vahetamina zamazeri
ra hige'za kumara ante'za rama'a vahe fore hutazageno, ete
zamahe fanane nehie. Hagi Agra vahera zamazeri ra hige'za,
rama'a fore hutazageno, ete zamazeri osira nehie. **24** Hanki
Agra kini vahe'mokizmi antahintahia zamazeri savri hige'za, kana
omne ka'ma kokampina neginagi hu'za hazagre'za vano nehaze.
25 Hagi ana'ma hige'za hanimpi eri'eri hu'za vano nehaze. Ana

nehu'za aka tima nenea vahe'mo'zama nehzaza hu'za traka
truku hu'za vano nehaze.

13 Hagi tamagra antahiho, ama ana maka nanekema tamagrama hazana nagra navufinti'ene nagesafinti antahi'na ke'ha hute'na, antahi ama hu'noe. **2** Hagi nagra'enena tamagrama hu'nazaza hu'na ama' antahi'zane vahe mani'noankita nagrira nagateore'naze. **3** Hianagi nagra Hihamu'ane Anumzane nanekea hu'za nehue. Knafima mani'nama nevua zanku Anumzamo'ene keharare'za nehue. **4** Tamagra ana maka'mota havige tusa vahe'mota, havi naneke nenasamize. Tamagra knare osu tusa vahe mani'naze. **5** Hagi tamagrama tamagi'ma hamunkita manisnuta knare antahi'zana erigahaze. **6** Hagi knama e'nerua zanku'ma ke ha'mareramante'nuana tamagesa anteta antahiho. **7** Hagi tamagra havigereti Anumzamofona aza hanune huta keagafina nehazo? Tamagra Anumzamofo kaziga anteta azahunaku kehara nehazo? **8** Tamagra Anumzamofo kaziga anteta aza hu'za nehazo? **9** Hagi amana'ma nehzazama tamageno erifore'ma hanuno'a, Agra knare avu'ava huramantegahifi? Hagi tamagra vahe'ma revatgama nehzaza huta Anumzamofona revatga hugahazo? **10** Tamagrama oku'ama havige huta Anumzamofoma azama hunaku'ma hanazana, hazenkefi manigahaze. **11** Agra hihamu masa'anuti tamazeri koro hinketa, tusi tamagogogu hugahaze. **12** Hagi knare antahi'zama eri naneketmimo'a, amnezankna huno tanefakna hugahie. Hagi tamagra'a kema eri hanavetiku'ma nehaza kemo'a mopa kavomo'ma tako'ma nehiankna nehie. **13** Hanki tamagra kea osutma natrenke'na mani'neno. Hagi natrenke'na nagrani'a kea nehu'na anankemofo nona'a nagra'a eri'neno. **14** Hagi frisuo,

manisuana nagri'za me'neanki'na, na'aneoma hunaku'ma hanua
nanekea amne hugahue. **15** Anumzamo'a nahe frigahianagi,
mago'arega amuha'zani'a omne'neanki Agripinke me'ne. Nagra
knazani'a eri'na Agri'ene kehara hugahue. **16** Hianagi ama
ana'ma hanua zamo'a nagu'vazigahie. Na'ankure Anumzamofo
avuga kumi vahe'mo'za e'za keagaeme osugahaze. **17** Hagi
nanekema hanuana antahi so'e hih. Tamagesa ante so'e huneta
nanekema hanuana antahiho. **18** Hagi nagrama keagafima
hanua keaga hago retrotra hu'noanki'na, nagrani'a hazenkeni'a
omne'ne hu'na nazeri ama hugahue. **19** Hagi ama ana nanekema
nehanugen'o'iza haviza hu'nane hunora hugahie? Hagi ana
nanekema hanugetama havige hanema huta hanage'na, nagra
ke osu' mani'ne'na frigahue. **20** Hagi Anumzamoka tare zanku
kantahigoanki, tare'za hunantege'na nagra kagri kavurera frara
oki'neno. **21** Nagritetira kazana erisga hunka nazeri haviza
nosunka, knazana naminka nazeri korora osuo. **22** Hagi Kagra
keaga nasmige'na kenona huganta'neno. Huge natrege'na keaga
kasmi'nena kenona hunka nasamio. **23** Nagra nama'a hazenke
hu'na kumira hu'nofi nasmige'na antahi'neno? Nagra nankna
kazigati krimpa eri haviza hu'na kumira hu'nofi naveri huo? **24**
Nahigenka kamagena hunenaminka, ha' vahe'ka'ama hunentana
kavukvara hunenantane? **25** Hagi Kagra zaho'mo'ma eri tasinoma
via zafa ani'na azeri koro nehunka, hagage trazama zaho'mo'ma
eri hareno'ma viana nevaririno? **26** Hagi Kagrama hana
nanekemo'a natage'za nenamigenka, nehazavema mani'nenama
hu'noa kumira eri nagumpina nentane. **27** Kagra tarega
nagiararena zafafi erintenka kina hunenantenka, kama vanoma
nehuankana rezaganenka negenka maka nagaka negane. **28**

Hagi vahe'mota tavufgamo'a kasri zankna huge, atafa kukena
hakanomo neankna nehie.

14 Hagi a'nemo'zama vahe'ma kasezmanentege'za osi'a kna
nemani'za rama'a knazampina unefraze. **2** Trazamo amosre
ahenteteno, ame huno friankna vahe'mota nehune. Huge zagemo
hanatino remsa higeno amema'amo ame huno fore huteno,
ame huno fanane hiankna nehune. **3** Hagi Kagra e'inahu
vahete kavua antenka ketenka mani'nano? Kagra e'inahu vahe
zamavarenka keaga huzmantenka refkoa hunezmantano? **4**
Hagi agruma osu vahera, iza azeri agru hugara hu'ne? I'o
mago'mo'a anara osutfa hugahie. **5** Hagi manita vanuna kna
Kagra antahinka kenka hu'nane. Tagra nama'a ika manita
vugahune, Kagra antahinka kenka hu'nanankinka, ko e'inahu
kna'afi manigahaze hunka hunte'nanankino, mago vahe'mo'a
agra'ama manino'ma vania kna'a azeri za'zara huno omanigahie.
6 E'na hu'negu amnerega kavua antenka negenka, natrege'na
mani'ne'na zago eri'za eneri'za vahe'mo'zama nehzaza hu'na
manisua kna'afina eri'zana e'neri'na musenkasea ha'neno. **7**
Na'ankure zafama antagima atrazage'za, ete hagegahune hu'za
amuhaba nehzanki'za kasefa agata hage'za azankunatmina
omere emere hugahaze. **8** Hagi ana zafamofo arafu'namo'a ome
ra huno osaparesingeno, agafa'amo'a hagege huno mopafina
kasrigahie. **9** Hianagi mopafina tima me'nenigeno'a ana zafamo'a
ete agata hageno, kasefa zafagna huno hageno marerigahie.
10 Hianagi vahe'ma frigeno'a hankaveamo'a vaganeregeno,
atumparega ra asimu'ma anteteno nefrie. **11** Hagi hagerimpima
zagema rentegeno'ma amuho huno amu'ma mareriankna
nehuno, ra zagema regeno'ma tiramo'ma taneankna huno, **12**
vahe'mo'a frino manigasa hu'nenigeno monamo'a vagaregahie.

13 Hanki matipima fraki nantenka kagekani nantenankeno karimpa ahe'zamo'ma evunagateresiana knare hisine. Hianagi ete nagri'ma antahi namisana kna, mago kna huhamprinanto.

(Sheol h7585) **14** Hagi fri'ne'nia vahe'mo'a ete otinora manigahifi?

Hagi e'inahu zama me'nenige'na, maraguzamat'i'na vanua knafina frizampinti'ma nazeri oti'nia zankura amuhara hu'na vugahue. **15** Hagi Kagra nagriku'ma kema hananke'na kenona hunegantengenka, Kagraka'a kazanuti'ma tro'ma hunte'nana vahe'mo'nagura tusiza hunka antahintahia hugahane. **16** Na'ankure menina nagama rerakaure'nama kama vanoma nehuazana negananki, kumi'ma huazamofona ohamprio. **17** Hagi e'ina nehunka kefo navu'navza zana kupi eririnka anaki nentenka kumi'ni'a refitesane. **18** Hianagi agonamo ankariseno eramianka nehigeno, mehimpinti havemo atamana huramiankna nehigeno, **19** tima hageno havea erino eviakna nehanigeno, tima hageno mopa erino viankna hunka vahe'mo'ma maniso'ema hunaku'ma amuha'ma nehiazana eri haviza nehane. **20** Kagra hankavetinka maka knafina zamazeri zamagatere vava nehanke'za fanane nehazagenka, zamavufaga eri ruzahu hutenka huzmantanke'za friza nevaze. **21** Hagi ana vahe'mokizmi mofavreramimo'za zamagi me'nea vahe mani'nazanagi, zamagra e'i ana zana antahi'za ke'za osu'naze. Hagi zamazeri fenkamima atresniana antahi'za ke'za osugahaze. **22** Zamagrira zamavufagafintira zamata negrige'za zamatagura nehu'za zamagra zamavufagura zavira netaze.

15 Hagi anante Tema kumateti ne' Elifasi'a amanage huno Jopuna kenona hunte'ne, **2** Knare antahi'zane vahe'mo'a e'inara huno agafa'a omne kea ohantagege, zage hanati kzigati amuhonentake zaho'mo eno eme vazi zoreankna

huno agi'arina osiresine. 3 Hagi knare antahi'zane vahe'mo'a
nena'a omne kea huno ke hara regahifi? 4 Hianagi kagra
Anumzamofona korora huntenka, agesga hunka Agri agorga
nomanine. 5 Hagi kumika'amo hugasmigenka nanekea nehane.
Kagra knare nanekema hunka vahe'ma azeri savri'ma hu'arera
knare hu'nane. 6 Nagra huhaviza hunogantoanki, kagri kagi'mo
huhaviza hunegante. Kagri kagefu'namo maka havizanka'a
huama hunegante. 7 Kagra kagesama antahi'nana, vahera
fore osu'nege'na nagra esera fore hu'noe hunka nehampi? Hifi
kagrama kagesama antahinana, agonaramina fore osu'nege'na
nagra fore hutogeno, henka fore hu'ne hunka nehano? 8
Anumzamo'ma Agra'a keagama retroma hifina kagra mani'nampi?
Hagi kagrake'za knare antahi'zana erinampi? 9 Hagi tagrama
antahita ketama osu'nona zana, na'a tagaterenka nentahinka,
tagrama antahini'ma osu'nona zana, na'a tagaterenka kagra
antahinira hu'nane? 10 Hagi tagri kazigama mani'naza ranra
vahe'ma, efeke zamazoka'ma reana vahe'mo'za kagri negafana
agatere'za za'zakna mani'naze. 11 Hagi knafima mani'nankeno
Anumzamo'ma kazeri so'ema hiazamo'a, osi huno knarer
huogantefi? Hagi akoheno'ma fru kema hugamia kemo'a, knarer
huoganteo? 12 Na'amo higeno antahintahi kamo'a afe'arera
nevigeno, kavumo'a ke so'ea nosie? 13 E'ina'ma nehigenka
Anumzamofona krimpa ahenentenka, keonke keretira azeri
havizana nehane? 14 Hagi ama mopafina magore huno agru
vahera omani'neankino, ama mopafina fatgo vahera omanitfa
hu'ne. 15 Hagi ko, Anumzamo'a ankero vahetmina antahi
nozmie. Hagi monafi vahe'mo'enena Anumzamofo avurera
agrua osu'naze. 16 Hagi mopafi vahe'mota agru osuta kumike
vahe mani'nonankita, kefo avu'ava'ma hu'zankura tinku'ma

ave'nesigeno'ma hiaza huno tusi taga'nete. **17** Hagi Jopuga nagra kaveri hugahuanki, kama antahio. Nagrama ke'na anthi'nama hu'noa zamofona huama hu'na kasamigahue. **18** Knare antahi'zane vahe'mo'zama zamafahemofompinti'ma eri'naza antahintahia eri fraoki, eri ama' hazage'na nagra antahi'noe. **19** Hagi e'inahu antahi'zama eri'naza vahera zamagra mopa agafa vahe mani'naze. Hagi zamagra emanivahera omani'naze. **20** Hagi kefo avu'ava zama nehia vahe'mo'a, mika zupa atazampi manino nevie. **21** Ana nehuno azeri agogofezamofo agasasankea antahi vava nehuno, musema huno mani knafinena ha' vahekura korora hu vava nehie. **22** Hagi agrama amentintima hiana, fegi'ma atirami'na hanizampima vanuana, bainati kazinteti nahe frigahaze huno korora nehie. **23** Hagi agra bretigura hakeno vano nehuno, igati bretia erigahueha huno agesa nentahie. Hanizamo'ma retrotra'ma huno'ma tava'oma'are'ma me'neana, ko antahino keno hu'ne. **24** Atazamo'ene hazenke zamo'ene azeri koro higeno, hate vunaku trotra nehia kini ne'mo nehiaza huno antahintahi hakare nehie. **25** Na'ankure azana anakino mopa nemasagino, Hanavenentake Anumzamofona huhaviza hunte'ne. **26** Hagi agra hanko azampina eri'neno Anumzamofona hara huntenaku agareno vu'ne. **27** Hanki afovamo'a avugosa eri anonevazigeno afafafina afovamo'a avite'neanagi, **28** agra haviza hu'nea kumapi nemanino, vahe omani zute noma pasru hu'zama hu'nea nompi manigahie. **29** Hanki fenozamine zago zmimo'enena zazatera omne fanane huge, keonke zama eri nafa'ama hu'zantmimo'a ruzahera huno mopa atumparera vuno enora osugahie. **30** Hanki agra hanizampintira atreno ofregahie. Hagi zagemofo amuhomo ne'zana te hagege nehanigeno, Anumzamo'ma asimu'ma antesia zaho'mo, ahe fanane hugahie.

31 Hanki negi vahe'mo'zama nehzaza hu'za nena'a omne fenozantera zamentintia osiho. Na'ankure e'inahu vahe'mo'a agra agu'agesa'ama omne zampintira mago mizana e'origahie.

32 Hanki e'inahu vahera kasefa vahe mani'neza ame hu'za frisageno, zagasefage ani'nane zafamo'ma hariri hiaza hu'za fanene hugahaze. **33** Hanki agra nena osu'negeno tagi'za tro hu'naza waini tinkna nehuno, olivi zafa amosaremo raga'a fore osu'negeno ame huno tagiramiankna hugahie. **34** Hanki Anumzamofo kema antahino amage'ma onte vahe'mo'a mofavrea kase nontesigeno, havigema huno knare osu kankmunteti'ma zagoma erino feno vahe'ma mani'nesia vahe'mofo seli nomo'a teveregahie. **35** Na'ankure ana vahe'mo'a hazenke zamofo amu'ene huno kefo avu'ava'za kasenente. E'ina huno arimpaintira havigema huno vahe'ma revatgama hu'za erifore nehie.

16 Hagi Jopu'a anante Elifasine ruga'amokizmia amanage huno kezmirera kenona hu'ne, **2** Rama'a zupa ama ana nanekea antahi'na oanagi, magore huno ama ana nanekema hazazamo'a naza osutfa nehigeta tamasunkura hunonantaze. **3** Hanki nazeri amuhoma hu nanekema nehzana taganeta omanigahazo? Na'a nehigeta kea huvava huta nevaze? **4** Hanki nagrama huaza huta tamagrama knafima manizasina, tamagrama nehzaza hu'na kefintira tamazeri haviza nehu'na nagen rusine. **5** Hianagi nagrama huazama huta tamagra knafima manizasina, nagra tamazeri hanavetikea huneramugetma fru hutma manizasine. **6** Hianagi nagra'ama naguvazi kazigati kema huampi, kema osu'ma manuampi, ana avamenteke knazanimo'a vagaore meno nevie. **7** Tamagerfa huno Anumzamo'a mika hanaveni'a erinetreno, naga'ni'a mika zamahe vaganere. **8** Ana nehuno nazeri havizantfa higeno, navufgamo'a zaferina'nire akamare'ne.

E'ina'ma hia zama vahe'mo'zama nege'za kumi hu'hea zamofo nona'a knazana e'nerie hu'za hu'naze. **9** Anumzamo'a tusi arimpa ahenenanteno nagrira nazeri haviza hu'ne. Agra tusi rimpagu nehuno avera aninkreki nehuno, avua anteno nenageno nage raponeno nenage. **10** Hanki vahe'mo'za zamagira renagate nemiza, nameragente rupro hunenamiza, huhaviza hunante'za eri mago hu'za ha'rarenante'naze. **11** Anumzamo'a kumi vahetmimofo zamazampi navrente'ne. Hanki Agra nazeriteno kefo avu'ava'ma nehaza vahe'mokizmi matevu zami'ne. **12** Hanki korapara hakare'a zamo'a knare huno me'nege'na knare hu'na mani'noanagi, Anumzamo'a nanankente navazu huno nazeri taganavazi'ne. E'ina nehuno nazeri haviza hunaku hankogna huno nazeri ot'i'ne. **13** Ana hige'za kevema nahe vahe'mo'za manigaginante'naze. E'ina hu'nazageno Anumzamo'a asunkura huonanteno kevea nenahegeno, navinompafi timo'a mopafina herafi neramie. **14** Hanki Anumzamo'a mago zupa natrege'na amnea omani'noanki, sondia vahe'mo'zama ha' vahe'ma nezmahazaza huno maka zupa naheva naheva huno tusi kano nemacie. **15** Hagi nagra nasunku nehu'na kopra beki kukena hati'na nentanina, navufga rama nehua zana atrogeno kugusopafi evurami'ne. **16** Hagi zavi'ma netogeno'a, navugosamo'a korankifa nehegeno, navumo'a finigu ahe'ne. **17** Hianagi nagra mago hazenkea osu'noanki, fatgo hu'na nunamuna nehue. **18** Hagi mopamoka korani'a refira otenenego, nagrama knama enerua zankura koranimo'a krafagea huno vino. **19** Hagi meninena ko, nagri'ma huama'ma huno tamage nehie huno'ma huama'ma hunantesia vahera monafinka mani'ne. Nagri'ma nahokeno nanekema hu' vahera manisga huno anagamu mani'ne. **20** Hagi aronenimo'za huhaviza hunenantazage'na

Anumzanimofontega nunamuna hu'na zavira atevava nehue. 21
Hagi nagri'ma navenesiana Anumzane nagri amu'nompina mago
vahe mani'neno nagri nagira erino Anumzanena nanekea haniegu
nehue. 22 Na'ankure nagrama fri'nama fri vahe kumategama
nevuna, ete omesua kafua osi'a me'ne.

17 Hagi hanavenimo'a evuramigeno, knani'amo'a eme upa
nehigeno, vahe'ma asente matimo'a navega anteno me'ne.
2 Hagi nagri'ma huhaviza hunenantaza vahe'mo'za nazeri
kagi'za mani'ne'za, hunte'za ki'za zokago kea hunenantazage'na
mani'ne'na nezmagoe. 3 Hagi nagrira hazenkeni'a omneneanki,
Anumzamoka naza huo. Na'ankure mago vahe'mo'a otino naza
hugara osu'ne. 4 Kagra antahintahizmia eriginke'za ama ana
zana antahi amara nosaze. E'ina hu'negu zamatrege'za kefintira
nazeri havizana hu'za nagateoreho. 5 Zamagra'a knare zanku
nentahi'za, aronezmia zamazeri haviza nehaze. E'ina hu'negu
mofavrezimia zamatrege'za, zamagaku nehu'za friho. 6 Hagi vahe
amu'nompina Anumzamo'a nagrira nazeri kizazokago zankna
higeno, vahe'mo'za navugosafina zamavetura ahenante'za vano
nehaze. 7 Hanki zavi'ma atoa zamo higeno navumo'a zorege'na,
nagra oza'oza hu'na vahe amema'agna nehue. 8 Hagi fatgo
zamavu'zmava'ma nehaza vahe'mo'za ama anazama nege'za,
antri hu'za zamagogogu nehazage'za, hazenke'zmima omne
vahe'mo'za Anumzamofoma amage'ma nontaza vahera ha'
renezmantaze. 9 Ana nehu'za fatgo zamavu'zma'ma nehaza
vahe'mo'za rukrahera osu, fatgo zamavu'zmavama nehaza
vahe'mo'za zamavu'zmavara hu'za nevazageno, zamazampima
pehena okamare maka zupa fatgo avu'ava'ma hu'zampina
hage'za mareneri'za ome hankaveti'za nevaze. 10 Hianagi
mika'mota atreta rukrahe huta eho, tamagri amu'nompina knare

antahi'zane vahera hakre'na eri forera osu'noe. 11 Nagrira knani'a vagaregeno amuha zani'a omane. Ana higeno nagesama antahi'na hugahuema hu'na retroma hu'noa zamo'a amare eme vagare. 12 Hagi ama vahe'mo'za ferukura eri rukrahe hu'za kenagere nehu'za, kenagekura ferure hu'za nehu'za, hanintirima hiazankura masa hu'ne hu'za nehaze. 13 Nagra fri vahe kumapima tafe'ma hu'na hanintirima hu'nefima masoresina knare hisine. Hanki hanimpima tafeni'ama rutare'na masina masogeno'a, knare hisine. (Sheol h7585) 14 Hagi fri vahe matiku'ma hu'na kagra nenfage nehu'na, hagirafagu'ma hu'na, kagra nenrorage hu'na huge, nensarogema huasina knare hisine. 15 Hagi amuha zani'a iga me'né? Iza amuha zani'a hakeno eri fore hugahie. 16 Hagi amuha zanimo'a fri vahe kuma kafante uramigahifi? Tagranena kugusopafi uramigahuno? (Sheol h7585)

18 Hagi anante Suha kumate ne' Bildati'a amanage hu'ne, 2 Jopuga zazate nanekea hunka vane. Kagrama tagiku'ma kenonama hurantesiema hanunka kagesa antahinka nanekea huo. 3 Hanki kagrama antahinana, tagra bulimakao afu mani'nompi? Hagi kagrama antahinana tagra kagri kavurera antahi'za omane vahe mani'none. 4 Hagi kagrira tusi krimpa ahenigenka kazokara vararegahananagi, e'i ana krimpa ahe'zamo'a, mopa eri rukrahera osugahie. Huge ana krimpa ahe'zamo'a, have agona erinkria osegahie. 5 Tamage huno kefo avu'ava'ma nehaze vahetmimofo tavi'mo'a asu hanigeno, akrukuma huno nerea tevemo'a ru'enena akrukru hunora ontegosie. 6 Hanki seli noma'afima neresia tavi'mo'a ome hanintiri nehanigeno, ana nompima hantinte'neni'a tavimo'a asu hugahie. 7 Hanki kefo avu'ava'ma nehia vahe'mo'ma ko'ma hanave'a me'hegeno'ma afete'ma agijama renakenerea zana osugahianki,

tava'onte renakeregahie. Hanki ru vahe'ma zamazeri haviza hu' antahintahima retro'ma nehia antahintahimo, agrira azeri haviza hugahie. **8** Kefo avu'ava'ma nehia vahera kukomo azenerigeno, agri'a agiamo avreno vigeno kerifina uneramie. **9** Hagi krifuma anaginte'naza zamo'a, agiamerumparera azeri'neno azeri antrako hugahie. **10** Hanki ana krifuma anaginte'neana zagaruruma hu'neama'a mopafi eri franokino azeri'niama'a, kama vanoma nehifi krifua hunte'ne. **11** Kefo avu'ava'ma nehia vahera korozamo azeri kagintegeno, hazenke zamo'a avaririno nevie. **12** Hagi menina zamagate'zamo higeno hanavezmi nomnegeno, hazenke zamo'a zamazeri haviza hunaku, tanafa'ma hanagu zamavega ante'ne. **13** Hagi krimo'a zamavufaga zamazeri haviza nehigeno, zamagia zamazamo'a kasrino nevie. **14** Kefo avu'ava zama nehaza vahera nonkuma zamifintira ame huno zamazeri atresige'za, fri'za fri vahe'ma kegava hu'nea kini ne'mofo kvafi umanigahaze. **15** Hagi ana vahe'mofo nonkumara, Salfae nehaza tevenefa'ane haveramimo tefanane hugahie. **16** Hagi ana vahe'mo'za zafa rafu'namo'ma hagegema hiankna hu'za hagege nehanageno, zafa azanku'namo amagino hagege hiankna hu'za, amagi'za osapa regahaze. **17** Hanki ana vahetmina ru'enena zamagesa antahi ozmisage'za fri'za fanane hanageno, ama mopafintira zamagimo'a fanane hugahie. **18** Hagi masafintira zamahe kasopenige'za hanimpi umanigahaze. Hagi ama mopafintira zmehenati atrenige'za ru'enena ama mopafina omanigahaze. **19** Hagi ana mofavrea kaseozmantesage'za, zamagehe'ina kaseozmantegahaze. Huge zamagrama ko'ma nemaniza kumapina mago vahera omanifta hugahie. **20** Hagi ana vahetaminte'ma fore'ma hiazankura zage fre kazigama nemaniza vahe'mo'za antri hu'za zamagogogou nehzageno, zage hanati

kazigama nemaniza vahe'mo'za zamagranena antri nehu'za
tusi'a zamagogogu nehaze. **21** Ana nehu'za amanage hugahaze,
kefo avu'ava'ma nehia vahe'mofo nonkuma'mo amanahura
hie nehu'za, zamagra Anumzamofona zamefi'ma hunemiza
vahetmimofo nonkumakino havizana hie, hu'za hugahaze.

19 Hagi anante Jopu'a amanage huno Bildatina kenona
hunte'ne, **2** Kagra zazate nata naminka ane. Kema hana
kemo'a zazate nazeri havizantfa hie. **3** Hago kagra 10ni'a zupa
kefintira nazeri haviza nehunka, kefinti'ma nazeri havizama
hanazankura kagazegura osane. **4** Hagi nagrama tamagema
hu'na kumi'ma hu'nesuana, kagri zana omne'neankinka e'inahu
kea eme huonantegahane. **5** Kagrama kagesama antahinana,
nagra knare hu'noe hunka kavufga rana nehunka, nagrama
knafima ufroa zankura kumi hu'nea nona'a knazana e'nerie
hunka nagrikura nehane. **6** Hianagi Anumzamo Agra'a nazeri
haviza nehuno, kukompina navrenente. **7** Hanki naza hiho
hu'na kezama atuana, mago vahe'mo'a ana kezankeni'a antahi
onami'ne. Naza hihogu'ma nanekea huanagi, mago vahe'mo'a
antahinamino nagri kaziga anteno nazahu kea osu'ne. **8** Hagi
kama vunaku'ma huankana Anumzamo maninkanirege'na kama
vu'zankura huge'na, akohe'na mani'noe. Ana nehuno kana
rehanintiri huno rehiza hige'na novue. **9** Hanki vahe'mo'zama ra
najima nemizageno nasenire'ma kini fetori'ma anteanknama
hu'neana, hagitenetreno nagaze erinami'ne. **10** Hagi Agra
maka kaziga hazenkea naminu nevige'na ome haviza hugeno,
arafu'na aga'ma zafa eri tasagima hiaza huno amuha zani'a
eri atrene. **11** Ana nehuno ha' vahe'amofoma hiaza huno
nagri'ma arimpa ahenante'nea zamo'a teve rukru hu'ne. **12**
Hagi sondia vahe'amo'za eritru hu'za hahunante'naku kana

nevarize. Ana nehu'za ana maka sondia vahe'amo'za seli noni'a avazagi kanegize. **13** Anumzamo'a naga'ni'a zamavare afete'are nezmanteno, ronen'iaramina zamazeri ha' vahe'ni'a sege'za hara renenantaze. **14** Hagi naga'nimo'za nenatrazageno, navate aronenimo'za zamage'akaninantaze. **15** Hagi nagri nompima nemaniza vahe'mo'zane, eri'za a'nemo'zanena kasefa vahe'ma zamagazankna hu'za nenagaze. Nagra zamagri zamavurera ruregati vahekna hue. **16** Hanki eri'za vahe'nigu'ma kema nehugen'o'a, ke'ni'a antahinonamie. E'ina hige'na eri'za vahe'nimo'ma ke'nima antahinogura mago'ane kea hu agesa nehuanagi, eme onage'ne. **17** Nagi'ma aka hu'na kema nehugen'o evia himnagura a'nimofona amuti agesa higeno, tusi avresra hunenantegeno, nafuhe'za tusi zamavesra hunantaze. **18** Ne'one mofavreramimo'zanena tusi zamavaresra hunante'za huhaviza hunenantaze. Ana nehu'za kema huzmi'zama nehuge'za zamefi hunenamize. **19** Hanki navate aronenimo'za zamagote'za zamavesra hunenantazageno, nagrama navesi nezmantoa vahe'mo'za zamefi hunenamize. **20** Na'ankure navufgamo'a zaferinanire akamarege'na, fri' avamente e'noanagi ofri'noe. **21** Hanki aronenimota tamasunku hunanteho. Na'ankure Anumzamo'a Agra'a azanu knazana namino, nazeri haviza nehie. **22** Hagi tamagra nagafare Anumzamo'ma hiazana huta, nazeri havizana nehaze? Nahigeta nazeri haviza huvava huta nevaze? **23** Hagi nagrama nagesama antahuana, nanekeni'a avontafepi krentege, mago'a zante'ma hanagati'za krentege, **24** havere'ma eri vakiki'za krentege'ma hazageno meno viresina knare hisine. **25** Hianagi nagra antahi'noe, nagu'vazino ete Navre Nera mani'neankino, magokna nagri kaziga eme anteno keagani'a naza huno eri fatgo hugahie. **26** Hanki fri'nugeno navufgamo'a

kasrigahianagi, ama ana navufgare mani'ne'na Anumzani'a kegahue. 27 Nagra navufinti Anumzanimofona kegahue. Nagra navufinti'ma kesua zankura tusiza huno nave'nesie. 28 Hanki nagafare nazeri havizahu kea hunka, agra hu'nea kefo avu'ava'mo higeno hazenkefina nemanie hunka nehane. 29 Hianagi ana nanekekamo'ma hazenkema avreno'ma kagrite'ma esia zankura korora nosane. Na'ankure bainati kazinteti kagrira hazenkea kaminigenka kagrama kenka antahinka banana, fatgo huno refko nehie hunka antahigahane.

20 Hagi anante Na'ama kumateti ne' Sofari'a amanage huno Jopuna kenona hunte'ne, 2 Nanekema hana nanekemo'a, antahintahinifina knarera osutfa hige'na keka'arera ke nona'a hu'zahue. 3 Kagrama nazeri havizahu nanekema hana nanekemo'a, tusiza huno nagaze eri namige'na, nagu'reti hu'na keka'arera kenona hugante'za hue. 4 Hanki ese agafare'ma vahe'ma zamazeri fore hige'za ama mopafima mani'za e'za, amare'ma ehanati'naza vahete'ma fore hu'hea zana kagra ontahi'nano, 5 kefo zamavu'zmava'ma nehaza vahe'mo'za zazatera musena nosage'za, Anumzamofo avu'ava'ma nosaza vahe'mo'za musena nehazanagi, zazatera menora novie. 6 Zamavufga rama hu'zazmimo'ene hihamu zmimo'a amename monarega marenerigeno, zamasenimo'a hampo avako hu'ne. 7 Hianagi rifama retrageno'ma fananema hiaza hu'za fanane hugahaze. Hanki zamage'za antahi'zama hu'naza vahe'mo'za anage hugahaze, zamagra iga mani'naze? hu'za hugahaze. 8 Zamagra ava'nafi vahekna hu'za hare'za fanane hugahaze. Hagi vahe'mo'za avanagnaza ke'naza zamo fanane hiankna hu'za ana vahe'mo'za fanane hugahaze. 9 Hanki ko'ma zamage'naza vahe'mo'za ru'enena nozmagesageno, naga'zmimozanena

ozmägegahaze. 10 Hanki ana vahe'mofo mofavrezmimo'za, zamunte omne vahe'ma zamazama hanagura memea hugahaze. Na'ankure zmafahe'zama zamunte omne vahe'mokizmi fenoma musufama eri'naza zantamina, zamagra'a zamazampinti ete zami'za vano hugahaze. 11 Hihamu'a me'nenigeno kasefa vahe manigahianagi, ana hihamu hankave'ane frino kugusopafi masegahie. 12 Zamagra kefo avu'ava'ma nehaza zamo'a tusi hada zamavesige'za tima'a aru'za nene'za, zamagefunaretira hune hane nehaze. 13 Ana kefo avu'ava zana notrazanki zamajipi haninkofite'za nemanize. 14 Hianagi ana ne'zamo'a aka ome hanigeno, zamarimpafina ha osifavemofo avu'ataga zankna ome hugahie. 15 E'ina hinke'za fenoma asagahu nakri'naza zana Anumzamo'a atre'nigeno zamarimpafina omnegosianki, amu'ma atitreaza huno eri atregahie. 16 Hanki ana vahe'mo'za osifa'vemofo avuatga zama'a anivazu hu'za nenesageno, ha' osifavemo zamaprisige'za frigahaze. 17 Ana hanige'za ru'enena olivi masavena nege, bulimakamofo amirine, tume rima'anena nene'za musena osugahaze. 18 Hanki eri'zama maraguzati'za eri'za erifore'ma hu'naza zantamina zamunte omne vahe zaminageno maraguzati'za eri'zama eri'naza zamo'a amnezankna hugahie. 19 Na'ankure zamagra zamunte omne vahetmina, rezmatga hu'za zamagra onki'naza none fenozmine eri'naze. 20 Zamagrakema antahi vahe'mo'za maka'zana ante'nazanagi, ru'enema maka'zama erisaza zankuke nehaze. Hanki rama'a zantmima antesaza zanku antahintahi hugahazanagi, ana zantamina ontegahaze. 21 Hagi ne'zama neneno'a magore huno negenora notreankino, fenozamimo'a zazatera omneno haviza hugahie. 22 Hanki rama'a fenoza antegahazanagi, hazenkefi ufre'za knazampina maniza vugahaze. 23 Hanki e'inahukna

vahera Anumzamo'a arimpafina hazenkeza eri avitenenteno tusi
arimpa ahenteno hazenkea amigahie. **24** Hanki ainireti'ma tro'ma
hu'nesaza ha'zanku koro hu'za fregahazanagi, bronsire kevenuti
zamahegahaze. **25** Hanki ana kevenu'ma ahe taponesigeno
amagenafinti'ma ruraponenkeno'a, keve agonare'ma koramo'ma
hanigeno kesuno'a tusi agogogu hugahie. **26** Hanki maka zago
fenozmia hanimpi fanene hanigeno, mago'ama mesia fenozmine
seli nozmi'nena tusi'a tevemo hagana hagana huno te fanene
hugahie. **27** Monamo'a kefozazmia eriama nehinkeno, mopamo'a
maka zama hu'naza zana huama huzmantegahie. **28** Hanki ana
vahemokizmi none fenozazminena tihageno erino nevanigeno,
Anumzamofo arimpahé zamo'a tihageankna huno zamavareno
vugahie. **29** Anumzamo'a kefo avu'ava'ma nehaza vahera e'ina
huno zamahe fanane hugahie. Hagi kefo avu'ava'ma nehaza
vahetmimofo mizama Anumzamo'ma havi miza erigahazema
huno'ma huhampri zmante'nea mizana e'ina hu'za erigahaze.

21 Hagi anante Jopu'a kenona amanage hu'ne, **2** Kagesa ante
so'e hu'nenka nagrama hanuankea antahio. Hagi kagesama
antenka antahi'nana zamo nagrira naza hugahie. **3** Akohenka
mani'enka nagrama hanua nanekea antahitenka, henka kagra
kiza zokago kea hunantegahane. **4** Nagra Anumzamofontega
narimpa haviza hu'zana eri ama nehuanki, vahetega narimpa
haviza hu'zana eri ama nosue. E'i ana agafare narimpa fru
hu'na nomanue. **5** Hanki nagrira nenageta antri huta tamazana
tamagipi anteta anikafriho. **6** Hagi kema huankemofo nagesa
nentahi'na tusi koro nehugen, nahirahi nere. **7** Nagafare kefo
avu'ava'ma nehaza vahem'za maka zampina knarera nehu'za,
mani'za vu'za ozafa omere'za himamu'ane vahera maniza feno
vahera nemanize? **8** Zamagra ana mani'ne'za negazageno

mofavrezmimo'za ra hu'za nomani'zana trohu'za nemanize. Ana
nehu'za mofavrea kasentazageno kase anante anantera hu'za
nevaze. **9** Hagi ana vahe'mo'za nonkumazmifima mani'zana
mago'zankura korora osu nemanizageno, Anumzamo'enena
knazana nozmige'za, knare hu'za nemanize. **10** Hanki ve
bulimakao afuzmimo'a mofavrea eri fore huvava nehigeno, a'
bulimakao afutamimo'za anentara kase kuntrara nosaze. **11**
Hanki mofavrezmimo'za sipisipi afumo'za kevure kevure vanoma
nehazaza hu'za magopi kiza zokagora hu'za nemanizageno,
neonse mofavreramimo'za musenkasea hu'za avoa hage'za
vano nehaze. **12** Zamagra tambarini nehe'za hapue nehaza
zavenane nehe'za zagamera nehaze. Ana nehu'za konkena
nere'za, musenkasena hu'naze. **13** Nomani'zazmifina knare hu'za
manime nevu'za zamarimpa frune fri'za nevaze. (*Sheol h7585*) **14**
Hagi havi avu'ava'ma nehaza vahe'mo'za Anumzamofonkura
amanage hu'za nehaze, Kagri kavukva'ma huzankura, tavesra
nehianki tatrewna vuo hu'za nehaze. **15** Marerirfa Anumza nera
Agra iza mani'nenigeta ke'a antahigahune. Hanki Agritegama
nunumuma hanunana, Agra na'a knare zana hurantegahie?
16 Hagi zamagrama antahi'zana tagra'a hankavere maka
zana nehune hu'za zamagesa nentahize. Hianagi e'inahu
antahintahima havi vahe'mo'zama namiza antahi'zana amagera
onte'na, afete manigahue. **17** Hagi kefo avu'ava'ma nehaza
vahera Anumzamo'a ame hunora zamahe ofri zamatrege'za
mani'ne'za ozafare'za nefrize. Hagi zamagra mago hazenke e'ori
amne nemanize. Hanki Anumzamo'a ana kefo vahe'mokizmigura
arimpa ahezmantero knazana nozamie. **18** Hagi zamagrira
zaho'mo'ma hagage tra'zama eriaknara huge, hanave zahomo
witi hona eri hareno vianknara nosio? **19** Hagi tamagra huta,

Anumzamo kumima nehaza vahe'mokizmi mofavreramina knazana zamigahie huta nehaze. Hianagi nagrama nehuana kumi'ma hu'ne'nia vahe knazana Anumzamo zami'nige'za fatgoma huno refkoma hania zana antahi ani hanaze hu'na nentahue. **20** Ana vahetamina zamarenke'za Hihamu'ane Anumzamo'ma zamazeri havizama hania zana zamagra zamavufinti nege'za, arimpama ahezmanenia zana zamagra zamavate keho. **21** Na'ankure zamagrama fri'zama vanu'za, naga'zmire'ma fore'ma hania zankura zamagesa ontahigahaze. **22** Hianagi mago vahe'mo'a Anumzamofona rempi humigara osu'ne. Na'ankure Agra marerirfa vahe'enena refko hunezmante. **23** Hanki mago'a vahe'mo'za miko zama nehaza zamo'a knare nehige'za muse hu'za mani'neza nefrize. **24** Hagi mago'a vahe'mofona zamavufagamo'a knare hige'za hankave vahe mani'ne'za nefrize. **25** Hagi mago'a vahera zamunte omanege'za nomani'za zmimo'a amuho hige'za knare osu nomani'zampi mani'ne'za nefrize. **26** Hianagi knare nomani'zampima mani'neno fria vahe'ene, amunte omne nomani'zante'ma mani'neno fria vahe'enena mago zahu huno mopafi asezmantegeno hagirafamo zamavufaga nene. **27** Hanki kagrama nentahina antahintahia nagra antahi'noe. Nagri'ma nazeri haviza hunaku'ma oku'ama retro'ma nehana antahintahia nagra antahi'noe. **28** Na'ankure kagra hunka, inantega ugagota kva vahe'mofo nona me'ne hunka nehunka, inantega kefo avu'ava'ma nehaza vahe'ma nemaniza seli nona me'ne? hunka nehane. **29** Hianagi karankama vanoma nehaza vahe zamantahigege'za tamage nanekea kasamaho. **30** Kefo zamavu'zmava'ma nehaza veamo'za hazenke zama ne-ege'za hazenkea e'norizanki amne nemanize. **31** Hagi mago vahe'mo'a amatera huhaviza huzmanteno havi avu'ava'zama

nehaza zantera nona hunozmante. **32** Hagi ana vahe'ma frizage'zama eri'za ome asezmantage'za sondia vahe'mo'za matimati zimirera kegava hute'za nemanize. **33** Hagi ana vahe'ma asentenaku'ma eri'za nevazageno'a, tusi'a vahekrfam'o'za zamavariri'za matitega nevaze. Rama'a vahe'mo'za antahinemi'za negazageno vogisi'amo'a kerifina uneramigeno, mopa ragana atrazageno uneramie. **34** Hanki inankna huno kagesama ontahi kema nehana kemo'a naza huno nazeri knarera hugahie? Mika nanekema hana kemo'a amnezankna hie!

22 Hanki anante Temani kumateti ne' Elifasi'a amanage huno Jopuna kenona hunte'ne. **2** Magore huno ama mopafi vahe'mo'a Anumzamofona aza osugahie. Ana nehanigeno, knare antahi'zane vahe'mo'a agra'a aza hugahianagi, Anumzamofona aza osugahie. **3** Kagrama fatgo kavukva'ma hanana zamo'a Hankavenentake Anumzamofo avurera amne zankna nehanigeno, knare kavukva'ma hnana zamo'a, Anumzamofona aza osugahie. **4** Hagi kagrama Anumzamofo agorga nemaninka, mono'ma hunentanana amanahu knazana atregeno kazeri havizana nehuno keaga huganteresino? **5** I'o kagra rama'a kumi hunka nevankeno kumikamo'a hihi huno mareri'nea agafare Anumzamo'a keaga hunegante. **6** Hagi roneka'amo'za kagripinti'ma zagoma nofi hunaku'ma hazagenka, zagoni'ma eme nenamita ete erisaze nehunka kukena'zamia erintanke'za zamavufaga zamavapako vu'naze. **7** Ana nehunka tinku'ma nehaza vahera tina nozaminka, zamagaku'ma nehaza vahera ne'zana ozami'nane. **8** Kagrama kagesa antahi'nana, hankave vahe'mo'zage'za mopa eri nafa'a nehazage'za, mopama eriga vahe'mo'zage enerize hunka kagesa nentahine. **9** Kento a'nanemo'zama zamazama hananegu'ma kagrite'ma ne-azana

zamatranke'za amne nevazagenka, megusa mofavre nagazmia
zamazeri haviza nehane. **10** E'ina hu'negu menina hazenke
zamo'a kukomo hiaza huno, maka asoparega kazeri kagigenka
mani'nankeno antri hanaza huno koro'zamo'a kagrite ne-e. **11**
E'ina agafare hanizamo'a kavua rehani higenka nonkankeno,
ti hageno refiteaza huno knazamo'a, kagrira rufitenegante.
12 Hianagi menina Jopuga antahio, Anumzana rankrerfa
hu'nea Anumzankino amunagamuma me'nea hanafitamina
zamagatereno amenagame monafi nemanie. **13** Hianagi
kagra amanage hunka nehane, nagrama nehua navu'nava
zana inankna huno Anumzamo'a keno antahino nehie? Agra
haninentake hampompi mani'neankino inankna huno tage
amara huno nerageno, refkora huno tagegahie? **14** Tapa
hampomo Anumzamofo avurera anteso higeno norage. Ana
nehigeno agra monamofona agatereno onaga'a vano nehuno
norage. **15** Hanki Jopuga antahio, ko'ma kumi vahe'mo'zama
hu'naza zamavu'zmava nehunka zamage ante'za nehampi?
16 Nozamima azeri oti'zama ki'naza tra'ma timo hageno
erino viankna huno ana kumi'ma nehaza vahera tavava
ozafa ore'ne'za kasefa vahe mani'neza frigahaze. **17** Anage
nehu'za Hankavenentake Anumzamo'a na'a hurantegahie.
Tatarenka vuo hu'za nehaze. **18** Anage nehazanagi e'i
ana Anumzamoke nozamifina knare'nare fenozana eri antevi
tezmante'ne. E'ina hu'negu kefo zamavu'zamava'ma nehaza
vahe'mo'zama nentahi'za antahintahia nagra ovaririgahue. **19**
Kefo avu'ava zama nehaza vahe'ma Anumzamo'ma zamazeri
havizama hige'zama, fatgo avu'ava'zama nehaza vahe'mo'za
nezamage'za muse nehaze. Ana nehanage'za ke'zami omne
vahe'mo'zama nezamage'za zamagiza regahaze. **20** Ana nehu'za,

anage hugahaze, ha' vahetimofona tamagerfa hu'za zamazeri
haviza nehzageno, tevemo fenozamia tefanane hie hu'za
hugahaze. **21** Hagi Jopuga menina Anumzamofonte kagraka'a
anteraminka nemaninka, kasunku hunka Agrane kea eri fatgo
nehunka krimpa fru hunka manio. E'inama hanankeno'a, nomani
zanka'afina maka zamo'a knare hugahie. **22** Amama kavumaro'ma
antekema kasamuana antahiso'e nehunka, kagu'afi erintegeno
meno. **23** Hanki kagrama ete rukrahe hunka Hankavenentake
Anumzamofonte'ma esnankeno'a, maka knazanka'a eri netreno
ete nomani'zanka'a eri so'e hugantegahie. E'ina hu'negu menina
nomanizankafima kefo kavukva zama me'neniana eri atro. **24** Ana
nehunka goligu'ma kavesikavesi'ma nehana zana netrenka, knare
zantfama hu'nea golima Ofiri mopafinti'ma eri'nana golia atregeno
havemoke'ma hu'nea tinkagomupi vino. **25** Ana nehunka atregeno
Hankavenentake Anumzamo goli ka'agnara huno nemanino,
knare zantfama hu'nea silvagnara huno manino. **26** Anama
hanigenka kagra Hankavenentake Anumzamofona tusi muse
hunentenka, kesga hunka Anumzamofona antahimigahane. **27**
Kagra Anumzamofontega nunamuna hanankeno, nunamunka'a
antahi kamigahie. Ana nehanigenka kagrama huvempama
hu'nana keka'a amage antegahane. **28** Kagrama nazano
hunaku'ma kagesama nentahinka anazama tro'ma hnana zamo'a
knare zanke nehanigeno, kama vanana kampina tavi'mo remsa
huganteno vugahie. **29** Hanki mago'a vahe'mo'zama knafima
mani'nesnagenka kagrama hunka, zamaza huo hunkama
hanankeno'a, Anumzamo'a zamagu'vazigahie. **30** Kumi'ma
nehaza vahe'enena Anumzamo'a zamagu vazigahie. Na'ankure
kagrama Anumzamofo avure'ma agruma hunka mani'nana zanku
huno zamagura vazigahie.

23 Hanki Jopu'a amanage huno kenona hu'ne. **2** Nagrira menina mani'zanim'a amuho nehige'na keha regahuanki'na, rentarako hune'na karagira orugahue. **3** Anumzamo'ma mani'nea kuma'ma nagrama ke'noresina, Agrama mani'nea kumapi menina vusine. **4** Anama hute'na kegagani'a Agri avure eri'na vute'na, nazama huno keagani'ma refko huno antahinogura kehara ome husine. **5** Anama hute'na keaganire'ma nonama huno keagama nasamisnia nanekea antahi ama' huresine. **6** Anumzamo'a Agra tusi'a hankave'areti hara renanteno, nazeri havizana hugahifi? I'o anara osu nagri nanekerera agesa ante'neno antahi so'e hisine. **7** Hagi nagrama fatgo vahe'ma mani'nenugeno refko huno nenageno, Agrama hazenkea omane'ne hanige'na mani vava hu'na vusine. **8** Zage hanati kaziga hake'na vuanagi onke'noe. Zage fre kaziga hake'na vuanagi Anumzamofona onke'noe. **9** Noti kaziga hake'na vu'noanagi, Anumzamo'a fraki'nege'na onke'noe. Sauti kaziga hake'na vu'noanagi navumo'a onketfa hu'ne. **10** Hianagi nagrama kama vanoma huana, nageno antahino hu'ne. Ana hu'neankino renaheno'ma kesanige'na, tegefima golima krazageno avusesema hiaza hugahue. **11** Na'ankure maka zupa nagra Anumzamofo kante nagia rente'na vano nehu'na, Agri avu'ava'za amage nente'na, ru kantera vugantigma nosue. **12** Anumzamofo kasegea namefira huomi'na amage ante'noe. Ana nehu'na ne'zama hiaza hu'na naneke'a erintogeno nagu'afi me'ne. **13** Hianagi Agrake Anumzana mani'neankino nazano hunaku'ma haniazana amne hanigeno, mago vahe'mo'a retro'ma hania antahintahi'a eri otregahie. **14** Ana hu'neankino nazano nagrite'ma tro hugahue huno antahintahima hu'nesniazana amne hugahie. Na'ankure nagri'ma hunantesiazana rama'a zantami retro hunte'neankino, Agrake keno antahino hu'ne. **15**

Ana hu'neanki'na menina Agri avurera tusi nahirahi nerege'na,
Agri hankavegu'ma nagesama nentahi'na tusi koro nehue. **16**
Anumzamo'a maka hankaveni'a eri netreno, Hankavenentake
Anumzamo'a Agra nazeri koro nagesa hu'ne. **17** Hanizamo eme
nazeri kagige'na hanizampi havizantfa hu'na mani'noanagi, kea
tagane'na omanigahue.

24 Nahigeno Hanavenentake Anumzamo'a keagama refko
hukna huhampri onte'nesniane? Ana hu'nege'za Agri'ma
amage'manentaza vahe'mo'za ana knama kesagura amnefina
avega ante'za mani'nazageno amne zanknara nehie? **2** Kefo
avu'ava'zama nehaza vahe'mo'za havige hu'za vahe mopa
hanarenakura, kanagi kana eri kasi ogantu'a nente'za, sipisipi
afutamina musufase'za zamagra afu kevufi eri havia nehaze.
3 Megusa mofavreramina rezmatga hu'za donki afuzamia
nevre'za, nofil'ma hu'nazana vahe'mo'za eme neramita erisaze
nehu'za, kento a'nemokizmi bulimakao afura avre'za nevaze.
4 Ana nehu'za zamunte omane vahera kama nevazafintira
amanefi zamaretufe netraze. Ana hazage'za zamunte omne ana
vahe'mokizmi zamagoro hu'za ome fra'nekize. **5** Ka'ma kokampi
afi donki afu'mo hiaza hu'za, zamunte omane vahe'mo'za
makazupa ne'zankura hakevava nehu'za, mofavre'zamimofoma
zamisaza ne'zanku'enena nehakaze. **6** Vahe hozafinti ne'zana
ome nehamre'za, havi avu'aval'ma nehaza vahe'mokizmi waini
hozafinti waini raga neragi'za, mago'ama atre'nazama'a ome
tagi vagare'haze. **7** Hagi zamavufagarera kukena omnege'za
zasiku nehu'za kenagera mase'za vano nehu'za, mago'zana
erigonofize. **8** Agonaregati'ma runo eanko'mo eme zamahe
nefarige'za, noma manisaza zanku huge'za havegampi mani'za
vano nehaze. **9** Kento a'nemokizmi zamasumpinti megusa

mofavre nagara, eme zamavaresga hu'za nevu'za, nofi'ma
hu'nazana ome paneseta ete ome zamavareta eho nehaze.

10 Hagi zamunte omne kukena zamavatera omnenege'za
zamavapako vano nehu'za, vu'za hozafintira vahe ne'zana ome
hamare'za eri nezamizanagi, zamagra'a zamagaku nehaze. **11**
Zamagra olivimofo raga'ane, wainimofo raga'a regatiti hu'za
tima'a e'nerizanagi, magore hu'za tima'a ne'za onkazageno
zmanankemo'a tusiza huno hagage nehie. **12** Frinaku'ma
karagi'ma neraza vahe'mokizmi zamageru'mo ran kumapintira
ome ra hu'ne. Ana nehazage'za zamahe kuzafa'ma ante'naza
vahe'mo'za zamazama hanaza vahoku zavira netaze. Hianagi
Anumzamo'a zavi'ma netazazana antahizamino rukrahera huno
nozamage. **13** Kefo zamavu zamava'ma nehaza vahe'mo'za
masazamofona ha'renente'za, masazamofo kante'ma vu'zankura
zamavesra nehige'za afete nemanize. **14** Nanterama zahufama
masama osu'negeno'a, vahe'ma zamahe fri vahe'mo'za ot'i'za
vu'za zamunte omne vahe'ene keonke zanku'ma atupa'ma
nehaza vahera ome zamahe nefri'za, musufa vahekna hu'za
kenagera vano nehu'za ke'onke'zana musufa nesaze. **15**
Vere a'nanema zamazeri savari'ma nehaza vahe'mo'za avega
ante'nazageno, zagemo'a tami nefarege'za amanage nehaze.
Tavugosarera refite'nesnunke'za vahe'mo'za oragegahaze
nehu'za, tavaravereti zamavugosarera ana'nekize. **16** Kumazafa
vahe'mo'za kenage vano nehu'za, vahe'mokizmi nona anafe
hu'za kumazafa nesaze. Ana nehu'za ferura zamavu nemase'za,
masama hiama'a ke'za antahi'za nosaze. **17** Kenage'ma hanima
kintrakoma hiana e'i zamagridera nantera nese. Ana nehige'za
kenage'ma amanovazi'zama fore'ma huno vahe'ma zamazeri
koro'ma nehia zana ke'za antahi'za hu'nazanki'za korora nosaze.

18 Hianagi timofo agremo'ma ame huno vagareaza hu'za fanane
nehaze. Maka zama zamagrama ante'naza zamo'a kazusifi
mesnige'za, zamagra'a ante'naza waini hozafinagi novaze. 19
Zagemo'ma aisima te ze'zema higeno kekokako'ma hu'nea
mopafima ufreankna hu'za kumi'ma nehaza vahera fri vahe
kuma'mo zamazeri nakrinige'za frigahaze. (Sheol h7585) 20
Ana hina kasema zamante'naza vahera anta'zmimo'za antahi
ozamigahaze. Ana nehanageno zamavufagamo'a haganentake
hanige'za kanintamimo'za nenesage'za, vahe'mo'za mago'enena
antahi ozamigahaze. Kumi'ma nehaza vahe'mo'za zahoko
tuno zafa eri hantagiankna hu'za tami'za masegahaze. 21
Kumi'ma nehaza vahe'mo'za mofavrema kase onte'naza
naravo a'nea rezmatga hu'za keonke'zazmia ener'i'za, kento
a'nenenema zamazama hu'zankura zamavesra nehaze. 22
Hianagi zago vahe'ma mani'za vahe'mo'za ra zamagima e'neri'za
vahera Anumzamo'a Agra'a hankave'areti zamazeri netre. Ana
vahe'mo'za maka zampina knare hu'za vugahazanagi, henka'a
ome haviza hugahaze. 23 Anumzamo'a zamatrengeno mago
zamo'a hazenkea ozamisnige'za, knare hu'za manigahaze.
Hianagi Anumzamo'a maka'zama hazazampina avua anteno
nezamage. 24 Hagi zamagra atupa knafi ra zamagia eri'za mani
so'e hute'za, ruga'a vahe'ma fri'za nevazaza hu'za frigahaze. Ana
hugahazankino witi ragamo'ma afu re'nege'zama kazinteti rukafari
zankna hu'za frigahaze. 25 Nagrama havigema nehanugen'o'a,
iza nagrikura huno havige nehane hunora nazeri kori'sigeno,
nagri nanekemo'a amne zanknara hugahie?

25 Hagi anante Suha mopareti ne' Bildati'a amanage huno
Jopuna kenona hunte'ne, 2 Anumzamo'a hankavenentake
hu'neanki'za maka vahe'mo'za Agrikuke korora hugahaze.

Ana hu'neankino maka zama monafima me'nea zantamina
Agrake kegava hu'nege'za Agri avesi amage ante'za, mani fru
hu'za nemanize. 3 Iza amuhara hu'nesnia vahe'mo monafima
mani'naza sondia vahe'a hamparigara hu'ne? Hagi ama
mopafintira ina vahe'moka hunka nagritera Agri masamo'a remsa
hunonante hunka hugahane? 4 Inankna huno mopafi vahe'mo'a
Anumzamofo avurera fatgoa huno nemanino, agrua huno
manigahie? 5 Ikamo'ene hanafimo'za remsa hutfa hu'nazanagi,
Anumzamofo avurera ana masamo'a rumsa osu'ne. 6 Tagra
mopafi vahe'mota kaninkna huta hagirafagna hu'none.

26 Hagi anante Bildati'ma hia nanekerera Jopu'a amanage huno
kenona hunte'ne, 2 Inankna hunka hankavezamima omne'nea
vahera zamaza nehunka, zamagra'ama zamaza osuga vahera
zamagura vazi'nane. 3 Kagra inankna hunka knare antahi'zama
omne'nea vahe'mofona antahintahia neminka, oku'ma me'nea
knare antahi'zanka'a erinte ama hane? 4 Ama ana knare
antahintahi zanka'a igati eri'nane? Ana hu'hankeno izo avamu'mo
kagri kagipina huvazino ama'na nanekea huamara nehie? 5
Fri'naza vahe'mokizmi hankro'ma hagerimofo agu'afima nemaniza
naga'mo'za Anumzamofonkura tusi koro nehazageno zamahirahi
nere. 6 Fri vahe kumapima nemaniza vahe'mo'za Anumzamofo
avurera frara oki amate mani'naze. Vahe'ma zamazeri havizama
nehia kumapima me'nea zantamima Anumzamo'ma kenaku'ma
hiana, mago zamo'a avurera anteso osu amate me'negeno
nege. (Sheol h7585) 7 Hanki noti kaziga me'nea mona anami
kankamumpi tro huntogenous me'negeno, Anumzamo'a anami
kankamumpi tro huntogenous mago'zamo'a azeoriaza me'ne. 8
Hanintirima huno antarakoma hu'nea hampompi Anumzamo'a ko
tina eri ano vazintegeno me'ne. Hianagi knagura huno ana timo'a

rufuragu vazinora evunoramie. 9 Ana nehuno hamponteti kini tra'a erirefitegeta nonkone. 10 Hagerimofo agofetura Anumzamo'a mago avame'zanteti isagana ante'ne. Ana hu'neankino ana isagamo hanine masanena refko hunezanante. 11 Anumzamo'ma monamofoma azeri konerigeno'a, monama tro huno regarinte'nea tra'mo'a torevare nehie. 12 Anumzamo'a hankave'areti higeno avunemanentea hagerimo'a, ome rurava nehe. Agra knare antahi'zanteti, hagerimofo agu'afima Rehapu'e nehazageno'ma nemania afi'zaga rehapanetie. 13 Anumzamo'ma asimu'ma antegeno'a, anamima me'nea monamo'a rumsa hutfaza nehie. Ana nehuno hagerimpima mani'neno vanoma nehia osifavea Agra azanuti ahe fri'ne. 14 Ama ana maka zama fore'ma hiana, Anumzamo'a hankave'areti tro'ma hu'nea zamofona, amne agema'a fore higeta kone. Hagi Agra menina sumi ke huno kea nehigeta nentahunanki, monagefinti'ma rankema huno'ma keagama hanigeta, inankna huta tagra antahi amara hugahune?

27 Jopu'a mago'ene keaga'a amanage huno hu'ne, 2 tamagerfa huanki kasefa'ma huno mani'nea Hankavenentake Anumzamo'a, kankamuna onamino knare avu'avara hunonanteno, natrege'na tusi natazampi manue. 3 Menima kasefa'ma hu'na mani'ne'nama nasimu'ma netoana, Anumzamo nasimura namige'na mani'noe. 4 Nagra havige nanekea nosu'ha, havigea hu'na vahera revatga osugahue. 5 Hagi tamagrama nehaza nanekegura, tamage nehaze hu'na osugahue. Ana nehu'na kefo avu'ava zana osu'na, mani fatgo hu'na mani'nena frigahue. 6 Nagra fatgo navu'nava'ma nehua zana kegava hu'ne'na, ana avamenteke mani'na vugahue. Nagrama kasefa'ma hu'na mani'na vanuanknafina, kumi hu'noe hu'na antahintahi hakarea osugahue. 7 Nagri'ma ha'ma renenantaza vahera, kefo avu'ava'zama

nehaza vahe'ma Anumzamo'ma zamazeri havizama nehiaza
huno zamazeri haviza nehuno, nagri'ma zamefi hunenamiza
vahera, kumi'ma nehaza vahe'ma zamazeri havizama nehiaza
huno zamazeri haviza hugahie. **8** Hagi Anumzamofoma
amage'ma nontaza vahera, amuha zazamia omanegahie.
Ana hanigeno Anumzamo'a ana vahera zamahe fananehu
vagaregahie. **9** Ana vahe'mofo avate'ma knazamo'ma esanigeno
zavi'ma atesniana, Anumzamo'a antahi omigahifi? **10** E'i
ana Hankavenentake Anumzamofona musena hunonte'za,
Anumzamofontega nunamuna osugahaze. **11** Nagra menima
rempima huramisuana, mago'zana eri frara okighauanki,
Anumzamofo hankave'a erinte ama hu'na tamasamigahue.
12 Ana hankave'a tamagra'a ko ke'naze. Hianagi na'a higeta
amunte omane nanekea hantageta eri hakarea nehaze? **13**
Kefo avu'ava'zama nehu'za, vahe'ma zamazeri havizama
nehaza vahera, Hankavenentake Anumzamo'a miza zamia
huhampri zamante'neanki'za erigahaze. **14** Ana rama'a mofavrea
antegahazanagi, ana mofavre naga'zmia hapi zamahege,
zamagaku hu'za frige hugahaze. **15** Hagi mago'ama ofri'ma
manisaza vahera, ruzahu ruzahu krimo zamahe frisnige'za, kento
a'nane nagazmimo'za ana vahekura zamasunkura hu'za zavira
otegahaze. **16** Kefo zamavu'zamava'ma nehaza vahe'mo'za
rama'a zago eri atru nehu'za, kukenanena rama'a eri tru hanageno
hihi huno marerigahianagi, **17** fatgo zamavu'zmava'ma nehaza
vahe'mo'za ana kukena eri nehankresnage'za, ke'zami omne
vahe'mo'za ana vahe'mokizmi zagoa refko hu'za erigahaze. **18**
Kefo zamavu'zmava'ma nehaza vahe'mo'zama noma kisazana,
pamponkemofo nomo'ma hiaza huno hankave'a omane no
negi'za, mani'ne'za hozama kvama hanazana tono no kizankna

hu'za nona kigahaze. **19** Kumi'ma nehaza vahe'mo'zama nozamifima masazana zago vahekna hu'za nemasaze. Hianagi mase'nafinti'ma oti'zama kazana, maka fenozamimo'a igafi freno omnetfa nehie. **20** Timo'ma hageno eaza huno, hazenke zamo'a eno eme zamavareno fregahie. **21** Zage fre kazigati zaho'mo eme zamazeri komenkame huno zamavaresga huno fresnige'za, ko'ma mani'naza nonkumatera omanigahaze. **22** Ana zahomo'a ana vahekura asunkura huozmanteno zamazeri haviza hanige'za, ana zahomofo hankavegu koro nehu'za zamagare'za fregahaze. **23** Hianagi maka vahe'mo'zama ana zama fore haniaza nege'za, zamaza rupro nehu'za tusi zamagiza regahaze.

28 Vahe'mo'za mopafinti silva kafi'za e'neri'za, golia tevefi kre'za erigru hu'za e'nerize. **2** Ainia mopafinti kafi'za eneri'za, have krefrage'za kopa e'nerize. **3** Mopa agu'ama golima me'nea havegu'ma nehakaza vahe'mo'za ofenkame hanintirima hu'neama'afi tavi tagizageno remasa hu'nege'za, tavi masare ana haveramina hake'za e'nerize. **4** Ana vahe'mo'za mopa agu'afina vahe'ma ovu'are keria kafi'za ufrete'za, ana kerifinanofite urami'za ihmareaza hu'za vute ete nehu'za eri'zana e'nerize. **5** Hagi mopamofo agofetura vahe'mo'za hoza eri'za nentaze. Hianagi mopamofo agu'afina goligu'ma nehakraza, tusi teve hanavazi'za haveramina kre nefragazageno tevemo'a tusi amuho huno mopa temara'mra nehie. **6** Anampinti'ma e'nerizana zago'amo'ma marerisa havema safaema nehaza have e'neri'za, golima me'nea mohanena kafi'za e'nerize. **7** Goligu'ma nehakraza vahe'mo'zama ana kerifima unefraza kana oku'a me'nege'za, namamo'zane tumpamo'zanena zamavua onke'naze. **8** Ana nehazage'za zamavufaga rama nehaza afi zaga kfamo'za anankrifina zamagia rente'za vano nosazage'za,

laioni mo'zanena anankrifina zamagaka renontaze. **9** Goli
eri'zama e'neriza vahe'mo'za kazinkazima hu'nea haveramina ru
frage mafrage hunetre'za, agona kafi'za eri ankrinesaze. **10**
Ana vahe'mo'za haveramimpina kafi'za ufre'za, zago'amo'ma
marerisa haveramina ke'za e'nerize. **11** Anama nehu'za ana
vahe'mo'za mopa kafi'za tima agafama huno'ma ne-eama'a
renkaninere'za marerisa zantamima oku'ama fraki'nea zana
erinte ama' nehaze. **12** Hianagi vahe'mo'za knare antahi'zana
igati ome e'neri'za, ama' antahi'zana igati ome e'nerize? **13** Mago
vahe'mo'e huno knare antahi'zane, ama' antahi'zama eri kumara
keno antahinora osu'ne. Na'ankure ama mopafima nemaniza
vahe amu'nompina knare antahi'zane, ama' antahi'zana onketfa
hugahane. **14** Ra hagerimo'a huno, nagranena omani'ne
nehanigeno, amefenkame mopa agu'afima me'nea tirumo'enena
huno nagranena omani'ne huno hugahie **15** Knare antahi'zane,
ama' antahi'zamofo mizama'amo'a rugatere'neankita, golireti'ene
silvaretira miza osugahune. **16** Ofiri mopafinti'ma eri'naza
golimofo mizama'ane, zago'amo'ma marerisa haverarena,
Oniksine Safaema nehaza havemofo mizama'a agatere'ne.
17 Knare antahi'zamo'a golimofo mizane kritoraisie nehaza
havemofo mizama'a agatere'ne. Ana hu'neankino goliretike'ma
tro'ma hu'nesnia zanteti'enena, knare antahi'zana miza osegahie.
18 Hagi hagerimpima kororiema nehaza zama me'nea zanteti'ene,
zago'amo'ma marerisa havema Jaspema nehaza haveretira
miza osegahane. E'ina hu'neankino knare antahi'zamo'a periema
nehaza zamofo mizanena agatere'ne. **19** Hagi zago'amo'ma
marerisa havema topasiema nehaza havema Itiopia mopareti'ma
eri'naza havemofona, knare antahi'zamo'a agatere'ne. E'ina
hu'neankino knare antahi'zamo'a hentofaza huno agruma hu'nea

golia agatere'ne. 20 E'ina hu'neankita, knare antahi'zamo'a igati ne-e? Hagi ama' antahi'zana inantega me'nesnigeta kegahune?

21 Mika zagamofo avurera knare antahi'zamo'a frakino me'neankino, knare avurgama hunte'negenoma anamifima hareno vanoma nehania namamo'enena onkegahie. 22 Fri vahe kumamo'ene vahe'ma zamazeri havizama hu kumamokea huke, knare antahi'zama hakeno ke kumara me'ne hazageta zaho kea antahino'e. 23 Knare antahi'zama eri kana Anumzamo Agrake keno antahino hu'ne. Ana hu'neankinka igati knare antahi'zana erghane. Anumzamo agrake antahi'ne. 24 Na'ankure maka zama ama mopamofo agofetu'ma me'nea zantamina Anumzamo'a keharu huno negeno, monamofo fenka kazigama me'nea zantamina nege. 25 Anumzamo'a zaho'mofona zaho'ma erisnia hankave'a avamente refko huno nemino, hampompima me'neno ko'ma arania zana tina, avamente refko huno Anumzamo'a ante'ne. 26 Ko'ene kopsi'nanena e'ikante megaha'e huno Anumzamo'a kasege retro hunte'negene ana kante amage nenta'e. 27 Hagi ana'ma huteno'a Anumzamo'a knare antahi'zama rezagane so'e huno keno erinte fatgo nehuno, knare huno me'ne huno nehie. 28 Ana nehuno Anumzamo'a amanage huno vahe'motagura hu'ne, Ra Anumzamofoma koro'ma huntezana, knare antahi'zana megeno, havi avu'ava zamofoma amefi'ma humisnanana, ama' antahi'zana erigahane hu'ne.

29 Jopu'a mago'ene keaga'a amanage huno hu'ne, 2 Ko'ma evia kafuramimpine ikampinema Anumzamo'ma knare huno kegavama hunantege'nama mani'na e'noaza hu'na, manisuegu antahintahia nehue. 3 Anumzamo agra nasenirera tavira remsa hunentege'na, mago zankura nagesa ontahi knare hu'na vu'noe. 4 Hagi ko'ma maka zamo'ma knare'ma higenama mani'noa

knafina, nagrite'ene naga'ni'arera Anumzamo'a taragoteno
knare aronen'i'a mani'nege'na ke'noe. 5 Hankavenentake
Anumzamo'ma nagranema taragotenoma mani'nea knafina,
mofavre naganimo'za nagri tava'onte mani'naze. 6 Ana
nehazage'na bulimakao afu zaga'nifintira ami rina rama'a
nerati'na, olivi hozanifintira rama'a olivi raga tagite'na, masavena
reratina rama'a erugenno viteno tima eviaza hu'ne. 7 Hagi
korapara nagra ugota kva vahe mani'ne'na, rankumamofo
kafante'ma keagama refkohu knazupa, zamagima me'nea
vahe'mo'zama trate'ma unemanizage'na nagranena tra'nire
uman'i'noe. 8 Kasefa vahe'ma nagrama neoge'zama nenage'za,
mani kantugma nehu'za kankamuna nami'naze. Ana nehazage'za
ozafanafa naga'mo'za, antahinenami'za oti'ne'za nenagazage'na
vu'noe. 9 Kva vahe'mo'zama keagama nehazaretira nagrama
neoge'zama nenage'za, kea osu mani'ne'za zamazanteti
zamagitera rehamunki'naze. 10 Ran kumate'ma ugagota hu'za
kegavama hu'naza kva vahera, zamagefunamo'a marerino
zmavagunafare akamrege'za kea osu zamagira hamunki'za
mani'naze. 11 Hagi nagrama keagama nehuge'zama antahi'za
vahe'mo'za hu muse hunenantage'za, keagama nehuge'za
nagaza vahe'mo'zanena knare keaga hunami'naze. 12 Na'ankure
zamunte omane vahe'ene megusa mofavre naga'mo'zama, taza
huo hu'za kema hazage'na, nagra zamaza hu'noe. 13 Amuha
zazamima omanea vahera zamaza nehuge'za, nagrira husga
hunante'naze. Ana nehu'na kento a'nanea zamaza nehuge'za
tusi muse hu'naze. 14 Maka zama hu'noana fatgo kazigatike
hu'noe. Ana nehugenno fatgo navu'nava zamo'a za'za kukanama
antaninogeno'ma hiaza huno rufitenante'ne. Hagi fatgoma huno
refkohu avu'ava'zamo'a, pristi vahe'mo'zama nentani'za kankrikna

huno nasenirera me'ne. **15** Zamavuma asuhu'nea vahera kana zamaveri nehu'na, zamagiama haviza hu'nea vahera zamaza huge'za kana vu'haze. **16** Zamunte omane vahe'mokizmia nafa zamigna nehu'na, ke'na antahi'nama osu'noa vahe'ma keagafima otizage'na, zamaza hu'na keaga eri ante fatgo hu'noe. **17** Anumzamofoma amage onte vahe'mo'zama vahe'ma zamazeri havizama hazage'na, ana vahera zamagemazampa ru tavegri'na, zamagipintira eri vari'noe. **18** Nagrama antahuana, tamagerfa hu'na ama mopafina zazate musenkasea hu'na mani'na vute'na ome ozafa re'na frigahue hu'na nagesa antahi'noe. **19** Hagi zafamofo rafu'namo ofenkame uramino mopa agu'afinti ti anivazu higeno ani'namo tretre hiaza nehigeno atako'mo aninare runteankna hige'na nagra korapara mani'noane. **20** Nagri'ma ko'ma knare nagima nami'naza zamo'a nagripina amne kasefa huno me'ne. Ana nehige'na maka zupa kasefa hankavea erivava hu'na nevue. **21** Nagrama antahintahima vahe'mokizmima nezamuge'za, maka vahe'mo'za akohe'za mani'neza, nagri nanekea antahi'naze. **22** Hagi nagrama keagama huvagama retogeno'a, mago'mo'e huno nagri kerera antemino keaga osu'ne. Na'ankure nagrama hua nanekea antahiso'e hu'nagu anara hu'naze. **23** Vahe'mo'za komaranigu'ma avegama ante'nazageno koma rige'zama musema nehzankna hu'za, nagri nanekema antahi'zankura tusiza huno zamavesi'ne. Ana hige'za za'za knama ko'ma oru'nereti'ma ko'ma rigeno'ma maka zamofo ani'namo'ma muse nehuno ani'na eri mareankna hu'za nagri nanekea muse hu'za eri'haze. **24** Hagi vahe'mo'zama antahintahi hakarema nehu'za mani'nazage'na, kiza renezami'na knare navugosa huzami'noe. E'inama hua kazigati zamarimpa zamazeri hankaveti'noe. **25** Nagra kva vahezmi mani'ne'na, e'ina hihō,

amana hiho hu'na vahera zamazeri ante fatgo nehu'na, mago
kini ne'mo sondia vahe'amofo amu'nompi nemaniaza nehu'na,
zavi'ma ataza vahera zamazeri tagane vahekna hu'noe.

30 Hianagi menina kasefa vahe'mo'za kiza zokago ke
hunenante'za huhaviza hunante'naze. Ana kasefa vahe'mokizmi
zamafahe'za nagri sipisipima kegavama nehaza kraramina
zamagra kegava hugara osu'naze. 2 Hagi nagrama zamagoana
hankave'zamia omane'neanki'za nagrira e'za eme naza hugara
osu'naze. Na'ankure hankavezmimo'a hago zamagripintira
vagare'ne. 3 Ana vahe'mokizmia zamunte omanege'za,
zamagaku nehu'za atre'za vu'za vahe omani ka'ma kokampi
umani'ne'za, kenagera ne'zankura hake'za vano hu'naze.
4 Ana nehu'za trazampintira aka tra'zana hu'za nene'za,
brumu zafamofo rafu'na'anena eri tasagi hu'za ne'naze. 5
Ana vahera kumapintira zamahe kasopenetre'za, kumzufa
vaheku'ma nehzaza hu'za kezatizmante'naze. 6 Ana'ma
hazage'za vu'za, tinkagomupine muri kampine, have kampine
umani'naze. 7 Anantegama umani'ne'za trazampi vano nehu'za,
donki afu'mo'zama nehzaza hu'za ana trazampina eri tru
hu'za mani'ne'za krafage hu'naze. 8 Hagi ana vahera zamagia
omaneno neginagi vahe mani'hazanki'za zamahe kasopazage'za
fre'naze. 9 Hagi ana vahe'mokizmi mofavre naga'mo'za,
nagirevare zagamera nehu'za, huhaviza hunante'naze. Ana
nehu'za nagrikura kiza zokago ke hunante'za, nazeri nagaze
hu'naze. 10 Nagra zamagri zamavurera mago havi zaga
manuge'za zamefi hunenami'za, nagritera erava'o nosu'za,
navufi zamavetu ahenante'naze. 11 Ati karima reragareaza huno
Anumzamo'a knaza namino nazeri ante ravahege'za, nazano
hunante'haku'ma haza zana amne hu'naze. 12 Hazenke zama

nehaza kasefa vahe'mo'za nazantmaga kazigatira oti'za, narotago
hazage'na fre'na vano nehuge'za, kama vanufina krifu eme
anaginte'haze. **13** Nagri'ma nazeri haviza nehu'za keonke'zama
eri kazigati maka zana nehu'za, kama nevufina eme rehiza
nehu'za, zamagrama antahi'zana agri'ma azahu vahera omani'ne
hu'za nehaze. **14** Nagri'ma ha'ma hunantenaku'ma e'nazana
vahe'mo'za, maka kazigati ankariserami'za e'za eme nazeri
haviza hu'naze. **15** Ana hige'na menina tusi koro nehugeno,
zaho'mo hampo erino viaza huno knare nagima e'neruazane
fenozaninena erino vu'ne. **16** Hagi nagra menina hago fri'za
nehugeno, natazamo'a maka zupa nazeri haviza nehie. **17**
Kenagera zaferinanimo'a tusi nata negrigeno, ana natazamo'a
naterenora novie. **18** Anumzamo'a hankavenentake azantetira
kukenagna huno rufitenante'ne. Ana hu'neno azantetira za'za
kukenama antaninoa kenamofo nananke kama'are azerino
nanankena nazeri pro hu'za nehie. **19** Ana huteno hapapi
matevuno natrege'na, kugusopagna nehu'na tanefakna hu'noe.
20 Ana hige'na naza hananegu Anumzamoka kagritega krafagea
hu'noanagi, keni'arera nona osu'nane. Ana nehunka kagri
kavure oti'noanagi, nagrira kamefi hunami'nane. **21** Kagra
karimpa ahenenantenka, hankavenentake kazanteti nazeri
haviza nehane. **22** Kagra kagigagi zaho atrankeno eno eme
nazeri sga huno nefregenka, kagra ununko atrankeno eno eme
nazeri haviza hu'ne. **23** Ana'ma nehanke'na nagrama antahuana,
kagra nahe fritenka hunantesnanke'na maka vahe'mo'zama
fri'za nevaza kumatega vugahue hu'na nagesa antahi'noe. **24**
Hagi mago vahe'mo'ma knafima mani'neno'ma azahu zanku'ma
krafama nehanigeno'a, tamagerfa huno mago'mo azana anteno
aza hugahie. **25** Nagrama ko'ma knare hu'na mani'ne'na,

knazampima mani'za vahekura zavira atenezmante'na, zamunte
omane vahekura nagu'afina tusiza hu'na keke huzmante'noe.

26 Hianagi nagriteria knare'za fore hanie hu'nama amuha'ma
hu'noa zana forera osigeno, kefo zamo nagriteria ne-egeno,
tavi masagu'ma avegama ante'noana omegeno hanizamo e'ne.

27 Nagu'amo'a hazenkefi manino ne-eno mani frua osu'ne.

Ana higeno maka zupa natazamo nazeri havizantfa hu'ne. **28**
Nagrira knazamo rentrako higena hanizampi vano nehu'na,
tavira onke'noe. Ana nehu'na kuma amu'nompima vahe'ma vano
nehazafi mani'ne'na, iza naza hugahieha nehu'na zavira ate'noe.

29 Ana nehu'na zavi'matoa nagerumo'a, afi kramo'ene za'za
agempunane namagu'ma ostritiema nehaza namamo'enema
krafama neha'aza hu'ne. **30** Navufgamo'a ru ko'nagifa nehegeno,
zaferinanifintira tusi amuho nehuno teve rukaru hu'ne. **31** Nagra
hapue nehaza zavena nehe'na, nasunku zagamera nehu'na,
konkena nere'na zavi zagamera hu'noe.

31 Hanki nagrama navuma kezani'afima mago huvempa kema
hu'noana, mago mofa'ma negesuna havi antahintahia e'orisnue
hu'na huvempa hu'noe. **2** E'inahu havi avu'ava'zama hanugeno'a,
manisgama hu'nea Hankavenentake Anumzamo'a ana havi
avu'ava zanirera havi mizana namigahie. **3** Havizama hu'za
refkoma hu so'ema nosaza vahera Anumzamo'a knaza nezamino,
kumi'ma haza vahetera hazenkeza atregeno ne-e. **4** Ana nehuno
maka zama hua zampina Anumzamo'a avua anteno nenageno,
nagama rerakaure'na vuana nenage. **5** Nagra mago vahera
havigea hu'na revataga nosu'na, havige zantera nagia re'na
ovu'noe. **6** Atrenkeno Anumzamo'a navu'navazania erinteno,
fatgoma huno refko'ma nehia sigerire negeno refko huno nageno.
Na'ankure nagrama fatgo navu'nava zama nehuana Agrake

keno antahino hu'ne. 7 Hagi Anumzamofo kama atre'na hazama negre'na, navumo kea zante'ma havi antahintahima hu'na kumi'ma hu'nesnua kumiro, mago'a kumi'enema hu'nesnuana, 8 atrenkeno nagrama hankre'nesnua ne'zana, ru vahe'mo'za vasage'za neho. Hagi nagrama hankre'nesnua avimzana eri tasagi hutreho. 9 Hagi mago a'ma nege'na havi antahintahima eri'nesnuano, tvaonire'ma nemanisnia ne'mofo a'ma nege'na kenunuma hu'nesanuana, 10 atrenkeno nagri a'mo'a ru vemofo a' nemanina, ru venenemo'za a'ni'a ante'za maseho. 11 Hagi nagra mago vemofo a'enema hazenkema hu'nesanuana, nagra'a tusi nagaze eri nami'noanki'na, ana kumi'ma hu'nesua zantera mizama'a nagra'a erigahue. 12 E'i ana kumi'mo'a, mago tevegna hu'neankino, tevava huno nevuno, teve kumapi vugahie. Ana hu'neankino ana maka'zama ante'noa zana, tevemo te fanene hugahie. 13 Hagi ko'ma nagri eri'za venenemozane a'nemo'zanema, knazamima eri'za neazage'nama, knazazamima e'orinesnuana, 14 inankna hu'na Anumzamofo avurera nagra keagafina otigahue? Inankna hunka eri'za vaheka'a kegava hu'nane huno Anumzamo'ma nagenokama hanige'na, na'ane hu'na kenona huntegahue? 15 Na'ankure Anumzamo'a Agrake nagri'ene eri'za vahe'ni'anena, antatimofo arimpafina tro hurante'ne. 16 Hagi zamunte omane vahe'mo'zama mago'a zanku'ma kema nehazage'na, i'ora osu'na amne nezami'na, kento a'nanemo'zama zamazama hanuegu'ma nagrite'ma zamavuma nentazage'na amne zamaza nehu'na, 17 nagragukera ontahi'noanki megusa mofavreramina, ne'zana refko hu'na zami'noe. 18 Nagra osi'ma mani'noregati'ma eno meninte'ma e'neana, megusa mofavre nagara nafa zamigna hu'na kegava hunezmante'na, kento a'nane nagara zamaza hu'na e'noe. 19

Hagi nonkumazmima omne vahe'ma kukenagu'ma atupa'ma
nehazage'na, kokena nezami'na, mago'a zanku'ma atupa'ma
nehaza vahera kukenane nakreku'enena zami'noe. **20** Ana
nehu'na zamazeri amuhoma hanigu sipisipi azokateti'ma
trohu'naza nakre kura zamuge'za antani'za amuhogu'ma
nehu'za musema nehu'za, nagrira husga hunante'naze. **21**
Hagi keaga refkohu ne'mo'a, nagri kaziga antegahie nehu'na,
nagra keagafina oti'na megusa mofavre naga'ma keagama
huzmantesnuana, **22** nazamo'a nazo'nafinti rutasagi huramigahie.
23 Na'ankure nagrama koro'ma nehuana, Anumzamo'a knazana
atreni'geno eme nazeri haviza hugahie hu'na nentahue. Hagi
Anumzamo'ma hankaveareti'ma nazeri havizama nehaniana,
nagrira amuhazani'a omane'ne. **24** Hagi nagra zagofina amuha
zani'a nonte'na, golimo'a naza hugahie hu'na namentintia
nosue. **25** Nagra'a nazapinti'ma erifore hu'na ante'noa zago
fenokura navufga erisga nosu'na, **26** monare'ma me'neno nerea
zagere'ene ikamo'ma knare zantfama huno remsama nehige'na
monora huonte'na, **27** e'i ana zantera mago narimpa hu'na
monora hunonte'na, nzantetira zanahe'na antakora osu'noe.
28 Hanki nagrama anama hu'nesanuana kumi hu'noankino,
kema refko'ma hunantesnia nemo'a knaza namigahie. Na'ankure
onagamu monafinkama nemania Anumzamofontera havige
hu'na eri fraki'nogu anara hugahie. **29** Hagi ha' vahe'nimo'zama
knazampima mani'nazage'na nezamage'na, nagra musena
nehu'na zamagizana ore'noe. **30** Ana nehu'na magore hu'na
zamazeri haviza hu nanekea hu'na kumira nosu'na, havizama
hunante'nazarera nona osu'noe. **31** Hagi nagri nompima
nemaniza eri'za vahe'nimo'za hu'za, maka eri'za vahe'a ne'zana
nezamino magore huno zamatrege'za amnea novaza ne'

mani'ne hu'za nagrikura nehaze. **32** Nagra ozamageno'a
vahe'ma nonire'ma azage'na magore hu'na zamatroge'za megira
omase'nazanki, kahana anagi hagaro nehu'na, zamavare nompi
antoge'za maka zupa mase'naze. **33** Mago'a vahe'mo'zama
nehazaza hu'na kumi'ni'a nagu'afina eri frakinaku hu'noanagi,
anara osu'noe. **34** Hagi rama'a vahe'mo'zama nenage'za,
kiza zokago kema hunenantesage'za, naga'nimo'zama eme
nasami'zankura korera hu'na nompina omani'noe. **35** Hagi nagra
nagesama antahuana, nagrama nehuankema mago vahe'mo'ma
agesama anteno antahiresina knare hisine. Nagra nazanko
avona ama antoanki atre'nenkeno Hankavenentake Anumzamo
negeno kenona hunanteno. Hagi mago vahe'mo'ma nagri'ma
keagama hunantenaku'ma hanuno'a avompi krenteno. **36** Anama
hanige'na muse nehu'na ana avona nazo'nare erigofi'na vano
nehu'na, kini fetori'ma hiaza hu'na nasenire antanigahue. **37** Ana
nehu'na kini vahe'mofo mofavremo'ma hiaza hu'na, Anumzamofo
avuga uoti'na nagra'ama maka navu'nava zama hu'nesanuana
ome eri ama hu'na asamigahue. **38** Hagi mopa'nimo'ma haviza
hu'nane huno'ma keagama hunantenigeno, hoza tinkamo'a tusi
zavi'netenigeno, **39** mago vahe'mofo hozafinti ne'za musufa
sege, ana hozamofo nefo ahe frige'ma hu'nesanuana, **40**
anama eri nafa'ama hu'nesanua mopafina witimo'a ohesianki
ave've trazamoke hageno marenerisanigeno, amne tra'zamo
balimofo nona erino hageno marerigahie. Ama ana nanekema
huvagareteno'a, Jopua kea osu'ne.

32 Jopuna 3'a rone'amo'za agri kere'ma ru'enema kenona
hunte'zankura zamavaresra hu'naze. Na'ankure Jopu'ma
agra'agu'ma huama huno, hazenkeni'a omane'neanki fatgo
hu'na mani'noe huno'ma hu'nea zanku anara hu'naze. **2** Hianagi

mago nehzave nera, Barakeli nemofokino agi'a Elihu'e. Ana hu'neankino agra Rami nagapinti nekino, Jopuna tusi arimpa ahente'ne. Na'ankure agrama agesama antahiana Anumzamo'a agri kumiku huno knazana nemianagi, nagafare Jopu'a huamara huno tamage hago kumi hu'nogeno Anumzamo'a knazana nemamie hunora nosie nehuno, Jopuna arimpa ahente'ne.

3 Ana nehuno Jopuna 3'a rone'a raminku'ene tusi arimpa ahezamante'ne. Na'ankure Jopu nanekere'ma kenona hunte so'ema nosu'za, Jopu'a hazenke hu'negeno Anumzamo'a knazana nemie hu'zama, hazenke'amofo agafama ke'za eri fore'ma osaza zanku anara hu'ne. 4 Elihu'a agra nehzave mani'negu huno kea osu mani'nege'za, Jopuna 3'a rone'amo'za zamagra ranra vaheki'za, Jopu'enena keaga vugote'za hu'naze. 5 Hianagi ana ranra naga'mo'zama Jopu nanekere'ma mago'enema kenona huontaza zankura, tusi arimpa ahe'ne. 6 Ana higeno Buzi kumateti ne' Barakeli nemofo Elihu'a amanage hu'ne, Nagra kasefa vahe manugeta tamagra ranra vahe mani'nazagu nagazegu nehu'na koro hu'na ke'nima huama huzankura ete azeri'noe. 7 Nagrama antahuana rama'a kafuma hu'naza vahe'mota knare antahi'zana huama hugahaze hu'noane. Na'ankure knare antahi'zamo'a e'inahu vahepinti ne-e. 8 Hianagi Anumzamo'a avamu'a huhu huvazigeno vahepina avamu'a mani'neankino, ana avamumo hige'za ama' antahi'zane vahera mani'naze. 9 Mago'a zupa ranra vahe'mo'za knare antahi'zana e'norizage'za, mago'a zupa kafuzmimo'ma rama'a hu'nea vahe'mo'za fatgo huno'ma refakohu avu'ava'zana antahi amara osu'naze. 10 E'ina hu'negu nagranena antahintahini'a Jopuga menina kasami'za huanki antahio. 11 Tamagrama keagama nehuta knare'nare antahintahima erinteta kema hugantugama

hazankea, akohe'na mani'ne'na antahi'noe. **12** Nagra nagesama ante so'ema hune'na keagatamima antahufina, magomo'e huno Jopunkura havige hie hunora huama huonte'ne. Ana nehutma Jopu'ma hia nanekerera kenona huonte'naze. **13** Hagi tamagra amanage huta oshiho, Jopuna agri knare antahi'zamo'a tagri antahi'zana agatereankino, agri kerera vahe'mo'a kenona huontesnianki, Anumzamoke kenona huntiesie. **14** Jopu'a nagranena keaga osu'neanki tamagranenke keaga hu'ne. Hagi nagranema keagama hiresina, tamagrama kenonama huntazankna hu'na kenona huontosine. **15** Hagi tamagrira keagatamia omanegetma antahintahi hakare nehuta, Jopu'ma hia nanekerera kenona huonte'naze. **16** Hianagi tamagrama kenona osu, akoheta zazate'ma manizaza hu'na nagranena aкоhe'na manigahufi? l'o. **17** Nagranena antahintahini'a huama hu'na Jopuga kasamigahue. **18** Na'ankure rama'a naneke nagu'afina avite'neanki'na nagu'amo'ma huama huo huno'ma nazeri otisanige'na huama hugahue. **19** Hagi nagri nagu'afina mememofo avufgareti'ma tro'ma hu'naza tintafepima kasefa waini tima ante'nazageno'ma me'neno ruhavahavu huno rupro hunaku'ma hiaza nagu'amo'a hu'ne. **20** Hanki nagra menima kasaminaku'ma hanua nanekema kasamisnugeno'a narimpamo'a fru hugahie. Hagi menina nagu'afima avi'mate'nea nanekea hugaho hugahue. **21** Nagra mago vahe'mofo kazigagera antene'na agrikera azana nosu'na, mago vahera havigea hu'na husga huontegahue. **22** Hagi nagrama havigema nagiteti'ma hu'na vahe'ma husga hunte'zante'ma knare'ma hu'noresi'na, nagri'ma tro'ma hunante'nea Anumzamо'a nagrira nazeri fanane hiresine.

33 Hianagi menina Jopuga kagesa antenka mani'nenka
nagrama maka nanekema hanuana antahio. **2** Nagra menina
ete nagira reaka hu'na nanekea agafa hu'za hue. **3** Nagrama
hanua nanekea fatgo nagu'areti hugahuanki'na, tamage naneke
hugahue. **4** Anumzamofo Avamu'mo nagrira tro hunantegeno,
Hankavenentake Anumzamo nasimura namige'na kasefara
hu'na mani'noe. **5** Kagra Jopugama knare'ma hu'nesunka,
nagrama keagama nehanugenka, kagra kazigatira antahintahia
hutenka, nagri kerera kenona hunanto. **6** Kama antahio, kagrane
nagranena Anumzamofo suza mani'no'ankino, nagri'enena higo
mopa erino tro hunante'ne. **7** E'ina hu'negu nagrikura korora
osuo. Na'ankure nagrama hanua nanekemo'a tusi knazana
kamino kazeri korora osugahie. **8** Nagra nentahugenka maka
nanekema hu'nampina hankavetinka kehara re'nane. **9** Kagra
Jopuga hunka, nagra agru hugeno kumi'ni'ane hazenke'ni'anena
omnegena ke'ni'a omne vahe mani'noe hunka hu'nane. **10**
Hianagi Anumzamo'a ha' vahe'arema nehiaza hunenanteno, kefo
zamavu'ava'zama nehaza vahe'ma zamazeri havizama nehiaza
huno nazeri haviza nehie hunka hu'nane. **11** Hagi vahe'ma
kinama hunezmantaza zafafi nagia erinteno Anumzamo'a kina
hunante'neno, kama vanoma hufina avua anteno nenage
hu'nane. **12** Hianagi Jopuga havige hu'nananki'na kaveri
hugahue. Na'ankure maka ama mopafi vahera Anumzamo'a
zamagatere'ne. **13** Ana hu'neanki kagra nagafare Anumzanena
kehara renka, na'a higeno vahe'ma zamaza hinogu'ma kema
nehazageno'a, kenona'a Anumzamo'a hunozmante hunka
nehane. **14** Hianagi Anumzamo'a ruzahu ruzahu kampinti vahera
keaga huneramianagi, Agri kea tagra keta antahita nosune. **15**
Kenage'ma nompi masenonkeno, ava'nafine ava'nagna zampine

Anumzamo'a nanekea eme nerasamie. **16** Hagi mago'a kenagera zimagesafi sumi huno koro kema zmasamiazamo, zamazeri korora nehie. **17** Anumzamo'ma e'inahu'ma nehiana, kefo avu'ava'zane avufgama erisgahu zane atreta tamagu'a rukrahe hiho huno anara nehie. **18** Hagi zamagra friza fri vahe kumatega ovanaze huno Anumzamo'a kegava hunezmante. **19** Hagi mago'a zupa zamagrama hu'naza kumite Anumzamo'a knazana zamige'za kri tafetera mase'nazageno, zaferina zamifintira zamata kri vava nehie. **20** Ana hu'neankino ne'zana one agesa higeno, knare'nare ne'zama kre'za e'naza ne'zanena none. **21** Hanki ana vahe'mofo zamavufagamo'a zaferinare akamaregeno, zaferina zamimo'a amate fore nehie. **22** Ana vahe'mokizmi fri'zamo'a tavaonte megeno, vahe'ma ahefri ankeromo'a zamavega anteno mani'ne. **23** Hianagi 1tauseni'a ankero vahepinti mago ankeromo agri'ma azama hanigu amu'nonte otino mani'neno agri avu'avazama huama huno, agra fatgo hu'ne huno'ma hiresina knare hisine. **24** Hanki ana ankeromo'ma ana vaheku'ma asunku'ma hunenteno'a amanage hiresine. Fri vahe kumapintira agu vazio. Na'ankure ana vahe'ma mizama seno ete zamavare kana ko ke'na erifore hu'noe. **25** Hagi ana ne'mofo avufgamo'a knare zantfa huno osi mofavre'mofo avufgamo'ma hiaza nehanigeno, ko'ma kasefa vahe'ma mani'negeno'ma avufgamo'ma knare'ma huno me'neaza hugahie. **26** Ana nehanigeno ana ne'mo'ma Anumzamofonte'ma nunamu hanigeno'a, Anumzamo'a muse huno nevre'nigeno agra Anumzamofo avufi negeno musena hugahie. **27** Ana'ma hanigeno'a ana nemo'a rone'amokizmia huama'ma huno zamasamisniana, nagra tamage kemofona eri rukrahe hu'na havige nehu'na kumi hu'noe. Hianagi Anumzamo'a nahe frigaragi kumini'a atrenanteno nahe ofri'ne. **28** Ana nehuno fri vahe

kumapinti Anumzamo'a ete nagu'vazino navre'ne. Ana hu'negu
hu'na menina ofri kasefa hu'na mani'nena masa negoe. **29**
Tamagerfa huno maka zupa e'inahu avu'ava'zana Anumzamo'a
vahe'mokizmia huzmanteneno, anahu avu'avara huno nevie.
30 Fri vahe kumapinti ete zamagu vazino zamavare'negu
hu'za, ofri kasefa hu'za mani'ne'za asimu erino mani'zamofo
masarera mani'za nevaze. **31** E'ina hu'negu mago'ene keaga
kasamigahuanki Jopuga akohenka mani'enka kagesa antenka
antahi so'e huo. **32** Hianagi kagrama mago'a nanekema
hunaku'ma hanunka, amne hananke'na antahigahue. Na'ankure
nagri'i ma nave'nesiana, vahe'mo'za kagri'i ma ke'za antahi'zama
hanazana ke'a omne'nea ne' mani'ne hu'za hanazegu nave'nesie.
33 Hianagi kagripima mago'a nanekema omane'nesiana, kagra
akohenka mani'enka, nagrama knare antahi'zama rempi
hugamisuana antahio.

34 Hagi Elihu'a mago'ene amanage hu'ne, **2** Knare antahi'zama
eri'nana ne'moka nagrama hanua nanekere kagesa antenka
nentahinka, ama' antahi'zama eri'nana ne'moka nagrama hanua
nankea akohenka mani'enka antahio. **3** Hagi ne'zama
tagite erinteta haga'ama neta konaza huno, maka nanekema
tagesamo'ma antahia nankea, tagesamo'a rezagane so'e huno
nentahie. **4** E'ina hu'negu inagemo fatgo huno knare hu'nefi
tagra'a rezaganeta negeta, rempi huta antahisune. **5** Hagi
Jopu'ma kema hifina anage hu'ne, nagrira ke'ni'a omane'neanagi,
Anumzamo'a kema hu kankamuni'a eri atrege'na mago zana
osu'noe huno hu'ne. **6** Nagrira mago hazenke'ni'a omanegeno
keni'a omane'ne. Hianagi vahe'mo'za nagrikura havige ne'
mani'ne hu'za nehaze. Nagrira kumini'a omane'neanagi natama
namino nevia natazamo'a vagaoresnia avamente nevie. **7**

Hagi magora Jopukna nera iza mani'ne. Agra kizazokago
ke huno vahe'ma zamaveri hu kege nehia ne' mani'ne. **8**
Ana nehuno Jopu'a kumi'ma nehaza vahe'ene eri mago huno
nemanino, kefo avu'ava'ma nehaza vahe'ene kna ahefrino
nemanie. **9** Na'ankure Jopu'a huno, Anumzamofoma musema
huntesnampintira mago zana e'origahane huno hu'ne. **10** E'ina
hu'negu ama' antahi'zama eri'naza vahe'mota nagri naneke
antahiho. Maka vahe'mo'zama antahi'nazana Anumzamo'a havi
avu'avara nosia ne' mani'ne hu'za antahi'naze. Ana hu'neankino
Hankavenentake Anumzamo'a mago hazenkea osugahie. **11**
Vahe'mo'zama hu'naza avu'avate anteno rezaganeno negeno,
mizana zamitere nehia Anumza mani'ne. **12** Tamagerfa huno
Hankavenentake Anumzamo'a mago hazenke zana osugahie.
Ana hu'neankino Hanavenentake Anumzamo'a fatgo huno
refkoa hugahie. **13** Iza ama mopa tro huteno, kegava huo
huno Anumzamofonkura hunte'ne? **14** Hagi Anumzamo'ma
Agra'a avamu'ene, asimu'anema ete eriresina, **15** maka
asimu'ma enerino kasefa'ma huno nemania zagamo'a fri
vaganeregeno, maka vahe'mo'za fri'za ete mopasazaresine.
16 E'ina hu'negu Jopuga ama' antahi'zane vahe mani'noema
hunka hanunka, nagrama nehua nanekere kagesa ante'nenka
antahio. **17** Kagrama antahinana fatgo avu'ava zanku'ma
avesrama hiresina, Anumzamo'a ama mopa kegava hunora
viresimpi? E'ina hu'negu Hankave nentake huno fatgoma
hu'nea Anumzamo'ma refko'ma hania zantera, mago hazenke
hu'ne hunka huamara huntegahampi? **18** Anumzamo'a kini
vahekura huno, mago zana huga vahera omani'naze nehuno,
zamagima me'nea vahekura huno havi avu'avaza nehaza vahe
mani'naze huno nehie. **19** Anumzamo maka vahera Agra'a tro

huzmante'neankino, agi me'nea vahe'ene zago vahekukera
nehuno, zamagi omne vahe'ene zamunte omne vahera zamage
amne zanknara nosianki, Agri avurera mago avamenteke
mani'naze. **20** Vahe'mo'za osi'a knafi ame hu'za nefrize. Kenage
amu'nompi friza nevazageno, hankave vahera Anumzamo'a
zamahe nefrie. **21** Na'ankure maka vahe'mo'zama haza zana
Anumzamo'a negeno, maka avu'ava zama hazana nege. **22**
Hanimia nehia zamo'a Anumzamofo avua resoa osanigeno,
maka kumira amate kegahie. **23** E'ina hu'negu tagra kna
huhampri'neta ana knarera esanunkeno, Anumzamo'a refkoa
huorantegahie. **24** Anumzamo'a mago hankave vahe'ma azeri
havizama hunakura, vahera antahigeteno anara nosie. Ana'ma
nehuno'a ana vahe nontera ruvahe azeri o'netie. **25** Ana
vahe'mo'za nehaza zamavu zmavara keno antahino hu'ne.
Ana hu'neankino kenageke'za ana vahera zamahe fanane
nehie. **26** Hagi havi vahe'mo'zama zamavu'zmava zama hu'naza
zamofo nona'a, amate zamazeri haviza nehige'za vahe'mo'za
nezamagaze. **27** Anama nehiana na'ankure Anumzamo'ma
hihoma huno hiazana nosu'za, Agri kasegema amage'ma nontaza
zanku anara nehie. **28** Ana zamunte omne vahera zamazeri
havizama hazage'zama Anumzamofontega zavi'ma nete'zama,
zavi krafama nehazageno'a Anumzamo'a antahi'ne. **29** Hianagi
ana zante'ma Anumzamo'ma nona huno havi avu'ava'ma nehaza
vahe'ma zamazeri havizama nosanigeno'a, izu huno Anumzamo'a
havi avu'ava nehie? hunora hugahie. Hagi avugosama eri fra'ma
nekisanigeno'a, mago vahe'mo'a keno eri forera osugahie.
Hianagi Agrake mago'mago vahete'ene ama mopafima me'nea
kumatamina kegava hu'ne. **30** Hagi Anumzamoke kefo
avu'ava'ma nehaza vahe'mo'zama kva vahe'ma mani'n'e'za

vahe'ma zamavare'za havi kampima atresnage'za, kumi'ma hu'zanku huno anara nehie. **31** Hagi izaga antahi'nankeno Jopu'a Anumzamofonkura huno, nagrama hu'noa kumi'mofo nona hunka nazeri haviza nehananki, mago'enena kumira osugahue hunora hu'ne? **32** Nagrama hu'nesnua kumira eri ama hunka nasamio. Hagi nagrama havi navu'navama hu'nesnuana henka'anena anzana osugahue. **33** Anumzamo'ma Jopugama hugantea zankura kave'nosie. Ana hu'negu kagri'ma kave'nesiaza Anumzamo'a hunantesie hunka kagesa ontahio. Hianagi nagri zana omane'neanki, kagripi antahintahia me'ne. Ana hu'negu menina knare antahi'zanka'a huama hugeta antahi'maneno. **34** Hagi ama' antahi'zama eri'naza vahe'mo'zane, knare antahi'zama eri'naza vahe'mo'zama nagrama hua nanekema nentahi'za amanage hu'za nagrikura hazaresine. **35** Jopu'a agafa'a omane'nea naneke nehantageno, antahintahia osu neginagi naneke nehie hu'za hazaresine. **36** Jopugama kefo nanekema hu'nana zantera, Anumzamo'a tusi'a knaza kamigahie. **37** Jopu'a kumi'ma hu'nea agofetu'ma, mago'ene kumi'ma hu'neana, azante rupro huno Anumzamofona kiza zokago ke hunenteno, tagri'enena keha'nereno, Anumzamofonkura huno fatgo hunora refkoa hunonante huno keharente'ne.

35 Anante Elihu'a mago'ene amanage huno hu'ne, **2** Jopuga Anumzamofo avurera fatgo hu'noema hunkama nehanana, kagrama antahinana tamage naneke nehue hunka nehampi? **3** Hagi kagra Jopuga Anumzamofonku hunka, nagrama kumi'ma osu mani'ne'nama fatgo navu'navama hanuana, anampintira na'a knare'zana erigahue? hunka nehane. **4** Hanki menina Jopuga kenona hunegante'na ana maka 3'a roneka'a raminena, kenona huzamantegahue. **5** Jopuga menina kesga hunka onagamu

monare'ma me'nea hamporamina ko. 6 Hanki kagrama kumi'ma
hanana zamo'a inankna huno Anumzamofona azeri havizana
hugahie? Kagra kumira mago'ene huvava hunka vugahananagi,
e'i ana zamo'enena azeri havizana osugahie. 7 Kagrama mani
fatgoma hunka manina zamo'a, magore huno Anumzamofona aza
nehifi? Na'a mago knare'za Anumzamo'a kagripintira erigahie?
8 Hanki kagrama hana hazenke zamo'a, vaheke'za zamazeri
havizana nehuno, knare kavukva'zama hana zamo'a vaheke'za
zamazeri so'ea nehie. 9 Hankave'zami me'nea vahe'mo'zama
vahe'ma zamazeri havizama nehazage'za, mago'a vahe'mo'zama
eme zamazama hanagura zavi krafage nehaze. 10 Hianagi
mago'mo'a amanage hunora nosie, nagri'ma nazeri fore'ma
hu'neno, hani zampima mani'nogeno'ma muse zagame'ma
namige'nama nehua Anumzana iga manie? 11 Anage nehuno
afi zaga kafane, nama ramimofo antahi'zama rugatereno knare
antahi'zama tami'nea Anumzana iga mani'ne hu'za nosaze?
12 Ana'ma nehige'za Anumzamo taza hanie nehu'za zavi
krafagea nehaze. Hianagi Anumzamo'a ke'zamia antahino nona
hunozmante. Na'ankure zamagra zamavufaga erisga nehu'za,
kumi nehaza vahe mani'naze. 13 Hianagi zamunte omane
vahe'mo'zama zavi krafagema nehaza zankura Hankavenentake
Anumzamo'a antahi nozamie hu'zama nehazana havige nehaze.
14 Hanki kagra Jopuga ko'ma hunka, Anumzamofona onkegahue
nehunka, Agrake'za eno nagrama hu'nesua kefo zantera
mizana eme namigahie hunka avega antenka mani'nananagi,
Anumzamo'a ana keka'a antahiogami'ne. 15 Hagi kumi'ma
nehaza vahera Anumzamo'a arimpa ahezamanteno zamazeri
haviza nosie hunka nehunka, kefo zamavu zamava'ma nehaza
zankura agesa nontahie hunka hu'nane. 16 Hianagi Jopugama

hana nanekea amunte omane naneke nehunka, kagesa ontahi
negi vahe'mo'zama nehzankna naneke hunka eri hakare
nehane.

36 Hagi Elihu'a mago'ene amanage huno hu'ne. 2 Jopuga
akohenka mani'nenga antahi'nege'na antahintahia kami'neno.
Na'ankure nagra mago'ene keaga hu'na Anumzamofo nanekea
eri hankaveti'za nehue. 3 Nagrama rempi hu'na antahi'zama
antahi'noa antahi'zanteti menima kasamisuana, nagri'ma tro'ma
hu'nea Anumzamo'a fatgo avu'ava'za nehia ne' mani'ne hu'na
kasamigahue. 4 Nagrama negasamuana havigea nogasamuanki,
tamage naneke negasamue. Na'ankure nagra hentofa antahi'zane
neki'na, menina kagrane mani'noe. 5 Anumzana hankavenentake
Anumza mani'ne. Hianagi mago vahera kefenkamia note. Agra
hihamufine, ama' antahi'zampina hankavenentake hu'ne. 6
Havi avu'ava'zama nehaza vahera Anumzamo'a zamatrege'za
kasefara hu'za nomanize. Hianagi knafima mani'naza vahera
fatgo huno refko hunezmante. 7 Ke'zamima omne vhetera avua
anteteno nemanie. Hianagi zamatrege'za kini vahe'ene kini trate
nemanizageno, maka zupa zamazeri antesga huvava nehie. 8
Hianagi vahe'ma kina huzmantesage'za mani'nenageno tusi'a
knazamo'ma zamazeri anakinige'zama mani'nesaza vahera, 9
na'a agafare anara hu'nefi Anumzamo'a eri zamaveri nehie.
Ana nehuno zamavufaga erisga nehu'za kumi'ma hu'haza
kumira eri zamaveri nehie. 10 Antahi'zazmia eri hagaro
hige'za kefo avu'ava'ma hu'naza zana keama nehzageno,
hanavenentake naneke hige'za kumi zamavu'zmava zana
atre'za rukrahera nehaze. 11 Hanki zamagrama Anumzamofo
nanekema nentahi'za, amage'ma antesnageno'a, nama'a
kafuma kasefa'ma hu'za manisaza kna'afina Anumzamo'a

asomu huzmantesigeno no mani'zazmimo'a knare hanige'za,
muse hu'za manigahaze. **12** Hianagi zamagrama Agri kema
ontahisnazana, ha' vahe'mo'za e'za bainati kazinteti eme zamahe
frisnage'za, e'i anazana na'a agafare fore nehie keamara
osu'za neginagi vahe frigahaze. **13** Anumzamofoma zamefi'ma
hunemiza vahe'mo'za, Anumzamo'ma zamuvro'ma antea zankura
zamarimpa ahenentaze. Ana nehu'za Anumzamo'ma zamazama
hanigura zavi krafa hu'za antahi'nogaze. **14** Ana monko
avu'avaza hume nevu'za, ozafa orene'za kasefa vahe nefrize. **15**
Hianagi Anumzamo'ma zamatrege'za knazampima unefrazana,
na'ankure ana knazamo'ma hanige'za zmatafima mani'ne'za
Agrite rukrahe hu'za esnageno zamagu vazino zamavaresnigu
anara nehie. **16** Jopuga amama mani'nana knazampintira
Anumzamo'a kavre atretno, knaza omane kumate kavrenteno
knare'nare ne'za tratera retro hugante'ne. **17** Hianagi kagra kefo
avu'ava'za nehana ne' mani'nanankino Anumzamo'a refko huno
negeno, fatgo huno kazeri havizana nehie. **18** Hianagi mago
vahe'mo'ma feno zanteti'ma regvatagama hu'zankura kva huo.
Ana nehunka zamatrege'za zagoreti masavea hu'za kumipina
kavre onteho. **19** Kagrama antesnana fenozamo'ene, maka
hankaveka'amo'a ama knazampintira kaza osutfa hugahie. **20**
Ana hu'negu ame huno haninkisie hunka haninkura avega onto.
Na'ankure knazamo'a kenagera ame huno eno, kumazamifintira
vahera eme zamazeri haviza nehie. **21** Kagra kegava hu'eneka
havi kavukva zampintira atrenka rukrahe huo. Na'ankure
havi kavukva zampinti atrenka rukrahe hunka esane huno
Anumzamo'a knazana kagritera atregeno ne-e. **22** Antahih!
Anumzana hankavenentake hu'neankino, ina ne'mo Agrama
rempima hunezamiankna nera mani'ne? **23** Mago vahe'mo'a

Anumzamofonkura, e'ina huo hunora osamige, Kagra mago zana
eri haviza hu'nane hunora huontegahie. 24 Hagi Agrama hankave
eri'zama eri'nea zanku Agrira agi'a husga nehu'za, zagamera
hu'za humuse huntegahaze. Ana hu'negu kagranena zagame
hunka humuse hunto. 25 Maka vahem'o'za Agrama tro hu'nea
zana, ko ke'naze. Hianagi Anumzamo'ma so'e antahi'zanteti'ma
eri'zama eri'nea zana afeteti ke'nazanki'za, keso'ea osu'naze. 26
Tamage, Anumzamo'a tagri antahi'zana agatereno rankrerfa
hu'ne. Ana hu'neankita Agrira kafu'amo'a nama'a hu'nefi keta
eri forera hugara osu'none. 27 Agra higeno mopafinti timo'a
amu huno marerino, hampo ome seteno tina fore huno kora
nerie. 28 Ana ko'mo'ma hampompinti'ma eramiana knare huno
maka vahete runente. 29 Anami monafima hampoma eritama
rente'hea zana, iza keno antahinora nehanigeno, Anumzamo'ma
nemanifinti'ma monagema nehia zana, inankna huta keta
antahitara hugahune? 30 Anumzamo'a higeno Agrama mani'nea
tavaontera kopsi'namo'a marave huno azeri kanegigeno,
masa'amo'ma amefenkame'ma hagerimofo ro'are'ma uneramia
zana ko. 31 E'inahu hankave'areti Anumzamo'a maka vahera
kegava hunezmanteno, ne'zana rama'a zamige'za atupara
nosaze. 32 Agra kevema hiaza huno kopasi'na azampi
eri'neno, inantego ahetsuema huno hirega ahenetre. 33 Hagi
Anumzamo'ma higeno monagema hiazamo'a, ununko atugahie
huno hunerasamigeno, bulimakao afutamimo'za zamagranena
anazanke hu'za nentahize.

37 Ama anazama fore'ma nehigeno'a nagu'amo'a antari
nehigeno, tumo'nimo'a fakrofakro nehie. 2 Anumzamo'ma
kema nehigeno agerumo'ma monagemo'ma nehiazama huno
atineramiana tamagesa ante'netma antahi so'e hiho. 3 Ana

monagemofo agasasa anami monafina atregeno vuno eno
huvaga neregeno, kopasi'namofo masa'a atregeno mopamo'ma
umetre eme atrema hu'nerega vuno eno nehie. 4 Hagi
kopasi'nama erigetama ketonkeno anantera, Anumzamofona
hankavenentake agerumo'a monagemo'ma hiaza higeta
nentahune. Anumzamo'ma kema nehigeno'a, kopasi'namo'ma
nehiaza huno masa'amo'a rumarave huno vuno eno nehie. 5
Anumzamofo agerumo'a monagemo'ma nehiaza hu'neankino,
so'e zantfa huno knare hu'ne. Agra tusi'a hankave'areti, tagri
antahi'zana agatereno ranra eri'zana e'neriankita, anazana
tagra keta antahita osugahune. 6 Agra higeno ko'mopa komo'a
moparera runentegeno, rankora huntogeno tusiza huno mopafina
nerie 7 Ana'ma nehige'za maka vahe'mo'za eri'zana e'ori
atre'za amne mani'ne'za, Agri hankave'a negaze. 8 Hagi ana
knafina afi zagagafamo'za koro fre'za vu'za, fra'makiza nemaniza
havegampino, kerigampi ome fra'nekize. 9 Hagi kagigagi
zahomo'a agrama nemaniregati ne-egeno, ra zahomo'a zasi
avareno ne-e. 10 Anumzamo'ma asimu'ma nentegeno'a tusi zasi
nehigeno, tintamimo'a fonupareno kragenefe. 11 Anumzamo'a
hampompina tina eri atru huno erivineteno, kopasi'na atregeno
ana hampompina ruganani huno vuno eno nehie. 12 Anumzamo'a
vuo huno'ma huntrega vuno hampomo'a ome eri tru hutere huno
neme. E'ina hihoma huno huzmanteaza hu'za maka kaziga ama
mopamofo agofetura vano nehaze. 13 Mago'a zupa Anumzamo'a
vagaore avesizama'a zamaveri huge knazama zamige, hunaku
kora atregeno nerie. 14 Jopuga kagesa ante'enka ama
nankeea antahio, Anumzamo'ma ruzahu ruzahu zantamima
eri fore'ma nehia zantamina negenka antahintahia erio. 15
Anumzamo'a hakare zana kegava hu'neankino, kopsi'nama

huntegeno hampompinti'ma ruganani huno'ma vuno eno'ma
nehia zana kagra kenka antahinka nosampi? **16** Maka zama
tro'ma hu'zana Anumzamo'a antahi ani' hu'neankino, hampoma
ante agofetu agofetu huno antegeno anami kankamumpima
me'nea zana kagra kenka antahinka nosampi? **17** Hagi sauti
kazigati'ma zaho'ma ne-ea zahomo'a omegeno, anante maka
zamo'a kazara osuno oti fatgo higeno'a, kamu'namo'a kukenaka'a
pasunekie. **18** Anumzamo'a higeno bronsireti'ma tro'ma hu'naza
kapoteti'ma masamo'ma rumarave nehiaza huno, amuho zamo'a
hamponteti ome antegeno eneramie. Ana hu'neanki, kagra e'ina
hu'zana hugara hu'nampi? **19** E'ina hu'negu tagra na'ane huta
Anumzamofonkura hugahumpi rempi huramio. Tagripina mago
antahi'zana omane'neankita, mago knare nanekea huta tagra'a
tagura ovazigahune. **20** Nagrama mago nanekema hunaku'ma
nehanugen'o'a, mago'a Anumzamofona asami'nageno agesa
ante'neno keagani'a antahi so'ea hugahifi? I'o anara osuno
nagrira nazeri haviza hugahie. **21** Monafima me'nea hampoma
zahomo'ma eri papama hutrenigeno, zagemo'ma tusiza huno
amuroma hanigeta, zagefina tavua onketfa hugahune. **22**
E'ina avamente noti kazigati'ma tusi'a tavi'ma ne-ea tavimofo
masa'amo'a goligna nehie. E'i Anumzankino avasase zama'amo
azeri kaginte'negeno, hankavenentake masa zama'afi ne-e. **23**
Hankavenentake Anumzamofona tusi'a hihamu'a me'neankita,
Agri avatera erava'oa osugahune. Hianagi Agra fatgo huno refko
nehia Anumza mani'neankino, tazeri havizana nosie. **24** Anama
hiazamo hige'za vahe'mo'za Agrira koro hunentaze. Hagi ama'
antahi'zane vahe mani'nonema hu'zama nehaza vahera antahi
nozamie.

38 Hagi tusi'a kagigagi zaho erino efi Anumzamo'a mani'neno,
Jopuna amanage huno kenona hunte'ne, **2** Jopuga kagrira
knare antahi'zana omane'ne. Ana hu'neankinka Nagrama
eri'zama erinaku'ma retro'ma hua zankura neginagi nanekea
nehane. **3** Nagra menina kagenoka hu'za huanki, vene'ne
antahi'za erinka oti hankavetio. Ana nehunka Nagri kere'ma
kenonama hananku trotra huo. **4** Kagra iga mani'nankena
ama mopamofona tra'a eri agafa hu'na trora hu'noe? Kagra e'i
anazama antahi ama'ma hu'nesunka nasamio. **5** Ama mopamofo
za'za'ane atupa'ane amu'noma'anema nofi'ma (measurement)
avazu huno kenofira iza tro hunte'ne? E'i ana zana kagra ko
kenka antahinka hu'nampi? **6** Ama mopamo'ma agofetu'ma
me'nea trara na'amo azeri hanavenetigeno, ome renage eme
renage huntete'ma me'nea haveramina, ome regari eme regari
hunte'ne? **7** Hagi kotu ofumo'za anazama nege'za magoka
zamagira ante'za zagamera nehazage'za, ankeru ramimo'zanena
ranke hu'za kezati'za musenkasea hu'naze. **8** Hagerimo'ma
ruvarehiramino mopaifima ezankura ama anante megahane
huno iza huntegeno me'ne? **9** Hagerimofona hamponteti
Nagra kukenama hiaza hu'na eri ano vasinente'na, hagerina
kumazu haninu eri anakinte'noe. **10** Ana nehu'na hagerimoka
agaterenka ovunka, amare megahane nehu'na, hagerimo'ma
ome atre eme atrema hu'nea ankina ankina, kafa erigi'na
rentarako hunte'noe. **11** Ana nehu'na amanage hu'na asami'noe.
Kavufgama erisgama nehana hagerimoka amare marenka eme
netrenka, mago'enena agatarenka ovuo hu'na asami'noe. **12**
Hagi Jopuga mago zupa masa huo hunka hankeno nanterana
rumsa nehigenka, kotu masagura hunka remasa hunka marerio
hunka hankeno anara hu'nefi? **13** Hagi kagra mago zupa

huntankeno nanterama remasama hia masazamo'a, ama
mopama ometre eme trema hu'nerega vuno eno huvaga
nereno, havi avu'ava zama nehaza vahera zamazeri ama
hige'za tavimofo korora hu'za fre'nazafi? **14** Zagema marerino
rumasama higeno'a, kokamo'a ruzache huno ama tfaza higeno,
avonkrenankre tvaravemo'ma nehiaza huno avasese'amo'a
so'e zantfa nehie. **15** Hagi zagema marerino remsama hige'za,
kefo zamavu'zmava zama nehaza vahe'mo'zama hanimpima
vano nehu'za, vahe'ma zamazeri havizama nehaza vahe'mo'za
zamazana ruhantgi trege'za anara nosaze. **16** Kagra Jopuga
hagerimpina uraminka hagerimo'ma agafa huno ne-ea kampuira
ome negenka, hagerimo'ma amefenkame'ma urami'neama'a
ome keme vunka kevaga re'nampi? **17** Fri vahe'mokizmi
kuma kafaramima me'neama'a ko negenka, hanintirima hu'nea
hanizamofo kafantamina ko ke'nampi? **18** Ama mopamo'ma ra
huno vuno eno'ma hu'neana kagra kenka antahinka hu'nampi?
Kagrama ana maka zantamima ko'ma antahi vagare'nesunka
nasamio. **19** Masamo'ma mani'neno'ma ne-ea kumara kagra
kenampi? Hanimo'ma nemania kumara iga me'ne? **20** Kagra
kana ke'nana zanaveri hanankeke masamo'ene, hanimokea
zanagrama nemani'a nonkumatega vuke eke hugahapi? **21** Kagra
ko antahi'nane, na'ankure maka zana forera osu'negenka kagra
ko fore hugota hu'nanankino, kafukamo'a rama'a hu'negahie!
22 Aisimo'ma aviteno me'neno eneramia nona ome negenka,
ko'mopa ko'mo'ma aviteno me'neno eneramia nona ke'nano?
23 E'i ana zantamima retro huntogeno'ma me'neana, hazenke
knama esanige'nama ha'ma hanuaza retro huntogeno me'ne.
24 Kopsinamo'ma ruganini huno vuno eno'ma nehia kana iga
me'ne? Zage hanati kazigati zaho'ma erino vuno enoma nehia

nonkuma'a iga me'ne? 25 Monafinti'ma avune ko'mo'ma herafi
ramino'ma eneramia tinkana iza tro hunte'ne? Monamo'ma
monagema huteno agasasama runo'ma vuno eno'ma hania kana
iza varinte'ne? 26 Vahe'ma omani hagege ka'ma kokampina, iza
kora atregeno runente? 27 Ana mopafina kora, zafane trazanena
omanenegeno mago zana omanetfa hu'neane. Hianagi iza
kora atregeno eno mopa eme rufru higeno, trazamo'a ete
hageno marenerie? 28 Ko'mofona nafa'a mani'nefi? Iza ata
komofona nafa'a mani'neno atregeno eneramie? 29 Aisimofona
iza anta'a mani'ne? Hagi iza monafintira aisi atakora kase
atregeno eneramie? 30 Zasi ko'matia knafina, tintamimo'a
hankavetino havegna nehigeno, hagerimofo agofetu'ma aisima
neramino'a azeri karagene. 31 Hagi Pleiadesie nehaza
hanafitamima, monare'ma me'nea zana Jopuga seni nofitetira
magopi anaki nezmanenk, Orioniema nehaza hnafitamima
anaki zmante'neanofira ahekanora hugahampi? 32 Ana nehunka
kagra ana hanafitamina hananke'za, mago kafufina kna'zamire
efore hutere nehanagenka, Beane mofavre naga'anema hu'za
nehaza hanafitamina kagra kegava huzmantegahampi? 33
Monafima ruzahu ruzahu zantamima me'naza zamo'za amage'ma
nentaza kasegea kagra antahi'nampi? Ana'ma hu'nesnunka
kagra hananke'za ama mopafi maka zantamimo'zanena
ana kasegea amage antegahazafi? 34 Kagra monafima
me'nea hampona kezati misankeno, kora atrenigeno eramino
kora kahegahifi? 35 Kopasi'nagu'ma hunka mago kaziga
vuo hunka'ma huntensankeno'ma nevuno'a, e'ina huoma
hunka hunantana zana hugahue hunora hugahifi? 36 Iza
knare antahi'zana, vahe agu'afina nenteno, ama' antahi'zana
vahe'mofo antahi'zampina ante'ne? 37 Iza knare antahi'zampina

avite'nesnimo maka hampontamina hamprigara hu'ne? Ana
nehuno monafima me'negeno anampinti'ma ko'ma neria mopa
kavoa eriragisigeno ko'mo'a herafiramigahie? 38 Anama
higeno'a kugusopamo'a ome runtrako huno eme hanavetigeno,
hihi huno magopi marenerie. 39 Zamagama netegenka
Laioni anenta'a ramine, laioniraminena zagagafa ahezminke'za
nenazafi? 40 Ana laioniramimo'za havegampine, kafoma ante'za
nemaniza trazampinti etirami'za zamagra'a anara nosazafi?
41 Kotkotiema nehaza namaramimo'za ne'zanku'ma hake'za
vano vanoma nehzageno, anenta'arimo'za ne'zama nesaza
zanku'ma Anumzamo'naregama krafama nehzageno'a, iza
ne'zana nezamie?

39 Hagi agonafima nemaniza afi meme afutamimo'za anenta'ma
nentaza kna fatgoa kagra antahi'nampi? Kagra nezmaganke'za
afi dia afu'mo'za anentara nentazafi? 2 Memene dia afumofo
anentamo'zama nezmarera arimpafima nemaniza ikama'a
antahi'nano? Nezamarera'ma kase zamantesnia kna kagra
kenka antahinka hu'nampi? 3 Memene dia afumo'zama
anentalma antenakura, zamaga renamagi'za mopare manine'za
anentara antazageno zamatazamo'a amne nehie. 4 Ana
hutazage'za ana anentatamimo'za ta'nopafi mani'ne'za nena
hute'za, nezamarerana atre'zama nevu'za ete rukrahera hu'za
nomaze. 5 Afi donki afu'ma rente'hazanofira iza katufegeno
fru huno vano nehie? 6 Hagege huno tra'zama omane'nea
ka'ma koka zamuge'za nemanizage'na, hagemoke'ma hu'hea
mopa Nagra zamuge'za nonkuma zamia ante'za nemanize. 7
Ana donki afutamimo'za ran kumapima nemaniza vahe'mofo
zamagasasankegura zamavaresra nehu'za, vahe'mo'zama
zamazeri agazonema hunaku'ma kema nehzage'za, kezmia

nontahize. **8** Ana donki afutamimo'za agonaramimpina vano
nehu'za, tra'zama nesnagura hake'za vano nehaze. **9** Afi
bulimakaomo'a fru huno mani'neno kagri eri'zana erigahifi? Ana
nehuno hanima hanigeno'a bulimakao afu nompina emasegahifi?
10 Afi bulimakao afu'mofona kare namare zafarenofira rentetenka,
hanankeno kamagera nevuno, hozafina mopa rekorino vugahifi?
11 Kagra ana bulimakao afu'mofo hankavegura antahineminka,
atresnankeno amuhoma hu'nesia eri'zanka'a eri kantegahifi?
12 Kagra ana afi bulimakao afumofo hankavegu nentahinka
atresnankeno, hozakafintira witia erino witi honama neharafina
vugahifi? **13** Mananinkna za'za anankene namama Ostritsie
nehaza namamo'a, muse nehuno agekona rutafra tafra nehie.
Hianagi azokamo'a za'za aginkunane afi patomofo azoka knara
osu'ne. **14** Ostriti namamo'za mopamofo agofetu amura antete'za
zamatre'za vazageno mopamofo amuhomo zamazeri amuho
hige'za nemanize. **15** Hagi vahe'mo'o, mago afi zagamo'o agiareti
amu'ama rempoke zankura Ostritsimo'a agesa nontahie. **16**
Zamagr'i'ma zamatama krige'zama kase zamante'naza zankura
ontahi'za, ru namamo'ma kase zamante'nea anenta'ma hiaza
hu'za kegavahu so'e nosaze. **17** Na'ankure Anumzamo'a knare
antahi'zana nomino, antahi ama'ma hu'zana agripintira eri
atre'negu huno anara nehie. **18** Hianagi ana Ostritsi namamo'ma
otino agama nereana, tusi avune anteno agama nerea hosi
afu'ene agumpima mani'nea vahera agatereno nevie. **19** Kagra
Jopuga hosi afu'mofona hankavea neminka, anankempima
me'nea azokara kagra hankeno fore huno me'nefi? **20** Kagra hosi
afu'mofona hankavea aminkeno ranra kenumo'zama nehzaza
huno takauñerefi? Hosi afu'mo'zama zamageru'ma nerazazamo'a
vahera zamazeri koro nehie. **21** Ana hosi afu'mo'za zamagra'a

hankavegu nentahi'za, haru hu'za mareri'za tami'za nehu'za
zamagareti mopa rentrako nehu'za, hatera zamagare'za nevaze.
22 Hosi afumo'za korora hu'za antahintahi hakarea osu, bainati
kazinteti'ma ha'ma nehazage'za hapintira atre'za kororanofraze.
23 Ana hosi afumo'za hapima nevazageno kevegumo'a vagare
vagare nehigeno, karugaru kevereti'ene keveretira zagemofo
masamo'a rumarave nehie. **24** Ha'ma agafa hunaku nehigeno,
paziveteti'ma ufema regeno'a, hosi afumo'a haru huno marerino
tamino nehuno manirava oheno, aga zanteti hankavetino
mopa nemasagie. Ana nehuno agareno ha'pina unefre. **25**
Paziveteti'ma ufema neraza krafagema hosimo'ma nentahino'a,
oho huno nehuno ha'ma afete ne-egeno'a, ha'mofo mna nentahie.
Ana nehuno hate'ma ugotama hu'naza sondia vahe'mokizmi
zamagerura nentahino, sondia vahe'mo'zama ivigema hu'za aza
zamagasasankea nentahie. **26** Jopuga kagri antahi'za amage
anteno, tumpamo'a ageko'na rutarerino sauti kaziga enevifi?
27 Hagi kagra hankeno tumpamo'a haresga huno marerino
vahe'mo'ma mareoriga'afina nona negifi? **28** Ana tumpamo'a
have ra'nafi manino vano nehuno, kenagera anampinka nemase.
Hagi nozamimo'a hankave kuma'zami me'neanki'za knare
hu'za nemanize. **29** Ana kumate'ma manine'za, ahe'zama
nenaza zaga afete mani'nazanagi, amne nezamagaze. **30** Hagi
tumpamo'ma mago zagama aheteno'a, ana zaga erino eno
anenta'amofona eme amigeno, korama'a anivazu huno nene.
Frino kasri'nesia zagamofo avufgama me'nesirega, tumpamo'za
ome atru nehanagenka zamagegahane.

40 Anante Ra Anumzamo'a amanage huno Jopuna asami'ne,
2 Kagra hankavenentake Anumzamofona keha' rentenka
nevunka, Agrira azeri fatgo hunaku nehampi? Ana hugahue

hunka hanananagi, Nagrama kagenokama hanugenka, Nagri
kerera, kenona hugahampi? 3 Anante Jopu'a amanage huno
kenona Ra Anumzamofona hunte'ne, 4 Nagra amne zaga
mani'noanki, inankna hu'na kagri kerera kenona hugahue?
Nagra nzanteti nagira ruhamunki'na manigahue. 5 Nagra ko
rama'a nanekea hu'noanki'na, mago'enena keaga osugahue. 6
Hagi kagigagi zahomo'ene komo'ene huno efi Ra Anumzamo'a
mani'neno, Jopuna amanage huno asami'ne, 7 Kagra vene'ne
antahintahi erinka oti hankavetio. Na'ankure mago'a kagenoka
hugahuanki, eri ama hunka kagra kenona hunanto. 8 Kagra
hanavetinka keaga hunka, nagri navu'navamo'a knare hu'ne
hunka nehane. Hianagi nagrira huhaviza nehunka, Jopuga
kagra'agura mani fatgo hu'na mani'noe hunka nehane. 9 Kagri
hankavemo'a Anumzamo'na hankavegna hu'nefi? Kagrama
kageru'ma nerankeno'a, Anumzamo'nama nageru'ma nerugen
monagema hianknara huno, kagri kagerumo'a monagea nehifi?
10 Hagi kagra knare'ma hu'nesanunka, kukena hiaza hunka
hihamu hanaveka'afi mani'nege'za, vahe'mo'za negage'za
rankagi negami'za husga huganteho. 11 Kagra krimpa ahe'zana
atregeno eama nehaningenka, zamavufaga rama nehaza vahera
zamazeri fenkami atro. 12 Zamavufga rama nehaza vahera
krimpa ahenezamantenka, uruha zamagege'za zamavufaga
anteramiza maniho. 13 Ana nehunka ana vahera kugusopafi
asene zamantenka, fri vahe kumapi kina huzmanto. 14 Jopuga
anama hananke'na knare'za hane hu'na kagri kagia husga
hugahue. Na'ankure kagrika'a hankavemo kaguvazigahie.
15 Hagi kagri'ma tro hu'noa zama hu'na hanavenentake
tusizaga hipopotamosiema nehaza afi zaga tro huntogeno
mani'neno bulimakao afu'mo'ma trazama nenea zama huno

trazama neneana ko. **16** Ana zagamofo amagenafima me'neno
hihamuma nemia ame'a negenka, amurugufima me'neno
hankavema nemia ame'a ko. **17** Ana zagamofo risonamo'a
sida zafamo'ma hiaza huno hankavenentake hu'ne. Hagi agia
zampima me'nea ame'amo'a magopi eri tru hutere hu'neankino
tusi hankaveti'ne. **18** Ana hipopotamosimofo zaferinamo'a
bronsireti'ma tro'ma hu'naza paipugna higeno, agia zampi
zaferinamo'a aini zafagna hu'ne. **19** Anumzamo'na mago'a
zaga kfama tro'ma huzmante'nofintira hipopotamosimo'a maka
ruzamagatere'ne. Ana hu'neankino tro'ma hunte'nesimoke,
ahesnigeno frigahie. **20** Hagi agona ramimpima afi zaga
kfamo'zama zokago'ma nerazafi, hipopotamosimo'ma nenea
trazamo'a hageno marenerie. **21** Nerga asinagna traza lotusine,
uha'enema tirupima nehaga'a trazamofo agafafi frakino nemase.
22 Tinkenare'ma hageno mareneria trazanku'ma lotusiema
nehaza trazampi freno mase'negeno, tona'mo reso huntogeno
nemanie. **23** Hagi tusi avunema anteno hageno ea tinkura
korora nosuno, Jodani timo'enema hageno ankena regama
varehiramino ea zanku'enena korora nosie. **24** Hagi avunteno
mani'neno kvama hu'nesnia vahe'mo'a aze'origahie. Ana nehuno
agonagampinanofitetira renteno avazu huno ovugahie.

41 Hagi agaza hunte tusizankna osifavema Leviatanima
nehaza osifavekrerfa, hagerimpima nemaniana Jopuga hukuretira
avazu nehunka, nofitetira agefu'narera anakigahampi? **2**
Agonagampina nofira rentetenka, avazu hunka nevunka,
ameragempina reraponentenka nofira rentegahampi? **3** Ana'ma
hanankeno'a kasunku hunantenka natro hunora fru kea hugahifi?
4 Ana nehuno nagra mago narimpa huanki'na kagri eri'za
vahe manine'na, kazokazo eri'za erigante vava hu'na vugahue

hunora hugahifi? 5 Namama avrenka kegavama nehana zana hunka kegava nehunka, nofitera rentetenka ne'one mofaneka'a zaminanke'za zokagora rentegahazafi? 6 Hagi zago vahe'mo'za ana zagama mizasenakura, mizama'agura keha rete'za, ana zaga ahe'za akafari osi osi hu'za eri'za maketifina zagorera ome atregahazafi? 7 Hagi ana zaga, nozamema nehaza keveretira asenifine avufgafinena ahegresogreso hugahampi? 8 Hagi ana zagamofo avufgare'ma kazama antenka kesanunka, henka'anena anara osugahue hunka hugahane. Na'ankure ana'ma hanugeno'ma henka'ama ha'ma hunantesniana, havizantfa hugahie hunka kagesa antahigahane. 9 Hagi antahio, kagrama hunka ana zagama azerisanue hunka'ma kagesama nentahisanunka anara osuo. Na'ankure ana zagama azerisanuemma huno hania vahera ana zagamo'a refaki hutregahie. 10 Mago vahe'mo'a ana leviatani'ema nehaza zaga azeri oraotigahie. Ana'ma haniana iza oti hankaveti'neno hara hunantegahie? 11 Iza mago zana nami'nesanigu hu'na, ete nona hu'na amigahue? Na'ankure ama mopafima maka zama me'nea zantamina, Nagri zanke me'ne. 12 Hagi leviataniema nehaza zagama hage rimpima nemania zagamofo hankavene, avufgane agia azankrefagura eri ama hu'na kasamigahue. 13 Ana zagamofo avufagare'ma me'nea irira iza eri kanope netreno, agofetu agofetu'ma huno'ma hankave avufgama me'neana iza reraponegahie? 14 Ana zagamofona ave krerfa hunte'neanki'za, vahe'mo'za koro nehaze. E'ina hu'neankino, iza ana zaga aheno agemzampa atavegrigahie? 15 Ana zagamofo amagenafina iri'amo'a, magopi rukamaretere huno evuevu hu'neankino hankavetino hankogna hu'ne. 16 Ana zagamofo iri'amo'a, magopi akamareno hantohanto hu'neankino, zahomo'ma ufrega

kana omane'ne. **17** Mago mago irimo'a agu'afinka, mago
irite rukamaretere huno azeri hankaveti'ne. Ana hu'neankino
eri kanopeno eri rure'rurera hugara osu'ne. **18** Hagi ana
zagamo'ma kasi'ma haniana, agonagampintira teve ruganani
huno vuno eno nehigeno, avurgafintira nantera zagma marerino
zagemo'ma remsama hiaza nehie. **19** Ana zagamofo agipintira
teve ruganani huno vuno eno nehigeno, agipintira tevemo'a
hagna hagna huno atineramie. **20** Ana nehigeno kavofima tima
tagino, tevere kre'negeno krakra hiaza huno, agonagampintira
amu'mo'a rugasu huno enevie. **21** Hagi agipinti'ma evia
zahomo'a tanknu'zafima tevema nerea tevea hukru higeno rukaru
nehigeno, teve nefamo'a agipintira hagna hagna huno nere.
22 Ana zagamofo anankempina tusi'a hankave me'neankino,
inantego vanoma hiana, tusiza huno vahera zamazeri koro
nehie. **23** Ana zagamofo avufgamo'ma marerino tamino'ma
hu'nea ma'amo'a, magopi ruhampri ruhampri huno antrako
huno hankaveti'neankino, eri pahesi rure rure'ma hu'amo'a
amuho hu'ne. **24** Ana zagamofo tumo'amo'a havegna huno
hanavetineankino, witima refuzafunepaza havegna hu'ne. **25** Ana
zagamo'ma o'manetige'za hankave vahe'mo'za koro nehu'za,
na'a hugahune hu'za kanku nehakaze. **26** Ana hu'neankino
bainati kazintetiro, keveretiro, karugru keveretiro, osi have
kazintetira mago vahe'mo'a ana zaga ahegara osu'ne. **27** Hagi
ainireti'ma tro'ma hu'naza ha' zantamima ana zagamo'ma keana,
trazankna huno keamne zankna nehuno, bronsireti'ma tro'ma
hu'naza ha' zantamima keana, kasari'nea zafagna hu'ne. **28**
Vahe'mo'za kevea ahe tresnageno mani'nesnirega vugahianagi,
korora ofregahie. Gumi atifina havea erinte'za ahegahazanagi
ana havemo'a hagege trazamo'ma avufgare'ma avako'ma

hiankna hugahie. **29** Kumpa kanoma kesaniana, trazankna huno ke amnezaneseno, karugru kevema matrevuno atresigeno esania zamofo agasasama nentahino'a kiza regahie. **30** Ana zagamofo asagufima me'nea irimo'a, mopa kavomo'ma rupararo vazigeno asane'neankna hu'ne. Ana hu'neankino, mopafima regararo heno'ma nevigeno'a, mopa vazikekurino nevie. **31** Hagi hagerimpima nevigeno'a, kavofima tima afino tevefi kre'hegeno timo'ma krakra hiaza huno, hagerimo'a krakra huteno masavemo'ma ze'ze'ma nehiaza nehie. **32** Ana zagamo'ma hagerimpima nevigeno'ma, amefi'ma timo'ma agrege'ma huno nevia zamo'a rumsa huno efeke hu'neankino, mago kavrinteaza nehie. Ana nehigeno ana zamo'a tavava ozafamofo efeke azoka kna huno efeke nehie. **33** Ama mopafina mago agrikna zaga omani'neankino, mago zagagura korora nosie. **34** Maka zagama mani'naza zagafina, agra zamagatereno avufga ra nehie. Ana hu'neankino maka afi zagama mani'nazana zamagatereno kini mani'ne.

42 Hagi anante Jopu'a amanage huno Ra Anumzamofona kenona hunte'ne, **2** Nagrama antahi'noana nazano hunaku'ma hanana zana amne nehanankeno, mago vahe'mo'a e'ina hu'zana osuo huno osugahie. **3** Kagra nantahigenka, iza antahintahi'a omene vahe'mo Nagri knare antahi'zankura nagenoka hu'ne hunkama hu'banana? E'i ana vahera nagragi'na, ke'na antahi'na osugeno nagri antahi'zampinena omaneanagi, knare zantfama hu'nea zanku amne keaga hu'noe. **4** Anumzamoka hunka, Jopuga kagesa naminege'na keaga nehu'na, mago'a kagenoka hugahuanki kenirera nona hunanto hunka hu'nane. **5** Kora vahe'mo'za kagri kagenkea nehazage'na antahi'noe. Hianagi menina nagra'a navufinti kagoe. **6** Maka nanekema hu'noana

ete erue. Ana nehu'na menina nasunku'ma huazana ama tanefapine kugusopafi mani'ne'na erinte ama hue. 7 Hagi Jopu'enema keagama Ra Anumzamo'ma huvagamareteno'a, amanage huno Temani kumateti ne' Elifasinkura hu'ne, Kagri'ene tare ronekagu'enena tusi narimpa aheramante'noe. Na'ankure Nagri eri'za ne' Jopu'ma nagriku'ma tamagema huno huamama hiaza huta, Nagri navu'nava zankura tamagra tamage huta huamara osu'naze. 8 E'ina hu'negu tamagra 7ni'a ve bulimakao afu'ene 7ni'a ve sipisipi afu'ene avreta Nagri eri'za ne' Jopunte vuta, tamagra'agu huta tevefi kre fanane hu' ofa ome hiho. Ana nehinkeno, Nagri eri'za ne' Jopu'ma tamagriku huno, nunamuma hanige'na, tamagra neginagi kema huta Nagri navu'nava zanku'ma tamage huta huama'ma osu'naza zantera, Jopu nunamuna antahi'na knazana ontamigahue. 9 Anagema hutege'za Temani kumateti ne' Elifasiki, Suha kumateti ne' Bildatiki, Nama kumateti ne' Zofariki hu'za Ra Anumzamo'ma hihoma huno huzmantea zana amage ante'za tro hu'naze. Ana hazageno Jopu'ma hia nunamuna Ra Anumzamo'a antahimi'ne. 10 Hagi rone'araminku'ma huno Jopu'ma nunamuma hutegen'o'a, Ra Anumzamo'a knare nomani'za ete Jopuna ami'ne. Ko'ma Jopu'ma ante'nea fenozama havizama hu'nerera, tamagerfa huno Ra Anumzamo'a ana mika fenozana ete ami'neno, ana agofetura mago'ene ante agofetu huno amigeno rama'a fenoza ante'ne. 11 Anama hutege'za afu aganahe'zane asarehe'zane korapa rone'amo'zanena e'za noma'afina ne'zana eme ne'naze. Ana nehu'za Ra Anumzamo'ma knazama atregeno agrite'ma e'nea zankura, Jopuna eme zamasunku hunente'za, azeri hankaveti nanekea hu'naze. Ana nehu'za mago mago vahe'mo'a muse zana, zagone golireti'ma tro'ma hu'naza rini eritere hu'za eme

ami'naze. **12** Ana higeno henka nomani'zama Jopu'ma manino vu'nea nomani zama'afina Ra Anumzamo'a asomu huntegeno ko'ma mani'nea nomanizana rugatere'ne. Higeno Jopu'a menina 14tauseni'a sipisipi afutami anteno, kemoli afutamina 6tauseni'a anteno, hozama e'neria bulimaka'ama zanazeri tragoteno rezmante'nea bulimakao afutamina 2tauseni'a anteno, a' tonki afutamina 1tauseni'a ante'ne. **13** Ana nehuno Ra Anumzamo'a ru'ene Jopuma ami'neana, 7ni'a ne' mofavre nemino, 3'a mofa'ne ami'ne. **14** Hagi ese mofa'mofona Jemima'e huno agia antenemino, anante mofa'mofona Kesia'e huno agia antenemino, nampa 3 mofakura Keren-Hapuku'e huno agia antemi'ne. **15** Hagi anama mani'naza mopa'afina, Jopu mofa'nemo'zama hiranto hu'za knare zantfama hu'nazankna mofa'nea omani'naze. Ana hu'neankino Jopu'ma fenone mohanema refko huno ne' mofavre naga'ama nezamino'a, ana mofane nagara ana zanke huno refko huno zami'ne. **16** Ana'ma huteno'a Jopu'a 140'a kafu mani'neno, agehone agigone azankonena ke'ne. **17** Ana'ma huteno'a Jopu'a knare'za huno za'zate maniteno, ozafa reno fri'ne.

Sams-Zgame

1 Kefo avu'ava'ma nehaza vahe'mokizmi kea amage'ontege, kumi'ma nehaza vahe'mokizmi zamage ontege, mani'ne'za Anumzamofoma kiza zokago kema hunentaza vahe'enema nomaniza vahe'mo'za asomu eri'za muse hugahaze. **2** Ra Anumzamofo kasegema avesi avesi hunenteno, masane haninema agesa are'are'ma ana kasegegu'ma nehia vahe'mo'a, **3** tinnenare me'nea zafamo'ma kna fatgo'are raga'a knare huno renentegeno, ani'na'amo'a harari osu tretre huno meankna huno, maka zama hania zamo'a knare zanke hugahie. **4** Hagi kefo zamavu'zamava'ma nehaza vahe'mo'za anara osugahazanki, zaho'mo witi hona'a eri hareno viankna hugahaze. **5** E'ina hu'negu kefo avu'ava'ma nehaza vahe'mota Anumzamo'ma keagama refkohu trate'ma mani'neno keagama refko huramantesigeta anankeaga agatenoresageno, kumi'ma nehaza vahe'mo'zanena fatgo zamavu'zamava'ma nehaza vahe kevufina omanigahaze. **6** Na'ankure fatgo avu'ava'ma nehaza vahe'mokizmia Ra Anumzamo'a kegava huzmantegahianki, kefo avu'ava'ma nehaza vahe'mo'za haviza hu'za fanane hugahaze.

2 Na'a agafare ama mopafima me'nea kumatamimpi vahe'mo'za hara hunakura oku'a nanekea retro nehazage'za, vahe'mo'za nena'a fore osia nanekea oku'a retro hu'za vano nehaze? **2** Hagi Ra Anumzamo'ma masavema freno huhamprinte'nea kini ne'mofone, Anumzamofonena hara huznantenakura ama mopafi kini vahetamimo'za retrotra nehazageno, kva vahe'mo'zanena ome eritrua nehaze. **3** Ana hute'za anage nehaze, tagri'ma nofi'ma rerantena'a zana rukampru nehuta, kegavama huneranta'a zana zanatretra fru huta manisune hu'za nehaze. **4** Monafima kini tra'are'ma mani'nea kini ne'mo'a zamagiza neregeno, Ra

Anumzamo'a kiza zokago ke hunezmante. **5** Ana nehuno arimpahe zampinti kea hunezmino, rimpa akahe ke huno zamazeri koro nehuno amanage hugahie, **6** Nagra'ni'a Saioni ruotge agonanire kini ne'ni'a azeri oti'noe. **7** Ra Anumzamo'ma trakema anaki namiankea zmasamigahue, Ra Anumzamo'a amanage huno nasmie, Kagra nemamofoga maninke'na, menina nagra kavre'na negafa'za hue. (Hibru 1:5-5) **8** Nantahigege'na ama mopafi kumatmina kami'nena erisanti haresankeno, maka mopamo'a kagri'za segahie. **9** Kazampina aini azompaka'a erinenka vahera kegava hunezmantenka, mopa kavo rufuzafupeankna hunka, ana vahetmina ana azompareti rufuzafupeahane. (Rev-Hupo hu'nea naneke 2:27) **10** E'ina hu'negu menina kini vahetmimota knare antahi'za e'nerinkeno, ama mopafi kva vahe'mota tamavumro kea antahiho. **11** Ra Anumzamofona koro hunteta agoraga'a mani'neta eri'zana erinenteta, tamahirahi nere'na koro hunteta agoraga'a mani'neta musena hiho. **12** Aru arimpa ahesigeno'a tamahe fanane hanigi, nemofona agihene, agona hene hiho. Na'ankure teve anefakna huno arimpama he'zamo'a, ame huno ruhagna hugahie. Agripima frakisu'za vahe'mo'za muse hugahaze.

3 Ra Anumzamoka ha' vahenimo'za ome ra hu'za hara hunantazanki ko! Rama'a vahe'mo'za oti'za hara renantaze!
2 Rama'a nagrikura hu'za, Anumzamo'a agura ovazigahie hu'za nehaze. **3** Hianagi kagra Ra Anumzamoka maka kaziga hankoni'gna hunka manigaginantka, ra nagia nemaminka naza hanke'na hara zamagate'nero. **4** Hagi Ra Anumzamo'ma nzama hinogu'ma krafage hu'na ke'zatugeno'a, ruotge agona'aretira antahinami'ne. **5** Navura mase so'e hute'na onetue, na'ankure Ra Anumzamo'a kegava hunenante. **6** Hanki rama'a 10tauseni'a

ha' vahe'mo'zama maka kzigati'ma eme navazagi kagisazana,
nagra korora zamagrikura osugahue. 7 Ra Anumzamoka, otio!
Nagri Anumzamoka nagu'vazio! Ha' vahe'ni'aramina zamerage
rupro hunka nezmahenka, kefo avu'ava'ma nehia vahera zamave
rufafinka zamaho. 8 Vahe'ma agu'vazi zana Ra Anumzamofompi
me'ne. Hagi kagri asomu'mo'a, kagri vahepi megahie.

4 Anumzanimoka kema hanugenka fatgo navu'navani'a refko
hunka negenka antahinamio! Knafima mani'nogenka kagra
naza hu'nane. Kasunku hunantenka nunamu'ni'a antahinamio.
2 Hagi ama vahe'mota nama'a zupa ra nagima nemamiza
zana eri rukrahe huta, agafa'a omne'zantera nazeri nagazea
nehaze? Nama'a zupa nena raga ore nanekea avesinenteta
havi nanekea nevararize? 3 Hianagi antahio, Ra Anumzamo'a
agri'ma nevaririza vahera zamazeri ruotge huno agrarega
zamavarenenteno, nagrama nunamuma hanugen'o'a antahi
namigahie. 4 Krimpama nehena kumira osuo, tafeke'are
masenenka kea osu mani'enka kagu'afi antahintahia huo. 5
Ofa fatgo hunka Kresramana nevunka, Ra Anumzamofonte
kamentinti huo. 6 Rama'a hu'za, izu knare'zana taveri hugahie?
hu'za nehaze. Hanki Ra Anumzamoka atregeno kavugosafinti
masamo'a remsa huranteno. 7 Kagra tusi'a muse'za nagu'afina
ante avitenantankeno witine kasefa wainima vasagazageno
rama'a hige'zama musema nehzama'a agatere'he. 8 Narimpa
fru hu'na korora osu'na masegahue. Na'ankure Ra Anumzamoka
naza hanke'na hazenkea e'ori knare hu'na nemanue.

5 Ra Anumzamoka, nunamu keni'a antahinaminka, knazampima
mani'ne'nama kragima neruana, nenagenka antahinamio. 2
Kagra nagri kini ne' mani'enka, nagri Anumza mani'nananki,
zavi krafage'nia kagesa antenka antahio. Na'ankure nagra

kagritega nunamuna nehue. 3 Ra Anumzamoka nanterama segenka nagerura nentahine, maka nanterana Kresramanama vu'zana retro huntete'na kenonama hunantesanku tusiza hu'na nagesa nente'na kavegantete'na nemanue. 4 Na'ankure kagra kefo avu'avazanku muse osu Anumza mani'nanankino, kefo avu'avazamo'a kagri tavaontera erava'o osugahie. 5 Hagi zamavufaga rama nehaza vahe'mo'za kagri kavuga o'otigahaze. Hagi kefo avu'a'ma nehaza vahera kavresa hunka zamagote nezmantane. 6 Kagra havigema nehaza vahera nezmahane. Ha'ma huno vahe'ma ahefri zanku'ma tusi aga'manetea vahe'ene, knare agerupinti'ma masavenkema huno vahe'ma revatgama nehia vahe'enena, Ra Anumzamoka kavresa hunka zamagote'nezmantane. 7 Hianagi vagaore kasunku'zamo'a rankrerfa hu'neanki'na amne nonka'afina marerige, ruotge mono nonka'ama me'nerega navugosa hunte'na korora hunegante'na keprihu'na monora hugantegahue. 8 Ra Anumzamoka fatgo kavukavazampi navrenka vuo, na'ankure ha' vahe'niaramimoza nazeri haviza hu'za nehzanki, navrenkama nevana kana eri fatgo huo. 9 Na'ankure nagri ha' vahe'mokizmi zamagipina tamage nanekea omnegeno, zamagu'afina vahe'ma azeri haviza hu'zamo avite'ne. Hagi zamananke nofimo'za, vahe'ma asenezmantaza mati kerigna higeno, vahe'ma masavema huno havi kampima avreno vu nanekemo'a, zamagefu'nafina avite'ne. 10 Anumzamoka keaga huzmantenka hazenke zamio, zamatrege'za zamagri kefo antahintahizamo, hazenkefina zamavareno ufreno. Hazenke zamavu'zmavamo'a marerige'za ha'regantazanki, zamahe natitrege'za kagri tava'ontera omaniho. 11 Hianagi kagripima eme fra'manekiza vahera zamatrege'za muse hiho. Anama nehu'za

zagamema hu'za musena nehanagenka, kegava huzmanto.
Kagriku'ma kavesinegantaza vahera kazana rusutenka turunara
huzmantenge'za kagri turunapi mani'ne'za musenkasea hiho. 12
Na'ankure tamage hunka Ra Anumzamoka fatgo avu'ava'ma
nehia vahera kagra asomu hunezmanterka, knare kavukavazanu
hankonuma hiaza hunka maka kaziga anteso hunezmanterka
kegava hunezmanterka.

6 Ra Anumzamoka kasima vazizampintira kea onasuge,
karimpa ahezampintira nazeri fatgoa osuo. 2 Ra Anumzamoka
hankaveni'a omneanki kasunku hunantenka naza nehunka,
zaferinanimo'a omne amanehianki naza huo. 3 Ra Anumzamoka,
nagu' namemo'a tusi kna navenesianki, inankna zupa naza
hugahane? 4 Ra Anumzamoka rukrahe hunka naza nehunka,
vagaore kavesizanka'agu nentahinka nagu'vazio. 5 Fri'za
vahe'mo'za fri'nazafintira antahi'nogamizanki, iza zagamera
huno fri vahe kumapintira kagri kagia husga hugahie? (**Sheol**
h7585) 6 Kragri'ma ruvavama huazamo nanankena segeno, maka
kenagera navunumo'a tafen'i'afina tiru nemaregeno, zavi'ma
atoazamo'a pilonimo'a pasupanegie. 7 Zavi'ma atoazamo
navumo'a zoregeno, ha' vahe'nimo'zama hazazamo hige'na
zavi'ma atoazamo navumofona hankave'a omane. 8 Ra
Anumzamo'a zavi krafage'ni'a antahianki, kefo avu'ava'ma
nehaza vahe'mota rukrahe huta natreta viho. 9 Asunku
hunantenogu'ma krafama huana Ra Anumzamo'a nentahino,
nunamuma huana nentahie. 10 Ana maka ha' vahe'nimo'za tusi
zamagaze nehanige'za antahintahi hakare nehu'za, havi zamagi
e'neri'za, ame huno zamagaze nehina rukrahe hu'za vughahaze.

7 Ra Anumzana nagri Anumzamoka, kagripi fra nekuanki,
nahenaku'ma navrizarzama ne-esagenka nagu'vazinka naza huo.

2 Ana'ma osnankeno'a laionimo'ma nehiaza hu'za nahe'za tagna taganu vazisageno mago vahe'mo'e huno eme naza huno nagura ovazigahie. **3** Ra Anumzana nagri Anumzamoka, nagrama vahe'ma zamazeri haviza huge, nzampima hazenke'zama mege, **4** hazenke'a omne vahe kefo avu'ava huntege, agafa'a omne zante ha' vahe'ni'amofo feno rohumare'na erige'ma hu'nenuana geno'a, **5** zamatrege'za ha' vahe'nimo'za narotgo hu'za nazeri'za zamaga kanonu kugusopafi nahetrenage'na ra nagigura nagesa ontahi'na frineno. **6** Ra Anumzamoka krimpa hezmanantenka otinka, ha' vahe'niaramina kasi vazizana eri zamaveri huo. Otinka zamarimpama ahenenantaza ha' vaheni'a fatgo kavukva hunka refko huzmantenka knazana zamio. **7** Atrege'za maka vahera emeri atru hu'za manigagisagenka, kagra manisga hunka mani'nenka kegava huzmanto. **8** Ra Anumzana maka vahe'ma refko nehia Anumzamo nagrira refko huno keana, nagra fatgo hu'noe. Fatgo navu'nav'a'ene knare navu'navu hugeno, hazenke zani'a omane'neanki, marerisa Anumzamoka nagrira refko hunanto. **9** Fatgo Anumzamoka kagra vahe'mofo antahintahine, tumo'enena negana Anumza mani'nananki, atregeno kefo zamavu'zmavama nehaza vahe'mokizmi kefo zamavu'zmava'mo'a vaganerena, fatgo avu'ava'ma nehaza vahera zamaza huge'za hankaveti'za maniho. **10** Marerifa Anumzana agra hankoni'agino, agra tumo'amo'ma fatgoma hu'nea vahera zamagu'nevazie. **11** Anumzamo'a fatgo huno keaga refko nehia Anumzankino, maka kna arimpa ahenezmante. **12** Hanki mago vahe'mo'ma agu'ama rukrahe osigeno'a, Anumzamo'a kazima'a kume neganeno, ati'a refagigino karina negreno retrotrara nehie. **13** Vahe'ma ahe fri ha' zama'a retro hunenteno, teve nefalane kevea'aramina retro hunente. **14**

Kefo zamavu'zmava'zama nehaza vahe'mo'za kefo avu'ava
zamo zamagu'afina avitege'za, a'nemo'za zamu'ene hazaza
hu'za hazenke avu'ava zana zamu'ene hu'za krunagema hu'za
kasenentaze. **15** Hagi iza'o vahe'moma taminogu'ma kerima
kafintenimo'a, agra'a ana kerima kafintenia kerifi tamigahie. **16**
Vahe'ma hazenkema hunte'nia hazenkemo'a rukrahe huno agri
asenire ne-enigeno, vahe'ma azeri haviza hunaku retro'ma hania
havizamo'a ete rukrahe huno agri kokovite egahie. **17** Fatgo
avu'ava zama'agura Ra Anumzamofona susu hunente'na, muse
zagame hu'na Ra Anumzana Marerifa Anumzamofona agia
erisga hugahue.

8 Ra Anumzana, tagri Anumzamoka maka ama mopafina Kagri
kagimo'a mareri agatere'ne! Himamu masaka'amo'a, monaramina
agatereno onagamu'a me'ne. **2** Ne'one mofavreramine, amima
nenaza mofavreramina rempi huzminke'za hankaveka'agura
huama nehanageno, ha' vahe'kamo'za mago kea nosazageno,
ha'ma renerantaza vahe'mofonena kezmia omane'ne. **3**
Tro'ma hunte'nana monaramimpima kesga huna koama, ikane
ofuramima tro hunka noma'are'ma ante'terema hu'nana kazanko
avoma nege'na, **4** amanahu nagesa nentahue, nankna hu zaga
vahera mani'honkenka tusi antahintahi hunerantenka, vahera
amnezaga mani'nonanagi kegava hunerantane? **5** Hianagi
monafima mani'naza ankeroramina zamazeri antesga hunka
tro hunezmantenka, mopafi vahera osi'a ante fenkma atrenka
tro hunezmantenka masazanu'ene ragima amizanu'ene fetorira
antaninte'nane. **6** Maka zama tro'ma hu'nana zantmimofo
kegava hinogu kva azeri otinentenka, maka zana agri kvafi
atrarkeno agra kegava hu'ne. **7** Maka sipisipi afu kevuramine,
bulimakao afu kevuramine, afi zaga kafane, **8** monaramimpima

hareza vanoma nehaza namaramine, hagerimpi nozameramine,
hagerimpima vanoma nehaza zagaraminenaka agri kavafinke
atrenka kegava huo hunka ami'nane. 9 Ra Anumzana tagri Ra
Anumzamoka, maka ama mopafina kagimo'a mareri agatere'ne!

9 Ra Anumzamofona mika nagu'areti hu'na susu hunente'na
agi'a erisga nehu'na, hentofa zama tro'ma hu'nea zamofo
agenkea eri ama hugahue. 2 Marerirfa Anumzamoka, muse
nehu'na zagame hu'na kagia erisga hugahue. 3 Hagi ha'
vahe'nimo'zama rukrahe'ma hanu'za, kagri kavuga traka hu'za
frigahaze. 4 Na'ankure kagra kema refko hu trate mani'enka
fatgo hunka keaga refko nehunka, nagrira fatgo hunka refko
hunenantane. 5 Krimpama ahenezmantenka ama mopafi vahera
kea nezmasunka, kefo avu'ava'ma nehaza vahera zamahe
frinkeno zamagimo'a fanene nehie. 6 Ha' vahera zamazeri
haviza hunka nevunka, rankumazmia tra'zama tasgi hutreankna
hunka vatitrankeno vahe'mo'za mago'enena zamagesa antahi
nozmize. 7 Hianagi Ra Anumzama kini tra'are'ma manivava
huno nevia Anumzamo'a, fatgo huno keagama refko hanigura
retro nehie. 8 Fatgo avu'ava huno ama mopafi vahera refko
hunezmaneno, fatgo huno vahetmina kegava huzmantegahie. 9
Hagi Ra Anumzamo'a zamazeri havizama nehaza zamunte omne
vahe'mokizmi fraki havegazmi mani'neanki'za hazenke knafina
anampinka ome frakiza manigahaze. 10 Kagri kagima antahi'naza
vahe'mo'za kagrite zamentinti nehzanki, kagrama zamaza
huogu'ma kantahima negaza vahera, Ra Anumzamoka kamefira
hunozamine. 11 Ra Anumzamo'a Saioni kumatera (Jerusalem)
kini tra'are manisga huno mani'neanki, zagame hunka agi'a
erisga nehunka, maka zama hu'nea zamofo agenkea maka ama
mopafi vahetmina zamasamio. 12 Na'ankure vahe'ma zamahe

frizare'ma, nona huno nezamahea Anumzamo'a knafima maniza
vahera antahi nezmiankino, hazenke'ma zamiza vahe'mo'zama
krafagema hanazana, ana krafage zamia antahi amnea
osugahie. **13** Ra Anumzamoka kasunku hunanto, zamavaresrama
hunenantaza vahe'mo'za nazeri haviza nehazagenka, kasunku
hunantenka, fri kahanteti'ma navresgama hu'nana Anumza
mani'nane. **14** Saioni (Jerusalemi) mofa'nemofo kuma kafantera
zagamera hu'na nagu'ma vazi'nana zankura musena hugahue.
15 Ama mopafi vahe'mo'za zamagrama kafinte'naza kerifi
neramisageno, zamagrama eri aka'ma hunte'naza kukompi
ufregahaze. **16** Ra Anumzamo'a fatgoma huno keagama refkoma
huno, agra'a avu'avara eriama nehigeno, kefo avu'ava'ma
nehaza vahe'mo'za zamagrama haza kefo zamavu'zmavazamo
rukrahe huno zamazeri havizana nehie. **17** Hagi ama mopafima
kefo avu'ava'ma nehaza vahe'mo'za, ete rukrahe hu'za fri vahe
kumapi vanageno, Anumzamofoma zamagema akaninentaza
vahe'mo'zanena ana zanke hugahaze. (*Sheol h7585*) **18** Hianagi
keonke zanku'ma upa'ma nehaza vahera, Ra Anumzamo'a
agera akoniozmente'na, zamunte omne vahe'mo'zama amuhama
nehaza zamo'a, fananea osugahie. **19** Ra Anumzamoka otio!
Atregeno vahe'mo'a hara azerino agate'orena, atregeno ama
mopafi vahe'mo'za keagare kavuga eotihio. **20** Ra Anumzamoka
zamazeri koro huo! Zamatrege'za ama mopafi vahe'mo'za amne
vahetafa mani'none hu'za antahiho.

10 Ra Anumzamoka nahigenka afetera otinka mani'nane?
Knazampima mani'nogenka nahigenka frakinka mani'nane?
2 Kefo avu'ava'ma nehaza vahe'mo'za zamavufagara hu'za
zamunte omne vahera zamazeri haviza hunaku nezmavaririzanki
zamatrege'za zamagrama hanaza hazanke zamo zamazeri

haviza hino. 3 Na'ankure kefo zamavu'zmava'ma nehaza
vahe'mo'za, zamavufagamofo avesizankura zamavufagara
nehu'za, zamagri'ama zamazama hania zankuke nentahi'za, Ra
Anumzamofona huhaviza hunente'za zamefira hunemize. 4 Kefo
avu'ava'ma nehia vahe'mo'a avufgara nehuno, Anumzamofonkura
nohakeno, Anumzana omanine huno antahintahi'afina agesa
nentahie. 5 Hianagi ana vahe'mo'ma maka zama hia zamo'a,
knare nehigeno kagrama azeri havizama hanana zamo'ma
avegama ante'neazana nonkeno, ha' vahe'zmia kiza zokago ke
hunezmante. 6 Hagi agu'afina amanage huno agesa nentahie,
mago zamo'a nazeri kazara osugahie nehuno, maka zupa muse
huvava hu'na nevanugeno hazenke zana navatera omegahie
nehie. 7 Hagi agipina kazusi kene, vahe'ma revatgama hu
kene, vahe'ma azeri havizama hu kemo avitegeno, agefu'nafina
hazenkema hu kene, kefo avu'avazama hu kemo avite'ne. 8
Hagi kuma tava'onte kafona anteno mani'neno hazenke'a omane
vahera ahe nefrino, oku'a frakino mani'neno azanavama antega
vahe'ma azeri havizama hania zanku nehake. 9 Laionimo'ma
trampima kafoma anteno mani'neno zagagafama ame huno
azeriaza huno, frakino mani'neno zamagra'ama zamazama
hugama osaza vahera kukozmifi zamazerite'za zamavazu hu'za
nevaze. 10 Hankavezmima omane vahe'ma evazageno'a,
hanavezmima me'nea vahe'mo'za zamahe'za rehapatinetraze.
Na'ankure kefo avu'ava'ma nehaza vahera hanavezmimo'a
ra hu'nege'za anara nehaze. 11 Ana kefo avu'ava'ma nehia
vahe'mo'a, agu'afina amanage huno agesa nentahie, nagrama
hua navunavara Anumzamo'a agenekanino, avua nonkeankino,
onagegahie huno nehie. 12 Ra Anumzamoka otio! Anumzamoka
vahe'mo'zama zamazeri havizama nehzage'za, knazampima

nemaniza vahera kagerakani ozmantenka, kazana erisga hunka zamaza huo. **13** Na'a higeno kefo avu'ava'ma nehia vahe'mo'a Anumzamoka amagena hunegamino, havi avu'ava'ma hua zantera nona osugahie huno agesa nentahie? **14** Hianagi Ra Anumzamoka hazenkema e'neri'za knazampima maniza vahera kenka antahinka nehanankinka, hazenkema zamiza vahera kagra'a kazanuti nona huzmantegahane. Zamagra'ama zamazama hugama osu'naza vahe'mo'za kagrite zamentintia nehaze. Kagra megusa mofavrerami zamazahu Anumza mani'nane. **15** Kefo avu'ava'ma nehuno vahe'ma azeri havizama nehia vahe'mofo azana ruhanentaginka, kefo avu'ava nehaza zantera zamarotgo hunka zamahehna huo. **16** Hagi Ra Anumzamofo mopafintira fanane hugahazanagi, Ra Anumzana mani vava kini mani'ne. **17** Ra Anumzamoka anteramiza nemaniza vahe'mokizmi zamavesizana negenka, zamagu'a zamazeri hanavenetinka krafa kezmia kagesa antenka nentahinka, **18** megusa mofavreramine vahe'mo'zama zamazeri havizama nehaza vahetega antenka zamahora nekane. E'ina'ma hanke'za ama mopafi vahe'mo'za koro nehu'za, mago'anena vahera zamazeri korora osugahaze.

11 Nagra Ra Anumzamofompinka frakina nemanuanki, nahigenka nagrikura namamo'za zamagu'vazinaku hare'za agonarega frazankna hunka korora nefrane hunka nehane. **2** Na'ankure kefo avu'ava'ma nehaza vahe'mo'zama fraki'za mani'ne'za, fatgo vahera zamahenaku atizamifi keve erinte'za eri negrize. **3** Hagi kasegema amage anteno fatgo avu'ava'ma hu'zama omanesigeno'a, fatgo vahe'mo'za na'a hugahaze. **4** Hagi Ra Anumzamo'a Agra'a ruotage mono nompi monafina kini tra'are mani'neno, avua omege emege nehuno, Agra'a avurgareti

vahera rezagneno nezamage. 5 Hagi Ra Anumzamo'a fatgo vahera refko huno nezamage. Hianagi havi zamavu'zmavama nehu'za, vahe'ma hazenkema nezamiza vahera tusi avesra hunezmante. 6 Hagi ana nehuno kefo avu'ava'ma nehaza vahe'ma hazenkema zamisiana monafinti amuho teve tankanuza herafi atrenigeno ko'arianka huno eramino zamahegahiankino, e'i miza zamia erigahaze. 7 Hagi Ra Anumzamo'a fatgo avu'ava nehia Anumza mani'neankino, fatgo avu'ava zanku ave'nesie. Hanki fatgo avu'ava'ma nehaza vahe'mo'zage, Agri avufina kegahaze.

12 Ra Anumzamoka nazahuo, na'ankure fatgo vahera omanitfa higeno, kema antahino amage antega vahera ama mopafina omani'naze. 2 Hagi mika vahe'mo'za havige vaheke nemani'za, tare zamagu'reti masavenkea nehu'za vahera rezamavataga nehaze. 3 Ra Anumzamo Agrake havigema nehaza vahe'mofa zamagira ruhamunegino, zamavufaga rama nehaza zamaganefu'na ruhamunenkie. 4 Zamagra ana vahe'mo'za hu'za, tagra tavufga rankema hanuna zamo vahera zmagatereghunanki, iza tagrira kva vahetia manigahie hu'za nehaze. 5 Na'ankure kefo vahe'mo'za zamunte omane vahera zamazeri haviza nehu'za, kna nezamizanki'na, Nagra kegava huzmante'nuge'za havi vahe'mo'za zamazeri havizana osugahaze huno Ra Anumzamo'a hu'ne. 6 Ra Anumzamofo nanekemo'a, agru hu'neankino silvama 7ni'a zupa tevefi kreno eri agru hiankna huno agrumentake hu'ne. 7 Ra Anumzamoka, havi zamavu zamava'ma nehaza vahe'mo'zama zamazeri havizama hu'zankura zamagu'vazinka maka knafina kegava huzamante vava huo. 8 Hagi kefo avu'avazamo'ma vahepima ome rama

nehige'za kefozama nehaza vahe'mo'za zamavufaga ra huza
vano nehaze.

13 Ra Anumzamoka nama'a knafi kagera kaninantegahane?

Ana maka kna kaganera kaninantegahampi? Nama'a knafi
kamefira hunaminka onagegosane? Ra Anumzamoka za'za knafi
kagera kaninantane. Za'za kna kamefira hunaminka onagane.

2 Nagra za'zate nasuzampina nemanugenogu nagu'namemo'a
knazampina manino nevie. Nahigenka natranke'za ha'
vahe'nimo'za nazeri havizama haza zankura zamavufaga
rana nehaze? 3 Rukrahe hunka nenagenka Ra Anumzana
nagri Anumzamoka kenona hunanto. Ru mase'nurega frinugi,
navurga eri hari hunka hanavea namige'na, ofri kasefa hu'na
mani'neno. 4 Hagi ha' vahe'nimo'za amanage hugahaze,
tagra hara hugateronkeno'e hu'za musena hugahaze. 5
Hianagi nagra vagaore kavesi zanka'agu namentintia nehu'na,
nagra nagu'ma nevazina zanku musena nehue. 6 Nagra Ra
Anumzamofonku zagamera hugahue. Na'ankure Agra knare'zana
rama'a hunante'ne.

14 Hagi neginagi vahe'mo'za zamagrama zamagu'afima
antahi'zana Anumzana omanine nehaze. Hagi zamagra
havizantfa hu'nazanki'za kasrino haviza hu'nea zamavu zamava
nehu'za, havi vaheke manizageno magore huno knare vahera
omani'ne. 2 Hagi Ra Anumzamo'a monafinka mani'neno, kema
antahi ama'ma hu vahe'mo'zama Anumzamofonku'ma antahimiza
amagema nentaza vahe'ma mani'nenagura kefenkatreno ama
mopafina nege. 3 Hianagi mika vahe'mo'za rukrahe hu'za
zamagenta hunemiza, kefo vaheke mani'naze. Hagi magomo'e
huno knare avu'vazana osu'neanki, mika vahe'mo'za kefo vaheke
mani'naze. 4 Hagi kefo zamavu zamava'ma nehaza, bretima

nenazaza hu'za nagri vahera zamazeri havizama nehu'za, Ra Anumzamofona nunamuna hu'za antahi nonkazafi? 5 Hianagi ana vahe'mo'za tusi'a koro hugahaze, na'ankure Anumzamo'a fatgo vahe'ene manigahie. 6 Hagi zamunte'ma omane vahe'mo'zama antahintahima retro'ma nehaza zana, havi zamavu'zamava'ma nehaza vahe'mo'za huhaviza nehazanagi, Ra Anumzamo zamunte omane vahe'mokizmi frakino zamagu'vazi kumazamia mani'ne. 7 Hagi nagrama antahuana, agu'vazi zana Saioni agonaregati egahiankino, Israeli vahera zamagu'vazigahie. Hagi Ra Anumzamo'ma naga'amofo maka'zama eri knarema hanigeno'a, Jekopu naga'mo'za musenkase nehanageno, Israeli vahe'mo'za tusi muse hugahaze.

15 Ra Anumzamoka, iza kagri mono nompina manigara hu'ne?
Iza ruotgema hu'nea agona ka'arera manigara hu'ne? 2 Iza'o hazenkema nosuno fatgo avu'ava'ma nehuno, agu'aretima huno tamage kema nehuno, 3 vahe'mofo azeri haviza hu kea nosuno, vahe'mofo huhaviza hunenteno, tavaoma'are'ma nemanimofoma havigema hunonteno, 4 kefo avu'ava'ma nehia vahe'ma amagen a hunemino, Ra Anumzamofoma amagema nentaza vahe antahine'zamino, knazampina unefreno'a, huvempama hu'nea zanku agesa nentahino runotagreno, 5 zagoma ami'nerema, rama'a zagoma ante agofetu'ma huno eme zamizanku'ma nontahino, zamagr'ilma zamaza huno hazenke'a omane vahe'ma zamazeri haviza hinogu'ma masavema hu'za zagoma amiza zagoma e'horia vahe'mo'a, oti hankanavetino manigahie.

16 Ra Anumzamoka nagu'vazio, na'ankure kagripinka mani'nena nagra nagura nevazue. 2 Hagi Ra Anumzamofonkura nagra hu'na, mika knare zama e'neruana kagritegati ne-e. 3 Hagi Anumzamofo vahe'ma amafima mani'naza vahera knare vahe

mani'nazage'na, zamagranema mani'zankura nagra musena
nehue. 4 Hagi havi anumzama nevaririza vahe'mo'za, rama'a
zamasu zampi manigahaze. Hagi nagra ana havi anumzante'ma
tima tagitre ofama huogu'ma, korama eri'za eme namisazana
erina ofa huonuge, ana havi anumzantamimofo zamagirera
huamara osugahue. 5 Hagi Ra Anumzamoka nagrama erisanti
hare'nua zane, tintafen'i Kagrake mani'nenka, henkama manisua
zani'a eri knare hugahane. 6 Hagi mopa'ma nami'nana mopamo'a,
knare hu'nege'na musena nehu'na, hentofa zantamina erisanti
neharoe. 7 Nagra nazeri fatgoma nehia Ra Anumzamofona agi'a
erintesaga hugahue. Na'ankure hanimpinena ana nanekemo'a
nagu'afi me'neno rempi hunenamie. 8 Nagra antahi'noe,
Ra Anumzamo'a mika knafina nagrane nemanino hanavea
nenamiankina, mago zankura korora hu'na antria osugahue. 9
E'ina hu'negu nagu'areti hu'na muse nehuankino, musezamo
nagripina avinetegi'na knare hu'na nemanue. 10 Na'ankure kagra
natrenanke'na fri'na fri vahe kumapina uomanige, atrenankeno
ruotagema hu'nea vahekamo'a frino onkasarigahie. (Sheol h7585)

11 Hagi kagra nomani'zamofo kana naveri nehankeno, kagri
tava'ontera musezamo'a avinetankina tamaga kaziga kzantega
mani'nena musena huvava hugahue.

17 Ra Anumzamoka mani fatgo hu'na mani'nuegu
kantahinegoanki nunamuni'a antahinamio. Hagi nzama huogu'ma
krafagema nehu'na, nagra regavatga nosuanki nunamuni'a
antahinamio. 2 Hagi kagra mani'nantegatira nazahunka refko
hunantenka, nazeri knare huo. Na'ankure kagrake knare'ma
hu'naza vahera zamagenka refakoa nehane. 3 Hagi kagra
hanimpina antahizani'a refako hunka negenka, nagu'amofona
renahenka negane. Hianagi mago kumira nagripina kenka

erifore nosane. Hagi kegaganifina mago kefo kea omanesie hu'na nehue. 4 Hagi kagri kasegema amagema nentoa zamo nazahige'na, haframa nehaza vahe'mokizmia namage'na hunezamue. 5 Mika zupa kagri kanteke nevugeno, nagamo'a kririno havifina vuno enora nosie. 6 Ra Anumzamoka kagritega kezana netuanki antahinamio. Ra Anumzamoka kagesa antenka nunamu keni'a antahinamio. 7 Hagi vagaore kavesi zanka'a hentofaza hunka eri ama huo. Ha' vahezamigu'ma koroma nehaza vahera, Kagra hanave kazanu zamagu nevazina ne' mani'nane. 8 Hagi Kagra kavurgama kegavama nehanankna hunka kegava hunantenka, kagekonanu refitenanto. 9 Kefo avu'ava'ma nehaza vahe'mo'za nazeri haviza huza nehazagenka nagu'nevazinka, ha' vahe'nimo'za nahenaku'ma navazagi kaginagenka nagu'nevazine. 10 Hagi zamagra mago vahekura zamasunkura hunozamante'za, zamavufaga ra hu nanekege nehaze. 11 Hagi kama nevuge'za zamagra navaririza nevu'za, mopafi nahetrenaku navazagi kagine'za, zamavu ante'za mani'naze. 12 Zamagra laionimo zagagafa aheno tapage hunaku eme krino maniaza nehu'za, agaho laionimo zagagafa ahenaku frakino maniaza hu'naze. 13 Hagi Ra Anumzamoka otinka ha' vahe'nia ha' huzamantenka zamahe mopafi zamatro. Kagra'a bainati kazinkonteti kefo vahepintira hara hunka nagu'vazio. 14 Hagi Ra Anumzamoka ama mopafi zama erisantima harenaku'ma tusizama nehaza vahe zamazampintira hanave kazanuti nagu'vazio. Ana nehunka miko knaza zamimofo avamente antenka mizana zamio. Ana nehunka zamagripintima fore hu anante nante hanaza vahera knazana zaminka vugahane. 15 Na'ankure nagra fatgo hu'na knare hu'noankina, henkama otinu'na kagri kavufina negage'na musena hugahue.

18 Ra Anumzamoka nagra navesigantoe, nagri hanavea
Kagrake mani'nane. **2** Ra Anumzamo'a ra haveni'ane, vihuni'a
mani'neno nagura nevaziankina, agripinka frakugeno hankoni'a
mani'neno nagura nevazie. Ra Anumzamo'a nagri hankone
hankavenine nazahu have mani'neno, fraki kuman'i'a mani'ne. **3**
Nagra Ra Anumzamofonku nunamu hu'na antahigogeno, ha'
vahe'nimofo azampintira naza hu'neanki'na, Ra Anumzamofona
ra agi nemina agi'a hentesga hugahue. **4** Nofi'mo nazeri kagiankna
huno fri'zamo'a nazeri kanegigeno, ti hageno refiteankna huno
hazenkezamo'a refitenante'ne. **5** Hagi fri'zamo'anofikna huno
anaki nenanterego, fri'zamo'a krifumo zagagafa azeriankna huno
naze'nerie. (**Sheol h7585**) **6** Hagi nagra narimpa natazane knazanifi
mani'nena Ra Anumzamofona krafage hunentogeno, Agra ra
mono noma'afinti ana krafageni'a agesa anteno antahi'ne. **7**
Hagi mopamo'a imi e'nerigeno, toretore nehigeno, agonamofo
tramo'a kazakaza hu'ne. Na'ankure Ra Anumzamofona arimpa
ahenegeno anara hu'ne. **8** Hagi agonagampintira toki nehigeno,
agipintira maka'zama tefanene hu tevemo hagana hagana
nehigeno, teve tankanu'zamo ankanuferami ankanuferami hu'ne.
9 Hagi Agra mona kafana erinagino ne-egeno, agagusamofo fenka
kaziga haninentake hampo me'ne. **10** Hagi serafimie nehaza
ankeromofo agofetu hareno ne-eno, zaho'mofo agekonare
mani'neno hareno evu'ne. **11** Hagi haninu agra'a azeri ano
nevazino, koma neria hamponteti Agra'a azeri ano vazinte'ne.
12 Hagi masazama'amo'a ana hampona rupapa huno nevigeno,
komopa komo'a nehigeno, tevemo'a teragareno vuno eno huno
erami'ne. **13** Hagi marerifa Ra Anumzamo monafinkati kema
nehigeno'a, agerumo'a tusi'a monage hiaza hu'ne. Hagi kema
nehigeno'a, tevemo'a ankanuferamino vuno eno nehigeno,

komopa komo'a hu'ne. 14 Hagi Agra keve'aramina ahetreno ha'
vahe'a zamahe panani nehuno, tusi'a masa'areti kopasinamo
ru marave marave hiaza huno zamahe savri hu'ne. 15 Hagi
Ra Anumzamoka kasimu'ma nentankeno'a, hagerimo'a apapa
huno vuno eno higeno mopa fore nehigeno, tusi'a keri fore
higeno, mopama azeri'nea tra'mo'a amate me'ne. 16 Hagi Ra
Anumzamo'a monafinka mani'neno azana antefenka atreno,
hagerimo nazeri nakri'za nehigeno naza huno navre'ne. 17 Hagi
hanavenentake ha' vahe'mo'zama nahe'zama nehazageno'a,
Agra naza nehuno zamavaresrama hunantaza vahepinti'enena
naza hu'ne. Na'ankure ha' vahe'nimo'za hanavenentake hu'za
nagri nagatere'nazagu anara hu'ne. 18 Ha' vahenimo'za
hanaveni'ama omnea knafi hara eme hunante'nazanagi, Ra
Anumzamo'a naza hu'ne. 19 Hago Agra navareno nagu'vazinia
kumapi ome nantene. Na'ankure Agra nagria muse hunante'negu
anara hu'ne. 20 Hagi Ra Anumzamo'ma knare'ma hunante'neana,
nagrama fatgo navunava'ma hu'noa zante nona huno mizani'a
nami'ne. Nazamo'a agru higena mago hazenke'ma osu'noa
zante, nona huno mizana nami'ne. 21 Na'ankure nagra
Ra Anumzamofona kasege'a amage nentena, nagra havi
navu'navara hu'na Anumzamofona otre'nogu huno anara hu'ne.
22 Nagra kasegea mika amage nentena, magore hu'na tra
ke'a ruotagre'noe. 23 Nagra kumira nosuna, Ra Anumzamofo
avufina kumi'ma huzankura kegava hu'na mani'noe. 24 Ana
hu'negu Ra Anumzamo'a knare navu'nava'ma hunore nona
huno mizana nami'ne. Na'ankure Agrama keana nagri nzampina
hazenke'zana omneno agru hu'negu huno, anara hu'ne.
25 Hagi manifatgoma huza maniza vahera, fatgo kavukva
hunezamantenka, hazenkezmima omne vahera knare kavukva

hunezmantane. 26 Hagi agruma hu'nea zamavu zamava'ma
nehaza vahera, agru hu'nea kavukava hunezmantenka, fatgoma
osu zamavuzamava nehaza vahera, fatgo kavukva hunka, ana
avu'avazanteria nona hunezmantane. 27 Hagi zamavufagama
anteramiza maniza vahera zamazeri antesaga nehunka,
zamavufagama antemareriza vahera zamazeri fenkami neutrane.
28 Hagi Ra Anumzamoka Kagra tavira rekru hunenantenka,
hanizana nagripintira eri neutrane. 29 Hagi Anumzanimoka
Kagra nzahankena hanave ha' vaheni'a nezamahe'na, Kagra
nzahankena ranra kuma kegina takaure'na nevue. 30
Anumzamofo avu'avamo'a knare hu'ne. Ra Anumzamoka ke'mo'a
tamage ke me'ne. Hagi Agra hankogna hu'nege'za vahe'mo'za
agripinka ome franekize. 31 E'ina hunanku ina Anumzamo kagri
knara huno Ra Anumzana mani'ne? Magore huno ra anumzana
omani'neanki, tagri Anumzamoka Kagrake hanavenentake
havetia mani'enka, kva hunerantane. 32 Hagi magoke
Anumzamo agrake hanavea nenamino, fatgo kantera knare huno
navareno nevie. 33 Hagi Agra nagiamofona azeri hanavetige'na
dia afumo'zama nehzaza hu'na agona morusapina vano
nehu'na, tarakara nosue. 34 Hagi Ra Anumzamo'a ha'ma
hu'zana rempi hunenamino, hanave namige'na bronsireti tro
hu'naza hanavenentake atia erigrinkenke nehue. 35 Hagi
Ra Anumzamoka Kagra nagu'vazi hanko nenaminka, tamaga
kazanu nazerisga hankena, hara hu'na vahe'mokizmi zamavurera
nagine vahera mani'noe. 36 Hagi nagamo'ma krarizankura
Kagra ranka varinantanke'na traka osu nevue. 37 Hagi
nagra ha' vaheni'a zamarotago hu'na ome zamazeneri'na,
zamarotago huge'na otre'noanki, zamarotago huvava hu'na
miko zazmia eri haviza nehu'na zamahe vagare'noe. 38 Hagi

nagra zamahe'na rehapatuge'za, nagafi ufrinte efrinte hu'za
oratigara osu'naze. **39** Hagi ha' vaheni'anema ha'ma hanua
hanavea Kagra nemalinka, ha' vaheni'a zamatrake'za nagafi
eme kepri hunante'naze. **40** Hagi Kagra ha' vaheni'a zamazeri
koro hanke'za, zamefira rukrahe hu'za onke fre'za vazage'na,
zamavesrama hunenantaza vahera mika zamahe vagare'noe. **41**
Hagi zamazama hanaza vaheku kezati'nazanagi, magomo'e huno
zamaza osige'za, Ra Anumzamofonku taza huo hu'za hazanagi,
zamaza osu'ne. **42** Hagi nagra ha' huzmantena zamahe
kasopoge'za, zahomo kugusopa eri hareno vuno eno hiakna
hu'za miko kokantega umani emani hu'naze. Hagi ha' vaheni'a
ha' huzmantena zamahena rehapatuge'za, kampi hapa kna
hu'naze. **43** Hagi Kagra ha'ma renenantazagenka, nagu'vazinka
nzamahankena ha' vaheni'a hara huzamagatere'noe. Hagi
Kagra kva vahera huhampri'nantake'na kumatamina kegava
hu'nope'za, zamage'na antahina osu'noa vahem'o'zanena nagri
nagoraga manine'za erizani'a eri'naze. **44** Hagi nagri nagenkema
miko kaziga vahem'o'zama nentahiza, zamanogu nehu'za nagri
nagafi anterami'za mani'naze. **45** Hagi ha' vahem'nikizmia
miko hanavezamia vagarege'za zamahirahiku nehu'za, fra'ma
nekiza vihu'zamia atre'za nagrite e'naze. **46** Hagi kasefa huno
mani'nea Ra Anumzana nagri fraki havenia mani'neanki'na,
agi'a ahentesga nehu'na, nagu'ma vazi'nea Anumzamofo agi'a
ahentesga hugahue. **47** Hagi ama ana Anumzamo, nagri'ma
nazeri haviza hu'naza vahera nona huno zamazeri haviza
nehuno, ru kazigati vahera zamavarenamige'za nagri nagafina
mani'naze. **48** Ha' vahem'i'mo'zama nahenaku nehazageno'a
naguvasi'ne. Hagi hazenke vahem'o'zama nazeri havizama
hu'za nehazagenka Kagra nagu'vazi'nane. **49** E'ina hu'nanku,

maka kumapi vahepintira nagra muse zagamera hu'na Ra
Anumzamoka kagia erisga hugahue. **50** Hagi Kagra kinima
nazeri oti'nana ne'kamo'na hanavea nenaminkena hara azeri
agatenerogenka, Kagra masavema frenka huhampri nante'nana
ne'mo'na kavesinenantenka Deviti'nane nagripinti'ma fore'ma
hania vahera kavesi rante vava hugahane.

19 Hagi monamo'a Anumzamofo hankave'a erinte ama
nehigeno, monafima me'nea zantamimo'a Agri erizankama'a
erinte ama hu'ne. **2** Hagi magoke magoke knamo'a
Anumzamofoku hu'ama nehigeno, maka kenagemo'a Agri
antahi'zama'a erinte ama nehaze. **3** Hagi masane haninemokea
kegaga neha'anagi, zanagerura ontahigahaze. **4** Naneke
zanimo'a mopane mopane vuno eno hu'ne. Hagi zagemofo
nonkumara Anumzamo'a monafi retro hunte'ne. **5** Hagi
anampinkatira zagemo'a aravema hunaku hu'nea ne'mo atiramino
eaza huno ne-eno, agare zokago nerea ne'mo agarenaku
muse nehia kna nehie. **6** Hagi zagemo'a mopamofona mago
kazigati hanatino mago kaziga unefreankino, mago zamo'a
agri amuhofintira frakigara osu'ne. **7** Hagi Ra Anumzamofo
kasegemo'a fatgo hu'neno kasefa tasimu neramie. Hagi Ra
Anumzamofo kemo'a, knare antahi'za me'heankino antahizama'a
omne vahera azeri ante fatgo huno knare antahi'za nezamie. **8**
Hagi Ra Anumzamofo kasegemo'a knare zantfa hu'heankino,
tagu'afina musezanente. Hagi Ra Anumzamofo kasegemo'a,
agru hu'heankino vahe'mofo avua eri hari nehuno, ama' antahiza
nemie. **9** Hagi Ra Anumzamofonku'ma kore'ma huntezamo'a
agru hu'heankino mevava hugahie. Hagi Ra Anumzamofo kemo'a
tamage ke me'heankino, makazana fatgo huno refako nehie. **10**
Hagi ana ke'amo'a, rama'a golima kre'za eri agruma hu'naza

golimofo mizama'a agaterene. Hagi ana ke'amofo haga'amo'a tume rima'amofo haga'a agatere'ne. 11 Hagi ana kekamo'a eri'za vahekamo'na havi avu'ava'ma huzanku koro kea nenasmino, ana nanekeka'ama amage'ma antaza vahera knare museza nezmie. 12 Hagi inankna hu'na nagripima me'nea kefozana kena antahina hugahue? Ra Anumzamoka kagrake oku'ama frakino nagripima me'nea kumini'a atrenantenka nazeri agru huo. 13 Hagi havizama hugahuanki hu'na antahine'nama hu kumipina natrege'na uofra'neno, hagi atregeno kumi'mo'a nazeri nagatereno navareno ovuno. Hagi natrege'na kumimpintira fru hu'na mani'neno. 14 Hagi Ra Anumzamoka atregeno kenimo'ene nagu'afima antahintahima nehua zamo'a kagri kavufina knare huno me'nena musena hunanto. Kagra Ra Anumzamoka fraki have mani'enka, nagu'vazi ne' mani'nane.

20 Hagi hazenkefima ufresankeno'a, Ra Anumzamo'a kagu vazigahie. Jekopu Anumzamo'a kegava hugante'nie. 2 Hagi Agra mono noma'afi mani'neno kza nehuno, Jerusalemi kumateti kza hu'zana atrenigeno egahie. 3 Hagi mika ne'za ofama hananana, antahi'negamino tevefima kre fanene hu ofama hananana, antahi muse hanie. 4 Hagi Agra kagri'ma kvesinia zana negamino, nazano tro'ma hunaku keagama retro hanana zana amane hugantenigeno knare zanke hugahie. 5 Hagi Kagrama ha'ma agatere'nanketa tagra musenkase huta kaninereta, Anumzantimofo agire krauvefana erisaga hugahune. Ra Anumzamo agrake mika nunamuma hanazana antahiramisie. 6 Hagi menina nagra antahi'noe, Ra Anumzamo'a monafinka ruotge kuma'afi mani'neno, Agra'ama huhampri'nante'nea kini ne'mo'na nunamuni'a antahinenamino kenona hunanteno, tamaga azanteti hanave'a eri ante ama huno naza huno

navregahie. 7 Hagi mago'a vahe'mo'za hosi afuzmine karisi zmimofo hanavegu antahinezamize. Hianagi tagra Ra Anumzana tagri Anumzamofonte tamentintia nehune. 8 Hagi mago'a vahe' mo'za evuramiza haviza hugahazanagi, tagra oti'neta hankavenentake huta manigahune. 9 Ra Anumzamoka aza hunka kini nera agu'nevazinka, taza huoguma krafagema nehanunkenka, krafa ketia antahiramio.

21 Ra Anumzamoka, kagrama kini ne'mofoma hankavema nemina zanku, agra tusi muse nehuno, azama hankeno ha' vahe'ama ha'ma huzmagatere'nea zankura tusiza huno kagrikura musenkasea hunegante. 2 Agri'ma agu'afima avesiazana amne neminka, nazankuro kantahigea zana, i'ora osunka amne nemine. 3 Kagra tamagerfa hunka kini nera asomu hunentenka, knare zantfa hu'nea golireti tro hu'naza kini fetori anuntera antani nentane. 4 Kini nemo'ma kantahigeno za'zate kasefa hu'na manisanuema higenka, Kagra hu izo hunka asimura neminka, kna'a eri zaza hankeno mani vava nehie. 5 Kagra kini nera aza hankeno, ha' vahe'a hara huzmagaterege'za agrira ragia ami'haze. Kagraka'a ra agima eri'zane hanavenena ami'hane. 6 Tamagerfa hunka mevava asomura hunentenka, tavaonkare avrentankeno muse huno Kagrane nemanie. 7 E'ina hu'negu kini ne'mo'a, Ra Anumzamofonku antahi amuhara nehuno, Marerisa Anumzamofona vagaore avesizanku nentahino, antria nosuno oti hankavetigahie. 8 Ra Anumzamoka hankavenentakema hu'nea tamaga kaziga kzanteti ha' vaheka'a hara hunezmantenka, kagri'ma zamavesrama hunegantaza ha' vaheka'a zamazeri haviza hugahane. 9 Kagrama efore'ma hanana knazupa, kagri ha' vahera Kagri tevenefake tevemo teno eri fanane hugahie. Ra Anumzamoka tusi krimpa ahenezmantenka tevefi zamahe

fanene hugahane. Ana nehanigeno Anumzamofo tevemo'a ana vahera teno eri fanane hugahie. **10** Ana vahepintima fore hu anante anante'ma hu'za ama mopafima mani'naza vahera, ama mopafintira zamahe vagaresnanke'za, ama mopafina omanigahaze. **11** Kagrira ana vahe'mo'za kazeri haviza hunaku kea anaki'naze. Hianagi ana kezamimo'a, amne zankna hugahie. **12** Na'ankure Kagra keveka'a atifima erintenka zamahenaku'ma eri karisnanke'za, koro atre'za fregahaze. **13** Ra Anumzamoka kagri hankavegu kagia ahentesga nehune. Ana nehuta kagri hihamugu zagamera huta kagia ahentesga nehune.

22 Anumzanimoke Anumzanimoke, na'a higenka kamefira hunenamine? Nazama huoguma kragima nerugenka, nahigenka naza osu afetera nemanine? (Matiu 27:46, Maki 15:34)
2 Anumzanimoka kagritega manigasa osuna mika knafina zagine haninena kagritega zavi krafagea nehuanagi, kagra antahi nonamine. **3** Ana hu'neanagi kagra ruotage hu'nana Anumzankinka kini trakare mani'hanke'za Israeli vahe'mo'za kagia erihentesga neheze. **4** Korapara tagri tagehe'za Kagrite zamentintima hazagenka, zamagu'vazinka ete zamavare'nane. **5** Kagritega zavi krafa hazagenka nentahinka, zamagu'vazi'nane. Ana nehanke'za kagrite zamentintia nehu'za zamagazegura osu'naze. **6** Hianagi nagra vaheknara osu'na hagirfagna vahe mani'noanki'za, maka kea nenasu'za zamefi hunenamize. **7** Maka vahe'mo'zama nenage'za, ki'za zokago ke hunenante'za, zamagefu'na hakana hunenami'za zamagena neru'za, **8** zamagra amanage hu'za nehaze, Ra Anumzamofonte amuhara nehuno amentintia nehianki, atrenkeno Ra Anumzamo aguravazino, Agra aza hino hu'za nehaze. (Matiu 27:39, 43. Maki 15:29. Luku 23:35) **9** Ana hu'neanagi kagrake'za naza

hanke'na antanimofo arimpafintira so'e hu'na atirami'noe.
Ana nehunka osi'ma manine'na antanimofo amima nenoa
knafina naza hankena namentintia kagritera hu'noe. 10
Antanimo'ma kasenante'nea knareti'ma eno menima ama
knare'ma egenka, kagra kegava hunenantenka, kagra nagri
Anumza mani'hane. 11 Nagrira natrenka afetera omanio,
na'ankure knazamo'a tavaonte me'neankino, mago vahe'mo'e
huno naza hugara osu'ne. 12 Rama'a ha' vahe'mo'za ve
bulimakao afu'mo'za nehzaza hu'za manikagi nante'naze.
Ana vahe'mokizmi hankavemo'a Basani kazigama nemaniza
ve bulimakao afutamimofo hankavezmimo'ma nehiaza huza
mani kaginante'naze. 13 Nagri ha' vahe'mo'za laionimo agira
aka huno mago'a zagagafa aheno nenaku krafa nehuno
rotago nehiaza hu'za, nahenaku narotago nehaze. 14 Tima
eri tagi atregeno'ma hiaza huno hankavenimo'a omanegeno,
zaferinanimo'a avazu hu'ne. Ana higeno tumoni'amo'a kragefe
masavemo nehiaza huno nagu'afina ze'ze huno pakepake hu'ne.
15 Zagere ante hagege hu'nea mopa kavomo tako hiankna
huno hankavenimo'a omnegeno, nagefunamo'a navagu'nafare
marerino antrako hu'ne. Ana higenka Anumzamoka kagra frio
hunka natranke'na kugusopafina mase'noe. 16 Kramo hiaza
hu'za ha' vahe'nimo'za mani kanegizageno kefo vahe'mo'za
navazagi kagi'naze. Nazampine, nagiafinena rerapone'naze. 17
Ana hazagena ana maka zaferinani'a hampri'na ke'noe. Hagi ha'
vahe'nimo'za uruha nenage'za zamagu muse nehu'za orevumi
arevumi hu'naze. 18 Ana nehu'za ana vahe'mo'za nagri kukena
refko hu'za eri zamente hu'za ener'i'za, nagri kukena erinaku
satu zokago re'naze. (Matiu 27:35. Maki 15:24. Luku 23:34. Jon
19:24.) 19 Hianagi kagra Ra Anumzamoka nagrira natrenka

afetera omanio. Na'ankure kagra nagri hanave mani'nananki
ame hunka enka eme naza huo. **20** Nagu'vazinka naza
huge'za vahe'mo'za kazintetira nahe ofriho. Kagra naza huge'za,
knare'ma hu'na mani'nofintira kragna vahe'mo'za nahe ofriho.
21 Laionimo'ma naheno nezama nehfintira naza nehunka, afi
bulimakao afumo'ma pazivema nare'zama nefintira naza hunka
nagu'vazio. **22** Nafu nagnahe'mokizmia Kagri kagia huama hu'na
nezamasami'na, atruma hu'za mono'ma hanaza vahe amu'nompi
oti'na kagia ahentesga hugahue. (Hibrus 2:12) **23** Hagi izagato Ra
Anumzamofonku'ma koro'ma nehanamota, Agri agia ahentesga
hiho. Ana maka Jekopu agehe'mota Agri agi'a ahentesga
huta monora huntaho. Israeli agehe'mota Ra Anumzamofonku
koro hunenteta, Agri agorga maniho. **24** Iza'zo zamatafima
mani'ne'za zamagra'ama zamazama huga'ma nosaza vahera, Ra
Anumzamo'a amefira hunozamie. Ana nehuno zamagritera ke
amnea huno frara nokianki, iza'o aza hinogu'ma nunamuma huno
zavi krafama huno antahigea vahera, nunamu'a antahimino aza
nehie. **25** Hanki Ra Anumzamoka kagri vahe'mo'zama mono'ma
hunaku'ma eme atru'ma hanafina, Kagra muse zanka'a nagu'afina
ante avite'nanke'na kagri kagia ahentesga hugahue. Kagriku'ma
koroma nehaza vahe zamavufi, ko'ma huvempama hu'na
hugahuema hu'na hu'noa zantamina ana maka huvagaregahue.
26 Zamunte'ma omane vahe'mo'za ne'zana nezamu hugahaze.
Ra Anumzamofonku'ma nehakesaza vahe'mo'za, Agri agia
ahentesga hugahaze. Anama hanaza vahera Anumzamo'a
vagaore museza antezmantek'e'za, musena hu'za vugahaze.
27 Ama mopafima maka kazigama mani'naza vahe'mo'za Ra
Anumzamoka kagrira antahi negami'za rukrahe hu'za kagritega
egahaze. Ana nehanage'za ama mopafima mani'naza maka

vahe'mo'za nagatenofite hu'za Kagri kagiafi zamarena eme
re'za monora hugantegahaze. **28** Na'ankure Ra Anumzamo'a
Agra'a kinia manino, maka ama mopafi vahera kegava hu'ne. **29**
Maka feno vahe'mo'za, ne'zana nene'za Ra Anumzamofona
monora huntegahaze. Ana nehanage'za ana zanke hu'za frisaza
vahe'ma mani'naza vahe'mo'za e'za, Ra Anumzamofo avuga
zamarena eme re'za monora huntegahaze. **30** Henkama fore'ma
hu'za mani'zama vanaza vahe'mo'za Ra Anumzamoka kagri
eri'zana eri'za nevanage'za, mofavretimo'za kaguvazama eri
fore'ma hu'nana zamofo agenkea antahigahaze. **31** Hagi ana
fatgo avu'avazama hu'nea zana nezmarera rimpafima mani'naza
mofavre nagamokizmia nezamasamisnage'za, maka'zama eri
fore'ma hu'nea zamofo agenkea antahigahaze.

23 Ra Anumzamo'a kva vaheni'a mani'neanki'na, mago zankura
atupara osugahue. **2** Ana hu'neankino afovage huno tretre'ma
hu'nea trazampi nantege'na mani fru nehue. Ana nehuno
kaza osu tintega navareno vige'na, tina ne'noe. **3** Agra
hanaveni'a ete eri kasefa nehuno, Agra'a agigu nentahino
navareno fatgo avu'avazamofo kantera nevie. **4** Ana nehu'na
knazamo'ma rehanima hige'na, hanimpi neviankna hugahuanagi,
anankna zamo'ma eme nazeri havizama hu'zankura korora
osugahue. Na'ankure Ra Anumzamoka sipisipi kva vahe'mo'zama
e'nerizankna azompaka'ane, sipisipima runeharizankna knonka'a
eri'enka nagrane mani'nanke'na ana zama negogeno'a,
narimpamo'fru nehie. **5** Ha' vahe'nimofo zamavuga, ra
ne'zana retro hunenantane. Ana nehunka nasenifina masave
taginka fre nenantenka, huhampri nantankeno, kapufinti'ma
avite'noma herafiramiaza huno musezamo'a nagu'afintira aviteno
varehineramie. **6** Tamagerfa huno Ra Anumzamofo knare

avu'ava zamo'ene agri avesi'zamo'a ofri'nama kasefa hu'na ama
mopafima manisua kna'afina, namage navararino vano hugahie.
Ana nehanige'na Ra Anumzamofo mono nompi maka zupa
manivava hugahue.

24 Ama mopa Ra Anumzamofo suza megeno, ama mopafima
maka'zama me'nea zantamimo'a agri zanke megeno, maka
vahe'mo'zanena agri vaheke mani'naze. 2 Na'ankure agra
ama mopamofo tra'ama amefenkame tami'nea hagerimofo
agofetu tro hunenteno, timofo agofetu mopa tro hunte'ne. 3
Ina vahe'mo Ra Anumzamofo agonafina marerigahie? Ina
vahe'mo Ra Anumzamofo ruotage mono nompina ome otigahie?
4 Hagi agu'amo'ene azamo'enema agru nehanigeno, havi
anumzante'ma mono'ma hunonteno havigema nosania vhemo
anampina vugahie. 5 E'inahu vahe'mo Ra Anumzamofontegatira
asomura erigahie. Anumzamo'a agu'vazino nevreno, fatgo vahe
mani'ne huno huntiegahie. 6 E'inahu vahe'mo Anumzamofonkura
nehakeno monora hunenteno, Jekopu Anumzamofo tvaontera
urava'o nehie. 7 Kuma kahantamimota anagita ru hagro
nehinkeno, korapa'ma me'naza kahamota anagita ru hagaro
nehinkeno, hankave'ane kini ne'mo'a efreno. 8 Hagi ana
hankave kinia iza'e? E'i agra Ra Anumzana hihamu'ane
hankanave Anumzankino, Agra hankavetino hara hugaterega
Anumza mani'ne. 9 Kuma kahamota anagita ruhagro hiho,
ana nehanageta korapa kahamota, anagita ru hagaro hiho.
Ana nehinkeno hankave'ane kini ne'mo'a efreno. 10 Hagi ana
hankave kinia iza'e? Ra Anumzana hankavenentake Anumzamo
agrake ugagota kinia mani'ne.

25 Ra Anumzamoka kagrite nagu namena eri'na e'na ama
nunamuna nehue. 2 Kagra nagri Anumza mani'nanke'na, kagrite

namentintia nehue. Kagra natrege'ha nagazegura osaneno. Hanki ha' vaheni'a zamatrege'za, hara hu nagate'nere'za musena osho. 3 Kagrite'ma amuha nehu'za zamentintima nehaza vhera zmatresnanke'za, zamagazegura osugahaze. Hianagi kagri'ma ha'ma renegantaza vahe'mo'za, osuga zamavu zamava'ma hu'naza zanku zamagesa nentahi'za zamagazegura hugahaze. 4 Ra Anumzamoka knare kavukva zana naveri nehunka, Kagri'ma kavaririnua kana rempi hunamio. 5 Tamage nanekeka'afi kegava hunka navrenka nevunka, anankema amage'ma antesnua zana rempi hunamio. Na'ankure kagra nagri Anumza mani'enka, nagu'vazinka ete nenavrane. Ana nehanku maka knafina Kagrama nazama hananku, amuhara nehue. 6 Ra Anumzamoka kasunku zanku'ene vagaore kavesi zankura kageraokanio. Na'ankure ana kavukva zana korapa knareti hume enka, meninena ana kavukvara nehane. 7 Ra Anumzamoka, ko'ma mofavrema mani'enema hu'noa kumi'ene kefo avu'ava zani'a, vagaore kavesizanku kagesa nentahinka kumini'a atrenanto. Na'ankure Ra Anumzana Kagra kasunku Anumza mani'nane. 8 Ra Anumzamo'a knare hu'neno fatgo hu'neankino, kumi'ma nehaza vhera rempi huzamige'za, agri avesi'zana amage nentaze. 9 Zamavufgama anteramiza maniza vhera, fatgo avu'ava huno kegava huzmanteno zamavareno nevuno, Agra'a avu'ava zana rempi hunezamie. 10 Ra Anumzamofo kasegene trakenema amage'ma nentaza vhera, agra vagaore avesi zanteti zamavesi nezamanteno, hugahue huno'ma huzmante'nea ke'are oti'neno anaza nehia Anumza mani'ne. 11 Ra Anumzamoka, nagri kumira rama'a me'neanagi kagri kagimofo knare zanku kagesa nentahinka, muse hugantoanki kumini'a eri atrenanto. 12 Iza'o Ra Anumzamofonku'ma koro'ma hunte'nesnia vhera, Agra'a

huhampri'nesia kante vuo huno huntenigeno vugahie. **13** Ana vahe'mo'za knare nomani'zampi nemanisnage'za, zamagrama kase zamantesnaza vahe'mo'za ama mopa erisanti hare'za so'e hu'za manigahaze. **14** Ra Anumzamo'a agriku'ma koro nehu'za, agri agoragama nemaniza vhahera, zamatrege'za agri rone'a nemanizageno, oku'a me'nea kasege'a eri ama huno nezamasamie. **15** Maka zupa nazama hanigu Ra Anumzamofonteke navua nentoe. Na'ankure nagri'ma nazeri traka'ma hunaku'ma hania kukompintira nazeri atregahie. **16** Ra Anumzamoka rukrahe hunka nenagenka, kasunkura hunanto. Na'ankure nasuzampi mani'noe. **17** Nagri nagu'afima me'nea knazamo'a ome ra huno nevie. Ana knafima manine'na antahintahi hakarema nehua zampintira, katufenka navre atro. **18** Knazamo nazeri havizama nehige'na, narimpa knafima mani'noa zana nenagenka, maka kumini'a eri atrenanto. **19** Nagri ha' vhahera rama'a efore nehu'za, nagri'ma ha'ma renenante'za zamavesrama hunantaza zana kagra ko. **20** Kagra nagu'nevazinka kegava hunka navrenka vuo. Natrege'za nazeri nagaze osiho. Na'ankure Kagripi e'na eme franekue. **21** Fatgo avu'avazamo'ene, mani fatgoma huno mani avu'azamo kegava hunantegahie. Na'ankure nagra nazama hanankura kagriku amuhara nehue. **22** Anumzamoka maka Israeli vahe'ma mani'naza kna zampintira kasunku huzmantenka ete zamagu'vazinka zamavro.

26 Ra Anumzamoka nagrira nenagenka fatgo vahe mani'nane hunka huo. Na'ankure nomaniza'nifina fatgo navu'nav'a'za hu'na e'noe. Ana nehu'na rukrahe osu hankaveti'na kagrite namentintia hu'noe. **2** Ra Anumzamoka nagrira renahenka nenagenka, nagu'ane antahintahi zani'a rezaganenka ko. **3** Na'ankure vagaore kavesi zamo'a navuga me'nege'na nege'na, maka zupa tamage

nagu'areti hu'na kamagera ante vava nehue. 4 Nagra havigema
nehaza vahe'enena vano nosu'na, tavre vahe'mofo amu'nompina
nomanue. 5 Havi zamavu zamava'ma nehaza vahe'mo'zama
atruma hazza atrugura navesra hunezmante'na, havi zamavu
zamava'ma nehaza vahe'ma manizafina omanigahue. 6 Ra
Anumzamoka nagri'ma hazenkeni'a omane'ne hu'na kaveri'ma
hanuana timpi nazana sese nehu'na, Kresramanama vu itakarera
neoe. 7 Ana nehu'na ranke hu'na muse zagamera hu'na
Kagri kagia ahentesga nehu'na, mika knare'nare kagu'vazama
hu'nana zankura, huama hu'na vahera zamasamigahue. 8 Ra
Anumzamoka kagrama mani'nankeno, kagri masa zamo'ma
me'nea mono nonka'agura navesi navesi nehie. 9 Hagi kumi'ma
nehaza vahe'ma zamazeri havizama hanampina, nagrira nazeri
haviza osuo. Ana nehunka vahe'ma zamahe'zama korama eri tagi
netraza vahe'ma zamahe frisnampina, nahe ofrio. 10 Ana vahe
zamazampina kefo avu'avazamo avinetegeno, tamaga kaziga
zamazampina zagore'ma masave hu'za mago'aza eri'zamo
avite'ne. 11 Hianagi nagrani'a fatgo navu'nav a zanke nehugu,
kasunku hunantenka ete navro. 12 Nagra agupo hu'nea mopare
oti'noanki'na, kagri vahe kerfamo'zama atruma hanafina, kagri
kagia ahentesga hugahue.

27 Ra Anumzamo'a nagri tavi mani'neno, nagu'vazi ne'
mani'neankina, nagra na'anku korora hugahue? Ra Anumzamo'a
nagrira hankave vihuni'a mani'neanki'na, na'anku nagra
nahirahikura hugahue? 2 Hanki havi avu'ava zama nehaza
vahe'mo'zama nazeri haviza hunaku erava'o nehanageno, ha'
vahe'nimo'za nahenaku egahazanagi, ana vahe'mo'za traka hu'za
masegahaze. 3 Rama'a sondia vahe kerfamo'za nahenaku kafo
eme ante'za navazagi kagigahazanagi, nagra korora osugahue.

Ha' vahenimo'za hara agafa hu'za eme hunantegahazanagi, Ra Anumzamofonku amuhara hugahue. 4 Ra Anumzamofona mago zanku antahigesue, Knare nagrira natresanigena kasefa'ma hu'nama manisnua kna'afina, Agri nompina manivava nehu'na, knare avu'ava'a nege'na, musena hunente'na Agri mono nompi mani'nena kama naverima hanigura kegahue. 5 Hanki hazenke zama esania knafina, Agra'a navre franekino, Agra'a seli mono nompi navre frakigahie. Ana nehuno navresga huno onagamu'a have agofetu nantesige'na knare hu'na manigahue. 6 Anama hanige'na nagri'ma nazeri kagi'naza ha' vaheni'a naza hanige'na hara huzmagetenerena, ranke hu'na musenkase nehu'na, Ra Anumzamofo mono nompina ofa kresramna vugahue. Ana nehu'na zavena ahe'na zagamera Ra Anumzamofontega hugahue. 7 Ra Anumzamoka naza huogu'ma kagritegama nunamuma nehanugenka, kasunku hunantenka nunamuni'a antahinamio. 8 Nagu'amo'a agritega nunamu hunka agriku hako huno hige'na, nagra Ra Anumzamokarega nunamuna nehue. 9 Ra Anumzamoka kamefira hunaminka kavugosa rukrahera nehunka, eri'za vahekamo'na krimpa aheonanto. Na'ankure kagra ko'ma nagu'vazinka e'nana Anumza mani'nananki, kamefira hunaminka onatrenka, nagu'vazinka nazahuo. 10 Nenfa'ene nenrera'enena zanamefira hunamigaha'anagi, Ra Anumzamo'a navareno kegava hunantegahie. 11 Ra Anumzamoka Kagra'a kavukvara rempi hunamio. Ha' vaheni'amo'za kafonte'za mani'nazanki, kegava hunantenka navrenka knare huno fatgo hu'nea kantera vuo. 12 Nagrira natrege'na ha' vahe'nimofo zamazampina va'nennenkeno zamagri'ma zamavesi'niazza hu'za nazeri havizana osiho. Na'ankure ana vahe'mo'za nagrira havige hunante'za e'za nazeri koro nehaze. 13 Tamagerfa hu'na namentintima huana,

henka'a Ra Anumzamofo knare'zana, nagrama mani'nama vanua knafina kegahue. 14 Ra Anumzamofonku avega antenka mani'nenga, oti hankavetinenka atregeno kagu'amo'a hankave enerisnigenka, Ra Anumzamo'ma kazama hanigu akohenka mani'nenga aveganto.

28 Ra Anumzamoka nagri fraki hankave haveni'a mani'nanku, kagritega kezanetuanki, kezankeni'a antahinamio. Na'ankure nagri kezankere'ma nonama osnanke'na, nagra vahe'mo'zama fri'za nevaza kumatega fri'na vugahue. 2 Nagra Ruotage'ma hu'nea mono nonka'ama me'nea kaziga nazana erisga hu'na naza huogu nunamuna nehuanki, kezankeni'a antahinamio. 3 Kefo zamavuzmavama nehu'za, havizama nehu'za tava'o zamire'ma nemani'za vahe'enema zamagiteti haganentake naneke nehazanagi, zamarimpafina havi avu'avamo'ma avitenege'zama havigema nehaza vahe'enena nazeri fenkamua otro. 4 Havi zamavu' zmava'ma nehu'za, kumimofo eri'zama eri'naza vahera, havi zamavu zmava'ma nehu'za kumi'ma hu'naza avamente antenka, mizana zamitere hunka zamazeri havizana huo. 5 Ana Ra Anumzamofo eri'zanku'ene, Ra Anumzamo'ma azampinti'ma tro'ma hu'nea zantaminkura antahi amne nehaze. Ana hu'nazankino zamazeri havizantfa hutresnige'za, mago'enena oti'za so'ea hu'za omanigahaze. 6 Ra Anumzamofona agi'a ahentesga hugahue. Na'ankure kasunku hunanto hu'nama kezatugeno'a, kezanke'ni'a antahinami'ne. 7 Ra Anumzamo'a hankveni'ane, hankoni'ane mani'ne. Ana hu'negeno nagu'amo'a agripi me'nege'na namentintia nehugen, agra naza nehie. Ana nehigeno nagu'amo'a tusi muse nehianki'na, muse zagame nehu'na susu huntegahue. 8 Ra Anumzamo'a vea kevu'amofo hankavea agra'a nezmino, masavema freno

huhamprinte'nea kini ne'mo'ma fra'ma nekino, agu'ma vazisnia
kumara agrake mani'ne. 9 Ra Anumzamoka nagri vahere
nehunka, fenozama hiaza hunka'ma erisinte'ma hare'nana
vahera asomu hunezmanenka, zamaza huo. Ana nehunka
sipisipi kva vahe'mo'ma nehiaza hunka, maka knafina kazampi
zamavarentenka kegava huzmante vava hunka vu.

29 Monafima nemaniza maka ankeromota Ra Anumzamofo
agia ahentesga hunenteta, agri agigu'ene hankave'agu'enena
husga hunenteta muse huntaho. 2 Ra Anumzamofoma so'e
zantfama hu'nea agia ahentesga nehuta, ruotage'ma huno
hankave nentake'ma hu'nea Anumzana monora huntaho.
3 Ra Anumzamofo agerumo'a hagerimofo agofetu'ma vuno
eno nehigeno, hankavenentake Ra Anumzamofo ageru'mo'a
hagerimofo agofetura monagema hiaza huno runagraseno vuno
eno nehie. 4 Ra Anumzamofo agerumo'a hankavenentake higeno,
konariri'amo'a avite'ne. 5 Hagi Ra Anumzamofo agerumo'a, sida
zafaramina runagaza penetreno, Ra Anumzamofo Lebanononi
kokampima me'nea Sida zafaramina, ru futagi atre'ne. 6 Ana
nehuno Lebanononi agonamofona higeno bulimakao anenta'mo'ma
hiaza huno, takaure takaure nehigeno, Hemoni agonamofona
higeno, afi agaho bulimakao afumo'ma hiaza huno takaunere. 7
Ra Anumzamofo agerumo'a kopsi'namo'ma hiaza huno rumarave
marave nehigeno tevenefa rukru nehie. 8 Ra Anumzamofo
agerumo'a hagege koka eri kanage nehigeno, Ra Anumzamofo
agerumo'a, Kadesima me'nea ka'ma koka eri tore nehie. 9
Ra Anumzamofo ageru'ma nerigeno'a, dia afu'mo'za anopa
anenta nentageno, zafa ani'namo'za harari hu'za mopafinke
eneramize. Ana nehazage'za agri mono nompima mani'naza
vahe'mo'za hu'za, Anumzamofo hankavenentake hu'ne hu'za agia

ahentesga nehaze. 10 Ra Anumzamo'a kini tra'are mani'neno, ranra hagerintamina kegava hu'ne. Ana hu'neankino agrake kinia mani'neno kegava hu vava hugahie. 11 Ra Anumzamo'a agra vahe'a hankavea nezamino, rimpa fruzanteti asomura huzmantesie.

30 Ra Anumzamoka kagra natranke'na fri vahe kumapina mani'noge'za nagri ha' vahe'mo'za ra zamagia e'neri'za nagefenkami otrazanki, kagra anampintira navre atirami'nanku, kagri kagia ahentesga hu'na rankagia kamigahue. 2 Ra Anumzana nagri Anumzamoka, kagrama naza huogu'ma nunamuma hugenka, kagra nazeri kanamr40 'nane. 3 Ra Anumzamoka nagra fri'na matipi uramiza hu'noanagi, anampinti navre atirami'nane. Ana nehunka nazeri kasefa hanke'na, fri'na fri vahe kumapina uorami'na kasefa hu'na mani'noe. (Sheol h7585)

4 Anumzamofo amage'ma nentza vahe'mota zagame huta Ra Anumzamofona husga hunenteta, ruotage'ma hu'nea zanku agia aheta humuse hunteho. 5 Na'ankure Ra Anumzamofo arimpa ahe'zamo'a zazatera meno ovugahie. Hianagi agri knare avu'avazamo'a, kasefa'ma huta manisuna kna'afina mevava huno vugahie. Hanima e'nigeta kenagera zavira ategahunanagi, nanterama ko'manetigeta musenkase hugahune. 6 Hagi nagra maka'zama ante'na knare'ma hu'nama mani'noa kna'afima nagesama antahi'noana, mago'zamo'a nagritera eno nazeri kazara osugahie hu'na antahi'noe. 7 Ra Anumzamoka kagra knare kavukva hunantenka nazeri hankavetinke'na agonamo'ma oti hankavetiazza hu'na oti hankaveti'noe. Hianagi kagrama kavugosama rukrahe hunka kamefi'ma hunaminke'na, nagra koro hu'noe. 8 E'ina hu'negu Ra Anumzamoka naza huogu kagritega krafage nehu'na, kasunku'ma hunante'naku nunamuna nehue. 9

Hagi nagrama fri'na fri vahe kumapima uramina kasrinuana, iza
zagamera huno Ra Anumzamoka'ma, knare kavukva'ma nehana
zankura kagia ahentesga nehuno, musena hugantegahie?

10 Ra Anumzamoka nagrama nehuankea antahi'nenaminka,
kasunkuma hunantenka naza huoguma nunamuma nehuana
antahinaminka naza huo. **11** Zavi'ma netoa zampintira nazeri
muse hanke'na musena hu'na avo nehagoe. Ana nehunka
nasunku kukenama hu'noa zana hate netrenka, kukenama hiaza
hunka musezana eri hankre nantanke'na musenkase nehue. **12**
E'ina hu'negu nagra fruhu'na omanigahuanki, nagu'areti hu'na
Ra Anumzana nagri Anumzamoka kagritega zagamera hu'na,
maka zupa susu hugante vava hugahue.

31 Ra Anumzamoka kagripi franekuanki natrege'za magore
hu'za nazeri nagazea osiho. Hanki fatgo kavukva zampinti
nagu'veazio. **2** Kagesa antenka nunamuni'a nentahinka, ame
hunka nagu'veazio. Kagra fraki haveni'ane, hankave vihuni'agna
hunka mani'nananki'ha, anampi fraki'na nagura vazigahue. **3** Ra
Anumzamoka Kagra fraki haveni'ane, hankave vihuni'anena
mani'nane. Kagri kagimo'ma knare haniazanku nentahinka
nazeri fatgo hunka kegava hunanto. **4** Ha' vahe'nimo'zama
nahenaku'ma krifuma anagi ante'nazafintira navare atiraminka
nagu'veazio. Na'ankure kagra nagri fraki kuman'i'a mani'nane. **5**
Kagri kazampi avamuni'a antoanki, Ra Anumzamoka nagu'veazio,
na'ankure Kagra tamagege hu' Anumza mani'nane. **6** Kaza
osu havi anumzante'ma mono'ma hunentaza vahera, tusi
navresra hunezmantoe. Hianagi nagra Ra Anumzamokare
namentintia nehu'na antahinegamue. **7** Nagra Ra Anumzamoka
vagaore kavesizanka'agura musena hugahue. Na'ankure kagra
knazani'a negenka natama eri'na vuazana antahinka kenka

hu'nane. 8 Hagi kagra ha' vahe'ni'amokizmi zamazampina nevre onte'nananki, nagu'vazinke'na ra mopafi knare hu'na mani'noe. 9 Hagi Ra Anumzamoka kasunku hunanto. Na'ankure nagra knazampima mani'ne'na zavi'ma atoa zamo'a navumo'a pro nehigeno, navufgamo'enena ome haviza hie. 10 Maka kna nasuzampi nemani'na, knazampima mani'na vuazamo, higeno kafuni'amo'a atupa nehie. Kumi avu'avazampi mani'na vuazamo higeno hankaveni'a omnegeno, zaferinani'a omne amne nehie. 11 Ha' vahe'nimo'za zamavaresra hunenantazageno, tava'onte'ma nemaniza vahe'mo'za nagefenkami netrazageno, ronenimo'zama kumapima nenage'za koro nefraze. 12 Fri'nea vahe'ma zamagekaniaza hu'za zamagekani nentazage'na nagra tako hu'nea mopa kavogna hu'noe. 13 Rama'a vahe'mo'za huhaviza hunentaza naneke nentahi'na tusi koro hu'noe. Hagi zamagra nahe frinaku oku'a atru hu'za kea anaki'naze. 14 Hianagi Ra Anumzamoka kagrite namentintia nehu'na nagri Anumza kagra mani'nane hu'na nehue. 15 Nasimu'mo'a Kagri kazampi me'neanki, ha' vahe'niamo'zama nahenaku'ma nenavaririza vahe'mokizmi zamazampintira nagu'vazio. 16 Atregeno kavugosafinti masazamo'a eri'za vaheka'arera remasa nehina, huvempama hunka huhagerafinana keka'agu nentahinka kasunku hunantenka nzahuo. 17 Hanki Ra Anumzamoka kagripi nagra franekue. Hagi natrege'za ha' vahetmimo'za nazeri nagazea osiho. Fatgo kavu'kvaka'afinti nagu'vazio. Hagi kefo zamavu'zmava'ma nehaza vahera zamazeri zamagaze nehunka, zamagira ruhamunkige'za friza matipi maseho. (Sheol h7585) 18 Havigema nehaza zamagefu'na erirava nehenka, fatgo zmavuzmava'ma nehaza vahe'ma huhaviza nehu'za zamavufaga ra kema nehaza zamagira eriravaho. 19 Ra Anumzamoka

knare kavukvamo'a rankrerfa hu'neankinka, kagri'ma koro'ma
hugante'za kagoraga'ama nemaniza vahera rama'a zmasimu
ante vite'nezmantane. Hagi kagripima eme frakinaku'ma aza
vahera knare kavukva zana antevite nezmanenka asomura
hunezmantake'za maka vahe'mo'za nezamagaze. **20** Ha'
vahe'mo'zama zamahe'zama nehazagenka Ra Anumzamoka
zamazeri franekinka, zamagipinti'ma huhavizama nehazagenka
zamazeri fra'nekine. **21** Ra Anumzamofona ra agi erisga hanue.
Na'ankure ha' vahe'nimo'zama mani'noa rankumama avazagi
kagizageno'a, Agra vagaore avesizama'reti nagu'vazi'ne. **22**
Hagi antrima nehu'na amanage hu'noe, Ra Anumzana atre'na
nagra ogama afete e'noe hu'na hu'noe. Hianagi naza huogu'ma
krafagema huana antahinka naza hu'nane. **23** Anumzamofo
vahe'mota Ra Anumzamofona tamavesinteho. Na'ankure Ra
Anumzamo'a Agri'ma avariri fatgoma nehaza vahera hazenkema
erizankura kegava hunezmante'anagi, zamavufaga rama nehaza
vahera zamazeri havizantfa nehie. **24** Ra Anumzamofonte'ma
amuha'ma nehaza vahe'mota korora osu hankavetita maniho.

32 Kema ontahi avu'ava zama'ama Anumzamo'ma atrenenteno,
kumi'ama apasente'nia vahe'mo'a tusi muse hugahie. **2** Hagi Ra
Anumzamo'ma mago vahe'mofo kefo avu'avalama eritrenigeno,
vahe'ma revatga hu avu'avazamo'ma agripima omnennenia
vahe'mo'a muse hugahie. **3** Hagi kumini'ama huama'ma
osugeno'a, nagri navufgamo'ene zaferinamo'enena tusi nata
negrige'ha karagi ruvava nehue. **4** Na'ankure zagine haninen
knazana nagrite ante'hankeno, tusi kna nave'nesie. Hagi
zagemo'ma tima te hagege hiaza huno, hankavenimo'a hagege
nehie. **5** Ana'ma hutege'ha kumini'a refiote maka kagrittega huama
hu'noe. Ana nehu'na nagra anage hu'noe, Ra Anumzamofonte

nagra keontahi navu'nava zani'a huama hugenka, kumini'a
apase nantankeno mika kumi'ni'a vagare'ne. **6** E'ina hu'negu
atrege'za Kagri kamage'ma nentaza vahe'mo'za knama me'nesire
kagritega nunamuna hiho. Ana hanageno knazamo'ma tima
hageazama huno esia zamo'a zamazeri onakrino. **7** Kagra fraki
kuman'i'a mani'nanankinka, hazenke knafina nagu'nevazinke'na,
ana zankura zagame nehu'na tusi musenkase nehue. **8** Hagi
Ra Anumzamo'a huno, Nagra kegava hugante'nena rempi
hugamisugenka knare kantera vugahane. Nagra navunte'na
negage'na antahintahia kamigahue. **9** Hagi antahintahizmi omne
hosí afuro, miuri afu'ma aini atupa'ama zamagipi ante'neza nofi
rente'za zamavazu hazage'za zamavariri'za vazanknara osiho.
10 Kefo avu'ava'ma nehaza vahera, rama'a knazamo zamazeri
haviza nehanige'za zamasuzampi manigahaze. Hianagi Ra
Anumzamofona vagaore avesizamo'a Agrite'ma zamentintima
nehaza vahete megahie. **11** Fatgo avu'ava'ma nehaza vahe'mota
Ra Anumzamofonku muse nehinkeno, tamagu'amo'ma fatgoma
hu'nenia vahe'mota ranke huta zagamera huta agi'a erisga hiho.

33 Fatgo avu'ava'ma nehaza vahe'mota zagamera huta Ra
Anumzamofona musena huntaho. Na'ankure fatgo avu'ava'ma
nehia vahe'mo'ma Ra Anumzamofo agima erisgama haniana
knare hugahie. **2** Hapu zavena neheta zagamera huta Ra
Anumzamofona agia erisga nehuta, 10ni'a strini nofi'ma me'hea
zavenagu'ma laeriema nehaza zavena neheta zagamera huta
musena hiho. **3** Kasefa zagame huta agia erisga hiho. Knarezantfa
huta zavena neheta ranke huta agi'a erisga huta musena hiho. **4**
Na'ankure Ra Anumzamofonkea tamage naneke me'neankino,
nazano hugahuema hu'nea zantamina Agra ana maka nehie.
5 Ra Anumzamo'a fatgo avu'avazane, mago zanke'ma huno

maka zama refkohu avu'ava zanku'ene avenesigeno, ama
mopafina Agri vagaore avesizamo avite'ne. **6** Ra Anumzamo'a
ke higeno mona fore nehigeno, Agra ke higeno monafima
me'nea hanafitamine zagine ikanena fore hu'ne. **7** Agra, Ra
Anumzamo hagerina repapa higeno magokepina umareno moriri
huno marerigeno, tinkerifima tima afintearkna huno hagerina
magokepi renatinte'ne. **8** Maka ama mopafima mani'naza
vahe'mo'za Ra Anumzamofonku korora hunte'za agraga'a
maniho. Maka ama mopafi vahe'mo'za Agrira kesga hu'za
monora hunte'za agorga maniho. **9** Na'ankure Agra ke nehigeno
ama mopa fore hu'ne. Agra huno, efore huo huno higeno ama
mopamo'a efore hu'no me'ne. **10** Ama mopafi vahe'mo'zama e'ina
hugahune hu'zama antahintahima retro'ma hazahantahia
Ra Anumzamo'a zamahe savri nehuno, mika zama hugahune
hu'zama kema anakiza zana eri haviza nehie. **11** Hianagi Ra
Anumzamo'ma mago'zama hunaku'ma antahintahima retro'ma
hu'nenia zamo'a mevava huno vugahie. Hugahue huno'ma
hu'nenia zana Agra tamage huno fore'ma hu anante anante'ma
hanigeno manino vania vahete'enena meno vugahie. **12** Ra
Anumzanku'ma tagri Anumzane hu'zama hanaza vahe'mo'za
muse nehinkeno, Nagri fenozane huno'ma eri santimahare'nea
vahe'mo'za muse hiho. **13** Monafinkatira Ra Anumzamo'a kefenka
atrelo ama mopafima mani'naza vahera maka nezamagie
14 Agrama nemania kumapintira kefenka ateno mika ama
mopafima nemaniza vahera nezamage. **15** Agra vahe'mofo
tumora trohunte'neankino, maka zama hu'na zana antahino keno
nehie. **16** Hankavenentake sondia vahetmimo'za kini nera agura
ovazi'nageno, harafa sondia ne'mo'a agra'a hanave'aretira kini
nera agura ovazigahie **17** Hosi afu'mo'za naza hanage'na hara

agateregahue hunka amuhara osuo. Na'ankure hosi afu'mofo hankavemo'a kaza huno kagura ovazigahie. **18** Hianagi Ra Anumzamo'a Agriku'ma koro'ma hu'za agoraga'ama nemani'za, vagaore avesizama'mofonte'ma amuha'ma nehaza vahete avua anteno nege. **19** Agra frizampintira zamagu'nevazino agatonto knafina zamatrege'za ne'zankuranofrize. **20** Ra Anumzamofonku tagra avega anteta manineta amuhara nehunankino, Agrake'za hankotia mani'neankino, taza hugahie. **21** Agriku tagu'amo'a musena nehie, na'ankure tagra, Agri ruotge agifi tamentintia nehune. **22** Ra Anumzamoka kagripi amuha zantia me'neanki, vagaore kavesi'zanteti maka knafina kegava hunka refiteranto.

34 Maka kna nagra Ra Anumzamofona husga hunente'na, Agri agi'a hentesga huvava hugahue. **2** Nagra Ra Anumzamofonku musena nehu'na navufga rana hugahuanki'za, vahe'mo'zama zamazeri havizama nehaza vahe'mo'za nentahi'za muse hugahaze. **3** Enketa Ra Anumzamofo avu'avazama'a huama nehuta, agi'a husga huntamneno. **4** Ra Anumzamofontega nunamuna hugeno, nunamuni'a antahinamino koro'ma nehua zana eri amne hu'ne. **5** Ra Anumzamofontegama zamavuma antete'za nemaniza vahe'mokizmi zamavugosafina zamagaze zamo'a refi'otegahie. **6** Amunte omne ne'ma amama mani'nea ne'mo'a nunamu higeno, Ra Anumzamo'a antahimino ana maka knazama'afintira agu'vazi'ne. **7** Ra Anumzamofo ankeroma'amo'a Agri'ma koro'ma hunte'za agoraga'ama nemaniza vahera manigagino kegava hunezmanteno hazenke zampintira zamagu'nevazie. **8** Agra knare avu'ava nehia ne'mani'neanki Ra Anumzamofona rehenka ko, Agripinkama frakino manisia vahe'mo'a muse hugahie. **9** Anumzamofo amage'ma

nentaza vahe'mota Ra Anumzamofona koro hunteta agoraga'a maniho. Na'ankure Agri'ma koro'ma hunte'za agoraga'ama nemaniza vahe'mo'za mago zankura atupara nosaze. **10** Hankavenentake laionimo'a mago'a kna agakura hugahie. Hianagi Ra Anumzamofonte'ma amentintima himo'a, knare zantaminkura upara nosie. **11** Mofavrenimota nagrite eta eme antahiho. Ra Anumzamofoma koroma hunteno agoraga'ama mani'zana rempi huramigahue. **12** Izaga ofrinka zaza kna ama mopafina knare hunka manizankura kave'nesie? **13** E'ina hunaku'ma hanunka, kefo nanekene havi nanekema hu'zankura, kagira kegava huo. **14** Kefo kavukava'ma nehanazana atrenka knare kavukva huo. Arimpa fruma huno mani zankuke nehakenka, ana kavukavake huo. **15** Ra Anumzamo'a fatgo zamavu'zamavama nehaza vahete avua anteno kegava hunezmante. Agritegama krafagema hanageno'ma zamaza hanigu agesa anteteno nemanie. **16** Hianagi Ra Anumzamo'a kefo zamavu'zmava'ma nehaza vahera amefi hunezmino, ama mopafintira zamahe fanane hanige'za vahe'mo'za zamagesa ru'enena antahi ozamigahaze. **17** Fatgo zamavu'zmava'ma nehaza vahe'mo'zama Ra Anumzamofontegama krafagema nehazageno'a, Agra antahi nezmino maka hazenkefintira zamagu'nevazie. **18** Ranknazampima mani'naza vahera Ra Anumzamo'a tva'ozmire nemanino, vahe'mo'zama knazama zami'za zamagu'ama zamazeri havizama nehaza vahera, zamagu'nevazie. **19** Fatgo zamavu'zmava'ma nehaza vahe'mo'za rama'a hazenkefi ufretere hugahazanagi, Ra Anumzamo'a ana hazenkefintira zamaza huno zmagu'vazitere hugahie. **20** Na'ankure Ra Anumzamo'a fatgo avu'ava'ma nehia vahe'mofo zaferina kegava huntegahiankino mago zaferina'amo'a hara

ontagigahie. 21 Kefo avu'ava'ma nehia vahera agrama nehania kefo avu'ava zamo'a ahenefrisigeno, fatgo avu'ava zanku'ma avresrama nehania vahera, ana avu'ava'zantera nona huno knazana amigahie. 22 Hianagi Ra Anumzamo'a eri'za vahe'a agu'vazigahie. Hanki Ra Anumzamofompima frakisia vahe'mo'a hazenkefina uofregahie.

35 Ra Anumzamoka nagri'ma mago zamarimpama hunontaza vahera mago krimpa hunozmantenka, ha'ma renantaza vahera ha'rezmano. 2 Ha' kukenaka'a nehunka, hankoka'a erinka enka eme naza huo. 3 Navaririzama neaza vahera keveka'ane, karugru keveka'ane erisga hunka nezmahegena, kagu'vazigahue hunkama nehana nanekeka'agura antahineno. 4 Nahenaku'ma nenavaririza vahe'mokizmia zamatrege'za zamagazegu hiho. Nazeri haviza hunaku'ma antahintahima nehaza vahera zamazeri haviza huge'za zamagazegu hiho. 5 Ra Anumzamoka witi hona'ama hiaza hunka huharafu huzmatrege'za zahomo'ma hiaza hu'za Kagri ankero vahe'mo'za zamaretufe zamatreno. 6 Kama vanaza kana eri hanintiri nehunka, eri krarintege'za Ra Anumzamoka ankeromo'a zamarotago huno vino. 7 Nagra zamagrira zamazeri havizana osu'noanagi, zamagra karifu anaginte nante'naze. Nagra mago zana osu'noanagi zamagra nagri nazerinaku keri kafinte'naze. 8 E'na hu'negu atregezo zamazeri havizama huzamo'a antri hanazaza huno zamavatera ne-ena, nagri'ma nazerisie hu'zama anaginte'naza krifumo'a zamazerino. Nagri kerima kafinte'hazafi, zamagra'a tamaho. 9 E'na'ma hanage'na Ra Anumzamokagura tusi musenkase nehu'na, kagi'a erisaga hugahue, na'ankure Kagra naguranevazine. 10 Ra Anumzamoka ana maka nagu'areti hu'na kagia erisga hugahue. Ra Anumzamoka magore huno Kagrikna

anumzana omani'ne. Hagi zamagra'ama zamaza huga osu
vahe'mofo zantamine, zmunte omne vahe'mofo zantaminema
musufama neseza zamazeri havizama nehzana iza zamaza
hugahie. **11** Kezmifinti'ma vahe'ma zamazeri havizama
hu vahe'mo'za, havige hu'za keaga hunenantaze. Nagra
osu'noa hazenkegura kagra hazenke hu'nane hu'za havige
hunenantaze. **12** Knare navu'nava'ma huzmantoa zantera, havi
zamavuzmava zanu nona hunentaze. E'ina'ma haza zamo
higeno, nagu'amo'a tusi kna nehie. **13** Hianagi krima erizage'na
nasunku hunezmante'na, atafa kukena hu'na manine'na kavera
a'o hu'na ana nagamofona zamazama hananegura nunamuna
hunezmantoanagi, ana nunamuni'arera nona nosane. **14** Nagra
nagaku'ma hiaza hu'na zavira atenezmante'na, nenreranku'ma
hiaza hu'na nasunkura hu'na zavira atenezmantoe. **15** Hianagi
nagrama tanafa'ma hu'na mase'zama huge'za, muse nehu'za
eme naregagi'naze. Hagi antahina ke'na osu'noa vahe'mo'za
hara eme renenante'za huhaviza hunante vava nehaze.
16 Kefo avu'ava'ma nehaza vahe'mo'zama nehzaza hu'za
zamagra kiza zokagoke hunenante'za zamavera aninkreki
hu'naze. **17** Ra Anumzamoka hago zazate mago zana huonante
natranke'za amanara hu'za neaze. Hanki hankavematiza ha'ma
hunentazana naguvazio. Laionimo'ma hiaza hu'za nahe'zama
nehaza vahepintira nagu'vazio. **18** Ana'ma hananke'na rama'a
mono kevuma atruma hanafina kagia ahentesga nehu'na,
susu hunegante'na tusi'a vahekrfefama atruma hanafina nagra
zagamera hu'na kagia erisga hugahue. **19** Hagi atregeno
ha' vahe'nimo'za nagri'ma nazeri havizama nehaza zankura
musena osiho. Ana nehunka zamatrege'za zamavaresrama
hunenante'za amnezampima knama nemamiza vahe'mo'za

rezavumira nehu'za nagi'zana oreho. 20 Zamagra zamarimpa
fruma hu'za vahe'enema manisaza zankura keaga nosazanki,
knare hu'zama zamagra'a erizante'ma vanoma nehaza vahe'ma
zamahesaza keaga retro nehaze. 21 Zamagra zamagira
reaka hu'za amanage hu'za havigea hunentaze, kagriku'ma
tavuma anteta haketa vanoma nehunazana, meni tagri tavumo'a
kageno eri fore hie. 22 Ra Anumzamoka kagra ama ana
zana kenka antahinka hu'nananki, kea osura omanio. Ra
Anumzanimoka Kagra natrenka afetera akohenka uomanio. 23
Ra Anumzanimoka otio! Otinka nahorakenka hara huo. Kagra
Ra Anumzana nagri Anumza mani'nananki nagri kaziga antenka
naguravazio. 24 Ra Anumzana nagri Anumzamoka nagra mago
hazenkea osu'noanki, huama hunka zamasnio, na'ankure kagra
fatgo hunka refko nehana ne' mani'nane. Hagi zamatrege'za
hazenkefima unefrenuge'za ha' vahe'nimo'za nagi'zana oreho.
25 Zamatrege'za zamagu'afina hu'za agrikuma nehuna nera hago
azeri haviza hu'ne hu'za osiho. 26 Hazenkefima mani'noge'zama
musema nehu'za nagizama neraza vahera zamazeri haviza
huge'za zamagazegu hiho. Zamavufga rama nehaza vahera
zamazeri haviza huge'za, zamagazegu nehu'za zamagi omne
vahe maniho. 27 Hianagi nagri'ma nahomanekaza vahera
museza ante vitezmanege'za muse nehuza amanage hiho,
Ra Anumzana agra marerisa Anumza mani'neankino eri'za
vahe'amofona muse hunenteno asomura hunteno arimpa frua
nemie hu'za hiho. 28 Ana'ma hananke'na fatgo kavukvazana
huama nehu'na, maka kna zagamera hu'na kagi'a ahentesga
hugahue.

36 Kefo avu'ava'ma nehia vahe'mofona kumimo'a sumisumi
huno agu'afina nanekea nesmigeno, agra Anumzamofonkura

korora nosie. 2 Na'ankure agra avufga ra nehuno, agesama antahiana kefo navu'nava zama nehua zamo'a, amne zane huno nentahie. 3 Maka kema hiana fatgo osu, krunagege nehuno, antahintahima huno knare avu'ava'ma huzankura avresra nehie. 4 Hagi agra kenagera avura ovase mani'neno kumima hania antahintahi hugentahige nehie. Ana nehuno knare osu avu'ava zanke nehuno kefo avu'ava zampinti'ma atreno rukrahe'ma huno ezankura agesa nontahie. 5 Ra Anumzamoka vagaore kavesizamo'a monamo'ma hiaza huno rankrerfa higeno, hugahuema nehana zama amagema antenka hu' kavukva zamo'a hampona azeri agatereno onaga'a me'ne. 6 Fatgo kavukava zamo'a zaza huno ra agonagna higeno, fatgoma hunka refkoma hu' kavukva zamo'a ra hagerimo'ma amafenkame urami'ankna hu'ne. Ra Anumzamoka kagra zagagafane vahe'enena magozahu hunka kegava nehane. 7 Anumzamoka vagaore kavesizamo'a knare zanfta hu'ne. Maka vahe'mo'za kagri kagekonamofo turunapinka franekize. 8 Zamagra Kagri nompinti ne'zana nezamu nehazagenka, Kagri musezamo'a tinkna hu'neanki'za nene'za muse nehaze. 9 Na'ankure kagra asimu'ma erino mani tigampui mani'nenka, tagri tavi mani'nanketa negone. 10 Ra Anumzamoka, kagri'ma kage'za antahizama nehu'za kavesinegantaza vahera vagaore kavesi zanteti zamavesi nezmanterka, fatgo zamavu'zmava'ma nehaza vahera fatgo hunka refko huzmanto. 11 Atregeno zamavufaga rama nehaza vahe'mo'za nagofetura zamagare'za vano nosnageno, kefo avu'ava'ma nehaza vahe'mo'za natufe kantutete natufe kamatetera osiho. 12 Kefo avu'ava'ma nehaza vahe'mo'za traka nehazanki ko. Matevuno mopafi zamatrege'za vasene'za oti'zankura ana'ana nehazankiza ru'enena o'otigahaze.

37 Kefo avu'ava'ma nehaza vahekura antahintahi hakarea osuo. Hagi kefo avu'ava'ma nehia vahera keganunua osuo. 2 Na'ankure zamagra trazankna hu'za ame hu'za hagage huge, trazamofo amosre'agna hu'za ame hu'za frigahaze. 3 Hagi Ra Anumzamofonte tamentinti nehuta knare tamavutmava hih. Ama mopafina knare huta nemanita fatgo avu'ava'zama hu'zanku hankavetita eri'zana eriho. 4 Ra Anumzamofonku musena huntegeno kagu'amo'ma ave'manesia zana kамиno. 5 Maka zama hunaku'ma hanana zana Ra Anumzamofo azampi nentenka Agrite'ma kamentintima hanankeno'a, Agra amne anazana hugahie. 6 Agra fatgo kavu'kva zanka'a erinte ama hanigeno, nantera zagemo hanatino remsa hiankna nehanigeno, fatgoma hunka refkoma nehana kavukvara zamo'a ferusegeno zage renteankna hugahie. 7 Ra Anumzamofo avuga akohenka mani'negeno, nazano hunaku'ma haniazana, Agra'a hino. Hanki kefo zamavu'zmava'ma nehaza vahe'mo'zama rama'a fenoma ante'za knare'ma hanaza zankura kagesa nontahinka, kefo avu'ava'ma nehaza vahe'mo'zama kefo avu'ava'ma hanaza zankura antahintahi hakarea osuo. 8 Krimpagura osunka atregeno krimpama ahe'zamo'a evuneramina, ana zankura antahintahi hakarea osuo. Na'ankure e'i ana zamo'a kavreno hazenkefi ufregahie. 9 Hanki kefo zamavu'zmava'ma nehaza vahe'mo'za fanane hugahazanagi, Ra Anumzamofonku'ma amuhama hunemiza vahe'mo'za mopa erisanti haregahaze. 10 Hanki kefo zamavu'zmava'ma nehaza vahe'mo'za ame hu'za fanane hanagenka, anama mani'narega ome hakegahananagi, ozmagegosane. 11 Hianagi zamavufagama anterami'za nemaniza vahe'mo'za ana mopa erisanti hare'za musena hu'za nemani'za, maka zampina knare hu'za manigahaze. 12 Hagi

kefo zamavu'zmava'ma nehaza vahe'mo'za Anumzamofoma
amage'ma nentaza vahe' zmahenaku kea oku'a ananeki'za,
zamarimpa ahenezmante'za, zamavera aninkreki nehaze.

13 Hianagi Ra Anumzamo'a ana vahekura zamagiza nere.
Na'ankure zamagri'ma keagama huzmantesia knamo'a ne-
eankino, Agra antahino keno hu'ne. **14** Hanki zamunte
omane vahe'ene, vahe'ma havigema hu'za zamazeri havizama
nehaza vahe'ene, fatgo avu'ava'ma nehaza vahe'mokizmia, kefo
avu'ava'ma nehaza vahe'mo'za zamahe frinaku kazinknozmia
hefiza zamazampi eneri'za, kevea atifi erinte'za atia eri
krikraranepaze. **15** Hianagi zamagri'a bainati kazinknomo
tumozmi reragino zamaregahie. Ana nehanigeno ati zmimo'a
hantagigahie. **16** Fatgo avu'ava'ma nehuno osi'a feno
ante'zamo'a, kefo avu'ava zanteti'ma feno vahe'ma mani
nomani'zana agatere'ne. **17** Na'ankure kefo avu'ava'ma nehia
vahe'mofo hihamua eri amne nehie. Hianagi Ra Anumzamo'a
Agri amage'ma nentaza vahera kegava hunezmante. **18**
Hagi hazenkezmima omne vahera Ra Anumzamo'a kegava
hunezmantenige'za, mevavama hania zantamina erisanti
haregahaze. **19** Hanki havi knama esige'za ana vahe'mo'za
zamagra zamagakura nosu'za, agatonto knafina rama'a ne'za
ante'ne'za negahaze. **20** Hianagi kefo avu'ava'ma nehaza
vahe'mo'za frigahaze. Hanki Ra Anumzamofo ha' vahe'mo'za
traza amosre'agna hu'nazanki'za, kumo ome amne hiakna hu'za
fanane hugahaze. **21** Hagi kefo avu'ava'ma nehaza vahe'mo'za
zagoa kehu'za erite'za, ete ome nozamize. Hianagi fatgo
avu'ava'ma nehaza vahe'mo'za muse hu'za keonke zana vahera
nezamize. **22** Hagi Ra Anumzamo'ma asomu'ma hunezmantesia
vahe'mo'za mopa erisanti haregahazanagi, Ra Anumzamo'ma

kazusima huzmantesia vahe'mo'za frigahaze. **23** Fatgo zamavu'zmava'ma nehaza vahe'mo'zama vanoma nehzageno'a, Ra Anumzamo'a kegava hunezmaneno nomani'zazmigura musena nehie. **24** Zamagra tanafa hugahazanagi, trakara hu'za zamasenia reofragegahaze. Na'ankure Ra Anumzamo'a zmazante zamazerigahie. **25** Hanki mofavrereti'ma manime e'na menima ozafama emeroana, Ra Anumzamo'a fatgo avu'ava'ma nehie vahera amefira huomige, zamatregeno ana vahe'mofo mofavreramimo'za ne'zankura upara nehu'za memea hu'za vano osu'naze. **26** Hanki fatgo zamavu'zmava'ma nehaza vahe'mo'za muse nehu'za keonke'zana vahera nezamizageno, mofavrezmia asomura hunezmane. **27** Hanki kefo avu'ava zampinti'ma atrenka rukrahe hunka fatgo avu'ava zama hanunka, manivava hugahane. **28** Na'ankure Ra Anumzamo'a fatgoma huno refkoma hu'zanku ave'nesiankino, fatgo avu'ava'ma nehia vahera amefira huomigahie. Agra knare huno kegava huzmantenige'za knare hu'za manivava hugahaze. Hianagi kefo avu'ava'ma nehia vahe'mofo mofavreramina zamahefri hana hugahie. **29** Fatgo avu'ava'ma nehaza vahe'mo'za mopa erisanti hare'za manivava hugahaze. **30** Fatgo avu'ava'ma nehaza vahe'mokizmia, zmagipintira knare antahi'zana atineramigeno, knare avu'avazane kefo avu'avazanema keama'ma hu'zana rempi hunezmie. **31** Hagi Anumzamofo kasegemo zamagu'afina avite'neankino, hazaonkre Anumzamofona amage ante fatgo hugahaze. **32** Hagi kefo avu'ava'ma nehaza vahe'mo'za kafo ante'za mani'neza, fatgo avu'ava'ma nehaza vahe zamahe frinaku kankamunku nehakaze. **33** Hianagi Ra Anumzamo'a zamatrenige'za ana kefo avu'ava'ma nehaza vahe'mo'za hunaku'ma nehazazana osuge, fatgo avu'ava'ma

nehaza vahe'mo'zama keagare'ma oti'nageno'a, zamazahinke'za
keagafina zamazeri zamagate'oregahaze. **34** Ra Anumzamofonte
kamentintia nehunka, Agri avu'avaza'ma'a nevararigeno, rankagi
negamino mopa kamigahie. Hagi negesankeno kefo avu'ava'ma
nehaza vahe'mo'za haviza hugahaze. **35** Hagi vahe'ma ha'ma
renezmantaza vahe'mo'za, knare mopafima zafamo'ma afovage
huno hageno mareriankna hu'za knare nomani'za nemanizage'na
negoe. **36** Hianagi mago'a knama evutege'na, ana kefo
avu'ava'ene vahetmima nemanizare'ma ome koana, nomanizanki
ko fanane nehaze. Ana'ma hazage'na ana vahetminku'ma
hake'na vanoma huana nozamagoe. **37** Hagi tamage kege
nehu'za, fatgo avu'vazama nehu'za, zamarimpa fruma hu'za
nemaniza vahe'mokizmi naga'mo'za henka knare hugahaze. **38**
Hianagi kefo zamavu'zmava'ma nehaza vahera zamahe fanane
hanige'za, vahera zamagripintira fore hu'za ovugahaze. **39**
Hianagi Ra Anumzamo'a Agri'ma amage'ma nentaza vahera
zamagu'nevazino hazenke knafina kegava hunezmante. **40**
Ra Anumzamo'a fatgo avu'ava'zama nehaza vahera zamaza
nehuno, kefo avu'ava'ma nehaza vahe'mokizmi zamazampintira
zamagu'vazige'za so'e hu'za nemanize. Na'ankure zamagra
Agripinka fra'maki'za nemanizagu anara nehie.

38 Ra Anumzamoka krimpa ahenantenka kea onasuge,
karimpa ahenantenka knazana naminka nazeri fatgo hugera
osuo! **2** Keve ka'anura nahankeno nagu'a unefregenka, kazanura
reentrako hunka narehapanetine. **3** Krimpama ahenantana
zamo higena kria enerugen, kuminimo higeno zaferinanimo'a
natanegrie. **4** Na'ankure kumini'mo'a ome ra huno nazeri
agateregeno, kna'amo'a narerari nehie. **5** Nagri'a neginagi
navu'navazamo higeno hi'mnage namumo'a navufgarega tusiza

huno hantohanto nehie. **6** Hagi tusi nata negrige'na pripri hu'na
vano nehu'na, maka kna natagura nehu'na zavi krafa nehue.
7 Hagi namagenamo'a teve ha' nehuno, natanegrige'na kri
e'nerue. **8** Ana nehuno hankaveni'a omnege'na tusiza hu'na
havizantfa hue. Nagu'afinti'ma natamagria zamo hige'na kragira
neruna krafa nehue. **9** Ra Anumzamoka, nagri'ma navesi'a
zana maka Kagra ko' kenka antahinka hu'nane. Kragi'ma nerua
zana Kagra nentahine. **10** Tumo'nimo'a fakro fakro nehigeno,
hankaveni'a nomanegeno, navuragamo'a asu nehie. **11** Hagi
zamavesima nezmantoa vahe'mo'zane, aronenimo'zanena,
kri ruvazirante zankure hu'za koro nehu'za afete nemanize.
Nagri'a koramo'zanena anagege nehu'za afete nemanize. **12**
Hagi ha' vahe'nimo'za nahenaku krifua anagintere nehazageno,
nagri'ma nazeri haviza hunaku'ma nehaza vahe'mo'za, maka
zupa nagri'ma nazeri havizama hanaza keagage retro nehaze. **13**
Nagra agesa ankanire vahe'mo'ma nehiaza hu'na kea nontahi'na,
kema nosia vahe'mo'ma agi'ma hamunkino maniaza hu'noe.
14 Nagra zamagesa ankanire vahe'mo'zama nehazaza hu'na
kea nontahi'na kenona huozamante'noe. **15** Ra Anumzamoka
kavega ante'na mani'noanki, Kagra kenona hunanto. Kagra Ra
Anumzana nagri Anumza mani'name. **16** Nagra amanage hu'na
nunamuna hu'na kasmi'noe, zamatrege'za ha' vahe'nimo'za
traka'ma hanua zankura nagizana nere'za musena osiho hu'na
kasami'noe. **17** Na'ankure nata zamo'a mevava huno nevige'na,
traka hu'za nehue. **18** Hianagi nagra kefo avu'ava'zama hu'noa
zana huama hu'na negasami'na, tusi nasunku nehue. **19** Hagi
hankavemati'za ha'ma renenantaza ha' vahe'nimo'za agafa'a
omne zante zamago ate'nenantaze. **20** Knare avu'ava'ma
huzmantorera kefo avu'ava zanu nona hunante'naze. Na'ankure

nagra knare avu'ava nehuge'za ha'renantaze **21** Ra Anumzana
nagri Ra Anumzamoka onatrege, natrenka afetera vugera osuo.

22 Ra Anumzana nagu'vazi Anumzamoka ame hunka eme
nazahuo.

39 Nagra amanage hu'noe, kema hanufina kegava hu'ne'na,
kema hu'zampintira kumira osugosue. Hagi Anumzamofoma
amage'ma nontaza vahe'enema mani'nenuna, nagra nagira
reaka hu'na kea osugosue. **2** Hianagi nagra akohena
nemanina knare zanku'ma nagima hamunki'na kema osu'na
nemnugeno'a, narimpa kanazamo'a ome ra nehie. **3** Ana
zanku'ma antahintahima nehugeno'a, narimpa he'zamo'a teve
arukru nehigeno, kema hu'zanimo'a amare amare nehie. **4**
Ra Anumzamoka nama'a kna ama mopafina mani'na vugahufi
hunagesa huo. Mani'nama vanuankna hamprinka ketenka
nasmio. Na'ankure knanimo'a tusiza huno aganere. **5** Hagi
kasefa hu'nama manisuankna eri atupa hankeno, Kagri
kavurera amnezankna hie. Hagi vahe'motama tasimu'ma erita
mani'zamo'a, magoke asimu'ma anteankna nehie. **6** Hagi
tagra zagemo'ma rentegeno vahe'mofo ame'ma'ama fore'ma
hiaza hu'nonankita, amuhoma huta eritruma hu'na zamo'a
amnezankna nehie. Fenoma eritruma nehuna zana, ina vahe'mo
erisantiharegahie ontahineta eritru nehune. **7** Hianagi menina
nagra izanku amuhara hugahue? Nagra Kagriteke namentintia
nehu'na amuhara nehue. **8** Hanki kumini'afintira nagu'nevazinka,
atregeno neginagi vahe'mo'za kizazokago kea huonanteho. **9**
Hagi nagira hamunki'na kea osu manigahue. Na'ankure Kagra
knazana nenamine. **10** Hianagi muse hugantoanki knazama
nenamina zana hanki eritro. Hazenkema namina zamo'a tusiza
huno nazeri haviza hianki natro. **11** Hagi kumi'ma huna zante'ma

knazama tamina zamo'a, zago'amo marerirfa zama antenonkeno
hakanomo'ma tragama hiankna huno, tazeri haviza nehie. Maka
vahe'mota tagra asimu'ma antegeno'ma vahe'mofo agipinti'ma
amu'ma atiramiankna hu'nonankita, ame huta fanane hugahune.

12 Ra Anumzamoka nunamuni'a antahio! Naza huogu'ma
zavi'ma netoana krafageni'a antahinamio! Zavi'ma netogeno'ma
navunumo'ma nehiazana keamnea osuo. Na'ankure nagra
nantu vahekna hu'na ama mopafina e'noankina nagehemo'zama
hu'nazaza hu'na ko fri'na vugahue. **13** Hanki karimpama
ahenenantana zana natrege'na, osi'a knafina musena hu'na
mani'nena fri'na va'neno.

40 Hagi Ra Anumzamo'ma nzama hanigura akohe'na avega
ante'na mani'nogeno, Agra rukrahe hunamino zavi krafageni'a
antahi'ne. **2** Ana nehuno hapake kerifima antahintahi hakarema
nehu'na mani'nogeno, navazu husga huno havere nantege'na,
oti hankaveti'na oti'noe. **3** Ana huteno Anumzantimofo
agima erisgama hu' zagamera kasefa zagame nami'ne.
E'ina hu'neana vahe'mo'zama nege'za Ra Anumzamofoma
koro'ma hunte'za Agrite'ma zamentintima hanagu anara
hu'ne. **4** Hanki zamavufaga rama nehaza vahete'ene havi
anumzante'ma zamentintima nehaza vahete'ma amema renti
osuno, Ra Anumzamofonte'ma amentintima hanimo'a, agra
muse hugahie. **5** Ra Anumzana nagri Anumzamoka vahe'mota
osugaza rama'a hetofa zantamina hurante'nane. Tagri'ma
hurante'nana zantmimofo antahintahima retro'ma huntanana
antahintahia, rama'agino avompina krentegara osu'ne. Hanki
mago vahe'mo'a kagri knara osu'ne. Kagrama hetofa zantmima
hu'nana zantmima hampri'nama kesuana ana makara hampri
vagaoregosue. **6** Hagi kresramnama nevuno ofama hu zankura

musena nosane. Hanki menina nazeri ani hanke'na antahi
ani' hue. Kagra tevefima kre fananehu ofane kumi ofagura
nantahinonkane. 7 Hagi anante nagra amanage hu'noe, ko,
Nagra ama oe. Anumzamofo avontafepina nagriku hu'za avona
krente'naze. 8 Anumzanimoka kagri kavesi'ma avaririzanku
muse nehue. Hagi kasegeka'amo'a tumonifi me'ne. 9 Nagra
fatgo kavukava zanka'a eri fraraoki'na, ana maka vaheka'a
zamasami'noe. Ra Anumzamoka Kagra kenka antahinka hu'nane,
nagra vahekura korora hu'na nagira hamunki'na omani'noanki
vahe'ma zmagu'ma vazi'nana zana huama hu'na vahe kevua
zamasmi'noe. 10 Hagi fatgo kavukava'ma nehana zanka'a
nagu'afina atrogenora frakino omne'ne. Hanki kema hu'nana
kere'ma amage'ma antenka vahe'ma zamagu'ma nevazina
hihamuka'amofo agenkea eriama hu'ha zamasmi'noe. Hagi tusi'a
vahekrerfa mani'nazafi eriama hu'na vagaore kavesi zamofone,
kema hu'nana kere'ma otinenka ana zama hu kavukavara eriama
hu'na zamasmi'noe. 11 Hanki Ra Anumzamoka, kasunkuma
hunenantana zana azeorinka, vagaore kavesizane ke'ma
hunana kere'ma amage'ma antenka ana zama hu kavukava
zamo'a kegava hunantegahie. 12 Na'ankure ohampriga'a
hazenkemo kaginante'ne. Hagi kuminimo'a agonagna huno
marerineno kama vanuankana rehiza hunantenege'na, ke'zanku
nehue. Ana nehu'na kuminimofo nampamo'a nasenifima
me'nea zamo'a nazokamofo nampana azeri agateregeno
hankaveni'a omne amne hie. 13 Hanki Ra Anumzamoka
muse hugantoanki nagu'vazio! Ra Anumzamoka ame hunka
enka nazahuo! 14 Hanki nagri'ma nahe frinaku'ma nehaza
vahe'mo'za zamagazegu nehanageno antahintahizmimo'a savari
hugahie. Hanki hazenkefima mani'noge'zama musema nehaza

vahe'mo'za zamagazegu hugahaze. 15 Hanki hunte'za nagiza nere'za, ehe ehe! hu'zama nehaza vahe'mo'za zamagazegu hugahaze. 16 Hianagi maka vahe'mo'za Kagri'ma negavaririza vahe'mo'za Kagri'enena muse hu'za manigahaze. Kagrama zamagu'mavazi'nana zanku'ma zamave'nesia vahe'mo'za, Ra Anumzamo'a marerisa Anumza mani'ne hu'za hiho. 17 Hanki nagra namunte omne kne mani'noankino, Ra Anumzamo'a nagrikura agesa antahinami vava nehie. Ra Anumzanimoka Kagra nazahu ne'maninka nagu'vazi ne' mani'nananki, ame hunka eme nazahuo.

41 Hagi zamunte omne vahe'ma knare zamavu'zmava'ma hunezmantaza vahera hazenke zama esigeno'a, Ra Anumzamo'a zamagu'vazigahie. 2 Ra Anumzamo'a zamagu nevazino zamaza hanige'za ofri'za knare hu'za manigahaze. Ana nehuno zamaza hanige'za maka zama hanaza zamo'a knare nehinkeno, ha' vahe'mo'zama zamahenaku'ma hanageno'a zamagu'vazigahie. 3 Hagi krima erizageno'a, Ra Anumzamo'a kegava hunezmanteno krizmia zamazeri negnamare. 4 Ra Anumzamokarega nunamuna nehuanki kasunku hunantenka nazeri kanamaro. Na'ankure osuo hunkama hu'nana kumi hu'noe. 5 Hianagi ha' vahe'nimo'za huhaviza hunante'za amanage nehaze, nazupa frinigeta tagera akanigahune? 6 Zamagra ronenimo'zama nantu'ma ante'nantazankna hu'za nantu ante nante'nazanagi, havigema hu'za nagenkema hanagu nanekea emerite'za vu'za nagenkea ome hugantikma nehaze. 7 Zamago'ma ante'nenantaza vahe'mo'za nazeri haviza hu kea sumi sumi hu'za nanekea ananeki'za, 8 agra havi kri erino tafe'arera mase'neankino onkanamregosie hu'za nehaze. 9 Knare aronenima mani'negena antahima nemina, magopinti'ma

ne'zama neno'a vahe'mo'a amefi hunenamie. **10** Hianagi Ra Anumzamoka kasunku hunantenka krini'a nazeri knamrege'na ana vahera nona huzmantaneno. **11** Nazama hananke'na ha' vahe'ni'ama ha'ma huzmagateresu'na, Kagra muse hunenantane hu'na hugahue. **12** Ra Anumzamoka nagrira hazenkeni'a omne vahe mani'nogu hunka, maka zupa kavuga nantanke'na mani' vava nehue. **13** Ra Anumzana Israeli vahe Anumzana mani'neno manivava Anumzanki, huta agi'a ahentesga hanune. Tamage, tamage.

42 Dia afumo'ma tinku'ma ave'nesigeno tinku'ma hakeno vanoma nehiaza hu'na Anumzamokagura nagu'amo'a tusiza huno ave'nesie. **2** Tinku'ma ave'nesigenoma hiaza huno nagu'amo'a kasefa'ma huno mani'nea Anumzamofonkura nave'nesige'na nazupa agri avurera vugahue hu'na nagesa nentahue. **3** Hanine zagenena zavi'ma netogeno navunuma hiazamo'a nezaniagna nehigeno, ha' vahenimo'za hu'za kagri Anumzana iga mani'ne? hu'za hu'haze. **4** Hagi mono'ma hunegantona knare'ma, ko'ma vahe kevuma zamavare'na mono nonka'afima, nevuge'zama zagamema hu'za musenkasema nehaza zanku'ma nagesa nentahugen, tumonimo'a netanie. **5** Hagi nagafare nagu'amo'a kna nehie? Nagafare tumo'nimo'a netanege'na nasunkura nehue? Nagra Anumzamokare namentintia nehuanki'na, Agrama nagu'mavazi'nea zanku agia ahentesga hugahue. **6** Hagi menina nagu'amo'a kna nehianagi, Jodani mopafima ogantuma me'nea Hemoni agonare'ene Misa agonare mani'nena Anumzanimokagura nagesa antahimigahue. **7** Hagi hagerimo'ma knafu knafu'ma huno agasasama neriankna huno, knazamo'a eme narefinete. **8** Hianagi mago mago kna Ra Anumzamo'a vagaore avesizama'reti avesinentege'na, mago mago kenegera

zagamera hu'na agia erisga nehu'na, nasimu'ma namige'nama
mani'noa Anumzamofontega nunamuna nehue. 9 Hagi nagra
Anumzanimofontega krafagea hu'na, Anumzanimoka hankave
havegani'a mani'nananki, nahigenka kagerakaninenantane? Na'a
hige'za ha' vahenimo'za nazeri haviza nehazage'na nasuzampina
vano nehue? 10 Hagi maka kna ha' vahenimo'zama kefinti'ma
nazeri haviza nehu'za, iga Anumzanka'a mani'ne hu'zama
haza zamo'a zaferinani'a ruhantagi'za rufuzafunepaze. 11
Nahigeno nagu'amo'a kna huno evuneramie? Hagi nahige'na
nasuzampina mani'na nevue? Nagra Anumzamo'ma nazama
hanigu amuhara hugahue! Nagu'mavazi ne', Anumzanimofona
mago'ene zagamera hu'na agia erisga hugahie.

43 Anumzanimoka nagrikura fatgo avu'ava'ane ne' mani'ne
hunka vahepinu huama huo. Kagri'ma nogavariri'za
vahe'mo'zama keagama hunenantenagenka nagri kazika antenka
nazahu keaga hunka naza huo. Fatgo huzama refkoma nosaza
vahe'mo'zama havigema hunentazana nagu'vazio. 2 Na'ankure
Anumzanimoka Kagra fraki vihuni'a mani'nane. Nahigenka
natufetranke'za, ha' vahe'mo'za knazana nenamizage'ha
nasuzampina vanovano nehue? 3 Hagi Anumzamoka
masazanka'ane tamage nanekeka'a atregeno kana naveri
huno navareno ruotge agonaka'a, Saionima nemanintega vino.
4 E'ina'ma hnanke'na kre sramanavu itaka'are vu'na nazeri
musema nehana Anumzanimoka hapu zavena ome ahe'na
zagamera hu'na kagia erisga hugahue. 5 Nahigeno nagu'amo'a
kna huno evuneramie? Hagi nahige'na nasuzampina mani'na
nevue? Nagra Anumzamo'ma nazama hanigu amuhara hugahue!
Nagu'mavazi'nea Anumzanimofona mago'ene zagamera hu'na
agia erisga hugahue.

44 Anumzamoka korapa'ma nazano tagehe'mokizmima
huzmante'nana zana ko tasamizageta tagra tagesafinti
antahi'none. 2 Kagra hihamu ka'anu ama mopafima nemaniza
vahetmina zamahe kasope netrenka, ana maka mopafina
tagehemokizmia avimazavi hankreankna hanke'za mani'naze.
Kagra ha' vahetia zamahe hana hanke'za ama mopa
tagehe'moza eri'za knare hu'za mani'naze. 3 Hagi tagehemo'za
bainati kazintetira ha' vahera harahu zamagatere'za ama
mopa e'ori'naze. Huge zamagra'a hankaverera hara hu
zamagateore'naze. Hanki Kagri hankavenentake tamaga
kazamo'ene kavugosafinti masamo zamaza hu'ne. Na'ankure
Kagra kavesizmante'nane. 4 Kagra nagri kini mani'enka, nagri
Anumzana mani'nane. Kagra hanke'za Israeli vahe'mo'za ha'
vahe'zmia hara huzmagatere'naze. 5 Kagri hankavefi ha' vahetia
hara huta zamatufeta ometre emetre nehuta, Kagri kagireti
ha'ma hurantenaku'ma hanaza vahera zamagofetura tagia reta
zmare hapakopatigahune. 6 Hagi atini'agura antahinomi'na,
kazinknoni'amo'a nagu'vazigahie hu'na amuhara hunomue.
7 Na'ankure Kagrake'za taza hanketa, ha' vahetia hara
huzmagaterenone. E'ina hunka zamavaresrama hunerantaza
vahera zamazeri zamagaze hu'nane. 8 Hagi maka kna
nanterantetima vuno kinagama omeseana Anumzamokagu
akagia nereta, zagamera huta kagia erisga nehune. 9 Hagi
menina kamefi huraminka tatrankeno ha' vahe'mo'za tazeri tagaze
nehaze. Ko'ma ha'ma hunaku'ma nevunkenkama nehanaza
hunka tagri'enena hatera vunka ome taza nosane. 10 Hagi
tatranketa ha' vahetimofo koro nefronke'za, ha' vahetimo'za
rohu eme tre'za keonke'zantia e'nerize. 11 Hagi tatrankeno ha'
vahe'mo'za sipisipi afu'ma ahe'za nenaku'ma hiankna hu'za

nerahe'za tahe panani hazageta vahe mopafina hazagreta umani
emani hu'none. **12** Hagi marerifa vaheka'a osi'a zagore atrenka
mago zagoa retrora osu'nane. **13** Kagra tatrake'za tava'ontire'ma
nemaniza vahe'mo'za kiza zokago kea hurante'naze. Hagi tagri
mopa atupa ometre emetrema hu'neregama manigagi'naza
vahe'mo'za kizazokago ke hunerante'za tazeri haviza nehaze. **14**
Tagrira kizazokago ke hunteza tazeri retro hanke'za, zamagena
neru'za kizazokago hurante'za tazeri fenkami netraze. **15** Maka
kna hugeforenenantazage'na, tusi nagazegu nehu'na vano
nehue. **16** Hagi maka kema antahunana kizazokago kema
hurantaza kege nentahita, ha' vahetimo'zama nonama hu'za
ha'ma hurante'zama nehaza zanke negone. **17** Kagrira tamefira
hugamita huhagerafi huvempa keka'a ha'ontaginonanagi, ama
ana zantamimo'a tagritera fore nehie. **18** Tagra Kagrira tamefira
hunegamita kana atreta havi kampina ovu'none. **19** Hianagi
tahenka tazeri haviza hutranketa afi kramofo kumapi nemanune.
Ana nehunka frizamofo hanizanu refitenerantane. **20** Hagi
tagrama Anumzantimofo agima aheta mono'ma huontege,
tazama rusuteta ru vahe' anumzamofontegama nunamuma
hunesunkeno'a, **21** tamage huno anazana Anumzamo'a keno
antahino hu'ne, na'ankure Anumzamo'a Agra tagu'afima oku'ma
me'nea zana keno antahino hu'ne. **22** Hianagi Kagri vahe'ma
mani'nona kazigati maka kna tagrira tahe nefrise. Sipisipi afu'ma
ahenaku'ma reharino'ma viaza hu'za rehari'za tavre'za nevaze
23 Hagi Ra Anumzamoka otinka taza huo! Nahigenka kavura
nevasane? Kagera kanirante vava osunka otinka tazahuo. **24**
Nahigenka ke'amnea nehane? Tatama tami'za tazeri havizama
nehazageta knafima mani'nonana nahigenka Anumzamoka
ontage vahe knara nehane? **25** Tagu'amo'a tamino mopafi

runtrako higeno, tavufgamo'a avugosaregati mopafi runtrako
huno mase. 26 Anumzantimoka otinka taza huo! Vagaore
kavesizanku hunka nona hunka mizasenka tavro.

45 Hentofa naneke antahintahifina nentahugen, nagu'a
nazeri otie. Ana hentofa nanekea kini neku hu'na kregahue.
Na'ankure nagefunamo'a avoma kre'are'ma knarezantfama
hu'naza vahe'mokizmi avo azotagna hu'ne. 2 Kagra hentofa
ne' mani'nane. Kagipinti fru huno knare nanekege atineramie.
E'ina agafare Anumzamo'a asomura hugante vava nehie. 3
Hankavenentake ha' nera bainati kazinka'a erinka kasoparega
atregeno uramino! Kagira hihamu masaka'amo kagatere'nea
ne' mani'nane. 4 Masanentake hihamuka'ane vunka tamage
nanekegu'ma, agu'ama anteramino mani'zanku'ma, fatgoma
huno refkoma hu avu'avakura hara ome huo. Ana nehunka
atregeno, tamaga kzamo'a ruzahukna kaguvasana eri fore
hinke'za keho. 5 Keveka'aramimo'a agona hu'neankino ha'
vaheka'aramimofo tumotmina ahe neragie. Ana nehanke'za maka
kokankoka vahe'mo'za kagafinke evuneramize. 6 Anumzamoka
kini traka'amo'a mevava hugahie. Fatgoma huno keagama
refkoma nehana azompaka'anu vahera kegava nehane. 7 Kagra
fatgoma huno keagama refkoma hu zanku kave'hesinka kefo
avu'avazankura kavesra nehane. E'ina hu'negu Anumzana
Kagri Anumzamo'a masavena kasenifina tagino kazeri ruotgera
nehuno, musezamofo masavena mago'a vahera rugatereno
kagridera rama'a taginte'he. 8 Hagi merema nehaza mnazamofo
mnama, aloveramofo mnama, kasiema nehaza zamofo mnamo'a
kini vahe'mo'za za'za kukenaka'a eri mnanentake hugahie.
Hagi elefanti aveteti'ma kinte'naza kini vahe kumapina strini
nofite'ma rente'za nehaza zavena nehe'za kazeri muse nehaze.

9 Kini ne'mofo mofa'nemoza agima me'nea anene mani'naze.
Hagi kuini a'mo'a Ofiri kumateti eri'naza golireti trohu'naza
zantaminu avasasea hu'neno kazantamaga kaziga oti'ne. 10 Kini
netema maniku'ma nehana mofamoka kama kagesa antenenka
antahio. Keonke zagaka'ama kumaka'aregama zamatrenka
e'nanana kagekanio. 11 Na'ankure negave'a, kini ne'mo'a
hentofa kagikagonagura tusiza huno avesinegante. Agra ranka'a
mani'negu ke'a antahiminka amage anto. 12 Hagi Tairi kumateti
musezantmina eri'za eme negami'nageno, feno vahe'mo'za
kagrama zamazama hananku anara hugahaze. 13 Kini ne'mofo
kasefa a'mo'a goliretimu avama renenia za'za kukenama huno
esigeno'a, avasase'amo'a tampre tampre hugahie. 14 Ana
avasase'ane kukena hunenige'za ana ara avre'za kini netera
nevngenno avegama hu' mofaneramimo'za amage avarariza
vugahaze. 15 Maka vahe'mo'za tusi musenkase nehu'za kini
ne'mofo kumapina ufregahaze. 16 Kagri ne' mofavremo'za
zmafahe'mozama hu'nazaza hu'za kini vahe manigahaze. Ana
hanagenka ugagota kva vahe zamazeri otisanke'za, maka ama
mopafina kva vahe manigahaze. 17 Nagra rankagi kamisuge'za
forehu anante anante'ma hu'za esaza vahe'mo'za, kagrira
antahinegamiza rankagia kamivava hu'za vugahaze.

46 Anumzamo'a fraki vihutine hankavetine mani'neankino,
hazenke knafima tazama hanigura maka kna retro huno nemarie.
2 E'ina hu'neankita imima e'nerisigeno, agonamo'a ankariseno
hageri amu'nompina vugahianagi, tagra korora osugahune.
3 Hagerimo'a kranto kranto huno agrenkera nehanigeno,
agonamo'a imina erino eri tore vare hugahianagi, tagra korora
osugosune. 4 Mago rantimo'a Anumzamofo rankumapi ufre efre
huno Marerirfa Anumzamo'ma nemanifima me'nea zantamina

tina zamino zamazeri muse nehie. 5 Anumzamo'a e'i ana rankumapi nemaniankino, vahe'mo'za eri havizana osugahaze. Nanterama komatanigeno'a Anumzamo'a ana kumara kegava huno aza hugahie. 6 Ama mopafima me'nea kumatamimpintira vahe'ma azeri agore hu agasasaneranigeno, kini vahe'mo'zama kegavama hu'naza kumatmimo'zanena fuzafupe'za amane zankna hugahaze. Hanki Anumzamo'ma ageru'ma aranigeno'a, tevemo'ma plastikima temramra'ma hiaza huno ama mopamo'a maramra hu'ne. 7 Monafi sondia vahe'mokizmi Ra Anumzamo'a, tagrane magopi mani'ne. Jekopu Anumzamo'a tagrama frakita mani vihuti mani'ne. 8 Eta Ra Anumzamo'ma ruzahu avu'avazama hiazana eme keho. Agra ra hazenke'za avreno, eno ama mopa eri haviza hie. 9 Agra ama mopafina maka kaziga ha'ma nehaza zana eri netreno, atine, kevenena eri hantagi netreno, hankoramina teve hanavazino kre'ne. 10 Tamagra tamagasarasana eri taganeta akoheta mani'neta, Nagrikura Anumza mani'ne huta antahiho. Kokankoka vahe'mo'za nagesga hu'za ra nagi nemasisageno, ama mopafi vahe'mo'zanena nagesga hu'za ra nagi namigahaze. 11 Monafi sondia vahe'mokizmi Ra Anumzamo'a, tagrane mani'ne. Jekopu Anumzamo'a frakita mani vihuti mani'ne.

47 Mika kokankoka vahe'mota tamazana nehetma, ranke huta muse zagamera nehutma hentofa Anumzamofona agi'a erisga hiho. 2 Na'ankure Marerirfa Ra Anumzamo'a knare zantfa hu'nea Anumza mani'neankita, kore hunenteta agorga'a manigahune. Agra maka ama mopafina marerirfa kini ne' mani'neno, ama mopa kegava hu'ne! 3 Agra kokankoka vahetmina hara huzmagatenereno ha' vahetia zamaheno eri tagafi atregeta, zamagofetu tagia reta ot'i'none. 4 Anumzamo'a

erisantima haresuna zana, huhamprirante'nea mopa tami'ne.
Jekopu mofavrermima Anumzamo'ma avesima nezmantea
naga'mo'zama erisantima nehare'za ra zamagima erisaza
zantamina zami'ne. 5 Kezati'za muse zagamera nehazageno,
Anumzamo'a mareri'ne. Hagi ufena nerazageno, Ra Anumzamo'a
anagamua mareri'ne. 6 Zgame huta Anumzamofo agi'a erisga
hiho. Zgame hiho. Zgame huta Kini netimofo agi'a erisga
hiho! Zgame hiho. 7 Na'ankure Anumzamo'a Agra maka ama
mopafi vahe Kini mani'ne. Zgame avontafepima krente'naza
zagame huta agi'a erisga hiho. 8 Anumzamo'a manisga huno
ruotge'ma hu'nea tra'are mani'neno, kokankoka vahera kegava
hunezmante. 9 Kokankoka vahe'mokizmi kva vahe'mo'za
Abrahamu Anumzamofo naga'ene emeritru hu'naze. Na'ankure
maka ama mopafi kini vahe'ma mani'nazana Anumzamofo vahe
mani'naze. Ana hu'neanki'za Ra Anumzamofona agi'a ahentesga
hugahaze.

48 Ra Anumzana marerisa ne' mani'neankita Anumzantimofo
rankumapina, Agri ruotge agonarera zagamera huta agi'a
ahentesga hugahune. 2 Hagi Anumzamofo agonamo'a,
hentofaza huno mesga hu'nege'za, maka kokankoka vahe'mo'za
kenakura tusi muse nehaze. Noti kaziga Saioni agonamo'a
ruotge hu'neankino hentofaza hu'nea kini ne'mofo rankuma
me'ne. 3 Anumzamo'a ana kumapi mani'neno, Agra'a ana
kumapinti eama huno kegava nehie. 4 Hagi ama mopafi kini
vahe'mo'za sondia vahezmia erimago hu'za ana rankumara
hara hunte'naku urava'o nehaze. 5 Hianagi e'zama eme
nege'za antri nehu'za, tusi zamagogogu nehu'za, atre'za koro
fre'naze. 6 Zamagrira tusi zamahirahi nerege'za, a'nemo'za
mofavre kasenteku zamatagu nehazankna hu'naze. 7 Hagi

kagra zage hanati kazigati hanavenentake zaho'mo Tasisi
kumate hanave venterami eri tagana taganu vazitreatkna
hunka kagra zamahe vagare'nane. 8 Ke'age nehazageta ana
rankumamofo konarari'agura antahi'nonanagi, Monafi sondia
vahe'mofo Ra Anumzamofo rankumara menina tagra tavufinti
kone. E'i ana kumara tagri Anumzamofo rankumakino Agra'a
kegava huvava hugahie. 9 Anumzamoka mono nonka'afina
mani'neta, vagaore kavesizantetima kavesinerantana zankura
tagesa antahinegamune. 10 Anumzamoka kagi'amo'ma hu'neaza
hu'za zagame'ma hu'za kagima erisgama hanaza zamo'a
mopa atumparega vuno eno hugahie. Hanavenentake tamaga
kazampina fatgo avu'avazamo avite'ne. 11 Saioni agonafi
nemaniza veamo'za muse nehanage'za, Juda mopafima
me'nea kumatamimpima nemaniza vahe'mo'za muse hiho.
Na'ankure Kagra fatgo kavukvama hunka vahe'ma refkoma
nehana kavukava zanku anara hugahaze. 12 Saioni rankumara
kaginka negenka, mani'neza kuma'ma kegavama nehaza za'za
nontamima kinte'nazana hamprinka ko. 13 Kuma vihuma
kino mareri'nea zana negenka, fraki hankave vihu keginama
hu'nea kumara ketenka, henkama efore hu'za esnaza vahera
nankeea zamasnio. 14 Na'ankure Anumzamo'a e'inahu
hu'ne. Agra manivava Anumzanti mani'neankino, Agra kegava
hurante'enigeta manime vuta ufrigahune.

49 Nanekema hanuana maka vahe'motma nentahinkeno, ama
mopafima mani'naza maka vahe'mo'zanena zamagesa ante'za
antahiho! 2 Marerifa vahe'ma, tami vahe'ma, feno vahe'ma,
tamunte omne vahe'motanena antahiho! 3 Na'ankure knare
antahi'zamofo naneke huama nehugen, nagu'afina antahi
ama' hu antahizamo avite'ne. 4 Nagra knare antahi'zamofo

nankegu nagesa ante'na nentahi'na, hapu zavena nehe'na,
fraki nankeea zagamepi erinte ama hu'na hugahue. 5 Hazenke
zama ne-enigeno, ha' vahe'mo'zama eme navazagi kagisazana,
nahanige'na nagra korora hugahue? 6 Zamagra fenoma
ante'naza zante zamentintia nehu'za, tusi zago fenoma ante'naza
zanku zamavufa ra hu'za akagi neraze. 7 Tagra antahi'none, mago
vahe'mo'a frizampintira agra'a aguravazige, Anumzamofona
atesinteno nefuna ovaregosie. 8 Mago mizantetira vahe'mo'a
atesino, agra'a agu'vazigara osu'ne. Na'ankure mago mizantetira
mizaseno, 9 frino onkasarino, manivava huno ovugosie. 10
Nagonke'za knare antahi'zane vahe'mo'za nefrizageno, ana
hukna hu'za neginagi vahe'ene antahintahi omne vahe'mo'zanena
nefrizage'za, ru vahe'mo'za ana vahe'mokizmi fenozana erisanti
neharaze. 11 Ana vahe'mo'za rama'a mopa eri'za zamagia
ana mopazmirera asamregahazanagi, matimati'mo'a manivava
nonkumazmi senige'za fri'za matipi umanigahaze. 12 Hagi
fenoma antene'za ra zamagima e'neriza vahe'mofo zamagimo'a
zazatera meno ovugahianki, zagagafama fri fananema nehiaza
hu'za fri'nageno, zamagimo'a fanane hugahie. 13 Hagi knare vahe
mani'none hu'za neginagi vahe'mo'zama nehaza vahete'ene,
ana vahe'mokizmi kere'ma zamentintima nehaza vahete ama
anazana fore hugahie. 14 Sipisipi afute kva vahe'mo, sipisipi
afutami zamavareno viaza huno fri'zamo'a zamavareno fri
vahe kumapina vugahie. Hagi nanteramasena Anumzamofona
vahe'mo'za kegava huzmantegahaze. Kumazmimofona afete'are
matipi zamavufagamo'a kasrigahie. (Sheol h7585) 15 Hianagi
nagrira nagu'nevazino, fri'zamofo hihamufintira Anumzamo'a eri
varino navaregahie. (Sheol h7585) 16 Hagi vahe'mo'zama rama'a
fenoma ante'za hage'za mareneri'nageno, nonkumazmifima knare

zantmimo'ma avimatesia zankura korora osho. 17 Na'ankure zamagrama frisageno'a, maka fenozamimo'a amanezankna hugahiankino, anazana eri'ne'za fri kantega ovugahaze. 18 Kasefama huno mani'nea knafina maka zampina knare hu'noe huno agra'a husga nehanigeno, vahe'mo'zanena humuse huntegahaze. 19 Hianagi ko'ma zamagehe'zama hu'nazaza hu'za fri'za nevu'za mago'enena zagemo'ma remsa hania masa onkegahaze. 20 Hagi fenozmigu'ma akagima neraza vahe'mo'za zamagra maka zana antahi anira nosazanki'za, afukra friaza huza frigahaze.

50 Ra Anumzana Hankavenentake Anumzamo'a zage fre kazigati evuno zage hanati kazigama evu'nea vahekrerfa ke huno eritru nehie. 2 Saioni kumara konarari'amo agatererfa kuma me'neankino, Anumzamofo masazamo'a remsa huno ana kumapinti enevie. 3 Hagi Anumzantimo'ma esiana agasasane egahiankino, maka zama tefanene hu tevemo avuga neresigeno, tusi ununko netanifi Agra egahie. 4 Agra monane mopane ke hanigeno emanineke negesakeno, Agra'a vahera keaga huzmanteno refko huzmantegahie. 5 Nagri'ma zamagu'aretimu hu'za namage'ma nente'za, huhagerafi huvempa kema hune'za nagrite'ma kresramnama vunenantaza vahera ke huge'za eho. 6 Hagi fatgoma huno refkoma hu avu'ava zama'agura monamo'a huama hino. Na'ankure Anumzamo'a Agra'a keaga refko hugahie. 7 Nagrama kema hanuana vahe'nimota kama antahiho. Ama'na zantminte Israeli vahe'mota huama huramantegahue. Nagra Anumzankina, tamagri Anumza mani'noe! 8 Tamagrama kresramnama nevaza zantero, tevefima krefanane hu ofama nagri navugama erita evavama nehaza zantera keaga huoramantegahue. 9 Hianagi bulimakao afu

keginaka'afinti ve bulimakao afukuro, meme afu keginaka'afinti
ve meme afukura avrenka eno hu'na osugahue. **10** Na'ankure
zafa avo'nompima maka zagagafama mani'nazana nagrike zaga
manizageno, tauseni'a agonaramimpima mani'naza bulimakao
afutamina nagrike suza mani'naze. **11** Maka namaramima
agonafima mani'nazana nagra kena antahina nehugenno, maka
zagagafama hofa avo'nompima vanoma nehaza zagaramina
nagrike suza mani'naze. **12** Hanki Nagri'ma naga'ma tenige'na
mago zankura tamagrira tamantahi onkegahue. Na'ankure maka
zama ama mopafima me'neana, nagrike zantaminke me'naze. **13**
Nagra ve bulimakao afutamimofo ame'ane, ve meme afu'tmimofo
koranena nenofi? **14** Marerirfa Anumzamofonte'ma huvempama
hu'nana naneke avaririnka, musenkase huno susu'ma hunte ofa
Anumzamofona hunto. **15** Ana nehunka hazenkefima ufresunka
nagritega nunamuna huge'na kaguvinugenga, nagrira ra nagia
namigahane. **16** Hianagi Anumzamo'a kefo zamavu'zmava'ma
nehaza vahetminkura huno, tamagra kasegeni'a huamara
hugara osu'nazanki nagafare kasege'ni'a huamara nehuta,
uhagerafi huvempa kea tamagititikera nehaze? **17** Na'ankure
tamazeri fatgoma nehugeta tamavesra hunenanteta, anankeni'a
tamamefi humita amagera nontaze. **18** Musufa vahe'ma
nezamageta, zamazeri rone nehuta, ru vahe'mofo aro, vema azeri
savri huno anteno nemasea vahetamine tragoteta nemanize.
19 Tamagipina, kefo avu'avazama hu nanekemo avitegeno,
havigema hu nanekege tamagefu'nafintira atineramie. **20**
Tamagra zogitru huta mani'neta tamafuhe'i zamagenke nehuta,
neramarera nemofo neramafuna havige hunezmantaze. **21**
E'ina'ma nehazage'na nege'na kema nosugeta, tamagrama
antahi'zana, Anumzamo'a tagrikna hu'ne huta nehaze. Hianagi

menina maka'zama hu'narera keaga huramantegahue. **22** Hagi Anumzamofonku'ma tamage'ma nekaniza vahe'mota kama antahiho, tamagu'a rukrahe huta tamasunku hih. Hanki ana'ma osnazana, tamahe'na rutagana taganu vazitranena vahe'mo'za tamaza osugahaze. **23** Hianagi muse nehuno susu hu ofama hunenantea vahe'mo'a, Anumzamo'na ra nagi nemiamanki'na, agu'mavazisua kana averi hugahue.

51 Anumzamoka kasunku hunanto. Vagaore kavesizanteti rama'a kasunku hunantenka kumini'a eritre vagaro. **2** Kefo avu'avazani'a sese hunantenka nazeri avusese nehunka, kumini'a sese hunka nazeri agru huo. **3** Na'ankure nagra kumini'a ke'na antahi'na hu'nogeno, maka zupa antahintahifina eri'zana e'nerie. **4** Nagra kagri kea hantagi'na ha' renegante'na, kagri kavurera kumi hu'noe. E'na hu'noankinka tamage hunantenka fatgo kazigati refko hunka keaga hunenantane. **5** Nagra kumi vahe mani'nogeno, nenrera'a kasenante'ne. Na'ankure nenrera arimpafina kumi vahe fore hu'noe. **6** Hianagi tamage nanekemo'a nagu'afi avitesie hunka Kagra kagesa nentahine. E'na hu'negu knare antahi'zana nagu'afina rempi hunamio. **7** Kumini'a hisopureti nazeri agru huge'na agru ha'neno. Sese hunka nazeri agru huge'na, efeke hamponkna ha'neno. **8** Hanki ete musenkasema huno mani avu'ava zana namigeno, nazeri fru hina ruhantaginana zaferinanimo'za musenkasena hih. **9** Kumini'arera ketenka omaninka, kefo avu'avazani'a eri atre vagarenanto. **10** Anumzamoka agru tumo nagu'afina tro hunenantenka, Kagrite'ma mani fatgoma hu'za nagu'afina antenanto. **11** Kavugatira nahenati notrenka, Ruotge Avamuka'a nagu'afintira eri otro. **12** Nagu'ma vazinkenama musema hunoakna musezana ete nemaminka, keka'ama antahino kavariri

navesi zana namio. **13** E'ina'ma hananke'na kefo avu'ava'ma
nehaza vahe'mokizmia kagri kavukavara rempi huzminuge'za,
kumi vahe'mo'za ete kagrite rukrahe hu'za egahaze. **14**
Vahe'ma ahe'na korama eri tagi'noa kumira Anumzamoka
apase nenantenka nagu'vazio. Ana'ma hananke'na fatgo
kavukvama hunka nagu'ma vazi'nana zankura, musenkasena
hu'na zagamera hugahue. **15** Ra Anumzamoka nagira eri o'za
huge'na, zagamera hu'na kagia ahentesga ha'neno. **16** Na'ankure
nagra ofa erina eme kamigahuanagi, kre fanene hu ofagura
musena nosane. Kagrite'ma kre fananehu ofama kresramnama
vuzankura kave'nosie. **17** Hagi kagri'ma kavenesia kresramna vu
ofa, e'i avufgama anteramino mani'zane. Avufgama anteramino
nemanino agua'retima huno asunku'ma huno agu'ama rukrahema
nehia vahera Anumzamoka kamefira hunomine. **18** Kagra
kavesintenka Saioni rankumara azeri knare nehunka, Jerusalemi
kumamofo kegina huo. **19** Ana hutenga mani fatgo hu'za
mani'neza fatgo avu'ava'ma hu'za kresramna vanaza ofagi,
tevefima kre fananehu ofagi, maka zagagafama tevefi krefanene
hu ofagi, bulimakao afu'ma kresramna vu itaka'arema kresramna
vu ofagura musena hugahane.

52 Hankavenentake sondia ne'moka, nagafare kefo avu'ava
zama nehana zankura kavufga rana nehane? Hagi Anumzamo'ma
fatgo avu'ava'ma huno, maka knafima nevia zankura kagesa
nontahino? **2** Maka kna vahe'ma azeri haviza hu antahintahige
retro nehunka, havigema huno vahe'ma azeri haviza hu kemo'a
asane'nea resagna huno kagipintira atineramie. **3** Kagra knare
avu'ava zama kavesi nentana avamena agaterenka, havi
avu'ava'zana kavesi nentenka, tamage kema kavesi nentanama'a
agaterenka havigea kavesinentane. **4** Knare osu keka'aretima

vahe'ma azeri havizama hu'zanku kavenesia nekinka, kagra
havige ne' mani'nane! 5 Hianagi Anumzamo'a kahe fanane
hanigenka, ru'enena omanigosane. Traza vatisreankna huno
nonkuma ka'afintira Anumzamo'a kavazu hutrena ru'enena
mopafina omanigahane. 6 Fatgo avu'ava'ma nehaza vahe'mo'za
nege'za, zamagogogu hugahaze. Anazama kagrite'ma fore'ma
hanige'za negenu'za, kagiza nere'za amanage hugahaze,
7 Anumzamo naza hugahie huno antahi omino, agra'a
hankavegu'ma nehia hankavenentake sondia nete'ma fore'ma
nehia zana keho. Agra'a feno zante amentinti nehuno, ru
vahe'mokizmia hanavetino kefo avu'ava'zana huzmantehava
huno nevie. 8 Hianagi nagra Anumzamofo nompina olivi zafamo
tretre huno amu mareankna nehuanki'na, maka kna Anumzamofo
vagaore avesizante namentintia huvava hugahue. 9 Knare
kavukva'ma hunantana zankura Anumzamoka kagia erisga
huvava nehu'na, Kagri kagire amuhara hugahue. Na'ankure
Kagri kagimo'a, knare zantfa hu'ne. Kavariri fatgoma nehaza
vahe'mokizmi zamavufi kagri kagia nagra husga hugahue.

53 Neginagi vahe'mo'zage zamagu'afina anagea nehaze,
Anumzana omani'ne hu'za zamagesa nentahize. E'inahu
vahera ko haviza hu'hazanki'za zamavuzmava zmimo'a kefoza
hu'neankino, magomo'e huno knare avu'ava zana nosie. 2
Anumzamo'a monafinka mani'neno, iza ama' antahi'zane vahera
ama mopafina mani'neno, agrira amagera nentefi huno, kefenkma
atreno maka vahera nerage. 3 Hianagi magore huno fatgo vahera
omani'neanki maka vahe'mota Anumzamofona tamagena humita
havizantfa hu'none. Maka vahe'ma mani'nonana kefo avu'avake
hunkeno mago'mo'e huno fatgo vahera omani'ne. 4 Ana kefo
zamavu'zmavama nehaza vahe'mo'za magore hu'za rempia

hu'za nontahize. Hanki bretima neankna hu'za nagri vahera zamahe'za nene'za Anumzamofontegama nunamuma hu'zankura zamagesa nontahize. 5 Hianagi tusi koro nehu'za zamagogofena, ha'ma regantesaza vahe'mokizmi zaferina herafi atregahie. E'ina hanigenka kagra zamazeri zamagaze hugahane. Na'ankure Anumzamo'a amagena huzmino zamatregahie. 6 Hanki Israeli vahe'ma zamagu'ma vazisia ne'mo'a Saioni agonaregati'ma esiana knare hugahie. Hanki Anumzamo'ma Agra vahe'ama eme zamavareno ete zamazeri so'ema hanigeno'a, Jekopu naga'mo'za ranke hu'za zagamera hu'za musena nehanageno, Israeli vahe'mo'zanena musenkase hugahaze.

54 Anumzamoka kagika'reti nagu'vazio. Hankanaveka'anu nagu'a refko hunka nago. 2 Anumzanimoka nunamu keni'a nentahinka, nanekema kasami'nuana kagesa antenka antahio. 3 Na'ankure ru vahe'ma emani vahe'mo'za hara renantazageno, vahe'ma zamazeri havizama nehaza vahe'mo'za nahefri'za nehaze. Zamagra Anumzamofonkura antahi amaneza nesaze. 4 Hianagi Anumzamo nazahu nera mani'ne. Agra naza hige'na kasefa hu'na mani'noe. 5 Ha' vahe'nimo'zama nagri'ma nazeri haviza hu antahintahima retro'ma haza antahintahia, eri arukrahe hugeno, zamagri zamazeri haviza hino. Anumzamoka kagrama huvempama hunana kante antenka, ana vahetmina zamahe fri vagarege'za mago'enena ama mopafina omaniho. 6 Ra Anumzamoka nagra navesite kagritera ofa kresramna nevu'na, susu hugante'na kagia ahentesga hugahue. Na'ankure e'inama hanuana knare hu'ne! 7 Na'ankure kagra maka hazenkenifintira nagu nevazinka, nazahanke'na ha' vahe'ni'aramina hara huzmagatere'noe.

55 Anumzamoka naza huogu'ma nunamuma nehuana antahi
amnea osunka, kagesa antenka nunamuni'a antahinamio. 2
Muse hugantoanki, nunamuni'a antahinaminka kenona hunanto.
Na'ankure hazenke zamo'a nazeri haviza hige'na kragira nerue.
3 Ha' vahe'nimo'za kezati'za rankege hunenantage'za, kefo
avu'ava'ma nehaza vahe'mo'za knazana nami'za nazeri haviza
nehu'za, tusi zamarimpa ahenenantaze. **4** E'ina'ma hazageno'a
tumonimo'a faki faki nehige'na, fri'zankura tusi koro nehue.
5 Tusi nagogo nefegeno koro zamo'ene nahirahimo'enena
nahenefrie. **6** Maho namamofoma hiaza hunora nagekona
huntenege'na, hare'na knare'ma hu'nea kumatega mani fruma
hu'na umanuresina knare hisine. **7** Nagra hare'na afete'are ka'ma
kokampi umanuresine. **8** Ununkomo'ene zasi komo'ma hifintira,
nagra ame hu'na fre'na afete ome fraki'na umanuresine. **9** Ra
Anumzamoka ha' vahe'nimozama retroma nehaza antahintahia
eri savri hunka eri haviza huo. Na'ankure vahe'ma azeri haviza
hu avu'avazane, mani fru osu avu'avaza rankumapina negoe.
10 Hanine zagenena ku'ma keginare vano nehu'za kegava
nehazanagi, tamage huno ha'zamo'ene kefo avu'ava zamo'a
kuma agu'afina avite'ne. **11** Maka zama eri haviza hu'zamo ama
ana kuma amu'nompina megeno, vahe'ma knama amino azeri
haviza nehuno, revatgama hu avu'avazamo'a ana kumara atreno
novie. **12** Ha' vahe'nimozama huhaviza hunantazasina, nagra
ana zankura nagesa ontahuresine. Hagi ha' vahe'nimo'zama
ha'ma eme hunantazaresina nagra frakuresine. **13** Hianagi
mago avamente'ma manino'a ne'moka anara nehane. Kagra
nagri'enema tagrotenka vanoma nehankena, kagena antahina
hu'noa navate ronenimoka anara nehane. **14** Korapara kagranena
knare huta magopi nemanita, tusi'a vahe'ma Anumzamofo

mono nontegama nevazafima magokama nevu'ane. **15** Ha'vahe'ni'aramina atregeno antri hanazaza huno fri'zamo'azmavatera ne-enkeno, matimo'a zamavu aga zmasgahu nakarino. Na'ankure kefo zamavu'zmava zamo'a zamagu'afina nonkino me'ne. (Sheol h7585) **16** Hianagi Anumzamofonku kea hanugeno, Ra Anumzamo'a nagu'vazigahie. **17** Knazani'afima mani'nena nanterane, feru'ene kenage'enena krafagea nehugeno, Ra Anumzamo'a antahi nemamie. **18** Ra ha'pintira nahokeno ete nagu'vazine. Na'ankure rama'a ha' vahe maninazafinti naza huno navare'ne. **19** Anumzana Agra kini mani vava huno neea kini ne'mo krafage'ni'a antahino zamazeri haviza hugahie. Na'ankure nagri ha' vahe'mo'za zamavu'zmavara rukrahera osuge, Anumzamofona korora huntegera nosaze. **20** Ronenimo'a ha'renanteno huhagerafi huvempagema hu'neana ruhanentagie. **21** Naneke'amo'a batagna huno frufru hu'neanagi, agu'afina ha'ma hu'za me'ne. Naneke'amo'a olivi masavenkna huno frufru hu'neanagi, agu'afina asane bainati kazi me'ne. **22** Knazanka'a Ra Anumzamofo azampi antegeno, Agra knazanka'a e'nerino kazeri hanavetino. Agra fatgo zamavu'zmava'ma nehaza vahera zamatrenige'za regarari'za trakara osugahaze. **23** Hianagi Anumzamoka kefo zamavu'zmava'ma nehaza vahera zamavarenka hazenke zamofo kerifi zamatregahane. Hagi vahe'ma zamahe nefri'za vahe'mo'zane krunagema nehaza vahe'mo'zanena kasefa vahe mani'ne'za ko frigahaze. Hianagi nagra Kagriku antahi negamina namentintia nehue.

56 Anumzamoka kasunku hunanto, na'ankure vahe'mo'za nahe'za narotago nehaze. Maka kna ha' vahenimo'za nazeri havizantfa nehaze. **2** Ha' vahe'nimo'za nahenaku knane knanena nenavararizageno, zamavufaga ra hanaza kazigati

rama'a vahe'mo'za hara eme hunenantaze. 3 Hianagi koro'ma hanua knafina, Kagrite namentintia hugahue. 4 Anumzamo'ma huvempama hu'nea kere namentintia nehu'na, agia ahentesga nehue. Nagra Anumzamofonte namentintia nehuankina, na'a hanigena amne vahetfankura korora hugahue? 5 Nagrama hua nanekea zamagra eri rukrahe nehu'za, nazeri haviza hunaku maka kna mani'ne'za oku'a kea retro nehaze. 6 Nagri'ma nazeri'za nahenakura, oku'a kea retro hu'za kafona ante'za vano nehu'za, kama vano nehuge'za zamavunte'za nenagaze. 7 Kefo zamavu'zmavama nehaza vahera ana zamavu'zmava zantera Anumzamoka zamahe kasopetro. Hanki krimpa ahezmanenkamazaki fenkami atro. 8 Kagra nasunku'ma huazana kavuntenka nenagane. Zavi'ma atogeno'ma navunu'ma hia navunura tafempi afinte'nane. Magoke magoke zana avompi krente'nane. 9 Hagi nazama huogu'ma Kagritegama kezamat'i'nena, ha' vahe'nimo'za koro fregahaze. E'ina'ma hanage'ha Anumzamoka nagri kaziga mani'enka hara huzmantane hu'na ke'na antahi'na hugahue. 10 Anumzamo'ma Agrama huvempama hu'nantenegu nentahina agi'a ahentesga hugahue. Tamage Ra Anumzamokama huhampri nante'nana zanku kagia erisga hugahue. 11 Nagra Anumzamokare namentintia nehuanki, na'a hanige'na amne vahetfankura korora hugahue. Agra vahetfa mani'neanki na'a hunantegahie? 12 Nagra huvempama hu'noa kere amage ante'na, nazama nehana zantera susu hu'na ofa hugantegahue. 13 Na'ankure Kagra fri zampintira nagu'nevazinka, tanafa'ma hu'za nehugenka naza hu'nane. E'ina hu'nananki'na menina amne Anumzamoka kavuga vano nehu'na, vahe'moma asimu'ma erino nemania tavitera vano hugahue.

57 Kasunku hunanto Anumzamoka, kasunku hunanto!
Na'ankure nagra kagripinka franekue. Kagri kagekonamofo
turunapinka, fraki'na mani'nenugeno hazenke zamo'a
nagateregahie. 2 Marerirfa Anumzamofontega nagra
kezatigahue. Maka zama hugantegahuema nehia zama
hunenantea Anumzamofontega kezanatigahue. 3 Agra
monafinkati nazama hu'zana atresigeno eme nagura vazigahie.
Nagofetu'ma zamagama re'za vonoma nehaza vahetmina, Agra
zamazeri zamagaze hugahie. Anumzamo'a monafinkati vagaore
avesizane, hugahuema hu'neaza huno navesinte vava hugahie.
4 Nagra vahe'ma amprizama nenaza laioniramimofo amu'nozmifi
mani'noe. Zamave'mo'ma keve kna higeno zamagefu'namo'ma
bainati kazinkno kna'ma hu'nea vahetmimofo amu'nompi
mani'noe. 5 Anumzamoka monaramina agaterenka onagamu
mani'nananki'za husga hugantegahaze. Hagi masazankamo'a
maka ama mopafina remsa hanie. 6 Ha' vahe'nimo'za
nahenaku krifu anagi ante'nazageno nagu'amo'a kna nehie.
Hanki kama vu'na e'nama nehfina, keri kafinte'nazanagi, ana
kerifina zamagra'a tamigahaze. 7 Anumzamoka nagu'areti
hu'na nagra kagritera namentinti nehue. Nagra nagu'areti
namentinti nehuanki'na zagamera hu'na kagia ahentesga
hugahue. 8 Nagu'amoka otio. Hapu zavenane laeri zavenanena
oti'o. Nagra zagame hu'na ko'matu'zana azeri otigahue. 9
Nagra maka kokankoka vahe'mokizmi zamavufina, susu hu'na
kagia ahentesga hugahue. Maka vahe'mokizmi zamavufina
zagamera hu'na Anumzamoka kagia ahentesga hugahue.
10 Anumzamoka vagaore kavesizamo'a, monagna huno
amunagamu marenerigeno, hugahuema hu'nana kema amage
antenka hu kavukava zamo'a amunagamu marerino hampona

avako nehie. 11 Anumzamoka monaramina mani agaterenka onagamu mani'nanankino, vahe'mo'za husga hunegante'nageno masazanka'amo'a maka ama mopafina remsa hugahie.

58 Tamagra kva vahe'mota fatgo naneke keagafina nehzafi?

Tamagra fatgo huta vahe'mokizmi naneke refko nehazo? 2 I'o, tamagu'afina kefozama hu antahintahi retro nehuta, ama mopafi vahera zamazeri haviza nehaze. 3 Kefo avu'ava'ma nehaza vahe'mo'za anama kasezmanetegati kana atre'za hazagre'naze. Zamagra nezamarera ku'afi mani'neza havigege hu'naze. 4 Nanekema hazazamo'a ha' osifavemofo avu'ataga zankna nehige'za, nanekema nehazazamo'a kobra osifavemo'ma hiaza hu'za kea nontahize. 5 Hagi zavenama aheno osifavema azeri oti vahe'mo'a, eri ruzahu ruzahu huno'ma zavenama ahesiana, ana osifavemo'a ontahigosie. 6 Anumzamoka zamagipima me'hea zamavera rutafri atro. Ra Anumzamoka ama ana laioniramimofo zamagemazampa rutavegri atro. 7 Zamatrege'za hagege mopafima tima tagiramino ome fananema hiaza hu'za fanene hiho. Zamatrege'za koravemo'za hagage hazaza huge, osi mofavremo ana kasentegeno zage onkeneno friankna hiho. 9 Kavoramimo'ma tevere'ma me'heno amuhoma nehia kna'a agetereno, Anumzamo'a ame huno kasefa vahero, ozafa tavavar, kefo avu'ava'ma nehaza vahera ruharafi hutregahie. 10 Anumzamofoma amage'ma nentaza vahe'ma, kefo avu'ava'ma nehaza vahe'mo'zama zamazeri havizama nehaza zante'ma Anumzamo'za nonama huno zamahenige'za, kenu'za muse hugahaze. Anumzamofoma amage'ma nentaza vahe'mo'za kefo zamavu'zamava'ma nehaza vahe'mofo korampi zamagia sese hugahaze. 11 Ana hanige'za maka vahe'mo'za

amanage hugahaze, tamage huno fatgo avu'ava'ma nehaza
vahe'mokizmia mizazmia me'neankino, fatgo huno'ma ama
mopafima vahe'ma refkoma nehia Anumzana mani'ne hu'za
hugahaze.

59 Anumzamoka ha' vahe'nimofo zamazampintira nagu'veazio.
Ha' vahe'nimo'zama ha' hunantenaku'ma neazana nahokenka
navre frakio. 2 Kefo avu'ava'ma nehaza vahe'mokizmi
zamazampintira nazeri vario. Vahe korama eri taginaku'ma,
tusi'zama hu'za vanoma nehaza vahe'mokizmi zamazampintira
nagu'veazio. 3 Hagi ko, zamagra nagri nahenaku kafona
nentaze. Ra Anumzamoka nagra havizana hunozmante'na
kumira osu'noanagi, hankavenentake ha' vahe'mo'za nahenaku
antahintahia retro nehaze. 4 Nagra mago havizana osu'noanagi,
ha' hunante'naku zamaga re'za ome retrotra nehaze. Otio!
Otinka nagri'ma hunante'zama nehaza zana negenka naza huo.
5 Ra Anumzana Monafi sondia vahe'mokizmi Anumzamoka,
Kagra Israeli vahe Anumza mani'nananki, otinka kokankoka
vahe'mo'zama ha'ma hunante'zama nehaza vahera knazana
zaminka zamazeri haviza huo. Kefo avu'ava'ma nehaza
vahe'tmina, kasunkura huozamanto. 6 Ana maka kinaga
e'za rankumamofona meg'i'a eme kagigagi nehu'za, kramo'ma
nehiaza hu'za hauhau hu'za vano nehaze. 7 Knare osu
nanekema zamagipinti'ma atineramiana ko. Zamagipinti'ma
rukahama huneramia nanekemo'a, bainati kazi atiramiankna
nehige'za amanage nehaze, Iza naneketia antahigahie hu'za
nehaze. 8 Hianagi Ra Anumzamoka Kagra ana vahetmina
zamagiza nerenga, kokankoka vahetamina kiza zokago ke
hunezmantane. 9 Kagra nagri hankave mani'nananki'na, Kagri
kavega mani'nengenka, nagura vazigahane. Na'ankure Kagra

Anumzamoka, nagrama frakisua hankave vihuni'a mani'nane. **10**
Nagri Anumzamo'a vagaore avesizama'areti avesima nenantea
ne'mo naza hugahie. Anumzamo'a naza hanige'na, ha' vaheni'a
zamage fenkaminete'na zamagiza regahue. **11** Ra Anumzamoka
zamahe ofrio. Na'ankure nagri vahe'mo'za ame'ama hu'za
rempima huzmina zana zamagenekanize. Hanki hihamukanu
zamahe arava hege'za zamarena reho. Ra Anumzamoka kagra
tagri hanko mani'ne. **12** Hagi ana vahe'mo'za kumi'mo avite kege
nehaze. Na'ankure ana vahe'mokizmi zamagipina kefo kemo
avite'ne. Zamatrejeno zamagri zamavufaga ra hu'zamo, zamazeri
haviza hino. Na'ankure zamagra kazusi ke nehu'za, krunage
nehaze. **13** Ra Anumzamoka karimpa ahe zamantenka zamahe
fanane huo! Zamahe fanane huge'za magore hu'za omaniho.
E'ina huge'za maka ama mopafi vahe'mo'za Anumzamo'a
Jekopu naga Israeli vahera kegava huzmantene hu'za ke'za
antahi'za hiho. **14** Ana maka kinaga ete e'za rankumamofona
meg'i aeme kagigagi nehu'za, kramo'ma nehiaza hu'za, hauhau
hu'za vano nehaze. **15** Zamagra ne'zankura maka kaziga
hake'za vano nehu'za, ne'zama nezamu'ma nosu'za hauhau
hu'za vano nehaze. **16** Hianagi nagra hihukagura zagamera
hugahue. Maka nanterana vagaore kavesizankura zagamera
hu'na kagia ahentesga hugahue. Na'ankure Kagra knazampima
mani'nogenka, nagrira fraki kuma'ene naguvazi kuma'ene
mani'nane. **17** Anumzamoka kagra hankavenia mani'nananki'na,
Kagritega zagamera hu'na kagia ahentesga hugahue. Kagra
fraki kumani'a mani'nanankinka, vagaore kavesizanka'aretima
kavesima nenantana Anumza mani'nane.

60 Anumzamoka, Kagra ko tatrenka tazeri haviza hu'nane.
Kagra krimpa aherantenka e'nananki, menina ete tazeri knare

huo! 2 Kagra mopa eri tore hankeno, kekora reno vuno
eno hu'neanki, ana kekokana renagro. Na'ankure mopamo'a
zahufa kazara nehie. 3 Kagra vaheka'amofona rama'a
knaza zaminka zamazeri amuho nehunka, hankave waini
taminketa neteta neginagia hu'none. 4 Hianagi Kagri'ma
koro'ma hugante'za, mono'ma hunegantaza vahera kevemo'ma
zamavate'ma zamazeri zankura, mago avameza zami'nane. 5
Kagrama kavesima nezmantana vahera zamagu'vazio. Tamaga
kazanu taguranevazinka, nunamuntia antahiraminka kenona
huranto. 6 Ruotge hu'nea konarari'afi mani'neno, ama huvempa
kea hu'ne. Nagra muse hu'na Sekemu kumara eri fako nehu'na,
Sukoti agupomofo zaza'ane upa'anena mesarimi hu'na kegahue.
7 Giliati'ene Manase'enena nagri suza mani'na'e. Hanki Efraemi'a
Nagri fetori manigeno, Juda'a kini azompani'a mani'ne. 8 Hianagi
Moapu mopa tima nefroa zuompani'a me'nigeno, Edomu mopare
nagia anona zafitregahue. Filistia vahera hara huzamagatere'na
musena hugahue. 9 Hagi iza navareno hankavenentake vihuma
me'nea rankumapina vugahie? Iza navareno Edomu moperara
vugahie? 10 Anumzamoka Kagra tatreka kamefira huneramino?
Kagra ru'enena tagri sondia vahetaminena hatera ovugosano? 11
Taza hunka ha' vahetia hara huzmanto, na'ankure vahetfamo'za
taza hugara osu'naze. 12 Anumzamofo hanavereti ha' vahetia
hara huzmagateregahune. Agra ha' vahetia zamahetreteno,
zamagofetu agia reno zamare hapatigahie.

61 Anumzamoka krafage'ni'a antahio! Nunamu ke'ni'a kagesa
antenka antahio! 2 Nagu'amo'ma knama nehige'na, mopa
atumparegati naza huogura Kagritega kezana netue. Hanki
navrenka hanavenentake havere marerige'na nagu'vazi'neno.
3 Na'ankure Kagra fraki kuma'ni'a mani'nenka, vihuni'a

mani'nanankino ha' vahe'nimo'za eme onahegahaze. 4
Natrege'na mono nonka'afi manivava hu'na va'neno. Natrege'na
Kagri kagekonafinka fraki'na mani'neno. 5 Na'ankure huvempama
hu'noana, Anumzamoka antahi'nane. Kagri kagigu'ma koro'ma
hu'za mono'ma hugantesaza vahe'mo'za erisanti haregahaze
hunkama ante'hana zana nagri nami'nane. 6 Kini ne'mofona
mago'ene kafuzage'a erinte za'za huo. Vahe'ma forehu anante
anante'ma huno'ma vania knafina, agra zazate ama mopafina
manigahie. 7 Agra Anumzamofo avuga kini manivava huno
vugahie. Hagi vagaore kavesi zamo'ene hugahuema hu'nana
zama hu kavukva zamo'a, kegava huntiesie. 8 Ana'ma hananke'na
knane knanena kagia ahentesga huvava hugahue hu'nama
huvempama hu'noa kante antena, zagamera hu'na kagia
ahentesga hugahue.

62 Anumzamo'ma nazama hanigu akohe'na avegante'na
mani'noe. Na'ankure Agrake nagura nevazie. 2 Agrake'za
fraki haveni'a mani'neno, nagura nevazie. Agra fraki kumani'a
mani'neankina, antria hu'na korora osugahue. 3 Hago zazate
ana maka vahe'mota magoke nera hara renteta aze. Ana
maka'moza nahenaku nenavararize. Zamagrama nagazana
nagra fraguvazirami have keginagna huge, kuraramperami
keginagna hu'noe. 4 Nagrama ra nagima eri'na mani'noa
zana, nazeri fenkami atrenaku, keaga retro nehaze. Havigema
hu'za nagri'ma nazeri havizama hu'nakura tusi muse nehaze.
Navurera husga hunenantazanagi, zamagu'afina antahi haviza
hunenantaze. 5 Anumzamoka Kagrikuke nagra akohe'na kavega
ante'na mani'noe. Nagra Kagripi amuha zani'a ante'noe. 6
Agrake'zage framaki hanave havenia mani'neankina, kegava
hunenanteno nagu'nevazie. Agra fraki kumani'a mani'neankina,

antria hu'na korora osugahue. 7 Anumzamoke nagura nevazino, ra nagia nemarie. Anumzamoke havegani'ane, fraki kumani'anena mani'ne. 8 Vahe'nimota Agriteke maka kna tamentintia hiho. Maka tamagu'a Agriteke anteho, na'ankure Agra fraki kumati mani'ne. 9 Agima me'nea vahetetima vuno agima omane vahetema vu'neana, mago asimu'ma hutreankna hu'nazankiza, zamagra amne'za Agri avufina mani'naze. Hanki zamagra'a knama sigelire'ma erinte'zama kesazana, knazmimo'a zahomofo kna'a agateore'ne. 10 Vahe'ma knama amino azeri havizama hu'zamo naza hugahie hunka kamentintina huge, musufamase avu'avazamo naza hugahie hunka amuhara huge, fenozanka'amo'ma ome rama huno nevanigenka, ana zamo'a naza hugahie hunka amuhara osuo. 11 Anumzamo'ma magoke kema nehige'na, tare zanku nagesa nentahue. Hihamu hankaveane Anumza mani'nane. 12 Vagaore kavesizana, Ra Anumzamoka Kagri suzane. Tamage hunka maka vahera refko huzmantenka nazanoma hu'nenarera nona hunka mizana zamigahane.

63 Anumzamoka Kagra nagri Anumza mani'nanke'na, Kagrikura tusiza hu'na nehakroe. Nagu'amo'a tinku'ma hiaza huno, Kagrikura navenesigeno, tima omne hagage kokampina navufgamo'a Kagrikura tusiza nehie. 2 Hagi Anumzamoka mono nonka'afina negage'ha hihamukane, masaka'anena ke'noe. 3 Na'ankure vagaore kavesi zamo'a asimu'ma erino mani'zana agatere'neanki'na, kagi'a erisga huvava hugahue. 4 Nasimu'ma erina mani'na vanua knafina, kagi'a ahentesga nehu'na, nazana erisga hu'nena Kagritega nunamuna hugahue. 5 Knare ne'zama naminke'na nemamura nehuankina, muse zagame hu'na husga hugantegahue. 6 Hanki tafenire'ma

masenena, kagrikura nagesa nentahi'na, ana kenagera nunamuna nehu'na, nagesa antahigami'noe. 7 Na'ankure Kagra nazahu ne' mani'hanki'na, nagra Kagri kagekonamofo turunapinka mani'nena muse zagamera hugahue. 8 Anumzamoka nagu'amo'a Kagrite tragoteno me'negenka, tamaga kazanu nazeri antrako nehane. 9 Hianagi nagri'ma nahenaku'ma nehaza vahe'mo'za haviza hugahaze. Zamagra friza fri vahe'mofo kumapi amefenkame mopa agu'a uramigahaze. 10 Bainati kazinknonu zamahe vagaresigeno, afi kramo'za zamavufaga'a traga hu'za negahaze. 11 Hianagi kini ne'mo'na Anumzamokagu musena hugahue. Anumzamofonte'ma zamentintima nehaza vahe'mo'za, Anumzamofona agia erisga nehanageno, havigema nehaza vahe'mo'za kea osugahaze.

64 Anumzamoka narimpa havizama hu'zama huama'ma hanuana antahi nenaminka, ha' vahe'mo'za nazeri koro ke nehu'za, nahe'za nehzanki kegava hunanto. 2 Kefo avu'ava'ma nehaza vahe'mo'za nahenaku nanekea oku'a retro nehzanki, nazeri franekinka, ranke rankema nehaza kefo vahe'mokizmi zamavureti nazeri frakio. 3 Zamagra ana vahe'mo'za bainati kazin kume'ma kaneaza hu'za, zamagefu'na kumera negane'za, nanekema hazana, kefo nanekezmimo'a kevema ahetrazaza nehzaze. 4 Ana vahe'mo'za kafoma ante'nazafinti kezmima omene vahera kevea nezmahe'za, antri hazaza hu'za korora osu tusiza hu'za hara hunezmantaze. 5 Zamagra kefo avu'avazama hunakura kea huganti hugama hu'za zamazeri hankaveneti'za, vahe krifuma anagintesagura oku'a keaga retro nehzaze. Ana nehu'za mago vahe'mo'a onketfa hugahie hu'za nehzaze. 6 Hazenkema hu' kema retroma nehu'za amanage nehzaze, knare antahintahirafa retro hune hu'za

nehaze. Vahe'mofo agu'afine antahintahifina vahe'ma revatga
huzamoke avite'neankinka keamara osutfa hugahane. 7
Hianagi Anumzamo'a Agra kevea zamahe'nige'za, ame hu'za
hazenkea erigahaze. 8 Zamagri zamagefu'namo zamazeri
haviza hanige'za, zamagesaza vahe'mo'za zamagena neru'za,
kiza zokago kea huzmantegahaze. 9 Ana hanige'za maka
vahe'mo'za koro nehu'za, Anumzamo'ma kaguvazama hia
zankura huama nehu'za, maka avu'avazama eri fore'ma hia
zamofonkura antahintahia huvava hugahaze. 10 Anumzamofoma
amage'ma nentaza vahe'mo'za Ra Anumzamofonkura muse
nehu'za, Agri turunapinka manigahaze. Ana nehanage'za fatgo
zamavuzmava'ma nehaza vahe'mo'za, muse nehu'za agi'a
ahentesga hugahaze.

65 Anumzamoka Saioni kumapi rankagia kamigahaze. Na'ano
hugantegahune hutama ko'ma huvempama hu'nenuna zana
tagra hugahune 2 Na'ankure Kagra nunamuntia nentahine.
Maka vahera Kagriteke egahune. 3 Tagrama kumitigu'ma
antahintahi hakarema nehunkenka, Kagra ana kumitia
apaserante'nane. 4 Tagrama huhamprintankeno, ruotge kuma
tava'onte'ma nemanimo'a rama'a asomu erigahie. Kagri mono
nompinka rama'a knare zane musezamo'enena avite'ne. 5
Anumzamoka knarezantfa huno mareri agatere'nea fatgo
kavukva hunka nunamuntia antahinka nona hunerantane.
Anumzamoka Kagra tagu'vazi ne' mani'nane. Ama mopafi
vahe'mo'za Kagrite zamentintia nehzageno, hagerimpima
afetema nemaniza vahe'mo'zanena kagrite zamentintia nehaze.
6 Kagra hihamukareti agonaramina trohunentenka, hanaveka'a
eri ama hu'nane. 7 Hagerimo'ma krantokrantoma nehigenka,
Kagra azeri arava nehenka, kokankoka mopafi vahe'mo'zama

rankerankema nehazagenka, zamazeri neraganane. **8** Mopa atumparegama nemaniza vahe'mo'za ruzahu ruzahu kaguva zantamima erifore'ma hana zankura, ama zana, naza fore nehie hu'za nehu'za, tusi zamagogogu nehaze. Zage hanati kazigati vuno zage fre kazigama umani emanima nehaza vahe'mo'za Kagrama hana kavukvamo zamagu'a zamazeri otige'za tusi muse nehaze. **9** Kagra mopa kegava hunenka tina aminkeno mopamo'a knare huno masavena nehie. Anumzamoka maka kaziga tina tro hunte'nanankino, knare huno witia tina amigeno, rama'a raga renente. Na'ankure Kagraka'a e'inahu huno fore hugahie hunka retro hunte'nana kante anteno efore nehie. **10** Hozama rekorinte mopafina Kagra kora atrankeno runteno mopa ru fru nehuno, mopa ragana runezmane. Ana nehunka ata kora atrankeno hozafina runtegeno ne'zamo'a knarerera huno nehageno rama'a ne'zana renente. **11** Kagra mago kafufina asomu hurantankeno, ne'zamo'a tusi'za huno amponere. Ana nehigeno kama vanoma hupinena nezamo'a aviteno herafineramie. **12** Hanki ka'ma kokampina trazamo'a hageno tretre nehigeno, agonaramimpina trazamo'a tretre huno refitegeno musena nehaze. **13** Hanki krahopina sipisipi afutamine, meme afutamimo'za avitazageno, agupofina witi hozamo'a fankanino kankmuna omnetfa hu'ne. Ana maka trazama nenaza afu'mozane hozamozanena ranke hu'za zagamera hu'za musena nehaze.

66 Maka ama mopa fima nemaniza vahe'mota, ranke huta zagamera huta Anumzamofona agi'a ahentesga hiho! **2** Anumzana Agri agimofo hihamu hanave'agura zagamera huta agi'a ahentesga hiho. Zgame huta Agri hihamu masazama'agura erinte ama hiho! **3** Anumzamofonkura, kavukva zamo'a knare zantfa huno mareri agatere'ne hiho. Ha' vahekamo'za Kagri

hihamu hankavegura koro hu'za zamavufaga eri anaki'za Kagritega neaze. 4 Maka ama mopafima me'nea zantamimo'za monora hunegante'za, zagamera hu'za kagia ahentsga hugahaze. Zgamera hu'za rankagia ahentesga hugahaze. 5 Eta tagri Anumzamo'ma hu'nea zana eme keho. Agra knarezantfa huno mareri agatere'nea avu'avaza, maka vahe'mofontera eri fore hu'ne. 6 Hagerina eripapa hugantigama huno kana erifore hige'za, Agri vahe'mo'za hagege mopafi rugitagi'za kantukaziga vu'naze. Hanki Agriku musena hanune. 7 Agra kinia mani'neno tusi'a hihamu'areti kegava huvava hugahie. Agra kokankoka vahera maka kna avua anteno nezmageanki, ke ontahi vahe'mo'za hara reonteho. 8 Maka ama mopafi vahe'mota Anumzamofona husga hunteho. Ranke huta agia ahentesga nehinke'za vahe'mo'za antahiho. 9 Tagrama fri'zankura kegava huneranteno, tatregeta regaririta trakara nosune. 10 Anumzantimoka rerahenka knazana neraminka, silvama tevefi kreno eri agru hiazza hunka tazeri agru hane. 11 Kagra kuko atrenka tazeritenka, tagumpina tusi'a knaza eri kofirantane. 12 Ana nehunka tatrankeno tasenia refrage mafrage hu'za karisia eri'za vano hu'naze. Tevefine timpinena ufre'nonanagi, ete Kagra tavrenka anketa maka'zama ampore'nea mopafi one. 13 Nagra tevefi kre fanane hu ofa mono nonka'afi eme hugantegahue. Nagrama huvempama hu'noa zantera ofa hugahue. 14 Nagra ra hazenkefi mani'nena, huvempa hu'noe. 15 E'ina agafare tevefima kre fanene hu ofa Kagritega hugahue. Nagra so'ema hu'nenia agonknaza ohari ve sipisipi afu kresramna vanugeno knare mna nevina, Nagra ve bulimakao afu'ene meme afu'enena Kagritega kresrama vanugeno, knare mna marerigahie. 16 Anumzamofoma koro'ma hunentaza vahe'mota, eta eme nentahinke'na Anumzamo'ma hunante'nea zana tamasmi'neno.

17 Nazama hinogura Agritega krafa nehu'na, nanekema hufina agi'a erisga huvava nehue. 18 Nagrama kumini'ama huama'ma osuresina, Ra Anumzamo'a nunamunkeni'a ontahisine. 19 Hianagi Anumzamo'a nunamuni'a nentahie. Nunamunkeni'a agesa anteno nentahie. 20 Anumzamo'a ra agi erisie. Agra nunamuni'a antahi amnea nosuno vaga ore avesizama'a nagritetira eri notre.

67 Anumzamoka kasunku hurantenka asomura hunerantenka, kavugosa rukrahe huramigeno kavugosafinti masamo'a remsa huranteno taza hino. 2 E'na hanankeno Kagri kavukva zana ama mopafi vahe'mo'za ke'za antahi'za nehanageno, tagu'ma vazi'nana hihamu hankaveka'a kokankoka vahe'mo'za ke'za antahi'za hugahaze. 3 Anumzamoka, vahe'mo'za kagia ahentesga hugahaze. Tamage maka kokankoka vahe'mo'za zagamera hu'za kagia ahentesga hugahaze. 4 Ana maka vahe'ma ama mopafima nemaniza vahe'mo'za musena nehu'za, zagamera hu'za kagia ahentsga hugahaze. Na'ankure Kagra mago avamenteke fatgo hunka vahera refko henezmantenka, kokankoka vahera antahintahia zaminka zamazeri fatgo nehane. 5 Maka vahe'mo'za zagamera hu'za Ra Anumzamoka kagia erisga hugahaze. Ana maka vahe'mo'za kagia erisga hugahaze. 6 Ana hanageno ama mopafina ne'zamo'a amporegahie. Anumzana tagri Anumzamo'a rama'a zampi asomura hunerante. 7 Anumzamo'a asomu hurantesie! E'na'ma hanigeno'a ana maka vahe'ma ama mopafima mani'naza vahe'mo'za Anumzamofona korora huntesaze.

68 Anumzamo'a otino ha' vahe'aramina zamahe panani hanie! Agri'ma avesrama hunentaza atre'za koro fregahaze. 2 Zamahe panani huge'za zahomo tevegu eri amne huno vuno eno

nehiaza hu'za freho. Fukimo tevemofo tava'onte me'neno
temramra hiaza hu'za, kefo avu'ava'ma nehaza vahe'mo'za
Anumzamofo avuga haviza hu'za fanene hugahaze! 3 Hianagi
fatgo zamavu'zamava'ma nehu'za Anumzamofo amage'ma
nentaza vahe'mo'za muse hiho. Anumzamofo vahe'mo'za
agri avuga musena nehanageno, musezamo'a zamagripina
avitegahie. 4 Anumzamofona zagamera huta agi'a ahentesga
hiho. Hampo agofetu'ma manino vanoma nehia nera husga
hunteho. Agi'a Ra Anumzanki, Agri avuga musena hiho. 5 Agra
megusa mofavre'ramimofo nezmafa mani'ne. Agra ruotge hu'nea
kuma'afi mani'neno, kento a'neramina zmahonekea Anumza
mani'ne. 6 Hagi agraku'ma nemania vahera Anumzamo'a naga'afi
avrentegeno muse huno nemanigeno, kinama hu'zama mani'naza
vahera kinafintira zamavare fegi atrege'za musena hu'za knare
nomani'zana nemanize. Hianagi Agri'ma ha'ma renentaza
vahera, hagege hu'nea mopafi zamantege'za nemanize. 7
Anumzamoka vaheka'ama Isipiti'ma zamavare atineraminka
kagia kazana ometre eme atre hunka masi hunka hagege
kokampima vugota hunka nevankeno, 8 mopamo'a momi'momi
huno tore'vare hu'ne. Anama hu'neana Anumzamoka kavuga,
Sainai agonamofo Anumzane, Israeli vahe Anumzamoka kavuga
anara hu'ne. 9 Kagri vahe'mo'zama erisantiharesaze hunkama
hagege mopama zami'nana mopafina, rama'a ko atrankeno,
kora aru kasri kasri huno maka zana azeri kasefa hu'ne. 10
Ana mopafi na Kagri vahera mani'nazagenka, ne'zana eri
amporenampinti zamunte omne vahera ne'zana Anumzamoka
zami'nane. 11 Ra Anumzamo'ma vahe'mokizmima nanekema
zamasamigeno, rama'a a'neramimo'za ana nanekea eri'za
vu'za ome huama hu'naze. 12 Hagi Kini vahe'mo'zane sondia

vahe'mo'zanena maka zana atre'za fre'naze. Zamagra makazana
atre'za frazage'za Israeli a'neramimo'za fenozmia refko hu'za
eri'naze. **13** Hagi zamagra sipisipi afu kevufima nemasageno,
maho namamofo agekonare silvanu rekamarenteankna nehuno,
azokate golinu rekamrenteankna huno refitegahie. **14**
Hankavenentake Anumzamo'ma ana mopafima nemaniza
kini vahe'ma zamahe panani'ma hu'neana, Zalmoni agonafi
ko'mopa ko tamiankna huno zamahe panani hu'ne. **15**
Basani agonaramina tusinasi agonarami me'ne. Basania
rama'a agonaramina amunagamu mareri'nea agonarami
me'naze. **16** Rama'a agona morusama me'nea agonamoka,
nagafare Saioni agonare'ma Anumzamo'ma manigahue hu'noma
hu'nea agonagura, kegasanea nehane? Tamagerfa huno
Ra Anumzamo'a ana agonare manivava huno vugahie.
17 Ohampriga'a karisiramimo'za Ra Anumzamofona azeri
kaginte'nazageno, Saioni agonaretira eno ruotgema hu'nea mono
noma'afinka emarer'i'ne. **18** Hanki mareri agatere'nea agonafima
marenerinka kina vahetmina zamavarenka marerinke'za, ke
ontahi vahe'mo'zane ha'ma renegantaza vahe'mo'zanena
musezana negamize. Menina Ra Anumzamo'a tagrane ama
agonafina manigahie hu'za nehaze. **19** Ra Anumzana
tagu'vazi Anumzamofona husga hunteho! Na'ankure maka
knafina knazantia Agra e'nerie. **20** Tagri Anumzana Agra
tagu'ma nevazia Anumza mani'ne. Mareri agatere'nea Ra
Anumzamo frizampintira tagura nevazie. **21** Hianagi Anumzamo'a
ha' vahe'aramina zamaseni rurako huno nezmaheno, ke
ontahi kefo zamavu'zmava zanku'ma zmavesinente'za ana
zamavu'zmavama nevaririza vahera Anumzamo'a zamaseni
zaferina rufuzafupegahie. **22** Ra Anumzamo'a huno, ha'

vahera Basanitira zamavare'na egahue. Amefenkame hageri agu'atira zamavare'na marerigahue. **23** Ana hanugeta nagri vahe'mota zamagri korampi tamagia sese nehanageno, kraramimo'zanena ana korana negahaze. **24** Anumzamoka Kagri nagara rama'amo'za erimpi hu'za neazage'za vahe'mo'za nezamagaze. Nagri Anumzana kini'nimoka naga'mo'za mono nompi erimpi hu'za unefraze. **25** Zgame'ma hu' vahe'mo'za vugota hazageno, zamefira ruzahu ruzahu zavenama ahe vahetami vazageno, amu'nompina mofa'nemo'za nevu'za nase'nasepana nehaze. **26** Maka Israeli vahe'ma atruma hanafina zagame huta Anumzamofona agj'a hentesga hiho. Israeli vahe'ma zamasimu'ma nezmia Ra Anumzana Zgame huta agj'a husga hunteho. **27** Osi nagara Benzameni naga'mo'za egote'za azageno, rama'a kva vahetmina Juda nagapinti azageno, maka Zebuluni nagapinti'ene Naftali nagapinti maka kva vahetmina e'naze. **28** Anumzamoka hihamuka'a eriama huo. Anumzamoka korapa'ma hu'naza hunka hankaveka'a eriama huo. **29** Ama mopafi kini vahe'mo'za musezana eri'za mono nonka'afi Jerusalemi egahaze. **30** Kokankokama ha' vahetamima mani'naza vahetamina zamazeri korio. Varoza trazampima afi zagama mani'naza zagaramina zamazeri korio. Bulimakao afutmima hankavezmi omne bulimakao anenta taminema mani'nazana zamazeri korio. Zamazeri arava hege'za silvane golinena eri'za takisia eme kamiho. Hanki ha'ma hu'zanku'ma musema nehaza vahetmina, zamahe panani huge'za freho. **31** Isipi vahe'mo'za zago'amo'ma marerirfa haveramina eri'za musezana eme negamisageno, Itiopia vahe'mo'za eme kepri hu'za monora hugantegahaze. **32** Ama mopafima kini vahe'mo'zama kegavama hu'naza kumatamimpima nemaniza vahe'mota,

Ra Anumzamofona zagamera huta agia ahentesga hiho. 33
Korapa'ma me'nea hampomofo agofetu'ma manino'ma harenoma
enevia nera zagamera huta agia erisga hiho. Kema nehigeno'a,
agerumo'a monagemo'ma hiaza nehie. 34 Anumzamofo hihamu
hankavemofo agi agenkea, huama hunka vahera zamasamio.
Agri konarari masa'amo'a Israeli vahera remsa hunezmantereno,
anami monafina hankave'amo'a avite'ne. 35 Anumzamo'a mono
noma'afina knare'zanfta huno mareri agatereno mani'ne. Israeli
vaher Anumzamo Agra'a vahera hihamu hankavea nezmiankino,
Agrake'za ragia erisie!

69 Anumzamoka nagu'vazio! Na'ankure timo'a ti hageno
nazeri nakrinaku nanankente ne-e. 2 Hapapi hampakanena
amefenkame supa'nena uneramue. Hankave moperara nagia
noroe. Timu'nompi nevugeno timo'a nazeri nakari'za nehie. 3
Anumzamoka nazama huogu'ma kavegama ante'nena krafagema
nehua zamo'a hanaveni'a omanegeno, navurgamo'a nata
negrigeno, nanankemo'a tusiza huno hagege nehie 4 Mago
haviza osu'nore'ma zamavaresrama hunenantaza vahem'o'za
nanumpima me'nea nazokara agatere'za rama'a vaher mani'haze.
Anumzamoka hankavenentake ha' vahem'o'za havige hu'za nahe
fri'za nehaze. Havige hu'za e'ori'noa zankura musufa se'nananki
tamio hu'za nehaze. 5 Anumzamoka Kagra neginagi navu'nava
zani'a kenka antahinka hu'nanankino, maka kuminii'amo'a
Kagri kavurera frara okigahie. 6 Ra Anumzamoka kagrite'ma
zamentintima nehaza vahera, nagrama hanua navu'navazamo'a
zamazeri zamagazea osino. Monafi sondia vahem'ofo Ra
Anumzamoka nagrama hanua navu'nava zantera zamazeri
fenkamia ozmatro. Kagra Israeli vaher Anumza mani'nane. 7
Na'ankure nagra Kagri kamagema antoa zanku kiza zokago

kea hunenantazage'na nagazegura nehue. Ana nehugeno nazeri havizama nehaza zamo'a tusiza huno nazeri nagaze nehie. 8 Nafuhemo'zama nenage'za keno antahino'ma osu'nea vahe'ma agatereankna nehaze. Hagi nenrera mofavremo'za rurega vahe'ma huntazankna zamavu'zamava hunenantaze. 9 Mono nonka'agu'ma navesintoa zamo'a nagu'afina tevema reankna nehigeno, Kagri'ma kazeri havizama hu kema nehaza vahe'mo'za nagri'enena nazeri haviza hu naneke nehaze. 10 Hanki zavi'ma nete'na kave'ma a'o'ma hu'na nunanuma nehuge'za vahe'mo'za, nazeri haviza hu ke nehaze. 11 Nasunku'ma nehu'na nasunku kukenama huazankura, zamagra hunte'za kiza zokago ke hazage'na nagra zamagri zamavurera kiza zokago zankna hue. 12 Hanki rankuma kafante'ma nemaniza kva vahe'mo'za nagenke nehazageno, akatima nene'za neginagima nehaza vahe'mo'za nazeri haviza hu zagame asunenantaze. 13 Hianagi menina kna fatgo'are nunamuna nehuanki Anumzamoka vagaore kavesi zanteti kavesinantenka nona hunantenka tamage hunka nagu'vazio. 14 Anumzamoka hapapintira navresga hunka nagu'vazio. Hanki natrege'na hapapina hampakanena uofra'neno. Zamavresrama hunenantaza vahe'mokizmi zamazampintira nagu nevazinka, tirupintira navazuhuti atro. 15 Anumzamoka natregeno tima hageno esiantimo'a eme narefi otege, tirumo'a nazeri onakrige, fri vahe kerimo'a nasgahu onakrino. 16 Ra Anumzamoka nunamuni'a antahinaminka nona hunanto, na'ankure vagaore kavesizamo'a knarezantfa hu'ne. 17 Anumzamoka eri'za vahekamo'na kamefira huonaminka, ame hunka nunamu keni'a antahinka nona hunanto. Na'ankure ra hazenkefi mani'noe! 18 Anumzamoka erava'o hunka nahokenka nagu'vazio. Ha' vahe'ni'amofo zamazampintira

ete nagu'vazinka navro. **19** Ha' vahe'nimo'zama nazeri nagaze
nehu'za, hu haviza hunenante'za, nagima eri havizama nehaza
zana Kagra ko kenka antahinka hu'nane. **20** Kema nenasuza
nazeri havizama hazza zamo'a, tumoni'a netanege'na kria enerue.
Hagi zamasunku hunantegahazafi hu'nama hua vahe'mo'za
zamasunkura hunonantaze. **21** Hagi ne'zama namigazana
netre'za, vahe'ma ahe nefriaza avu'atgaza nezampina ante'za
nenami'za, tinku'ma navenesige'za tima namigazana atre'za,
aka waini nami'naze. **22** Atregeno rama'a ne'zama retro hunte'za
nenaza zamo'a, kukonkna huno zamazeri haviza nehina, maka
zampima knare'ma hu'za nemaniza nomanizamo'a krifugna huno
zamazeri haviza hino. **23** Atregeno zamavumo'a asu nehinke'za,
zamavua onkeho. Ana nehunka zamatregeno zamavufagafina
hanavezmia omne amne nehina, hanavezmia atreme vu'za ome
haviza hiho. **24** Kagra karimpa ahe'zamantenka zamazeri haviza
nehunka, tusi'a kasivazi nezmantenka zamahe hana huo. **25**
Nonkumazmimo'a haviza nehinkeno, nevasaza seli nozmimo'a
vahera omaninigeno zutesie. **26** Na'ankure Kagrama knama
zaminka zamazeri havizama hana vahera zamahe'za zamasu'za
nehu'za, zamazeri havizama nehanke'za zamatagu'ma nehaza
vahe'mokizmia ki'za zokago ke hunezmantazageno mago'ane
zamatagura nehaze. **27** Kumi'zmia erinte agofetu agofetu
nehunka, ana kumizmia apasezmantenka zamagura ovazio. **28**
Asimu eri avontafepima zamajima me'neana renehaganenka,
fatgo avu'ava'ma nehaza vahe'mokizmi zamajima krentesampina
zamagia kreonto. **29** Anumzamoka knazampi mani'nena
natagu nehuanki, vahe'ma zamagu'ma nevazina hihamuka'anu
nagu'vazio. **30** E'inama hananke'na zagame hu'na kagia
ahentesga nehu'na, susu hugante'na husga hugantegahue.

31 Na'ankure e'i ana'ma hanua zamo'a bulimakao afu'ma aheno kresramna vuge, maka pazine'ene agigo azankonema me'nenigeno kresramna vanigeno Ra Anumzamo'ma musema hu'zana agatere'ne. **32** Zamavufama anterami'za nemaniza vahe'mo'za Anumzamo'ma eri'zama erisia zana nege'za, musena hugahaze. Anumzamofonku'ma nehake'za nunamuma hunentaza vahe'mo'za hankavea erigahaze. **33** Na'ankure Ra Anumzamo'a maka zanku'ma upama nehaza vahe'mokizmi krafagea nentahino, Agri naga'ma zamavare'za kinama ome huzmante'naza vhahera ozmatregahie. **34** Maka monamotane, ama mopamokanena Ra Anumzamofona agia ahentesga nehinkeno, hagerine maka ana hageri agu'afima nemaniza zagamotanena zagamera huta agia ahentesga hiho. **35** Na'ankure Anumzamo'a Jerusalemi kumara agu'nevazino, Juda rankumatamina eri fatgo huno kigahie. Ana hanige'za Agri vahe'mo'za anampi mani'ne'za zamagra mopazmia erisanti haregahaze. **36** Eri'za vahe'amofo nezmagehoza erisanti hare'za nemanisage'za, agri'ma amagema nentaza vahe'mo'za anampina manigahaze.

70 Muse hugantoanki Anumzamoka nagu'vazio! Ra Anumzamoka ame hunka enka eme nazahuo. **2** Nahenaku'ma nehaza vhahera zamazeri fenkami netrenka, zamazeri zamagaze huo. Hagi hazenkefima mani'noge'zama musema nehaza vhahera zamazeri rukrahe huge'za zamagazegu nehu'za viho. **3** Oho! Meni keta eri fore hu'ne hu'zama nagriku'ma nehaza vahetmina, zamazeri zamagaze huge'za zamagazegu hiho. **4** Hianagi Kagriku'ma nehakaza vahe'mokizmia, tusi'a muse'za ante avite'zmantesane. Zamagu'ma vazi'nana zanku'ma zamave'nesia vahe'mo'za Anumzana marerirfa Anumza mani'ne hu'za ranke hu'za kagia ahentesga huvava hanaze! **5** Hianagi nagra

namunte omne maka zankura upa nehua ne' mani'noe. Hanki Anumzamoka muse hugantoanki, ame hunka eme naza huo. Kagrake'za naza hunka naguvasi' nera mani'nananki, Ra Anumzamoka ame hunka eme nazahuo.

71 Ra Anumzamoka kegava hunantogu Kagritega neoanki, natrege'za ha' vahenimo'za nazeri nagazea oshiho. 2 Nahokenka nagu'vazio, na'ankure Kagra fatgo avu'ava zanke nehana Anumza mani'nane. Kagesa antenka krafageni'a nentahinka nagu'vazio. 3 Hanavenentake havegani'a mani'nege'na anampinka fre'na maka kna ome frakineno. Kagra huzmanteg'e'za nagura vaziho. Na'ankure Kagra nagu'vazi havegani'ane vihuni'ane mani'nane. 4 Kefo zamavu'zmava'ma nehaza vahe'mokizmi zamazampinti'ene, vahe'ma zamazeri havizama nehaza vahe'mokizmi zamazampintira nagu'vazio. 5 Na'ankure Ra Anumzamoka kagrake'za nagri amuha zani'a mani'nane. Mofavrema mani'nena agafa hu'na kagritera namentintia hu'noe. 6 Kasema nanteneregati kagrake'za naza hankena mani'na e'noe. Kagra nенарера arimpafintira navre atirami'nane. E'ina agafare zagamera hu'na Kagri kagia ahentesga huvava hugahue. 7 Maka zama nagri mani'zampima fore'ma nehia zana, rama'a vahe'mo'za ke'za antahi'za nehu'za rempi nehaze. Na'ankure kagra hanaveni'a mani'nanka, kegava hunenantane. 8 E'ina agafare tagane'na omani zagamera hu'na kagi'a ahentesga huvava hugahue. Ana nehu'na maka kna kagri hihamu masakagura huama hugahue. 9 Hanki ozafama renugenka Anumzamoka onatro. Hankaveni'ama omanenigenka kamefira huonamio. 10 Na'ankure ha' vahe'nimo'za nazeri haviza hu naneke nehu'za, nahe frinaku oku'a nanekea retro nehaze. 11 Zamagra amanage nehaze, Anumzamo'a amefi humianki,

avaririta ome azerisune. Na'ankure mago vahe'mo'a ahora
okegosie hu'za nehaze. **12** Anumzamoka nagrira natrenka afetera
omanio. Anumzani'amoka ame hunka enka eme naza huo. **13**
Havigema hunante'za nazeri havizama nehaza vahe'mokizmia,
zamazeri zamagaze nehunka zamazeri haviza huo. Hanki
hazenkema naminaku'ma nehaza vahera zamazeri fenkami
netrenka, zamazeri zamagaze huo. **14** Hianagi nagra kagrite
amuhara huvava nehu'na, zagamera hu'na mago'ene kagia
ahentesga huvava hugahue. **15** Fatgo kavukava zanka'agura
nagra huama nehu'na, vahe'ma agu'ma nevazina zankura maka
zupa huama hugahue. Na'ankure kagra tagu'ma vazi'nanana ra
zankrefa tro hu'nanankina, nagra ke'na antahina hugara osu'noe.
16 Ra Anumzamoka hanavenentake eri'zama eri'nana zankura
nagra husga hugantegahue. Kagra maka'zama kegava hu'nana
Anumzana mani'nanankina, fatgo kavukava'ene Anumza kagrake
mani'nane hu'na mika vahera zamasmigahue. **17** Anumzamoka
mofavrema mani'noretima agafa huno amare'ma eana, Kagra
rempi hunaminka neanke'na hentofazama hu'nea kavukva
zanka'agura huama hu'na vahera zamasami vava nehue. **18**
Ozafama resugeno efe nazoka'ma tagisiana, Anumzamoka
onatrenka naza huge'na mani'nena, hihamu hankaveka'ane, ranra
kaguvezama erifore'ma hu'nana zantminkura, menima fore'ma
nehaza vahera zamasmi'neno. **19** Anumzamoka fatgo kavukva
zankamo'a mona agatereno ame'anagema mareri'ne. Kagra
ruzahu ruzahu kaguva zanke erifore hu'nane. Anumzamoka
kagri kna vahera ama mopafina omani'ne. **20** Kagra antahinenka
natranke'na hazenkefine knazampinena unefroe. Hianagi kagra
nazeri knare nehunka, amefenkame mopa agu'ama mani'nofintira
ete navre atiramigahane. **21** Navresga hunka ra nagi nenaminka,

mago'ane nazeri knare hunanto. **22** Hapu zavena ahena kagia ahentesga hugahue. Na'ankure kagra huvempama hu'nana keka'are amage ante Anumzani'a mani'nane. Israeli vahete'ma Ruotge'ma hu'nana Anumzamoka, nagra laeri zavena nehe'na zagamera hu'na kagia ahentesga hugahue. **23** Nagra ranke hu'na muse zagamera nehu'na, Kagia ahentesga hugahue. Na'ankure kagra nagu'vazinka ete navre'nane. **24** Hagi fatgo kavukva zanka'agura maka kna huama hu'na vahera zamasami vava hugahie. Na'ankure nazeri havizama hunaku'ma nehaza vahera zamazeri fenkami netrenka zamazeri zamagaze hu'nane.

72 Anumzamoka fatgoma huno refkoma hu' avu'ava zana kini nera neminka, fatgo kavukva zanka'a kini ne'mofa nemofona amio. **2** Fatgo avu'ava huno vaheka'a refko hunezmanteno, zamunte omne vahera fatgo avu'ava hunezmanteno kegava huzmantesie. **3** Ranra agonaramimo'za knare huno manifru hu nomani'za avre'za vahetera ne-enageno, neone agonaramimo'za fatgo avu'ava zamofona nena raga'a rentegahaze. **4** Zamunte omane vahera zamahonekeno, maka zanku'ma upa'ma nehaza vahemokizimi mofavreramina zamagu nevazino, vahem'a ha'ma renezmantaza vahera zamazeri haviza hugahie. **5** Zagema reno nevanigeno ikamo'ma remsa nehanire, fore'ma hu anante anante'ma hu'za vanaza vahem'o'za korora hunegante'za monora hugante vava hu'za vanaze. **6** Hagi kini ne'mo'ma vahem'a kegavama hania avu'ava zamo'a, menima apri'nea apepate'ma ko'ma runteankna nehuno, mopafima atako'ma runteankna hugahie. **7** Kini ne'mo'ma kegavama hania kna'afina, Anumzamofoma amage'manentaza vahem'o'za mani'za zmifina knare hu'za hagegahaze. Ikamo'ma remsama nehanifima maka'zama hanaza zamo'a, knare zanke huno tretre hanie. **8** Hagi

mago hagerinteti'ma vuno mago hagerintema vanigeno, Yufretisi
tinteti'ma vuno, mopa atumparegama vuno e'noma haniana,
ana kini ne'mo miko vahera kegava hanie. **9** Hanki hagage
kokampima nemaniza vahe'mo'za agrite zmarena emere'za kepri
nehanageno, ha' vahe'aramimo'za zamavugosaregati avuga
masene'za kugusopa negahaze. **10** Hanki Tasisi kumate kini
vahe'mo'zane, hageri amu'nompima nemaniza vahe'mo'zanena
takisi zagoa eri'za kini nera eme amigahaze. Ana nehanageno
Seba kumate kini ne, Seba'enena ana hu'za musezana eri'za
kini nera eme amigahaze. **11** Maka kini vahe'mo'za agrite
kepri hunentesageno, maka kokankoka vahe'mo'za agri eri'za
erintegahaze. **12** Na'ankure zamunte omne vahe'mo'zama
krafagema nehanageno'a, agra antahizmino zamagu vazigahie.
Vahe'mo'za zamazeri havizama nehazage'zama, vahe'mo'zama
zamazama nosaza vahera, agra zamaza hugahie. **13** Zamunte
omne vaheku'ene maka zanku'ma upama nehaza vahekura
agra asunku hunezmantero zamagu' vazi'nige'za ofrigahaze. **14**
Vahe'mo'zama knama zami'za zamazeri haviza nehu'za, ha'ma
rezmantaza vahera zamahokeno zamagu vazigahie. Na'ankure
agri avurera vahera raza mani'naze. **15** Kini ne'moka zazate
manigahane! Seba kumateti golia eri'za kagri eme kamisaze.
Maka zupa kagrikura nunamuna hunegante'za, asomu kea
hugantesaze. **16** Ama mopafina witimo'a rama'a nehanigeno,
agonafinena witimo'a hageno, marerino umase emase hanie.
Lebanoni zaferamimo'ma nehiaza huno zafa ragamo'a knare
huno renentenigeno, ran kumapima nemaniza vahe'mofo
nomani'zamo'a tra'zama hageno tretre hiakna huno, knare'za
huno afovage huno tretre hugahie. **17** Hanki kini ne'mofo ajimo'a
mevava huno nevina, zagemo'ma me'neno'ma remsama huno

vania kna'afina kini ne'mofo agia erisga hugahaze. Anumzamo'ma
agri'ma asomu'ma hunte'neankna huno maka ama mopafi vahera
asomura hunezmantesige'za nege'za ana nera husga huntesaze.

18 Ra Anumzana Israeli vahe Anumzamofona agi'a ahentesga
hanune. Agrake'za knare huno mareri agatere avu'ava zana
erifore nehie. **19** Ra Anumzamofona hihamu masa'ane agi'a
ahentesga huvava hanune! Hankavenentake masa'amo'a maka
ama mopafina remsa hanie! Tamage! Anazana fore hanie. **20**
Jesi nemofo Deviti nunamumo'a amare eme vagare'ne.

73 Tamagerfa huno Anumzamo'a Israeli vahe'mokizmia knare
hunezmanteno, zamagu'amo'ma agruma hu'nea vahe'mokizmia
knarera hunezamante. **2** Hianagi nagiamo'a kralige'na
traka hu'na masekate'noe. Nagiama renakeroana regaririna
masekatoe. **3** Na'ankure zamavufaga rama nehaza vahera
kanive renezmante'na, kefo avu'ava'ma nehaza vahe'mokzimi
nomanizamo'ma knare zanke'ma hia zama nege'na, kenanunu
hu'noe. **4** Na'ankure ana vahe'mokizmia zamavufagafina
zamatazana omanege'za, kria e'ori hanaveti'za nemanize. **5**
Mago'a vahe'mo'zama nehazaza hu'za hazenkefina uofrege,
ruga'a vahe'mo'zama nehazaza hu'za knazampina unofraze. **6**
E'ina hu'negu zamavufaga rama hu' zamo'a, zmanankempima
nentaniza pasesugna nehigeno, vahe'ma hazenkema zamizamo'a
kukena antanizankna hu'ne. **7** Ana vahe'mokizmi zamagu'amo'a
hanavenetino tapari'nege'za kefo avu'ava zana huvava hu'za
nevaze. **8** Zamagra kiza zokago kene kefo kege nehu'za,
zamavufaga ra nehu'za vahe'ma zamazeri haviza hu kankuke
nehakaze. **9** Zamagrama nanekema nehu'za monafima mani'naza
vahera huhaviza hunezmante'za, zamagra mopa eri nafa'a hu
nanekege nehaze. **10** Ana hazage'za zamagogogou nehzageno,

antahintahi zmimo'a savri nehie. Ana nehu'za ana vahe'mokizmi
nanekea tima nazaza hu'za nenaze. **11** Ana vahe'mo'za
amanage nehaze, inankna huno Anumzamo'a keno antahinora
hugahie? hu'za nehaze. Marerirfa Anumzamo'a amafima fore'ma
nehia zana, keno antahinora osugahie hu'za nehaze. **12**
Kefo avu'ava'ma nehaza vahera zamageho, knare nomani'za
mani'nazageno fenozmimo'a ome ra huno nevie. **13** Nagra
nagu'a kegava hugeno agru huno me'negena, kumira osu'noanki,
e'i ana zama hu'noa zamo'a amnezankna hugahifi? **14** Maka
knafina hazenkefi nagra mani'na nevue, maka nanterana
nazeri haviza hankena natagura hu'na nevue. **15** Nagra
ama anazamofo nanekema vahetmima zamasamuresina, ha'
vahe zamazampi vaheka'a zamavarente'naku nagra komoru
huresine. **16** Hianagi inankna hu'za kefo avu'ava'ma nehaza
vahe'mo'za, nomaniza zamifina knarerera nehaze. Nagra antahi
amara osu'na, tusi knazampi nemanue. **17** Ana'ma hute'na
Anumzamoka mono nompima ufre'na, kefo avu'ava'ma nehaza
vahe'mofonte'ma henkama efore'ma hania zana ke'na antahi'na
hue. **18** Tamagerfa hunka Anumzamoka krari'nenia kampi
zamavarentege'za rekrari'za zavapi urami'za hazenke eriho.
19 Zamagra ame hu'za hazenkea eri'za haviza nehanageno,
korozamo zamahe frigahie. **20** Vahe'mo'ma ava'nama keteno
nanterama otigeno, ana ava'namo'ma fanenema hiankna hunka
Anumzamoka zamazeri fanenema hugahane! **21** Ana zama ke'na
antahi'nama nehugen'o'a, musezanimo'a omanegeno narimpa
aka nehegeno, tumo'nimo'a natagri'ne. **22** Nagra ana zana
anira osu'noanki, neginagi hu'na antahintahi'a omne afi zaga
kafagna kagri kavurera hu'noe. **23** Hianagi nagra katre'na ovu
maka knafina kagrane mani'nogenka, tamaga kaziga nazante

nazeri'nane. 24 Ana nehunka knare antahintahi naminka, nazeri fatgo nehanankinka, henka navrenka masanentake kumapina vugahane. 25 Monafina nagri vahera omani'neanki, kagrake'za mani'nane. Hagi mopafina mago zankura navesi ontegahuanki, kagrike'za navesi kantegahue. 26 Nagu'amo'ene navufgamo'enena zaferina omne amne huno navresra nehianagi Anumzamoke'za nagu'amofona nazeri hankavenetiankino, nagri Anumza Agra mani vava nehie. 27 Kagri'ma katre'za afetema nemaniza vahe'mo'za fanane hugahaze. Na'ankure kamefi'ma hugamiza vahera zamazeri haviza nehane. 28 Hianagi nagrama Anumzamofo tvaonte'ma nemanua zamo'a knare nehie. Ra Anumzamo'a nagri Anumza mani'neno, nagu vazi kuma mani'neankina, knare'ma huno mareri agatere avu'ava zama'agura huama hugahue.

74 Anumzamoka nahigenka kamefira huraminka mani vava hunka nevane? Nahigenka trazampi zmantanke'zama vanoma nehaza sipisipi afutaminkura, Kagra krimpa ahenezmantane? 2 Korapama Nagri vahe manigahaze hunkama huhampri'nana vahe mani'nonanki, kagera okaninka kagesa antahiramio. Tagu'ma nevazinka mareri fenozani'agna huta manigahaze hu'nana vahe tagra mani'none. Kagra Saioni agonarema nemanina agonagura (Jerusalemi) kagesa antahio. 3 Eri havizama hazageno havizama huteno zazate'ma me'noma nea rankumapi, nevunka ko. Ha' vahetimo'za Kagri mono nona eri haviza hu'naze. 4 Kagri ha' vahe'mo'za ana mono nompi mani'ne'za kezana net'i'za, ha'ma hugatere'naza avame'zana, krauvefana (flek) asenentaze. 5 Saumenuma zafama antagitre'naku'ma nehzaza hu'za nona antagi tapage nehaze. 6 Hagi mono no zafare'ma antreno'ma keonke'zamofo amema'ama trohunteno avasasema hunte'nea

zana, sasume tunuti'ene hamanteti antagi hantagutagi atre'ne. 7
Ana ha' vahe'mo'za zamagra teve tagintazageno mono nonka'a
teno ko mopafi tepasaru huramigeno, Kagri kajima me'nea nona
eri ankrare kre'naze. 8 Zamagra amanage hu'za antahintahia
antahi'naze, ana maka zana eri haviza hutregahune hu'za
hute'za, ana mopafima Anumzamofoma mono'ma hunentaza
nonkumatamina teve tagintazageno te'ne. 9 Anumzamoka
tamagrane mani'noe hunka mago avamezana eri fore hanketa
onkone. Hagi ana maka kasnampa vahe'mo'za omanizageno,
ama knazamo'ma vagamalesia zama tasami'naza vahera
omani'naze. 10 Anumzamoka nama'agna atresankeno ha'
vahetimo'za huhavizana hugantegahaze? Hagi zamatre'sanke'za
maka zupa kagia eri haviza huvava hanazo? 11 Nahigenka
hankavenentake tamaga kazana rusutenka taza nosane?
Hanavenentake kazana renamaginka omaninka rusutenka
zamahe frio. 12 Hianagi Anumzamoka korapama evu'nea knafine
meninena nagri kini ne' mani'enka, ama mopafina tagura
vazi'nane. 13 Kagra hankaveka'reti hagerina eri atanankeno tare
kaziga otikenka, hagerimpima nemania afizagamofo aseniramina
rupraro vazi'nane. 14 Laviataniema hu'za nehaza afi zagama
hagerimpi nemania zagamofo aseniramina rupraro vazitenka,
hagage kokampima nemaniza zagagafa zaminke'za ne'naze.
15 Kagrake'za kampu'i tine, neone tinena erinkazo hankeno,
timo'a krohupeno enevigenka, ontaneno evuvavama nehia
tirantamina eri neranane. 16 Masane, haninenan anantarega
kagri suza me'na'e. Kagrake'za zagine ikanena, tro hunte'nane.
17 Kagrake'za mopamofona isagana antetere nehunka, amuho
knane zasi'ma hu kna trohu ante'nane. 18 Ra Anumzamoka ha'
vahe'mo'zama huhavizama hunegantazana kagesa nentahinka,

neginagi vahe'mo'zama kagi'ama huhaviza nehaza zana ko.

19 Hagi atregeno maho namaka'a afi zagamo'za zamahe'za oneho. Vahe'mo'zama knama nezamiza vaheka'a kagerakani zamante vava osuo. **20** Huhagerafi huvempa kema hu'nana zana kagera okanio. Na'ankure ama mopafima hanintirima hu'nefina, vahe'ma ohefri ahefrima hu'zamo'a avite. **21** Vahe'mo'zama zamazeri havizama nehaza vhahera zamatrege'za, zamagazegura nehu'za rukrahe hu'za oviho. Hanki atrege'za zamunte omne vahe'mo'zane, maka zanku'ma atupa'ma nehaza vahe'mo'za kagi'a ahentesga hiho. **22** Anumzamoka otinka tagri kaziga antenka tahoko. Neginagi vahe'mo'za maka knafina, hago zazate huhaviza hugante'za nevaze. **23** Ha' vahekamo'zama nehazankea antahi amnea osuo. Hagi ranke hu'zama huhaviza hunegantaza zamo'a anagamu mareri vava nehie.

75 Anumzamoka susu huganteta kagia ahentesga hune. Na'ankure tagri tava'onte kagra mani'nane. Knare'za huno mareri agatere'nea kavukva zanka'agura vahe'mo'za huge antahige nehaze. **2** Anumzamo'a huno, vahe'ma refko hu knama erinte'noa kna fatgore, vhahera mago avamentek ante'na refko huzmantegahue. **3** Hagi mopama momi'ma higeno, vahe'mofo mani'zamo'a herave korave nehigena, Nagra mopama azeri'nea trara azeri akona nehue. **4** Zamavufga rama nehaza vahekura tamavufga rana osiho nehu'na, kefo avu'ava'ma nehaza vahekura hu'na, hara agateregahune huta tamimiza runafege nehuta, hankavetamia erita mareoriho hu'na zamasamigahue. **5** Hara hu agateregahune huta hankavetamia erita marenerita, tamanankena antesga huta tamavufga rankea osiho. **6** Vahe'mofoma azeri antesgama hu'zana, zage hanati kazigatiro, zage fre kazigatiro, hagage

kokampintira omegahie. 7 Anumzamoke vahera refko huno, nezmageno avre anagamu netreno, avre henkama netreno hugahie. 8 Na'ankure mnanentake zantamine waini tinema eri havia hu'nea hankave tina agrema'age nehigeno, Ra Anumzamo'a azampi azeri'ne. Agra maka ama mopafima kefo avu'ava'ma nehaza vahete tagitresigeno, ana vahe'mo'za nene'za ro'afima me'nia ankarere'anena nehana hugahaze. 9 Hianagi nagra maka kna Anumzamo'ma tro'ma hu'nea zankura huama hu vava nehu'na, zagamera hu'na Jekopu Anumzamofona agi'a ahentesga hugahue. 10 Na'ankure Anumzamo'a huno, kefo avu'ava'ma nehaza vahe'mokizmi hankavea eri atregahuanagi, fatgo avu'ava'ma nehaza vahe'mokizmia mago'ane hankavea zamigahue.

76 Juda vahe'mo'za Anumzamofona ke'za antahi'za hu'neza kesga hunentazageno, Israeli mopafina agimo'a haruharu hu'ne. 2 Jerusalemia Agrama nemania kuma megeno, Saioni agonare noma'a me'ne. 3 E'i anampina ha' vahe'mokizmi kevemofo agonare'ma tevema nerea kevema, hankoma, bainati kazinknone mago'a hazantamine ruhantagi atre'ne. 4 Kagri hihamu hankavene masazanka'amo'a, zagagafama ahe'za nenaza agonaramina agatere'ne. 5 Hankave ha' vahetmina zamarohu zamarenka zamahe fri'nanankiza mago'mo'a otino hara huorantegahie. 6 Jekopu Anumzamoka hate'ma ne-enka ivimo agazamo'ma hunka ankeno'a, hosi afu'mo'ene hosi agumpima vanoma nehu'za ha'ma nehaza vahe'mo'zanena, kazara osu'za mopafi mase'naze. 7 Na'ankure kagoro huga vaheki'za Kagrikura vahe'mo'za korora hugahaze. Hagi krimpa ahezamo'ma tevema nerisifina, iza knarera hu'enenia vahe'mo kavuga otigahie? 8 Ha' vaheka'ama knazama zamisana kea

monafinkati huama nehankeno, mopafima nemaniza vahe'mo'za zmahirahiku nehu'za, kea osu kavuga akohe'za nemanize. 9 Hagi Anumzamo'a otino vahe'mo'zama zamazeri havizama nehaza vahera refko huzmantegahie. 10 Vahe'mo'za zamarimpama nehaza zamo'a, rankagi negamize. Na'ankure mago'ama mesia rimpaher'za erinka kanankempi kavasese hugahane. 11 Ra Anumzana tamagri Anumzamofontega huvempa nehuta, anama huvempama hanaza kea eri ragareho. Knare'zantfama huno mareri agatere'nea ne'tega miko vahe'mota musezana erita agrite eho! 12 Na'ankure ugagota kva vahe'mo'zama antene'za, akagima neraza zantamina, Agra ahe hantagi netrege'za, ama mopafi kini vahe'mo'za koro hunentaze.

77 Anumzamofontega ranke hu'na nagra krafagea hugahue. Nazama hinogura ranke hu'na krafa hanugeno Anumzamo'a antahi namigahie. 2 Hazenkefima unefre'na, Ra Anumzamofonku hake'noe. Kinagareti'ma agafama huno vuno ko'ma ome tu'neana monafinka nazana rusutete'ha nunamuna hu'noanagi, narimpamo'a kna hu'ne. 3 Anumzamokagu'ma nagesama nentahi'na, natagura karagi neru'ha, kagriku'ma nentahi'na nunamuma nehugen, zaferinani'a omne amne hu'ne. 4 Kagra navua eri hari hanke'ha maka kinaga navura omase mani'nena, tusi antahintahi hakare nehu'na kea osu'noe. 5 Ko'ma evu'nea knafima knare'ma hu'na mani'hoa zanku nagesa nentahi'na, ko'ma evu'nea kafuramimpima fore'ma hu'nea zantaminkura nagesa nentahue. 6 Nagrama kenage'ma nehua zagamenigura nagesa nentahi'na, nagu'afina antahintahia hu'noe. Anante antahintahinimo'ma ama'ma higena, ko'ma hu'noa zagamekura nagesa nentahi'na, anage hu'noe, 7 Anumzamo'a ha natreno amefi hu'namifi? Ete mago'anena avesinanteno nazeri so'ea

huonantegahifi? 8 Vagaore avesizamo'a ha fanene hu vagarefi?
Huvempama hu'nea kemo'a hago vagarefi? 9 Anumzamo'a
asunku'ma hurante zankura agekanifi? Hifi tusi'a arimpa
aheneranteno asunku zama'a azenerifi? 10 Anante anage
hu'na antahi'noe, Marerirfa Anumzamo hara renante hu'na
hu'noe. 11 Hianagi Anumzamo'ma hu'nea avu'ava zankura
nagera okanigahue. Tamage, nagra korapa'ma ruzahu ruzahu
kaguvazama hu'nana zankura nagera okanigahue. 12 Maka
zama tro'ma hu'nana zankura nagesa antahigami vava nehu'na,
ranra avu'avazama hu'nana zantmimofonku nagu'afina antahi
vava hugahue. 13 Anumzamoka kavukva zankamo'a ruotagetfa
hu'ne. Tagri hankavenentake Anumzankna Anumzana magore
huno omanitfa hu'ne. 14 Kagra ruzahu ruzahu kagu'vaza
eri fore hu'nana Anumza mani'nane. Kagra vahe'mokizmi
amu'nompi hankaveka'a erifore hu Anumza mani'nane. 15 Kagra
hankavenentake kazanuti vaheka'a Jekopu mofavreramine,
Josefe mofavreraminena zamagu'vazi'nane. 16 Anumzamoka
timo'ma negageno'a, koro nehigeno, hagerimo'ma negageno'a
koro huno ahirahiku hu'ne. 17 Hampompintira ko'mo'a herafi
neramigeno, monagemo'a kragugu nehigeno, kopsinamo'a
rutrage huno kevema ahene trazankna huno enevie. 18
Kagra hankeno monagemo'a ununkomofo agasasa nerigeno,
kopsinamo'a maka kokantega trage huno rumsa huno vuno eno
nehigeno, ama mopamo'a kaza nehuno tusi agogogu nehie. 19
Kama vanoma nehana kamo'a hageri amu'nompi vu'ne. Kagra
tusi'a hankave timpi nevankeno, vahe'mo'za kagiaka nonkaze.
20 Sipisipi afutami avreno viankna hunka, vaheka'a ana kampina
zamavarenka vananke'za, Aroni'ene Moseskeea sipisipi afu kva
vahekna huke zamavareke vu'na'e.

78 Rempima huramisua zana vahe'nimota antahiho, nanekema
tamasmisuana tamagesa ante'neta antahiho. 2 Na'ankure nagra
mago fronka ke tamasamigahue. Rempima huramiga zantamima
korapama oku'ama me'nea zantmi rempi huramigahue. 3
Kanihe'ma ko'ma antahi'nona kanihe tamasamigahue, ko'ma
tagehe'mozama hurasmi anante anante'ma hu'za e'naza kanihe
tamasamigahue. 4 Hagi ama ana tamage nanekea, mofavretirera
frara okigosunanki, Ra Anumzamo'ma hihamu hankave'anuti'ma
ruzahu ruzahu kaguva zantmima erifore'ma hu'nea zantamina,
menima fore'ma nehaza vahetmina zamasamigahune. 5
Na'ankure Agra Jekopuna trake'a nemino, kasege'a Israeli vhahera
zami'ne. Ana nehuno taghe'mofonkura, mofavre nagatamia
ama ana nanekea rempi huzamiho huno zamasmi'ne. 6 Ana
hinkeno henkama fore hu anante anante'ma hu'za vanaza
vahe'mo'za, ama ana nanekea antahine'za, mofavrezmia rempi
hu'za zamasami vava hu'za viho. 7 E'ina hanage'za fore hu
anante anante'ma hu'za vanaza vahe'mo'za Anumzamofonkura
amuhara nehu'za, kasegea amage nente'za, ruzahu ruzahu
kaguva zama hu'nea zankura zamagera okanigahaze. 8 E'ina
nehu'za zamagehemo'zama zamagu'ama eri hanavemati'naza
zana nosu'za, hara renonte'za, kea antahi'za avarari fatgo
nosu'za, zamagu'a Anumzamofona omi'nazanknara osugahaze.
9 Hagi Efraemi sondia vahe'mo'za ati kevea zamazampi
eri'nazanagi, ha'ma hazafina zamage'na humi'za hara osu
koro fre'naze. 10 Zamagrama huhagerafi huvempa kema
Anumzanema hu'nazankea runetagre'za, kasege'ama avarari
zankura zamavaresra hu'naze. 11 Anumzamo'ma maka ruzahu
ruzahu zama zamaveri'ma hu'nea zankura zamagenekani'za,
kagu'vazama hu'nea zankura zamagesa ontahi'naze. 12 Hagi

Zoani kaziga Isipi mopafina zamafahe'mofo zamavufina, Agra
ruzahukna kaguvaza erifore hu'ne. **13** Na'ankure Agra hagerina
amu'nompinti eri ataneno, kana eri fore huno zamavreno kantu
kaziga vigeno, timo'a emare hihi huno mareri'ne. **14** Hagi
masafi'na hamponteti kana zamaveri huno zamavareno nevuno,
maka hanimpina teve anefanu remsa huzmanteno zamavareno
vu'ne. **15** Ka'ma kopina Agra havea rutaneno tina zamigeno,
timo'a krohupeno ege'za ne'naze. **16** Hagi Agra neone tintamina
erifore higeno, havefintira hanatino tirantima eviaza huno
enevie. **17** Hianagi ana hagege ka'ma kopina amnea omani'za
kumira hu'za ne-eza, marerirfa Anumzamofona hara rente'za
e'naze. **18** Zamagra zamagu'areti hu'za Anumzamofona rehe'za
nege'za, zamavesi zmavesima nehia nezankura Anumzamofona
antahige'naze. **19** Ana nehu'za Anumzamofona huhaviza
hunente'za amanage hu'naze, Anumzamo'a Agra amne hagege
kokampintira ne'zana eri fore huramigahio? hu'za hu'naze. **20**
Tamage Agra havea rutanegeno timo'a krohupeno evuno aviteno
megahianagi, Agra bretine ame'anena vahe'a zamigahifi? **21**
Hagi Ra Anumzamo'ma ana nanekema nentahigeno'a, arimpama
ahe'zamo'a teveregeno Jekopu nagara teve krenerasegeno,
mago'a Israeli vahe'mokizmia tevereti krerasage'ne. **22**
Na'ankure zamagra Anumzamofontera zamentintia nosu'za,
kegava hurantegahie hu'za antahi omi'naze. **23** Hianagi Agra
monamofonkura kafana anagio, higeno monamo'a kafana
anagino erihagro hu'ne. **24** Mana ne'zanema nehaza ne'zana
ko'ma riankna huno monafinkati herafi tregeno, monafintira
witia zmige'za ne'naze. **25** Ankeromofo ne'za zamige'za
vahe'mo'za nenazageno, nezmu'ma huga avamente Anumzamo'a
rema'a ne'za zamige'za ne'naze. **26** Zage hanati kaziga

zahora huntegeno monafina zahora erino enevigeno, Agra'a
hihamu'areti sauti kaziga zahora azeri fatgo higeno Agra antahia
kantera nevie. **27** Agra monafinti ame'a atregeno eramino
mopafina kugusopamo hihi huno mareriankna nehigeno, namama
zmi'neana namaramimo'a rama'a hu'za hagerinkena kasepagna
hu'naze. **28** Ana namaramina Anumzamo'a higeno seli noma
ki'za mani'naza amu'nompine, seli noma ki'zama nemanizafinena
erami erami hu'naze. **29** Zamagrama zmanankenku'ma haz
zaga Agra zamige'za nezamu hu'naze. **30** Hianagi ana
ne'zana nevaga orenazageno, ana ne'zamo'a zahufa zamagipi
me'nege'no, **31** Anumzamo'a ana vahetamina tusi arimpa
ahe'zmanteno hankavenentake vahezmia zamahehna hu'ne.
Hagi hankavenentake Israeli nehazaveramina zamahehna
hu'ne. **32** E'inara hu'neanagi, ana vahe'mo'za ana zankura
zamagesa ontahi'za kumira hu'za vu'naze. Anumzamo'ma knare
eri'zama eri'nea zankura antahimi'za Agrite'ma zamentintima
hu'zankura zamavaresra hu'naze. **33** E'ina hazageno ame'
huno zamazeri haviza hige'za amne zankna nehazageno,
zamazeri koro hige'za koro hu'naze. **34** Hagi Anumzamo'ma
agafa huno zamahema nefrige'za nege'za, maka zana netre'za
ete rukrahe hu'za Anumzamofonera hanaveti'za zamentintia
hu'naze. Ana nehu'za zamagu'a rukrahe hu'za Anumzamofona
zamagu'areti hu'za avariri'naze. **35** Anumzamo'a tagri fraki
haveganti mani'ne hu'za zamagesa nentahi'za, Mareri Agatere
Anumzana tahokeno tavre'nea nere hu'za antahi'naze. **36** Hianagi
ana maka zama hu'nazana zamagiteti hu'nazanki tamage hu'za
zamagu'a omi'naze. Zamagra amne zamagiteti havige hu'naze.
37 Zmagu'amo'a tamagea huno Anumzamofonera hankvetino
omnene. Ana hige'za Anumzanema huhagerafi'naza huvempa

kea kegava osu'za ru hantagi'naze. **38** Hianagi Anumzamo'a asunku Anumzankino kumizmia atrenezmanteno, zamahe fri vagaore'ne. Rama'a knafi rimpahé'zana azenerino, zamahe vaga ore'ne. **39** Ana nehuno vahekura amne vahetfa mani'naze huno agesa antahi'ne. Vahe'mo'za zahomo'ma evu huhu huno vuteno omeankna huza vagaregahaze. **40** Hagi hagage kokampima mani'neza rama'a zupa Ra Anumzamofona hararenentazageno arimpa knanena mani'ne. **41** Hagi mago'ané Ra Anumzamofona rehe'za nege'za Israeli vahe ruotge Anumzamofona rimpagna erimi vava hu'za vu'naze. **42** Zamagra ha' vahe'zmimofo zamazampinti'ma zamagu'ma vazi'nea hihamu'agura zamage kaninte'naze. **43** Isipi mopafima ruzahu ruzahu kaguvazama erifore nehuno, Zoani kazigama knare huno mareri agatere'nea ruzahu ruzahu kaguvazama eri fore'ma hu'nea zankura zamagesa nontahizageno, **44** Agra tirazmia eri rukrahe higeno korasege'za ana tintetira tina one'naze. **45** Agra tusi'a kosintami huzmantegé'za kregre hu'za nezamampri'zageno, hogatmi huntege'za rama'a hazenkea zami'naze. **46** Agra neonse kenu'ene ranra kenu'ene huzmantegé'za, hozazmia ne'za erihna hu'naze. **47** Agra ranra komopa ko atregeno waini zafa zamia ahe haviza nehigeno, neonse komopa ko atregeno, sikamo zafazmia ahe haviza hu'ne. **48** Hagi Agra bulimakao afuzmia ranra komopa ko atregeno zamahe nefrigeno, kopsina atregeno trazama nenaza afuzagama kegavama hu'nazana zamaheno eri vagare'ne. **49** Agra tusi'a arimpa ahe'nezmanteno, vahe'ma zamazeri haviza hu ankero vahetamina mago'a huzmantegé'za, zamazeri haviza nehu'za zamahe fri'nagura e'naze. **50** Agra arimpa ahezamofo kana retro huno magore huno Isipi vahetmina zamagura ovazi'neanki, knazana zaminio zamazeri haviza hu'ne. **51** Isipi vahetmimofo

nompintira ese ne' mofavreramina Agra zamahe fri'ne. Hamu nagamokizmi zamagonesa mofavreramina agra zamahe fri'ne.

52 Hianagi Anumzamo'a Agra'a vahetmina sipisipi afutmima vugoteno avreno'ma viankna huno hagege kokampina kegve huzmante so'e huno zamavareno vu'ne. **53** Agra'a kegava huzamanteno zamavareno vige'za zamagra korora osu'naze. Hianagi ha' vahe'zmimo'za hagerimpina ti nakri'naze. **54** Agra ruotge'ma hu'nea mopa atupare zamavareno e'ne. Agra tamaga azantetima ha'ma huno'ma eri'nea agona kokampi zamavareno e'ne. **55** Hagi Agra zamavugama ana mopafima mani'naza vhera zamahe kasopenetreno, ana mopa erisantihareho huno zami'ne. Ana hige'za avamente avamente hu'za refko hu'za Israeli naga nofimo'za seli nonkuma ki'za mani'naze. **56** Hianagi zamagra Anumzamofona rehe'za nege'za, Marerirfa Anumzana ha' renente'za, kasege'a ovarari'naze. **57** Zamagra Anumzamofona zmagenta hunemi'za, zamagehemo'zama hu'nazaza hu'za Anumzamofona avarari fatgo osazageno, ati amagenamo'ma kazakiankna huno zmavu'zamava zmimo'a kazaki'naze. **58** Zamagra havi anumzantamimofoma mono'ma hunente'za, kumama tro husgama hunte'naza zamo Anumzamofona azeri arimpa nehe'za, havi anumzama antre'za tro'ma huntaza zanku Anumzamo'a azeri kanivea rezmante'ne. **59** Hanki Anumzamo'ma ana nanekema nentahino'a tusi arimpa ahegeno, Israeli vhera amefi huzamino zamatre vagare'ne. **60** Ana nehuno Silo kumate'ma seli mono noma'afima nemaniretira atreno vu'ne. Vahe amu'nompima seli noma'afima nemaniretira atreno vu'ne. **61** Agra huhagerafi huvempage vogisia ha' vahe zamazampi antege'za eri'za kumazmirega vu'naze. Agri hihamu hankvema huvame huno me'nea zana ha'

vahemoza eri'za ome antene'za ana zamofona ke amne
zankna hu'naze. **62** Agra vahe'aramina ha' vahe zamazampi
zamavarentege'za ha' vahe'mo'za zamahe'za kazinteti traga
hu'naze. Na'ankure Agra'ama erisantiharege'za Agri ruotge
vahe'ma mani'naza vahekura tusi arimpa ahezmante'ne. **63**
Kasefa nehzaveramina tevemofo neza nesazageno, kasefa
mofaneramimo'zama vema erisaza vene'nea omanige'za,
masinezmante'zama nehaza zagamera osu'naze. **64** Hagi
pristi vahera bainati kazinteti zamahe vagarazage'za, ana pristi
vahe'mokizmi kento aneramimo'za zamasunkura hu'za zavira
ote'naze. **65** Vahe'mo'zama mase'nazafinti'ma otizaza huno Ra
Anumzamo'a oti'ne. Hanave sondia ne'mo'ma hanave waini
tima neteno, neginagima huno mase'nereti'ma otiankna huno
oti'ne. **66** Ha' vahe'aramina Agra zamahe panani hige'za ete
freza nevazageno, zamagazema huvavama hu'are zamazeri
haviza hu'ne. **67** Hianagi Josefe nagara avesra huzmanteno
nezmatreno, Efraemi naga nofi'enema mani'zankura avresra
hu'ne. **68** Hianagi Juda naga huhamprino zamagrane umani'ne.
Na'ankure Agra Saioni agonagu avesi'ne. **69** E'i anante ruotgema
hu'nea mono noma'a Agra kisga huno kintegeno, anagamu
marerino monarega mareri'ne. Ana nehuno ana nomofo tra'ama
ante'neana mopamo'ma hanavetiankna huno hanaveti'neankino
mevava hugahie. **70** Agra eri'za vahe'a Deviti huhamprinteno,
sipisipi afu keginafinti ke higeno e'ne. **71** Anumzamo'a Devitima
avre'neana a sipisipine amima nenea anenta'aramima kegavama
nehia eri'zampinti avreno Jekopu agehemofo, Ra Anumzamo'a
Agra'a feno zama'agna huno huhampri'nea Israeli vahe'a kegava
hu eri'zana ami'ne. **72** Hagi Deviti'a maka agu'areti'ene maka

zama tro'ma hu'are'ma antahi ani'ma hu'nea ne'kino, Israeli
vahera kegava hu'ne.

79 Anumzamoka meg'i'a vahe'mo'za hara eme huragatere'za
erisanti'ma hare'nana mopaka'a e'neri'za, ruotgema hu'nea
mono nonka'a eri haviza nehu'za, Jerusalemi kumara tagna
vazitrazageno hihi huno mareri'ne. **2** Eri'za vaheka'aramine
Kagrima negavaririza vaheka'aramina zamahete'za zamavufaga'a
atrazageno namamo'zane zagagafamo'za ne'haze. **3** Jerusalemi
kumapina zamahe'za korana tagitrazageno tihtageno eviankna
nehigeno, asezmente'nia vahera magore huno omani'ne.
4 Mika tagri tava'onte'ma nemaniza vahe'mo'za huhaviza
hunerantazageno, mani kagirante'naza kumapinti vahe'mo'za
ki'za zokago ke hurante'naze. **5** Ra Anumzamoka nama'a
kna krimpa aherantenka vugahane? Kagra karimpa aherante
vava hunka vugahampi? Maka kna kanive renerantankeno
ana zamo'a tevenefakna hu vava huno vugahifi? **6** Mono'ma
hugante'zanku'ma zamavaresrama hunegantaza vaheku karimpa
ahenezmantenka, kini ne'mo'ma kegavama hu'nea kumatamimpi
vahe'mo'zama kaghanta'ma novaziza vahetami karimpa
ahenzanto. **7** Na'ankure Kagri vahe Israeli vahera zamahe'za
eri vagarazageno, mopazmimo'a vahe omani hagege kokankna
hie. **8** Ko'ma tagehemo'zama hu'naza kumitera antahintahi
ka'afina ana zankura antahinka ovuo. Kasunku hurantenka ame
hunka enka eme taza huo. Na'ankure tagra tusi'a hazenkefi
manune. **9** Anumzana tagu'vazi ne' mani'nananki taza huo.
Kagra'a kagimofo knare zanku nentahinka taza huo. Kagri
kagima husgama hugantesaza zanku netahinka, kumitia apase
nerantenka tagu'vazio. **10** Na'a hanige'za ru vahe'mo'za hu'za,
iga zamagri Anumzana mani'ne? hu'za hugahaze. Tagona

kema hunka ana vahetmima ha'ma huzmante'sana zana,
tagra kamneno. Na'ankure zamagra eri'za vaheka'aramimofo
korana zamahe'za eri tagi atre'naze. **11** Kinama hu'naza
vaheka'amo'zama zamatagu'ma nehu'za, kragi'ma neraza
zana antahio. Frigahaze hu'zama hazage'zama mani'naza
vahera, marerirfa hihamuka'anu zamagu'veazio. **12** Anumzamoka
tava'ontire'ma nemaniza vahe'mo'zama Kagri'ma huhavizama
hugantazarera, 7ni'a zupa ana zantera nona huzmanto. **13**
Ana'ma hananketa Kagri vahe'mota tretre'ma hu'nea trazampima
tantenanketa sipisipigna huta mani'nomota musena nehuta, susu
hugante vava nehanunkeno, henkama forehu anante anante
hu'zama esaza vahe'mo'za ana zanke hugahaze.

80 Sipisipi afu kevuma kegavama nehzaza hunkama Israeli
vahe'ma kegavama nehana kva ne'moka, kagesa antenka
antahio. Sipisipi afu'ma kegavama huno viazama hunka Josefe
agehe'mofoma, avrenka nevamoka antahio. Kagra serafimiema
nehzaza ankerontremofo amu'nompima manisga hunkama
nemanina Anumzamoka masazanka'a remsa hunerantenka
eme taza huo. **2** Efraemi naga'ma, Benzameni naga'ma,
Manase nagate'enena Hankaveka'a eri ama' hunka tagu'veazio.
3 Etenka tazeri knare nehunka, kavugosafinti masanu remsa
hunerantenka taguravazio. **4** Ra Anumzana Monafi sondia
vahetmimofo Anumzamoka, zazate kagri vahe'mota nunamuma
huta neonkenka karimpa ahenerantane. **5** Tasunkuzana bretima
hiaza hunka neraminka, tima hiaza hunka tavunura rama'a
taminketa ne'none. **6** Tava'ontire'ma nemaniza vahetmina
zamatranke'za, tagri mopareku hu'za hara hunerante'za, ki'za
zokago kea hunerantaze. **7** Monafinka sondia vahe'mofo
Anumzamoka ete tazeri knare nehunka, atregeno kavugosafinti

masa zamo'a remsa hunerantesigenka taguravazio. **8** Kagra Isipitira waini avina rukafrinka erinka, ama mopafima meg'i'a vahetmima mani'nazana eme zamahenati netrenka, tagrira ama ana mopafi avimzama seaza hunka eme hankre'nane. **9** Kagra ama mopa emeri ama' hurantanketa, tagra ama ana mopafi arafu'na reta mani avite'none. **10** Ana waini zafamofo turuna'mo agonaramina turuna hunentegeno, azankuna'amo'za hankave sida zafa refite'ne. **11** Hagi azankunamo'a hageno zage fre kaziga Mediterenia hagerintega vigeno, agatamo'a hageno zage hanati kaziga Yufretisi tinte uhanati'ne. **12** Hianagi nahigenka hoza kegina ahe fragu vazitranske'za karankama vanoma nehaza vahe'mo'za ufre'za krepi raga musufa neragize? **13** Zafa tanopafinti zamagonknazama ohari afi afu'mo'za ana wainia zamaganuti reppipro nehzageno, afi zagagafamo'za ana zafa raga nenaze. **14** Monafinka sondia vahe'mofo Anumzamoka muse hugantonanki etenka eno. Waini hozaka'afima nehia zana Monafinkatira kefenkma atrenka negenka, ama ana waini zafaka'a kegava huo. **15** Ana wainia Kagraka'a kazampinti kri'hane. Ana ne'mofavrea Kagraka'a azeri nena hu'nane. **16** Ana waini hozaka'a teve negre'za, rukafri kafro hutre'naze. Karimpa ahenga kavugosa hunezmantenka zamahe fanene huo. **17** Hanki kazana rusutenka kaza tamaga kazigama mani'nea ne' hankavea neminka, Nagri vahe manigahaze hunkama tazeri nenama hu'nana vahe mani'nonanki tazeri hankavetio. **18** E'ina hugeta tamefira huonkamimneno. Ete tazeri kasefa hugeta, Kagritega nunamuna nehuta, kagia ahentesga hamneno! **19** Monafinka sondia vahe'mofo Anumzamoka ete tazeri knare nehunka, atregeno kavugosafinti masazamo'a remsa huranteno taguravazino.

81 Anumzamo'a Agra tagri hankaveti mani'neanki zagame
huta agi'a erisga hanune. Jekopu Anumzamofontega muse
zagamera huta agi'a erisga hih? 2 Zgamera nehuta
nasenasepana neheta, knare ageru'ma neria hapu zavenane
laeri zavenanena aheho. 3 Kasefa ikama eme antesigeta
sipisipi afu'mofo paziveteti ufennereta, ikamo'ma zarama
vagehinigeta, ra ne'za kreno nekna egahianki, ne'zana kreta
neneta musenkase hih. 4 Ama'i Israeli vahe'mofo trake,
Jekopu Anumzamo'ma Israeli vahe'motama tami'nea kasegene
trake. 5 Anumzamo'ma Isipi vahe'ma ha'ma renenteno'a, Josefe
naga'mozama avaririsaza trake huno retro hunte'ne. Nagra
ontahi'noa agerupinti agerura runo anage hu'ne, 6 Nagra
zamafunte'ma me'nea knazana eri atroe. Kna zama e'neriza
ekaeka kutamia tamazampintira eri atre'noe. 7 Kna fima mani'neta
krafa nehazagena, tamagu'vazi'noe. Nagra hanintiri hampompinti
monagema hiaza hu'na kenonatamia huramante'noe. Meriba
tinte tamamentintia reramahe'na tamage'noe. 8 Tamavumro
tamantena tamazeri fatgo hunaku huanki, vahe'nimota antahiho!
Israeli vahe'mota tamavumro'ma nentenugeta kea osu mani'neta
amne tamagesa antahiho. 9 Ru vahe'mokizmi anumzantera
monora huontege, havi anumzantera tamarena reta monora
huonteho. 10 Nagra Ra Anumzana tamagri Anumzamo'na Isipi
mopafintira tamagura vazi'na tamavre'na emarereri'noa Anumza
mani'noe. Tamagira eri aka hunenke'na knare zantaminura
tamagipina ante vita'neno. 11 Hianagi nagri vahe'mo'za
keni'a nontahi'za, namagera onte'naze. 12 Zamagu'amo'ma
hanavetige'na zamatroge'za zamagra zamavesi avariri'za
vu'naze. 13 Tamagra nagri vahe'mota keni'a nentahinkeno,
Israeli vahe'mota nagri kante'ma navaririta vanageno'a knare

hugahie. 14 Nagra ame hu'na tamagri ha' vahera zamahe rava
hugahue. Ha'ma renezmantaza vahera nazana rusute'na hara
huzmagateregahue. 15 Ra Anumzamofoma zamavaresrama
hunentaza vahe'mo'za agri avurera antri nehu'za tatapa
hugahaze. Ana knazana eri vava hu'za vugahaze. 16 Hianagi
knare zantfama hu'nea witi tami'nena negahaze. Ana nehu'na
havefinti afi tumeri taminena neramu hugahaze.

82 Anumzamo Agra mona kumapina vugota huno mani'neno,
anumza mani'nonema huza nehaza kva vahetamima omeritruma
hu'za keagama nehazageno'a, nanekea refko nehuno
antahintahi'a huama nehie. 2 Tamagra nama'a zupa
havizama nehaza vahe'mokizmia zamavesi nezmaneta, kefo
avu'ava'ma nehaza vahera knare avu'avara hunezmantaze? 3
Hankavezmima omne vahe'ene megusa mofavre nagara zamaza
nehuta, zamunte omne vahe'ene zamazeri havizama nehaza
vahe'enena zamahokeho. 4 Zamunte omne vahe'ene maka
zanku'ma upa'ma nehaza vahe'enena zamagu'nevazita kefo
avu'ava'ma nehaza vahe'mokizmi zamazampintira zamahoketa
zamavareho. 5 Hagi vahe'ma zamazeri havizama nehaza
vahe'mota, mago zana antahita keta osuta hanimpi vano
nehazageno, ama mopamofo tra'amo'a tore'vare nehie. 6 Nagra
amanage hu'noe, tamagra anumza mani'naze, ana makamota
tamagra Marerirfa Anumzamofa mofavre mani'naze hu'na hu'noe.
7 Hianagi vahe'mo'zama nehzaza huta frigahaze. Mago'a kva
vahe'mo'zama nehzaza huta frigahaze. 8 Anumzamoka otinka
ama mopafi vahera keaga huzmanto. Na'ankure ana maka
vahe'ma mani'nazana kagri vaheke'za mani'haze.

83 Anumzamoka kea osura omanige, agesa ankanire vahe
knara hunka omanige, akohenka omanio. 2 Ha' vahekamo'zama

ranke rankema nehaza zana nontahino? Zamavesrama hunegantaza vahe'mo'zama zamavufaga rankema nehzana nonkano? 3 Vaheka'a zamahenaku amne vaheknama hu'za vano nehu'za, marerirfa fenozani'e hunkama hu'nana vaheka'a zamahenaku oku'a nanekea retro nehaze. 4 Zamagra amanage nehaze, enketa Israeli vahera mopazmifintira zamahehna hamneno hu'za nehaze. Zamahehna hanunkeno, ama mopafina Israeli vahe zamagia omnenige'za mago'ane antahi ozamisaze. 5 Zamagra mago zamarimpa hu'za ana nanekea retro nehu'za, kagri'ma ha'ma regante'naza nanekea huhagenerafi'za huvempa nehaze. 6 Hagi ana nanekema nehaza vahetamina Idomu vahetmima, Ismaeli vahetmima, Moapu vahetmima, Hagri vahetmima, 7 Gebali vahetmima, Amoni vahetmima, Ameleki vahetmima, Filistia vahetamine, Tairi rankumapi vahe'mo'zane anara hu'naze. 8 Asiria vahe'mo'zanena anampina efre'za Loti agehe'mokizmia hankave zami'naze. 9 Midieni vahe'ma huzmante'nanaza nehunka, Kisoni tirampima Siserane Jabininema huznantenana zana huzmanto. 10 Ana vahetmina Endori mopafi zamahehna hankeno zamavufagamo'ma anampima kasri'neankna hino. 11 Zamatrege'za hankavenentake vahe'zmimo'za Orebike Zebikema hu'na'aza hu'za nefrinkeno, ugagota kva vahe'zmimo'za Zebake Zalmunakema hu'na'aza hu'za friho. 12 Na'ankure zamagra hu'za, Anumzamo'ma traza ne' afu'tmima kegavama nehia mopa aheta hanaregahune hu'za hu'naze. 13 Anumzamoka zamahe panani huge'za kagikagi zahomo kugusopa eri harafi huno freankna nehu'za, zaho'mo witi hona eri hareno viankna hoho. 14 Zamatrege'za zafafi afe taginteankna hu'za nerenko, agonafi afe'ma tagintegeno ruhagna hagna huno teankna hoho.

15 Ununko huntogeno nezmavrarino keonke'zana eri tasagihu agumpi agumpi huno zamazeri korora hino. **16** Zamazeri zamagaze huge'za tusi zmagazegu nehu'za, Ra Anumzamoka kagifi eme anterami'za mani'neza kamage anteho. **17** Zamazeri zamagaze nehunka, zamarimpa zamazerigna huvava huge'za zamagazegu nehu'za friho. **18** E'ina huge'za Ra Anumza mani'nane hu'za kage'za antahi'za nehanageno, maka mopafi vahe'mo'za kagrake'za Marerirfa Anumzana mani'nane hu'za ke'za antahi'za hugahaze.

84 Monafinka Sondia vahe'mokizmi Ra Anumzamoka nemanina kumakamo'a hentofaza hu'ne. **2** Ra Anumzamofo mono nompima mani'zankura nagu'areti hu'na navesinavesi nehue. Nagra nagu'areti'ene, maka navufgareti'enena muse nehu'na ranke hu'na kasefa huno mani'nea Anumzamofona zagamera hu'na agi'a ahentesga hugahue. **3** Kisve namamo'zane suvi namamo'zanena kresramna vu ita tava'onte nozmia kine'za amura ante'za mofavre'zmia azer'hena nehaze. Monafi sondia vahe'mofo Ra Anumzamoka nagri kini mani'nenka, Anumzani'a mani'nane. **4** Ra Anumzamoka kagri nompima nemaniza vahe'mo'za muse nehu'za, zagamera hu'za kagia ahentesga huvava hugahaze. **5** Ra Anumzamokaregat'i'ma hankavema e'neriza vahe'mo'za muse nehanageno, Saioni agonare'ma vu'za mono'ma ome hugante'haku'ma zamagesa are'are'ma nehaza vahe'mo'za muse hugahaze. **6** Hagi balsam zafamo'ma hu'nea Baka agupofima rugitagi'zama vanu'za, ana agupofinti'ma tima hanatiaza hu'za maka zana eri kasefa hugahaze. E'ina hanigeno ko'ma arania zamo'a, kerifina timo'a avitegahie. **7** Anama nevu'za ome hankavetime vu'za hanavenentake vahetami Ra Anumzamofo avuga Jerusalemi kumatera uhanatigahaze. **8**

Ra Anumzana Hankavenentake Anumza Jekopu Anumzamoka nunamuni'a antahinamio. **9** Anumzana tagri hanko mani'nananki, masavema taginka frenentenka huhamprinte'nana kini ne'mofona kavuntenka negenka kegava huntu. **10** Magoke knama Kagri mono nompima mani'zamo'a, tauseni'a knama megi'ama mani'zana agatere'ne. Kefo avu'ava'ma nehaza vahe'mofo, nompima knare nomani'zama mani'zana atre'na, Anumzamoka nomofo kafante'ma mani'suana knare hugahie. **11** Na'ankure Ra Anumzamo tagrira kegava huneranteno masati mani'ne. Agra'a asunku hunezmanteno razmagia nezamie. Fatgo zamavu zamavama nehaza vahe'mokizmia knare zantamina azeori nezamie. **12** Monafi hankavenentake sondia vahe'mokizmi Ra Anumzamoka, kagrite'ma zamentintima nehaza vahe'mo'za muse hugahaze.

85 Ra Anumzamoka mopaka'a azeri knare hu'nane. Kagra etenka Jekopu nagamofo fenozana erinte avitente'nane. **2** Kagra vaheka'amofo kefo avu'ava zana atre'nezmantenka, maka kumizmia refite zmante'nane. **3** Krimpa akama nehegenka azenerinka, krimpa ahezamo'ma tevenefa'ma nehigenka krimpa aheozmante'nananki azeri'nane. **4** Anumzana tagu'vazi ne'moka krimpa aherantenka kea orasunka, ete tazeri knare huo. **5** Kagra krimpa aherante vava hunka vugahampi? Kagra vahetmima forehu anante nante'ma hu'za vanaza vahera krimpa ahezmantegahampi? **6** Kagra ete tazeri kasefara hananketa, vaheka'amota kagrikura musena huta ovanuno? **7** Ra Anumzamoka vagaore kavesizana, taveri nehunka tagu'vazio. **8** Ra Anumzana Agra Anumzamo'ma haniankea nagra antahi soe hugahue. Na'ankure Agri kema antahiza amagema nentaza vahera rimpfa fru nezamie. Hagi ana atre'za

neginagi zamavu'zmavara ete osiho. 9 Hagi Anumzamofoma koro'ma hunente'za agri agoragama nemaniza vahera tamage huno zamagu vazigahie. Ana hanigeno tagri mopafina Agri masazamo'a avitegahie. 10 Vagaore avesizamo'ene tamage nanekemo'enena eme tutagiha nehakeno, fatgo avu'avazane, arimpa fruzamo'enena eri mago hu'na'e. 11 Hugahuema hu'nea kema amage'ma anteno ana zama hu' avu'avazamo'a mopafinti hageno atiramigeno, fatgo avu'avazamo'a monafinkati ke fenkma atreno nege. 12 Ra Anumzam'o'a knare'ma hu'nea zana tamisigeno ama mopafina nezamo'a amporesigeta vasagegahune. 13 Fatgo avu'avazamo'a vugota huno nevuno kama vania kana retro huno vugahie.

86 Ra Anumzamoka kagesa antenka nunamu keni'a antahinka nona hunanto. Na'ankure nagrira kna nami'za nazeri haviza nehazage'na, maka zankura atupa nehu'na, naza hugara osu'noe. 2 Anumzamoka kegava nagrira hunanto. Na'ankure kagri kavariri fatgo nagra nehue. Kagrite'ma namentintima nehua Anumzanimoka eri'za vahekamo'na nagu'vazio. 3 Ra Anumzamoka kasunku hunanto, na'ankure maka kna kagritega nunamuna huvava nehue. 4 Ra Anumzamoka eri'za vahekamo'na nagu'afina muse'za antenanto, na'ankure kagritega nunamuna nehu'na monora hunegantoe. 5 Ra Anumzamoka kagra knare'zantfa hu'nanankinka kumizmia atrezmante'naku retro hu'nane. Zamazama hananegu'ma kagri'ma kantahigaza miko vahe'mokizmia vagaore kavesizanu ante avite'nezmantane. 6 Ra Anumzamoka kagesa antenka nunamu ke'ni'a antahinamio. Kasuraginantenna nazama huogu'ma krafama nehua krafageni'a antahinamio. 7 Hazenke knafima ufresuna kagritega nunamuna hanugenka, nunamu

keni'a antahinamigahane. 8 Ra Anumzamoka kagrikna anumzana
magore huno omani'ne. Kagrama nehana kna kagu'vazana
mago'a anumzantmimo'za osugahaze. 9 Mika kokankoka
vahe'ma tro'ma huzmante'nana vahe'mo'za Ra Anumzamoka
kavuga e'za monora eme hunegante'za ruotge'ma hu'nea kagia
ahentesga hugahaze. 10 Na'ankure kagra knarezantfa huno
mareri agatere'nea kavu'kvaza erifore nehane. Kagrake'za
Anumzana mani'nane. 11 Ra Anumzamoka kavukva zanka'a
rempi hunamige'na, tamage nanekeka'a amage antena va'neno.
Nagu'a nazeri agru huge'na, kagri kagigura koro hunte'na
agorga mani'neno. 12 Ra Anumzana nagri Anumzamoka
nagu'areti hu'na susu hunegante'na, zagamera hu'na kagia
ahentesga hugahue. Kagi'a ahentesga huvava hu'na vugahue.
13 Na'ankure Kagrama navesi'nantenka knare'ma hunenantana
zamo'a rankrerfa hu'ne. Kagra fri vahe kumapinti nagu'vazi'nane.
(Sheol h7585) 14 Hazenke vahe'mo'za ha'renantaze. Vahe'ma
zamahe'za zamazeri havizama nehaza vahe'mo'za nahe fri'za
nehu'za, Kagrira kagefenkami atre'za kage amneza nehaze. 15
Hianagi Ra Anumzana kagra keke nehunka kasunku hu Anumza
mani'nanankino, vagaore kavesizanu knare hunerantenka, ame
hunka krimpa ahenorantenka, kema hu'nana kema avaririnka
ana zama hu kavukva zamo'a kagripina avite'ne. 16 Ra
Anumzamoka kavugosa hunaminka, kasunku hunanto. Eri'za
vaheka'amofona hankavea neminka, eri'zama erinegantea
a'mofo nemofona agu'vazio. 17 Ra Anumzamoka nagri'ma
navesi nenantana zamofo avame'zana naveri huo. E'ina hugeno
zamavaresrama hunentaza vahe'mo'za nege'za zamagazegura
hugahaze. Na'ankure Ra Anumzamoka knarera hunenantena
naza nehane.

87 Ruotge agonarera Ra Anumzamo'ma tro'ma hu'nea rankumara me'ne. 2 Agra mago'a rankuma'ma Israeli mopafima me'nea rankumatmima avesima nenteama'a agatereno Jerusalemi rankumara avesinente. 3 Anumzamofo rankuma'mokagura vahe'mo'za hentofa kege hunegantaze. 4 Nagri'ma ke'za antahi'zama hu'naza vahe'ma antahima nezamisuna, Isipi vahe'ma Babiloni vahe'enena zamagia ahentesgahue. Filistiane Tairi kuma'ene Itiopia kuma'enena ana zanke hu'na zamagia ahentesgahue. Ana maka'mo'za Jerusalemi kumapi vahe ase'za manigahaze! 5 Ana hugahianagi Jerusalemi kumapima nemaniza vahekura amanage hugahie, maka Jerusalemi kumapima fore'ma huta nemaniza vahe'mota, muse huta knare nomani'zante nemanisageno, Marerirfa Anumzamo'a ana rankumara Agra'a eri hanavetisigeno meno vugahie. 6 Ra Anumzamo'ma vahe zamajima kreno evanuno'a Agra amanage hugahie, zamagra Jerusalemi kumapi kasezmantege'za, zamagra ana kumapi vahe mani'naze huno hugahie. 7 Zgame nehaza vahe'mo'zane konkema neraza vahe'mo'zanena amanage hu'za zagamera hugahaze, Tagrama musema nehuna zamo'a, Jerusalemi kumapinti ne-e, hu'za hugahaze.

88 Ra Anumzana naza nehunka nagu'ma nevazina Anumzanimoka, masare'ene haninenaga Kagri kavuga nunamuna nehue. 2 Nunamuma nehua nunamu keni'a nentahinka, naza huogu'ma krafagema nehuana antahinaminka naza huo. 3 Na'ankure nomanizanifina hazenke zamo'a avineteno, navareno fri vahe kuma tava'onte nevie. (Sheol h7585) 4 Fri'zage'zama matipima ome asenezmantaza vahekna hu'noe. Nagra hanaveni'a omene vahe kna hu'noe. 5 Zamagra fri vahe amu'hompi natrazage'na, fri' vahe'ma matipima asentegenoma

maseankna hu'na mase'noe. Ana hugenka Kagra kazana
antenka kegava huonante natranke'na haviza hu'noe. **6**
Kagra amefenkame tami'nea kerimofona aro'are, hanintirima
hu'nefi natre'nane. **7** Krimpama ahezamo'a narentrako huno
urami'ne. Hagerimo'ma hiaza hunka rugnafu knafu hunka
naherava he'nane. **8** Roneni'aramina nagritetira renatitranke'za
vu'za e'za nehu'za zamago atenante'naze. Nagra frekani'a
omanoge'na krifu ahente'na manue. **9** Knazama eri'na zavi'ma
atoazamo'a, navunumo'a navua resuhie. Mago mago knafina Ra
Anumzamokama nazama hanankura kantahinegoe. Kasunku'ma
hunantenka nazama hanankura kagritega nazana erisga nehue.
10 Kagra kagu'vazana hunka fri'nea vahera aza nehampi? Fri'naza
vahe'mo'za fri'nazafintira oti'za zagamera hu'za kagia ahentesga
hugahazafi? **11** Frizage'zama matipima asezmant'e'zama
vahe'mo'za vagaore kavesizanka'agura huamara hugahazafi?
Huge keka'ama avaririnka hugahuema hu'nana zama nehana
kavukva zankura keonke zamo'ma havizama hu'nefina huama
hugahazafi? **12** Kaguvazama zama hu'nana zantamina hanimpina
ke'za antahi'za hugahazafi? Hifi frizage'za vahe'mo'zama
zamage'ma akanizmantaza vahe'mo'za fatgo kavukva zankura
keaga huge antahigamige hugahazafi? **13** Hianagi Ra
Anumzamoka naza huogu kagritega krafagea nehue. Maka
nanterana kagritega nunamuna nehue. **14** Ra Anumzamoka
nahigenka nenatrenka, kavugosa rukrahera hunka kamefira
hunenamine? **15** Osi'ma mani'noregati'ma knazama eri'na e'noa
zamo'a, kri eri'na fri'za hue. Kagra nazeri koro'ma hu' zanke
hanke'na, rama'a knazampi mani'na oe. **16** Krimpa ahe'zamo'a ti
hageankna huno narefi netegen, nazeri namanoma vazina
zamo'a nazeri haviza nehie. **17** Nanteranteti'ma agafama huteno

tima hageno refite'nanteankna huno korozamo'a narefite'ne. 18

Ronenine navesimanentoa vahetaminena nagripintira zamavare
hana hu'nane. Ana hankeno hanimo'a, nagri arone ase'ne.

89 Ra Anumzamofo vagaore avesizama'agura nagra zagamera
huvava hugahue. Hugahuema hu'nana kema avaririnkama hu
kavukvazana huama nehanuge'za, forehu anante anante'ma
hanaza vahe'mo'za antahigahaze. 2 Na'ankure nagra amanage
hu'na huama hugahue, Ra Anumzamoka vagaore kavesizamo'a
mevava huno vugahie. Hugahuema hunana kema avaririnkama
hu kavukvazamo'a monamo'ma nehiaza huno mevava hugahie.
3 Ra Anumzamoka hunka, Nagrama huhamprinte'noa eri'za ne'
Deviti'ene huhagerafi hvempagea nehu'na, agri'ene hvempa
kea hu'noe. 4 Devitiga kagripinti'ma fore'ma hu anante
anante'ma hu'za vanaza vahepintinke, kini vahera zamazeri
fore hvava hu'na vugahue hunka hu'nane. 5 Ra Anumzamoka
monamo'za knare huno mareri agatere kavukva zanka'a husga
hunegantesage'za, hugahuema hu'nana ke'ma avaririnkama hu
kavukvazana, atruma hu'za mani'saza ankerovo'za husga
hugahaze. 6 Iza monafima nemanizafintira Ra Anumzanknara
hu'ne? Monafima mani'nea hanavenentake ankeromo'a Kagri
knara osu'ne. 7 Marerirfa ankerovo'za, Anumzamofonkura
kesga hu'za koro hunentaze. Anumzamo'a Agri'ma tra'are'ma
manigagintehaza ankerovo'za, zamagatereno mareri
agatere'nea Anumza mani'ne. 8 Ra Anumzana Monafinka
Sondia vahe'mofo Anumza mani'nane! Kagrikna hankave
Anumzana omani'ne. Ra Anumzamoka kagra hankavenentake
Anumza mani'nenka, hugahuema hu'nana kema avaririnkama
hu kavukvazamo'a kazeri kagi'ne. 9 Kagra knafu knafu'ma nehia
hagerina kegava hu'nane. Hagerimo'ma knafu knafu'ma higenka,

Kagra zamaherava nehane. **10** Rehapu'e hu'zama nehaza
tusi'a osifave krerfama hagerimpima nemania osifavea, Kagra
asenia rupraro vazinka ahe'nane. Hankavenentake kazanuti
ha' vaheka'a zamahe panani hu'nane. **11** Ra Anumzamoka
mona kagri su'a megeno, mopa kagri su'a me'ne. Hagi
maka ama mopafima me'nea zantamina maka kagrike zantmi
me'neankinka, kagrake tro huzmante'nane. **12** Kagrake'za noti
kazigama me'nea zantamina tro nehunka, sauti kazigama me'nea
zantamina tro hu'nane. Tabori agonane Hemoni aganonemokea
musena nehuke, zagamera huke kagia ahentesga neha'e. **13**
Anumzamoka kazamofona hihamu hanave'amo'a agatere'ne.
Kazamo'a tusiza huno hanavenentake hu'ne. Tamaga kaziga
kazamo'a mareri agatereno hankavenentake hu'ne. **14**
Fatgo avu'avazane, maka zama fatgoma huno'ma refkohu
avu'avazamokea kinima mani'nana traka'amofo tra me'na'e.
Vagaore kavesizamo'ene tamage nanekekamo'enena kavuga
neva'e. **15** Ra Anumzamofoma mono'ma hunente'za muse
zagame'ma nehaza vahe'mo'za muse hugahaze. Na'ankure
zamagra Ra Anumzamofona Agri masa zampi vano nehaze. **16**
Kagri kagirera nanteranteti agafa hu'za musena nehazageno,
vuno kinaga omese'ne. Fatgo kavukva zanka'amo'a zamagrira
zamazeri muse nehie. **17** Kagra masanentake hihamu
hankavezmi mani'nane. Na'ankure kagra muse hurantenka
hankavea neraminketa, tagra hankavenentakera nehune. **18**
Ra Anumzantimoka Kagra tagri hanko mani'nane. Israeli
vahe'mofo Ruotge'ma hu'nea Ne'mo'a Agra kinia tam'i'ne.
(2 Samuel 7:8-16) **19** Korapara Kagri'ma kazigazima hu'za
negavariri'za tagehemofona, ava'nafi nanekea amanage hunka
zamasami'nane, Nagra hankavenentake sondia azeri oti'noe.

Nagra amne vahepinti vahetmimofo kini manigahane hu'na
huhamprinte'noe. **20** Nagra eri'za vahe'ni'a Deviti hakena erifore
hu'noe. Nagra ruotge masave anumpina taginte'na, azeri ruotge
hunte'noe. **21** Nagra nazanu hagaza nemi'na, hihamu'ane nazanu
azeri hankavetigahue. **22** Ha' vahe'amo'za revatga osuge, kefo
avu'ava'ma nehaza vahe'mo'za azeri fenkamia otregahaze.
23 Agri avuga ha' vahe'aramina zamahe'na rehapatinetre'na,
zamavaresrama hunentaza vahera zamahehna hugahue. **24**
Nagra avesinte vava nehu'na, agrane mani'nenugeno nagri
nagifinti hankavea erino ome hankavetigahie. **25** Hihamu
amisugeno Mediterenia hagerinteti vuno, zage hanati kaziga
Yufretis tirantema uhanati'nea mopa kegava hugahie. **26**
Ana hanugeno Nagrikura amanage hugahie, Kagra Nenfaga
mani'enka, nagri Anumza mani'nanankinka, nagri naguvazi
Have mani'nane huno hugahie. **27** Nagra azeri nagonesa mofavre
sa'hena, maka ama mopafina hankavenentake kini ne' fore huno
manigahie. **28** Nagra vagaore navesizanu, navesinte vava hu'na
nevuna, huhagerafi huvempa ke'ni'a eri tamage hugahue. **29**
Agripinti'ma fore hu anante anante'ma hu'za vanaza vahera
kegava huzmante'nanena, kini tra'amo'a monagna huno mevava
huno vugahie. **30** Hianagi agripinti fore hu anante anantema
hanaza vahe'mo'zama nagri kene kasegenema novaririza,
kasegeni'a novarisaza, **31** tra keni'a ruhanetagi'za, kasegenima
ovaririnazana, **32** Nagra ana kumizmirera sefu nezmi'na,
ke'nima rutrage'narera knazana zamigahue. **33** Hianagi Nagra
navesinte vava nehu'na, agri'enema huvempama hu'noa keni'a
ruha'ontagigahue. **34** Huge huhagerafi'noa keni'a ruha'ontagige,
magore hu'na kema hu'noa kea ete'na eri otregahue. **35** Nagra
ruotge hu'nea huvempage Devitina hunte'noankina, havigea

osugahue. 36 Deviti nagapintike kini vahera manivava hu'za vanageno, kini tra'amo'a zagemo'ma nehiaza huno mevava huno vugahie. 37 Ikamo'ma monafima me'nenoma, huama'ma huno neviaza huno, tra'amo'a mevava huno vugahie. 38 Hianagi menina kavresra hunentenka kamefi humine. Masavema anumpima tagintenka kinima azeri oti'nana nera krimpa ahentane. 39 Eri'za vaheka'anema huhagerafi'nana hvempa kea kamefi huneminka, kini fetori'a kugusopafi zafitre'nane. 40 Agu'ma nevazia kuma have keginaramina, maka ahe fragu vazinetrenka, fraki kuma'a eri haviza hutre'nane. 41 Maka vahe'ma ana kante'ma enevaza vahe'mo'za arohure'za keonke zama'a eri hana nehazageno, tavaoma'arema nemaniza kini ne'mofona kizazokago ke hunte'naze. 42 Ha' vahe'aramina hankave zaminke'za hara hugate'nere'za, musenkase nehaze. 43 Ha'ma nehia bainati kazinknom'a eri amnezankna nehunka, ha'ma nehigenka kamefi huminka aza osu'nane. 44 Kagra marerirfa konariri'a eri netrenka, kini tra'a mopafi eri akaha hutre'nane. 45 Kagra ame hunka zahufafi azeri ozafa nerenga, azeri agaze hu'nane. 46 Ra Anumzamoka nama'agna fraki vava hunka vugahane? Krimpa ahe'zamo'a nama'gna teveareno vugahie? 47 Kagesa antahio, nagra zazatera mani'na ovugahue. Vahe'ma tro'ma hurante'banana, amne'za mani'none. 48 Mago'mo'e huno mani vava huno ovugahianki, maka frisuna vaheke mani'none. Mago'mo'e huno fri'zana agatereno fregara osu'ne. (Sheol h7585)

49 Ra Anumzamoka iga vagaore kavesizana me'negenka anara nehane? Kagra hvempama Deviti'ma hunentenka, kavesinte vava hugahue hu'nane. 50 Ra Anumzamoka eri'za vaheka'amo'na huhavizama hunenantazana antahio. Rama'a vahe'mo'zama huhavizama hunenantaza kea nagu'afi erinte'na vano nehue. 51

Ra Anumzamoka ha' vahekamo'za kizazokago ke hunenantaze.
Anumpima masavema tagintenka kinima azeri ot'i'nana nera,
vuno eno'ma hirega hunte'za ki'za zokago ke hunentaze. **52** Ra
Anumzana ragi amivava hugahune. Tamage, tamage.

90 Ra Anumzamoka fore hu anante anante huno'ma e'nea
vahepina, kagra kumati'gna hunka maninka e'nane. **2**
Agonaramina forera osu'negeno, ama mopane kokanema
tro'ma osu'enka, ko maninka e'nana Anumzankinka eseteti'ma
agafama huno atupare'ma uhanati'neana Kagrake'za Anumzana
mani'nane. **3** Vahera zamazeri rukrahe hanke'za ete kugusopafi
nevazagenka amanage nehane, tamagra fri vahe mani'nazanki,
ete frita kugusopa seho hunka nehane. **4** Na'ankure **1** tauseni'a
kafumo'a, kagri kavurera amneza me'neankino, mago knamo'a
sondia vahe'mo'ma kenage'ma kvama krino mani'negeno
ame huno eviankna hu'ne. **5** Avanama ke'nea zamo'ma
vahe antahintahifinti'ma ame huno fanane hiankna hunka
vahera ahe nefrine. Vahe'mo'za nanterama trazama hageno
mareriankna nehaze. **6** Nanterana tra'zamo'a amosrea aheteno,
kinagama segeno'a hagege nehie. **7** Ra Anumzamoka krimpama
aherantanketa hagege nehuta, kasima vazinerantanketa, tagra
tusi tagogogu nehune. **8** Ra Anumzamoka kumitia kavuga
eri fanara huntankeno, oku'a nehu'na kumitimo'enena kagri
masare amate me'negenka negane. **9** Tagra maka kna kagri
krimpia hezampi manita nevuta, tasimu'ma anteankna huta ame
huta fanane nehune. **10** Kafuma manita vanuna kafua, **70'a**
kafu tami'nane. Hanki tavufgamo'ma knare'ma huno me'nigeta,
amne **80'a** kafuzagea manigahune. Hianagi knare kafuma
manita vanumpina, tatazamo'ene hazenke zamo'enena aviteno
nevanigeno, kafu zagetimo'a ame huno evanigeta fanane

hugahune. **11** Krimpa ahe'zamofo hihamu'a, iza mago vahe'mo'a antahino keno hu'ne? Na'ankure krimpa ahe'zamo'a, rankrerfa hu'neanki'za kagoro hugantega vahe korora hunegantaze. **12** E'ina hu'negu manitama vanuna kna'a rempi huramigeta knare antahi'zana enerita manita vamneno. **13** Ra Anumzamoka ete tagritega eno. Hago zazate krimpa ahezmantenka avega antenka ananki, eri'za vaheka'aramina kasunku huzmanto. **14** Maka nanterana vagaore kavesizanteti tazeri knare hugeta, maka knama manita vanunana, musena nehuta zagamera huta musena huvava hamneno. **15** Tazeri havizama hunka e'nana avamente, ete tazeri muse huo. Hazenkefima manitama e'nona kafumofo avamente tazeri muse huo. **16** Ra Anumzamoka eri'za vahekamota ranra zama tro'ma hu'nana zana taveri hananketa negesunkenka, anahu kna hunka hihamu masaka'a mofavre nagatimofona eriama hananke'za kegahaze. **17** Ra Anumzana tagri Anumzamoka kavesizamo'a tagri'ene me'neno, maka zama hanunana eri knare nehinketa, maka zampina knare hanune.

91 Hagi iza'o marerisa Anumzamofo hankavefima ome frakino manisia vahera, Hankavenentake Anumzamo refitentenigeno ana tonapinka manigahie. **2** Hagi nagra Ra Anumzamofonkura amanage hu'na huama hugahue. Ra Anumzamo'a nagrama frakisanua kuma'ene, nagu'vazisania kuma mani'neno, nagri Anumza mani'neanki'na agrite namentintia hugahue. **3** Na'ankure Anumzamo'a kva hugante'neankino, katre'nigeno vahe'mo'zama krifuma anaginte'naza krifumo'a kaze'orisigeno, vahe'ma ahe nefria krimo'a kazeri havizana osugahie. **4** Ageko'nafi kavre frakinkenka mani'nesnankeno, agekona'anu refitegantegahie. Anumzamofona vagaore huvempa ke'amo'a, hankone hankave vihugna hu'neankino kegava hugahie. **5**

Kenage'ma kamano vazi'zama fore'ma hania zankura korora osuo. Ana nehunka masare'ma kevemo'ma ame huno eno kazeri havizama huzanku'enena korora osuo. **6** Ana zanke hunka kenage'ma rankrima esania zanku'enena korora nosunka, hazenke zamo'ma eno masare'ma eme kazeri haviza hunaku'ma hania zanku'enena korora osuo. **7** Hagi kagri tva'ontera 1tauseni'a vahe nefrisanigeno, kazantamaga kaziga **10** tauseni'a vahe frigahaze. Hianagi ana zamo'a kagritera erava'o osugahie. **8** Kagra kavufinti negesnankeno, havi zamavu zamava'ma hu'naza vahera Anumzamo'a zamazeri haviza hugahie. **9** Hagi kagra Ra Anumzamofoma fraki kumaka'a eri nesenka, Marerisa Anumzamofoma, kagu'vazi kumaka'ama eri sesanana, **10** magore huno havi zamo'a kazeri havizana nosanigeno, mago krimo'a kagrama manisana nonku'ma ka'arerera erava'o osugahie. **11** Na'ankure inantego vunka enkama hananana, Ra Anumzamo'a ankeru vahe'a huzmante'na e'za, maka kama vanoma hanampina eme kegava hugantegahaze. **12** Ana nehu'za zamazanu kavresga hanageno, havemo'a kagiafina oregahie. **13** Laionine osifa'venena zanazeri fenkami netrenka, hankave laionine ha' osifa'venena (cobra) kagiafi zanazerintenka zanare hapatigahane. **14** Ra Anumzamo'a huno agrama avesi nenantegu hu'na, agrira agu'nevazi'na, Nagri nagima keno antahino'ma hu'negu hu'na, kegava huntegahue. **15** Hagi nagritegama nunamunke'ma hanige'na, agri nunamua antahimigahue. Ana nehu'na knafima mani'nesige'na, agrane magoka manine'na, aza nehu'na ra agi amigahue. **16** Ana nehu'na mizama'ama amisanuana, kna'a erinte za'za hanugen muse huno nemanisige'na, Nagra vahe'ma agu'ma nevazua hanaveni'a eri averi hugahue.

92 Ra Anumzamoka susu huno humusema hugante zamo'a
knare'zantfa hu'neanki'na, Marerisa Anumzamoka zagame
hu'na kagi'a ahentesga hugahue. **2** Anumzamoka maka
zupama tagri'ma kavesirantenka knare'ma hunerantana
zankura nanterana huama nehu'na, maka zupama kage'ma
kaninorantana zankura kinaga huama nehu'na, **3** Laeriema
nehaza zavenareti'ene, hapureti'ene zavena nehe'na, zagamera
hu'na kagia ahentesga hugahue. **4** Ra Anumzamoka Kagrama
eri'nana eri'zanu nazeri muse hankena, Kagrama kazanu'ma tro
hunka eri fore'ma hu'nana zankura zagamera hu'na musena
nehue. **5** Ra Anumzamoka kagra ra eri'za eri'nanankino,
Kagri antahi'zamo'a rankrerfa huno amefenkame tami'ne.
6 Antahintahima oma'ne vahe'mo'a ana zana keamara
nosigeno, neginagima nehia vahe'mo'a ana zana antahiamara
nosie. **7** Havi avu'ava zama nehaza vahe'mo'za, trazamo
rehakarufeno mareriaza hu'za nehagesage'za, kefo avu'ava
zama nehaza vahe'mo'za amosrema ahenteaza hu'za makazana
antegahazanagi, kagra zamahe fanene hugahane. **8** Na'ankure
Ra Anumzamoka kagi'a ahentesga hu vava hu'za vugahaze. **9**
Ra Anumzamoka kagri ha' vahe'mo'za tamagerfa hu'za fanane
nehanage'za, havi zamavu zamava'ma nehaza vahe'mo'za
miko panani hu'za ufre efre hugahaze. **10** Hianagi afi
bulimakaomofo pazivemo'ma hankavematiaza hunka, nagrira
nazeri hankave ti'nane. Ana nehunka kasefa masavereti
taginka nanuntera frenantanke'na musena hu'noe. **11** Nagra
navufinti nezmagoge'za ha' vahenimo'za evu neramizageno, kefo
avu'ava'ma nehaza vahe'mo'zama, ha'ma renenantaza vahe'ma,
ha'ma huzmagaterazageno zavi krafama haza zana antahi'noe.
12 Hianagi fatgo avu'ava'ma nehaza vahe'mo'za, tofe zafamo

knare zantfa huno hageno mareriankna nehu'za, sida zafamo
Lebanoni mopafi hageno tretre huno mareriankna hugahaze.

13 Zamagra Ra Anumzamofo nompi hankre'naza zafagna
nehu'za, tagri Anumzamofo kumapina zamagra knare'zantfa
hu'za tretre hu'za hagegahaze. **14** Fatgo vahe'mo'za tavava
ozafa regahazanagi raga renente'za, zafa asi'namo tretre huno
kasefa kasefa nehiaza hu'za manigahaze. **15** Ana vahe'mo'za
huama hu'za, Ra Anumzamo'a fatgo avu'ava'za nehia nekino,
Agra hankave havetia mani'neankino Agripina havi avu'ava zana
omne'ne hu'za hugahaze.

93 Ra Anumzamo'a Agrake kinia mani'neno masanentake
zaza kukena hu'ne. Hanave'areti kukena hu'neno hahunaku
retro huno mani'ne. Ama mopa tro huntogeno hankavetino
me'neankino, mago vahemo'e huno eri kazara osutfa hugahie.
2 Ra Anumzamoka kagra maka zana forera osu'negenka
korapa mani'nanankinka, kinia mani vava hunka neane.
3 Ra Anumzamoka hagerimo'a tusiza huno kranto kranto
nehigeno, monagemo'ma hiaza huno timo'a ra agasasa
nerie. Ana nehigeno hagerimo'a hanavetino kranto krantora
nehie. **4** Ra Anumzamofo hanavemo'a hagerimo'ma eme
runagrama neseno'ma, agasasama neriam'a agetereno tusi
hankavenentake higeno, rama'a tintamimofo agasasankenena
agatere'ne. **5** Anumzamoka'ma ante'nana kasegea mago
vahe'mo'a eri otregahie. Tamagerfa huno Ra Anumzamoka Kagri
mono nonkamo'a ruotge huno mevava hugahie.

94 Ra Anumzamoka kagri'ma ha'ma renegantaza vahera,
kagra nona hunka zamazeri haviza nehana Anumza mani'nane.
Ana hu'nananki krimpa ahe'zana eriama huge'za keho. **2**
Ama mopafima mani'ne'za zamavufaga rama nehaza vahera,

otinka keaga huzmantenka refko hunezmantenka mizana zamio. **3** Ra Anumzamoka nama'agna kefo zamavu zamava'ma nehaza vahe'mokizmia zamatre'nanke'za musena huza maniza egahaze? Nama'a knazami me'ne? **4** Nama'a zupa kefo zamavu zamava'ma nehaza vahe'mo'za havigea nehu'za, kefo avu'ava'ma nehaza nama'a zupa zamavufaga erisga hu nanekea nehaze? **5** Ra Anumzamoka ana vahe'mo'za kagri vahera zamare hapa'neti'za, Nagri vaherema hunka erisantima hare'nana vahera zamazeri haviza nehaze. **6** Ana vahe'mo'za kento a'nene megusa mofavre nagara zamahe nefri'za, ru mopareti'ma tagri mopafima emani'naza vahe'enena zamahe nefrize. **7** Ana vahe'mo'za hu'za Ra Anumzamo'a avua norage hu'za nehu'za, Jekopu naga'mo'za tagrama hu'na zantera Ra Anumzamo'a avua anteno norage hu'za nehaze. **8** Tamagra neginagi nehuta keontahi vahe mani'nazanki kama antahiho, ina zupa ama' antahi'zana erigahaze? **9** Vahe'motama tagesama tro hunte'nea Anumzamofona agesa ankani re'nefi? Vahe'mota tavuragama tro hunte'nea Anumzamofona, avua asuhu'nefi? **10** Ama mopafi vahe'ma knama zaminno zamazeri fatgoma nehia Anumzamo'a, zamavumrora anteno zamazeri fatgoa osugahifi? Ama mopafi vahe'ma rempi hunezamia Anumzamo'a antahi'zankura atupa hu'nefi? **11** Ra Anumzamo'a vahe'mokizmi antahi'zama keno antahino'ma hiana, ana antahintahizmimo'a amnezankna huno zahoma huhu hutreankna hu'ne. **12** Ra Anumzamokama azeri fatgoma nehunka kasege ka'afinti'ma rempima hunemina vahe'mo'a asomu erigahie. **13** Ana vahemo'ma knafima unefregenka, kegava hunentenka arimpa fru neminka, kefo avu'ava'ma nehia vahe'mofo keria Anumzamoka kagra kafintenenka azerigahane. **14** Na'ankure Ra Anumzamo'a

vahe'a amefira hunozamino, nagri nagare huno huhampari zamante'nea vahe'agino ozamatregahie. **15** Keagama refko'ma hanazana, fatgo avu'ava zante nege'za refko hugahaze. Ana nehanage'za fatgo avu'ava'ma nehaza vahe'mo'zama nege'za amage antegahaze. **16** Hagi kefo avu'ava'ma nehaza vahe'mo'zama nazeri havizama nehanageno'a, iza nagritega anteno nagura nevazino, havi avu'ava'ma nehaza vahe'mo'zama nazeri haviza hu'zama nehanageno'a naza hugahie? **17** Hagi Ra Anumzamo'ma naza osiresina, nagra ko fri'na keonke zamofo agasasankema omne fri vahe kumapi umanusine. **18** Nagrama hu'na regarari'na umasoema hugenka, Ra Anumzamoka vagaore kavesi zanteti knare hunantenka nazerisga hu'nane. **19** Narimpagna zamo'ma nazeri havizama hunaku'ma nehigenka, Kagra nazeri fru hunka nazeri hankavetinke'na, muse hu'noe. **20** Fatgo avu'ava zama nosu'za, havi kasegema nente'za, vahe'ma zamaza hazage'zama kumi'ma nehaza kva vahe'mo'za Kagranena taragote'za nomanize. **21** Ana vahe'mo'za magopi atru hu'za kea anakite'za, fatgo avu'ava zama nehaza vahera zamahe frikea hu'za kna nezami'za, ke'zami omane vahera zamahe frinaku nehaze. **22** Hianagi Ra Anumzamo'a nagri vihuni'agino kegava hunantegahie. Anumzanimo'a nagrama frakinua havega mani'ne. **23** Kefo avu'ava'ma nehaza vahe'mo'zama hu'naza kumira erino zamagri zamagumpi nenteno, ana kumi zamigu huno zamazeri havizana hugahie. Ra Anumzana tagri Anumzamo ana vahera zamazeri havizana hugahie.

95 Enketa Ra Anumzamofona muse zagame huta agi'a ahentesga nehuta, tagu'ma nevazia Havegi Ra Anumzamofona ranke huta agi'a ahentesga hanune. **2** Enketa Agri avuga vuta susu hunenteta, muse zagame huta agi'a ahentesga hamneno.

3 Na'ankure Ra Anumzamo'a marerisa Anumza mani'neno,
maka havi anumzantamina zamagatereno, ugota Kini mani'ne. 4
Ama mopafima kerima huno ame fenkame'ma urami'neregati'ma
vuno, ame'nagame marerigatere'nea agonaregama vu'neana,
ana maka Anumzamofo azampi me'ne. 5 Hagerina Anumzamo
tro hu'negu huno, Agri suza me'ne. Ana zanke huno ho'mu
mopa azanuti tro hu'ne. 6 Enketa kepri huta mono hunenteta,
Ra Anumo'ma tagri'ma tro'ma hurante'nea ne' avuga tarena
reta monora huntesune. 7 Na'ankure Agra tagri Anumza
mani'neankino, sipisipi afu'tamima kegavama nehiaza huno
kegava hurantegeta, Agri azampi mani'none. Ana hu'neanki,
meninenam tamagesa ante'neta Agri agerura antahiho. 8 Ra
Anumzamo huno, Israeli vahe'mo'zama hagege kokampima ne-
eza, Meriba kumaku'ma Masa kumarema nehaza kumatema,
zamagu'a kafama erig'i'zana zana huta tamagu'a kafana eri
onkiho. 9 Hagi tamagehe'moza hagege kokampima manine'za,
maka zama eri fore'ma hua zana ko ke'nazanagi, Nagri hanave
kenaku renahe'za ke'naze. 10 Hagi 40'a kafumofo agu'afina
nagote nezmantena amanage hu'na hu'noe, ama vahe'mo'za
kana atre'za hazanegre'za, nagrama hihoma hu'na huzmantoa
nankeea amagera nontaze. 11 Ana'ma hu'nazagu hu'na tusi
narimpa ahenezmante'na, amanage hu'na huvempa hu'noe.
Nagrama huama hu'na, tamisugetama ome mani fru hugahazema
hu'noa mopafina uofretfa hugahaze (Hibru 4:3).

96 Tamagra Ra Anumzamofona kasefa zagame hunteho.
Maka ama mopafima mani'naza vahe'mota Ra Anumzamofona
zagame hunteho. 2 Ra Anumzamofona zagame hunenteta,
agi'a ahentesga hiho. Ana nehuta vahe'ma zamagu vazino
etema nezamavarea zankura, maka knafina huama huta vahera

zamasamiho. 3 Agri hihamu masazama'agura kokankoka
vahera huama huta nezamasamita, hanavenentake eri'zama
eri'nea zankura, huama huta maka vahera zamasamiho.

4 Ra Anumzamo'a maka zana agatereno tusi'a Anumza
mani'neankino, Agrake ra agi'a erigahie. Maka havi anumzana
zamagatere'neankita, Agrikuke'za korora huntegahune. 5
Na'ankure maka ama mopafima mani'naza vahe'mokizmi havi
anumzantamina, amne zamazanteti tro hu'naza zantami me'naze.
Hianagi anamifima me'nea monaramina, Ra Anumzamo agra'a
tro hunte'ne. 6 Ra Anumzamo'a noma'afina ragi erino kinia
mani'negeno, agri hihamune masa'amo'ene konariri'amo'enena
noma'afina avite'ne. 7 Ama mopafima kokankokama mani'naza
vahe'mota, Ra Anumzamofona husga hunenteta, agri hihamu
masa zama'aguenena husga hunteho. 8 Ra Anumzamo'a agrake
ra agia erigara hu'neanki agi'a erisga nehuta, ofatamia erineta,
agri mono nompina ufreho. 9 Ra Anumzamofona ruotage
huno masa nentake'ma hu'nea avasase zama'afi mani'neta
monora hunteho. Maka ama mopafima mani'naza vahe'mota,
agri avure mani'neta, kore hunenteta, tamahirahiku hoho. 10 Ama
mopafima kokankokama mani'naza vahe'mokizmia zamasamita,
Ra Anumzamo'a kini mani'ne huta hoho! Ama mopa tro huntogeno
hankavetino me'neankino, mago zamo'a eri kazara osugahie.
Agra ana nehuno maka ama mopafima mani'naza vahera, mago
avamenteke refko huzmantegahie. 11 Monane mopamokanena
muse nehinkeno, hagerimokane tigu'ama me'nea zantami
motanena, ranke huta Ra Anumzamofona husga hunteho. 12
Hozamokane hozafima nehagaza ne'zamota, avo nehageta
musenkase hoho. Ana nehanageta zafa ta'nopafima me'nea
zafamota ranke huta muse zagamera hoho. 13 Na'ankure Ra

Anumzamo'ma esaniana, ama mopafima mani'naza vahe eme
refko huzmanteku egahianki, agri avuga ana zana hugahaze.
Ama mopafi vahe'ma eme refko huzmantesiana, fatgo avu'ava
zanteti'ene, ke tamage'areti'ene huno eme refko huzmantegahie.

97 Ra Anumzamo'a kini mani'neno maka zana kegava
hu'ne huta, maka ama mopafima mani'naza vahe'mota
muse nehinke'za, hagerimofo amu'hompima me'nea mopafima
nemaniza vahe'mo'zanena musena hiho. 2 Hanintiri hu'nea
hampomo'ene tapari'nea hampomo'ene azeri kagintegeno
mani'ne. Fatgo avu'ava zanteti'ene mago avamenteke'ma
refko'ma hu avu'ava zama'areti, kini tra'amofo trara anteno
mani'ne. 3 Tevenefa'mo agri avuga hagana hagana nehigeno,
maka asoparegati'ma ha' vahe'amozama eme regaginte'naza
vahera teve zamareno tefanene nehie. 4 Agri kopasi'namo'a
trege huno ama mopa remsa nehigeno, ama mopamo'ma ana
zama negeno'a tusi ahirahi nere. 5 Anumzana ama mopama
kegava hu'nea ne'mofo avuga, agonaramimo'za masavemo'ma
ze'ze huno pakepake nehiaza hu'za pakepake hu'naze. 6
Anamima me'nea mona ramimo'za fatgo avu'ava zama'agu
huama nehanageno, maka ama mopafima kokankokama
mani'naza vahe'mo'za agri hihamu masazama'a negaze. 7
Hagi zmazantetima antre'za tro'ma hu'naza havi anumzamofo
amema'are'ma mono'ma hunente'za, zamavufaga rama nehaza
vahe'mo'za zamagazegu hugahaze. Ana nehanageno maka
havi anumzantamimo'za, Anumzamofo avuga zamarena re'za
mono huntegahaze. 8 Saioni kumamo'ene, Juda mopafima
me'nea kumatamimo'za, anankema nentahi'za, tusi musenkase
nehaze. Na'ankure Ra Anumzamokama keagama refko'ma
hana zanku, anara hu'naze. 9 Na'ankure Ra Anumzana

Kagra Marerirfa Anumza mani'nenka maka ama mopa kegava hu'nane. Ana hu'enka kagrake'za rankagia erinka, maka havi anumzantamina zamagterenka onagamu mani'nane. **10** Ra Anumzamofoma avesima nentaza vahe'mota, kumimofona tamefi humiho. Tamagu'areti'ma huta amage'ma nentaza vahe'mota, Ra Anumzamo'a kegava huramantegahie. Ana nehuno kefo avu'ava zama nehaza vahe zamazampintira tamagu vazigahie. **11** Fatgo avu'ava zama nehaza vahera Anumzamo'a remsa hunezmantero, zamagu'amo'ma fatgo hu'nea vahera musezana ante nezmantege'za muse nehaze. **12** Anumzamofoma amage'ma nentaza vahe'mota, agrama hu'nea avu'ava zankura muse hunenteta, ruotage'ma hu'nea agigura susu huntaho.

98 Ra Anumzamo'ma knare'nare zama erifore'ma hu'nea zanku huta, Agritega kasefa zagame huntesune. Agra tamaga kaziga hankavenentake azanteti'ene, ruotage'ma hu'nea azanteti'ene huno hara hugatere'ne. **2** Ra Anumzamo'a Agrama vahe'ma zamagu'ma vazizama'a eriama nehuno, maka kokankoka vahera fatgo avu'ava zama'a eri zamaveri hu'ne. **3** Agrama Israeli vahe'ma huvempa huzmantero, maka zupa nagra navesi tamante vava nehu'na, namefira huozamigahue huno'ma huvempama hu'nea nanekegu agesa antahi'ne. Ama mopama ometre emetre'ma hu'neregama nemaniza maka vahe'mota, Anumzamo'ma tagu'ma vazi'nea zana ko ke'naze. **4** Maka ama mopafima nemaniza vahe'mota ranke huta Ra Anumzamofo agia ahentesga hiho. Mago zankura rekura osuta, ranke huta muse zagamera eri otita nehuta musenkasea hiho. **5** Hapu zavena nehenkeno knare ageru neranigeta, zagamera nehuta Ra Anumzamofona agi'a ahentesga hiho. **6** Ufenteti'ene sipisipimofo paziveteti ufena nereta, Ra Anumzana kini ne'mofo avuga ranke

huta zagamera nehuta musenkasea hiho. 7 Hagerimokane, hagerimpima nemaniza zagaramimota tamagerura erintesga huta rantamageru riho. Anazanke huta ama mopamokane, agofetu'ma nemaniza zantamimota tamagranena anazanke hiho. 8 Ranra tintamimoza zamazana nehesageta, agonaramimota tamagerura eri mago huta musenkase zagamera hiho. 9 Na'ankure Ra Anumzamo'ma ne-eana ama mopafima nemaniza vahe refko huzmanteku ne-eankino, maka ama mopafima kokankokama nemaniza vahera fatgo avu'ava huno, mago avamenteke refkoa huzmantegahie.

99 Ra Anumzamo'a kini manino maka zana kegava hu'neanki, maka kokanko'ma nemaniza vahe'mota korora hunenteta tamahirahiku hiho. Agra serabimie nehaza ankerontremofo amu'nompi kini tra'a anteno onagamu mani'negeno, ama mopamo'a imi enerie. 2 Saioni kumapina Ra Anumzamo'a tusi konariri'ane mani'neno, maka kokankokama mani'naza vahetera Agra manisga huno mani'neno kegava hunezmante. 3 Maka ama mopafima mani'naza, vahe'mo'za ra huno so'e zantfama hu'nea kagia husga hunegante'za, kagrikura ruotage hu'ne hu'za hiho. 4 Hankavenentake'ma hu'nana kini ne'moka, fatgo avu'ava zanku kave'nesie. Kagraka'a fatgoma huno refko hu avu'ava zana eri agafa hu'nane. Ana nehunka Israeli vahera magoke avamente antenka fatgo avu'ava hunka refko hunezmantane. 5 Ra Anumzana tagri Anumzamofona agi'a ahentesga nehuta, agri agafi ome kepri huta monora huntasnune. Na'ankure agra ruotage hu'ne. 6 Hagi pristi eri'zama eneriza vahe amu'hompin, Mosesi'ene Aronikea pristi eri'zana eri'na'e. Agritegama nunamuma nehaza vahe amu'nompin, Samueli'a agrane nunamuna higeno, Ra Anumzamo'a nunamuzamia

antahi nezamino nona huzmante'ne. 7 Ra Anumzamo'a vimago hampompi mani'neno, Israeli vahera keaga zamasami'ne. Ana hige'za amage anteho huno'ma zamasamia tra kene, kasegenena amage ante'naze. 8 Ra Anumzana tagri Anumzamoka nunamu zamia antahi zami'nane. Ana'ma hanke'za kagri'ma ke'za antahi'zama hazana, kumi atre zamante Anumza mani'nane hu'naze. Hianagi zamagrama kumi'ma hazagenka nona hunka zamazeri haviza nehana Anumza mani'nane. 9 Ra Anumzana tagri Anumzamofona agi'a ahentesga nehuta, ruotage'ma hu'nea agona'afina monora huntesnune. Na'ankure Ra Anumzana tagri Anumzamo'a ruotage hu'ne.

100 Maka ama mopafima mani'naza vahe'mota musenkase huta zagamera nehuta Ra Anumzamofo agi'a ahentesga hiho. 2 Ra Anumzamofona muse huta eri'zama'a erinteho. Agri avugama nevanuta, muse zagame huta viho. 3 Ra Anumzamo'a Anumza mani'ne huta keta antahita hiho. Agra'a tro hurantegeta agri vahe mani'none. Ana huta agri vahe mani'nonankino, sipisipi kva vahe'mo sipisipi kegava hunteankna huno kegava hurantegeta mani'none. 4 Agri kumapima ufre kahante'ma nevuta muse hume nevuta, unefreta agi'a ahentesga hiho. Ana nehuta susu huta muse hunenteta, ra agi'a ahentesga hiho. 5 Na'ankure Ra Anumzamo'a knare hu'negu agri vagaore avesizamo'a mevava huno vugahie. Hagi hugahuema huno hu'nea ke'are oti'neno, fore hu anante anante'ma hu'za knane knanema mani'za aza vahera zamaza nehia Anumza mani'ne.

101 Ra Anumzamoka vagaore mevava kavesi zanka'agu'ene, fatgo kavukva zankura zagamera hugahue. Ra Anumzamoka zagame nehu'na kagri kagia ahentesga hugahue. 2 Nagra kegava hu'na mani'nena, fatgo avu'ava zanke hu'na vugahue.

Ra Anumzamoka ina zupa enka, nagrira eme naza hugahane?
Nagra nonifima manine'na, inankna zama hanuana fatgo
avu'ava zanke hugahue. 3 Nagra vahe'ma agazema nemia
havi avu'ava zantera navua ante'na onkegahue. Havi avu'ava
zama nehaza vahe'mokizmi avu'ava zankura nago'nete. Ana
hu'neanki'na ana vahe'enena rutragote'na omanigahue. 4
Akrahe krehe avu'ava zama nehaza vahera zamatre'nuge'za
nagri tva'ontera omegahaze. Ana nehu'na kefo avu'ava zana
namefi humigahue. 5 Tava'ozamire'ma nemaniza vahe'ma
oku'ma zamazeri havizama nehaza vahera, ozmatre'na zamazeri
haviza hugahue. Vahe'ma zamage fenkami netre'za zamavufaga
ataneraza vahera ha' rezamantegahue. 6 Zamagu'areti'ma
tamagema hu'za Anumzamofoma avariri fatgoma nehaza vahera,
nagra kegava huzmantegahue. Iza'o hazenke'ama omne'nenia
vahe'mo Nagri eri'zana erigahie. 7 Havigema hu'za vahe'ma
rezmatgama nehaza vahera zamatre'nuge'za, nagri nompina
mani'neza eri'zani'a e'origahaze. Havigema nehaza vahera
zamatre'nuge'za, nagri noni'afina mago kankamuna zaminuge'za
navuga omanigahaze. 8 Ama mopafintira kefo avu'ava zama
nehaza vahera, maka nantera nagra zamahe fanene huvava
hugahue. Anumzamofo rankumapima havi avu'ava zama nehaza
vahera zamahe fanene hugahue.

102 Ra Anumzamoka nunamuni'a nentahinka, naza huogu'ma
zavi krafama nehuana antahinamio. 2 Kna zampima
mani'nesugenka, kavugosa rukrahe hunka kamefira huonaminka,
kagesa antahinamio. Ana nehunka naza huogu'ma kezankema
nehanugenka, ame hunka naza huo. 3 Kumo'ma mareriteno
ame huno fanane hiazza hu'na osi'a knafi mani'nena fanane hu'za
nehugen, zaferinanifintira teve rukru nehigeno, tevemo'ma

tankanu'zama teganinkani nehiankna zaferinanimo'a nehie. 4
Zagemo'ma trazama temagigeno'ma hiaza huno nagu'amo'a
evuramitfaza nehige'na, ne'zana onesanua nagesa nehie.
5 Karagi'ma ruazamo higeno, navufgamo'a zaferinare vuno
ome kamare'ne. 6 Hagege huno vahe omani ka'ma kokampi
komutomo'ma hiaza hu'na nagrake nemani'na, atrazageno
haviza hige'za vhahera nomaniza kumatamimpi, komutomo'ma
manino vano hiaza nehue. 7 Kenagera navura mase'noanagi,
antahintahimo'a eri'zana erivava hige'na, navura omase'noe. Ana
hige'na nomofo agofetu'ma namamo agraku akoheno maniaza
hu'na nemanue. 8 Nagri ha' vahe'mo'za maka zupa kiza zokago ke
hunantevava nehaze. Ana nehu'za vahe'ma kema nezamasu'za
zamazeri havizama hunakura, nagri nagi ahenente'za hu
havizana hunezmantaze. 9 Ne'zama neaza hu'na ta'nefara
nene'na, tima nofina navunumo'a eramige'na, navunu'ene tina
ne'noe. 10 Na'ankure kagra tusi krimpa ahenantenka, nagrira
nazeri sga hutenga matevu natre'nane. 11 Nagra za'za kna
omanigahuankino knanimo'a ame huno kinaga fre zagemofo
amema'amo'ma hiaza huno vaga nereshige'na, trazamo
osapareaza hu'na hagege nehue. 12 Hianagi Ra Anumzamoka
kagra kinia maninka za'zate kegava hunka vugahane. Ana
hu'nesnanke'za henkama mani'za vanaza vahe'mo'zanena
ana zankura zamagera okanigahaze. 13 Kagra otinka Saioni
rankumakura kasunku huntegahane. Na'ankure kagrama
kasunku'ma huntenka aza hugahue hunkama huhampri'nana
kna fatgo eankinka, kavesinentenka aza hugahane. 14 Saioni
kumapi havemo'a haviza hu'neanagi, eri'za vahekamo'za
tusiza hu'za avesinte'naze. Ana nehu'za menima kumamo'ma
haviza higeno kugusopa moke'ma hu'nea zankura, tusiza

hu'za zamasunku hunentaze. **15** Maka kokankoka mopafima mani'naza vahe'mo'za Ra Anumzamofo agigura zamahirahiku nehu'za, avuga zamarena regahaze. Ana nehanage'za maka ama mopafi kini vahe'mo'za Anumzamoka hihamu masaka'agura koro hugahaze. **16** Na'ankure Ra Anumzamo'a Jerusalemi kuma'ma ete eri so'ema huno negino, Agra'a hihamu masa'afima eama'ma hania zanku anara hugahaze. **17** Ana nehuno zamunte omane zamavufaga zamavapa nemaniza nagamokizmi nunamuna antahi nezamino, nazankuro nunamuma hu'za antahima kesaza nunamu kezmia antahi amnea osugahie. **18** Ama ana zankura avontafepi krente'ne sanunke'za henkama fore hu anante anante'ma hanaza vahe'mo'za hampari'za antahigahaze. Ana nehanage'za henkama fore'ma hanaza vahe'mo'za Ra Anumzamofo agi'a ahentesga hugahaze. **19** Ra Anumzamo'a onagamu ruotgema hu'nea noma'afi mani'neno, kefenkateno ama mopafina nege. **20** Hagi kinafima mani'naza vahe'mo'zama karagi'ma nerazazana nentahino, zamahe frigahune hu'za hu'naza kina vahera katufe zamatre'naku anara nehie. **21** Ana'ma hanige'za Saioni agonafina Ra Anumzamofo agi'a huama nehanage'za, Jerusalemi kumapina agri agia ahentesga hugahaze. **22** Maka ama mopafima kokankokama nemaniza vahe'mo'za, magopi eme eritru nehanage'za, maka ama mopafima kinimo'ma kvama huterema hu'nea mopareti e'za Jerusalemi kumapina Ra Anumzamofo mono eri'zana emerintegahaze. **23** Ozafa ore kasefa vahe mani'nogeno, Ra Anumzamo'a nagri hankavea eri netreno, knani'a eri atupa hu'ne. **24** Ana higena Anumzamofonkura amanage hu'na hu'noe. Anumzanimoka kasefa vahe mani'noanki, knani'a eri atupara hunka ama mopafintira nazeri otro. Kagra ofri manivava

hunka neana Anumza mani'nane. 25 Korapara Kagra ama
mopamo'ma regrino'ma me'nia trara tro hunentenka, monare'ma
me'nea zantamina Kagra kazanteti tro huzmante'nane. 26
Ana zantamimo'za vagaresazanagi, Kagra manivava hunka
vugahane. Atafa kukenamo'ma hiaza huke ome haviza hugaha'e.
Kasefa kukena eri nehankreno atafa kukenama hate atregeno'ma
viaza hunka zanazeri atresankeke vagaregaha'e. 27 Hianagi
Kagra mago avamenteke maninka nevnankeno, kafu kamo'enena
vagaore vuvava huno vugahie. 28 Kagri eri'za vahe'mokzimi
mofavre nagara, Kagra kegava hu so'e huzmante'snanke'za
knare hu'za manigahaze. Ana'ma hananke'zama manine'za
kase zamantesnaza mofavre nagapinti'ma efore'ma hu'za vnaza
vahe'mo'za, kagrane magoka knare hu'za manigahaze.

103 Maka nagu'areti hu'na Ra Anumzamofona agi'a ahentesga
nehu'na, nagu'areti hu'na ruotage'ma hu'nea agi'a ahentesga
hugahue. 2 Maka nagu'areti hu'na Ra Anumzamofona agi'a
ahentesga nehu'na, knare avu'ava zama huno maka zampima
nazama nehia zankura naganera okanigahue. 3 Anumzamo'a
maka kumin'i'a eri netreno, maka krini'a eri netreno, 4
nagu'vazino navrege'na ofri'na mani'noe. Ana nehuno vagaore
avesi zane asunku zanena, fetori'ma hiaza huno nanuntera
ante'ne. 5 Anumzamo'a knare'nare zantamina namige'na eri
knare nehue. Ana nehu'na nazeri kasefa higena, tumpamo'ma
hanave'ama eri kasefa'ma nehiaza hu'na hanavea erina
manigahue. 6 Ra Anumzamo'a fatgo avu'avaza huzmanteno,
vahe'mo'zama knamazami'za zamazeri havizama nehaza vahera,
maka mago avamenteke refko hunezmante. 7 Korapara
Ra Anumzamo'ma nazano tro hunaku'ma hiazana eri ama
huno Mosesena asami'ne. Ana nehuno hankave eri'zama

eneria zana zamaveri hige'za Israeli vahe'mo'za ke'naze. **8**
Ra Anumzamofona asunku zamo'a aviteno mareri'ne. Ana
hu'neankino, avesi rante vava nehuno, ame huno arimpa ohe
Ra Anumza mani'ne. **9** Agra kea tasuvava nosuno, arimpa
aherante vava huno ovu Anumza mani'ne. **10** Tagrama kumi'ma
hu'nona avamente knazana tamigaragi anara nosuno, tagri
kefozamofo avamente ranknaza tamigaragi anara nosie. **11**
Anumzamofoma koro hunte'za agoragama nemaniza vahe'ma
avesima nezamantea avesizamo'a, monamo'ma mopama
agatereno ame'nagame'ma meaza huno Ra Anumzamofo avesi
zamo'a ame'nagame mareri'ne. **12** Zage hanati kazigatima
zage fre kazigama evu'neana afete me'neankino, anahukna
huno tagri kumira afete eri netre. **13** Nefa'ma mofavre
naga'ama asunku'ma hunezmanteaza huno, Ra Anumzamo'a
Agri'ma koro'ma hunente'za agoragama nemaniza vahera
asunkura hunezmante. **14** Na'ankure Agrama mopama erino
tagri'ma tro'ma hurante'neana, Agra ko tageno antahino
hu'neankino, tagrikura kugusopa mani'naze huno nentahie.
15 Tagra vahe'ma ama mopafima mani'nonana trazankna
hu'nonankita za'zatera omanigahune. Ana hu'neankita tra'zamofo
amosremo'ma osi'a knafi rutarenteaza nehune. **16** Anama
hutegenos zaho'mo ana amosrema eri hare'noma vigeno,
zamage'ma nekanizaza nehune. **17** Hianagi Ra Anumzamofonku
koro'ma nehu'za Agri agoragama nemaniza vahera, knane
knanena Anumzamofona vagaore avesi zamo'a zamagrane
mevava nehie. Ana nehanigeno zamagripinti'ma fore'ma
hanaza vahe'mokizmi mofavre nagate'enena fatgo avu'ava
huzmanteno nevie. **18** Anumzamofo kasegene tra ke'nema
kegava huso'ema hu'nezama amage'ma nentaza vahera, e'inahu

avu'ava'za hunezmante. **19** Ra Anumzamo'a Agrama kinima manisania trara monafi retro hunte'ne. Ana hu'neankino anante mani'neno, makazana kegava nehie. **20** Hankavenentake hu'naza ankeromota Ra Anumzamofo agi'a ahentesga hiho. Hankavenentake'ma hu'neta, nazano hihoma huno higeta Agri amage'ma nentamota, nazano hihoma huno hania zamofo ke'a amage anteho. **21** Monafima ohampriga'a ankeroramima mani'netama agri avesi'zama amage'manentaza ankeromota, Ra Anumzamofona agi'a ahentesga hiho. **22** Maka zama tro'ma hunte'neno Agrama kegavama hu'nea mopafima nemaniza zantamimota, Ra Anumzamofona agi'a ahentesga hiho. Ana nehinke'na nagranena maka nagu'areti hu'na Ra Anumzamofona agi'a ahentesga hugahue.

104 Nagra nagu'areti hu'na Ra Anumzamofona agi'a ahentesga hugahue. Ra Anumzana Anumzanimoka kagra rankrerfa hu'nane. Za'za kukenamo'ma hiaza huno masa zankamo'ene konaririkamo'enena kazerino vazinte'ne. **2** Za'za kukenama hiaza hunka masa zanka'a eri hankre'nane. Ana nehunka monafima me'nea zantaminena, seli noma eri atama nereaza hunka, mona eri atarente'nane. **3** Monafima me'nea hampompima tima marenevazimofo anaga kaziga, nonka'ama vazisga hania zafaramina retrure'nane. Hagi karisifima hiaza hunka hampompina maninka vano nehunka, zahopi maninka harenka vano nehane. **4** Kagra zaho'mofonku hankeno nanekek'a erino vano nehie. Ana nehigeno hagna hagna'ma huno nerea tevemo, Kagri eri'za vahera mani'ne. **5** Kagra ama mopa tro hutenga tra'are antankeno me'neankino kazara osugahie. **6** Tavravereti'ma hiaza hunka hagerinu mopa refi'netenka, agonaramina tinu refitankeno azeri nakari fenkateno onaga me'ne. **7** Hianagi kagrama hage

rimofonku'ma hankave kema hankeno'a, koro huno nevie.
Kagrama monagemo'ma hiankna hunka kageru'ma nerankeno'a,
tintamimo'a ame'ama huno nevie. 8 Agonaramimo'za marerisga
nehzageno, agupo mopamo'za uramiza e'ire mano hunka
hunte'hampi me'naze. 9 Ana nehunka hagerimofona, isa kana
antetenankeno ana isa kana agatereno vuno mago'anena mopa
refi'otegahie. 10 Kampu'i tina tro huntankeno, tinkagomupina
nevigeno, ne'onse tintamina huntankeno agonaramimofo
amu'nompinena nevuno, 11 maka afizaga gafamofona tina
nezamige'za nenazageno, afi donki afu'tamimo'za tinku'ma
nezmagege'za ana tina nazageno fru zame'nesie. 12 Hare'zama
vanoma nehaza namamo'za ana timofo ankenarega nona ki'za
manine'za, ana timofo ankenaregama me'nea zafaramimofo
azankunate manine'za zagamera nehaze. 13 Kagra mona
kumakafi onagamu mani'enka, kora atrankeno eramino agona
ramimpina runente. Ana nehunka kagraka'a kazanko avona
antenka, maka zana tro hunka ama mopafina antankeno
aviteno me'ne. 14 Bulimakao afu'mo'zama nesaza trazana kagra
hankeno hagenege'za vahe'mo'za ahe'za hoza nentaze. Ana
hutazagenka kagra hankeno, mopafintira ne'zamo'a hageno
marerino nenarga rentege'za vahe'mo'za e'nerize. 15 Anazanke
hunka kagra hankeno wainimo'a hageno marerige'za, eri'za
waini tina tro hu'za nene'za antahi musena nehazagenka,
olivi masavena zaminke'za eri'za zamugosafina frageno rumsa
nehigenka, ne'zama nene'za hankavema eri'za manisaza
zana bretia nezamine. 16 Ra Anumzamofo zafamo'za tina
nezamu nehazageno, Ra Anumzamo'ma Lebanoni mopafima
sida zafaramima hankre'nea sida zafamo'za tina nezamu
nehaze. 17 Ana sida zafa ramimpina nama ramimo'za nona

eme ki'za nemanize. Ana nehazage'za afi patomo'zanena
(stork) saipresi zafa ramimpi nozamia eme negize. **18** Za'za
agona ramimpima nemaniza afi meme afutamimo'za vano
vano hu'za nemanize. Ana nehazage'za vare'mo'za havemofo
keko kampi fraki'za zamagu nevazize. **19** Kagra ika tro hunka
ante'hankeno me'neno, ruzahu ruzahu knagura hunerasamie.
Ana nehigeno inankna fatgore zagemo'a ufregahie zagemo'a
agra'a keno antahino hu'ne. **20** Kagra hanina atrankeno
hania eme negie. Ana hanke'za zafa tano'pafima nemaniza
zagagafamo'za rerakaure'za vano nehaze. **21** Kenagera kasefa
laioni ramimo'za zagagafama ahe'za tragama hu'za nesagura
rankrafage hu'za vano nehazagenka, Anumzamoka ne'zana
zaminke'za nenaze. **22** Hagi zagema ufrege'za ana laionimo'za
ete vu'za nemaniza have kampi ome nemasaze. **23** Ana'ma
nehazage'za vahe'mo'za vu'za e'za hu'za eri'za zamia ome
e'nerizageno vuno kinaga nese. **24** Ra Anumzamoka, kagra
agigu agigu zantami tro hu'nane. Kagra knare antahi'za ka'areti
ana maka zantamina tro hu'nane. Ana hankeno Kagrama tro
hu'nana zagagafamo'za ama mopafina mani avite'naze. **25**
Hagerimo'a rankrerfa huno uvu evu hu'negeta negone. Ana
hu'neankino ana hagerimofo agu'afina agigu agigu zaga, osira
rana huno ohampriga'a mani avite'naze. **26** Ana hagerimofo
agofetura venteramimo'za vano nehazage'za, Laviataniema hu'za
nehaza afi zagama, tro'ma hu'nana zagamo ana hagerimpina
tina freno vano nehuno zokagora nereno nemanie. **27** Ana
maka tro'ma huzmantenana zagagafamo'za, kna fatgore'ma
ne'zama zamisnanku kagriteke kete'za nemanize. **28** Kagra
ne'zana zaminke'za nenaze. Kagra kazana eri atarenka ne'zana
zaminke'za nazageno zamura nehie. **29** Hianagi Kagrama

rukrahe'ma hunka kamefi'ma huzaminke'za, zamagra antri hu'za antahintahi hakare nehaze. Hagi Kagrama zamasimu'ma erinke'za, zamagra fri'za ete mopanesaze. **30** Kagra kasimura huhu huvazi zamantanke'za, zamasimura eri'za kasefa hu'za mani'naze. Ana nehunka maka ama mopamofo agofetu'ma me'nea zantamina, ete eri kasefa hankeno me'ne. **31** Ana hu'neankino Ra Anumzamofo hihamu masazamo'a mevava huno nevanigeno, maka zama tro'ma hu'nea zankura Ra Anumzamo'a muse hugahie. **32** Ra Anumzamo'ma kefenkateno ama mopafima uruha'ma nehigeno'a, ama mopamo'a kazakaza nehigeno, Ra Anumzamo'ma agona ramima avako'ma nehigeno'a tevegu nehie. **33** Nagrama ofri'ma mani'nesua kna'afina, Ra Anumzamofontega zagamera hugahue. Ana nehu'na zagame hu'na Anumzamofo agi'a ahentesga hunteme nevu'na ome frigahue. **34** Nagrama Ra Anumzamofonku'ma antahintahima nehua zama Agrama keno antahino'ma hanuno'a muse hanie. Na'ankure nagra Ra Anumzamofonte mani'nena musenkasea nehue. **35** Hagi kumi'ma nehaza vahe'mo'za ama mopamofo agofetutira fanene nehanageno, kefo avu'ava'ma nehaza vahe'mo'za fanane hu'za omanisaze. Maka nagu'areti hu'na Ra Anumzamofona husga hunente'na, Ra Anumzamofo agi'a ahentesga hugahue.

105 Ra Anumzamofona agi'a aheta susu hunenteta, ranra eri'zama eri'nea zankura maka ama mopafima mani'haza vahera huama huta zamasamisune. **2** Anumzamofontega muse zagame huta susu huntessnune. Ana nehuta knare huno hentofa eri'zama eri'nea zankura vahera zamasamisune. **3** Anumzamofo agimo'ma ruotage'ma hu'nea zankura husga huntessune. Hagi Ra Anumzamofoma mono'ma hunentaza vahe'mota muse hoho. **4** Ra Anumzamofonku'ene agri hankave'agu'enena

nehaketa, avugosafima kesunkura hake vava hanune. 5
Agrama ruzahu ruzahu eri'zama eri'nea zanku'ene kaguvaza eri
fore nehuno, keaga refko hugahue huno'ma hu'nea zankura
taganera okanisune. 6 Hagi Agri eri'za vahe Abrahamu mofavre
naga'mota, agrama huhampri ramantegeta Jekopumpinti'ma
fore'ma hu'naza vahe mani'naze. 7 Ra Anumzamo'a agrake tagri
Anumzana mani'ne. Ana hu'neankino, maka ama mopafi vahera
refko hunezmante. 8 Anumzamo'ma huhagerafi hvempagema
hu'nea kegura maka zupa ageraokani antahi vava hugahie.
Ana hu'neankino tauseni'a zupama fore hu anante anante'ma
hu'za vanaza vahete'enena ana hvempa kemo'a mevava huno
vugahie. 9 Hagi ana huhagerafi hvempagea Abrahamu'ene
hu'neankino, ana hvempagea Aisakinte eri hankaveti'ne. 10
Anumzamo'a henka ana hvempama hu'neanke'a Jekopunte
eriamma nehuno, Israeli vahetera ana hvempa kemo'a mevava
hugahie huno zamasami'ne. 11 Tamagrama eriterema hanare
Kenani mopa tamisanugeta erisanti hareshnageno, ana mopamo'a
tamagri mopa mevava hugahie huno Anumzamo'a hu'ne. 12
Ama ana nanekema Anumzamo'ma hu'neana, Kenani vahe
amu'nompina Israeli vahera kraka vahekna hu'za osi'a naga
mani'nazageno anankea hu'ne. 13 Israeli vahe'mo'za vahe
mopafine, ru kinimo'zama kegavama hu'naza mopafi mani'za
vano vano hu'naze. 14 Hianagi Anumzamo'a zamatrege
mago'a vahe'mo'za zamazeri havizana osu'naze. Israeli vahetega
Anumzamo'a anteno zamazeri haviza hunaku'ma nehaza kini
vahera ha' kea huzamine. 15 Anumzamo'a huno nagrama
huhampri'noa vahera zamavakora osiho huno nehuno, nagri
kasnampa vahera zamazeri havizana osiho huno hu'ne. 16
Anage nehuno Kenani mopafina Anumzamo'a agatontoza

atregeno ne'egeno, maka ne'zana eri fanane huvagare'ne. 17
Ana'ma nehuno'a mago ne' huntegeno ugoteno Isipi mopafima
vu'neana Josefekino, kazo kazo eri'za erisanie hu'za zagoreti
mizase'za avre'za vu'naze. 18 Ana hute'za seni nofiteti
agafina anakizageno atagura nehige'za, ainireti rini tro hute'za
anankempina rusi hu'naze. 19 Ana huno manino nevigeno
ava'nama ke'nea zamo'ma efore'ma hania knamo'a ehanati'ne.
Ana higeno Ra Anumzamo'a Josefena reheno ke'ne. 20 Hagi
kini ne' Fero'a hige'za kinafintira Josefena katufente'naze.
Vahete'ma kegavama hu'nea kini ne'mo hige'za kinafintira katu
fentageno vu'ne. 21 Ana hutazageno kini ne'mo'a Josefena
huhampri antegeno rankva manino, maka noma'afima me'nea
zantera kegava nehuno, maka fenoma ante'nea zante'enena
kegava hu'ne. 22 Ana hu'neankino agra amne kini ne'mofa
eri'za vahera kina nompina zamavarenenteno, kini ne'mofoma
antahintahima nemiza vahera rempi huzamigahie. 23 Hagi henka
Israeli naga'mo'za Isipi mopafina efre'naze. Ana hutazageno
Jekopu'a Hamu vahe mopafi kraka vahe seno eman'i'ne.
24 Anante Ra Anumzamo'a Agra'a Israeli vahera zamaza
hige'za, rama'a mofavre kasezamante'naze. Ana hume nevu'za
rama'a vahe ome forehu hakare hu'za ha' vahe'zamimofo
hankavea zamagatere'naze. 25 Anante Anumzamo'a Isipi
vahera antahi'zana eri rukrahe hige'za, Agri'a nagara Israeli
vahera ha' rezamante'naze. Ana nehu'za Ra Anumzamofo
Agri'a eri'zama eneriza Israeli vahe'ma zamazeri haviza hanaza
kanku hake'naze 26 Hianagi Ra Anumzamo'a eri'za vahe'a
Mosesene, Aronine huhampari zanantegeke vu'na'e. 27 Ana
higeke Hamu nagama Isipi mopafima nemaniza vahetera vuke,
Ra Anumzamo'ma hu'nea kagu vazane, avamezanena ome

eri fore hu'na'e. **28** Ra Anumzamo'a higeno Isipi mopafina hanizamo eme refite'ne. Na'ankure Anumzamofo nanekea ontahi'za Israeli vahera zamatrazage'za ovu'naza zante anara hu'ne. **29** Anumzamo'a maka tintamina eri rukrahe higeno, kora segeno ana timpima mani'naza nozameramimo'za fri vagare'naze. **30** Anantero hogam'o'za Isipi mopafina avitete'za, kini ne'mo'ma nemasefinena mani vite'naze. **31** Ra Anumzamo'a kosine umpe umpe'ene huzmanteg'e'za eri erintagu hu'za maka Isipi mopafina emani avite'naze. **32** Ko'mopa ko huntogeno ko'ma riaza huno eneramigeno, kopsi'na atregeno ru trage huteno tevenefa huno maka Isipi mopafina vuno eno huvagare'ne. **33** Isipi vahe'mokizmi waini hozane, fiki zafaramineno eri haviza nehuno, Isipi mopafima me'nea zafaramina rukrara karurupetre'ne. **34** Ana nehuno tusinasi kenutami huzmanteg'e'za rama'a hu'za ohampriga'a e'naze. **35** Ana kenu'mo'za trazantamina vatri'za neza maka eri hana nehu'za, hozafi me'nea ne'zantamina ne'za maka eri vagare'naze. **36** Ana nehuno Anumzamo'a Isipi mopafina ese'ma kasezmante'nea agonesa anentatamina miko zamahe vaganereno, maka vahe'mo'za zage mofavregu'ma musema nehu'za hankavetie hu'zama nehaza ne' mofavre nagara zamahe vagare'ne. **37** Ra Anumzamo'ma vahe'a Israeli naga'ma zamavarege'za Isipiti'ma etirami'za e'naku'ma nehu'za, rama'a silvane golinena eri'ne'za e'naze. Magomo'e huno Israeli naga nofipintira tanafara osu'ne. **38** Israeli vahe'mo'zama Isipi mopama atre'za azage'za, Isipi vahe'mo'za tusi muse hu'naze. Na'ankure ko'ma Israeli vahe koro'ma hu'naza zanku anara hu'naze. **39** Anumzamo'a mago hampo antegeno Israeli vahera anteso hunezmanegeno, hanimpina tevenefanu remsahu zamante'ne. **40** Israeli vahe'mo'zama ne'zanku'ma antahigazageno'a, hifa

namazaga atregeno ege'za ahe'za nenazageno, monafinti mana
ne'zana atregeno ege'za eri'za nazageno zamura hu'ne. 41
Agra havea rutanegeno timo'a rumpasasa huno krohupeno
eno, hagege kokampina ranti evu'ne. 42 E'inama hu'neana
Anumzamo'a eri'za vahe'a Abrahamuma ruotge huvempa
kema hunte'nea kegu agesa nentahino anara hu'ne 43 Hagi
Anumzamo'ma nagri nagare'ma huno huhampari zamante'nea
Israeli vahe'ma, Isipiti'ma zamavareno ne-ege'za, ranke hu'za
kezati'za musenkasea nehu'za e'naze. 44 Ana nehuno ru
vahe'mokizmi mopa eri zami'ne. Ana hige'za ru vahe'mo'za
maraguzati'za hankre'naza ne'za Israeli vahe'mo'za eri nafa'a
hune'za vasage'za ne'naze. 45 Ama ana maka zama fore'ma
hu'neana, Israeli vahe'mo'za nege'za, Anumzamofo kasegene tra
kenena amage antesagu huno anara hu'ne. Ra Anumzamofona
agi'a ahentesga hanune.

106 Ra Anumzamofo agi'a ahentesga nehuta susu huntunesune.
Na'ankure agra knare hu'ne. Agrama avesi nerantea
zamo'a vagaore mevava huno nevie. 2 Ra Anumzamo'ma
hankavenentake eri'zama eri'nea zankura, iza hamprino kegara
hugahie? Ana hu'neankino mago vahe'mo'a agri agi'a husga
huntegahianagi, Agrama antahi'nea avamentera osugahie. 3
Iza'o maka zupama fatgo avu'ava zama nehuno, fatgo huno
refkohu avu'ava zama nehia vahe'mo'a muse hugahie. 4 Ra
Anumzamoka vaheka'ama zamazeri knare'ma nehanunka,
kagesa antahi nemalinka, erava'o hunka naza hunka nagu'vazio.
5 Kagrama huhampri zamante'nana vahe kamo'zama so'e
mani'zampima musema hu'za nemanisage'na, zamagrane
musema hu'zanku nave'nesige'na kagri vahe'ene musena
hanue hu'na nagesa nentahue. Kagrama erisantima hare'nana

vaheka'ane natrege'na magoka mani'ne'na, Kagri kagi'a ahentesga ha'neno. **6** Tagri tagehe'mo'zama hu'nazaza huta tagra kumi hu'none. Ana nehuta kumi hu hakare huta eri hakare hu'none. **7** Tagehemo'zama Isipima mani'neza kagrama eri fore'ma hu'nana kaguva zankura musena osu'naze. Kagrama kavesi zamantenenkama so'e kavukva'ma huzmante'nana zankura zamaganekani'naze. Ana nehu'za Koranke hagerinte'ma ne-eza ha' regante'naze. **8** Ana hu'neanagi Anumzamo'a Agri agimofo knare zankure huno zamaguravazi'ne. Ana nehuno Agra tusi hankave'a erinte ama hanige'za kesazegu anara hu'ne. **9** Anumzamo'a hankave ke Koranke Hagerimofona huntegeno, hageri amu'nompina ka fore huno, hagage kokampima hu'neaza huno mopa fore higeno hagege hu'ne. Ana hutegeno hagege kokampima me'nea mopare'ma viaza huno, hagerimofo amu'nompina Israeli vahera zamavareno kantu kaziga vu'ne. **10** E'ina huno Anumzamo'a ha'ma rezmante'naza vahe'mofo zamazampintira zamagu'nevazino, ha' vahe'zmimokizmi hankavefintira zamagu'vazino ete zamavare'ne. **11** Hianagi zamagri ha' vahera, hagerimo ete eme ruhamprino refitege'za fri vagarageno, anampintira magore huno kuzafara omani fri vagare'naze. **12** Ana'ma hige'za Anumzamofo vahe'mo'za agrama huvempama hu'nea kegura zamentinti nehu'za, zagame hu'za agri agi ahentesga hu'naze. **13** Hianagi Ra Anumzamo'ma erifore'ma hu'nea zankura, ame hu'za zamagekani'naze. Ana hige'za Anumzamofo antahintahigura avega onte'za nazano hunaku'ma haza zana, amne tro hu'naze. **14** Hagege kokampima e'nazana ne'zama ne'zankura tusiza huno zamavesi zamavesi hu'ne. Ana nehige'za vahe omani ka'ma kokampina Anumzamofona rehe'za ke'naze.

15 E'ina hazageno Anumzamofoma antahigaza zana amne
zami'ne. Hianagi havizantfa hu'nea kri atregeno eme zamazeri
haviza hu'ne. **16** Seli nonkuma'ma eme ante'za mani'nafintira,
mago'a oti'za Ra Anumzamo'ma huhampri zananteno zanazeri
ruotagema hu'nea pristi eri'za netre Mosese'ene Aronikema
e'neri'a eri'zankura kanive reznante'naze. **17** Ana'ma hazageno'a
mopamo'a ruaka huno Datanina asgahu nenakrino, anampina
Abiramune mago'a naga'enena zamazeri nakrifenza atreno
refite'ne. **18** Ana naga'mokizmi kema antahi'za amage'ma
nente'za vahe'mo'za havi avu'ava'ma hu'naza vahera, tevemo
eramino eme te fanane hu'ne. **19** Horepi agonafima ete'za
golireti kre maramra hu'za, bulimakao anenta'mofo amema'a tro
hunte'za, ana zamofo avuga kepri hu'za monora hunte'naze. **20**
Hihamu masa'ane Anumzana amne zama hiaza hu'za, tra'zama
nenea zaga ve bulimakaomofo amema'are atre'naze. **21** Isipi
mopafima zamagu vazinaku'ma hankave kaguvazama erifore'ma
nehuno, zamavareno etiramino'ma e'nea Anumzana, zamage
kaninte'naze. **22** Anumzamo'ma e'inahu hankave eri'zama Hamu
mopafi erifore nehuno, ruzahu kaguvazama koranke hagerinte'ma
erifore hige'zama ke'naza zankura zamagesa ontahi'naze.
23 E'ina'ma hu'nazagu huno Anumzamo'a zamazeri haviza
hugahue huno huama hu'ne. Hianagi Agrama huhamprinte'nea
ne' Mosese'a Anumzamofone veamokizmi amu'nompi oti'neno
antahigeno, krimpa ahe'zana atregeno uramino huno meme
higeno, Anumzamo'a zamazeri havizana osu'ne. **24** Hagi
zamagra knare mopafima ufre zankura zamavesra hu'ne.
Na'ankure Anumzamofo kegura zamagra zamentintia osu'nazagu
anara hu'naze. **25** Zamagra seli nozamifi mani'neza sumisumi
hu'za kehakare nehu'za, Ra Anumzamofo nanekea amage

onte'naze. **26** Ana'ma hazagu huno Anumzamo'a aza erisga
nehuno vahe omani ka'ma kokampi zamatre'nuge'za frigahaze
huno huvempa kea hu'ne. **27** Ana nehu'na zamagripinti'ma
efore'ma hanaza vahera, zamazeri panani hanuge'za ru vahe
moparega umani emani hu'ne'za anantega frigahaze hu'ne.
28 Hagi henka Israeli vahe'mo'za Peori kumatera Bali havi
anumzana mono hunente'za, fri vahete'ma ofama nehaza
ne'zanena ne'naze. **29** E'inahu havi avu'ava zama haza zamo
Ra Anumzamofona azeri rimpa hazageno rankri atregeno
eno, eme zamazeri haviza hu'ne. **30** Hianagi Finiasi'a otino
kumi'ma hu'naza vahera zamahe hana higeno, ana krimo'a
vagare'ne. **31** Ana hu'neankino ananteti'ma agafa hu'za mani'za
vanaza vahe'mo'zane, henkama forehu anante nante'ma hu'za
vanaza vahe'mo'za, Finiasi'a fatgo avu'ava'za hu'ne hu'za
maka zupa antahimi'za vugahaze. **32** Israeli vahe'mo'za Meriba
mopafima me'nea tintaminte'ma mani'neza Ra Anumzamofona
azeri rimpa ahazageno, ana'ma hazazamofo knazana Mosese
agofetu erintegeno eri'ne. **33** E'ina hu'za Mosesena azeri
rimpa ahazageno, osuga naneke Mosese'a hu'ne. **34** Anama
emani'naza mopafima mani'naza vahera, Ra Anumzamo'a
zamahe hana hiho huno Israeli vahera huzmante'neanagi, ana
nanekea amagera ante'za zamahe hanara osu'naze. **35** Hianagi
Israeli vahe'mo'za ana mopafima nemaniza vahe'ene ruhava
hu'za nemani'za, ana vahe'mokizmi kefo avu'ava zana amage
ante'za hu'naze. **36** Ana nehu'za havi anumzamofo monora
hunte'naze. Ana'ma haza zamo'a krifugna huno zamazeri haviza
hu'ne. **37** Ana nehu'za ne'mofa zamia zamahe'za havi anumzante
kresramna vu'naze. **38** Hazenkezmi omane'nea ne'mofa zamia
zamahe'za, korazmia eri neragi'za, Kenani vahe'mokizmi havi

anumzantaminte zamahe'za Kresramanama vu'naza korazmimo
mopa eri hi'nimna vu'ne. **39** E'inahu kefo avu'ava'ma hazazamo
higeza Anumzamofo avurera agrua nosu'za, havi anumzama
avesima antaza zamo'a Ra Anumzamofo avurera, vere a'mo'ma
neve'enema mani fatgo osuno, atreno mago venema monko
avu'ava zama hiaza hu'naze. **40** E'ina hu'negu Ra Anumzamo'a
vahe'agura tusi arimpa ahenezmanteno, nagri vahere huno'ma
erisanti'ma hare'nea vahera agotezmantero avesra huzmante'ne.
41 Ana huteno ru mopafi vahe'ma zamavesrama hunezmantaza
vahe'mokizmi zamazampi zamavarentege'za, ana vahe'mo'za
kegava huzmante'naze. **42** Ana nehu'za ha' vahe'zamimo'za
knazana zamiza zamazeri haviza nehazage'za, zamagri hankavefi
mani'naze. **43** Rama'a zupa Anumzamo'a zamagu vazi'neanagi,
kema antahi avu'ava zana zamagripina omane'negu huno,
zamagri kumimo zamazeri haviza hu'ne. **44** Hianagi knafima
mani'neza zamazama hanigu Ra Anumzamofontega zavi krafa
hu'za nunamuma hazageno'a, nunamuzamia antahino asunku
huzmante'ne. **45** Anumzamo'a zamagrikure huno huvempama
huzmante'nea nanekegu agesa antahi'ne. Na'ankure vaga ore
mevava avesi zama'agu agesa nentahino, antahintahi'a rukrahe
hu'ne. **46** Israeli vahe'ma zamavare'za ome kina huzmante'naza
vahera, Anumzamo'a zamarimpa eri rukrahe hige'za Israeli
vahera zamasunku huzmante'naze. **47** Taguvazio, Ra Anumzana
tagri Anumzamoka ru vahe moparegama umani emanima
hu'nontegati tavre atru huo. Ana'ma hananketa ruotage'ma
hu'nea kagia neheta hu muse huneganteta, musenkase huta
kagi'a ahentesga hugahune. **48** Ra Anumzana Israeli vahe
Anumzamofona agi'a ahentesga hanune. Maka zupa knane
knanena agra manino nevia Anumza mani'ne. Maka vahe'mota

tamage huta nehuta, Ra Anumzamofona agj'a ahentesga hanune.

107 Ra Anumzamofona susu huntasnune. Na'ankure agra knare avu'ava hu'neranteankino, avesimaranteno knare'ma hunerantea avu'avazamo'a mevava huno vugahie. **2** Ra Anumzamo'ma ha' vahe zamazampinti'ma tamagu'vazino tamavre'nenia vahe'mota, ranke huta Ra Anumzamo ha' vahe'mofo zamazampinti tagu'vazino tavre'ne huta huama huta vahera zamasamihio. **3** Na'ankure zage hanati kazigane, zage fre kazigane, noti kazigane, sauti kaziganema ru vahe moparegama umani emanima huta kinama huta mani'nazaregatira, agra ete zamavare atru hu'ne. **4** Mago'amo'za vahe omani ka'ma kokampi vano vano nehu'za, manisnaza rankumaku hake'nazanagi onke'naze. **5** Ne'zankura zamaganetege'za tinku'enena hagage nehu'za fri'za hu'naze. **6** Ana kna zampima manine'za, Ra Anumzamofontega zavi krafa hazageno, ana kna zampintira zamagu'vazino ete zamavare'ne. **7** Agra knare huno zamavare fatgo huno umanisaza rankumate zamavareno vu'ne. **8** Zamatreneke'za Ra Anumzamofona vagaore mevava avesi zama'agura susu hunente'za, knare avu'ava'ma huzmante'nea zanku'enena humuse hunteho. **9** Tinku'ma avesiaza huno maka zanku'ma ave'nesia vaheran eri knare hunente. Ne'zanku'ma hiazza huno maka zanku'ma aga'ma netea vahera, knare zantaminu agu'afina antevinete. **10** Mago'a nagara tusi haninkino antrako hu'nefi, seni nofiteti kina huzmantage'za zamatagu nehu'za mani'naze. **11** Na'ankure Ra Anumzamofo nanekea ha'arente'za zamefi hunemiza Marerisa Anumzamo'ma hihoma huno huzmantea nanekea amagera onte'nazagu anara hu'naze. **12** E'ina agafare Anumzamo'a zamazeri anteramisige'za akohe'za

manisazegu, zamatrege'za tusi maraguzati'za knanentake eri'zana eri'naze. Ana nehu'za traka hu'nazanagi, mago vahe'mo'e hunora zamaza osu'ne. **13** Ana knaza zamifima zamagrama mani'ne'za, Ra Anumzamofontega zavi krafa hazageno, ana knazampintira zamaza huno zamagu'vazi'ne. **14** Tusi hani zampinti'ene fri'zamofo turunapima mani'nazafintira Anumzamo'a zamavare atineramino, seni nofimo'ma kinama rezmante'nea zana katufezmante'ne. **15** Ana'ma hanige'za zamatrenke'za Ra Anumzamofona vagaore mevava avesi zama'agura susu hunente'za, knare huno hentofa avu'ava'ma huzmante'nea zanku'enena susu huntaho. **16** Bronsireti'ma tro hu'naza kahana rurapage huno rufuzafupenetreno, kafama erigi'za retrako nehaza ainia rufutagi atre'ne. **17** Zamagrama agri ke'ama ontahi avu'ava'ma hazazamo'a, negi vahe'mofo avu'ava'za tro nehu'za, kumi'ma haza nona'a knafina ufre'za zamatazana eri'naze. **18** Ne'zama ne'zankura zamavesra nehu'za, fri'zamofo kahantera erava'o nehaze. **19** Ana knazamo'ma zamazeri haviza hige'zama manine'za, Ra Anumzamofontega zavi krafa hazageno, ana hazenkefintira zamagu'vazino zamavare atirami'ne. **20** Anumzamo'a naneke'a huntegeno eno zamazeri neganamreno, frinaku'ma nehazafintira eme zamagu'vazi'ne. **21** Ana hu'negu zamagra Ra Anumzamofona vagaore mevava avesi zama'agu'ene, knare avu'ava'ma huzmante'nea zanku'enena susu huntegahaze. **22** Ana nehu'za muse ofa Anumzamofontega Kresramana nevu'za, knare avu'ava'ma hu'nea zankura zagame hu'za musenkase nehu'za huama hiho. **23** Mago'amo'za ventefi mani'za hagerimofo agofetu vu'za e'za hu'za ru moparega fenozana eri'za zagore ometre emetre nehaze. **24** Ana vahe'mo'za zamagranena Ra Anumzamo'ma hankave eri'zama eri'nea zana

ke'za antahi'za nehu'za, knare zantfama hu'nea zantamima
hagerimofo agu'afima tro'ma hunte'nea zanena ke'naze. **25**
Anumzamo'a hankave zaho huntogeno eno hagerina eme
vazi'zoregeno, hagerimo'a kranto kranto nehie. **26** Ana nehuno
anama mani'naza ventea erisga huno ame'nagame monafi
mareriteno, atregeno hagerimpina amefenkame uneramie.
Ana'ma higeno'a ventefima vanoma nehaza vahe'mo'za koro
hu'za tusi zamagogogu nehaze. **27** Ana nehu'za ventefima
vanoma nehaza vahe'mo'za aka tima ne'nea vahe'mo'ma neginagi
nehuno, traka huno umse emase hiaza nehu'za, ventema agu'vazi
antahi'zazmimo'a vagare'ne. **28** Ana knazamo'ma zamazeri
havizama nehige'za, Ra Anumzamofontega kezati'zageno,
ana knaza ramimpintira zamagu'vazino zamavare'ne. **29**
Anumzamo'a hagerimofona akohenka manio huno magoke zupa
higeno, hagerimo'ma kranto kranto'ma nehia agasasamo'a urami
avazage'ne. **30** Hagerimo'ma ome avamazagegeno'a ventefima
vano nehaza vahe'mo'zama nege'za tusi muse nehzageno,
vunaku'ma haza kumate'ma me'nea tinkenarega zamavare so'e
huno zamagu'ma vazisaza kumatega vu'ne **31** E'ina hu'negu Ra
Anumzamofona vagaore avesi zama'agura susu hunente'za,
knare avu'ava'ma huzmante'nea zanku'enena susu huntegahaze.
32 Anumzamofo vahe'ma atruma hanafina Agri agi'a ahentesga
nehu'za, kva vahe'ma atruma hanafinena husga huntegahaze.
33 Tirama ne-ea tintamina Anumzamo'a eriranegeno hagege
mopa fore nehigeno, tima nehanatia kampuitamina eri ranegeno
mopamo'a hagege hu'ne. **34** Ana nehuno masave nentake'ma
hu'nea mopafina, higeno hagemo'a aviteno mopa eri haviza
hu'ne. Na'ankure ana mopafima nemaniza vahe'mo'zama havi
avu'avazama hu'naza zanku huno anara hu'ne. **35** Hianagi

hagege kokampina Anumzamo'a higeno tirura mare'nevazigeno, ka'ma kokampina higeno tintamimo'a rama'a eforera huno ne-e. **36** Ana'ma huteno'a ne'zanku'ma zamaga'ma netea vahera zamavareno ana mopafina vige'za umanine'za, nona ki'za ranra kumatmina erifore hu'za mani'naze. **37** Ana mopafina hoza ome eri'za nente'za, waini hozanena antazageno raga rentege'za rama'a tagi'naze. **38** Anumzamo'a vahe'a asomu huzmanteg'e'za rama'a mofavre kasezamante'za eri hakare nehazageno, bulimakao afu'mo'zanena rama'a forehu hakare hu'za vu'naze. **39** Hagi zamagra rama'a vahe'ma mani'nazaretira ome osi osi hume vu'za osi'a vahe mani'nazagu ha' vahe zamimo'za hara eme huzmagatere'za zamazeri zamagaze nehu'za, zamata nezami'za tusi knaza zamizage'za zamasunku zampi mani'naze. **40** Ra Anumzamofo vahe'ma ha'ma eme huzmantaza vahe'mokizmi kva vahetera, Anumzamo'a arimpa ahe'zana erikaha hutrege'za, ka'ma kokampina kanku hazagre'za vano vano nehaze. **41** Hianagi zamunte omane vahe'mo'zama knafima mani'nazageno'a, Anumzamo'a zamaza huno zamavare netreno, sipisipi afu'mo'zama nehazaza huno zamazeri hakare hige'za, rama'a mofavre zamante'za eri hakare nehaze. **42** Fatgo avu'ava'zama nehaza vahe'mo'za ana zama nege'za muse nehanage'za, kefo avu'avazama nehaza vahe'mo'za kea osu zamagira hamunki'za mani'naze. **43** Hagi iza'o knare antahi'zama me'nesia vahe'mo'a ama ana zankura agesa anteno nentahino, Ra Anumzamofo vagaore mevava avesi zama'a keno antahino hugahie.

108 Anumzamoka nagu'areti hu'na kagritera namentintia nehue. Ana nehuanki'na maka nagu'areti hu'na zagamera nehu'na, kagri kagia ahentesga hugahue. **2** Nanterama zahufa

masama osu'nesige'na oti'na laeliema nehaza zavenane,
hapu'ema nehaza zavenanena nehe'na masama hu'zana azeri
otisugenno masa hugahie. 3 Maka ama mopafima mani'naza
vahe'mokizmi zamavufi, Ra Anumzamoka susu hugantegahue.
Ana nehu'na kokankokama nemaniza vahe'mokizmi zamavufi
kagi'a ahentesga hu'na zagamera hugahue. 4 Na'ankure
vagaore mevava kavesi zamo'a mona agatereno ame'nagame
mareri'ne. Ana nehigeno so'e kavukva'ma hurante vavama hunka
neana zamo'a onagamu hampompi mareri'ne. 5 Anumzamoka
kagri kagia ahentesga hanunkeno monafi marenerisigeno,
kagri hihamu masazankamo'a maka ama mopafina vuno
eno hanige'za vahe'mo'za antahiza ke'za hanaze. 6 Hanki
menina kagrama kavesinerantana vaheka'a tagu'vazinka ete
tavar. Nunamuni'a antahi nenaminka kagra hankave ka'areti
nagu'vazio. 7 Anumzamo'a ruotage'ma hu'nea mono noma'afi
mani'neno amanage huno huvempa hu'ne. Nagra hara ko
hugatere'noanki'na, muse hu'na Sekemu mopane Sukoti agupo
mopa refko hugahue. 8 Giliati mopane Manase mopamokea
nagri mopa menakeno, Efraemi mopamo'a bronsi fetori nanunte
nentanuankna huno megeno, Juda mopamo'a kini vahe'mo'ma
azampima e'neria azotani'agna hu'ne. 9 Hagi Moapu mopamo'a
tifre zuompa ni'agna hu'neankino, henka nagri eri'za vahe
nemanisige'na, Idomu mopafi nagia nona zafi atregahue. Ana
nehu'na Filistia vahera hara huzmagatenere'na, kezati'na musena
hugahue. 10 Iza navareno hankave vihu keginama hugagi'naza
rankumapina ufregahie? Iza navareno Idomu mopafina vugahie?
11 Anumzamoka kagra ko kamefi hurami'nampi? Anumzamoka
tagri sondia vahera zamaza osugahampi? 12 Anumzamoka
taza hugeta ha' vahetia hara huzmagateramneno. Na'ankure

vahe'mo'ma tazama hu'zamo'a, amne zankna hugahie. 13

Anumzamo'a taza hanigeta hara huzmageteregahune. Na'ankure
ha' vahetia agiareti zamare hapatigahie.

109 Anumzana kagri kagima ahentesgama nehua Anumza
mani'nanki, kagasasana eri taganenka omanio. 2 Na'ankure
kefo avu'ava'zama nehu'za krunagema nehaza vahe'mo'za,
zamagira reaka hu'za nazeri haviza hu nanekea nehu'za,
havige hunante'za vano nehaze. 3 Maka kazigatira huhaviza
hunenantaza kemo nazeri kanegigeno, mago agafa'a omane'nea
zante zamagra nenhaze. 4 Nagra navesi nezmante'na, nunamu
huzmante noanagi, zamagra rukrahe hu'za osu'noa zanku
havi naneke hunante'naze. 5 Knare avu'ava zama huzmantoa
zantera, nona hu'za havi avu'ava hunante'naze. Ana nehu'za
nagra navesi zmantoanagi, nagrira navesi onante'za zamavesra
hunante'haze. 6 Kefo avu'ava'ma nehia vahe huntegeno ha'ma
renenantea vahera keaga hunteno, Agri ha' vahe huntegeno
keaga hunteno. 7 Hagi keaga'ama refko hania ne'mo'ma
naneke'ama nentahino'a, hago hazenke hu'ne huno hugahie.
Ana nehuno ana ne'mo'ma nunamuma huno e'neana, ana
nunamumo'a kumizase'ne. 8 Atregeno ana ne'mo'a ame huno
nefrisigeno, mago vahe'mo agri nona eri'noe. 9 Agri mofavre
naga'mo'za megusa nemanisageno, nenaro'a kento a' manisanie.
10 Ana ne'mofo mofavre naga'mo'za vano vano nehu'za, vahe
zante meme hu'za vano nehu'za, havizama hu'nea nozamia
atre'za afete hake'za vano hiho. 11 Hagi ana ne'mo'ma mago
vahe'mofo zama nofi'ma hu'neno omi'nesia zantera, anazamofo
nafa'amo'a eme ana ne'mofo fenzozana eri vagaregahie. Ana
nehanige'za ru kumate vahe'mo'za e'za, amuhoma huno
eri atruma hu'nea feno zama'a maka eri'za vugahaze. 12

Mago vahe'mo'a ana ne'mofonkura asunkura hunteno knare
avu'avara huonteno. Ana nehina ana ne'mofo megusa mofavre
nagara zamasunkura huozmantegahaze! **13** Ana nehanigeno
agripinti'ma fore'ma hanaza mofavre nagara ana maka fri
vagaresage'za, henkama fore'ma hanaza vahe'mo'za ana vahera
antahi ozamigahaze. **14** Ana ne'mofo agehemmo'zama hu'naza
kumira Ra Anumzamo'a aganera okanisie. Ana nehuno ana
ne'mofo nerera'ma hu'nesia kumira avontafepintira eri otresie. **15**
Ra Anumzamo'a maka zupa ana vahe'mokizmi kumikura agesa
antahi vava nehanige'za, ana ne'mofona vahe'mo'za mago'ene
zamagesa antahi omigahaze. **16** Na'ankure ana ne'mo'a vahe'ma
so'e avu'ava'ma huzmante zankura avesra nehuno, zamunte
omane vahe'ene ke'onke zanku atupama nehaza vahera
zamazeri haviza nehie. Ana nehuno zamarimpa zamatafima
mani'naza vahera zamahe fri'ne. **17** Ana ne'mo'a sifana kema
vahe'ma huzmanteno zamazeri haviza hu zankura muse nehie.
Ana hu'neanki menina agri sifna kemo sifna hunteno azeri haviza
hanie. Ana ne'mo'a vahera zamazeri so'ea nosia neki, ana nera
azeri so'ea osanie. **18** Agrama vahe'ma sifna kema huzmantea
zamo'a, avate'ma za'za kukenama eri antaniaza nehuno, tima
negeno avufgafi ufreaza nehigeno, masavemo'ma zaferinafima
ufreaza hu'ne. **19** Hagi vahe'ma sifnama huzmante'nea zamo'a
ete rukrahe huno agrite eno, kukenama antaniaza huno avufgare
nemesigeno, maka zupama amu nofi'ma regeno afafafima
meaza hino. **20** E'inahu knazana Ra Anumzamo'a atresigeno
eno, nagri'ma nazeri haviza hu kema nehaza vahera eme
zamazeri haviza hanie. **21** Hianagi Ra Anumzana nagri
Anumzamoka, kagraka'a kagigu nentahinka, enka eme naza
huo. Na'ankure kavesi zankamo'a knare zantfa hu'neanki,

nagu'vazinka ete navro. 22 Nagrira namunte omanege'na, maka zankura atupa hu'na mani'nogeno, tumo'nimo'a fakifaki nehuno nata negrie. 23 Kinaga fre zagemo rentegeno namemo ome atupa hiaza hu'na, ome vagare'za nehu'na, ra kenu'mo atafari ramiaza nehue. 24 Nagra ne'zama a'o hu'na manua zamo higeno narenafina hanave'a nomanegeno, navufgamo'a tari'vazino zaferinare ome akamare'ne. 25 Vahe'mo'zama nagri'ma nenage'za tusi kizazokago ke hunenante'za, zamasenia rugenka hu'naze. 26 Ra Anumzana nagri Anumza mani'nananki naza hunka, vagaore mevava kavesi zanteti nagu'vazio. 27 Ama ana zama nehana zankura, Ra Anumzamo Agra'a azanuti agura nevazie hu'za ke'za antahi'za hiho. 28 Zamagra nagrira kazusi hunantegahaze. Hianagi kagra asomu hunantegahane. Nagrira nazeri haviza hugahaze. Hianagi zamagrira zamazeri haviza hananke'za zamagazegu hugahaze. Hianagi kagri eri'za vahe'mo'a musenkase hugahie. 29 Nagri'ma havigema hunante'naza vahe'mo'za zmagazezamo'a refitezmantegahie. Ana nehanageno za'za kukenamo'ma rufiteaza huno zamagazemo'a refitezmantegahie. 30 Ra Anumzamofona tusiza hu'na susu hunente'na, vahe'ma atruma hanaza amu'nompima mani'nena, agri agi'a ahentesga hugahue. 31 Na'ankure Agra maka zanku'ma atupa'ma nehaza vahe kaziga mani'neno, vahe'mo'zama zamazeri havizama nehu'za zamahe frinaku'ma nehzageno'a Agra zamaza nehie.

110 Ra Anumzamo'a Ranimofonkura amanage huno asami'ne, nazantmaga kaziga mani'nege'na, ha' vaheka'a zamazeri atresanuge'za kagiafinka mase'nagenka zamagofetu kagia renka otigahane! 2 Ra Anumzamo'a kazeri antesga hanigenka Jerusalemi rankumate kva mani'enka, mago'a kuma'enena

kegava nehunka, ha vaheka'anena kegava huzmantegahane. 3
Hagi kagrama hate'ma vunaku'ma hananke'za, kagri vahe'mo'za
amne zamagra'a oti'za kagrane vanageta ha' vahe'enena hara
ome hugahaze. Ruotage'ma hu'nea agonafima kenage ata
komo'ma, trazante runtegeno kasefa hankavema ete eriaza
hunka, maka zupa hankaveka'amo'a kasefa hugahie. (Hibru
5:6, 6:20, 7:17-21.) 4 Ra Anumzamo'a huvempa hu'neankino
naneke'a amage antegahie. Melkizedeki'ma hu'neaza hunka
Kagra pristi vahe fore hugahane. E'ina hu'neankinka pristia
manivava hunka vugahane. 5 Ra Anumzamo'a kazantamaga
kaziga mani'neankino, arimpahe zamo'ma efore hania knazupa,
kini vahera rama'a zamaheno rehapatitregahie. 6 Ama mopafima
mani'naza vahera, zamagrama hu'naza zamavu'zmava zantera
Anumzamo'a keaga hunezmanteno, zamatresnige'za hapinti
rama'a vahera zamahe'za eri kevu hanageno hihi huno
marerigahie. Ana nehuno maka ama mopafima mani'naza kini
vahetamina zamaheno rutragatrago hutregahie. 7 Hianagi agra
karanka nevuno, kantegama me'nea osi tina neneno hankavea
erigahankino hara hu agatereno asenia antesga hugahie.

111 Ra Anumzamofona agi'a ahentesga hanune. Fatgo
avu'ava'ma nehaza naga'ma atruma hanafina, maka nagu'reti
hu'na Ra Anumzamofona susu huntegahue. 2 Ra Anumzamo'ma
eri'zama eri'nea eri'zamo'a, so'e zantfa hu'ne. Ana hu'neanki'za
agrama eri'nea eri'zanku'ma musema nehaza vahe'mo'za, ana
zamofo agenkea atrazageno zamagu'afi me'nege'za nentahize.
3 Maka zama Anumzamo'ma nehia zamo'a agri hankave
hihamu masa zama'anena erinte ama nehie. Ana hu'neankino
Anumzamofo fatgo avu'ava zamo'a, vagaore mevava huno
nevie. 4 Anumzamo'a ruzahu hentofa eri'zama eri'nea zankura,

tamaganera okanisie huno tagri antahi'zana eri o'netie. Ra Anumzana tagri Anumzamo'a asunku nehuno arimpa fru Anumza mani'ne. 5 Anumzamofonku'ma koro'ma hunte'za agorga'ama nemaniza vahera, agra ne'zana zamige'za nenaze. Agrama huempama hu'nea kasege'agura agera okani agesa antahi vava hugahie. 6 Anumzamo'ma hankave'ama eri ama hige'za agri vahe'mo'zama ke'nazana, ru vahe mopa hanareno, eri zamige'za erisantihare'za menina mani'naze. 7 Agrama hugahue huno'ma hu'nea zana maka tro nehuno, fatgo huno refko nehia Anumza mani'neankino, maka kasege'amo'a tamage ke me'neankita antahita amage antegahune. 8 Ana kasegemo'a mevava hugahie huno eri hankaveti'neankita, maka zupa fatgo tavutva nehuta amage ante vava hugahune. 9 Agra vahe'a mizaseno ete nezamavareno, mevava hania huhagerafi huempage huzmante'ne. Ana hu'neankino agri agimo'a, ruotage huno hentofaza hu'ne. 10 Ra Anumzamofoma koro'ma hunte'zana, knare antahi'zamofo agafa'a me'ne. Iza'zo agri avesi'zama amage'ma antesnaza vahe'mo'za antahintahi zampina ani hugahaze. Ana hu'negu maka zupa Anumzamo'a ra agia eri vava hanie.

112 Ra Anumzamofo agi'a ahentesga hoho! Iza'o Ra Anumzamofonku'ma koro hunenteno, muse huno'ma agri kasegema amage'ma nentesnia vahe'mo'a knare asomu erigahie. 2 Ana nehanageno mofavre naga'amo'za ranra vaheke efore hu'za maka kaziga ama mopafina knare hu'za manigahaze. Hagi ana fatgo avu'ava zama nehania vahepinti'ma, henka forehu anante nante'ma hu'za maka kazigama vanaza vahe'mo'za asomu'ene manigahaze. 3 Ana vahe'mokizmi nompina zagone feno zamo'enena megahie. Ana nehanigeno fatgo zamavu

zamavamo'a maka zupa mevava huno vugahie. 4 Hani zana fore hugahianagi, Anumzamofo amagema nente'za vaheku'ma zamasunku'ma nehu'za, knare zmavuzmava hunezmante'za fatgo zamavu'zamava zama nehaza vahe'mokizmia tavi'mo remsa huzmantegahie. 5 Vahe'mo'za zagoma nofi hunaku'ma nehanageno, iza'o muse huno zagoma nemino, maka zama hanifima fatgo kazigatike'ma hania vahe'mo'a, maka zama hania zamo'a knare hugahie. 6 Fatgo avu'ava zama nehania vahera kefo avu'ava zamo'a azeri otregahie. Fatgo avu'ava zama nehaza vahera, vahe'mo'za zamagerakani ozamante'za, zamagesa antahizami vava hugahaze. 7 Ana vahe'mo'za knazama fore hania zamofo agenkema nentahisu'za korora osugahaze. Na'ankure zamagra Ra Anumzamo'a taza hugahie hu'za amuhara nehu'za, zamentintia nehaze. 8 Ana vahe'mo'za zamagu'a zamazeri hanaveneti'za, korora osu mani'ne'za nezmagesage'za ha' vahezmia zamazeri haviza hugahaze. 9 Ana vahe'mo'za zamunte omane vahera refko hu'za mago'a zana amne zamigahaze. Ana nehanageno fatgo zamavu'zmavama nehaza zamo'a mevava huno nevanige'za vahe'mo'za, husga hunezmante'za ra zamagi zamigahaze. 10 Hagi kefo zamavu'zamava zama nehaza vahe'mo'za ana zama nege'za, zamarimpagu nehu'za zamavera aninkreki hugahaze. Ana nehu'za kefo avu'ava zama nehaza vahe'mo'zama knare'nare zama erinaku'ma antahintahima hu'nesaza zana e'orisageno, mago'a zama erinaku'ma amuhama nehaza zamo'a amne zankna hugahie.

113 Ra Anumzamofo agi'a ahentesga hanune! Ra Anumzamofo eri'za vahe'mota Anumzamofo agi'a ahentesga hiho. Ra Anumzamofo agi'a ahentesga hiho. 2 Menine henkanena Ra Anumzamofo agigura muse hunte vava huta vanune.

3 Zage hanatitegati vuno zage fretegama vanigeta, maka
vahe'mota, Ra Anumzamofo agi'a husga huntesune. 4 Ra
Anumzamo'a onagamu mani'neno, maka ama mopafi vahera
kegava hu'negeno, Agri konarari masa zamo'a mona agatereno
amenagame mareri'ne. 5 Ina vahe'mo Ra Anumzana tagri
Anumzamo'ma tra'are'ma manisgama hu'nea Anumzankna
vahera mani'ne? 6 Ana Anumzamo'a onagame mani'neno
kefenkateno monane mohanena nege. 7 Zamunte omne vahe'ma
kugusopafima mase'nazana Anumzamo'a zamavazu huno
zamazeri o'netino, maka zanku'ma atupa'ma nehaza vahe'ma
ta'nefapima mani'nazana zamavaresga nehie. 8 Ana huteno
kva vahe'mofo trate zamantege'za, agri vahe'ma kegavama
nehaza ugota kva vahe'mo'zama nemaniza tva'ontera nemanize.
9 Mofavre onte naravo ara mofavre amigeno rama'a mofavre
nenteno, tusi muse nehie. Ra Anumzamo'a ra agia erisie.

114 Hagi Israeli vahe'mo'zama Isipiti'ma atre'zama e'nazana,
Jekopu naga'mo'za ru zamageru'ma neraza vahe'mokizmi
moparegama umani'nazaregatira atre'za e'naze 2 Ana'ma
hazageno'a Juda mopamo'a Anumzamofo mono nonkna higeno,
Israeli mopa Agra'a kegava hu'ne. 3 Koranke hagerinte'ma
azageno'a, ana hagerimo'a nezmageno koro fre'ne. Ana
nehigeno Jodani timo'a ete rukrahe huno ne-erega vu'ne. 4
Ranra agonaramimo'za, ve sipisipimo'zama nehzaza hu'za
takaure takaure nehzageno, ne'onse agonaramimo'za anenta
sipisipimo'zama nehzaza huza takaure takaure hu'naze.
5 Nazamo higenka Koranke hagerimoka, korora nefrane?
Nazamo higenka Jodani timoka, ete rukrahe hunka neantega
nevane? 6 Nazamo higeta ranra agonaramimota, ve sipisipimo'za
nehzaza huta takaure takaurera nehaze? Nazamo higeta

ne'onse agonaramimota, anenta sipisipi afumo'zama nehzaza
huta takaure takaurera nehaze? 7 Ama mopamoka Ra
Anumzamofo avuga kahirahiku nehunka, Jekopu Anumzamofo
avuga kahirahiku huo. 8 Ana Anumzamo'a havefina higeno tirura
marenevazigeno, havemoke'ma hu'nea agonafintira higeno tina
hanatino ne-ea ne' mani'ne.

115 Ra Anumzamoka tagra rantagia e'origahunanki, kagrake
rankagia erigahane. Na'ankure kagra maka zupama vagaore
kavesi zanku'ene, hugahuema hu'nana zama amage'ma
antenkama nehana zanku huta, kagi'a husga hunegantone.
2 Nagafare ama mopafima mani'naza vahe'mo'za tagrikura
hu'za, Anumza zamimo'a iga mani'ne hu'za nehaze?
3 Tagri Anumzamo'a monafinka mani'neankino nazano
hunaku'ma hiazana agra'a avesite amne nehie. 4 Hianagi
mago'a vahe'mokizmi havi anumzana, silvareti'ene golireti
vahe'mo'za avako hu'za zamazanteti tro hu'naze. 5 Ana
havi anumzantamina zamagira me'neanagi, keaga nosu'za,
zamavurga me'neanagi, onkegahaze. 6 Hagi zamagesa
me'neanagi keaga nontahi'za, zamagona me'neanagi mna
ontahigahaze. 7 Zamazana me'neanagi mago zana avakora
hu'za nonke'za, zamajia me'neanagi kana ante'za vanoa
nosu'za, zamanankena me'neanagi, zamagerura orugahaze. 8
Hagi ana havi anumzantamima tro'ma nehaza vahe'mo'za ana
havi anumzantamo'zama havizama nehzaza hu'za zamagra
haviza nehanage'za, ana havi anumzante'ma zamentintima
nehanaza vahe'mo'za zamagranena haviza hugahaze. 9 Hagi
tamagra Israeli vahe'mota Ra Anumzamofonte tamentintia
hiho. Na'ankure agra hankogna huno mani'neankino, agrake'za
tamahorakeno tamagura nevazino kegava huneramante. 10

Aroni nagapinti'ma pristi eri'zama e'neriza nagamota, Ra Anumzamofonte tamentintia hiho. Na'ankure agra hankogna hu'neankino agrake'za tamahorakeno tamagura nevazino, kegava huneramante. **11** Hagi Ra Anumzamofonku koro'ma hunteta agoraga'ama nemaniza vahe'mota, Ra Anumzamofonte tamentintia hiho. Na'ankure Agra tamazahu ne' mani'neno tamagri hanko mani'neankino, Agrake'za tamahora keno tamagura nevazino kegava huneramante. **12** Ra Anumzamo'a ageraokani agesa antahi neramiankino, asomura hurantegahie. Israeli vahera asomura hunezmanteno, Aroni naga'ma pristi eri'zama e'neriza naga'enena asomura huzmantegahie. **13** Zamagi me'nea vahero zamagi omane vahe'mo'zanema, Ra Anumzamofonkuma koro'ma nehaza vahera Anumzamo'a asomu huzmantegahie. **14** Ra Anumzamo'a asomu huramantena tamagra mofavrea kasente hakare nehanageno, tamagri mofavre naga'enena asomura huzmantesnige'za mofavrea kasente hakare hanaze. **15** Ra Anumzana monane mohanema tro'ma hu'nea Anumzamo tamagrira asomura huramantesie. **16** Monafina Ra Anumzamo nemanino, ama mopa vahemotagu maniho huno tami'ne. **17** Ko'ma fri'naza vahe'mo'za zagamera hu'za Ra Anumzamofo agi'a ahentesga osugahaze. Na'ankure zamagra fri'za keaga osu kumapi, matipi umani'naze **18** Hianagi tagra Ra Anumzamofona menine henka'anena agri agi'a ahentesga huvava huta vanune. Ra Anumzamofo agi'a ahentesga hanune!

116 Nagra Ra Anumzamofona navesinentoe. Na'ankure Agra nagerura nentahino asunku'ma hunanteno nazama hinogu'ma krafa kema huana antahinenamie. **2** Na'ankure Agrama agesa anteno antahi nemania zankura, nagrama kasefa'ma hu'na manisanua kna'afina agriteke nunamuna hugahue. **3** Fri'zamo'a

nofimo'ma nazeri anakiaza nehigeno, fri vahe kumaku'ma
koro huazamo'a, nazeri fenkami netre. Ana zamo hige'na
knazampi nemani'na nasu zampi nemanue. (Sheol h7585) 4

Ana'ma nehige'na Ra Anumzamofo agi ahe'na, Ra Anumzamoka
nagu'vazio hu'na nunamuna nehue. 5 Ra Anumzamo'a asunku
huneranteno, fatgo avu'ava nehia ne' mani'neankino, tagri
Anumzamofona arimpa fruzamo'a avite'ne. 6 Zamagra'ama
zamaza osuga vahera, Ra Anumzamo'a kegava hunezmante.
Korapara ra hazenkezampi mani'nogeno naguravazi'ne. 7
Menina narimpa fru hu'na mani'noe. Na'ankure Ra Anumzamo'a
knare hunante'ne. 8 Nagrira fri'zampinti nagu'vazino nenavreno,
navunura eri haminenanteno, naza hige'na trakara hu'na
nomasoe. 9 Ana nehigu nagra kasefa'ma hu'na ama mopafima
manisanua kna'afina, Ra Anumzamofo avure kana vano
hugahue. 10 Nagra Ra Anumzamokare namentinti nehugu
amanage hugahue. Ranknazamo nazeri haviza nehie. 11
Nagra antahintahi hakarema nehua knafina amanage hu'na
Kagritega kezana netue. Maka amama mani'naza vahera havige
nehaza vahe mani'naze. 12 Ra Anumzamo'ma maka knare
avu'ava zama hunante'nea zantera, nagra na'a nona hu'na
amigahue? 13 Waini ofama erino Ra Anumzamofonte emerisga
hiaza hu'na nagu'vazino navre'nea zankura musenkase nehu'na,
agi'a ahentesga hugahue. 14 Hagi Anumzamofo vahe'ma
maka eme etruma hanafina, nazano hugahue hu'nama Ra
Anumzamofo avure'ma huvempama hu'noa zantamina hugahue.
15 Ra Anumzamofoma amage'manentaza vahe'ma frizana,
Anumzamofo avurera so'e zantfa nehie. 16 Ra Anumzamoka
nagra kagri eri'za vahe mani'noanki'na, eri'za vahekamo'na
kagri nompima eri'za e'neria a'mofo mofavre mani'noe. Ana

hu'neankinkanofimo'makinama renante'neana katufenka nazeri
fruhu'nane. **17** Ana hu'neanki'nakagritega humuse ofani'a
hunegante'na, Ra Anumzamoka kagire nunamuna hugahue.
18 Hagi nazano hugahue hu'nama Ra Anumzamofo avure'ma
huvempama hu'hoa zantamina, maka Anumzamofo vahe'ma eme
etrumahanafina ana zana hugahue. **19** Jerusalemi kuma'mofo
agu'afima, Ra Anumzamofo mono noma me'nea kumapi, Ra
Anumzamofo agi'a husga huntesue.

117 Maka ama mopafima kokankokama nemaniza vahe'mota,
Ra Anumzamofo agi'a husga huntaho. Maka mopafi vahe'mota
Anumzamofona agi'a ahentesga hihoh. **2** Na'ankure Ra
Anumzamo'a tusiza huno vagaore avesi zanteti avesi neranteno,
Agra hugahuema hu'nea ke'a avaririno kegava hurantevava
nehie. Ra Anumzamofona agi'a ahentesga hanune.

118 Ra Anumzamofona susuhunesune, na'ankure Agra knare
avu'avaza huneranteno vagaore avesi zama'areti avesirante vava
nehie. **2** Maka Israeli vahe'mota huta, Anumzamofona vagaore
avesi zama'amo'a mevava huno nevie huta hihoh. **3** Aroni naga'ma
pristi eri'zama e'neriza nagamota hanazana, Anumzamofona
vagaore avesi zama'amo'a mevava huno nevie huta hihoh.
4 Ra Anumzamofonku'ma koro'ma hunente'zaagoragama
nemaniza vahe'mota Anumzamofona vagaore avesi zama'amo'a
mevava huno nevie hu'za hihoh. **5** Nagra ra knazampima
manine'na Ra Anumzamofonte nunamuma hugeno'a, Ra
Anumzamo'a nunamuni'a antahinamino knazanifintira naza
hige'na fruhu'nane manue. **6** Ra Anumzamo'a nagri kaziga
mani'neanki'na, nazano vahe'mo'ma hunante'naku'ma hania
zankura, korora osugahue. **7** Tamage, Ra Anumzamo'a nagri
kaziga mani'neankino, nagrira naza hugahie. Ana nehuno ha'ma

renenantaza vahera zamazeri haviza nehanige'na, muse nehu'na
zamage fenkami atregahue. **8** Ra Anumzamofompima fra'makino
mani'zamo'a, vahete'ma amuha'ma hu'zana agatere'ne. **9**
Ra Anumzamofompima fra'makino mani'zamo'a, ugagota kva
vahete'ma amuha'ma hu'zana agatere'ne. **10** Maka kokankoka
vahe'mo'zama eme navazagi kagi'za hara hunante'naze. Hianagi
Ra Anumzamofo agifi ana vahera hara huzmagatere'noe.
11 Nagri'ma ha'ma hunante'nakura tamagerfa hu'za maka
asoparegati eme navazagi kagi'naze. Hianagi Ra Anumzamofo
hankavefi hara huzmagatere'noe. **12** Ha' vahe'mo'za tumemo'ma
nehiaza hu'za eme nazeri kagi'naze. Hianagi tevemo'ma osi
trazampima ruhagana huno teteno fanane hiankna hu'naze. Ana
nehazage'na Ra Anumzamofo agifi hara huzmagatere'noe. **13**
Ha' vahenimo'za hankaveti'za hara hunante'za e'za eme nazeri
haviza hunaku hu'naze. Hianagi Ra Anumzamo'a naza hu'ne. **14**
Ra Anumzamo'a nagri hankavene, nagri zagame'ene mani'ne.
Ana hu'neankino agrake naguranevazie. **15** Fatgo avu'ava
zama nehaza vahe'mo'za seli nozamifi manine'za musenkase
nehu'za, muse zagame'ma hu'nazana, Ra Anumzamofo tamaga
azamo'a, hankavenentake'za eri fore hu'ne hu'za hu'naze. **16**
Ra Anumzamo'a tamaga kaziga azana eri sga huno mani'neno
hara hugaterene. Ra Anumzamofona tamaga kaziga azamo'a
hankavenentake eri'za eri fore hu'ne. **17** Nagra ofri'na kasefa
hu'na manine'na, Ra Anumzamo'ma tro'ma hu'nea zankura
huama hu'na vahera zamasamigahue. **18** Ra Anumzamo'a
nagrira nazeri fatgo hunaku knaza namino nazeri havizantfa
hu'ne. Hianagi natrege'na ofri'noe. **19** Fatgo avu'avazamofo
kafana eri anaginantege'na, ufre'na Ra Anumzamofona humuse
hunta'neno. **20** Ama Ra Anumzamofo kafane. Ana hu'neanki'za

fatgo vahe'mo'za ama ana kafanteti ufregahaze. **21** Anumzamoka nagri nunamuma antahi nemalinka, nagu'mavazinke'nama knare hu'nama mani'noa zankura susu hu'na humuse hugantoe. **22** Noma negiza eri'zama'a omane'nea have hu'zama eri atre'naza havemo'a, nomofo renagentete asetenageno noma azeri hankaveti have fore hu'ne. (Matiu 21:42, Maki 12:10-11) **23** Ama ana eri'zana Ra Anumzamo eri fore higeta negonankino, hentofaza hu'negeta negone. **24** Ama zagegna Ra Anumzamo tro hu'ne. Ana hu'neankita ama ana knafina musenkase huta trimpa frune manisanune. **25** Ra Anumzamoka keke huta muse hugantonanki, tagu'vazinka neravrenka, tazeri so'e hananketa maka zampina knare huta manisanune. **26** Iza'o Anumzamofo agifima esania vahera, Ra Anumzamo'a asomu huntegahie. Ana vahe'mofona Ra Anumzamofo nompi agia husga huntesune. (Matiu 21:9. 23:39. Maki 11: 9-10. Luku 13: 35.19: 38. Joni 12: 13) **27** Ra Anumzana tagri Anumza mani'neankino, agra'a masa'areti remsa hurante'ne. Ofama huntesaza zana erita vuta, kresramna vu itamofo pazivete nofiteti ome anakinteho. **28** Anumzamoka nagri Anumza mani'nanku, susu hu'na humuse hugantegahue. Kagra nagri Anumza mani'nananki'na, kagri kagi'a husga hugahue. **29** Ra Anumzamofona susu huta humuse huntesanune. Na'ankure agra knare zantfa hu'neankino, vagaore mevava avesi zama'amo'a mevava huno vugahie.

119 Iza'zo nomani'za zamifima fatgo avu'ava zama nehu'za, Ra Anumzamofo kasegema amage'manentaza vahe'mo'za muse hugahaze. **2** Iza'zo Anumzamofo kasegema amage'ma nente'za vahe'mo'za, maka zamagu'areti'ma hu'za agriku'ma nehakaza vahe'mo'za muse hugahaze. **3** Ana vahe'mo'za havi avu'ava zankura zamavesra nehu'za, Anumzamofoma ave'nesia avu'ava

zanke hu'za amageranentaze. 4 Anumzamoka kagra kasegeka'a neraminka tagrikura hunka, ana kasegea amage ante fatgo hoho hunka hu'nane. 5 Nagri'ma nave'nesiana maka zupa kagri trake amage nentesugen, nomani'zanifina ome hankavetisiegu nave'nesie. 6 Ana'ma hanige'na nagazegura osugahue. Na'ankure kagri kasegefi navua ketena vugahiankina, nagra nagazegura osugahue. 7 Hagi fatgoma hu'nea kasegeka'ama rempima hu'na antahisuna, fatgo nagu'reti hu'na kagrira humuse hugantegahue. 8 Kagri tra keka'a amage antenaku nehue. Muse hugantoanki natrenka kamefira huonamio. 9 Inankna huno nehezavemo'a nomani'za ma'afina agrua huno manigahie? Agrama mani agruma huno mani'naku'ma hanuno'a, kagri ke'ma amage'ma antesanuno, anara hugahie. 10 Kagri'ma kagenakura nagu'reti tusiza hu'na nehakoanki, natrege'na kagri kasegea atre'na kana hazagre'na ofraneno. 11 Kagri nanekea nagu'afi erintogeno me'neanki'na, kagri kavurera kumira osugahue. 12 Ra Anumzamoka kagri kagia ahentesga nehuanki, tra keka'a rempi hunamio. 13 Kagrama tasami'nana kasegeka'a, nagipintira huama hu'na vahera zamasamigahue. 14 Kagri kasegegu'ma musema nehua zamo'a, afu fenonku'ma musema nehua zana rugatere'ne. 15 Amage'ma antehoma hunka tami'nana tra kegura nagesa are'are nehu'na, kagri kavukva zante navua ante'na negoe. 16 Kagri tra kegura tusi muse nehuanki'na, kagri nankegura naganera okanigahue. 17 Nagra kagri eri'za vahe mani'noanki nazeri so'e huge'na, kasefa hu'na manine'na nanekeka'a amagera anta'neno. 18 Navurga eri hari huge'na, kagri kasegefima hentofazama me'nea zana keama ha'neno. 19 Nagra ama mopafina karaga vahe eman'i'noanki, nagri navurera kasegeka'a eri frara okio.

20 Kagri kasegema amage'ma ante'zankura maka knafina
nagu'amo'a tusiza huno avesi'avesi nehie. **21** Kema ontahi
veganokno'ma nehu'za kasegeka'ama atre'za hazama negraza
vahera, kagra zamazeri konerinka zamatrenanke'za huviza
hugahaze. **22** Zamatrege'za kiza zokago kea hunenante'za
huhaviza huonanteho. Na'ankure kagri kasegea, nagra amagera
nentoe. **23** Vugota kva vahe'mo'zanena magopi manine'za nazeri
haviza hunaku keaga ana'nekize. Hianagi eri'za vahekamo'na
kagri kasegegu nagesa antahintahi nehue. **24** Kagri kasegegura
tusiza hu'na musena nehugen, ana kasegemo'a knare antahi'za
nenamie. **25** Nagra kugusopafi urami'na mase'noanki, kagra
naneke ka'areti nazeri kasefa huo. **26** Nagrama nazano
hunaku'ma nagesa antahi'noa zana kagrira kasamugenka,
ke'nirera nona hunante'nane. Ana hu'nananki menina tra keka'a
rempi hunamio. **27** Nagrira naza huge'na kasegeka'amofo
agafa'a antahi ama ha'neno. Ana'ma hananke'na so'e zantfama
hu'nea eri'zama eri'nana zankura nagesa antahintahi hugahue.
28 Nagu'amo'a kna nehigena, nasunku zampi mani'nena zavira
netoanki, kagrama nanekefima hu'nana kante amage antenka
nazeri hankavetio. **29** Nagrama havigema nehua zampintira
nazeri afete atro. Ana nehunka kasunku hunantenka, kasegeka'a
rempi hunamio. **30** Kagrira ogatre'na tamage hu'na kamage
antegahue hu'na ko huhampri'noe. Ana nehu'na maka zupa
kasegeka'a, nagu'areti hu'na amage antegahue hu'na nagesa
antahi'noe. **31** Kagri kasegea azeri antrako hu'noanki, Ra
Anumzamoka natregeno mago zamo'a nazeri nagazea osino. **32**
Kagri kasegeka'a, amage ante'na vugahue. Na'ankure nagri
antahi'zana, kagra eri ra hu'nanku anara hugahue. **33** Ra
Anumzamoka kasegeka'a rempi hunamige'na, amage ante'na

nev'u'na ome vagaretega va'neno. 34 Ama' antahi'zana namige'na kasegeka'a nentahi'na amage antahine. Ana kasegeka'a maka nagu'areti hu'na amage antegahue. 35 Kagra naveri huge'na kagri kasegemo'ma vuoma huno hu'nea kante vaneno. Na'ankure nagra ana kasegegu musena nehue. 36 Nagri nagu'a eri rukrahe huge'na kagri kasegema amage ante'zanku navesi navesi nehu'na, havi kazigati zago eri'na feno vahera omani'neno. 37 Agafa'a omene zantaminte'ma navuma negoazana eri netrenka, kagrama naneke ka'afima hu'nana kante amage antenka nazeri kasefa huo. 38 Kagrama huvempama hu'nana zana eri'za vahekamo'nare erinteamo nehananke'za, vahe'mo'za kagriku korora hugantegahaze. 39 Vahe'mo'zama nazeri nagazema hu nanekema nehazafintira, Kagra naza huo. Na'ankure kagri kasegemo'a knare hu'ne. 40 Kagri kasegema amage'ma ante zankura navesi navesi nehuanki, kagra fatgo kavukva hunka nazeri kasefa huo. 41 Ra Anumzamoka atregeno vagaore mevava kavesi zamo'a nagritera ne-esigenka, kagrama huvempama hu'nana kante antenka, nagu'vazinka ete navro. 42 Ana'ma hananke'na nazeri havizama hu kema nehaza vahe'mofo ke'zamirera kenona huzmantegahue. Na'ankure kagri nanekere namentintia nehue. 43 Kagra tamage keka'a nagipintira eri otro. Na'ankure nagra kagri kasegegu amuhara nehue. 44 Kagri kasegea nagra maka knafina amage antevava hugahue. 45 Mago zamo'a kina reonantesige'na fru hu'na vano hugahue. Na'ankure nagra maka nagu'areti hu'na, kagri kasegea amage nentoe. 46 Kini vahe'mokizmi zamavuga ot'i'na kagri kasegea huama hu'na nezamasami'na, nagazegura osugahue. 47 Kagri kasegegura muse nehuankina, ana kasegea navesinentoe. 48 Nagra kagri kasegere nazana erisga nehu'na, kagri kasegegura maka zupa

nagesa antahintahia nehue. **49** Kagri eri'za vahekamo'nama
huvempama hunante'nana kegura kagesa antahio. Na'ankure
anazamo hige'na, kagritera amuhara nehue. **50** Kagrama
huvempama hunante'nana nanekemo nazeri hankavenetigeno,
knazampima ufroana ana nanekemo nazeri kasefara nehie. **51**
Zamavufga rama nehaza vahe'mo'za, nagrira ki'za zokago ke
hunenantaze. Hianagi nagra Kagri kasegea namefira hunomue.
52 Ra Anumzamoka korapa'ma tami'nana kasegeka'a naganera
nokanue. Ana nehugeno ana nanekemo nazeri hankavenetie.
53 Kefo avu'ava'ma nehaza vahe'mo'zama Kagri kasegema
amage'ma nontageno'a, tusi narimpa nehe. **54** Ru vahe
moparega kraka'ma umanine'na, Kagri kasegea eri rukrahe hu'na
asunte'noe. **55** Ra Anumzamoka kenage'enena kagri kagigura
naganera nokanue. Ana nehuanki'na kagri kasegea amage
antegahue. **56** Nagra nomani zanifina maka zupa kagri kasegea
amagenentoe. **57** Ra Anumzamoka nagri suza mani'nane hu'na
kagrira huhampari'noe. Ana nehu'na huvempa hu'noanki'na
amage'ma anteho hunka'ma tami'nana nanekeka'a, amage
antegahue. **58** Kagra asomu hunanto hu'na maka nagu'reti hu'na
kantahinegoe. Kagrama huvempa hu'nana kante amage antenka,
kasunku hunanto. **59** Nagrama nehua navu'nava zankura
nagesa antahintahi nehu'na, rukrahe hu'na Kagri kasege amage
antegahue. **60** Nagra mago zankura avega ontegahuanki'na,
amehu'na Kagri kasegea amage antegahue. **61** Kefo avu'ava
zama nehaza vahe'mo'za nazeri anaki'za nehaze. Hianagi
Kagri kasegegura nagera nokanue. **62** Kenagera oti'na fatgoma
hu'nea kasegeka'agura humuse hunegantoe. **63** Kagri'ma
kamagema nente'za vahe'mo'za, Kagri kasegema amage'ma
nentaza vahe'ene tragote'na nemanue. **64** Ra Anumzamoka

vagaore mevava kavesi'zamo ama mopafina avite'neanki, kasegeka'a rempi hunamio. **65** Ra Anumzamoka kagrama huempama hu'nana kante amage antenka, eri'za vahekamo'na knare'zana rama'a tro hunante'nane. **66** Kagri kasegegura namentinti nehuanki, knare'ma huno refkohu avu'ava zane, ama' antahi'zana namio. **67** Nagra kamagera onte'na kana atre'na havi kante vugenka, kagra knaza naminka nazeri fatgo hu'nane. Hianagi menina kagri nanekeka'a amagenentoe. **68** Kagra knare hu'enka knare avu'ava zanke nehananki, kasegeka'a rempi hunamio. **69** Zamavufga rama nehaza osu'hoa zanku havige hunante'za vano nehaze. Hianagi nagra nagu'reti hu'na, Kagri kasegea amagenentoe. **70** Ana vahe'mokizmi zamagu'amo'a afovamo'ma hiaza huno kakani'ne. Hianagi kagri kasegegura tusiza hu'na muse nehue. **71** Knazama naminka nazeri havizama hu'nanana nagri knare zanku anara hu'nane. Na'ankure e'i ana zamo'a Kagri kasege amage ante'za rempi hunami'ne. **72** Kagrama tami'nana kasegemo'a, rama'a tauseni'a goline silvanena rugatereno nagritera razankrerfa me'ne. **73** Kagraka'a kazampinti tro hunantenka nazeri fore hu'nane. Ana hu'nanku kagri kasegema rempima hu'na antahisanugu ama' antahi'zana namio. **74** Kagriku'ma koro'ma nehaza vahe'mo'za nagri'ma nenage'za muse hugahaze. Na'ankure Kagri nanekegu amuhara nehugu anara hugahaze. **75** Ra Anumzamoka kagra fatgo hunka refkoa nehane. Nagri nazeri fatgo hunaku naneke ka'are Kagra oti'nenka, knazana nami'nane. **76** Eri'za vahe kamo'nama huempama hunante'nana kante amage antenka, atregeno vagaore mevava kavesi zamo nazeri hankavetino. **77** Kagra kasunku hunantenka nazeri kasefa huge'na mani'neno. Na'ankure Kagri kasegegura tusiza hu'na muse nehue. **78** Zamavufga rama

nehaza vahe'mo'zama havigema hu'za nazeri havizama hu'naza
vahera zamazeri zamagaze huo. Hianagi nagra Kagri kasegegu
nagesa antahintahi hugahue. **79** Kagri kasegema antahi'neza,
kagriku'ma koro'ma nehu'za kagoraga'ama nemaniza vahera
atrege'za nagrite erava'o hiho. **80** Naza hugena kagri kasege
amage nente'na, havi nagia e'orisanue. Ana nehu'na nagazegura
osanue. **81** Kagrama nagu'vazinka navresnanku navesinavesi
nehige'na kavega ante'na za'zate'ma manua zamo higeno,
zaferinani'a omane amane nehie. Hianagi Kagri nanekegu
amuhara nehue. **82** Kagrama huvempama hu'nana kemo'ma
nenama efore hanigu navuma antete'na manua zamo'a,
navunata negrie. Ana hige'na nagra hu'na, nazupa nazeri knare
hugahane hu'na nehue? **83** Mememofo akrutetima troma hu'naza
tintafema teverema ante hagege hazageno, ome haviza hiankna
huno navufgamo'a havizantfa hu'ne. Hianagi Kagri tra kea
nagra nagera okani'noe. **84** Nama'a zupa Kagrikura kavega
antegahue? Nagri'ma knama nenamiza vahera, ina zupa nona
hunka knazana zamigahane? **85** Zamavufga rama nehaza
vahe'mo'za kagri kasegea amagera nonte'za, nagrama tnafa'ma
hu'na mase'nugura kama vano nehfina keri kafinentaze.
86 Maka kasegekamo'a tamage nanekege me'ne. Agafa'a
omane'nea zante vahe'mo'za havige hu'za hazenke naminaku
nehazanki naza huo. **87** Ana vahe'mo'za ama mopafintira
kofahu'za nahe fri'za hu'naze. Hianagi Kagri tra kea namefira
huomi'noe. **88** Kagra vagaore mevava kavesi zanteti nagrira
nazeri antese hunka kegava hunenantane. Ana hu'negu kagri
tra kea amage ante vava hugahue. **89** Ra Anumzamoka Kagri
nanekemo'a vagaore mevava naneke me'neankino, monafinka
hankavetino me'ne. **90** Kagra nazano hugahue hunkama hu'nana

zama nehana kavu'ava zamo'a mevava nehuno, forehu anante
nante'ma hu'za vanaza vahetera vugahie. Mopa tro hunka
antankeno hankavetino me'ne. **91** Kagri kasegemo'a hankavetino
meme eno ama knarera ehanati'ne. Ana hu'neankino maka ama
mopafima me'nea zantamimo'za Kagri eri'zanke e'nerize. **92**
Hanki Kagri kasegegu'ma tusi musema osuresina, nagrama
natazama erua knafi ko frusine. **93** Nagra tamagerfa hu'na kagri
kasegea nagera okanigahue. Na'ankure ana nanekemo higenka,
nasimura naminke'na kasefa hu'na mani'noe. **94** Nagra kagri
vahe mani'noanki nagu'vazio. Na'ankure maka zupa Kagri kasege
amagera nentoe. **95** Kefo avu'ava zama nehaza vahe'mo'za
kafo ante'za mani'neza nazeri haviza hunaku nehaze. Hianagi
Kagri kasegegura nagesa antahintahi hugahue. **96** Nagrama
ke'na antahi'na huana, mago zamo'a knare huno hankavetino
mezana omane'ne. Hianagi Kagri kasegea mago zamo'a azeri
ontesigeno, mevava huno vugahie. **97** Nagra Kagri kasegegura
tusiza hu'na navesi nente'na, maka knafina nagesa antahintahi
nehue. **98** Kagri kasegemo knare antahi'zana namige'na,
ha' vaheni'a knare antahizampina zamagate'nero. Na'ankure
maka zupa Kagri kasegemo nagrane me'neno, nazeri fatgoa
nehie. **99** Nagra maka zupa Kagri kasegegu nagesa antahintahi
nehu'na, rempima hunenamiza vahera zamagatere'na knare
antahi'zana eri'noe. **100** Ranra vahe'mokizmia zamagatere'na
knare antahi'zana eri'noe. Na'ankure maka zupa Kagri tra ke
amagera nentogu anara hu'noe. **101** Maka kefo avu'ava zama
hu'zantera nagia renakere'na novue. Na'ankure kagri naneke
amage antenaku anara nehue. **102** Nagra Kagri tra kea atre'na
namefira huomi'noe. Na'ankure Kagra knare'za hunka, rempi
hunami'nanku anara hu'noe. **103** Kagri nanekema nagite'ma

erinte'nama koana, tusi haganentake hu'neankino, tumerimo'ma
hagama nehiama'a rugatereno tusi haga hu'ne! **104** Kagri
kasegemo ama' antahi'zana nemamie. E'ina hu'negu maka havi
avu'ava zankura nagotenentoe. **105** Kagri nanekemo'a lamu
tavikna huno nagiafina remasa hunenanteno, tavikna huno
kama nevufina remsa hunenante. **106** Nagra huvempa hu'na
fatgoma hu'nea trake amage antegahue. Anage nehu'na hu
hankavetuanki'na amage antegahue. **107** Ra Anumzamoka
nagra tusi'a kna zampi manuanki, Kagrama huvempama
hu'nana kante amage antenka, nazeri kasefa huge'na ofri
mani'neno. **108** Ra Anumzamoka ofagna hu'na Kagri'ma
rama'a zupama susu'ma hu'na husgama hunegantoana antahi
nenaminka, kasegeka'aramina rempi hunamio. **109** Maka zupa
ha' vahenimo'za nahe fri'za nehaze. Hianagi Kagri kasegea
naganera okanigahue. **110** Kefo avu'ava zama nehaza vahe'mo'za
nagri'ma nazeri haviza hunakura, kampina krifu anagi antazankna
nehaze. Hianagi Kagri kasegea atre'na hazanogroe. **111**
Kagri kasegea mevava feno zankna hu'na erisanti hare'noe.
Na'ankure ana nanekemo, nagu'a nazeri muse nehie. **112**
Nagra kagri kasege maka zupa amage antegahue hu'na nagesa
antahi'noanki'na, amage anteme nevu'na ufrigahue. **113** Kagri
kasegema amage antegahune nehu'za tare antahintahima
nehaza vahera nagote'nezmantoe. Hianagi Kagri kasegea
navesinentoe. **114** Nagrama fra'ma kisanua kuma'ene hankonine
Kagra mani'nane. Kagri nanekugu amuhara nehue. **115** Tamagra
kefo avu'ava zama nehaza vahe'mota, nagrira natareta viho.
Na'ankure nagra Anumzanimofa kasege amage ante'naku
nehue. **116** Ra Anumzamoka kagrama huvempama hu'nana
kante amage antenka, nazeri hankavetige'na ofri kasefa hu'na

mani'neno. Ana nehunka atregeno amuha'ma nehua zamo'a, amne zanknara osino. **117** Nazeri sga huge'na knare hu'na nemani'na, maka zupa kasegeka'agura antahintahi huvava ha'neno. **118** Kagri kasegema amage'ma nontaza vahera kamefi hunezamine. Zamagra ana vahe'mo'zama nehaza havigemo'a amne zankna hugahie. **119** Kefo avu'ava zama nehaza vahera kagra amne zama hiaza hunka ama mopafintira reganope netrane. Ana hu'negu nagra Kagri kasegea navesinentoe. **120** Nagra kagriku koro nehugeno, navufgamo'a nahirahi nere. Kagra keagama refko'ma nehana zanku, nentahi'na korora nehue. **121** Nagra knare huno fatgo hu'nea avu'avaza hu'noanki, natrege'za vahe'ma knama zamiza zamazeri havizama nehaza vahe'mo'za nazeri havizana osho. **122** Muse hugantoanki kagri eri'za vahekamo'na kegava hunenantenka, natrege'za zmavufga rama nehaza knazana onamiho. **123** Kagrama huvempama hu'nana kante amage nentenka, fatgo kavukva hunka havi avu'ava zama nehaza vahe'mokizmi zamazampinti'ma naza hunka nagu'vazisanegu'ma navuma antete'nama manua zamo'a navumo'a natagrie. **124** Vagaore mevava kavesi zanteti eri'za vahekamo'na kavesigante'noe hunka naveri nehunka, tra keka'a rempi hunamio. **125** Nagra Kagri eri'za vahe mani'noanki ama' antahi'zana namige'na, Kagri kasegea antahi amara ha'neno. **126** Ra Anumzamoka menina Kagri kna efore hu'negu, Kagri kasegema runetagraza vahera zamazeri haviza huo. **127** Tamagerfa hu'na Kagri kasegema navesimanentoa zamo'a, agruma hu'nea golia rugatere'ne. **128** E'ina agafare maka Kagri kasegemo'a tamage naneke me'ne hu'na nentahi'na, havi kante'ma vu'zankura nagonete. **129** Kagri kasegemo'a knare zantfa hu'negu, nagra amage nentoe. **130**

Kagri nanekema eri vakare'za rempima huneramiza zamo'a, tavi remsa hiankna huno remsa hunerante. Ana hu'neankino antahizama'a omane vahe'mo'enena nanekeka'a antahi ani' hugahie. **131** Nagi'ma aka hu'nena nagefunama hagna hagna'ma nehuana, na'ankure nagu'areti tusiza hu'na Kagri kasegema navesinentogu anara nehue. **132** Kagri kagima avesinentaza vahe'ma hunezmantanaza hunka, rukrahe hunka kasunkura hunanto. **133** Kagra huvempama hu'nana kante antenka, kama vanoma hanufina kegava hunanto. Ana'ma hanankeno'a kefo avu'ava zamo'a nazeri nagate oregahie. **134** Vahe'mo'zama knama namiza nazeri havizama nehaza zampintira, Kagra ete navu'vazinka nenavrege'na, Kagri kasegea amage anta'neno. **135** Kagra kavugosafinti masaka'anu eri'za vahekamo'na remsa hunenantenka, kasegeka'a rempi hunamio. **136** Vahemo'zama Kagri kasegema amage'ma nontageno'a, navunumo'a, navufintira tinkna huno herafi neramie. **137** Ra Anumzamoka Kagra fatgo kavukva'ene ne' mani'nankeno, Kagri kasegekamo'enena fatgo hu'ne. **138** Kagrama tami'nana kasegemo'a fatgo hu'neankino, vahe'mo'za zamentintia hugahaze. **139** Nagri'ma ha'ma renenantaza vahe'mo'za Kagri nanekea antahi nomizageno, narimpa ahe'zamo'a tusi'za huno teve rukru nehie. **140** Kagrama huvempama hu'nana nanekeka'ama avamepima erinte'na koana knarezantfa hu'nege'na, Kagri eri'za vahekamo'na tusiza hu'na navesinentoe. **141** Nagra amne nagi omane vahe mani'noge'za, vahe'mo'za huhaviza hunenantaze. Hianagi Kagri kasegea naganera nokanue. **142** Fatgo kavukva zamo'a mevava huno vugahie. Ana hu'neankino Kagri kasegemo'a, fatgo naneke me'ne. **143** Knazamo'a nazeri navesra hianagi, kagri kasegemo nazeri muse nehie. **144** Kagri kasegemo'a maka zupa tamagerfa

huno fatgo hu'ne. Kagra naza huge'na ana nanekea antahi
ama nehu'na, kasefa hu'na mani'neno. **145** Ra Anumzamoka
nagra nagu'areti hu'na Kagritega zavi krafa hu'na nunamuna
nehuanki, nunamuni'a antahinamio. Ana'ma hananke'na kagri
tra kea amage antegahue. **146** Kagritega zavi krafa nehuanki,
nagu'vazinka naza huge'na, Kagri kasegea amage anta'neno. **147**
Kagrama naza hananegura zahufama masama osu'nege'na oti'na
Kagritega zavi krafa nehu'na, Kagri nanekere amuhara nehue.
148 Kenage'ma navu'ma omase hari hute'nama nemanuana,
na'ankure Kagri nanekegu nagesa antahintahi nehu'na anara
nehue. **149** Ra Anumzamoka vagaore mevava kavesi zanteti'ma
kavesi nenantana Anumza mani'nananki, zavi krafama nehuana
antahi nenaminka, Kagrama hu'nana kante amage antenka nazeri
kasefa huge'na nasimura eri'na mani'neno. **150** Kema ontahi
vahe'mo'za nazeri haviza hunaku nagritega erava'o nehaze. Ana
vahe'mo'za Kagri kasegemofo tava'ontera omani'nazanki afete
mani'naze. **151** Ana hu'neanagi Ra Anumzamoka nagri tvaonte
mani'nankeno, ana maka Kagri kasegemo'a tamage nanekege
me'ne. **152** Nagra korapa'ma Kagri kasegema rempi hu'nama
antahi'noana, Kagra kasegeka'agura vagaore mevava hugahie
hunka eri fore hankeno me'ne. **153** Nagrama natazama e'nerua
zana negenka, ana knazampintira nazeri atro. Na'ankure nagra
Kagri kasegea naganera nokanue. **154** Nagri kaziga antenka
keagafina naza hunka keaga nehunka, Kagrama huvempama
hu'nana kante antenka nazeri kasefa nehunka, nasimura
namige'na mani'neno. **155** Kefo avu'ava zama nehaza vahe'mo'za
zamagu'ma vazizamofona afete nemanizankinka zamagura
ovazigahane. Na'ankure ana vahe'mo'za kagri kasegea amagera
nontazagu, anara hugahane. **156** Ra Anumzamoka Kagri

kasunku zamo'a rankrerfa hu'neanki, kagri kasegemo'ma hu'nea
kante antenka nazeri kasefa nehunka, nasimura namige'na
mani'neno. **157** Nagri'ma nazeri havizama nehaza vahe'ene
knazama nemamiza vahetmina rama'a mani'naze. Hianagi
Kagri kasegea atre'na namefira hunomue. **158** Havigema
hu'za vahe'ma rezmavatga hazage'zama hazenkema eneriza
vahe'ma nezamage'na, amutisanua nagesa nehie. Na'ankure
ana vahe'mo'za Kagri nanekea antahi amneza nehaze. **159**
Nagrama kagri kasegema navesimanentoa zana nenagenka, Ra
Anumzamoka vagaore mevava kavesi zanteti kavesinantenka
nasimura namige'na kasefa hu'na mani'neno. **160** Kagri
nanekemo'a tamage naneke me'ne. Ana hu'neankino maka fatgo
tra kekamo'a vagaore mevava huno vugahie. **161** Mago ke agafa'a
omane zante ugagota kva vahe'mo'za nazeri haviza nehaze.
Hianagi nagu'areti hu'na kagri nanekegura korora nehu'na
nagesa antahintahi nehue. **162** Mago vahe'mo'ma tusi fenzama
eri nafa'a nehuno musema hiaza hu'na, Kagrama huvempama
hu'nana nanekegura tusi muse nehue. **163** Havigema hu
avu'ava zankura, nagrira nagonete. Hianagi Kagri kasegea
navesi nentoe. **164** Fatgoma hu'nea kasegegura, mago zage
knafina 7ni'a zupa Kagrira humuse hunegantoe. **165** Kagri
kasegema amage'ma nentaza vahe'mo'za ra zamarimpa frune
nemanizankino, mago zamo'a zamazeri tanafara osugahie. **166**
Ra Anumzamoka nagu'vazinka etema navresnanku amuhara
nehu'na kavega ante'na manine'na, Kagri kasegea amagenentoe.
167 Kagri kasegema nagrama amage'uentoana, na'ankure nagra
tusiza hu'na navesinentogu hu'na amagerantoe. **168** Maka
kasegeka'ane tra keka'anena nagra amagenentoe. Na'ankure
nagra maka'zama nehuana, Kagra ko nagenka antahinka

hu'nane. 169 Ra Anumzamoka nagri zavi krafamo'ma Kagrite'ma ne-eana antahi nenaminka, Kagrama huvempama hu'nana kante amage antenka ama' antahi'zana namio. 170 Nagrama nunamuma nehuana antahi nenaminka, kagrama huvempama hu'nana kante antenka nagu nevazinka ete navro. 171 Kagra kasegeka'ama rempima hunenamina zanku hu'na, Kagri kagia husga hunegantoe. 172 Kagri kasegegura nagra zagame hugahue. Na'ankure Kagri kasegemo'a, miko fatgo nanekege me'ne. 173 Kagra kazana rusutenka nazahuo. Na'ankure nagra Kagri kasegema amage antegahue hu'nama huhampri'noanki naza huo. 174 Ra Anumzamoka Kagrama nagu'nevazinka nazama hananku kavega ante'na mani'noe. Ana nehu'na Kagri kasegegura tusiza hu'na musena nehue. 175 Kagra natrege'na ofrina kasefa hu'na manine'na, Kagri kagia ahentesga haneno. Ana nehanugeno Kagri kasegemo naza huno vugahie. 176 Sipisipi afumo'ma hiaza hu'na kana atre'na hazagre'noe. Ana hu'noanki Kagri eri'za vahekamo'na eme hakrenka navro. Na'ankure Kagri kasegegura naganera nokanue.

120 Nagrite'ma knazama fore'ma higena, Ra Anumzamofonte e'na zavi krafa hu'na antahigogeno, nunamuni'a antahi nami'ne. 2 Nagra amanage hu'na nunamuna hu'noe. Ra Anumzamoka zamagi'arima nehu'za vahe'ma rezamatgama nehaza vahe tvaontera omanisuanki naza hunka navre atro. 3 Havigema nehuta vahe'ma revatagama nehaza vahe'mota, Ra Anumzamo'a naza tamagrira tro huramantegahie? Inankna knaza tamagrira tamigahie? 4 Harafa sondia vahe'mokizmia roro hu'nea keve zamireti, tamahe haruharu nehuno, brumu zafamofo teve tankanu'za nerenia erino regasrimprigahie. 5 Nagra Meseki mopafima kraka'ma eman'i'nena nomani'zana mani so'ea

osu'noe. Anazanke hu'na afete Kedari mopa fima mani'noana, seli nontamimpi nemani'na mani so'ea osu'noe. 6 Zamarimpa fruma huno manizanku'ma zamavesrama nehaza vahe'enena zazate mani'noe. 7 Nagra ha' osu fru huno mani zankuke nehua neki'na, arimpa fruma huno mani zanku'ma keagama nehuge'za, ha' eri otikege nehaze.

121 Nagra navua kesga hu'na agonaramintega koanagi, inantegati nazamahu vahera egahie? 2 Monane mohanema tro'ma hu'nea Ra Anumzantegati naza hu'zana ne-e. 3 Agra katre'nigenka regrarinka omasegosane. Na'ankure kagri'ma kegavama hunegantemo'a avura nomasea ne' mani'ne. 4 Antahio, tamagerfa huno Israeli vahe'ma kegavama hunezman temo'a, avu'tokora nosuno avura nomasea ne' mani'ne. 5 Ra Anumzamo'a tamagrira kegava huramante'ne. Ra Anumzamo'a ton a zafagna huno kagri tvaonte mani'neno, kegava hunegante. 6 Zage feru'pima nevnankeno'a zagemo'a tenogasagesigeno, kenage'ma nevnankeno'a, ikamo'a hazenkea ogamigahie. 7 Ra Anumzamo'a kagrira kegava hugante'sigenka, so'e hunka nemaninka hazenkea e'origahane. 8 Meninteti'ma agafa huteno henkama maninoma vaniana, inantego vunka enka'ma hananana Ra Anumzamo'a avua anteno kegava hugante vava huno vugahie.

122 Vahe'mo'za nagrikura hu'za, enketa Ra Anumzamofo mono nontegama vanune hu'za nehazage'na, tusiza hu'na musena nehue. 2 Hagi menina Jerusalemia rankafaraminteti ufreta kumapina oti'none. 3 Jerusalemi rankumapima me'nea nontamina magopi magopi hu'za eri hankaveti'za ki'nazageno, kuma'mo'a hankavetino knare huno me'ne. 4 Ra Anumzamofo vahe Israeli vahe'mo'za trakemo'ma hihoma huno hu'nea kante ante'za, nagate nofite hu'za anantega mareri'za Ra

Anumzamofona susu hunente'za, agi ome ahentesga nehaze. 5
Hagi mani'neza keagama refko'ma nehaza tratami anantera
me'ne. Ana tratamintera Deviti naga'mo'za kinima mani'za
esaza kini tratami me'ne. 6 Rimpa fruma huno manizankura
Jerusalemi rankumakura nunamu huntaho. Jerusalemi kuma'ma
avesi nentaza vahe'mo'za makazampina knare hu'za hage'za
marerigahaze! 7 Jerusalemi kuma'moka kuma keginamofo
agu'afina arimpa fru huno mani avu'ava zamo megahie.
Ana nehanigeno kini vahe'mofo nontamimpina hazenkea
omanesige'za knare hu'za manigahaze. 8 Nagrira nafu
nagna'zane, rone'nimo'zanema Jerusalemi kumapima mani'naza
nagaku nagesa nentahi'na, Jerusalemi kumapina hara omena
arimpa fru'za mesanie hu'na nehue. 9 Ra Anumzana tagri
Anumzamofo mono noma me'nea zanku nagesa nentahi'na,
Jerusalemi kuma'mokagura nunamuna nehanugenka maka
zampina knare hunka hagenka marerigahane.

123 Ra Anumzamoka monafinka kini trakare manisga
hu'nanke'na, nagra navua kesga hu'na negagoe. 2
Eri'za vahe'mo'za kva vahe zamimofonte zamavu kete'za
nemanizageno, eri'za a'mo'a kvama hunte'nea a'mofonte
azama hanigu'ma avuma keteno maniaza huta, Ra Anumzana
tagri Anumzamo'ma asumantagi ranteno tazama hanigu,
agrite tavua keteta nemanune. 3 Ra Anumzamoka kasunku
hunerantenka mago'ene kasuragiranto. Na'ankure tagrira tusiza
hu'za vahe'mo'za tazeri haviza nehaze. 4 Zamavufga rama
nehaza vahe'mo'za za'zate tagrira kiza zokago ke hunerantage'za,
keontahi vahe'mo'za tagrira tazeri haviza nehaze.

124 Maka Israeli vahe'mota amanage huta hiho. Ra
Anumzamo'ma tagri kazigama omani'neresina, inankna hugahie?

2 Ra Anumzamo'ma tagranema omani'nesige'zama ha'
vahetimo'zama ha'ma eme hurantesnazana inankna hugahie?

3 Ha' vahetimo'zama tusi zamarimpama aherante'naresina,
ko e'za magozagama asgahu nakriankna hu'za tagrira eme
tavuaga tasgahu nakrizasine. **4** Tagrira timo hageno eme
tavreno nevigeno, timo tazeri nakariresine. **5** Tusi avunema
anteno hageno nea timo, tagrira eme tavreno vu'neresine.

6 Ra Anumzamofona humuse huntesanune. Na'ankure agra
tatreg'e'za afi zagamo'zama zagagafama ahe'za tragama
nehazaza hu'za, ha' vahe'mo'za eme tahe'za traga osu'naze. **7**
Krifuma anagintegeno azeri'nea namamo'a rugraru'vazino freaza
huta, tazeri'nea nofimo'a rukano higeta atreta fre'none. **8** Ra
Anumzama monane mopane tro'ma hu'nea Anumzamo tagrira
taza nehie.

125 Ra Anumzamofonte'ma zamentintima nehaza vahe'mo'za
zamagra Saioni Agonama mago zamo'ma azeri tore'ma osigeno,
oti hankavematino mevava huno viaza hu'za oti hanavetine'za
mani'za vugahaze. **2** Agonaramimo'ma Jerusalemi kuma'ma
azeri kaginteaza huno, Ra Anumzamo'a vahe'a meninteti'ma
agafa huteno vuvavama haniana manigagi zamanteno kegava
huzmantegahie. **3** Kefo avu'ava zama nehaza vahe'mo'za kva
vahera efore hu'za Ra Anumzamofoma amage'ma nentaza
vahe'mofo mopa kegava osugahaze. Hanki zamagrama e'ina'ma
hanage'za, Anumzamofoma amage'ma nentaza vahe'mo'za,
zamagranena zamage ante'za kefo avu'avaza hugahaze. **4**
Zamagu'amo'ma fatgo hu'nege'za, knare zamavu zamava'ma
nehaza vahe'mokizmia, Ra Anumzamoka zamazeri knare huo. **5**
Hianagi Ra Anumzamoka, kefo avu'ava zama nehaza vahera
zamazeri netrenka, anazanke hunka havi avu'ava zama nehaza

vahera zamazeri atro. Israeli vahe'mo'za zamarimpa frune manisaze.

126 Israeli vahe'ma kinama ome hu'naza vahe'ma Ra Anumzamo'ma ete zamavarenoma Jerusalemi kumate'ma egeta, tagra ava'na negompi huta hu'none. 2 Ana zupa tagra tusi kizazokago nehuta, zagame huta muse hu'none. Ana'ma nehunke'za ana zupa kokankoka vahe'mo'za amanage hu'naze. Ra Anumzamo'a ruzahu'za huno Israeli vahera zamaza hie hu'za hu'naze. 3 Tamage, Ra Anumzamo'a ruzahu'za huno tagrira taza higeta tusi muse hu'none. 4 Negevi hagage kokampima tima enevuno mikazama eri kasefa'ma nehiaza hunka, knare'zanu Ra Anumzamoka ante vitenerantenka tazeri kasefa huo. 5 Zavi'manete'za avimzama nehankresaza vahe'mo'za ranke hu'za muse zagame nehu'za ne'zana hamaregahaze. 6 Avimzama hankre'naku'ma eri'za kantegama nevu'za, zavitemema nevanamo'za, hozafinti'ma ne'zama hamre'za nontegama eri'za ne-esuza ranke hu'za muse zagamera nehu'za eri'za egahaze.

127 Hagi Ra Anumzamo'ma mago noma onkisiana, ana noma kisia kamunta nemofo eri'zamo'a amne zankna hugahie. Hagi Ra Anumzamo'ma mago rankuma'ma kegavama osaniana, kuma kvama nehaza vahe'mokizmi eri'zamo'a, amne zankna hugahie. 2 Kagrama ne'zama nesana zanku'ma kamu'nasisima nehunka, nanterame otinka eri'zama e'nerinkeno vuno hanima huno kenage'ma nesegenka nontegama neanana, amne zampi hankaveka'a neutrane. Na'ankure Ra Anumzamo'a agrama avesi nezmantea vahera mani frua zamige'za zamura nemsaze. 3 Ra Anumzamo'ma mofavreramima neramiana museza neramie. Ana hu'neankino Anumzamo'a asomu hunerante. 4 Kasefa ne'mofo

mofavreramimo'za harafa vahe'mo'ma azampima keveramima eriaza nehie. 5 Keve kupima keveramima eri viteankna huno, rama'a ne' mofavreramima eri fore'ma hu'nesia ne'mo'a muse hugahie. Na'ankure agra agazegura osuno ha' vahe'anena kuma kafantera keaga hugahie.

128 Ra Anumzamofoma koro'ma hunente'za agri avu'ava'ma amage'ma nentaza vahe'mo'za muse hugahaze. 2 Kagrama kamu'nasisima hunka eri'zama eri'nesana eri'zamofo raga'a, kagraka'a taginka negahane. Ana'ma hanunka asomu'ene knare hunka manigahane. 3 Nonka'afina kagri a'mo'a wainimo knare huno rama'a ragama renteankna hugahie. Kagri mofavre naga'mo'zama ne'zama nenaku'ma trate'ma manikagi snazana, mensi nehagea olivi zafagna hu'za manigagi kantegahaze. 4 Tamagerfa huno e'inahu zama fore'ma haniana, Ra Anumzamofoma koro'ma hunentaza vahete fore hugahie. 5 Ra Anumzamo'a Saioni kumate mani'neno, asomu hugantegahie. Kagrama kasefa'ma hunka manisnana kna'afina, Jerusalemi kumamo'a maka zampina so'e zantfa huno nehagesigenka kegahane. 6 Kagra muse hunka mani'nenka mofavre naga kamo'zama kasezamante'naza mofavre nagara zamagegahane. Israeli vahe'mo'za ha'zana omanesige'za fru hu'za manisaze.

129 Nagrama mofavrema mani'noreti agafama huteno'ma e'neana, ha' vahe'nimo'za hara eme hunante'za nazeri haviza hutere hu'naze. Ama ana nanekea maka Israeli vahe'mota namage anteta hiho. 2 Nagrama mofavrema mani'noreti agafama huteno'ma e'neana, ha' vahenimo'za hara eme hunante'za nazeri haviza hutere hu'naze. Hianagi nagrira hara hunagateore'naze. 3 Ha' vahe'mo'zama sefu'ma nami'naza zamo'a nagumpina, hozama antenaku'ma hozafu vahe'mo'za zazate'ma tinkama

asazaza huno tinka evu evu hu'ne. 4 Hianagi Ra Anumzamo'a fatgo hu'neankino, kefo avu'ava'ma nehaza vahe'mo'zama kinama renante'nazanofira ahekano hutrege'na fru hu'na mani'noe. 5 Jerusalemi kuma'ma zamago'ma tenentaza vahera, zamarotago hanage'za rukrahe hu'za nefre'za zamagazegu hanaze. 6 Ana vahe'mo'za nomofo agofetu'ma nehagea trazamo'ma mareri za'za osu'neno hagege hiaza hu'za, zamagra zazatera omanine'za hagege hugahaze. 7 Ana trazana witima vasage vahe'mo'a azampina eri avio tege, kona anakigera osugosie. 8 Hagi zamagri tvaonte'ma vahe'ma enevu'za amanahu asomu nanekea huozmantegahaze. Ra Anumzamo'a asomu huramante'nie. Tagranena Ra Anumzamofo agifi asomu ke huramantone hu'za osugahaze.

130 Ra knazamo refite'nantegena manine'na, Ra Anumzamokarega naza huogu kezanetue. 2 Ra Anumzamoka nagerura antahio. Kasunku hunantogu'ma kezamanetuanakagesa antenka antahio. 3 Ra Anumzamoka Kagra tagri kumi'ma avontafepima krentantesina, keagama hurantesana zupa Kagrira keagafina, iza kagateregahie? 4 Hianagi kagra tagri kumi'ma atrerante'nana zanku huta kagriku korora hugahune. 5 Ra Anumzamofonku avega ante'noe. Nagu'amo'a Agriku avega ante'neankina, agri nanekere amuhara nehue. 6 Kenage'ma kuma kvama nehaza vahe'mo'zama, ame huno nanterama rumsama hanigu avegama nentazama'a, agatereno nagu'amo'a tusiza huno Ra Anumzamofonkura avega nente. Tamage rumsama hanigu avegama nentazama'a agatereno nagu'amo'a tusiza huno Ra Anumzamofonkura avega nente. 7 Israeli vahe'mota Ra Anumzamofonku amuhara hiho. Na'ankure agripina vagaore mevava avesi zamo'ene, vahe'ma agu'vazino

ete avre avu'ava zamo'a avite'ne. 8 Israeli vahe'mo'zama maka kumi'ma hu'naza zampintira, Ra Anumzamo'a Agrake'za kumizamia eri netreno ete zamavaregahie.

131 Ra Anumzamoka navufga atahara nosuna, nagra namimiza runafagera nosue. Nagra ranra zanku'ene, nagrama osuga zankura nagesa antahintahia nosue. 2 Osi mofavremo'ma zavima ote'noma nerera azampima akoheno maseaza hu'na, akohe'na narimpa frune nemanue. Ana zanke huno nagu'amo'enena fru huno nemane. 3 Tamagra Israeli vahe'mota meninteti'ma agafama huno vaniana Ra Anumzamofonte amuhara huvava huta viho.

132 Ra Anumzamoka Devitinku'ene, agrama maka knazampima manino e'neazankura kaganera okanio. 2 Israeli vahe'mofo Hankavenentake Anumzamoka Deviti'ma huvempagema kagrite'ma hu'neana, 3 amanage huno hu'ne, nagra nonirega vu'na, siperera uomasegahue huno hu'ne. 4 Nagra atre'nugeno navumo'a toko nosanige'na, navua kesuraki'na omase manine'na, 5 Ra Anumzana Israeli vahe'mokizmi hankavenentake Anumzamo'ma manisania nona kite'na, mani frua hugahue hu'ne. 6 Tagra Efrata (Betlehemi) kumate'ma manineta huhagerafi huvempage vogisimofo agenkea antahiteta, vuta Ja'ari mopafi me'negeta ome ke'none. 7 Anante tagra huta, enketa Anumzamo'ma nemania nontega vuta, Agrama nemania kini tra'mofo agiaifi monora huntesanune huta hu'none. 8 Ra Anumzamoka otinka Kagri hankavema huhamprino me'nea huhagerafi huvempage vogisimo'ma, Kagrama mani fruma hanana nompima nevanigenka, Kagrane enka ana nompinka umarerio. 9 Kagri pristi vahe'mo'za za'za kukenama hiaza huza fatgo avu'ava zana eri nehankre'za, Kagri'ma hankavetiza

kamage'ma nentaza vahe'mo'za, ranke hu'za zagamera nehu'za musenkasea hugahaze. **10** Kagri eri'za ne' Devitinku kagesa nentahinka, Kagraka'ama masavema frentenka huhampari'nana kini nera kamefira huomio. **11** Ra Anumzamo'a Devitina hankave huvempage hunte'neankino, ana huvempagea eri otregahie. Ana huvempa kema hu'neana, kagrama kasezmante'nana mofavre nagapinti mago'mofo huhampri antesnugeno kagri nona erino kinia manigahie, huno hu'ne. **12** Hagi kagri ne'mofavre naga'mo'zama, nagrama huhagerafi'noa huvempa kene, kasegenema amage'ma antesageno'a, zamagripinti'ma fore hu anante anante'ma hu'za vanaza mofavre naga'mo'za kinia mani vava hu'za zugahaze. **13** Na'ankure Ra Anumzamo'a Saion kuma hunehamprino, Nagri kuma mesie huno hu'ne. **14** Ra Anumzamo'a huno, ana kumara nagrama mani fru hanua kuma mevava hugahie. Na'ankure ana kumakura tusiza huno navenesianki'na, anampi nagra manigahue. **15** Ana kumapi vahe'mo'zama nazankuro atupa'ma hanaza zana, amne zamazeri knare nehu'na, ana kumapima zamunte omane vahe'ma mani'naza vahera ne'zana zami'nuge'za nezamu zugahaze. **16** Hagi Jerusalemima nemaniza pristi vahera za'za kukenama hiazza huna vahe'ma zmaguvazi zana eri hankre zamantegahue. Ana nehanuge'za hankaveti'za namage'ma nentaza vahe'mo'za, ranke hu'za zagamera nehu'za musenkasea zugahaze. **17** Hanki Nagra Devitina hankave'a amigahue. Nagrama masavema taginte'na huhamprinte'noa ne'mo nagri vahe'mofo tavira manigahie. **18** Nagra agri ha' vahera zamagaze zanu refite zmantegahue. Hianagi agra hihamu masa'ane kini ne' efore zugahie.

133 Hagi koganamo'zama mago zamarimpa hu'za magopima mani avu'ava zamo'a knare zantfa hu'ne. 2 Mago arimpama huno mani avu'ava zamo'a, Aroni asenire masave tagino frentegeno agemazampa azokatega uramino za'za kukena'amofo ananke kante uramiankna nehie. 3 Mago arimpa huno mani avu'ava zamo'a, Hemoni agonaregati ata ko'mo, eno Saionima me'nea agonaraminte eme runteaza hu'ne. E'ina kumate Ra Anumzamo'a asomura hunezmante'nige'za, mani vava hugahaze.

134 Maka Ra Anumzamofo eri'za vahe'ma, Ra Anumzamofo mono nompima kenage eri'zama e'neriza vahemota Ra Anumzamofona agi'a ahentesga hiho. 2 Ana nehuta nunamuma hanafina, tamazana erisga huta ruotage'ma hu'nea mono noma me'nerega hunenteta Ra Anumzamofona agi'a ahentesga hiho. 3 Monane mohanema tro'ma hu'nea Ra Anumzamo'a Saioni agonare mani'neno asomu huramantegahie.

135 Ra Anumzamofo eri'za vahe'motma Ra Anumzamofona agi'a ahentesga hiho. Ra Anumzamofona husga huntaho. Ra Anumzamofona agi'a ahentesga hiho. 2 Ra Anumzamofo mono nompima omanetiza vahe'ene, tagri Anumzamofo mono nonkumapima oneti'za vahe'mota anara hiho. 3 Ra Anumzamofona agi'a ahentesga hiho. Na'ankure Ra Anumzamo'a Agra knare hu'ne. Ra Anumzamofona zagame huta agi'a ahentesga hiho. Na'ankure Agri agimo'a so'e zantfa hu'ne. 4 Na'ankure Ra Anumzamo'a Jekopunkura nagri'a suzane huno huhamprinenteno, Israeli vahekura huno nagri marerisa feno zankna hu'za manigahaze huno huhampri zamante'ne. 5 Nagrama ke'na antahi'nama huana, Ra Anumzamo'a rankrerfa hu'ne. Ana hu'neankino maka havi anumzantamina zamagatere vagare'ne. 6 Ra Anumzamo'a monafino, ama mopafino,

hagerimofo agofeturo, hagerimofo agu'afinema nazano tro
hunaku'ma hiazana amne nehie. **7** Agra higeno mopama ome
atretegatira hampomo'a eri tru huno marenerigeno, ko'ene
kopasi'nanena atregeno ne-e. Ana nehuno fenoma nentea
noma'afinti zahora atregeno ne-e. **8** Isipi vahe'mokizmi agonesa
mofavreramine, afukra zamifintira agonesa anenta'araminena
maka ome zamahetre eme zmahetre hu'ne. **9** Isipi vahe'mota
tamagri amu'nompi, Feronte'ene, Fero eri'za vahetera kaguva
zane, avamezanena eri fore huno zamazeri haviza hu'ne. **10**
Kokankokama mani'naza vahera ome zmahetre eme zmahetre
nehuno, hankavenentake kini vahera zamahe fri'ne. **11** Ana
kini vahera, Amori vahe kini ne' Sihonima, Basani vahe kini ne'
Ogima, maka Kenani mopafima mani'naza kini vahe'taminena
zamahe hana hu'ne. **12** Ana huteno ana vahe'mokizmi mopa
Agra vahe Israeli nagara eri zamige'za erisanti hare'naze. **13** Ra
Anumzamoka kagri kagimo'a maka kna mevava huno nevie. Maka
vahe'ma forehu anante nante'ma hu'za vanaza vahe'mo'za Ra
Anumzamoka Kagri kavukva zankura antahigami'za vugahaze.
14 Na'ankure Ra Anumzamo'a vahe'a refko huno nezamageno,
eri'za vahe'a asunku huzmantegahie. **15** Kaza osu havi
anumzantamina, silvareti'ene golireti vahe'mo'za avako hu'za
zamazanteti tro hunte'naze. **16** Ana havi anumzaramina
zamagira me'neanagi, keaga nosu'za, zamavua me'neanagi
zamavua nonke'za, **17** zamagesa me'neanagi keaga nontahiza,
zamagona me'neanagi zamasimura nontaze. **18** Hagi ana
kaza osu havi anumzantamima tro'ma hu'naza vahe'ene, ana
zantaminte'ma zamentintima nehaza vahe'mo'zanena, ana kaza
osu havi anumzankna hugahaze. **19** Israeli vahe'mota Ra
Anumzamofo agi'a ahentesga nehinke'za, Aroni naga'nofi'ma

pristi eri'zama e'neriza naga'mo'za Ra Anumzamofo agi'a ahentesga hiho. **20** Livae naga nofi'mota Ra Anumzamofo agi'a ahentesga nehinke'za, iza'zo Ra Anumzamofonku'ma koro hunente'za vahe'mo'za Agri agoragama nemanisaza vahe'mo'za Ra Anumzamofo agi'a ahentesga hiho. **21** Saioni agonare'ma mani'naza vahe'mota Ra Anumzamofona agi'a ahentesga hiho. Na'ankure Agra ama ana Jerusalemi kumapi nemanie. Ra Anumzamofo agi'a ahentesga hiho.

136 Ra Anumzamofona susu huntetesune, na'ankure Agra knare hu'ne. Anumzamofona vagaore avesizama'amo'a mevava huno vugahie. **2** Anumzana susu huta humuse huntetesune. Na'ankure Anumzamofona vagaore avesizama'amo'a mevava huno vugahie. **3** Ra Anumzamofona susu hunteta husga huntetesune, Agra maka ama mopafi ranra vahetmimofo Ra Anumza mani'ne. Na'ankure Anumzamofona vagaore avesizama'amo'a mevava huno vugahie. **4** Agrake'za hankavenentake kaguvazana eri fore nehigu, Agrike'za susu hunenteta humuse huntesanune. Na'ankure vagaore avesizama'amo'a mevava huno vugahie. **5** Monafima me'nea zantamima Agra'a antahintahireti'ma tro'ma hunte'nea Anumzamofona susu huta humuse huntesanune. Na'ankure vagaore avesizama'amo'a mevava huno vugahie. **6** Ama mopama tro huteno, timofo agofetu'ma antegenoma'me'nea Anumzamofona susu huta humuse huntesanune. Na'ankure vagaore avesizama'amo'a mevava huno vugahie. **7** Monafima me'neno remsa nehia tavitamima tro'ma hunte'nea Anumzamofona susu hunteta humuse huntesanune. Na'ankure vagaore avesizama'amo'a mevava huno vugahie. **8** Zagema tro'ma hunte'neana, masama kegavama hu'neno remsa haniegutro hunte'ne. Na'ankure vagaore avesizama'amo'a mevava huno

vugahie. **9** Ikane hanafi'taminema tro'ma hunte'neana, kenage kegava hune'za, remsa hanazegu tro hunte'ne. Na'ankure Agrama oratreno avesirante vavama nehia zamo'a, vagaore mevava huno vugahie. **10** Isipi vahe'mokizmi agonesa mofavreramima zamahe hana'ma hu'nea Anumzamofona susu hunteta humuse huntesanune. Na'ankure Agrama oratreno avesirante vavama nehia zamo'a, vagaore mevava huno vugahie. **11** Israeli vahera Isipi mopafintira Agra zamavareno atiramige'za e'naze. Na'ankure Agrama oratreno avesirante vavama nehia zamo'a, vagaore mevava huno vugahie. **12** Agra Hankavenentake azanteti rusuteno zamavareno e'ne. Na'ankure Agrama oratareno avesirante vavama nehia zamo'a, vagaore mevava huno vugahie. **13** Koranke hagerima eri rupapama hugantigama hu'nea Anumzamofona susu huta humuse huntesanune. Na'ankure Agrama oratreno avesirante vavama nehia zamo'a, vagaore mevava huno vugahie. **14** Ana'ma huteno'a ana hagerimofo amu'nompi Israeli vahera zamavareno vu'ne. Na'ankure Agrama oratreno avesirante vavama nehia zamo'a, vagaore mevava huno vugahie. **15** Hianagi Ferone sondia vahe'a koranke hagerimpi zamaherege'za tinakri'za fri'naze. Na'ankure Agrama oratreno, avesirante vavama nehia zamo'a vagaore mevava huno vugahie. **16** Agra vahe'ama zamavareno, vahe omani ka'ma kokampima e'nea Anumzamofona susu huta humuse huntesanune. Na'ankure Agrama oratreno avesirante vavama nehia zamo'a, vagaore mevava huno vugahie. **17** Hankave kini vahetmima zamahe hana'ma hu'nea Anumzamofona susu huta humuse huntesanune. Na'ankure Agrama oratareno avesirante vavama nehia zamo'a, vagaore mevava huno vugahie. **18** Zamagimo'ma mareri'nea kini vahetamina zamahe fri vagare'ne.

Na'ankure Agrama oratareno avesirante vavama nehia zamo'a, vagaore mevava huno vugahie. **19** Amori vahe kini ne' Sihonina ahe fri'ne. Na'ankure Agrama oratareno avesirante vavama nehia zamo'a, vagaore mevava huno vugahie. **20** Basani vahe kini ne' Oginena ahe fri'ne. Na'ankure Agrama oratreno avesirante vavama nehia zamo'a, vagaore mevava huno vugahie. **21** Ana'ma huteno'a Anumzamo'a ana kini vahe'mokizmi mopa, erisantiharesaze huno Agra vahe'a erizami'ne. Na'ankure Agrama oratareno avesirante vavama nehia zamo'a, vagaore mevava huno vugahie. **22** Agri eri'za vahe Israeli vahe'mo'za ama ana mopa erisanti haregahaze huno zami'ne. Na'ankure Agrama oratreno avesirante vavama nehia zamo'a, vagaore mevava huno vugahie. **23** Tagri hankavemo'ma evuramigetama manuna knafina Agra aganera kaninoramie. Na'ankure Agrama oratreno avesirante vavama nehia zamo'a, vagaore mevava huno vugahie. **24** Agra tagri ha' vahe'mokizmi zamazampinti tagu'vazino ete neravare. Na'ankure Anumzamo'ma oratareno avesirante vavama nehia zamo'a, vagaore mevava huno vugahie. **25** Anumzamo'a maka vahe'ene zagagafanena ne'zana nezamie. Na'ankure Agrama oratreno avesirante vavama nehia zamo'a, vagaore mevava huno vugahie. **26** Monafinkama nemania Anumzamofona susu huta humuse huntesanune. Na'ankure Agrama oratreno avesirante vavama nehia zamo'a, vagaore mevava huno vugahie.

137 Babilonima me'nea tintamimofo ankenarega mani'neta, Jerusalemi kumakura tagesa nentahita zavira te'none. **2** Zavenama neheta zagame'ma nehuna hapuramina, wilo zafaramimpi runtani'none. **3** Na'ankure kinama hurante'naza vahe'mo'za tagrikura, zagame nehinketa antahisune hu'za

kazikazi hu'naze. Tatama tami'za tazeri havizama nehaza
vahe'mo'za hu'za Saioni agonamofo agirevare zagamera
nehinketa musena hamneno hu'za tutu hu'naze. 4
Ana hianagi ru vahe mopafima eman'i'nonana inankna
huta Ra Anumzamofo zagamera hugahune? 5 Nagrama
Jerusalemi kuma'mokagu'ma nagane'ma kanisugeno'a, naza
tamaga'amo'ma eri'zama e'neria eri'zana mago'enena e'origahie.
6 Nagrama Jerusalemi kuma'mokagu'ma nagane'ma nekani'na,
Jerusalemi kuma'mokagu'ma ugota musezani'a mani'hane
hu'nama osanugeno'a, nagefunamo'a marerino navagu'nafare
ome rukamaresie. 7 Babiloni vahe'mo'zama Jerusalemi kuma'ma
ha'ma eme hunte'za eri'za zupama, Idomu vahe'mo'za hu'za,
Jerusalemi kumara maka tapage tapagu hutrenkeno havizantfa
hinoma hu'za kezama ati'naza zankura, Ra Anumzamoka
kaganera okanio. 8 Babiloni kuma'moka havizantfa hugahananki
kagesa antahio. Tagrite'ma hurante'nana avu'ava zante'ma,
nonama hugantesia vahe'mo'a muse hugahie. 9 Ana'ma hania
vahe'mo'a Babiloni kuma'moka ne'onse mofavre nagaka'a
zamazeriteno, haveraminte ruhapakopatino zmahegahie.

138 Ra Anumzamoka nagu'areti susu hu'na humuse
hunegantoe. Havi anumzantamimofo zamavufi zagamera
nehu'na, kagri kagi'a ahentesga hugahue. 2 Ruotagema hu'nea
mono nonka'amofo avugama kepri hu'na kagia ahentesga
nehu'na, susuma hunegantoana vagaore mevava kavesi
zanka'agu anara nehue. Na'ankure Kagrama huvempama
hu'nana naneke ka'amo rankagia negamie. 3 Nagrama
nunamuma nehugenka nagri nunamuntera nona nehunka,
naza hunka nazeri hankavetinke'na hankaveti'na mani'noe.
4 Maka ama mopafima mani'haza kini vahe'mo'za Ra

Anumzamoka humuse hu'za susu hugantegahaze. Na'ankure kagri nanekema antahinuza anara hugahaze. 5 Ana nehu'za Ra Anumzamoka kagri kavukva zankura zagamepi erinte'za zagame hugahaze. Na'ankure Ra Anumzamoka hihamu masazamo'a rankrerfa hu'ne. 6 Ra Anumzamo'a marerisa Anumza mani'neankino, zamavufagama anterami'za maniza vahera kegava hunezmanteanagi, zamavufagama erisga nehaza vahera afeteti ko zamageno antahino nehie. 7 Tusi knazamo nazeri kagige'na nemanugenka naza nehane. Ha' vahenimo'za tusi zamarimpa ahenahtegahazanagi, Kagra kegava hunantegahane. Kagra tamaga kaziga kazana rusutenka nagu'nevazine. 8 Ra Anumzamokama nazano nagri nomani'zampima fore hugahiema hunkama hvempama hu'nana zantamina, eri fore hugahane. Na'ankure Ra Anumzamoka vagaore kavesi zamo'a mevava huno nevie. Kagra kazampinti nagrira nazeri fore hu'nananki kamefira huonamio.

139 Ra Anumzamoka nagra inanknahu vahe mani'noe, ko nagri nagu'a rezaganenka ke'nane. 2 Nagrama manuampi, otuampi Kagra ko nagenka antahinka nehunka, afete mani'noanagi, Kagra nagri antahi'zana ko keama hu'nane. 3 Kama vano nehfine, navu'ma masofinena Kagra kavua antenka nenagenka, maka navu'nava zama huana, ko nagenka antahinka hu'nane. 4 Maka nanekea osu'nogenka, e'i naneke hugahie hunka Ra Anumzamoka ko antahinka kenka hu'nane. 5 Kagra navugane namefi'ene nevunka, kazanteti refite'nante'nane. 6 Kagri antahi'zamo'a so'e zantfa huno mareri agatere'neankina, nagra antahi amara osugahue! 7 Nagra Kagri Avamura atre'na iga vugahue? Nagra Kagri kvatetira atre'na korora fre'na, iga ome frakigahue? 8 Hagi nagrama monafima marerisuana, Kagra

ko monafina mani'nane. Nagrama fri'na fri vahe kumapima
vanuana, Kagra ko anampina mani'nane. (Sheol h7585) 9 Hagi
nanterama zahufa zagma nehanatina, nagrama nageko'na
huntesige'na hare'na vu'na hagerimofo amu'nompima me'nea
mopafi umanuresina, 10 anantega kegava hunenantenka nazeri
ako'na hasine. 11 Hagi tamagerfa hunka hani zamoka eme nazeri
fra'nekigeno, zage ferupinagi ame hunka hani zamoka enka eme
nazeri kagio hu'nama huresina, 12 ana hanimo'a Kagri kavurera
nazeri frara okiresine. Ana nehigeno hanimo'a, Kagri kavurera
masa huno zage ferukna hanigeno, hanimo'ene msamo'enena
Kagri kavurera mago zanke hu'na'e. 13 Na'ankure maka nagu'a
navufga Kagra tro hunante'nane. Ana hutenga antanimofo
rimpfima mani'nogenka maka navufga Kagra rehatinante'nane,
14 Kagrama nagrima tro'ma hunanana, so'e' zantfa hunku tro
hunante'naku muse hunegantoe. Kagrama eri'nana eri'zamo'a,
knare huno so'e zantfa hu'ne. Ana hu'neanki'na e'i ana
zana nagra ke'na antahi'na hu'noe. 15 Kagri kavurera frara
oki'noanki, maninenka nenagankeno oku'a nenrera arimpafina
zaferinani'mo' eme rekanuhe rekanuhe nehige'na fore hu'noe.
16 Nenrera'a kase onante'negenka, ko nagrira nagenka antahinka
hu'nane. Ama mopafima kasefa'ma hu'na manisanua kna'afima
tro'ma hanua zana, maka knamo'a ome'negenka maka zana
ko avontafepi krente'nane. 17 Anumzamoka nagriku'ma
nentahina antahizamo'a, soe'zantfa huno mareri agetere'ne. Ana
hu'neanki'na ana maka zantamina hampari'na kegara osu'noe.
18 Hagi ana maka zana hampari'na kegahue hu'na hugahuanagi,
hagerimofo ankenarega me'nea kaseparamina ana zantamimo'a
rugatere'ne. Hagi mase'nofinti'ma omatuana Kagra magoka
nagrane mani'nane. 19 Anumzamoka nagri'ma navenesiana,

havi avu'ava zama nehaza vahe'ma zamahe frisanana knare
hugahie. Hazenkema eri hakarema huta vahe korama eri
neragiza vahe'mota, nagri navatetira atreta afete viho. **20** Ana
vahe'mo'za Anumzamoka Kagrira huhaviza hunegante'za, ha'ma
renegantaza vahe'mo'za Kagri kagi'a amnene amnene nehaze.
21 Ra Anumzamoka Kagri'ma kavesinogantaza vahera nagra
navesra hunezmante'na, kagri'ma ha'ma renegantaza vahera
zamage henkami atregahue. **22** Nagra tamagerfa hu'na ana
vahera tusi narimpa ahenezmante'na, ana vahe'ma nezamage'na
nagri ha' vahe mani'naze hu'na nehue. **23** Anumzamoka nagri
nagu'a rezaganenka keama nehunka, antahintahi hakare'ma
nehua zana renahenka ko. **24** Anumzamoka krimpa knazama
erigami navu'navazama nagripima me'nesiana refkohu so'e
hunka nenagenka, manivava asimu'ma erino mani kante
navrenka vuo.

140 Ra Anumzamoka havi avu'ava zama nehaza vahe'mokizmi
zamazampintira nagu'nevazinka, hazenke vahe'mo'zama
hazenkema namizankura kegava hunanto. **2** Ana vahe'mo'za
havi avu'ava zama hanaza zanke zamagu'afina retro nehu'za,
maka zupa ha' hiho hu'za vahera zamarimpa revava nehaze.
3 Keagama haza nanekemo'a, osifavemofo agefunamo'ma
asaneankna nehu'za, ha' osifavemofo avu'atga zamo zamagipina
avite'neanki'za vahera zamazeri haviza hu keaga nehaze. **4**
Ra Anumzamoka havi avu'ava zama nehaza vahe'mo'zama
nazeri havizama hu'zankura kegava hunanto. Hazenkema eri
hakarema nehaza vahe'mo'zama hazenkema nami'zankura
kegava hunanto, na'ankure nagrira nazeri haviza hunaku oku'a
keaga retro nehaze. **5** Zamavufga rama nehaza vahe'mo'za,
nagrimsa nazerinakura kukona antenenante'za, kama vano

nehufina krifua anaginentaze. 6 Ra Anumzamoka Kagrikura, nagri Anumza mani'nane hu'na nehuanki, Ra Anumzamoka kasunku hunantogu'ma nunamuma nehanugenka, kagesa antenka nentahinka nunamuni'a antahinamio. 7 Anumzana nagri Ra Anumzamoka Kagra hankavenentake hu'nanankinka nagura vazinka ete nenavrane. Ha' knafina kagra hankogna hunka anteso hunenantenka, kegava hunante'nane. 8 Ra Anumzamoka havi avu'ava zama nehaza vahe'mo'za nazano erinakura tusiza huno zamave'nesianagi, zamatrege'za anazana e'oriho. Ana nehunka havi avu'ava zama hunaku'ma kema retro'ma hanaza zana eri atregeno, anazana forera osuno. Na'ankure ana'ma osnanke'za zamagra zamavufaga erisga hugahaze. 9 Nagri'ma ha'ma renenantaza vahera, zamatrege no nagri'ma nazeri haviza hunaku'ma nanekema retro'ma nehaza zamo'a zamagrite efore huno zamazeri haviza hino. 10 Kagra teve nefake tankanu'za, atregeno ana vahe agofetura eramino. Ana nehunka ana vahera zamazeri atrege'za tevefi vuge, tinkerifi uramige nehu'za, korora fre'za atioramiho. 11 Havigema nehaza vahera zamatrege'za tagri mopafina manine'za, maka zampina knarera osiho. Hazenkema eri hakarema nehaza vahera, knazamo zamavaririno zamazeri haviza hino. 12 Hianagi nagra ke'na antahi'na hu'noankino, knama zami'za zamazeri havizama nehaza vahera Ra Anumzamo'a zamaza nehuno, zamunte omane vahera knare huno zamaza nehie. 13 Tamagerfa hu'za fatgo avu'ava zama nehaza vahe'mo'za, Anumzamoka kagi'a husga hugantegahaze. Ana nehanage'za Kagri kavukva zama amagemanentaza vahe'mo'za, kagrane magoka manigahaze.

141 Ra Anumzamoka Kagritega kezantuanki, ame hunka nagritega eno. Kagritega zavi krafama nehuana, nentahinka eme

nazahuo. 2 Mana nentake'za insensima kre mna nevazagenka negenka musema nehanaza hunka, nagrama nunamuma nehua nunamuntera muse huo. Zagema unefrege'za kinagama ofama kresramna nehzaza hu'na, nazana erisga nehuanki antahinamio. 3 Ra Anumzamoka keagama hanufina, nagitera kegava hunanto. 4 Natrege'na havi avu'ava zama hu'zantera narimpamo'a oti'otira nosanigeno, havi avu'ava zama nehaza vahera zamage ante'na ana avu'ava zana osa'neno. Ana nehunka hazenkema nehaza vahe'mo'zama ne'zama nene'za musema hanafina omanisue. 5 Fatgo avu'ava'ma nehia vahe'mo'ma navesinenanteno'ma sefu'ma naminu nazeri fatgoma haniana knare hu'ne. E'inahu avu'ava zamo'a vahe'mofo asenire maseve tagino frentearkna hu'neanki'na, i'o hu'na osugahue. Hianagi havi ava'ava zama nehaza vahekura, ana avu'avazamirera nona huzamanto hu'na, nunamuna huvava nehue. 6 Keagama refkoma nehaza kva vahera zamazerite'za matevu zamatresage'za zavenipi uramigahaze. Ana'ma hanage'za ana havi avu'ava zama nehaza vahe'mo'zama ke'za antahi'zama hanazana, nagrama hu'noa nanekegura tamage naneke hu'ne hu'za hugahaze. 7 Mopama reko'neria bulimakao afumo'ma, mopama reko'nerino havema refaragu'ma vaziaza huno, havi avu'ava zama nehaza vahe'mokizmi zaferinamo'a, fri vahe kerimofo avazare ruherafino vuno eno hugahie. (Sheol h7585) 8 Hianagi Ra Anumzana, Anumzanimoka kagrite navua kete'na nemanue. Kagrake'za fraki kuman'i'a mani'nanku, zamatrege'za nahe ofriho. 9 Nagri'ma nazerinaku'ma havi avu'ava zama nehaza vahe'mo'zama anaginte'naza krifumo'a, atregeno naze'orino. 10 Havi avu'ava zama nehaza vahera zamatrege'za, zamagra'ama

frakinte'naza kukompi ufreho. Ana nehanage'na nagrira mago
zamo'a nazeri haviza osanige'na, knare hu'na vugahue.

142 Ra Anumzamofontega ranke hu'na kezanelue. Ana
nehu'na Ra Anumzamo asunku hunanteno naza haniegu agritega
ranke hu'na nunamuna nehue. 2 Anumzamofo avuga knazani'a
eri'na ne-ena, knazani'aramina Agri avure eri'na eme nesamue. 3
Nagu'amo'ma tusi knama nehigenka, nagra na'a hugahufi Kagra
ko nagenka antahinka hu'nane. Nagrama kama vanoma nehfina
vahe'mo'za nagri nazerinakura krifua eme anagi fraki'naze.
4 Vahe'mo'zama eme naza hanagu navua omente emente
hu'noanagi, mago vahe'mo'e huno eme naza osu'ne. Ana
hige'na fra'ma kisanua kumaku hake'noanagi, mago vahe'mo'e
huno asunkura hunanteno naza osu'ne. 5 Ra Anumzamoka
naza huogu Kagritega nunamuna nehuanki, Kagrake'za
fra'ma kisanua kumara mani'nane hu'na nehuankinka, ofri'na
kase'fama hu'na manisanua kna'afina Kagrake'za nomani zanifina
manigahane. 6 Naza huogu'ma krafagema nehuana, kagesa
antenka antahinamio. Na'ankure ranknazamo narefitege'na
mani'noanki, nazeri havizama hunaku'ma narotagoma nehaza
vahe zamazampintira nagu'vazinka ete navro. Na'ankure zamagri
hankavemo'a, nagri hankavea agatere'ne. 7 Nagrira kinafintira
katufenanto. Ana'ma hananke'na Kagri kagia ahena susu nehu'na
humuse hugantegahue. Nagri'ma rama'a knare kavukvama
hunantana avu'ava zanku, Kagri kavu'kava zama amage'ma
nentaza vahe'mo'za e'za eme nazeri kagigahaze.

143 Ra Anumzamoka nazama hananegu'ma nunamuma
nehuana kagesa antenka antahio. Na'ankure Kagra tamage
hunka hugahue hunkama nehanaza nehunka, fatgo kavukva'ma
nehana Anumzamoka nunamuni'a antahinaminka nona hunanto.

2 Nagra Kagri eri'za vahe mani'noanki, refkoa huonanto.
Na'ankure mago vahe'mo'e huno Kagri kavurera fatgo huno
hazenke'a omane vahera omani'ne. **3** Ha' vahe'nimo'za
nagenere'za nazerite'za, nahetrazage'na mopafi mase'noe. Ana
hute'za natrazage'na fri' vahe'mo'zama fri' vahe kumapima
nemanizaza hu'na hanizampi mani'noe. **4** Ana hazageno
nagu'amo'a evuramigeno hankaveni'a omane amne hige'na
antahintahi hakare nehu'na koro hu'noe. **5** Korapa'ma fore'ma
hu'nea zankura nagesa nentahi'na, kagrama tro'ma hunte'nana
zanku'ene, kzampinti'ma eri fore'ma hu'nana zankura nagesa
antahintahi nehue. **6** Nazana erisga hu'na nunamuna kagritega
nehue. Mopamo'ma hagage huno tinku'ma avesiaza hu'na,
Kagrikura tusiza huno nave'nesie. **7** Ra Anumzamoka nagri
nunamuntera ame hunka nona hunanto. Na'ankure nagu'mo'a
evu neramie. Nagrira natrenka kamefira huonamio. Ana'ma
hananke'na nagra fri'na haviza hugahue. **8** Natrege'na
maka nanterana vagaore mevava kavesi'zankura nagesa
antahigami'neno. Na'ankure namentintia Kagrite nehugu, kama
vanua kana naveri huo. Na'ankure nagrani'a Kagri kazampi
nentoe. **9** Ra Anumzamoka ha' vahe'nifintira nagu'vazio.
Na'ankure kagripinka frakinaku nagare'na neoe. **10** Rempi
hunamige'na kagri kavesi zana amagera anta'neno. Na'ankure
nagri Anumza Kagra mani'nane. Atregeno Kagri so'e Avamu'mo
navareno fatgo hu'nesia kante vino. **11** Ra Anumzamoka
rankagika'agu kagesa nentahinka, nagririra ete kegava hunanto.
Kgra fatgo kavukva nehana Anumza mani'nanku, knazampintira
naza hunka nazeri atro. **12** Vagaore mevava kavesi zanteti
kavesi nante'nananki, ha'ma renenantaza vahe'ene, nazeri

haviza hunaku'ma nehaza vahera zamazeri haviza hugahane.

Na'ankure nagra Kagri eri'za vahe mani'noe.

144 Ra Anumzamo'a nagri hankave have mani'negu hu'na
Agri agi'a husga huntegahue. Agrake'za nazane nazankonena
eri hankavenetino, ha'ma hu'zana rempi hunenamie. 2 Agra
vagaore avesizama'reti avesinenantea Anumza mani'neankino,
hankave vihuni'a mani'ne. Agrake'za fraki kuman'i'a mani'neno,
nagura'vazino ete nенавре. Agra hankoni'a mani'negena,
agripinka fraki'na nemanugeno, ru moparega vahetamina
zamazeri nagafi atrege'na kegava hunezamantoe. 3 Vahera
tagra nankna zaga mani'nonkenka, Ra Anumzamoka kegava
hunerantenka, vahetfankura antahintahi hakarea nehane? 4
Na'ankure vahe'ma mani'nonana, vahe'mo agonafinti magoke
zupa asimu antegeno viankna nehuta, zage rentegeno vahe
amema'amo efore huteno ame huno fanane hiaza huno vahe'mota
nemanuna knatimo'a ame' huno nevie. 5 Ra Anumzamoka anami
mona eri ankro hunka eramio. Ana nehunka agonaramintera
kazana eme avako hugeno tevegumo'a vemagu vemagu huno
marerino. 6 Kopasi'na atregeno ruganani huno vuno eno nehuno,
Kagri'ma ha'ma renegantaza vahera zamahe panani hino.
Kagra keveraminka'a ahetrenka zamazeri koro huge'za freho. 7
Anagamu monafinkati kazana antefenka atrenka, tima hageno
eme nazeri nenakrifintira naza hunka nagura nevazinka, ru
vahe'mokizmi hankavefintira nagu'vazio. 8 Ana vahe'mo'za havi
nanekege nehu'za, ana hugahune hu'za huvempa nehazanagi,
ana zana osugahaze. 9 Anumzamoka kasefa zagame hu'na
kagika'a erisga hugahue. Nagra 10ni'a nofi'ma me'nea hapu
zavena nehe'na, zagamera hu'na kagika'a ahentesga hugahue.
10 Kagrake'za kini vahera hankavea zaminke'za, ha' vahe'zamia

hara huzamagate nerazagenka, eri'za vaheka'amo'na Deviti'na
nagu'vazinke'za ha' vahe'nimo'za bainati kazinura nahe ofri'naze.
11 Ha' vahenimokizmi hankavefintira nagu'vazinka ete navro.
Ana vahe'mo'za havi nanekege nehu'za, ana hugahune hu'za
huvempa nehazanagi, havige nehaze. **12** Tagri ne' mofavre
naga'mo'za zafamo ame huno hageno mareneriaza hu'za, ame
hu'za ra ome hanaze. Mofa'ne nagatimo'za kini vahe'mofo noma
vazisgama nehia zafaraminte'ma avasasema hunentaza kna
hanaze. **13** Ruzahu ruzahu ne'zamo, ne'zama nentona nompina
avitesie. Sipisipi afu kevutimo'za rama'a tauseni'a kasenente'za,
rama'a 10 tauseni'a kasentesageno sipisipi afu'ma nentona
keginamo'a avitesiegu nave'nesie. **14** Hagi bulimakao afutimo'za
rama'a zantmi eri'za esaze. Tagri kumamofo have keginafintira
ha' vahe'mo'za kama hage'za mareriza vahera zamavare'za
kina ome huozmantesaze. Ana hanigeno ran kumatimofo kuma
amunompima, knazama fore hige'za zavi krafama nehaza
zana omanesie. **15** Iza'o e'inahu asomu'ma erisania vahe'mo'a
muse hugahie. Ana nehanigeno Ra Anumzamo'ma zamagri
Anumzama manisia vahe'mo'za muse hugahaze.

145 Anumzamoka nagri kini mani'nanku hu'na Kagrira husga
hugantegahue. Ana nehu'na maka zupa, Kagri kagia ahentesga
huvava hugahue. **2** Maka kna Kagrira husga hunegante'na,
kagia erisga hu vava hugahue. **3** Ra Anumzamo'a agrake'za
tusi'a Anumza mani'neankino, agrake'za ra agia erigara hu'ne.
Ana hu'neankino agrake'za tusi'a Anumzana mani'neankita
Agrira rezaganeta kegara osu'none. **4** Vahe'ma fore hu anante
anante'ma hu'za vanafina, Kagrama hankave eri'zama erifore'ma
hu'nana zamofo agenkea zamasami anante anante hu'za nevu'za,
kagri hankavegura huama hu'za vahera zmasamigahaze. **5** Kagri

hihamu hankavegu'ene, knare'nare eri'zama eri'nana zankura,
nagesa antahintahi hugahue. **6** Kagrama hankave eri'zama
eri'nana eri'zamofo agenkea vahe'mo'za hugantu hugama
hu'za nentahinage'na, tusi'a Anumza mani'nane hu'na vahera
huama hu'na zamasamigahue. **7** Rama'a knare'nare kavukvama
hu'nana zankura maka vahe'mo'za huge antahige nehu'za, fatgo
kavukva zankura zagamera nehu'za musenkase hugahaze. **8**
Ra Anumzamo'a knare avu'ava huneranteno asunku hunerantea
Anumzankino, ame huno arimpa oheno, vagaore mevava aesi
zanteti avesinerantea Anumza mani'ne. **9** Ra Anumzamo'a
maka vahera knare avu'avaza hunezamanteno, maka zama
tro'ma hunte'nea zantamina asunku hunezamantea Anumza
mani'ne. **10** Ra Anumzamoka maka zama tro'ma hunte'nana
zantamimo'a Kagrira humuse hunegantesage'za, kamage'ma
nentaza vahe'mo'za Kagri kagi'a husga hugahaze. **11** Ana
nehu'za kagrama maka mopama kegava hunana hihamu masa
zanka'agura nanekea nehu'za, hanaveka'agura huama hu'za
vahera zamasamigahaze. **12** Kagrama hankave eri'zama eri'nana
zamofone, Kagrama kegavama hunana hihamu hankavea
maka vahe'mo'za ke'za antahi'za hugahaze. **13** Kagrama kini
maninka kegavama hunana kuma'mo'a vagaore mevava huno
vugahie. Mika knafima forehu anante anante'ma hu'za vanaza
vahe'enena kegava huzmantenka vugahane. **14** Tanafa'ma
hu'za masaza vahera Ra Anumzamo'a zamaza nehuno,
knazamo'ma rentrakoma nehia vahera zamazeri sga nehie. **15**
Maka zagamo'za kagrite zamavua antete'za amuhara nehu'za
mani'nazagenka, kna fatgore ne'zana zaminke'za nenaze. **16**
Maka zagagafamo'za ne'zama nesaza zanku'ma nehazagenka,
Kagra kazana rutarenka ne'zana zaminke'za nezamu nehaze. **17**

Maka zama hifina Ra Anumzamo'a fatgo avu'ava zanke nehuno, asunku huranteno ana maka zana hunerante. **18** Tamage zamagu zamagesa regati'ma Ra Anumzamofonku'ma kezamatiza vahetera, Agra erava'o nehie. **19** Agri'ma koro'ma hunte'za amage'ma nentaza vahe'mo'zama nazankuro atupa'ma nehaza zana nezamino, zavi krafama nehzana nentahino, zamaza huno zamagu nevazie. **20** Ra Anumzamofoma avesinentaza vhahera, Agra kegava hunezamante. Hianagi havi zamavu zamava'ma nehaza vhahera, zamazeri havizantfa hugahie. **21** Nagra Ra Anumzamofo agi'a ahentesga hugahuanki, maka zantamima agra azampinti'ma tro'ma higeta ama mopafima mani'naza zantamimota, ruotage'ma hu'nea agi'a ahentesga huvava huta vugahaze.

146 Ra Anumzamofona agi'a ahentesga hanune. Nagra maka nagu'reti hu'na Ra Anumzamofona agi'a ahentesga hugahue. **2** Nagrama kasefa'ma hu'na manisanua kna'afina Ra Anumzamofona agi'a ahentesga hugahue. Nasimu'ma eri'na manisanua kna'afina, Anumzanimofontega zagamera hu'na agi'a erintesga hugahue. **3** Ama mopafima mani'naza kva vahe'mo'za taza hugahaze huza amuhara osiho. Na'ankure zamagra amne vahetfa mani'nazanki'za, tamaza hu'za tamagura ovazigahaze. **4** Hagi ana vahe'mo'zama frizageno'a zamavufagamo'a mopanese. Anama friza zupa, nazano hugahune hu'za antahintahima retroma hu'naza zamo'a amne zankna nehie. **5** Hianagi izano Jekopu Anumzamo'ma azama nehania vahe'mo'a muse nehanigeno, Ra Anumzana Anumzama'arema amuha'ma nehania vahe'mo'a muse hugahie. **6** Anumzamo'a monane, mopane, hagerine, maka zantamima anampima me'nea zantamina agrake'za tro hu'ne. Ana hu'neankino nazano hugahuema huno huvempama hu'nea

zana huvava huno nevie. 7 Vahe'mo'za knama zami'za zamazeri havizama nehaza vahera, fatgo huno refko hunezamanteno, ne'zanku'ma zamaga'ma netaza vahera ne'zana nezamie. Ana nehuno Ra Anumzamo'a kinafima mani'naza vahera katufe zamantege'za fru hu'za nemanize. 8 Zamavu'ma asuhu'nea vahera Ra Anumzamo'a zamavua eri hari nehuno, knazamo'ma zamazeri fenkami atre'nea vahera zamazeri sga nehuno, fatgo avu'ava zama nehaza vahera avesi nezamante. 9 Meg'iati ru vahem'a tagranema enemaniza vahera Ra Anumzamo'a kegava hunezmanteno, kento a'nane zagane megusa mofavre nagara zamaza nehie. Hianagi havi avu'ava zama nehaza vahem'a zama nazano hunaku'ma retro'ma haza antahi'zana eri savri nehie. 10 Ra Anumzamo'a kinia mani vava huno vugahie. Saioni vahemota Anumzamo'a fore hunante anante'ma hu'za vanaza vahetera kinia manivava huno vugahianki, agi'a ahentesga hanune.

147 Ra Anumzamofona agi'a ahentesga hanune. Anumzantimofoma zagamema huta agi'ama ahentesga hanuna zamo'a knare hu'ne. E'na hu'neankino agri agima ahentesga hu avu'ava zamo'a so'e huno knare zantfa hu'ne. 2 Ra Anumzamo'a Jerusalemi kumara ete eri so'e huno ki'ne. Ana nehuno Israeli vahem'a zamavare'za ru moparegama ome kinama huzmante'naza vahera ete ome zamavareno eme eritru nehie. 3 Knazamo'ma higeno zamagu'amo'ma havizama hu'nea vahera ete zamazeri so'e nehie. Ana nehuno namuma zamare'nea zana anaki nezamante. 4 Anami monafima hanafi tamima me'neana agra ko keno antahino nehuno, mago mago hanafi'mofona agi'a amitere hu'ne. 5 Tagri Ra Anumzamo'a ra huno hankavenentake Anumza mani'ne. Ana hu'neankino Agri antahi'zamo'a mareri agatereneankita, mago'zantera erinteta, e'na hune huta kegara

osu'none. 6 Zamavufgama anterami'za nemaniza vahera Ra Anumzamo'a zamazerisga nehie. Hianagi havi avu'ava zama nehaza vahera kugusopafi zamazeri netre. 7 Zgame huta Ra Anumzamofona susu henenteta humuse huntaho. Hapu zavena neheta zagamera huta, Ra Anumzana tagri Anumzamofona agi'a ahentesga hiho. 8 Anami monafina higeno hampomo'a rufiteno enevigeno, kora huntogeno ama mopafina kora runentegeno, agonaramimpina trazamo'a hageno marenerie. 9 Agra afi zagagafa ne'zana nezamino, kotkoti namamofo anentamo'zama ne'zanku'ma krafama nehazageno'a ne'zana nezamie. 10 Ra Anumzamo'a hosi afu'mofo hankavegu'ene, mago vahe'mofo hanavegura antahinomie. 11 Hianagi Agriku'ma koro nehu'za, vagaore mevava avesi zanku'ma amuha'ma nehaza vaheku, Ra Anumzamo'a musena nehie. 12 Jerusalemi kumapima nemaniza vahe'mota Ra Anumzamofona agi'a ahentesga hiho. Saioni agonafima nemaniza vahe'mota, tamagri Anumzamofona agi'a ahentesga hiho. 13 Na'ankure rankumatamimofo kafante'ma eri rusima nehaza ainia agrake'za eri hankavenetie. Ana nehuno ana kumapima tamagri mofavre naga'ma mani'nazana asomu hunezmante. 14 Tamagri mopamo'ma ometre eme atrema hu'nerega agrake'za kegava higeta fru huta nemanizageno, knare zantfama hu'nea witia tamigeta neramura nehaze. 15 Agrama mago zanku'ma ama mopafima keagama hutregeno'a, ame huno ana nanekemo'a ama mopafina eneramie. 16 Ama mopafina aisia atregeno eramino refinetegeno, tanefa ruherafi atreaza huno aisia ruherafi atregeno mopa refi'nete. 17 Agra monafintira have komopa ko atregeno eneramie. Anazamo higeno tusi zasi nehiankino, mago vahe'mo'a ana zasipina omanigahie. 18 Hagi henka keaga nehigeno, keaga'amo

ana aisia eri ze'ze hutegeno, zaho huntegeno eno ana tina
eme ahesageno vu'ne. **19** Agra naneke'a eri ama huno
Jekopuna nesamino, kasege'ane tra ke'anena Israeli vahera
huama huno zamasami'ne. **20** Amanahu avu'ava zama tro'ma
huzmante'neana, ruga'a mopafi vahe'ma agri kasegema
ontahi'naza vahera anara huozmante'ne. Ra Anumzamofona
agi'a ahentesga hanune.

148 Ra Anumzamofona agi'a ahentesga hanune. Amenagame
monafinkatira Ra Anumzamofona agi'a ahentesga nehinkeno,
anami monafintira, Ra Anumzamofo agi'a ahentesga hiho. **2**
Maka Agri ankeru nagamota Anumzamofo agi'a ahentesga
nehanageta, monafima maka Agri sondia vahe'ma nemaniza
vahe'mota agi'a ahentesga hiho. **3** Zagemokane ikamokanena
Ra Anumzamofo agi'a ahentesga nehikeno, remsama nehaza
hanafi'mota Anumzamofo agi'a ahentesga hiho. **4** Anami
hampoma agatereno onagame'ma me'nea monaramimo'za
Anumzamofo agi'a ahentesga nehanage'za, hampoma agatereno
onagame'ma me'nea timo'enena Anumzamofo agi'a ahentesga
hugahie. **5** Hagi ana zantamimo'za Ra Anumzamofo agi'a
ahentesga hiho. Na'ankure agra fore hiho huno hige'za fore
hu'za me'naze. **6** Agra amare megahaze huno nonkuma'ma
huzmantenere manevava hu'za neaze. Ana hu'neankino agrama
huama'ma hu'nea kemo'a, mevava huno vugahie. **7** Maka ama
mopafi zantamimota Ra Anumzamofo agi'a ahentesga nehinkeno,
hagerimpima tusinasi zagama nemaniza zagamotane, hagerimofo
amefenkamema nemaniza zagamota Ra Anumzamofo agi'a
ahentesga hiho. **8** Hagi kopasi'namokane komopa ko'mokane,
aisimokane ko'mokane, Anumzamofonkea amage anteho. **9** Maka
ranra agona'motane, ne'onse agona'motane, rgama renentaza

zafamotane, maka sida zafa'motane, **10** afi zagagafamotane,
vahe'mo'zama kegava nehaza zagagafamotane, tamasagu
regati'ma regraromaheta vanoma nehaza zaga kafamotane,
hareta vanoma nehaza nama'motane, **11** ama mopafi kini
vahetamine, maka ama mopafi vahe'ene, ugagota kva
vahe'motane, keagama refkoma nehaza kva vahe'motane,
12 nehazave'motane mofa'nemotane, ozafamotane, ne'onse
mofavre nagamotanena Ra Anumzamofo agi'a ahentesga hoho.
13 Maka zantamimo'za Ra Anumzamofona agi'a ahentesga
hugahaze. Na'ankure agri agimo'a rankrerfa hu'neankino, agri
hihamu hankavemo'a monane mohanena agatereno onagame
mareri'ne. **14** Agra vahe'a antahizamino hankavea nezamie.
E'inama hige'za agri amage'ma nentaza vahe'mo'za agi'a
ahentesga nehaze. Israeli vahe'ma agri tvaonte'ma nemani'naza
vahe'mota, Ra Anumzamofona agi'a ahentesga hoho.

149 Ra Anumzamofona agi'a ahentesga nehuta, Ra
Anumzamofontega kasefa zagame hanune. Agri'ma amage
nentaza vahe'motama atruma hanafina zagamera huta
Agri agi'a ahentesga hoho. **2** Israeli vahe'mota tamagri'ma
tro'ma huramante'nea Anumzamofonkura muse huntegahaze.
Jerusalemi kumapima nemaniza vahe'mota, kini ne'tamigura
muse huntegahaze. **3** Tamagra Agri agia ahentesga
huta avoa nehageta, nase'nasepane hapu zavenanena
aheho. **4** Na'ankure Ra Anumzamo'a vahe'agura tusiza
huno muse hunezmanteankino, zamavufagama anterami'za
nemaniza vahera zamaza hige'za ha' vahe'zamia hara
huzmagate'neraze. **5** Anumzamofo amage'ma nentaza
vahe'mota, ha'ma hugatemaneraza zankura muse hugahaze.
Ana nehu'za nozamifima mase'naku'ma nehu'za ranke hu'za

muse zagamera hugahaze. 6 Zamagipintira Anumzamofo agi'a ahentesga nehu'za, tarega kazigama asane'nea bainati kazina zamazampi eri'ne'za, 7 maka ama mopafima mani'naza vahera nona hu'za hara hunezamante'za, zamagrama hunenaza zamavu'zmava zantera nona hu'za vahera zamazeri haviza hugahaze. 8 Ana nehu'za kini vahezmia seni nofinu kina renezmante'za, kva vah'e'zaminena ainireti tro hu'naza seni nofiteti kina rezmantete'za, 9 ke'ma refkohu vah'e'mo'zama e'inahu knaza erigahaze huno'ma hu'nea kante amage ante'za, ana vahera knazana zami'za zamazeri haviza hugahaze. Ana hu'neanki'za Anumzamofoma amage'ma nentaza vah'e'mo'za, knare zamagi erigahaze. Ra Anumzamofona agi'a ahentesga hanune!

150 Ra Anumzamofona agi'a ahentesga hanune. Ra Anumzamofona Agri nom'a'fi eta, agi'a ahentesga hanune. Agri hihamu hankavema erinte ama'ma nehia mona kumapina, Agri agi'a ahentesga hiho. 2 Agrama hankavenentake eri'zama eri'nea zamo'a, knare huno so'e zantfa hu'neanki' agi'a ahentesga hiho. 3 Ufena nereta Anumzamofo agi'a ahentesga nehuta, laeriema nehaza zavenane hapuema nehaza zavenane neheta, Anumzamofo agi'a ahentesga hiho. 4 Nase'nasepa neheta zagine huta avoa nehageta, kita zavena neheta konkenenareta Anumzamofo agi'a ahentesga hiho. 5 Tare kapa tamazampi eri'neta runkasase hinkeno, agasasa neranigeta Anumzamofo agi'a ahentesga hiho. Anazana runkasase'ma hanageno ra agasasama neranigeta, Anumzamofo agi'a ahentesga hiho. 6 Maka zagama tamasimu'ma erita nemanisaza zagamota, Ra Anumzamofo agi'a ahentesga hugahaze. Ra Anumzamofo agi'a ahentesga hanune.

Mani'zanti Mofo Nanekee

1 Ama avontafera knare nomanizamofo ke Israeli vahe'mokizmi kini ne' Solomoni, Deviti nemofo krente'ne. **2** Ama knare nomanizamofo ke'mo'a, knare antahi'za neramino, tavumro ante ke neramino, taza hinketa oku'ama me'nea kea keta antahita hugahune. **3** Knare antahintahi neramino, tazeri fatgo nehanigeta, fatgo avu'ava nehuta, fatgo huta refko nehuta, maka vahe'mofona mago avamente knare avu'avara huzmantegahune. **4** Hagi ama ana nanekemo'a, antahi'zama'a omene'nesia vahera knare antahintahi nezamino, ne'mofara antahiza nezaminke'za knare hu'za maka zana refko hugahaze. **5** Knare antahintahima eri'nesimo'a, ama nanekea nentahinkeno rempi hunemina, mago'ane ama' antahi'zana e'nerinkeno, antahi ama'ma hania ne'mo'a, avumro kea erigahie. **6** Ama nanekemo'a zamaza hina, knare antahintahima eri kene, avame kea antahi ama' nehuta, antahi'zane vahe'mo'zama hu'naza kene, ruzahu ruzahu fraki kea erigahaze. **7** Anumzamofonku kore huntenu agorga'a manizana, antahi'zama eri'zamofo agafa'a me'ne. Hu'neanagi neginagi vahe'mo'za knare antahi'zane avumro kegura zamagena humigahaze. **8** Mofavre'nimoke, negafa'ma kavumro kema hania kea amage nentenka, negrerama rempima hugamisia kea ha'ontagio. **9** Ana kavumro kemo'a, avasase zanu anunte fetori anteankna nehuno, anankempi pasesunofi anteankna hugantegahie. **10** Mofavre'nimoke, kumi vahe'mo'za kefoza huogu kavazuma hanazana, ana kefozana osutfa huo. **11** Tagrane egeta frakineta hazenkezmi omne vaheku ome zmahamnenno hnagenka, ovutfa huo.

12 Fri vahe kumamo'ma vahe'ma zamasgahu nevaziankna huta, zamasimuma eri'za mani'haza vahera zamahe frisune.

(Sheol h7585) 13 Mika zago'amo mareri zantamima zamaheta
hanaresuna zantamina refko huta nontifi eri antevi'neteta, 14
musufama erisuna zagoa refko hugamigahunanki, tagrane
enoma hanagenka, 15 mofavre'nimoke, zamagranena ovutfa
huo, zamagrama vanarega ovuo. 16 Na'ankure ame hu'za
kumira nehu'za, vahera zamahe'za korana eri neragize. 17
Namamo'ma negesigenka krifu anaginte'sanana, ana namamo'a
krifufina ohenigeno, krifumo'a amnezankna hugahie. 18 Anahu
kna hu'za, vahe'mo'za ruvahe zamahe'naku hazanagi, zamagra'a
zamahe nefrise. 19 E'inahu kanteti'ma musufama fenoma
erizamo'a, kahe frigahie. 20 Knare antahintahizamo'a mago
a'kna hu'neankino, kama vu'za e'za nehazafi oti'neno kezanelino,
vaher atru hu'za nemanizafi ranke huno kezatino kea nehie. 21
Ana a'mo'a tusi kereso nehaza kamofo atuparegati kezatino,
rankumapi ufre kafante mani'neno kea nehie. 22 Antahiza omane
vahe'motma nama'a zupa musena hutma antahizantmi omane
vahera manigahaze? Kiza zokago kema knare antahizanku'ma
nehzazana, taganetma omanigahafi? 23 Nagrama i'oma
hugantoa kema amage'ma antesanke'na, nagu'a neramina,
knare antahi'zani'a rempi huramigahue. 24 Hianagi kema
nehugenka antahi nonaminka, kagrite etragote'za nehugenka
antahi nonamine. 25 Kavumro'ma negantogenka, keni'a
nontahinka, osuo huazama nehanku, 26 ana nona'a kagrite'ma
esia hazenkegura, kagiza regahue. Tusi'a hazenke zamo kazeri
kagateresige'na, Nagra kagiza regahue. 27 Zahoko'mo hiaza
huno hazenke zamo'ma tamazeri agaterenko, hankro zaho'mo
hiaza huno tinko'mo refitege, hazenke'zamo ene kore'zamo
tmagritera egahie. 28 Ana hanige'za zamagra zamazama
hanugura kezatigahazanagi, nagra kenona huozamigahue.

Zamagra nagrikura hakresnazanagi, onagegahaze. 29 Na'ankure zamagra antahi'zama erizankura zamesra hunente'za, Ra Anumzamofona kore hunte zamagesa ontahi'naze. 30 Nagrama zamavumro antoankea erinetre'za, zamazeri fatgo huankea amage onte'haze. 31 E'ina hu'negu zamagrama hu'nesaza zamuzmamofona raga'a nesageno, oku'ma hu'naku retroma hu'nesaza zamavu'zmavamofo nona'a havi miza erigahaze. 32 Antahintahizmi omane vahe'mokizmia, neginagi zamavu'zmavamo zamahe nefrinkeno, knare hu'none hu'zama hanaza zamo, zamahe frigahie. 33 Hianagi aza'o nagri kema antahisimo'a, hazenke e'ori knare huno nemanino, havizankura korora osu mani fru huno manigahie.

2 Mofavre'nimoke, Nagri kema antahinka kasegenima eri kagu'afi nentenka, 2 knare antahintahire kagesa neminka, kagu tumokareti hunka ama' antahi'zana e'herinka, 3 kagrama knare'zane havizanema refko hu antahintahigu'ene, ama' antahizanku'ma kezama netinka, 4 silvagu'ma hiankna hunka knare antahizankura nehakrenka, marerisa zantami frakinte'nea zanku hakreankna hunka hakresunka, 5 Ra Anumzamofoma kore hunteno agoragama manizana keama nehunka, Anumzamofo antahi'zana hakrenka erifore hugahane. 6 Na'ankure Ra Anumzamo'a knare antahiza neramigeno, Agri agipinti antahi'zane, antahi ama'ma huzamofo kea ne-e. 7 Fatgo vahe'mofona knare antahiza ante avitenenteno, makazampima mani fatgoma huno mania vahe'mofona, Agra hanko zamigna nehie. 8 Na'ankure Agrake fatgo vahe'mokizmia kama vano hu'zazmifina kegava nehuno, zamagu tumoteti hu'za amage'ma antaza nagara kavu'za zamifina zamagu nevazie. 9 Ana nehunka fatgo avu'avazane, fatgo huno ke refkohu avu'ava ene, maka vahe'ma mago avamente

avu'ava'ma hunte'zana antahi ankeregahane. **10** Na'ankure knare antahintahimo kagu'afi unefrenigeno, antahi'zamo'a, kazeri muse hugahie. **11** Knare antahizamo'a kva hugante'nenigeno, ama' antahintahimo'a kaguvazigahie. **12** Knare antahizamo'a kefo avu'avaza'ma nehu'za, akrehe krehe zmageru'ma neraza vahepintira, kaza huno kagu'vazigahie. **13** Iza'o fatgo avu'avamofo kama atremo'a, hani avu'avamofo kampi nevie. **14** Iza'o knare osu avu'ava'ma musema huno nehuno, akrehe krehe kefo avu'avazankuma muse nehimo'a, **15** kama vu'zama'amo fatgo osu'neankino, havige vahe manine. **16** Arumofo a'mo monko'za huno vano nehania a'mo, nagrane eno huno kazeri savri hu'naku hanianagi, ana knare antahintahi'zamo'a kahokeno kaguvazigahie. **17** Ana a'mo nevena netreno, kahefazniare Anumzamofo avure'ma huhagerafina'a huvempa kea amefi hunemie. **18** Na'ankure ana a'mofo nompima ufre'sanana, fri vahe'mokizmi kumate vu'nea kampi vugahane. **19** Agrite'ma vimo'a eteno omeno, knare asimu eri kana onkegahie. **20** E'ina hu'negu knare vahe'mo'ma nevia kante nevunka, fatgo avu'ava'ma nehia vahe'mofo kante vugahane. **21** Na'ankure hazenkezmi omane vahe'mo'za ana moperera nemani'nesage'za, maka zampima mani fatgoma nehaza vahe'mo'za ana mopare manigahaze. **22** Hianagi kefo avu'ava'ma nehaza vahe'mokizmia ana mopafintira zamazu hunetreno, fatgoma hu'za omanisaza vahera zamahe fanane hugahie.

3 Mofavrenimoke, nagrama rempima hugamua kea kage'okario. Hianagi kasegeni'a kagu'tumote erintegeno meno. **2** Na'ankure kaza nehanigenka, karimpa frune zaza kafuzage knare hunka maninka vugahane. **3** Atregeno vahe'ma knare kavukvama huntezamo'ene, tamage avu'avamo'a katreno

ovino. Hagi knankempinofi kintegeno me'ne'na kagu'tumote
avonkrentegeno meno. 4 E'ina'ma hanankeno'a, Anumzamo'ene
vahe'mo'zanena kavesinegante'za, husga hugantegahaze. 5
Anumzamofona mika kagu'areti hunka antahi'neminka, nagrani'a
antahintahiretira makazana hugahue hunka osuo. 6 Hanki
mikazama hanampina antahiminka agihanta nevazigeno, vanana
kana azeri ante fatgo hugantegahie. 7 Kagraka'a antahizankura
knare hu'ne hunka eri antesga osunka, Anumzamofonku
koro huntenka agorga'a nemaninka, havi avu'ava zana
kamefi humio. 8 E'i ana'ma hanankeno'a, kavufa kazeri
neganamreno, zaferina ka'a kazeri hanavetigahie. 9 Feno
zanka'anu'ene hozakafima pusama nenama hania nezanteti'ene
Ra Anumzamofona aminka, agia erintesga huo. 10 Ana
hanankeno Anumzamo'a kaza nehina nezama ante nonka'amo'a
aviteno herafi neramina, waini tintafemofona kasefa waini timo
aviteno tagiramigahie. 11 Mofavre'nimoka Ra Anumzamoma,
kazeri fatgo hania kegura, kamefira huomige, kazeri fatgoma
hunaku kazeri akorisiana karimpagna osuo. 12 Na'ankure
mago ne'mo'ma mofavre'ama avesima nenteno azeri fatgo
nehiankna huno, Ra Anumzamo'a avesimantea vahera azeri
fatgo nehie. 13 Iza'o knare antahintahigu hakreno e'nerino,
antahi ama'huzama erisimo'a, muse hugahie. 14 Na'ankure ana
knare antahintahimofona mizama'amo'a, silvaretima e'neriza
zagoa agateneregeno, goliretimma e'neriza zagoa, mago'ane
agatere'ne. 15 Knare antahintahimo'a mizama'amo mreri'nea
havea agatere'ne, mago'a zankuma nentahinka kavesi kavesima
nehana zantamina ageterene. 16 Zaza knama maninka
vuzamo'a, knare antahintahimofona tmaga azampi megeno,
hoga kaziga azampina fenone, agi husaga hu'za me'ne.

17 Knare antahintahimofo avu'ava'ma huzamo'a, krimpafru
nehunka muse hugahane. **18** Iza'o ana knare antahintahima
azerimo'a, asimu eri zafagna hu'neankino, agri avesizama
azeri hampo'na hanimo'a muse hugahie. **19** Ra Anumzamo'a
knare antahi'zama'areti, ama mopamofo tra'a erifore nehuno,
antahi ama' hu antahi'zama'areti mona eri fore hu'ne. **20**
Agra'a antahizanteti higeno timo'a mopa agu'afintira katati huno
marerigeno, hampomo'a atakora nerie. **21** Mofavre'nimoke
atregeno knare antahintahizane, havizane knare zanema
antahinka refkohu kavukva'zana kagripintira fanane osina,
kegava huo. **22** Hagi ana antahizamo'a kasimu kaminigenka
za'za kna nemaninankeno, asunku'zamo'a knankempi kavasese
huganteaza hugahie. **23** Ana nehunka kama vananana, kva
hugantenkenka traka osunka, knare hunka vugahane. **24** Kavu'ma
masesanana kore osunka, haganentake kavu masegahane. **25**
Ame huno hazenkema esigenka kagra korera nosunka, kefo
vahé'ma knazamo'ma azeri haviza hanigenka, korera osuo. **26**
Na'ankure Ra Anumzamo kagrira kegava hugante'nesigeno,
kagafina krifumo'a aze'origahie. **27** Kagrama azama huga
kankamunte'ma mani'nesunka, atupa'ma hu'ne'naza vahera
amané aza huo. **28** Tva'onkare nemani'simofona amiga'ma
hu'nesunka, oki ege'na kami'neno hunka osuo. **29** Tva'onkare
nemanisaza vahera hazenke zamikea retro osuo. Na'ankure
kagrikura taza hugahie hu'za antahinegamize. **30** Kegafa'a
omaneno, mago kefozama huogante'nesnigenka, mago nera
azerinka keaga huonto. **31** Hazenkema hanaza vahé'mokizmi
zamavu'zmavakura kegasane nosunka, zamagrama hanaza
zamavu'zmavara osuo. **32** Na'ankure Ra Anumzamo'a
akrehe krehe zamavu'zmava'ene vahekura avesra huno

agote'nezmanteno, fatgo zamavu'zmava'ma nehaza vaheku
avesi'nezmante. 33 Kefo zamavu'zmava'ma nehaza vahe'mokizmi
naga'zmimofona, Ra Anumzamo'a kazusi hunezmante. Hianagi
fatgo ne'mofo nagapina asomu hunezmante. 34 Vahe'mokizmima
azanava kema huzmante vahe'mofona, Ra Anumzamo'a
agri'enena azanava ke huntegahie. Hianagi anteramino
manimofona, asunku hunente. 35 Knare antahi'zane vahe'mo'a, ra
agi erigahianagi, neginagi antahi'zane vahe'mo'za, zamagazegu
hugahaze.

4 Mofavre naga'nimota, negafanama rempi hugamisua kavumro
kema kagesa antahi ankeresunka, antahi ama' hu antahintahia
erigahane. 2 Nagra knare antahiza negamuanki, rempi
hugamisua kea kamefira huonto. 3 Nagrama nenfa nompima
onensa mofavrema mani'norera, anta'nimofo magoke mofavre'a
mani'nogeno kegava hunante'negeno, 4 amanage huno nenfa'a
rempi hunami'ne, Mika kema kasamisua kea kagu tumote
erintenka azeri hampo'na nehunka, kasegeni'a amage'ma
antesunka, knare hunka manigahane. 5 Knare antahintahia
erio, antahi amahu antahi'zana erio, kasamisua nanekea
kagera okaninka, kamagenaa huontetfa'za huo. 6 Knare
antahintahimofoma kamagenama huontesankeno'a, kagu
nevazina avesima antesankeno'a, kegava hugantegahie. 7
Knare antahintahil'zana raza me'neanki erio. Hagi maka'zana
erigahananagi agatere'nea zana knare antahi'za erio. 8
Knare antahintahi zana azerisga nehugen, kagrira kazeri
sga hino, agri'ma azeri akonama hanankeno'a, kagrira ran
kagi kamigahie. 9 Ana antahi'zamo'a, rimpa fru'zanu konariria
kasenire huneganteno, kinimofo asinentike fetori kasenire
resi hugantegahie. 10 Mofavrenimoke, nagrama huankema

antahitenka, ana kema avaririnka amage'ma antesunka, rama'a kafuzage maninka vugahane. **11** Knare antahizampi vuogu nagra kazeri fatgo nehu'na, knare fatgo kante kavare'na nevue. **12** Ana kantema kagama renakerenka vananana mago zamo'a asevazi ogantena, triginaku'ma hananana tanafara osugahane. **13** Kagrama hananegu'ma amama kasamua kea otrenka azeri hanavenetinka atregeno ovino. Na'ankure e'i ana kema huogu'ma rempima hunegamua kemo'a mani'zanka'agna hugahie. **14** Havi kefo avu'ava hania vahe'mofo kantera ovunka, haviza huno kefoza hu'ne'nia vahe'mo hania zana ovaririo. **15** Ana kantera ovunka, atrenka rukagesenka vugahuema hantega vuo. **16** Na'ankure zamagra kefo avu'ava zama osu'nesu'za zamavura ovase'za mani'ne'za kefozana hute'za zamavura masegahaze. Vahera zamazeri haviza hutesuzage, zamavura vasegahaze. **17** Kefo avu'ava'ma hu'zana, breti neankna nehu'za, hazenkema hu'zana waini ti ne'za negi neankna nehaze. **18** Hianagi fatgo vahe'mofo mani'zamo'a, zagemo zahufa nehanatino remsa hume ne-eno, eme remsa huno feru aseankna nehie. **19** Hianagi havi avu'ava ene vahe'mofo mani'zamo'a, hani hiankna hu'neanki'za, ana vahe'mo'za na'amo zamazeri tanafa nehie nonkaze. **20** Nagrama huankere mofavrenimoka kagesa antenenka, mika keni'a antahi ankero. **21** Hagi ana nanekea kavure antenenka negenka, ana mika kea kagu'afi erintenka kegava huo. **22** Na'ankure iza'o ana kema erino agu'afima antemofona, mani'zama'amo'a knare hanigeno, mika avufgamo'a knare hugahie. **23** Ana mika'zana hugahananagi agatere'nea zama hananana, antahi zanka'a kegavahu so'e huo. Na'ankure e'i tamage asimu erisana tinkampui me'ne. **24** Havigema hu'zana netrenka, krunagema kagipinti'ma atiramizankura atregeno afete

meno. 25 Kavua kegantigama osunka, ke fatgo hunka kavugage kavua kenka vuo. 26 Kagama rentenkama vanana kana kva hu'nenka, kavua kenka nevugen, mika zamo'a kagritera agafa huno eme hanavetigahie. 27 Kagia antifi omerege amafi emerege osunka, kagamo'ma kefo avu'avapima kavareno vezankura kva huo.

5 Mofavrenimoke, knare antahi'zane ama' antahi'zamofo kema kasamisuana kagesa antenka antahi so'e huo. 2 Anama hanunka ama' antahintahire nemaninka, keagama hananana antahintahine vahe'mo'za nehazankna hunka kea hugahane. 3 Na'ankure savri a'mofo agipinti kemo'a, tume rima'amo haga hiakna nehinkeno, agipinti'ma atiramisia nanekemo'a, olivi masavemo fru huno karoro hiakna hugahie. 4 Hianagi refaregama kesanana, ana a'mo'a akahe trazankna nehuno, tare kaziga asane'nea kazinkna hu'ne. 5 E'i ana a'mofo agamo'a fri'zampi uneramino, agama renakereno viazamo'a, fri vahe kerifi nevie. (*Sheol h7585*) 6 Ana savari a'mo'a, asimu'ma erino mani kankura nontahino, kama via kamo'a fatgoa nosianagi antahino keno nosie. 7 E'ina hu'negu mofavrenimota ke'ni'a antahitama, amama tamasamisua kemofona tamagena huomihio. 8 Ana savari a'mofona atrenka ogantu'a nemaninka, nomofo kasama'arera uravao osuo. 9 Anama hananana havi kagi e'nerinka, zahufaf i kasefa vahe mani'nesanke'za, havi vahe'mo'za kazeri haviza hugahaze. 10 Onke'nesana vahe'mo'za hanaveka'a atrenka eri'nanazana, e'nerisageno, knare zantamima amuho hunka eritru huntanesa zantamina ru vahe'mo'za erigahaze. 11 Henkama frinaku'ma hanana knama esigeno'a, krimo'a kavufafina ra nehuno, kazeri zaferinage hinkenka karagi nerunka, 12 anage hugahane, na'a hige'na navumaro kema nenasimige'na, navesra hunente'na,

nazeri fatgo nehige'na, anankea ontahi'noane hugahane. **13**
Nahige'na rempi hunami vahe'mo'zama nazeri kante ante kema
nasamiza vahe'mokizmi kea ontahi'noane hunka hugahane! **14**
Nagra mika vahe zamavurera haviza hu'na keforoe hugahane.
15 Ru vahe'mofo tintetira tina ono, kagra'a tintetike tina no,
e'i a'ka'ane mani fatgo huzanku hu'ne. **16** Amanefina tinka'a
ome tagi atre, eme tagitre osuo. Kagra a'enenke'za maso. **17**
Atregeno kagri a'mofo suzanke meno, aru a'nенена monkozana
osuo. **18** Kasefa'ma mani'eneka e'rinana a'ka'ane muse hunka
mani'negeno, Anumzamo'a asomu hugantegahie. **19** A'ka'amo'a
dia a' afu'mo'ma hiankna huno avesi avesi huno knare zantfa
huneganteanki, amima'amo'a maka kna kavesizana kazeri
knare nehina, kagri'ma kavesi kantenia zamo'a kazeri agrarega
atre'na agri avesi'zampi manigahane. **20** Neve'enema mani
fatgo huno'ma omanisia a'nea mofavre'nimoka ke'negeno
kavufgamo'a oraotino. Atregeno amima'arera kavrenteno kanura
okino. **21** Na'ankure Ra Anumzamo'a miko kama vano hunana,
ke'ankereno refako huno tage'negeta vano nehune. **22** Kefozama
nehia ne'mofona kefo avu'ava zama'amo'a kukomo azeriakna
nehigeno, kumi'amo kina rentegeno nemanie. **23** Agra'a
avesizama kegavama osaniazamo hanigeno frigahie. Rama'a
havizama haniazamo hanigeno, fanane hugahie.

6 Mofavrenimoke, tava'onkare'ma nemanisimo'ma nofi hugahue
hanigenka aza hugahue hananano, rumofonku'ma huvempa
hunka kaza hugahuema hananana, **2** kagraka'a huvempama
hu'nenana kemo'ma kinama regatenigenka, **3** mofavre'nimoka
amana huo, hago agri azampi mani'nananki kagra'a kavufa
anteraminka ana nete vunka, kasunku naneke ome hugeno, kina
reogante'ha amne fru hunka manigahane. **4** Kavu tokora osunka,

kavura omasenenka, ame hunka vuo. 5 Kagra dia afumo'ene namamo enema zagagafama ahe vahe'mofo azampinti ame huno freankna hunka, kagra'a kavufga kaguvazio. 6 Eri'zama e'ori feru vahe'motma kipazuvemoza nehaza zante ome negeta, rempi huta nentahita, knare antahi'zana eriho. 7 Kipazuvemofona kva vahe'zmia omanigeno, zamazeri ante fatgohu kva vahe zamia omanigeno, kvama krizamante kva vahe zamia omani'neanagi, 8 ne'zamo'ma rama'ama fore hianknafina nezama omane knafima nesagura, ne'zana eri atru nehaze. 9 Eri'zama e'ori feru vahe'motma, nama'a zupa tamavura masegahaze? Nazupa masetamavuna segahaze? 10 Osi'agna ko kavura masenka hinkrafora antegenko, osiagna ko mago'ane manifru nehunka, osiagna ko mago'ane kagemazampare kazana antenka manifru hananana, 11 mago zanka'a omanetfa hanigenka, kumazafa vahemo atireti kazerino fenozanka'a erivagareankna hugahane. 12 Mago zazmi omane kefovama nehaza vahe'mo'za akrehe krehe zmageru aruza vano nehaze. 13 Ana vahe'mo'za havigema nehan'za zamavu resukinegami'za, zamagiareti rekapasga nehu'za, zamazanteti'ene zamazankoreti'ene erigu'a hu'za avame'namera hugahaze. 14 Havi avu'avaza'ma erifore'ma hu'zamo'a zamagu'afina aviteneg'e'za, kefo avu'ava zana hakare zupa nehu'za, hazenkea eri hakare hu'za nevaze. 15 E'ina hu'negu e'inahu vahetera hantka huno havizamo'a agritera eno, ame huno azeri haviza hanigeno, ana'ma azeri havizama hania knazama eritre kana omanetfa hugahie. 16 Sigisi'a zama Ra Anumzamofoma agomanetea zantamina me'neanagi, seveni'a zamo'a Ra Anumzamofo avurera kasrino haviza me'ne. 17 Agra avufga erisga nehuno, ru vahe kefenkami atre'zane, havigema hu'zane, hazenke'a omane vahe'ma aheno korama'a eri fegi

atre'zane, **18** havi antahintahizamo antahintahifima mevite'zane,
havi zante'ma ame huno avreno neviazane ave'nosie. **19**
Keagama refkohu trate osu'nea zanku tamage nehie huno havige
hu vahe'ma, zamagipinti'ma krunagema hu'zama atineramia zane,
naga'afima hazenke zama eri hakare nehiazana Anumzamo'a
agonete. **20** Mofavrenimoke, negafa'ma kasamisia kasegea
otretfa nehunka, negrera'ma rempi hugamisia kea amge'anto. **21**
Kagu'afi erintenka azeri antakro maka zupa nehunka, avaseseza
hiankna hunka rugaginka knankempi anakio. **22** Kama vanoma
hananana ana kemo kazeri fatgo nehuno, kavu'ma masesanana
kegava huneganteno, masenesampinti'ma otisanana nanekea
kasamigahie. **23** Na'ankure ama ana kasegemo'a rampe tavikna
higeno, amama rempima huneramia kemo'a masa megeno,
kazeri fatgohu kavumro'ma antea kemo'a, mani'zamofo ka me'ne.
24 Savri a'nemo'za kazeri hava huzankura ana kemo kza nehina,
neve'enema mani fatgo osu savari avu'avazante vanoma nehania
a'mofo haganentake ageru'mo'a kazeri havizana osugahie.
25 Ana a'mofo agi agonagura kegasanea osuge, atregeno
kavazu hunaku'ma avureti'ma revumi'ma hugamisia zamo'a
kavazua osino. **26** Na'ankure savri a'enema mase zamo'a kazeri
kefo regahianagi, vereti a'mo'ma kavazu haniana kasimu ka'a
erigahie. **27** Akru huno neresia tevema hankeri kasumpima
antesanana kukenaka'a azerino ontegahifi? **28** Teve zugu'ma
neresifima kaga vapa'ma vananana, kagagusa teonkasagegosifi?
29 E'ina hukna hugahane, tava'onka'arema nemanisia ne'mofo
a'enema masege, monkozama hananana hazenke erigahane. **30**
Aga'ma netenigeno ne'zama nesia zanku'ma kumzafama erisia
vahera, rama'a tamarimpa kna hunontaze. **31** Hu'neanagi ana
ne'ma azerisageno'a, seveni'a zupa nama'aza eri'neo seveni'a

zupa antegofetu huno miza segahie. Hagi atupa'ma hanuno'a, no'ma'afima ante'nesia fenoma'areti ene mizasegahie. **32** Hianagi ru ne'mofo a'enema maseno monkozama huntlesia ne'mo'a, ana negi' avu'ava zama'areti agra'a azeri haviza nehie. **33** Ahe'zama azeri agazema huntesaza zamo'a, agrite me'nesigeno agaze zamo'a vagaore agrite mevava hugahie. **34** Na'ankure ana a'mofo neve'ma rimpama ahisia zamo marerisigeno nona huno kahenaku esiana asuntagi'zana agripina omanegosie. **35** Ana hazenkere miza antege, rimpia azeri fru hu'naku rama'a zantami eme amisia zamo'a, azeri fru osugahie.

7 Mofavre'nimoke, Keni'a nentahinka, kasegeni'a eri kagu'afi antegeno raza segantena kva huo. **2** Kasegeni'ama amage antesanana kagra kasefa hunka nemaninka, rempima hugamisua zana kavurgama kegava nehanankna hunka kegava huo. **3** Kazeri kagesa hanigu rini kazampi antaniankna hunka kantu kagu'afi tumoka'are krento. **4** Knare antahintahigura nensaro'e nehunka, antahi amahu antahintahigura nenafu'e hunka huo. **5** Ve'ama mani'nesia a'mo'ma kazeri savri'ma hu'zama nehinkeno'a, ana kemo'a kaza nehina rugazigati a'mo'ma kazeri savri hunaku'ma masavenkema nehanigeno'a, anankemo'a kagu'vazigahie. **6** Mago zupa mani'ne'na noniamofona zaho eri kampinti negogeno, **7** mago'a nehzave enevazafina kogeno amuno zamifina, mago nehaza ne'kanora, knare antahi'zama'a omane'nea ne' ke'noe. **8** Agra monko'amofo nontava'onte vu'nea nonkaranka nevuno, ana a'mofo nonte vu'nea kampi ufreto vu'ne. **9** Hanima huku'ma nehigeno hanimo'ma retrako huzahifi anara hu'ne. **10** Ana a'mo'ma kukenama hu'neana monko a'nemo'za nehzankna kukena hu'neno, ana ne'ma masavenkema asamino azeri savri'ma hanigura e'ne. **11** Ana a'mo'a kehagra hagra nehuno,

nontera manirava oheno kankekanke nehige'za, rama vahe'mo'za
ke'za antahi'za hu'naza are. **12** Ana a'mo'a hakarea zupa
kampine, maketi kumapine, maka kaziga mani'neno vene'nema
evazageno'a rezamaheno zamavazuma hanigu negea akino,
13 ana nehaza nera azeri anukiazamo antako hunenteno,
avufga azeri oti'are avunutira negeno anage hu'ne, **14** Nagra
menina narimpa fruma eri kresramana vugeno, huvempama
hunte'noa kemo'a raga re'ne. **15** Hu'negu kagriku hakare'na
kagenaku oregati hago eme kage'na eri forehue. **16** Isipi
vahe'mokizmi pse'ane tavravereti mase tafera hunte'noe. **17**
Hago knare manama vuzantamina miama, aloima, sinamoninu
mase tafepina rutri hu'na ahemna vunte'noe. **18** Hagi egeta
umaseneta, zokagora nereta musena nehanukeno ko'aturanteno.
19 Nenave'a nontera omani'neanki, hago afete ka vu'ne. **20**
Zgomo'a ku'afina avite'negeno vu'neankino kora omegosianki
ama ikamofona amu'nontega esia kante vu'ne. **21** Ana a'mo'a
masavenkema asamino avresia nanekea, rama'a naneke
asami'ne. **22** Ana ne'mo'a ame huno ve bulimakao afu aheku
avazu hu'za nevazankna huno ana a'mofona avaririno vu'ne. **23**
Kevemo'ma tumo'ruragino ahesnia zankura agesa ana ne'mo'a
nontahino, agra namamo hareno krifu anagintepi ufreankna
nehuno, ahe frisia zankura nontahie. **24** Hanki mofavre'nimote,
tamagesa anteso'e hutma nanekeni'a antahiho, **25** Atrenkeno
tamagu'amo'a ana a'mofo kerera amagera ontege, kavareno
agri kantera ovino. **26** Na'ankure ana a'mo'a rama'a vene'ne
zamazeri haviza nehuno, zamahe fri'ne. **27** Hagi ana a'mofo
nona fri vahe kerimofo ranka me'neankino, ana kamo'a fri vahe
kumapi urami'ne. (*Sheol h7585*)

8 Knare antahintahi'zamo'ene antahi amahu antahi'zamo'a mago
a'kna hu'neankino agerura eri antesga huno kezana netie. **2** Agra
kamofo tavaonte me'nea agonare, ka hatana hu'nefi oti'neno, **3**
rankumapi ufre'nea kante ene kampi otineno ranke huno kezana
netie. **4** Ana miko vahe'motmagu kezankea nehue. Vahe'motagu
kezankea nehue. **5** Antahi'zantmi omane vahe'motma eta
knare'ma huno refakomahu antahi'zana emeriho. Neginagi
antahi'zane vahe'motma, eta antahi amahu antahi'zana emeriho.
6 Kama antahiho kema nehuana, na'ankure mareri agatere'nea
zanku nehue, maka nanekema hanua kemo'a, fatgo huno
tamage kege tamasamigahue. **7** Nagra tamage kege nehu'na,
havi kegagama nagipinti'ma hu'zankura nagonete. **8** Maka
nanekenimo'a tamage huno fatgo higeno, krunagene kazaki kema
hu'zana omane'neanki, **9** ana maka kemo'a antahi'zane vahetera
fatgo hu'ne. Ana antahi'zama erinaku'ma hakaza vahetera, fatgo
hu'ne. **10** Nagrama hiho hu'nama rempima huneramua kemo'a,
silva agateregeno, antahi'zama eri'zamo'a, goli'a agatere'neanki
eriho. **11** Na'ankure knare antahi'zamo'a mareri agatere'nea
havea agatereno, kavesi kavesima nehunka razane hunka
nehanazana agatere'ne. **12** Nagra knare antahi'zamo'na knare
huno refakohu avu'ava'zane nemanue, Nagripi antahi'zana
me'neanki'na miko zana nagrake refko hu'na negoe. **13**
Ra Anumzamofonku'ma koro'ma hunte'zana kefo avu'ava'ma
huzankura kagotegahie. Agra'a agima erisga nehuno, avufga ra
nehuno, havi avu'ava nehuno, akrahe akrehe ageru'ma aru'zana
navesra hunentoe. **14** Knare antahi'zama ami'zane, refakoma
hu'zana nagripi me'ne. Nagra antahi ama'ma hu'zane hanavenena
nagri zane. **15** Nagra mani'noge'za kini vahe'mo'za kegava
nehazageno, ugota kva vahe'mo'za fatgo hu'nea kasegea retro

nehaze. **16** Kva vahe'mo'za nagra zamaza nehuge'za, vahera zamavare fatgo hu'za nevazageno, trakere kva vahe'mo'za fatgo hu'za refkoa nehaze. **17** Iza'o nagri'ma avesi nentemofona, nagra avesi nentoe. Hagi nagriku'ma hakre'nimo'a, nagrira nagefore hugahie. **18** Nagripi fenozane, ra agima eri'zana me'ne. Hanavetino za'zate'ma meno vu fenozane, fatgo avu'ava zana nagripi me'ne. **19** Nagrama nezamua zamo'a, golia agatenereno knare silvama mizama nesazazana agatere'ne. **20** Nagra fatgo avu'ava zamofo kante nevu'na, fatgo huno refakoma hu'zamofo kantamimpi nevue. **21** Iza'zo nagri'ma zamavesi nantesaza naga'mo'za, fenona erisanti neharesage'na, nagra feno nozamifina zago'amo'ma mareri zantamina antevi tezamantegahue. **22** Ra Anumzamo'a pusazana nagri nazeri fore huteno, mika'zana henka tro hu'ne. **23** Korapara ama mopama tro osu'neno ese zana nagri huhamprinante'ne. **24** Nagra fore hutogeno henka hagerina tro higeno, kampui tintamimo'a hanatino vu'ne. **25** Ranra agonane, onensa agona forera huno menima antenerera omanenege'na, nagra pusante fore hu'noe. **26** Miko mopane, hofa kokama ama mopafi me'neane, kugusopa nazana henka tro hu'ne. **27** Nagra korapa mani'nogeno monarera mika'zana tro hunenteno, hagerina tro huntegeno, tavumo'ma ometre emetre'ma hutera evu'ne. **28** Nagra ko mani'nogeno anagamua hampona tro hunenteno, tinkampu'ima hanatino tiru'ma umarenia keria tro hu'ne. **29** Nagra korapa mani'nogeno hagerinkura, e'i avamente tirura marenka emetro huno kase hunenteno, tiru'ma maresia mopa trohu'ne. **30** Nagra maka'zama tro'ma hu'nea Ne'mofo tavaonte mani'ne'na, aza nehugenno muse nehige'na maka kna nagranena rama'a muse nehue. **31** Maka kokama tro'ma hu'nea zanku'ene

vahe'ma anampima mani'nea zankura, nagra tusi'a muse
nehue. 32 E'ina hu'negu mofavre'nimoka ke'ni'a antahinamio,
na'ankure nagri navu'nav avaririsaza vahe'mo'za muse
hugahaze. 33 Kavumro'ma antesua kea nentahinka, ama
antahi'zana e'nerinka kavesra huontenka amage anto. 34
Ke'ni'ama nentahi'za, kumanimofo atirami kante'ma knane
knanema naveganente'za, kahani'are'ma navegama nentaza
vahe'mo'za, tusi muse hugahaze. 35 Na'ankure nagriku'ma
hakremo'a, nomaniza hakeno erifore nehigeno, Ra Anumzamo'a
avesinente. 36 Hianagi ha'marenanteno kumi'ma nehimo'a,
agra'a hazenke enerie. Iza'o avesrama hunantemo'a, fri'zamofo
avesinente.

9 Knare antahi'zamo'a mago a'kna hu'neankino noma'a negino,
7ni'a noma azeri oti zafa antreno eriso'e nehie. 2 Hagi ana a'mo'a
ra ne'za retro nehuno, waini tina tro huno nenteno, ne'zama
ante trara retro hunte'ne. 3 Ana huteno eri'za a'ne'a, vahe ome
kehihogu hunezamanteno, agra rankumapina marerisga hunereti
ke'zana atino, 4 tamagi omene vahe'motane refakoma hutama
kezampima atupa'ma hu'nesamota, 5 rukrehe huta nagrite etma
ne'zana eme neneta, waini tima tro'ma hunte'noana eme neho. 6
Hagi neginagi kavukava'ma nehanazana netrenka nomanizanka'a
agafa hunka erintese nehunka knare antahintahizana rempi
hunka nentahinka anazana hunka vuo. 7 Azanava kema
hu vahe'mofoma azeri fatgoma hananana, kema asamisana
kegura huhaviza hugantegahie. Kefo avu'ava'ma nehanimofo
azeri fatgo hu kema hananana, ana kegura kiza zokago ke
hugantegahie. 8 Ana hu'negu azanava ke'ma nehia vahera azeri
fatgo osuo, avesra hugantegahie. Ama' antahi'zane vahe'ma azeri
fatgoma hanankeno'a, avesigantegahie. 9 Ama' antahintahine

vahē avumrora nentegenō mago'ane antahintahifina, amā
huno manino. Fatgo avu'ava zane ne' rempi hunemigeno
antahintahi'afina mago'ane antahi'zana erino. **10** Ramofoma
koro'ma huntēno agorga'ama mani'zamo'a, knare antahi'zamofo
agafa me'ne. Ruotage'ma Hu'nemofo kagra antahi amā'ma
hananana, amā' antahi'za erigahane. **11** Na'ankure knare
antahi'zamo'a hūno, nagriteti za'zakna nemaninka mago'ane
rama'a kafu manigahane hū'ne. **12** Kagrama amā' antahizama
erisanana, knare antahi'zamo'a, mizama'a kamigahie. Kagrama
kiza zokagoma huntēsanana kagra'a haviza hugahane. **13**
Neginagi avu'ava'ma hū'zamo'a mago a'mo rankege nehiankna
hū'neankino, ke antahi'zama'a omanegeno, antahintahizana
agripina omane'ne. **14** Agrira noma'amo'a rankumamofona
mesga hūno me'negenō kahama'are manineno, **15** zamagra'a
erizante'ma vu fatgo hū'za kante'ma agatere'za vu'za e'zama
haza vahekura, kezatino, **16** atrenke'za zamagi omne vahē'mo'za
rukrahe hū'za eho, nehuno refko hū'zama ke amā' osu'naza
vahē'mokizmigura kea nehie. **17** Kumzafama ase'nana timo'a
knare haga hugahie. Hagi ne'zama kagragu oku'ama ne'nana
ne'zamo'a haga hugahie. **18** Hianagi fri'za me'ne hū'za nontahi'za,
ko'ma ana a'mofo nontegama vu'naza vahē'mo'zama fri'naza
zankura nontahize. (*Sheol h7585*)

10 Solomoni knare antahintahi zamofo naneke, erigofa
hūno krente'nea naneke. Ama' antahintahine mofavremo'a,
nefana azeri muse nehie. Hianagi neginagi antahintahine
mofavremo'a, nererana rimpa erihaviza higeno, asuzampi
nemanie. **2** Havi kazigati'ma erisana feno zamo'a kaza
osugahianagi, mani fatgoma hunka mani'zamo'a, fri zampintira
kagu vazigahie. **3** Fatgoma hūno'ma nemania vahera, Ra

Anumzamo'a atregeno agazankura nosie. Hianagi fatgo osu'zama
haza vahera, zamatrenige'za erinaku'ma maragu'zamaneti'za
zana e'origahaze. 4 Feru'ma maniza vahe'mokizmia zamuntera
nomane. Hianagi amuhoma hu'za eri'zama erizamo'za, rama'a
fenoza nentaze. 5 Ama' antahi'zama eri'nea vahe'mo'a,
ne'zamo'ma nenama hianknafina, ne'zana eritru nehie. Hianagi
ne'zama hamareno eri atruhu knafima, avu'ma masea vahe'mo'a
agazegu hugahie. 6 Fatgo vahe'mokizmia zamasenirera
asomu'mo'a, kini fetori antani zamanteankna nehie. Hianagi
kefozama nehaza vahe'mokizmi kemo'a, hazenkezana refi'nete.
7 Fatgo vahe'mo'zama ko'ma knare zama hu'naza zankura,
vahe'mo'za antahinezmi'za muse nehaze. Hianagi kefo zama
nehia vahe'mofona, agi agenke'a omanegahie. 8 Ama'
antahintahine vahe'mo'za, eri'za kea nevaririze. Hianagi tavare
vahe'mo'za, haviza nehaze. 9 Iza'zo mika zampima mani
fatgoma hazza vahe'mo'za, knare hu'za nemanize. Hianagi fatgo
zama osnimo'a, fra'okigahie. 10 Regavumi kavami huzamo'a,
hazenke eri kamigahie. Hagi tavre vahe'mo'za zamagra'a haviza
hugahaze. 11 Fatgo vahe'mofo zamagipinti'ma atiramia kemo'a,
asimu ami tinkapui'mo atiramino eankna nehie. Hianagi kefozama
nehaza vahe'mokizmi zamagipinti'ma atiramia kemo'a, vahe'ma
hazenkema zami zamarimpa he'zana zana refi'nete. 12 Vahe'ma
antahi havizama hu'zamo'a, ha' fra hu'za eri fore nehie. Hianagi
vahe'ma avesima ante'zamo'a, miko kefozana refi'nete. 13 Knare
antahizamo'a knare'ma huno refkomahu vahe'mofo zamagipinti
atineramie. Hianagi knare antahintahi omane vahe'mofona
agumpi sefu amigahaze. 14 Ama' antahi'zane vahe'mo'a,
antahi'zana erite erite huno, rama'a enerie. Hianagi neginagi
kema haza vahe'mo'za, mika zankura atupa nehu'za, ame hu'za

haviza hugahaze. **15** Feno vahe'mokizmi feno zamimo'a, vihu huzmantankna hugahie. Hianagi zamunte'ma omaneazamo zamunte omane vahera zamazeri haviza nehie. **16** Fatgo zamavu'zamava'ma nehaza vahe'mokizmia mizazmia, knare nomaniza erigahaze. Hianagi kefozama nehaza vahe'mo'za, havi miza erigahaze. **17** Avumro'ma anteankema antahimia vahe'mo'a, knare nomaniza eri kante nevie. Hianagi zamazeri fatgoma hazanke'ma zamavesrama huntaza vahe'mo'za, havifi nevaze. **18** Rimpa knama hu'nea vahe'mo'ma ana rimpa knama refitenakura, rama'a havige nehie. Hagi vahe'mokizmi zamagenkema hu vahera, neginagi vahere. **19** Rama'a kegagama huzamo'a, kumipi kavareno nevie. Hianagi iza'o agefu'nama kegavama himo'a, ama' antahi'zane vahe mani'ne. **20** Fatgo vahe'mofo kemo'a, knare silvagna hu'ne. Hianagi havi vahe'mokizmi antahintahimo'a, haviza huno mago kna'a omane'ne. **21** Fatgo vahe'mofo kemo'a, rama'a vahe zamazeri hanavenetie. Hianagi neginagi vahe'mo'za antahi amahu antahintahigura atupa hu'za nefrise. **22** Ra Anumzamo'a zamazeri feno vahe nesea asomumo'a, asunku'zana eri ozamigosie. **23** Neginagi vahe'mo'za, kefo avu'ava zana kiza zokago hazankna hu'za nehaze. Hianagi ama' antahintahine vahe'mo'za, knare antahintahifi muse hu'za makaza nehaze. **24** Kefo vahe'mo'zama koro'ma nehzazamo'a, zamagrite egahie. Hianagi fatgo vahe'mo'za zamave'ma nesiazana erigahaze. **25** Kefo avu'avazama nehaza vahe'mokizmia unu ko'ma atuno esuno'a, zamavareno fregahie. Hianagi fatgo vahe'mo'za oti hanaveti'za, mani'vava hugahaze. **26** Feru vahe'ma eri'za erinogu'ma huntesanana, ana vahe'mo'za aka'zamo vahe'mokizmi zamajipi ufrelo akahiankna nehu'za, tokimo vahe'mokizmi zamavurgafi

ufareno aka heankna kagritera hugahaze. 27 Ra Anumzamofoma koro'ma hunteno agorga'ama mani'zamo'a, za'za kafuzage manigahane. Hianagi kefozama hu vahe'mokizmia knazamia erikofa hinke'za, za'zatera omanigahaze. 28 Fatgo vahe'mo'zama amuha'ma nehaza zamofo nena'a musezane. Hianagi havi avu'ava'zama nehaza vahe'mo'zama amuha'ma nehazazamo'a amene zankna hugahie. 29 Ra Anumzamofo avu'ava'zamo'a fatgo vahe'mokizmi, vihu huzmantankna hu'ne. Hianagi havi avu'ava'zama nehaza vahe'mokizmia, zamazeri haviza hugahie. 30 Fatgo vahe'mokizmia zamazeri torera osugahie. Hianagi havi zamavu'zmava'ma nehaza vahe'mo'za ama'na mopafina omanigahaze. 31 Fatgo vahe'mofo agipinti'ma atiramia kemo'a, knare antahi'za atiramino nevie. Hianagi akrehe krehe ageru'ene vahe'mofona azeri taganegahie. 32 Fatgo vahe'mofo zamagipintira vahe'mokizmi zamazahu naneke atineramie. Hianagi kefo vahe'mokizmi zamagipintira, akrehe krehe kemo atineramie.

11 Havigema huno avamente'ma refkohu so'ema nosia vahera, Ra Anumzamo'a agoteno avesra hunente. Hianagi avamente'ma fatgo huno mizama asea vaheku avesinente. 2 Kavufga atare'zamo'a, kagazeza erigamigahie. Hianagi kavufga anteramizamo'a, knare antahintahiza erino egahie. 3 Maka zampima tamage huno fatgo avu'ava'ma hanimofona, ana avu'avazamo kegava huntegahie. Hianagi hazenke vahe'mofo akrehe akrehe'zamo'a, zamagrira zamahe fanane hugahie. 4 Refkoma hugantesia knarera, feno zankamo'a kaza osugosie. Hianagi fatgoma huno mani'zamo'a frizampintira kagu'vazigahie. 5 Fatgo vahe'mokizmia tamage hu zamavu'zmava'mo hanige'za, kama nevaza kamo'a, knare hu'nesige'za vugahaze. Hianagi

havi vahe'mokizmia zamagra nehanaza kumimofo kna'amo,
zamazeri traka hugahie. **6** Fatgo zamavu'zmava'ma nehaza
vahe'mokizmia, fatgo zamavu'zmava zmimo'a zamagu nevazie.
Hianagi fatgo osu vahe'mokizmia fatgo osu zamavu'zmava
zamo zamazerigahie. **7** Kefozama nehia vahe'mo'ma erinaku'ma
amuha'ma nehia zamo'a frisigeno'a anama erinaku'ma amuhama
nehiazamo'a, amane zankna hugahie. **8** Hazenke zamo'ma fatgo
vahete'ma esniana, Ra Anumzamo'a aza huno aware atrenigeno,
ana hazenke zamo'a kefozama nehanaza vahete egahie. **9**
Anumzamofonku'ma kore'ma hunte'za agoragama omaniza
vahe'mo'za, kezmireti tava'ozmire'ma mani'namokizmia zamazeri
haviza nehaze. Hianagi fatgo vahe'mo'za ama' antahi'za zamimo
zamagu nevazie. **10** Fatgo vahe'mo'zama nomani'za zamifima
knare hazageno'a, rankumapi vahe'mo'za musenkase nehaze.
Hagi kefo zamavu'zamava'ma nehaza vahe'ma fri'zage'za,
havizama nehia zana vagaregahie hu'za tusi muse nehaze.
11 Anumzamo'ma fatgo vahe'mofo nomani'zama asomu'ma
huntegeno'a, rankuma'mofo agimo'a marenerie. Hianagi kefo
avu'ava'ma nehia vahe'mofo agipinti'ma esia kemo'a, rankumara
eri haviza hutregahie. **12** Tava'ozmire'ma nemaniza vahe'ma
zamage henkaminetaza vahe'mo'za, neginagi vahe mani'naze.
Hianagi fatgo antahi'zane vahe'mo'za kea osu akohe'za
nemanize. **13** Iza'o vahe amefi kema huno vanoma hanimo'a,
oku'a fraki'nesia zana huama hugahie. Hianagi tamage kema
hu vahe'mo'a, nefu'ma hu'ne'nia zana huama huontegosie. **14**
Ama' antahi'zane kva vahe'ma omanisigeno'a, kuma'mo'a haviza
hugahie. Hianagi knare antahi'zama ami vahe'ma rama'ama
mani'nenageno'a, kuma'mo'a hankavetino knare hugahie. **15**
Mago'mo'ma vahepinti'ma nofi'ma hu'nesigenka, anazamofo

nona hu'na miza kamigahue hunka hanunka, knaza erifore
hugahane. Hianagi ana'ma hu'zanku'ma avesrama hanimo'a,
agra'a agu'vazigahie. **16** Rimpa fru avu'ava'ene a'mofona,
agesga hunentaze. Hianagi vaheku'ma asuragionte ne'mo'a,
feno zanke e'herie. **17** Vahe'mofo asuraginteno so'e avu'ava'ma
hunte ne'mo'a, agra'a azeri so'e nehie. Hianagi vahe'mokizmi
havizama huzmantea ne'mo'a, agra'a azeri haviza nehie. **18**
Kefo avu'ava'ma nehaza vahe'mo'za antesaza feno zamimo'a
atupa knafi megahie. Hianagi fatgo vahe'mokizmi mizamo'a,
za'za kna megahie. **19** Fatgo vahe'mo'za knare manizanku
nehakaze. Hianagi havi avu'avazama nevaririza vahe'mo'za
fri'zanku nehakaze. **20** Hagi akrehe akrehe avu'ava zama
agu'afima me'nea vahe'mofona, Ra Anumzamo'a agotenezmante.
Hianagi fatgoma hu'za nemaniza vaheku, Ra Anumzamo'a
musena hunezmante **21** Tamage, havi avu'ava'ma nehaza
vahe'mo'za hazenkea agateore'za, ana hazenkea erigahaze.
Hianagi fatgo vahe'mokizmi mofavreramina, Ra Anumzamo'a
keaga huozmanteno zamagu'vazigahie. **22** Hentofa agi agonane
a'mo'ma fatgo osu avu'ava'ma nehia a'mo'a, agra afu'mofo
golire tro hunte rinima agonafi antanintaza kna hu'ne. **23** Fatgo
avu'ava'ma nehaza vahe'mo'za, knare'zama erifore'ma hanaza
zanku zamave'nesie. Hianagi havi zamavu'zamava'ma nehaza
vahe'mo'za hazenkefi manigahune hu'za antahigahaze. **24**
Zamagraru'ma ontahi'za vahe'ma zamaza nehaza vahe'mo'za,
zamagra mago'aneru' eri avitegahaze. Hianagi rumofo amiga
zama omisnazana, maka zankura eme atupa hugahaze. **25**
Muse hu'za vahe'ma veva'ma nehaza vahe'mo'za zamagra
rama'aza erigahaze. Vahe'ma zamazahu vahe'mo'za, ana nona'a
erigahaze. **26** Iza'o ne'zama'ama zagore'ma otreno, azeri

akonama hania vahe'mofona, vahe'mo'za huhaviza huntegahaze. Hianagi iza'o ne'zama'ama zagore'ma atresimofona, asomu'mo agritera megahie. **27** Iza'o knare avu'ava zanku'ma kazingazi huno hakesimo'a, knare'za erinkeno, kefo zanku'ma hake'simo'a, kefoza erigahie. **28** Iza'o rama'a fenoma ante'nesia zanku'ma antahintahima hanimo'a, evuramigahie. Hianagi fatgo vahe'mo'za zafamo anina eri mareankna hu'za tretre hugahaze. **29** Naga'amofoma hazanke'ma erimisimo'a, mago'zana erisinti oharegosie. Neginagima hanaza vahe'mo'za ama' antahi'zane vahe'mokizmi eri'za vahe manigahaze. **30** Fatgo vahe'mofo avu'avamo'a, asimu eri zafagna hu'ne. Hagi iza'o vahe'ma agu'mavazimo'a ama' antahi'zane vahe mani'ne. **31** Ama mopafina fatgo vahe'mo'za miza zamia e'herisage'za, kefo zamavu'zamava'ma nehanaza vahe'mo'zane, kumi vahe'mo'za knazana erigahaze.

12 Azerinte fatgohu kegu'ma avesintemo'a, ama' antahi'zamofonku avesinente. Hianagi azeri ante fatgohu kegu'ma avesrama hunte'mo'a, neginagi vahe mani'ne. **2** Knare zamavu'zamava'ma nehaza vahera, Ra Anumzamo'a avesi nezamanteanagi, havi zamavu'zmava'ma hunaku'ma retroma nehaza vahera, Ra Anumzamo'a haviza hu'naze huno huzmantegahie. **3** Kefozama hanaza zantetira mani'zazmia retrora osugahaze. Hianagi fatgo zamavu'zmavaza'ma hanazana, rafunare'za mani'nageno, vahe'mo'za eri tasagira osugahaze. **4** Hentofa avu'ava'ene a'mo'a, nevena knare agi nemie. Hianagi knare avu'ava osania a'mo'a, nevena zaferinafi namureno kasriankna hugahie. **5** Fatgo vahe'mo'ma antahi'zama retroma hania antahi'zamo'a, knare huno fatgo hu'ne. Hianagi havi zamavu'zamava nehanaza vahe'mo'zama,

tami'naza antahi'zana, regavatga hugahaze. **6** Kefo zamavu'zamava'ma nehaza vahe'mokizmi ke'mo'a, vahe zamahe nefria vahe'mokizmi zamazankna hu'ne. Hianagi fatgo vahe'mofo kemo'a, vahe'mokizmia zamagu'nevazie. **7** Kefo zamavu zamava'ma nehaza vahe'mo'za, haviza hu'za fanane nehaze. Hianagi fatgo vahe'mokizmi naga'mo'za, oti hanavenetize. **8** Antahi'zama'amo'ma knare'ma hu'nesia nera, vahe'mo'za husga huntegahaze. Hianagi antahi'za zmimo'ma fatgoma osu vahera, vahe'mo'za zamavesra huzmantegahaze. **9** Eri'za vahe'ama mani'ne'nia vahe'mo'ma, anteramino amane vahe maniazama hanimo'a, zamunte omane vahe'mo'za zamagra'a zamavufaga erisga nehazageno ne'zazmia omane vahera zamagatere'naze. **10** Fatgo vahe'mo'a zagagafa'amofona kegavagriso'e hunezamante. Hianagi kefo zamavu'zamava'ma nehaza vahe'mo'za zagagafa zamia kegava hugahazanagi, kanonkeve zamigahaze. **11** Amuho hu'za hozama antaza vahe'mo'za, rama'a ne'za me'enige'za negahaze. Hianagi neginagi vahe'mo'za, nena raga'a omne'zante knazmia ahe fri'za eri'zana e'nerize. **12** Kefo zamavu'zamava'ma nehaza vahe'mo'za kefo zamavu'zamava hu'za eri'za vahe'mokizmi zante ke zmanunu nehaze. Hianagi fatgo vahe'mo'za, arafuna rene'za raga rentegahaze. **13** Kefo zamavu'zamava'ma nehaza vahe'mo'za, havigema nehaza kezamifinti, krifu ahazankna nehaze. Hianagi fatgo vahe'mo'za ana krifufina ohe'za agateneraze. **14** Knare zamageru'ene vahe'mo'za, kezmireti knare'zana e'nerize. Hagi eri'za vahe'mo'za, anahu kna hu'za erizazmireti mizazmia e'nerize. **15** Neginagi vahe'mo'zama zamagesama antahi'zana, zamagrama nehaza zamo'a fatgo hu'ne hugahazanagi, ama' antahi'zane vahe'mo'za rumo'zama antahintahima zamizankea

nentahize. **16** Neginagi vahe'mokizmia zamarimpa he'zamo'a ame huno amate eama hanigenka kegahananagi, ama' antahi'zane vahe'mo'a azeri havizama nehinkeno'a, rimpa he'zamo'a eama hanigenka onkegahane. **17** Tamagema hu vahe'mo'a, keagare'ma otisimofona tamage huno hufore huntegahie. Hianagi havigema hu vahe'mo'a, keagare'ma otisimofona havige huno hu frakintegahie. **18** Antahintahima osuno ame'ama huno hu ke'mo'a, kazimo vahe avufafi reankna nehie. Hianagi antahintahima huteno, keagagama hu vahe'mofo kemo'a, zamaza huno zamazeri neganamare. **19** Tamage ke'mo'a mevava hugahie. Hianagi havigema hu kemo'a, za'zatera omanegahie. **20** Kefo antahintahine vahe'mokizmi zamagu'afina vahe'ma rezmavataga hu antahi'zamo avite'ne. Hianagi rimpa fru zanku'ma nehaza vahe'mo'za muse hugahaze. **21** Fatgo vahe'mokizmirera hazenke zana omegahie. Hianagi havi zamavu'zamava'ene vahe'mokizmirera, hazenke zamo'a avitegahie. **22** Ra Anumzamo'a havigema nehaza vahekura, tusiza huno agotezmanteno avesra hunezamante. Hianagi, tamagema nehaza vahekura, tusi muse nehie. **23** Ama' antahi'zane vahe'mo'za ame hu'za antahintahi zazmia eri ante ama nosaze. Hianagi neginagi vahe'mo'za neginagi antahintahizamia ame hu'za huama nehaze. **24** Hanavetinka eri'zama erisanana, kva vahe fore hugahane. Hianagi feru vahe'ma manisanana, kazokzo eri'za vahe manigahane. **25** Antahintahi hakarema hu'zamo'a, vahe'mofona azeri antepri nehie. Hianagi zamazeri hanaveti ke'ma vahe'ma huzami zamo'a, zamazeri antesga nehige'za muse nehaze. **26** Fatgo vahe'mo'za tava'ozamire'ma nemaniza vahe'mokizmia, knare antahi'za zami'za knare kante zamavare'za nevaze. Hianagi

kefo zamavu'zamava'ma nehaza vahe'mo'za zamavare'za havifi nevaze. 27 Feru vahe'mo'zama zagagafama ahesazana onkregahaze. Hianagi kazingazi huno eri'zama eri'zamo'a, vahe'mofona marerisa feno zama'e. 28 Fatgo avu'ava'ma huno mani'zamo'a, knare nomanizamofo ka me'ne. Hagi ana fatgo avu'ava'ma avaririzamo'a, fri'zana omane'ne.

13 Ama' antahi'zane mofavremo'a nef'a'ma avumro'ma antesiankea antahigahianagi, veganokano kema hu mofavremo'a, vahe'mo'ma avumro'ma antesiankea ontahigahie. 2 Knare kema vahe'mokizmima huzmi vahe'mo'za, knare zana e'neriza muse hugahaze. Hianagi hazenke vahe'mo'za vahe'ma zamazeri haviza nehu'za zamatama zamizanku zamave'nesie. 3 Iza'o agi'ma kegavama huno kema himo'a, agra'a maniza kegava nehie. Hianagi rama'a keagama hania vahe'mo'a, agra'a azeri haviza hugahie. 4 Feru vahe'mokizmi zamagu'amo'a, rama'a zama eri'zanku zamave'nesianagi, anazana e'norize. Hianagi amuho hu'za eri'zama erisaza vahe'mo'za zamavesinia zana eri knare hugahaze. 5 Fatgo vahe'mo'za havigema huzankura zamavesra nehaze. Hianagi kefo zamavu'zamava nehaza vahe'mo'za rumokizmirera zamagaze huno zamagote zamavu'zmava nehaze. 6 Fatgoma huno manizamo'a kva hugantena, knare hunka hazenkea omanesigenka manigahane. Hianagi kefo avu'avamo'a, kumi vahera azeri haviza hugahie. 7 Mago'a zamunte omane vahe'mo'za, feno vahe kna nehaze. Hagi mago'a feno vahe'mo'za, zamunte omane vahekna nehazanagi, feno vahe mani'haze. 8 Feno vahe'mo'za nomaniza'zmima eri havizama huzankura, miza hu'za manigahaze. Hianagi zamunte'ma omane vahe'mofona, mago vahe'mo'a azeri korera osugahie. 9 Fatgo vahe'mokizmi lamu tavimo'a, ru masa nehige'za, muse nehaze. Hianagi

kefo zamavu'zamava'ma nehaza vahe'mokizmi lamu tavimo'a,
asu nehie. **10** Avufga ra nehuno vahe'mofo agorga omani
avu'avazamo'a, ha' fra hu'za avreno ne-e. Hianagi avumro
kema antahino amagema ante vahe'pina, knare antahi'zamo'a
megahie. **11** Revatga hunka havige kanteti'ma erisana zagomo'a,
ame huno fanane hugahie. Hianagi eri'zama erino, osia eri atruma
hute hutema himo'a, rama'a eri atru hugahie. **12** Vahe'mo'za
fore hugahie hu'za amuha nehaza zamo'ma fore'ma osanige'za,
zamagu'amo'a haviza hugahie. Hianagi ana zamo'ma e'ama'ma
hania zamo'a, asimu ami zafagna hugahie. **13** Avumro'ma
antesia kemofoma zokagoma antesimo'a, agra'a hazenkefi
mani'noe huno hugahie. Hianagi kasegema asaminia kemofo
agorga'ama mani'nimo'a, nomani'zama'afina knare hugahie. **14**
Ama' antahi'zane vahe'mo rempima hugamisia zamo'a, asimu ami
ti kapu'i hanatiakna hu'neankino, iza'o ana kema antahi'minimo'a
fri'zamofo krifufintira agatenere. **15** Knare hu'za antahi amama
haza vahe'mokizmia, vahe'mo'za zamavesi nezamantaze.
Hianagi hazenke vahe'mokizmi zamavu'zmavamo'a, hanavetino
haviza hu'ne. **16** Maka zamofo ankereno hu vahe'mo'a agesa
antahiteno, maka zana nehie. Hianagi neginagi antahintahine
vahe'mo'za, zamagesa ontahi neginagi zamavu'zmavaza eri
ama nehaze. **17** Kefo vahe'mofoma katogema huntesigeno
vaniana, hazenkefi ufregahie. Hianagi iza'o tamagema huno
kema hu vahe'ma, ke erino vanigu'ma katogema huntesigeno
erino vaniana, vahe'mokizmia zamazeri knare hugahie. **18**
Iza'o avumaro'ma antesaza kema ontahisimofona amunte
omnesigeno, agazegu hugahie. Hianagi izano azeri fatgohu
kema asamisigeno antahino amage antesimofona, agrira
husaga huntegahaze. **19** Ave'nesinia zama e'nerisigeno'a,

agu'amo'a muse hugahie. Hianagi neginagi vahe'mo'za havi zamavu'zmava'ma nehaza zampinti'ma atreno atiramizankura zamavesra nehie. **20** Iza'o knare antahi'zane vahe'enema vanoma nehia vahe'mo'a, knare antahi'za erigahie. Hianagi neginagi vahe'enema tagrote'za vanoma nehaza vahe'mo'za, hazenke erigahaze. **21** Hazenke zamo'a kumi vahe'mokizmi nezmavaririe. Hianagi fatgo vahe'mokizmia, fenozmimo'a rama'a hugahie. **22** Knare vahe'mo'a mofavre'amo'ene henka negeho'ma erisintima haresia zana, ko retro huzmanteteno nefrie. Hianagi kumi vahe'mo'zama fenoma eri atruma haza fenona, fatgo vahe'mo'za erigahaze. **23** Zamunte omane vahe'mokizmi hozafina, rama'a neza fore hugahianagi hazenke nomanizamo'a timo'ma hiaza huno eri harafi huno vugahie. **24** Iza'o mofavre'amo hazenke nehanigeno kanoma amino azeri fatgoma osanuno'a, mofavre'a avesinonte. Hianagi iza'o mofavre'ama avesima nentemo'a, hanavetino azeri fatgo hugahie. **25** Fatgo vahe'mo'za rama'a ne'za me'nege'za nezamu nehaze. Hianagi kefo vahe'mofoza, zamaga tevava nehaze.

14 Knare antahi'zane a'mo'a noma'a erise higeno, naga'amo'a so'e nehie. Hianagi neginagi a'mo'a, noma'ane naga'anena eri haviza nehie. **2** Fatgo avu'avazal'ma nevaririmofona, Ra Anumzamofo kore'zamo agu'afina me'ne. Hianagi iza'o kefo avu'aval'ma nehimo'a Ra Anumzamofona korera hunonte. **3** Neginagi vahe'mo'ma kema hiankemo'a, agrazante kano eri agumpi nente. Hianagi fatgo vahe'mofo kemo'a, agu'vazigeno knare huno nemanie. **4** Bulimakao omani'nea afu nompina avusese nehie. Hianagi hanave bulimakaomo'a rama'a ne'za erifore nehie. **5** Tamage huno kemahu ne'mo'ma, keagare'ma oti'nea ne'ma aza huno huama haniana, tamage hugahie.

Hianagi havigema hu ne'mo'a keagare'ma oti'nea ne'ma kema
aza huno'ma haniana havige hugahie. **6** Hagi kiza zokago
kehu vahe'mo'ma, knare antahizanku'ma hakesuno'a, keno
eri fore osugahie. Hianagi ama' antahi'zane vahe'mo'a, fru
huno antahi'zana erigahie. **7** Knare antahi'zama omane
vahepintira, mani agetaginka manio, na'ankure knare antahi'zana
e'origahane. **8** Knare antahi'zane vahe'mo'a kama vania kana
antahi ani' hu'neno vugahie. Hianagi neginagi vahe'mo'za
zamagrazmi rezmatga nehaze. **9** Neginagi vahe'mo'za kumimofo
nona'ama erizankura, hunte'za kiza zokago nehaze. Hianagi fatgo
avu'ava'ene vahepina, vahe'ma antahiami' avu'ava zana me'ne.
10 Mago'mago vahe'mo, agria'a rimpala aka'zana antahino keno
nehie. Hagi mago'mo'e huno rumofo musezana mika'a erinte
amara osugahie. **11** Kefo vahe'mofo nomo'a, haviza hugahie.
Hianagi fatgo vahe'mofo seli nomo'a, hanavetino megahie.
12 Mago kamo'a vahe avurera knare hugahianagi, avaririno
atuparega vaniana fri'za me'ne. **13** Musema huzampinena rimpala
akazana me'ne. Hagi musema hu'zamo'a vagamaresigeno'a,
asuragi'za egahie. **14** Zamentinti osu vahe'mo'za zamagrama
hu'nesaza zamavu'zmava zante, mizana erigahaze. Hagi knare
vahe'mo'a agra'a, hu'nesia avu'ava zante, mizana erigahie.
15 Osi'a antahintahima eri'naza vahe'mo'za, maka zankura
zamentinti nehaze. Hianagi knare antahi'zane vahe'mo'a kama
vu zama'afina kva nehie. **16** Knare antahi'zane vahe'mo'a kva
huso'e hu'neno, kefozana agatenere. Hianagi neginagi vahe'mo'a
kva huso'e osuno, Maka'zana amane hugahue huno nehie. **17**
Ame huno rimpama ahe vahe'mo'a, neginagi avu'ava nehie.
Hagi kefozama hu antahintahima eri fore'ma nehia vahera,
avesra hunentaze. **18** Osi'a antahintahine vahe'mo'za, neginagi

avu'avaza erisantiharegahaze. Hianagi maka'zama ankere'za hu
vahe'mo'za, kini fetori anteankna huno antahi'zana erigahaze. **19**
Iza'zo kefo zamavu'zmava nehanamo'za knare'zama nehanaza
vahe zamavuga zamarena regahaze. Havi zama nehamo'za
fatgo vahe'mokizmi kegina kafante zamare'na ome re'za
husga huzmantegahaze. **20** Amunte'ma omne'simofona,
knampa'amo enena avesiontegahie. Hianagi feno vahe'ma
manisimofona, rama'a vahe'mo'za knampa'a manigahaze. **21**
Inamo'o tava'oma'are'ma mani'nesimofoma kefenkami netreno
knare'ma huontesimo'a, kumi hugahie. Hianagi iza'o amunte
omane vahe'ma knare'ma huntесимofона, Anumzamo'a asomu
huntegahie. **22** Havi avu'ava'ma hu'zamofo kema retroma
hanaza vahe'mo'za, havi kantera novazafi? Hianagi iza'zo
knare avu'ava'ma huzamofo kema retroma hazamo'za, mani
fatgoma huno mani'zane vagaore avesi'zana ke'za erigahaze. **23**
Hanaveti'za mika eri'zama eri'za vahe'mo'za, rama'a eriguhe'za
erigahaze. Hagi mani'ne'za ke'agema hu vahe'mo'za, zamunte
omane vahe manigahaze. **24** Ama' antahi'zane vahe'mofo
fenomo'a, anunte kini fetori meankna huno me'ne. Hianagi
neginagi zamavu'zmava'ma nehaza vahe'mokizmia, neginagi
zamavu'zmavamo'a zamazeri neginagi nehie. **25** Keagama
hunezmantesafima, tamage hunka kema huamama hanamoka,
rama'a vahe zamagu'vazigahane. Hianagi keagafima havigema
hunka huama'ma hanamoka, havige vahe manigahane. **26**
Ra Anumzamofoma kore'ma huntесимofона, Agra hanave
vihu huntenkeno mani'nena, mofavre'amo'za hanave vihufi
manigahaze. **27** Ra Anumzamofoma kore'ma hunteno Agri
agorga mani'zamo'a asimu ami' kapu'i ti me'neankino, vahe'ma
ahefri krifufintira azeri atregahie. **28** Kinimo'ma rama'a vahe'ma

kegavama hanige'za, agrira ragi amigahaze. Hianagi kinimo'ma
osi'a vahe'ma kegavama hanuno'a, agra haviza hugahie. **29**
Ame' huno zamarimpa ohe vahe'mo'za, ama' antahi'za e'nerize.
Hianagi hatuma hu'za zamarimpahe vahe'mo'za, neginagi
zamavu'zmava eri ama' nehaze. (Jem 1:19-20.) **30** Vahe'mo'ma
rimpama ante fru huno'ma mani'zamo'a, avufgamofona asimu
amigahie. Hianagi rumofo zante'ma kesanema nehanimofona,
ana avu'avamo'a zaferinafi namureno kasriankna hugahie.
31 Kagrama amunte omane vahe'ma zamazeri havizama
hanunka, tro'ma huzmante'nea Anumzamofo huhaviza nehane.
Hianagi kagrama zamazeri so'e hanunka, Anumzamofona
ra agi amigahane. **32** Kefo avu'ava'ma nehia vahe'mofona,
ana kumi avu'ava'zamo azeri haviza hugahie. Hianagi fatgo
vahe'mo'ma frisigeno'a, agu'vazigahie. **33** Knare antahi'zamo'a,
ama' antahi'zane vahe'mofo agu'afi akoheno meso'e huno
megahie. Neginagi vahe'mofo agu'afina ana knare antahi'zamo'a,
agra'a azeri ante'ama nehie. **34** Fatgo avu'ava hu'zamo'a ana
mopafi me'nea kumara azeri antesga nehie. Hianagi kumi'ma
nehaza avu'avazamo'a mika ana mopafi vahe'mofona, azeri
agaze nehie. **35** Knare avu'ava'ma nehia eri'za ne'mofona,
kinimo'a muse hunente. Hianagi agazema hu avu'ava'ma nehia
eri'za vahera, kinimo'a rimpa ahentegahie.

15 Akohenka antefru hunka kenona hanana zamo, rimpa
akahe'zana eri'amane hugahie. Hianagi hakrugema hanana
zamo'a, rimpaher'zana azeri otigahie. **2** Knare antahi'zane
vahe'mofo agipintira, knare antahi'za e'nige'za vahe'mo'za
antahi muse hugahaze. Hianagi neginagi vahe'mofo agipintira,
neginagi kemo akaha huneramie. **3** Ra Anumzamo'a mika
kaziga kefo vahete'ene, knare vahetera avua keteno nemanie.

4 Fru kema hu'zamo'a vahe'mofo asimu ami zafagna hu'ne.
Hianagi akrehe akrehe kema hu'zamo'a, vahe'mofo agu'a
ahenefri. 5 Neginagi antahi'zane vahe'mo'a nef'a'ma azeri
fatgo hiankea nontahie. Hianagi iza'o azeri fatgoma hiankema
antahimo'a, knare antahi'za e'nerie. 6 Fatgo vahe'mokizmia
nozamifina, fenozamo avinete. Hianagi kefo vahe'mo'za
erisaza mizana, hazenke'za erigahaze. 7 Knare antahi'zane
vahe'mo'za, antahi'zana vahera nezamize. Hianagi neginagi
antahi'zane vahe'mo'za, anahura osugahaze. 8 Kefo avu'ava'ma
nehaza vahe'mo'zama, Ra Anumzamofonte'ma Kresramanama
vunentaza zankura, agonete. Hianagi fatgo vahe'mo'zama haza
nunamunku, Agra muse nehie. 9 Kefo vahe'mo'ma hia avu'ava
zankura, Ra Anumzamo'a agotenente. Hianagi fatgo avu'ava'ma
huzanku'ma kazigazima hia vahe'mofona, Ra Anumzamo'a
avesinente. 10 Fatgo kamofoma amefi humisimo'a, tusi'a
hazenke erigahie. Iza'o azeri fatgohu kemofoma avesrama
huntesimo'a, frigahie. 11 Fri' vahe'mofo kuma'mo'ene fri'zamo'a,
Ra Anumzamofo avurera amate me'neankino, tagutumotia
keno antahino hu'ne! (Sheol h7585) 12 Veganokno kema hu
vahe'mo'za, azeri fatgoma hanimofona avesra hunenteno, ama'
antahi'zane vahe'mofontera aza hinogura urava'o osugahie.
13 Krimpamo'ma musema hu'nesigeno'a, kavu'gosafintira
knare huno kizanki'za hugahie. Hianagi karimpamo'ma
musema osu'nesigeno'a, kavugosamo'a rugaririgahie. 14 Ama'
antahi'zane vahe'mo'za antahi'zama eri'zankura zamaganete.
Hianagi neginagi antahi'zane vahe'mofona havi kemo'a,
ne'zama'agna hugahie. 15 Zamunte omane vahe'mo'za mika zupa
maniza'zmifina tusi'a amuho nehu'za maragu'zanetize. Hianagi
muse arimpane manisimo'a, ne'zane tine neneno muse huvava

hugahie. **16** Osi'a fenoma anteneta Ra Anumzamofonku'ma kore'ma hunte'nuna zamo'a, rama'a fenoza ante'neta hazenkema erizana agaterene. **17** Vahe'ma avesinentenka hozafi kamo'ma osia refko hunka ne'zamo'a, ra bulimakao afu'ma ahego rimpagnanema refkoma huno ne'zana erifru nehie. **18** Ame huno'ma rimpama ahe vahe'mo, haframa hu'zana eri fore nehie. Hianagi akohenoma rimpma fru huno mani vahe'mo'a haframa hu'zana erifru nehie. **19** Eri'za e'ori feru'ma mani vahe'mofo kamo'a, ave'ave trazampima neviankna hu'ne. Hianagi mani fatgo hu'za mani vahe'mokizmi kamo'a ranka me'hege'za nevaze. **20** Ama' antahi'zama me'nea mofavremofo nef'a, muse nehie. Hianagi neginagi ne'mo'a, nererana kefenkaminetre. **21** Antahi'zama'a omane vahe'mo'a, neginagi avu'ava zankura muse hugahie. Hianagi ama' antahi'zane vahe'mo'a, knare zanke nehuno, fatgo kante nevie. **22** Knare antahi'zama vahepinti e'orinenka mago'a zama retro'ma hunaku'ma hananana, ana zamo'a forera osugahie. Hianagi rama'a knare antahintahima eritenka, retro'ma banana zamo'a, efore hugahie. **23** Fatgo huno'ma kenonama hanimo'a, muse hugahie. Hagi kna fatgore'ma huga kema hania kemo'a, knare'zantfa hugahie. **24** Knare antahi'zane vahe'mo'ma asimu erisia kamo'a anagamu marenerino, fri vahe kumapima uramizankura kegava hunente.

(Sheol h7585) **25** Ra Anumzamo'a avufama eri antesgama hanimofona nomani'zama'a, eri haviza hugahie. Hianagi kento a'mofo fenoma'ane nonkuma'a, kegava huntegahie. **26** Kefo avu'avaza'ma hu antahi'zama retromta huzankura, Ra Anumzamo'a avesra huno agonete. Hianagi avusese hu'nea kema huzankura, Agra muse nehie. **27** Iza'o mika'za rehatri huno nagrike zanema hu' vahe'mo'a, hazenke erino naga'afina

efregahie. Hianagi havi kazigati'ma masavema huno mizama
sezanku'ma avesrama huntesimo'a, knare huno manigahie.
28 Fatgo agu'ane vahe'mo'a agesa antahiteno, kenona nehie.
Hanki kefo vahe'mofo agipintira, kefoge atineramie. **29** Ra
Anumzamo'a kefo zamavu'zmava'ma nehaza vahe'mokizmirera,
afete nemanie. Hianagi fatgo vahe'mokizmi nunamunte, agesa
anteno antahinezamie. **30** Musema nehia vahe'mofo avufima
kesanana, muse hugahane. Knare'zama hu'nesia zamofo
agenkema hu ke'mo'a, vahe'mofona zaferina kampina azeri
fru hugahie. **31** Iza'o so'e nomani'zama manisiegu'ma, azeri
fatgoma hu kema nehinkeno antahisimo'a, knare antahi'zane
vahe'mo'zama manisaza amu'nompi manigahie. **32** Iza'o
azeri fatgo hu kema nehanigeno ontahisimo'a, agra'a azeri
haviza nehie. Hianagi iza'o azeri fatgo hu kema nehinkeno,
antahisimo'a, ama' antahintahi erigahie. **33** Ra Anumzamofonku
kore'ma huntenu agoragama mani avu'avazamo, vahe'mofona
knare antahintahia rempi hunemie. Hagi kagrama anteraminka
manisunka, rankagia erigahane.

16 Vahe'mota e'ina hu'za hugahune huta antahintahia retro
hugahunanagi, Ra Anumzamoke ana antahintahima retro'ma
hanuntera, huvagare kea huntegahie. **2** Tagrama mika zama
hu'nazamo'a knare hune huta tagesa antahigahunanagi,
nanknahu tagutagesareti ana mika'zana nehune Ra Anumzamoke
refako hugahie. **3** Mika'zama huku'ma hanana zana Ra
Anumzamofo azampi antegeno, ana mika zama huku'ma
antahintahima retro'ma hanana zamo'a, nena'a fore hugahie.
4 Ra Anumzamo'a agafa'a me'hegeno maka'zana trohu'ne.
Hagi zamahe fananema hania kefo zamavu'zmava'ma nehaza
vahe'enena, tro huzmante'ne. **5** Ra Anumzamo'a zamavufga ra

nehaza vahekura, avesra huzmanteno agotenezmante. Hagi zamavufara hanaza vahe'mo'za, knazampi manigahaze. **6**
Tamage huta Ra Anumzamofo avesinteta mani fatgo huta manisunkeno'a, Ra Anumzamo'a kumitia eritregahie. Ra Anumzamofonku'ma kore hunteta Agri agorga manisunazamo, kefo zampintira tazeri amane hugahie. **7** Ra Anumzamo'ma musema nehia kante'ma tavutva'ma hanunkeno'a, ha' vahetimo'zanena zamarimpa fru hurantegahaze. **8** Fatgo mani'zane mani'enka osi'a fenoma ante'snamo'a, havi kampinti rama'a fenoma antesana zana agatere'nne. **9** Ana hugahune huta antahintahia retro hugahunanagi, Ra Anumzamo Agrake maka'zama hanuna kana erinte fatgo hugahie. **10** Kini vahe'mo'za Anumzamo'ma e'ina hihoma huno zamia antahi'zanteti kea nehaze. Hagi vahe'ma refakoma hanu'za, fatgo hu'za vahera refako hoho. **11** Fatgoma huno maka'zama refko hu'zana, Ra Anumzamofontegati ne-e. Hagi fatgoma huno maka'zama kna'amo'ma hu'nea avamente'ma refkoma huzanku ave'nesie. **12** Kini vahe'mofona kefo avu'ava zankura agoteno, avesra nehie. Na'ankure kini tra'ma me'neana, fatgo avu'avamofo agofetu me'ne. **13** Kini vahe'mo'za fatgo vahe'mofo kegu musena nehu'za, tamage keagama nehia vahoku zamavesinezamantaze. **14** Kini ne'mofo rimpa aka'zamo'a frigahane naneke me'ne. Hianagi knare antahi'zane ne'mo'a, kini ne'mofona rimpa azeri fru hugahie. **15** Kini ne'mofo avugosamo'ma kiza avu'ava'ma haniana, kasimu erinka manigahane huno nehie. Ana avu'avamo'a, mona hampomo ko runo eramigeno, ne'zamo afureankna nehie. **16** Knare antahi'zama eri'zamo'a golia agateregeno, ama' antahi'zama avesinteno eri'zamo'a, silva agatere'neankino hentofaza hu'ne. **17** Fatgo vahe'mofo kamo'a,

ranka me'nege'za, kefo avu'ava zamofona azeri agateregahaze.
Iza'o kva hu'neno ana kama avaririmo'a, agra'a agu'nevazie. **18**
Kavufga ra huzamo'a, kazeri haviza hugahie. Kagra kavufga
husgama hu'zamo'a, kazeri tanafa kofa hugahie. **19** Akoheno
anteramino amunte omane vahe'enema mani'zamo'a, avufga ra
hu vhemo ha'pinti feno eri'neaza refko hu'zana agatere'ne.
20 Iza'o avumro antesaza kema avaririsimo'a, hakare'zama
hanifina knare hugahie. Ra Anumzamofonte'ma amentintima
hanimofona, asomu huntegahie. **21** Antahi ama'ma haza vaheku,
ama' antahi'zane vahere hu'za hugahaze. Knare kema hania
nanekemo, vahe'mofona avare agrarega atregahie. **22** Ama'
antahintahima eri'naza vahe'mofontera ana ama' antahi'zamo'a
asimu ami kampu'i tinkna hu'ne. Hianagi neginagi avu'ava
zamo'a, neginagi avu'ava'ma nehaza vahetera, nona'a knaza
nezamie. **23** Ama' antahi'zane ne'mofo agu'amo azeri ante
fatgo higeno, mago'ane vahe'ma agu'ama azeri rukrahe hu
kea agipintira atineramie. **24** So'e kema hu'zamo'a tumemofo
rima'agna hu'neankino, vahe'mofo agu'amemofontera haga
higeno, zaferinamofona azeri so'e nehie. **25** Mago'a vahe'mo'za
knare kante nevune nahazanagi, anama nevaza kamofo
atuparega fri'za me'ne. **26** Eri'zama e'neri'za vahe'mo'za
antahi'naze, eri'zama zamu'nasisi hu'za e'orisanu'za ne'zana
onegahazanki'za zamagamate'zamo hige'za, eri'zana e'nerize.
27 Kefo vahe'mo'za kefozama eri fore huzanku nehakraze.
Ke'zmimo'a afe tevemo te'osa hiankna huno, vahe'mokizmia
zamazeri haviza nehie. **28** Akrehe akrehe zamageru'ene
vahe'mo'za, vahe'mokizmi amu'nompina kea erintage'za ha' fra
nehaze. Vahe'mofo amefi agenke'ma huzamo knare arone'a, azeri
netane. **29** Haframahu ne'mo'a, tavaloma'are'ma nemanimofona

revatga huno avreno havi kante nevie. **30** Iza'o avuma mago ne' resuki nemimo'a, akrehe akrehe avu'avaza nehie. Hagi iza'o agj'ma haninkofisigenka, hazenke avu'ava nehie hunka antahigahane. **31** Fatgo avu'ava zama hu'zama nevaza vahemokizmia tu zamazokamo'a, kini fetori anunte antanintea kna nehige'za, ra agi nezamize. **32** Ame huno arimpa'gnama osu vahem'o'a himamu vahera agateregeno, iza'o rimpa he'zama azerirava nehimo'a, tusi'a kuma'ma ha'ma huno eri'nemofona agatenere. **33** Mago'azama hunakura satu zokago renka antahiamma hugahue hnananagi Ra Anumzamoke hu izora hutenko, anazamo'a eforera hugahie.

17 Vahe'mo'ma rimpia frune akoheno mani'neno naga'anema osia kave'ma ne'zamo'a, tusi'a ne'zama hafra nehuno kreno ne'zana agatere'ne. **2** Knare antahi'zane eri'za ne'mo'a, kva'amofo mofavre'mo'ma agaze hu avu'ava'ma hania mofavremofona ugota huno kegava hunte'neno, mofavre'amo'za erisanti haregahaze huzmante'nesafintira erigahie. **3** Koline silvanena tevefi kre'za eri agru nehaze. Hianagi Ra Anumzamoke tagu'amofona reheno nege. **4** Kefo avu'ava'ene vahe'mo'a, havigema nehazankea nentahie. Hagi tavre vahe'mo'a, vahe'ma azeri haviza hukema hazanke nentahie. **5** Amunte omane vahe'ma huhaviza huntisia vahe'mo'a, tro'ma huzmante'nea Ra Anumzamofa huhaviza hunente. Hagi hazenkema erisaza zanku'ma muse hanimo'a, agra'a havi mizana erigahie. **6** Nenama hu'za ra avuma omesaza vahe'mokizmia, zamagehe'mo'za kini fetorikna zamanuntera hu'nage'za, ra zamagi vahe'mo'za nezamize. Hagi mofavremo'za zamarera zamafana muse huzmantegahaze. **7** Neginagi vahe'mofontera knare ke'ma hu'zamo'a, haviza hu'neanagi, kva ne'mo'ma havigema hu'zamo'a, havizantfa hu'ne.

8 Mago'mo'ma mago zama erinaku zagoreti'ma maseve'ma
amino erisia zamo'a agraragisa kaguvaza huno efore hiankna
nehie. Iza'o anazama himo'a maka zampina knare nehie. 9
Iza'o havizama huntesimofoma kefo zama'a atrentesimo'a,
amu'nozanifina avesinte avu'avazamo'a, meno vugahie. Hianagi
arone'amofo havi avu'avazama'agu hugantigama hanimo'a,
knare knampa'a azeri atanegahie. 10 Kemofoma refko
huno antahi ankemare vahe'mofona, magoke zupama azeri
fatgo hu kema asamisankeno'a antahigahianagi, neginagi
vahe'mofoma azeri fatgo hunaku'ma 100'a zupa knona
ami'sanana, avu'avara ruzahera osugahie. 11 Kefo avu'avazane
vahe'mo'za, ha'ma erifore hu zankuke zamave'nesiakino,
hazenkema zami vahera huntenkeno zamavaririgahie. 12
Anenta'ama kumzafama ase'nesaza beama, mago ne'mo'ma
kantegama tutagihama hunte'zamo'a knare hu'neanagi, neginagi
vahe'mo'za neginagi zamavu'zamava'ma nehaza vahe'enema
tragoteno manizana agatere'ne. 13 Hagi mago vahe'mo'a
knare'zama magamofoma huntlesia zanku'ma, nona huno
kefozama huntlesia vahe'mofona, kefo zamo'a naga'afintira
atreto ovutfa hugahie. 14 Haframa hu'zamo'ma agafama
nehanigeta, koma eri amne osanunkeno'a, ti anagi atregeno
ti hageno eankna huno rama'aza eri haviza hugahie. 15
Kefo avu'ava'ma nehia vaheku'ma fatgo vahere nehu'za, fatgo
zmavu'avazama nehaza vaheku'ma, kefo vahere hu'zama
nehaza tare zamavu'zmavakura, Ra Anumzamo'a agoteno
avesra hunezmante. 16 Neginagi vahe'mo'za knare antahi'zama
rempima hu'za eri zamave'sizama omane'nege'za, na'a hige'za
avono huzama mizasesaza zagoa zamazampina eri'haze?
17 Mika zupa knampati'mo'za zamavesirantegahaze. Hagi

knazampima taza hanagu tafuhe'mokizmia kasezmante'naze. **18**
Knare antahi'zazmima omane vahe'mo'za zamagrazmi huvempa
hu'za, tava'ozmire nemani'za vahe'mo'za nofi'ma hu'naza zama
ovakanesageta, tagrati vakanezmanegahune hu'za nehaze. **19**
Iza'o ha'frama hu'zankuma avesintemo'a, kumiku ave'nesie. Iza'o
agra'a agima erintesgama nehimo'a, hazenke erigahie. **20** Akrehe
akrehe agu'ane ne'mo'a, knare zana hakeno erifore osugahie.
Hagi izo'tavre kema nehanimo'a, hazenkefi ufregahie. **21**
Neginagi vahe'mofo nerera nef'a, tusi'a ataza e'nerie. Higeno
nefa rimpamo'a, ana neginagi ne'mofonkura musena osugahie. **22**
Musema huno mani'zamo'a, tusazamo vahe'ma azeri so'e higeno
maniankna nehie. Hianagi vahe'mofo antahi'zamo'ma havizama
haniana, havi krimo zaferinafi me'neno azeri haviza hiakna
hu'ne. **23** Kema refkohu tratema kefo ne'mo'ma mani'nesuno'a,
keagama eri haviza hinogu oku'a masevema huno amisia zagoa
e'nerino, keaga eri rukrahe huno fatgo kantera ontahigosie. **24**
Antahi'zane vahe'mo'a knare antahi'zante avua anteno nevie.
Hianagi havi vahe'mofo avumo'a, mopa ataginare ame huno
omegege, emegege huno nevie **25** Neginagi mofavremo'za
nezmafana zamasuzana eri nezamie. Hagi kasema ante'nea
zamarerahe'ina, zamarimpa zamata erinezamize. **26** Fatgo
hu'nesia vahe'ma knazama zamige, knare huno hazenke'a
omane kva vahe'ma kanoma ami'zamo'a, haviza hu'ne. **27**
Knare antahintahima me'nea vahe'mo'a, rama'a keaga osugahie.
Hagi ama' antahi'zama me'nenia ne'mo'a, ame huno rimpagna
osugahie. **28** E'ina hu'negu neginagi vahe'mo'ma kema osuno
manisia zankura, vahe'mo'za knare antahi'za eri'ne hugahaze.

18 Agra'aku'ma nemanisia vahe'mo'a, agraguке agesa
nentahie. Knare antahizama eri'nea vaheku'enena ana ne'mo'a

avesiozmantegahie. **2** Neginagi vahe'mo'a ama' antahintahima erizankura, musena osugosie. Hianagi agra'a antahi'zanke hu'netreno manigahie. **3** Kefo avu'ava'ene vahe'mo'a, mago'a vahekura antahi amane'za neseno, zamagi'a eri haviza nehuno, zamagaze erinezamie. **4** Knare antahi'zane vahe'mofo agipinti ke'mo'a, tiru kna hu'ne. Hianagi mika knare antahizamo'a, timo kerifinti aviteno herafiramino neviankna nehie. **5** Hazenkema huteno keagahu trate'ma otisigenka, hazenkema hu'nesia vaheraaza osutfa huo. Hagi fatgo vahe'ma keagafima oti'nenigenka havigema huntenka azeri atre'zankura kva huo. **6** Neginagi vahe'mofo kemo'a, hafra hu'za eri fore nehigeno, ana ke'zmimo'a kanonkevegu meme nehie. **7** Neginagi vahe'mofo agi'mo'a, havi ke'agage nehanigeno, krifu agra'a avufare anaginente'ankna nehiakino, agrira azeri haviza hugahie. **8** Vahe agenkema hu'zamo'a, haga ne'zankna hu'neankino, ame huno vahe agu'afina ufregahie. **9** Zaferina omane feru vahe'mo'a, maka'zama eri havizama nehia vahe'mofo nefu manine. **10** Ra Anumzamofo agimo'a hanavenentake vihugna hu'neankino, fatgo vahe'mo'za agritega zamagare'za nevazageno, zamagu nevazie. **11** Feno vahe'mofo fenomo'a ra kuma zmimofo vihugna hu'neakino, kegava hurantenketa knare huta manigahune hu'za nentahize. **12** Avufga ra hu'zamo'a, henka hazenkefi kavrentena manigahane. Hianagi knare hunka anteraminka mani'zamo'a, kazerisga huno knare kagi kamigahie. **13** Iza'o kema antahi anke ore'neno ke'nonama hanimo'a, agra neginagi avu'ava nehuno agaze zana agra'a erigahie. **14** Krima eri'nesimo'ma ana zankuma antahintahi hakarema osaniana, ana krifina amane manino vugahie. Hianagi vahe'mofo antahintahimoma havizama haniana, iza knareru huno manigahie? **15** Maka'zama antahi ankere

vahe'mo'a, knare antahintahima erinakura muse nehie. Knare vahe'mo'a agesazofo huteno nemanie. **16** Musezama eri'neno esimofona, kafana anagisigeno keagama hukuma hania rankva nera negesigeno, keaga humigahie. **17** Keagafima otinesia ne'ma ese'ma keagama refkoma huno kesiana tamage hugahazanagi, anantema antahigesia ne'mo, hazenke'a keno erifore hugahie. **18** Taisi zokagoma re'zamo ha' frama hu'zana eri fru nehuno, hanave netremoke'ma ha'ma hu'zana zanazeri netane. **19** Kagrama negafu'ma arimpama azeri havizama hu'nenana ne'ma avare'zamo'a, rankumamofo hanavenentake vihu hunteankna huno negafu'ma avare'zamo'a amuho hu'ne. Ha' frama hu'zamo'a, rone ka'a hanavenentake kafa erigino rentroko huno, refko hiankna hugahie. **20** Knare kema kagipintima atiramisuno'a, knare ne'zama nankeno kamuma hiankna huno kaza hugahie. Fatgo kema banana kemo'a, kazeri knare hugahie. **21** Kekamo'a vahera zamazeri so'e nehuno, zamazeri havizana hugahie. Hagi kema huzantema avesima nentesimo'a, ana ke'amoma rentesia raga'a agra'a erigahie. **22** Iza'o a'ma hakreno erinesimo'a, knare'za hakreno eri'neankino, Ra Anumzamo'a avesinente. **23** Amunte omante vahe'mo'a, asumaraqinteno azama hanigu meme nehianagi, feno vahe'mo'a, hanave kefinti kenona nehie. **24** Rama'a ronekamo'a kazeri haviza hugahianagi, tamage ronekamo'a negafuma nehiaza huno tava'onkare manigahie.

19 Amunte omante vahe'ma mani'neno, maka zampima mani fatgoma hu'zamo'a, neginagi vahe'mo'ma akrehe krehe ageru'ma ruzana agatere'ne. **2** Mago vahe'mo'ma keno antahino'ma osu'nesia zama hunaku'ma haniana, knarera osugahie. Iza'o ame'ama huno mago'zama hunaku'ma hanimo'a, ana zana eri haviza hugahie. **3** Mago'a vahe'mokizmi zamagri'a

neginagi zamavu'zmava zamo zamazeri haviza nehige'za,
Ra Anumzamofona zamarimpa ahenentaze. 4 Amunte'ma
me'nea ne'mofona, rama'a knampa'a manigahaze. Hagi fenoma'a
omane ne'mofona knampa'amo'za netraze. 5 Keagare'ma
omati'nesia vahe'ma havigema huno huama'ma hunteno azama
hanimo'a, knazana erigahie. Hagi havi kema hanimo'a, mizama'a
erigahie. 6 Rama'a vahe'mo'za zamazama hania vahe arone
manizanku zamave'nesie. Hagi maka vahe'mo'za muse zama
nezami'za vahe'mofo rone nemanize. 7 Kagrima kamunte'ma
omanesige'za, kafuhe'za kavesi ogantegahaze. Hagi knampa
ka'amo'za mago'ane agatere'za zamavesra hugantegahaze.
Kazama hanazegu'ma hakesanana, zamagra omanigahaze. 8
Kagrama knare antahi'zama erisunka, kagraka'agu avesinentane.
Kagrama ama' antahi'zama azeri hampo'nama hanunka, knare
hunka manigahane. 9 Keagafima otisia vahe'ma havigema
huno huama huntlesia vahe'mo'a knaza erigahie. Hagi havigema
hanaza vahe'mo'za frigahaze. 10 Neginagi vahe'mo'za marerisa
zampina manigara osu'naze. Kazokzo eri'za vahe'mo'ma kva
vahe manino, kva (princes) vahe'ma kegava huntezamo'a,
knarera osutfaza hu'ne. 11 Knare antahi'zama eri'nesia ne'mo'a,
ame huno arimpa ohegosie. Hagi havizama huntlesia zanku'ma
agesama ontahisiana, husga huntegahaze. 12 Kini vahe'mofo
rimpa he'zamo'a, laionimo rankrafa hiankna nehie. Hianagi
vahe'ma zamavesinteno zamazama hu avu'ava zamo'a, trazante
ata ko arunteankna nehie. 13 Mago ne'mofavremo'ma neginagi
avu'avazama hiana, nefana tusi'a hazenke erinemie. Hagi mago
ne'mofo a'mo'ma kefra nehuno, ke huvava hania a'mo'a, nomofo
anuntupinti ko'arigeno varivri hiankna hugahie. 14 Negrera
negafampinti none fenozanena erisanti haregahane. Hianagi

Ra Anumzamoke, ama' antahi'zane a'ra kamigahie. **15** Feru
vahe'moka kavu mase vava hugahane. Hagi eri'za e'ori vahe'moka
ne'zanku frigahane. **16** Iza'o kasegema amage'antesimo'a
knare huno manigahie. Hagi iza'o Ra Anumzamofo avu'ava'ma
amefi'ma humisimo'a, frigahie. **17** Iza'o amunte omane vahe'ma
knare avu'ava'ma hunentemo'a, Ra Anumzamofo anara hunente.
Hagi agrama hania avu'avamofo avamente, mizana amigahie. **18**
Mofavre kamofona azeri fatgoma hugama hu'nesire, avumarora
antenka azeri fatgo huo. Hagi azeri fatgoma osnanana, frinogu
kave'nesie. **19** Hantaka huno'ma arimpa ahe vahe'mo'a,
hazenke'a erigahie. Na'ankure kagrama aza hunka eri amane
hanankeno'a, henka ana ne'mo'a anazana nehinkenka aza
huvava hugahane. **20** Kavumro antesia kema nentahinka, kazeri
fatgoma hania kema avaririsunka, mani so'e hunka vugahane.
21 Vahe'mo'a rama'a zanku antahi'zana eri retro huno hugahue
hugahianagi, Ra Anumzamo'ma antahino fore hugahie hu'nesia
zamoke fore hugahie. **22** Ra zama me'neana huvempama
hunte'nesia kere, amage'ma anteno mani'zane. Hagi amunte
omane vahe'ma mani'zamo'a, havige vahera agatere'ne. **23** Ra
Anumzamofonku'ma koro'ma hunteno agorga'ama mani'zamo'a,
kavreno knare mani'zante vugahie. Hagi iza'o e'inahu'ma
hanimo'a, mago'zankura korera osuno knare huno manigahie. **24**
Eri'za e'ori feru vahe'mo'a, ne'za nenaku tafepi azana antesigeno
vugahianagi, ana ne'zana agipina erinteno onegahie. **25** Vahe'ma
huhaviza nehania vahe'ma azerinka sefu'ma amisankeno'a,
knare antahi'zama omane vahe'mo'za nege'za, knare avu'vara
amage antegahaze. Hianagi knare antahi'zama me'nea vahe'ma
azeri fatgo hanankeno'a, mago'ane antahi'zana erigahie. **26**
Mago mofavremo'ma nefo'ma neheno, nererama nompinti'ma

ahenati atresia mofavremo'a, tusi'a agazeza erino naga'afina
eme antegahie. 27 Kavumro'ma antesianke'ma ontahi'sanana,
e'i knare antahi'zamofo kana atrenka havifi vugahane. 28 Havige
hu vahe'mo'ma havigema huno keagafima omati'nea vahe'ma
huama'ma hunte'zamo'a, keagama antahi trara kiza zokago
zankna nehuno, havi avu'ava zana ne'za nazankna nehaze. 29
Vahe'ma huhavizama hunezmantaza vahe'mokizmi'a, mizazmia
ko tro huzmantegeno me'neanki'za erigahaze. Nehanage'za
neginagima hanaza vhahera, kanonkeve zamigahaze.

20 Waini tima nenea vahe'mofona azeri neginagi higeno,
vahe'ma huhaviza hu kea nehigeno, aka timo'a vahe'mofona
azeri negi nenkeno ke huhaviza nehuno hara hugahie. Waini
ti neno neginagi hu vahe'mofona, agripina ama' antahi'zana
omanegahie. 2 Kinimofo arimpa akahe zamo'a, laionimo rankrafa
hiankna hu'ne. Kini vahe'mofona azeri arimpa ahe'simofona, ahe
frigahie. 3 Haframa hu'zanku'ma mani kore huno agatere'zamo'a,
ra agi erigahie. Hianagi neginagi vahe'mo'za ame hu'za
hafra nehaze. 4 Feru vahe'mo'ma hozama ante knare'ma
mopama rekorino hozama ontesuno'a, hozama hamare knarerera
ne'zana ohamaregahie. 5 Vahe'mofono antahi'zamo'a tirukna
huno me'neanagi, ama' antahi'zane vahe'mo'a ana tirupintira
ana antahi'zana afi anaga netre. 6 Rama'a vahe'mo'za, tavesi
negantone hugahazanagi, mago mago vahe'mo'za tamage hu'za
kavesigantegahaze. 7 Fatgo avu'ava'ene ne'mo'a, mani fatgo
huno nemarie. Agri mofavre zagamo'za, asomu erigahaze. 8
Kini vahe'mo'ma keagama refako hunakura trate mani'neno,
keaga refko huno havi avu'ava zana ke fore nehie. 9 Nagu'amo'a
fatgo higena, nagra agru hu'noankino nagripina kumira omane'ne
huno izu hugahie? 10 Havige hu'za maka'zama refko hu'za

kna'ama ke'zane, havige hu'za avamente refkoma osu'zanena Ra Anumzamo'a avesra huno agote'nezmante. **11** Mofavremofona avu'avate negenka, agri avu'avamo'a agru hu'neanki, fatgo mofavre mani'neanki hugahane. **12** Tagesama me'neana keaga antahi'zane, tavuragama me'neana tavuma ke'za me'neankino, tarega'zana Ra Anumzamo museza tami'ne. **13** Kagrama kavu'ma masetenka manizankuma kavesi kavesima haniana, kamuntera omanegosie. Kavu'ma omasesanana ne'zama nesana zamo'a rama'a megahie. **14** Knare osu'ne! Knare osune! Huno mago'a zama mizama seku'ma himo'a nehie. Hianagi mizaseno kantegama nevuno'a, ana zankura knare'za erue huno rama'a musenke hume nevie. **15** Antahi'zama ami kemo'a, goline zago'amo'ma marerisa havea agetere'ne. **16** Onke'nенана vahe'mo'ma nofi'ma nehinkeno magomo apasegahue hanigenka, anamofo anakreku'a huvame hunka eri'negeno, ana nofi'ma hu'neazana eme apaseno. Savri a'mo'ma nofi'ma hanigeno'ma mago'mo apasegahuema hanigenka, aza hu'na apasentegahue huno kaminia zana erio. **17** Kumzafa kave'mo'a haganentake hugahianagi, refuzufupe havemo kagipi aviteno kagi traga hiankna henka'a hugahie. **18** Antahi'zana vahepinti eritenka eri'zama eri antahi'zana retro huo. Hagi knare antahi'zama mago'mofompinti'ma e'orinesunka hatera ovuo. **19** Vahe zamagenkema hu vahe'mokizmi oku'zana hu ama nehaze. E'ina hu'negu vahe zamagenkema hu vahe enena tragotenka omanio. **20** Nerera nefama huhaviza huntlesia vahe'mofona tavi'amo asu hanigeno kumazu hanimpi maniakna huno frigahie. **21** Arera afama ofri mani'nesigeno'ma erisinti haregahanema hu'nesia zama ame'ama huno erisia mofavremo'a, atuparega asimu'a omanegosie. **22** Kefo avu'ava'ma hugante'sagenka

anahukna hu'na nona huzamantegahue osuo. Hagi avega antenegeno Ra Anumzamo kaza huno ana knazana erino. **23** Mago'azama mizaseku'ma hanigeno kna'ama refako huno kezama (skel) erinteno refako hu so'e osu avu'ava zana, Ra Anumzamo'a avesra huno agonete. **24** Vahe'mo'ma mika zama hiazana, Ra Anumzamoke azeri ante fatgo nehie. Inankna huno mago'a vahe'mo'a agra'ma nehia zana keno antahino hugahie? **25** Kagesa antahi ankeretenka Anumzamofontera huvempa huo. Ame'ama hunka huvempama hutesunka, henka'a anama hu'nesana kegu kagesa antahintahi nehunka kagraka'a kazeri haviza hugahane. **26** Ama' antahi'zane kini ne'mo'a kefo zamavu'zamava nehaza vahera witi hona'a hareno eriherahe hianka huno rezaganeno ke ama huteno, henka knanentake havenu witi'a refuzafupeankna huno knazana zamigahie. **27** Ra Anumzamofo lampe tavi'mo'a, vahe'mofo kantu agu'afi ufreto mika kefo agu'agesama me'neana hakeno eri ama nehie. **28** Kini ne'mo'ma vahe'mokizmima avesi nezamanteno knare avu'ava huzamantesiana, agra knare huno mani'neno, za'za kna kva eri'zantera manino vugahie. **29** Nehazave ramimofona hanave zamimo ra zamagia nezamie. Hianagi ranra vahera efe'zmazoka nege'za vahe'mo'za husga hunezmantaze. **30** Hazenkema hania vahe'ma knokeve'ma ami'zamo, kefo avu'ava zana ahenati netreno, agu'a azeri agru hugahie.

21 Tima eriante fatgo'ma higeno kama'are vu fatgo hiankna huno, Ra Anumzamo'a kini vahe'mofo agu'agesa azeri antefatgo nehigeno, Agri avesite nevie. **2** Vahe'mo'za maka zamavu'zamava'ma nehaza zankura, fatgo avu'avaza nehune hu'za hugahazanagi, Ra Anumzamoke zamagu'a refako huno nezamage. **3** Ra Anumzamofo avurera fatgo avu'ava zane, fatgo

huno refako hu'zamo'a, Kresramanama vu zana agatere'ne. 4
Vahe'ma ke fenkamite zane, avufga ra hu'zamo'a, nena raga'a
rentesiana kumire. 5 Knare huno antahintahima retro huteno,
hanavetino eri'zama eri'zamo'a, rama'aza erifore hugahie.
Hianagi ame'ama hu'zamo'a, amunte omane vahe manigahie. 6
Havigereti eri fenomo'a, hampogino kirga hiankna huno fanane
nehuno, frikante kavreno vugahie. 7 Kefo avu'ava'ma nehaza
vahe'mokizmi hazenke'zamo'a, zamavazu huno zamazeri haviza
hugahie. Na'ankure zamagra fatgo zamavu'zamava huzankura,
zamavesra hunentaze. 8 Hazenke zamima me'nea vahe'mo'za
mani fatgo hu'za nomanize. Hianagi hazenke zamima omane
vahe'mo'za fatgo avu'avate nemanize. 9 Fra vazivava a'ene
mago nompi omanino, agraku'ma nomofo fegu'a mani'zamo'a,
knare hu'ne. 10 Kefo avu'ava'ma nehaza vahe'mo'za, kefozama
huzankuke zamave'nesie. Ana nehu'za tava'ozmire'ma nemaniza
vahera zamazeri haviza nehaze. 11 Vahe'ma huhaviza'ma hu
vahe'ma kanoma amiza azeri fatgoma hazageno'a, antahi ama'
osu vahe'mo'za nege'za ama' antahi'zana erigahaze. Hianagi
knare antahi'zama eri'nesaza vahe'mo'za zamazeri fatgohu
kema zamasamisage'za mago'ene antahi'zana erigahaze. 12 Ra
Anumzamo'a fatgo hu'neankino, kefo vahe'mo'ma noma'afima
hia avu'ava'zana keno antahino nehiankino, ana vahera zamazeri
haviza hugahie. 13 Mago vahe'mo'ma amunte omane vahe'mofo
kezanke'ma antahi omisimofona, agrama mago zanku'ma
upama hu'neno kezatisige'za antahi omigahaze. 14 Rimpama
hegante'nesia vahe'ma oku'ama musezama ami'zamo'a arimpa
ahegante'nesia zana eri fru hugahane. 15 Vahe'mo'ma fatgo
huno refako hu avu'ava'ma hanigeno'a, fatgo vahe'mo'za
muse hugahaze. Hianagi kefo avu'ava'ma nehaza vahe'mo'za,

tusi koro hugahaze. **16** Mago'mo'ma antahi ama'ma hu antahi'zamofo kama atreno havifima vanimo'a, frino ko'ma fri'naza vahe'ene umanigahie. **17** Knare ne'zama neneno, tima neno musehu zanku'ma mika zupama avesivava hanimo'a, zago'amo'a vagaresigeno amunte omane vahe manigahie. **18** Fatgo avu'ava'ma nehaza vahetema hazenkema esiana, kefo avu'ava'ma nehaza vahe'mo'za zamagri nona eri'za ana hazenkea erigahaze. Hagi hazenke vahe'mo'za fatgo vahe'mofo nona eri'za knazana erigahaze. **19** Mago ne'mo'ma kehakare nehuno, rimpia hevava nehania a'amofoma atreno ka'ma kopima umanisiana knare hugahie. **20** Ama' antahi'zama eri'nesia ne'mo'a, knare feno zantamine olivi masavena noma'afina erivitegahie. Hianagi neginagi antahi'zane vahe'mo'za, mika fenozazmia atre vaganeraze. **21** Mago vahe'mo'ma fatgo avu'avazane vahe'ma avesinte avu'ava'ma hankavetino avaririsimo'a, knare nomani'zanki, fatgo avu'ava'ene ra agine erigahie. **22** Ama' antahi'zane ne'mo'a, hanave vahe'mokizmi rankumara ha' huzamanteno e'herino, hanave vihugu'ma amuha'ma hunemiza vihua tapage hutregahie. **23** Iza'o kema hu'zampima agi'ene aganefu'nanema kegavama hanimo'a, hazenkea e'origahie. **24** Vahe'ma huhavizama huzamante vahe'mo'a, avufga ra nehuno, vahera zamage fenkami netreno, agra'a avufga erisga hu'zanke nehie. **25** Eri'za e'ori feru vahe'mo'a mika zama eri'zankura avesi avesi nehuno, frigahie. Na'ankure agra azana eri avako huno, eri'zana e'ori'ne. **26** Feru ne'mo'a mika'zama eri'zankura antahi vava nehie. Hianagi fatgo ne'mo'a agra'agura ontahino, mika fenozana vahera nezamie. **27** Kefo avu'ava ene vahe'mo'ma kresramnama nevia zankura, Ra Anumzamo'a agoteno avesra hunenteankino, kefo zamagu'zamage'sareti'ma eri'za aza vahera

mago'ane agatereno avesra hunezamante. **28** Keagama refako hu trate'ma havigema huno hu ama'ma huntesimo'a, frigahie. Hianagi tamage kema hanimofona, ana agenke'amo'a mevava huno vugahie. **29** Kefo avu'ava'ma hu vahe'mo'a, havige huno nagra knare vahe mani'noe nehie. Hianagi fatgo vahe'mo'za zamagesa antahi so'e hute'za kana nevaze. **30** Ama' antahi'zana eri'enka, antahi ama'ma hu antahi'zana erigahananagi, Ra Anumzamofoma ha'ma rente'sanana ana antahi zankamo'a amne zankna hugahie. **31** Ha'ma hu'zana hosi afura azeri retro hugahazanagi, ha'ma azerigatere zana, Ra Anumzamofontegati egahie.

22 Vahe'mo'ma knare kagi'ma kami'zamo'a, rama'a fenoma ante'zana agatere'ne. Hagi vahe'mo'ma kagri'ma kavesigante zamo'a, goline silvanena agatere'ne. **2** Feno vahe'ene amunte omane vahe'enena, Ra Anumzamo ana tarega vahera tro huzanantege'ne mani'na'e. **3** Antahi ankere antahi'zane vahe'mo'a, hazenke zama ne-esigeno'a negeno maniganesigeno agateregahianagi, knare antahizama omane vahe'mo'a, hazenkema fore'ma nehanigeno'a, negeno vuno ana hazenkezana erino knazampina manigahie. **4** Agra'a avufga anteramino nemanino, Ra Anumzamofonku'ma koro huntenu, agorga'ama mani'zamo'a, rama'a fenoza nentesankeno kagia husga nehanagenka, za'za kna manigahane. **5** Akrahe krahe avu'ava ene vahe'ma nevaza kampina, ave'ave zane vahe'ma azeri kukone me'ne. Hianagi iza'o agra'ama kegavama himo'a afete nemanie. **6** Mofavreka'a knare kante'ma vu'za rempi humigeno knare kante nevuno, rama hanuno'a, ana avu'avara atreno rukrehe osino. **7** Feno vahe'mo'za zamunte omne vahera, kegava hunezamantaze. Hagi zagoma nofi'ma nehaza

vahe'mo'za zago'ama nofi'ma haza ne'mofo kazokazo eri'za
vahe nemanize. **8** Kefozama krinenimo'a, henka ne'zama'a
hazenke'za kafigahie. Hagi vahe'ma zamazeri havizama nehia
himamu'amo'a, vagaregahie. **9** Iza'o zamunte'ma omane naga'ma
muse zampinti'ma ne'zama zamisia vahera, Ra Anumzamo'a
asomu huzamantegahie. **10** Kehu haviza hu vahera zamahe
anati atrenkeno, vahe'ma huhavizama hu'zane, ha'ma hu'zane,
fragema hu'zana vagareno. **11** Agu'amo'ma agru nehanigeno,
fru kema huzanku avenesismo'a, kini ne'mofo rone'a manigahie.
12 Ra Anumzamo'a antahi'zama erizante avu'a anteno kegava
nehianagi, hazenke vahe'mofo kea erinetre. **13** Feru vahe'mo'a
amanage nehie, megi'a laioni mani'neankino, vanuana nahe
frigahie huno nehie. **14** Savri a'mofo agipinti'ma ne-ea kemo'a,
muri kankna hu'ne, izano Ra Anumzamo'ma arimpa hentesimo'a,
ana muri kampi tamigahie. **15** Mofavremofo agu'afina neg'i nagi
avu'avazamo avitegahianagi, kanoma amino azeri fatgoma
hu'zamo ana avu'ava zampintira azeri arukrahe hugahie. **16**
Fenozami mago'anane eri rama'a hunaku'ma zamunte omane vahe
kna zamiza zamazeri haviza nehaza vahe'ene, feno vahe'ma
musezama nezamiza vahe'mokizmia, zamuntera omanegahie.
17 Knare antahi'zane vahe'mofo kere kagesa antenka antahise
nehunka, nagrama rempima hugamisuaza huo. **18** Na'ankure
anankemo'a knare hu'neankinka kagu'afi erintenankenana
kemo'a, kagitera me'nena kea hutere hugahane. **19** Nagra
menina rempi hunegamugu, nentahinka Ra Anumzamofonte
kagranena kamentinti huo. **20** Nagra 30'a knare kegaga
krentegantenofina, kavumro kene, antahiza eri zamofo naneke
kregaminoankinka, **21** ama ana kereti tamage kea rempi
hunka antahinenka, iza'o tamage kegu'ma hugantenigenka

e'nesamofona fatgo'are kenona ome asamigahane. **22** Zamunte
omane vahe'mokizmi zana ohanareho, na'ankure zamagra
zamunte omane vahe mani'naze. Hagi zamunte omanesige'zama
atupama hu'nesaza vahera, keagarera zamavarenteta zamazeri
havizana osiho. **23** Na'ankure Ra Anumzamo'a, zamunte omane
vahera zamahokeno zamazeri havizama hanaza vahe'mokizmia,
zamazeri haviza hugahie. **24** Arimpa hevava vahera rone
huonto, ame huno rimpahе vahe'enena tagro oto, **25** ru ana
vahe zamavu'zamava enerisankeno, kukomo kazeriankna huno
kagu'a kazeri haviza hugahie. **26** Mago vahera huvempа hunka
mago'za hugantegahue osuo. Hagi ru vahe'mo'ma nofi'ma
hu'nesigenka, ana nofi'ma hu'nea zana nagra vakantegahue
hunka osuo. **27** Anama nofi'ma hu'nesaza zama apa osesanke'za
miko zanka'ane, tafe'ma masinkama nemasesana zanena eri
vagaregahaze. **28** Tamagehe'mo'za ko'ma re'nenaza kanagi
kana, akasi kantutretma rumofo mopa eri havia osiho. **29**
Eri'zama eri antahi'zama eri'nea ne'mofo eri'zana negano? Agra
kini vahe'mokizmi eri'za vahe nemanino, agi omane vahe'mofo
eri'za vahera omanigahie.

23 Rankva ne'ene kave negahane hu'za kagima hanagenka
umani'nenka ne'zama nekura, antahi so'e hutenga kva hunka
ne'zana no. **2** Rama'a ne'zama ne' vahe'moka, kagraka'a
knankenofi kazinuti taga hiankna nehane. **3** Rankva ne'mofo
ne'zamo'a, kasanea osino. Na'ankure ana kaveteti, regavatga
hugahie. **4** Feno vahe'ma mani'zankura maragu'zatinka kazeri
havizana osunka, ama' antahi'za e'nerigeno feno vahe'ma mani
antahi'zamo'a kazeri havizana osino. **5** Kavuma keramage'ma
hanankna huno, feno zankamo'a fanane hugahie. Na'ankure
agekona eri atareno tumpa namamo hareno hampompi

mareriankna huno, afe hugahie. 6 Veva osu ne'mo'ma ne'za
emeno huno kagi hania nezantera ovuo. Knare ne'za krentesia
nezantera, ksanegura osuo. 7 Na'ankure agra e'inahukna ne'kino,
nama'a mizana hugahie antahintahi hakare nehuno, ne'zana
nenenka tina no hugahianagi, agri agu'amo'a, kagri'enena
omane'ne. 8 Anama ne'nana ne'zana amu'atinetrenka,
nanekema hu so'e hunte'nana zamo'a, amanezankna hugahie.
9 Neginagi vahe'ma mani'nena fina keaga osuo, na'ankure
ama' antahi'zanteti hanana kea, huhaviza hugahaze. 10
Tamagehe'mo'za koma re'ne'naza kanagi kana akasi kantugma
osuge, megusa mofavremofo mopa kavunofi ahenka e'orio. 11
Na'ankure zamahoma ke'nia Nera hankave Ne' mani'neankino,
tamagrira keaga Agra'a hurmantegahie. 12 Kagu'areti kavumro
kea nentahinka, antahizama kami kere kagesa antenka
antahio. 13 Mofavrema azeri fatgoma huzankura, korera
osuo. Kagrama kanoma amisanana ofrigahie. 14 Azeri fatgo
hu kanoma ami'zamo'a, fri vahe kumapima vezankura agu
amena agu'vazigahane. (Sheol h7585) 15 Mofavre'nimoka ama'
antahi'zama erisanana, Nagri nagu'amo'a muse nehuno, 16
kagipinti'ma fatgo ke'ma antahi'sugen'o'a, mika nagu'amo'a muse
hugahie. 17 Kumi vahe'mokizmi zamavu'zmavakura kegasanea
osuo. Hianagi Ra Anumzamofonku kore'ma hunteno agorga'ama
manizanku maka kna, kagesa antahio. 18 Henkama fore hania
zanku'ma tamage hunka kagesa nentahinka, amuha'ma nehana
zamo'a amnezanknara osugahie. 19 Mofavre'nimoka, ke'n'i'a
antahinka knare antahi'zana erinka, fatgo kante kagu'a antenka
vuo. 20 Rama'a aka'tima nene'za neginagi nehaza vahe'ene,
rama'a zagagafamofo ame'are'ma nehaza vahe'enena, trago
oteho. 21 Aka tinte vahe'ene rama'a ne'zama ne' vahe'mo'za

zamunte omne vahe manigahaze. Hagi zamavu'ma mase vava
vahera, kukena zamimo'a tagato tagatu hugahie. **22** Kasema
kante'nea negafa ke'a nentahinka, negrera'ma tvavamaresigenka
kefenkamia otro. **23** Tamage kema mizase'nenunka zagonera
otro, ama' antahizanki, huogu'ma rempima hugamisiazanki,
antahi'ama huno refkoma hu'zana erio. **24** Fatgo avu'ava'ma nehia
mofavremofo nef'a, tusi'a muse hugahie. Hagi ama' antahi'za
eri'nea mofavre'agura, nef'a muse huntegahie. **25** E'inahu
kavukva hunka negrera kfama azeri muse nehunka, ksegante'nea
negrerana azeri muse huo. **26** Mofavre'nimoke, kagu'tumoka'a
Nagri nemalinka, kvuma ke'sanana, Nagri navu'navate kento.
27 Monko avu'ava'ma huno Savri'ma huno vanoma nehia a'mo'a,
murigankna higeno, vema ante'nea a'mo'ma savrima huno
vanoma nehia a'mo'a, osi tinkerigna huno urami'neankino, ana
tinkerifima uramisaza vahe'mo'za haviza hugahaze. **28** Ana
a'mo'a kumza vahe'kna huno kazeri savri hunaku kaveganteno
mani'neankino, vene'nea azeri savri hanigeno, mani fatgo
huno a'are'ma omani'zamo'a ra hugahie. **29** Iza hazenkefina
mani'vava higeno, iza asu zampina nemanie? Iza ke hakarea
nehigeno, iza hara azeri o'netie? Iza avufamo hazenkea
erigeno namuna nere? Iza avumo korankera nehie? **30** E'i
anazama fore'ma nehiana zazate'ma aka tima nenaza vahe'ene,
hanave waini tima tagi havia hu'za ne'naza vahe'tmimofonte
fore nehie. **31** Atregeno wainimo'ma korankrema nehuno,
agrema'amo taferopinti krakra huno mrenerino, knankente'ma
fruma huno urami'nia zamo'a, kazeri kasanea osino. **32** Hianagi
henka'a osifavemo kreankna nehuno, ha' osifavemo kamprino
avuatgazama'a regatati huganteankna hugahie. **33** Kavumo'a
ruzahu ruzahu'za negenkeno, antahintahi kamo'a savri nehina,

kema hanana kemo'a savri hugahie. 34 Hagi e'inama nehanana, hageri amu'nompi me'nea ventefi mase'nankeno kranto kranto huno kazeri tore tore hiakna nehuno, ventemofo seli rente zafare mani'nankeno, zahomo kavregantugama hiakna hugahane. 35 Anage hugahane, nahazanagi nata onkrine hunka nehunka, kanona namizanagi antahina kena osu'no'e hugahane. Hanki nagrama ete otisuna, mago'ane ana tina negahue nehane.

24 Havi vahe'mo'ma hania avu'ava zankura kegasane huge, ana vahe'enema tragotenka mani'zankura, kagesa ontahitfa huo. 2 Na'ankure antahiza zamifina vahe'ma hazenke'zami antahi'zamo avitegeno, zamagipinti'ma atineramia ke'mo'a, hazenke erinte kege nehaze. 3 Knare antahi'zanteti nona neginka, ama' antahi'zanteti eri hanavetigahane. 4 Antahi'zama eri'nenanteti, knare fenozane zago'amo'ma mareri zantamina nonka'afina erinte avitegahane. 5 Ama' antahi'zane vahe'mo'za rama'a hanave eri'zageno, antahi'zama eri vahe'mo'za mago'ane hanavea e'nerize. 6 Ha'ma hu'zante'ma ama' antahi'zama hunka e'orinesunka, hatera ovuo. Na'ankure rama'a vahe'mo'zama hate'ma vanana kavumro'ma kantesagenka, hara azeri agateregahane. 7 Knare antahi'zamo'a mesga hu'neanki'za, neginagi vahe'mo'za erigara osu'nazanki'za, rankumamofo kafante'ma kva vahe'mo'zama atruma hu'zama kema hanafina, mago kea osugahie. 8 Kefo avu'ava'zama hu antahi'zama retro'ma nehaza vahe'mokizmigura, hazenke vahere hu'za nehaze. 9 Neginagi avu'ava'ma hu'zama retro'ma hanazana, kumi nehaze. Vahe'ma huhavizama hunezmantea vahe'mofona, vahe'mo'za zamavesra hu'za zamagote'nentaze. 10 Knazampima unefrenka hanavema otisankeno'a, hanaveka'a omanegosie. 11 Havigema hu'za zamahe frinaku'ma hanaza

vahera, zamaza huta zamavareho. Hagi zamahe frinaku hanaza vahera, zamaza huta zamavareho. **12** Antahi'nesunka ontahi'noe hunka havigea osuo. Na'ankure Anumzamo'a kagu'a kageno antahino nehuno, kagu'a kegava hunegantea ne'mo'a, kagu'a kageno antahino osugahie hunka osuo. Miko vahe'mokizmia zamagrama hu'nesaza zamavu'zmavate anteno mizana zamamigahie. **13** Mofavre'nimoka tume rima'a no, na'ankure knare hu'neankino, kagitera haga hugahie. **14** E'i anahukna huno, ama' antahi'zamo'a kagu'afina haga hugahie. Hagi hakenkama erifore'ma hanankeno'a, henkama erigahue hunka amuha'ma nehana zamo'a, amnezanknara osugahie. **15** Kefo vahe'moka fatgo vahe'mo'zama nemaniza nontera, zamazeri haviza hunakura kva hunka omanio. Hagi fatgo vahe'mo'za nemaniza kumara eri havizana osuo. **16** Na'ankure fatgo vahe'mo'za, 7ni'a zupa evuramiga hazanagi, ete otigahaze. Hianagi kefo avu'ava'ma nehaza vahetema mago hazenkema esuno'a, eme zamazeri haviza hugahie. **17** Ha'ma renegantesaza vahe'ma evuramisagenka, musena osuo. Hagi tanafa'ma hanaza zankura, musena osuo. **18** Na'ankure Ra Anumzamo'a ana'ma hanankeno'a, negageno musena hunoganteno arimpahe zama'a anamofontetira eritregahie. **19** Kefo vahe'mofo avu'avakura korera hunka antahintahi hakarea nosunka, ana havi zamavu zamavakura kegasanea osuo. **20** Na'ankure kefo zamavu'zava'ene vahe'mokizmia, henkama knare huzama mani'saza mani'zana omanesige'za, lamu tavi'mo asu hianknha hugahaze. **21** Mofavre'nimoka, Ra Anumzamofone kinimofonena koro huneznantenka zanagorga nemaninka, ha'ma reznantesaza vahe'enena magopina tragoteta omaniho. **22** Na'ankure e'inahu vahetera, tusi'a hazenke zamo ame huno

egahie. Ra Anumzamo'ene Kini ne'mo enema zamisaza knazana, mago'mo'e huno ontahitfa hugahie. **23** Ama' antahi'zama eri'naza vahe'mo'za amanahu ke hugahaze. Nanekema trate refkoma hanuza magomofonkukera osugahaze. **24** Iza'o kefozama hu'nesia neku'ma, kefozana osune huno'ma hanige'za, rama'a vahe'mo'za anagema hania nekura, huhaviza hunentesageno, kokankoka vahe'mo'za antahi haviza huntegahaze. **25** Hu'neanagi iza'zo kefoza hu'nesia neku'ma, kefoza hu'ne hu'zama huama'ma hanamo'za, rama'a asomu eri'za rama'aza antegahaze. **26** Tamagema huno ke nonama hu'zamo'a, e'i knare kvate knampaka'amo kanukino kantako huganteankna hugahie. **27** Kotazana hozama antesanaza retro hunka hoza antetenka, henka nonka'a kigahane. **28** Tava'onka'are'ma nemanisimofoma trate'ma kegagama hunentezama, kenana zanku nehazafi huama huo hanagenka, havigea hunka hazenkema osu'nesia zankura, hazenke hu'ne huonto. **29** Hagi zamagrama hunantesaza zana nona hu'na huzamantegahue hunka osuge, mago'mo'ma havizama hugantesiana, nona hu'na havizana huntegahue hunka osuo. **30** Nagra feru ne'mofo hozafine antahintahi'a omene ne'mofo waini hozafi agatere'na nevu'na koana, **31** ave've trazamo'ene hozafi inozamo hageno ana hoza refitegeno, have keginama hugagi'nea zamo'a fraguvazirami'ne. **32** Ana zama nege'na nagesama nentahugen'o'a, mago'aza rempi hunami'ne. **33** Osi'agna nagra navura masehimarege, osi'agna masege, osi'agna nazana anamagi'na manisga huge'ma hanugen'o'a, **34** musufa vahe'mo'za mika fenozmi kumzafa sage'za, mika zazmimo'a ame huno vagaresige'za, zamunte omene vahe maniankna hugahaze.

25 Ama'i Solomoni knare antahi'zamofo naneke, Juda vahe
kini ne' Hezekia eriza vahe'mo'za eri'za krente'naza naneke.
2 Ra Anumzamo'a rama'a zama antahizama'afi erifrakinegu,
ra agi nemune. Hagi kinimo'a anama fraki'nea zama hakeno
erifore nehigeta, agrira ra agi'a amita husga nehune. 3
Monamo onagamu me'geno, mopamo'a ufenkamu megeta
antahita keta nosunankino, e'nahukna kante kini vahe'mokizmi
antahintahizmia tagra antahita keta osugahune. 4 Silvama kre'za
eri avusese hazageno, knare'ma hige'za anantetira zago'amo
mareri zantamina tro nehaze. 5 Kefo avu'ava'ma hanaza vahe'ma
kini ne'mofo kumapinti'ma zamahenati atresazana, agrama
kegavama hu'nea kuma'mo'a, hanavetino fatgo huno megahie.
6 Kini ne' avure'ma emanisunka, nagra ra vahe'mani'noe hunka
kavufga ra nosunka, zamagine vahe'mokizmi tratera eomanio. 7
Akoheno mani'enkeno kema huno avrenagamute zamo knarera
hu'neanki, agine vahe'mofo avufima hugantesigenka anama
mani'enana tra'ma atrenka urami zamo'a kagaze hugahanki,
antahinka kenka huntenka fatgoza huo. 8 Ame hunka naneke
hu tratera magomofona avrentenka kehara huonto. Na'ankure
tava'onkare'ma mani'naza vahe'mo'za, ana nanekeka'ama
eriamu hu'za kazeri kagazema hanazana, atuparega na'a kagra
hugahane? 9 Kagrama tava'onkare'ma nemanisimo'enema ke
ha'ma nehanunka, mago'mofo oku'a avu'ava'amofo nanekea hu
amara osuo. 10 Henka'ama vahe'mo'za antahisu'za, fraki'za
hazankea kagra franokine huge, kazeri kagaze nehu'za mika
zupa antahi haviza hugante vava hugahaze. 11 Hagi vahe'mo'ma
knare antahi'zama kna fatgo'are'ma hu'ama'ma hanigeno'a,
ana ke'mo'a golire tro hunte'naza epoli zafa ragamo silva
zuompafi meankna hu'ne. 12 Knare antahi'zanteti'ma azeri

fatgoma nehanigeno agesa anteno antahisimo'a, golire tro hunte'naza avasaseza agesafi anteankna hu'ne. **13** Kema erino esia ne'mo'ma, ome huo huno huntesigeno esia kema eme fatgo huno anankema hu ne'mo'a, hozafinti neza hamare knare ata ko'mo rufuru hiankna nehigeno, kva'amofo agu'amo'a fru nehie. **14** Mago vaheku'ma museza kamigahue huno'ma avufga ra hu kazigati huvempa hunteteno, anazama omisia vahe'mo'a, ko aruku zaho e'nerino hampo ko atuno hanintiri huteno, kora oriankna nehie. **15** Hagi ame hunka krimpama ohe'zamo'a, kva vahera rimpa azerifru hunka, kagrarega avrentegahane. Ante fru hunka hukemo'a, ha' frama hu'zana mika azeri agateregahane. **16** Tume'mofo tima'amo'a haga hu'neanki, nenenunka avamente no, rama'a nesanana amu'atigahane. **17** Tava'onkare'ma nemanisimofo nontera hakare zupa vuvava osuo, anama hanankeno'a musema huno'ma negavreanknara osugosianki, avesra hugantegahie. **18** Tava'onkarema nemanisimofoma havigema huntenka, agenkema hanana zamo'a, kumpa knonu aheankna nehunka, kazinteti avufgama akafrankna nehunka, keve aheankna hugahane. **19** Kagrama kaza osuga vahe'ma antahinemisankeno havi knama esigeno'a, naza hugahiema hananana, ave'eneno ata negrifi ne'zama neankna nehunka, agamo haviza hu'nea ne'mo revazamu revazamu huno viankna hugahane. **20** Vahe'mo'ma asunku zampima mani'nenigenka muse zagamema hananana, ana asunku zampi mani'nea vahe'mofona, zasi knafi nakreku'a zafi atreankna nehunka, aka tinu avufga taga hu'nefi tagi atreankna hugahane. **21** Ha' vahekamofoma aga'zanku'ma nehanigenka ne'zama nesia zana neminka, tinku'ma avenesinigenka tina amigeno neno. **22** E'inahu'ma hanankeno'a, teve tankanuza asenifi

hampagenteankna hanankeno, agra'a havi avu'ava zama'agura
agaze nehanigeno, Ra Anumzamo'a mizana kamigahie. **23**
Vahe'ma amefiga ke'ma hu kemo'a, noti (north) kazigati zaho'mo
ko atufeno eankna huno, ana vahe'mofontera arimpa ahe'za
erino esigeno, avugosamo'a zahe hugahie. **24** Fegi'a anaga
nomote kagraku manizamo'a, nogu'afima kehakarema nehia
a'enema manizana agaterene. **25** Afete kumateti knare'zamofo
agenkema egeno antahizamo'a, tinku avesinere zasi ti amigeno
neankna nehie. **26** Fatgo ne'mo'ma kefo avu'ava ene ne'ma,
avaririno kefo avu'ava'ma ome haniana, knare tinkerifi agamunke
timo ufreno eri haviza hiankna hugahie. **27** Vahe'mo'ma ra'ma'a
tumerima ne'zamo'a, knarera osu'nne. Vahe'mo'ma agra'a ra
agima eri'zanku'ma mraguzamat'i'zamo'a, knarera osu'nne. **28**
Iza'o, rimpa aka he'zama azeri aravama ohesiana, mago ra
kuma'mofo have keginamo fragu vaziramiankna hugahie.

26 Neginagi vahe'ma ragima amizamo'a, zage knafi ko'
ariankna nehigeno, ne'zamo afure knafi ko' ariankna huno
knarera nosie. **2** Mago'mo'ma hazenkema osu'nenigeno kazusi
hunte kema hanigeno'a, ana kazusi kemo'a kisave namamo
mika zupa manigsa osuno hareno vano vano nehiankna huno,
vahetera ana kazusi kemo'a forera osugahie. **3** Hosi afura sefu
knonu ahe'za azeri ante fatgo nehazageno, donki afumofona
aeni zamagipina rente'haza zante zamavazu hu'za zamazeri
fatgo nehaze. Hagi neginagi vahera kanonteti zamagumpi
zamahe'za zamazeri fatgo hugahaze. **4** Neginagi vahe'mofona
neginagi naneke zimirera kenona huozamanto, anama hananana
zamagri kna hunka neginagi vahe manigahane. **5** Antahiso'e
hutenka neginagi vahe'mo'za, neginagi nanekema hanaza
nanekerera, kenona zmia huzamanto, ru zamagra antahisazana

knare antahiza eri'none hugahaze. **6** Neginagi vahe'mofoma katogema huntesankeno kema erino vaniazamo'a, mago kaga akafri atreankna nehuno, avuatga ti neankna hugahane. **7** Neginagi vahe'mo'ma knare nomanizamofo nanekema hu'zamo'a, vahe'mofoma frino sti'nea agamo eri'za e'oriankna huno, ana naneke'amo'a erizana e'origahie. **8** Neginagi antahi'zane vahe'ma ra zamagima zmizamo'a, kumi'atifima have erinteno ahe atrenaku anteankna nehie. **9** Neginagi antahi'zane vahe'mo'zama knare nomanizamofo naneke hanazana, negi ti neno neginagi hu'nea vahe'mo, ave'ave nofi azampi azerineno traka truku huno vano hiankna nehie. **10** Neginagi antahi'zane vahe'ene karankama enevanaza vahe'ma zagore'ma eri'za erisazegu'ma zamavaresia zamo'a, keve ome ahetre emehetre huno rama'a vahe zamaheankna hugahie. **11** Kramo'ma amu'ma atitrenere'ma eteno viaza hu'za neginagi vahe'mo'za koma nehaza neginagi zamavu'zmavara hutere nehaze. **12** Neginagi vahe'mo'za amuhama hazazamo'a, ama' antahi'zane vahe'ma mani'none hu'za antahiza vahera zamagateneraze. **13** Kampine ra kumamofo kantamimpina ha' zaga laioni manine hu'za feru vahe'mo'za nehaze! **14** Kafamo'ma hantintenare'ma me'neno anagino erigino hiankna hu'za, feru vahe'mo'za nemasaza tafe zamire, rukrahe rukrahe nehaze. **15** Feru vahe'mo'a ne'zama ante tafepintira ne'zana erigahianagi, agipina erinteno nezankura avesra hugahie. **16** Feru vahe'mo'a agragu'ma antahiana, 7nia knare antahi'zane vahera, nagra zamagetere'noe huno nentahie. **17** Rumozama ha' frama nehazafima, anintaka huno kema hu'zamo'a, kramofo agesare avazu huno viankna nehie. **18** Tava'oma'are nemanimofoma revatga nehuno, kiza zokago ke hugantoe huno'ma nehimo'a, negi ne'mo teve nerea keve ome

ahetre eme ahetre hiakna nehie. **20** Hagege teve rampama omanesigeno'a, tevea rukru huno ontegahie. Hagi vahe zamefi kema hu'zama omanesigeno'a, ha' frama hu'zana omanegosie. **21** Tevemo'a tanknuzare tevea nereno hagage teve rampare rukru huno tevea nereankna hu'za keframa vazi vahe'mo'za, ha'ma hu'zana eri agafa nehaze. **22** Vahe'ma amefi agenke hu kemo'a, haganentake ne'zankna hu'neankino, vahe'mofo agu'afinka unefre. **23** Vahe'ma azeri havizahu antahi'zama kagu'afima me'negenka, amne kagiteti'ma fru kema humisanana, mopa kavomofo amega'a silva masave frenteno eri knare hiakna hugahane. **24** Mago'mo'ma avesra hunentesia vahe'mofoma amega agiteti avurera so'e ke humigahianagi, agu'afina antahi muginente. **25** Knare kema hanigenka ana kegura tamage hunka antahiomio, na'ankure agu'afina 7ni'a kasrino agote'zamo avite'ne. **26** E'i ana kefo antahi'zana frakigahianagi, mika veamo'za, kefo avu'ava'afi eama hanige'za kegahaze. **27** Iza'o kerima asentesimo'a, anama asentesia kerifi agra'a tamisigeno, iza'o havema rezahe huno marenerinimofona, ana havemo'a ete eramino havema retufeno marerino nevanimofona eme rehapatigahie. **28** Havi kema hu vahe'mo'a, avesrama hunentea vahera, havige huno azeri havizahu ke hunente. Rumofo zante ke'neno masave kema hu'zamo'a, ruga'a vahera azeri haviza nehie.

27 Okina e'inahu'za hugahue hunka kavufga rana osuo, na'ankure mago mago knamo'ma erino'ma e'nia zana ontahi'nane. **2** Atregeno ru vahe'mo'za husga hunegantena, kagra'agura husga osuo. Rurega vahe'mo'za husga huganteho, kagra'a kavufga husga osuo. **3** Havemo'a kna higeno, kasepamo'a tus'i'a knanentake hu'neanagi, neginagi vahe'mo'zama nehaza

zamavu'zmavamo'a, ana tarega zana agatereno tusi'a
knanentake hu'ne. 4 Rimpama ahe'zamo'a havizantfa higeno,
asivazi zamo'a ti hageno eankna hugahianagi vahe'mofa zante'ma
negeno arimpa haviza hu'zamo'a, tusia havizantfa hu'ne. 5 Havi
avu'ava'ma hanigenkama amate huama huntenka azeri fatgo'ma
hu'zamo'a, frakinkama avesima nentenka azeri fatgoma osanana
zana agatere'ne. 6 Knampa kamo'ma kazeri fatgo hukuma katama
kami'zamo'a, ha' vahekamo regavatga huno kagi'ma antako'ma
hania avu'avara agatere'ne. 7 Amu'ma hu'nesimo'a, tumemofo
rima'a one atregahie. Hianagi agazanku'ma nehania vahe'mofona
aka hu'nesia nezamo'agi, agitera haga hugahie. 8 Nonkuma
zamire'ma maniso'e osu vahe'mo'za, namamo'zama nozamire
manirava osu kanke kankema hazankna nehaze. 9 Kavesima
kanteno kavumroma ante'zamo'a, mnanentake masavemo'ene
knare mnavovo zamo mnaviankna huno rone'amofo agu'a azeri
muse hugahie. 10 Roneka'ane negafa rone'amofona kamefira
huozamio. Hazenkema e'nerisunka kazama hinogura negafu
nontega ovuo. Tava'onkare'ma nemanisimofo nontega vu'zamo'a,
afete'ma mani'nenia nagafu nontegama vu'zana ageterene. 11
Mofavre'nimoka, ama' antahi'za e'nerigeno nagu'amo'a muse
nehina, ana zamo'a knama nami'za huhaviza hunenantaza vahera
kenona zamia huzamantegahie. 12 Knare antahi'zama me'nesia
vahe'mo'a hazenkema agrite'ma eku'ma haniazana ko negeno,
maniganenigeno agateregahie. Hianagi knare antahi'zama
omane vahe'mo'a, avua onkeno ana hazenkefina vuno ufregahie.
13 Zamagenka antahinkama osu'nesana vahe'mo'za nofi'ma
kagripinti hugahune hanagenka, amanea ozaminka nakre kuzmia
avame zana erinege'za, ana nofi'ma hu'nesaza zana eme
vakanegahie. 14 Mago ne'mo'ma nanterama'afima kezatino,

so'egane huno'ma haniana, vahe'ma sifna aheankna hugahie. **15**
Ke fra nehuno kema huvavama nehia a'mo'a, nomo trovari huvava
hiankna nehie. **16** E'ina hu kna a'nema zamazeri ante fatgohu
kema zamasamia zamo'a, zaho'ma azeriankna nehuno, masave
fre'nea azanteti azerigeno arugraru vaziankna hugahie. **17**
Aenireti'ma, aenima kane'agonama nehiankna huno, vahe'mo'a,
vahe'mofo antahintahia azeri fatgo hugahie. **18** Fiki zafama
kegava hanimo'a, raga'a tagino negahie. Hagi iz'a'o kva'amofoma
kegava huntesimo'a, ra agi agra erigahie. **19** Timpima kvugosama
kanankna huno, kavukava'ma hanazamo'a kagu'afima me'neaza
eri ama nehie. **20** Fri vahe kuma'mo'ene, fri vahe'mo'za avi'ma
notazankna huno, vahe'mofo zamavenesia zamo'a zamura
nosie. (**Sheol h7585**) **21** Koline, silvama azeri agruma hunakura,
tusi'a tevefi kre'za negazanagi, vahe'mofoma reheno negeana
ragima amizanteti reheno nege. **22** Neginagi vahe'mofona
neginagi avu'ava atresiegura, havereti witima refuzafupeno
hona'a hareankna hunka zmahegahananagi, ana neginagi
zamavu'zamava'ma nehaza zampintira, zamazeri otregahane.
23 Memene, sipisipi afukamo'zama nemaniza nomaniza zamia
rezaganenka ke so'e hunka negenka, kagu'areti hunka kegava
huzamanto. **24** Na'ankure, fenozamo'a mevava osanigeno,
ragima eri'zamo'a mago naga nofitera meno ovugahie. **25**
Trazama akafra atresigeno'ma kasefa hagesigeno agonaregati
trazana erinoma ufresigeno'a, **26** sipisipi afu'mo'zane meme
afu'mo'za nenesageno, sipisipi afumofona azoka'aretira kukena
hatino nentanino, meme afura mopama mizasega'are zagonera
atrelo zagoa erigahie. **27** Hagi meme afumofo ami rima'a, rama'a
me'enkeno agrane noma'afima nemaniza naga'amo'zane

nenesageno, kazokzo eri'za mofane'amo'za nesazama'anena
megahie.

28 Kefo zamavu zamava'ma nehazamokizmia, vahe'mo'za
zamarotgo nosazanagi, kore nefraze. Hianagi fatgo
zamavu'zamava'ma nehaza vahe'mo'za, laionimo nehiankna
hu'za hanaveti'za nemanize. **2** Mago kumapima vahe'mo'ma
mago rimpama hu'zama omanesigeno'a, rama'a kva vahe
fore hugahie. Hianagi antahi'zane vahe'ene antahi ama' hu
antahi'zane vahe'ma mani'nesigeno'a, maka zamo'a knare huno
vugahie. **3** Amunte omane vahe'mo'ma, amunte'ma omane
vahe'ma azeri havizama nehiazamo'a, e'i ranko aruno hozamofo
eri haviza hiankna nehie. **4** Kasegema ruhantagi vahe'mo'za,
kefo avu'avaza'ma nehaza vahekura husga hunezmantaze.
Hianagi kasegema nevaririza vahe'mo'za kefo vahe'mokizmia ha'
renezmantaze. **5** Kefo zamavu' zamava'ma nehaza vahe'mo'za,
fatgo huno refkohu avu'ava zana antahi amara nosazanagi,
Ra Anumzamofonku'ma nehakamo'za makazana antahi amara
nehaze. **6** Amunte omane vahe'ma mani'neno fatgoma huno
mani'zamo'a, havi avu'avatet'i'ma feno vahe'ma mani'zana
agatere'ne. **7** Kasegema amage'ma ante mofavre'mofona, ama'
antahiza agripina me'ne. Hianagi ne'zama nehana hu vahe'enema
tragoteno manisia ne'mo'a, nefana ra agaze erimigahie. **8**
Zagoma agrama trohu kazigati'ma ra zago agima ahentesia
vahe'mofona, ana zagomo'a agri kupina omanegosianki, zamunte
omane vahe'ma zamavesinte'za kegavama huzmantesaza
vahe'mo'za erigahaze. **9** Kasegema antahizanku'ma amagena
hunemia vahe'mofonena, Ra Anumzamo'a agri nunamuma
antahizankura agotenente. **10** Iza'o fatgo vahe'ma avreno kefo
avu'ava'ma hu kante'ma vanimo'a, agra'a asente'nesia kerifi

tamigahie. Hianagi tamagema huno manisimo'a, knare'za erisanti haregahie. **11** Feno vahe'mo'a agra'agu'ma antahiana ama' antahi'zane vahe mani'noe huno hugahianagi, zamunte omane ama' antahi'zane vahe'mo'za, amane agrira age'za antahi'za hugahaze. **12** Fatgo vahe'mo'ma rankuma'mofoma kegavama higeno'a, mika veamo'a rimpa fru higeno, tusi muse nehaze. Hianagi kefo vahe'mo'ma kegavama higeno'a, mika vahe'mo'a franekie. **13** Iza'o kumi'ama framakinimo'a, nomani'zama'afina knarerera osugahie. Hianagi kumi'ama huama nehuno, atreno arukrahe huno esimofona, Anumzamo'a asunku huntenu azeri so'e huntegahie. **14** Maka knama Ra Anumzamofonku'ma koro huntenu agoragama mani vahe'mo'a, muse hugahie. Hianagi izano agu'amo'ma hanavema atisimo'a, hazenke erigahie. **15** Kefo avu'ava'ma nehia kva vahe'mo'a, zamunte'ma omane vahe'mokizmia, laionimo vahe aheno nenaku krafa hiankna nehigeno, beamo'ma vahe'ma aheno nenaku arotago nehianka nehie. **16** Vahe'amofoma knama zami kva ne'mofona, ama' antahi'zana agripina omanene. Hianagi havigema huno fatgo osu kanteti'ma fenoma eri'zanku'ma avesrama huntlesia kva ne'mo'a, za'zate manino vugahie. **17** Mago vahe'ma ahefri'nesia ne'moma, vahe'ma ahe fri'nesia antahintahimo'ma knama neminkeno, nontema mani so'e osu vanoma nehina, aza osu atrenkeno frino. **18** Tamage avu'ava huno mani'zamo'a, hazenkefintira kagu vazigahie. Hianagi iza'o mani fatgoma huno'ma omanisimo'a, ame huno traka hugahie. **19** Hanavema atino eri'zama mopafima erisimofona, ne'zama'amo'a avitegahie. Hianagi iza'o agafa'ama omanezante'ma avaririsimo'a, amunte omane vahe manigahie. **20** Tamagema huno hugahue nehiazama fatgo huno'ma nehia vahe'mo'a, rama'a asomu erigahie. Hianagi iza'o ame'ama huno

feno vahe'ma maninaku'ma hanimo'a, hazenkefi ufregahie.

21 Magomofo kazigama nemanino magomofoma atre'zamo'a, knarera osu'n'e. Hianagi mago'a vahe'mo'za breti ankra'are, kumi avu'avaza eri fore hugahaze. **22** Agraguке'ma antahi' vahe'mo'a, ame' huno feno vahe'ma mani'zanku agu'agesa nentahie. Hianagi henkama amunte omnesia zankura, keno antahino nosie. **23** Vahe'ma azeri fatgo hunaku azeri koneria ne'mo'a, vahe'mofoma masavenkema huzamante nera agatereneankino, henka rama'a vahe'mo'za agrikuke hugahaze. **24** Iza'o nerera nef a zama kumzafama neseno kumira nosue nehimo'a, agra mikazama eri havizama nehia vahe'ene tragonete. **25** Agraguке'ma antahi vahe'mo'a, ha' azeri onetie. Hianagi Ra Anumzamofonte'ma amentinti nehanimo'a, nomani'zama'afina mani knare hugahie. **26** Iza'o agra'a antahi'zanku'ma knare hu'neanki'n'a amne hugahuema hanimo'a, neginagi vahekna nehie. Hianagi iza'o ama' antahi'zampima vanimo'a, knazana agateregahie. **27** Iza'o amunte omane vahe'ma amisimo'a, mago zankura upara osugahie. Hianagi iza'o ozamage vahe kna nehuno zamaza osanimo'a, rama'a kazusifi manigahie. **28** Kefo vahe'mo'zama kvama mani'za kegavama hazageno'a, mika vahe'mo'za fra'nekize. Hianagi ana kefo kva vahe'zagama frizage'za, fatgo vahe'mo'za ome rama'a nehaze.

29 Iza'o rama'a zupama azeri fatgoma hanaza kema ontahino eritrenimo'a, ame huno havizantafa hanige'za, azeri fatgo hugara osugahaze. **2** Fatgo vahe'mo'zama kvama manizage'za, mika vahe'mo'za muse nehaze. Hianagi kefo vahe'mo'zama kegavama hazage'za, zamarimpa kna nehu'za, kragi neraze. **3** Ama' antahi'zama avesintea ne'mofo nef'a muse nehie. Hianagi savri a'enema tagroteno nemanimo'a, fenoma'a atre vaganere. **4** Fatgo

avu'ava ene kini ne'mofo kuma'mo'a, oti hanavetigahie. Hianagi masavema ami kazigati'ma ami'naza zagoma eri ne'mo'a, kuma'amofona eri haviza hugahie. **5** Tava'o zamire'ma mani'nesia vahe'ma rezmatga hu'za masave kema huzmantaza zamo'a, zamagra'a kama nevazafi kuko anteankna nehaze. **6** Kefo vahe'mofona krifumo azeriankna huno kumimo'a azenerianagi, fatgo vahe'mo'za zagame hu'za muse nehaze. **7** Fatgo vahe'mo'za zamunte omne vahe'mofo nomani'zankura antahi nezamiza kegava hunezmantaze. Hianagi kefo vahe'mo'za, anara nosaze. **8** Vahe'ma huhavizama huzamante vahe'mo'za ra kumapi tevea taginteknna nehaze. Hianagi ama' antahi'zane vahe'mo'za, haframa hu'zana eri amane nehaze. **9** Ama' antahi'zane vahe'mo'ma neginagi vahe'ma keagarema avrentesiana, ana neginagi ne'mo'a, arimpa ahentege ana ke'arera ki'za zokago ke nehanigeno zanarimpa fru'zana omanegosie. **10** Vahe'ma zamahe fri vahe'mo'za, hazenkezmi omane vahekura zamavesra hunezmantaze. Hianagi fatgo vahe'mo'za, hazenkezmi omane vahe'ma zamazeri so'ema hanaza zanku nentahize. **11** Neginagi vahe'mo'za zamarimpa he'zana azerirava nosazanagi, ama' antahi'zane vahe'mo'za, zamarimpa ahe'zana azerirava nehaze. **12** Kva ne'mo'ma havigemofoma amage'ma antesiana, mika eri'za vahe'amo'za haviza hugahaze. **13** Amunte omane vahe'ene, knama nezamiza vahe'enena, Ra Anumzamo'a ana taregamokiznima magozahu'zama, zanami'neana zanavuma ke'za zanamine. **14** Zamunte omne vahe'ma fatgo huno refakoma huzmantesia kini ne'mo'a, za'za kna kinia manino vugahie. **15** Mofavrema kanoma amino azeri fatgoma hu'zamo'a, ana mofavrea ama' antahi'za amigahie. Hianagi kanoma amino azeri fatgo osu mofavremo'a, nererana agaze eri nemie. **16**

Kefo zamavu'zmava'ene vahe'mo'za kvama manizageno'a, kefo
avu'ava zamo'a ra huno marenerie. Hianagi fatgo vahe'mo'za
mani'ne'za nezamagesage'za evurami'za haviza hugahaze. **17**
Mofavreka'a avumro antenka, azeri fatgoma hanankeno knare
avu'ava'ma hanigenka, karimpa fru nehina muse hugahane.
18 Ra Anumzamo'ma henkama fore'ma hania zanku'ma, eri
ama huno kasnampa kema ozamasmisige'za, vahe'mo'za savri
hu'za magoke kantera omanigosaze. Hianagi iza'o kasegema
amage'ma antesimo'a, muse hugahie. **19** Kazokzo eri'za
vahe'mofona kegera hunka azeri antefatgo osugahane. Na'ankure
ana kea antahi ama' hugahianagi, ana kemofona amagera
anteno anazana osugahie. **20** Zamagesa ontahi ame'ama
kema nehaza vahera nezamagano? E'i ana vahera neginagi
zamavu'zamava'ma nehaza vahe'mo'za zamaza hu'zama
erisaza kamo'a zamagetere'n. **21** Osi'ma mani'nesigenka
maka'zama hugnareke'ma hunte'nesana eri'za ne'mo'a, henka'a
kazeri haviza hugahie. **22** Arimpama ahe vahemo ha'ma
hu'zana eri agafa nehie. Hagi ame huno rimpa ahe vahe'mo'a,
rama'a kumi nehie. **23** Zamavufga eri antesga hu vahe'mo'za
evuramigahaze. Hianagi zamavufagama anteramiza mani
vahe'mo'za, ra zamagi erigahaze. **24** Kumzafa vahe'enema
tragoteno manisimo'a, agra'a azeri haviza nehie. Keaga refakohu
tratetima antahigesankeno huama'ma hanige'za kana amigahaze.
Hagi huamama osniana, Anumzamo'a azeri haviza hugahie. **25**
Vahe'mofoma koroma huntesanana, kagra'a krifu anaginentane.
Hianagi iza'o Ra Anumzamofonte'ma amentintima hanimofona,
agu'vazinkeno knare huno manigahie. **26** Rama'a vahe'mo'za
kva vahe zamimozama zamavesima zamantesaza zanku
zamavu'zmavara nehazanagi, Ra Anumzamo refako huno nege.

27 Fatgo vahe'mo'za kefo vahekura zamavesra hu'za zamago atenezmantaze. Hianagi kefo vahe'mo'za fatgo z mavuzmava'ene vahekura, zamavesra hu'za zamago'atenezmantaze.

30 Ama'na nanekea, Jake nemofo, Aguri Itielintegane Ukalintega huama huno kre zanami'nea naneke. 2 Tamage nagra mago'a vahe'mo'zama nehaza havizana agatere'na havizantfa nehu'na, vahe'mo'zama antahi ama'ma nehzaza hu'na antahiamara nosue. 3 Nagra knare antahi'zana rempi hu'na e'ori'na, Anumzamo'ma Ruotage hu'nemofoma keno antahino'ma hu antahi'zana e'ori'noe. 4 Iza monafinka mareriteno ete erami'ne? Iza zahora aza agu'safina azeri'ne? Iza tavarave'afina tina anakino ante'ne? Iza mopa ometre emetretera mika'zana antegeno fore huno me'ne? Agri agi'a iza'e, nemofo agi'a iza'e? Antahinesunka nasamio! 5 Anumzamofo kema maka ke'za antahi'zama hu'nazana tamage ke me'ne. Agra mika zamagu vasinogu'ma Agrite'ma neaza vahe'mokizmia hankogna hu'neno zamagu nevazie. 6 Anumzamofo nanekerera kagra'a kagesafintira amerasenka ruokamaro, ru kazeri korino havige vahe maninane huno kazeri ama hugahie. 7 Anumzamoka tare zantfanku kantahige'za huanki kavresra huonanto, ama mopafi ofri'ha kasefa hu'na mani'nesurera, 8 ese' zanku'ma kantahigesuana, nazahuge'na vahe'ma revatgahu avu'ava'zane havigea osaneno. Anante zana natrege'na rama'a feno vahera omanige, namunte omane vahera omanisuanki magoke magoke knama nesugeno namuma hania avamente namio. 9 Na'ankure nagrama rama'azama antesuna, namefi hunegamina ru Ra Anumzamoka kage'ha antahi'na osu'noe huge, ru namunte omanena musufa nesena, kagi eri haviza huzankura, avamente namio. 10 Mago kazokzo eriza

nemofona kva'amofontera vunka ome azeri haviza hu kea osuo. Kagrama anama hnankeno'a, ana kazokzo eriza ne'mo'a antahi haviza hugantena, hazenkefi manigahane. **11** Mago'a vahe'mo'za nezmafana hu haviza hunezamante'za, nezamrerana musenkea hunozmantaze. **12** Mago'a vahe'mo'zama antahizana kumitia omne'ne nehazanagi, Anumzamofo avurera agrua osu'naze. **13** Mago'a vahe'mo'za knare hu'none huza zamavufaga ra nehu'za, mago'a vahe'mokizmia zmage fenkami netraze. **14** Mago'a vahe'mokizmi zamavemo'a, vahe'ma zamahe bainati kazinkna higeno, tuke zamavemo'a kazinkna huno asaneneankino zamunte omane vahe ene, mago'a zanku'ma atupa'ma hu'nesnaza vahera, ama mopafintira zamasga huvazigahaze. **15** Kukufamo'a taremofatre zanante'ne. Zanagi'a, Namio, Namioka! Zmavesizama eriknarema nosia zana 3'a za me'ne. Zmamuma nosia zana 4'a za me'neankino, **16** e'i ana zantamina, fri vahe kumaki, vene'ma mase a'mo'ma mofavrema nontea naravo aki, tima anihuma nehia hagege mopagi, ke'onke zama tefananema nehia tevemofonena zamura nosie. (**Sheol h7585**) **17** Nefama negeno azanava kema hunenteno, nererama kefenkami atresnia vahe'mofo avurga, kotkoti nama zaga'mo'za ana avurga ani kasonepesageno, tumpa namamo'za avufga nevagaregahaze. **18** Nagritera 3'a zamo ruzahukna zana megeno, antahi ama'ma nosua zana 4'a za me'ne. **19** E'i ana zana ina kante tumpamo'a monafina hareno nevie, ina kante osifavemo'a have agofetura regraroheno vanoa nehie. Ina kante ventemo'a tusi'a hagerimpina vano nehie. Hagi na'a hu'nea zanku vene'nemo'za, vene omase akura zamave'nesie. **20** Savri a'mofo avu'avamo'a amanahu hu'ne, venema maseteno'a, ne'za neteno agiteti eri ho'mu hiankna nehuno, kefo zana osu'noe nehie. **21** 3'a zamo ama mopamofona

azeri tore nehanigeno, 4'a zamo raga oregosie. 22 E'i kazokzo
eri'za ne'mo'ma kini mani'zane, neginagi antahi'zane vahe'mo'za
nezama nezamuma hu'zane, 23 ave'sinontaza a'mo'ma ve'ma
eri'zane, kazokzo eri'za a'mo'ma kva'ama maninesia a'mofo
ve'ama rehanareno manizamo'a, ama mopa azeri tore nehie. 24
Ama'na mopafina 4'a onensa zagaramina mani'hazanagi, knare
antintahimo'a zamagripina avite'ne. 25 Kipzuvemofona hanave
zmimo'a osi hu'neanagi, ko knafima nesagura ne'zana zagegnafi
eritru nehaze. 26 Krofamofona hanavezmia omne'neanagi, havefi
nozmia negize. 27 Kenumofona kini vahe'zamia omani'neanagi,
sondia vahe'mo'zama nehzaza hu'za, vugota hu'za nevazageno,
ana amage amage hu'za nevaze. 28 Tagovira kazanteti amne
fru hunka azeriga zagamo'agi, kini vahe'mokizmi marerisa
nompina ufregahaze. 29 3'a zagamo'za knare huza kana
nevazagena kenasane nehuanagi, 4'a zagamoza fatgo hu'za
nevazagena negoe. 30 E'i ana zaga laionigino mika zagamofona
hanave'amo'a zamagatere'neankino, mago zagagura korora
huno manigane ozamantegahie. 31 Ve kokoremoza zamahihiza
eri antesga hu'za vazageno, ve memeki afumo'za zamasenia eri
antesga hu'za vazankna huno, kini ne'mo'ma sondia vahe'anema
nevuno'a, ana nehie. 32 Kagrama neginagi kavukava'ma hunka
kavufa ra nehunka, kefo avu'ava'ma hu antahi'zama retro'ma
nehanunka, kazanu kagite refintenka kea osuo. 33 Mememofo
amirima tatizana bata tronehaze. Hagi kagona ru hapati'sazana,
kora hugahie. E'ina hu'negu arimpama ahe'zamo'a, ha' eri fore
nehie.

31 Ama'na nanekea, kini ne' Lemuelina nerera knare antahintahi
ami ke rempi humi'ne. 2 Nagrani'a narimpafinti'ma kasegante'noa
mofavre'nimoka, Ra Anumzamofonte huvempa hugeno nami'nea

mofavre mani'nane. 3 Hanave ka'a a'nerera hunka otro.
E'inahu a'nemo'za kini vahe'ma zamazeri havizama nehaza
a'nerera osuo. 4 Lemueliga kini vahe'mo'za aka tina onesageno,
kva vahe'mo'za hanave tima nezankura zamavesi zamavesi
osugahaze. 5 Na'ankure aka tima nesu'za kasegemofona
zamage'nekaniza zamunte omane vahera zamazeri so'e
osugahaze. 6 Aka tina fri'zama nehanaza vahe nezamita,
waini tina ra hazenkefima mani'naza vahe zaminke'za neho. 7
Zamatrenke'za aka tina nene'za, zamunte omnea zanku'ene, ra
knazama eri'naza zankura zamagekaniho. 8 Kema huga'ma
osu'nesia vahe'mokizmima keagahu trate'ma zamavarente'za
zamazeri havizama nehanageta, kea hutma zamaza hiho. 9
Zamunte'ma omane vahe'ene, zamagra'ama zamaza hugama
osanaza vahe'mokizmi knare'zankura, fatgo hu'za refkoma
huzmantesaza zankura keaga hunka zamaza hugahane. 10
Izaga knare avu'ava ene ara erigahane? Na'ankure e'inahukna
a'mo'a, zago'amo marerisa havea agatere'ne. 11 Neve'a ana
a'mofonkura maka'zana hugahie huno antahinemiankino, mago
zankura atupara osugahie. 12 Mika zupa nomani'zama'afina,
ana a'mo'a, knare zanke'za nevena hunenteno, azeri havizana
osugahie. 13 Ana a'mo'a muse nehuno sipisipi azoka ene kafina
nofi'ene (flax) hakeno erino nofi zagiteno, agra'a azanu kukena
hatino tro nehie. 14 Ana a'mo'a ventemo'za zagore atre feno eri
avitete'za neazankna huno, afetetira ne'zana erino noma'afina
egahie. 15 Agra masa osu'nesigeno nanterampi otino nevene,
noma'afi naga'amofo ne'zana retro nehuno, eri'za mofamo'ma
eri'zama emerisia zana retro huntiegahie. 16 Ana a'mo'a hozama
ante mopa rezagneno keteno, agra'a eri'nesia zagoreti mizaseno
waini hoza antegahie. 17 Ana a'mo'a hanavetino eri'zana eri

a'kino, hanavetino eri'zana erigahie. **18** Ana a'mo'a zagoma erifore'ma hu eri'za eri kaziga knare hu'neanakino, tavira rekru hunteno eri'zana e'nerinkeno kenage segahie. **19** Ana a'mo'a agra'a, azanutinofira zagino kukena hatino tro nehie. **20** Agra zamunte omane vahera zamaza nehuno, mago'a zanku'ma atupama haza vahera zamaza nehie. **21** Ana a'mo'a zasi ko'ma atanigeno'a, noma'afima nemaniza naga'amo'zama zasiku'ma fri'zankura, korora osugahie. Na'ankure amuhoma hu tavravereti hatino kukena huzamante'ne. **22** Agra tafe'ma masi tafera hatino tafera nehuno, zago'amo mareri efeke ene fitunke tavravereti kukena hugahie. **23** Rankumamofo kafante'ma ranra vahe'mo'zama atru hu'za kegagama nehazafina, ana a'mofo nevena antahimiza ke'za antahi'za hu'naza nere. **24** Mika zupa ana a'mo'a knare kukena nehatino, zamu'nofira tro nehige'za feno vahe'mo'za eme mizase'naze. **25** Agra hanave'areti'ene ra agima ami'zanteti kukena hiankna nehuno, henkama esia zankura kiza regahie. **26** Ana a'mo'a ama' antahi'zanteti kea nehigeno, agipina vahe'mofoma knare kema hunte kemo avite'ne. **27** Arga mika'zama noma'afima me'nea zantamina kegava hu so'e nehuno, ferura nomanie. **28** Mofavre zaga'amo'za hu muse hunentesageno, neve'a husga huntegahie. **29** Rama'a a'nemo'za knare avu'vara nehazanagi, kagra zamagaterenka hiranto a'tfa mani'nane. **30** Mago a'mo'ma fru huno knare avu'ava'ma hania zamo'a krevatga hanigeno, agi agonama keganunuma hananazamo'a, fanane hugahie. Hianagi Ra Anumzamofoma koro hunteno agoragama nemanisia a'mofona, husga huntegahaze. **31** Agrama eri'zama eri'nesia avamente mizana neminkeno, knare avu'ava'ma nehuno, knare eri'zama

eri'nesia zankura, vahe'mo'za ra kuma'mofo kafante husga
huntegahaze.

Ikrisiaasatis

1 Rempi humi ne' Deviti nemofo Jerusalemi kumate kini ne' Solomoni naneke. **2** Rempi humi ne'mo'a huno, Mika zamofona agafa'a omaneno! Agafa'a omanegeno, ana maka zamo'a agafa'a omnetfa hu'ne. **3** Vahe'mo'za tusi amuho hu'za ama mopafina eri'zana e'nerizanagi, ana eri'zampintira na'a erifore hugahaze? **4** Vahera efore huno frino nevanigeno, ru vahera ete efore huno frino nevianagi, ama mopamo'a mevava huno ne-e. **5** Maka nanterana zagemo'a hanatiteno evuno kinagama segeno'a ufreteno, ete agareno anama hanati'nere enevie. **6** Hagi zaho'ma eriana sauti kazigati erino vuno ome arugagino, ete noti kaziga vuno ome arugagino, zahora erino kagigagi nehie. **7** Hagi maka timo'za kampui hanatite'za vu'za hagerimpinke unefrazanagi, hagerimo'a avira note. Hagi ana timo'za hagerimpima vute'za, ete anama hanati'nazareti eme aru hanati'za ete hagerimpina nevaze. **8** Maka ama mopafi zantaminku'ma antahintahima hu'zamo'a, tusiza huno tavesra nehianki hu amara hugara nosune. Tavumo'a rama'a zantmi negeanagi, mago'ane ke'nia agesage nehie. Anahukna huno tagesamo'a rama'a keaga nentahianagi, mago'ane antahinia agesage nehie. **9** Hakare zama menima fore'ma nehia zana, korapa fore hu'nea zamo fore nehie. E'ina hu'neankino ama mopafima fore'ma nehia zantamina magora kasefa zana forera nosianki, korapa fore hu'nea zantmi fore nehie. **10** Mago'mo'a huno amazana kasefaza fore nehianki keho huno osugahie. Na'ankure mika'zana korapa fore osu'nonkeno fore hu'neaza ete fore nehie. **11** Korapama fore'ma hu'nea zantaminkura antahintahia osu zamagenekanize. Hanki henkama fore'ma hanaza vahe'mo'za menima nehu'na zantaminkura zamage

akanigahaze. **12** Nagra Rempi huzmi ne'mo'na Jerusalemi kumate mani'ne'na, Israeli vahe kinia mani'na kegava huzmante'noe. **13** Ama mopafima me'nege'zama maka zama nehaza zana, nagra knare antahi'zanteti, refako hu'na ke'na antahi'nama huana Anumzamo'a tusi knaza vahe'mofona kofintegeno, knazana e'nerize. **14** Mika zana ama mopafima nehaza zama koana, agafa'a omane'za nehzanki'za, zaho'ma avararizankna nehaze. **15** Kazakinesia zana azeri fatgo osugahane. Hagi omne'nenia zana ohamprigahane. **16** Nagra'agura amanage hu'na hu'noe, mika Jerusalemi kumate'ma efore'ma hu'za kinima mani'ne'za vahe'ma kegavama huzmante'naza, kini vahetmina zamagatere'na nagra knare antahi'zana eri'noe. Kote'ma mani'zama e'naza kini vahetmina zamagatere'na, rama'a knare antahi'zane, antahintahizanena eri'noe. **17** Ana hute'na ete knare antahi'zane neginagi antahi'zane erinte'na refko hu'na ke'noanagi, e'i ana zampinti'ma ke'na eri fore'ma huana, e'i ana zamo'enena zaho'ma arotagoma hiankna hu'ne. **18** Na'ankure rama'a knare antahintahima eri zamo'a rama'a kasu zampi manigahane, mago'anema rama'a antahintahi zama eri'zamo'a anahukna hunka mago'ane mareri agatere kasunku zampi manigahane.

2 Nagra amanahu antahintahi hu'noe, Menina muse zampima knare zama me'nesigura refko hu'na kesue hu'hoe. Hianagi ana muse zampima koana agafa'a omne'ne. **2** Hagi musema nehuno kiza zokagoma hu'zana agafa'a omne avu'ava zankino, mago knare zana eri forera osugahie hu'na hu'noe. **3** Ama mopafima vahe'mo'zama osi'a knafima mani'neza musema nehzaza ke'nue hute'na, waini tina nene'na musena nehu'na, neginagi avu'ava zana hu'noe. **4** Hanki ra eri'za eri'na tusinasi nontami

kinente'na rama'a waini hozaramina nentena, **5** rama'a hoza
nente'na, agona agona ruzahu ruzahu zafa ragama renentea
zafaramina rama'a kri'noe. **6** Ana nehu'na tintamina ahentragi'na
ana tirupinti tina afina zafa hoza tina ami'noe. **7** Kazokzo
eri'za vene'nene a'nangenena mizasena zamavroge'za nonifina
mani'ne'za mofavreramina kase hakare hu'haze. Hagi ko'ma
mago'a kini vahe'ma Jerusalemima kinima mani'naza vahera,
zamagatere'na rama'a sipisipi afutamine meme afutaminena
ante'noe. **8** Ana nehu'na kuma'nifintira rama'a silvane golinena
zogina eri atru nehu'na, ru kini vahe'mo'zama namiza fenonena
rama'a ante'noe. Hagi zavenama nehe'za zagamema hu
vahera, vene'nene a'nangenena rama'a zamavroge'za kumanifina
emani'haze. Ana nehu'na nagra'a nazeri muse hanufi nehu'na
henka a'nanea rama'a knare'nare a'nene eri'noe. **9** E'ina'ma
nehu'na ko'ma Jerusalemi kumate'ma kinima mani'za e'naza
vahetmina zamagatere'na rama'a feno ante'noe. Ana hugeno
knare antahi'zamo'a nagri'ene me'ne. **10** Ina zanku'ma navesia
zana amane e'neri'na, inanknahu musezama hunaku'ma huazana
amanne hu'noe. Ana nehu'na tusi muse hu'na eri'zana eneri'na,
ana eri'zamofo nena'ama efore'ma hiazana ke'noe. **11** Hianagi
maka zama hankaveniamma atre'na erifore hua zantmima koana,
ana zantamina agafa'a omane'ne. Amane zahoma avaririankna
hu'noe. Mago knare zana ama mopafina kena eri amara
osu'noe. **12** Hanki knare antahi'zane neginagi antahi'zanema
erinte'na refkoma hu'na koana, henkama efore hania kini ne'mo'a
tro'ma osu'nesua zana, naza tro hugahie? Maka zama tro'ma
haniana, nagra ko tro hu'noaza tro hugahie. **13** Nagrama
nagesama antahuana, masamo'ma hanizama agatereankna
huno, knare antahi'zamo'a neginagi antahi'zana agatere'ne.

14 Na'ankure knare antahi'zane vahe'mo'a kama neviankana negeno nevianagi, neginagi antahi'zane vahe'mo'a hanimpi nevie. Hagi mago zama keama'ma huana ana taregamokea magozahu hu'na'e. **15** E'inahu'za me'nege'na nagra amanahu antahintahi hu'noe, neginagi vahetema fore'ma hania zamo'a, ana hukna za nagritera fore hugahie. E'ina hu'neanki knare antahi'zamo'a nankna knare'za erifore huramigahie. Knare antahi'zama eri'zamofona agafa'a omane'ne. **16** Na'ankure knare antahi'zane vahe'mo'za neginagi vahe'mo'zama nehazaza hu'za frisage'za zamage akani zamantegahaze. Vahe'mo'zama maniza vanafina, ana tare kevufi vahekura zamageakanizmantegahaze. Ana hanigeno neginagi vahe'ma friaza huno knare antahintahine vahe'mo'ma fri'nige'za zamageakanintegahaze. **17** E'i zanku asimu'ma erino ama mopafima mani zankura tusi navesra nehie. Na'ankure mika zama hua zamo'a asunku zanke'za avreno eme nemarie. Tusi amuhoma huta maka zama hu'na zamo'a agafa'a omne'neanki, amne zaho'ma avaririankna nehune. **18** E'ina hu'negu maka zama ama mopafima amuho'ma hu'na eri fore'ma nehua zankura, tusi'za huno navresra hie. Na'ankure ete ru vahe azampi maka zama amuho hu'na eri fore'ma hua zantamina atre'na vu'zanku navesra hie. **19** Hagi nagri noma erisia nera, knare antahi'zane nepi, neginagi antahi'zane nepi, nagra antahi'na ke'na osu'noe. Hianagi maka zama amuhoma hu'na eri fore'ma hu'noa zantamina, ana vahe'mo kegava hugahie. Na'ankure ana zantamina knare antahi'zanteti erifore hu'noe. E'inahu zamo'enana agafa'a omne'ne. **20** E'ina hu'negu ama mopafima tusi amuhoma hu'na eri fore'ma nehua zantaminkura antahintahia hu'na namentintia nosue. **21** Mago'a vahe'mo'za knare antahintahi zamireti'ene antahi'za zamireti'ene maka

zantamina eri retro huntete'za, amuho hu'za erifore osu'naza
vahetmimofo zamazampi ana zantamina nentaze. Ama ana
zama kogeno'a agafa'a omnegeno rankefoza fore nehie. 22 E'na
hu'neanki mago'mo'ma amuhoma huno eri'zama eria zampintira
naza erifore nehie? 23 Na'ankure maka kna eri'zama eruna
zamo'a ata zane, asunku zanena avreno eme neramigeno,
kenage'ene feru'enena antahintahi timo'a eri'zana eri vava
nehie. E'na hu'neankino maka zamo'a agafa'a omne'ne. 24
Amuhoma huno erifore'ma hia ne'zama neneno, tima neneno
musenkasema hu'zamo'a mago'a zama hu'zana agatere'ne.
E'i anama huno musema hu'zama ke'na antahi'nama huana,
Anumzamofontegati ana zana ne-e. 25 Na'ankure Anumzamo'ma
azama osanigeno'a mago vahe'mo'a agra'a hankaverera ne'zana
erifore huno neneno musena osugahie. 26 Anumzamo'a agrama
musema nehia zama nehaza vahera knare antahintahi zane,
muse zanena nezmie. Hianagi kumi vahe'mo'zama feno vahe'ma
nesazageno'a Anumzamo'a ana fenozmia erino agri'ma avesia
avu'ava'ma nehaza vahe nezmie. E'i ana zamo'enena agafa'a
omne'neankino amne zaho avaririaza nehie.

3 Ama mopafina maka'zama fore'ma hu kna metere higeno,
maka'zama hu kna metere hu'ne. 2 Vahe'ma kasente kna
megeno, vahe'ma fri kna me'ne. Hoza hankare kna megeno,
hozama hamare kna me'ne. 3 Vahe'ma ahfri kna megeno,
vahe'ma azeri knamare kna me'ne. Maka'zama tapagema hutre
kna megeno, ete kasefa'ma azeri otino ki kna me'ne. 4 Zavite
kna megeno, kizamare kna me'ne. Asunku'ma hu kna megeno,
musema huno avoma hage kna me'ne. 5 Havema erino ometre
eme atrema hu kna megeno, havema zogi atru hu kna me'ne.
Vahe'ma azeri anuki kna megeno, vahe'ma azeri anuoki kna

me'ne. **6** Keonke zanku'ma hake kna megeno, avresra huno'ma ohake kna me'ne. Mago'a zama erinte kna megeno, ante'nea zama eritre kna me'ne. **7** Kukenama tagato hu kna megeno, tagato'ma hu'nea zama rehati kna me'ne. Kema osuno mani kna megeno, keagama hu kna me'ne. **8** Vahe'ma avesinte kna megeno, vahe'ma avesrama hunte kna me'ne. Ha'ma hu kna megeno, ha'ma osuno rimpafuru huno mani kna me'ne. **9** Vahe'mo'ma tusi amuhoma huno eri fore nehia zamo'a, na'a knare'za eri fore nehie? **10** Anumzamo'ma knazama tagumpima nentea zana nagra ke'noe. **11** Anumzamo'a mika zana kna fatgo'are knare zantfa huno tro hunte'ne. Ana nehuno manivava zana Anumzamo'a vahe'mofo tumopi ante'ne. Ana hu'neanagi Anumzamo'ma tro'ma hunte'nea zana eseteti'ma agafa huno vuno atumpare'ma vu'nea zantamina vahe'mo'a ke vagaore'ne. **12** E'ina hu'negu mago'zama ke'na antahinama huana, muse nehuno knare avu'ava'ma hu'zamo maka'zana agatere'ne. **13** Maka amuho'ma hu'zama eri fore'ma hanaza ne'zane, tinena nene'za musena hiho. Na'ankure e'i ana zantamina Anumzamo museza neramie. **14** Nagra antahi'na ke'na huana, Anumzamo'ma tro'ma hu'nea zantera mago vahe'mo'a kasefa zana tro huntege, eri atregera osugahie. Anumzamo'ma tro'ma hunte'nea zana Agra ko tro hunte'neankino, mevava hugahie. Vahe'mo'zama Agri agoraga'ama mani'ne'za mono'ma huntесagu Anumzamo'a tro hunte'ne. **15** Mika zama menima fore nehia zana, ko fore hu'nea zamo ete efore nehiankino, ama ana zamo'a henka fore hugahie. Na'ankure Anumzamo'ma ko'ma eri fore'ma hu'nea zanke eri fore huvava nehie. **16** Mago zama ama mopafima koana, fatgo avu'ava'zama huga'zana netre'za, fatgo osu avu'ava zanke nehaze. **17** E'ina hige'na amanahu

antahintahi nagu'afina antahi'noe, Anumzamo'a fatgo vahe'ene
kefo avu'ava'ma nehaza vahera keagare refko huzmantegahie.
Na'ankure maka zama hu kna metere hu'neankino, miko
tavutavara refko hugahie. **18** Hagi vahekura amanahu antahintahi
nagra antahi'noe, zagagafa kna hu'none hu'zama ke'za
antahi'zama hanagu Anumzamo'a vahera rezmaheno nezamage.
19 Na'ankure zagagafare'ma fore'ma hania zamo'a, vahetera fore
hugahie. Zgagafamo'zama nefri'zaza hu'za vahe'mo'za nefrise.
Magore huno vahe'mo'a zagagafa agateore'neanki, zagagafane
vahe'enena mago zanke hu'na'e. E'ina hu zamo'a agafa'a
omaneno knarera osu'ne. **20** Vahe'ene zagagafanema frisa'ana
kugusopa segaha'e. Kugusopareti regripeno tro huzanante'negu,
ete frisukea kugusopa segaha'e. **21** Vahe'mofo avamumo'a
anagamu marenerisigeno, zagagafamofo avamumo'a mopafi
ufregahie hu'za mago'a vahe'mo'za nehazanagi, tagra tamage
kea ontahi'none. **22** E'ina hu'negu amuhoma huno'ma mago
vahe'mo'ma eri fore'ma hania zana erinteno neneno musenkase
hino. Na'ankure e'i amuhoma huno'ma eri'zama eri'nea zamofo
mizane. E'ina hu'neankino henkama fore'ma hania zamofona,
iza knarera hu'nea averi hugahie?

4 Hagi mago zama koana, ama mopafina vahe'ma knama
amino azeri havizama hu zamo'a mevava huno nevige'na
ke'noe. Ana nehige'za vahe'mo'za zavira netazanagi, vahe'mo'za
zamazeri amnea nosaze. Vahe'ma knama zamiza zamazeri
havizama nehaza vahera hanave vaheki'za, hanavezmi omane
vahera zamazeri haviza nehaze. **2** E'ina hige'na fri'naza
vahe'mo'za tasimu'ma erita mani'nona vahera tagatere'za
musena nehaze hu'na nagesa antahi'noe. **3** Hianagi knare
zantfama hu'neana, kaseozmantenage'za ama mopafima havi

avu'avazama onke'naza vahe'mo'za knarera hu'haze. **4** Hagi
mago'zama koana, maka eri'zama vahe'mo'zama hankavezmima
eri zamavuga atre'zama enerizana, tava'ozmire'ma nemaniza
vahe'mokizmi zante kezmanunu nehu'za, anahu kna vahe
asenaku amuhoa hu'za eri'zana e'nerize. Hianagi ama ana
zamo'enena agafa'a omaneza tro nehzankino, zaho'ma
avarirankna nehaze. **5** Hagi neginagi vahe'mo'za eri'zana
e'ori zamazana renamagiza mani'za zamo hige'za, zamagra
zamagakura nehu'za fri'zana nehaze. **6** Hagi nagesama
antahuana, osi'a fenoma anteno fruma huno mani'zamo'a,
tusi amuho huno rama'a fenoma eritru hu'zana agaterene.
Na'ankure rama'a zama eri atruhu antahintahireti'ma amuhoma
huno eri'zama eri zamo'a, agafa'a omneno zaho'ma avarirankna
nehie. **7** Hagi mago'ma agafa'a omane zama ama mopafima
ke'noana ama'nahu knaza ke'noe. **8** Mago ne'ma afu agna'ma
omanigeno, mofavre onte'neanagi, tusi amuho huno eri'zana
erino fenona eritru nehianagi, ana zamo'a knarera hunonte.
Hianagi amanahu agenoka agra'a antahinonke, Izanku hu'na
ama eri'zana e'nerue? Na'a hige'na maraguzati'na erizantera
nehu'na musena hu'na nomanue huno nehie. Ana maka zamo'a
agafa'a omne zamo kna nemie. **9** Tare vahe'mokema eri'zama
eri'zamo magoke vahe'mo'ma eri'zama eri'zana agatere'ne.
Na'ankure taremakea oza aza huke eri'zana erigaha'ankino,
knare hugaha'e. **10** Hagi mago'mo'ma traka'ma hanigeno'a,
magomo'a azeri otigahie. Hianagi trakama hanigenoma azahu
vahe'ma omani'nimofona kasunku hunto. **11** Anahu kna huno,
taremokema magopima masena'ana amuho huke masegaha'e.
Hianagi magokemo'ma agraku'ma masesiana inankna huno
amuhoa hugahie? **12** Magoke vahera ahe'za azeri haviza

hugahazanagi, tare vahe'mokea hara huke ohevri
(oza aza) hugaha'e. Hagi 3'a nofima magokepima erinteno
zagi'nenianofira ame hunora eri akamprura osugahie. **13** Amunte
omane kasefa vahe'ma mani'neno, knare antahi'zane vahe'ma
mani'zamo'a, ozafa kini ne' mani'neno avumro'ma ante ke'ma
eri atre'zana agatere'ne. **14** Ana kasefa ne'mo'a amunte omne
nagapinti fore hu'nenianagi, amne feno vahera fore hugahie. Ana
nehuno kina nompintira amane kinia efore hugahie. **15** Ana'ma
hige'na kogeno ana maka vahe'mo'a ana (nehaza) kasefa kini
ne'mofo amage'ntaze. **16** Ohampriga'a vahe krerfamo'za
kasefa kini ne'mofo kaziga mani'naze. Hianagi henkama fore
hu'za esnaza, kasefa kini nekura musena huontegahaze. Ama
ana zamo'enena agafa'a omneneankino, zaho'ma avaririankna
nehie.

5 Anumzamofo nompima unefresunka akohenka ufro.
Anumzamofo tavaonte'ma akoheno umani'neno kema
antahi'zamo'a, agesa ontahino neginagi ofama kre sramnavu
zana agatere'ne. Na'ankure zamagra e'i haviza nehune hu'za
nontahize. **2** Kagitetira ame'ama hunka keaga huge ame'ama
hunka kagu'retira maka antahintahi zanka'a Anumzamofo
avuga huamara osuo. Na'ankure Anumzamo'a monafinka
manigenka kagra ama mopafi mani'nane. Ana hu'negu kagra
osi'a naneke huo. **3** Mika zanku'ma antahintahi hakarema
hanunka, rama'a avana kegahane. Rama'a kegagama hu
zamo'a neginagi vahe asegaahane. **4** Anumzamofoma mago
zama amigahue hunkama huvempa hu'nenunka, zazatera
azerinka ovuo. Na'ankure Anumzamo'a neginagi vahekura
musena nosianki, Anumzamofoma amigahue hunkama huvempa
hu'nenana zana amio. **5** Anumzamofonte'ma huvempa osu

zamo'a knare hu'ne. Hagi Anumzamofonte'ma huvempa huteno,
ana nanekema amage'ma onte'zamo'a knarera osu'ne. **6**
Hagi atregeno kagimo'a kavreno kumipina ovino. Ana nehunka
pristi vahetera kagraka'ama kaguvasi kazigatira hunka ruge
hunaku hurega hantga hu'na huvempa Anumzamofontera hu'noe
hunka osuo. E'inama hananana, Anumzamofona azeri arimpa
ahesankeno, mika zama eri fore'ma hanana zantamina eri
haviza hugahie. **7** Rama'a nanekema nehuno, rama'a ava'nama
ke zamo'a, agafa'a omane'ne. E'na hu'negu Anumzamofo
korora hunentenka agoraga'a manio. **8** Kesankenoma kamani
vahe'mo'zama zamunte omane vahe'ma knama zamiza zamazeri
haviza nehu'za, zamazama hugazama atre'za zamazama
nosnagenka antria hunka kagogogura osuo. E'i ana'ma nehaza
vahe'mokizmia zamagri'enena kva vahezmia mani'neno, anahu
avu'avara hunezmantege'za anara nehaze. **9** Mopafinti'ma
amuroma hu'za erifore'ma nehaza kavera, kini ne'moke erihna
nehie. **10** Zagogu'ma avesi avesima nehania vahe'mo'a
zagoa eri avi otegahie. Hagi fenoma ante'zanku'ma agesama
nentahisia vahe'mo'a, fenozana eri knarera osugahie. E'i ana
zamo'enena agafa'a omne'ne. **11** Rama'a fenoma ante'nea
vahe'mofona, rama'a vahe'mo ana fenontera kregre huno eri
fanane hugahie. E'na hugahianki, ana fenozamo'a nankna
knare'za avreno nafa'amofona eme amigahie? Magozana avreno
eme omigosianki, negenigeno ana fenozamo'a fanane hugahie.
12 Amuho huno'ma eri'zama eneria vahe'mo'a osi'a neza nesio,
rama'a neza nesianagi avura mase so'e nehie. Hianagi rama'a
fenoma ante'nea vahe'mo'a avura mase so'e osugahie. **13** Hagi
tusi'a kefo avu'avazama ama mopafima koana, tusi'a fenoma
eri atruma nehia vahe'mofona, agri fenomo azeri haviza nehie.

14 Hagi rama'a zagoma tro hu kazigatima atraza zagomo'a,
ome fanene nehige'za mofavre'mo'za erisaza zagoa nomane.

15 Hagi nerarera rimpafintira magozana e'orita tavufga avapa
e'nonankita, frisuta mago'a fenozana e'rineta ovugahune. **16**
Ama'ha zamo'enena tusi'a kefo avu'avaza me'ne. Ama mopafima
vahe'mo'ma fore'ma huno e'nea kante anteno, friana anahu
kna huno nevie. Hiankino amuhoma huno eri'zama eri fore'ma
nehia zamo'a, zahoma avaririaza huno amnezankna nehie. **17**
Hagi ama mopafima mani'zama azafina hanimpi kavera nene'za
tusi'a zamatafine, krifine, zamarimpa ahezampi mani'za neaze.

18 Anahu kna hu'na nagrani'ama mago knare zama ke'na eri
fore'ma huana, iza'o amuhoma huno eri fore'ma hania zana
neneno musenkase huno, osi'a knama Anumzamo'ma ami'nea
knafina manino. Na'ankure e'i amuhoma hu'nea eri'zama eria
zamofo mi'zama'e. **19** Hagi Anumzamo'ma mago vahe'ma
zagone fenonema nemino'a, amuhoma huno erifore'ma hania
zama neneno'ma musema hania antahintahia ami'ne. E'i ana
zantamina Anumzamo'a muse'za ami'ne. **20** Anumzamo'a ana
vahe'mofona ana zantamimpi antahintahia erintegeno ana zanku
muse nehuno, ko'ma manino'ma e'nea nomania zankura agesa
nontahie.

6 Hagi mago kefo zama mopafima me'neno'ma vahe'mofoma
knama nemia zama koana, **2** Anumzamo'a mago'a vahera
zago fenona nezmianagi, ana vahera atregeno amuho'ma
huno eri fore'ma nehiazana neneno musena nosie. Hianagi
ana vahe'mo'a ana zantamina atreno frigeno, ru vahe'mo'za
e'nerize. E'i zamo'a havizantfa hu'neankino, agafa'a omne'ne.
3 Hagi mago ne'mo'ma 100'a mofavreramima anteteno muse
osu nomani'zama manime vuno ozafa omereno frisige'zama

knare'ma hu'za aseontesageno'a, haviza hugahie. Arera arimpafima fri'negeno'ma kasentea mofavrema asente'zamo, ana nera agatereno knare zantfa hugahie. 4 Na'ankure e'inahu mofavremo'a arera rimpafima fritegeno kasentegeno, frino amnezankna higeno hanizamo refitegeno agi'a nomane. 5 E'i ana fri mofavremo'a zagea kege, mago zana keno antahinora nosianagi, 100'a mofavrema anteteno manime vuno ozafa omereno fria nera agatereno manigasa nehie. 6 Hagi ana ne'mo'ma 1 tausenia kafu'a maniteno ete mago'ane 2 tauseni'a kafua manigahianagi, mani'zama'afima musema huno mani'noma ovaniiana knarerera osu'ne. Na'ankure tarega'mokea magozahu huke frike magoke kumapi umanigaha'e. 7 Vahe'mo'ma maka eri'zama amuhoma huno eneriana agrama agipima nesia zanku eri'zana enerie. Hianagi ana nezamo'a amura nosie. 8 E'ina hu'negu inankna kazigati knare antahi'zane ne'mo'a, neginagi antahi'zane nera agatere'ne? Hagi amunte omne ne'mo'ma maka zama eri fore nehuno, vahe zamavugama knare avu'ava'ma huno vanoma hania zamo'a, nankna huno aza hugahie? 9 Nazano ante'enana zankura muse nehunka, onte'enana zama erizankura antahintahia huvava osuo. E'inahu zamo'a zaho'ma avaririankna hu'neankino, agafa'a omane'ne. 10 Maka zama fore'ma huno me'neana, ko agia ante'nea zantaminke megeno, nanknahu zantami mago mago vahetera fore hugahie, ko Anumzamo'a keno antahino hu'ne. E'ina hu'negu agafa'a omane zantera, Anumzamo'enena kehara osuo. 11 Rama'a kema hu zampintira, ana kemofo agafa'a ontahigahane. E'ina hu'negu rama'a kema hanunka, nankna knare'za erifore hugahane? 12 Osi'a knama ama mopafima manisunana, so'e manizama mani'zana iza antahino keno

hu'ne. Mago'a zamofo amema'amo'ma hiaza huta, osi'a knafima agafa'a omane nomanizama manisuna knafina, knare'ma huno manisia zana magomo'e huno keno antahinora osu'ne. Fritama vutesunkenoma ama mopafima fore'ma hania zana, mago vahe'mo'a keno antahinora osugahie.

7 Knare avu'ava'ma hu zamofo zago'amo'a, marerirfa mnanentake masavena agatere'ne. Vahe'ma fri knamo'a, vahe'ma kasente kna agatere'ne. **2** Tahunte'ma vu knamo'a tusi ne'zama kreno nenenno musema hu nompima vu'zana agatere'ne. Na'ankure maka vahera fri vaheke mani'nonanki, amnema mani'nona vahe'mota tagera okanisune. **3** Asunku'ma hu'zamo, kiza zokago'ma hu'zana agatere'ne. Na'ankure asunku'ma hu'zamo'a, tagu'a tazeri ani higeta, ruzahu ruzahu avu'ava'ma hu'zana antahita keta nehune. **4** Knare antahi'zane vahe'mo'a vahe'ma fri'negeno'ma asunku'ma huno mania nontega agu'amo'a nemane. Hianagi neginagi antahi'zane vahe'mo'a musema nehaza nontega agu'amo'a nemane. **5** Knare antahi'zane vahe'mo'ma hanave kema huno vahe'ma azeri fatgohu kema antahi'zamo, neginagi vahe'mo'ma zagame'ma nehia zama antahi'zana agatere'ne. **6** Neginagi vahe'mofo kiza zokago kemo'a, ne'zama kre'nea kavomofo henka kazigama ave'ave trazanuma tevema hugre'negeno'ma trage raragema hiaza nehie. Ama ana zamo'a agafa'a omnetfa hu'ne. **7** Vahe'ma knama amino azeri havizama hu'zamo'a, knare antahi'zane vahera azeri neginagi vahe nese. Anahu kna huno mago'zama huntenogu'ma, zagoma atesino masavema hu zamo'a, vahe'mofo agu'a azeri haviza nehie. **8** Eri'zama eri afinare'ma ate zamo, eri'zama eri agafama hu zana agateregeno, arimpa fru huno mani'neno avegama ante'zamo avufga rama hu'zana

agatere'ne. 9 Ame'amara hunka krimpa oho. Na'ankure ame'ama'ma huno arimpama ahe zana neginagi vahe'mofo avu'ava me'ne. 10 Nahigeno korapa'ma mani'nama e'noa knamo'a, menima mani'noa kna agatere'ne hunka kagenoka osuo. Na'ankure e'i knare antahi'zantetira kagenoka osugahane. 11 Knare antahi'zanteti'ma erisanti'ma hare'zamo'a knare hu'neankino, nomani'zama maninka vanampina knare huno kaza hugahie. 12 Zagomo'ma kazama nehiankna huno, knare antahi'zamo'a kazahugahie. Hianagi knare antahi'zamoke kagura vazigahie. 13 Anumzamo'ma tro'ma hu'nea zantamina kenka antahinka huo. Hagi kazaki zantamima Agrama tro'ma hunte'nea zantamina, iza eri fatgo hugara hu'ne? 14 Maka zama hana zantmimo'ma knare'ma hania knafina, muse huo. Hianagi maka zamo'ma amuhoma hanigenka, kenka antahinkama hananana Anumzamoke knare knane, havi knanena negamie. E'ina hu'negu mago'mo'a okima fore'ma hania zana keno antahinora osu'ne. 15 Agafa'a omene nomanizama mani'na e'nofina, ama tare'za ke'noe. Fatgo avu'ava'ma nehaza vahe'mo'za ame hu'za nefrizageno, kefo avu'ava'ma nehaza vahe'mo'za, zazate maniza nevu'za kefo avu'avara hu'za nevaze. 16 Hagi fatgo avu'ava zana agaterenka fatgo vahetfa manisue hunka nosunka, knare antahi'zane vahera agaterena, knare antahi'zane vahetfa manisue hunka osuo. Na'ankure e'inahu kavukva zamo'a, kazeri haviza hugahie. 17 Kagra kefo avu'ava'ene vahera agaterenka kefo avu'ava zana nehunka, neginagi vahera oso. Nahanigenka kagra kasefa vahera mani'nenka ame'amara hunka frigahane? 18 Anantarega koro kema antahino amage'ma ante'zamo knarera hu'ne. Na'ankure Anumzamofoma koroma hunteno, amage'ma ante zana anantarega avu'avazampi ne-e.

19 Mago knare antahi'zane ne'mofo hankavemo'a, 10ni'a ugagota
kva vahetmima rankuma'ma kegavama hu'naza vahe'mokizmi
hankavea agatere'ne. **20** Magore huno ama mopafina fatgo
huno'ma mani'neno kumi'ma osu vahera omani'ne. **21** Ana maka
nanekema vahe'mo'zama hanaza nanekea kagesa antenka
ontahio, aru eri'za vahekamo huhaviza hugante'nia naneke
antahigahane. **22** Na'ankure aru vahe'ma hu havizama hunentana
zana, kgra kenka antahinka hu'nane. **23** Ama ana maka zana
knare antahizanteti refko hu'na kete'na amanage nagra'agura
hu'noe, knare antahi'zane vahe mani'nue hu'na huanagi, nagra
knarera osu'noe. **24** Knare antahi'zamo'a afete me'neankino,
hakeno'ma eri'amo'a tusi amuho hu'ne. **25** Maka kaziga knare
antahi'zankura hake'na vano nehu'na, nagafare maka zana
fore huno me'ne hu'na hakenaku antahintahia retro hu'noe.
Nagafare vahe'mo'za kefo avu'avara nehu'za neginagi avu'avara
nehaze hu'na ke'na antahi'na hunaku nagesa antahi'noe. **26**
Mago zama ke'na eri fore'ma huana, mago'ma kefo zantfa huno
fri'zama agatere'neana, a'nemofo krifumo'e. A'nemofo agu'amo'a
krifugna hu'neankino, fru fru azamo'a vahe'ma kinama hunentea
seni nofi kna hu'ne. Anumzamo'ma musema nehiazama nehia
vahe'mo'a, ana akura koro fregahie. Hianagi kumi'ma nehia
vahe'mofona, kati higeno aze'nerie. **27** Rempima humi ne'mo'a
huno, maka zamofo agafa'ama hakena erifore'ma hunakura,
mago mago zamofo agafa'a hakena ketere hu'noe. **28** Anama
hake'nama nevu'na mago zana onke'noanagi, 1 tauseni'a
vahepin, fatgo avu'ava'ene nera magoke ke'noe. Hianagi
magore hu'na fatgo avu'ava'ene ara onketfa hu'noe. **29** Magoke
zama ke'na erifore'ma huana amane, Anumzamo'a fatgo vahe

tro hunte'neanagi, vahe'mo'a rama'a kankamu retro huno kefo
avu'avara nehie.

8 Iza knare antahi'zane vahera mani'neno, maka zamofo
agafa'ama eri ama'ma hu'zana antahine? Knare antahizamo'a
vahe'mofo avugosafi remsa higeno, avugosamo'a rumsa huno
nevie. **2** Kini ne'mofo ke antahinka amage anto hu'na nagra
negasamue. Na'ankure kagra ko Anumzamofo avuga ke'a amage
antegahue hunka huvempa hu'nane. **3** Ame'amara hunka kini
ne'mofo avugatira eri'zanka'a atrenka vunka kini ne'mofoma
ha'ma renentaza vahe'enena kea ome hu hageorafio. Na'ankure
kini ne'mo'a nazano agri'ma avesinia zana amane hugahie. **4**
Kini ne'mofo kemo'a, hihamu'a me'ne. Mago vahe'mo'a agenoka
huno, na'a nehane hunora osugahie. **5** Hiankino kini ne'mofo
kema amage'ma antea vahe'mo'a, knazana e'origahie. Knare
antahi'zane vahe'mo'a maka zama hania knane, maka'zama eri
fore'ma hania kna fatgoa keno antahino hugahie. **6** Na'ankure
vahe'mofona hazenke zama'amo'a marerigahianagi, maka
zamofona kna'a metere higeno kankamuma'a metere hu'ne. **7**
Tamagerfa huno okima fore'ma hania zana, mago vahe'mo'a
keno antahinora osu'neankino, okima fore'ma hania zamofona,
iza huamara huno tasamigahie? **8** Mago vahe'mofona hihamu'a
omane'neankino, fri'zama nehanigeno asimu'amo'ma atre'zama
nehanigeno'a aze'origahie. Anahu kna huno fri'zana mago
vahe'mo'a aze'origahie. Ha'ma hu knafima sondia vahe'ma
hunonteankna huno, kefo avu'ava zamo'a magore huno kefo
avu'ava'ma nehia vahera atresigeno ovugahie. **9** Maka zama
ama mopafima fore'ma nehia zanku'ma antahintahima hufintira,
mago zama kena eri fore'ma huana, vahe'mo'ma vahe'ma azeri
haviza hu'zanke me'nege'ha ke'noe. **10** Kefo avu'ava'ma nehia

vahe'ma frige'za, antahimi'za knare'za hu'za asezamantazage'na
zamage'noe. Ana'ma hu'za asentete'za, ete ana ne'mo'ma
hazenkema eri hakarema nehia rankumapima ne-eza, ana
ne'mofo agia ahentesga nehaze. E'inahu avu'ava zamo'a
agafa'a omane'ne. **11** Hagi hazenkema nehaza vahe'ma
keagazmima ame hu'zama refko'ma hu'za knama nozamizage'za,
zamagrama zamagesama antahi'zana hazenkema hu'zana
knare'za nehune nehu'za huvava huza nevaze. **12** Hianagi kefo
avu'ava'ma nehaza vahe'mo'zama 100'a zupama hazenkema
nehu'za za'za knama mani'za nevazage'na, nagrama antahi'na
ke'nama huana Anumzamofoma koro'ma hunte'za agoraga'ama
nemani'za vahe'mo'za zamagatere'za knare zantfa hu'za
manigahaze. **13** Hagi kefo avu'ava'ma nehaza vahe'mo'zama
maka zama hanaza zamo'a, knarera huno hageno mareorigahie.
Na'ankure Anumzamofona korora hunontazanki'za, knama
mani'zama vanaza knamo'a kinaga zagemo'ma ufregeno vahe
amema'amo'ma fanene nehiankna hu'za fanene hugahaze. **14**
Hagi agafa'a omne zama mago'ma ama mopafima eri fore'ma
nehiana, knare vahetmina kefo avu'ava'ma nehaza vahe'ma
huzmantaza kna avu'ava hunezmante'za, kefo avu'ava'ma
nehaza vahera knare vahetmima huzmantaza kna avu'ava
hunezmantaze. E'inahu avu'ava zamo'enena agafa'a omne'ne.
15 E'ina hu'negu ama mopafina magora knare zana omne'neanki,
ne'zane tinema neneno musema huno'ma mani nomani'zamoke
knarera hu'ne. E'ina'ma hanu'za Anumzamo'ma eri'zama
zamige'za ama mopafima amuhoma hu'za eri fore'ma nehaza
zantami nene'za musena hugahaze. **16** Hagi knare antahi'za
erisue nehu'na, ama mopafi vahe'mo'zama knazama e'neriza
zama koana, vahe'mofona avumase zana omane'neanki, feru'ene

kenage'enena vahe'mo'a eri'zana eri vava nehige'na ke'noe. 17

Anama hige'na nagrama ke'na antahi'nama huana, maka zama
ama mopafima Anumzamo'ma tro nehia zana, mago vahe'mo'a
keno antahinora osugahie. Knare antahi'zane vahe'mo'enena
nagra knare hu'noanki'na, Anumzamo'ma tro'ma nehia zana
amne ke'na antahina hugahue huno hugahianagi, ana maka
zana keno antahinora osugahie.

9 Ana hige'na ama ana maka zama rezaganena koana,
fatgo avu'ava'ma nehia vahe'mo'ene knare antahi'zane
vahe'mo'enema, maka zama neha'a zamo'a Anumzamofo
azampi me'ne. E'ina hu'neankino mago vahe'ma avesintege
avesra huntege'ma hu'zana vahe'mo'a keno antahinora osu'ne. 2
Maka fatgo avu'ava'ene vahero, kefo avu'ava'ene vahero, knare
vahero, havi vahero, agruhu vahero, agru osu vahero, mono
vahero, mono ontahi vahera, ana maka vahe'mo'a mago'zahu
kanteke vugahie. Hagi Anumzamofonte'ma huvempama nehaza
vahete'ene Anumzamofonte'ma huvempama huzankuma koroma
nehaza vahete'enena mago zahu zanke fore hugahie. 3
Ana maka vahe'motare'ma mago zahu'zama fore'ma nehia
zamo'a knarera nosie. E'ina hu'negu vahe'mo'za zamagra'a
kegava hu'neza knare avu'avara nosazanki'za zamagra'a
zamavesi'zamofo amage'hente'za, ome havizana nehaze. Hagi
ana amefira mago'zana omane'neanki, fri'za nevaze. 4 Hianagi
kasefa'ma hu'za mani'naza vahe'mokizmia amuha zazmia
me'ne. Na'ankure zamagra amanage hu'za nehaze, kasefa
huno mani'nea kramo'a fri'nea laionia agatere'ne hu'za nehaze.
5 Hagi kasefa'ma huta mani'hona vahe'mota, frigahune huta
antahi'none. Hianagi fri'naza vahe'mo'za magozankura zamagesa
ontahige, mago zamofo antahintahimo'a antahintahi zamifina

nomanegē'za, vahe'mo'zanena antahi nozamize. **6** Ana vahe'ma
fri'zageno'a vahe'ma zamavesi nezmante'za, zamavaresrama
hunezmantē'za, kezmanunuma nehaza antahintahi zamo'enena
ana maka fanene nehie. Ana hu'neankiza ete ru'enena ama
mopafima fore'ma nehia zantamina nege'za, antahintahia
osugahaze. **7** E'ina hu'negu muse nehunka vunka nezanka'a
ome nenenka, waini tinka'a ome no, na'ankure Anumzamo'a ko
e'inahuzana hugahane huno hu izo hugante'ne. **8** Maka zupa
knare'nare kukena nehunka, masavena kanuntera fre vava huo.
9 Ama mopafima agafa'a omne knama maninka vanana kna'afina,
Anumzamo'ma kamigenka avesima nentana a'ka'anena muse
hunka manio. Na'ankure ama mopafima amuhoma hunka
maninka vanana zamofo mizama'a kami'ne. **10** Inanknahu
eri'zama ama mopafima erisanana maka hankaveka'reti hunka
erio. Na'ankure frinka matitega vananana eri'zana ome e'orige,
eri'za antahintahia ome retro huge, antahi'zana erige knare
antahi'zanena erigera osugahie. (**Sheol h7585**) **11** Hagi ete mago
zama ama mopafima koana, tusi zama huno agama nerea
vahe'mo'a agare zokago'ma reana, vahera zamagaterekera
nosigeno, hankave ha' vahe'mo'za hara huzmagateregara
nosaze. Anahukna huno knare antahi'zane vahe'mo'a agakura
nehigeno, maka zama knare huno tro'ma nehia vahe'mo'a feno
vahera nomanigeno, knare huno avonoma huno antahi'zama
eria vahe'mofo nomani' zama'amo'a knarerera nosie. Hianagi
knare kankamunte'ma ruhiza'ma huterema nehaza vahe'mo'za
knarerera nehaze. **12** Na'ankure mago vahe'mo'a knazama
avate'ma esiankna antahino keno osu'neankino, kukomo nozame
azerigeno antri nehiaza huge, krifumo nama azerigeno antri
nehiankna huno hazenke zamo'a vahetera ame huno ne-e. **13**

Hagi ama mopafima fore'ma nehia zantmima negogeno'ma, mago
knare antahintahima nenamino nazeri musema hiana ama'ne,
14 mago osi kumapina osi'a vahe mani'nazageno, hihamu'ane
kini ne'mo'a sondia vahe'ane eno kuma keginamofo tavaonte
mopa kateno ante hihi huno marerino hara huzmante'za hu'ne.
15 Hagi ana kumapina mago amunte omne ne' nemania ne'mo'a,
knare antahizama'areti ana kumara agu'vazi'ne. Hianagi mago
vahe'mo'e huno ana'ma hu'nea zankura antahi omi'naze. **16** Ana
higeno knare antahi'zamo'a hankavea agatere'neanagi, amunte
omane ne'mofo knare antahizankura vahe'mo'za antahimi'za
zazatera novaze. **17** Knare antahi'zane ne'mo'ma akoheno'ma
hania ke'ma antahi'zamo'a, neginagi kini ne'mo'ma ranke'ma
huno kema nehigeno'ma antahi'zana agatere'ne. **18** Knare antahi
zama eri'zamo ha'zama ante zana agatere'ne. Hianagi kumike
ne'mo'a rama'a knare'zantamina eri haviza hugahie.

10 Mnanentake zama nentaza taferopima kosintamimo'zama
fri'za mesu'za, kasri'za ana taferopima me'nea mnanentake'zana
eri haviza hugahaze. Hagi e'ina hukna huno osi neginagi
avu'ava zamo'a, knare antahi'zane knare agima vahe'mofoma
amino husgama hunte'zana eri haviza nehie. **2** Knare
agu'agesane vahe'mo'a knare avu'avaza nehigeno, havi
agu'agesane vahe'mo'a, neginagi avu'avaza nehie. **3** Neginagi
vahe'mofona kama vania avu'avate negenka, e'i neginagi
vahere hunka hugahane. **4** Hagi kvakamo'ma arimpama
aheganteno kema kasanigenka, eri'zana atrenka ovuo. Fru
hunka mani'nenka kvakamofo kema antahisankeno'a, mago'ane
arimpa aheogantegahie. **5** Hagi mago kefo avu'ava zama ama
mopafima koana, ugagota kva vahe'mo'za eri'zana eri havizana
nehaze. **6** Neginagi vahera marerirfa eri'zanke nezami'za, feno

vahera evurami'nea eri'za nezamize. 7 Hagi mago zama koana, kazokazo eri'za vahe'mo'za hosi afu agumpi vano nehazage'za, ugagota kva vahe'mo'za kazokazo eri'za vahekna hu'za mopafi vano nehaze. 8 Mago vahemo'ma agra'ama kafinte'nesia kerifina agra'a uramigahie. Hagi korapama me'nesia have keginama ahe fragu'ma vazisanana anampintira osifavemo'a kamprigahie. 9 Hagi mago vahe'mo'ma havema frage eri'zama e'nerisigeno'a, ana havemo'a tamino hazenke amigahie. Hagi mago vahe'mo'ma zafama ape'ma nehanigeno'a, ana zafamo'a hazenkea amigahie. 10 Hagi osane'nenia sasumereti'ma eri'zama erisanana rama'a hankave atrenka eri'zana erigahane. Hianagi knare antahi'zama erinenia vahe'mo'a knare huno eri'zana erigahie. 11 Ko'ma osifavemo'ma vahe'ma ampritesigeno'ma ana osifavema azeri agazonema haniana, ana osifavema azeri agazonema hania vahe'mofo eri'zamo'a amnezankna hugahie. 12 Knare antahi'zane vahe'mo'a vahekura asunku hunezamanteno knare mani'zankuke keaga nehie. Hianagi neginagi vahe'mo'a hazenke'za avreno nomani'zama'afima esiankege nehie. 13 Neginagi vahe'mo'a neginagi kereti agafa huteno, neginagi avu'ava zanteti'ene kefo nanekereti'ene ome hu vagaregahie. 14 Naza henka fore hugahie mago vahe'mo'a antahino keno osu'neanagi, neginagi vahe'mo'a rama'a naneke huvava huno vugahie. Hagi henkama fore'ma hania zana iza asamigahie? 15 Neginagi vahe'mo'za eri'zana eri'sazanagi tusi zamavaresragu hugahaze. Na'ankure nozamiregama nevaza kana ke'za eri forera osugahaze. 16 Mago osi mofavremo'ma kini manino kegavama hu'nesia mopafima nemanisaza kva vahe'mo'za nanterama ne'zama kre'za nene'za musema hanaza mopafi vahe'mota, razampi haviza hugahazanki kva hiho. 17 Mareri

vahe'mofo mofavremo'ma kinima manino kegavama hu'nesia
mopafi kva vahe'mo'za kna fatagore neginagi osu'are nezama
nenesaza mopafi vahe'mota muse hugahaze. **18** Eri'za e'ori feru
vahe'mofo nomo'ma varivarima nehanigeno ko'ma eri so'ema
osanigeno'a varivari huno nomofo agu'afi efreno eri haviza
hugahie. **19** Rama'a ne'zama kreno ne'zamo'a kiza zokagoma
nehuno musenkasema huno mani'za avreno ne-enigeno, waini
tima nezamo'a museza avreno neanagi, zagoretike makazana
tro hugahane. **20** Antahizanka'afina kini nera antahi havizana
huonto. Nemsampinka maninenka feno vahera huhavizana
huonto. Na'ankure osi namamo'a ana nanekeka'a erino ana
vahera ome asmi'nigura ontahi'nane.

11 Kagra rama'a kaziga eri'zana e'nerinka, henka'a knare
miza erigahane. **2** Zago fenonka'a 7ni'afino 8'afino refako
hunka atregeno erizana erino. Na'ankure okima ama mopafima
havizama fore'ma hania knazana ontahi'nane. **3** Hagi
hampomo'ma ome knama nehuno'a, ko tagiramino nerie. Hagi
zafama antagi atregeno'ma noti kazigo, sauti kazigama umasere
anante nemane. **4** Hanki kagrama zahoku'ene hampo koku'ma
avegama antesunka avimzana hankrenka hoza ovasgegahane.
5 Zaho'mofo kama kenka antahinka osuge, osi mofavrema
areranku'afima fore'ma nehiazama kenka antahinka osanaza
hunka, Anumzamo'ma e'neria eri'zane, maka zama tro'ma nehia
zana kenka antahinka osugahane. **6** Nanterana avimza avinka'a
nehankrenka, kinaganena avimza avina hankro. Na'ankure
mago avimzamo'ma havizama hanigeno'a, mago avimzamo'a
knare hugahie. Huge anantarega avimzamokea knare hugaha'e.
7 Masa zamo'a haganentake hu'neankino, vahe'mo'za muse
hu'za zagea negaze. **8** Hagi mago vahe'mo'ma rama'a kafu

zagema manino yunaku'ma hanuno'a, ana maka knafina muse
huno manino vino. Hianagi ana knaramimpina rama'a havi
knaramina me'neanki, agera okanino. Ana maka zama esnia
zana agafa'a omne'ne. 9 Kasefa vahe'ma mani'zana knare
hu'neanki, kasefa vahe'moka maka kna muse hunka nemaninka,
nazano hunaku'ma banana zana amne huo. Hianagi kagera
okanio, maka zama banana zana Anumzamo'a keaga huganteno
refko hugahie. 10 E'ina hu'negu krimpa ahezana netrenka,
kavufga kegava hunka manio. Na'ankure kasefa kavugane
hihamukanena amneza me'neankino agafa'a omane'ne.

12 Kasefa vahe'ma mani'nenante tro'ma hugante'nea
Anumzanka'amofona antahineminka monora hunto. Hagi
henkama havi knafima ufresunka nagra mani'zanigura musena
osue hunka hugahane. 2 Zagene ikane, hanafi'mofo masamo'ma
kavurgare'ma rehanintirima nosnigeno, ko'ma nerigeno'ma
negia hampomo'ma rehanintirima osu'nesire Anumzamofona
antahimio. 3 Hagi ana knafina tamazamo'a hanavemo'a
omanena tamahirahi nerenko, osi'a tamave nemenkeno,
tamavua asu hugahie. 4 Kagesamo'ma ankan i orenesigenka
eri'zama enerisaza agasasama nentahisante Anumzamofona
antahimio. Hagi menina ese nama ageru arigenka onetine.
Hianagi ana maka namaramimofo agerumo'a agerura rume vuno
ome osi huno taganegahie. 5 Agonaregama mareri zanku'ma
koroma osuge, ra'naregama uramizanku'ma koro'ma osuge,
almoni zafa amosre gna huno kazokamo efeke osuge, fri'zama
nehia kenumo'ma hagagi hagagi'ma nehiaza osuge, vea zama
hu kavesi'zamo'ma evuoramige'ma hu'enire Anumzamofona
antahimio. Mani vava kuma mati'matitegama vurava'o osuge,
vogisifama omase'nenakeno vahe'mo'ma zavima ote'nenire

Anumzanka'amofona antahimio. 6 Kasefa vahe'ma mani'enante
Anumzanka'amofona antahimio. Hagi silvanofimo akampru
osunenigeno, golireti'ma tro'ma hu'naza kavomo'ma takoma
osu'nenire tro'ma hugante'nea Anumzamofona antahimio. Avega
ante'nege nofimo'va tinkerifima uneramia havizana osino. 7
Ana'ma hanigeno'a kugusopamo'a eteno moparega vinkeno,
tami'nea netega avamutimo'a Anumzamofontega ete vugahie. 8
Mika zamo'a agafa'a omane'ne huno rempi humi' ne'mo'a hu'ne.
Tamage huno ana maka zamo'a agafa'a omane'ne. 9 Rempi
humi ne'mo'a knare antahi'zana nagrike suzane huno osu'neanki,
maka zama antahino keno'ma hu'nea zana vahetmina rempi
huzmi'ne. Vahe'mofo knare antahi'zana antahino keno hu so'e
huteno, isa'are erinte fatgo hutere huno krente'ne. 10 Hagi rempi
humi ne'mo'a haganentake nanekema huama'ma hunakura
hakeno keno erifore huteno, ana antahi'zana knare huno tamage
nankeea eriama huno krente'ne. 11 Knare antahi'zane vahe'mofo
nanekemo'a, sipisipi afu azeri fatgo nehia agona azotagna
hu'ne. Hagi knare antahi'zane vahe'mofo nanekema eri atruma
hu'zamo'a, rama'a nirireti zafa ahentroko higeno hankavetino
meankna hugahie. 12 Hianagi mofavrenimoka mago'ene kavumro
nankeea kasamigahue, rama'a avontafe'ma kre zankura kva
huo. Na'ankure avontafe'ma kre'zamo'a atumpa'a omnegeno,
avontafe'ma hamprino antahi'zama erizamo'a kazeri kavresra
hugahie. 13 Hago ana maka nankeea huvagaroe. Hagi amanage
hu'na vagare nankeea hugahue, Anumzamofonku korora
huntenka agoraga'a nemaninka kasege'a avaririo, na'ankure e'i
ana maka vahe'mo'ma amage antesia ke me'ne. 14 Hagi maka
zantmima oku'a nehuna zane, knare tavutva nehuna zane, havi

tavutva nehuna zantero Anumzamo'a keaga huranteno refko
hugahie.

Soromoni'

1 Mika zagametamima agatere'nea zagame Solomoni kre'nea
zagamere. **2** Nagira antako nehunka nagira no. Na'ankure
kavesima nenantana zamofo haga'amo'a waini timofo haga'a
agatere'ne. **3** Kavufagare'ma fre'nana mananentake masavemo'a,
knare mna vu'ne. Kagimo'a mananentake zama tagitreankna
nehie. E'ina hu'negeno kasefa a'neramimo'za kagritera tusi'zana
nehaze. **4** Navregeta tagareta va'maneno. Kini ne'mo'a navareno
noma'arega vu'ne. Jerusalemi mofa'nemo'za hu'za, Kini ne'moka
kagrikura tusi muse hugahune. Waini tima husgama hunentona
zana agatereta, kagrira husga hugantegahune. Mofamo'a huno,
Kagra knare zantfa hu'nanku, husga hunegantaze. **5** Jerusalemi
mofa'neramimotma antahiho, navufgamo'a hokonke hu'neanagi,
hentofaza nehuno, Kedari vahe'mofo seli nontaminkna nehuno,
Solomoni seli nomofo tavravegna hu'ne. **6** Navufgamo'ma
hokonke'ma hu'nea zankura uruhara onageho. Na'ankure zogemo
navufga te hokonke hu'ne. Nasarahehe'za tusi zamarimpa
ahenante'za waini hozatia kegava huo hu'za hazage'na
kegava nehu'na, nagra waini hozani'a kevga osu'noe. **7**
Nagu'areti'ma hu'na navesi negantoa ronenimoka, iga menina
sipisipi afu kevuka'a avrenka vugahane. Kinaga iga sipisipi
afuka'a ome zamantenka manigasa hugahane. Nahanige'na
savri a'nenegrara hu'na kagri kavumo'zama sipisipi afutmima
kegavama nehazafina vano hugahue. **8** Hentofa a'moka
antahinka kenkama osu'nesunka, sipisipi afu kevu'nimofo agaka
avaririnka neone meme afuka'aramina sipisipi kva vahetmimofo
seli nomofo tvaonte eme zamantege'za trazana neho. **9**
Navesima negantoa navate ronenimoka, Fero karisiramimofo
amu'hompi karisi renteno avazu nehia a' hosi afukna kagra

hu'nane. **10** Kameragemo'a knarezantfa higeno, kagesafima
rente'nana rinimo'a kazeri hentofaza higeno, knankempima
rente'nana pasesumo'a kazeri hentofaza hu'ne. **11** Kagesare'ma
tafintenana konariri zana golireti trohu negamita, knankempima
ante zana silvare pasesu trohu kamigahune. **12** Kini ne'mo'ma
ne'zama nenea tratema mani'negeno'a, nagrama navufgar'e'ma
fre'noa masavemofo mana'amo'a ana nompina avi'nete. **13**
Avesima nenantea ne'mo'a tare amintrenimofo amunompima
mananentake'za merema anakintogeno meankna hu'ne. **14**
Avesima nenantea ne'mo'a, En-Gedi waini hozafima henae
nehaza zafa amosre'agna hu'ne. **15** Navesima negantoa
mofamoka, kagra hiranto kagi kagonane a' mani'nane. Tare
kavurgamokea maho namagna hu'na'e. **16** Navesima negantoa
ne'moka kagra hentofaza hunka kagi kagonane ne' mani'nane.
Kagra maka vahera agaterenka hentofa ne' mani'nane. Zamana
zamana trazamo'a tagri tafe me'ne. **17** Nonti'ama ki'nazana,
nomofa amagenta zafa sida zafanu nente'za, meni zafanu
nontamina runkre hugahaze.

2 Nagra Saroni agupofi flaua kna nehu'na, agupofima nehagea
lili flaua kna hu'noe. **2** Mofa'neramimofo amunompina
navesima negantoa mofamoka, ave'ave trazampi me'hea
lili flauamofo amosregna hu'nane. **3** Navesima negantoa
ne'moka zafaramimofo amu'nompina mareri agatere epoli
zafagna hunka mago'a vene'ne amu'nompina mani'nane.
Ana zafamofo tonapi mani'nena haganentake raga'a tagi'ha
nenoe. **4** Tusi neza retro hunte'nea ra nontega navareno
nevuno, agu'areti'ma huno avesima nante'nea avu'avamo'a
tavravereti refite nanteankna hu'ne. **5** Anante hagegema hu
zafargareti'ma kre'nea bretia namige'na ne'na, hankavea eri'na

mani'na nevu'na, epoli zafa raga namige'na nenavuna ha'neno.
Na'ankure kagrikura tusiza hu'na navesi negante'na kria e'nerue.

6 Hagi hoga'a azante nanuna ante harage nehugeno, tamaga azanura nanuki'ne. **7** Jerusalemi mofaneramimota gazeline afi dia afu'mo'za nentahisageta nagritera huvempa hutma tamavesi'zana ame huta eri o'otinkeno kna fatgore eno. **8** Hagi avesima nentoa ne'mo'a, agonarega ne-ege'na agasasanke'a nentahue. Takaure takaure huno agona kreneramino, vagri vagri huno ne'one agona kreramino ne-e. **9** Avesima nentoa ne'mo'a gazeliema nehaza afukna huge, agaho dia afukna hu'ne. Nosika mani'neno zaho eri kampinti mase nompinka rencragino nege. **10** Nevesima nentoa ne'mo'a amanage huno nagrikura hu'ne, navesi navesima hunegantoa mofamoka otinka eno. Hentofa zagan'i'a mani'nananki egeta nagrane va'mneno. **11** Hagi zasi'ma nehianknamo'a vagaregeno kora aruse'ne. **12** Flaua trazamo'a hageno amosrea ahegeno, wainia taga huno eri fatgo nehigeno, namaramimo'a zanontera tusiza hu'za nani'nani nehazage'za, kugofa namaramimo'za kugokugo nehaze. **13** Fiki zafamo'a agafa huno raga neregeno, grepi zafamo'a amosre nehegeno, mna'amo'a antaguntagu nehie. Navesima negantoa mofamoka otinka eno. Hentofa zaganimoka nagri'ene eno huno navesima nentoa ne'mo'a hu'ne! **14** Maho namanimo'a fra'ma nekia havegampimka agonafi frakino mani'ne. Kavugosa naveri nehunka, kagerura aruge'na antahi'neno. Na'ankure kagerumo'a haga nehigeno, kavugosamo'a hentofaza hu'ne. **15** Avesima nentankeno kavesima negantea grepi hozatani'a eri haviza hanagi, maka neone afi kraramina zamazeri hana huo. Na'ankure grepi zafamo'a amosre ahente'ne. **16** Navesima nentoa ne'mo'a nagri su'a manige'na, nagra agri su'a mani'noe.

Ana hu'neankino liliema nehaza flaua hozamofo amu'nompi vano nehuno, amosrema ahente'neana nene. 17 Rumasama osu'enire gazeliema nehaza dia afumo'ma agonaregati'ma ne-eaza hunka, navesima negantoa ne'moka ete nagritega eno.

3 Maka kenagera tafeni'are mase'nena, navesima nentoa ne'mofonkura tusiza hu'na antahintahia nehu'na, ava'nafina agrikura hakena vano hu'noanagi onke'noe. 2 Anama onke'na amanage hu'na hu'noe, menina oti'na rankumapine neone kampi vano nehu'na, nagu'areti'ma hu'na navesima nentoa ne'mofonkura hakena vano hugahue. Anage nehu'na otina hakena vano hu'noanagi onke'noe. 3 Anante kumama kegava hu'za vanoma nehaza vahe'mo'za eme nage'za eri fore hazage'na, navesima nentoa nera ke'nazo hu'na zamantahige'noe. 4 Kuma'ma kegavama nehaza vahetmima zamagate'ma nere'na, nagu'areti'ma hu'na navesi navesima nehua nera ome ke'na erifore hutena, ome agazafe'na anukinena avre'na nentrera nontega vu'na agrama amu'enema huno kasenante'nefinka vu'hoe. 5 Vemo'a huno, Jerusalemi mofaneramimota gazeliema nehaza afu'ene, afi diamo'ma nehia zante tamagesa nentahita, navesizana azeri ora otigosune huta huvempa hunenko vuno kna fatgore vino. 6 E'i iza ka'ma kopintira kumo'ma rentikenoma eaza huno kumagumagu huno ne-e? Hagi merema nehaza mna zane, frenkinsensie nehaza mna zane maka mnanentake zama feno vahe'mo'zama zagore'ma netrazankna'ma nehiana iza'e? 7 E'i Solomoninki'za, mase tafe'are mani'nege'za zamafunte zafa hu'za neazageno Israeli vahepima ugagotama hu'naza harafa sondia vahera, 60'a vahe'mo'za azeri amu'nompi ante'za avre'za neaze. 8 Ana maka vahe'mo'za bainati kazinteti'ma ha'ma hu'arera vugota hunazanki'za, ha'ma hu'zana antahikasi'haze.

Ha' vahe'mo'zama kini ne'ma kenage'ma eme ahe'zanku'ma kegava hunentaza vaheki'za mago magomo'za bainati kazina zamote anaki tragotetere hu'naze. **9** Hanki Lebanoni mopafinti'ma eri'za e'naza zafanu kini ne' Solomoni'ma manisia trara tro hu'naze. **10** Ana sesenkumofo noma antesgama hu zafa Silvareti tro nehu'za, amagenama ante kaziga golireti eri fagaginente'za, fitunke tavravereti tafera masinte'naze. Jerusalemi mofanemo'za ana konararia tro huntenezankino, tusiza hu'za ana konararigura zamavesinte'naze. **11** Atiramita kini ne' Solomonina eme keho. A'ma masimigeno tusi musema hia knare'ma, nerera'ma ami'nea kini fetori antanino ne-e.

4 Navesima negantoa mofamoka, kagi kagonamo'a arava ohe hentofazaga mani'nanke'na kema hugamizankura amuho hue. Kavufima refite'nana tavravemofo amefira, kavurgararemokea maho namagna hu'na'e. Hanki kazokamo'ma evuramiazamo'a Giliati agonafinti sipsipi afu'mo'za takoure takoure hu'za evuramizankna nehie. **2** Kave'mo'a sipsipi afu anenta meni azoka harenteza ti frentageno efeke nehiankna huno efeke hu'ne. Magore huno kavemo'a hagro osu'neanki fenkamine anagami kavemo'a mago tragave hu'ne. **3** Kagi'morenamo'a korankrenofikna hu'ne. Kagimo'a vahe'mo'ma kesane hu'are knare'zantfa hune. Kavugosama refite'nana tavravefina kameragemo'a korankre huno pomigreneti zafa rgagna hu'ne. **4** Hagi knankemo'a Deviti zaza nonkna huno hentofaza nehigeno, Deviti nonte'ma hankave sondia vahe'mo'zama tauseni'a hankozmima eme hantinte'za enevazankna hu'ne. **5** Tare aminka'araremokea kugaveza dia anenta afumoke lili trazampi traza neneke vano ha'ankna huna'e. **6** Nanterama zasima osuno masama osu'nesige'na, ame hu'na mnmanentake'za merene frenkinsensima

me'hea agonafina marerigahue. 7 Navesima negantoa mofamoka kagrira kagi kagonamo arava ohe hentofa zaga mani'nankeno, maka kavufgamo'a afuhe afahera osuno hentofaza hu'ne. 8 Lebanonitira zahufa a'nimoka, nagrane egeta va'mneno. Amanae nehaza agonafintira eramio. Laionimo'ene lepatimo'enema noma kikema nemania agona Senirine Hemoni agonararemofo morusapintira eramio. 9 Zahufa a'nimoka kagra marerisa zagani'a mani'nanankinka tumonire avako nehane. Kesgama hunka kavuma nenaganke'nama knankempima pasesuma hu'nana zama negogeno'a, tumoni'amo'a fakifaki hu'ne. 10 Zahufa a'nimoka kavesi'nenantana zamo'a hentofaza hu'ne. Kavesima nenantana zamo'a waini timofo haga'a agatere'ne. Hagi kavufgare'ma fre'nana masavemofo mnamo'a, mika haganentake zana agatere'ne. 11 Zahufa a'nimoka kagiteti'ma pakepakema nehia zamo'a tume rimo'ma nehiaza huno haganentake nehigeno, kagefu'namofo henka kaziga amirine tumerine me'ne. Ana nehigeno kukena ka'afinti mnamo'a Lebanoni sida zafafintima neviankna mna nevie. 12 Zahufa a'nimoka kagra nagrike hoza mani'nenka, mareri fenozani'a mani'nane. Refite'nea ti kampui kagra mani'nenka, oku'a ti kampui tini'a mani'nane. 13 Kagri hozafina pomigreneti zafa'moza metru hutere hune'za, knare'nare raga renentaze. Hagi mnanentake zantmima henama nadima, 14 zafronica, kalamusine sinamoninema, ana maka frenkinsensima, merema, aloe trazane, maka knare'ma huno mananentakema nehia zantaminena ana hozafina me'ne. 15 Hozafi me'nea ti kampui kna nehunka, knare tirukna hu'nane. Lebanoni agonafinti'ma eneramia tinkna hunka mani'nane. 16 Noti kazigatira zahora erinka ne-egeno, sauti kazigati'enena zahora erino ne-ena huta, hozaniafinti mna'a erita vuta eta hi'o.

Navesima negantomoka hozaka'afina enka hentofa zafa raga
eme taginka nenka ko.

5 Zahufa a'nimoka nagra hozani'afi ufre'na mnanentake'za
merene, haganentake zanena eritru nehu'na, tumemofo
anoma'ane tima'anena nenena musena hu'noe. Ami rine
waini tinena ne'noe. Jerusalemi mofa'nemo'za hu'za, Ovesinte
avesintema neha'a veatremota'a ne'zana neneta tina ne'o.
Ante fenkamu atreta tanavesi'zana tima neaza hi'o. **2** Navura
mase'noanagi antahintahimo'a eri'zana eri vava hu'ne. Agasasa
arige'na antahugenava avesima nenantea ne'mo'a kafante eme
vagre vagre nehuno anage hu'ne, kafana anaginanto marerisa
zaganimoka, maho namanimoka kafuhe kafahe omanegenka
hentofa zaga mani'nane. Ata komo'a nanuntera runtegeno
atake nehigeno, nazokamo'a tinke huno pasupanegie. **3**
Hianagi nagra hago kukena hutrena mase'hoanki, inankna hu'na
otigahue? hu'noe. Ko naga sese hutena mase'noanki, ete otina
vanugenava nagamo'a pehana hugahie. **4** Avesima nenantea
ne'mo'a azana antegamateno kafana eri anagi'za hige'na
kogeno, tumonimo'a fakro fakro hu'ne. **5** Anama hige'na otina
kafama nenagugenava, nazantegatira mnanentake'za meremo'a
pakepake hu'ne. Mnanentake'za meremo'a nazankoregatira
pakepake nehige'na, kafama agu'atima ahentrokoma hu'noa zota
avazu hu'noe. **6** Avesima nenantea nera kafana anaginte'noanagi,
rukrahe huno ko atreno vu'ne. Atreno'ma vigeno'a nagu'amo'a
kna huno evuramino musena osige'na, hake'noanagi kena eri
fore osu'noe. Ke'zana ati'noanagi, ke'niarera voera osu'ne. **7**
Kuma'ma kegava nehaza vahe'mo'za, kuma kegava hu'za vano
nehazaregati eme nage'za erifore nehu'za, nahe'za nakare
kuni'a eri'naze. Ana vahetamina kuma kegina kegava nehaza

vahetamine. 8 Jerusalemi mofaneramimota, avesimanenantea ne'ma kesuta, avesima nentana mofamo'a kagrikura kri erino mani'ne huta asamigahune huta huvempa hunanteho. 9 Kagi kagonamo arava oheno hentofa mofamoka, ina kazigati avesima nentana ne'mo'a mago'a venenea zamagatere'ne? Ina kazigati aronekamo'a mago'a venenea agatere'negenka e'inahu kea hunka huvempa hihon hunka nehane? 10 Navesima nentoa ne'mo'a, hanavenentake nekino, avufamo'a tevenefa tagivazu hu'neankino, 10 tausenia vahepina agra zamagatere'ne. 11 Asenimo'a marerisa goligna nehigeno, azokamo'a egaraki egaraki huno kotkoti namagna huno haninke hu'ne. 12 Hanki tare avurgamokea tinkenafi nemania maho namamofo avurgagna nehuke, marerisa konarari zama ami rimpi sese higeno rumarave hiankna hu'na'e. 13 Ameragemo'a balsami zafamo'ma amosrema ahentegeno'ma mnama neviankna hu'ne. Hagi agi morenamo'a liliema nehaza trazamofo amosrefinti'ma meremo'ma viankna mna vu'ne. 14 Azampasamo'a goli vimagokna higeno, berilie nehaza havenu konarari hunteankna hu'ne. Avufgamo'a elefanti aveteti'ma hiaza huno kanifuge higeno, safie nehaza havenu'ma konararima hunteankna hu'ne. 15 Tare agararemokea efeke havereti vimago zafa tro hunteteno, rusima hunte'zana goliretike tro huteno anampinka resi hunteankna hu'na'e. Avu'ava'amo'a Lebanoni agonaramimpima knare'nare sida zaframima meankna hu'ne. 16 Agi'mo'a tusi haga nehie. Agra vahe'mo'za kesane huga ne' mani'ne. Jerusalemi mofa'nemota avesimanentoa ne'mo'a, e'inahu ne' mani'ne.

6 Kagi kagonamo'ma aravama ohe hentofa mofamoka kagu'aretima hunka kavesima nentana nera iga vu'ne? Kaza huta hakegahunanki, ina kantega rukrahera huno vu'ne? 2

Avesima nentoa ne'mo'a manamentake zama me'nea hoza'arega uramino, sipisipi afuzaga'a kegava nehuno liliema nehaza tra'zamofo amosre'a asenaku vu'ne. 3 Nagra nagu'aretima hu'na navesi nentoa nemofo suza manugeno, nagu'aretima hu'na avesima nentoa ne'mo'a, nagri suza mani'neankino, agra liliema nehaza trazampi sipisipi afuzaga kegava huno vano nehie. 4 Kagra hentofa a'ni'a mani'nankeno, kavufgaretira Tirza kumamo'ma hiaza huno so'e zantfa hu'ne. Kagra Jerusalemi kumamo'ma knare'zantfama hiaza hunka knarezantfa nehunka, sondia vahe'mo'zama krauefama (flek) eri'za otizankna hu'nane. 5 Kavuraga keamne huo, na'ankure kavugura koro nehue. Kazokamo'a hagerimo'ma rukranto krantoma nehiaza nehigeno, meme afu kevumo'za Giliati agonafinti takaure takaure hu'za eramizankna hu'ne. 6 Meni sipisipi afu ti frente'za azeri agru hazageno efe anentake hiankna kavemo'a hu'ne. Anagamine fenkamine kavemo'a tragave huno knare zantfa hu'neankino, regasima nehankeno'a efeke huno knare nehie. 7 Tare kameragemokea kavugosama refite'nana tavaravefintira pomigreneti, zafa ragamofo avufgaretima hiaza huno koranke nehie. 8 Kini ne'mofo a'nea 60'a kuini manizageno, henka a'ne'a 80'a manizageno, ohampriga'a vene omase mofa'nea mani'nazanagi, 9 nagri maho nama agra hiranto zaga mani'neankino, agra ruzahu knazaga mani'ne. Nerera'ma magoke'ma ante'neno agrikuke'ma nehia mofa mani'ne. Muna'nemo'za agrira husga hunentazageno, kini nemofo a'neramimo'zane henka a'neramimo'zane vene omase mofanemo'zanena zagame hu'za agj'a erisga nehaze. 10 Iza avufgafintira rumsa nehie? Avufgafintira ikamo'ma remsama nehiaza nehigeno, zagemofo avunasisimo'ma nehiaza nehigeno,

sondia vahe'mo'za krauvesa eri'za oti'zankna huno konarari'amo'a
hentofaza hu'ne. 11 Krepimo'ene pomigreneti zafamo'ma
amosrema ahege, asinama eri marege'ma hu'ne'nia ome
ke'naku, zafa rgama renentea zafa hoza agupofi urami'noe. 12
Navesizamo'a ugagota kva ne'mofo karisifi me'nege'na kena
antahina nehu'na antri nehue. 13 Ete rukrahe hunka eno.
Sulamu kumateti mofamoka ete eno, ete egeta kagamneno.
Higeno mofamo'a huno, Tarefima manimpima hu'za zamagama
netrazafina, Nagafare nagenakura nehaze?

7 Kva ne'mofo mofamoka kagia noma antaninana kagamo'a
hirantoza hu'ne. Kagiamo'a knarezantfa hu'neankino,
keonke'zama tro'ma hu'are'ma knare'ma hu'nea vahe'mo'ma
havere'ma eri vimago huno marerirafa avasesezama tro
hunteankna huno hentofaza hu'ne. 2 Hagi mnanentake zane
wainima eri haviamma hunentaza kapugna huno kriko'mo'a
knare zantfa hu'ne. Hagi kamumo'a witi herafintazageno hihi
huno mareriaza huno marerinegeno, liliema nehaza trazamofo
amosrenu avasase hugagintazageno asivaziankna huno knare
zantfa hu'ne. 3 Tare aminka' amokea tare anenta dia afukna
nehuke, gezelie nehaza kugave'za dia afukna hu'na'e. 4
Knankemo'a mani'nezama kuma kegavama nehaza noma
elefanti aveteti kinazankna huno hentofaza hu'ne. Hanki
kavurga raremokea Hesboni kumapine, Bat-rabimi kuma kafante
me'nea tirutamimpinti ru marave hiankna huno hentofaza hu'ne.
Kagonamo'a Lebanon kumate mani'nezama kegavama nehaza
za'za nomo'ma Damaskasi kaziga avugosa hunteankna huno
knare'zantfa hu'ne. 5 Hagi kasenimo'a mesga huno Kameli
agonagna nehigeno, kazokamo'a kini ne'mofo tavravegna hu'ne.
Hagi e'i ana kazoka kutera kini ne'mo'a evuramigahie. 6

Navesima neganta mofamoka kagra marerigatere zagani'a mani'nane. Kagri kavufgare'ma mika zama me'nea zamo'a nazeri muse nehige'na, nagra tusiza hu'na navesinegantoe. 7 Kagra tofe zafagna hunka za'za hu'nankeno, aminka'araremokea tofe zafamo asite asite ragama renteankna hu'na'e. 8 Hagi nagra tofe zafare marerina raga'a azerigahue. Tare aminka'amokea grepi ragamo'ma hiaza nehigeno, kasimu'ma nentakeno'a epoli zafa ragamo'ma neviankna mna nevie. 9 Hagi nagi'ma nenankeno'a, haga'amo'a knare zantfama hu'nea wainima nenogeno, haganentake'ma huno nagipima uramiankna nehie. 10 Nagra ve'nimofo su'za manugeno, agra tusiza huno avesi nenante. 11 Navesima neganta ne'moka egeta avo'nompi vano nehuta, osi kumatamimpi umasamneno. 12 Nanterame otita waini hozafi vuta, waini zafamo'ma amuma marege amosrema rupokrasege'ma hu'enigura ome kegahu'e. Ana nehuta pomigreneti zafamo'ma amosrema ahenenigura negeta, anampi navesima neganta zana eri kaveri hugahue. 13 E'i anampi mentreki zafa ragamo'a, tusi mna nevina kahantirera maka knare'nare zafa raga nemena, kasefa ragane korapa zafa raganena megahiankino, e'i ana suzantamina navesima negantomoka antegante'noe.

8 Nenrera amima nenka ra hunka nagri nensarogama mani'nantesina, knare hisine. Na'ankure vahe'mo'za nenagazage'na korora osu, amne kagira antako nehuge'za mago kea osazasine. 2 Nagra kavre'na rempima hunami'nea a' nenrera nompinka vusine. Haganentake mnazanteti eri havia hu'nea waini tina kamugenka nenanke'na, haganentake pomigreneti tinena kamugenka nasine. 3 Hoga kazanu naseni fitara ante harage hunenka, tamaga kazanu nanuki fanki hasine. 4 Jerusalemi

kumate a'nemota veamo'ma aravema hu antahintahia tazeri
o'otinenunkeno kna fatgo'are egahie huta huvempa hiho. 5 Ina
mofamo ka'ma kokana atreno ne-eno, avesima nentea ne'mofo
asumpina maserino ne-e? Mofamo'a huno, Negrera'ma atagu'ma
nehuno kasegante'nea epoli zafa agafafima mani'nankena
kavufga kazeri oti'noe. 6 Taferomofo avaza'a erigiankna hunka,
tumoka'amofo agofetu navrenentenka asama nehiaza hunka
kazampasanafina nagrike navrento. Na'ankure navesizamofo
hankanavemo'a frizamofo hankavemo'ma hiaza huno tusi
hankanaveti'ne. Navesizamo'a tusi hankanavetino matipima
vahem'a asenenteankna hu'ne. Navesizamo'a teve anefamo'ma
hagana hagana'ma hiaza huno hagana hagana huno marenerie.

(Sheol h7585) 7 Avesizamofo tevea rama'a timo'a resura osuge,
tima hageno esia timo'a avesizana erino vugara osu'ne. Hagi
mago ne'mo'ma avesizama mika zago fenonteti'ma tesizama
hanige'za, vahem'o'za tusi kiza zokago ke huntegahaze. 8
Nerasaro'a osi mofa mani'negeno, amima'amo'a oharage'ne.
Hagi mago'a vahem'o'zama a' erintegahune hu'zama hanageta,
tagra nerasarona na'a huntegahune? 9 Hagi nersaro'ma kuma
keginagna'ma huno maniresina, ana kegina agofetura silvareti
zaza nona kita manineta kegava huntosine. Hagi agrama
kafama maniresina, tagra sida zafagna huneta, kahantera
ahekanrentosine. 10 Nagra kuma keginagna hu'nogeno,
amini'amo'a za'za nonkna hu'ne. Hagi navesimanentoa ne'mo'a
agrama nenageno'a tusiza huno ananke nakrura nehuno
avesinante'ne. 11 Solomoni'a Ba'al-hamoni kumatera waini
hoza ante'neanagi, ana waini hoza vahem'o'za kegava hu'naze.
Hagi ana hozama kegavama hu'neza zagoma troma nehaza
vahem'o'za hozama ante'za zafa rgama tagiza nona'a 1tauseni'a

silva zago eme amitere hu'naze. **12** Hianagi nagri waini hoza nagri su'ankina amigahuankino, Solomoni'a 1tausenia silva zagoa miza osegahie. Hianagi 200'a sekeli zagoreti hozama kegavama nehaza vahera mizana zamigahue. **13** Hozafima mani'namoka, nagrane nemaniza vahe'mo'za kagri kagerukura zamagesa ante'za nentahize. Hagi natrege'na kagerura antahi'neno. **14** Navesima negantomoka gezeriema nehaza afi ve dia afumo'ma nehiaza nehunka, kasefa afi ve dia afumo'ma mananentake zama me'nea agonaramimpima vanoma nehiaza hunka ame hunka nagritega eno.

Aizaia

1 Hanki Juda kini vahera, Uzia'ma, Jotamu'ma, Ahasi'ene
Hezekaiki hu'zama kinima mani'za e'naza knafina, Amosi
nemofo Aisaia'a Jerusalemine Juda mopafima nemaniza
vahetema fore'ma hania zana amanahu avana knaza ke'ne.

2 Ra Anumzamo'a amanage hu'ne, Monamoka nentahigeno,
mopamoka antahio, mofavre naga'ma kegava huge'zama
rama hu'naza mofavre naga'moza Nagrira zamefi hunenamize.

3 Hanki bulimakao afu'mo'a nafa'amofona keanke regeno,
tonki afu'mo'a kegavama huntene'mo'ma ne'zama nemia
kumara antahi ankere'ne. Hianagi Israeli vahe'mo'za nagrira
ke'za antahi'za osazageno, Nagri vahe'mo'za antahi amara
osu'haze. 4 Israeli vahera kumike vahe manizageno, kumi'mofo
knamo zamazeri rentrako hu'ne. Havi zamavu'zamava nehaza
vahe'mo'za zamagrira kasezmante'haze. Zamagra fatgo osu
zamavu zamava nehaza vahe mani'ne'za, Ra Anumzana
nenatre'za, ruotagema hunemofona kefenkami netre'za, Israeli
vahe'mokizmi Ra Anumzana zamefi humi'haze. 5 Na'a agafare
e'inahu tamavutamvara huvava huta nevanagano knazana
tamigahie? Na'ahigeta veganokanora huvava huta neaze?
Zamasenifina kri me'negeno maka zamavufagamo'a hankave'a
omane'ne. 6 Henkamu zamagigo avozareti marerino anagamu
zamasenire marerigeno, mago knare zana omane'neanki, ruzahu
ruzahu namumo avite'ne. Ana higeno ana namuna sesera huno
olivi masavena anteno anakigara osu'ne. 7 Hagi mopatamimo'a
haviza huno megeno, ranra kumatamia tevemo te fanane hu'ne.
Hozatamifintira nezmagazage'za ru kumate vahetamimo'za
ne'zana eme eri vagare'za vu'naze. Ru kumatega vahe'mo'za
e'za kumatamia eri haviza hazageno, mopa tamifina mago'zana

omanetfa hu'ne. 8 Higeno hentofazama hu'nea Jerusalemi kumara atrazageno, waini hozafi fugagi no kintearkna huge, kono hozafi tona no kintearkna huge, ha' vahe'mo'za mago rankuma'ma kafo eme ante'za avazagi kagintazankna hu'ne. 9 Hagi Hankavenentake Ra Anumzamo'a tataregetama menima mani'nona vahe'mota Sodomune Gomora kumatremokema havizama huna'aza huta haviza husine. 10 Hagi tamagra Sodomu kumate kva vahe'mota Ra Anumzamofo nanekea antahi ankenerenke'za, Gomora kumate vahe'mota Ra Anumzana tagri Anumzamofo kasegea tamagesa anteta antahiho! 11 Hagi hakare'a zupama Kresramanama nevaza ofamo'a, nagri navurera amne zankna hu'ne huno Ra Anumzamo'a hu'ne. Ve sipisipireti'ene knare zantfama hu'nea bulimakaomofo afovareti'ma, kre fananehu ofama tevefima hu'naza zankura navesra hu'ne. Hagi ve bulimakaone ve sipisipine meme afumofo korankura nave'nosie. 12 Hanki tamagrama Nagri navure'ma monote'ma neazageno'a, iza ama ana zantamina eri'neta eho huno huramante'ne? Anama hazazamo'a Nagri mono nompina tusi'a agasasa ruta vano nehuta, renkrare nehaze. 13 Hagi Ofama erita neaza ofa agafa'a omane ofa erita neazanki Nagritera omeho. Mananentake'za insensima kre mnama nevaza zamo'a nago'nete. Kasefa ikante'ma musema hazafine, Sabati knare'ma nezama atretama mono'ma hazafine, mago'a knare'ma mono'ma hazafinena omanisua nagesa nehie. Na'ankure tamagrama haza kumi'mo, atruma huta mono'ma haza monora eri haviza nehie. 14 Kasefa ikante'ene huhamparinte'naza knare'ma musema nehaza musenkura, Nagri nagu'amo'a musena nosie. Anazamo'a Nagrira tusi knaza namige'na, erisga huzankura nevesra hu'ne. 15 Hanki tamazama erisga huta

nunamuma hanage'ha, Nagra navua onke'nugeta, zaza nunamu
hugahazanagi antahi oramigahue. Na'ankure ke'a omane
vahe'ma zamaheta eri tagi'naza koramo'a tamazampina avite'ne.
16 Hagi tamagra ti fretma agru nehutma, Nagri navure'ma havi
tamavu tamava'ma me'neana eri netreta, kumi'ma hu'zana
atreho. **17** Hagi knare avu'ava hu'zana rempi huta nentahita,
fatgo huno refkohu avu'ava zana nehutma, kento a'hanea
zamazeri so'e nehuta, kefo zamavu'zamavama nehaza vahera
zamazeri fatgo nehuta, megusa mofavrea kegava huzmanteho.
18 Hanki Ra Anumzamo'a huno, Tamagra enketa ana zankura
magopi keaga erinte fatgo hamneno. Tamagri kumimo'a oninake
korankre hu'neanagi, Nagra sese huramante sanugeno, efeke
huno hamponkna nehanigeno, koranentike hu'neanagi sipisipi
afu'mofo azoka'moma hiaza huno efe'nentake hugahie. **19**
Hagi tamarimpamo'ma o'netisigeta Nagri kema antahisutma,
ama mopafinti'ma knarenare ne'zama fore'ma hania ne'zana
tamagra negahaze. **20** Hianagi tamefi'ma hunenamita ke'nia'ma
ontahisazana, bainati kazimofo ne'za segahaze. Nagra Ra
Anumzamo'na amana kea nehue. **21** Jerusalemi rankumamoka
kora Nagri kea antahinka mani fatgo hu'nanane. Hianagi menina
mago savri a' kna nehane. Kora makazampina fatgo hunka refko
nehanke'za, kagri agu'afima nemaniza vahe'mo'za fatgo zamavu
zamava hu'nazane. Hianagi menina Jerusalemi kumapina
vahe'ma ahe fri vahe'mo avite. **22** Kagra kotera knare silvagna
hu'nananagi menina krogro ahenea silvagna nehunka, kora
knare wainigna hu'nananagi menina amane tinkna hu'nane. **23**
Jerusalemi kumamoka kva vahe'mo'za Nagri kea nontahi'za,
kumazufa vahe'mokizmi knampa mani'naze. Zamagra masavema
huno mago'a zama eri'zanku'ene, musezama erite'za eri'zama eri

zankuke nehakaze. Zamagra megusa mofavrea zamaza nosu'za, kento a'ninemokizmi kaziga ante'za keaga nosaze. **24** E'ina hu'negu hanavenentake Ra Anumzana Israeli vahe'mokizmi hanave Anumzamo'a amanage hu'ne, Nagri'ma ha'ma renantaza vahera nona hu'na ha'huzmantegahue. **25** Hagi naza rusute'na knazanteti tamavumro ante'na tamazeri haviza nehu'na, tamazeri pheheng'e ma' nehiazana ana maka tevefi kre fanane hu'na eri atregahue. **26** Hagi Jerusalemi kumapima manine'za kema refko nehaza vahetamine, knare kanisol vahetamimo'za ko'ma ese agafare'ma mani'nazaza hu'na, ete zamazeri otigahue. Anama hutesuge'za vahe'mo'za henka'a hu'za, fatgo avu'avaza nehuno Ra Anumzamofo ke amagenentea rankuma me'ne hu'za hugahaze. **27** Saioni kumamofona fatgo avu'ava zanteti refko huno negeno ete avregahie. Ana nehuno ana kumapima nemaniza vahe'mo'za zamagu'ama rukrahe'ma hanageno'a, fatgo avu'ava huno zamagu vazigahie. **28** Hianagi kema ontahi vahe'ene kumi'ma nehaza vahe'mo'zanena havizantfa hanage'za, Ra Anumzamofoma zamefi'ma hunemiza vahe'mo'za omani'za fanane hugahaze. **29** Hanki tamagrama oki zafa agafafima havi anumzama mono'ma hunentaza zanku'ene, hozama kariteta anampima havi anumzama mono'ma hunentaza zankura tamagazegu hugahaze. **30** Hanki tamagra oki zafamofo ani'namo harari hiakna nehuta, hozamo ti omanegeno hagege hiakna huta haviza hugahaze. **31** Hagi hankavenentake vahe'mo'za hagege zafagna hu'nesageno, havi tamavu tamavamo'a teve rukaru huno neramaresigeno, mago vahe'mo ana tevea rusu hugara osugahie.

2 Hanki Jerusalemi vahete'ene Juda vahete'ma fore'ma haniaza Amosi nemofo Aisaia'ma ava'nagna zampi ke'nea

zamofo naneke. 2 Hanki henkama vagareknama esigeno'a
Ra Anumzamofo mono noma me'nea agonamo'a, mika
agona agateregahie. Ana agonamo'a maka agonaramina
agatereno ame'nagame merarigahie. Anama hanige'za maka
kokankoka vahe'mo'za agrite zamavune ante'za egahaze.
3 Maka vahe'mo'za e'za amanage eme hu'za hugahaze,
Enketa Ra Anumzamofo agonafi vuta, Jekopu Anumzamofona
mono noma'afi vanunkeno, Agri avu'avapima vanuna zamofo
avu'ava zana rempi huraminigeta, agri avu'avapina vugahune.
Na'ankure Saiontira Ra Anumzamofo kasegemo'a nevinkeno,
Jerusalemitira Ra Anumzamofo nanekemo'a atiramino vugahie.
4 Hanki kokankokama nemaniza vahe'mo'zama zamarimpama
ohe ahema nehaza zana, zamazeri fru hanige'za fru hu'za
manigahaze. Ana nehu'za bainati kazinknozamia rukuta
huza mopa rekori azota tro nehu'za, karugru keve zamia
ruguta hu'za zafa azankunama nekafriza kazi tro hugahaze.
Ana nehu'za hara hu'za zamagra zamagra ohe fri ahe fria
osugahaze. 5 Hanki Jekopu nagara enketa Ra Anumzamofo
masazampi kana vanune. 6 Hanki Ra Anumzamoka Israeli
vaheka'a kamefi huzami'nane. Na'ankure zamagra zage hanati
kaziga vahe'mokizmi zamavu'zamava amage nente'za, Filistia
vahe'mo'zama nehazaza hu'za fri vahe hankrote zamentintia
nehu'za, megi'a vahe'ene hagerafi'za nemanize. 7 Hanki
mopa zamifina silvamo'ene golimo'enena avitege'za, magore
hu'za feno zankura atupara osu'naze. Mopa zamifina hosi
afutamimo'za hakare hazage'za, karisigura atupara osu'naze.
8 Hanki ana mopazamifina kaza osu havi anumzantamimo
avite'ne. E'ina nehu'za zamagra'a zamazanteti'ma tro hu'naza
zante zamarena re'za monora hunentaze. 9 E'ina hu'negu

vahetamina Kagra zamazeri fenkami atrege'za, zamagazegu
nehanagenka zamagima me'nea vahera mopafi zamazeri
fenkami atro. Ana nehunka Ra Anumzamoka kumizmia atre
ozmanto. **10** Hanki tamagra makamota vuta have kampine,
mopa kampine ome frakiho. Na'ankure Ra Anumzamo'ma
Hihamu Masa'anema esanigetama kesuta koro huta haviza
hugahaze. **11** Hanki ana knafina, hazenkema nehu'za ra
zamagima eneriza vahera, Ra Anumzamo'a zamazeri fenkami
atregahie. Ana nehina Ra Anumzamofo agige'za erisga
hugahaze. **12** Hanki ra zamagima ener'za havi zamavu
zamava'ma nehaza vahera, Hankavenentake Ra Anumzamo'a
mago kna huhampari zamante'neankino, ana knama esanigeno'a,
zamazeri fenkami atregahie. Na'ankure vahe'mo'zama ra
zamigima e'neriza zantamina maka eri fenkami atregahie. **13**
Ana nehuno za'za huno mareri agatere'nea sida zafaramima
Lebanonima me'nea zafaramine, Basani mopafima ana makama
me'nea oki zafaraminena antagi atregahie. **14** Anazanke huno
ame'nametegama mareri agatere'nea zaza agonaramine, ne'onse
agonaraminenza zamazeri haviza hugahie. **15** Hanki mani'nezama
kuma'ma kegava nehaza za'za nontamine, maka hankave
nentake kuma keginanena ahe fragu vazitregahie. **16** Ana nehuno
fenozama erino vano nehia ranra venteramina eri haviza nehuno,
maka avasase'ane ne'onse vente raminena zamazeri havizantfa
hugahie. **17** Hanki zamagima erisgama nehaza vahera zamazeri
fenkami netreno, nagre nagre huno'ma agima erisgama nehia
vahera azeri atregahie. Ana hanigeno Ra Anumzamo'a Agrake'za
ragia ananknama efore'ma hania zupa erigahie. **18** Ana hanigeno
kaza osu havi anumzantamimo'za fanane hugahaze. **19** Hanki Ra
Anumzamo'ma mopama eri tore hunaku'ma masanentake hihamu

hankave'ane esanige'za, veamo'za koro nehu'za havegampine,
muri kampine ome frakigahaze. **20** Hanki ana zupa ana
maka vahe'mo'za kaza osu havi anumzantamima silvareti'ene
golireti'ma tro'ma huntene'zama mono'ma hunentaza zana, ana
maka eri'za kfamozane tampramozama nemaniza havegampi
atregahaze. **21** Hanki ana zupa Ra Anumzamo'ma ama
mopama eri tore nehuno, vahe'ma zamazeri koro hunaku'ma,
masanentake hihamu hankave'anema esanige'za, veamo'za
koro fre'za vu'za agonarega havegampine murigampine ome
frakigahaze. **22** Hanki mago vahe'mo'a taza hugahie huta antah
ozamiho. Na'ankure maka vahera amne vahetfa mani'nazanki'za,
inankna hu'za tamagrira tamaza hugahaze?

3 Hanki menina keho, Jerusalemi kumapine Juda mopafima
nemaniza vahe'mo'zama mika'zama eneriza kane, zamaza
hu'zama eneriza kana, Ra Anumzana Hankavenentake
Anumzamo'a rehiza nehuno, bretine tinema eneriza kanena
rehiza hugahie. **2** Hanki harafa vahe'tamine, sondia vahetamine,
kema refko hu' vahetamine, kasnampa vahetamine, amene
vahetamine, rankumapi ranra vahetamine, **3** 50'a sondia vahete
kva vahe'tamine, zamagine vahetamine, kanisolo vahetamine,
maka'zama tro'ma hu antahintahi eri'naza vahetamine, henka
fore'ma hania zanku'ma havi kasnampa ke'ma nehaza vahera
Ra Anumzamo'a maka zamazeri atregahie. **4** Hanki Ra
Anumzamo'a huno, Nagra nehazaverami zamazeri otisuge'za
Judane Jerusalemi kumatrentera kva vahe'zamia nemanisage'za,
ne'onse mofavre naga'mo'za kegava huzmantegahaze. **5**
Hanki vahe'mo'za zamagra zamagra ozeri haviza azeri
haviza nehanageno, mago ne'mo'a mago nera ha'renente'na,
tava'ozmire'ma nemaniza vahe'mo'za hara orente arente

hugahaze. Ana nehanage'za kasefa vahe'mo'za ranra vahe
kea antahi'za amagera nontesage'za, zamagi omne vahe'mo'za
zamajima me'nea vahe'mofo kea antahi ozamigahaze. **6** Hanki
ana knafina mago ne'mo'a agra'a nef a nagapi vuno amanage
huno nefuna ome asamigahie, Kagra nakre kuka'a ante'nanku
kva vahetia mani'enka, amama mani havizama hu'nona
knafina, kagra kegava hurantegahane. **7** Hianagi ana ne'mo'a
kenona'a amanage huno hugahie, Nagra knarer a osu'noankina
tamaza osugahue. Ana hu'negu nagrikura vahete kva manisanie
hutma nazeri oraotih! **8** Hagi Jerusalemi kumamoka tanafa
nehanankeno, Juda mopafima me'nea kuma'motanena traka
hugahaze. Na'ankure Ra Anumzamofona huhaviza henenteta
amagera onte'naze. Ana'ma ha'azamo Ra Anumzamofo hihamu
hankave'a eri amnezankna hu'na'e. **9** Hanki tanavugosamo'ma
hufore'ma hiana, Sodomu kumate vahe'mo'zama hu'nazankna
kumi hu'naze. Ana hu'negu mago'a zana eri frara okiho.
Na'ankure hazenke zana tamagra'a eri tamavate atre'nazanki
kva hiho. **10** Hanki fatgo avu'avazama nehaza vahera so'e
hu'za manigahazanki zamasamiho. Na'ankure eri'zama eri'naza
eri'zamofo mizama'a erigahaze. **11** Hianagi kefo zamavu
zamava'ma nehaza vahekura, ra hazenkefi manigahazankita
tasunku huzmantone. Na'ankure zamagrama hu'naza havi
zamavu zamavamofo mizama'a zamagra'a erigahaze. **12**
Hanki tamagra Ra Anumzamofo vahe mani'nazanagi, kasefa
vahe'mo'za knazana tamamiza tamazeri havizana nehanageno,
a'nemo'za tamagrira kegava huramante'naze. Ana nehanage'za
kva vahe'mo'za vahenimota tamavre'za kana atre'za havi kampi
nevaze. **13** Hanki Ra Anumzamo'a maka kokankoka vahera
keaga huzmante'naku keaga refko hu trate oti'ne. **14** Ana zanke

huno ugota ranra vahetamine, Agri vahetema kvama hu'naza
vahe'enena keaga eme huzmantegahie. Ana vahera e'i tamagra
mani'nazankita, Ra Anumzamofo waini hoza eri haviza hu'naze.
Ana nehutma zamunte omne vahe'mokizmi fenoza musufa erita,
tamagra'a nompi ante avite'haze. **15** Hanki hankavenentake Ra
Anumzamo'a amanage huno hu'ne, Tamagra nahigeta Nagri
vahera knazana zamita zamazeri havizana nehuta, zamunte
omne vahera zamazeri haviza nehaze? **16** Hanki Ra Anumzamo'a
amanage huno hu'ne, Saioni kumate mofanemo'za zamavufaga
ata nere'za, zamavufaga ra huza vano nehu'za, zamagazea
eri amne hu'za zamavu masavea hu'za vano nehaze. Ana
nehu'za zamasenia antesga hu'za vano nehu'za, zamanankena
eri fatgo hu'za vano nehu'za, zamagia avozare'ma kama vanoma
nehazageno'a, zamagiafima hu'naza avasese zamo'a ankro
ankro nehie. **17** E'ina hu'negu Saioni kumate a'hane nagatera, Ra
Anumzamo'a namu atresanigeno zamasenifina avitegahie. Ana
hina zamasenirera magore huno zamazokara omnetfa hugahie.
18 Hagi ana knafina Jerusalemi a'nemo'zama knare'nare avasese
zama antaninaza zantamima Ra Anumzamo'ma eri atresiana,
zamasenire'ma anamaki'naza tvaravegi, zamimizare'ma hu'naza
maremarenki, **19** zamagesare'ma renentaza rinigi, zamazampima
nehaza asanki, zamavugosare'ma refinetaza tvaravegi, **20**
zamagia avu'are'ma ananekiza zantamine, zamazoka'ma eri
so'e nehaza zantamine, zamare'nafima ananekizanofiki,
zamazonafima ante kareneramiza tvaravegi, zamavufagare'ma
nefraza masavene, mananentake zantamima nentaza tafene,
safezama erineri'za ku'ene, **21** zamazampima nentaniza rinine,
zamagonare'ma renentaza rinine, **22** knare nare kukanaramine,
kankri tamine, nakre ku'zamine, zamavate kuzmine, **23**

kapozamine, zamavate'ma nehaza efeke za'za kukenazamine, zamasenire'ma ananekiza efeke tavravene, zamafunte'ma ruganegiza tavravenena, ana maka Ra Anumzamo'a eri atregahie. **24** Hagi Jerusalemi a'nemo'za ko'ma nehazaza hu'za zamavufagarera mnanentake masavena ofresageno, zamavufagaretira havi mna nevanigeno, ko'ma knare renofi'ma nehaza zana atre'za, amne nofiteti renofira rentegahaze. Ko'ma masave fre'za zamazoka'ma eri neharariza zana osnageno, zamazokamo'a pupusegahie. Hagi ko'ma knare'nare kukenama nentaniza zana nosu'za, zamasunku kukena antanigahaze. Ana nehanigeno knare'nare zamavugosa tevereti kresageno zamafuhe zamafahe hugahie. **25** Hanki Jerusalemi kumamoka antahio, vene'ne nagaka'a bainati kazinteti zamahe hana nehanage'za, hankave sondia vaheka'a hapinti zamahe hana hugahaze. **26** Ana nehanigeno Jerusalemi kumamofo ran kafaramimo'za anazama negesu'za, tusi zamasunku hu'za zavirategahaze. Ana nehanigeno mika zama'ama eri hana hute'za atrazageno mopafima mania akana Jerusalemi ran kumamo'a hugahie.

4 Hanki ana zama fore'ma hania kna zupa, 7ni'a a'nanemo'za mago nera avazu hute'za amanage hu'za asamigahaze, Ne'zana tagra'a erifore huta neneta, kukenatia tagra'a haketa antanigahune. Ana hugahunanki amne ara tavrentegeno tagazema nehia zamo'a amne hino. **2** Hagi mago kna ne-eankino ana knama efore'ma hanigeno'a, Ra Anumzamo'a hanigeno zafamofo azankunamo'a kasefa agata hageno knare zantfa nehina, ana mopafintira musenkase hu'za knare'nare ne'za hamaregahaze. Hagi ofri'ma mani'nesamo'za anazama negesu'za, tusi zamavufaga atanere'za ra zamagi erigahaze. **3**

Hagi ofri'ma Jerusalemi kumapima Saionima mani'naza vahera, kasefa hu'za manigahaze huno Ra Anumzamo'a zamagia ko krente'ne. Ana hu'neanki'za ana vahekura ruotage hu'haze hu'za vahe'mo'za hugahaze. 4 Hagi Ra Anumzamo'a kema refko hu avamu'areti'ene amuho nentake asimu'areti'ene huno Jerusalemi kumapima mani'naza mofanemokizmi kefo avu'avazamia sese hunezmantero, Jerusalemi kumapima koramoke'ma hu'nea zana sese huno erigrugahie. 5 Hanki ana nehuno Ra Anumzamo'a ferura hampo huntenigeno, Saioni agonare'ene ana agonare'ma eme atru hu'za mono'ma hanaza vahetera ene eme refitegahie. Ana nehuno kenagera Ra Anumzamo'a hunte'nigeno tevene toki'mo'ene remsa nehanigeno, ana agonamofona mago seli nomo rufiteankna huno maka kaziga hanaventake masamo remsa huno rufite vagaregahie. 6 Ana hina ana hampomo'a mago seli nonkna huno me'neno, Jerusalemi kuma'mofona, zagegnafina refite'nenteno ko'mopa ko'ma rania knafina refitentegahie.

5 Hanki nagrama nave'masinentoa ne'mofo waini hoza'agu mago zagamera hugahue. Anama navesinentomo'a agona mopafina masavenke huno tretre hu'nefi mago waini hoza ante'ne. 2 Ana ne'mo'a mopa rehankorino haveramina zogi atretno, anampina knare'nare waini rampa'a hankari'ne. Hagi anama huteno'a ana hozafina, mani'neza hozama kegavama hanaza nona kisga huno zare kinte'ne. Ana huteno hozamofo amu'nompina waini rgama regatati'ma hu keria have taga huno tro hunte'ne. Hagi anama huteno mani'neno, knare krepi raga rentenefi huno'ma keana, akake krepi raga rente'ne. 3 Ana'ma higeno'a hoza nafa'amo'a amanage hu'ne, Waini hozani'mo havizana hu'nefi, nagra havizana hu'nofi, Jerusalemi kumapine, Juda

mopafima nemaniza vahe'mota refko huta keho. 4 Nagrama waini hoza'nimofoma huntega zana hago hunte'noanki, na'a nagra mago'zana huonte'noe? Knare krepi raga rente'nefi hu'nama ome koana, na'a hu'negenopi agra akake krepi raga rente'ne.

5 Hanki menina ana waini hoza'nimofona na'a huntegahufi tamasamigahue. Ana hozamofo kegina kana eri netre'na, hozamofo have kegina tapage hutresnugen, afizaga gafamo'za ufre'za ana wainia zamagiareti rentrantru ahe'za eri havizantfa hugahaze. 6 Ana nehanage'na ana hoza mopa eri haviza ha'nena, ka'makoka fore hugahie. Ana hanugen, mago vahe'mo'e huno mopa rehakorige, krepi nofi'mofo azanku namanku'a rosevara nosanigeno, havi trazamo'ene ave've tra'zamo'a ana hozafina hageno marerigahie. Ana nehina hampomofona huntenugeno, ana hozafina kora ruontegahie. 7 Hanki Israeli vahe'ene Juda vahe'mo'zanena Hankavenentake Ra Anumzamofo waini hozagna hu'za mani'naze. Ana hu'nazageno fatgo huno refko hu avu'avaza hanafi huno zamagripina ke'neanagi, vahe'ma aheno korama eri tagi zamo avinetegen, fatgo avu'avaza hanafi huno'ma ke'neanagi, vahe'ma zamahe friza krafagege antahi'ne.

8 Hanki hazenkefi manigahazanki antahiho, ko'ma nompima mani'naza vahe'ma zamahenati netreta nozamima mizaseta enerita, ko'ma hozama ante'naza mopama mizaseta zamahenati netraza vahe'mota maka vahe'mo'za tamatre'za fresageta ana mopafina tamagrake manigahaze. 9 Hianagi nagra nentahugen hankavenentake Ra Anumzamo'a amanage huno huvempa kea hu'ne. Tamagerfa huno ama ana knare'nare ranra nontamimo'a havizantfa hina, mago vahe'mo'e huno ana nontamimpina omanitfa hugahie. 10 Hagi rama'a waini hoza antesazanagi, osi'a raga rentena tagita regatatio hugahaze. Ana nehina 10ni'a kupinti

fraguvazita witi avimzana hankregahaze. Hianagi vasagesazana magoke kuke eririgahaze. **11** Hagi nanterampima otita aka tima nenaza vahe'motane, kinagama aka tima nenazageno'ma vuno kenege'ma nesegeta neginajima nehaza vahe'mota hazenke erigahaze. **12** Hagi ana vahe'mo'za wainine aka tine ne'zanema kre'za nene'za musenkasema hazafina, lailiema nehaza zavenane hapu zavenane nasenasepane konkene nere'za musena nehaze. Hianagi zamagra Ra Anumzamofo avu'ava zanku'ene, azampinti'ma tro'ma hu'nea zanena nege'za agrira antahi nomize. **13** E'ina hu'negu Ra Anumzamo'a huno, Tamagerfa hu'za nagri vahe'mo'za nagrira antahi amara osazagu, ha' vahe'zamimo'za eme zamavare'za ru moparega ome kina huzmantegahaze. Hagi zamajima me'nea vahe'zamimo'za ne'zanku nefrisage'za, vea kevumo'za tinkura havizantfa hugahaze. **14** Hagi Jerusalemi kumapima mani'naza kva vahe'ene, vea kevumota aka tima neneta musenkasema nehuta, tamajima erisgama nehaza vahe'ma tamasgahu nakrinakura, fri vahe kerimo'a razampi agira eri aka nehie. (**Sheol h7585**) **15** Ana nehuno mika vahera zamazeri fenkami tregahie. Hagi zamajima me'nea vahera zamazeri fenkami netreno, zamavufaga rama nehaza vahera zamazeri fenkami atregahie. **16** Hianagi fatgoma huno refko'ma hu avu'ava zama'agu hu'za hankavenentake Ra Anumzamofona agj'a erisga nehanageno, ruotage'ma hu'nea Ra Anumzamo'a ruotage hu'noe huno fatgo avu'ava zana zamaveri hugahie. **17** Hagi ana knafina sipisipi afumoza knare trazana hake'za nene'nageno, afovage sipisipine agaho meme afumo'zanena havizama hu'nea kumapina vano nehu'za trazana negahaze. **18** Hagi havigema hu avu'ava zanu'ma kumima renteta avazuma huta nevaza vahe'mota, tamagra ra

hazenke erita havizantfa hugahaze. **19** Hagi tamagra amanage
nehaze, Israeli vahete'ma ruotage'ma hu'nea Anumzamo'ma
eri'zama eri'naku'ma nehiana ame huno erisigeta negesunkeno,
antahintahi'ama retroma hu'nea zana ame huno eri fore hanigeta
tagra'a tavufinti ke'nune hutma nehaze. **20** Hagi tamagra kefo
zanku'ma knare zane nehutma, knare zanku'ma kefo zane
nehutma, haninkuma masae nehutma, masagu'ma hanine
nehutma, aka zankuma haga zane nehutma, haga zanku'ma aka
zanema nehaza vahera hazenke erigahaze. **21** Hagi tamagra
hutma, knare antahintahi eri'neta mago'a vahe'ma zamagate
re'nonema hutama nehaza vahera hazenke erigahaze. **22**
Hagi aka tima ne'zante'ene, aka tima eri haviamma hu' zante'ma
ugagotama nehaza vahera, tamagra hazenke erigahaze. **23**
Hagi nanekema refko'ma hu' zupa, hazenke'ma hu'naza
vahe'mo'za masave hu'za zagoa tamizageta, zamatrazage'za
fru hu'za nevazageta, hazenkezmima omne'nea vahe'mofo kea
refko hutma keso'e osuta kna nezamize. **24** E'ina hu'negu,
hagagema hu'nea trazama tevemo tefanane hiaza huno ana
maka te fanana hanige'za, zafamofo rafu'namo hagage higeno
ani'namo harari huneramigeno, flaua'ma renteana zaho'mo
eripopo hutreaza hugahaze. Na'ankure Israeli vahete'ma
ruotage'ma huno hankavenentake'ma hu'nea Ra Anumzamofo
kasegea amagera onte'nazagu anara hugahaze. **25** E'ina
hu'negu Ra Anumzamo'a agri'a vahera rimpa ahenezmanteno
azana rusuteno zamazeri haviza nehie. Hagi azana rusuteno
agonaramina eri tore'vare nehuno, vahera zamahe frigeno, fri
vaher zamavufagamo'a kumapima me'nea ne'onse kantamimpina
amne zankna huno avite'ne. Ra Anumzamo'a agra ana
hu'neanagi rimpa ahe'zamo'a frua osu'negeno azana erisga

huteno mani'ne. **26** Hagi Ra Anumzamo'a mago avameza erisga hanige'za kokankoka vahe'mo'za eme atru nehanageno, mopama ome atretegama mani'naza vahera hoge hanige'za tragiza egahaze. **27** Hanki ana vahera hankavenentake vaheki'za mago zamimo'e huno avesragura nosanigeno, mago'mo'a trakara huno nomasenigeno, mago zamimo'e hunora avutokora huno nomasenigeno, magomofo amu'nofimo'a krekorona nosanigeno ina, zamagia nomofo nofi'mo'a magore huno akamprura osugahie. **28** Ana vahe'mokizmi kevemofo agona'amo'a roro hu'nege'za, ati zami'a erigi krarape'za keve ahe'are tro hu'za mani'naze. Hagi hosi afuzamimofo agiamo'a hankavenentake havegna higeno, karisimofo wilimo'a kagikagi zahomo'ma ame'ma huno kagiankna huno kagigagi hu'ne. **29** Hagi laionimo krafama huno'ma eaza hu'za neageno, mago kasefa laionimo mago zaga azampi azeriteno, avazu huno fregeno mago vahe'mo'ma agu'ma ovaziankna huza krafa hu'za egahaze. **30** Hanki anama ha'ma eri'za esaza zupa, ana vahe'mo'zama krafama hu'za esaza krafa kemo'a hagerimo havere eme rupokraseteno, sasa huno eramiazza nehanige'za egahaze. Hagi vahe'mo'ma kegamateno ama mopa fima kesniana, kumamo'a havizantfa hina, hanizamo refite'nesnigeno kegahaze. Ana nehanigeno zagemofona hampomo avuga rufitesnigeno remsa osuno hanintiri hugahie.

6 Hagi kini ne' Uzia'ma fria kafufina, Ra Anumzamo'a kini tra'are onagamu manisga huno mani'nege'na, mago avana'gna zana ke'noe. Ana hu'negeno zaza kukena'amo'a ra mono nompina ruvite'nege'na ke'no'e. **2** Hagi Anumzamofona anaga kaziga, serafimie nehaza ankeromo'za oti kagiza mani'nazage'na ke'noe. Ana ankeromokizmia 6si'a zamageko'na huzmantetere

hu'nege'na zamage'noe. Hagi tare zamageko'naretira zamavugosa rufi'nete'za, tare zamageko'naretira zamagia refinete'za, tare zamageko'naretira ru tafratafra hu'za hare'za vano hu'naze. 3 Hanki ana ankeromo'za ranke hu'za Hankavenentake Ra Anumzamo'a ruotage hu'ne, ruotge hu'ne, ruotage hu'ne hu'za nehu'za, agri hihamu masa'amo'a ama mopafina avitene hu'za hu'naze. 4 Hagi ana ankeromo'zama ra zamageru'ma raza zamagasasamo higeno, ra mono nomofo kafa zafamofo tra'amo'a tore tore nehigeno, noma azeri oti'naza have ramimo'enena tore'vare nehigeno, ra mono nompina toki'mo avite'ne. 5 Hanki anama nehige'na nagra hu'na, hago hazenkefi mani'noe hu'na nentahina amanage hu'na hu'noe, Tamagerfa hu'na nagra menina haviza hugahue. Na'ankure maka zupa nagipina havi keagamo avite'nea ne' mani'ne'na, havi keagamo zamagipi avite'nea vahe amu'nompi mani'noe. E'ina hu'neanagi nagra navufinti Kini Nera Hankavenentake Ra Anumzana negoe. 6 Hagi anante mago ankeromo'a ofama hu itareti, teve nerea tankanu'za tuzareti hampageno erino nagritega hareno e'ne. 7 Hanki ana ankeromo'a ana tankanu'za nagitera eme nenteno, amanage huno hu'ne, Ko, ama tankanu'za kagite'ma antogeno kumika'a eri atreankinka agru hunka manigahane hu'ne. 8 Hanki anama hutege'na Ra Anumzamofo ageru antahugenno amanage huno hu'ne, iza huntegahue? Iza Tagri nanekea erino vugahie? Anagema hige'na amanage hu'na hu'noe, Nagra ama mani'noanki, nagri hunantege'na va'neno hu'na hu'noe. 9 Hagi anante Ra Anumzamo'a amanage huno hu'ne, kgra vunka vea nagara amanage hunka ome zamasamio, maka kna kea antahigahazanagi, antahi amara osugahaze. Maka kna tamavua kegahazanagi, ke'amara osugahaze. 10 Hagi menina ana

vahe zamagu'a eri hankavenetinka, zamagesa erinkaninerenka, zamavua eri asu huo. Hanki anama osnanke'za zamavua ke so'e nehu'za, zamagesa antahini nehu'za, zamagu'ama rukrahe'ma hu'za Nagrite'ma esnage'na zamazeri kanamaregahue. **11**
Higena Ra Anumzamoka nama'a knafi ama ana zamo'a meno vugahie hu'na antahige'noe. Anage hugeno kenona huno, Ama ana zamo'a me'nesnigeno, maka ranra kumatamimo'a haviza huvagaresnigeno, ana kumatamimpina vahera omanitfa hanageno, nontamimpina vahera omanitfa hanigeno, maka hoza zamifina magore huno ne'zana omnetfa hugahie. **12** Nagra Ra Anumzamo'na mopazamifintira zamavare atresuge'za afete moparega umanigahaze. Ana hanugenno mopazamifina vahera omanisnageno, mopazamimo'a ka'ma koka megahie. **13** Hagi ana'ma hutesnige'za 10ni'a nagapima mago naga'ma manisaza naga'mo'zanena havizantfa hugahaze. Hianagi terebinti zafane, oki zafama antagitazageno agafa'ama tevemo'ma tetegeno'ma agafa'a me'nefintima Nagrama huhampri'noa vahe'mo'za ruotage vahe'nia ete hage'za efore hugahaze.

7 Hanki Uzia negeho, Jotamu nemofo Ahasil'ma Juda vahe kinima mani'nea knafina, Siria kini ne' Resini'ene, Israeli kini ne' Remalia nemofo Pekakea, marerike Jerusalemi kumate vahera hara eme huzmante'na'e. Hianagi zanagra hara huzamagate ore'na'e. **2**
Hanki Siria kini ne'mo'ma Efraemi naga'enema eri mago'ma hia nanekema, Deviti naga'mo'zama nentahiza antri nehazageno, zahomo zafa eri toretore hiankna hu'za zamahirahiku hu'naze.
3 Hanki anante Ra Anumzamo'a amanage huno Aisaiana asami'ne, kagrane negamofo ne' Siar-Jasubu'enena atiramita vuta, tiru'ma henkanite'za Jerusalemi kumapima tima avre'za erami'naza tinkante vutetna, kukenama sese'ma nehaza kante

kini ne' Ahasina ome ke'o. 4 Hanki ome kenunka amanage hunka asamio, kagra kva hu'nenka karimpa frune nemaninka korora osuo. Siria kini ne' Resenine, Jerusalemi kini ne' Peka kazinigura antahintahi hakarea osuo. Zanagri zanarimpa ahe'zamo'a tevemo'ma tegege vazigeno kumoke'ma nehiaza huno amne zankna hugahie. 5 Na'ankure Siria vahe'mo'zane, Efraemi naga'mo'zane, Remalia mofavre naga'mozanena, amanage hu'za kagri'ma kazeri havizama hanaza nanekea anaki'naze. 6 Tagra Juda mopafi vuta kumate marerita vahera zamazeri koro nehuta, hahu zamagatereta mopazamia e'herita, Tabeli nemofona azeri otita huhamprintesnunkeno, Juda vahe kinia manigahie hu'za hu'naze. 7 Hianagi Nagra hankavenentake Ra Anumzamo'na amanage hu'na nehue, anazamo'a forera huno eamara osugahie. 8 Na'ankure Siria mopamofo ugota ran kumara Damaskasi kuma megeno, kini ne' Reseni'a Damaskasi kumapinke mani'neno kegava hu'ne. Higeno Israeli mopamofo rankumara Samaria me'ne. Hianagi 65'a kafua agateore'nesnigeno, Israeli mopamo'a havizantfa hugahie. Hanki Ahasi'ene eri'za naga'amo'za Nagri ke'ma ontahisazana, zamazeri haviza hutregahaze. 9 Hagi Efraemi nagamokizmi ugota rankumazamia Sameria me'ne. E'ina higeno Sameria kuma'ma kegavama hu'neana, Remalia nemofo kegava hu'ne. Hanki kamentintifima kagrama oti hankavema otisnanana, kagra oti hankavea otigahane. 10 Hanki mago'ene Ra Anumzamo'a Ahasinkura amanage huno asami'ne, 11 Ra Anumzana kagri Anumzamo'ma mani'nema hunka hanunka mago amuhoma hu'enienia avame zanku antahigegeno, amefenkame fri vahé kumapintiro, ame nagame monafintira avame'zana erifore hanigenka ko. (Sheol h7585) 12 Hianagi Ahasi'a kenona amanage hu'ne, nagra Ra Anumzamofona e'inahura hu'na antahinege'na,

Agri hankave'a rehe'na onkegahue. **13** Higeno Aisaia'a kenona'a amanage hu'ne, Deviti naganofimota tamagesa anteta antahiho. Nagrama fruma huramante'na manua zankura renaheta negeta, Ra Anumzamo'ma anazanke huno arimpa fru huramante vava huno vugahie hutma tamagesa nentahita, antahigesageno'ma avame'zama eri fore'ma hanigeta kesaza zankura antahi'nogaze. **14** E'ina hu'negu Ra Anumzamo'a Agra'a mago avame'zana tamaveri hugahie. Ana avamezamo'a amanahu hugahie, mago vene omsenesnia mofa'mo amu'ene huno mago ne' mofavre anteno, Imanueli'e huno agi'a antemigahie. **15** Hagi ana mofavremo'a nenama huno e'i havi zanki knare zankima huno ke'ama'ma hania knafina, bulimakaomofone, sipisipi afu'mofo amirinteti tro hu'naza ne'za sisi neneno, tumerine negahie. **16** Hagi ana mofavremo'ma e'i havi zanki knare zankima huno keama'ma osu'nesnia knafina, kagra Ahasigama koro'ma hunezanantana kini netremokizni mopamo'a havizantfa huno mago'zana omanetfa hugahie. **17** Hianagi kagrite'ene, veaka'are'ene, kagri naga nofitera, Ra Anumzamo'a mago knaza atrenigeno egahie. Hagi ana knazana, ko'ma Efraemi naga'mozama Juda naga'ma zamatre'za zamagrugu'ma mani'naza knareti'ma eno meninte'ma egeno'a, fore osu'neankna knaza fore hugahie. Anama hanigeno'a, Ra Anumzamo'a Asiria kini ne' avreno Juda mopafina egahie. **18** Hagi ana knama esanigeno'a, Ra Anumzamo'a hoge hanige'za, kosimo'za hazaza hu'za sauti kaziga tinkenaregama nemaniza Isipi sondia vahe'mo'za vazintagu hu'za ne-esage'za, tumemo'za nehazaza hu'za Asiria sondia vahe'mo'za ruherafi'za egahaze. **19** Anama hanige'za ana maka Juda mopafine, krahopine, agona mopafine, have kampine, knare trazama me'nesnia mopafine, ave'ave

trazama me'nesnia mopafine, tinkerifinena emani avitegahaze.

20 Hagi ana knafina Ra Anumzamo'a Yufretisi rantimofo kantu kazigati, eri'za vahe'a Asiria kini nera miza huntesnigeno resa kazina erino eno, tamaseni tamazoka'ene tamagi tamazoka'ene tamavufga tamazokara vazagate atregahie. **21** Hagi ana knafina ha' vahe'mo'za afu krazamia zamahe hana hugahaze. Hianagi mago mago vahe'mo'a mago anenta bulimakaone tare meme afu antetere hugahie. **22** Hanki zamagra rama'a amirima zamisaretira, sisiema nehaza ne'zama eri kragefenesaza ne'za negahaze. Hagi ana mopafima osi'a naga'ma manisamo'za sisi ne'zane tumerinena me'nesige'za negahaze. **23** Hanki ana knafina 1tauseni'a waini zafa me'nenige'za 1tauseni'a silva zago (sekels) enerisaza waini hozafinagi, ave'ave trazamo'ene trazamo'enena hageno marerino eri haviza hugahie. **24** Ana hanigeno ana hozafima vuku'ma hania vahe'mo'a ati kevene eri'neno vugahie. Na'ankure ana maka mopafina ave'ave trazamo hageno refite vagaregahie. **25** Hagi osi agona ramimpima, ko'ma hozama hankorita anteta nevazafinagi, anampina ave'ave trazamoke avite'nenigetma koro hutma ovugahaze. Ana nehutma ana hoza atre'nage'za bulimakaone memene sipisipi afutamimo'za anampina vano nehu'za trazana negahaze.

8 Hagi anante Ra Anumzamo'a amanage huno nasami'ne, Kagra ra avontafe eritenka, ana avontafepina avo zotareti amatfama hu'are ranra avompinti, Maher-Salal-Has-Bazie hunka krento. **2** Hagi ana avoma negrana nanekenema eme keteket huama'ma hana'a netre'na, pristi ne' Uriane, Jeberekia nemofo Zekaraiaikizini huznantanena emani'neke kegaha'e. **3** Hagi anankema hutege'na a' ni'amo'a kasnampa a'kina agrane umasogeno amu'ene huno ne' mofavre kasente'ne. Ana higeno Ra Anumzamo'a amanage

huno nasami'ne, Ana mofavremofona Maher-Salal-Has-Bazi'e
hunka agi'a antemio hu'ne. 4 Na'ankure ana mofavremo'a nena
huno nenfage nenrerage huno kea osu'nesnigeno, Damaskasi
kuma'ene Sameria kumapinti fenozana, Asiria kini ne'mo ha'
eme huzamagatereno ana maka erino mopa'arega vugahie.
5 Hagi mago'ene Ra Anumzamo'a amanage huno nasami'ne,
6 Siloa timo'ma akoheno fru huno'ma eneviaza hu'na Nagra
Ra Anumzamo'na ama vahera fru huzmante'na neoanagi,
zamagra anazana ke amara osu'za zamefi hunenami'za kini
ne' Resinine Remalia nemofo Israeli kini ne'enena razampi
antahi musena huznante'naze. 7 E'ina hu'negu tamagerfa
hu'na, Nagra Ra Anumzamo'na Asiria kini nera hunte'nugeno,
Yufretisi rantimo'ma tusi ti hageno ne-eno ana maka'zama
refite vagareaza huno, rama'a sondia vahe'ane eno hara eme
huzmantegahie. 8 Hagi timo hageno ne-eno vahe'ma eme azeri
anakrigeno anankempi eme atreaza huno, ana maka Juda
mopafina ha' vahe'moke'za mani avitegahie huno hu'ne. Ana
hu'neanagi [Immanuel] Ra Anumzamo'a tagrane mani'neankino,
Agra agekona rutareno mopatamia refiteno kegava hugahie. 9
Hagi ha' vahetima tva'onte'ene afete'enema mani'naza vahe'mota
tamagesa anteta antahiho, tamagra sondia vahetamia eri tru
hutma hara eme hurantegahaze. Hianagi kasamreta hara
osnage'za, tamagrira tamahe'za rehapatitregahaze. 10 Tamagra
atru hutma e'ina hugahune hutma kea anakigahaze. Hianagi
ana nanekemo'a nena'a fore osuno, amne zankna hugahie.
Na'ankure Ra Anumzamo'a tagrane mani'ne. 11 Hagi Ra
Anumzamo'a hankavenentake azanuti nagofetu nenteno koro
ke hunanteno, kagra ama vahe'mokizmi zamavu zamavara
amagera onto huno huhankavetino nehuno, amanage hu'ne. 12

Ama vahe'mo'za hu'za, mago'a vahe'mo'zama Juda vahe'ma zamazeri haviza hunaku ke ananekizema hu'zama hanaza nanekegura, tamage huta korora osiho. Ana nehuta zamagrama koro'ma nehzaza huta, koro'ma hanaza zantera tamagra korera osiho. **13** Hianagi hanavenentake Ra Anumzamo'a huno, tamagrama keta antahitama hanazana Nagrikura ruotage hu'nea Ra Anumzana mani'ne hutma nentahita, Nagrikuke korora hiho. **14** Ana hu'neanki'na Nagra fra'maki havega mani'ne'na, Israeline Juda vahetera ra kampi mago tanafa'ma hu'za masesaza havegna hu'na mani'nesnuge'za, maka vahe'mo'za tanafa hu'za masegahaze. Ana nehu'na Jerusalemi kumapima mani'naza Israeli vahetera kukone krifumo zamazeriankna hu'na kama vanoma hanafina manigahue. **15** Hagi ana hu'nesnuge'za maka vahe'mo'za ana have agofetu tanafa hu'za masesage'za zamazeriza kina rezmantegahaze. **16** Hagi nagra Aisaia'na, Ra Anumzamo'ma nanekema nasamige'nama krentoa avontafera erigite'na, ana agofetura nazanko avona antete'na namage'ma [disaipol] nentaza nagara zami'noe. **17** Hagi nagra Israeli vahe'ma amefima huzami'nea Ra Anumzamofonku avega ante'na mani'nena agrite amuhara hugahie. **18** Saioni agonafima nemania Hankavenentake Ra Anumzamo, nagranema amama mani'naza mofavreramina nami'ne. E'ina hu'neankino tagri'ma tatagetama mani'nonana, Israeli vahete'ma henkama erifore'ma hania zantamimofonte mago avame'zankna huta menina mani'none. **19** Hanki mago'a vahe'mo'za tamagrikura hu'za, sumisumi'ma nehu'za fri vahe hankro'enema keagama nehaza vahete vuta antahintahi ome eriho hu'zama nehzana, inankna huno fri'nenia vahe'mo'a kasefa'ma huno mani'nea vahera antahintahia amigahie? Na'a hunege'za vahe'mo'za

Anumzamofontega nunamuna hu'za antahia nonkaze? 20
Vahe'mo'zama keagama hanafima, Anumzamofo kasegene
trakemo'ma hu'enenia kante'ma ante'zama keagama osnazana,
e'i ana vahe'mo'za hanizampi mani'naze. 21 Tusi zamata
negrina zamagakura nehanage'za, kokankoka ama mopafina
vano vano hugahaze. Zamagazamo'ma tusizama hanige'za, eri
zamarimpah'e'za, kini zamimofone Anumza zamimofona huhaviza
hugahaze. Ana nehu'za monafi zamavua ke nagamutegahaze.
22 Ana nehu'za mopafima kesnazana hazenke zamo'ene,
atazamoke meni'geno korozamo zamazeri antrako hugahie.
Ana hanigeno ana knazamo zamaretufeno hanizampi ome
zamatregahie.

9 Hianagi knazampine hanizampima nemaniza vahe'mo'za
mago'enena zamatagura osugahaze. Hagi Naftaline Zebuluni
mopafima nemaniza vahera, korapara Ra Anumzamo'a
zamazeri fenkami atrege'za zamagazegu hu'naze. Hianagi
henkama esania knafina, Galili kumara meg'i'a vahe ku'ma
me'neanagi, Ra Anumzamo'a ragi amigahie. Ana hanige'za
Jodani timofo kantu kazigama nemaniza vahe'ene, Mediterenia
ra hagerimofo ankenaregama evu'nea rankamofo tavaonte'ma
nemaniza vahe'mokizminena zamagesga hugahaze. Ana
hanage'za knazama eneriza zamo'a vagaresige'za fru hu'za
manigahaze. 2 Hagi hanimpima nemaniza vahe'mo'za tusi'a
masa kegahaze. Tusi'a hani zamo'ma refitege'zama nemaniza
mopafi vahe'mokizmia, masazamo remsa huzmantegahie. 3
Ra Anumzamoka Israeli vahera zamazeri rama'a nehunka,
rama'a museza antevite zamantegahane. Ana neharke'za
hozafinti ne'zama nehamare'za muse nehzankna hu'za musena
nehu'za, hapinti'ma rohure'za fenzama e'neriza musema

nehazankna muse kagri kavuga hugahaze. 4 Na'ankure bulimakao afumofo anankempi kare'namare zafama nentaza zafagna hu'za kinama huzmante'neza knama nezami'za vahera, Midieni vahe'ma hu'nanaza hunka knama zamiza zamazeri haviza nehaza vahera zamahe pasaru nehunka, knazama nezamiza zama eri atrenka zamagu'ma vazi'nana zanku anara hugahaze. 5 Ana nehunka maka hankave sondia vahe'mo'zama hapima antani'nezama ha'ma hu'naza zamaga none, korampima ante'za regazari'naza kukenanena tevefi hanavazinka kresnankeno tevemo te fanene hugahie. 6 Na'ankure tagriku huno mago mofavrea tamigahiankino, ana mofavrema efore'ma hanigeno'a, agri afunte kamania me'enkeno kegava hugahie. Ana hu'neankino agima ahesnazana, Knare zantfa huno Antahintahi tamisia nere nehu'za, Hankavenentake Anumzane nehu'za, Manivava Nafatia nehu'za, Tarimpa fruzamofo Kinie hu'za hugahaze. 7 Hagi Agri hankavemo'a vagaore mevava hanigeno, ha'ma hu'zana omanetfa hugahie. Ana nehuno kini ne' Deviti no erino kinia mani'neno, Deviti'ma kegava hu'nea kumatamina kegava hugahie. Hagi ana knareti'ma agafama huteno'ma vuvavama hanigeno'a, fatgo avu'ava zanteti'ene knare'ma huno refko'ma hu avu'ava zanteti, agra kamania hugahie. Hagi Hankavenentake Ra Anumzamo'a vahe'amo'zama knare hu'za manisnazegu, hankave antahintahi hu'neankino, ama ana zantamina eri fore huvagaregahie. 8 Hagi Jekopumpinti'ma fore'ma hu'naza vahera Israeli vahete'ma knazama atre'nigeno esania zanku Ra Anumzamo'a koro ke huzmante'ne. 9 Hagi ana maka Efraemi naga'ene Sameria rankumate'enema nemaniza vahe'mo'za, ana zamofona ko antahi'naze. Hianagi zamagrira zamarimpamo'a hankavenetige'za zamavufaga erisga nehu'za

amanage hu'naze. **10** Brikireti'ma kinona nontamina ru fragu vazitre'nazanagi, tagra havea kasefa taga huta nontia negita, sikamo fiki zafaramima antagi'naza nontera, eteta sida zafa hankregahune. **11** Hu'neanagi Israeli vahe'mokizmi ha' vahe Resinima ha'ma renentaza vahe Ra Anumzamo'a azeri otisigeno hara Israeli vahera eme huzmantegahie. **12** Hanki Anumzamo'a zage hanati kazigatira Siria (Aramia) vahe hunezmaneno, zage fre kazigatira Filistia vahe huzmantesnige'za e'za Israeli vahera eme hara huzmagateregahaze. Ama anazana forera hugahianagi Anumzamofo rimpa ahe'zamo'a Israeli vahetera me'nesnigeno, azana rusuteno zamazeri haviza huvava huno vugahie. **13** Hianagi monafi hankavenentake sondia vahe'mofo Ra Anumzamo'ma zamazeri havizama hu'nea zankura, zamagesa nentahiza agritera ete'za zamagu'a rukrahera hu'za ome'naze. **14** E'ina hu'negu magoke knafinke'za Ra Anumzamo'a Israeli vahera zamasenine zamarisonanena runekafrino, magoke knafinke'za tofe ani'na rukafrino nompintima nehagea varozana rukafri atregahie. **15** Hanki zamagima me'nea vahe'ene, ranra vahe'mo'za e'i ana zamasenia manizageno, kruna kasnampa kema nehaza vahe'mo'za e'i ana zamarisona mani'naze. **16** Hagi ugota huzmante'neza kegavama huzmante'naza vahe'mo'za zamavare'za havi kampi vazage'za, anama zamavariri'za nevaza vahe'mo'za kana atre'za hazagre'naze. **17** E'ina hu'neankino Ra Anumzamo'a nehazave raminkura musena hunozmanteno, megusa mofavre naga'ene kento a'nenena asuragi ozmantegahie. Na'ankure maka vahe'mo'za neginagi nanekege nehu'za, Anumzamofo avu'avara amagera nonte'za havi zamavu'zamava hu'naze. E'ina rimpa ahe'zamo'a vagaoresnigeno, azana erisga huno rusuteteno manigahie. **18** Tamagerfa huno veamokizmi

kefo zamavu zamava'mo'a mago afe teve nereno, zafa tanopane avo'no traza neregeno toki'mo vemagu vemagu huno ame'nagame mareneriaza nehie. **19** Hankavenentake Ra Anumzamofona tusi arimpa aheankino, ama mopafi maka vahetamina zamazeri haviza hanige'za, tevemofo ne'za segahaze. Anama hanigeno'a mago'mo'e huno mago'mofona aza osugahie. **20** Ana nehu'za tamaga kazigane hoga kazigama nemanisaza vahera zamahe'za negahazanagi zamura osanige'za zamagra'a mofavre zamahe'za negahaze. **21** Manase naga'mo'za Efraemi nagara zamahe'za nesageno, Efraemi naga'mo'za Manase nagara zamahe'za negahaze. Anama huteke eri mago'ma hana'ana, Juda nagamokizmia hahu zamantegaha'e. Anumzamo'a ama anazana atrenigeno zamagratera egahianagi, Agri rimpia ahe'zamo'a vaga oresanigeno, azana erisga huno rusuteteno manigahie.

10 Tamagra izagato keagafima vahe'ma zamazeri savri nehuta havigema huta kasegema tro'ma hu vavama nehaza vahe'mota ko hazenkefi mani'naze. **2** Anama hazazamo higeta zamunte omne vahe'ene, feno zanku'ma atupa'ma nehaza vahera fatgo tamavu'tamavara huozmanteta fenozmia zamazeri savri huta e'nerita, kento a'nanemofo zana frakineta rerakaureta e'herita, megusa mofavre'ramimofo zantamina musufa e'nerize. **3** Hanki tamagrama hu'naza avu'avazante'ma Anumzamo'ma knazama tamisia zupa tamagra na'a hugahaze? Tamagri'ma zamazeri havizama hu knazama afeteti'ma ne-esnigetma, tamagra izante tamaza hinogura nevuta, feno zantamina izante atresnageno kegava hugahie? **4** Hagi mago'zana omnetfa hanigeta kinama huzmante'nesaza vahe amu'nompi harononte huta manige, fri vahe amu'nompi frita manige hugahaze. E'na

hu'zana hugahazanagi Agri rimp ahe'zamo'a me'nenigeno
azana erisga huno rusuteteno manigahie. **5** Ra Anumzamo'a
amanage huno hu'ne, Asiria vahe'ma Nagri kumpa knonknama
hu'nazage'na tamagripima huvazina narimpa ahe'zama eri
amama nehua vahera hazenkefi mani'naze. **6** Asiria vahe
huntesnigeno Anumzamofoma amage'ma nonte'za agri'ma
azeri arimpama nehaza vahera hara eme hunezmanteno, feno
zazamia zamaheno nehanareno ana vahera kampi hapakna
huno agianu zamare hapatigahie. **7** Hianagi Asiria kini ne'mo'a
Anumzamo hunantegena ama eri'zana e'nerue huno ontahigahie.
Agra agesama antahiana maka vahera hara huzmante'na
zamahe fanane hanue huno anara hu'ne. **8** Hagi Asiria kini
ne'mo'a huno, sondia vahete'ma ugagotama hu'naza vahenimoza
kinia manigahaze hu'ne. **9** Hagi Kalno kuma'ma hu'noaza hu'na
Kakemisi kumara eri haviza nehu'na, Hamati kuma'ma hu'noaza
hu'na, Arpatia kumara erihaviza nehu'na, Sameria kuma'ma
hu'noaza hu'na, Damaskasi kumara eri haviza hu'noe. **10**
Hanki Jerusalemine Sameria kumate'ma havi anumzantamimofo
amema'ama me'neana agatereno rama'a havi anumzantamimofo
amema'a me'nea kumatamina eri haviza hu'noe. **11** Hanki
Sameria kuma'ene anampima me'nea havi anumzantamimofo
amema'araminenra eri havizama hu'noaza hu'na, Jerusalemi
kuma'ene anampima me'nea havi anumzantamofo amema'a
eri haviza hugahue. **12** Hagi Nagra Ra Anumzamo'nama ana
maka'zama huoma hu'nama hunte'noa zama Saioni agonare'ene
Jerusalemi kumate'ma huvagama retesnige'na, Nagra agrira
azeri haviza hugahue. Na'ankure agra avufga erisga nehuno,
agrama agesama antahiana knare hu'noe huno antahi'ne. **13**
Ana nehuno agra amange hu'ne, Nagra hanavereti'ene knare

antahizanteti ama ana maka zana huvagare'noe. Na'ankure nagra ama' antahi'zanireti, mago'a kumatmimofo mopama umetre emetrema hu'neama'a, eri netre'na hara huzmante'na fenozazmia hanare'noe. Nagra hankavenentake neki'na, kini zamia ha' huzamagatere'noe huno antahi'ne. **14** Hagi namamofo amu'aramima anom'aafintima azanuma erinaku'ma nehiaza hu'na kokankoka kumatamimpintira fenozmia zogi tru hu'noe. Anama nehugen'o namamofo amu'ma e'nerigeno krara krara huno avuma e'neriaza hunora mago'mo'e huno kea osu'ne. **15** Hagi sasumemo'o somo'a azampima erineno eri'zama eneria nemofo hanavea agatere'noe huno hugahifi? Hagi kumpa knomo'a, agra'a avesitera vahera ahegahieo? Azompamo'a agra'a avesitera kana vugahifi? **16** E'ina hu'negu Monafi sondia vahe'mofo Hankavenentake Ra Anumzamo'a Asiria sondia vhetera mago kefo kri atresigeno eno eme zamazeri haviza hugahie. Ana nehuno ana maka knarenare feno zazamia teve taginte'nigeno hagna hagna huno tefanane hugahie. **17** Hagi ruotage'ma hu'nea Ra Anumzamo'a, Israeli vhetera mago tavi mani'ne. Hianagi ave'ave trazankna hu'neza Israeli vahe'ma knazama nezamiza Asiria vahera, mago teve anefa kna huno magoke zupage ana havi trazana tefanane hugahie. **18** Hagi Ra Anumzamo'a zafa tano'pane tretrema hu'nea mopazmia eri haviza hugahie. Ana hanigeno mago ne'mofoma mago krimo'ma azeri haviza higeno, avufgamo hariri hiaza huno mopazmimo'a haviza hugahie. **19** Ana hanigeno Asiria vahe'mokizmi zafa tanopamo'a, osi'a akavoza zafa me'enkeno, amne osi mofavremo ana zafaramina hamprigahie. **20** Hanki ana knafina Jekopu agehemo'za Israeli vahepinti'ma ofri'ma osi'ama mani'naza naga'mo'za, zamahe hana'ma hu'naza vahekura mago'enena zamaza

hu'zankura antahi ozamigahaze. Hianagi Israeli vahe'mokizmi ruotge'ma hu'nea Ra Anumzamofonteke zamazama hanigura antahimigahaze. **21** Hanki osi'a Jekopu naga'ma ofri'za mani'namo'za, Hankavenentake Ra Anumzamofontega ete'za egahaze. **22** Hagi Israeli vahe'mota rama'a huta hagerinkenafi kahepankna hu'nazanagi, osi'a naga'ma ofri'za mani'zamo'za ete'za egahaze. Hagi zamagrama havi zamavu'zamavama hanageno e'inahu'za fore'ma hugahiema hu'nea kante anteno, Ra Anumzamo'a zamazeri haviza hugahie. **23** Hagi Monafi sondia vahe'mofo Hankavenentake Ra Anumzamo'a huvempa huno, mika ama mopafima mani'naza vahera knaza zami'na zamazeri haviza hugahue huno hu'ne. **24** E'ina hu'negu Monafi sondia vahe'mofo Hankavenentake Ra Anumzamo'a amanage hu'ne, Jerusalemi kumapima nemaniza vahe'ni'amota, Isipima hu'nazaza hu'za, Asiria vahe'mo'zama hegi kanonteti'ma erisgama hu'za sefu'ma tamisnageta korora osiho. **25** Hianagi kofta'a knafi tamagri'ma narimpama aheneramantoa zamo'a vagaregahie. Ana hanige'na ana narimpa ahe'zana erimare'na Asiria vahete atre'na zamazeri haviza hugahue. **26** Ana nehu'na Orebi have tvaonte'ma Midieni vahe'ma sefu'ma zami'noaza hu'na, Asiria vahera hegi kanonteti sefu zamigahue. Hagi hagerimofo agofetu'ma hankaveni'ama eri amama hu azomparetimma huge'za Isipi vahe'ma tima nakri'nazaza hu'na Asiria vahera zamazeri huviza hugahue. **27** Hagi tamafuntetira knazana eri netrena, karenamare zafa tamanankempintira eritrenugetma knare hutma manigahaze. **28** Hagi tagri ha' vahe'mokizmi sondia vahe'mo'za Migroniti efre'za Aiti kumate ehanatite'za, ana maka kutuzmia Mikmasi emeri atru hu'naze. **29** Hagi anama hute'za agonamofo kitagifafinti kreramiza kantu

kaziga uhanatite'za, mareri'za ana kenagera Geba kumate umase'naze. Anama hazageno'a Rama kumate vahera tusi zamahirahite'ne. Ana nehazage'za Soli kumapima Gibiama nemaniza vahe'mo'zanena koro fre'naze. **30** Hagi tamagra Galimi kumate vahe'mota rankrafage hiho, Laisa kumate vahe'mota tamagesa anteta antahi so'e hiho, Anatoti vahe'mota tusi tamasu zampi mani'naze. **31** Matmena kumate vahe'mo'zane, Gebimi kumate vahe'mo'za kumara atre'za koro fre'za fra'maki kumaku hakre'za vu'naze. **32** Hagi tagri'ma ha'ma hurantesnaza sondia vahe'mo'za menina Nobu kumatera seli nonkumara eme antegahaze. Ana nehu'za kegamate'za Saioni agona nege'za, Jerusalemi kumara ha'hunteku trotra hu'none hu'za zamazana erisga hu'za erinakigahaze. **33** Hianagi keho, Monafi sondia vahe'mofo Hankavenentake Ra Anumzamo'a, ra zamagima eri'za hakavemati'naza Siria vahera zafama antagi atreankna huno zamazeri fenkami atregahie. Za'za huno ra zafagna hu'neanagi, zafama antagi atreno azanku namanku'ma rukafari atreankna hugahie. **34** Ana maka zafaramina saumeretima antagi atrazankna huno Hankavenentake Anumzamo'a Lebanoni vahera zamahe vagaregahie.

11 Hanki Jesi naga'mo'za mago zafa agafagna hu'nazankino, henka mago kasefa agata ana zafamofo agafafintira hageno azanku'na omereno raga rentegahie. **2** Ana'ma hanigeno'a Ra Anumzamofo Avamu'mo'a ana ne'pi eman'i'nen, knare antahi'zane ama' antahi'zane ami'nigeno, fatgo huno hihamu'ane refko nehuno, Ra Anumzamofona antahino keno nehuno, koro huntenu agoraga'a manigahie. **3** Hagi agra Ra Anumzamofoma koro huntenu agorga'a manizanku tusi musena hugahie. Hagi agrama nanekema refko'ma haniana, agra avufinti'ma ke'nesnia

zante'ene, vahe'mo'zama asami'nesnaza kema antahisia
nankegura huno refkoa osugahie. 4 Hianagi zamunte omne
vahera fatgo avu'ava huno refkoa hunezmanteno, vahe'mo'zama
zamazeri havizama nehaza vahera magoke avamenteke anteno
refko huzmantegahie. Hagi agra keagareti vahera zamazeri
haviza nehuno, agipinti zahonu kefo avu'ava'ma nehaza vahera
zamahe frigahie. 5 Ana kini ne'mofo fatgo avu'avazamo'a,
amu'nofi reankna nehanigeno, ke'are'ma oti'neno anankema
amage'ma ante avu'avazamo'a, efeke kukena azo'naregati ante
kreramigeno asoparega evuramiaza hu'ne. 6 Afi kra'mo'a sipisipi
afu' anenta'ene magopi mani'nakeno, Lepatimo'a anenta meme
afutamine magopi maseno manisnigeno, anenta bulimakaone
kasefa laionimokea magoka vano nehuke ne'zana nenesakeno,
osi mofavremo zamavareno vano hugahie. 7 Hagi bulimakao
afu'ene beamokea magopi vano nehuke, trazana nenesakeno
anenta zanimo'za magopi mase'za manigahaze. Hagi laionimo'a
bulimakao afu'mo'za tra'zama nenazaza huno negahie. 8 Hagi
amima nenesania mofavremo'a, kobra osifavemofo kerigantera
amne zokagora neresnigeno, ha' osifavemo'ma noma kino
mase'nesifina osi mofavremo'a amne azanura avako hugahie. 9
Hagi Ra Anumzamo'na ruotage'ma hu'nea agonanirera, mago
zamo'e huno eme eri havizana osanigeno, ana agonarera
mago hazenkemo'enena ometfa hugahie. Ana hanigeno Ra
Anumzamofoma keno antahinoma hu antahizamo'a, maka
mopafima hagerimo ru viteaza huno avitegahie. 10 Hagi ana
knafina Jesi naga nofipinti'ma fore'ma hania ne'mo'a, mago
avame'zankna huno maka vahetera otigahie. Ana hu'nesnige'za
ama mopafi vahe'mo'za agrite e'za emanigasa hugahaze. Ana
hanigeno agrama mani'nia kumamo'a knare zantfa hugahie.

11 Hagi ana knama efore'ma hanigeno'a, Ra Anumzamo'a hankavenentake azana rusuteno, Agri vahe'ma osi'ama ofri'za Asiria moparegane, Isipine, Patrosine Kusi moparegane, Elamu moparegane, Sinari moparegane, Hamati moparegane, hageri amunompi me'nea moparegama umani'haza vahe'a ete mago'ane zamavareno nonkumazamire egahie. **12** Ana nehuno Agra mago avame'za erisga hanige'za ama mopafi vahe'mo'za negesnageno, Israeli vahe'ma ru moparegama kinama ome hu'naza vahera ete zamavare tru nehuno, Juda vahe'ma maka kazigama panani hu'zama ama mopafi umani emanima hu'naza vahera ete zamavare atru hugahie. **13** Ana'ma hanigeno'a, Efraemi vahe'mo'zama kanivema neraza zamo'a vagaresigeno, Juda vahe'ma ha'ma renezmantaza zamo'a vagaregahie. Efraemi vahe'mo'za Juda vahera kanivea reozmante'nageno, Juda vahe'mo'za Efraemi vahera hara reozmantegahaze. **14** Hanki anara nosu'za eri mago'ma hanazana, zage fre kazigama me'nea ne'onse agonaramimpima nemaniza Filistia vahera ame hu'za eramiza hara hunezmante'za, zage hanati kazigama nemaniza vahera hara huzmante'za, feno zazamia hanare'za erigahaze. Ana nehu'za Idomu vahe'ene Moapu vahe'ene Amoni vahe'enena hara huzamagatere'za kegava huzmante'nage'za zamagri zamagorga manigahaze. **15** Hagi Isipima me'nea hagerimo'ma efreneama'a Ra Anumzamo'a eri hagege nehuno, azana rusuteno amuhonentake zaho hunte'nigeno eno Yufretisi rantina eri ho'mu nehuno, ana tina 7ni'afi refko hanigeno, osi osi huno enevina, vahe'mo'za hagege mopare vugahaze. **16** Ana'ma hania zamo'a ranka efore hanige'za, Asiriati'ma agri vahe'ma ofri'zama osi'ama manisaza vahe'mo'za ko'ma Isipiti'ma Israelima e'nazaza hu'za egahaze.

12 Hagi anankna zupa tamagra amanage hugahaze, Ra Anumzamoka nagra susu hu'na musenkase hugantegahue, Kagra karimpa ahenante'nane. Hianagi ana karimpa ahe'zana netrenka, nazeri so'e hu'hane. 2 Tamagerfa huno Ra Anumzamo'a ete nagu'vazino navre'ne. Nagra Agrite namentintia nehu'na, korora osugahue. Na'ankure Ra Anumzamo'a hankaveni'an zagameni'a mani'neankino, nagu'ma nevazino ete navresia nera Agrake mani'ne. 3 E'ina hu'negu muse nehuta tima hanatipinti'ma tima nefizaza hutma, tamagu'ma vazi'nea zankura Ra Anumzamofona musena huntegahaze. 4 Ana zupa tamagra amanage hugahaze, Ra Anumzamo'ma hu'nea avu'ava zankura agi'a ahentesga huta musenkea huntesnune! Agrama tagrite'ma tro'ma hu'nea avu'ava zankura kokankokama mani'naza vhahera huama huta nezamasamita, zamage'ma akani zankura Agri agimo'a ame'nagame mareri'ne huta huama hugahaze. 5 Ra Anumzamo'ma knare zantfama hurante'nea zankura, zagamera huta agi'a ahentesga hanune. Ama ana zankura huama huta maka ama mopafima mani'naza vhahera zamasami vagaresnune. 6 Saionima mani'naza vahe'motma zagamera ranke huta nehuta musenkasea hiho. Na'ankure marerisa ne'ma ruotage'ma hu'nemo'a, Israeli vahe'mota amu'nompi tamagrane mani'ne.

13 Hagi Babiloni vahete'ma fore'ma hania zana avana'gna zampi Ra Anumzamo'a Amosi nemofo Aisaiana averi higeno ke'neana amanahu hu'ne. 2 Hagege agonafi mago avame'za eri ot'i'nenka ranke hunka kezanetinka, kazanu avame'name huge'za zamagima me'nea vahe'mo'zama rankumapima unefraza kafanteti ufreho. 3 Nagra zamazeri ruotage'ma hu'hoa vaheni'ama hankavenentake sondia vhahera huzamantesnuge'za, Nagri narimpahe'zana eriama hu'za Babiloni vhahera hara

huzmantegahaze. Hagi ana sondia vahe'mo'za muse nehu'za
hara hugahaze. 4 Kagesa antenka agonaramimpinti'ma neria
agasankea antahio, ana agasasana rama'a vahe'mofo
agasarankino, kokankoka vahe'mo'za hate vunaku sondia
vahetami zamavare'za emeri atru nehu'za nerazankna agasasa
nerianki kagesa antenka antahio. Hagi ana sondia vahera,
Monafi sondia vahe'mofo Ra Anumzamo ha' hunaku sondia vahe
zamavare tru nehie. 5 Ana sondia vahera afete moparegati e'haze.
Ra Anumzamo'a ana sondia vahepi huvazino arimpa ahe'zana
erima nehuno, ana maka mopa eri haviza hugahie. 6 Hagi Ra
Anumzamofo knamo'a hago erava'o nehianki zavi krafage hiho.
Ana knazana Hankavenentake Ra Anumzamo'a tusi'a knaza
atre'nigeno egahie. 7 E'ina hu'negu mika vahe'mo'za zamazana
erisga hugara osanageno, tumo'zamimo'a hapatigahie. 8 Ana
nehina zamagra tusi koro nehu'za, mago a'mo mofavre anteku
atagu nehiaza hu'za zamatagura nehu'za, zamagra zamagogogu
nehu'za ovufi avufi nehanageno zamavugosamo'a korankifa
hegahie. 9 Hanki antahihi, tamagerfa huno Ra Anumzamofo
kna ne-eankino ana knama efore'ma hanigeno'a, Agra tusi'a
rimpa ahenezmanteno ama mopa eri ka'ma kokaneseno,
ama mopafima mani'naza kumike vahera ranknaza zamin
zamahe vagaregahie. 10 Hagi ana knafina monafima me'nea
hanafitamine, atruma huterema hu'za nemanaza hanafi'mo'za
remsa osugahaze. Ana nehanigeno zahufama hanatinoma
marerisia zogemo'a ete rehani nehina, ikamo'a remsa osugahie.
11 E'inahu hu'na Ra Anumzamo'na ama mopafim vahe'mo'zama
havi zamavu'zamava'ma nehu'za, kefo zamavu'zamava nehaza
zantera zamazeri haviza hugahue. Ana hukna hu'na zamavufaga
rama nehaza vahera zamazeri haviza nehu'na, vahe'ma zamazeri

haviza nehaza vahera zamahe vagaranena ana zamavu'zamava
zana omanegahie. **12** Hagi vahera knare goligna hu'za osi'a vahe
mani'nageno, Ofiriti'ma knare golima ke'zanku'ma amuhoma
hu'za nehakazankna hu'za vahekura hakegahaze. **13** E'ina
hu'negu Monafi sondia vahemofo Ra Anumzamo'na tusi narimpa
aheanki'na ana zupa mona azeri kazakaza nehu'na, mopa
eri tore hanugeno tore'vare hugahie. **14** Hagi ana knafina
vahemofa Gazeriema nehaza dia afu ahenaku nehigeno
koro huno nefreaza nehanageno, kva vahemofa sipisipi
afutamimo panani huno freaza hu'za, vahemofa panani
hu'za vahezmiregane mopa zamiregane fre'za vugahaze. **15**
Hanki izano ha' vahemofa azerisnia vahera bainati kazinteti
zamarenefri'za, izano ha' vahemofa azerisimofona bainati
kazinteti zamahe frigahaze. **16** Ana nehu'za ne'onse mofavre
nagara, negesnage'za a'nanemokizmi zamazampinti hanare'za
ruragati'za mopafi zamavuga atresnage'za frigahaze. Hagi
nozamia tapage hu'za fenozamia eneri'za, a'nanezamia zamazeri
havi'za hugahaze. **17** Hagi ko, Nagra Ra Anumzamo'na
Midia vahera zamazeri o'netuanki'za e'za Babiloni vahera hara
eme huzmantegahaze. Zamagra silvagu'ene goligu'enekura
hu'za Babiloni vahera hara eme huozmantegahaze. **18**
Hagi zamagra kevereti nehazaveramina zamahe nefri'za,
amima nenesaza mofavre naga'ene, ne'onse mofavre nagara
zamasunkura huozmante zamahe vagaregahaze. **19** Hagi
Babiloni rankumamofo konaririmo'a, knare zantfa huno ruga'a
kumatamina agatere'neane. Ana hu'nege'za Kaldia vahemofa
ana kumakura tusi muse nehzane. Hianagi Ra Anumzamo'a
Sodomune Gomora kumatre'ma hu'neaza huno, Babiloni kumara
eri haviza hugahie. **20** Hagi ana kumapina meninteti'ma agafama

huteno'ma nevanigeno, henkama forehu anante anante'ma hu'za mani'za vanaza vahe'mo'za magore hu'za ana kumapina nona kiza nomanisnage'za, anampina Arapu vahe'mo'za seli nonkuma'zamia eme ante'za omanigahaze. Ana nehanage'za sipisipi afu kva vahe'mo'za sipisipi afu'zamia anampina atre'nage'za e'za tra'zana onegahaze. 21 Hianagi anampina afi zagagafamo'zane afi kramo'za nozamifina enemanisnage'za, komutomo'zane Ostretiema nehaza namamo'zanena anampina emanigahaze. Ana nehanage'za anampina afi meme afu tamimo'za takaire takaire hu'za vano hugahaze. 22 Hagi Hainema nehaza afi kramo'za vihufi eman'i'neza krafagea nehanageno, Zekoriema nehaza afi kramoza kini vahe nompina emanine'za krafagea hugahaze. Tamagerfa huno Babiloni kumamo'ma havizama hania knamo'a hago eme kofta nehankino, zazatera manino ovugahie.

14 Hanki Ra Anumzamo'a Jekopu nagara asunku hunezmanteno, nagri vahe fatgo mani'haze huno ete Israeli vahera zamavaregahie. Ana nehanage'za megi'a vahe'mo'za Jekopu naga'ene eme hagerafi'za manigahaze. 2 Hagi mago'a mopafi vahe'mo'za Israeli vahera zamaza hanage'za mopa zimirera ete egahaze. Anama hanage'za Israeli vahe'mo'za ana vahera fenozama hiazza hu'za erisantihare'za ve kazokzo eri'za vahe nezmante'za, a' kazokzo eri'za vahe nezmante'za, zamazeri haviza nehu'za kinama huzmante'naza vahe'ene knazama zami'naza vahera Ra Anumzamofo mopafina kegava huzmantegahaze. 3 Hanki ananknama esanigeno'a, kinafima mani'hazagenoma tutuma huramantageta, tamatagu'ma nehuta amuho hutama eri'zama eri'naza zampintira, Ra Anumzamo'a mani fru tamigahie. 4 Ana'ma hanigeta Babiloni kini ne'mofona

zagamepinti amanage huta ki'za zokago kea huntegahaze, tazeri havizama hu'nea nera hago evuramianki keho. Hagi tagri'ma arimpama aheneranteno ha'ma renerantea zana amare eme vagareankino, mago'enena anara osugahie huta hugahaze.

5 Kefo zamavu'zmavama nehaza vahe'mofo azompama zamazampima me'negezama hihamu eri'nazema nehaza azompane, kini vahe'mo'zama zamazampima eri'nage'zama kini mani'nazema hu'za zamagesgama nehaza azotanena, Ra Anumzamo'a refutagitregahie. 6 Na'ankure ana kini vahe'mo'za vahe'ma tusi zamarimpa ahenezmante'za, ozamatre kazikazi hu'za maka mopafi vahera hara huzmante vava hu'naze. 7 Hianagi menina maka mopafina ha'zana omege'za, akohe'za mani'naze. Ana hu'negu maka vahe'mo'za ranke hu'za zagamera nehu'za musena nehaze. 8 Ana'ma nehazage'za Saipresi zafa'mo'zanena muse nehazageno, Lebanoni Sida zafamo'za hu'za, kagrikura hago evuramiankino, zafama antagi vahe'mo'a eno tagrira antagi otregahie hu'za hu'naze. 9 Fri vahe kumamo'a, maka zana trotra huno kamarara huno vanankenoma kavre'nigura kavega anteno mani'ne. Fri'naza vahe'mokizmi avamura zamazeri retro nehuno, maka fri'naza mopafi kini vahetamina zamazeri oti vagaregahie. (Sheol h7585) 10 Hagi makamo'za eme negage'za amanage hugahaze, Tagri'ma hiaza huno kagri'enena hankaveka'a omne'ne. Ana hu'neankinka tagrama manunaza hunka manigahane hu'za hugahaze. 11 Kora avasase'ane kukena hu'nanke'za, vahe'mo'za hapu zavena nehe'za zagamera hu'za kamarara hu'za rankajima negamiza zamo'a fri vahe kumapi uneramina, kanimo mase tafeke'a nemanesigeno, hagirafamo rufitegantegahie. (Sheol h7585) 12 Kagra nantera ofunkna hunka remsa nehunka, maka kuma'ma hankavetinka hara hunka rama'a

vahe zamagatere'nana ne' mani'nananagi, inankna hutenga
monafintira menina mopafina evurami'nane! **13** Ana nehunka
kagra kagu'afina amanage hunka antahi'nane, Nagra monafinka
mareri'na, Anumzamofo hanafi tamimofona agatere'na, onaga'a
kini trani'a ome ante'na manigahue. Ana hute'na noti kaziga afete,
miko kazigati'ma eme atruma nehaza agonafi kini trani'a ante'na
manigahue hunka hu'nane. **14** Hagi nagra hampona agatere'na
onagame marerite'na, Marerisa Anumzamo'ma mani'neankna
hu'na umanigahue hu'nane. **15** Ana hugahue hu'nananagi
menina kazeri atregenka evuraminka amefenkame fri vahe
kumapi urami'ne. (*Sheol h7585*) **16** Hagi ana fri vahe kumapima
mani'naza vahe'mo'za kagene'ne nehu'za, ama nera maka
mopafi vahe'ma zamazeri kazama nehuno, maka kuma'ma azeri
tore nehia nepi ru nere hu'za hugahaze. **17** Ama ana ne'mo
ranra kumara eri haviza nehuno, ama mohanena eri haviza
higeno ka'ma kokama fore hu'nea nere. Ana nehuno hapinti'ma
zamazeria vahera zamatrege'za kumazamirega novazageno,
kina huzmante'nea nere hu'za hugahaze. **18** Maka ama mopafi
kini vahe'ma nefarizage'za, zamagri'a matipi eri so'e hu'za knare
avasese zampi asenezmantaze. **19** Hianagi kagrira matipina
aseogante'za, kasagafe atresagenka zafa zankuna'a kitagi
atrazaza hunka, bainati kazinteti zamahe fri'nesnaza vahe'ene
karanka mase'nesnanke'za zamagiareti krehapati'za vano
hugahaze. Hagi hakare'a vahe'ma hapinti zamahe frizage'za,
rehagagi'za kerifima asenezmantazafi asegante'nagenka
amefenkame uramigahane. **20** Kagrama frisnanke'za mago'a
kini vahe'ma eriso'ema hu'za asenezmantazaza hu'za kagrira
eriso'ea hu'za aseogantegahaze. Na'ankure kagra mopaka'a
eri haviza nehunka, vaheka'a zamahe fri'nane. E'ina hu'negu

kefo avu'ava'ma nehaza vahepinti'ma fore'ma hanaza vahera zamagimo'a fanane hina zamagekani zamantegahaze. **21** E'ina hu'negu zamafahe'zama hu'naza kumimofo nona'a mofavre naga'zmia zamavaretma ome zamahe frisaza kumara retro huzmanteho. Ana'ma osnage'za ra hu'za mopa eri nafa'a nehu'za, ranra kuma ante'za ama mopafina eri hakare hugahaze.

22 Hagi Monafi sondia vahe'mofo Ra Anumzamo'a amanage hu'ne, Nagra Babiloni vahera hara huzmante'na zamahe vaganere'na, manisaza vahe'enena zamagi'a eri fanene nehu'na, henkama fore'ma hanaza mofavre nagazminena zamahe fanene hugahue. **23** Monafi sondia vahe'mofo Ra Anumzamo'a amanage hu'ne, Anampima mani'naza vahera knaza zami'na, ruharafi hunetre'na, Babiloni kumara eri hapa hanugen komutomo'za anampina emenigahaze. **24** Hagi Monafi sondia vahe'mofo Ra Anumzamo'a amanage huno huvempa kea hu'ne, tamagerfa hu'na nazano hugahuema hu'na hu'noa zamo'a fore nehinkeno, nazanoma retroma hu'noa zamo'a fore hugahie.

25 Nagri mopafima mani'naza Asiria vahera miko zamazeri haviza nehu'na, Nagri agonaramimpima mani'naza vahera nagiareti zamarehapatigahue. Bulimakao afu'mofo anankempima nentaza karenamare zafagna huno, Israeli vahe'ma knazama nezamiza zana zamafuntetira eri atregahue. **26** E'inahu avu'ava hunaku antahintahia retro hu'neankino, Anumzamo'a azana erisga huno maka kaziga ama mopafima me'nea kumatmina eri haviza hugahie. **27** Hagi Monafi sondia vahe'mofo Ra Anumzamo'ma antahintahima retro'ma huno hugahuema hu'nesnia zana, iza eri atregahie? Hagi azama rusute'nesnia azana, iza eri anakegahie? **28** Hanki kini ne' Ahasi'ma fria kafufina, Ra Anumzamo'a amanahu naneke nasami'ne, **29**

Filistia vahe'mota sefu'ma neramia heginknoma rufutagia zankura musena osiho. Na'ankure osifavemofo mofavremo ha' osifavea fore hugahie. Anama huteno'a, ageko'na me'nea osifave efore huteno hareno vano hugahie. **30** Zamunte'ma omne vahera ne'zana zamisuge'za nenesage'na, atupa'ma hu'naza vahe'mokizmia kegava huzmantesuge'za knare hu'za manigahaze. Hianagi mago'a Filistia vahera zamagazanku hu'za nefrisageno, osi'ama manisazama'a zamahe frigahaze. **31** Filistia ran kumapima mani'naza maka vahe'mota ran kumamofo kafante manineta rankrafa hutma zavira netenkeno tamasumnamo'a hapatino. Na'ankure noti kazigatira tusi sondia vahe'mo'za magopi manumanu hu'za neazageno, zamefitira kumo'a tusiza nehige'za neaze. **32** Hagi ha' vahetamimofo kema eri'za esaza kato vahe'mo'zama eme tamantahigesageta, amanage hutma zamasamiho, Ra Anumzamo'a Saioni kumara agri vahe'mo'zama ome zamagu'ma vazisaza kuma retro hunte'ne hu'ne.

15 Hanki Moapu mopama havizama hania zankura Anumzamo'a amanahu naneke nasami'ne, ha' vahe'mo'za mago kenage e'za Moapu mopafima me'nea Ari ran kuma'ene Kiri rankumatrena eri haviza hazageno, Moapu mopamo'a havizantfa hu'ne. **2** Ana maka Diboni rankumapima nemaniza vahe'mo'za, havi anumzante'ma mono'ma hunentaza noma me'nea agonarega mareri'za zavi krafa hu'naze. Moapu vahe'mo'za Nebo rankumaku'ene Medeba rankumakura zamasunku hu'za zavira nete'za, zamagi zamazoka'ene zamaseni zamazokara vazagate tre'naze. **3** Kumamofo ne'onse kampina zamasunku kukena hu'za vano hu'naze. Nozami agofetu nemani'za atruma hu'za nemaniza kumatamimpina tusi zavi krafa nehazageno, zamavunumo'a tusiza hu'ne. **4** Hesboni ran kumateti'ene

Eleale rankumatet'i ma zavi krafama haza agasasankea ogantu
Jahasi rankumate vahe'mo'za antahi'naze. E'inama hiazanku
Moapu hankave sondia vahe'mo'za zamahirahiku nehu'za
hanavezamia omnege'za, tusi zavi krafa hu'naze. **5** Nagra
Moapu vahekura nagu'areti hu'na tusi zavi ate'noe. Na'ankure
vahe'mo'za mopazamia atre'za koro fre'za, Zoari ran kuma'ene
Eglat-Silisia ran kumate vu'naze. Luhiti ran kuma'ma me'nea
karanka mareneri'za zavira nete'za vu'naze. Horonaimi ran
kuma'ma me'nea karankanema nevu'za, kuma'ma havizama
hiazankura tusi zavi krafage hu'za vu'naze. **6** Nimrimi tintamina
tanageno, tinkenaregama me'nea trazamo'enena hagege hu'ne.
Ana higeno anampina trazamo'ene zafamo'enena hagege
higeno, kasefa huno zafaninage zana omnene. **7** E'ina hu'negu
Moapu vahe'mo'za feno zazamima eri truma hu'nazana eri'za,
ana zantamine korora fre'za, zafamoke'ma hu'nea tinkagomupinti
rukatagi'za Moapu mopa atre'za vu'naze. **8** Moapu mopafinti'ma
zavi krafama nehaza agasasamo'a, Moapu mopama ome
atre'nea atumpare me'na'a kumatre, Eglaimi rankuma'ene
Be-elim rankumate vige'za antahi'naze. **9** Na'ankure Dimoni
timpina koramo aviteno e'ne. Hianagi Ra Anumzamo'a huno,
mago'ene Moapu vahera zamazeri haviza hugahue nehuno,
laioni huntanena vuno koro'ma fre'za vanaza Moapu vahe'ene
Moapuma osi'ama mani'naza vahera zamaheno tagnavazino
negahie.

16 Moapu vahe'mota koro freta vuta Idomu vahe'mokizmi
rankumate Sela umani'none. E'ina hu'neta kinimofona takisi zago
amisnune nehuta, sipisipi anenta atronkeno Juda vahe kinima
Jerusalem kumate'ma mani'nere vu'za hu'none. Ana sipisipima
avre'zama vanazana, hagege kokampima vu'hea karanka vu'za

Saioni agonare vugahaze. 2 Hagi nama anenta'mo anom'a'a
atreno megi mani'neno tahaza tahaza hiaza hu'za, Moapu
mofa'nemo'za Arnoni tina taka hegahaze. 3 Hagi Juda vahera
zamasami'za, Antahiso'e huranteta taza hiho, ha' vahetimo'zama
tarotago hazagetama koro'ma freta vu'nona vahera, hanimo'ma
feru zagma resoma nehiaza huta tonara huneranteta, tamefira
huoramiho. Ana nehuta ha' vahe'mofo zamazampina tavre
onteho. 4 Tazeri havizama nehaza vahe'mokizmigura korora
freta onanki tamagra hankotigna huta mani'enketa, tagra
tamagrane manisune. Hagi tagra antahi'none, tazeri havizama
nehaza vahera atre'za vanageno, knazamo'a vagaregahie. Ana
hanige'za ha' vahetimo'za mago'ene hara hunorante'za mopatia
atre'za vuho huta hugahaze. 5 Hanki ana'ma hutena ana knafina
Deviti nagapinti fatgoma huno'ma keagama refkoma hania nera
mago efore hugahie. Ana ne'mo'a vahe'a avesi nezmaneno,
fatgo avu'ava huno kegava hunezmanteno, vea'amokizmi
nankeea antahi so'e huteno, mago avamenteke anteno refko
hugahie. 6 Hagi Moapu vahe'mo'zama zamavufaga rama hu'naza
nankeea hago tagra antahi'none. Zamagra mago'a vahera
zamagatere'none nehu'za, ra zamagi eri nankege nehu'za,
havige hu'za vahe'mokizmia ki'za zokago ke hunezmantaza
vahe mani'naze. Ana hu'negu Moapu vahera havigehu vahe
mani'nazanki, ke'zamia antahi ozamaho. 7 E'ina hu'negu
zamatrenke'za Moapu vahe'mo'za Moapu mopagura zavira
nete'za, Kir-Haresetiti'ma krepi rgama tagi'za eri hagege hu'za
nenaza zankura zamagesa nentahi'za zavi krafa hiho. 8
Hanki Hesbonima me'nea hozaramimo'a hagege nehigeno,
Sibmanema me'nea waini hozamo'a ana zanke huno hagege
hu'ne. Hagi mago'a kumapi kini vahe'mo'za ana waini hozafina

e'za knare'ma hu'nea waini raga'aramina eme regatati hu'naze.
Ana waini hozamofo agema'ama ometre emetrema hu'neana,
Hesbonine Sibma rankumateti agafa huteno vuno, noti kaziga
Jazeri ran kumate vuteno, zage hanati kazigama me'nea hagege
kokantega vuteno, uvava huno zage fre kaziga Fri'nea hagerinte
uhanati'ne. **9** E'ina hu'negu Jaseli kumate vahe'mo'zama,
Sibmama me'nea waini hozagu'ma zavi'ma atazankna hu'na
nagranena zavirate'noe. Hesboni kumaku'ene Eleale kumakura
navunu hu'ne. Na'ankure ko'ma kezati kantu kamama huta,
ne'zama nevasagetama musema nehazaza huta musena
osugahaze. **10** Ne'zama vasagetama hozaregati'ma ne-etama
tusi musema nehaza zana omanegeno, waini hozafinti'ma muse
zagame'ma nehuta kezaneti'za zanena omanegeno, krepima
rentra'ma nehe'zama muse kezama neti'za zane, kezankema
nehu'za musema nehaza zana omnegahie. Na'ankure Ra
Anumzamo'a eri atre vagare'ne. **11** Ana'ma hige'na Moapu
vaheku'ene Kir-Heresiti vahekura nasuragi zmantogeno, mago
vahe'mo asuzampi mani'neno hapu zavena neheno zavi'ma
ateankna hu'na nagu'areti hu'na zavirate'noe. **12** Hanki Moapu
vahe'mo'za kaza osu havi anumzamofo mono noma me'nea
agonarega mareri'za mono'ma hunte'nazana, amne zante
hanavezmia atre'za monora hunte'haze. **13** Hanki ama'i Moapu
mopamo'ma havizama hania zamofo nanekea, ko Ra Anumzamo
keaga hunte'nea naneke. **14** Hianagi menina Ra Anumzamo'a
amanage huno nehie. 3'a kafufima zagore eri'za erigahaze
huzama kema anakite'za, vahe'ma zamavrazage'za eri'zama
enerige'zama ana kema eri knare'ma nehazaza hu'na Moapu
mopamofo ra agine avasase zanena atresugenozazatera
menora ovanige'na zamazeri zamagaze hugahue. Ana hanige'za

osi'amo'za ofri'za kasefa hu'za manigahaze. Hianagi zamagrira hanavezmia omanegahie.

17 Hanki Damaskasi rankuma'ma havizama hania zamofo nanekea Ra Anumzamo'a amanage huno hu'ne, Damaskasi rankuma'mo'a knare'ma huno menima me'nea zana huno omaneno, haviza huramino mopafi hihi huno megahie. **2** Ana nehanigeno Aroerima me'nea kumatamimpintira vahe'mo'za atre'za vu'za e'za nehanageno, anampina sipisipi afu'mozage mani'nesnage'za, zamazeri korora osugahaze. **3** Hanki ha' vahe'mo'za e'za Efraemi mopafima me'nea kumate'ma hankavenentake vihuma hu'naza zana eri haviza nehu'za, Damaskasi kumate'ma kinima nemaniza zana eri netre'za, osi'a naga'ma ofri'za manisaza Aramu vahera zamazeri fanene hugahaze. Ana hanage'za Israeli vahe'mokizmima hiaza huno hankavezmia omenegahie huno Monafi sondia vahe'mofo Ra Anumzamo'a huvempa hu'ne. **4** Hanki ana knama esigeno'a, Israeli vahera hanavezmimo'a evuramisnigeno, zamavufagamo'a hariri huno zaferinare akamregahie. **5** Ana nehina mago vhemo Refaimi agupofinti witi raga vasageno, e'nerino mago mago atreankna hu'za osi'a vahe manigahaze. **6** Ana nehina olivi zafare kanonteti amasajino ruharari higeno amuzare'ma osi'a olivi raga tareo 3'o 4'o 5fu'a meaza hu'za osi'a vahe manigahaze huno Israeli vahe'mokizmi Ra Anumzamo'a huvempa hu'ne. **7** Hagi e'i ana knafina zamagu'a rukrahe hu'za tro'ma huzmante'nea ne' Israeli vahe'mokizmi Ra Anumzama Ruotage'ma hu'nea ne'teke zamavua nege'za antahi amigahaze. **8** Zamagra Asera havi anumzamofo amema'a zamazanteti'ma antre'za tro hunte'naza havi anumzantera zamen a nonte'za, ana havi anumzante'ma ofama hu' itama tro'ma hunte'narera mnanentake zantamina

kre mna vuontegahaze. **9** Hagi ana knafina ha' vahe'mokizmi ranra kumara Israeli vahe'mo'za hahu zamagatenere'za, ana kuma tamimpima nemaniza vahera zamahenati atregahaze. Ana hina ana kumatamimpina vahera omanisigeno, zafa tanopamo hageno marerino refitegahie. **10** Na'ankure Israeli vahe'mota tamagu'ma vazi'nea Anumzana tamefi hunemita fraki havegantamia tamefi humi'naze. E'ina hu'negu meg'i'a onke'naza vahe'mofo havi anumzamofo knare waini hoza erita antegahaze. **11** Hagi ana wainima hankresaza knazupa, ana nanteranke'za ana wainimo'a agata rehakrufeno marerino amosrea ahentegahianagi, tusi'a atama kri knama esigeno'a, ana wainimo'a raga rente so'ea osugahie. Na'ankure zamagra haviza hugahaze. **12** Hanki kokankoka kumategati sondia vahe'ma emeri atru nehaza vahe'mo'za zamagasasama neraza agasasankemo'a, tiramo'ma agasasama neriankna nehie! **13** Hagi rama'a tiramo sasa huno zamagasasama neriaza hu'za krafa hugahazanagi, hankavetino zamarotago hanige'za, ete rukrahe hu'za e'narega vugahaze. Ana nehu'za agonafima zaho'mo vemagu vemagu huno raisi hona'ama eri hareno viankna huno zamarotgo hanige'za fregahaze. **14** Hanki kinagama sege'za veamo'za tusi zamagogogu hu'naze. Hianagi nanterana ha' vahera omanizageno, ana korozana omane'ne. Hagi ha'ma hurante'za maka zantima eri'naza vahera Anumzamo'a e'inahu huno mizana zamigahie.

18 Kusi timofo kantu kazigama zamageko'nama hunte'nea ne'onse zagaramimo'zama hare'za vanoma nehaza mopafima me'hea kumataminkura nasunku huramantoe. **2** Hagi Isipi vahe'mo'za barozanteti ventea tro hute'za, Naeli timpi zamatrage'za nanekema eri'za vu vahe'mo'za kea eri'za

neaze. Hanki neazage'za amanage hu'za huzmante'naze, zaza
hu'za zamavufagamo'ma hentofaza hige'za, mopa'zamifina
ranra timo'ma tusiza higeno, ana mopafima nemaniza
vahe'mo'zama, vahe'ma zamazeri haviza nehazageno maka
mopafi vahe'mo'zama tusi koro hunezmantaza vahetega, ame
huta viho hu'za huzmante'naze. 3 Hagi maka kokankoka
mopafima nemaniza vahe'motane, maka zamotanena tamagesa
antetma antahiho, agonafima mago avame'zama efore'ma
hanigetma kesnagura tamavua keso'e nehutma, ufema
resnagura tamagesa anteta manineta antahiho. 4 Na'ankure
Ra Anumzamo'a amanage huno nasami'ne, Nagra nemanua
kuma'nire mani'ne'na akohe'na, feru zagemo akoheno renteaza
hu'na zamagegahue. Ana nehu'na ata ko'mo ne'za vasage
knazupa hozafi ko runteaza hu'na, akohe'na maninena
zimagegahue hu'ne. 5 Na'ankure ana kumamo'a, waini zafamo
knare huno marerino amosre ahenteteno, raga rentegeno
raga'amo afurenaku hiaza nehie. Hianagi waini ragamo afu
orenifi vahe'mo, azanku'nama nekafria kazinteti azankunatamin'a
roneseno ranra azankunatamina kitagi atregahie. 6 Itiopia
vahera ha'eme huzmante'za sondia vahe'zamia zamahe hana
hanage'za fri'za mopafina me'nenage'za, fri'naza zamavufaga
tumpamo'za zagegnafina eme ne'nenage'za, zasi knafina afi
zagaramimo'za eme negahaze. 7 Ana knafina Monafi sondia
vahe'mofo Anumzantega musezana eri'za esazana, Itiopia
vahera zaza hu'za, zamavufagamo'ma hentofaza hige'za, ranra
timo'ma tusiza higeno, ana mopafima nemaniza vahe'ma
zamazeri haviza nehazageno, maka mopafi vahe'mo'za tusi koro
hunezmantaza vaheki'za Hankavenentake Ra Anumzamofo

ajima erisgama nehaza mono nonte, Saioni agonare muse
zazamia eri'za egahaze.

19 Hanki Isipi mopare'ma fore'ma hania zankura Ra Anumzamo'a amanage huno nasami'ne, Ra Anumzamo'a hampomofo agofetu mani'neno ame huno Isipi mopare nevie. Ana nehanigeno Isipi mopafi havi anumzantamimo'a, Agri agiafi zamahirahiku nehu'za nemase'nagano, Isipi vahe'mofona hanavezmia omnena, kore nehanageno zamagu'amo'a hapatigahie. **2** Ra Anumzamo'a huno, Nagra Isipi vahera zamagu'a zamazeri otisuge'za zamagra zamagra ha' ohunte ahunte hugahaze. Nefu'a otino negnana hara hunentesnigeno, tava'oma'arema nemanisimo'a otino tvaoma'are'ma nemanisimofona hara huntegahie. Ana nehanigeno mago ran kumapi vahe'mo'za oti'za mago ran kumapi vahera hahu nezmantesnage'za, mago kini ne'mofo naga'mo'za oti'za mago kini ne'mofo nagara hara huzmantegahaze. **3** Ana hanigeno Isipi vahera hankavezmia omanena, mago'azama hunaku'ma kema retro'ma hu'nesaza zana Nagra eri savri hanuge'za, ana zana osugahaze. Ana hanuge'za antahintahima erinakura, zamazanteti tro hu'nesnaza havi anumzante'ene, zamavune vahete'ene, fri vahe hankro'enema keagama nehaza vahete zamagra vugahaze. **4** Hagi ana nehu'na Isipi vahera, vahe'ma zamazeri havizama nehia kini ne'mofo azampi zamavare ante'nugeno, vahekura asunku nosia hankave kini nekino, ana ne'mo kegava huzmantegahie. Nagra Monafi sondia vahe'mofo Ra Anumzamo'na ama'na nanekea nehue. **5** Hagi hagerimo'a taneno hagege nehanigeno, Naeli ran timo'a tanesigeno hagege huno ho'mu hugahie. **6** Hanki ne'onse tintamima tanenigeno, hinimnamo'a tusiza hanigeno, Isipima

me'nea tintamimo'za tane'za omanegahaze. Ana nehina timpima
nehagaza varozamo'za kasriza himna vugahaze. 7 Hagi Naeli
tinkenaregama me'nea varozane, hozama ante'naza zamo'enena
hagege hanigeno, zaho'mo emeri hareno vanigeno, mago zana
omanegahie. 8 Hagi Naeli timpinti'ma nozamezama nehaza
vahe'mo'za zavi krafa nehanageno, Naeli timpima nozame
huku'ma netresaza vahe'mo'za zamasunku hu'za zavitegahaze.
Kukoma timpima atresaza vahe'mo'za nozamea aze'orisageno,
zamarimpamo'a evuramigahie. 9 Ana nehina tra'zama eri'za
tavaravema tro nehaza vahe'mo'za, zamarimpa kna nehanage'za,
osinofiteti'ma efeke tavaravema tro nehaza vahera, amuha
zazamia omanegahie. 10 Hagi zago eri'zama eneriza vahe'mo'za
na'a hugahuneha nehu'za neginagi nehanage'za, efeke
kukenama hati'za tro'ma nehaza vahe'mo'za haviza hugahaze.
11 Hanki Zoani ran kumate'ma nemaniza kva vahera mago knare
vahera omani'nazanki, negi nagi vahe mani'naze. Hagi knare
antahi'zane vahe'mo'zama Isipi kini ne' Feroma antahi'zama
ami'nazana, havi antahizanke ami'naze. Tamagra na'a agafare
Ferona amanage huta nesamize? Tagra antahi'zane vahe'mofo
mofavre mani'neta, ko'ma antahi'zane kinima fore hu'za
mani'naza nagapinti vahe mani'none huta nehaze. 12 Hianagi
menina antahi'zane vaheka'a iga mani'naze? Zamatrege'za
Hankavenentake Ra Anumzamo'ma Isipi mopare'ma nazano
tro'ma hunaku'ma retro'ma nehia zana eme eriama hu'za
kasamaho. 13 Hagi Zoani ran kumate kva vahe'mo'za neginagi
nehazage'za, Memfisi rankumate kva vahe'mo'za zamagra'a
orevataga arevatga nehzageno, Isipi mopare kva vahe'mo'za
Isipi mopa kegava hu so'ea osu'naze. 14 Hagi Ra Anumzamo'a
neginagi avamu huntogeno, Isipi vahe antahi'zana eri savari

hu'ne. Ana hu'neanki'za aka ti neteno neginagi hu'nea vahe'mo agra'a amuti atrenefi, re hapahapa hiaza nehu'za Isipi vahera zamavare'za havi kante vu'naze. **15** Hagi Isipia zamagi me'nea vahera manisnigeno, zamagi omne vahera manisnigeno hugahianagi, magomo'e huno Isipi mopa eriso'ea osugahie.

16 Hanki e'i ana knafina Isipi vahe'mokizmia a'negna huno hanavezmia omane amne hanige'za, tusi'a knaza erigahaze. Ana nehanageno Monafi sondia vahe'mofo Ra Anumzamo'a azana erisga huno zamazeri haviza hunaku nehanige'za, tusi koro nehu'za zamahirahiku hugahaze. **17** Anama nehu'za Isipi vahe'mo'za Juda vahe'mokizmi zamagima nehesage'za nentahi'za tusi koro hugahaze. Na'ankure Hankavenentake Ra Anumzamo'ma zamagrite'ma fore'ma haniazama retro'ma hu'nea zanku anara hugahaze. **18** Hagi e'i ana knafina Isipi mopafima me'nea 5fu'a ranra kumapima nemaniza vahe'mo'za, Kenani vahe'mokizmi zamageru neru'za, Monafi sondia vahe'mofo Ra Anumzamofo agifi huvempa hu'za, Anumzamofo agorga manigahune hu'za hugahaze. Ana 5fu'a kumapinti mago kumamofo agi'a Zagemofo Kumare hu'za agi'a ahegahaze. **19** Hanki ana knafina Isipi mopamofo amu'nompina Ra Anumzamofoma Kresramana vunte ita mago megahie. Ana nehanigeno Isipi mopama ometre atuparega, nege'zama Ra Anumzamofo agima erisgama hu'zana agri agifi huhampri'za mago have retru rentesnageno megahie. **20** Hagi Isipi mopafina ana zamo'a mago avame'za me'neno, Hankavenentake Ra Anumzamo'a Isipi mopafina mani'ne huno huzmagesa hugahie. Ana hu'nesnigeno ha' vahezmimo'zama eme zamazeri havizama nehanageno, zavi krafama nehanageno'a Ra Anumzamo'a mago zamagu'vazi ne' huntisigeno eno eme zamaza huno zamagu

vazigahie. **21** Ana hanigeno Ra Anumzamo'a lsipi vahetera Agra'a erinte ama hanige'za, ana knafina lsipi vahe'mo'za ke'za antahi'za nehu'za, monora hunente'za kresramna vu'zane ofanena eri'za eme huntegahaze. Ana nehu'za Ra Anumzamofo agifi huvempa nehu'za, anama huvempama hanaza zana amage ante fatgo hugahaze. **22** Tamage, Ra Anumzamo'a lsipi vahera knazanteti sefu'zamino zamazeri haviza hugahie. Hianagi zamazeri havizama hutesuno'a, ete zamazeri knamaregahie. Ana hanige'za ete Agrite rukrahe hu'za nunamu hanageno, Ra Anumzamo'a nunamuzmia nentahino, zamazeri so'e hanige'za knare hu'za manigahaze. **23** Hanki ana knafina lsipitira mago ranka fore huno Asiria vugahie. Ana hu'nesnige'za ana kantera Asiria vahe'ene lsipi vahe'mo'za vu'za e'za nehu'za, Ra Anumzamofona Agriteke magoka monora huntegahaze. **24** E'i ana knafina lsipi mopane Asiria mopamokema ha'aza huno, Israeli mopamo'a eama huno zanagrite eme tragotegahie. Ana hanage'za zamagripinti kokankoka mopafima nemani'za vahe'mo'za asomura erigahaze. **25** Hanki Monafi sondia vahe'mofo Ra Anumzamo'a ana 3'a kumara amanage huno asomu kea huzmantegahie. lsipi vahera Nagri vahe mani'nagu asomu hunezmante'na, Asiria vahera Nagra nazampinti tro huzmante'nogu asomu hunezmante'na, Israeli vahera Nagrani'a vahere hu'na erisanti'ma hare'noa vahekina asomu huzmantegahue.

20 Hanki ana kafufina Asiria kini ne' Sargoni'a sondia vahe'are ugota hu'nea kva ne'a huntogeno sondia vahera zamavareno vuno, Astodi kumate vahera hara ome huzmanteno zamazeri zamagatere'ne. **2** Hagi anama hia knafina, Ra Anumzamo'a Amosi nemofo Aisaiana amanage huno nanekea asami'ne, kasunku kukenama hu'nana zana kavufaretira ome zafi netrenka, kagia

noma vazi'nanana ome kazufe atro. Higeno kema hiaza huno zafi netreno, avufa avapako agia nona agiafina omanenegeno amne vano hu'ne. 3 Hagi anante Ra Anumzamo'a amanage hu'ne, eri'za vahe'ni'a Aisaia'ma avufga avapako'ene agianoma ontani'ma 3'a kafufima vanoma hu'neana, e'i Isipi kumamo'ene Itiopia kumamoke'ma knazampima ufresnanke'zama nege'za kva hanazegu, e'i ana avame'zana tro hu'ne. 4 Ana hu'negu Asiria kini ne'mo'a vuno ana tare kumatmimpinti vahera ha' ome huzmagatereteno, tavava ozafaramine, kasefa veatamine, zamavufaga avapako zamagia nona omanesiaza zamavareno kina ome huzmanteku vugahie. Ana hanige'za Isipi mopare zamavufaga zamavapako mani'ne'za tusi zamagazegu hugahaze. 5 Hanki anama hanage'za Itiopia vaheku'ma amuha'ma nehu'za, Isipi vaheku'ma zamimizama runafe'ma nehaza vahe'mo'za, tusi koro nehu'za, zamagazegu hugahaze. 6 Hanki ana knafina hagerimofo ankenaregama mani'za vu'naza vahe'mo'za amanage hugahaze, keho, Asiria kini neku'ma koro'ma freta vanunke'zama tagu'vazigahazema huta antahima nezamuna vahera hago haviza hu'naze. E'na hu'neankita Asiria kini ne'mofo azampintira atreta ofregahune huta hugahaze.

21 Hagi hagerimofo ankenaregama me'nea hagege kokamo'ma havizama hania zamofo nanekea Ra Anumzamo'a amanage huno nasami'ne, Vahe'mo'za tusi koro hu'za novaza hagege kokampinti tusi'a zahomo'a vemagu vemagu huno otigahie. Ana huteno hagege kokampinti hankave zaho'mo otiteno avumenteno eaza huno kumama eri haviza hu vahe'mo'a egahie. 2 Hagi mago havizantfa hu'nea ava'na Ra Anumzamo'a naveri hige'na ke'noe. Vahe'ma zamazeri havizama nehia vahe'mo'a vahera zamazeri haviza hu vava nehigeno, vahe'ma havigema huno rezamatga

nehia vahe'mo'a, vahera rezmavataga hu vava nehie. E'ina
hu'negu Elamu sondia vahe'mota ete Babiloni vahera hara eme
hunezmanterke'za, Midia vahe'mota eta kumazmia eme avazagi
kagiho. Ra Anumzamo'a huno, Babiloni vahe'mo'zama mago'a
vahe'ma zamazeri havizama nehaza zana, nagra ana maka
knazana eri atregahue. 3 Hagi ana avanagna zama nege'na,
tusi koro nehu'na nahirahiku hu'noe. Ana nehugen a'nemo'za
mofavre anteku nehazageno, zamarimpa zamata negriankna
huno natagri'ne. Nagra ana zankura tusi koro nehugen,
antahintahinimo'a knarera osu'ne. Ana hige'na mago'zama
kezanku'ene mago kema antahi zankura nave'osige'na pri
hu'noe. 4 Nasenimo'a kagigagi nehige'na, koro nehugen
nahirahire'ne. Kenagera mase so'e hugaragi tusi koro nehugen
nahirahire'ne. 5 Hanki nagra nezmagoge'za mago'a vahe'mo'za
ne'zama nenaza trara retro nehu'za, mopafina tavarave eri tare'za
tafera nehu'za ne'zana retro hu'naze. Anama hute'za ne'zane
tinena nene'za mani'naze. Hianagi mago ne'mo amanage huno
kezati'ne, sondia vahete kva vahe'mota antahiho, ha' vahera
hago azanki, ha'ma hu'zana hankotamia erita masavena freta
retrotra hiho. 6 Na'ankure Ra Anumzamo'a amanage huno
nasami'ne, kuma'ma kegava hania vahe mago huntogeno vuno
naza fore nehifi ome keteno, na'a kegahifi eme kasamino hu'ne.
7 Hagi ana ne'mo'ma kesinigeno, hosi afu agumpima mago
mago vahe'ma manitere hu'nesnage'za tare hosi afutrema
taragoteterema hu'zama ne-esnage'za, donki afu'ene kemoli
afutamimofo agumpima vahe'ma mani'nezama avazuhumpi
huza ne-esageno'ma nezmagesuno'a naza fore hugahifi agesa
anteno antahi so'e hino. 8 Hanki anama huntazageno'ma ome
avuma anteno kesia ne'mo'a laionimo krafa hiaza huno amanage

hugahie, Ra Anumzamoka ha' vaheku'ma mani'neza kvama
nehaza nonte mani'nena maka feru'ene kenage'enena kegava
huvava nehue. 9 Hagi menima koana, hosi afu agumpina rama'a
vahe'mo'za mani'ne'za kantigama tare tragotetere hu'za maniza
neazage'ha negogeno, mago agerumo amanage hu'ne, Babiloni
kumamo'a hago haviza huno evuramie, Babiloni kumamo'a hago
haviza huno evuramie huno hu'ne. Ana higeno Babiloni vahe'mofo
havi anumzantamimofo amema'a tro hu'zama retru re'naza
zantamimo'a evuramino mopafi rutma tamanu hu'ne! 10 Tamagra
nagri vahera witi refuzafupazankna huno knazamo'a tamazeri
havizantfa hu'ne. Hianagi Hankavenentake Ra Anumzana Israeli
vahe'motma Anumzamo'ma nasamia nanekea hago huama
hugeta antahize. 11 Ra Anumzamo'a Duma ran kumate'ma fore
hania zankura amanage huno kea nasami'ne, Seiri mopafintira
mago vahe'mo amanage huno kezatino nantahige'ne, ha'
vahe esnagu'ma kavuma antenka negana ne'moka, nama'a
kna manino kora tugahie. Nama'a kna manino kora tugahie,
huno nantahige'ne? 12 Anage'ma higeno'a ha' vaheku'ma
avuma atenoma mani'nea ne'mo'a amanage huno kenona
hunte'ne, hago kora atugahianagi, hanimo'enena egahie. Hanki
nantahigenaku'ma hanuta henka eta eme nantahigegahaze. 13
Hagi Arabia kumate'ma fore'ma hania zankura Ra Anumzamo'a
amanage huno nasami'ne, Dedani vahe'mota feno zantamia
kemoli agumpi erinteta vutma, Arabia mopafima osi traza
akavozafi ome anteta masegahaze. 14 Hanki tinku'ma tusiza
hu'za hagege hanaza vahera, Tema kumate vahe'motma tina
afinezmita, hapinti'ma atre'za fresaza vahera ne'zana zamiho. 15
Na'ankure ana vahera ha' vahe zamimo'za bainati kazinteti'ene
ati kevereti zamahe'za zamarotago hazage'za hapinti koro fre'za

e'naza vahe mani'naze. 16 Na'ankure Ra Anumzamo'a amanage huno nasami'ne, zagore'ma mago kafufi eri'za erigahaze hu'zama kema anakite'za vahe'ma zamavrazage'za, eri'zama enerige'zama ana kema eri knare'ma nehzaza hu'na, ama ana kafumofona mago mago kna hamparintere nehuankino, ana knama efore'ma hanigeno'a, Kedari kumate'ma me'nea hentofa zantamimo'a haviza hugahie. 17 Hanki Kedari kumate sondia vahera atiretira knare hu'za hara nehzaza vahe mani'naze. Hianagi zamahe hana hanage'za, osi'a naga manigahaze. Ra Anumzana Israeli vahe Anumzamo ama ana nanekea hu'ne.

22 Hanki Ava'nagnazane nehzaza agupofima fore hania zamofo nanekea Ra Anumzamo'a amanage huno nasami'ne, Na'a higeta mika vahe'mota nontamimofo agofetura marenerize? 2 Rankumapima nemaniza vahe'mota tusi tamagasaki neruta kereso nehzaza vahe mani'naze. Hagi kuma karampima fri'za mase'naza vahera, bainati kazinteti zamahazage'za frige, hapinti zamahazage'za frigera osu'haze. 3 Hagi maka tamagri kva vahe'mo'za magoka koro fre'za afete vu'nazanagi, ha' vahe'mo'za ati keveretira hara huoramante amne akohe'za tamazeri'naze. Hagi koro freta afete vunazanagi, hake'za tamavre'za mika kina huramante'naze. 4 E'ina hu'negu amanage hu'na tamagrikura nehue, nagrikura kea osuta natrenke'na mani'nena vahe'nimo'zama havizama nehzaza zanku zavi krafa nehu'na manigahuanki, nazeri fruma hu'zankura antahintahi hakarea osiho. 5 Na'ankure Ava'nagnazanema nehzaza agupofima fore'ma hania zamofonkna Monafi hankavenentake sondia vahe'mofo Anumzamo'a huhampri ante'neankino, ana knama esigeno'a vahe'mo'za kezankege nehu'za agasasankemo'ma hania zankura koro nehanageno, ha' vahe'mo'za e'za kuma

kejina eme tapage nehanage'za, agonaramintega kezati
anagamu atregahaze. **6** Hagi Elamu sondia vahe'mo'za ati
kevezamia zamazampi eri'ne'za hosi afu zamine, karisi zamine
eri'za hahunaku neaze. Ana nehazage'za Kiri ran kumate
vahe'mo'za ha'ma hanaza hanko zamia eri'za neaze. **7**
Knare zantfama hu'nea agupo mopatamifina, karisimoke'za
avite'ne. Ana nehige'za hosi afu agumpima mani'nezama ha'ma
nehaza sondia vahe'mo'za ran kumamofona ranra kafaramintera
ha'hunaku retrotra hu'za mani'naze. **8** Juda vahe'ma zamagu'ma
nevaziza zana Anumzamo'a e'inahu huno eri atregahie. Ana
hanigeta ana knafina Zafa tanope hu'za nehaza nompima
ante'naza ha' zantaminte amuhara hugahaze. **9** Hagi tamagrama
kazana Jerusalemi ran kumamofo keginafina, rama'a kantamimo
ankronkru hu'negetma ke'naze. Ana hu'negetma fenka kaziga
Deviti rankumapima me'nea tirupi tina henkani'naze. **10** Ana
ne hutma tamagra Jerusalemi kumapima me'nea nontamina
nehampritma, mago'a nona tapage hutma ana noma ki'naza
haveraminteti kuma kejina eri hankavetita tro hu'naze. **11**
Hanki tamagra anama huteta, ko'ma me'nea tirupinti'ma tima
avrentenakura kuma keginamofo amu'nompi tima eme marevazi
kumara retro hu'naze. Hianagi Anumzamo'ma korapa'ma
e'inahu'za fore hugahie huno'ma kema hunte'nere'ma ama
ana zamo'ma eforema nehia ne'mofona antahimita amagera
onte'naze. **12** E'ina hu'negu Monafi sondia vahe'mofo Ra
Anumzamo'a ana knafina huzmanteno zavi krafa nehuta,
tamaseni tamazokara vazagate netreta, tamasunku kukena
erintaniho hu'ne. **13** Hianagi tamagra anara nosutma bulimakao
afutamine, sipisipi afutamine aheta ne'zana kreta nenetma,
waini tinena neta musenkase ne hutma amange ne haze, okina

frisnunku enketa ne'zane tinena neneta, musenkasea hamneno
nehaze. **14** Hianagi nentahugen Monafi sondia vahe'mofo Ra
Anumzamo'a eama huno amanage hu'ne, tamagrama hu'naza
kumira eri atre oramantesugeta mani'neta frigahaze huno hu'ne.
15 Hanki Monafi sondia vahe'mofo Ra Anumzamo'a amanage
huno hu'ne, Kini ne'mofo nompima kvama hu'nea ne' Sibnante
evunka amanage hunka ome asamio, **16** Sibnaga kagra amafina
na'a nehane? Kagra izaga have agonafina huzmantanke'za
havea taga hu'za unefraze. Ama ana havegamo'a kagri'ma
asegantesnaza mati megahie. **17** Hagi kva huo! Kagra hankave
ne' mani'nananagi Ra Anumzamo'a kazeriteno kavazu huno
vuno matevuno katregahie. **18** Hagi kagrira mago baligna huno
kazeri kagigagi huno kazeri antumo huteno, mago vahe omani
ka'ma kokampi matevuno katregahie. Ana hanigenka anantega
frisnankeno, konariri'ane karisikamo'a anantega megahie. Kagra
kinimofo eri'za vahe mani'nananagi, kinimofo nagara zamagaze
eri zamigahane. **19** Hagi Ra Anumzamo'a huno, kagrama enerina
eri'zampintira kazeri henkami netre'na kahegasope tregahue. **20**
Hagi ana knafina eri'za vaheni'a Hilkia nemofo Eliakimina ke
hanugen esanige'na, **21** kagrama nentanina zaza kukena Nagra
eri'na agri antanintegahue. Ana nehu'na kagrama kratimpafima
renentana kamunofira, eri'na agri renente'na, kagri eri'zana
agri erimigahue. Ana hanugen maka Jerusalemi kumapima
nemaniza vahete'ene, ana maka Juda vahera nafa zamigna huno
manigahie. **22** Ana hutena Nagra agri azo'narera Deviti naga'mofo
kinofira anakintegahue. Ana hanugen, agrama erinagi'nia
kahana mago vahe'mo'a eri onkinigeno, agrama erigi'nia kahana
mago vahe'mo'a eri onagigahie. **23** Hanki ana eri'zama aminu'a
eri'zampina, seli nomofo nofi avazuhumpi hu'za mopafi aini

azota ahazageno ufreo azeri kona hiaza huno, ana eri'zampina mani hankavetino manigahie. Ana hanige'za Eliakimima erisnia erizantera agri naga'mo'za knare zamagi erigahaze. 24 Ana hanige'za naga'amo'za agriteke zamazama hanigura zamavua antegahaze. Naga'amo'zane agrama kasezmante'nimo'za, kavoramine kapuraminema azotare'ma hantintazaza hu'za agriteke hanti'za manigahaze. 25 Hagi Monafi sondia vahe'mofo Ra Anumzamo'na amanage nehue, Ana knafina ana azeri konama hu'nea azotamo'a hantagi ramigahie. Ana hanige'za agrite'ma hagerafine'zama knama nemiza naga'mo'za, kurarampe'za uramigahaze. Ra Anumzamo'na ama'na nanekea nehue huno hu'ne.

23 Hagi Tairi kumate'ma fore'ma hania zamofo kasnampa naneke ama'ne, Tasisi kumate ventemotma zavi krafa huta zaviteho. Na'ankure Tairi kumamo'ene ventemo'ma enemania kumamo'a havizantfa hu'ne. Hagi ana kuma'ma havizama hu'nea zamofo nanekea hageri amunompi me'hea kuma Saiprusiti eme zamasami'naze. 2 Hagerimofo ankenaregama nemaniza vahe'motane, Saidoni rankumate'ma fenozama zagore'ma netraza vahe'motanena tamasunku nehuta akoheta maniho. Tamagrite'ma fenoma eriza zagore'ma eme atrenakura hagerimpi neaze. 3 Hagi kagripintira feno vahe'mo'za hagerimofo agofetu vano nehu'za, nanazana zagore kokankona ome atre'za vano nehaze. Naeli timofo ankenaregati witia eri'za zagoa eme retro nehaze. Tairi kumamoka maka mopafi vahe'mo'za e'zama maka'zama zagore'ma netraza kuma me'nane. 4 Saidoni kumamoka tusi kagazegu huo, na'ankure hagerimo'ene hanave vihuma hu'nea hagerimo'enena amanage nehie, nagra mofavrema antenaku'ma atagu'ma nehiazana nosu'na, mofavrea

nontena, mofa'nene ne' mofavreraminena kegava osu'noe. 5
Hagi Isipi vahe'mo'zama Tairi rankumate'ma fore'ma hia zamofo
agenkema antahisu'za, tusi antahintahi hakare hugahaze. 6
Hagerimofo ankenaregama nemaniza vahe'mota, tamasunku
huta zavi neteta, koro freta hagerina takaheta Tasisi kumate viho.
7 Tairi kumara hentofa kuma korapa meneg'e'za ana kumapina
tusi musenkase nehaza kuma me'ne. Korapara ana kumapi
vahe'mo'za mago'a vahera huzmantage'za afete moparega
vu'za e'za hu'za, ranra kumatmina ome azeri oti, eme azeri oti
hu'naza kuma me'ne. 8 Ina vahe'mo ana knazana retro hu'nea
knazamo Tairi kumatera forera nehie? Ama ana kumapintike'za
kini vahera zamazeri fore nehie. Ama ana kumapi zago vahera
mani'nage'za, kokankokatira ra zamagia nezamiza kuma me'ne.
9 Monafi sondia vahe'mofo Ra Anumzamo ama ana knazana
fore hugahie huno retro hunte'nea zamo efore hu'ne. Na'ankure
hankavezamigu zamagesa nentahi'za zamagi erisga nehaza
vahe'ene, kokankokati'ma ra zamagima nezamiza vahe zamazeri
zamagaze hunaku Anumzamo'a anara hu'ne. 10 Naeli timo'ma
tima hagenoma eri harafi'ma huno eviaza huta Tasisi vahe'mota
mago'zamo'a tamaze orinigeta mopatamifina amne vuta eta
hugahaze. 11 Ra Anumzamo'a azana hagerimofo agofetu
rusuteno, kini vahe'mo'zama kegavama hu'naza kumatmina
azeri tore nehuno, Kenani mopafima hankavenentake fraki
kuma'ma ki'naza kumatamina eri haviza hugahue hu'ne. 12
Hagi Agra amanage hu'ne, Saidoni kumamoka ko'ma nehzaza
hu'za husga huogantegahaze. Na'ankure evuraminka havizantfa
hu'nane. Menina otitma hageri amu'nompi me'nea kumate
Saiprusi vugahaze. Hianagi ana kumate'enena mani frua
huta omanigahaze. 13 Hanki menina Kaldia vahe mopa

keho. Anampina vahera magore hu'za omani'naze. Na'ankure Asiria vahe'mo'za e'za kumazamia eri haviza hazageno, mopazamifina afi zagagafamo'za avite'naze. Asiria vahe'mo'za kuma kegina zamimofo tvaontera zaza no ki'za mani'ne'za hara huzmante'za hankavenentake vihu zamia tapage tapagu hu'za eri haviza hu'naze. **14** Tasisi kumate ranra ventema hageri agofetu'ma vanoma nehaza ventemota tamasunku huta zavi ateho. Na'ankure hankavenentake vihuma hu'naza kumatmimo'a hago haviza hu'ne. **15** Hagi ana zama fore huno evutesanige'za, mago kini ne'moma nemania kna huno 70'a kafumofo agu'afi, Tairi kumara zamagera kanintegahaze. Hianagi ana 70'a kafuma evutesnigeno'a, mago monko a'mofo agire vare zagame'ma nehaza zagamemo'a, Tairi kumamofo avate fore hugahie. Ana zagamepina amanage hu'ne. **16** Monko a'moka vahem'o'za antahiogamizanki mago hapue nehaza zavena eritenka, ran kumamofo amu'nompi vano nehunka, zavena aheso'e hunka nehenka, rama'a zagame nehuge'za vahem'o'za ete antahigamiho. **17** Hagi ana 70'a kafuma evutesnigeno'a, Ra Anumzamo'a Tairi kumara atresanigeno, monko a'mo'ma nehiaza huno maka ama mopafi kini vahem'ene zagore savri huno vano hugahie. **18** Hianagi Tairi kumamo'ma eri'nia zagomofo ante agofetuma huno'ma aminia amemaa, agra erinte ruotage hanigeno Ra Anumzamofo su'zane huno ruotage huno megahie. Ana'ma hanageno'a ne'zana rama'a me'nesnige'za Ra Anumzamofo pristi vahem'o'za nene'za, knare'nare kukena rama'a me'nesnige'za antanigahaze.

24 Antahiho, Ra Anumzamo'a ama mopa eri haviza hanigeno, ama mopamo'a ka'ma mopa megahie. Ana nehuno Agra ama mopamofo avugosa eri ruzahé zahu nehuno, vahetamina

zamazeri panani hugahie. 2 Hagi pristi vahe'ma amne
vahe'ma, eri'za vahe'ene kva vahe'ene, eri'za a'nanene kva
a'nanenena anahu knazanke enerisageno, fenozama mizanesaza
vahe'mo'zane, zagore'ma fenozama netraza vahe'mo'zane,
zagoma nofi'ma nehaza vahe'mo'zane zagomanofite'ma netraza
vahe'mo'zanena anazanke hu'za anahu knazanke erigahaze.
Ana zanke hu'za vahe'zama erite'za nezamiza vahe'mo'zane,
vahe'zama eneriza vahe'mo'zanena anahu' knazanke erigahaze.
3 Ama mopamo'a havizantfa huno mago'zana omanena, ka'ma
koka megahie. Ra Anumzamo ama ana nanekea hu'ne. 4
Ama mopamo'a hagege huno haviza nehina, asunku nehuno
zavi krafa hugahie. Ana nehina ama mopafima zamagine
vahe'ma nemaniza vahe'mokizmi zamajimo'a fanane hugahie.
5 Ama mopafima nemaniza vahe'mo'za ama mopa eri haviza
hu'naze. Na'ankure zamagra Anumzamofo kasegene tra kenena
runetagre'za Anumzamo'ma zamagranema mevava huhagerafi
huvempa kema huhagerafi'nea kea ruhantagi'naze. 6 E'na
hu'negu Anumzamo'a ama mopa sifna hunteno azeri haviza
nehige'za, ama mopafima mani'naza vahe'mo'zama havi
zamavu'zamava'ma hu'naza zamofo nona'a knazana eri'za fri
vagarazage'za osi'a naga mani'naze. 7 Hagi kasefa wainimoza
zavi krafa nehazageno, waini nofimo'enena kasrine. Ana hige'za
waini tima nene'za muse zagame'ma nehaza vahe'mo'za karagi
ru'naze. 8 Hagi nase'nasepamofo agasasamo'a vagaregeno,
hapu zavenanema nehe'zama musema nehaza zana vagare'ne. 9
Hagi waini tina ne'nazanagi muse zagamera osu'naze. Na'ankure
waini timo'a zamagitera akahe'ne. 10 Hazenke zamo'ma
avimate'nea kumamo'a fragu vazino evuramigeno ka'ma koka
megeno, nontamimofo kafaramimo'a erigi vagare'neankino, mago

vahe'mo'a ana nontamimpina uofregahie. **11** Ama mopafima musenkasema nehaza zana hago vagare'ne. Ana hige'za kumamofo karampi mani'ne'za musema nehaza wainigura krafa hu'za kezati'naze. **12** Hagi rankumamo'a havizantfa higeno, ana kumamofo kahamo'a tamana tamanu huno evurami'ne. **13** Anahu kna avu'ava zamoke, ana maka mopafima nemaniza vahepina fore hutere hugahie. Olivi rgama tagige, grepi rgama tagite'za osi'a ragama atrazageno zafare menege'za neragizankna hu'za osi'a vahe manigahaze. **14** Hagi anama hanige'za zamagra zamagerura erisga hu'za muse zagame hugahaze. Ana nehanage'za zage fre kazigama nemaniza vahe'mo'za Ra Anumzamofo hihamu hankave'agura ranke hu'za Agi'a ahentesga hugahaze. **15** E'ina hu'negu maka vahe'ma zage hanati kazigama nemani'za vahe'mota Ra Anumzamofona agi'a ahentesga nehinkeno, hageri ankenama nemaniza vahe'mota Ra Anumzana Israeli vahe'mokizmi Anumzamofona Agi'a ahentesga huta ra agi amigahaze. **16** Hagi mopama ome atre eme atrema hu kazigatira muse zagame'ma nehzana, amanahu zagame nehzanki antahiho. Fatgo avu'avazama nehia Anumzamofona agi'a ahentesga nehune hu'za hu'naze. Hianagi nagra amanage hu'na hu'noe, nasunku huanki'na musena nosu'na haviza hu'na amne zankna hugahue. Na'ankure nagrama koana, havi zamavuzmava nehu'za havige nehaza vahe'mo'za, mago'ene vahera rezmatga nehu'za, zamazeri haviza nehzanki, ina vaheku knare vahera mani'ne huta antahimigahune. **17** Ama mopafima mani'naza vahe'mota tamagri'ma tamazeri tamagogofe'nia zamo'ene krifumo'ene kukomo'enena tamazerinaku tamavega ante'naze. **18** Hagi knazama esania zamofo agasasankema nentahino koro'ma freno vania vahe'mo'a, kerifi uramigahie.

Ana hanigeno iza'o ana kerifinti'ma atiramino koro'ma fre'nia
vahera kukomo azeri antarako hugahie. Anami monamo'a
ruhagaro nehanigeno, ama mopamo'ma rigama anteno me'nea
tramo'a kaza hugahie **19** Ana nehanigeno mopamo'a kekokako
huno atamana huneraminigeno, mopamo'a rutragino vuno
eno nehanigeno, tusiza huno mopamo'a tore tore hugahie.
20 Anama nehanigeno'a ama mopamo'a, vahe'mo negi ti
ne'neno antifi omere emere hiaza nehuno, tusi'a zaho'mo mago
osi nonte zaho erigeno, masete otite hiaza hugahie. Hagi
ama mopafi vahe'mofo ke ontahi zamavu'zmavamo hanigeno,
mopamo'a evuramino mago'enena ete oraotigahie. **21** Hagi
ana knafina Ra Anumzamo'a anami monafima nemaniza havi
ankero vahe'ene, ama mopafi kini vahetamina zamazeri haviza
hugahie. **22** Ana nehuno murigampi vahe zamavare vazi'za kina
huzmantazaza huno, Ra Anumzamo'a magopi zamavare atru
huno kina huzmantegahie. Ana hanige'za zazate manitesnageno,
henka knazana zamigahie. **23** Hagi ikamo'a kizmankizma
nehanigeno, zagemo'a agazegu hugahie. Na'ankure Monafi
sondia vahe'mofo Ra Anumzamo'a Saioni agonafi Jerusalemi
kumate kinia emanino vahera kegava hugahie. Ana hanigeno
Agri masazamo'a, Jerusalemi kumate ugota kva vahe'amofo
zamavuga me'nesnige'za kegahaze.

25 Ra Anumzana kagra nagri Anumzanki'na, nagra kagika'a
ahentesga nehu'na, musenkase hu'na susu hugantegahue.
Na'ankure kagra korapa retro huntenga huvempa hu'nana
kante amage antenka, so'e kavukvara hunka hentofa zana tro
hunerantane. **2** Kagra ranra kumatamina eri haviza hankeno
kugusopamo hihi hiaza nehigenka, hankave vihuma hu'naza
ranra kumatmina eri haviza nehunka, meg'i'a vahe'mokizmi

ranra kumara eri haviza hananke'za ete'za ana kumara eri
orati'za onkigahaze. 3 E'ina hu'negu hankave vahe'mo'za Kagri
kagi'a ahentesga nehanage'za, kefo zamavu'zmavama hu'za
osuga zama nehaza vahe'mokizmi ranra kumapima nemaniza
vahe'mo'za Kagrikura tusi koro hugahaze. 4 Na'ankure Kagra
zamazama hugama osaza vahe zamaza nehunka, zamunte
omane vahe'ene keonke zanku'ma atupa nehaza vahe'mokizmia
kegava hunezmanenka, komopa komo'ma zamazeri havizama
nehia vahera Kagra nonkna hunka refitenezmanenka, amuho
knafina turunara hunezmanthane. Na'ankure hazenke vahe'mo'za
tusi ununkomo'ma nehiaza hu'za neazagenka reso hunerantane.
5 Ru kumateti vahe'mo'zama feru zagemo tusi amuho hiaza
hu'za, tazeri haviza hunaku hu'nazanagi, hampomo zagemofoma
reso higeno hankave'a omaneaza hunka resohurantake'za,
kefo zamavu'zmavama nehaza vahe'mo'za ha'ma hugate
nere'zama nehaza zagamera osu'naze. 6 Hagi Monafi sondia
vahe'mofo Ra Anumzamo'ma, ama Saioni agonare'ma ne'zama
retro'ma haniana, knare'ma hu'nesnia afu ame'ane, zaza knafima
retroma huntazageno knare zantfama hu'nesnia waini tine retro
hanige'za, kokankokama mani'naza vahe'mo'za eme eritru hu'za
tusi'a ne'za negahaze. 7 Hagi maka ama mopafi vahe'ma
frizamo'ma refi'matenezmantea zana, Ra Anumzamo'a ama
Saioni agonare eri atregahie. 8 Hankavenentake Ra Anumzamo'a
fri'zamofo hankavea eri haviza hutrenigeno vaga nerena, maka
vahe'mokizmi zamavunura eri ho'mu hugahie. Ana nehina
Agri naga'ma ama mopafima zamazeri havizama nehaza zana
anara osugahaze. Ra Anumzamo ama'na kea hu'ne. 9 Hagi
ana knafina amanage hugahaze, Ra Anumzana tagri Anumza
mani'negeta Agrite tamentintia nehuta avega ante'nonane. Ana

hu'neanki otinketa Agrama tagu'vazino etema tavre'nea zankura
musena huntamnenno hu'za hugahaze. **10** Ra Anumzamofona
hankavenentake azamo'a Saioni agona kegava hugahie. Hianagi
Moapu vahera Agra'a agiafi zamazeri atre'nige'za, ha' vahe'mo'za
e'za ha' eme huzmante'za, zamazeri haviza hanage'za, bulimakao
afu'mo hagege trazante rifa'a agiareti rehapa hiaza hugahaze.
11 Ana hanige'za timpima zamazama rutare'zama zanagoma
nerazaza hugahazanagi Anumzamo'a zamavufaga rama nehaza
zane, vahe'ma rezmavatgama nehaza zana eri fenkami atregahie.
12 Ranra kuma zamimofo zaza vihu kegina'zamia, eri haviza
hanigeno, faragu vaziramino mopafinke kugusopa segahie.

26 Hagi ana knama efore'ma hanige'za, Juda mopafima
nemaniza vahe'mo'za ama zagame hugahaze. Rankumatimo'a
hankaveti'ne hu'za hugahaze. Ra Anumzamo'ma tagu'ma nevazia
zamo'a hankave kuma keginagna huno kegava hurantegahie.
2 Rankumamofo keginare kafantamina anagita eri hagaro
hinke'za, fatgo veamo'za efreho. Ana maka zupa Anumzamofona
amagenentaza vahe mani'naze. **3** Hagi maka zupa Kagrikuma
antahintahima nehia vahe'mofona, knare zamarimpa frua
nezamine. Na'ankure Kagrite zamentintia nehaze. **4** Ra
Anumzamofonku maka knafina antahi nemita tamentintia Agritera
hanune. Na'ankure Ra Anumzana tagri Ra Anumzamo'a mevava
hanavetia Agrake mani'ne. **5** Hagi zamavufaga rama nehaza
vahera zamazeri fenkami netreno, rankumazmia ahe pasru higeno
mopafi evuramino kugusopase'ne. **6** Hagi zamunte omne'ne
vahe'ene, knazama e'neriza vahe'mo'za, zamagiareti rentrako
hu'za rankumamo'ma haviza higeno kugupama me'nefina
vano nehaze. **7** Hagi fatgo vahe'mo'zama vanoma nehaza
kamo'a pehe hu'nege'za kana nevazagenka, fatgo vahe'mo'zama

vanoma hanaza kana Ra Anumzamoka erinte fatgo nehane.
8 Ra Anumzamoka tagra Kagri kasegemo'ma hihoma hu'nea
kante amage nenteta kavega nentone. Ana nehuta Kagri
kajima ahentesgama huzankura tagu'areti tavesinentone. **9**
Kenagera nagu'amo'a tusiza huno kavesinegantegeno, nanterana
avamunimo'a kagrane manisia zankura tusiza huno ave'nesie.
Hagi kagrama fatgo hunka'ma refko'ma nehana kavukvazamo'a
ama mopafina me'nege'za, fatgoma huno mani avu'ava zana ama
mopafi vahe'mo'za rempi hu'za nentahize. **10** Hianagi kefozama
nehaza vahe'ma kasumantagi nezmantanke'za, fatgoma huno
mani avu'ava zana rempi hu'za nontahize. Fatgo vahe'ma
nemaniza mopafi mani'nazanagi, kefo avu'avaza huvava hu'za
nev'u'za, Kagri hihamu hankaveka'agura zamagesa nontahize.
11 Ra Anumzamoka Kagra kazana erisga hunka zamazeri
haviza hunaku nehananagi, zamagra anzana nonkaze. Kagra
zamazeri zamagaze nehunka, vaheka'ama tusizama hunka
kavesi nezmantana zana erinte ama hananke'za negesnagenka,
ha' vahekama te fanane hanie hunkama retro'ma hunte'nana
tevemo ana vahera te fanane hugahie. **12** Ra Anumzamoka
Kagrake'za tarimpa frua tagrira neramine. Na'ankure maka zama
nehuna zana Kagri hankaveretike nehune. **13** Ra Anumzana tagri
Anumzamoka, ru vahe'mokizmi kva vahe'mo'za tagrira kegava
hurante'naze. Hianagi Kagri kagige husga hunegantone. **14**
Hagi fri'naza vahe'mo'za kasefara hu'za omanisageno, fri'zama
vu'namo'za ete oraotigahaze. Kagra zamazeri haviza nehunka,
zamazeri fenkami atranke'za haviza hu'naze. Zamazeri fanene
hanke'za vahe'mo'za zamagekani nezmante'za, zamagesa antahi
nozamize. **15** Hianagi Ra Anumzamoka mopatia eri ra nehunka,
tazeri rama'a nehunka, mopatimofo ometre emetrema hu'nea

agema'a miko erira nehunka eri za'za nehanketa, Kagrira rankagi negamune. **16** Ra Anumzamoka, kagra vahekama zamazeri havizama hanke'za hankavezamia nomane. Hianagi zamagra zamasunku nehu'za, ete kagrite e'za sumisumi hu'za nunamuna Kagritega hu'naze. **17** Hagi amu'ene hu'nea a'mo mofavre kasente'naku nehuno ata negrigeno maseno rukrahe krahe nehuno krafa nehiaza huta, Ra Anumzamoka kagri kavurera tusi'a knaza enerita tatazanku hu'none. **18** Hagi tagranena tamu'ene hu'neta tata negrigeta rukrahe krahe nehunanagi, zaho kasente'none. Ana nehuta ama mopafi vahera zamagura novazune. Ana higeta ama mopafima manisaza vahera kase ozmante'none. **19** Hianagi Kagri vahe'mo'zama fri'nafintira oti'sageno, zamavufagamo'a kasefa hanige'za manigahaze. Hagi fri'za kugupama se'naza vahe'mo'za oti'za muse zagame hugahaze. Na'ankure nanterama osi ata ko neriaza hunka ama mopa ru kasefa nehunka, fri'naza vahera fri'nafintira zamazeri otinka zamasimura zamigahane. **20** Nagri vahe'mota nontamifi unefreta, tamefira kafana erigiho. Osi'a knafi frakita mani'enkeno Anumzamofo arimpa ahe'zamo'a evino. **21** Keho Ra Anumzamo'a agrama nemania kuma'afinti atiramino, ama mopafima nemaniza vahe'mokizmi kumi'mofo nona huno zamazeri haviza hunaku ne-e. Hagi mago'a vahe'mo'ma vahe'ma aheno eriragi'nesnia korana ama mopamo'a erinte ama hugahie. Iza'zo ra hazenkema hu'nesnaza vahera zamazeri ante ama hanige'za kegahaze.

27 Hagi ananknafina hagerimpi vanoma nehia osifavegu'ma Leviataniema nehaza osifavea Ra Anumzamo'a hankavenentake huno asanenea bainati kazima vahe'mofoma amanoviziga bainati kazinu hagerimpima vanoma nehia osifavea ahe frigahie. **2** Hagi ana knafina knare waini hozagura amanage huno zagamera

hugahie. 3 Nagra Ra Anumzamo'na ana waini hoza kegava
nehu'na, mika zupa tina ami vava nehu'na, vahe'mo'ma eno emeri
haviza hu'zankura zagine haninena kegava huvava nehue. 4 Hagi
menina ana waini hozagura narimpa ahenontoe. Hagi Nagrama
kesnugenno havi trazamo'ene ave've trazamo'ma ana hozafima
hageno marerisnige'na, ha' huzmantena zamarehapatitena ana
trazana tevefi hanavazi'na kre fanane hugahue. 5 Hianagi
nagriku'ma kegava hunantegahie huno'ma hania vahe'mo'a,
Nagrane arimpa fru huno nemaniankino, e'i anamo'a tamage
huno nagrane arimpa fru huno manigahie. 6 Hagi mago kna
neankino ana knama esanige'za, Jekopu naga'moza waini
zafamo'ma hiaza hu'za rafuna nere'za, agata hage'za amosare
ahe'za raga ahentesagano maka ama mopafina avitegahie. 7
Hagi Ra Anumzamo'a Israeli vahe'mokizmi ha' vahe'ma zamazeri
haviza hu'neaza huno, Israeli vhahera zamazeri havizana nosuno,
Israeli nagamokizmi ha' vahe'ma zamahe fri'nea zana huno,
Israeli vhahera zamahe nefrio? l'o, anara nosie. 8 Ra Anumzamo'a
naga'a arimpa ahezamanteno zamatrege'za vu'za vahe moparega
kina ome hu'naze. Agra arimpa ahenezamanteno, zage hanati
kazigati hankave zaho atufeno eno maka'za eri harafi huno
viazza huno zamazeri harafi huno vu'ne. 9 E'ina hu'negu
(Jekopu) Israeli vahe'mokizmi kefozamo'ene kumi'mo'enema
vagamaresniana magoke kanke me'ne. Havi anumzante'ma
ofama nehaza have ita ru tamana tamanu nehu'za, Asera havi
anumzamofo amema'ama zafarema antrente'nezama mono'ma
hunentaza kumatamina eri haviza nehu'za, mnanentake'za
insensima kre manama nevaza ita ru tamana tamanu hutreho.
10 Na'ankure hankavenentake vihuma me'nea kumamo'a menina
haviza huno me'ne. Ana higeno ana kumapima nemaniza

vahe'mo'za koro fre'za omanizageno, mago ka'ma kokankna higeno anampina bulimakao afu anentamo'za emanine'za traza nene'za, ne'onse zafamofo ani'naramina vatari'za nevaga neraze.

11 Hanki ana zafa azankuna tamimo'ma hagegema huteno'a hantagino mopafi evu neramige'za a'nemo'za zogi'za tevefi krazageno nere. Na'ankure ana vahe'mo'za ke ontahi vahe mani'naze. E'ina agafare azeri fore'ma hu'ne'mo'a zamasunkura huozmantegahie. Ana hu'neankino tro'ma huzmante'nea ne'mo'a asunkura huno zamatresnige'za omanigahaze. **12** Hagi ana knafina Ra Anumzamo'a maka mopafima Israeli vahe'ma mani'nazana zamavare tru hugahie. Yufretisi tinteti agafa huteno vuno, Isipi tinnenarega vanigeno, vahe'mo witi refuzafupeno zogiazza huno vahe'a magoke magoke zogi tru hugahie. **13** Hagi ana knafina ufemo'a rankrafage nehanigeno, Israeli vahe'ma Asiria mpare'ene Isipi mpare'ma vu'za kinama ome hu'naza vahe'mo'za Jerusalemi kumate e'za Ra Anumzamofona ruotage'ma hu'nea agona'are monora eme huntegahaze.

28 Tasunku hugantone. Efraemi naga'mo'zama nemaniza rankumamoka, knare'hare kavasase zankamo nehigenka mani'nanke'za, Efraemi naga'mo'za aka ti nene'za zamavufaga erisga nehaze. Hagi ana rankumamoka tra'zamo knare avasase renteaza hunka, agona kaziga knare agupo mopafi hentofa waini hoza ante'nane. Hianagi kavufgama erisgama nehana zana, mago zupa zagemo traza te vamagiazza hunka haviza hugahane. **2** Hanki ko, Ra Anumzamo'a hankavenentake sondia vahera ko huhampri'neankino ana vahe huzmantesige'za e'za tusi ko'mopa komo'ene tusi'a zahomo'ene timo'ene hageno refiteaza hu'za ame hu'za zamahe'za mopafi refitegahaze. **3** Hagi Efraemi naga'mozama

aka tima nene'za, Sameria kumaku'ma zamimizama runafe'ma
nehaza vahera ha' vahe'mo'za zamagiareti eme rentrako hu'za
zamare hapatigahaze. **4** Hagi kagra knare agona mopafi flauamo
avasase zama'ane me'neankna hunka mani'nane. Hianagi zafa
raga tagi knama zahufama ome'negeno, ame huno mago fiki zafa
ragamo afure'negeno, mago vahe'mo keteno ame huno tagino
neankna hugahaze. **5** Hanki ana knafima osi'a naga'ma ofri'ma
manisnaza nagatera Monafi sondia vahe'mofo Ra Anumzamo'a
zamasenire'ma kini fetorima avasasezama anteaza huno Agra'a
manigahie. **6** Ana nehuno trate'ma mani'neno kema refkoma
hanimofona, fatgoma huno kema refko hu avamu Anumzamo'a
nemino, hankavemati'za ha'ma hu'za kuma'ma aguvazisnaza
sondia vahera hankave zamisige'za kuma kafantera otigahaze.
7 Hagi kasnampa vahe'ene pristi vahe'mo'za zamagranena waini
tine aka tine nene'za tusi neginagi nehu'za, umasete emasete
hu'za kana nevaze. Hagi Anumzamo'ma zamaveri'ma nehia
kasnampa vahe'mo'za keso'ea nosazage'za, pristi naga'moza
vahe'mokizmi knazama refkoma hazafina kezmifina hantga
nehaze. **8** Hagi mani'naza tratera amu'mati'naza zamo avitegeno,
magore huno amne kankamuna omanetfa hu'ne. **9** Ana
vahe'mo'za amanage nehaze, agra iza antahi'zana rempi
hunemino, naneke'a izante eri ama huno asaminakura nehuno,
iza aminte osi mofavrea mani'nea mofavremofo asaminakura
nehie hu'za nehaze. **10** Agra maka zupa ana nanekege'za
nehie. Mago ne'mo'ma osi mofavremofoma eri amatfa huno
osite osite isare isare, trate trate e'ina huo huteno, amana
huo huteno'ma hiaza nehie. **11** Ana hu'negu Ra Anumzamo'a
ru vahe zamagipi huvazino, ontahi'nesnaza zamagerupinti
vahe'amofona nanekea huzamigahie. **12** Hagi ana vahekura

Anumzamo'a amanage huno zamasami'ne, ama kumara mani
fruhu kumaki, zamatrene'za knazama eneriza vahe'mo'za mani
fru hiho. Hianagi ana kea ontahi'naze. **13** E'ina hu'negu osi
mofavrema rempi hunezamizaza huno, Ra Anumzamo'a agra'a
eri amatfa huno isare isare, trate trate e'ina hiho huteno, amana
hiho huteno osite osite fru huno kea nezmasamina zamefira
rukrahe hu'za traka hu'za hazenke eri'za mase'nesage'za
eme zamazeri'za vugahaze. **14** E'ina hu'negu Jerusalemi
rankumate'ma mani'netama ki'za zokago kema nehaza kva
vahera Ra Anumzamofo nanekea antahiho. **15** Na'ankure tamagra
amanage hutma nehaze, tagra fri'zane huvempa nehuta, fri vahe
kuma'ene keaga huhagerafi'none nehaze. Hagi henka knazama
esania knazamo'a, tavakora osugahie. Na'ankure tagrama
havigema nehuna kemo, tagu'vazina manigahune nehuta,
vahe'ma rezmatgama nehuna zamo frakirantegahie huta
nehaze. (*Sheol h7585*) **16** E'ina hu'negu Ra Anumzamo'a amanage
huno nehie, Antahiho, noma renagentete'ma asenentaza havea
hanavenentake higeno zago'amo'a mareri'nea havea Saioni
agonare asente'noankino, iza'o ana havere'ma amentintima
hanimo'a agazegura huno antahintahi hakarea osugahie. **17** Hagi
fatgoma huno kema refkohu avu'avara, kema refkoma hu'za
nente'na, fatgoma huno refkoma hu avu'ava zana, fatgoma huno
refkoma hu'za antegahue. Ana hanugen havigema nehu'za
framanekiza kumazmia, tusi ununko'mo runo tina hageno
eno emeri haviza huno vugahie. **18** Hagi ofrigahunema huta
fri'zanema huvempama hu'naza nanekea eri atresugeno, fri
vahe kuma'enema huhagerafi'naza nanekemo'a amne zankna
hugahie. Ana nehanigeno henkama esania knazamo'a, eme
tamazeri haviza huno tamare hapatigahie. (*Sheol h7585*) **19** Ana

knazamo'a tamagerfa huno tamatreno ovuno, hanine zagine
maka knafinena tamagrane meno vugahie. Hagi ama ana kemofo
agafa'ama antahi ama'ma hanutma antri nehutma tamagogogou
hugahaze. **20** Hagi mase sipamo'a atupa higeno, kofino'ma
mase kafe'mo'ma atupa hu'negeno vahe'mo kenage mase so'e
nosiaza hutma mase so'ea osugahaze. **21** Na'ankure Perasimi
agonafine, Gibioni agupofima ko'ma hu'neaza huno hankave'ane
Ra Anumzamo'a eno eri'zama'a erigahuema huno hu'nea
eri'zana emerigahie. Hianagi ana eri'zama erisniana tamagrama
antahi'naza kantera e'orino, ruzahu kna eri'za erigahie. **22** E'ina
hu'negu kiza zokago kema nehaza zana atreho. Hagi anama
osnazana ko'ma mani'naza avamena agatereta tusi'a knazampi
ufregahaze. Na'ankure Ra Anumzana Monafi sondia vahe'mofo
Anumzamo'a, ama maka mopa eri haviza hugahue huno hu'nea
naneke nehue. **23** Hagi menina tamagesa ante so'e hu'neta,
nagrama hanua nanekea antahiho. **24** Hagi magora hozama
nentea ne'mo'a hozama ante'nakura mopage'za rehankori
vava huno nevifi? Anara nehuno mopage'za rupopo huvava
huno vugahifi? **25** Hagi mopama rehankorino eri ante fatgoma
huteno'a, anampina haninke mepo nehankreno, witia kankamunte
erinte fatgo huno nehankreno, balia kankamu'are nehankreno,
hozamofo ankinarega raisia kri kanegiaza me'ne. **26** Hozama
erinte fatgoma huno ante antahintahia Anumzamo'a rempi
hunemie. **27** Hagi haninke mepo'a, witima refuzafumanepoa
zafaretira, refuzafuranope. Witima refuzafupe zafama donki
afumo'ma renteno vano nehia zafaretira kohera refuzafunope.
Hianagi mepoma amasaginakura osi kanonteti nemasagino, ra
kanontetira nomasagiaza me'ne. **28** Hagi witi raga refuzafupeno
bretia tro nehie. E'ina hu'negu zazatera refuzafupe vava

osugahie. Na'ankure hosi afutema rentesia karisiretimawitima
zazate'ma refuzafumapeniana haviza hugahie. 29 Hagi ana
maka eri'zama eri antahi'zana, Monafi sondia vahe'mofo Ra
Anumzamofontegati ne-e. Vahe'ma azeri fatgoma hu kaziga
knare hu'neno, knare antahi'zampina avite'ne.

29 Ra Anumzamo'a amanage hu'ne, Arieli kumamoka kva huo,
Arieli kumamoka Devitima kumama eme ante'noma mani'nea
kuma me'nane. Hagi kafugu kafugu'ma musenkasema hu
nezama krenka nenana zana hvava hunka vuo. 2 Nagra
Ra Anumzamo'na knaza atresugenno Arieli kumamokarega
egahie. Ana hanuge'za kagripima nemaniza vahe'mo'za
tusi zavi krafa hugahaze. Anama hanaza zamo hanigenka
kagra Arieli kumamoka kresramna vu itani'agna nagritera
hugahane. 3 Nagra ha' vahera huzmantesuge'za e'za
eme miko asoparegati kavazagi kagigahaze. Ana nehu'za
mani'nezama ha'ma hugantesnaza zana, kuma keginamofo
tvaontera mopa kate'za erinte hihi hanageno marerisige'za,
zaza no kiza mareriza manine'za hara hugantegahaze. 4
Hagi kagrira mopafi kazeri fenkamu atresnagenka kamuragufati
kugusopafi mase'nenka anampinti sumisumi ke hugahane.
Kagerumo'ma kugusopafinti'ma osi'osi'ma huno esania zamo'a,
mago hankro'mo mopa agu'afinti keaga hiaza hugahie. 5 Hianagi
ha' vahekamo'za tusi'a kugusopagna hu'za tusi'a vahe'mo'za
hara eme hugantegahaze. Hagi kema ontahi'za hazenkema eri
hakarema nehaza sondia vahera mago hankave zaho'mo witimofo
hona'a eri harafi huno viaza hu'za ame hu'za vugahaze. 6 Nagra
Monafi sondia vahe'mofo Ra Anumzamo'na mona kereti'ene,
iminti'ene tusi'a agasasane zahoteti'ene ununkoteti'ene maka'za
te fanane hu tevereti'ene hu'na zamahe fanene hugahue. 7

Hagi ru moparegati tusi'a sondia vahe e'za Arieli (Jerusalemi)
kumara eme avazagi kagine'za, fraki'za nemaniza ha'ma eme
hunte'za azeri havizama hanaza zamo'a, kenage'ma ava'na
keaza hu'za eme zamazeri haviza hute'za omanigahaze. **8**
Anahu kna huno mago agazanku nehia ne'mo mase'neno ava'na
keana, ne'za neneno ke'neanagi, o'matiana aga zamo'a vaga
noregeno, tinku ave'nesia ne'mo mase'neno ava'na keana,
ti neneno ke'neanagi, otiana tinku ave'nesigeno traka huno
mase'ne. Maka moparegati tusi'a sondia vahe'ma e'za Saioni
agonamofoma ha'ma eme hunte'naza vahetera e'ina huknaza
fore hugahie. **9** Hanki antri nehuta antahintahi hakare nehuta,
tamavu sukita tamavu asuhu vahekna huta maniho. Tamagra
waini tima nenaza vahe'mo'zama nehzaza huta neginagia
hunazanagi, aka tina one'naze. Tamagra umasete emeset
huta traka traku hu'nazanagi, aka tina one'naze. **10** Na'ankure
Ra Anumzamo avu mase avamu huntesigeno tamagritera
egahie. Ana hanigeno kasnampa vahe'mokizmi zamavua erisu
nehuno tamaßenirera rufitegeta kega'zana onke'naze. **11** E'ina
hu'negu Ra Anumzamo'ma eri kaveri'ma higenkama kenanana,
fuki rekamarente'naza avontafe knaza me'negenka ke'nane.
Ana hunesigeno mago vahe'mo erino avoma nehamprisania
vahe nemino hamprion hanigeno'a, a'o fuki rekamare neanki'na
eri vakare'na hamprigara osu'noe huno hugahie. **12** Hagi
ana'ma hutena avoma nohamprisnia vahe'ma ana avontafe'ma
eri neminka, ama avona hamprioma hanankeno'a, nagra
avoma hampri'zana ontahi noanki'na ohamprigahue huno
hugahie. **13** Hanki Ra Anumzamo'a amanage huno hu'ne,
ama vahe'mo'za kereti'ene zamagiteti hu'za nagia ahentesga
nehzaze. Hianagi zamagu'amo'a nagritera omane afete me'ne.

Nagri'ma antahi'namiza mono'ma hunenanta zana vahe'mo'zama
ante'naza kasege amage ante'za monora hunenantaze. **14**
E'ina hu'negu nagra mago'ene hentofaza zamagritra eri
fore hanuge'za kegahaze. Anama nehu'na knare antahi'zane
vahe'mokizmi antahi'zana eri netre'na, antahi zane vahe'mokizmi
antahi'zana eri atregahue. **15** Hagi havi zamavu'zamava'mahu
antahintahima eri franeki'za, mago vahe'mo'a tageno antahino
osugahie hu'za nehu'za Ra Anumzamofo avure franekune hu'za
nehaza vahe'mo'za kva hiho. **16** Tamagra miko zana eri rukrahe
nehaze. Hagi mopa kavoma tro'ma nehia ne'mo'a, mopagna
hu'ne nehaze. Hagi mago zama tro'ma hunte'nesnia zamo'a,
azama avako'ma huno tro'ma hunte'nesnia venafona, asamino
kagra trora nagrira huonte'nanema haniana, e'i knare hugahifi?
Hagi mopa kavoma tro'ma hu'nesnia ne'ma, mopa kavomo'ma
asamino kagra mago'zana ontahi'nanema huno haniana, e'i
knare antahi'zana e'origahie. **17** Hagi osi'a knafi Lebanonon zafa
tanopamo'a rukrahe huno masavenke hoza mopa fore hugahie.
Ana hanigeno hozamo'a tretre huno zafa tanopagna hugahie. **18**
Hagi e'i ana knafina zamagesa ankanire vahe'mo'za avontafepi
me'nea nanekema hamprisnazana antahigahaze. Hagi zamavu
asuhi vahe'ma tusi'a hanimpima mani'naza vahe'mo'za ruhari
hu'za ete zamavua kegahaze. **19** Vahe'mozama zamazeri
havizama nehaza vahe'ene keonke zanku'ma atupa'ma nehaza
vahe'mo'za, Ra Anumzana Israeli vahe'mokizmi ruotage'ma
hu'nea Anumzamofona musenkase hunte'za agi'a erisga
hugahaze. **20** Hianagi kema ontahi'za hazenke'ma nehaza
vahe'ene, Anumzamofo kegu'ma kiza zokago kema nehaza
vahera fanane hu'za omanigahaze. Ana nehanage'za kefo
zamavu'zmava huzankuke'ma nehaza vahe'mo'za tamage

hu'za fanane hugahaze. 21 Hagi vahe'ma havige huzmante'za keagafi zamavare nente'za, hazenkema hu'naza vahe'ma havige hu'za keagafima zamaza nehu'za, fatgo vahe'ma keagafima zamavarenentaza vahe'mo'za ana zanke hu'za knazana erigahaze. 22 E'ina hu'negu Abrahamuma agu'vazino avre'nea Ra Anumzamo'a amanage huno Israeli vahekura nehie, tamagra Jekopu agehe agehemota tamagazegura nosinkeno tamavugosamo'a evuoramino. 23 Hianagi Nagri nazanko avoma agri mofavre naga'ma amu'nompima mani'naza vahe'ma negenu'za, Nagri nagimo'a ruotge hu'ne nehu'za, Jekopu Anumzana ruotage hu'ne nehu'za, Israeli vahe Anumzamofona koro hunte'za agorga manigahaze. 24 Hagi antahintahi zamimo'ma hazama negrea vahe'mo'za tamage nanekea antahi ama' hugahaze. Hagi ke hakare nehu'za ke ontahi vahe'mo'za e'ina hihoma hu'na rempima huzamisnua kea amage antegahaze.

30 Ra Anumzamo'a amanage huno hu'ne, ke ontahi mofavre nagani'a Juda vahera haviza hugahazanki kva hiho. Nagri kea nontahita tamagra'a kea retro nehutma, meg'i'a vahe'ene kea ome eri hagenerafize. Hianagi Nagri Avamutegatira nome. E'ina nehuta kumira tamagra'a tamavufare eri agofetu agofetu nehaze. 2 Nagrira nantahige'za nanekea e'nori'za, Isipi moparega zamazahu vaheku hake'za Isipi kini ne' Ferontega unerami'za, Isipi vahe kvafi mani'naku nevaze. 3 E'ina hu'negu Fero'ma kegavama huramantesnia zamo'a, tusi tamagaze'za fore hugahie. Isipi kini ne'mo'ma kegava hurantesie hutama amuha'ma hanazana tamagazegu hugahaze. 4 Na'ankure Juda mopare'ma ugota hu'naza kva vahera Zoani mani'nazage'za, eri'za vahe'amo'za Hanesi kumate vu'haze. 5 Hianagi Juda naga'moza tusi

zamagazegu hugahaze. Na'ankure Isipi vahe'mo'za mago knare
zana hu'za zamaza nosu'za, zamagaze eri nezami'za zamazeri
fenkami atregahaze. **6** Hagi ama nanekea sauti kazigama Negevi
ka'ma kokampi nemaniza afizagaramimofo naneke. Tamagra
Juda kva vahe'mota donkine kemoli afu'mofo agumpina fenozana
erinteteta, tamaza huga'ma osu'naza vahetega musezana erita
hagege kokampina nevaze. Hagi ana kokampina hazenke
eriga koka me'negeno, laionima, ha' osifa'vema, agekona hunte
osifavemo'ma avite'nea kokampi nevaze. **7** Isipi vahera tamaza
hugahune nehu'za, havige nehaze vahe mani'naze. E'ina hu'negu
Isipi kumakura, mago zama'a omaneno, hagerimpima nemania
zagagu'ma Rehapan'e nehaza tusi zaga mani'ne hu'na nehue. **8**
Hanki Ra Anumzamo'a vahe'agura nasamino, Zamagrama haza
zamavu zamavakura menina vunka avontafepine, have tafete'ene
ome krento. E'ina hu'nesnankeno ana nanekemo'a mevava huno
nevuno, henka'anena keaga huzmanteno vino huno hu'ne. **9**
Na'ankure zamagra ama ana vahera ke ontahi vahe mani'ne'za,
havige mofavre naga nemani'za, Ra Anumzamo'ma rempima
huzamia nanekea amage'ma ante'zankura zamavesra nehia vahe
mani'naze. **10** Ana nehu'za zamagra ava'nama negaza vahekura
ava'na onkeho hu'za nehu'za, kasnampa vahekura mani fatgoma
huta manisuna zankura kasnampa nanekea orasamiho huza
nehu'za fru nanekege nerasamita, havige kasnampa kege
tasamiho huza nehaze. **11** Hagi tagri kana rehiza osutma,
ogantu afete maniho nehutma, Israeli vahe'mofo Ruotage Ra
Anumzankura erava'o huta orasamiho nehaze. **12** E'ina hu'negu
Israeli vahe'mofo Ruotage Ra Anumzamo'a amanage huno
hu'ne, Tamagra Nagri nanekea eri netreta, hazenke avu'ava'ene
havige kegura taza hugahie hutma amuhara nehaze. **13** E'ina

hu'negu tamagra kumi hu'nazankino, ana kumi'mo'a zazate
mareri agatere'nea keginamofo asenire osi ka fore huteno, ana
kamo omera hume vuno ranka fore higeno keginamo ame huno
faragu vaziaza huno, ana kumimo'a tamazeri havizantfa hugahie.

14 Hagi ana havizama hanaza zamo'a, vahe'mo'zama mopa
kavoma rufuzafupea kna hu'za haviza hugahaze. Hanageno ana
kavofima tevema nerefintira tevea erinonteta, tinkerifintima tima
ofiankna huta tamagra havizantfa hugahaze. **15** Israeli vahe'mofo
Hankavenentake Ruotage Ra Anumzamo'a amanage huno hu'ne,
Tamagrama tamagu'a rukrahe hutma nagrite'ma eta tamarimpa
frunema mani'sanuta tamaguvazi zana erigahaze. Nagra
kegava huramantegahue. Hanki tamagrama akoheta mani'neta
Nagri'ma antahi namisnazana, Nagra tamazeri hankavetigahue.
Hianagi tamagra ke'n'i'a antahinamita amagera nonteta, **16**
anage nehaze, Tagra agareno nevia hosi afu'mofo agumpi
mani'neta, koro freta vugahune huta nehaze. E'ina hu'negu
tamagri'ma tamarotago'ma hanazana ame hu'za tamavaririza
tamefira vugahaze. **17** Magoke ne'mo'a amne 1 tauseni'a
vahera zamarotago hanige'za korora fregahaze. Hagi ha' vahe
kazigati'ma 5fu'a vahe'mo'zama e'za eme kezankema hanage'za
ran kumapima mani'nesaza vahera ana maka'mo'za kumara
atre'za koro fregahaze. Ana hanageno agonafi (fleki) krauefa
rententaza zafa atrazageno zafa rampage otiazza huno, kumapina
vahera omanigahie. **18** Ana hu'neanagi Ra Anumzamo'a
arimpa fruzane asunku zana tamagrite eri ama hunaku tusiza
huno avenesigeno tamavega anteno mani'ne. Na'ankure Ra
Anumzana fatgo avu'avaza hu Anumza mani'ne. Hagi agrite'ma
zamentintima nehaza vahemota muse hugahaze. **19** Hagi
Saioni vahe'ma Jerusalemi rankumapima menima mani'naza

vahe'mota, tamasunkura hutma zavira otegahaze. Tamagrama
zavi netesageno Anumzamo'ma nentahisuno'a tamagerfa
huno asunku huramanteno tamaza hugahie. 20 Tamage
Ra Anumzamo'a nezankna huno knazana neramino, tinkna
huno hazenkea tamigeta havizantfa hu'naze. Hianagi rempima
huneramia vahe'mo'a amate tamagrane mani'nesanigeta,
tamavufinti kegahaze. 21 Hagi kama nevanafinti'ma atretma
ufrete efrete'ma nehanageno'a, tamefi mani'neno amanage
huno tamasamigahie. Kana ama me'neanki, amare viho huno
hugahie. 22 Anama hanigeta silvareti'ene golireti'ma eri
anoma vazinoma tro'ma hunte'nea havi anumzantamimofo
amema'ama, mago agru osu'noma pehanagezama matevu
atreaza huta matevu netreta, henka'ane ontamagesnunku tatreta
viho hutma hugahaze. 23 Hagi anama hanageno'a, hozafima
avimzama hankresnaza zantera, kora atrenigeno runtegahie.
Ana hanigetma hozafinti'ma ne'zama vasagesnaza knarera,
ne'zana vasagesnageno ne'zamo'a amporegahie. Hagi ana
knafina tamagri bulimakao afutamimo'za rama'a traza me'nesnifi
mani'ne'za trazana negahaze. 24 Hagi mopama rehankoneriza
bulimakao afutamine donki afutamina anom'a hare'za eri so'e
hu'nesaza witi raga'a zami'nage'za negahaze. 25 Hagi ana knafina
tamagri ha' vahera rama'a zamahe nefrisageno, za'za nonte'ma
mani'ne'za kuma'ma kegavama nehaza nomo'ma fragu vazino
evuneramina, mareri agatere'nesania agonaramimpinti'ene
ne'onse agonaramimpintira tintamimo hanatino egahie. 26
Hagi ana'ma hania knafina, ikamofo masa zamo'a zagemofo
masagna hanigeno, magoke zupa remsa hania zagemo'agi, 7ni'a
knafima remsama huvava huno viankna huno remsa hugahie.
Ra Anumzamo'a vahe'ama knazama zamino zamavufagama

ru tragama hu'nea zana, Agra'a anaki zmanteno zamazeri kanamregahie. 27 Hagi Ra Anumzamo'ma afeteti'ma neana keho. Rimpa ahezamo'a tusi tevenefakna nehigeno, tevegumpi ne-e. Ana nehigeno Agripina tusi rimpa ahezamo avinetegeno, mika zama te fananehu tevemo agefunafintira atineramie. 28 Hagi Anumzamo'ma asimu'ma antegeno'a, ti hageno makaza eri harafi huno vahe'mofo ananke avamente eviaza nehie. Ama mopafi vahera Anumzamo'a zamazeri haviza nehige'za, zamahirahiku nehaze. Hagi hosi afumofo agipi aini atupa rentete'za, ovuku'ma hazarega zamavare'za vazaza huno, Anumzamo'a antahi antahi'zamia zamazeri savri huno ovuku hanarega vanige'za ome haviza hugahaze. 29 Hianagi tamagra Ra Anumzamofo vahe'mota mono'ma hu knare'ma musema nehzaza huta muse zagame hugahaze. Ana nehuta konkema neraza vahe'mo'zama Ra Anumzamo'ma Israeli vahe'mokizmi fraki havema mani'nea agonare Jerusalemima nevazage'za musema nehzaza huta musena hugahaze. 30 Hagi Ra Anumzamo'a vahe'mokizmi zamagesa eri hagaro hanige'za, hankavenentake ke'zanke'a nentahisnageno, zamavua eri hari hanige'za zamaheku'ma erisgama nehia azana nege'za, arimpa he'zamo'ma mika'za teno eri fanane nehia tevegna huno'ma ne-ea zane monagemo'ma tusiza nehigeno komopa komo'ma faragu vaziramino'ma eneramia zana kegahaze. 31 Hagi Ra Anumzamofo ageru'mo Asiria vahera zamazeri zamagogo nefesigeno, Agra hegi kanonteti sefura zamigahie. 32 Hagi Ra Anumzamo'ma hegi kanonteti'ma Asiria vahe'ma mekizami mekizamima nehanige'za, ana kanomofo agerute ante'za agri vahe'mo'za zozopane hapu zavenane nehe'za eri verave korave nehanageno zamahegahie. 33 Hagi tevema hanavazi'za Asiria

kini ne'ma kresnageno tlesia keria, korapa retro hunte'haze. Hagi ana keria rankeri ofenkame kafiza urami'naze. Ana nehu'za ana kerifima kresnaza tevea rama'a harente'naze. Ana hu'neankino Ra Anumzamo Agra'a zaho'areti huhu hanigeno ana tevemo'a rukaru huno salfa havere tevea tagintegeno teaza huno agafa huno tegahie.

31 Hagi Isipi vahe'mo'za taza hugahaze hutma uneramita, hosi afumofo hankavegu'ene, Isipi vahe karisigu'ene, hosi afu agumpima mani'za nevaza hankave sondia vahe'ma mani'naza zanku'ma hutama nevaza vahera kva hiho. E'ina nehazanagi Israeli vahe'mofo Ruotage Ra Anumzamofona haketa nonketa, tamazama hanigura antahi nonkaze. 2 Hagi Ra Anumzamo'a agranena knare antahintahigu atupa osu'neankino, nazano hugahuema huno hu'nea ke'a amage anteno nehia nekino, havi zamavu zamava'ma nehaza vahe'mokizmi naga nofi'ene, ana havi zamavu'zmava'ma nehaza vahe'ma zamazama nehaza vahe'enena Agra zamazeri haviza hugahie. 3 Hagi Isipi vahera Anumzana omani'nazanki, ama mopafi vahetfa mani'naze. Hagi hosizmimo'a hosi mani'nazanki avamura omani'haze. Ana hu'neankino Ra Anumzamo'a azama erisga huno Isipi vahera zamazeri haviza nehuno, agripinti'ma zamazahu zama eneriza vahe'enena zamazeri haviza hanige'za haviza hugahaze. Ana hanigeke taregamokea omanike magoka fanane hugahae. 4 Na'ankure Ra Anumzamo'a amanage huno nasami'ne, koro zama'a omane'nea laionimo takaireno sipisipi afu aheno azerino tapage huno nenenigeno, agu'vaziku sipisipi afute kva vahe'mo'za kezankege nehazageno korora osiaza huno, Saioni agonare'ene agri tvaonte'ma megagi'nea agonaramintera Monafi sondia vahe'mofo Ra Anumzamo'a eramino hara eme

huzmantegahie. 5 Hagi namamo'ma noma'amofo agofetuma
hareno eme tafratafra'ma nehuno, noma'a avunteno kegavama
nehiaza hu'na, Nagra hankavenentake Ra Anumzamo'na
Jerusalemi kumara kegava huntegahue. Ana hu'ne'na maka
zupa navunte'na nege'na, agu'vazigahue. 6 Hagi tamagra
Israeli vahe'mota Ra Anumzamofona ha' renenteta atreta
vu'nazanki, ete rukrahe huta Agrite eho. 7 Hagi mago kna
ne-eankino ananknama esanigeta, kumike tamazanteti'ma
avako huta, silvareti'ene golireti'ma havi anumzantamima
tro'ma hu'naza zana, miko'mota matevu netretma tamefi
humigahaze. 8 Asiria vahera mago bainati kazimo zamahe
fanane hugahie. Ana bainati kazina mago vahe'mofo kazina
omne'neanki, Nagra Ra Anumzamo'na atresanugeno egahie. Ana
hanige'za ana bainati kazimofo koro hu'za nevnage'za, nehzave
nagazamia zamavarenage'za kazokazo eri'za erigahaze. 9
Zamagra tusi koro nehanageno hankave vihu zamimo'a, faragu
vaziramigahie. Ana nehanige'za sondia vahe zamire'ma ugota
hu'naza vahe'mo'zama ha'mofo avame'zama nege'za koro atre'za
fregahaze. Saioni agonarema tevema neregeno Jerusalemi
kumapima tevenefa'anema mani'nea Ra Anumzamo ama ana
nankeea huama hu'ne.

32 Hagi antahiho, mago zupa mago kini ne' efore huno fatgo
avu'avazanteti vahera kegava nehanigeno, kva vahe'amo'za
mago avamente ante'za vahera kegava huzmantegahaze.
2 Hagi mago mago vahe'mo'za tusi zahoku'ma ome fra'ma
neki'za kuma kna nehu'za, ununko'matigeno vahe'mo'zama ome
frama nekiza kumakna nehu'za, ti omane hagege kokampima
neonse tintami hanatino eankna nehu'za, ka'ma kokampi
ra havemo zage reso huntogeno turuna hunteankna hu'za

manigahaze. 3 Ana nehanige'za zamavufinti'ma kesnaza
vahe'mo'za zamavua kesu nokisnage'za, zamagesama ante'za
antahisnaza vahe'mo'za, antahi ankeregahaze. 4 Hagi antahintahi
osu ame hu'za nanazama nehaza vahe'mo'za, menina ama'
antahi'za eneri'za miko zampina refkohu so'e hugahaze. Ana
nehanage'za zamagi'mo'ma kna nehige'za keagama hu so'ema
nosaza vahe'mo'za keaga hu so'e hugahaze. 5 Hagi havi
vahe'ene neginagi zama nehaza vahe'ma ra zamagima nezamiza
zamo'a vaganerena, havi zamavu'zmava'ma hu'za eri'naza
zama vahe'ma nezmizage'za, husgama hunezmante'za ra
zamagima nezamiza zamo'a vagaregahie. 6 Na'ankure negi
vahe'mo'za neginagi naneke nehantagaze. Mika zupa kumi'ma
hu zankuke nehake'za, Ra Anumzamofona ave'osia avu'avaza
nehu'za, Anumzamofonkura rama'a havige nehaze. Ana nehu'za
zamagaku'ma nehaza vahera ne'zana nozami'za, tinku'ma
zamavesia vahera tina nozamize. 7 Hagi havige vahe'mofo
asenifina havi antahi'zamo avite'ne. Zamagra vahe'ma zamazeri
havizama hunakura, havige eri'za kankamu retro hu'za havige
kereti zamunte omne vahera rezmatga nehaze. Ana nehu'za
nanekere'ma otiza zupa, zamunte omane vahe'mo'za tamage
nehazanagi, zamagra havige hu'za keagafina zamazeri havia
nehaze. 8 Hianagi knare antahi'zane vahe'mo'za knare zanke
retro nehanage'za, vahe'mo'za antahi zamigahaze. Ana nehu'za
maka zupa anama retro'ma hu'naza antahizante oti hakaveti'neza
knare avu'ava zanke hugahaze. 9 Jerusalemi a'nemota, menina
noma mani zantamifina so'e huta mani'netma, tamagrama
antahi'zana anazanke huta manigahune hutma nentahize.
Hianagi menima hanua nanekere tamagesa anteta antahihio.
10 Menina mago'zana forera osigeta, so'e huta mani'naze.

Hianagi mago kafu huteta osi'a kna manita vanageno, grep
ragamo'a zahufafi harari huraminigeta ne'za raga'a oragigahaze.

11 Hagi mago zana fore osanigeta so'e huta manigahune
hutama nehaza a'nemota, menina antri huta koro nehuta,
kukenatamia tagato tagatu nehuta tamasunku kukena eri rugagita
masiho. **12** Knare nare hoza tamigu'ene waini hozatamigura
tamazana kofita tamasunku huta tamamizare nemasagita zavi
ateho. **13** Nagri vahe'mokizmi mopagura tamasunku huta
zavi ateho. Na'ankure ave'ave nofi'mo'ene havi tra'zamo ana
mopafina hageno pogigahie. Hagi musema huta nemaniza
nontamine, musema huta nemaniza ran kumamo'a omanegahie.
14 Na'ankure maka vahe'ma rankumapima mani avitene'zama
kegekege'ma hu'za vanoma nehaza zana atre'za fresnageno,
vahe kugoa origahie. Onagamu mesga hu'nege'za mani'neza
kuma kegava nehaza none, kini vahe nomo'a amne meno haviza
hanigeno, tonki afutamimo'za muse nehu'za anampina vano
nehanageno, sipisipi afu'mo'za anampina vano hu'za trazana
negahaze. **15** Ana huta mani nesnunkeno, Ra Anumzamo'a
Avamu'a eri tagitrenigeno tagritera eramigahie. Ana hanigeno
ana knafina ka'ma kokamo'a, masavenke huno tretre mopa fore
nehanigeno, ana masaventretre hunenia mopafintira mago zafa
tanopagna hugahie. **16** Hagi fatgoma huno refko hu avu'avazamo
ka'ma kokampina fore huno meno nevina, tretre'ma hania
mopafina fatgo avu'ava zamo efore huno meno vugahie. **17**
Hagi fatgo avu'ava zamofo ne'za raga'ama efore'ma haniana,
veamo'za korora osu'za akohe'za fru hu'za nemaniza maka zupa
oti hankavetigahaze. **18** Ana hanigeno Nagri vahe'mo'za kuma
zamifine, nozamifina mago zamo'a zamazeri koro osanige'za
zamarimpa frune nemaniza, mago'a zamofo agasasankea

ontahi'za akohe'za manigahaze. 19 Ko'mopa ko'mo eramino zafa tanopa ru puraru nehuno, rankumara ahe fragu vasinigeno fragu vaziramino mopafi masegahie. 20 Ra Anumzamofo vahe'mota maka zupa muse hugahaze. Ana nehuta ne'onse timofo tvaonte ho'za anteta avimzana runeranita, bulimakao afutamine, tonki afutamia zamatresnage'za zamesite amne vano hu'za trazana negahaze.

33 Hagi tamagrama vahe'ma zamazeri havizama nehaza vahe'mota tamagrira zahufa zamazeri havizana osu'nazanki kva hiho. Vahe'ma komoru hunka ha' vahe zamazampima zamavarenentana vahera kagrira komoru hu'za ha' vahe zamazampi kavre antegahaze. Hagi kagrama vahe'ma zamazeri havizama huvagama retesnanke'za, henka kagrira kazeri haviza hugahaze. Kagrama vahe'ma komoru hunka ha' vahe zamazampima zamavarente vagama retesnanke'za, henka kagrira komoru hu'za ha' vahe zamazampina kavre antegahaze. 2 Ra Anumzamoka kasunku huranto. Na'ankure kagrama tazama hanankura kavega anteta mani'none. Maka nanterana tazeri hankavenetinka, knafima une fresnunkenka Kagra tagu'vazio. 3 Hagi kagrama kageru'ma nerankeno'a monagegna nehige'za, vahe'mo'za koro nefragenka, Kagrama o'netinke'za ama mopafi vahe'mo'za panani hu'za nefraze. 4 Hagi anama hanke'zama atre'za fraza vahe'mokizmi fenozana, tusi kenutami'moza eme atru hu'za hozafi ne'zama neza eri fanane nehzaza hu'za ana fenozana eri vagaregahaze. 5 Ra Anumzamo'a mika vahera zamagatereno monafinka mani'ne. Ana hu'neankino Jerusalemi kumapina knare'ma huno refko'ma hu avu'ava zama'areti'ene, fatgo avu'ava zama'areti ante avitegahie. 6 Ana nehuno manitama vanaza kna'afina, Agra maka zupa

hankave'areti tamagura nevazino, muse huno neramavreno, antahi'zana neramino, knare antahintahi zanena tamagrira tamigahie. Hagi Ra Anumzamofonku'ma koro'ma hu'zamo'a agritera mareri feno zankna huno me'ne. 7 Hagi keho, Jerusalemi kumapi harfa sondia vahe'mo'za kumamofo karampi vano nehu'za, zavi krafa nehaze. Ana nehazage'za vahe'ma zamazeri mago zamarimpa hunakuma eri'zama eneriza vahe'mo'za tusi krafa hu'za zavi ate'naze. 8 Hagi ranra kamo'a amne megeno, ana kampima vanoma nehaza vahe'mo'za vano osu'naze. Hara osugahune hu'zama huhagerafi'naza naneke'a eri netre'za, mago'a vahe kumamofona huhaviza nehu'za, vahera zamage fenkami atre'naze. 9 Hagi mopamo'a zavi krafa nehuno hagege huno havizantfa hu'ne. Ana nehigeno Lebanoni zafa tanopamo'a agazegu nehuno hagege higeno, Saroni agupo mopamo'a hagege kokankna nehigeno, Basani kokampine Kameli agonafima me'nea zafaramimofo anina'amo'a harari hurami vagare'ne. 10 Hianagi Ra Anumzamo'a amanage huno hu'ne, Nagra menina oti'na hankave'nia erinte ama' hanuge'za husga hunenante'za Nagri nagj'a ahentesga hugahaze. 11 Tamagra Nagri'ma ha'ma renenantaza vahe'mota havigema nehaza zamo'a, tamu'enema nehiaza nehzankita, kasentesazana traza rampa kasentesageno, tamagrama zamasimu'ma antesaza zamo'a tevegna huno tamagrira te fanane hugahie. 12 Tamagrira tevemo te tanefa nesena, ave've traza tevefi krazageno teno ta'nefa aseaza hugahaze. 13 Hagi Nagrama eri fore'ma hu'noa erizankura afete'ma mani'naza vahe'mota tamagesa nentahinkeno, tvaonte'ma mani'naza vahe'mota Nagri hankavegura keta antahita nehuta huama hiho. 14 Kumi vahe'ma Saionima nemaniza vahe'mo'za tusi koro

nehanage'za, Anumzamofoma amage'ma nontaza vahe'mo'za zamahirahiku nehu'za tagra inankna huta maka'zama tefanenema nehia tevefina manigahune hu'za nehaze? Hagi iza tevavama huno nevia tevefina manigahie hu'za hugahaze. **15** Hianagi iza'zo fatgoma hu'za kama vanoma nehu'za, tamage kegema nehu'za, mago'a zante'ma masavema hu'za zami'naza zagoma e'nori'za, vahe'ma aheno korama eri taginogu'ma kema eme anankisaza kea nontahiza, kefozama huzanku'ma zamavuma ke amnema nehaza vahe'mo'za, **16** knare hu'za asgama hunerega manisga hu'za manigahaze. Ana nehu'za zamagra agonafi hankavenentake fraki kuma me'nefi mani'nesnage'za, mika zupa bretia eme zamisage'za nenenageno timo'enena knare huno me'nesnige'za negahaze. **17** Hagi Masa'nentake huno konariri'ane kini nera tamagra tamufinti kegahaze. Ana nehutma kegavama hania mopamo'ma maseno afete'ma vuno eno hu'neama'a kegahaze. **18** Hagi ko'ma tamagrite'ma fore'ma hu'nea knazankura ete tamagesa antahintahi nehuta tamagu'afina amanage hutma tamagra'a tamagenoka hugahaze. Inantega tagripinti'ma takesi zagoma eri'za nehampriza vahera mani'naze? Hagi tagri kumapima ha' vaheku'ma mani'neza kegavama nehaza zaza nontamima hampari'naza kva vahetamina iga mani'naze? **19** Hagi vahe'ma zamazeri koro nehu'za hazenkema nehu'za ru vahe zamageru'ma antahi ama' osuga nanekema nehaza vahera, zamavugosafina onketfa hugahaze. **20** Hagi kesga huta Saioni agonare tamavua keho, ana kumatera ne'zama kreta neneta musema hanaza kuma huhamprinte'ne. Ana hu'neankino Jerusalemi kumate'ma masaza vahetera mago zamo'a zamazeri havizana osanige'za, knare huza mani'nesageta kegahaze. Mago seli nomo oti hanavetinege'za tagana vaziza

reonomagige, zafa'a eri okasige, nofi'amo ruru ovaziankna
huno Jurusalemi kuma'mo'a oti hankavetigahie. 21 Hianagi
Hihamu Hankave'ane Ra Anumzamo'a anantega Agra ranra
tine ne'onse tinkna huno mani'nenigeno ne'onse ventegi, ranra
venteramimo'za ana timpina omegahaze. 22 Na'ankure Ra
Anumzamo'a keagatima refko hania nera agra'a nemanino,
Agra kasegea neramino, kinitia mani'neankino, Agra'a tagura
vazigahie. 23 Hagi tamagri ha' vahe'mo'za amanahu hu'naze,
mago ventemofoma amu'nompi zafamo oti fatgo osu'negen
selima anaki nofitamimo'a ru kreko vako nehigeno selia ruta
oreankna hu'naze. E'ina hu'nazankita tamagra vuta feno zazamia
ome refko huta enerisnage'za, zamagia keni zamaza keni
vahe'mo'za henka vu'za ome kesnazana mago'a fenozana
me'nesnige'za zamagranena eri'za vugahaze. 24 Hagi Jerusalemi
kumapima nemaniza vahera Ra Anumzamo'a kumitamia atre
ramantegahie. Ana hugahiankino magomo'e huno nagra kri
eri'noe huno osugahie.

34 Maka kokankokama mani'naza vahe'mota erava'o hu'neta
tamagesa anteta antahi so'e hiho. Anama nehanagetma
ama mopamokane, ama mopafima ana maka'zama me'nana
zamokanena ama nanekea kagesa antenka antahio. 2
Ra Anumzamo'a maka kokankokama nemaniza vahekura
rimpa ahenezamanteno, sondia vahezmigura tusi arimpa
ahezmanteankino, zamahe hana hugahie. Ana nehuno ana
vahera zamatrengi'za zamahe'za rugitagi atregahaze. 3 Hagi
anama hanigeno'a tamagerfa hu'za fri'naza zamavufaga eri'za
asezmanegara osugahie. Ana hanigeno fri zamavufagamo'a
amne zankna huno me'neno hinimna vugahie. Hagi korazamimo'a
agonafina avitegahie. 4 Hagi monafinti hanafi tamimo'a atafari

neramisnigeno, mago avontafe'ma regazariaaza huno monamo'a
regazarino vugahie. Ana nehina monafima me'ne'za remsama
nehaza zantamina, zagma ikama hanafi tamimo'zanena,
wainimofo ani'namo harari huramiaza nehanigeno, fiki zafamo
hagege huno mopafi evuramiaza hugahaze. 5 Hagi Ra
Anumzamo'a huno, Bainati kazinimo'a monafima me'nea
zantamintera eri'zama'a eri vagareteno, Edomu kumate vahe'ma
zamazeri haviza hugahue hu'nama hu'noa vahe zamahe
fri vagareku uramianki keho. 6 Sipisipi afutamine meme
afutmima ofama hunaku'ma ahenegizageno, koramo'ene kre'areti
afo'va'amo'ma kazintegama hantohantoma nehiankna kazi Ra
Anumzamo'a eri'neankino, e'inahukna huno Ra Anumzamo'a
rama'a vahe Bozra rankumapi nezmaheno ana maka Edomu
mopafima mani'naza vahera ana zanke huno tusi'a vahe
zamahegahie. 7 Hagi afi bulimakao afutamine, anenta ve
bulimakao afutamine, hankave bulimakao afutaminena ana zanke
huno zamahe frigahie. Ana hanigeno mopazmifina koramo'a
tagiramino avinetesnigeno, zamafova'amo'a kugusopafina
avitegahie. 8 Na'ankure Ra Anumzamo'a mago kna ko
huhampri'ne. Ana hu'neankino ana kafuma esanigeno'a,
Jerusalem kuma'ma ha'ma rente'naza Idomu vahera nona huno
hara renezmanteno, (Saioni) Jerusalem kumara agu'vazigahie.
9 Hagi Idomu mopafima me'nea tintamimo'a evuno fukinkna
hugahie. Ana nehanigeno kugusopamo'a evuno salfa havere
teve reaza nehanigeno, mopazamimo'a fukimo tevefi reaza
huno teveregahie. 10 Hagi feru'ene kenage enena ana tevemo'a
tevava nehanigeno, tusi toki huvava hugahie. Ana hanigeno
Idomu mopafina henkama fore hu anante anante'ma hu'za
vanaza knafinena vahera omanitfa hina, ana mopafina mago

vahe'mo'e huno vano vano osutfa hugahie. **11** Ana nehina ka'ma kopima nemaniza komutomo'ene, kotkoti namamo'zane tumpa namaramimo'ene kazin tumpamo'zanena ana mopa eri nafa'a hugahaze. Ra Anumzamo'a ana mopa atreni'geno havizantfa huno, mago have kevu eri tru hunteaza hugahie. Hagi agra nomofo za'za'anane mareri'anema eri fatgoma hu'zama negazanofikna huno kumara eri haviza hutresigeno ka'ma koka fore huno mago'zana omanegahie. **12** Hagi Idomu mopafima zamagima me'nea vahe'ene kva vahe'enena omanitfa hanageno, kinima maniga vahetamina magore hu'za omanigahaze. **13** Mani'nezama vaheku'ma kegavama nehaza zaza nontamintera ave've trazaramimo hageno marenerisigeno, agaso trazane havi tra'zamo'zanena hankave vihu keginazmirera hage'za marerigahaze. Ana nehanigeno anampina afi kraramimo'ene ostretiema nehaza mananinkna namamo'za e'za no eme ki'za manigahaze. **14** Hagege kokampima nemaniza afi zagagafaramimo'za, anampina e'za eme atru nehanage'za, afi meme afutamimo'za anampina eman'i'neza krafage hugantu hugama hugahaze. Ana nehanageno kenage'ma vanoma nehia zaga lilitiema nehaza zagamo anampina emasegahie. **15** Hanki anampina ko'mutomo no eme kino amura anteteno kegava hu'nesnigeno, horahora hina agekona'areti rutareno refitentegahie. Ana nehanigeno tumpamo'za veate veate e'za anampina emanigahaze. **16** Hagi Ra Anumzamofo avontafepi me'neanki haketa hampriho. Ana maka kema hunte'nea zagagafa maka evaga nereshnage'za, mago'mo'e huno ana zagagafamo'a agrakura omeno, tare tare huno etere hugahie. Na'ankure Ra Anumzamo agra'a agipinti e'ina huo huno huntessnigeno, Agri'a Avamu'mo zamavare atru huno zamavareno egahie.

17 Hanki inante manitere hugahazafi, Ra Anumzamo Agrake
nofira mesarimi huno erinte fatgo huno keteno mopa refko huno
zamisnige'za, mofavre kase anante anante hu'za mani'neza
henka'anena mani vava hu'za vugahaze.

35 Ka'ma kokamo'ene hagege kokamokea muse hugaha'e.
Hagi hagege kokampina krokasiema nehaza flauamo
marerino amosrea ahentesnigeno, ana hagege kokamo'a
muse hugahie. **2** Hagege kokantamimpine maka kaziga
flauamo'a amosre aheno avinetesigeno, ana kokamo'a muse
zagame huno muse hugahie. Ana kokamofo avasase'amo'a,
Lebanoni zafa ta'nopamofo konaririgna nehina, Kameli
agonane Saroni agupomofo konaririgna hugahie. Ana
hanige'za Ra Anumzana tagri Anumzamofo hankave'ane
masa'anena kegahaze. **3** Hanki hanavezmima omne'nea
zamazana zamazeri hankavenetino, zamarenamo'ma havizama
hunege'zama zamahirahiku'ma nehaza zamare'nanena zamazeri
hankavetinke'za oti hankavetigahaze. **4** Antahintahi hakarema
nehu'za koroma nehaza vahera amanage hutma zamasamiho.
Koro osutma oti hankavetiho. Na'ankure tamagri Anumzamo'a
eno nona huno tamagri ha' vahera eme zamazeri haviza nehuno,
tamagu vazigahie. **5** Hanki zamavu asuhu vahe'mo'za zamavua
negesnage'za, zamagesa ankanire vahe'mo'za, zamagesa
antahigahaze. **6** Ana nehina zamagama haviza hu'nesnia
vahe'mo'za, dia afu'mo haru huno marerino tamino nehuno vano
hiaza hu'za vano hugahaze. Hagi keagama osu vahe'mo'za ranke
hu'za muse zagamera hugahaze. Na'ankure hagege kokampintira
timo'a restisti huno tina hageno ka'ma kokampina vuno eno
hugahie. **7** Zagemo'ma te hagegema hu'nea kokampina tiru efore
hugahie. Hagegema higeno tima omane'nea mopafintira, kampui

tintamimo nehanatsnigeno, kora hagege mopa me'nege'za afi kramo'za nomagi'za mani'nafina, trazamo'ene barozamo'ene hageno marerigahie. 8 Hagi anantera rankarega me'nesnige'za, ana rankankura Ruotage Avu'ava'mofo Rankane hu'za agia ahegahaze. Hanki ana kantera agruma osu'nesnaza vahe'mo'za kana vano osugahaze. Anumzamofo vahe'mo'zage ana kampina vano hugahaze. Ana nehanage'za neginagi zamavu zamava'ma nehaza vahe'mo'za ana kantera vano osugahaze. 9 Laionimo'ene afi zaga kafamo'za ana kampina vano osugahaze. Hianagi Ra Anumzamo'ma zamagu vazino ete zamavare'nesnia vahe'mo'za ana kampina zamagrake vano hugahaze. 10 Ra Anumzamo'ma zamagu vazino ete zamavare nesnia vahe'mo'za muse hume ne-eza, Jerusalemi kumapina muse zagame hu'za efregahaze. Hagi mevava musezamo zamasenirera kini fetorikna huno megahie. Tusi'a musezamo zamagripina aviteteno varehi ramigahie. Ana hina zamasu zamo'ene zamarimpa kna hu'zamo'a zamatreno fregahie.

36 Hanki Hezekaia'ma kinima manino egeno 14nima hia kafufina, Asiria kini ne' Senakeribi'a marerino Juda mopafima hankavenentake vihuma hu'naza ranra kumatmina ha' eme huzmanteno eri vagare'ne. 2 Ana hu'neankino Asiria kini ne'mo'a Lakisi kumate mani'nereti sondia vahete kva vahe'ene rama'a sondia vahe'ene huzmanteg'eza kini ne' Hezekaia'ma Jerusalemi kumate'ma mani'nerega vu'naze. Hagi Jerusalemi vute'za sondia vahete kva ne' Rabsaki'a vuno kumamofo anaga kazigama me'nea tirupinti'ma mopama kafi'za tima avre'za Jerusalemi kumapima urami'nazare oti'ne. Hagi anama kafi'za tima avre'naza tinkamo'a, kukenama sesema nehzaregama vu'nea kamofo tva'onte me'ne. 3 Hagi anante kinimofo nompi

kva ne' Hilkia nemofo Eliakimiki avontafe'ma kre eri'zama eneria
ne' Sibnaki, kinimo'ma tro'ma nehiazama avompima krenentea
ne' Asapu nemofo Joaki hu'za ana ne'ma mani'nerega e'naze.

4 Hanki ana Asiria sondia vahete ugota kva ne' Rebsaki'a
ana 3'a nagara amanage huno zamasami'ne, Hezekaiana
amanage huta ome asamiho, marerisa Asiria kini ne'mo'a
amanage hu'ne, kagra inankna hankaveka'agu antahintahia
nehunka knare hu'noe hunka nehane? 5 Hagi keagage'ma
hu'zampintira magora hara agateregahampi? Iza naza hugahie
hunka kagesa nentahinka nagrira hara renenantane? 6 Hanki
ko, menina Isipi vahe'mo'za naza hugahaze hunka kagra
antahi amuha nehane. Hianagi Isipi kini ne' Fero avu'avamo'a,
mago hakemo hagege hiaza hu'neankino, ana kanonte'ma
azama erino rempimpima hanimofona ana azotamo'a futagino
azampi kota aheaza hugahie. Hagi Feronte'ma amuha'ma
hunemiza vahe'mo'za e'inahu hu'za haviza hugahaze. 7 Hianagi
Hezekai'a menina Ra Anumzana tamagri Anumzamofonku
antahi nemifi? Na'ankure kora Hezekeia'a Ra Anumzamofoma
agonaramimpima mono'ma hunentaza kumatamine kresramna
vu itaraminema me'neana, eri atre vaganereno, Juda vahe'ene
Jerusalemima nemaniza vaheku'ma zamasamino, Jerusalemima
magoke'ma me'nea kresramna vu itareke ofa hiho huno
hu'nea ne' mani'ne. 8 Hagi tamagrama antahintahi tamima
rukrahe'ma hanaza nanekea menina kvani'a Asiria kini ne'mo'a
amanage hu'ne, tamagrama sondia nagatamima knare'ma
hu'nesnage'na, hosi agumpima mani'nezama ha'ma hanaza
zana 2 tauseni'a hosi afutami tamigahue hu'ne. 9 Hagi tamagra
Isipi vaheku'ma antahizamita karisiramine hosi afutaminena
eme taza hanageta hara hugahune hutma nentahize. Hianagi

nagri kva ne'mofo sondia vahe'mokizmi kva vahepinti mago
agi omane kva ne'mo tamagrira hara huramagateregahie.

10 Tamagrama antahi'zana agra'a antahi'zanteti e'no hara
huranteno mopatia eri haviza huku nehie hutma nentahizafi?
I'o. Ra Anumzamo hunanteno marerinka vunka ama kumara
hara ome huntenga eri haviza huo huno hunante'ne. **11** Hagi
anante Eliakimiki, Sibnaki, Joaki hu'za anankema nentahizafi,
Asiria sondia vahete kva nera amanage hu'za asami'naze.
Tagra eri'za vahekamota muse hugantonanki, Aramu kea
antahi'nonanki, antahinoma kefinti tasamio, na'ankure kagrama
Hibru tagerupinti'ma neratasaminanke'za, kuma keginamofo
agofetu'ma mani'naza vahe'mo'za anankea antahigahaze. **12**
Hianagi Asiria sondia vahete kva ne' Rebsakia amanage hu'ne,
nagri kva ne'mo'ma ama'na kema atrege'nama eri'na e'noana,
tamogra kva nete'ene tamagriteke'za atrege'na ome'noanki,
anamu kuma kegina agofetu'ma mani'naza vahe'mo'zanena ama
nanakea antahigahaze. Na'ankure ha'ma erita eta Jerusalemi
kuma'ma eme avazagi kagisanunketa tamagra kva vahe'ene
maka vahe'motanena rifane avinena retma negahaze. **13** Anage
nehuno ana Asiria sondia kva ne'mo'a Hibru kefinti kezatino
amanage hu'ne, marerisa Asiria kini ne'mo'a amanage hu'neanki
antahiho. **14** Tamagra atrenkeno Hezekaia'a reramataga
osino, na'ankure Hezekai'a tamagrira hara huno tamagura
vazigara osu'ne. **15** Hezekaia'ma huno Ra Anumzamo'a taza
hanigeta Asiria vahera hara huzmagatereta Jerusalemi kumara
agu'vazigahune huno'ma hania kegura tamentintia osiho. **16**
Hagi Hezekaia nanakea tamagra antahi omiho. Asiria kini
ne'mo'a amanage hu'neanki antahiho. Tamagrama fru huta
mani'neta tamagra'a waini hozafinti tagita neneta, tamagra'a

fiki zafareti tagita neneta, tamagra'a tinkerifinti'ma tima afitama
nesanunema hanutma, atretma nagrite enketa tarimpa fru
hutama manisnuna nanekea erinte fatgo hamneno. **17** Hagi
anama huta mani'nesnage'na nagra eme tamavre'na mago mopa
tamagri mopagna moperega ome tamantegahue. Ana mopafina
waini tima tro hu'zana, waini hoza rama'a megeno, bretima
tro hu'zana, witi hoza rama'a me'nne. **18** Hagi Hezekaia'ma
tamagriku'ma huno Ra Anumzamo'a taza hanigeta Asiria vahera
hara hu zamageteregahune huno nehiana reramatga nehianki
kva hiho. Hianagi ama mopafina mago'a vahe'mofona ru
anumzamo'a aza higeno, Asiria kini nera hara hugatere'nefi? l'o.
19 Hagi Hamati vahe'ma Arpati vahe'ma Sefarvaimi vahe'ma
huta ko'ma ha'ma hu zamagtere'nonana anumzazmimo'a iga
mani'neno zamaza osu'nne. Ana hige'na Sameria kuma'enema
ha'ma hunte'noana anumza'zmimo'a zamaza osige'na, hara
hugaterogeno Sameria kumamo'a nagri nazampi me'nne. **20**
Hanki tagra rama'a kumatmi hara hu zamagate re'nonanagi,
anumza zamimo'za zamaza osazageta mopazmia eri'none. E'na
hu'negu inankna huno Ra Anumzamo'a tamaza hanigeta, hara
hutma Jerusalemi rankumara agura vazigahaze? **21** Hianagi
Asiria sondia vahete kva ne'mo'ma hia nanekerera magore hu'za
kenona'a osu'naze. Na'ankure kini ne' Hezekaia huzmanteno
magore hutma ke'arera kenona osiho huno huzmant'e'nege'za
anara hu'naze. **22** Anante kini ne'mofo nompima kegavama
nehia ne' Hilkia nemofo Eliakimiki, avontafe'ma erinte fatgoma
huno negrea ne' Sibnaki, kinimo'ma tro'ma nehia zamofoma
avompima krenentea ne' Joaki hu'za, kukena zamia tagato
tagutu hute'za kini ne' Hezekaiante vu'za, Asiria sondia vahete
kva ne' Rabsaki'ma hu'nea nenekea ome asami'naze.

37 Hagi anankema kini ne' Hezekaia'ma nentahino'a, ame
huno kukena'a tagato tagatu nehuno asunku kukena nehuno, Ra
Anumzamofo ra mono nompinka ufre'ne. **2** Ana nehuno kini
ne'mofo nompi kva ne' Eliakimine avontafe kre eri'zama eneria
ne' Sibnane ugotama hu'za pristi eri'zama eneriza vahe'enena
huzmanteno, zamasunku kukena hu'neta vuta kasnampa ne'
Amosi nemofo Aisaia ome keho huno huzmante'ne. **3** Hagi
Aisaia avure uhanatite'za, Hezekaia'a amanage hu'ne hu'za ome
asami'naze, Menina ama knafina tusi'a knazamo'ene, tazeri
fatgo hu'zamo'ene, tagaze hu'zamo tagritera e'ne. E'inama
hu'neana mago a'mo mofavre'za negegeno mofavre anteku
hianagi, hankave'a omneaza huno hankavetia omne'ne. **4** E'ina
hianagi Ra Anumzana kagri Anumzamofontega nunamu hunka
antahigegeno, Asiria sondia vahete kva ne' Rabsakima kva'amo
Asiria kini ne'mo'ma huntogeno eno, kasefa'ma huno mani'nea
Anumzamofoma huhavizama hunte'nea nanekerera antahino ete
agrira azeri haviza hugahifi antahigenka nunamu hunka taza
hugeta osi'a naga'ma mani'nomota ofrita mani'mneno. **5** Hagi
Hezekaia eri'za vahe'mo'zama Aisaiante'ma neazageno'a, **6**
Aisaia'a amanage huno zamasami'ne, Ra Anumzamo'a amanage
hie huta kvatamimofona ome asamiho, Asiria kini ne'mofo
eri'za vahe'mo'zama Nagri'ma eme huhavizama hunantaza
nanekea nentahinka korora osuo. **7** Hanki antahio, Nagra Asiria
kinimofo agu'afina mago avamu ante'nugeno mago naneke
eme asaminageno nentahino, ete rukrahe huno mopa-arega
nevanige'na, mago vahe azampi avrentesnugeno bainati kazinteti
ahe frigahie. **8** Hagi Asiria sondia vahete kva ne' Rabsakima
antahiamma, Asiria kini ne' Senakeribi'a Lakisi rankumara atreno
vu'ne nehazageno'a, Jerusalemi kumara ete atreno vuno ome

antahiana kini ne'mo'a Libna kumate vuno hara ome nehie
hazageno anantega ome ke'ne. **9** Hanki anante Asiria kini ne'
Senakeribi'ma antahiamma, Kusi kumateti Itiopia kini ne' Tirhaka'a
hahugantenaku ne-e hu'za hazageno nentahino'a, ke'ma erino vu
vahera amanage huno huzmanteg'e'za Hezekaiantega kea eri'za
vu'naze, **10** Amanage huta ome asamiho, kagrama kamentintima
hunentana Anumzamo'ma huvempa huno, Asiria kini ne'mo'a eno
hara hugagetereno Jerusalemi kumara e'origahiema hu'neana,
regavataga hu'neanki anankegura kagesa ontahio. **11** Tagrama
Asiria kini vahe'motama mago'a kuma'ma hahu zamagateretama
maka zama eri havizama hu'nonana, kagra ko antahi'nane.
Hanki kagrama antahinana mago'a vahe'ma zamazeri havizama
hu'noa zana hu'na, kagrira kazeri havizantfana osugahufi? **12**
Hagi Gosani kuma'ma, Harani kuma'ma, Rezefi kuma'ene, Edeni
vahe'ma Tel-Asari kumate'ma nemaniza vahe'enema, ko'ma
nagehe'mozama ha'ma huzmante'zama zamazeri havizama
hu'nazana, anumza zamimo'a magore hunora zamaza osu'ne. **13**
Hagi Hamati kini ne'ene Arpati kini ne'ene Sefarvaim rankumate
kini ne'ene Hena kini ne'ene Iwva kini ne'enena inantega
mani'naze? **14** Asiria kini ne'mo'ma kretre'nea avona, ke'ma eri'za
e'naza vahe zamazampinti Hezekai'a erino hamprino keteno,
Ra Anumzamofo ra mono nontega ana avona erino marerino
Ra Anumzamofo avure omeri atarente'ne. **15** Anama huteno'a
Hezekai'a amanage huno Ra Anumzamofontega nunamuna
hu'ne, **16** Ra Anumzana Israeli vahe'mota Anumzamoka
Kagra hankavenentake hu'namoka, serabimi ankeroramimofo
amunompi kini traka'a me'ne. Kagrake'za tamage Anumzana
mani'enka, maka ama mopa kva hu'nane. Na'ankure monane
mopanena kagrake tro hu'nane. **17** Ra Anumzamoka kavua

negenka kagesa antenka nunamuni'a nentahinka, Asiria kini ne' Senakeribi'ma kasefa'ma hunka mani'nana Anumzamoka'ma kazanava kema atregeno'ma e'neana antahio. **18** Tamage huno Ra Anumzamoka, Asiria kini vahe'mo'za mago'a kumatmimpi vahe'ene mopazaminena eri haviza hu'naze. **19** Ana nehu'za anumza zaminena tevefi hanavazi'za kre'naze. Na'ankure zamagra tamage anumzana omani'nazanki, vahe'mo'za havi anumzantamina zafareti'ene havereti erite'za zamazanteti tro hu'naza zantaminki'za anara hu'naze. **20** E'ina hu'negu menina Ra Anumzana Anumzantimoka taza hunka Senakeribi azampintira tagu'vazio. Anama hananke'za maka ama mopafima mani'naza vahe'mo'za nege'za Ra Anumzana Agrake tamage Anumzana mani'ne hu'za kagrira kage'za antahi'za hugahaze. **21** Hanki anante kasnampa ne' Amosi nemofo Aisaia'a amanage huno Hezekaintega kea atrentegeno, kema erino vu vahe'mo'a erino vu'ne, Ra Anumzana Israeli vahe'mota Anumzamo'a amanage hu'ne, Asiria kini ne' Senakeribi'ma hia zanku'ma nunamu hunka antahiganku, **22** Ra Anumzamo'a amanage huno hu'ne, Senakeribiga Saioni mofa'mo'a kazanava ke nehuno, kiza zokago ke huneganteno Jerusalemi mofa'mo'a koro'ma atrenka nefresnankeno'a agena rugahie. **23** Senakeribigama azanvanke hunentenka, huhaviza hunentenka, ranke hunka kavufga erisga hu keaga nehunka, kagrama kana kavugura nagra so'e hu'noe nehunka, Israeli vahete'ma Ruotage'ma hu'noa Anumzamo'na nazeri haviza hu kea hu'nane. **24** Kagra eri'za vaheka'a huzmantanke'za e'za, Ra Anumzamo'na nazeri havizahu kea hu'naze. Hagi kagra'agura amanage hunka hu'nane, nagra karisiramini'afi mani'ne'na, marerigatere'nea agonaramimofo morusapi vano nehu'na, Lebanoni zafa tanopafina vahe ovu'afi

ufre'na knare'nare sida zafaramine, saipresi zafaraminen
antagi'noe hunka hu'nane. **25** Anage nehunka inantego vanoma
huana nagra'a tinkerirami kafina anampinti tina nene'na, Isipi
mopafima maka'ma me'nea tintamina nagareti rerane'noe
hunka hu'nane. **26** Ana hu'nananagi Senakeribiga menina
antahio, Nagra Ra Anumzamo'na e'ina hu'za fore hugahie
hu'na korapa retro hunte'noa zamo menina efore nehianki
ontahi'nano? Nagra e'ina huo hu'na hugenka hankave vihu
keginama hu'naza kumatmina tapage hunka, eri mopafi atrankeno
kugupaseno hihi huno mareri'ne. **27** Ana nehige'za ana kumapi
vahera hankavezamia omanege'za antahintahi hakare nehu'za
zamagazegu hu'naze. Ana nehu'za hozafi ne'zamo mensi
amumpa anteno nehagegeno, nomofo agofetu nehagea trazamo
hageno ra osu'negeno zagemo te vamajankna hu'naze.
28 Hianagi kagrama noma nemaninazane, kama vanoma
nehanazane, Nagri'ma tusi karimpama ahenantana zanena,
nagra ko kage'na antahi'na hu'noe. **29** Na'ankure kagrama
tusi krimpama ahenenantenka, veganokno kavukvama hu'nana
zana, nagra hago antahi'noe. E'ina hu'negu Nagra hukuni'a
kagonagampi vazi rusi nehu'na, hosimofo agipima nentaza aini
atupa kagipina ante'na kavazu hanugenka, ete e'nana kantega
vugahane. **30** Hanki Hezekaiaga kagritera amanahu avame'za
fore hugahie. Meni kafufina agra'ama hageno marerisnia witireti
erita neneta, anaga'a kafufina ana witifinti'ma taniramino hageno
rentesnia witireti erita negahaze. Hianagi nampa 3 kafurera
tamagra'a hoza erita anteta neneta, waini hozanena nenteta
raga'a tagita negahaze. **31** Hagi Juda vahe'ma zamahe nefri'za
osi'ama eme zamatrage'zama mani'naza naga'mo'za, waini
zafamo hiazza hu'za, rafuna atresnageno mopafi uramisnige'za

hage'za mareriza raga rentegahaze. **32** Na'ankure ha' vahe'mo'za nezmahe'za osi'ama zamatresnaza naga'mo'za Jerusalemi kumapintira atiramiza ne-enageno, knazampintima ofrizama osi'a naga'ma manisnamo'za Saioni agonaretira egahaze. Hankavenentake Ra Anumzamo'na e'ina hu'za fore hugahie hu'na hankave antahintahi retro hu'noankino, tamagerfa huno ana zana efore hugahie. **33** E'ina hu'negu Ra Anumzamo'a Asiria kini nekura amanage hu'ne, Agra ama Jerusalemi rankumapina eofrege, magore huno keve'a aheotrege, hanko'a erino erava'o osuge, mani'neno'ma ha'ma hania nonkumara have kegina tvaontera eme trora osugahie. **34** Agra Jerusalemi rankumapi efreku egahianagi, ete rukrahe huno anama enesia kantega vugahie huno Ra Anumzamo'a ama ana nanekea huama hu'ne. **35** Ra Anumzamo'na ra nagigu'ene, eri'za vahe'ni'a Devitima huvempama hunte'noa kegu nagesa nentahi'na, Jerusalemi rankumara agu'vazina kegava hugahue! **36** Ra Anumzamo'a mago Ankero huntogeno Asiria vahe'ma seli nonkuma'ma eme ante'za mani'nafi vuno, ana kenageke'za 1hanret 85 tauseni'a Asiria sondia vahera zamahe fri vagare'ne. Ana higeno nanterama masama higeno ana kumapima kazana fri'nea vahe'mofo zamavufagamoke'za avite'ne! **37** Ana higeno Asiria kini ne' Senakeribi'a seli nonkumama eme ante'noma mani'neana atreno kuma'arega Asiria viazamo, Ninive rankumate umani'ne. **38** Mago knazupa Nisroku'e nehaza anumza'amofo mono nompi Senakaribi'a mono hunenteno mani'negeke, tare mofavre'a Adrameleki'ene Sareselikea vuke bainati kazinteti ome ahe friteke, koro freke va'azamoke Ararati moparega umani'na'e. Ana hutakeno mago mofavre'a Esarhadoni agri nona erino kinia mani'ne.

38 Hagi ana knafina Hesekaia'a kri eriteno fri'za hu'ne. Ana higeno kasnampa ne' Amosi nemofo Aisaia'a agrite eazamo, Ra Anumzamo'a amanage hie huno eme asami'ne, Krikamo'a vaga oresnigenka frigahananki, nagaka'a kehu atru hunka mika eri'zanka'a erinte fatgo huo. 2 Higeno Hezekaia'ma anankema nentahino'a, avugosa rukrahe huno nozafarega hunenteno, Ra Anumzamofontega amanage hu'ne, 3 nunamuna hu'ne, Ra Anumzamoka kagri kavure'ma maka nagu'areti'ma hu'na keka'ama ruotagre'na amage'ma nente'nama, kagri kavure'ma knare navu'nava'ma hu'noa zankura kagesa antahi namio, nehuno Hezekaia'a krafage huno tusi zavi ate'ne. 4 Anama higeno'a, Ra Anumzamo'a ete Aisaiana amanage huno kea asami'ne, 5 Kagra ete vunka, Ra Anumzana negageho Deviti Anumzamo'a amanage hie hunka Hezekaiana ome asamio, Nagra nunamunka'a ko nentahi'na zavi'ma atana kavunura ko koanki'na, 15ni'a kafuka'a erinte zaza ha'nena manitenka henka frigahane. 6 Ana nehu'na Asiria kini ne'mofo azampintira hara hu'na kagura nevazi'na, Jerusalemi rankuma'enena kegava hugahue. 7 Hagi Ra Anumzamo'ma avame'zama eri fore'ma hanigenkama negesunka, Ra Anumzamo'ma huvempama hu'nea zana tro hugahie hunka kagesa antahio. 8 Hagi Ahasi'ma latama ahentenege'za zagemofo kna'ama negaza latamofo amema'amo'ma ko'ma evu'neana ete 10ni'a zupa kamefiti renakerenka ete vuo huankino, ana huno ete vugahie, higeno kema hiankante anteno anazana efore hu'ne. 9 Higeno Hezekaiama kri'amo'ma atrentegeno'a amanage huno avona kre'ne, 10 Nagrama antahuana zahufa kasefa vahe mani'nena fri'na vu'na kasefa'ma hu'na maniga knani'a, fri vahe kumapi umanigahue hu'na nagesa antahi'noe. (Sheol h7585) 11 Nagrama

antahuana kasefa'ma huzama mani'naza vahe'mofo mopafina Ra Anumzana Anumzanimofona onkegahue nehu'na, ama mopafima kasefa'ma hu'za mani'naza vahera zamavufina onkegahue hu'na nagesa antahi'noe. **12** Hagi nagri nomanizamo'a sipisipi afute kva vahe'mo osi seli no ki'nea eri anafe huno viaza nehuno, kukena hatinofi'nu anaki antrako hiaza hige'na ko fri'noanagi ana nofipintira ahekano hutreno nazeri fru hu'ne. Anumzamoka zagine haninena knani'a eri atupa hanke'na nasimura atre'za hue. **13** Nagra akohe'na mani'nogeno nantera se'ne. Hianagi laionimo zaferina eri rarupeaza huno maka zaferinani'a nazeri rarupe'ne. Hagi feru'ene kenage'enena kagra nazeri haviza nehane. **14** Hagi kisave namamo'ene afi patomoke ha'aza hu'na krafa nehu'na, maho namamo'ma zavi'ma neteaza hu'na zavira ate'noe. Monafinkama kenagamutoa zamo higeno navumo'a nata negrigeno navunu hu'ne. Ra Anumzamoka hazenke zampi manuanki eme naza huo hu'na hu'noe! **15** Hianagi nagra na'ane hu'na kea hugahue? Ra Anumzamo'ma agrama nasami'nea kemofo amage anteno ana zana eri fore hu'ne. E'ina hu'negu nagrama kasefa'ma hu'nama mani'nama vanua kafu'afina, knazama namitenka nazeri knare'ma hu'nana zankura antahi kamigahue. **16** Ra Anumzamoka amanahu' zama vahete'ma eri fore'ma nehanana, vahe'mofo avu'ava azeri rukrahe hankeno kasefa asimu e'nerie. Nagrite'ma amanahu' zama efore'ma hia zamo'a avamunimofona nazeri kasefa hu'ne. Ra Anumzamoka krini'a eri atrenka, nazeri so'e hanke'na ofri'na kasefa hu'na manue. **17** Tamage hunka nagri knare zanku hunka natrankena ana knazampina vu'noe. Ra Anumzamoka kagra kavesi nante'nanankinka natranke'na havizana hu'na kerifina uoram'i'noe. Ana nehunka maka kuminia eri atre'nane. **18** Na'ankure fri

vahē kumapima nemanisaza vahē'mo'za Ra Anumzamoka hu
muse hunogantesageno, fri vahē'mo'zanena kagia ahentesga
osugahaze. Hagi fri vahē kumapima nemani'naza vahē'mo'za
knare eri'zama enerina zankura amuhara huogamigahaze.

(Sheol h7585) 19 Nagrama menima musema hunegantoaza
hu'za kasefa'ma hu'za mani'naza vahē'mo'zage humusea
hugantegahaze. Hagi mago ne'mofonte'ma knare avu'ava zama
hunte vava hu'nenana zamofo agenkea, mofavre'amofona
asamitere huno vugahie. 20 Ra Anumzamo'a tamage huno nagu
vazigahie. Ana hugahiankita kasefa'ma huta manisuna kna'afina
maka zupa Ra Anumzamofo mono nompi vuta zavena neheta,
zagame huta agia ahentesga hugahune. 21 Hanki anante
Aisaia'a amanage huno Hezekaia eri'za vahera zamasami'ne,
fiki zafa raga ante hagege huta regripeteta erita Hezekaia
usagertera ome antenkeno teganino. 22 Higeno Hezekaia
amanage huno Aisaiana antahige'ne. Inankna avame'zamo
nagritera efore hanige'na nege'na, Ra Anumzamofo mono
nontega ete mareri'na monora ome huntegahue?

39 Hanki ana knafina Babiloni kini ne' Baladani nemofo
Merodak-Baladani'a Hezekaia'ma krima erino mase'nefinti'ma
kanamre'ne hu'zama haza nanekema nentahino'a, mago
avonkreno nanekema eri'za vu'za e'za hu vahē nezamino,
muse zanena antentege'za eri'za Hesekaiantega vu'naze. 2
Hesekaia'a ana vahē'ma azageno'a, muse nehuno zamazeri
frufra huteno zagoma nentea nonki, silvane goline mnanentake
zantamine knare'nare masavene ha' zama nentea none, ana
maka fenozama nentea nontamina zamaveri huvagare'ne. Hagi
Hesekaia'ma kegava hu'nea mopa'afima me'nea zantamine,
kinimofo nompima me'nea zantaminena magore huno otreno

ana maka zamaveri huvagare'ne. 3 Anante kasnampa ne'
Aisaia'a, kini ne' Hesekaiente eno amanage huno antahige'ne,
Amama ete'zama vaza vahera igati ete'za, na'ane hu'za
eme hute'za vaze. Anage higeno Hesekaia'a kenona'a huno,
afete mopa Babiloni moparegati e'naze. 4 Anage higeno
Aisaia'a amanage huno antahige'ne, Kinimoka nompina na'a
ke'naze? Higeno Hesekaia'a kenona huno, Kinimo'na nompima
me'nea zantamina ana maka kevagare'naze. Ana nehu'na zago
fenoma nentoa nontamina magore hu'na otre'na ana maka
zamaverihu vagaroge'za kevagare'naze. 5 Hagi anante Aisaia'a
amanage huno Hesekaiana asami'ne, Monafi sondia vahe'mofo
Hankavenentake Ra Anumzamo'a amanahu naneke hianki
kagesa antenka antahio, 6 tamagerfa huno mago kna ne-eankino
ananknama ehanatisnigeno'a, ana maka kinimoka nompima
me'nea marerisa feno zantamine, kafahe'mozama ko'ma eritruma
hazageno meno eno meninema me'nea zantaminena magore
hu'za otre'za ana maka eri'za Babiloni moparega vugahaze huno
Ra Anumzamo'a hu'ne. 7 Ana nehu'za kagripinti'ma fore'ma
hanaza mofavrerpinti mago'a zamavare'za Babiloni moparega
vute'za, zamagonknaza ome harisnage'za mani'ne'za Babiloni
kini ne'mofo nompi eri'zana erigahaze. 8 Hanki anagema
higeno'a Hesekaia'a antahiteno, agrama antahiana Aisaia'ma
eme hia zantamimo'a, agrama manisnia kna'afina ha' zana
forera osina mani fru huta manigahune huno agesa nentahino,
amanage huno Aisaiana asami'ne, Ra Anumzamofo nanekema
kagrama eme nasamina nanekemo'a knare hie.

40 Vahe'nimota mani so'e huta maniho, huno tamagri
Anumzamo'a hu'ne. 2 Jerusalemi vahe'mofona fru kefinti
nankea zamasamio, Hapima manita neaza zamo'a amare eme

vagare hunka kezatinka zamasamio. Na'ankure Ra Anumzamo'a kumi'ma hu'naza zantera knazana ante agofetu huno ranknaza zamigahie. Hianagi menina maka kumi'zmia ko atrezmante'ne.

3 Mago vahe'mofo ageru'mo kezatino amanage nehie, Ra Anumzamo'ma esania kana ka'ma kokampina retro nehuta, hagege kokampina Anumzamo'ma esania rankana varita eripehe hiho. (Matiu 3:3, Maki 1:3, Joni 1:23) 4 Ana nehutma maka urami erami hu'nesnia agupofina mopa kateta ante pehe nehutma, ranra agonaramine ne'onse agonaramina kafitma eri agupo nehutma, marerino tamino'ma hu'nesiama'a erinte fatgo hu so'e hiho. 5 Anama hanageno'a Ra Anumzamofona hankavenentake masa'amo'a eama hanige'za, maka ama mopafima mani'naza vahe'mo'za kevagaregahaze. E'i ama ana nanekea Ra Anumzamo'a agra'a agipinti huama hu'ne. (Luk 3:4-6.) 6 Hagi mago kezankemo'a huno, Ranke hunka kezatio huno higeno, Na'ane huna kezatigahue huno magomo'a higeno, Maka ama mopafima mani'naza vahera trazankna hu'nazankino, tanopafi me'nea trazaramimo amosre aheteno rutri huramiazza huno, ra zamajima eneriza zamo'a fanene hugahie. 7 Trazamo'a hagege nehigeno, amosre'amo'a mopafi evuneramie. Na'ankure Ra Anumzamo'a agra'a zahora huhu hutregeno eno eme zamazeri tore hige'za mopafi evuneramize. Tamagerfa hu'za maka vahe'mo'za trazankna hu'naze. 8 Hanki trazamo'a hagege nehanigeno, trazamofo amosre'amo'a mopafi evuramigahie. Hianagi tagri Anumzamofo nanekemo'a, vaga oreno mevava hugahie. (1 Pita 1:24-25.) 9 Saioni rankumapinti'ma knare musenkema huama'ma nehana vahe'moka, agonarega marerinka kagerura erisga hunka hankavetinka ana musenkema huama huo. Jerusalemi rankumapima mani'neta musenkema

huama'ma nehaza vahe'mota, korora osutma kezatitma, Juda
mopafima me'nea rankumatmimpima nemaniza vahera tamagri
Anumzana ama'nagi keho hutma zamasamih! **10** Keho, Hihamu
hankave'ane Ra Anumzamo'a egahiankino Agra'a hankave'areti
vahera eme kegava hugahie. Ana hugahiankino mizama zamisia
zana azampi eri'neno egahie. **11** Sipisipi afu kva vahe'mo
nehiaza huno, agra vaher'a kegava hu so'e nehuno, Sipisipi
afute kva vahe'mo sipisipi afu anenta'a asagufinka avrenteaza
huno, agra vaher'a asagufinka zamavarenenteno, anenta'ma
ante'naza sipisipi afutamina akoheno zamavareno vugahie. **12**
Hanki mago vahe'mo'a maka hagerina afino azampina erinteno
refko'a huno kege, azamofo atumpa'aretira anteno mona refko
huno kegahifi? I'za maka mopa kateno mago ekaeka kupina
erinte vaga nereno, agonaramimofo kna'a erintenora refko
huno negeno, ne'onse agonaramimofo kna'anena erinteno
refko huno kegahie? **13** Iza Ra Anumzamofo antahi'zana
keno antahino nehuno, e'ina hunka maka zana trora huo
hunora antahi'zana ami'ne? **14** Ra Anumzamo'a izampinti ama'
antahi'zana enerino, antahintahi'zanena e'nerie? Antahi'zane
fatgoma huno refkoma hu avu'ava zanena, iza rempia hunemie?
15 Tamagerfa huno ama mopafi vahe'ma Ra Anumzamo'ma
zamageana, kavofinti timo osi'a pake huramiaza nehazageno,
nanaza erinte'za kna'a negaza sigerire kugusopa meaza
nehaze. Ana nehigeno hageri amu'nompima me'nea moparamina
erinteno refko huno keana amne zankna hu'za osi kugusopagna
hu'naze. **16** Lebanoni mopafima ana maka mani'naza bulimakao
afutminteti'ene, Lebanonima me'nea zafaramina ana maka
antagita Ra Anumzamofontega tevefi kre fanane hu ofa
huntegahaze. Hianagi anazamo'a Ra Anumzamo'ma antahi'nea

kantera ovugahie. **17** Agri avurera mika ama mopafi vahe'mo'za amane zaga mani'naze. Agrama zamageana amane zagama zamageaza huno nezmage. **18** Ina vahete huntenga Anumzanena mago avame hu'ne hunka hugahane? Inazamofo amema'amo agriknara hu'ne hunka hugahane? **19** Mago'zamofo amema'a zafareti antreza tro hute'za golireti eri anovazinte'za silvareti seninofira tro hu'za avasase'a hunte'naza havi anumzankna, Ra Anumzamo'a hu'nefi? **20** Hagi amunte omane vahe'mo'a havi anumzamofo amema'ama miza segama osia vahe'mo'a hankave zafa erino ana zama tro'ma nehaza eri'za vahe amigeno, ana havi anumzamofo amema'a zafare antreno tro hutegenenrinte fatgo huno antegenenome'neno avugosaregatira mopafina evunoramie. **21** Kagra ontahi'nampi? Kagrira onkasmi'nafi? Ra Anumzamo'ma mopamofo agafa'ama erigafa huno tro'ma hu'neazana kora kasamigenka ontahi'nampi? **22** Ra Anumzamo'a kini tra'are monafi manisga huno mani'nege'za, ama mopafi vahe'mo'za kenu taminkna hu'naze. Anamifima me'nea monaramina, selinoma hiaza huno eri atarentegenenenevigeno, vahe'ma mani seli noma eri atareno kintegeno meaza huno noma'a kintene. **23** Ama mopafi kva vahetmina, Ra Anumzamo'a zamazeri fenkami atrege'za amane zankna nehaze. **24** Mago vahe'mo mensintfa avimza avina vati krigeno rafu'namo zahufa mopafi uorami'negeno, Ra Anumzamo'a amuho nentake zaho atregeno ame huno eno ana avimza eri hagege higeno, kagikagi zaho'mo witi hona'ama eri harafi huno freaza nehaze. **25** Ruotge'ma hu'nea Ra Anumzamo'a amanage huno nehie, Ina vahete hunteta nagrikna vahe mani'ne huta hugahaze? **26** Kavua kesga hunka monafima me'nea hanafitmina iza trora hu'nefi ko? Ra Anumzamo agrake tro huzmanteteno, nama'a hanafitami

me'neana, ana maka keno antahino nehuno, mago magomofona agi'a amitere hu'ne. Agrira tusi'a hankave'a me'negu huno kegava higeno, mago'mo'e huno fananea nosie. **27** Hagi na'a higeta tamagra Israeli vahera Jekopu naga'mota amanage hutma ke hakarea nehaze, Ra Anumzamo'a knazantia nonkeno fatgo avu'avara hunorante hutma nehaze. **28** Tamagra ontahi"nazafi? Tamagrira ontamasami'hazafi? Ra Anumzamo'a fanane osuno manivava Anumza mani'ne. Ama mopafima maka zama me'nea zantamina, agrake tro hu'ne. Magore huno agrira kasmora ahege, avesra hugera osugahie. E'ina hu'neankino mago vahe'mo'a agri antahi'zana hakenora eri forera osugahie. **29** Hankavezmima omne'nea vahera Ra Anumzamo'a hankavea nezamino, hankavezamima omanegezama kasrokasarama nehaza vahera mago'ene hihamua sotu huno nezamie. **30** Kasefa mofavreramimo'za zamavesra kosara hugahaze. Hankave kasefa vahe'mofonena hankavezmia omanesige'za traka hugahaze. **31** Hianagi Ra Anumzamofonte'ma, amuha nehu'za zamentintima nehaza vahe'mo'za, kasefa hankave eneri'za tumpamo hiaza hu'za haresga hu'za vano nehu'za, zamagama resnazana zmasafekura nosu'za, kama vanazana zamavesra osugahie.

41 Ra Anumzamo'a amanage hu'ne, Hageri amu'nompima me'nea mopafima mani'naza vahe'mota, tamagasasana eritaganeta mani'neta, nagri kea antahiho. Kokankokama mani'naza vahe'mota hanave eneritma, erava'o huta nanekea hiho. Hagi keagama eri fatgoma hu kumate enketa, keaga eri fatgo hamneno. **2** Zage hanati kaziga kini nera iza azeri otigeno vuno maka kaziga hara huzmagatenere? Iza mago'a kumate kini vahera azampina zamavarentegeno, zamazeri havizana nehuno bainati kazinteti'ene ati keveretira zamahe

hanara nehie? Ana hige'za zaho'mo witi hona'a eri hareno freanknara huno ati'aretira zamahe hanara hu'ne. 3 Korapara agra vanoa osu'nea kante Agra ame huno zamarotago huno vu'ne. Anama nehuno'a agra hazenkea e'ori'ne. 4 Iza ese agafarera ama ana zantamina forera huo higeno forera hu'ne? Iza ese agafaretira vahera fore huo higeno fore huteno manino ne-e. Ese agafa Nagra Ra Anumzamo'na mani'ne'na, vagarera nigrake mani'noe. 5 Hageri amu'nompima mani'naza vahe'mo'za anazama nege'za zamahirahi nerege'za koro nehaze. Ana nehazage'za afete mopafima mani'naza vahe'mo'za zamagogogu nehu'za magopi eme atru hu'naze. 6 Hagi maka tavao'zamirema mani'naza vahera zamazeri hankaveneti'za, korora osu hankavetita maniho hu'za zamasami'naze. 7 Zafareti'ma antre'zama keonke'zama tro'ma nehaza vahe'mo'zane, golima aeni trate'ma ante'za ru kutama nehaza vahemo'zanena, zamagra'a ozamazeri hankaveti azamazeri hankaveti hu'za knare eri'za enerune hu'za nehu'za, nirireti ana zama tro'ma hu'naza zana ahentrako hazageno evunoramie. 8 Hianagi tamagra Israeli vahera Nagri eri'za ne' Jekopu naga'mota, nagri ronen'i'a Abrahamumpinti efore hu'naza naga mani'nazage'na, nagri eri'za vahe manisnaze hu'na tamagrira ko huhampri ramante'noe. 9 Mopa ome atre eme atre hutegati tamagrira tamavre'na e'noe. Ana nehu'na nagri eri'za vahe mani'naze hu'na huhampri neramante'na, namefira huorami'noe. 10 E'ina hu'negu korora osiho, na'ankure nagra tamagrane mani'noe. Nagra tamagri Anumza mani'noanki, antahintahi hakarea osiho. Nagra tamazeri hankaveneti'na, tamaza hugahue. Nagra tamagerfa hu'na hankavenentake tamaga nazampi tamazerigahue. 11 Hanki antahiho, tamagri'ma zamarimpa aheneramantaza vahe'mo'za

zamagazegu nehanage'za, zamagefenkami atregahaze. Ana
nehanage'za tamagrime ha'ma reneramantaza vahe'mo'za
fanane hu'za amne zankna hugahaze. **12** Hagi keha'ma
reneramantaza vahekura keganti kegama hugahazanagi,
ozmagetfa hugahaze. Ana nehanage'za ha'ma reneramantaza
vahe'mo'za amne zankna hu'za fanane hugahaze. **13** Nagra
Ra Anumzana tamagri Anumza mani'noe. Ana hu'noanki'na
tamaga tamazante tamazerine'na kegava huneramantoanki'na
tamaza hugahuanki korora osiho hu'na neramasamue. **14**
Israeli vahera Jekopu nagara hagirafagna huta hankavetamia
omane vahemota korora osiho. Na'ankure nagrake'za tamaza
hugahue. Nagra Ra Anumzana tamagu'ma vazina tamavre'noa
Anumzankina, Israeli vahetema Ruotgema hu'noa Anumza
mani'noe. **15** Antahiho, witima refuzafu nepaza zafare'ma,
kasefa ave'ama antegeno witima refuzafuma nepeaza hu'na
tamagrira tamazeri retro ha'nena, agonaramina refuzafu'nepeta,
ne'onse agonaramina witi akruma hareaza hugahaze. **16** Witima
harenaku zahopi matevigeno, zaho'mo hona'ama erino viaza huta
zamazeri panini hanage'za vugahaze. Hianagi Ra Anumzana
Israeli vahetema Ruotage'ma hu'noa Anumzamo'na nagi erisga
nehutma, nagri hihamu hankavegura musena hugahaze. **17**
Zamunte omne vahe'ene, nana zanku'ma atupa'ma nehaza
vahe'mo'za tima ne'zankura zmanankemo'a tusiza huno hagege
hanige'za tinkura hakegahazanagi onkegahaze. Hianagi nagra
Israeli vahe'mofo Ra Anumza mani'noanki'na atupama hanaza
zana nezami'na namefira huozmigahue. **18** Nagra hanugen
hagegema hu'nea agonaramimpintira ranra tintamimo hageno
ne-esnigeno, krahopintira kampui tintamimo'a nehanatisnige'no,
hagegema hu'nea ka'ma kokampina hanugen timo'a hanatino

tirutamina marenavezisigeno, hagege huno kekokakoma hu'nesia
mopafina tina evugahie. 19 Hagegema hu'nea ka'ma kokampina,
sida zafama, akasia zafama, meni zafama, olivi zafama, saipresi
zafane, agigu agigu zafaramina nagra hanugen magoka
hageno marerigahie. 20 Anama hanige'za ana zantamima ke'za
antahi'zama nehu'za, Ra Anumzamo'a agra'a azanteti tro hune
hu'za nehu'za, Israeli vahetema Ruotage'ma hu'nea Anumzamo
agra'a tro hu'ne hugahaze. 21 Ra Anumzamo'a huno, Keagatamia
erita eme huama hiho. Israeli vahe kinimo'a keagafima ke
hamaresaza nanekea erineta eho hu'ne. 22 Kaza osu havi
anumzamofo amema'ama tro'ma hunte'nazana keagare'ma ne-
eta eri'netma enke'za, na'a fore hugahifi eme tasamiho. Ko'ma
evu'nea zamofo nanekea nerasamisageta, na'a fore hugahifi
rezaganeta kamneno. Ana nehu'za henkama fore'ma hania
zana hu fore hu'za tasamisageta antahisune. 23 Hanki ana
nehu'za henkama fore'ma hania zankura tasamisageta nentahita
mani nesanunkeno, anazama fore'ma hanigeta, tamage anumza
mani'naze huta hugahune. Havi zano knare zano tro hinketa
negeta, antahintahi hakare nehuta korora hamneno. 24 Ana
hu'neanagi zafare'ma antre'za tro'ma hu'naza havi anumzamota
tamagra amneza manizageno, hankavetamia omne'ne. Hagi
ana havi anumzante'ma mono'ma hunentaza vahera haviza
hu'za himanage avu'ava'ene vahe mani'naze. 25 Nagra noti
kazigati mago nera ko huhampri ante'noankino, zage hanati
kazigati ne-eno agra nagri nagri aheno husga hunantegahie.
Ana nehuno mopa kavo tro nehaza vahe'mo'za zamagareti
mopa henerazaza huno, zamagima me'nea kva vahera mopafi
zamazeri atre vagaregahie. 26 Mago'a kumamofo anumzamota,
tamagripintira ina anumzamo, ko'ma maka'zama agafa huno

fore'ma hu'neregati'ma, menima fore hania zamofonkura tasamigeta ko antahitonkeno ana zamo'a eforera nehigeta, e'i tamage hu'ne huta nehumpi? l'o magomo'e huno anara osigeno, mago vahemo'e huno kema hazankea ontahitfa hu'ne. 27 Nagra Ra Anumzamo'na nagrake, Saioni kumara asami'na, amanahu'za fore hugahianki ko hu'na hugeno ketege'na, Jerusalemi ran kumatera musenkema erino e'nia vahera huntogeno e'ne. 28 Hianagi nagrama koana ana havi anumzampintira mago'mo'e huno keaga huge, knare antahi'zana vahera amige, zamantahima kesuana mago'mo'e huno ke'niarera nona osugahie. 29 Hagi ko, zamagra amnezanki'za mago zana tro osugahaze. Ana havi anumzamofo zamema'a vahe'mo'za tro hu'naza zanki'za mago'zana osu'za fanane hu'za amne zankna hugahaze.

42 Ra Anumzamo'a huno, Nagrama huhampri ante'ne'nama azeri hankavemaneti'na musema hunentoa eri'za vahe'ni'a ama'nagi keho. Nagra avamuni'a agripi antesanugen, ama mopafima kokankoka mani'naza vahetera fatgoma huno refkohu avu'ava zana erino vugahie. 2 Agrama ke'ma haniana rankea nosuno, vahe zamavufina keaga osugahie. 3 Keta'mo futaginaku rupagagi hiaza hugahianagi, rufura otuginigeno, tavi'mo asu huku ome osi'osi hiaza hugahianagi, asura osugahie. Agra kazigazi huno tamage ke'mo'ma hu'nea kante anteno fatgo avu'ava zana erinte ama hugahie. 4 Agra avesra osu hanavetino mani'neno kazigazi huno ama mopafime maka kaziganena, fatgo avu'ava zana eri fore hugahie. Ana nehina hageri amu'nompima me'nea mopafima nemaniza vahe'mo'za agri kasege'agu avega ante'za manigahaze. (Matiu 12:18-21.) 5 Hagi Ra Anumzana Anumzamo'a monaramina tro huteno, eri rutareno enevuno ama mopa tro huteno agigu agigu zama me'nea zantamina

eri fore nehuno, vahera zamasimura nezamino, avamu'ma zamige'zama vanoma nehaza Anumzamo eri'za vahe'agura amanage nehie. 6 Nagra Ra Anumzamo'na, fatgo navu'navaza vahera zamaveri huo hu'na kagi hu'noe. Ana hu'noanki'na kazante kazerine'na kegava hugantegahue. Ama mopafi vahe'enena kagri kagofetu huvempa hu'na huhagerafigahue. Ana nehanugenka kokankokama mani'naza vahetera tavi masazami manigahane. 7 Zamavuma asuhu'nesnia vahera zamavua eri hari nehunka, kinama hu'naza vahera katufe nezmantenka, hanintiri kina nompima mani'naza vahera zamazeri atre'snanke'za fru hu'za vugahaze. 8 Nagrake'za Ra Anumzana mani'noe, Ra Anumzanema hu'neana e'i nagri nagie. Hagi atre'nuge'za nagri'ma husgama hunenantaza za hu'za zafare'ma antre'za tro'ma hu'naza havi anumzantamina husga huozmantegahaze. 9 Hagi keho, ko'ma tamasami'na henkama efore'ma hugahie hu'nama tamasami'noa zantamina, ko efore huno evie, ana hige'na kasefa zantamima henkama efore'ma hania zamofo menina erinte ama hu'na neramasamue. Ana zantamima efore osu'nesnige'na ko tamasami'nugeta antahitesnageno, henka anazana efore haniegneramasamue. 10 Kokankoka mopafima mani'naza vahe'mota, Ra Anumzamofona kasefa zagame huta agi'a ahentesga hiho. Hagerimpima vano nehaza vahe'motane, hagerimpima nemaniza zaga kafamotane, hageri amu'nompima me'nea mopafima nemaniza vahe'motanena, kasefa zagame huta Ra Anumzamofona agia ahentesga hiho. 11 Hagege kokampima nemaniza vahe'motane, hagege kokampima me'nea ranra kumatmimpima nemaniza vahe'motane, Kedari kuma tvaonte'ma me'nea ne'onse kumatmimota ranke huta agi'a ahentesga hiho. Ana nehinke'za Sela ran kumate'ma nemaniza

vahe'mota agonaramimofo morusapi marerita muse zagamera ranke huta nehuta agi'a ahentesga hiho. **12** Ra Anumzamofona zamagra husga hunteloh. Ana nehinkeno hageri akenama nemaniza vahe'mota agi'a ahentesga hiho. **13** Hankave sondia ne'mo hate vunaku rimpia nehegeno otino ivimo agazamo huno viaza huno, Ra Anumzamo'a atiramino ha' vahe'a zamahenaku nevie. **14** Ra Anumzamo'a huno, Zazate kea osu narimpa fru hu'na mani'nena, narimpa ahe'zana erinte ama hu'na mago zana osu'noe. Hianagi menina mago a'mo mofavre kasentenaku higeno atakriaza huno nata negrige'na krafa nehu'na, nasimu'ma ante'zankura nasafeku hugahue. **15** Nagra ranra agonaramine ne'onse agonaramina aherava nehena, mika trazantamina eri hagege hugahue. Ana nehu'na ranra tintamina eri tanesnugen, hagege mopa nesena, tirutamina eri hagege huvagaregahue. **16** Zamavuma asuhu'nea vahera zamagrama ke'za antahi'zama osu'naza kante zamavare'na nevu'na, ke'za antahi'zama osu'naza kantera kegava huzmante'na zamavare'na vugahue. Hagi hanizana eri atresuge'za masa negesage'na, marerino tamino'ma hu'nesnia zana eri pehe hugahue. Hagi ama ana zantamina otre'na ana maka zana huvagaregahue. **17** Hianagi kaza osu havi anumzante zamentinti nehu'za, kre maramra hu'za tro'ma hu'naza amema'a raminku'ma hu'za anumzanti mani'nane huzama nehaza vahe'mo'za tusi zamagazegu hugahaze. **18** Hagi Ra Anumzamo'a huno, Tamagesa ankanire vahe'mota tamagesa nentahinkeno, tamavu asu vahe'mota tamavua keho. **19** Tamagra nagri eri'za vahe mani'nazanagi tamavua asu hu'ne. Hagi agesa ankanire vahe'ma huntogenoma kema eri'noma via vahekna huta, tamagesa ankanire vahe mani'naze. Nagri eri'za vahe maniho hu'nama huhampri zamante'noa

vahera zamavu asu hu'ne. **20** Tamagra rama'a zantami ke'nazanagi kenira nosutma, tamagesa anteta antahinazanagi mago nanekea antahinira nosaze. **21** Ra Anumzamo'a fatgo avu'ava zama'agu muse nehuno, hihamu hankave'ane kasege'a azeri sga hugahie. **22** Hianagi menina ha' vahetamimo'za ha'eme huramante'za fenozama eri'za vazaza hu'za tamavre'za vu'za kina nompi kina ome huneramante'za, mago'a kerifi ome tamatregahaze. Hanigeno mago vahe'mo'ma ete zamavareta ehoma nosiankna hugahaze. **23** Hagi tamagri amu'nompintira iza agesa anteno ama nanekea antahigahie? Ama knaret'i'ma agafama huno'ma vaniana, nagri kea tamagra antahiteta amage anteho. **24** Iza ha' vahera huzmantege'za Jekopu nagara rohura zamare'za fenozazmia eri'za nevu'za, Israeli vahe'mota hara eme huneramante'za, maka feno zantamina emeri'za vu'haze? Ra Anumzamofo kasegema rutagreta kumi'ma agri avure'ma hu'naza zanku, agra atregeno anazana fore hu'ne. Na'ankure tagra agri avu'avara novaririta, agri amage'ma onte'nona zanku huno atregeno ana zana efore hu'ne. **25** Ana hu'negu Ra Anumzamofona tusi arimpa ahegeno, ha' vahe huzamantege'za e'za ha' eme hurantazageno, maka kaziga tevemo te kagiaza hu'ne. Ana hu'neanagi anazana keta antahita osu'none.

43 Hianagi Jekopu naga'ma tamagri'ma tro'ma huneramanteno, Israeli vahe'ma tamazeri fore'ma hu'hea Ra Anumzamo'a huno, Korora osiho, Nagra tamagu'vazi'na tamavre'noe. Na'ankure tamagra nagri su'za mani'haze hu'ha tamagi ahe'ha tamavre'noe. **2** Hanki tintamima takama ahenage'na nagra tamagrane mani'nenugeno tima hagenia timo'a tamazeri onakrigahie. Hagi teve nerisifi ufregahazanagi, tevemo'a tamare orasagegahie. **3** Nagra Ra Anumzana tamagri Anumza mani'noe. Israeli vahete'ma

ruotage'ma hu'ne'na tamagu'vazi'na tamavre'noa Anumza
mani'noe. Isipi vahe'ma, Kusi vahe'ma, Seba vahe'enena tamagri
nona hu'na miza nezamina tamagrira tamavre'noe. 4 Na'ankure
tamagra nagri navurera knare zantfa hu'nazage'na tamage
sga hu'nena, navesi neramantoe. Ana hu'noanki'na tamagri'ma
tamagu'ma vazi'na tamavrenakura mago'a vahe zamatroge'za
tamagri nona eri'za nefrizage'na tamagrira tamavre'noe. 5
Nagra tamagrane mani'noanki korora osiho. Tamagri'ene
mofavre nagatamima zage hanati kazigane zage fre kazigama
mani'nazana nagra magopi tamavre atru hugahue. 6 Ana nehu'na
noti kazigama mani'naza vahekura zamatreke'za eho nehu'na,
sauti kazigama mani'naza vahekura zamaze'ori zamatreke'za
eho hu'na hugahue. Hagi afete kokantegatira ne'mofavre naga'ni'a
zamavare'na ne-e'na, mopamo ome atretegatira mofa'ne nagani'a
ete zamavare'na egahue. 7 Nagriku'ma Anumzantie hu'zama
nagima nehaza vahe'mo'za eme atru hugahaze. Na'ankure
ra nagi namisaze hu'na trohu zmante'noanki'na, Nagrake'za
zamazeri fore hu'na tro huzmantoge'za mani'naze. 8 Hagi Ra
Anumzamo'a huno, Zamavuma ke'zana zamavurga megeno,
kema antahi'zana zamagesa me'neanagi, zamavu asuhu vahe
nese'za, zamagesa ankanire vahe'ma nesaza vahera ke
hutru hiho. 9 Maka kokankokama ama mopafima mani'naza
vahe'mo'za magopi eme eri atru nehaze. Hagi ana vahe
amu'nompintira izo otino ama ana zankura huamara nehuno,
ko'ma evu'nea zantamina taveri hugahie. Keagare'ma oti knazupa
zamasaminke'za tamage nehaze hu'zama keagafima zamazama
hanaza vahera zamavare'ne'za eho. Anama hanage'za mago'a
vahe'mo'za nentahi'za e'i tamage nehaze hu'za hugahaze. 10
Hianagi maka'zama hu'noa zanku'ma tamage nehiema huta

huamama hanaza vahera tamagra Israeli vahe mani'naze
huno Ra Anumzamo'a hu'ne. Nagri eri'za vahe mani'naze
hu'na huhampri tamante'noa vahe mani'nazankita, Nagrira
nageta antahita huta tamentintia nehuta nagrikura Ra Anumza
mani'ne huta hugahaze. Korapara nagrikna anumzana tro
huntageno omani'neankino, henka'a nagrikna anumzana tro
huontegahaze. **11** Nagrake Ra Anumzana mani'noankino, nagrira
nagatereno mago'mo'a anumzana manino tamagura ovazigahie.
12 Nagra erinte ama hu'na, tamagura vazite'na huama hu'noe.
Ana hu'neankino magore huno ru anumzana tamagranena
omani'ne. E'ina hu'negu tamagra Nagriku'ma Anumza mani'ne
huta huama'ma hanaza vahe mani'naze. Nagrake'za Anumzana
mani'noe. **13** Korapara Nagrake mani'na e'noa Anumzana
mani'noakino, mago zamo'a nazampima azerinesua vahera avre
otregahie. Nagrama mago zama hanugeno'a, mago vahe'mo'a
eri otregahie. **14** Israeli vahe'motare'ma Ruotage'ma hu'neno,
ete tamavre'nea Ra Anumzamo'a amanage hu'ne, Tamagrama
knare huta manisagu hu'na sondia vahera huzmantesnuge'za
vu'za, Babiloni vahera ha' ome huzmantesnage'za, musema
nehu'za ra zamagima eneriza ventefi koro fre'za vugahaze.
15 Nagra tamagi Ra Anumzana Ruotage'ma hu'noa Anumza
mani'noe. Ana hu'noanki'na nagrake Israeli vahera tamazeri
fore hu'nena, tamagi kinia mani'noe. **16** Ra Anumzamo'a huno,
Iza hagerimpina kana eri fore nehuno hanavenentake timpina
kana vari'ne. **17** Ana hige'za ana kampina hankave sondia
vahetamine, hosi afutamine, karisiraminena huzmantoge'za
e'naze. Ana hu'nazanagi lamu tavi husu higeno asu hiaza hu'za
zamagra otigara osu'za timpi urami'za fri'naze. **18** Hianagi
korapa'ma fore'ma hu'nesnia zankura tamagesa ontahiho. Ko'ma

evu'nesnia zankura antahintahia osiho. **19** Hagi nagra menina kasefa'za tro nehuanki keho. Hagi ana zamo'a tima hanatiaza huno efore nehianki, tamagra nonkazo. Nagra ka'ma kokampina kana nevari'na, hagege kokampina hanugenno timo'a hanatino evugahie. **20** Ana hanige'za afi zagagafamozane afi kramo'zane, mananinkna nama ostretimo'zanena nagi'a erisga hugahaze. Na'ankure hagege kokampine, ka'ma kokampinena Nagra hanugenno tina hanatino egahiankiza, nagrama huhampri'noa vahe'mo'za tina negahaze. **21** Nagri vahe manisaze hu'nama tro huzmante'noa vahe'mo'za nagri nagi huama nehu'za ahentesga hugahaze. **22** E'ina hu'neanagi tamagra Jekopu naga'mota nagri nagia aheta monora hunontaze. Hianagi Israeli nagamota Nagrira tamavesra hunentaze. **23** Tamagra sipisipi afutamina avreta eta nagritega tevefina kre fananehu ofa nosuta, mago'a ofanena huta nagri nagia erisga osu'haze. Hianagi mago'a ofane, mnanentake'za insensia nagritera kreta ofa hunanteho hu'na tutu hu'na tamagrira knazana ontami'noe. **24** Hagi tamagra mnanentake'za insensia zagoretira mizaseta ofa huonuge, ofama haza afutamimofo afovaretira nazeri musena osu'haze. Hianagi tamagra kumi huta kna nenamita, kefo tamavu tamava'ma hazazamo nazeri navesra nehie. **25** Hianagi Nagra Ra Anumzamo'na nagimofo knare zanku nagesa nentahi'na, maka kumitamia eri atre vaganere'na mago'enena nagesa ontahigahue. **26** Hanki keagare enketa magopi keaga huta eri fatgo nehanunketa, hazenketia omane'nea vahe mani'none huta keagafi huama hinketa, e'i tamage nehzafit antahimneno **27** Korapara tamagehe'za kumira nehzageno, tamagri tamagi'ma eriza keagama nehaza vahe'mo'za ha' renenante'za nagri kea rutagre'naze. **28** E'ina hu'negu tamagri pristi vahe'ma mono

nompima eri'zama eneriza vahera, zamazeri zamagaze nehu'na,
Jekopu nagara zamazeri havizantfa hanuge'za, Israeli vahera
kiza zokago ke huramantesnageta tamagaze zanku hugahaze.

44 Hianagi menina tamagra Israeli vahera Jekopu naga'mota
Ra Anumzamo'a amanage hianki antahiho, Nagri eri'za vahe
manigahaze hu'na ko huhampari tamante'noe. 2 Hagi tamagr'i'ma
tro'ma huno tamazeri fore'ma hu'nea Ra Anumzamo'a amanage
nehie, antatamimofo rimpafina Nagra tamazeri fore hu'noanki'na,
kegava huramantegahue. Nagri eri'za vahe Jekopugagu'ma
Jeshurumu'ema nehazage'nama huhampri'noa ne'moka korora
osuo. 3 Na'ankure hagege huno tima omane'nea mopafina
tina tagi netre'na, hagege mopafina hanugen tina evugahie.
Ana nehu'na tamagrama kase zamantesnaza mofavre nagatera
avamuni'a eri herafinetrena henkama zamagripinti'ma efore
hunante anante'ma hu'za vanaza vahera asomu huzmantegahue.
4 Zamagra trazamo tretre huno hageaza nehu'za, tinkenare
me'hea popra zafamo hageaza hugahaze. 5 Mago'mo'a
huno, Ra Anumzamofo suza mani'noe nehanigeno, mago'mo'a
huno nagra Jekopu suza mani'noe nehanigeno, mago'mo'a
huno Ra Anumzamofo suza nagra mani'noe huno azantera
krenentenigeno, mago'a vahe'mo'za hu'za tagra Israeli vahe
mani'none hu'za zamagia erisga hugahaze. 6 Ra Anumzamo'a
amanage hu'he, Nagra Israeli vahe'mota kini mani'nena
tamagu'ma vazi'noa Anumzankina Monafi sondia vahe'mofo
Ra Anumza mani'noe. Ana hu'heankina Nagra'a ese agafa
hu mani'nena, Nagra'a vagare'enena mani'noe. Magore huno
Nagrikna Anumzana omani'ne. 7 Iza Nagri knara hu'nefi huama
hino. Nagrikna vahe'ma mago'ma mani'nesniana hinkeno, nagri
navure eno Nagrama vahe'ni'ama huhamprima zamante'noa

vahetera korapara na'a fore hu'nefi eme huama nehu'za,
henkama ne-ea zane henkama fore'ma hania zanena eme huama
hino. 8 Nagri vahe'mota tamahirahikura nehuta korora osiho,
ama ana zantamima fore'ma osu'nege'na e'inahuza fore hugahie
hu'na ko'ma tamasami'noana tamagra ontahi'nazafi? Tamagra
Nagrira ko keta antahita hu'nazanki, nagrikna Anumzana magora
mani'neno, Nagrama huaza huno hankave havegnara huno
mani'nage'na nagra ontahi'nofi? 9 Hanki havi anumzamofo
amema'a zafare'ma antre'za tro'ma nehaza vahera amne'za
mani'naze. Ana nehu'za ana zanku'ma mareri fenoza ante'none
nehaza zantamina amneza me'ne. Ana havi anumzante'ma
mono'ma hunentaza vahera, zamavu suhuno neginagi vahe
mani'nazanki'za, tusi zamagazegu hugahaze. 10 Zafareti'ma
antreno havi anumzama tro'ma huge, golireti'ma kreno havi
anumzamofo amema'ama tro'ma nehia vahera, ana anumzamo'a
mago zana aza osugahie. 11 Hagi antahiho, havi anumzantamima
troma nehia vahe'ene azama hu'za ana anumzama tro'ma
nehaza vahe'mo'zanena zamagazegu hugahaze. Na'ankure ana
havi anumzamofo ame'ma'a vahe'mo'za zamazanteti tro hu'naze.
E'na hu'negu zamatrenke'za eme eri atru hute'za amare echo.
Tamagerfa hu'na nagra zamazeri koro hanuge'za, zamagazegu
hugahaze. 12 Ainireti'ma eri'zama eri antahi'zama eri'nea
vahe'mo'a hama eri'neno hankave'a atreno ainia runtra aheno
ana havi anumzamofo amema'a tro nehie. Hagi ana eri'zama
e'neriana aganegeteno hankave'a omne amne nehigeno, tinkura
ave'nesigeno ana zana tro nehie. 13 Hagi magora zafareti'ma
antreno keonke zama tro'ma nehia vahe'mo'a, nofi avazu
hu'neno, anante avona eri vakokino krenteno evuteno, ananka
avaririno siselireti hanagatino vahe amema'a avaseseane tro

huteno erino nompi ome nente. **14** Ana zantamima tro hunakura sida zafama, saipresi zafama oki zafareti'ene erino tro nehie. Ana nehuno menizafa, zafa tanopafi krinegeno ana zafafina kora runentegeno hageno mareneria zafa antagino ana zana tro nehie. **15** Mago'a ana zafaramina, kave'ma kreno nesnia teve nehareno, mago'a tevema hugreno tohisigu nehare. Mago'a ana zafafintira erino havi anumzamofo amema'a tro hunteteno, monora hunente. **16** Ana zafa mago'a apapu huno afu ame'a kreno neneno muse nehie. Ana nehuno mago'a zafa erino tevefi kregeno neregeno teve tonehino, tevemo'a knare huno navufga temuho hie huno muse nehie. **17** Hianagi mago'a zafa erino havi anumzazamimofo amema'a antreno tro hunteteno ana zante monora hunenteno, amanage huno nunamuna nehie, kagra anumzani'a mani'nanku naza nehunka nagu'vazio huno nehie. **18** Tamagerfa hu'za havi anumzante'ma mono'ma hunentaza vahe'mo'za neginagi nehu'za, ama antahi'zana e'norize. Anazamo zamavua anteso hige'za nonke'za, antahintahi zamimo'a ankanire'neanki'za ama' antahi'zana e'norize. **19** Mago'mo'e huno amanahu antahi'zana e'norie. Mago zafa eri'na teve heg're'na bretia krege afu ame'anena krena ne'noe. Ana nehu'na mago'ama mesia zafaretira kasrino haviza huno agoterfa zana trora hutena ana zafa atuparera narena re'na monora huntegahufi? **20** Inankna hu'za vahe'mo'za negia nene'za tanefa'ma ase'nia zantera zamentintia nehaze? Ana vahera havi antahi'zazmimo rezamavatga hige'za havi kante nevazankiza, zamagra'a zamagura ovazigahaze. Ana nehu'za tamaga kazigama eri'naza zankura havige'za eri'none hu'za ke'za antahi'zara osugahaze. **21** Ra Anumzamo'a amanage huno nehie, Israeli vahera Jekopu nagamota ama zantaminkura tagera

okaniho, nagra tamazeri fore hugeta nagri eri'za vahe mani'haze.
Hagi Israeli vahe'mota Nagra nagera akani oramantegahue. 22
Zaho'mo hanintiri hampo erino eviaza hu'na, tamagri kefozana
eri netre'na, kna'ane anafru huramia ata ko zahomo eri huhu
huno eviaza hu'na kumi tamia eri atre'noe. Ana hu'negu
Nagrite rukrahe huta eho, na'ankure nagra ko tamagu'vazina
tamavre'noe. 23 Ra Anumzamo'ma ama anazama tro'ma
hu'nea zama negetma, anami monaramimoka muse zagame
nehugen, mopa agu'afima me'nea zamoka muse nehugen,
agonaramimokane zafa tanopafima me'nana zafaramimotanena
ranke huta muse zagamera hiho. Na'ankure Jekopu naga'ma
aguvazino ete avre'nea Ra Anumzamo Israeli vahetera agra
hankave'a erinte ama' nehie. 24 Israeli vahe'mota ha' vahetmimofo
zamazampinti'ma tamagu'mavazino neramavreno, antatamimofo
zamarimpafima tamazeri fore'ma hu'nea Ra Anumzamo'a
amanage hu'ne, Nagrake Ra Anumzana mani'nena maka zana
tro nehu'na, anami monaramimpine ama mopafima me'nea
zantamina nagrake tro hu'na erimporogeno me'ne. 25 Havi
kasnampa kema nehaza vahera ana kasnampa kea eri atrogeno
nen'a forera nosigeno, henkama fore hania zanku'ma zamema
eri nentaza vahera antahintahi zamia zamazeri neginagi nehue.
Ana nehu'na antahi'zane vahe'mokizmi antahi'zana eri atroge'za,
neginagi vahe nemanize. 26 Nagri kasnampa vahe'ene, nagri
kema erino vu vahe'mo'zama henkama fore hania zanku'ma
huama'ma hu'naza zantamina, Nagra ana zantamina erifore
nehua Anumza mani'noe. E'ina hu'negu menina amanage
nehue, Jerusalemi rankumapina mani avinete'za, Juda mopafima
me'nea kumatmina negi'za havizama hu'nea kumatmina nagra
hanuge'za ete erioti vagare'za kigahaze. 27 Nagra hugeno

hagerimo'a hagege hu'nea Anumzankina, nagra hanugeno tirantamimo'za tanegahaze. 28 Nagra Sairusina huhamparugen no nagri sipisipi kva vahe mani'neankino, Nagri'ma nave'nesia zana ana maka agra eri fore hugahie. Ana hu'neankino agra hanige'za Jerusalemi ran kumara ete eri kasefa hu'za negi'za, Nagri mono noma azeri oti'za ki tra'a agafa hu'za kigahaze.

45 Masavema frenteno azeri ruotage'ma hu'nea ne' Sairusinkura Ra Anumzamo'a amanage hu'ne, Nagra tamaga kaziga azante azerine'na hankavea nemisanugeno, ina kuma'mo ha'ma eme hentesniana hara hugate'nereno, kini vahera hara huzmagatereno hankavezamia eri atregahie. Nagra ranra kumatmimofo kafana anagi'na eri hagro hunentesugenno mago vahe'mo'a ana kafana eri onkigahie. 2 Nagra Sairusiga kavuga vugota hugante'na nevu'na, agonaramina aherava hu'na eri pehe hu'na nevu'na, bronsireti tro'ma hu'naza kuma kafantamine, ainireti'ma tro'ma hu'naza azotama kafantema rentroko'ma hunte'naza azotanena eri anafe hutregahue. 3 Ana nehu'na zago fenoma vahe'mo'zama hanintirrima hu'nefinkama oku'ama fraki'zama ante'naza fenona eri kamigahue. Anama hanugenka nagrikura Ra Anumza mani'neno Israeli vahe'mokizmi Anumzankino, nagi aheteno huhampari nante'ne hunka, kenka antahinka hugahane. 4 Eri'za vahe'ni'a Jekopunku'ene Israeli vahe'ma nagri vahere hu'nama huhampri zamante'noa vahe'mokizmigu nentahi'na, Nagrira kenka antahinka osu'nananagi, kagrira kagia ahete'na, kavre'na kva kagia kaminoge'za husga hunegantaze. 5 Nagrake'za Ra Anumzana mani'noankino, magore huno nagrikna anumzana omani'ne. Nagrira kenka antahinka osu'nananagi, nagra hankavea kamigahue. 6 E'inama hanuge'za, zage hanati kazigati'ma evuno, zage fre kazigama mani'naza vahe'mo'za,

Nagrikura agrake Ra Anumzana mani'neankino, magore huno
agrikna anumzana omani'ne hu'za ke'za antahi'za hugahaze. 7
Nagra masa tro nehu'na, nagra haninena eri fore hu'noe. Nagra
huge'za knare nomanizana nemanizage'na, Nagra huge'za
vahe'mo'za knafina unefraze. Nagra Ra Anumzamo'na ama
ana maka zana hugeno forera nehie. 8 Anami monaramina
asamigeno, ne'onse ko'mo'ma nehiaza huno fatgo avu'avazamo'a
kora runo eramino, kankamuna erifore hanigeno, tagu'ma
vazizamo'a hageno ome ra nehina, fatgo avu'avazamo'a
magoka hageke marerigaha'e. Nagra Ra Anumzamo'na ana
zana eri fore nehue. 9 Hagi tro'ma hunte'nemofoma ke
ha'ma renentea vahe'mo'a kva hino. Mopa kavomo'a tro'ma
hunte'nemofona hafra huntegahifi? Hagi mopamo'a kavoma
tro'ma nehia nekura, na'a hu'za nehane huno huge, kazana
omnene huno hugahifi? 10 Mago mofavremo'ma nefama
antahigeno, mofavrea na'a nentane nehuno nereranku'ma
antahigeno, mofavrea na'a kasenentanema huno'ma hania
mofavremo'a hazenkefi mani'neanki kva hino. 11 Israeli vahetema
ruotage'ma hu'neno, Israeli vahe'ma zamazeri fore'ma hu'nea
Ra Anumzamo'a amanage nehie, Israeli vahete'ma henkama
fore'ma hania zanku'ene nazampinti'ma tro'ma hu'noa zankura
nagri nantahigeta keho. 12 Nagra ama mopa tro hute'na ana
agofetura vahe tro hu'na ante'noe. Nagra nazampinti anami
monaramina tro hu'na rufanara hunentena, maka zantamine,
zagene, ikane hanafitamina tro huzmante'noe. 13 Nagri fatgo
navu'navaza amage ante'nogu Sairusina azeri oti'noe. Ana
hu'negu kama vania kana eri fatgo hu'na eri pehe hugahue.
Ana hanugeno agra Nagri rankumara eri kasefa huno negino,
nagri vahe'ma zamavare'za ome kinama huzmante'naza vahera

zagoa e'ori ana vahera katufe zamantegahie huno Monafi
sondia vahe'mofo Ra Anumzamo'a hu'ne. **14** Ra Anumzamo'a
amanage hu'ne, Isipi vahe'mo'zama tro hu'naza zantamimo'ene
Kusi vahe'mofo zago fenomo'ene zamagima mareri'nea Seba
vahe'mo'zanena tamagrike zanke segahaze. Ana nehanageta
seni nofiteti kina rezmante'nesage'za tamagri tamefi ne-eza
tamagiafi zamarena eme nere'za anage hugahaze, tamagerfa
huno Anumzamo'a tamagrane mani'neankino Agrikna anumzana
magore huno omani'ne hu'za hugahaze. **15** Israeli vahe'mokizmi
Anumzamoka, vaheka'a Israeli vahera ete nezamavrana Anumza
mani'nane. Ana nehunka mago'a vhetera eamara nosane. **16**
Havi anumzamofo amema'ama zamazantet'i'ma tro'ma nehaza
vahe'mo'za tusi zamagazegu hugahaze. **17** Hianagi Israeli
vahemota fanane osu manita vanazegu, Ra Anumzamo'a
tamagu vazino ete tamavrene. Ana hu'neankita vahe zamavurera
tamagazegura osuta, mani vava huta vugahaze. **18** Hagi monane
mopanema tro huno erinte fatgo huteno, noma'arera antegeno
mefatgo hunegeno amne omanenianki agigu agigu zamo mani
avitesie huno tro hunte'nea Ra Anumzamo'a amanage hu'ne,
Nagrake Ra Anumzana mani'noanki, magore huno nagrikna
Anumzana omani'ne. **19** Nagra fraki'na hanintirima hu'nea
mopafina mani'nena Jekopumpinti'ma fore hu'naza Israeli
nagara oku'a nanekea tamasami'na, vahe omani kokampina
nagrikura hakeho hu'na osu'noe. Nagra Ra Anumzamo'na tamage
nehuankino, maka nanekema nehuana fatgo nanekege nehue.
20 Tamagra ru kumapinti'ma fretama esaza vahe'mota magopi
eri tru huteta erava'o hiho. Mago vahe'mo'ma havi anumzama
azampi erineno zamagu'ma ovazi anumzante'ma nunamuma
nehia vahera antahintahi'a omane'nea vahe mani'ne. **21** Ana

vahe'mota eta eme atru magopi huteta zamatrene'za ana havi
anumzantmimo'za zamagra zamagra keaga hute'za huamara
hiho, Iza menima fore'ma hania zankura kora huama hu'nea
zamo eforera nehie? Nagra Ra Anumzamo'na ama anazankura
huamara hutogeno eforera nehie. Nagrake fatgo navu'navara
nehu'na, vaheni'a ete nezamavroa Anumza mani'noankino,
magore huno Nagrikna anumzana omani'ne. **22** Maka ama mopafi
vahe'mota Nagrite rukrahe huta enke'na tamagura vazi'nena
maniho. Na'ankure Nagrake Ra Anumzana mani'noankino,
magore huno nagrikna anumzana omani'ne. **23** Nagra Ra
Anumzamo'na nagra nagifi huvempa huankino, nagipinti'ma
fatgo nanekema huama'ma nehua kemo'a, amne zanknara
osuno nena raga rentegahie. Ana nehina Nagri nagifi maka
vahe'mo'za zamare'na eme nere'za, Nagri nagorga manigahune
hu'za huvempa hugahaze. **24** Zamagra Nagrikura amanage
hu'za hugahaze, Ra Anumzamofona agripinke fatgo avu'ava
zane hankavenena me'ne hu'za hugahaze. Ana nehanage'za
Anumzamofoma zamarimpama ahente'naza vahera esnageno
zamazeri zamagaze hugahie. **25** Hianagi Jekopumpinti'ma
fore'ma hu'naza Israeli vahe'mo'za, Ra Anumzamo'ma zamazeri
fatgo hu'nea zanku ra zamagia erigahaze.

46 Hagi Beli havi anumzamo'a arenaregeno, Nebo havi
anumzamo'a urami'ne. Ana havi anumzantremofo amema'a
zafareti antre'za tro hazageno knanentake hu'neankino, tonki
afutamimofo agumpi erintazage'za, knagu nefri'za eri'za nevaze.
2 Ana havi anumzane ana havi anumzama kofiza vanoma
nehaza vahe'mo'zanena zamarena re'za kepri hugahaze.
Hagi ana havi anumzamo'a erino'ma vanoma nehaza vahera
agura ovazinigeno erino'ma vanoma nehia vahe'mo'a ana havi

anumzana agura ovazigahiankino, taregamokiznia zamavare'za
kina ome huzmantegahaze. 3 Osi'a Israeli vahe'ma Jekopu
naga'ma ofri'ma mani'naza nagamota kama antahiho, ese'ma
fore'ma osu'nage'na Nagra hugeta forera hu'naze. Anama
neramarera rimpafinti'ma fore'ma hazza zupa agafa hu'na nazampi
tamazeri sga hu'na tamavre'na e'noe. 4 Hagi tamagrira efe
tamazoka resnigetma tavava ozafa regahazanagi, Nagra zahera
osu'na magoke avamenteke manina vugahue. Tamagra ozafa
tavava omeregahazanagi, Nagra nazampi tamavresga hu'nena,
kegava huramante'na knazantamia eri o'za nehu'na, tamagura
vazigahue. 5 Iza nagrikna vahera mani'nesnia vahete refkoa huta
negeta, ama vahe'mofo avu'avamo'a Ra Anumzane mago'za
hu'ne huta hugahaze? 6 Mago'a vahe'mo'za kuzamifinti golia eri
henerafi'za, Silvanena erinte'za sigerire kna'a kete'za, golireti
ne'onezama tro'ma hu eri'zama antahi'naza vahe, zago miza
sezamante'naku zuruna hazage'za havi anumzamofo amema'a
tro hutazage'za, ana zante zamarena re'za monora hunentaze.
7 Ana havi anumzamofo amema'a zamafunte erisga hu'za vu'za,
noma'are ome retru rentazageno neme. Ana amema'amo'a
kana vuno enora osugahiankino, retruma rentazageno mere
megahie. Mago vahe'mo'a ana amema'are'ma naza huo huno'ma
krafagema hanigeno'a, ana kerera nona huno knazampintira
agura ovazigahie. 8 Tamagra amama hanua kea tamagera
okanita antahintahifi erinteho. Tamagra kumi vahe mani'nazanki,
ama ana nanekea tamagu'afi erinteho. 9 Korapa'ma evu'nea
knafima tro'ma hu'noa zankura tamaganera okanita tamagesa
antahiho. Nagrake Anumzana manugen, Nagri namefira mago
anumzana omani'ne. Nagrake Ra Anumzana manugen, magore
huno nagrikna Anumzana omani'ne. 10 Mago zana forera

osu'nege'na, inankna huno anazamo'a eforera huteno ome vagaregahie Nagra korapa knafi ko huama hutogeno, kema hu'noa kante anteno, anazamo'a henka eforera nehie. Nagrama nazano hugahuema hu'na retromma hunte'nesua ke'mo'a amne zankna osugahie. Nazano huku'ma hanua zana amne hugahue.

11 Nagra afete zage hanati kazigati mago vahera ke hu'noankino, agra mago tumpa namamo mago'zaga aheno nenaku eri fafukino eramiaza huno eno, Nagrama antahintahima retro'ma hu'noa zana agra emeri fore nehuno, Nagrama tro hugahuema hu'na hu'noa zantamina agra eme tro nehuno, e'inahu eri'za erigahue hu'nama huhampari'noa zana agra emeri vagaregahie. **12** Hagi keontahi vahe'mota tamagrama antahi'zana, Nagriku'ma fatgo avu'ava'ma huno ete tavresnia knama huhampari'nea knamo'a afete me'nne huta nehaza vaheki, Nagri ke antahih. **13** Nagra fatgo navu'nava zani'a avrерava'o nehuankino afetera omanene. Ana hu'neankina ame huna tamagrira tamagu vazigahue. Nagra hu izo hanugeno Saioni kumatera agu'vazizana fore nehina, Israeli vahera ra zamagi zamigahaze.

47 Babiloni kumamoka vene omase mofaknama hu'hana kumamoka eraminka kugusopafi manio. Babiloni mofamoka kini traka'a atrenka mopafi umanio, Babiloni vahe'mokizmi mofamoka ko'ma nehana zana hunka kavasasea hunka vanoa nehananke'za vahe'mo'za kagenunua osugahaze. **2** Ana nehunka witima refuzafuma nepaza have erinka witia refuzafu nepenka, kavugosare'ma rufite'hana tavaravea eri netrenka, kenaka'a hatenetrenka, kagia anona zafi netrenka tina takahegahane. **3** Vahe'moza kukenaka'a hate atresnageno kagaze kavufgamo'a amate megahie. Kagrama hu'nana zante nona hu'na narimpa ahegante'na kazeri haviza nehu'na, mago vahere hu'na

otregahuankina zamahe vagaregahue. 4 Tagri'ma Tagu'vazino tavre'nea Anumzamofo agi'a, Monafi sondia vahe'mofo Ra Anumzane huno me'ne. Ana hu'neankino Israeli vahe'mokizmi Ruotage hu'nea Anumza mani'ne. 5 Babiloni kumamoka kuini mofaknama hunanke'za, kegavama hunana kumamo'zama kagesgama nehaza kumamoka kagira hamunkinka hani zampi manio. Na'ankure mago'anena kagesga osugahaze. 6 Nagra vaheni'amokizmi narimpa ahezamante'na, Nagri vahe manisaze hu'na hu'noa vhahera zamazeri haviza hanane huna kagri kazampi zamavare antogenka, kasunkura huozmante'nane. Ana nehunka tavavaneramine ozafaraminenas tusi'a knaza eri zamagofetura ante'nane. 7 Kagrama antahinana zaza kna kuinia mani vava hu'na vugahue hunka antahi'nane. Hianagi henkama kagrite fore'ma hania zankura kagesa antahi so'ea osu'nane. 8 E'ina hu'negu kama antahio, mago zana nagritera fore osanigena knare hu'na manigahue nehunka, muse hunka manizankuke nehunka, nagrake mani'noankino magore huno nagrikna vhahera omanine hunka nehane. Nagra kento ara omanige, mofavre nagani'a ofrigahaze hunka hu'nane. 9 Hianagi ama tare zantre'moke ame huke kagrite eke magoke zupage kazeri fenkami atregaha'e. Negave'ene mofavre nagakamo'za magoke zupage frigahaze. Kagrama antahinka ruzahu ruzahu avua tagazane avune zanema ante'noa zamo kegava hunantegahie hunka'ma nehana zantamimo'a, kza osanigenka ra hazenkefi ufregahane. 10 Kagrama hana kefo kavukva zampi frakinka mani'enka, vahe'mo'a nonage hunka nehane. Kagrama hunka knare antahi'zane ama' antahintahi eri'noema hunka hanazamo, kazeri havi kampina atregenka, kgra kagu'afina hunka nagrake'za maka hankavea eri'noankino magore huno nagrikna vhahera

omani'ne hunka nehane. 11 Hianagi tusi'a knamo kagrite esanigenka, mago'a safezana hunka ana knazana eri amnea osugahane. Kagrama antahinka e'inahu knazana forera osugahie hunkama antahi'nesnana knazamo, kagritera ame huno efore hanigenka mago zantetira miza hunka ana kana rehizara osugahane. Hagi antahinka kenka osu'nana knazamo, ame huno kagritera egahie. 12 Kagrama kasefa'ma mani'enka'ma avuataga zane avunezanema antahi'nana zantamimo kaza hugahifi, avamera antenka negenka ha' vaheka'a azeri korora huo. 13 Vahe'mozama antahintahima kami'naza zamo higeno kavesra nehie. Hagi ke huge'za monafima me'nea zantamima refkoma hu'zama negaza vahe'mo'zane, hanafitamima nege'za kasefa ikante'ma fore'ma hania zanku'ma kasnampa kema nehaza vahera huge'za, oti'za kagrite'ma fore'ma hu'zama nehia hazenke zampintira kagura vazih. 14 Trazama tevemo tetegeno agafa'a meankna zamagra hu'naze. Ana hu'neankino ana tevemofo hanavefintira zamagra'a zamagura ovazigahaze. Hu'neankino ana tevemofo tankanuza me'nesige'za tevea tohige ana teve tavaontera manigera osugahaze. 15 Kagrama osi'ma mani'nantegati'ma eno menima ege'za kagranema mani'neza antahintahi negami'za, henkama fore hania zanku havi kasnampa kema nehaza vahe'mo'za kagrira katre'za rure rure uvu evu hanageno kazama hania vahera omanigahie.

48 Tamagra Jekopu naga'ma Israeli vahere huno'ma tamagima me'negeta, Juda nagapinti'ma efore'ma hu'naza vahe'mota ama'na nanekea antahiho. Tamagra Ra Anumzamofo agifi huvempa huta Israeli vahe'mota Ra Anumzamo'a Ra Anumza mani'ne hutma huama nehazanagi, tamagra havige tamagiteti nehuta, fatgo tamavutamavara nosaze. 2 Tamagra Ra Anumzamo

huhamparintegeno ruotge hu'nea Jerusalemi kumapi vahe mani'nonankino, Israeli vahe Anumzamo'a taza hugahie huta antahintahia nehuta, ana Anumzamofo agi'a Monafi sondia vahe'mofo Ra Anumzane huta nehaze. 3 Hagi henkama efore'ma hania zankura korapa huama hutogeno, ana zantamimo'a ame huno fore huno ko evu'ne. 4 Na'ankure tamagrira ko tamage'na antahi'na Nagra hu'noankino tamagu'amo'a hankavetigeno, tamanankemo'a hankavetino ainigna higeno, tamasenimo'a hanavetino bronsigna hu'ne. 5 E'ina hu'neanki'na ama anazama tamagritera forera osu'nege'na, ko huama hu'na tamasami'noe. Na'ankure ana zamo'ma tamagrite'ma efore'ma hanigeta, havi anumzamofo amema'a zafarero, ainireti'ma tro'ma hunte'naza zamo eri forera nehie huta hu'zanku ko tamasami'noe. 6 Ko'ma tamasami'na henkama fore hugahie hu'nama hu'noa zantamina ko fore higeta ke'naze. Hianagi tamagra tamage hu'ne huta ana zankura huamara osu'naze. Ana hu'neankina kora ontamasami'noa zantami kasefa zantaminku menina neramasamina, oku'ama frakinoma megeta onke'naza zantamina eri ama hu'na tamarasamigahue. 7 Korapara fore higeta onke'nazaza menina kasefa'za eri fore nehue. Ana nehuankita tamagra huta, antahi'nonaza eri fore nehie huta osugahaze. 8 Hagi korapatima eno menima e'neana tamagesamo'a ankan i renegetma ke ontahi vahe mani'nazanki'na, ama ana zankura huamara hu'na ontamasami'noe. Na'ankure Nagrama tamage'na antahi'nama hu'noana, esema fore'ma hunazaregatima manitama e'nazana keontahi vahe mani'naze. 9 Hianagi Nagra tamagrira narimpa aheramante'na tamahe fanane hunaku hu'noanagi, Nagrani'a nagimofo so'e zanku nagesa nentahi'na anara osu narimpama ahe'zana netroankiza, ana zankura nagia husga

hugahaze. **10** Hanki antahiho, Nagra tamagri'ma tamazeri agruma hu'noana amuhonentake tevefima silvama kreno eri agruma nehiazana hu'na tamazeri agrua osu'noe. Hianagi nagra amuhonentake knaza tami'na tamazeri agrua hu'noe. **11** Nagra nagimofo so'e zanku nagesa nentahī'na, nagia huhaviza osnaze hu'na e'inahu zana hu'noe. Ana hu'noanki'za nagrike'za ra nagia namigahaze. **12** Israeli vahera Jekopu nagamota nagri keaga antahiho, nagra tamagri'ma kema hu'noa Anumzamo'na ngrake Ra Anumzana mani'noe. Nagrake ese agafa manine'na, ngrake vagarera mani'noe. **13** Nagra nazampinti erivako hu'na ama mopamo'ma regri'nea tra'a trora hu'noe. Tamaga nazanteti mona tro hu'na eri atarentogeno me'ne. Nagrama e'ina hi'o hu'nama huanke antahike monamo'ene mopamokea oti fatgo neha'e. **14** Tamagra maka'mota amare magopi emetru hu'netma nagrama hanua kea antahiho. Mago havi anumzamo'a henkama fore hania zankura amanagea huno tamasami'ne? Ra Anumzamo'a avesinentea ne' huntesnigeno eno, Babiloni kumate fore hanie huno'ma agesama nentahia zana emeri forera hanigeno, Ra Anumzamo'a Agra'a azanteti Babiloni vahera zamazeri haviza hugahie hunora tamasami'ne? **15** Nagra hu'noankina, ana nera ke hute'na avre'na esanugenno eri'zama eme erinia zamo'a knare hugahie. **16** Nagrite erava'o hutma amama hanua nanekea antahiho. Ese agafarera nagra oku'a nanekea osu'noe. Anazama efore'ma nehigena nagra anante ko mani'noe. Hagi menina Ra Anumzamo'a Avamu'a nenamino hunantege'na e'noe. **17** Israeli vahe'motare'ma Ruotage'ma hu'neno, tamagu vazino tamavre'nea Ra Anumzamo'a amanage huno nehie. Nagra knare huno tamaza hania zama rempi hunerami'na, knare kante'ma tamavre'na nevua Ra Anumzana

tamagri Ra Anumza mani'noe. **18** Tamagrama Nagri kasegema antahitama amage'ma antaresina, timo'ma hageno evu'vava hiaza huno maka zupa tamarimpa frumo'a mevava nehina, fatgo tamavu tamava'mo'a, hagerimo ankenarega eme runagraseaza hisine. **19** Tamagripinti'ma fore'ma haza vahe'mo'za, hageri ankenaregama me'nea kahepankna hu'za hamprigara osazasine. Ana nehazagena Nagri navugatira zamagia eri fananea osusine. **20** Babiloni kumara atretma atiramiho, Babiloni vahera zamatretra fretma viho. Tamagra muse nehutma kezatita, Ra Anumzamo'a eri'za vahe'a Israeli vahera Jekopu nagara ete zamagu vazino zamavare hutma, kea atrenkeno ama mopafina maka kaziga vuno eno hino. **21** Ko'ma Ra Anumzamo'ma vahe'ama zamavareno ka'ma kokampima e'neana, tinkura hagegea osu'haze. Agra havea rutanegenetimo'a herafiramige'za ne'naze. **22** Ra Anumzamo'a amanage nehie, Havi zamavu zamava'ma nehaza vahe'mo'za mani so'e hu'za zamarimpa frunena omanigahaze.

49 Tamagra hageri amu'nompi me'nea mopafima nemaniza vahe'mota nentahinkeno, afete moparegama mani'naza vahe'motanena tamagesa anteta antahiho, anta'nimofo arimpafi mani'nogeno Ra Anumzamo'a Agri eri'za vahe mani'nuegu nagrira kea hu'neankino, kasema nenantegeno'a nagia ahente ama hu'ne. **2** Hagi bainati kazinkna huno nagira eri nesaneno, Agra azanteti refitentege'na mani'noe. Kevema tro huteno kaneno eri fatgo huno ahe'arema retro huno kevegupi eririaza huno nazeri frakine. **3** Ra Anumzamo'a amanage hu'ne, nagrira nasami'ne, Israelia Nagri eri'za vahe mani'nanankina, nagra hankaveni'ane masazani'anena kagrite eri ama hanuge'za, maka vahe'mo'za kegahaze. **4** Hianagi nagra amanage hu'na hu'noe, nagra tusi maragu'zati'na eri'zana eri'noanagi, ana eri'zamo'a amne

zankna higeno, ne'zama'a forera osu'ne. Hianagi ana eri'zama
eri'noana Ra Anumzamo keno antahino hu'neankino, agrake ana
eri'zantera mizana namigahie. 5 Hagi Ra Anumzamo'a amanage
hu'ne, Nagri eri'za vahe mani'enka Jekopu naga Israeli vahera
Nagrite zamavarenka esane huno'ma, nentrera arimpafima
tro'ma hunente'nea Ra Anumzamo'a nagrira ra nagi nenamino,
nagri Anumzamo'a hankavea nami'ne. 6 Ana hu'neankino
Ra Anumzamo'a nagrikura amanage hu'ne, Nagri eri'za vahe
mani'enka Israeli vahe'ma Jekopu naga'ma zamazeri frakuge'za
ofri mani'nazama'a zamazeri hankavetio hu'na osi eri'za kami'noe.
Hianagi e'i ana eri'zankera omne'neanki, menina Nagra kazeri
ante'ama hu'na ra eri'za kamisugenka, mago tavikna hunka
mani'enka, maka ama mopafi vahera zamaza hananke'na, ete
zamagu'vazi'na zamavaregahue. 7 Vahe'mo'zama azeri haviza
nehu'za kokankoka vahe'mo'zama agomatenentazageno kva
vahe'mokizmi eri'zama eneria nekura Israeli vahetema Ruotge'ma
hu'neno, zamagu'ma vazi'nea Ra Anumzamo'a amanage
hu'ne, Kini vahe'mo'za kagrira kagesga hu'za onetisageno, kva
vahe'mo'za kagri kagiafi eme kepri hugahaze. Na'ankure Israeli
vahete'ma ruotage'ma hu'nea Anumzana, hugahuema huno
hu'neaza nehia Ra Anumzamo kagrira ko huhamprigante'ne.
8 Ra Anumzamo eri'za vahe'agura amanage huno hu'ne,
Nagrama knama huhampri'noa kna zupa nasunku hugante'na,
nunamunka'a antahinegami'na kaza hu'noe. Ana hu'negu maka
ama mopafi vahetera, kagra mago huhagerafi huvempa keni'a
mani'enankena, kegava hugante'nena kagriteti maka ama
mopafi vahe'enena huhagerafiahue. Ana nehananke'na Israeli
mopa ete eri'soe hanuge'za, erisantima hare'naza mopa'zamima
menima, vahe'ma omani'naza mopa'zamia ete eri'za manigahaze.

9 Hagi kinama hu'za hanimpima mani'naza vahekura, kinafintira
atiramita fru huta viho hunka nehunka, karanka havege
agonaramimpina ne'zamo'a ampore'nena neneta vugahaze
hunka zamasamio. 10 Zamagakura nosu'za, tinkura nofrisnageno,
zagehakura ofrigahaze. Na'ankure asunku'ma hunezmantea
Anumzamo kampu'i tintamima me'nere zamavareno vutere
hugahie. 11 Nagra agonaramini'a aherava nehe'na mopa ante
marerinugen, rankana fore hugahie. 12 Anama hanuge'za
Nagri vahe'mo'za afete moparegati egahaze. Mago'a vahera
noti kazigati ne-esnage'za, mago'a vahera zage fre kazigati ne-
esnage'za, mago'a vahera Aswani ran kumateti'ene egahaze. 13
Anami monaramimota, ranke huta muse zagamera nehinkeno,
ama mopamoka muse nehugen, agona ramimokanena
muse zagame huo. Na'ankure Ra Anumzamo'a hazenkema
eri'za mani'naza vahe'a asunku huzamanteno zamazeri so'e
hugahie. 14 Hianagi Saioni kumate vahe'mo'za hu'za, Ra
Anumzamo'a agekaniranteno amefi huneramie hu'za nehaze.
15 Hianagi Ra Anumzamo'a anankemofo nona'a amanage
hu'ne, Mago a'mo'ma mofavrema anteno avre'neno amima
nemisia mofavrea agerakanintegahifi? Agrama kasente'nesia
mofavregura asunkura hunteno aza osugahio? Hianagi Nagra
maka zupa namefira huozamigahue. 16 Hagi kamema'ane
kaginena naza agusare eri vakaki'na krentogeno me'nege'na,
maka zupa nege'na antahinegamue. 17 Mofavre nagakamo'za
ete ne-esnage'za, kagri'ma eme kazeri havizama hu'naza
vahe'mo'za katre'za koro fregahaze. 18 Kavua keganti kegama
hunka kesnanana, maka mofavre nagaka'amo'za eri atru hute'za
kagritega ne-esnagenka zamagegahane. Nagra kasefa hu'na
mani'noa Ra Anumzamo'na huama nehuankinka, mago a'mo

ve nontega vuku avasase hiaza hunka, zamavare kagrarega nezmantenka tusi muse hugahane. **19** Tamagerfa huno mopa tamimo'a havizantfa higeno, Jerusalemi kumapina vahera omanitfa hu'ne. Hianagi etema esnaza mofavre nagakamo'za Jerusalemi kumara eme mani titipa hanageno kankamuna omanena, kagri'ma ha' eme hugante'za kazeri havizama hu'naza vahe'mo'za tvaonka'arera ome'za afete manigahaze. **20** Afete kote gama kina nompima umanine'za kasez mante'naza mofavre nagakamo'za esu'za amanage hu'za eme kasamigahaze, ama kumamo'a osi hianki, kenka mago'a kankamunku eri fore hugeta anampi manisnune hu'za hugahaze. **21** Anagema hanagenka kagu'afina amanage hunka antahigahane, nagra naravo mani'na mofavrea kase ozmante'noanki, ama mofavre nagara iza nami'ne? Ha' vahe'mo'za eme kina hunante'za navre'za vazage'na ngrake umani'noanki, igati ama mofavre nagara e'naze? hunka hugahane. **22** Ra Anumzamo'a amanage hu'ne, Nagra mago avame'za nazampina erisga hu'nesnuge'za, ru mopafi vahe'mo'za nege'za, ne' mofavretamia zamazampi nevre'za, mofa'netamia zamazo'nare zamavarente'za eme kamigahaze. **23** Kini vahe'mo'zane kuini a'nemo'za tamagri eri'za vahe mani'neza maka zantamintera kegava hugahaze. Kagiifi eme zamarena nere'za kepri hu'za husga hunegante'za kagiareti kugupa ham'i'za negahaze. Anama hanagenka nagri'ma kenka antahinkama hananana, Ngrake Ra Anumzana mani'noankino, iza'o nagrite'ma amentinti nehuno amuha'ma hania vahe'mo'a agazegura osugahie. **24** Hanki hankavenentake ha' vahe'mo'zama rohu'ma eme zamare'za eri'za vanaza fenozana, iza ome zamaheno hanarege, vahe'ma kina ome huzmantenaku zamavare'za vanaza vahera, iza ome zamagura

vazino zamavaregahie? 25 Hianagi Ra Anumzamo'a Jerusalemi kumakura amanage hie, Ha' vahekamo'zama hankavenentake sondia vahekama nezmauvre'za feno zantaminema rohu'ma re'za eri'za vu'naza zantamina ete erigahue. Ana nehu'na tamagri'ma ha'ma eme huramantesia vahera hahunezmante'na, mofavre nagaka'a zamagu'vazi'na ete zamavaregahue. 26 Ana nehu'na kagri ha' vahetamina hanuge'za zamagra'a zamavufaga nene'za, waini tima neneno neginagi hiazza hu'za, zamagra'a korana nene'za neginagi hugahaze. E'inama hania zana maka ama mopafi vahe'mo'zama nege'za, Nagrikura hu'za Jekopu nagamofona hankavenentake Anumzana Agrake Ra Anumzana mani'neankino naga'a zamagu'vazino ete nezamavarea Anumza mani'ne hu'za ke'za antahi'za hugahaze.

50 Ra Anumzamo'a amanage hu'ne, A'ma atre avona kre'za nezamarera'ma ami'naza avona Nagra kete'na neramarerana avre netrena, nofi'ma hu'noa zante apasenakura tamagrira zagorera otre'noe. Hianagi tamagrane neramarera'enema hu'naza kumimofo nona hu'na tamatroge'za, ru vahe'mo'za eme tamavre'za kina ome huramante'haze. 2 Nagra tamagriku'ma e'na eme hake'noana na'a higeno mago vahera mani'nege'na eme onke'noe. Kezama emeti'noana, na'a higeta ke'nirera, ke nona osu'haze. Tamagrama antahi'zana azamo'a atupa hu'neankino oravregahie nehuta hankave'a omane'neankino tagura ovazigahie huta nehazo? Nagra hankave kea hugeno hagerimo'a hagege nehigena, tintamina hugeno hagege higeno ka'ma koka fore hu'ne. Ana higeno timpima mani'naza nozamemo'za tinku hu'za fri'za kasriza hinimna vu'haze. 3 Nagra kento kukenama nehiazza hu'na hanireti mona ramina kukena huzmante'noe. 4 Hankavenentake Ra Anumzamo'a keagama hu kaziga rempi

hunami'neanki'na, knazama eneriza vahera knare ke hu'na zamazeri hankavetigahue. Maka nanterana nazeri o'netino, nagesa eri ankazo nehige'na, agrama rempi hunenamia zana avonoma rempima nehaza mofavremozama nehzaza hu'na nentahue. 5 Ra Anumzamo'a nanekeni'a antahio huno, nagesa eri ankazo hige'na nagra ke'a eri netre'na ete namefitira atre'na ofre'noe. 6 Nagra namefi huzamuge'za, namagenafina sefura nenami'za, nameragena zamuge'za nagi'nazokara zanefi'naze. Navugosarera rufira ote'noge'za, kiza zokago ke hunenante'za avetura ahenante'naze. 7 Hianagi Ra Anumzamo naza hige'na ana zankura nagazegura osu'noe. Na'ankure nagra havegna hu'na hankavetina agri eri'zana erigahue. E'ina hu'negu ana eri'zama eri'noa zankura nagazea osugahue. 8 Nagri'ma nazama huno keaganima refko huno negeno tamage nehie hania nera tvaonte mani'neanki, iza nagrikura haviza hu'nane hunora keaga hunantenakura nehie? Hagi atrenkeno navareno keagarera vuno, ama agafare keaga hunegantoe huno keagafi huama hinketa antahimneno. 9 Hankavenentake Ra Anumzamo nagrira naza nehiankino, ina vahe'mo nagrikura huno hazenkeka'a me'ne hunora hugahie. Havigema hunantaza vahe'mo'za, tvaravemo frupa re'negeno hakanomo anoseno eri vagareaza hu'za vagare'za haviza hugahaze. 10 Ra Anumzamofoma koro hunenteno Agri eri'za vahe'amofo kema amage'ma nenteno tavima omanenigeno hanimpima vanoma nehanimo'a, Ra Anumzamofo agire amentintia nehuno, Anumzanimo'a naza hugahie huno amuhara hino. 11 Hianagi tamagra'a teve hugreta rekru hutma manineta tamagra'ama hugraza tevere tevema toma nehiaza vahemota kva hiho. Nagra knaza tamisugeta rama'a tamataza erigahaze.

51 Ra Anumzamo'a amanage hie, Fatgo avu'avazama kazingazi hutma nevaririta, Nagriku'ma hake vavama nehaza vahe'motma antahiho, ra havereti rutmana hu'na tamagri'ma tro'ma huramante'noa havere tamavua nenteta, mopama kafi'na tamavre'noa kerire tamavua keho. 2 Agripinti'ma fore'ma hu'naza ne' Abrahamu negeta kaseramante'nea a' Seranena keho. Abrahamuma kema hu'noana agrike ke hu'noe. Ana hute'na asomu huntogeno agripinti ohampriga'a vahera fore huhakare hu'naze. 3 Ra Anumzamo'a Saioni vahera zamazeri knare nehuno, havizama hu'nea mopa eri knare nehuno, hagegema hu'nea mopa'a eri knare hanigeno Ideni hozagna hugahie. Ana nehuno kama kokana eri knare hanigeno, Anumzamofo hozagna hugahie. Ana hanige'za zavena nehe'za, musenkase zagame hu'za, Ra Anumzamofo agia ahentesga hu'za susu huntegahaze. 4 Hagi Nagri vahe'mota tamagesa anteta antahiho, Nagriteti kasegemo'a nevanigeno, fatgoma huno refkohu avu'avazamo'a tavi'mo hiaza huno maka kokankoka mopafina remsa huno vuno eno hugahie. 5 Nagrama fatgo navu'nav a zama hu'na vahe'ma ete zamagu'vazi'na zamavaresnua knamo'a hago erava'o nehie. Nagra hankavenentake nazanteti fatgo navu'nav a huna maka ama mopafima me'nea kumatmina kegava hugahue. Hageri amu'nompima me'nea kumamo'za Nagri hankavegura zamentinti nehu'za, hankave nazama rusute'na zamazama hanugu navega ante'za manigahaze. 6 Tamavua kesga hutma monarega negeta, anazanke hutma mopafina keho, tevegumo hiaza huno, monaramimo'a vaganeresnigeno, tavaravemo hiaza huno ama mopamo'a atafa neresnigeno, ama mopafima mani'naza vahe'mo'za kosima friaza hu'za frigahaze. Hianagi fatgo navu'nav a ma hu'na vahe'ma zamagu vazi'na ete

zamavare navu'nava zamo'a vagaore mevava hugahie. 7 Fatgo
avu'avazama keta antahitama nehuta Nagri kasegema tamagu'afi
azeri antarako'ma hu'naza vahe'motma, nagri nanekea antahiho.
Vahe'mo'zama huhavizama huramantesaza zankura korora
huta antahintahi hakarea osiho. 8 Na'ankure ana vahe'mokizmi
zamavufaga, hakanomo kukena taga huno neaza huno taga
huno negahie. Hianagi Nagri fatgo navu'nava zamo'a vaga
oreno mevava hugahie. Ana nehanigeno nasunku'ma hu'na ete
vahe'ma zamagu'ma vazisua zamo'a, henkama forehu anante
nante'ma hu'za vanaza vhetera meno vugahie. 9 Otio, Otio! Ra
Anumzamoka otinka hankave ka'a eri ama hunka, korapa'ma
evu'nea knafima tagri naga'ma zamazama hu'nanaza hunka,
menina taza huo. Hagerimpima nemania afi'zaga Rehapuna
kagra kanonteti reharuharu hutenga, kazinteti kitagi osi'osira
hu'nane. 10 Kagrake'za hagerina eri hagege nehunka, hageri
amu'nompina kana eri fore nehunka, zamagu'ma vazinka ete
zamavranke'za kagri vahe'mo'za ana kante e'naze. 11 Ko'ma
zamagu'ma vazinka zamavare'nana vahe'mo'za, muse zagame
nehu'za Saioni kumatega ete egahaze. Mevava musezamo'a
kini fetorigna huno zamasenirera me'nesnigeno, tusi musenkase
zamo zamagu'afina avitegahie. Ana nehanigeno asunku'ma
huno zavi'ma ate'zana zamagripina omnegahie. 12 Nagrake'za
Ra Anumzamo'na tamazeri hankaveneti'na, knazana eri atrena
tamazeri knarera nehue. E'ina hu'negu maka vahe'mo'za amne
vahetfa mani'nazanki'za trazamo'ma ame huno hagege hiankna
hugahazanki, mago vahekura korora osiho. 13 Nagra mona
tro huntogeno nemege'na, mopamo'ma oti fatgoma hu'nea
tra'a trora hu'noe. Hianagi tamagri Ra Anumzama tamagri'ma
tamazeri fore'ma hu'noa Anumzamonagura tamaganekanize.

Tamagri'ma zamarimpa aheramante'za tamazeri havizama
haza vahekura maka zupa na'a higeta tamagogogura
nehaze? Anama tamarimpama aheneramantaza vahera menina
iga mani'nazagetma nezamagaze? **14** Kinafima mani'naza
vah'e'mo'za kinafina mani'ne'za ofrigahazanki, ame hu'za
kinafintira atre'za fru hu'za vugahaze. Ana nehu'za ne'zankura
atupara osu rama'a me'nesige'za negahaze. **15** Nagra Ra
Anumzana tamagri Anumza mani'noanki'na, hagerina eri kranto
kranto hugeno ra agasasana nerie. Ana nehiankino Monafi
sondia vahe'mofo Ra Anumzane huno nagj'a me'ne. **16** Nagra
tamagite nanekeni'a nente'na nazanteti refite'ramante'noe.
Nagrake'za monaramina tro hunente'na mopama oti'nea trara
trohu'noe. Ana nehu'na Saioni kumapima mani'naza vahekura
Nagri vahe fatgo mani'naze hu'na nehue. **17** Jerusalemi
kumapima nemaniza vahe'mota otiho, otita ru tamavuna
nehutma, oti hankavetaho. Ra Anumzamofo arimpa ahe'zana,
waini tima hiaza huno kapufi tamigeta nevagareteta tusiza
huta neginagi nehuta, tamagia reso'e osu'naze. **18** Hagi
kagrama kasezamantenka kegavama hu'nana ne' mofavre
nagapintira magomo'e huno kazantera azerino kana kaverira
osu'ne. **19** Kagrira tare knazamo eme kazeri haviza hune.
Iza asunkura huganteno karimpa eri fruhu kea hugahie? Ana
knazana ha'zamo'ene agatonto zamo'ene eme kazeri haviza
hugahianki, Nagra inankna kampinti kazeri so'ea hanugenka
karimpa frua hunka manigahane? **20** Kagri ne' mofavre
naga'mo'za zamavu evuevu huno hankavezamia omanege'za,
kukomo dia afu azerinteaza hu'za maka kantu hanarerera mase
vagare'naze. Ra Anumzamo'a ana vahera zamazeri ko'herino,
zamazeri havizantfa hugahie. **21** E'ina hu'negu hazenkefima

mani'naza vahe'mota kama antahihō, tamagra neginajima
nehzana waini ti neta neginagia nosaze. 22 Hankavenentake
Ra Anumzamo'ma, kazama higenka'ma ha' vaheka'ama
ha'ma huzamagatenerana Anumzankamo'a amanage hie,
Nagri narimpa ahe'zamo'ma kapufima me'negenka'ma kazampi
eri'enekama nenenka neginajima hu'nana kapua ko eritre'noe.
Ana hu'neanki'na henka'anena atrenugenka ana kapufintira
narimpa ahe'zana onegahane. 23 Hianagi kagri'ma kazeri haviza
nehu'za, kavugosaregati mopafi maso hazagenka mase'nanke'za,
mopafima hiaza hu'za kamagenafina zamagiareti rentrako'ma
hu'za vanoma hu'naza vahe'mokizmi zamazampi ana kapua
antegahue.

52 Otio, Otio Jerusalemi kumamoka otinka hankaveka'a eri
kavugato. Knare'ma hu'nesnia avasase'ane kukenaka'a eri
hankrenka so'e zantfa huo. Ruotage'ma hu'hana Jerusalemi
kumamoka Ra Anumzamofo vahe'ma omaninesaza vahera
eofregahaze. 2 Jerusalemi kumamoka kinama hugantagenka
mani'nampintira otinka kugupa rupopo hutro. Saioni mofa'moka
knankempima seninofi'ma rente'za kinama hugante'nafintira eri
netrenka fru hunka manio. 3 Na'ankure Ra Anumzamo'a amanage
huno hie, Tamagrira zagorera atroge'za mizase'za tamavre'za
ovu'nazanki, amne tamavre'za vu'naze. Ana hu'neanki'na
tamagrira zagoretira antesi'na ontamavregahuanki, amane
tamagu'vazi'na ete tamavregahue. 4 Ra Anumzamo'a amanage
hu'ne. Esera nagri vahe'mo'za Isipi mopalrega urami'za kraka
vahe umani'naze. Hagi Asiria vahe'mo'za amane zampi zamazeri
haviza hu'naze. 5 Hagi menina amafina na'a ante'nogeta negaze?
Nagri vahera hazenkezmia omene'neanagi amane zampi
zamavare'za vu'naze. Ana hazage'za kegavama hunezmantaza

vahe'mo'za tusi kiza zokago ke nehu'za, mika kna nagia huhaviza
nehaze. 6 E'ina hu'negu Nagri nagia ke'za antahiza hugahaze.
Ana hu'negu ana knarera kema hurami'nea Anumzane hu'za
Nagrira ke'za antahiza hugahaze. Tamage e'i Nagra ama
mani'noe. 7 Knare musenkema agonaramimpima erinoma ne-
eno rimpa fruma huno manizamofo ke'ma huama nehuno, so'e
huno'ma manizamofo kema huama'ma nehuno, agu'vazino
avrezamofo kema huama'ma nehuno, Saioni kumapima nemania
vahe'mofonku'ma kagri Anumzamo'ma kinima mani'neno kegava
hugahiema huno'ma nehia vahe'mofo agia agusamo'a hentofaza
hu'ne. 8 Hagi antahiho, ran kuma keginamofo agofetu'ma
mani'neza kegavama nehaza vahe'mota, magoka kezatita muse
zagamera hihio. Na'ankure tamagra tamavufinti'ma nege'sageno
Ra Anumzamo'ma Saioni kumate'ma ete ne-esige'za anara
hugahaze. 9 Jerusalemi kuma'ma havizama hu'nea kazigama
mani'naza vahe'mota, magoka tamagerura eri mago huta ranke
huta muse zagamera hihio. Na'ankure Ra Anumzamo'a vahe'a
zamazeri so'e nehuno, Jerusalemi kumara agu'vazino ete
nevare. 10 Ra Anumzamo'a hankavenentake huno ruotge'ma
hu'nea azana ama mopafi vahetera erinte ama nehanki'za,
maka kaziga ama mopafi nemaniza vahe'mo'za kegahaze. Ana
hu'neanki'za maka ama mopafima mani'naza vahe'mo'za, tagri
Ra Anumzamo'ma vahe'ama zamagu vazino'ma zamavaresnia
zana kegahaze. 11 Babiloni kumara atreta atiramita echo, atreta
atiramita ne-etma, agruma osu'nesnia zana avakora osiho. Ana
nehutma Ra Anumzamofo mono nompima eri'zama e'neriza
zantamina eritama esnaza vahe'mota, tamagra'a tamazeri
agru huteta ana zantamina erita echo. 12 Hianagi tamagra
ame'amara hutma Babiloni kumara atretma vuge, korora freta

vugera osiho. Na'ankure Ra Anumzana Israeli vahe Anumzamo vugota huramanteno ne-eno, ehenka huno kegava huramanteno vugahie. **13** Hagi keho, maka zama nagri eri'za vahe'mo'ma haniana, knare antahizanteti nehanigeno, anazamo'a knare zanke hugahie. Ana nehanige'za vahe'mo'za nege'za ra agi nemiza, agri agia husga hugahaze. **14** Hagi agri'ma ahazageno koramo'ma hu'nea zanku nege'za vahe'mo'za anthintahi hakarea hu'naze. Ana higeno vahe'mo'zama azeri haviza hazageno, avugosamo'a havizantfa huno vahe'mofo avugosagnara osu'ne. **15** E'ina hu'negu huno Nagri eri'za nemo'a hakare'a ama mopafi vahera zamazeri otisanige'za Nagrira monora hunantegahaze. Agrama haniazza nege'za kini vahe'mo'za keaga osugahaze. Na'ankure korapara ama ana zankura zamasamige'za ontahi'naza za nezamasamino, zamaveri hazage'za onke'nazaza zamaveri hanige'za nege'za, antahi amara osu'nazaza zamasamige'za ama' antahi'zama eri'za zanku anara hugahaze.

53 Ra Anumzamo'ma hankavenentake azanuti'ma eri'za vahe'are'ma hankave'ama erinte ama'ma hu'nea zanku'ma, tagrama menima huama'ma huta tamasamisuna zankura, iza tamage hunora amentintia hugahie? **2** Hagi agra ana ne'mo'a, mago zafa agatamo avofage huno retuheno hagege kokampi hageno mareriaza hugahie. Ana nera vahe'mo'za agenunu hugara osu'ne. **3** Ana nera vahe'mo'za zamefi hunemi'za, zamavesra huntazageno, tusi'a rimpa knane nemanino, asunku zampi mani'ne. Ana nehige'za vahe'mo'za avufima ke'zankura ke amne amne nehu'za keamara hu'za onke'naze. **4** Tamagerfa huno ana ne'mo'a tagri knazane, tasunku zanena agra'a erigofi'ne. Tagrama antahunana Anumzamo'a kna amino azeri haviza hunaku atregeno knazamo'a azeri havizantfa nehie huta

antahi'none. 5 Hianagi tagri kumitigu hu'za avufagafina karugrua
nere'za, tagri kefo zantigu hu'za ahe'za avufga agu'za ru'naze.
Agri'ma kanama nemi'za, atama ami'naza zamo tagritera tarimpa
frua avreno ne-egeno, agri avufgama rutraga trago'ma hu'naza
zamo, tagrira tazeri kanamre'ne. 6 Tagra maka vahe'mota
sipisipi afu'mo hiaza huta kana atreta, tavesia kampi ufre efre
nehunkeno, tagrama hu'nona hazenke'mofo nona'a, tagra'a
knazana erigaragi, Ra Anumzamo'a knazana ana ne'mofo
agofetu erintegeno eri'ne. 7 Vahe'moza ana nera azeri haviza
nehu'za, atazana ami'nazanagi agira reakara huno keaga osu'ne.
Ana nehuno sipisipi afumofo anenta'a ahenaku avre'za vuge,
sipisipimofo azoka harenaku avre'za nevazageno akoheno viaza
huno agira reakara huno kea osuno akoheno vu'ne. 8 Ana
nera azerite'za keagare avre'za vu'nazanagi, keaga'a refkohu
so'e hu'za onke'za frigahie hu'za hu'naze. Hagi iza huama
huno ana nekura ama naga nofipinti eforera hu'ne hunora
hugahie? Ana hu'neankino nagri vahe'mota ke ontahi kumi
tamavutamava zamofo nona'a agri agofetu erinte'za sefura
nemi'za, ama mopafintira ame hu'za azeri atre'naze. 9 Ana
nera havi zamavu zamava'ma nehaza vahe'ma zamahe nefri'za
kante ante'za ahe friteza, zago feno vahe'mofo matipi ome
asente'naze. Na'ankure agra mago hazenkea nosuno havigea
osu'negu anara hu'naze. 10 E'ina hu'neanagi Ra Anumzamo'a
Agra'a avesite ana nera azeri henkamu atreno knazana amigeno
asunkuzampina mani'ne. Ana ne'mo'ma vahe'mota kumimofo
nonama huno frinegu huno agra zazate ofri manino nevuno, agigo
azankomofona kegahie. 11 Ana ne'mo'ma erisnia knazamo'ma
vagama retesigeno'a, so'e huno manigahie. Ra Anumzamo'a
huno Nagri eri'za ne'mofo avu'avazamo'a fatgo hu'neankino,

antahintahi zama'areti maka vahera zamazeri fatgo vahera
neseno, kumi zamimofo knazana erigofigahie. 12 E'ina hu'negu
zamagima me'nea vahe'mo'zama fenoma erisafintira agrama
erisiama'a nagra eri amigahue. Ana hanugeno hapinti'ma erisia
zantamina harafa vahe'ene refko huno erigahie. Na'ankure agra
maka avufga atre vagareno maka vahe kumiku huno frige'za,
kumi nere hu'za zamagesa antahi'naze. Hianagi agra rama'a
vahe'mofo kumi enerino, kema rutrage'za kumi'ma nehaza
vahe'mofontega anteno nunamuna hunezmante. (Luku 22:37.)

54 Jerusalemi kumakura Ra Anumzamo'a huno, Mofavre onte
naravo a'moka ranke hunka musena huo. Kagra mofavrema
nezamante'za zamatagu nehaza zana ontahi'nananki, ranke
hunka zagamera nehunka musena huo. Na'ankure vere'ma
mani'nesia a'mo'ma antesnia mofavre nagara, kagri mofavre
naga'moza ohampriga'a fore hu'za zamagateregahaze. 2
E'ina hu'negu seli nonka'a erira nehunka, seli nonka'afima
nerafina tavaravea eritarenka erira nehunka, seli nonte'ma anaki
nofitamina eri zaza huo. Ana nehunka seli noma avazuhumpi
huno'ma nofi'ma rente zafaramina asentenka eri hankavetio. 3
Na'ankure kagri kagehemo'za henka'a ome rama'a hanu'za,
tamaga kaziga mopafine, hogá kaziga mopafinena mani
vite'za vugahaze. Ana nehu'za maka kokankoka kumatamina
kegava nehu'za, vahe kugoma orisnia ranra kumatmina eri'za
manigahaze. 4 Tamagra korora osiho, na'ankure tamagrira
tamazeri tamagazea osugahie. Kagraka'a antahi amne zanknara
osuo. Na'ankure kagra kagazegura osugahane. Hianagi kasefa
a'ma mani'enka kentoma mani'hanke'zama, kazeri kagazema
hu'naza zankura mago'ane antahintahia osuo. 5 Na'ankure
kagri'ma tro'ma hu'nea ne'mo'a kagri negave knara huno mani'ne.

Ana ne'mofo agi'a Monafi sondia vahe'mofo Hankavenentake
Ra Anumzane huno me'ne. Agra kagri'ma kaguma vazino
kavre'nea nekino, Israeli vahete'ma Ruotage hu'nea Anumza
mani'ne. E'ina hu'neankino agra maka ama mopafi vahe'mofo
Anumzane hu'za agia ahegahaze. **6** Na'ankure kagra mago
kasefa a'mo mensintfa vea eri'neanagi, neve'a atregeno, tusia
asunku zampima maniaza hunka mani'nankeno, Ra Anumzamo'a
kagia hu'ne huno kagri Anumzamo'a nehie. **7** Na'ankure osi'a
knafi namefira hugami'noe. Hianagi tusi nasunku hugante'na ete
kavregahue. **8** Nagra tusi narimpa ahenegeante'na kagri kavufima
ke'zankura, osi'a knafi keamne hu'noe. Hianagi maka knafina
vagaore navesizanteti nasunku hugante'na, navesigante vava
hugahue huno Ra Anumzana kagu'ma vazi'nea Anumzamo'a
nehie. **9** Noa knafina Nagra huvempa hu'na, ama mopa
mago'ene tintetira eri havizana osugahue hu'na hu'noe. Ana
hu'noanki'na meninena ana zanke hu'na mago huvempa kema
hanuana, mago'enena narimpa aheneramantena tamazeri kora
origahue. **10** Hagi agonaramimo'a noma'arera omnesigeno,
ne'onse agonaramimo'a torevareru hugahie. Hianagi Nagrama
navesi neramantoa navesi'zamo'a hankavetino nemesanigeno,
tamagranema narimpa fru hu'na manisnue hu'nama huvempama
hu'noa kea mago'zamo'e hunora eri otretfa hugahie huno
asunku'ma hunegantea Ra Anumzamo'a hu'ne. **11** Jerusalemi
kumamoka tusi'a knazampi ufrenka katagura hu'nane. Hagerimpi
ventemo nevigeno zaho'mo retufe kantu te retufegma te hiaza
huno, knazamo'a kazeri haviza higeno mago vahe'mo'a asunkura
huogante'ne. Hianagi Nagra mizama'amo marerisa havea
takosie nehaza havereti Jerusalemi kumara negina, safire
nehaza havereti Jerusalemi kumamofo trara antegahue. **12**

Rabie nehaza havereti sondia vahe'mo'zama manisnaza za'za
nona negi'na, rankumamofo kafaramina belie nehaza havea
avasase'amo'a marave'age netrea haveraminteti tro nehu'na,
marerisa haveraminteti kuma kegina tro hugahue. **13** Ra
Anumzamo'na Nagrake'za mofavretamia rempia huzamisuge'za,
tusi'a zamarimpa fru hu'za nemaniza makazampina knare
hugahaze. **14** Fatgo avu'avazampina kazeri hanavetina kazeri
neni hugahue. Ana hanugeno mago vahe'mo'e hunora kata
kamino kazeri havizana osanigenka, mago zankura korora
osugahane. Na'ankure kazeri koro'ma huga zantamimo'a
kagritera eravao osugahie. **15** Hanki mago vahemo'ma ha'ma
hugante'naku'ma esaniana, e'i ana vahera Nagra hara erita
viho hu'na huozmante'noe. Ana hu'negu ha'ma eri'za esnaza
vahe'mo'za hara osu tamagri agorga manisune hu'za hugahaze.
16 Hagi antahiho, ainireti'ma agigu agigu zama tro'ma nehaza
vahera Nagra'a nazampinti zamazeri fore hu'noe. Ana hunoge'za
ana ainia tevefi krete'za runtrantru ahe'za ha'ma huzantamina tro
hunage'za ana zanteti hara nehaze. Ana hu'noanki'na ana ha'
zantamina eri'nezama ha'ma hu'za mago'a vahe'ma zamazeri
havizama nehaza sondia vahera Nagra zamazeri fore hu'noe. **17**
Hianagi eri'nezama ha'ma hugante'naku'ma nehaza ha'zamo'a
amne zankna hugahie. Ana nehina havigema hu'zama keagafima
kavrentesnagenka, oti hankaveti'nenka keagama hugantesaza
vahera keagafina zamagateregahane. E'i ana zantamina Ra
Anumzamofo eri'za vahete fore hanige'na rezagane'na nege'na
zamagra knare hu'naze hu'na hugahue huno Ra Anumzamo'a
hu'ne.

55 Hagi antahiho, tinku'ma kavenesinimoka enka tina eme
no. Zagoma omne'nesanimota eta zagoa ate'osita amne

ne'zana neneta, waini tine bulimakaomofo amirinena zagoretira teosita amne neho. (Revalesen Hufo hu'ne 21:6, 22:17) 2

Na'a higeta ne'za ne'zanterompage amne zantera zagoa netraze. Ana nehutma eri'zama erita eri fore'ma nehaza zagoa tamazama osu'zantera netraze? Nagri nanekere kama tamagesa anteta nentahitma, knare nezanke nenenkeno tamu nehanigetma musena hiho. 3 Tamagesa antetma Nagri kea nentahita Nagritega eho. Hagi Nagri kema antahita amage'ma antesuta ofri manigahaze. Nagra ko'ma Devitinku'ma vagaore navesi zanteti'ma navesi kante vava hugahuema hu'na huvempa hunte'noaza hu'na, tamagri'enena anahukna hu'na vagaore navesizanteti hugarerafi huvempage hugahue.

(Aposolo 13:34, Hibru 13:20) 4 Keho, agrira kva vahe Nagra azeri otugeno ugota huno maka vahera kegava hunezmaneno Nagri hihamu hankavea kokankoka vahetera eri ama hu'ne. 5

Tamagerfa huta ru moparega vahe'ma tamagra keta antahita osage'za, tamagri'ma ke'za antahi'za osu'nesnaza vahe'ma ke'ma hanage'za zamagare'za tamagritega egahaze. Na'ankure Israeli vahe'mota ruotage Ra Anumzana tamagri Anumzamo'na, Nagrama hu'noa zanku hu'za rantamagia tamigahaze. 6 Ra Anumzamo'a tamagri tva'onte mani'nesire, haketa azeri fore nehuta, tamagri tva'onte'ma mani'nesire, agrikura kea hiho. 7 Kefo tamavu tamava'ma nehaza vahe'mota ana tamavu tamava'zana netrenke'za, fatgo osu antahintahima e'neri'za vahe'mota ana antahintahitamia netretma rukrahe huta Ra Anumzana tagri Anumzamofonte eho. Ana'ma hanageno'a Anumzamo'a tusi'a asunku huneramaneno kumitamia atreramantegahie. 8

Na'ankure Nagri antahi'zamo'a tamagri antahizanknara osigeno, tamagri tamavu tamavamo'a, Nagri navu'nava knara osu'ne

huno Ra Anumzamo'a hu'ne. 9 Monamo'ma mopama agatereno onagamuma meaza huno, Nagri navunavamo'ene Nagri antahizamo'a, tamagri tamavu tamava'ene tamagri antahi'zanena agatereno onagamu me'ne. 10 Ko'mo'ma monafinti'ma ama mopafima runenteana, amnea eteno novianki, mopamofona rufru higeno, hozafi ne'zamo'a agata hageno marenerie. Ana nehuno hu'zama nentea vahe'mofona avimzana nemino, vahe'mofona ne'zana amigeno nene. 11 E'ina hu'negu Nagrama nehua nanekemo'a, ete rukrahera huno Nagritera amne avapara omegahianki, Nagri'ma navesi'nea eri'zana erivaga nereno, na'a agafare ana nanekea atrogeno e'ne, anazana erinte ama huvagaregahie. 12 Hagi tamagra tamarimpa frune atiramita nevuta musenkase hugahaze. Ana nehanage'za tamavugama me'nea ranra agona ramimo'zane, ne'onse agonaramimo'za muse zagame nehanage'za, karankama me'nea zafaramimo'za zamaza ahe'za musenkase hugahaze. 13 Menima ave'ave trazamo'ma me'nefina, saipresi zafamo agri nona erino hageno marenerisigeno, ave'ave nofi'ma me'nefina, zagasefage mentoli zafamo agri nona erino hageno marerigahie. E'i ana zamo'a mago mevava avame'za me'nesnige'za, ana zama nege'nu'za Nagrira antahinami vava hugahaze.

56 Ra Anumzamo'a amanage huno hu'ne, Tamagra knare'ma huno refkohu avu'ava'zane, fatgo avu'ava'zane hiho. Na'ankure tamagri'ma ete tamagu'ma nevazina fatgo navu'navama erinte ama hanua knamo'a hago kofta nehie. 2 Iza'o mani fruhu kna Sabatimofo kasegema amage'ma nenteno, havi avu'avazama nosania vahe'mo'a asomu erigahie. 3 Ru moparega vahe'mo'ma Ra Anumzamofo amage'ma nentesania vahe'mo'a huno, Ra Anumzamo'a tagrira hu izora hanigeta

Agri vahe'enena omanigahune hu'za zamagesa ontahiho.
Ana nehanage'za zamagonknaza hari'nesnaza vahe'mo'za
hu'za, tagra hagege hu'nea zafagna hu'none hu'za zamagesa
ontahiho. 4 Na'ankure e'inahu vahekura Ra Anumzamo'a
amanage huno nehie, Tamagonknazama hari'nea vahe'mota
mani fruhu kna Sabati kasegea amage nenteta, Nagri'ma
navenesia avu'avazama nehuta, huhagerafi huvempa ke'niama
azeri antrakoma hanage'na, 5 Nagra ana vahe'mokizmia
zamagia noni'amofo agu'afine asopareganena krentenesnuge'za,
vahe'mo'za nege'za antahi zamigahaze. E'i ana zamagia tamagri
ne'mofamokizmi zamagia agatre'nesia zamagi zamisugeno
ana zamagimo'a vagaore mevava hugahie. 6 Ru moparega
vahe'mo'ma Ra Anumzamofoma amage'ma nenteno, Agri
eri'zama e'nerino Ra Anumzamofo agigu avesi avesi nehuno,
Anumzamofo mono hunenteno, mani fruhu kna Sabatimofo
kasegema amage nenteno, huhagerafi huvempa kenima azeri
antrakoma nehania vahera, 7 Nagra avre'na ruotage'ma hu'nea
agona'niarega vu'na, Nagritegama nunamuma nehaza noni'afi
vanugeno musenkase hugahie. Ana nehu'za Nagritegama
kresramnama nevaza itare'ma tevefi kre fanane hu ofane
mago'a ofanema hanage'na, Nagra nege'na muse hugahue.
Na'ankure Nagri nomo'a maka ama mopafi vahe'mo'za nunamu
eme hanaza no megahie hu'za hugahaze. 8 Israeli vahe'ma
zamavare'za kinama ome huzmante naregati'ma ete zamavare
atruma hu'nea Ra Anumzamo'a amanage nehie, Ko'ma Israeli
vahe'ma zamavroge'za emani'naza vahepin, mago'ene ru
vahera zamavaresnuge'za zamagrane emanigahaze. 9 Hagi
tanopafima nemaniza afi zagagafamotanena ne-enkeno, zafa
tanopafima nemaniza afi zagagafamota eta ne'zana eme

neho. 10 Israeli vahe'mokizmi kva vahera zamavu asuhu
vahe manine'za, antahintahigura atupa hu'naze. Zamagra zuka
kragna hu'nazankiza zamavu'ma mase'zankuke zamavenesige'za
zamagira hamunkiza masene'za ava'na kevava nehaze. 11
Zamagra amu osu kramo'ma agraguке nentahino ne'zama nevava
nehiaza hu'za zamagruguке nentahiza, ama' antahi'za omane
sipisipi kva vahe mani'haze. Ana nehu'za mago mago'moza
zamagra zamavesite vanovano nehu'za, zamagra havige hu'za
vahera rezmataga hu'za fenozana e'nerize. 12 Ana vahe'mo'za
hu'za enketa waini tina neneta aka tina rama'a nesune hu'za
nehaze. Ana nehuta okinena aka tina negahunanagi amama
nenona avamena agatereta rama'a negahune huza nehaze.

57 Fatgo zamavu'zmavama nehaza vahe'ma nefrige'za, ana
zankura vahe'mo'za antahinozamize. Anumzamofo avu'ava'ma
nevaririza vahe'ma nefrizage'za, vahe'mo'za antahi amara
nosaze. Na'ankure fatgo avu'ava zama nehia vahe'ma nefrizana
kefo avu'ava zampina oufresaze huno Anumzamo'a zamatrege'za
nefrize. 2 Fatgo zamavu zamava'ma nehaza vahe'ma nefrizana,
matipi umase'za mani fru nehaze. 3 Hianagi tamagra havi
kasnampa kema nehia a'mofo mofavre naga mani'neta, savri
avu'ava nehuno monkote nehia a'mo kaseramante'nea mofavre
mani'nazanki amare eravao hiho. 4 Tamagra izanku kiza
zokago kea hunentaze? Tamagra izanku tamagira akara huta
tamagefu'na rehakanara hunemize. Tamagra ke ontahi havige
vahe'mofo mofavre mani'naze. 5 Hagi monko avu'avazama
hu tamagu tamagesamo'a teve akrukru huno teaza nehideta,
havi anumzante'ma mono'ma hunentaza zafa agafarega vuta
savari avu'ava zana nehuta, mofavre nagatamia zamaheta
osi tinkagomupine, havegampinena havi anumzamofontega

kresramna nevaze. **6** Hagi tinkagomupinti pehema hu'nea
haveramima me'nefintira mago erita eme antazageno me'negeta,
ana zante wainia tagitretra ofa nehuta, witi ofanena nehaze. Ana
zama nehuta tamagra tamagesama antahi'zana Nagrikura muse
hurantegahie huta nehzafi? **7** Tamagra mareri agatere'nea
agonarega marerita monko avu'ava zana ome nehuta, anante
havi anumzantega ofa kresramna nevaze. **8** Tamagra tamefi
Nagrira hunenamita, kafantamimofo amefiga'ane, kafa zafarera
havi anumzamofo amema'a tro hunenteta, savri anegna
huta tafe'ma eritareta masi'naza tafetera tamavufga avapako
mase'neta tamavufga oge age nehuta, havi avu'vazana nehaze.
9 Tamagra olivi masavenuti eri maseve huta nefreta, mnacentake
paurana rama'a tamavufgarera rutritri huteta vuta, Moleki havi
anumzantera monora ome hunentaze. Ana nehuta mono'ma
huntesnaza havi anumzankura vahe huzmantazage'za afete
moparega nevu'za, fri vahe matipinena ana havi anumzankura
ome nehakaze. (Sheol h7585) **10** Tamagra tusi afete nevazageno
tamavesra nehianagi, amazama nehuna zamo'a amne zankna
nehie huta tamagesa nontahizanki tamagra kasefa hankave
enerita, kazikazi huta anazana huta nevaze. **11** Tamagra
izanku korora nehuta, Nagrira renavatga huta tamefira hunamita
antahionami'naze? Nagrama akohe'na zaza knafima kema osuma
manua zanku Nagrikura korora nosazafi? **12** Hagi maka tamavu
tamava'zane, fatgo tavutava nehunema nehaza zanena, Nagra
erinte ama hugahuanagi, ana zamo'a tamaza osugahie. **13** Hanki
tamagrama hazenkefima unefreta, havi anumzantamima zogi
atruma nehaza anumzantamina kehinke'za eme tamaza hihio.
Ana hugahazanagi ana anumzaramina osi zaho'mo zamazeri
faki hutresigeno zamavareno fregahie. Hianagi Nagripima

frakino nemanisnia vahe'mo'a ama mopa erisanti hareno
nemanino, Nagri ruotage agonani'a eri nafa'a huno manigahie.

14 Ra Anumzamo'a amanage hu'ne, Nagri vahe'mo'za ete
egahazanki, kana varita eri ante fatgo nehuta, kampima me'neno
zamazeri tanafa huga zantamina eritreho. **15** Ra Anumzana
mani ruotage hu'neno manisga huno monafinka mani'neno
manivava nehigeno agi'amo'ma ruotgema hu'nea Anumzamo'a
huno, Nagra mareri agetere'nea kumate mani'noanagi, iza'o
avufgama erinte neramino, kumi'agu asunku'ma nehia vahe'ene
nemanina, izano agu'amo'ma uramia vahe'ene mani'nena
azeri hankavea netue. **16** Nagra vaheni'a narimpa ahezmante
vava osugahue. Hagi e'inama hanuana nezmagesugen
hanavezmia omnena, Nagrama zami'noa zamasimura fri'za atre
vagaregahaze. **17** Nagrama narimpama ahezmante'na zamazeri
havizama hunoana, na'ankure zamagrama havigema hu'za
maka zantamima eri zamagrafinke'ma atre'za kumi'ma haza
zanku anara hu'noe. Hianagi zamagra'a zamavesite rukrahe
hu'za ko'ma hu'naza kumi huvava hu'za nevaze. **18** Hagi
zamagrama haza zamavu'zamavara hago Nagra zamage'noe.
Hianagi Nagra zamazeri neganamrena zamazeri so'e hu'na
kegava huzmante'na zamavare'na nevu'na, zamasunku zampima
mani'neza zavi'ma netaza vahe'enena nasunku huzmante'na
zamazeri hankavetigahue. **19** Ana hanuge'za ana vahe'mo'za
zagamera hu'za Nagri nagia ahentesga hugahaze. Afete'ene
tvaonte'enema me'nea mopafima nemaniza vahe'mo'za, mani
fru hu'za Nagri narimpa fruzampi manigahaze. Ana nehanage'na
krifintira zamazeri knamaregahue huno Ra Anumzamo'a hu'ne. **20**
Hianagi havi zamavu zamava'ma nehaza vahe'mo'za, hagerimo
kranto kranto nehuno, havi hava zantamine hapa'ene erino

ankenarega eme ruvati treaza hu'za ana zamavu zamavara
otre'za huvava nehaze. 21 Hagi havi avu'avazama nehaza
vahe'mo'za knarerera hu'za zamarimpa frunena omanigahaze
huno Nagri Anumzamo'a hu'ne.

58 Ra Anumzamo'a amanage hu'ne, Kagra akohenka ke'zana
otinka ranke hunka ufema reaza hunka kezatinka, Nagri kema
rufu'netagiza vaheni'a kea nezmasaminka, Jekopu naga'mo'zama
nehaza kumi zamavu zamava zankura zamasamio. 2 Hianagi
fatgo zamavu'zmavama nehaza vahe'mo'zama nehazankna hu'za
maka zupa Nagritega nunamuna nehu'za, Nagri navu'navaza'ma
keama hu'zanku musena nehaze. Anumzazmimofo kasegea
zamefi hunomiza, Nagri tava'onte'ma erava'oma huzankuke
musena nehaze. 3 Ana nehu'za tagrama ne'za a'o nehuta,
tavufgama anteramita nemanunana nonkano hu'za nehaze.
Ana kema haza nona'a Ra Anumzamo'ha amanage nehue,
anama ne'zama a'o huta nunamuma haza zupa, tamagra'ama
tamazeri muse hu'zankuke tamagesa nentahita, eri'za vahetamia
tutu huzmantazage'za eri'zana e'nerize. 4 Tamagra ne'zana
atreta nunamuna nehazanagi, tamagra kehakare huta hafra
nehuta, tamazana anakita hara nehaze. Hagi ne'zama a'oma
haza zupa e'inahu avu'ava'ma hanazana, Nagra monafinkatira
nunamuntamia ontahigahue. 5 Tamagrama antahi'zana, ne'zama
a'o hu'na zupa, zaho'mo traza eri pagagi higeno mopafi agona
reaza huta tavufama eri anteneramita, tasunku kukena eri nehuta,
tanefapi mase'neta nunamuma nehuna zankura, Ra Anumzamo'a
muse nehie huta nehazanagi, tamagra havige nehaze. 6
E'ina huta ne'zama a'o huta nunamuma nehaza zankura
nave'nosianki, Nagri'ma navenesiana, havigema huta kinafima
zamavarente'naza vahera katufenezmanteta, knazama zamita

zamazeri havizama nehaza vahera zamatrene'za fru hu'za
nevanageta, bulimakao afu'mofo anankempima karenamare
zafama antazaza hutama vahe'ma knama nezamiza zana maka
atre vagareho. 7 Nagri'ma navenesiana amanahu tamavutamava
hiho, Ne'zanku'ma atupa'ma hanaza vahera ne'zana nezamita,
zamunte omane vahe'mo'zama nonku'ma nehakesageta,
nontamifi zamavare nenteta, kukenagu'ma atupa'ma hu'nesnaza
vahera kukena zamiho. Ana nehutma tamagri koramo'zama
knafima mani'nesanageta, ozamatreta zamaza hiho. 8 Tamagra
ana avu'ava'ma hanaza zamo'a nantera zagemo'ma hanatino
remsa hiaza nehina, ame hu'na tamazeri knamaresugeno fatgo
tamavu tamava zamo'a ugota huno nevanigeno, Anumzamofo
hihamu masazamo'a tamefira remsa huramanteno ne-eno kegava
huramantegahie. 9 Hagi kezamatita nunamuma hanageno'a, Ra
Anumzamo'a kenona huramantegahie. Hagi tamagra taza huo
hutama krafama hanageno'a, Nagra ama mani'noe huno hugahie.
Hagi vahe'ma knama nezamiza zana netretma, vahe zamavufina
tamazana asuteta zamavufintankema nehaza zama netreta,
10 ne'zanku'ma atupa'ma nehaza vahe'ene knafima mani'naza
vahe'ma zamazama hanageno'a, ana tamavu tamava zamo'a
hanimpinti tavimo remsa nehiaza nehina, hanimpi manisazanagi
zage ferupima maniaza huta manigahaze. 11 Ana nehanageno Ra
Anumzamo'a maka knafina kegava huramanteno nevuno, hagege
kokampina nazankuro atupa'ma hanazana tamazeri knare
hugahie. Ana nehuno zaferinatamia azeri hankavetisanigeta,
tretre huno nehagea hozagna nehuta, kampu'i timo oraneno evu
vava hiaza hugahaze. 12 Hanki ko'ma havizama hu'nea ranra
kumatamina tamagra ete eri so'e huta negita, tamagehe'zama
korapa'ma noma ki'naza marufi eri zugage huta nona kigahaze.

Ana nehanage'za vahe'mo'za tamagrikura hu'za, havizama hu'nea keginane, nontamine, kumapi ne'onse kantamina eri zugage hu'za ki vahere hu'za hugahaze. **13** Ra Anumzamo'a huno, Nagrama mani fruhu knani'e hu'nama huhampari'noa kna Sabatimofo kasegea rutagreta tamagra'a tamavesi'zana amagera onteho. Ana nehuta Sabati knagura Ra Anumzamofo kna me'ne huta antahinemita, tamagra'ama tamazeri musema hanaza zankura nohaketa, amunte omane nanekenena osiho.

14 Tamagrama mani fruhu kna Sabatimofo kasegema amage'ma antesageno'a, Ra Anumzamo'a asomu huramantegahie. Ana hanigeta neramageho Jekopuma eri santi haregahanema huno Ra Anumzamo'ma huhamparinte'nea mopafima me'nea agonafi tamatrenigeta mani so'e nehuta, ne'zana neneta musenkasea hugahaze. Ra Anumzamo'a agra'a agipinti ama nanekea huama hu'ne.

59 Antahiho tamagerfa huno Ra Anumzamofo azamo'a atupara osu'neankino, tamagu nevazino, agesa akaniore Anumza omani'neankino nunamuma hanazana antahiramigahie. **2** Hianagi tamagrama nehaza kumi'mo, tamagri Anumzamofona refkohu afete netre. Ana hu'neankino tamagri kumi'mo'a Anumzamofo avua rehiza higeno, tamagri nunamuna nontahie.

3 Tamagri tamazampina vahe'ma zamahe friza vahe'mofo koramo avitegeno, kefo avu'ava'zamo tamazankofina hareki'n. Tamagipina havigema hu'zamo avitegeno, tamagefunafina kefo ke'ma hantagezamo avite'n. **4** Mago vahe'mo'ma magomofoma keagama hunteana havige huno keaga hunentegeno, keagafima avrenteal vahemo'enena agrama agu'ma vazinakura havige nehie. Ana nehuta tamagra'ama vahe'ma zamazeri haviza hazza zamo'a, mofavre amu'ene nehiankna nehuta, kumima

hazana mofavre kasenteankna nehaze. **5** Ana nehazageno havi antahintahi tamimo'a, ha' osifavemofo anenta'mo amu'afinti horaho huno eviankna nehigeno, pamponkemofo nofi'mo ne'onse zagaramima anomagino eri antrakoma nehiaza nehie. Ana hu'neankino izao ana osifavemofo amu'ama nesanimo'a nefrisnigeno, mago amu'amo'ma rutako'ma hanigeno'a, mago ha' osifave horaho hugahie. **6** Tamagrama nehaza havi tamavu tamavamo'a vahera zamaza nosiankino, pamponkemofo nofi'mo haviza hu'negeno, kukenama tro'ma hu so'e osiankna hu'ne. Ana hu'neankino havi tamavu tamava'ma nehuta, hazenkema hu'zamo tamazampina avite'ne. **7** Ana vahe'mo'za kumi'ma huzante zamagi'a eri'za nevu'za, kezami omane vahe korana ame hu'za zamahe'za eri neragi'za, kumi'ma huzankuke antahintahia nehu'za, maka'zana eri haviza hu'za vanovano nehaze. **8** Ana hu'neankitma vahe'enema tamarimpa fruma huta mani'zana nontahita, kama vanoma nehazafina, fatgoma huno refkohu avu'ava zana nosaze. Ana nehazage'za tamagri tamagiakafima rente'za nevaza vahe'mo'za zamarimpa fru hu'za omanigahaze. **9** E'ina hu'negu fatgo huno refko hu avu'ava zamo'a tatreno afete me'negeta fatgo avu'avara nosune. Masaza kegahunanki huta amuhara hunanagi, hanizamo refinete. Masa kegahunanki huta amuhara hunanagi, hanimpi vano nehune. **10** Ana knazamo higeta avu asuhu'nea vahe'mo kanku nehakeno azanteti asarega erieri huno eneviaza huta vano nehune. Ana nehuta zage ferupi vano nehunanagi, hanimpima vano hia vahe'mo'ma masete otite huno vanoma nehiaza huta vano nehune. Hankavezmima me'nea vahe'ma manizafina, fri vahekna huta nemanune. **11** Ana knazamo higeta beamo'za vahe amprinaku'ma regazigazi nehazaza nehuta, maho namamo'za kragima nerazankna

nehune. Ana nehuta fatgoma huno refko hu'zanku amuhara hu'nanagi afete nemegeta, tagu'mavazi zanku tavua anteta nehakonanagi afete me'ne. **12** Na'ankure Ra Anumzamoka Kagri kavurera rama'a hazenke hu'nonankino, tagri kumi'mo eriama huno kumi vahe mani'naze huno keaga hunerante. Ana nehigeta tagra kumi vahe mani'none huta keta antahita nehune. **13** Ra Anumzamoka kagri kea ruhanentagita, havige huta kagrira kageta antahita osu'none huta nehune. Ana nehuta Anumzantimoka tamefi hunegamita, vahera huhaviza hunezmanteta, tusi hazenke erifore nehuta, tarimpafima me'nea havigea tagipinti huama nehune. **14** Hagi fatgoma huno refkomahu avu'ava zamo'a ete rukrahe huno nevigeno, fatgo avu'avazamo'a ogantu afete onetie. Ana nehigeno tamage'ma hu avu'ava zamo'a karampi masete otite nehie. Ana higeno anazamo'a tamage avu'ava zana retufenetre. **15** Tamagema hu'zamo'a inaregafi fregeno, havi avu'avazama atrea vahera vahe'mo'za hatati'za azeri haviza nehaze. Hagi Ra Anumzamo'ma fatgo huno'ma refko hu avu'avazama nonkeno'a musena nosie. **16** Hagi agrama kegeno, zamazeri havizama nehaza vahe'ma mago vahe'mo'ma efreno azama hugama osigeno'a, antri nehuno Agra'a azanuti ete agu'vazino nevreno, agra fatgo avu'ava huno zamazeri knare hige'za nemanize. **17** Hagi fatgo avu'ava zana amimizare ha' kukenagna huno nentanino, agu'vazino etema avre'zana asenire kankrikna huno nentanino, havizama nehaza vahe'ma zamazeri havizama hania zana rimpa ahezana kukenagna huno nentanino, kazigazima huno fatgo avu'avazama hu'zana nakre kukna huno antanine. **18** Zamagrama hu'naza zamavu zamavate anteno ha' vahe'a arimpa ahezmaneno nona huno zamazeri haviza nehuno, agri'ma ha'ma renentaza vahera nona huzmantegahie.

Ana nehuno hageri ankenaregama maniza vu'naza vahe'enena
nona huno zamazeri haviza hugahie. **19** Anama hanige'za zage
fre kazigama nemaniza vahe'mo'za Ra Anumzamofonku koro
hunte'za agorga nemanisageno, zage hanati kazigama nemaniza
vahe'mo'za Agri hihamu hankave'agura husga huntegahaze.
Na'ankure Ra Anumzamo'a asimu nentegeno zaho'amo ti
hageno ne-eaza huno ne-esanige'za nege'za anara hugahaze.
20 Zamagu'ma vazinia ne'mo'a Saioni eno, Jekopu naga'ma
kumi'ma atre'za zamagu'a rukrahe'ma hu'naza nagara eteno
eme zamavaregahie huno Ra Anumzamo'a hu'ne. **21** Nagra Ra
Anumzamo'na tamagranena mago huhagerafi huvempa kea
amanage hu'na hu'noe, Nagra Avamuni'a tamagripi nente'na,
nanekeni'a tamagipima ante'noa nanekemo'a me'ne"na huama
huvava huta vugahaze.

60 Jerusalemi kumamoka otinka remsa huo, na'ankure
kagri masamo'a ko e'ne. Ana nehugen, Ra Anumzamofona
hankavenentake masa zama'amo'a kagritera remsa hino. **2** Hagi
ko, maka ama mopafina hanizamo refi'netegen, tusi haninkino
vahera rufitezmante'ne. Hianagi Ra Anumzamo'a zage hanatiaza
huno kagritera eama hanigeno, hihamu masa'amo'a kagrite
remsa hugahie. **3** Ana nehanige'za kokankoka vahe'mo'za ana
masa nege'za kagritega ne-esnage'za, kini vahe'mo'za ana zanke
hu'za ana tavi'mofo masare egahaze. **4** Kavua kesga hu'enka
keganti kegama hunka ko, mofavre nagakamo'za magopi
eri atru hute'za erimago hu'za kagritega neaze. Ne' mofavre
nagakamo'za afete moparegati ne-esnage'za, mofa'ne nagaka'a
zamavaresga hu'za neazanki ko. **5** Ana zama negesnankeno'a,
kavugosafintira rumsa nehanigeno tumokamo'a fakifaki nehina,
tusi'a musezamo kagu'afina avitegahie. Na'ankure fenozana

eri'za hagerimpi kagrite ne-esageno, ana zanke hu'za maka ama
mopafi vahe'mo'za feno zazamia eri'za kagritega egahaze. **6** Hagi
rama'a kemoli afu'mo'za avi'netesageno, Midiani vahe'ene Efa
vahe'mokizmia, ohampariga'a agaho kemoli afutamimo'za Seba
mopafi vu'za goline, mnanentake zantamima kremnama vu'zana
ome eneri'za, Ra Anumzamofo husgama hunte'zamofo knare
musenkenena eri'za egahaze. **7** Ana nehanage'za Kedari kumate
zagagafaramina rama'a zamavare atru hute'za zamavare'za
kagritera ne-esage'za, Nabaioti kumateti ve sipisipi afutamina
maka avre'za kresramnavu itare marerigahaze. Anama hanaza
sipisipiramina aheta ofama nehaza itare'ma nagritegama ofama
hanage'na Ra Anumzamo'na nege'na muse hugahue. Ana
nehu'na mono noni'a hihamu hanavenireti avasesena hunte'na
eri so'e zantfa hugahue. **8** Iza'za hampomo eaza hu'za neageno,
maho namamo noma'arega hareno'ma eaza hu'za neaze? **9**
Tamagerfa hu'za hageri ankenaregama nemaniza vahe'mo'za
Ra Anumzamo'nama zamazama hanugura nagrite zamavua
kete'za neman'ingen, Tasisi kumate vahe'mo'za egota hu'za
ne-eza ne'mofavre nagaka'a afeteti ventefi zamavarente'za ne-
eza, ana ventefina rama'a silvane golinena erinente'za egahaze.
E'inama hazana kagri'ma kazeri so'ema hugenka'ma so'e
kagima eri'nanaza nege'za, Ra Anumzana tamagri Anumzama
Israeli nagamotare'ma ruotage'ma hu'noa Anumzamo'na ra
nagi namiku anara hugahaze. **10** Jerusalemi kumamoka,
kuma keginaka'a megi'a vahe'mo'za e'za emeri zugege hu'za
neginageno, kini vahe zamimo'za kagri eri'za erigahaze. Kora
kagrira narimpa ahenegante'na knazana kami'noe. Hianagi
menina nasunku hunegante'na navesigantegahue. **11** Jerusalemi
kumamoka, kuma kafankamo'a feru'ene kenage'enena hagro

huteno me'nesnige'za, afete moparegati vahe'mo'za feno
zamia eri'za kagritega ne-esnage'za, kini vahe'zamimo'za ugota
huzmante'za zamavare'za ana vahera kagritega egahaze. **12**
Hianagi mago kumapi vahe'mo'o, mago kini ne'mo'ma kegavama
hu'nesia mopafi vahe'mo'zama kagri kagorgama mani'neno kagri
eri'zama eri'zanku'ma ave'osinia vahe'mo'a, haviza huno fanane
hugahie. **13** Lebanoni mopafima me'nea zafa ta'nopafintira, meni
zafane saipresi zafane mago'a knare'nare huno za'zama hu'nea
zafaramina antagi'za eri'za kagritega egahaze. Hagi ana zafa
ramintetira nagri mono nona eri zugege hu'za kisnageno knare
zantfa hugahie. Ana hu'nesnige'na kini tra'n'i'are mani'n'e'na,
nagia antesnua no me'neno nagri hankavea erinte ama' hugahie.
14 Ana hu'nesnige'za korapa'ma kazeri havizama hu'naza
vahe'mokizmi mofavre naga'mo'za kagrite e'za, kagiafi zamarena
eme nere'za kagrikura amanage hugahaze. Ra Anumzamofo
ran kumakino, Saioni kumara Israeli vahe'mokizmi Anumzama
ruotage'ma hu'nea Anumzamofo kumare hu'za hugahaze. **15**
Jerusalemi kumamoka havizantfa hu'nanke'za, vahe'mo'za
kavesi nogante'za zamefi hunegami'za, anampina mareriza
atiramiza osu'naze. Hianagi nagra Ra Anumzamo'na kazeri
so'e zantfa hu'nesnuge'za vahe'mo'za muse nehanage'za,
henkama mani'za vanaza vahe'mo'zanena kagrikura muse
hugante vava hugahaze. **16** Mofavremo nerera ami anivazu
hiaza nehunka, maka kokantega vahe'mokizmi knare'nare feno
zantamine kini vahemokizmi feno zanena erigahane. E'inama
nehanagenka kagrama kenka antahinkama hananana, Jekopu
nagamofo hankave nentake Anumzankino, nagu nevazino
nahokeno ete navre'nea Ra Anumzane hunka hugahane.
17 Hagi bronsi eri'na egaragi goli erina ne-ena, aini erina

egaragi, silva eri'na ne-ena, zafa eri'na egaragi, bronsi eri'na ne-ena, have eri'na egaragi, aini eri'na egahue. Ana nehu'na rimpama fru huno mani avu'ava zana huntenugeno kegava hunegante'na, fatgo avu'ava'zamo'a ugota huno mika zana kegava hugahie. **18** Tamagrama mani'naza mopafine, mopa tamimofo agema'ama ometre emetrema hu'nea atumpareganena, ha'mofo agenkene, ha'ma nehuno keonke zama eri havizama hu'zamofo agenkenena magore hutma ontahitfa hugahaze. Hianagi kuma kegina ka'agura, Ra Anumzamo'a ete ko nagu vazino navre'ne hunka agia anteneminka, kuma kafanka'agura Ra Anumzamofo agia husga hanune hunka agj'a antemigahane. **19** Hanki zagemo'a koma ferupima remsa huneganteazana huno remsa nosanigeno, ikamo'ma kenage'ma remsa hunegantea zana huno remsa huogantegahie. Na'ankure Ra Anumzamo'a mevava taviareti remsa huneganteno kagri Anumzamo'a hankave masaka'a manigahie. **20** Hanki kagrite'ma remsama hania zagemo'ene ikamokea magore huke tami ofregaha'e. Na'ankure Ra Anumzamo agra mevava tavika'a manisanigeno, maka kasuzamo'a vagaregahie. **21** Ana hanige'za kagri vahe'mo'za fatgo avu'avake nehu'za, mopa eri'za manivava hugahaze. Nagra'a nazampinti zafa avima kriaza hu'na hankre noanki'za, nagri nazanko avo mani'nesage'za vahe'mo'zama nezamage'za nagri nagia husga hugahaze. **22** Hagi menina osi'a naga nofi mani'nazanagi, henka tusi'a vahe eforehu hakare huteta hankavenentake vahe efore huta manigahaze. Ra Anumzamo'na ama nanekea huankino, nagrama ko huhampari'noa knare ama anazamo'a ame huno efore hugahie.

61 Ra Anumzamofo Avamumo'a nagrite eman'i'ne. Na'ankure Ra Anumzamo nagrira nanunte masave tagino frenenanteno,

knama zamiza zamazeri havizama nehaza vhahera knare musenke
ome huama hunka zamasamio huno hunantege'na e'noe. Ana
nehuno rama'a knazampima mani'naza vhahera zamarimpa
fru nezaminka, hapinti'ma zamazeri'za kinama huzmante'naza
vhahera zamazeri netrenka, kinama hu'naza vhahera kinafintira
atreta fruhuta viho hunka zamasamio huno hunante'ne. 2 Hagi
Ra Anumzamo'a naga'ama so'e avu'avazama huzmanteno
zamazeri so'ema hania kafugura huama hunka nezmasaminka,
vah'ama knama zamiza zamazeri havizama hu'naza vhahera
arimpa ahenezmanteno zamazeri haviza haniankna ome
huama hunka nezmasaminka, zamasunku nehu'za zavi krafa
nehaza vhahera zamarimpa fru zamio huno hunantege'na
e'noe. 3 Saioni kumapima mani'neza zavi krafama nehaza
vhahera zamarimpa fru nezaminka, zamanunte'ma kugusopama
erinte'nezama zavi'ma netaza zana ome erinetrenka, avasase'ane
tavaravereti anaki zamanto. Ana nehunka zavi'ma netaza
zana eri netrenka, musema hu'zana masavema nehiaza hunka
fre nezmanenka avesra gosrama nehiazana eri netrenka,
kukenama nehiaza hunka Ra Anumzamofo agima ahentesgama
hu'zana ante'zamanto. Anama hananke'za ete hankavea eri'za
muse zagame nehu'za, Ra Anumzamofona muse huntegahaze.
Ana nehanage'za vah'mo'za nezamage'za, Ra Anumzamo
oki zafa hankre'negeno oti hankave ti'neankna hu'naze hu'za
nehu'za, Ra Anumzamofo agia ahentesga hugahaze huno
hunantege'na e'noe. (Matiu 11:5, Luku 4:18, 19, 7:22) 4 Anama
hutesuge'za korapa'ma havizama hu'nea rankumazmia zamagra
eri zugage hu'za kigahaze. Ana nehu'za maka zantamimo'ma
havizama huno za'za knama meno'ma e'nea zantamina eri
kasefa hu'za kigahaze. 5 Keta antahita osu'nesaza vah'mo'za

e'za tamagri sipisipi afutamina eme kegava nehanage'za,
hozatamifine waini hozatamifina afete moparegati vahe'mo'za
eri'zana eme eri ramantegahaze. 6 Hianagi tamagrikura
Ra Anumzamofo pristi eri'za vahere hu'za nehu'za, tagri
Anumzamofo avuga eri'za eneriza vahere hu'za tamagrikura
hugahaze. Ana nehanageta kokankoka vahe'mo'za eri'za eme
tamamisnaza zagofenoreti ne'zana neneta, ana vahe'mokizmi
feno zante rantamagia enerita tamimiza runafage hugahaze. 7
Nagri vahe'mota tamagazegu hu'nazanagi ante agofetu hu'na
tami'nugeta rama'a zantami eri santiharegahaze. Tamazeri
tamagaze hu'nazanagi, ranke huta zagamera huta ana fenozama
tami'nua zantera musena hugahaze. E'ina hu'negu mopatamifina
rama'a zantami eri agofetu huta erita manigahaze. Ana nehutma
tusi'a muse nehanageno ana muse zamo'a vaga oreno mevava
hugahie. 8 Na'ankure fatgoma huno refkoma hu avu'ava
zanku Ra Anumzamo'na nave'nesie. Musufamase avu'avazane,
vahe'ma azeri havizama hu avu'ava zankura tamagerafa
huno nave'nosie. Nagri naga'mo'za rama'a knaza eneri'za
hazenke eri'nazagu, nagrama zamigahuema hu'nama hu'noa
kante amage ante'na musezana nezami'na, mevavama hania
huhagerafi huvempa kea zamagrane huhagerafiahue. 9 Hagi
zamagripinti'ma henkama efore'ma hanaza vahera, maka ama
mopafi vahe'mo'za zamagesga hu'za antahizamigahaze. Anama
zamagesgama hanaza vahe'mo'zama zamage'za antahi'zama
hanazana, Ra Anumzamofo vahe mani'nazageno agra'a asomu
hunezmante hu'za hugahaze. 10 Ra Anumzamofonkura tusiza
hu'na muse nehanugen, nagu'amo'a Anumzanimofonkura
muse zagame hunteghie. Na'ankure Agrama nagu'mavazino
navre'nea zana kukenagna huno antaninenanteno, fatgo

avu'ava zanu, zaza kukenagna huno antaninante'ne. Ana'ma hige'na mago vemofo a'masiminaku higeno asenire knare tavrave anakiankna nehu'na, zagoamo'ma marerisa zantaminteti a'mofoma avasese hunteankna hu'noe. 11 Mopafinti keonke zamo rehakarufeno hageno marenerigeno, hozafi avimzamo amumpa anteno mareriaza huno, Ra Anumzamo'a hanigeno, fatgo avu'avazamo'ene Agri'ma husgama huntezamo kokankoka vahe'mofo avurera hageno marerigahie.

62 Na'ankure Saioni kumamoka kagri knare zanku hu'na nagira hamunki'na omani kea huvava nehu'na, Jerusalemi kumamoka knare zankura akohe'na omanigahue. Ana hu'na nevanugenno nanterampi zage hanatino remsa hiaza huno, fatgo avu'avazamo'a kagripintira remsa nehanigeno, agu'mavazi zamo'a kenage tavi tagi karugaru huno nevigeno remsa hiaza huno remsa hugahie. 2 Maka ama mopafi vahe'mo'za fatgo kavukvazana negesnage'za, kini vahe'mo'za kagri hihamu masazana kegahaze. Ana nehu'za Ra Anumzamo'ma kasefa kajima antegamisnia kagi ahegahaze. 3 Kagra Ra Anumzamofo azampi mago avasese'amoke hu'nea kini fetori meankna nehunka, kinimo'ma nentania fetori Ra Anumzankamofo azampi meankna hugahane. 4 Ra Anumzamo'a amefi humine hu'za kagia nehe'za, mopa'amo'a hagage koka fore hu'ne hu'za kagia ohegahaze. Hianagi mago kasefa kajima ahesazana, nagra agrikura muse hunentoe hu'za kagia nehe'nageno, vere'ma mani'nea a'mo'ma muse nehuno neve'enema maniaza huno mopakamo'a so'e huno mesigeno, Anumzamo'a muse hugantegahie. 5 Mago kasefa ne'mo vene omase'nea mofo a' eriankna hu'za, kagri ne'mofavre naga'mo'za kagrane eri hagerafigahaze. Ana nehanageno menima a'ma

e'neria ne'mo'ma, ana a'ma musema hunenteaza huno kagri
Anumzamo'a kagrira musena hugantegahie. **6** Jerusalemi
kumamoka kuma keginare'ma mani'neza kvama hanaza vahera
ko huhampri zamante'noe. Ana hu'noanki'za kenage'ene
feru'enena zamagira hamunkite'za omanigahaze. E'ina hu'negu
Ra Anumzamofontegama nunamuma banana vahe'mokane,
kezanke'ma banana vahe'mokanena mani frua osunka kezati
vava huo. **7** Ana huta Ra Anumzamofontega kezati vava
huta nevinkeno, Jerusalemi kumara ete eri hankavetisnigeno,
maka ama mopafi vahe'mo'za anazama negesu'za husga
huntegahaze. **8** Ra Anumzamo'a hankavenentake tamaga azana
erisga huno huvempagea hu'neankino, ha' vahetamimo'za e'za
tamu'na sisima huta hankre'naza witine, tamu'na sisima huta
hankre'naza waini hozafintira afete mopearegati vahe'ene tamagri
ha' vahe'enena zamatrenuge'za e'za eme eri'za onetfa hugahaze.
9 Hianagi witi ragama hamare'nazana tamagra'a neneta, Ra
Anumzamofona agia husga huntegahaze. Ana nehanage'za
waini rgama tagisnaza vahe'mo'za ana wainia Nagri mono
kumapina negahaze. **10** Jerusalemi kumapima menima mani'naza
vahe'mota kumara atreta, kuma kafaramimpinti atiramita vuta
vahe'ma esnaza kana eri ra nehuta, mopa kateta antemrenerita,
kampima haveramima me'neana eritreho. Ana nehuta maka
vahe'mo'zama kesnaza avame'zana, krauefa erisga hiho. **11**
Jerusalemi kumamoka antahio, Ra Anumzamo'a maka ama
mopafi vahera zamasami'neanki'za, kagrikura amanage hu'za
hugahaze. Saioni kumamoka kagri'ma kaguvezino'ma kavresnia
nera ne-eankino, musezane nonama huno kamisnia mizana
magoka eri'neno ne-e. **12** Ana hu'neanki'za kagri vahekura
hu'za, Ra Anumzamo'a zamagu vazino zamavare'nea vahe

mani'nazanki'za ruotge vahe mani'haze hu'za hugahaze. Anage
nehu'za kagrikura hu'za, Ra Anumzamo'a amefira huomi'nea
kumaki haketa vanune hu'za Jerusalemi kumamokagura
hugahaze.

63 Idomu kaziga Bozra kumateti'ma za'za kukena'are'ma korankrema hunegeno'ma ne-ea nera iza'e? Iza kini ne'mofo za'za kukena hu'neno hihamu hankaveanena agatre azatrea huno masia hunora ne-e? E'i ana nera Nagragi'na fatgo navu'nav a zampinti nanekea nehuanki'na hihamu hankavenireti zamagura vazigahue. 2 Hanki waini rgama rentra'ma nehazafima wainima rentra ahe'nea vahe'mofo kukenaregama hiazama huno, tamagri kukenaregama kora penimoke'ma hu'neana nazamo anara hu'ne? 3 Mago vahe'mo'a nagranena mani'neno naza osige'na nagrake waini raga rentra ahe'na regatati hu'noe. Nagrira tusi'a narimpa ahege'na ha' vaheni'a krepima regatiti'ma nehiaza hu'na zamahe'na zamarehapa hugeno, kora zamimo'a rugatati huno maka kukenanirega koramoke hu'ne. 4 Nagra vaheni'ama zamagu vazi'na ete'na zamavaregahue hu'nama huhampari'noa kna nagu'afi antahinoankina, zamagu vazi'na ete zmavrenua kafua hago e'ne. 5 Nagrama koana Nagri vahe'ma zamazama hanaza vahera omani'zagen a antri hu'noe. E'na hige'na tusi'a narimpa ahenezmante'na Nagra'a nazanteti zamagu vazi'na ete zamavare'noe. Ana nehugen Nagri narimpa ahezamo'a mareri'ne. 6 Tusi'a narimpa ahenezmante'na maka kokankoka vahera zamahe'na rehapati'noe. Ana nehu'na narimpama ahe'zana aka tima nehiaza hu'na zamuge'za nene'za neginagia hu'haze. Ana nehazage'na zamagri korana mopafi eri tagi atre'noe. 7 Ra Anumzamo'ma tavesi neranteno so'e avu'avazama hunerantea zanku'ene Ra Anumzamofo aglma

husgama hunte'zankura huramagesa hugahue. Tamagerfa huno
Ra Anumzamo'a asunku zama-areti'ene vagaore avesi zanteti
Israeli vahera zamazeri so'e hu'ne. Maka'zama Anumzamo'ma
tagri'ma hurante'nea kante anteno tusi'a asunku huranteno
taza hu'ne. **8** Ra Anumzamo'a huno, Ama ana vahera
tamagerfa hu'za Nagri vahe fatgo mani'naze. E'na hu'neanki'za
zamagra nagri navurera havi kea osugahaze. Ana nehuno Agra
zamagu'vazi ne' mani'ne. **9** Hanki zamagrama knazama eneri'za
zamatafima nemani'zageno'a, Ra Anumzamo'enena ana knaza
enerino, atazampi mani'ne. Ana nehigeno Agri tavaonte'ma
nemania ankeromo zamagrane mani'neno zamagu vazi'ne. Ra
Anumzamo'a avesizama'areti'ene asunku zama'areti huno ete
zamavare'ne. Hagi korapa'ma mani'za e'naza knafina, maka
zupa Ra Anumzamo'a azampi zamavaresga huno e'ne. **10**
Hianagi Ra Anumzamofona ke'a rutagre'za zamefi hunemi'za
Ruotage Avamu'amofona arimpagna erimi'naze. Ana hazagu
huno ete rukrahe huno Ra Anumzamo'a zamagri ha' vahe
fore huno Agra'a hara huzmante'ne. **11** Anama hutege'za
Mosese knafima korapa'ma fore'ma hu'nea zankura zamagesa
ete nentahi'za amanage hu'za hu'naze. Hageri amu'nompima
kama erifore huno vahe'ane naga'are'ma kegavama nehaza
vahe'enema zamavareno'ma e'nea Anumzana iga mani'ne hu'za
nehu'za, Agra Ruotage Avamu'ama atregeno amunozamifima
enemanino, **12** hankavenentake azanu Mosesena azantamaga
kaziga hankavea nemino, hagerina refkohu kanti kama huno
kana erifore hige'za kantu kazigama vu'nazana, Ra Anumzamo'a
agri agimo'ma agi'ama mevava hanigu anara hu'ne. **13**
Hagerimo'ma amefenkame'ma tami'nefina agra'a ugota huno
nevuno zamavareno vu'ne. Hagi hosi afumo'za hagege

kokampima viaza hu'za vu'nazanagi, trakara hu'za omase'naze.

14 Hagi bulimakao afumo'za agupofi umani fru hazankna huno, Ra Anumzamofo Avamumo'a mani fru zami'ne. E'inahu avu'avaza hunka vaheka'a kegava hunka zamavarenka ne-enka Rankagia eri'nane. **15** Ra Anumzamoka monafinka masanentake huno hankave'ane kumapintira, kefenkma atenka tagrira tago. Inantega tusia hihamu hankaveka'a me'ne? Kagra kasunkura hurantenka knare kavukvara hunorantane. **16** Abrahamu'a tageno antinora osigeno, Israeli'a tagenira osu'neanagi, kagra nerfaga mani'nane. Kagra Ra Anumzamoka tagri nerfaga mani'enka, korapama tagu'vazinka tavre'nana ne' mani'nane. **17** Ra Anumzamoka na'a higenka tatranketa kagri kana novaririta, tagu'a kafana erinegita, kagrira korora huganteta kagorga nomanune? Hagi nagri eri'za vahe mani'neta, Nagri naganofi mani'nazema hanunka, rukrahe hunka tagritega ete eno. **18** Ruotage'ma hu'nea mono nonka'a osi'a knafi ruotge vahekamota erita mani'nonane. Hianagi menina tagri ha' vahe'mo'za ha' eme huranteza ana mono nona eme eri haviza nehu'za, zamagiareti renkrare re'naze. **19** Kagra hunka nagri vahe mani'naze hunka tagi nehunka kegava hurante'nananagi, ana'ma huozmantehana vahe'mo'zama nehazankna tavutava nehuta, kagri kagima nohaza vahe'mo'za nehazankna tavutava nehu'ne.

64 Ra Anumzamoka nagri'ma navesiana anami mona eri anafe hutrenka eramigeno, ama mopafima me'nea agonaramimo'a kagri kavurera tore'vare hino. **2** Tevemo zafare tevenereno ti tegrakra hiazza nehanagenka, kagra eraminka ha' vaheka'arera kajika'a eme eri ama nehuge'za, maka ama mopafima mani'naza ha' vahekamo'za nege'za kagri kavurera zamahirahiku hoho. **3** Na'ankure tagra e'inahu'zana forera osugahie huta hu'nonaza

fore higeta konana, kagra monafinti eneraminkeno, ama
mopafima me'nea agonaramimo'a kagri kavurera tore'vare
hu'ne. 4 Hagi korapara magora Kagri kna Anumzana mani'neno,
kagrite'ma zamentintima nehu'za, kavegama antaza vahetera
hankave'a erinte ama huno zamaza hu'ne hu'zama haza nanekea
zamagesafintira nontahi'za, ana anumzana zamavufintira
onke'naze. 5 Hagi musema hu'zama fatgo zamavu'zamava
nehu'za, kagri kavukava'ma zamagema okaniza amage'ma
nentaza vahera kagra zamaza nehane. Hianagi tagrama
kumi'ma huvava hunkenka, kagra karimpa aherantenane. E'ina
hu'neankino ina vahe'mo tagrira taguvazino taza hugahie? 6
Maka vahe'mota agruma osu'nea vahekna hunone. Tagrama
fatgo tavutava nehune hutama nehu'na tavutavamo'a, pehanama
regriri travravegna hu'none. Tagrama hu'na hazenkemofo kumi'mo
higeno, zafa ani'namo uza re'negeno zaho'mo eri hareno viaza
huno tagri kumi'mo tavareno afete vu'ne. 7 Mago vahe'mo'e huno
kagri kagia aheno nunamuna osuge, kagritera erava'oa huno
kamagera onte'ne. Tagri kumi'mo higenka kamefi huraminkeno,
tagrama huna kumi'mo tazeri haviza higeta havizantfa huta
mani'none. 8 Ana hu'neanagi Ra Anumzamoka tagri nerfaga
mani'nane. Tagra higo mopagna huta manunkenka, kagra mopa
kavoma tro nehia nekna hunka mani'nane. Kagraka'a kazampinti
makamota tro hurantanketa mani'none. 9 Ra Anumzamoka
zazatera krimpa ahenerantenka, tagri kumikura kagesa antahi
vava osuo. Tagra kagri vahe mani'neta nunamu nehunanki
kavua antenka tago. 10 Kagri routage rankumatamimo'a ka'ma
kokankna higeno, Saioni kumamo'enena ka'ma kokankna higeno,
Jerusalemi kumamo'enena haviza higeno anampina vahera
omanitfa hu'ne. 11 Konariri amoke'ma huno ruotage'ma hu'nea

mono nontima, me'nege'zama tagehe'moza anampima vu'za
Kagri kagina ahentesgama nehaza mono nona, tevemo teno
eri fanane nehigeno, ana maka knare narezanti'ma anampima
me'nea zane, maka nontaminena tevemo te fragu vazigeno
hihi huno marerino amne'za se'ne. 12 Ra Anumzamoka ama
ana maka zama nehanazana, eri amnea osugahampi? Kagra
amanea kea osu mani'enka tazeri havizana huvava hunka
vugahano?

65 Hagi Ra Anumzamo'a huno, Nagra nunamuma hu'za
nantahima nonkaza vahe'mo'zama nunamuma hu'za nantahima
kesagu zamavega antena mani'noe. Nagriku'ma nohake'za Nagri
nagi'ma nohaza vahe'mo'za nagrira nage'za eri fore hazage'na
Nagra ama mani'noe, ama mani'noe hu'na nehue. (Rom 10:20,
21) 2 Nagri kema runetrage'za knare osu kante'ma nevu'za,
zamagra'a antahintahima nevarariza vahetera zamazama
hunakura nazana rusutetena maka knafina mani'noe. 3 Ana
havi zamavu zamava'ma huvava Nagri navufina nehu'za, nazeri
narimpa nehe'za, hoza zamifina havi anumzante kresramna
nevuzu, simenire'ma tro'ma hunte'naza itarera mananentake'zana
kremna vu'naze. 4 Ana nehu'za matipi maniza vano nehu'za,
kenagera oku'a havi avamute monora nehu'za, afu'mofo ame'a
nene'za, Anumzamo'na navure'ma agruma osu'nea zagagafama
kre'haza tima'anena ne'naze. 5 Ana vahe'mo'za mago'a vahekura
hu'za, tagri tavufgamo'a ruotage hu'neanki, tagri tavaontera
omanita ogantu'a maniho hu'za nehaze. E'inahu zamavu
zamava'ma nehaza zamo'a tevegumo nagonagampi fregeno
kumagumaguma hiakna maka knafina nehie. 6 Keho, Ra
Anumzamo'na maka tamagri havi tamavutamavara avontafepi
krentogeno me'ne. Ana hu'negu nagra akohe'na omani'na, maka

kumitamimofo avamente antena nona hu'na mizana tamente
tamente tamitere hugahue. 7 Ana hanuge'za zamagri kumi'ene
zamagehe'i kumimofo knazanena erigahaze. Na'ankure zamagra
agonaramintega vu'za, havi anumzante tevefi ofa ome nehu'za,
nagri nagia eri haviza hu'naze. E'ina hu'nazanki'na ana kumi'ma
hu'naza zamofontera, nona hu'na mizazmia zami fatgo hutere
hugahue. 8 Ra Anumzamo'a amanage huno hu'ne, Mago vahe'mo
krepi raga regatiti huno tima'a eriteno akru'a atreaza nehigeno,
mago vahe'mo huno matera ovuo. Na'ankure mago'a tima'a
me'negenka regatiti hu so'e osu'nane huno nehiaza hu'na, nagri
eri'za vaheni'a Israeli vaheku nagesa nentahi'na zamazeri haviza
huvaga oregahue. 9 Nagra Jekopu naga'ene Juda vahepinti
rama'a vahe zamazeri fore hanuge'za, nagri agonaramina eri
nafa'a hu'za anampi manigahaze. Nagri eri'za vahe manigahaze
hu'na ama ana vahera huhampari'noa vaheki'za, ana mopa
erisanti hare'za manigahaze. 10 Ana hanigeno ana mopafina
sipisipi afu zamimo'ene bulimakao afu'zamimo'za avite'za
nemaninageno, Saroni agupomo'a sipisipi afu kevumo'zama
ne'zama nesaza agupo fore hinkeno, Akori agupomo'a bulimakao
afu kevumo'zama manigasama hanaza mopa megahie.
Nagriku'ma nehakaza vahetera e'inahu'za fore hugahie. 11
Hianagi Ra Anumzamo'na tamefi hunenamita, ruotge'ma hu'nea
agonani'a tamage akaninenteta, Gati havi anumzante ne'za
retro hunenteta waini tinena tagi havia huta Meni'e nehaza havi
anumzante ofa nehaze. 12 E'ina nehazanagi ha' vahe kazinkante
tamavrentesnuge'za, ha' vahe'mo'za tamazeri pri huza bainati
kazinteti tamahegahaze. Na'ankure nagrama kezamatuan
nagri kea antahita nona nosuta, kema tamasamuana, nagri
kea antahi so'ea osu'naze. Ana nehuta nagri navurera havi

tamavu tamavaza nehuta, nagri'ma nave'nosia avu'avaza amage ante'naze. **13** E'ina hu'negu Ra Anumzamo'na amanage hu'na nehue, Nagri eri'za vahe'mo'za ne'zana negahazanagi, tamagra tamagaku hugahaze. Nagri eri'za vahe'mo'za tina negahazanagi, tamagra tinku hugahaze. Nagri eri'za vahe'mo'za muse hugahazanagi, tamagra tamagazegu hugahaze. **14** Nagri eri'za vahe'mokizmi zamagu'afina musezamo avitesanige'za, muse zagame hugahaze. Hianagi tamagri tamagu'afina tamasuzamo avinetena, tumotamimo'a netanesnigeta zavi krafa hugahaze. **15** Ana hu'nesnuge'za Nagri eri'za vahe'mo'zama vahe'ma sifnagema huzmantekura, tamagri tamagi ahe'za sifna kea huzmantegahaze. Na'ankure Ra Anumzamo'a tamagrira tamahe fanene nehuno, eri'za vahe'aramina ru zamagi zamigahie. **16** Hanki iza'o ama mopafima mani'neno, agra'ama asomu erigahue huno'ma hanimofona tamage huno Anumzamo'a asomura huntegahie. Iza'o mopafima huvempama hanimo'a, tamage Anumzamofonte huvempa hugahie. Na'ankure ko'ma hu'naza hazenkeramina Nagra nagekani zamante'noe. **17** Hanki antahiho, Nagra kasefa monane kasefa mowanena tro hugahuanki'za, ko'ma fore'ma hu'nea zamo'a antahintahi zamifina mago'enena omanesanige'za zamagesa ontahigahaze. (2 Pita 3:13, Revalesen-Hufo hu'nea naneke 21:1) **18** Hianagi Nagrama kasefa'zama tro'ma hanua zanku muse huvava nehuta manigahaze. Nagra Jerusalemi kumara vahe'mo'zama musema hu'za manisaza kuma retro hugahue. Ana kumapima manisaza vahe'mo'za tusi muse huvava hugahaze. **19** Nagranena Jerusalemi kumakura muse hunente'na, vaheni'agura antahi so'e huzmantegahue. Ana nehanugeno Jerusalemi kumapima zavi krafama nentahiza zana hu'za mago'enena ontahitfa

hugahaze. **20** Mofavre nentamo'ma osi'ma mani'neno'ma nefriazana osugahie. Maka vahe'mo'za zazate manite'za tavava ozafa re'za 100'a kafu hanazanagi, kasefa vahe mani'haze hu'za hugahaze. Hanki 100'a kafuma agateore'neno'ma ame huno'ma frisnia vahekura sifna ahentegeno frie hu'za hugahaze. **21** Nagri vahe'mo'za zamagra nontamina ki'za ana nontamimpi nemaniza, zamagra waini hoza ante'za raga'a negahaze. **22** Nagri vahe'mo'zama ko'ma noma kinage'za, ru vahe'mo'zama emerizama mani'nazanknara nosnageno, waini hozama ante'hage'za ru vahe'mo'zama eme tagi'za nenazanknara osugahaze. Na'ankure Nagri vahe'mo'za zafamo'ma nehiaza hu'za zazate maniza nevu'za, zamazampinti zamu'na sisima hu'za eri fore'ma hu'naza zantamina nene'za musenkase hu'za maniza vugahaze. **23** Zamagrama erisnaza eri'zamo'a amne zanknara osugahie. Ana nehanage'za kasezmantesaza mofavre naga'zamimo'za hazenkea e'origahaze. Na'ankure ana naga'mokizmi mofavre nagara Ra Anumzamo'a asomu huzmante'neankino zamagripinti'ma henkama kase anante nante'ma hanaza vahe'enena asomu huzmantegahie. **24** Hagi zamavesinia zanku'ma nantahima onke'nenage'na, Nagra kenona huzmantegahue. Ina zankuro nunamuma nehanage'na nentahi'na, zahufa nunamuna nehanage'na ana zana zamigahue. **25** Afi kramo'ene sipisipi anentamokea magopi mani'neke trazana nenesakeno, laionimo'ene bulimakao afumo'enena magopi mani'neke hagege trazana negaha'e. Hianagi osifavemo'a kugusopa negahie. Ana hu'neanki'za Nagri ruotage agonafina havi avu'ava zana nosnageno, magomofoma azeri havizama hu'zana omanegahie. Ra Anumzamo'na amana nanekea nehue.

66 Ra Anumzamo'a amanage huno hu'ne, Mona kumamo'a
Nagrama nemanue tra megeno, ama mopamo'a nagijama
nentoa tra me'ne. E'ina hu'neankita Nagri nona inantega
kinantesnage'na, nagra mani frua hugahue? (Matiu 5: 34,
35. Aposolo 7: 49, 50) 2 Na'ankure Nagra Ra Anumzamo'na
monane mopane maka zantamina nazampinti tro huntogeno
me'ne huno Ra Anumzamo'a hu'ne. Hagi zamavufagama
anteramiza nemaniza, zamasunku hu'za zamagu'a rukrahe
nehu'za, nagri nanekegu'ma koroma hunte'za zmahirahiku'ma
nehaza vaheku nagrira nave'nesie. 3 Hianagi ve bulimakaoma
ahe'za ofama nehaza zamo'a vahe'ma ahe friaza nehu'za,
sipisipi anenta'ma ahe'za ofama nehaza zamo'a, krama ananke
eri vamigino ofama nehazankna nehaze. Hagi witi ofama nehaza
zamo'a, nagri navurera afumofo koroma ofama hazankna
nehu'za, mna nentake'zama ofama haza zamo'a, nagrama
koana havi anumzante kre mna nevazankna nehaze. Ana
nehu'za zamagra'a zamavesite kasarino'ma agoterfa avu'ava
zana nehu'za, kana atre'za zamagra'a zamavesi nevaririze.
4 E'ina hu'negu zamagrama koro'ma nehaza knazana ko
huhampri zamante'noanki'na, atrenugenzo zamagrite egahie.
Na'ankure Nagrama kema hu'noana mago'mo'e huno kenona
osigeno, kema nehugen'o'a mago'mo'e huno nagri kea ontahine.
Nagri navurera kefo avu'ava nehu'za nagrama musema nosua
zamavuzmava nehaze. 5 Hagi iza'o Ra Anumzamofo kegu'ma
ahirahiku'ma nehania vahe'mo'a Ra Anumzamofo kea agesa
anteno antahino. Nagri nagireku hu'za neramafu'za zamavesra
huneramante'za kiza zokago ke huneramante'za Ra Anumzamo'a
hankave'ane eno eme zamazeri muse nehina, kamaneno
hu'za nehaze. Hianagi tamagerfa hu'za ana kema nehaza

vahe'mo'za tusi'a zamagazegu hugahaze. **6** Rankumapinti'ma tusi agasasankemo'ma nehiana nentahita, ra mono nompinti'ma nehaza agasasankea antahiho. E'i ana agasasankea Ra Anumzamo'a agri'ma ha'ma rente'naza vahe nona huno miza nezamige'za nehaza agasasamo'e! **7** Jerusalemi rankumamo'a mago a'mo mofavre anteku nehigeno ata negrigeno ne' mofavre omenteaza osu'neanki, ame huno ne' mofavre anteankna hu'ne. **8** Hanki e'ina hu'zana kora negeta nentahita hu'nazafi? Mago kumamo'a mago zupagera ame hunora eforera nehia zampi? Mago kumate vahe'mo'a ame hunora vahera forera huno eri hakare nehia zampi? I'o. Ana hu'neanagi Saioni kumamo'ma mofavrema antenakura agafa huno atama negrisnigeno'a, ame huno ne' mofavreramina kasezamantegahie. **9** Nagra hanugen mofavrema kasentezama nehaniretira mofavrea kase ontegahifi? Nagrama mofavrema fore hinoma hu'na hugeno'ma fore nehia Ra Anumza mani'noanki'na, nagra zamarimpa eri kugeno mofavrea nontaze hu'na tamagri Ra Anumzamo'na nehue. **10** Jerusalemi kumaku'ma avesinentamota, agrane tusi musena hiho. Maka vahe'ma Jerusalemi kumaku'ma tamasunku huta zavi'ma netaza vahe'mota, menina agrane musena hiho! **11** Ana nehinkeno mofavrema ami amiaza tamagrira nehina, agripintira amima anivazu huno neaza huta anivazu huta rama'aza enerita mani so'e huta manigahaze. **12** E'ina hu'negu Ra Anumzamo'a amanage huno hu'ne, Antahiho, Nagra hanugen tima hageaza huno maka ama mopafi vahe'mokizmi feno zamo'a Jerusalemi kumapina eme avitenigeno, mago zankura atupara osugahie. Ana zantamima erinutma tusi muse hugahaze. Mago a'mo mofavre'a azampi avre'neno ami amigeno neneno muse hiaza nehuta, nerera'a amote avrenteneno zokago renenteaza

hugahaze. **13** Mago a'mo mofavre'a kvahu so'e hu'nen
avavaseaza hu'na, kegava huzmantegahue. Ana hanugeta
Jerusalemi kumapina fru huta manigahaze. **14** Anazama eri
fore'ma hanua zama negesnageno'a, tamagu'afintira tusi muse
nehanigeta, trazamo hageno amosre ahenteaza huta hankave
vahe fore hugahaze. Ra Anumzamo'a hankave'a, agra'a eri'za
vahe'are erinte ama hugahie. Hianagi ha' vahe'amokizmia
arimpa ahezmanegahie. **15** Hanki tamagra negesnageno,
Ra Anumzamo'a teve anefa'ene ne-eno, kagikagi zahomo'ma
hiaza huno karisi'afi mani'neno ame huno egahie. Ana nehuno
tusi arimpa ahezmanento tevereti ha' vahe'a zamazeri haviza
hugahie. **16** Ra Anumzamo'a tevereti'ene bainati kazinteti'ene
maka ama mopafi vahera kumi zamimofo nona huno zamahe
vagaregahie. Ana hanige'za rama'a vahe frigahaze. **17** Ra
Anumzamo'a huno, havi anumzante'ma vu'za hozafima mono
ome huntoku'ma nehu'za, zamagra'a zamazeri agru hu avu'avaza
nehazageno, amu'nozamifinti mago vahemo'ma afu'mofo ame'a
neneno, kafane mago'a Ra Anumzamo'ma i'oma higeno
agruma osu'nea zagaramima nenea vahekura, Ra Anumzamo'a
zamazeri haviza hanuge'za fanane hugahaze huno hu'ne.
18 Ra Anumzamo'a huno, Vahe'mokizmi antahintahi'zane
zamavu zamava zanena ko ke'na antahi'na hu'noanki'na,
kokankoka vahe'ene maka ruzahu ruzahu zamageru'ma neraza
vahe'enena, e'na eme zamazeri atru hugahue. Anama hanuge'za
zamagra e'za Nagri hihamu hankaveni'a kegahaze. **19**
Hanki ama ana nanekema eri tamagema senakura, ofri'ma
mani'naza vahera huzmantesnuge'zama mago'a ru kumategama
vanazana, Tasisima, Putima, Ludima, Mesekima, Tubalima,
Javani kumate'ene hageri amu'nompima me'nea kumatamimpine

huzmantesnuge'za vu'za Nagri'ma nageza antahi'za osu'naza
vahetera nagri hankavegura ome huama hugahaze. **20** Hanki
maka tamagri naga'ma umani'naza moparegati vahe'mo'za
maka tamagri nagara zamagra hosi afu zamifine, tonki afu
zamifine, kemoli afu zamifine, karisi zamifine zamavarentete'za
zamavare'za nagri ruotge agona Jerusalemia egahaze huno Ra
Anumzamo'a hu'ne. Israeli vahe'mo'zama witi ofama hunaku'ma,
nagri navure'ma agruma hu'nea zuompafima witima erinte'za
nagri mono nompima vazaza hu'za zamagrira zamavare'za
egahaze. **21** Anama hutesnage'na mago'a nagara pristi
erizante huhampari nezmante'na, mago'a nagara huhampari
zamantesnuge'za Livae naga manigahaze huno Ra Anumzamo'a
hu'ne. **22** Nagra Ra Anumzamo'na amanage hu'na nehue, Kasefa
monane kasefa mopama tro'ma hanua monane mopamokea
nagri navure mevava hugaha'e. E'ina hukna huno tamagripinti'ma
fore'ma hanaza vahe'mo'za mani vava hu'za vanageno, zamagri
zamagimo'a fananea osuno mevava hugahie. **23** Mago kasefa
ikanteti vuno mago ikante vutere hanigeno, mago Sabati
knareti vuno mago Sabati knare'ma vuterema hanige'za, maka
ama mopafi vahe'mo'za e'za nagri navuga zamarena eme
re'za mono hunantegahaze huno Ra Anumzamo'a hu'ne.
24 Ana'ma hute'za atirami'za vu'za, nagri kema ruhantagi
naza vahe'ma fri'naza zamavufaga ome zamagesnazana,
anama fri'naza vahe zamavufagafima mani'naza kanimo'za
nofrisnageno, tevema nezamarea tevemo'enena asura osugahie.
Maka vahe'mo'zama ana vahe zamavufagama kesnazana,
hinimnake huno zamagotegahie.

Zeremaia

1 Ama nanekea Benjamini nagamofo mopafi me'nea rankuma Anatoti kumate nemaniza pristi vahepinti, mago ne' Hilkia'e nehaza ne'mofo nemofo Jeremaia huama hu'nea naneke. **2** Ama ana nanekema Ra Anumzamo'ma agafama huno Jeremaiama asami'neana, Amoni nemofo Josia'ma Juda vahe kinima manino egeno 13nima hia kafufi asami'ne. **3** Hagi Josia nemofo Jehoiakimi'ma Juda vahe kinima manino'ma e'nea knafinena Ra Anumzamo'a ana zanke huno Jeremiana nanekea asamigeno, huama huno ne-egeno, Josiana mago mofavre'a Zedeki'ama kinima efore huteno manino egeno 11nima hia kafure ehanati'ne. Anama 11nima hia kafumofona 5fu ikampi ha' vahe'mo'za e'za Jerusalemi kumapi vahera eme zamavare'za ru mparega ome kina huzmante'naze. **4** Ahante Jeremaia'a huno, Ra Anumzamo'a amanage huno nasami'ne. **5** Antakamofo arimpafina kazeri forera osune'na ko kagrira kage'na antahi'na hu'noe. Hagi negarera'a kaseogante'nege'na ko kagrira kazerinte ruotage nehu'na, kokankoka vahete Nagri kasnampa vahe manigahane hu'na kagrira huhampri'noe. **6** Ana ke'ma hige'na nagra kenona hu'na, Ra Anumzana Anumzamoka nagra mensi kasefa mofavre mani'noanki'na, vahe avufima keagama hu'zana antahini osu'noe hu'na hu'noe. **7** Hianagi Ra Anumzamo'a amanage huno kenona hu'ne. Kagra mofavre mani'noe hunka osuo. Nagrama inantego vuoma hu'na hugantesua kumatega nevunka, maka nanekema kasamisuana ome huama hunka vahera zamasamigahane. **8** Hagi mago vahekura kagra korera osuo. Na'ankure Nagra kagrane manine'na kegava hugantegahue huno Ra Anumzamo'a hu'ne. **9** Anagema huteno'a Ra Anumzamo'a azana antegamateno nagite avako nehuno amanage hu'ne,

antahio, menina Nagra nanekeni'a kagri kagipi ama nentoe.

10 Hagi menina Nagra kagrira huhampruankinka, kokankoka vahete'ene kinimo'ma kegavama hu'nea mopafinena vano nehunka, ko'ma me'nesiazana eri tasagi hune atrenka, ko'ma menesiazana eri taganavinetrenka, ko'ma me'nesiazana eri haviza hunetrenka, ko'ma me'nesiazana eri akaha hunetrenka, kasefaza eri otinka neginka, kasefaza hankregahane. **11** Anante Ra Anumzamo'a amanage huno nantahige'ne. Jeremaiaga na'a negane? Huno hige'na nagra hu'na, Almoni zafamofo azankuna'a negoe hu'na hu'noe. **12** Anagema hugeno'a Ra Anumzamo'a huno, Ha tamage hunka keama hane. Hagi Nagra keni'are navu ante'na ke'nesanugeno maka zama fore hugahie hu'nama hu'noa nanekemo'a nena raga'a regahie. **13** Hagi anante Ra Anumzano'a mago'ene ete nantahigeno, Menina na'a kane? Hige'na nagra kenona hu'na, kavofi me'neno krakra nehia timo noti kazigati ruvarehi ramino tagrama mani'nontega e'za nehige'na negoe. **14** Anagema hugeno'a Ra Anumzamo'a huno, E'i ana zama kanana noti kazigati ranknazamo'a ru herafiramino eno ama mopafima nemaniza vahera eme zamazeri haviza hugahie. **15** Hagi antahio, Nagra noti kazigama me'nea moparamima kegavama hu'naza kini vahetamina ke hanuge'za e'za, Jerusalemi rankumamofo kafaraminte kini trazamia eme ante'za nemani'za, Jerusalemi rankumamofo vihu kegina eme kegava nehu'za maka Juda mopafima me'nea kumataminena kegava hugahaze. **16** Hagi e'inahu zama hanua zamo'a, Nagri vahem'o'zama havi zamavu zamava'ma hu'naza zante keaga huzmante'na anara hugahue. Na'ankure zamagra Nagrira zamefi hunenami'za vu'za, zamazanteti'ma tro'ma hunte'naza havi anumzante kresramna nevu'za monora hunte'naze. **17** Hagi

kagra Jeremaiaga otinka retrotra hunka, Nagrama huoma hu'na hugantoa nanekea vahera maka ome zamasamio. Kagra zamagrikura korora osuo. Hagi kagrama koro'ma hananke'na zamagri zamavuga kazeri koro hugahue. **18** Hagi Jeremaiaga antahio, mago rankumamofoma hanave vihu keginama hu kagizankna hu'na kagrira menina kazeri hanavenetina, aenireti fumaza zafa retru rentazankna kagrira nehu'na, bronsireti kuma kegina hugagi zankna hugahue. Ana hanugenka kagra oti hankave ti'nesanke'za, maka ama ana mopafi vhemo'zane Juda kini vhemo'zane, kva vhemo'zane, pristi vhemo'zane, Juda vahem'o'zanena kazeri fenkami otregahaze. **19** Hagi zamagra hara hugantegahazanagi, hara hugagate oregahaze. Na'ankure Nagra kagrane mani'nena kaguvazigahue huno Ra Anumzamo'a huama hu'ne.

2 Hagi Ra Anumzamo'a mago'ane amanage huno nasami'ne, **2** Kagra Jerusalemi kumapima nemaniza vahetega vunka, Ra Anumzamo'a amanage hie hunka ome huama hunka zamasamio. Zahufa vere vu'nea a'mo nevema avesi avesi'ma hunteaza huta, maka tamagu'areti huta tamavesi nante'naza zankura nagesa antahi atrogeno nevie. Ana nehuta hozama onte hagage ka'ma kopima tamavrenama neogeta namagera navararita e'naze. **3** Hagi e'i ana knafina Israeli vahe'mota Nagri vahe fatgo mani'nazankita, hozafinti ne'zamo ese afu re'negeno hamreankna huta ruotge hu'nazane. Hagi ana ne'zama eri havizama haza vahera kumi hu'nazankino, knazamo zamazeri haviza hu'ne. Nagra Ra Anumzamo'na ama ana nanekea nehue. **4** Hagi tamagra Jekopumpinti fore'ma hu'naza nagamotane maka Israeli mopafima mani'naza naga nofimota Ra Anumzamo'ma nehia nanekea antahiho. **5** Ra Anumzamo'a amanage huno

nehie, Tamagehemo'za Nagra nahaviza huzmantenoge'za
nagrira natre'za afetera mani'naze? Zamagra kaza osu havi
anumzana amanezante mono ome hunente'za, zamagra'a
zamazeri amne'za se'naze. 6 Hagi Isipitima zamavare atiramina
hagage ka'ma kopima mago'zama omanegeno vahe'ma
vanoma nosazageno vahe'ma azeri haviza huzamo'ma avite'nea
kokampima vugote'zamante'na vu'noa zankura zamagra Ra
Anumzamo'na zamagekaninantaze. 7 Hagi Nagra tamagrira
tamavre'na masaven tretre mopafina ogeta knare'nare ne'zana
neneta zafa raganena ne'naze. Hianagi tamagra Nagri mopafima
enemanita hinimnage avu'avaza huta mopa eri pehena hu'naze.
Ana hazageno erisantima haregahazema hu'na tami'noa
mopamo'a Nagri navurera hinimna vu'ne. 8 Hagi pristi vahe'mo'za
Nagrikura, iga mani'ne? hu'za nohakaze. Ana nehazage'za
kasegema kegavama hu'naza vahe'mo'za, Nagrira ke'za antahi'za
nosaze. Hagi kva vahe'mo'zanena Nagrira keha renante'naze.
Ana nehazage'za kasnampa vahe'mo'za Bali havi anumzamofo
agifi kasnampa ke nehu'za, amunte omaneno kaza osu havi
anumzante monora hunentaze. 9 E'ina hu'negu Nagra mago'ane
keaga huramante'naku nehue huno Ra Anumzamo'a hu'ne.
Ana hu'neanki'na Nagrama keagama huramantesanuana,
tamagrira keaga huramantene'na, tamagrama kase zamantesaza
mofavre naga'enena keaga hunezmantena, tamagri mofavre
nagamokizmi mofavreraminena keaga huzmantegahue hu'na
Nagra Ra Anumzamo'na nehue. 10 Hagi tamagra zage fre kaziga
hagerina takaheta vuta ogantu Saiprusi mopafima nemaniza
vahera ome nezamageta, zage hanati kaziga vuta Kedari
mopafima nemaniza vahera ome zamageho. Kora amanahu
zana fore higeta ke'nazaza fore nehifi? 11 Hagi mago'a mopafi

vahe'mo'za tamage anumzana omani'neanagi havi anumza zamia atre'za ru anumzana amagera nentazafi? i'o anara nosaze. Hianagi tamagra Nagri vahe'mota hihamu masa'ane Anumzamo'na nontera, amunte omaneno kaza osu havi anumza avrente'naze. **12** E'i ana'ma nehaza tamavu tamava zantera monamo'a antri huno koro nehuno, antahintahi hakare nehuno kea nosie huno Ra Anumzamo'a hu'ne. **13** Na'ankure Nagri vahe'mo'za tare hazenkema hu'nazana, Nagra enevia tinkna hu'na mani'noanagi nenatre'za, zamagra'a tinkeria kafi'nazanagi ana kerifina mopamo'a kekokako higeno timo'a mare novazie. **14** Hagi Israeli vahera kazokazo eri'za vahe omanige, kinafina manine'za kase zamantegera osu'neanki nagafare ha' vahe zamimo'za e'za maka zana eme agu'zaneru'za zamavare'za nevaze? **15** Ha' vahe zamimo'za laionimo krafagema nehiaza hu'za ranke huza kezati nezamante'za, mopazamia eri haviza hazageno anampina mago'zana omnetfa hu'ne. Ana nehu'za ne'onse kuma zaminena tapage hutrazageno anampina mago vahera omanifa hu'ne. **16** Hagi Isipi mopafina Memfisi kuma'ene Tapanesi kumapinti e'za Israeli vahera eme tamazeriza tamaseni zokara vazagate atre'naze. **17** Hagi tamagri hazenkemofo mizama'a ama ana kna zamo'a tamagritera e'ne. Ra Anumzana tamagri Anumzamo'ma tamavreno kante'ma neviana atreta tamefi'ma humiza zante anara hu'naze. **18** Hagi Isipi vahe mopafima vu'nazana na'a mago knare'za erinaku vu'naze. Tamagra Naeli timpinti ti nenaku vu'nazafi? Na'a mago knare'zana erinaku Asiria mopafinena vu'naze. Tamagra Yufretisi timpinti ti nenaku vu'nazafi? **19** Tamagrama hu'naza kefozamo kna zana tamino tamazeri fatgo hugahie. Ana nehina Nagri'ma natretama vu'naza zamo keaga huramanteno tamazeri fatgo

hugahie. Ra Anumzana tagri Anumzama atreta tamefi'ma hunemita agri agoragama omani nonana, haviza huno osugaza hu'none huta antahigahaze. Nagra Anumzana Monafima sondia vahe'mokizmi Ra Anumzamo'na ama ana nanekea nehue. 20 Hagi korapara tamagrira karenamare zafareti tamanankempina rusi hute'za knama neramiza zafa ru tamana hunetre'na, seni nofiteti'ma kinama huramantenageta kazokazo eri'zama e'nerizanofira rukano hutre'noe. Hianagi tamagra huta Agri eri'zana e'origahune huta nehaze. Anage nehuta agonaramimpine anina kuronkuroma hu'nea zafa agafafina monko a'nemo'za nehzaza huta havi anumzantera monora hunentaze. 21 Hianagi knare zantfama hu'nea wainimofo nofiteti kitagi'za mopafi hankraza kna hu'na tamagrira hankre'noe. Hianagi menina na'a higeta hageteta havizama hu'nea afi wainia fore nehzaze? 22 Hagi tamagra laema nehzaza hankave marasini reti'ene rama'a soporeti tamavufga sese hugahazanagi, ana havi zama hu'naza zamofo avame'zana Nagri navurera amne me'nege'na negoe, huno Ra Anumzamo'a hu'ne. 23 Hagi ana kegura tamagra huta, tagra Bali havi anumzamofo amema'arera monora huonte'nonanki, inankna huta tagra'a tazeri pehena hu'none huta nehzaze. Hianagi tamagrama kasrino havizama hu'nea avu'ava zama agupofima hu'naza zana keho. Hagi tamagra a' kemoli afu'mofo agifi he'negeno, krahakraha huno ve kemoligu hakeno vano hiankna huta havi anumzankura haketa vano nehzaze. 24 Hagi tamagra, afi' a' donki afu'mo agafi ahe'negeno zahopi agona antesga huteno mana'mana huno vano hiankna nehzaze. Ana knafina agriku'ma haza ve tonki afu'moza agrikura hakeza vano nosazanki agra'a hakeno ve tonkigura vano nehie. 25 Hagi tamagra Israeli vahe'mota, tamagareta havi anumzante'ma vano

nehazageno tamanankemo'ma hagagema nehia zana nazupa
atregahaze? Hianagi tamagra huta, havi anumzama avesima
nenteta amage'ma nentona zana otregahunanki, kagra kea
osunka manio huta Nagrikura nehaze. **26** Hagi tamagra Israeli
vahe'motane, Israeli kini vahe'motane, kva vahe'motane, pristi
vahe'motane, kasnampa vahe'motanena, tamagra kumzafa
vahe'mo kumzafa nesageno keno eri fore higeno agazegu hiankna
huta tamagazegu hugahaze. **27** Hagi tamagra zafareti antre'za
tro'ma huntenaza havi anumzankura huta nerafa'e nehuta,
havere'ma eri pehe hu'za tro'ma hunte'naza havi anumzankura
agra kaserantene huta nehuta tamefi hunami'naze. Hianagi
tamagra'ma hazenkefima unefreta Nagrikura eme tagu'vazio huta
krafagea nehaze. **28** Hianagi tamagra'a tamazantet'i'ma tro'ma
hunte'naza havi anumzantamina iga mani'naze? Zamagrama
muha'ma hu'nesanu'za eme tamaza hugahazanki, knazampima
ufresuta ana havi anumzantami kehinke'za e'za eme tamagu
vaziho. Na'ankure ana havi anumzantamima tro'ma huntenazana,
Juda mopafima me'nea ranra kumatamimofo amente amente
tro huntetere hu'naze. **29** Tamagra nahigeta Nagrama osu'noa
zankura huta hazenke hurante'ne huta nehuta Nagrira kehara
renenantaze huno Ra Anumzamo'a hu'ne. **30** Tamagri mofavre
nagara zamazeri fatgo hunaku knazana zamuanagi, zamagra
ana zankura ontahi'naze. Ana nehazageta tamagra laionimo
zagagafa aheno neankna huta kasnampa vahera zamahe
fri'naze. **31** Hagi ama knafima fore huta mani'naza vahe'mota Ra
Anumzamo'ma nehia nanekea antahiho. Nagra Israeli vahetera
hagege kokankna nehu'na, hanizamo kintrako hu'nea kokankna
zamagridera hu'nofi? Hagi nahigeta Nagri vahe'mota huta, hago
menina Anumzamo'ma kegavama hurante'nea zana atreta fru

huta manunankita Agri kvafina omanigahune huta nehaze. **32**
Hagi tamagrama antahi'zana mago mofamo'a avasasema nehia
zankura agera nekanigeno, zahufa a'mo'a ese'ma neve'enema
aravema ha'a yupama antani'nea kukenagu'enena aganera
nekanifi? I'o anara nosaze. Hianagi Nagrira za'za knafi zamagera
kaninenamize. **33** Tamagra Israeli vahe'mota, karuna kereti'ma
masave huno monko avu'ava zama hu' zantera antahini
hu'naze. Ana hu'nage'za monko zante'ma vugotama hu'naza
a'nemo'za tamagripinti rempi hu'za nentahize. **34** Hagi zamunte
omaneno ke'zami omane vahe'mokizmi koramo'a tamagri
kukenarega tusiza hu'ne. Tamagra tamavufintira negazage'za
tamagri nona eme tapage hu'za musufa ose'nazanagi, tamagra
zamahe fri'naze. **35** Hagi kagra amanage hunka nehane,
nagra mago hazenkea osu'noankino Ra Anumzamo'a arimpa
ahe onantegahie hunka nehane. Hianagi antahio, kumira
osu'noe nehanankinka keagafi manigahane. **36** Nahigenka kama
nevana kana atrenka kavua keganti kegama hunka kazama
huzankura nehakane? Korapa'ma Asiria vahe'mo'zama kazama
osazagenkama kagazegu'ma hu'nanaza hunka, Isipi vahe'mo'za
kazama osanagenka kagazegu hugahane. **37** Hagi kagrama
muha'ma nehana vahera Ra Anumzamo'a amefi huzamisigenka
kagazegu nehunka kazana kasenire ante'nenka ana kumara
atrenka egahane. Ana vahe'mo'za kagrira tamage hu'za kaza
osanagenka knarerera hunka omanigahane.

3 Hagi mago ne'mo'ma nenaroma a'ma atrenigeno ana a'mo'ma
vuno ru vema ome eritenigeno, neve'a ete vuno ana ara ome
avregahifi? E'inama hanuno'a Israeli mopa eri himna vugahie.
Hianagi tamagra monko a'mo ve erige atrege huno vano hiaza
huteta, menina Nagrite neazo huno Ra Anumzamo'a hu'ne. **2**

Hagi tamavua kesga huta mago zama omane agonaramimpima
kesazana, ana maka agonafina havi anumzante mono hunenteta
monko avu'avaza hu'naze. Tamagra monko a'mo vene'nema
esagu kante mani'neno avunteno keaza nehuta, nonkuma'a
omne Arapu vahe'mo'zama ka'ma kokampi vano vano hiaza
huta savri avu'avazane kefo avu'avazama huta vanoma nehaza
zamo mopa eri haviza nehie. 3 E'i ana agafare Nagra ata kora
atrogeno mopafina runontege'na, ko'enena atrogeno mopafina
runonte. Ana nehuani tamagra monko avu'avaza hu'nea
a'mo agaze eri amne hiaza huta tamagazegura nosaze. 4
Hianagi tamagra Nagrikura huta, osi'ma mani nontegati'ma
eno amare'ma e'neana, kagra nerfaga mani'nenka, tagrira
tavesirantenka e'nane huta nagrikura nehaze. 5 Anage nehuta
tagrira za'zatera arimpa aherante vava huno nevuno tazeri haviza
osugahie huta Nagrikura nehaze. Hianagi tamagra'a tamavesi
avaririta kea ontahi havi avu'ava zana huvava huta nevaze.
6 Hagi Josaia'ma kinima manino Juda vahe'ma kegavama
hu'nea knafina, Ra Anumzamo'a amanage huno nasami'ne.
Nagri'ma natre'naza Israeli vahe'mo'zama hu'naza avu'ava
zana kenampi? Nevente'ma mani fatgo osu a'mo'ma hiaza
hu'za maka agonaramimpine, ranra zafaramimofo agafafinena
vu'za monko a'nemo'za nehzaza hu'za havi anumzantera
monora ome hunte'za vano hu'naze. 7 Hagi ana'ma hazage'na
Nagrama nagesa antahuana, ana a'mo'a ana'ma huno vano
hutesuno'a, nagrite ete egahie hu'na nagesa antahi'noe. Hianagi
anara osigeno keontahi nenunkna 'a Juda'a anama hia avu'ava
zana avufinti ke'ne. 8 Hagi nagri'ma natre'za vu'naza Israeli
vahe'mo'za havi anumzante vu'za mono hunente'za monko
avu'ava zama nehaza zama nege'na, a'ma netre'za krenezamiza

avo krenezami'na huzmante'noe. Ana'ma hua zana keontahi
nenunkna Juda'a ko ke'neanagi korora huno ana monko
avu'ava'ma nehiazana otre'ne. 9 Na'ankure Israeli vahe'mo'za
monko avu'ava zana amane zane hu'za zamagesa nentahi'za
zafare'ene havereti'enema tro'ma hu'naza havi anumzante
mono'ma hunente'za, monko zama haza zamo mopa eri haviza
hu'ne. 10 Hagi Israeli nenunkna Juda'a Nagrira natreno vuno
havi avu'ava zana ome hu'neanagi, nagritera rukrahera huno
eno agu'areti huno asunkura osu'ne. Hianagi agra Nagrira
eme renavataga huno, amega'ati agu'a rukrahe hu'ne. Nagra
Ra Anumzamo'na amana nanekea nehue. 11 Hagi anante
Ra Anumzamo'a mago'ane amanage huno nasami'ne, Israeli
vahe'mo'za nagrira natre'za vazage'za, Juda vahe'mo'za keontahi
avu'ava hu'naze. Hianagi Israeli vahe'mo'za Juda vahera
zamagatere'za osi'a knare hu'naze. 12 E'ina hu'negu Jeremaiaga
noti kazigama me'nea mopafima nemaniza vahetega vunka
amanage ome huo, Israeliga nagrira natrenka vu'nana a'
mani'nananki etenka nagrite eno. Anama hananke'na Nagra
narimpa aheogantegahue. Na'ankure nagra nasunku Anumza
mani'noankina narimpa ahegante vava osugahue huno Ra
Anumzamo'a hu'ne. 13 Hagi tamagra hago hazenke hu'none
huta kumitamia huama nehuta, Ra Anumzana tagri Anumzamoka
keka'a runetrageta, ani'na kuronkuro zafaramimofo agafafina,
havi anumzantera monora ome hunenteta, kagri nanekea
rutagreta amagera onte'none huta tamasunkura hiho huno Ra
Anumzamo'a nehie. 14 Hagi ke nontahita mani fatgo nosaza
mofavre nagamota, Nagrite ete eho huno Ra Anumzamo'a hu'ne.
Na'ankure nagra tamagri kva mani'noe. Mago kumapintira mago
vahe nevre'na mago nagapintira tare vahe zamavaretete hu'na

Saioni agonare vugahue. **15** Ana hute'na Nagri nagu'amo'ma hu'nenia zama hu'nesaza vahe kva huhampari zamantegahue. Ana hanuge'za manine'za Nagri antahi zanteti'ene ama' antahizanteti kegava huramante'za tamavre'za vugahaze. **16** Hagi ana knafima rama'a vahe'ma ome forehu hakarema huta ana mopafima mani avi'matesanuta, Nagri huhagerafi huvempage vogisima ko'ma knare knafima tamagranema me'nea zankura tamagesa antahi atresageno ovugahie. Ana vogisigura tamagesa ontahi tamagane kaninemita onkegahaze. Ana nehutma ru'enena huhagerafi huvempage vogisia kasefara trora osugahaze huno Ra Anumzamo'a hu'ne. **17** Hagi ana knazupa Jerusalemi kumakura Ra Anumzamofo kini tra me'ne hu'za nehanage'za, mika ama mopafi vahe'mo'za Jerusalemi kumate eme atru hu'za Ra Anumzamofo agi'a ahentesga hugahaze. Ana nehu'za keontahi havi zamagu zamagesamofona amagera ontegahaze. **18** Hagi ana knafina Juda naga'mo'zane Israeli vahemo'zanena noti kaziga moparegama umani naregatira eri mago hute'za erami'za, Nagrama zamafahelima zamuge'za erisantima hare'naza mopafina ete emanigahaze. **19** Hagi Ra Anumzamo'a huno, Nagra amanage hu'na antahintahia hu'noe. Nagra ama vahera zamavare'na Nagra'a mofavregna hu'na kegava huzamantegahue hu'na nagesa antahite'na, erisantima haresaza zana ama mopafina magore huno omane'nea kna mopa hentofa mopa tami'noe. Ana nehu'na nagesama antahuana, Nagrikura nerafa'e nehuta natreta ovu namage antesazegu antahintahia hu'noe. **20** Hianagi tamagra Israeli vahe'mota mago a'mo'ma nevente mani fatgo osiakna huta, nagritera mani fatgo osu'naze huno Ra Anumzamo'a hu'ne. **21** Hagi agonaramimpintira rankrafage nehazage'za vahe'mo'za antahi'naze. E'i Israeli

vahe'mo'za Ra Anumzamofontega zavi krafa nehu'za zamasunku hu'naze. Na'ankure Ra Anumzana zamagra'a Anumzana atre'za havi avu'avaza nevariri'za, antahi omi'naza zanku anara hu'naze. 22 Hagi ke ontahi mofavre nagamota ete nagrite enke'na ana ke ontahi tamavu tamava zampintira tamazeri kanamara'neno. Anagema hanuge'za veamo'za hu'za tagra ete kagrite'ma neonana, na'ankure kagra Ra Anumzana tagri Anumza mani'nanketa kagritera neone hu'za hugahaze. 23 Tagrama monko avu'avazama nehuta, ne'onse agonaramimpine ranra agonaramimpima havi anumzantaminte'ma mono'ma huzmanteta vanoma hu'nona zampintira mago tazahu'zana e'ori'none. Tamage Ra Anumzana tagri Anumzamo agrake Israeli vahe'mota tagura vazigahie. 24 Hianagi tagra mofavrema mani nontegati'ma eno meninte'ma egetama keta e'nonana, tafahe'za maraguzati'za eri fore'ma hu'naza sipisipima, bulimakaoma, ne' mofavrezamima, mofa'nezaminena agaze'a omne Bali havi anumzamofo ami vagare'naze. 25 Ana hu'negu tagra tagazegu huta kepri nehune. Na'ankure tagrane tagehe'zanena Ra Anumzana tagri Anumzamofo avufi kumira hu'none. Tagrama mofavrema mani'nonteti'ma eno amare'ma egeta, Anumzamofo nanekea antahita amagera onte'none.

4 Hagi Ra Anumzamo'a huno, Israeli vahe'mota enaku'ma hanuta nagrite ete rukrahe huta echo. Hagi haviza huno agoterfa anumzaramina Nagri navureti'ma eri atresuta kana atreta hazagreta havifina ovugahaze. 2 Hagi tamagrama fatgo huno refkohu avu'ava nehuta, fatgo avu'ava'ma nehuta kasefa hu'na mani'hoa Anumzamo'ha nagifima huvempama hanage'na, Nagra asomu huramantenuge'za ruga'a vahe'mo'zama nege'za, e'im a hanaza hunka asomu huranto hu'za eme nehu'za, Nagri nagi'a

ahentesga hugahaze. 3 Hagi Ra Anumzamo'a amanage huno
Juda vahe'ene Jerusalemi vaheku'enena hu'ne. Avimzana
ave've trazampina ohankreta, hankave mopamo'ma nehiaza
huno tamagu'amo'ma hankavema ti'neazana, rekorita rupopo
huteta avimzana aseho. 4 Hagi Juda vahe'motane Jerusalemi
vahe'motanena havi tamagutamagesa atreta tamagu'a rukrahe
hiho. A'nama osnazana Nagri narimpa he'zamo'a tevemo hiaza
huno rukru hina, mago vahe'mo'a rusura osugahie. Na'ankure
tamagra kefo avu'ava'ma hu'naza zante anara hugahue. 5 Hagi
Ra Anumzamo'a huno, Juda vahe'ene Jerusalemi vaheku'enena
amanage hunka zamasamio hu'ne. Amama mani'naza mopamofo
agu'afina maka kaziga ufena nereta, ranke huta kezatita
amanage hoho. Maka vahera eme eri tru hutenketa, koro freta
hankave vihu keginama hu kagi'naza kumatamimpi ufresune
huta hoho! 6 Hagi mago avame zana flekia tro huteta anamifi
erintesga huta nevuta, Jerusalemi kumapima mani'naza vahera
amanage huta korokea huzamaho. Ame huta koro freta vuta
fra'ma kisaza kumaku hakeho. Na'ankure Nagra noti kazigati
ranknaza atre'nugeno eno eme tamazeri haviza hugahie. 7 Hagi
laionimo frakino mani'nefinti atiramiaza huno, ha' vahe'mo'za
kumazamifintira e'za tamagri kumara eme eri haviza hugahaze.
Ana vahera maka nonkumatami eri haviza nehaza vaheki'za
maka zama mopatamifima me'neana eme eri haviza nehu'za,
ranra kumatamina eme ahetapage hutresageno anampina
magore huno vahera omanitfa hugahie. 8 E'na hu'negu
tamagra tamasunku kukena nentanita, tamasunku huta tusi
zavi krafage hoho. Na'ankure Ra Anumzamo'a tusi arimpa
aheneranteankino, ana rimpa ahezamo'a mevava huno nevie. 9
Hagi Ra Anumzamo'a huno, anazama fore'ma hania knafina

kini vahe'ene kva vahe'mo'zanena, antri nehanageno muha zazamia omanegahie. Ana nehanage'za pristi vahe'mo'za tusi koro nehanage'za, kasnampa vahe'mo'za antahintahi hakare nehu'za mago nanekea osugahaze. **10** Hagi anante nagra amanage hu'na hu'noe. Ra Anumzamoka Jerusalemi kumapi vaheku'ma hunka, tamarimpa frune knare huta manigahaze hunka'ma hu'nana kegura, zamagra hu'za agra reravatga hu'neankino, ha' vahe'mo'za bainati kazinteti tananke eme rukafari'za nehaze hu'za nehaze. **11** Hagi mago kna ne-eankino Ra Anumzamo'a Jerusalemi vahekura huno, hagage kokampima me'nea agonaramimpinti amuhonentake zaho'mo zahora erino nagri vahetera egahie. E'ina zahora zamana zamana hu'neno witi honama eri neharea zahora omane'neanki, **12** e'i ana zahora Nagra huntanena egahiankino, hankavenentake zaho atufeno egahie. Ana nehu'na Nagra ana vahera keaga huzamantegahue. **13** Hagi anante nagra Jeremaia'na amanage hu'na vahera zamasami'noe. Keho, ha'ma hurantesia ne'mo'a ko'ma runaku'ma nehia hampomo rehanintiri hiankna huno tagrama mani'nontega ne-e. Ana ne'mofo karisiramimo'za kagigagi zahokna hu'za neazage'za, hosi afu'aramimo'za tumpamo'ma tusi avunema anteno hareno vanoma nehiama'a agatere'za zamagare'za neaze. Anazama nege'na hazenkefi manunankita haviza hu'none hu'na hu'noe. **14** Hagi tamagra Jerusalemi kumapima nemaniza vahe'mota, kefo avu'ava zama nehaza zana atreta tamagu'a eri agru hiho. E'ina'ma hanuta tamagu vazi'zana erigahaze. Nama'a zupa tamagra kefo antahi'zana atre'nageno tamagu'afina meno vugahie. **15** Hagi tamagrite'ma fore'ma hania knazamofo nanekema eri'za eme huama hunaku'ma neaza vahera, Dani kumateti'ene Efraemi

agona kokampima me'nea kumatamimpi vahe'mo'za eri'za neaze. **16** Hagi ana vahera Anumzamo'a zamasamino, ana mopafima mani kagi'naza vahetamine, Jerusalemi kumapima nemaniza vahetaminena amanage huta zamasamiho, Afete mopalregati ha' vahe'mo'za ibige nehu'za Juda mopalima me'nea ranra kumatamina hahu zamantenaku neaze huta hiho. **17** Ana ha' vahe'mo'za e'za Jerusalemi kumara, hozare kegava nehaza vahe kna hu'za kumatamia eme avazagi kagigahaze. Na'ankure Jerusalema nemaniza vahe'mo'zama Nagri nanekema ru hantagi'za ha'ma renante'naza zante anara huzmantegahaze huno Ra Anumzamo'a hu'ne. **18** Hagi tamagrama manita azafima hu'naza hazenkere ama ana knazamo'a tamagritera egahie. Ana hugahiankino ana knazamo'a tusi'a akama hiankna huno tamata neramino tumo'tamia retanegahie. **19** Hige'na nagra Jeremaia'na anankema nentahugen'o'a, nagu'amo'a razampi nata negrigeno, tumonimo'a vagri vagri nehige'na mani so'ea osu'noe. Na'ankure ha' vahe'mo'za ha' eri'za ne-eza, ibige nehu'za ufema neraza agasasagema nentahugen'o'anara hu'ne. **20** Hagi nagra negogeno knazamo'a kankamuna omino anamagenare anamagenarera huno ne-eno mika ama mopal'i vahera zamazeri haviza nehige'na ke'noe. Ana nehuno nagri seli nontamina ame huno eri tapage hunetreno, asante'ma tafi tavaraveramina eri tagato higeno mopal'i evurami'ne. **21** Hagi ha' vahe'mo'za nazupa krauefa (fleki) zamia erikasi atre'za nevanage'na negesugen'o ibigema nehu'za ufema neraza agasasankea ome vagaregahie? **22** Hagi Ra Anumzamo'a huno, hago Nagri vahe'mo'za negi nene'za Nagira ke'za antahi'za osaze. Ana nehu'za ne'onse mofavre naga'mo'zama nehazaza hu'za ama' antahi'zana e'orize. Hagi zamagra havi avu'ava zama hu'zantera knare hu'nazanagi,

fatgo avu'ava zama hu'zana ontahi'haze. **23** Hagi nagra ama
mopafima ke'noana mago zana omanetfa higeno, menima
me'neankna huno omane'neanki mopamo'a avugosa osu'ne.
Ana hige'na monare'ma koana remsama nehia tavitamina
omane'ne. **24** Hagi ranra agonaramine ne'onse agonaramima
zamagoana imi enerigeno, tore vare nehazage'na ke'noe. **25** Hagi
anama nehige'nama keganti kegamama hu'na koana, magore
hu'na vahera ozamage'noe. Ana higeno maka namamo'za
hare'za fre vagare'haze. **26** Hagi nagrama koana ko'ma afovage
nehuno masavenke huno tretre'ma hu'nea mopamo'a menina
hagege huno ka'ma kokankna higeno, miko rankuma tamimo'a
haviza huvagare'ne. E'ina zantamima fore'ma hu'neana Ra
Anumzamo tusi rimpia ahezamantegeno anara hu'ne. **27** Hagi
Ra Anumzamo'a amanage hu'ne. Nagra amama mani'naza
mopa maka eri haviza hugahuanagi, ana makara eri haviza
huvaga oregahue. **28** E'ina agafare mopamo'a zavi krafa
nehanigeno, monamo'a evuno hanintiri hugahie. Na'ankure
nagra henkama fore'ma hania zana ko huama hu'noanki'na,
antahizani'a ete eri rukrahera osugahue. **29** Hagi hahunaku
hosи agumpi mani'za neaza sondia vahe'ene, atifi keve erinte'za
nehaza sondia vahe'mokizmi zamagasasankema nentahi'za,
maka rankumatamimpima nemaniza vahe'mo'za kumara atre'za
avonompine, have agonafine frazageno magore huno ana
kumamatamimpina vahera omanitfa hu'ne. **30** Hagi maka zanka'ama
aguzama eme neruza maka zanka'ama eri hana'ma hu'za
nevaza vahe'moka kagra na'a hugahane? Nahigenka kagra
korankre hentofa kukena hu'eneka, golireti'ma tro'ma hu'naza
avasase zantamina eri nehankrenka kavurera penia fre'nane?
E'ina avasase zantamima eri hankare'nana zantamimo'a kaza

osugahie. Na'ankure kagrama kavesi nezmantana vahe'mo'za, kagrira kavesinogante'za kahe frisaza kanku nehakaze. 31 Hagi mago a'mo ese kna'a mofavrema anteku'ma nehigeno ata negrigeno krafama nehiankna krafage nentahue. Ana hu'neankino Saioni kumapi vahe'mo'za zamasimu ante'zanku nehu'za, kezati'za ha' vahe'mo'za nahe friku nehzanki eme naza huo, naza huo hu'za nehaze.

5 Hagi Ra Anumzamo'a huno, Jerusalemi kumapima ne'onse kantamima me'nefine, vahe'ma atruma nehaza kumapinena tamagareta ufre efre huta fatgo vahe'ma mani'nesagura hakevagareho. Hagi ana'ma nehuta fatgo avu'ava'za nehuno tamage avu'ava zanke'ma nehania vahe'ma mago'ma keta eri fore'ma hanage'na, Jerusalemi rankumara kumi'a atrentegahue.
2 Hagi kasefa huno mani'nea Ra Anumzamofo agifi huvempa nehune nehazanagi, zamagra havige nehaze. **3** Ra Anumzamoka tamage avu'ava zanke'ma nehaza vaheku kavua antenka nehakane. Kagra vaheka'a sefura zaminka zamazeri fatgo nehananagi ana zankura zamagesa ontahi'haze. Kagra knazanteti zamazeri haviza hu'nananagi, Kagrama zamazeri fatgoma hu'zankura zamavesra hu'ne. Zamavugosamo'a hankavetino havegna hu'nege'za, zamagu'ama rukrahe'ma hu'zankura zamavesra nehaze. **4** Ana hige'na nagra amanage hu'na hu'noe. E'ina vahera zamunte omaneno antahintahizamia omene vaheki'za, Ra Anumzamofo avu'ava zana ke'za antahi'za osu'haze. Ana nehu'za zamagri Anumzamo'ma amage anteho huno'ma hu'nea avu'ava zane tra kenena amagera nontaze.
5 E'ina hu'neanki'ha nagra vu'na kva vahezamine ome keaga hu'na kegahue. Na'ankure Ra Anumzamofo avu'avaene Anumzazmimofo tra kenena keza antahiza hu'haze. Hianagi

ana kva vahe'mo'za zamagranena Anumzamo'ma zami'nea
eri'zana e'nori'za Agri nanekea rutagre'za agorga'a omani'naze.

6 E'ina'ma hu'nazagu huno zafa tanopafinti laonimo eno eme
zamahe nefrisigeno, hagage kokampinti afi kramo eno eme
zamazeri haviza hugahie. Ana nehanigeno afi pusimo'a eno
ranra kumazamimofo tvaonte eme kafo anteno mani'neno, iza'o
kumapinti'ma atiramisia vahe zamaheno nenaku emanigahie.

Na'ankure keontahi kefo zamavu zamava hu'nazagu anara
hugahie. 7 Ra Anumzamo'a huno, tamagrira kumira atre
oramantegahue. Na'ankure tamagri mofavremo'za zamefi
hunenami'za, anumzana omani'neanagi amne zante huvempa
hu'naze. Nagra ne'zana zamuge'za nezamu hu'nazanagi,
zamagra monko avu'avaza nehu'za monko avu'ava zama
nehaza nontega erintagu hu'za vu'naze. 8 Zamagra ve
hosí afu'mo'a a' hosí afu negegeno agafi neheanka hu'za,
tava'ozamire'ma nemaniza vahe'mokizmi a'nea ke zamanunu
nehaze. 9 Ra Anumzamo'a huno, E'inahu zamavu zamava
zantera hazenke zamigahue. Nagra tamagerfa hu'na tamagrama
hazankna avu'ava zama hanaza vahera knazana zami'na
zamazeri havizana nosu'na, e'inahu avu'ava zama nehaza
vahera nona huo zamantegahufi? 10 Tamagra ha' vahe'mota
Juda vahe waini hozafi tinkante tinkante nevuta ragama
rente'nesiana eri haviza nehuta, osi'a netreta waini azankuna
tamimo'ma havizama hu'enianiana akafrita eri atreho. Na'ankure
zamagra ana vahera Ra Anumzamo'na vahera omani'naze.

11 Hagi Israeli vahe'ene Juda vahemo'zanena Nagrira zamefi
hunami vagare'naze huno Ra Anumzamo'a hu'ne. 12 Israeli
vahe'mo'za Ra Anumzamofonkura havige hu'za, Agra mago
zana humoranteno, hazenke zana atresigeno tagritera omegahie.

Ana nehuno ha' zane agatonto zanena atre'nigeno omegahie hu'za nehaze. **13** Hagi kasnampa vahe'mo'za e'inahu naneke nehazanagi ana naneke zamimo'a zahokna huno nena'a omane naneke nehaze. E'ina hu'negu hazenke'za fore hugahie hu'zama nehaza kasnampa kemo'a zamagri zamavate efore hanige'za kegahaze. **14** Ana hu'negu huno Monafi sondia vahe'mokizmi Ra Anumzamo'a amanage huno hu'ne. Vahemo'zama e'inahu kema nehaza agafare Jeremaiaga kagipi Nagra nanekeni'a antesanugenka huama nehanankeno, kagipintira teve nefakna huno atiramino, tevema teaza huno ana vahera tesige'za akrukru hu'za teveregahaze. **15** Hagi Ra Anumzamo'a huno, Nagra ru kazigati ha' vahe'ma zamavare'na esuana hankavenentake vaheki'za korapa knafi mani'za e'naza vahe zamavare'na a'nena maka Israeli vahe'mota hara eme huramantegahaze. Ana vahe'mokizmi zamagerura tamagra ontahi nazankita kema hanazana antahi amara osugahaze. **16** Ana ha' vahe'mokizmi sondia vahe'mo'za hankaveti'za hara nehaza vaheki'za, keveretira hantga osu'za rama'a vahe zamahe nefriza vahe mani'naze. **17** Hagi ana vahe'mo'za tamagri hozafima mene'a kave'ene, nontamifima me'nea kavera eme ne'za eri hana nehu'za, mofavre naga'mokizmi ne'zanena eme ne'za eri hana hugahaze. Ana nehu'za sipisipine bulimakao afutaminena zamahe'za nevaga nere'za, grepri ragane fiki raganena tagi'za nevaga nere'za, hankave vihu keginama hu kagi'naza kumapi frakita tagu vazigahunema nehaza kuma'enena bainati kazinteti ha' eme huramante'za eri haviza hugahaze. **18** Hianagi ana knafima huzamantenuge'za e'za eme tamazeri havizama hanaza ha' vahe'mo'za, ana makara tamahe fanane huvaga oregahaze huno Ra Anumzamo'a

hu'ne. **19** Hagi Jeremaiaga vahe kamo'zama kantahige'za, nahigeno Ra Anumzana tagri Anumzamo'a amazana hunerante? hu'zama hanagenka amanage hunka zamasamio. Tamagrama mopatamifima mani'neta Anumzamofona tamefi hunemita, ru vahe'mokizmi havi anumzante monora hunte'naze. Ana hu'nazagu menina ru vahe mopafi umani'neta ana vahe'mokizmi eri'za eri zamantegahaze hunka zamasamio. **20** Hagi Ra Anumzamo'a huno, Israeli vahe'ene Juda vahe'enena amanage hunka zamasamio. **21** Kea ontahi neginagi vahe'mota kama antahihio. Tamagrira tamavua me'neanagi tamavua nonketa, tamagesa me'neanagi nanekea nontahize. **22** Tamagra nahigeta Nagira nagesga nosuta, Nagri navurera antri nehuta korora huta tamarena noraze. Nagra Ra Anumzamo'na hagerina tro hute'na, hagerimo'a amare eme tregahie hu'na mevava avame zana kahepa ante'na, evu'noankino ana isagana timo'a agatereno ovugahie. Hagi hagerimo'a kranto kranto huno ne-eno rekazarino ra ageru runo egahianagi, anama ante'noa isagana agate oregahie. **23** Hianagi tamagra keontahita hankave tamagu tamagesane vahe mani'naze. Ana hu'nazankita rukrahe huta tamefi hunenamita natreta ufre efre nehaze. **24** Hagi zamagra hu'za, tagu'areti huta Ra Anumzana tagri Anumzamofona koro hunteta agri agorga manisune huza nosaze. Agra kora atregeno ne'zama hankre knare'ene, ne'zama hamre knarera kora runentegen, Agrake'za higeno ne'zamo'a kna fatgore fore nehigeta, huhampari terema hu'nea kna fatgore ne'zana nehamarone huta tamagesa nontahize. **25** Tamagrama haza havi avu'ava zamo kana rehiza higeno, knare'nare zantamimo'a eforera higeta nonkaze. Tamagi kumi'mo kana rehiza higeta ana asomura e'norize. **26** Nagri vahe'mota amu'nompina mago'a

havi avu'ava nehaza vahe mani nazanki'za ana, vahe'ma zamazeri havizama hunakura, namazama nehu'za krifu ante'neza zaga kfa ufrenogu kva hazankna hu'za kva hune'za vahera zamazenerize. **27** Ana vahe'mokizmi nompina ruzahu ruzahu namarami azerite'za ekaeka kupi erivita zankna hu'za, vahera karuna kereti rezamatga hu'za fenozana eri'za, nozamifina eri avinetaze. E'ina'ma haza zamo higeno zamagimo'a haruharu hige'za feno vahera nemanize. **28** E'ina'ma hazazamo hige'za zore'za afovage nehu'za, masavenke hu'naze. Ana nehuza havi avu'ava zana otre kazigazi hu'za nehaze. Ana nehu'za megusa mofavreramina fatgo avu'vara hunozamante'za, zamunte omane vahetega ante'za zamaza nosazage'za zamagrama eriga zana e'norize. **29** Nagra Ra Anumzamo'ha anazarntera tamage hu'na nona huzmante'na zamazeri haviza hugahue. Mago mopafi vahemo'ma amanahu avu'ava'ma hania vahe'enena, ana zanke hu'na nona huzmante'na zamazeri haviza hugahue. **30** Hagi vahe'mofona azeri antrima nehuno azeri koroma hu'zamo hago ama Juda mopafina efore hu'ne. **31** Kasnampa vahe'mo'za havi kasnampa naneke huama nehazage'za, pristi vahe'mo'za nazano hunaku'ma haza zana zamagra'a hankavere tro nehazage'za, Nagri vahe'mota ana avu'avaza zama negeta tavesinentaze. Hianagi ana knazamo'ma evu vagamaresigeta tamagra na'a hugahaze?

6 Tamagra Benzameni nagamota Jerusalemi kumapintira atiramita atreta freho. Hagi Tekoa kumatetira ufennerenke'za, Bet-hakeremi kumatetira mago avame zana inuna kretra resu nehinke'za nege'za vahe'mo'za korora fre'za ome zamagura vaziho. Na'ankure noti kazigati hankave sondia vahe neazanki'za knazana eme tamiza tamazeri havizantfa hugahaze. **2** Jerusalemi

kumamoka hentofaza hunka frufru kavufgane mofani'agna
hu'nananagi Nagra kazeri haviza hugahue. 3 Kini vahe'mo'za
ha' huramante'naku sondia vahezamia zamavaretere hu'za
e'za Jerusalemi rankumamofo meg'i'a mopa eme refko huza eri
zmante hute'za seli nozmia kiza manine'za avazigi kagigahaze. 4
Ana vahe'mo'za kezati'za, otita retrotra hinketa kinaga vuta hara
ome huzmantamnenno hu'za huga hazanagi, ete henka amanage
hugahaze, ko zage ufre'za higeno zage tamema'amo'a ko ome
zaza hie hu'za hugahaze. 5 E'ina hu'neanagi ame huta otinketa
hanimpi hara ome huzmanteta, hankave vihu keginazamia
vuta ome tapage hutresanune hugahaze. 6 Hu'neanagi Monafi
sondia vahe'mofo Ra Anumzamo'a amanage hu'ne, Jerusalemi
kumamofo meg'i'ama megagi'nea zafaramina antagitreta ana
zafareti tukera aheta kuma keginamofo tavaonte ante hihi
hinkeno marerina, anante manineta hara huzmantegahaze.
Na'ankure Jerusalemi kumapina vahe'ma azeri haviza hu'zamo
avite'ne. 7 Hagi Jerusalemi kumapintira, kefo avu'ava zamo'a
tinkerifinti timo aviteteno herafiramino eviankna huno enevie. Ana
kumapina vahe'ma hazenkema nezamiza zamo'ene, maka zama
eri havizama nehaza zamofo agasasamo avite'ne. Ana hige'na
Nagrama koana kri vahe'ene zamahe kuzafa'ma ante'naza
vaheke'za zamage'noe. 8 Hagi Jerusalemi vahe'mota ama koro
kema hanuana antahiho. Tamagra ama nanekema ontahisage'na,
Nagra namefi hunerami'na mopatamia eri haviza hanugen, ama
ana mopafina vahera omanitfa hugahie. 9 Hagi Monafi sondia
vahe'mofo Ra Anumzamo'a amanage huno hu'ne. Mago vahe'mo
waini hozafi vuno grepri ragama neragino atre'neama'a hakeno
tagi vagareankna hu'za, Israeli vahe'ma osi'ama mani'naza
vahera ha' vahe'mo'za eme zamahe vagaregahaze. 10 Hagi

ana koro kea ina vahete vu'na ome huama hugahue. Iza nagri
kea antahigahie? Zamagesamo'a ko ankani re'neanki'za kea
ontahigahaze. Ra Anumzamofo nanekemo'a kiza zokago zankna
hige'za zamavesra nehaze. **11** E'ina hu'negu Ra Anumzamofo
rimpa ahezamo nagripina avitege'na azeri'nama vuazamo'a
tusiza huno navesra hu'ne. Anagema hugeno'a Ra Anumzamo'a
huno, ana narimpa ahe'zana eri kaha hutregeno kumamofo
karampima zokago'ma neraza mofavre nagate'ene, atruma
hu'za nemaniza nahezave nagate'ene, veneneraminte'ene a'ne
zamire'ene, tavava ozafaraminte esanige'za narimpa ahe'zana
erigahaze. **12** Hagi Nagra zamazeri haviza hanuge'za ru
vahe'mo'za nozamine mopazamine a'nezaminena erigahaze.
Na'ankure Nagra hankavenentake nazana erisga hu'na ama'na
mopafima nemaniza vahera zamazeri haviza hugahue. Ra
Anumzamo'na ama ana nanekea huama nehue. **13** Hagi maka
zamagima omane vaheteti'ma vuno zamagima me'nea vahete'ma
vigeno'a, antahintahi zamifina agraguке'ma nentahino havige'ma
huno zagoma erino fenoma erivite zankuke zamave'nesie.
Kasnampa vahe'mo'zane pristi vahe'mo'zanena anzanzke hu'za
vahera rezmataga hu'za zagoa e'nerize. **14** Hagi Nagri vahera
zamavufagafina ra namu me'neanagi pristi vahe'ene kasnampa
vahe'mo'za antahi amneza hu'za ana namuna anaki so'e
hunozamante'za anage nehaze, hazenkezana omne'neanki fru
huta manigahaze hu'za vahera nezamasamize. Hianagi fruma
huno manizana nomane. **15** Hagi Israeli vahe'mo'za agoterfa
avu'ava zama hu'naza zankura zamagazea nosifi? l'o ana
zankura havi zamavugosa nehu'za magore hu'za zamagazegura
nosaze. E'ina hu'neanki'na Nagrama zamazeri haviza hanua
zupa mago'a vahe'ma zamahema frisufi zamagranena frigahaze

huno Ra Anumzamo'a hu'ne. **16** Hagi Ra Anumzamo'a amanage
huno hu'ne. Kama hatna'ma hu'nere oti'neta korapa'ma knare
kama me'nege'za tagehe'zama vanoma hu'naza kana ina
me'ne huta hiho. Hagi knare kama keta eri fore'ma hanuta
ana kante nevuta tamarimpa frua erigahaze. Hianagi tamagra
amanage huta nehaze, l'o e'i ana kantera ovugahune huta
nehaze. **17** Hagi Ra Anumzamo'a huno, Nagra hanine zagenena
tamagrite'ma kvama hanaza vahera huhampari zamantoge'za
mani'neza, ufe krafama antahisagu tamagesa anteta antahiho
hu'za neramasami zanagi tamagra ontahigahune huta nehaze.
18 E'ina hu'negu Ra Anumzamo'a huno, kokankokama ama
mopafima nemaniza vahe'mota antahiho. Vaheniare'ma eri
fore'ma hanua zana akoheta mani'neta keho. **19** Hagi
kokankokama ama mopafima nemaniza vahe'mota antahiho.
Nagra Israeli vahete'ma hazenke zama atresanugen esaniana,
zamagrama havi antahintahima retro'ma hu'naza zante nona
hu'na knazana zamigahue. Na'ankure Nagrama hua nanekea
amagera nonte'za, kasegeni'a zamefi humi'naze. **20** Hagi
Tamagra Seba kumateti'ma erita e'naza mananentake zama
frenkinsensi reti'ma ofama nehaza ofagu'ene, Kalamusiema
nehaza mananentake hake zotama, afete moparegati'ma eri'za
e'naza zanteti'ma ofama hunantaza zankura Nagra musena
nosue. Ana nehu'na tevefima kre fananehu ofama nehaza ofane
ruga'a ofaramima nehaza ofama negogeno'a, Nagri navurera
knarera nosie. **21** E'ina hu'negu Ra Anumzamo'a amanage
hu'ne. Nagri vahe'mo'zama kama vanoma nehzafina tanafa'ma
hanazaza ante'nesanuge'za anampinti tanafa nehanage'za,
venenemoza'ne ne' mofavrezamine, tvaonte'ma nemaniza
vahe'ene rone zamimo'zanena maka tanafa hu'za mase'za

frivaga regahaze. 22 Hagi Ra Anumzamo'a amanage huno hu'ne. Noti kazigama me'nea moparegati ha' vahera neazanki keho. Ana vahera mopa ome atretegati vaheki'za, zamagra hankavenentake hu'nazanki'za menina oti'za ha'zana retrotra nehaze. 23 Hagi ana sondia vahe'mo'za atine kevenena zamazampi eri'neza neaze. Hagi zamagra vahekura zamasunku osu'za vahe'ma hazenkezmi vahekiza zamagra hosi afu'mofo agumpi mani'neza hahunaku erimpi hu'za neazankino, zamagasasamo'a hagerimo rupokraneleno neriankna zamagasasane neaze. Anama neazana so'e zantfama hu'nea Jerusalemi kuma eri haviza hunaku retro hu'za neaze. 24 Hagi Jerusalemi kumapi vahe'mo'za hu'za, tagra ana ha' vahe'mokizmi zamagenkea ko antahi nonankita, menina tahirahiku nehunkeno zaferinati omne amne nehie. Ana nehigeta menina tasu zampi mani'neta antahintahi hakare nehuta, mofavre antenaku nehia a'mo ata hoza e'neriankna huta tusi tatazampi nemanune. 25 Hagi ha' vahetimo'za mika kaziga manivaga razanki kampina vano nosuta, hozareganena vuta eta osiho. Na'ankure ha' vahe'mo'za bainati kazi eri'neza mika kaziga mani vagare'naze. 26 Anage higeno Anumzamo'a huno, Nagri vahemota tamasunku kukena erinentanita, ta'nefa erita nefreta magoke ne'mofavrema ante'nea vahemo'ma ana mofavrema frigeno asunku huno zavi'ma ateaza huta tusi zavi krafa hiho. Na'ankure maka zama eri havizama nehaza sondia vahe'mo'za ame hu'za e'za eme tamazeri haviza hugahaze. 27 Hagi Ra Anumzamo'a nagrikura huno, ainima tevefi kreteno e'i ainifi huno rezaganeno keso'ema nehia vahekna hu'na, Jeremaiaga huhampri kantoe. Ana huankinka Nagri vahe'mokizmi zamavu'zmava zana rezaganenka keso'e hugahane. 28 Hagi zamagra zamagu'amo'a hankavetige'za keontahi vahe mani'naze.

Ana vahera ke huhaviza hu'za vahera ke nezamasaza vahe mani'naze. Ana hu'nazanki'za zamagra vahe'ma zamazeri haviza huke hu'za vano nehzanki'za bronsimo'ene ainimoke'ma hankavema tiankna huno antahintahizmimo'a hankaveti'nea vahe mani'naze. Ana hu'nazanki'za maka kefo avu'avazanke nehaza vahe mani'naze. **29** Tevema hugre akru'ma nehia tefereti tevea hugre anefa higeno silva te maramra huno aenia eri otege nehie. Hianagi ana silvafintira retiema nehia ainia kreno eri zo-onkigeno ana eri'zamo'a vuno amne zankna nehie. E'ina avamente vahe'mo'za havi avu'ava zana otre'za huvava hu'za nevaze. **30** Hagi zamagra haviza hu'nea silvama eri trazankna vahe mani'naze. Na'ankure Ra Anumzamo'a ko amefi huzami'ne.

7 Ra Anumzamo'a Jeremaiana mago'ene amanage huno nanekea asami'ne. **2** Ra Anumzamofo mono nompima unefraza kafante ome oti'enka, amanage hunka vahera zamasamio. Juda vahe'ma ama kafantet'i'ma ufreta Ra Anumzamofoma mono'ma hunentaza vahe'mota Ra Anumzamo'a amanage hianki antahiho! **3** Hagi Monafi sondia vahe'mokizmi Ra Anumzama, Israeli vahe'mokizmi Anumzamo'a amanage huno hu'ne. Tamagrama havi avu'ava zama nehaza zama netreta mani fatgoma hanage'na, Nagra tamatresanugeta mopatamifina manigahaze. **4** Vahemo'za rezamatga hu'za, Ra Anumzamofo mono nona ama me'ne. Ra Anumzamofo mono nona ama me'ne, Ra Anumzamofo mono nona ama me'neankita knare huta manigahune hu'za rezmatagama hanaza nanekea antahi ozamaho. **5** Hagi tamagra havi antahintahi zane havi avu'avazanena netreta, tamagra'a fatgo avu'ava'za ohunte ahunte nehuta, **6** ru vahe'ma tamagrane enemaniza vahe'ene, megusa mofavre

naga'ene, kento a'neraminena zamazeri haviza osiho. Ana
nehuta ke'zami omane vahera zamahenofrita, havi anumzantera
monora huonteho. Ana'ma hanazana tamagra'a tamazeri
haviza hugahaze. **7** Hagi tamagrama Nagri kema antahita
amage'ma antesage'na, Nagra tamatresanugeta tamagehe'ima
eri santihareta manivava hugahazema hu'na zami'noa mopafina
manigahaze. **8** Hianagi keho! Tamagra havige kere tamentintia
nehazankino, ana nanekemo'a tamaza osugahie. **9** Hagi tamagra
kumazafa neseta, vahera zamahe nefrita, monko'zana nehuta,
havige nehuta, Bali havi anumzante mnanentake zana kre mna
nevuta keta antahita osu'naza anumzantami amagera nenteta
ete, **10** Nagri nagima erisga hugahazema hu'noa nompi eta,
hago tagu vazigeta knare huta mani'none huta nehuta ete
vuta agoterfa avu'ava zana ome nehaze. **11** Hagi tamagrama
antahi'zana Nagri nagima eme erisgama nehaza mono nona,
kumzafa vahe'mo'za eme frakisaza havega me'ne huta nehazafi?
Tamage! Ama anampima nehaza avu'ava zana hago ke'noe huno
Ra Anumzamo'a ama nanekea hu'ne. **12** Hagi Nagri nagima
me'nesige'za mono hunantegahazema hu'na huhamparuge'za
seli mono noma kinaza kumate Silo vuta, nagri naga'ma Israeli
vahe'mo'zama kumi'ma hazage'na ana kuma'ma eri havizama
hu'noa zana ome keho. **13** Hianagi tamagranena ana havi
avu'ava zana huta nevazage'na, Nagra ana zankura kea huvava
hu'na vuanagi keni'a ontahize. Nagra kezatuanagi nagri kerera
izo osu'naze. **14** E'ina hu'negu Silo kuma'ma eri havizama
hu'noaza hu'na, Nagri nagima me'nesige'za mono'ma hunanteho
hugenome'negeta, tazahu zana erigahunema huta muha'ma
nehaza mono nona eri haviza nehu'na, tamagehe'ima zami'noa
mopanena eri haviza hugahue. **15** Hagi Nagri navugama

mani'naretira Nagra tamavre atresugeta tamafuhe'za Israeli
naga'mo'zama hu'nazaza huta vugahaze. **16** Hagi Jeremaiaga,
ama vahe'ma zamazama hanugura Nagritega zavi krafa nehunka
nunamuna hunka zamaza huo hunka nantahi onko. Na'ankure
kagri nunamunkea ontahigahue huno hu'ne. **17** Hagi kagra
Juda mopafima me'nea kumatamimpine, Jerusalemi kumapima
me'nea ne'onse kampima nehaza havi avu'ava zana nonkano?
18 Hagi mofavre naga'mo'za teve hare'za azage'za zamafahe'za
teve erinte fatgo nehazage'za, a'ne naga'mo'za flauateti keki
tro hazage'za, mago a' havi anumzanku'ma Monafi Kuiniema
nehaza a'tega ofa hunte'za nehaze. Ana nehu'za mago'a havi
anumzaramintega wainima tagitre ofanena nehu'za Nagrira nazeri
narimpa nehaze. **19** Hagi Ra Anumzamo'a huno, Ana avu'ava
zama nehzana Nagrira nazeri havizana nosazanki, zamagra'a
zamazeri haviza nehazanki'za zamagazegu hugahaze. **20**
E'ina hu'negu Ra Anumzamo'a amanage hu'ne. Nagri narimpa
ahe'zamo'a tusiza huno teve rukru nehianki'na, ama kumapima
mani'naza vahete'ene zagagafare'ene zafaraminte'ene hozafi
ne'zaraminte'enena ana narimpa ahe'zana eri kaha hutresugenno,
tevegna huno akrukru huno neresigeno mago vahe'mo'a rusura
osugahie. **21** Hagi Monafi sondia vahe'mokizmi Ra Anumzama
Israeli nagamokizmi Anumzamo'a amanage hu'ne. Tamagrama
tevefima kre fananehu ofama hunantenaku'ma nehaza ame'a,
erinteta ruga'a ofama hunanteku'ma haza zantamine tamagra'a
neho. **22** Hagi Nagrama tamagehe'ima zamavare'na Isipitima
atirami'na e'noana, tevefima kre fananehu ofane ruga'a ofanena
ofa hunanteho hu'na Nagra huozamante'hoe. **23** Hianagi
Nagra amanage hu'na zamasami'noe. Nagri ke antahita
amagenenentke'na, Nagra tamagri Anumza manisugeta, tamagra

Nagri vahe manigahaze hu'na hu'noe. Maka zama hihoma hu'na hanua zama antahita amage'ma antesanuta, maka'zama hanaza zamo'a knare'zanke hugahie. **24** Nagra anage hu'na hu'noanagi, zamagra Nagri nanekea ontahi'naze. Ana nehu'za zamagu'amo'a hankavetigege hige'za kefo avu'avazamimofo amage ante'naze. Ana nehu'za zamavugama vugazana atre'za zamefi nevaze. **25** Hagi tamagehe'zama Isipima atre'za e'naza knareti'ma eno ama knarema ege'na, Nagra eri'za vaheni'a kasnampa vahera huzmantoge'za knane knanena nanterana evava hutere hu'za nanekea eme zamasami'naze. **26** Hianagi zamagra magore hu'za Nagri kea antahi'za amagera onte'naze. Ana nehu'za zamagu'a eri hankaveneti'za zamafahe'zama hu'naza havi avu'ava zana agatere'za havi avu'ava zana hu'naze. **27** Hagi Jeremaiaga amanage hunka zamasamio huno Ra Anumzamo'a nasami'ne. Ama ana zanku'ma huama'ma hunka zamasamisanke'za, kagri kea ontahigahaze. Kezatinka koro kea zamasamio. Hianagi kagri kea antahi'za nona huogantegahaze. **28** Ana'ma hanagenka amanage hunka zamasamio. Ama vahe'mo'za Ra Anumzana Anumzazmimofo nanekea amagera nonte'za, Anumzamo'a zamavumarora anteno zamazeri fatgoma hunaku'ma hiazana amagera onte'naze. Ana nehu'za tamage avu'avazamo'a zamagripintira fanane nehigeza ana zankura nanekea nosaze. **29** E'ina hu'negu Jerusalemi kumapima nemaniza vahera zamasamige'za, zamasunku hu'za zamaseni zamazokara hare netre'za, zavi krafa hu'za mago'zama omane agonaramimpina vano hiho. Na'ankure menima fore'ma haza vahe'mo'za Ra Anumzamofona tusiza hu'za azeri arimpa hazageno ana zanku huno Agra zamatreno amefi huzami'ne. **30** Hagi Ra Anumzamo'a huno, Juda

vahe'mo'za Nagri navurera rama'a havi avu'ava hu'nazanki'na
Nagra namefi huzami'noe. Nagri nagima me'nesanige'za mono
hunante'gahazema hu'na hu'noa mono nompina, agoterfa havi
anumzaramimofo amema'ama tro'ma hu'za ante'naza zamo ana
mono nona eri pehenage hu'ne. **31** Hagi havi anumzante'ma
mono'ma huntesaza kumatamina, Hinomu agupofi Tofetiema
nehaza kumate trohunte'za anante ne'mofa'zmia zamahe'za
tevefina kre tasage'za havi anumzantera ofa hu'naze. E'inahu
avu'ava zama hu'nazana Nagri antahi'zampina omanegeno,
Nagra ana hiho hu'na huozamante'noa avu'ava'za tro hu'naze.
32 Ana hu'negu Ra Anumzamo'a huno, kva hiho! Mago kna
ne-eanki'za vahe'mo'za mago'enena Tofeti kumare nehu'za
Hinomu agupoe hu'za osugahazanki, vahe'ma zamahe fri agupoe
hu'za hugahaze. Na'ankure ana mopafina vahera asente'za
nevanageno kankamuna omnetfa hugahie. **33** Ana hanigeno
fri'nesaza vahe'mokizmi zamavufagamo'a amne zankna hina,
namamo'zane afi zagagafamo'za e'za zamavufaga'a eme
negahaze. Ana hina mago vahe'mo'a kasefa huno mani'neno
ana zagagafaramina rehari otregahie. **34** Hagi Juda mopafima
me'nea rankumatmimpine, Jerusalemi kumapima me'nea ne'onse
kantamimpina vahe'mo'za vano nehu'za zagamera nehu'za
musena hu'za vano osugahaze. Hagi anampina aravema
nehu'za musema nehaza zamofo agasasankea mago'enena
ontahigahaze. Hagi ana mopamo'a havizantfa hina mago
vahe'mo'a anampina omanigahie.

8 Hagi Ra Anumzamo'a huno, Ana knafina ha' vahe'mo'za
eza Juda kini vahe'ene kva vahe'enema asezamante'naza
matipintira tapage huza eri hagaro hutre'za zaferina zamia
e'neri'za, Jerusalemi kumapi vahe' mati'ene, pristi vahe' mati'ene,

kasانampa vahe'mokizmi mati'enena tapage hu'za zaferinazamia
erigahaze. 2 Hagi ana zaferinaramina eri'za zamagrama
zamavesi nente'za eri'zama erinente'za mono'ma hunentaza
havi anumzaramina, zagma, ikama, ofuramimofo zamavuga
ana zaferinaramina rufanara huza evugahaze. Ana vahe'mokizmi
zaferina ete eri tru hu'za aseozamante atresageno me'neno
rifamo'ma mopama eri masavema hiaza hugahie. 3 Hagi
kefo avu'ava'ma nehaza Juda vahe'ma fri vagaresageno osi'a
naga'ma ru moparega umani emanima hanuza, nahigeta kora
ofari kasefa huta mani'none, hu'za hugahaze huno Monafi sondia
vahe'mofo Ra Anumzamo'a hu'ne. 4 Hagi Jeremaiaga amanage
hunka vahera zamasamio huno Ra Anumzamo'a nasami'ne.
Hagi vahe'mo'ma tanafa'ma huno maseteno'a ete ora netigeno,
vahe'mo'ma havi kante'ma vuteno'a ete rukrahe huno eza me'ne.
5 Hianagi na'a hige'za Jerusalemi kumapi vahe'mo'za Nagrira
natre'za vuvava nehu'za, krunagema nehaza avu'ava zana
azerintrako nehaze? Ana nehu'za Nagritera ete rukrahe hu'za
nomaze. 6 Zamagrama haza nanekerera Nagra nagesa ante'na
antahi so'e nehuanagi, tamage nanekea nosaze. Hagi mago
vahe'mo'e huno hazenkema huteno'a, hago haviza tro hu'noe
huno keno antahino nehuno asunkura nosie. Hosi afu'mo'ma
mago zanku'ma ontahino agareno hapima ufreaza hu'za, maka
vahe'mo'za hankaveti'za zamagra'a antahi'zanke amage ante'za
nevaze. 7 Hagi ruzahu ruzahu namaramima, erintaguma hu'za
magopima hare'za vanoma nehaza namaramimo'za, mago
kuma'ma atre'za ru kumate'ma hare'zama vanaza kna fatgo'a
zamagra ko ke'za antahi'za hu'naze. Hianagi Nagri vahe'mo'za
Ra Anumzamo'na kasegea ontahi'naze. 8 Tamagra huta, ama'
antahi'zane vahe mani'nonkeno, Ra Anumzamofo kasegemo'a

tagrane me'ne nehaze. Hianagi antahiho, kasegema rempima
huneramiza vahe'mo'za, kasegea eri rukrahe hu'za havige
krente'naza naneke rempi huneramize. **9** Knare antahi'zane
vahera zamazeri zamagaze hanage'za zamahirahiku nehu'za
antahintahi hakare nehanage'za, zamazeri'za zamavare'za
vugahaze. Zamagra Ra Anumzamofo nanekea antahi'za amagera
onte'nazanki, nankna knare antahi'za zamagra eri'naze? **10**
E'ina hu'negu a'nezamia ru vene'ne avrenezami'na, mopa
zamia ru vahe eri zamusuge'za eri nafa'a hugahaze. Na'ankure
zamagi omane vaheteti'ma vuno zamagine vahete'ma vige'za,
maka vahe'mo'za zamagrugu kezmireti
feno eri truhu vahe mani'naze. Hagi maka kasnampa vahe'ene
pristi vahe'mo'zanena ana zanke hu'za vahera rezamatga
nehaze. **11** Hagi Nagri vahe'ma ra namuma zamare'neana
pristi vahe'ene kasnampa vahe'mo'za eri age'a hu'za havi
tusa kinezmante'za osi zankita knare huta tamarimpa frune
manigahaze hu'za nehazanagi, tamage hu'za zamarimpa frunena
nomanize. **12** Hagi Israeli vahe'mo'zama agoterfa avu'ava zama
hu'naza zankura zamagazea nosifi? I'o zamagazegu'ma nehu'za
kepri'ma hu avu'avara ontahi'naze. E'ina hu'negu Nagra zamazeri
havizantfama hanua knama esige'na, zamazeri haviza hanuge'za
mago'a vahe'ma urami'nafi zamagra'enena urami'za haviza
hugahaze huno Ra Anumzamo'a hu'ne. **13** Ra Anumzamo'a huno,
Nagra atre'nugeno hoza zamifina ne'zana rentesige'za ne'zana
ohamaregahaze. Gepi ragamo'a nofi'arera raga reontesigeno,
fiki zafamo'a raga re'ontegahie. Ana nehanigeno ani'na ramimo'a
harari hugahie. Nagrama zami'noa zantamimo'a zamagripintira
fanane hugahaze. **14** Anante Juda vahe'mo'za amanage hu'za
hugahaze. Tagra nahanigeta amarera maniteta hugahune?

Erinketa vuta hankave vihuma me'nea kumatamimpi vuta
umanineta anampi frisanune. Na'ankure Ra Anumzana tagri
Anumzamofo avufima kumi'ma hu'nona agafare, frigahaze huno
avuataga zana timpi anteno tamigeta neneta fri'za nehune
hu'za hugahaze. **15** Tagra arimpa fruma huno manizanku
amuhara hunanagi, arimpa fruma huno mani'zana omane'ne.
Tagra krifintira kanamareta manigahumpi huta hunanagi, ana
knamo'a omegeno koro zamo eno eme tazeri tagogofe'ne. **16**
Hagi ha' vahetimo'za hago erava'o nehazageno, ve hosi afu
zamimo'zama zamagonafinti'ma ne-ezama hankra kasa'ma hu'za
aza agasasankea noti kazigama Dani nagamokizmi mopafima
nemaniza vahe'mo'za antahi'naze. Ana agasasankemo'a amama
mani'nona mopa maka eri momi hu'ne. Ana ha' vahe'ma e'nazana
tagri mopafima me'nea zantamine ranra kumataminena maka eri
haviza huvaga nere'za vahe'enena tazeri haviza hunaku neaze.
17 Hagi Ra Anumzamo'a huno, antahiho, Nagra ha' osifa'verami
huzamanta'nena e'za eme tamamparisageta ana osifa'veramina
mago zana huta rutafritre kankamuna omanegahie. **18** Hagi nagra
tusi nasunku nehugeno mago zamo'a nazeri knare hugara osu'ne.
Ana nehigeno tumonimo'a netane. **19** Nagri vahe'mo'zama
afete moparega mani'neza zavi'ma nete'za Ra Anumzamo'a
Jerusalemi kumapina kinia manino kegava osu'nefi hu'zama
haza agasasankea antahiho. Ana nanekerera Ra Anumzamo'a
kenona huno, Nahigeta tamagra kaza osu havi anumzaramimofo
amema'arera monora hunenteta, megi'a ru vahe'mokizmi havi
anumzaramintera monora hunenteta nazeri narimpa ahe'naze?
20 Hagi Juda vahe'mo'za amanage hu'naze. Hozama vasage
knamo'a hago evu tagateregeno, knare'ma huno kintuma nerea
knamo'a sago evie. Hianagi tagu'ma vazi kankamuna omane.

21 Hagi nagra Jeremaia'na, koge'za vahe'nimozama havizama hazageno'a nagri'enena nagu'amo'a havizantfa hu'ne. Ana nehige'na nagra tusi zavi nete'na antahintahi hakare hu'noe. **22** Hagi Gileati mopafina marasinia omanegeno tota vahe'enena omani'nazafi? Nahige'za nagri vahe'mo'za karifintira kanamare'za knarera hu'za nomanize?

9 Hagi nasenifima mago tinkeri megeno navunumo'a navurga kampintima kampu'i tima hanatino eazama hiresina nagri naga'ma zamahe fri'naza nagakura kenage'ene feru'enena zavira tevava huresine. **2** Hagi nagra vaheni'a zamatre'na ka'ma kopima vu'na karankama nevaza vahe'mo'zama unemasaza nompinka umanuresina knare hisine hu'na nagesa nentahue. Na'ankure zamagra monko a' kna hu'za vano nehu'za mani fatgoa nosu'za, Anumzamofona ha' renentaza vahe mani'naze. **3** Hagi Ra Anumzamo'a huno, Nagri vahe'mo'za atifi keve erinte'za ahenaku krinkekema hazaza hu'za zamagefu'na eri fagagite'za kevema ahe trazaza hu'za krunagea nehaze. Ana hazageno tamagema hu'zamo'a omanegeno krunagemo ana mopafina zamunekie. Ana nehu'za Nagrikura zamagenekaniza kefo avu'ava zana huvava hu'za nevaze huno Ra Anumzamo'a nehie. **4** Hagi mago mago vahe'moka tvaonka'are'ma nemanisia vahekura kva nehunka kafukaganana antahi omio. Na'ankure zamagra zamagra orevatga arevatga nehanageno, tava'o zamire'ma nemanisaza vahe'mo'za oti'za krunage ohunte ahunte huza zamagra'a zamazeri haviza hugahaze. **5** Mika vahe'mo'za tava'o zamire'ma nemaniza vahera orevatga arevatga nehu'za, magore hu'za tamagea nosaze. Zamagra karunagema hu'zantera ko rempi hu'za antahi'naze. Ana hu'nazanki'za kumi'ma hazazamo'a zamagrira zamazeri zamasafe nehie. **6** Hagi

tamagra karunagema hu' avu'avazamofo amunompi mani'neta,
Nagri'ma keta antahitama hu'zankura tamavresra nehaze huno
Ra Anumzamo'a hu'ne. 7 E'ina hu'negu Monafi sondia vahe'mofo
Ra Anumzamo'a huno, silvama tevefi krazageno silva'age eri
zogjankna hu'na, knazanteti rezamahe'na kegahue. Hagi Nagri
vahe'mota kumikura, mago zana naza osu'nesuaza hugahue?
8 Hagi tamagrama nanekema haza nanekemo'a havigege
nehazageno ana nanekemo'a vahe ahefri kevegna hu'ne. Ana
nehuta tava'ontmire'ma nemaniza vahera tamarimpa fru naneke
nezmasamizanagi, tamagri antahizampina zamagri'ma zamahe
frisaza antahi'za retro hu'naze. 9 Hagi Ra Anumzamo'a huno,
E'inahu avu'ava zama nehaza zantera zamazeri haviza hugahue.
Ana nehu'na ana avu'ava zantera ama ana vahera Nagrani'a nona
huzmantegahue. 10 Hagi nagra Jeremaia'na agonaraminku'ene
ka'ma kokampima sipisipima kegavama nehaza mopagura
nasunkura nehu'na zavira ategahue. Na'ankure anampina
mago zana omanegeno vahemo'enena vano osigeno bulimakao
afu'mofo agerura omanegeno, namaramimo'zane afi zaga
kafamo'zanena maka kore atre'za fre vagare'sagu anara hugahue.
11 Hagi Jerusalemi kumara eri haviza hanugenno haveramimo hihi
huno megahie. Ana hu'nesanige'za afi kramo'za e'za anampina
eme nogi'za manigahaze. Ana nehanage'na Juda mopafima
me'nea kumatamina eri haviza hanugenno ana kumatamimpina
vahera omanitfa hugahie. 12 Hagi iza knare antahi'zana
eri'nesania vahe'mo amama fore'ma nehia zamofona antahi
amara hugahie? Hagi Ra Anumzamo'a iza nanekea asmi'nesia
vahe'mo, ana nanekea eri amara huno vahera zamasamigahie?
Hagi nagafare mopamo'a havizana huno ka'ma kokanknara
higeno, anampina vahe'mo'a kana anteno vanoa nosie? 13

Hagi anante Ra Anumzamo'a amanage hu'ne. Amanahu zama fore'ma hu'neana, na'ankure Nagri vahe'mo'za amage'ma anteho hu'na zaminoa kasegeni'a zamefi hunemi'za, Nagrama hua nanekea amagera onte'nazagu anara hu'ne. **14** Hianagi zamagri zamagu'amo'a hankavetige'za, zamagra'a zamavesi'za amage nente'za zamafahе'zama huzamaveri hu'nazaza hu'za, Bali havi anumzamofo amema'are monora hunte'naze. **15** E'ina hu'nazagu Ra Anumzana Monafi sondia vahe'mofo Anumzama Israeli vahe'mokizmi Anumzamo'a huno, Nagra menina aka ne'za zamisanuge'za nenesage'na, timpina vahe'ma ahe nefriaza antete'na zamisuge'za negahaze. **16** Hagi Nagra zamazeri panani hanuge'za maka ama mopafina zamagehemo'za, ke'za antahi'za osu'nesaza mopaquega umani eman hugahaze. Ana hu'nesage'na ha' vahe huzmanta'nena anantega vu'za bainati kazinteti ome zamahehana hugahaze. **17** Hagi Monafi sondia vahe'mofo Ra Anumzamo'a huno, Ana zantamima tamagrite'ma fore'ma hania zankura tamagesa antahi so'e nehuta, zavi'matesaza a'neramina zamagi hinke'za eho. **18** Hagi ana a'nemoza ame hu'za e'za zagamera eme nehu'za zavira netesageno tavunura nehuno, tavunumo'a tavufintira tinkna huno herafiramino. **19** Hagi Jerusalemi kumapi vahe'mo'za zamasu zampi manine'za zavira nete'za amanage nehzanki antahiho. Tagra havizantfa huta mani'neta tagazegu nehunkankita mopalatia atreta vugahune. Na'ankure ha' vahetimo'za nonkumatia ko tapage hutre'naze. **20** Hagi Jerusalemi kumapima nemaniza a'nanemota Ra Anumzamo'a amanage nehianki tamagesa ante so'e hu'neta antahiho. Asunku'ma huno zavi'ma ate'zana mago mago'mota mofa'ne nagatamia rempi huzamitere nehuta tavaontamire'ma nemaniza a'neneraminena rempi huzamitere hiho. **21** Na'ankure

fri'zamo'a nontimofona zaho eri kampinti ko takaureno enefreno, marerisa nontifinena ko efre'ne. Ana nehuno ne'mofatimo'za ra osu'nageno fri'zamo'a zamazeri atrege'za, karampina vanoa nehu'za zokagora ore'naze. Ana nehige'za nahezave naga'mo'za kumamofo amunompima atruma hu'za nemaniza zana hu'za omani'naze. **22** Hagi Ra Anumzamo'a amanage hie hunka zamasamio. Frisaza vahe'mokizmi zamavufagamo'a, mopafina amne zankna hanigeno, afu'rifama hagi'za hozafima antazankna hugahie. Ana nehanigeno hozafinti'ma witima taga hute'za eri tru osu atrazageno, meankna huno fri zamavufagamo'a me'nesanige'za vahe'mo'za eri tru hu'za aseozamantegahaze. **23** Hagi Ra Anumzamo'a huno, knare antahi'zane vahe'mo'a knare antahi zama'agura avufga rana nosina, hankave vahe'mo'a hankave'agura nentahino avufga rana osino. Ana nehina feno vahe'mo'a fenoma ante'nea zankura nentahino avufga rana osino. **24** Hianagi avufga rama hunaku'ma hania vahe'mo'a Nagriku'ma Ra Anumzana agrake mani'neno, vaga ore mevava avesi zane fatgoma huno refko'ma hu avu'ava zane, fatgo avu'ava'zanena Agrake nehiema hu'zama ke'za antahi'zama nehaza vahe'mo'za zamavufaga rana hiho. Na'ankure Nagra e'inahu avu'ava zanku musena nehue huno Ra Anumzamo'a hu'ne. **25** Hagi Nagra Ra Anumzamo'na amanage hu'na nehue, mago kna ne-eankino ana knama esanige'na zamagoza anomaga tagama osu'naza vahe'ene tagama hu'naza vahe'enena knaza zami'na zamazeri haviza hugahue. **26** E'i ana vahera Isipi vahe'ma, Juda vahe'ma, Idomu vahe'ma, Amoni vahe'ma, Moapu vahe'ene, ka'ma kopima nemani'za zamazoka'ma tagahu atupa'ma nehaza vahe'ene zamazeri haviza hugahue. Na'ankure

zamagra zamagaze zamavufagamofo noma'a taga osazageno,
maka Israeli vahe'mo'zanena zamagu'a rukrahera osu'naze.

10 Ra Anumzamo'ma Israeli vahe'motagu'ma nehia nanekea antahiho. 2 Ra Anumzamo'a amanage huno hu'ne. Monare'ma fore'ma nehia zana negeta korera osiho. Na'ankure kokankokama nemaniza vahe'mo'za ana zantaminkura tusi koro nehzanki, anama hanaza zana negeta zamagera onteho. 3 Ana vahe'mo'za amunte omanea avu'avaza nehaze. Zamagra zafa antagi atrazage'za, zafareti keonke zama tro'ma nehaza vahe'mo'za ana zafa antre'za kaza osu havi anumzana tro nehaze. 4 Ana amema'ama tro'ma nehaza zantera, silvareti'ene golireti'ene avasasea hunte'naze. Ana hute'za hama eriza nilia ahentrako hazageno evu noramie. 5 Hagi e'i ana kaza osu havi anumzantamina kono hozafi namamo'za e'zanku vahe amema'a tro hu'za antazankna anumzanki'za, zamagra keaga osugahaze. Ana hu'nazanki'za kana vano nosage'za vahe'mo'za erisga hu'za vano nehaze. E'inahu anumzantaminkura korora osiho. Na'ankure tamagrira tamazeri havizana nosu'za, mago knare'zana huoramantegahaze. 6 Ra Anumzamoka mago vahe'mo'a Kagri knara osu'ne. Kagra ran krerfa hu'nanankino kagri kagimo'a ra huno hankavenentake hu'ne. 7 Hagi Kagra maka ama mopafi vahe kinia mani'nananki'za, kagrikuke korora hugantegahaze. E'na hu'neanki'za vahe'mo'za kagri agoragage manigahaze. Na'ankure ama mopafima maka ama' antahi'zane vahe'ma mani'naza vahepinti'ene maka kini vahe'pinti'enena mago'mo'e huno Kagri kna vahera omni'ne. 8 Hagi kaza osu havi anumzante'ma mono'ma hunentaza vahe'mo'za knare antahi'zana omanege'za zamagra neginagi vahe mani'naze. Zamagrama mono'ma hunentaza zantamina

zafareti antre'za tro hunte'naza zantami me'ne. **9** Hagi zamagra Tasisiti eri'za e'naza silvane, Ufaziti eri'za e'naza golinena eri'za golireti'ma keonke zama tro'ma nehaza vahe zamizage'za, ana havi anumzantamina eri anovazi zamante'naze. Ana hute'za kunavenke tavaravene koranke tavaravenena eri'za ana eri'zama antahini'ma hu'naza vahe zamizage'za zaza kukena hatitage'za ana havi anumzantamina antani nezamantaze. **10** Hianagi tamage Anumzana, Ra Anumzamo agrake mani'ne. Agra kasefa huno nemania Anumzankino, manivava kini mani'ne. Agrama arimpa he'zama erinte ama'ma nehigeno'a, ama mopamo'a torevare nehige'za ama mopafi vahe'mo'za mani so'ea osugahaze. **11** Hagi ru anumzante'ma mono'ma hunentaza vahera amanage huta zamasamaho. Tamagri anumzamo'za monane mohanena trora osu'nazanki'za, ama mopafinti'ene monamofo fenka kazigatira fanane hu'za omanigahaze. **12** Hianagi Ra Anumzamo'a agra'a hankavereti ama mopa tro huteno agra'a knare antahizanteti mopamofo tra'a tro huno eri hankavenetino, Agra'a antahi'zanteti monaramimpima me'nea zantamina tro huteno rufanara huntogeno me'ne. **13** Hagi agrama keagama nehigeno'a monage nehigeno, monafintira ko'mofo agasasanke nehie. Ana nehigeno mopama ome atretegatira hampo'mofona huntogeno marerino mopa rufi'nete. Agra kopasi'na huntogeno magoka ko'ene ne-egeno, agra fenoma nentea nompinti eri anagino zahora huntogeno ne-e. **14** Hagi miko vahera neginagi hu'za antahintahi omane vahe mani'naze. Golireti'ma havi anumzantamima tro'ma hu'naza vahe'mo'za, anazama tro'ma hu'naza zankura tusi zamagazegu hugahaze. Na'ankure ana amema'ama tro'ma hu'naza zantamina havigeza tro hu'naze. Ana havi anumzantamimo'za zamasimura

ante'za kasefara hu'za nomanize. **15** Hagi zamazanteti'ma antre'za tro'ma hu'naza havi anumzantamina amneza me'naze. Ana hu'neanki'za vahe'mo'za kiza zokago ke huzamantegahaze. Hagi zamagri'ma keaga huzmanteno zamazeri havizahu knama esanige'za, haviza hu'za fanane hugahaze. **16** Hianagi Israeli vahe Anumzamo'a zamazanteti'ma antre'za tro hu'nazankna anumzana omani'ne. Agra maka'zama tro hunte'nea Anumza mani'ne. Hagi Israeli vahekura Nagri vahe mani'naze huno Agra'a huhampari zamante'ne. Ana hu'neankino Monafi sondia vahe'mofa Ra Anumzane huno agi'a me'ne. **17** Hagi ha' vahe'mo'za e'za kuma'ma eme vazagi kagisageta Jerusalemi kumapima nemaniza vahe'mota ama mopa atreta vugahazanki, kutuntamia retrotra hiho. **18** Na'ankure Ra Anumzamo'a amanage huno nehie. Nagra Juda mopamofo agu'afima nemaniza vahera knaza zami'na zamazeri panini hanuge'za ufre efre hugahaze. Ana nehu'na rama'a hazenke'za atre'nugeno eno eme zamazeri haviza hanige'za, Nagri narimpa ahe'zana kegahaze. **19** Hagi tamagra Jerusalemi vahe'mota amanage hugahaze. Tagri namumo'a teonkanigeta tusi'a tasu'zampi manune. Ana hianagi ana knazana amne erita vugahune huta nehaze. **20** Hagi nemanuna seli nontimo'a haviza huno evuramigeno, noma avazuhumpima nehianofimo'a akanokanu hu'ne. Ana higeno mago vahe'mo'a taza huno ete eri otigara osu'ne. Ne' mofavre nagatia hago zamavare'za vu'nazankita henka'a mago'enena ozamagegahune. **21** Hagi kva vahetimo'za hago neginagi hu'nazankiza Ra Anumzamofona antahige'za knare antahi'zana e'norize. E'ina hu'negu maka'zama nehaza zamo'a knarera nosigeno, sipisipi kevu naga'mo'za panani hu'za ufre efre nehaze. **22** Hagi tamagesa ante'neta antahihiho. Noti kazigati rama'a

sondia vahe'mo'za ha'eme huramante'naku tusi zamagasasa
ru'za erava'o nehaze. Ana hu'neanki'za Juda mopafima me'nea
kumatamina eme eri haviza hanageno mago'zana omnena
afi kramo'zage anampina manigahaze. **23** Ra Anumzamoka
nagrama kena antahinama huana, mago vahe'mo'a agra'a
avesitera kana ontege, agra'a antahintahia retro huteno kana
vano osugahie. **24** E'ina hu'negu Ra Anumzamoka nazeri fatgo
huo. Hianagi karimpa ahenantenka anara osunka, fatgo kavukva
hunantenka nazeri fatgo huo. Na'ankure kagrama karimpama
ahenantesanke'na nagra fri'na amane zankna hugahue. **25**
Hagi kagri'ma kage'za antahizama nosu'za, kagri kagire'ma
zamentintima nosaza vahete karimpa ahe'zana eri rukaha hutro.
Na'ankure ana vahe'mo'za tagri naga Israeli vahera zamahe'za
eri hana hu'naze. Ana vahe'mo'za vahe'ma zamahe'za eri
hana'ma hazageno'a mopatifina vahera omanigeno ka'ma koka
efore hu'ne.

11 Hagi Ra Anumzamo'a amanage huno Jeremaia'na
nasami'ne. **2** Juda mopafi vahe'ene Jerusalemi kumapima
nemaniza vahete'enema huhagerafi huvempa kema hanua
kea antahi so'e hutenga vunka ome huzamagesa huo. **3** Ra
Anumzana Israeli vahe'mokizmi Anumzamo'a amanage hie
hunka ome zamasamio. Iza'o kasegemo'ma hu'nea nanekema
amage'ma ontessania vahe'mo'a kazusifi manigahie. **4** Na'ankure
Isipi mopafima tamagehe'za kazokazo eri'zama e'neri'zama
mani'nazafinti'ma zamavare atirami'na e'noa kna zupama
zamasami'noana, Nagri kema antahita amage'ma antesuta,
tamagra Nagri vahe manisage'na, Nagra tamagri Anumza
manigahue hu'noe. **5** Hagi Nagra tamagehe'ima huvempama
huzamante'na, amirimo'ene tumerimo'ma avimate'nea mopa

tamigahue hu'na hu'noa nanekema eri ragama re'noa mopafi
menina tamagra mani'naze. Anagema hige'na nagra hu'na,
Ra Anumzamoka tamage hane hu'noe. **6** Hagi anante Ra
Anumzamo'a amanage huno nasami'ne. Kagra vunka Juda
mopafima me'nea kumatamimpine Jerusalemi kumapima me'nea
ne'onse kantamimpi vano nehunka amanage hunka zamasamio,
huhagerafi hvempagea antahi so'e nehuta amage anteho hunka
zamasamio. **7** Hagi Nagrama tamagehe'ima zamavare atirami'na
lsipiti'ma ne-ena, kenia ruotagreho hu'na koro kea zamasamime
neogeno eno ama knarera ehanati'ne. **8** Hianagi tamagehe'za
ana nanekea antahi'za amagera onte'naze. Ana nehu'za
zamagu'amo'a hankave netige'za, mago mago'mofoma agu'afinti
otia havi avu'avaza tro hutere hu'naze. Ana hazagena Nagri
ke'ma antahita amage'ma onte'nuta e'inahu knaza erigahaze
hu'nama kasegefima huvame'ma hunte'noa knazana zami'noe.
9 Anante Ra Anumzamo'a amanage huno nasami'ne. Juda
vahe'mo'zane Jerusalemi kumapima nemaniza vahe'mo'za Nagri
nanekea ontahi sanune hu'za nanekea oku'a retro hu'naze. **10**
Zamagra zamagehe'zama hu'nazaza hu'za rukrahe hu'za kumi
ome hu'naze. Nagra kema hua nanekea nontahi'za, vu'za ru
anumzantamina amagera ome ante'naze. Israeli vahe'ene Juda
vahe'mo'zanena, zamagehe'zanema huhagerafi'noa hvempa
nanekea ruhantagi'naze. **11** E'na hu'negu Ra Anumzamo'a
amanage hu'ne. Nagra knaza atre'nugeno eme zamazeri haviza
hanige'za ana knazampintira atre'za ofregahaze. Nagrikura
kasunku huranto hu'za zavi krafagea hugahazanagi, ke'zamia
antahi ozamigahue. **12** Ana'ma hanuge'za Judama me'nea
kumatamimpima nemaniza vahemo'zane Jerusalemi kumapima
nemaniza vahe'mo'za, mananentake zama ofama hunentaza

havi anumzantamintega vu'za zavi krafagea ome hugahaze. Hianagi ana havi anumzantamimo'za knazampintira zamaza osugahaze. **13** Na'ankure Juda vahe'mota tamagri'ma rama'a kumatamima meaza huno, tamagrira rama'a havi anumzantami me'ne. Jerusalemi kumapima rama'a ne'onse kantamima meaza huta, havi anumzantaminte ofama huntesaza itaramina rama'a tro hunte'neta, agoterfa Bali havi anumzante mana nentake zana kresramna vunaku nehaze. **14** E'ina hu'negu Jeremaiaga ama ana vahekura nunamuna huozamanto. Zamagri'ma zamaza huogura zamagri zamagira erinka Nagritega zavi krafagea osuo. Na'ankure knazamo'ma eme zamazeri havizama hanige'za zavi krafama hanage'na antahi ozamigahue. **15** Hagi Nagrama navesi neramanta vahenimota, hago rama'a havi avu'ava zana hu'nazanki, izu hu izo higeta nagri mono nompina neaze? Tamagrama afu ame'areti'ma ofama hanaza ofamo'a, anama esania knazamofo kana rehiza hanigeta, tamagra musena huta vugahazafi? **16** Hagi Ra Anumzamo'a Israeli vahe'motagura huno, olivi zafamo zagasefage anina renenteno, knare ragamarenteankna vahe mani'naze huno tamagia ante'ne. Hianagi tusi ununko'mo'ene monagemo'enema nehiaza huno Agra eno ana olivi zafaramina teve tagintesigeno nereno azanku'natamina tefutagi ramigahie. **17** Nagra Monafi sondia vahe'mofa Ra Anumzamo'na ana olivi zafa krite'na, haviza huo hugenka haviza hu'nane. Na'ankure Israeli vahe'motane Juda vahe'motanema Bali havi anumzante'ma ofama kre manama nevaza zamo nazeri narimpa ahege'na anara hu'noe. **18** Hagi nagri'ma ha'ma renenantaza vahe'mo'zama nazeri haviza hunaku'ma kema retro haza nanekea Ra Anumzamo'a eri ama huno nasami'ne. **19** Nagrira mago sipisipi anenta'ma

ahenaku'ma avre'za nevazageno agazonema huno neviaza
hu'za navre'za vu'naze. Nagri'ma nahenakura amanage hu'za
nanekea retro hu'hazana nagra kena antahi'na osu'noe. Ama
zafa antagi atresunkeno raga'amo'a amne zankna nehina, ahe
frisunkeno ama mopafina agia omanesie hu'za hu'naze. 20
Hianagi Ra Anumzamofona amanage hu'na asami'noe. Monafi
sondia vahe'mofo Ra Anumzamoka kagra fatgo hunka keaga
refko nehunka, vahe'mofo agu'afine antahi'zampinema me'nea
zana keama nehane. Zamagrama nehaza avu'ava zante'ma
nonama hunka zamazeri havizama hanana zanku navua ante'na
negoe. Na'ankure nagra maka zana ko kagri kazampi ante'noe.
21 Hagi Anatoti kumate vahe'mo'za hu'za, kagrama kasnampa
kema Ra Anumzamofo agifima hunka vananketa kahe frigahune
hu'za hu'naze. 22 E'ina hu'negu Monafi sondia vahe'mofo
Ra Anumzamo'a ana vahekura amanage hu'ne. Nagra knaza
zamisanugeno, nehzave zamia hapinti zamahe hana hugahaze.
Ana nehanage'za ne'mofa zamimo'za ne'zama nesaza zanku
hu'za frigahaze. 23 Ana hanigeno Anatoti kumate vahera magore
huno kasefara huno omanitfa hugahie. Na'ankure zamazeri
havizama hanua knama esanige'na Anatoti kumate vahera
zamazeri haviza hanuge'za ana knazana erigahaze.

12 Ra Anumzamoka kagra fatgo kavukva'ene ne' mani'nankena
nagra keaga Kagrane hu'za nehue. E'ina hu'negu menina
natrege'na fatgoma huno refkoma hu avu'ava zanku
Kagranena keaga ha'neno. Hagi nahige'za havi avu'ava
zama nehaza vahe'mo'za maka zampina knarera hu'za
nemanizage'za, havigema hu'za vahe'ma rezmatagama nehaza
vahe'mo'za musena hu'za fru hu'za nemanize? 2 Zafama
hankrazankna hunka Kagra zamagrira hankranke'za rafu'ha re'za

nomani'zampina knare nehaze. Ana vahe'mo'za kagrikura tusiza hu'za zamagitetira kagi hanta nevazize. Hianagi zamagu'amo'a kagri tava'ontera omane'neanki afete me'ne. 3 Hianagi Ra Anumzamoka nagri nagu'amo'a inankna huno Kagritera me'nefi ko rezaganenka ke'nane. Havi avu'ava zama nehaza vahera, sipisipi afu'ma ahenaku'ma zamavazuma hu'zama vazaza hunka zamavarenka nevunka, zamazeri rure huge'za mani'neza zamahema frizasa knagura avega anteho. 4 Hagi ama mopamo'a nama'a knafi asunkura huno zavira netegen, trazamo'a hagegea nehigeno, afi zagagafamo'zane namaramimo'zanena nomanize? Na'ankure ama mopafima nemaniza vahe'mo'zama nehaza havi avu'ava zamo higeno anara hu'ne. Ana'ma hige'za vahe'mo'za hu'za, tagrite'ma henkama fore'ma hania zana Anumzamo'a onkegahie hu'za nehaze. 5 Hagi Ra Anumzamo'a Jeremaia'na amanage huno kenona hunante'ne, Kagra menina vahe'ene traginka nevanke'za kagatenerazagenka kasefekura nehananki, inankna hunka hosi afu'enena kagia regahane? Hagi knare'ma huno pehe'ma hu'nea mopafima tanafa'ma hanunka, inankna hunka Jodani tinkenaregama tra'zanke hu'nea kokampina kagia regahane? 6 Hagi kagrira kafu kaganahe'zane nagakamo'zanena ko kagrira ha' regante'naze. Ana nehu'za kaheku kea retro nehaze. E'ina hu'negu zamagrama so'ema hugantesaza zankura antahi ozamio. 7 Hagi Nagri vahere hu'na huhamprima zamantoge'zama marerisa feno zani'agna'ma hu'za mani'naza vahera namefi huzamigahue. Ana nehu'na navesima nezamantoa vahera ha' vahezmimokizmi zamazampi zamavarentegahue. 8 Hagi Nagri vaherema hu'na huhamprima zamante'noa vahe'mo'za, zafa tanopafi laionigna hu'nazanki'za, ra zamageru ru'za krafage hunante'naze. E'ina

hu'negu Nagra navesra huzamante'noe. **9** Hagi Nagri vaherema hu'na huhamprima zamante'noa vahe'mo'za mago namagna hu'nazankino, tumpamo'za eme zamazeri kagi'neza zamazeri haviza hunaku nehaze. Hagi mago'a afi zagagafaraminena kehinke'za e'za ana namamofo avufga eme neho. **10** Hagi rama'a sipisipi kva vahe'mo'za e'za Nagrama hankre'noa waini hozani'a eme eri haviza nehu'za hozani'a zamagareti rentrako hu'naze. Ana nehu'za knare zantfama hu'nea mopani'a eri haviza hazageno, vahe omani ka'ma koka fore hu'ne. **11** Hagi ana hu'za ana mopa eri haviza hazageno, mago zana omanetfa hu'ne. E'ina hazageno mopamo'a asunku huno Nagritega zavite'ne. Maka mopamo'a haviza hina vahera omanigahie. Ana hugahiankino ana mopagura mago vahe'mo'a antahi omigahie. **12** Rama'a ha' vahe'mo'za maka'za eri haviza hunaku hagage kokampima me'nea agonaramimpina hago e'naze. Na'ankure Ra Anumzamo ana vahera hanige'za e'za mopamofona mago atumpareti vuno mago atumparega vanige'za bainati kazinkanonteti vahera eme zamahe hana hugahaze. Ana hina mago vahe'mo'a atreno freno agura ovazigahie. **13** Hagi tamagra Israeli vahe'mota witi hoza antegahaze. Hianagi witima vasage knazupa ave've traza vasagegahaze. Tusi tamu'nasisi hu'za eri'zana enerisageno zamavesra hugahie. Hianagi anampintira mago ne'zana e'ori'za zamagazegu hugahaze. Na'ankure Nagra Ra Anumzamo'na tusi narimpa ahezamante'sanua zamo anara hugahie. **14** Hagi Ra Anumzamo'a amanage hu'ne. Nagrama mevava fenozane hu'na Nagri vahe Israeli naga'ma zamuge'za nemaniza mopamofo tavaonte'ma nemani'za havi avu'ava'ma nehaza vahe'mo'zama, ana mopama eri havizama hu'naza vahera mopa zamifintira zamahenati atregahue. Ana nehu'na Juda

vahe'enena ana vahe amu'nompintira zamahenati atregahue. **15**
Hianagi ana'ma hutesu'na ana vahera nasunku huzamante'na
ete zamavare'na vanuge'za, erisantima hare'za mani'naza
mopazmire umanitere hugahaze. **16** Hagi vahe'mo'zama tamage
zamagu zamagedesareti'ma Nagri vahe'mokizmi avu'ava zama
amage nente'za, korapa'ma Bali havi anumzamofo agifi huvempa
hihoma hu'za Nagri vahe'ma rempima huzami'naza zana netre'za,
Nagri nagifima huvempama hu'za, Ra Anumzamo'a kasefa huno
mani'ne hu'zama hanu'za, Nagri vahe'ene magoka manigahaze.
17 Hianagi mago mopafi vahemo'ma Nagri kema antahino
amage'ma ontesania vahera, Nagra zamazeri haviza nehu'na,
zamahe kasope atregahue huno Ra Anumzamo'a hu'ne.

13 Hagi Ra Anumzamo'a amanage huno nasami'ne. Kagra
vunka efeke tavaravenofira ome mizasenka kafafafi anakinto.
Hianagi ana tavaravea atregeno timo'a avakora osino. **2** Hige'na
Ra Anumzamo'ma hunantea kante ante'na, nafafafima anakisua
efeke tavaravenofira ome mizasete'na nafafafi anakinte'hoe. **3**
Anante Ra Anumzamo'a ete mago'ene amanage huno nasami'ne.
4 Kagrama mizasenka'ma kafafafima anakintana efeke tavarave
nofira erinka, Yufretisi tintega vunka havefima rutane'nesania
kampi ome frakinka anto. **5** Anage hige'na Ra Anumzamo'ma
nasamia kante ante'na, Yufretisi tintega vu'na, ana tavaravea
ome fraki'hoe. **6** Hagi za'za kna evutegeno, Ra Anumzamo'a
nasamino, Yufretisi tintegama hugantogenka'ma vunka, kafafafi
efeke tavaravenofi'ma ome fra'ma ki'nananofira ome erio. **7**
Hige'na Yufretisi tintega vu'na ana tavaravenofi'ma ome fra'ma
ki'nore vu'na mopa ome kaf'i'na koana, hago frupareno atraga
trago higeno ana tavaraveretira mago zana hugara osu'ne. **8**
Anante Ra Anumzamo'a amanage huno nasami'ne. **9** Nagra

Ra Anumzamo'na huanki'na, ana tavaravemo'ma havizama hiaza hu'na, Juda vahe'ene Jerusalemi vahe mo'zanema ra zamagima e'heriza zana eri haviza hugahue. **10** Hagi amama havi avu'ava zama nehaza vahe'mo'za Nagri kea antahi'za amagera nontazanki, zamagu'amo'a hankavetige'za zamagra'a zamavesi amage'nente'za, havi anumzantamimofo eri'za eneriza monora hunte'naze. E'ina hu'nazagu ana efeke tavaravemo'ma farupareno haviza higeno erino mago zama osiankna hugahaze.

11 Hagi kora Israeli vahe'ene Juda vahe'enena, afafafima zaza tavaravema rugagino anaki antrako'ma nehiaza hu'na, zamazeri antrako hu'noane. Ana'ma hu'noana Nagri vahe fatgo manine'za nagia erisga nehu'za, ra nagia namisaze hu'na hu'noanagi zamagra Nagri kea antahi'za amagera onte'naze. **12** Ana hu'negu Ra Anumzana Israeli vahe Anumzamo'a amanage hie hunka ome zamasamio. Maka mopa kavoma tro'ma hu'nazana, waini ti afiviteno ante'za tro hu'naze hunka huo. Anagema hananke'za amanage hu'za kasamigahaze. Izo mopa kavoa waini ti afinteno ante'za me'neanki, tagrikura ontahi'naze hunka nehampi? **13** Anagema hanagenka, Ra Anumzamo'a amanage hie hunka zamasamio. Ama mopafima nemaniza vahera waini tina rama'a eri hakare hanuge'za nene'za neginagi hugahaze. Deviti noma erino kinima manisia ne'teti vuno, pristi vahe'ene kasnampa vahe'ene maka Jerusalemi kumapima nemaniza vahete'enema vanige'za waini tina nene'za neginagi hugahaze.

14 Hagi mopa kavomo evuramino mopa kavore rurako hiankna hu'na zamazeri haviza hanuge'za, zamafahe'za oti'za mofavre naga zaminena ha' orente arente hugahaze. Nagra antahi fru huno zamante'na, nasunku'ene narimpa frunena huozamante zamazeri haviza hugahue. Nagra Ra Anumzamo'na amana

nanekea nehue. **15** Hige'na nagra anante amanage hu'na
Juda vahera zamasami'noe. Tamagra tamufga rana osuta Ra
Anumzamo'ma nehia nanekea tamagesa ante'neta antahi so'e
hiho. **16** Ra Anumzana tamagri Anumzamofona ra agi amiho.
Ru ana osu'nesageno kna hina haniza avreno tamagratera
egahie. Ana hanigeta agonaramintegama vanoma hanazana
hanimpina tanafa huta masegahaze. Tamagra tavi masama
kesaza zankura tusiza huno tamavesigahie. Hianagi Anumzamo'a
tavi masa eri amne hina tusi hanizampi manigahaze. **17** Hianagi
Anumzamo'ma hia nanekema tamagra antahita amage'ma
ontesage'na, nagra Jeremaia'na tamavufga rama nehaza zankura
tusi zavi ateramanategahue. Ana nehanugeno navunumo'a
tusiza huno herafiramigahie. Na'ankure Ra Anumzamofo
vahera ru moparegati vahe'mo'za eme tamavre'za ome kina
huramantegahaze. **18** Hagi Ra Anumzamo'a huno, kini ne'ene
kuini a' nereranena amanage hunka ome zanasamio. Tanagrama
nemani'a Kini trara atreta utiramita kugusopafi umani'o. Na'ankure
kini fetorira tanaseniretira evurami'ne. **19** Hagi sauti kaziga
Negevi mopafima me'nea kuma tamimo'za kuma kafana erigi
vagare'nageno, mago vahe'mo'a kafantamina eri onagigahie.
Juda vahera maka zamavare'za vu'za ru vahe moparega ome kina
huzmantegahaze. **20** Hagi noti kazigati'ma ha' vahe'ma neazana
tamavua kesga huta keho. Kegava hihoma huno tamigeta
kegavama nehaza hentofa sipisipi nagara menina iga mani'naze?
21 Hagi kagra ha' vahekagu'ma ronen'i'e hunka zamazeri so'ema
hu'nana vahe'ma, Ra Anumzamo'ma kvama zamazeri otisige'za
kegavama hugantesagenka, kagra na'ane hugahane? Kagrirra
a'nemo'za mofavre antenaku nehzageno zamata negriankna
kata krigahie. **22** Hagi kagraka'a kagenoka hunka, Na'a agafare

ama zamo'a nagritera fore nehie? hunka hugahane. E'ina'ma hiana na'ankure kagra rama'a kumi'ma hu'nana zante, kenaka'a eri tagato hutresageno kagaze kavufgamo'a amate megahie. **23** Hagi haninke avufgane Itiopia vahe'mo'za ruzahera huno agrono avufga erigahifi? Hifi lepatimo'za zamazokate'ma tupritapri'ma hu'neana eritregahazo? I'o anara osugahaze. E'inama nehiaza hunka havi kavukvazana huvava hunka nevunka, knare kavukava zana nosane. **24** Ra Anumzamo'a huno, e'ina agafare hagege kokampinti zaho'mo eno witi honama eme eri harafi huno viaza hu'na tamagrira tamazeri panani ha'nena ufre efre hugahaze. **25** Hagi Ra Anumzamo'a huno, Ama ana zamo'a tamagrite fore hugahie hu'na Nagra ko huhampari'noa zamo tamagritera efore nehie. Na'ankure tamagra Nagrira tamagekani nenanteta havi anumzante tamentintia hu'naze. **26** E'ina hu'negu Nagra'a kenatamia erisga hu'na tamavugosa rufitesuge'za, vahe'mo'za tamagaze zamavufaga kegahaze. **27** Hagi tamagra monko a'nemo'za nehzaza huta krahakraha huta havi anumzantera monko avu'ava zana agonafine trampinema huta vano nehuta agoterfa avu'ava zama nehzana Nagra ko tamage'noe. Jerusalemi kumapima nemaniza vahera nasunku huramantoe, nama'a knafi agru osu avu'avazampina manita vugahaze?

14 Hagi Juda mopafima ko'ma origeno maka zamo'ma hagege hianknafina Ra Anumzamo'a amanage huno anazankura Jeremaia'na nasami'ne. **2** Juda vahe'mo'za tusi zavi krafa nehzage'za, ranra kumapima kuma kafama erigi'zama mani'naza vahera zaferina zamia omane amane nehie. Maka vahe'mo'za mopafi masene'za zavira nete'za zamasunkura nehaze. Ana nehzageno Jerusalemi kumapinti'ma tusi zavi krafama nehaza zamofo agasasamo'a amenagame mareri'ne.

3 Hagi ugota kva vahe'mo'za, ti ome afiho hu'za eri'za vahe zamia huzamantage'za vu'naze. Hianagi maka tinkerimo'a hagege hu'nege'za ana eri'za vahe'mo'za na'a hugahune hu'za antahintahi hakare nehu'za, tintaferamina amne eri'za e'naze. Ana hute'za zamagazegu nehu'za zamazana zamasenire ante'za rufite'naze. 4 Hagi mopamo'a hagege huno kekokako hu'ne. Na'ankure ana mopafina kora ruonte'ne. Ana hige'za hozama nentaza vahe'mo'za zamagranena zamazana zamasenire rufite'za zamasunku hu'naze. 5 Hagi afi a' dia afu'mo'za zamagranena anentazamia zamatre'za fre'naze. Na'ankure trazama nesaza zana omanege'za anara hu'naze. 6 Hagi afi donki afumo'za hagege agonaramimpi oti'za, afi kramo'ma hiaza hu'za zamasafeku nehu'za, zamaganefuna hagana hagana hu'naze. Trazama nesaza zanena omanegeno zamavumo'a kagikagi hu'ne. 7 Hagi zamagra hu'za, Ra Anumzamoka tagrama hu'nona havi avu'ava zamo ama hazenkea avreno eme neramie. Hianagi kagrika'a kagi'mofo knare zanku nentahinka tazahuo. Na'ankure tagra rama'a zupa tamefira hunegamita, Kagri kavufina kumira huvava huta e'none. 8 Hagi tagra Israeli vahe'mota Kagrite amuhara nehuta kavega ante'nonkenka, knazamo'ma tagrite'ma ne-egenka, kagra tagu'nevazine. Hanki kagra nahigenka, ru moparegati amane kanteno ea vahemo magoke kenage tagrane emaseteno viazana nehane? 9 Hagi nahigenka antahintahi hakarema nehia vaheknara nehunka, harafa ne' mani'noanagi vahe'ma azama osianknara nehane? Hianagi Ra Anumzamoka tagrane magoka mani'nane. Ana nehunka Nagri vahe mani'naze hunka tagrira huhampari rante'nananki, Kagra orataro. 10 Anante Ra Anumzamo'a ana vahekura amanage hu'ne. Tamagra Nagri'ma natreta afete'ma

mani'zankuke tamavenesigeta, akoheta mani so'ea nosaze.
E'ina hu'negu Nagri vahe mani'naze hu'na antahi noramue.
Nagra menina havi avu'ava zama hu'naza zanku nagesa
nentahi'na, knazana tami'na tamazeri havizana hugahue. **11**
Anante Ra Anumzamo'a amanage huno nasami'ne, Jeremaiaga
ama vahe'ma knare hu'za manisazegura Nagritega nunamuna
osuo. **12** Hagi ne'zama atre'za nunamuma hana zana Nagra
antahi nozami'na, tevefi kre fanane hu ofane, witi ofanema
hanaza zankura Nagra musena osugahue. Hianagi Nagra ha'
vahe huzmanta'nena eme zamahe nefrisage'na, zamagatonto
zanteti'ene' ruzahu ruzahu kireti zamahe frigahue. **13** Hianagi
nagra amanage hu'na hu'noe. Ra Anumzamoka ama ana
vahe'mokizmi kasnampa vahe'mo'za ko zamasami'za, ha'ma
hu'zane zamagatonto hu knamo'a omesanigeta knare huta
manigahaze hu'za nezamasami'za, Ra Anumzamo tamarimpa
frua tamisnigeta ama mopafina manigahaze hu'za nehaze. **14**
Anante Ra Anumzamo'a huno, e'i ana kasnampa vahe'mo'za
Nagri nagifi havi kasnampa naneke nehaze. Nagra mago vahera
huntege, nanekea asamigera osu'noe. Zamagra havige hu'za
ava'hagna zana ke'none nehu'za, fri vahe hankro'ene nanekea
nehu'za, zamagra'a antahintahifinti agafa'a omne nanekea
nehaze. **15** E'ina hu'negu Ra Anumzamo'a amanage hu'ne.
Nagra huozamante noanagi Nagri nagifima havi kasnampa
kema hu'za, ha'ma hu' zane zamagatonto zanena ama mopafina
omegahie hu'za hu'naze. Hianagi ana kasnampa kema hu'naza
vahera hapinti'ene zamagatonto zamo'ene zamahe frigahie.
16 Hagi ana kasnampa kema nehazage'zama antahi'naza
vahe'enena hapinti'ene zamagatonto zamo'ene zamahe frigahie.
Ana hanage'za ha' vahe'mo'za veneneramine, a'ne zamine

ne'mofavre naga'zmimokizmi fri'naza zamavufaga eri atresageno
Jerusalemi kumamofo ne'onse kantamimpi megahie. Ana
hu'za maka fri vagaresageno mago vahe'mo'a kasefara huno
mani'neno aseozamantegahie. Na'ankure zamagrama hu'naza
kumi'mofo nona'a knazana zamagri agofetura antegahue.

17 Hagi Jeremaiaga ama ana vahera menina amanage
hunka zamasamio. Hanine zagenena zavira tevava nehugen
navunumo'a tinkna huno fragu vazineramie. Na'ankure mofa'nane
gna'ma hu'nage'na, nagrama navesima nezamantoa vaheni'a
ha' vahe'mo'za zamahe'za rehapatizage'za zamatagu hu'naze.

18 Hagi nagrama vu'na kuma'mofo fegi'ama ome kesuana,
hapinti'ma zamahe fri'nesaza vahe zamavufaga ome kegahue.
Hagi rankumamofo agu'afima ufresuana ne'zanku hu'za fri'nesaza
vahe zamavufaga ome kegahue. Hagi pristi vahe'ene kasnampa
vahe'mo'zanena ke'za antahiza osu'naza moparega vu'naze.

19 Ra Anumzamoka tamagerafa hunka Juda vahera hago
kamagena huzami'nampi? Hagi Saioni kumara hago kavesra
huntenka kagote'nentampi? Kagra nahigenka tazeri haviza
hutenka zazatera tatranketa tatafina mani'nonkeno anazamo'a
ameri huno vagarenorante? Tagra tarimpa frune manisanumpi
huta muhara hunanagi, mago knare'zana ome'ne. Tagrama
kanamaresuna knagu muhara huta avega antonanagi, tusi koro
zampinke mani'none. **20** Hagi Ra Anumzamoka tagehe'zama
hu'naza kumiku'ene tagrama hu'nona kumikura hago kagri kavufi
kumi hu'none huta huama hune. **21** Hagi Ra Anumzamoka
Kagraka'a rankagimofo knare zanku kagesa nentahinka,
kamefira huoramio. Ana nehunka masanentake kini traka'a
eri ante fenkamia otro. Tagranema huhagerafi huvempa kema
hu'nana kegura kagesa nentahinka ruha'ontagio. **22** Hagi

ru vahe'mokizmia kaza osu havi anumzaramimo'za kokura hanageno kora rugahifi? Monafintira agra'a avesitera kora rugahifi? I'o, Ra Anumzana tagri Anumzamoka Kagrake'za nehankeno kora nerie. E'ina hu'negeta kagrama taza hananku muhara nehuta kavega nentone. Na'ankure ama ana maka zana kagrake hankeno fore nehie.

15 Anante Ra Anumzamo'a amanage huno nasami'ne, Moseseka Samuelikea Nagri navuga otike ama ana vahekura kasunku huzamanto huke nunamuna huke nantahige'sa'anagi, Nagra nasunkura huo zamantegahue. Hinke'za ana vahera Nagri navugatira manigane'za viho. 2 Hagi zamagrama kantahige'za, tagra inantega vugahune? Hanagenka amanage huno Ra Anumzamo'a hie hunka zamasamio. Iza'zo krima eri'za frisaza vahera, ko huhampri'na, iza'zo hapinti'ma frisaza vahera ko huhampri'na, iza'zo ne'zanku'ma hu'za frisaza vahera ko huhampri'na, zamavare'za ru moparegama kinama ome huzmantesaza vahera, ko huhampri'hoe. 3 Nagra 4'a kankamu retro hu'na ana vahera zamahe hana hugahue huno Ra Anumzamo'a hu'ne. Nagra hanuge'za ha' vahe'mo'za bainati kazinteti zamahe nefrisage'za, kraramimo'za zamavufaga avazuvaze hu'za nefresage'za, namamo'za zamavufaga tagnataganu hu'za nenesage'za mesiama'a afi zaga kafamo'za ne'za eri hana hugahaze. 4 Ama anazama hanuana na'ankure, Juda kini ne' Hezekaia nemofo Manase'ma, kinima mani'nea knafima Jerusalemi kumapima havi avu'ava zama hu'nea zante anara hanuge'za, maka ama mopafima mani'naza vahe'mo'za nentahi'za zamagogogu hugahaze. 5 Ra Anumzamo'a huno, Jerusalemi kumapima nemaniza vahe'mota iza asunkura huneramante'sanigeno, Iza zavira ateramantesigeno, Iza

knare huta mani'nazo huno tamantahigegahie? 6 Nagra Ra Anumzamo'nama nehuana, tamagra tamefi hunenamita natretra rukrahe huta vu'naze. E'ina hu'nazagu Nagra nazana erisga hu'na tamazeri haviza hugahue. Nagra nasunku'ma huramante'nama neozamo'a tusi navaresra hie. 7 Hagi maka Juda mopafima me'nea ranra kumatamimofo kafantera, witi honama azotareti'ma eriherahe'ma hazageno zaho'mo eri hareno viaza hu'na, vaheni'a zamazeri panini hugahue. Ana nehu'na mofavre naga zaminena zamahe hana hugahue. Na'ankure zamagra havi avu'ava zana atre'za zamagu'a rukrahera osu'naze. 8 Hagi hageri ankenaregama me'nea kaheparamina rugatere'za rama'a kento a'nerami manigahaze. Nagra zage ferupi ha' vahera zamavare'na esanuge'za, nahezave naga'mokizmi zamarerahe'ina eme zamahe frigahaze. Ame hu'na ana knazana zamisanuge'za antahintahi hakare nehu'za tusi koro hugahaze. 9 Hagi 7ni'a ne' mofavrema zamante'nesia a'mo'a ana maka mofavre naga'a frisageno, hankave'a omanesigeno, mani'neno asimu ante'zanku hugahie. Tusi zage ferupinagi, ana a'mofo zagemo'a ufregahie. Ana hanigeno agazegu nehuno, kepri huteno manigahie. Nagra Ra Anumzamo'na huankino mago'ama mani'naza vahera ha' vahe zamazampi zamavarente sanuge'za zamahe frigahaze. 10 Hagi anante nagra Jeremaia'na hu'na, nagra nasunku huanki nahigeno nenarera'a nagrira kasenante'ne? Amama mani'noa mopafi vahe'enena maka zupa kehakare nehu'na, kefra nevazue. Nagra mago vahe'mofo zananofira osugeno, mago vahe'mo'a nagri'zananofira osu'ne. Hianagi maka vahe'mo'za nagrikura hu'za sifnafi manigahie hu'za nehaze. 11 Hianagi Ra Anumzamo'a huno, Jeremaiaga Nagra kagu'vazisugenka mani'nenka knare eri'zana erigahane. Kagri ha' vahe'mo'za knafima mani'neza

antahintahi hakarema nehu'za, kagrikura kasunku hurantenka taza huo hu'za eme meme hugahaze. **12** Anumzamo'a huno, noti kazigati'ma neaza ha' vahe'mo'za, ainimo'ene bronsi mokema huna'aza hu'za hankavenentake vaheki'za, mago vahe'mo'a zamazeri otregahie. **13** Miko tamagri feno zantamine zago'amo marerisa zantaminena, amne fru hu'na eri zamisanuge'za tamagri ha' vahe'mo'za arohu eme tamare'za erigahaze. Na'ankure amama mani'naza mopatamimofo agu'afina rama'a kumi hu'haze. **14** Nagra hanuge'za ha' vahetamimo'za eme kina huramante'za tamavre'za vanageta, keta antahita osu'nesaza mparega kina ome hugahaze. Na'ankure Nagrira narimpa he'zamo'a, teve rukru hiakna huno tamagritera egahie. **15** Hige'na nagra Jeremaia'na amanage hu'noe. Ra Anumzamoka nagrite'ma fore'ma nehia knazana, ko kenka antahinka hu'nane. Kasunku hunenantenka nazeri havizama nehaza vahera nona huzamanto. Na'ankure nagra Kagri eri'za vahe mani'noa zanku hu'za, nahe fri'za nehzanki antahi nemaminka kegava hunanto. **16** Kagri nanekemo'ma nagrite'ma ne-ege'na ne'zama hiaza hu'na nenoe. Ana nanekemo musezana nemamigeno, nagu'amo'a musenkasea nehie. Na'ankure Ra Anumzana Monafi sondia vahe'mofo Anumzamoka, kagri kagimo'ma nagripima me'neazanku anara nehue. **17** Nagra ne'zama kre'za nene'za musenkasema nehaza vahe'enena nomanuanki, nagraku nemanue. Na'ankure kagri hankavemo'a nigrane me'nege'na, ana vahe'mo'zama nehaza kumikura tusi narimpa ahenezmantoe. **18** Nahigeno nagri knazamo'a zazatera meno nevie? Nahigeno namumo'a tenonkanie? Kagra enevia timo vahe revatga huno hagege hunegeno, vahe'mo ome antegeno eankna nagritera hugahampi? **19** Hagi anagema hugeno'a Ra Anumzamo'a kenona amanage

hu'ne. Kagrama kagu'a rukrahe'ma hunka nagrite'ma ete esananke'na, ete kasefa hankavea kamisanugenka, nagri eri'zana erinka vugahane. Kagra agafa'ama omne nanekema nehana zana netrenka, knare nanekege'ma hanunka, Nagri nagi'ma erinka keagama hu vahe manigahane. Ana hananke'za vahe'mo'za rukrahe huza kagritega egahazanki, kagra zamagri zamagera ontegahane. **20** Nagra kagrira kazeri hankaveti'sanugenka, bronsireti'ma eri hanaveti'za tro hu'naza vihu keginagna hunka ama vahe zamavurera manigahane. Ana hu'nesanke'za hara regantegahazanagi kazeri otregahaze. Na'ankure Nagra kagrane mani'ne'na kegava hunegante'na kagu'vazi'na ete kavregahue. Nagra Ra Anumzamo'na ama nanekea nehue. **21** Nagra havi avu'ava zama nehaza vahemokizmi zamazampintira kaza hu'na kavare atregahue. Ana nehu'na hazenke vahe'mokizmi zamazampintira ete kagu'vazina kavaregahue.

16 Hagi mago'ene Ra Anumzamo'a amanage huno nasami'ne. **2** Hagi amama mani'hana kumapina ara erinka ne' mofavreramine mofo'nerami'nena ozamanto. **3** Na'ankure ama kumapima kasezamante'naza mofavreraminte'ma fore'ma hania zanku'ene zamarera zamafante'ma fore'ma hania zankura Ra Anumzamo'a amanage huno hu'ne. **4** Zamagrira ruzahu krimo zamahe frigahie. Ana hina mago vahe'mo'a zavira ateno ase ozamantesige'za fri'za mopafi umase emase hu'nesageno, zamavufagamo'a rifagna hugahie. Mago'a vahera ha' vahe'mo'za zamahe nefrisageno, mago'a vahera ne'zanku hu'za frigahaze. Ana hanage'za namamo'zane, afi zaga kfamo'zane zamavufaga traga hu'za negahaze. **5** Hagi Ra Anumzamo'a mago'ene huno, ama ana vahe'ma fri'enage'za zavi'ma atesaza nompina vunka zavira netenka kasunkura huozamanto. Na'ankure narimpa fru zana

zamagritetira ko eri netre'na, vagaore navesi'zane nasunku
zanena eri atre'noe. 6 Hagi feno vahero zamunte omane vahero
amama mani'haza mopamofo agu'afima nemaniza vhahera maka
frisage'za mago vahe'mo'a zavira ateno aseozamantegahie.
Vahe'mo'za ana vahekura zamasunku hu'za zamavufaga taga
huge, zamazokara taga hugera osugahaze. 7 Hagi mago
vahemo'ma frisige'za zavi'ma nete'za mani'nesaza vhahera mago
vahe'mo'a ne'zane tinena erino eme ozamigahie. Zamarera
zamafa'zanena frisage'za ana zanke hu'za vahe'mo'za eme
zamasunkura hunezamante'za tina afiza eme ozamigahaze. 8
Ana hu'neanki vahe'mo'zama tusi ne'zama kre'za nene'za tinema
nene'za musenkasema hanaza nompina kagra umani'enka,
ne'zane tinena onetfa huo. 9 Na'ankure Monafi sondia
vahe'mofo Ra Anumzana Israeli vahe Anumzamo'a amanage
hu'ne, Kagrama ofri kasefa'ma hunka manisana kna'afina
mani'enka kavufinti negesanke'na, ama mopamofo agu'afima
mani'neza muse zagame'ma nehu'za ki'za zokago'ma nehaza
avu'ava zana Nagra eri fanane nehu'na, aravema nehazage'za
musenkasema nehaza zamagasasanena eri atregahue. 10
Hagi ama anazamofo nanekema vahe'ma nezamasamisanke'za
zamagra anage hugahaze. Nagafare Ra Anumzamo'a ama
ana hazenke zantamina atre'nigeno tagritera egahie? huza
hugahaze. Tagra na'a havizana hu'nona zante tazeri haviza
hunakura nehie? Ra Anumzana tagri Anumzamofo avufina inan
kumi tagra hu'none hu'za hugahaze? 11 Anagema hanagenka
amanage hunka zamasamio. E'ina'ma hanuana na'ankure
tamagehe'zama zamefi hunenami'za havi anumzaraminte'ma
mono'ma hunezamante'za, eri'zama eri nezamante'za, zamefi
hunenami'za, Nagri kasegema amagema onte'nazagu anara

hugahue huno Ra Anumzamo'a hu'ne. **12** Ana nehuta tamagehe'zama hu'naza havi avu'ava zana zamagatereta tamagra hu'haze. Tamagri tamagu tamagesamo'a hankavetigeta tamagra'a tamavesite havi avu'ava zana nehuta, Nagri nanekea nontahize. **13** E'ina hu'negu amama mani'naza mopafintira tamazeri mate'venugeta tamagehe'zane tamagranema keta antahita osu'naza mopalrega vugahaze. Anantega umani'neta hanine zagenena kaza osu havi anumzantamintera monora huzamantegahaze. Ana'ma nehanage'na Nagra nasunkura huramante'na tamazeri so'ea osugahue. **14** Hianagi Ra Anumzamo'a huno, Mago kna ne-eankino ana knama esanige'za, mago'a zante'ma huvempama hunakura, Israeli vahe'ma zamavareno Isipiti'ma atiramino e'nea Ra Anumzama kasefa huno mani'nea Anumzante huvempa nehune hu'za osugahaze. **15** Hianagi zamagra amanage hugahaze, tamagerafa huno ofri kasefa huno mani'nea Ra Anumzamofo agifi huvempa hunankino, Israeli vahe'ma tavaretregeta vuta noti kaziga mopalregane ru mopalregama ome kinama huta mani'nontegati tavreno ete mopalire e'ne. Anagema hanazana na'ankure Nagra zamagehe'ima zami'noa mopalifi ete zamavare'na esua zanku anagea hugahaze. **16** Hianagi Ra Anumzamo'na menina rama'a ha' vahe huzamantesuge'za e'za, nozame zama nehaza vahe'mo'zama kuko atre'za nozamema aze'nerizaza hu'za, ama ana vahera ha' vahe'mo'za zamazerigahaze. Ana'ma hutesage'na ete henka mago'ene ha' vahera huzamantesuge'za e'za, zagagafa zama nehaza vahe'mo'zama zaga kfama zamarotago hu'za nehazaza hu'za, ranra agonaramimpine, ne'onse agonaramimpine, havegampinema fra'ma ki'za mani'nafintira zamavazu hugahaze. **17** Na'ankure Nagra maka zama nehazana

navunte'na nezamagoanki'za, havi avu'ava zama nehaza zamo'a
nagri navurera franokie. Ana hu'neanki'za nagri navurera kumi
zamia eri frara okigahaze. **18** Hagi kotazana, zamagrama
kumi'ma nehu'za hazenke'ma hu'naza zantera, knazana nagra
mago'ene eri agofetu hu'na zamazeri haviza hugahue. Na'ankure
zamagra kaza osuno agoterfa havi anumzaramimofo amema'ama
tro'ma hu'za eri hakarema nehaza zamo Nagri mopa eri haviza
hu'ne. **19** Hagi anante nagra hu'na, Ra Anumzamoka hazenke
knafima mani'nogenka kagra nagri hankave mani'enka, fra'ma
kisanua hankave kuman'i'a mani'nane. Kokankonka maka ama
mopafima mani'naza vahe'mo'za kagrite e'za amanage hugahaze.
Tagehe'zama amage'ma ante'naza anumzaramina tamage
anumzana omani'naze. Zamagra amne zanki'za mago'zana
huozmante'naze. **20** Hagi vahe'mo'za zamazantetira amne
anumzazamia tro hugahaze. Hianagi ana anumzantamima
tro'ma hanazana e'i tamage anumza omani'naze. **21** Hagi
Ra Anumzamo'a huno, menina Nagra'a hihamu hankaveni'a
zamaveri hanuge'za kegahaze. Ana nehu'za Ra Anumzanema
hu'za nehaza nagia ke'za antahiza hugahaze.

17 Hagi Juda vahe'mokizmi kumira roro hu'nea aini
zotareti havegna'ma huno hankaveti'nea zamagu'arera
hanagati'za krenente'za, Kresramanama nevaza itaraminte'ma
me'nea pazivetaminte'enena hanagati'za krente'naze. **2** Hagi
ana vahe'mo'za havi anumzantaminte'ma Kresramanama
nevaza itama tro nehu'za, Asera a' havi anumzamofo
amema'ama zafare'ma antre'za tro'ma hute'za, ranra zafa
agafaramimpine agonaramimpinema ante'naza zantaminkura
mofavre naga'zmimo'za zamagera okani'za vu'za monora
ome hunezmantaze. **3** E'ina hu'negu Nagra tamagri ha'

vahera zamatresuge'za Nagri agonaramimpina ne-eza havi
anumzante'ma mono'ma hunentaza kumatamina eme eri
haviza nehu'za, zagine marerisa feno zantaminena rohu eme
tamare'za eri'za vugahaze. Na'ankure tamagrama mopatamifima
kumi'ma huta eri hakarema hu'naza zante anara hugahaze. 4
Erisanti haregahazema hu'nama tami'noa mopa azeri so'e osu
atregahaze. Nagra tamatresugeta keta antahitama osu'naza
moparega ha' vahetamimofo eri'za vahe umanigahaze. Na'ankure
tamagrama hazazamo narimpa ahe'zana eri akru hazageno,
tusi narimpa ahe vava nehiankino, mago vahe'mo'a ana tevea
rusura osugahie. 5 Hagi Ra Anumzamo'a amanage huno
hu'ne, Vahete'ma amuha'ma nehuno vahe'mo naza hugahie
nehuno, vahe'mofo hankavegu'ma nentahino, Nagri'ma amefi'ma
hunenamia vahe'mo'a sifnafi manigahie. 6 E'inahu'ma hania
vahe'mo'a hagege kokampi me'nea trazankna hu'neankino,
henkama manino vanifina so'e nomani'zana omanigahie. Ana
hu'neankino agra hagege kokampima hagemoke hu'negeno
vahe'ma nomanifi manigahie. 7 Hianagi iza'o Ra Anumzamofonte
amentinti nehuno, Agritema amuha'ma nehania vahe'mo'a
asomu'ene manigahie. 8 Hagi e'inahuma nehia vahe'mo'a,
tinke'nare hankre'naza zafamo'ma rafu'na atregeno fenkame timpi
urami'negeno, zagegnama egeno'a korera nosiankna nehie. E'na
hu'neankino zage knafinena ani'na eri nemareno raga rente vava
huno vugahie. 9 Hagi vahe'mofo agu'afina vahe'ma revatagama
hu'zamoke aviteno mago krigna hu'neankino kanamaregara
osu'ne. Ana hu'negu iza ana zana keno antahino hugahie?
10 Hianagi Nagra Ra Anumzamo'na vahe'mofo antahi'zana
ke'na antahi'na nehu'na, vahe'mofo agu'anena rezagane'na
negoe. Ana nehu'na zamagrama nehaza zamavu zamavate

ante'na mizana zamatere nehue. **11** Hagi fatgo osu kanteti'ma zago fenoma eri atruma nehaza vahe'mo'za, namamo agra'a onte'nea amute anukino mase'negeno horaho hiankna nehaze. Ana hu'neanki'za kasefa vahe mani'neza ana feno zana atre vagarete'za, ozafama ome resazana zamunte omene negi nagi vahe manigahaze. **12** Hagi nagra amanage hu'noe, Ra Anumzamofo hihamu hankave'ane kini tra'mo'a ese agafareti mesga huno meno e'neno, mono noma'afi me'negeta monora hunentone. **13** Ra Anumzamoka Israeli vahe'mo'za Kagrite'ma amuha'ma nehaza Anumza mani'nane. Iza'o rukrahe'ma huno katreno vania vahe'mo'a agazegu nehuno kugusopafi avon krente'negeno fanene hiankna hugahie. Na'ankure Ra Anumzamoka kagra vahemo'ma neneno kasefa'ma huno manisia kampui tinkna hu'nananagi, kagri'ma katre'naza agafare anara hugahaze. **14** Ra Anumzamoka krifintira nazeri kanamarege'na kanamare'na nemani'na, nagu'vazinka navarege'na knare hu'na manisue. Na'ankure kagri kagige'za husga hunegantoe. **15** Hagi antahio, Israeli vahe'mo'za kiza zokago kea hunenante'za, Ra Anumzamofo naneke hunka huama'ma nehana nanekea, iga me'nefi atregeno ana nanekemo'a nena'a efore hinketa kamneno? hu'za nehaze. **16** Ra Anumzamoka nagri vahe'ma kegava huo hunka'ma nami'nana eri'zana atrena ofre'noe. Ana nehu'na mago zupa kagrikura hu'na, ama vahetera kari atregeno eme zamazeri haviza hino hu'na osu'noe. Maka nanekema hu'noana kagra ko kenka antahinka hu'nane. **17** Ra Anumzamoka kagra nazeri korora osuo. Na'ankure hazenke zama ne-esigenka kagrake'za fra'ma kisanua kuman'i'a manigahane. **18** Hagi knama nami'za nazeri havizama nehaza vahera zamazeri zamagaze huo. Hianagi nagrira natrege'na nagazegura nehu'na,

antahintahi hakarea osa'neno. Hagi ana vahera kna nezaminka mago'ane ante agofetu hunka zamazeri haviza huo. **19** Hagi Ra Anumzamo'a nagrira nasamino, Kagra vunka Jerusalemi kuma kafaraminte ome otio. Ese'ma uotisanana veamokizmi kafanema hu'nea kafanteti'ma, Juda kini vahe'mo'zama ufre'za atirami'zama nehaza kafante uotio. Ana'ma hutenga vunka maka kafaraminte'enena ome otitere nehunka, **20** amanage hunka maka vahera zamasamio. Ama kuma kafaramimpinti'ma ufrata atiramitama nehaza vahe'motane, Juda kini vahe'motane Jerusalemi kumapima nemaniza vahe'motane, maka Juda vahe'motanena Ra Anumzamo'ma hania nanekea kama antahiho. **21** Ra Anumzamo'a huno, Nagrama hanua koro kea antahiho. Tamagrama knare huta mani'sanunema hanuta, mani fruhu kna Sabatirera Jerusalemi kumamofo kafaramimpintira feno zana erita marerita atiramita osiho. **22** Sabati knarera nontamifintira knama huga zana eri fegira nonteta, eri'zanena e'oriho. Hianagi Nagra tamagehe'ima zamasami'na Sabati kna ruotge hu'ne hu'nama zamasami'noa kante amage anteta kegava hiho. **23** Hianagi tamagri tamagehe'za ana nanekea antahi'za amagera nonte'za rukrahema hu'za ana nanekema antahi zankura zamavaresra hu'ne. Ana nehu'za zamavumro'ma ante kema huana zamagesa ante'za ontahi'naze. **24** Hianagi Nagri nanekema antahita, kuma kafaramimpinti'ma feno zama erita atiramita mareritama nosuta, zagore'ma notreta, Sabati kna zupa eri'zama e'norita, Sabatima kegavama hanage'za, **25** kini vahemo'zane eri'za vahe zamimo'zanena ama ana kuma kafaramimpinti mareri'za atirami'za huvava hugahaze. E'ina nehanigeno Deviti nagapinti kinia efore hunante anante hu'za Jerusalemi kumapina kini tratera manigahaze. Maka zupa kini vahemo'zane eri'za

vahe'zamimo'zanena, karisizamifine hosi agumpine mani'neza,
kuma kafaramimpintira mareri'za atirami'za nehu'za, Juda
vahe amu'nompina vano hugahaze. Ana nehanage'za ama
rankumapina vahera manivava hu'za vugahaze. **26** Hagi
Jerusalemi kuma'mofoma megagi'nea kumatamimpinti'ene
Juda mopafima me'nea kumatamimpinti'ene, Jerusalemi
kuma tavaonte'ma megagi'nea ne'onse kumatamimpinti'ene,
Benzameni naga'mokizmi mopafinti'ene, zage fre kazigama
me'nea ne'onse agonaramimofo agafinti'ene, agonaramimpima
me'nea mopafinti'ene, Negevi kazigatiki hu'za vahera ne-e'za,
tevefima kre fananehu ofane, mago'a ofaramine, witi ofaramine,
mana nentake'za insensine, muse ofanena eri'za Ra Anumzamofo
mono nontega egahaze. **27** Hianagi tamagra Nagri kema
ontahita Sabatima kegavama nosuta, mago'a knare'ma nehzaza
huta, Jerusalemi kumamofo kafaramimpinti'ma fenozama
erita marerita atiramita nehuta Sabati zupama ke'onke zama
zagore'ma atresage'na, Nagra Jerusalemi kuma kafaramintera
teve tagintesanugenonero, Jerusalemi kumapima me'nea
ranra nontaminena teno vuno eno huno neresigeno, mago
vahe'mo'a ana tevea rusura osugahie.

18 Hagi Ra Anumzamo'a amanage huno Jeremaia'na
nasami'ne. **2** Kagra mopa kavoma tro nehia ne'mofo nontega
uramige'na, anante Nagra nanekeni'a kasami'neno. **3** Anage
hige'na nagra mopa kavoma tro nehia nemofo nontega urami'na
ome koana, kagikagi nehigeno mopa kavoma tro'ma nehia
zante ana ne'mo'a mago kavo tro nehige'na ke'noe. **4** Hianagi
mopa kavoma tro nehia ne'mo'ma keana ana kavomo'a agrama
antahi'nea kantera forera osigeno, anama tro'ma nehia mopa
kavoa ete eri regripeteno agrama antahi'nea kante ete ru

kavo tro hu'ne. 5 Anante Ra Anumzamo'a amanage huno
nanekea nasami'ne. 6 Tamagra Israeli vahe'motama Nagriku'ma
antahi'zana, mopa kavoma tro'ma nehia nemo'ma mopa
kavore'ma hiazana tagritera osugahie huta nehazafi? Tamagra
Israeli vahe'mota mopa kavoma tro'ma nehia ne'mofo azampima,
higo mopama meaza huta, Nagri nazampi mani'naze. 7 Hianagi
Nagra mago'a zupa huama hu'na, mago mopafi vaheku'ene mago
kinimo'ma kegavama hu'nesia mopafi vaheku'ma hu'na, zamazeri
haviza nehu'na zamavare atregahuema hanuge'zama, 8 ana koro
kema huzamisanua mopafi vahe'mo'zama kefo avu'ava zama
tro'ma nehaza zama atresage'na, Nagrama zamazeri haviza
hugahue hu'nama hu'noa zana osugahue. 9 Hagi Nagra mago'a
zupa huama hu'na, mago mopafi vaheku'ene mago kinimo'ma
kegavama hu'nesia mopafi vahekura hu'na, tamazeri so'e
hanugeta hankavetita manigahaze hanuge'za, 10 ana nanekema
antahi'za amage'ma nonte'za, Nagri navufima kefo avu'ava
zama hagine'na, tamazeri knare hugahue hu'nama huvempama
hu'noa zana osugahue. 11 E'ina hu'nagu Jeremaiaga vunka Juda
vahe'ene Jerusalemi vahera Ra Anumzamo'a amanage huno koro
kea hie hunka ome zamasamio. Tamagri'ma tamazeri knare'ma
huga zana atre'na tamazeri haviza hugahuanki, makamota kefo
avu'ava zama nehaza zana atreta fatgo avu'ava'za hoho. 12
Hianagi ana vahe'mo'za anage hu'za kenona hugantegahaze.
Kagrama nehana nanekea antahi nonkamune. Tagra nazano
hunaku'ma hanuna zana, keka'a ontahi tagri tagu'amo'ma hihoma
hania havi avu'ava zana huta vugahune. 13 E'ina hu'nagu
Ra Anumzamo'a huno, amanahu kefo avu'ava'ma nehaza
zamofo agenkea mago'a vahe'mo'za nehazageta antahi'nazo
hunka ome zamantahigenka ko. Israeli vahe'mo'za Nagri

navurera vene omase mofakna hu'nazanagi, menina haviza
huno kefozantfa hu'nea avu'ava'za hu'naze. **14** Hagi mago'a
knafina Lebanonima me'nea havege agonaramimpintira aisimo'a
ze'zera huno hagegea hugafi? Hifi ana agonaramimpinti'ma
zasi nentake tintamima hanati'zama eneramiza timo'za tane'za
hagegea hugahazafi? I'o anara nosaze. **15** Hianagi Nagri
vahe'mo'za nagrikura zamagenekani'za, vu'za kaza osu havi
anumzaraminte mnanentake zantamina ome kremana vu'naze.
E'inama haza zamo hige'za traka hu'za korapa'ma knare
hu'negeza'ma neaza kana eme atre'naze. Ana hute'za menina
haviza huno hapake hu'nea kante nevaze. **16** E'ina hu'nazagu
huno mopa zamimo'a haviza hina ka'ma koka fore huteno mago
avame'za megahie. Ana hu'nesanige'za maka zupa kante'ma
vanoma hanaza vahe'mo'zama nege'za, antri huza zamagena
rugahaze. **17** Hagi ha' vahe'zamimo'za negesage'na zage
hanati kazigati zahomo'ma eno kugusopama eri harafi'ma huno
viaza hu'na zamazeri panani hanuge'za ufre efre hugahaze.
Ana nehu'na knazama erisazana Nagra namefi hunezami'na,
knazamo'ma zamazeri havizama haniana, rukrahera hu'na
ozamagegahue. **18** Hagi anante veamo'za amanage hu'naze.
Enketa mago'a kanku haketa Jeremaiama azeri havizama hanuna
nanekea oku retro hamneno. Tagranena rama'a pristi vahe
manizageno, knare antahi'zane vahe'ene kasnampa vahe'enena
rama'a mani nazankita agrira antahi omi'none. E'ina hu'negu
agrama nanekema rempi huneramino antahintahi neramino,
kasnampa nanekema tasami'zankura tavesra hunentone.
Enketa nanekereti azeri haviza nehuta, agrama hania nanekea
ontahisanune hu'naze. **19** Hagi anante nagra anage hu'noe.
Ra Anumzamoka nagri nunamuna antahinamio. Ana nehunka

nagri'ma ha'ma renenantaza vahe'mo'zama nehaza nanekea antahio! **20** Knare avu'ava zama hua zantera nona hu'za havi avu'ava zanteti mizana nami'za nehazafi? Na'ankure zamagra nagrira nahenaku keri kafinte'naze. Kagri kavuga nagra ot'i'nena karimpa ahenezamantenka zamazeri haviza osuogu'ma memema hu'na kantahige'noa zankura kagera okanio. **21** Ana hu'negu zamatrege'za ana vahe'mokizmi mofavre naga'mo'za zamagaku hu'za nefrisage'za, mago'a vahera ha' vahe'mo'za e'za bainati kazinteti eme zamahe friho. Vene'ne naga'ene mofavre naga'enena eme zamahe vagaresnage'za a'nezmimo'za mofavrea onte kento a'nene maniho. Zamatrege'za ranra vahera kri eri'za nefrisagenka, nehazaveramina zamatrege'za bainati kazinteti hapi zamahe friho. **22** Ha' vahe'mokizmi sondia vahe'mo'zama nozamifima ame hu'zama emarerisage'za, tusi koro nehu'za nozamifintira krafage hugahaze. Na'ankure nagrama uramisua kerima kafinente'za, kama vanufima krifuma anagi ante'nazagu anara hugahaze. **23** Hianagi Ra Anumzamoka nagri'ma nahe fri'naku'ma kema retro'ma hu'nazana kagra ko antahi'nane. E'ina hu'negu ana kefozazamine kumi'zaminena atre ozamantenka krimpa ahenezamantenka nezmagege'za ru vahe'mo'za e'za eme zamazeri haviza hiho.

19 Ra Anumzamo'a amanage huno nasami'ne. Mopa kavoma tro nehia netega uraminka, mopa kavoa mago ome miza huo. Ana hutenga mago'a kva vahe'ene pristi vahe'enena kea hunka zamavare'nenka vuo. **2** Hagi Jerusalemi kuma'mofona, kavo rurakohu kafanema nehaza kafanteti atiramita vuta Ben-Hinomu agupofi viho. Anantegama vuteta amanage hunka ome zamasamio. **3** Tamagra Juda kini vahe'motane Jerusalemi kumapima nemaniza vahe'motanena Ra Anumzamo'ma hiankea

antahiho, Monafi sondia vahe'mofo Ra Anumzana, Israeli
vahe'mokizmi Anumzamo'a amanage hie, antahiho Nagra
rama'a knaza avre'na ama agupofina esuge'za ana zamofo
agenkema vahe'mo'za nentahisu'za antri hugahaze. 4 Na'ankure
Israeli vahe'mo'za zamefi hunenami'za ama agupofina ru
anumzamofo mono hunte kuma eri fore hu'naze. Ana nehu'za
Juda kini vahe'mo'zane, zamagehe'zane zamagranena ke'za
antahi'za osu'naza havi anumzante mananentake'za insensia
kre mana vu'naze. Ana nehu'za ke'zami omane mofavre nagara
rama'a zamahe'za anampina korana eri tagi atre'naze. 5 Ana
nehu'za zamagra Bali havi anumzante'ma mono'ma huntesaza
kumatami tro huntesa hu'ne'za, ne' mofavre'zamia zamahe'za
Bali havi anumzantega tevefi kre fanenehu ofa nehaze.
Nagra kea huramante'na, e'ina hiho hu'na huozamante'noa
avu'avaza nehu'za, Nagri antahi'zampinena e'inahu antahi'zana
omane'neaza tro hu'naze. 6 E'ina hu'negu antahiho, Ra
Anumzamo'a huno mago kna ne-eanki'za ama mopagura Tofeti
agupoe nehu'za, Ben-Hinomu agupoe hu'za osugahazanki, vahe
zamahe'za rukitagi netraza agupoe hu'za hugahaze. 7 Tamagra
Jerusalem vahe'motane Juda vahe'motanena rama'a antahintahi
retro hugahaze. Hianagi nagra ama agupofi ana antahintahi zana
eri haviza hugahue. Nagra ha' vahetamia zamatresanuge'za
e'za bainati kazinteti eme tamahe frigahaze. Ana hutesage'na
namaramine afi zagagafarami huzmante'sanuge'za e'za fri
tamavufga eme traga hu'za negahaze. 8 Nagra ana hanugen
Jerusalem kumamo'a haviza huno me'nesige'za, kantegama
vanoma hanaza vahe'mo'za anazama nege'za antri nehu'za
zamagogogou hugahaze. Na'ankure rama'a hazenke'zamo'ma
enoma emeri havizama hu'nea zanku anara hugahaze.

9 Hagi ha' vahe'mo'zama eme ha'ma huramantenaku'ma
esu'za Jerusalemi kumara eme avazagi kagigahaze. Ana
hanageno ne'zana vagaresanigeta ne'zama nesaza zanku
hugeta tamagri tava'onte'ma nemanisaza vahera zamaheta
neneta, ne'mofavre nagataminena zamaheta negahaze. 10
Jeremaiaga nanekema huvagama nerenga, kagranema vu'naza
vahe'mo'za negesagenka mopa kavoma erinka vu'nana kavoa
rurako nehunka, 11 amanage hunka zamasamio, Monafi
sondia vahe'mofo Ra Anumzamo'a huno, ama mopa kavoma
ete eri so'e osu'are'ma rufuzafupeaza hu'na, Juda vahe'ene
Jerusalemi kumapima nemaniza vahe'enena zamazeri haviza
hugahue. Ana hanugen Tofeti mopa'afina frisaza vahe'ma
asezamantesaza mati megahie. Hianagi rama'a vahe friga
hazankino vahe'ma ase zamantesaza kankamuna omanegahie.
12 Nagra Ra Anumzamo'na huanki'na, ama ran kuma'ene
anampima nemaniza vahe'enena e'inahu avu'ava huna zamazeri
haviza hugahue. Ana nehu'na Nagra ama ran kumara eri
haviza hutresanugen Tofeti mopamo'ma hu'neaza huno
agru osugahie. 13 Jerusalemi kumapima me'nea nontamine
Juda kini vahe'mokizmi nontamimo'za, Tofeti mopamo'ma
hiaza hu'za Nagri navurera agrua osugahaze. Na'ankure ana
nontamimofo agofetura marerita monafima me'nea hanafitaminte,
mananentake'za insensia kre mna nevuta, kaza osu havi
anumzantamintera waini tina tagita ofa hu'naze. 14 Hagi Ra
Anumzamo'a hunantege'na Tofetima mani'nena kasnampa
nanekema nehuretira nagra atrena vu'na Ra Anumzamofo
mono nomofo kumapi ome ot'i'nena amanage huna vahera
zamasami'noe. 15 Monafi sondia vahe'mofo Ra Anumzama
Israeli vahe Anumzamo'a huno, amama me'nea ran kumate'ene

ne'onse kumatamima megagi'nea kumatamintera, huvempama hu'noa knazantamina kofa'a knafi atrenugenego egahie. Na'ankure tamagrira tamagu'amo'a hankavenetigeta Nagri nanekea ontahi'naze.

20 Hagi Ra Anumzamofo mono nonte'ma ugota huno kegavama hu'nea pristi ne' Imeri nemofo Pasuri'a, mani'heno Jeremaiaama kasnampa kema hiana antahi'ne. 2 Ana nanekema nentahino'a Pasuri'a hige'za kasnampa ne' Jeremaiana azeri'za sefu amite'za avre'za vu'za, Ra Anumzamofo mono nonkumamofo anaga kaziga Benzameni kafanema nehazare tare agiararena zafafi eri rusi hu'za kina hunte'naze. 3 Hagi anante knarera Jeremaiana kinafintira Pasuri'a katufente'ne. Ana'ma nehigeno'a amanage huno Jeremaia'a Pasurina asami'he. Ra Anumzamo'ma kagri kagima aheana Pasuri'e huno nosianki, Magor-Misabibie huno kagia nehe. 4 Na'ankure Ra Anumzamo'a kagrikura amanage huno nehie. Nagra hanugeno kagrite'ma fore'ma hania zamo'a kagri'ene roneka'araminena tamazeri koro hugahie. Kagra negesanke'za ha' vahe'mo'za e'za maka roneka'a bainati kazinteti eme zamahe frigahaze. Ana nehina maka Juda vahera Babiloni kini ne'mofo azampi zamavarentesugeno zamavareno Babiloni kumate ome kina huzamante'neno, bainati kazinteti zamahe frigahie. 5 Ana nehu'na ha' vaheka'a zamatre'nuge'za e'za ama ran kumapinti zago fenona eme ha' hu'za eri'za vugahaze. Ana nehu'za tamagrama eri'zama erita eri fore'ma hu'naza zantamine, zago'amo marerisa zantamine, tamagri kini vahe'mo'zama ante'naza zantamine, goline silvanena maka eri'za Babiloni kumatega vugahaze. 6 Hagi kagra Pasurigane maka nagakanena tamavre'za Babiloni vu'za kina ome huramantegahaze. Kagra havige kasnampa naneke hunka

roneka'aramina zamasami'hanku, kagrane kasnampa nanekema
zamasami'nana ronekanena Babiloni mopafi frisage'za anantega
aseramanategahaze. **7** Ra Anumzamoka Kagra renavatga
hanke'na, anama renavatgama hana naneke antahi'na amage
ante'noe. Kagra nagri hankavea agatere'nanku kagri nanekea
eri otre'noe. E'ina hu'negu maka vahe'mo'za maka zupa
kiza zokago zankna hu'na mani'noge'za maka vahe'mo'za
kiza zokago kea hunenantaze. **8** Hagi nagrama kasnampa
kema huterema hua zupa nagra kezati'na, ha' zana esanigeta
haviza hugahaze hu'noe. E'inagema hu'na Ra Anumzamofo
nanekema hua zanku vahe'mo'za huhaviza hunante'za kiza
zokago ke hunante vava hu'naze. **9** Hianagi nagrama hu'na, Ra
Anumzamofo agi'a huama nosu'na, agri nanekea mago'enena
huama osugahue hu'na huanagi, ana nanekemo'a nagu'afina
tevemo'ma hiaza huno nereno, zaferinanifina tevema reaza
nehie. Nagra nanekeka'a huama osu nagu'afi azerisue hu'na
huanagi, azeri'agura amuho nehue. **10** Hagi nagra rama'a
vahe'mo'zama sumisumima nehaza nanekema antahuana,
maka kaziga koro'zamo avite'ne nehia nere nehu'za, nagrira
koroke hunante'za, kagrama mago'a nanekema hananketa,
huama huta vahera zamasamigahune nehaze. Nagrite'ma
havi zama fore'ma huno nazeri traka'ma hanige'za kenakura,
rone'nimo'zanena zamavu ante'za nenagaze. Ana nehu'za
amanage hu'za nehaze. Agra'a traka huno masesigeta, agrama
hu'nea avu'ava zantera knazana amigahune hu'za nehaze.
11 Hianagi Ra Anumzamo'a harfa sondia kna huno nagrane
mani'ne. E'ina hu'negu nagri'ma nazeri haviza hunaku'ma nehaza
vahe'mo'za Agri avuga tanafa hu'za nemase'za nagrira nazeri
nagate'oregahaze. E'ina'ma hania zamo hanige'za zamagazegu

nehanageno, havi zamajima erisaza zamo'a vagaoren mevava
huno vugahie. **12** Monafi sondia vahe'mofo Ra Anumzamoka
fatgo zamavu'zmavama nehaza vahera kagra rezmahanenka
negenka, zamagu'an antahintahi zazaminena negane. Kagra
krimpa ahe'zana zamagridera erinte ama huo. Na'ankure maka
knazani'a kagrite eri'na neoe. **13** Ra Anumzamofontega zagame
nehuta, Ra Anumzamofona Agi'a husga huntesanune. Na'ankure
havi avu'ava zama nehaza vahe'mo'zama, ke'onke zanku'ma
atupa'ma nehaza vahe'ma zamazeri havizama nehazageno'a, ana
vahe'mokizmi zamazampintira Agra zamagu'vazino nezamavare.
14 Hagi antanimo'ma kasenante'nea knagura huhaviza hu'na
sifna huntoe. Ana huankino anama kasenante'nea knagura
mago vahe'mo'a antahimino musenkasea osanie. **15** Hagi
anama kasenantegeno'ma, ne' mofavre fore hia huno nanekema
erino nenfama eme asamigeno musema hu'nea nera, sifna
huntoe. **16** Ra Anumzamo'ma korapa'ma me'nea rankuma'ma
asunku osuno eri haviza hiankna huno ana ne'mo'a haviza
hanie. Atrenkeno ana nemo'a nanterama ha' vahe'mo'zama
hanaza krafagea nentahino, feru'ma ha'ma eri'za ne-ezama
hanaza ibigemofo agasasankea antahino. **17** Na'ankure Ra
Anumzamo'a antanimofo arimpafima nahe fiasina, antanimofo
arimpamo'a nagri mati kna huteno kase onantesine. **18** Nahigeno
antanimo'a kasenante'nege'na, maka zupa hazenke zampine
asunku zampinena mani'na ne-e'na, maka zupa nagazegura
hu'na neoe.

21 Hagi Ra Anumzamo'ma Jeremaiama ama nanekema
asami'neana, kini ne' Zedekaia'a, Markija nemofo Pasurine
Ma'aseia nemofo pristi ne' Zefaniakiznima huznantegeke
Jeremai'ene keaga ome hunaku vuteke amanage ome

hu'na'e. 2 Muse hugantonanki tagri tagi erinka Ra Anumzamofona antahigegeno taza hino. Na'ankure Babiloni Kini ne' Nebukatnesa'a ha'eme hurantenaku nehie. Ko'ma hu'nea zana huno Ra Anumzamo'a asunkura huranteno hankave kaguva zama eri fore'ma hanigeno'a, Nebukatnesa'a sondia vahe zaga'a zamavareno ete rukrahe huno vugahifi antahigenka ko. 3 Hianagi Jeremaia'a amanage huno ana netrena zanasami'ne. Zedekaiana amanage huta ome asami'o. 4 Ra Anumzana Israeli vahe Anumzamo'a amanage huno hie, Babiloni kini ne'ene sondia vahe'amozanema kuma keginamofo fegi'ama eme kafoma ante'za mani kagi'nesaza vahe'enema ha'ma hunaku'ma tamazampima eritama vanaza ha' zantamina erineta ete rukrahe huta rankumapi efregahaze. Anama hanage'na Nagra ana ha' vahera zamatresanuge'za rankumapina efregahaze. 5 Nagra hankavenentake nazana rusute'na Nagrani'a hara huramantegahue. E'inama hanuana Nagra tusi narimpa aheramante noanki'na tamazeri havizantfa hugahue. 6 Ana nehu'na ama rankumapima nemaniza vahete'ene, zagagafa re'enena kefo kri atresugenno eno eme zamahe frigahie. 7 Hagi Ra Anumzamo'a huno, anazama fore'ma hutesige'na anantero, Juda kini ne' Zedekaiane, eri'za vahe'ane krimo'ma zamahe ofrisia vahe'ene, hapinti'ene zamagaku'enema hu'za ofrisaza vahe'enena, zamavare'na Babiloni kini ne' Nebukatnesa azampine sondia vahe'amo'zama tamahenaku'ma nehaza vahe zamazampi tamavre antesugenno, tamazoa onkiza zmasunkura huoramante'za bainati kazinteti tamahe frigahaze. 8 Hagi Ra Anumzamo'a mago'ene amanage hie hunka vahera zamasamio hu'ne. Keho! Tamasimu'ma erita manisaza zamofo kane, fri'zamofo kanena tamagri tamavuga antogeno me'ne. 9 Hagi

rankumamofo agu'afima manisaza vahera mago'a bainati kazinteti
zamahe nefrisage'za, mago'a ne'zanku hu'za nefrisage'za,
mago'a kri eri'za frigahaze. Hianagi iza'o rankumapinti'ma
atiramino fegi'ma vuno, Babiloni sondia vahe'ma kafoma
eme avazagi kagi'za ha'ma huramantenaku'ma nehaza vahe
zamazampima ufresania vahera ahe ofrisageno asimu erino
manigahie. **10** Nagra ama rankumamofona mago knare zana
huontegahuanki, hazenke'za eri'na agritera egahue hu'na nagesa
antahi'noe. Ama rankumara Babiloni kini ne'mofo azampi
erintesanugeno, teve taginteno eri haviza hugahie huno Ra
Anumzamo'a huama hu'ne. **11** Hagi Juda kini ne'mofo nagara,
Ra Anumzamo'a amanage hie hunka zamasamio hu'ne. **12**
Deviti naga'mota Ra Anumzamo'a amanage hianki antahiho,
maka nanterana vahe knazama keagafima refko'ma hanazana
fatgo huta refko hiho. Hagi mago vahe'mo'ma mago vahe'ma
kna nemino, ke'onke zama'ama musufama eri'nesanigeta, ana
musufa vahe'mofo kaziga anteta agura ovaziho. Hagi ana'ma
osanageno'a, narimpa ahe'zamo'a tevemo hiaza huno rukru
hina mago vahe'mo'a rusura osugahie. Na'ankure tamagrama
hu'naza kefo avu'ava zamo hanige'na anara hugahue. **13** Hagi
amama havege'ma hu'nea agonafima nemanita, kefenkamuteta
agupofima negeta, iza amuhara hu'nesia vahemo hara eme
hurantegahiema huta nehaza vahe'mota antahiho. Nagra hara
huramantegahue. **14** Hagi Ra Anumzamo'a huno, Tamagrama
hu'naza kefo tamavu tamava zantera, Nagra nona hu'na
knazana tamigahue. Ana nehu'na zafaraminte teve tagintesugeno
teno nevuno, maka zantamima kuma tva'onte'ma megagi'nea
zantaminena tevereno erihana hugahie.

22 Hagi Ra Anumzamo'a amanage huno hu'ne. Kagra Jeremaiaga Juda kini ne'mofo nonte uraminka amanage hunka nanekea ome zamasamio. 2 Juda kini ne'ma Deviti kini trate'ma mani'nana ne'mokane, eri'za vahe kamo'zane, ama kuma'mofo kafaramimpinti'ma efresaza vahe'motanena tamagesa ante'neta Ra Anumzamofo nenekea antahaho. 3 Hagi Ra Anumzamo'a huno, Fatgo avu'avaza huta refkoma hanazana, vahe'mo'zama zamazeri havizama nehu'za ke'onke'za zamima musufama erisageta, zamazeri havizama hanaza vahetega anteta zamaza hih. Ana nehuta ru vahe'ma tamagranema enemaniza vahe'ene, megusa mofavre naga'ene, kento a'nane naga'enena zamazeri havizana huta hara reozmanteho. Ana nehuta ke'zami omane vahera zamaheta ama kumapina korana eri tagi otreho. 4 Hagi tamagrama ama nanekema antahita amage'ma antesageno'a, kini ne'ma nemania nomofo kafaramimpinti Deviti kini trate'ma kinima emanisaza vahe'mo'za karisine hosi afumofo agumpi mani'ne'za enefresage'za, kini ne'mofo eri'za vahemo'zane veamo'zanena ana kafaramimpinti efregahaze. 5 Hianagi tamagra Nagri kema antahita amage'ma ontesarazana, Nagra'a nagifi huvempa huankino ama nomo'a havizantfa hanigeno anampina mago zana omanegahie huno Ra Anumzamo'a hu'ne. 6 Hagi Juda kini ne'mo'ma nemania kumakura amanage huno Ra Anumzamo'a hu'ne. Kagra nagri navurera knare'zantfama hu'nea Gileati mopagna nehunka, Lebanoni mopafima me'nea za'za agonagna hu'nane. Hianagi menina kazeri haviza hanugenka, ka'ma kokamo'ma hiaza nehunka, havizama hu'nea kumapima vahe'ma omaniaza hugahane. 7 Nagra tamagri ha' vahera huzmantenuge'za ha'ma hu'zantamine erine'za e'za knare'nare sida zafaraminteti'ma noma ki'naza zafaramina eme

tagana vazi'za teve hanavazi'za kregahaze. **8** Hagi ana'ma hutesage'za henka kokankoka moparegati vahe'mo'zama ama rankuma tavaonte'ma enevanu'za, amanage hu'za zamagra'a zamagenoka hugahaze. Nahigeno Ra Anumzamo'a agima vu'nea Jerusalemi rankumara amanahu avu'ava zana trohunte hu'za hugahaze. **9** Ana ke'zamirera zamagra'a kenona amanage hu'za hugahaze. E'ina'ma hu'neana, na'ankure Ra Anumzana zamagra'a Anumzanema huhagerafi huvempa kema hu'naza nanekema zamefi hunemi'za, havi anumzaraminte kepri hu'za mono'ma nehu'za eri'zama eri zamante'naza zanku anara hu'ne hu'za hugahaze. **10** Hagi kini ne' Josaia'ma fria zankura zavira neteta tamasunkura osuta, agri nemofo kini ne' Jehoahasinku tamasunkura nehuta zavirateho. Na'ankure ha' vahe'mo'za eme avre'za ru moparega ome kina huntesageno, anantega umani'neno mopa'a eme onketfa hugahie. **11** Hagi Josaia nemofo Jehoahasima nefa noma erino Juda kinima maninege'za avre'za kinama ome hunte'naza nekura Ra Anumzamo'a huno, ete ama kumatera omegahie hu'ne. **12** Anama avre'za vu'za ome kinama hunte'naza moparega umani'neno frigahiankino, ama mopa ete mago'enena eme onkegahie. **13** Hagi Ra Anumzamo'a huno, Kini ne' Jehoiakimi'a ra knazampi ufregahianki kva hino. Na'ankure agra fatgo osu avu'ava huno tva'oma'are'ma nemaniza vahera hige'za noma'ane noma'amofo agofetu'ma me'nea nonema ki'naza vahera, mizana ozami'ne. **14** Hagi ana kini nemo'a huno, nagra noni'a ra nonkrefa kite'na nomofo agofetu'ma me'nea nompina ranra zante ome hunaraginte eme hunaraginte nehu'na, zaho'ma eri kana rama'a hagenente'na, sida zafareti nomofo agu'afina ahegagintegahue. Ana hute'na koranke pentireti eri masave hu'na frentesugenohentofaza

hugahie huno nehie. **15** Hagi kagrama antahinana mago'a
vahe'ma zamagatere'na rama'a sida zafareti'ma noma ki'noa
zamo hige'na kinia mani'noe hunka nehampi? Hagi negafa
Josaia'ma ne'zane tinema neneno, fatgo avu'ava zama nehuno,
fatgoma huno vahe'ma refkoma hiazamo higeno knare'ma huno
noman'i'zama mani'neana kagra antahi'nampi? **16** Hagi Josaia'a
zamunte omane vahe'ene ke'onke zanku'ma atupa'ma hu'naza
vahe'enena zamagri kaziga anteno zamaza hu'ne. Ana'ma
hiazamo higeno maka'zama hiazamo'a knare zanke hu'ne. Ra
Anumzamo'a huno, Nagri'ma nageno antahino'ma hu'nesania
vahe'mo'a e'inahu avu'avaza hugahie huno hu'ne. **17** Hianagi
kagra maka zana kavureti keganunu nehunka fatgo osu kanku
hakenka fenozana eri avi'netane. Ke'zami omane vahera zamahe
nefrinka, zamunte omane vahera zamazeri haviza nehunka,
zago'zamia hanarenka e'nerine. **18** E'ina hu'negu Juda kini ne'
Josaia nemofo Jehoiakiminkura Ra Anumzamo'a amanage huno
hu'ne. Jehoiakimi'ma frisige'za vahe'mo'za agrikura zamasunku
hu'za zavira nete'za, nerafunkura tasunku hune nosanageno,
nerasaronkura tasunku hune hu'za osugahaze. Ana nehanage'za
vahemo'zanena zavira atenente'za kvatimofonkura tasunku
huntone nosanageno, hankave kini nekura tasunku huntone
hu'za nosu'za, agrikura zavira otegahaze. **19** Hagi agri'ma
asente'sazana tonki afu'ma frige'za asente'naku'ma avazu hu'za
megia nevazankna huza Jerusalemi kumapintira avazuvaze hu'za
kuma kafante vute'za megi'a ome matevu atregahaze. **20** Hagi Ra
Anumzamo'a huno, Jerusalemi kumapima nemaniza vahe'mota,
ana maka vahe'ma zamagranema nanekema huhagerafi'naza
vahera hago haviza huvagarazanki zamagrikura Lebanoni mopafi
marerita zavira ome neteta, Abarimi mopafina ranke huta zavi

krafa ome nehuta Basani mopafinena zavirateta vano hiho. **21**
Hagi kagrama maka zampima knare'ma hunka mani'nana knafi
ko nagra koro kea kasami'noane. Hianagi kagra hunka, ana
nanekea ontahigahue hunka hu'nane. E'inahu kema hanana
ko'ma osi'ma mani'nantegati'ma hunka'ma e'nana naneke ana
nanekege menina nehane. Ana nehunka nagri kea antahinka
amagera nontane. **22** Hagi kagri ha' vahe'mo'za zaho'mo hiaza
hu'za e'za kva vaheka'a eme zamavaresga hu'za vugahaze.
Kagrama eri hagerafinka'ma nemanina vahera zamavare'za
maka kina ome huzamantegahaze. Ana hanigenka kagrama
hu'nana havi kavukva zankura krimpamo'a kna nehina kagazegu
hugahane. **23** Hagi Lebanonima nemaniza vahe'mota, namamo
sida zafafi noma ki'no nemaniaza huta, sida zafareti nona kita
mani'nazanagi, mofavre ante'naku nehia amo'ma atagu nehiaza
huta kofta'a knafi tusi tamatagu nehuta kragira rugahaze. **24**
Hagi Ra Anumzamo'a huno, Nagra Ra Anumzama kasefa hu'na
mani'noa Anumzamo'na huankinka, Juda kini ne' Jehoiakimi
nemofo Jekoniaga tamaga kaziga nazampi nentanua rinigna
kagra hu'nananagi, kagrira ana rinima eri zafitreankna hugahue.
25 Ana hute'na kahefrinaku'ma nehazagenka koro'ma hune
zamantana vahera, Babiloni kini ne' Nebukatnesane Babiloni
sondia vahe'mokizami zamazampi kavrentegahue. **26** Hagi
kagri'ene negrerenena tanazerite'na matevu atresugeta ru
moparega vugaha'e. Ana mopa tanagri mopa omame'neanagi
anantega umanineta frigaha'e. **27** Ama mopafima e'zankura
tusiza huno tanavesigahie. Hianagi ometfa hugaha'e. **28** Hagi
nahigeno Jehoiakimi'a tako'ma huno haviza hu'nea mopa
kavogna nehuno, vahe'mo'za avesi nontaza mopa kavognara
hu'ne? Nahaniige'za agri'ene mofavre naga'anena zamavare'za

vu'za ome zamasgafe tresage'za ke'za antahi'za osu'nesaza
mopafina kina hugahaze? 29 Hagi mopamoka, ama mopamoka,
ama Israeli mopamoka Ra Anumzamofo nanekea antahio. 30
Hagi Ra Anumzamo'a huno, Jehoiakimi agigenkema krentesana
avontafepima krentesanana, agrikura mofavre onte'nea nere
hunka krento. Na'ankure ne' mofavre naga'afintira magomo'a
agri kumara erino Deviti kini tratera kinia omanigahie. Ana
nehina henka'anena kinia eforera hu'za Juda vahetera kegava
osugahaze.

23 Hagi Ra Anumzamo'a huno, Nagri vahetema kegavama
nehaza kva vahe'mota, Nagri vahera zamazeri haviza
nehzankita, hago hazenkefi mani'naze. Sipisipima kegavama
nehaza vahe'mo'za sipisipi naga'ma repanani hazage'za
hazagre'za frazankna tamagra nehaze. 2 E'ina hu'negu Ra
Anumzana Israeli vahemota Anumzamo'a ana sipisipi kva
vahe'motagura amanage huno nehie. Tamagra Nagri sipisipi
nagara repanani nehuta, kantera zamavare fatgo huta ovu'haze.
Ana nehuta kegava hu so'e huozamante'naze. Tamagrama
e'inahu havi avu'ava zama hu'haza agafare Nagra nona
hu'na tamazeri haviza hugahue huno hu'ne. 3 Hagi ana'ma
hute'ha Nagra vaheni'ama zamazeri panani huge'zama ru
moparegama umani emanima hu'nazaregatira, osi'a naga'ma
ofri'ma mani'nazama'a ete zamavare tru hugahue. Ana hanuge'za
ete mopa zamire e'za emanine'za mofavrea kasezmante'za
hakare hu'za ome ra hugahaze. 4 Hagi Nagra kasefa kva vahe
zamazeri otisuga'za kegava huzmantegahaze. Ana hanuge'za
mago'enena korora huge zmagogogura osugahaze. Anampintira
magomo'e huno fananea osugahie huno Ra Anumzamo'a
hu'ne. 5 Hagi Ra Anumzamo'a huno, magokna ne-eanki'na

Nagra Deviti nagapintira mago fatgo avu'ava ene kini ne' azeri otigahue. Ana hanugen agra kinia mani'neno, knare antahi zanteti'ene fatgo avu'ava zanteti'ene fatgoma huno refkoma hu avu'avazante'ene huno agrama kegavama hania mopafi vahera kegava huzmantegahie. 6 Hagi agrama kinima manino kegavama hania knafina, Juda vahe'ene Israeli vahe'mo'zanena mago zankura zamagesa ontahi knare hu'za zamagu'vazi'za manigahaze. Ana hanage'za vahe'mo'za ana ne'mofo agima ahesazana, Ra Anumzamo'a tagri fatgo avu'ava zamofo agafa'a mani'ne hu'za agia ahegahaze. 7 E'ina hu'negu Ra Anumzamo'a huno, mago kna ne-eankita tamagra amanage huta osugahaze. Tamagerfa huno Ra Anumzana ofri mani'nea Anumzankino, Israeli vahera tavre atiramigeta Isipi mopaintira e'none huta osugahaze. 8 Hianagi zamagra amanage hu'za hugahaze. Ofri kasefa huno mani'nea Ra Anumzamo'a noti kaziga mopaintira Israeli vahera zamavare atiramino ne-eno, ru moparegama zamavare trege'zama kinama ome huterema hu'naregatira ete zamavare atru hugahie. Ana hanige'za ete mopazamifi emanigahaze hu'za hugahaze. 9 Hagi Ra Anumzamo'ma ruotage'ma hu'nea naneke'ama kasnampa vahe'ma ome zamasamio huno'ma nenasamigeno'a, tumo'nimo'a nata negrigeno zaferinani'a omne amne hu'ne. Ana nehigeno aka ti ne'neno rama'a waini ti ne'nea vahe'mo, negi nagi nehuno traka huno umasete emasete hiaza hu'noe. 10 Hagi rumofo a'ene rumofo venema monko'zama hu avu'ava'zamo'a mopafina avitegeno, amama mani'naza mopamo'a sifnafi mani'neno kragi'herie. Ana higeno mopamo'a hagege nehigeno, ka'ma kokampima me'nea trazamo'enena hagege hu'ne. Na'ankure kasnampa vahe'mo'za maka'zama nehaza zamo'a kumi zanke nehu'za, zamagrama eriga eri'zana

hankaveti'za e'ori'naze. **11** Hagi mago'ene Ra Anumzamo'a huno,
Kasnampa vahemo'zane pristi vahemo'zanena Nagri navu'nav
zana amagera nontaze. Ana nehu'za Nagri mono nompinena havi
avu'ava zana nehazage'na nezamagoe. **12** E'ina hu'negu kama
vanaza kamo'a kriri hatu hu'nea kampi vazankna nehanage'na,
zamaretufe atresuge'za ome traka hu'za masegahaze. Na'ankure
zamagrama hu'naza avu'ava zante'ma nonama hu'na zamazeri
haviza hanua kafumo'a ne-eanki'na, knaza zamigahue huno
Ra Anumzamo'a hu'ne. **13** Hagi ana nehazage'za Samelia
kumate'ma nemaniza kasnampa vahe'mo'zama mago kasrino
havizama hu'nea avu'ava zama hu'naza zama ke'noana, zamagra
Bali havi anumzamofo agifi kasnampa kea nehu'za, Israeli
vaheni'a zamavare'za havi kante vu'naze. **14** Hianagi Jerusalemi
kumapima nemaniza kasnampa vahe'mo'za zamagranena,
havizama hu'nea zamavu'zmava zama nehazage'na Nagrama
zamage'noana, ru vahe a'nene monko avu'avaza nehu'za,
maka zupa havige kege hu'naze. Ana nehu'za havi avu'ava
zama nehaza vahera hu izo huzmantage'za mago'ene havi
avu'ava zana huvava nehu'za atre'za rukrahera hu'za ome'naze.
Nagrama maka vahe'ma zamagoana Sodomu kumate vahe
kna hu'za haviza nehazage'za, Jerusalemi kumapi vahe'mo'za
Gomora kumate vahe kna hu'za haviza hu'naze. **15** E'ina hu'negu
Monafi sondia vahe'mofo Ra Anumzamo'a kasnampa vahekura
amanage hu'ne, Nagra aka traza nezamina avuataga zama
me'nea tinena zamisuge'za negahaze. Na'ankure Jerusalemi
kumapima nemaniza kasnampa vahepinti havi avu'ava zamo'a
agafa huteno ama mopafina vuno eno hu'ne. **16** Hagi Monafi
sondia vahe'mofo hankavenentake Ra Anumzamo'a huno,
Kasnampa vahe'mo'zama kasnampa kema nehaza nanekea

ontahiho. Na'ankure tamagrikura knare huta manigahaze hu'za
havi kasnampa nanekea nehaze. Ana nanekema nehzana Ra
Anumzamo'na Nagra osu'noa naneke nehzanki, zamagra'a
antahintahifinti havige huza ava'nagna zana ke'none huza
nehaze. **17** Hagi ama ana kasnampa vahe'mo'za Nagri
nanekema amage'ma nontaza vahekura hu'za, Anumzamofo
rimpa fru zamo'a tamagrane mesie nehu'za, kema nontahi'za
zamagra'a zamavesite'ma vanoma nehaza vahekura hu'za,
hazenke zamo'a tamagratera omegahie hu'za nehaze. **18** Hianagi
nagra Jeremaia'na hu'na, ana kasnampa vahepintira izi Ra
Anumzamofo atrufina Agri avuga mani'neno, agra avufintira
Anumzamofona negeno nanekema hiana antahi'ne? Ana
hu'neankino Agrama hia nenekea mago'mo'e huno agesafintira
ontahi'ne. **19** Hagi keho! Ra Anumzamofo arimpahe zamo'a,
ununkomo'ma nehiaza huno ne-e. Ana nehiankino Agri rimpa
ahe'zamo'a kagikagi zahomo nehiaza huno ruherafi ramino
eno, havi avu'ava zama nehaza vahemokizmi zamasenia eme
reentrako hugahie. **20** Hagi Ra Anumzamofo arimpa ahe'zamo'a
vagaore mevava huno nevanigeno, nazano hugahuema huno
antahi'nesia zana ana maka huvagaregahie. Henka'a ana maka
zama ome vagaresania zupa, tamagra ama ana zankura antahi
ama' hugahaze. **21** Ra Anumzamo'a huno, Nagra ana kasnampa
vahera huozamante'noe. Hianagi zamagra'a zamagesafinti
kasnampa kea hu'za nevu'za, Nagra nanekea ozamasami
noanagi, zamagra zamagesafinti havi kasnampa kea ome
huama nehaze. **22** Hianagi Nagri atrufima zamagra mani'ne'za
nagri nanekema antahi'naresina, Nagri nanekea huama hu'za
vaheni'a zamasamizage'za nentahi'za, kefo avu'azama nehaza
kante'ma nevaza zana atre'za rukrahe hu'za ne-eza, havi

avu'ava zampintira atre'za azasine. **23** Ra Anumzamo'a huno, Tamagrama antahi'zana, amama mani'nona mopa'afinke Anumzana Agra mani'neno, afete ru moparega Anumzana omani'ne huta nehazafi? **24** Hagi Ra Anumzamo'a huno, tamagrama antahi'zana mago vahemo'ma fra'ma ki'nesaniana Nagrikura onkegahie huta nehazo? Ra Anumzamo'a huno, monafine mopafinema Nagrama mani avi'mate'noana tamagra ontahi'nazafi? **25** Hagi Ra Anumzamo'a huno, ama ana kasnampa vahe'mo'zama Nagri nagifima havige kasnampa nanekema hu'nazana, nagra ko antahi'noe. Ana kasnampa nanekea amanage hu'naze. Nagra mago ava'na ke'noe, nagra mago ava'na ke'noe hu'za hu'naze. **26** Hagi ama ana kasnampa vahe'mo'zama zamagra'a zamagu'afinti'ma eri fore hu'zama havi kasnampa nanekema huama'ma hu'za nevaza zana, nazupa ome atregahaze. Zamagrira zamagu'amo rezmatga hige'za havi kasnampa naneke eri fore hu'za huama nehaze. **27** Hagi zamagra havige ava'nama ke'naza ava'na kea huge antahige nehu'za, zamagrama antahi'zana ana nehanunke'za Anumzamofona antahi omisaze hu'za hu'naze. Zamagehe'za e'inahu avu'avaza hu'za Nagrira antahi onami'za Bali havi anumzante monora hu'naze. **28** Hagi mago kasnampa ne'mo'ma ava'nama ke'nesaniana atrenkeno agra ana ava'na huama hino. Hagi mago vahe'mo'ma Nagritegati'ma nanekema eri'nesania vahe'mo'a Nagrama asami'nesanua nanekea hu fatgo huno vahera zamasamino. Nagri nanekemo'a witimofo raga'agna hu'ne. Hianagi ana kasnampa vahe'mokizimi nanekemo'a witimofo akrua gna hu'ne. **29** Ra Anumzamo'a huno, Nagri nanekemo'a tevegna hune'no, hamankna hu'neankino havea rufrageno rako huno rufuzafu petregahie. **30** Hagi Ra Anumzamo'a huno, Antahiho!

Nagrama mago vahe'ma asami'nenua nanekema musufama erino, Anumzamo nesami'nea naneke huno'ma huama'ma hania kasnampa vahera ha'rentegahue. **31** Ra Anumzamo'a huno, zamagra'a zamagiteti havi kasnampa nanekema nehu'za, Anumzamo tamia naneke nehunema hu'za nehaza kasnampa vahera tamagerfa hu'na ha' rezamantegahue. **32** Hagi Ra Anumzamo'a huno, Ava'nama ke'naza zanku'ma havi kasnampa kema nehaza vahera ha' rezamantegahue. Zamagra havige hu'za vaheni'a rezamatga hu'za zamavare'za havi kante nevaze. Nagra ana vahera huhamparite'na huzamantoge'za ome'naze. Ana hu'neankino zamagrama haza zamo'a ama vahera zamaza osufa nehie, huno Ra Anumzamo'a hu'ne. **33** Hagi Ra Anumzamo'a Jeremaianagura huno, Mago vahemo'o, mago kasnampa nemo'o, mago pristi vahemo'o kagrite'ma eno, henkama fore'ma hania zankura Ra Anumzamo'a mago'a kasnampa kea kasaminefi tasamioma hanagenka, mago kasnampa kea omneneanki, Ra Anumzamo'a tamatregahie hunka zamasamio. **34** Hagi mago vahe'mo'o, mago kasnampa vahe'mo'o mago pristi vahemo'ma havigema huno ama kasnampa kea Ra Anumzamo nasamige'na huama nehuema huno hania vahera, Nagra ana vahe'ene noma'afima nemaniza naga'enena ana maka ranknaza zamigahue. **35** Hagi nagra Jeremaia'nama tamasami'nuana, tamafuhe'zane tamagri tavaonte'ma nemaniza vahe'enena amanage huta ontahige antahige hiho. Na'ane huno Ra Anumzamo'a kenona nehie nehuta, na'ane huno nanekea nehie? huta hiho. **36** Hianagi Ra Anumzamofo kasnampa kemo'a amanahu hune huta mago'enena huamara osiho. Na'ankure tamagra'a naneke huama nehuta, tagri Anumzama Monafi sondia vahe'mofo Anumzama kasefa'ma huno mani'nea Ra

Anumzamofo nanekea eri akrahe krahu nehaze. 37 Hagi mago
vahemo'ma ana kema hania kasnampa vahe'ma antahigenakura
amanage huno antahigeno. Na'ane huno Ra Anumzamo'a
kenona huneganteno, na'ane huno nanekea kasami'ne? 38
Hianagi tamagra huta ama'i Ra Anumzamofo kasnampa naneke
huta nehazanagi, Nagra e'inahu nanekea osiho hu'na i'o
huramante'noe. Hianagi Nagri kea eri netreta, ete ama'i Ra
Anumzamofo kasnampa naneke huta nehaze. 39 E'ina hu'negu
Nagra naganekani nezami'na, Nagri tava'ontetira tamaretufe
atresugeta, tamafahe'ine tamagri'enema tami'noa rankumara
atreta vugahaze. 40 Hagi Nagra tamatrenugeta tamagaze zampi
mani vava huta nevuta, havi tamagia erita vuvava nehuta
anazankura tamagera okanigahaze.

24 Hagi Babiloni kini ne' Nebukatnesama, Juda kini ne'
Jehoiakimi nemofo Jekonaia'ma eme nevreno, eri'za vahe'ane
keonke zama zamazanteti'ma tro'ma nehaza vahe'ene ke'onke
zamofo amema'ama negraza vahe'ene eme zamavareno
kina ome huzmantetegen, Ra Anumzamo'ma ava'nagna
zampi naveri'ma hu'neana, fiki zafamofo raga tare ekaeka
kupi erintete'za Ra Anumzamofo mono no kafante antageno
me'nea naveri hu'ne. 2 Hagi mago ekaeka kupima ke'noana,
knare huno afure'nea fiki rgarami megeno, mago ekaeka
kupima koana, haviza huno kasri'nea fiki rgarami vahemo
negara osu'negena ke'noe. 3 Anante Ra Anumzamo'a
nantahigeno, Jeremaiaga na'a kane? huno hige'na nagra
hu'na, knare fiki rgaramima koana, knare zantfa higeno,
havizama hu'nea fiki rgaramima koana havizantfa higeno
vahe'mo'a negara osu'nege'na ke'noe hugeno, 4 anante Ra
Anumzamo'a amanage huno nasami'ne. 5 Nagra Ra Anumzana

Israeli vahe'mota Anumzamo'nama nehuana, Nagrama ama
mopafinti'ma zamavare atroge'za vu'za Babiloni mopafima kinama
ome hu'naza Juda vahe'mo'za, nagri navurera e'i knare'ma
hu'nea fiki rgaraminkna hu'naze. 6 E'ina hu'neanki'na Nagra
navu ante'na nezamage'ha knare hu'na kegava huzmantegahue.
Ana nehu'na ete zamavare'na mopazamifi e'na, eme zamazeri
hankaveneti'na zamazeri fenkamia otegahue. Avimzama mopafi
hankrazankna hu'na mopafi zamazeri nehankre'na mopafintira
zamazeri vati otregahue. 7 Hagi Nagra zamagu'zamagesa
zamazeri otisuge'za Nagrikura Ra Anumza mani'ne hu'za ke'za
antahi'za hugahaze. Ana nehanage'na Nagra zamagri Anumza
mani'nena, zamagra Nagri vahe manigahaze. Na'ankure zamagra
maka zamagu'areti hu'za Nagrite ete rukrahe hu'za egahaze. 8
Hianagi Ra Anumzamo'a huno, Havizama huno vahe'mo'ma
negama osu'nea fiki ragamo'ma hiaza hu'na, Juda kini ne'
Zedekaiane eri'za vahe'ane, Jerusalemi kumapima nemaniza
vahe'ma ofri osi'a naga'ma ana mopafi mani'nesazo, vu'za Isipi
mopafima umani'nesaza naga'enena namefi huzamigahue. 9
Hagi Nagrama zamazeri havizantfama hanua zana maka ama
mopafi vahe'mo'zama negenu'za, tusi zamagogogu hugahaze.
Hagi zamavare atre sanuge'zama umanisaza mopafi vahe'mo'za
zamage fenkami netre'za, kiza zokago ke huzamantegahaze.
Hagi ana vahe'mo'za vahe'ma huhavizama huzmante'nakura
Juda vahe'mo'zama havizama hu'nazaza huta sifnafi maniho
hu'za huzmantegahaze. 10 Hagi Juda vahetera ha' vahe'ene
agatonto zane krine atrenugeno eme zamahe frigahie. Ana
hanige'za zamagehe'ine zamagri'enema zami'noa mopafintira
fanane hu'za omanigahaze.

25 Hagi Josaia nemofo Jehoiakimi'ma Juda vahe kinima manino egeno nampa 4ma hia kafufina, Nebukatnesa'a Babiloni vahe kinia ese kafu kinia mani'ne. E'i ana knafi Ra Anumzamo'a maka Juda vahekura ama nanekea Jeremaia'na nasami'ne. 2 Ana hige'na kasnampa ne' Jeremaiana maka Juda vahe'ene maka Jerusalemi kumapima nemaniza vahera zamasami'na, 3 Amoni nemofo Josaia'ma Juda vahe kinima manino egeno 13nima hia kafureti'ma, eno meni amare ehanatigeno'a ana makara 23'a kafu hu'ne. E'i ana kna'afina Ra Anumzamo'a nanekea nasamige'na tamasami vava hu'na e'noanagi, tamagra ana nanekea ontahi'naze. 4 Ra Anumzamo'a eri'za vahe'a maka kasnampa vahe'aramina huzmantenge'za knane knanena e'za nanekea eme tamasami'naze. Hianagi antahi amne nehuta, ana nanekerera tamagesa anteta ontahi'naze. 5 Hagi ana kasnampa vahe'mo'za hu'za, tamagra havi kante'ma nevaza zane, havi avu'ava zama nehaza zana atreho. Tamagra e'ina'ma hanuta, Ra Anumzamo'ma tamafah'e'ine tamagri'enema tami'nea mopafina mani vava huta vugahaze hu'za tamasami'naze. 6 Hagi tamagra ru anumzaramintera eri'zama'a eri nenteta monora huonteho. Ana nehuta ana anumzantamimofo amema'a tamazantetira avako huta tro hunteta nazeri narimpa oheho. Hagi tamagra anama osnage'na tamazeri havizana osugahue. 7 Hianagi Nagri nanekea ontahi'naze. E'ina nehuta tamazanteti'ma havi anumza ramimofo amema'ama tro'ma haza zamo, Nagrira nazeri narimpa neheta, hazenke zana avreta tamagra'a tamavatera e'naze. 8 Hagi Monafi sondia vahe'mofo Ra Anumzamo'a huno, Tamagra Nagri nanekea antahita amagera onte'nazagu, 9 antahihoi! Nagra noti kazigama me'nea mopafima nemaniza vahe'ene eri'za vaheni'a Babiloni kini ne' Nebukatnesanena huzmantenuge'za

e'za maka amama mani'naza mopamofo agu'afima nemaniza
vahera hara huneramante'za, tamagri tavaonte'ma nemaniza
vahe'enena hara huzamantegahaze. Ana hanage'na ama mopa
eri havizantfa hanuge'za vahe'mo'za nege'za antari nehu'za
kiza zokago ke hugahaze. Ana hanigeno mopamo'a haviza
huno mevava huno vugahie. **10** Ana nehu'na musenkasema
nehaza agasasazane a'ma ovasimi avasimima nehutama nehaza
krafagene witima refuzafupe havemofo ageru'ene lampe tavimofo
masanena tamagripintira eri atrenugen omanegahie. **11** Ana
hina ama mopafina mago vahera omanitfa hanigeno kama koka
megahie. Hagi Israeli vahe'ene zamagri tavaonte'ma nemaniza
vahemo'zanena 70'a kafufi Babiloni kini nemofo eri'za vahera
umanigahaze. **12** Hagi anante 70'a kfuma evutesige'na Babiloni
kini ne'ene kegavama hu'nea mopafi vahe'enena kumi'ma hunaza
zantera Nagra kna zami'na zamazeri haviza nehu'na mopazmia
eri haviza hanugen haviza huvava huno meno vugahie. **13** Hagi
maka ama mopafima me'nea kumatamimpima fore huterema
hania zanku'ma, Jeremaia'ma maka kasnampa kema asamugen
ama avontafepima krente'nea zantamimo'a maka fore hugahie.
14 Hagi Babiloni vahe'mo'zama hu'naza zamavu'zmava zantera
Nagra nona huzamantegahue. Ana hanuge'za ru moparegati
hankave kini vahe'mo'zane ru moparegati vahe'mo'zanena
e'za Babiloni vahera eme zamavare'za kina ome huzamante
nesage'za kazokazo eri'za erigahaze. **15** Hagi Ra Anumzana
Israeli vahe Anumzamo'a amanage huno nasami'ne. Narimpa
ahe'zamofo waini timoma avite'nea kapua nazampintira erinka,
hugante'nua mopafi vahete vuge'za maka ana mopafi vahe'mo'za
neho. **16** Hagi ana waini tima ne'za neginajima nehu'za
traka hu'za umasete emasete hugahaze. Na'ankure Nagra ha'

vahe'zami huzmantenuge'za e'za eme hara huzmantesage'za
anara hugahaze. **17** Hagi anagema hutege'na ana kapua Ra
Anumzamofo azampintira erite'na, maka Ra Anumzamo'ma ome
zamio huno'ma hunantea moparamimpi vahete vu'na ana waini
tina ome zamuge'za ana maka vahe'mo'za ne'naze. **18** Hagi
ese'ma agafa hu'noana Jerusalemi kuma'ene Juda mopafima
me'nea kumatamimpi vu'na kini vahe'ene eri'za vahe'zamine ome
zamuge'za ana kapufinti waini tina ne'naze. Ana'ma hazageno'a
kumazmimo'a havizantfa huno me'nege'za, vahe'mo'za antri
nehu'za kiza zokago ke hunezmante'za, vahe'ma sifnama
huzmante'nakura e'ima hazaza huta sifnafi maniho hu'za nehaze.
E'i ana zamo'a meninena meno eno ama knarera ehanati'ne. **19**
Hagi anantetira Isipi vu'na, kini ne' Ferone mika eri'za vahe'ane,
kamani eri'za vahe'ene mika vahe'enena ome zamuge'za ana
waini tina ne'naze. **20** Ana nehu'na ru moparega vahe'ma Isipi
mopafima enemaniza vahe'enena zamuge'za ne'naze. Anantetira
maka Uzi mopafima nemaniza kini vahe ome zamuge'za ne'naze.
Hagi Filistia vahe kinia 4'a kumate'ma mani'nazana, Askelonima,
Gazama, Ekrone osi'a naga'ma ofri'ma mani'naza Asdoti
naga'mokizimi kini vahe'ene ome zamuge'za ana waini tina
ne'naze. **21** Hagi Idomu vahe'ene Moapu vahe'ene Amoni
vahe'enena ana waini tina ome zamuge'za nenage'na, **22** maka
Tairi kini vahe'ene maka Saidoni kini vahe'ene hagerimofo
kantu kaziga ankenaregama nemaniza vahetaminena ome
zamuge'za nenage'na, **23** anantetira vu'na Dedani kini vahe'ene
Tema kini vahe'ene Buzi vahe'ene afete'ma umani emanima
hu'neza zamagi zamazokama neharaza vahe'mokizmi ome
zami'noe. **24** Hagi maka Arabia kini vahe'ene ru moparegati
vahe'ma hagege kokampima enemaniza vahe'mokizmi kini

vahe'enena ome zamuge'za nenazage'na, **25** anantetira maka Zimri kini vahe'ma Elamu kini vahe'ma, Midia kini vahe'ene ome nezami'na, **26** anantetira vu'na maka noti kaziga mopafima nemaniza kini vahera, afete mani'nazo tvaonte mani'nazo, maka zami vaganere'na, maka ama mopamofo agofetu'ma mani'naza kini vahera zami vagaregahue. Ana hutesanugen ome vagarettega Babiloni kini ne'mo ana waini tina negahie. **27** Hagi Jeremaiaga amanage hunka ome zamasamio. Monafi sondia vahe'mofo Ra Anumzana Israeli vahe Anumzamo'a huno, ama ana waini tina neta neginagi nehuta, amuranetita traka huta umase emase nehuta ete mago'enena oraotih. Na'ankure Nagra ha' vahera huzmanta'nena e'za, hara eme huramante'za tamazeri haviza hugahaze. **28** Hianagi ana waini tima zamagra kazampinti'ma eri'za onesagenka, kagra amanage hunka zamasamio. Monafi sondia vahe'mofo Ra Anumzamo'a huno, Otreta neho huno hu'ne hunka huo. **29** Hagi keho! Jerusalemi kumaku'ma hu'na Nagri nagima mesiema hu'na hu'noa kuma esera eri haviza hute'na, ana maka vahera zamazeri haviza hugahuanki tatresigeta amne manigahune huta tamagesa ontahihi. Nagra Ra Anumzana hankavenentake Anumzamo'na huanki'na, ha' vahe huzmantenuge'za ama mopafina vano nehu'za maka vahera hara huzamante'za vano hugahaze. **30** Hagi Jeremaiaga zamazeri havizama hanua kasnampa nanekea maka amanage hunka zamasamio. Ra Anumzamo'a ruotage'ma hu'nea kuma'afintira ranke huno mopa'amofona ke'za tinemisigeno ageru'amo'a ra agasasa rugahie. Grepri rgama zamagareti'ma regatati'ma nehu'za, kezama netizankna huno ranke huno ama mopafima nemaniza vahera zamazeri haviza hugahie. **31** Hagi ana kezankemo'a, mika mopa atuparega vuno eno

hanige'za antahigahaze. Na'ankure Ra Anumzamo'a miko ama
mopafi vahera keaga huzmanteno zamazeri haviza nehuno, kefo
avu'ava'ma nehaza vahera tamatresige'za bainati kazinkonteti
zamahe frigahaze. Ra Anumzamo ama ana nanekea hu'ne. **32**
Hagi Monafi sondia vahe'mofo Ra Anumzamo'a huno, Antahiho,
ama ana knazamo'a mago kaziga mopareti agafa huteno, miko
kokantega vuno eno huvagaregahie. Hagi ana nehiankino ama
mopamofo atumparegati mago ununko agafa huno eankna
nehie. **33** Hagi ana knafina Ra Anumzamo'ma zamahe frisia
vahe'mokizmi zamavufagamo'a ama mopamofo agofetura maka
kaziga amne zankna hugahie. Ana hina mago vahemo'e huno
ana vahekura zavira neteno erise ozamantegahie. Anama
frisaza vahe zamavufagamo'a kasrino rifagna hugahie. **34**
Hagi sipisipi afute kva vahe'mota tusi tamasunku nehuta
zavira ateho. Sipisipi afu nagamokizmi rankva vahe'mota
tamagri'ma tamahe nefrino tamare tufetresia knamo'a hago
eanki, kugusopafi maseta rukrahe krahe hiho. Na'ankure knare
mopa kavomo'ma evuramino rutako'ma nehiaza huta havizantfa
hugahaze. **35** Hagi sipisipi afute kva vahe'motane, sipisipi
afumokizmi rankva vahe'motanema tamagareta ome frakisaza
kuma'ene, fre'naza kantaminena omanetfa hugahie. **36** Hagi
sipisipi afute kva vahemo'zane, sipisipi afumokizmi rankva
vahemo'zanena rankrafa hu'za zavira netazanki antahiho.
Na'ankure sipisipi afu'mo'zama trazama nenaza mopa Ra
Anumzamo'a eri haviza nehige'za anara nehaze. **37** Hagi Ra
Anumzamofo arimpa ahe'zamo hanigeno, sipisipi afu'mo'zama
trazama nene'za mani fruma nehaza mopamo'a haviza huno
ka'ma koka megahie. **38** Hagi laionimo fraki kuma'a atreno
eaza huno Ra Anumzamo'a ne-e. Na'ankure Agra tusi arimpa

ahezmantero ha' vahe huzmantesanige'za e'za Juda vahera ha'
eme huzmantegahaze. Ana hanageno mopa zamimo'a haviza
huno ka'ma koka megahie.

26 Hagi Josaia nemofo Jehoiakimi'ma agafa huno Juda
vahe kinima nemanigeno'a, Ra Anumzamo'a amanage huno
Jeremaia'na nanekea nasami'ne, 2 Ra Anumzamo'a huno, kagra
vunka Nagri mono nomofo kuma amu'hompi ome ot'enka,
maka Juda mopafima me'nea kumapi vahe'mo'za ana mono
nompima mono'ma hunaku'ma esaza vahera, Nagrama huo
hu'nama kasamua nanekea magore hunka otrenka ana maka
zamasami vagaro. 3 Hagi kagrama ome huama'ma hanana
nanekema antahi so'ema nehu'za, kefo avu'ava zama nehaza
zama atre'za rukrahe hu'za esage'na, zamagrama havi avu'ava
zama nehaza zante'ma zamazeri haviza hugahuema hu'noa
knazana eri tregahue. 4 Hagi Ra Anumzamo'a amanage hie
hunka ome zamasamio. Nagri nanekema nontahita, Nagrama
tami'hoa kasegema amage'ma nonteta, 5 knane knanena
eri'za vaheni'a kasnampa vahera huzmantoge'za e'za nanekea
eme tamasami'naze. Hianagi tamagra ana nanekea antahita
amagera onte'naze. 6 Ana hu'nazagu ko'ma Sailo ran kuma'ma
eri havizama hu'noaza hu'ha, ama mono nona eri haviza
hanuge'za, maka ama mopafima me'nea kumapi vahe'mo'zama,
ha' vahe'zamima kema zamasunakura Jerusalemi kumamo'ma
havizama hiaza huta sifnafi maniho hu'za hugahaze. 7 Hagi
Jeremaia'ma ama ana kasnampa kema vuno Ra Anumzamofo
mono nompima ome huama'ma hige'za, pristi vahe'ene kasnampa
vahe'ene miko vahemo'zanena antahi'naze. 8 Hagi Jeremaia'a Ra
Anumzamo'ma asmi'nea nanekea ana maka huvagama retege'za,
anante pristi vahe'ene kasnampa vahe'ene miko vahe'mo'zanena

e'za Jeremaiana eme azeneri'za, kagra meni frigahane nehu'za,
9 kagra nahigenka Ra Anumzamofo agifi kasnampa kea hunka,
ama mono nomo'ene rankuma mo'enena Sailo kumamo'ma
havizama hu'neankna huke haviza hanakeno, anampina mago
vahera omanitfa hugahie hunka nehane? Anagema hutage'za Ra
Anumzamofo mono nompi Jeremaia'a mani'nege'za vahe'mo'za
e'za eme regagi'naze. 10 Hagi Juda kva vahe'mo'za kini ne'mofo
nompi mani'nazareti anankema nentahi'za Ra Anumzamofo
mono nontega mareri'za, mono nompima ufre kafanku'ma
Kasefa Kafanema nehaza kante umani'naze. 11 Anante pristi
vahemo'zane kasnampa vahemo'zanena, amanage hu'za Juda
kva vahe'ene mika vahe'enena zamasami'naze. Ama ne'mo'a
frigahie. Na'ankure tamagra'a tamagesafinti nentahizageno agra
kasnampa kea huno ama rankumamo'a haviza hugahie huno
hu'ne. 12 Anante Jeremaia'a otino Juda kva vahe'ene mika
vahe'enena amanage huno zamasami'ne. Ra Anumzamo'a
hunanteno ama mono nomo'ene ama rankumamo'enena haviza
hugaha'anki vunka kasnampa nanekea ome huama hunka
zamasamio hige'nama e'noa nanekea ana maka hago hugeta
antahi'naze. 13 Ana hu'negu kama nevaza kana atreta ne-
eta, tamavutamava zanena erinte fatgo nehuta, Ra Anumzana
tamagri Anumzamofo kea antahita amage anteho. E'ina'ma
hanageno'a Ra Anumzamo'a antahintahi'a rukrahe hanigeno,
tamazeri havizama hugahuema huno hu'nea knazana atresigeno
tamagritera omegahie. 14 Hagi menina tamagri tamazampi
nagra mani'noanki, nazano tamagrama kesageno fatgo huno
knare hugahiankima huta hanaza zana amne hunanteho. 15
Hianagi nagri'ma nahe frisuta tamagrama keta antahitama
hanazana, keni'a omane'nea ne' nahe frigahazankino nagri

kora kumi'mofo knazamo'a tamagrite'ene ama rankumate'ene
maka ama ana kumapima nemaniza vahete'ene megahie.
Na'ankure maka amama huama'ma hu'na tamasamua nanekea
tamage nanekegino, Ra Anumzamo hunantege'na eme huama
hugeta tamagra'a tamagesafinti antahi'naze. **16** Anante Juda
vahete kva vahe'mo'zane, maka vahe'mo'za amanage hu'za
pristi vahe'ene kasnampa vahetaminena zamasami'naze. Ama
ne'mo'a mago hazenkea osu'neankita ahe ofrigahaze. Na'ankure
Ra Anumzana tagri Anumzamofo agifi, agra nanekea eme huama
huno tasami'ne. **17** Hagi mago'a Juda mopafi ranra vahe'mo'za
anampinti oti'za, anama atruma hu'naza vahera amanage hu'za
zamasami'naze. **18** Hezekaia'ma Juda vahe kinima mani'nea
knafina, Moreseti kumateti kasnampa ne' Maika'a maka Juda
mopafima nemaniza vahera amanage huno kasnampa kea
zamasami'ne, Monafi sondia vahe'mofo Ra Anumzamo'a huno,
Saioni agonafima hozama antenaku mopama rekori atreaza
hanugeno Jerusalemi kumamo'a haviza hanigeno anampina
havemoke'za hihi huno megahie. Ana nehina menima Ra
Anumzamofo mono noma me'nea agonafina, zafa tanopamo
hagegahie huno hu'ne. **19** Hagi Maika'ma anagema hige'za,
Hezekaia'ene maka Juda vahe'mo'za Maikana ahe fri'nazafi? l'o
anara osu'naze. Hagi Hezekaia'a Anumzamofo koro huno agri
agorga nemanino, kasunku hunanto huno Anumzamofontega
nunamu higeno, Ra Anumzamo'a antahintahi'a rukrahe
huno knazanteti tamazeri haviza hugahuema huno hu'nea
zana atregeno ome'ne. E'ina hu'negu menima Jeremaiaama
hunte'naku'ma nehu'na avu'ava zamo'a, tagra'a tavate knazana
avreta eri agofetu nehune. **20** Hagi henka mago nera Kiriati-
jearimi kumateti ne' Semaia nemofo Uriakino, Jeremaia'ma

hiankna naneke Ra Anumzamofo agifi kasnampa ke huno,
Jerusalemi kuma'ene Juda mopamo'enena haviza hugahie huno
hu'ne. **21** Hagi kini ne' Jehoiakimi'ene maka hankave sondia
vahe'amo'zane maka eri'za vahe'amo'zanema ana nanekema
nentahizageno'a, kini ne' Jehoiakimi'a Uriana ahe frinaku hu'ne.
Hianagi Uria'a ana nanekema nentahino'a koro freno Isipi
moparega vu'ne. **22** Hianagi kini ne' Jehoiakimi'a Akbori nemofo
Elnatanine mago'a vahetamine huzamantege'za Isipi vu'za, **23**
Uriana ome avre'za kini ne' Jehoiakiminte azageno, bainati
kazinteti ahe friteno avufga'a erino zamagi omne vahe'ma asene
zamantaza matipi ome atre'ne. **24** Hianagi Jeremaiama ahe
frinaku'ma nehazageno'a, Safani nemofo Ahikami'a Jeremaiana
aza hige'za ahe ofri'naze.

27 Hagi Josaia nemofo Zedekaia'ma agafa huno Juda vahe
kinima nemanigeno'a, Ra Anumzamo Jeremaia'na nasami'nea
naneke. **2** Ra Anumzamo'a nasamino, Bulimakao afumofo
anankempima nentaza karenamare zafaka'a tro hutenga, ana
zantera bulimakao akruteti'ma tro hu'naza nofi anakitenka ana
zafa kagra knankempi eri rusi hunto hu'ne. **3** Hagi ana'ma hutenga
Idomu kinine Moapu kinine Amoni kinine Tairi kinine Saidoni kini
neteganena kea atrezmanteg'e'za, kema eri'za vu'za e'zama
nehaza vahe'ma, Juda kini ne' Zedekaia'ene keaga hunaku
Jerusalemi kumapima emani'naza vahe'mo'za ana naneke
eri'za viho. **4** Hagi ana eri'za vahera zamasaminka, Monafi sondia
vahe'mofo Ra Anumzana Israeli vahe Anumzamo'a amanage
hie hunka nezmasminka, huzmanteg'e'za kva vahezamia ome
zamasamiko. **5** Nagra hankavenentake nazanteti ama mopane,
vahe'ene maka zagagafanena tro hu'noankina, ana zantamina
Nagra'a navesite izano aminaku'ma hua vahera refko hu'na

nemue. **6** Hagi menina ana maka mopatamia eri'na Nagri eri'za ne' Babiloni kini ne' Nebukatnesa azampi antegahue. Ana nehu'na afi zagagafaraminena avre amisugeno agrake'za kegava huzamantegahie. **7** Hagi ana maka mopafi vahe'mo'za Babiloni kini ne' Nebukatnesa eri'za vahe manime nevanageno hanige'za, mofavre'amofo eri'za erime nevuza negeho eri'za vahe umanigahaze. Ana hume nevanageno vuno Babiloni kuma'ma haviza hugahiema hu'na huhampari'noa knare uhanatigahie. Ana hanige'za maka kokantegati hankave kini vahe'mo'za Babiloni vahera ha' eme huzamagatere'za kegava huzamante'nage'za kazokzo eri'za vahe manigahaze. **8** Hagi mago kumapi vahe'mo'o mago kinimo'ma kegavama hu'nesania mopafi vahe'mo'ma kini ne' Nebukatnesa'ma agarenamare zafama anankempima antenigeno agazonema huno agri agoragama omanisia vahera, Nagra Anumzamo'na azeri haviza hugahue. Hagi hapinti mago'a vahera zamahe nefrisageno, krimo mago'a zamahe nefrisigeno, ne'zanku hu'za mago'a frigahaze. Ana nehanage'na Nebukatnesa hunte'nugeno ana kumatamimpi vahera zamaheno erihana hugahie, huno Ra Anumzamo'a hu'ne. **9** E'na hu'negu havige kasnampa vahe kene, avune vahe'ene, ava'na kema huama nehaza vahe'ene, hankro'ene keagama nehaza vahe'ene, afa zama nehaza vahemo'zanema hu'za, Babiloni kini ne'mofo eri'za vahera omaniho hu'za hanaza nanekea ontahiko. **10** Hianagi zamagra havige kasnampage nehzankita ana nanekegu'ma tamage nehaze hutama hanage'na, Nagra tamavre atresanueta mopatamia atreta ru moparega umanineta anantega fri hana hugahaze. **11** Hagi karenamare zafama bulimakao afu'mofo anankempi ante'nageno kvama hunte'nea vahe'mofo amage anteno mopa rekoria kna hu'za, Babiloni

kini ne'mofo agoragama mani'saza vahera zamatresanuge'za
zamagra'a mopafi manine'za hoza ante'za nene'za manigahaze
huno Ra Anumzamo'a hu'ne. **12** Hagi Juda kini ne' Zedekaina
anahukna nanekea asami'na, tamagrama ofri knare'ma huta
manisunema hanuta atrenkeno Babiloni kini ne'mo'a karenamare
zafa tamanankempi rusi hanigeta, agri'ene agri vahe'mokizmi
eri'za vahe maniho. **13** Hianagi Babiloni kini ne'mofo eri'za
vahe'ma omani'naku'ma hania vahete'ma, Ra Anumzamo'ma
huno mago'a vahera hapinti nefrisage'za, mago'a krimo zamahe
nefrisigeno, mago'a ne'zanku hu'za frigahazema huno hu'nea
knazamo'a kagri'ene vaheka'anena eme tamahe frigahie. **14**
Ana hunegu havige kasnampa ke huza, Babiloni kini ne'mofo
eri'za vahera omanigahazema hu'za hanaza nanekea ontahiho.
Na'ankure zamagra havige kasnampa naneke neramasamize.
15 Hagi Ra Anumzamo'a huno, ana kasnampa vahera Nagra
huozamante'noanki, Nagri nagifi e'za havige kasnampa naneke
eme nehaze. Ana hu'neankita tamagra ana nanekema antahita
amage'ma antesage'na, ana kasnampa vahe'ene tamagri'enena
mopa tamifintira tamahe kasopetresanugeta ru moparega
umanineta fri vagaregahaze. **16** Hagi anagema hu'na kini ne'ma
asamite'na, anante Ra Anumzamo'a amanage hie hu'na pristi
vahe'ene maka vaheku'enena zamasami'noe. Ra Anumzamofo
mono nompinti feno zama eri'za Babilonima vu'naza zantamina
kofa'a knafi ete eri'za egahaze hu'za havige kasnampa nanekema
nehaza nanekea havige nehzanki ontahiho. **17** Tamagra ana
vahe'mokizmi nanekea ontahiho. Hagi Babiloni kini ne'mofo
eri'za vahe'ma manisuta, ofri knare huta manigahaze. Hianagi
tamagra ana kasnampa vahe'mokizmi nanekema antahisazana,
ama rankuma'mo'a havizantfa hugahie. **18** Hagi zamagra

tamage kasnampa vahe'ma mani'nesageno Ra Anumzamo'ma
keagama nezmasamisia vahe'ma mani'nesu'za, Monafi sondia
vahe'mofa Ra Anumzamofona nunamu hu'za antahigesageno,
Babiloni vahera zamatresige'za Ra Anumzamofo mono nompima
mago'ama me'nea zantamine, Juda kini ne'mofa nompima me'nea
zantamine, Jerusalemi kumapinema me'nea zantaminena eme
eri'za Babiloni moparera ovugahaze. **19** Hagi mono nompima
me'nea zantamina, bronsireti tro'ma hu'naza zafaramine,
bronsireti'ma ra zuompama tro'ma hu'naza zuompagu'ma
hagerinema hu'za nehaza zoumpane, agiamma hunte tra'ma
tro huntene'za keonke zama ante'neza eri kanti kamama
nehaza zane, mago'a zantamima Jerusalemi kumapinti'ma
e'ori'naza zantaminku, Monafi sondia vahe'mofa Ra Anumzamo'a
amanage hu'ne. **20** E'i ana marerisa zantamina, Babiloni kini ne'
Nebukatnesa'ma Juda kini ne' Jehoiakimi nemofo Jekoniane
Juda kva vahe'ene Jerusalemi kva vahe'enema zamavareno
Babilonima kina ome hunezmanteno atreno vu'nea zantamine.
21 Hagi Ra Anumzamofo mono nompima me'nea zantamine,
Juda kini ne'mofa nompima me'nea zantamine, Jerusalemi
kumapima me'nea zantaminku'enena, Monafi sondia vahe'mofa
Ra Anumzana Israeli vahe Anumzamo'a huno, **22** Ana maka
zantamina eme eri'za Babiloni kumatega umani'nesageno
vuno Nagrama ete antahi zamisua knama huhampri'noa knare
uhanatigahie huno Ra Anumzamo'a hu'ne. Anantetira ete
zamavare'na ama kumate eme zamante'nena makaza zamia ete
eri knare huzmantegahue.

28 Hagi Zedekaia'ma Juda vahe kinima manino egeno namba
4ma hia kafumofona 5fu ikantera, Gibioni kumateti kasnampa
ne' Azuri nemofo Hanania'a, ra mono nompi mani'nogeno eno,

pristi vahe zamavufine maka vahe zamavufinena amanage
eme hu'ne. 2 Monafi sondia vahe'mofo Ra Anumzana
Israeli vahe Anumzamo'a huno, Babiloni kini nemo'ma knama
neramia zamo'ma karenamare zafama bulimakao anankempima
antenegeno mopama rekoma nerianknama huno knama nehia
knazana emeri atregahue. 3 Babiloni kini ne' Nebukatnesa'ma
Nagri mono nomofo agu'afinti'ma maka zama erino Babiloni
kumate'ma vu'nea zantamina, tare kafumofo agu'afi ete maka
er'i'na ama kumatera egahue. 4 Ana nehu'na Jehoiakimi
nemofo Juda kini ne' Jekonaiane, maka Juda mopafi vahe'ma
vu'za Babiloni kumate'ma ome kinama hu'naza vahe'enena,
zamavare'na ama ana kumate egahue. Na'ankure Babiloni kini
nemo'ma karenamare zafama zamanankempima ante'neana
rufutagi netre'na zamavare'na egahue huno Ra Anumzamo'a
hu'ne. 5 Hagi anante pristi vahe'ene maka vahe'ma, Ra
Anumzamofo mono nompima oti'naza vahe zamavufi, kasnampa
ne' Jeremaia'a amanage huno havige kasnampa ne' Hananiana
kenona hunte'ne. 6 Tamage naneke Hananiaga hanankino, Ra
Anumzamo'a anama hana zantamina nehuno, maka kasnampa
nanekema hana nanekea Ra Anumzamo'a erinen ragaresanie.
Ana nehuno Ra Anumzamofo mono nompinti zantamima eri'za
Babiloni kumate'ma vu'naza zantamine, kinama ome hu'naza
vahe'enena kasnampa kema hana kante anteno, Ra Anumzamo'a
maka zamavareno Jerusalemi kumate'ma esanigu kesanune. 7
Hianagi nagra menima hanua nanekea kagra nentahige'za, maka
vahemo'zanena antahiho. 8 Hagi tagrama fore osu'nonke'zama
ko'ma mani'za e'naza kasnampa vahe'mo'za, rama'a kumapi
vahete'ene, kini vahe'mo'zama kegavama hu'naza mopafima
nemaniza vahete'ma ha'ma esania zanku'ene, zamagatonto

zanku'ene krima esania zanku'enena kasnampa kea huama
hu'naze. **9** Hianagi mago kasnampa vahemo'ma kasnampa
kema huno, ha' zana omanena mani fru huta manigahaze huno
hania kemo'ma nena rgaresanigeta, e'i tamage Ra Anumzamo
keaga asamigeno eme huama hu'neane huta keta antahita
hugahune. **10** Hagi anagema hutegen'a anante Jeremaia'ma
karenamare zafama anankempima ante'neana, Hanania'a erino
rufutagi atre'ne. **11** Hagi ana'ma huteno'a Hanania'a mika
vahe zamavuga otino amanage hu'ne, Ra Anumzamo'a huno,
ama ana hukna hu'na Babiloni kini ne' Nebukatnesa'ma maka
mopafi vahetamima, karenamare zafama zamanankempima
ante'neana tare kafumofo agu'afi rufutagi atregahue hu'ne.
Hianagi Jeremaia'ma ana nanekema nentahino'a atreno vu'ne.
12 Hagi Hanania'ma karenamare zafama Jeremaia anankempima
me'nea zafama erino rufutagi atretegeno, mago'a knama
evutegen'a Ra Anumzamo'a amanage huno Jeremaiana
asami'ne. **13** Ra Anumzamo'a amanage hie hunka Hananiana
ome asamio. Kagra zafareti tro hu'naza karenamare zafa erinka
rufutagi'nanku, anama rufutagi trana kare'namare zafamofo
nontera aenire karenamare zafa tro huntegahue hu'ne. **14** Hagi
Monafi sondia vahe'mofo Ra Anumzana Israeli vahe Anumzamo'a
amanage huno nehie, Nebukatnesa er'za vahe maniho hu'na
Nagra maka mopafi vahera aenireti tro hu'naza karenamare
zafa zamanankempina ante zamante'noe. Ana hu'noanki'za agri
eri'zanke erigahaze. Na'ankure afizaga kafa'nena agra kegava
hugahie hu'na ko hankavea ami'noe. **15** Hagi kasnampa ne'
Jeremaia'a anagema huteno'a anante kasnampa ne' Hananiana
amanage huno asami'ne. Hananiaga antahio, Ra Anumzamo'a
kagrira huogante'neanagi, kagra havige eme hunka masavenke

eme hanke'za vahe'mo'za ana keka'a antahigami'naze. 16
E'ina hu'negu Ra Anumzamo'a amanage nehie, Kagrira ama
mopafintira kazeri atresugenka omanigahane. Kagra meni ama
kafufi frigahane. Na'ankure kagra vahera rempi huzaminke'za
Ra Anumzamofona ha' rente'naze. 17 Higeno ana kafumofo 7ni
ikante kasnampa ne' Hanania'a fri'ne.

29 Hagi Nebukatnesa'ma Jerusalemi kumateti'ma kasnampa
vahe'ene, ranra kva vahe'ene pristi vahe'ene mika vahe'enema
z mavareno Babilonima ome kinama huzamante'nea vahetega
kasnampa ne' Jeremaia'a Jerusalemi kumate mani'neno ama
avona kre atre'ne. 2 Hagi kini ne' Jekoniane kuini a' nererane,
eri'za vahe'ene, Juda kva vahetamine, maka'zama zamazanteti
trohu antahi'zama eri'naza vahe'ene, maka zama golireti tro'ma
nehaza vahe'ene, Jerusalemi kumapima nemaniza vahe'enema
Jerusalemi kumateti'ma zamavare'za Babilonima ome kina
huzmantetageno henka ama ana avona kre'ne. 3 Hagi ana
avoma Jeremaia'ma kretegeno'a, Juda kini ne' Zedekaia'a,
Safari nemofo Elasa'ene Hilkaia nemofo Gemariakizni ana avona
zanamigeke erike, Babiloni kini ne' Nebukatnesantega Babiloni
kumatega vu'na'e. Ana avomo'a amanage hu'ne. 4 Hagi Monafi
sondia vahe'mofo Ra Anumzana Israeli vahe Anumzamo'a,
Jerusalemi kumateti'ma tamavre atregetama vuta Babiloni
kumate'ma kinama ome hu'naza vahe'motagura amanage huno
nehie. 5 Tamagra nona kita nemanita, hozanena erita antenkeno
ne'zamo'a nena hanigeta erita neneta maniho. 6 Tamagra ara
enerina, vea enerina hutu ne'mofara kasezmaneho. Ana nehuta
ne' mofavretamirera a'nea avre nezamita, mofa'netamia verera
nenteta nehinke'za zamagranena ne'mofara kase hakare hih.
Ana nehuta osi'a vahera omanisazanki rama'a vahe fore hih.
7

Hagi Nagrama tamavre atrogeta kinama ome huta mani'naza kumamo'ma knare huno mesiema hanuta, tamagra mago'a kanku haketa ana kumara aza nehuta, Ra Anumzamo'narega nunamuna hiho. Na'ankure ana kumamo'ma knare'ma huno mesigeta, tamagranena knare huta fru huta manigahaze. **8** Hagi Monafi sondia vahe'mofo Ra Anumzana Israeli vahe Anumzamo'a huno, Tamagranema mani'naza kasnampa vahe'ene zamavune vahe'enena zamatreke'za tamagrira tamareramatga osiho. Ana nehuta ava'nama ke'nesaza zanku'ma nehanageta ontahiho. **9** Na'ankure Nagra ana vahera huozmante'noanki, Nagri nagifi havige kasnampa naneke zamagra neramasamize huno Ra Anumzamo'a hu'ne. **10** Hagi Ra Anumzamo'a amanage nehie, Babilonima kinafima umani'nenageno 70'a kafuma evu vagama resige'na, Nagra antahinerami'na huvempama huramante'noa nanekea eri rgare'na, ete tamavre'na ama Jerusalemi kumatera egahue. **11** Na'ankure nazano Nagrama huramante'naku'ma hu'noa antahintahizana ko retro hunte'noe. E'ina antahi'zama retro'ma hu'noana, tamazeri haviza hu antahintahizana retro osu'noanki, henkama knare'ma huta nemanisageno muhama nehaza zamo'ma knare'ma hania antahintahi retro hu'noe, huno Ra Anumzamo'a hu'ne. **12** Ana'ma hanugeta tamagra Nagritega kezaneitia, Nagrite'ma eta nunamuma hanage'na, Nagra ana nunamu ketmia antahiramigahue. **13** Hagi tamagrama miko tamagu'areti'ma huta Nagriku'ma hakenuta, Nagrira nageta erifore hugahaze. **14** Ana'ma hanage'na maka moparegati'ene maka kumatamimpima, kinama ome hutama mani'naregatira ete tamavre atru hanugeta, ko'ma mani'nage'nama tamazeri atrogetama vu'naza kumate ete egahaze. **15** Hagi Babilonima mani'nonkeno'a Ra Anumzamo'a kasnampa vahetia ko zamazeri

oti'ne huta tamagra nehaze. **16** Hianagi Deviti'a kini trate'ma mani'nea kini ne'ene ama rankumapima mani'naza maka vahe'ene tamafu'tamagna zama kinafima ovu mani'naza vaheku'enena Ra Anumzamo'a amanage nehie. **17** Monafi sondia vahe'mofo Ra Anumzamo'a amanage hie, ha' vahe huzamantesuge'za bainati kazinteti eme hara huzmantegahaze. Ana nehanage'za mago'a vahera ne'zanku hu'za nefrisage'za, mago'a vahera krimo zamahe frigahie. Ana hanuge'za haviza huno kasri'nea fiki rgama vahemo'ma oneankna hugahaze.

18 Hagi Nagra ha' vahe huzmantesuge'za bainati kazinteti eme zamarotago nehanage'na, agatonto zanteti'ene kriretilene hu'na zamarotago hugahue. Anama hanuge'za fre'za umani emanima hanaza kumatamimpi vahe'mo'za tusi koro nehu'za, huhaviza hune zamante'za, kiza zokago ke huzamantegahaze. Anage nehu'za ana vahe'mo'za ha' vahe'zamima huhavizama huzmante'nakura, Juda vahe'mo'zama havizama hu'nazaza huta sifnafi maniho hu'za hugahaze. **19** Ra Anumzamo'a huno, Na'ankure Nagra eri'za vaheni'a kasnampa vahera knane knanena, huzmantoge'za evava hu'za keni'a eme huama hu'nazanagi ana nanekea antahita amagera onte'naze huno Ra Anumzamo'a hu'ne. **20** E'ina hu'negu Jerusalemi kumateti'ma tamavre atrogetama vuta Babilonima umani'naza vahe'mota, Nagra Ra Anumzamo'nama nehua nanekea antahiho. **21** Hagi Monafi sondia vahe'mofo Ra Anumzana Israeli vahe Anumzamo'a amanage nehie, Kolaia nemofo Ahapuke Ma'aseia nemofo Zedekaiakea Nagri nagifi havige kasnampa ke hunaku, Nagra Babiloni kini ne' Nebukatnesa azampi zanavre anta'nena mikamota negesageno zanahe frigahie. **22** E'ina hu'negu Juda mopareti'ma vu'za Babilonima kina ome hu'naza vahe'mo'za,

mago vahe'ma huhavizama hunte'hakura, Ra Anumzamo'a kazeri haviza hanigenka, Babiloni kini ne'mo'ma Zedekaiane Ahapunema tevefima kre rasage'nea kna hugahane hu'za sifna kea huzmantegahaze. **23** Na'ankure ana netremokea Israeli vahe agu'afina havizantfa hu'nea avu'ava'za hu'na'e. Zanagra tava'ozanire'ma nemaniza vahe'mokizmi a'nene monko'zana nehuke, Nagra huo zante'noanagi Nagri nagifi eke havige kasnampa nanekea hu'na'e. Nagra anazana ko ke'na antahi'na hu'nena nehue huno Ra Anumzamo'a hu'ne. **24** Hagi Nehelamu nagapinti ne' Semaiama ome asami'nogu'ma Ra Anumzamo'ma Jeremaiama asami'nea naneke. **25** Hagi Monafi sondia vahe'mofa Ra Anumzana Israeli vahe Anumzamo'a amanage nehie, Semaiaga kagraka'a kagesafinti amanage hunka avona kretenka atrankeno, maka Jerusalemima mani'naza vahete'ene, pristi ne' Ma'aseia nemofo Zefanaiantegane, maka pristi vaheteganena vu'ne, **26** Hagi Ra Anumzamo'a pristi ne' Jehoiada nontera kagri Zefanaiaga kavrenenteno, Nagri mono nontera kegava hu'enka iza'o neginagi vahe'mo'ma kasnampa nanekema hania vahera azerinka agafina zafareti runtrako hunka kina hunentenka, anankempina ainireti'ma tro'ma hu'naza rini rusi huo huno kazeri oti'ne. **27** E'na hu'negu nahigenka Anatoti kumateti kasnampa ne' Jeremai'a'ma tamagri amu'nompima kasnampa nanekema nehigenka, agrira azeri konerinka azeri fatgoa osu'nane? **28** Na'ankure Jeremai'a amanage huno avona kretregeno Babilonima mani'nona nagatega e'ne. Tamagra ana kumatera za'za kna manigahazanki nona kita nemanita, hozanena anteta neneta maniho hu'ne. **29** Hianagi Semaia'ma kre'nea avona pristi ne' Zefanai'a'erino vuno Jeremai avure ome hampri'ne. **30** Ana'ma hutegenoa'anante Ra Anumzamo'a

Jeremaiana amanage huno asami'ne. **31** Babilonima kinama ome hu'za mani'naza vahetegama kema atrezmante'sanana, Ra Anumzamo'a Nehelamu kumateti ne' Semaiankura amanage hie hunka zamasamio. Nagra asamua naneke eme huama osu'neanki, agra havige kasnampa naneke eme higeta ana naneke'a antahimi'haze. **32** E'ina hu'negu Ra Anumzamo'a huno, Nehelamu nagapinti ne' Semaiane agripinti'ma fore'ma hanaza vahe'enena zamazeri haviza hugahue. Ana hanugeno magore huno agri nagapintira ama vahe amu'nompina mani'neno, vaheni'ama Nagrama zamazeri knare'ma hanua zana onketfa hugahie. Na'ankure Nagrikura ha'renteho huno vahera rempi huzami'negu anara hugahie. Nagra Ra Anumzamo'na ama ana nanekea nehue.

30 Hagi ama nanekea Ra Anumzamo'ma Jeremaiama asami'nea naneke. **2** Ra Anumzana Israeli vahe Anumzamo'a huno, Nagrama kasamua nanekea mago avontafepi ana maka krento. **3** Hagi antahiho! Mago kna ne-eankino ana knama esige'na, Nagra vaheni'a Israeli vahe'ene Juda vahe'enena kinafintira ete zamavare'na esanuge'za zamagehe'ima zami'noa mopa ete eme eri nafa'a hu'za manigahaze huno Ra Anumzamo'a hu'ne. **4** Hagi Ra Anumzamo'a Israeli vahe'ene Juda vaheku'enena amanage hu'ne. **5** Ra Anumzamo'a huno, Vahe'mo'ma koro'ma nehuno krafagema nehia zana nentahue. Ana hu'neankino koro'zamo avitegeno, knare huno arimpa fru huno mani'zana omane'ne. **6** Hagi vene'nemo'za zamu'enea hu'za mofavrea kasenezamataza za me'nefi zmantahigenka ko? Hagi nahige'za a'nemo'za mofavre ante'naku nehazageno, zamata negrige'za zamarimpare zamazama refita zanknara hu'za venenemo'za zamarimparera zamazana refinetaze?

Hagi nahigeno zamavugosamo'a, kore nehaza vahe'mofo zamavugosamo'ma nehiazana nehie? 7 Hagi antahiho, korapara egeta onke'naza kna hazenkeza egahiankino Jekopu nagara eme tamazeri haviza hugahie. Hianagi zamagrira zamagu vazigahue. 8 Hankavenentake Ra Anumzamo'a huno, ana knama e'nige'na Israeli vahe zamanankempima ante'naza karenamare zafa eri'na rufutagi netre'na kinafintira katufe zamantegahue. Ana hanuge'za ru vahe'mokizmi kazokazo eri'za vahera mago'enena omanigahaze. 9 Hianagi zamagra Ra Anumzamo'na Nagri eri'za vahe nemani'za, Deviti nagapinti'ma kinima azeri otisanua ne'mofo eri'za vahe manigahaze. 10 Hagi ana hu'negu Nagri eri'za vahe Jekopu naga'mota antahintahi hakarea nosuta, Israeli vahe'mota korora osiho. Na'ankure Nagra Ra Anumzamo'na ru moparegama mani'naregatira, ete tamavre'na ne-ena, ne'mofa'ma ru kuma tamimpima kinama ome hu'naregatira ete zamavare'na egahue. Ana hanugeta Jekopu nagamota mopatamia ete eme erita akoheta mani fruhuta manisageno, mago vahemo'e huno tamazeri korora osugahie, huno Ra Anumzamo'a hu'ne. 11 Na'ankure Ra Anumzamo'a huno, Nagra tamagrane manine'na tamagu vazigahue. Nagrama tamazeri panani'ma hugeta umani emanima hu'naza mopafi vahera zamahe hana hugahue. Hagi tamagrira tamatresugeta amnea omanigahazanki, knaza tami'na tamazeri haviza hugahue. Hianagi Nagra fatgo avu'avaza hu'na knazana tamina tamazeri fatgo hugahue. 12 Hagi Ra Anumzamo'a huno, Tamagrira tamavufga rutraga hu'za tamahe nazankino namumo'a teganigara osu'ne. 13 Hagi tamagri'ma tamaza hanugu'ma Nagritegama keagama hania vahera omanigeno, tamagrira namunte'ma fre marasinia omane'neankino, tamagri namumo'a teoganigahie.

14 Hagi ko'ma tamagri'ma tamavesineramantaza vahe'mo'za menina zamagekani tamante'za, mago'a zana hunoramantaze. Hagi mago vahe'mo'ma asunku'ma osuno, ha' vahe'ama azeri havizama hiaza hu'na Nagra tamazeri haviza hu'noe. Na'ankure tamagra ra hazenke nehuta kumi'ma huta eri hakarema hu'nazagu anara hu'noe. **15** Hagi nahigeta hazenkema tamavufafima tami'naza namuma teogania zankura krafagea nehaze? Nagra ama ana knazama neramuana, na'ankure tamagra ra hazenke huta tusi kumi hu'nazagu anara huneramantoe. **16** Hianagi afi zagagafamo'za mago'zagama aheno'ma nehanama nehiankna hu'zama eme tamahe hana'ma nehaza vahera, anahukna hu'za eme zamahe hana hugahaze. Ana nehanage'za tamagri ha' vahera maka zamavare'za kina ome huzmantegahaze. Hagi rohu'ma eme tamare'za maka zantamima eri'zama vu'naza vahera, ana zanke hu'za zamagrira rohu ome zamare'za maka zazamia eri'za vugahaze. **17** Hianagi Nagra tamavufga tamazeri knare nehu'na, tamagri namuna eri hagege hugahue. Na'ankure zamagra hu'za tagri vahera omani'naze nehu'za, Saioni kumara amneza me'neankino mago vahe'mo'a antahi nomie hu'za nehaze. **18** Hagi Jekopu naga Israeli vahera Nagra nasunku hunezamante'na, kinafintira zamavare'ha mopazamire vanuge'za, ko'ma mani'nazaza hu'za nonku'ma ome ante'za manigahaze. Ana nehu'za Jerusalemi kuma'ene kinimofo nonena, ko'ma me'nea marurera ete eriso'e hu'za kigahaze. **19** Hagi zamagrama muse zagame'ma nehu'za musenkasema hanaza agasasamo'a tusiza hugahie. Nagra zamazeri rama'a hanuge'za, osi'a nagara omani rama'a vahe manigahaze. Ana nehu'na ra zamagi zamusuge'za, vahe'mo'za zamage fenkamia otregahaze. **20** Hagi mofavre naga'zamimo'za ko knafima knare hu'za mani'nazankna

hu'za manigahaze. Ana nehanageno mani'zazmimo'a knare
nehina Nagri navurera mani so'e nehanage'na, knama zami'za
zamazeri havizama hanaza vahera, nona hu'na zamazeri haviza
hugahue. **21** Hagi zamagri amu'nompinti mago'zmimo kva
nera fore huno kegava huzmantegahie. Nagra ana nera avre
tava'o hanugeno Nagri navate manigahie. Na'ankure Nagri
tava'ontera mago vahemo'e huno agra'a avesitera omegahie. **22**
E'ina hu'negu tamagra Nagri vahe manisage'na, Nagra tamagri
Anumza manigahue. **23** Hagi antahiho! Ununkomo'ma atufeno
eankna huno Ra Anumzamofo arimpahe zamo'a ne-eankino, ana
rimpa ahezamo'a kefo avu'ava'ma nehaza vahe'mofo zamasenire
egahie. **24** Hagi Ra Anumzamofo arimpa ahe'zamo'a ameru huno
vagaoreno me'nesigeno, nazano hugahuema huno agu'afima
antahi'nesia zana huvagaregahie. Henka ama ana zana tamagra
keta antahita hugahaze.

31 Hagi Ra Anumzamo'a huno, Mago kna huhampri
ante'hoankino ana knama esige'za mika Israeli vahepima
mani'naza naganofimo'za Nagri vahe mani'nage'na, Nagra
zamagri Anumza manigahue. **2** Hagi Ra Anumzamo'a huno,
Israeli vahe'ma hapinti'ma zamahe ofrisaza vahe'mo'za hagege
ka'ma kokampi manisazanagi knare hu'za manigahaze. Na'ankure
Nagra Israeli vahera mani fru zamigahue. **3** Hagi ko'ma
zamagrite'ma eamama hu'hea Ra Anumzamo'a amanage
hu'ne, Nagra Israeli vahera vagaore mevava navesi zanteti,
zamavare nagrarega ante'noe hu'ne. **4** Israeli vahera Nagra ete
tamazeri hankavetisugeta tamagra hankave vahe manigahaze.
Hagi Israeli vahe'mota vene omase'nea mofakna hu'nazankita,
ko'ma nehzaza huta muse zagamera nehuta tambolinia
neheta avoa hagegahaze. **5** Hagi tamagra ko'ma nehzaza

huta Sameriamama me'nea agonaramimpina waini hoza kasefa antegahaze. Hagi waini hozama antesaza vahe'mo'za, ana hozafintira raga'a tagiza nene'za musena hugahaze. 6 Hagi mago kna ne-eankino ana knama esanige'za, kuma kvama nehaza vahe'mo'za, Efraemi agona kokampi manine'za, amanage hu'za kezan kea hugahaze. Otinketa Saioni agonare vuta Ra Anumzana tagri Anumzamofona monora ome huntesanune hu'za hugahaze. 7 Hagi Ra Anumzamo'a amanage hu'ne. Jekopu nagakura ranke huta muse zagamera huzmanteho. Ana vahe'mo'za maka vahera zamagatere'naza vahe mani'naze. Hagi ranke huta Nagri nagima musema huta husgama hanazana amanage hiho, Ra Anumzamoka, Israeli vaheka'a osi'ama ofri mani'naza vahera zamagu vazinka zamavro huta hiho. 8 Hagi antahihi! Nagra noti kaziga moparegatira zamavare'na ne-e'na, mopama ome atre eme atrema hutegatira maka zamavare tru hugahue. Hagi anampina zamavu suhu vahe'ene, zamaga haviza hu vahe'ene, zamu'ene a'nanene, mofavre antenaku'ma nehaza a'nenea egahaze. Ana hanuge'za Israeli vahera rama'a vahe ete mopa zimirera egahaze. 9 Hagi zamavare'nama ne-esuge'za zamagra zavi nete'za Nagritega nunamuna nehanage'na, zamavare'ha ete egahue. Hagi Nagra tinnenarega zamavare'na ne-e'na, knare huno pehe hu'nesia kante zamavare'na ne-esuge'za tanafara osugahaze. Na'ankure Nagra Israeli vahe'mokizmi nezmafana manugen, Efraemi'a zage mofavreni'a mani'ne. 10 Hagi kokankoka vahe'mota Ra Anumzamofo nanekea nentahinkeno, afete'ma hageri ankenaregama nemaniza vahe'mota amanage huta huama hiho, Israeli vahe'ma zamazeri panani'ma hu'nemo ete zamavareno eteno sipisipi afute kva vahemo'ma sipisipi afutamima kegavama

nehiaza huno kegava huzmantegahie huta hiho. **11** Na'ankure Ra Anumzamo'a Jekopu nagara hankavenentake ha' vahe zamimofo zamazampintira ete zamagu vazino zamavaregahie. **12** Hagi zamagrama etesanu'za Saioni agonafi mareri'za manine'za ranke hu'za kezati'za zagamera nehu'za musenkasea hugahaze. E'ina'ma hanazana Ra Anumzamo'ma knare'nare zantamima witima, wainima, olivi masavema, sipisipine, bulimakao afu kevumo'zama anenta'ma ante hakarema hanaza zanku'ene hu'za musena hugahaze. Ana hanigeno nomaniza zamimo'a mago'ma masaventretre'ma hu'nea hozagna hanige'za, mago'enena zamasunku zampina omanigahaze. **13** Hagi ananknafina vene omase mofa'nemo'za musenkase hu'za avo nehagesage'za, nahezavemo'zane ranra vahe'mo'zanena ana zanke hu'za avo hagegahaze. Na'ankure zamasunku zampima mani'naza zana eri atresuge'za musenkase hugahaze. Nagra zamagu'a zamazeri hankaveneti'na zamasunku zana eri netre'na museza zamigahue. **14** Hagi Nagra pristi vahe'mofo zamagu'afina museza antevite nezmante'na, knare'nare zantami vaheni'a antevite zamantesuge'za musenkase hugahaze, huno Ra Anumzamo'a hu'ne. **15** Hagi Ra Anumzamo'a huno, Rama kumatetira ra zavi krafage nehaze. E'i ana zavi krafagema nehiana Reselikino, agra mofavre'agu huno zavira netegeno mago vahe'mo'a azeri amne hugara nosie. Na'ankure miko mofavre naga'amo'za fri vagare'naze. **16** Hianagi Ra Anumzamo'a huno, Reseliga mofavre nagaka'agu'ma zavi krafama nehana zana atrenka kavunura eri amne huo. Na'ankure kagrama zavi'ma te'nana zamo'a amne zanknara osugahie. Mofavre nagakamo'za ha' vahe mopa atre'za ete kagritega egahaze. **17** E'ina hu'negu henka knare'za fore hugahianki amuhara nehunka manio. Ana

hanage'za mofavre nagakamo'za ete mopa zamire egahaze.

18 Hagi Efraemi (Israeli) naga'mo'za zavira nete'za amanage nehazage'na antahi'noe. Agazone osu bulimakao afu' anenta azeri fatgoma hiaza hunka sefu taminka tazeri fatgo nehunka ete tavrenka enka eme tazeri knare huo. Na'ankure kagra Ra Anumzana tagri Anumza mani'nane. **19** Hagi Ra Anumzamoka kagrira katretra vu'nonanagi, menina Kagrite eta tasunku eme nehune. Hagi tazeri fatgoma hanketa tagra'a kefozama keta antahitama nehuta, tagazegu huta kepri nehune. Na'ankure nehazavema manitama e'nontegatima hu'nona kefo avu'ava zankura tagazegu nehune. **20** Hagi Ra Anumzamo'a huno, Efraemina Nagra navesinentoa mofavre mani'ne. Nagra knazana amigahuanagi maka zupa nagesa antahinemua mofavreni'a mani'ne. Ana hu'neankino nagu'amo'a agrite me'negu Nagra tamagerfa hu'na nasunku huntegahue. **21** Hagi tamagra Israeli vahe'mota kuma'ma atreta vu'naza kana keso'e nehuta, negetama ete esaza avame zana, zafaramina asenteta viho. Hagi Israeli vahe'nimota vene omase mofa kna hu'nazanki ete echo. Ete eta ranra kumatamifi emanihio. **22** Hagi tamagra Nagri mofakna hu'nazanagi, tamagra natreta ufre efre huta zazate mani'naze. Nazupa tamagra atreta rukarahe huta Nagritega egahaze? Nagra Ra Anumzamo'na kasefa'za ama mopafina erifore nehue. E'i ana avu'ava zana a'mo'a vemofo azeri anukiankna hu'ne. **23** Hagi Monafi sondia vahe'mofo Ra Anumzana Israeli vahe Anumzamo'a huno, Nagra Israeli vhahera ete zamavare'na esuge'za mopa zimirera emanigahaze. Maka Juda mopafine ranra kuma tamimpima emanisaza vahe'mo'za amanage hu'za hugahaze. Ruotage'ma hunenka fatgo avu'ava zama nehana agonomoka Ra Anumzamo'a, asomu hugantesie. **24** Hagi Juda

mopafima me'nea kuma tamimpima manisaza vahe'mo'zane,
hozama ante vahe'mo'zane sipisipi afu'ma avre'za vanoma
hanaza vahe'mo'zanena magopi knare huza manigahaze. 25
Hagi avesragu'ma hania vahera ete azeri kasefa nehu'na,
hankave'ama omanesia vahera ete hankavea amigahue. 26
Hagi masenena ana zantmima ketena, oti'na keganti kegamama
huana, haganentake navu mase'nofinti oti'noe. 27 Hagi Ra
Anumzamo'a huno, Hozafi avimza hankregeno hageno rama'a
rgama ahenteaza hu'na, mago kna ne-eanki'na Israeli vahe'ene
Juda vahe'enena zamazeri amporesanuge'za rama'a vahe
fore nehanageno, zaga kafamo'enena rama'a forehu hakare
hugahie. 28 Hagi korapara Nagra navu antete'na manine'na,
zamagrira zanefi netrena, tapage hunetrena knazana zami'na
zamazeri haviza hu'noane. Hianagi menina navunte'na kegava
hunezamante'na, zamazeri trure'na noma hiaza hu'na negi'na,
avimazama hiaza hu'na mopafi zamazeri hankaregahue, huno
Ra Anumzamo'a hu'ne. 29 Hagi ana knafina amanahu fronka
kea osugahaze. Zamafahe'za afu ore'nea waini raga nazageno,
mofavre naga zamimofo zamagitera aka hu'ne hu'za osugahaze.
30 Hianagi anopa waini rgama negeno agite'ma akaheaza huno,
mago'magomo'a agra'ama hu'nesia kumimofo kna'a erino fritere
hugahie. 31 Hagi Ra Anumzamo'a huno, Mago kna ne-eankino
ana knama esanige'na, Israeli vahe'ene Juda vahe'enena kasefa
huhagerafi huvempa kea zamagrane hu hagerafahue. 32
Hagi ana huhagerafi huvempa kemo'a, ko'ma zamagehe'ima
lsipi mopafinti'ma zamazante zamavazu hu'na oa zupama
zami'noankna huvempa nanekea omane'ne. Nagra nezamave
kna hu'noanagi huhagerafi huvempa kema zamagranema
hu'noana runetrage'za amagera onte'naze, huno Ra Anumzamo'a

hu'ne. 33 Hagi Ra Anumzamo'a huno, ana kasefa huhagerafi
huvempa kema Israeli vahe'enema hanuana, Nagra kasegeni'a
antahintahi zamifi nente'na, zamagu'afi krentegahue. Ana
nehu'na Nagra zamagri Anumza manisanuge'za, zamagra
Nagri vahe manigahaze. 34 Hagi ana knareti'ma agafama
huno vaniana, magomo'a otino tvaoma'are'ma nemanisimofone
afu'agananena rempi humino, Anumzamofona kenka antahinka
huo hunora osugahie. Na'ankure agi omane vaheteti'ma
vuno agima me'nea vahete'ma vaniana maka'mo'za Nagrira
nage'za antahi'za hugahaze. Na'ankure kumizamia eri netre'na,
ana kumi zamigu'ma nagesa anti ozamisua zanku anara
hugahaze. 35 Hagi zagema huntegeno feru'ma remsa nehigeno,
ikane hanafi taminema higeno nonkuma'are me fatgo hu'neno
hanimpina remsa nehigeno, hagerima eri kranto kranto'ma
higeno ra agasasama neria Ra Anumzamofo agi'a Monafi sondia
vahe'mofo Ra Anumzankino, agra amanage hu'ne. 36 Nagra
Ra Anumzamo'na huvempa huankino, zagine ikane hanafi
tamima huge'za nonku'ma zamire'ma me fatgoma hazaza hu'za,
Israeli vahe'mo'za manivava hu'za vugahaze. Hianagi zagine
ikane hanafi tamimo'zama Nagrama zami'noa eri'zama e'oriza
zupa fananema hazaza hu'za, Israeli vahe'mo'za mopazamia
atre'za fanane hugahaze. 37 Hagi Ra Anumzamo'a huno,
mago vahemo'ma monamofo agema'ama nofi avazu huno
kevanereno, mopama azeri oti'na tro'ma hu'noa agafa'ama
kevama retesige'na, ana zupa Israeli vahe'mo'zama hu'naza havi
avu'ava zantera namefi huzamigahue huno, Ra Anumzamo'a
hu'ne. 38 Hagi Ra Anumzamo'a huno, Mago kna ne-eankino ana
knama esanige'za, ama Jerusalemi ran kumara Ra Anumzamo'na
nagire ete eriso'e hu'za kigahaze. Ana'ma hanazana Hananeli

Zaza Nonema nehzareti eri agafa hute'za vu'za, Renagente'nere
Kuma Kafanema nehzare vugahaze. **39** Hagi anantetira nofi'ma
avazuma hu'za kesazanofimo'a vufatgo huno Garepiema nehaza
osi agonare vuteno, anantetira rukrahe huno Goa kumate
evugahie. **40** Hagi fri vahe'ma ome asenezamante'za ta'nefa'ma
ome netraza agupone, Kidroni tinkagomupima me'nea mohanena
maka erigu'a netreno vuvava huno, zage hanati kaziga kuma
keginamofoma, Hosi Kafanema nehzare uhanatigahie. E'ina
hanigeno rankumamofo agu'afima mesania mopamo'a Ra
Anumzamofo suza me ruotage huno megahie. Ana hanigeno
mago vahe'mo'a eno hara eme hunteno ama ana rankumara
erige, eri havizana hugera osugahie. Ana hanigeno ama ana
kuma'mo'a knare huno mevava huno vugahie.

32 Hagi Zedekaia'ma Juda vahe kinima manino egeno 10nima
hia kafufina, Ra Anumzamo'a Jeremaia'na ama nanekea
asami'ne. Hagi ana'ma hu'neana Nebukatnesama Babiloni
kinima manino egeno 18nima hia kafufi anara hu'ne. **2** Hagi
ana knafina Babiloni kini ne'mofo sondia vahe'mo'za e'za
Jerusalemi kumara eme vazagi kagi'naze. Ana nehzageno
Juda kini ne'mofo kumapima sondia vahe'ma nemanizafi
kasnampa ne' Jeremaia'a kina huno mani'ne. **3** Na'ankure
Juda kini ne' Zedekaia'a, Jeremaiana kina hunenteno amanage
huno hu'ne, kagra nahigenka kasnampa kea hunka, Ra
Anumzamo'a huno, Nagra ama rankumara Babiloni kini ne'mofo
azampi antesanugenohara huramanteno ama anankumara
erigahie. **4** Ana hanigeno Juda kini ne' Zedekaia'a Kaldia
vahe zamazampintira zamatreno ofregahie. Hianagi Zedekaiana
avre'za Babiloni kini nete vanageno, zanagra zanavufi oge
age nehuke keaga hugantigma hugaha'e. **5** Hagi anantetira

Babiloni kini nemo'a Zedekaiana avreno Babiloni vanigeno
umani nesanige'na, Nagra anantega ome kegahue. Hagi kagra
Babiloni vahera hara huzamante'gahananagi kasamarenka
hara huzamagate oregahane huno, Ra Anumzamo'a hie
hunka kasnampa kea hu'nane nehuno, Zedekaia'a Jeremaiana
kina hunte'ne. 6 Hagi Jeremaia'a huno, Ra Anumzamo'a
amanage huno nanekea nasami'ne. 7 Antahio! Negafana negna
mofavre Salumu nemofo Hanameli'a kagrite eno amanage
hugahie. Nagri mopama Anatoti kumate'ma me'nea mopa
mizaso huno hugahie. Na'ankure kagra agrira avate nefuga
ugota vahe mani'nanku amane ana mopa mizasegahane.
8 Hagi Ra Anumzamo'ma nasami'nea kante anteno, nenfa
negna mofavre Hanameli'a eno, kini ne'mofo kumapima sondia
vahe'ma nemanifima kinama hu'na mani'nofi eno amanage
hu'ne. Benzameni nagamokizmi mopafima Anatoti kumate'ma
Nagri mopama me'neana kagra mizaso. Na'ankure kagra
nagrira navate nena fuga ugota vahe mani'enka ana mopa
ete mizasenka eriga vahe mani'nanankinka, kagra'a suza
mizasegahane. Anagema hige'na nagrama antahuana, e'i Ra
Anumzamo naneke nasamianki'na ana hugahue hu'na hu'noe. 9
Anage nehu'na anante 17ni'a silva zagoa sigerire erinte'na kna'a
kete'na, nenfa negna mofavre Hanamelina mizana senente'na,
Anatoti kumate'ma me'nea mopa eri'noe. 10 Hagi ana mopama
mizamasoa mopamofo avona eri fatgo hu'na nagia krena eri
vakaki nente'na, ananteria vahera manine'za negage'na ana
avontafera eri renamagi'na fukinteti retrako nehu'na, mizama
hua zagoa sigerire erinte'na nege'na Hanamelina erimi'noe.
11 Hagi ana mopama mizama hua mopamofo kasege'a tare
avontafete anahukna hu'na krete'na mago avona repasi hu'na

fukinu rentarako nehu'na, mago avontafera repasi osu atre'noe.

12 Hagi anantarega avona eri'na Maseia negeho Neri nemofo Baruku ami'noe. E'ina'ma hu'noana nenfa negna mofavre Hanameli avufine, anama mizamasoa avontafete'ma zamazanko avoma ante'naza vahe zamavufi anazana hu'noe. Ana nehu'na maka Juda vahe'ma, kini ne'mofo kumapima sondia vahe'ma nemaniza kumapima mani'naza vahe zamavufine ana zana hu'no'e. **13** Hagi maka vahe'mo'za negage'na amanage hu'na Barukuna asami'noe. **14** Monafi sondia Vahe'mofo Ra Anumzana Israeli vahe Anumzamo'a amanage huno nehie, mopama mizamasoa mopamofo kasege'ama krente avontafetrena fukima rekamare su'ane amnema me'nea avontafe'enena anantarega erinka mopa kavofi antegeno havizana osu zazate meno. **15** Na'ankure Monafi sondia Vahe'mofo Ra Anumzana Israeli vahe Anumzamo'a huno, vahe'mo'za henka'a nontamine mopane waini hozanena zagoreti mizasegahaze. **16** Hagi mopama miza hu'noa mopamofo kasege'ama krente avontafe'ma Neria nemofo Barukuma amite'na, Ra Anumzamofontega amanage hu'na nunamuna hu'noe. **17** Ra Anumzamoka kagra tusi'a hihamu hankave ka'areti kazana rusutenka monane mohanena tro hu'nane. Ana hu'neankino kagritera mago zamo'a amuhoa osu'ne. **18** Hagi Kagra vagaore kavesizanteti, rama'a tauseni'a vahera kavesi nezamantane. Hianagi nef'a'ma hu'nea kumitera nona hunka nemofona azeri haviza nehane. Anumzamoka kagra tusi hankavenentake ne' mani'nanankino, kagri kagi'a Monafi sondia vahe'mofo Ra Anumzane. **19** Kagra knare antahintahia vahera nezaminka, hankave eri'za erifore nehane. Ana nehunka vahe'mo'zama maka zamavu'zmavama nehzana kavua antenka negenka, zamagrama nehaza avu'avate antenka mizazmia

refko hunka nezamina Anumza mani'nane. 20 Hagi kagra Isipi
mopafina kaguvazane avame'zanena erifore hu'nanankinka,
meninena Israeli vahepine maka kokankokama nemaniza
vahete'enena kaguva zane avame zanena erifore nehanke'za
maka vahe'mo'za nege'za meninena rankagia negamize. 21
Hagi Kagra hankavenentake kazana rusutenka, Isipi mopafina
kaguva zane avame zanena eri fore hunka vahera zamazeri
koro nehunka, vaheka'a Israeli vahera Isipitira zamavarenka
atirami'nane. 22 Hagi ana hutenga kagra zamagehe'ima
huvempa huzmantenka, tumerimo'ene amirimo'enema avite'nea
mopama zamigahue hunka hu'nana kante antenka ama mopa
zami'nane. 23 Ana hanke'za tagehe'za ama mopa eme
eri'nafa'a hu'za mani'naze. Hianagi kagri nanekea nontahi'za
kasegeka'a amagera onte'naze. Kagrama amage anteho
hunkama huzamante'nana nanekea magore hu'za amagera
ontagenka ama hazenke zantamina atrankeno zamagritera
ne-e. 24 Hagi menina Babiloni vahe'mo'za e'za Jerusalemi
rankumara eme vazagi kagine'za, kuma keginamofo asoparega
mopa antehihi hu'za mareri'za hara hurante'za kumara erinaku
nehaze. Hagi anama nehzana, na'ankure Kagrama hunana
kante amage ante'za Babiloni vahe'mo'za kazintetira mago'a
nerahesageno, mago'a ne'zanku huta nefrisunkeno, mago'a
krimo tahe nefrisige'za kuma'ma erinaku'ma nehaza zana
ko negane. 25 Hagi tamagerfa hu'za Babiloni vahe'mo'za
ama rankumara erigahaze. Hianagi kagra Ra Anumzamoka
hunka, vahera kehinke'za negesagenka zagoreti mopa mizana
huo hanke'na anara hu'noe. 26 Anante Ra Anumzamo'a
Jeremaiana amanage huno asami'ne. 27 Nagra Ra Anumzana
miko vahe'mofo Anumza mani'noankino, mago zamo'a nagritera

amuhoa osugahie. **28** E'ina hu'negu Ra Anumzamo'a huno, menina ama rankumara Babiloni vahe zamazampine, Babiloni kini ne' Nebukatnesa azampine anta'nena hara huzmagatereno erigahie. **29** Hagi Babiloni vahe'ma ama rankuma'ma ha'ma eme hunentaza vahe'mo'za, kumara teve tagintesageno tegahie. Nontamimofo agofetura Bali havi anumzante'ma ofa kresramna nevuta, ru anumzantaminte'ma waini tima tagitreta ofama nehuta, Nagri'ma nazeri narimpama nehaza nontaminena teve taginte'sageno te vagaregahie. **30** Hagi Israeli vahe'ene Juda vhemo'zanena, kasefa zamireti'ma eno amare'ma ege'na, Nagrama zamagoana mago knare zana osu'nazanki havi avu'ava zanke hu'za e'naze. Zamagra Israeli vahe'mo'za mago knare zana osu'nazanki, zamazanteti'ma avako'ma hu'za tro'ma hu'zama e'naza zamo nazeri narimpahe'ne huno Ra Anumzamo'a hu'ne. **31** Hagi ama Jerusalemi rankuma'ma erigafama hu'za ki'naza knareti'ma eno meni ama knare'ma ege'za, vahe'mo'za nagrira nazeri narimpa ahe'nazankina, zamazeri atresuge'za Nagri navurera omanigahaze. **32** Na'ankure Israeli vahe'ene Juda vhemo'zanena maka kefo avu'ava zama nehaza zamo Nagrira nazeri narimpa ahe'ne. Ana nehazage'za kini vahe zamimo'zane, kva vahe zamimo'zane, pristi vahe zamimo'zane, kasnampa vahe zamimo'zane, maka Juda venenemo'zane, Jerusalemi rankumapima nemaniza vahe'mo'za zamagranena havi avu'ava zanke hu'za nazeri narimpa ahe'naze. **33** Hagi zamagra zamavugosa rukrahe nehu'za, zamefi hunami'naze. Nagra maka zupa rempi huzmi vava hu'noanagi, Nagrama zamasamua zamavumro nanekea antahi'za amagera onte'naze. **34** Hagi zamagra kasrino agoterfa havi anumzamofo amema'a eri'za vu'za, Nagri nagima me'nesige'za mono hunantegahaze hu'noa

mono nompi omente'za, ana nona eri pehena hu'naze. 35 Hagi Ben-Hinomue nehaza agupofi Bali havi anumzante'ma mono'ma huntesaza kumatamina tro hunte'haze. Ana hute'za anante ne' mofavre naga'zamia zamahe'za Moreki havi anumzante Kresramana vu'naze. Nagri antahi'zampina e'inahu antahintahia omanegeno, e'ina huno kasri'nea havi avu'ava zana hihonu Nagra huozamante'noa avu'avaza nehu'za, Juda vahera zamatu fazage'za kumira hu'naze. 36 Hagi e'ina hu'negu Ra Anumzana Israeli vahe Anumzamo'a huno, Tamagra huta ha'zamo'ene agatonto zamo'ene krimo'ene tazeri haviza nehiankino, Babiloni kini ne'mo hara huragatereno ama rankumara erigahie hutama nehaza kumakura Nagra amanage nehue. 37 Hagi antahiho! Nagri narimpahe zamo'ma teve rukaru'ma hige'na, zamazeri panini huge'za ru moparegama umani emanima hu'naregatira, ete zamavare'na ama kumate esuge'za, mago zankura ontahi knare hu'za emanigahaze. 38 Hagi zamagra Nagri vahe manisage'na, Nagra zamagri Anumza manigahue. 39 Hagi Nagra magoke antahizanke nezami'na, magoke ka zamaveri ha'nena nevu'za nagrira koro hunante'za namage antegahaze. Na'ankure e'i ana'ma hanazana zamagri knare zanku'ene henkama kase zamantesaza mofavre naga'zamimofo knare zanku'ene anara hugahaze. 40 Hagi Nagra knare avu'ava zama hunezmantoa zana atre'na rukrahera osugahue hu'na, zamagranena mevava huhagerafi huvempsa kea hugahue. Ana nehu'na zamagu'afina Nagri'ma koro'ma hunante'za nagorgama manisaza avu'avaza ante zamante sanuge'za, ru'enena natre'za ovugahaze. 41 Hagi Nagra zamagrikura muse nehu'na knare avu'ava zana huzmantegahue. Ana nehu'na avimzama nehiaza hu'nama ama mopafi hankre sanuge'za mani'nenage'na, Nagra maka

nagu'areti hu'na nazano huzmantegahue hu'na hu'noa zana
huvagaregahue. **42** Hagi Ra Anumzamo'a huno, Nagrama
ranra knazantet'i'ma ama vahe'ma zamazeri havizama hu'noaza
hu'na, knare'nare zantamima huzmantegahue hu'na huvempama
huzmante'noa zantamina ana maka zamazeri knare hugahue. **43**
Hagi tamagra huta, Ra Anumzamo'a Babiloni vahe zamazampi
ama mopa erintegeno, mopamo'a havizantfa higeno magore huno
vahe'ene zagagafanena omanitfa hu'ne huta nehaze. **44** Hagi
mopama mizasesazana, mago'a vahe'mo'za anante manine'za
ke'nonkeno mopa mizase hu'za ana mopamofo kasege'ama
krentesaza avontera zamagi'a eri vakakite'za ana avona eri
rentarako huntegahaze. Hagi mopama mizama sesazana,
Benzameni naga mopafine, Jerusalemi kuma tvaonte'ma me'nea
mopafine, Juda kuma tamimpima me'nea mopafine, ne'onse
agona kokampima me'nea kumatamine, Sefela agupo kokane,
Negevi kaziganema me'nea kuma tamimpinti'enena, mopa
zagoreti miza hu'za erigahaze. Na'ankure ana knafina Nagra
ete kinafintira zamavarena mopa zamire esuge'za knare hu'za
manigahaze huno Ra Anumzamo'a hu'ne.

33 Hagi Jeremaia'ma kini ne'mofo kumapima sondia vahe'ma
nemanifima, kinama huno mani'nefi mani'negeno, ete nampa
2 zupa Ra Anumzamo asami'nea naneke. **2** Ra Anumzama
mopama tro huteno, antegeno noma'arema me fatgo hu'nea
Anumzanku'ma agi'a Ra Anumzanema hu'za nehaza Ra
Anumzamo'a amanage nehie, **3** Kagra nantahigege'na keka'arera
Nagra ke nona hu'na ranra zantamima fra'ma ki'negenka kenka
antahinka'ma osu'hana zantamina eri kaveri hanena ko. **4**
Hagi rankumapima me'nea nonteti'ene, Juda kini vahe'mokizmi
nonteti'ma, tapage'ma hu'za kuma keginare'ma omente hihi

hu'za mareriza mani'neza ha'ma hu'naza nontaminkura, Ra Anumzana Israeli vahe Anumzamo'a amanage huno hu'ne. 5 Zamagra Babiloni vahe'enema ha'ma nehu'za anara hugahaze. Ana nehanageno Nagri narimpa ahe'zamo'a teve rukru hiankna nehanige'na, Jerusalemi kumapi vahera narimpa ahezmante'na zamahe frisugeno rankumapina frisaza vahe zamavufagamo'a avitegahie. Na'ankure Jerusalemi kumapima nemaniza vahe'mo'zama nehaza havi avu'ava zamo hanige'na, navugosa rukrahe nehu'na namefi huzamigahue. 6 Hianagi henka'a ama rankumara Nagra ete eri knare nehu'na, vahe'enena zamazeri kanamaregahue. Ana hanuge'za knare nomani'zampi muse hu'za nemanisage'za mago'enena hara eme huozamantegahaze. 7 Hagi Israeli vahe'ene Juda vahe'enena kinafintira ete zamavare'na e'na, eme zamazeri so'e hanuge'za ko'ma mani'nazaza hu'za manigahaze. 8 Hagi zamagra kumi'ma hu'naza kumi'zamia maka sese hunezamante'na, Nagri'ma ha'ma renante'naza kumi'enena maka atre'zmantegahue. 9 Hagi ana'ma hutesuge'za maka kokankoka vahe'mo'za Jerusalemi kumate'ma maka knare'nare zama eri fore'ma hanua zamofo agenkea nentahi'za, Nagri nagine hihamuni'agura husga hugahaze. Hagi Jerusalemi kuma'mofoma maka zampima azeri knare'ma hanua zamo hanige'za, vahe'mo'za koro nehu'za zamahirahiku hugahaze. 10 Hagi Ra Anumzamo'a huno, Tamagra huta ama kumamo'a havizantfa higeno, magore huno vahemo'ene zagagafamo'enena omani'ne huta nehuta, Judama me'nea kuma tamimpine Jerusalemi kumapima me'nea ne'onse kantamimpina, magore huno vahe'ene zagagafanena omanitfa hu'ne huta nehaze. Hianagi henka ana kuma tamimpina vahera ete esageta zamagerura antahigahaze. 11 Hagi musenkasema

nehu'za kiza zokago'ma hanaza zamagerura nentahita, veamo'za
eri hagerafinaku'ma nehu'zama hanaza zamageru'enena
antahigahaze. Ana nehuta Ra Anumzamofo mono nompima muse
ofama eri'za ne-e'zama zagame'ma hanazana amanage hu'za
nehanageta antahigahaze. Hankavenentake Ra Anumzamofona
humuse huntesanune, na'ankure Ra Anumzamo'a knare
hu'neankino, avesiranteno knare avu'ava'ma hunerantea zamo'a
mevava huno vugahie hu'za hugahaze. Na'ankure Nagra ete
zamazeri so'ema hanuge'za ko'ma mani'naza avamente'ma
manisaza zanku anara hugahaze huno Ra Anumzamo'a hu'ne.

12 Hagi Monafi sondia vahe'mofo Ra Anumzamo'a huno, Menina
ama mopamo'ene maka ranra kuma tamimo'enena havizantfa
higeno, magore huno vahemo'ene zagagafamo'enena omanitfa
hu'ne. Hianagi henka vahera enemanisage'za, sipisipi kva
vahe'mo'zanena sipisipi afu zagazmia zamavare'za knare trazama
me'nesirega vanage'za ome mani fru hugahaze. **13** Hagi ne'onse
agona kokampima me'nea kuma tamimpine, Sefela agupo
mopafima me'nea kuma tamimpine, Negevi mopafima me'nea
kuma tamimpine, Benzameni naga mopafima me'nea kuma
tamimpine, Jerusalemi kuma tava'onte'ma me'nea mopafine,
maka Juda mopafima me'nea kuma tamimpinema manisaza
vahe'mo'za, ko'ma nehzaza hu'za ete sipisipi afu'zamia
hampari'za erinte fatgo hugahaze. Nagra Ra Anumzamo'na
ama ana nanekea nehue. **14** Hagi Ra Anumzamo'a huno,
Mago kna ne-eankino ana knama esanige'na, Israeli vahe'ene
Juda vahe'enema knare'zanku'ma huvempama huzmante'noa
nanekea eri knare hugahue. **15** Hagi ana knafina zafareti kasefa
azankuna rehakarufeno mareriaza hu'na, Deviti nagapinti magora
fatgo avu'ava'ene ne' azeri ot'i'nena maka ama mopafi vahera

fatgo avu'avateti refko huzmantegahie. **16** Hagi ana knafina
Juda vahe'mokizmi zamagu nevazisageno, Jerusalemi kumapi
vahe'mo'za knazana omanesige'za knare hu'za manigahaze.
Ana nehu'za Jerusalemi kumakura hu'za, Ra Anumzamo'a tagri
fatgo avu'avazane hu'za agia antemigahaze. **17** Na'ankure Ra
Anumzamo'a huno, Deviti nagapintike Israeli vahe kinia mani
vava hu'za nevanageno, **18** Livae nagapintike pristi vahera
fore hu'za nevu'za, Nagri navurera tevefi kre fanane hu ofane,
witi ofane, mago'a ofanena huvava hu'za vugahaze. **19** Hagi
Ra Anumzamo'a Jeremaiana amanage huno asami'ne, **20**
Nagrama masane haninemoke'ma eforema huterema hana'a
knama ante'noa kna mago vahe'mo'a eri atresigeno, ru knarera
eforera osugaha'e. **21** E'i ana kanteke Nagrama huhagerafi
huvempa kema hu'na, eri'za vaheni'a Deviti nagapintike kinia
mani'za nevanageno, Livae nagapintike pristi vahera mani'za
nevu'za Nagri eri'zana erigahazema hu'na huvempama hu'noa
nankeea mago vahe'mo'a eri otregahie. **22** Hagi Nagri eri'za
ne' Deviti naga'ene, eri'za vaheni'a Livae naga'enena rama'a
vahe zamazeri fore ha'nena, monafi hanafi kna nehu'za hageri
anke'nafe kahepankna nehanage'za vahe'mo'za ohamprigahaze.
23 Hagi Ra Anumzamo'a Jeremaiana asamino, **24** Vahe'mo'zama
hu'za, tare naga nofi'ma Israeli vahe'ene Juda vahe'enena,
Ra Anumzamo'ma Nagri vaherema huno nehia vahe'ma amefi
hunezamie hu'za vahe'mo'zama nehzana kagra nontahimpi?
Anage hu'za Nagri vahera kezamasu'za zamazeri fenkami
netre'za, Israeli vahera zamage amneza nesaze. **25** Nagrama
masane haninemoke'ma me'nekema efore'ma huterema hana'a
kasegene monane mopa'nemokema kankamuznire'ma me
fatgoma hana'a kasegema huhagerafi'noana mago vahe'mo'a eri

otregahie. 26 E'i ana kante, Jekopu naga'ene Nagri eri'za ne'
Deviti nagara namefira huozamigahue. Nagra Deviti nagapinti
kinia zamazeri otitere hanuge'za, Abrahamune, Aisakine,
Jekopumpinti'ma forehu anante nante'ma hu'za esaza vahera,
kinia mani'za kegava huzmantegahaze. Ana nehanage'na Nagra
nasunku hunezamante'na kinafintira ete zamavare'na mopazmire
esuge'za eman'i'neza maka zampina knare hu'za manigahaze.

34 Hagi Babiloni kini ne' Nebukatnesa'ene sondia vahe'ane,
maka agrama kegavama hu'nea mopafi vahe'mo'zane,
maka vahe'mo'zanena e'za Jerusalemi kuma'ene, tva'onte'ma
megagi'nea kumataminena hara eme huzamante'naze. Ana'ma
nehaza knafi Ra Anumzamo'a ama nanekea Jeremaiana
asami'ne. 2 Ra Anumzana Israeli vahe Anumzamo'a amanage
hie hunka Juda kini ne' Zedekaiana ome asamio. Kagra antahio!
Ama rankumara Babiloni kini ne'mofo azampi erinta'nena teve
taginte'nigeno tegahie. 3 Hagi kagra Zedekaiaga agri azampintira
atrenka ofregahane. Na'ankure kagrira kazeriza Babiloni kini nete
vanagenka kavufinti ana kini nera ome negenka, agrane keaga
hugantugama hugaha'e. Anantetira kavre'za Babiloni kumate
vugahaze. 4 Hianagi kagra Juda kini ne' Zedekaiaga antahio!
Nagra Ra Anumzamo'na huvempa huanki'za, hapintira kagrira
kahe ofrigahaze. 5 Hianagi kagra knare hunka mani'enka krimpa
frune frigahane. Ana hananke'za kagehe'zama ko'ma kinima
mani'neza frizage'za, mananentake zantamima kre manama
nevu'za ra zamagima zami'nazaza hu'za, kagrama frisanke'za
vahe'mo'za ana nehu'za, zavira nete'za amanage hugahaze.
Kva ne'timofonkura tasunku hune hu'za hugahaze. Na'ankure
Nagra Ra Anumzamo'na ama ana nanekea huvempa nehue
huno hu'ne. 6 Anagema hutegen'o'ka kasnampa ne' Jeremaia'a

vuno, Juda kini ne' Zedekaia'a Jerusalemi mani'negeno ana miko nanekea ome asami'ne. 7 Hagi e'i ana knafina Babiloni kini ne'mofo sondia vahe'mo'za e'za, Jerusalemi kuma'ene Lakisi kuma'enena Azeka kuma'ene hara eme huzamante'naze. Hagi kora e'i ana 3'a kumara Juda mopafina hankavenentake vihu kegina me'nege'za hara hu'za e'ori'naza kumatami hara eme huzmante'naze. 8 Hagi Kini ne' Zedekaia'a kazokazo eri'za vahe'ma zamatresage'za fruma hu'za manisaza zamofo nanekema maka Jerusalemi vahe'enema huvempama hutegen, henka Ra Anumzamo'a Jeremaiana ama nanekea asami'ne. 9 Hagi Zedekaia'a huno, mika Hibru vene a'enema kazokazo eri'zama e'neriza vahera, zamatrenke'za fru hu'za maniho. E'na hina magore huno Hibru vahe'mo'a, otino Hibru vahera kazokazo eri'za vahera zamavare ontegahaze. 10 Hagi ana nanekema huhagerafino huvempama hia kerera maka eri'za vahe'mo'zane, maka vahe'mo'zanena mago zamarimpa nehu'za, mago'anena kazokazo eri'za vahera ozamavaregahune nehu'za kazokazo eri'za vene'nene a'nenena zamatrage'za fru hu'za vu'naze. 11 Hianagi henka mago'a knama evutege'za, antahintahi zamia rukrahe hige'za zamatrage'za fruma hu'za vu'naza kazokazo eri'za a'ene venenea ete zamavare'za, kazokazo eri'zana zami'naze. 12 Ana hazageno Ra Anumzamo'a Jeremaiana asamino, 13 Nagra Ra Anumzana Israeli vahe Anumzamo'na, tamagehe'za Isipi mopafima kazokazo eri'zama e'neri'za mani'nage'na zamavare atirami'nama ne-e'na amanage hu'na huhagerafi huvempa kea huzmante'na amanage hu'noe, 14 nehamprinkeno 7nima hutere hania kafurera tamagra Hibru vahe'mota, Hibru vahe'ma zagoreti'ma mizama sesage'za, kazokazo eri'zama erisaza vahera 6si'a kafuma eri'zama eritesageta 7nima hania kafufina

zamatrenke'za fru hu'za maniho hu'na hu'noanagi, ana nanekea
tamagehe'za zamagesa ante'za nentahiza amagera onte'naze.

15 Hagi osi'a knama evia knafina tamagra, Nagri nagima
me'nesige'za mono'ma hunantegahaze hu'noa mono nompi
vuta, tamagu'a rukrahe nehuta, Nagri navurera knare avu'ava'za
huta huvempa huta tamagra'a vahepinti'ma kazokazo eri'za
vahe'ma zamavare'nazana zamatrage'za fru hu'za vu'naze. **16**
Hianagi tamagra rukrahe huta menina Nagri nagia eri haviza
huta, kazokazo eri'za vene a'enena zamatrage'za fruma hu'za
zamagra zamavesite'ma vu'naza eri'za vahera ete zamavareta
kazokazo eri'zana zamige'za erinezamantaze. **17** E'ina hu'negu
Ra Anumzamo'a huno, tamagra Nagri nanekea amagera anteta
tamagra'a vahepinti'ma zamavrage'za kazokazo eri'zama e'neriza
vahera zamatrage'za fru hu'za ovu'naze. E'ina hu'negu antahiho!
Nagra hanuge'za ha' vahe'mo'za bainati kazinteti mago'a tamahe
nefrisageta, mago'a krimo tamahe nefrina, mago'a ne'zanku
huta frigahaze. Ana hu'na tamagr'i'ma tamazeri havizama hanua
zamofo agenkema ama mopafi vahe'mo'zama nentahi'suza,
tusi zamagogogogu hugahaze. **18** Hagi tamagra ana huvempa
nanekema Nagri navure'ma huhagerafi'nazana, e'i ana'ma
huvempama haza nanekema eri hankavetinaku'ma, agaho
bulimakaoma ahete'za amu'nompinti rutane kanti kamama
huntene'za, amunompi vazankna hu'naze. Hianagi maka'mota
ana'ma huvempama hu'naza nanekea amagera onte'naze. Ana
hu'nazagu tamagrira bulimakao afu'ma aheteta amu'nompinti'ma
rutane atrazankna hugahue. **19** Hagi Juda kva vahe'ene,
Jerusalemi kva vahe'ene, kini ne'mofo nompi eri'za vahe'ene,
pristi vahe'ene, ana mopafi mika vahemo'zanena huvempama
hu'naza ke'zamia amagera onte'nazanki'za, anazanke hu'za

bulimakao afu'ma rutane kantigama hunte'naza amu'nompi vugahaze. **20** Nagra ha' vahe'zamimofo zamazampi zamavare anta'nena zamahe frigahaze. Ana hanage'za fri zamavufaga anamifima hare'za vanoma nehaza namamo'za nenesage'za, afi zagagafamo'zanena negahaze. **21** Hagi Nagra Juda kini ne' Zedekaiane eri'za vahe'anena, zamahe frinaku'ma nehaza ha' vahe zamazampi zamavare antegahue. E'i ana ha' vhahera Babiloni kini ne'mofo sondia vaheki'za menina ko tamagrira tamatre'za vu'naze. **22** Hagi antahiho! Nagra ha'nena ete Jerusalemi kumate e'za ha' eme huramante'za ama ana kumara eri'za teve tagintegahaze. Hagi Juda mopafima me'nea kumatamina ana maka eri haviza ha'nena anampina magore hu'za vhahera omanitfa hugahaze huno Ra Anumzamo'a hu'ne.

35 Hagi Josaia nemofo Jehoiakimi'ma Juda vahe kinima mani'nea knafina Ra Anumzamo'a Jeremaiana amanage huno asami'ne, **2** Kagra Rekapu naga'ene vunka ome keaga hutenga, zamavarenka ege'za Ra Anumzamofo nonte etesagenka, zamavarenka mago hunaragintepinka umareriteta, anampinka waini tina ome zamige'za neho. **3** Hagi anagema huno Ra Anumzamo'a nasamitege'na, nagra vu'na Habazinia negeho ne' Jeremaia nemofo Jazaniane, ana maka ne' mofavre naga'ane afu'aganahe'inema nezamavare'na, maka Rekapu naga'enena, **4** zamavarena Ra Anumzamofo mono nonte'ma ete'na, Anumzamofo eri'za ne' Iglesia negeho ne' Hanani ne' mofavre naga'ma nemanizafinka zamavare'na ufre'noe. Hagi ana'ma hunaraginte naza nomo'a, hunaraginte'nage'za mago'a eri'za vahe'ma nemaniza nomofo tavaonte me'nea nompi zamavare'na ufre'noe. Hagi ana'ma hunaraginte naza nomo'a, mono no kafante kva nehia ne' Salumu nemofo

Maseia'ma nemania nomofo anaga kazigama me'nea nompinka
zamavare'na vu'noe. 5 Hagi anante waini timo'ma avi'mate'nea
tintafentamine kapuraminena eri'na e'na, Rekapu naga'mokizmi
zamavuga eme nente'na, waini tina erita neho hu'na hu'noe.
6 Hianagi zamagra amanage hu'za kenona hunante'naze.
Tagra waini tina onegahune, na'ankure tagri nerafa Rekapu
nemofo Jonadabu'a tasamino, tamagra waini tina nonenke'za
tamagripinti'ma forehu anante nante'ma hu'za vanaza mofavre
naga'mo'zanena onetfa hiho huno tasami'ne. 7 Anage nehuno
tamagra nona nonkita, hoza erita nonteta, waini hozanena erita
ontetfa hiho. Hianagi tamagra kraga vahe'ma manitama vanoma
hanaza mopafina, maka kna tamagra seli nompima manita
vanoma hanuta za'zate manigahaze huno tasami'ne. 8 E'ina
hu'negu nerafa ne' Rekapu nemofo Jonadabu'a huranteno,
tamagrane a'nane nagatamine, ne'mofavretamine mofa'ne naga
tamimo'zanena waini tina onetfa hiho huno higeta, ana naneke
amage anteta neonkeno eno ama knarera ehanati'ne. 9 Ana
nehuta nona kita nomanita, waini hoza nonteta hozanena erita
avimzana nohankrone. 10 Hianagi tagra seli nompi nemanita,
nerageho ne' Jonadabu'ma amage antehoma huno hu'nea
nanekea maka amage ante'none. 11 Hianagi Babiloni kini
ne' Nebukatnesama eno ha'ma eme hunerantegeta, tagra
Kaldia sondia vaheku'ene Siria sondia vaheku koro nehuta
amanage hu'none. Enketa Jerusalemi kumate vanune nehuta,
e'nonku menina Jerusalemi kumate mani'none. 12 Hagi
anagema hutazageno anante Ra Anumzamo'a amanage huno
Jeremaiana asami'ne, 13 Monafi sondia vahe'mofo Ra Anumzana
Israeli vahe Anumzamo'a huno, kagra vunka Juda vahe'ene
Jerusalemi kumapima nemaniza vahe'enena ome zamasamio.

Tamavumro'ma antenaku'ma nehua kene, Nagri nanekenena
antahita amagera ontegahazafi? **14** Hagi Rekapu nemofo
Jonadabu'a mofavre naga'a zamasamino, waini tina oneho huno
huzamantege'za one'za neageno eno ama knarera ehanati'ne.
Na'ankure nezamafa'ma hia naneke amage ante'naze. Hianagi
Nagra rama'a zupa tamagrira tamasami vava hu'na e'noanagi,
tamagra Nagri nanekea antahita amagera onte'naze. **15** Hagi
Nagra Ra Anumzamo'na eri'za vaheni'a kasnampa vahera
rama'a zupa huzmantoge'za evava nehu'za, amanage hu'za
eme tamasami'naze. Maka'mota havi avu'ava zama nehaza
zana atreta tamagu'a rukrahe huta fatgo avu'avaza hiho. Ana
nehuta havi anumzantaminte'ma mono'ma hunezamanteta,
zamage'ma nentaza zana atreho. E'ina'ma hanuta tamagehe'ine
tamagri'enema tami'noa mopafina knare huta manigahaze hu'za
eme tamasami'naze. Hianagi ana nanekea tamagesa anteta
nentahita amagera onte'naze. **16** Hagi Rekapu nemofo Jonadabu
mofavre naga'mo'za nezmageho'ma hu'nea nanekea antahi'za
amage ante'naze. Hianagi tamagra Nagri nanekea antahita
amagera onte'naze. **17** E'ina hu'negu Hankavenentake Ra
Anumzana Israeli vahe Anumzamo'a amanage nehie. Nagra
Juda vahe'ene Jerusalemi kumapima nemaniza vahe'enena,
knaza zami'na zamazeri haviza hugahuema hu'na hu'noa
knazanteti zamazeri haviza hugahue. Na'ankure Nagra keaga
zamasmuani Nagri nanekea antahi'za amagera nontazage'na,
zamagrikura kezati'noanagi ana kerera kenona osu'nazagu
anara hugahue. **18** Hagi anante Jeremaia'a Rekapu nagara
zamasamino, hankavenentake Ra Anumzana Israeli vahe
Anumzamo'a huno, Na'ankure tamagra neramafa Jonadabu'ma
huramante'nea nanekene tra ke'anena maka amage nenteta,

nazano hihoma huno huramante'nea zanena maka amage ante vagare'naze. 19 E'ina hu'nagu Monafi sondia vahe'mofo Ra Anumzana Israeli vahe Anumzamo'a huno, Rekapu nemofo Jonadabu nagapintira mago'mo otino Nagri eri'zana erino nevanige'za, zamagripinti'ma henkama forehu anante nante'ma hanaza vahepintira otitere hu'za ana eri'zana erivava hu'za vugahaze.

36 Hagi Josaia nemofo Jehoiakimi'ma Juda vahe kinima manino egeno nampa 4ma hia kafufina, Ra Anumzamo'a amanage huno Jeremaiana asami'ne. 2 Kagra mago avontafe eritenka, Israeli vahete'ene Juda vahete'enena maka kumatamimpima fore'ma hania knazanku'ma kasami'noa nanekea ana maka avontafepi krento. Hagi ana nanekema krentesanana, Josaia'ma kinima mani'nea knafima agafama hu'na nanekema kasami'noregati krenteme enka ama knare ehanatio. 3 Hagi maka Juda vahe'mo'za zamazeri haviza hunaku'ma antahintahima nehua zamofo nanekema antahizaresina, kefo avu'ava zazmia atre'za zamagu'a rukrahe hazage'na, kumi zamia atre zmantoresine. 4 Hagi anante Jeremaia'a Neria nemofo Barukuna ke higeno egeno, mika nanekema Ra Anumzamo'ma asami'nea nanekea nesamigeno, Baruku'a mago avontafepi miko krente'ne. 5 Hagi ana hutegeno anante Jeremaia'a Barukuna amanage huno asami'ne, Nagra amafi kina hu'na mani'noanki'na Ra Anumzamofo mono nontega ovugahue. 6 E'ina hu'negu Ra Anumzamofo nanekema kasamugenka avontafepima krentana nanekea, ne'zama a'o hu'za nemaniza kna zupa Ra Anumzamofo mono nompi erinka vunka, ome hamprig'e'za maka mono nompima mani'nesaza Juda vahe'mo'za antahi vagareho. Ana nehuge'za Juda mopafima me'nea ranra kumatamimpinti'ma

esaza vahe'mo'zanena antahigahaze. 7 Hagi zamagra kefo
avu'ava'ma nehaza zama atre'za makamo'za zamagu'a rukrahe
nehu'za, nunamuma hanageno'a Ra Anumzamo'ma asunku'ma
huzmantesiana knare hugahie. Na'ankure Ra Anumzamo'a
vahe'agura huno, tusi narimpa ahenezamante'na zamazeri
haviza hugahue huno huama hu'ne. 8 Hagi anante Neria nemofo
Baruku'a, kasnampa ne' Jeremaia'ma asami'nea nanekea, Ra
Anumzamofo mono nompi ana maka nanekea ome hampri'ne.
9 Hagi Juda kini ne' Josaia nemofo Jehoakimi'ma kinima
mani'negeno vuno 5fuma hia kafumofona 9ni ikantera, Jerusalemi
kumapi vahe'mo'zane maka Juda mopafima me'nea kuma
tamimpima nemaniza vahemo'zanena Jerusalemi kumate e'za,
ne'zana a'o hu'za manine'za Anumzamofo mono huntenuku
hu'naze. 10 Hagi avontafepima maka'zama krenentea ne' Safani
nemofo Gemaria'ma Ra Anumzamofo mono nompima nemanifi,
maka vahe'mo'za nentahizageno Baruku'a Jeremaia'ma hu'nea
nanekea avontafepinti hampri'ne. Hagi hunaraginte'nageno
Gemaria'ma nemania nomo'a Ra Anumzamofo mono nomofo
anaga kazigama me'nea kumapima, Ra mono nompima
ufre kafanku'ma, Kasefa Kafanema nehaza kafama me'nea
tva'onte me'ne. 11 Hagi Ra Anumzamofo nanekema Baruku'ma
avontafepinti'ma hampriana Safani negeho Gemaria ne'mofo
Mikaia'a ana maka nanekea antahi vagare'ne. 12 Ana'ma
huteno'a agra kini ne'mofo nonte uramino, avoma kreno erinte
fatgoma nehia ne'mofo nonte'ma viana, ana maka kini ne'mofo
eri'za vahetami mani'nazageno vu'ne. Ana vahetamina avonkreto
erinte fatgo nehia ne' Elisamaki, Semaia nemofo Delaiaki, Akbori
nemofo Elnataniki, Safani nemofo Gemariaki, Hanania nemofo
Zedekaia e'ne maka eri'za vahe'amo'za mani'nageno ome

zamage'ne. **13** Anante Baruku'ma avontafepinti'ma hamprige'za maka vahe'mo'zama antahi'naza nanekea, Mikaia'a ana nanekea ome zamasami vagare'ne. **14** Ana'ma hutege'za maka kini ne'mofo eri'za vahe'mo'za oti'za, Kusi nagapinti ne' Selemaia negeho Netania nemofo Jehudi hunte'za, Barukuna amanage hunka ome asamio, e'ima hamprige'zama veamo'zama antahiza avontafera erino eno hu'za huntazageno vuno ome asamigeno, Neria nemofo Baruku'a ana avontafera erino zamagritega e'ne. **15** Hagi ana vahe'mo'za Barukuna asami'za, muse hugantonanki amare mani'nenka ana avona hamprio, hu'za hazageno Baruku'a ana avona hamprige'za antahi'naze. **16** Hagi Baruku'ma ana maka nanekema hamprige'za antahi vagama rete'za, zamanogu hu'za ovufi avufi nehu'za, Barukuna amanage hu'za asami'naze. Tamagerfa huta maka ama nanekea vuta kini ne' ome asamigahune. **17** Hagi anante Barukuna antahige'za, muse hugantonanki inankna hunka ama avona kre'nampi tasamio? Jeremaia'a agra'a agipinti nehigenka maka ama avona kre'nampi? **18** Anage hazageno Baruku'a kenona huno, Izo agra agipinti nehige'na avo zota eri'na ana maka nanekea ama avontafepina krente'noe. **19** Anante maka kini ne'mofo eri'za vahe'mo'za Barukuna asamiza, vahe'mo'za onkesarega kagrane Jeremaia'enena vuta ome fraki'o. **20** Hagi anagema hute'za ana avontafera eri'za kini ne'mo'ma nemania kumapi vu'za, avoma kreno eri fatgoma nehia ne' Elisama nompi ome antete'za, vu'za ana maka nanekea kini ne' ome asamizageno antahi'ne. **21** Hagi ana avontafe ome erinka eno huno kini ne'mo'a Jehudina huntogeno vuno, avoma kreno erinte fatgoma nehia ne' Elisama nompinti ome erino eno, kini ne'ma mani'nere agri eri'za vahe'amozanena oti'nazageno ana avona eme hamprige'za

antahi'naze. **22** Hagi ama ana zama fore hu'neana, 9ni ikana zasi
nehia knagino kini ne'mo'a zasi'ma nehigeno nemania nompi,
teve hugre'za nemaniza zama kapareti'ma tro'ma hunte'nafi
tevea hugreno tonehino mani'ne. **23** Hagi Jehudi'a ana avoma
osi'a hamprino 3'o 4'a isama nevigeno'a, kini ne'mo'a osi kazinteti
anama'a ahesagane huno teve hugre'zama nemaniza zama
tro'ma huntenafi kretere hu'ne. Ana huno nevigeno ana avontafera
tevemo teno eri fanane hu'ne. **24** Hagi kini ne'mo'ene maka eri'za
vahe'amo'za magore hu'za ana nanekema nentahi'za korora
nehu'za, kukenazamia tagatora osu'naze. **25** Hagi Elnatani'ma
Delaia'ma Gemariaki hu'za kini nekura ana avontafera tevefina
onkro hu'za asami'nazanagi, zamagri nanekea ontahi'ne. **26**
Ana'ma huteno kini ne'mo'a nemofo Jeramilinki, Azrieli nemofo
Seraianki, Abdili nemofo Selemianki huno hunezmanteno,
avoma kreno erinte fatgoma nehia ne' Barukune, kasnampa ne'
Jeremaia kiznia vuta ome zanazerita eho huno huzamantege'za
vu'haze. Hianagi Ra Anumzamo'a ana netrena zanazeri fraki'ne.
27 Hagi Jeremaia'ma nehigeno Baruku'ma kre'nea avontafe'ma
kini ne'mo'ma tevefima kretegeno'a, anante Ra Anumzamo'a
Jeremaiana amanage huno asami'ne, **28** kagra mago avontafe
erinka, ko'ma krente'nankeno kini ne' Johoiakimima tevefima
kre'nea nanekea ana avontafepi ana maka nanekea ete krento.
29 Ana nehunka kini ne' Jehoiakiminkura amanage hugahane. Ra
Anumzamo'a huno, kagra avontafera tevefi negrenka amanage
hu'nane. Nahigeno Jeremaia'a avontafepina kreno, Babiloni
kini nemo'a eno ama kumara eri haviza nehuno vahe'ene,
zagagafanena zamaheno erihana hugahie huno hu'ne? **30**
E'ina hu'negu Ra Anumzamo'a Juda kini ne' Jehoiakiminkura
amanage hu'ne. Agri nagapintira magore huno henka'a agri nona

erino Deviti kini tratera kinia omanitfa hugahie. Hagi fri'nige'za avufga'a fegi eritre'nesageno, masarera zagemmo renentesigeno, kenagera aisi komo runtegahie. **31** Hagi zamagramma hu'naza kumitera, Nagra nona huzamante'na agri'ene mofavre naga'aner i'za vahe'anena zamazeri haviza hugahue. Ana nehu'na zamagrite'ene Jerusalemi kumapi vahete'ene, Juda vahete'enena hazenke'za atresugeno egahie hu'na hu'noanagi ana nanekea ontahi'naze huno Anumzamo'a hu'ne. **32** Hagi anante Jeremaia'a ru'ene mago avontafe erino avoma kreno erinte fatgoma nehia ne' Neria nemofo Barukuna nemino higeno, koma kre'nea avoma Juda kini ne' Jehoiakimi'ma tevefima kre'nea nanekeramina, ete Jeremaia'a nehigeno avontafepi krente'ne. Ana nehuno mago'ene ana agofetura rama'a anahukna nanekenena nehigeno krente'ne.

37 Hagi Babiloni kini ne' Nebukatnesa'a, Jehoiakimi nemofo Jehoiakinina mago agi'a Koniakino agri no erino Juda vahe kini manisiegu huno, Josaia nemofo Zedekaiana kinia azeri oti'ne. **2** Hagi Zedekaia'ene eri'za vahe'amo'zane ana maka vahemo'zanena Ra Anumzamo'ma asamigeno kasnampa ne' Jeremaia'ma hia nanekea ontahitfa hu'naze. **3** Hagi kini ne' Zedekaia'mago zupa Selemia nemofo Jehukaline Ma'aseia nemofo pristi ne' Zefanianena huznanteno, kasnampa ne' Jeremaiana amanage huta ome asami'o. Muse hugantoanki Ra Anumzana tagri Anumzamofontega nunamu hugeno taza hino huta ome asami'o. **4** Hagi Jeremaia'a fru huno mani'neno agra avesite vahepina vuno eno nehuno mani'ne. Na'ankure agrira ana knafina kina huonte'nageno anara hu'ne. **5** Hagi ana knafinena Fero sondia vahe'mo'zama Isipima atre'za karankama neazema nehaza nanekema, Jerusalemi kuma'ma eme avazagi

kagi'zama mani'naza Kaldia vahe'mo'zama nentahiza, Jerusalemi kumara atre'za vu'naze. **6** Anante Ra Anumzamo'a kasnampa ne' Jeremaiana asamino, **7** Ra Anumzana Israeli vahe Anumzamo'a amanage hie hunka, Juda kini ne'mo'ma Nagri navesi'zama keno eri fore hunaku'ma huzmante'sanige'zama esaza vahera amanage hunka zamasamio. Antahiho! Fero sondia vahe'mo'zama tamaza hunaku'ma aza vahe'mo'za ete rukrahe hu'za mopa zamirega Isipi vunaku nehaze. **8** Ana'ma hanage'za Babiloni sondia vahe'mo'za ete rukrahe hu'za e'za ama Jerusalemi rankumara hara eme hugatenere'za teve tagintesageno tegahie. **9** Hagi Ra Anumzamo'a mago'ene huno, Tamagra'a amanage huta tamare ramataga osiho. Tamagerfa hu'za Babiloni vahe'mo'za hago tatre'za vaze huta tamagesa ontahio. Na'ankura zamagra ovu'za ete rukrahe hu'za egahaze. **10** Hagi Babiloni sondia vahera tamagra maka zamahe vaganereta, mago'a zamahe kuzafa'ma hanaza sondia vahe'mo'zage seli nozamifina manigahaze. Hianagi anama zamahe kuzafa'ma hanaza sondia naga'mo'za otivare'za e'za ama rankumara teve eme tagintesageno tegahie. **11** Hagi Fero sondia vahe'mo'zama neazema haza nanekema Babiloni sondia vahe'mo'za nentahi'za, Jerusalemi kumama eme avazagi kagi'za mani'naretira atre'za vu'naze. **12** Ana knafina Jeremaia'a Jerusalemi rankumara atreno, Benzameni nagamofo mopafi vuno, naga'afinti mopa'a ome erinaku vu'ne. **13** Hagi rankumamofona Benzameni kafanema nehaza kafante'ma egeno'a, sondia vahete kva ne' Hanania negeho, Selemia nemofokino agi'a Irija'e. Ana hu'neankino ana ne'mo'a eno kasnampa ne' Jeremaiana eme azenerino amanage hu'ne. Kagra koro frenka vunka Babiloni vahe'ene umaninaku vu'za nehane. **14** Hagi anagema higeno'a

Jeremaia'a huno, i'o kagra havige nehane. Nagra korora fre'na
Babiloni vahe'ma mani'nazarega novue. Hianagi Irija'a anankea
nontahino Jeremaiana avreno kini nemofo eri'za vahete vu'ne.

15 Hagi ana'ma hutenge'za kva vahe'mo'za Jeremaiana tusi
zamarimpa ahenente'za sefura amite'za avre'za vu'za, avoma
kreno erinte fatgoma nehia ne' Jonatani nompi ome kina
hunte'naze. Na'ankure Jonatani nona kina no erise'naze. **16**
Hagi ana kina nona mopafi kafi'za urami'naza kina nonkino,
Jeremaia'a anampina za'za kna umani'ne. **17** Hagi henka
kini ne' Jedekaia'a vahe huzmantenge'za Jeremaiana ome
avre'za azageno, noma'afi oku'a amanage huno antahige'ne. Ra
Anumzamo'a mago'a nanekea kasami'nefi? higeno Jeremaia'a
huno, i'zo me'ne nehuno amanage hu'ne. Kagira Babiloni
kini ne'mofa azampi kavrentegahaze. **18** Hagi anage nehuno
Jeremaia'a kini ne' Jedekaiana asamino, nagra na'a mago
hazenkea kagrite'ene, kagri eri'za vahete'ene, ama vahete'enena
hu'nogenka, kinafina navrente'nane? **19** Hagi Babiloni vahe'mo'za
e'za kagri'ene amama mani'nana mopafi vahe'enena hara
eme huoramantegahaze hu'zama, kasnampa kema nehaza
kema antahi'nana kasnampa vaheka'a iga mani'naze? **20** Hagi
menina muse hugantoanki, naza huogu kini nera ranimoka
kantahi negoanki antahi nenaminka, natrege'na avoma kreno
erinte fatgoma nehia ne' Jonatani nompina ova'neno. Ana'ma
hananke'na anampima umanine'na fri'zankura navesra nehie. **21**
Anagema hutegenoa kini ne' Jedekaia'a hige'za Jeremaiana
avre'za vu'za, kini ne'mofa kumapima sondia vahe'ma nemanifi
ome kina huntageno mani'nege'za, bretima negraza vaheteti
mago mago knarera bretia eri'za ome amitere hazageno neneno
mani'ne. Ana nehazageno vuno rankumapima me'nea bretimo'a

maka vagare'ne. Hianagi Jeremaia'a sondia vahe'ma nemanizafi
kina huno mani'ne.

38 Hagi Matani nemofo Sifatiaki, Pasuri nemofo Gadaliaki,
Selemaia nemofo Jukaliki, Malkia nemofo Pasuriki hu'za
mani'ne'za nentahizageno Jeremaia'a maka vahera amanage
huno zamasami'ne, **2** Ra Anumzamo'a huno, iza'o ama
rankuma'mofo agu'afima manisia vahera hapinti ahe frige,
ne'zanku huno frige, krimo ahe frige hugahie. Hianagi iza'o Kaldia
vaherazamazampima freno vania vahe'mo'a ofri manigahie. Anama
ofri manisaza vahera hapinti fenozama rohure'za erizankna hu'za,
ozamahe zamatresege'za manigahaze. **3** Hagi Ra Anumzamo'a
huno, Ama Jerusalemi rankumara Babiloni kini ne'mofo sondia
vaherazamazampi erintesuge'za hahugatere'za erigahaze hu'ne.
4 Hagi Jeremaia'a anagema hige'za anante kini ne'mofo eri'za
vaherem'o'za kini nera asami'za, ama nera ahe frigahune.
Na'ankure amanahu nanekema nehia zamo'a, ama rankumapima
nemaniza sondia vaherene'ne maka vahemo'zanema koro'ma
hanaza naneke nehie. Na'ankure agra ama vaheremokizmi knare
zankura keaga nosianki, hazenkema erisaza nanekege nehie. **5**
Hagi anante kini ne' Zedekaia'a huno, antahiho! Agra menina
tamagri tamazampi mani'neanki'na, nagra kini ne'mo'na mago
zana osugahue. **6** Hagi anagema hige'za Jeremaiana avre'za
kini ne'mofo nemofo Malkiza tinkerifi ome atrageno urami'ne.
Anama ome atre'naza tinkerimo'a sondia vaherem'a nemaniza
kumapi me'ne. Ana hu'negeno ana kerifina tina omanegeno
hapamoke me'nefi Jeremaiana nofi rentene'za atrazageno
anampi uramino hampakane'ne. **7** Hagi mago nera Ebet-
Melekikino kini ne'mofo nompi eri'za e'neria nere. Agra Itiopia
mopafinti nekino, kini ne'mofo nompi mani'neno, Jeremaiana

avre'za tinkerifima ome atre'naza nanekea antahi'ne. Hagi ana zupa kini ne'mo'a rankumamofona Benzameni kafanema nehaza rankafante mani'ne. **8** Hagi Ebet-Meleki'a kini ne'mofo nompima mani'neretira atreno vuno, kini nera amanage huno ome asami'ne. **9** Kini nera ranimoka, ama vahe'mo'za havi avu'avaza hu'za, kasnampa ne' Jeremaiana avre'za vu'za tinkerifina ome atre'nazankino, anampi manineno agazanku huno frigahie. Na'ankure magore huno rankumapina ne'zana omanetfa hu'ne.

10 Anagema higeno'a kini ne'mo'a Ebet-Melekina amanage huno huntene, Ru frisnigi vunka 30'a vahe ome zamavarenka ana kerifintira kasnampa ne' Jeremaiana ome avre atreho. **11** Anage higeno'a Ebet-Meleki'a ana vahera ome zamavarege'za kini ne'mofo nompi vu'za, feno zama nentaza nomofo fenka kazigama me'nea nompima, tagato tagatu'ma hu'nea kukenane atafa kukenama nentazafinti ana kukena ome eriteno vuno nofi ome anakiteno atregeno Jeremaia'ma kerifima mani'nere urami'ne.

12 Hagi ana Itiopia ne' Ebet-Meleki''a Jeremaiana amanage huno asami'ne, Ana tavarave nofi erinka tarega kazo'namofo fenka kaziga atregeno rugagino, ana hutenga nofimo'ma katama kami'zankuranofira erinka kavuga ana tavravemofo amu'nompi anakio. Higeno anama asamia zana amage anteno Jeremaia'a hu'ne. **13** Ana hute'za ana nofite Jeremaiana ana kerifintira avazuhu anagate'naze. Ana hutazageno kini ne'mofo kumapima sondia vahe'ma nemanizafi mani'ne. **14** Hagi mago zupa kini ne' Zedekaia'a vahe huzmanteg'e'za vu'za Jeremaiana ome asamizageno Ra Anumzamofo mono nomofona nampa 3 kafama unefrazare mani'negeno eme ke'ne. Higeno kini nemo'a amanage huno Jeremaiana asami'ne. Nagra mago zanku kantahige'za nehuanki magore hunka nagritera eri frara okio. **15** Anage higeno

Jeremaia'a amanage huno Zedekaiana asami'ne. Nagrama kekare'ma nonama hu'na kasami'nuana nagrira tamagerfa hunka nahe frigahane. Hagi nagrama knare antahintahima kamisuana, ana nanekeni'a ontahigahane. **16** Hianagi kini ne' Zedekaia'a oku'a zanagrake mani'neke Jeremaiana amanage huno huvempa hunte'ne. Ra Anumzana kasefa huno mani'nea Anumzama, tasimu'ma tamigeta mani'nona Anumzamofo avufi huvempa huanki'na kagrira kahe ofrigahue. Ana nehu'na kahe frinaku'ma nehaza vahe zamazampina kavre ontegahue. **17** Anante Jeremaia'a amanage huno Zedekaiana asami'ne. Ra Anumzana Monafi sondia vahe'mofo Anumzana Israeli vahe Anumzamo'a huno, ha'ma osu kagrama atrenka Babiloni kini ne'mofo eri'za vahe zamazampima ufresunka, kagra knare hunka manigahane. Ana'ma hananke'za ama Jerusalemi rankumara tevea tagi ontegahaze. Ana hanagenka kagranne nagaka'anena knare huta manigahaze. **18** Hianagi kagrama atrenka Babiloni kini ne'mofo eri'za vahe zamazampima uofresanke'ha, Nagra Kaldia vahe zamazampi ama Jerusalemi rankumara erintesuge'za teve tagintesageno tegahie. Ana hanigenka kagra ana vahe zamazampintira zamatrenka ofregahane. **19** Hagi kini ne' Zedekaia'a amanage huno Jeremaiana asami'ne. Koma Juda vahe'mo'zama atre'za Babiloni vahe'enema umani'naza vaheku koro nehue. Nagri'ma navre'za Babilonima vu'za Juda vahe zamazampi ome antesage'za, nazeri havizama huzanku korora nehue. **20** Higeno Jeremaia'a ana kenona huno, Kagriria kavre'za Juda vahe zamazampina ome ontegahaze. Hagi Ra Anumzamo'ma hige'nama kasamuua nanekea antahinka amage'anto. Ana'ma hananke'za kagrira kahe ofrisagenka knare hunka manigahane. **21** Hianagi kagrama kema ontahinka,

kagraka'ama atrenka Babiloni vahe zamazampima uofresanana,
Ra Anumzamo'a amanahu huno ava'nagna zana naveri hige'na
ke'noe. 22 Juda kini ne'mofo nompima mani'naza maka
a'nane nagara, ana maka zamavare'za vu'za Babiloni kini
ne'mofo eri'za vahe ome zami'naze. Ana hazage'za ana
a'nemo'za hu'za, kagrama antahima nezamina ronekamo'za
kagrira hara hugagatenere'za regavatga hazagenka zamagri
nanekea antahi'nane. Ana hankeno kagiamo'ma hapapima
hampakaneg'eza, kagrira rukrahera hu'za onkage'naze. 23
Ana maka a'ne naga'kane mofavre nagakanena ana maka
zamavare'za vu'za Kaldia vahe ome zamigahaze. Ana hanagenka
kagra zamagri zamazampintira zamatreka ofregahane. Hianagi
kagrira Babiloni kini ne'mo'a kaze'nerinige'za ama rankumara
teve tagintesageno tegahie. 24 Hagi anante Zedekaia'a amanage
huno Jeremaiana asami'ne. Amama hana nanekea atregeno
mago vahe'mo'a ontahino. Vahe'ma zamasamisanana kagra
frigahane. 25 Hagi kagranema keagama hu'a nanekema
nagri eri'za vahe'mo'zama antahisu'za, e'za kagri'ma eme
kantahige'za, kagra na'ane hunka hankeno kini ne'mo'a na'ane
hifi magore hunka ana nanekea eri frara okinka tasamio. Anama
hananketa kagrira kahe ofrigahune hu'za hugahaze. 26 E'inahu
nanekema hanagenka kagra amanage hunka zamasamio.
Nagrama kini ne'ene keagama huana, nagra Jonatani nompima
umanine'na fri'zanku ete natrege'na ana nompina ova'neno
hu'na antahige'noe hunka zamasamio. 27 Hagi anante maka kini
ne'mofo eri'za vahe'mo'za Jeremaiante e'za eme antahigageno,
kini nemo'ma asami'nea kante anteno agra kenona huzmante'ne.
Hige'za Jeremai'a'enena mago'ene keaga osu'naze. Na'ankure
kini nemo'enema keagama hu'na'a nanekea mago vahe'mo'a

ontahitfa hu'negu anara hu'naze. **28** Hagi Jeremaia'a sondia vahe'ma nemaniza kumapima kinama huno nemanifi anampinka mani'nege'za, ha' vahe'mo'za e'za Jerusalemi kumara hara eme hugatere'za eri'naze.

39 Hagi Juda kini ne' Zedekaia'ma kinima mani'negeno 9nima hia kafumofona 10ni ikante, Babiloni kini ne' Nebukatnesa'ene maka sondia vahe'amo'zane e'za, Jerusalemi kumara eme avazagi kagine'za Jerusalemi vahera hara huzmante'naku hu'naze. **2** Hagi Zedekaia'ma kinima mani'negeno 11nima hia kafufina 4 ikamofona 9ni zupa kuma keginafinti anafe hu'za Jerusalemi kumapina ufre'naze. **3** Hagi anante maka Babiloni kini ne'mofo eri'za vahe'mo'za rankumapi ufre'za, kuma keginamofona Amu'no Kafanema nehaza kafante eman'i'naze. Ana vahe zamagi'a, Negal-Sareseliki Samgal-Neboki Sarsekimiki Rabsarisiki kini ne'ma antahintahima nemia ne' Negal-Sareseli'ene ruga'a Babiloni kini ne'mofo eri'za vahemo'zanena ananteke eman'i'naze. **4** Hagi Juda kini ne' Zedekaia'ene maka sondia vahe'mo'za ana vahe'ma nezamage'za, zamagra kenage atre'za koro fre'za, kini ne'mofo hozama me'nea kantegama nevaza kantega vu'za, tare keginamofo amu'nompima me'nea kafanteti atirami'za fegi vu'naze. Ana'ma hute'za fre'za Araba kaziga Jodani agupoma me'nerega vu'naze. **5** Hianagi Babiloni sondia vahe'mo'za zamarotago hu'za vu'za, Zedekaiana Jeriko agupofi ome azeri'naze. Ana hute'za Zedekaiana avre'za Hamati mopafina Ribla kumate Babiloni kini ne' Nebukatnesa'ma mani'nere mareri'naze. Ana hazageno e'inahu knaza erigahie huno anante huama hu'ne. **6** Hagi ana Ribla kumate, Babiloni kini ne'mo'a Zedekaia ne' mofavre nagara, Zedekaia'a negegeno zamahe fri'ne. Ana nehuno Juda mopafi kva vahe'enena maka

zamahe fri'ne. 7 Hagi ana'ma huteno'a Zedekaiana tarega avua
reragati netreno Babiloni avreno vunaku bronsire seninofiteti
kina hunte'ne. 8 Hagi Babiloni vahe'mo'za kini ne'mofo none,
vahe'mokizmi nonena teve tagintageno nerege'za, Jerusalemi
kuma'mofo keginaramina rutapage tapagu hutre'haze. 9 Hagi
Babiloni sondia vahete'ma ugotama hu'nea ne' Nebusaradani'a
Jerusalemi rankumapima mago'ama mani'naza vahera kina
ome huzmante'naku Babiloni zamavareno vu'ne. Ana nehuno
ruغا'a vahe'ene, ko'ma koro'ma fre'za agranema eman'i'naza
vahe'enena zamavareno magoka vu'ne. 10 Hianagi ana sondia
vahete kva ne' Nebusaradani'a zamunte omane vahe'ma mago'a
zazimima omane'nea vahera Juda mopafi zamatrevo nevuno,
waini hozane hozama ante mohanena nezamino vu'ne. 11 Hagi
Babiloni kini ne' Nebukatnesa'a, Jeremaia kazigagura amanage
huno sondia vahete kva ne' Nebusaradanina hunte'ne. 12 Kagra
vunka Jeremaiana ome avrenka kegavahu so'e nehunka mago
hazenkea omio. Ana nehunka nazano huoma huno kasaminia
zana amage antenka anazana huo. 13 Hagi anage nehuno
sondia vahete ugota kva ne' Nebusaradanink, kini ne'mofo eri'za
vahete kva ne' Nabusasbaninki kini ne'ma antahintahima nemia
ne' Negal-Sareseline mago'a kva vahe'enena huzmanteg'e'za
vu'za, 14 mago'a vahe ome huzmantage'za Jeremaia'ma
sondia vahe kumapima kinama huno mani'nefinti ome avre'za
e'naze. Ana hazage'za Jeremaiana avre'za Safani negeho
ne' Ahikamu nemofo Gedalia azampi antazageno avreno
noma'arega vu'ne. Ana higeno Jeremaia'a agra'a vahe'ene
magoka mani'ne. 15 Hagi sondia vahe'ma nemaniza kumapima
ko'ma Jeremaia'ma kinama huno mani'negeno'a Ra Anumzamo'a
amanage huno asami'ne. 16 Itiopia kumate ne' Ebetmelekina

amanage hunka ome asamio. Monafi sondia vahe'mofo Ra Anumzana Israeli vahe'mofo Anumzamo'a huno, Ama kuma'ma eri haviza hugahuema hu'na hu'noa kante amage ante'na ame hu'na eri haviza hugahue. Ana nehu'na azeri knarerera osugahue. Ana hanigenka ana zupa kagra kavufinti kegahane. 17 Hianagi Nagra Ra Anumzamo'na huanki'na, ana zupa kagu'vazi'na kavretregahue. Ana hanuge'za kagrama zamagoro'ma nehana vahe zamazampina kavreontegahaze. 18 Na'ankure kagra Nagrite'ma kamentintima nehana mizama'a kva hugantesuge'za hapintira kahe ofrigahaze, huno Ra Anumzamo'a hu'ne.

40 Hagi Jeremaiane, maka Jerusalemi kumapi vahe'ene Juda mopafi vahe'enena Babiloni vahe'mo'za zamazeri'za seni nofiteti kina rezmantete'za zamavare'za Babiloni kina ome huzmante'naku vu'za, Rama kumate'ma uhanatizageno'a Babiloni sondia vahete ugota kva ne' Nebusaradani'a Jeremaiama kinama rente'naza seninofira katufente'ne. Ana hutegeno henka Ra Anumzamo'a Jeremaiana nanekea asami'ne. 2 Hagi Babiloni sondia vahete ugota kva ne'mo'a Jeremaiana ke higeno egeno amanage huno asami'ne. Ra Anumzana kagri Anumzamo'a huama huno, ama kumatera ama hazenke zana fore hugahie huno hu'ne. 3 Ana hu'neankino Ra Anumzamo'a kema hu'nea kante amage anteno ana maka zana huvagare'ne. Na'ankure Ra Anumzamofo avurera tamagra kumi nehutma Agri nanekea antahita amagera onte'naze. Ana hu'nazagu huno ama ana knazantamimo'a tamagritera fore nehie. 4 Hu'negu menina ko! Kazante'ma kinama regante'naza seninofira ama katufe atroe. Hagi kagrama antahisankeno knare'ma haniana, amne nagranena Babiloni vananke'na knare hu'ne ome kegava hugantegahue. Hagi nagrane vu'zamo'ma antahisankeno

knare'ma osaniana, nagranena omo. Hianagi inantego kagrama antahisankeno knare'ma haniregama vunaku'ma hanunka, maka mopamo'a kagri kavuga me'neankinka amne vugahane. 5 Hagi kagra maninaku'ma hanunka ete vunka, Babiloni kini ne'mo'ma huhampari antegeno'ma Juda mopafima me'nea kumatamima kegavama hu'nea ne', Safani negeho ne' Ahikamu nemofo Gedalia'ma mani'nere vunka, vahe amunompi agrane umanio. Ana'ma osunaku'ma hanunka inantego vunaku'ma hanantega amne vugahane. Anage nehuno sondia vahete kva ne' Nebusaradani'a Jeremaiana ne'zane musezanena nemino atregeno vu'ne. 6 Hagi ana'ma hutegen'o'a Jeremaia'a ete Mizpa kumate vuno Ahikamu nemofo Gedali'ene mago'a vahe'ma Juda mopafima zamatrage'zama mani'naza vahe'ene umani'ne. 7 Hagi mago'a Juda sondia vahete kva vahe'ene mago'a sondia vahe'ma ka'ma kokampima umani'naza vahe'mo'zama antahizama, Babiloni kini ne'mo'ma Ahikamu nemofo Gedaliama huhampri antegeno ana maka mopane, zamunte omane vene a'ene mofavre naga'ma zamavare'za Babilonima ovu'za zamatrage'zama mani'naza vahete'ma kegava hia nankeea antahi'naze. 8 Ana hute'za zamagra Gedalia kenaku Mizpa kumate vu'naze. Hagi anampima vu'nazana Natania nemofo Ismaeliki, Karea nemofo Johananiki, Tanhumeti nemofo Seraiaki, Netofa nagapinti ne' Efai ne' mofavre nagaki, Ma'aka nagapinti ne' Jezani'ene agri nagapinti vene'nemozane maka vu'naze. 9 Hagi anante Safani negeho ne' Ahikamu nemofo Gedalia'a ana kva vahe'ene, zamagranema vu'naza vahera amanage huno huvempa huno zamasami'ne. Tamagra ama mopafi manineta, Babiloni kini ne' Nebukatnesa eri'za vahe'ma mani'neta agri agoraga mani zankura korora osiho. Na'ankure e'i ana'ma

hanazana knare huta manigahaze. **10** Hagi menina antahiho, tamagri tamagi eri'na nagra Mizpa kumate manine'na, Babiloni vahe'ma tagri'ma eme tagenaku'ma eterema hanaza zupa, nagra zamagrane keaga hugahue. Hianagi tamagra waini ragane, zafa rgaramine, olivi masavenena kavoramimpi eri atru nehuta, tamagrama erita mani'naza kuma tamimpina maniho. **11** Hagi Juda vahe'mo'zama vu'za e'zama hu'za Moapu mopafine, Amoni vahepine, Idomu mopafine, mago'a mopareganema umani emanima hu'naza vahe'mo'za zamagranema antahizama, Babiloni kini ne'mo'a osi'a vahe'ma zamatrege'za Juda mopafina mani'nageno, Safani negeho Ahikamu nemofo Gedaliaama kva azeri otigeno kvama huzmantea nanekema nentahi'za, **12** Juda vahe'ma zamahe panani'ma hazage'za fre'za maka kazigama umani emanima hu'naregatira Juda mopafi ete e'za, Mizpa kumate'ma Gedalia'ma mani'nere e'naze. Ana hute'za wainine mago'a zafa rgaramina tagiza eri atru hu'naze. **13** Hagi Karea nemofo Johanani'ene ana maka sondia vahete kva vahe'ma, vahe omani kokampima umani naregatira, Gedalia'ma Mizpa kumate'ma mani'nere e'naze. **14** Hagi zamagra anante Gedaliana amanage hu'za asami'naze, kagrira eme kahe frisie huno Amoni kini ne' Balisi'a huntogeno Natania nemofo Ismaeli'ma ne-e hu'za nehaza nanekea antahi'nampi ontahinano? Hianagi Ahikamu nemofo Gedalia'a ana kezamirera antahi amuhara osu'ne. **15** Hagi anante Karea nemofo Johanani'a Mizpa kumate Gedaliana oku'a amanage huno ome asami'ne, kagra hu izo huge'na vu'na vahe'mo'za ontahi'sazama'a, Netania nemofo Ismaelina ome ahe fri'neno. Na'a agafare kagrira kahe frisige'za, amama eme atruma hu'za kagri kagiafima mani'naza Juda vahe'mo'za panani hu'za fresageno, osi'ama mani'naza Juda vahera frigahaze? **16**

Hianagi Ahikamu nemofo Gedalia'a Karea nemofo Johananina amanage huno kenona hunte'ne. Kagra e'inahu avu'ava zana osuo, na'ankure kagrama Ismaelinku'ma nehana nanekea havige nehane.

41 Hagi ana kafumofo 7ni ikantera, Elisama negeho ne' Netania nemofo Ismaeli'a, kinima nemaniza nagapinti nekino, kini ne'mofo eri'zama e'neriza vahepinti mago zamimo'e. Ana hu'neankino 10ni'a vahe zamavarege'za Ahikamu nemofo Gedalia kenaku Mizpa kumate e'naze. Hagi zamagra Gedalia'ene manine'za magoka ne'za nenazafinti, 2 Netania nemofo Ismaeli'ene agranema vu'naza 10ni'a vahe'mo'za oti'za, Babiloni kini ne'mo'ma kva azeri otigeno Juda mopama kegavama hu'nea ne' Safani nemofo Gedaliana bainati kazinteti ahe fri'naze. 3 Hagi Ismaeli'a Juda vahe'ma Gedalia'enema Mizpa kumate'ma mani'naza vahera anazanke huno zamahe nefrino, Babiloni sondia vahe'ma anante'ma mani'naza vahe'enena zamahe fri'ne. 4 Hagi Gedalianama ahe fri'nea nanekea vahe'mo'za ontahi'nageno, anante kna zupa, 5 Sekemine Silone Sameria kumatetiki hu'za, 80'a vahe'ma e'nazana, zamagi zamazokara nehare'za, kukena zamia tagato nehu'za, zamavufaga taga nehu'za, witi ofama hu'zane, manarentake zantamima kre manama vu'zanena eri'neza Ra Anumzamofo mono nompi ofa hunaku e'naze. 6 Hagi ana'ma nehazageno'a Netania nemofo Ismaeli'a ana vahe zamagenaku Mizpa kumapintira zavira neteno atiramino e'ne. Hagi eme nezamageno'a amanage huno hu'ne, tamagra evuta Ahikamu nemofo Gedaliana keho. 7 Hagi anagema hige'za zamagra rankumapima ufrage'za, Netania nemofo Ismaeli'ene agranema mani'naza vahe'mo'za ana vahera zamahe frite'za zamavufaga'a eri'za mago tinkerifi

ome matevu atre'naze. **8** Hianagi ana vahepintira 10ni'a
vahe'mo'za Ismaelina asami'za, tagrira tahe ofrio, na'ankure
witine bali ragane olivi masavene tume rima'agi huta frakunkeno
me'ne. E'i anage hazageno Ismaeli'a antahintahi'a rukrahe
huno zamagri'ene mago'a vahe'ma zamagranema mani'naza
vahera zamahe ofri'ne. **9** Hagi Ismaeli'a Gedali'ene mago'a
vahe'ma agrama zamahe fri'nea vahe zamavufagama eri vazi'nea
tinkeria rankrerfa hu'neankino ana kerima kafinte'nea nera,
Israeli kini ne' Ba'asa'ma ha' eme huntenaku nehigeno, kini
ne' Asa'ma kafinte'nea tinkerie. Ana hu'nefi Netania nemofo
Ismaeli'a anama zamahe fria vahe zamavufaga erinte avite'ne.
10 Hagi Netania nemofo Ismaeli'a ana'ma huteno'a ana maka
Mizpama mani'naza vahera kina huzmanteteno zamavarege'za,
Mizpa kumara atre'za Amoni vahe mopama me'nea kantega
vu'naze. E'i ana vahera kini ne'mofo mofa'ne zagane, Mizpa
kumate'ma zamatrage'za mani'naza vahe'ma, Babiloni Sondia
vahete kva ne' Nebusaradani'ma Ahikamu nemofo Gedalia
azampima antegeno, kegavama hu'nea vahe zamavareno vu'ne.
11 Hagi Karea nemofo Johanani'ene mago'a sondia vahete kva
vahe'mo'za, Netania nemofo Ismaeli'ma hu'nea kefo avu'ava
zamofo nanekea ana maka antahi vagare'naze. **12** Ana'ma
hute'za zamagranema mani'naza vene'ne nagara ana maka
zamavare'za Netania nemofo Ismaelina ha' ome huntenaku
vu'za, Gibeoni kumate'ma rantiru'ma me'nere nevige'za ome
ke'naze. **13** Hagi ana maka vahe'ma Ismaeli'enema nevaza
vahe'mo'za, Karea nemofo Johananine sondia vahete kva
vahetaminema nezamage'za tusi musenkase hu'naze. **14** Hagi
Ismaeli'ma ana maka vahe'ma Mizpa kumateti'ma kinama
huzamanteno zamavareno vu'nea vahe'mo'za, ete rukrahe hu'za

Karea nemofo Johanainte e'naze. **15** Hianagi Netania nemofo Ismaeli'a 8'a vahe zamavarege'za Johananku koro fre'za Amoni vahe moparega vu'naze. **16** Hagi anante Karea nemofo Johanani'ene maka sondia vahete kva vahe'ma agranema mani'naza vahe'mo'za, Netania nemofo Ismaeli'ma, Ahikamu nemofo Gedaliama ahenefrino kinama huzamanteno zamavareno nevige'za Gibeoniti'ma ome zamavare'naza vahera ana maka Mizpa kumatetira zamavare'za vu'naze. Anampima vu'nazana, sondia vahe'ene, a'nane naga'ene, mofavre naga'ene, kini nemofo eri'za vahe'enena zamavare'za vu'naze. **17** Hagi zamagra lsipi vunaku karanka nevu'za, Betlehemu kuma tvaonte Gerut Kimham umani'naze. **18** Na'ankure Babiloni kini ne'mo'ma Ahikamu nemofo Gedaliama kva azeri otigeno Juda mopare'ma kegavama hu'nea ne'ma, Netania nemofo Ismaeli'ma ahe fri'nea zanku Babiloni vahe koro hu'za umani'naze.

42 Hagi maka sondia vahete kva vahe'ene Karea nemofo Johanani'ene Hosaia nemofo Jezania'ene zamagi omane vaheteti vuno zamagima me'nea vahete'ma vige'za, ana maka vahe'mo'za erava'o hute'za, **2** kasnampa ne' Jeremaiana amanage hu'za asami'naze. Muse hugantonanki Ra Anumzana kagri Anumzantega nunamuna hugeno, ama osi'a vahe'ma mani'nona vahera asunku huranteno taza hino. Na'ankure kora rama'a vahe mani'nonanagi menina osi'a vahe mani'nonkenka neragane. **3** Hagi Ra Anumzana kagri Anumzantega nunamuna hunka antahigegeno, nazanoma hanuna zane, inantego vanuna kanena taveri hino. **4** Hagi anante kasnampa ne' Jeremai'a amanage huno zamasami'ne. Tamagrama nehaza nankeea hago antahuanki'na, nazankuro tamagrama haza zana Ra Anumzana tamagri Anumzamofona nunamu hu'na antahigesugeno, na'ane

nanekema nasaminia zana magore hu'na erifra okigahuanki
ana maka tamasami vagaregahue. 5 Hagi anante zamagra
amanage hu'za Jeremaiana kenona hunte'naze. Ra Anumzana
kagri Anumzamo'ma kasamisia nanekema tagrama antahita
amage'ma ontesunkeno'a, tamage huno magozana eri frara
okino keagafina huama hurantegahie. 6 Hagi Ra Anumzana
tagri Anumzamofoma omego huta hugantonkenkama nevana
Anumzamo'ma musema hanuna nanekeo musema osanuna
nanekema hanigeta, tagra amne antahita amage antegahune.
Ra Anumzana tagri Anumzamofo kema antahita amage'ma
antesunana maka zamo'a knare hurantegahie. 7 Hagi 10ni'a
zage knama evutegeno'a, Ra Anumzamo'a Jeremaiana nanekea
asami'ne. 8 Ana'ma hutegeno'a Karea nemofo Johananine maka
sondia vahete kva vahe'ma agranema mani'naza vahe'ene,
zamagi omane vaheteti vuno zamagima me'nea vahete vigeno,
ana maka Jeremaia'a kehige'za eme tru hu'naze. 9 Ana
hutageno Jeremaia'a ana vahera amanage huno zamasamine,
Ra Anumzana Israeli vahe Anumzantega ome nunamuna hugeno,
asunku hurante'noma huta hunantage'nama nunamuma ome
hugeno'a amanage huno hu'ne. 10 Tamagra ama Juda mopafima
manisage'na, Nagra tamazeri hankavenetina tamazeri havizana
osugahue. Ana nehu'na ama mopafina tamagrira avimzama
hankreankna nehu'na, ete tamazeri vati otregahue. Na'ankure
knazama tami'noa zankura tusiza hu'na nasunkura nehue. 11
Hagi tamagra Babiloni kini ne'mofonku'ma koro'ma nehaza
zana mago'anena korora osiho. Na'ankure Nagra tamagrane
manine'na agri azampintira tamagu'vazi'na tamavregahue huno,
Ra Anumzamo'a huama hu'ne. 12 Hagi Nagra tamagrikura
nasunku huneramante'sugeno, agranena asunku huneramanteno

tamatrenigeta ama mopatamifina manigahaze. Na'ankure Nagra tamagrane manine'na agri azampintira tamagu vazina tamavregahue huno, Ra Anumzamo'a huama hu'he. **13** Hianagi tamagrama huta ama mopafina omanigahunema huta Ra Anumzana tamagri Anumzamofo ke runetagreta, **14** tagra Isipi mopare vuta umanineta ha'ma hu'zana nonketa, ufema resaza agerura nontahita, ne'zanku'enena atupara osugahune huta hugahaze. **15** Hagi e'inahu nanekema hanuta Juda vahe'ma osi'ama mani'naza nagamota Ra Anumzamofo nanekea antahiho, Monafi sondia vahe'mofo Ra Anumzana Israeli vahe'mota Anumzamo'a huno, Isipi mopare'ma vu'zanku'ma hankave antahintahima hanazana, **16** tamagra Isipi mopafi umani'nesage'za, tamagrama koro'ma hune zamantaza ha' vahe'mo'za bainati kazinteti tamahe frigahaze. Ana nehanigeno agatonto zanku'ma koro'ma huta nevaza zamo tamavaririno Isipi moperera vanigeta anantega ufrigahaze. **17** Hagi Isipi mopare'ma umani zanku'ma hankave antahintahima hu'naza vene'ne nagara, anantega umani'nesage'za bainati kazinteti tamahe nefrisageno, ne'zanku huta nefrisageno, krimo'ene tamahe frigahie. Ana hina knazama atre'nugeno eme zamazeri haviza hania knazamo maka tamahe fanane hina, mago'mo'e huno kasefara huno omanigahie. **18** E'ina hu'negu Monafi sondia vahe'mofo Ra Anumzana Israeli vahe Anumzamo'a huno, Nagri'ma narimpa ahege'na knazama atrogeno Jerusalemi kumapima nemaniza vahete'ma e'neaza hu'na, Isipi moperera vanage'na narimpa ahe'zana atre'nugeno tamagritera egahie. Ana hanuge'za vahe'mo'za neramage'za, tusi koro nehu'za vahe'ma kazusima huzamante'nakura ama vahe'mo'zama havizama hazaza huta haviza hoho hu'za hugahaze. Ana hanigeta mago'ene eta

ama kumara eme onkegahaze. **19** Hagi Juda vahe'ma ofri osi'ama mani'naza vahe'motagu'ma Ra Anumzamo'ma huno Isipi mopare'ma oviho huno'ma koro kema huramante'nea nanekegura menina tamagra antahi ankereho. **20** Ra Anumzana tamagri Anumzamofontega hunanteta, tagri Anumzantega vunka tazama hanigura nunamuna hugeno, nazano tagri Ra Anumzamo'ma hihoma huno hurantesania nanekea eme huama hugeta nentahita, nazano hihoma huno hania zana amage anteta hugahune huta hu'naza zana, havige nehuta amagera onte'naze. **21** Hagi ana nanekea huama hu'na tamasami'noe. Hianagi Ra Anumzamo'ma tamagri Anumzamo'ma hia nanekea antahita amagera nonteta, maka zanku'ma hige'nama eme tamasamua zanena amagera onte'naze. **22** E'ina hu'negu menima antahi ankereho, inantego vunakure hutama nehaza moparega umani'nesageno anantega, ha' vahe'mo'za bainati kazinteti mago'a vahera tamahe nefrisageno, mago'a vahera ne'zanku huta nefrisageno, mago'a vahera krimo tamahe frigahie.

43 Hagi Ra Anumzana zamagri Anumzamo'ma vea kevuma zamasamio huno Jeremaiama asamia nanekema, ana maka nanekema zamasami vagama neregeno'a, **2** anante Hosaia nemofo Azaria'ene, Karea nemofo Johanani'ene maka veganokno vahemo'zanena Jeremaiana asami'za, Ra Anumzana tagri Anumzamo'a huno Isipi moparega vuta uomanaho huno hu'ne hunka'ma nehanana kgra havige nehane. **3** Hianagi Neria nemofo Baruku'a antahintahi kami'negenka tagri tazeri haviza hunaku nehane. Ana nehunka Babiloni vahe zamazampi tavrentesanke'za tahe frige, tavre'za Babiloni kina ome hurantege hugahaze. **4** Hagi anage nehu'za Karea nemofo Johanani'ene,

maka sondia vahete kva vhemo'zane, maka vhemo'zanena
Ra Anumzamofo kea rutagre'za Juda mopafina omani'naze.
5 Hagi Karea nemofo Johanani'ene maka sondia vahete kva
vahenene, Juda vahe'ma zamahe pananima hazage'za, ru
moparegama umani emanima hu'naza vahe'ma osi'a naga'ma
ete Juda mopare'ma maniku'ma aza vahera mika zamavare'za
vu'naze. 6 Hagi ana nehu'za zamagra mika vene'ne zagane
a'naneramine, mofavre zagane, kini ne'mofo mofane zagane,
maka vahe'ma, Babiloni sondia vahete kva ne' Nebusaradani'ma,
Safari negeho Ahikamu nemofo Gedalia azampima zmantegeno
kvama huzmante'nea vahe'enena nezamavare'za, kasnampa ne'
Jeremaiane Neria namofo Barukunena zanavre'za vu'naze. 7
Hagi ana nehu'za Ra Anumzamofo kea rutagre'za Isipi mopafi
ufrete'za, vuvava hu'za Tapanesi kumate uhanati'naze. 8
Hagi Tapanesi kumate'ma umani'nageno'a, Ra Anumzamo'a
Jeremaiana amanage huno asami'ne, 9 Juda vahe'mo'za
negesagenka kazampina ranra have eritenka vunka, Tapanesi
kumapima kini ne' Fero'ma nemania nontegama vu'nea kampima
brikima ante pehe'ma hu'za vu'naza brikia akerinenka anampi
ana haveramina kafinka asento. 10 Ana hutenga amanage
hunka zamasamio. Monafi sondia vahe'mofo Ra Anumzana
Israeli vahe Anumzamo'a huno, Antahihi! Nagra eri'za vaheni'a
Babiloni kini ne' Nebukatnesana huntesugeno ne-esige'na
Nagra avre'na esugeno amama fra'makua haveraminte kini tra'a
eme anteno mani'neno, ana haveramimofo agofetu mani'neno
kini eri'zama erisania seli noma'a eritareno kintegahie. 11
Hagi agrama esuno'a Isipi mopa eme eri haviza hugahie.
Ana nehina krimo zamahe frigahiema hu'na huhampri'noa
vahera krimo zamahe nefrina, kinafima vugahazema hu'na

huhampri'noa vahera kinafi nevanage'za, bainati kazinteti zamahe
frigahazema hu'na huhampri'noa vahera bainati kazinteti zamahe
frigahaze. 12 Hagi Nagra agri azante hanugeno, Isipi vahe
havi anumzantamimofo mono nontamina teve taginenteno,
ana mono nompinti havi anumzantamimofo amema'a erino
mopa'arega vugahie. Ana nehuno sipisipi kva vahe'mo'zama
kukena zamireti'ma zmavufgama azeri anoma vazi'zankna
huno Isipi mopa mika azeri kagintegahie. Ana huteno mago
vahe'mo aze'orisageno ete mopa'arega vugahie. 13 Hagi Isipi
vahe'mo'za zagere'ma mono'ma hunentaza havi anumzamofo
amema'ama tro huntene'za mono'ma hunentaza zafaramina
eri haviza hunetreno, Isipi vahe havi anumzantamimofo mono
nontamina teve tagintesanigeno tegahie.

44 Hagi Isipi mopafima me'nea kumatamina, Migdolina,
Tapanesima, Memfisine, Patrosi kazigama hu'za nemani'naza
Juda vahe'ma zamasamisia nanekea Ra Anumzamo'a amanage
huno Jeremaiana asami'ne. 2 Hagi Monafi sondia vahe'mofo
Ra Anumzana Israeli vahe Anumzamo'a huno, Jerusalemi
kumate'ene, Juda mopafima me'nea kuma taminte'ma knazama
atrogeno'ma eme zamazeri havizama hu'neana, ko keta
antahita hu'naze. Hagi antahiho, menima kesazana ana kuma
tamimo'a havizantfa hazageno, anampina magore hu'za vahera
omani'naze. 3 Na'ankure zamagra kefo avu'ava'ma hazazamo
Nagrira nazeri narimpa nehe'za, zamagrane, tamagrane,
tamafahe'zanena keta antahita osu'naza anumzaraminte
mnanentake zana ofa kremna vunte vavama huta vu'nazagu
anara hu'noe. 4 Hagi Nagra knane knane eri'za vaheni'a
kasampa vahera huzmantoge'za tamagritega e'za, amanage
hu'naze. Nagri'ma nave'nosia hi'mnage avu'ava zana oshi

hu'za eme tamasami'naze. 5 Hianagi zamagra ana nanekerera zamagesa ante'za nontahi'za, kefo avu'ava zama nehu'za havi anumzantaminte'ma ofama nehaza zanena atre'za zamefira huomi'naze. 6 E'ina'ma hazageno'a Nagrira tusi narimpa ahege'na Juda mopafima me'nea ranra kumataminte'ene Jerusalemi kumapima me'nea ne'onse kantamimpinena narimpa ahe'zana eri kaha hutre'na ana kumatamina eri haviza hutrogeno ka'ma koka meno eno ama knarerera menina ehanati'ne. 7 Hagi menina Monafi sondia vahe'mofo Ra Anumzana Israeli vahe Anumzamo'a huno, Nahigeta tamagra'a tamavatera hazenkea huta knazana avreta ne-eta venene naga'ene a'nanene naga'ene mofavre naga'ene, ne'onse mofavre naga'enena fanane hanageno Juda vahera omani'sazegura anara nehaze? 8 Hagi nahigeta tamagra Isipi mopafima emanineta tamazantet'i ma avako'ma huta tro'ma haza zamo'ene, ru anumzantaminte'ma ofama hazazamo'a Nagrira nazeri narimpa ahe'naze? Ana hu'nagu tamagra'a tamazeri havizantfa hanage'za, ru moparega vahe'mo'za neramage'za kizazokago ke huneramante'za, ha' vahezamima sifnagema huzmant'e nakura, Juda vahe'mo'zama havizama hu'nazaza huta haviza hihohu'za huzamantegahaze. 9 Hagi tamagehe'zane, Juda kini vahe'ene a'ne zamimo'zane, tamagrane a'ne tamimo'zanema, Juda mopafine Jerusalemi kumapima me'nea ne'onse kantamimpima hu'naza havi avu'ava zankura ko tamage kani'nefi? 10 Hagi meninena tamagra tamavufga anteramita Nagri agorga noamanita, tamagri'ene tamafahe'inema zami'noa kasegene tra keni'anena amagera onte'naze. 11 E'ina hu'negu Monafi sondia vahe'mofo Ra Anumzana Israeli vahe Anumzamo'a huno, Nagra navugosa rukrahe hu'na hara huneramantena knazana tami'na Juda vahera

maka tamazeri haviza huvagaregahue. **12** Hagi Juda vahe'ma osi'ama mani'naza naga'ma, Isipi mopafi vanunema hu'za hanavemati'za e'naza vahera zamazeri tregahue. Ana hanuge'za mago'a bainati kazinteti zamahe nefrisage'za, mago'a ne'zanku hu'za frigahaze. Hagi zamagine vaheteti vuno zamagima omane vahete'ma vanige'za ana maka vahera bainati kazinteti zamahe nefrisage'za mago'a ne'zanku hu'za frigahaze. Ana hu'za ana maka Isipi mopafi fri hana hanage'za, vahe'mo'zama nezamage'za zamanogu nehu'za, kiza zokago ke hunezamante'za, vahe'ma sifnama huzmante'nakura Juda vahe'mo'zama hu'nazaza huta haviza hiho hu'za hugahaze. **13** Hagi Isipi mopafima umani'naza vahera, Jerusalemi kumapima mani'naza vahe'ma hu'noaza hu'na bainati kazinteti'ene, zamagatonto zanteti'ene, krireti'ene hu'na zamazeri haviza hugahue. **14** Ana hanuge'za osi'a Juda vahe'ma Isipi mopafima emani'naza vahepintira magomo'e huno ana knazana agatereno vuno, ete umanisunema hu'zama zamavesi zamavesi'ma nehaza Juda moperara uomanigahaze. Hianagi anampintira osi'a naga'mozage ete vugahaze. **15** Hagi anante maka vene'nemo'zane, a'nezmimo'zama ru anumzante'ma mananentake zama kre mnama vu ofama nehage'zama antahi'naza vene'neramine, Isipi mopafima Patrosi kumate'ma nemaniza Juda vahe'mo'zanena eme atru hute'za Jeremaiana amanage hu'za kenona hunte'naze. **16** Kagra Ra Anumzamofo agifi eme neramasamuema hunka nehana nanekea tagra ontahigahune. **17** Hianagi tagra tamagerfa huta mikazama hugahunema huta huvempama hu'nona nanekere otineta, monafi kuini a'mofonte mananentake zantamima kre mnau ofa nehuta, waini tinema tagitreta ofa hugahune. Tagehe'za e'inahu avu'ava hu'nazankita tagrane, kini vahetimo'zane, kva

vahetimo'zanena Judama me'nea kumatamimpine, Jerusalemi kumapima me'nea ne'onse kantamimpinena ofa hu'none. Ana hu'nonanagi ana knafina ne'zankura atupara osuta knare huta nemanita, hazenkea e'ori'none. **18** Hianagi tagrama monafi kuini ate'ma manamentake zama kre manama ovuta, waini tima tagi tre ofama osu'nana, tagra maka zankura atupa nehunkeno, mago'a bainati kazinteti tahe nefrizageta, mago'a ne'zanku huta fri'none. **19** Hagi anankema haza agofetura a'nemo'za hu'za, tagrama monafi kuini a'te'ma manamentake zantamima kre manavu ofama nehuta, waini tima tagi tre ofama nehuta, agri avugosama me'nea kekiramima tro huta waini tinema tagita ofama hu'nonana, tagra'a antahi zantetira osu'nonanki nerave'za hu izo hazageta anara hu'none. **20** Hagi anante Jeremaia'a ana maka veamokizmi nanekerera amanage huno ke nona huzmante'ne. **21** Tamagrama antahi'zana tamagrane tamagehe'zane, kini vahetamimo'zane, kva vahe'tamimo'zane, maka vahe'motanema Juda mopafima me'nea kumatamimpine Jerusalemi kumapima me'nea ne'onse kantamimpinema, mana nentake zantamima kre mnavu ofama hu'naza avu'ava zankura, tamagrama antahi'zana Ra Anumzamofo antahi'zampina omanegeno hago agekanine huta nehzafi? **22** Hagi tamagrama hu'naza havi avu'ava zane, kasrino hi'mnage'ma hu'nea avu'ava zanema hu'naza zankura Ra Anumzamo'a avua anteno kegara osuno tusi avesra huramante'ne. E'ina hu'negu mopatamimo'a sifnafi megeno, mago zana omaneno ka'ma koka fore higeno, anampina magore huno vahera omanitfa higeno, meno eno ama knarera ehanati'ne. **23** Na'ankure tamagra manamentake zantamima kre mnavu ofaramima nehuta, Ra Anumzamofo avufi kumi nehuta, Ra Anumzamofo nanekea amagera nonteta, agri

kasegene tra kenena rutagre'naze. Ana nehuta Agri eri'zama keama'ma osaza zanku huno knazana atregeno eme tamazeri haviza higeno, eno ama knarerera ehanati'ne. **24** Hagi anante Jeremaia'a maka vahe'ene a'nene naga'enena amanage huno zamasami'ne. Maka Isipi mopafima mani'naza Juda vahe'mota Ra Anumzamo'ma hia nanenkea antahiho. **25** Monafi sondia vahe'mofa Ra Anumzana Israeli vahe Anumzamo'a huno, Tamagrane a'nene naga'tamimo'zanena huta, tagra'a tagipinti'ma huvempama hu'nona nanekere amage antegahune nehuta amanage hu'naze. Tagra monafi kuini a'tega mananentake zama kre mnavu ofaramina hunenteta, waini tima tagitre ofanena huntegahune hu'naze. E'ina hu'nazagu tamagra menina vuta nazano huvempama hu'naza zana amage anteta anazana hiho. **26** Hianagi Juda vahe'ma Isipi mopafima nemaniza vahe'mota Ra Anumzamo'a amanage hianki antahiho, Nagra Ra Anumzamo'na hankavenentake nagifi huvempa huankino, Juda vahe'ma Isipi mopafima nemaniza vahe'mota Nagri nagifina magore huta huvempa huta, Ra Anumzana kasefa huno mani'nea Anumzamofo agifi huvempa nehune huta osutfa hugahaze. **27** Hagi antahiho! Nagra navua ante'na zamagegahuanagi, knare zama esanigu anara osugahuanki, knazama esanigu navua ante'na kegahue. Hagi Juda vahe'ma Isipi mopafima nemaniza vahera, bainati kazinteti zamahe nefrisage'za, mago'a ne'zanku hu'za frigahaze. Ana hume nevu'za ana maka ome fri vagare'za omanitfa hugahaze. **28** Hagi ana hina osi'a naga'ma bainati kazinteti'ma zamahe ofrisaza vahe'mo'za Isipi mopa atre'za ete vu'za, Juda mopafi umanigahaze. Hagi osi'a vahe'ma Juda mopama atre'za Isipi mopafima umani'naza vahe'mo'za zamagri nanekemo tamagea me'nefi, Nagri nanekemo tamagea me'nefi

zamagra'a ke'za antahi'za hugahaze. **29** Hagi Ra Anumzamo'a huno, Tamagrama ama ana mopafima mani'nesage'nama tamazeri havizama hanua zamofo avame'zana meni tamaveri hugahue. E'ina'ma hanugeta tamagrama keta antahitama hanazana, Nagrama tamazeri haviza hugahuema hu'na hu'hoa nanekemo'a, tamagerfa huno efore hugahie. **30** Hagi Ra Anumzamo'a huno, Antahih! Juda kini ne' Zedekaiama avre'na, Babiloni kini ne' Nebukatnesama ha'ma hunenteno ahe frinaku'ma nehia ne'mofa azampima avrente'noaza hu'na, Isipi kini ne' Hofrana avre'na, agri ha' vahe'mo'zama ahenaku'ma nehaza vahe zamazampi avrentegahue.

45 Hagi Josaia nemofo Jehoiakimi'ma Juda vahe kinima mani'no egeno nampa 4ma hia kafufina, kasnampa ne' Jeremaia'a nanekea nehigeno Neria nemofo Baruku'a avontafepi krente'ne. Jeremaia'a amanage huno Barukuna asami'ne, **2** Ra Anumzana Israeli vahe Anumzamo'a Barukugagura amanage huno hie, **3** kagra hunka, nagra ko hazenke zampi manue hunka hu'nane. Na'ankure natazampima mani'nofina Ra Anumzamo'a mago'ene knazana eri agofetu huno nemlige'na, nasuzampina nemani'na mani frua osu tusiza hu'na karagira nerue. **4** Kagra amanage hunka Barukuna asamio, Ra Anumzamo'a huno, antahio! Nagrama eri oti'nama ki'noa zana, eri tagna vzinetre'na, Nagrama hankre'noa zana eri vati atregahue. E'ina'ma hanuana maka mopafi anara hugahue. **5** E'ina hu'negu kagra nahigenka knare zamoke nagritera fore hanie hunka kagesa nentahine? Hagi antahio! Nagra ranknaza avre'na maka vahetera egahue, Ra Anumzamo'na ama nanekea hue. Hianagi inantego vananana kagrira kegava hugante'nuge'za kahe ofrigahaze.

46 Hagi Ra Anumzamo'a ru kumataminte'ma fore'ma hania
zankura amanage huno Jeremaiana asami'ne. **2** Hagi
ama nanekea Isipi vahe nanekegino, Isipi kini ne' Niko
sondia vahe'mo'za, Yufretisi timofo tavaonte Kakemisi kumate
mani'nazageno Babiloni kini ne' Nebukatnesa'a sondia vahe'ane
eno hara eme huzmagatere'ne. Hagi ama ana zama fore'ma
hu'neana, Juda kini ne' Josaia nemofo Jehoiakimi'ma kinima
manino egeno nampa 4ma hia kafufi fore hu'ne. **3** Hagi
tamagra Isipi vahe'mota ranra hankotamine tamazante'ma azeri
hankotamia eri retro nehuta, hapima ufre'are retro huta maniho.
4 Hagi tamagra hosi afutamia retrotra nehuta, hosi agumpima
manita ha'ma hu sondia vahe'mota hosi agumpi ko marerita
maniho. Ana nehuta aini kankrira nentanita, karugaru kevetamia
kane fatgo nehuta, tamimizama refite ha' kukenatamia tamavate
eri hankare'neta tro huta maniho. **5** Hagi menina naza fore
hie? Isipi sondia vahe'ma zamagoana tusi koro nehu'za, ete
rukrahe hu'za koro fre'za e'naze. Ana nehazage'za Isipi harfa
sondia vahetamina ha' vahe'mo'za hara huzmagaterage'za koro
fre'naze. Maka kaziga koro'zamo zamazeri kagige'za rukrahe
hu'za onke nefrage'na zamage'noe, huno Ra Anumzamo'a hu'ne.
6 Hagi tusizama huno agamaneresia vahe'mo'a agareno atreno
nofresigeno, harfa sondia vahemo'enena korora ofregahie. Ana
nehu'za noti kaziga Yufretisi tinkenarega tanafa hu'za mase'naze.
7 Hagi ina vahe'mo'za Naeli timo'ma tima hageteno antepapa
huno'ma eaza huza neaze? **8** E'i ana vahera zamagra Isipi
vahekiza Naeli timo'ma hageno repapa huno neaza hu'za ne-
eza amanage hu'naze, tagra ome ra huta ama mopafina mani
avineteta, ranra kumatamina eri haviza huvaga nereta, ana kuma
tamimpima nemaniza vahe'enena zamazeri haviza hugahune

huza nehaze. 9 Hagi hosi afumota ame huta tamagareho, karisimota ame huta taragita viho, harfa sondia vahemota avazuhumpi huta hate nevinke'za, Sudani sondia vahe'ene, Libia sondia vahe'ma hankore'ma e'neriza vahe'motane, Lidia kumate sondia vahe'ma atireti'ma ha'ma nehaza vahe'motanena vuta ha' ome hiho. 10 Hianagi e'i anankna Monafi sondia vahe'mofo Ra Anumzamofo knagino, Agra ha' vahe'a nona huno zamazeri haviza hugahie. Hagi aga'ma ate'nea kazimo'ma vahe zamavufagane koranema negeno amu'ma hiaza hu'za, bainati kazinteti zamahe hana hugahaze. Na'ankure Monafi sondia vahe'mofo Ra Anumzamo'a Agra'a zamahe frigahiankino, mago ofama hiaza huno noti kaziga Yufretisi timofo tvaonte ana vahera zamahe hana hugahie. 11 Hagi vene omase Isipi mofa'moka krika'ama kanamaresiema hanunka, Giliati moparega marerinka tusa trazankura ome hako. Hagi rama'a marasini erinka negahananagi, ana zamo'a amne zankna hanigeno krika'amo'a vagaoregahie. 12 Hagi rama'a kuma tamimpima nemaniza vahe'mo'za kagrama kagazegu'ma hana nanekema nentahi'za, kagri zavi krafamo'ma maka mopafima avi'matea zanena antahi'naze. Na'ankure harfa sondia vahetamimo'za zamagra zamagra ozeri tanafa azeri tanafa hu'za umase emase hu'naze. 13 Hagi Babiloni kini ne' Nebukatnesa'ma eno Isipi mopafi vahe'ma ha'ma eme huzmantesia zankura, Ra Anumzamo'a kasnampa ne' Jeremaiana amanage huno asami'ne. 14 Ama nanekea huama huta maka Isipi mopafi vahe'ene, Migdoli kumapi vahe'ene, Memfisi kumapi vahe'ene, Tapanesi kumapima nemaniza vahe'enena zamasamita, tamagra otita ha'ma hu'are trotra huta maniho. Na'ankure ha' vahe'mo'za e'za maka Isipi vahera bainati kazinteti eme tamahe hana hugahaze. 15 Hagi

nagafare harfa sondia vahetamimo'za mopafina zamavugosa
regatira masene'za, ora otigahaze? Na'ankure Ra Anumzamo'a
mopafi zamazeri atresige'za masene'za anara hugahaze. **16** Hagi
Agra zamazeri taraka hanige'za tanafa hu'za agofetu agofetu
hu'za nemase'za, amanage hugahaze. Otinketa kaserantageno
korama tami'nea mopatiregane, vahetima mani'narega vamneno.
Na'ankure ha' vahetimo'za bainati kazinteti ha' eme hurante'za
tazeri haviza nehaze. **17** Hagi Isipi kini ne' Ferona kasefa agi
ante'miza, Rankege nehuno mago'za osu nere hu'za hugahaze.
18 Hagi Kini ne'ma Monafi sondia vahe'mofo Ra Anumzanema
huzama agima nehaza Ra Anumzamo'a huno, Nagrama kasefa
hu'na mani'nomo'na huankino, mago vahe'mo'a Isipi vahe ha'
huzmante'naku ne-eankino, agra Tabori agonamo'ma zaza
huno'ma agatereankna nehuno, Hageri ankenare'ma me'nea
Kameli agonamo'ma mareri agatereanknara hu'ne. **19** Hagi Isipi
mopafima mani'naza vahemota ru moparegama kinama ome
huta manisagu kutuntamia eri retrotra hiho. Na'ankure Memfisi
kumamo'a evuramino haviza hina anampina mago vahera
omanitfa hugahie. **20** Hagi Isipi mopamo'a mago knare zantfa
hu'nea a' agaho bulimakao afukna hu'ne. Hianagi noti kazigati
mago urunkosimo eno eme amprigahie. **21** Hagi Isipi vahe'mo'za
zagoreti'ma mizasage'za zamagranema eman'i'nazza sondia
vahe'mo'za afovage hu'za anenta bulimakao afukna hu'nazanki'za
oti hankavetine'za hara osu, Isipi vahe'mo'zama hazaza hu'za
zamagranena atre'za fregahaze. Na'ankure zamagrama hu'naza
avu'ava zante nona huno ra hazenke zamo eme zamazeri
haviza hanige'za atre'za fresaza knamo'a hago kofta hie. **22**
Hagi Isipi vahe'mo'za osifavemo sisi nehuno regararo heno
freaza hu'za akohe'za regararohe'za fregahaze. Na'ankure ha'

vahe zamimo'za zafama antagi tre'naku'ma hiaza hu'za, sasume
erine'za hahu zamante'naku egahaze. **23** Hagi Ra Anumzamo'a
huno, Isipi mopafima me'nea zafa tanopamo'a tusi titipa huno
vahera uofrega hu'neanagi, ufre'za zafa ome antagitre eme
antagitre hugahaze. Na'ankure zamagra rama'a kenukna hu'za,
ohampriga'a vahe egahazanki'za anara hugahaze. **24** Hagi Isipi
vahera tusi zamagazegu nehanage'na, noti kaziga vahe'mokizmi
zamazampi zamavare antegahue. **25** Hagi Monafi sondia
vahe'mofo Ra Anumzana Israeli vahe Anumzamo'a huno, Tebesi
vahe'mokizmi havi anumza Amonine, Isipi kini ne' Ferone, Isipi
vahe'ene kini vahe'zamine, havi anumzazamine Fero'ma taza
hugahiema hu'za muha'ma nehaza vahe'enena Nagra knazana
zami'na zamazeri haviza hugahue. **26** Hagi Isipi vahera zamahe
frinaku'ma nehaza vahe Babiloni kini ne' Nebukatnesane, eri'za
vahe'amokizmi zamazampi zamavarentegahue. Ana hanuge'za
Isipi mopafima manisaza vahe'mo'za korapa knafima mani'naza
avamente ete vugahaze huno Ra Anumzamo'a huama hu'ne. **27**
Hianagi Nagri eri'za vahe Jekopuga korora osuo. Ana nehugen
Israeli vahe'mota antahintahi hakarea osiho. Na'ankure afete
moparegama mani'nazaregatira ete tamagu'vazi'na tamavre'na
ne-ena, mofavre naga'tamima kinama ome hu'za mani'naza
moparegatira ete zamavare'na egahue. Ana hanugeta Jekopu
nagamota ete mopatamire ha' zana omanesigeta fru huta
emanigahaze. Ana nehanageno mago vahe'mo'a tamazeri
korora osugahie. **28** Hagi Ra Anumzamo'a huno, Eri'za vaheni'a
Jekopuga korora osuo. Na'ankure Nagra kagrane manigahue.
Hagi tamavre atrogetama umani'naza kuma tamimpi vahetamina
ana maka zamazeri havizahu vagaregahue. Hianagi tamagrira
anara osugahue. Hagi Nagra knaza tami'na tamazeri fatgo

hugahuanagi avamente knazana tamigahue. Ana nehu'na
tamatrenugeta amnea omanigahaze.

47 Hagi Fero'a Gaza kumara hara eme huonte'negeno, Filistia
vahete'ma fore hania zankura Ra Anumzamo'a kasnampa
ne' Jeremaiana amanage huno asami'ne. **2** Ra Anumzamo'a
huno, antahiho, noti kazigatira mago ranti hageno ne-eankino
mopa eme refi'neteno, maka'zanena refitegahie. Ana nehuno
rankuma'ene ana kumapima nemaniza vahe'enena zamahe
refi'netesige'za, vahe'mo'za tusiza hu'za kezatigahaze. Ana
nehanage'za ana mopafima nemaniza vahe'mo'za tusi zavi
krafa hugahaze. **3** Hagi hosi afutamimo'za zamagare'za ne-
esageno, zamagiafintira vagri vagri nehina, karisiramima ne-
esigeno agafinti'ma agasasama rania zama vene'nemo'zama
antahisu'za, mofavre naga'zamia rukrahera hu'za ozamage
fregahaze. Na'ankure zamazamo'a stino zuzufrinige'za anara
hugahaze. **4** Hagi Filistia vahe'ma knazamo'ma eme zamazeri
havizama hania knamo'a hago meni efore hu'ne. Ana hu'neanki'za
Tairi vahe'ene Saidoni vahera zamaza osugahaze. Na'ankure
hageri amu'nompima Kriti kumateti'ma Filistia vahe'ma osi'ama
emani'naza vahera, Ra Anumzamo'a knaza zaminio zamazeri
haviza nehie. **5** Gaza kumapi vahe'mo'za zamasunku nehu'za
zamaseni zamazoka nehare'nageno, Askeloni kumapintira mago
zamofo agasasa omanetfa hugahie. Hagi agupo kokampima
osi'ama maniza vahe'mota, tamavufgama taga nehazageno
korama nehia zana ina zupa atregahaze? **6** Hagi Ra Anumzamofo
bainati kazimoka vahe'ma zamazeri havizama nehana zana
nazupa atrenka amnea manigahane huta tamagra kezatiho.
Kogra bainati kazimoka kuka'afi ufrenka, akohenka umanio.
7 Hianagi Ra Anumzamo'ma bainati kazimofoma hunteno,

Askeloni rankuma'ene hagerimofo ankenaregama nemaniza
vahe'enema ha' ome huzamanto huno huntesigeno eno, eri'zama
eme e'nerisuno'a, inankna huno mani frua hugahie?

48 Hagi Moapu vahete'ma fore'ma hania zankura, Monafi
sondia vahe'mofo Ra Anumzana Israeli vahe Anumzamo'a
amanage hu'ne. Nebo kumakura tamasunku hunteho, na'ankure
ha' vahe'mo'za eme eri haviza hanageno, haviza huno megahie.
Hagi Kiriataimi kuma'ma hankave vihu keginama me'nea kumara,
ha' vahe'mo'za eme eri haviza nehu'za, kuma keginanena
tapage hutresage'za, ana kumapima nemaniza vahe'mo'za tusi
zamagazegu hugahaze. 2 Hagi Moapu vaheku'ma husgama
hunezmantaza zana mago'ene anara osugahaze. Ha' vahe'mo'za
Hesboni kumapi emanine'za, Moapu vahe'ma zamazeri havizama
hanaza zamofo nanekea amanage hu'za retro hugahaze.
Enketa vuta Moapu vahera ome zamahe hana hanunkeno
zamagia omanesie huza hugahaze. Hagi Matmeni kumapima
nemaniza vahera bainati kazinteti zamahe hana hanageno
zamagasasa omanegahie. 3 Hagi Horonaimi kumapinti'ma
ranke hu'za tusi zavi krafagema nehzana antahiho. Ana zavi
krafagema hunazana maka'zamo'a haviza hie, maka'zamo'a
haviza hie hu'za krafagea hu'haze. 4 Moapu vahe'mo'za
havizantfa nehanage'za, mofavre naga zamimo'za tusi zavi
krafa hugahaze. 5 Hagi Moapu vahe'mo'zama koro'ma fre'za
Luhiti agonamofo asoparega mareneri'za zavira nete'za, kuma
zamimo'ma havizama hania zamofo agasasankema antahisu'za,
Horonaimi kumatega zavira nete'za uramigahaze. 6 Hagi
tamagra tamavufagura freta vuta, hagage kama kokampi me'nea
junipe nehaza trazankna huta ome frakiho. 7 Hagi Moapu
vahe'mota antahitama tagri hankavemo'ene, fenozamo'ene taza

hugahiema huta nehaza vahera, tamagri'enena eme tamavre'za
kinafi nevu'za, Kemosi havi anumzanka'ane, pristi vahe'ane,
eri'za vahe'anena zamavare'za ru moparega kinafi vugahaze. 8
Hagi ha' vahe'mo'za e'za maka kumara eri haviza hanageno,
mago kumamo'e huno amnea omanigahie. Agona kokampima
me'nea agupo mopama eri haviza nehu'za, fenkamu agupo
mopanena eri haviza hugahaze. Ra Anumzamo'ma hu'nea kante
anteno ama ana zamo'a fore hugahie. 9 Hagi Moapu mopafina
hage eme ruherafi atregahazankino, vahera zamageko'nama
hunte'nige'za hare'za vazaresina knare hisine. Na'ankure ranra
kumazmimo'a havizantfa huno megahie. Ana hina anampina
vahera omanitfa hugahie. 10 Hagi Ra Anumzamo'ma zami'nea
eri'zama zamavesra kosrama hu'za eriso'ema nosaza vahera
kazusifi manigahaze. Hagi bainati kazima erino vahe'ma ahe
ofrisia vahe'mo'a kazusifi manigahie. 11 Hagi Moapu vahera
ese'ma agafa hu'za mani'za e'nazaregatira, waini tro huteno
tagiganti kama osu mopa kavofi antegeno me'negeno, ana
waini timofo haga'amo'ene mna'amo'ma vagaore knare huno
meankna hu'za mago vahe'mo'a hara eme huzmanteno eme
zamavreno vige'za kina osu knare hu'za mani'naze. 12 Hianagi
Ra Anumzamo'a huno, mago kna ne-eanki'na ana knama
esige'na mago'a vahe huzmantesuge'za e'za Moapu vahera
eme zamazeri haviza hugahaze. Ana hanuge'za Moapu vahera
waini tina mopa kavofinti eri tagi trazankna nehu'za, mopa
kavoma ru takotaku hutrazankna hugahaze. 13 Hagi ana'ma
hutesige'za, Israeli vahe'mo'za havi anumzamo taza hugahie
hute'za Beteli kumate zamagazegu hu'nazaza hu'za, Moapu
vahe'mo'za Kemosi havi anumzazmigura tusi zamagazegu
hugahaze. 14 Hagi tamagra Moapu vahe'mota huta, tagra

harfa vahe manineta hankave sondia vahe mani'nonankita,
hankavetita hara hugahune huta nehaze. **15** Hagi Monafi
sondia vahe'mofo Ra Anumzanema hu'za agima nehaza
Kini ne'mo'a huno, ha' vahe'mo'za e'za Moapu vahera eme
zamazeri haviza nehu'za, ranra kuma'zaminena eri haviza
hugahaze. Ana nehu'za knare'nare nehzave nagara bainati
kazinteti zamahe hana hugahaze. **16** Hagi Moapu vahe'mo'zama
knazama eri'za havizama hanaza knamo'a hago erava'o hie.
Ana hugahiankino ana hazenke zamo'a ame huno egahie. **17**
Hagi Moapu vahe tvaonte'ma nemaniza vahe'motane, agri'ma
keta antahitama hu'naza vahe'motanena, agrikura tamasunku
hunteta zavira neteta amanage hiho. Kinima mani'neno ragima
e'neria hankavemo'a nankna higenopi, hago evuramie huta hiho.
18 Hagi Diboni kumapima nemaniza vahe'mota rantamagima
e'neriza zana atreta amne vahekna huta kugusopafi uramita
maniho. Na'ankure Moapu vahe'motama eme tamazeri havizama
hanaza vahe'mo'za e'za kumamofo vihu keginaramima hu'nazana
eme tapage tapagu hutregahaze. **19** Hagi Aroeri kumapima
nemaniza vahe'mota kantega ome oti'neta tamavua anteta
negenke'zama koro'ma fre'za esaza vahera na'a fore hie?
huta zamantahigeho. **20** Hagi tamagra anagema hanage'za
zamagra kenona hu'za, Moapu kumamo'a haviza hige'za,
mika vahe'mo'za tusi zamagaze zanku nehaze. E'ina hu'negu
tamagra tamasunku nehuta tusi zavi neteta, Arnoni ti tva'onte'ma
nemaniza vahera ome zamasamita, Moapu kumamo'a haviza
hie huta hiho. **21** Hagi agona kokampima me'nea agupo
mopafima me'nea kumatamina, Holoni kumaki, Jasa kumaki,
Mafati kumaki, **22** Diboni kuma'ene Nebo kuma'ene Bet-diblataimi
kuma'ene, **23** Kiriataimi kuma'ene Bet-gamuli kuma'ene Bet-

meoni kuma'ene, 24 Kerioti kuma'ene Bozra kuma'ene, ana maka Moapu mopafima me'nea kumatamine, afetero tva'ontero ana maka'ma me'nea kumatamimo'za zamagrama hu'naza zamavu'zmavate ranknaza erigahaze. 25 Hagi Ra Anumzamo'a huno, Moapu vahera zamazamo'a stinigeno hankave zamia omanegahie. 26 Hagi Moapu vahe'mo'za Ra Anumzamofona veganokano hunente'za, zamavufaga erisga hu'naze. Ana hu'negu ha' vahe'mo'za eme zamazeri haviza hanage'za, aka ti ne'naza vahe'mo'za neginagi nehu'za, zamagra'a amuti trazampi mase'za rukrahekrehе nehazaza hugahaze. Ana nehanage'za vahe'mo'za nezamage'za tusi zamagizaregahaze. 27 Hagi kora Moapu vahe'mota Israeli vahekura musufa vahe mani'naze huta nehuta, kiza zokagoke hune zamanteta, zamagriku'ma keagama nehuta tamagena ru'naze. 28 Hagi tamagra Moapu vahe'mota ranra kumatamina atreta koro freta vuta havegampi umaniho. Ana nehuta maho namamo havegampima ufre kante'ma noma kino maniazza huta umaniho. 29 Hagi Moapu vahe'mo'za zamagra'agu'ma antahi'zana knare hu'none nehu'za, zamagra razampi zamavufaga erisga nehu'za, zamagra'a antahisga nehu'za, keontahi avu'ava zama nehaza zamofo nanekea ko antahi'none. 30 Ra Anumzamo'a huno, Moapu vahe'mo'zama keontahi avu'ava zama hu'za vanoma nehaza zana Nagra ko ke'na antahi'na hu'noe. Hianagi zamagra zamavufa erisgama hu kema nehaza zamo'a magore huno ne'zama'a forera osugahie. 31 E'ina hu'negu menina ana maka Moapu vahekura nasunku hunezamante'na tusi zavi ate'zmantegahue. Ana nehu'na Kir-hareseti kumate'ma nemaniza vene'negura tusiza hu'na zavira ate'zmantegahue. 32 Hagi Jazeri vahe'ma zavi'ma atezamante noama'a agatere'na Sibma vahe'motagura zavira

ateramantegahue. Na'ankure tamagri waini hozamo'a vuvava
huno Fri Hagerintega nevuno, Jazeri hagerintegane vu'ne.
Hianagi ha' vahekamo'za e'za mago'a zafa ragaramine grep
raganena emeri haviza hugahaze. **33** Hagi kora Moapu mopamo'a
knare zantfa hu'nege'za hoza antete'za musenkase nehu'za
nenaza zamo'a hago vagare'ne. Hagi wainima rentra ahe'za
tro'ma nehaza kumapina mago'ene wainia rentra ohegahaze.
Hagi kezati'za musenkasema nehu'za wainima rentra'ma
nehaza zana osugahaze. Zamagra kezankea hugazanagi, e'i
musenkasema nehaza kezankea omane'ne. **34** Hagi Moapu
vahe'mo'zama zavi krafama hanazana, Hesboni kumateti agafa
huteno vuno, Eleale kumate vuteno, vuvava huno Jahasi kumate
nevanigeno, Zoari kumatetira agafa huteno vuno, Haronaimi
kumate vuteno, vuvava huno Eglat-Selisia kumate vanige'za
zavi krafa hugahaze. Anama nehanigeno'a Nimrimi tintamimo'a
hagege hanigeno tina e'ovugahie. **35** Hagi Ra Anumzamo'a
huno, Moapu vahe'mo'zama agonaregama mareri'za havi
anumzante'ma mananentake zama kremana vu'za ofama
nehaza vahera maka zamazeri atregahue. **36** Hagi konkema
nere'za zavi nehzaza hu'na nagu'areti Moapu vaheku'ene Kir-
hareseti kumate vaheku'enena tusi nasunku nehu'na zavira
ategahue. Na'ankure zamagrama eri truma hu'naza feno
zamo'a maka fanane hugahie. **37** Hagi ana'ma hanige'za maka
Moapu vahe'mo'za zamasunku nehu'za zamaseni zamazokara
vazagate netresage'za vene'nemo'za zamagi zmazoka'enena
hare tregahaze. Ana nehu'za zamazana taga hanageno korana
nehanige'za, zamasunku kukena erintanigahaze. **38** Hagi
Ra Anumzamo'a huno, Mago vahe'mo avesra higeno mopa
kavo rurako hutreaza hu'na, Moapu vahera maka zamazeri

haviza hugahue. Ana hanuge'za nozamimofo agofetu'ene kuma
amu'nompima atruma nehaza kumapinena manine'za zavi
krafa hugahaze. **39** Na'ankure Moapu mopamo'a havizantfa
hanige'za Moapu vahe'mo'za zavira ategahaze. Ana hanige'za
Moapu vahe'mo'za zamagazegu nehu'za zamavugosa rukrahe
hugahaze. Hagi Moapu vahe tva'onte'ma nemaniza vahe'mo'za
zamagrite'ma fore'ma hania zama nege'za tusi zamagogogu
nehu'za, kiza zokago ke huzmantegahaze. **40** Hagi Ra
Anumzamo'a amanage nehie, Keho! Tumpamo mago'a zaga
azerinaku ageko'na erifafukiteno ame huno hareno eramino
ageko'nareti eme rufiteaza hu'za, ha' vahe'mo'za e'za Moapu
vahera eme zamazeri haviza hugahaze. **41** Hagi ha' vahe'mo'za
Kerioti rankumara ha' eme hugatere'za eneri'za, hankave
vihu kegina zaminena eri nafa'a hugahaze. Ana nehanage'za
ana zupa Moapu harafa sondia vahe'mokizmi zamagu'amo'a
a'nemo'za mofavre antenaku nehzageno zamata negriankna
zamata krigahie. **42** Hagi Moapu vahera zamazeri havizantfa
hanigeno zamagia omanegahie. Na'ankure Ra Anumzamofo
avurera veganokano nehu'za zamavufaga eri'za mareri'naze. **43**
Hagi Ra Anumzamo'a huno, Koro zamo'ene kafinte kerimo'ene
krifumo'enena Moapu vahe'mota tamazeri haviza hugahie. **44**
Hagi hapinti'ma koro huno fre'nia vahe'mo'a kerifi unefresigeno,
kerifinti'ma atiramino fre'nia vahera krifumo azerigahie. Na'ankure
nonama hu'na zamazeri havizama hanua kafu egahianki'na,
Nagra ama ana knazantamina atre'nugeno Moapu vahetera
egahie huno Ra Anumzamo'a hu'ne. **45** Hagi Moapu vahe'mo'za
koro fre'za Hesboni kumate vu'gahazanagi, ome kesazana
Hesboni kumara teve neresige'za kesazanagi, mago zana osu
hankave'zami omanesiaza otigahaze. Hagi Hesboni kuma'ma

tesania tevemo'a ko'ma Sihoni noma tevema re'nea avamente tegahie. Ana tevemo'a Moapu vahe zamasenia tehana nehuno, rankege'ma nehaza vahe zamaseni zaferina tehana hugahie.

46 Moapu vahe'mota hago hazenkefi mani'naze. Havi anumza Kemosinte'ma mono'ma hunentaza vahera haviza hugahaze. Na'ankure ne'mofatamia zamavare'za ru moparega kina ome huzmantegahaze. **47** Hianagi henkama esia knafina Moapu vahera ete zamazeri knare hugahue huno Ra Anumzamo'a hu'ne. Ra Anumzamo'ma Moapu vahe'ma keagama huzmantesia zamofo nanekea amare eme vagare'ne.

49 Hagi Amoni vahekura Ra Anumzamo'a amanage huno hu'ne, Israeli vahe'mo'za ne' mofavrea kase ozmante'nafi? Zamafahe'mokizmi mopama erisantima haressaza mofavre nagara omani'nazafi? Hagi nahige'za Moleki havi anumzante'ma mono'ma hunentaza vahe'mo'za, Gati naga'mofo mopa eme eri nafa'a hu'za ranra kuma zamifina mani'naze? **2** Hagi e'ina'ma hu'nazagu Ra Anumzamo'a huno, Mago kna ne-eanki'na Nagra ha' vahe huzmante'sanuge'za e'za Amoni vahe mopafima me'nea Raba kumara ha' eme hunte'za eri haviza hanageno moriri huno marerigahie. Ana nehina ana kuma tva'onte'ma me'nea ne'onse kumatamina teve tagintesageno tefanane hugahie. Ana hanige'za Israeli vahe mopama eri'naza vahera Israeli vahe'mo'za zamavare netre'za mopa'zamia ete erigahaze, huno Ra Anumzamo'a hu'ne. **3** Hagi Hesboni kumate'ma nemaniza vahe'mota tamasunku huta zavi ateho, na'ankure Ai rankumara eme eri haviza hanageno moriri huno marerigahie. Hagi Raba kumate vahe'mota tamasunku kukena huta zavira neteta freta vuta kuma keginamofo agu'afi ome frakiho. Na'ankure Moleki havi anumzane, pristi vahe'ane eri'za vahe'anena zamavare'za

ru moparega kina ome huzamantegahaze. 4 Hagi tamagra nahigeta Amoni vahe'mota masavenke huno tretre'ma hu'nea agupo mopafima ne'zama hankregeno knare'ma huno ne'zama ahentea zankura rantamagia enerita tamavufga erisga nehaze. Tamagra ke ontahi mofakna hu'nazankita, tamagra'a feno zanku muhara nehuta, iza eno hara eme hurantegahie? huta nehaze. 5 Hianagi antahiho, tamagri tvaonte'ma mani kagi'naza vahera zamazeri otisuge'za e'za eme tamazeri koro hugahaze. Ana nehu'za Amoni vahera eme tamahe kasopetresageta mago'mofonkura antahi omi maka kaziga ufre efre hugahaze. Ana hanage'za koro'ma freta vanaza vahera mago vahe'mo'e huno tamazeri atrua osugahie huno Anumzana Monafi sondia vaher'mofo Ra Anumzamo'a hu'ne. 6 Hianagi henka Amoni vahera zamavare'na esuge'za ete knare hu'za mopazmire manigahaze huno Ra Anumzamo'a hu'ne. 7 Hagi Idomu vahekura Monafi sondia vaher'mofo Ra Anumzamo'a amanage huno hu'ne, Knare antahi'zane vahera Temani kumatera omani'nazafi? Hifi knare antahi'zama nezamiza vahera omanitfa hu'nazafi? Ana hazageno knare antahizamo'a zamagripintira hago vagare'nefi? 8 Hagi tamagra Dedani kumapima nemaniza vahe'mota rukrahe huta koro freta vuta ofenkame urami'nesia kerifi ome frakiho. Na'ankure Idomu vaher'ma zamazeri havizama hanua zupa Iso naga'ma zamazeri havizama hu'noaza hu'na Idomu vahera kumi zamimofo nona hu'na zamazeri haviza hugahue. 9 Hagi grepi rgama neragiza vaher'mo'za maka tagi vaga norazanki mago'a netraze. Hagi kenage'ma musufama nesaza vaher'mo'za maka zana eri vaganorazanki, zamavesiama'a e'neriza mago'a netraze. 10 Hianagi Iso naga'mofo mopafintira Nagra maka zana eri hana hanugenno mago zana omanetfa hugahie. Ana nehu'na

zamagrama fra'manekiza kumara eri ama hanuge'za zamagra
frara okigahaze. Zamagri mofavre naga'ene naga'zamimozane
zamagri tvaonte'ma nemaniza vahemo'zanena haviza hu'za
fanane hugahaze. **11** Hagi Idomu vahe'mota megusa mofavre
naga'tamina atrenke'na Nagra kegava huzmante'nuge'za ofri
manigahaze. Ana nehanuge'za kento ane'tamimo'za Nagriku taza
hugahie nehu'za muhara hugahaze. **12** Hagi Ra Anumzamo'a
amanage hu'ne, Hazenkea osu'nesaza vaheragi Nagri narimpa
he'zamofo kapufinti tina negahaze. Hagi nahanieg'na Nagra
tamatresugeta amnea manigahaze? Tamagrira knazanteti
tamazeri haviza hugahue. **13** Hagi Ra Anumzamo'a huno,
Nagra'a nagifi huvempa huankino Bozra kumamo'a haviza huno
evuramino hihi huno me'nesige'za vahe'mo'za nege'za tusi
koro nehu'za, kiza zokagoke huzamantegahaze. Ana nehu'za
vahe'ma sifna kema huzamantenakura zamagrama hazaza
huta haviza hiho hu'za hugahaze. Ana hanigeno Idomu vahe
ranra kuma zamimo'a haviza huno meno vugahie. **14** Hagi
Ra Anumzamo'ma nagri'ma nasami'neana amanage hu'ne.
Nagra amanage hu'na kema erino vu vahera mago huntogeno
maka kazigama mani'naza vahetega kea erino vu'ne. Hinke'za
maka vahe'mo'za magopi eme eritru hu'za retrotra hute'za
oti'za e'za Idomu vahera ha' eme huzamanteho. **15** Hagi
Ra Anumzamo'a Idomu vahekura amanage hu'ne, Antahihio,
Nagra tamazeri amane hanugeta ruga'a kumapima nemaniza
vahé amu'nompina osi'a naga manigahaze. Ana hu'nesage'za
vahé'mo'za huhaviza huramantegahaze. **16** Hagi tamagra
vahé'ma zamazeri koro'ma haza zamo higeta tamavufga ra
nehuta tamagra'a reramatga nehaze. Hagi tumpamo have
agonafi nomagino amu anteaza huta, have agonafina onagamu

ranra kuma tamina kita nemanize. Hianagi anamu anantetira
tamazeri mopafi atregahue, huno Ra Anumzamo'a hu'ne. **17**
Hagi Ra Anumzamo'a huno, Idomu vahe'mo'za havizantfa
hanage'za, karankama vu'za e'zama nehu'za kesaza vahe'mo'za
tusi koro hu'za antri nehu'za, zamagena rugahaze. **18** Hagi
korapara Sodomu kuma'ene Gomora kuma'ene tvaozanire'ma
megagi'nea kumataminema eri havizama hu'noaza hu'na, Idomu
mopa eri haviza hanuge'za ana mopafina magore hu'za vahera
omanisage'za, anampina magomo'a nona kinora omanigahie
huno Ra Anumzamo'a hu'ne. **19** Hagi Ra Anumzamo'a huno,
Jodani tintega me'nea zafa tanopafinti laionimo'a ame huno
takaureno eno, knare traza me'nefi sipisipi afu'moza traza
nenageno eme zamarotago hiaza hu'na, Idomu vahera mopa
zamifintira ame hu'na Nagra zamahe kasopetregahue. Ana
nehu'na Nagra mago ne' huhamprisugeno ana ne'mo kegava
huzamantegahie. Na'ankure iza Nagri kna nera mani'nesia
ne'mo hara renenantesigeno, ina kva ne'mo Nagri navurera
otigahie? **20** Hagi e'ina hu'negu Ra Anumzamo'ma Idomu mopafi
vahe'ma zamazeri haviza nehuno, Temani kumapi vahe'enema
zamazeri havizama hania zamofo antahintahia amanahu huno
retro hu'neanki antahihi. Ne'onse sipisipi anentatamima hazaza
hu'za, ne'onse mofavre nagatamina zamavazu hu'za vugahaze.
Ana nehu'za zamagrama hu'naza avu'ava zamofo nona'a,
masavenke huno tretre'ma hu'nea Idomu mopa eri havizantfa
hugahaze. **21** Hagi Idomu vahe'mo'zama mopafima trakama
hu'za masesaza zamofo agasasamo'a maka ama mopa eri
tore hugahie. Ana nehina Idomu vahe'mo'zama zavi krafama
hanaza zamofo agasasankea Koranke Hagerintegama nemaniza
vahe'mo'za antahigahaze. **22** Hagi antahihi, tumpamo mago'a

zaga azerinaku ageko'na erifafukiteno ame huno haren
eramino ageko'nareti eme rufiteaza hu'za, ha' vahe'mo'za e'za
Bozra kumate vahera eme zamazeri haviza hugahaze. Ana'ma
hanage'za Idomu vahe'mokizmi harafa sondia vahe'mo'za
a'nemo'za mofavre antenaku nehazageno zamata negrige'za
koro nehazankna hu'za koro hugahaze. **23** Hagi Ra Anumzamo'a
Damaskasi kumate vahekura amanage hu'ne, Hamati kumate
vahe'ene Arpati kumate vahetera, zamagrite'ma esania knamofo
nanekema nentahi'za zamagu'amo'a hapanetisige'za tusi koro
nehu'za, hagerimo fruhuno omani tusiza huno kranto kranto hiaza
hugahaze. **24** Hagi Damaskasi kumate vahe'mo'za hankavezamia
omanesige'za ete rukrahe hu'za atre'za koro fregahaze. Ana
nehanageno koro zamo zamazeri ananekisige'za, mofavre
anteku nehia a'mo ata negrigeno hiaza hu'za tusi koro nehu'za,
antri huza nava'nava hugahaze. **25** Hagi Damaskasi kumara agi
me'nea kuma me'nege'na muse hunentoa kumaki, nahige'za
ana kumara atre'za vahe'mo'za korora fre'naze? **26** Hagi e'ina
nehazage'za zamagri nehazaveramina ha' vahe'mo'za kuma
amu'nompima me'nea neonse kantamimpi zamahe nefri'za, ana
zupa Damaskasi kumapi sondia vahera maka zamahe hana
hugahaze, huno Monafi sondia vahe'mofo Ra Anumzamo'a
hu'ne. **27** Hagi ana nehu'na Nagra Damaskasi rankumamofo
kuma keginafina teve tagintenugeno nereno Ben-hadati'ma
ki'nea zaza nontaminena tevemo teno eri hana hugahie. **28**
Hagi Kedari kumaku'ene Hazori mopafima me'nea kumatamima,
Babiloni kini ne' Nebukatnesama ha'ma huzmagatere'nea
kumataminkura Ra Anumzamo'a amanage hu'ne. Ha' vahe'mota
otita Kedari kumate vahera hara hunezamanteta, zage hanati
kazigama nemaniza vahera zamazeri haviza hiho. **29** Hagi ana

nehu'za ha' vahe'mo'za seli nozamine, sipisipi afu'zamine, seli noma negiza tavarave zamine maka fenoza zaminena e'neriza, kemori afu'zminena zamavare'za vugahaze. Ana nehanage'za vahe'mo'za kezatizami'za, tamagri'ma tamazeri koro'ma hania zamo'a maka kaziga tamazeri kagie hu'za hugahaze. **30** Hagi Ra Anumzamo'a huno, Hazori kumate vahe'mota koro freta vuta afete me'nesia muri kampi ome frakiho. Na'ankure Babiloni kini ne' Nebukatnesama ha'ma eme huramanteno tamazeri havizama hania zamofo nanekea ko retro hunte'ne. **31** Hagi Ra Anumzamo'a Babiloni vahera zamasamino, Tamagra otita vuta mago zanku'ma ontahi akohe'zama nemaniza vahera ha' ome huzamanteho. Ana vahe tva'ontera mago'a vahera omani'naze, ana nehazage'za, kuma kafane kafama erigi'za rentrako'ma nehaza zanena omane'nea kumapi nemanize. **32** Hagi kemoli afu'zamine bulimakaone sipisipi afu'zamia rohure'za eri'za vugahaze. Hagi zamaseni zamazoka'ma tagahu atupa'ma nehaza vahera, ha' vahe hanuge'za maka kazigati e'za knazana eme nezami'za, zaho'mo hiazza hu'za eme zamazeri harafi hanage'za maka kaziga vu'za e'za hugahaze, huno Ra Anumzamo'a hu'ne. **33** Hagi Hasori kumamo'a haviza huno za'zate nemanenigeno, anampina afi kraramimo'za emanigahaze. Ana nehanigeno anampina magore huno vahera omanitfa nehanigeno, ana kumapina vahe'mo'a kana eme anteno vano osugahie. **34** Hagi Juda kini ne' Zedekaia'ma agafa huno kinima nemanigeno'a, Ra Anumzamo'a kasnampa ne' Jeremaiana Elamu vahete'ma fore'ma hania zankura amanage huno asami'ne. **35** Hagi Monafi sondia vahe'mofo Ra Anumzamo'a huno, Elamu vahe'mo'za atireti hankavea e'nerizanki'na ana ati zamia eri'na rehantagi atregahue. **36** Hagi Nagra maka kazigati ha' vahera zamavare'na

esanuge'za, ra zaho'mo eaza hu'za Elamu vahera ha'eme
huzmantegahaze. Ana hanage'na Elamu vahera Nagra zamazeri
panani hanuge'za ama mopafina maka kaziga fre'za vu'za
e'za hu'za kumate kumatera manitere hugahaze. 37 Hagi
Elamu vahe'ma zamahe frinaku'ma hanaza ha'vahe'mo'za
negesage'na, Elamu vahera zamazeri koro hugahue. Nagra
Ra Anumzamo'na huanki'na tusi narimpa ahenezmante'na
knazana zami'na zamazeri haviza hugahue. Ana nehu'na ha'
vahé huzamante'nuge'za bainati kazinteti eme zamaheme vu'za
ome zamahe hana hugahaze. 38 Hagi ana hute'na Nagra Elamu
kumate kini trani'a ante'na manine'na, kini vahe'zamine eri'za
vahe'zaminena zamazeri haviza hugahue, huno Ra Anumzamo'a
hu'ne. 39 Hianagi henka Elamu vahe'ma kinama ome hu'za
mani'nesaregatira, ete zamavare'na mopazamire egahue, huno
Ra Anumzamo'a hu'ne.

50 Hagi Babiloni vaheku'ene Babiloni mopafima nemaniza
Kaldia vahekura Ra Anumzamo'a amanage huno kasnampa
ne' Jeremaiana asami'ne. 2 Kagra mago avame'za erisga
hu'enka mika kumatamimpima nemani'haza vahetega vunka,
mago nanekea eri frara okinka kezatinka amanage huo. Ha'
vahé'mo Babiloni kumara eme e'herigeno, Babiloni vahé havi
anumza Belinku'ma Maduku'ema nehaza havi anumzamofo
amema'a rurakoraku hunetre'za Babiloni vahé'mo'zama havi
anumzantamimofo amema'ama tro'ma hu'naza zantami'na
rurakoraku hunetre'nageno kaza osu havi anumzamo'a agazegu
hugahie. 3 Na'ankure noti kazigati vahé'mo'za e'za Babiloni
vahera ha'eme huzmanté'za zamazeri haviza hanage'za, maka
vahé'ene bulimakaone sipisipine mago'a afu'zmimo'zanena
Babiloni kumara atre'za koro fre vagaresageno mago vahera

omanitfa hugahie. 4 Hagi Ra Anumzamo'a huno, Anazama fore'ma hania knafina Israeli vahe'ene Juda vahe'mo'zanena magopi eme atru hute'za zaviteme ne-e'za Ra Anumzana Anumzazmimofonkura hake'za egahaze. 5 Hagi ana nehu'za Saioni kumategama nevaza kanku vahera zamantahige'za nege'za, ana kuma'ma me'nea kaziga zamavugosa hunte'za vugahaze. E'ina'ma zamagrama hu'nazana Ra Anumzamo'ene mevava huhagerafi huvempa ke ome huhagerafi'neza zamage'ma okaninagu anara hugahaze. 6 Hagi Nagri vahe'mo'za sipisipi afu'tamimo'zama nehazaza hu'za hazagre'za ufre efre hu'naze. Hagi sipisipi afute kva vahe'mo'za, sipisipi afu'tamima zamavare'za ranra agonaramimpine ne'onse agonaramimpine vazage'za kanku ome hazagre'za vano nehu'za, nemaniza noma zamage akani'zankna nehaze. 7 Hagi tutagi ha'ma huzmantaza vahe'mo'za zamahe frizage'za, ha' vahe zamimo'za amanage hu'naze. Anama zamahe frisaza zamofo kna'a tagra e'origahune. Na'ankure Agripima mani'nesageno fatgo avu'ava zama huno kegavama huzmantesia Ra Anumzamofo avufi kumira nehu'za, zamafahe'mo'za Agrite'ma muha'ma hu'naza Ra Anumzamofo avufi kumira hu'naze. 8 Hagi Juda vahe'mota Babiloni vahe mopafintira ame huta atreta nevuta, ve meme afumo'ma sipisipi afu'tami zamagatere'za vugota hazaza huta viho. 9 Na'ankure noti kaziga mopafima nemaniza hankavenentake vahetamina Nagra zamazeri otisuge'za, magopi eme eri tru hute'za avazuhumpi hu'za Babiloni vahera ha' eme huzmante'za, hara huzamagateregahaze. Hagi ana ha' vahe'mo'za atima ahe'arera knare hu'naza vaheki'za mago'zama ahazana hantga nosaza vahe mani'nazankiza, Babiloni vahera ha' eme huzmagatere'za zamavare'za kina ome huzmantegahaze.

10 Hagi Babiloni vahera hara eme huzmantza maka zana rohure'za eri'za vugahaze. Ana hugahazankino mago mago ha' vahe'mo'a avemasinia feno zana erimente huno eri avitetere huno vugahie, huno Ra Anumzamo'a hu'ne. **11** Hagi Ra Anumzamo'a huno, Babiloni vahe'mota Nagri vahera ha' huzmanteta kumazmia eri haviza nehuta, mika zazamia rohu zamareta erita neeta, ve bulimakao afu'mo witi hona refuzafu'nepeno takaure takaure hiaza nehuta, ve hosi afu'mo nehiankna krafa huta e'naze. **12** Hagi e'inama hanageno'a kaseramanteno amima tami'nea neramarera'a tusi agazegu hugahie. Ana hanigeno ama mopafima me'nea kumatamimofo amu'nompina agia omanena haviza huno vahe omani hagage ka'ma koka fore hugahie.

13 Na'ankure Ra Anumzamofo arimpa ahe'zamo hanigeno Babiloni kumamo'a haviza hina, anampina mago vahemo'e huno omanitfa hugahie. Hagi ru kumapi vahe'mo'zama ana kuma tva'onte'ma vu'za ezama nehu'za ana zama kesu'za tusi antri hu'za nava'nava hugahaze. **14** Hagi Babiloni vahe'mokizmi ha' vahe'mota avazuhumpi huta maka kazigati eta Babiloni kumara eme azeri kaneginke'za atifima kevema erintetama nehaza vahe'mota kevea magore huta otreta ahetrenkeno Babiloni kumapina ufreto. Na'ankure zamagra Ra Anumzamo'na navufi kumi hu'naze. **15** Hagi tamagra Babiloni kumamofona maka vahe'mota kezatita rankege nehinke'za, zamazama erisga hu'za hara osanunema hu'za tamagritegama esageta, Babiloni kuma kegina ahenafrage hunetreta, manine'za kuma kvama nehaza zaza nontamina tapage hutreho. Na'ankure e'i Ra Anumzamofo arimpa ahe'za me'neanki, vahe'ma zamazeri havizama hu'nazaza huta zamagri'enena zamazeri haviza hiho.

16 Hagi Babiloni mopafima hozama eri'za avimzama nehankraza

vahe'ene, ne'zama hamare zupama kazinteti'ma ne'zama
nehamaraza vahe'enena zamahe hana hugahaze. Hagi Babiloni
vahe'ma ha' vahe'zamimo'zama bainati kazinteti'ma ha'ma
eme huzmantesage'za, ru vahe'ma zamagranema eman'i'zana
vahe'mo'za koro atre'za mopa zamirega uvuevu hugahaze. **17**
Hagi Israeli vahe'mo'za sipisipi afu kevugna hu'nage'za, ha'
vahe'mo'za laionigna hu'za eme zamarotago hazage'za panani
hu'za fre'naze. Hagi esera Aselia kini ne'mo eme zamaheno
netegen, anantera Babiloni kini ne' Nebukatnesa eno zaferina
eme hakaneno ne'ne. **18** E'ina hu'negu Monafi sondia vahe'mofo
Ra Anumzana Israeli vahe Anumzamo'a huno, Antahiho, Asaria
kini ne'ma knama ami'na azeri havizama hu'noaza hu'na,
Babiloni kini nera azeri haviza nehu'na, Babiloni mowanena
eri haviza hugahue. **19** Hagi sipisipi nagara, Israeli vahera
ete zamavare'na mopa zamire esuge'za, Kameli agonafinti'ene
Basani mopafinti'ene Efraemi agona kokampinti'ene Gileati
mopafinti'enena trazana nezamu hu'za negahaze. **20** Hagi Ra
Anumzamo'a huno, Anazama fore'ma hania knafina Israeli
vahepine Juda vahepinena mago kumira omanegahie. Na'ankure
Nagrama zamatreseuge'za osi'a naga'ma ofri manisaza nagara
kumi'zamia eritresuge'za vahe'mo'za kumi'zamia onkegahaze.
21 Hagi Babiloni vahe'mokizmi ha' vahera Ra Anumzamo'a
huzmanteno, Marerita Merataimi kumate vahe'ene Pekodi
kumate vahe'enena hara ome hunezmanteta maka zazmi'nena
eri haviza hiho. Ana nehuta hihoma hu'na huramante'noa zana
ana maka huvagareho, huno Ra Anumzamo'a hu'ne. **22** Hagi
Babiloni mopafina ha' zamofo agasasamo'a tusiza nehanigeno,
ana mopafina maka zamo'a ome haviza hugahie. **23** Hagi
Babiloni vahe'mo'za ama mopafi vahetera mago hanavenentake

hamankna hune'za vahera zamazeri haviza hu'nazanagi, menina
ha' vahe'amo'za Babiloni kumara eme eri anafe hunetre'za eri
haviza hugahaze. Ana hanage'za vahe'mo'zama ana zama
nege'za tusi antri nehu'za zmagogogu hugahaze. **24** Hagi Ra
Anumzamo'a huno, Nagra Babiloni vahemota tamazerinaku
kuko ante'nogeno tamazeri'ne. Hianagi anazana keta antahita
osu'naze. Na'ankure Ra Anumzamofo ha' rente'nagu ana
kukomo'a tamazeri'ne. **25** Hagi Ra Anumzamo'a ha' zama
nentea noma'a anagi hagro huno arimpa ahe'zana eri fegi
atre'ne. Na'ankure Monafi sondia vahe'mofa Ra Anumzamo'a
Babiloni vahe mopafi eri'za erinaku anara hu'ne. **26** Hagi afete
moparegati ha' vahe'mota eta Babiloni mopafi vahera hara
eme huzmanteta, ne'zama nentaza nontamina tapage hutreho.
Ana nehuta witima hiaza huta maka zantamina magopi eri hihi
nehuta, mago zana otreta maka eri haviza hutrenkeno anampina
mago'zana omanetfa hino. **27** Hagi Babiloni vahe'mokizimi ve
agaho bulimakao afu'tamina maka zamahe hana huta traga
hiho. Na'ankure Babiloni vahe'ma Ra Anumzamo'ma nona
huzmanteno zamazeri havizama hania knamo'a hago e'neanki
kva hiho. **28** Hagi mago'a Juda vahe'ene Israeli vahe'mo'zanema
Babiloniti'ma koro fre'za Saioni kumate'ma esaza vahe'mo'za
huama hu'za, Ra Anumzana tagri Anumzamo agri mono
noma eri havizama hu'naza vahera arimpa ahene'zamanteno
ana zante zamazeri haviza nehie hu'za hugahaze. **29** Hagi
atireti'ma ha'ma nehaza vahera maka ke hinke'za e'za Babiloni
kumara eme avazagi kagine'za, zamagrama hu'naza avu'ava
zantera anazanke hu'za nona huzmante'za zamazeri haviza
nehinke'za, magore hu'za zamatre'za ofreho. Na'ankure zamagra
zamavufaga ra nehu'za, Ra Anumzana Israeli vahete'ma

ruotage'ma hu'nea Anumzamofona ha' rente'naze. 30 E'ina
hu'negu agri nehzaveramina kumamofo neonse kantamimpi
zamahe tresage'za frigahaze. Ana nehu'za ana zupa sondia
vahe'zaminena maka zamahe hana hugahaze, huno Ra
Anumzamo'a hu'ne. 31 Hagi Monafi sondia vahe'mofo Ra
Anumzamo'a huno, Antahiho! Tamavufga rama nehaza Babiloni
vahera nagra hara huzamantegahue. Na'ankure tamagri'ma
knazama tami'na tamazeri havizama hanua knamo'a hago
menina efore hu'ne. 32 Hagi kema ontahi veganokano'ma nehana
kuma'moka, traka hunka mase sankeno mago vahe'mo'a kazeri
oraotigahie. Ana nehanige'na Nagra ranra kumatamimpina teve
tagintesugeno nereno ana kumatamimofo tva'onte'ma me'nesia
zanena teno erihana hugahie. 33 Hagi Monafi sondia vahe'mofo
Ra Anumzamo'a huno, Israeli vahe'ene Juda vahe'enena ha'
vahe'mo'za eme zamazeri haviza hute'za zamavare'za kina
ome huzmantete'za ozamatre'za zamazeri antrako hu'naze.
34 Hianagi zamagri'ma zamagu'vazino zamavaresia ne'mo'a
hankavenentake hu'neankino, Monafi sondia vahe'mofo Ra
Anumzane huno agia me'ne. Ana hu'neankino tamagerfa
huno Agra zamaza huno hara huno nezamanteno, maka ama
mopafi vahera mani frua zamigahie. Hianagi Babiloni vahera
zamatresigeno nomaniza zamimo'a haviza hanige'za mani
so'ea osugahaze. 35 Hagi Ra Anumzamo'a huno Babiloni
mopafima nemaniza Kaldia vahera bainati kazinteti eme
nezmahe'za, Babiloni kumapima nemaniza vahe'ene eri'za
vahe'ene knare antahi'zane vahetaminena bainati kazinteti
ha' eme huzmante'za zamazeri haviza hugahaze. 36 Hagi
henkama fore'ma hania zanku'ma havi kasnampa kema nehaza
vahe'zamia bainati kazinteti ha' eme huzmantesage'za, neginagi

vahekna nehanage'za, harafa sondia vahe'zamia ha' eme huzmantesage'za tusi koro hugahaze. **37** Hagi Babiloni vahe hosi afutamina ha' vahe'mo'za bainati kazinteti eme zamahe nefri'za karisi zamia eri haviza hugahaze. Ana nehu'za ruregati sondia vahe'ma zamagranema emanine'za zamaza hu'za ha'ma nehaza sondia vahera zamazeri haviza hanageno hankavezmi omanena a'negna hugahaze. Hagi ha' vahe zamimo'za maka feno zazimia rohure'za eri'za vugahaze. **38** Hagi Nagra hanugeno mopazamifina kora ruontesigeno maka ranra timo'enena taneno hagage kokankna hugahie. Na'ankure Babiloni mopafina havi anumzaramimofo amema'amo'a avite'nege'za, Babiloni vahe'mo'za ana zante amagera nente'za neginagi vahekna hu'nazagu anara hugahie. **39** E'ina hu'negu Babiloni kumapina magore huno vahera omanitfa hanigeno anampina afi zagagafamo'ene afi kraramimo eno enemanisigeno, mananinkna huno zaza anankene nama ostretie nehaza namamo'ene anampina emanigahie. Ana hina Babiloni kumapina mago vahera omanitfa hanigeno, henkama mani'za vanaza knafinena anampina vahera omanigahaze. **40** Hagi korapara Nagra Sodomu kuma'ene Gomora kuma'enena eri haviza nehu'na, zanagri tvaonte'ma megagi'nea kuma taminena eri haviza hu'noe, huno Ra Anumzamo'a hu'ne. E'ina'ma hu'neankna za Babiloni kumatera fore hanigeno, mago vahe'mo'a anampina nomanisigeno, mago vahe'mo'a eno anampina kana anteno vano osugahie. **41** Hagi noti kazigati'ma sondia vahe'ma neazana keho. Ana vahera tusi'a vahe mani'za hankavenentake vaheki'za, rama'a kini vahe'ene mopama ome atretegati eme eri tru hu'za ha' eme huramante'naku trotra nehaze. **42** Hagi zamagra ana vahe'mo'za vahekura zamasunku huozamante vaheki'za, zamazampina

atine karugru kevenena eri'naze. Ana hune'za zamagra hosi afu agumpi manine'za ne-esageno zamagasasamo'a hagerimo rupokra neseno hiankna agasasa rugahie. Hagi Babiloni vahemota tamagri hara eme huramante'naku avazuhumpi hu'za egahaze. **43** Hagi ana ha' vahe'ma aze nanekema Babiloni kini nemo'ma nentahino'a, koro nehanigeno azamo'a hankave'a omanena zuzu frino evuramigahie. Ana nehanigeno antahintahi hakare nehina, a'nemo mofavre anteku nehigeno hiankna ata krigahie. **44** Hagi Jodani tintegama me'nea zafa tanopafinti laionimo ame huno atiramino eno, sipisipi afumo'za afovage hu'nea traza nene'za mani'nageno eme zamarotago hige'za frazankna hu'na, Nagra ame hu'na Babiloni vahera mopazmifintira zamahegasopetregahue. Ana nehu'na mago ne' huhampari antesugenno ana mopa kegava hugahie. Hagi ana'ma hanua zankura ina vahe'mo Nagri'enena kehara nerisigeno, ina kva ne'mo nagrikura huno e'i haviza nehane huno hugahie? **45** E'na hu'nego Babiloni kumate'ma fore'ma hania zanku'ene, Babiloni mopafima nemaniza Kaldia vahete'ma fore'ma hania zanku'ma Ra Anumzamo'ma retro'ma hunte'nea antahintahi zana tamagesa ante'neta antahihio. Hagi maka vahe'ene mofavre naga'enena sipisipi afu anentama avazu hu'za nevazankna hu'za zamavazu hu'za vanageno nonku'ma zamifina vahera omanigahie. **46** Hagi ha' vahe'mo'zama Babiloni kuma'ma ha' eme hu'za erisaza zamofo agasasamo'a mopa eri tore nehina, Babiloni vahe'mo'zama zavi'ma atesaza zamofo agasasankea mago'a mopafi vahe'mo'za antahigahaze.

51 Hagi Ra Anumzamo'a amanage huno hie, Nagra maka zama eri havizama nehaza vahe zamarimpa eri otisuge'za, ra zaho'mo hiaza hu'za e'za Babiloni mopafi vahera eme

zamazeri haviza nehu'za, Leb-kamai kumapi vahe'enena
zamazeri haviza hugahaze. 2 Hagi Nagra ru moparegati ha' vahe
huzamantesuge'za e'za witi hona zahopi vazi herahe hutrageno
zaho'mo onoma'a eri hareno viaza hu'za Babiloni vahe'ma
ha'ma eme huzmantesaza zupa, maka zazamia eri vagare'za
vanageno mago zana omanetfa hugahie. 3 Hagi ha' vahe'mota
Babiloni vahera zamatreke'za ha' kukena zamia eri nehu'za,
kevea atifina erinte'za eri onkariho. Maka Babiloni sondia
vahera zamahe vaganereta, nahezave raminena ozamatreta
maka zamahe hana hiho. 4 Hagi kevereti vahera zamahe
atresage'za Babiloni mopafina traka huza nemasesage'za,
zamahe kuzafa'ma hanaza vahe'mo'za kumamofo ne'onse
kantamimpina traka hu'za umase emase hugahaze. 5 Na'ankure
Israeli vahete'ma ruotage'ma hu'nea Anumzamofo avure'ma
hu'naza kumimo'a mopazmifina avite'neanagi, Monafi sondia
vahe'mofo Ra Anumzana zamagri Anumzamo'a Israeli vahe'ene
Juda vahe'enena amefira huozami'ne. 6 Hagi Babiloni mopaintira
tamagareta freho. Babiloni vahe'mo'zama nona hu'za erisaza
knazampintira maka vahe'mota atreta freta tamagu'vaziho.
Na'ankure Babiloni vahe'mo'zama hu'naza havi avu'ava zante Ra
Anumzamo'ma arimpa ahezmanteno nona huzmanteno zamazeri
haviza hania kna menia me'ne. 7 Hagi kora Babiloni kumamo'a,
golireti tro hu'naza kapumo Ra Anumzamofo azampi me'neankna
hu'negeno, mika kotegati vahe'mo'za ana kapufinti Babiloni
vahe waini tina eme ne'naze. Ana hu'nazagu maka kokantega
vahe'mo'za neginagi hu'naze. 8 Hianagi Babiloni kumamo'a ame
huno evuramino haviza hugahie. Ana hu'negu tamagra zavira
atenenteta atama negrire'ma fresania masavena keta erinteho.
Ana'ma hanageno'a ete kanamarege nazana hugahie. 9 Hagi

ruregati'ma e'za Babiloni mopa fima eman'i'naza vahe'mo'za
hu'za, tagra Babiloni vahera knamaresazegu zamaza hu'none.
Hianagi mago vahemo'e huno onkanamare'ne. Ana hu'negu
mago mago vahe'mota atreta mopatirega vuta eta hanune.
Na'ankure Babiloni vahe'mo'zama hu'naza kumi'mofo knazamo'a
hihi huno monafi mareri'negeno Anumzamo'a zamazeri haviza
nehie. **10** Hagi Ra Anumzamo'ma Babiloni vahe'ma zamazeri
havizama hia zamo'a, tagrikura fatgo hunaze huno tazerinte
ama nehie. Ana hu'negu enketa Saioni vuta Ra Anumzana tagri
Anumzamo'ma eri'nea eri'zankura ome huama hamneno. **11**
Hagi Babiloni vahe ha' vahe'mota kevetamia ahegona nehuta
hankotamia erisga hiho. Babiloni vahe'mo'zama Ra Anumzamofo
mono noma eri havizama hu'naza zanku huno, Ra Anumzamo'a
arimpa ahenezmanteno zamazeri haviza hunaku, Midia kini
vahera zamazeri otisige'za e'za Babiloni vahera hara eme
huzmantegahaze. **12** Hagi mago avame zana krauvefa (flek)
erisga hu'neta Babiloni kuma keginamofo tva'ontera hara huta
eho. Ana nehuta sondia vahera rama'a huzmantenke'za Babiloni
kumatera kafona ante'za mani kagine'za zamavua ante'za
keho. Na'ankura Ra Anumzamo'ma Babiloni vahe'ma zamazeri
haviza hugahuema huno retro'ma hunte'nea zana meni erifore
hunaku nehie. **13** Hagi tamagra Babiloni vahe'mota ranra
tintamimofo ankenarega nemanita, rama'a feno zantami nentaza
vaher mani'naze. Hianagi tamagri'ma tamahe fananema hania
knamo'a kofta hiankino tamazeri fanene hugahie. **14** Hagi
Monafi sondia vahe'mofo Ra Anumzamo'a agra'a agifi huvempa
huno, Nagra tamagerfa huanki'na tusi kenutami eaza hu'na
rama'a ha' vaher zamavare'na esuge'za, tamagrira hara eme
huramagetene'reza kezati'za tusi musenkase nehu'za kanikahara

regahaze. **15** Hagi Ra Anumzamo'a hankave'areti mopa tro hunenteno, knare antahizama'areti mopamofona azerinte fatgo higeno noma'arera me'ne. Ana nehuno ama' antahi'zama'areti monaramina tro huno eri rufanara hunte'ne. **16** Hagi Agrama agi'ma reaka'ma huno keagama nehigeno'a, agerumo'a timo hiaza huno monaramimpintira agasasa nerie. Ana nehigeno mopama ome tre eme atrema hutegatira amu'mo'a eri tru huteno hampona kino marenerie. Hagi Agra higeno kopasi'namo'a rumarave nehigeno, kora nerigeno, fenoma nentea nompintira higeno zahomo'a atiramino zahora erino ne-e. **17** Hagi mika vahera neginagi hu'za knare antahi'za omane'nea vahe mani'naze. Hagi golireti'ma havi anumzantamima tro'ma nehaza vahe'mo'za tusi zamagazegu hugahaze. Na'ankure anama tro'ma nehaza amema'aramina tamage zana omane'neankino ana zantamimo'za zamasimura ante'za kasefara hu'za nomanize. **18** Hagi ana havi anumzantamina amneza me'neanki'za, vahe'mo'za ana zantaminkura kiza zokago ke huzamantegahaze. Hagi keagama refko huzamante knama esania zupa, haviza hu'za fanane hugahaze. **19** Hianagi Jekopu nagamofo Anumzamo'a Agra kaza osu havi anumzanknara osu'neanki, Agra ruzahukna hu'ne. Na'ankure Agrake'za maka zana tro hu'ne. Ana hu'neanki'za Israeli vahera Agrama erisantima hare'nea naga nofi vahe mani'naze. Hagi Agri agi'a Monafi sondia vahe'mofo Ra Anumzane huno me'ne. **20** Hagi Ra Anumzamo'a Babiloni vahekura huno, Ha' nehaza konte kano nazampi eruankna huta tamagra mani'nazage'na tamagripi huvazi'na kokankokama nemaniza vahera zamahe pasaru nehu'na, tamagripi huvazina kinimo'zama kegavama hu'naza mohanena eri haviza hu'noe. **21** Hagi tamagripi huvazi'na hosi agumpima manine'za ha'ma

nehaza sondia vahe'ene hosi afutaminena mopa kavoma rurako'ma nehiaza hu'na zamazeri haviza nehu'na, karisifima manine'za ha'ma nehaza vahe'ene karisi raminena zamahe'na rufuzafupe atre'noe. **22** Hagi tamagripi huvazi'na veatamina zamazeri haviza nehu'na, kasefa vahe'ene ranafa vahe'enena zamazeri haviza nehu'na, ne' mofavre naga'ene mofa'ne naga'enena zamazeri haviza hu'noe. **23** Hagi tamagripi huvazi'na sipisipi afutamine kva vahe'zminena zamazeri haviza nehu'na, hoza afu'ma nehaza vahe'ene mopama rekoneriza bulimakao afuzminena zamazeri haviza nehu'na, gavana vahetamine kamani eri'za vahe'enena zamazeri haviza hu'noe. **24** Hianagi menina tamagra tamavufinti negesage'na Babiloni kumapima nemaniza vahemo'zane Babiloni mopafima nemaniza Kaldia vahe'mo'zama Saioni kumapima hu'naza havi zamavu'zamava zantera nona huzmantegahue, huno Ra Anumzamo'a hu'ne. **25** Hagi Ra Anumzamo'a huno, Babiloni vahe'mota mago agonagna huta hankavenentake hu'neta maka mopafi vahera zamazeri haviza hu'naze. Hagi menina Nagra nazana rusute'na hara hunegante'na, kazerite'na katrenugenka zavenitegati tamisankeno tevemo'a kagrira tehana hanigenka, mago agonama afe tevemo'ma teosa hiankna hugahane. **26** Hagi tamagri kumamo'a haviza hanigeno ana kumapintira havea eri'za noma retrure trara tro huge, noma azeri sgama hania havea, noma renagentetera aseontegahaze. Na'ankure kagrama haviza hanankeno'a, ka'ma koka fore huteno meno vugahie, huno Ra Anumzamo'a hu'ne. **27** Hagi ha'ma hu avame'zana krauvefa erisaga nehuta ufena nerenge'za kokankoka vahe'mo'za eme eri atru hu'za Babiloni kuma'ma ha'ma hunte'nakura eme trotra hoho. Hagi zurunama hanage'za ha'ma eme huntesaza vahera,

Ararati mopafi vaheki, Mini mopafi vaheki, Askenazi mopafi vaheki huta kehinke'za etesageta, sondia vahete kva vahera huhamprinke'za, kenu tamimo ruherafiramino viaza hu'za, sondia vahera zamavare'za hosi afutamimofo agumpi mani'za hatera vugahaze. **28** Hagi Midia mopafima nemaniza kini vahé'ene gavana vahe zamine, maka eri'za vahe zaminena kehu tru nehuta, maka zamagrama kegavama hu'naza mopafi vahe'enena kehu atru huteta Babiloni vahera hara ome huzmanteho. **29** Hagi mopamo'a antri nehuno ata negrisigeno ahirahiku hugahie. Na'ankure Ra Anumzamo'ma Babiloni mopama eri haviza hanugenno kama koka fore hina anampina mago vahera omaniffa hugahiema huno hu'ne nanekemo'a nena raga fore hanigeno anara hugahie. **30** Hagi Babiloni vahé'mokizmi harfa sondia vahera a'nenegna huno hankavezmia omanesige'za hara osu atre'za, kuma keginamofo hankave vihu zamifi manigahaze. Hagi rankuma zamifima me'nea nozamia tevemo te hana nehanigeno, kuma keginamofo kafantamina tapage hutregahaze. **31** Hagi ha' vahé'mo'zama ran kumamofona maka asoparegama eme eri vagare'zama maniza zamofo nanekea, kema eri'za vu vahé'mo'za zamagia re'za Babiloni kini nera ome asamitere hu'naze. **32** Hagi tima takama nehzare sondia vahé'mo'za eme kva hu'ne'za, timpima me'nea ketatamina teve tagintesageno tegahie. Ana hazage'za Babiloni sondia vahé'mo'za tusi koro nehu'za neginagi negahaze. **33** Hagi Monafi sondia vahé'mofo Ra Anumzana Israeli vahé Anumzamo'a huno, Ha' vahé'mo'za e'za Babiloni mopamo'a witima refuzafuma nepaza kumakna hu'neankino witima refuzafuma nepazankna hu'za zamazeri haviza hugahaze. Ana hu'neankino witima hamareankna huno ana vahé'ma zamazeri havizama hania knamo'a hago egofta

hu'ne. 34 Hagi Jerusalemi kumapima nemaniza vahe'mo'za hu'za, Babiloni kini ne' Nebukatnesa'a tagrira eme taheno nehana nehuno, agareti trehapa tinetreno, tima omane tintafema mopafima rerarakama hutreankna nehuno, hagerimpima nemania tusi zagamo'ma mago zagama asgahu nakriaza huno tasga hu'enakrino, Jerusalemi kumapinti feno zantaminena negeno amura nehigeno, ete agipintira tagrira amuti tre'ne. 35 Hagi Saionima nemaniza vahe'mota huta, Babiloni vahe'mo'zama tagri'ma eme hazenkema nerami'za Jerusalemi kuma'ma eri havizama hu'nazankna hu'za ha' vahe'mo'za Babiloni mopafima nemaniza vahera zamagri'enena hazenke eme zamigahaze nehinke'za, Jerusalemi kumapima nemaniza vahe'mo'za hu'za, tagri'ma tahe'za korama eri tagi'naza zantera nona hu'za, Babiloni vahera korana zamahe'za eri tagigahaze hu'za hugahaze. 36 Hagi e'ina hu'negu Ra Anumzamo'a amanage huno Jerusalemi vahekura hu'ne. Keho, Nagra tamagri kaziga ante'na tamaza hu'na Babiloni vahe'mo'zama eme huramante'naza avu'ava zantera nona hu'na Babiloni vahe'mokizmi hagerina eri hagage nehu'na, ne'onse tintaminena eri ranegahue. 37 Ana hanugeno Babiloni kumamo'a fragu vaziramiteno hihi huno megahie. Ana huno me'nesige'za anampina afi kramo'za enemanisage'za vahera omanitfa hugahaze. Hagi vahe'mo'za anzama nege'za koro hu'za zamagena neru'za, kiza zokago ke huzmantegahaze. 38 Hagi Babiloni vahe'mo'za kasefa laionimo krafage hiaza hu'za krafa nehu'za, anenta laionimo karagugaragu hiaza hugahaze. 39 Hagi zamagrime havi avu'ava zama hu' zamofo zamavesi zamo'ma teve rukaru'ma hanige'na, ne'zama nesaza zana trate retro hunte zamantesanuge'za nene'za waini tinena nene'za neginagi hugahaze. Ana hute'za oraot'iare mase

vava hu'za vugahaze, huno Ra Anumzamo'a hu'ne. **40** Hagi
sipisipi anenta afu'tamine, ve sipisipi afutamine ve meme
afu'tamima zamahenaku'ma zamazeri fenkami atrazaza hu'na,
zamagrira zamazeri fenkami atregahue. **41** Hagi Babiloni
vahera ha' vahe'mo'za hara huzmagateresage'za ama mopafi
vahe'mo'zama ra zamagima nezamiza zamo'a vagaregahie.
Ana'ma hanige'za vahe'mo'za nezamage'za tusi antri nehu'za
zamagogogou hugahaze. **42** Hagi hagerimo'ma eme runagrama
seteno hageri ankenama rufite vagareaza hu'za, ha' vahe'mo'za
e'za Babiloni vahera eme zamarefite vagaregahaze. **43** Hagi
Babiloni mopafima me'nea kumatamimo'za haviza huza ka'ma
koka fore hanageno, anampina vahera omanitfa hanigeno,
mago vahemo'e huno anampina ufreno ovugahie. **44** Hagi
Babiloni vahe havi anumzanku'ma Beliema nehaza anumzana,
Nagra knaza ami'na azeri haviza hanugeno, maka zama asgahu
nakri'nea zantamimo'a agipinti rukha huramigahie. Ana hanige'za
ru moparegati'ma Babiloni vahe'ma eme nezamagaza zana eme
ozmagegahaze. Ana nehina Babiloni kumamofo have keginamo'a
mopafi faragu vaziramigahie. **45** Hagi mika Nagri vahe'mota
Babiloni mopafintira atreta atiramita freta vuta ome tamagu
vaziho. Na'ankure ana'ma hanazana Ra Anumzamofo arimpahe
zamo'ma Babiloni vahete'ma ne-ea zana agateregahaze. **46** Hagi
ama mopafima nazano fore'ma hania zanku'ma vahe'mo'zama
eme tamasamisaza nanekema nentahisnageno'a, tamagu'amo'a
antria nehina korora osiho. Hagi ama kafufina mago naneke
nentahita, anaga'a kafufina ru naneke antahigahaze. Ana nehuta
ha'ma hanaza zamofo agenkea nentahita, mago kini nemo'ma
otino mago kini ne'ma ha'ma huntlesia zamofo agenkenena
antahigahaze. **47** E'ina hu'negu antahiho! Babiloni vahe'mokizmi

kaza osu havi anumzantamina, mago kna ne-eanki'na ana knama efore'ma hanige'na, zamazeri haviza hugahue. Ana hanuge'za maka ana mopafima nemaniza vahe'mo'za tusi zamagazegu hugahaze. Ana nehanageno ha' vahe'mo'za Babiloni vahe'ma zamahe frisaza vahe'mo'za traka hu'za mopafi umase emase hugahaze. **48** Ana hanige'za monaramimo'zane, mopamo'ene anampima me'nea zantami'mo'zanena, Babiloni kumamo'ma havizama hania zankura musenkase nehu'za zagame hugahaze. Na'ankure Babiloni vahe'ma e'za eme ha'ma huzamante'za zamazeri havizama hanaza vahera noti kazigati egahaze, huno Ra Anumzamo'a hu'ne. **49** Hagi Babiloni vahe'mo'za Israeli vahe'ene kokankoka vahe'enena zamahe fri'nazankino, Babiloni kumamo'a agranena haviza hugahie. **50** Hagi bainati kazinteti'ma tamahe ofrisageta fraza vahe'mota otiteta omanita ame huta freho. Hagi tamagra afete kotege umanigahazanki, Ra Anumzamofonkura tamagera okanita, Jerusalemi kumakura tamagesa are'are hiho. **51** Hagi vahe'mo'za tagrira tazeri haviza hu naneke hazageno, tusi tagaze zamo tavugosa refite'ne. Na'ankure ru mopafi vahe'mo'za e'za Ra Anumzamofo mono nompima, ruotage'ma hu'nefinkama umareriza eri pehanama hu'naza zanku anara hu'none. **52** E'ina hu'negu Ra Anumzamo'a huno, henka mago kna ne-eankino ana knama esige'na, Babiloni vahe'mokizmi havi anumzamofo amema'a eri haviza hugahue. Ana nehanuge'za ha' vahe'mo'za maka Babiloni mopafi vahera hara eme hunezamante'za, rama'a vahe zamahe kuzafa hanage'za masene'za karagi rugahaze. **53** Hagi Babiloni vahe'mo'za manine'za ha'ma hanaza vihua kegina eri hankaveti'za hampompi kiza marerigahazanagi, Babiloni kuma'ma eme eri havizama hanaza vahera, Nagra huzmante

sanuge'za e'za emeri haviza hugahaze, huno Ra Anumzamo'a hu'ne. **54** Hagi Babiloni vahe'mo'za ra zavi krafa nehanageno, Babiloni mopafima maka zama eri haviza hanaza zamofo agasasamo'a tusiza hugahie. **55** Na'ankure Ra Anumzamo'a Babiloni vahera zamazeri haviza nehuno, rankege'ma nehaza zamagerura ruraganeku nehie. Hagi Babiloni vahe'ma ha'ma eme huzmantesaza vahe'mokizmi zamagerumo'a, rama'a tintamimo'ma hiankna hu'za zamagasasa ante'za ne-esageno, zamagerumo'a ome rahuno egahie. **56** Hagi maka zama eri havizama nehaza vahe'mo'za e'za Babiloni vahera hara eme huzmante'za zamazeri haviza hugahaze. Ana nehu'za harafa sondia vahe'zamia zamavare'za kina hunezamante'za, ati zamia eri'za refutagi atregahaze. Na'ankure Ra Anumzana nonahu Anumzankino, Babiloni vahe'mo'zama hu'naza avu'ava zantera tamagerfa huno nona huzmanteno zamazeri haviza hugahie. **57** Hagi Babiloni vahe'mokizmi kva vahetamine, antahi'zane vahetaminena, Nagra hanuge'za waini tina nete'za neginagi hugahaze. Ana nehu'na gavana vahe'ene, sondia vahete kva vahe'ene, harafa sondia vahetaminena hanuge'za masehimare'za ora otigahaze, huno Kini ne'ma Monafi sondia vahe'mofo Ra Anumzanema huno Agima me'nea Anumzamo'a ama ana naneke huama nehie. **58** Hagi Monafi sondia vahe'mofo Ra Anumzamo'a amanage nehie, ha' vahe'mo'za e'za Babiloni ran kumamofo vihu kegina eme tapage hutresageno tamino mopafi megahie. Ana nehu'za zaza kuma kafantamina teve tagintesageno tegahie. Hagi vahe'mo'zama zamu'na sisima hu'naza zamo'a amne zankna nehina, Babiloni mopafi vahe'mo'zama maka zantamima, hankavema atre'za eri fore'ma hu'naza zantamimo'a tevemofo ne'zanke asegahie. **59** Hagi Zedekaia'ma Juda vahe kinima 4'a

kafuma nemanigeno'a, kasnampa ne' Jeremaia'a mago naneke atregeno Maseia negeho Neria nemofo Seraia'a erigeke Juda kini ne' Zedekaia'ene Babiloni vu'na'e. Hagi Seraia'a kini ne'mo'ma kama anteno vanoma haniazamofo kankamuma erinte fatgoma nehia nere. **60** Hagi ana avompima Jeremaia'ma krente'neana Babiloni vahete'ma mika hazenke zama fore'ma hania zanku'ma, Anumzamo'ma asami'nea kasnampa nanekea mika krente'ne. **61** Hagi Jeremaia'a amanage huno Seraiana asami'ne, Babilonima uhanati'sunka, kagra ama avona otreンka ranke hunka ana maka nanekea hampri vagaro. **62** Ana'ma hutenga kagra amanage hunka huo, Ra Anumzamoka Kagra hunka, Babiloni mopa eri haviza hanugeno, ana mopafina vahe'ene zagagafanena omanitfa hanigeno mago zana omanesigeno ka'ma koka mevava hugahie hunka hu'nane. **63** Hagi ama avontafepima me'nea nanekema hampri vagamaretesunka, nofi erinka ana avontafetera have rentetenka, Yufretisi rantimofo amu'nompi ome matevu atregeno vino. **64** Hagi ana'ma hutenga amanage hunka huo. Ama avontafe'ma atrogeno timpima uramiaza huno, Babiloni kumamo'a uramino ome fanane huteno, ete ora otigahie. Na'ankure Nagra ra hazenke atresugeno eno eme zamazeri haviza hanige'za zamasafeku hugahaze. Jeremaia'ma hu'nea kasnampa nanekemo'a amare eme vagare'ne.

52 Hagi Zedekaia'a 21ni'a kafu nehuno kinia fore huno Jerusalemi kumate mani'neno, 11ni'a kafufi Juda mopa kegava hu'ne. Hagi nerera'a Libna kumateti ne' ru Jeremaia mofakino, agi'a Hamutali'e. (2 King 24:18-25:7 Jeremaia 39:1-10) **2** Hagi Jehoiakimi'ma hu'neaza huno Ra Anumzamofo avurera Zedekaia'a kefo avu'avaza hu'ne. **3** Hagi Jerusalemi kumapima nemaniza vahe'mo'zane, Juda vahe'mo'zanema haza havi

zamavu'zmava zamo higeno, Ra Anumzamofona arimpa
ahegeno Agri avure'ma mani'naretira zamahe kasopetrege'za ru
moparega umani'haze. Hagi Zedekaia'a Babiloni kini ne'mofo kea
antahino amagera onte'neanki ha' arente'ne. 4 Hagi Zedekaia'ma
kinima mani'no egeno 9nima hia kafufina, 10ni ikamofona 10ni
zupa, Babiloni kini ne' Nebukatnesa'a sondia vahe'aramine
eno Jerusalemi kumara ha'hunte'naku eme avazagi kagine'za,
manine'zama ha'ma hanaza zana, kuma keginamofo tva'ontera
meg'i mopa kate'za ante hihi hu'za mareri'haze. 5 Hagi Babiloni
vahe'mo'za atre'za ovu'za Jerusalemi kumara vazagi kagiza
mani'nageno vuno, Zedekaia'ma kinima manino vigeno, 11nima
hia kafure uhanati'ne. 6 Hagi ana kafufina 4 ikamofona 9ni
zupa, Jerusalemi rankumapina tusi agatontoza fore higeno,
vahe'mo'zama ne'zama ne'saza zana omanetfa hu'ne. 7 Hagi e'i
ana knazupa Babiloni sondia vahe'mo'za Jerusalemi rankumapina
ufrenaku kuma kegina tapage hu'haze. Hianagi ana'ma nehu'za
avazagi kagi'nazama'agu Zedekaia'ene sondia vahe'amo'zanena
kenage kumara atre'za, kini ne'mofo hozama me'neregama tare
kazigati'ma kuma keginamoke'ma eme renagema ante'nateti
atirami'za fre'za, Araba kaziga vu'naze. 8 Hianagi Babiloni
sondia vahe'mo'za kini ne' Zedekaina rotago hu'za vu'za Jeriko
agupofi ome azeri'haze. Ana hazage'za maka Zedekaia sondia
vahe'mo'za agrira atre'za panani hu'za ufre efre hu'haze. 9
Hagi Zedekaina azerite'za, Babiloni kini ne'ma mani'nerega
Hamati mopafi Ribla kumate avre'za vazageno, keagafi azeri
otiteno agrama hu'nea avu'ava zantera, e'inahu knaza erigahane
huno hunte'ne. 10 Hagi Ribla kumate Zedekaia mani'neno
negegeno agri avufi, Babiloni kini ne'mo'a ne' mofavre naga'a
zamahe nefrino, Juda kva vahetaminena ana maka zamahe fri

vagare'ne. **11** Hagi ana'ma huteno'a anante Zedekaiana tare avuraga reragati atreteno, bronsireti tro hu'naza seninofiteti kina renteteno avreno Babiloni vuno ome kina huntogeno mani'neno anampi fri'ne. (2 Kin 25:8-17) **12** Hagi Babiloni kini ne' Nebukatnesama kinima manino egeno 19nima hia kafufina 5fu ikamofo 10ni zupa, Nebukatnesa avate'ma kvama nehaza sondia vahete'ma ugotama hu'nea kva ne' Nebusaradani'a Jerusalemi kumatera e'ne. **13** Ana'ma huteno'a agra Ra Anumzamofo mono nona teve taginenteno, kini ne'mofo nonena teve taginenteno, Jerusalemi kumapima me'nea nontamina maka teve taginte'ne. Ana nehuno zamajima me'nea vahe'mokizmi nontaminena teve tagintegeno te'ne. **14** Hagi kini ne'mofo avate'ma kvama nehaza sondia vahete'ma ugotama hu'nea ne'enema e'naza sondia vahe'mo'za, Jerusalemi kumamofo keginarera mani kagine'za ana kegina maka tapage hutrazageno kegina omane'ne. **15** Hagi kini ne'mofo avate'ma kvama nehaza sondia vahete'ma ugotama hu'nea ne' Nebusaradani'a, zamunte omane vahe'ma mani'nazana nezamavareno, rankumapima mago'ama zamatre'naza vahe'enena nezamavareno, koro'ma hu'za Babiloni vahe zamazampima atre'za umani'naza vahe'enena nezamavareno, ruzahu ruzahu zantamima troma nehaza vahe'ma mago'ama mani'naza vahe'enena zamavareno Babiloni vuno ome kina huzmante'ne. **16** Hianagi Nebusaradani'a, Juda mopafi mani'neta waini hozane, mago'aza hozanena erita nenteta maniho huno zamunte omane vahera mago'a zamatrege'za mani'naze. **17** Hagi Babiloni vahe'mo'za Ra Anumzamofo mono nompi vu'za, bronsireti'ma tro'ma hu'naza fumaza zafaramina runafe'nafu hu'za e'neri'za, Ra Anumzamofo mono nompima bronsireti'ma tro'ma hu'naza zuompama tima afintageno'ma

nemanea zuompane, agia'a raminena ru tamana tamanu hute'za ana maka bronsiramina eri'za Babiloni vu'naze. **18**
Hagi ana nehu'za kavoramine, sipetiramine tavi'ma erisu'ma nehaza zotaramine, ranra zuomparamine ne'onse zuompa raminena eri'naze. Ana nehu'za bronsireti'ma tro'ma hu'naza zantamima mono nompima me'nege'za eri'zama e'neriza zantamina ana maka eri'za vu'naze. **19** Hagi Babiloni kini ne'mofo avate'ma kvama nehaza sondia vahete'ma ugotama hu'nea ne' Nebusaradani'a, ana zanke huno ne'onse zuomparamine, tevema taginentaza kavoramine, ranra zuomparamine, waini ti ofama nehaza amu mani tin taferaminema golireti'ene silvareti'enema tro'ma hu'naza zantaminena, ana maka erino Babiloni vu'ne. **20** Hagi ko'ma kini ne' Solomoni'ma Ra Anumzamofo mono nompi mesie huno bronsireti'ma tro'ma hu'nea zantamina, tare fumaza zafa rarenki, tima afinentaza zuompane, bulimakaomofo amema'a ramima fenka kazigama tro'ma hunte'nea zantamine, anazama azerisgama hu'nea agia raminena eri'za vu'naze. Hagi ana maka bronsireti'ma tro'ma hu'naza zantamimofo kna'amo'a agateregeno sigerirera erinteno kegara osu'ne. **21** Hagi ana tare zafararema bronsireti'ma tro'ma hu'nazana, za'za amo'a 8mita higeno, kagi'amo'a 5mitagi 30'a sentimita higeno, agu'afina hagro hu'ne. Hagi anazama tro'ma hu'naza bronsimofo tapa'amo'a 75 milimita hu'ne. **22** Hagi ana fumaza zafararemofo zanesenirera bronsiretike kankrira tro hu'nazankino ana zamofo mareri'amo'a 2mitagi 20ti sentimita hu'ne. Ana hu'nege'za bronsiretike pomigreneti zafa rgamofo amema'a, anazantera krente'za avasase'a hugagi'naze. Hagi mago fumaza zafamofona anazanke hu'za pomigreneti zafa rgamofo amema'a krente'za avasase'a hunte'naze. **23** Hagi ana fumaza zafa

raremofo zanasenire'ma tro'ma hunte'naza zamofo asoparegama pomigreneti zafa rgamofo amema'ama krente'nazana, 96si'a krentetere hu'naze. Ana nehu'za ana fumaza zafararemofo zanesenire'ma tro'ma hunte'naza zantera, pomigrenetimofo raga 100'a tro huntetere hu'naze. (2 Kin 25:18-21) **24** Hagi Babiloni sondia vahete kva ne' Nebusaradani'a vugota pristi ne' Seraiane agri amagenare'ma hu'nea pristi ne' Zefanaiane 3'a vahe'ma mono no kafante'ma kvama nehaza vahe'enena kina huzmanteno zamavareno vu'ne. **25** Hagi ana nehuno Nebusaradani'a Jerusalemi rankumapintira sondia vahete'ma kvama hu'nea nera nevreno, kini ne'ma antahintahima nemiza vahera 7ni'a vahe zamageno nezamavareno, sondia vahete'ma kvama hu'nea ne'mofe avonkre eri'zama e'rinenteno, sondia vahe'ma kasefa zamavareno zamazerinte fatgoma nehia ne'enena avre'ne. Ana nehuno Jerusalemi rankumapintira, 60'a vahe mani'nageno zamageno zamavare'ne. **26** Hagi Babiloni sondia vahete kva ne' Nebusaradani'a anama zamavarea vahera ana maka zamavareno Babiloni kini ne'ma Ribla kumate'ma mani'nere vu'ne. **27** Hagi ana hutegen Babiloni kini ne'mo'a Hamati kaziga Ribla kumate ana maka vahera zamahe fri'ne. Ana hute'za Juda vahera mopazamifintira zamavare'za kina ome huzmanteku Babiloni moperega vu'naze. **28** Hagi Nebukatnesama kinima manino egeno 7nima hia kafufina, 3 tausen 23'a Jiu vahera zamavareno kina ome huzmante'ne. **29** Hagi Nebukatnesama kinima mani'negeno 18nima hia kafufina, Jerusalemi kumapintira 832'a vahe zamavareno kina ome huzmante'ne. **30** Hagi Nebukatnesama kinima manino egeno 23ma hia kafufina, Babiloni sondia vahete kva ne' Nebusaradani'a 745fu'a Jiu vahe zamavareno kina ome huzmante'ne. Ana higeno ana makara 4

tausen 600'a Jiu vahe zamavare'za kina ome huzmante'naze.
(2 Kini 25:27-30) **31** Hagi Juda kini ne' Jehoiakini'ma kinafima
manino egeno 37nima hia kafumofona 12fu ikamofo 25 zupa,
Babiloni kini ne' Evil-Merodaki'a Jehoiakinina asunku hunteno
kinafintira katufente'ne. Na'ankure agra ana kafufi Babiloni
kinia efore huteno anara hu'ne. **32** Hagi Evil-Merodaki'a
Jehoaikinina so'e avu'ava hunenteno, mago'a kini vahe'ma
agranema Babiloni kumapima umani'naza kini vahe'mo'zama
nemaniza tra'ma agatere'nea trate higeno mani'ne. **33** Hagi ana
hutegenos Jehoaikini'a antanineno kinafima mani'nea kukena'a
hatenetreno, kasefa kukena eri hankrereno, ananteti'ma agafama
huno viana maka zupa Babiloni kini ne'mo'ma nezama nenea
tratetira ne'zana netere hu'ne. **34** Hagi mago mago zupama
ne'zama mizaseno'ma nesia zago'a, Babiloni kini ne'mo'a
Jehoiakinina amitere huno nevigeno vuno agrama fri'nea knare
ome vagare'ne.

Lementesen-Zavi Krafa

1 Jerusalemi kumapina kora vahe'mo'a tusiza hu'nea kumamo'agi, atreno vuno eno higeno, menina vahera omanitfa hie. Kora ama mopafima me'nea kumatmimpina zmagatereno agri agimo'a anagame mareneria kuma me'neane. Hianagi menina mago kento a'mo hiaza huno tusi'a knazampi mani'ne. Kora kini ne'mofo mofa kna huno mani'neno, ne'onse kumatmina rama'a kegava hu'neanagi, menina mago kazokazo akna hie.

2 Jerusalemi kumamo'a mago a'mo nehiaza huno kenagera tusi zavikrafa hu'ne. Ana nehigeno avunumo'a tusiza huno ameregentega erami erami hu'ne. Kora tusi vahe ronea huzmante'neno savrira huno vano hu'neanagi, magomo'e huno eno eme azeri vavaose'ne. Ana nehigeno maka rone'amo'za komoru hunte'za, agri ha' vaheke mani'naze. **3** Hagi Juda vahera ha' vahezmimo'za eme zamavare'za vu'za mopazmirega ome kina huzmante'neza, kazokazo eri'za zamiza zamazeri haviza hu'naze. Ana hazage'za Juda vahe'mo'za ru vahepi umani emanı hu'neza, magore hu'za mani fru osu'naze. Ana nehu'za tusi knazampima mani'nageno'a, ha' vahe'mo'za zamarotago hu'za ome zamazeri havizantfa hu'naze. **4** Hagi Saioni kumategama vu'nea kantamimo'za tusi zavi krafa hu'naze. Na'ankure knama huhamparinte'nezama knane knanema ne'zama kre'zama nene'za mono'ma huterema nehaza knarera mago vahe'mo'e hunora ome'nea zanku anara hu'naze. Jerusalemi ran kumamofo kuma kafaramimpina vahe'mo'a marerino atiramino osigeno, pristi vahe'mo'za tusi karagi ru'naze. Ana nehazage'za Jerusalemi kumapi mofa'nemo'za zavi netazageno, Jerusalemi kumamo'a tusi'a atazampi mani'ne. **5** Jerusalemi kuma'ma ha'ma eme huntaza vahe'mo'za ana kumara kegava hazageno zamagri

eri'za vahe mani'ne. Ana nehu'za agri ha' vahe'mo'za Jerusalemi kumapina knare hu'za mani fru hu'za mani'naze. Jerusalemi kumapi vahe'mo'za tusi kumi hu'nazagu huno, Ra Anumzamo'a knazana atregeno eno eme zamazeri haviza hu'ne. Ana hazageno ha' vahezmimo'za mofavre nagazmia zamavare zamavugate'za vu'za afete moparega kina ome huzmante'naze. 6 Jerusalemi kumamofona knare avasase zama'amo'a atreno vu'ne. Kva vahe'amo'za dia afu'mo trazanku hakeno vano hiaza hu'naze. Ha' vahe'zamimo'za zamarotgo hazage'za fre'za nevazageno hankave zamia omane'neanagi, fre vava hu'za vu'naze. 7 Anama hige'za afete moparegama umani emanima hu'nezama knazama eneri'za, marerisa fenozama ante'naza zankura zamagesa antahi atrazageno vu'ne. Hagi ha' vahe'mo'zama zamavare'zama nevazageno'a, mago vahemo'e hunora zamagura ovazi'ne. Ana nehazage'za ha' vahezmimo'za hazenke zama zamagrite'ma fore hiazama nege'za zamagizare'naze. 8 Jerusalemi kumamo'a tusi'a kumi huno mago himnage zankna hu'ne. E'ina agafare ana rankumo'a agrua osu'ne. Kora ana kumamo'a knare zantfa hunege'za vahe'mo'za kenazanagi, menina havizantfa hie. Jerusalemi kumamo'a asunku nehuno franekie. 9 Jerusalemi kumamo'a mago akana hu'neankino, agru'ma osu'nea avu'avazamo'a frara okino amate kena'arera me'ne. Hianagi agrite'ma henkama fore'ma hania zankura agesa ontahi'ne. Hagi Jerusalemi kumamo'ma havizantfama higeno'a, mago vahemo'e hunora asunkura huonte'ne. Ana higeno amanage huno hu'ne. Ra Anumzamoka nagri knazana ko. Na'ankure ha' vahenimo'za zmavufga ra nehaze. 10 Jerusalemi kumamo'a mago akna hu'neankino, ha' vahe'mo'za eza rohu emere'za marerisa feno zantamima'a eri vagare'naze. Ra Anumzamo'a huno, ru

moparegati vahe'mo'za Nagri Mono nompina umareorihō hūno
asevazi zmante'neanagi mani'neno negege'za ru moparegati
vahe'mo'za Mono nompina umarerī'naze. **11** Jerusalemi
kumapima mani'naza vahe'mo'za karagi neru'za ne'zama nesaza
zankura tusiza hu'za hake'naze. Ana nehu'za ne'zama nene'za
ofri kasefa'ma hu'za manisnagura, knare'nare feno zazamia vahe
nezami'zage'za, nona'a ete ne'za zami'naze. Hagi Jerusalemi
kumamo'a mago akna hu'neankino amanage hūno hu'ne. Ra
Anumzamoka nagrira nazeri haviza nehazanki, nago hūno
hu'ne. **12** Jerusalemi kumamo'a kantegama enevaza vahekura
kezatino, amama nagrite'ma fore'ma nehia knazana amnezane
huta nehazafi? Kesga huta keganti kegama hiho, nagrama
enerua knazana mago'a enerizagēno, Ra Anumzamo'a arimpa
ahenanteno nazeri haviza nehifi? Ra Anumzamo Agra'a nazeri
havizana nehie. **13** Ra Anumzamo'a onagamuti teve nefā
atregeno eramino zaferinani'afi teno ufre'ne. Ana nehuno
krifureti nagiatina nazeri antrako hūno nazeri rukrahe hu'ne. Ana
higeno zaferina omneamne higeno, maka zupa navu evuevu
nehige'na nagraku mani'noe. **14** Ra Anumzamo'a karenamare
zafama hiaza hūno kumini'a magopi erinteteno Agra'a azanteti
nanankempi anaki antrako hunte'ne. Ana kumimofo knazamo
higeno hankaveni'a omne'ne. Ana nehuno Ra Anumzamo'a
nagrira ha' vahe'nimokizmi zamazampi navre antege'za, eme
nazeri haviza nehazage'na hankaveti'na hara huzmantega
osu'noe. **15** Hankavenentake sondia vaheni'a Ra Anumzamo'a
amefi hunezamino, Agrama huhampri'nea kna fatgore ha'
vahera zamatrege'za e'za nehazaveramina eme zamahe
vagare'naze. Juda mopamo'a mago vene omase'nea mofakna
hu'neankino, vahe'mo'zama zamagareti wainima regatiti'ma

nehazaza huno Ra Anumzamo'a rehapatitre'ne. **16** E'inahu zama fore'ma hiazamo hige'na, tusi zavi netogeno navunumo'a tinkna huno eneramigeno, mago vahe'mo'a tavao'nirera mani'neno nazeri navavaneseno, nazeri hankavea oti'ne. Na'ankure ha' vahenimo'za hara hunagaterazageno, mofavre nagani'a zamazeri so'ea osige'za tusi'a knazampi mani'naze. **17** Saioni kumamo'a mago mofakna hu'neankino, vahe'mo'zama eme azama hanagura azana rusute'neanagi, mago vahe'mo'a eno asunkura hunenteno azeri hankavea oti'ne. Ra Anumzamo'a Jekopu nagakura huama huno, Tavaoma'arema nemaniza vahe'mo'za oti'za ha' vahe'a fore hugahaze huno hu'neankino, ha' vahe'mo'zama Jerusalemi kuma'ma kazana, agru osu zankna hu'nege'za ke'naze. **18** Jerusalemi kumamo'a huno, Ra Anumzamo'ma nagri'ma hunantea avu'avazamo'a fatgo hu'ne. Na'ankure amage antoma huno hunantea nanekea namefi humi'noe. Ana hu'negu maka vahe'mota tamagesa anteta nentahita, nagrama erua knazante tamavua anteta keho. Ha' vahenimo'za e'za vene omase mofane nagani'ane, nehzave naga'nianena eme zamavare'za vu'za, afete mopalrega ome kina huzmante'naze. **19** Zamagranema savri'ma hu'na vanoma nehua venenemo'za eme naza hanazegu'ma kema huana, havige hu'za renavatga hu'naze. Pristi vahenimo'zane, ugagota kva vahenimo'za ne'zanku fri'za hute'za, ne'zama nesaza zanku hake'za vano hazanagi, onke'za ran kumapi fri'naze. **20** Ra Anumzamoka ko, rama'a knaza e'neri'na havizantfa nehue. Narimpamo'a nevamagigeno, tumonimo'a rutane'ne. Na'ankure kagri kea ontahi'noe. Kumamofo ne'onse kantamimpine, nompinena bainati kazinteti nagri vahera zamahe fri'naze. **21** Nagrama karagi'ma ruana maka vahe'mo'za antahi vagare'naze. Ana hu'neanagi

mago vhemo'e hunora eno asunkura hunenanteno, nazeri hanavea oti'ne. Ra Anumzamoka'ma atrankeno eno nazeri havizama hia knazamofo agenkea ha' vahenimo'za nentahi'za, tusi muse hu'naze. Hagi Ra Anumzamoka'ma zamazeri haviza hugahue hunka'ma huvempama hu'nana kante antenka, ame hunka zamazeri haviza huo hu'za zamagra hu'naze. 22 Hagi zamagrama hu'naza kefo avu'ava zana negenka, nagrama hu'noa kumi'nire'ma nazeri haviza hankenoma tumonimo'ma natama negrige'na karagi'ma ru'noaza hunka zamagr'i'enena zamazeri haviza huo.

2 Saioni kumamo'a vene omase mofakna hu'neankino Ra Anumzamo'a arimpa ahenenteno, arimpahe'zana hamponkna huno atregeno eramino Saioni kumara refite'ne. Ana knafina Ra Anumzamo'a agiama nentea trakura agesa ontahi, Israeli vahe'mo'ma ra agima eneria konaririzama'a eri mopafi atre'ne! 2 Ra Anumzamo'a Jekopu nagamokizmia asunkura huozmanteno, afi zagamo'ma mago zagama asgahu nakriaza huno zamaheno eri vaganereno, magore huno nonkumazmia otre eri haviza huvagare'ne. Ana nehuno tusi arimpa ahenezmanteno, ana maka Juda mopafima me'nea ranra kumatamimofo vihu kegina tapagehu atre vagare'ne. Ana maka mopane kva vahe'enena mopafi zamazeri atre vagarege'za tusi zamagazegu hu'naze. 3 Ra Anumzamo'a Israeli vahera tusi arimpa ahenezmanteno, maka hankave zamia eri atre'ne. Ana nehuno ha' vahe'zamimo'zama ha'ma eme huzmante'naku'ma erava'oma nehazageno'ma, tamaga azanu'ma anteso huno'ma zamazama nehizana eritreno zamaza osu'ne. Teve nefamo hagna hagna huno maka'za teno eri vagareaza huno, Jekopu nagara zamazeri havizantfa hu'ne. 4 Ha' vahe'mo'ma hiaza huno kevea atifi erinteno kri

krarapeno, Saioni kumara hara hunte'ne. Jerusalemi kumamo'ma avesinentea vahe'a, Ra Anumzamo'a hankave'a erintearma huno zamahe fri vagare'ne. Ra Anumzamofo arimpa ahe'zamo'a, tusi'a teve nefamо hiaza huno Jerusalemi rankumara teno eri vagare'ne. 5 Hagi ha' vahe'mo hiaza huno, Ra Anumzamo'a Israeli vahera ha' rezmanteno maka mopa'zamia eri haviza nehuno, kini vahe nontamine hankave vihu zaminena eri haviza huvagare'ne. Anama hiazamo hige'za mofanemo'zama nehazaza hu'za maka Juda mopafima nemaniza vahe'mo'za tusi zamasunku zampi mani'neza, zavi krafa hu'naze. 6 Ra Anumzamo'a hozafi fugagi noma hiaza huno, mono noma'a eri tapage hutre'ne. E'ina nehuno atruma hu'za mono'ma hunentaza nona eri tapage hutre vagare'ne. Ana nehuno Saioni kumapima ne'zama kre'za nene'za musema nehaza knane, mani fruma nehaza Sabati knanena zamazeri zamagekanine. Ana nehuno Ra Anumzamo'a kini vahe'ene pristi vahera tusi arimpa ahenezmanteno, eri'za zamifintira zamazeri atre'ne. 7 Ra Anumzamo'a Agritegama kresramna vunentaza ita amefi hunemino Mono noma'anena amefi humi'ne. Ana nehuno ha' vahe zamazampi zamavarentege'za Jerusalemi kumapima kinimofo nontamima azeri agu'ma vazi'nea vihu keginaramina emeri anafa'a hu'naze. Ana nehu'za mono'ma hu knare'ma hiaza hu'za, ha' vahe'mo'za Ra Anumzamofo Mono nompi mareri'za ivimo agazamo huza tusi zamagasasa ru'naze. 8 Ra Anumzamo'a Jerusalemi kumamofo kuma kegina tapage hutrenigeno haviza haniegu agesa antahi'ne. Ana nehuno nofi avazuhumpi huno anteno keteno, azama rusuteno kuma keginama eri havizama hunaku'ma nehia azana eri onamagi'neanki rusuteno, kuma keginane, manisga hu'nezama ha'ma nehaza nonena eri

haviza higeke zanasunku nehuke zavi ate'na'e. **9** Ana higeno Jerusalemi kumamofo rankafaramina mopamo refinetege, kafante'ma eri rusima nehaza ainiramina, Ra Anumzamo'a rufutagi atrene. Hagi kini vahe'zamine kva vahe'zaminena ha' vahe'mo'za eme zamavare'za afete moperega vu'za kina ome hunezmantageno kasegemo'enena fanane hu'ne. Ana nehigeno Ra Anumzamo'a ava'nagna zampina eforera huno kasnampa vahera nanekea eme ozmasami'ne. **10** Hagi Jerusalemi kumapi ranra vahe'mo'za zamasunku kukena nehu'za, kugusopa kate'za zamanunte nefre'za, kea osu akohe'za mopeafi mani'naze. Ana nehazage'za vene omase mofa'nema Jerusalemi kumapima nemaniza mofanemo'za mopeafi kepri hu'haze. **11** Nagri vahe'ma knama eri'zazama nege'na, ne'onse mofavre naga'mozama kumamofo kankamumpima hankavezmi omanege'zama umase emasema nehaza zama negena, zavira netogeno navumo'a pro nehigeno, tumonimo'a atane'ne. Ana nehigeno nagu'afi zamo'a marerino nanankempi titipa hu'ne. **12** Ne'onse mofavre naga'moza, hapinti ahe kuzafa hu'naza sondia vahe'mo hiaza hu'za, kumamofo kankamumpi mani'neza ne'zanku fri'za nehu'za, antazamimofonku hu'za ne'zane tinena tamiho hu'za nehazage'za antazamimo'za zamazampi zamavare'nage'za nefrise. **13** Hagi Jerusalemi kunamokagura nasunku hugantoanki, na'ane hu'na kagrikura hugahue? Magora ina kuma'mo kagrama eri'hankna knazana kora eri'neane hu'na kagri'enena erinte'na kegahue? Saioni mofa'moka na'ane hu'na kazeri hankaveti nanekea hugahue? Kagrama eri'nana hazenke zamo'a, hagerimo'ma hiaza huno amefenkame antuntu huno urami'ne. Ana hu'neankino mago vahe'mo'a kazeri onkanamregahie. **14** Kasnampa vahekamo'zama avanagnaza ke'none hu'zama huama'ma

hu'nazana, havige hu'za kagrira regavatga hu'naze. Hagi kagrama
hu'nana kumira erinte amara hu'za kasamizagenka nentahinka,
ana kumimofo kinafintira atrenka fru hunka omani'nane.
Anumzamofontegati eri'nona kasnampa ke hu'zama kagri'ma
kasami'nazana havige hu'za kavre'za havi kampi vu'naze.

15 Jerusalemi kumamoka kagri tvaonte'ma enevuza kasunku
zampima mani'nana zama nege'za, zamazana rupro nehu'za
kiza zokago ke hunegante'za, Jerusalemi kumapima mani'naza
vahem'a nezamage'za zamagena ru'naze. Ana nehu'za amanage
hu'za hu'naze. Kora ama kumamo'a knare zantfama huno
konariri'ane kuma me'nege'za maka ama mopafi vahem'o'zama
nege'za muse nehu'za husgama hunte'naza kumapi ru kumare?
hu'za hu'naze. **16** Jerusalemi kumamoka maka ha' vahekamo'za
sifna kea hunegante'za, zamavera aninkreki nehu'za zokago kea
amanage hu'za nehaze. Amanahu knama fore hanie hutama
avegama ante'nona kna meni efore higeta ofri kasefa huta
mani'neta Jerusalemi kumara eri haviza nehune hu'za nehaze. **17**
Ra Anumzamo'ma korapa'ma huno, e'ina hu'za hugahuema huno
retroma hunte'nea zamo efore nehigeno, hugahuema huno'ma
hu'nea nanekea eri rganere. Ana hu'neankino Jerusalemi
kumamoka asunkura huoganteno, kazeri mopafi atre'ne. Ha'
vaheka'a hankave nezamino, zmatrege'za e'za, hara eme
hugagatere'naze. Ana nehu'za kagrama havizama hana zankura
tusi musenkase hu'naze. **18** Jerusalemi kumapima mani'naza
vahemota Ra Anumzamofontega zavi krafagea hiho. Ana nehuta
feru'ene kenage'enena zavira netenkeno, tamavunu'mo'a tinkna
huno eramino. Kagra amnea omaninka, zavira tevava nehugen
kavumo'a pro hino. **19** Kenagera otinka mani'nenka, tima eri
tagi treaza hunka, knazane krimpa haviza hu'zanena erinte

ama hunka kazama hanigura Ra Anumzamofona asamio.
Ana nehunka ne'onse mofavre nagaka'ama zamagaku'ma
nehu'zama kuma kankamumpima fri'zama nehaza nagama
zamazama hanigura, kazana erisga hunka Ra Anumzamofontega
nunamuna huo. **20** Ra Anumzamoka Kagra'a vahete'ma
amanahu knazama eri fore'ma nehana zana negenka kagesa
antahio. Ane'mo'zama zamavesi zamavesi'ma hunezmantaza
mofavrezamia zamahe'zama nenazana, e'i knare nehifi? Pristi
vah'e'ene kasnampa vahe'enema ha' vahe'mo'zama Kagri
mono nompima mareri'zama zamahe nefri'zana, e'i knare
nehifi? **21** Ha' vahe'mo'za kasefa vahe'ene tavava ozafaramima
zamahe frizage'za, kuma kankamumpina, kugusopafi mase'naze.
Nahezaveramine mofa'neramina bainati kazinteti zamahe fri'naze.
Ra Anumzamoka anama krimpama ahea knafina, magore hunka
ozmatre zamahe fri' vagare'nane. **22** Ra Anumzamoka karimpahe
knama egenka ne'zama kreno neneno musema hu kna zupa
vahe'ma zurunama hanke'zama azankna hunka, ha' vaheni'a
zuruna hanke'za e'za maka kazigatira eme nazeri koro nehu'za
hara hunante'za nagrama kase zamante'na kegavama nehua
ne'onse mofavre nagani'a ozmatre'za ana maka zamahe hana
hu'naze.

3 Ra Anumzamo'a arimpa ahenanteno, knaza namino nazeri
haviza hige'na, tusi natama kria zana nagra ke'noe. **2** Ana
nehuno narotago higena, hanimpi tavira omane'nea kante
vu'noe. **3** Tamagerfa huno maka zupa nagrike'za nazeri
haviza huvava huno nevuno, mago'a vahera anara osu'ne. **4**
Ama navufga nazeri navesra nehuno, navufga nazeri haviza
nehuno zaferinani'aramina ruhantagi'ne. **5** Knaza atregeno
eno eme nazeri kanegigeno, hazenke zamo'a maka kaziga

nazeri kagi'ne. **6** Korapa'ma fri'za vu'naza vahe'mo'zama hanimpima mani'nazaza huno, natrege'na hanimpi mani'noe. **7** Tusi'a vihu kegina huno nazeri agu'atege'na, anampintira atre'na atiorami'noe. Ana nehuno seni nofiteti nagia nazampina kinarente'ne. **8** Nazama hinogu'ma Anumzamofontega nunamuna hu'na antahige'noanagi, krafa keni'a eri atre'ne. **9** Kama vunaku'ma hua kampina Anumzamo'a ra have ome anteno rehiza nehuno, vunaku'ma huankana eri kazakinkazoko hige'na haviza hu'nea kante vu'noe. **10** Beamo'o laionimo'o afi zaga azerinaku kafo anteno maniaza huno, Ra Anumzamo'a nazeri haviza hunaku kafonteno mani'neno, **11** navazuhu kanti atreno, laionimo nehiaza huno navufga tagnataganu vaziteno, natrege'na vahe'mo'a eme naza osige'na mase'noe. **12** Anumzamo'a keve'a atifi erinteteno, avazuhu krarapeno nahenaku krinkenke hu'ne. **13** Ana huteno keve'areti tumoni'a ahetane'ne. **14** Maka nagri vahe'mo'zama nenage'za tusi nagiza re'naze. Ana nehu'za amnea omani'za maka zupa zagame nehu'za ana zagamepi kiza zokago ke hunante vava hu'naze. **15** Rama'a knazanteti nagu'afina antevi'neteno, aka trazanteti tro hu'naza ti namige'na ne'noe. **16** Anumzamo'a ne'onse haverami nagipina eri hatrentege'na navera ani futagi'noe. Ana nehugen kugusopa hatreno nagofetu ante'ne. **17** Arimpa fruma huno mani'zana nomanizanifina omanegeno, knare huno musema huno mani'zankura nagekani'noe. **18** Ana hige'na amanage hu'noe, hanaveni'a omanegeno, Ra Anumzamofonkuma amuhama nehuazana huonantegahie hu'na antahi'noe. **19** Hagi nagrama ranknazama eri'noa zamo'ene vahe moparegama kraga vahe kna'ma hu'na vano vanoma hu'noa zamo'enena, mago aka tima neazama hu'noa zana nagera okani'ne. **20** Maka zupa ana

zanku'ma nagesa nentahugeno'a, nagu'amo'a kna nehigeno havizantfa hu'ne. 21 E'ina hu'neanagi mago zanku nagesa nentahi'na, amuhara nehue. 22 Ra Anumzamo'ma avesiranteno knare'ma hunerantea avesi'zamo'a, tamagerfa huno vagaore mevava nehie. Na'ankure agri asunkuzamo'a vagaore meno nevie. 23 Maka nanterana Anumzamoka kagri kasunku zamo'a egasefa huvava nehiankino, hugahuema hunka hu'nana zama nehana kavukvazamo'a tusi zankerfa me'ne. 24 Nagra'ma nagesa antahuana, Agra nagri Ra Anumza mani'negu nagra Agriteke amuhara huntegahue. 25 Ra Anumzamo'a agrite'ma amuha'ma nehu'za, zamagu'areti'ima hu'za agriku'ma nehakaza vahera zamazeri knare nehie. 26 Akoheno avega anteno mani'nenigeno Ra Anumzamo'ma ete agu'vazino avre avu'ava zamo'a knare hu'ne. 27 Nahezavema mani'nesire'ma knazama eri'zamo'a, e'i knare hu'ne. 28 Ra Anumzamo'ma mago vahe'ma knazama neminigeno'a, anazankura keaga osu agraku akoheno manino. 29 Anama nehanigeno keaga osu agra avufgama anteramino kugusopafima mani'nesigeno, negeno azama hunaku'ma hanuno'a aza hugahie. 30 Hagi mago vahemo'ma ameragente'ma rupro huminaku'ma nehanigeno'a, amne ante vivi hu'nesnigeno rupro humina, agra amne agazea erigahie. 31 Na'ankure Ra Anumzamo'a mago vahera amagena humi vava huno ovugahie. 32 Ra Anumzamo'a vahera knazana amigahianagi, Agra vaga ore mevava avesi zama'agu nentahino, avesinezmanteno knare avu'ava hunezmante. 33 Ra Anumzamo'ma knazama atregeno eno vahe'ma zamazeri havizama nehiana, Agra'a anaza hunakura nosie. 34 Hanki vahe'mo'zama kina vahe'ma zamazeri havizama huge, 35 mago vahe'mo'ma Marerisa Anumzamofo avure'ma fatgo

avu'ava'ma nehanigeno'ma, haviza hane huno'ma huntege,
36 keagare'ma oti zupama havige hu'za zamazeri havizama
nehaza avu'ava zanku'enena Ra Anumzamo'a ave'nosie. 37
Ra Anumzamo'ma osu'nenia nanekerera, iza agra'a avesitera
mago zana eri forera hugahie? 38 Ra Anumzana Marerisa
Anumzamo'a Agra agipinti huama huno, knare zane havi
zanena forera huo huno higeno forera nehie. 39 Ofri kasefa'ma
huno mani'nesnia vahe'mo'a, agri kumi'mofo nonama huno
azeri havizama hania zankura ke hakarea osino. 40 Hagi
tagrama nehuna tavutavara rezaganeta ke so'e huteta, ana
tavutva zampintira ete rukrahe huta Ra Anumzamofontega
esanune. 41 Hanki tagu'areti huta tazana erisga nehuta,
monafinkama mani'nea Anumzamofontega amanage huta
nunamuna hugahune, 42 tagra kumi huta kagrira tamefi
hugamunkenka, kumitia atre orante'nane. 43 Kagrira karimpa
ahe'zamo'a avitegenka, kasunkura hunka oratrenka tavaririnka
tahe fri'nane. 44 Kagrira tusi hampomo refitegenka mani'nanketa,
nunamuna hu'nonanagi tagri nunamumo'a kagritera ovu'ne.
45 Tagrira tatranketa vahemoparega vano nehunke'za, amne
zama hiaza hu'za tage so'ea osu'naze. 46 Maka ha' vahetimo'za
huhaviza hurante'naze. 47 Anama hazageta koro hu'none.
Na'ankure tagesa ontahuna hazenke zamo eme tazeri havizantfa
hu'ne. 48 Knazamo'ma eno nagri vahe'ma eme zamazeri
havizama hiazama negogeno'a, navunumo'a tima eviankna huno,
49 navufintira navunura hu vava nehie. 50 Ana zavira ontagane
ate vava nehanugen, Ra Anumzamo'a monafinti kefenka
ateno nagegahie. 51 Jerusalemi rankumanifi a'neneramima, ha'
vahe'mo'zama eme zamazeri havizama hazazama negogeno'a,
tumonimo'a netanegeno nagu'amo'a havizantfa hu'ne. 52

Nagra mago havizana osu'noanagi, ha' vahe'nimo'za namama
ahenakuma rotago'ma hazaza hu'za nagene re'naze. **53** Zamagra
nahe'za nagrira kerifi eri nevazi'za, ana kerigana havenu
refite'naze. **54** Ana hazageno timo nazeri nakari'aza higena,
nagra frigahue hu'na antahi'noe. **55** Ana kerifima mani'nofintira Ra
Anumzamoka kagra naza huogu kagri kagia ahe'na nunamuna
nehue. **56** Hagi Kagra nunamu keni'a nentahinanki, kagesa
renkani oro. **57** Hagi nazama huogu'ma kema hugenka Kagra
nagrite erava'o nehunka, korora osuo hunka nasami'nane. **58** Ra
Anumzamoka keagani'a refko hunka nentahinka nagu'vazinke'na
knare hu'na mani'noe. **59** Ra Anumzamoka nagri'ma hazenkema
eme nami'naza vahera hago kenka antahinka hu'nane. Ana
hu'nananki nagri kaziga antenka agra fatgo hu'ne hunka ana
vahera keaga huzmanto. **60** Ana vahe'mo'zama nagri'ma
nazeri havizama hunaku'ma, maka keagama retro'ma hu'nazana
hago ke'nane. **61** Hagi ana vahe'mo'zama kiza zokago kema
hunenante'za, nagri'ma nazeri haviza hu kema anakiza nanekea
Ra Anumzamoka hago antahi'nane. **62** Ha' vaheni'amo'za maka
zupa, nagri'ma nazeri havizama hanaza nanekea, zamagira
magopi ante'neza sumisumi hu'za keaga huvava nehaze.
63 Manizafina zagamepi erinte'za kiza zokago zagame ke
hunante'naze. **64** Ra Anumzamoka ana vahe'mo'zama hu'naza
havi zamavu'zamava negenka, mizana zamitere hugahane. **65**
Ana vahe'mokizmi zamagu'a eri hankavetige'za, sifnafi maniho.
66 Ana vahera Kagra krimpa ahenezmantenka, zamarotago
hunka zamahe hana huge'za, Ra Anumzamoka mopamofo
agofetura omanitfa hiho.

4 Kora mago zamo'a okamaregeno knare zantfa hu'nea
golimo'agi, menina ome haviza higeno masa zama'a omane'ne.

Ana nehigeno Ra Mono nompima ruotage'ma hu'nefima
mizama'amo'ma marerisa haveramima ante'naza haveramina,
kumamofo ne'onse kantamimpina rupanani hutre'haze. 2
Jerusalem kumapi vahe'mo'za kora zago'amo'ma marerisa
golimo'ma hiaza hu'za knare zantfa hu'nazanagi, menina
havizantfa hu'za vahe'mo'ma azampinti tro hu'nea mopa kavogna
hu'naze. 3 Afi kramo'a anenta'amofona antahinemino, amina
amino azeri so'ea nehie. Hianagi nagri vahe'mo'za kama kokampi
ostritsie nehaza mananimo anenta'agu antahi nomino amefi
humiaza hu'za mofavre naga'zamia zamefi hunezamize. 4 Ne'one
mofavre naga'zamimo'za amima nesaza zana omanegeno,
zmanankemo'a hagage nehigeno, zamagefu'namo'a marerino
zamagi'mofo zamavagu'nafafi akamare'ne. Mofavre naga'mo'za
ne'zanku memea hu'nazanagi, mago vahe'mo'e hunora ne'zana
ozami'ne. 5 Feno vahe'mo'za kora mizama'amo marerifa
ne'za ne'nazanagi, menina kumamofo ne'onse kantamimpi
mani'neza zamagaku nehaze. Ana nehu'za kora knare'nare
huno avasase'amoke hu'nea kukenama antani'za vanoma
hu'naza vahe'mo'za menina kazokzo eriza vahe mani'naze. 6
Nagri vahe'ma Jerusalem kumapima nemaniza vahe'mo'zama
hu'naza kefo zamavu'zmava zamo'a, Sodomu rankumapima
nemaniza vahe'mo'zama nehazageno'ma, Ra Anumzamo'ma
ame huno eri haviza higeno'ma mago vahe'mo'e huno'ma
zamazama osu'neankna kefo avu'vazana agatere'ne. 7 Kora
Jerusalem kumapi kva vahe'mofo zamavufagamo'a aisigna huno
efenentake nehigeno, amirinkna huno efenentake nehigeno,
hankave vahe mani'nageno, zamavufagamo'a masanentake
huno mizama'amo marerisa havemofonku'ma Safirie nehaza
havemofo avufgaregati'ma rumsa nehiaza hu'ne. 8 Hianagi

menina zamavufagamo'a hokonke hu'ne. Ana hu'nege'za kampima vanoma nehazage'za zamage amara osu'naze. Zafamo hagage hiaza huno zamavufagamo'a tro azotagna huno harari hige'za, zaferinage hu'naze. **9** Bainati kazinteti'ma zamahe fri'naza vahera knare hu'za fri'nazanagi, ne'zanku'ma hu'za friza vahe'mokizmi fri'zamo'a havizantfa hu'ne. Na'ankure ne'zanku'ma hu'za friza vahe'mo'za, za'zate zamagakura hazageno, zamavufagamo'a tro azotagna huno harari huno hokonke hige'za fri'naze. **10** A'nanemo'za mofavre naga zamigura tusi zamasunku huzmante'naze. Hianagi ana mofavre naga'ma frizage'za, ana a'nанемо'за zamagra'a ana mofavrezmia kre'za ne'naze. E'inahu zama fore'ma hu'neana, ha' vahe'mo'zama nagri vahe'ma ha'ma eme huzmante'za zamazeri havizama hu'naza knafi anazana fore hu'ne. **11** Ra Anumzamofona arimpa ahe'zamo'a tusiza higeno, arimpama ahe'zana eri kaha huno, Jerusalemi kumara teve tagintegeno teno uramino kuma'ma retru re'zama kinaza haveramina tefaragu vazirami'ne. **12** Ama mopafi kini vahe'mo'zane, ama mopafi vahe'mo'zama antahi'zana, ha' vahe'mo'za Jerusalemi kuma keginamofo kafana tapage hu'za kumapina uofregahaze hu'za antahi'nazane. **13** Hianagi pristi vahe'mo'zane kasnampa vahe'mo'zama Jerusalemi kumapima nemaniza fatgo vahe'ma zamahe fri'zama korama eri tagitre'naza kumiku huno Anumzamo'a ha' vahera zamatrege'za e'za, Jerusalemi kumara eri haviza hu'naze. **14** Ana pristi vahetamine kasnampa vahemo'zanena zamavu asuhu vahekna hu'za, kumamofo ne'onse kantamimpi eri'eri hu'za vano nehaze. Ana vahera koramo zamazeri pahenage hu'nege'za, vahe'mo'zama kukena zamire'ma avako'ma hu'zankura tusi koro hu'naze. **15** Vahemo'za ana vahekura kezati'za amanage hu'naze. Tamagra

agru osu'nazanki tagritera erava'oa osuta atreta viho hu'naze.
Anagema hazage'za pristi vahe'ene kasnampa vahe'mo'za
atre'za vu'za ru moparega umani'naze. Hianagi ana mopafi
vahemo'zanena hu'za, ama mopafina omanigahazanki atreta
vihohu'za hu'naze. **16** Ra Anumzamo agra'a zamazeri panini
hige'za vu'za e'za hazageno, ana vahera avua anteno kegava
huozmante'ne. Ana higeno pristi vahe'ene ranra vahetaminena
vahe'mo'za zamavesi nozamante'za zamagesga osu'naze.
17 Tagri'ma eme taza hanaza vahoku kantega tavu anteteta
mani'nonkeno tavumo'a tatagri'ne. Za'za noma kinte'nompi
marerita mani'neta mago'a moparegati vahe'mo'zama eme
tazama hanagu tavua anteteta mani'nonanagi, eme tagura
ovazi'naze. **18** Neone kampima vanoma hunaku'ma hu'naza ha'
vahetimo'za zamavua tagrite antete'za manizageta, kana vano
osu'none. Tagrama knama eritama havizama hanuna knamo'a
hago egofta hu'ne. Ana hu'neankita osi'a kna manisanunkeno,
havizama hanuna knamo'a egahie. **19** Ha' vahetimo'za
tahenaku'ma tagenema re'nazana, tumpamo'ma ame huno
hareno viaza hu'za, agonaramimpina tahe'za tagenea nere'za,
ka'ma kokampina tahenaku ome kafo ante'za mani'naze. **20**
Ra Anumzamo'ma masavema frenteno azerinte ruotage'ma
hu'nea kini ne'mo, kegava hurante'nigeta ru vahe kumapina
manigahune huta hu'none. Hianagi ha' vahe'mo'za azeri'naze. **21**
Idomu vahe'ma Usi mopafima nemaniza vahe'mota, Jerusalemi
kuma'mo'ma havizama hia zankura musenkase nehaze.
Hianagi Anumzamofo arimpa ahe'zamo'a, kapufi waini ti meaza
hu'neankino, tamagrite'enena eri tagitresnigeta, neneta neginagi
huta kukenatamia hatetre vagaregahaze. **22** Saioni kumamoka
kefo avu'ava'ma hankeno Ra Anumzamo'ma ana kumimofo

nonama huno kazeri havizama hu'nea zamo'a hago vagaregahie.
Ana hu'neankino Saioni vahe'ma kinama ome hu'naza vahera
za'zatera tamatre'nigeta kinafina omanigahaze. Hianagi Idomu
kumamoka, Ra Anumzamo'a kumika'ane kefo zanka'anena
erinte ama huno, ana kumi'mofo nona'a kagri'enena knazana
kamigahie.

5 Ra Anumzamoka menima tagrite'ma fore'ma nehia
knazamo'ma tazeri havizama nehitetama tusi'a tagazema
e'nerunana neragenka antahiramio. **2** Onke'nona vahe'mo'za
e'za tagri mopa eme enerizage'za, ru moparegati vahe'mo'za e'za
tagri nontamina emeri nafa'a hu'za mani'haze. **3** Tafahe'za omani
megusa mofavregna huta tagra nemanunke'za, trerahe'za kento
a'nanegna hu'za mani'haze. **4** Tima nenompi, tevema enerunana
zagoretike'za mizaseta eri'none. **5** Ha' vahetimo'za rama'a zampi
tazeri haviza huvava nehazageta mani fru huta omani'none. **6**
Tagri'ma ne'zama tamisnageta nesunku huta Isipi vahe'ene,
Asiria vahe'mokizmi zmagorga mani'none. **7** Tagri tagehe'za
kumi hute'za ko fri'za menina omani'haze. Ana hu'nazageta
menina zamagri kumi'mofo knazama'a e'nerune. **8** Tagrira
kazokzo eri'za vahe'mo'za kegava hurantazageta mani'nonkeno,
mago vahe'mo'e huno ana vahe'mokizmi hankavefintira tagura
vazino taza osu'ne. **9** Hagi nezanku'ma vuta eta huta hakeku'ma
hunana, ka'ma kokampina ha' vahe'mo'za bainati kazinteti
tahe frinaku kafonte'za mani'haze. **10** Tusi taga'matea zamo
higeno, tavufgamo'a sikonima negraza avenimo'ma teve ha'ma
hiaza huno tusi amuho hu'ne. **11** Saioni kumapi a'nanea
zamagra zamazeri haviza nehu'za, Juda mopafima me'nea ranra
kumatamimpima nemaniza vene omase mofa'nea ha' vahe'mo'za
eme zamazeri haviza hu'naze. **12** Kva vahetia zamazeri'za

zamazante nofi anakite'za, zafare hanti'naze. Ana nehu'za ranra vahetia so'e avu'ava zana hunozmante'za, zamazeri zamagaze hu'naze. **13** Hagi nehazave nagara huzmantazage'za witima refuzafunepaza have rezahe nehazage'za, mofavre nagatia tusinasi teverami hare'za kofizmantazage'za, knazamigu nehu'za eri'naze. **14** Ranra vahetamimo'za kuma kafante'ma nemaniza zana atre'za nevazage'za, nahezave naga'mo'za zavena ahe'za zagamera osu'naze. **15** Muse zagame'ma nehuta avoma nehagona zana atreta, zavi zagame nehuta tasuzampi mani'none. **16** Rantagima e'neruna zamo'ma, tasenire'ma kini fetorikna'ma hu'nea zamo'a mopafi evuramigeta, tasuzampi mani'none. Anama hu'neana tagrama hu'nona kumi'mo higeno anara hu'ne! **17** Anazama fore'ma nehigeno'a, tarimpamo'a havizantfa nehigeno, zavi'ma atonazamo higeno tavumipamo'a evuno hanintiri higeta, tavua keso'e osu'none. **18** Saioni ran kumapina vahera omanino atreno vuno eno higeno, ka'ma koka fore higeno anampina afi kraramimozage mani'neza vano hu'naze. **19** Hianagi Ra Anumzamoka kagrake kinia mani'enka, henkama fore hu anante nante'ma hu'za vanaza vahetera manivava hunka vugahane. **20** Ra Anumzamoka na'a hu'negenka za'zatera kamefira huneraminka antahi noramine? **21** Ra Anumzamoka menina ete tazeri knare hananketa knare huta nemanisunkenka, knatia eri kasefa hananketa, ko'ma knare hutama mani'nonaza huta manisnune. **22** Hifi tagrira tusi karimpa herantenka kamefi huneraminka, kavesra hurante vaganerampi?

Izikeli

1 Hagi 30ma hia kafumofona namba 4 ikamofona 5fugnare kina
vahezagane Kebar tinnenare Babiloni mani'nogeno, monamo'a
anagige'na ava'nagna zampi Anumzamofona ke'noe. **2** Hagi
ana 5fu kna zupa kini ne' Jehoiakinima kinama huno mani'nea
kafumo'a 5fu'a kafu hu'ne. **3** Hagi nagra Busi nemofo pristi
ne' Izikeli'na Babiloni vahe mopafi Kebar tinte mani'nogeno
Ra Anumzamo'a keaga nenasamino, azana nagrite ante'ne.
4 Hagi negogeno noti kazigati tusi'a ununko atuno ne-egeno,
hampomo'ene kopsinamo'enena tusiza nehigeno, ana hampona
tusi hankavenentake masamo rugagintegeno, amu'nompina teve
neregeno, anima tevefima kre fizoma higeno koranentake'ma
hiaza nehigeno tevemo'a ruragareno vuno eno hu'ne. **5** Hagi
ana tevemofo amu'nompina 4'a kasefa'ma hu'za mani'naza
zagarami mani'naze. Hagi ana 4'a zagama zamagoana, vahe
kna hazageno, **6** mago magomofona 4'a avugosagi, 4'a
agekonagi huno metere hu'ne. **7** Hagi zamagiamo'a fatgo higeno,
zamaga agusamo'a bulimakao afu anentamofo agiamo'ma hiaza
higeno, ana zamaga agusamo'a bronsi eri masave huntazageno
masanentake huno tampretampre hiankna hu'ne. **8** Hagi ana 4'a
zagaramimofona 4'a kaziga zamageko'namofo henka kaziga,
vahe aza huntetere hu'ne. Ana higeno magoke magokemofona
4'a avugosane, agekonane metere higeno, **9** zamagekonama
rufanara'ma hazageno'a mago'mofo ageko'namo'a mago'mofo
agekona ome avako hutere hu'ne. Hagi kama vazana mago
mago'mo'a rukrahera osu vu fatgo hu'naze. **10** Hagi ana
4'a zagaramimofo zamavugosamo'a amanahu hu'ne, avuga
kaziga vahe avugosa huntegeno, tamaga kaziga laioni avugosa
huntegeno, hogar kaziga ve bulimakao afu'mofo avugosa

huntegeno, zamefira tumpamofo avugosa hunte'ne. **11**
Zamavugosamo'a e'ina hu'ne. Hagi mago mago zagamofona 4'a
ageko'na huntetere hu'neankino, tare zamageko'namo'a rufanara
higeno, magomofo agekonamo'a magomofo agekonare ome
avako hutere hu'ne. Hagi tare zamageko'nanura zamavufaga eri
fraki'naze. **12** Hagi mago magomo'a avugosama huntenerga
vu fatgo nehigeno, Avamumo'ma vuoma hirega rukrahera
osu ana zagaramimo'za nevaze. **13** Hagi ana zagaramimofo
amu'nozmifina tevema nereazamo'a, tankanu'zagna huge,
tosi tavikna zamo vuge ege hu'ne. Hagi ana tevemo'a tusiza
huno hagna hagna huno remsa nehigeno, ana tevefintira
kopsinamo'a rutrage huno vuno eno hu'ne. **14** Hagi ana
tevefina kasefa'ma hu'zama mani'naza zagamo'za kopsinamo'ma
hiaza hu'za trage hu'za vuge'ege hu'naze. **15** Hagi ana
zagaramima zamagoana, mago mago zagamofo asoparega
mopafina mago mago wili metere higeno, ana makara 4'a
me'nege'na ke'noe. **16** Hagi ana wilimo'za amanahu hu'naze,
zamavufaga'amo'a berilie nehaza havereti'ma nehiaza huno
ana wilimo'za mago zanke hu'za marave marave nehazageno,
mago mago wilimofo agu'afina mago wilimo rugeka huno metere
hu'ne. **17** Hagi ana zagaramimo'za 4'a kaziga zamavugosa
hunte'nazanki'za, vunaku'ma hazankazigama nevu'za, rukrahera
osu amne vu fatgo hu'naze. **18** Hagi ana wiliramimofoma eri
koravema hunte'nea ainiramimo'a ra huno za'za hu'negeno
rama'a avurgaramimo megagi'ne. **19** Hagi kasefa'ma hu'za
mani'naza zagamo'zama kama nevazageno'a, ana wilimo'za
magoka vuge, haresgama hu'za marerizage'za zamagranena
ana nehaze. **20** Ina kazigoma avamu'mo'ma virega nevazageno,
wilimo'zanena vu'naze. Na'ankure kasefa'ma huza mani'naza

zagaramimokizmi avamu'mo'a ana wiliramimpina mani'ne. 21
Hagi ana zagaramimo'zama nevazageno'a, ana wiliramimo'za
nevazageno, ome otizage'za ome oneti'za, haresgama hazage'za,
zamagranena magoka ana zanke huza haresga hu'naze.
Na'ankure kasefa'ma hu'za mani'naza zagaramimokizmi
avamu'mo'a, ana wiliramimpi mani'ne. 22 Hagi ana zagaramimofo
zamasenirega anagamu kankamumpina aisire'ma zagma
rentegenoma'rrumarave nehiaza huno rumsa huvagare'ne. 23
Hagi fenkama kazigama me'nea kankamumpina ana zagma'za
tare zamagekona rutare'za mago'mofo agekonamo'a magomofo
agekonare avako hutere nehazageno, tare zamagekonanura
zamavufaga refitetere hu'naze. 24 Hagi ana zagma'za
hare'zama nevazageno'a zamagekonamofo zamagasasamo'a
rama'a timofo agasasagna nehigeno, Hankavenentake
Anumzamofo agerumo'ma nehiankna nehigeno, rama'a sondia
vahetmimofo zmagasasankna nehigena antahi'noe. Hagi kaza'ma
osu uomaneti'za, zamagekona atrazageno urami'ne. 25
Hagi zamagekona atrazageno uramige'zama o'matizageno'a,
anagamu zamasenirega kankamumpinti mago ageru aru'ne. 26
Hagi ana zagaramimofo zamasenirega anagamu kankamumpina
safie nehaza havereti tro hu'naza kini tra me'ankna higeno,
ana tratera vahe'ma maniaza hu'nege'na ke'noe. 27 Hagi
ana vahe'mofona afafafinti'ma mareri anagate'nea avufgamo'a,
tefi'zoma hu'nea ainireti'ma hiaza huno rumsa hugagi'ne. Hagi
afafafinti'ma mefenkamuma te'nea avufgamo'a tevenefa kna
higeno, tusi'a masamo masanentake huno ana nera rugaginte'ne.
28 Ana ne'mofoma rugagima ante'nea masazamo'a, ko'ma ru
knafima furagenamo'ma rugaginteknna hu'ne. Ra Anumzamofo
hanavemofo masamo e'inara hu'ne. Hagi ana zama nege'na,

navugosaregati mopafi masene'na nentahugenno mago vahe'mo
nanekea hu'ne.

2 Ra Anumzamo'a amanage huno nasami'nne, Vahe'mofo
mofavremoka, otinege'na nanekea kasmi'neno. **2** Hagi anagema
nehigeno'a Avamumo'a nagu'afi efreno nazeri otige'na, otinena
nanekema nasamiana antahi'noe. **3** Hagi Agra amanage
hu'ne, Vahe'mofo mofavremoka, Nagra Israeli vahetega
hunegantoe, keontahi kumapi vahe'ma ha'ma renante'naza
vahetega hunegantoe. Zamagrane zamafahe'mozanena ke'ni'a
rutrageme e'za menina ama knarera ehanatize. **4** Hagi
zamagu'amo'a havegna huno hankavetigeno, zamagu'a rukrahe
osu vahetega hunegantoanki, amanage hunka ome zamasamio,
Ra Anumzana Hankavenentake Anumzamo'a amanage nehie. **5**
Hagi anankea antahisazo ontahisazo kasnampa nera amu'nontifi
emani'neno hu'neane hu'za zamagra ke'za antahi'za hugahaze.
Na'ankure zamagra keontahi vahe mani'naze. **6** Hagi vahe'mofo
mofavremoka ave'ave' trazampine segintaveramimofo amu'nompi
vano hiankna hugahananki, kagra zamagriku'ene kezmigura
korora osuo. Na'ankure zamagra keontahi vahe mani'naze.
7 Hagi ana vahe'mo'za kea antahisazo ontahisazo Nagri'
nanekea eri ama hunka zamasamio. Na'ankure zamagra keontahi
vahe mani'naze. **8** Hianagi vahe'mofo mofavremoka kema
kasaminua kea antahio. E'i ana vahe'mo'zama nehzaza
hunka kea ontahisanki, kagira aka hunka amama kami'naku'ma
nehua zana no. **9** Anage hige'na negogeno azana rusute
namigeno, ana azampina avonkre'za regazarinte'naza avontafe
me'hege'na ke'noe. **10** Hagi ana avontafera eri rupuma hige'nama
ke'hoana, ana avontafemofo avugane amiganena vahe'mo'zama

zmasunku'ma hu keagane, zavi krafagema hu keagane, hazenke
zamofo keagane krente'naze.

3 Anante Ra Anumzamo'a nasamino, Vahe'mofo mofavremoka
kavugama regazarinte avontafema me'neana erinka netenka,
vunka Israeli vahera ome zamasamio. **2** Anagema hige'na
nagira aka hugeno, ana avontafera namige'na ne'noe. **3** Ana
avontafe'ma nenogeno'a amanage huno nasm'i'ne, vahe'mofo
mofavremoka amama negamua avontafera negamu hugeno
kagu'afina aviteno meno. Hige'na ana avontafe'ma nenogeno'a,
nagitera haga'amo'a tumerinkna hu'ne. **4** Ana higeno, Ra
Anumzamo'a anage huno nasami'ne, vahe'mofo mofavremoka
menina vunka Israeli vahera nanekeni'a ome zamasamio. **5**
Hagi amama hunegantoana ru zamageru'ma neraza vahetega
hugantege, zamagerumo'ma amuhoma hu'nea zamageru'ma
neraza vahetega hugantegera nosuanki, Israeli vahetek
hunegantoe. **6** E'i ana Israeli vahera rama'a hu'za ru zmageru
ru zamagerura norazankinka, zamageru'ma antahi'amo'a
amuhoa osu'nea vahetega hunegantoe. Tamage huanki
e'inahu vahetegama hugantoresina keka'a antahizasine. **7**
Hianagi Israeli vahe'mo'za keka'a ontahigahaze. Na'ankure
zamagra Nagri kema antahizankura, zamavesra nehanki'za
kagri kema antahizankura zamavesra hugahie. Tamage
huno maka Israeli vahe'mofo zamagu'amo'a hankavetino
havegna hu'ne. **8** Hianagi menina zamagri zamagu'amo'ma
hankavetiankna hu'na kagri kagu'anena kazeri hankaveti'nena
zamagrikura zamagorora osugahane. **9** Zamagra keontahi
vahe mani'nazanagi, kagrira hankavenentake daimoni havegna
hu'na kazeri hankavetisugenka, ana vahetaminkura zamagorora
huge, kahirahikura osugahane. **10** Mago'ane amanage huno

nasm'i'ne, Vahe'mofo mofavremoka, nanekema kasmuana antahi so'e nehunka, maka nanekema kasamuana kagu'afi erinto. **11**
Hagi vaheka'ama kinama hu'za Babilonima mani'naza vahetega vunka, hanavenentake Ra Anumzana, Agra Anumzamo'a amanage hie hunka ome zamasamio. Ana nanekea antahisazo ontahisazo amne ome huama hunka zamasnio. **12** Hagi anante Avamu'mo'a navresga nehige'na nentahugeno, namefitira tusi'a agasasa nerifinti amanage hu'ne, Ra Anumzamofona kuma'afi himamu masa'agura agia ahentesga hugahaze. **13** Hagi e'i ana agasasana kasefa'ma hu'za mani'naza zagaramimofo zamagekonamofo agasasane, tava'ozmirema meterema hu'nea wilimofo agasasa antahi'noe. **14** Hagi Avamumo'a navresga huno navareno nevige'na, tusi narimpagna nehu'na vu'noe. Hianagi Ra Anumzamo'a hankavenentake azana nagofetu anteno nazeri'ne. **15** Ana higena Juda vahetmima mani'naza kumate Kebar timofo tava'onte Tel-abibi e'noe. Hagi narimpamo'a tusi kna nehige'na ana kumatera ana kina vahetaminena 7ni'a zagegna mani'noe. **16** Hagi 7ni'a knama evutegenoa Ra Anumzamo'a amanage huno nasm'i'ne, **17** Vahe'mofo mofavremoka, kagrira Israeli vahete kavu antenka mani'nenka kegava huo hu'na kazeri otuanki, amama kasminua nanekea antahitenka Nagri nagira erinka Israeli vahera koro kea zamasamio. **18** Hagi kefo avu'ava'ma nehia vaheku'ma hu'na, tamage hunka frigahane hu'nama hanugenkama vunka ana vahe'ma ana koro ke'ma ome osamige, vunka avumro ome antenka ana kefo avu'ava zama'a azeri fatgo osnankenoma frisiana, agri korankumira kagra erigahane. **19** Hianagi kefo avu'ava'ma nehia vahe'ma koro kema nesamisankenoma ana kema ontahino, agu'ama rukrahe osuno, kazigazi huno kumi avu'ava'ma nehuno ufrisiana, kagra'a

kagu vazigahanankino, agri korankumimo'a kagritera omegahie.

20 Hagi menima fatgo avu'ava'ma nehia vahe'mo'ma fatgo avu'ava'ma atreno rukrahe huno kefo avu'ava'ma hanige'na, kama vanoma nehifina tanafa hu'zama Nagrama antesugeno'a agra frigahie. Na'ankure kagra koro kea osamisankeno frigahiankino, fatgo avu'avazama hu'nea zankura nagesa ontahigahue. Hianagi ana vahe'mofo korankumira kagra erigahane. **21** Hagi kagrama fatgo avu'ava'ma nehia vahe'ma kumira osuo hunka koro kema huntesanke'noma kumi'ma osniana, agra ofri amne manigahie. Na'ankure agra koro kema asmi'nanana antahino, agra'a agu vazi'neankino agri korankumi'mo'a kagritera omegahie. **22** Hagi anante Ra Anumzamo'a azana nagrite anteno amanage hu'ne, otinka agupofi vuge'na anantega nanekea ome kasmi'neno huno hu'ne. **23** Anage hige'na oti'na aguporega vu'na ome koana, Kebar tinnenare'ma kenoankna huno Ra Anumzamofona hankavenentake masamo'a atrureno oti'nege'na nege'na, navugosaregati mopafi mase'noe. **24** Hianagi Avamu'amo nagu'afi efreno nazeri otige'na otugeno amanage huno nasmi'ne, nonka'afi vunka agu'ati kafana omeriginka manio. **25** Hagi vahe'mofo mofavremoka ko, kagrira nofi'nuti anaki kantenagenka ana vahe kevufina ovugahane. **26** Hagi kagrira kagefuna kavagunafare eri kamarentanena kefo avu'ava'ma nehaza zankura kea hunka zamazeri fatgoa osugahane. Na'ankure zamagra keontahi vahe mani'naze. **27** Hianagi nanekema kasmisnuankna kavagunafarema kagefunama akamare'neana eri atrenugenka amanage hunka zamas migahane, Ra Anumzana Agra Anumzamo'a amanage hie, Iza'oma kema antahinaku'ma hanimo'a, kea antahino. Hagi iza'oma kema ontahinaku'ma

hanimo'a, kea ontahino. Na'ankure zamagra keontahi vahe mani'naze.

4 Hagi menina vahe'mofo mofavremoka hapateti'ma brikima tro'ma hunte'nazana erinka kavuga antenenka anante Jerusalemi rankumamofo amema'a eri vakakinka tro hunto. **2** Hagi ana hapateti'ma regripenkama tro'ma banana brikimofona ha' vahe'mo'zama rankuma'ma avazagi kagine'za mopama kate'za ante hihi hu'ne'zama ha'ma nehaza zana tro hutenga kagio. Ana nehunka ha'ma hunaku'ma rankuma keginamofo megi'ama ha' vahe'mo'zama vihuma hu'za kanegizaza hunka, ana havemofona vihua hunka kagio. Ana hutenga ha' vahe'mo'zama rankumamofoma seli nonkuma'ma kiza kanegizaza hunka seli nonkumara kinka ana kumamofona kagio. **3** Hagi ana'ma hutenga ainire fraipani erinka kagrane ana rankumamofo amu'nompinena antegeno ainire keginagna huno me'nena kavugosa anantega huntenege, ha' vahe'mo'zama rankuma'ma avazagi kagine'zama hankaveti'za ha'ma hunezmanta zankna hino. Hagi e'i ana maka zama tro'ma banana zamo'a, Israeli vahe'mo'zama nege'za kvama hanaza zamofo avame'za megahie. **4** Ana hutenga Israeli vahe'mofo kumimofo knazana hoga kaziga'a mase'nenka eri agofetu anto. Na'ankure anama mase'nana kna'afina Israeli vahe knaza erinka vugahane. **5** Hagi Israeli vahe'ma knazama erisaza avame'zana 390'a knafi kamigahuankino, mago knamo'a mago kafu huvame huno metere hugahiankino, 390'a kafufi kumi'ma hu'naza zantera knazana zami'na vugahue. **6** Hagi e'i su'ama vagamarena rukrahe hunka tamaga kazigati ete mase'nenka, Juda vahe'mokizmi kumimofo knazana erio. Hagi 40'a kna kamuankino, 40'a knamo'a 40'a kafu huvame huno me'ne. **7** Hagi rukrahe hunka Jerusalemi kuma'ma

tro huntenka, ha' vahetamima trohunte kaginte'nana kumamofona kazana rusutenka knazama erisaza zamofo kasnampa kea hunto. **8** Nagra nofiteti anaki kantenugenka rukrahe osu ana kazigatike mase'nenankeno, ha' vahe'mo'zama rankuma'ma avazagizama ha'ma huzmante'naza knamo'a evu vagaregahie. **9** Hagi kagra witine balinenki, kohe'ene lentoli koheki, miletiema nehaza ne'zanki witigna ragama renentea ne'za emema nehaza ne'zane ante avitetenka kanenka zuompafi eri havia hunka bretia tro huo. Hagi 390'a knama masenka manisana kna'afina ana bretia negahane. **10** Hagi mago mago kna zupama nesana bretimofo kna'amo'a, 200'a gremi hugahianki anampinti refko hunka nezama neknarera netere huo. **11** Ana hukna hunka mago mago knarera kasefa tina mago lita kapu netere huo. **12** Hagi vahe'mofo rifamo'ma hagegema hu'nesia rifare, tevea hugrenka ana bretia krenka nenege'za vahe'mo'za kageho. **13** Hagi Ra Anumzamo'a mago'ane amanage hu'ne, Israeli vahe'ma zamahegasopenuge'za ru vahe'enema umani'neza, amama hanaza hu'za agru osu ne'za negahaze. **14** Anage hige'na nagra hu'na, Ra Anumzamoka e'inahu avu'ava zana kora hu'na nazeri pehena osu'noe. Nagra ositeti'ma mani'nama e'noa kna'afina agra'ama fri'nea bulimakao afuro sipisipi afuro, afi zagamo aheno traga hu'nea bulimakao afuro sipisipi afuro, agru osu afu ame'a onetfa hu'noe. **15** Anage hugeno Ra Anumzamo'a amanage hu'ne, Knareki vahe rifa atrenka bulimakao rifare tevea hugrenka bretia kregahane. **16** Anage nehuno Ra Anumzamo'a mago'ane amanage huno nasmi'ne, Vahe'mofo mofavremoka, Nagra Jerusalemi kumapima me'nea ne'zana eri fanene hanenkeno, nezankura atupa nehu'za osi'a nezama mesiama'a sigerirera erinte'za refko huza osi'a netere nehu'za antahintahi hakare

nehu'za, osi'a tima nesu'za tusi zamagogogu hugahaze. 17 Nagra e'inahu'za hanuge'za bretigu'ene tinku'enena atupa nehu'za, ovufi avufi hu'za tusi zmagogogu hugahaze. Na'ankure kumi'ma hu'naza zanteku hu'za ome haviza hu'za zaferinage hugahaze.

5 Ra Anumzamo'a huno, Menina vahe'mofo mofavremoka asane'nesia bainati kazi erinka azokama tagahu vahe'mofo resa kazinkna hunka kagi kazoka'ene kanu kazoka'enena haro. Ana huntenka sigerire erintenka kna'a negenka, 3'afi refko hunto. 2 Hagi ha' vahe'mo'ma Jerusalemi kuma'ma avazagino ha'ma hunte knama vagamare'na, ana 3'a kevufintira mago kevua Jerusalemi kumamofo amema'ama tro'ma huntenana kuma agu'afi teve hugrenka kro. Hagi anante kevua taga hunka eri osi'osi hunka ana kumamofo agu'afi atrenka vano huo. Hagi namba 3 kevua zahopi eritregeno zaho'mo eri hareno nevina Nagra kazina eri'na zamefi zamavaririna vugahue. 3 Hianagi osi'a kazokara erinka zaza kukenaka'amofo atumpare anakintegeno meno. 4 Hagi anampintira ete osi'a kazokara erinka tevefi kregeno teno. Hagi ana tevemo'a mika Israeli vahe'ma mani'nazarega teno vuno'eno hugahie. 5 Hagi Anumzana Ra Anumzamo'a huno, Jerusalemi kumara maka kokankoka vahe'mofo amunompi antogeno me'nege'za, ama mopafi kumatmimo'za megaginte'naze. 6 Hianagi Jerusalemi kumapi vahe'mo'za kokankoka vahe'mo'zama Nagri kasegene trakema amagema nontageno'a zamagri tava'onte'ma manigagi'naza vahe'mo'zama kasege'nine tra keni'anena zamagena hunemi'za zana zamagatere'za Nagri navu'navara novaririze. 7 E'ina hu'negu Ra Anumzana Anumzamo'a huno, Tamagri tavaonte'ma manigagi'naza kumapi vhahera zamagatereta keontahi vahe mani'neta kasegeni'ne tra ke'ninenova novaririze. Mago'a kumatmima tamagri tavaonte'ma

megagi'nea kumapi vahe'mo'za tra kezamia avaririza knare
hu'nazanagi zamagri knara tamagra osu'naze. 8 E'ina
hu'negu mika'zama kegavama hu'nea Ra Anumzamo'a huno,
Nagra'nia Jerusalemi kumate vahera hara reramante'na, tamagri
tavaonte'ma megagi'naza kumapi vahe'mo'za neramagesage'na
knazana tamigahue. 9 Hagi kasrino hi'mnage hu'nea avu'ava'ma
haza zanku kora osu'noaza hugahuanki'na, henka anara
mago'enena osugahue. 10 E'ina hu'negu zamafahe'za mofavre
nagazmi zamavufaga nenenageno, mofavre naga'zmimo'za
zmafahe'i zamavufaga negahaze. Tusi knaza tamami'na tamazeri
haviza hanugen, amnema manisaza vahetmina zamazeri
panani hanuge'za mago mago hu'za vahe mopafi umani eman
hugahaze. 11 E'ina hu'negu Nagra kasefa hu'na mani'noa
Ra Anumzamo'na tamage hu'na huankina, kasrino hi'mnage
hu'nea avu'avaza huta mono noni'a eri haviza nehuta, eri
hi'mnage hu'nazagu Nagra tamatregahue. Ana nehu'na Nagra
nasunkura huramante'na tamatrenueta omanigahaze. 12 Hagi
3'a kevufintira mago kevu vahe'mofona agatonto zamo'ene
krimo'ene zamazeri haviza hanige'za Jerusalemi kuma agu'afi
frigahaze. Hagi mago kevu vahera kumamofo megia ha'
vahe'mo'za kazinteti zamahe frigahaze. Hagi mago kevu vahera
zamahe panani hanenke'za mago mago hu'za vahe kumatega
vu'za e'za hanagena, ha' vahe huzmanta'nena bainati kazinteti
zmarotago hu'za zamahegahaze. 13 Hagi e'ina hanugen
nasima vazi'zamo'a amnea hanigeno narimpama ahezamo'a
ome vagaregahie. E'ina hanuge'za Nagrikura Ra Anumzana
hihamua'ane Anumzamo ama anazana nehie hu'za ke'za
antahi'za hugahaze. 14 Hagi tamazeri havizantfa hanugen
kumatmimo'enena haviza hu'enkeno, megagi'naza kumatmimpi

vahe'mo'za ana kante'ma enevu'za kesu'za zamagena neru'za
ama kumamo'a havizantfa hie hu'za hugahaze. **15** Ra
Anumzamo'na nehuanki'na, narimpa ahe'zama tamaveri'ma
hanuana knaza atre'na tamazeri havizantfa nehanugeno,
kumatmimo'enena haviza hu'nenkeno, megagi'haza kumatmimpi
vahe'mo'za nege'za antri hu'za zmagogogu nehu'za kiza zokago
ke huramantegahaze. **16** Hagi agatontozama atresanuana
vahe'ma zamahe fri kevegna huna ahe tranenkeno agatontoma
huno ke'onke'zama eri haviza hu'za avreno egahie. Hagi agatonto
zana atre'va atre'va hu'na ne'zana eri fanane hutfaza hugahue.
17 Hagi agatonto zane afi zagaramine huzmantesuge'za maka
mofavretmia eme zamahe hana hanageta, mofavre onte vahekna
huta manigahaze. Ana nehu'na ruzahu ruzahu kefo krine ha'
vahe'ene huzmanta'nena eme tamazeri havizantfa hugahaze.
Nagra Ra Anumzamo'na ama nanekea nehue.

6 Ra Anumzamo'a amanage huno nasami'ne, **2** Vahe'mofo
mofavremoka, Israeli agonaramintega kavugosa hunte'nenga
amanage hunka kasnampa kea huntu, **3** Israeli agonaramimoka
Ra Anumzamofo nanekea antahio! Ra agonaramine
osi agonaramine, tinkrahotamine, aguporaminenkura Ra
Anumzamo'a huno, Nagra ha' vahetami huzmanta'henkeno
agonaramimpima havi anumzama mono'ma hunentaza kumara
eri haviza hugahaze. **4** Ana nehu'za havi anumzante'ma
kresramnama nevaza itaramina, tapagehu netre'za mnanentake
zama kre'mnاما nevaza itaramina rurakoraku nehu'za, kaza
osu havi anumzantmimofo zamavuga vahetmina zamahe
vatu hugahaze. **5** Hagi Israeli vahe'ma fri'naza zamavufaga
kaza osu havi anumzazmimofo zamavuga eri tru hunente'na,
zaferinazmia kresramna vu itaraminte rupanani hu'na atrena

kagigahue. **6** Mika nemaniza kumatamine, rankumatmimo'enena havizantfa hinkeno, mono'ma nehaza agona kumatmimo'enena haviza hugahie. Hagi mono'ma nehaza agona kumatmimpima me'nea kresramna vu itaramine, kaza osu havi anumzantamine, mnantenake zama kre mnama nevaza itaraminena taganavaziza eri havizantfa hanageno, tro'ma hunteneta mono'ma nehaza zantmimo'a maka fanane hugahie. **7** Hagi maka kaziga ha' vahe'mo'za vahera zamahe fri vagaresageta, manisaza nagamota negeta Nagrikura Ra Anumza mani'ne huta keta antahita hugahaze. **8** Hianagi mago'a vahera ozamahe zamatregahue. Na'ankure ha' vahe'mo'za zamavare'za vanage'za ru kumategane mago'a mopafi mago mago hu'za umanigahaze. **9** Hagi kina huzamante'za zamavare'za vanaza vahetmimofo kumatega umani'neza, Nagri'ma zamagenama hunenamiza havi anumzama kezamanunuma hu'za mono'ma huntazage'nama narimpa knama hu'noa zankura zamagesa antahigahaze. Na'ankure zamagra hi'mnage huno kasri avu'ava hu'naza zanku zamagazegu hugahaze. **10** Ana nehu'za Nagrikura Ra Anumza mani'ne nehu'za, kema hu'nea kemo'a amne zanknara osu'neanki, knaza tamino tazeri haviza hie hu'za ke'za antahi'za hugahaze. **11** Ra Anumzamo'a huno, Kazana nerunka kagia mopare nemasaginka amanage huo, Avo! Israeli vahe'mo'za kasrino hi'mnage avu'ava'ma hazazamo higeno ha' vahe'mo'zane, agatonto zane, kefo kriramimo'enena zamazeri haviza hie hunka huo. **12** Hagi afete moparegama mani'nesaza vahetmina kefo krimo zamahe nefrinigeno, tavaonte'ma manisaza vahera ha' vahe'mo'za zamahe nefrisageno, mago'ama manisaza vahe'mo'za zamagaku hu'za frigahaze. E'ina hu'na maka narimpa ahe'zana zamagrite maka rupopo hutre vagaregahue. **13** Hagi ha' vahe'mo'zama

zamahesage'za frisaza vahe'mokizmi zamavufagamo'a maka osi
agonaramimpine, ranra agonaramimpine, zafa agafafine, anina
kuronkuro hu oki zafa agafafine, kaza osu havi anumzazmimofo
amu'nompine, mnanentake'zama krewnama nevaza itaramimofo
avuganena megagi'enige'za nege'za Nagrikura Ra Anumza
mani'ne hu'za ke'za antahi'za hugahaze. 14 Ana hute'na
mopazmire nazana rutare'na ka'ma mopareti agafa huteno vuno
Ribla kumate'ma uhanati'nia mopa eri havizantfa hanuge'za,
Nagrikura Ra Anumza mani'ne hu'za ke'za antahi'za hugahaze.

7 Ra Anumzamo'a anage huno nasami'ne, 2 Vahe'mofo
mofavremoka, Ra Anumzana Agra hanavenentake Anumzamo'a
Israeli vahe mopagura amanage hie, Ha' vagare! Maka
Israeli mopamo'ma knazampima ufresia knamo'a kofta huno
egahie. 3 Hagi menina knazama tamisua knamo'a, eankina
narimpama ahe'zana atresugenno tamagrite egahie. Tamagrama
hu'nesaza tamavu tamavate antena refako hu'na ana kante
mizana tamamigahue. Na'ankure tamagra hi'mnage huno
kasri avu'ava hu'naze. 4 Hagi nasunkura huoramante'na ne
vua keamne nehu'na oramatregosuanki, kasrino hi'mnage
avu'avazama hu'naza zanteramazeri havizantfa hanugeta,
Nagrikura Ra Anumza mani'ne huta keta antahita hugahaze.
5 Hagi Ra Anumzamo'a amanage hu'ne, Tusi'a hazenke'za
ne-e. 6 Tamagri'ma tamazeri havizama hania knamo'a hago
eankino, hago egofta hie. Hagi kahe fananema hania knamo'a,
kavega anteno mani'neanki ko. 7 Israeli mopafima nemaniza
vahe'mota havizantfa hanaza knamo'a hago ne-egeno, ana
knamo'a hago egofta nehianki, agonaramimpina zagame'ma
nehu'za musema nehaza zamo'a vagaresigeno, zamagogogou
hugahaze. 8 Hagi menina tusi'a narimpa ahe'zana tamagri

tamavufgare eri rukaha hutre vagaregahue. Ana nehu'na tamavu tamava'ma hu'naza kante antena refko hu'na hi'mnage avu'ava'ma hu'nazarera hazenkea tamigahue. 9 Hagi nasunkura huramante'na oramatregahue. Na'ankure maka avu'ava'ma hu'nazare'ene kasrino hi'mnage avu'avazama hu'naza zantera nona hu'na tamazeri havizantfa hanugeta Nagrikura Ra Anumza mani'neno amanahu zana hurante huta keta antahita hugahaze.

10 Ko, anankna ama efore nehie! Knazama esia knamo'a ama ne-e! Vahe'ma azeri havizama huzamo'a rumpamu huno egeno, azotamo'a agata hageno amu'maregeno, avufga rama hu'zamo'a nena huno amosre ahe'ne. 11 Hagi veganokno avu'avazamo ome ra huno nevuno vahe'ma sefu'ma nezamiza azota aseno agatareankino kumima nehaza vahera zamazeri haviza hanigeno, mago'mo'e huno omanigahie. Maka fenozmimo'ene maka marerisa fenozmimo'enena amne zankna huno fanane hugahie.

12 Hago ana kna e'ne, ana knamo'a ama ehanatie. Hagi nanazama mizase vahe'mo'za musena nosinke'za, zagore'ma nanazama atre vahe'mo'za zamasunkura osiho. Na'ankure rimpama ahe'zamo'a magoke vahetera omegahianki, maka'a vahete egahie. 13 Hagi zagore'ma mopa'ama atresia vahe'mo'a, ana tarega'mokema ofrike mani'nena'a knafina mopa'a ete e'origahie. Na'ankure maka vahete'ma fore'ma hania zama ava'nagna zampima eri averi'ma hu'nesia zana ete rukrahera osugahiankino, mago vahe'mo'e huno kefo avu'avazampina mani vava huno ovugahie. 14 Hagi hate'ma vunakura ufenetra re'za mika ha' zana retrotra hugahazanagi, hatera ovugahaze. Na'ankure maka vahe'mo'za nazeri narimpa ahe'naze. 15 Kumamofo megi'a ha' vahe nemanisageno, ran kumamofo agu'afina krimo'ene agatonto zamo'enena megahie. Hagi megi'a kokampima nemanisia vahera

bainati kazinteti zamahe nefrisage'za, agatonto zamo'ene, kefo
krimo'ene kuma agu'afima nemaniza vahera zamahe frigahie.

16 Hagi ana zamo'ma zamazeri havizama osnia vahe'mo'za
agonarega fre'za umani'neza, agupofi maho namamo'ma nehiaza
hu'za mago magomo'za kumi zamigura zamasunkura hu'za
zavira ategahaze. **17** Hagi maka vahetmimofo zamazamo'a
satino frisigeno, zamarenamo'a hefa hofa huno hankavezmia
omanegahie. **18** Anama hanige'za zamasunku kukena hu'neza
tusi zmahirahiku nehu'za zamagogogu hugahaze. Ana nehu'za
zamagazegu nehu'za zamavugosa refinete'za, zamazokara
vazagate'za eri rampage hugahaze. **19** Hagi silva zagozmia kampi
herafi netre'nageno, golizmimo'a amne zankna hugahie. Hagi
Ra Anumzamo'ma arimpama ahe'zamantesia zama atresigeno
esia knafina, silvamo'ene golimo'enena zamagura ovazigahie.
Hagi silvane golimo'enena kaga'ma ate'zana eri amne osuge,
zamarimpafina avitesigenora zamura osugahie. Na'ankure e'i
ana silva zagomo'ene golimo'enena vahe'mofona kumipina
avrenente. **20** Hagi zamagra e'i ana hentofa konariri zantminku
zamavufaga ra nehu'za, ana zanuti kasrino hi'mnage huno
kaza osu havi anumzana trohu'naze. E'ina hu'negu e'i ana
zantamina eri arukrahe hanugeno, agru osu'za segahie. **21** Hagi
ana zantamina ru mopafi vahetamine, kefo avu'ava'ma nehaza
vahe'mokizmi eri zami'nuge'za, rohu emere'za ana zantamina eri
pehana hugahaze. **22** Hagi Nagra namefi huzmi'nuge'za kefo
avu'ava'ma nehaza vahe'mo'za mono noni'afina ufre'za keonke
zana eri pehana nehanageza, musufa vahe'mo'za mareri'za
ruotge'ma hu'nea zantamina eri pehena hugahaze. **23** Hagi
seni nofi retrotra hiho. Na'ankure ama mopafina vahe'ma aheno
korama eri tagi hazenke zamo avitegeno, rankumapina vahe'ma

ohefri ahefri hu'zamo'a avite'ne. 24 Ana hu'negu megagi'naza kumatmimpima kefo avu'ava zante'ma vugotama hu'naza vahe zamavare'na esuge'za, nonkumazmia eme zamahe'za hanaregahaze. Hagi tamavufga rama nehaza hanavetamia eri atrenugeno, ruotge'ma hu'nea kumatamina eri pehena hugahaze. 25 Hagi zamazeri zamagogoma fesia zama esige'za mani fruma huno mani'zanku hakegahazanagi, ke'za eri forera osugahaze. 26 Hagi hazenke zamo'a ana agumpi ana agumpi huno zamagratera ne-enigeno, ana zamofo agenkemo'a ana agumpi ana agumpi huno egahie. Kasnampa vahe'mo'zama ava'nagna zama ke'zama zamasamisagura nehakesageno, pristi vahe'mo'zama kasegema rempi huzmi'zamo'a fanane nehanigeno, ranra vahe'mo'zama antahintahima zami'zamo'enena fanane hugahie. 27 Hagi kini ne'mo'a zavira neteno asunkura nehanigeno, mareri eri'za vahe'amo'za tusiza hu'za zamarimpa knafi nemanisageno, ana mopafi vahe'mokizmi zamazamo'a zamahirahitegahie. Zamagrama nehaza avu'avazante nona hu'na knazana nezami'na, zamagrama vahe'ma zamazeri havizama nehzaza hu'na, zamagri'enena zamazeri haviza hugahue. E'inama hanuge'za zamagra Nagrikura Ra Anumza mani'ne huza ke'za antahi'za hugahaze.

8 Hagi namba 6si kafumofona namba 6si ikantera 5fu knazupa, Juda vahemokizmi ugagota vahe'tmina navuga manizage'ha noni'afina mani'nogeno Ra Anumzamofo azamo'a nagrira nazerigeno hanave'amo'a nagrite e'ne. 2 Ana hige'na koana vahe amema'agnaza ke'noe. Hagi ana vahe amema'agna zagamofo afafaretima urami'nefina teve anefakna higeno, afafareti'ma mareri anagamuma atre'nea avufgamo'a, ainireti'ma hiaza huno tusi tampretampare huno masanentake hu'ne. 3

Hagi ana vahekna zagamo'a azana rusuteno naseni nazokate
nazeritege'na ava'nagnaza kogeno, Avamu'mo'a navresga huno
monane mopane amu'nompi vuno, Jerusalemi mono kumapima
unefraza kafama noti kazigama avugosama hunte'nerema
havi anumzamofo amema'ama tro huntazageno me'neno
Anumzamofoma azeri arimpama nehegeno kanivema nerere
navareno vu'ne. 4 Anante'ma vu'nama koana navuga Israeli
vahe Anumzamofo himamu masa'a Kebar timofo tavaonte'ma
me'nege'nama ke'noankna huno me'nege'na kogeno, 5
Anumzamo'a nagrikura amanage hu'ne, Vahe'mofo mofavremoka
noti kaziga kavua ko. Anage hige'na noti kaziga navua kesga
hu'na kogeno, noti kazigama kuma kafa tava'onte'ma kresramna
vu itama me'nea tava'ontera havi anumzamofo amema'a
me'negeno, Anumzamo'ma arimpagu'ma nehuno kanivema
nerea havi anumzamofo amema'a me'negena ke'noe. 6
Anama negogeno'a Anumzamo'a amanage hu'ne, Vahe'mofo
mofavremoka, Israeli vahe'mo'zama kasrino hi'mnagema hu'nea
avu'ava'ma nehu'za mono noni'afinti'ma afete'ma nahenati
netrazana negampi? Hianagi ete mago'ene tusi'a hi'mnage
huno kasri avu'ava zana kegahane. 7 Hagi anantetira mono
kumamofo kafante navareno vige'na koana, ana kumamofo have
keginafina mago kamo hagro hunege'na ke'noe. 8 Negogeno
Anumzamo'a amanage hu'ne, Vahe'mofo mofavremoka, have
keginafima hagro hu'negenkama ke'nana kana kafio higena
kafina koana mago kafa me'negena ke'noe. 9 Anama negogeno'a
Anumzamo'a anage huno nasami'ne, Vunka agu'a ufrenka
kasrino hi'mnage'ma hu'nea avu'avazama nehaza zantamina ko!
10 Hige'na anampinkama ufre'na koana, ana nomofo agu'afina
rugaraga asoparega ruzahu ruzahu zagama zamasaguregati'ma

regrarohe'zama vanoma nehaza zagaramimofo amema'ane,
agru osu zagaramimofo amema'aramine, Israeli vahe'moma
kaza osu havi anumzama mono'ma hu'ntaza anumzantmimofo
amema'aramine tro hunte'za evu'nazage'na ke'noe. **11** Hagi
ana zamofo zamavuga Israeli ranra vahera 70'a otizageno,
Safani nemofo Zasania'a amunoznifina oti'nege'na ke'noe.
Hagi ana 70'a vahe'mo'za, mananentake'za negraza zuompa
zamazampi eritere hu'za oti'nageno tevegumo'a zamasenirega
marenerige'na ke'noe. **12** Hagi anante Anumzamo'a amanage
huno nasami'ne, Vahe'mofo mofavremoka, mago mago
Israeli ranra vahe'mo'za'ma hanimpima keonke zagaramimofo
amema'ama tro'ma hunte'nazafinkama nehaza avu'ava zana
negano? Na'ankure zamagra hu'za Ra Anumzamo'a ama
mopa amagenta humi'neankino nontage hu'za nehaze! **13**
Anage nehuno amanage huno nasmi'ne, Menina mago'ane
tusiza huno kasrino havizanfta hu'nea avu'ava nehanagenka
zamagegahane. **14** Anage nehuno navareno Ra Anumzamofo
mono nomofona noti kaziga kafante vige'na, koana anampinka
a'neramimo'za Tamusi havi anumzankura tusi zavi netazage'na
ke'noe. **15** Anama negogeno'a Anumzamo'a amanage huno
nasami'ne, Vahe'mofo mofavremoka, ama zana negano? Hianagi
menina mago'ane kasrino havizanfta hu'nea avu'ava zana
kaveri hugahue. **16** Anage nehuno navareno Ra Anumzamofo
nomofona agu'afinka ufrege'nama koana, Ra Anumzamofo mono
omofo kafantera ko noma kinte'naza nomofone, kresramnama
vu itamofo amu'nompina 25'a venenemo'za ana mono nona
zamefi humiza zage hanati kaziga zamavugosa huntene'za
kepri hu'za zagemofonte monora hunentazage'na ke'noe. **17**
Anama negogeno'a Anumzamo'a huno, Vahe'mofo mofavremoka

negano? Juda vahe'mo'za kasrino haviza hu'nea kefo avu'ava'ma nehzana, kagrama antahinana osi'za nehzafi? Hagi zamagra ana nehu'za ama mopafi vahe'ma ha'ma omerente emerente nehu'za, ohefri ahefri hu avu'avaza hu'za ama mopa eri antevite'za nazeri narimpa ahe'za nehazo? Ko, zamagra kefo avu'ava'ma nehaza zamo'a, Nagrira antahionami'za zafa azankuna hantagi'za zamagonare antazankna nehaze. 18 E'ina hu'negu tusi narimpa ahezmante'na zamazeri haviza hugahue. Hagi nasunkura huzmante'na magomofona otregahue. Antahina zamazama hanuegu'ma ranke hu'za kezankea hugahazanagi, kezankezmia ontahigahue.

9 Hagi anante Ra Anumzamo'a ranke huno amanage nehige'na antahi'noe, Vahe'ma zamahe nefri'za vahera huzmantenke'za zamazampina ha' zana erine'za rankumapina eho. 2 Anage hige'na kogeno, anagamu noti kaziga kuma kafama me'nea kazigati 6si'a vene'neramina vahe'ma zamahe fri ha'zana zamazampina eriri eriri hu'za neazageno, anampina efeke kukena hu'nemo afafafina avontafe'ma kre vogisi me'negeno e'ne. Hagi ana vahe'mo'za agu'afi ufre'za bronsire itamofo asoparega uoti'naze. 3 Hagi ana'ma hazageno'a Israeli vahe Anumzamofo hihamu masazamo'a serabimiema nehaza ankeronte'ma me'neretira, marerino mono nomofo kafante vu'ne. Ana higeno efeke kukena hu'neno, afafafima avontafe bogisima anakinte'nea nera Ra Anumzamo'a amanage huno asami'ne, 4 Jerusalemi kuma agu'afi vano nehunka, kasrino himnage'ma hu'nea kefo avu'ava zama nehaza zanku'ma aza'o avesra nehuno, zavi'ma netea vahe'mofo kokovitera avame'zana antetere huo huno asmi'ne. 5 Hagi nentahugenno Ra Anumzamo'a mago'a nagara amanage huno zamasami'ne, Ameñi avaririta

rankumapina nevuta, mago vahekura tamasunkura huzmanteta ozamatreta zamahe friho huno hu'ne. 6 Hagi maka ozafanafama, kasefa vene'nema, kasefa mofa'nema, neone mofavreramima, a'neraminena maka zamahe hana hiho. Hianagi avame'zama kokovite'ma me'nea vahera zamavakora osiho. Ra mono nomofo avugama mani'naza vaheteti agafa huteta viho. 7 Anama huteno'a mago'ane amanage hu'ne, Zamahesaza vahetamimofo zamavufaga erita mono nompi ome ante aviteta ana nona eri pehena hiho huno nezmasamino, ko atiramita viho huno hu'ne. Anagema hige'za atiramiza rankumapi nevu'za, vahetmina zamahe'za vu'naze. 8 Hagi ana vahetmima zamahe'zama nevazage'na nagrake mani'nena navugosaregati mopafi mase'na amanage hu'noe, Ra Anumzana kagra Anumza mani'nane! Hagi Jerusalemi kumapi vahe'ma karimpama ahe'zmanenkama zamazeri havizama nehanke'zama osi'ama maniza Israeli vahera maka zamahe hana hugahampi? 9 Anage hugeno Ra Anumzamo'a amanage huno nasami'ne, Israeli vahe'ene Juda vahe'mofo kumi'mo'a ome rankrerfa hie. Ama mopafina vahe koramo'a avitegeno, rankumapina agraguке'ma antahino vahe'ma azeri savri'ma hu ava'ava zamo'a avitene. Na'ankure zamagra amanage hu'za nehaze, Ra Anumzamo'a ama mopa amefi hunemino, nonke hu'za nehaze. 10 E'ina hu'negu Nagra mago vahera nasunkura huzmante'na ozmatregahue. Hianagi maka zamavu'zamava'ma hu'naza zamofo avamente nona'a huzmantetere hugahue. 11 Anagema hutegen'o a efeke kukenama hu'neno afafafima avontafe bogisima rente'nea ne'mo'a amanage eme hu'ne, huo hunkama kema nasmina kante ante'na, ana zantamina hu vagare'noe huno Anumzamofona eme asmi'ne.

10 Anagema nehige'na avanagna zampima koana, serabimie
nehaza ankeromofo asenirega safie nehaza havereti tro hu'naza
kini tra me'nege'na ke'noe. **2** Hagi anante Ra Anumzamo'a
efeke kukenama hu'nea ne'mofonkura amanage hu'ne, **4'a**
vahekna zagaramima oti'nazafi vunka, zamagafinti tevema
nerea tankanuzaramina rama'a ome zoginka kazampi eri
avitetenka, rankumapina rupanani hunka atro huno asmigeno,
Ra Anumzamofo ke antahino nevige'na ke'noe. **3** Hagi serabimie
nehaza ankeromo'a mono nomofo sauti kaziga otino mani'negeno,
ana ne'mo'a umarerigeno mono kumamofo agu'afima me'nea
kumapina hampomo'a avite'ne. **4** Ana hige'na negogeno
serabimie nehaza ankeromofo agekonamofo anaga kazigatira
Ra Anumzamofo hihamu masazamo'a atreno mono nomofo
kafante vigeno, ana nomofo agu'afina hampomo avitegeno, Ra
Anumzamofo hihamu masazamo'a mono nonkumara remsa
hu'ne. **5** Hagi ana serabimi ankeroramimofo zamageko'hamofo
zamagasasamo'a, Ra Anumzana hihamu'ane Anumzamo'ma
kema nehigeno'ma neriankna ageru aru'ne. Hagi ana agerura
mono nomofo fegiatira amne antahiga hu'ne. **6** Hagi Ra
Anumzamo'a efeke kukena hu'nea nekura huno, wiliramimofo
amu'nompinti'ene serabimi ankerontamimofo amu'nompinti
tevea tagio higeno, ana ne'mo'a vuno mago wilimofo tava'onte
uoti'ne. **7** Ana higeno anante mago serabimi ankeromo'a azana
rusuteno amu'nozmifima me'nea tevefinti mago'a tankanu'za
tevea hanageno efeke kukenama hu'nea ne'mofo azampi
antegeno erino atirami'ne. **8** Hagi ana serabimi ankeromokizmi
zamageko'hamofo fenka kaziga, vahem'mofo zmazankna hu'neaza
me'ne. **9** Hagi ana serabimi ankeromofo tava'ontera **4'a** wili
me'neankino, mago mago ankeroma oti'nerera mago wili metere

hu'neno ana wiliramimo'za berielie hu'za nehaza havegna hu'za
mareve marave hu'naze. **10** Hagi ana mika 4'a wilimo'za mago
zanke hu'nazankino, mago mago wilimofo agu'afina mago wilimo
rugeka huno metere hu'ne. **11** Hagi 4'a kaziga ana serabimi
ankeromo'za zamavugosa hunte'nazanki'za, inan kazigama
vunakura rukrahera osu'za, ana kaziga vu fatgo hu'za vute'za,
fatgo hu'za ete'za hugahaze. **12** Hagi ana mika serabimi
ankeromokizmi zamagenafine, zamazampine zamageko'hafine,
maka zamavufafina ana 4'a wiliramimo'ma hu'neankna huno
avuragaramimo'a avite'ne. **13** Hagi nentahugenno mago agerumo'a
amanage hu'ne, rukrahe rukrahe nehia wiliramine huno hu'ne. **14**
Hagi mago mago serabimi ankeromofona 4'a avugosa huntetere
hu'ne. Hagi ana 4'a avugosafintira, mago avugosamo'a ve
bulimakaomofo avugosagna higeno, mago avugosamo'a vahe
avugosagna higeno, mago avugosamo'a laionimofo avugosagna
higeno, namba 4 avugosamo'a tumpamofo avugosagna hu'ne. **15**
Hagi anantetira ana 4'a serabimi ankeromo'za oti'za mareri'naze.
Hagi e'i ana zagaramina kasefa'ma huza mani'naza zagaramima
Kebar tinkenare'ma zamage'noa zagaramine. **16** Hagi ana
serabimi ankeromo'zama nevazageno'a, 4'a wilimo'zanena
zamavariri'za magoka vu'naze. Hagi ana ankeromo'zama
zamageko'nama rutare'za mopafinti'ma neharazage'za, anazanke
hu'za ana wiliramimo'za magoka vu'naze. **17** Hagi ana Serabimi
ankeromo'zama kaza'ma osu oti fatgoma nehazageno'a,
ana wilimo'zanena kaza osu oti fatgo hu'naze. Hagi ana
ankeromo'zama haresgama nehazageno'a, ana wilimo'zanena
magoka vu'naze. Na'ankure kasefa'ma hu'zama nemaniza
zagaramimofo avamu'mo'a ana wiliramimpina mani'ne. **18** Hagi
Ra Anumzamofo hihamu masa'amo'a mono no kafantetira atreno,

ana serabimi ankeroramimofo zamagofetu emani'ne. **19** Hagi negogeno ana serabimi ankeromo'za zamageko'na rutare'za neharazageno, wilimo'zanena magoka vu'za zage hanati kaziga Ra Anumzamofo mono no kahante uoti'naze. Ana hazageno Israeli vahe Ra Anumzamofo hihamu masazamo'a zamagofetu umanenege'na ke'noe. **20** Hagi e'i ana zagaramina kote'ma Kebar ti ankenare'ma kasefa hu'za mani'naza zagaramima Israeli vahe Anumzamo'ma mani'nemofo fenkama kazigama mani'nage'na ke'noa serabimi ankerontamine hu'na kena antahina hu'noe. **21** Hagi mago magomofona 4'a avugosama, 4'a agekonama huno huntetere higeno, ana agekonamofo fenkma kaziga vahe azankna za huntetere hu'ne. **22** Hagi ana zagaramimofo zmavugosamo'a Kebar tinkenare'ma ke'noa kasefa'ma hu'za mani'naza zagaramimofo zamavugosagna hu'ne. Hagi mago magomo'a rukrahera osu inantegama virega vu fatgo huno vu'ne.

11 Hagi anante Ra Anumzamofo Avamumo'a navresga huno mono nomofo zage hanati kazigama avugosama hunte'nea kafante vige'na koana, kafanteria 25'a vene'ne mani'nazage'na zamage'noe. Hagi ana vene'nemofo amu'nompina kva netrena Asuri nemofo Ja'azania'ene, Benaia nemofo Pelatiakea otinake'na zanage'noe. **2** Hagi Ra Anumzamo'a amanage huno nasmi'ne, Vahe'mofo mofavremoka antahio, ama ana venenemo'za rankumapina kefo avu'ava'ma hu antahintahia retro nehu'za, vahe'mokizmia kefo antahi'zana zami'naze. **3** Hagi zamagra amanage hu'za nehaze, nontamima ki kna zahufa erava'o osu'ne. Hagi rankuma'mo'a ne'zankre kavogna higeta, tagra ana kavofi afu ame'a meaza huta knare huta manigahune hu'za nehaze. **4** E'na hu'negu vahe'mofo mofavremoka kasnampa

kea hunka huhaviza huzamanto. **5** Higeno Ra Anumzamofo Avamumo'a nagrite eno amanage huno eme nasm'i'ne, Ra Anumzamo'a amanage huno hu'ne, Israeli vahemota tamagrama antahintahima nehaza zana Nagra ko kena antahina hu'noe huno nehie. **6** Hagi tamagra rama'a vahe zamahe frizageno, mika kuma kantamimpina fri vahe'mokizmi zamavufagamo avite. **7** E'ina hu'negu Ra Anumzana Agra Anumzamo'a amanage hie, rankumapima vahe'ma zamaheta zamavufagama eritruma hazana, e'i ame'a megeno rankumamo'a kavo me'ne. Hianagi tamagrira rankumapintira tamavaririnugeta atreta atiramigahaze. **8** Hagi tamagra kazinkanonku korora hazankina, Nagra bainati kazinknonu hara huramantegahue huno Ra Anumzana hankavenentake Anumzamo'a hie. **9** Hagi rankumapintira tamahe kasopetre'na ru vahe zamazampi tamavrente'nugeno, ru vahe'mo'za knazana tamigahaze. **10** Hagi bainati kazinteti tamaheme vu'na Israeli vahe mopa atupare uhanati'nugeta, Nagrikura Ra Anumza mani'ne huta keta antahita hugahaze. **11** Hagi ama rankumamo'a tamagritera kavognara osanigeno, ete tamagra ama ana kavofi afu ame'a meaza huta knarerera huta omanigahaze. Hagi tamagrira knazana tamami'na vu'na Israeli vahe mopa atupare uhanatigahue. **12** Ana hanugeta Nagrikura Ra Anumza mani'ne huta keta antahita hugahaze. Na'ankure tamagra Nagri kasegea ovariri'naze. Hianagi tamagri tavaonte'ma mani kagi'naza kumatamimpi vahe'mofo zamavu'zamava avariri'naze. **13** Hagi ana kasnampa kema nehugen, Benaia nemofo Pelataia'a fri'ne. Ana hige'na navugosaregati mopafi mase'na rankrafa hu'na amanage hu'noe, Ra Anumzana kagra Anumzamoke! Israeli naga'ma osi'ama mani'naza naga zamahe hana hu'za nehano? **14** Hagi anante Ra Anumzamo'a amanage huno

nasami'ne, **15** Vahe'mofo mofavremoka, Jerusalemi kumate'ma
mago'ama mani'naza vahe'mo'za hu'za, kafuhe'zane kagranema
magokama kinama hutama mani'naza nagamotane maka Israeli
vahe'motagu'enena hu'za, Ra Anumzamofo tava'ontetira atre'za
afete umani'nazageno, ama mopa eri santihareho huno tagri
ko tami'ne hu'za Jerusalemi vahe'mo'za nehaze. **16** E'ina
hu'negu amanage huo, Ra Anumzana Agra Anumzamo'a
amanage hie, Zamahe kasopoge'za ru vahe mopafina mago
mago hu'za umanizageno, zamahe panani huge'za ru vahe
kumapina umani emanu hu'nazanagi, osi'a knafima umani'naza
kumatmimpina Nagra mono nozmigna hu'noe. **17** E'ina hu'negu
amanage huo huno Ra Anumzana Agra Anumzamo'a hu'ne,
ru moparegama umani emanima hu'nazaregatira tamavre atru
hute'na, Israeli mopa ete tamigahue. **18** Hagi ete rukrahe
huza mopazmire'ma esu'za Nagri navure'ma kasrino havizama
hu havi anumzamofo amema'aramima me'neana emeri atre
vagaregahaze. **19** Ana hanage'na Nagra magoke zamagu
zamagesa nezamina, kasefa avamu zamagu'afina antegahue.
Ana nehu'na hankavetino havegna hu'nea zamagu'a eri netrena,
kasefa zamagu'a zamigahue. **20** Ana hanuge'za tra keni'ane
kasegeni'anena kegava nehu'za avaririgahaze. Ana nehu'za
zamagra Nagri vahe mani'nage'na, Nagra zamagri Anumza
manigahue. **21** Hianagi havi anumzamofoma amagema nente'za
kasrino havizama hu'nea zamofoma amage'ma antesia vahera
zamagrama hu'naza zamavu'zmavate ante'na knazana zamitere
hugahue huno Ra Anumzana Anumzamo'a hu'ne. **22** Hagi anante
Serabimiema nehaza ankeromo'za zamagekona rutare'za hare'za
nevazageno'a wilimozanena magoka nevazageno, Israeli vahe
Anumzamofo hihamu masa'amo'a zamasenirega me'nege'na

ke'noe. 23 Hagi Ra Anumzamofo masazamo'a, rankumapintira
atreno marerino zage hanati kaziga me'nea agonamofona
onagamu umane'ne. 24 Anama hutegeno'a ava'nagna zana
negogeno Avamumo'a navresga huno Babilonima kinama
hu'nazare vu'ne. Hagi anante'ma navrenoma vigeno'a ana
ava'nagna zamo'a vagare'ne. 25 Ana higena Ra Anumzamo'ma
naveri'ma higenama maka zama ke'noa zantamina kinafima
mani'naza vahera zamasmi vagare'noe.

12 Ra Anumzamo'a amanage huno nasami'ne, 2 Vahe'mofo
mofavremoka, keontahi vahe amu'nompi mani'nane. Zamavuma
ke'zana zamavurga huzmante'neanagi, zamavua nonkaze,
keagama antahi'zana zamagesa huzmante'neanagi, keaga
nontahize. Na'ankure zamagra keontahi vahe mani'naze. 3
E'ina hu'negu vahe'mofo mofavremoka, zage ferupi kagra
fenonka'a retrotra hunka kina ome hu'naku'ma neviza hunka
nevuge'za kageho. Kagra'a kumateti'ma ru kumate'ma kinama
ome hunaku'ma viaza hunka nevuge'za keho. Hagi zamagra
keontahi vahe mani'nazanagi, Nagrama nagesama antahuana,
e'inama hananke'za zamagra ke'za antahiza hugahaze. 4
Hagi negesagenka, zageferupi fenonka'a eri fegi atrenka retro
nehugen, kinagama sena kinama huzmante'za zamavare'zama
nevaza vahekna hunka vuo. 5 Hagi nege'nagenka have
kuma kegina hagenkro hutenka, fenonka'a erinka ana kampinti
frenkrohuramio. 6 Hagi rehanima nehanigenka negesagenka
kuka'a erinka kafunte nentenka, atrenkama vanana mopama
kezankura kavogasafina tavrave erinka refite'nenka vuo. E'inama
hananana Israeli vahe'mo'za kagehogu avame'name'za tro
hugantoe. 7 Hige'na Ra Anumzamo'ma nasami'nea kante
antena ana zana hu'noe. Kina vahe'mo'zama nehzaza hu'na

ferura fenoni'a eri megi netre'na, kinaga kuma have kegina,
nazanuti kafina hagenkro hu'noe. Hagi kinagama hanintirima
higena, fenoni'a nafunte erigonefi'na negazage'na vu'noe. **8** Hagi
nanterama segeno'a, Ra Anumzamo'a amanage huno nasami'ne,
9 Vahe'mofo mofavremoka keontahi Israeli vahe'mo'za e'i na'a
nehane hu'za kantahi onke'nazafi? **10** Hagi amanage hunka
zamasamio, Ra Anumzamo'a amanage hie, Ama avamezama
hua avamezamo'a Jerusalemi kumapima nemaniza ugota kva
vahe'ene maka Israeli vahe'mo'za kesaza avame'za hue. **11** Hagi
amanage hunka zamasamio, tamagrama hanaza zamofo avame'za
nagra nehuankita, ama ana zana tamagrite efore hugahie. Hagi
tamagrira ha' vahe'mo'za kina eme huramante'za tamavre'za ru
moparega vugahaze. **12** Hagi zagema ufrenigeno'a Jerusalemi
kumate ugota kva ne'mo'a fenozama'a afunte erigonefino vugahie.
Hagi kumamofo have kegina kafiza hagenkro hu'neza avre
atiramigahaze. Hagi avugosafina tavrave refite'neno atre'noma
vania mopa onkegahie. **13** Hagi kukoni'a rutarente'nenugeno
ana kukomo azerigahie. Ana hutena avre'na Babiloni va'nena
Babiloni mopafi umanisianagi ana mopa onke mani'neno frigahie.
14 Hagi agri'ma manigaginte'naza vahera zahopi zamazeri
panani hutregahue. Hagi eri'za vahe'ane, sondia vahe'anena
bainati kazina anoma'a eri atretena ana bainati kazinteti
zmavaririgahue. **15** Hagi zamahe panani'ma hanuge'zama mago
mago hu'za ru moparegane ru kumatamimpima umani eman
hanu'za, Nagrikura Ra Anumza mani'ne hu'za ke'za antahi'za
hugahaze. **16** Hianagi osi'a nagama zamagu'ma vazisugen'o'ma
bainati kazinteti'ma zamahenofrisageno, agatonto zamo'ene
ruzahu ruzahu kriramimo'ma zamahe ofrisia vahe'mo'za maka
kefoza huno hi'mnage avu'avazazmia anama vanaza mopafi

vahetmintera huama nehu'za, Nagrikura Ra Anumza mani'ne
hu'za ke'za antahi'za hugahaze. **17** Hagi Ra Anumzamo'a
amanage hu'ne, **18** Vahe'mofo mofavremoka, kagogonefena
kahirahiku nehunka, ne'zane tinena no. **19** Hagi ana mopafi
vahera amanage hunka zamasamio, Israeli mopafima Jerusalemi
kumate'ma mani'naza vahekura, Ra Anumzana hankavenentake
Anumzamo'a amanage hie, zamagogogu nehu'za zamahirahi
nerena ne'zane tinena negahaze. Na'ankure maka anampima
nemaniza vahe'mo'zama hafra nehu'za, vahera ohefri ahefri
nehaza zanteku huna mopazmifintira miko zantamina eri fanane
hanugeno, mago'zana omnetfa hugahie. **20** Hagi vahe'ma
nemaniza kuma'mo'a havizantfa hinkeno, mopa zamimo'enena
havizantfa hugahie. E'ina hinkeno Nagrikura Ra Anumza mani'ne
hu'za ke'za antahi'za hugahaze. **21** Hagi Ra Anumzamo'a
amanage huno nasami'ne, **22** Vahe'mofo mofavremoka, Israeli
mopafima mani'naza vahe'mo'za mago kea amanage hutere
nehaze, knamo'a tagatere tagatere nehigeno, avanagema
tasami'nana kemo'a amne zankna huno nena raga'a nore
nehaze. **23** Hagi amanage hunka zamasamio, Ra Anumzana
Agra Anumzamo'a amanage hie, Zamagrama nehaza nanekea
eri atra'enkeno, Israeli agu'afina mago'enena ana nanekea
osugahaze. Hanki mika avanagna zama kenana zamo'ma
efore'ma hania knamo'a hago kofta nehie hunka zamasamio. **24**
Hagi Israeli vahepina mago'anena havige ava'nagene havige
kasnampa kenena huama osugahaze. **25** Na'ankure Nagra Ra
Anumzanki'na nanknahu nanekema hunaku'ma hanuana amne
hanugeno, ana zamo'a fore hugahie. Hagi ana kemo'a zazatera
meno ovugahianki, tamagri knafi ana zana fore hugahie. Tamagra
keontahi vahe mani'nazanki'na, nanknahu nanekema huankemo'a

nena raga'a rentegahie huna Ra Anumzana, Anumzamo'na hue.
26 Hagi Ra Anumzamo'a mago'ane amanage huno nasami'ne,
27 Vahe'mofo mofavremoka ko, Israeli vahe'mo'za amanage
nehaze, avanagna zama ke'nea zamo'a kora forera osanigeta
za'za kna manita vugahune nehu'za, kasnampa kema nehiana
afete me'nea zanku nehie hu'za nehaze. 28 E'ina hu'negu
amanage hunka zamasmio, magore huno kema hunte'noa
ke'ni'amo'a zazatera meno ovugahianki, ame hu'na ana ke'ni'a
eri nенарага regahue huno Ra Anumzana Anumzamo'a hie
hunka huo.

13 Ra Anumzamo'a amanage huno nasami'ne, 2 Vahe'mofo
mofavremoka, Israeli mopafi vahe'mo'zama havige kasnampa
kema zamagra'a zamagesafinti'ma nehaza vahera amanage
hunka zamasamio, Ra Anumzamo'a amanage nehianki antahiho.
3 Hagi Ra Anumzana hankavenentake Anumzamo'a amanage
hu'ne, Neginagi kasnampa vahe'mo'za mago'zana nonkazanagi
zamagra'a antahintahima nevaririza vahe'mo'za kva hiho. 4 Hagi
Israeli vahe'mota, tamagri kasnampa vahe'mo'za haviza hu'nea
kumapi nemaniza afi kragna hu'naze. 5 Hagi ana vahe'mo'za
kumamofo have keginama havizama hu'neana, mareriza
eriso'ea osu'naze. Ana hu'neanki'za Ra Anumzamo'ma huhampri
ante'nea kna zupama ha'ma eme nehanage'za hankaveti'za
hara osugahaze. 6 Hagi zamagra havige ava'nagnaza nege'za,
havige kasnampa nehu'za, Ra Anumzamo tasamia ke nehune
hu'za nehazanagi, Nagra ozmasami'noa naneke nehu'za,
zamagra ana naneke zmimo'ma eama'ma hanigu avega ante'za
nemanize. 7 Hagi tamagra havige avana negeta, Nagra
osu'noa kegura Ra Anumzamo hie huta havige kasnampa kea
nehaze. 8 E'ina hu'negu Ra Anumzamo'a amanage hu'ne,

Na'ankure tamagra havige nehuta, havige ava'nane negazagu,
Nagra hara reneramantoe huno Ra Anumzamo'a hu'ne. **9**
Hagi havige ava'nagna zama nege'za, havige kasanampa
kema nehaza kasnampa vahera nazana erisga hu'na hara
huzmantegahue. Ana hanuge'za Nagri vahe kevufina omanige,
Israeli vahetmima zamajima krente'naza avontafepina zamagia
kreontegahaze. Ana hanage'za Israeli mopafina vano osugahaze.
E'ina hanuge'za Nagrikura Ra Anumza mani'ne hu'za ke'za
antahi'za hugahaze. **10** Na'ankure havige kasnampa vahe'mo'za
vahe'ni'a rezamatga hu'za amanage nehaze, hazamoke'ma
hu'nefina hara omane'nigeta tamarimpa fru huta manigahaze
hu'za nehaze. Hagi vahe'mo'zama kumamofo have keginama
hana'ma kate'za hunaku'ma nehazage'za, ana kasnampa
vahe'mo'za efeke masave fre'za eri nehananaze. **11** E'ina hu'negu
kuma keginare'ma efeke hapama fre hanane'naza vahera,
ana keginamo'a traka huno masegahie huta zamasamiho.
Nagra tusi ko'ene komopa ko'ene, ununko'ene huntanenkeno
ana have kegina eri fragu vazitregahie. **12** Hagi ana kuma
have keginamo'ma tapage'ma huraminige'za ana kasanampa
vahera zamantahige'za, efeke hapama fre hanane'naza
kegina, iga me'ne hu'za hugahaze. **13** E'ina hu'negu Ra
Anumzana Agra miko'zama kegavama hu'nea Anumzamo'a
amanage hie, Narimpa ahe'zamante'na ununkora hunente'na,
nasivazi zamante'na ko'ene komopa ko'enena huntanenkeno
vazihagagino maka zana eri havizantfa hugahie. **14** Hagi efeke
pentima hu'naza kuma have kegina eri tapage hutre'nugeno
mopafi masenigeno tra'ma anteta tro'ma hu'naza tra'mo'a
amate megahie. Hagi ana have keginamo'ma faragu vaziramino
tamarefitenketa, Nagrikura Ra Anumza mani'ne huta keta

antahita hugahaze. **15** Anama hutena have keginane, ana keginare'ma efeke hapa'ma fre hananenaza vahe'enena, narimpa ahe'zana zamagrite rupopo huvagaregahue. Ana nehu'na amanage hu'na hugahue, have keginamo'a nomanegeno, ana keginare'ma efeke hapa'ma fre hananenaza vahe'enena omani'naze hu'na hugahue. **16** Israeli kasnampa vahetmima, Jerusalemi kumaku'ma kasnampa kema nehu'za, havige ava'nama nege'za, ha'zana omanegahianki fru huta maniho hu'zama nehaza zanena omanegahie huno Ra Anumzamo'a hu'ne. **17** Hagi vahe'mofo mofavre'moka, menina Israeli a'nemo'zama zamagra'a zamagesafinti'ma havige kasnampa kema nehaza a'neramina, zamazeri haviza hu kasnampa ke huzmantenka, **18** amanage huo, Ra Anumzana Mikozama Kegavama Hu'nea Anumzamo'a amanage hie, Safezanema nehuta vahe zamazampi avasase zama tro huta antani nezmaneteta, travavema hatita zamasenire'ma anaki nezmanetaza zamo'a krifufima zagagafa azeriaza huno vahera aze'nerianki kva hiho. Hagi tamagesama antahi'zana vaheni'a zamazeri haviza hugahune huta nehuta, tamagra knare huta manigahune huta nehazanagi, Nagra ana zantamina eri haviza hutregahue. **19** Hagi osi'a bali azampi eri avite'za tro hu'naza bretine, osi'a breti ankra'a Nagri vahepintira enerita, Nagri nagia eri haviza hu'naze. Ana nehuta ofriga vahetmina zamahe nefrita, friga vahetamina zamatrage'za nemanizageta ofrita knare huta manigahaze huta havigea nezmasamize. **20** E'ina hu'negu Ra Anumzana Mikozama Kegava Hu'nea Anumzamo'a amanage hie, Safezama huta vahe zamazampi asama tro'ma huntazageno krifufima namama azeriazama huno zamazeri'nea zana zamazampintira rutraga hutre'nugeno, namaramimo'za krifufinti aru kraruvazi'za hare'za

frazankna hu'za kinafintira fru hu'za manigahaze. 21 Ana nehu'na tavaravema hatita zmasenire'ma anaki zmante'naza zana eri tagato hutre'na, vaheni'a zamagu vasinuge'za mago'enena tamagri hihamufina omanigahaze. E'ina hanugeta Nagrikura Ra Anumza mani'ne huta keta antahita hugahaze. 22 Na'ankure tamagrama havige zama hazazamo fatgo vahe'mokizmia muha zana eri netraze. Hianagi Nagra mago zana hu'na zamazeri zamasunkura osu'noanagi, tamagra zamazeri fatgo hazage'za kefo avu'ava zana atre'za zamagura ovazi'naze. 23 E'ina hu'nazagu havige avanagna zama negaza a'nemota ru'enena nonketa, safezanena osugahaze. Tamagri tamazampintira vahe'ni'a zamagu vazi'hena, Nagrikura Ra Anumza mani'ne hu'za ke'za antahiza hugahaze.

14 Hagi anante mago'a Israeli ranra vahe'mo'za e'za navuga emanizageno, 2 Ra Anumzamo'a amanage huno nasm'i'ne, 3 Vahe'mofo mofavremoka, ama kva vahe'mo'za kaza osu havi anumzazmnia zamagu'afi avrenente'za, kefo avu'ava'ma nehu'za tanafa'ma hanaza zana zamavuga ante'naze. E'ina hu'negu zamatrenuge'za Nagri'enena nanekea osugahaze. 4 E'ina hu'negu Ra Anumzana miko zama kegavama hu'nea Anumzamo'a amanage hie hunka zamasamio, Mago Israeli vahe'mo'ma kaza osu havi anumzama avre agu'afima nenteno, kefo avu'avazanu traka huno mase'za avuga tro hunenteno, kasnampa vahete'ma ne-ea vahera agrama hu'nenia avu'avazante ante'na Ra Anumzamo'na Nagrani'a kenona huntegahue. 5 E'ina hu'na Nagri'ma natre'za kaza osu havi anumzama nevaririza Israeli vahe'mokizmi zamagu'a eri rukrahe hugahue. 6 E'ina hu'negu Ra Anumzana Mikozama Kegavama Hu'nea Anumzamo'a amanage hie hunka Israeli vahera zmasmio,

Kaza osu anumzana tamefi hunemita, hi'mnage avu'ava'ma
nehaza zana atreta tamagu'a rukrahe hiho. 7 Hagi Israeli
vahe'mo'o, ruregati'ma enemania vahe'mo'ma Nagri'ma amefima
hunenamino, kaza osu havi anumzama agu'afi avre nenteno, kefo
avu'avaza nehuno, tanafa'ma runo trakama hania zama avuga tro
hunenteno Nagri antahintahima erinaku'ma kasnampa vahetema
nevia vahera Nagra Ra Anumzamo'na kenona huntegahue. 8
Ana nehu'na namefi humi'na ha'rentena mago avame'za azeri tro
nehu'na Israeli vahe'ni'afintira ahe kasopetresugeno omanigosie.
E'ina hanuge'za Nagrikura Ra Anumza mani'ne hu'za ke'za
antahi'za hugahaze. 9 Hagi kasnampa ne'mo'ma kasnampa
kema haniana, e'i Nagra revataga hanugen hugahianki'na,
vahe'ni'amokizmi amu'nompintira naza rusute'na ahe frigahue.
10 Hagi kasnampa vahe'ene kasnampa vahete'ma mago'a
antahintahima erinaku'ma neaza vahe'enena magozahu knaza
zamigahue. 11 E'ina hanenke'za Israeli vahe'mo'za mago'anena
kana atreza havi kampina ovuge, kumira huza zamazeri
pehena osugahaze. Hianagi zamagra Nagri vahe mani'nage'na,
Nagra zamagri Anumza manigahue huno Ra Anumzana
mika zama kegavama hu'nea Anumzamo'a hu'ne. 12 Hagi
Ra Anumzamo'a amanage huno nasm'i'ne, 13 Vahe'mofo
mofavremoka, mago mopafi vahe'mo'zama Nagritema mani
fatgoma osu'za kumi'ma hanage'na, nazana rutare'na ne'zazamia
eri fanane nehu'na, agatontoza atrenugeno ne'zanku hu'za
zagagafamo'za fri vagaregahaze. 14 Hagi Noa'ma, Danieli'ma,
Jopu'ma hu'za ana mopafina manigahazanagi, zamagri fatgo
avu'avazamo'a zamagura ovazizasine. Nagra mikazama kegava
hu'noa Ra Anumzamo'na nehue. 15 Hagi Nagrama mago'a afi
zagaramima huzmantesuge'za ana mopafi vahe'ma zamahe'za

neza eri vagamare'nageno, mopamo'ma havizama hinkeno'a
vahe'mo'za koro hu'za ana mopafina vano osugahaze. **16**
Tamage hu'na Nagrama miko zama kegavama hu'noa Ra
Anumzamo'na huankino e'i ana 3'a vahetmina anampina
mani'naresina, ne'mofazmia zamagura ovazitfa hazasine.
Zamagriake zamagu nevazi'na, anama nemaniza mopa eri
havizantfa husine. **17** Ana huge ha' vahe humzantoge'za
ana mopafi vahe'ene afukra zminena eme zamahe'za eri
vagarazasine. **18** Tamage hu'na Nagra kasefa hu'na mani'noa
Ra Anumzamo'na huankino, e'i ana 3'a vahetmima anampina
mani'naresina ne'mofazmia zamagura ovazi'tfa hazasine. Hagi
zamagrama hu'naza fatgo zamavu'zamava zantera zamagrike
zamagu nevazi'na mopazmia eri havizantfa husine. **19** Ana
huge ruzahu ruzahu kefo krirami netre'na, narimpahe'zana ana
mopafi eri tagitrogeno vahe'ene afukra zaminena amanezama
hiaza hu'za zamahe'za eri vagaresine. **20** Tamage Nagra kasefa
hu'na mani'noa Ra Anumzamo'na huankino, Noa'ma, Danieli'ma,
Jopu'ma hu'za anampina mani'naresina ne'mofazmia zamagura
ovazi'tfa hazasine. Hagi zamagri'a fatgo zamavu'zamava zamo'a
zamagrike zamagura vazisine. **21** Na'ankure Ra Anumzana
Anumzamo'a amanage hu'ne. Ama'na 4'a knazana atrogeno
zamazeri haviza hisine, ana 4'a knazana, ha' vahe humzantege,
agatontoza atrege, afi zagarami huntege, kefo kri atrege hugeno
Jerusalem kumapi vahe'ene afu krazminema zamahe hanara
huresina tusi havizantfa hisine. **22** Hianagi anampina mago'a
vahe'ma zamatre'nage'za mani'naza vahe'ene ne'mofazmine
zamavare'za e'nage'za, tamagrane Babiloni emanigahaze.
Hagi ana vahe'mo'zama zamavu'zamava eme nehu'za mago'a
avamename zama eme hanaza zama kesunka, ruzahu ruzahu

knazama atrogeno'ma Jerusalemi kuma'ma eri havizama hia
zana kagra'a kavufinti kegahane. 23 Hagi ana mofavre'ramimofo
zamavuzmava'ene mago'a avamename'ma hanaza zama
kesunka, tusi kasunku huzmantegahane. Na'ankure Agra amnea
ana zana osu'noanki, agafa'a me'nere anara hu'ne hunka kenka
antahinka hugahane huno Ra Anumzamo'a hu'ne.

15 Hagi Ra Anumzamo'a amanage huno nasm'i'ne, 2 Vahe'mofo
mofavremoka, hagagema hu'nea waini rampa'amo'a zafafi
zaferamimofo rampa'a agaterenefi? 3 Hagi ana waininofimofo
ramparetira eri'za mago'a knare'zana tro nehu'za, mago'a eri'za
kavoma hantinte'zana trora nehzafi? 4 Hagi ana waini rampama
tevefima kresageno'ma urefa erefa'ama nereno amunoma'ama
tegege vazintesiama'a eri'za mago'azana trora hugahazafi? 5
Hagi tevema ore'nere'ma eri'za mago'a zama tro huga'ma osu'nea
waini rampa, inankna hu'za tevemo'ma tegege vazinte'nesiama'a
eri'za mago'azana trora hugahaze? 6 E'ina hu'negu Anumzana
Mikozama Kegavama Hu'nea Ra Anumzamo'a amanage hu'ne,
Waini teve rampama zafafi tevenema eri havlama hu'na tevema
kroaza hu'na Jerusalemi kumapi vahera namefi huzamigahue. 7
Hagi namefi huzminenkeno tevefinti atre'za atiramigahazanagi,
ete tevefinke kasagegahaze. E'ina hanugeta Nagrikura Ra
Anumza mani'ne huta keta antahita hugahaze. 8 Nagra mopazmia
eri havizantfa hugahue. Na'ankure zamagra Nagrira tamage
hu'za namagera onte'naze huno Ra Anumzana Mikozama
Kegava Hu'hea Anumzamo'a hu'ne.

16 Ra Anumzamo'a mago'ane amanage huno nasm'i'ne, 2
Vahe'mofo mofavremoka, Jerusalemi kumate vahe'mo'zama
hi'mna vuno kasri'nea avu'ava'ma nehaza zana eri ama
hunka nezmasaminka, 3 Jerusalemi kumapi vahera tamagra

Kenani vahe'mofo mopafi fore hu'nazankino, neramafa'a Amori neki, neramarera'a Hiti a' mani'ne huno Ra Anumzamo'a hie hunka zamasamio. 4 Hagi fore'ma hu'nanana ama'na hu'ne, kasema kantea knarera mago vahe'mo'e huno karikonofira taga huge, tinura koranka'a sese hugantege, hagea fregantege, tavravefina kazeri anovazi kantegera osu'ne. 5 Ana nehazageno mago'a vahe'mo'za kasuntagi kante'za kazeri so'ea osu'nazanki, megia trazampi katre'naze. Na'ankure kasema negantege'za zamavaresra hugante'naze. 6 Hige'na karanka enevu'na koana, kagra korampi ki'mu'nerenka mase'nanke'na, negage'na amanage hu'noe, ofri kasefa hunka manio! Hu'na nehu'na koranka'agura, ofri kasefa hunka manio hu'na hu'noe.

7 Kegava hugantogenka trazankna hunka marerinka ome nena hankeno, kavasasemo'a kagateregeno aminka'amo'a nena higeno, kavufafina kazokara tagi'neanagi, kukena osu kavapako mani'nane. 8 Ana hanke'na karanka ete mago'ane enevu'na kagoana, ko ve eri avamente kavufga avapa'ma mani'nankena, tavraveni'a eme rutare'na refitegante'noe. Ana nehu'na, hunagru hugante'na Nagri su'a kagra mani'nanankina, a' erigantegahue hu'na Ra Anumzamo'na hu kase hugante'noe.

9 Nagra tina fregante'na kavufgaretira korana sese hugantete'na, masavena fregante'noe. 10 Ana hute'na avasese'ane efeke zaza kukena eri'na hunegante'na, kagia nona kagafina hunegante'na, kasenirera knare tavrave anakinegente'na, knarezantfa hu'nea nakreku kavufgarera antanigante'noe. 11 Ana nehu'na asana kazampina antani negante'na, pasesua knankempina hunegante'na zago'amo marerisa zanteti kavasasea hugante'noe.

12 Ana nehu'na maremarea kagonafi renegante'na, rinia kagesafinena renegante'na, kuinimo nentania hentofa fetori

kasenifina antanigante'noe. **13** E'ina hu'na golireti'ene silvareti'ene konariria hunegante'na, knare huno zamana zamana hu'nea efeke tavravenu kukena hugante'noe. Hagi ne'zama kami'noana knare huno kne osi'osi hu flauaki, tume rima'agi, olivi masavenki hu'na kami'noe. Ana hugenka ra hunka konariri kamo'a kagateregenka kuini a'kna hu'nane. **14** Hagi ana'ma hankeno'a, konariri zanka'amofo agenkemo'a maka kumatega haru haru hu'ne. Na'ankure marerifa zantmima kami'noa zamo konararika'a eri knarezantfa hu'ne, huno Anumzana Mikozama Kegava Hu'nea Ra Anumzamo'a hu'ne. **15** Hianagi kagraka'a konaririgu antahinkeno raza nesegenka, ra kagi e'nerinka savri avu'ava zana hu'nane. Inankna vahe'ma kante'ma evia vahe'enena savri nehunka, ana konariri zanka'a ana vahetami ome zami'nane. **16** Hagi mago'a knare kukenaka'a erinka havi anumzantami kumatami avasasea hunezmantenka anampi savri avu'avara hu'nane. E'inahu avu'ava zana eri fore osuga avu'ava eri fore hu'nane. **17** Hagi golireti'ene silvareti'enema marerisa konariri'ane zantmima tro'ma hugante'noana erinka ve havi anumzantami tro huzmantenka, ana havi anumzantamine savri avu'avara hu'nane. **18** Hagi Nagrama kami'noa avasese'ane kukenanuti zamazantetima tro'ma hunte'naza havi anumzamofo kofinentenka, Nagrama kami'noa olivi masavene mnanentake'za insensinuti kre mna nevunka monora hunentane. **19** Hagi knare huno kne osi'osi hu flauaki, tume rima'agi, olivi masavenki hu'nama ne'zama nesana zanema hu'nama kami'noana, havi anumzamofo avuga knare mna vu'zane hunka ofa hu'nane huno Anumzana miko zama kegava hu'nea Ra Anumzamo'a hu'ne. **20** Ana'ma hutenga Nagrama kami'noa ne'mofara zamahenka havi anumzantaminte kresramna vunte'nane. E'inahu monko avu'ava'ma huwavama

hunka nevanana knare hunoganteo? **21** Hagi mofavreni'aramina zamahenka kaza osu havi anumzantaminte tevefi ofa Kresramana vu'nane. **22** Hagi ana kasri avu'ava'ma nehunka, savari hunka vanoma nehunka osi'ma mani'enkama hu'nana kavukava zana kage kani'nano! Kagra kavufga kavapa'ma mani'enkama kagra korampi'ma ki'mu'ma re'nana zankura kagesa nontahine. **23** Maka kefo avu'ava'ma hu'nana zantera, rama'a knazana kagritera efore hugahie, huno Anumzana mika'zama kegavama hu'nea Ra Anumzamo'a hu'ne. **24** Hagi rankumamofo amu'nompina kaza osu havi anumzantmimofo mono'ma hunte kumatamina avasese huntetere hu'nane. **25** Hagi kumamofo kamo'ma maka vuno enoma hu'nerega havi anumzatmimofo mono hunte kumatami tro husga huntetere nehunka, konaririka'a azeri hi'mnage nehunka kante'ma enevaza vahe'enena savarira nehane. **26** Hagi kagri'ma negage'za tusiza hu'zama kavesinegantaza Isipi vahe'ene savrira hunka nevunka, nazeri narimpa nehane. **27** E'ina hu'negu nazana rusute'na hara renegante'na, mopaka'a eri osi hu'noe. Ana nehu'na zamagraguke'ma antahi ha' vahetami, Filistia mofa'neramomofo zamazampi kavrentoge'za, kefo monko kavukva zankura tusi antri nehu'za zamagogogu hu'naze. **28** Ana nehunka mago'ane Asiria vahe'enena savri hunka monko'zana hu'nane. Na'ankure monko zama hana zamo'a onkagaretfa hu'ne. **29** Ana nehunka mago'ane Babiloni vahe'ene ana savri monko avu'ava zana ome hu'nananagi, ana monko avu'ava zamo'a onkagaretfa hu'ne. **30** Hagi kagu'afina monko avu'avamo aviteno kri kami'ne. Na'ankure zamagaze osu monko anemo'zama nehzaza hunka ana monko avu'avarra nehane huna Miko'zama Kegavama Hu'noa Ra Anumzamo'na nehue. **31** Hagi rankumamofo neone kamo'ma

ometre emetre'ma hu'nerega havi anumzamofo mono'ma hunte kumatamina tro huntsga huntetere hu'nane. Hianagi kagra mago'a monko a'nemozama nosazaza hunka kagranema monko'zama hugantaza vahetetira zagoa e'ori'nane. 32 Kagra vere a'mo nevema atreno savri huno vano hiankna hunka, negave'ene hugazana kenka antahinka osu'nana vene'nene hunka vano nehane. 33 Hagi monko a'nemo'za zagore monko zana hu'za vano nehazanagi, kagra maka kazigati'ma aza vene'neramina zago nezaminka masave hunka zamavranke'za, kagri'enena eme monkozana nehaze. 34 E'ina hu'negu kagra ruga'a monko a'mofaknara osu'nane. Hagi vene'nemo'za monko'za hanune hu'za zagoa kami'za kantahi onke'nazanki, kagra'a zagoa nezaminka ke hanke'za monko'zana kagri'enena eme hu'naze. 35 E'ina hu'negu monko a'moka Ra Anumzamo'ma nehiankea kama antahio! 36 Anumzana Mikozama Kegava Hu'nea Ra Anumzamo'a amanage hie, Kagra vahe'mofoma azeri agafihe kavukva nehunka, oku kavufga zamaveri hunka monkozana hunka vano nehunka, kasrino hi'mnama vu'nea kaza osu havi anumzamofonte mofavreka'a ahenka korama'a ofa hunane. 37 E'ina hunanku monkozama nehunka musema hunka vanoma nehanke'zama kavesima negantaza vahe'tamine, zamavaresrama hunegantaza vahetaminena maka zamavare atru hugahue. Maka zamavare atru hanuge'za manigagine'za negagesage'na kukenaka'a hatetresugenka kavufa kavapako mani'nesanke'za mika oku kavufga kegahaze. 38 Ana nehu'na vema ante'naza a'nemo'za savri'ma hazage'za keaga huzmante'za knama nezami'zankna hu'na knazana negami'na, vahe'ma zamahe frizageno'ma nezamizankna knaza kamigahue. Ana nehu'na tusi narimpa ahegante'na kahe frigahue. 39 Ana

hute'na kavesima kante'za monko'zama hunegantaza vahe'mofo
zamazampi kavre anta'nenke'za, ana vahe'mo'za kazeri haviza
nehu'za, monkozama nehana kumatamine, havi anumzantamima
mono'ma hunentana nontaminena kahe'za tagana vazitregahaze.
Ana nehu'za kukenaka'ane kavasese zanka'anena kahe'za eri
hatetresagenka kavufga avapako manigahane. **40** Ana rama'a
vahetami ke hanage'za e'za havenknonu eme kahe frite'za, bainati
kazinknonu kavufga ru krakru hu osi'osi hutregahaze. **41** E'ina'ma
hu'nana kavukva zantera rama'a a'nemo'za negagesage'za,
ana vahe'mo'za nonka'a taginte'za knazana kamigahaze. E'ina
hu'na monkozama nehana kavukvara asevazi kantesugenka,
ete ru'enena monkozama hugante'nazegura vahera mizana
osegahane. **42** Ana hanugeno narimpama ahegante'noa zamo'a
ome vagarenigeno, kanivema reneganta zamo'a amne hina
mago'enena narimpa aheogantegahue. **43** Na'ankure kote'ma
osi'ma mani'nanke'nama knare'zama hu'na kegava krigante'na
e'noa zankura kagesa ontahi, kefo avu'ava'zana hunka nazeri
narimpa ahe'nane. E'ina hu'nanku kasrino hi'mnagema hu'nea
avu'avazama hu'nana zantera nona hu'na knazana kamigahue
huno Anumzana Mikozama Kegava Hu'nea Ra Anumzamo'a
hu'ne. Ana hanugenka ko'ma hu'nana monko avu'ava zana
kagra mago'ane agaterenka osugahane. **44** Hagi ko, maka
vahe'mo'za kema hanafina kagrikura amanage hu'za hutere
hugahaze, mofa'amo'a nererama nehia avu'ava nevaririe
hu'za hugahaze. **45** Kagra negrera mofa mani'nanankino,
negrera'a nevenku'ene mofavre'araminkura zamagote'zmanteno
avresra huzmantene'nea a'mofo mofa mani'nane. Hagi
kagra kanunknahe'mofo nezmaganaga mani'nanankinka,
zamavenenehe'ine mofavre'zmigura zamagote'zmante'za

zamavaresra hunezmantaza a'nemokizmi nezmaganaga mani'nane. Hagi negrera'a Hiti a' manigeno negafa'a, Amori ne' mani'ne. **46** Hagi nunakamofo agi'a Sameriakino, mofane'aramine noti kaziga manigeno, negagna'a Sodomukino sauti kaziga mofa'ne naga'ane mani'ne. **47** Hagi kagra kefo avu'avazazmia nezmavaririnka, hi'mnage huno kasri avu'ava'ma nehzankna avu'ava zankera osu'nananki, zamagrira zamagaterenka maka kefo avu'ava zana hu'nane. **48** Kasefa hu'na mani'noa Ra Anumzamo'na tamage hu'na huanki, Sodomu'ene mofane'aramimo'za osu'nazankna avu'ava hu'nane huno, Anumzana miko'zama kegavama hu'nea Ra Anumzamo'a hu'ne. **49** Hagi nunakamo Sodomu'a amanahu kumi hu'ne, agrane mofane'amozanena zamavufaga ra nehu'za, rama'a ne'za nene'za mago zankura atupara nosazanagi, zamunte omnege'za atupama hu'naza vahera zamaza osu'naze. **50** Zamagra zamavufaga ra nehu'za hi'mnage zamavu'zmava Nagri navufina hu'naze. E'ina hu'nazagu mika vahera Nagra nezamage'na zamahe fri'noe. **51** Hagi Sameria'a kumira hu'neanagi, kagriria kagatereno rama'a kumira osu'ne. Na'ankure hi'mnage kumira kagra Sameriana agaterenka rama'a kumi hu'nane. Hagi tare nunaka'amokea kumira hu'na'anagi, osi'a knare hu'ne. Hianagi zanagrira zanagaterenka hi'mnage'ma hu'nea kumira hu'nane. **52** Hagi kagra tusi kagazegu huo, na'ankure kumi ka'amo'a kagateretfaza hu'ne. Hagi ana kumi'mo higeno nunaka'amokea kumi'zani'a omne vahekna hu'na'e. **53** Hianagi Sodomune mofane'aramimofo fenonema rohure'za eri'za vu'nazana, ete eri avite'nezmante'na, Sameriane mofane'aramimofo fenozmima rohu'ma re'zama eri'za vu'nazana ete erivite nezmante'na, kagri fenonena ana zanke hu'na eri avite'gantegahue. **54** Ana

hanugenka tamage hunka kagra maka zama hu'nana zankura
kagazegu hugahane. Nagrama kazeri havizama hanua zama
nunakamokema negesukea muse hugaha'e. **55** Hagi Sodomu'ene
mofane'aramimo'zane, Sameria'ene mofane'aramimo'zanena,
ete ko'ma mani'nazankna hu'za knare hu'za manisagenka,
kagrane mofanekanena ana huta koma mani'nazankna huta
knare huta manigahaze. **56** Hagi ko'ma knare hunka mani'enka
kavufga rama hana knafina, Sodomuna kefenkami atrenka
mago kea huomi'nane. **57** Hianangi e'i ana kefo avu'ava
zankamo'a eama hige'za maka vahe'mo'za ke'naze. Hagi menina
Siria mofa'nemozane, agri tava'ontema manigagi'naza kumapi
mofa'nemofozane, Filistia mofa'nemo'zanena hunte'za kagiza
neraze. **58** Hagi monko avu'ava'ma hunka kasrino hi'mnagema
hu'nea avu'ava'ma hu'nana zanter, mizama'a erigahane huno Ra
Anumzamo'a hu'ne. **59** E'ina hu'negu Ra Anumzana miko zama
kegava hu'nea Anumzamo'a huno, kagrama hu'nana kavukva
zante kazeri havi'zana hugahue. Na'ankure huvempama hunka
Nagri'enema huhagerafi'nana kea ruhantagi'nane. **60** Hianagi
ko'ma osi'ma mani'nanke'nama kagranema huhagerafi'noa
huvempa kegu nagesa nentahi'na, ana huhagerafi huvempagea
eri hankaveti'nena mevava huhagerafi huvempage megahie.
61 Hagi nunaka'amo'ene negagana'enema kagrite'ma ne-
esakenka kagrama hu'nana avu'ava zanku kagesa nentahinka
kagazegu hugahane. Hagi nunaka'amofone negagananena
mofaka'ararenkna hu'na kamigahuanagi, huhagerafi huvempa
kema hu'noa zanter onkamigahuanki, amne kamigahue. **62** Hagi
huhagerafi huvempa kea kagri'ene eri kasefa hu'na hanugenka,
Nagrikura Ra Anumza mani'ne hunka kenka antahinka hugahane.
63 Hagi maka kumi'ma hu'nana kumika'ama atregantesugenka

ana zanku'ma kagesama nentahisunka, kagazegu nehunka
mago kea osu akohenka manigahane huno Anumzana miko
zama kegava hu'nea Ra Anumzamo'a hu'ne.

17 Ra Anumzamo'a amanage huno nasm'i'ne, 2 Vahe'mofo
mofavremoka, fronka kema kasamisua nanekea Israeli vahera
zamasnio. 3 Amanage hunka zamasamio, Mikozama Kegava
Hu'nea Ra Anumzamo'a amanage hie hunka zamasamio, mago
ra tumpamofona ra agekonarare hunte'negeno, azokamo'a
za'za huno ruzahu ruzahu avonkrenakre huno konarari'amo'a
agatere'nea tumpamo hareno Lebanonzi zafafi vuno sida zafamofo
amumpa ome nekafrie. 4 Hagi ana sida zafa amumpama
akafriteno'a erino keonke'zama zagore'ma netraza vahe'mokizmi
mopafi vuno, ana vahe'mokizmi rankumapi ome kri'ne. 5 Hagi
ana'ma huteno'a ana tumpamo'a mago'a avimzana Israeli
mopafintira erino vuno, knare huno tima'ane mopafi ome
hankre'ne. Hagi anama hankre'neana, rama'a ti me'nefi wilo
zafa hankreankna huno ome hankre'ne. 6 Ana avimzamo'a
hageno waini zafa sampreno, mopafi rafu'nare'ne. Hagi ana
azankunamo'za eri arufagagi'za ana tumpama mani'nerega
zamavugosa hunente'za, agata hage'za azankunara omere
emere hu'haze. 7 Hagi ete mago ra tumpamofona anahukna
huno ra agekona hunte'negeno, rama'a azoka me'ne. Hagi
ana waini zafamofo arafu'haramine azankunatmimo'za ana
tumpamo'a ti erino egahie hu'za zamagesa nentahi'za, rukrahe
hu'za ana tumpama mani'hea kaziga zamavugosa hunte'haze.
8 Hianagi ana waini zafama hankre'neana rama'a azankuna
reno rama'a ragarami renenteno, knare waini zafa fore hinogu
knare mopafi tinkenare hankre'ne. 9 Hanki Ra Anumzana
miko'zama kegavama hu'nea Anumzamo'a amanage hie hunka

zamasamio, ana wainimo'a knare huno hageno marerino raga reontegahianki, Nagra rafuna'a eri vatitrenugeno raga reontenigeno a'ninamo'a hariri hanigeno osaparegahie. Nagra amuhoa osu'na fru hu'na eri vati tregahuankino, mago hankave vahe'mo'a eme vati otresigeno rama'a sondia vahe'mo'zanena eme vati otregahaze. **10** Hagi ana wainima ete vatinoma krisiana, knare huno hagegahifi ko? Ifi zage hanati kazigati'ma esia zaho'mo eme eri hagage hugahio? I'o, anama knare'ma huno hageno mareri'nea mopafi mani'neno hagage hugahie. **11** Hagi Ra Anumzamo'a amanage huno nasm'i'ne, **12** Keontahi Israeli vahera amanage hunka zamasmio, Tamagra tumpamofo fronka kemofo agafa'a antahi ani' hu'nazafi? Babiloni kumate kini ne'mo'a Jerusalemi kumate eno, kini ne'ene ugagota kva vahe'araminenza zamavareno Babiloni vu'ne hunka zamasmio. **13** Hagi Juda kva vahe'mofo mofavre'ramimpinti mago ne' avreno ana ne'ene huhagerafi huvempage nehuno, agri agoragama mani'neno maka kema haniamma antahimisigura huvempage hu'ne. Ana nehuno ana mopafima ugagotama hu'naza kva vahetmina zamavareno Babiloni kumate vu'ne. **14** Hagi e'inama hu'neana Israeli vahe'mo'za hanaveti'za hara huonte'za, agri agorga mani'neza agri kema nevaririza mopazmire'ma manisagu huvempa kea hu'naze. **15** Hianagi Juda kini ne'mo'a Babiloni kini nera ha' arenenteno, ha'ma eme aza huza hanagu rama'a sondia vahetamine hosi afutaminena Isipi kumateti ome zamavarenka eno huno agri agi'ma erino Isipima unemania eri'za ne'a hunte'ne. Hagi ana antahintahi'amo'a ome knare hugahifi? E'i ana'ma hania zamo'a Babiloni kini ne'mofo azampintira rugraru vazigahifi? Nanekema huvempa huke huhagerafina'a kea ruhantgino atreno fregahifi? **16** Kasefa hu'na mani'noa Ra Anumzana Nagra

hankavenentake Anumzamo'na huankino, tamage huno Juda
kini ne'mo'a kinima azeri otigekema kema anakike huhagerafi
huvempa kema hu'na'a kini ne'mofo kumapi Babiloni frigahie.

17 Hagi Babiloni sondia vahe'mo'ma Juda vahe kuma'ma
avazagi kagiza mani'neza ha'ma hanaza zama kuma keginamofo
megi'ama mopama ante hihi hu'za mani'neza rama'a vahe'ma
zamahe fri'zama nehanageno'a, Isipi kini ne' Fero'a hankave
sondia vahe'a zamavareno egahianagi, zamaza osugahaze. **18**
Hagi Juda kini ne'mo'a kema ananekino huvempama hu'nea
kea ruha'nentagino Babiloni kini ne'enema huhagerafi'nea kea
ovariri'ne. Na'ankure agra azana ante nagamuteno huvempa
huteno, ana kea ovariri'neankino ana knazana agate'oregahie.

19 E'ina hu'negu miko'zama kegava hu'noa Ra Anumzamo'na
huankino, Nagri nagifima huhagerafi huvempa kema hu'neana
ruhanentagino ovariri'neankina, Nagra ana nona'a knazana
amigahue. **20** Nagra kukoni'a eri atranenkeno ana kukomo
azerinige'na avre'na Babiloni kumate knazana ome amigahue.
Na'ankure huvempama hu'nea kea rutagreno, Nagritera mani
fatgo hunora omani'ne. **21** Hagi hankave sondia vahe'aramina
bainati kazinteti zamahe hana hanige'za, manisaza sondia
vahe'mo'za maka kaziga atre'za panani hu'za fresagenka, Ra
Anumzamo hu'nea kante amanara hie hunka kenka antahinka
hugahane. **22** Hagi Mika'zama Kegava Hu'nea Ra Anumzamo'a
amanage hu'ne, Nagra zaza sida zafamofo amumpa'a akafrina,
Israeli mopafima za'za huno mareri agatere'nea agonafi ome
krigahue. **23** Hianagi Israeli mopafima za'za huno mareri
agatere'nesia agonafi ome krisugen, hageno ome rahuno
azankunatamina vuno eno huno ragaramina renenteno marerisa
zafa fore hanigeno, agigu agigu namaramimo'za e'za ana sida

zafa tonapinka nona eme ki'za manigahaze. 24 Hagi zaza zafaramina eri atupa nehu'na, atupa zafaramina eri za'za nehu'na, kasefa zafaramina eri hagage nehu'na, hagage zafaramina eri kasefa hanenkeno kasefa huno hageno marerinke'za, Nagrikura Ra Anumza mani'ne hu'za zafaramimo'za ke'za antahi'za hugahaze. Nagra Ra Anumzamo'na huanki'na ana zana hugahue.

18 Ra Anumzamo'a amanage huno nasm'i'ne, 2 Zamafahe'moza aka krepi raga nazageno mofavre'zmimofo zamagitera akahune hutama Israeli vahe'motama nehaza fronka nanekemofo agafa'amo'a nankna hu'ne? 3 Nagra kasefa hu'na mani'noa Ra Anumzamo'na huankino, mago'mo'e huno Israeli mopafina ama fronka nanekea osutfa hugahaze. 4 Na'ankure mika vahera Nagri vaheke mani'naze. Hagi nef'a'ene nemofo'enena Nagri vahe mani'na'ankino, iza'o kumi'ma hanimoke frigahie. 5 Hagi mago fatgo avu'ava'ma nehania vahe'mo'ma knare huno fatgo avu'ava'ma nehuno, 6 havi anumzamofonte'ma Kresramanama vuntesaza ne'zama onege, Israeli vahe'mofo kaza osu havi anumzante mono huonteg, ru vahe'mofo a'nene savri nosuno, ika kri eri'nesia a'ene monko'za nosuno, 7 mago vahe'mofo havige huno keonke'zama'a eri havia nosuno, amigahue huno'ma eri'nesia zana ete ami fatgo nehuno, musufa noseno, amunte omne vahe ne'za nemino, kukena'a omane vahe kukena hunenteno, 8 zagoma nofi'ma huno eri'nea vahera agofetu huno zago agia ahenteno e'norino, havi avu'ava'ma huzankura koro nehuno, tare vahe'mofo kea fatgo kazigati refko nehuno, 9 kasegeni'ane tra ke'ni'anema kegava huno amage'ma antesuno'a, agra fatgo vahe manigahiankino tamage huno ofri manigahie huno Miko'zama Kegava Hu'nea Ra Anumzamo'a

hu'ne. **10** Hianagi e'inahu huno'ma fatgo avu'ava'ma nehania
vahe'mofo mofavremo'ma vahe'ma aheno korama'a eri neragino,
nefuma knare osu avu'ava'ma hunenteno, **11** nef'a'a anara
osugahianagi, agra havi anumzamofonte'ma kresramnama
vuntesaza ne'zana neneno, ru vahe'mofo a'nene savri nehuno, **12**
zamunte omne vahe'ene miko zankuma atupama nehaza vahera
zamazeri savri huno fenozmia enerino, vahe'za musufa enerino,
kamigahue huno'ma huvempa huno eri'nea zana nomino, havi
anumzamofonte monora hunenteno, hi'mnage avu'ava nehuno,
13 zagoma nofi'ma hu'nea vahera rama'a agofetu huno zago agia
ahenteno e'neria vahe'mo'a agra ofri amne manigahio? l'o. Agra
amnea omanigahianki, frigahie. Na'ankure kasrino hi'mnage
avu'ava zantmi hu'neankino, tamage huno kumi'amofo knazana
agra'a erino frigahie. **14** Hagi e'inahu kefo avu'ava'ene ne'mofo
mofavremo'ma nef'a'ma hu'nea kumi avu'avazama negeno,
avaririno ana avu'avara osu mani koro huno mani'neno, **15**
havi anumzante'ma Kresramnama vuntesaza ne'zama onege,
Israeli vahe'mofo kaza osu anumzante'ma mono huontegi,
ru vahe'mofo a'nene savri nosuno, **16** mago vahera havige
hunteno keonke'zama'a eri havia nosuno, amigahue huno'ma
eri'nesia zana ete nemino, musufa noseno, amunte omne
vahera ne'zana nezamino, kukenagu atupa hu'naza vahera
kukena hunezmanteno, **17** zamunte omane vahera zamazeri
haviza nosuno, zagoma nofi'ma hu vahera agofetu huno
zago agia ahenteno e'norino, kasegeni'ane tra ke'ni'anema
kegava huno amage'ma antesuno'a, agra nef'a'ma hu'nea kumi
avu'avazamofo nona hunora ofrigahianki, tamage huno amne
manigahie. **18** Hagi nef'a'a frigahie. Na'ankure agra havige
huno vahe'mofo zantamina eri savri nehuno, musufa neseno,

vahe'amofona knare avu'vara huozmante'neankino, ana kefo
avu'va'zama hu'nea zantera frigahie. **19** Hagi mofavre'amo'ma
knare huno fatgo avu'ava'ma nehuno, kasege'nine tra ke'ni'anema
kegava huno amage'ma nenteno, ofrino amnema manisigeta,
amanage huta nantahigegahaze, nahigeno nef'a'ma hu'nea
kumi'mofo mizama'a nemofo'a e'orie? huta hugahaze. **20** Hagi
kumi'ma hania vahe'moke frigahie. Hagi mofavremo'a nef'a'ma
hu'nenia kumimofo nona'a knazana e'orisigeno, mago ne'mo'a
mofavre'amo'ma hu'nesia kumimofo nona'a knazana e'origahie.
Hagi fatgo avu'ava'ma nehania vahera agri fatgo avu'avate
mizana nemino, kefo avu'ava'ma hania vahera, agri'a kefo
avu'ava zante azeri haviza hugahie. **21** Hianagi kefo avu'ava
zama nehania vahe'mo'ma kefo avu'ava zama netreno agu'a
rukrahe huno tra keni'a amage nenteno, knare avu'ava'ene fatgo
avu'ava'enema hanuno'a, ofrigahianki amne manigahie. **22** Hagi
magore hu'na mago kumi'agura nagesa ontahigosue. Na'ankure
fatgo avu'avaza hugahiankino ofri amne manigahie. **23** Miko'zama
Kegava Hu'nea Anumzamo'a huno, kefo avu'ava'ma nehia
vahe'ma nefrigeta, tamagesama antahi'zana Nagrikura musena
nehie huta nehazo? l'o. Nagra musena nosue. Hagi kefo avu'ava
zama'a atreno amnema mani'zanku nave'nesie. **24** Hianagi fatgo
avu'ama nehania ne'mo'ma atreno'ma kefo avu'ava ome nehuno,
kasrino hi'mnage avu'avazama ome haniana, agra manigahio?
l'o. Agra omanigahianki frisigeno maka fatgo avu'ava'ma hu'nea
zamo'a amnezankna hanige'na, Nagra ana zankura nagesa
ontahigahue. Na'ankure kefo avu'ava huno kumi hu'neankino ana
kumimofo nona'a omanigahianki frigahie. **25** Hianagi amanage
huta hugahaze, Ra Anumzamo'ma hia avu'ava zamo'a fatgo
osie huta hugahaze. Hagi Israeli vahe'mota antahiho, Nagri

navu'navamo fatgoa hunefi, tamagri tamavu tamava'mo fatgoa
hu'ne? **26** Hagi Fatgo avu'ava'ene vahe'mo'ma ana fatgo
avu'ava'ama atreno kumi'ma haniana, agra kumi hugahiankino
frigahie. Na'ankure fatgo osu avu'azama hania zanku huno
agra frigahie. **27** Hagi kefo avu'ava'ma nehania vahe'mo'ma
ana kefo avu'ava'ma atreno agu'ama rukrahe huno'ma fatgo
avu'ava zama haniana, agra'a agu'vazigahie. **28** Na'ankure agra
maka kefo avu'ava'ma hu'nea zana keno antahino nehuno,
ana avu'ava zana atreno agu'a rukrahe hu'neankino, tamage
huno agra ofrino manigahie. **29** Hianagi Israeli vahe'mota huta,
Ra Anumzamofo avu'avamo'a fatgo osu'ne huta nehaze. Hagi
tamage huno Nagri navu'navamo'a fatgoa osu'nefi? I'o. Tamagri
tamavu tamava'mo fatgoa osu'ne. **30** E'ina hu'negu Israeli
vahera, magoke magoke'mota tamagrama hu'nesaza avu'ava
zante ante'na Nagra refko huramantegahue huno Mikozama
Kegava Hu'nea Anumzamo'a hu'ne. Hagi aru tamagri kumi
avu'ava zamo tamazeri haviza hanigi kefo avu'ava zana atreta
tamagu'a rukrahe hiho. **31** Hagi kefo avu'avazama nehaza
zana netreta tamagu'a rukrahe huta kasefa tamagu tamagesa
enerita kasefa avamu eriho. Hagi Israeli vahe'mota nahanigeta
tamagra frigahaze? **32** Na'ankure vahe'ma nefrizage'na Nagra
musena nosuanki, tamagu'a rukrahe huta ofri amne maniho
hu'na Miko'zama Kegava Hu'noa Anumzamo'na nehue.

19 Ra Anumzamo'a amanage huno Izikieli'na nasami'ne,
Israeli ugagota kva vaheku'ma zagamema hunka zavi'ma
atesanana, **2** amanage hunka zavira tegahane, negrera'a kore
osu laioni mani'neankino, kasefa laioniramimofo amu'nompina
mani'neno anenta'aramina knare huno kegava hu'ne. **3** Hagi
anampintira mago ve laioni anentara knare huno kegava higeno,

hankavenentake Laioni efore huteno zagagafane vahe'enema
ahenoma nesia avu'avara rempi hu'ne. 4 Hagi ana zamofo
agenkema miko mopafi vahe'mo'zama nentahi'za, kerise'za
krifu anaginte nazageno ana kerifi ana laionimo'a tamige'za
azeri'za nofi rente'za avazu hu'za Isipi mopafi vu'naze. 5 Hagi
nerera'a nontegama esigu aveganteno maniana, ana laioni
anentamo'a ometfa hu'ne. Hagi ana anenta'mo'ma ufanene
higeno'a, anenta'aramimpinti mago avreno kegava nehigeno ome
ra huno hankavenentake laioni efore hu'ne. 6 Hagi laioniramine
vano nehuno rama huno hankavema netino'a, zagagafama aheno
ne'zana rempi huteno vahera aheno ne'ne. 7 Hagi agra hankave
vihuramina tapage hunetreno, rankumatamina eri haviza nehuno,
ranke huno agerura runo vano nehuno, ana mopafima mani'naza
vahera zamazeri koro hu'ne. 8 Ana hige'za mika mopafi
vahe'mo'za eza keri eme kafinte'nazafi uramige'za kukozmia
agofetu rutarente'za azeri'naze. 9 Hagi ana kerifintira azeri'za
vogisifi antete'za avre'za Babiloni kini nete vute'za kina ome
huntazageno, Israeli agonaramimpina mago'enena ra agerura
runo vano osu'ne. 10 Hagi negrera'a tinnenare'ma me'nea waini
hozaka'afima me'nea waini zafamo'ma rama'a tima e'nerino,
rama'a azankunatami omere emere nehuno rama'a rgama
renteankna hu'ne. 11 Hagi ana zafamofo azankunatmimo'za ome
hankaveti'za kini vahe'mo'zama zamazampima eneriza azota
fore hu'naze. Hagi ana waini zafamo'a za'za huno mika zafa
agatereno marerigeno rama'a azankunatami me'ne. 12 Hianagi
tusi Narimpa ahente'na ana waini zafa tasagihu mopafi atrogeno
zage hanati kazigati zaho'mo'a maka raga'a eri harari hutregeno,
azankunatamimo'za hantagiramiza hagege hutazage'za tevefi
krazageno teno eri hana hu'ne. 13 Hagi menina hagage huno

ti omne kokampi ana wainia vatino ome kri'ne. 14 Hagi ana waini zafamofo azankunaramimpinti tevea arukru agata'ane raga'anena teno eri hana higeno, azankunamo'zama kini vahe azompama fore'ma huga azankuna tamina anampina magore huno omnetfa hu'ne. Hagi ama zavi zagamekino, zagamema huno zavimate zagame megahie.

20 Hagi Babilonima kinama huta mani'nonkeno 7nima hia kafumofo, namba 5fu ikamofona 10ni knazupa Israeli ranra vahe'mo'za Ra Anumzamofontegati antahintahi erinaku navuga emani'naze. 2 Ana hazageno Ra Anumzamo'a amanage huno nasm'i'ne, 3 Vahe'mofo mofavremoka, Israeli ranra vahetamina amanage hunka zamasamio, Mikozama Kegava Hu'nea Ra Anumzamo'a huno, tamagra Nagri nagenoka huta antahintahi erinaku e'nazo? Nagra kasefa hu'na mani'noa Ra Anumzamo'na huankita, tamagra nagenoka huta antahintahia e'origahaze. 4 Hagi kagra keaga huzmantenka refko huzmanto, vahe'mofo mofavremoka, keaga huzmantenka zamafahemofo hi'mnage avu'ava zama zamavariri zama nehaza zana eri ama' huge'za negenagenka, 5 amanage hunka zamasamio, Mikozama Kegava Hu'nea Anumzamo'a amanage huno hie, Israeli vahe'ma Nagri vahe manigahaze hu'nama huhampri'noa kna zupa, Isipi mopafi Jekopu mofavreramina huvempa huzmante'na Nagra Ra Anumzanamo'na tamagri Anumza mani'noe hu'na huama hu'noe. 6 Hagi ana knarerera Nagra Isipi mopafintira zamavare atirami'na kasefa mopama zamigahuema hu'na huhampri'noa mopafi zamavare'na vugahue. Ana mopafina ami rine tume rimo'enena avitegeno maka mopa agatere'nea mopagini knare'zantfa huno hentofaza hu'nea mopa me'ne. 7 Hagi nagra amanage hu'na zamasami'noe, hi'mnage zama ante'nazana mago mago'mota

eri netreta, Isipi vahe'mofo kaza osu havi anumzana monora
hunteta tamagra'a tamazeri pehena osiho hu'noe. Nagra Ra
Anumzana tamagri Anumza mani'noe hu'na zamasami'noe. **8**
Hianagi zamagra ha'renante'za ke'ni'a ontahi'naze. Ana nehu'za
ana hi'mnage zama zamavugama ante'nazana zamefira huomi,
Isipi vahe'mofo havi anumzantera monora hunte'za vu'naze.
Ana nehazageno Nagrira tusi narimpa ahege'na, narimpa
ahenzante'na Isipi mopafi zamazeri haviza hugahue hu'noe. **9**
Hianagi umani'naza kumate vahe'mofo zamavufima huvempama
hu'na, Isipiti'ma zamavare'na egahue hu'nama hu'noa zanku
nagesa nentahi'na, Nagima eri haviza nehu'za nagazema
erinami zanku'ene ana zana osu'noe. **10** E'ina hu'negu Isipi
mopafintira zamavare'na atirami'na, ka'ma kokampina e'noe. **11**
Nagra tra ke'ni'a nezami'na, kasegeni'a zamasmi'noe. Na'ankure
ana kasegeni'ama amage'ma antesimo'a, ofri manigahie. **12**
Hagi ana nehu'na mani fruhu kna Sabatima zami'noana,
Nagri'ene zamagri'ene amu'nompi mago avame'za me'enige'za,
Ra Anumzamo huhampri ranteno tazeri ruotge hu'nea vahe
mani'none hu'za ke'za antahi'za hugahaze. **13** Hianagi Israeli
vahe'mo'za ka'ma kokampima ne-eza Nagri kea amage nonte'za,
kasege'ni'ane tra ke'ni'anena zamefi humi'naze. Zamagrama
tra keni'a amage'ma antazaresina knare hu'za manizasine.
Sabati manigasa knani'a kegava osu'naze. E'ina hu'nagu
ka'ma kokampima neazage'na narimpa ahenzante'na zamazeri
haviza hugahue hu'noe. **14** Hianagi negazage'nama Isipiti'ma
zamavare'na atirami'nama e'noa vahe'mokizmi zamavufima,
e'inahu'ma hanu'na Nagra'a nagima eri haviza huzanku
Israeli vahera zamazeri havizana osu'noe. **15** Hagi ka'ma
kokampima neazage'na nazana erisga hu'na amanage hu'na

huvempa hu'noe, miko mopama ageterenea mopama amirine
tumerimo'enema avite'nea mopama zamigahuema hu'na
huvempama hu'noa mopafina zamavare'na ovugosue hu'na
huvempa hu'noe. **16** Na'ankure zamagra keni'a amagera nonte'za,
tra keni'a zamefi hunemi'za, Sabati knani'a kegava nosu'za,
vahe'mo'za zamazanteti trohu'naza anumzantaminte monora
hunte'naze. **17** Hianagi zamavufima koana nasuntagige'na
zamahe ofri'na, ka'ma kokampina zamazeri havizana osu'noe. **18**
E'na hu'negu mofavre naga'zmia amanage hu'na zamasmi'noe,
tamafahe'mokizmi zamavu'zmavara novaririta, zamagrama
hu'naza zana huta kaza osu havi anumzantamina monora
huntea tamazeri pehena osiho hu'na zamasami'noe. **19** Hagi
Nagra Ra Anumzana tamagri Anumza mani'noanki, keni'a
amage nenteta tra keni'a amage anteho. **20** Ana nehuta
Sabati knani'aramina kegava hihio. Na'ankure amu'nontifina
e'i ana knamo'a mago avame'za me'nena Ra Anumzamo'na
tamagri Anumza manisugeta, tamagra Nagri vahe manigahaze.
21 Hianagi ana mofavreramimo'za ke'ni'a nontahi'za, ke'ni'a
amagera nonte'za tra keni'a kegava nosu'za, ana kasegema
amage'ma antazasina, ofri so'e hu'za manizasine. Hianagi
anara osu'naze. Ana nehu'za Sabati knani'a kegava osu'naze.
E'na hazage'na ka'ma kokampina narimpa ahezmante'na
zamazeri haviza hunaku hu'noe. **22** Hianagi Nagra e'inara
osu'noe. Na'ankure mago'a kumapi vahe'mofo zamavufima
lsipiti'ma zamavare'na e'noa zanku nagesa nentahi'na, Nagima
eri haviza hu'zanku'ene ana zana osu'noe. **23** Ana nehu'na
Nagra amanage hu'na ka'ma kokampina huvempa hu'na
zamasami'noe, Israeli vahera zamahe panini hanuge'za
hazagre'za mika mopafi vu'za e'za hu'za mago mago hu'za umani

emani hugahaze hu'noe. 24 Na'ankure zamagra kasegeni'a amagera nonte'za, tra keni'a zamefi hunemi'za Sabati knani'a kegava nosu'za, zamazanteti tro hu'naza anumzantaminte'ma zamafahe'mo'zama mono'ma hunte'naza havi anumzante monora hunte'naze. 25 Ana hazage'na Nagra zamatroge'za zamasumma eri'za omani tra kene, kasegene amage ante'naze. 26 Ana nehu'na zamatroge'za musezazmia zamagonesa mofavrezmia zamahe'za Kresramana nevu'za, zamagra'a zamazeri pehena hu'naze. E'inama hu'noana Nagra zamazeri haviza hanuge'za Nagrikura Ra Anumza mani'ne hu'za ke'za antahiza hihogu anara hu'noe. 27 E'ina hu'negu vahe'mofo mofavremoka amanage hunka Israeli vahera zamasnio, Miko'zama Kegava Hu'nea Ra Anumzamo'a huno, Tamafahe'za anahu kna hu'za huhaviza hunante'za zamefi hunami'naze. 28 Hagi zamigahue hu'nama huvempama huzmante'noa mopafi zamavare'na oge'za, maka za'za agonafine maka anina kuronkuroma hu'nea zafa agafaramimpina ofazmia havi anumzazamirera Kresramana nevu'za nazeri narimpa nehe'za, mnanentake zana kre mna nevu'za, waini tina tagiza ofa hu'naze. 29 Ana hazage'na Nagra zamantahige'na amanage hu'noe, Ina'na agonarega monora ome nehaze hu'na zamantahige'noe. Hagi ana kumakura Bamae hu'za menina agia nehaze. 30 E'ina hu'negu Israeli vahera amanage hunka zamasnio, Miko'zama Kegavama Hu'nea Ra Anumzamo'a amanage hie, Tamagri tamafahe'mozama hu'nazaza huta agoterafa havi anumzantera a'nemo ru vene savri hiankna huta monora hunenteta tamagra'a tamazeri pehena hu'naze. 31 Hagi havi anumzantega mofavretamia aheta ofa kresramna nevuta, vahe'mo'zama zamazanteti'ma antre'za tro'ma hunte'naza havi anumzantera monora hunenteta

tamagra'a tamazeri pehena hume eta ama knarera ehanatize. Hagi Israeli vahera Nagra tamatre'nugeta nagritetira eta knare antahi'zana eme e'origahaze. Tamage Nagra kasefa hu'na mani'nena Miko'zama Kegavama Hu'noa Ra Anumzamo'na huanki'na, magore hu'na tamatre'nugeta eme nagenoka huta Nagritegatira antahintahia e'origahaze. **32** Hagi tamagrama antahi'zana, manigaj'naza ru mopafi vahe'mo'za nehzaza huta havere'ene zafare'ene antre'zama tro hunte'naza anumzantami monora hunteta vugahune huta tamagesa antahi'naze. Hianagi antahitahi tamifima retroma hu'naza antahintahimo'a eforera osugahie. **33** Hagi Nagra Ra Anumzana miko'zama kegava hu'noa Anumzamo'na kasefa Hu'na mani'noa Anumzanki'na hankavenentake nazana rusute'na narimpa aheneramante'na, kini mani'nena kegava huramantegahue. **34** Hagi narimpa aheneramante'na tamahe panani'ma hugeta vahe mopafine kumapinema mago mago huta umani emanima hu'nazana, hankavenentake nazana rusute'na ete tamavre atru hugahue. **35** Hagi ru vahe'mokizmi hagege kokampi tamavre'na vu'na, navugosafina negesage'na tamavugosafina nege'na keaga huramante'na knazana tamigahue. **36** Hagi kote'ma lsipi vahe hagege kokampima tamafahe'ima knazama zami'noaza hu'na tamagrira knazana tamigahue huno Miko'zama Kegava Hu'nea Ra Anumzamo'a hu'ne. **37** Hagi e'ina hanugeta mago mago'mota azompani'amofo fenka kazigati ankarohu neramisage'na, huhagerafi huvempagea hu'na tamazeri hagerafigahue. **38** Ana nehu'na amu'nontmifintira keni'ama nontahi'za, ha'ma renenantaza vahetamina zamahe fanane hugahue. Hagi anama umani'naza mopafintira zamavare'na atiramigahuanagi, Israeli mopafina eofregahaze. E'ina hanugeta Nagrikura Ra

Anumza mani'ne huta keta antahita hugahaze. **39** Hagi Israeli
vahe'motagura Miko'zama Kegava Hu'nea Anumzamo'a amanage
hie, ke'ni'ama ontahisuta amne zamazantet'i'ma antre'za havi
anumzama tro hunte'nazana monora huntaho. Hianagi henka
tamagra namagera nenteta, havi anumzantera monora hunteta
ruotge'ma hu'nea nagia eri havizana osugahaze. **40** Na'ankure
Nagri ruotge agonama, Israeli mopafima za'za agonama me'nere
maka Israeli naga'mo'za atru hu'za monora hunantegahaze
huno Miko'zama Kegava Hu'nea Ra Anumzamo'a hu'ne. Hagi
e'i anante tamantahi kenugeta ofaramine, knare'nare muse
zantamina erita enesage'na, antahi muse huramantegahue.
41 Hagi ru vahepinti'ene ru vahe'mokizmi mopafinti'ma ete
tamavre'na atirami'na esu'na, mnanentake zama kre mana
vazage'na manama nentahi'na musema hunezmantoankna hu'na
tamagrikura musena huramantegahue. Ana nehu'na tamagri
amu'nompi ruotge navu'nava zani'a eriama hanuge'za, ru kumate
vahe'mo'za kegahaze. **42** Hagi ko'ma tamafahe'ima zamigahue
hu'na nazama erisga hu'na huvempama hu'noa mopama Israeli
mopafima tamavre'na ufresugeta, Nagrikura Ra Anumza mani'ne
huta keta antahita hugahaze. **43** Hagi e'i anante kefo tamavu
tamava'ma huta tamazeri pehanama hu'naza zankura tamagesa
nentahita, kefo tamavu tamava'ma hu'naza zankura tamagra
tamagazegu hugahaze. **44** Hagi kefo avu'ava'ma nehuta havi
avu'ava'ma hu'naza zantera, nagima eri haviza hu'zanku nagesa
nentahi'na, Israeli vahe'mota tamazeri havizana osugahue.
E'ina hanugeta nagrikura Mikozama Kegava Hu'nea Anumza
mani'ne huta keta antahita hugahaze. **45** Hagi Ra Anumzamo'a
amanage huno nasami'ne, **46** Vahe'mofo mofavremoka, sauti
mopa kaziga kavugosa hunte'enka sauti kaziga mopamofona

sifna ahenentenka sauti kaziga Negevi mopafima me'nea zafaramimofona kasnampa kea hunka huhaviza huzmanto.

47 Hagi sauti kazigama Negevi mopafima me'nea zafaramina amanage hunka zamasamio, Ra Anumzamofo nanekea kama antahio, Mikozama Kegava Hu'nea Anumzamo'a huno, antahiho, Nagra teve taginte'nugeno mika kasefa zafane osapa zafanema zafafima me'neana teno erihana hugahie. Hagi anama taginte'nua tevemo'a, asura osu anefa huno nereno maka sauti kazigama me'nea zafaramina tehana huno marerino, noti kazigama me'nea zafaraminena tehana hugahie. **48** Hagi Nagra Ra Anumzamo'na ana tevea taginte'noankino, asura osugahie hu'za maka vahe'mo'za ke'za antahi'za hugahaze. **49** Anage hige'na nagra amanage hu'noe, Mikozama Kegava hu'nana Anumzamoka, vahe'mo'za nagrikura hu'za, kagra nena raga'a omane fronka ke nehane hu'za nehaze.

21 Ra Anumzamo'a amanage huno nasami'ne, **2** Vahe'mofo mofavremoka, Jerusalemi kumatega kavugosa hunte'enka mono nomofona sifna ahenentenka, kasnampage hunka Israeli mopa huhaviza hunka, **3** amanage huo, Ra Anumzamo'a amanage hie, antahio, Nagra ha'renegante'na bainati kazinknoni'a anomaa'fintira avazuhu saga hu'na fatgo avu'ava'ma nehaza vahe'ene kefo avu'avazama nehaza vahera kagripintira zamahenati atregahue. **4** Na'ankure Nagra tamagripintira fatgo avu'ava'ma nehaza vahe'ene kefo avu'ava zama nehaza vahera bainati kazinknoni'a anore'ha eri'nena sauti kazigati'ma marerino noti kazigama uhanati'nea vahera maka hara rezmantegahue. **5** E'ina hanuge'za maka vahe'mo'zama ke'za antahi'zama hanazana, Nagra Ra Anumzamo'na bainati kazinia anomaa'fintira avazuhu sga hu'na eri'noankina ete anomaa'fina

vazi ontegahue. **6** Hagi vahe'mofo mofavre Izikeliga, kagra ana vahetamimofo zamavuga krafagea nehunka, tumoka'amo'a netanenigenka zavira netenka tusiza hunka kasunkura huo. **7** Hagi ana'ma nehananke'za negage'za, na'a nehigenka katagura nehunka zavi krafa nehane? hu'zama kantahigesagenka, amanage hunka kenona huzmanto, na'ankure fore'ma hania zamofo agenke nentahi'na anara nehue hunka huo. Mika vahe'mofo tumo'mo'a atanenko, zamazampina hanavea omanenko zamahirahi nerena, zamagu'amo'a kna nehanigeno, zamarenamo'a hanavezmia omaneno hefa'hofa hugahie. Mikozama kegavama hu'nea Anumzamo'a huno, knazamo'a ne-e. Knazamo'a kantega ne-e huno hu'ne! **8** Hagi Ra Anumzamo'a amanage huno nasami'ne, **9** Vahe'mofo mofavremoka amanage hunka kasnampa kea huo, Ra Anumzamo'a amanage hie, bainati kazinknona, kume knazageno asanetege'za masave frente'naze. **10** Hagi ana bainati kazinknoma kumema kanente'neana vahe akafrinaku higeno kumera kaneno masavena frentegeno, kopsinamo'ma nehiaza huno ru marave marave hu'ne. Ne'nimofo Juda azompagura tamagra musena huta tamentintia osihoh! Na'ankure ana bainati kazinknomo'a maka azompa antagi akafri kafro hugahie. **11** E'na hu'negu bainati kazinknona amigeno masavena frenteno vahe'ma ahe vahe'mo'ma eri'are retro hunte'ne. **12** Hagi vahe'mofo mofavre Izikeliga, katagura hunka zavi krafa nehunka kazana ruge ruge huo. Na'ankure ana bainati kazinknonura vahe'ni'ane, maka Israeli vahetamimofo ugagota kva vahetaminena hara huzmantegahie. Hagi ana Israeli ugagota kva vahe'mo'zane, Israeli vaheni'anena bainati kazinknonu maka zamahegahaze. **13** Nagra vahe'ni'a rezamahe'na kegahuankino, zamagrama keni'ama ontahisazana maka ama ana zantmimo'a

zamagrite fore hugahie huno Miko'zama Kegvama Hu'nea
Anumzamo'a hu'ne. **14** Hagi vahe'mofo mofavre Izikieliga,
amanage hunka kasnampa kea huo. Kazana nehenka atregeno
vahe'ma ahe kazinknomo'a tare zupa vahera zamahege, 3'a
zupa zamahege hino. Ana bainati kazinknom'a rama'a vahe
zamahegahiankino, maka kazigati vahera zamavazagi kagino
zamahe frigahie. **15** Ana hanageno tumo'zamimo'a netanenkeno,
hankavezmia omanegahie. Hagi ana bainati kazinknona maka
kuma kafantera vahe'ma ahe fri'are retrurente'nageno me'neno
kopsinagna huno rumarave nehuno vahe'ma ahe fri'are retrotra
huno me'ne. **16** Hagi ana bainati kazinknomoka tamaga
kaziga rukrahe hunka runekafrinka, hoga kaziga rukrahe hunka
runekafrinka, ina kazigo rukrahe'ma hanantega rukafrío. **17**
Hagi Nagra nazana nehesugeno, nasima vazi'nea zamo'a
ome amne hugahie huno Ra Anumzamo'a hu'ne. **18** Hagi Ra
Anumzamo'a amanage huno nasami'ne, **19** Vahe'mofo mofavre
Izikieliga, Babiloni kini ne'mofo bainati kazinknomo'ma esiankana
tare huhamprinto. Hagi ana tare kamokea magoke moparetike
agafa hugaha'e. Hagi avame'za trohunka rankumategama
agafa huno'ma nevaza kantu hanare retru rentetere huo. **20**
Hagi bainati kazinknomo'ma Amoni vahepima Raba kumate'ma
vania ka huhamprinentenka, kazinknomo'ma Judane vihumo'ma
agatere kumapima Jerusalemima vanianka huhamprio. **21**
Na'ankure Babiloni kini ne'mo'a tare kamokema hatana'ma
hunate otineno, amena erinteno negeno, keve'aramina ruroretore
huno zagoa reno negeno, vahe'mo'zama zamazanteti'ma tro'ma
hu'naza havi anumzana ina kante vanue huno agenoka huno
antahi negeno, Kresramanama vu afu'mofo tumorare rezaganeno
keso'e hugahie. **22** Hagi amenezama tro'ma nehanigeno'a,

tamaga azampina Jerusalemi kumare huno krente'nenia kevemo
efregahie. Ana'ma hanigeno'a ame huno ha'ma hu kezana
netino, zamaheho huno'ma hanige'zama vahe'ma zamahesagu
ve meme afutamina zamazeri retro huzmante'ne. Hagi ana
kezama ati'neana ana ve meme afutamimo'za Jerusalemi kuma
kafante hara nehu'za, mopa kafiza ana kuma keginamofo
megia ante hihi hu'za mareriza mani'neza kahama renafe hu'za
mareri'zana za'za zafareti tro hu'za renafe kahana hu'za mareri'za
vahera hara huzmantegahaze. **23** Hianagi Jerusalemi kumapima
mani'naza vahe'mo'za kesazana, havige'za hu'za ameneza tro
nehaze hu'za antahigahaze. Hagi zamagra Jerusalemi vahe'ene
Babiloni vahe'ene mago rimpama huno mani' keaga huke
huvempa huna'anagi, Babiloni kini ne'mo'a kumima hu'naza
zantera huzamagesa huno kina huzmanteno zamavareno
vugahie. **24** E'ina hu'negu Ra Anumzana Miko'zama Kegava
Hu'nea Anumzamo'a amanage hu'ne. Na'ankure Jerusalemi
vahe'motama kumi'ma hu'naza zana hunagesa hazage'na,
kumitamigura nagesa antahi'noe. Hagi ana avu'ava'ma hazafi
maka kasegema hantagi avu'ava'ma hu'naza zamo'a, frara okino
eama higeno maka avu'ava zama nehuta kumi'ma hu'naza
zamo'a eama hu'ne. Na'ankure tamagra mika avu'ava'ma hu'naza
zana hunagesa hazankino, ha' vahe'mo'za eme tamazeri'za
kina huramante'za tamavre'za vugahaze. **25** Hagi kagra
Israeli kva nera kefo avu'avaza hunka kasri avu'avaza nehana
nekino, knaka'amo'a atuparega egeno, knazama eri knamo'a
atumpare egeno, **26** Ra Anumzana Mikozama kegavama Hu'nea
Anumzamo'a amanage hie, Kanunte'ma anaki'nana tavravea
eri netrenka, kini fetorira eritro. Ko'ma me'neaza huno keonke
zamo'a omanegahie. Agima omne vahe'ma anteramino'ma

mani'nesia vahera agia aminka azerisga nehunka, agima me'
vahem'a manisgama hu'nesia vahera azeri anteraminka ra
agi'a eritregeno agi omne vahem'a aseno manino. **27** Nagra
Jerusalemi kumara eri haviza nehu'na eri havizantfa hugahue.
Ana hutena ana kumara eri so'e osu atranenkeno, eri so'e
hugahie hunama hu'noa ne'ma esige'na, agri azampi antegahue.
28 Hagi vahem'ofo mofavre Izikeliga amanage hunka kasnampa
kea huo, Amoni vahem'o'zama Israeli vahem'a kema zamasu'za
zamazeri havizama nehaza vahera Mikozama Kegavama Hu'nea
Ra Anumzamo'a amanage hie hunka zamasamio, bainati kazine,
bainati kazimo'a vahem'a ahenaku anoreno masave frentegen
kopsinamo rumarave marave nehiaza nehie. **29** Ana'ma
nehigeno'a Amoni vahem'otagura havige ava'na keneramante'za
havige kasnampa ke huneramante'za kefo avu'ava'ma hu'za
savri'ma nehaza vahera kazinkno erita zmanankempi nentaze.
Ana higeno knazama erisaza knamo'a hago egofta nehie. **30**
Hagi bainati kazinknona ete anomaa'fi vazinto. Tamagri'ma
tro'ma huramante'nea kumapi, tamagehe'mokizmi mopafi keaga
Nagra huramantegahue. **31** Ana hute'na nasima vazi'nea
zana tamagritera eri ama hu'na, vahem'a zamatama zami'za
zamahe fri'zama antahi ani'ma hu'naza vahem'a zamazampi tamavre
antegahue. **32** Ana hanugeta tamagra tevema tevemo'ma te
fanene hiakna hanageno korantmimo'a tagiramina, vahem'o'za
tamagrikura mago'anena zamagesa ontahigahaze hu'na Nagra
Ra Anumzamo'na nehue.

22 Ra Anumzamo'a amanage huno nasami'ne, **2** Vahem'ofo
mofavre Izikeliga, Jerusalemi kumara keaga hunto. Agra
vahem'a eritagi rankumaki, keaga huntenka maka hi'mnage
avu'ava zama'a eri ama huo. **3** Ana nehunka Mikozama

kegava hu'nea Anumzamo'a amanage hie hunka zamasamio,
Rankumamo'a rama'a vahe kora aheno eri neragino,
vahe'mo'zama zamazantet'i'ma antre'zama tro'ma hu'naza havi
anumzante monora hunteno azeri pehena nehuno agra zante
knazana avreno e'ne huo. 4 Hagi kagra vahe zamahenka
korana eri neraginka, vahe'mo'zama zamazantet'i'ma antre'zama
tro'ma hu'naza havi anumzante monora huntenga kagra'a
kazeri pehena nehunka kumi hu'nane. E'ina hunka knaka'a
eri atupa nehunka, kafu zageka'a eri atupa hu'nane. E'ina
hu'negu maka kumapi vahete'ene maka mopafi vahe'mokizmi
zamavurera ki'za zokago'za kazeri tro hanuge'za hunte'za kagiza
regahaze. 5 Hagi tava'onte'ma mani'naza vahe'mo'zane, afete'ma
mani'naza vahe'mo'zanena hunte'za keontahi tamavutamavama
huta tamagima eri pehenama haza zantera zokago ke
huramantegahaze. 6 Hagi keho, mago mago ugagota Israeli kva
vahe'mo'za zamagra'a hihamu erigote'za, vahera zamahe'za
korana eri tagitere hu'naze. 7 Hagi Jerusalemi kumapina
mofavrermimo'za zamarera zamafankea nontahizageno,
ruregati'ma emani vahe'ma, megusa mofavrema, kento a'henea
knare huta kegava huozmante zamazeri haviza nehaze. 8
Ana nehuta ruotge'ma hu'nea zantamina eri pehana nehuta,
Sabati knani'a kegava osu'naze. 9 Hagi ana kumapima
mani'naza vahe'mo'za ru vahe'mokizmia havige huzmante'za
zamahe nefrizageno, mago'a vahe'mo'za havi anumzamofo
mono nompima havi anumzante'ma Kresramanama vunte'naza
afu ame'a agonafina nene'za savri monko avu'ava zana
hu'naze. 10 Hagi mago'a vahe'mo'za nezmafa a'ene monko'zana
nehazageno, mago'a vahe'mo'za ika kri'ma eri'naza a'nene
monkozana hu'naze. 11 Hagi mago'a vahe'mo'a tavaonte'ma

nemania vemofo a'ene savri huno monko'zana hu'ne. Hagi mago'a vahe'mo'za nezmanofero azeri savri hu'za ante'za nevasazageno, mago'a vahe'mo'za nezmasaro zamazeri savri hu'za zamante'za nemasazageno, mago'a vahe'mo'za nezmafa mofane zamazeri savrira hu'naze. **12** Hagi mago'a vahe'mo'za zago atesige'za vahera zamahe nefrizageno, nofima hu'za zagoma eri'za vahera rama'a zago agi ahezmante'za agofetu zagoa eri'za feno vahera nemanize. Hianagi Nagrira tamagekani nante'naze huno Ra Anumzana Miko'zama Kegavama Hu'nea Anumzamo'a hu'ne. **13** Hagi havigema huno vahe zagoma erino feno vahe'ma nemania vahe'ene, havigema huno vahe'ma zamahe nefria vahera tamage hu'na Nagra narimpa ahezmanategahue. **14** Hagi tamagr'i'ma knazama tami'nua knafina, tamagra kazigazi huta ana knazana erita vuge, hankavetita manigera hugahazo? Nagra Ra Anumzamo'na huanki'na ana zana hugahue. **15** Hagi Nagra tamahe panani hanugeta vahe kumategane, vahe moparega mago mago huta umani emanı hanage'na pehenage avu'ava zantamia eri fanane hugahue. **16** E'ina hu'na ru kumate vahetamimofo zamavufina tamazeri haviza neha'nena, Nagrikura Ra Anumza mani'ne huta keta antahita hugahaze. **17** Ra Anumzamo'a amanage huno nasami'ne, **18** Vahe'mofo mofavre Izikieliga, Israeli vahe'mo'za Nagri navurera karogro ahe'naze. Maka bronsima, tinima, ainima, lidi haveramima kre'za eri agru nehu'za, havizama hu'neama'a atrazankna hu'naze. Ana nehu'za zamagra silva kre'za eri agru hute'za havizama'a atrazankna hu'za knarera osu'naze. **19** E'ina hu'negu Ra Anumzana Miko'zama Kegavama Hu'nea Anumzamo'a amanage hie, Na'ankure tamagra maka karogro ahe'nazagu, Jerusalemi kumate tamavre atru hugahue. **20** Hagi vahe'mo'zama karogro

ahe silvama, bronsima, tinima, ainima, lidima tevefima kre maramra huno eri agru hunaku'ma eri atruma hiaza hu'na, tusi narimpa aheneramante'na nasivazi neramante'na tamazeri atru hu'na kre agruma hiankna hu'na tamazeri haviza hugahue.

21 Hagi Nagra tamazeri atru hu'na tusi narimpa ahe'zanu kre tasage'nugeta ana tevefi tasagegahaze. **22** Ana hanugeta silvamo tevefi te agru hiaza huno te agru hanigeta, Nagrikura Ra Anumzamo'a arimpa ahe'za atregeno tagritera ne-e huta keta antahita hugahaze. **23** Hagi Ra Anumzamo'a amanage huno nasami'ne, **24** Vahe'mofo mofavre Izikieliga amanage hunka Israeli vahera zamasamio, rama'a haviza hu'za mopazmia eri haviza hazagu, Narimpama aheramante'noa knafina tamagra agru osuno ko ruonte mopagna hu'naze. **25** Hagi kasnampa vahe'mo'zama laionimo zagagafa aheno tagana vaziankna hu'za kea anaki'za kezmi omne vahera zamahe nefri'za fenozmia eri'za feno vahera nemanizageno, amu'no zamifina rama'a kento a'ne erifore hu'naze. **26** Hagi ana kumapi pristi vahe'mo'za kasege'ni'a ha'rente'za noviriri'za, ruotge'ma hu'nea zana eri pehena hu'naze. E'ina zamo ruotge hu'nea zantaminki, e'i amane zantaminki nehu'za, e'i agru hu'nea zantaminki, agru osu zantaminki hu'za vahe'mo'za keamara nosaze. Sabatia kegava nosu'za, Sabatia ru hantgi'za Nagi'a eri haviza nehaze. **27** Hagi Jerusalemi rankumapima mani'naza ugagota kva vahe'mo'za, havigema hu'za vahe fenoma erinakura, afi' kramo zagagafa aheno tagna vaziankna hu'za vahe korana eri tagiza zamahe nefri'za zagozmia e'nerize. **28** Hagi ana'ma nehazage'za kasnampa vahe'mo'za havige hu'za ava'nagnaza kenone nehaza kereti'ene, havigema huza zagoma eri avu'avazanu kefo avu'avazamia refite nezmante'za, Ra Anumzana Mikozama Kegava hu'nea

Anumzamo'a amanage hie hu'za Ra Anumzamo'ma magore
huno'ma osu'nearkeva nehaze. **29** Hagi ana mopafi vahe'mo'za
havige hu'za vahe zagoa e'neriza, musufa nesaze. Ana nehu'za
zamunte omne vahe'ene, miko zanku'ma atupama nehaza
vahera zamazeri savri hu'za keonke zazmia e'neriza, ruregati'ma
emani'naza vahera fatgo zamavu'zmavara huozmante'naze. **30**
Hagi ana'ma hazage'na ana kuma'mofoma have keginama tro
nehuno, anko kante'ma navugama otino maniso hanige'nama
ana kuma'ma eri havizama osanua vaheku'ma hake'na koana
mago vahera onketfa hu'noe. **31** E'ina hu'negu tusi narimpa
ahezmante'na zamazeri haviza hugahue. Ana nehu'na maka
kefo avu'ava'ma hu'naza zamofo nona'a zamagrite erinte'na
maka zamahe fanane hugahue, huno Ra Anumzana Mikozama
Kegava Hu'nea Anumzamo'a hu'ne.

23 Ra Anumzamo'a amanage huno nasami'ne, **2** Vahe'mofo
mofavre Izikieliga, mago a'mofo mofa'trena tare mani'na'e. **3**
Isipi kumate'ma kasefa mofa'trema mani'na'a knafi agafa huke
savrica nehuke, monko avu'ava zana nehakeno vene'nemo'za
amiznimofona azeri'za zopasi'na nere'za zanavufagarera
zokagora rezanante'naze. **4** Hagi nuna'amofo agi'a Oholaki,
negana agi'a Oholib'a'e. Hagi zanagra nagri su'aseke
mani'neke ne' mofavreramina kasenezmanteke mofaneramina
kasezmante'na'e. Hagi Ohola'a e'i Sameria kumaki, Oholib'a
e'i Jerusalemi kumare. **5** Hagi Ohola'a nagri a' mani'neanagi
monkotera tusiza huno vano nehuno, tavaoma'arema nemania
Asiria sondia vahera zamavaririno savarira huno vano hu'ne.
6 Hagi ana vahetamina hokonke kukena hu'naza gavana kva
vahetamine, sondia vahete kva vahetaminki'za ana makamo'za
hosu agumpi vano nehaza hentofa nehazaveramine. **7** Hagi ana

a'mo'a maka ana hentofa nehazaveramina zamavesi nezmantero
monkozana nehuno, ana Asiria vahe'mofo kaza osu havi
anumzante monora hunteno azeri pehena hu'ne. 8 Hagi ko'ma
lsipima kasefa mofa'ma mani'neno'ma monkote'ma nehige'zama,
venenemo'zama ante'za nemase'za, avufaga zopasi'nama
nere'za, monkozama hunte'za e'naza avu'ava zana otre'ne. 9
E'ina hu'negu agrama avesima nezmantege'zama, azerisavari
hu'za monko'zama hunentaza Asiria vahe zamazampi antoe. 10
Hagi ana vahe'mo'za Oholana mika'a kukena'a eri hatetre'za
azeri agaze nehu'za, ne' mofavreramima'ane mofane'araminena
zamavare'za nevu'za, agrira bainati kazinteti ahe fri'naze. Ana
higeno a'nemo'za Ohola avufare'ma fore'ma hu'nea zankura
huge antahige hu'naze. 11 Hagi negna Oholiba'a ama ana
zana ke'neanagi, agu'a rukrahera osu'neanki, nuna'amo'ma
hu'nea avu'avara agatereno vene'nea kenunu nehuno ana
veneneraminena rama'a monko avu'ava hu'ne. 12 Hagi Oholiba'a
Asiria kva vahetamina ke anunu nehuno, gavana vahetamine,
sondia vahete kva vahetamine, hosi agumpima maniza nevaza
vahetamine, knare kukenama hu sondia vahetamina maka
hentofaza hu'naza kasefa veneneraminkino zamagenunu huno
avesi'zmante'ne. 13 Ana hige'nama koana nuna'amo Oholiba'ma
hu'neaza huno monko'zana nehuno, agra'a tusiza huno azeri
pehena hu'ne. 14 Hianagi Oholiba'a rama'a monko avu'ava zana
huno vu'ne. Ana nehuno have keginare'ma Babiloni vahe'mofo
amema'ama frage'za krentete'za koranke masavema frente'naza
vahetamine, zamema'ama zamage'neana, 15 zamu nofi'ma zamafafafima
ananeki'za, zamanunte'ma anaki tavarave zmanuntera anaki'za,
ana makamo'za Babiloni kamani eri'za vahe kna hu'nageno
zamage'ne. 16 Hagi ana vahe'mokizmi zamema'ama negeno'a,

kenunu huno avesi nezmanteno, ana vahe'ma esanageno'ma zamagranema monkozama hanigu kema erino vuno eno'ma hu' vahera huzmantenge'za Babiloni vu'naze. **17** Ana hige'za Babiloni vahe'mo'za eme ante'za mase'ne'za monkozana hunte'za azeri pehena hu'naze. Hagi ana'ma hu'za monkozama hu'za azeri pehenama hutazageno'a, ana vahetamina tusiza huno avesra huzmanteno agote'zmanente'ne. **18** Hagi ana monko avu'ava zana Oholiba'a amate avufga avapako vano nehuno ana avu'ava zana nehige'za ke'naze. E'inama nuna'amo'ma higenama Nagra navesra hunte'na nagotenente'na namefi'ma humi'noaza hu'na namefi humi'noe. **19** Hianagi Oholiba'a Isipima mofa'ma mani'neno'ma monkote'ma huno vanoma hu'nea agesa nentahino, tusiza huno mago'ane monkozana huvava huno vu'ne. **20** Ana nehuno donki afu'mofo agozagna zamago'za huntegeno, hosi afu'mofo agozarimo'ma aviteankna'ma hu'nea Isipi vahe'enena monkozana huno vano hu'ne. **21** Ana nehunka Oholibaga Isipima mofa'ma mani'nanke'zama aminka'arema azeriza, zopasi'nama nere'za knara'ma kante'za monkozama hugante'naza zanku tusiza hunka antahintahi nehunka, ana'ma hanana zanku kave'nesie. **22** Hagi e'ina hu'negu Oholibaga Mikozama Kegavama Hu'nea Ra Anumzamo'a amanage hie, monkozama hugantazagenka kagote zamantenka kamefi'ma huzami'nana vahetamina zamarimpa re'nuge'za, maka kazigati eme kavazagi kagi'za ha' eme hugantegahaze. **23** Hagi e'i ana vahetamina zamavare atruma hanuana, Babiloni vahetamima, maka Kaldia vahetamima, Pekodi vahe'ma, Soa vahe'ma, Koa nagapinti vahetamima, maka Asiria gavana vahetmima, sondia vahete kva vahetamima, hosi agumpima maniza vano nehu'za ha'ma nehaza hentofa nehzaveramina zamavare atru hanuge'za

hara huramantegahaze. **24** E'ina hanuge'za tusi'a vahe'mo'za ha'zazmia eri'neza aini fetori zamia nentaniza avazuma nehaza karisifine ha' zazmia erinte'za e'za nazanoma huramante'naku'ma hanaza zana zamagra avu'avapi avrente'za maka kazigati e'za hara eme hugantegahaze. **25** Ana nehu'na kanive regante'noankino zamagra zamarimpa ahenegante'za kazeri havizantfa hugahaze. Ana nehu'za kagesane kagonanena taga hunetre'za, amanema manisaza vahera kazinteti zamahe nefri'za ne'mofatamia zamavare'za nevu'za, amnema manisazama'a zamazeri'za tevefi kre tasagegahaze. **26** Ana nehu'za kukenaka'a maka hatenetre'za, zago'amo'ma marerisa kavasese zanka'a hate'za erigahaze. **27** E'ina hu'na Isipima mani'nenka erigafa hunka hu'nana monko kavukava zana eri amanea hugahue. **28** Na'ankure Ra Anumzana Miko'zama Kegava Hu'nea Ra Anumzamo'a amanagea hie. Kavresra hunezmantenka kago'ma ate'zmantenka kamefi'ma huzamina vahe'mokizmi zamazampi Nagra kavrente'za nehue. **29** Ana vahe'mo'za kazeri haviza nehu'za, amuhoma hunka erifore'ma hunana fenonka'aramina eri hana hu'za vanagenka, kavufga kavapako manigahane. Ana hanankeno maka vahe'mo'za monko zama nehana kavufga amate kegahaze. Kagrama savri'ma hunka monko zama hunkama vano hanazamo, **30** higeno ama ana hazenkea avreno eme kamie. Na'ankure ru kumatamimpi venenemo'zama monko zama hugantesazegu zamavesi nezmantenka, zamazanteti'ma antre'za tro'ma hu'naza havi anumzantaminte monora huntenka kagraka'a kazeri pehena hu'nane. **31** Hagi kagra nunakamo'ma hu'nea avu'ava amage antenka hu'nananki'na, agri'ma narimpa ahente'na knazama ami'noankna knazana kagrira kamigahue. **32** Hagi miko'zama kegavama hu'nea Ra Anumzamo'a amanage

hie, Nunakamo'ma ne'nea rankapufi narimpa ahe'zana tagi kaminugenka rama'a negahane. Ana hananke'za vahe'mo'za hunte'za kagi'za regahaze. **33** Hagi ana tima nesnunka neginagi nehunka, kasunku'ma banana zamo'a kazeri havizantfa hugahie. Na'ankure e'i ana kapua nunakamofo Sameria kapue. **34** Hagi ana kapufinti tina nehana hanankeno hagege hugahie. Ana hutenga ana kapua aru praro nevazinka aminka'a nemasaginka kasunkura hugahane huno Mikozama Kegava Hu'nea Ra Anumzamo'a hu'ne. **35** E'ina hu'negu Ra Anumzamo'a amanage hie, Kagra kamefi Nagrira hunaminka kagekani nenantenka, savri'ma hunka vano nehunka, monkozama hunka vanoma hu'nana mizama'a kagra erigahane. **36** Hagi Ra Anumzamo'a amanage huno nasami'ne, Vahe'mofo mofavre Izikieliga, knare Oholane Oholibakiznia keagarera zanavrentenka keagaznia refko hugahampi? Hi'mnage avu'ava'ma neha'a avu'ava'znia huama hunka zanasamio. **37** Na'ankure zanagrama savri huke ru vene monko zama ome nehuke, vahe'ma zamahe fri'na'a koramo'a zanazampina me'ne. Vahe'mozama zamazantet'i'ma antre'za tro'ma hunte'naza havi anumzantamine monko zana nehuke, ne'za ofama nehiaza huke Nagrama zanami'noa mofavreramina zamaheke ana havi anumzante Kresramana vunte'na'e. **38** Hagi mago'ene nagritera anahu kna avu'ava hunante'na'e. Zanagra ana zupage seli mono noni'a eri pehena nehuke, Sabati knani'a kegava osuke, eri haviza hu'na'e. **39** Hagi vahe'mo'zama zamazantet'i'ma tro'ma hu'naza havi anumzante mofavrezania aheke Kresramana vunenteke, anankna zupa seli mono noni'afina emarerike eri pehena hu'na'e. E'inahu knaza Nagri mono nompina hu'na'e. **40** Hagi ana nehuke kema erino vuno eno'ma hu vahete kea atrake'za, vu'za afeteti vahera ome

zamavare'za e'naze. Hagi ana vene'nema avre'za neazageta'a tanagra tina freta masave konariria nehuta, zago'amo'ma marerisa avasesezanu tanavasasea hu'na'e. **41** Hagi tanagra zamana zamana tafe hu'naza sipare mani'neta, tanavugama me'nea tratera Nagri mananentake'za insensine masavenena ante'na'e. **42** Hagi anampina ruzahu ruzahu vahe'mo'za kereso nehazageno, tima ne'za neginagima nehaza vahe'ma hagege kokampinti'ma zamavare'zama e'naza vahe'mo'za ana atre'mokizni zanazampina asana antani nezanante'za, zanasenifina avasese'ane kuini fetorira antani zanante'naze. **43** Anama hutazage'na ve'ama atreno monkote'ma vano nehige'zama, monko zama hunte'za nevazageno avresragu'ma nehia akura nagra amanage hu'hoe. Menina ama ara ama venenemo'za zamatrenke'za monko a'nema nehazaza hu'za monkozana huntaho. Na'ankure agra monko a' mani'ne. **44** Hagi ana vahe'mo'za monko a'nema monko zama hunentazaza hu'za, ana ara ante'za mase'ne'za monko'zana hunte'naze. Ana hukna hu'za Oholane Oholibanena zanante'za mase'neza monko zana huznante'naze. **45** Hianagi fatgo zamavu'zmavama nehaza vahe'mo'za, ve'zania atreke monko'zama huke vanoma nehuke vahe'ma zamahe nefri'a zantera keaga huznante'za knazana zanamigahaze. Na'ankure zanagra ve'zania atreke monkote huke vano nehuke, vahe'ma zamaheke korama eri tagina'a zante zanagra knazana erigaha'e. **46** Hagi Miko'zama Kegavama Hu'nea Anumzamo'a amanage hie, tusi'a sondia vahetami zamavarenka ege'za, ana atre'mofo zantamina arohu eme zanare'za ener'i'za zanazeri koro hiho. **47** Hagi ana sondia vahe'mo'za ana a'trena havenknonu zanahe frite'za, bainati kazinknonu rukafri netre'za ne'mofazania zamahe nefri'za

nozania teve taginte'nageno tegahie. 48 E'ina hu'na ana mopafina savari monko avu'ava zana eri fanane hanugeno, maka a'nanemo'za nege'za ana a'tre'mokema hu'na'a monko zanavu'zanava zana ovaririgahaze. 49 Hagi tanagrama monko avu'ava zama nehuta, vahe'mo'zama zamazantet'i'ma antre'za tro'ma hunte'naza havi anumzante'ma mono'ma hu'na'a zante tanagra knazana e'nerita, Ra Anumzana Miko'zama Kegavama Hu'nea Anumza mani'ne huta Nagrikura keta antahita hugaha'e.

24 Hagi Babilonima kinama ome hutama mani'nonkeno'a, 9ni kafumofona 10ni ikantera 10ni knazupa Ra Anumzamo'a amanage huno nasami'ne. 2 Vahe'mofo mofavre Izikieliga, ama knamofo agi'a avompi krento. Na'ankure Babiloni kini ne'mo'a Jerusalemi kumara ama ana knare avazagi kagino hara huntegahie. 3 Keontahi vahetamina ama'na fronka ke zamasamio, Miko'zma Kegavama Hu'nea Anumzamo'a amanage hie, Ne'zama negraza kavofina tina taginteta tevefi anteho. 4 Hagi sipisipimofona knare'ma hu'nea azo'na ame'ane, amo' ame'anena tagahu osi'osi huta ana kavofina kreho. Knare'ma hu'nesia zaferina'aramina ana kavofina kre viteho. 5 Sipisipi afu kevufintira knare'ma hu'nesia afu avreta anara hiho. Tevea kitagita ra teve hugreteta ana kavofina ti taginteta ana teve agofetu antenkeno timo'ma amuho huno'ma krakra nehanifi, ana afu'mofo zaferina'a anteho. 6 E'ina hu'negu Mikozama Kegavama Hu'noa Ra Anumzamo'na amanage hue, Vahe'ma zamaheno korama eri neragia Jerusalemi kumamo'a agu'afima karogroma ahe'negen, ana karogroma sesema hu'za eri agruma nosaza kavogna hu'neankino haviza hugaha'e. Hagi ana kavofintira mago mago ame'a eritre eritre nehugen ome vagareno. 7 Hagi vahe'ma zamaheno korazmima eri tagi'nea koramo'a, ana

kuma amu'nompi me'ne. Hagi vahe'ma zamahe'nea korana
mopafi tagitregeno, kugusopamo'a refi'oteniegu have agofetu
tagitre'ne. 8 Hagi amate'ma me'nенама Nagrama narimpama
ahenente'na nonama hunte'nugu ana a'mo'ma zamahe'nea vahe
korana have agofetu amate tagitre'noe. 9 E'ina hu'negu Ra
Anumzana Mikozama Kegavama Hu'nea Anumzamo'a amanage
hie. Vahe'ma zamaheno korama eriragi'nea rankuma'mo'a haviza
hugahie. Ana kuma'ma kre tasagesua zana Nagra tusi teve
hanavazintegahue. 10 E'ina hu'negu tevea kitaginka, tusi teve
hanavazitenka tevea taginto. Ame'a kregeno teso'e nehina,
hagemare zantamina anampina atregeno zaferinamo'a teso'e
hino. 11 Hagi ana kavofina mago zana onte teve tankanuzare
ante'negeno, ana kavomo'a ome amuho huno agu'afima
me'nea kopamo'a ome tefizo huteno, karogroma ahe'nea zana
teganoperamino. 12 Hagi anama karogroma ahe'nea zana
rekanopetrenaku ana'anara hiana, ana karogromo'a kanope
orami'ne. Hagi tevefima kreana karogroa tegano ope'ne. 13
Hagi menina havi kavukva hunka monko kavukava nehana
zamo'a kazeri pehena hu'ne. Kazeri agru hunaku'ma kazeri
agrumsa huana agrua osu'nane. Hagi ru'enena kazeri agru osu
katrenugenka mani'nenanke'na narimpa ahe'zana kagrite rupopo
hutregahue. 14 Nagra Ra Anumzamo'na huankino ana zana
efore hukna eankina Nagra ana zana hugahue. Nagra narimpa
ahe'zana aze'orina antahintahini'a rukrahera osugahue. Hagi
mago vahekura nasunkura hunte'na, otregahuanki, agrama
hu'nenia avu'avate'ene agrama hu'nea zante ante'na knazana
amigahue hu'na Mikozama Kegavama Hu'noa Ra Anumzamo'na
hue. 15 Hagi Ra Anumzamo'a amanage huno nasami'ne, 16
Vahe'mofo mofavre Izikieliga, kavuma negenka kavesi kavesima

hunentana aka'a kavugatira ame hu'na avre atre'za nehuanki
kagra kasunkura nehunka, zavira netegeno kavunura osino.

17 Vahe'mo antahisigi hunka akohenka zavira netenka, fri
vahetera kasunkura osuo. Kanunte'ma ana'ma nekina tavravea
eri otrenka, kaga anona hate otrenka, kagi kagona refi'otenka,
tahu ne'zama eri'za eme kamisaza ne'zana ono. 18 E'inahu
ke higena nanterana vahetaminena nanekea hutogeno, ana
kinaga a'nimo'a fri'ne. Ana higeno anante nanterana nanekema
nasami'neaza hu'na mani'noe. 19 Ana zama vahe'mo'zama
nege'za, na'a tagritera fore hunaku nehigenka nehampi tasamio?
20 Anage hu'za nantahigazage'na amanage hu'na zamasmi'noe,
Ra Anumzamo'a amanage huno nasami'ne, 21 Amanage hunka
Israeli vahera zamasamio, Mikozama Kegavama Hu'nea Ra
Anumzamo'a amanage hie, antahiho, tamagrama ran tamagima
enerita tamavesi tamavesima hunentaza mono noni'a eri haviza
hugahue. Hagi ne' mofavre nagatamima, mofa'netamia zamatrete
azage'zama Judama mani'naza mofavretmia bainati kazinteti
zamahe vagaregahaze. 22 E'ina hanigeta nagrama huaza huta
tamagi tamagonarera refi'noteta, tahune'zama eme tamisazana
onegahaze. 23 Ana nehuta tamanunte'ma ananeki'za tavaravene,
tamagia anonena hate otregahaze. Ana nehuta tamasunkura
huta zavira ote mani'neta, kefo avu'ava zampi ome haviza
nehuta, kumi'ma hu'naza zankura kragira rugahaze. 24 Hagi
Izikeli'a tamagri avame'za mani'nenketa, agrama hu'nea maka
avu'ava zana tamagra hugahaze. Ama ana zamo'ma efore'ma
hanigeta Mikozama Kegava Hu'nea Ra Anumza mani'ne huta
Nagrira keta antahita hugahaze. 25 Hagi Ra Anumzamo'a anage
huno nasami'ne, Vahe'mofo mofavre Izikieliga, Israeli vaher vihu
kumara eri netre'na, musema nehu'za ra zamajima e'neri'za zana

eri netre'na, zamagu'areti'ma tusiza hu'zama zamavesi nentaza
zana erinetre'na, ne'mofazmia zamahe hana hugahue. **26** Hagi
ana'ma hanua knarera ana knazampinti'ma freno esia ne'mo'a,
ana zama fore'ma hania zamofo agenkea eme kasamigahie. **27**
Hagi e'i ana knazupa kagra mago avame'za mani'enka fre'zama
esaza vahera keaga hunezaminka, agafa hunka nanekea
hananke'za ke'za antahizama hanazana, Miko'zama kegava
hu'nea Ra Anumzane hu'za Nagrira nage'za antahiza hugahaze.

25 Ra Anumzamo'a amanage huno nasami'ne, **2** Vahe'mofo
mofavre Izeliga, Amoni vahe moparega kavugosa hunte'nenka,
Amoni vahe'mo'zama havizama hanaza kasnampa kea
huzmanto. **3** Amanage hunka Amoni vahera zamasamio,
Mikozama Kegavama Hu'nea Ra Anumzamofo kea antahiho,
Ra Anumzana Agra Anumzamo'a amanage hie, Na'ankure
kagra amanage hunka puhaha kagerura ru'nane, ra mono
nona haviza higeno, Israeli mopamo'a haviza higeno, Juda
vahera kina huzmante'za zamavare'za vu'naze hunka hu'nane.
4 E'ina hu'negu tamagrira tamavre'na zage hanati kaziga
vahe zamisuge'za, tamavre'za kegava huramantegahaze. Ana
nehu'za amu'nontamifi seli nonkumara eme kiza manine'za, zafa
aragatimia tagiza nene'za, bulimakao afutamimofo amirina tati'za
negahaze. **5** Hagi Raba rankumara kemori afutamimo'zama
traza nesaza mopa eri fore nehu'na, Amoni kumara sipisipi
afu'mokizmi kuma erifore hugahue. E'ina hanugeta Nagrikura
Ra Anumza mani'ne huta keta antahita hugahaze. **6** Hagi
Mikozama Kegavama Hu'nea Ra Anumzamo'a amanage hie,
Israeli vahe'mo'zama knazampima unefrazageta tamazana
neheta, haruhuta marerita tamita nehuta, vahe'nimo'zama
havizama nehazageta musena hu'naze. **7** E'ina hu'nagu Nagra

nazana rusute'na hara reneramante'na, rohu'ma tamaresaza
vahe'mokizmi zamazampi tamavre anta'nena tamazeri haviza
hugahaze. Ana nehu'na tamahe vagara'nena ana mopafintira
fanane hugahaze. Anama hanugeta Nagrikura Ra Anumza
mani'ne huta keta antahita hugahaze. **8** Miko'zama kegavama
hu'nea Ra Anumzamo'a amanage hie, Moapu ne, Seiri
vahemo'zanena zamagrama antahi'zana Juda vahe'mo'za
ruzahura osu'nazanki, ruga'a mopafi vahe kna hu'naze hu'za
nehaze. **9** E'ina hu'negu ha' vahe'tami huzmante'nuge'za Moapu
vahe'mokizimi mopa atumparegati agafa hu'za rankumazmia
Bet-Jesimotima, Ba'al-Meonima, Kiriataimi kuma'zmia zamahe'za
hanaregahaze. **10** Hagi Nagra Moapu vahe'ma hu'noaza
hu'na Amoni vahera zage fre kaziga vahe'mokizmi zamazampi
zamavare anta'nena, ana vahe'mokizmiza sesageno ruga'a
mopafi vahe'mo'za zamagesa antahi nozmisage'na, **11** Nagra
Moapu vahera keaga huzmante'na knazana zamigahue. E'ina
hanuge'za Nagrikura Ra Anumza mani'ne hu'za ke'za antahi'za
hugahaze. **12** Hagi Mikozama kegavama hu'nea Ra Anumzamo'a
amanage hie, Na'ankure Idomu vahe'mo'zama Juda vahe'ma
nona hu'za ha'ma huzmante'naza zamo'a, ra hazenke eri fore
hu'naze. **13** E'ina hu'nagu Mikozama Kegavama Hu'nea Ra
Anumzamo'a amanage hie, Nagra nazana rusute'na Idomu
vahe'ene zagagafazminena zamahe fri hana hugahue. Ana
hu'na Temani kumateti'ma erigafa huno Detani kumate'ma
uhanati'nea kumazmia eri haviza nehu'na, mika vahera bainati
kazinteti zamahe vagarenugenovahera omanitfa hugahie.
14 Hagi Israeli vaheni'a huzmantesuge'za nona hu'za Idomu
vahera zamahegahaze. Nagri narimpa ahe'zamo'ma hu'enenia
avamente ante'za zamazeri haviza nehu'za, zamahesage'za

Nagri narimpahe'zana ke'za antahi'za hugahaze huno Miko'zama
Kegavama Hu'nea Ra Anumzamo'a hu'ne. 15 Hagi Ra Anumzana
Agra Anumzamo'a amanage hie, Filistia vahe'mo'za Israeli
vahekura tusi zamavaresra hunezmante'za, hara huzmante
vava hu'za neaze. 16 E'ina hu'nazagu Mikozama Kegavama
hu'nea Ra Anumzamo'a amanage hie, Nagra nazana rusute'na
Filistia vahera hara hunezmante'na, Kereti vahetamine, ra
hagerimofo anke'regama mani'naza vahetaminena zamahe hana
hugahue. 17 Hagi kefo avu'ava'ma hu'nazarera, Nagra tusi
narimpa ahezmante'na nona hu'na zamazeri haviza hanuge'za
Nagrikura Ra Anumza mani'ne hu'za ke'za antahi'za hugahaze.

26 Hagi Babilonima kinama ome hutama mani'nona knafina,
11ni kafumofona ese ikana ese knazupa Ra Anumzamo'a
amanage huno nasami'ne. 2 Vahe'mofo mofavre Izikieliga, Tairi
vahe'mo'za Jerusalemi vahe kumakura amanage hu'za hu'naze,
mika kumatmimofo kuma kafamo'a hantagiramigeno, ana kuma
kafamo'a anagino ruhagro hu'ne. Ana higeta ana kuma'mo'a
haviza higeta, tagra feno vahera se'ta manune hu'za hu'naze. 3
E'ina hu'nagu Mikozama Kegavama Hu'nea Ra Anumzamo'a
amanage hie, Keho, Nagra Tairi vahe'motma ha' vahe ase'na,
rama'a kumatmimpi vahe zamavare'na a'nena hagerimo moriri
huno eno ankenarega eme runagrama seaza hu'za, tusi
vahekrefamo'za hara eme huramantegahaze. 4 Zamagra Tairi
rankuma'mofo have kegina eme tapage nehu'za, mani'nezama
kuma'ma kegavama nehaza za'za nozminena tapage hugahaze.
Ana nehu'na mopazmia reganope atre vagaresugen havege
fore hugahie. 5 Ana hanugen hageri amu'nompi nozame kuko
rutare'za kanarahu kuma megahie. Na'ankure Nagra Mikozama
Kegavama Hu'noa Ra Anumzamo'na huankino maka kumate

vahe'mo'za arohu eme re'za mika zama'a eneri'za, **6** ne'onse kuma'aramima ra mopafima me'nea kumatamina bainati kazinteti ha' vahe'mo'za e'za eme zamazeri haviza hugahaze. Ana hanage'za zamagrama Nagrikura Ra Anumza mani'ne hu'za keza antahi'za hugahaze. **7** Na'ankure Miko'zama Kegavama Hu'nea Ra Anumzamo'a amanage hie, antahio. Nagra noti kazigati Babiloni kini ne' Nebukatnesana ama mopafima mani'naza kini vahe'mokizmi rankini ne'ki'na avre'na a'enkenko mika hosiramima'ane, karisiramima'ane, hosi agumpima vano nehu'za ha'ma nehaza vahetamine, tusi'a sondia vahetmima'anena zamavareno esige'za hara eme huzmantegahaze. **8** Hagi agra ana mopafima neonse kumatamima me'neana eri haviza hu vagaregahie. Hagi zamagra kumamofo have keginamofona mopa katente'za ita tro hute'za, hanko'zamia eri'za anante mareri'za hara huzmantegahaze. **9** Hagi agra sondia vahe'arami huzmantenige'za tusinasi zafa kitagi'za ana kuma have kegina rufrage mafrage nehu'za, aeni kanonteti kuma'ma kegavama nehaza za'za nona ahe tapage hutregahaze. **10** Agra rama'a hosi afu'tamimpi maniza hara eme hugahazankino ne-esageno'ma zamagafinti'ma marerisia kugusopafinti kumagunamo'a refite ramantegahie. Hagi karisiramine, hosi afutamimo'zanema, tapage hu'nea kuma have keginafima mareriankna huno'ma kuma kafampima marerinkeno'a, ana keginamo'a momi huno kaza hugahie. **11** Hosi afu'aramimofo zamagigomo'a mika kuma kampina retrako hu'za vano hugahaze. Hagi agra maka vahera bainati kazinteti zamahe vagaresigeno, noma vazisgama hu'naza anumza zafamo'za mopafi ampararu humasegahie. **12** Ana vahe'mo'za maka fenonka'a eri vaganere'za, keonke zama tro hunka zagoma e'nerina zantaminena maka eri

vaganere'za, tamavesima nentaza nontamina eri haviza nehu'za, havene zafaramine, kugusopanena eri hantagu hu'za hagerimpi atregahaze. **13** Hagi hapuema nehaza zavenama nehenka zagame'ma hunka musema nehana zana eri atresugenno, vahe'mo'za zavenama nehanke'zama nentahiza zana hu'za zavena krafagea ru'enena ontahigahaze. **14** Hagi kagrira hageri amu'nompi have kazeri tro ha'nena, nozame'ma nehaza vahe'mo'za kukoma knarama hu kumasenka manigahane. Na'ankure Nagra Ra Anumzamo'na huankinka ete rankumaka'a eriso'ea osugosane huno Mikozama Kegavama Hu'nea Ra Anumzamo'a hu'ne. **15** Amanage huno Mikozama Kegavama Hu'nea Ra Anumzamo'a Tairi vahe'motagura hie, Kagrama traka'ma hana agasasane, ahe kuzafa'ma antesia vahe'mo'zama kragi'ma ranaza zane, bainati kazinteti'ma zamahesia zamofo agasasama ra hagerinkenama me'nea mopafi vahe'mo'za antahisu'za zmahirahiku nehu'za koro hugahaze. **16** E'ina hanigeno hageri anke'na nemaniza ugagota kva vahe'mo'za kini tra zamiretira erami'za kini fetori zamia nezafi'za, avonkre avankre kukenazimia hatetregahaze. Zamagra mopare mani'neza maka kna zamahirahikura nehu'za, kezmia omanenige'za antri hu'za nava'nava hugahaze. **17** Zamagra amanage hu'za zavi zagamera hu'za zavira ategantegahaze. Kagimo'ma haruharuma higenka marerisa ranku'mamoka, nahigenka havizana hane. Kagra hagerina kegava hunenka, maka zago fenontera kegava hankeno tava'onka'are'ma mani'naza vahe'mo'za zamahirahiku hu'naze. Hianagi ventekamo'a menina haviza hu'ne. **18** Hagi menina Tairi kuma'mo'a haviza nehigeno, ra hagerinkena mani'naza vahe'mo'za nege'za zmahirahiku nehazageno, hageri amunompima mani'naza vahe'mo'za traka'ma hana zankura

tusi zamagogogu nehaze. **19** Hagi Mikozama Kegava Hu'nea Anumzana Ra Anumzamo'a amanage hie, ruga'a kumamo'zama hu'nazankna hu'na, Tairi kumara Nagra eri haviza hu atrenugeno mago'zana omanegahie. Hagerimo'ma aheno refiteankna hu'na ha' vahera humzantesuge'za eme kahe vagaresageno ka'ma koka fore hugahie. **20** Nagra hugante'nugenka korapama fri vahe kumapima umani'naza vahetamine umanigahane. Havizama hu'nea kumapima maniaza hunka hugante'nugenka, fri vahe kumapina umanigahane. Ana hanugenka kasefa'ma hu'za mani'naza vahe'mokizmi mopafina ete omegahane. **21** Hagi tamazeri havizantfa hanena, kefoza huta frisageno tamagimo'a ome fanane hugahie. Ana hanageno vahe'mo'za tamagrikura eme hakregahazanagi, eme tamage'za eri forera osugahaze huno Mikozama Kegavama Hu'nea Ra Anumzamo'a hu'ne.

27 Ra Anumzamo'a amanage huno nasami'ne, **2** Vahe'mofo mofavre Izikieliga, Tairi vahe'mokizmia zavi hunka zavira ate'zmanto. **3** Kagra hageri ankena kante mani'nankeno, miko kazigati vahe'mo'za kagripinti mika fenozana zagoreti eme miza nesaze. Miko'zama Kegvama Hu'nea Ra Anumzamo'a amanage hie hunka zamasamio, Tairi kumamoka hunka, nagra mika kumara zamagatere'na navasase'ane kuma mani'noe hunka nehane. **4** Hagi mopa atupakamo'a hageri amunompi evu'negen, noma kinegantaza vahe'mo'za anampi konarari'ane no kigante'za vu'naze. **5** Hanki ventema tro'ma hu meni zafa Seniri kumateti antagi'za vente'mofo zafa'a tro nehu'za, sida zafa Lebanoniti antagi'za ventemofo selima rente zafa retrure'za ahente'naze. **6** Hagi Basani kumateti oki zafa antagi'za tima rupapama hu'za ventema erino vu kuta zafa tro nehu'za, vahe'ma vanoma hanaza trara Saiprusi kumateti Saipresi zafa ahente'za enevu'za anantera

elefanti aveteti avaseseа hunte'naze. 7 Hagi avonkre avankre
tavravea ventere'ma rente'negeno zahoma erino ventema avreno
vu tavravea Isipiti erinka rente'nane. Hagi ventemofo ko' nona
hokonke'ene fitunke tavrave Elisa hageri ankenaregati erita tro
hu'naze. 8 Hagi Saidoni kumateti vahe'ene Aravati kumateti
vahe'mo'zane ana ventea eri'za vano nehazankino, zamagra
ventema eri'za vanoma hu'arera knare'zanfta hu'naze. Hagi
ventefima vanoma hu vahera, Tairi vahekiza zamagra ventea
eri'za vano nehaze. 9 Hagi Gebali kumateti vahe'ma eri'zama
eri'ama antahinima hu'naza ranra vahe'mo'za ventemo'ma
hagroma hige'za fukina rekamare'za tro nehaze. Hagi mika'a
hagerimpima vano nehaza venteramimo'za kagritetike miko
fenozana eme mizanesaze. 10 Hagi Pesia vahe'ma, Lidia
vahe'ma, Puti vahe'mo'za kagri sondia vahe emese'za nemanize.
Hagi hankozmine fetori zamia kagri kumapi eme ante'za rankagia
negamize. 11 Hagi have keginaka'arera Aravati vahe'ene
Heleki vahetamine mani'neza kegava hazageno, Gamadi
vahe'mo'za za'za nontera manine'za kumara kegava hu'naze.
Hanki hankozmia have keginare eme hanti'za kagizageno,
konararikamo'a marenerie. 12 Hagi Tasisi vahe'mo'za kagritega
fenozmia zagorera netre'za, mago'a fenona kagripinti miza
nehaze. Na'ankure kagira fenonkamo'a kagatere'ne. Zamagra
silvama, golima, ainima, tinima, Lidinena eri'za eme negami'za
nona hu'za zamavesia zana kagripintira eme eri'naze. 13 Hagi
zagoma tro'ma hu'zane, kazokzo eri'za vahe'ene bronsiretim
tro hu'zanena Grisi vahemozane, Tubali vahe'mo'zane, Mesheki
vahe'mo'zanena eme kami'naze. 14 Hagi Bet-Togarma vahepinti
eri'zama erisia hosine, hapima eri'za vano hanaza hosiramine,
miuli tonki afutaminena miza hu'nane. 15 Hagi Detani

vahe'mo'za keonke zazmia eri'za eme negamiza, nona hu'za zamavesia zana kagripintira emeri'naze. Hagi hageri anke'nama nemani'za vahe'mo'za elefanti ave'ane hokonke zafagu'ma eboniema nehaza zafanena eri'za eme negamizagenka zagoa zami'nane. **16** Hagi rama'aza kagra ante'nanke'za, Aramu vahe'mo'za kagripinti keonke'zana eme mizanese'za mago'a zazmia zagorera eme kami'naze. Hagi tekusie nehaza havene, korankre tavravene, knare'za huza avonkre avankre hu'za hati'naza zantamine, knare'za huza tro hu'naza za'za tavaravene, kororiema nehaza zama hagerimpi nemanea zantamine, rubie nehaza haveraminena eri'za eme negamiza, nona hu'za zamavesia zana kagripintira eme eri'naze. **17** Hagi Miniti kazigati witine, fikireti trohu nezane, tumerine, olivi masavene, bamue nehaza manamentake pauranena, Juda vahe'mo'zane Israeli vahe'mo'zanena eri'za eme negamize. **18** Hagi kagra rama'a feno zantami ante'nanke'za, Damaskasi vahe'mo'za Helboni kazigati wainine Sahari kumategati efekenofira eri'za eme negamiza, nona hu'za zamavesia zana kagripintira eri'naze. **19** Hagi Javani vahe'mo'zane Uzari vahe'mo'zanena ainine, kasia manamentake zafane, haganentake kifagnaza kalamusine eri'za eme negamiza, nona hu'za zamavesia zana kagripintira eri'naze. **20** Hagi Detani vahe'mo'za hosimofo agofetu'ma ante'za mani'za nevazaza eri'za eme negami'za, nona hu'za zamavesia zana kagripintira emeri'naze. **21** Hagi Arabia vahe'ene Ketari mopafi ugagota kva vahe'mo'za zamagra sipisipi anentatamine, ve sipisipi afutamine memeramine avre'za eme negamiza nona hu'za kagripintira zamavesia zana emeri'naze. **22** Hagi Seba vahe'ene Ra'ama vahe'mo'zanena fenozmia eri'za eme negamiza vaheki'za, zamagra knare'zanfta hu'nea manamentake

zantamine, zago'amo marerisa haveramine, goline eri'za eme negamiza, nona hu'za zamavesia zana kagripintira eri'naze.

23 Hagi Harani vahe'ma, Kane vahe'ma, Edeni vahe'ma, Seba vahe'ma Asuri vahe'ma, Kilmati vahe'mo'zanena fenozmia eri'za eza mago'a zante eme negamiza vahe mani'naze. **24** Hagi maketi kumaka'afina ama ana vahe'mo'za knare'nare tavravene, hokonke tavravene, kapeti'ema nehaza avonkre nankre tavraverami eri'za eme negami'za nona hu'za zamavesia zana kagripintira emeri'naze. **25** Hagi Tasisi kumate venteramimo'za ana fenozana kaza hu'za eri'za e'naze. Hagi hageri amu'hompima me'nea mopafima tusi feno ante aviteankna nehane. **26** Hagi ventema eri'za vanoma nehaza eri'za vahekamo'za kavre'za hageri amu'hompina nevazanagi, zage hanati kazigati zahomo'a, ana hageri amunompi ana venteka'aramina eri tapage tapagu huno kazeri haviza nehie. **27** Anama higeno'a mika zago fenonka'ane, zagore'ma fenoma neutrana zantamine, ventefima vanoma nehaza vahetamine, ventema eri'za nevaza vahetamine, ventema eri so'ema hu vahetamine, zagore'ma fenoma netraza vahetamine, sondia vahetamine, maka ventefima vu'naza vahe'mo'zanena ventemo'ma havizama hige'za maka hagerimpi tami'naze. **28** Hagi anama nehzage'za ventefima vanoma nehaza eri'za vahe'mo'zama krafama hazage'za, hagerinkenama me'nea mopamo'za momi hu'naze. **29** Hagi ventefi eri'za vahe'ene ventema eriza vanoma nehaza vahe'mo'zanena ventefintira atre'za atiramiza hagerinkena eme otigahaze. **30** Ana nehu'za rankrafa hu'za kagrikura tusi zavi atenegante'za, kugusopa kate'za zamasenifina nefre'za, tanefa'pina mase'za rukrahe krahe hugahaze. **31** Hagi kagrikura zamasunku hu'za zamanu zamazokara ase'za eri rampage nehu'za,

zamasunku kukena hune'za tumo'zmimo'a netanenige'za, zavira
ate'za krafa hugahaze. **32** Hagi zamasunku'ma hu'za zavima
nete'za amanage hu'za zavi zagamera hugahaze. Inankuma'mo
hageri amu'nompima me'nea Tairi kumamo'ma havizama huno
me'nero agasasa'ama omnea kumaknara hu'ne? **33** Hagi maka
mopafi vahe'mo'za kagripinti maka zana eme mizama nehu'za
musena nehaze. Keonke'zama tro'ma hana zantaminkura mika
mopafi kini vahe'mo'za musena hu'naze. **34** Menina kagrira
hagerimo kazeri haviza higenka, hagerimofo aro'are amefenkame
uraminka mani'nane. Ana hankeno vente'ma eri'za vanoma
nehaza maka vahe'tamine, ventefi eri'za vahe'mo'zane feno
zanka'ane ventemo'enena maka hageri agu'age fre'naze. **35**
Hagerinkena mani'naza vahe'mo'za ana nanekema nentahiza
antri nehazageno, kini vahe'mo'za tusi zamagogogu nehazageno
koro zamavugosa hu'ne. **36** Hagi maka mopafi feno vahe'mo'za
kagrite'ma fore'ma higenka fananema hana zankura zamagena
neru'za, anahu knazana tagrite fore hanigi hu'za tusi zamagogogu
nehaze.

28 Ra Anumzamo'a amanage huno nasami'ne, **2** Vahe'mofo
mofavre Izikieliga, Tairi kumate ugagota kva nera Mikozama
Kegavama Hu'nea Ra Anumzamo'a amanage hie hunka
asamio, kagra kavufga ra nehunka nagra anumza mani'nena
anumzantmimofo trate hageri amu'nompi mani'noe hunka kagesa
antahi'nane. Hianagi kagra anumzana omani'nananki, kagra
amne ama mopafi vahetfa mani'hane. Anumza mani'nena
knare antahiza eri'noe hunka nehananagi anara osu'nane. **3**
Kagrama kagesama antahi'nana, Danielina agaterena knare
antahi'zana eri'nena, maka oku'ama me'nea zana antahi'noe
hunka nehane. **4** Hagi kagra knare antahi'zanka'areti feno

vahera nemaninka, goline silvanena zagoma ante nompina
eri ante avite'nane. **5** Hagi kagra zagoma trohu'arera knare
hu'nanankinka, knare antahi zanka'areti feno vahera se'nane. E'i
ana fenonka'amo higenka kavufa ra hu'nane. **6** E'ina hu'nanku
Mikozama Kegavama Hu'nea Anumzamo'a amanage hie,
na'ankure kagrama antahinana, nagra mago anumza mani'noe
hunka antahintahia nehane. **7** E'igu kefozama hu'za vahe'ma
zamahe'zama zamazeri havizama nehaza vahetami ruregati
zamavare'na esuge'za, knare antahi'zanka'aretimu amuhoma
hunka eri atru'ma hu'nana zantamine, konarari zantaminena hara
eme hugante'za eri haviza hugahaze. **8** Hagi ha' vahe'mo'za
kahe'za kerigampi ome karesagenka, hageri amu'nompi fri
haviza hugahane. **9** Hagi kagri'ma kahe frisaza vahe'mokizmi
zamavufina nagra anumza mani'noe hunka hugahano? Kagra
zamazantet'i'ma kahesaza vahe'mokizmi zamavufina anumzana
omanigahananki amne vahe manigahane. **10** Nagra Ra
Anumzamo'na huankinka, kagra zamagoza no taga osu vahe'ma
friaza hunka ruregati vahetamimo zamazampi frigahane huno
Ra Anumzana Anumzamo'a hu'ne. **11** Hagi Ra Anumzamo'a
amanage huno nasami'ne. **12** Vahe'mofo mofavre Izikeliga, Tairi
kumate kini ne'mofona amanage hunka zavi zagamera hunto. Ra
Anumzana Agra Anumzamo'a amanage hie, kagra knare hunka
mago zanka'amo'a haviza osigeno knare antahizamo'a kagripina
avitegeno, konararika'amo'a marerifa' ne' mani'nane. **13** Kagra
Anumza ne'mofo hozafi Ideni mani'nankeno, zago'amo'ma
marerirfa haveramina rubi havema, topasi havema, Daimonima,
berili havema, onksi havema, jaspa havema, lapis lazuri havema,
emereli havema, tekusi havenu'ene huno kukena hugante'neane.
Hagi ana haveramina golinuti eri anovaziteno kagri'ma kazeri

fore'ma nehuno'a kavasesea hugante'ne. **14** Kagrira huhampri kantogenka Anumzamofo ruotge agonare mani'enka, kageko'na rutarenka kegava hu'nanane. Ana hu'enka amuho huno tefizo hu'nea haveramimofo amu'nompi vano hu'nane. **15** Ese'ma tro'ma hugante'noregatira mago hazenkeka'a omne ne' mani'nane. E'ina hunka hazenkeka'a omane ne' maninka neankeno, kefo avu'ava zamo'a kagripintira efore hu'ne. **16** Hagi mika zama zagore'ma netrenka mizanesenka hana avu'ava zampinti hafra hu'zana kagripina avitegenka, kumira hu'nane. E'ina hanke'na Anumzamofo ruotge agonafintira pehenama hu'nea zama eri atreankna hu'na kazeri netrena, amuho huno tefizoma hu'nea haveramimpima vanoma nehana zana, kahe kasopogenka atrenka atirami'nane. **17** Hagi knare kagi kagonama hugantea zanku kavufaga ra nehunka, kumira hu'nane. Konararika'agu kavufaga rama hanazamo knare antahizanka'amo'a ome haviza higeno, ama mopafi kini vahe'mo'za kagehogu ama mopafina kahe kasopegatre'noe. **18** Hagi kagra tusi kumi avu'avaza nehunka, fatgo osu kankamunteti'ma zagoma retro'ma hana zamo mono nonka'a eri pehena hu'ne. E'ina hu'negu maka vahe'mo'za negagesage'na teve huntenogeno kagripinti rukru huno kagrira tegasagegahie. **19** Hagi ruzahu fri'zama frinka ome fananema hanankeza kagri'ma kage'za antahi'zama hu'naza vahe'mo'za tusi zamagogogu hugahaze. **20** Hagi Ra Anumzamo'a amanage huno nasami'ne, **21** Vahe'mofo mofavre Izikieliga, Saidoni kuma'ma me'nea kaziga kavugosa hunte'nenka, ana kumamo'ma havizama hania kasnampa kea, **22** amanage hunka hunto, Ra Anumzamo'a amanage hie, Saidoni kumamoka Nagra ha'regante'na hihamu masazani'a tamagri amu'nompi eriama hugahue. E'inama hu'na ruotage avu'ava zani'ama eri

ama'ma hanuge'za, Nagrikura Ra Anumzamo kanazana neramie hu'za ke'za antahi'za hugahaze. **23** Nagra kefo kria atresugeno eme zamazeri haviza nehanige'na, ha vahe huzmantanena maka kazigati hara eme huzmante'za zamahesageno, koramo'a kumazmifina avitegahie. E'ina hanuge'za Nagrikura Ra Anumza mani'ne hu'za ke'za antahi'za hugahaze. **24** Ana hanigeno Israeli vahe'mofo tava'onte'ma mani'ne'za ave've trazamo'ma hiaza hu'zama zamarege zamaregema hu'za Israeli vahe'ma zamazeri haviza nehu'za, huhavizama hunezmantaza vahetamina omanigahaze. E'ina hanuge'za Nagrikura Ra Anumza mani'ne hu'za keza antahi'za hugahaze. **25** Hagi Ra Anumzana Agra Anumzamo'a amanage hie, Israeli vahe'ma zamahe panani'ma huge'za ufre efrema hu'nazaregat'i'ma zamavare atruma hanu'na, zamagri amu'nompi ruotge navu'navani'a erinte ama hanuge'za ruga'a kumatamimpi vahe'mo'za kegahaze. E'ina hanuge'za eri'za vaheni'a Jekopuma ami'noa mopafina manigahaze. **26** Hagi Israeli vahe'mo'za ana mopafina knare hu'za manine'za, nona kiza nemaniza waini hoza ante'za negahaze. Hagi ruga'a kumatmimpima nemaniza vahe'mo'zama Israeli vahe'ma hu havizama hunezmantaza vahetmina knaza nezamisuge'za, zamagra knare hu'za manigahaze. E'ina hanuge'za Israeli vahe'mo'za Nagrikura Ra Anumza mani'ne hu'za ke'za antahi'za hugahaze.

29 Hagi Babilonima kinama ome hutama mani'nonkeno 10nima hiankafumofona 10ni ikanter 12fu knazupa Ra Anumzamo'a amanage huno nasami'ne. **2** Vahe'mofo mofavrea Izikieliga, Isipi kini ne' Fero'ma nemania kaziga kavugosa hunte'enka, agrane Isipi vahe'mo'zanema havizama hanaza zamofo kasnampa kea, **3** amanage hunka huo, Ra Anumzana Agra Anumzamo'a amanage

hie, Antahio, Isipi kini ne' Feroga kagra tusi'a osifave krerfa
tinka'afina masenanku Nagra hara regantegahue. Hagi kagra
hunka Naeli tina nagra tro hunte'noankino, nagri ti me'ne hunka
hu'nane. 4 Hianagi Nagra kagemazampafi hukua eri rusi hu'na,
ana timpintira kavazuhu atresugeno ana timpima nemani'za
nozamemo'za kaheheka'are akamarenesage'na ana maka
zamavazu hu atitregahue. 5 Hagi kagri'ene mika nozameraminena
tamavre'na hagege kokampi ome tamatregahue. Ana hanugeno
vahe'mo'za ome zoraonkisageta afi zagagafane, namaramimofo
ne'za segahaze. 6 E'ina hanuge'za Isipima mani'naza vahe'mo'za
Nagrikura Ra Anumza mani'ne hu'za ke'za antahiza hugahaze.
Na'ankure Israeli vahe'mo'za kagrikura hankave azompa
mani'nampi hu'za hu'nazanagi, hake azotagna huno hankaveka'a
omane'ne. 7 Israeli vahe'mo'za azompama hiaza hu'za kagrira
zamazampi kazerine'za nevazagenka, kagra ru hantaginka
zamazampi vazinka zamare'nane. Kagrite'ma zamagenama
rentintima hazagenka zamaza osu zamatranke'za traka hu'za
mase'naze. 8 E'ina hu'negu Ra Anumzamo'a amanage hie,
Nagra mago ha' vahe zamavare'na esuge'za bainati kazinteti
maka vahe'ene zagagafanena eme zamahe vagaresigeno,
9 Isipi mopafina vahera omaninkeno haviza hugahie. E'ina
hanuge'za Isipima mani'naza vahe'mo'za, Nagrikura Ra Anumza
mani'ne hu'za ke'za antahi'za hugahaze. Na'ankure kagra
hunka, Naeli tina nagra tro huntogeno nagri ti me'ne hunka
hunaku, 10 Nagra menina kagri'ene tinka'anena ha' rerantanena,
Isipi mopa Migdoli kazigati agafa huteno vuno Aswani kaziga
vuteno, vu vava huno Itiopia mopama eme atrete uhanatisige'na
mika eri haviza hanenkeno, vahera omanitfa hugahie. 11 Hagi
40'a kafufina magore huno vahe'mo'zane zagagafamozanena

ana mopafina vano vanoa osugahaze. **12** Hagi mago'a moparamima haviza hu'za me'naza amu'nompina, Isipi mopa eri havizantafa hanugeno rankumatmimo'za 40'a kafufina haviza hu'za megahaze. Ana nehu'na Isipi vahetamina zamahe panani hanuge'za, ru vahe mopafine vahe kumapinena mago mago hu'za umani emanı hugahaze. **13** Ana hugahazanagi Ra Anumzana Agra Anumzamo'a huno, Isipi vahetamima vahe kumategama umani emanima hu'nazana, 40'a kafuma agaterena, anantegatira ete zamavare atru hugahue. **14** Ana nehu'na kinama ome hunaregatira ete zamavare'na mopa agafazmire Patrosi kumate esuge'za, zamagi omane vahe emanigahaze. **15** Ana huno himamu'a omane kuma me'neno kote'ma hu'neaza huno hihamua erino ruga'a kumapi vahera zamagate oregahie. Hagi hanavezmia eri atresugeno magore huno mago'a kumatamina kegava huozmantegahie. **16** Israeli vahe'mo'za mago'enena tamagritegatira zamazama hu'zana eme e'origahaze. Na'ankure tamagri'ma eme tamantahige'za zamaza hu'zama eri'za kumi'ma hu'naza zanku zamagesa nentahiza anara hugahaze. E'ina nehu'za Nagrikura Ra Anumzana Agra Anumza mani'ne huza ke'za antahi'za hugahaze. **17** Hagi Babilonima kinama ome hutama mani'nonkeno, 27nima hia kafumofona ese ikantera ese knazupa Ra Anumzamo'a amanage huno nasami'ne. **18** Vahe'mofo mofavre Izikeliga, Babiloni kini ne' Nebukatnesa'a Tairi kumate vahe'enena tusi ha' nehuno sondia vahe'a ra eri'za zamige'za enerizageno zamanu zamazokamo'a pupunesegeno zamafumo'a pro hu'ne. Hianagi Tairi vahe'ma ha'ma huzmantazana mago knare mizana e'ori'haze. **19** E'ina hu'negu Ra Anumzana Agra Anumzamo'a amanage hie, antahiko, menina Nagra Isipi vahe mopa Babiloni

kini ne' Nebukatnesa eri ami'nugeno, ana mopafima me'nea
maka fenozana rohu'reno eri vagareno vugahie. E'i ana zama
erisiana sondia vahe'mofo mi'za megahie. **20** Nagri kema
amage'ma ante'za, sondia vahe'ane agranema amuhoma hu'za
Tairi vahe'ma zamazeri havizama hu'naza zante mizazamigna
hu'na Isipi mopa zamigahue huno Mikozama Kegavama Hu'nea
Ra Anumzamo'a hu'ne. **21** Hagi ana knazupa Israeli vhahera
hihamu hankavea nezami'na, Izikieliga kagira eri aka hanena
zamagri amu'nompi maninenka nanekea zamasamigahane.
E'ina hanuge'za Nagrikura Ra Anumza mani'ne hu'za ke'za
antahi'za hugahaze.

30 Ra Anumzamo'a amanage huno nasami'ne. **2** Vahe'mofo
mofavre Izikieliga amanage hunka kasnampa kea huo, Mikozama
Kegavama Hu'nea Ra Anumzamo'a amanage hie, Hago kna
efore hianki, zavi krafa huo. **3** Na'ankure knamo'a kofa hie,
Ra Anumzamofo knamo'a kofa hie. E'i anankna maka mopafi
vahetera hamponkino hanintiri hanigeno havi kna fore hugahie.
4 Hagi ha' vahe huzmantenugeno Isipi vhahera bainati kazinteti
e'za eme zamahehana nehanage'za, Itiopia kumate vahe'mo'za
zamatagu nehu'za zavi krafa hugahaze. Ana nehanageno
mika fenozazmia erihana nehu'za kumazmia eri haviza hu'za
vugahaze. **5** Hagi Itiopia sondia vahe'ma, Puti vahe'ma,
Ludi vahe'ma, Lidia vahe'ma, maka Arabia vahe'ma, Libia
vahe'ma, Israeli vahe'enena ha' vahe huzmantanena magoka
Isipi vahe'ene maka bainati kazinteti eme zamahe vagaregahie.
6 Hagi Ra Anumzamo'a amanage hu'ne, Isipi vahe'ma eme
zamazama hanaza vahe'enena ha' vahe'mo'za zamahe hana
hanageno, Isipi vahe'mo'zama zamavufaga rama nehaza
hankavemo'a evuramigahie. Hagi noti kaziga Migdoli kumateti

maniza vu'za sauti kaziga Aswani kumate'ma uhanati'naza
vahera maka bainati kazinteti zamahe vagaregahie, huno Ra
Anumzamo'a hu'ne. 7 Hagi mika havizama huno me'nea
moparamimofo amu'nompina Isipi mopamo'a haviza huno
mesigeno, havizama hu'naza rankumatamimofo amu'nompina
zamagri rankuma'mo'za haviza hu'za megahaze. 8 Hagi Nagrama
Isipi mopafi kumatamima teve taginente'na, Isipi vahe'ma
eme zamazama nehaza kumatamima zamazeri havizama
hanuge'za, Nagrikura Ra Anumza mani'ne hu'za Isipi vahe'mo'za
ke'za antahi'za hugahaze. 9 Hagi ana zupage kema erino
vuno eno'ma hu vahetami huzmanta'nena ventefi ame' hu'za
vu'za, knare hu'za mani'naza Sudani vahera (mago'a agia
Kusima, Itiopiama, Sairini) vahe'enena ome zamazeri zamagogo
fegahaze. E'ina hu'na Isipi mopama eri havizama hanuge'za,
hago hazenke zana egahie hu'za zamagogogura nehu'za
zavi krafa hugahaze. 10 Ra Anumzamo'a amanage hu'ne,
mika Isipi vahe kevua Babiloni kini ne' Nebukatnesa azampi
zamavarenta'nenkeno, rama'a vahe kevu mani'nazanagi zamahe
hana hugahie. 11 Hagi Nebukatnesa'a keontahi sondia vahe'ane
eno Isipi mopa eri haviza nehuno, bainati kazina anomafinti
avazu huno maka vahera zamahe frisage'za zamavufagamo'a
ana mopafina avitegahie. 12 Hagi Nagra Ra Anumzamo'na
huankina, Naeli tirana eri nerane'na, kefo z mavuzmava'ma
nehaza vahe zamazampi ana mopa erinta'nena zamagra eme
eri haviza hanageno hagege ka'ma koka fore hugahie. 13
Hagi Ra Anumzana Agra Anumzamo'a amanage hu'ne, Isipi
vahe'mo'zama zamazanteti'ma antre'za tro'ma hu'naza havi
anumzantamina Nagra eri haviza nehu'na, keonke'zamofo
amema'ama Memfisi kumate'ma tro'ma hunte'ne'za mono'ma

hunentaza havi anumzanena eri haviza hugahue. Ana hanugeno Isipi mopafina magore huno ugagota kva vahera omanisigeno, ana mopafi vahe'mo'za zmagogogu hugahaze. **14** Hagi Patrosi kumara eri haviza nehu'na, Zoani kumara teve taginte'nugeno teveregahie. Ana nehu'na Tebesi kumapi vahera zamagrama hu'naza zantera knaza zami'na zamazeri haviza **15** Hagi Isipi vahe vihu kuma Pelusiumi kumapi vahera narimpama ahenezmante'na, Tebesi kumapi vahe kevua zamahe hana hugahue. **16** Hagi Isipi mopafina teve tagintenugeno, Pelusiumua vahera (mago agi'a Sinigi'za) tusi'a zamata eneri'nageno, Tebesi vahera antri hanazaza hu'za hara eme hunezmante'nage'za, Memfisi kumate vahe'mo'za zamatafina maka kna mani'za vugahaze. **17** Hagi Oni kumate kasefa vahe'ene, Pi-beseti kumate kasefa vahe'enena bainati kazinteti zamahe vagaregahaze. Ana hanageno ana kumatamimpi vahera zamavare'za kina ome huzmantegahaze. **18** Hagi Isipi vahe'mo'za ra zamagina eneriza hanave'zmia eri havizama hanugeno'a, anankna zupa Tafenesi kumapina tusi hani hugahie. Hagi hampomo'a Isipi mopafina refite'nigeno maka vahetamina zamavare'za, Babiloni kina ome huzmantegahaze. **19** E'ina hu'na zamagrama hu'naza avu'ava zantera Isipi vahera kna zana zamisuge'za, Nagrikura Ra Anumza mani'ne hu'za ke'za antahi'za hugahaze. **20** Hagi Babilonima kinama ome hutama mani'nonkeno, **21**nima hiankafumofona ese ikanter 7ni knazupa Ra Anumzamo'a amanage huno nasami'ne. Vahe'mofo mofavre Izikieliga, Nagra Isipi kini ne' Fero azana ru hantagi'noe. Hagi ana azantera teganinogura mago'a zana frege mago'a zana anteno anara oki'neankino, kazinknona erino hara hugara osu'ne. **22** E'ina hu'negu Ra Anumzana Agra Anumzamo'a amanage hie, Nagra Isipi kini ne' Ferona

ha'rente'na knare'ma hu'nea azane, havizama hu'nea azanena
anantarega ruhantagisugeno bainati kazinkomo'a azampintira
hanareramigahie. 23 Ana nehu'na Isipi vahera zamahe panani
hanuge'za, vahe mopafine vahe kumatamimpi umani eman
hugahaze. 24 Ana nehu'na Babiloni kini ne'mofo azana eri
hanaveti'na hihamua nemina bainati kazini'a azampi antegahue.
Hianagi Isipi kini ne' Ferona tarega azantrena ru hantaginugeno
Babiloni kini ne'mofo avuga ahe kuzafa ante vahe'mo atagu
nehuno krafa hiankna hugahie. 25 Hagi Babiloni kini ne'mofo
azana, eri hanavetigahue. Hianagi Isipi kini ne' Fero azana
eri haviza hanugen stino evuramigahie. E'inama hanuge'za
Nagrikura Ra Anumza mani'ne hu'za ke'za antahi'za hugahaze.
26 Ana nehu'na Isipi vahera zamahe panani hanuge'za, vahe
mopafine, vahe kumatamimpi umani eman hugahaze. E'ina
hanuge'za Nagrikura Ra Anumza mani'ne hu'za ke'za antahiza
hugahaze.

31 Hagi Babilonima kinama ome hutama mani'nonkeno,
11nima hiancafumofona namba 3 ikantera, ese knazupa Ra
Anumzamo'a amanage huno nasami'ne. 2 Vahe'mofo mofavre
Izikieliga, Isipi kini ne' Ferone sondia vahe'anena amanage
hunka zamasamio, tamagra mika vahera zamagatereta, tusi
hihamu vahe mani'naze. 3 Hagi ko, Asiria vahe'mo'za Lebanon
sida zafagna hu'za knare'nare azankuna omente amente
hazageno mago'a zafaramina tonu huzmantene. Agra za'za
huno amunagamu hampompi marerino, mika zafaramina
zamagatere'ne. 4 Hagi ana zafamofona timo ne'zana nemigeno,
mopa agu'afima me'nea timo ana zafa ne'zana amigeno zazara
hu'ne. Hagi ana zafaramima tima ne'zamiana, timo mika
zafafina nevuno tina nezamie. 5 E'ina hunegu ana zafamo'a

mika zafaramina hageno agatenereno, rama'a azanku'nareno
ani'na kuronkuro hu'ne. Na'ankure agra rama'a ti agafafintira
eri'negu anara hu'ne. **6** Hagi maka namaramimo'za ana zafa
azankunataminte nona eme negizageno, mika zaga kafamo'za
ana zafa agafafi anentara eme kasente'naze. Hagi ana zafamofo
turunapi mika zamagima me'nea vahe'mo'za kokantegatira
enemanize. **7** Hagi ana zafamofona hentofa azankunatmi me'ne.
Na'ankure ana zafamofo arafu'namo'za rama'a tima me'nefi
amefenkame urami'za tina ani avazu nehaze. **8** Hagi Anumzamofo
hozafima me'nea sida zafamo'za ana zafa gnara osazageno,
meni zafane mago'a zafaramimo'za ana zafa gnara osu'naze.
Anumzamofo hozafima me'nea zafamo'zanena ana zafa gnara
osu'haze. **9** Na'ankure Nagra ana zafa rama'a azankunataminu
konariria huntogeno knare'za higeno, mika Anumzamofo
hozafima me'nea zafaramimo'za kezmasane nehaze. **10** E'ina
hu'negu Ra Anumzana Agra Anumzamo'a amanage hu'ne,
Na'ankure agra mika zafaramina zamagatereno amunagamuma
mareri'nea zanku agra avufga ra hu'ne. **11** Ana hu'negu Nagra
ana zafa nagotente'na namefi hunemina hankavenentake ha'
vahe'mokizmi zamazampi zamavare antanenko, zamazeri
havizantfa hugahie. **12** Hagi ruregati vahe'ma zamazeri haviza
hu'arema vugota hu'naza kefo vahe'mo'za ana zafa antagi
atre'naze. Hagi ana zafamofo azankuna'mo'a agonaramimpine,
agupofine, krahopina hantagiramino mase'ne. Hagi ana zafa
agafafima nemaniza vahe'mo'za atre'za vu'za e'za hu'naze.
13 Hagi maka namaramimo'za anama antagitre zafa atupare
nemanizageno, zagagafamo'za ana zafamofo azankunatamimofo
agofetu vano hu'naze. **14** E'inama hanigeno'a tinkenafima
me'nea zafamo'za hage'za zaza hu'za mago'a zafaramina

zamagate'nere'za zamavufaga rana osugahaze. Na'ankure zamagranena e'inahu kna hu'za frisaza vahe mani'nazanki'za, fri'za kerifima urami'za mani'naza vahe'ene umanigahaze. **15** Hagi Ra Anumzana Agra Anumzamo'a amanage hie, sida zafamo'ma frino fri vahe kumapima urami'nea kna zupa, mopa agu'afima me'nea tintamina hanuge'za zavi krafa hu'za zamasunku nehanage'na, mika tintamina eri tanegahue. Anama hanige'za maka Lebanoni zafamo'za zamasunku huza zavi nete'nageno maka zafamo'za hagege hugahaze. (*Sheol h7585*) **16** Hagi ana zafama trakama huno'ma nemaseno vagri'ma hia agasasa kenu mago'a mopafi vahera Nagra zamazeri koro hu'noe. Hagi fri kumapima nevaza vahe'enema huntoge'noma nevige'za, Idenima me'naza zafamo'zane knare'nare zafama Lebanoni me'naza zafamo'zane, knare'ma hu'za tima e'neriza zafamo'zanena fri vahe kumapi mani'ne'za musena hu'naze. (*Sheol h7585*) **17** Hagi ana zafamofo tonapima nemaniza, agri'enema erigaherafiza nemaniza vahe'mo'za bainati kazinteti'ma zamahe'naza vahe'ene magoka matipina urami'naze. (*Sheol h7585*) **18** Hagi Ideni hozafima me'nea zafaramimpintira ina zafamo kagri knara huno za'zara huno ragi'ane zafa me'ne? Hagi kagra Ideni hozafima me'nea zafaramine, magoka fri vahe kumapina uramita zamagoza anomata taga osu' vahe'ma kazinteti'ma zamahazage'zama mase'naza kumapi vugahaze. Ama ana zantamina Ferone mika sondia vahe'are fore hugahie huno Ra Anumzamo'a hu'ne.

32 Hagi Babilonima kinama ome hutama mani'nonkeno, 12fuma hia kafumofona 12fu ikantera, ese knazupa Ra Anumzamo'a amanage huno nasami'ne. **2** Vahe'mofo mofavre Izikieliga, Isipi kini ne' Feronkura amanage hunka zavi zagamera nehunka zavira atento, Kagra maka vahetamimofo zamavurera laionigna

nehunka, timpi tusi zankna osifavegna hunenka kaganutira tina amasagi agrenke nehunka, ti rantintamina regamu hunka rehana hu'nane. 3 E'ina hunanku Ra Anumzana Agra Anumzamo'a amanage hu'ne, Nagra tusi'a vahekrerfa zamavare'na vanuge'za, kuko ome atre'za ana timpintira kazerite'nagena, 4 mago'za omene mopafi matevu'na ruhapati'na katregahue. Ana nehu'na maka kokantega namarami agi huntenugeno kavufagarera hare'za enemanisageno, zagagafamo'za kavufaga traga hu'za nezamu hugahaze. 5 Hagi kavufaga ru tragatrago hu'na agonaramimpi ometre emetre hanugeno mesiama'amo'a aguporamimpina avitegahie. 6 Hagi koranka'a tinkase'na humisugeno mika agonafina vuno eno nehuno, tinkrahopinena ome aviteno marerigahie. 7 Hagi e'inama hu'na kahe fananema hutesu'na, hamponteti mona refita'nenkeno hanafitamima, ikama, zogemo'enena hanintiri hu'za remasa osugahaze. 8 Mika monafima me'nea tavitamina eri asu ha'nenkeno, remasa huogantegahie. Ana nehanige'na hani atrenugeno haninkino maka mopaka'a refitegahie huno Ra Anumzana Agra Anumzamo'a hu'ne. 9 Hagi hazenkema tami'noa zamofo agenkema maka keta antahitama osu'naza mopafi vahe'mo'zama antahisu'za, antahintahi hakare nehu'za tusi koro hugahaze. 10 Hagi rama'a vahetami zamazeri zamagogofesuge'za negage'za zamagogogu nehanageno, kini vahe'mo'zama negagesu'za tusi antri nehu'za zamagogogu hugahaze. Na'ankure zamagra negesage'na bainati kazinknona eri verave korave huna vugahue. Ana knaret'i'ma agafama huno vanige'za, ana zankura mika zupa zamagesa nentahi'za zamagogogura hugahaze. 11 Na'ankure Ra Anumzana Agra Anumzamo'a amanage hu'ne, Isipi kini ne'moka, Babiloni kini ne'mo hara hugantegahie! 12 Hagi Nagra

hanavenentake sondia vahetamina huzmante'nuge'za vu'za
rama'a vahetmina ome zamahe vagaregahaze. Hagi e'ina sondia
vahe'mo'za, vahe'ma zamazeri havizama hu'za zamahe'arera
vugota hu'naze. Ana hu'nazanki'za zamagra Isipi vahe'motama
rantamagima eneriza zantamina eri haviza nehu'za, rama'a
vahe zamahe frigahaze. **13** Ana nehu'na mika tinke'nafima
nemaniza zagagafazmia zamahe fri vagaregahue. Ana hanugeno
tinke'nafina vahe'mo'zo zagagafamo'zanena timpina zamagia
re'za vano hu'za tina regamua osugahaze. **14** Ana hute'na ana
tina eri fru hanugeno masavemo'ma hiaza huno akoheno vugahie
huno Ra Anumzana Agra Anumzamo'a hu'ne. **15** Isipi mopama
eri haviza hanugeno, ana mopafima me'nea zantmimo'a haviza
nehanige'na, ana mopafima mani'naza vahetamima zamahe
hana'ma hanuge'za, Nagrikura Ra Anumza mani'ne hu'za keza
antahiza hugahaze. **16** Amana zagamera Isipi vaheteku'ma hu'za
zavima atesaza zagamere. Hagi Isipi mopagu'ene Isipi vahekura
ru mopafi a'neramimo'za magoke avamente zamagerura erinte'za
zagamera hu'za zavira ategahaze huno Ra Anumzana Agra
Anumzamo'a hu'ne. **17** Hagi Babilonima kinama ome hutama
mani'nonkeno, 12fuma hia kafumofona ese ikantera, 15nima
hia knazupa Ra Anumzamo'a amanage huno nasami'ne. **18**
Vahe'mofo mofavre Izikieliga, Isipi vahetaminkura kasunkura
hunka zavi krafa huo. Na'ankure nagra huzmantenuge'za
hanavenentake kumapi vahe'mo'zama ko'ma fri'zama mopa
agu'afi urami'za umani'naza vahe'ene mago'a vahe'enema
mani'nazarega umanigahaze. **19** Na'ankure tamagra mago'a
vahetamina zamagatereta knare vahera omani'nazanki, uramita
fri vahe kumapi zamagoza ano taga osu vahe'ma fri'za umani'nafi
umanaho hunka huzmanto. **20** Ha' vahe'mo'za zamagrira

bainati kazinknonteti zamahegahaze. Menina bainati kazinknona
anona reno azampi eri'neanki, mika Isipi vahe kevu krerfa
zamavare'za vugahaze. **21** Hagi fri vahe kumapintira, ru kumapi
hankavenentake kva vahe'mo'za Isipi vaheku'ene zamazama
nehaza vahe'mokizmigura kiza zokago kea huzmante'za
amanage hugahaze, ama vahe'mo'za zamagoza anomaga taga
osu vahetamima bainati kazinteti'ma zamahe fri'naza vahe
mani'nafi mani'naku eramize hu'za hugahaze. (**Sheol h7585**) **22**
Hagi Asiria vahe'ma frizage'za asezmente'naza matimofona,
maka sondia vahe'ama bainati kazinteti'ma zamahe'naza
vahe'mofo zamavufagamo megagi'ne. **23** Hagi Asiria vahe'ma
asezmante'naza matimofo kerimo'a ame fenkame me'ne.
Ana vahera ama mopafima vano nehu'za, vahe'ma zamazeri
koroma nehaza vahe'ma bainati kazinteti'ma zamahazage'za
asezmante'naza mati me'ne. **24** Hagi Elamu vahera anampi
asente'nazageno, rama'a hanave sondia vahe'aramina anampi
asezmante kagi'naze. E'i ana sondia vahetamina bainati
kazinteti'ma zamahe fri'naza vahetamimofo mati me'ne. Hagi
kora ana vahe'mo'za ama mopafima vanoma nehu'za, vahe'ma
zamazeri koro'ma nehaza vaheki'za, zamagoza anomaga taga
osu vahe'mo'zama fri vahe kumapima umani'nafi zamagazegu
nehu'za umanigahaze. **25** Hagi Elamu vahe'ma masesaza tafema
hunte'nazana, kazinteti'ma zamahe'naza sondia vahe'aramimofo
mati'mo agri mati'mofona megagi'ne. Ana maka sondia vahera
bainati kazinknonteti zamahe fri vagare'naze. Na'ankure ana
vahe'mo'za ama mopafi vano nehu'za, vahe'ma zamahe'za
zamazeri koroma hu'naza vahekiza zamagoza anomaga taga
osu vahe'ene zamagra zamagazegu nehu'za ana kerifina
uramiza fri vahetamimofo amu'nompi umani'naze. **26** Hagi

Meseki vahe'ene Tubali vahe'enena anampi asezmantageno, sondia vahe'zanimofo matimo megagi'zanante'ne. Hagi kora ana vahe'mo'za ama mopafima vano nehu'za, vahera zamazeri koro hu'naza vahe mani'naze. Hianagi menina bainati kazinteti zamahe fri vagare'naze. **27** Hagi ana vahetamima asezmantesazana, zamagoza anomaa taga osu ko'ma vano nehu'za vahe'ma zamazeri koro'ma hu'naza vahe'ma frizage'za zamagesaga hu'za ha'zazmima fita ruzmante'za asezmanente'naza kna hu'za ase ozmantenaze. (*Sheol h7585*) **28** Hagi Feroga kagri'enena kahe frisagenka, zamagoza anomaa taga osu vahe'ma bainati kazinteti'ma zamahe frizage'za asezmanente'naza amunompi asegantegahaze. **29** Hagi Edomu vahe'ene mika kini vahe'ane, ugagota kva vahe'araminenaa mareri zamagi eri'naza vahe mani'nazanagi, bainati kazinteti'ma zamahe fri'naza vahe'ene, zamagoza ano taga osu vahe'ma frizage'za asezmanente'naza matipi asezmanente'naze. **30** Hagi maka noti kazigati kva vahe'mo'zane Saidoni vahe'mo'zanena kora vahera zamazeri koro hu'naza vaheki'za, bainati kazinteti zamahe frizage'za anampina asezmanente'naze. Na'ankure zamagra hihamu zaminuti vahera zamazeri koro hu'nazankiza, zamagazegu nehu'za fri'za zamagoza ano taga osu vahe'ma fri'za umani'nazafi umani'naze. **31** Hagi Fero'ene sondia vahe'amo'zama fri vahe kumapima uramiza, bainati kazinteti'ma ru mopafi sondia vahe'ma zamahe fri'naza sondia vahe'ma ome zamagenu'za Fero'a asunku'ma nehia zana atreno osi'a antahi muse hugahie. Huno Ra Anumzamo'a hu'ne. **32** Nagra huntogeno Fero'a ama mopafi vahera zamazeri zamagogofeno vano hu'neanagi, Ferone maka sondia vahe'araminenaa zamagoza ano taga osu vahe'ma

asezmente'nazafi asezmantegahaze huno Ra Anumzana Agra
Anumzamo'a hu'ne.

33 Ra Anumzamo'a amanage huno nasami'ne, **2** Vahe'mofo mofavre Izikieliga, vaheka'a amanage hunka zamasamio, Nagrama ha' vahe'ma huzmantenuge'za, ha'ma eme huramante'nageta ha' vahe'ma esigeno'ma avuma anteno kegava huno mani'neno, kezama atino huramasami vahera mago ama mopafi vahepinti hu hamprintenkeno mani'neno, **3** negesigeno ha' vahe'ma esageno kesuno'a, ha' vahe neanki kva hiho huno ufe reno vahera huzmasamino. **4** Hagi ufema resigeno'ma nentahino'ma zofe'zafema nehuno mani'nenigeno, ha' vahe'moma eme ahesageno frisiana agri korankumimo'a mago vahetera eovugosianki, agra'a erigahie. **5** Agra ufema regeno nentahino'a koro freno agura vazigaragi, neginagi huno mani'negeno eme ahe'nazankino, mago vahe'mo'a agri korankumira e'origahie. **6** Hianagi avuma anteno ha' vaheku'ma kegavama hu'nea ne'mo'ma kesigeno, ha' vahe'ma esigeno'ma ufema reno koro kema vahe'ma ozamasami'ma mani'nenigeno, ha' vahe'mo'za e'za mago'mofoma eme ahesageno frisiana, e'i ana nera kefo avu'ava'ma nehia nona'a frigahianagi, agri korankumira avuma ante'noma ha' vahe'ma esigu'ma kvama hu'nea ne'mo erigahie. **7** E'ina hu'negu vahe'mofo mofavre Izikieliga, ha' vahe'ma esigu Israeli vahete kegava huo hu'na hu hamprigante'noe. E'igu Nagrama hanuankea erinka korokea zamasamigahane. **8** Hagi kefo avu'ava'ma nehia vaheku'ma Nagrama hu'na, tamage kagra frigahane hu'nama hanugenkama, ana nanekema erinka ome osamisankeno ana ne'mo'ma havi avu'avazama atreno agu'a rukrahe'ma osaniana, agra kumi'ma hu'nea zantera frigahie. Hianagi agri korankumimo'a

kagrite evugahie. 9 Hianagi kefo avu'ava'ma nehia vahe'ma ana nanekema erinka ome asamisankeno nentahino, havi avu'avazama atreno agua rukrahema osaniana, agra kumima hu'nea zantera frigahie. Hianagi kagra'a kaguvazigahane. 10 Hagi kagra vahe'mofo mofavre Izikieliga amanage hunka Israeli vahera zamasamio, tamagra amanage nehaze, tagrama huna hazenke zamo'ene kumi'mo'ene refiterantegeta haviza huta mani'none. Hagi inankna huta tagura vazigahune? huta nehaze. 11 Hagi amanage hunka zamasamio, Nagra kefo avu'ava'ma nehia vahe'ma nefrige'na musena nosue. Hianagi kefo avu'ava'ma nehia vahe'mo'ma agu'ama rukrahe huno mani'zanku nave'nesie. Hagi kagu'a rukrahe huo, kagu'a rukrahe huo. Nahanigeta Israeli vahe'mota kumi avu'ava zampina mani'neta frigahaze? 12 Hagi vahe'mofo mofavre Izikieliga zamasamio, mago fatgo avu'ava'ma nehania ne'mo'ma kumi'ma haniana, ko'ma hu'nea fatgo avu'ava'amo'a agura ovazigahie. Hagi mago kefo avu'ava'ma nehania ne'mo'ma, agu'a rukrahe huno fatgo avu'ava haniana, ko'ma hu'nea kefo avu'ava'amo'a azeri havizana osugosie. 13 Hagi fatgo avu'ava'ma nehania vaheku'ma hu'na, kagra ofrinka amne manigahane hu'na hunte'nenua ne'mo'ma, fatgo avu'ava zama'are'ma amentintima nehuno, kumi'ma haniana magore hu'na fatgo avu'ava'ma hu'nea zankura antahiomigosuanki, ana kumi avu'ava'ma hu'nea nona'a frigahie. 14 Hagi kefo avu'ava'ma nehia vaheku'ma frigahane hu'nama huntesa vahe'mo'ma, ana kumi avu'avazama atreno agua'ama rukrahe huno fatgo avu'avazama nehuno, 15 negami'na erisue huno huvempa nehuno vahe'mofo zama eri'nesia zana eme nemino, musufama eri'nesia zana venafo ome nemino, vahe'mo'ma kasefa'ma huno mani kasege amage'ma antesia vahe'mo'a, agra ofri

knare huno manigahie. **16** Ana hanige'na kumi'ma hu'nea kumi
avu'ava'agura mago'enena nagesa ontahigosue. Hagi agra
fatgo avu'ava hu'neankino, tamage huno ofrigahianki amne
kasefa huno manigahie. **17** Hianagi Izikieliga vaheka'amo'za
hu'za, Ra Anumzamo'a fatgo avu'avara nosie hu'za nehaze.
Hianagi fatgo avu'ava'ma osu vahera zamagra Israeli vahe
mani'naze. **18** Hagi fatgo avu'ava'ma nehania vahe'mo'ma
atreno kefo avu'ava'ma haniana, agra ana kefo avu'ava'ma hania
zantera frigahie. **19** Hagi kefo avu'ava'ma nehania vahe'mo'ma
ana kefo avu'avazama atreno agu'ama rukrahe huno knare
huno fatgo avu'ava'ma haniana, agra ana fatgo avu'ava'ma
hu'nea zantera ofri amne manigahie. **20** Hanki tamagra Israeli
vahe'mota huta, Ra Anumzamo'a fatgo avu'avara nosie huta
hu'nazanki'na, Nagra mago mago vahe'mota tamavu tamavara
refko hu'na ketere hugahue. **21** Hagi Babilonima kinama ome
hutama mani'nonkeno, 12fuma hia kafumofona 10ni ikantera 5fu
knazupa, Jerusalemiti mago ne'mo'a freno Babiloni ehanatino,
Jerusalemi rankumara ha' vahe'mo'za eme eri haviza hazage'na
koro frena oe huno eme hu'ne. **22** Hagi anama koro freno esia
nera oki egahianki nehuno, kinaga Ra Anumzamofo hankavemo'a
nagrite eno, nagira eri knare huno nagerura nami'neankina ana
ne'ma nanterama esige'na agefunu atupa hu'nea vahe knara
osu'na, amne agranena keaga hugara hu'noe. **23** Hagi Ra
Anumzamo'a amanage huno nasami'ne, **24** Vahe'mofo mofavre
Izikieliga, Israeli mopafima haviza hu'nea ranra kumatmimpima
nemani'za vahe'mo'za amanage hu'za nevaze, Abrahamu'a
magoke ne' mani'neanagi Anumzamo Israeli mopa amigeno
erisantihareno mani'neane. Hianagi menina tagra rama'a vahe
mani'nonankino, tamagerfa huno ama mopa Anumzamo'a

tagri tami'ne hu'za nehaze. **25** E'ina hu'negu amanage hunka zamasamio, Ra Anumzana Agra Anumzamo'a amanage hie, Tamagra korama me'nea ame'a neneta, zamazantet'i'ma kaza osu havi anumza'ma tro'ma hunte'naza zana monora hunenteta, vahe'ma zamahe nefrina vahe'mota, ama mopa tagri mopa me'ne huta nehazo? **26** Tamagra hateti rehatri huta vahe'zana nehanareta, tava'ontamirema nemaniza vahe'mokizmi a'nanema renehanaraza vahe'mota ama mopa erisanti haregahune huta nehazo? **27** Hagi amanage hunka zamasamio, Ra Anumzana Agra Anumzamo'a amanage hie, Nagra kasefa hu'na mani'noa Anumzamo'na huankino, tamage huno Israeli mopafima havizama hu'nea kumatmimpima nemaniza vahera bainati kazinteti zamahe frigahaze. Hagi kumamofo meg'i'ama vanoma hanaza vahera, afi zagagafamo'za zamahe'za nesanageno, hankave vihufine havegampinema frakiza manisaza vahera krimo zamahe frigahie. **28** Hagi ana mopa eri haviza hanenke'za Israeli vahe'moma zamavufaga rama nehaza zamo'a omanenigeno, agonaramimo'a hagege huno magozana omnenkeno anampina vahera vanoa osugahie. **29** Hagi e'ina'ma hu'na ana mopama eri haviza hanugenno maka zamo'ma havizama hanige'za Nagrikura Ra Anumza mani'ne hu'za ke'za antahi'za hugahaze. **30** Hagi vahe'mofa mofavre Izikieliga, vaheka'amo'za kuma kegina tavaonte'ma atruma huge, nonkafa zamire atruma huge'ma hazafina kagrikura amanage hu'za zamagra zamagra mani'zafina nehaze, enketa Ra Anumzamo'ma kasampa vahe'ama asamigenoma nehia naneke ome antahisune hu'za nehaze. **31** Hagi zamagra kentahi vahe tro hu'za kagritega ne-eza, Nagri vahekna hu'za kavuga eman'i'za kema hanankea nentahizanagi, ana nanekea ovaririgahaze. Na'ankure

zamagraguke'ma antahizamo zamagu'afina avite'neankiza,
vahe'ma zamazeri savri'ma hu'za zagoma eri'za feno vahe'ma
mani'zankuke nentahize. 32 Hagi kagrama hana nanekemo'a
zamagrama antahi'zana, ogenunu agenunuma hu zagame'ma
hentofa zamanke'ma ante'za zavenama ahe so'ema nehu'za
nehazankna hu'ne. Na'ankure kema hanankea antahi'nazaragi,
ana nanekea ontahi'za novaririze. 33 Hagi tamagerfa huno ama
ana nanekemo'a nena raga regahiankino, ana zamo'ma efore'ma
hanige'za negesu'za, kasnampa nera kora tagrane mani'neane
hu'za ke'za antahi'za hugahaze.

34 Ra Anumzamo'a amanage huno nasami'ne, 2 Vahe'mofo
mofavre Izikieliga, sipisipi afute kva vahe'mo'zama nehazaza
hu'za, Israeli vahe'ma kegavama hune zamantaza kva vahera
amanage hunka knazama erisaza kasnampa kea zamasamio,
Ra Anumzana Agra Anumzamo'a amanage hie, Israeli mopafima
mani'naza sipisipi afute kva vahe'mota tamagrama nenaza
zankuke nentahita sipisipi afutamina ne'zana nozamize. 3
Tamagra sipisipi afutamina aheta afova'a neneta, azoka'aretira
kukena trohuta nentanita, afovagema hia sipisipia ahegita
nenazaragi, ana sipisipi afutamina kegava huso'e nehuta ne'zana
nozamize. 4 Hagi hankave'zmima omene sipisipia zamazeri
hankavea notita, krima eri'naza sipisipine namuma zamare'nea
sipisipi nagara zamazeri nonkanamareta, zamagia zamazama
rehantagi'naza sipisipia anakinozmaneta, hazamagrene'za
kankuma nehakaza sipisipia haketa zamavareta nomaze.
Hianagi tamagra hankavetita zamazeri haviza nehuta, kegava
hunozmantaze. 5 E'ina hazage'za Nagri sipisipi naga'mo'za
panani hu'za ufre efre hu'za hazagrazage'za, maka afi
zagagafamo'za eme zamahe'za ne'haze. Na'ankure sipisipi kva

vahera omani'nagu anara hu'naze. 6 E'ina hazage'za Nagri
sipisipi afu nagamoza hazagre'za maka agonaramimpine, maka
zaza agonaramimpina vano nehaze. Ana hu'za maka ama
mopafina hazagre'za vano nehazageno, mago vahe'mo'e huno
ana sipisipiraminkura hakege, avua ante'nora kegera osu'ne. 7
E'ina hu'negu tamagra sipisipi kva vahe'mota Ra Anumzamofo
nanekea antahio. 8 Hagi Nagra Ra Anumzana kasefa hu'na
mani'noa Anumzamo'na huanki, Nagri sipisipi afute kva vahera
mani'nazanagi zamatrage'za afi zagamo'za zamahe'za nenage'za
hake'za ozamavare'naze. Hianagi sipisipi kva vahe'mo'za
zamagruguke antahi'za zamagra'a ne'zana ne'zamu nehu'za,
sipisipini'aramina ne'zana ozami'naze. 9 E'ina hu'negu sipisipi
kva vahe'mota Ra Anumzamofo nanekea antahiho. 10 Hagi Ra
Anumzana Agra Anumzamo'a amanage hie, Antahiho, Nagra
hara huzmante'na sipisipi kva vahetamimofo zamazampintira
sipisipi afu'niaramina zamavrenuge'za sipisipi afutamina ne'zana
ozamigahaze. Ana hanuge'za ko'ma nehazaza hu'za sipisipi kva
vahe'mo'za zamahe'za onegahaze. Sipisipi afu'niaramina sipisipi
kva vahetamimofo zamagipintira zamahe'na zamazeri varinuge'za
zamahe'za onegahaze. 11 Na'ankure Ra Anumzana Agra
Anumzamo'a amanage hie, Antahiho, Nagra sipisipi afu'niagura
hakre'na zamazeri fore nehu'na kegava huzmantegahue. 12 Hagi
panini'ma hu'za ufre efrema hu'naza sipisipi afutaminku'ma sipisipi
kva vahe'mo'ma hakeankna hu'na sipisipi afu'nagania hakena
hampo komatuno tusi hanima hige'zama hazagre'za ufre efrema
hu'naza sipisipi nagara maka kazigatira zamagu'vazina zamavare
atru hu'na kegava huzmantegahue. 13 Hagi ru vahe mopafine
kumatmimpinema umani emanima hu'naregatira zamavare
atru hanuge'za, zamagra'a mopafi emeri atru hugahaze.

E'ina hutena Israeli agonaramimpine, tinkrahopine, vahe'ma
omani kumatamipine, mani'nesagena ne'zana zamigahue. **14**
Hagi Israeli mopafima knare trazama me'nea agonaramimpi
zamante'nuge'za ana agonaramimpi masene'za ana tra'zana
negahaze. **15** Hagi Nagra sipisipi afuni'aramina kegava nehu'na,
knare tra'zama me'nenifi zamavare'na vano nehanena tra'zana
nene'za masegahaze huno Ra Anumzana Agra Anumzamo'a
hu'ne. **16** Fananema hu'naza sipisipi afutamina hakena
nezamavare'na, hazama gre'naza sipisipi afutamina zamavare'na
ne-ena, zamagia zamazama rehantagi'naza sipisipi afu'tamina
anakinezmant'e, krima eri'naza sipisipi afutamina zamazeri
kanamregahue. Hianagi afovage'ma hu'za hankavemati'naza
sipisipi afu'tamina, zamazeri haviza nehu'na fatgo hu'na refko
huzmantegahue. **17** Hagi tamagra Nagri sipisipi afu'motagura
Ra Anumzana Nagra Anumzamo'na amanage hue, Nagra
mago mago sipisipi afumota tamente tamente keaga refko
hutere nehu'na, ve sipisipi afutamine, ve meme afutamimofo
keaga refko hutere hugahue. **18** Hagi mago'amota rama'a
knare tra'zama nazageno tamu'ma higeta, amnema mea
tra'zama tamagianuma reprimapi huta rehaviza hunetreta,
avusesema hu'nea tima nazageno tamu'ma higeta, ana timpi
vano huta regamuma nehzana e'i knarera osu'ne. **19** Hagi
Nagri sipisipi afutamimo'za, tamagiaret'i'ma repripro'ma hutraza
traza nene'za, regamuma haza ti nenazana e'i knare nehifi?
20 E'ina hu'negu Ra Anumzana Agra Anumzamo'a amanage
huno zamagrikura hie, Keho, Nagrani'a afovage'ma hu'nea
sipisipine, asozage'ma hu'nea sipisipinena refko huznantegahue.
21 Hagi tamagra afovagema hu'naza sipisipimota, hankavezmima
omne sipisipiramina tamaßeninuti'ene tamazonanu'ene ome

zamaretufe eme zamaretufe nehuta, pazine ome zamare eme
zamare hazage'za, hazagre'za ru kumatega ufre efre hu'naze. **22**
Hagi Nagra sipisipi afu nagani'a zamagu vazi'nuge'za, ru'enena
zamazeri havizana osugahaze. Ana nehu'na knare sipisipine,
havi sipisipinena refko huznantegahue. **23** Ana nehu'na magoke
sipisipi afu kva ne' Devitina Nagri eri'za ne' azeri otisugen
mani'neno ne'zana nezamino kegava huzmantegahie. **24** Nagra
Ra Anumzamo'na Anumzazmia manisugen, eri'za ne'ni'a Deviti
ugagota kvazmia manigahie. Nagra Ra Anumzamo'na ama
nanekea hue. **25** Hagi Nagra mani fruma hu'za manisaza
huhagerafi huvempagea zamagranena huhagenerafina, afi
zagaramina ama mopafintira zmahenati atranena, ka'ma kopine
zafafinena koro osu mase'za vanoma nehanageno, afi zagamo'za
ozmamprigahaze. **26** Hagi zamagri'ene agonanimofoma
megagi'nea kumataminena asomu huzmantegahue. Ana nehu'na
ata ko'ma ahe knarera mopazmifina ata kora atresugen asomu
ata kora runtegahie. **27** Hagi ana'ma hanugen'a zafamo'za
raga neresageno, hozafina nezamo'a amponerenige'za knare
hu'za mopazmifina manigahaze. Hagi karenamare zafama hiaza
hu'za, knama eneri'za zana erinetre'na kinama huzmante'naza
vahemokizmi zamazampinti'ma kazufezmante'na zamagu'ma
vazinuge'za, Nagrikura Ra Anumza mani'ne huza ke'za antahiza
hugahaze. **28** Hagi ete ru'enena ha' vahemmo'za eza rohura
eme nozamisage'za, afi zagagafamo'zanena zamahe'za negera
osugahaze. Zamagra knare hu'za zamagu vazi'za manisage'za
mago'a vahemmo'za eme zamazeri korora osugahaze. **29**
Ana nehu'na hozama antesaza mopazmia eri kasefa hu'na
eri masave hanuge'za, ru'enena zamagakura nosanage'za,
ru vahemmo'zanena eme huhavizana huozmantegahaze. **30**

E'ina hanuge'za Nagrikura Ra Anumzana tagri Anumzamo
tagrane mani'ne hu'za nehu'za, Israeli vahera Anumzamofo vahe
mani'none huza nehu'za Nagrira nage'za antahiza hugahaze
huno Ra Anumzana Agra Anumzamo'a hu'ne. 31 Hagi tamagra
Nagri sipisipi afu nagakita, Nagri keginafi mani'naze. Ana
hu'nazankita tamagra Nagri vahe manizage'na Nagra tamagri
Anumza mani'noe huno Ra Anumzana Agra Anumzamo'a hu'ne.

35 Ra Anumzamo'a amanage huno nasami'ne, 2 Vahe'mofo
mofavre Izikieliga, Seiri agonarega kavugosa hunte'nenka,
havizama hania zamofo kasnampa kema huntesanana, 3
amanage huo, Ra Anumzana Agra Anumzamo'a amanage hie,
ko, Nagra Seiri agonamoka nazana rusutena hara hunegante'na,
kazeri havizantfa hanugenka ka'ma koka fore hugahane.
4 Nagra maka ranra kumatamia eri havizantfa hanugeno
mopatamimo'a ka'ma koka fore hanigeta, Nagrikura Ra Anumza
mani'ne huta tamagra keta antahita hugahaze. 5 Na'ankure
tamagra Israeli vahera hara huzmante vava huta ne-eta,
kumi'ma hu'naza zante'ma nona hu'na Israeli vahe'ma ha'
huzmantehogu'ma huge'za aza ha' vahe'ene eri mago huta
Israeli vahera hara huzmante'naze. 6 E'ina hu'negu Nagra
kasefa hu'na mani'noa Ra Anumzamo'na huanki'na, katresuge'za
vahe'ma zamahe'za korama eri neragi'za vahe'mo'za karotago
hugahaze. Na'ankure vahera ozamatre zamahenka korazmia
eri taginanku, zamahenkama korama eri tagi'nana vahe'mo'za
kagrira kavaririgahaze. 7 Hagi Seiri agona eri havizantfa
ha'nena ka'ma koka fore hina, ana mopafina vahera ufre'za
atiramiza osugahaze. 8 Hagi ha' vahetami huzmantenuge'za e'za
bainati kazinteti eme tamahe fri'nageno, tamavufgamo'a tamagri
ranra agonafine, neone agonafine krahopinenavaitegahie. 9

Hagi Nagra tamazeri haviza ha'nena mopatamimo'a haviza
huno meno nevi'na, kumatamia eri haviza hanena anampina
vahera omanisageta, Nagrikura Ra Anumza mani'ne huta keta
antahita hugahaze. **10** Nagra Ra Anumzamo'nama Israeli
vahe'ene Juda vahe'enema mani'noa zankura tamagesa ontahita
amanage nehaze, zamaheta mopazmia hanareta erisanti
haregahune huta nehaze. **11** E'ina hu'negu Nagra Ra Anumzana
kasefa hu'na mani'noa Anumzamo'na huankina, Nagri vahe'ma
tamarimpama ahezmaneta zamazeri havizama hu'nazaza hu'na,
tamagrira ana hugahue. Hagi tamagrama hu'naza kante antena
refkoa huneramante'na, Nagrani'a nazeri ama ha'nena, nage'za
antahiza hugahaze. **12** Ana nehuta Israeli mopafima me'nea
agonaraminku'ma huhavizama hu'nanana Ra Anumzamo'a
antahi'ne huta Nagrikura keta antahita hugahaze. Hagi tamagra
amanage hu'naze, mopazmia eri haviza hanunke'za ana
mopazmia tagri tamisageno tagri su'za megahie huta hu'naze. **13**
Tamagra tamavufga ranke nehuta, huhavizama hunanteta e'naza
kea Nagra antahi'noe. **14** Ra Anumzana Agra Anumzamo'a
amanage hie, Nagra tamazeri haviza ha'nena mopatamimo'a
ka'ma koka fore hina, kokankoka vahe'mo'za muse hugahaze.
15 Israeli vahe'mo'zama knazampima ufre'za havizama hazageta
Idomu vahe'mota muse hu'nazankina, Seiri agonafi vahe'ene
Idomu vahe'motanena knazana tamina, tamazeri haviza nehu'na
tamahe fanane hanugeta, Nagrikura Ra Anumza mani'ne huta
keta antahita hugahaze.

36 Vahe'mofo mofavre Izikeliga, amanage hunka Israeli
mopafima me'nea agonaraminkura kasnampa kea huzmanto,
Israeli agonaramimoka Ra Anumzamo'ma hiankea antahilo. **2**
Ra Anumzana Agra Anumzamo'a amanage hie, Ha' vahekamo'za

amanage hu'za kagrikura nehaze, kagri ranra agonaramimo'za
ko tagri'za se'ne hu'za nehaze. 3 E'ina hu'negu amanage hunka
kasnampa kea huo, Ra Anumzamo'a amanage hie, Na'ankure
maka kazigatira ha' vahe'kamo'za hara eme huramante'za
maka zantmia eri nafa'a nehazage'za ana zankura vahe'mo'za
tamefi kea nehu'za tamagenkea hu'naze. 4 E'ina hu'negu Israeli
mopafima me'nea agonaramimota, Ra Anumzamo'a amanage
hianki antahiho, Ra Anumzamo'a huno, Israeli mopafima
me'nea ranra agonaramine, neone agonaramine tinkrahotamine,
aguporamine, havizama huno me'nea kumatamine, vahe'ma
omani rankumataminkura tamagri tava'ontema mani'naza
vahe'mo'za kiza zokago kea huneramante'za, tamefi kea
huneramante'za, tamagenkea hu'naze. 5 E'ina hu'negu Ra
Anumzamo'a amanage hie, Tamage huno narimpa ahe'zamo'a
teve rukru hiankina, ruga'a mopafi vahe'ene Idomu vahe'enena
narimpa ahezmante'na huhaviza huzmante'noe. Na'ankure
Nagrira nage fenkami netre'za, tusi muse nehu'za nagri mopa eme
aguza ru'za eri nafa'a hu'naze. 6 E'ina hu'negu Israeli mopafima
me'nea ranra agonaramine, neone agonaramine, tinkrahotamine,
aguporaminkura amanage hunka kasnampa kea huo, Ra
Anumzamo'a amanage hie, Ko, ruga'a mopafi vahe'mo'zama
huhaviza huneramante'za knazama tamigeta tamagazegu'ma
hu'naza zantera, tusi narimpa ahezmantegahue. 7 E'ina hu'negu
Ra Anumzana Agra Anumzamo'a amanage hie, Nagra nazana
erintesaga hu'na huvempa huankino, tamagri tava'onte'ma
mani'naza mopafi vahe'mo'zama tamagrku'ma hu'za, haviza
hugahazema hu'za huramante'naza nanekea, zamagrite
antenuge'za ana knazana zamagra'a eri'za zmagazegura
hugahaze. 8 Hianagi Israeli agonaramimpima me'nea zafamota

Nagri vahe'mo'zama eme nesaza zana rama'a azanku'na ahenteta zafa raga'a renteho. Na'ankure kofa hu'za ete kumazmirera egahaze. **9** Hagi ko, Nagra tamagri su'a mani'noanki'na tamagrite ete rukrahe hu'na tamaza hanugeta mopafina hoza erita krigahaze. **10** Ana nehu'na vahera zamazeri rama'a hugahuankino, maka Israeli vahe anara hugahue. Hagi ranra kumatmimpina mani avi'nete'za havizama hu'nea ranra kumatamina ete eri so'e hu'za kigahaze. **11** Hagi ana kumapina vahe'ene zagagafanena zamazeri hakare ha'nena mofavrea kasezmante hakare hugahaze. Ana hanugeta tamafahe'i knafima hu'nazaza huta ana mopa mani vinetenage'na, ko knafima osu'noaza hu'na knare'za huramantegahue. E'ina hanugeta Nagrikura Ra Anumza mani'ne huta keta antahita hugahaze. **12** Hagi Israeli vahe'ni'a huzmantenuge'za ana agonaramimota tamagofetura vano hugahaze. Ana nehu'za tamagrira zamazeri santi haresageta, zamagri'za neseta ru'enena mofavrezmia zamazeri havizana osugahaze. **13** Hagi Ra Anumzana Agra Anumzamo'a amanage hie, Vahe'mo'za tamagrikura amanage hu'za nehaze, tamagra vahera zamazeri haviza nehuta, mofavreramina zamazeri kefoneraze. **14** E'ina hu'negu kagra ru'enena, vahe'ene mofavre naga'enena zamazeri havizana osugahane huno Ra Anumzana Anumzamo'a hu'ne. **15** Hagi ru mopafi vahe'mo'za mago'enena huhavizama huramante'naza nankeea nontahisageno, zamazeri tamagazea nosanageno, ru'enena ru mopafi vahe'mo'za zamazeri tanafara osugahaze huno Ra Anumzana Anumzamo'a hu'ne. **16** Hagi Ra Anumzamo'a amanage huno nasami'ne, **17** Vahe'mofo mofavre Izikieliga, Israeli vahe'mo'za mopazmifima mani'neza hu'naza havi zamavu'zmava zamo, Nagri navurera mopazmia eri haviza hu'naze. Hagi ana

zamavuzmavama hu'naza zamo'a, a'nemo'za ikankri eri'za agru
osu'nazankna hu'naze. **18** E'ina hu'nagu narimpa ahezmante'na
zamazeri havizana hu'noe. Na'ankure zamagra vahera zamahe'za
ana mopafina korana eri neragi'za, havi anumzantera monora
hunte'za, ana mopazmia eri haviza hu'nazagu anara hu'noe. **19**
Nagra ana hukna hu'na zamahe panani huge'za, vahe mopafine,
kumatamimpine hazagre'za mago mago hu'za umani eman
hu'naze. Zamagrama hu'naza zante'ene, zamavu zamavate'ene
keaga huzmante'na refko huzmante'noe. **20** Hagi ana'ma
huza vahe mopalregane, vahe kumategama nevu'za Ruotge'ma
hu'nea nagia eri haviza nehazage'za, ana kumapi vahe'mo'za
hu'za, ama vahetamina Ra Anumzamofo vahetaminagi, Agri
mopafintira atre'za e'naze hu'za hu'naze. **21** Hianagi Israeli
vahe'mo'zama ru mopalima vu'za ezama hazaregama ruotge'ma
hu'nea nagima eri havizama nehaza zankura, Nagra ra nagesa
nentahue. **22** E'ina hu'negu Israeli vahera amanage hunka
zamasamio, Ra Anumzana Agra Anumzamo'a amanage hie,
Ama zama hu'za huana Israeli vahe'mota so'e zanku hu'na
osuanki, vahe kumategama vazaregama ruotge'ma hu'nea
nagima eri havizama nehaza zanku hu'na amanara hu'za
hue. **23** Hanki ru mopalregama umani'neta ruotge'ma hu'nea
nagima eri havizama hu'naza nagia eriama hu'na ahentesga
hugahue. E'inama hu'na nagima eriama hu'na hentesgama
hanuge'za, anama umani'naza mopalvi vahe'mo'za Nagrikura
Ruotge hu'nea Ra Anumza mani'ne hu'za ke'za antahiza
nehanage'na, Nagrani'a ruotge hu'noe hu'na eri ante ama
hanuge'za zamagra kegahaze. **24** Hagi maka kumamatamimpinti'ene
maka mopalintira tamavre'na ete tamagri mopalvi emeri atru
hugahue. **25** Ana nehu'na avusese tinuti ru ani'ani hu'na tina

freramante'na, agru osu tamavutamava zane, vahe'mo'zama
antre'za troma hunte'naza havi anumzama mono'ma hunentaza
zampintira tamazeri agru hugahue. **26** Ana nehu'na kasefa
tumo anteneramante'na, kasefa avamu anteramantegahue.
Hagi hankavetino havegna'ma hu'nea tumorra erinetre'na,
fru'ma huno kema amage ante tumo anteramantegahue. **27**
Hagi Avamuni'a tamagu'afina anteramante'nugeta tra ke'ni'ane
kasegeni'anena kegava nehuta avaririgahaze. **28** E'ina hanugeta
tamagehe'ima zami'noa mopafi umanineta, tamagra Nagri
vahe mani'nage'na, Nagra tamagri Anumza manigahue. **29**
Ana nehu'na Nagra maka agru osu tamavutmava zampintira
tamagu nevazi'na, witi hozama hankre'nage'na, raga'a eri
rama'a hanenkeno, witimo'a ome rama'a hinkeno mopatamifina
agatontozana omegahie. **30** Hagi zafa ragane hozafi ne'zanena
eri rama'a hanenkeno tamagatonto'ma nehazage'za ru mopafi
vahe'mo'zama huhaviza huneramante'za kiza zokago kema
huramante'naza zana osugahaze. **31** E'ina hanugeta kefo avu'ava
zama nehuta, kefo zama nehuta, kasri avu'ava'ma hu'naza
zankura, Israeli vahe'mota tamagesa nentahisageno tamagoteno
amu'ati tamagesa hugahie. **32** Hagi antahi'neni hiho, ama ana
zama hanuana, tamagrikure hu'na osugosue huno Ra Anumzana
Anumzamo'a hu'ne. Hagi Israeli vahe'mota tamagazegu hiho.
33 Hagi Ra Anumzana Agra Anumzamo'a amanage hie, Kefo
tamavu'tamava zampinti'ma tamazeri agruma hanua kna zupa,
kumatmifina vahera zamazeri ante avinetena, havizama hu'nea
kumatamina eri so'e hugahue. **34** Hagi mopatimo'ma havizama
huno ka'ma kokama menege'zama negaza mopafina hoza
erita ante'nesage'za karanka vu'za e'zama hanaza vahe'mo'za
kegahaze. **35** Ana hanuge'za amanage hugahaze, hozama onte

ka'ma mopamo'a, Ideni hozagna hie nehu'za, havizama higeno
vahe'ma omani'nea rankumatamimpina vahe'mo'a avitegeno
kuma keginamo'a hanavenentake huno knare hie hu'za hugahaze.

36 E'ina hanuge'za tamagri tava'onte'ma manigagi'naza mopafi
vahe'mo'za nege'za, Nagrikura hu'za Ra Anumzamo ama
kumatmina eri so'e nehuno, havizama hu'nea mopa eri knare
higeno, hozamo'a ampore hu'za ke'za antahi'za hugahaze.

Nagra Ra Anumzamo'na huanki'na ana zana Nagrani'a hugahue.

37 Ra Anumzana Agra Anumzamo'a amanage hie, Nagra Israeli
vahe'mokizmi nunamu kea antahizami'na zamazeri rama'a
hanuge'za, sipisipi afu kevugna hu'za rama'a vahe fore hu'za
manigahaze. **38** Hagi Kresramana vu kna zupama ofama hanaza
sipisipi afu'tamima Jerusalemi kumapi avre'za eme rupazima
hazaza hu'za havizama hu'nea ranra kumatmimpina rupazi
hugahaze. E'ina hanige'za Nagrikura Ra Anumza manine hu'za
ke'za antahi'za hugahaze.

37 Hagi mago zupa Ra Anumzamo'a azana nagrite antegeno,
Avamumo'a navareno vuno vahe zaferinamo avite'nea agupofi
ome nante'ne. **2** Hagi Ra Anumzamo'a navareno ana agupofina
vano nehige'na omege emegema huana, rama'a fri vahe'mofo
zaferinarami'mo hagege huno ana agupofina avitente'ne. **3** Ra
Anumzamo'a amanage huno nantahige'ne, vahe'mofo mofavre
Izikieliga ama vahe zaferinaramimo'za zamasimura ete amane
eri'za manigahazafi? Hige'na nagra hu'na, Ra Anumzana
Anumzamoka Kagrake'za kenka antahinka hu'nane. **4** Anagema
hugeno'a, ete amanage huno nasami'ne, ama zaferinaraminkura
amanage hunka kasnampa kea huzmanto, ama hagege
zaferinaramimota Ra Anumzamo'ma nehia nanekea antahiho.
5 Ra Anumzana Agra Anumzamo'a ama zaferinaramotagura

amanage hie, Nasimura atresugeno tamagu'afina efre'na tamasimura erigahaze. **6** Nagra tamagrunanofira ome hagerafi emeri hagerafi huneramante'na, tame'a zaferinarera eri rukamre neramante'na, tamavufgareti tamazeri ano vazineramantena, nasimura huhu hvaziramantane'na tamasimura erita ete kasefa huta manigahze. E'ina hanugeta Nagrikura Ra Anumza mani'ne huta keta antahita hugahaze. **7** Hige'na Ra Anumzamo'ma hunanteaza hu'na kasnampa kea hu'noe. Ana kasnampa kema hugeno'a, ana zaferinaramimo'za zamagasasa nerazage'na nentahugeno, ankrare ankraru nehu'za zamagrare uvu evu hu'za ome rekanu eme rekanu henaze. **8** Hagi negogeno ana zaferinaramintera agrunaramina efore higeno, ame'arami'na efore huno zaferinaramintera ukamaregeno, zamavufagamo'a ana zaferinaramina eri hananegeno vahe fore hu'naze. Hianagi zamagra zamasimura e'ori'naze. **9** Ana'ma higeno'a Ra Anumzamo'a amanage huno nasami'ne, Vahe'mofo mofavre Izikieliga, amanage hunka zaho'mofonkura kasnampa kea huo, Ra Anumzana Agra Anumzamo'a amanage hie, 4'a asoparegati zahomoka enka amama fri'za mase'naza vahera zamasimura eme zamige'za, zamasimura eri'za ete kasefa hu'za maniho. **10** Anagema hige'na hunanteaza hu'na ana kasnampa kea hugeno, zamasimumo'a ufreto zamazeri otige'zama oti'nazana, rama'a sondia vahekrerfa oti'naze. **11** Ana'ma hazageno'a Ra Anumzamo'a amanage huno nasami'ne, vahe'mofo mofavre Izikieliga, ama zaferinaramina e'i Israeli vahetami mani'naze. Ana hu'neankiza zamagra hu'za zaferinatimo'a hagege higeno, amuha zantia omane nehaze. **12** Hianagi amanage hunka kasnampa kea zamasamio, Ra Anumzana Agra Anumzamo'a amanage hie, Keho, Nagra mati keria eri anagi hagro hu'na

matipintira tamazeri otina tamavre'na Israeli moparega ete
vugahue. **13** E'ina hu'nama mati kerima eri anagi hagro hu'nama
vahe'nimotama tamazeri ot'i'nugeta, Nagrikura Ra Anumza
mani'ne huta keta antahita hugahaze. **14** Ana nehu'na Avamuni'a
tamagu'afina ante'ramantenugeno tamasimura taminigeta kasefa
huta nemanisage'na, tamavre'na vanugeta tamagra'a mopafi
umanigahaze. E'ina'ma hanugeta, Nagrikura Ra Anumzamo Agra
hu'neankino, hugahuema hu'nea zana hie huta keta antahita
hugahaze huno Ra Anumzana Agra Anumzamo'a hu'ne. **15**
Hagi Ra Anumzamo'a amanage huno nasami'ne, **16** Vahe'mofo
mofavre Izikieliga, mago azota erinka ana azotarera Juda
vahe'ene agri'enema eri mago'ma hanaza avameza me'ne hunka
krenentenka, ete mago azota erinka ana azotarera, Efraemi
naga'mozama Israeli vahe'enema eri mago'ma hanaza avame'za
me'ne hunka krento. **17** Hagi ana tare zota erinka atupa'arare'na
magopi eri rekanu heznantegeno magoke azota kna hi'o. **18** Hagi
ana'ma hu'nenankeno'ma kagri vahe'mo'zama kantahige'za,
nagafare e'inara hunampi tasamio hu'zama hanagenka, **19**
amanage hunka zamasamio, Ra Anumzamo'a amanage hie,
menina Nagra Efraemi nagapinti' ne' Josefente'ma mago'a Israeli
naga'ma hagerafi'naza azota eri'na Juda azotare eri rekanu
ahe'nuge'ne Nagri nazampina mago azota megahie. **20** Hagi
avoma krente'nana azotarare'na zamavure kazampi eri'nege'za
negesagenka, **21** amanage hunka zamasamio, Ra Anumzamo'a
amanage hie, Keho, nagra Israeli vahetamina vahe kamategama
umani emanima hu'naregatira uzamavare ezamavare hu'na
zamazeri atru hutena, zamavare'na mopazmire vugahue. **22**
Hagi ana mopafina, Israeli agonaramimpina Nagra magoke vahe
zamazeri tro hugahue. E'ina hanugenno magoke kinimo kegava

huzmante'na, ete ru'enena atane'za tare mopafi vahera forera osugahaze. **23** E'ina hanuge'za ete ru'enena havi anumzante'ene, kasrino agote zantaminte'ma mono'ma huzmante'za kumima nehu'za zamazeri pehenama hu'naza mago'enena osugahaze. Hianagi kumi'ma hu'za zamagenama hunami naza zampintira, zamagu'nevazi'na zamazeri agru ha'nena zamagra Nagri vahe mani'nage'na, Nagra zamagri Anumza manigahue. **24** Hagi Nagri eri'za ne' Deviti'a kini ne'zmia mani'nigeno, magoke sipisipi kva ne' azampi manigahaze. Ana nehu'za Nagri kasegene tra kenena amage ante fatgo hugahaze. **25** Hagi eri'za ne'ni'a Jekopuma amugenno tamagehe'zama mani'naza mopafi manigahaze. Hagi zamagrane, mofavrezmine, zamagehe'mozane forehu anante anante'ma hu'za maniza vanaza vahe'enena mani'veva hu'za nevanageno, eriza ne'ni'a Deviti ugagota kva mani'veva huno vugahie. **26** Hagi Israeli vahe'mo'zanema narimpa fru hu'nama manisua huhagerafi hvempa ke hanugeno, ana huhagerafi hvempa kemo'a mevava huno vugahie. Ana nehu'na mikazama hanazana zamazeri ampore'nugeno rama'a vahe rupazi hu'za manisage'na, amuno'zmifina mono noni'a antesugeno mevava huno vugahie. **27** Hagi Nagrama manisua kumamo'a zamagrane me'nena, Nagra zamagri Anumza mani'nugeno, zamagra Nagri vahe manigahaze. **28** Hagi mono noni'a zamagri amu'nompima antesugeno mevavama hanigeno'a, ama mopafi vahe'mo'za Nagrikura Agra Ra Anumzamo'a Israeli vahera zamazeri ruotge hie hu'za ke'za antahiza hugahaze.

38 Ra Anumzamo'a amanage huno nasami'ne, **2** Vahe'mofo mofavre Izikieliga, Gogu kuma'ma Magogu mopafima me'neno Meseki kuma'ene Tubali kumatre'ma ugagota huno kegavama huzanante'nea kumatega kavugosa hunte'nenka, havizama

hania zamofo kasnampa kea hunto. 3 Hagi Ra Anumzana Agra Anumzamo'a amanage hie, Meseki vahe'mokizmine Tubali vahe'mokizmi ugagota kva ne' Gogiga Nagra ha'regantegahue. 4 Hagi Nagra kazeri rukrahe hu'na kagemazampafi huku rente'na kavazu nehu'na, maka sondia vaheka'ane, hosi afutamine, ana hosi afu agumpima vanoma hu'za ha'ma nehaza vahe'ene, tusi'a sondia vaheka'ane, ha' kukena zamine, neone hankozmine, ranra hankozmine, ha'ma hu zantamine bainati kazinena eri'enage'na maka zamavare atiramigahue. 5 Hagi kagri'enema esaza sondia vahera, Pesia sondia vaheki, Kusi (Itopia) sondia vaheki, Puti (Libia) sondia vaheki hu'za hankozmine, aeni fetori antani'neza ha'zazmi eri'neza kagrane ne-enage'za, 6 anampina Goma'ene sondia vahe'aramine, noti kaziga afete mopa Bet-Togarma vahetamine egahazankino rama'a vahe'mo'za kavaririza egahaze. 7 Hagi kagra retrotra nehunka, kagranema mani'naza sondia vahe kevukerfa zamazeri ante fatgo huge'za ha'ma hu'are tro huza maniho. 8 Hagi rama'a knama evutenige'na henkama esia kafufina hugantane'na vunka, hapinti'ma kumazmi'ma eri haviza hazage'za ru mopafima umani emanima hu'nazaregati'ma ete e'za kumazmi'ma emeri so'ema hu'za Israeli mopafima me'nea agonaramimpima mani fru'ma hu'za knare'ma hu'za mani'naza vahe'ene hara eme huzmantegahane. 9 Hagi kagrane maka sondia vaheka'ane, ru moparegati sondia vahe'mo'zanena ununko'ma atiaza huta hatera marerigahaze. Rama'a vahe vugahazankino, hampomo kino runtrako hiazza huta tusi'a sondia vahetamine mopa ante hananeta marerigahaze. 10 Hagi Ra Anumzana Agra Anumzamo'a amanage hie, Ana knazupa mago antahintahi antahintahika'afina enkenka, kefo avu'avazama hu antahintahirami retro nehunka, 11 kagra amanage hunka

hugahane, vihu osu kumatmimpi vahera ha' ome huzmantegahue. Zamagra mago zankura zamagesa ontahi, hara omegahie hu'za nehu'za kumazmimofona vihu kegina nosu'za, kuma keginamofo kafana hagenonte'za, kahama erigi'za rentrakohu zafanena trohu onte'hazankina ha' ome huzmantegahue hunka hugahane.

12 Hagi atrezama ru moparegama vu'za e'zama hazageno'ma havizama hu'nea kumatamima ete emeri so'ema hu'za ama mopamofo amu'nompi emanine'za rama'a bulimakoane sipisipi afutamine eri ampore'za mani'naza vahera ome rohuzmare'na maka zazmia erigahue hunka nehane. **13** Hagi Siba kumate vahe'mo'zane, Dedani kumate vahe'mo'zane, zagore'ma keonke'zama miza hu'za atre'zama nehaza Tasisi vahe'mo'zane, maka neonse kumazmifima nemaniza vahe'mo'zanena amanage hu'za kagrikura hugahaze. Kagra sondia vaheka'aramima zamavarenka e'nanana, vahe arohu zamarenka feno zamine, silvane, goline, bulimakao afutamine, sipisipi afutamine, maka fenozmia erinaku e'nano? hu'za kantahigegahaze. **14** E'ina hu'negu vahe'mofo mofavre Izikieliga, Gogina amanage hunka kasnampa kea hunto, Ra Anumzana Agra Anumzamo'a amanage hie, Israeli vahe'nimozama zamagu'ma vazi nonkumapima ko'ma mani'nazana kagra onke'nampi? **15** Hagi kagra afete kumaka'arega noti kazigati, tusi'a sondia vahetamine, ru kumatmimpinti vahetamimozane kagri'ene esagenka, tusi'a vahekrfamozane hanavenentake sondia vahetamine hosi afu agumpi maniza egahaze. **16** Hagi hamponkino mopama refite vagareankna huta, Israeli vaheni'a hara eme huzmantegahaze. Hagi mago'a kna evutenige'na henka'a kavre'na esugenka, Nagri mopafi vahera hara eme huzmante'nanke'na, Gogiga kagripi huvazina ruotgema hu'nea nagini'a erintesga hanenke'za,

ama mopafi vahe'mo'za Nagrikura Ra Anumza manine hu'za
nage'za antahi'za hugahaze. **17** Hagi Ra Anumzana Agra
Anumzamo'a amanage hie, Koma evu'nea knafima Nagri
eri'za vahe Israeli kasnampa vahe'mofo zamagipima nanekema
antoge'zama huama hu'za, henka mago'a kafuma evutesigeno
Israeli vahera ha'eme huzmantegahie hu'zama hu'naza nepi,
ru ne' mani'nane? **18** Hianagi Gogi'ma Israeli vahe'ma ha'ma
huzmantenia kna zupa, narimpa ahe'zamo'a marerinkeno
tusi nasivazigahie huno Ra Anumzana Agra Anumzamo'a
hu'na'e. **19** Na'ankure tusi narimpa neheno nasivazi zamo'a
tevenefa nehige'na Nagra huama huankino, ana knazupa
Israeli mopafina tusi eminkrerfa erigahie. **20** Hagi hagerimpima
nemaniza nozameramimo'zane, monafima hare'za vanoma
nehaza namaramimo'zane, maka zagagafamozane, maka
zamasaguregati'ma rekrarohe'za vanoma nehaza zagamozane,
maka ama mopafi vahe'mo'zanena Nagri navuga zamahirahiku
hugahaze. Ana nehanageno agonaramimo'za ankarise'za
eneramisageno, vanoma nehaza kamo'a mehi enerisigeno,
keginamo'za mopafi fragu vaziramigahaze. **21** Hagi Nagra
hanuge'za agonaramini'afina bainati kazinteti Gogiga hara
hugantegahaze. Ana nehanage'za sondia vahetmimo'za zamagra
zamagra hahu'za ohefri ahefri hugahaze huno Ra Anumzana
Agra Anumzamo'a hu'ne. **22** Ana nehu'na ruzahu ruzahu kri
atresugenotamazeri haviza nehina, ha'vahe huzmantenuge'za
eme tamahegahaze. Hagi ana'ma nehanafina komopa ko'ene,
amuho huno fizo hu'enenia haveraminu ko'mariaza hu'na
atresugenotamagri'ene ru vahetmima tamagri'enema mani'naza
vahera tamahe frigahie. **23** E'inahu avu'ava'za hu'na Nagrani'a
hihamuni'ane Nagrani'a ruotge navu'nava'enena ama mopafi

vahe zamavurera eriama hugahue. E'ina hanuge'za Nagrikura
Ra Anumza mani'ne hu'za keza antahi'za hugahaze.

39 Vahe'mofo mofavre Izikeliga, Gogi'ma havizama hania
zamofo kasnampa kea amanage hunka huo, Ra Anumzana
Anumzamo'a amanage hie. Meseki vahe'ene Tubali vahe'mofo
kini ne' Gogiga Nagra hara regantegahue huno hie. **2** Nagra kazeri
rukrahe hu'na kavazu hute'na afete noti kazigati hugantugenka
Israeli agonaramimpi vahera hara ome huzmantegahane. **3** Ana
nehu'na hoga kaziga kazampintira atika'a ruhanare netrena,
tamaga kaziga kazampintira keveka'a ruhanare atregahue.
4 Hagi Israeli agonaramimpi kagrane sondia vaheka'ane,
kagranema vu'naza vahe'mo'zanena frigahaze. Ana hanage'na
namazagaramine afi zagagafa huzmantenuge'za kavufga
eme traga hu'za negahaze. **5** Hagi ana'ma hunka frisanana
mago'za omene zampi ufrinte efrinte hugahaze. Na'ankure Ra
Anumzana Nagra Anumzamo'na hue. **6** Hagi Magogi mopafine,
hagerinkenama me'nea mopafinema nemaniza vahe'mo'zama
so'e huta mani'nonema hu'za nehaza mopare teve tagintanena
neresige'za Nagrikura Ra Anumza mani'ne hu'za ke'za antahiza
hugahaze. **7** Hagi Israeli vahe'nimofo amunompina ruotgema
hu'nea Nagia eriama hanuge'za, ru'enena ruotge'ma hu'nea
nagia huhavizana osugahaze. E'ina hanuge'za ama mopafi
vahe'mo'za Nagrikura Israeli vahe'mofo Ruotge Ra Anumza
mani'ne hu'za ke'za antahi'za hugahaze. **8** Hagi keho, ana zama
fore'ma hania kna neiankino tamage huno ana zana fore hugahie.
Hagi e'i ana kna Nagra ko huhampri ante'noankino, anazana fore
hugahie huno Ra Anumzana Agra Anumzamo'a hu'ne. **9** Hagi
ana knama efore hina, Israeli mopafima me'nea ranra kumapima
nemaniza vahe'mo'za, hapima fri'naza sondia vahe'mokizmi

hanko'zmima, ati kevezmima, kumpa knozminena maka eri'za
7ni'a kafufi tevea kregahaze. **10** E'ina nehu'za zafafintira
teve'zana osuge, zafa antagigera 7ni'a kafufina osugahaze.
Na'ankure zamagra fri'naza sondia vahe'mokizmi ha'zanteti
tevea hugregahaze. Hagi rohu'ma eme zamare'za zamazeri
havizama nehu'za mika zazimima eri'naza vahera, ana hu'za
zamagrira arohu ome zamare'za mika zazmia erigahaze huno
Mikazama kegavama hu'nea Ra Anumzamo'a hu'ne. **11** Hagi
ana knarera Gogima asentesaza matira Israeli mopafi amigahue.
Hagi ana mopama amisuana, fri hagerimofo zage hanati kaziga
kama nevaza agupo mopa zami'nuge'za, Gogine ana maka
sondia vahe'a ana agupofi asezmantesageno, kama nevaza
kana rehiza hugahie. E'ina hanige'za ana agupogura Hamon-
golie hu'za agia ahegahaze. **12** Hagi Israeli mopama Israeli
vahe'mo'zama eri agruma hunakura, 7ni'a ikampi ana vahetamina
asezmanegahaze. **13** Hagi maka Israeli mopafi ana vahetamina
asenezmante'za Nagri nagia ahentesga nehanageno, e'i ana
knama esige'za Nagrira antahinamitere hugahaze huno Ra
Anumzana Agra Anumzamo'a hu'ne. **14** Hagi ana mopama
eri agruma hunakura 7ni ikamofo atumparega mago'a vahe
huzmantesage'za maka kna ana mopafina vano nehu'za, fri
vahe zamavufaga zogi'za asezmanegahaze. **15** Hagi ana fri
vahe zamavufagagu'ma hakeza nevanage'no mago zamimo'ma
vahe zaferinama ome kenuno'a, mago avame'za tafintenenigeno
vahe'ma asente vahe'mo'za emeriza Hamon-Gogi Agupofi
ome asentegahaze. **16** Hagi anama vahe'ma asezmant'e'zana
rankumamofona mago agi'a Hamonae hu'za agi'a ahegahaze.
E'inahu hu'za mopa eri agru hugahaze. **17** Hagi vahe'mofo
mofavrea Izikeliga, Ra Anumzana Agra Anumzamo'a amanage

hie hunka maka namaramimku'ene afi zagagafagu'enena zamasamio, Israeli agonaramimpina Kresramana vunaku tusi'a ne'za retro nehuanki, emeri atru huneta ame'ane korama'anena negahaze hunka zamasamio. **18** Hagi Basani mopafinti afovage ve meme afutamine, sipisipi afu'tamine bulimakao afutamimofo korane avufga'anema neaza huta, hankavenentake sondia vahe'mokizmi zamavufagane, ugagota kva vahe'mokizmi koranena negahaze. **19** Hagi ana ne'zama retro'ma hanua ne'zama nesazana vahe zamavufaga neramu nehuta, korana nene'nageno tamu'mo'a hihi huno enevina neginagi hugahaze. **20** Hagi Nagri ne'za trate emanineta, hosi afutamimofo zamavufagane, karisifima vanoma nehaza vahe'mokizmi zamavufagane, hankavenentake vahe'mokizmi zamavufagane, ruzahu ruzahu sondia vahe'mokizmi zamavufaganena neramamu hugahaze huno Ra Anumzana Agra Anumzamo'a hu'ne. **21** Hagi ama mopafi vahetera hihamu hankaven'i'a eriama hanenkeno, maka negesage'na, tamagrama hu'naza avu'ava zantera keaga huneramante'na nazana rusutena knazana tamigahue. **22** Hagi ana hutesuge'za ana knareti'ma agafama huno vaniana, Israeli vahe'mo'za Nagrikura Ra Anumzana tagri Anumza mani'ne hu'za ke'za antahi'za hugahaze. **23** Hagi Israeli vahe'mo'za kefo avu'ava'ma hu'naza zante ha' vahe'mo'za eme zamahe'za kina ome huzmante'naze hu'za, ru mopafi vahe'mo'za ke'za antahi'za hugahaze. Na'ankure zamagra kefo avu'ava nehu'za, Nagri namagera onte'nagu navugosa ru krahe hu'na namefi hunezmi'na ha' vahe'mokizmi zamazampi zamavarentogeno, bainati kazinteti zamahehana hu'naze. **24** Hagi zamagrama hu'naza pehenage avu'ava zante'ene kasegema rutagre'naza zante navugosa rukrahe hu'na namefira hunezmi'na, knazana zami'noe. **25**

E'ina hu'negu Ra Anumzana Agra Anumzamo'a amanage hie, menina Nagra Israeli vahera Jekopu agehe'mokizmia nasunku huzmante'na kinama hunazaregatira zamavare'na e'na mopazmia eme nezmi'na, Ruotge'ma hu'nea nagima vahem'o'zama eri havizama hu'zankura frage hugahue. 26 Hagi mago vahe'mo'ma zamazeri koro osanige'za knare'ma hu'za mopazmifima umanisu'za, Nagrite'ma mani fatgoma osu'naza zanku'ene zamazeri zamagaze'ma hu'noa zankura zamage akanigahaze. 27 Hagi ru vahe mopafinti'ene ha' vahe'mokizmi mopafinti'ma zamavare atruma hanuge'za, kokankoka vahe'mo'za nagrikura Ruotge hune hu'za ke'za antahiza hugahaze. 28 E'ina hanuge'za Israeli vahe'mo'za Nagrikura Ra Anumzana tagri Anumza mani'ne hu'za ke'za antahiza hugahaze. Na'ankure Nagra ha' vahe huzmantoge'za eme zamahe'za zamavare'za vu'za kumazmirega kina ome huzmantetazage'na ete zamavare'na mopazmire e'noe. Hagi magore hu'na magomofona ha' vahe kumatega atresugenno kinafina omanigahie. 29 Ana nehu'na Avamuni'a Israeli vahepina eri akaha hutresugenno ne-esige'na, ru'enena namefira huo zamigahue huno Ra Anumzana Agra Anumzamo'a hu'ne.

40 Hagi Babilonima kinama ome hutama mani'nonkeno, 25 fuma hia kafumofona, ese ikamofona 10nima hiakna zupa, Jerusalemi rankuma'ma ha' vahe'mo'zama eri havizama hunareti'ma e'neana, e'i 14ni'a kafu nehigeno, ana knazupa Ra Anumzamo'a avanagna zampi navareno (Jerusalemi) vu'ne. 2 Hagi ana ava'nagna zampina Anumzamo'a navareno Israeli mopafima zaza agonama me'here vu'ne. Hagi ana agonamofo sauti kaziga me'nea zamo'a, mago rankuma kna huno me'nege'na ke'noe. 3 Hagi Ra Anumzamo'ma navareno anante vige'na

koana, mago ne'mofo avufaretira bronsigna higeno, ana ne'mo'a
mago kaziga azampina, efeke nofi erino mago kaziga azampina
mesarimima huno ke azota azerineno mono no kumapima ufre
kafante oti'negena ke'noe. **4** Negogeno ana ne'mo'a amanage
huno nasami'ne, vahe'mofo mofavre Izikieliga, maka zama
kaveri'ma hanuana kavunura negenka kagesa antenka antahi
ankero. Na'ankure ama ana zantmi kaveri hunaku kavre'na
e'noe. Hanki ama ana maka zana huama hunka Israeli vahera
zamasamio. **5** Hagi ese zama ke'noana, keginamo mono
nona rugaginte'negena ke'noe. Hagi ana ne'mo'a azampina
mesarimima nehaza zota azeri'neankino, ana azotamofo
zaza'amo'a 3.6 mita hu'ne. Hagi ana have keginama ana
ne'mo'ma mesarimima huno keana, anagamima mareria'amo'a
3.6 mita higeno, rama hu'amo'a 3.6 mita hu'ne. **6** Hagi zage
hanati kazigama me'nea kafante umarerino kantigamama me'nea
kafa zafararema mesarimima huno rama hu'neama'ama (tapa'a)
keana 3.6 mita hu'na'e. **7** Hagi ana keginamofo kafante'ma kuma
kva vahe'mofo nontrena ana kafamofo kanti kama tare nontre
me'neankino, ana nontre'mofona zazaznimo'a 3.6 mita higeno,
upama huno kanti'kama vu'neama'amo'a 3.6 mita hu'ne. Hagi
ana nontre'mofo amu'nompima kama ufre'amo'a 2.5 mita hu'ne.
Hagi agu'afima ufre kama mesarimima huno keana zaza'amo'a
3.6 mita hu'ne. **8** Hagi ana kafamofoma agu'afima kinte'nea
noma mesarimima hu'neana, zaza'amo'a 3.6 mita hu'ne. **9** Hagi
agu'afima umarereri kankamuma mesarimima hiana 4mita higeno,
tare zafararema kanti kamama retruma rentenea zafararemofo
tapa'amo'a 1mita hu'ne. Hagi ana zafararemokea zanavugosa
agu'afi hunte'na'e. **10** Hagi ana kafama ufretera, kuma kva
vahe'mofo noma me'neana 3'a nontami kanti kaziga megeno,

3'a nontami kama kaziga me'ne. Hiankino ana nontmimofo zaza'amo'ene atupa'amo'enena magozahu hu'ne. **11** Hagi ana kuma kafamofona atupa'amo'a 5 mita higeno, zaza'amo'a 6.5 mita hu'ne. **12** Hagi ana nontmimofo avugama keginama hu'neana, zaza'amo'a 50 sentimita marerigeno, 50 sentimita atupa kaziga hu'ne. Hagi kuma kafante'ma kegavama hu vahe'mofo noma hunaragi'naza, miko kaziga zaza'amo'ene atupamo'enena 3mita hutere hu'ne. **13** Hagi kuma kafa'ma kegavama nehaza vahe'mofo nompina anagami mago kaziga nomumpareti'ma mesarimima huno kantu kaziga nomumpare'ma viana zaza'amo'a 12.5 mita higeno, kantu kamama me'nea nontremofo kafamokea ohumi ahumi hu'na'e. **14** Hagi ana kuma kafamofoma agu'afima kanti kamama retruma rente'naza zafararema mesarimima huno ke'neana, zaza'amo'a 30 mita hu'ne. Hagi ana maka kuma kafantamintera zaza'amo'a magozahu huno 30 mita hu'nea zafarami kanti kama asentetere hu'ne. **15** Hagi ana kafamofona kama ufreteti'ma marerino agu'a nonte'ma ufre'nea kankamuma mesarimima hu'neana, 25mita hu'ne. **16** Hagi ana nontmimofona ne'one zaho eri kana megagigeno, ana nontamima hunaragi'nea asafinena neone zaho kana (windua) kuma kafantega hagegamu atre'ne. Hagi kuma kafamofo kanti kamama retruma rente'nea zafararemofo zanasenirera tofe zafamofo amema'a tro huntetere hu'ne. Hagi ana maka kuma kafantera anahuke'za hu'ne. **17** Hagi ana ne'mo'a mono no kumapi navareno vige'na koana, ana kumamofona 30'a neone hunaragine nontami megeno, vahe'ma vuno eno'ma hu kana ana nontmimofo zamavuga arugagino evigeno, ana nontamimo'za zamavugosa kama vutega hunte'nazage'na ke'noe. **18** Hagi ana kamofona zaza'amo'a ana nontmimofo zaza kaziganena magozahu

hu'ne. Hagi e'i ana kama vu'neana mono nona onagamu mesga higeno fenkma evu'ne. **19** Hagi fenkma kazigama me'nea kafamofona, agu'a nomofona agu'afinti vuno megiamu uhanati'nea kankamura mesarimima hu'neana, zage hanati kazigane noti kaziga kankamura'amo'a 50 mita huno magozahu hu'ne. **20** Hagi ana ne'mo'a, noti kaziga ufre kafamofona za'za kazigane atupa kaziganena ome mesarimi huno ke'ne. **21** Hagi ana kafante'ma kegavama hu'za manisaza vahe'mokizmi noma hunaragi'nazana, kafamofona kanti kama 3'a metere hu'ne. Hagi ana nontmimofo zaza'amo'ene atupa'amo'enena ese kafante'ma me'nea nontaminkna huno zaza'amo'a 25 mita higeno, atupa'amo'a 12.5 mita hu'ne. **22** Anahukna huno zaho'ma eri kafane, avunoma kigamumate'nea nomo'ene, kanti kamama me'nea retruma rente'nea zafararente'ma tofe anina zafama trohunte'nea avasase zamo'a zage hanati kaziga kafantema me'nea kna huno magozahu hu'ne. Hagi ana nontamintera 7nia ladamo marerino uhanatine. **23** Hagi zage hanati kazigama me'neankna kafa noti kaziga kafamofo mago kaziga asoparega me'ne. Hagi agu'a kafanteti'ma mesarimima huno megia kafante'ma vigeno'a, kankamura'amo'a 50mita hu'ne. **24** Ana huteno sauti kaziga nevreno vige'na, sauti kazigama me'nea kafana ke'noe. Hagi ana nomofo kafante'ma me'nea zantamima mesarimima huno ke'neana, ruga'a kafante'ma hu'neaza huno magozanke hu'ne. **25** Hagi ana kafante'ma zaho'ma eri kafama hagente'nea kafamo'ene avu nomo ki'nea nomo'enena, ruga'a kafante'ma hu'neaza huno magozahu hu'ne. Hagi ana kafamofona zaza'amo'a 25 mita higeno, atupa'amo'a 12.5 mita hu'ne. **26** Hagi 7ni'a latare marerinka ana kafamofo ko'noma kintenerera uhanatigahane. Hagi ana

kafamofona rugaragama me'nea zafararentera, tofe zafamofo amema'a trohuno konariria hunte'ne. **27** Hagi agu'a mono kumamofona noti kaziga mago kafana hagente'haze. Hagi meg'i'a kafanteti'ma agu'a kumamofo kafante'ma vu'nea kankamuma mesarimima hu'neana 50 mita hu'ne. **28** Ana huteno ana ne'mo'a agu'a mono kumapi navareno vuno sauti kazigama me'nea kafante vuno, ana kafana ome mesarimima huno keana, ruga'a kafamo'zama hu'nazaza huno magozahu hu'ne. **29** Hagi ana kafamofona mago'a kafante'ma hu'neaza huno kumama kegavama nehia vahe'mifo nona 3'afi hunaraginenteno anahukna huno rugaraga zafararena megeno, zahoma eri kafama hagente'nea zamo'enena mago'zanke hu'ne. Hagi kafantetima vuno avu nontema vunea kankamumofona zaza'amo'a 25 mita higeno, atupa'amo'a 12.5 mita hu'ne. **30** Hagi ana kafamofo avunomofo zaza'amo'a 25 mita higeno, atupa'amo'a 2.5 mita hu'ne. **31** Hagi ko, noma ki'nea nomo'a meg'i'a kumatega avugosa hunte'ne. Hagi ana kafamofo rugaragama asente'haza zafararentera tofe zafamofo amema'a trohunte'za avasasea hunte'haze. Hagi ana kafante'ma rerakaureno mareri'zana 8'a lada tro hunte'haze. **32** Hagi anantetira navareno agu'a mono kumamofona zage hanati kaziga kafante vuno ana kafana ome mesarimima huno ke'neana, ruga'a kafankna huno magozanke hu'ne. **33** Hagi ana kafante'ma rugaragama hunaraginte notamimo'ene, rugaraga vihu kafama ufre nomo'enena ruga'a kafantaminte'ma hu'neaza huno magozanke hu'ne. Hagi ana kafantema mareriza rugaraga me'nea notamintera zahoma eri kafantami me'nne. Hagi ana kafamofona zaza'amo'a 25 mita higeno atupa'amo'a 12.5 mita hu'ne. **34** Hagi avu nomo'a, fegia kumatega avugosa huntogeno, ana kafante'ma

kantikama retruma rente'naza zafararemofo zanasenirera tofe
zafamofo amema'a tro hunte'naze. Hagi ananteti'ma anagamuma
mareri'zana zamagiama reza mareri lada 8'a trohunte'ne. 35
Hagi anantetira ana ne'mo'a navareno noti kaziga kafante vuno,
noti kaziga kafana ome mesarimi huno ke'ne. Hagi noti kaziga
kafamofo zaza'amo'ene atupa'amo'a ruga'a kafankna huno
magozanke hu'ne. 36 Ana kafante'ma rugaragama hunaraginte
nontamimo'ene, kafama ufre nomo'enena magozanke hu'ne.
Ana higeno zaho eri kafama hagentetere'ma hu'nea zamo'a
magozanke hu'ne. Hagi ana kafamofo zaza'amo'a 25 mita
higeno, upa'amo'a 12.5mita hu'ne. 37 Hagi ana kafamofo
avu nomo'a megi'a kumatega avugosa hunte'ne. Hagi ana
kafamofo rugaraga kazigama retruma rente zafararemofo
zanasenirera, tofe zafamofo amema'a trohunte'ne. Hagi ana
kafante'ma mareri'zana 8'a zupa agia renake reno mareri
lada trohu'za mareri'naze. 38 Hagi ana kafante'ma avunoma
kinte'nomofa kantikaziga tevefima kre fananehu ofama hu afu
ame'aramina sese nehaze. 39 Hagi anama hunaraginte nompina
taretare huno rugaraga ofama ante itararena me'ne. E'i ana
itararamintera tevefima kre ofane, kumimofo nonama huno
hu ofane, havi avu'ava'ma hu'nea zantema hu ofama hu'zana
sipisipi afuzaga ahegahaze. 40 Hagi megi'a kumamofo noti
kaziga kafante'ma mareri ladarera megi'a kanti kama tare
itarare megeno, agu'afina kanti kama tare itarare me'ne. 41
Hagi ofama hu itaramina 8'a me'neankino, 4'a agu'a mono
kumamofo kafante megeno, 4'a megi'a mono kumamofo kafante
me'ne. E'i ana itaraminte kresramnama vu sipisipia ahe'za
tagana nevazize. 42 Hagi havere itaramina Kresramanamavu
sipisipi afutmima aheno tagnavazintezana 4'a trohunte'ne.

Hagi ana itaramimofo zaza'zmimo'ene atupa'amo'enena 50
sentimita higeno, atrure'amo'a 75 sentimita hu'ne. Hagi ana
itaramintera ana sipisipi afutamima ahegisaza zantamine anama
ahegisaza sipisipi afutami antegahaze. **43** Hagi zaza'amo'a
7 sentimitagi hafu hu'nea eri fagajinte hukurami nozafarera
hantinte'za kagi'naze. Hagi itaramima tro'ma hunte'nazana
sipisipi afutamima aheno taganavazinte itarami tro hunte'naze.
44 Hagi fegiatima agu'afi kumapima ufre kantera tare nontre
zagamema hu vahe'mofo nona hunaragintegeno me'ne. Mago
nomo'a noti kaziga kafante avugosa huntogeno, mago nomo'a
sauti kaziga kafante avugosa hunteno me'ne. **45** Hagi ana
zantamima naveri'ma huno vanoma hia ne'mo'a amanage
huno nasami'ne, sauti kazigama avugosama hunte'nea nona
mono noma kegavama hania pristi vahe'tmimofo none hu'ne.
46 Hagi sauti kazigama me'neno noti kazigama avugosama
hunte'nea nona Kresramanama vu itama kegavama hanaza
pristi vahetamimofo none huno hu'ne. Hagi Livae nagapintira
Zadoki amohezage Ra Anumzamofontera erava'o hu'za eri'zana
erintegahaze. **47** Hagi ana ne'mo'a agu'afima me'nea mono
kumara mesarimi huno keana, ana maka kazigamo'a 50 mita
hu'ne. Ana higeno kresramna vu itamo'a mono nomofo avuga
me'ne. **48** Ana huteno mono nomofo avunoma kinte'nazare
navareno vuno kantigama kafa zafararema ome mesarimima
huno ke'neana 2.5 mita hu'ne. Hagi kama ufre kankamuma
mesarimima hu'neana 1.5 mita hu'ne. **49** Hagi ana nomofo
zaza'amo'a 10mita higeno, atupa'amo'a 5mita hu'ne. Hagi ana
nomofona kantigama tare vimago zafarare megeno ladaramimo
marerino ana kahantera uhanatine.

41 Hagi anantetira ana ne'mo'a mono nomofo agu'afi navareno umarerino agu'afima hunaraginte nomofona kafantetima ufre kankamuma kanti kamama mesarimima hiana 3 mita hu'ne. 2 Hagi kama ufre'ama mesarimima hiana 5 mita higeno, kafama ufrete'ma kantikamama me'nea zafararema mesarimima hiana, tapa'amo'a 2.5 mita hu'ne. Hagi meg'i'a mono noma mesarimima huno keana zaza'amo'a 20 mita higeno, upa'amo'a 10 mita hu'ne. 3 Hagi hunaragintegeno ruotge'ma huno ruotge'ma hu'nefinka, ana ne'mo'a umarerino kafama ufrete'ma kantikamama kafa zafararema mesarimi huno keana, atupa'amo'a 1mita higeno, zaza'amo'a 3 mita hu'ne. Hagi kafama ufre kankamumo'a 3.5 mita hu'ne. 4 Hagi anama hunaraginte noma mesarimima huno keana, anantarega kaziga 10 mita hutere hu'ne. Hagi amama hunaraginte nomo'a, ruotge huno ruotge hu'ne huno nasami'ne. 5 Hagi ana ne'mo'a ruotge'ma hu'nea mono none, ruotge'ma huno ruotage'ma hu'nea mono nomofo asa'ama mesarimima huno keana, tapa'amo'a 3mita hu'ne. Hagi ne'one nontamina ana nomofona hunaraginteno kagi'neankino, ana nontamimofona maka kaziga 2 mita hutere hu'ne. 6 Hagi ana ne'one nontamimofo agofetura 3'a agofetu agofetu huno nona kino mareri'ne. Hagi 3'a noma agofetu agofetuma huno ki'nerera 30'a neone nontami hunaragintetere huno kagi'ne. Hagi ana mika neone nontamimofo asamo'a ra mono nontera eme rutrago ote'ne. 7 Hagi ana nontamima agofetu agofetuma huno kinoma mareri'nea nontmimofo asamo'a fenkamia osi higeno, amunompi nontera omera higeno, amuzare nomofona ome rankrefa hu'ne. Hagi mago nomoma ome tregeno mago noma ana agofetu'ma erigafama hu'nerera lada tro huntetere huno anagamua mareri'ne. 8 Hagi ana mono noma ki'neana, havea

anteno marenerigeno 3.6 mita hutegeno, mono nona ki'neankino
ana mono nomofo asoparega ne'one nontamina kino kagi'ne.
9 Hagi hunaraginte nontamimofo fegi'a asamofo tapa'amo'a
2.5 mita hu'ne. Hagi ana ne'one nontamine, **10** mono nomofo
amu'nompima me'nea kankamuma mesarimima hu'neana 10 mita
hu'ne. **11** Hagi anama hunaraginte nontmimofona mago'zama
omane kaziga kafana metere hu'neankino, mago kafamo'a noti
kaziga avugosa huntogeno, mago kafamo'a sauti kaziga avugosa
hunte'ne. Hagi kankamuma me'noma kagi'nea kankamumofo
rama hu'amo'a 2.5 mita hu'ne. **12** Hagi mono nomofo zage fre
kaziga avugosama hunte'nea mono nomofo atupa'amo'a 35
mita higeno, zaza'amo'a 45 mita higeno, asamofo tapa'amo'a
2.5 mita huno kagi'ne. **13** Ana huteno ana ne'mo'a mono
noma mesarimima huno keana, zaza'amo'a 50 mita hu'ne.
Hagi mono kumama mesarimima huno keana, zaza'amo'a
50mita hu'ne. **14** Hagi mono nomofo zage hanati kazigama
kuma'ma mesarimima huno keana, zaza'amo'a 50mita hu'ne. **15**
Hagi mono nomofona zage fre kazigatima mesarimima huno
ruotge'ma huno ruotge'ma hu'nea mono nomofo kafante eana,
anahukna huno 50 mita hune. Anantero ana mono nomofona
kumama me'nea zaza kazigane, hunaraginte nontaminema
mesarimima huno keana, 50 mita hu'ne. Hagi mono nomofona
meg'i'ama, agu'ama, avunoma, **16** kafa zafama, eri osi'ma hu'za
zaho eri kantamima hagente'nazane, hunaraginte nontamima
kafantegama avugosama hunte'nea nontaminena zafaretike
ahe'ne. **17** Hagi ruotgema huno ruotge'ma hunefinkama
ufre kafantero, mesarimi huza negeza agu'ane meg'i'anena
zafaretike asa ahe'za avonkre nankrera hunte'naze. **18** Hagi ana
avoma kre'nazana, tofe anina kna zafa trohunente'za serabimie

nehaza ankerō trohundetere hazagēno, tofe zafa megeno
ankero manigeno hutere hu'ne. Hagi mago mago serabimi
ankeromofona tare avugosa huntetere hu'ne. **19** Hagi kanti kama
hanagati'za ankerontre trohundetere hazagēno, zanavugosa
tofe zafa humitere hu'na'e. Hagi ana ankerontremofona, mago
kaziga vahe avugosa huntegeno, mago kaziga'a laioni avugosa
hunte'neankino, tofe zafa amunompi me'negeno zanavugosa
ohumi ahumi hu'na'e. Ana hu'zanke hu'za ana mono nomofona
mekagi'naze. **20** Hagi meg'i mono nomofone, mono nomofonena
mopareti'ma marerino anagamuma mareri'neana, ankeromofo
amema'ane, tofe zafamofo amema'a hanagatino tro hunte'ne.
21 Hagi mono nomofona zaza kafa zafa hagente'nazankino,
hunaragintegeno ruotge huno ruotge'ma hu'nea nomofo kafana
anahu hu'za hagente'naze. **22** Hagi mnanentake zama kremna
vu ita zafare tro hunte'nazankino, atrure'amo'a 1.5 mita higeno,
zaza'amo'ene atupa'amo'enena 1mita hu'ne. Hagi ana itamofona
renagentete'ene, asoparegane, riga'anena maka zafa aheno
kagi'ne. Hagi ana ne'mo'a amanage huno nasami'ne, ama ita Ra
Anumzamofo avugama me' ita mene huno nasami'ne. **23** Hagi
ruotgema hu'nea mono nonte'ene, hunaragintegeno ruotge huno
ruotge'ma hu'nefinkanena tare tragote kafana metere hu'ne.
24 Hagi ana kafantamimofona repasihu'a megeno, tare inisi
metere hu'ne. **25** Hagi ana tare kafanterera areharare zafare'ma
hu'neaza hu'za, serabimi ankeromofo amema'a hanagati'za tro
hunente'za, tofe zafa trohundetere hu'za evu'naze. Hagi anagami
kaziga avu nomofona zafa ahe harare'za evu'naze. **26** Hagi
ana avu nomofona kanti kama asoparega tofe zafa trohunte'za
enevu'za, zaho kana eri osi hu'za tro huntetere hu'naze.

42 Hagi anantetira ana ne'mo'a navareno meg'i'a mono kumamofona noti kaziga vuteno, navareno mono nomofona kantu kaziga hunaraginte nontaminte vu'ne. Hagi anama hunaraginte nontmina, noti kaziga meg'i'ama me'nea asamofona, mago kaziga asoparega me'n'e. 2 Hagi mago nona noti kaziga avugosa hunte'nea nomofona zaza'amo'a 50 mita higeno atupa'amo'a 25 mita hu'ne. 3 Hagi ana nontmimofone mono nomofo amu'nompima me'nea kankamumo'a 10mita hu'ne. Hagi kantigama nontamina 3'a agofetu agofetu hu'za ki'za mareri'nageno zamavugosa ohumi ahumi hu'naze. 4 Hagi ana nontmimofo noti kaziga, kafana megeno zamavuga mago ka evu'neankino, anankamo'a 5 mita kahesa higeno, zaza'amo'a 50 mita hu'ne. 5 Hagi agofetu'ma hunaraginte'nea nomo'a ositfa higeno, amu'nompima hunaraginte'nea nomo'ene mopafi nomo'enena ra hu'na'e. Na'ankure fenkma kazigama me'nea nontamimofona ra kankamu me'n'e. 6 Hagi amu'nompine mopafinema hunaraginte nontre'mofoma azerina zafa meankna huno agofetura nampa 3 nomofona azerina zafa omane'ne. 7 Hagi ana nontmimofo asoparega megia keginamo'ma hiaza huno mago kegina evu'neankino, zaza'amo'a 25mita hu'ne. 8 Hagi hunaraginte nontamimofo isamofo zaza'amo'a 25mita higeno'a, mono no tava'onte'ma me'nea keginamo'a 50'a mita hu'ne. 9 Hagi fenkama kazigama me'nea nontmimofona megia kumapinti'ma ufresaza kafana, zage hanati kaziga me'n'e. 10 Hagi ana keginamofo agu'afina hunaraginte nontmi meno vuno, mono nonkuma keginare ome rehe'ne. 11 Hagi ana nontmimofo zamavuga, mago ka vu'ne. Hagi e'i ana nontamimo'za noti kazigama me'nea nontaminkna hunazankino, zaza'zmimo'ene atupazmimo'ene, kafazmimo'zanena magozanke hu'naze. 12

Hagi ana keginamofona zage hanati kaziga, ana nontamimpima nevaza kafana me'neankiza, anampinkati ufre'za kagi'za sauti kaziga vute'za, noti kazigama nehzaza hu'za ufregahaze. **13**
Anante ana ne'mo'a amanage huno nasami'ne, noti kazigama hunaraginte nontamine, sauti kazigama hunaraginte nontamina, mago kaziga me'neankino, ruotge hu'nea nontmi me'ne. Hagi Ra Anumzamofonte'ma enaku'ma hanaza pristi vahetamimo'za, ana nontamimi ruotge'ma hu'nea ofa ne'zana negahaze. Ana nehu'za ruotgema hu'nea zantamine, witi ofane, kumite'ma hu ofane, kefozama hu'nea zante'ma hu ofanena anampi antegahaze. Na'ankure ana kumamo'a ruotge hu'ne. **14** Hagi pristi vahe'mo'zama antanine'za Ruotge'ma hu'nea kumapima ufrenesaza kukenazamia ana nontamimi ome hatentete'za, meg'i'a mono kumapina vugahaze. Hagi anama hutesu'za amne kukena hu'za vahetamima mani'nazarera vugahaze. **15** Hagi mono no kumapima me'nea zantmima mesarimima huvagareteno'a, zage hanati kaziga kafanteti navareno atiramino vuteno, mono kumamofona meg'i'a mesarimi huno kagine. **16** Hagi mesarimima hu azotanu'ma zage hanati kazigama mesarimima huno keana, zaza'amo'a 1tausen 800 mita hu'ne. **17** Hagi noti kazigama mesarimima huno keana, zaza'amo'a 1tausen 800 mita hu'ne. **18** Hagi sauti kazigama mesarimima huno keana, zaza'amo'a 1tausen 800 mita hu'ne. **19** Hagi zage fre kazigama mesarimima huno keana, zaza'amo'a 1tausen 800 mita hu'ne. **20** E'ina huno ana maka 4'a kaziga mesarimi huno ke'neana, ana maka kaziga 1tausen 800 mita hutere hu'ne. Hagi ruotge'ma hu'nea kuma'ene amne kuma'enena, mago keginamo huta'nene.

43 Hagi anantetira navareno zage hanati kazigama avugosama hunte'nea kafante vu'ne. **2** Anante'ma vige'nama koana, Israeli vahe Anumzamofo hihamu masa'amo'a zage hanati kazigati ne-ege'na ke'noe. Hagi anama ne-egeno'a agasasamo'a rama'a tizogesamofo agasasankna higeno, himamu masa'amo'a mopa remsa hu'ne. **3** Hagi e'i ana avanagna zama ke'noana, rankuma'ma eri haviza hu'za nehige'nama ke'noankna avanagna zane, Kebar tinnenare'ma mani'nena ke'noankna za nege'na navugosaregati mopafi mase'noe. **4** Hagi Ra Anumzamofo hihamu masazamo'a, zage hanati kaziga kafanteti mono nompina efre'ne. **5** Ana'ma higeno'a Ra Anumzamofo Avamu'mo'a e'i anantetira navresga huno agu'a mono kumapi ufrege'na ke'noana, Ra Anumzamofo hihamu masazamo'a mono nona aru vite'ne. **6** Ana higena ana ne'ene oti'nena nentahugenno mago vahe'mo'a mono nompinkati kea hunamino, **7** amanage hu'no nasami'ne, Vahe'mofo mofavre Izikieliga, e'ama kumara kini traima menia kuma'ene, naga trama ante'nua kuma me'ne. Hagi e'i ama ana kumara Israeli vahe amu'nompima manivava hanua kuma me'ne. Hagi Israeli vahe'mo'zane, kini vahe'zmimozanena savari avu'ava huge, havi anumzantera monora huntege, fri'naza kini vahe'mofo zamavufaga eri'za eme ante'za ama kumara eripehana hu'za eri kefozana osugahaze. **8** Zamagra kaza osu havi anumzamofo kremlnavu ita Nagri kresramna vu itamofo tavaonte ante'za amunompina asa hunenteza, Nagri kafante kahana hagente'nagu, Nagra tusi narimpa ahezmante'na zamazeri haviza hu'noe. **9** Hagi Israeli vahe'mo'zama savri monko zamavu'zamava nehaza zane, kini vahetamimofo fri zamavufanema eri atre'nage'na, zamagrane Nagra emanivava hugahue. **10** Hagi vahe'mofo mofavre Izikieliga, kasefa mono

noni'amo'a inankna hunefi Israeli vahera zamasamige'za
nentahiza kumi'ma hu'naza zankura zamagazegura nehu'za,
ana mono nomofo amema'a mesarimi hu'za keho. **11** Hagi
maka zama hu'naza zanku'ma zamagazegu'ma hanagenka
ama mono nomofo amema'ama, eri ante ama hunka ana
mono noma ki'naza antahintahi'ama ana mono nompinti'ma
marerino atiraminoma hu kafantamima, ana nomofona maka tra
ke'ane kasege'anena nezamasaminka, avontafepi krente'nege'za
nege'za zamagu'areti hu'za avaririho. **12** Hagi ana mono
nomofo kasegea ama'ne, agona hanakupima me'nea mono
nonkuma'mo'a ruotge hu'ne. Mono nomofo kasegea e'ine. **13**
Hagi kresramna vu itamofo zaza'amo'ene atupa'amo'enena
amana hu'ne. Ana Kresramana vu itamofo agafa'amo'a, 50
sentimita ana maka kaziga higeno, ana itamofoma anamare'ma
avama rente'neana 25 sentimita hu'ne. **14** Hagi ana itamofona
mopareti'ma marerino amu'nompima e'neana 1 mita higeno, rama
hu'amo'a 50 sentemita hu'ne. Hagi amu'nompinti'ma marerino
ofama hute'ma uhanati'neana, 2 mita higeno, rama hu'amo'a 50
sentemita hu'ne. **15** Hagi kresramna vu itamofona avamare'amo'a
2 mita marerigeno, renagentetema menea 4'a pazivemo'a
agatereno anagamu marerine. **16** Hagi ana kresramna vu itamofo
agofetura 4'afi renagentegeno, ana 4'a kaziga 6 mita hutere
hu'naze. **17** Hagi anagamuma me'nea tra'amo'a, ana maka
kaziga 7 mita hutere higeno, avamare'neama'amo'a 25 sentemita
hu'ne. Hagi agafa'amo'a 50 sentemita hutere huno kagi'ne. Ana
hute'za zage hanati kaziga lada tro huntazageno kre sramnavu
itarera mareri'naze. **18** Anante Agra amanage huno nasami'ne,
Vahe'mofo mofavre Izikieliga, Ra Anumzana, Anumzamo'a
amanage hie, kresramnavu itama tro'ma huntetenuta, ama'na

kasege avaririta kre fanene hu ofa nehuta, korana tagita rutri trira
hiho. **19** Hagi Livae vahepinti'ma Zadoki naga'mo'zama pristi
eri'zama nagri tava'onte'ma mani'ne'za eneri'za vahera kumimofo
nonama hu ofa hu'zana kasefa ve bulimakao zamiho, huno Ra
Anumzana Agra Anumzamo'a hu'ne. **20** Hagi ana ve bulimakao
afu'mofo korama'a mago'a taginka, Kresramana vu itamofona
4'a renagentete'ma me'nea pazivetera nefrenka, itare'ma ahe
harari'noma kagi'nea zafare'enena frentenka kagio. E'ina hunka
ana kresramnavu ita eri agru hunka kumi nona hugahane. **21** Hagi
kumite'ma ofama hu bulimakao afura erino mono kumamofona
megi'a e'ifi kregahiema hu'zama huhamprinte'nenafi ome kre
fanene hugahie. **22** Hagi namba 2 knazupa mago anenta ve
meme afu'ma afuhe afahe osu'nesia ahenka kumi ofa hugahane.
E'ina ana hutenga bulimakao afuteti'ma Kresramana vu itama
eri agru'ma hu'nazaza hunka, ana kre sramnavu ita eri agru
hugahane. **23** Hagi ana'ma hutenga afuhe afahe osu'nesia
kasefa ve bulimakao afu'ma, ve sipisipi afuma hunka ahenka
Kresramana vu ita eri agru hugahane. **24** Hagi ana afutamina Ra
Anumzamofo avuga ofa hanage'za, pristi vahe'mo'za ana afutera
hagea ante'za vu'za eza hute'za eri'za tevefima kre fananehu
ofa Ra Anumzamofontega hugahaze. **25** Hagi 7ni'a knamofo
agu'afina, mago mago knarera afuhe afahe osu'nesia ve meme
afuki, kasefa ve bulimakao afuki, ve sipisipi afuki hu'za ahe'za
kumi ofa hutere hugahaze. **26** Hagi 7ni'a knamofo agu'afina
mago mago knarera kumimofo nona huno kresramna vu ita
eri agru huno eri ruotge hugahie. E'ina hanigeno ruotge huno
nagri su'a megahie. **27** Hagi ana'ma nehanigeno 7ni'a knama
vagare'na, namba 8ti knarera pristi vahetmimo'za agafa hu'za
vahetamimo'zama tevefi kre fananehu ofane, rimpa fru ofama

eri'za esaza ofa ana kresramna vu itarera kresramna vugahaze.
E'ina hanage'na Nagra antahi muse hunezmante'na zamavare
Nagrarega antegahue huno Ra Anumzana Agra Anumzamo'a
hu'ne.

44 Ana huteno agu'a mono kampintira navareno meg'i'a mono
kumapima zage hanati kaziga kafante vianagi, ana kafana
erigi'naze. 2 Ra Anumzamo'a amanage huno nasami'ne,
Ama kuma kafana erigi'neankino, ete ru'enena onagigosaze.
Mago'mo'e huno ama ana kafantetira eofretfa hugahie. Na'ankure
Ra Anumzana Israeli vahe Anumzamo ama ana kafanteti
emarer'i.ne. E'ina hu'negu ama ana kafamo'a erigiteno megahie.
3 Hagi Israeli vahe'mokizmi ugagota kva ne'moke'za, ama ana
kafanteria mani'neno Ra Anumzamofo avuga ne'zana negahie.
Hagi agra avunoma kinte'nea kafanteti ufreteno, ete ananteti
atiramigahie. 4 Hagi anantetira ana ne'mo'a noti kaziga kafante
navareno mono nomofo avuga vige'na koana, Ra Anumzamofo
masazamo'a mono noma'afina avite'negena navugosaregati
mopafi umase'noe. 5 Ana hugeno Ra Anumzamo'a amanage
huno nasami'ne, Vahe'mofo mofavre Izikieliga, Ra Anumzamofo
mono nomofo tra kene, kasegenema kasamisuana, keso'e
nehunka kagesa antahi so'e huo. Mono nompima ufre kafane,
mono nompinti'ma atirami kafanenku'ma kasamisuana kagesa
antenenga antahi so'e huo. 6 Hagi keontahi Israeli vahera
amanage hunka zamasnio, Ra Anumzana Mikozama Kegavama
Hu'nea Anumzamo'a amanage huno hie, Israeli vahe'mota kasrino
hi'mnage avu'avazama nehaza avu'avara hanki atreho! 7 Ana
nehuta mago'anem tamagra tamagoza anoma taga osu vahe'ene,
zamagu'amo'ma agruma osu'nea vahetamima, zamavareta
Nagri mono noni'afina efrazage'za, nezane afu afova'ane,

afu koranema ofama eme nehu'za mono noni'a eri pehana hu'naze. Ana nehuta huhagerafi'nona kasegea ru hantagi'haze.

8 Hagi ruotge'ma hu'nea zantaminte'ma kegavama huneta, erizani'ama erihoma hu'nama huramante'noana atreta, ru kumate vahetami huzmantage'za mono noni'a kegava hu'naze. **9** E'ina hu'nazagu Ra Anumzana Agra Anumzamo'a amanage hie, ru vahe'ene, ru vahe'ma tamagranema nemaniza vahe'mo'zanena zamagoza ano taga nehu'za Ra Anumzamonarema zamentintima osanu'za, Nagri mono nompina mareorigahaze. **10** Hianagi Israeli vahe'mo'zama natre'za kaza osu havi anumzama nevaririzageno, Livae naga'mozama natre'za kama hazagre'za afete'ma vu'naza vahe'mo'za anama hu'naza zamavu'avazamofo mizama'a erigahaze. **11** Hagi zamagra Livae naga'moza mono nomofo kafanteria kegava nehu'za, ofama hu afutamima eri'zama esanazana ahe'za akasintesageno, pristi vahe'mo'za eri'za tevefima kre fanane hu ofa ome nehu'za, vahera zamaza hu'za eri'zana erigahaze. **12** Hianagi ana Livae vahe'mo'za zamagra huzmagesa hazage'za kaza osu havi anumzantaminte monora hunte'naze. E'ina hu'negu hankave ke huzmantoanki'za, kumi'ma hu'naza zamofo mizama'a erigahaze huno Ra Anumzana Agra Anumzamo'a hu'ne. **13** Hagi zamagra Nagri tvaontera e'za erizani'a eri nantege, ruotge'ma hu'nea zantmintero, ruotge huno ruotge'ma hu'nea ofaramintera, erava'oa osugahaze. Na'ankure kasrino hi'mnama vu'nea avu'ava'ma hu'naza zantera zamagazegu hugahaze. **14** Hianagi mono nompima ne'one eri'zama me'nea eri'za zamisuge'za eneri'za, mono nompima me'nea maka eri'zana erigahaze. **15** Hianagi Israeli vahetmimo'zama Nagri'ma natre'za kaza osu havi anumzantamima ome avaririzage'zama Livae pristi

vahetamima Zadokimpinti'ma fore'ma hu'naza vahe'mo'zama
Nagrite'ma mani fatgo hu'neza navariri'naza vahemozage
Nagri navuga otine'za afu afovane koranena ofa hugahaze
huno hanavenetake Anumzamo'a hu'ne. **16** Hagi zamagrake
mono noni'afina emareril'za navuga mani'neza, kresramna vu
tratera erizani'a erigahaze. **17** Hagi agu'afi me'nea mono
kumapima vunakuma hanu'za efeke zaza kukena hu'neza
umarerigahaze. Hagi sipisipi azokateti'ma tro'ma hu'nesaza
kukena antanine'za agu'afima me'nea mono kumapino, mono
nompina mareriza eri'zana e'oriho. **18** Hagi zamasenirera
efeke travravereti'ma tro'ma hu'ne'naza kankri nentani'za, efeke
travravereti'ma tro'ma hu'nesaza kukena agu'afina antaniho. Hagi
zamazeri amuho huno zamu'nama hagega kukena ontaniho.
19 Hagi ruotge'ma huno ruotge'ma hunefinkati'ma atre'za fegi
ruotgema hu'nea nompima enaku'ma hanuza, anama antanineza
eri'zama eri'nesaza kukena ana nompinka hatentete'za ru kukena
hu'za rama'a vahe'ma mani'nazafina egahaze. Hagi ana'ma
osnageno'a ana kukenafintira ruotge'ma hu'nea zamo'a vahera
zamazeri ruotge hugahie. **20** Hagi pristi vahe'mo'za zamazokara
hare'za eri rampagera osuge, zamazokara atresagenora hageno
zazara osugahianki, hare'za eri atupa hugahaze. **21** Hagi pristi
vahe'mo'zama hankave waini tima netesu'za mono nonkumapina
uofregahaze. **22** Hanki pristi vahe'mo'zama a'ne'ma erinaku'ma
hanu'za, ru vahe'mokizmi kento a'neo, ru vahe'mo'ma atre'neni
a'nea e'origosie. Hagi zamagra a'nema erinaku'ma hanu'za,
vene omase Israeli mofane erige, pristi vahe'mokizmi kento a'ne
erige hugahaze. **23** Hagi ina avu'avazamo ruotgera higeno,
ina avu'ava zamo ruotagera osigeno, ina avu'avazamo agrua
higeno, ina avu'avazamo agrua osune zamagra vahe'ni'a rempi

huzamigahaze. **24** Hagi pristi vahe'mo'za zamagra keaga refkoma hu kva vahe mani'neza, vahe'nimo'zama mago zamarimpama osnaza zantera, Nagri kasegemo'ma hu'nesia kante ante'za keagazmia refko hugahaze. Ana nehu'za kasegeni'ane tra keni'anena pristi vahe'mo'za nevariri'za, trakene huvempa kene, nezama kre'za nene'za mono'ma nehaza knane, mani fruhu kna Sabatinena kegava hugahaze. **25** Hagi pristi vahe'mo'za fri kerafamofo tava'ontera vu'za zamazeri pehana osugahaze. Hianagi nezmarera'o, nezamafa'o, mofavrezmio, kora nefuo negna'o, ve e'ori nezmasaroma frinesige'za amne fri kerafa tava'ontera vu'za zamazeri pehana hugahaze. **26** Hagi anama huno naga'amofo fri kerafa tavaonte'ma vuno agra'ama azeri pehanama hutesuno'a, agra'a azeri agru huteno, 7ni'a kna avega anteno manigahie. **27** Hagi anama hutesuno'a agafama huno ruotge'ma hu'nea mono nompima ufrenaku'ma hania knarera, agra'a kumi'mofo ofa hino huno Ra Anumzana Agra Anumzamo'a hu'ne. **28** Hagi pristi vahe'mo'za mago zana erisantiharege, mohanena erisantiharegera osugahaze. Na'ankure Nagrake'za zamogra fenozana mani'noe. **29** Hagi pristi vahe'mo'zama ne'zazmima erisazana, vahetmimo'zama witi ofane, kumite'ma hu ofane, havi avu'ava'ma hu'nesaza zante'ma eri'za esaza ofafinti erigahaze. Ana nehu'za mika zama Ra Anumzamofo suzane hu'za eri ante ruotge'ma hu'za eri'za esaza zantami erigahaze. **30** Hagi hozafinti ese nezane, maka zantamima muse zanema hu'za eri'za Ra Anumzamofoma eme amisaza zantamina, pristi vahe'mo'za erigahaze. Ana nehuta ese witima hamareta heruta bretima tro'ma hanazana, pristi vahetami eme zaminkeno Ra Anumzamo'a asomura huramanteno. **31** Hagi

pristi vahe'mo'za fri'nenia namao, zagagafao, afi zagamo aheno
traga hu'nenia zagagafa onegahaze.

45 Hagi Israeli vahe'ma mopama refko huta nezamisuta
anampintira Nagri mopa regorinteho. Hagi anama regorintesaza
mopamofo zaza'amo'a 90 kilomita hanigeno, atupa'amo'a 72
kilomita hugahie. Hagi ana mika mopamo'a ruotge hugahie. **2**
Hagi e'i ana mopafintira mono noma ki mopama regorinte'sazana
ana maka kaziga atumpa'amo'a, 250 mita hino. Hagi ana noma
kisaza nomofo meg'i'a mopa kankamuna, 25 mita meno kagino.
3 Hagi anama ruotge mope hutama regorinte'naza mopafinti'ma
rankna mopa regori antegahazankino, ana mopamofo zaza'amo'a
90 kilo mita hanigeno, atupa'amo'a 36 kilo mita hugahie.
E'ina mopamofo agu'afi mono nona mesigeno ruotge'ma huno
ruotge'ma hu'nea kumara megahie. **4** Hagi e'i ana mopamo'a
me ruotge huno me'nenke'za, ra mono nompima eri'zama
eneri'za Ra Anumzamofo avugama erava'oma hanaza pristi
vahe'mo'za nona kiza nemanisageno, anampina mono nona
megahie. **5** Hagi Livae naga'ma mono nompima eri'zama erisaza
vahe'mokizmi mopama regorisazana, zaza'amo'a 90 kilo mita
hinkeno, upa'amo'a 36 kilo mita hino. Hagi e'i ana mopamo'a
Livae vahe'mokizmi mopa me'nenke'za anampi rankumazmia
kiza manigahaze. **6** Hagi ana mopamofo tavaontera rankumama
kisaza mopa regorigahazankino, zaza'amo'a 90 kilo mita
hanigeno, upa'amo'a 18 kilomita hugahie. Hagi ana mopafi'ma
iza'o, Israeli vahepinti'ma noma eme kinaku'ma hanimo'a amne
eme kigahie. **7** Hagi ugagota kva ne'mofona mopama amisazana,
ruotge'ma hu'nea kuma'ene ran kuma'ma ami'naza mopamofo
zage fre kazigane, zage hanati kaziganema me'nea mopalare
amigahaze. Ana mopalaremofo atupa'a raremokea, zage fre

kazigane, zage hanti kaziga mopama ometre eme atrema hu'nere
vuke eke hugaha'e. Ana hanigeno anagamu kaziga, mago
nagamofo mopa mesigeno, fenka kaziga mago naga'nofimofo
mopa megahie. **8** Hagi e'i ana mopamo'a Israeli mopamofo
agu'afina ana kva nemofo mopa megahie. Hagi ugagota kva
vahe'mo'za Israeli vahe'ni'a zamazeri havizana osugahazanki,
mopa refko hu'za Israeli vahera nagatenofite hu'za zamigahaze.
9 Hagi Ra Anumzana Agra Anumzamo'a amanage hie, Tamagra
Israeli vahe'mokizmi ugagota kva vahe'mota rama'a zampi havi
tamavu'tamavara huta, vahe'ni'amofo zamazeri haviza hazanki
atreho! Hagi havi tamavu tamavama huta vahe'ni'a mopama
zamahenatita enerita, nozmifinti'ma zamahe kasonepeta fatgo
osu tamavu'tavama nehaza zana atreho huno Ra Anumzana
Agra Anumzamo'a hu'ne. **10** Hagi hagegezamofo kna'ane, timofo
kna'ama refkoma huta negeta mizama atesinaku'ma hanuta,
tamage huta refko huta negeta mizana atesi fatgo hiho. **11**
Hagi efaema nehaza zana hagege zamofo kna'ama refkoma
hu'za negaza zanki, batiema nehaza zana timofo kna'ama
refko hu'za negaza zane. E'ina hu'negu 10ni'a bati kevufintira,
mago kevumo'a mago homagna higeno, 10ni'a efamo'a mago
homagna hu'na'ankino, ana taregamokea mago avamenteke
21.6 lita hutere hu'na'e. **12** Hagi maka zamofo kna'ama refko huta
kesazana sekoli nehaza zagomofo avamente refko hugahaze.
Ana hu'neakino mago sekoli zagomofo kna'amo'a 20'a gera
zagomofo kna'agna higeno, 60'a sekoli zagomofo kna'amo'a
(silva) mago minamofo kna'agna hu'ne. **13** Hagi ofama erita
esuta amana hiho. Witima 6'a ku'ma eri avite'nuta, mago
kura ofa erita egahaze. Hagi balima anahukna huta 6'a kuma
eri avimatesuta, mago kura ofa erita egahaze. **14** Hagi olivi

masavema 10ni'a kavoma avite'nuta, mago kavoa ofa erita egahaze. (Mago korimo'a 10ni'a batigna nehuno, mago homagna knazanimo'a hugahie.) **15** Hagi tretre'ma hu'nesia mopafima 200'a sipisipi afu'ma ante'nenunka, mago avrenka ofa eme hugahane. Hagi witi ofama, tevefima kre fananehu ofama, arimpa fru ofaramina, e'inahu huta kumi'mofoma nonama hu ofa eme hugahaze huno Ra Anumzana Agra Anumzamo'a hu'ne. **16** Maka Israeli vahe'mo'za ama ana ofa eri'za Israeli kva nera eme amigahaze. **17** Hagi tevefima kre fanene hu ofama hu'zane, witi ofama hu'zane, tima tagitre ofama hu'zanena kini ne'mo zaminige'za hugahaze. Hagi maka mono'ma hu knare'ene, kasefa ikante'ma mono'ma nehu'za musema hu'za nezama kreza ne'naza knare'ene, Sabati knare'ene, maka atruma hu'za mono'ma nehaza knare'enena, kumitema hu ofane, witi ofama huzane, kre fanenema hu ofane, rimpia fru ofama hu'zana agra kini ne'moke'za zami'nige'za Israeli vahe'mo'za kumizmirera nona hu'za ofa hugahaze. **18** Hagi Ra Anumzana Agra Anumzamo'a amanage hie, ese ikamofo Ese knazupa, mago agaho ve bulimakao afu'ma afuhe afahe'ma osu'nesia bulimakao afu aheta mono nona eri agrua hiho. **19** Hagi pristi vahe'mo'za ana bulimakao afuma ahe'za kumi ofama hanaza afu'mofo korama'a eri'za agu'a mono nomofo kaha zafarera nefre'za, kresramna vu itamofo anaga kaziga 4'a renagentetema aheharari zafarera nefre'za, mono kumamofo agu'afima me'nea kuma kafa zafarera ome fregahaze. **20** Hagi ana ikamofo 7ni knazupa, vahe'mo'ma mago'azama haniregama hantga huno hu'nenia kumi'ene, ontahineno'ma hu'nenia kumira anahukna huta zamazeri agrua nehuta, mono nona eri agru hugahaze. **21** Hagi ana ikamofona 14ni knazupa ozmaheno'ma zmagatere'nea knagura tamagesa

antahinemita ne'zana kreta neneta musena hugahaze. Hagi 7ni'a knamofo agu'afi ne'zana kreta neneta, musena hugahazankino anankna'afina zo-ore bretige negahaze. 22 Hagi ana knarera kini ne'mo'a agrare'ene maka Israeli vahete'ma kumi ofama hu bulimakao afura avrentegahie. 23 Hagi ana 7ni'a knamofo agu'afina kini ne'mo'a mago mago knare'ma hanaza ofa 7ni'a afuhe afahe osu'nesia bulimakao afutaminki, 7ni'a ve sipisipi afutaminki huno zaminige'za ahe'za Ra Anumzamofontega tevefi kre fananehu ofa hutere hugahaze. Ana nehu'za mago ve meme afu ahe'za mago mago knarera kumitema hu ofa hutere hugahaze. 24 Hagi witi ofama hu'zana 14ni'a kilo hu'nenia knare witine, olivi masavea 4 lita nemino mago bulimakao afu'ene ve sipisipi afu'ene agra amitere hanageno kumitera ofa hugahie. 25 Hagi 7ni ikamofona 15ni knazupa seli nompima mani'za ka'ma kopima e'naza zamofoma antahimi knamo'a agafa hugahie. Hagi 7ni'a knamofo agu'afina ozmahe zamagatere'nea knare'ma ofama nehazakna huno mago mago knarera kini ne'mo'a kumi ofane, tevefima kre fananehu ofane, witi ofane, olivi masave ofanena erino egahie.

46 Ra Anumzana Agra Anumzamo'a amanage hie, Agu'a mono kumamofo zage hanati kazigama me'nea kafana 6si'a eri'za knafina eriginteno meno. Hianagi manigasa kna Sabatire'ene kasefa ikante'ma ne'zama kreno neneno musema hu knare'enena ana kafana eriogita anagintenko meno. 2 Hagi Israeli vahe'mokizimi ugagota kva ne'mo'a, meg'i'a mono kumapintima agu'afima unefrea kafante'ma asente'naza zafare azerino oti'nenige'za agri ofa pristi vahe'mo'za eri'za tevefima kre fananehu ofane, arimpa fru ofa hugahaze. Hagi agra anante kepri huno monora huteno, ete e'nea kantegati atiramigahie.

Hagi ana kafana erionki atre'nageno vuno kinaga omasegahie.

3 Hagi manigasa kna Sabati knaraminte'ene kasefa ikante'ma mono'ma nehaza knarerera, ana mopafi Ra Anumzamofo avuga ana kafante monora eme hugahaze. 4 Hagi mago mago Sabati knarerera ugagota kva ne'mo'a, 6si'a afuhe afahe osu sipisipi anentataminteti'ene mago ve sipisipireti'ene huno Ra Anumzamofontega tevefima kre fananehu ofa hugahie. 5 Hagi witi ofama haniana, knare'ma huno kane so'ema hu'nea witia mago ekaeka kuki (21.6 lita) mago ve sipisipi afu'enena ofa nehuno, agra avesite mago mago sipisipi anentera witia refko huntetere huno ofa hugahie. Hagi olivi masavema ofama haniana, witima mago mago ekaeka kuma refkoma hunteterema hanire olivi masavena 4lita tagintetere huno ofa hugahie. 6 Hagi kasefa ikante'ma mono'ma nehaza knarerera ugagota kva ne'mo'a, mago bulimakao afuma afuhe afahe'ma osu'nesianki, 6si'a sipisipi afu anentaki, mago ve sipisipigi huno avreno egahie.

7 Hagi ve bulimakao afu'ma avreno'ma ne-eno'a witi ofama hu zana mago ekaeka ku knare'ma huno kne osi'osi'ma hu witia erino eno. Hagi ve sipisipinema ofama hu witia mago ekaeka ku erino eno. Hagi mago mago sipisipi anenta'enema ofama hu witia agra'a avesite erino egahie. Hagi mago mago ekaeka witi ku'ma eri'zama e'narera, mago kavo olivi masavena erino etere hugahie. 8 Hagi ugagota kva ne'mo'ma zage hanati kaziga kafanteti'ma emareritesuno'a, ete ana kafanteti fegira atiramigahie. 9 Hagi ne'zama kre'za nene'za musema nehu'za Ra Anumzamofoma mono'ma hunte knare'ma esaza vahe'mo'za noti kaziga kafanteti'ma emarerite'nu'za, ete ana kafantetira atiorami, sauti kaziga kafanteti atiramiho. Hagi sauti kaziga kafanteti'ma emarerite'nu'za noti kaziga kafanteti

atiramiho. Hagi emarer'i'nenaza kafantetira atioramitfa hiho. Hagi ru kafanteti atiramitere hiho. **10** Hagi ugagota kva ne'mo'a ana vahetamine umareriteno, ete atinerami'nazana agra'enena atiramigahie. **11** Hagi nezama kreno neneno musema nehuno atru huno mono'ma hu knarera, mago ekaeka ku eriviteta witi ofa bulimakao afu'enena nehuta, mago ekaeka ku witia eriri aviteta ve sipisipi afu'enena ofa hiho. Hagi sipisipi afu anentataminema ofama hanazana, witia agra avesite mago mago sipisipi afu anentatera refko huntetere hugahie. Hagi mago kavo 4lita hu'nenia olivi masavena mago mago witi ekaeka kutera refko huntetere hugahie. **12** Hagi kini ne'mo'ma agra avesite'ma hu ofane, tevefima kre fananehu ofane, arimpa fru ofanema agra avesite'ma Ra Anumzamofontegama hunaku'ma esanigeta, agu'a mono kumamofo zage hanati kazigama me'nea kafa anagintenko, manigasa kna Sabatire'ma nehiaza huno ofa eme Kresramana vino. Hagi e'i ana'ma huteno'ma atiramisigeta ana kafana erigigahaze. **13** Hagi mika nanterana afuhe afahe osu, mago kafu hu'nesia sipisipi anenta aheta Ra Anumzamofontega kre fananehu ofa huntetere hiho. **14** Hagi mago mago nanterama mago mago sipisipima aheta kre sramana vanafina 2kilo witine 1lita olivi masavene eri havia huta ofa hiho. Ama kasegea eriotre atrenkeno meva meva huno vino. **15** Hagi mago sipisipi anentaki witigi, olivi masavena otreta mika nanterana ofa hunante vava hiho. **16** Hagi Ra Anumzana Agra Anumzamo'a amanage hie, kini ne'mo'ma mofavrerami ma'afinti'ma mago mofavre'ama mago mopama amisiana, ana mofavremofo mopa me'nenkeno agripinti'ma forehu anante anante'ma hanaza vahe'mo'za erisantihare'za vugahaze. **17** Hianagi kini nemo'ma mago mopama refko huno eri'za vahe'ama

ami'niana, ana mopamo'a agrisu'a me'nena hoza anteno nenena
50'a kafuma evanigeno'a, eteno ana mopa kini ne' amigahie.
Hianagi kini ne'mo'ma mofavre'ama ami'enia mopamo'a agri
mopa mevava hugahie. **18** Hagi kini ne'mo'a vahera knazmino
zamahe kasonepeno, vahe mopa e'orino. Hanki mopama refko
huno mofavre'ama aminaku'ma hanuno'a, agra'a mopafinti refko
huno amino. Hagi Nagri vahe'mo'zama mopazmima atre'za
vu'za eza huzankura nave'nosie. **19** Hagi avanagana zampima
navareno'ma vanoma nehuno maka zama naveri'ma nehia
ne'mo'a, kuma kafamofo tavaonte'ma me'nea kafanteti navareno
ruotge'ma hu'nea nompinka vu'ne. E'i ana nona pristi vahe
nonkino, noti kaziga avugosa huntene. Hagi anama hunaraginte
nontamimofona, amefiga zage fre kaziga atumparega mago
kuma naveri hu'ne. **20** Hagi ana kumakura amanage huno
nasami'ne, Kefo avu'ava'ma hu'nesare'ma eri'za esaza ofane,
kumi ofanema hanaza afu ame'a pristi vahe'mo'za amafi negre'za,
witi ofanena kregahaze. Ruotge'ma hu'nea ofama eri'za meg'i'a
mono kumapima vanage'zama vahe'ma zamazeri ruotge'ma
huzankura amafi kregahaze. **21** Ana huteno fegi'a mono kumapi
navareno kuma'mo'ma 4'afima omerenagente eme renagente'ma
hu'nere vige'na koana, mago kuma metere hu'negena ke'noe.
22 Hagi meg'i'a kumamofona 4'afima renagentetera osi kuma
megeno, kegina hugagintetere hu'naze. Hagi ana kumatamimofo
zaza'amo'a 20mita higeno, atupa'amo'a 15mita hutere hu'ne.
Hagi ana maka kumatmimofo zaza'amo'ene atupa'amo'enena
magozahu hu'ne. **23** Hagi ana ne'one kumatamipina ofama
hanaza ne'zama kre'zana asoparega ita tro hunte'za kagine'za,
henka kaziga teve hugre'za tro huntukagi'naze. **24** Hagi ana
ne'mo'a amanage hu'ne, vahe'mo'zama ofama eri'za esazana,

mono nompima eri'zama e'heriza vahe'mo'za ana nontamimpi
kregahaze.

47 Hagi ana ne'mo'a ete navareno mono no kafante vu'ne. Hagi anante'ma ot'i'nena ke'noana mago timo'a mono no kafamofona fenka kazigati enevige'na ke'noe. Hagi ana timo'a mono nompinka sauti kazigati hanatiteno vuno, kresramna vu itamofona tamaga kaziga soparegati arugagino evuno zage hanati kaziga nevige'na ke'noe. **2** Hagi ana ne'mo'a mono kumamofona noti kaziga kafanteti navareno atiramiteno, megi'a keginamofona arugagino zage hanati kaziga kafante vu'ne. Hagi sauti kazigati timo'a osi'osi huno hanatino ne-egena ke'noe. **3** Hagi ana ne'mo'a efeke nofi eri'neno zage hanati kaziga evuno ana tima mesarimima huno uramino keana 500mita hunegeno navareno ana tina takaheno vigeno, ana timo'a nagia merumpare eme atre'ne. **4** Hagi ana ne'mo'a ete mago'ane 500 mita mesarimi huno ana tina vuteno navareno takaheno vigeno, ana timo'a marerino nare'navi eme atre'ne. Ana huteno ete mago'ane 500 mita mesarimi huno ana tina vuteno, navareno takaheno vigeno, ana timo'a nafafafi emetre'ne. **5** Hagi eteno mago'ane 500mita mesarimi huno vuteno, navareno takahege'na vu'noana, ana timo'a ame fenkame urami'neankino, zanago aruno takahega hu'ne. **6** Ana ne'mo'a amanage hu'ne, Vahe'mofo mofavre Izikieliga, amama kaveri'ma huazana hago kano? Anage nehuno rukrahe huno ana tinkena navareno vu'ne. **7** Hagi ete rukrahe hu'na ne-ena koana, ana timofona rugaraga ankenarega zafamo'a tusiza hu'nege'na ke'noe. **8** Anante ana ne'mo'a amanage huno nasami'ne, Ama timo'a zage hanati kaziga hagage kokampi vuno, Jodani agupofi vuteno, Fri hagerimpi ufreno ana hagerina ome azeri kasefa hanigeno, hagemoke'ma hu'nea zamo'a amane hugahie. **9** Hagi

ana tima nevirega keonke zagafamo'za tusiza hugahaze. Ana
nehanageno ana timpina nozameramimo'za tusiza hugahaze.
Na'ankure ana timo'a ome kasefa hugahie. Ana hinkeno keonke
zagamo'za ana tima vanirega mani avitegahaze. **10** Hagi
nozamema ahe vahe'mo'za ana hagerinke'na oti'za vugahaze.
En-Gediti'ma vuno En-Eneglaimima vaniana, ante hagegema
hanaza kukomo'a hagerinkena avitegahie. Hagi Medeterenia
hagerimpima nehiaza huno Fri Hagerimpina ruzahu ruzahu
nozamemo'a avitegahie. **11** Hianagi Fri Hagerimofo ankenarega
me'nea hapa tirupima me'nea hagemo'a amnea osu hagea
me'nesige'za, anampinti hagea eri'za negahaze. **12** Hagi ruzahu
ruzahu zafaramimo'a ana tinnenarega kanti kama hageno ruzahu
ruzahu zafaraga rentegahie. Hagi ana zafaramimofo anina'amo'a,
arena renoramisigeno, raga rentevava hugahie. Maka ikantera
raga rente vava hugahiankino, tagiza raga nenenageno
asina'amo'a vahera zamazeri knamaregahie. Na'ankure ana
timo'a mono nompinti hanatino egahie. **13** Ra Anumzana Agra
Anumzamo'a amanage hie, Mopama refkoma hu'zama 12fu'a
Israeli naga'nofi'mozama erisazana, Josefempinti'ma fore'ma
hu'naza vahe'mo'za tare mopa erigahaze. Hagi mopama refkoma
hanuta mago zahu huta mago'mago nagara zamitere hih.
Na'ankure Nagra zamafahe'mofona ama mopa zaminuge'za
erisanti haregahaze hu'na huhampri zamante'noe. Ana hu'negu
mago avamentekke anteta refko huta mopa zamitere hinke'za
erisanti hare'za maniho. **14** Hagi mopama refkoma hanuta mago
zahu huta mago'mago nagara zamitere hih. Na'ankure Nagra
zamafahe'mofona ama mopa zaminuge'za erisanti haregahaze
hu'na huhampri zamante'noe. Ana hu'negu mago avamentekke
anteta refko huta mopa zamitere hinke'za erisanti hare'za

manaho. **15** Hagi mopama ometre emetre hu atupamo'a amana hugahie. Noti kaziga mopa atupamo'a Medeterenia hagerinteti erigafa huno vuno, Hetloni uhanatiteno, Lebo-hamati rugitagino vuno Zedati vugahie. **16** Hagi anantetira Damaskasi mopane Hamati mopamofo amunompima Berotane Sibraimi kumatre'ma me'nate rugitagino vuno, Haurami mopa atumpare Hazeri-Hatikoni kuma tavaonte uhanatigahie (ana mopa atupamo'a noti kazigane zage hanati kaziga amu'nompi evu'ne). **17** Hagi ana mopa atumpamo'a, Medeterenia hagerinteti agafa huteno vuno Damaskasi mopa atumpamofo anaga noti kaziga vuno Hazar-enani vugahiankino, e'i noti kaziga mopa atupa megahie. **18** Hagi zage hanati kazigama ometre'nea mopa atupamo'a, Haurani kuma'ene Damaskasi kuma'ene amu'nompinti agafa huteno uramino vuno sauti kaziga Jodani tinnenare vuteno, Israeli mopane Giliati mopamofo amu'nompinti uramino fenkamu Fri Hagerinte vuno sauti kaziga Tamari kumate uhanatigahie. E'i ana mopa atumpa zage fre kaziga mopa atupa'a megahie. **19** Hagi sauti kaziga mopa atumpamo'a Tamar kumateti agafa huno zage fre kaziga evuno Mariba tima me'nerega Kadesi kumate vuteno, Isipi tinkraho avaririno ra hagerinkenare uhanatigahie. E'i ana mopa atumpa sauti kaziga mopamofo atupa megahie. **20** Hagi zage fre kaziga mopa atupamo'a, sauti kaziga mopa atupamo'ma emetre'nereti agafa huno Medeterenia hageri anke'narega marerino anagamu noti kaziga Lebo Hamati kumamofona zage fre kaziga uhanatigahie. E'i ana mopa atupa zage fre kaziga mopa atumpa megahie. **21** E'i ama ana mopa refako hu'za Israeli vahe'mo'za nagatenofite hu'za erigahaze. **22** Hagi tamagra mopa refko huta enerita, ru vahe'mo'zama Israeli vahere hu'zama tamagranema emanine'za mofavrema

kasezmantesaza vahe'enena mopa refko hu so'e huta zamiho. Zamagra Israeli vahekna hu'za manigahazanki, Israeli naga nofima mani'nafi mopa zaminke'za emanaho. 23 Hagi Israeli naga'nofimota mopafima rurega vahe'ma mani'naza mopa, ana mopa zaminke'za maniho. Ra Anumzamo'ha ama ana nanekea nehue.

48 Hagi mopama refko hu'za nagatenofite'ma hu'za zamisaza naga'mofo zamagi'a amana hu'ne, Noti kaziga refaregama me'nea mopa Dani naga'mo erigahie. Hagi mopa atumpazamimo'a Hetloni kantega vuno Lebo-hamati vuteno, Damaskasi mopamofo atuparega Hamati tavaonte noti kaziga Hazar-enani uhanatigahie. E'ina hanigeno Dani mopamo'a zage hanati kazigatira evuno, zage fre kaziga evugahie. 2 Hagi Dani nagamofo mopamo'ma ome atresirera, zage hanati kazigati evuno zage fre kazigama evaniana, Asa naga'mofo mopa megahie. 3 Hagi Asa nagamofo mopama ome atresirera, zage hanati kazigati evuno, zage fre kazigama evaniana Naftali naga'mofo mopa megahie. 4 Hagi Naftali nagamofo mopama ome atresirera, zage hanati kazigati evuno zage fre kazigama evaniana, Manase nagamofo mopa megahie. 5 Hagi Manase nagamofo mopama ome atresirera, zage hanati kazigati evuno zage fre kazigama evaniana Efraemi naga'mofo mopa megahie. 6 Hagi Efraemi naga'mofo mopama ome atresirera, zage hanati kazigati evuno zage fre kazigama evaniana, Rubeni naga'mofo mopa megahie. 7 Hagi Rubeni naga'mofo mopama ome atresirera, zage hanati kazigati evuno zage fre kazigama evaniana Juda naga'mofo mopa megahie. 8 Hagi Juda naga'mofo mopa atuparera, zage hanati kazigati evuno zage fre kazigama evaniana, ruotge musezane huta mopa regorintesageno megahie. Hagi ana mopamofo zaza'amo'ene

atupa'amo'enena mago'a mopama regorinazankna huno mago
avamenteke 90 kilomita hugahiankino, ana mopa atupamo'a
zage hanati kazigati vuno zage fre kaziga uhanatigahie. E'ina
hanigeno ana mopamofo amu'nompi mono nona megahie. **9** Hagi
ana mopamofo amu'nompima Ra Anumzamofoma regorimisaza
mopamofo zaza'amo'a 90 kilomita hinkeno, atupa'amo'a 36
kilomita hugahie. **10** Hagi ana mopafinti'ma pristi vahetmima
regorizmisaza mopamofo zaza'amo'a noti kaziga 90 kilomita hina,
upa'amo'a zage fre kaziga 36 kilomita hina zage hanati kaziga 36
kilomita hina, sauti kaziga zaza'amo'a 90 kilomita hugahie. E'ina
hanigeno Ra Anumzamofo ra mono nomo'a amu'nompi megahie.
11 E'i ana mopafima manisazana Sadoki nagapinti'ma fore'ma
hu'enaza pristi vahetaminke manigahaze. Na'ankure Israeli
vahe'mo'zane mago'a Livae naga'mo'za hazaza hu'za natre'za
namefira huonami'za, nagrira navariri fatgo hu'naze. **12** Hagi pristi
vahetmima regori zami'naza mopamo'a ruotge hugahiankino,
Livae vahe'mokizmi mopamo'ma ome atre atupareti pristi vahera
mopa regori zamigahaze. **13** Hagi Livae naga'ma regori zamisaza
mopamofo za'za'ane atupa'amo'enena, pristi vahetamimofo
mopanena magozahu hugahie. Hagi anantarega mopamofo
za'za'amo'a 90 kilomita hinkeno, atupa'amo'a 36 kilomita hugahie.
14 Hagi magore huta pristi vahe'motane Livae vahemota ama
ruotge'ma hu'nea mopa zagorera otrege mago'a zantera nona
huta vahera ozamitfa hugahaze. Na'ankure ama ana mopamo'a
ruotge hu'neakino, Ra Anumzamofo mopa megahie. **15** Hagi
ana ruotge'ma hu'nea mopafina sauti kaziga mago mopa
regorintegahazankino, zaza'amo'a 90 kilomita hanigeno, atupa
kaziga'amo'a 18 kilomita hugahie. E'i ana mopamo'a ruotgera
osugosianki, ruga'a Israeli vahe'mo'za ana mopafina amne nona

negi'za hoza antegahaze. Hagi e'i ana mopamofo amunompi rankumara megahie. **16** Hagi ana rankuma'mofona 4'a asopa me'nigeno, ana maka asopamo'a 16.2 kilomita huno magozahu hugahie. **17** Hagi ana rankumamofona meg'i'a hozama antesaza mopama meno kagi'nia mopamofona rama hu'amo'a 900 mita hugahie. **18** Hagi rankumamofoma zage hanati kaziga mopafine, zage fre kaziga mopafinena Jerusalemi kumapima manisaza vahe'mo'za hoza antegahaze. Hagi ana mopalaremofo zazaznimo'a 36 kilo mita hanigeno, atupazanimo'a 18 kilomita hutere hugahie. **19** Hagi mago mago Israeli nagapinti'ma e'za rankumapima eri'zama emeneri'za manisaza vahe'mo'za ana mopafina hoza antegahaze. **20** Hagi ana maka erinte ruotge'ma hu'nea mopamofo za'za'amo'ene atupa'amo'enena, magozahu huno 90 kilomita hugahankino ana mopamofo agu'afi ran kumara megahie. **21** Hagi erinte ruotge'ma hu mopalima ran kumama mesia mopamofo zage hanati kazigane, zage fre kazigama amnema me'nia mopa kini ne'mofo mopa megahie. Hagi zage hanati kazigama Jodani tinte'ma vu'nea mopane, zage fre kazigama Medeterenia Hagerinte'ma vu'nea mopamokea, noti kazigati uramino sauti kazigama vu'neana 90 kilo mita hutere hu'na'e. **22** Hagi kini ne'mofo mopamo'a Livae vahe'mokizmi mopane rankumama manesia mopamo'a rure megahie. Hagi ana hanigeno kini nemofo mopamofo agema'amo'a noti kaziga Juda nagamofo mopare ome atre'nigeno, sauti kaziga Benzameni naga'mofo mopare ome atregahie. **23** Hagi ruga'a Israeli naga'mo'za amana hu'za nagatenofitera hu'za mopa refko hu'za erigahaze. Hagi kini ne'mofo mopama sauti kazigama ome atretetira, zage hanati kazigati evuno zage fre kazigama evaniana, Benzameni naga'mokizmi mopa megahie. **24** Hagi

Benzameni naga'mofo mopama ome atresiretira, zage hanati kazigati evuno zage fre kazigama evaniana, Simioni nagamofo mopa megahie. **25** Hagi Simioni naga'mofo mopama ome atresirera, zage hanati kazigati evuno zage fre kazigama evaniana, Isaka naga'mofo mopa megahie. **26** Hagi Isaka naga'mofo mopama ome atresirera, zage hanati kazigati evuno zage fre kazigama evaniana, Zebuluni naga'mofo mopa megahie **27** Hagi Zebuluni naga'mofo mopama ome atresirera, zage hanati kazigati evuno zage fre kazigama evaniana, Gati naga'mofo mopa megahie. **28** Hagi Gati nagamofo mopa atumpamo'a sauti kaziga Tamari kumateti agafa huno Mariba tinte Kadesi kumate vuteno, Isipi tinkraho avaririno vuno Medeterenia hagerinte uhanatigahie. **29** Ama ana mopa Israeli naga'mokizmi refko huta zamisage'za, eri santihare'za manigahaze huno Ra Anumzana Mikozama Kegava Hu'nea Anumzamo'a hie. **30** Hagi ama'i rankumapinti'ma atiramiza esaza kuma kafantaminkino, noti kaziga kuma keginamofo zaza'amo'a 2 tausen 250 mita hugahie. **31** Hagi ana kumamofona 12fu'a kafa megahiankino, mago mago kafantera 12'a Israeli naga'mofo zamagi metere hugahie. Hagi noti kaziga 3'a kafa megahiankino, ese kafantera Rubeni agi mesigeno, anante kafantera Juda agi mesigeno, namba 3 kafantera Livae agi megahie. **32** Hagi zage hanati kaziga kuma keginamofo zaza'amo'a 2tausen 250mita hanigeno, 3'a kuma kafa megahie. Ese kafantera Josefe agi mesigeno, anante kafantera Benzameni agi mesigeno, namba 3 kafantera Dani agi megahie. **33** Hagi sauti kaziga kuma keginamofo zaza'amo'a 2 tausen 250 mita hanigeno, 3'a kuma kafa megahie. Ese kafantera Simioni agi mesigeno, anante kafantera Isaka agi mesigeno, nampa 3 kafantera Zebuluni agi megahie. **34** Hagi

zage fre kaziga kuma keginamofo zaza'amo'a, 2 tausen 250
mita hanigeno, 3'a kuma kafa megahie. Ese kafantera Gati
agi mesigeno, anante kafantera Asa agi mesigeno, namba 3
kafantera Naftali agi megahie. **35** Hagi ana rankuma keginama
rugagi'nea zaza'amo'a ana makara 9 tausen mita hugahie.
Ana hina e'i ananknareti'ma agafama huno'ma vaniana, ana
rankumamofo agi'a, Ra Anumzamo'a Amafi Mani'ne hu'za agi'a
ahegahaze.

Taneo

1 Juda kini ne' Jehoiakimi'ma 3'a kafuma kinima nemanigeno'a, Babiloni kini ne' Nebukatnesa'a Jerusalemi kumate vahe ha' eme huzmante'naku sondia vahe zaga'ane eno Jerusalemi kumara eme avazagi kagi'ne. **2** Hagi Ra Anumzamo'a Nebukatnesa azampi Juda kini ne' Jehoiakimina avrentegeno azenerino, Anumzamofo ra mono nompima eri'zama eneriza zantaminena eri'ne. Ana huteno erino Babiloni vuno, havi anumza'amofo mono nompima fenozama nentazafi omente'ne. **3** Ana huteno kini ne' Nebukatnesa'a, agri nompima eri'zama eneriza vahete'ma ugotama huno kegavama hu'nea ne' Aspernasina huntenu, Israeli kini ne'mofo nagapinti'ene Juda kva vahe'mokizmi nagapintira, **4** vunka kasefa vahe'ma zamafuhe zamafahe'ma osu'nesiane, hiranto zamavugosa huzmante'nesiane knare antahi'zampima avite'nesazane, maka antahintahi'zama rempi hu'za antahi'zantema knare hu'nesazane, maka nanekema ame hu'za antahiamama'ma nehu'za, kini ne'mofo nompima eri'zama eri antahi'zama ani'ma hu'nesnaza nahezaverami, ome zamavarenka enka Babiloni vahe'mokizmi zamagerura rempi hunezaminka, avoma kreno hampri'zana rempi huzamio huno hunte'ne. **5** Nehuno kini nemo'a huno, Maka zupa nagri nompinti knare zantfama hu'nea ne'zane waini tinena negahaze huno huzmante'ne. Ana nahezaveramina 3'a kafufi rempia huzamitesnage'za, henka ufre'za kini ne'mofo eri'zana erigahaze. **6** Ana vahe amunompina, Juda naga'nofipinti nehazaveramina, Daniel'i'ma, Hanania'ma, Misael'i'ma, Azariaki hu'za mani'haze. **7** Hanki ugota kva ne' Aspernas'a ana nagara ru zamagima ante zami'neana amanahu hu'ne. Danielinkura Belsasa'e nehuno, Hananiankura Setraki'e nehuno, Misaelinkura

Misaki'e nehuno, Azariankura Abetnego'e huno zamagia
antezami'ne. 8 Hianagi Danieli'a Anumzamofo avure'ma
agra'ama azeri pehenama hu'zanku, kini ne'mofo nompinti'ma
ne'zane waini tinema negahazema huno'ma hia nanekegura
Aspenasina antahigeno, knare natresankena kini ne'mofo
nompintira ne'zana onegahuo huno antahige'ne. 9 Hanki
anante Anumzamo'a Aspenasi agu'afina asunku'za antentegeno,
Danielina asunku hunenteno aza hunaku hu'ne. 10 Hianagi
Aspenasi'a amanage huno Danielina asami'ne. Nagra kini nekura
koro nehue. Na'ankure agra'a huhamprino e'inahu e'inahu
ne'zane tinena negahaze huno huhampri'ne. Ana hu'neankino
tamagri tamavufgamo'a hariri huno, mago'a tamagranema
e'naza nehazavemokizmi zamavufaga gna'ma osanigeno'a, kini
ne'mo'a nananke rukafrigahie. 11 Anante kini ne'mo'a huntogeno,
Danielima, Hananiama, Misaelinema, kegavama huzmante'nea
ne' Aspenasi'a mago eri'za ne' huntogeno Danieli'a amanage
huno asami'ne. 12 Muse hugantoanki eri'za vahekamota avame
antenka, 10ni'a knamofo agu'afina, hozafi ne'zane, kasefa
tine tamigeta namneno. 13 Hagi 10ni'a knama evutesigenka,
kini ne'mofo nompinti'ma ne'zama nenaza nehazavemokizmi
zamavufaga negenka, tagri tavufga negenka hutenga, henka
nazano kagri eri'za vahe'motama hurante'naku'ma hanana zana
amne hugahane. 14 Higeno anama kegavama huzmante'nea
ne'mo'a anagema haza nanekerera mago arimpa nehuno,
10ni'a knafi avamera anteno zamage'ne. 15 Hagi 10ni'a knama
evutegeno'a, kegavama huzmante'nea ne'mo'a zamageana,
Danieline 3'a nagamokizmi zamavufagamo'a masavenke huno
knare zantfa nehuno, kini ne'mofo nompinti'ma ne'zama nenaza
nehazaveramina zamagatere'ne. 16 Ana higeno kegavama

huzmante'nea ne'mo'a, knare'hare ne'zane waini tinema zamio
huno'ma kini ne'mo'ma hu'neana netreno, hozafi ne'zane kasefa
tine zaminu vu'ne. **17** Hanki Danieline ana 3'a nehazave
nagara Anumzamo'a antahintahi'zane ama' antahi'zanena
zamige'za, avontafepima ruzahu ruzahu nanekema krente'nazana
rempi huvagare'za ana maka antahi'naze. Ana nehazageno
ruzahu ruzahu avanagna zane, ava'namofo agafa'a eriama
hu antahi'zana Anumzamo'a Danielina ami'ne. **18** Hagi kini
ne'mo'ma knama ante'nea knamo'a ehanatigeno, kini nemo'a
ana nehazaveramina zamavareta efreho huno higeno, kini
ne'mofo eri'za vahete kva ne' Aspenasi'a zamavareno kini ne'
Nebukatnesa avuga vu'ne. **19** Ana higeno kini ne'mo'ma ana
nehazaveraminema keagama huno zamageana, Danieli'ma,
Hanania'ma, Misaeli'ma Azari'enema hazankna vahera magore
huno omanine. Ana higeno kini ne'mo'a zamavarentege'za
agri'ma antahintahima ami' eri'za vahe mani'naze. **20** Kini
ne'mo'ma ana 4'a nehazaveramima, knare antahintahine, ama'
antahi'zanku'ma zamantahigeno'ma keana, maka Babiloni
mopafima antahi'zane vahe'ene, kagu'vazama erifore'ma nehaza
vahe'ene, zagoma neraza vahe'ene kini ne'mofoma antahi'zama
nemiza vahera razampi ruzmagatere'naze. **21** Hagi Danieli'a ana
eri'zama'a erino nevigeno vuno, Sairusi'ma erigafa huno Babiloni
kinima mania kafure uhanati'ne.

2 Hagi Nebukatnesa'ma nampa 2 kafuma kinima mania
kafufina, mago'a ava'naramima ke'ne. Ana avanaramima keteno'a
tusi antahintahi hakare nehuno avura omase'ne. **2** Anama
huteno'a ana ava'namofo agafa'ama eme eriama'ma hanazegura,
zamavune vahe'ma, zamema nentaza vahe'ma, henkama fore
hania zanku'ma kasnampagema nehaza vahetegane Kaldia

vaheteganena kea atregeno vuno eno hu'ne. Hagi ana kea antahi'za kini ne'mofo avuga emeri atru hutazageno, 3 Kini ne'mo'a amanage huno zamasami'ne, Nagra mase'ne'na mago ava'na kete'na, ana avanama ke'noa zankura inankna avana ke'noeha hu'na antahintahi hakare hu'noe. 4 Hige'za ana Kaldia vahe'mo'za amanage hu'za Arami vahe zamagerupinti kenona'a hunte'naze. Kini ne'moka za'zate kinia maninka vugahane. Ana hu'negu kagri eri'za vahe mani'nonanki, ana ava'na huama hugeta nentahita, ana ava'namofo agafa'a eriama huta kasamineno! 5 Hianagi kini ne'mo'a ana Kaldia vahera amanage huno zamasami'ne. Nagra tamage hu'na tamašamuankita, ana ava'nafima ke'noa zama onasamita, ana avana'mofo agafa'ama eri ama'ma huta onasami'nazana, vahe huzmante'nuge'za tamagrira tamahe'za rukafri kafro hutregahaze. Ana nehu'za tamagri nona tapage tapagu hu'za magopi eri hihi hugahaze. 6 Hianagi ana ava'nafima ke'noa zama nenasamita, ana ava'namofo agafa'ama eri ama'ma huta nasamisage'na, nagra rama'a museza nerami'na rantamagi tamigahue. E'ina hu'negu menina ana avanamofo agafa'a eriama huta nasamiho. 7 Hagi mago'ene ana vahe'mo'za kini nera amanage hu'za asami'naze. Hagi kini ne'moka, ana avanaka'a huama hunka kagri eri'za vahe'mota tasamitegeta antahiteta, ana ava'namofo agafa'a huama huta kasami'neno. 8 Hazageno kini ne'mo'a amanage hu'ne, tamagrama antahi'zana zazate nanekea huta avazu huta nevanunkeno, ko'ma huvempama hu'nea nanekea atreno antahintahi'a rukrahe hugahie huta nehaze. 9 Hagi ana ava'nafima ke'noa zamofo agafa'ama eri ama'ma huta onasaminegashina, mago avamenteke knazana tamigahuema hu'noa kegu tamagesa nentahita, tamagra mago

tamarimpa huta, antahintahi'a rukrahe hugahie huta havige
huta nagrira renavatga nehaze. Ana hu'negu menina ana
avana kema nasami'nage'na antahisuna, ana avana'mofo
agafa'anena eri ama huta nasamigahaze hu'na hugahue.
10 Hanki ana Kaldia vahe'mo'za kini ne'mofona amanage
hu'za kenona hunte'naze. Kini ne'moka tagriku'ma hihoma
hunkama hana zana, magore huno ama mopafima mani'nea
vahe'mo'a huamara huno onkasamigahie. Kini ne'moka ko'ma
ama mopafima hankavenentake hu'za ra zamagima eri'za
mani'naza kini vahe'mo'za, e'inahu agenoka zamavune vahe'ma,
zamema nentaza vahe'ma, henkama fore hania zanku'ma huama
nehaza vahe'mokizmia zamantahi onke'nazankna agenoka kagra
tantahinegane. **11** Kini ne'moka tagri'ma tantahimagana zama eri
ama'ma hu'amo'a, tusiza huno amuho tavesie. Ana hu'neankino
mago vahe'mo'a eri amara huno onkasamigahianki, vahe'enena
nomaniza anumzantamimoke ana zana eri amara hugahie. **12**
Kini nemo'ma ana nanekema nentahino'a, tusi arimpa nehegeno,
Babiloni mopamofo agu'afima antahi'zane vahe'ma mani'naza
vahera zamahe hana hihogu sondia vahera huzmantazage'za
13 Antahi'zane vahe'ma zamahe fri nanekemo'a mago kasege efore
hige'za, antahi'zane vahera zamahe hana hunaku vu'za e'za
hu'naze. Ana nehazage'za mago'a vahera huzmantazage'za
Danieline 3'a nagara ome hake'za zamahe frinaku vu'naze. **14**
Hanki kini ne'mofo avate'ma kegavama nehaza sondia vahete
kva ne' Arioku'a, Babiloni mopamofo agu'afima antahi'zane
vahe'ma mani'naza vahera zamahe fri'naku vu'ne. Anama
nehigeno'a Danieli'a knare antahi'zama'areti Arioku'enena keaga
hu'ne. **15** Danieli'a amanage huno Arioku'na antahige'ne. Na'ane
huno kini ne'mo'a e'ina hu hankave kasegea anakino, antahi'zane

vahera zamahe frigahue huno nehie? Anagema higeno'a Arioku'a anazamofo agafa'a eriama huno Danielina asami'ne. **16** Anante Danieli'a ame huno kini nete vuno, Osi'a kna naminege'na ana ava'namofo agafa'a eriama hu'na kasami'neno huno ome antahige'ne. **17** Ana kerera kini ne'mo'a hu i'zo higeno, Danieli'a noma'arega vuno 3'a afuhe'ina Hananiane, Misaheline, Azaria kizmia ana nanekea omerinte ama huno nezmasamino, **18** amanage hu'ne, monafinkama mani'nea Anumzamofontega nunamu hanunkeno, agra asunku huneranteno ana ava'namofo agafa'a erinte ama huno tasami'nie. Anama hanigeno'a tagri'ene, ruga'a knare antahi'zane vahe'ma Babilonima mani'naza vahe'enena kini ne'mo'a tahe ofrigahie huno hu'ne. **19** Hagi ana kenagera Danieli'a mase'negeno, Anumzamo'a ana ava'nane, ana avanamofo agafa'a, ava'nagna zampi erinte ama huno averi hu'ne. Anama higeno'a monafinkama mani'nea Anumzamofo agi'a Danieli'a ahentesga huno, **20** amanage hu'ne, Maka kna Anumzamofo agi'a ahentesga huvava hugahune. Na'ankure knare antahi'zane, maka hankavenena Anumzamofopinke me'ne. **21** Ama mopafima ruzahu ruzahu knama fore'ma nehiana, Anumzamo Agrake higeno fore nehie. Agrake kini vahera azeri fore nehuno, azeri netreno nehie. Ana nehuno Agrake knare antahi'zana vahe'mofona amigeno ama' antahi'zana enerie. **22** Framakino oku'ama me'nea zana Anumzamoke eri ama huno vahera nezamasamino, masare nemania Anumzankino hanimofo agu'afima me'nea zana keno antahino hu'ne. Ana hu'neankino Agra masafi nemania Anumza mani'ne. **23** Nagri nagehe'mokizmi Anumzamoka muse hunegante'na Kagri kagia ahentesga nehue. Na'ankure knare antahi'zane, hankavenena Kagra nenamine. Ana nehunka kini ne'mofo ava'nagu'ma nunamuma hutama

kantahigona zana, Kagra eri ama' hunka nasami'ne. **24** Hagi
anante kini ne'mo'ma Babiloni mopamofo agu'afima knare
antahi'zane vahe'ma mani'naza vahe'ma vunka zamahe frio
huno'ma hunte'nea ne' Ariokunte Danieli'a vuno, amanage huno
ome asami'ne. Knare antahi'zane vahe'ma Babiloni mopamofo
agu'afima mani'naza vahera kagra zamahe ofrinka nezman trenka
navrenka kini nete vuge'na, kini ne'mofo ava'na ome eriama
hu'na asami'heno. **25** Anante Arioku'a, Danielina ame huno
avreno kini nete vuno, amanage huno kini nera ome asami'ne.
Juda nagapinti vene'nema kinama eme hu'naza nagapintira
mago nera ama hakena avre'na oankino, kagrama ke'nana
ava'namofo agafa'a erinte ama huno kasamigahie. **26** Anante
kini ne'mo'a amanage huno Danielina mago agi'a Belsasana
antahige'ne. Nagrama ava'nafima ke'noa zana nenasaminka,
ana ava'namofo agafa'a eri amara hunka nasamigahano? **27**
Anagema higeno'a Danieli'a amanage huno kini nera asami'ne.
Mago antahi'zane vahemo'o, amema nentea vahemo'o, avune
vahe'mo'o, henka fore hania zanku'ma kasnampa nanekema
nehaza vahe'mo'za, anama ke'nana ava'namofo agafa'a erinte
ama hu'za kini nemoka kasamigara osu'naze. **28** Hianagi
monafinkama mani'nea Anumzamo, fra'ma kino oku'ama me'nea
zana eri fore nehia Anumza mani'neankino, Anumzamo'a
henkama fore hania zamofo sipakare'ma masenankeno'a ava'nafi
kini ne'moka eri kaveri hu'ne. **29** Hagi kini ne'moka kagrama
mase'nenka'ma ava'nama ke'nanana, henkama fore'ma haniazza
ke'nane. Ana hu'neankino oku'ama framakino me'nea zama
erifore nehia Anumzamo, ana ava'na eri kaveri hu'ne. **30** Hagi
ama ana ava'namofo agafa'ama eriama'ma huno nagri'ma
nasami'neana, nagra mago'a antahi'zane vahera zamagatere'na,

antahi'zana eri'nogu huno anara osu'ne, i'o. Anumzamo ana ava'namofo agafa'a nasami'neanki'na, huama hanugenka ava'na kamofo agafa'a antahi ama' hugahane. **31** Hagi kini ne'mokama ava'nama ke'nampina, mago ne'mofo amema'a kavuga ot'i'negenka ke'nane. Ana amema'amo'a tusizankna huno masanentake huno ruzahukna hu'negenka negenka tusi koro hu'nane. **32** Ana vahe amema'amofo aseni'a goliretike tro nehu'za, tare azantrene amimiza'a silvareti tro nehu'za, amukofareti'ma uramino amote'ma ome atre'neana, bronsireti tro nehuno, **33** arenareti'ma urami'nea agiararena ainireti tro hu'naze. Hagi agia'a ainireti'ene higo hapateti eri havia huza tro hu'naze. **34** E'i anama hunkama avanama negankeno'a, mago havea vahe'mo azampinti rutamana huotre'neaki, agonafinti agra'a atamanasiteno eramino, ana vahe amema'amofo agiararema, ainireti'ene higo hapatetima eri haviamma hu'za tro'ma hu'naza agia rarena rufuzafupetre'ne. **35** Ana higeno ana maka ainine, higo hapa'ene, bronsine, silvane, golinena magokage rufuzufupegeno, witima neharegeno zaho'mo eno, onoma'a magore huno otreno eme eri harafima huno viaza huno erino vu'ne. Hianagi anama eno ana vahe amema'ama rufuzafupea havemo'a, ra agona seteno maka ama mopa ruvite'ne. **36** Hagi kini ne'moka e'inahu ava'na ke'nanankita menina ana ava'namofo agafa'a eriama huta kasamigahune. **37** Kini ne'moka, kagra maka kinia zamagaterenka vugote'nane. Hagi monafinkama mani'nea Anumzamo kagrira kinia manio huno huhamprigenka kinia mani'hankeno hankavene rankaginena kami'ne. **38** Ana nehuno kagrira hankavea kamigenka vahe'ene zaga kfane namaraminenegava hu'nane. Ana hu'neankinka ana vahe amema'amofo aseni'ama golireti'ma tro hu'nagenka'ma kenanana, e'i kagra

mani'nane. **39** Hanki henka'a kagri kamefira mago kini ne' efore hugahiankino, ana kini ne'mofo hankavemo'a, kagri hankavea agateoregahie. Hagi anantera nampa 3 kini efore huno, maka ama mopa kegava hugahie. Ana hu'neankino agra ana vahe amema'ama bronsireti'ma tro'ma hu'nazankna hu'ne. **40** Hagi ana amefira nampa 4kini efore hugahiankino, hankavenentake huno ainigna hugahie. Na'ankure ainimo'a maka'zana rufuzafu'nepeaza me'ne. Ana hu'neankino ainimo'ma maka'zama rufuzafunepeaza huno, ana kini ne'mo'a maka vahera hahu zamanteno zamazeri haviza huvagaregahie. **41** Hagi ana ava'nafima ke'nanana, ana amema'amofo agia ainireti'ene higoreti'ene eri havia hu'za tro hu'naze. E'inama hu'neana, agafa'amo'a amanahu hu'ne. Ana kini ne'mo'ma kegavama hu'nesnia vahe'mo'za zamagrare zamagrare hu'za otitere hugahazankino, mago'amoza aenigna huza hankavenetisageno, mago'amo'za hankave otigahaze. **42** Hagi ana vahe amema'amofo agia'a ainireti'ene higoreti eri haviamma hu'za tro hu'nagenkama ke'nana zamofo agafa'amo'a amanahu hu'ne. Anama efore'ma hania kini nemo'ma kegavama hania vahe'mo'za, mago kaziga hankave netiszage'za, mago kaziga hankavea otigahaze. **43** Ana vahe amema'amofo agijama ainireti'ene higoreti'ma eri haviamma hu'za tro'ma hu'nagenka'ma ke'nana zamofo agafa'amo'a amanahu hu'ne. Anama refko haza kini vahe'mo'za mofa'nezmi omeri emeri nehu'za, eri mago hunaku hanazanagi, zamagra magopina omanigahaze. Na'ankure ainine higomo'enena ruohamprigaha'e. **44** Hagi anankini vahe'mo'zama kinima mani'zama esnaza knafina, Monafinkama nemania Anumzamo'a mago kasefa kuma (Kindom) erifore hugahiankino, mago vahe'mo'a eri havizana osutfa huge, mago vahe'mo'a eno hara hunora ana kumara ohanaregahie.

Ana hu'neanki'za Anumzamo'ma eri fore hania kumapima
mani'snaza vahe'mo'za, mago'a kini vahera zamazeri fenkami
atre vaganere'za, zamagra manivava hu'za vugahaze. **45**
Kagrama ana ava'nafima kankeno'a, mago havea vahe'mo
azanuti ruofregeneanki, agra'a frageramino ana vahe amema'ama
ainireti'ene bronsireti'ene hapa'ene silvareti'ene golireti'ma tro'ma
hu'naza vahe amema'ama rufuzafupe'nea havemofo agafa'amo'a
e'inahu hu'ne. Hagi Ra agi'ane Anumzamo'a henkama fore'ma
haniaza kini nemoka ava'nafi eri kaveri hu'ne. Ama ana ava'na
tamage ava'na ke'nane. Ana hu'neankino amama eri fore'ma
hu'na kasamua kante anteno efore hugahie. **46** Kini ne'
Nebukatnesa'a Danieli'ma hia nanekema nentahino'a, Danielina
agiafi avugosaregati kepri huno umaseno husga hunenteno,
ofane mna nentake zantamina erita eta eme kre mna vunteho
huno vahera zamasami'ne. **47** Hanki anante kini ne'mo'a amanage
huno Danielina asami'ne. Tamagerfa huno kagri Anumzamo'a
anumzamokizmi Anumza mani'neno, kini vahe'mokizmi Razami
mani'neno, oku'ma me'nea zama eri fore'ma nehia Anumza
mani'ne. Ana hu'neankinka ava'nama ke'noa ava'namofo oku
antahi'zama'a emeri ama hunka nasami'ne. **48** Anante kini
ne'mo'a Danielina eri'zama'afintira avre anagamutegen Babiloni
mopafina ugota kva ne' mani'ne. Ana nehuno kini nemo'a
mago'a marerirfa musezantami Danielina nemino, huntogeno
Babiloni mopamofo agu'afima knare antahi'zane vahe'ma
mani'naza vahera kegava huzmante'ne. **49** Hagi kini ne'mo'ma
anama nehigeno'a Danieli'a kini nera antahigegeno, Satrakine,
Mesakine, Abetnekonena huhampri zamantege'za, Babiloni
mopafina mago'a eri'zantera kegava hu'naze. Ana nehazageno
Danieli'a agra kini ne'mofo nompi mani'ne.

3 Kini ne' Nebukatnesa'ma vahe amema'a golireti tro hu'neana zaza'amo'a 27ni'a mita higeno, kahesa'amo'a 3'a mita hu'neankino ana amema'a Babiloni mopafina Durae nehaza agupofi retru rente'ne. **2** Ana huteno ana vahe amema'ama erinte ama hu'neana, ugota kva vahe'ma, kiapu vahe'ma, gavana vahe'ma, antahintahima nemiza vahe'ma, kanisolo vahe'ma, zagoma kegavama nehaza vahe'ma, keagama refko nehaza vahe'ene ana vahe'ma zamaza nehaza vahe'ene maka kamani eri'zama eneriza vahe'enena zamagi hu'ne. **3** Ana hutege'za ugota kva vahe'ma, kiapu vahe'ma, gavana vahe'ma, antahintahima nemiza vahe'ma, kanisolo vahe'ma, zagoma kegavama nehaza vahe'ma, keagama refko nehaza vahe'ene ana vahe'ma zamazama nehaza vahe'ene maka kamani eri'zama eneriza vahe'enena, Nebukatnesama ana vahe amema'ama erinte ama'ma hunaku'ma hianknarera emeri atru hute'za ana amema'amofo avuga oti'naze.

4 Anama hutazageno'a kezamanetia vahe'mo'a otino, ranke huno amanage hu'ne. Kokankokati'ma e'naza vahe'ma, ru vahe ru vahepinti'ma e'naza vahe'ma ruzamageru ruzamageru'ma neraza vahe'motanena amama hanua nanekea antahita amage anteho. **5** Hagi tamagrama antahisageno, ufema nere'za, hapue nehaza zavenane laerie nehaza zavenama nehe'za, konkema nere'za, mago'a zavenanema nehesagetama nentahisanuta, tamarena nereta kepri huta, kini ne' Nebukatnesa'ma golireti'ma tro'ma hunte'nea vahe amema'arera monora hunteho. **6** Hanki iza'o ana vahe amema'are'ma kepri huno renaren mono'ma huontesnia vahera, ame huta zamazerita hagana haganama huno tusi tevema nerea kerifi zamasgafe atregahune. **7** Anagema hutege'za maka vahe'ene, kokankokati'ma e'naza

vahe'ene, ru zamageru ru zamageru'ma neraza vahe'mo'za
ufema, konkema, laeri zavenama, hapu zavenane mago'a
zavenaramima nehage'zama nentahi'za kini ne' Nebukatnesa'ma
golire vahe amema'ama tro'ma hu'nea zante zamarena re'za
monora hunte'haze. **8** Hianagi mago'a Babiloni vahe'mo'za kini
nete e'za, Juda naga'mozama hazza zamavu'zamava zanku kini
nera eme asami'naze. **9** Kini ne' Nebukatnesana amanage hu'za
asami'naze. Kini ne'moka, za'zate kinia maninka vugahane! **10**
Kini nemoka kagra mago kasegea amanage hunka huvempa
hu'nane. Ufene, konkene, laeri zavenane, hapu zavenane
mago'a zavenaramima nehesnage'zama nentahisu'za, maka
vahe'mo'za mopafi kepri hu'za zamarena nere'za, golireti'ma
tro'ma hunte vahe amema'a monora huntegahaze hunka hu'nane.
11 Anage nehunka iza'o ana vahe amema'are'ma renama
nereno, kepri huno mono'ma huontesnia vahera azeri'na hagana
haganama huno tusi tevema nerea kerifi asagafe atregahue
hunka hu'nane. **12** Hianagi 3'a Jiu nagara, Setrakima, Misakima,
Abetnegoma hunka huhampari zamantanke'zama, Babiloni
mopafima kvama mani'naza naga'mo'za, kini nemoka kagri
kea ontahi'za, kagrama amage'ma nentana anumzantamina
monora hunonte'za, golireti vahe amema'ama tro'ma hunka
retruma rente'nana zante'enena monora huonte'naze. **13**
Ana nanekema Nebukatnesa'ma nentahigeno'a tusi arimpa
ahegeno, mago'a vahe huzmantenge'za vu'za, Setrakima,
Mesakima, Abetnegoma hu'za ome zamavare'za agri avuga
e'naze. **14** Azageno Nebukatnesa'a amanage huno ana
nagara zamantahige'ne. Setrakigane, Mesakigane Abetnegogata,
nagri anumzaraminte'ene, golireti'ma vahe amema'ama tro'ma
hu'na retruma rente'noa zantera monora huonte'nazema

hu'za nehzana, e'i tamage nehazo? **15** Hanki menina tamagrama antahisanage'zama ufema nere'za hapue nehaza zavenane, lairie nehaza zavenama nehe'za, konkema nere'za, mago'a zavenanema nehesnagetama nentahisanuta, kepri huta tamagra tamarena nereta, golireti'ma vahe amema'ama tro'ma hunte'noa zantera monora hunte so'e hiho. Hagi ana zante'ma mono'ma huontesnage'na, hanuge'za tamagrira tamazeri'za hagana hagana'ma huno tusi tevema nerea kerifi tamasga fetregahaze. Anama hanage'na ina anumzamo nagri nazampintira tamagrira tamagu vazino ana tevenefake kerifintira tamaza hugahifi tamagegahue? **16** Anagema hige'za Setraki'ma, Mesaki'ma, Abetnego'za kini ne' Nebukatnesana amanage hu'za asami'naze. Kini ne'moka kagrama hana nanekerera mago kea huta tagra tagura ovazigahune. **17** Hagi kagrama hagana hagana'ma huno'ma tusi tevema nerea kerifima tagri'ma tasagafe atresnankeno'a, tagrama amage'ma nentona Anumzamo'a taza huno ana tevefintira tavrenetreno, kini ne'moka kazampintira tagu'vazino taza hugahie. **18** Hianagi tagrama amage'ma nentona Anumzamo'ma tazama osaniana, e'i ana zankure huta kagri anumzaraminte'ene vahe amema'ama golireti'ma tro'ma hunka retruma rente'nana zante'enena kepri huta monora huontegahune. **19** Hagi Setraki'ma, Mesaki'ma, Abetnego'za anagema hazageno'a, Nebukatnesana tusi arimpa ahegeno avugosamo'a rugrari'ne. Anama higeno'a huzmantege'za hagana hagana'ma huno tusi tevema nerea tevea mago'ene hugrazageno 7'ni'a zupa amuhoa huno, ko'ma amuhoma nehia avamena agatereno tusi amuho hu'ne. **20** Ana hutazageno Setrakima, Mesakima, Abetnegonena ome zamazeriza nofiteti anakite'za, hagana hagana'ma huno tusi tevema nerea kerifi zamasgafe

atrehogu hankavenentake sondia vahe'a huzmante'ne. 21
Anagema hige'za ana 3'a nagara zamazeri'za, zaza kukenane,
nakre kuzmine, kankri zamine mago'a kukenazminena zamavate
maka me'nege'za nofiteti anakite'za, hagana hagana'ma
huno tusi tevema nerea kerifi zamasgafe tre'naze. 22 Kini
nemo'ma huzmantege'za tevema mago'ene hugrazageno
tusi amuhoma nehuno hagana hagana'ma nehifi, Setrakima
Mesakima Abetnegoma hu'za zamasga ftre'naze. Hianagi
anama zamasga fetraza sondia vahera hagana hagana'ma
huno nerea tevemo terasagege'za fri'naze. 23 Hagi Setrakima,
Mesakima, Abetnegonemanofi'ma anakite'za hagana hagana'ma
huno tusi tevema nerea kerifi zamasgafe atre'naza nofimo'a,
me'nege'za ana tevemofo agu'afina mani'naze. 24 Anama
hutazageno'a, kini ne' Nebukatnesa'a ana naga'ma nezamageno,
antri huno o'netino antahintahima nemiza vahera amanage
huno zamantahige'ne. Tagra 3'a vahe nofitetira anakiteta
tevefina zamasga ftre'nompi? Anagema hige'za zamagra
kenona hu'za, i'zo 3'a naga'mokizmi anara hu'none. 25 Hagi
Nebukatnesa'a huno, Menima koana anakima zamante'nona
nofimo'a zamagafina omanege'za, 4'a vahe ana tevemofo
agu'afina mani'neza, mago hazenkea zamavufagarera omaneaza
vano nehaze. Hagi nampa 4 ne'ma ke'noa ne'mofo avu'avamo'a,
anumzamofo mofavregna hu'ne. 26 Anagema higeno'a anante
Nebukatnesa'a anama hagana hagana'ma nehia tevemofo
kafante urava'o nehuno, amanage huno kezati'ne. Setrakigane
Mesakigane Abetnegogata, Marerisa Anumzamofo eri'za vahe
mani'nazanki, tevefintira atreta atiramita amare eho. Anagema
hige'za Setraki'ma Mesaki'ma Abetnego'ma hu'za ana tevefintira
atirami'za e'naze. 27 Anante ugota kva vahe'ma, kiapu

vahe'ma, kini ne'mofoma antahintahima nemiza vahe'ma,
gavana vahe'ma hu'za ana naga'mokizmire erava'oma hu'za
kazana, tevemo'a zamavufaga oregeno, zamaseni zamazokara
teorasagegeno, zaza kukena zamia tevemo'a tevararo'vararura
osigeno, tevemofo mna'anena zamavufaga regatira ontahi'naze!

28 Anante kini ne' Nebukatnesa'a amanage huno hu'ne.
Setrakima, Mesakima, Abetnegokizmi Anumzamo'a ankero'ama
huntegeno eno eri'za naga'ama zamagu'ma vazia zankura, Agri
agia ahentesga hanune. Na'ankure zamagra agrite zamentintia
nehu'za, fri'zankura antahi amane hu'naze. Ana nehu'za nagrama
ante'noa kasegegura koro nosu'za, ru anumzantera monora
hunonte'za, zamagra'a Anumzanteke monora hunte'naze. **29**
E'ina hu'negu menina mago kasege ante'na huvempa huankino,
mago nagamo'o, mago kumate vahe'mo'o, ru zamageru ru
zamageru'ma neranaza vahemo'zanema, Setrakima, Mesakima,
Abetnego Anumzamofoma huhavizama hunteszaza vhahera,
zamahe'za zamavufaga rutragatragu hutresnage'za frigahaze.
Ana nehanage'za nozaminena tagana taganu vazi'za mopafi
eri hihi hugahaze. Na'ankure mago anumzamo'a zamagri
Anumzamo'ma hiazana huno, amage'ma nentesnia vhahera
agura ovazigahie. **30** Hagi kini ne' Nebukatnesa'ma anagema
huteno'a, Setrakima, Mesakima, Abetnegoma huno kasefa
eri'za zamige'za, koma eri'naza eri'zana rugatere'za, Babiloni
mopamofo agu'afina eri'zana eri'naze.

4 Kini ne' Nebukatnesa'a amanage huno avona kreteno, atregeno
maka vahetegane, kokankoka mopafima nemaniza vahetegane,
ru zamageru ru zamageru'ma neraza vahe'ma maka mopafima
nemaniza vahetega vuno eno hu'ne. Maka'motarega musenkea
atreramantoanki, tamarimpa frune maniho. **2** Nagra menima

musema nehu'na tamasamisuana, Marerisa Anumzamo'ma kaguvazane avame'zama nagrite'ma eri naveri'ma hu'nea zanku tamasamigahue. 3 Agra Anumzamo'ma tagrite'ma eri taveri'ma nehia kaguva zamo'a, ruzahu huno hankavenentake hu'ne. Ana hu'neankino Agrama kegavama hania kumamo'a vaga ore mevava huno nevanigeno, henkama forehu anante nante'ma hu'zama vanaza vahete'enena kegava huno vugahie. 4 Nagra Nebukatnesa'na noni'afi mani so'e hu'na mani'nogeno, maka zago fenonimo'a knare zantfa hige'na muse hu'na mani'noe. 5 Hianagi mago kenagera, sipa'nire masene'na avanagna zama ke'noa zamo'a, nazeri nagogofeno vu'ne. 6 Ana hige'na ana ava'namofo agafa'ama eme eri ama hu'za nasamisaze hu'na, Babiloni mopafima knare antahi'zane vahe'ma mani'nazarega kea atrogeno vuno eno hu'ne. 7 Anama hutoge'za kagu'vazama eri fore'ma nehaza vahe'ma, zagoma neraza vaheki, ofuntamima nehampriza vahe'ma, henkama fore'ma hania zanku'ma kasnampa kema nehaza vahe'mo'za nagrite azage'na ana ava'nama ke'noa zamofo nanekea zamasami'noe. Hianagi magomo'e huno ana ava'namofo agafa'a eri amara huno onasami'ne. 8 Ana vahetamima evu vagaretazageno henkarfama e'neana, nagrama amage'ma nentoa havi anumzamofo agire'ma asamre'na Belsasa'e hu'na agima antemi'noa ne'mofona, ruotage'ma hu'naza anumzantamimofo avamumo agrane mani'nea ne' Danieli'a efreno nagri navuga eme otige'na, 9 ana avanama ke'noa zamofo nanekea amanage hu'na asami'noe. Belsasaga ruzahu ruzahu antahi'zama eri'naza vahe'mokizmi ugota huzmantenka kegava huzmante'nana ne' mani'nane. Nagrama antahi'noana ruotage'ma hu'naza anumzantamimofo avamumo kagripina mani'neankinka, mago

zamo'a kagriterera frara okisanigenka, ana maka zana eri ama huvaga regahane. Ana hu'negu nagrama ke'noa avanama menima kasamisua ava'hamofo agafa'amo'a, inankna hu'nefi eri ama hunka nasamio. **10** Nagra sipa'nire mase'nena amanahu ava'na ke'noe. Ama mopamofona amu'no amu'nompina, mago tusi zankna zafa za'za huno amunagamu mareri'negena ke'noe. **11** Hagi ana zafamo'a hagera huno hankavenentake nehuno, za'za huno onagamu monafi mareri'nege'za maka kazigama ama mopafima mani'naza vahe'mo'za ke'naze. **12** Ana zafamofo ani'na ramimo'a knare'zantfa huno zagasefage nehigeno ragamo'a avite'neanki'za maka mani'naza vhemo'zane zagagafamo'zanena raga'a ne'naze. Ana zafamofo tonapinka afi zagagafamo'za enemanizageno, namamo'za azankuna'afina e'za no eme ki'naze. Ana nehzage'za maka ama mopafi zagagafamo'za ana zafaretike ne'zana eme ne'naze. **13** Hagi sipanire'ma mase'nena ana avanagna zampima kogeno'a, ruotge'ma hu'nea ankeromo mona atreno eramige'na ke'noe. **14** Ana ankeromo'a amanage huno kezati'ne. Ana zafa antagi atretma azankuna'aramina akafri akafro hunetreta, ani'na'aramina ru vatari atre vaganereta, raga'aramina eritma rupanani hutreho. Ana nehutma afi zagagafamo'zama e'za ana zafamofo tonapima eman'inazana zamorotgo nehuta, namamo'zama e'za azankuna'afima noma eme ki'za mani'nazana zamarotgo hinke'za hare'za freho. **15** Hianagi ana zafamofo agafa'ane rafuna'anena tasagira osutma atrenkeno mopafi me'nena trazamo'a hageno refinetenkeno, ainireti'ene bronsireti tro hu'nesnaza seninofi'nu anakinteho. Ana huteta atrenkeno fegi mani'nesnigeno, kenage'ma ata ko'ma tami'nia ko'mo agofetura runentesanigeno, agra afizaga kafane mani'neno trazana neno.

16 Hanki agra vahe antahi'zana e'orino, afi zagagafamofo antahi'za enerino mani'nesnigeno, 7ni'a kafumo'a evugateregahie.

17 Ama ana nanekema eri'za eme huama'ma hu'nazana, ruotage'ma hu'naza ankeromo'za ama anazana fore hugahie hu'za huhankaveti'za eme huama hu'naze. E'ina hu'negu maka vahe'mo'zama ke'za antahi'zama hanazana, Marerisa Anumzamo maka ama mopa kegava hu'neankino, agi me'nesnia vahero, agi omne vahero amne huhampri antesnigeno kinia manigahie hu'za maka vahe'mo'za ke'za antahi'za hugahaze. **18** Hagi nagra kini ne' Nebukatnesa'na e'inahu ava'na ke'noanki, kagra Belsasaga ana ava'namofo agafa'a eri ama hunka nasamio. Na'ankure ruzahu ruzahu antahi'zane vahe'ma nagrama kegavama hu'noa mopafima mani'naza vahe'mo'za ana ava'namofo agafa'a eri amara hu'za nasamigara osu'naze. Hianagi kagra eri ama hunka nasamigahane, na'ankure ruotage'ma hu'naza anumzantamimofo avamumo kagrane mani'ne. **19** Hanki ana ava'nagema huama higeno'a, Belsasa'a ko antahintahi'afina rezaganeno antahiteno, ana zamo'a azeri koro agesa higeno, ana ava'namofo agafa'ama eri ama hu'zankura koro nehuno, osi'a knafi akoheno mani'neno antahintahi hakare hu'ne. Ana'ma higeno'a kini nemo'a amanage huno asami'ne. Belsasaga ama ana ava'nagu'ene, ana ava'namofo agafa'ama eriama hunka nasamizankura kagogogura osuo. Anage higeno Belsasa'a kini nera asamino, ama ana ava'nafima ke'nana zantamimo'a kagritera efore osanianki, kagri ha' vahete efore hanie. **20** Hagi ava'nama ke'nampina mago zafamo'a hageno zaza huno hankavenentake huno anagamu monafi marerinegeno, ama mopafima maka kazigama mani'naza vahe'mo'za ke'naze. **21** Hagi ana zafamofo ani'naramimo'za knare'zantfa hu'za zagasefage

hu'nageno, ama mopafima mani'naza maka vahe'mo'za
nesaza avamente rama'a zafa raga rente'ne. Ana zafamofo
tonapinka afi zagagafamo'za enemanizage'za, namaramimo'za
azankuna'afina e'za no eme ki'za mani'nazagenka ke'nane. 22
Kini ne'moka ava'nafima ke'nana zafa, e'i kagra mani'nane.
Na'ankure kagra mago hankavenentake kini efore hankeno,
kagimo'a ame nagame monarega haruharu huno mareri'ne.
Ana nehigenka ama mopafi vahera maka kagrake kegava
huzmante'nane. 23 Hanki ana ava'nafima kankeno'a monafinkati
mago ruotage'ma hu'nea ankeromo eramino amanage eme
hu'ne. Ama ana zafa antagita eri haviza hutreho. Hianagi
agafa'ane rafuna'anena tasagi huotreho. Ana nehutma ainireti'ene
bronsireti'ma tro'ma hu'nesazanofi'nu erita ana zafamofo
agafa'arera anakiteta atrenkeno, me'nenigeno tra'zamo hageno
kagino. Ana hu'nesnigeno kenage'ma ata ko'ma rania zamo,
asenirera runtetere nehina, afi zagagafane mani'enigeno 7ni'a
kafumo'a evu agatereno huno hu'ne. 24 Hanki kini ne' ranimoka
kagrite'ma fore hania zanku, Marerisa Anumzamo'a eme eri ama
huno kaveri hu'neankino, ana ava'namofo agafa'amo'a amanahu
hu'ne. 25 Kagra vahe'enena omaninka atrenka vunka afi zaga
kafane umanigahane. Ana nehunka 7ni'a kafumofo agu'afina,
bulimakao afu'mozama nehzaza hunka traza nenesnankeno, ata
ko'ma kenage'ma runte'nea zamo'a, kasenirera runtetere hugahie.
Ana nehanigenka anantega mani'nenga kenka antahinka'ma
hananana, Marerisa Anumzamo maka ama mopafi vahera
kegava hu'neno, izano huhampri ante'naku'ma hanimofona,
amne huhampri antegeno kinia nemanie hunka kenka antahinka
hugahane. 26 Hianagi ankeromo'ma huno, Ana zafamofo
agafa'ane rafu'nanena atrenkeno mopafima menoma huno

hu'nea zamofo agu'agesamo'a amanahu hu'ne. Kagrama kenka antahinkama nehunka, monafinkama mani'nea Anumzamo Agrake maka zana kegava hu'ne hunkama hanunka, ete kinia emaninka kegava hugahane. **27** E'ina hu'negu kini ne' Nebukatnesaga amama kasamisnua knare antahi'zana eri otro. Kagrama kumi'ma nehana zana netrenka, fatgo kavukva zanke huo. Ko'ma havi kavukavazama hu'nana zana kamefi huneminka, zamunte omane vahera kasunku huzamanto. Anama hanunka knare hunka nemaninankeno, nazanoma hanana zamo'a knare zanke huno vugahie. **28** Hagi ana maka zama Danieli'ma kini ne' Nebukatnesama asami'nea zamo'a agritera efore huvagare'ne. **29** Hagi henka 12fu'a ikama avutegeno'a, mago zupa Babiloni kumapina kini ne' Nebukatnesa'a noma'amofo agofetu'ma mani'neno zasi'ma eneria nonte vano hu'ne. **30** Hagi agrama keganti kegamama huno Babiloni ran kuma'ma negeno'a amanage huno hu'ne. Ama agima marerisa Babiloni kumara nagra hankavereti eri fore nehu'na, avasase'ane kumara kintoankino, kinima manisnua noni'amo'a ama ana kumapi megahie. E'ina hanigeno nagimo'a vuno eno hanige'za, maka vahe'mo'za antahi vagaregahaze. **31** Hianagi ana nanekema kini ne'mo'ma huvaga ore'negeno, monafinkati mago ageru'mo huno, kini ne' Nebukatnesaga ama nanekea antahio, amama kegava hu'nana mopa menina kagri kazampintira eri atroe. **32** Ana hanuge'za kavazu hutresagenka vahe'enena omaninka vunka afi zaga kfane umani'nenka, bulimakao afu'mozama nehzaza hunka traza negahane. Ana nehunka mani'nesnankeno 7ni'a kafumo evu agateresanigenka, kagrama kenka antahinkama hananana, Marerisa Anumzamo'a maka vahera kegava hu'neankino, izano huhampri antenaku'ma himofona huhamprinente hunka

hugahane. 33 Hanki anante nazano Nebukatnesanku'ma ankeromo'ma hu'nea zamo'a ame huno kini ne'mofo avate fore hige'za, vahe'enena omanisnie hu'za avazuhu atrazageno vuno, afi zagagafane umani'neno bulimakaomo'zama nehazaza huno traza ne'ne. Ana nehuno mani'negeno kenage'ma ata ko'ma tami'nea zamo anu azokapina hampo kine. Ana nehuno anantega mani'negeno aseni azokamo'a zaza huno, tumpamofo azokakna nehigeno, agigo azankomo'a namamofo agigogna hu'ne. 34 Hanki ana knama evu vagaretege'na nagra Nebukatnesa'na, monafinka kesga hu'na kogeno, antahi'zanimo'a ete ege'na, Marerisa Anumzamofo agia husga hu'na monora hunente'na, mani vavama nehia Anumzamofona muse hunte'noe. Agra mani vava nehia Anumzankino, Agrama kegavama hania kumamo'a fore'ma hu anante anante'ma hu'za vanaza vahetera vagaore mevava huno vugahie. 35 Maka ama mopafima mani'naza vahe'mo'za amne zaga mani'naze. Monafi ankeromo'zane ama mopafi vahe'mo'za Agri agorga mani'naze. Ana hu'neankino nazano hunaku'ma hania zana, amne hugahiankino mago vahe'mo'a e'inara osuo huno hunonteno, na'ante amazana nehane hunora osugahie. 36 Hagi anankema nehugen'o'ame huno antahintahi nimo'a ete e'ne. Ana hige'na ete kinia eman'i'na knare nagine hankave ni'anena ete eri'noe. Ana huge'za ko'ma antahintahima nami'naza vahe'ene, nagranema eri'zama eri'naza vahe'mo'za ete e'za nagrane eman'i'naze. Ana hige'na ko'ma kegavama hu'hoa mopa ete kegava nehu'na, ko'ma kinima mani'nogeno'ma nagimo'ma hu'neama'a rugatereno amenagame mareri'ne. 37 Hanki menina nagra Nebukatnesana, monama kegava hu'nea Anumzamofona muse hunente'na, Agri agia ahentesga nehu'na, ragi amigahue. Agrama maka

zama hia zamo'a fatgo huno knare zanke nehie. Ana nehuno zamavufagama erisgama nehaza vahera zamazeri fenkami netrea Anumza mani'ne.

5 Hagi mago'a kafuma evutegeno'a, Belsasa'a Babiloni kumatera kinia efore huno maniteno, mago zupa tusi'a ne'za negreno, agri agoragama mani'neza ranra eri'zama eneriza kva vahetamina 1 tauseni'a vahe kehige'za azageno zamagrane waini tina ne'ne. 2 Hagi Belsasa'a waini tima neno neginagima nehuno'a, ko'ma nefo Nebukatnesa'ma Jerusalemi Ra Anumzamofo mono nompinti'ma golireti'ene silvareti'ma tro'ma hu'naza kapuramima erino e'nea kapuramina eri'za esazegu huzmant'e. Na'ankure agrane, agri agoragama eri'zama eneriza vahe'ane, a'nane'ane henkama eri'nea a'nane'ane ana kapuramimpi waini ti nenaku anara hu'ne. 3 Anagema hige'za Jerusalemia Anumzamofo mono nompinti'ma golireti tro'ma hu kapuramima eri'za e'naza kapuramina ome eri'za azage'za, kini ne'ene, agri agoragama eri'zama eneriza vahe'ane, a'nane'ane, henkama eri'nea a'nanene ana kapuramimpintira waini tina ne'naze. 4 Hagi ana kapuramimpinti'ma waini tima nene'za, golireti'ene, silvareti'ene, bronsireti'ene, ainireti'ene, zafareti'ene, havereti'ma tro'ma hunte'haza havi anumzazamimofo zamagi husga hu'naze. 5 Anama nehazageno'a, kini ne'mo'ma kesga huno noma'amofo asarega, tavi'ma rekru'ma hunentaza azotama me'nea tvaonte'ma keana, mago vahe'mofo azamo efore huno avona negregeno ke'he. 6 Anama higeno kini nemo'ma negegeno'a, avugosamo'a ruzahne nehigeno, tusi koro hu'ne. Ana nehigeno agiamo'a ahirahi neregeno, zaferina'a omne'amne nehigeno, oti hankavetigara osu'ne. 7 Anama higeno'a kini ne'mo'a ruzahu ruzahu antahi'zama eri'naza vahera kehige'za

e'naze. Anante antahi'zane vahe'ma Babiloni kumapinti'ma e'naza vahera amanage huno zamasami'ne. Iza'o ama avoma hamprino antahiteno, ana avomofo agafa'ama eriama huno nasamisnimofona, kini vahe'mo'zama nentaniza koranke zaza kukena antanintegahue. Ana nehu'na golireti trohu seninofi anankempina antegahue. Ana hanugenonagrama kegavama hu'noa mopafina nagri namefira nampa 3 kva ne' before hugahie.

8 Kini ne'mo'a anage hutege'za knare antahi'zane vahe'amo'za efretere hu'za ana avona ke'nazanagi, magomo'e huno ana avona hampriteno, ana avomofo agu'agesa'a eri amara huno asamigara osu'naze. 9 Hagi ana'ma hazageno'a kini ne' Belsasana mago'ene avugosamo'a ruzahere nehigeno, tusi koro hu'ne. Ana hige'za agri agroragama eri'zama eneriza vahe'mo'za na'a hugahune nehu'za tusi savri hu'naze. 10 Hianagi kini ne'mofo nerera'ma anazama fore hia zamofo nanekema nentahino'a, ne'zama nenaza nompi ame huno umarer'i'ne. Ana huteno Belsasana amanage huno ome asami'ne. Za'zate kinia maninka vugahananki, ana zankura antahintahi hakarea nehunka kamanogura osugeno, kavugosamo'a ruzahera osino. 11 Ama kegavama hu'nana mopamofo agu'afina mago ne' mani'neankino, ruotage'ma hu'naza anumzaramimofo avamu'mo agripina mani'ne. Ko'ma negafa Nebukatnesa'ma kinima mani'nea knafina, ana ne'mofona anumzaramimofo antahi'zamo'ma hiaza huno, antahintahi zama'amo'ene, knare antahi'zamo'ene ama' antahi'zamo'a agripina avite'nea ne' mani'ne. Hagi negafa Nebukatnesa'a ana nera huhamprintegeno, Babiloni vahe'ma zagoma re'za negaza vahe'ma, ikante zagere'ma ke avame'ma huza nanekema nehaza vahe'ma, zamene vahe'ma, ruzahu ruzahu antahi'zama eri'naza vahetera kegava huzmante'nea ne' mani'ne. 12

Hanki ana nera Danielikino, kini ne' Nebukatnesa'a agi'a eri rukrahe huno Belsasa'e huno antemi'ne. Ana ne'mofona ruzahu antahi'zamo'ene ama' antahi'zamo agripina avite'nea nekino, ava'nane kaguvazanena amne agafa'a eriama nehuno, amuhoma hu'nea knazanena erioza nehie. Ana hu'neanki Danielinku hugeno eno anama ke'nana avomofo agafa'a eriama huno kasamino.

13 Anagema hutege'za Danielina ome avre'za kini ne'mofo avuga azageno, kini ne'mo'a antahigeno, kagra Danieligema nehaza ne'ma Juda mopareti'ma nenfa kini ne' Nebukatnesa'ma zamavareno eno kinama huzmantenea vahepinti ne' mani'nampi?

14 Vahe'moza kagriku'ma nasamina zana, ruotage'ma hu'nea anumzaramimofo avamu'mo agrane mani'negeno, antahi ama'ma hu' antahizamo'ene knare antahi'zamo kagripina avite'nea nere hu'za hu'naze. **15** Hagi asaregama krente'nea avomofo agafa'ama eme eri ama huta nasamaho hu'na knare antahi'zane vahe'ene kaguvazama eri fore'ma nehaza vahera kehuge'za e'nazanagi, ana avomofo agu'agesa'a eri amara hu'za onasami'naze. **16** Hianagi vahe'mo'za kagrikura eme nasami'za, maka zamofo agu'agesa'a eri ama nehunka, amuhoma hu'nesnia zanena eri fru hugahane hu'za hu'naze. E'ina hu'negu kagra ana avoma ke'noa avomofo agu'agesa'a eri ama hunka nasamisnanke'na, husga hugante'na kini vahe'mo'zama nentaniza fitunke kukena eri hankre negante'na, golireti trohu seni nofi knankempina antegantegahue. Ana nehu'na huhampri kantesugenka, nagrama kegavama hu'noa mopamofo agu'afina, nagri namefira nampa 3 kvane efore hugahane. **17** Hagi anante Danieli'a kini ne'mofona kenona hunteno, nagri'ma namiku'ma hana muse zantamina kagraka'a erige, vahe zamige huo. Hianagi nagra anama ke'nana avona hamprite'na ana avomofo agu'agesa'a eri ama hu'na

kini ne'moka kasamigahue. **18** Hagi kini ne'moka antahio, Marerisa Anumzamo negafa Nebukatnesana huhampri antegeno, hankavenentake kinia efore higeno, agimo'a haru haru huno vuno eno hu'ne. **19** Hagi Anumzamo'a azerintesga huno ra agi amigeno, ruzahu ruzahu zamavufagane vahe'ma, ru zamageru ru zamageru'ma neru'za kokankokama nemaniza vahe'mo'za, agrikura koro nehu'zma zamahirahiku hu'naze. Ana nehuno negafa'a hankave nekino, izano ahe frinaku'ma himofona ahe nefrino, izano atre'nugeno manisanie himofona atregeno nemanigeno, agra avesite ragima aminaku'ma himofona ra agia nemino, azeri fenkami atrenaku'ma himofona azeri fenkami netre. **20** Hianagi negafa'a avufga erisga nehuno, keontahi avu'ava'za higeno, Anumzamo'a kini tra'aretira avre atregeno, ragima e'neria zamo'a omanene. **21** Anumzamo'a vahe antahintahia eritreno afi zaga kfamofo antahintahi nemino, avre atregeno vahe'enena omanino vuno afi donki afutamine umani'neno, bulimakao afu'mozama nehzaza huno trazana neneno mani'negeno kenage'ma ru'nea ata ko'mo'a aseni azokapina runtetere nehigeno, agrama keno antahino'ma hiana Marerisa Anumzamo maka ama mopafi vahera agrake kegava hu'neno, izano avesinte'mofo huhamparintegeno kinia nemanie huno antahi'ne. **22** Hianagi kagra agri mofavre Belsasaga ama ana zamofona ko kenka antahinka hu'nane. Hianagi kagra kavufga anteraminka omani'nane. **23** Ana nehunka kagrama musema hanazamo higenka, monama kegavama hu'nea Anumzamofo agi'a eri haviza nehunka, huzmantanke'za vu'za mono noma'afinti'ma eri'za e'naza kapua ome eri'za azagenka, kagri agoragama eri'zama eneri'za vaheka'ane a'naneraminka'ane, henka a'neraminka'ane ana kapufina waini

tina ne'naze. Ana nehutma kaza osu havi anumzaramima silvareti'ene golireti'ene bronsireti'ene ainireti'ene zafareti'ene havereti'ma keaga ontahi, avu onke, antahino keno osu havi anumzama vahe'mo'zama tro'ma huzmante'haza zantamimofo zamagi husga hu'naze. Hianagi kasimu'ma negamino, maka zama nehana zama kegava nehia Anumzamofo agia husga huonte'hane. **24** Ana hu'negu Anumzamo'a huntegeno mago vahe'mofo azamo eno ama ana avona asarega eme kregenka ke'hane. **25** Hagi amanahu avonkrente'negenka ke'hane, MENE, MENE, TEKEL, PARSIN. **26** Hanki anama krente'nea kemofo agu'agesamo'a amanahu hu'ne. MENEMA hu'neana, hago hampari'ne hu'neankino, nama'a knama kinima manisnana kna hago Anumzamo'a hampri atupa hu'neankino menina vagare knaka'e. **27** TEKELIEMA huno krente'nea kemofo agu'agesamo'a, Maka kavukvara sigerire erinteno rezaganeno keana, kagri kavukvamo'a knare osigenka kinima maniga avamentera omani'hane. **28** PARSIKIEMA huno krente'nea kemofo agu'agesa'amo'a, Amu'nompinti refko hu'ne huno krente'ne. Ana hu'neankino Anumzamo'a kagrama kegava hu'nana mopa ko refko huno, mago kaziga mopa Midia vahe nezamino, mago kaziga mopa Pesia vahe zami'ne hu'ne. **29** Hagi anankema kini ne' Belsasa'ma antahiteno'a, huzmantenge'za kema hu'nea kante ante'za, kini vahe'mo'zama nentaniza fitunke kukena eri hankrenente'za, golireti tro hu'naza seni nofi anankempina ante'nentazageno, Belsasa'a Danielinkura huama huno anage hu'ne, nagri namefira nampa 3 kva ne' menina efore hie. **30** Hianagi ana kenagera Midia sondia vahe'mo'za ran kumapi efre'za Babiloni kini ne' Belsasana ahe fri'naze. **31** Ana

hutazageno Midia mopareti ne' Dariusi'ma 62'a kafu nehuno,
agafa huno Babiloni moperara kinia manino kegava hu'ne.

6 Hanki Midia mopareti ne' Dariusi'ma kinima efore huno maniteno'a, anama kegavama hia mopa 120'afi mopa refakohu osi osi huteno, ana mopa kegava hutere hanazegu gavana vahe huhampri zamante'ne. **2** Hagi anama huhampri zamante'nea vahete'ma kegavama huzmantesnaza vahera 3'a vahe huhampri zamante'ne. Ana 3'a vahe'ma huhampri zamante'nefina magora Danieli huhampari ante'neanki'za, kini ne'mofa zantaminte'enena zamagra kegava hugahaze. **3** Hanki anama huhampri zamante'nea vahepina Danieli eri'zamo'a knare zantfa higeno, kini ne'mo'a negeno anama kegavama hu'nea mopamofo agu'afina hunte'nigeno ugota kva ne' manisniegu antahintahi retro hu'ne. **4** Hagi anama huhampri zamante'nea kva vahe'mo'za, Danieli'ma kamani eri'zama eri haviza hanige'za nege'zama kini ne'ma ome asamisnaza kankamunku hake'nazanagi, onketfa hu'naze. Na'ankure Danieli'a fatgo nekino, eri'zama eri'neana tamage kazigatike e'nerino, mago zana eri havizana osu'ne. **5** Ana hu'negu ana kva vahe'mo'za mago zupa zamagra'a amanage hu'za hu'naze. Danieli eri'zampina mago havizana keta eri forera osune. Ana hu'negu magoke kama me'neana, agrama Anumza'amofoma amage'ma nentea kasege'afi ufreta azeriteta keagafina avrentegahune. **6** Anagema hute'za ana kva vahe'mo'za eri vararumi'za kini nete vu'za, amanage hu'za ome hu'naze. Kini ne' Dariusiga za'zate kinia maninka vugahane! **7** Kagri'ma kaza huta eri'zama e'neruna kva vahe'ene, antahintahima negamuna vahe'ene, gavana vahe'mota maka mago trimpa huta, kini ne'moka kantahigonanki, knare hu izo nehunka mago kasege antenka huhankavetisnanke'za, 30'a

zage gnamofo agu'afina mago vahe'mo'a, mago'mofontero,
mago anumzantero, mago vahete'enena nunamuna osanianki,
kagriteke monora hugantesaze. Hagi mago vahemo'ma ana
kasegema rutagresia vahera avre atresnankeno laionimofo kerifi
uramigahie. **8** E'ina hu'negu kini ne'moka menina hananke'za
ana kasegea avontafete kretesnagenka, ana avontera kazanko
avona krentesnankeno, Midia vahete'ene Pesia vahetera mago
kasege efore huno me'nesnige'za eri otregahaze. **9** Anagema
hutazageno'a kini ne' Dariusi'a huzmanteg'e'za ana kasegea
avontafete kretazageno, ana avomofo agofetura agra'a agi
kreno eri vakakinte'ne. **10** Hianagi Danieli'ma ana kasegere kini
ne'mo'ma agima krenteno eri hankavetia nanekema nentahino'a,
koma nehiaza huno noma'arega vuno, noma'amofo agofetu'ma
me'nea nomofo hunaragintepinka rena ome nereno, zaho eri
kama Jerusalemi kazigama me'neana eri nagi hagarо hu'ne. Ana
nehuno mago zagemofo agu'afima 3'a zupama nunamuma huno
Anumza'amofoma susu huntetere'ma nehiaza huno nunamuna
hu'ne. **11** Anante kini ne'mofo eri'za vahe'mo'zama kema
anaki'naza kante amage ante'za magoka eri vararumi'za vu'za
Danieli nonte ome kazana, Anumza'amo'ma azama haninogu
nunamu nehige'za ome ke'naze. **12** Hagi ana vahe'mo'za
kete'za kini nete e'za, Kagra kini ne'moka mago kasegea
huhankavetinka, 30'a zagemofo agu'afina mago vahe'mo'a mago
anumzante'ene mago vahetera nunamuna huonteno nagriteke
nunamuna hugahie hunka nehunka, iza'o anama osania vahera
azeri'na laionimofo kerifi atregahue hunka hunampi anagea
osu'nane? Hazageno ana kenona kini ne'mo'a huno, Izo e'i
Midia vahe'ene Pesia vahe'mokizmi kasege ko me'neankino,
mago vahe'mo'e hunora eri otregahie. **13** Anante kini nera

asami'za, Juda ne'ma kinafima eman'i'nea ne' Danieli'a kagri
kasegea rutagreno amagera onte'ne. Ana nehuno agra'a
Anumzamofontega mago zagegnamofo agu'afina 3'a zupa
nunamuna nehie. **14** Hazageno kini ne'mo'ma ana kema
nentahigeno'a arimpamo'a tusi kna nehigeno mani'neno, inankna
hu'na Danielina aza hugahueha huno antahintahi hakare nehuno,
mani'negeno ana zupa zagemo'a ufregeno kinaga se'ne. **15**
Hagi kinaga zagema unefrege'za kini ne'mofo eri'za vahe'mo'za
ete eri vararumi'za kini nete vu'za amanage ome hu'naze. Kini
ne'moka kagra ko antahi'nane, Midia vahe'ene Pesia vahe'mo'za
mago kasegema kini ne'mo'ma huhankaveti'nesnia kasegea
mago vahe'mo'a ruotagregahie. **16** Anagema hazageno'a kini ne'
Darius'i'a huzmantege'za vu'za Danielina ome avre'za laionimofo
kerifi ome atre'naze. Ana hutazageno kini ne'mo'a Danielina
asamino, Maka zupa kagu'areti'ma hunka agri eri'zama enerina
Anumzankamo'a kaza huno kavresie. **17** Hanki Danielima
retufe vazi'naza kerimofo avazarera mago have eri'za renkani
rente'naze. Anante kini ne'mo'ene eri'za vahe'amo'za ana
havemofo agofetura avame'zana zamagia krete'za fukireti
rekamarente'naze. Na'ankure vahe'mo'ma Danielima eme avre
atre'zanku anara hu'naze. **18** Ana'ma hute'za kini nemo'a
marerisa nonkuma'arega atreno vuno umani'neno, ana kenagera
ne'zana oneno, ko'ma nehiazana huno eri'za vahe'a hige'za
eme azeri musena osu'naze. Ana hazageno ana kenagera
mani'neno avura omasetfa hu'ne. **19** Hanki nanterame kini nemo'a
otiazamo, ame huno laionimofo kerima me'nerega vu'ne. **20** Ana
kerire'ma kini ne' Darius'i'ma uhanatiteno'a, tusi asunku nehuno
amanage hu'ne. Kasefa'ma huno mani'nea Anumzamofa eri'za
ne' Danieliga, kagu'areti'ma hunka agri eri'zama erintenkama

nevana Anumzamo'a kegava hugantege'za laionimo'za kahe'za one'nazafi? **21** Anagema higeno'a Danieli'a kenona huno, Kini nemoka knare hunka za'zate kinia mani vava hunka vugahane! **22** Nagri Anumzamo'a ankero vahe'a huntogeno eno laioniramimofo zamagira eri hamunkige'za hazenkea onami'naze. Na'ankure Anumzamofo avurera hazeke'ni'a omanege'na, kini nemoka kagri zana magora eri havizana osu'nogu anara hu'ne. **23** Kini ne'mo'a tusi muse nehuno huzmanteg'e'za, Danielina ana kerifintira avre atre'naze. Magore huno Danieli avufga reohakanene. Na'ankure agra'a Anumzamofonte amentinti hu'negu anara hu'ne. **24** Anante kini nemo'a hankavege huno vahera huzmanteno, Vuta Danielima havige hu'za kanivema rente'naza vahera ome nezamavareta, a'mofavre zaminena zamavareta vuta laionimofo kerifi ome zamaretufe vaziho huno huzmant'e'ne. Anage hige'za vu'za anazana ome hu'naze. Hianagi zahufa mopalera uoram'inage'za, laionimo'za haru hu'za mareri'za zamazerite'za zaferi'nazamia anifunetagi'za taganataganu vaziza nenaze. **25** Hagi anante kini ne' Dariusi'a mago avona kreteno, atregeno kokankoka ana mopafima ru zamavufagane ru zamavufagane ru zamageru'ene ru zamageru'ene vahe'ma mani'narega nevigeno amanage hu'ne, musenke atre ramantoankita knare huta tamarimpa frune manigahaze. **26** Maka ama nagrama kegavama hu'noa mopafi vahe'mota kasefa'ma huno mani'nea Anumzana Danieli Anumzamofonku korora hunteho. Na'ankure kasefa huno mani'neno, manivava nehia Anumzankino, agra kinia manivava huno nevanigeno, hankave'amo'a vaga oregahie. **27** Ana hu'neankino ana Anumzamo'a agra vahe'a zamagu vazino nezmavreno, monafine mopafinena kaguva zane avame'zanena eri fore nehia Anumzankino, laionimofo hankavefintira Danielina

aza huno avre'ne. 28 Ana hutegeno Darius'i'ma kinima mani'nea knafine, Pesia kini ne' Sairusi'ma kinima mania knafina, Danieli avatera mago zana fore osigeno knare huno mani'ne.

7 Hagi Belsasa'ma agafa huno Babiloni kinima efore'ma huno mania kafufina, Danieli'a mago zupa sipa'are mase'neno ava'nagnaza keteno amanage huno avona krente'ne. 2 Nagra Danieli'na kenage'ma mase'nena ava'nagna zama koana, ama mopafina maka asoparegatira zaho eazamo ra hagerina emeri kranto kranto hu'ne. 3 Anama hutege'na koana, hagerimpintira 4'a tusizankna ruzahu ruzahu afi'zaga atiramiza e'naze. 4 Kotama atirami'nea afi zagamo'a laionigna higeno, tumpamofoma hiaza huno ageko'na hunte'ne. Anante negoge'za ana afi'zagamofo ageko'na eri ampukasi atre'haze. Anama hute'za atrazageno'a vahe'mo'ma hiaza huno, tare agiareti mopare reno oti'ne. Hagi ana afi'zagamofona vahe antahintahi ami'ne. 5 Anante nampa 2 afi'zagama koana beagna hu'neankino, agia mopafi reno oti'nege'na kogeno, mago zagamofona 3'a asoza zaferina agipi haninkofi'ne. Anante antahugenno mago vahe'mofo agerumo'a asamino, Otio! Otinka nama'a vahe'mofo avufgama nenaku'ma hanunka no hu'ne. 6 Anante nampa 3 afi'zagama ke'hoana lepatigna higeno, amagenafina namamofoma hiaza huno 4'a agekona huntegeno, 4'a aseni hunte'nea zaga efore hige'na ke'hoe. Ana higeno ana zagamofona mikazama kegavama hu hihamu hankavea ami'ne. 7 Hagi anante kenage'ma ava'nagna zama kofina, magora nampa 4 afi zaga ke'hoe. Ana zagamofona koro huga avugosa huntenezeno, hankavenentake hu'neno ainire ave hunte'neankino, ana aveteti ha'ma huntaza vahera anintrantu huno neneno zamatreya vahe'enena agianuti maka rentrantru ahe vagare'ne. Ana zagamo'a 3'a afi zagagafa

zamagatereno ruzahu hu'neankino, 10ni'a pazine asenifina hunte'nege'na ke'noe. **8** Hanki ana zagmafo 10ni'a pazivetamima negogeno'a, ana pazivemokizmi amu'no zamifintira ame huno mago osi pazine mareri'ne. Ana pazivemo'a ko'ma me'nea 3'a pazivetamina retagre netreno, zamagri nona eri'ne. Ana osi pazivemofona vahe avurgagna avurgarare hunte'negeno, agi'ma hunte'nefintira veganokno ke nehuno, avufga erisgahu naneke nehige'na antahi'noe. **9** Ana ava'nafima koge'za kini trara eri'za e'za noma'are erinte fatgo hu'za eme nentage'na ke'noe. Anama hutazageno'a korapa'ma mani'neno, mani vava nehia Anumzamo'a tra'a erino mani'neno vahe refko huzmantenaku eme ante'ne. Kukenama hu'nea kukenamo'a efeke hampomo hiaza huno efenentake nehigeno, azokamo'a efenentake hu'ne. Hagi agrama mani'nea kini tra'mofona tevemo hagna hagna nehigeno, anama mani'nea tra'mofo wirifina tevemo akarukaru huno nerege'na ke'noe. **10** Ana nehigeno agrama mani'nefintira teve tirupinti tinkna huno varehirami varehirami huno tevemo'a e'ne. Ana nehige'za tausen tausenia agatereno rama'a vahetamimo'za agri tvaontera mani'neza agri eri'zana erinentazageno, ohampriga'a vahe krerfamo'za Agri avuga oti'naze. Anante keagafina ufrenero agafa huno keaga refko hu'za higeno, avontafe tamimo'a ru vakarente vagarege'na ke'noe. **11** Hagi ana ava'nafima koana ana osi pazivemo'a tusiza huno avufga erisga hu nanekea nehige'na ke'noe. Ana nehige'na negoge'za nampa 4 afi zaga ahe'za avufga'a tevefi kre fanane hu'naze. **12** Hagi ana 3'a afi zaga kafamokizmia hihamu hankave zamia eri atre'neanagi, huhampri ante'nea kna'ama esigu osi'a kna zamatrege'za mani'naze. **13** Ana kenage'ma mago'anema ke'noa ava'nafina, vahe'mofo mofavregna ne'mo

hampompi mani'neno monafintira e'ne. Ana hume eazamo korapa'ma mani'neno manivava huno ne-ea Anumzamo'ma mani'nea tavaonte egeno agrama nemanifinka avreno ufre'ne. **14** Ana huteno ragine, hankavene maka ama mopafima mani'naza vahe'ma kegavama hania hihamu hankavea agrike ami'neanki'za, maka ama mopafima ru zamavufagane ru zamavufagane vahe'ma mani'ne'za, ru zamageru ru zamageru'ma neraza vahe'mo'za agri kege antahigahaze. Agrama kinima manino kegavama hania kumamo'a, mevava hanigeno mago zamo'a eri haviza osugahie. **15** Hagi nagra Danieli'na ana ava'nama ketena tusi antri nehugenno, nagu'amo'a kna nehige'na, antahintahi hakare hu'noe. **16** Ana hige'na Anumzamo'ma nemania kini tra'mofo tvaonte'ma mani'za vahepi mago'mofonte vu'na, ana ava'namofo agu'agesa'a eri ama hunka nasamio hu'na antahige'noe. Anama hugeno'a amanage huno eri ama huno nasami'ne. **17** Kagrama 4'a afi zagagafama ava'nafima ke'nana zamofo agu'agesamo'a amana hu'ne, ama mopafintira 4'a hankavenentake kinia efore hugahaze. **18** Hianagi marerisa Anumzamofo avure'ma ruotage'ma hu'naza vahe'amokizmia, ana mopa zamisnige'za kegava hu vava hu'za vugahaze. **19** Hagi nampa 4 afi zagama ke'noa zamofo agu'agesa'a eri ama huno nasamisniegu hu'noe. Na'ankure agra mago'a afi zagakfa zamagatereno ruzahu hu'neankino, vahera zamazeri koro huga zaga mani'ne. Ana hu'neankino agri'ma ha'ma hunte'naku'ma nehaza vahera ainire aveteti'ene bronsire azankonuti anintrantu neheno atreama'a agareti rehana titre'ne. **20** Anazanke hu'na ana zagmafo asenifima 10ni'a pazive'ma me'nea zamofonku'ene, 3'a pazive'ma retagare netreno'ma zamagri noma eri'nea osi pazive'mofo agu'agesa'a eri ama huno nasamisniegu hu'noe. Ana osi pazivemo'a ruzahu

huno mago'a pazivera zamagatere neankino, vahe avurga
huntegeno agi'enena hunte'neankino, ana agipintira ke hakarea
nehuno avufga erisga hu naneke hu'ne. **21** Ana ava'nafima
kogeno'a ana pazivemo'a Anumzamo'ma huhampri'nea vahera
ha' huzmagatere'ne. **22** Anama nehigeno'a Marerisa Anumzama
korapa mani'neno mani vavama huno ne-ea Anumzamo anante
eno, keaga eme refko huno agra vahe'a zamaza hu'ne. Anama
hutege'za Anumzamofo vahe'mo'zama kinima mani'za maka
zama kegavama hanaza knamo'a ehanati'ne. **23** Anante amanage
huno eriama huno nasami'ne, nampa 4 afi zagama ke'nana
zamofo agafa'amo'a, nampa 4 hankave kuma efore hugahiankino,
ruغا'amokizmia zamagatereno ruzahu kna hugahiankino, maka
ama mopafi vahera zamazeri haviza nehuno, agiareti zamare
hapatigahie. **24** Hanki 10ni'a pazine'ma ke'nana zamofo
agafa'amo'a, anama hankavenentake kinimo'ma kegavama
hu'nesnia mopafintira 10ni'a kini vahe efore hu'za mopa kegava
hugahaze. Anama hutesnageno'a, anantera mago kini efore
huno mopa kegava hugahie. Hianagi 10ni'a kini vahera ru
zamagtereno ruzahukna hugahiankino, 3'a kini vahera zamazeri
atregahie. **25** Ana kini ne'mo'a Marerisa Anumzamofo agia
huhaviza hunenteno, Anumzamo'ma huhampari zamante'nesnia
vahera zamazeri haviza hugahie. Ana nehuno mono'ma nehu'za
musenkasema nehaza knane, kasegenena eri ruzahne nehuno,
agrama kegavama huzmantesniana 3'a kafugi 6si'a ikamofo
agu'afi kegava huzmantegahie. **26** Hianagi Anumzamo'a keagafi
azeri otino refko hunenteno, maka hankave'a eri atrevaga
resnigeno ru'enena otino mago zana osugahie. **27** Hanki anante
ama mopafi kini vahe'mo'za e'neriza hihamu hankavene, ra
zamaginena Marerisa Anumzamo'a zamagripintira erimarenlo,

Agrama huhampari zamante'nea vahe zamigahie. Agra kinia mani vava huno vugahianki'za, maka kva vahe'mo'za agri eri'zanke eneri'za agri kege antahigahaze. 28 Hagi nagra Danieli'nama ke'noa ava'namofo nanekemo'a amare emente. Nagra ana ava'nama kete'na tusi koro nehu'na antahintahi hakare nehugen, navugosamo'a rukrahe hu'ne. Hianagi ana zamofo nanekea vahera ozamasami atrogeno nagu'afi me'ne.

8 Hagi Belsasa'ma kinima manino egeno nampa 3ma hia kafufina, nagra Danieli'na mago'ene nampa 2 avanagnaza ke'noe. 2 Ana ava'nagna zampima ke'noana, Elamu mopafima ugagotama hu'nea ran kuma Susa kumate Ulai timofo ankenare oti'nena ana ava'nagna zana ke'noe. 3 Hagi anante nagra kesgama hu'na koana, tare za'za pazine hunte'nea ve sipisipi afu'mo tinnenare oti'nege'na ke'noe. Hagi tare pazine'mokea za'za hu'na'anagi henkarfama hageno mareri'nea pazivemo'a, kotama marerinea pazivemofona agatereno za'za hu'ne. 4 Ana ve sipisipimo'a hankavenentake hu'neakino kogeno'a, zage fre kazigane, noti kazigane, sauti kazigane vuno eno nehuno, maka zama avugama me'nea zana ome mitre eme mitre hu'ne. Ana higeno mago'a afi'zagamo'za oti hankavetine'za hara hunente'za, agrama ha'ma huzmantea vahera zamagu vazigara osu'naze. Ana hazageno agra avesite nazano hunaku'ma hiazana nehuno hankave nentake afi'zaga efore hu'ne. 5 Hanki ana ava'nama koa zanku antahintahi hakare nehu'na koana, mago ve meme afu'mo'a zage fre kazigati efore huteno, moperera agiamo'a avako osiazza, ame huno maka ama mopafina agareno vuno e'ho hu'ne. Ana mememofona tare avurgararemofo amunompina mago tusizankna pazine mareri'ne. 6 Hagi tinnenare'ma oti'nege'nama ko'ma ke'hoa ve

sipisipi afu'ma mani'nerega, ana ve meme afu'mo'a tusi arimpa nehegeno taragino vu'ne. **7** Ana hige'na anante kogeno ana mememo'a sipisipi afu'mofona tusi arimpa ahenenteno, eme ahe nefrino, tare pative'ararena rufutagi atre'ne. Ana sipisipimo'a hankavetino hara hugara osigeno, meme afumo'a ahetregeno masegeno agiareti rehapat'i'ne. Ana higeno mago afi'zagamo'a, mememofo hankavefintira aza huno agura ovazi'ne. **8** Anama huteno'a mememo'a tusi hankavenentake zaga efore hu'ne. Hianagi hankave'amo'ma ome rama nehigeno'a, hankavenentake pative'amo'a ruhantagirami'ne. Ana higeno anampintira 4'a hankave pazivetami hanatiteno, ama mopamofona 4'a kaziga asoparega avugosa ome hunte eme hunte hu'ne. **9** Hagi mago pazivepintira mago osi pative hanatiteno, ana pazivemo'ma ome ran kerfama huno hankavema enerino'a, sauti kaziga vahe'ene zage hanati kaziga vahe'ene, knare zantfama hu'nea Israeli mopafi vahera zamazeri haviza hu'ne. **10** Ana nehigeno ana pazivemofo hankavemo'a ra ome huno monafinkama nemaniza sondia vahe ha' ome huzmante'ne. Ana nehuno monafima me'nea hanafitamina eri atafri atreno agareti zamare hapati'ne. **11** Ana nehuno monafima nemaniza sondia vhete Kva nekna hanue nehuno agrite'ma mago mago zupama ofama hunentaza ofanena erinetreno, mono'ma hunentaza nonena eri haviza hutre'ne. **12** Vahemo'zama kumi'ma nehaza zamo ana pative'mofona hankave amigeno, monafima nemaniza sondia vahe hankavea eri netreno, mago mago zupama ofama nehaza zana eri netreno, tamage nanekea eritre'ne. Ana nehuno ana pazivemo'ma nazano hunaku'ma hiazana amne tro huke'za hu'ne. **13** Anante ruotage'ma hu'na'a ankerontre'ma mani'nampintira magomo'a amanage huno magomofona antahige'ne. Ke ontahi havi avu'ava

zama ama ava'nagna zampima fore hia zantamina nama'a kna
maniteno vagaregahie? Ana hanige'za vahe'mo'za ina zupa
ete eri agafa hu'za mago mago zupama huterema nehaza ofa
hugahaze? Ina zupa ana pazivemofo hankavea vagaresnigeno,
Monafi sondia vahetamima zamazeri haviza nehuno, mono
noma agiaret'i'ma eri havizama nehia zamo'a vagaregahie? **14**
Higeno mago ankeromo'a kenona huno, ama ana knazamo'a
2tausen 300'a zagine hanine maniteno ome vagaresnige'za,
Anumzamofo mono nona ete eri so'e hugahaze. **15** Hanki nagra
Danieli'na ana avana gnazama nege'na, ana ava'nagna zamofo
agafa'agu'ma antahintahi hakarema nehugen'o'a, ame huno
mago ne'mo navuga eme oti'ne. **16** Anante antahugenno mago
vahe'mofo ageru'mo Ulai tintegati kezatino, Danieli'ma ke'nea
ava'nagna zamofo agafa'a Gebrieliga eri ama hunka asamio
hu'ne. **17** Higeno ankero ne' Gebrieli'ma eno nagrama oti'noa
tvaonte'ma ege'na, nagra tusi koro nehu'na navugosaregati
mopafi kepri hu'na masogeno, Gebrieli'a huno, mopafi vahetfa
mani'nane. Hianagi monane mohanema vagareku'ma hania
knafima fore'ma hania knaza ava'nafima kana zantamimofo
agafa'a antahi ama' hugahane. **18** Hagi ana ankeromo'ma agi'ma
reaka huno keagama nenasamigeno'a, navumo'a kagigagi
hige'na navugosaregati mopafi traka hu'na mase'noe. Hianagi
ana ankeromo'a navako huno nazeri otige'na oti fatgo hu'noe.
19 Anama huteno'a anante amanage hu'ne. Henkama knazama
fore'ma hania zamofo kasaminaku e'noe. Anumzamo'a arimpa
ahe'zama'ama eri ama'ma hania kna ko huhamprinte neankino,
kagrama ava'nafima ke'nana kante anteno, ana maka zamo'a
eama hugahie. **20** Hagi mago ve sipisipi afu'mofoma tare
pazive'ma hunte'negenka ke'nanana, e'i Midia kini ne'ene Pesia

kini netrente huvame huke me'na'e. **21** Hagi azokake'ma hu'nea
ve meme afumo'a Grisi kini nete huvame huno me'ne. Ana
mememofoma tare avurgamofo amu'nompima mago ra pazine'ma
hunte'negenka'ma ke'nanana, e'i ko'ma Grisi mopare'ma kinima
efore hu'nea nete huvame huno me'negenka ke'nane. **22** Hagi ana
mememofoma 4'a ne'onse pazivetamima hanati'za ra pazine'ma
ruhantagi netre'za agri noma eri'naza zamofo agafa'amo'a, Grisi
mopa 4'afi refko hanige'za, 4'a kini vahe'mo'za kegava hugahaze.
Hianagi ko'ma Grisi mopare kinima mani'nea ne'mofo hankavea
agateoregahaze. **23** Hanki henka'a ana 4'a kini vahe'mo'zama
kinima mani'za ome vagareku'ma hanaza knafina, vahe'mo'za
tusi kumi hu'za eri hakare hugahaze. Anama hanaza knafina
mago kini ne' efore hugahiankino, vahera zamage fenkami
neteno, havigege nehuno, knare avu'avara huozmantegosie. **24**
Ana ne'mo'a tusi'a hankave kini efore hugahie. Hianagi agra'a
hankaverera anazana osugahie. Ana nehuno hankave kva
vahetamine Anumzamofo vahe'enena zamazeri haviza hugahie.
25 Ana ne'mo'a havigema huno vahe'ma revatgama hania
avu'avazamo hanigeno, maka zampina knarera nehuno, agrama
agesama antahisiana nagra maka vahera zamagatere'noe
huno antahigahie. Ana nehuno rama'a vahera antri hanazaza
huno zamahe nefrino, maka kini vahe'mokizmi Kini nera ha'
huntegahie. Hianagi mago vahe'mo ha'hunteno azeri haviza
osaniaza agra'a haviza hugahie. **26** Hagi ava'nagna zampima
mika nantera ofaramima nehaza zama negenka, mika kinaga
ofaramima nehaza zama ke'nanana, e'i tamage'za ke'nane.
Hianagi ana zamo'a ame' huno forera osu zazate meteno fore
hugahianki, eri amara hunka vahera ozamasaminka atregeno
frakino meno. **27** Hagi nagra Danieli'na anankema antahitogeno'a

hankavenimo'a omanege'na, mago'a kna kri eri'na mase'noe.
Anama hutege'na ete ot'i'na kini ne'mofo eri'zama e'nerua
eri'zante vu'noe. Ana nehu'na ana ava'nama ke'noa zanku
antahintahi hakare hu'noanagi, ana ava'namofo agafa'a antahi
amara osu'noe.

9 Hanki Midia mopareti ne' Ahasuerusi nemofo Dariusi'ma agafa
huno Babiloni (Kaldia) mopare'ma kinima mania kafufina, **2** agafa
huno ese kafuma kinima nemanige'na, Anumzamo'ma kasnampa
ne' Jeremaiante eri ama huno'ma, Jerusalemi kumamo'a 70'a
kafumofo agu'afi havizana huno megahie higeno'ma krente'nea
avona hampri'na nentahi'na, tusi nagesa antahintahi hu'noe. **3**
Anama hute'na nasu'zana erinte ama hu'na, nasunku kukena
nehu'na, ta'nefa nefre'na, ne'zana a'o hu'na mani'nena tazama
hanigura, Anumzamofontega nunamuna hu'noe. **4** Hagi Ra
Anumzana nagri Anumzamofontega amanage hu'na kumitigura
huama hu'na nunamuna hu'noe. Ra Anumzana so'e zantfa
hunka marerisa Anumzamoka, maka zupa navesiramante vava
hugahue hunka huhagerafi'nana huvempa keka'are ot'i'enka,
kavesi negante'za kagri kasegema amagema nentaza vahera,
knare kavukvara hunezmantane. **5** Hianagi tagra kumi huta kefo
avu'ava nehuta, ha'reneganteta, amage'ma anteho hunka'ma
tami'nana kasegene tra kenena tamefi humi'none. **6** Kagri eri'za
vahete'ene tafahe'inte'ene, ana maka Israeli vahetema
kagri kagifima eme huama hu'naza nanekea tagesa anteta
ontahi'none. **7** Ra Anumzamoka kagra fatgo kavukva'ene
ne' mani'nane. Hianagi menima tagri'ma tagesnanana, tusi'a
tagazegu hume onkeno eno ama knare ehanatie. Amanahu'ma
hiana tagrama Juda mopafine, Jerusalemi kumapine Israeli

mopafinema mani'nona vahe'motama tamefi hunegamita, kagri
kema rutagrona zanku hunka, tahe panani hanketa maka ru
moparega umani emani hu'none. **8** Ra Anumzamoka, tagrane
kini vahetine ugagota kva vahetine tafahe'zanena kagritera kumi
hu'nonku huta tagazegu hune. **9** Tagra Ra Anumzamoka nanekea
rutagreta tamefi hugami'none. Hianagi Ra Anumzana tagri
Anumzamoka kasunku hunka kumiti eri netrana Anumza mani'ne.
10 Anumzamoka eri'za vaheka'a kasnampa vahe zamagipi
huvazinke'za kasegekane tra kekanema eme huama hu'za
tasami'nazanagi, Ra Anumzana tagri Anumzamoka nanekea
antahita amagera onte'none. **11** Maka Israeli vahe'mota Kagri
kasegea rutagreta tamefi hugami'none. Ana hu'nonku hunka,
maka knazama tagritema fore'ma hania zamofo nanekene tazeri
havizama hania zamofo nanekema kagri eri'za ne' Mosese'ma
krente'nea kemo'a, tagrama kumi'ma hu'nona nona'a tagri
tavufgare ana knazana fore nehie. **12** Kagrama hu'nana naneke
amage antenka, kva vahetire'ene tagrite'enena tusi'a knaza
atrarkeno e'ne. E'i ana knazana kora ama mopafina atrarkeno
ome'nea knaza atrarkeno Jerusalemi kumatera efore hu'ne. **13**
Hanki Mosese'ma kasegefima krente'nea knazamo'a, tamage
huno maka tagrite efore hu'ne. Hianagi tagra rukrahera huta,
Ra Anumzana tagri Anumzamofo asunku zankura memea
nehuta, kumi avu'ava zantia atreta tamage naneke'a amagera
onte'none. **14** E'ina hu'nonku huno Ra Anumzamo'a knazama
retro'ma hunte'nea knazanteti tazeri havizana hu'ne. Tagra agri
nanekea rutagreta kea ontahi'nonku huno, Ra Anumzana tagri
Anumzamo'a fatgo avu'ava'za huno tazeri haviza hu'ne. **15**
Hagi menina Ra Anumzana tagri Anumzamoka, kagra tusi'a
hankaveka'ama erinte ama hunka, Isipi moparet'i'ma vaheka'ama

hankavenentake kazanteti'ma zamavarenka'ma e'nana zankura,
vahe'mo'za kagri kagia ahentesga hu vava nehaze. Hianagi
tagra tamagerfa huta tusi kumi huta havizantfa hu'none. **16** Ra
Anumzamoka kagra fatgo kavukva nehana ne' mani'nananki,
ruotage'ma hu'nea agonakare'ma me'nea Jerusalemi kumakuma
krimpama ahententana zana atro. Na'ankure tagri tvaonte'ma
mani kagi'naza vahe'mo'za, tagrama huna kumimo'ene
tagehe'mozama hu'naza kumi'mo hige'za, Jerusalemi kuma'ene
kagri vahekura kiza zokago ke hurante'naze. **17** Hagi menina
tagri Anumzamoka, kagri eri'za vahemo'nama taza huogu'ma
nehua nunamuna antahinenaminka, Ra Anumzamoka kagri
kagimofo knare zanku nentahinka, atregeno kavugosafinti
masazamo'a havizantfama hu'nea mono nonka'a remsa huntenu.
18 Anumzanimoka muse hugantonanki kagesa antenka nunamu
ketia antahiramio. Knafima mani'nona zana kavua antenka
neragenka, Kagri kagimo'ma me'nesnige'zama mono'ma hunante
vava hugahazema hunka hu'nana rankumaka'mo'a haviza
huno me'nea zana ko. Tagra fatgo vahe mani'neta, taza
huogura amanahu kea nosune. Hianagi tagrama antahi'nonana,
kagra kasunku Anumza mani'nanketa anagea nehune.
19 Ra Anumzamoka nunamuntia antahineraminka, kumitia
atrenerantenka za'zatera omaninka nunamuntia antahineraminka,
Kagraka'a kagifima zamagima hu'nana vaheku'ene Nagri
nagimo'ma Jerusalemi kumate me'nesnige'za monora hunante
vava hugahazema hunka hu'nana kumaku'ene kagesa
nentahinka, ame hunka taza huo. **20** Nagra Danieli'na
kuminigu'ene Israeli vaheni'amokizmi kumira Ra Anumzana
Nagri Anumzamofontega nunamuna huna huama nehu'na,
ruotage'ma hu'nea agonagura nunamuna hu'noe. **21** Hagi

ana nunamuma nehu'na koana, ko'ma ke'noa ava'nafima
ke'noa ankero ne' Gebrieli'a kinaga ofama kresramnama vu
knare nagrama mani'norega e'ne. **22** Eteno amanage huno
nasami'ne, Danieliga nagrama e'noana, kagri antahintahi eri ama
hanugenka antahi ama' hananegu e'noe. **23** Danieliga kagrama
agafama hunka nunamuma nehankeno, nunamunkamofo nona'a
Anumzamo'a ame huno kea atregante'ne. Ana hige'na menina
ana kemofo agafa'a eri ama hu'na kasaminaku e'noe. Na'ankure
kagra Anumzamofo avurera so'eza hankeno kavesigante'ne.
E'ina hu'negu kagesa ante'eneka ava'nagna zama ke'nana
zamofo agafa'ama eriama'ma hu'na kasamisnuana antahi
so'e huo. **24** Anumzamo'a 7ni'a zupa 70'a kafua huhampri
neankino, kagri vahe'ene kagri ranku'ma Jerusalemi kumapintira,
keontahi avu'ava zana eri atregahie. Ana nehuno kefo avu'ava
zantamifintira miza senezmanteno kumi zamia eri atregahie.
Ana hanige'za vahe'mo'za maka zupa fatgo avu'ava zanke
amagera antegahaze. Ana nehanageno agrama eri kaveri'ma
hu'nea ava'nagna zama eri nenarga nereno, ruotage'ma hu'nea
kuma'ma masave freno erinte ruotage hunaku e'i ana zantamina
hugahie. **25** E'ina hu'negu menima ama kema nentahisanunka
antahi ama huo. Jerusalemi kuma'ma eriso'e huta ete kihoma
huno kini ne'mo'ma hania knareti'ma agafa huteno vuno, ugagota
Kini ne' Mesaiaama efore'ma hania knare'ma uhanatisniana,
e'i 49ni'a kafugi 434'a kafugi ana mikama erintesiana 483'a
kafumofo agu'afi Jerusalemi kumara ete eri so'ea huza
negi'za, kumapi ne'onse kantamina tro nehu'za, fra'ma ki'za
mani'neza ha'ma hanaza kumataminena trora hugahazanagi,
zamagra tusi'a knazamofo agu'afi mani'neza ana eri'zana
erigahaze. **26** Hagi 434'a kafuma evutesanige'za, Anumzamo'ma

huhamprinte'nea ne' Mesaiana ahesnageno nefrisanige'za, mago zama'a otregahaze. Ana hanageno mago hankave kini ne'mofo sondia vahe'mo'za e'za Jerusalemi kuma'ene ra mono nona eri haviza hugahaze. Ana knazama esaniana mago timo hageteno, makaza eri harafi huno viaza hugahie. Ana hanigeno ana ha'mo'a me'nesaniganu vuno maka zama vagare knare uhanatisanigeno, Anumzamo'ma hu'nea kante anteno, maka zamo'a havizantfa hugahie. 27 Anama efore'ma hania kini ne'mo'a 7ni'a kafumofo agu'afina hara osu fru huta manisanune huno vahe'enena huvempa hugahie. Anagema huteno 3'a kafugi 6si'a ikama nemanino'a, Anumzamofontegama kresramnama nevaza zane, ofaramima nehaza zana eri atregahie. Ana nehuno maka havi avu'ava'ma hania zamofo agofetura havizantfama hu'nea avu'ava'ma haniana, Anumzamofo mono nomofo agofetura kasrino havizantfama hu'nesnia za erino marerino antegahie. Hagi maka zama eri havizama hania ne'mo'a anante mani'nesnigeno, Anumzamo'ma huhamprinte'nea knazamo'a, agri avate rupopo hugahie.

10 Hagi Pesia kini ne' Sairusi'ma nampa 3 kafuma kinima nemanigeno'a, Danielina mago agi'a Belsasakino ru'ene mago ava'hagnaza Anumzamo'a eri averi higeno ke'ne. Agrama ana zama keno antahino'ma hiana, tamage huno henka fore'ma hania zamofo ke'neankino, tusi'a ha'zane knazane egahie.
2 Hagi ama ana ava'nama nagra Danieli'nama kete'na, 3'a sontamofo agu'afina nasunkura nehu'na zavirat'hoe. 3 Ana knafina knare'nare ne'zane, afu me'anu, waini tinena magore hu'na nagitera erinte'na one'noe. Ana nehu'na ana knafina magore hu'na nazokapine navufgafina masavena fre'na erisera osu'na mani'nogeno 3'a sontamo'a evu nagatere'ne. 4 Hagi

ese ikamofona 24zupa nagra Taigrisi rantimofo ankenare
oti'nena, 5 kesgama hu'na koana, mago ne'mo'a efeke zaza
kukena antani'neno, Goliretike tro hu'naza amunofi afafafina
rugagino rente'nege'na ke'noe. 6 Ana ne'mofo avufgaregatira
rumsa huno, krisolaitie nehaza haveretima nehiaza huno
rumsa hu'ne. Hagi avugosafintira kopasi'namo'ma nehiaza huno
rumarave nehigeno, avurgafintira tosi tavi'mo'ma nehiaza huno
rughananini hu'ne. Azamo'ene agiamo'enena masave freza eri
avugosa hu'naza bronsigna nehigeno, agerumofo agasasamo'a
rama'a vahe'mokizmi zamagerumofo agasasamo'ma hiaza
hu'ne. 7 Danieli'na ana avanagna zana nagrake ke'noanagi,
nagranema mani'naza vahe'mo'za ama ana ava'nagna zama
ke'noana, zamagra onke'naze. Hianagi zamagra tusi koro
nehu'za, frakinaku koro fre'za vu'naze. 8 Ana hazage'na nagrake
anantera oti'nena ruzahu ava'nagna zana ke'noe. Hankaveni'a
omanegeno navugosamo'a rukrahe nehigeno, zaferinani'a
omane amane hu'ne. 9 Hagi anante ana nemo'ma keagama
nehige'na ageru'ama nentahugen'o'a, navumo'a kagigagi hige'na
navugosaregati mopafi traka hu'na mase fatgo hu'noe. 10
Anante mago vahe'mofo azamo navako huno nazeri oti'ne.
Hianagi nahirahi neregena nazanteti vazisga hune'na mopafi
narena re'na mani'nena nahirahiku hu'noe. 11 Anante ana
ne'mo'a amanage huno nasami'ne, Danieliga Anumzamofo
avurera knare hu'nankeno Agra avesigante'ne. Ana hu'negu
nagrama kasamisnua nanekea kagesa ante'nenka antahi so'e
huo. Kagriku huno hunantege'na e'noanki, oti'enkena antahio.
Anagema hige'na nahirahiku nehu'na oti'noe. 12 Ana hugeno
anante agra nasamino, Danieliga korora osuo, kagrama ese
kna zupama Anumzamofo avure'ma kavufga erinte raminka

mani'nenkama, agafa hunka ama' antahi'zanku'ma nunamuma
nehankeno'a, Anumzamo'a monafinkatira nunamunka'a
antahiteno, hunantege'na nunamunka'amofo nona'a hunaku
e'noe. **13** Hagi nagra ko ame hu'na enaku hu'noanagi, Pesia
mopare'ma kegavama hu'nea ankeromo kana rehiza hige'na,
21ni'a zagegna mani'noe. Anante vugota hu'naza ankerompinti
magora Maikoli'e nehaza ankeromo eno eme naza hu'ne.
Na'ankure Pesia kini vahe amunompina nagrake mani'nogeno
eme naza hunaku anara hu'ne. **14** Hanki nagrama menima
e'noana, kagri vahete'ma henkama fore haniaza eri ama
hu'na kasaminaku e'noe. Na'ankure ama ana ava'nagna zama
ke'nanana henkama fore'ma haniaza ke'nane. **15** Hagi agra
anagema huno nenasamige'na navugosaregati mopafi masena
kea hugara osu'noe. **16** Hagi ana nemo'a tagrama hunaza
huno mopafi vahekna hu'neankino, nagite azana eme anteno
navako hige'na, nagira reaka nehu'na agafa hu'na keaga hu'noe.
Ana nehu'na ana ne'mo'a navuga oti'nege'na amanage hu'na
asami'noe. Ranimoka nagra ava'nagna zama ke'hoa zamo higeno
navufgamo'a tusi nata negrigeno hankaveni'a omane'ne. **17**
Ana hu'neanki'na na'ane hu'na kagri eri'za vahemo'na ranimoka
kasamigahue. Hankaveni'a omanege'na nasimu'ma ante'zankura
tusi amuho hue. **18** Hanki anante vaheknama hu'nea ne'mo'a ete
mago'ene navako higeno, hankavenimo'a ete e'ne. **19** Anante
ana ankeromo'a huno, Korora osunka karimpa frune manio!
Na'ankure Anumzamo'a avesigante'neankino, Agra kagesga
hu'negu korora osunka oti hankavetio. Hagi ama ana nanekema
nenasamige'nama nentahugen'o, ete hankavenimo'a osi'a
ege'na amanage hu'na asami'noe. Muse hugantoanki ranimoka,
ana zankura menina keaga nasamio. Na'ankure kagra ko nazeri

hankaveti'nane. **20** Anagema hugeno'a amanage huno kenona hunante'ne. Nagrama menima e'noa zamofo agafa'a kagra kenka antahinka hu'nampi? Nagra amafina za'zatera omani'na ete ame hu'na vu'na, Pesia mopare'ma kegavama hu'nea havi ankerone hara ome hu'na azeri agateregahue. Anama hutesnugeno'a Grisi mopare'ma kegavama hu'nea ankeromo'a eme hara hunantegahie. **21** Anante ana ankeromo'a amanage huno nasami'ne. Menina tamage nanekema avontafepima krente'naza nanekea eri ama hu'na kasamigahue. Hagi mago vahe'mo'a nagrira naza hige'na ana havi ankeroraminena hara osu'noanki, Israeli vahe'mota tamagrite'ma kegavama nehia ankero ne' Maikoli naza hige'na hara hu'noe.

11 Hagi Midia mopareti ne' Dariusi'ma agafama huno kinima mania kafufina, nagra ankero ne' Maikoli'na aza hu'na azeri hankavetinaku agri tavaonte oti'noe. **2** Hagi menina Danieligama eri ama'ma hu'na kasamisnua nanekemo'a tamage me'neankino, henka fore hania zanku kasamigahue. Henka'a **3**'a kini efore hu'za Pesia mopa kegava hutesnageno, zamagri zamefi'ma nampa **4** kinima efore hania kini ne'mo'a zamagatereno tusi zago feno ante'nesnia ne' efore hugahie. Ana huteno tusi'a feno ne'ma mani'nia zamo hanavea aminkeno maka vahera zamazeri oti'nige'za Grisi mopafi vahera hara ome huzmantegahaze. **3** Anama hutena henka mago hankavenentake kini efore huno rama'a vahe kegava hugahiankino, nazano hunaku'ma hania zana amne hugahie. **4** Hianagi agri hankavemo'ma ome rama nehanigeno'a, agri hanavemo'a evuraminkeno agrama kegavama hu'nea mopa **4**'a kini vahe'mo'za refko hu'za kegava nehanage'za, anampina agri nagapintira kinia omanigahaze. Na'ankure hankave zamimo'a ko'ma mani'nea kinimofo hankavegnara

osugahie. 5 Hagi sauti kaziga mopama kegavama hu'nea kini ne'mo'a hankave kinia manigahie. Hianagi ana kini ne'mofo eri'za ne'mo'a rugateregahiankino, agra'a kuma kegava huno kinia manigahie. 6 Hagi mago'a kafuma evute'na, noti kaziga kini ne'ene sauti kaziga kini netremokea, hara osu fru huta manisanu'e huke nanekea anakigaha'e. Ana nanekema eri hankavema tinakura sauti kaziga kini ne'mo'a, mofa'a amisanigeno noti kaziga kini ne'mo'a a' erintegahie. Hianagi ana a'mofo hankavemo'a za'zatera omanesigeno, neve hankavemo'enena vagaregahie. Ana hanige'za ana a'ene nevene nefane agri'ma amage'ma vanaza vahe'enena zamahe hana hugahaze. 7 Hianagi ana a'mofo nagapinti mago ne'mo sauti kaziga moparera kinia efore hugahie. Anama huteno'a sondia vahe'a zamazeri atru huno, noti kaziga mopare'ma kegavama hu'nesia kini ne'mofona, hankave vihu hugagi'nesnia kuma'afi ufreno hara huno azerigateregahie. 8 Anama hutesuno'a anumzazmine, aenireti'ma tro'ma hunte'haza amema'ane, zago'amo'ma marerisa zantamima golireti'ene silvareti'ma tro'ma hu'nesaza zantaminena erino Isipi vugahie. Anama hute'nuno'a noti kaziga kinia mago'a kafufina hara huontegahie. 9 Hagi henka noti kaziga kini nemo'a vuno, sauti kaziga kini nera hara ome hunteteno, ete rukrahe huno mopa'are egahie. 10 Hianagi noti kaziga kini ne'mofo mofavre naga'moza rama'a sondia vahe'zaga zamazeri atru hute'za, tima hageno repapa huno eaza hu'za, sauti kaziga kini nera hara eme hunte'za rama'a kumatamina eri agatereme vu'za ogantu kini ne'mo'ma nemania hanave vihu keginare uhanatigahaze. 11 Ana hugahazanagi sauti kaziga mopare kini ne'mofona tusi arimpa ahesanigeno, sondia vahe zaga'ane vuno, noti kaziga kini ne'mo'ma zamazeri atruma hu'nea sondia vahe krerfa hara ome

huzmagateregahie. **12** Hagi sauti kaziga kini ne'mofoma ha'ma
eme huntesaza sondia vahe'ma zamahe hana'ma hanageno'a,
sauti kaziga kini ne'mo'a tusi muse nehuno, avufga erisga
hugahie. Hianagi agri sondia vahe'mo'za mago'enena hanaveti'za
maniza ovugahaze. **13** Hagi mago'a kafuma evutesnigeno'a,
noti kaziga kini ne'mo'a, ko'ma zamavareno hate'ma e'nea
sondia vahera rugatereno, rama'a sondia vahe'ene rama'a
ha'zane eri'neno, hara erino egahie. **14** Hagi ana knafina rama'a
vahe'mo'za sauti kaziga kini ne'mofona hara rentegahaze. Ana
nehanage'za ama ana ava'nama eri rgama renakura Danieliga
kagri vahepinti mago'a harfa vahe'mo'za zamagranena hara
rentegahaze. Hianagi zamagra hantaga hanageno, anazamo'a
amne zankna hugahie. **15** Anante noti kaziga kini ne'mo'a
sondia vahe'ane eno, sauti kaziga mopare'ma hankave vihu
keginama hugagi'naza rankumara eme avazagi kagino hara
hugateregahie. Ana hanige'za sauti kaziga moperara hankave
sondia vahe mani'nazanagi oti hankaveti'neza hara osugahaze.
16 Ana hanigeno noti kaziga kini ne'mofona mago vahe'mo'a
hara huontesnigeno, nazano agrama hunaku'ma hania zana,
amne agra avesite tro hugahie. Ana nehuno knare zantfama
hu'nea Israeli mopafi umani'neno, ana mopa eri haviza hunaku
agesa antahigahie. **17** Hagi noti kaziga kini ne'mo'a agrama
kegavama hu'nea mopafinti maka sondia vahe'a zamavare
hana huteno vuno, hara osuta fru huta manisanu'e huno
sauti kaziga kini ne'ene keaga ome anaki'naku antahintahi
hugahie. Ana huteno mopa'ama hanare'nakura haviza huno,
sauti kaziga mopare kini ne'mofona mofa'a amisanigeno ara
erintegahie. Hianagi ana antahizamo'a eri'zana e'orisanigeno, ana
zamo'a amne zankna hugahie. **18** Anama huteno'a henka agra

rukrahe huno hageri ankenaregama me'nea ranra kumatamimpi
vahetamina hara ome huzamanteno zamazeri agateregahie.
Hianagi mago sondia kva ne'mo hara hugateresanigeno, agrama
hu'nea veganokno avu'ava zankura tusi agazegu hugahie.

19 Anama hutesanigeno'a ete rukrahe huno esania zamo,
mopa'afima hankavenentake vihuma hugagi'naza ran kumapi
emanigahie. Hianagi agra traka huno masenige'za, mago'enena
onkegahaze. **20** Ana hanigeno agri noma erino kinima manisnia
ne'mo'a, kini nompima marerirfa feno zama eri avi'ma atesigura
mago ne' huntessnigeno vano huno agrama kegavama hania
moparamimofo agu'afintira, takisi zagoa vahetetira zogigahie.
Hianagi atupa knafi kinia fore huno maniteno frigahiankino,
mago vahe'mo'a arimpa ahenteno ahe frige, hapinti frie hu'za
ke'za antahi'za osugahaze. **21** Hagi agri noma erino kinima
manisnia nera, kini ne'mofo nagapinti agri noma erino kinima
omaniga vahemo kinia manigahie. Anama hutesuno'a agra
ame huno kinia efore huno maka mopa kegava nehuno havige
huno vahera rezmatga huno kini eri'zana erigahie. **22** Rama'a
sondia vahe'mo'za ana kini nera hara hunte'nakura egahazanagi,
ana sondia vahera zamahe vagaregahie. Ana nehuno ana
zanke huno Ra Anumzamo'ma huhagerafi'nea ugagota pristi
ne'enena azeri haviza hugahie. **23** Hagi ana ne'mo'a mago'a
mopafima nemaniza vahera rezmatga huno hara osu fru huta
manisnune huno huhagerafigahie. Ana nehuno agri vahera
osi'a vahera mani'nazanagi agra hankave kini efore hugahie. **24**
Ana ne'mo'a vahera ozamasami'neno antri hanazaza huno, afu
afa'za osu'nazaza huno, fenomo'ma agatere'nea provinsifi ufreno
vahera ome rohu'reno maka fenozazamia erino agri amage'ma
vanaza vahera refko huzamigahie. Hianagi amana avu'ava zana

za'zatera huno ovugahianki, atupa knafi ome vagaregahie. **25**
Hagi agra ana kini ne'mo'a korora osu, sauti kazigama nemania
kini ne' ha' huntenaku rama'a sondia vahe'zaga zamavare
atru hugahie. Ana hanigeno sauti kaziga kini ne'mo'a hankave
sondia vahe'a zamavareno vanigeke hara hugaha'e. Hianagi
sauti kaziga kini ne'mo'a hara hugate'oregahie. Na'ankure
mago'a vahe'mo'za agrira havige hu'za revataga hanageno
anara hugahie. **26** Ana nehanageno agrane magoka manine'za
agri nompinti'ma knare ne'zama nenaza vahe'mo'za oti'za azeri
haviza hugahaze. Ana hanage'za tima hagenoma eaza hu'za ha'
vahe'mo'za e'za sondia vahe'a rama'a zamahe frigahaze. **27** Hagi
anantarega kini netremokea magoka trate mani'neke havige huke
orevatga arevatga hugaha'e. Hianagi kema anakisna'a kemo'a
amne zankna hugahie. Na'ankure Anumzamo'ma hunte'nea kna
fatgore maka'zama vagama resania knamo'a egahie. **28** Anante
noti kaziga kini nemo'a rama'a fenoza eri'neno ete rukrahe huno
mopa'arega vugahie. Hianagi karankama nevuno'a Anumzamofo
vahe'mo'zama mono'ma nehaza zantamina eri haviza nehuno,
maka zanena eri haviza huteno ete nonkuma'arega vugahie. **29**
Hagi Anumzamo'ma huhampri'nea knama efore'ma hanigeno'a,
noti kazigati kini ne'mo'a ha' erino vuno sauti kaziga kini nera
ha' ome huntegahie. Hianagi ko'ma hu'nea zana hunora hara
hugateoregahie. **30** Zage fre kazigama me'nea hagerimofo
ankenaregama nemaniza vahe'mo'za ventefi e'za hara eme
hunte'za, azeri koro hugahaze. Anama hanageno'a ete atreno
mopa'arega vugahie. Hianagi agrira tusi arimpa nehesanigeno
nevuno, tamage Anumzamofo mono'ma hunentesaza zana eri
haviza nehuno, Anumzamofoma zamefi hunemiza vahe'mokizmi
nanekea antahigahie. **31** Ana ne'mofo sondia vahe'mo'za ra

mono nomofo hankave vihu kegina eri nafa'a nehu'za, mono
nona eri pehenage nehu'za, mago mago zupama Kresramanama
nevaza zana asevazi nezamante'za, Anumzamofo mono nompina
kasrino'ma havizama hu'neaza eritru regahaze. 32 Anumzamofo
kasegema zamefi'ma humisnaza vahera ana kini nemo'a havige
huno rezamatga hanige'za, agri amage antegahaze. Hianagi
Anumzamofoma ke'za antahi'zama hu'nesnaza vahe'mo'za
oti hankave ti'neza agri nanekea eri atregahaze. 33 Hagi
amu'nozamifima knare antahi'zama eri'nesnaza kva vahe'mo'za,
rama'a vahera knare antahi'zana zami'za zamazeri fatgo hugahaze.
Hianagi ana avu'ava zana ana kva vahe'mo'za za'zatera hu'za
ovu'nesnage'za, kva vahera kazinteti zamahe nefrisage'za,
mago'a kva vahera tevefi kre tasagesage'za frigahaze. Ana
nehu'za mago'a kva vahera kinafi zamazeri nente'za, fenozamia
rohu zamare'za erigahaze. 34 Hagi ama ana knazama fore'ma
hania knafina ana kva vahe'mo'za osi'a zamazama hu'zana
erigahaze. Ana nehanage'za rama'a vahe'mo'za ana kva vahera
kaziga antegahazanagi havige hu'za anara hugahaze. 35 Ha'
vahe'mo'za anama knare antahi'zama eri'naza kva vahera
mago'a zamazeri haviza hugahaze. E'inahu zama hanaza zamo'a
kva vahera Anumzamofo avurera zamazeri agru huno zamazeri
avusese hanige'za Anumzamo'ma agesama nentahia vahekna
hu'za mani'nesageno henka maka zamo'ma vagama resnia
kna efore hugahie. Na'ankure Anumzamo'ma huhampari'nea
knamo'a zahufa ne-e. 36 Ana kini ne'mo'a agri'ma avesi'nia zana
amne tro nehuno, agra'agura huno nagra maka anumzantamina
zamagatere'noe huno avufga erisga nehuno, maka havi
anumzantamina zamagatere'nea Anumzamofona huhaviza
huntegahie. Ana avu'ava zana hume nevanigeno, Anumzamofo

arimpa ahe'zamo'ma ome vagamaresia zupa, agri avu'ava
zamo'enena ome vagaregahie. Na'ankure Anumzamo'ma huno
henka fore hugahiema huno hu'nesnia zamo'a tamage huno efore
hugahie. **37** Hagi ana kini ne'mo'a agehe'mokizmi anumzana
antahi nozamino, a'nane mo'zama mono'ma hunentaza havi
anumzanena antahi nomino, mago'a havi anumzanena antahi
ozamigahie. Na'ankure agra avufga erisga nehuno, nagra maka
anumzantamina zamagatere'noe huno agesa antahigahie. **38**
Hianagi agrama mono'ma huntesniana, hankave vihu keginama
kegavama nehia havi anumza monora huntegahie. Hagi
ana havi anumzana agehe'mo'za ke'za antahi'za osu'naza
anumzankino, golima, silvama, zago'amo marerisa haveramine
mago'a musezane ofa nemino monora huntegahie. **39** Hagi ana
kini ne'mo'ma vahe'ma ha' ome huzmanteno hankave vihuma
hu'nesnaza kuma'ma erinaku'ma hanuno'a eme azama hanigeno
ha'ma hanigura ru vahe'mokizmi anumzantaminku kea hugahie.
Ana nehuno agri kema antahisaza vahera, zamazeri ante
ama' huno rankva zamazeri o'netino, mopa refko huno zagore
atresige'za miza hugahaze. **40** Hagi maka zama ome vagamare
knama enaku'ma nehanigeno'a, sauti kaziga kini nemo'a eno,
noti kaziga kini nera ha' eme huntegahie. Anama hanigeno'a noti
kaziga kini ne'mo'a ame huno karisifima mani'neza ha'ma hanaza
vahe'ene karisiramine, venteramine erino hagerimpima ha'ma
nehaza vahetamina zamavareno vanige'za, sauti kaziga kini nera
hankaveti'za hara ome huntegahaze. Timo'ma hageno maka
zama erino viaza huno maka mopafi vahera hara huzmanteno
zamazeri zamagateregahie. **41** Ana kini ne'mo'a sondia vahe
zaga'ane knare zantfama hu'nea Israeli mopafi ufreno eri agrarega
nenteno, rama'a kumapi vahera hara huzamagateregahie.

Hianagi Moapu vahe'ene Idomu vahe'ene Amoni mopafinema
nemaniza vahera hara hu zamagate oregahaze. **42** Ana nehuno
ana kini ne'mo'a rama'a kumapi vahera hara huzmagatereno
kegava huzmantegahie. Hanki Isipi vahe'mo'zanena atre'za
ofregahaze. **43** Ana kini ne'mo'a Isipi mopafima me'nea goline
silvane maka marerisa feno zantamina agrake kegava hugahie.
Ana hanige'za Libia vahe'ene Itiopia vahe'mo'za agri eri'za vahe
manigahaze. **44** Hianagi zage hanati kazigati'ene noti kazigati
vahe'mo'zama hanaza nanekema nentahisuno'a, tusi koro agesa
hugahie. Ana nehuno tusi arimpa nehesnigeno vuno maka zana
eri haviza nehuno, ha' vahe'a ome zamahe vagarenaku hugahie.
45 Ana'ma hutesuno'a vuno Medeterenia ra hageri anke'nane,
Saioni agonamofo amu'nozanifi agra kini nemo'ma manisnia seli
nona ome kino manigahie. Hianagi anante'ma mani'nesnige'za
ome ahe frisnageno, mago vahemo'e hunora aza osugahie.

12 Hanki ugota ankerne ne' Maikoli'a Israeli vahe'motma kegava
huneramantea ankeronkino, ana knafina agra otigahie. Ana
knafima fore'ma hania knazana, magore huno ama mopafina
fore osu'neankna knaza fore hugahie. Hianagi Danieliga kagri
vahe'ma zamagima avontafepima me'nesnia vahera Anumzamo'a
zamagu vazi'nige'za knare hu'za manigahaze. **2** Hanki ko'ma
frizage'zama ase zamante'naza vahera fri'nafintira ete otigahaze.
Anama hute'za mago'amo'za manivava zamasimu enerisnage'za,
mago'amo'za tusi zamagazegu nehu'za ana zamagazefi
manivava hu'za vugahaze. **3** Hanki knare antahi'zane vahe'mo'za
monamo'ma remsama hiaza hu'za remsa nehanage'za, rama'a
vahe'ma zamavare'za fatgo avu'avapima nevanaza vahe'mo'za,
ofumo'ma hiaza hu'za maka zupa remsa huvava hu'za vugahaze.
4 Hianagi kagra Danieliga ama'na nanekema me'nea avontafera

eri runkanirenentenka, atregeno oku meno vuno maka zama
ome vagarenaku'ma hania knare uhanatino. Rama'a vahe'mo'za
ama'na nanekemofo agafa'a antahi ama' hunakura tusiza hu'za
hake'za vu'za e'za nehanageno antahintahizmimo'a ome ra huno
vugahie. 5 Hanki nagra Danieli'na koana, timofo kantu kama
anke'narera tare netre oti'hake'na ke'noe. 6 Ana ankerontrepinti
mago'mo'a, efeke zaza kukenama hu'neno timofo agofetu'ma
oti'nea ne'mofona amanage huno antahige'ne. Nama'a kna
manitesnunkeno ama'na ruzahu'zama tasami'nea zamo'a eforera
huvgaregahie? 7 Higeno efeke zaza kukenama antani'neno,
timofo agofetu'ma oti'nea ne'mo'a, tare azantre'na monarega
erisga hu anagamu netreno, mani vavama nehia Anumzamofo
ajifi huvempa huno amanage hu'ne, Nagra huvempa huankino,
anazama fore'ma haniana 3'a kafugi 6si'a ikampi fore hugahie.
Anumzamofo vahe'mokizmi hankavemo'ma vagama resanigeno,
ana knazamo'enena vagaregahie. 8 Hagi nagra Danieli'na
ana nanekema hiana antahi'noanagi, Ana nanekemofo agafa'a
antahi amara osu'noe. Ana hige'na amanage hu'na antahige'noe,
Ranimoka ama ana zamo'ma evu vagama retesigeno amefira
na'a efore hugahie? hu'na antahige'noe. 9 Hianagi agra amanage
huno hu'ne, Danieliga menina atrenka vuo. Na'ankure nanekema
krente avontafemo'a runkanireno me'nenigeno vuno henkama
maka zamo'ma vagama renaku'ma hania knafi eforera hugahie.
10 Ana knazama fore'ma hania zamo'a, rama'a vahe zamazeri
agrū huno zamazeri avusese hugahie. Hianagi kefo zamavu
zamava'ma hanaza vahe'mo'za kefo zamavu zamava huvava
hu'za nevu'za, antahiamara osugahaze. Ana nehanage'za
antahi'zane vahe'mo'za zamagrake anazamofo agafa'a antahi
amara hugahaze. 11 Hanki Anumzamofontegama maka zupama

kresramnama nevaza zama ase nevazi'za kasrino havizama
hu'nea zama Ra mono nompima retru rente'nesnage'zama
mono'ma hunteszazana 1tausen 2hantret 90'a zagegnamofo
agu'afi anara hugahaze. **12** Hanki ana knazamofo agu'afima
oti hankaveti'za mani'neza Anumzamofoma avega ante'za
mani'nesageno'ma 1tausen 3hantret 35'a zage gnamo'ma
evania vahera Anumzamo'a asomu huzmantegahie. **13** Hanki
kagra menina Danieliga oti hankavetinka mani'negeno vuno
atuparera uhanatino. Kagra frinka mani fru hugahananagi, maka
zamo'ma vagama resania knazupa ete otinka Anumzamo'ma
refko huno'ma antegante'nea zantamina erisanti haregahane.

Hosea

1 Hagi Usia'ma, Jotamu'ma, Ahasi'ma Hesekaia'ma hu'za Juda
vahe kinima mani'za azageno, Joasi nemofo Jeroboamu'ma
Israeli vahe kinima mani'nea knafina Ra Anumzamo'a Beri
nemofo Hoseana amanage huno asami'ne. **2** Ra Anumzamo'a
Beri nemofo Hoseampima hvazino Israeli vahera amanage huno
zamasami'ne, Kagra vunka savri'ma hu'za vanoma nehaza monko
a'nenefinti ara ome erigeno, savri mofavrerami kasezmaneno.
Na'ankure e'i ana avu'avazamo'a, monko a'nemo'za savri hu'za
vano nehzankna hu'za Israeli vahe'mo'za havi anumzante
mono ome hunente'za Ra Anumzamo'na natre'naza avu'avaza
zamaveri hugahie. **3** Ana higeno Hosea'a Diblaimi'e nehaza
ne'mofa Goma ara omerigeno, Goma'a amu'ene huno
mago ne' mofavre kasente'ne. **4** Hagi Ra Anumzamo'a Hoseana
asamino, Ana mofavremofona Jesrili'e hunka agi'a antemio.
Na'ankure Nagra kofta hu'na Jesrili agupofima vahe'ma aheno'ma
korama eri tagi'nea zantera, Jehu nagara knazana nezmi'na,
Jehu nagapinti'ma kinima mani'za neaza zana eri atregahue. **5**
Hagi ana knazupa Israeli vahe'mokizmi ati zamia Jesrili agupofi
ruhantagi atregahue. **6** Hagi Goma'a mago'ane amu'ene huno
mago mofa kasentegeno, Ra Anumzamo'a Hoseana asamino,
Mofaka'amofo agia, Lo-Ruhama'e, nasunkura huozmantegahue
hunka antemio. Na'ankure Nagra mago'enena Israeli vahera
nasunkura huozmantegahue kumizmi'a apase ozmantegahue. **7**
Hianagi Nagra Juda vahe'mokizmia nasunkura hunezmantegahue
zamagu'ma vazinuana atiretiro, bainati kazintetiro, ha'ma
hu'zantetiro, hosine, hosi afu agumpima mani'neza ha'ma
nehaza vaheteti'enena hu'na zamagura ovazigosuanki, Nagra
Ra Anumzana zamagri Anumzamo'ha zamagu'vazigahue. **8**

Hagi Lo-Ruhama'a ome rama huno amima netregeno'a, Goma'a mago'ane amu'ene huno mago ne' mofavre kasente'ne. **9** Ana higeno Ra Anumzamo'a huno, Agi'a Lo-Ami'e, nagri vahera omani'naze hunka antemio. Na'ankure zamagra nagri vahera omani'nage'na, Nagra zamagri Anumzana omanigahue. **10** Ana hugahianagi henka'a Israeli vahe'mo'za hageri anke'nafi kahepankna hu'za rama'a vahe fore hanageno, vahe'mo'a hamprigara osugahie. Ana hanigeno, Nagri vahera omani'naze huno'ma hu'nea kerera, ete rukrahe hu'za Agra kasefa huno mani'nea Anumzamofo mofavrerami mani'naze hu'za hugahaze. **11** Ana hanigeno Israeli vahe'ene Juda vahe'mo'zanena eri mago hu'za mago vahe nemaniza, magoke kva ne' azeri otite'za, ana mopafintira atre'za marerigahaze. Na'ankure Jesrilii mopafina rankna fore hugahie.

2 Hagi kagra kafuhe'inkura, Ami'e, Nagri vahere nehunka, kasarahehe'inkura Ruhama, navesinentomo'e, hunka hugahane.
2 Mofavrenimota neramarerana hankavetita nanekea asaminkeno, monko ane'mo'zama zamavugosama eri ruzahu ruzahu'ma nehu'za, ami'mo'ma amate'ma hu kukenama nentaniza zana osino. Na'ankure agra nagri ara omanige'na, nagra agri vea omani'noe. **3** Ana'ma osniana mika kukena'a ahena hate atranenkeno, nerera'ma kasentegeno kukena osu avapama mani'nea kna huno avapa manigahie. Ana hute'na hagage kokampi atreankna hu'na atranenkeno tinku huno frigahie. **4** Hagi Nagra mofavre'aramina nasunkura huozmantegahue. Na'ankure agra monkote huno vano nehuno, kase zmante'nea mofavrerami mani'naze. **5** Hagi nezmarera'a agaze'a omene monko a'kino, agra tusi agaze avu'avaza huno amu'enena hu'ne. Na'ankure agra ana a'mo'a huno,

nagrama navesinentoa vene'neramimo'zama ne'zama, tima,
sipisipi azokate kukenama, efeke kukenama, olivi masavema,
wainima hu'za nami'naza vene'neramina zamavaririgahue huno
hu'ne. 6 E'ina hu'negu nagra ave'ave trazanteti kama vanoma
nehia kana asevazintegahue. Ana nehu'na have kegina hu'na
kama vano nehia kana rehiza hanugeno, kama vanoma
hu'zankura hakegahie. 7 Hagi ana a'mo'ma agrama avesi
nezmantea vene'neramima zamarotago huno'ma vaniana ome
zamaze'origahie. Hagi ana vene'neraminkura hakeno vano
hugahianagi, zamageno eri forera osugahie. Zamageno'ma
erifore'ma osnuno'a agra amanage hugahie, nagra ete ese
ve'ni'are vanue. Na'ankure agranema mani'noana knare hu'na
mani'noane huno hugahie. 8 Hagi rama'a witima, kasefa
wainima, olivi masavema, silvama golima hu'na ami'noa zankura
nagriku nami'ne huno agesa ontahino, erino Bali havi anumza
ami'ne. 9 E'ina hu'negu hozama vasage knarera nagra witini'a
eneri'na, zafa ragama rente knarera wainini'a erigahue. Ana
hukna hu'na kukenama huno avufgama refite'nogu'ma sipisipi
azokate kukenane efeke zaza kukenanema ami'noana ete'na
erigahue. 10 Nagra menina miko kukena'a hate atranena agri'ma
avesima nentaza vahe zamavuga avufga avapako otigahiankino,
mago'moe huno nagri nazampintira agura ovazigahie. 11 Hagi
ne'zama kreno neneno musema nehia zane, kasefa ikantero
mago mago Sabati knarero, nezama kreno neneno musema
nehia zana miko eri atregahue. 12 Hagi navesima nenantaza
vahe'mo'za mizani'a nami'naze huno'ma nehia waini nofitamine,
fiki zafanena eri haviza hanugeno anampina zafa avono fore
hinkeno afi zagagafamo'zage ana zafa ragaramina negahaze.
13 Hagi Bali havi anumzantaminte'ma mnanentake'za insensima

kremana vunezmantea zanku, Nagra knazana ami'na azeri haviza hugahue. Ana nehuno agesafi rinia eri renenteno, marerisa avasese'za eri nentanino avesima nezmantea vene'nerami nezmavaririno Nagrikura agenekanie. **14** E'ina hu'negu Nagra ami'mi hu'na hagage kopi ome antete'na, akohena fru nanekea asami'na nagrarega avrentegahue. **15** Hagi anantega waini hoza'a nemi'na, Hazenke Agupoe hu'zama nehaza agupo eri rukrahe ha'nena, amuha'ma hu'zamofo kaha megahie. Hagi ana a'mo'ma mofa'ma mani'nege'nama, Isipiti'ma avre'na ati'neramugenzo zagamema hu'neaza huno zagamera hugahie. **16** Hagi Ra Anumzamo'a huno, Ana knarera, Nagrikura nenave'e hunka nehunka, kvani'a mani'ne hunka Bali havi anumzankura osugahane. **17** Na'ankure Nagra Bali havi anumzamofo agiramima nehea zana agipintira eri atrenugenzo, ana zamagiramina neheno monora huontegahie. **18** Hagi ana knarera zagagafama, namaramima, mopa agofetu'ma zamasaguregati'ma regrarohe'za vanoma nehaza zagaraminena, huhagerafi hvempage hugahue. Ana nehu'na maka atirami'ne, bainati kazinknone, maka ha'zanena ana mopafintira eri atre'nuge'za korora osu knare hu'za manigahaze. **19** Nagra a' kavra'nena Nagri a' mani vava hugahane. Nagra a'ma kavresuana, fatgo avu'ava zanteti'ene fatgoma huno refkoma hu zanteti'ene avesima anteno knare avu'ava'ma hunte zanteti'ene nasunku zanteti'ene, **20** hugahue hu'nama hu'noa zama amage ante'na hu navu'nava zantetiki huna ara kavra'nena, Nagrikura Ra Anumzane hunka kenka antahinka hugahane. **21** Hagi Ra Anumzamo'a huno, Ana knarera Nagra hanugeno, monamo'a kora atrenigeno mopafina neranigeno, **22** mopamo'a witine, wainine olivi rgaramina Jesrili agupofina rentegahie. **23** Hagi avimzama hankreankna hu'na

ana ara ana mopafi nehankre'na, nasunkura Huogantegahue
hu'nama hu'noa agia eri rukrahe hu'na, Nasunku Hugantegahue
nehu'na, Nagri vahera omani'haze hu'noa agia ete eri rukrahe
hu'na, Nagri vahere hanuge'za, ete zamagra Nagrikura tagri
Anumzane hu'za hugahaze.

3 Anante Ra Anumzamo'a amanage huno nasami'ne, Kagra
ete vunka ru vene'nemo'zama avesintazageno savri huno
monkote'ma vanoma nehia a'ka'a ome avesinto. Israeli
vahe'mo'za e'inahu kna hu'za monko a'nemo'za nehzaza
hu'za havi anumzantera monora ome hunente'za, kaza osu
havi anumzantaminte ante hagagema hu'naza waini raga'a ofa
hunezmantazanagi, Ra Anumzamo'na navesinezmantoe. **2**
Higena 15'a silva zagogi, 6'a bali kutetiki, waini tintetiki hu'na ana
ara mizasena ete avre'noe. **3** Anante ana ara asami'na, kagra
zazate nagranena maninka nevunka, monkote'ma hunka vano
nehana zana atro. Kagra ru vene'nenena savrira hunka vano
osuge, ru vea ome e'orige huge'na, nagra kagri ve mani fatgo
ha'neno. **4** Ana hukna hu'za Israeli vahe'mo'za rama'a knama
mani'za vanaza knafina, kini vahe'ene ugagota kva vahezmia
omanisageno, kresramana vu zane, retru rene'za mono'ma
hunentaza havenena omanesigeno, pristi vahera omanisageno,
kaza osu havi anumzantamina omanegahie. **5** Ana hanigeno
Israeli vahe'mo'za ete rukrahe hu'za Ra Anumzana zamagra'a
Anumzante'ene kinizmi Devitinte'ene egahaze. Ana nehu'za Ra
Anumzamofonku korora hunte'za agoraga'a mani'neza, henkama
maniza vanaza knafina Agripinkati knare'zana erigahaze.

4 Hagi Ra Anumzamo'a amanage hianki Israeli vahe'mota
antahiho, Ra Anumzamo'a amanage huno ama mopafima
mani'naza vahera keaga huramanteanki antahiho, Tamagra avariri

fatgo nosuta, avesi ante'zana omanegeno, Anumzamofoma
keno antahino'ma hu'zana ama mopafina omanene. 2 Hagi
tamagripina vahe'ma sifna hunte'zanki, havigema huzanki,
hazenkezmi omane vahe zamahe fri'zanki, kumzafa zane,
monko avu'avazane, mika kaziga ha' frama hu'zane, vahe'ma
aheno korama eri tagi'zamo avite'ne. 3 E'i ana agafare
mopatamifina zavi krafagemo'a avitegeno, mopafina tina
omaneno hagege nehigeno, monafima hare'za vano nehaza
namaramine, hagerimpi nozameramine, afi' zagagafamozanena
fri vagare'naze. 4 Hagi mago vahe'mo'a mago vahekura huno
kagri hazenke me'nne huno osino. Na'ankure ama hazenkea
pristi vahe'mota eri fore hu'nagu keaga huneramantoe. 5
Hu'negu tamagra zage ferupina tanafa huta nemasesage'za,
havige kasnampa vahe'mo'zanena hanimpina tanafa hugahaze.
Hagi anta'tamimofo Israelina azeri haviza hugahue. 6 Hagi
vahe'nima zamazeri havizama hanuana, na'ankure Nagrira
nage'za antahiza zamagra osu'nazagu anara hugahue. Hagi
pristi vahe'mo'za Nagrira nagenira osu'nagu, zamagri'enena
antahi nozamue. Hagi tamagra Nagri kasegea tamagekanizagu,
tamagrira tamagekani neramante'na mofavretamia asomura
huozmantegahue. 7 Hagi rama'a pristi vahe'ma fore'ma nehu'za,
rama'a kumi hu'naze. Hagi ra zamagima eneriza zana zamazeri
zamagaze hugahue. 8 Hagi vahe'mo'zama kumizmire'ma ofama
hunaku'ma eri'za aza ofa pristi vahe'mo'za ne'naze. E'ina hu'negu
vahe'mo'zama kumima nehazage'za, pristi vahe'mo'za rama'a
muse nehaze. 9 Hagi nazano pristi vahe'mo'zama haza zamavu
zamavara vahe'mo'zanena ana zamavu zamava avaririza kefo
zamavu zamavara nehaze. Ana hu'nazagu pristi vahe'ene
amne vahe'enena ana zamavu'zmava hu'naza zante zamazeri

haviza hugahue. **10** Hagi rama'a ne'zana negahazanagi, zamura osugahie. Hagi savri monko avu'ava zana hugahazanagi, mofavrea kase hakarea osugahaze. Na'ankure tamagra Nagrira Ra Anumzana natreta ru anumzamofo amage ante'hazagu anara hugahaze. **11** Hagi waini tine, kasefa waini tine, savri monko avu'ava'ma hu'zamo, antahi ama'ma hu'zana Nagri vahepintira eri netre. **12** Hagi Nagri vahe'mo'za zafare'ma kaza osu havi anumzama antre'za tro hunte'naza havi anumzane, rampa zante'ma tro'ma hunte'naza havi anumzana antahinegaze. Hagi zamagra savri monko avu'avazama hazazamo zamazeri havia hige'za zamagra Anumzamofontera mani fatgo hu'za nomaniza monora huonte'naze. **13** Hagi zamagra agonaramimpi mareriza kaza osu havi anumzantera kresramana vunentaze. Hagi knare ton'a'ma hu'nea oki zafane, popra zafane, terebinti zafa agafafi kre manavu ofa hunte'naze. E'ina agafare mofa'netamimo'za ana zanke hu'za monkote hu'za vano nehazageno, tamanoferehe'za ana zanke hu'za savri hu'za monkote vano nehaze. **14** Hianagi monkozama hu'za vanoma nehaza mofa'netamine, tamanoferehe'inena Nagra knazana zami'na zamazeri havizana osugahue. Na'ankure tamagra vene'nemotanena ana zanke huta zagore'ma monkiza nehaza a'nanene monkozana ome nehuta, havi anumzamofo mono nompi savri'ma nehaza a'nene ofa ome Kresramana nevaze. E'ina hu'negu ama' antahi'zana omanenigeta haviza hugahaze. **15** Hagi Israeli vahe'mota monko a'negna huta mani fatgo huta nomanizanki, Juda vahe'motanema ana zama huzankura kva hiho. Hagi havige anumzante'ma Gilgalima mono'ma hunentaza zankura kva nehuta, kasefa'ma huno mani'nea Ra Anumzamofo agifima huvempa nehaza zankura kva hiho. **16** Hagi Israeli vahe'mokizmi

zamasenimo'a hankavetigege huno keontahi bulimakao afu'mofo
asenimo'ma hiaza hu'ne. Hianagi inankna hu'na e'inahu vahera
sipisipi afu anentama aware'noma vanoma nehigeno tra'zama
nenea knara hu'na kegava huzmantegahue. **17** Hagi Israeli
vahera zamatreke'za zamagra'a zamavesi'za avaririza kaza
osu havi anumzantera viho. **18** Hagi Israeli vahe'mo'za aka
tima nete'za monko a'negu ome hake'za ana a'nene monkosa
ome nehaze. Hagi ranra kva vahe'mo'za zamagima eri'zana
netre'za zamagazema hu avu'ava zanku zamave'nesie. **19**
Hagi hanave zaho'mo mikaza eme eri hareno freankna hu'na
zamavare atregahue. Na'ankure zamagrama havi anumzantema
kresramnama vunte'nazagu anara hanuge'za zamagazegu
hugahaze.

5 Pristi vahe'mota ama nanekea antahiho! Israeli vahe'mota
tamagesa anteta antahiho! Kini vahe'mota tamagesa anteta
antahiho! Keaga tamagri huneramante. Na'ankure tamagra Mizpa
vahetera krifu anagi anteankna huta monora havi anumzante
Tabori agonafina hunentaze. **2** Hazenke zamita rama'a vahe
zamazeri haviza hu'nazagu ana zantera Nagra kna zana tami'na
tamazeri fatgo hugahue. **3** Hagi Efraemi vahera Nagra zamage'na
antahi'na hu'noanki, Israeli vahe'mota Nagri navurera frara
oki'naze. Efraemi vahe'mota monko anemo'zama nehzaza
huta savri huta vano nehuta, Israeli vahe'mota tamazeri pehana
hu'naze. **4** Hagi kefo avu'ava'ma nehaza zamavu'zmava'zamo
tamazeri antrako hige'za rukrahera hu'za Anumza zmimofontera
nomaze. Na'ankure savri monko avu'avazama hu'zamo
zamagu'afina me'negeno, Ra Anumzamofona ke'za antahi'za
nosaze. **5** Hagi Israeli vahe'mo'zama zamavufaga rama hu'
zamavu'zamava nehaza zamo, zamagri avu'ava zana huama

nehie. Hagi Israeli vahe'ene, Efraemi vahe'mo'za zamagri'a kumimo zamazeri tanafa nehanige'za, Juda vahe'mo'zanena magoka tanafa hugahaze. 6 Hagi Ra Anumzamofo avesizanku hakenaku sipisipi afu kevu'zamine, bulimakao afu kevu'zmine egahazanagi, Ra Anumzamofona eme ke'za eriforera osugahaze. Na'ankure Agra ko zamatreno zamagrira vu'ne. 7 Zamagra Ra Anumzamofona tamage hu'za avariri fatgoa osu'naze. Na'ankure zamagra savri mofavrerami kasezmante'naze. Menina kasefa ikante'ma ne'zama kreza nene'za musema hu'za mono'ma hu'zamo'a zamazeri havizantfa nehuno, hozazminena eri haviza hugahie. 8 Hagi pazivete'ma tro'ma hu'nea ufena Gibea kumateti nerenko, Rama kumatetira ufena nerenko, Bet-Aveni kumatetira ranke huta kezankea nehuta, tagra Benzameniga kavaririta hatera vugahune huta hiho. 9 Hagi knazama amino vahe'ma azeri havizama hu knarera, Efraemi vahe'mo'za ka'ma kokamo'ma nehiaza hu'za havizantfa hugahaze. Hagi Israeli vahe amunompima huama'ma nehua zamo'a tamage huno fore hugahie. 10 Hagi Juda ugagota kva vahe'mo'za kanagi kama akasi'za mopama eri haviama huza musufama nesaza vahe kna hu'naze. E'ina hu'neankina narimpama ahe'zamante'zana tima tagitreankna hu'na zamagri zamagofetu narimpa ahe'zana erikaha hutregahue. 11 Hagi keagama refkohu knafina Efraemi vahera knazamo'a zamazeri havizantfa hugahie. Na'ankure kaza osu havi anumzamofo amagera ante'za nevazagu anara hugahaze. 12 Hagi Nagra havi (moth) kfamo kukena hagenkro kru hiankna hu'na Efraemi vahera zamazeri haviza nehu'na, kasri zamo kasrino keonke'za eri haviza hiaza hu'na Juda vahera zamazeri haviza hugahue. 13 Hagi Efraemi'a agrama krima eri'nea zana kegeno, Juda'a namuma'a ke'ne. Hagi Efraemi'a

rukrahe huno Asiria vuno agine kini ne' ome ke'neanagi, ana kini ne'mo'a kri'a azeri kanamaregara osuge, ra namuma re'neana eri osaparentegara osu'ne. 14 Na'ankure Nagra Efraemi vahetera laionigna nehu'na, Juda vahetera kasefa huno hanave laionigna hu'nena zagagafama aheno tagana vaziankna hu'na zamahe'na tagana vazigahue. Nagra zamahete'na haninkofi'na nevanugeno, mago vahe'mo'e huno zamazeri ovarigahie. 15 Hagi ana hute'na ete rukrahe hu'na nemanurega umani'nenuge'za, kefozama hu'naza zankura zamasunku nehu'za, zamagra tusiza hu'za Nagrikura hakregahaze. Hagi ana knazampima mani'neza nagrikura tusiza hu'za hakegahaze.

6 Hagi enketa ete rukrahe huta Ra Anumzamofontega vamaneno. Na'ankure Agra tagrira tavufga rutraga trago hu'neankino, Agrake tazeri so'e hugahie. Hagi Agra tavufga rutraga tarago hu'neakino, Agrake namuntera anaki rantegahie. 2 Hagi tare knama evanigeno'a, Agra tazeri kasefa hugahie. Hagi nampa 3 kna zupa tazeri soe hanigeta, agri avuga manigahune. 3 Hagi Ra Anumza mani'ne huta Agrira keta antahita hanune. Hagi Agrama atiramino'ma vania zamo'a, nanterama rumsa huno koma'tiankna nehanigeno ete efresia zamo'a, trazama nehagea knafima neria kokna hugahie. 4 Hagi Efraemi vahe'mota Nagra na'a tamagrira huramantegahue? Hagi Juda vahe'motanena Nagra na'a huramantegahue? Tamagrama tamavesi nenantaza zamo'a nantera hampo kiteno ame huno fanane hiakna nehigeno, nantera ata aheteno ana ata'mo ame huno hagege hiakna nehaze. 5 E'ina hu'negu kasnampa vahe'nia huzmantanena tamahe'za rutraga trago hunetre'nage'na, nagipinti'ma atiraminia keaganu tamahe'na rutraga tarogo hunetre'na, kopsinamo rutarage huno mikaza eri ama hiaza

hu'na, keaga refko huramantegahue. **6** Na'ankure Nagri'ma nave'nesiana ofama huzankura nave'nosianki, tamagu'aretima huta Nagri'ma navesinante zanku nave'nesie. Anumzamo'nama nageno antahinoma huzanku nave'nesianki, tevefi kre fananehu ofama hu'zankura nave'nosie. **7** Hianagi tamagra Adamu kna huta Nagri huhagerafi huvempagea runetagreta, Nagrira tamage huta tamagu'aretira huta namagera nontaze. **8** Hagi Giliati rankumapina kefo avu'ava'zama nehaza vahe'mo'za avitazageno, zamagakafina koramo avite'ne. **9** Hagi vahe'ma ahe frinaku'ma kafoma ante'za nemaniza vahekna hu'za pristi vahe'mo'za Sekemu kumategama vu kantega kafona antene'za, vahera zamahe nefri'za, hazenke zana eri fore nehaze. **10** Hagi Israeli vahepinna knare osu kefoza me'negena ke'noe. Efraemi vahe'mo'za monko avu'avaza nehazageno, Israeli vahe'mo'za zamagra'a zamazeri pehana hu'naze. **11** Hagi vahe'nima zamazeri knare'ma hanua zupa, Juda vahe'motanena zamazeri havizama hanua kna ko huhamprinte'noe.

7 Nagra Israeli vahera zamazeri so'e hunaku huanagi, Efraemi vahe'mofo kefo avu'avazamo'a eama nehigeno, Sameria vahe'mofona havi zamavu'zamava zamo'a zamagripina avite'ne. Zamagra kefo zamavu'zamava nehazage'za, musufa vahe'mo'za nona tagna nevazizage'za, megia musufa vahe'mo'za vano nehu'za vahe'mofo zana musufa energize. **2** Hianagi ana kumi'zamigu'ma nage'ma nokanua zana zamagra ke'za antahiza osu'naze. Kumima haza zamo'a maka kaziga megagi zmante'nege'na, Nagra ana maka kumizmi'a amate negoe. **3** Hagi kefo avu'ava zanteti kini nera azeri muse nehu'za, havigema huzanteti ugagota kva vahe'zmia zamazeri musena nehaze. **4** Hagi zamagra savri monko avu'avaza hu vahe mani'nazanki'za,

breti krenaku'ma witi flaua'ma heneru'zama avenifima tevema
hugrazageno tusi amuhoma nehiankna huno, monkozama hu
zamagu'zamagesamo'a teve rukru nehie. 5 Hagi kini ne'mo'ma
ne'zama kreno neneno musema nehia knarera, ugagota kva
vahe'mo'za hankave tina ne'za neginagi nehzageno kini ne'mo'a
zamagri'enena kiza zokago kea nehie. 6 Hagi kefo avu'ava'ma
hu antahiza zamimo'a avenimo'ma tusi amuhoma nehiankna
huno, amuho huteno kenagera amuhomo'a ome osi osi nehuno,
nanterama segeno'a tevenefa'mo'ma nehiaza huno hagana
hagana nehie. 7 Hagi zamagra avenimo'ma tusi amuhoma hiaza
hute'za, kva vahe'zmia zamahe hana nehaze. Hagi miko kini
vahezamia zamahe vaganere'za nagrama zamazama hanugura
nagritega kea nosaze. 8 Hagi Israeli vahe'mo'za ru vahe'ene
ruhavia hu'za nemaniza, te so'e osu'nea kekigna hu'naze. 9 Hagi
ru vahe'mo'za hankavezamia eri amne nehzazanagi, zamagra
ana zana keza antahiza nosaze. Hagi tu'zamazokamo'a tusiza
nehianagi, zamagra e'i ana zana ke'za antahiza nosaze. 10 Hagi
Israeli vahe'mokizmi keontahi zamavu'zamava zamo'a eriam
huno nezmasamianagi, zamagra rukrahe hu'za Ra Anumzana
zamagra'a Anumzantera omege Agrikura hakegera nosaze.
11 Hagi Efraemi vahe'mo'za mago antahi'zana omne maho
namagna vahe mani'naze. Zamagra Isipi vaheku zamazama
hanagura kezaneti'za, kegavama huzmante'sazegura Asiria
vahekura kea hu'naze. 12 Hagi anantegama vanage'na namama
hareno enevigeno, kukoma rutare ante'neno azeneriankna hu'na
Nagra kukoni'a atrena zamazerite'na, knazana zamigahue. 13
Zamagra ra hazenkefi manigahaze. Na'ankure nagrira zamefi
hunami'za fre'nazankiza, zamagra haviza hugahaze. Hagi
ete nagra zamavarenaku nehanagi, zamagra havige hu'za

renavatga nehaze. **14** Hagi zamagra zamagu'aretira hu'za nagritega krafagea nosazanki, tafe'zamire mani'neza amne krafagea nehaze. Zamagra wainire'ene witire'ene ome eritru nehu'za, Nagrira zamefi hunami'naze. **15** Hagi Nagra rempi huzami'na zamazeri hankaveti'noanagi, zamagra nazeri haviza hunaku oku'a kea anaki'naze! **16** Hagi zamagra rukrahe hu'za e'nazanagi, Nagriteria ome'nazanki haviza hu'nea atigna hu'naze. Hagi kva vahe'zamimo'zama knare osu kema hu'nazagu hu'za ha' vahe'mo'za kva vahera eme zamahe fri vagaregahaze. E'ina hanage'za Isipi vahe'mo'za zamagi'za regahaze.

8 Hagi ufena tamagite anteta reho! Tumpa namamo nehiaza hu'za ha' vahe'mo'za Ra Anumzamofo nona eme avazagi kanegize. Na'ankure zamagra huhagerafi huvempa keni'a ruha'nentagi'za, kasegeni'a ha'rente'nazagu anara hugahaze. **2** Israeli vahe'mo'za nagritega amanage hu'za zavi krafagea hu'naze. Anumzamoka tagri Anumza mani'nanketa tagra keta antahita kagrira hu'none hu'za hu'naze. **3** Hianagi Israeli vahe'mo'za knare avu'ava zana zamagena humi'nazankino, ha' vahe'amo'za zamahe'za zamarotago hugahaze. **4** Hagi zamagra nagripintira hu izo kea e'orine'za, kini vahera zamazeri oti'naze. Nagra ke'na antahina osu'noge'za, kva vahera zamazeri oti'naze. Hagi silva zamireti'ene golireti'enena kaza osu havi anumzana tro hunte'nazanagi, ana zamo'a zamazeri haviza hugahie. **5** Hagi Sameri'a vahe'mota bulimakao anenta'amofo amema'ama golire'ma tro'ma hunte'naza zankura, nagra tusiza hu'na narimpa ahenezmantoe. E'i ana zanteria tusiza huno narimpa neheanki, nazupa kefo avu'ava zana atreta knarera huta manigahaze? **6** Hagi mago Israeliti eri'za vahe'mo ana havi anumzana azanteti tro hunte'neankino, e'i anumzana omanine.

E'ina hu'negu ana zantamina erita ru tamanatamanu hutreho. 7
Hagi tamagra menina zaho nehankrazankita henka ra zahokrerfa
hamaregahaze. Hagi witia hankre'nageno marerigahianagi, raga
reontegahie. Hagi marerino ragama rente'niana, ha' vahe'mo'za
musufa emerigahaze. 8 Hagi Israeli vahera zamasagahu
nakarisige'za, haviza hu'nea kavo meaza hu'za kokankoka vahe
amu'nompi mani fankanu haregahaze. 9 Na'ankure zamagra
afi donki afumo agra'a avesi'zante vano hiaza hu'za Asiria
mareriza vu'haze. Hagi Efraemi'a zagore monko avu'avara
huno vano hu'ne. 10 Hagi zamagra ru vahete zamavufaga
zagore ome atre'nazanagi, Nagra zamazeri atru hu'na keaga
huzmantegahue. Hanki hankave kini ne'mo knazana zamin
zamazeri haviza hume nevanige'za, osi'a vahe manigahaze. 11
Hagi Efraemi vahe'mo'za ofama hu ita rama'a tro hu'nazanagi, e'i
ana itaramimo'a Nagri navurera kumima hu itarami efore nehie!
12 Hagi Nagra rama'a kasege kreza'mi'noanagi, zamagra ana
kasegea kazageno amanezankna hige'za, tagri'zana omene'ne
nehu'za, ana kasegeni'a amagera onte'naze. 13 Hagi zamagra
nagritega ofa eme kresramana nevu'za, ana afu'mofo ame'a
ne'nazanagi, Ra Anumzamo'a ana ofagura musena nosue. Hagi
menina kefo avu'avaza zamigura agesa nentahino, kumi'ma
hu'naza zantera knazana zaminige'za, ete Isipi rukrahe hu'za
vugahaze. 14 Hagi Israeli vahe'mo'za tro'ma huzmante'nea
Anumzana zamage kaninente'za, kini vahe'mokizmi nonkumazmi
kinte'naze. Hagi Juda vahe'mo'za rankumamofo have kegina
eri hankaveti'za tro hu'haze. Hianagi Nagra teve atresugen
rankumazmia tefanane nehina, vihu kumazminena tevemo
tefanane hugahie.

9 Israeli vahe'mota, ru kumate vahe'mo'zama nehzaza huta
musenkasea osiho. Na'ankure tamagra monkote huta vano
nehuta Anumzamofona tamage huta avariri fatgoa nosaze.
Hagi tamagra witi honama neharaza kumapima zagore savari
monko avu'avazama huzanku tamave'nesie. **2** E'ina hu'negu witi
honama neharaza kumapintira vahe'mo'za witia e'orisageno,
wainima regatati'ma nehaza kumapintira, waini tina e'origahaze.
E'ina hanigeno kasefa wainima tromta hu grepi raga omanegahie.
3 Hagi tamagra Israeli vahe'mota Ra Anumzamofo mopafina
omanigahaze. Hianagi Efraemi vahe'mo'za Isipi mopafi ete
rukrahe hu'za nevu'za, Asiria umani'neza agruma osu ne'zana
negahaze. **4** Ana nehu'za Ra Anumzamofontega waini ti
ofa nosu'za, ofama Kresramanama vanaza zanku'enena Ra
Anumzamo'a musena osugahie. Hagi ofama hanaza zamo'a
vahe'ma frite'ma zavi'ma netazageno, nezmia bretigna hugahie.
Anama ofama hu'zama nesamo'za zamagra'a zamazeri pehena
hugahaze. Na'ankure ana bretima nesazana zamaga'ma
tege'zama nenazankna hu'za negahazankino, ana ne'zana
er'i'za Ra Anumzamofo mono nompina eofregahaze. **5** Hagi
ne'zama kreno nenenos musenkasema hu knarera na'a hugahaze!
Nezama kreno nenenos Ra Anumzamofoma antahimi knarera na'a
hugahaze? **6** Hagi keho, hazenke zamofo korora fregahazanagi,
Isipi vahe'mo'za zamazeri atru nehanage'za, Memfisi vahe'mo'za
aseramantergahaze. Hagi silvareti'ma tro'ma hu'naza feno
zantamimofo agofetura, traza nehagenigeno, ave'ave trazamo
seli nontamia hageno refitegahie. **7** Hagi knazama tamino
vahe'ma zamazeri havizahu kna hago ne-egeno, mizama
eri knamo'a hago ama fore nehianki, Israeli vahe'mota keta
antahita hiho. Na'ankure kumitamimo'a rankrerfa huno havizantfa

hu'negeta, kasnampa vahekura neginagi vahere huta nehuta,
Anumzamofo Avamumo'ma nanekema asmigeno'ma neramasmia
vahekura tamavesra hunezmantaze. 8 Hagi Anumzamo'a
kasnampa vahe'a huntegeno Efraemi vahete'ma havizama
fore'ma hu'zankura kegava hu'neanagi, kama vanoma hirega
tamagra krifua anaginteta vano nehuta, Anumzamofo nompi
manineta hara renenteta, knare osu avu'avara hunentaze. 9
Hagi korapa'ma Gibea kumate'ma hu'naza hu'za zamagra kefo
avu'ava zana hu kasrikasri hu'za hu'naze. Hagi Anumzamo'a
ana kefo avu'avaza zamigura ageranokanino, kumi avu'ava
zamigura knazana zaminno zamazeri haviza hugahie. 10 Hagi Ra
Anumzamo'a huno, Israeli vahe'ma ese'ma zamage'na erifore'ma
hu'noana, hagage kokampinti'ma grepi ragama tagiankna
hu'noe. Hagi ese'ma zamagehe'ima ke'noana, fiki ragama
rente'nefinti'ma ese'ma afuma re'nea ragagna hu'nazage'na
zamage'noe. Hianagi zamagra Ba'al-Peori eme natre'za kaza
osu havi anumzante monora hunente'za, zamagra'a zamazeri
zamagazea hu'za himanage zama zamavesinenta zankna
zamagra hu'naze. 11 Hagi Efraemi vahe'mo'zama ra zamagima
e'neriza zamo'a namamo'ma hiaza huno hareno frenige'za,
mofavrea kase ontege, zamu'enena osuge, zamarimpafina
mofavrea forera osuge hugahie. 12 Hagi zamagra mofavrea
kasente'za zamazeri ra hugahazanagi, Nagra ana maka
hanare vagaregahue. Nagrama zamagri'ma zamatresuge'za
zamagra ra hazenkefi manigahazanki, kva hiho. 13 Hagi Tairi
vahe'mo'zama knare mopafima mani'nazankna hu'za kotera
Efraemi vahe'mo'za knare kumapi mani'nazanagi, Efraemi
vahe'mo'za mofavrezmia zamavare'za vanage'za, zamahe
frigahaze. 14 Hagi Ra Anumzamoka naza zamigahampi,

amne zamio. Hagi nagrama kantahigenuana, mofavrema kase kuntra'ma hu zamarimpa nezminka, amina eri hagage huge'za mofavrea amina ozamiho. **15** Hagi Gilgali kumateti eri agafa hu'za kefo avu'ava zana hazage'na, ananteti agafa hu'na navesra huzamante'noe. Kefo zamavu'zmava'ma haza zanku noniafintira zamahekasope netre'na, nagra ru'enena navesi ozmantegahue. Na'ankure kva vahe'zmimo'za ha' renenantaze. **16** Hagi zafa arafunama tasagi hiazza hu'na Efraemi vahera zamazeri haviza hanuge'za raga reontegahaze. Mofavrea kasente'za zamavesi zmante'gahazanagi, Nagra ana mofavrezmia zamahe frigahue. **17** Hagi Nagri Anumzamo'a avresra huzmanteno zamatrengie'za, ru vahe mopafi kokankoka vano hugahaze. Na'ankure zamagra Anumzamofonkea antahi'za amagera onte'naze.

10 Hagi Israeli vahe'mo'za knare'zama huno hageteno rama'a ragama renentea wainigna hu'naze. Hianagi zamagra rama'a fenoza nente'za ante'za havi anumzante'ma kresramna vunte ita rama'a tro hu'naze. Hagi rama'a ne'za mopafintira nehamare'za, havi anumzama mono'ma hunentaza havemofonena rama'a avasase'zana hunentaze. **2** Hagi ana vahe'mokizmi zamagu'afina havigema hu'zamo avite'neanki'za, menina ana zamofo knazana erigahaze. Ra Anumzamo'a Kresramanama nevaza itaramina eri taganavazi netreno, havema retrurente'nezama mono'ma hunentaza haveramina erino rutamanatamanu hutregahie. **3** Hagi zamagra amanage hugahaze, Tamage huno menina tagrira kini vahetia omani'ne. Na'ankure tagra Ra Anumzamofona korora hunontone hugahaze. Hianagi mago kini vahe'ma manisiana, agra na'a hurantegahie? **4** Hagi zamagra agafa'a omene naneke nehu'za, hugahune hu'zama huvempama nehaza zantamina nosaze. E'ina hu'negu knare'ma hu'zama keagama

refkoma osu avu'ava'ma zama nehaza zamo'a avuatga (poisin)
trazamo hozafi hageno mareriankna nehie. 5 Hagi bulimakao
anentamofo amema'ama Bet-Aveni kumate'ma troma hunte'naza
havi anumzantera naza fore hugahie hu'za Sameria kumate'ma
nemaniza vahe'mo'za tusi zmagogogu nehaze. Anampima
nemaniza vahe'mo'zane, kaza osu havi anumzante'ma mono'ma
hunentaza pristi vahe'mo'zanena tusi zavi krafa hugahaze.
Na'ankure ra zamagima e'neriza zana eme zamahe'za hanare'za
vugahaze. 6 Hagi ana kaza osu havi anumzazmia eme eriza
Asiria vu'za kini ne' Jarebina muse'za ome amigahaze. Hagi
Efraemi vahe'mo'za tusi zamagazegu nehanageno, Israeli
vahemo'zanena zamagra'a antahintahima amage'ma ante'naza
zankura zamagazegu hugahaze. 7 Hagi Sameria vahe'ene
kini ne'enena teve asesama timo'ma erino viankna huno
zamavareno vugahie. 8 Hagi Israeli vahe'mo'zama marerisgama
huneregama havi anumzamofoma mono'ma hunte'za kefo
zamavu'zamava zama nehaza Aveni kumara eri haviza hugahie.
Havi anumzante'ma Kresramanama nevaza itazmirera ave'ave
trazantamimo agofetura hageno refitegahie. Ana hanige'za ranra
agonagura hu'za ankrisenka refiteranto huge, osi agonagura
hu'za tagumpi emasenka frakiranto hu'za hugahaze. 9 Hagi
Israeli vahemota Gibea kumateti agafa huta kumira huteta huvava
huta neaze. E'ina hu'neankino Gibea kumate'ma kefo avu'ava'ma
hu'naza vahera hapi zamahe vagare'naze. 10 Hagi Nagrama
knazama zaminaku'ma hanua knarerka knazana zami'na zamazeri
fatgo nehu'na, kokankoka vahera zamazeri atru hanuge'za
atru hute'za, hara eme huramante'za tare zupama kumi'ma
hu'nazarera kina huramantegahaze. 11 Hagi Israeli vahera azeri
agazonema hu agaho a' bulimakaomo'ma witi honama refuzafupe

zanku'ma ave'nesiankna nehianki'na, zamana'zamana huno
hentofaza hu'neaza anankempina karenamere zafa antegahue.
Efraemina karenamare zafa anankempi ante'nugeno erizana
enerina, Juda vahera hanugeno mopa rekonerinigeno, Jekopu
naga'mo'za mopa rupopo hugahaze. **12** Tamagra'a fatgo
avu'ava zana nehankreta, vagaore avesizana nehamareta,
rekorino mopa rupopoma nehiaza huta tamagua eri fatgo
hugahaze. Na'ankure menina Ra Anumzamofonku'ma hakekna
neanki Agriku nehakenkeno, Agra eno fatgo avu'ava zama'a
koma runteaza huno eme asomu huramantegahie. **13** Hianagi
tamagra kefo avu'ava zamofo hoza enerita, knare osu avu'avaza
nehamareta, havige zamofo raga'a ne'naze. Na'ankure tamagra'a
hanavegu tamentintia nehuta, rama'a sondia vahe'mo'za
taza hanageta knare huta manigahune huta tamentintia
nehaze. **14** E'ina hu'negu ha'ma huramante'naza krafagea
tamogra vihe'mo'za nentahisageno, Bet-Abeli kuma'ma kini ne'
Salmani'ma eri havizama hu'neaza huno kuma vihutamia eri
haviza hugahie. Higeno aneramine mofavrezminena zamahe fri
vagare'naze. **15** E'inahu knaza Beteli kumatera fore hugahie.
Na'ankure kumi avu'ava zama hu'naza zamo'a amenagame
mareri'ne. Hagi knazama esania knamofo nanterana, Israeli kini
nera ahe frigahaze.

11 Hagi Israeli vahe'mo'zama mofavrema mani'nazage'na
navesi'nezmante'na mofavreni'e hu'na Isipitira zamavare'noe. **2**
Hianagi Nagrama kema zamagriku'ma nehuge'za, mago'ane
natre'za afete vu'naze. Ana nehu'za Bali havi anumzantaminte'ene
kaza osu havi anumzantaminte'ene ofane mananentake zanena
ome kremana vu'naze. **3** Hagi Israeli vahera zamazantera
Nagra zamavazu hu'na vano nehu'na, kama vanoma hu

avu'ava zana rempi huzmi'noe. Hianagi Nagrama zamazeri knamare'noa zana ke'za antahi'za osu'naze. 4 Nagra nasunku hunezmanteh'na navesi nezmante'na Israeli vahera zamavare'na vu'noe. Ana nehu'na zamanankempintira karenamare zafa eri netre'na, pri hu'na ne'zana zami'noe. 5 Zamagra ete rukrahera huza Isipia ovugahaze. Hianagi Asiria vahe'mo'za kegava huzmantegahaze. Na'ankure Nagrite'ma e'zankura zamavesra hu'nazagu anara hugahaze. 6 Hanki rankumazmifina bainati kazinteti ha' vahe'mo'za eme ha' huzmanteh'za ku'ma kafazmia tapage hunetre'za, zamahe vagaregahaze. Ana hanageno antahintahima retro'ma hu'naza zamo'a amne zankna hugahie. 7 Na'ankure Nagri vahe'mo'za natre'za rukrahe hu'za nevaze. Ana nehu'za Marerisga hunemo'e hu'za zamagra hugahazanagi, Nagra zamazeri so'ea osugahue. 8 Hagi Efraemi vahe'mota inankna hu'na tamatregahue? Inankna hu'na Isareli vahe'mota tamatregahue? Hagi inankna hu'na Adma kumate vahe'ma zamazeri havizama hu'noa zana hugahue? Hagi inankna hu'na Zeboimi kumate vahe'ma zamazeri havizama hu'noa zana hugahue? Nagra nagu'reti tusi'za hu'na nasunkura huramantoe. 9 Hagi narimpa ahe'zamo'ma tevema reana atrenugenoe evuramina, Israeli vahera zamahe vaga'oregahue. Na'ankure Nagra vahetfana omani'noanki, Anumza mani'noe. Nagra Ruotage hu'noa Anumzama amu'nontamifima nemanua Anumzanki'na, Nagra narimpa aheramante'na e'na eme tamahe hanara osugahue. 10 Mago knafina Ra Anumzamofona amage antegahaze. Nagra Ra Anumzamo'na laionimo'ma nehiaza huna ranke nehanuge'za, mofavre naga'nimo'za zage fre kazigatira zamahirahiku nehu'za egahaze. 11 Hagi maho namamo'zama nehazaza huza Isipitira hare'za ne-esageno, Asiriati'ma maho

namamo'za zamahirahiku nehu'za hare'za azankna nehanage'na,
ete zamavare'na kumazamire ome zamatregahue hu'na Ra
Anumzamo'na nehue. **12** Hagi Efraemi vahe'mo'za havigege
huza nevazageno, Juda vahe'mofo Anumzamofo kea ontahi
vano vano nehu'za Ruotge'ma Hu'nemofona zamagu'aretira
hu'za avariri fatgoa nosaze.

12 Hagi Efraemi vahe'mo'za ne'zama neankna hu'za zahora
nene'za, maka kna zage hanati kazigati'ma ea zaho nevaririze.
Zamagra havige avu'ava zane, vahe'ma ohe fri ahe fri hu
avu'avaza hu'za eri hakare nehaze. Ana nehu'za Asiria vahe'ene
eri mago hu'za nemani'za, zamazama hu'zama erisagura olivi
masavena atrage'za Isipi eri'za nevaze. **2** Ra Anumzamo'a Juda
vahera keaga hunezmaneno, zamagrama hu'naza zamavu
zamavatera Jekopu nagara knazana zaminio zamazeri haviza
hugahie. **3** Hagi Jekopu'a nerera arimpafima mani'neno'a,
nefu agiare azerino hara hunte'ne. Hagi ra vahe'ma neseno'a,
Anumzane hara hu'ne. **4** Hagi agra ankero ne' hara huno
agatenereno, agri'ma asomu'ma hunte'nigura zavira neteno
antahige'ne. Hagi agra Anumzamofona Beteli eme keno erifore
huno keaga nehuno, asunkuma huntenu azama hanigura
agri'enena keaga hu'ne. **5** Ra Anumzana Agra Monafi sondia
vahe'mofo Anumzankino, agi'a Ra Anumzane. **6** Ana hu'negu
menina tamagra'a Anumzante rukrahe huta eta vahe'ma avesinte
avu'avazane, vahe'ma knare hunte avu'ava zanena eme azeri
hankavetiho. Ana nehuta tamagra'a Anumzamofonte amuhara
huta viho. **7** Hagi zagore fenoma atre'za eri'zama nehaza
vahe'mo'za, fatgo kazigatira zagoa retro nosazanki, havige
hu'za vahe'mofo zana kna'a refko hu so'e huza nege'za mizana
te'nosizanki, zamazeri savri hu'za miza nesaze. **8** Hagi Efraemi

vahe'mo'za hu'za, tagra feno vahe mani'neta, rama'a feno ante'none hu'za zamavufaga ra nehaze. Ana nehu'za amanage nehaze, Vahe'ma zamazeri savri'ma huta fenoma retroma huna kumira mago vahe'mo'a tageno eri forera osugahie hu'za nehaze. **9** Hianagi Nagra Ra Anumzana tamagri Anumzamo'na, Isipitira tamavre'na atirami'noa Anumza mani'noankina, ko'ma fugagi noma kita manita e'naza zanku'ma antahimita seli noma kita nemaniza kna huta, ete tamatrenugeta ete seli nompi umanigahaze. **10** Hagi Nagra kasnampa vaheni'afi huvazi'na nanekea nehu'na, avanagna zana rama'a eri zamaveri nehu'na, rama'a fronka kea zamagripi huvazi'na tamasm'i'noe. **11** Hianagi Gileati vahe'mo'za kefo avu'ava'ene vahe mani'nazanki'za, knare osu vahe mani'naze. Hagi Gilgali kumate'enena bulimakao afu ahe'za havi anumzantera Kresramana vu'nazankino, Kresramana vu itama tro'ma hu'naza zamo'a hozama rekorinte agupomofo refarega have eri hihi huntazankna huno meno vu'ne. **12** Hagi korapara Jekopu'a (Israeli) Aramu mopaquea freno umani'neno, sipisipima kegava hia zanteti ara eri'ne. **13** Hagi Ra Anumzamo'a kasnampa ne'mofompi huvazino Israeli vahera Isipitira zamavareno atirami'ne. Ana nehuno ana kasnampa ne'mofompi huvazino kegava huzmante'ne. **14** Hianagi Efraemi vahe'mo'za kefo avu'ava zantfa hu'za Ra Anumzamofona azeri arimpa ahe'naze. E'ina hu'negu menina Ra Anumzamo'a vahe'ma zamahe'za korama eritagi'naza knazana eri zamagofetu nenteno, kumi avu'avazama hu'naza zantera nona huno mika zamazeri haviza hugahie.

13 Hagi kora Efraemi naga'mozama kema hazage'za vahe'mo'za koro huza zmahirahiku nehazageno, Israeli vahepina zamagimo'a mareri'ne. Hianagi Efraemi vahe'mo'za Bali havi

anumzante monora hunte'za kumira hu'nazagu fri'naze. **2** Hagi meninena Israeli vahe'mo'za mago'ane kumira huvava hu'za nevu'za, kaza osu havi anumzamofo amema'a silvareti tro hunte'naze. Ana nehu'za ana zantera Kresramanama vunenteta agira antako hunteho hu'za nehaze. **3** E'ina hu'nagu zamagra nantera hampomo fanane hiankna nehu'za, nantera zage rentegeno ata'mo fanane hiankna ana vahe'mo'za hugahaze. Ana nehu'za witi honama hare kumapinti zahomo witi hona eri hareno viankna nehu'za, tokima mareri kampinti teve tokimo atiramino ome vagareankna nehaze. **4** Hianagi Nagra tamagri Anumzamo'na Isipitira tamavre'na e'noa Anumza mani'noe. Hagi tamagra ru anumzamofo agia ahentesga osiho. Na'ankure tamagu'ma vazi Anumzana magora omani'neanki, Nagrake'za mani'noe. **5** Hagi hagege huno tima omane ka'ma kopina, Nagra kegava huramante'noe. **6** Hianagi Nagra ne'zana tamugeta neramu'ma nehuta, tamagra tamavufga erisaga nehuta, Nagrira tamage kaninante'naze. **7** E'ina hu'negu Nagra laionimo zagagafa aheaza hu'na neramahe'na, lepatimo karanka frakineno zagagafa aheno tagana vaziankna hugahue. **8** Hagi Nagra a' beamo'ma anenta'a avre'nageno ha'hiankna hu'na zamahe'na zamimiza eri tapage hunetrena, laionimo zagagafa aheno neankna nehu'na, afi zagamo zagagafa aheno tagana vazinkna hu'na zamahena tagna taganu vazitregahue. **9** Hagi Israeli vahe'mota tamagra havizantfa hugahaze. Na'ankure tamagra tamazama nehua Anumzamo'na ha' renante'naze. **10** Hagi ranra kumatamifinti'ma tamagu'ma vazinia kini vahetamia iga mani'naze? Hagi kini vahe'ene kva vahetaminema tamio huta hu'naza kini vahe'tamine kva vahetaminena iga mani'naze? **11** Anagema hazage'na narimpa aheneramante'na, kini vahera tamamite'na

ete tusi narimpa ahe neramante'na, ana kini vahera zamavare atre'noe. **12** Hagi Efraemi vahe'mokizmi kefo avu'ava zana kona anakintegeno me'negeno, kumizmia avompi krentegeno me'ne. **13** Hagi Israeli vahe'mo'za anemo'zama mofavre antenaku'ma nehazageno nehiankna zamata erigahazanagi, ana mofavrea knare antahiza omane mofavre kasenteankna hugahaze. Hagi mofavrema kasente knarer, ana mofavremo'a nerera arimpafintira atioramigahie. **14** Hagi Nagra fri vahe kumapintira (Seol) ete ozamavaregahufi? Hagi fri'zamofo hanavefintira ozmavregahufi? Hagi nagra ama ana vahekura nasunkura osugahue. (*Sheol h7585*) **15** Hagi miko kafuhe'i amunompina Efraemiga knare'za hunka nehagenka tretre hunka mareri'nane. Hianagi Ra Anumzamo'a zage hanati kazigati zahora hunte'nigeno hagege kokampina zahora erino ne-eno, tinkeria eri neraneno, neonse tinena eri hagege nehuno, maka mareri zago fenozana emeri vagareno vugahie. **16** Hagi Sameria vahe'mo'za kumi'ma hu'nazarera knazana erigahaze. Na'ankure zamagra Anumzamo'na ha'renante nazankino, kazinteti zamahe vaganere'za neone mofavreramina zamahe'za rutraga hunetre'za, amu'ene aneramina zamahe'za zamarimpa reraragu fegahaze.

14 Israeli vahe'mota kumi'tamimo tamazeri tanafa hu'negu tamagu'a rukrahe huta Ra Anumzana tamagri Anumzamofontega echo. **2** Hagi tamagra Ra Anumzamofonte ete rukrahe huta eta kumitamia amanage huta eme huama hiho. Miko kumitia atrenerantenka kasunku hurantenka tavaregeta kagia ahentesga hugantamneno. **3** Hagi Asiria vahe'mo'za tagura ovazigahaze. Tagra ha' vahe'mo'zama vano nehu'za ha'ma nehaza hosi afu agumpina vano osugosune. Ana nehuta tagra'ama tromta hunte'nona zankura ru'enena tagri anumzane huta osugosune.

Na'ankure kagrake'za megusa mofavreraminkura kasunkura hunezmantane. 4 Hagi Ra Anumzamo'a huno, Nagri'ma natreta havi tamavu tamava'ma nehaza zampintira tamavre'na tamazeri so'e hugahue. Na'ankure tamagri'ma narimpama aheneramantoa zamo'a evuramie. 5 Hagi Israeli vahetera Nagra ata ko'ma eramiaza hanuge'za, lili flauamo amosre ahenteaza nehu'za Lebanoni zaza sida zafamo'ma nehiaza hu'za arafu'nazmia mopafina atre'nageno amefenkame uramigahie. 6 Ana nehu'za olivi zafamofo agatamo'ma tragun tragu huno hageno vuno eno nehiankna nehanageno, mana'zmimo'a Lebanoni zaza sida zafamofo amosremo'ma neviankna mana vugahaze. 7 Hagi Israeli vahe'mo'za ete e'za, Nagri turunapinka mani'neza hoza ante'nageno witi zamimo'a rama'a raga renentenige'za, rama'a hoza vasagegahaze. Zamagra grepimo afova tretre'ma huno hageaza nehanageno, Lebanoni wainimofo agenkemo'ma haruharuma nehiaza huno zamagenkemo'a haruharu hugahie. 8 Hagi Efraemi vahe'mota, kaza osu havi anumzana mago'enena avako osuta atreho! Nagra nunamu tamirera nona huneramante'na kegava huneramantoe. Nagra saipresi zafagna hu'nogeta, Nagripinti zafa raga neragize. 9 Hagi knare antahi'zane vahe'mo'za amama nehua nanekea antahi ama' hugahaze. Hagi ama' antahi'zane vahe'mo'za amama nehua nanekea ani' hugahaze. Na'ankure Ra Anumzamofo avu'ava zamo'a tamage huno fatgo hu'neanki'za, fatgo zamavu zamava'ma nehaza vahe'mo'za Agrira nevaririze. Hianagi kumi vahe'mo'za tanafa hu'za traka nehaze.

Zoe

1 Hagi ama nanekea Ra Anumzamo'a Petueli ne'mofo Joel
asami'nea naneke. **2** Hagi ranra vahe'mota ama nanekea
nentahinkeno, ama mopafima mani'naza vahe'motmanena ama
ana nanekea antahiho. Tamagri knafine tamagehe'i knafinena,
amanahu zana fore hu'neaza fore nehifi? **3** Hagi tamagra
ama ana nanekea mofavre'tamimofo zamasaminke'za, zamagra
mofavre'zmia zamasami anante anante hu'za viho. **4** Hagi
tra'zama akafr'i'za nenaza kenumo'zama nege'zama atrazama'a,
magopima manumanu hu'za hare'za vanoma nehaza kenumo'za
nazageno, zamagrama nege'za atrazama'a takaure takaure'ma
hu'zama vano nehaza kenumo'za nazageno, atrazama'a ana
maka zama vatri'zama nehana'ma nehaza kenutmimo'za ne'za
erihana hu'naze. **5** Hagi aka tima neta neginagima nehaza
vahe'mota otitma tamasunku hutma zavi krafa hiho. Na'ankure
haganentake waini timo'a vagarenigeta mago'anena onegahaze.
6 Hagi tusi'a hanavenentake huno hampriga osu kenutmimo'za,
sondia vahe'mo'za hate vazankna hu'za nagri mopafina mani
vite'naze. Hagi ana kenutamimofona zamavemo'a a' laionimofo
avekna hu'ne. **7** Ana hu'neankino waini hozani'a ne'za eri haviza
nehu'za, fiki zafani'aramina ani anagazape atrere hu'naze.
Ana nehu'za ana zafa akrutamina tavrofetre vagarazageno
azankuna'aramimo'a efeke huvagare'ne. **8** Hagi tamagra mago
mofa'mo ve erinaku hu'nea vemo frigeno, kento kukena hu'neno,
nevenku zavi krafa hiankna huta zavira ateho. **9** Hagi Ra
Anumzamofo mono nompima ofama hu witine waininen
omanegahie. E'ina hanige'za Ra Anumzamofo eri'zama eneriza
pristi vahe'mo'za tusi zavi krafa hugahaze. **10** Hagi hozamo'a
haviza higeno, mopamo'a hagege higeno, witi ragamo'a ome

haviza higeno, wainimo'a hagege higeno, olivi masavema
eneriza zafamo'enena hagege hu'ne. **11** Hagi hozama erita
nentaza vahe'mota tamagazegu hiho. Grepi hozafima eri'zama
eneriza vahe'mota zavi krafa hiho. Na'ankure witine balimo'enena
hozafina nena'a reontegeno hozamo'enena hagege hu'ne. **12**
Hagi waininofimo'a hagege higeno, fiki zafama, pomigreneti
zafama, deti zafama, epoli zafamo'zanena hagege hu'naze. Ana
maka zafaramimo'a hagege higeno, vahe'mo'zama musema
nehaza zamo'a vagare'ne. **13** Hagi pristi vahe'ma kre sramana vu
itare'ma eri'zama eneriza vahe'mota tamasunku kukena hunetma
zavi krafagea hiho. Anumzamofo eri'za vahe'mota tamasunku
kukena hunetma kenage'enena maniho. Na'ankure tamagri
Anumzamofo mono nompima ofama huntesaza wainine witinena
omanegahie. **14** Hagi ke omente emente huta vahera ke hutru
huta ne'zana a'o hutma nunamu hiho. Ranra vahetamina ke
hutru huta, mika ama mopafima nemaniza vahera zamavareta
Ra Anumzana tamagri Anumzamofo ra mono nompi marerita, Ra
Anumzamofontega rankea huta kezatiho. **15** Knare osu kna fore
hugahianki, kva hiho! Na'ankure Ra Anumzamo'ma knazama
tami'sania knamo'a, hago kofta nehie. Ana knazamo'a Hihamu
Hankave'ane Anumzamofontegati egahie. **16** Hagi tagra'a
tavufinti negonkeno nezantimo'a vaganeregeno, musenkasema
huta Anumzantimofo mono nompima mono'ma hunentona
zamo'a vagare'ne. **17** Hanki mopafima hankre'naza avimzamo'a,
hagege huno nefrigeno, nezama vasagente nomo'a haviza
nehanigeno, witima vasagente nomo'a haviza huno frugu
vaziramine. Na'ankure witimo'a hagege huno haviza hu'ne.
18 Hagi bulimakao afutamimo'za ne'zankura krafa nehu'za,
ne'zama nesaza zankura hake'za vano nehzageno, sipisipi

afu kevumo'zanena ne'zama nesnaza tra'zana omanege'za tusi
zamagaku hu'naze. **19** Ra Anumzamokarega nagra nunamuna
nehue. Na'ankure sipisipi afu'mo'zama nenaza trazana afeteno
erihana nehuno, mika zafanena terasage vagare'ne. **20** Hagi afi
zagagafa'moza tima nesaza zankura tusiza nehu'za Kagritega
krafa nehaze. Na'ankure ana miko timo'a tane vagaregeno,
maka avo'hona afe tevemo teno erihana hu'ne.

2 Hagi Saioni agonareti ufennereta, Nagri ruotage agonaretira
kezatinke'za ana mopafima nemaniza vahe'mo'za zamagogogu
nehu'za, zamahirahiku hiho. Na'ankure Ra Anumzamofo
knamo'a hago ne-eankino, hago erava'o hu'ne. **2** Hagi e'i ana
knama fore'ma haniana tusi'a hanintiri hanigeno, komanetigeno
agonaregama rumsama nehiankna huno hanavenentake sondia
vahe'mo'za ruherafiramiza egahaze. Anama hanazana kora
anahukna zana forera osu'neanknaza fore hugahiankino,
henka'a forehu anante anante'ma hu'za vanaza vahepina,
anahukna zana forera osugahie. **3** Hagi tevemo'a maka
zana teno zamavuga nevigeno, zamefira tevemo'a hagana
hagana huno mika zana tefanane huno vu'ne. Hagi zamavuga
maka zamo'a Ideni hozagna hu'neanagi, zamefira mago
zana omanetfa higeno kugusopa fore hu'ne. **4** Hagi ana
kenumo'za hosi afu kna hu'nazankino, hosi afumo'zama hate'ma
zamagama reza nevazankna hu'za zamagare'za e'naze. **5**
Hate'ma nevia karisimo'ma neriankna zamagasasa ru'za ana
kenutmimo'za agona morusapina takaire takaire nehu'za
mugafu afe'ma neregeno, tarage tregema hiaza hu'za tusi'a
sondia vahe'mo'za hahunaku avazuhumpi hu'za vazankna
hu'naze. **6** Hagi kokankoka vahe'mo'zama ana kenutamima
nege'za, tusi zamatagu nehu'za koro zamavugosa hu'naze. **7**

Hagi ana kenumo'za hanave sondi'a vahe kna hu'za ne-eza, ran kumamofo kuma keginarera sondia vahe'mo'zama nehazaza hu'za mareri'naze. Hagi zamagra vuganti kama osu'za zamagra'a kanteke vu fatgo hu'za vu'naze. **8** Hagi anama vu'nazana, magomofo kana ome rehiza eme rehiza hu'za ovu'nazanki, zamagra'a kante vu fatgo huza kuma kegina anafe hu'za vutere hu'za vu'naze. **9** Ana nehu'za ana kenumo'za ran kuma'ma me'nerega zamagare'za vu'za, kegina agofetu mareri'naze. Ana nehu'za maka nontmimpina mareneri'za, musufama nesazaza hu'za zahoma eri kampinti'ene nompina umareri'naze. **10** Hagi nevazageno'a imi enerigeno, monamo'a ahirahiku nehigeno, zagine ikanemokea rehanintiri nehakeno, hanafimo'za remasa osu'haze. **11** Hagi Ra Anumzamo'a monagema hiaza huno kea nehuno, ohampriga'a sondia vahetmina vugota huzmanteno zamavareno nevie. Ra Anumzamo'ma keagama refkoma hania knamo'a, knare osu kna fore hugahiankino iz a knarera hu'nesia vahemo ana knazupa oti hankavetigahie? **12** Hagi Ra Anumzamo'a huno, ne'zana a'o nehuta, zavira neteta, mika tamagu'areti huta Nagritega eho. **13** Hagi kasunku'ma hanunka amega kavufgare kukena tagatora osunka, tumokamo'a netanena kasunka hunka Ra Anumzana kagra'a Anumzamofontera eno. Na'ankure Agra asunku Anumzana mani'neno, ame huno arimpa ohe Anumzankino, vahe'ma avesinte zamo'a Agripina avite'ne. Ana hu'neankino Agra ame hunora vahera knazana zamin, zamazeri havizana osugahie. **14** Hagi Agra arimpa fru huramanteno, asomu huramantesigeta witi ofane waini ofanena erita Ra Anumzana tamagra'a Anumzantera ofa eme hugahazafi? tagra ontahi'none. **15** Hagi Saioni agonareti ufena nereta, ne'zana a'o huta nunamu nehuta,

vahera kehutru huta monora hiho. **16** Hagi mika vahera zamazeri atru hiho, ranra vahe'ene mofavreramine, aminte'ma mani'nesnaza mofavreraminena zamavare atru hiho. Hagi kasefa vene a'enema menima aravema huke maninena'a vene a'enena nompintira atirami'o. **17** Hagi Ra Anumzamofo eri'zama eneriza pristi vahe'mo'za, ra mono nomofo avugane, kresramana vu itama me'nea kankamumpi mani'neza amanage hu'za zamasunkura hu'za zavi krafage hiho. Ra Anumzamoka vaheka'a zamagu nevazinka, atrege'za kiza zokago kea huozmanteho. Zamatrege'za megij'a vahe'mo'za huhavizana hunezmante'za kiza zokago kea hu'za iga mono'ma hunentaza Anumzana mani'ne hu'za osiho. **18** Hagi Ra Anumzamo'a mopa'ama agu'ma vazi'sanigura tusi agesa nentahino, vahe'agura asunku huzmantegahie. **19** Hagi anante Ra Anumzamo'a amanage huno vahe'a kenona huzamante'ne, keho Nagra rama'a witine wainine, olivi masavenena tami'nugeta rama'a neza ante avite'nageno, ru kumapi vahe'mo'za mago'enena hunte'za kiza zokago kea huoramantegahaze. **20** Hagi Nagra noti kazigatima e'naza sondia vahetamina zamahe vararisanuge'za hagege kokampi vugahaze. Hagi tamavugama mani'naza sondia vahetamina zamarotago hanuge'za zage hanati kaziga Fri hagerimpi urami vagaregahaze. Hagi kamefima mani'naza sondia vahetamina zamarotago hanuge'za zage fre kaziga Mediterenia hagerimpi uramigahaze. Ana hanugenzo zamavufagamo'ma kasri'nia zamo'a tusi'a himna vuno ama mopa refitegahie. Tamage Ra Anumzamo'a raza erifore hu'ne. **21** Hagi nagri mopamoka korera osunka, musenkase huo. Na'ankure tamage huno Ra Anumzamo'a raza erifore hu'ne. **22** Hagi afi zagagafamota korera osiho, na'ankure hagege kokampina kofta huno trazamo'a afovage

huno tretre hugahie. Hagi zafamo'za ete raga rentenageno, fiki zafamo'zane grepinofimo'zanena rama'a raga rentegahaze.

23 Hagi Saioni kumate vahe'mota muse hiho. Ra Anumzana tamagri Anumzamo'ma huneramantea zankura musena huntaho. Agra knare avu'ava zama'a eri ama huno ese ata kora atregeno etegeno, rugnare henka kora ete atregeno ne-e. **24** Hagi witi hona'ama refuzafupe kumapina witimo'a avinetesnigeno, waini tima regatatima hunentaza kerifine olivi masavema regatati'ma hunentaza kerifina waini timo'ene olivi masavemo'enena aviteno varehiramigahie. **25** Hagi ohampriga'a sondia nagania, tra'zama akafri'za nenaza kenutamine, magopima manumanuma hu'za hare'za vanoma nehaza kenutamine, takaire takaire'ma hu'za vanoma nehaza kenutamima huzmantoge'za, nama'a kafufi eman'i'neza mika zama vatri'zama nehana'ma hu'naza zantera ete nona huramantegahue. **26** Ne'zamo'a amporena ne'zana neramu nehuta, knare zama huramantoa zankura Ra Anumzana tamagri Anumzamo'na ra nagi namigahaze. Ana hanuge'za ru vahe'mo'za mago'enena vahe'nimota tamazeri tamagazea osugahaze. **27** Hagi ana hanugetma Nagrikura Israeli vahe amunompi mani'ne huta tamagra keta antahita hugahaze. Nagra Ra Anumzana tamagri Anumza mani'noankino, nagrikna anumzana magore huno omani'ne. Ana hu'neankino ru'enena vahe'mo'za nagri vahera zamazeri zamagaze osugahaze. **28** Ana zantamima evu vagamaretena Nagra Avamuni'a maka vahepi eri herafi atresugeno, tamagri ne'mofatamimo'za, kasnampa kea huama nehanageno, kasefa vahe'mo'za avana'gnaza negenageno, ranafa tamimo'za ava'na kegahaze. **29** Ana knafina kazokazo eri'za venenere'ene a'nere'enena Nagra Avamu'ni'a eri herafi atregahue. **30** Hagi Nagra monafina ruzahu ru'zahu kaguvaza

eri fore nehu'na, ama mopafina kaguvaza erifore hanugeno korane, tevene, toki'enena hugahie. **31** Zagemo'a rukrahe huno hani hanigeno, ikamo'a rukrahe huno kora fore hanigeno henka tusi'a hanave'nentake Ra Anumzamofo kna egahie. (Matiu 24:29 Maki 13:24, 25, Luku 21:25 Hufo hu'nea naneke 6:12,13.) **32** Hianagi e'i ana knafina iza'o Ra Anumzamofo agima ahesia vahe'mofona agu'vazigahie. Na'ankure mago'a vahe'ma Jerusalemi kumapima Saoni agonare'ma mani'naza vahe'mo'za Ra Anumzamo'ma hu'nea kante ante'za knare hu'za manigahaze. Hagi e'ina vahetamina Ra Anumzamo'ma kema hige'za e'naza vahekiza knare hu'za manigahaze.

3 Hagi Ra Anumzamo'a huno, Ana zama fore'ma hania knafina Juda vahetmimofo feno zantamine, Jerusalemi kumate vahetmimofo feno zantaminena ete erinte avite zmantegahue. **2** Ana nehu'na mika kokankoka vahetmina Jehosafeti agupofi zamavare atru hu'na, mareri feno zani'agnama hu'naza Israeli vahe'nima zamahe panani'ma hazage'za panani'ma hu'za vahe mopafima umani emanima hazage'za, Nagri mopama refkoma hu'za eri'naza zantera keaga huzmantegahue. **3** Hagi zamagra vahe'nima zamavarenakura satu zokago re'za nege'za, ne' mofavreramina monko a'nere nona hu'za eneriza, mofaneramina waini tinte nona hu'za zami'naze. **4** Hagi maka Tairi vahe'ma, Saidoni vahe'ma, Filistia mopafima nemaniza vahe'motanena nahigetma e'inahu zantamina hunantaze? Tamagra mago'a zante nona huta nazeri haviza hu'za nehazo? Tamagrama mago'a zante'ma nona hunanteta nazeri havizama hunaku'ma ana'ma nehanazana, Nagra ame hu'na ana zantamina eri rukrahe hu'na, tamagrira tamazeri haviza hugahue. **5** Na'ankure Nagri silvane goline, mareri fenoza

ni'araminena tamagra eritma havi anumzantamimofo mono nontamimpi ome ante'naze. **6** Hagi Juda vahe'ene Jerusalemi vahe'enena zamavareta Griki vahete zagore zamatrazage'za zamavare'za kumazmia atre'za afete moparega vu'naze. **7** Hianagi Nagra anama zagore'ma zamatre'nazaregtira zamavare vagare'na ne-ena nazanoma huzmante'naza zantera, nona hu'na tamagrira ana huramantegahue. **8** Hagi ne'mofavretamine mofo'netaminena zamavare'na zagore Juda vahete atranena, zamagra zamavare'za Sabia kumate vahetega zagore zamatre'nage'za afete'are vugahaze. Nagra Ra Anumzamo'na nehue. **9** Hagi ama ana nanekea kokankoka vahera huama hunka zamasamige'za ha'ma hanagura sondia vahezmia retro nehu'za, makamo'za emarerri'za erava'o hiho. **10** Hozama reko'ma neriza ainia rukuta huta bainati kazinkno tro nehuta, zafa azanku'nama romaseta eri hagroma nehaza kazintamia rukuta huta karugru keve tro hiho. Ana nehinkeno hankave'ama omane vahem'a, nagra hankave vahem'a mani'noe huno hino. **11** Hagi mika kokankoka vahemota ame huta vahem'a refkoma hu agupofi eme atru hiho. Hagi Ra Anumzamoka sondia vaheka'aramina zamavarenka eramio. **12** Hagi mika kokankoka vahem'o'za zamagra'a zamazerinte trotra hu'za Jehosafati agupofi omeri atru hiho. Na'ankure e'i anante Nagra mani'nena mika kokankoka vahera keaga huzmantegahue. **13** Hagi agena fagagi kazinteti apritma hoza hamareho, na'ankure hozamo'a uzate'ne. Hagi eta grepia eme regatati hiho. Na'ankure krepima regatati'ma hu kumara grepimo'a aviteno varehirami'ne. E'i anahu kna huno ama ana vahemokizmi kefo avu'ava zamo'a aviteno varehirami'ne. **14** Hagi rama'a ohampriga'a vahem'a kevumo'za keagama eri fatgoma hu agupofina avegante'za mani'naze. Na'ankure Ra

Anumzamofo knamo'a, hago erava'o ana agupofina nehie.

15 Hagi zagine ikamo'enena haninkisakeno, ofumo'a remasa osugahie. **16** Hagi Ra Anumzamo'a Saioni agonaretira kezana netinigeno, Jerusalemi kumapintira agerumo'a monagema hiaza hugahie. Ana hanigeno monane mohanemokea imima eriaza huke momi'momi hugaha'e. Hianagi Ra Anumzamo'a Agra'a vahe Israeli vahetera fraki havegazmi manigahie. **17** E'ina'ma hanugeta tamagrama keta antahitama hanazana, Nagrikura Ra Anumzana tagri Anumzamo'a ruotge agonare Saioni mani'ne hugahaze. Hagi Jerusalemi kumamo'a ruotage hanigeno, ru vahe'mo'za mago'enena hara eme huzamagate oregahaze. **18** Hagi ana knafina agonaramimpina grepimo'a rama'a hanigeno, haganentake wainimo'a avitegahie. Ana nehanigeno bulimakao afutamimo'za ana agonafina ome rama'a nehanageno, bulimakao amirimo'a avitegahie. Hagi Judia kazigama me'nea tintamimo'ma tane'nea tintamimo'za kampu'i hanati'za evugahaze. Ana nehanigeno Ra Anumzamofo mono nompinti kampu'i tina hanatino Akasia agupofina nevuno, maka zana tina amino vugahie. **19** Hianagi Isipi kokamo'a haviza nehanigeno, Idomu kokamo'a hagege koka fore hugahie. Na'ankure zamagra Juda vahera hazenkezami omene vahe zamogra mopafi zamahe'za korazmia eri tagi'naze. **20** Hagi Juda mopafina vahera mani vava hu'za nevanageno, vahe'ma forehu anante anante'ma hu'za vanaza vahe'mo'za Jerusalemi kumapina mani vava hu'za vugahaze. **21** Hagi zamagri'ma zamahe'za korama eri tagi'naza zante'ma nonama osu'noa zantera, Nagra nona huzamante'na zamahegahue. Na'ankure Nagra Ra Anumzana Saioni nemanua Anumza mani'noe.

Emosi

1 Hagi Juda mopafina Tekoa kumateti sipisipi kva ne' Amosi kre'nea naneke. Ama ana nanekea imina e'orinegeno zahufa tare kafua me'negeno, Usia'ma Juda vahe kinia manigeno, Joasi nemofo Jeroboamu'ma Israeli vahe kinima mani'nea knafi avanagna zampi Amosina Anumzamo'a averi hu'ne. **2** Hagi Amosi'a amanahu knaza ke'ne, Ra Anumzamo'a Saioni agonareti'ene Jerusalemitira kema hu'neana, mona kemo hiaza huno agerumo'a nehigeno, sipisipimo'zama trazama nenaza trazamo'za hagege hazageno, Kemoli agonafima me'nea zantamimo'zanena hagege hu'naze. **3** Hagi Ra Anumzamo'a amanage hu'ne, Damaskasi vahe'mo'za kumira huvava huza vazanki'na amane zamatrengue'za omanigahazanki, kna zamina zamazeri haviza hugahue. Na'ankure Giliati vahera witima hare kumapi witi hareaza hu'za aini kanonteti zamahe'naze. **4** E'ina hu'negu Nagra kini ne' Hazaeli'ma nemania kumara teve taginente'na, Benhatati'ma nemania hankave vihu kumara eri haviza hugahue. **5** Hagi Nagra Damaskasi rankumamofo kahana tapage hunetrena, Aveni agupofima nemaniza vahera nezamahe'na, Bet-edeni kumate kva vahera nezamahesugeno, Aramu kumate vahera zamavare'za Kiri kumate kina ome huzamantegahaze huno Ra Anumzamo'a hu'ne. **6** Hagi amanage huno Ra Anumzamo'a hie, Gaza vahe'mo'za kumira huvava hu'za vazankina amanea zamatrengue'za omanigahazanki, knazami'na zamazeri haviza hugahue. Hagi zamagra nagri vahera nozmifintira zamazeri'za Idomu vahete zagore zamatre'naze. **7** E'ina hu'negu hu'na Gasa kuma'enena nagra tevi tagintane'na, Gaza rankumamofo hankave vihu kegina teno erivaregahie. **8** Hagi Nagra Astoti vahera zamahe vaganere'na, Askeroni kini nera azeri

haviza hugahue. Hagi anantetira ete Ekroni vahera nezamahe'na, osiamma mani'naza Filistia vahera zamahegahue huno Ra Anumzamo'a hu'ne. **9** Hagi amanage huno Ra Anumzamo'a hie, Tairi vahe'mo'za kumira huvava hu'za vazankina, amanea zamatrenuge'za omanigahazanki, kna zamina zamazeri haviza hugahue. Na'ankure zamagra kora Israeli vahe'ene huvempa huza koganagna huta manigahune hu'naza kea amagera onte'za, miko vahera zamavare'za zagore ome zamatrage'za Idomu vahe'mo'za kazokazo eri'za vahe zamavare'za vu'naze. **10** E'i ana agafare Tairi hankave vihu keginare teve tagintesugeno rankuma zaminena te fanane hugahie. **11** Hagi amanage huno Ra Anumzamo'a hie, Idomu vahe'mo'za kumira huvava hu'za vazankina amanea zamatrenuge'za omanigahazanki, knazami'na zamazeri haviza hugahue. Na'ankure Idomu vahe'mo'za zamagra'a vahera zamahe nefri'za zamasunkura huno zamantaze. Hagi zamarimpa hevava nehige'za hara azeri oti vava nehaze. **12** E'ina hu'nagu Nagra Temani kumara teve taginte'nugeno nerena, Bozra kuma'enena teve tagintanena teno eri vagaregahie. **13** Hagi amanage huno Ra Anumzamo'a hie, Amoni vahe'mo'za kumira huvava hu'za vazankina amanea zamatrenuge'za omanigahazanki, knazamina zamazeri haviza hugahue. Na'ankure Mopama erinakura zamu'enema hu'naza a'nemokizmia zamarimpa zamahe'za reragufe'naze. **14** E'ina hu'nagu Raba kumamofo hankave vihu keginare tevea tagintanenkeno ana kumara teno eri vagaregahie. Hanave zahomo'ma erino eaza hu'za ivimo agazamo hu'za hatera eza eme zamazeri haviza hugahaze. **15** Hagi Amoni kini ne'ene ugagota kva vahe'anena kinafi zamavare'za vugahaze huno Ra Anumzamo'a hie.

2 Hagi Ra Anumzamo'a amanage hu'ne, Moapu vahe'mo'za kumira huvava hu'za vazankina, amane zamatrenuge'za omanigahazanki, kna zamina zamazeri haviza hugahue. Na'ankure zamagra Idomu vahe kini ne'mofo zaferina eri'za tevefi krazageno tanefa'sene. **2** E'ina hu'nagu Nagra teve taginte'hugeno Moapu kumara tevea nerenko, Kerioti kumamofo hanave vihu kegina tevemo te hana hugahie. Ha' vahezmimo'za ivimo agazamo'ma hu'za Moapu vahe'ma eme zamahesaza agasasane ufe krafa kenena antahigahaze.

3 Hagi kini vahe'zamine maka kva vahezminena zamahe hana hugahue huno Ra Anumzamo'a hu'ne. **4** Hagi Ra Anumzamo'a amanage hu'ne, Juda vahe'mo'za kumira huvava hu'za vazankina amane zamatrenuge'za omanigahazanki knaza zamigahue. Na'ankure zamagra Ra Anumzamo'na kasegea zamefi hunenamiza tra kea ovariri'naze. Hagi zamagehe'ima zamazeri savri'ma hu'naza havigereti zamazeri savri hazage'za, havi anumzantera monora hunte'naze. **5** E'ina hu'nagu Nagra Juda kumara teve tagintenugeno nereno hanave vihu keginama hugagi'naza Jerusalemi kumara teno eri hana hugahie. **6** Hagi Ra Anumzamo'a amanage hu'ne, Israeli vahe'mo'za kumira huvava hu'za vazanki'na amane zamatrenuge'za omanigahazanki kna zamina zamazeri haviza hugahue. Na'ankure zamagra fatgo vahera zagore nezamatre'za zamunte omene vahera zamaga nonte nona hu'za zamatre'naze. **7** Hagi zamagra zamunte omene vahera zamasunkura huozmante kugusopafi zamare hapati atre'naze. Hagi nef'a'ma anteno masea mofara nemofo'a ana mofake anteno masene. E'ina nehu'za ruotge'ma hu'nea Nagia eri haviza hu'naze. **8** Hagi nof'i'ma hu'za vahe'mokizmi tavravema eri'nazana havi anumzazmimofo mono nompima kresrama vu

itama me'nefi tafe ome hu'za nemase'za, havigema hu'za zago
agima ahezmanente'za eri'za zagoa, eriza waini ti miza hu'za ne'za
neginagi hu'naze. **9** Hagi Amori vahe'mo'za za'za hu'za sida
zafagana hazageno, hanave zamimo'a oki zafagna hu'neanagi,
Nagra Israeli vahekure hu'na Amori vahe'mofo ragane rafu'nane
eri haviza hu'noe. **10** Hagi Nagra Isipi mopafinti'ma tamavre'na
mareri'noana, Amori vahe mopa erinafa'a hanazegu 40'a kafufina
kegava huramante'na vahe'ma omani hagege kokampina e'noe.
11 Hagi tamagri mofavre nagapintira Nagra mago'a veneneramina
kasnampa vahe zamazeri oneti'na, mago'a vahera Nagrite
mani ruotge hu'za manisaza kva vahe (Nazirites) zamazeri
oti'hoe. Hagi Ra Anumzamo'a huno, Ama kema nehuana tamage
nehufi Israeli vahe'mota hu'ama huta zamasamaho hu'ne. **12**
Hianagi mani ruotge'ma hu'za mani'naza kva vahetamia tamagra
waini tina zamizage'za ne'za neginagi nehazageta, kasnampa
vahera kasnampa kea osu taganeta maniho huta zamazeri
kor'i'noe. **13** E'ina hu'negu Nagra witima refuzafupeankna hu'na
knazana tami'nena, tamagra knazama eri'naza vahe'mo'za'ma
pripri hu'za nevaza vahekna hugahaze. **14** Hagi ame'ama hu'za
zamagama neraza vahe'mo'za fregara osanageno, hanave
vahe'mokizmia hanavezamia omanenigeno, harafa sondia
vahe'mo'za kasamare'za hara hu'za zamagura ovazigahaze. **15**
Hagi atireti'ma ha'ma nehaza vahe'mo'za oti hanavetine'za hara
osanageno, zamagama neraza vahe'mo'za zamagare'za ome
frara oki'nageno, hosi afumofo agumpima mani'neno ha'ma nehia
vahe'mo'a hara huno agraa agura ovazigahie. **16** Hagi koro'ma
osu ha'ma nehaza sondia vahe'mo'za ana knazupa maka
ha'zazimia atre'za zamavapa fregahaze huno Ra Anumzamo'a
hu'ne.

3 Hagi Israeli vahe'ma mik'a'a Isipiti'ma tamavreno e'nea
vahe'motagu'ma Ra Anumzamo'ma keagama huneramantea
nanekea antahih. **2** Ama mopafima nagatenofite'ma
hu'za mani'nafintira tamagri huhampri tamante'na Nagri vahe
mani'haze hu'noe. E'ina hu'negu Israeli vahe'mota maka kumi'ma
hazarera knazana tamina tamazeri haviza hugahue. **3** Hagi
tare vahe'moke'ma magoka vugahu'e hukema kema retro
osu'nesukea, magoke kantera knare amnea vugahapi? **4** Hagi
laionimo'ma mago zagagafama ohe'nenuno'a amanea krafa
hugahio? Hagi anenta laionimo'ma havegampima ne'zama
one mani'nenuno'a, amane krafa hugahifi? **5** Hagi nama'ma
azeriku'ma krifuma ome anaginte'neno anampinkama ami'mi
huno azeri'nigu'ma ne'zama onte'nenkeno'a, amane namamo'a
ana krifufina ufregahifi? Krifuma anaginte'nenia zafamo'a agra'a
amanea ruhategahifi? **6** Hagi ha'ma hu ufema rankumapinti'ma
renkeno'a, ana kumapima nemaniza vahe'mo'za fru hu'za
manigahazafi? Hifi mago kumamo'ma knazampima unefreana
Ra Anumzamo'a ana knazana keno antahino osu'negeno ne-
efi? **7** Hagi Ra Anumzamo'a nazanoma hunaku'ma oku'ama
retroma nehia antahintahia eri'za vahe'a kasnampa vahetami
nezamasamie. **8** Hanki laionimo'ma krafama hanigeno'a, iza
korora osugahie huta hugahune? Hagi hanavenentake Ra
Anumzamo ama nanekea nehianki, iza ama ana kasnampa kea
hugahie? **9** Hagi ama nanekea Asdoti vihu kumapima nemani'za
vahe'ene Isipi kumapima nemaniza vahera zamasamih. Hagi
zamagra Sameria agonaramimpi omeri atru hu'za mani'neza,
miko kefo zamavu'zamava zama nehaza zana keho. **10**
Hagi Nagri knare navu' navama hu'zana zamagenekanigeno,
hanave vihuma me'nea kumazamifina ha'ma orente arente

hu'zamo'ene kumazafa zamo'ene hazenke zamo'a avite'ne huno
Ra Anumzamo'a hu'ne. 11 E'ina hu'nagu Ra Anumzamo'a huno,
Ha' vahe'zmimo'za eza maka hanave vihu keginama hu'naza
kumazmia eri haviza nehu'za, mika'zazmia rohu eme zamare'za
erivagare'za vugahaze hu'ne. 12 Hagi Ra Anumzamo'a huno,
Sipisipi afute kva vahe'mo'ma laionimofo agipinti'ma sipisipi
afu'mofo agarareno agesama eri variankna huno, Sameria
kumapima nemani'za Israeli vahera osia zamagu vazigahie.
E'ina'ma hania zamo'a tafe'ma masi'za nemaniza tavravema osi'a
eri sgane hu'za vazankna hugahie. 13 Hagi Ra Anumzana Monafi
sondia vahe'mofo Anumzamo'a huno, Ama nanekea antahiteta
Jekopu naganofira koro kea huzmanteho. 14 Nagrama Israeli
vahe'mo'zama hu'naza kumite'ma knazama zami'nua knazupa,
Betelima me'nea kresramana vu ita eri haviza hugahue. Hagi
ana kresramana vu itamofo pazine'a, ruhantagi atresugen
mopafi evuramigahie. 15 Hagi Nagra zasi knafima mani'nagu'ma
kinte'naza nontamine, zage knafima mani'nagu'ma kinte'naza
nontamine, elefanti aveteti'ma knare'nare nontamima kinte'naza
nontamina eri haviza hugahue huno Ra Anumzamo'a hu'ne.

4 Hagi Basani kumapinti afovage bulimakao afu'ma Sameria
agonafima mani'naza afumota ama nanekea antahiho, Tamagra
a'nemota zamunte'ma omene vahe'ma knama nezamita,
tamavenenehe'mofonkura huta, waini tina mago'ane eme
taminketa namaneno huta nehaze. 2 Hagi hankavenentake Ra
Anumzamo'a ruotge avu'ava zama'afi huvempa huno, Magokna
neankino tamagrira afu'ma renentaza hukureti tamarente'za
tamavazu hu'za nevanageno, nozamema nehiaza hu'za
tamagona kampi nofi' eme rente'za tamavre'za vugahaze. 3 Hagi
kuma keginamofo ankaro kampinti tamavre'za atiramiza fegu'a

vute'za, tamavre'za Hamoni vugahaze huno Ra Anumzamo'a hu'ne. 4 Hagi Beteli kumate'ene Gilgali kumate'ma vuta kaza osu havi anumzante'ma kresramanama vunezamanteta, kumi'ma nehaza zana huta viho. Gilgali kumatema kema nontahita mika nanterama kresramanama nevuta, 10 ni'a kevufinti mago kevuma erita 3'a knamofo agu'afima ofama nehaza zana huvava huta viho. 5 Hagi zisti'ma ante witiretira ko susu ofa eme nehuta, tamagra'a tamavesite'ma eritama eme hanaza ofarera ko tamagra rantamagia eriho. Na'ankure Israeli vahe'mota ana avu'ava'ma huzankura tamave'nesie. 6 Hagi kora Nagra agatontoza atrogeno maka rankumapina ne'zana nomanegeno, neonse kumatamimpinena bretia omane'ne. Hu'neanagi e'i anama hiazankura tamagu'a rukrahe huta Nagritera ome'naze huno Ra Anumzamo'a hu'ne. 7 Hagi nezama hamarekna 3'a ika me'neanagi kora atrogeno hoza tamifina runonuge'na, mago rankumapina kora atrogeno nerige'na, mago rankumapina kora azerugen runonte. Hagi mago hozafina kora nerigeno, ko'ma atroge'noma runontea hozamo'a hagege nehie. 8 Hagi tare rankumaro tagufa rankumapi vahe'mo'za tinkura masege otigera hu'za hakeza mago kumapina vugahazanagi tina onegosaze. Hianagi tamagrama anama nehuta ete Nagritega rukrahe huta nomaze huno Ra Anumzamo'a hie. 9 Hagi Nagra amuho zaho zage hanatitegati huntogeno hozatamia te hagege nehige'na, kenutami huzmantoge'za waini hozatamine fiki hozatamine, olivi zafa hozatamine, olivinena ne'za eri hana hu'naze. Hianagi tamagra anazama negeta tamagra ete Nagritega rukrahe huta nomaze huno Ra Anumzamo'a hie. 10 Hagi korapama Isipi vahe'ma hu'noa kna hu'na tusi'a knaza tamagrira nerami'na, nehzave tamia bainati kazinteti zamahe nefri'na hosi afutamia

zamatroge'za kumazafa sezə nevazagəno, seli nonkuma'ma
ome anteta mani'neta ha'ma hu'naza kumapina fri'naza vahe
zamavufagamofo hi'manamo'a tamazeri haviza hu'ne. Hianagi
ana zama negeta rukrahe huta Nagritega nomaze huno Ra
Anumzamo'a hie. **11** Hagi Sodomune Gomora kumatre'ma
hu'noaza hu'na, mago'a kumatamia eri haviza hu'noe. Hagi
tamagra tevefima me'neno nerea zafa rampagna hu'nazagena,
hampage atreankna hu'na tamagrira hampage atre'noe. Hianagi
tamagra anazama negeta ete rukrahera huta Nagritega nomaze
huno Ra Anumzamo'a hie. **12** E'ina hu'nagu Israeli vahe'mota
ama anahu knaza tamigahuanki, retro huta manineta tamagri
Anumzamo'na nageho huno hu'ne. **13** Na'ankure Ra Anumzamo'a
Agrake agonaramina tro hunenteno, zahora azeri otigeno zahora
enerigeno, antahizama'a vahe'mokizmirera eri ama nehie. Hagi
Agra nantera masama nehiana ete eri hani nehuno, mika mopa
Agra kegava hu'ne. Hagi Agra Monafinka Hanavenentake sondia
vahe'mofo Anumzane huno Agri agi'a me'ne!

5 Hagi asunku zagame hugahuanki, Israeli vahe'mota antahihō,
2 Vene omase mofa knama hu'nea Israeli kumamo'a, haviza
huno mopafi evuramianki'za mago'ane erisaga hu'za onkigahaze.
Hagi agra mopafi evuramino maseankino, mago vahe'mo'a
aza huno azeri ora otigahie. **3** Hagi Hanavenentake Ra
Anumzamo'a huno, mago Israeli vahe rankumapinti'ma 1tauseni'a
sondia vahe'ma hate huzmante'nage'za vugahazanagi, ete
100'a vahe'mo'za egahaze. Hagi mago kuma'mo'ma 100'a
vahe'ma huzamante'nage'za hate'ma vanazana, 10ni'age ete
egahaze. **4** Hagi menina Ra Anumzamo'a amanage Israeli
vahemotagura hie, Tamagrama nagri'ma haketa eri fore'ma
hanuta ofri kasefa huta manigahze! **5** Hagi Beteli kumate'ene

Gilgali kumatera vuta nagrikura ome haketa vano nosuta, Beseba rugitagita oviho. Na'ankure Gigali vahe zamavare'za kina ome hunezmante'za Beteli vhahera ha' vahe'mo'za eme zamahe hana hugahaze. **6** Hagi tamagra Ra Anumzamofoma haketa azeri fore'ma hanuta, tamagra ofri kasefa huta manigahaze. Hagi ana'ma osanazana, Agra tevegna huno eno Josefe nagara eme teno eri vagaregahie. Ana nehuno Beteli kumara tevemo tesigeno, anampima mani'naza vhahera teve zamare'nigeno, mago vahe'mo'a ana tevea resu hugara osugahie. **7** Hagi keaga fatgo huta refkoa osu havige nehuta, fatgo vhahera knaza nezami'za vahe mani'naze. **8** Hagi Agra Ra Anumzamo'a atruma hu'za nemaniza hanafi taminku'ma Pleiadesiema nehaza hanafitamina tro hunenteno, Agrake monafima Orioniema nehaza hanafitamina tro huntege'za remsa hu'za me'naze. Hagi Agra hanina eri ruzaher higeno masa fore nehie. Hagi Agra hagerimpintira tina eri atru huteno kora atregeno, mopafina ete eneramie. Hu'neankino Agri agi'a Ra Anumzane. **9** Hagi Agra hanave vhahera ame huno zamazeri haviza nehuno, hanave vihuzmia ahe fragu vazinetre. **10** Hagi keagafima fatgoma huza tamazeri fatgoma haza vhahera tamavesra hunezamanteta, tamage'ma haza vhahera tamago ate'nezmantaze. **11** Hagi tamagra zamunte omane vhahera zamazeri haviza huta rama'a takisi zago agi ahezamanteta witizmia enerita, fatgo huta miza agia ahenozmantaze. E'ina hu'nagu tamagra knare'nare nontami kinte'nazanagi ana nontamifina omanigahaze. Hagi tamagra knare'nare waini hoza ante'nazanagi, ana waini hozafintira tagita tima'a onegahaze. **12** Na'ankure Nagrama kena antahinama huana, tamagra tusi'a kumi hu'naze. Hagi zagoa enerita keagafina knare vhahera zamazeri haviza nehuta, rankumamofo kahampima

zamunte omane vahe'ma mani'nazana zamaza nosaze. **13** E'ina hu'negu ama' antahi'zane vahe'mota, ama'i havi kna me'negu tamagira hamunkita maniho. **14** Hagi knare zama huzanku nehaketa, havi avu'ava zana atreta freho. Anama hanazana kasefa huta manigahaze. E'ina hanageno Monafi sondia vahe'mofo Hankavenentake Ra Anumzamo'a tamagrama taza hugahiema huta hanaza kante anteno tamaza hugahie. **15** Hagi havi avu'ava zana tamavesra hunenteta, knare avu'avazanku tamavesinenteta, keagama refako hanazana fatgo huta refako hiho. E'ina'ma hanageno'a Hanavenentake Ra Anumzamo'a Josefe naga'ma osi'ama manisaza nagara asunku huramanteno tamaza hanigu'enene. **16** E'ina hu'negu Ra Anumzana Monafi sondia vahe'mofo Hankavenentake Anumzamo'a amanage hie, mika kuma kantamipinena vahe'mo'za tusi zavi ategahaze. Hagi hozama nentaza vahera ke hinke'za eza zavira eme netenageta, zagoreti miza sazage'zama zavi'ma netaza vahera ke hinke'za eza zagamera eme hu'za zavira ateho. **17** Hagi waini hozafintira rama'a zavi krafa hugahaze. Na'ankure Nagra tamagri amunompi nevanugenno anazana fore hugahie huno Ra Anumzamo'a hie. **18** Hagi Ra Anumzamofo knama efore hanigeta kesaza zankura tusiza huno tamagrira tamave'nesie. Hagi ana knarera naza fore hugahie tamagra ontahi'naze. Hagi ana knare'ma fore'ma haniana, hanimo rentrako hanigeno masazana omanegahie. **19** Hagi ana knafina tamagra mago vahe'mo'ma laionigu'ma koroma freno vuno beamo ome tutagiha'ma huntea kna hugahaze. Huge mago vahe'mo'ma noma'afi umanigasama nehuno, aza anteganti antegeno osifavemo ampriankna hugahaze. **20** Hagi Ra Anumzamofo knamo'a haninentake hinkeno masazana omnetfa hugahie. **21** Hagi Nagra Ra Anumzamo'na atruma huta ne'zama

kreta neneta musenkasema nehaza knagu'ene mono'ma nehaza knagura tusiza hu'na navesra hunte. **22** Hagi tamagrama krefanane hu ofama nehuta, witi ofama nehuta, afovage afutamima aheta tamarimpa fru ofama nehaza ofatamia, Nagra antahi oramigahue. **23** Hagi sigrosigroma nehia zagame'ma nehuta, hapu zavenama nehaza zama antahi zankura tusiza huno navesra hianki erita freho. **24** Hianagi tima hageno'ma evu vavama nehiankna hutma fatgoma huno refkoma hu tamavu tamavara huvava huta vihogu Nagrira neve'nesie. **25** Hagi Israeli vahe'mota 40'a kafufima hagege ka'ma kopima manita e'nazana Kresramana vu ofane, witi ofanena hunante'nazafi? **26** I'o, tamagra'a tamazanteti'ma tro'ma hunte'naza Sakuti kini havi anumzamofo amema'are'ene, Kizuni hanafi'mofo amema'ama tro'ma hunte'naza zante monora hunte'naze. **27** E'ina hazagu Nagra zamagrira tamatrenuge'za Damaskasi kumamofo zage hanati kaziga tamavre'za kina ome huramantegahaze huno Monafi sondia Vahemofo Ra Anumzamo'a hu'ne.

6 Hagi Jerusalemine Sameria rankumapinema nemaniza vahe'mota hazenkea omesigeta fru huta manigahune huta nentahizo? Hagi tamagra Israeli vahe agu'afina, rantamagi me'nea vahe mani'nage'za, ru vahe'mo'za tamagripinti zamazahu zana eme enerize. Hianagi haviza hugahazanki, kva hih. **2** Hagi tamagra Kalne nehaza kumate vuta na'a fore nehifi ome keteta ete anantetira Hamatiema nehaza rankumate vuteta, anantetira henkamu Filistia vahe rankumatega Gati uramita ome keho. Hagi tamagra zamagrira zamagate ore'nazanagi, zamagrama eri'naza hazenkea keho. Mopazmimo'a tamagri mopa agatereno rana osu'ne. **3** Hagi hazenke zama fore'ma hania knagura tamagra nontahizanagi, tamagrama nehaza havi

avu'avazamo'a hazenke'zana avre tava'o nehie. 4 Hagi knare
sipare'ma nemaseta bulimakao afu ame'ane sipisipi afu ame'ama
nenaza vahe'mota kva hoho. 5 Hagi tamagra agafa'a omane
zagame nehuta, hapu zavena neheta Deviti'ma hu'neaza hanune
huta nehaze. 6 Hagi tamagra rama'a waini tina neneta, rama'a
mananentake zanteti tamavufga ahe mana nevuta, masavena
freta tamavufga erise nehaze. Hianagi Josefe nagate'ma
zamazeri haviza hu'zama e'nia zankura, tamagra tamasunkura
nosaze. 7 E'ina hu'negu ese'zana tamagri kina eme huramante'za
tamavre'za ru moparega vanageno, nezama kreta neneta
musenkasema nehaza zana omanegahie. 8 Hagi Hanavenentake
Ra Anumzamo'a Agra'a agifi huvempa huno amanage hie,
Zamavufaga rama nehaza Jekopu nagakura nagote nezmanente'na,
hankave vihu keginama hu'naza kumazamigu'enena navesra
huntoankina, miko zaziminena ha' vahe'mokizmi zamazampi
antegahue. 9 Hagi 10ni'a vahe'ma ofri mago nompima manisaza
vahe'mo'za miko fri vagaregahaze. 10 Hagi ana fri vahe'mokizmi
nagapinti mago'mo fri'naza vahe erino ome asenteku ne-eno,
nomofu agu'afima mani'nenimofo eme antahigeno, Mago'a
vahera amne mani'nafi? hanigeno, l'o miko fri'naze hanigeno,
ana nemo'a huno, Mago kea osunka, Ra Anumzamofo agia oho
huno hugahie. 11 Hagi Ra Anumzamo'ma huno, Ra nomokane
osi nomokanena mika mopafi fragu vaziramio hanigeno'a, amane
fragu vaziramino mopafi rutamana tamanu hutregahie. 12 Hagi
tamagra tamagesama antahi'zana hosi afumo'za havege'ma
hu'nefina, amane zamagare'za vugahazafi? Hifi havefina amane
bulimakao afura avreta mopa ome rehankorigahazafi? Hianagi
tamagra neginagi huta fatgoma huno refako hu'zana eri rukrahe
hazageno, avuataga zankna nehigeta, fatgo avu'ava zamofo

haga'a eri rukrahe hazageno, aka zankna nehie. **13** Hagi ha'ma huta Lodebari kumama eri'naza zankura musenkase nehuta, tamagra tamavufga ra nehuta tagra'a hanavereti Karnami kumara hara huzmagatere'none huta nehaze. **14** Hianagi ha' vahetamia zamavare'na esanuge'za mopatamifi hara eme huramantegahaze huno Hankavenentake Ra Anumzamo'a hie. Hagi tamagri'ma knama emerami'za tamazeri havizama hanazana, noti kaziga Lebohamati kumateti agafa hute'za vuno sauti kaziga Araba agupofima mani'naza vahera ana maka tamazeri haviza hugahaze.

7 Hagi Hankavenentake Ra Anumzamo'a mago ava'nagnaza naveri higena koana, ama mopafima huzmante'nige'za e'nagu Agra kenutamina kevure kevure retrotra huzmante'ne. Hagi ana kenutamima e'nazana kini ne'mo'ma hozama hamaretenigeno, kasefa'ma revu huno hagenia knare egahaze. **2** Hagi ana ava'na gnazama kofina kenumo'za mikozana ne'za eri vaganerazage'na nege'na, amanage hu'na hu'noe, Hankavenentake Ra Anumzamoka muse hugantoanki kumitia atrerantenka tagu'vazio. Anama osnanketa Israeli vahera osi'a vahe mani'nonankita omanita vagaregahune. **3** Hagi Ra Anumzamo'a antahi'zama'a rukrahe nehuno, retro'ma hu'noa zana osugahue huno hu'ne. **4** Hagi Hankavenentake Ra Anumzamo'a ete mago'ane mago ava'nagnaza naveri hu'ne. Hagi nagra koana, Agra vahe'a tevereti zamahe hana hunaku teve retro hunte'nege'na ke'noe. Hagi ana tevemo'a hagerina teno eri vaganereno, hozama ante mohanena tevagare'ne. **5** Anante nagra hu'na, Hanavenentake Ra Anumzamoka muse hugantoanki tevea atregeno omeno. Tagra Israeli vahera osi'a vahe mani'nonkeno, hanavetia omaneneanki tataro hu'na

hu'noe. **6** Anage hugeno Ra Anumzamo'a antahintahi'a rukrahe nehuno, anara osugahue huno hu'ne. **7** Anantera ete mago'ane Ra Anumzamo'a ava'nagnaza naveri hige'na koana, noma eri fatgoma nehaza nofi'ma aenima rente'naza nofi (plumb line) Ra Anumzamo'a azampina eri'neno, ana nofiteti'ma ante'za nege'za hu'naza kegina tava'onte oti'neno ana keginamo'ma fatgoma hu'enigu anteno ke'ne. **8** Hagi Agra amanage huno nantahige'ne, Amosiga na'a negane? Hige'na nagra kenona hu'na, Nomofo mesarimima nehazanofire hugeno, Ra Anumzamo'a keno'a hunanteno, Nagra vaheni'a amanahukna hu'na mesarimi hu'na ante fatgo hu'na koankina, zamagra fatgoa osu'nazagu kumizmia atre ozmantegahue hu'ne. **9** Hagi Aisaki negeho'zama agonaramimpima havi anumzante'ma mono'ma hunentaza kumatamina eme eri haviza nehu'za, Israeli vahe'mo'zama havi anumzante'ma mono nehaza nonena eri haviza hugahaze. Hagi kini ne' Jeroboamune vahe'anena bainati kazinteti zamahegahaze. **10** Hagi Beteli kumateti pristi ne' Amazia'a amanage huno Israeli kini ne' Jeroboamuntega kea atrenteno, Amosi'a Israeli vahe amunompi manineno kagrira kahenagenka frigahane huno kasnampa kea nehie. Ana higu tagra agri kea ontahigahune. Na'ankure agra mopatimo'ma havizama hania kege nehie. **11** Hagi Amosia huno, Jeroboamuna ahenefri'za Israeli vahera ama mopafintira zamavare'za ru moparega kina ome huzmantegahaze huno nehie. **12** Hagi Amazia'a amanage huno Amosina asami'ne, amafina kasnampa kea osunka atrenka Juda kaziga umani'nenka anantega kasnampa kea nehuge'za zagoa kamiho! **13** Hagi ama kini ne' Jeroboamu'ma mono nehia kuma megeno, maka Israeli vahe'mo'zama mono'ma nehaza kuma amafina me'negu,

kagra mago'anena ama Beteli kumapina kasnampa kea eme osuo. **14** Hige'na nagra Amosi'na kenona hunte'na, nagra kasnampa vahera omani'na, kasnampa eri'zama eri'zana rempi hu'na ontahi'noanki, nagra sipisipi kegava nehu'na fiki zafane kegava nehua ne' mani'noe. **15** Hianagi Ra Anumzamo'a ana sipisipima kegava nehua eri'zampintira nagi huno amanage hu'ne, Vunka Israeli vaheni'a kasnampa kea ome zamasamio huno hunante'ne. **16** Hagi Ra Anumzamo'ma hiankea kagra antahio, kagra hunka, Israeli vahepinia kasnampa kea eme nosunka, Aisaki agehe'ina zamazeri haviza hugahaze nanekea eme osuo nehane. **17** Hianagi Ra Anumzamo'a amanage huno Amaziagagura hianki antahio, A'kamo'a ama rankumapi savri huno monkote huno vano hanigeno, bainati kazinteti ne'mofaka'a zamahe fri vaganere'za mopaka'a refko huza eri vagaregahaze. Ana hanagenka kagra rurega vahe mopafi ufrigahane. Hagi Israeli vahe'mo'za mopazmia atre'za rurega kina ome hu'za mani'neza anantega frigahaze.

8 Hagi Hankavenentake Ra Anumzamo'a ete mago'ane ava'nagnaza naveri hige'na koana, uzate'nea zafaragamo'za ekaeka kupina avite'za me'nazage'na ke'noe. **2** Hagi Ra Anumzamo'a nantahigeno, Amosiga na'a negane hige'na, uzate'nea zafa ragamo'za eka eka kupina avite'za me'nazage'na negoe hugeno, Ra Anumzamo'a huno, Israeli vahe'mo'za knazama eri'nagura e'nahukna hu'za ko uzate'nazanki'na, ame hu'na knazana zamina zamazeri havizana hugahue. **3** Hagi ana knafina, ra mono nompima muse zagame'ma nehaza zana atre'za zamasunku zagame hu'za zavi krafa hugahaze. Na'ankure fri vahe zamavufagamo'za mika kaziga umase emase hugahaze. Hagi ana vahera kumamofo fegu'a eri'za

ometre ometre hugahaze, hu'na Nagra maka'zama kegava
hu'noa Ra Anumzamo'na nehue. 4 Hagi zamunte omane
vahe'mokizmi zama kumazafa neseta, nanazanku'ma atupama
hu'naza vahe'ma knazama nezamiza vahe'mota, kama antahiho.
5 Hagi tamagragura amanage nehaze, inanknare kasefa
ikante'ma ne'zama kreta neneta, musema nehu'na knamo'a
ome vagarenigeta, havigea huta witia zagorera ome atregahune
huta nehaze. Anage nehuta mani fruma nehuna Sabati knamo'a
vagarenigeta nezantia zagore ome atregahune huta nehaze.
Tamagra zamunte omane vahe'ma rezamavatagama hanagu
ko ete nevaze. Hagi witi raga ne'zama refakoma hunakura,
knarera huta refako osuta, havige huta osi'a zante ra zago agi
ahezmantage'za mi'zana nesaze. 6 Hagi witima zagore'ma
atre'naku'ma nehuta hona'a mopafinti zogita eri havia huta
netraze. Hagi zamunte'ma omane vahe'ma kazokzo eri'za
vahe'ma zamavareneta, mizazmia mago silva zago zamige, aga
ano zamige nehaze. 7 Hagi Hankavenentake Ra Anumzamo'a
huvempa huno, tamagra Jekopu naga'mota hu'naza kefo
tamavu'tamava zankura nagera akani oramantegahue. 8 Hagi
e'inama hazza zamofontera mopamo'a momi hanigeno, miko
vahe'mo'za zavi krafa hugahaze. Hagi mopamo'a Naeli timo'ma
hageno vazi zore'noma eviaza huno ome ra huteno, ete ome
uramiankna hugahie. 9 Hagi Hankavenentake Ra Anumzamo'a
huno, Ananknafina Nagra feru kopi zagea huntenugeno ame
huno unefrena, masa me'nenifi ame hu'na eri hani hugahue.
10 Hagi musenkasema nehaza zana eri rukrahe hanena, zavi
krafa hugahaze. Hagi tamasunku kukena nehuta, tamazokara
vazagategahaze. Hagi magoke mofavrema frinege'za nehzaza
huta zavira ategahaze. Hagi ana kna, e'i kefo knarafa fore

hugahie. 11 Hagi Hankavenentake Ra Anumzamo'a huno, Mago kna ne-eankina agatontoza atrenugenoma mopa fina egahiankino, ana agatonto zana tinkuro nezankura huza zamagara otegahazanki, Ra Anumzamofo kema antahizanku tusi zamagara tegahie. 12 Hagi Anumzamofo nanekegura hake'za hagerima ome atre emetre'ma hutegane, noti kazigane, sauti kaziganena vu'za e'za hugahazanagi, hake'za eri forera osugahaze. 13 Hagi ana knafina knare'nare mofa'nanene, kasefa nehazavemo'zanena Anumzamofo kema antahizankura tinkuma hiaza huza tusiza nehanageno zamavu evu evu hanige'za traka huza masegahaze. 14 Hagi Sameria vahe havi anumzante'ma huvempama hu'naza vahe'ene, Beseba havi anumzante'ene Dani havi anumzante'ma huvempa hu'naza vahe'enena, mika fri vagare'za oraotigahaze.

9 Hagi anante'ma avanagna zama koana, kresramana vu itamofo tavaonte Ra Anumzamo'a otinege'na kogeno amanage huno nasami'ne, mono nomofo zaza vimago zafaramima noma vazisgama hu'nea zafaramimofo agofetu hankavetinka amasagigeno evuramino fenkama mani'naza vahera zamaheno. Hagi mago'a manisaza vahera magore huza omanigahazanki bainati kazinteti zamahe'nuge'za fri vagaregahaze. 2 Hagi zamagra mopa agu'afi hanagati'za amefenkame fri vahe'ma asenezmantafi vugahazanagi, Nagra anampinkati hankave nazanteti zamavazu hu'na zamahegahue. Zamagra monafi mareriza umani'gahazanagi, anantegati ome zamavarefenka atregahue. (Sheol h7585) 3 Hagi amenagame Kameli agonafi ome fraki'nazanagi, anampinkati hakena zamazerigahue. Hagi zamagrama hagerimofo ro'are'ma ufrakinage'na, nagra hagerimpi ra osifave huntanena zamarotago huno ome

zamaprigahie. 4 Hagi ha' vahe'zmimo'zama zamavare'za kinama ome huzmantesnarega, ha' vaheku hanuge'za bainati kazinknonteti zamahe fri'nage'za, vahe kopi frigahaze. Hagi Nagra zamazeri knarerera zamagrira osugahuanki, zamazeri haviza hugahue. 5 Hagi Monafi sondia vahe'mofo Ra Anumzamo'ma ama mopama avako'ma nehigeno'a, mopamo'a ze'ze huno maramra huno evuneramigeno, ana mopafima nemaniza vahe'mo'za zavi krafage hugahaze. Hagi mopamo'a Naeli timo'ma ti hageno vazi'zoreno eviankna huteno ete evurami'ne. 6 Hagi Ra Anumzamo'a kuma'a monafinka tro hunenteno, noma'amofo trara mopafi tro hunte'ne. Hagi Agra hagerimpinti tina eri vanaheno mareriteno, atregeno ama mopafina kora nerie. Hagi Agri agia Ra Anumzane. 7 Hagi Israeli vahe'mota tamagra Itiopia vahera zamagatereta ruzahu vahe mani'none huta nehaze huno Ra Anumzamo'a nehie. Hianagi Nagra Israeli vahera Isipiti zamavare'na atirami'na, Filistia vahera Krititira zamavare'na atinerami'na, Aramu vahera Kiri kumatetira zamavarena atirami'noe. 8 Hagi Nagra Hihamu'ane Anumzamo'na rama'a kumi'ma nehaza Israeli vahe'mota neramagoankina, mika tamahe vagaregahue. Hianagi Jekopu nagara tamahe vagaore'na osi'a tamatre'nugeta manigahaze huno Ra Anumzamo'a hu'ne. 9 Hagi Israeli vahera hanave ke hanugen, ruga'a mopafi vahe'ene Israeli vahera refakoa huramantegahie. Ana hugahiankino mago vahe'mo'ma witima vazi herehema higeno, havizama hu'nea witimo'ma mopafi evuramiankna hu'za Israeli vahe'nimo'za ru mopafi umanigahze. 10 Hianagi nagri vahepinti'ma kumima nehuta, mago'zana fore osugahie hutama nehaza vahera mika'a bainati kazinteti tamahe fri vagaregahaze. 11 Hagi ana knafina Deviti nona ete eri hanavetina negi'na, tapagema hu'naza kuma

kegina ete eri so'e nehu'na, kumamo'ma mopafima havizama
huno evuramino me'nefintira ete eri oti'na ki'nugeno, ko'ma
me'neaza huno konaririane hankavenentake kuma megahie. **12**
Ana hanuge'za Israeli vahe'mo'za Idomu mopa eri nafa'a nehu'za,
ru kumapi vahe'ma nagrama huhampri zamante'noa vahe'enena
kegava huzmantegahaze. Hagi ama ana nanekea Ra Anumzamo
nehiankino, ana zana hugahie. **13** Hagi Ra Anumzamo'a
huno, Mago kna ne-eankino grepine witinema hankre'hageno'a
ame huno hageno marerino raga rente'nige'za hoza vazage
vahe'mo'za erige erigetete'za hozafi atrenageno megahie. Hagi
Israeli agonafinti wainimo'a tusi'a haga hugahie. **14** Nagra
Israeli vaheni'a kinama hu'nazaregati zamavarena mopazamifi
e'nuge'za, mikä kuma'zmima havizama hu'neana emeri kasefa
hu'za ki'za nemaniza, waini hozane, zafa raga hozanena
ante'za nene'za manigahaze. **15** Hagi Nagrama zami'noa
mopafi zamavare'na ome nezamante'na, ete mago'anena ana
mopafintira zamavare otregahue, huno Ra Anumzana tamagri
Anumzamo'a hie.

Obadaia

1 Ama'i Ra Anumzamo'a ava'nagna zampi Obadaina eri averi higeno Idomu vahete'ma fore'ma hania hazenke zamofo keteno, Idomu vahekura Ra Anumzamo'a amanage hie huno ome huama hu'ne. Hagi keagama erino vu vahe Ra Anumzamo'a mago ne' hunenteno, amanage hunka ama mopafima nemaniza vhahera ome zamasamige'za, Maka vahe'mo'za retrotra nehu'za, sondia nagazmia zamazeri tru hute'za Idomu vahera hara ome huzmanteho huno hunte'ne. 2 Ra Anumzamo'a Idomu vahekura amanage huno hu'ne. Ama mopafima nemaniza vahe amu'hompintira tamagrira tamazeri anteramisuge'za, vahe'mo'za tamagefenkami atregahaze. 3 Tamagrama tamavufga rama nehaza zamo reramavatga hu'ne. Na'ankure tamagra havemoke higeno, mesga hu'nea agonaramimpi nemanita amanage huta tamagra nentahize, Mago vahe'mo'a amaretira eme tazeri fenkami otregahie huta nehaze. 4 Hagi tamagra tumpamo onagamu hampompi hareno vano hiaza nehutma, ofuramima me'nea amu'hompi nona negize. Hianagi anantetira tamazeri fenkami atregahue hu'na Nagra Ra Anumzamo'na nehue. 5 Hagi kumazufa vahe'mo'zama kenage'ma musufama eme e'neriza mago'a zana netraze. Hagi waini hozafinti'ma grepri rgama taginaku'ma aza vahe'mo'za maka tagi vaganorazanki mago'a netraze. 6 Hianagi Iso (Idom) nagamotma tamagri feno zantamina maka eme agu'zaneru'za, marerisa feno zantamina fra'ma ki'nazana hake'za eri'za vugahaze. 7 Tamagritegama eme ante'za tamazama hu'za ha'ma nehaza vahe'mo'za, rukrahe hu'za ha' huneramante'za mopatamifintira ha'reramante'za tamahenati atregahaze. Tamagranema fru huta manisanune hu'zama kema huhageraf'haza vahe'mo'za havige hute'za

tamagrira tamazeri haviza hugahaze. Tamagrama antahima nezamiza ronetamimo'za, tamagrira tamazerinaku krifu anaginte gahazanagi tamagra anazana keta antahita osugahaze. **8**
Hagi ana knafina magore hu'na knare antahi'zane vahera Idomu mopafina zamatre suge'za omanigahaze. Ana nehu'na Idomu mopafima me'nea agonaramimpima ama' antahi'zane vahetamima nemaniza vahera maka zamazeri haviza hugahue.
9 Temani kumate harfa sondia vahe'mo'za tusi koro hugahaze. Ana nehanage'za Idomu mopafima me'nea agona ramimpima nemaniza vahera zamahe hana hugahaze. **10** Na'ankure Jekopu naganofira tamagri tamafuhe'za mani'nazanagi, tamagrama zamazeri havizama hu'naza agafare, tamagaze zamo refite neramante'na, Nagra tamagrira tamazeri haviza hanugeta tamagaze zampi manivava huta vugahaze. **11**
Hagi Juda naga'mokizmi ha' vahe'mo'zama e'za, Jerusalemi kuma keginamofo kafaramima tapage hu'za zago fenozmima e'neri'za, Jerusalemi kuma'ma refko hu'za erinaku'ma satu zokago'ma neragazegeta tamagranena ha' vahe tro huta ot'i'neta zamaza osu'naze. **12** Tamagri tamafuhe'za Juda nagama kna zampima mani'nazageta anazankura antahi muse nehuta kiza zokago ke huzmante'naze. Ana nehutma Juda naga'ma eme zamazeri havizama nehzageta, osuga'za huta musena nehuta, hazenkema eme zami'za zamazeri havizama nehzage'za tusi'a knazampima mani nazageta, tamagra osuga'za huta tamimiza runafage nehuta rantamagi eri'naze. **13** Ana knazamo'ma Nagri vahe'ma zamazeri havizama hige'zama mani'nazageta, rankuma zamifi ufreta feno zamia aguza ruta eri'naze. Hazenke zamo'ma zamazeri havizantfama hige'zama mani'nazageta, kiza zokago ke hunezmaneta osugaza huta, tusi'a knazampima

mani'nazageta feno zamia aguzaruta eri'naze. **14** Tamagra kantu hanare oti'neta Juda naga'ma koro'ma fre'za vaza nagara zamahe nefrita, ozamahe zamatrage'zama mani'naza nagara tusi knafi mani'nazanagi zamazerita ha' vahe zamazampi ante'naze. **15** Ama mopafima kokankokama mani'naza vahe'ma Ra Anumzamo'ma refko hune zamanteno, zamagrama hu'naza avu'ava zante'ma mizama zamatere hania knamo'a hago erava'o nehie. Tamagra vahe'ma huzmante'naza kna avu'ava zana tamagri huramantegahaze. Hu'neankita ana avu'ava zamofo knazama'a tamagra'a erigahaze. **16** Ruotage'ma hu'nea agonianifinti'ma tima neaza huta nagri vhahera zamahe'nagu, maka ama mopafima kokankokama nemaniza vahete'ene tamagrite'enena knaza atre'na tamahe fanene hanugen tamagia omanegahie. **17** Hianagi osi'a naga'ma hapinti'ma ozamahenaza naga'mo'za, Saioni Agonafi manisnageno, ete ana kumamo'a ruotage kuma megahie. Ana'ma hanige'za Israeli vahe'mo'za ete e'za mopa'zamia erisanti hare'za manigahaze. **18** Jekopu naga'mo'za tevemo kaninkani huno teaza nehanageno, Josefe naga'mo'za tevemo hagna hagna hiakna hu'za, Idomu vhahera hagege hu'nea trazankna hu'nazanki'za tevemo traza te fanane hiaza hu'za Idomu vhahera ozmatre maka zamahe hana hugahaze. Nagra Ra Anumzamo'na ama nanekea huama nehue. **19** Hagi Nagri vahe'ma Negevi kazigama nemaniza vahe'mo'za vu'za, Idomu agona mopama me'neana omeri'za umanigahaze. Juda mopafima me'nea agona ramimofo asoparegama nemaniza vahe'mo'za, Filistia vahe'mokizmi agupo mopa erigahaze. Ana nehu'za Efraemi naga'mokizmi hoza mopane, Sameria vahe'mokizmi mohanena ete eri nafa'a nehanage'za, Benzameni naga'mo'za Gileati mopa ome eri'za manigahaze. **20** Hanki

Israeli vahe'ma ru mparegama kina ome hu'za mani'naza
vahe'ma ete mopa zamire'ma esanu'za, mopama erisna zana
Fonesia vahe mopa atupareti agafa huteno, vuvava huno noti
kaziga Zarefati mpare vanige'za eri'za manigahaze. Jerusalemi
kumapi vahe'ma zamavare'za noti kazigama kinama ome
huzmante'naza vahe'mo'za Negevi mopalima me'nea ranra
kumatamimpi emanigahaze. **21** Hanki ha'ma hugatere'naza
vahe'mo'za Saioni agonare mareri'za mani'neza, Idomu mopalima
me'nea agonaramina kegava hugahaze. Ana'ma hutesageno'a
Ra Anumzamo'a Agra'a kinia manino ana mopa kegava hugahie.

Jona

1 Ra Anumzamo'a Amitai nemofo Jonana, amanage
huno asami'ne, **2** Otinka tusi'a rankumate Ninive vunka,
kefo avu'ava'ma nehaza zankura kezatinka Anumzamo'a
keaga huneramante hunka zamasmio. Na'ankure kefo
zamavu'zamava'ma hu'nazana hago Nagra ke'noe. **3** Higeno Ra
Anumzamo'ma Jonama hunteno, vuoma hirega ovuno atreno
freno Tasisi vunaku agesa nentahino, Jopa uramino Tasisi vuku
nehia vente ome kefore huteno, vania zana tafera mizaseteno
Ra Anumzamofona atreno freno, afete Tasisi kumate vu'naku
ventefi mareri'ne. **4** Ana higeno Ra Anumzamo'a tusi'a zaho ko
huntegeno hagerimo emeri kranto kranto nehigeno ana ventemo
tagana vazi'za hu'ne. **5** Ana ventefima eri'za e'neriza vahe'mo'za
tusi koro nehu'za zamagra anumaza zamire kezankea nehu'za
fenoma ventefima me'neana o'za hurantesie hu'za asgahu'za
hagerimpi atre'naze. Ana hazanagi, Jona'a ana ventemofo agu'afi
fenka uramino avu uvaseno, hinkrafo ante'ne. **6** Mase'negeno
ana vente'ma eneria ne'mo'a agrite uramino, nahigenka kagra
kavura mase'nane? Otinka anumzankamofontega nunamuna
huo, kagri anumzamo'a tagrikura asunku huranteno taza hanigeta
tagra ofrisunel! **7** Ana ventefi eri'za vahe'mo'za ke hugantu kama
hu'za, E'enenketa satu zokagora reta ama'na hazenke'mofona aza
ugagota hu'nefi kamneno, nehu'za satu zagoma re'za kazana
Jona agimo efore hu'ne. **8** Ana hute'za Jonana anage huza
antahige'naze, Iza hu'nea hazenkere hagerimo'a tagririra tahe
refite'zana nehie? Kagra nankna eri'za e'nerina ne' mani'nane?
Kagra igati e'hane? Rankuma ka'a igatire? Kagra ina vahepinti
fore hunane? Hu'za antahige'naze. **9** Jona'a ke nona huzmanteno
anage hu'ne, nagra Hibru nere, monafinka Anumzama hagerine,

hagege mohanema tro hu'nea Ra Anumzamofonte nagra monora hunentoe. **10** Anagema hige'za ventema eneriza vahe'mo'za nentahi'za, tusi zamanogu nehu'za, anage hu'za Jonana antahige'naze. Kagra inankna hazenke hu'nane? Na'ankure Jona'ma Anumzamofonkema rutagreno fre'nea kea ana nagara zamasamige'za antahi'nareti hu'naze. **11** Hagerimo'a mago'ene tusiza huno kranto kranto huno regazarino avune ante'no e'ne. Hige'za Jonana antahige'naze, Inankna kagrira hugante sunkeno hage rimo'a rurava hegahie? **12** Hazageno nagrira nasgahutma hagerimpi matevu natrenkeno, timo'a rurava hino. Nagra hago ke'na antahina nehue, na'ankure nagri hazenke zamofo agofetu hagerimo'a tamagritera avunea nente, huno zamasmi'ne. **13** E'inama nehiana netre'za ana vahe'mo'za tusiza hu'za avame ante'za tin ankenare vu'zante maraguzati'naze. Ana hu'nazanagi, amuhara osu'naze. Na'ankure hagerimo'a mago'ane erirankasege'za ankenarega vugara osu'naze. **14** Anante Anumzamofo kezatimi'za, Ra Anumzamoka muse (plis) hugantonanki ama ne'ma ahe frisuna zankure hunka tagrira tahe fanane osuo. Ama ke'a omane ne'ma ahe frisuna zankura, tagrira tazerinka keaga huoranto, Kagriku huta amanahura huntegahune, Ra Anumzamoka kavesiniaza Kagra huo. **15** Anante Jonana asgahu'za hage rimpi matevu'za atrageno, avunema nentea hagerimo'a aru rava ahe'ne. **16** Anama hiazanku ana vahe'mo'za, Ra Anumzamofona tusi'a koro hunte'za, Kresramana vunente'za, mago'a huvempa kea Agrite hu'naze. **17** Ana hazageno Ra Anumzamo'a tusi'a nozame huntogeno Jonana asga huvazigeno, Jona'a nozamemofo rimpafina tagufa zagegi, tagufa kenageki huno mani'ne.

2 Jona'a nozamemofo arimpafinti, Ra Anumzana agra'a
Anumzamofontega nunamu hu'ne. **2** Agra anage hu'ne,
Nagra tusi'a hazenkefi mani'nena Ra Anumzamofontega
hazenke zanimofona asamugeno, Agra ke'ni'a antahinami'ne. Fri
vahe'mofo kumapi mani'nena fri'za nehu'na nazama huogu'ma
kezatugenka, kagra zavi krafa ke'ni'a antahinami'nane. (**Sheol**
h7585) **3** Kagra nasga hunka ame fenkame hagerimofo agu'afinka
natre'nane. Anampina timofo hanavemo nazeri kagigagi hu'ne.
Kagra hanave'ane zaho huntankeno haferina eri kranto kranto
huno e'nea timo, nagrira nazeri nakrino refite'ne. **4** Ana
hige'na Kagripintira ko nagrira nahe anati atre'nane hu'na nagra
antahi'noe. Kagri ruotge ra mono nonka'a mago'ene onkegahue,
hu'na nagesa antahi'noe. **5** Kagigagi huno avune ante'nea timo,
nazeri nakrino nanankempi marerige'na ti nakrika ate'noe. Ame
fenkame tam'i'nea timo nazeri kagigeno, Hagerimpi inozamo
nanuna eri ano vazi'ne. **6** Agonamofo agafafi nagra urami'noe.
Ana mopamofo agu'afinka rentrako hunantesige'na kina hu'na
manivava hugahue hu'na nagesa antahi'noe. Hu'neanagi Kagra
Ra Anumzamoka, ana kerifintira naza hunka navare atre'nane. **7**
Navu evuevu hige'na frinaku nehu'na, nagra Ra Anumzamoka
nagesa antahi kamugeno, nunamuni'amo ruotge ra mono
nonka'afine, Kagrite'ene e'ne. **8** Knare osuno havi anumzante
mono hunentaza vahe'mo'za, Anumzamofo asunku'zana zamagra
erigaragi, zamagena hunemize. **9** Hianagi Ra Anumzamoka
kezati'na kagia erisga nehu'na, nagra zagamepinti Kagritega
ofa hugantegahue Ra Anumzanimoka nagrama huvempama
hua kea, amage antegahue, na'ankure nazahu hanavea Ra
Anumzamoka Kagrake mani'nane. **10** Anante Ra Anumzamo'a

nozamea huntogeno ke'a zafa huno, Jonana hageri ankenare
hagage kahepante amu ome atitre'ne.

3 Anante Ra Anumzamo'a mago'ene Jonana anage huno
asami'ne, **2** Mensintfa otinka, tusi'a kumate Ninive vunka,
Nagrama kasmisua nanekea vhahera ome zamasamio. **3** Anage
higeno, Jona'a otino Ra Anumzamo'ma asamia kante anteno
Ninive vu'ne. Ninive kumara tusi'a ranku'ma me'negeno ana
kumapina tagufa zagegna rukitagi'za mago atuparega kana
nevaze. **4** Jona'a ana kumapi agafa huno, magoke zagegnafi
vuno, agra kezatino anage hu'ne, **40**'a zagegna evanigeno
Ninive kumamo'a haviza hugahie. **5** Anante Ninive vahe'mo'za
Anumzamofo kere zamentinti nehu'za, zamagra ne'zana a'o
nehu'za, ranteti vuno osite'ma vu'hea vahe'mo'za zamasunku
kukena (sek klos) eri hankre'naze. (Mat 12:41, Luk 11:31-32.)
6 Ana nanekemo'ma Ninive kini nete'ma uhanatigeno'a, kini
tratetira otiazamo, kini kukena'a atova hutreno, asunku kukena
erino antaniteno, ta'nefapi mani'ne. **7** Anante kinine, kagota eri'za
naga'ane amage'ma antesaza naneke atrageno ran kumapi
vahe'zagare vuno eno higeno, kinimo'a huno magore hunka
kagro, zagagafaka'a, atregeno ne'zane, tinena one'tfa hino,
huno hu'ne. **8** Mago mago'moka kasunku kenage eri nehunka,
hagi ana zanke hunka zagagafaka'a asunku kukena eri hundo.
Kagranena Anumzantega kagu'areti hunka nunamuna nehunka,
kumi hu'zane, ha' fra huno vahe azeri haviza hu'zana atreho. **9**
Ontahi'none, Anumzamo'a nentahino asuragi ranteno Agra'a
rimpa ahe'zana atresigeta ofri manigahune. **10** Kefo avu'ava zama
nehaza zama atre'za zamagu'a rukrahe hazageno, Anumzamo'a
negeno, Agra asunku huzmanteno zamahe frigahuema hia
agu'agesa atre'ne.

4 Hagi Jona'a musena osuno tusi asi vazigeno, 2
Ra Anumzamofontega anage huno nunamuna hu'ne, Ra
Anumzamoka muse (plis) hugantoe. Ese agafareti nagra ko
antahi'noe, Ninivea eri haviza osugahane hu'na kuman'iare
mani'nena antahi'noe. Antahite'na mopani'a atre'na, Tasisia nagra
fre'na vu'noe! Na'ankure, Kagra kasunku nehunka knare kavukva
vahera huzmante Anumza mani'nane, agazone hunezmanenka
kasunku'zamo avite Anumzankinka, zamazeri haviza hugahue
hana vahera anara nosane. 3 E'izanku nona'a, Ra Anumzamoka
nagri menina nahege'na fri'neno. Nagrama omani'na, frisugen'o
knare hugahie. 4 Ra Anumzamo'a anage hu'ne, knare kegafa
me'negenka krimpa nehano? 5 Anage higeno, Jona'a ra kumara
atreno zage hanati kaziga via'zamo, zage tonare huno osi
no ome kino anampinka mani'neno, inankna'za Ninivea fore
hugahie nehuno avu anteno mani'ne. 6 Hagi Ra Anumzamo'a
aza huno Jonana anumofo tona huntenuogu, nofi traza huntogeno
hageno mareri'ne, ana nofi'ma hage'nea zankura Jona'a,
tusi'za huno musena hu'ne. 7 Hianagi maseno ko'atigeno
nanterampi, Anumzamo'a havigafa huntogeno ananofira eme
ani traga hutregeno, ana nofi'mo'a hagege hu'ne. 8 Zagema
hanatigeno'a, Anumzamo'a amuho nentake zaho, zage hanati
kazigati huntogeno, zagem'o'a Jona anuntera tentegeno, avu evu
evu higeno Jona'a fri'za nehuno, anage huno kezati'ne, nagrama
nagesa antahuana frisugen'o'a knare hugahie, kasefa hu'na
mani'zankura nave'osie. 9 Anante Anumzamo'a Jonana amanage
huno asmi'ne, Knare ke agafare nofikura kasia nevazio? Huno
antahigegeno Jona'a knare ke agafare nagrira nasivazige'na
friku nehue hu'ne. 10 Higeno Ra Anumzamo'a amanage hu'ne,
Eri'za erinka, krinka kegava hu'nana nofiku kagra krimpagna

nehano, nofimo'a mago kenage hagetenno mago zage knafi
fri'ne. **11** Ninive rankumapina 120 tauseni'a agatere'nea vahe
mani'nazankiza e'izana tamazanki, havizanki hu'za osugahaz.
Afu' kevuzaga rama'a mani'naze. Hianagi, kagrama antahi'nana,
Nagra e'i ana rankumakura nagesa nontahuo? Huno asmi'ne.

Maika

1 Hanki ama nanekea Ra Anumzamo'ma, Moreseti kumateti ne' Maikama ami'neana, Jotamu'ma, Ahasi'ma, Hezekaia'ma hu'za Juda mopare'ma kinima maniterema hu'za aza kafu ramimpi Sameria kumate'ene Jerusalemi kumate'ma fore hania zamofo naneke Maikana asmi'ne. **2** Maka ama mopafima mani'naza vahe'mota ama nanekea nentahinke'za, Ama mopa agofetu'ma me'nea zantami motanena tamagesa ante'neta antahiho. Ra Anumzamo'a ruotage'ma hu'nea mono moma'afi mani'neno, menina keaga huneramante. **3** Hagi antahiho! Ra Anumzamo'a agrama nemania tra'a monafinka atreno ne-eankino ama mopafima havi anumzantamimofoma mono'ma hunentaza za'za agonaramimpi agia eme regahie. **4** Ana'ma hanigeno'a agonaramimo'a tinkna huno agiafina maramara nehanigeno, agupo moparamimo'a runetanenigeno, kragefe'nea masavema teze'zema hiazza hanigeno, agonaramintegati timo'ma vazi hagajino uramiazza huno aguporega vugahie. **5** Hanki ama ana zama fore'ma haniana na'ankure, Israeli vahe'ene Juda vahe'mo'zama Anumzamofo nanekema eri tre'za kumi'ma hu'naza zanku huno fore hugahie. Maka Israeli vahe'mo'za kumira hu'nazankino, iza ana knazana erigahie? Ugagota ran kuma Sameria kuma'mo ana knazana erisanigeno, Juda vahe'mo'zama havi anumzante'ma mono'ma hunentaza kumara iga me'ne? E'i Jerusalemi kumakino agra'a knazana erigahie. **6** Ana hu'neanki'na nagra Ra Anumzamo'na Sameria kumara eri haviza hanugenogu kugusopamo'ma hihi huno mareriaza hugahie. Ana hanugenogu ana kumapi mopamo'a pehe hanige'za anampina waini hoza antegahaze. Ana nehu'na kuma keginamofo have ramina ahefaragu vazisanugenogu agupofinke'za uramisigeno,

keginama retrure'za tro'ma hu'naza tramo'a amate megahie. 7

Samaria kumapima havi anumzamofo amema'ama antreta tro'ma
hunte'nazana ru takohu osi osi hunetre'na, havi anumzante'ma
mono'ma hunentaza nompima, mizama eri'naza zama eme
ante'naza zantamina tevemo tefanane hugahie. Ama ana
zantamima mizama se'nazana, monko zama nehaza vahe'ma
miza sezamante'naza zagoreti miza se'naza zantamine. Ana
hu'neanki'za ana zantamina eri'za ru moparega vu'za monko
avu'ava zama nehaza vahe ome mizase zamantegahaze.

8 E'ina hu'negu nagra Maika'na tusi nasunku hu'na zavira
nete'na, navatetira kukena hate netre'na nagia nonena ontani
vano hugahue. Afi kramo'ma hiaza hu'na krafa huna vano
nehu'na, mananinkna nama, ostritsimo'ma hiaza hu'na zavira
tegahue. 9 Na'ankure nagri vahemokizmi namumo'a teganigara
osu'neankino, ana namumo'a takaireno Juda vahete'enena
nevie. Ana namumo'a Jerusalemi kumamofo rankafantera
vuteno, agu'a ufreno eri haviza hu'ne. 10 Ama ana zankura
huamara huta Gati kumapima nemaniza vahera ozamasamiho.
Ana nehuta magore huta tamavunura otreho. Hagi Bet-
Leafra kumate'ma nemaniza vahemota tamasunku nehuta,
kugusopafi maseta rukrahe krahe hiho. 11 Hanki Safiri
kumapima nemaniza vahe'mota, tamagazegu nehuta tamavatera
kukena omanesiaza kina vahe kna huta ru moparega viho.
Za'anani kumapima nemaniza vahe'mo'za kuma zamimofo
vihufintira atre'za atioramigahaze. Ana nehuta zavi krafama
hanazana Bet-Ezeli kumapi vahe'mo'zama eme tamazama
osnaza zanku anara hugahaze. 12 Maroti kumapima nemaniza
vahe'mo'za tusi zamatafi nemani'za, ina zupa knare zana
fore hugahie nehu'za avega antete'za manigahaze. Na'ankure

ama ana knazamo'a Ra Anumza mofontegati e'neankino,
Jerusalemi kumamo'enena ama ana knazana erigahie. **13**
Hanki Lakisi kumapima nemaniza vahe'mota karisiramina erita
hosí afutamire rente vaganereta, anampi takaureta koro freho.
Na'ankure Juda mopafima me'nea ranra kuma tamimpintira
Israeli vahera zamavaririta tamagra esera keontahi avu'ava zana
nehuta, Jerusalemi kumapima nemaniza vahera zamavareta
kumipina ufre'naze. **14** E'na hu'negu Juda vahemota, Moreset-
Gati kumate'ma nemaniza vahekura tamasunku huta huso'e
hunezamanteta musezana tre zamanteho. Na'ankure ana
kumara ru vahe'mo'za erisanageno tamagri kumara mago'enena
omanegahie. Hanki Aksibi kumapima nemaniza vahe'mo'za
Israeli kini vahera karunage hu'za rezamavataga nehu'za zamaza
osugahaze. **15** Hanki Moreseti kumapima nemaniza vahera,
Nagra Anumzamo'na tamagri ha' vahera huzmantesuge'za e'za,
ha' eme huramante'za tamagri kumara eri nafa'a hugahaze. Ana
hanage'za Israeli ranra kva vahe'mo'za koro fre'za Adulamu ran
kumatega vugahaze. **16** Juda vahe'mota tamagrama tamavesi
nezamantaza mofavre nagatamina, ame hu'za hanare'za
vugahazanki tamasunku hunezamanteta tamaseni tamazokara
vazagategahaze. Na'ankure mofavre nagatamima zamavare'za
afete moparegama kinfima vanaza zanku huta tamaseni
tamazokara vazagate atresageno fankimofo kokovite azoka'ma
omaneaza huno tamanuntera tamazokara omanegahie.

2 Hagi Maika'a mago'ane huno, Zamavu'ma omase kenage'ma
oti'za mani'neza havi avu'ava zama hanaza zanku'ma
antahintahima retro'ma nehaza vahe'mo'za kva hiho. Nanterama
sege'za kefo avu'avazama hunaku'ma antahintahima hu'naza
avu'avaza nehaze. Na'ankure hankavea zamagripi me'negu,

nazanoma hunaku'ma hazza zana amne nehaze. 2 Hanki zamagrama mago vahe'mofo hozama ke zamasanema nehu'za, ana mopa enerize. Hagi mago vahe'mofo noma erinakura ana nomofo venafo azeri haviza nehu'za noma'a eneri'za, vahera rezamatga hu'za fenozmire nozminena eneriza, naga'zamimo'zama erisantima hare'naza mopa havige hu'za zamazeri havia hu'za eri nafa'a nehaze. 3 Hianagi Ra Anumzamo'a amanage huno nehie. Tamagrama havi avu'ava zama nehaza zante'ma nonama huramante'nua zana retro nehuankina, havi avu'ava zanteti nona huramante'na tamazeri haviza hanugeta tamagra'a tamagura ovazigahaze. Ana hanugeta ko'ma tamavufga rama nehuta vanoma nehaza zana huta vanoa osugahaze. Na'ankure kefo knamo tamagritera egahie. 4 Hanki ana knafina tamagri ha' vahe'mo'za amanage hu'za zagamepina huvazi'za kiza zokago kea huramantegahaze. Tagra hago havizantfa hunkeno, Anumzamo'a mopatia hanareno, tagri'ma komoru hu'za ha' vahe zamazampima tavre ante'naza vahe eri zami'ne. 5 E'ina hu'negu Ra Anumzamofo kevu naga'mo'zama taisi zokago'ma re'za mopama refko hu'za erisageta, tamagra mago'zana e'origahaze. 6 Anagema huge'za e'inahu nanekea nosunka, e'inahu kasnampa kea osuo hu'za vea kevumo'za hu'naze. E'inahu knazamo'a tagritera eno eme tazeri havizana hanigeta, tagazegura osugahune hu'za hu'naze. 7 Hagi Jekopu nagamota tamagra e'inahu nanekea nehazo? Tamagrama antahi'zana Ra Anumzamofo Avamumo'a arimpa ahenorante huta nehazafi? Hagi iza'o fatgo avu'ava zama hania vahe'mofona nagri nanekemo'a azeri so'e hugahie huno hu'nefi? 8 Hianagi Anumzamo'a huno, nagrira ha'renenanteta vahe'mokizmi nakre ku'zamia tamagra musufa neseta, mago zana fore osanigeta

knare huta manigahunema hu'za nehaza vahe'ene, hategati'ma
aza vahe'mokizmi zanena musufa nesaze. 9 Nagri vahepima
mani'naza a'nanea, knare'hare nozamifintira zamavare netraze.
Ana nehuta mofavre naga zamimo'zama musezama erisanti
haresaza zama zaminaku'ma nehaza zana musufa nesaze. 10
Ana hu'nazagu menina tamagra otita ama mopa atreta viho!
Mago'ene ama mopafina nonkumara anteta mani frua osugahaze.
Na'ankure tamagra kumi eri hakare nehuta ama mopa eri
havizantfa hu'nazankita knaza erita havizantfa hugahaze. 11 Hagi
mago ne'mo'ma eno, nagra kasnampage huankino wainimo'ene
aka timo'enena rama'a fore hugahie huno'ma havigema hania
neku veamo'za avesintegahaze. 12 Anumzamo'a huno, Mago
zupa maka Israeli vahera zamavare atruma hanuana, osi'a
naga'ma ofri mani'naza naga'a ana maka zamavare tru hugahue.
Ana nehu'na sipisipi afu zagama keganafima zamavare atruma
hazaza hu'na, zamavare atru hanuge'za manigahaze. Ana
hanuge'za rama'a sipisipi afuzagamo'zama knare tra'zama
me'nefi atru hu'za mani'neza zamagasasamoke'ma nehzaza
hu'za manigahaze. 13 Ru moparegama kinama huta
mani'nesafintira, kegavama huramante'nea ne'mo'a tamaza huno
kinafintira anafe huno tamavre atiraminigeta, ha' vahe'mokizmi
kuma'mofo kafaramimpintira etiramita egahaze. Tamagri kini
ne' Ra Anumzamo agra'a ugota huramanteno nevuno, kegava
huramanteno tamavreno vugahie.

3 Hanki nagra ama nanekema huana, Israeli nagatema ugotama
hu'naza kva vahe'mota antahiho, e'i zana fatgo zanki havi zanki
huta ko keta antahita hu'naze. 2 Hianagi tamagra knare avu'ava
zankura tamavesra nehuta, kefo avu'ava zama hu'zankuke
tamave'nesie. Nagri vahe'mo'za ofri kasefa mani'nazageta

zamavufaga eri tragatragu nehuta, zaferina zamiretira ame'a zamia eri hazori netraze. 3 Tamagra Nagri veamokizmi zamufga neneta, maka zamavufaga hakaneta eri vaga neraze. Ana nehuta zaferina zamia rufu netagita, afu me'ama osi kavofine ran kavofinema krenaku'ma tagahu osi'osi'ma hazaza nehaze. 4 Ana nehuta kna zamo'ma tamagrite'ma ne-egeta Ra Anumzamo'ma tamaza hanigura zavi krafa nehazanagi, Ra Anumzamo'a eme tamaza osugahie. Na'ankure tamagra rama'a havi avu'avaza hu'nazankino avugosa, rukarahe nehuno ontamagegahie. 5 Ra Anumzamo'a amanage huno nehie. Tamagra havige kasnampa kema nehaza vahe'mota, Nagri vahera zamavareta havi kante nevaze. Ana nehutma ne'zama tamamiza vahera fruge hunezmantaze. Hianagi ne'zama ontamamiza vahera, agafa hutma koro kea ha' vahe'mo'za tamazeri haviza hugahaze huta hunezmantaze. 6 E'ina hu'negu tamagritera hanizamo eme refitesigeta hanimpi mani'neta mago'enena ava'nagna zana onketfa hugahaze. Ana hanigetma henkama fore'ma hania zankura mago'enena huamara osugahaze. Ana kasnampa kema nehaza vahe'mota masare manigahazanagi hanimpima maniazza huta manigahaze. 7 Ana'ma hanigetma henkama fore'ma hania zanku'ma havige kasnampa kema nehaza vahe'mota tusi tamagazegu nehuta kepri hugahaze. Na'ankure Anumzamo'a naneke tamirera kenona huoramigahie. 8 Hianagi Ra Anumzamofo Avamumo'a nagripi emani viteno hankavea nemamie. Ana nehuno fatgo avu'ava zane fatgoma huno refkoma hu avu'avazanena naza hige'na kena antahina nehue. Ana nehuno nazeri hankanavetige'na Israeli vahe'motama keontahi avu'ava zama nehaza zanku'ene kumi tamigura, korora osu'na huama nehue. 9 Israeli vahe'mokizmi kva vahe'mota tamagesa

ante'nete ama nanekea antahiho. Fatgoma huno refko'ma
hu avu'ava zankura tamavesra nehutma, fatgo avu'ava zana
netretma akrache karahe avu'avaza nehaza vahe mani'naze.

10 Hagi Jerusalemi kuma'ma eri agafama huta kinte'nazana,
vahe'ma ahe fri avu'ava zamo'ene havi avu'ava zamo avite'nea
agofetu kinte'naze. **11** Tamagra kva vahe'mota keagama refko'ma
hazana, masavema hu'za ramiza zago e'nerita, keaga refkoa
nehaze. Tamagra pristi vahe'motane kasnampa vahe'motanena
zagoma eritetage kasnampa nanekea nehuta vahera rempia
hunezmize. Ana nehutma makamota huta Ra Anumzamo'a
tagrane magoka mani'neankino hazenke zamo'a tagritera
omegahie huta nehaze. **12** E'ina hu'negu kva vahe'motane,
pristi vahe'motane kasnampa vahe'motanema hu'naza avu'ava
zamofo hazenkea Ra Anumzamo'a Jerusalemi kumamofo
agofetu anteno kumara eri haviza hanigeno, fragu vaziramino
kugusopamo'ma hiaza huno hihi huno marerigahie. Ana hanigeno
Saioni agonafima menima Anumzamofo mono noma me'nea
agonafina, zafa tanopamo hageno refitegahie.

4 Hagi henka mago kna ne-eankino ananknama efore'ma
hanigeno'a, menima Ra Anumzamofo mono noma me'nea
agonamo'a mago'a agonaramina zamagatereno onaga'a
me'neno, marerisa agona megahie. Ana hu'nesige'za
kokankokama ama mopafima mani'haza vahe'mo'za timo'ma
evuvavama nehiaza hu'za ana agonafi evava hugahaze.
2 Kokankokati'ma esaza vahe'mo'za amanage hugahaze.
Enketa Ra Anumzamofo agonafima Israeli vahe'mokizmi
Anumzamofo mono nompi vanunkeno, Agra'a avu'ava zana rempi
huramisigeta, Agri kante vano hanune hu'za hugahaze. Na'ankure
Ra Anumzamo'ma rempima huramisia kasegemo'a Saioni

agonafinti atiramino vuno eno nehanigeno, Agri nanekemo'a Jerusalemi kumapinti atiramigahie. 3 Anumzamo'a vahe'mokizmi nenekea refko huno knaza zamia e'nerino, hankave vahe'ma afete moparegama umani emanima hu'naza vahe'mo'zama ha'ma hunaku'ma hanazana eri amne hugahie. Ana hanige'za vahe'mo'za bainati kazinkno zamia rukuta huza mopama rekori azota tro nehu'za, karugru keve zamia ruguta huza zafama rosesaza kazi tro hugahaze. Mago kumamo'ma otino mago kuma'ma ha'ma hunentea zana, omanesigeno ha'ma hu avu'ava zama rempima nehaza zamo'enena omanegahie.

4 Ana hanigeno mago'mago vahe'mo'a agra'a krepimofo agafafine, fiki zafamofo agafafi manitere hugahie. Na'ankure mago vahe'mo'a eno eme zamazeri korora osugahie. Monafima mani'naza Sondia Vahe'mofo Ra Anumzamo ama ana nanekea huvempa nehie. 5 Maka ama mopafima nemaniza vahe'mo'za zamagra'a anumza amage antetere hugazanagi, Ra Anumzana Anumzantimofo amage anteta tagra vuvava hugahune. 6 Ra Anumzamo'a huama huno, Ana knafina Nagra agiama haviza hu'nesia vahe'ene, ru moparegama kinama ome hu'naza vahera zamazeri atru nehu'na, knazama zami'na zamazeri haviza huge'za zamasu zampima umani'naza vahe'enena ete zamazeri atru hugahue. 7 Hagi zamagama havizama hunege'za kama vuga'ma osu'naza vahe'ma osi'ama mani'naza nagara zamazeri atru hugahue. Ana nehu'na ru kumategama kinama ome hu'za mani'naza nagamokizmia zamazeri hanavetisuge'za hanave vahe fore hugahaze. Ana nehanage'na Ra Anumzamo'na Jerusalemi kumate mani'nena Nagrания kegava huzmante vava hugahie. 8 Hianagi kagra Jerusalemi kumamoka, Ra Anumzamofo vahe'mokizmi hankave

vihu kegina mani'nanankino, kinima maninka kegavama nehana hankavemo'ene hihamuka'amo'enena ete kagrite egahie. Ana hanigeno kinima mani anante anante'ma huno kegavama hu'zamo'a hentofa Jerusalemi kumanifi meno vugahie. **9**
Hianagi Jerusalemi kumamoka nagafare rankea hunka krafagea nehane? Kinima manino kagri'ma kegavama hugante vahera omani'nazafi? Knare antahintahima kaminno kazeri fatgoma hu vahera omani'nazafi? Hagi mago a'mo'ma mofavre ante'naku nehigeno atama negriankna huno katazamo kazeri anakinte'ne.
10 Jerusalemi kumapima nemaniza vahe'mota, mago a'mo'ma mofavre antenaku'ma higeno atama negrigeno omeru emeru nehuno karagi'ma riaza hiho. Na'ankure menina ran kumara atreta kama kokampi amate umanigahaze. Tamagra Babiloni moparega vuta kina ome hugahaze. Hianagi anantegatira Ra Anumzamo'a tamagu'vazino, tamagri ha' vahe'mokizami hankavefintira ete tamavregahie. **11** Hianagi menina ama knarer a rama'a kumapi vahe'mo'za eri tru hu'za hara huramantenaku nehu'za amanage hu'za nehaze. Jerusalemi kumara eri haviza huteta, havizama haniazana kesanune hu'za nehaze. **12**
Hianagi ana vahe'mo'za Ra Anumzamofo antahizamo'a inankna hu'nefi antahi amara nosaze. Anumzamo'a magopi zamazeri tru huteno, witima magopi erintete'za havereti refazafuma nepazankna hunaku antahintahia retro nehuno zamazeri atru nehianagi, zamagra anazana ke'za antahi'za nosaze. **13**
Jerusalemi kumapima nemaniza vahe'mota otita tamagri ha' vahe'ma mani'nazana ome zamaheta zamazeri havizantfa hiho huno Ra Anumzamo'a hu'ne. Na'ankure Nagra hankanavea tamisanugeno, tamagri hankavemo'a hankavenentake huno mago ainireti tro hu'naza pazivekna nehanigeno, tamajamo'a

bronsigna hu'nesanigeta, rama'a kumatamimpi vahera hara huzamanteta zamazeri havizantfa nehutma, havi kanteti'ma eri'naza feno zantamina eritma, maka ama mopama kegavama hu'noa Ra Anumzamo'na eme namigahaze.

5 Hianagi tamagra menina Jerusalemi kumapima nemaniza vahe'mota, sondia vahetamina zamazeri atru huta erinte fatgo hiho. Na'ankure ha' vahe'mo'za Jerusalemi kumara eme avazagi kanegize. Ana nehzanki'za Israeli kva vahe'mota kumpa kanonteti tamarametare rupro huramigahaze. **2** Hianagi Juda mopafima Efrata nagamokizmi kumatamima me'nefintira Betlehem kumamoka, kagra osi kumatfa me'hane. Hianagi Nagri nagi erino kagripinti Israeli vahe'mokizmia mago kva ne' efore hugahie. Anama fore hania kva ne'mofo agigo azankomo'za korapa mani'za e'naza nagaki'za, meninena naga zamia mani'naze. Ana hu'neankina makazana fore osu'negena korapa huhampri ante'noa nekino kva efore hugahie. **3** Ana hu'neankino Anumzamo'a Israeli vahera amefi huzamisige'za, ha' vahe'zamimo'za kegava huzmanteme ne-esageno eno, mago a'mo mofavrene hu'neno atafi manino ne-esia a'mo mofavrema antesania knare ehanatigahaze. Anama kasentesia ne'mofo naga'mo'za vu'za ru moparegama kinama ome hu'nesaregatira atre'za mopa zamirega Israeli ete e'za, nagazamine eme eri atru hugahaze. **4** Ana ne'mo'a kva efore huteno, Ra Anumzamofo hihamu hankavere'ene, Ra Anumzana agri Anumzamofo hankavenentake agifine vahe'a kegava huzmantegahie. Ana hanigeno mago zamo'a eno agri vahera eme zamazeri antria osugahie. Na'ankure maka ama mopafima kokankokama mani'naza vahe'mo'za agri hankavea ke'za antahiza nehu'za agi'a husga huntegahaze.

5 Ana ne'moke'za zamarimpa frua zamigahie. Hagi Asiria
vahe'mo'zama mopatifima efre'za, hankave vihutima tapage
hu'zama efresageta, 7ni'a kva vahe huhamparizamante
sanunke'za tagrira kegava hunerantesnageta, sondia vahete kva
vahera 8'a huhampari zamantegahune. **6** Hagi zamagra ana kva
vahe'mo'za hankaveti'za Asiria vahera bainati kazinteti hara ome
huzamagatere'za kegava hunezamante'za, Nimroti vahe'mokizmi
mopafima unefraza kantamimpinti ufre vagare'za bainati kazinteti
hara ome hu'za mopa erigahaze. Hagi Asiria vahe'mo'zama
isagma agatere'za tagri mopafima efrenaku'ma zamazatre
zamagatrema hu'za ne-esageno'a, tagri kini ne'mo'a taza huno
tagu vazigahie. **7** Hagi Israeli vahepinti'ma ha' vahe'mo'za
ozamahe zamatresage'za osi'a manisaza vahe'mo'za atre'za
ru moparega umani eman hugahaze. Ana hugahazanki'za,
nanterama ata ko'mo trazante'ene mopare runteankna nehu'za,
ko'mo trazante runteankna huza maka kaziga umani eman
hugahaze. Anazama haniana mago vahe'mo'a aze'origahiankino,
Ra Anumzamo'a Agra'a hankanevefi hugahie. **8** Hagi Jekopu
nagapinti'ma osi'a naga'ma zamatresage'za, kokankokama ru
vahepima umani emanima hanaza vahe'mo'za, zafa ta'nopafima
ruzahu ruzahu afi zagagafama mani'naza amu'nompima laioni
maniaza nehu'za, sipisipi afu'ene meme afu kevuma maniza
amu'nompi, hankavenentake hu'nea kasefa laionimo kva
vahe'zami omani'negeno zamagumpi tako ureno ana afutamima
zamaheno tagana taganu vaziaza hanige'za mago'a vahe'mo'za
zamaza osugahaze. **9** Tamagra Israeli vahe'mota maka ha'
vahetamina hara huzmanteta zamahe fanane huvagaregahaze.
10 Ra Anumzamo'a Israeli vahekura huno, Ana knafina tamagri
hosí afutamina zamahe frivaga nere'na, karisi taminena eri

haviza huvaga regahue hu'ne. 11 Ana nehu'na ranra kumatamina
eri haviza huvaga nere'na, ana kuma tamire'ma hankave
vihuramima hugaginazana tapage hu'na eri atre vaganere'na, 12
afa ha'ma nehaza avu'ava zana Nagra tamagripintira eri atre vaga
regahue. Ana hanugeno magore huno tamagri amunompina,
henkama fore hania zanku zagoma nereno havige kasnampa
nanekema nehia vhahera omanigahie. 13 Ana nehu'na havi
anumzamofo amema'ama zafare antreta tro'ma hunte'naza
zantamine, havere'ma havi anumzamofo amema'ama tro'ma
hunte'naza zantaminena eri atre vagaresanugeta, tamagra'a
tamazampinti'ma tro'ma hunte'nesaza zantera tamare'na reta
monora huontegahaze. 14 Ana nehu'na Asera havi anumzamofo
amema'ama zafare'ma antreta tro'ma hunte nazana erikasi atre
vaganere'na, ranra kuma taminena eri haviza huvaga nere'na,
15 Nagri nanekema antahino amage'ma ontisia kumapi vhahera
narimpa ahenezmante'na zamazeri haviza hugahue.

6 Ra Anumzamo'a amanage huno nehianki tamagesa ante so'e
hu'neta antahiho, Ranra agonaramine neonse agonaramimo'za
nentahisageta zamagri zamavufi naneketamia huama hihio. 2
Hagi menina agonaramimotane, ama mopamofo tra'amo kanena
Ra Anumzamo'ma keagama nehiana antahio. Na'ankure Ra
Anumzamo'a vahe'a keaga huzmantenaku nehiankino, Israeli
vahe'mo'zama hu'nesaza kefo zamavu zamava'za erinte ama
huno keaga huzamantegahie. 3 Anumzamo'a huno, vahe'nimota
Nagra naza mago havizana huneramante'na, na'a mago zana
hua zamo tamagrira tamazeri tamavesra hu'nefi Nagri kerera
nona huta nasamiho? 4 Isipi mopafima kazokazo eri'zama
enerita mani'nage'na Nagra ete tamagu'vazi'na tamavre'na
e'noe. Mosesema Aronima Miriamuma hu'na huzmantoge'za

kva huramante'za nevazageta zamage vu'haze. 5 Tamagra Nagri vahe'mota tamagesa nontahizafi? ko'ma Moapu kini ne' Balaki'ma, Beori nemofo Balamunku huno kazusi huzamanto huno nehigeno, Balamu'ma ana kazusi kema osu'no asomu kema huramante'neana ontahi nazafi? Sitimi kumate'ma mani nazareti'ma atreta Gilgali kumate vunaku'ma neazage'na, Nagra Ra Anumzamo'na eri fore'ma hu'noa kaguva zankura tamagera okaniho. E'i ana zantamima tamaveri'ma hu'noana, Ra Anumzamo'na fatgo navu'nava'za keama hihogu anara hu'noe. 6 Anante Maika'a huno, e'ina'ma hu'nea zamofo nona'a, nagra Ra Anumzamofo avugama eme kepri hu'na mono'ma hunte'naku'ma esanu'na, na'a eri'nena ofa eme huntegahue? Mago kafu hu'nesania ve bulimakao afu anenta azerina kresramnavu ofa eme huntegahufi? 7 Nagra 1,000ni'a ve sipisipi afu'ma ahe'na ofama hunente'na, 10tauseni'a kavofima olivi masavema taginte'na ofa eme amisua zankura Anumzamo'a musena hunantegahifi? Ana nehu'na nagrama kasentesua agonesa mofavre'nima ahena kumi'nimofo nona hu'na ofa hugahufi? I'o anara osugahue. 8 Ra Anumzamo'a knare avu'ava zama hanaza zana ko tamasami'neankino, Agri'ma ave'nesiana, fatgo avu'ava zanke nehuta, vahe'ma asunkuma hunte avu'avazanku tamavenesita, tamagri Anumzamofo avugama tamavufgama anteramita mani avu'ava zanku ave'nesie. 9 Jerusalemi ran kumapima nemaniza vahe'motagura Ra Anumzamo'a amanage huno nehianki antahihi. Tamagrama knare antahi'zane vahe'ma mani'naku'ma hanuta, Ra Anumzamofo koro hunenteta, Agri agoraga manihi. Tamagri'ma tamazeri fatgoma hania vahera ko huhampri ante'neanki, anazankura antahintahi nehuta anazama huhampri ante'nemofo nanekegura tamagesa anteta antahihi.

10 Hagi kefo avu'ava zama nehaza vahe'mo'za havigereti fenozana nozmifina eri avinete'za, witima sigerire erinte'za nege'za zagore'ma netrazana, osi'a witiagi ra zagore netrage'na, e'i ana avu'avazamigura Nagrira nave'nosie. **11** Mago vahemo'ma havigema huno vahe'ma azeri havia hu kazigati'ma, kruna sigerima nehania vahe'mofo kumira Nagra atre ontegahue. **12** Feno vahe'ma Jerusalemi ran kumapima nemaniza vahe'mota, zamunte omane vahe'mokizmi zama erinakura, kazigazi huta hanareta e'nerize. Ana nehazageno maka ana kumapima nemaniza vahe'mokizmi zamagipina havigemo'ene, vahe'ma zamazeri havizama hu' nanekemo avite'ne. **13** E'ina hu'negu Nagra menina agafa hu'na tamagri kumimofo nona'a tamazeri haviza hunaku nehue. **14** Tamagra ne'zana negahazanagi tamura osugahie. Nontamifina fenozana eri tru hugahazanagi, ana zantamimo'a tamagranena mevava osugahie. Na'ankure eri atruma hanaza feno zantamina ha' vahe zamatre sanuge'za e'za ha' eme huramante'za eri'za vugahaze. **15** Tamagra hoza erita antegahazanagi, ne'zama'a vasageta onegahaze. Olivi zafamofo raga'a tagita regatati hugahazanagi, tamavufgare'ma fresaza masavena rama'a e'origahaze. Grepimofo raga'a tagita regatiti hugahazanagi, anampintira tima'a erita waini tina trora huta onegahaze. **16** Hagi havi avu'ava'ene kini ne' Omri'ma ante'nea kasegege tamagra amagera nenteta, kefo avu'ava'ene kini ne' Ahapu avu'ava'za amagera nentaze. Ana nehazanki'na Nagra tamagrira tamazeri haviza hanuge'za, vahe'mo'za neramage'za zamefi hunerami'za, kiza zokago ke huramantesnageta tamagazegu hugahaze.

7 Nagra tusi nasunku hue. Mago vahe'mo agategeno zafa raga ragino nenaku viana, magore hu'za otare'za maka tagi

hana hu'nazageno, anampintira grepio fiki ragama tagino oneno
agaku'ma nehiaza hu'noe. 2 Anumzamofoma zamagu'areti'ma
hu'za amage'ma nentaza vahera ama mopafina omanizageno,
fatgo zamavu'zmavama nehaza vahera omanitfa hu'naze. Hagi
maka vahe'mo'za havigege nehu'za vahe'ma zamahe'za korama
eri tagi zankuke nehu'za, zamafu zamagnana zamahe nefri'za
vaheke mani'naze. 3 Ana vahe'mokizmi zamazamo'a kefo avu'ava
zama hu' zanteke knarera hu'ne. Gamani eri'za vahemo'zane
keagama refko'ma nehaza vahe'mo'za masavema hu'za zagoma
zamizage'za eri'zana e'nerize. Ana nehazage'za zamagima
me'nea vahe'mo'za, zamagr'i'ma zamave'nesia zankuke nenekea
nehu'za fatgoma huno refkohu avu'ava zana eri rukrahekrahu
nehaze. 4 Knare vahe'mo'za ave've trazankna nehazage'za, fatgo
avu'ava'ma nehaza vahe'mo'za ave've trazana agatere'za ha'
zankna hu'naze. Hianagi tamagr'i'ma keagama huramantesania
knamo'a hago eankino, tamagrira tamazeri haviza nehanigeta
neginagi hugahaze. 5 E'ina hu'negu tavaonka'are'ma nemanisia
vahe'ene, roneka'ane, akamofonena knare hu'naze hunka antahi
nezaminka oku nanekenena huamara hunka ozamasamio.
6 Hagi ananknafina ve mofavremo'a otino nefa arimpa eri
haviza nehanigeno, mofa'mo'a otino nererana ha' renente
sanigeno, zahufa amo'a otino a' nenoferona ha' rentegahie.
Ana hugahiankino kagri'ma ha'ma regantesania vahera fatgo
huno kagri nagapi mani'ne. 7 Hianagi nagri'ma nazama hanigu
Ra Anumzamofonteke navua nentoe. Anumzamo'ma nagri'ma
nagu'vazisinigu hu'na Agrikuke avega antete'na manigahue.
Ana hu'neankino nagri Anumzamo'a antahinamigahie. 8 Nagri
ha' vahe'motama knafima mani'nenugeta nenageta musena
osiho. Na'ankure nagra tanafa hu'na masegahuanagi ete

otigahue. Nagra hanizampina manigahuanagi, Ra Anumzamo
nagri tavira mani'neno remsa hunantegahie. **9** Nagra Ra
Anumzamofo avurera kumi hu'noankino, knazama namin
nazeri fatgoma nehanige'na, navufga anterami'na manigahue.
Hianagi osi'a knafi arimpa ahenanteteno, ete nagri kaziga
anteno nagri ha' vahera knama nami'za nazeri havizama hu'naza
zantera nona huzmantegahie. Ana huteno Ra Anumzamo'a
navareno tavite vanige'na, fatgo avu'ava zama'a keama hugahue.
10 Ana'ma hanige'za nagri ha' vahe'mo'zama nege'za Ra
Anumzamo'a agri kaziga mani'ne hu'za nehu'za, Ra Anumzana
kagri Anumzamo'a iga mani'ne hu'zama hu'naza nanekegura
zamagazegu hugahaze. Nagri ha' vahe'mo'zama havizama
hanaza zana, nagra navufinti zamagegahue. Ana hugahazankino
kampi hapa me'nege'za vahe'mo'za rehapa kopa hu'za vano
hazaza hu'za haviza hugahaze. **11** Ana huga hiankino ana
knama esanigeta, Israeli vahe'mota ranra kuma tamimofo kegina
ete eri kasefa huta nehuta, mopa tamimofo isa kana erinte
ra huta vuta eta hugahaze. **12** Ana knafima tamagritegama
vahe'ma esazana, Asiria mopareti agafa huteno vuno, Isipi
mopare uhanatiteno, Isipi moparetira vuvava huno Yufretisi
ran tima me'nea moparega vanigeno, mago hagerinteti vuno
mago hagerinkenare vanigeno, mago agonaregati vuno mago
agonaregama nemaniza vahe'mo'zanena tamagritega egahaze.
13 Hianagi ana vahe'mokizmi mopafina vahera omanifa hanigeno,
ka'ma koka fore hugahie. Na'ankure ana mopafima mani'naza
vahe'mo'zama hu'naza kefo avu'ava zanku anara hugahie. **14**
Ra Anumzamoka Nagri vahere hunka huhampari zamante'nana
vaheka'arera, sipisipi kva vahe kna hunka zafa tanopafima
menima mani'naza vaheka'a kegava huzamanto. Hagi kagra

zamatrege'za ko'ma hu'nazaza hu'za, Basani mopane Gileati
mopama afovage'ma hu'nea mopafi hoza ante'za nene'za maniho.

15 Ana nanekerera Ra Anumzamo'a tamage huno nehuno,
korapa'ma Isipi mopafima kinama hu'neta kazokazo eri'zama
enerita mani'nazage'na, Nagra hankavenentake kaguva zantami
eri fore nehu'na, tamavre'na atirami'noa kna hu'na, tamagratera
hanave kaguvaza eri fore hugahue. **16** Ra Anumzamo'ma
tamagrite'ma eri fore'ma hania avu'ava zama, ama mopafi
vahe'mo'zama negesageno'a hankave zamimo'a amne zankna
nehanige'za, zamagazegu nehu'za antahintahi hakare hugahaze.
Ana nehu'za keaga osu zamagitera rehamunenki'za, negi vahe
maniaza hugahaze. **17** Ana nehu'za osifa'vemo hiaza hu'za
zamasaguregati regraro ahe'za vano nehu'za, kugusopa nene'za
fra'ma ki'za nemaniza kumapinti'ma atirami'za Ra Anumzana
tagri Anumzamofo avure'ma eme otisanu'za, tusi koro nehu'za
zamahirahiku hugahaze. **18** Anumzamoka magora kagrikna
anumzana omani'ne, Ana hu'neankino kagri vahepinti'ma osi'a
naga'ma ozamahe zamatrage zama mani'naza nagamokizmi
kumi'ma atre zamantega anumzana omani'ne. Anumzamoka
kagrira krimpa neheanagi ana zamo'a za'zatera mevava
hunora novie. Na'ankure Kagra muse hunerantenka mevava
kavesi zanteti kavesi'nerantane. **19** Kagra mago'ene kasunkura
hunerantenka, tagri kumira erinka kagianu rehapatitenka, erinka
hagerimofona amefenkame ro'are mate vutregahane. **20** Kagra
korapa tagehe'i Abrahamune Jekopu kiznima huvempama
huznante'nana kante amage antenka, vagaoreno mevava kavesi
zana taveri hugahane.

Nahumu

1 Ama nanekea Ninive kumate'ma fore hania zanku Elkosi
kumateti kasnampa ne' Nahumuna Anumzamo ava'nagna zampi
eri averi humigeno keteno, ama avontafepina krente'ne. **2** Ra
Anumzana agra kanive nereno nona hu Anumza mani'ne. Ra
Anumzamo'a Agra tusi arimpa nehegeno nona nehie. Iza'zo
Ra Anumzamofoma ha'ma renentaza vahe'mokizmia Agra
arimpa ahenezmanteno nona nehie. Ana nehiankino Agri rimpa
ahe'zamo'a ha' vahe'arera meno vugahie. **3** Ra Anumzamo'a
ame huno arimpa noheanagi, Agrira tusi'a hankave'a me'ne. Ana
hu'neankino hazenkema nehaza vahera zamatrenige'za amanea
omanigahaze. Agra hankave'a zahopi erinte ama nehuno,
ununkopi erinte ama nehie. Ana nehigeno agiafinti'ma evia
kugusopamo'a hampona negie. **4** Anumzamo'a hagerimofonku
hunteno, hagege huo huno'ma higeno'a, hagerimo'a hagege
nehanageno, mika tintamina eri nerane. Ana nehigeno Basani
mopafine, Kameli agonaramima masave tretre'ma hu'nea
mopafima me'nea traza'mo'za hagege nehanageno, Lebanoni
mopafima zagasefage zafa tanopama me'nea tanopamo'a
hagege huno harari nehie. **5** Anumzamofo avuga agonaramimo'za
torevare nehazageno, ne'onse agonaramimo'za mara'mra
hu'za mekineramize. Ana nehigeno ama mopafima mani'naza
vahe'mo'zane, ama mopamo'enena Agri avuga zamahirahiku
nehaze. **6** Ana hu'neankino Anumzamofo arimpahe zama
esanigeno'a, iza oti hankavetino nemanisigeno, iza knarera
hu'nesia vahemo rimpa ahe'zana oti hankavetineno erino
vugahie? Anumzamofo arimpa ahe'zamo'a teve nefamo'ma hiaza
huno ruhagana hagana huno herafiramigahie. Ana nehanigeno
Agrama kama ne-e sanigeno'a haveramimo'a tamana tamanu

huno fuzauperamigahie. 7 Ra Anumzamo'a knare hu'neankino, tamagerfa huno knazama esania knafina hankave vihugna hurantegahie. Agrite'ma amuhama nehu'za taza hugahiema hu'za nehaza vahera Agra zamageno antahino hu'neankino, knazama esania knafina Agra kegava hunezamante. 8 Hianagi Agri'ma ha'ma renentaza vahera, tima hageno eaza huno eme ruharafi huno vugahie. Ana nehuno ha' vah'e'a zamarotago hanige'za hanimpi ufregahaze. 9 Tamagra Anumzamofoma ha'ma renentaza vah'e'mota, Agri'ma ha'ma rentenaku'ma mago nanekema anakisazana, tamagrira tare ragufa zupa anara osuno, magoke zupage ame huno tamagrira tamazeri haviza hanigeta fanane hugahaze. 10 Zamagra ave'ave trazamo zamazeri traka hiaza nehuta, aka ti ne'nea vah'e'mo hiaza huta traka taraku nehanageno, hagege ave've traza harafi hu'za tevefi krazankna huno tamazeri fanane hugahie. 11 Ninive kumamofo agu'afintira mago vah'e eama huno, Ra Anumzamofa avure'ma havi avu'ava zama hu' antahintahia retro nehuno kefo antahi'zana nezamie. 12 Ra Anumzamo'a amanage huno Israeli vah'e'motagura nehie, Asiria vahera rama'a vah'e maniza hankavenentake vah'e mani'nazanagi zamagra haviza hu'za fanane hugahaze. Nagri vah'e'mota kora tamazeri haviza hu'noane. Hianagi menina mago'enena tamazeri havizana osugahue. 13 Asiria vah'e'mo'zama tamagri tamanankempima karenamare zafama eri rusima hunte nazana eri'na ru tamana hunetre'na, seni nofiteti'ma kinama rezamante nazana rukano hutregahue. 14 Hanki Ra Anumzamo'a Asiria vah'e'ma Ninive kumapima nemaniza vahekura amanage hu'ne. Tamagri tamagima eri'za manisnaza mofavre nagara, mago'enena omanitfa hugahaze. Tamagramma mono'ma hunentaza havi anumzaramimofo mono

nontamimpima havi anumzamofo amema'aramima ante'nazana
eri haviza huvagaregahue. Tamagra omanita frita vanagu
matimati tamina retro huneramantoe. Na'ankure tamagra kefo
vahetfa mani'neta ama mopafina manigara osu'naze. **15**
Tamagra Juda vahe'mota keho, knare musenkema erinoma
ne-ea vahe'mo'a agonaramintegati ne-e. Agra arimpa fru
huno mani zamofo naneke erino ne-e. Hanki ne'zama kreta
neneta musenkasema nehuta Anumzamofoma mono hunte
knaramima esanigeta, ana knarera monora nehuta, nazano
Anumzamofo amigahune hutama huvempama hu'nesaza zana
amiho. Ana'ma hanage'za tamagri ha' vahe'ma kefo avu'ava zama
nehaza vahe'mo'za mago'enena mopatamia eme e'origahaze.
Na'ankure Anumzamo'a tamagri ha' vahera ko zamazeri haviza
huvagare'ne.

2 Ninive kumamoka kagri'ma eme ha'ma huganteno kahe
panini'ma hania vahera hago ne-e. Ana nehigu kuma'ma
kegavama hanaza vahera huzmantege'za kumamofo vihu
keginare marine'za, ha' vahe'ma esnaza kantega zamavua
antene'za kegava hiho. Ana nehanageta sondia vahera zamazeri
retrotra nehuta hankavetita hara hiho. **2** Ha' vahe'mo'za kora
Israeli vahera hara eme huzamante'za maka zana eri haviza
nehu'za waini hoza zaminena eri haviza hu'nazane. Hianagi
menina Ra Anumzamo'a Israeli vahera ete zamazeri so'e nehuno,
ko'ma hu'neaza huno ra zamagi zami'naku nehie. **3** Hankave
sondia vahe'mo'zama ha'ma eme huramante'naku'ma esazana
koranke hankorami eri'ne'za, koranke kukena antani'nesaza
vahe'mo'za egahaze. Hanki ana vahe'mokizmi karisimofo
ainiretira zamagama neresageno'a tevemo'ma nehiaza huno
rughanani nehanige'za egahaze. Ana nehanage'za sondia

vahe'mo'za karugaru kevezamia erintesga hanageno tevesesaza
nemesanige'za egahaze. 4 Rankumamofo amu'nompima ne'onse
kantamima me'nefine, kumamofo amunompima kankamuma
me'nege'za vahe'ma atruma nehazafinena, sondia vahe'mo'za
karisifi mani'neza ame hu'za rugitagi'za vu'za e'za hugahaze.
E'inama hanaza zamo'a kopasi'namo ruganani huteno, tavi tagi
vazu huno vuno eno hiaza hugahaze. 5 Kini ne'mo'a eri'za
vahe'a huzamantenige'za ame hu'za vunaku hanazanagi, tanafa
hu'za masegahaze. Ana'ma nehu'za ame hu'za kumamofo vihu
keginare vu'za, fra'ma ki'za manine'za ha'ma hanaza kumara retro
hugahaze. 6 Rantimofo kahana ahenagisigeno, ana timo'a kini
ne'mofo nonkumara emeri haviza hugahie. 7 Ninive kumapima
nemaniza vahera zamavare'za kina ome huzmanteho huno kea ko
hunte'ne. Anama hanage'za zamagazegu nehanage'za kazokazo
eri'zama e'neriza mofa'nemo'za zamimizare nemasagi'za, maho
namamo'ma nehiaza hu'za zamasunku nehu'za zavi krafa
hugahaze. 8 Ko'ma meno e'nea knafina Ninive kumamo'a mago
tirukna hu'neane. Hianagi menina ana kumapi vahe'mo'za atre'za
freza vu'za e'za hu'naze. Ana nehazageno mago vahe'mo'a
huno anante otiho! anante otiho! Huno hu'neanagi, magomo'e
huno ana kea ontahino rukrahera huno ome'neanki maka'moza
atre'za fre'naze. 9 Ha'ma eme huzamantaza vahe'mo'za
kezati'za, Ninive kumapina marerisa feno zantamimo'a aviteno
hamprigara osu'neanki rohu zamareta maka silva zagone
golinena eri vagareho hu'za hu'naze. 10 Ninive kumara ha'
vahe'mo'za eme rohu zamare'za maka zana eri havizantfa
hazageno, mago zana omanetfa hu'ne. Vahe'mokizmi tumo'mo'a
atanegeno zamarenamo'a zamahirahi re'ne. Ana nehazageno
hankave zamimo'a omanetfa nehige'za, zamanogu nehazageno

zamavugosamo'a korankifa ahene. **11** Kora Ninive kumara hankavenentake kuma me'neankino, ana kumapima mani'naza vahe'mo'za mago havegampi laionimo'za anenta'aramine manine'za, anampina ne'zana nene'za mago zankura korora nosu'za knare hu'za nemanizankna hu'neane. Hianagi menina ana kumamo'a iga vu'ne? **12** Kora Ninive kumapima nemaniza sondia vahe'mo'za hankavenentake hu'nazanki'za, laionimo zagagafa aheno anenta'arami eme ante hihi huzmantegeno, a' laionimo'za nemaniza havegampima zagagafamo aviteaza hu'za, hapinti zana eri'za eme eri hihi hu'naze. **13** Hankavenentake Ra Anumzana Monafi sondia vahe'mofo Anumzamo'a huno, Nagra Ninive kumamoka hara hugantenaku nehuankina karisiraminka'a tevefi hanavazi'na negresuge'za, ha' vahe'mo'za nehazaveraminka'a bainati kazinteti zamahe hana hugahaze. Ko'ma vahe'mokizmi feno zama ha'ma huzamagaterenka eri'nana knara hunka ru'enena e'origahane. Huzmantanke'za kema eri'za vu'za e'zama nehaza vahe'mo'zama, kema eri'za ha' vahete'ma vanazana, ko'ma nehazaza hu'za kezmia ontahigahaze.

3 Ninive rankumapima nemaniza vahe'mota kva hiho. Tamagra havige nehuta vahe zamahe nefriza vahe mani'naze. Ana nehuta hapinti vahe feno zantamina rohu zamareta Ninive kumapina eri ante avite'naze. **2** Ha' vahe'mokizmi sondia vahe'mo'za karisi zamifi mani'neza hosi afu zamima sefu'ma rumeki nezami'zama neazageno neria agasasane, karisi zamimofo tazamo'ma havema refaragu'ma vazino ne-ea zamofo agasasane, hosi afuzamimo'zama vagari vagarima hu'za esaza zamofo zamagasasankea antahigahaze. **3** Ha' vahe'mo'za hosi agumpi manine'za taragi'za ne-eazageno, bainati kazi zamireti'ene karugaru keve zamiretira ru marave marave nehanige'za

egahaze. Ana nehu'za rama'a vahe eme zamahe frisnageno, frisaza vahe'mokizmi zamavufagamo'a hihi huno amne zankna huno hamprigara osugahie. Ana hanige'za vahe'mo'za zamaga ana zamagofetu re'za vano nehu'za tanafara hugahaze. 4 E'i ana zama fore'ma haniana na'ankure, Ninive kumamo'a mago knare agi agonane monko a'mo'ma safeza huno vene'nema zamavare agrarega atreankna huno, maka kumatamimpi vahera zamazeri savari hige'za eme monko avu'ava zana nehazageno, safe'zama nehia zantamina rempi huzamige'za ana avu'ava hu'nazagu anara hugahie. 5 Hankavenentake Ra Anumzamo'a amanage huno nehie, Ninive kumamoka hara hugante'na siketi kenaka'a erisga hu'na kavugosa refitenunka kavufga kavapako oti'nesanke'za maka ama mopafi vahe'mo'za negagesagenka tusi kagazegu hugahane. 6 Nagra himna vu'nesania tetemuteti kazeri haviza hugahue. Nagrama kazeri havizama hanua zana maka ama mopafi vahe'mo'za negesu'za kiza zokago ke hugantegahaze. 7 Ana maka vahe'mo'zama kagri'ma kagesaza vahe'mo'za, zamagia zamefigati reme reme nevu'za amanage hugahaze. Ninive kumamo'a haviza huno kugusopafi maseanagi, iza eno zavira eme atenentesigeno, iza eno eme asunkura hunenteno azeri so'ea huntegahie? hu'za hugahaze. 8 Naeli ran timofo ankenaregama Tebesi kumamo'ma knare'ma huno me'negeno'ma, timo'ma kagintegeno'ma me'nea kumara kagra Ninive kumamoka rugaterenka knarera hu'nampi? Ana kumamofona hagerimo vihugnara huntegeno timo'a maka asoparega keginagna huno mekaginte'neno agura nevazie. 9 Itiopia mopafi vahe'mo'zane, Isipi mopafi vahe'mo'za Tebesi rankumapi vahera ozmatre zamazahu vava nehaze. Ana nehakeno ana knafinena Puti mopafi vahe'mo'zane Libia mopafi

vahe'mo'za zamagranena Tebesi mopafi vahera zamaza huke
hara hu'na'e. **10** Hianagi Tebesi rankumara ha' vahe'mo'za
eme ha' hunte'za eri haviza nehu'za vahera zamavare'za kuma
zamirega kina ome huzmante'naze. Ne'onse mofavre naga
zaminena zamazerite'za maka kumamofo kantu hanafi ruragati'za
zamahe'naze. Sondia vahe'mo'za satu zokago re'za nege'za,
lsipi kamanimofo eri'za vahera refko hu'za eri'za vahe'zami
zamare'naze. Ana nehu'za Tebesi rankuma'ma kvama hu'naza
kva vahetamina seninofiteti kina huzmante'naze. **11** Ninive
kumamoka, kagranena aka ti ne'naza vahe'mo'za neginagi
nehzankna hugahane. Ana nehunka ha' vahe'mokizmigu koro
nehunka frakisana kumaku hakegahane. **12** Kagri'ma ha'ma
eme hugantenaza vahe'mo'za, kumamofo vihu keginaka'a
eme tapage hutrenageno, mago vahe'mo fiki zafa eri tagosi
tagosi nehigeno, ese'ma afure'nea fiki ragamo evuramino
vahe agipi freankna hugahie. **13** Kagri sondia vahe'mokizmia,
a'nemofoma hiaza huno hankave zamia omane amane hanige'za
mago zana osugahaze. Kagri mopafima ha' vahe'mo'zama
efresaza kamo'a ruhagro hugahie. Ran kumamofo kafante'ma
eri rusima nehaza zafa tevemo teno eri hana hugahie. **14** Kagri
ha' vahe'mo'zama kuma'ma eme avazagi kagi sagenka'ma
kumamofo agu'afima mani'nenka'ma nesana zana tina afinka
retro huo. Ana nehunka kumamofo vihu kegina eri hankavetio.
Higo mopa kafinka eri hapa hapa hunka simentia tro hutenga,
kuma kegina hunka eri hankavetio. **15** Hianagi Ninive kumamoka
kagria tevemo teno eri hana nehanige'za, ha' vahe'mo'za
bainati kazinteti vahera eme zamahe hana hugahaze. Ha'
vahe'mo'za kenu'mo traza neno eri fananema hiaza hu'za
tamagrira tamahe vaga nere'za, nazamo'ma zamavugama evania

zanena kege'za otre ne'za eri fanane hugahaze. Tamagra kora
kenu'mo hiaza huta rama'a vahe fore huta eri hakare hu'nazanagi,
tamagrama freta ome tamagu'ma vazisaza kana omanetfa
hugahie! **16** Monafi hanafi'ma me'neama'a rugatere'za zagorema
nanazama atre'za eri'zama nehaza vahe'mo'za tamagripina
kora mani'nazane. Hianagi kenumo'za zafani'na vatari hana
hute'za, zamageko'na rutare'za hare'za frazankna hugahaze. **17**
Tamagri sondia vahe'mo'zane, kva vahe'mo'za zamagranena
kenukna hu'nazanki'za, zasi ko'matia knafima kenumo'zama
magopi hare'za e'za keginare eme rukamarazankna nehaze.
Hianagi zagma hanatige'za ana kenu tamimo'za hare'za
frazankna hu'za, inantego frazage'za vahe'mo'za nozamagaze.
18 Asiria kini ne'moka, sipisipi afute kva vahekamo'zane, eri'za
vahekamo'zanena zamavu mase'naze. Ana hu'nazage'za sipisipi
afute kva vahe omani'negeno sipisipi afutamimo agona agona
panani huno freankna hu'za, kagri vahe'mo'za panani hu'za ufre
efre hu'naze. Ana hu'nazankino mago vahe'mo zamazeri tru
hugara osu'ne. **19** Kagrama hazenkema eri'nana zamo'a, mago
namunkna hu'neankino marasinimo'a kazeri kanamaregara
osu'ne. Kagrama hazenkema erina nanekema vahe'mo'zama
antahisu'za, muse nehu'za zamaza ahegahaze. Na'ankure
kagra mago vahera otre havi avu'ava zama huzamante vavama
hu'nana zanku anara hugahaze.

Havakaki

1 Ama nanekea kasnampa ne' Habakukuma ava'nagna zampi Anumzamo eri averi higeno ke'nea zamofo naneke. **2** Ra Anumzamoka kagrama nazama hananegura za'zate krafa hu'na e'noe. Hianagi kagra antahi onami'nane. Kagritega krafa hu'na hazenke zamo'a avite hu'na huanagi, kagra enka eme nagura ovazi'nane. **3** Na'a agafare havi avu'ava zana eri naveri hanke'na negoe? Ana nehunka nagafare natranke'na kefo avu'ava zana negoe? Navuma keganti kegamama huana, hazenke zamo'ene kefo avu'ava zamoke avite'na'e. **4** Hanki kasegemofona hankave'a omanegeno, keagafima nanekema fatgoma huno refko hu so'e huno keteno miza agima ahente avu'ava zamo'enena ome haviza hie. Havi avu'ava zama nehaza vahe'mo'za, fatgo avu'ava zama nehaza vahera ru zamagatere'za rama'a vahe mani'naze. E'i ana agafare fatgoma huno refkohu avu'ava zana eri rukrahe krahu nehaze. **5** Hagi Ra Anumzamo'a kenona huno, Ama mopafima me'nea kumatamimpima keganti kegama hunka kavuma kesanunka antri hugahane. Na'ankure menima kagrama mani'nana kna'afina mago'a zana tro nehuankinka, ana zanku'ma kasamisnagenka antahi ozamigahane. (Aposolo 13:41) **6** Hagi keho, Babiloni vahera kea ontahi hazenke vahe mani'nazanki'na zamazeri hankavetisuge'za ama mopafina maka kaziga vano nehu'za, ru vahe'mokizmi nonkumara zamahe'za hanaregahaze. **7** Ana Babiloni vahekura maka vahe'mo'za tusi koro hunezmante'za zmagogogou nehaza vahe mani'naze. Ana nehu'za mago kasegea ovariri'za zamagra'a kasegere oti vahe mani'naze. **8** Ana vahe'mokizmi hosi afu tamimo'za zamagama nerazana, lepatimoza'ma zamagama nerazama'a agatere'za zamaga neraze. Ana nehu'za afi kramo'ma kenagema

segeno ha'ma hunaku'ma erisivazino vanoma nehiam'a,
rugatere'za kafona nente'za hara nehaza vahe mani'naze.
Hagi hosi agumpima mani'neza ha'ma nehaza vahe'mo'za
tumpamo ne'zama'a aheno nenaku afeteti erifafukino tamino
azeriaza hu'za afeteti zamaga neraza vahe mani'naze. **9**
Ana vahe'mokizmi antahi'zamo'a, ha' huno maka zama eri
haviza hu'areke antahintahia nehu'za neaze. Ka'ma kokampi
zahomo'ma hiaza hu'za akasi hu'za egota nehu'za, kahepama
magopi harafi huno eri atru hiankna hu'za, vahera zamavare'za
kina ome hunezmantaza vahe egahaze. **10** Ana vahe'mo'za
kini vahekura zokagoke hunezmante'za, kva vahe'mokizmia
zamagi'za regahaze. Hankave vihu keginama hugagi'naza ranra
kumakura kiza nere'za, vihu kegina zamirera fegiati mopa
kate'za ante hihi hu'za mareri'za hara huzmante'za kumara
e'neriza vahe egahaze. **11** Zaho'mo hiaza hu'za ame hu'za e'za
mago kumara eri haviza nehu'za, mago kumate vu'za ana ome
nehaza vaheki'za, zamagra hankavegu'ma antahizageno anumza
asenezmantea vahe mani'naze. Hianagi zamagra ko havi avu'ava
hu'naza vahe mani'naze. **12** Ra Anumzana nagri Anumzana
Ruotage'ma hu'nana Anumzanimoka, kagra ofri mani vava
hunka neana Anumza mani'nane. Tamagerfa hunka tagrira tazeri
fanane hunakura nosane. Hagi ha' vahetia Kagra huhampari
zamantanke'za e'za tagrama hu'nona tavutava zantera mizama'a
eme tami'naze. Tagrama fra'ma kisuna haveti'moka, Kagra
Babiloni vahera huhampri zmantanke'za e'za tagrama hu'nona
kumimofo nona'a knazana eme tamiza tazeri fatgo hu'naze. **13**
Kagri kavumo'a agru hu'neankinka havi avu'ava zantera kavua
nonkane. Ana nehunka kumikura kavesra hunentane. Hagi na'a
agafare havi avu'ava zama nehu'za havigema nehaza vahera

zamaza nehane? Hagi havi avu'ava zama nehaza vahe'mo'zama e'za, fatgo zamavu zamava'ma nehaza vahe'ma eme zamazeri havizama nehzagenka, na'a higenka kea osu akohenka nemani'ne? 14 Kagra hagerimpi nozamegna hunka vahera tro nehunka, zamasaguregati'ma regraroma ahe'za vanoma nehaza zagaramimofo kva vahe'zamima omani'nazankna tagra nehumpi? 15 Hagi mago vahemo'ma huku atreno nozame avazu huge, kuko atreno nozamerami zamavazu hiaza hu'za Babiloni vahe'mo'za vahera zamavare'za kina ome huzmantete'za musenkasea nehaze. 16 Ana'ma hute'za kuko zamigu musena nehu'za, ana kukonte monora nehu'za Kresramana vunente'za, ama kukona mago anumzankino tagrira taza higeta feno vahe manita ne'zankura atupara nosune hu'za nehaze. 17 Kagra zamatresanke'za ana avu'ava zana hu'za vuvava hugahazafi? Ana nehu'za maka ama mopafi vahera zamasunkura huozamante zamazeri haviza huvava hu'za vugahazo?

2 Za'za nonte'ma mani'neza kumama kegava nehzankna noni'afi mareri'na nagra manine'na, Ra Anumzamo'ma keagama nasamisnigu avega ante'na mani'nena, inankna huno nagri narimpa knazartera kenona hunantegahifi kegahue. 2 Hagi anante Ra Anumzamo'a amanage huno nasami'ne, Nagrama ke nonama hugantesanua nanekea erinte ama hunka tafete krentetegeno, iza'o ana nanekema erino ome huama hunaku'ma hania vahe'mo'a, hampri so'e huno vahera zamasamino. 3 Ama ava'nagna zampima kaveri'ma hanua zama kesanana, henka fore haniaza kegahane. Henkama knamo'ma ome vagaresirega fore'ma hania avame'za kegahanankino, ana zamo'a eme nena raga regahie. Anazamo'ma ame huno eama'ma nosanigenka, antahintahi hakarea osunka akohenka manio. Na'ankure ana

zamo'ma esiana mago'zamo'a kana ase vaziontesigeno ame
huno efore hugahie. **4** Hagi avufga rama nehia vahera keho!
Agra'a hankavegu antahi amuhara nehuno, fatgo avu'ava zana
nosie. Hianagi fatgo avu'ava zama nehia vahe'mo'a amentintire
otigahie. (Rom 1:17, Galesia 3:11, Hibru 10:38) **5** Hanki
avufga rama nehia vahera waini timo'a azeri haviza nehigeno,
noma'afina mani so'ea nosie. Ana hu'neankino fri vahe kerimo
vahe eri nenakrianagi amu nosiankna huno maka kokankokama
mani'naza vahera, agra vahekna huno zamavare tru nehie. (**Sheol**
h7585) **6** Hianagi kokankokati'ma zamavare'zama kinama ome
huzmante'naza vahe'mo'za amanage hu'za kiza zokago kea ana
vahekura huzmantegahaze, tamagra musufaza erita antevineteta
feno vahe nemanizanki, kva hoho. Hianagi ama ana avu'ava zana
nama'a knafi huvava huta vugahaze? **7** Tamagrama vahe zama
nofi'ma hutma eri'naza vahe'mo'za antri hanazaza hu'za, tamagra
oti'neta tamahirahiku nehuta tamavumoke nehanage'za, maka
zama musufama erita eme ante'naza zantamina eme eri hana
hu'za vugahaze. **8** Na'ankure kokankokama nemaniza vahe'ma
tamagrama rohu'ma zamareta fenozamima eri'naza zantera,
nona hu'za osi'a naga'ma ofri mani'naza vahe'mo'za tamagri
fenozana eme rohu tamare'za erigahaze. Na'ankure tamagra
vahera zamaheta korana eri neragita, mopazmine kumazminena
eri haviza nehuta, ana mopafima maniza vahe'enena zamazeri
haviza hu'nazagu anara hugahaze. **9** Vahe'mokizmi fenozama
havigema huta erita nontamifima ante hihi nehutma, magozana
fore osanigeta knare huta manigahunema nehaza vahera kva
hoho. **10** Rama'a mopafi vahe zamaheta zamazeri haviza
hu'nagu, tamagri kefo tamavu tamavamo tamazeri haviza nehie.
11 Nomofo asoparegama anteta mareri'naza haveramimo'za

kezatiza keaga huneramante'nage'za, noma vazisgama hu'naza zafa ramimo'zanena ana nanekere zamavaharo hu'za keaga huramantegahaze. **12** Tamagra vahe'ma zamaheta korama eri taginetreta, hazenke avu'ava'ma nehuta, eri'naza zanteti'ma ran kuma'ma eri otita ki'naza vahe'mota haviza hugahazanki, kva hiho. **13** Na'ankure Monafi sondia vahe'mokizmi Ra Anumzamo'a huvempa huno, ama mopafima mani'naza vahe'mo'zama maraguzamati'za eri atru'ma nehaza feno zamo'a, tevemofo ne'za nesenigeno, ana maka vahe'mokizmi eri'zamo'a amne zankna hugahie. **14** Ra Anumzamofo hihamu hanavegu'ma keno antahinoma hu antahizamo'a, ama mopafina hagerimo'ma kankamuma'ama otreno ruvite'neaza huno ruvitiegahie. **15** Tamagri tvaonte'ma nemaniza vahe'ma waini tima zamizage'za nene'za neginagima nehazageta, oku zamavufagama kesagu'ma tutu huta waini tima zamizage'za nenaza vahe'mota, kva hiho. **16** Hagi menina ran tamagima e'neriza zana atreta tamagazegu nehuta, waini tina neneta neginagi nehuta, kukena tamia hate atresage'za, oku tamavufga tamagegahaze. Ra Anumzamo'a arimpa ahe'zana zuompafi azantmaga kaziga eri'neankino, tamagrite rukaha hutregahie. Ana hanigeno ran tamagima e'neriza zamo'a eri rukrahe hanigeta tamagazegu hugahaze. **17** Tamagrama Lebanoni vahe zafafinti'ma zafama antagi hana'ma huta e'naza zante, nona huno Anumzamo'a tamagri'enena tamazeri atregahie. Ana zafafima mani'naza afi zaga kafama zamazeri havizama hu'naza avamente, antri hanazaza huno knazamo'a tamagratera egahie. Tamagra rama'a vahe mopafina zamahe netreta, ran kuma zamifinena hazenkea eri hakare hu'naze. **18** Hagi vahemo'ma avako huno azanteti'ma tro hu'nea havi anumzamo'a, na'a mago knare

zana eri forera hunezamigeno, tevefima kre maramrama hu'za tro'ma hu'naza havi anumzamofo amema'amo'a na'a mago knare zana rempi hunezamie? Na'ante ana kegaga osu havi anumzantamima tro'ma hu'nea vahe'mo'a ana zantamintera amuhara nehie? **19** Zafare'ma antre'za tro'ma hu'naza havi anumzanku'ma huta, mase'hampintira otinka tagu'vazio nehuta, havere'ma hanagati'za tro'ma hu'nazageno keagama nosia havi anumzanku'ma huta, otinka rempi huramio hutama nehaza vahe'mota, haviza hugahazanki, kva hih. Ana anumzantamina golireti'ene silvareti'ene eri ano vazintageno, agu'afina asimura omane'neankino kazara osugahie. **20** Hianagi Ra Anumzamo'a ruotage'ma hu'nea mono noma'afi mani'neanki, maka ama mopafima kokankokama nemaniza vahe'mota Agri avuga kea osu akoheta maniho.

3 Ama'i kasnampa ne' Habakuku'ma zagamepi erinteno hu'nea nunamune. **2** Ra Anumzamoka kagri kagi kagenkea nentahi'na, vahemo'ma tro osuga zama tro hu'nana kavukva zankura tusiza hu'na koro hue. Amama mani'nona kafumofo agu'afina ete ana kavukva zana eri kasefa huge'za, tagri knafima mani'naza vahe'mo'za keho. Krimpa ahe'zamo'ma esania knafina kaganera kanioraminka kasunku huranto. **3** Anumzana ruotage'ma hu'nea Anumzamo'a Temani kazigati ne-eno, Parani agonaregati ne-ege'na ke'noe. Ana nehigeno monafina hihamu masa'amo refi'netegeno, ama mopafina maka kokankoka vahe'mo'za Anumzamofo agi ahentesga hu'naze. **4** Agri hihamu masa'amo'a zagemofo masamo'ma hiaza huno rumsa hu'ne. Ana nehigeno azampintira kopsi'namo ruganini huno vuno eno hu'ne. E'i hankave'ama fra'ma ki'nefinti anara hu'ne. **5** Vahe'ma azeri havizahu krimo Agri avuga nevigeno, ruzahu ruzahu krima

maka zantamima eri havizama nehia kri'mo Agri amagera
nevie. 6 Agrama kama nevifinti'ma oti fatgoma higeno'a,
mopamo'a imi e'nerie. Hagi Agrama amne avuma zamagea
zankura kokankokama me'nea kuma tamimpima nemaniza
vahe'mo'za antri nehaze. Korapa'ma me'za neaza agona
ramimo'za ankarise'za mopafi nemassage'za, vagaore mevava
ne'onse agonaramimo'za mopafi evurami'za rugahesa hu'naze.
Agrama vano nehia kamo'a korapa me'nea kankino, menina
me'neno, henka'anena mevava hugahie. 7 Kusani vahe'mokizmi
seli nontamimo'za ra hazenkefi me'nage'na nege'na, Midieni
vahe'mo'za tusi koro nehu'za zamahirahiku nehazage'na
zamage'noe. 8 Ra Anumzamoka ranra tintamina karimpa
ahezamantenka nezamasaginka, hagerinena eri kranto krantora
nehampi? Ama anazama fore'ma nehiana, Kagrama zamagu'ma
nevazina hosi afu ka'amofo agumpine, ha'ma hugatenerana
karisi agumpima maninka nevana zamo anara nehifi? 9 Kagra
atika'a erisga nehunka, kevemofo kupinti keveramina hefinka
eri'nane. Ana nehunka tiranteti mopa rugitagine'nane. 10
Agona ramimo'za Kagri'ma negage'za, momi'momi nehazageno,
timo'ma amutu'mutu huno hageno eneramigeno, hagerimo'a
kranto kranto huno tusi ageru neruno, hihi huno amunamu
zampi marenerie. 11 Kagra kevema ahe atranke'noma vuno
eno'ma nehiazamo'a kopasi'namo'ma nehiaza huno rumarave
huno teve tagi avazu huno vuno eno nehie. Ana'ma nehigeno'a
anami monafina zagemoe'ene ikamokea kaza osuke anante oti
fatgo hu'na'e. 12 Kagrina tusi karimpa nehegenka, kokankokama
nemaniza vahera karimpa ahezamantenka zamare ha'panetine.
13 Ana nehunka Kagrama masave fre zamantenka huhampari
zamante'nana vahe'ma zamagu vazinaku'ma nevunka, havi

avu'ava zama nehaza vahe'mokizmi kva vahera zamare
hana'hapa'netinka, zamasenireti'ma vuno zamagare'ma vu'nea
zaferinazamia maka avazuhu atre'nane. **14** Kagigagi zahomo'ma
hiaza hu'za tahe panani hunaku'ma erintaguma hu'za aza
harfa sondia vahe'mokizmi kva nera, agri kevereti asenifina
rerapone'nane. Zamagra muse nehu'za zamunte omane
nagara mago vahe'mo'a zamaza osanigeta zamahe hana
hugahune nehaza vahera zamagri kevereti nezmahane. **15**
Kagra hosi afutaminka'afi mani'enka hagerina rentarako
hunka nevankeno, hagerimo'a tusiza huno avune nente. **16**
Ama ana zantamimofo nanekema nentahugeno'a tusi nahirahi
neregeno, nagararemokea tore tore hu'na'e. Ana nehigeno
nagiamo'a nahirahi te'ne. Nagra ana knagura akohe'na avega
ante'na mani'nena negesugeno, tagri'ma eme tazeri havizama
hu'naza vahe'ma knazamo'ma zamazeri havizama hania zana
kegahue. **17** Hagi fiki zafamo'a amosrema'a aheontesigeno,
wainimo'a nofi'arera raga'a reontegahie. Ana nehanigeno olivi
zafamo'a raga renontesigeno, hozafi ne'zamo'enena nena
raga reontegahie. Sipisipi afutamimo'za nemaniza keginafina
nomanisageno, bulimakao afutamimo'za nozmifina omanitfa
hugahaze. **18** Ana hugahianagi nagra Ra Anumzamofona
husga hunente'na Anumzamo'ma nahokeno nagu'ma vazi'nea
zankura nagra musenkase hugahue. **19** Hankavenentake Ra
Anumzamo'a nagri hankaveni'a mani'ne. Dia afu'mofo agiamo'ma
hankavema ti'neaza huno nagri nagia eri hankavenetie. Ana
hu'neanki'na agona ramimpina amne vano vano hugahue. Ama
nunamu zagamera, zamamema huzante'ma ugotenoma nehia
vahe'mo'ma kitagna zavenarami neheno hu' zagamere.

Zefanaia

1 Ra Anumzamo'a ama nanekema Zefanaiaama ami'neana, Amoni nemofo Josia'ma Juda vahe kinima mani'nea knafi ami'ne. Hagi Zefanaia nef'a Kusiki, Kusi nef'a Gedaliaki, Gedalia nef'a Amariaki, Amaria nef'a Hezekaia'e. **2** Nagra ama mopamofo agofetu'ma me'nea zantamina maka eri harafi hutregahue huno Ra Anumzamo'a hu'ne. **3** Maka vahe'ene zagagafanena ruharafi hutre vaganere'na, anamifima hare'za vanoma nehaza namaramine, hagerimpi nozameraminena ruharafi hutre vagaregahue. Havi avu'ava zama nehaza vahera zamahe vagarete'na magopi zmamavufga'a erinte hihi hanuge'za tetemukna nehanagena, ama mopamofo agofetutira maka vahera zamahe vagaregahue huno Ra Anumzamo'a hu'ne. **4** Juda mopa'fima nemaniza vahete'ene Jerusalemi ran kumapima nemaniza vahetera nazana rusute'na zamazeri haviza hugahue. Bali havi anumzante'ma mono'ma hunentaza vahe'ma, ama ana mopa'afima osi'ama manisazama'a maka zamahe vaganere'na, ana havi anumzaraminte'ma pristi eri'zama e'neriza vahe'enena zamahe vagarenugeno zamagia omanegahie. **5** Ana vahe'mo'za nozamimofo agofetu mareri'za mani'ne'za, zager'e'ene ikante'ene ofuraminte'ene zamarena re'za monora hunezamantaze. Zamagra Ra Anumzamofo amage nentone nehu'za, Moleki havi anumzante monora nehaze. **6** Ko'ma Ra Anumzamo'na namage'ma antete'za natre'naza vahe'mo'za, kegavama hunezamante'na asomuma huzmante'sanugura nantahia nonkaze. **7** Hagi Ra Anumzamo'ma vahe'ma refko hunezamanteno keagama huzmantesania knamo'a hago kofta nehianki, Agri avurera keaga osu akoheta emanaho. Zgagafama aheno kresramnama viaza huno Ra Anumzamo'a, Agra vahe'a

zamahenaku trotra nehie. Ana nehuno zamagri'ma zamazeri havizama hanaza vahera ko zamagi hu'ne. **8** Ra Anumzamo'a huno, anama zamahe'nua kna knazupa, Juda vahe'mofo kva vahetamine, kini vahe'mokizmi mofavre naga'ene, ru vahe'mokizmi zamavu'zamavama nevaririza vahe'enena knazana zamina zamazeri haviza hugahue. **9** Megi'a vahe'mokizmi havi anumzante'ma mono'ma hunentaza vahe'ene vahe'mokizmi fenozama zamahe'za nehanare'za, havigema hu'za fenozama eri'za kva ne' zamimofo nompima eme nentaza vahe'enena ana zupa zamazeri haviza hugahue. **10** Ra Anumzamo'a huno ana zupa, ran kumamofona nozame kafanteti mago ran krafage hugahie. Ana hanigeno zamasunku'ma huza zavi'ma atesaza krafagemo'a ran kumapina vuno eno hugahie. Ana'ma nehanigeno'a agonaramimpintira ra agasasa neranigeta antahigahaze. **11** Maketi kumapima mani'naza vahe'mota tamazana kofita zaviteho. Na'ankure maka zama zagore'ma eme netraza vahe'ene zagoma rezahe'ma nehaza vahe'enena fanane hugahaze. **12** Ana knafina Jerusalemi kumapima hanima hu'nea ma'afima mani'nezama kumi avu'ava'ma nehu'za, oku'a nehune hu'za nehu'za zamagrama antahi'zana, Ra Anumzamo'a mago knare zano mago havizana osugahie hu'za nehaza vahe'mokizmia, ramu tavi'ni'a tagina hakre'na zamazeri haviza hugahue. **13** Zamagri fenozana vahe'mo'za eme agu'za neru'za, nozamia tapage hutregahaze. Ana hanage'za nozamia kasefa kigahazanagi, ana nontamimpina omasegahaze. Waini hoza antegahazanagi, raga'a tagi'za tima'a onegahaze. **14** Hagi Ra Anumzamo'ma vahe'ma keaga hunezamanteno refko'ma huzmantesania knamo'a hago kofta nehiankino, ame huno ana knamo'a efore hugahie. Ana knama efore'ma hania knazupa,

hankave sondia vahe'mo'za tusi zavi krafa hugahaze. **15** E'i ana kna Anumzamofo arimpa ahekna efore hugahiankino, vahe'mo'a hazenkezampi manino nomaniza mani so'ea nosanigeno, tusi'a hazenkeza fore hina maka zamo'a havizantfa nehanigeno, hanima haniana tusi hani huno rentrako hugahie. Ana nehanigeno hampomo'a kintrako hanigeno hanintiri hugahie. **16** Ana knafina ufe krafamo'a tusiza nehanigeno, sondia vahe'mo'za ibimo agazamo nehu'za erintagu hu'za hankave vihu kegina me'negeno, kuma kegava nehaza za'za nontamima me'nea ranra kumatamintega vugahaze. **17** Ra Anumzamo'a huno, Nagri navufima kumi'ma hu'nazagu hu'na hazenke zana atrenugenno eno eme tamazeri haviza hanigeta, zamavu suhu vahe'mo'zama nehzaza huta rege'rege huta vano hugahaze. Tamagri koramo'a kugusopafi tagi neramisanigeno, tamavufgamo'a mopafi me'neno kasrino rifagna huno hi'mna vugahie. **18** Ra Anumzamofo arimpa ahe' zamo'ma esania knazupa, silvane golinema ante'naza zamo'a tamagura ovazigahie. Na'ankure Anumzamofo arimpa ahe'zamo'a, tevegna huno ama mopa teno erihana hugahie. Tamagerfa huno, maka ama mopafima nemaniza vahe'mo'za, antri hanazaza huno zamahe vagaregahie.

2 Tamagaze zama omane Juda vahe'mota, tamagra magopi eme eritru hiho, eme eritru hiho. **2** Anumzamo'ma keagama huramantesiana knamo'ma ome'nesigeno, kagrama kagu'ama rukrahe'ma hanana knamo'ma witi honama zaho'mo ame huno eri hareno viaza huno ovanigeno, Ra Anumzamofo arimpa ahe'zama ome'nesire, **3** tamavufga eri anteramita nemanita, Ra Anumzamo'ma hihoma hianke'ma amage'ma nentaza vahe'mota Anumzamofonku hakeho. Fatgo avu'ava zana hankavetita nehuta, tamavufga anteramita maniho. Ana'ma

hanageno'a Anumzamofo arimpa he'zamo'ma esania knazupa, Agrama kegava huramantesigu'enena ontahi'naze. 4 Hagi Gaza kumapina vahera omanitfa hanageno Askeloni kumara maka eri havizantfa hanageno, Astoti kumapi vahera kinagama senkeno'a ha' vahe'mo'za e'za eme zamahe panini hanage'za nefresage'za, E kroni kumapi vahera trazama vati'netreaza hu'za maka zamahe vagaregahaze. 5 Hageri anke'nama nemaniza Kereti vahe'mota kva hiho. Na'ankure Ra Anumzamo'a Kenani mopafima nemaniza Filistia vahe'mota keaga huramanteno, tamazeri haviza hanigeta maka vahera omanita huza fanane hugahaze hu'ne. 6 Hagi hageri ankenaregama me'nea Filistia vahe mopafina, traza nehagesigeno, sipisipi afu'ma kegavama nehaza vahe'mokizmi nontamimo'ene sipisipi afutamimofo keginamo'ene anampina megahie. 7 Juda naga nofipinti vahe'ma osi'ama ofri manisaza vahe'mo'za anampina trazama nenaza afu'zamia kegava hu'za manigahaze. Ana nehu'za hanima hanige'za Askeloni vahe'mokizmi nompi umasesageno Ra Anumzana zamagri Anumzamo'a kegava hunezmanteno, zamazeri knare hugahie. Kumapinti vahe'mo'za atre'za fresageno azumateni'a nontamimpi eri nafa'a hu'za manigahaze. Na'ankure Juda vahe'mokizmi Anumzana Ra Anumzamo so'e avu'ava hune zamanteno, ete zamazeri knare nehanige'za makazampina knare hu'za manigahaze. 8 Hagi Ra Anumzamo'a huno, Moapu vhemo'zane Amoni vahe'mo'zama Nagri vahe'ma huhavizama hunezmante'za kiza zokago kema hunezmante'za, mopazmima zamazeri koro hu'za erinaku'ma nehaza zana Nagra ko antahi'noe. 9 Monafi sondia vahe'mofo Ra Anumzamo'a huno, Nagra kasefa hu'na mani'hoa Anumzana Israeli vahe'mokizmi Anumzamo'na tamage huanki'na, Moapu vahe'mo'za Sodomu vahe'mo'zama hu'nazaza

nehanage'za, Amoni vahera Gomora vahe'ma hu'noaza hu'na ozamatre maka zamazeri haviza hanugeno, anampina ave'ave trazamoke nehanigeno hagema kafiza eri'naza kerimoke'za hugahie. Nagri naga'ma osi'ama manisaza vahe'mo'za, ana vahe'mokizmi fenozana rohu zamare'za e'neriza, mopazmia eri nafa'a hugahaze. **10** Hagi Moapu vahe'mo'zane Amoni vahe'mo'zama zamavufaga rama hu'naza zamofo mizama'a erigahaze. Na'ankure zamagra Monafi sondia vahe'mokizmi Ra Anumzamofo vahera huhaviza hunezamante'za, kiza zokago ke huzamante'nagu anara hugahaze. **11** Ra Anumzamo'a maka ama mopafima me'nea havi anumzantamina eri haviza huvaga nereno, vahera zamazeri koro hugahie. Ana hanige'za kokankokama nemaniza vahe'mo'za mopazamire manitere hu'ne'za, Ra Anumzamofona monora huntegahaze. **12** Hagi Itiopia vahe'motanena Nagri bainati kazimo tamahe frigahie! **13** Ra Anumzamo'a azana rusuteno noti kazigama nemaniza vahera hara hunezamanteno, Asiria vahera zamazeri haviza hugahie. Ana nehuno ugagotama hu'nea Ninive kumara eri haviza hina, vahera omanisigeno ka'ma koka fore hugahie. **14** Hagi ana kumapina trazante afu'tamimo'za e'za anampina eme vano nehanageno, afi zagagafamo'za e'za anampina emanigahaze. Ana nehanage'za komutomo'za nontamimofo azeri hanaveti zafare umani emanı hu'ne'za krafa nehanageno, zamagerumo'a zaho'ma eri kafanteti atiramino evu evu hugahie. Faragu vaziramino hihima hania haveramimo, nomofo kafaramina rehiza hugahie. Ana nehanigeno noma vazisgama hu'nea sida zafaramimo'a amate megahie. **15** Ninive ran kumapima nemaniza vahe'mo'za kora tusi muse nehu'za zamavufaga erisga nehu'za, zamagrama antahi'zana mago zana tavatera fore osanigeta

knare huta manigahune hu'za antahi'naze. Zamagra hu'za mago kumamo'e huno tagri kuma knara osu'ne hu'za nehaza kumamo'agi menina evuramino haviza hige'za, afi zaga kfamo'za anampi eme nogi'za mani'naze. Ana hazage'za karankama evaza vahe'mo'za ana kuma'ma nege'za, kiza zokago ke hunente'za zamazana ruharakihariki hu'naze.

3 Jerusalemi kumapima nemaniza vahe'mota kva hiho, na'ankure ana kumapima nemaniza vahe'mota keontahi havi avu'ava huta vahera zamazeri haviza nehuta, kumara eri pehena hu'naze. **2** Jerusalemi kumapi vahe'mo'za kea runetagre'za, zamavumro'ma anteankea antahi'za novaririze. Ana nehu'za Ra Anumzana zamagri Anumzantera zamentintia nosu'za, Agritera erava'oa nosaze. **3** Jerusalemi kumate kva vahe'mo'za, laionimo ran krafa huno vano nehiankna nehazage'za, keagama refko'ma nehaza kva vahe'mo'za, kinagafima vanoma nehaza afi kramo'za kenage zagagafa ahe'za nevaga retazageno masa nehiankna nehaze. **4** Jerusalemi kumapima nemaniza kasnampa vahe'mo'za zamavufaga ra nehu'za, tusi hazenke vahe mani'naze. Pristi vahe'mo'za Anumzamofo kasegea runetagare'za, Ra Anumzamofo Mono nona eri pehena hu'naze. **5** Hianagi Ra Anumzamo'a Jerusalemi ran kumapina ko'ma nemanire mani'neankino, Agra mago havizana nosie. Knane knanena Agra fatgo huno vahera refko hinezamante'neanagi, vahe'mo'za Agrira keamara nosaze. Hianagi kefo avu'ava zama nehaza vahe'mokizmia zamagaze zana nomane. **6** Nagra rama'a kumatamimpi vahera zamahe vagarogeno, mani'nezama kuma'ma kegavama nehaza zaza nozmimo'a haviza huno me'ne. Kuma zamifima vanoma nehaza ne'onse kantamina eri haviza huge'za vahera vano osazageno, ranra kumazmimo'a haviza

huno megeno, anampina magore huno vahera omanifaza hu'ne. **7** Nagrama antahuana tamagerfa hu'za Nagri agoraga nemani'za, Nagrama zamavumro'ma antoanke'ma antahisage'na kumazmia eri haviza osugahue hu'na antahi'noe. Hianagi zamagra maka'zama hazafina, kazigazi hu'za havi avu'ava zana hu'za vu'naze. **8** E'ina hu'negu akoheta Nagri navega anteta maniho huno Ra Anumzamo'a hu'ne. Na'ankure Nagrama oti'na keagama huzmante'sanua knazupa, ko antahintahi retro hu'noanki'na kokankokama nemaniza vahe'ene kinimo'ma kegavama hu'nea mopafima nemaniza vahera zamazeri atru hute'na, narimpa ahe'zana zamagrite eri akaha hu atregahue. Nagrama kanivema rezamantesanua narimpa ahe'zamo'a, teve nefakna huno maka ama mopa teno eri fanane hugahie.

9 Ana zupa maka kokankoka vahera zamagerura eri agru hanuge'za, ana maka vahe'mo'za mago zamarimpa hu'za Ra Anumzamo'na Nagia ahentesga hu'za monora hunante'gahaze.

10 Nagri'ma mono'ma hunenantaza vahe'nima zamahe panani'ma hazage'za Itiopia mopafima mane'nea timofo kantu kazigama umani'naza vahe'mo'za, Nagritega ofa eri'za egahaze. **11** Nagri kema nontahita veganokano'ma hu'naza zankura, e'i ana zupa tamagazegura osugahaze. Na'ankure ru'enena tamagra Nagrira hara reonantegahaze. Tamagri amu'nompintira zamavufaga rama nehu'za kema nontahiza vahera zamazeri atregahue. Ana hanugenruo tage'ma hu'nea agona'nifina zamavufaga rama nehaza vahera omanigahaze. **12** Hianagi akohe'zama nemani'za, zamavufagama anteramiza nemaniza vaheke zamatrenuge'za manigahaze. Na'ankure zamagra Ra Anumzamofo agifi frakiza nemaniza vahe mani'naze. **13** Israeli naga'ma osi'ama manisaza vahe'mo'za mago hazenkea nosu'za, mago havigea nosu'za,

magore hu'za havigea huza vahera rezamataga osugahaze.
Ana nehu'za zamagra ne'zana nezamu nehu'za, mani fru
hu'za nemani'hageno mago vahe'mo'e huno zamazeri korora
osugahie. **14** Hagi Saioni mofamoka zagamera nehuge'za, Israeli
vahe'mo'za rankea hu'za kezati'za zagamera hiho. Jerusalemi
mofa'moka maka kagu'areti hunka musenkasea nehugenno,
karimpamo'a so'e hino. **15** Na'ankure Ra Anumzamo'ma keaga
huneramante'no tamazeri haviza hugahuema huno hu'nea
zana eri netreno, tamagri ha' vahe'mokizmi sondia vahera
zamaretufege'za vu'naze. Ana hu'neankino Ra Anumzana Agra'a
Israeli vahe'mota Kinimo tamagri amu'nompina manigahie.
Ana hanigeta hazenke'zama e'zankura korora osugahaze. **16**
Ana kna zupa Jerusalemi kumakura hu'za, Saioni agonamoka
korora nehunka atregeno kazamo'a arage oramino hu'za
hugahaze. **17** Na'ankure Ra Anumzana kagri Anumzamo
kagri amu'nompina mani'ne. Agra hankavenentake harafa ne'
mani'ne. Agra kagrikura tusi muse hugahiankino, avesi zama'areti
koroma nehana zana maka eri amne hugahie. Kagrikura ranke
huno zagamera nehuno, Agra musenkasea hugahie. **18** Ra
Anumzamo'a huno, musenkasema nehaza knare'ma musema
osu'naza zanku'ma tamasunku'ma nehaza vahera zamavare
atru hugahue. Ana hanuge'za mago'enena tamazeri tamagazea
hanageta tamagazegura osugahaze. **19** Tamagri'ma knazama
tamiza tamazeri havizama hu'naza vahera, ana knazupa
hazenke zamigahue. Hanki zamagama havizama hu'nea vahera
zamagu'nevazi'na, vahe'mo'zama zamahe'za zamarotago'ma
hazage'zama fre'naza vahera ete magopi zamavare tru hugahue.
Ru kumategama vuta kinama ome hutama mani'nage'za,
ana kumapi vahe'mo'za kiza zokago ke huneramante'za

huhaviza huramante'naze. Hianagi menina ete zamagu'a eri rukrahe hanuge'za, tamagrira husga huramantegahaze. **20** Ana kna zupa tamagrira magopi tamavre tru hute'na, tamavre'na nonkuma tamire ete egahue. Ama mopafima mani'naza vahe amu'nompintira, tamagrira knare tamagi tamisuge'za tamagesga hugahaze. Tamagra'a tamavufinti negesage'na tamazeri so'e hugahue. Nagra Ra Anumzamo'na ama nanekea hue!

Hagai

1 Pesia mopafi kini ne' Dariusi'ma kinima manino egeno nampa
2ma hia kafufina, 6si ikamofona ese knazupa, ama nanekea
Ra Anumzamo'a kasnampa ne' Hagaina nemino, Juda mopare
ugagota hu'nea Gavana ne', Sieltieli nemofo Zerubabeline,
ugagota Pristi ne' Jehozadaki nemofo Josuakizani zanasamio
huno asami'nea naneke. **2** Monafi sondia vahete'ma ugagotama
hu'nea Ra Anumzamo'a amanage hu'ne. Vahe'mo'za amanage
nehaze, Ra Anumzamofo mono noma ete eri kasefa'ma huno ki
kna zahufa ome'ne hu'za nehaze. **3** Anagema hazazanku Ra
Anumzamo'a kasnampa ne' Hagai ajipi huvazino amanage hu'ne,
4 Tamagra na'a higeta Nagri mono nona atrazageno havizana
huno me'negeta, marerisa nontamimpina tamagra nemanize? **5**
E'ina hu'negu Monafi sondia vahe'mofo Ra Anumzamo'a huno,
tamagrama nehaza avu'ava zantamia refkohu so'e huta keho. **6**
Tamagra rama'a hoza nentazanagi, nezama'a osi'a e'nerize.
Tamagra ne'zana nenazanagi, tamamura nosie. Tamagra
tina nenazanagi, mago'ene tinkura tamave'nesie. Tamagra
kukena nehazanagi, anazamo'a tamavufga azeri amuhoa nosie.
Tamagra zago eri'zana erita kutamifina erinerizanagi, hagro
hu'nea kutamifi erinerize. **7** Monafi sondia vahe'mofo Ra
Anumzamo'a amanage hu'ne. Tamagrama nehaza avu'ava zana
refkohu so'e huta keho. **8** Tamagra agonaramimpi marerita
zafa ome antagita eta Nagri mono nona eme kih. Ana'ma
hanage'na Nagra anazankura muse nehanuge'za, anampina
Nagri nagia husga hugahaze huno Ra Anumzamo'a hu'ne. **9**
Hozafintira tamagra knare huta ne'zana hamaregahune huta
amuhaba hu'nazanagi, ne'zamo'a hunte so'e nosie. Tamagra ana
ne'zama erita nontamire'ma azana, Nagra ana ne'zantamina

huhu hunetroe. Na'a hige'na anara nehue? Na'ankure Nagri mono nomo'a evuramino haviza huno me'negeta, atreta tamagra'ama knare'hare nontamima kisaza zante maragu'zama neti'za zante, anara nohue huno Monafi sondia vahe'mofo Ra Anumzamo'a hu'ne. **10** E'inahu tamavu tamava'ma nehaza zanku huno, hampompintira komo'a eoramigeno, hozafina ne'zamo'a hunte so'e nosie. **11** Nagra kora atresugenno mopafina ruontegahiankino, agonaramimo'ene mopamo'enena hagege nehanigeno, witimo'ene waini ragamo'ene olivi zafa ragamo'enena hagege nehanigeno, maka ama mopafima hageno mareneria zantamimo'enena hagege hugahie. Ana'ma hanigeno'a vahemo'ene afutamimo'zanena ne'zama ne'zankura hakegahaze. Anazanke huno tamagrama maraguzamatita eritruma hu'naza zantamimo'a maka haviza hugahie. **12** Anante Sieltieli nemofo Zerubabeli'ene, pristi ne' Jehozadaki nemofo Josua'ene, pristi vahe'mo'zane Anumzamofo vahe'ma ofri osi'ama mani'naza vahe'mo'zanena Ra Anumzana Anumzazamimofo naneke amage ante'naze. Ra Anumzana zamagri Anumzamo'ma kasnampa ne' Hagaima asamigeno, eme zamasamia kante ante'za zamagu'areti hu'za ana nanekea amage ante fatgo hu'naze. Ana nehu'za Ra Anumzamofonku koro hunente'za Agri agorga mani'naze. **13** Anante Ra Anumzamofo kato ne' Hagai'a amanage huno Ra Anumzamofo nanekea vahera zamasami'ne. Ra Anumzamo'a huno, Nagra tamagrane mani'noe huno huama hu'ne. **14** Hanki anante Juda mopare ugota hu'nea Gavana ne' Sieltieli nemofo Zerubabeline, ugota pristi ne' Jehozadaki nemofo Josuakiznia Ra Anumzamo'a antahintahi zanamino zanarimpa zanazeri onetino, Anumzamofo vahe'ma osi'a ofri'ma mani'zana vahe'enena anazanke hu'ne. Ana hige'za

Monafi sondia vahete'ma ugagotama hu'nea Ra Anumzama
Anumzazamimofo mono nona erigafa hu'za ki'naze. 15 Ana
eri'zama eri agafama hu'nazana, Darius'i'ma kinima manino
egeno nampa 2ma hia kafufina 6si ika mofona 24ma hianknazupa
eri agafa hu'naze.

2 Hanki ana kafufina 7ni ikamofona 21ni knazupa Ra
Anumzamo'a kasnampa ne' Hagai agipi huvazino mago'ene
amanage hu'ne. 2 Juda mopafima ugagota hu'nea Gavana ne'
Sieltielo nemofo Zerubabeline, ugagota pristi ne' Jehozadaki
nemofo Josuane, Anumzamofo vahe'ma ofri osi'ama mani'naza
vahera amanage hunka zamasamio. 3 Amama mani'naza
vahe kevufintira iza kora mani'neno, ama mono nomofo
avasase zama'a ke'ne? Menima kazana tamagri tamavurera
inankna nehie? Tamagrama kazana koma hu'nea zana
avasase'a omaneno amne zankna nehifi? 4 Hianagi menina
Ra Anumzamo'a amanage huno hie, Zerubabeliga menina oti
hankavetio. Ugota pristi ne' Jehozadaki nemofo Josuagane,
osi'a naga'ma ofri'ma ana mopafima mani'naza vahe'mota
oti hanavetineta eri'zana eri agafa hiho. Na'ankure Nagra
tamagrane mani'nena tamaza hugahue huno Monafi sondia
vahe'mofo Ra Anumzamo'a nehie. 5 Tamagehe'zama Isipi
mopareti'ma neazage'na huvempama huzmante'noa kante, Nagri
Avamu'mo'a tamagri'ene mani'negu tamagra korora osiho. 6
Monafi sondia vahe'mofo Ra Anumzamo'a amanage nehie.
Nagra osi'a knafi mago'ene monane, mopane, hagerine, eri
kaza hugahue. 7 Maka ama mopafima me'nea kumatamina eri
kaza hugahue. Ana hanuge'za maka kokankoka vahe'mo'za
marerisa zago feno zamia eri'za ama mono nompi egahaze.
Nagra ama mono nompina hihamu masa zanteti ante avitegahue

huno Monafi sondia vahe'mofo Ra Anumzamo'a hu'ne. **8** Silva Nagri suza megeno, golia Nagri suza me'ne huno Monafi sondia vahe'mofo Ra Anumzamo'a huama hu'ne. **9** Ama mono nomofoma kote'ma me'nea avasase zama'a, henkama esania avasase zamo'a rugateregahie. Ana hanige'na ama kumapina arimpa fruza eri'na egahue huno Monafi sondia vahe'mofo Ra Anumzamo'a huama hu'ne. **10** Hagi kini ne' Darius'i'ma kinima manino egeno nampa 2ma hia kafumofona, 9ni ikampina 24zupa Ra Anumzamo'a mago'ene kasnampa ne' Hagaina amanage huno nanekea eme asami'ne, **11** Monafima mani'naza sondia vahe'mofo Ra Anumzamo'a amanage huno hie. Kasegemo'a na'ane huno hu'nefi pristi vahera zamantahigeta keho. **12** Hagi ofama nehanaza afupinti mago vahe'mo'ma ruotagema hu'nea ame'ama erino zaza kukena'afi erinte kafagino erino nevanigeno, ana kukenamo bretirero, kre ne'zantero, waini tintero olivi masaventero, mago'a ne'zante'ma avako'ma hanigeno'a, ana zantamimo'a ruotage hugahifi anara osugahie? Anagema hige'za pristi naga'mo'za hu'za, i'o anara osugahie hu'za hu'naze. **13** Hagi anante Hagai'a amanage huno zamantahige'ne, Mago vahemo'ma fri'nesia vahe avufgar'e'ma avako huteno, ete ne'zama avako hanigeno'a, ana zantamimo'a agru hugahifi agrua osugahie? Anagema hige'za pristi naga'mo'za kenona hu'za, l'zo agru osugahie hu'za hu'naze. **14** Anante Hagai'a huno, Ama vahe'mo'zane, ama kokampima nemaniza vahe'mo'zanena e'inahu hu'naze, maka'zama nehu'za, maka ofama nehaza zanena kumizmi'mo eri pehena hu'ne. **15** Hianagi Anumzamo'a huno, Tamagra Ra Anumzamofo mono noma eri agafa huta tra'a onki'nazageno'ma tamagrite'ma fore'ma hu'nea zankura, refkohu so'e huta keteta anara hiho. **16** Ne'za kevuma ante'nazana

tamagra ome erinaku'ma nevuta, 20'a kupi eririgahune huta tamagesa antahi'naze. Hianagi 10ni'a kupinke'za eriri'naze. Waini ragama regatati'ma nehuta 50'a kavofi afi avitegahune huta tamagesa antahi'naze. Hianagi 20'a kavofinke'za afi avite'naze. **17** Nagra hozama eri havizama nehia kriramine, ranra komopa ko'ene atrogeno maraguzamatita hozafima eri fore'ma hu'naza ne'zantamina eri haviza hu'neanagi, tamagra Nagritera rukrahera huta nomaze, huno Ra Anumzamo'a hu'ne.

18 Meninteti'ma agafa huno vanigeta, 9ni ikamofo 24zupama Ra Anumzamofo mono nomofo tra'ama eri agafama huta ki'naza knagura tamagesa antahintahi hiho. **19** Avimzama ohankreta atrazageno nompima menegeno, witima ohamarazageno, waini ragamo'ma nofitema reontegeno, fiki zafamo'ene pomigreneti zafamo'ene olivi zafamo'zanena raga reonte'nazare huvempa hu'na neramasamue. Hagi menima ama knaret'i'ma agafama huno vaniana, Nagra asomu huramantenueta rama'aza antegahaze.

20 Ra Anumzamo'a ana ikamofona 24 zupa amanage huno mago'ene Hagai'na nanekea nasami'ne, **21** Juda mopare'ma ugotama hu'nea Gavana ne' Zerubabelina asaminka, Nagra Anumzamo'na kofa'a knafi monaramine mohanena eri kaza hugahue huno hie hunka asamio. **22** Nagra ama mopafi kini vahera kini tratetira zamazeri netre'na, meg'i'a kini vahe'mo'zama kegavama nehaza hankavezmia eri haviza nehu'na, karisiramine agumpima mani'za vanoma nehaza vahe'enena zamazeri atregahue. Hosi agumpima mani'za vanoma nehaza vahe'mo'za bainati kazinteti zamagra'a ohefri ahefri hugahaze. **23** Hianagi Monafi sondia vahe'mofo Ra Anumzamo'a huno, ama ana zama fore'ma nehanige'na Sieltieli nemofo Zerubabeliga, Nagri eri'za vahe mani'nanku kazerisga hu'na rankagi kamigahue. Na'ankure

Nagra ko kagrira huhampri kante noankinka, kini vahe'mo'zama
zamazampima ante'neza avame'zama renekamaraza rinigna
hu'nane huno Monafi sondia vahe'mofo Ra Anumzamo'a huama
hu'ne.

Zekraia Sekaraia

1 Dairusi'ma mago kafuma kinima mani vagareteno namba
2 kafuma unemanigeno'a, ana kafumofona 8ti ikantera
Ra Anumzamo'a Berekia nemofo, Ido negeho Zekaraiana
amanage huno nanekea asami'ne, 2 Nagra Ra Anumzamo'na
kagehemokizmia tusi'a narimpa ahezmante'noe. 3 E'ina
hu'negu amanage hunka vahetmina zamasamio, Hihamu'ane Ra
Anumzamo'a amanage nehie, Ete rukrahe huta Nagrite enkena,
Nagra Hihamuane Anumzamo'na ete rukrahe hu'na tamagritera
va'heno, huno Hihamunentake Ra Anumzamo'a nehie. 4 Ko'ma
tamagehe'mozama hu'naza zana osiho. Hagi tamagehemo'zama
kefo zamavu'zmavazama nehazage'za ko'ma mani'za e'naza
kasnampa vahe'mo'zama huama hu'za, Hihamunentake Ra
Anumzamo'a amanage nehie, menina kefo avu'ava zama nehaza
zana atreta tamagu'a rukrahe hiho hu'za hunazanagi, ana keni'a
antahi'za zamagu'a rukrahera osu'naze, huno Ra Anumzamo'a
nehie. 5 Tamagehe'za menina iga mani'naze? Hagi kasnampa
vahe'mo'za ofri mani vava hu'za nevazafi? 6 Hianagi maka
nanekema eri'za vaheni'a kasnampa vahepima huvazi'nama
hu'noa kemo'a, tamagehe'mofona zamagate ore'neanki, Nagrama
hu'noa kante anteno ana zana efore hu'ne. E'inama higeno'a
zamagu'a rukrahe nehu'za amanage hu'naze. Na'anoma
Monafinka Sondia vahe'mofo Ra Anumzantegati'ma erisunema
huta hu'nona zana erune. Agra nazano huramantegahuema
huno'ma hu'nea zana hurante'ne. 7 Hagi Dairusi'ma mago
kafuma kinima manivagareteno namba 2 kafuma nemanigeno,
11ni ikamofona 24 zupa Ra Anumzamo'a mago'ane Kasnampa
ne' Berekia nemofo, Ido negeho Zekaraia'na amanage huno
kea nasami'ne, 8 Kenagera ava'hagnaza negogeno, mago

krahopi miteli zafarami me'nefi koranke hosi afumo'a oti'negeno,
ana hosi afu agumpina mago ne' mani'nege'na ke'noe. Hagi
ana ne'mofo amefira koranke'ma, osapake'ene efeke hosi
afutami mani'nazage'na ke'noe. 9 Anazama nege'na nagri'enema
nanekema nehia ankerona amanage hu'na antahige'noe,
Ranimoka, ama zana nazane? Anagema hugeno'a nagri'enema
nanekema nehia ankeromo'a amanage huno kenona hu'ne,
E'i zana nazampi, nagra kaveri hugahue huno hu'ne. 10 Hagi
miteli zafaramimofo amu'nompi mani'nea ne'mo'a amanage
huno nasm'i'ne, Ama nagara Ra Anumzamo'a ama mopafima
vano huta na'a fore nehifi keho huno'ma huzmante'nea nagare.
11 Anage higeno hosi agumpima mani'naza naga'mo'za Ra
Anumzamofo ankeroma miteli zafa amu'nompima oti'nea nera
amanage hu'za asami'naze, Ama mopafima vanoma huta
konana, mika ama mopafima mani'naza vahe'mo'za fru hu'za
akohe'za mani'naze. 12 Anagema higeno'a Ra Anumzamofo
ankeromo'a amanage hu'ne, Monafi sondia vahe'mokizmi
Ra Anumzamoka nama'a zupa Jerusalemi kumaku'ene Juda
mopafima me'nea rankumataminkura kasunkura huozmante
krimpa ahezmanenkva vugahane? Karimpama ahezmanenkama
e'nanana hago 70'a kafu evie. 13 Higeno Ra Anumzamo'a
asunku huntenu fru kefinti, nagri'enema keagama nehia ankerona
kenona hunte'ne. 14 Ana hutegeno nagri'enema keagama
hu'nea ankeromo'a amanage hu'ne, Monafinka sondia vahe'mofo
Ra Anumzamo'a amanage hie hunka ranke hunka huama
huo. Jerusalemi kumaku'gu'ene Saioni kumaku'enena tusiza
hu'na navesia nentoe. 15 Hagi kokankoka vahe'ma zamarimpa
fruma hu'za nemani'za vahekura, tusi narimpa ahenezmantoe.
Na'ankure osi'ama vaheni'ama narimpama ahezmanoge'za,

zamagra razampi zamazeri haviza nehaze. **16** E'ina hu'negu Ra Anumzamo'a amanage nehie, Nagra nasunku hunezmante'na ete rukrahe hu'na Jerusalemi oankino, Nagri nona ana kumapina ete eri so'e hu'za ki'nageno, mesarimima nehaza nofinu Jerusalemi kumara ante'za ke'za mesarimia hugahaze, huno Monafi sondia vahe'mofo Ra Anumzamo'a hu'ne. **17** Monafi sondia vahe'mofo Ra Anumzamo'a amanage hie hunka ete mago'ene ranke hunka huama huo, Nagri rankuma'mo'a ete mago'ane mika zampina knare huno hageno marerinigeno, Ra Anumzamo'a mago'ane Saionia azeri so'e nehuno, nagri rankumare huno Jerusalemia huhamprigahie. **18** Anante nagra kesga hu'na navuga koana, 4'a pazine me'nege'na ke'noe. **19** Nagranema keaga nehia ankero nera anante amanage hu'na antahige'noe. Ama zana nazane hu'na antahigogeno, amanage huno kenona hu'ne, E'i pazivetamina Juda vahe'ene, Israeli vahe'ene, Jerusalemi vahe'enema zamahe panani'ma hazage'za panani'ma hu'za fre'naza pazivetamine hu'ne. **20** Anante Ra Anumzamo'a 4'a vahetmima ainireti'ma keonke zama troma nehaza vahetmina naveri hu'ne. **21** Anante nagra antahige'na, ama vahe'zaga zamagra na'a hunaku neaze hu'na antahigogeno, amanage hu'ne. Ama 4'a pazivemo'za Juda vahera zamahe panani hazage'za panani hu'za fre'naze. Hianagi menima neaza vahe'mo'za ama ana 4'a pazivetamina, e'i 4'a kumate vahetaminki'za zamazeri zamagogonefe'za zamazeri haviza hunaku neaze.

2 Anante kesga hu'na koana, mago ne'mo'a anteno keno mesarimima hu nofi azampina erinege'na ke'noe. **2** Nege'na amanage hu'na antahige'noe, Kagra iga nevane? Hu'na antahigogeno anage hu'ne, Jerusalemi kumamofo atupa'ane,

zaza'ane ante'na mesarimi hu'na kenaku neoe huno hu'ne.

3 Anante naganema keagama nehia ankeromo'a natreno
nevigeno'a, ete ru ankeromo eme tutagiha hunte'naku eno, 4
amanage huno eme nasm'i'ne, Kagarenka vunka antu nehaza
nera ome asmio, Jerusalemi kuma kegina omanesige'za
kuma kegina omane kumakna hugahaze. Na'ankure anampina
vahe'mo'zane, afu zagamozanena tusiza hu'za mani vite'za
kuma keginamofo fegianena manigahaze. 5 Hianagi Nagra
ana kumamofona teve anefanu kegina hunente'na, ana kuma
amunompina hankavenentake masanuti remsa hugahue huno
Ra Anumzamo'a hu'ne. 6 Otiho! Otiho! Noti kaziga moparega
atreta viho, huno Ra Anumzamo'a nehie. Na'ankure Nagra
monafi zahomo'ma 4'a kazigama zaho'ma erino vuno eno'ma
hiaza hu'na, tamahe panani hugeta ru moparega ufre efre
hu'naze. 7 Otio! Babiloni mofa'neraminema nemanizamota
freta Saioni viho. 8 Na'ankure Monafinka sondia vahe'mofo Ra
Anumzamo'a amanage hu'ne, Agra hihamu masazama'amofo
hanavefi hunantege'na, rohu'ma kreno keonke zanka'ama
eri'naza vahe'ma zamazeri havizama hunakura vu'noe. Na'ankure
kagri'ma kavako'ma hanazana, Agria avuragamofo raga'a avako
hugahaze. 9 Kama antahihi, Nagra nazana eri verave hanuge'za,
ko'ma kazokazo eri'zama eri zamante'naza vahe'zimimo'za
zamarohura zamare'za keonke zazmia eri hana hugahaze.
E'ina hanugenka Monafinka sondia vahe'mofo Ra Anumzamo
hunantege'na e'noe hunka kenka antahinka hugahane. 10
Saioni mofa'moka zagame hunka muse huo, na'ankure Nagra
amu'nonka'afi maninaku neoe huno Ra Anumzamo'a huama
hu'ne. 11 Ana knarera rama'a meg'i'a kokankoka vahe'mo'za Ra
Anumzanena emeri hagerafiza nagri vaherase'za manigahaze.

E'ina hanigenka nagrikura, Monafi sondia vahe'mofo Ra Anumzamo ama nera huntogeno nagritega e'ne hunka kenka antahinka hugahane. 12 Hagi Ra Anumzamo'a ruotge'ma hu'nea mopafina Juda nagara agrarega zamavare nenteno, Jerusalemi kumara ete mago'ane erigahie. 13 Maka vahe'mota Ra Anumzamofo avuga akoheta maniho, na'ankure Agra ruotge'ma hu'nea noma'afintira oti'ne.

3 Hanki ana ankeromo'a ugagota pristi ne' Josua'a Ra Anumzamofo ankeromofo avuga oti'negeno naveri hu'ne. Hagi vahe'mofoma huhaviza huno, e'ina hu'ne amana hu'nema nehia ne' Sata'a ana ankeromofona azantamaga kaziga oti'neno, Josuana keaga hunte'naku retro huno mani'ne. 2 Ra Anumzamo'a Satankura huno, Ra Anumzamo'a Sataga keonke kema nehanana, havige nehane huno nehie. Tamage, Ra Anumzana Jerusalemi kuma'ma huhampri'nea Ra Anumzamo'a ama ne'ma keagama huntanana eri atroe huno kazeri ko'herino anage hu'ne, Ama nera tevefinti'ma tevema tagisga nehiaza hu'noe. 3 Josua kukenamo'a tusi pehanage hu'negeno ana ankeromofo avuga oti'ne. 4 Hagi ana ankeromo'a mago'a ankerontamima anante'ma oti kagi'naza ankeroramina amanage huno zamasami'ne, pehanage kukena'a hate atreho, huno nehuno rukrahe huno Josuankura amanage hu'ne, Kumika'a atrenegante'na marerirfa kukena rehankre kantoe huno hu'ne. 5 Anante nagra amanage hu'noe, atrege'za anuntera agru tavravenu vafoa anakinteho hu'na huge'za, agru hu'nea tavrave pristi vahe'mo'zama zamanunte'ma vafoma negiza tavrave anuntera kinente'za, kasefa za'za kukena eri'za eme hunte'haze. Ana'ma hazageno'a Ra Anumzamofo ankeromo'a tavaonte otino mani'ne. 6 Anante ana ankeromo'a amanage huno

Josuana avumro nanekea asami'ne. 7 Monafi sondia vahe'mofo Ra Anumzamo'a amanage hie, kagrama Nagri navu'nava'ma nevaririnka nagrama hanua kema amage'ma antesanke'na, nagra hu izo hugantenenka noni'ane nonkumani'anena kegava nehunka, amama oti'naza vahe amunompina hu izo huganta'nena vano hugahane. 8 Ugagota pristi ne' Josuagane, maka ruga'a pristi vahe'ma kavugama mani'nazamotanena menina antahiho, tamagra henkama fore'ma hania zantmimofo avameza mani'haze. Nagra eri'za vahe'ni'amofo agi'a Zafa Azankunare hu'neanki'na avre'na egahue. 9 Kama go, mago have 7ni'a avurga hunte'nea have Josua avugama ante'noa havere avona krenente'na, ama mopafima me'nea kefo avu'ava zana magoke knafi eri atregahue, huno Monafi sondia vahe'mofo Ra Anumzamo'a hu'ne. 10 Ana zupa mago magomota tava'ontamire'ma nemani'namokizmia ke hanage'za tamagri grepinofimofo turunapine, fiki zafamofo turunapi emanigahaze.

4 Anante nagri'enema keaga hu'nea ankeromo'a ete nagrite eno eme nazeri otige'na mase'nefinti'ma antrima huno otiankna hu'na otugeno, 2 amanage huno nantahige'ne, Kagra na'a negane? Hige'na amanage hu'na asmi'noe. Goliretike tro hu'nea tavi zota me'negeno, agofetura masave tafe megeno, ana masave tafemofona 7ni'a ramu tavi megagigeno, 7ni'a ramu tavimofona 7ni'a wikirami tavi'ma rekruma hu'zana metere hu'ne. 3 Hagi tare Olivi zafamokea ana tavi zota eri amu'no hakeno amunompima masavema taginte zompamofo tamaga kaziga mago'mo'a otigeno, mago'mo'a hogakaziga otinege'na ke'noe. 4 Anante nagranema kema nehia ankerona amanage hu'na antahige'noe, Ranimoka ama zantamina nazantamine? hu'na hu'noe. 5 Kagra antahinka kenka hu'nano huno ana ankeromo'a nantahigege'na,

i'o ranimoka antahina ke'na osu'noe hu'na hu'noe. 6 Anage
hugeno amanage huno nasm'i'ne, Ra Anumzamo'a amanage
huno Zerubabelinkura hu'ne, ama ana zana hankaveka'areti'ene
hihamuka'aretira eri forera osugahananki, Nagri Avamumofo
hankavereti ana zana hugahane, huno Monafi sondia vahe'mofo
hankavenentake Ra Anumzamo'a hu'ne. 7 Kagima me'nea
agonamoka kagra izage? Zerubabeli avuga agupo segahane.
Hagi agrama mono noma ki vagare havema agofetuma ante
vagama renigeno'a, vahe'mo'za kezati'za, Anumzamo'a asomu
hanie, Anumzamo'a asomu hanie hu'za hugahaze. 8 Anante
mago'ane Ra Anumzamo'a amanage hu'ne, 9 Zerubabeli
agafa huno mono nona ki'neankino, agra ki vagaregahie. E'ina
hanige'za Monafi sondia vahe'mofo Ra Anumzamo hunantege'na
kagritega e'noe hu'za vahe'mo'za ke'za antahiza hugahaze.
10 Osi'zama eri agafama hu knagura antahi amnea osuo.
Na'ankure Ra Anumzamo'a Zerubabeli azampima noma eri
fatgo hu'za negi'za nofi'ma kesuno'a, muse hugahie. Hagi
7ni'a ramu tavira, e'i Ra Anumzamofo avuraga huvame huno
me'neankino ama mopafima me'nea maka zana ke hagro huno
nege. 11 Anage hige'na amanage hu'na ankerona antahige'noe,
ramu tavi'ma rekruhunte azotamofo tamaga kazigane, hogá
kaziganema ot'i'na'a olivi zafararena e'i na'ane? 12 Nehu'na
mago'ane amanage hu'na antahige'noe. Kanti kamama mena'a
olivi zafamofo azanku'namoke'ma golire tafentrempima goli
masavema tagimanevazi'ana, e'i na'ane. 13 Hugeno agra
kenona huno, Kagra ama zantamina antahinka kenka osu'nano?
huno nantahigege'na, l'o ranimoka ontahi'noe hu'na hu'noe.
14 Anante agra amanage huno hu'ne, ama tare netrena Ra
Anumzamo'ma masavema tagino freneznanteno huhamprino

asomu huznantege'ne maka ama mopama kegavama hu'nea Ra
Anumzamofo eri'za netre mani'na'e.

5 Anante kesga hu'na kogeno mago regazari'naza avontafemo'a monafi hareno enevige'na kogeno, **2** ana ankeromo'a anage huno nantahigene, Na'a negane? Hige'na nagra amanage hu'na hu'noe, regazarinte avontafe'mofona zaza'amo'a 10 mita higeno, atupa'amo'a 5 mita hu'nea avontafemo hareno vano nehige'na negoe. **3** Hugeno anante agra amanage huno nasami'ne, Ama'i maka mopa'fima mani'naza vahe'ma zamazeri havizama hania kazusi zane. Na'ankure kumzufama nesaza vahera mago kaziga avontafepi kemo'ma hu'nea kante anteno, ama mopa'fintira maka zamazeri atre vaganereno, havigema hu'za huvempama nehaza vahera mago kaziga avontafepi kemo'ma hu'nea kante anteno, ama mopa'fintira zamazeri atregahie. **4** Monafi sondia vahe'mofo Ra Anumzamo'a huno, Nagra ana kazusizana huntesugeno kumazufama nesaza vahe'nompine, nagri nagifima havigema hu'za huvempama nehaza vahe'mokizmi nompinena ufrenero, ana nontamimpi mani'neno, maka noma ki'naza zafane havenena neno eri vagaregahie. **5** Ana zama ketogeno'a nagri'enema nanekema nehia ankeromo'a eazamo amanage huno eme nasami'ne, Na'a ne-efi kesga hunka ko. **6** Anage hige'na nagra hu'na, e'i zana na'ane? Hu'na antahigogeno amanage huno nasami'ne, ama zana witima erinte'za kna'ama refkoma nehaza ekaeka kukino, (ephah) ama zana mika ama mopa'fima nemaniza vahe'mokizmi kefo avu'avazane. **7** Ana ekaeka ku'mofona knanentake avaza'a eri anagisga higena koana, ana kupina mago a' mani'negena negogeno, **8** ana ankeromo'a amanage hu'ne, Ama a'mo'a kefo avu'avazamofo hu avame huno mani'ne, nehuno ana ara retufegeno ana ekaeka kupi

uramigeno knanentake'ma hu'nea avaza'a erigi'ne. 9 Anante kesga hu'na koana, tare a'tremokea zahopi hareke e'na'e. Ana a'tremokizni zanagekonamo'a tusizankna afi patomofo agekona'agna hu'neankike, ekaeka kupima mani'nea ara, ana ekaeka ku'aga eme azerisga huke vu'na'e. 10 Anante nagri'enema nanekema nehia ankerona antahige'na, iga e'i ekaeka kura erike neva'e? 11 Anagema hu'na antahigogeno'a amanage huno nasami'ne, Sinari mparega mono noma'a ome ki'za ante'naku avre'za nevazankino, noma'ama ome ki vagama retenu'za, ana ekaeka kura trate ome antegahaze.

6 Anante kesga hu'na kogeno tare bronsire agonararemokizni amu'nompinti 4'a karisirami ne-ege'na ke'noe. 2 Hagi esera koranke hosi afu'moza karisia rente'za avazu hu'za azageno, haninke hosi afu'mo'za ananteria karisia rente'za avazu hu'za e'naze. 3 Hagi nampa 3a efeke hosi afu'moza karisia rente'za avazu hu'za azageno, efeke hosi afutamimofo zamefira tupri tapri hosi afutamimo'za karisia rente'za avazu hu'za e'naze. Hagi ana maka 4'a hosi afu'mokizmia hankavezamimo'a mareri'ne. 4 Anante nagranema nanekema nehia ankerona antahige'na amanage hu'noe, ranimoka, ama zantamina nazantamine? 5 Hugeno ana ankeromo'a anage huno kenona hu'ne, E'i 4'a monafi avamutamine. Ama ana maka mopama kegavama hu'nea Ra Anumzamofo avuga mani'nazareti, Agri eri'za erinaku atiramiza nevaze. 6 Hagi haninke hosi afumo'za karisia rente'za avazu hu'za noti kaziga vazageno, Efeke hosi afumo'za karisia rente'za avazu hu'za zage fre kaziga vazageno, tupri tapri hosi afumo'za karisia rente'za avazu hu'za sauti kaziga vu'naze. 7 Hagi ana hankavenentake hosi afutamimo'za atirami'zama ne-eza ama mopafi vano hu'za kenaku nona mani soe osu'naze.

Ana'ma hazageno'a Ra Anumzamo'a huno, Ome vano huta mopa keho, huno huzmantege'za ana hosi afumo'za ame hu'za vu'naze. **8** Agra kezatino amanage huno nasami'ne, kama antahio, noti kaziga kokampima vaza hosi afutamimo'za, noti kokamofoma narimpama ahente'noa zana eri ravahe'naze. **9** Ra Anumzamo'a amanage huno nasm'i'ne. **10** Kinama ome hu'naza nagara Heldai'ma, Tobija'ma, Jetaiama hu'za Babilonitira silvane, golinena eri'za e'nazanki omerinka ana zupage Zefanaia nemofo Josaia nonte vuo. **11** Hagi ana vahe'mo'zama eri'za e'naza silvane golinena erinka kini fetori tro hutenga, ugagota pristi ne' Jehozadaki ne'mofo Josuana kini fetorira asenifi antaninto. **12** Ana nehunka Monafi sondia vahe'mofo Ra Anumzamo'a amanage hie hunka asamio, ama nera Azanku'nare hu'za agia nehaza nekino, agrama mani'nea kumapintira azanku'nareno Ra Anumzamofo ra mono nona kigahie. **13** Agra Ra Anumzamofo mono nona kite'no, kini tratera mani'neno kegava huno kinia mani'enige'za ragia amigahaze. Hagi ana trate mani'neno pristi eri'zanena erigahiankino, ana tare eri'zamokea hara ore area osugaha'anki, fruhuke mago kanteke vugaha'e. **14** Hagi Heldaiama, Tobijama, Jedaiama, Sefanaia nemofo Henikizmi avamezankna huno ana kini fetorimo'a Ra Anumzamofo mono nompi me'nena, vahe'mo'za zamagesa antahi zamigahaze. **15** Hagi afete kumate'ma nemaniza vahe'mo'za ete ete hu'za Ra Anumzamofo mono nona eme kinagenka, nagrikura Monafi sondia vahe'mofo Ra Anumzamo huntogeno, eme nasami'ne hunka kenka antahinka hugahane. Hagi kagrama Ra Anumzana kagri Anumzamofo kema tamagema hunka amage'ma ante fatgoma hanankeno'a, ama ana zana before hinkenka kegahane.

7 Hagi Dairusi'ma kinima mani'neno kegavama huno e'neana
4'a kafu evutegeno 9ni ikana Kislevie hu'za nehaza ikamofona
4 kna zupa Ra Anumzamo'a Zekaraia'na amanage huno
nasm'i'ne. **2** Hagi Beteli kumate vahe'mo'za Ra Anumzamofo
avesizanku antahige'za kehogu, Sareza'ma, Regem-melekine,
mago'a vahetaminena huzmante'haze. **3** Zamagra e'za
Monafi sondia vahe'mofo Ra Anumzamofo nompima eri'zama
eneriza kasnampa vahe'ene pristi vahetaminena amanage
hu'za eme zamantahigegahaze. Rama'a kafuzagefima zavi
krafagema nehuta, ne'zama a'o huta nunamuma hutama
e'nonaza huta, 5fu ikampina zavi krafa nehuta ne'zana a'o
huta nunamuna huta vugahuno? **4** Anante Monafi sondia
vahe'mofo Ra Anumzamo'a amanage huno nasami'ne, **5**
Maka ama mopafi vahe'ene pristi vahetaminena amanage
hunka zamantahigo, tamagra 70'a kafufima 5fu ikante'ene 7ni
ikante'enema ne'zama a'o huta zavi krafa nehuta, nunamuma
hu'nazana tamage huta Nagrite ne'zana a'o huta nunamuna
hu'nazafi? **6** Hagi ne'zane tinema ne'nazana tamagra'agu
nentahita ne'nazafi? **7** Hagi ama ana nanekea Jerusalemi
kumapima knare nomani'zante mani'nazageno, ana tavaonte'ma
me'nea kumatmimpine sauti kazigama me'nea mopafi Negevi
vahe'mo'zama mani vite'zama mani'nageno'a, Ra Anumzamo'a
ko'ma mani'naza kasanampa vahetamimpina huvazino, ama ana
nanekea ontamasami'neo? **8** Anante Ra Anumzamo'a amanage
huno Zekaraiana asami'ne. **9** Monafi sondia vahe'mofo Ra
Anumzamo'a amanage hu'ne, knare huta maka vahe knazana
refko nehuta, mago mago'mota asunku ohunte ahunte nehuta
knare avu'ava ohunte ahunte hiho. **10** Ana nehuta kento
a'nene, megusa mofavreramine, ruregati'ma tamagri'enema

emani'naza vahe'ene, zamunte omane vahe'enena knazana
zamita zamazeri havizana nosuta, tamagra ramagra ontahi haviza
antahi havizana huta tamazeri haviza osiho. **11** Hianagi zamagra
ana kema antahizankura zamavaresra nehu'za, zamagu'a eri
hankaveti'naze. Ana nanekema antahizankura zamefi hunemi'za,
zamagesa renkanire'naze. **12** Monafi sondia vahe'mofo Ra
Anumzamo'ma Avamu'afima korapa'ma mani'naza kasnampa
vahete'ma atregeno'ma e'nea nanekea zamagu'amo'a havegna
huno hankaveti'neankiza ontahi'naze. E'ina hu'negu Monafi
sondia vahe'mofo Ra Anumzamo'a tusi'a arimpa ahezmante'ne.
13 Monafi sondia vahe'mofo Ra Anumzamo'a anage hu'ne,
Nagrama kema nehuge'za, nagri nanekea ontahi'nazanki'na,
zamagrama kema hanage'na, zamagri nanekea ontahigahue
huno hu'ne. **14** Ana nehu'na hankro zahomo kagikagi huno
kugusopa eri hareankna hu'na zamazeri atrenuge'za, antahiza
keza osu'nesaza mopafi umani emanı hugahaze. Ana hanugen
atre'zama vanaza mopamo'a, haviza huno vahe omani ka'ma
mopa megahie.

8 Monafi sondia vahe'mofo Ra Anumzamo'a amanage huno
hu'ne. **2** Nagra Saionigura tusiza hu'na navesi nentoe.
Tamagerfa hu'na navesinente'na, ha' vahe'agura tusi narimpa
ahenezmantoe. **3** Hagi Ra Anumzamo'a huno, Nagra ete Saioni
vu'na Jerusalemi kuma amu'nompi umani'nugeno, Jerusalemi
kumakura hugahuema hu'nea zama avariri fatgo nehuno tamage
avu'ava'ma nehia rankumare nehu'za, Monafi sondia vahe'mofo
Ra Anumzamofo agonagura, ruotge hu'nea agone hu'za
hugahaze. **4** Monafi sondia vahe'mofo Ra Anumzamo'a huno,
ete mago'ene ozafa nafamo'zane tavavane'mo'za Jerusalemi
kumapina eri tru hu'za azompazamia zamazampina eri'za

mani'neza nanekea hugahaze. **5** Hagi ana rankumapina ne'mofa'mo'za avite'neza zokagore'za vano hugahaze. **6** Monafi sondia vahe'mofo Ra Anumzamo'a huno, Anumzamofo naga'ma osi'ama mani'namotarera tusi amuho huramantegahie. Hianagi nagriteram amuhoa hunantegahifi? huno Marerisa hihamu'ane Ra Anumzamo'a hie. **7** Monafi sondia vahe'mofo Ra Anumzamo'a huno, vahe'ni'a zage hanati kaziga kokampinti'ene zage fre kaziga kokampintira zamagu vazigahue. **8** Ana vahera nagra zamavare'na esuge'za, Jerusalemi kumapi emanigahaze. Zamagra Nagri vahe manisage'na, Nagra zamagri Anumza mani'ne'na, ruzahes osu navu'nava zanteti'ene fatgo navu'nava zanteti'ene hu'na kegava huzmantegahue. **9** Monafi sondia vahe'mofo Ra Anumzamo'a huno, Hihamu'ane Ra Anumzamofo mono noma eri agafama hu'za kiza zupama, kasnampa vahe'mo'zama hu'naza kema antahi'nesaza vahe'mota menina hankavetita mono nona kih. **10** Kote'ma mono noma ki eri'zama agafama osu'nerera, eri'zana omanegeno, eri'zama enerisage'noma atesizmante zagoa omane'negeno, afu'mo'zama eri'zama enerisagenoma tesizmantesia zagoa omanene. Hagi vahe'mo'a afete kana vano osu'ne. Na'ankure Nagra zamazeri otuge'za ha' vahe'mo'za maka kaziga oti'za hara nehazage'za, agra agra ohe ahema hu'zamo'a avite'ne. **11** Hianagi menina osi'ama maniza vahera Nagra kote'ma hu'noa kna navu'navara hu'na narimpa ahe ozmantegahue huno Hihamu'ane Ra Anumzamo'a hu'ne. **12** Na'ankure avimzama krisageno'a knare huno nehage'na, krepimo'za knare hu'za raga rentegahaze. Ana nehanigeno monafintira ata kora hozafina runtenkeno, mopamo'a fru hugahie. **13** Ama mopafima manigagi'naza vahe'mo'za korapara Judane Israeli vahe'motagura sifana kea huranante'za

huhaviza hu'nazanagi, ete tanavre'na asomu huranantegahuanki, koro osuta oti hankanaveti'o. **14** Na'ankure Monafi sondia vahe'mofo Ra Anumzamo'a huno, Ko'ma tamagehe'zama nazeri narimpama ahazage'na narimpa ahezmante'na zamagrira zamazeri haviza hunaku hu'noe. Hanki Nagra antahi'zani'a zahera osugahue. **15** Hianagi menina Jerusalemi kumate vahe'ene Juda kumate vahe'enena knare navu'nava huramante'na, tamazeri so'e hu'za huanki, korora osuta tamarimpa fru huta maniho. **16** Hianagi tamagra amanahu hugahaze, tamagra kema hanazana tamarimpa fru huta tamage kege'za nehuta, keaga trate'ma keagama hanazana, tamage huta fatgo kazigati refko hugahaze. **17** Magomofoma azeri havizama hu nanekea retrora osuta, havigema huno huvempama huzankura tamavesi tamavesia osho. Ama ana maka zantaminkura tusiza huno nagonete huno Ra Anumzamo'a hu'ne. **18** Monafi sondia vahe'mofo Ra Anumzamo'a nagrite eno amanage huno kea eme nasmi'ne. **19** Monafi sondia vahe'mofo Ra Anumzamo'a amanage hie, 4 ikante'ma, 5fu ikante'ma, 7ni ikante'ma 10ni ikante'ma ne'zama a'oma huta nunamuma nehazazana menina eme vagare. Hagi ana knaramimo'za Juda vahe'motarera ne'zama kreno neneno musemahu knarami fore hugahie. E'ina hu'negu tamage nanekagu'ene arimpa fruma huno mani'zanku tamavesinteho. **20** Hihamu'ane Ra Anumzamo'a amanage hie, Vahe'mo'za ne-enageno ranra kumatmimpima nemaniza vahe'mo'zanena egahaze. **21** Mago rankumapima nemanisaza vahe'mo'za eza, mago rankumapima nemani'naza vahera eme zamantahige'za amanage hugahaze, enketa vuta Ra Anumzamofo avesizankura ome antahinegeta, Hihamu'ane Ra Anumzamo'ma tazama hanigura ome hakamaneno hu'za hugahaze. **22** Anage nehu'za

rama'a vahetamine kokankokama hihamu'ane vahe'ma nemaniza
vahe'mo'zanena e'za Ra Anumzamofo avesi zankura eme
antahinege'za, Hihamu'ane Ra Anumzamofonkura hakegahaze.

23 Monafi sondia vahe'mofo Ra Anumzamo'a huno, e'i ana knafina
10ni'a ru kumateti ru zamageru neranaza vahe'mo'za, mago Jiu
nemofo kukena'are azerine'za amanage hugahaze, Tatregeta
kagra'ene vamneno. Na'ankure Anumzamo'a tamagrane mani'ne
hu'za hazageta antahi'none hu'za hugahaze.

9 Ra Anumzamo'a Hadraki mopafi vaheku'ene Damaskasi
kumate vahera keha rezmante'ne. Na'ankure maka vahe'mo'zane,
maka Israeli vahe'mo'zanena Ra Anumzamofonku zamavua
ke'naze. 2 Ra Anumzamo'a Hamati kumate vahe'enena ana huno
keha rezmante'ne. Tairi vahe'mo'zane Saidoni vahe'mo'zanena
ama' antahi'zane vahe mani'nazanagi anazanke huno keha
reneznante. 3 Tairi kuma'mo'a hankave vihu kegina hu'ne.
Kumapina silva eritru higeno kugusopagna huno marerigeno,
golima eritru hu'nea zamo'a hapa kna huno kumapina moriri
huno mareri'ne. 4 Hianagi menina Ra Anumzamo'a Tairi
kumamofo fenozana eri atre vaganereno, vihu kegina'a ahe
fragu vazitresigeno hagerimpinke frena maka zana tevemo
teno eri hana hanigeno mophage megahie. 5 Askeloni kumapi
vahe'mo'za Tairi kumapima fore'ma hania zama kesu'za,
tusi zamagogogu hugahaze. Gaza kumate vahemo'zane,
Ekroni kumate vahe'mo'zanena ana zanke hu'za zamahirahiku
hugahaze. Na'ankure amuha'ma nehaza zamo'a haviza hugahie.
Gaza kumate kini nera ahe nefrisageno, Askeloni kumapina
vahera omanigahaze. 6 Hagi ruregati vahe'mo'za Asdoti kumara
emeriza nemanisage'na, Filistia vahe'mo'zama zamavufaga
rama nehaza zana eri haviza hugahue. 7 Zamagipintira

korana eri netre'na, zamave kampima nago'manetoa zantmima
rusima huno'ma me'neana eritregahue. Ana hanuge'za osi'ama
mani'naza Filistia naga'mo'za Juda vahe kna hu'za agru
hu'neza Anumzamo'na monora hunantegahaze. Ko'ma Jebusi
vahe'mo'zama hu'nazaza hu'za Ekrónima nemaniza Filistia
naga'mo'za nagri vahe'ene eme hagerafiza manigahaze. **8**
Nagra mono noni'a kegava hanenkeno, ha' vahe'mokizmi
sondia vahe'mo'za vu'za eza osugahaze. Magore huno knama
tami'zama tamazeri havizama nehaza vahe'mo'za tamazeri
havizana osugahaze. Na'ankure menina Nagrani'a navua
ante'na kegava huzmantegahue. **9** Hagi Saioni mofara anage
hunka asmio, ko, kagri kinimo'a kagritega ne-eanki, avufa
anteramino, donki agumpi manino, ve agaho donkifi ne-
e. **10** Nagra Efraemi vahe karisiramina eritre vaganere'na,
Jerusalemi vahe'mo'zama hate'ma eri'za vano nehaza hosi
afutamina eri haviza huvaganere'na, maka ha'ma nehaza ati'zmia
eri haviza hugahue. Ana hanugeno agra fru huno'ma mani
nomanizamofo naneke nehuno, mago hagerinteti'ma mago
hagerinte'ma evigeno, Yufretisi tintetima vuno mopa atumpare'ma
evu hanati'nea mopa kegava hugahie. **11** Hagi huhagerafi
huvempa kema ko'ma koranteti'ma hu'nogu hu'na ti omane
kerifima kinama hu'naza kina vahetmia katufe zamantegahue.
12 Amuha'ma nehuta mani'naza kina vahetmina eteta hankave
vihu kumapi enke'na, ko'ma atre'naza zamofontera ante
agofetu hu'na maka zantmia ete tamamigahue. **13** Na'ankure
Judana atima refagagino kreankna nehu'na, Efraemina azeri
keveni'agna hugahue. Ana nehu'na Saioni ne'mofavreramina
zamazeri bainati kazinkno kna hu'nena, ha' vahe'moma
nehiazza hu'na Grisi vahetera ana kazinknona eri verave

hugahue. **14** Ra Anumzamo'a vahe'arema efore huno, anagami mani'neno kevema ahe atrenigeno'a kopasina eriankna huno vugahie. Sauti kaziga hagege kokampima kagikagi zaho'ma eriaza huno Hihamu'ane Ra Anumzamo'a ufenkrafa nehuno, zahopi eno hara hugahie. **15** Monafi sondia vahe'mofo Ra Anumzamo'a Agra'a vhahera kegava huzmantenige'za, kumi atifinti ha' vahe'zmia hara huzmante'za hara huzamagateregahaze. Waini tima nenea vahe'mo neginagi huno ranke ranke hiaza hu'za hapina ranke ranke hugahaze. Kre sramna vu itamofo renagenteteti koramo'ma aviteno varehi neramiaza huno, ha' vahe'ma zamahesaza koramo'a varehiramigahie. **16** Ana knazupa Ra Anumzana zamagri Anumzamo'a sipisipi kva vahe'mo'za afuzami zamagu'vaziankna huno, Agra'a vhahera zamagu'vazigahie. Ana hanige'za zago'amo marerisa havere tro hu'naza avasese'zamo kini fetorite me'neno taperape hiakna hu'za agri mopafina taperape hu'za remasa hugahaze. **17** Vahe'mo'zama kesazana zamagri konararizmimo'a hentofaza huno knarezantfa hugahie. Ana hanige'za nehazavemo'za witia nene'za knare vahe zoneresageno, mofanemo'za kasefa waini ti nene'za zamagra'enena knare hu'za zoregahaze.

10 Hozagnama esigeno ne'zamo'ma hagesigura Ra Anumzamofo antahigenkeno kora atrenkeno runo. Na'ankure agra ko'ma ru hampona eri fore nehigeno kora nerie. Agra mago'magomofona kora amigeno hozazmimo'a afova tretre huno nehage. **2** Nozmifima mono'ma hunentaza anumzantmimo'za havi antahintahi nezamasamizage'za, zamene vahe'mo'za havige nehazage'za, ava'nama eri rukrahe'ma hu vahe'mo'za havige hu'za ava'na kea eri rukrahe hu'za vahe'mofona zamazeri haviza nehaze. E'ina hazage'za vahe'nimo'za sipisipi kva vahe

omanige'za sipisipi afutamimo'za hazagrazankna nehazage'za,
ha' vahe'mo'za eme zamazeri haviza nehaze. **3** Sipisipi afu
kva vaheku'ene kva vahetaminku'enena tusiza huno narimpa
ahe'zamo'a tevereankina, ve mementamina ha' huzmantegahue.
Na'ankure Hihamu'an Ra Anumzamo'a Juda vahetmina, agra'a
sipisipi afutmima kegava nehiankna hugahie. Ana nehu'na
Juda vahera zamazeri knare zantfa hanuge'za, hapima eri'za
vanoma nehaza hosi afukna nehanage'na, **4** ana nagapinti
nomofoma renagentete'ma azeri hanaveti havea eri fore nehu'na,
zamagripinti seli noma avazuhumpi huno ki azota eri fore
nehu'na, zamagripinti ha'ma hu atia eri fore nehu'na, ugagota kva
vahetaminena zamazeri fore nehanuge'za, **5** zamagra hihamu'an
ha' vahetami fore hu'za ha' vahe'zmia kama vanoma nehaza hu
hapapi zamahe'za zamagareti rehampakanegahaze. Na'ankure
Ra Anumzamo'a zamagrane mani'neankiza, hosi afu agumpima
vanoma nehu'za ha'ma nehaza vahera hara huzmagateregahaze.
6 Nagra Juda nagara zamazeri hankaveneti'na, Josefe nagara
zamagu'vazigahue. Nagra ete zamavare'na egahue. Na'ankure
Nagra zamagrikura tusiza hu'na nasunkura hunezmanoe. Nagra
Ra Anumzana zamagi Anumza mani'noanki'na zavi krafagezmia
antahi'na zamaza hugahue. **7** Efraemi naga'mo'za hankave ha'
vahe fore nehanageno, zamagu'amo'a waini tima nazageno
musema nehiankna hugahie. Mofavre naga'zamimo'za nege'za
zamagu'areti hu'za Ra Anumzamofona musena huntegahaze.
8 Nagra hogefinti kezati'nena eme atru hugahaze. Na'ankure
Nagra'a zamahora ke'na ete zamavare'noe. Ana hanogu ge'za
rama'a vahe fore hu'za kote'ma mani'nazankna vahe fore
hugahaze. **9** Avimza avima ru herahe'ma hutreaza hu'na zamazeri
mago mago huge'za ru mopafi ru mopafi hu'za umani emaní

hugahazanagi, afete moparegama umanine'za zamagesa antahi namigahaze. Ana nehzanki'za zamagra'ene mofavrezminena knare hu'za ofri mani'neza, ete Israeli moperara egahaze.

10 Isipi mopereti'ene Asiria mopereti'enena zamavare'na e'na Giliali mopafine, Lebanoni mopafinena emeri atru hanuge'za mani kankamuna omanetfa hugahie. **11** Hagerimo'ma hiaza huno'ma hazenke zamo'ma kama renkani renigeno'a, Ra Anumzamo'a agra'a ana mopafina rugitagino nevuno, eri arava ahiegahie. Ana'ma hanigeno'a Naeli tiramo'a tanenigeno, Asiria vahe'mo'ma avufga rama nehia zana ahe haviza hanigeno, Isipi kinimofo hankavemo'a anante eme vagaregahie. **12** Nagra Ra Anumzamo'na zamazeri hankaveti'nena Nagri nagifi kana vano hugahaze huno Ra Anumzamo'a hu'ne.

11 Lebanoni kumamoka kafanka'a anagi'negeno tevemo'a sida zafaka'a teno eri hana hino. **2** Saiprisi zafamota zavi krafa hiho, na'ankure sida zafamo'za evuramize. Knare'nare zafaramimo'za mopafinke'za masaze. Basanima me'nana oki zafamoka, zavi krafa huo, na'ankure zafa tanopaka'a ahe huti namati hu'naze. **3** Sipisipi afu kva vahetmimo'zama zavi krafagema nehzana antahio, na'ankure sipisipi afu'ma kegavama nehaza avonona eri havizantfa nehzageno, kasefa laionimo'za krafage nehaze. Na'ankure Jodani vahe'mo'zama zamavufaga rama nehaza zamo'a haviza hie. **4** Ra Anumzana nagri Anumzamo'a amanage hie, Zamaheginaku'ma avame'zama anteterema hu'naza sipisipi afutamina vunka ome kegava huo. **5** Ana sipisipi afutamima tesite'za hegi'za eri'zama vaza vahe'mo'za afu'ma ahigi'za zantera zamarimpamo'a kna osige'za ahiegiza eri'za vu'naze. Hagi ana sipisipi afutmima zagore'ma atre'za zagoma eriza vahe'mo'za hu'za, Ra Anumzamo'a ra agi erisie, na'ankure

tagra zago feno vahe fore hune hu'za nehaze. Hagi sipisipi kva
vahe'mo'za ana sipisipigura zamasunkura huozmant'e'naze. 6
Anahukna hu'na ama mopafi vahekura nasunkura osugahue,
huno Ra Anumzamo'a nehie. Nagra zamatrenuge'za zamagra
zamagra ohefri ahefri nehanageno, zamagri'a kini ne'mo'enena
zamahe frigahie. Nagra zamaza hu'na ozamavaresuge'za
zamahe hana hanageno mopazmimo'a ka'ma mopa megahie. 7
Ana hazage'na zamahenaku'ma huhamprinte'neza, knazama
zami'za zamazeri havizama nehaza sipisipi afu kevumofo kva
vahe nagra mani'noe. Ana nehu'na sipisipi kva vahe'mo'zama
eneriza azompa tare erite'na, mago azompagura Asunku zane
hu'na agia nente'na, mago azompagura Erimago hanune hu'na
agi'a antemi'noe. 8 Mago ikamofo agu'afi 3'a sipisipi kva
vahetmina erizazmifintira zamazeri tre'noe. Na'ankure nagra
ana sipisipi kva vahetaminkura mago narimpa huozmantoge'za
zamagra zamagote'nante'naze. 9 Ana hazage'na amanage hu'na
zamasmi'noe, Nagra sipisipi kva vahera mani'na tamagrira kegava
osugahue. Iza'oma frinaku'ma hanimo'a frisigeno, ahenaku'ma
hanaza su'ana ahegahaze. Hagi mani'nazama'amo'za zamagra
zamagra ohe ahe hu'za zamavufaga traga hu'za negahaze.
10 Anante Asunkure hu'nama agima antemi'noa azompa
amu'nompinti ruhanentagi'na, kokankoka vahetaminema
huhagerafi huvempagema hu'noana anante ruhantagi'noe. 11
Zamagri'enema huhagerafi huvempagema hu'noana e'i ana
knare eme vagare'ne. Hagi knazampima mani'naza sipisipi
afutamimo'zama ana zama hugezama nege'za, Ra Anumzamo'a
amama hia avu'ava zampi huvazino naneke nerasamie hu'za
keza antahiza hu'naze. 12 Anante amanage hu'na zamasmi'noe,
Tamagrama antahisageno knare'ma hanigeta mizani'a namiho,

hagi knare'ma osanigeta azeriho. Anage huge'za kna'a erinte'za kete'za 30'a silva zago nami'naze. (Exodus-Uti 21:32) **13**
Ra Anumzamo'a amanage huno nasami'ne, Ama marerisa zagoma nagri'ma mizama saza zagoa erinka mopa kavoma tro'ma nehia ne' matevunka amio. Anage hige'na ana zagoa eri'na mono nontega vu'na mopa kavoma tro'ma nehia ne' ome mate vumi'noe. **14** Ana hute'na Juda vahe'ene Israeli vahe'mo'zama koganama huza magopima mani'naza zana ama ruhantague hu'na nehu'na, Erimago hanune hu'nama agima ante'noa azompa eri'na amu'nompinti ruhantagi'noe. **15** Anante Ra Anumzamo'a amanage huno nasami'ne, Ete mago'ene neginagi sipisipi kva vahe'mofo eriza zantamina erio. **16** Hagi keho, menina sipisipi kva vahera kefo sipisipi afu kva vahe azeri oti'za nehue. Ana sipisipi afu kva vahe'mo'a hazenkema eri'nesia sipisipi afu'ene, anenta sipisipi afu'ene, krima eri'nesaza sipisipi afutamina kegava nosuno, knare'ma hu'za mani'naza sipisipi afutaminena ne'zana ozamigahie. Anara osugosianki, afovage sipisipi afutaminke ahegino neno eri hana nehuno agigo azanko'age atregahie. **17** E'inahu kefo sipisipi afu kva vahe'mo'a ra hazenkefi ufregahianki kva hino. Bainati kazinteti aheza azana runekafri'za, tamaga kaziga avurga repro hugahaze.

12 Ra Anumzamo'ma Israeli vaheku hu'nea naneke. Monama eri rutareno tro hunenteno, mopamofo tra'ama tro hunenteno, vahe'ma tro huno avamu'ma agu'afima ante'nea Ra Anumzamo'a amanage hie, **2** Nagra Jerusalemi kumara azeri retro hanugeno aka tinkna hu'nena, Jerusalemi kuma'mofoma megagi'nea kumapi vahe'mo'zama sondia vahe'zmima huzmantesage'za Jerusalemi kuma'ene Juda kuma'enema ha'ma huzmanteku'ma esanu'za neginagi eme hugahaze. **3** Ana knarera Jerusalemi

kumara mago knanentake have erise'nugeno, iza'o ana havema erisgama hunaku hanimo'a tusi hazenke erigahie. Ana nehanige'za Jerusalemi kumara ha' hunte'naku maka kokankoka vahe'mo'za emeri atru hugahaze. 4 Ra Anumzamo'a huno, ana knarera maka hosi afutamina zamazeri koro nehu'na, ana hosi afutamimofo agumpima vanoma nehaza vahetmina zamazeri savri hugahue. Juda vahetmina navunte'na kegava hu'nena ha' vahezamimofo hosi afutamina zamavurga eri asu hugahue. 5 Juda mopafi kva vahe'mo'za amanage hu'za zamagu'afina antahigahaze, Jerusalemi kumapi vahe'mo'za Monafi sondia vahe'mofo Ra Anumzana zamagri Anumzamo hankavea nezmie hu'za hugahaze. 6 E'i ana knarera Juda vahera zamazeri tevenefa kna hanenko teve hanavazi'negeno akrukru hiankna huge, afe tagintageno witi hoza ruhagna huno tefanane hiankna hugahaze. Tava'ozmire'ma nemaniza mopafi vahera tevemo ruhagana hiankna huza zamazeri haviza hu vagaregahaze. Hianagi Jerusalemi kumapima nemaniza vahe'mo'za mago zankura antri osu' knare hu'za manigahaze. 7 Hagi Ra Anumzamo'a esera Juda vahe zamagura vasinigeno, Deviti nagamo'ma ra agima eneria zamo'ene, Jerusalemi kumapima nemaniza vahe'mo'zama ra zamagima e'neriza zamo'enena Juda nagara zamagate'oregosie. 8 E'i ana knarera Ra Anumzamo'a Jerusalemi kumapi vahera zamahoegahie. Hagi amu'nozmifima hankavezmima omane'nesia vahe'mo'za kini ne' Deviti kna hu'za hankave vahe nemanisageno, kini ne' Deviti naga'mo'za Anumzankna nehu'za, Ra Anumzamofo ankeromo vugote zmanteno viankna hugahaze. 9 Hagi ana knafina Jerusalemi kumapi vahe'ma ha'ma renezmantaza mopafi vahera agafa hu'na zamahe vagaregahue. 10 Ana hute'na Deviti nagate'ene

Jerusalemi kumapi nemaniza vahete'enena asunku'ma nehuno nunamuma hu avamu tagitregahue. Ana hanuge'za karugru kevema nare'naza ne' nagri nenage'za, magoke'ma ante'nea mofavre'ama fri'negeno nerera afa'ma tusi zavi krafa hiankna huza tusi zavi ategahaze. **11** Ana knare'ma Jerusalemi kumapi vahe'mo'za zamasunku'ma hu'za zavima atesazana, Megido agupofima Hadad-Rimoninku'ma zavi'ma ate'nazankna hu'za zavira ategahaze. **12** Ana maka Israeli vahe kevumo'za zavira ategahazankino, mago mago naga nofimo'a agra'a eri atru huno zavira atetere hugahie. A'nemo'zane vene'nemo'zanena arure arure zavira netesageno, Neteni naga'mo'za arure zavira netesage'za, Deviti naga'mo'zanena arure zavira ategahaze. **13** Levi naga'mo'za arure zavira atesageno, a'nezamimo'za arure zavira netesageno, Simei naga'mo'za arure zavira netesageno a'nezmimo'za rure zavira ategahaze. **14** Mago'mago naga nofi'ma mani'naza naga'mo'zanena ana hu'za vene'ne'amo'za arure zavira netesageno zamanarahehe'za arure zavira ategahaze.

13 Ana knarera Deviti nagamofo kumi'ene, Jerusalemima nemaniza vahe'mokizmi kumi'ene, agru osu avu'ava zanema sese huno zamazeri agruma hania tina anagi tregahie. **2** Hihamu'ane Ra Anumzamo'a huno, ana knarera zamazanteti antre'za tro hunte'naza anumzantmimofo zamagia ana mopafintira eri atre vagarenugeno, ana zamagiraminkura zamage kanigahaze. Ana nehu'na ana mopafintira maka havige kasanampa vahetmina zamazeri atregahue. Ana nehu'na agru osu avamutaminena ana mopafintira zamahenati atregahue. **3** Ana hanugenno mago'mo'ma kasnampa kema hanimofona, agri nererake nefakea amanage huke asamigaha'e, kagra frigahane, na'ankure kagra Ra Anumzamofo agifi havige kasnampa ke nehane.

Hagi ana kasanampa kema huno vanigeno'a nererake nefakea kazinteti ahe fri'nakeno frigahie. 4 Ana knarera kasanampa vahe'mo'za ava'nagna zama nege'za huama'ma nehaza zankura zamagazegu nehu'za mago'anena kasanampa vahe'mo'zama nentaniza azokake kukena hu'za vahera revatga osugahaze. 5 Hianagi agra anage hugahie, nagra kasnampa vahera omani'noanki hozama ante vahe mani'noe. Osi'ma mani'nogeno'a kazokazo eri'za vahe zagore natrazage'na nagra hoza erizanke eri'na e'noane. 6 Ana hanige'za mago'a vahe'mo'za agrira antahige'za, kamimizafina na'amo kahe'ne? hu'zama antahigesageno'a anage hugahie, ronenimokizmi nonte vu'noge'za nahe'naza zamo'e huno hugahie. 7 Otio, bainati kazimoka, tavaonire'ma oti'nea sipisipi afute kva nera amasagio, huno Hihamu'ane Ra Anumzamo'a hu'ne. Sipsipi afute kva nera ahe frigeno sipisipi afu'aramimo'za panani hu'za nefre'nagenka ne'onese sipisipi nagara hara huzmantagahue. 8 Hagi maka mopafina 3'a kevu vahepintira tare kevu vahe'mo'za fri vagaregahaze. Hianagi magoke kevu vaheke manigahaze, huno Ra Anumzamo'a hu'ne. 9 Hagi mago kevu vahe'ma mani'naza vahera tevefi zamavare'na ufre'na, tevefima silvama kreno eri agru hiankna nehu'na, golima tevefi kreno'ma eri zogiankna hugahue. Ana hanuge'za zamagra nagri nagi ahe'za nunamuna nehanage'na nunamuzmia antahi'na nona huzmante'na, Nagri vaher mani'naze hu'na nehanuge'za, zamagra hu'za Ra Anumzamo'a, tagri Anumza mani'ne hu'za hugahaze.

14 Keho, Ra Anumzamofo kna neankino, Jerusalemi vahera arohu eme tamare'za feno zantmia negesage'za refko hu'za erigahaze. 2 Na'ankure maka kokankoka vahera zamavare atru hanuge'za Jerusalemi kumapi vahera hara eme

huzmante'za kumazmia e'neriza, arohu zamare'za maka'zazmia
e'neriza a'nanneramina zamazeri haviza hugahaze. Vahetmina
amu'nompinti refko hu'za kina huzmante'za zamavare'za
vanageno, zamatre'zama vanaza vahe'mo'za eri havizama
hutre'zama vanaza kumapi manigahaze. 3 Ana huteno, ko'ma
ha'ma huzmante'nea knafima hu'neaza huno Ra Anumzamo'a
kokankoka vahera hara huzmanteno vano hugahie. 4 E'i ana
knarera Ra Anumzamo'a Jerusalemi kumamofona zage hanati
kaziga Olivi agonare agia eme reno oti'nigeno, Olivi agonamo'a
amu'nompinti ankariseno zage hanati kaziga vanigeno, zage
fre kaziga vanigeno, mago agupo efore hugahie. Hagi mago
kaziga agonamo'a noti kaziga vanigeno, mago kaziga agonamo'a
sauti kaziga vugahie. 5 Ama ana agupofi korora freta
vugahaze, na'ankure ama ana agupomo'a Azeli uhanati'ne.
Juda kini ne' Uzia knafima imima erige'zama fre'nazankna huta
korora fregahaze. Ana'ma nehanageno'a Ra Anumzana nagri
Anumzamo'a ruotge'ma hu'naza naga'ane egahie. 6 E'i ana
knarera masa forera nosanigeno, zasira omanenkeno, aisia
oramigosie. 7 Ana knamo'a ruzahu knarafa fore hugahiankino,
ana zama fore'ma haniana Ra Anumzamoke antahino keno
hu'ne. Feru'ene kenage'enena omanegosiankino kinagama
senigeno'a, masamo'a hanina osugosianki anante megahie. 8 E'i
ana knarera vahe'ma asimu'ma ami timo'a Jerusalemi kumapinti
hanatiteno amu'nompinti refko huno mago kaziga timo'a Fri
Hagerima me'nerega vinkeno mago kaziga timo'a Mediterenia
Hagerima me'nerega vugahiankino zage knafine ko knafinena
ontane evuva evuva hugahie. 9 Ana hanigeno Ra Anumzamo'a
maka mopafi vahetera kinia manigahie. E'i ana knarera magoke
Anumza maninkeno, magoke agije aheza monora huntegahaze.

10 Geba moparetima vuno Jerusalemi kumamofona sauti kaziga Rimonima uhanati'niana, ana maka mopamo'a agupo mopa segahie. Hianagi Jerusalemi kuma'mo'a agonare mesga huno me'nenige'za vahe'ma anampima mani'nazana, Benzameni kafantetira vuno Kona kafante vuteno, Hananeli Zaza nonte uhanatino vuteno, kini ne'mofo wainima regatati'ma nehazare vugahie. **11** Ana kumapina vhahera mani vitesageno ru'enena Jerusalemi kumara hara eme hu'za eri havizana osnageno, knare huno mevava hugahie. **12** Hagi maka kokankoka vahe'mo'zama Jerusalemi kumapi vahe'ma ha'ma eme huzmante'naza vahetega Ra Anumzamo'a kefo kri atresigeno eme zamazeri haviza hugahiankino, oti'za mani'nenageno zamavufagamo'a negasrinigeno, zamavu kerifina zamavurgamo'a negasrinigeno, zamagikampina zamagefunamo'a ana zanke huno kasrigahie.

13 E'i ana knarerera Ra Anumzamo'a zamazeri zamagogofena zamahirahiku nehu'za zamagra zamagra zamazankano hara hugahaze. **14** Juda vahe'mo'zanena Jerusalemi kumapi vu'za hara ome hugahaze. Jerusalemi kuma tavaonte'ma megagi'nea kumatamimpintira fenozantmina eri atru hugahazankino, goline, silvane, kukenanena rama'a eritru hugahaze. **15** Hagi ha' vahe'mokizmi seli nonkumapima mani'naza hosi afutaminte'ene, miuli donki afutaminte'ene, kemoli afutaminte'ene, donki afutaminte'ene, maka bulimakao afu'taminte'enena anahu kna kefo krimo egahie. **16** Ana'ma hutesige'za, Jerusalemi vahe'ma ha'ma eme huzmantesaza vahe'ma, ana krimo'ma zamahe ofri'nige'za mani'naza vahe'mo'za, mago mago kafurera Jerusalemi kumate mareri'za Kini ne' Monafi sondia vahe'mofo Ra Anumzana monora ome hunente'za, Anumzamo'ma zamavareno'ma e'nea zanku'ma fugagi nompima mani'nezama

nezama kre'za nene'za musema nehaza knaraminkura musena
eme hugahaze. **17** Hagi ama mopafinti'ma ina nagamo'zo
Jerusalemima mareriza Kini ne', Monafi sondia vahe'mofo Ra
Anumzamofoma mono'ma ome huontesaza vahe'mofontera
ko'mo'a ruontegahie. **18** Hagi ka'ma kokampima Anumzamo'ma
zamavareno'ma e'nea zanku'ma musema nehaza knare'ma,
Isipi vahe'mo'zama zamagranema mareri'za musenkasema
osnazana, Ra Anumzamo'a ruga'a vahete'ma hu'neaza huno
kora atrenigeno zamagritera runontesigeno, kefo krima atregeno
ruga'a vahe'ma zamazeri havizama hu'neankna hugahie. **19** Hagi
ne'zama kreza nene'za seli nompima mani'za e'naza knagu'ma
antahimi'za musenkasema nehaza knare'ma, Isipi vahe'ene
ruga'a mopafi vahe'mo'zanema mareriza musenkasema osanaza
vahera anahu knaza zaminio zamazeri haviza hugahie. **20**
Ana knarerera hosi afu'mofo anankempima rente'naza berotera,
Ra Anumzamofontera ruotge hu'ne hu'za krentegahaze. Hagi
kresramna vu itamofo avugama me'nea zuomparamimo'ma
ruotge'ma hu'neaza huno Ra Anumzamofo nompima nezama
negraza kavoramimo'enena ruotge hugahie. **21** Ana maka
ne'zama kre'za nenaza kavoramima Jerusalemi kumapine,
Juda mopafinema me'neana, Monafi sondia vahe'mofo Ra
Anumzamofontera ruotge hugahie. Iza'o mono'ma hunaku'ma
esia vahe'mo'a, amne ama ana kavoramina erino kresramnama
vania ne'zana kreno negahie. Hagi ana knarerera Monafi sondia
vahe'mofo Ra Anumzamofo nompina zagore'ma keonke'zama
atre vahera omanigahie.

Marakai

1 Ama'i nanekea Ra Anumzamo'a kasnampa ne' Malakaiampi
huvazino Israeli vahe zamasmi'nea naneke, **2** Ra Anumzamo'a
huno, Nagra navesi neramantoe. Hianagi tamagra amanage
hutma nantahinegaze, Kagra inankna kazigati tavesia nerantane?
Anagema hazageno'a, Ra Anumzamo'a anage hu'ne, Jekopu'a
Iso negna mani'neanagi, nagra Jekopuna navesi ante'noe.
(Rom 9:13) **3** Hianagi Isona navresra hunente'na, agona
kokama erisantima hare'nea kokana eri hagage hugeno, hagage
koka me'negeno, ana kokampina afi kraramimo avite'ne. **4**
Idomu vahe'mo'za amanage hugahaze, tazeri haviza hazageta
havizantfa hu'nonanagi, ete vuta nonkumatia omeri so'e huta
kigahune. Hianagi Monafi sondia vahe'mofo Ra Anumzamo'a
huno, nonkumara tro hu'za manigahazanagi, Nagra ana
nonkumazmia eri tagna taganu vazitrenugeno, ana mopagura
kefo avu'avazamo avite'nea mope hu'za nehu'za, anampima
nemaniza vahekura, Ra Anumzamo arimpa ahezmante vava
nehia vahere hu'za hugahaze. **5** Tamagra'a tamavufinti negeta
amanage huta hugahaze, Ra Anumzamofo hihamu'amo'a
rankrerfa hu'neankino, Israeli vahe mopa atupa agatereno vuno
eno hu'ne huta hugahaze. **6** Monafi sondia vahe'mofo Ra
Anumzamo'a pristi vahetaminkura amanage hie, ne'mofavremo'a
nefana antahimino kesga nehuno ke'a antahinemigeno, eri'za
vahe'mo'a kva'amofona kesga huno ke'a antahinemie. Hanki
Nagrikura huta nafatimo'e nehuta, kvatimo'e nehaze. Hianagi
nahigeta nagesga nehuta keni'a nontahize? huno Monafi sondia
vahe'mofo Ra Anumzamo'a hu'ne. Hianagi tamagra huta, inankna
huta Kagri kagia eri haviza nehune? huta nehaze. **7** Tamagra
agru osu ne'za erita kre sramana vu itanirera Kresramana

nevaze. Hianagi tamagra amanage nehaze, inankna huta kagri kagia eri pehana nehune? huta nantahinegaze. Ra Anumzamofo ita kehenkami netrone huta nehuta, tamagra ana ita keamane zankna nehaze. **8** Avuma asuhu afu'ma avreta nagrite'ma ofama eme kre sramana vanazana, e'i knare avu'avaza hugahazafi? Agia azamo'ma haviza huge, kri erige'ma hu'nesia afu'ma kre sramanama vanazana, e'i knare avu'vaza hugahazafi? E'ina'ma hu'nenia afura avrenka gavana nera ome aminenka ko, agra musena hugantegahifi? huno Monafi sondia vahe'mofo Ra Anumzamo'a hu'ne. **9** Hagi menina Anumzamofo asunku zankura pristi vahe'mota antahigeho. E'ina ofama tamagra tamazanuti'ma hanaza zana Anumzamo'a negeno musena hugahifi? huno Monafi sondia vahe'mofo Ra Anumzamo'a hu'ne. **10** Hagi mago'mo'ma mono no kafama erigisigeta knare osu ofama Kresramanama nevaza zama eme Kresramanama ovanazana, e'i knare hugahie. Nagra tamagrikura musena hunoramantoanki'na, ofama hanazana musena hu'na antahi oramigahue, huno Monafi sondia vahe'mofo Ra Anumzamo'a hu'ne. **11** Zage hanati kazigati evuno zage fre kazigama mani'naza vahepina, nagri nagimo'a marerigahie. Hagi nagri nagire maka kaziga mananentake'za insensine agru ofanena hugahaze. Na'ankure nagri nagimo'a kokankoka vahetera marerigahie, huno Ra Anumzana Monafi sondia vahe'mofo Anumzamo'a hu'ne. **12** Hianagi tamagra Nagri Kresramana vu ita keamne zankna nehuta, knare osu zana erita Kresramana vu itarera eme ofa nehuta kresramna vu itani'a eri pehana hu'naze. **13** Tamagra amanage nehaze, Ra Anumzama amage'ma ante zamo'a tusi amuho hu'ne huta nehuta, kasegeni'ama amage'ma ante'zankura tamagona remaku hu nagamunetraze, huno Monafi sondia vahe'mofo

Ra Anumzamo'a hu'ne. Musufasege, agaza haviza huge, kri erige'ma hu'nenia afu'ma ofama erita eme Nagrite'ma nehzana Nagra ana ofatamirera musena nehufi? huno Ra Anumzamo'a hu'ne. 14 Hagi iza'o knare ve sipisipi afu ofa hugahue huno'ma huteno, agaza haviza huge kri erige'ma hu'nenia sipisipi afu'ma eme ofama Ra Anumzamofonte'ma hanimo'a, kazusifi manigahie. Na'ankure Nagra ra kini ne' manugenno kokankoka vahe'mo'za Nagri nagigura koro nehaza ne' mani'noe, huno Monafi sondia vahe'mofo Ra Anumzamo'a hu'ne.

2 Hagi Ra Anumzamo'a huno, Pristi vahe'mota antahiho, ama'i tamagrama amage'ma antesaza kasege. 2 Hagi tamagra tamagu'areti huta nagi'a ahentesga hoho. Hagi ana'ma osana zana, Monafi sondia vahe'mofo Ra Anumzamo'a huno, asomu'ma eri'naza zantamina eri haviza hugahue. Tamage Nagra ko kazusi huramante'noe, na'ankure tamagra tamagu'aretira huta keni'a antahita novaririze. 3 Tamagripinti'ma fore hu'naza mofavreramina kna zami'na zamazeri haviza nehu'na, tamagrama ofa Kresramana vunaku'ma eme ahegisaza ofa afumofo arifa eri'na tamavugosafina rehame hu'na freneramante'na, zamazeri matevanugeta afu arimpama hute'za arifa'ama eri'za ome netrazafi umanigahaze. 4 E'na hanugeta Nagriku ama kasegea atregeno e'ne huta keta antahita nehanageno, Livae nagate'ma huhagerafi hvempa kema hu'hoa kemo'a meno vugahie, huno Monafi sondia vahe'mofo Ra Anumzamo'a hu'ne. 5 Livae vahe'enema huhagerafi hvempagema hu'noana, asimu'ma erino mani ke'ne, arimpa fruma huno mani ke ami'noe. Nagri'ma koro'ma hunanteno, nagoraga'ama mani huhagerafi hvempage amugenno agra Nagri nagorga koro hunanteno mani'ne. 6 Agirira tamage nanekemo agipina me'negeno, mago havige

nanekea osu'ne. Agra Nagri'ene arimpa fru zampine fatgo
avu'ava zampine nevuno, kumi avu'ava zampintira rama'a vahe
zamazeri rukrahe hu'ne. 7 Hagi pristi vahe'mo'za vahe'ma
zamaza hanage'za Anumzamo'nama nage'za antahi'zama
hanaza vahe mani'naze. Ana hu'negu vahe'mo'zama knare
antahi'zama erinaku'ma hanu'za zamagrite vanage'za rempi
huzamigahaze. Na'ankure pristi vahera Monafi sondia vahe'mofo
Ra Anumzamofo kema erino vuno eno'ma hu vahe mani'naze. 8
Hianagi pristi vahe'mota Anumzamo'na kana atreta hazanegraze.
Rama'a vahe tamagra antahintahia zamizage'za kumpina
trakara hu'naze. Livae vahe'enema huhagerafi'noa huvempa
kea ru hantagi'naze, huno Monafi sondia vahe'mofo Ra
Anumzamo'a hu'ne. 9 Tamagra Nagri kea amagera nonteta,
veamokizmima Nagri kema rempima hunezamita mago'amofona
masavenke hunezamita, mago'amokizmia ha'renezmantaze.
Ana hu'negu Israeli vahe'mo'za tamefi huramigahaze. 10
Maka vahe'mota antahita ketama hanunana magoke Nerafa'a
mani'ne. Ana hu'neankino Agrake'za Anumzana mani'neno,
mika vahera tro hurante'ne. Hagi nahigeta hara ore are
nehuta, Anumzamo'ma tafahe'inema huhagerafi huvempagema
hu'neana ruha'nentagune? 11 Juda vahe'mo'za zamentintia
atre'za hazagrazageno, kasrino hi'mnama vu'nea avu'ava zana
Israeli mopafine Jerusalemi kumapinenia hu'naze. Hagi Juda
venenemo'za kaza osu havi anumzante'ma mono'ma hunentaza
a'neramina ara eri'za Ra Anumzamofo mono nona eri pehana
hu'naze. 12 Ra Anumzamo'a Israeli vahepinti'ma iza'o ana
avu'ava'ma nehia vahe'ene, ana avu'ava'ma nehuno ofama erino
Monafi sondia vahe'mofo Ra Anumzamofonte'ma esia vahera
ahe fanane hugahie. (Jen-Agafa 2:18-25) 13 Hagi ana nehuta

mago zama nehzana tamagra amana nehaze, Ra Anumzamofo
Kresramana vu ita zavi krafage nehuta tamavunuteti repasupa
negita, kragira neraze. Na'ankure ofama eme nehaza ofagura
musena huno e'norie. **14** Hianagi tamagra agenoka huta,
nahigeno Anumzamo'a antahinoramie? hutama nehzana,
na'ankure Ra Anumzamo'ma neramagegetama nehzavema
manineta huvempa huta eri'naza a'enena mani fatgo huta
nomanize. **15** Anumzamo'a tanagrira vene a'enena trohu
tanantegeta, arave huta magoke tanavufga huta mani'na'e.
Amega tanavufgare'ene avamupine tanagra Agri su'a mani'na'e.
Hagi Agra naza tanagripintira eri'za nehie? Tanagripinti'ma
fore'ma hanaza mofavreramimo'ma Agri'ma koroma hunte'za
agoraga'ama mani zanku ave'nesie. E'igu kagu'a kegava
hunenka nehzavema mani'nenka eri'nana aka'are mani fatgo
huo. **16** Na'ankure aravema atane zankura tusiza huno nevresa
nehie huno Ra Anumzana Israeli vahe Anumzamo'a hu'ne.
A'ma netranana, nomani'zama'a azeri amuho nehunka, tusi'a
ataza nemine, huno Monafi sondia vahe'mofo Ra Anumzamo'a
hu'ne. E'igu kagu'a kegava hu'eneka, aka'are mani fatgo hunka
manio. **17** Tamagra rama'a naneke huta Anumzamofona azeri
avesra nehaze. Nehuta inankna huta azeri avesra nehune? huta
agenoka nehaze. Kefo avu'ava'ma nehaza vahe'mota huta, Ra
Anumzamofo avurera tagra knare hu'nonankino, Agra muse
hunerante hutama nehaza kemo'a, Ra Anumzamofona azeri
avesra nehigeta, iga fatgo huno'ma refkoma nehia Anumzana
mani'ne? huta agenoka nehaze.

3 Hagi antahiho, Nagri nanekema erino vania kato vaheni'a
huntoankino agra vugoteno nevuno, kama vanua kana retro
hugahie. Ana hanigeno, tamagrama nehakaza Ra Anumzamo'a

antri hanazaza huno mono noma'are egahie. Huhagerafi
huvempagema huama'ma hania kato neku'ma nehakaza ne'mo'a
tamage huno egahie, huno Monafi sondia vahe'mofo Ra
Anumzamo'a hu'ne. 2 Hianagi Agrama esanigeno'a, iza knarera
huno ana knarera otigahie? Iza knarera hu'nenimo oti'nenor
kegahie? Na'ankure Agra aenima krefizo huno'ma azeri agruma
nehia teve nefakna huge, pehenage kukenama sese huno azeri
agruma nehia sopegna huno mani'ne. 3 Agrama eri'zama erisiana,
tevefima silvama kreno eri agruma nehiakna huno, Livae vahera
zamazeri agru hanige'za, agrunentake goline silvagna hu'ne'za
Ra Anumzamofontera fatgo avu'ava hu'za ofa hugahaze. 4
Ana hanage'za, ko'ma evu'nea knaramimpine kafuramimpinema
hu'naza ofama antahizami'nea kna huno Ra Anumzamo'a
Juda vahe'ene Jerusalemi vahe'mokizmi ofa antahi zamigahie.
5 Ana knarera Nagra erava'o hu'na keagare tamavrente'na
keaga huramantegahue. Avuatga vahe'ene savri hu'za monko
avu'avazama hu'zama vanoma nehaza vahe'ene, zamagi'ari
vahe'enena Nagra ame hu'na keagare zamavarente'na keaga
huzmantegahue. Hagi iza'o eri'za vahe'ama zagoma atesinte
so'ema nosuno, kento a'nene, megusa mofavreramima zamazeri
haviza nehuno, ruregati'ma emanı vahe'enema zamazeri
havizama nehia vahe'ene koroma hunante'za nagorgama
nomaniza vahe'enena Nagra keaga huzmantegahue. Na'ankure
ama ana vahe'mo'za Nagrira korora hunante'za nagoraga'a
nomanize, huno Monafi sondia vahe'mofo Ra Anumzamo'a
hu'ne. 6 Nagra Ra Anumzana ruzache osu Anumza mani'noe.
E'ina agafare Jekopu mofavreramimota tamazeri haviza osugeta
fananea osu'naze. 7 Tamafahe'mofo knareti'ma e'neana,
kasegeni'a kehenkami netreta ovariri'naze. Menina ete rukrahe

huta nagrite enkena, Nagra ete rukrahe huna tamagrite vaneno, huno Monafi sondia vahe'mofo Ra Anumzamo'a hu'ne. Hianagi tamagra nagenoka huta, inankna huta tagra rukrahera huta egahune? huta nehaze. **8** Vahe'mo'a Anumzamofo zantamina amane musufa segahifi? Hianagi Anumzamo'na zantamina tamagra musufa nesaze. Hianagi tamagra huta, inankna huta Anumzamofo zana musufa nesone? Taitine ofane tamagra musufa nesaze. **9** Tamagra ana maka'mota kazusifi mani'naze, na'ankure tamagra maka ama mopafima mani'naza vahe'mota Nagri'za musufa nesaze. **10** Hagi maka'zama refkoma nehanageno 10ni'ma hania kevua erita ne'zama nentazafi ome antenkeno nezamo'a aviteno mono nonifina meno. Ana nehuta menina renaheta keho, zahoma eri kana monafintira Nagra eri anagi'na tusi'a asomura eri tagitresugenonontamifina fenomo'ma aviteno varehiramina fenoma ante kankamunkura hakegahaze huno Monafi sondia vahe'mofo Ra Anumzamo'a hu'ne. **11** Hagi anama hanage'na hozatamia kegava huramante'nugeno havi kafamo'za zafa ragatamia neza eri hana nosanageno, waini zafamo'a ragama rente'nuno'a zahufafina havizana huno hariri huoramigahie, huno Monafi sondia vahe'mofo Ra Anumzamo'a hu'ne. **12** Ana hanige'za maka kokankoka vahe'mo'za asomu'ene nemaniza vahere hu'za hugahaze. Na'ankure mopatmimo'a hentofaza hu'ne huno Monafi sondia vahe'mofo Ra Anumzamo'a hu'ne. **13** Tamagra hankave kege huta Nagrira nazeri haviza nehaze huno Ra Anumzamo'a hu'ne. Hianagi tamagra huta, tagra inankna huta hankave kea huta kazeri haviza nehune? huta nehaze. **14** Tamagra huta, nanknare zama'agu Anumzamofona eri'zama'a erinenteta, nanknare'za agripintira erisunku huta kasege'a amagera antegahune nehuta,

Monafi sondia vahe'mofo Ra Anumzante'ma kumitigu'ma tasunku
huta zavi'matesunana na'a eri fore hugahune? huta nehaze. **15**
Hianagi menina huta, zamavufaga rama nehaza vahe'mo'za
asomu eri'za nemanizageno, kefo avu'ava zama nehaza
vahe'mo'za feno vahe nesazageno, Anumzamofoma rehe'za
negaza vahe'mo'za knazana e'norize huta nehaze. **16** Hagi
anante Ra Anumzamofoma koro'ma hunente'za agoraga'ama
nemaniza vahe'mo'za keaga huganti kama nehzageno, Ra
Anumzamo'a agesa anteno nentahie. Ana nehzageno age'okani
antahimi vava avontafema Agri avugama me'nea avontafepi, Ra
Anumzamofoma koroma hunente'za, agoraga'ama nemaniza
vahe'mokizmi zamagia krente'ne. **17** Nagra ana vahetmima mareri
fenozama hiaza hu'nama zamazeri nafa'ama hanua knarera,
kema antahi mofavrema nefo'ma kegava hiaza hanuge'za,
zamagra nagri vahe manigahaze, huno Monafi sondia vahe'mofo
Ra Anumzamo'a hu'ne. **18** E'ina hanugeta, e'i fatgo avu'ava'ene
vaheki, kefo avu'ava'ene vaheki, e'i Anumzamofoma eri'zama
erinentea vaheki, Anumzamofoma eri'zama'ama eri nontea
vaheki huta mago'ane keta antahita hugahaze.

4 Monafi sondia vahe'mofo Ra Anumzamo'a anage hie,
maka'zama refkoma hanua knamo'a, avenifima tevema
hugre'nageno keonke zama tefizo nehiankna kna neankino,
avufga rama nehia vahe'ene, kefo avu'ava'ma nehia vahe'enena,
hagage trazama tevemo'ma tefanenema hiaza hugahie.
Ana tevemo'a arafunama, azankuna'ma, maka'zama 'anena
tefanane hugahie. **2** Hianagi Nagri nagigu'ma koro'ma
nehuta, nagoraga'ama nemaniza vahe'motarera, hanavenimo'a
tamagrite'ma efore'ma haniana, fatgo avu'avaza zamo'a
zagemo'ma hiaza huno remsa hunermanteno, tamazeri

knamarena bulimakao anentamo'ma keginafinti'ma atiramino
ne-eno muse huno haru huno takaure takaure huno vano
hiankna hugahaze. 3 E'i ana knazupa kefo avu'ava'ma nehaza
vahe zamagofetu tamagia reta vano hugahaze. Na'ankure
e'i ana kna zupa ana vahe'mo'za tamagia agu'samofo fenka
kaziga tanefa samparegahaze. E'i anazama fore'ma hania
kna retro nehuankino ana zana fore hugahie huno Monafi
sondia vahe'mofo Ra Anumzamo'a hu'ne. 4 Eri'za vaheni'a
Mosesema kasegema ami'noa zanku tamagesa antahiho. Maka
kasegene tra kenema maka Israeli vahe'mo'zama avaririsaze
hu'nama Sainai (Horep) agonafima ami'noa kasegene tra kenena
tamagera okaniho. 5 Hagi antahiho, Nagra kasnampa vaheni'a
Elaizana huntanenko egota hutenigena, Ra Anumzamofo
knama efore hanigeno ranra knazama efore huno vahe'ma
zamazeri koro'ma hania kna henka egahie. (Luku 1:17) 6 Agra
zamafahe'ina zamagu'a eri rukrahe hanige'za mofavrezmire ne-
enageno, mofavreramimofo zamagu'a eri arukrahe hanige'za
zamafahe'intega vugahaze. Anama osnage'na Nagra e'na ama
mopa emeri haviza hugahue.

NEW TESTAMENT



Hianagi Jisasi'a anage hu'ne, Nafanimoke, ontahine'za anara nehzanki, kumizmia atrezmanto.

Anage nehige'za sondia vahe'mo'za zaza kena'a refko huza erinaku taisi zokogo re'naze.

Ruku 23:34

Matiu

1 Ama'na avona Jisas Kraisi agigo azankomofo naneke. Agra Deviti nagapinti fore higeno, Deviti'a Abrahamu nagapinti fore hu'ne. **2** Abrahamu'a, Aisaki nef'a'e, Aisaki'a Jekopu nef'a'e, Jekopu'a, Judane afu'aganahe'ina kasezmante'ne. **3** Juda'a, Perezine, Zerakizni neznafa'e, neznarera'a Tamari kasezanante'ne, Perez'i'a, Hezroni nef'a'e, higeno Hezroni'a, Rami nef'a'e. **4** Rami'a, Aminadabu nef'a'e, Aminadabu'a, Nasoni nef'a'e, higeno Nasoni'a, Salmoni nef'a'e. **5** Salmoni'a Boasi kasente'ne. Hagi Boasi nerera agi'a Rehapu'e. Boasi'a Oveti kasente'ne. Hagi Oveti nerera agi'a Ruti'e. Oveti'a Jesi kasentegeno, **6** Jesi'a, kini ne' Deviti nef'a'e. Deviti'a Solomon nef'a'e, Betsibama Uria a'ma eri'nea a'mo kasente'ne. **7** Solomoni'a Rehoboam nef'a'e, Rehoboamu'a Abija nef'a'e, hagi Abija'a Asa nef'a'e. **8** Asa'a Jehosafati nef'a'e, Jehosafati'a Joram nef'a'e, hagi Joram'a, Uzia nef'a'e. **9** Uzia'a Jotamu nef'a'e, Jotamu'a Ahasi nef'a'e, Ahasi'a Hezekiaia nef'a'e. **10** Hezekiaia Manase nef'a'e, Manase'a Amoni nef'a'e, hagi Amoni'a Josaia nef'a'e. **11** Josaia'a Jekonaia nefakino, afu'aganahe'ine kase zamante'ne. Anama hu'neana kinafima zamavare'za Babiloni vuku haza knafine. **12** Babilon kumate kina ome hutageno Jekonaia'a, Seatieli nef'a'za hu'ne, Seatieli'a, Zerubabel nef'a'e. **13** Zerubabel'i'a, Abihuti nef'a'e, Abihuti'a, Eliakim nef'a'e, hagi Eliakimi'a, Azori nef'a'e. **14** Azori'a, Zadoki nef'a'e, Zadoku'a, Akimi nef'a'e, hagi Akimi'a, Eliuti nef'a'e. **15** Eliuti'a, Eliaza nef'a'e, Eliaza'a, Matani nef'a'e, hagi Matani'a, Jekopu nef'a'e. **16** Jekopu'a, Josefe nef'a'za higeno, Josefe'a Mariana neve'e. Hagino Jisasima kasentege'za, agi'a Kraisi'e hu'za antemi'naze. **17** Abrahamunteti vuno Devitinte'ma vahe'ma forehu anante anante hu'hazana 14ni'a naga nofi fore hu'haze.

Hagi Devitinteti'ma eno Babiloni kina huzmante'nare'ma e'neana
14ni'a naga nofi fore hunante anante hu'naze. Hagi kinama
huzmante'nareti vuno Kraisi knare'ma e'neana 14ni'a naga nofi
forehu'nante anante hu'naze. **18** Jisasi Kraisi'ma fore hu'neana
amanahu hu'ne, Agri nerera Mariana, Josefente huhampri
ante'hageno, nomago hu'ne omani'nakeno, Ruotge Avamu'mo
rimpafi emanigeno, amu'ene hu'nege'za kefore hu'naze. **19** Ana
hazageno, agri neve Josefe'a fatgo ne' mani'negu, Mariana
azeri agaze hu'zanku, oku'a a' atrenaku agu'agesa antahi'ne.
20 Hianagi ana antahintahima retro nehigeno'a, mago Ramofo
ankeromo ava'nafi eno anage huno asmi'ne, Josefe, Deviti
nemofoge, korera osunka Mariana aka'agi avro, na'ankure agri
rimpafima mani'neana, Ruotge Avamu'mofo mofavre mani'ne.
21 Ne'mofavre kasentegahianki, ana mofavremofo agi'a, Jisasi'e
hunka agi'a antemio, na'ankure Agra vahe'amokizmi kumi'zmifinti
zamaza hugahie. **22** Ama ana maka'zama efore hu'neana, korapa
Ra Anumzamo kasnampa ne'te ke hunte'nea zamo nena'a efore
hu'ne. **23** Keho vene omani'nea a'mo mofavre amu'ene huno,
Ne'mofavre kasentegahie, ana hanige'za zamagra Agri Agi'a
Imanueli'e hugahaze, ana agima eri rukrahe haniana, Anumzamo
tagrane mani'ne hu'ne. (Ais 7:14) **24** Mase'nefinti Josefe'a otino
Ramofo ankeromo asmino hunte'nea kante anteno, Mariana a'
avare'ne. **25** Hianagi anteno omaseno amne kegava hu'negeno,
ne'mofavre kasentegeno, Josefe'a, Jisasi'e huno agi'a ante'ne.

2 Jisasi'ma Betlehemi Judia kaziga mopare, Heroti'ma kini
mani'nea knafi fore'ma hige'za, zage hanatitegati antahi'zane
vahe'mo'za Jerusalemi ehanati'za, anage hu'naze, **2** Jiu
vahe'motma Kinima manisia nera inantega kasente'ne? Na'ankure
tagra Agri ofuna zage hanati kazigati keteta, mono hunteku

e'none. 3 Ama ana nanekema Heroti'ma kini ne'mo nentahino'a, agu'agesamo kore nehuno tarerare nehigeno, Jerusalemi kumate vahe'mo'zanena agrama hiaza hu'naze. 4 Heroti'ma pristi vahe'zagane, kasegere'ma ugagota hu'naza vahe'ma magopi zamazeri atru huteno'a, inantega Mesaia'a fore hugahie? huno zamantahige'ne. 5 Hige'za zamagra, agri husmi'za, Judia kaziga Betlehe kumate kasentegahie, na'ankure korapa Anumzamofo kasnampa (profet) ke huama hu'nea ne'mo avon tafepi amanage huno krente'ne, 6 Hagi kagra, Betlehemia, Juda vahe mopafina, kagra Juda vahe'mokizmi ranra kumapintira osasi kumatfana omani'nane, na'ankure kagripinti magora ra nera Israeli vahe ni'ama kegavama hania nera fore hugahie. (Mai 5:2.) 7 Hagi Heroti'a frakino oku'a antahi'zane vahera zamagenoka huno, Nankna ana ofumo'a fore hu'ne huno zamantahige'ne. 8 Heroti'a Betlehemu viho huno hunezmanteno, anage huno zamasmi'ne, Vutma ana Mofavrea ome haketa ketetma, Agri'ma kefore'ma hanutma eme nasminke'na, nagranena anazanke hu'na monora ome hunt'a'neno. 9 Ana nanekema kini ne'mo'ma hige'za antahite'za, nevu'za ko'ma zage hanati kaziga mani'neza ke'haza ofumo kagota huzmanteno nevige'za keme nevazageno ana Mofavre mani'nea nomofo agofetu eme otige'za ke'naze. 10 Ana ofuma negageno'a tuni'a muse zamo zamagu'afina avite'ne. 11 Ana nompi emarereri'za ana Mofavrene nerera Mariane nege'za, zamugosa regati kepri hu'za mono hunte'naze. Eri'zama vu'naza feno'zana anagi'za, musezama ami'nazana, golima, mananentake paurane (frankincense), mere'ne (myrrh) ami'naze. 12 Anumzamo'ma ava'nafi zamasmino Herotintera oviho huno'ma hu'nea kea nentahiza, antahi'zane vahe'mo'za oti'za rugantegati mopa zamirega vu'naze. 13 Antahi'zane

vahe'ma vutageno'a, Ra Anumzamofo ankeromo Josefena ava'nafi efore huno asmi'ne, Otio! Mofavrene, nerera'nena znavrenka Isipi frenka vuo, anantega umani'hege'na Nagrama kasmisugenka eno, na'ankure Heroti'a ana Mofavre hakreno ahe friku nehie huno asami'ne. **14** Anage higeno Josefe'a otino ana Mofavrene, nererane ana kenage agu'afi zanavreno Isipi vu'ne. **15** Anantega Isip vuno umani'negeno Heroti'a fri'ne. Ana'ma hu'neana Anumzamo kasnampa ne'mofo asmigeno korapa kre'nea kemofo nena'a efore hu'ne, Isipitira Nagra Ne'mofavre'ni'a agi hugeno e'ne. (Hos 11:1.) **16** Anante Heroti'ma keama, antahi'zane vahe'mo'za revatgama hazageno'a, agra tusi'a rimpa he'ne. Agra vahe huzmanteno, Betlehem kumapinti ene, ana tva'onte me'hea kumapinti, zagegafu'zmimo tare zagekafureti urami'nea mofavre'zaga ome zamahe friho huno antahi'zane vahe'mo'za ofugu'ma asami'za, e'inahu'zana fore hugahie hazageno antahi'nea knagu anage hunora zamasami'ne. **17** Anante korapa mago kasnampa ne' Jeremaia Anumzamo asmigeno hu'nea kemofo nena'a fore hu'ne, **18** Mago ageru Rama kumateti antahi'naze, zavi neteno tusi'aasuza eri'ne, Reseli'a mofavre rmima'agu zavi ate'ne, higeno agri'ma azeri tagane'zankura ave'osi'ne, na'ankure magore huno omani tfa higeno'e. (Jere 31:15.) **19** Heroti'ma fitegeno, mago Ra Anumzamofo ankeromo Josefena ava'nafi eno Isipi eme asmi'ne, **20** Otinka, Mofavrene nererane zanavarenka Israeli mopare vuo, na'ankure ahe'naku hakre'naza vahera hago fri'naze. **21** Anage higeno Josefe'a otino ana Mofavrene, nererane zanavreno ete Israeli mopare e'ne. **22** Hianagi Heroti nemofo Akelasi, nefo no erino Judia kaziga kegava hie kema nentahino'a, ana kaziga vezanku koro hu'ne. Anumzamo ava'nafima asmi'nea

kante anteno, agra (Josefe) atreno Galili kaziga vu'ne. 23

Agra zanavreno viazamo, Nasareti kumate umani'naze. Anama hu'neana korapa kasnampa vahe'mo'za hunte'naza kemo nena'a efore hiankino Jisasinkura Nazareti Nere hu'za agia hegahaze.

3 Ana knafina mono ti frezmante Joni'a, Judia kaziga ka'ma mopafi ne-eno amanage huno Anumzamofo ke huama huno zamasmi'ne. 2 Kefozantamigu tamasunke huta tamagu'a rukrehe hih. Na'ankure mona kuma'mo'a hago tava'o nehie. 3 Na'ankure korapa ama'na kegu kasnampa ne' Aisaia'a Joninku anagea hu'ne, Mago ageru'mo ka'ma mopafinti kezatino, Ramofo kana varinenteta, agri kana eri ante fatgo hih. hu'ne! (Ais 40:3) 4 Joni'a kemori azokateti trohunte kena masi'neno, trazama nenaza afu'mofo akruteti amu'nofira nehuno, kenu'ene, afi' tumemofo rima'ane ne'ne. 5 Anante Jerusalemi kumate vahemo'zane, Judia kazigati ene, ana mika Jodani kazigati vahe'mo'zane mika eri hantage'za Joninte etere hazageno, 6 Joni'a Jodani timpi huama kumi'zmi hutere nehazageno, mono ti fre zamante'ne. 7 Hianagi agrama kege'za hakare'a Farisi vahe'ene, Sadusi vahe'ma mono ti frekure hu'za ageno, Joni'a anage huno zamasmi'ne, tamagra ha' osifavemofo mofavre nagare, aza tmasmino amuma ne-ea Anumzamofo rimpahé zampintira fregahaze huno tamasami'ne. 8 Ana hu'nagu raga rentenkeno, tamagu'a rukrehe hunaze huno tamage'za sena, 9 hagi Abrahamu'a nerfakita, tagra knare hu'none hutma osiho. Na'ankure nagrama tamagri'ma tamasamuana, Anumzamo'a amne hanigeno ami havemo'a, Abrahamuna mofavre nagara fore humigahie. 10 Meninena hago sasumemo'a mika zafa agafare kriri'neankino, hakare zafamo knare ragama reontesia zafaramina, antagino tevefi mate'vuno atregahie. 11 Nagra amne tinteti mono tina fre nermantoe,

tamagu'a rukrahe hanazegu, hianagi Agra henkama ne-emo'a
nagrira nagatereno hihamu'ane ne' egahie, hige'na nagra Agri
aganona (sendol) erizafiga osu'noe. Ruotge Avamuteti'ene
tevenu'ene Agra mono tina fre ramantegahie. **12** Witi ne'za
eri atru hania kna hago atupa nehigeno, Agra vazihhehehu
azota azampi erino mani'ne. Hanki witi akru hare kuma eri
hagro nehuno, anampinti nena'a zogirino erino nompi Agra ome
nenteno, hona'a tevava tevefi krenkeno tegahie. **13** Anante
Jisasi'a Galiliti atreno Joni mono ti frente'snie huno Jodani tinte
e'ne. **14** Hianagi Joni'a tima Agri'ma frente'zankura i'o nehuno,
Kagra, nagrira tina fre nantesankeno knarera hugahie, hianagi
Kagra nagritega neano? **15** Hianagi Jisasi'a ke nona'a Jonina
asmino, Menina amne fre nantegahane, na'ankure tagrati'a
e'inama hanu'ana fatgo avu'avaza hugahue, higeno Joni'a Agri
ke antahino, **16** mono tima frentegeno, Jisasi'a ana timpinti
ame huno otino ankenarega mrerino ne-egeno, monamo hagro
nehigeno, keana Anumzamofo Avamu'mo maho nama'gna huno
akoheno eramino Jisasinte emani'ne. **17** Higeno, monafinkati
mago ageru'mo huno, Ama'i Nagrama avesinento'a magoke
Mofavreni'agi'na Nagra tusi'a muse Agrira hunentoe.

4 Anante Jisasina Avamu'mo'a avreno vahe omani ka'ma
mopafi Sata revatga hinogu vu'ne. **2** Ka'ma kokampi 40'a
hanine zagine ne'zana oneno a'o huno mani'ne. Ana huteno
Agra tusi'a aga'zanku hu'ne. **3** Revatga hu ne'mo'a anante
ehanatino Jisasinku anage hu'ne, Kagrama Anumzamofo mofavre
mani'nesunka, ke nehugenoma have'zagamo'a breti fore hino.
4 Hianagi Jisasi'a ana ke nona'a huno, Anumzamofo avontafepi
anage huno krente'ne, Vahe'mo'a bretige neneno kasefara
huno omanigahie. Hianagi maka kema Anumzamofo agipinti

atirami'nea nanekema amage antesu'za manigahaze. (Diu-Kas 8:3) **5** Higeno anantetira Sata'a, Jisasina avreno Jerusalemi ruotge rankumate vuno, ra mono nomofo amumpare ome antegeno ot'i'negeno, **6** anage huno Jisasina asmi'ne, Kagrama Anumzamofo Mofavrema mani'nesunka, Kagra amareti takauro, na'ankure Anumzamofo avontafepina anage hu'za krente'naze, Anumzamo'a ankero naga'a kagriku huno huzmantesige'za, zamagra zamazanteti kazeri sga hanagenka, kagrira haverera kagiafina kavavera onkahegosie. (Sam-Zga 91:11-12) **7** Hianagi Jisasi'a agrikura anage hu'ne, Mago'ene anage hu'za Anumzamofo avon tafepina kre'naze, Kagra Ra Anumzanka'a revatga hunka onkegahane hu'ne. (Diu-Kas 6:16) **8** Ete ru'ene Sata'a avreno Jisasina mago za'za agonarega marerino, maka mopa kagi'afima me'nea kumatmimpi me'nea konariri zama'a averi hu'ne. **9** Hagi Sata'a anage huno Jisasina asmi'ne, Kagrama krenarenka nagiafi mono hunantesnanana ama zantamina maka Kagri kamigahue. **10** Higeno anante Jisasi'a agriku huno, Sataga manigno! Na'ankure Anumzamofo avontafepina anage hu'za krente'naze, Kagra Ra, Anumzanka'a Agrike krena renka monora hunentenka Agri eri'za erintegahane hu'ne. (Diu-Kas 6:13) **11** Higeno anante Sata'a, Agrira atreno vige'za, ankero vahe'mo'za e'za Jisasina eme aza hu'naze. **12** Ana huteno Jisasi'ma antahiamma Jonima azeri'za kina nompi ante'naze kema nentahino'a, Agra atreno Galili kaziga vu'ne. **13** Hagi Nazaretia atreno Kapaneamu nonkumate umani'naku ran tiru ankenare, Zebulunine, Nafatalikizni mopa kaziga vu'ne. **14** Ama'i korapa kasnampa ne' Aisaiana Anumzamo asamigeno huama huno kre'nea kemofo nena'a efore hu'ne. **15** Zebuluni mopane Nafatali mopane, hageri anke'narega, Jodani timofo kantu kaziga, Galili

megi'a vahe'ma, **16** hanizampi nemaniza vahe'mo'za tusi'a masaza ke'naze. Hagi ana mopafi nemani'za, fri'zamofo tonapi mani'naza vahera, zamagri zamagofetura masazamo remsa hu'ne. (Ais 9:1-2) **17** Ana knareti agafa hu'neana, Jisasi'a mono ke huzmasamino anage hu'ne, Tamagu'a rukrahe hoho, na'ankure Anumzamofo mona kuma'mo'a hago tava'o nehie. **18** Galili tiru ankenarega nevuno, Agra tare kogna ome znage'ne, Saimoni'e, mago agi'a Pita'e, hagi negna'a Endru'e. Zanagra nozame kuko tirupi atre'na'e, na'ankure zanagra nozame zante netrenki'ne ana hu'na'e. **19** Agra anage huno zanasmi'ne, Eta eme namage anteke'na, vahe'ma zamavazu hana'azana huranaveri ha'neno. **20** Hantaka hu'ne kuko zani'a netre'ne, amage'antene vu'na'e. **21** Jisasi'a ananteti'ma viana, tare kogna ome zanage'ne, Jemsi Zebeti nemofoki, negna Jonine votifi neznafa, Zebeti ene kukozmi nehati'za mani'nageno anante ome zanagi hu'ne. **22** Hantaka huke votifi neznafanat atre'ne, Agri amge vu'na'e. **23** Jisasi'a maka Galili kaziga vano nehuno, osi mono nozmifi (sinagog) marerino Knare Musenkea (gospol) mona kuma'mofo naneke rempi hunezmino, maka zamufa haviza hu'nea kri vahe'ene krimo amu'nozmifi me'nea vahera zamazeri so'e huzmante'ne. **24** Ana nehigeno Jisasi agenkemo Siriane maka kaziga vuno eno hige'za, nentahi'za zamagra maka kri vahera zamavare'za Agrite e'naze, ruzahu ruzahu krima eri'naza vahe'ene, zamufa zamatazane, kefo avamu'mo zamagu'afi mani'neane, manani kri'ne, zamufa fri'nea vahe'ene (paralais) zamare'za Agrite ageno zamazeri so'e hu'ne. **25** Ana higeno rama'a vahe krerafamo Jisasima amage ante'nazana, Galiliti'ma, Dekapolisi kazigati'ma, Jerusaleti'ma, Judia kazigatiki, Joda timofo asoparegati etere hu'za amage ante'naze.

5 Hagi Jisasi'ma hakare vea kevuma nezmageno'a, mago
agonare mareri'ne. Anante'ma umanige'za, amage'ma nentaza
disaipoli naga'mo'za Agrite e'naze. **2** Anante Agra agafa
huno rempi hunezamino, amanage hu'ne, **3** Zamufama
anterami'za avamupima manisaza vahe'mo'za, Anumzamofo
asomura erigahaze. Na'ankure mona kumara zamagri kumare.
4 Zamasu zampi mani'ne'samokizmia, Anumzamo'a asomu
huzmantegahie. Na'ankure Agra zamazeri fru hugahie. **5**
Akohe'za nemanimokizmia Anumzamo'a asomu huzmantegahie.
Na'ankure maka mopa zamisige'za erigahaze. **6** Fatgo avu'avaku
zamaganeteno, tinku zamesiaza nehazamokizmia Anumzamo'a
asomu huzmantegahie. Na'ankure Agra zamagrira knare
huzmantegahie. **7** Vaheku'ma zamasunku hunezmantamokizmia
Anumzamo'a asunku huzmantegahie. Na'ankure Anumzamo'a
asuntgi zamantegahie. **8** Zamagu'amo'ma agru hu'nesamo'za,
Asomu erigahaze. Na'ankure zamagra Anumzana kegahaze.
9 Ha'ma erifru nehazamo'za, asomu erigahaze. Na'ankure
zamagrikura Anumzamofo mofavre hugahaze. **10** Knare
zamavuzmama nehanage'za hafra huzmantesamo'za, asomura
erigahaze. Na'ankure mona kumamo'a zamagri'za segahie.
11 Vahe'mo'ma huhaviza huneramanteno, kanonkeve
neramino, maka hankromofo nanekea havige huno hugofi
neramanteno, Nagriteku huno havigema huramantesimota,
asomu erigahagahaze. **12** Kaninkaha hutma muse hiho, na'ankure
avamutami'mofo fenozana rama'a monafinka me'ne. Na'ankure
korapara kasnampa vahera anahukna hu'za zamahe'naze.
13 Tamagra ama'na mopare hage mani'naze. Hianagi ana
hagemo'ma haga'ama omanesigeno'a, inanknahu huno hage'a
ete erigahie? E'i mago knare'za hugara osiankino, atresnage'za

vahe'mo'za zamagareti rehaviza hutregahaze. **14** Tamagra ama mopamofo tavi mani'naze. Mago rankumamo agonare me'nesia rankumamo'a fra okigahie. **15** Vahe'mo'za ramu tavi rekru hu'za baketifina nontaze. Tavi ante azotare hantintenageno remasa nompina nehie. **16** Anahu kante tavika'a atregeno, vahe'mokizmirera remsa hanige'za, knare kavu kvara nege'za, monafi mani'nea Negafana ra agi amigahaze. **17** Tamagra kasegene, kasnampa vahe ke eri atreku e'ne hutma Nagrikura osiho. Nagra kasegene kasnampa ke eri atrenaku ome'noanki, eri knare hunaku e'noe. **18** Nagra tamagerafa hu'na neramasmue, monane mopane vaga'oreno me'hena, mago onensa avoma kasegefi me'nea zamo'a vagaore me'enkeno, hakare zamo'a efore hugahie. **19** Hagi iza'o ana kasegefinti mago rufutagino, rumofo rempi humino, ana hiho hanuno'a, agra ositfa mona kumapina manigahie. Hianagi mago vahe'mo'ma Anumzamofo kasegema amage nenteno, rempi vahe huzmisuno'a, mona kumapina henka ra agine vahe manigahie. **20** Na'ankure Nagra neramasmue, tamagri tamavu'tamavamo'ma fatgo huno kasegere ugagota hu'naza vahe'mofone, Farisi vahe'mokizmima, zamagatema oresiana, tamagra mona kumapina ovugahaze. **21** Tamagra ko antahi'naze, tamagehe'ima zamasmi'naza kea, Kagra mago vahera ahe ofrio, hagi iza'o vahe'ma ahe frisimo'a, keagare otigahie hu'ne. **22** Hianagi Nagra anage nehue, iza'o nefuma rimpa kna huntesimo'a, agra keagare otigahie. Aza'o mago nefuma huhaviza hunte'simofona, avare'za kanisolo kva vahete (Sanhedrin) vugahaze. Hagi iza'o neginagi ke nehie huno hanimofona, tusi'a tevefi avare tregahaze. (**Geenna g1067**) **23**
E'ina hu'negu, kagrama ofa ka'a erinka kre sramanavu itare'ma esunka, negafu'ma rimpa hegante nenia zanku antahisunka, **24**

ana kresramana vu itare ofa ka'a atrenka ete vunka, kotazana
ana negafu'ene ome kasunke hutenka, henka ofaka'a eme
amio. 25 Hagi mago'mo naneke hugantenaku hanimofona
karanka nevutna ame'ama hunka rimpa eri fru huo, aru kagrira
kavreno ke refakohu vahete vanigeno, anante ke refakohu
ne'mo'a kavreno kina kva ne'te vanigeno, hagi kagrira kasaga
huno kina nompi katre'zanku, ana huo. 26 Tamage hu'na
kagrira negasamue, kagra anampintira atioramitfa hugahane,
hagi agima ahegantesiama'a mizase varesunka henka kina
nompintira atiramigahane. 27 Tamagra antahi'naze amanagema
hu'nea kea, Tamagra ru vene, a'ene monko'zana osugahaze
hu'ne. 28 Hianagi Nagra neramasmue, aza'o mago a' negeno
kesane hanimo'a, hago ana a'ene monko'za agu'afina hu'ne. 29
Tamaga kavurgamo kazeri kumipi katre'na, eri tagitinka mate
vuo, na'ankure ru maka kavufa tevefi (hell) vu'zankura, mago
kvufamo fanane hani'ana, knare hugahie. (Geenna g1067) 30
Kazantmaga'amo kumipi kavrentena, taga hunka matevu atro.
Ru mika kavufamo tevefi vu'zankura mago kavufa atresanana, e'i
knare'za hugahie. (Geenna g1067) 31 Korapara anage huno avona
krente'ne, Iza'o a' ama huntenaku hanuno'a, a' atre avonkre
amino hu'ne. 32 Ana hanigeno Nagra anage tamagrikura nehue,
mago vahe'mo a' a'mo monko'za osu'enigeno atre'siana, ana
ne'mo'a ana ara huntesigeno monko'zana hugahie. Hanigeno
iza'o, vemo'ma atre'nesia a'ma erisia ne'mo'a, monko'za hugahie.
33 Mago'ene tamagra korapama, tamagehe'ima zamasmi'nea
kea antahi'naze, Huvempa kea ha'ontagigahane. Hianagi Ra
Anumzantera huvempa hu'nana kea eri knare huo hu'ne.
34 Hianagi Nagra anage hu'na neramasmue, mona kumaku
hunteta huvempa osiho, na'ankure Anumzamo nemania tra'e, 35

mopa'mofonku hunteta huvempa osiho, na'ankure Agra agia
nentea trare, hifi Jerusalegura osiho, na'ankure tusi'a kinimofo
rankumare hu'ne. (Ais 66:1-2) **36** Kagra kasenire huntenka
huvempa osuo, na'ankure kagra mago kazokara eri efeke osuge,
haninkera osugahane. **37** Hianagi kema hananana, izo hanunka,
izo huo, i'oma hnunka i'o huo, mago'a amana kema agatereno
hanuno'a, hankro'mofontegati eanke hugahie. **38** Tamagra
anagema hu'nea kea antahi'naze, Avu rupro hanimofona, agri
enena avu rupro huo. Ave rutafri simofona, agri enena ave
rufatfrio hu'ne. **39** Hianagi mago'ene anage hu'na neramasmue,
haviza huramante simofona, azeri havizana osiho. Hianagi
iza'o tamaga kaziga kameragente'ma kahena, rukrehe hugeno,
mago kaziga kameragente kaheno. **40** Mago'mo'ma sioti ka'agu
namio hanigenka, anakre kuka'ane amio. **41** Iza'o kagri'ma
tutu huno fenoni'a erinka, mago kilo mita vuo hanigenka,
eriagaterenka tare kilo mita vuo. **42** Mago zanku kantahige
simofona amne amio, erite'na kamisue huno kantahigena, i'o
osuo. **43** Tamagra antahi'nageno korapara anage hu'naze,
Kagri tava'onte mani'nemofona kavesintetfa nehunka, ha' vahe
ka'a krimpa hento hu'ne. **44** Hianagi Nagra anage hu'na
neramasmue, ha' vahetmia zamesizmantetfa nehuta, tamahesia
vahera nunamu huzmanteho. **45** E'inama hanuta monafi nemania
Nafatamimofo mofavre manigahaze. Agra zagegu higeno, zagea
knare vahete ene, havi vahetera neregeno, fatgo vahete'ene,
fatgo osu vahete enena kora atregeno nerie. **46** Na'ankure
tamavesima antenia vahe'ma, tamavesi zamantenuta na'a
mizama'a erigahaze? Tagra antahi'none, takesi zagoma eri
vahe'mo'za anahu knara nehaze. **47** Tamagrama nermafunk'za
zamazeri so'e hanazana, na'a mago'a zana hugahaze? Megi'a

vahe'mo'za zamagranena anahu kna nehaze. 48 E'ina hu'negu tamagra monafi neramafa'ma fatgo huno agru hu'nea kna hutma fatgo hutma agru hiho huno zamasmi'ne.

6 Vahe'mofo avure fatgo avu'ava nehanage'za kagezankura kva hiho, monafi mani'nea Neramafa'a mizana ontamigahie. 2 Hanki kagrama zamunte omane vahe'ma zamaza hunka keonke'zama zamisunka, ufenkrafahu vahera huzmantenge'za ufre'za ugota osiho, havige vahe'mo'za mono nompine (sinagog) kantegane nehaza knara osuo, e'ina hanankeno'a vahe'mo'za kagi erisaga hugahaze. Nagra tamage hu'na nermasmue, hago zamagra mizazmi'a eri'haze. 3 Hianagi zamunte omane vahe zamaza hanunka, atregeno hoga kazamo'a, tamaga kazamo'ma hania zana onkeno, 4 e'ina hunka oku'a amigeno, oku'a me'negeno negea Negafa Anumzamo'a mizana kamigahie. 5 Nunamuma hunaku'ma hanuta, havige vahe'mo'za nehazankna osiho. Na'ankure zamagra mono nompi oti'za mani'ne'za, megi'a kampine oti'ne'za nunamu nehazage'za, vahe'mo'za negazazana osiho. Tamage hu'na Nagra neramasgue, zamagra ko mizazimia eri'haze. 6 Hianagi tamagrama nunamu hunaku hanuta, nomofo agu'afi ufreta, kafa eri kiteta Neramafantega oku'a nunamu hiho. Hinkeno oku'aza negea Neramafa'a mizana tamigahie. 7 Nunamuma hanuta, agu'agesa omne vahe'mo'za revahe revahe hu'za, megi'a vahe'mo'za (gentiles) hantgazankna kea osiho, na'ankure zamagrama antahi'zana, rama'a naneke nehusunkeno Anumzamo'a antahisie hu'za nehaze. 8 E'i ana hu'negu zamagri knara osiho. Na'ankure antahi onkenageno atupa'ma hu'naza zana ko tamagri Neramafa'a antahi'ne. 9 Amanahu kna hutma nunamuna hiho. Tagri Nafati'moka monafi mani'nane, Kagri Kagimo ruotage huno mesie. 10 Kagri mona

kumara esie, Kagri kavesi'zana monafinka nehzankna huno,
ama mopafi efore hanie. **11** Mago mago knare'ma nesuna
ne'zana menina tamio. **12** Kumitia atre'rantegeta, anahu kna
huta kumi'ma hurante'namokizmi'a atre'zmanta maneno. **13**
Ana nehunka tatregeta rerahe'zampina uoframaneno. Hianagi
hankromofo azampintira taza hunka tavro. [Na'ankure Kagri
mona kumamo mevava hugahie. Tamage.] **14** Hagi tamagrima
kefoza hurmantesamokizmi kumi'zami atrezmante sageno'a,
monare nemania Nafatimo'a, kumi'tamia eri atre ramantegahie.
15 Hagi vahe'mokizmi kefozazimi atre ozmante snageno'a,
monare nafatmimo'a, kefo zantamia atre oramantegahie. **16**
Ne'zama a'o hanuta tavre vahe'mo'za nehaza knara hutma havi
tamugosa osiho. Na'ankure e'inahu tamugosa nehanage'za,
vahe'mo'za nege'za, ne'za a'o hu'naze hu'za hugahaze. Nagra
tamage hu'na neramasmue, ko zamagra mizama'a eri'naze. **17**
Hianagi ne'zama a'o hanutma, tamasenire masavena nefretma,
tamugosa sese hiho. **18** E'ina hanageno nezama a'oma
hanaza zana vahe'mo'za onkeho. Hianagi tamagri Neramafa
oku'a nemanimo kagegahie. Nehuno oku'a me'negeno negea
Neramafa'a mizana tamagrira tamigahie. **19** Ama mopafina
knare'nare fenona eritru osiho, havi kafamo'ene, krogroheno
erihaviza nehanigeno, kumza vahe'mo'za nona anafe hu'za
kumza nesaze. **20** Hianagi monafinka fenona havi kafamo'ene,
krogro ohegeno, kumza vahe'mo'za nona tagana vaziza kumza
ose fenotamina, tamagra eritru hiho. **21** Na'ankure fenonka'a
me'enirega, e'i anantega kagu'amo'a megahie. **22** Kavurgamo'a
kavufa'mofo rampe tavi me'ne, ana hu'neankino kavurgamo knare
huno me'enigeno'a, mika kavufamofona remsa hugantegahie.
23 Hianagi kavurgamo'ma haviza hanigeno'a, mika kavufa

hanizamo refitegahie. Hianagi kagu'afi me'nea tavimo asu'ma hanigeno'a, tusi'a hani hugahie. **24** Mago'mo'a tare kva netrenerera eri'zana e'origahie. Na'ankure anamo'a mago'mofona avesra hunenteno, mago'mofona avesi nenteno, mago'mofonte amage nenteno, mago'mofona kefenkami atregahie. Kagra Anumzante'ene zagore'enena erizana eri otegahane. **25** E'ina hu'negu, Nagra neramasmue, tamagrama manisnaza zankura tamagesa antahintahi hakare osuta, naza kavera negahune, igati tina negahune, kukena tavufarera na'a hugahune huta ontahihio. Anampina kavemo'a mani'zana agaterenefi, hipu kukenamo'a tavufa agatere'neo? **26** Namamo'ma hareno vano nehiana keho, zamagra hoza ante'za, kafiza, eri atru hu'za, kave ante'nompina nontazanagi, monare nemania Neramafa ne'zana nezamie. Namamo'za tamagrira tamagaterenafi? A'o. **27** Hagi mago tamimo'ma knare'zama huno mani'zanku'ma antahintahi hakarema hania zamo'a, asimu'a erizazara hugahio? A'o. **28** Nahigetma kukena huzankura hakare antahintahia nehaze? Flauamo'a nankna huno nehagefi keho, zamagra eri'za e'oriza kukena trora nosaze. **29** Ana hianagi Solomoni'a avasese'amo hu'nea knare nare kukena hu'neanagi, ami flauamofo avasese'amo'a agatere'ne. **30** Hianagi Anumzamo'ma, amuma me'nea trazama kukenama huma ante'neana, menina me'neanagi vahe'mo'za okina tevefi eri kregahaze. Ana hu'negu tamagrira Anumzamo'a agatereno kukena hurmantegahie. Tamagra osi'a tamentinti'ne naga mani'naze. **31** Ana hu'nagu tamagra nanezane tine neneta nakukena hugahune hutma hakare antahintahi osiho. **32** Na'ankure mono ontahi vahe'mo'za, miko zankura nehakaze. Na'ankure monafi nemania Neramafa'a miko zankuma upama hu'nazana ko antahi'ne. **33** Hianagi

kota zana, Anumzamofo kumaku'ene, fatgo avu'avazanku haketenkeno, ana maka'zana anazanke huno tamamigahie.
34 E'i zanku oki fore hania zankura tamagesa hakare osiho. Na'ankure okizana atrenkeno, agra'a kva krino, mago knare'ma esia hazenkea, ana knazupage knaza megahie.

7 Jisasi'a anage huno mago'ane zamasami'ne, Rumofona refako huo zamantenkeno, anahu kna huno Anumzamo'a tamagri e'nena refako huoramanteno. 2 Na'ankure rumofoma refako huntesante, ana avamente Anumzamo'a kagrira refako hugantegahie. Kagrama rumofoma refakoma banana avamente, anazanke huno kagrira refako hugantegahie. 3 Nahigenka osi zama negafu avufima me'neazana negenka, kagri kavufima ra zafa rampama me'neana nonkane? 4 Na'anе hunka negafunkura, natregena osi'zama kavufi me'neana eri traneno nehane, kagri kavufi'ma ra zafa rampama me'neana? 5 Kagra tavre vahere, esera ra zafa ranpama kavufima me'neazana eri atrenka kavua keama hutenga, ete negafu avufi me'nea osi'zana eri atregahane. 6 Tamagra ruotage hu'neniazana kramofona omiho, hiro zantamia afumofona omiho. Zamagra eri'za zamajianu rehapa atiza eri haviza hugahaze. Ana hute'za Arukrehema hanuza tamahe'za traga trogo hugahaze. 7 Antahigesankeno anazana kamigahie, hakesunka before hugahane, kafante vagre vagre hanankeno, anagi kantegahie. 8 Na'ankure maka vahe'mo'za antahima nege'za e'nerize. Iza'o, hake'noma vanimo'a, keno eri fore hugahie. Kafante vagre vagre nehanimofona, anagi antegahie. 9 Hagi tamagri amu nompinti magomofo ne' mofavremo, breti eri namio hanigetma, havea knare eri amigahzafi? 10 Hifi nozame eri namio hanigeno'a, agra knare osifavea eri amigahio? 11 Hianagi tamagra havi avu'ava'zama nehaze vahe'mota antahi'naze,

mofavre'tmima knare muse'zama ami'zana, monafima nemania
Neramafa'a, knare musezana, iza'o Agri'ma antahigemofona
rama'a zantami nemie! **12** Vahe'mo'zama maka zampima
kagri'ma, hugantesaze hunka nehanana avu'avara, kagra ana
avu'ava zamagrira huzmanto. Na'ankure e'i kasegene kasnampa
vahe'mokizmi kenena eri knare hugahaze. **13** Tamagra osi
kafampinti ufreho, na'ankure fananehu kantema vu'nea kamo'a,
ra huno fru hu'ne. Ana kantera rama'a vahe'mo'za amage ante'za
nevaze. **14** Ana hianagi asimu eri kumate vu'nea kafamo'a osi
higeno, ana kamo'a kakanino amuho hu'nege'no, osi'amoza ana
kana nege'za nevaririze. **15** Kva hiho havige kasnampa vahekura,
sipisipimofo avufa eri hankre'za egahazanagi, zamagu'afinka afi
kra egahaze. **16** Kagrama zamagenka, antahinka zamagrime
hananana, rgama rentesare kegahane, krepia ave'ave zafafinti
noragize, hifi ave'ave trazampinti fikia tagigahazo? A'o, anara
osugahaze. **17** Anahu kante hakare knare zafamo'za, knare
raga renentageno, havi zafamo'za havi raga renentaze. **18**
Knare zafamo'za havi zafa raga oregahaze, ete havi zafamo'ma
knare zafa raga oregahaze. **19** Miko zafamo'za, knare ragama
reontesazana, antagiza matevu'za tevefi atregahaze. **20**
E'ina hu'negu ana kante, zamavu'zmavama hanare zamageta
antahita hugahaze. **21** Hagi mago'a vahe'mo'za Nagrikuma Ra
Anumzanti, Ra Anumzantie nehaza vahe'mo'za, mona kumapina
ovugahaze. Hianagi iza'o monafi nemania Nafanimofo avesi'ma
nevariri'samo'za ufregahaze. **22** Ana knazupa rama'a vahe'mo'za
anage hu'za Nagrikura hugahaze. Ra Anumzane, Ra Anumzane,
Kagri kagifina mono nanekea hu'none. Kagri kagifina havi
avamura hunenteta, kaguvaza (mirakol) eri fore hu'nonane
hanagena, **23** ana knazupa Nagra anage hu'na zamasamigahue,

tamagra kasegeni'a amage'onte vahe mani'nazage'na tamagrira
tamantahina kena osu'noanki, maniganeho hu'na zamasmigahue.

24 E'ina hu'negu, iza'zamo ama keni'a nentahi'za amage
nentamo'za, knare antahi'zane ne'mo hanave nentake havemofo,
agofetu nona kiankna nehaze. **25** Hagi kora nerigeno, tina hageno
ne-egeno, zaho kora atuno ana nona eri tagna vazinaku ana'ana
hianagi, ana nona eri tagna ovazi'ne. Na'ankure keri kafino
tamino havemofo agofetu nona ome ki'negu anara hu'ne. **26** Hagi
iza'zamo, ama Nagri naneke nentahiza amage ontесамо'за, negi
vahe'mo noma'a kasepampi kiankna hugahaze. **27** Kora arigeno,
tina hageno ne-egeno, zahomo'ene huno ana nona eri traka
hutregeno asaga huramino, razampi tagana taganu vazirami'ne.
28 Jisasi'a ana naneke zamasami vagarege'za mika vahe anante
atru hu'namo'za antahi'nazana, kasegere ugagota hu'naza
vahe'mokizmi avamentera ozamasmi'ne. Rankva vahe'mo rempi
hunezamia kante, hihamu'ane naneke nehige'za nentahi'za
muse hunente'za, hakare zamagesa antahi'naze.

8 Hagi Jisasi'ma agonaregati'ma eramige'za, tusi'a vea
krerfamo'za amage vu'naze. **2** Mago fugo namure'nea ne'mo'a,
avuga rena emereno amanage hu'ne, Ramoka Kagrama naza
huku'ma nehanunka, Kagra amane nazeri avusese hugahane. **3**
Higeno Jisasi'a azana antegantuteno ana ne'mofo avufare avako
nehuno, anage hu'ne, Nagrima navesiana, fugo namunka'amo'a
amanage hugahie. Higeno ame huno ana fugo namumo'a afe
higeno, avusese hu'ne. **4** Jisasi'a ana nera asami'ne, Kagra kva
hunka, ama zankura mago'mofona osomitfa huo. Hagi pristi nete
vunka, kavufa ome averinka ofa erinka vunka, Mosesema hu'nea
kante antenka zamagrite eri ama huo. **5** Jisasi'ma Kapeniumu
kumate uhanatigeno'a, 100'a sondia vahe'mokizmi kva ne'mo

(sensurien), Agrite eno aza hinogu antahige'ne. **6** Agra anage hu'ne, Ranimoka eri'za ne'ni'a avufgamo'a frigeno, tusi'a atazampi nonte maseno mani'ne. **7** Higeno Knareki'na vu'na ome eri so'e huntegahue. **8** Hianagi ana sondia kva ne'mo'a kenona'a anage hu'ne, Ramoka, nagra knarera osu'noankinka, eno hanugenka nagri nompina omegahane. Hanki amane ke'age nehugeno, eri'za ne'nia knare hunteno. **9** Na'ankure naganena mago kva vahe'mofo hinkanaga mani'nogeno, sondia vahe'mo'zanena nagri hinkanaga mani'hazage'na, mago'mofonku hu'na vuo hugeno, agra nevie. Mago'mofonku eno hugeno agra ne-e. Hagi nagrani'a kazokzo eri'za neku, amana huo hugeno, agra anazana nehie. **10** Hagi Jisasi'a ana ke nentahino'a, tusi antri nehuno, amage'ma vu'naza nagara anage huno zamasmi'ne, Nagra tamage huna neramasamue, mago nera Israeli vahepina amanahu hanave amentintine nera, Nagra onketfa hu'noe. **11** Amanage hu'na neramasamue, hakare'a veamo'za zage nehanatia kazigati'ene zage fre kazigati'ene eri hantage'za Abraha'ene Aisaki'ene Jekopu'ene monafina muse nehu'za, ne'za nene'za manigahaze. **12** Hu'neanagi rama'a zamagri kumarema huno'ma huzmante'nea Israeli vahe'mo'za tusi'a kumazu hanimpi meg'i'a zamatreseage'za, anantega manine'za zavira nete'za, zamavera aninkreki hugahaze. **13** Anante Jisasi'a 100'a sondia vahete kva nera anage huno asami'ne, Kagrama kamentinti hanku kagrira kaza hugahianki amne vuo, huno humanentegeno'a, ana kna fatgore eri'za ne'amofona kri'amo'a atrente'ne. **14** Pita nompi Jisasi'ma umarerino ome keana, nenemo ara avufa amuho amaho kri erino mase'negeno omege'ne. **15** Ana huteno ana a'mofo azante ome avako higeno, avufa amuho zamo'a atrentegeno, otino neza tro huno zami'ne.

16 Kinagama segeno'a, hakare havi avamutami zamagu'a fre'nea vahe zaga zamare'za Agrite e'naze. Agra ana havi avamura kereti ahenati netreno, maka krima eri'naza vahera zamazeri knamare'ne. **17** Amana zana kasnampa ne'mo, Aisaia korapa hunte'nea kemofo avufa'a efore hu'ne. Agra kumitia e'nerino kritia eri atrerante'ne hu'ne. (Ais 53:4.) **18** Anante Jisasi'ma kegeno tusi'a vahe'mo'za Agrira azeri kagigeno'a, Agra zamasmino timofo kantu kaziga viho huno amage'ma nentaza disaipoli nagara huzmante'ne. **19** Anante magora kasegere ugagota hu'nea ne'mo Agrite eno amanage hu'ne, Rempi hurami nere, inantego vnanana, nagra kamage ante'na vugahue. **20** Higeno Jisasi'a amanage huno agrira asami'ne, Afi kramofona mopafi nemasea kerigama'a me'ne. Hare'za vanoma nehaza namaramimofona nozamia me'ne. Hianagi Vahe'mofo Mofavre'mofona asenima anteharege huno masesia zana omane'ne. **21** Jisasi amagema nentaza disaipol nagapinti mago zamimo anage hu'ne, Ramoka natrege'na pusazana nenfana ome asenteteno huno hu'ne. **22** Hianagi Jisasi'a anage huno asami'ne, Nagri namage eme nentenka, atrege'za fri kerfamo'za, zamagri'a fri kerfa asenteho. **23** Jisasi'ma votifima marenerige'za, Agri amage'ma nentaza disaipol naga'mo'za avaririza vu'naze. **24** Nevazageno tusi'a zaho komo ana tirupinti agafa huteno, ana timo'a eri kranto kranto huno votia refite'za hu'ne. Jisasi'a masenegeno anara hu'ne. **25** Hige'za amagema nentaza disaipoli naga'mo'za, Agrite eza eme azeri oneti'za anage hu'naze, taza huo Ramoka, Hago tagra friza nehune. **26** Hianagi zamagrikura anage hu'ne, Nahigetma korera nehaze, onensa tamentiintine nagara? Nehuno Agra anante otino hanave ke huno ana zaho ene, tinena rurava huo higeno, kranto krantoma nehiretira,

arane'ne. 27 Hige'za ana disaipol naga'mo'za tusi zamagogogou
nehu'za, zahomo'ene, timo'ene ke'a erizafa nehianki, ama
inankna vahere? hu'naze. 28 Jisasi'ma timofo kantu kaziga
Gadara uhanatigeno'a, hankaro'mo znagu'a fre'negeke matipi
nemani'a netremoke, Jisasi'ene tutagiha hu'na'e. Zanagra tusi
hamponatikeno vahe'mo'za koro hu'za ana kantera novazane. 29
Zanagra tusi kezatike, Anumzamofo Mofavre'moka, nago'azana
huorantenka tataro. Kagrama amafima e'nanana tagri tazeri
haviza hunaku e'nano, knama osu'nefina? 30 Hagi mago'a
ogantu'agna rama'a afu zagamo'za ne'za nene'za mani'naze. 31
Anante ana hankaromo'za anage hu'za antahige'naze, Tagri'ma
tahe natitresunka, hurantegeta antu afu'zagafi uframneno.
32 Hazageno Jisasi'a anage hu'ne, Viho! Hige'za atiramiza
afu'zagafi ufrageno, ana afu'zagamo'za zamagage zamagage
hu'za zaveniteti tirupi tkaure'za ti nakri'naze. 33 Unefrizage'za
afu' kva vahe'mo'za zamaga re'za vu'za kumate uhanati'za,
anama hu'naza zamofo naneke vea' ome nezamasami'za
ana netremokizni zanagu'afinti'ma hankro'mo'za atirami'zama
afu'mofo agu'afi ufre'zama fri'naza naneke zamasmi'naze. 34
Anante ana kumapinti vahe krerfamo'za eri hantge'za Jisasinte
e'za, emema nege'za, Ama tagri kazigatira ko atrenka vuo, hu'za
hunte'naze.

9 Hagi Jisasi'ma votifima mareriteno'a, tina takaheno kantu
kaziga Agra'a rankumate vu'ne. 2 Anama hutege'za vahe
zagamo'za agamo fri'nea nera sesenku hu'za erizafa hu'za Agrite
e'naze. Jisasi'ma zamagri zamentintima negeno agama fri'nea
nekura huno, Korera osuo mofavre'nimoka, kagri kumira hago eri
atroe. 3 Higeno mago'a kasegere ugagota hu'naza vahe'mo'za,
zamagra zamagra anage hu'naze, ama'na ne'mo'a Anumzamofo

huhaviza hunente. 4 Hazageno Jisasi'a zamagri antahintahizmia negeno, anage hu'ne, Nahigetma kefo antahintahia tamagu'afina nentahize? 5 Inanke'mo oza hugahie, kefo zanka'a eri ataroe hanua kemopi, otinka vuo hanua kemo'e? 6 Hianagi Nagrama tamaverima hanuana, Vahe'mofo mofavremo'a ama mopafina hanave'a me'neankino kefozana eri fanane huga vahe mani'ne. Hankina tameri ha'nena kegahaze, huno nehuno rukrahe huno, ana agaza sti'nea ne'mofonku, Otinka sesenkuka'a erinka nonka'arega vuo huno higeno, 7 anante otino noma'arega vu'ne. 8 Ana'ma hiaza vahe'mo'za nege'za, zamagra tusi kore nehu'za, Anumzamo'ma e'inahu hanave'ma Jisasima ami'nea zankura, Anumzamofo agi'a ahentesga hu'naze. 9 Ananteti Jisasi'a nevuno, mago nera agi'a Matiu'e nehaza ne' takisi zago zonegi'za onensa nompi mani'negeno omegeno, Nagri namage eme anto, higeno agra otino amage vu'ne. 10 Hagi Jisasi'ma vuno Matiu nompi ne'za ome nenege'za, rama'a takisi zagoma zonegiza vahe'ene, kumi vahe'mo'zanena e'za Jisasi'ene amage'ma nentaza disaipol naga'ane kave eme ne'naze. 11 Ana'zama farisi vahe'mo'za nege'za, amage'ma nentaza disaipol nagara anage hu'za zamantahige'naze, Nahigeno tamagri'ma rempima hurami ne'mo'a, takisi zago zogi naga'ene, kumi naga'enena ne'zana nene hu'za zamantahige'naze? 12 Hagi Jisasi'ma anankema nentahino'a amanage hu'ne, Kri'zamima omane'nesia vahe'mo'za tusa (dokta) netera ovugahaze, hagi krima eri'nesaza vahe'mo'zage tusa netera vugahaze. 13 Jisasi'a zamasamino, Vutma avontafepi ome rezaganeta antahihio, ama kemo'a na'ane hu'nefi, Nagrira rumofo asuragintezanku nave'nesie, hagi (ofagura) kresramana vezankura nave'nosie. Na'ankure Nagrama e'noana, fatgo vahe zamagi hunaku ome'noe. Hagi

kumi vahe zamagi hanuge'za, zamagu'a rukrahe hihogu e'noe.
(Hos 6:6.) **14** Hagi ana knafina Jonima amage nentaza
disaipoli naga'mo'za Jisasinte e'za, Nahigeta tagrane Farisi
vahe'enena ne'za a'o nehunke'za, Kagri kamage'ma nentaza
disaipol naga'mo'za, ne'zana a'o nosaze? hu'za antahige'naze.
15 Hazageno Jisasi'a zamagrikura anage hu'ne, Aravema
hute'ma kenaku eme atruma hu'naza vahe'mo'za, aravema husia
ne'ma zamagranema mani'nesige'za zamasunkura osugahaze,
tamagefi? Hu'neanagi mago kna ne'eankiza aravema hunaku'ma
hania nera, zamagripintira avaretrete'za, anante zamagra
ne'zana a'o hugahaze. **16** Mago'mo'a kahefa tavaravea korapa
kenarera erinteno ohatigahie. Anama antenoma hatsia kenamo'a
ampimpi huno eri tagato hora hugahie. **17** Ana nehuno
vahe'mo'a kahefa wainia, meme akruteti tro'ma hu'nea atafa
waini tafempina tagi ovazigahie. Na'ankure meme akruteti
tro'ma hu'nea atafa tafemo'a, pro hanigeno wainimo'a tagisigeno,
ana tintafemo'a haviza huzanku, kahefa wainia, kahefa meme
akruteti tro hunte tafempi tagi vazisigeno, taregamoke knare
hugaha'e. **18** Ana kema nehigeno, mago ugoteno keaga
nehia ne'mo'a eno, Agrite eme kepri nehuno, anage hu'ne,
Mofanimo'a mensi fri'neanki, enka kaza agrite eme antegeno,
agra otino asimu erino mani'no. **19** Higeno Jisasi'ene Agri
amage nentaza disaipol naga'mo'za otiza ana ne' avariri'za
amage vu'naze. **20** Higeno mago ara korankri erino 12fu'a
zagegafu mani'nea a'mo, Jisasi amefi eno zaza kena'amofo
atupa'are eme avako hu'ne. **21** Na'ankure agrama agesama
antahiana, nagra magoke'zana Agri za'za kenarafante azeri
sugeno'a, kri'nimo'a atrenantegahie huno agu'afina antahi'ne.
22 Hianagi Jisasi'a rukrahe huno negeno amanage hu'ne,

Mofani'moka korera osuo, kagrika'a kamentintimo kazeri knare hie, nehigeno ana kna fatgo'are ame'ama huno ana ara kri'amo'a, so'e hunte'ne. **23** Jisasi'ma vuno ana ugoteno keaga nehia kva ne'mofo nompima ufreno, uvire tafema neraza vahe'ene, zavisu krasu nehu'za zamasuzampi mani'haza vahe krerfa ome nezmageno, **24** amanage huno zamasmi'ne, Atretma eviho, na'ankure ama mofara ofri'neanki, amane avu mase'ne. Anagema hiazanku Agrira tusiza hu'za kiza zokago ke hunte'naze. **25** Hianagi ana vahe krerfa'ma huzmantenge'za megi'a vazageno'a, ana nomofo agu'afi ufrea zamo akoheno ana mofa'mofo azante azerigeno ame huno ana mofa'mo'a oti'ne. **26** Higeno anama hiazamofo agenke'mo'a, ana kaziga vuno eno huno zamukine. **27** Ananteti Jisasi'ma nevigeno'a, zanavu asu hu'nea netremoke avariri'ne nevuke kezati'ne, Deviti mofavre'moka kasuragiranto huke hu'na'e. **28** Hagi ana nompima Jisasi'ma ufregake, ana zanavu asuhu ne'tremokea Agrite e'na'e. Hagi Jisasi'a amanage huno zanagrikura hu'ne, Amana zana Nagrikura eriamane hugahie hutna, tanamentintia neha'o? Higene zanagra Agriku anage hu'na'e, ozo Ramoka, **29** anante Jisasi'a zanavuragare avako nehuno, anage hu'ne, Tanamentinti'ma haku anazamo'a tanavufare fore hugahie. **30** Higeno zanavurgamo'a hari hu'ne. Jisasi'a hanave zanavumro zananteno, Mago vahe'mo'a atrekeno ama'na nanekea ontahitfa hino. **31** Hianagi zanagra atreke nevuke, ana nanekea ome hugantugama ana kaziga hu'na'e. **32** Hagi vu'za e'zama nehazana, mago nera havi hankaro'mo ke'a eritaganegeno kea nosia ne' avare'za Jisasinte e'naze. **33** Ana kefo avamu'ma ahenatitregeno'a, kema nosia ne'mo'a keaga hu'ne. Mika vea krerfamo'za antri nehu'za amanage hu'naze, amanahu'zana

Israeli vahe'motafina korapara fore higeta onke'nonazane hu'za
hu'naze. **34** Hianagi Farisi vahe'mo'za amanage hu'naze,
Jisasi'ma hankaroma ahenenatiana, hankromokizmi ugagota
hankromofo (Satan) hankave'afi ana nehie hu'za hu'naze. **35**
Ananteti Jisasi'a osi kumate'ene rankumatera vano nehuno osi
mono nompi rempi hunezmino, Anumzamofo mona kumakura
mono nanekea nezamasmino, mika kri eri amane hu'ne. **36**
Ana vahe krerfama nezmageno, Jisasi'a tusiza huno asunkura
huzmante'ne. Na'ankure zamagra tusi negine'za zamaza
osu'are, kva vahezmi omani sipisipimo hiankna hu'naze. **37**
Ananteti Jisasi'a amage nentaza disaipol nagaku amanage
hu'ne, Ne'zamo'a hozafina rama'a anare'neanagi, eri'za vahera
osi'a mani'naze. **38** Ana hu'negu anare'nea hozamofo nefo,
Ramofo nunamu hutma antahigenkeno, mago'a eri'za vahera
huzmantesige'za ome hamareho.

10 Jisasi'a amage'ma nentaza disaipol nagara zamagi hige'za
ageno, zamagrama hankro'ma ahe natinetre'za, ruzahu ruzahu
krima zamagu'afi me'nea vahe'ene, krima erinesaza vahe'ma
zamazeri so'e hanaza hanavea zami'ne. **2** Ana 12fu'a aposol
naga'mokizmi zamagi'a ama'ne, pusana, Saimoni'e (Pita'e hu'za
nehaze) Andru'a agri negna'e, Jemisi'e Zebeti nemofo Joni nefu'e.
3 Filipiki Batolomiuki Tomasiki Matiu zamagire takesi zago eneria
nere, Jemis Alfias ne'mofo ene, magora Tadiasi'e. **4** Romu vahe
ha' renezmantaza Zaretie nehaza nagapinte nera Saimoni'e,
hagi magora Judas Iskalioti Jisasima avrezmi'nea Aposolo nere.
5 Jisasi'a ana 12fu'a aposolo nagara hunezmanteno, amanahu
ke huno zamavumro ante'ne, Megi'a vahe'mokizmi kaziga oviho,
ana nehutma mago Sameria vahe kumapina u'ofreho. **6** Hianagi
vanazana, Israeli vahe'ma sipisipigna hu'za fanane hu'naza

vaheteke viho. 7 Tamagrama nevusutma, ama'na naneke hiho, Anumzamofo kumamo'a hago erava'o nehie, nehutma, 8 kria eri amane nehutma, fri vahera zamazeri o'netitma, fugo namure'nea vahera zamazeri so'e nehutma, hankrora ahenatitreho. Hankavea amane tamuanki, amane zamiho. 9 Magore hutma golio, silvo, kopa tamasopare kupina eri'oritfa hiho. 10 Nantuma vukura tmavate kutamia e'oriho, mago'a anakrekuro, tamaga none, azompanena e'oritfa hiho. Na'ankure eriza vahe'mo'ma upama haniazana amigahie. 11 Osi taonifi vanazano, kumatema vanazana, haketa erifore hutma aza anampina knarera hu'neo, zamagrane maninetma, vukuma hanaza kna vugahaze. 12 Hagi ana nompima unefresutma, tamagra musenkea huzmanteho. 13 Kegeno ana nompi vahe'mo'ma knare'ma hanagenka, karimpa fru nanekea atregeno ana nonte meno. Hianagi knarema osnagenka, karimpa fru naneke ka'a atregeno kagripi meno. 14 Hanki mago'a vahe'mo'zama muse hu'za tmareontege, nanekema hanazama ontahisagetma, anankumama netresutma tmagareti kugusopa arupopo hunetretma, ana kumara atretma viho. 15 Tamage hu'na neramasmue, Anumzamo'ma keagama refako hu knazupa, Sodomune, Gomora kumate korapa hu'neazana, agatereno ranknaza erigahie. 16 Antahihi, Nagrama humanermantoana afi kramo'za avite'za mani'nafi sipisipi afumo ufrea kna hu'na huneramantoe. Hagi osifave'mo'ma nehia kna hutma kva hunetma, knare antahintahi eneritma, maho namamo nehia avu'ava hutma mago havizana osiho. 17 Hu'neanagi vahekura kvahihi, na'ankure kanisolo vahete zamagra tamavre'za vu'za keaga huneramante'za, osi mono nompi omeramante'za sefukno tamigahaze. 18 Ana nehu'za mago'ene tamavre'za Gavanane, kini vahetaminte vugahaze. Na'ankure tamagra

Nagri namage'nentaza nagare. Hagi Nagri nanekea Jiu vahera nezmasamita, megi'a vahera anahu hutma zamasamiho. **19**
Hianagi tamagrima tamavre'za vanagetma, inankna keaga hugahune hutma tamagesa ontahiho. Na'ankure nankna kema hanaza kea, anakna fatgore Anumzamo'a tmasamisnigeta hugahaze. **20** Na'ankure tamagra'a ana keaga osugahaze. Hagi tamagri neramafa Avamumo tamagripi efreno hugahie. **21** Nefu'a ami'mi huno nefuna ahe frigahie, nef'a'a mofavre'a anazanke hugahie. Hanigeno mofavre zagamo'za, arera afana ha'rezmante'za zamahe frigahaze. **22** Hakare vahe'mo'za Nagri nagima hesaza'zanku ha'reramantergahaze. Hianagi aza'o oti hanavetino refare'ma vanimofona agu'vazigahie. **23** Hianagi mago kumate'ma vnageno tmazanva hanagetma atretma ru kumate viho. Tamage hu'na neramasmue, Israeli kumapina vuvaga ore'nesageno, Vahe'mofo Mofavrea egahie. **24** Amage'ma nentea disaipol nemo'a rempi huzami nera agatereno mani anagamu otrene. Kazokzo eriza nemo'a, kva ne'amofona agate'orene. **25** Amne amage'a nentea ne'mo'a rempima humi ne'a gnara hugahie. Hanigeno kazokzo eri'za vahe'mo'a kva ne'agnara hugahie. Hagi mago nagamofo ugotama huzmante'neasia ne'kuma ugagota hankrore (Belzabul) haniana, naga'amofonena mago'ane havi zamagi zamigahie! **26** Zamagrirkura korera osiho, hakare fraki'neazana efore hugahie, hakare'zama oku'a me'neazamo'a efore hugahie. **27** Nagrama hanimpima tmasamisua kea, masare zamasamiho. Hagi sumi kema tamagesafima antahisaza kea, nomoteti kezatitma hugahaze. **28** Tamufama tamahe fri vahekura korera osiho. Hianagi tamagu'a ahe ofrigahie. Anazanku kore'ma hunteszazana, tamagu'ane tamavufanema teve tirupima kre fanane hanimofo Anumzamofonku korera

hunteho. (Geenna g1067) 29 Tare kisave nama azeriza osi zagrera netrafi? Ana hu'neanagi, mago zanimo'a mopafina negafa avesi zampintira asgahu orami'ne. 30 Kanunte'ma me'nea kazokara ko miko hampri'ne. 31 Ana hu'negu korera osuo, kagra miko kisave nama'zaga zamagaterenka raza mani'nane. 32 Aza'o vahepi huama huno, Jisasi vahe mani'noe hanimofona, Nagra monafinka Nenfante agrira huama hu'na nagri vahe mani'ne huntegahue. 33 Hianagi aza'o, Nagrima vahepi hufra kisimofona, Nagra monafinka Nenfa avurera agrira hufra kintegahue. 34 Nagrama e'noa zankura rimpa fruza erino ama mopafi e'ne hunka kagesa ontahio. Nagrama e'noana rimpa fruza erina ome'noe, hagi ha' kazi bainati eri'na e'noe. 35 Na'ankure Nagrama e'noana vahe kankamu retro hanenkeno nefana ha' rentesigeno, mofa'amo nerera ha' rentesigeno, Nenofero'a a' nenofero ha' rentesigeno, 36 hagi ana ne'ma ha'ma rentesazana agri'a naga'amoza otiza hara rentegahaze. 37 Aza'o nefano, nererama avesinte zamo'ma ra hanigeno, Nagri'ma avesinante zamo osima hanimo'a, Nagri'ma namage'ma antezanter knarera osugahie. Hanigeno aza'o ne'aguro mofa'agu'ma avesinte zamo'ma ra hanigeno, Nagri'ma avesinante zamo osima hanimo'a, Nagri'ma namage'ma antezanter knarera osugahie. 38 Hanigeno iza'o keka zafa'a erisaga huno namage ontresimo'a, Nagrima namage antezanter knare osu'ne. 39 Iza'o agra'a nomanizama'are asimu'a atresimo'a, asimura e'origahie. Hagi iza'o Nagriku huno nomanizama'atresimo'a henka'a asimura erigahie. 40 Iza'o kagrima kavaresiana, Nagri navaregahie. Hagi aza'o Nagrima navaresimo'a, hunantegena e'nomofa avaregahie. 41 Aza'o kasanampa ne'ma avaresimo'a, kasnampa ne'mo'ma erisia avamente mizana erigahie. Aza'o fatgo ne' avaresimo'a, fatgo

ne'mo'ma erisia avamente mizana erigahie. 42 Hagi azago zasi tintafama taginka namage'ma nentaza nagapinti mago agima omane'nesi mofoma amisamoka tamagerafa hunka mizanka'a erigahane.

11 Jisasi'a 12fu'a amage'ma nentaza disaipol nagamokizmi naneke zamasmi vagareteno, anantetira rankumate'ene ne'onse kumate ene mono ke nehuno, rempi huzamiku vu'ne. 2 Hagi Joni'a kina nompi mani'neno, Kraisi'ma eria erizamofo ke nentahino, Joni'a agri'a amagema nentaza disaipol naga agenoka ome hutma keho huno huzamantege'za, 3 vu'za, Kagra avegama ante'nomokafi ru nere, hifi tagra mago'a vaheku kegahune? 4 Ana ke nona'a Jisasi'a anage huno zamasmi'ne. Tamagra vutma, nentahita, kaza zana Jonina ome asamiho, 5 avu suhu vahe'mo'za kazageno, zmaga havizahu vahe'mo'za kana vazageno, fugo namuzmare'nea vahe'mo'za knare hazageno, zamagesa ankanire vahe'mo'za antahi'zageno, fri vahe'mo'za otizageno, zamunte omane vahe'mo'za knare muse ke antahi'naze. 6 Hanki iza'o Nagrama huazanku'ma amentintima ataresigeno uoramisimofona, Anumzamo'a asomu huntegahie hutma ome asamiho. 7 Joni amagema nentaza disaipol naga nevazageno, Jisasi'a agafa huno anampi mani'naza kevua Joninkura zamasmi'ne, Ka'ma kopima vu'nazana na'a ome ke'naku vu'naze? Zahomo traza eri tagosi hiaza ke'naku vu'nazafi? 8 Hagi na'a ome kenaku vu'naze? Mago vahe'mo marerisa kukena hu'nea kenafi? Kinimofo kumapi nemaniza vahe'mo'zage marerisa kukena eri nehankraze. 9 Hu'neanagi na'a ome kenaku vu'naze? Mago kasnampa nepi? Tamage hu'na Nagra neramasamue, hakare kasnampa vahera zamagatereno mani'nea ne' ome ke'naze. 10 Ama ana neku avontafepina

amanage huno krentene, Antahio, kema erino vu vahe'ni'a
Nagra huntogeno ugagota huganteno kama vanana kana
varino vugahie hu'ne. (Mal 3:1) **11** Tamage hu'na Nagra
neramasmue, a'nemo'za kasema zamante'naza vahepintira,
mago'mo'e huno mono tima frezamante Joni knara osu'ne! Ana
hianagi Anumzamofo kumapima osi hu'nemo, anamo agrira
agatere'ne. **12** Mono ti frezamante Joni knareti eno menima
eana, Anumzamofo kumama erikura hanavetiza kazigazi hu'za
ha' nehaze. **13** Hagi miko kasnampa kene, kasegea nehazageno
eno Joni knare eme atre'ne. **14** Hagi Nagrama nehua kema
antahinakuma hanutma, antahiho, Elaijae egahie hu'nea nera
agra'a Joni'e. **15** Iza'o agesama me'enemimo'a, ama nanekea
antahi ankereno. **16** Hianagi amagnafi mani'naza vahe kura
inankna ke zamagrikura hunte'na hugahue? Amanahu kna hu'ne,
maketi kumapi mofavre'zagamo'za kanuzage hu'za mani'ne'za,
mago'amokizmigu ke'za atigantu zami'za, **17** tagra konke tafe
reneramantonketa, tamagra avoa nohagaze, zavi nehunketa,
tamagra zavira notaze hu'za hu'naze. **18** Hagi Joni'ma manino
e'nea knafina, ne'zana rama'a oneno, waini tina onege'za,
zamagra havi avamu agripina mani'ne hu'naze! **19** Vahe'mofo
mofavremo eno ne'zane tine nenege'za, zamagra anage hu'naze,
keho ne'za nevaganereno, aka tinte nehuno, takesi eri vahe'ene
kumi vahe'mokizmi ronezamie hu'naze! Ana hu'neanagi anama
hu'nefina knare antahi'za, eriama hu'ne. **20** Anante Jisasi erigafa
huno mago'a kaguvaza higeza ke'naza ranra kumateti vahe'mo'za
zamagu'a rukarehe osaza zanku, ke ontahi vahere huno
huhaviza huzamantene. **21** Kva hiho Korasini vahe'mota! Kva
hiho Bedsaita vahemota tusi nasunku huramantoe! Na'ankure
kaguvazama huazama Tairine, Saidoni kumatema huasina,

zamagra zamasunku kukena nehu'za, tanefa fare'za zamagu'a rukarehe ko hazasine. 22 Tamage hu'na neramasamue, Tairi vahe'mo'zane, Saidoni vahe'mo'za Anumzamoma vahe'ma refakoma huknare osi'a knaza erigahazanki, tamagra rama'a knaza zamagareta erigahaze. 23 Hagi tamagra Kapaniumu vahe'mota monarerera marerigahafi? Anara osugahaze. Tamagra fri vahe'mofo kumapi Hedes uramigahaze, Nagrama tamagripima hua kaguvaza Sodomu huasina, meninena amane mesine. (Hadēs g86) 24 Tamage hu'na neramasamue, vahe'ma refakohu knarera, Sodomu mopafi vahe'mo'za erisaza knazana, agateretma ra knaza erigahaze. 25 Ana knazupa Jisasi anage huno nunamuna hu'ne, Nenfaga monane, mopamofo Ra mani'nane, susu hu'na musenke hugantoe. Antahi'zane vahe manita, antahi ankerenone nehaza vahetera, eri frakinenka, osi mofavre'gna hu'naza vahete eri ama hu'nane. 26 Hagi Nafa'nimoka amanahu'zama hua zamo'a, Kagri kazeri muse nehie. 27 Miko'azana Nenfa nami'ne, magomo'a Nemofona antahino keno osu'neanagi, Nefake antahi'ne. Mago'mo'e huno Nefana antahino keno osu'neanagi, Nemofoke antahino keno hu'ne. Hagi Nemofoma eri averi hugahue himofo, eri averi hugahie. 28 Ana'ana nehuta maragu'za neti'nageno, knama tamavenesinimota nagrite enkena tamazeri fru ha'neno. 29 Nagri agarenamare zafa eri kofinetma, Nagriteti rempi hiho. Na'ankure Nagra akohena nagu'a antefru hu'na nemanue. Hanigeno tamagu'amo'a fru hugahie. 30 Nagri agarenmare zafama eri'amo'a oza higeno, knazanima erisaga hu'amo'a, amuho osu'ne.

12 Hagi ana kna mani fruhu knazupagino (sabat), Jisasi'a witi hozafi nevige'za, Agri amage nentaza disaipol naga'mo'za zamaga'atege'za witimofo raga'a taniza ne'naze. 2 Hianagi Farisi

vahe'mo'za, anama hazaza nezmage'za, anage hu'za Jisasina
asm'i'naze, Ko! Kagri kamage nentaza disaipol naga'mo'za,
kasegemo osuo hu'neaza mani fruhu knarera nehaze. **3**
Hianagi Jisasi'a anage huno zamasmi'ne. Deviti ene magokama
vu'naza naga'mo'za zmagamatege'za hu'naza zana hampritma
avontafepina ontahinazo? **4** Zamagrama Anumzamofo nompi
mareriza ruotge hu'nea bretima omeri'za ne'nazana, kasegemo
huno pristi vahe'moke negahie hu'nea bretia? (1 Sam-Zga 21:1-6)
5 Hifi kagra kasegefina hamprinka onke'nano, pristi vahe'mo'za
mani fruhu (Sabati) kna rufunetagizanagi havizana nosaze? **6**
Hianagi Nagrama neramasmuana, mono noma agatere'neazana
ama me'ne. **7** Tamagrama amana kemofo agafa'ama antahiam
hanutma, Nagrima navesiana vahaku'ma asuraginte zanku
navesianki, kresramna vuzankura nave'osie hu'ne. (Hos 6:6) Ke'a
omne vahera tamagra huhaviza huozmantegahaze. **8** Na'ankure
Vahe'mofo Mofavremo mani fruhu knamofona Rana mani'ne. **9**
Ananteti Jisasi'a atreno osi mono nozimifi (Sinagok) vu'ne. **10**
Anampina Mago aza sti'nea ne' mani'negeno, zamagra Jisasina
keaga hunte kanku nehake'za, Jisasina antahige'za, Kasegemo'a
vahera mani fruhu knazupa azeri knare huo hunefi? hazageno, **11**
Jisasi'a zamagriku huno, Amu'no tamifintira ina ne'moka sipisipi
afukamo mani fruhu knare'ma kerifi uramisigenka avazuhu
anaga otregahano? **12** Vahe'mofo kna'amo'a inankna higeno,
sipisipimofo kna'amo'a inankna hu'ne, e'ina hu'negu manifruhu
(sabat) knarera vahera amne aza hugahane. **13** Anante aza
sti'nea nera anage huno asmi'ne, Kazana ru fatgo huo! Higeno
azana ru fatgo higeno, mago kaziga azamo hu'neaza huno
fatgo hu'ne. **14** Hianagi Farisi vahe'mo'za atre'za atinerami'za,
ahesaza kanku hakeza keaga huge antahige hu'naze. **15**

Jisasina ahenaku nehzageno nentahino, anampinti atreno
nevige'za, rama'a vahe'mo'za amage avaririza nevazageno, Agra
mika kri'zmia zamazeri knare hunezmanteno, **16** anage huno
zamasmi'ne, Agra'a inanka ne' mani'nefi vahera ozmasmiho
huno hanavetino zamasmi'ne. **17** Ama'i Aisaia kasnampa ne'mo
hu'nea kemofo nena'a fore hu'ne. **18** Keho Nagri eri'za vaheni'a
huhamapri ante'noana, Nagra navesi nentogeno nagu'amo muse
agrikura nehie. Nagra avamu ni'a agripi antesugeno, agra fatgo
zamofona huama megi'a vahete hugahie. **19** Agra fra ovazino,
ranke osuno, ranke huno kampina vano osugahie. **20** Hakea
erifu otagogahie, tevemo'a tegege vazigahianagi Agra fatgo
zanke nehanigeno fatgo'zamo agateregahie. **21** Agri agifi megi'a
vahe'mo'za zamentinti'a hugahaze. (Ais 42:1-4) **22** Anante
hankro'mo agu'afi fre'nea ne'mofona avurga asu higeno kea
nosia ne' avre'za Jisasinte vazageno, Agra eriknare huntogeno
kea nehuno avua ke'ne. **23** Anama hige'za miko vahe kevumo'za
antri nehu'za anage hu'naze, Agra ama Nera David nemofopi? **24**
Hianagi Farisi vahe'mo'za ana ke nentahi'za anage hu'naze, Ama
ne'mo hankro'ma hunte'neana, hankro'mofo kagota kva Belsebuli
hanavefi hunte'ne hu'naze. **25** Jisasi'a antahintahizmi refako huno
nezmageno anage huno zamasmi'ne, Mago mago rankumapi
vahe'mo'za amu'nompinti refakoma hanuza, zamagrazmi
zamazeri haviza hugahaze. Hagi mago rankumamo'o, nomo o
refako osnu'za hanavetigahaze. **26** Ana hu'neanagi Satama,
Satanima humegi atesiana, agra'a ha' arentegahie. Inankna
huno agri rankumamo'a megahie. **27** Nagrama hankromofo
kva Belsebuli hihamure, hankroma hunentanena, iza hihamure
tamagri mofavremo'za hunentaze? E'ina agafare tamagrira refako
hurmantegahie. **28** Hianagi Nagrama Anumzamofo hanavefi

hankro'ma hunentanena, Anumzamofo kumamo'a tmagrite ko e'ne. 29 Inankna huno mago ne'mo'a hanave vahe'mofo nompina vuno miko'zama'a erigahie. Anara osuneno kota'zana ana nera azerino kina renteteno, anante noma'afi mrerino kumzafa nese. 30 Nagranema omani'nenamo'za ha' Nagrira renenantaze. Hagi iza'zo Nagrane atru huza omani'namoza, fragu vaziza vu'za e'za hugahaze. 31 E'ina hu'negu Nagra amanage hu'na neramasgue. Mika azanavankene kumi'ma vahe'mo'zama hanazana, Anumzamo'a atre zmantegahie. Hianagi Ruotge Avamumofo azanava ke hunteszazana, Anumzamo'a kumi zmia atre ozmantegahie. 32 Iza'o Vahe'mofo Mofavregu mago kema huhaviza hunte'sazana, Agra kumizmi'a atre zmantegahie. Hianagi iza'o Ruotge Avamumofonku huhaviza hunteszaza vahera menine, henka'anena kumi zami'a atre ozmantegahie. (aiōn g165) 33 Hagi Jisasi'a mago'ene huno, Knare zafamo'a knare raga'a regahie. Hagi havi zafamao'a havi zafa raga rentegahie. Na'ankure ragare negenka zafamofona knare hu'neanki haviza hu'neanki hugahaze. 34 Tamagra ha' osifave'mofo mofavre kevu mani'naze. Havizama nehana vahe'moka, inankna hunka knare'zana hugahane? Na'ankure krimpafi me'nea kea kagi'mo nehie. 35 Knare vahe'mo'a knare'zama rimpafima erinte'neaza, agimo'a eriama nehie. Havi vahe'mo'a havizama rimpafi erinte'nea agi'mo'a eriama nehie. 36 Hianagi Nagra amanage hu'na neramasamue, Anumzamo'ma vahe'ma refakoma huknarera, miko'a havigema nehaza kere, tamagenoka huzmantegahie. 37 Naneke hunante fatgo hu'nane huno refako hugantegahie. Naneke hunenante haviza hu'nane huno refako hugantegahie. 38 Anante mago'a kasegere ugagota hu'naza vahe ene Farisi vahe'mo'za anage hu'za asmi'naze, Rempi Hurami ne'moka,

mago avame'za Kagra hananketa kesunegu nehune. **39** Hianagi Jisasi'a kenona anage huno zamasmi'ne, Ama knafi vahe'mo'za kefoza nehu'za zamentinti nosaza vahe'mo'za avame'za kenaku nehazanagi, mago avame'zana onkegahaze, kasnampa ne' Jona avame'zanke kegahaze. (Jona 1:17) **40** Anahu kna huno, Jona'a tagufa zagegi tagufa haninki huno nozamemofo rimpafi mase'neankna huno Vahe'mofo Mofavremo tagufa zagegi, tagufa haninki huno mopa agu'afi masegahie. **41** Ninive vahe'mo'za Anumzamoma refakoma hania knarera, ama knafi vahe ene magoka ot'i'za, keaga hurmantegahaze. Na'ankure Jona'ma huama hia kere zmagu'a rukrahe hu'naze. Hagi keho Jonama agatere'neana ama'ne. **42** Hanki sauti kazigati kuini a'mo Anumzamo'ma refakoma hania knarera otino, ama knafi vahe'motma keaga hurmantegahie. Na'ankure afete moparegati eno Solomoni knare antahintahi antahinaku e'ne. Hagi ko, Solomonima agatere'neazana ama me'ne. **43** Hagi havi avamu'mo, vahe'ma atreno vuno, noma manisia kumaku hagege kokampi ome hakeana before osu'ne. **44** Ana huteno anage hu'ne, ko'ma mani'nena atre'na e'nofi umanisue nehuno, eno eme keana harafi huno eri antefatgo hu'negeno ke'ne. **45** Eteno vuno 7ni'a havi avamu tmimo'ma agri'ma agtere'nea ome zamavreno ege'za ufre'za mani'naze. Henkama mani'nea mani'zamo'a, pusama mani'nea mani'zana agtereno havi zantfa hu'ne. E'inahu avu'avaza ama knafi havi zamavu'zmava nehaza vhetera fore hugahie. **46** Jisasi'a ana naneke atru hu'naza vahe kevumokizmi nezmasmige'za, Nerera ene aganahe'za Agri'ene keaga hunaku meg'i'a eman'i'naze. **47** Anante mago'a vahe'mo Agrira asmino, Negrera'ene kagnahe'za Kagrane keaga hunaku meg'i'a eman'i'naze higeno, **48** anama asmi'mofonku

anage huno asmi'ne, Nagri nentrera ene nagnahe'za izaza mani'naze? **49** Ana nehuno amage nentaza disaipol naga'a mani'narega azanu zmerino anage hu'ne. Ko, nentrera ene naganahe'za ama mani'naze. **50** Iza'o monafi mani'nea Nenfa avesi'zama amage'ma antesimo'a, agra nenagna'ene nensarozane, nentreraza mani'naze.

13 Ana knareke Jisasi'a nompinti atreno vuno, tiru ankenare umani'ne. **2** Rama'a vahe'mo'za mani'nere umani korave hazageno, votifi marerino umanige'za, rama'a vahe'mo'za tiru ankenare oti'naze. **3** Ana huteno Rama'a fronka kea anage huno zamasmi'ne. Antahiho hoza kri ne'mo'a avimza krinaku vu'ne. **4** Ana'ma huno avimzama negrigeno'a, mago'a avimzamo'a kamofo ankinafi evuramigeno, nama zagamo eno eme ne'ne. **5** Mago'a avimzamo'a havege huno osi'a mopa me'nefi evurami'ne. Na'ankure osi'a mopa me'negen, ame huno hageno mareri'ne. **6** Hianagi zagemo hanatino mrerino temagi atre'ne, na'ankure rafu'namo krakaka kigeno, zagemo te osapare'ne. **7** Hagi mago'a avimzamo'za ave'ave trazampi evuramigeno, ana ave'ave trazamo hageno rentrako higeno haviza hu'ne. **8** Hu'heanagi mago'amo'a knare mopafi evuramino ne'zana rente'ne. Mago'amo'a 100'a rentegen, mago'amo'a 60'a rentegen, mago'amo'a 30'a rente'ne. **9** Iza'o agesama me'henimo'a ama kea antahise hino. **10** Hagi agri'ma amage'ma nentaza disaipol naga'mo'za Jisasinte e'za anage hu'za antahige'haze, Nahigenka fronka kefintikera nezmasmi'ne? **11** Hazageno Jisasi'a ke nona huno, Anumzamofo kumapi oku'a me'hea zantamina kehogu tamaveri nehie. Hianagi zamagrira zameri nosie. **12** Iza'o mago'azama eri nemimofona, mago'ene ami'nigeno, agra eri avitegahie. Iza'o e'ori

nenimofona, mago'a zama eri'neniana hanregahie. **13** Ama'na agafare, Nagra fronka kefintira nezmasmue. Na'ankure zamagra negazanagi keso'e osugahaze, antahigahazanagi antahi so'e hu'za amara osugahaze. **14** E'inama hu'naza'zamo'a kasnampa ne' Aisaia hu'nea nanekemo'a avufa'a fore hu'ne, Tamagra antahigahazanagi, amara osugahaze. Tamagra kegahazanagi, keanke oregahaze. **15** Na'ankure vahe'mokizmi zmarimpamo hanavetino anaki'ne. Higeno zmagesareti'ma kema antahizamo'a amuho hunezmantege'za zmua asu'nekiza, zmurgaretira zamua onke'za, zmagesa nontahiza, zamagu'aretira amara nosazankiza, zamagu'a rukrehera osnagena, Nagra zamaza osugahue. (Ais 6:9-10.) **16** Hianagi tamagra ketama antahitama hazazante Anumzamo asomu huneramante. Na'ankure tamavua negeta tamagesamo'a nentahie. **17** Tamage hu'na neramasmue, korapa rama'a kasnampa vahe'mo'zane, fatgo vahe'mo'za amama negaza'za kenaku hu'nazanagi onke'za, nentahizankea, antahinaku hu'nazanagi ontahi'naze. **18** Jisasi'a mago'ene anage hu'ne, Antahihi, Avimza ase'nea fronka kemofo agu'agesa'a, ama'ne, **19** Mago'a vahe'mo'za Anumzamofo kumamofo knare naneke nentahi'za, antahi ama osaza nagamofona, Sata'a eno zamarimpafi me'nea kea emeri atre'ne. Amana hu'ne, kamofo ankinafi avimza kri'nea kna hu'ne. **20** Mago avimazamo have mopafi evurami'neana, amanahu kna vaheku hu'noe. Anumzamofo naneke nentahino, ame'ama huno muse hu'ne. **21** Ana hianagi rafu'na uorminegeno, osi'a kna mani'negeno ana nanekemofonte rehe'za egeno'a, ana nanekea ame huno atreno traka nehie. **22** Hagi ave'ave trazampi evu rmi'nea avimazana anahu kna hu'ne, Anumzamofo kea antahiteno, ama mopafi afufenonku agesa nentahigeno, ana zamo avazu

higeno Anumzamofo kemo'a nena raga'a reonte'ne. (aiōn g165)

23 Hianagi so'e mopafi kri'nea avimza avimo'a, amanahu vaheku hu'noe, naneke nentahino ana nanenkemofo agu'agesa'a ama nehuno, nena raga'a renteno mago'amo'a 100'a rentegeno, mago'amo 60'a rentegeno, mago'amo 30'a rente'ne. 24 Jisasi'a anage huno mago'ene fronka ke zamasmi'ne, Anumzamofo kuma'mo'a mago ne'mo hoza'afi knare avimza aseankna hu'ne.

25 Hianagi avimaza aseteno umasenegeno, ha' vahe'amo havi traza'mofo avi ana witi hozafi eme neseno vu'ne. 26 Anama hutegeno'a witimo hageno raga ome renentegeno, havi trazamo enena hage ama hu'ne. 27 Hagi nena nehigeno kazokzo eri'za vahe'amo'za e'za, hoza nefana antahige'za, ramoka kagra knare avimzanke hoza ka'afina kri'nampi? Inankna huno havi trazana hage'ne? hu'za antahige'naze. 28 Hoza nef'a'a anage huno zamasmi'ne, Ha' vahetimo anara hu'ne! huno hige'za, kazokzo eri'za vahe'mo'za anage hu'za asmi'naze, knare tatesanketa ome zanegi atregahumpi? hu'za antahige'naze. 29 Hianagi hoza nef'a'a anage huno zamasmi'ne, a'o tra'za zanefisafima witine zanefigahazanki atrenkeno meno. 30 Atrenkeno magoka tarega moke hage'ne hoza hamare knare uhanati'o, hozama hamareknare, hoza hamaresaza vahera nagra zamas migahue. Kotazana havi traza zanegita nofi anakita tevefi kresigu eri atru hiho. Hianagi witi eri atru hutma nezama ante noni'afi eri antegahaze huno zamasami'ne. 31 Jisasi'a anage huno mago'ene fronka ke zamasmi'ne, Anumzamofo kumamo'a masteti zafa rgamofo avima'agna hu'neankino, vahe'mo erino hoza'afi negrie.

32 Mago'a zafa avigna osu'neanki onensa avima'a me'ne. Hianagi ana osi zafamo'a ra huno mago'a hozafima me'nea zantamina agteregeno zafa segeno, Nama'zagamo'za eza no azankunate

emegiza amu ante'naze. (Ezi 31:3-14.) **33** Jisasi'a anage huno mago'ene fronka ke zamasmi'ne, Mona kumamo'a amanahu hu'ne, mago a'mo zisti erino witi flauapi herafinteno kregeno ra hiankna hu'ne. **34** Jisasi'ma maka kema vea kevufi hu'neana fronka kege zamasmi'ne. Hagi Agra amate kea ozmasmi'ne. **35** Amanage huno kasnampa ke hu'nea kemofo avufa'a fore hu'ne, Nagra fronka kefintike kea hugahue. Nagra monane mopa fore osu'nereti'ma eno menima ama knare'ma e'neana, oku'a me'nea kea eri ama hugahue. (Sams-Zga 78:2.) **36** Ana huteno ana vahe kevua, zamatreno nompi ufre'ne. Agri'ma amage'ma nentaza disai pol naga'mo'za Agrite e'za, anage hu'za asmi'naze, Hozafi hage'nea havi tra'zamofo agu'agesa'a tasmio. **37** Hazageno Jisasi'a anage huno zamasmi'ne, Knare avimza ase'nea nera, Vahe'mofo Mofavre. **38** Hagi hoza, ama mope, knare avimzana, Anumzamofo mofavrermine, havi tra'zana, Sata mofavreramine. **39** Hagi ha' vahe'mo havi traza kri'neana Sata'e. Hozama hamare kna, mopa vagare kne, hoza hamare vahera, ankero vahezage. (*aiōn g165*) **40** Havi traza eri tru hu'za tevereti kre'nazana anahu hu'ne, vagaresia knarera tevefi kregahie. (*aiōn g165*) **41** Ana knarera Vahe'mofo mofavremo'a ankero vahe'a huzmantesige'za, kumi'ma nehu'za vahe'mokizmima zamazeri kumipima nentaza vahera, Agra'a kumapintira zamazeri megi atregahie. **42** Hagi zamagrira zamazeri mate vanage'za amuho tevefi mani'ne'za zavira nete'za, zamavera aninkreki hugahaze. **43** Ana'ma hanige'za fatgo vahe'mo'za nezmafa kumapina zagemo remsa hiankna hu'za manigahaze. Iza'o agesama me'ne'nigeno'a, ama naneke antahise hino. (Dan 12:3.) **44** Mona kumamo'a, zago'amo'ma mareri'neaza hozafi frakiankna hu'negeno, mago'mo ome keno eri fore huteno, ete eri

franekino, musezamo higeno viazamo miko zama'a zagore ome
atre vagareteno, ana mopa ome mi'za hu'ne. **45** Mago'ene mona
kumamo'a, feno ne'mo knare kintna me'negeno hakrea kna
nehie. **46** Ana hu'neankino zago'amo mareri'hea kintana mago
hakeno eri fore'ma huteno'a, ete vuno miko zama'a mizante ome
atreno zago erino, ana kintna ome mizase'ne. **47** Mago'ene
mona kuma'mo'a, noza kuko timpi atreno rama'a ruzahu ruzahu
nozame azeriankna hu'ne. **48** Hagi avi'matetegeno'a avazu
hu'za kasepampi atrete'za, knare nozamea eri'za zuompafi
ante'naze. Hianagi havi'za hu'nea nozame'a matevu atre'naze.
49 Anahu kna huno mona mopa vagare knarera ankeromo'za
e'za fatgo vahe amu'nompinti keontahi vahera eme zamavare'za,
(aiōn g165) **50** tevefi matevu'za zamatresage'za ana kumapina
zavi nete'za, zamavera ani kreki hugahaze. **51** Tamagra maka
kema huana antahi ama nehazafi? Huno zamantahigege'za
kenona'a anage hu'za Jisasina asmi'naze, izo. **52** Jisasi'a
anage huno zamasmi'ne, E'ina hu'negu miko kasegere ugagota
hu'naza vahe'mo'za mona kumamofonku e'ina hugahaze hu'za
hunezmasamiza vahe'mo'za, nomofo nafa'amo noma'afi ufreto
korapa fenozane, kasefa fenozama'a erino atineramia kna
nehaze. **53** Ana fronka kea Jisasi'a zamasmi vagareteno, ana
kuma atreno, **54** Agra kuma agafa'are Nazareti eno osi mono
nompi eme rempi hunezmige'za, antri hu'za anage hu'naze, Ama
ne'mo'a knare antahi'zane, kaguaza eriforehu hankavea igati
eri'ne? **55** Ama kapenta ne'mofo mofavrefi? Nererankura Maria'e
nehazafi? Aganahe'za Jemsi ene Josefe ene Saimoni ene
Judasizafi? **56** Hagi asarahe'za tagrane omani'nazafi? Inaregati
ama ne'mo'a ama maka'zana eri'ne. **57** Nehu'za antahi haviza
hunentageno, Jisasi'a anage huno zamasmi'ne, Kasnampa

vahe'mofona Agri kumate vahe'mo'zane, maka naga'amo'za
ra agi nomize. **58** Ana hu'negu rama'a kaguvazana amafina
osugahie. Na'ankure zamagra zamentintia nosaze.

14 Hagi ana knafina Heroti'a Galili kumate ugota kva ne'mo,
Jisasi agenke antahiteno, **2** eri'za vahe'a zamasmino, E'i
mono ti frente Joni fri'nefinti otine, e'ina hu'negu kagu'vaza hu
hanavea agripina me'ne. **3** Hagi Heroti'a Jonina azerino kina
nompi kina rente'ne. Na'ankure nefu Filipi a' Herodiasi eri'nea
zanktekure. **4** Na'ankure Joni'a anage huno asmi'ne, negafu
a'ma rehanre'nanana tra kea hantaginane. **5** Ana higeno Heroti'a
ahe frinaku hianagi, rama'a vahe kevu mani'nageno kore hu'ne.
Na'ankure Jonina mago kasnampa ne' mani'ne hu'za vahe'mo'za
ke'za antahi'za hu'naze. **6** Hianagi Herotima kasente kna egeno,
Herodiasi mofa'mo zamavuga avo eme reazamo, Herotina tusiza
huno azeri muse higeno, **7** tusi'za huno avesinteno, agra hanave
ke huno huvempa huno, Na'anku'ma nantahigenanke'na amne
kamigahue huno asmi'ne. **8** Nerera'ma amia antahizante ana
mofa'mo'a huno, Mono ti frente Joni agenopa kitaginka zuompafi
eme namio. **9** Kini ne'mo'a kamigahue hu'nea kegura keke
hianagi, ne'zama nenaza vahe'mokizmi zamavufi huvempa
hu'negu, amigahaze huno huzmante'ne. **10** Agra mago'mofo
huntegeno kina nompi vigeno, sondia vahe'mo'za Joni agenopa
akafrí amizageno, **11** aseni'a tafepi erinteno, ana mofa'mofo
eme amigeno, erino vuno nerera ome ami'ne. **12** Anante Joni
amage nentaza disaipol vahe'amo'za e'za avufa'a emeri'za,
ome asentete'za vu'za Jisasina ana kea ome asami'naze.
13 Heroti'ma Jonima ahe fri'nea naneke Jisasi'a nentahino,
ana kuma atreno vahe omani'nea ka'ma mopare agrake votifi
marerino vu'ne. Vige'za hakare veamo'za nentahi'za maka

kumateti eri hantge'za avariri'za mopafi vu'naze. **14** Vu'za
uhanatizageno, Jisasi'a ventefinti takaunereno keana hakare vea
nezmageno tusi'za huno asunku hunezmaneno kri eri'namokizmi
zamazeri so'e hu'ne. **15** Kinaga sege'za, amage nentaza
disaipol naga'mo'za Jisasinte e'za anage hu'naze, ama vahe
omani ka'ma kopi mani'nonkeno, hago hani hu'za nehianki,
ama vahe'zaga huzmantegē'za kumatega vu'za, zamagra'a
nesaza ne'zana ome miza seho. **16** Hianagi Jisasi'a anage huno
zamasmi'ne, Zamagra ovugahazanki ne'zanku keta zaminke'za
neho! **17** Hige'za, zamagra anage hu'za Jisasina asmi'naze,
5fu'a bretigi, tare nozaki huta ama eri'none hazageno, **18**
Erita eme namiho, huno hige'za eri'za eme ami'naze. **19**
Ana vahetmina apepate maniho huno nezmasmino, ana 5fu'a
brette, tare nozara erino, monafi ke'nagamuteno negeno,
asomu ke huno susu huteno, bretia korino amage'ma nentaza
disaipol naga zamige'za, ana vahetmina zami'ne. **20** Makamo'za
ana ne'za nageno zamu hu'ne. Nege'za atrazama'a zogi'za
12fu'a ekaeka kipi zogiri avitente'naze. **21** 5 tauseni'a vene'ne
nazamo'za ne'naze, hagi a'nene mofavre'zaga ohampri'naze. **22**
Amage'ma nentaza disaipol naga ame huno huzmanteno, Ko
votifi mareritma kantu kaziga viho nehuno, anampima mani'naza
vahekrerfa huzmantegē'za vu'za e'za hu'naze. **23** Ana veara
huzmantegē'za vutageno, Agra agonarega nunamu hunaku
mrerino umani'negeno, kinagasegeno Agra'ake anante mani'ne.
24 Anama nehige'za, amage'ma nentaza disaipol naga'mo'za ti
amu'nompi nevazageno, hanave zahoko atigeno timo'a kranto
kranto huno votia eri rukrahe hu'za hu'ne. **25** Ana nehigeno kotu
afa'za nentegeno, Jisasi'a ana ti avozare ne-ejeno, **26** amage'ma
nentaza disaipol naga'mo'za negageno ti avozare ne-ejeno tusi

koro nehu'za, Amanu hankrore nehu'za koro hu'za krafa hu'naze.

27 Hianagi ame huno Jisasi'a anage huno zamasmi'ne, Korora osuta akoheta maniho, ama Nagre, huno higeno, 28 Pita'a anage huno asmi'ne, Ra'moka kagrama mani'enunika, eno hunka huge'na kagritega va'neno. 29 Higeno Knareki eno! higeno Pita'a votifinti uramino ti avozare Jisasintega vu'ne. 30 Hianagi tusi'a zaho enerigeno negeno koro huno, ana timpi uneramino kezatino, Ramoka nazahuo! 31 Higeno Jisasi'a ame huno azana antegantu ateno avazu nehuno, anage huno asmi'ne, Kagra osi kamentinti hane, Na'a higenka tare kagu kagesa nentahine? huteno, 32 ana votifi marerikeno, zaho'mo amane hu'ne. 33 Ana votifi mani'namo'za Jisasina mono hunente'za, tamage Kagra Anumzamofo mofavre mani'nane hu'za hu'naze. 34 Hagi ana timofo kantu kaziga ankenare, Kenesareti mopare vu'naze. 35 Ana kumate vahe'mo'za Jisasi'ma e'ne hazankema nentahi'za, kea humzantageno ana kumamofo tava'onte me'nea kumapi vahe'mo'za kri eri'naza vahera zamavare'za Jisasinte e'naze. 36 Kri vahe'mo'za Jisasinku muse hugantonanki tatregeta kena atupaka'are avako hamneno, nehu'za avako'ma hazamokizmi krizamimo'a vagare'ne.

15 Anante mago'a Farisi vahe'ene kasegere ugagota hu'naza vahe'mo'za Jerusaleti, Jisasinte e'za anage hu'za asmi'naze.

2 Na'a hige'za kamage nentaza disai pol naga'mo'za tagehe'i avu'ava zana ruhanentagize? Na'ankure zamazana sese osu ne'zana ne'naze. 3 Jisasi'a ana ke nona'a, amanage huno zamasmi'ne, Nahigeta tamagra tamagehe'i avu'ava avriri zankuke nehutma, Anumzamofo kasegea rufunetagize? 4 Na'ankure, Anumzamo'a anage hu'ne, Negafane, negrera ke amage antenka zanagi erisaga huo, iza'o nererano, nefano huhaviza

huntesimofona ahe friho hu'ne. **5** Hianagi tamagra anage
nehaze, iza'o nererano nefanku huno, kazahu'za ante'noa zana
Anumzamofo ami'none haniana, **6** agra nererano nefana antahi
omino amagera nonte. Hagi anama nehutma Anumzamofo kea,
nermageho avu'avakuke nehutma retufe netraze. **7** Tamagra
tavre vahere, Aisaia'ma kasnampa kema hunte'neana tamagriku
tamage hu'ne, **8** Ama vahe'mo'za amega zamagiteti Nagia
erisaga nehaze. Hianagi nagritetira zamagu'amo'a afete'are
me'ne **9** Hianagi nena'a omne mono hunenante'za, rempima
hazana vahe'mofo keage nehaze. (Ais 29:13.) **10** Jisasi'a vahe
kevu kehutru huteno anage hu'ne, Antahi ankeretma antahi ama
hiho. **11** Vahe'mo'za zamagipima nazazamo'a zamazeri haviza
nosie. Hianagi zamagipinti'ma atiramia zamo zamagu'a zamazeri
haviza nehie. **12** Anante amage nentaza disaipol naga'mo'za
e'za, anage hu'za asmi'naze, Farisi vahe'mo'za kema hana
antahite'za zmarimpama ahegante'nazana Kagra antahi'nano?
13 Hianagi Jisasi'a kenona'a amanage huno zamasmi'ne,
maka'zama Nagri Nenfama onkri'neana, mika zanefi tregahie.
14 Zamatreke'za zamu suhu kva vahe'mo'za, zamusuhu vahera
kana zameri'za viho. Na'ankure zamavu suhu vahe'mo'za,
zamavu suhu vahera kana zameri'za vanazana, taregamoke
kerifi uramigaha'e. **15** Hianagi Pita'a amanage huno hu'ne, ana
fronka kemofo agafa'a eriama hugeta antahi maneno higeno, **16**
Jisasi'a amanage huno hu'ne, Tamagranena antahi so'e osu'neta
nehazafi? **17** Tamagipima nageno tamarimpafi uneramigeta
arifama neraza'zana ontahi'nazo? **18** Hianagi agipinti atiramia
zamo'a agu'afinti neankino, azeri haviza nehie. **19** Na'ankure
agu'afinti havi antahintahizane, vahe ahe fri'zane, monko'zane,
arave osu'neno monko'za hu'zane, kumzafa sezane, havigegu

eri tamage hu'zama, knare vahe'mofo huhaviza hunte'zana ne-e. **20** Ama'na zantamimo vahera zamazeri haviza nehie. Hianagi azama sese osu'neno ne'za nezamo'a, vahera azeri havizana nosie. **21** Anantetira Jisasi'a ana kumara atreno, Tairine Saitoni kumate vigeno, **22** mago Kenani a' ana kaziga nemania a'mo eno ranke huno kezatino, kasunku hunanto Ramoka, Deviti nemo fogga, mofanimofona havi hankro'mo agu'afi fre'negeno tusi haviza hu'ne. **23** Hianagi Jisasi'a ana a'mofo kenona osu'ne. Agri amage nentaza disaipol naga'mo'za e'za anage hu'za asami'naze. Muse hugantonanki huntogeno vino, na'ankure agra tusi kereso nehianki huntogeno vino. **24** Hianagi Agra amanage huno kea hu'ne, Nagri'ma hunante'neana Israel vahe'ma fanane hu'naza sipisipiguke huno hunante'ne. **25** Hianagi ana a'mo'a eno Jisasi avuga kepri huno amanage hu'ne, Ramoka Kagra naza huo! **26** Higeno Agra ana kenona anage hu'ne, Mofavre bretima eri'na matevu'na kraramimofo ami'zamo'a knarera osu'ne. **27** Hu'neanagi ana a'mo'a anage hu'ne, izo Ramoka, hianagi ana kramoza razmimofo itareti angra heramiam'a nenaze. **28** Anante Jisasi ana a'kura anage huno asmi'ne, A'moka, Kagri kamentintimo'a ra krefahie, kagrima kavesinia kante anzana fore hugahie. Higeno, ame huno ana mofa'amofo krimo'a atrente'ne. **29** Hagi ana kuma atreno Jisasi'a Galili tinkenarega vuno, agonarega umrerino anantega umani'ne. **30** Rama'a vahe'mo'za anantega Agrite ne-eza, zamagia zamaza sti'nea vahe'ene, zamagia haviza hu'nea vahe'ene, zamu suhu'nea vahe'ene, zamazama haviza hu'nea vahe'ene, zamagefuna atupa hu'nea vahe'ene, mago'a ruga'a vahe'ene zamare'za Jisasi agafi eme zmantageno zamazeri so'e hu'ne. **31** Tusi'a zmanogu nehu'za antri hu'naze. Kageno

agefuna atupahu vahe'mo ke nehigeno, zamaza haviza hu'nea
vahe'mo'za knare nehazageno, agia havizahu vahe'mo otino
nevigeno, zamavu asuhu vahe'mo'za zamavua negage'za, Israeli
vahe'mokizmi Anumzamofo agi zamagra ahentesga hu'naze. **32**
Jisasi'a amage nentaza disaipol naga'a ke huno anage huno
zamasmi'ne, Nagra ama vahetaminkura nasunku huzmantoe,
na'ankure zamagra tagufa kna Nagranena mani'hageno nezama
nesazazana omne'ne. Nagrama huzmantesuge'za zamaga ene
vuzankura navenosie. Na'ankure kantega nevu'za zamavu evu
evu hanige'za traka ome hugahaze. **33** Amage'ma nentaza
disaipol naga'mo'za anage hu'za Agriku hu'naze, Inantegati
rama'a bretia erita ama tusi vahe krerfa zmisunke'za, ama
vahe omani kokampina erignare hugahaze? **34** Jisasi'a anage
huno zamasmi'ne, Nama'a breti tamagra eri'naze? Hige'za
zamagra anage hu'naze, 7ni'a bretigi, mago'a osi nozamerame.
35 Ana huteno vea kevua huzmanteg'e'za mopafi mani'naze.
36 Manitageno ana 7ni'a bretine noza'ene erino Anumza'mofo
susu hunteteno, tmanasino amage nentaza disaipol naga'a
zamige'za eri'za ana vea kevu zami'naze. **37** Ana hige'za maka
vahe'mo'za ana neza nazageno zamu hutege'za, atrazama'a eri
atru hu'za 7ni'a ekaeka kupi eri avite'naze. **38** Hagi ana nezama
ne'nazana 4tauseni'a vene'ne nazamo'za ne'naze. Anampina
a'nene, mofavre'ramina ohampri'naze. **39** Hagi ananteti Jisasi'a,
ana tusi'a vea kevu huzmanteg'e'za nozimirega vu'za e'za
nehazageno, votifi marerino Magadani kaziga vu'ne.

16 Anante Farisi vahe'ene Satusi vahe'mo'za Jisasinte e'za,
monafinti avame'za huraveri huo hu'za rehe'za ke'naze. **2** Hianagi
Agra anage huno zamasami'ne, Kinagamasegeno korimpe'nare
kamupaseko atigeta, okina zo'ego tugahie nehaze. **3** Hagi

nanterama monare kamupse ko netigeta negetma, zaho ko atugahie nehazageno, zaho kora netie. Menina monare fore'ma hiazana refako hutma negazanagi, ama knafima fore'ma hiazana refako hutma nonkazo? 4 Ama knafi havi tamutma ene tamentinti netraza veamotma avame'zanku nantahi negazanagi, mago avame'za eri fore ha'nena onkegahazanki, kasnampa ne' Jonama hu'nea avame'zanke kegahaze. Anage huteno zamatreno vu'ne. (Jona 1:17-2:10.) 5 Hagi amage nentaza disaipol naga'amo'za tirumofo kantu kaziga ankenare unehanati'za, zimage'akani'za breti e'ori' e'naze. 6 Hagi anante Jisasi'a zamasamino, Kvahihio, Farisi vahe'ene Sadusi vahe'mokizmi zistigura huno Jisasi'a zamasmi'ne. 7 Anage hige'za, zamagra'zmi hugantu kama huza bretima e'rima onazanteku nehie hu'naze. 8 Jisasi'a antahino keno nehuno, Agra anage hu'ne, Tamagra osi'a tamentinti nehaza vahe'mota, amu'notamifi bretima e'ori'naza zankura nahigeta ke hakare nehaze? 9 Tamagrira tamage'akaninefi? 5fu'a bretima, 5 tauseni'a vahe'mo'za netazageno, nama'a nege'atrege hu'nazama'a eka eka kupina erivite'naze? 10 Hifi 7ni'a bretiretimma 4 tauseni'a venenemoza nene'za zamu'ma hiama'a, eka eka kutamimpima eriri avite'nazana tamagra antahi'nazo? 11 Inankna huta keta antahita nosaze, Nagra bretigura nosue? Hianagi Farisi vahe'ene Sadusi vahe'mokizmi zistigura kva hiho. 12 Anante zamagesa antahi ama nehu'za, bretifi nentageno zonerea zistigu kva hiho nosie. Hianagi Farisine Sadusi vahe'mo'za rempima hunemiza zanku kva hiho nehie. 13 Ananteti Jisasi'ma eno Sisaria Filipai kumate enehanatino, anage huno amage'ma nentaza disaipol naga zamantahige'ne, Iza'e hu'za Vahe'mofo mofavregura nehaze? 14 Hige'za zamagra ana kenona anage hu'za asmi'naze, Mago'amo'za mono ti frezmante

Joni'e nehaze, ruga'amo'za Elaija'e nehaze, mago'amo'za
Jeremaiapi nehzageno, mago'amo'za hu'za mago kasnampa
nere hu'za nehaze. **15** Jisasi'a amanage huno zamantahige'ne,
Hu'neanagi tamagra iza'e, huta Nagrikura nehaze? **16** Higeno
Saimon Pita'a kenona'a anage hu'ne, Kagra Kraisige, kasefa
huno mani'nea Anumzamofo mofavre mani'nane. **17** Jisasi'a
anage huno asmi'ne, Saimoniga, Jona nemo fogga, Anumzamo'a
asomu hugantesie. Na'ankure vahe'mo amazana erigaveri nosie.
Hu'neanagi Nenfa monafi mani'nemo erigaveri nehie. **18** Nagra
anage hu'na negasamue, kagra Pitage, hanki'na ama ana
havere, mono noni'a ki'nugeno, fri'zamofo hanavemo'a azeri
agete'oregahie. (**Hadēs g86**) **19** Nagra mona kumapi kinofitmina
kamigahue. Kagrama ama mopafima na'ano anakisanana,
monafina anakigahie. Na'ano mopafim'ma atresana zana, monafina
atregahie. **20** Anante amage nentaza disaipol naga'agura,
Kraisi'e hutma vahera ozmasmiho huno zamasmi'ne. **21** Ana
knareti'ma e'neana, Jisasi'a amage nentaza disaipol naga'a agafa
huno zamasamino, Agrama Jerusalemi vanige'za, ugota mono
kva (elda) vahe'mo'zane, ugagota pristi vahe'mo'zane, kasegere
ugota hu'naza vahe'mo'za, rama'a zampi azeri haviza nehu'za
ahe frisagene friteno tagufa knarera otigahie, huno zamasami'ne.
22 Pita'a, Jisasina avare rure anteno, agafa huno anage huno
kesu'ne, O'e Ranimoke! E'ina hu'zana Anumzamo'a atresigeno,
Kagridera forera osugahie! **23** Hianagi Jisasi'a rukrahe huno
Pitankura anage hu'ne, Maniganenka namefi evuo Sataga! Nagri
kana rehiza nehane. Na'ankure kagra Anumzamofo antahintahi
e'norine, vahe'mofo antahi'za e'nerine. **24** Anante Jisasi'a amage
nentaza disaipol naga'a zmasamino, Mago vahe'mo Nagri
namage antenaku hanuno'a, agra'a avesizana, atreteno rugeka

zafa'a erino namage eno. 25 Na'ankure asimu'a aguvaziku hanimo'a, asimu'a atregahie. Hianagi iza'o Nagriku huno asimu'a atresimo'a asimu'a erigahie. 26 Mago'mo mika mopafi zantami eri tru nehuno, agra'a agu amema atre'siana, na'a azahu'zana erigahie? Hifi agu amemofo nona huno na'a amigahie? 27 Vahe'mofo mofavremo ankero tmima'ane, Nafa'amofo hanavefi esuno'a, Agra magoke magoke'moma hu'nenia avu'avate anteno mizana amigahie. 28 Nagra tamage hu'na neramasmue, menima amama otitma mani'nafintira mago'amota ofri mani'netma negesageno Vahe'mofo mofavremo'a kini manino egahie.

17 Hagi 6si'a knamofo amefi kna zupa, Pitama, Jemisima, Joni Jemisi nefuma huno Jisasi'a zamagri'ake zamareno za'za agonarega mareri'ne. 2 Zamuga umani'nege'za negageno, avugosafintira zage avunasisimo'ma hiaza nehigeno, kukena'amo efeke huno tavimo'ma hiaza huno remsa hu'ne. 3 Anante Mosesi ene Elaijake zamuga efore hu'ne naneke Jisasi' ene hu'naze. 4 Hagi Pita'a amanage huno Jisasina asmi'ne, Ramoke, amafima mani'nonana knare hu'ne, Kagrama knarere hananana, nagra tagufa ton a nona kigahue. Magora Kagriki, magora Mosesinki, magora Elajanki hu'na kigahue, 5 huno kema nehigeno, masa'ane hampomo tamino refite'nezmantegeno, mago ageru'mo hampompinti anage hu'ne, Ama'i Nagri Ne'mofavre, Agriku navesi nentena, tusiza hu'na musena hunentoe, ke'a antahi amiho! 6 Amage' nentaza disaipol naga'mo'za nentahi'za tusi zmagogo fege'za mopafi ruhapati'za zmugosaregati mase'naze. 7 Hianagi Jisasi eno zmako nehuno, Koro osuta otiho, huno zamasmi'ne. 8 Kesga hu'za kazana mago'a vahera onke'nazanki, Jisasi'a Agrake mani'nege'za ke'naze. 9 Ana hute'za agona atre'za eneramizageno, Jisasi'a

hu kase huzmanteno, Amama avana'gnazama kazazana
mago vahera osmi'enkeno, Vahe'mofo mofavremo fripintira
otino. **10** Amage nentaza disaipol naga'mo'za anage hu'za
antahige'haze. Nahige'za kasegere ugagota hu'naza vahe'mo'za,
koteno Elaija'a ete'ne hu'za nehaze? **11** Jisasi'a kenona huno,
Elaija'ma tamage huno esuno'a maka'zana emeri zo'e hugahie.
12 Hu'nazanagi Nagra neramasmue, Elaija'a ko e'ne. Ana
hu'neanagi agrira ke'za antahi'za osu'naze. Hianagi Agri'ma
hunte'nazana, zamagri'ma zmesiaza hu'naze. Anahukna hu'za,
Vahe'mofo mofavre'mofona azeri haviza hugahaze. **13** Anante
amage nentaza disaipol naga'mo'za antahini nehu'za, Mono ti
frezmante Joninku Agra nehie hu'naze. **14** Hakare vea kevufi
azageno, mago ne'mo'a eno, Jisasi agafi rena emereno, **15** anage
hu'ne, Ramoke, kasunku mofavre'nimofona hunto, na'ankure
mananiza negegeno ran kna enerino, mago'a kna traka huno
teve tanenkino, timpi traka huno masetere nehie. **16** Nagra
avare'na kamage'ma nentaza disaipol nagate oanagi, zamagra
azeri onkanamare'naze. **17** Jisasi'a kenona huno, Tamagra
tamentintia nosuta fatgo tamagutamagesa ontahi vahe mani'naze!
Nama'a kna Nagra tamagranena manigahue? Nama'a zupa
knaza tmia erigahue? Nagrite avretma amare eho. **18** Anante
Jisasi'a havi avamu kesigeno atiramino vigeno, ana knazupage
mofavremofo krimo'a so'e hu'ne. **19** Anante amage' nentaza
disaipol naga'mo'za zamagraku Jisasinte e'za anage hu'naze.
Na'a higeta havi avamura huntonkeno atinoramie. **20** Jisasi'a
anage huno zamasmi'ne, Na'ankure tamagra osi tamentinti
hu'naze. Nagra tamage hu'na neramasmue, masteti zafamofo
osi avima'agna tamentintimo'ma hu'nena, anage hutma ama
agonagura hugahaze. Amarera atrenka anture vuo hanageno'a,

amne vugahie. Mago'zamo'a amuho huormantegahie. 21 [Hagi amanahukna havi avamumo'a, vahe agu'afinti atioramigahie. Hagi kave atretma nunamuma hanutma amne huntegahaze.] 22 Hagi Galili utruma hutazageno, Jisasi'a anage huno zamasmi'ne, Vahe'mofre Mofavre komoru hu'za avare'za vahe zamazampi antegahaze. 23 Zamagra ahe frisageno friteno, tagufa knare Agra otigahie, huno hige'za amagema nentaza disaipol naga'mo'za nentahi'za zamarimpa kna hu'naze. 24 Kapeniumu etageno ra mono nompi zago e'neri'za vahe'mo'za, Pitante e'za anage hu'naze, Tamagri'ma rempi huneramia ne'mo'a, ra mono nompi tare takesi zagoa nentefi nonte? 25 Pita'a izo nehuno nompi umrerigeno, Jisasi'a ese antahigeno, Saimoniga na'ane kagesa nentahine? Ama mopafi kini vahe'mo'za izampinti takesi zagoa e'nerize? Zamagra vahepintipi ru vahepintire? 26 Higeno Pita'a ru vahepinti e'nerize hutegen, Jisasi'a anage hu'ne, Hagino naga'amo'za miza osegahaze. 27 Hianagi tagra zamarimpa kna eri ozamisunanki, tirute vunka huku nofi ome atrenka ese'ma avazu banana nozara agi eri aka hunka mago zago me'nena kegahane. Ana zago erinka Nagrite'ene kagra re'enena ome miza hugahane.

18 Hagi ana knafi amage nentaza disaipol naga'mo'za Jisasinte e'za amanage hu'naze. Aza mona kumapina ugagota vahera manigahie? 2 Hazageno Jisasi'a mago osi mofavre ke higeno egeno, amunozamifi azeri otiteno, 3 amanage hu'ne. Nagra tamage hu'na neramasmue, Tamagra ruzahé huta osi mofavre'gna osanuta, mona kumapina ovutfa hugahaze. 4 Aza'o agra avufa antermimo ama osi mofavre'gna hanimo, mona kumapi rana manigahie. 5 Hagi aza'o ama anahukna huno osi mofavrema Nagri nagifima avresimo'a, Nagri navregahie.

6 Hu'neanagi iza'o ama ne'one mofavre nagapinti'ma Nagrite
amentinti nehimofoma kumipi avarente'simofona, ne'zama
refuzafuma nepaza ra have eritma anankempi tafiteta, asgahutma
hageri amu'nompi atresageno tima nakriniana knare hugahie.
7 Iza'o rumofoma kumipima avrenentea vahekura nasuragie,
na'ankure hakare zupa vahe'ma zamazeri kumipi netreazana
me'ne. Hianangi iza'o rumofoma kumipi avrentesimo'a tusi'a
hazankefi manigahie. 8 Hagi kazamo'o, kagiamo'ma kavareno
kumi kante'ma vanigenka, akafrinka matevu atro. Kagra'ma
magoke kazane kaganema me'nesigenka manivava kasimuma
erisanana knare hugahie. Hagi tare kazane kagane me'nenige'za
tevava tevefi mate'vu katregahaze. (aiōnios g166) 9 Kavurgamo'ma
kumipi kavrentesigenka, tagatinka matevu netrenka, manivava
kasimuma magoke kavurgane erisanana knare hugantegahie.
Hagi tarega kvurgama menesigeno'a, tevava tevefi matevu
katregahie. (Geenna g1067) 10 Tamagra kva hiho, amana ne'onse
mofavre nagara zimage fenka otreho. Na'ankure Nagrama
nermasmuana monafina zamagri ankeromo'za, mika zupa
monafinka mani'nea Nenfa avugosa negaze. 11 [Vahe'mofo
mofavre'ma e'neana fanane hu'naza vahe hakreno zmarenaku
e'ne.] 12 Na'ane tamagesa nentahize? Magomo'ma 100'a
sipisipi ante'nesnifinti, mago'ma fanane hanigeno'a, 99'a
agonarega zamatrenero mago'ma fananema hu'nemofonkura
ome hakreno ovregahio? A'o. 13 Agra hakreno erifore hanuno'a,
tamage neramasmue, 99ni'a fananema osu'naza sipisipi
afuzaga agatereno mago'ma fananema hu'nemofona tusi'a
muse huntegahie. 14 Anahu kna huno, monafinka Nermafa
avesi'zamo'a, ama ne'onse nagapintira magore huno frino fanane
osanie nehie. 15 Mono negafu'ma kumi'ma hugantesigenka,

vutna tanagragu umani'neta ana havizama hu'nesia zana ome
azeri fatgo hundo. Agrama keka'ama antahisiana, negfuna avare
kamatane. **16** Hagi keka'ama ontahisnigenka, magoro tareo
znavrenka vunetma, nentahisageno mika hazenkea erifatgo huno
eriamma hugahie. **17** Hanigeno agrama antahi oramisiana, mono
kevumofo asamio. Hanankeno mono kevumofo ke ontahisiana,
atregeno agra mono ontahi vahero, havige huno takesi zago eri
vahekna vahe manino. **18** Nagra tamage hu'na neramasmue,
inankna zama mopare'ma anakisnaza zana, anazanke huno
monarera anakigahie. Hagi inankna zama mopare'ma vakane
atresnaza zana, anahu'kna huno monarera vakane atregahie. **19**
Ete mago'ene Nagra tamage hu'na neramasmue, taremotna
ama moparera mani'netna, mago tnarimpa hutetna, mago'a
zanku antahigesna'ana, monafinka mani'nea Nenfa'a amne
hugahie. **20** Na'ankure ama mopare'ma taremo'o tagufamo'za,
Nagri nagire emeritru hanafina, Nagra zamagri amu'nozmifi
manigahue. **21** Anante Pita'a, Jisasinte eno anage hu'ne,
Ramoke, kumi hunantesia nenafuna, nama'a zupa kumi'a
atrentegahue, 7ni'a zupa atrentegahufi? **22** Higeno Jisasi'a
Pitankura anage hu'ne, 7ni'a zupo'ompge, Nagra tamage hu'na
negasamue, 7ni'a 70'a zupa atrentegahane. **23** Ama ana
agafare mona kumamo'a amanahu hu'ne, mago kinimo'ma
kazokzo eri'za vahe'amoza zagoa nofi hu'naza ete erinaku
hige'za eri'za refako hu'za eme amizankna hu'ne. **24** Anama
huno zaganeno hakeno negege'za, 10 tauseni zago'a nofi
hu'nea ne' agrite avare'za e'naze. **25** Na'ankure ana ne'mo'a
nofima hu'neana ovaknegeno, ramo hamponage ana ne'ku
huno, a'mofavre'ane mika tuzampaza ante'neazana zagore
ome atrenka, nofima hu'neama'a etenka vaknento higeno, **26**

anante kazokzo eriza ne'mo'a mopafi agri avuga mseno keke
hunteno, kagra agazone hunaminege'na, mika nofi'ma hunoana
ete'na nagra vaknaneno hu'ne. 27 Ana kazokzo eri'za ne'mofo
Ramo'a kazokazo nera asuragi anteno avrenetrenonofima
hu'nea zana atrentene. 28 Ana higeno atiramino fegi vuteno'a,
magoka kazokazo eri'za eneri'a ne'mo agripinti 100'a silva
zago nofi hu'nea ne'omege'ne. Anante ananke nofite avazu
nehuno anage hu'ne, nagripinti nofi'ma hu'nana zana etenka
vakano hu'ne. 29 Anante ana kazokzo eri'za ne'mo mopafi
unemaseno keke hunteno, agazone hu'nantenege'na nagra
eme vaknaneno. 30 Hianagi ana kea ontahino ruvahe hiazamo
kina nompi avreno ome retufe vazigeno mani'neno, nofi'ma
hu'nea zana vaknegahie. 31 Magoka kazokzo eri'zama eneriza
naga'mo'za fore'ma hiazana kete'za, tusiza hu'za zamasunku
hute'za vazamo'za mika zama fore hiazana ra zamimofo ome
asmi'naze. 32 Anante rankva ne'amo'a ugota kazokzo eri'za ne'
kehuno, Kagra havi kavukva'ene kazokzo eri'za nere! Na'ankure
kagrama keke ke hunantake'na maka nofi'ma hu'nana zana
atregante'noe. 33 Nagrama hugante'noaza hunka kazokzo
eri'za negafuna kasunkura huontegahampi? 34 Nehuno tusi asi
vazigeno, agri rankva'amo kina nonte kva nehaza vahete, azeri
haviza nehanageno mani'neno nofi'ma hu'neaza vakanenogu
avreno ome zami'ne. 35 Ana hu'negu, mago mago'mokama
negafuma kagu'reti hunka kumi'ama apase ontesanana, monare
Nenfa'a tamagrira anazanke hurmantegahie.

19 Jisasi'a ana naneke zamasmi vagareteno, Galili kumara
atreno, Judia kaziga, Joda tina agatereno vu'ne. 2 Tusi'a
vahre krerfamo'za avaririza nevazageno, anantega zamazeri
so'e huzmante'ne. 3 Anante mago'a Farisi vahre'mo'za rehe'za

kenaku Agrite e'za, mago'azama hanigeno'a amne nenanrona
ahenatigahie huno kasegemo'a hu'nefi? hu'za antahige'naze.
4 Jisasi'a ke nona huno, Tamagra hampritma onke'nazo, ese
agafare'ma Anumzamo'ma vene, a'enema tro huneznanteno, **5**
amanage hu'ne, ama kegafare vemo'a nerera afana atreno,
nenaro'ene hagerfigeno, ana tarega'moke eri mago hune,
magoke zanavufa manigaha'e. (Jen-Agf 2:24) **6** Hanige'ne,
mago'ane tare vahe omanigaha'e. Hagi magoke znavufa
manigaha'e. E'na hu'negu na'ano Anumzamo'ma eri hagerfima
ante'nesia zana, mago ne'mo'a ovakanegahie. **7** Hige'za Farisi
vahe'mo'za Agriku anage hu'naze. Na'a higeno Moses'e'a
tagrikura huno, a'ma hunte avona kretma nemita hunteho hu'ne?
8 Jisasi'a anage zamagriku hu'ne, Mose'a tamasmino a'netmia
atregahaze hu'neana, na'ankure tamagri'ma tamarimpamo usasi
ki'negu hu'ne. Hianagi Anumzamo pusanteti'ma agafa hu'neana
amanahu kana omne'ne. **9** Hagi menina tmagrikura amanage
nehue, Aza'o nenaro'ma savri monko avu'ava osu'nesigeno
netreno ru a' erisimo'a, monko avu'ava hugahie. **10** Agri
amage nentaza disaipol naga'mo'za anage hu'naze, Amana
ke'mo'ma arave hu'nea vene a'enenu'ma hu'nesiana, arave
osuta amane manisunkeno'a knare hugahie. **11** Jisasi'a
anage zamagriku hu'ne. Amama huntoa kea, hakaremo'a
e'origahie. Hagi azano Anumzamo'ma ami'nenimo anara
hugahie. **12** Na'ankure kase zmantetegati zmufamo knare
huozmante'nesamo'za arave osugahaze. Hagi mago'amo'za
zmagonkna'za hari'naza vahe'mo'za arave avu'ava zana
osugahaze, mago'amo'za arave osu'za mona kumaku nentahize.
Inamo'ma ama rempima humi kema humiazama erisimofona
atregeno erino. **13** Anante ne'onse mofavrezimi zamavare'za

aza anteno nunamu huzmantesiegu Jisasinte e'naze. Hianagi
Jisasima amage nentaza disaipol naga'mo'za ana vahera
ke zamasu'za, i'o huzmante'naze. **14** Hianagi Jisasi'a huno,
Zamahe onatita zamatrene'za ne'onse mofavre zaga Nagrite
eho, mona kumara e'ina hu vahe'mokizmi kumare, **15** nehuno
azana zamanunte anteno asomuke huzmanteteno zamatreno
vu'ne. **16** Anante mago ne'mo Agrite eno amanage hu'ne,
Rempi hurami ne'moka, inanknahu knare navunava hutena
mani vava nasimura erigahue? (*aiōnios g166*) **17** Higeno Jisasi'a
anage huno ana ne'ku hu'ne, Nahigenka na'amo knare hune
hunka Nagrira eme nantahinegane? Agra magoketfamo knarera
hu'ne. Hianagi kasimu erinaku'ma hanunka, kasege amage'anto,
18 higeno ina su'ane? Huno antahi'gegeno, Jisasi'a ke'nona
huno, Vahera ahe ofrio, monko zana osuo, kumzafa oso,
hazenkema osu'nesia vahekura hazenke hu'ne hunka havigea
huonto, **19** antaka'ane nafaka'mofonena ra zanagi zanamio.
Hagi kagra kavufga avesi antanankna hunka tava'onkare
nemanisimofona avesinto. **20** Ana nehazave ne'mo, anage hu'ne,
nagra nagu'areti ana miko kasegea amage'nentoe, hagi inaza
nagra nosue? **21** Higeno Jisasi'a agrikura anage hu'ne, Kagrama
fatgo hugahuema hanunka, vunka zagore afufenonka'a ome
atrenka, ana zagoa erinka zamunte omne vahe ome nezminka,
hagi kagra monafinka feno eri santi haregahane. Hutenga
Nagrira eme namage anto. **22** Hianagi ana nehaza'mo'ma
anankema nentahino'a, tusi'a asuzampi vu'ne. Na'ankure agra
tusi'a afufeno ante'negu anara hu'ne. **23** Jisasi'a amage'ma
nentaza disaipol nagara anage huno zamasami'ne, Tamage
hu'na neramasmue, afufeno ne'mo mona kumate vunaku
haniana, tusi amuho huntegahie. **24** Mago'ene Nagra nehue,

kemolimofona amuho huontenko nekazamofo kampintira frenkro huramigahie. Hagi feno ne'mo'ma Anumzamofo kumapi vuku'ma haniana, tusi'a amuho huntegahie. **25** Amage nentaza disaipol naga'mo'za, ana kema nentahiza, tusi antri hu'za zmagogogu nehu'za anage hu'naze. Hagi aza knare huno agura vazisigeno manigahie hu'naze. **26** Hazageno Jisasi'a ana mokizmi nezmageno amanage hu'ne, Vahe'mo'a amuho huntenkeno osugahie. Hianagi Anumzamo'a mika'zana amuhoa huontenko amne hugahie. **27** Higeno Pita'a amanage agrikura hu'ne, hagi kamago. Hakare zanti atreta Kagri kamage nentone! Tagra naza erigahune? Higeno, **28** Jisasi'a amanage huno zamasmi'ne, Tamage hu'na neramasmue. Miko zama azeri kasefa'ma hania knarera, Vahe'mofo mofavremo'ma, Agri'a masanentake tra'are umanisigenka, tamagrama namage'ma nentamotma tamagranena 12fu'a kini trate umani'neta, 12fu'a Israeli naganofira refako huzmantegahaze. **29** Hagi azago, nonka'o, kafuhe'mofono, kasarahehe mofono, negafano, negrerano, mofavre'kao, hoza'ka'ama Nagri'kuma hunka atresamoka, 100'a rugaterenka ama knafina enerinka, henka esia knafina manivava kasimu erigahane. (aiōnios g166) **30** Hu'neanagi hakare ugagota hu'namo'za ehenka hanageno, ehenka hu'namo'za vugagota hugahaze.

20 Jisasi'a mago'ene huno, Anumzamofo kuma'mo'a, mopamofo nefo'ma nante'rampi viazamo zagore'ma eri'zama erisaza vahe ome zamavareno ege'za agri waini hozafi eri'za emeri'zankna hu'ne. **2** Hige'za eri'za vahe'ene mizama mago zagefima erisaza zante, mago zamarimpa hutageno, huzmanteg'e'za waini hoza'afi vu'naze. **3** Nanterana 9 kilokinaza nehigeno, mago'ene vuno omegeana ruga'a naga'mo'za eriza

e'ori maketi kumapi oti'za mani'nageno omezmage'ne. 4
Zamagriku Agra anage hu'ne, tamagrane waini hozani'afi
eri'za omenerinkena, mizana fatgo hu'na tamigahue. 5 Hige'za
vu'naze. Hagi kva ne'mo'a eteno ana feru'ene kinaga zogemo'ma
rukrahe higeno (3 kiloki) vuno magokna ke ome hu'ne. 6 Ana
kinaga 5 kiloki naza higeno, viazamo mago'amo'za eri'za e'ori
amne oti'za mani'nageno ome zamagefore nehuno, nahigetma
ama zageferura eri'zana e'oritma otita amnea mani'naze?
Huno zamantahige'ne. 7 Hige'za zamagra anage Agrikura
hu'naze, Mago'mo'e huno zago erizantera oravregeta anahu huta
mani'none. Hazageno, vutma waini hozani'afi tamagranena eri'za
ome eriho hu'ne. 8 Kinagasegeno hozamofo nafa'amo eri'za
kva ne' asamino, eri'za vahe ome ke hunka zagozimi zamio,
henkama e'namokizmireti agafa hunka kotama e'namokizmire
vuo. 9 Hagi 5 kiloki kinaga eri'za eme eri'naza vahe'mo'za,
mago kante e'za nanterama emeri'naza vahe kna hu'za mago
zogemofo agu'afi miza eri'naze. 10 Pusantema eri'zampima
zmavrege'za eri'namo'za e'za, rugatereta rama'a erigahune
hu'za zmagesa antahinazanagi, mago avamente miza zamia
eri'naze. 11 Ana miza eneriza, agafa hu'za ana hozamofo
nefana ke hakare hunte'za, 12 anage hu'naze, henkama e'naza
naga'mo'za, osia knafi (1 aua) eri'zana emeri'nagenka, tusi'a
knanentake eri'za zage tasageta eri'nonkenka, magoke avamente
mizana neramine. 13 Hianagi hoza nafa'amo kenona huno
mago'mofo asmi'ne, knampa nimoke, havizana hunogantoe.
Mago zage'mofo agu'afi mizankura mago trimpa hunopi osu'no'e?
14 Mizanka'a e'nerinka vuo. Nagra henkama eri'za emeri'naza
vahera, magozahu avamente tamagrime tamua kante zaminaku
nehue. 15 Nagra zantema nazano hugahue hanuazamo'a

knarera osu'nefi? Hipi havi antahintahima e'nerinana Nagrama
knare'zama huazankupi? **16** Hu'negu, henkama hunenimo'a
ugagota hanigeno, ugagota hunenimo'a uhenkategahie. **17**
Jisasi'ma Jerusalemi mrerino nevuno'a amage nentaza disaipol
nagara, zamavare otage atreno anage huno kantega zamagri'ake
zamasamime vu'ne, **18** Keho, Jerusalemi nevunankiza, Vahe'mofo
Mofavrea aware'za ra mono kva vahete ene, kasegere ugagota
hu'naza vahe zmisage'za, frigahie hu'za keaga huntegahaze. **19**
Ana nehu'za aware'za mono ontahi megi'a vahete vnage'za,
kiza zokago ke hunente'za sefu kanonteti kanonkeve nemiza
ahe'za hantigahaze. Hanageno tagufa knarera agra otigahie.
20 Anante Zebeti ne' mofavre rarene neznarera ene Jisasinte
e'za, mopafi neznerera'a renaren mago zanku antahige'ne. **21**
Jisasi'a anage huno anaaku asami'ne, Na'anku kavenesie?
Higeno ana a'mo Jisasina anage huno asami'ne, Hugnare
hugeke tare mofavre treniafinti mago'mo'a kazamofona tamaga
kaziga manisigeno, magomo'a hoga kaziga mani'nogu Kagri
kumapina nehue. **22** Higeno Jisasi'a kenona'arera anage
hu'ne, Tamagra nantahima negazana ontahineta nehaze! Knare
Nagrama nenaku'ma nehua tafempintira amne negahazafi?
huno zmantahigege'za, zamagra anage hu'naze, Tagra amne
negahune, hu'naze. **23** Agra zanagri znasmi'ne, Nagri taferopintira
amne negaha'anagi tamagani'ane, hoga kaziga mani'zana,
Nagrizana omane'neakina ontanasamigosue. Hagi zamagri'ma
Nenfama erigahaze huno'ma huhampri zmanteno retroma
huzmante'nemo'za erigahaze. **24** Anante 10ni'a amagema
nentaza disaipol naga'mo'za nentahiza, tusiza hu'za tare
kognagura zamarimpa hezmante'naze. **25** Hianagi Jisasi'a
zamagi hutru huno zamasmi'ne, Koma antahinazane, megia

mono ontahi vahete kvamo'za, kva huzmante'naze. Higeno
iza'o agatereno eri'za kantema mani'nemo'a hankave'a zmagrite
nenteno kva kri'nezmane. **26** Tamagripina amanahu'zana
omneno. Hagi iza'o tamagripinti ugagota hugahue hanimo'a,
atregeno eriza vahe manino. **27** Hagi iza'o kagota hugahue
hanimofona, atregeno kazokzo eriza ne'ka'a manino. **28** Anahu
kna huno Vahe'mofo Mofavre'ma e'neana, Agri eriza erintehogura
ome'ne, Agra'a erizana enerino, asuragino rama'a vahe zamaza
huno miza senaku asimu'a atregahie. **29** Zamagrama atre'za
Jerikoma nevzage'za, tusi vahe kevu krerfamo'za avariri'za
vu'naze. **30** Tare znavu asuhu netre'moke kamofo ankenare
mopafi mani'neke, Jisasi evie kema nentahikea, zanagra kezatike,
Ramoke, Deviti nemofoga kasunku huranto. **31** Hakeno vahe
kevumo'za kne hu'za taganetna mani'o hu'nazanagi, tusi kezatike
mago'ane vivi huke, Ramoke, Deviti nemofoga kasunku huranto
huke hu'na'e. **32** Jisasi'a anante eme otino, znagi hiazamo anage
hu'ne, Na'a Nagra hurnantenuegu neha'e? hige'ne, **33** anage
zanagra hu'na'e, Ramoka tavurga eri hari huranto hakeno, **34**
Jisasi'a asuntgi znanteno zanavurgare znavako higeno, ame
huno zanavurga ruhari higeke nege'ne Jisasi avaririke vu'na'e.

21 Jerusalemi kumara emeri atupa hu'za Betfage kumate
ehanati'za, Olivi agonare emanine'za, Jisasi'a amage nentaza
disaipol nagapinti tare'mokizni huznanteno, **2** anage huno
zanasmi'ne, Vutna antu kumate ome kesakeno, a' donki afura,
anenta'ane kina rentenenigeno mani'neankitna ome kegaha'e.
Kina katufetna zanavreta Nagrite e'o. **3** Avareta ne-esnakeno
mago'moma kema hina, eri'za me'negeno Ramo'a hurantegeta
enevro'e hutna hi'o. Ahagema hanakeno'a, ko avretna vi'o
hugahie. **4** Amazama fore hu'neana korapa avontafepi kasnampa

vahe'mo hunte'nea, kemo eama hu'ne. **5** Saioni mofara
anage hunka asmio, ko, kagri kinimo kagritega ne-eanki, avufa
anteramino, donki agumpi manino, ve agaho donkifi, ne-e.
(Zek 9:9.) **6** Amage nenta'za disaipol nagapinti vu'namoke
Jisasima kema huzanante'neaza hu'na'e. **7** Ana a' donkine,
anenta'ane znavre'ne eke anakre kuzni'a zafike ana donki
agumpi vasi'nakeno, Jisasi'a ana agofetu mrerino mani'ne. **8**
Manino nevige'za rama'a veamo'za nakre ku'zami zafiza kante
vasi'za nevzage'za, mago'amo'za zafa azankuna akafri'za kampi
vasinageno anante vu'ne. **9** Rama'a vahe kote'za Agri avuga
vu'naza vahe'zagane, henkama aza vahe'mo'za tusi muse
nehu'za kezati'za, muse huntesune Deviti ne'mofavrea, agrira
asomu hunto ramofo agifi ne-emofona, muse huta agi'a erintesga
hunagamu atresune. **10** Ana nehazageno Jisasi'ma, Jerusalemi
kuma agu'afi uhanatige'za mika veamo'za antri nehu'za muse
hu'za, ama nera iz'a'e? **11** Nehu'za ana vahe kevumo'za hu'za,
ama'i kasnampa ne' Jisasi'e, Nasareti kumateti, Galili kazigati
e'nea nere hu'naze. **12** Jisasi'a mono nomofo agu'afi ufreно
maka zagore netre'za miza neseza nehaza vahe'zaga zamahe
anatige'za fegi'a atirami'naze. Hagi zago rezahe nehaza vahe
sipa eri herafi netreno, mizante maho nama zaga ante'naza
vahe tra'zmi eri rukrahe hutre'ne. **13** Jisasi'a anage huno
zamasmi'ne, Anumzamofo avontafepima kre'nazana, nagri nona
Anumzamofonte nunamu hunte no megahie hu'ne. Hianagi
tamagra kumzafa vahe frakiza manisnaza kuma retro nehaze.
(Ais 56:7.) **14** Ana hige'za zmuraga asu hu'nea vahe'ene, zmaga
haviza hu'nea vahe'mo'za Agrite ra mono nompi ageno zamazeri
so'e huzmante'ne. **15** Hianagi pristi vahe'ene kasegere ugagota
hu'naza vahe'mo'za Jisasi'ma kaguvaza hiaza negazageno,

mofavre ramimo'za ranke hu'za, Deviti Nemofo muse huntone
hazazamo zamarimpa hege'za, Jisasinku anage hu'naze, **16**
Amama mofavre ramimo'zama nehaza kea nentahino? Hazageno
Jisasi'a anage hu'ne, Ozo, tamagra mono avontafera hampritma
onke'nazo, osi mofavrene, aminte mofavremokizmi zamagipi,
kagri rankagi kami'zana retro hunte'nane. (Sam-Zga 8:2.) **17**
Jisasi'a anage huteno Jerusalemi rankumara atreno Betani
kumate vuno, anante umase'ne. **18** Jisasi'a nanterana otino
ete Jerusalemi rankumatega vunaku nevuno aga'zanku hu'ne.
19 Keana kama vutega magoke fiki zafa oti'negeno, Agra ana
zafa tava'onte eno eme keana magore huno nena'a omneno
ani'namoke hu'negeno, Agra ana zafagu huno, (*aiōn g165*)
20 Mago'enena kagripina raga fore osugahie. Ana zafamo'a
osapategeno amage nentaza disaipol naga'mo'za nege'za
zmanogu nehu'za antahige'naze. Nankna huno ama fiki zafamo'a
ame huno osaparare? **21** Hu'za hazageno, Jisasi'a anage
huno kenona zimirera hu'ne, Tamage hu'na neramasgue,
tamentinti nehutma tare tagufa tamagesa ontahisnutma, tamagra
fiki zafa huntua kna'zana ageteretma amne hazasine. Hianagi
ama'na agonagu hutma, otinka hage rimpi tka'uro hanageno'a
amne ana hugahie. **22** Hanki nazankuro kamentinti hunka,
nunamu hunka antahigesanana, amne erigahane. **23** Jisasi'a
ra mono nomofo kumate marerino rempi hu'nezmige'za, pristi
vahemo'zane, Jiu kva vahe'mo'za Jisasinte e'za amanage hu'za
antahige'naze, Ina hihamure ama eri'zana Kagra e'nerine, Aza
ana hihamua Kagrira kami'ne? **24** Jisasi'a zamagri kenona
huno, Nagra anazanke hu'na mago zanku tmantahigegahue,
anazama Nagri'ma nasmisage'na, Nagra ina hihamufi ana
eri'zana e'nerufi anazanke hu'na tmasmigahue. **25** Joni'ma mono

tima frezmanter'neana, iza'e agafa'a, monafintipi vahe'mo'za huntageno eri'ne? Hige'za ana vahe'mo'za nanekea nentahi'za agafa'agu naneke ohumi ahumi hu'za, tagrama huta, monafintire hanunkeno'a, Agra tagriku anage hugahie, hanki nahigetma agritera tamentintina nosaze? Huno hugahie. **26** Hianagi tagrama hutma, vahe'mo'za huntageno eri'ne hanunke'za, vahe'mo'za tahegahaze hu'za koro hu'naze. Na'ankure maka vahe'mo'za Joninkura kasnampa nere nehaze. **27** Nehu'za Jisasina ke nona'a hunte'za, Tagra ontahi'none hazageno, Agra anazanke huno zamasmi'ne, Nagranena igati eri'noa hihamufi eri'zana eneruo ontamasmigahue. **28** Hianagi tamagra na'ane tamagesa nentahize? Mago ne'mo'a tare ne'mofavre zanante'ne. Pusa ne'te viazamo anage hu'ne, mofavre'nimoka menina vunka waini hozafi eri'za omerio hu'ne. **29** Ana mofavremo'a ke nona hunteno, Nagra ovugahue hutenoagi, henka agu'a zahe huno vu'ne. **30** Neznafa'a henka'mofonte viazamo anahu ke huno ome antahige'ne. Ana mofavremo ke nona huno, nagra ana hugahue hutenoagi, ovu'ne. **31** Taremokiznifintira inamo nef avesizana avaririne? Zamagra hu'za Pusante'mo'e, hazageno Jisasi anage huno, Nagra tamage hu'na neramasmue, takesi zagoma vahepinti zonegiza vahe'ene, monkote'ma nehaza vahe'mo'za tamagrira tamagatere'za Anumzamofo kumapina vugahaze. **32** Na'ankure Jonima tmagritega e'neana fatgo avu'ava huramerinaku e'negetma, tamagra agritera tamentinti osu'naze. Hianagi vahepinti takesi zagoma zogi vahe'mo'zane, monko vahe'mo'za agritera zamentinti hu'naze. Hagi tamagra ana zana negetmagi, tamagu'a rukrahe hutma tamentinti huonte'naze. **33** Mago fronka kea antahiho. Mago mopa agafa ne'mo'a waini hoza kri'ne. Ana hoza kegina huno wainima tatisia keria

asenteteno, hagi mani'neno kvahu nona kintene. Zoka mani'neno ikante zago mizaseterehu (rent) vahete hoza'a netreno afete ka vu'ne. **34** Hozama anarere knama egoftama higeno'a, kazokzo eri'za vahe'a huzmantege'za, agr'i'ma refako hu'za amisnazama'a erisnagu kegava hu'ne'za ikante mizama (rent) nezamiza nagate e'naze. **35** Ana hianagi, anama kegavama hu'naza naga'mo'za zmarotago hu'za, magora knonkeve nemi'za, magora ahe nefri'za, magora have kanonu ahe'naze. **36** Mago'ane kazokzo eri'za vahera pusante'ma huzmante'neama'a agatereno hakare huzmantege'za vazage'za, anazanke huzmante'naze. **37** Henkarfana, ne' mofavreni'a agazone humigahaze nehuno mofavre'a huntegeno vu'ne. **38** Hianagi ana hoza ikante kva hu'ne'za miza nesaza vahe'mo'za, kageno nemofo'ma ege'za, ama fenoma erisia mofavre ama eanki erinketa ahenefrita ana fenona erigahune. **39** Anage hute'za, ana waini hozafinti avazuhu fegu atre'za ahe fri'naze. **40** Hagi anantema waini hozamofo nafa'amo'ma esuno'a, hozama kegavama hu'naza vahera, na'a huzmantegahie? **41** Agrira anage hu'za asmi'naze, Agra havi avu'ava hanaza vahera zamazeri havizahutfa hugahie. Huteno ana waini hoza zamazampinti hanare'mreno, hoza kegava hu'ne'za hoza anerere knare, agrama erigahue hu'nesiama'ama amisaza vahe zamigahie hu'naze. **42** Jisasi'a anage huno zamasmi'ne, Anumzamofo avontafepina tamagra hampritma nonkazo? Nogi vahe'mo'za knare osu'ne hu'za eritre'naza havemo'a, nomofo renagentete asente'nageno azeri hanaveti have menina fore nehie. Ama'i Anumzamo tro hu'neankino, tverura so'e zantfa fore nehie. (Psa-Zga 118:22-23) **43** Ama ana agafare, Nagra kea tamagrira tamasmina, Anumzamofo kumara tamagripintira hanareno, iza'zo Anumzamofo kuma'mofo nena

rgama renentesnamokizmi zamigahie. 44 Hagi mago'mo'ma amana havere'ma asaga hurmisimo'a, korino rupanini hugahie. Hianagi ana havemo'ma inamofo agofeturo asagahu ramisimo'a fuzafuleno kugupa segahie. 45 Hige'za ugagota pristi vahe'mo'zane, Farisi vahe'mo'za ana fronka kema hia nentahi'za, zamagra antahi'zazmifina, tagriku nehie hu'za hu'naze. 46 Jisasina azerisaza kanku hakre'nazanagi, zamagra tusi'a vahe kevugu kore hu'naze. Na'ankure ana vahe kevumo'za, Agrikura kasnampa nere hu'za nehaza zankure.

22 Hagi Jisasi'a fronka kea mago'ene zamagrikura anage huno zamasami'ne. 2 Mona kumamo'a mago kini ne'mo mofavre'amo arave huku higeno kave retro hu'neankna hu'ne. 3 Huteno agra kazokzo eri'za vahe'a, zamajima hu'noa vahe'zaga ome kehinke'za, aravemahu nezantera eho huno huzmanteg'e'za vazanagi, zamagra omegahune hu'naze. 4 Mago'ene ruga'a kazokzo eri'za vahera hunezmanteno, anage hu'ne, zamajima hu'noa nagara zamasamiho, Nagra aravehu ne'zana hago retro huntogeno me'ne. Ve bulimakaone agusage afu'zagani'a, ko ahe'za traga huvazi antazageno, mika'zana retro hunte'naze. Ana hu'negu aravemahu nezante eho. 5 Hianagi anankea ontahiza atre'za vu'za e'za hu'naze. Mago'mo'a hoza arega vigeno, mago'mo'a zago eri'za ma'are vu'ne. 6 Ruga'amo'za eri'za vahe'zamia zamazeri haviza nehu'za, zamahe fri'naze. 7 E'ina hazazamo, kini ne'mofona tusiza huno rimpa haviza higeno, sondia vahe'a huzmanteg'e'za vu'za ana vahe'ma zamahe fri'naza vahera ome zamahe nefri'za, rankumazmia teve taginte'naze. 8 Anante Agra kazokzo eri'za vahe'agura anage huno zamasmi'ne, aravema hu ne'zana hago trotra hunte'ne. Hu'neanagi zamajima hu'nona vahe'mo'za efregara osu'naze. 9

E'ina hazagu, ranra kampi vutma inankna vahe'ma zmagesuta, zmagi hinke'za aravema hu nezantera eho. **10** Hige'za ana kazokzo eri'za vahe'amo'za rankuma kampi vu'za e'za hu'za zmagaza vahe'a, havi avu'ava nehaza vahero, knare vahero kehutru hazage'za, ana aravehu nompina, zamagi hu'naza vahe'krerfamo'za avite'naze. **11** Hu'neanagi, Kini ne'mo'ma efreno arave hutema zmagi hu'nea vahepima eme keana, anampina mago nera aravehu kukena osu'nea ne' eman'i'negeno ke'ne. **12** Hagi Agra ana neku anage hu'ne, nenfuga aravemahu kukenama osu'nenka kagra inankna hunka amafina efre'nane? Hianagi agrama hukeaga omne'geno mago keaga osu'ne. **13** Anante Kini ne'mo eri'za vahe'a zamasamino, azeritma nofi agare azante anakitetma, asgahutma tusi'a hanizampi matevutrenkeno, anampinka zavira neteno, ave aninkreki hino hu'ne. **14** Na'ankure ra'ma'amokizmi ke hu'neanagi, osi'a naga huhampri nezmante. **15** Anante Farisi vahe'mo'za magopi omeri truhu'za, rehesageno, Agra'a hania kefinti azerisune hu'za ke retro hu'naze. **16** Hute'za zamagri zmage nentaza naga'ene, Herodima amage nentaza disaipol naga'ane, magoka huzmantage'za Jisasinte vu'za anage hu'naze. Rempi huzami nere, tagra antahi'none, Kagra tamage ne'tfa mani'enka, tamage ke'moma hu'nea kante antenka Anumzamofo kankura rempi hunezmine. Mago'mofonkukera nosane, na'ankure mago'mofontega nontane. **17** Hagi tagrira tasmio. Kagra nankagesa nentahi'ne? Knare hu'negu, Sisama ami takisi zagoa amigahumpi omigahune? **18** Hianagi Jisasi'a havi antahi'zama eri'zana nezmageno anage hu'ne, Tamagra tavre vahere! Na'a higetma renvatga huta negaze? **19** Mago'ma takisima nehaza zagofinti eri naveriho, hige'za mago zago eri'za Agrite e'naze. **20** Jisasi'a zamagriku

anage hu'ne, Ama aza amema'ane aza naneke krente'haze?

21 Zamagra ke nona'a hu'naze, Sisa su'ane hazageno, Agra zamagriku anage hu'ne, anama huno, Sisa'zama me'nesiana, Sisa amiho. Hagi Anumzamofo zama me'nesiana, Anumzamofo amiho. **22** Anankema nentahi'za antri nehu'za, Agrira atre'za vu'naze. **23** Ana zupage Satusi mono vahe'mo'za, (vahe'mo'za friprintira o'otigahaze nehaza vahe'mo'za) Jisasinte e'za eme antahige'naze, **24** Remp i huzami ne'moka, Mosesie'a huno, Mago'ne'mo'ma mofavre kase onte'enoma frisigeno'a, nefu'a ana kentora a'erineno nefu fri'nea ne'mofo mofavre kasentegahie. **25** Hagi tagripina 7ni'a kogna mani'nafinti, agonesa mofavremo a' eriteno, mofavre onteno fri'geno, ana ara negna erinte'ne. **26** Anantemo'a anazanke hu'ne, hagi 3mo'a anazanke huno tamino 7nimofonte vu'ne. **27** Ana ara henka fri'ne. **28** Ana hu'negu Fripinti otisaza kna'zupa, ana kognafintira iza a' manigahie? Na'ankure ana miko'mo'za ana ara erinte'naze. **29** Jisasi'a kenona'a anage huno zamasmi'ne, Tamagrati tamazeri havia nehaze, na'ankure avontafero, Anumzamofo hanavea antahi'amara nosaze. **30** Na'ankure fri'nehnafinti'ma oti snazana, arave hu'zana omnesigeno, ara vasi omiami hu'zana omnesigeno, monafinka ankero vahe'kna hu'za manigahaze. **31** Hianagi fri'naza vahe'ma otisaza zanku'ma Ra Anumzamo'ma tamagriku'ma hu'nea kea hamprita ontahinazo. **32** Nagra Abrahamuma Aisaki'ma Jekopu Anumza mani'noe hu'neana? Agra fri vahe'mofo Anumzana omani'ne, hagi kasefa hu'za mani'naza vahe'mofo Anumzane. (Eks-Ati 3:6) **33** Tusi'a vea kevumo'za ana nanekema nentahi'za, rempima huzmia kegura tusi antri hu'naze. **34** Hianagi Farisi vahe'mo'zama antahi'zama, Satusi vahera keosza kema Jisasi huzmantenge'za, Farisi vahe'mo'za magopi eritru hu'naze. **35**

Zamagripinti mago'zmimo'a, kasegere ugagota hu'nemo, reheno
kenaku anage huno agenoka hu'ne. **36** Rempi huramine'moka,
inana tra kemo mareri'agetereno vugagota hu'ne? **37** Jisasi'a
kenona'a asmino, Rana, kagrika'a Anumzana, mika tumokareti
ene, mika kagu kamenteti ene, mika antahintahi ka'areti avesinto.
(Diu-Kas 6:5) **38** Ama e'i pusama huno, vugagote'nea kasege.
39 Anante'ma hu'neana, kagragu'ma kavesi'nentanaza hunka,
tva'onkarema nemanisimofona avesinto hu'ne. (Lev-Pris 19:18)
40 Mika kase'gemo'ene, kasnampa vahe'mofo kemo'a, asma tare
tra kemofonte aniri'ne. **41** Farisi vahe'ma eri'tru'ma nehazageno'a
Jisasi'a mago zamagenoka ke zmantahige'ne, **42** Tamagra
Kraisinkura nankna tamagesa nentahi'ze? Agra iza ne' mofavre?
Huno zmantahigege'za, Deviti mofavre hu'naze. **43** Agra
zamagrira anage huno zamasmi'ne, Nahigeno Avamumo'a
Devitina asmigeno Ranimoke hu'ne? **44** Ramo'a nagri Rantega
anage hu'ne, tamaga kazigani'a mani'negena, ha' vaheka'a
zamare kagri kagafi antaneno hu'ne. (Psa-Zga 110:1) **45**
Deviti'ma, Rane huno'ma hu'neana, inankna huno agri mofavrea
manigahie? **46** Ana kemofo nona'a, mika'amo'za mago'a kea
huntega osu'za, ana knareti'ma vu'neana koro hunente'za
mago'anena, Agrira agenoka osu'naze.

23 Jisasi'a anante ana vea kevugu'ene, amage nentaza disaipol
nagaku anage hu'ne. **2** Kasegere ugagota hu'haza vahe'ene,
Farisi vahe'mo'za, Mosesi kasege kemofonte nemanize. **3**
Ana hu'negu nankna ke'ma tamasm'i'sazana, tamagesa antahi
ankeretma, tamasmisazaza hiho. Hianagi zamagrama hanaza
zana osiho, na'ankure zamagrama rempima huzami'za zana
amage' ante'za nosaze. **4** Zamagra kna'nentake huno erisaga
huama'a amuho hu'nea zantmi anakiza vahe zamafunte nentaze.

Hu'neanagi zamagra zamazana ante'za zamazankonutira retufe
zimage'sa nontahize. **5** Ana mikazama nehzana vahe'mo'za
zimagehogu zamagra ana nehaze. Na'ankure zamagra osi
nunamu vogisifina mago'a mono kea kre vazite'za, zmazante'ene
kokovite'ene anaki'za nofi arente arente zaza kukenare nehaze.
6 Hakare vahe atru hu'za ne'za nenafi kva vahe trate mani'zanku
zamavenesi'za, osi mono nompi kva vahe trate manisnaza zanku
zame'nesie. **7** Hagi vahe'mo'za maketi kumapima humusema
hunezmante'za, rempi huzami vahere'ma hu'za hanaza'zanku
zmenesie. **8** Hu'neanagi tamagrikura rempi huzami vahere hu'za
osih. Na'ankure Rempi hurami'nera Magoke mani'negetma,
tamagra ana miko'a kogna mani'naze. **9** Hagi ama mopafina
nenfa'e hunka mago'mofonkura osuo, na'ankure tamagrira
Magoke Nafa'tmimo monafinka mani'ne. **10** Anazanke hutma
kvatie hutma mago nekura osih. Na'ankure magoke Kva
tamia Kraisi mani'ne. **11** Ugagotama tamagri'pima hu'nesnimo'a,
tamagri eri'za ne' manino. **12** Iza'o agra'ama ante marerisimofona,
azeri anteramigahie, izao agra'ama anterami'simofona, azeri
antesga hugahie. **13** Hu'neanagi kva hiho, kasegere ugagota
hu'naza vahe'ene, Farisi vahe'mota, tamagi'ari hutma tavre
vahe mani'naze. Mona kumapima vunaku haza vahera, tamagra
kafa erigita ahenkani renezmantaze. Na'ankure tamagratamia
unofretama zamatrage'za ufrenaku'ma haza vahera unofraze.
14 [Kva hiho, kasegere ugagota hu'naza vahe'ene, Farisi
vahera tamagi'ari hutma tavre vahe mani'naze. Na'ankure
tamagra kento a'nemokizmi havige hunezmanteta nozimine,
maka zazimine rezmatga hutma kumzafa eri vaganereta, kefo
zama nehaza zantami refitenaku za'za nunamu nehaze. E'i
ana'ma nehazagu tusi'a kna erigahaze.] **15** Kva hiho, kasegere

ugagota hu'naza vahe'ene, Farisi vahera, tamagiri hutma tavre
vahe mani'naze. Mago'mo agu'a akarahe hinogura, tamagra
mopafina vanohutma, hagerina taka nehaze. Anama hutma
mago'ma nevretma, anamofona tamagra mani'naza avamena
ageteretma tarezupa tevemofo mofavre azerinesaze. (Geenna

g1067) 16 Kva hiho, tamavu suhu kva vahera, tamagra anage
nehaze, iza'o ra mono nonte hunteno huvempa haniana, amne
zane! Hianagi inamo'o ra mono nompima me'nea golimofo
agire'ma huvempa hanimo'a, agrama huvempama hunte'nea
kere amage anteno. 17 Tamavu suhuno neginagi vahe mani'naze!
Ina'nazamo tusi'a razana me'ne, goli mopi, hipi ra mono nomo'ma
goliretimu azeri ruotge hu'nea zamo'e? 18 Hianagi tamagra
anage nehaze, iza'o kre sramnavu itamofonte hunteno, huvempa
haniana amne'zane. Hianagi iza'o kre sramnavu itamofo agofetu
me'nea ofare hunteno huvempama hanimo'a, huvempama
hunte'nea ke'are amage anteno. 19 Tamusuhi vahe mani'naze!
Ina'nazamo razana me'ne, ofamopi, kre sramnavu itamo ofa azeri
ruotgera nehio? 20 E'na hu'negu, iza'o kre sramnavu itamofonte
huvempa hanimo'a, kre sramnavu itare me'neazanku'ene
huvempa nehie. 21 Hagi iza'o ra mono nonte'ma huvempama
himo'a, anampinkama nemania Anumzante ene huvempa
nehie. 22 Iza'o monamofonte huvempa hanimo'a Anumzamofo
traku'ene, anantema nemania Anumzanku huvempa nehie. 23
Kva hiho, kasegere ugagota hu'naza vahe'ene Farisi vahera,
tamagi'ari hutma tavre vahe mani'naze. Na'ankure tamagra
migufa'ene, nasene, zonkofea ofa nentaze. Hianagi kasegefima
ugagota hu'neazana, fatgo avu'ava huzanki, asunkuzane, ke
amage ante'zana tamagena hu'nemize. Hianagi ama zantamine,
mago'azama nehaza zane tamagena huomitma amne hugahaze.

24 Tamagra tamuvusuhu kva nagare, havigafa kuko antetma
azeri netraze, hianagi kemoli afura asagahu nevazize. 25
Kva hiho, kasegere ugagota hu'naza vahe'ene, Farisi vahera,
tamagi'ari hutma tavre vahe mani'naze. Na'ankure amega
kapumofone, zuompamofona tamagra azeri avusese nehaze.
Hianagi zamagu'afina kumzafa'sezane zamagrugu ke huzamo
avitene. 26 Tamavu asuhu Farisi vahekure, pusantera zuompane
kapumofona agu'afi sesehugeno, amega avufamo'a anahu
kna huno avusese hino. 27 Kva hiho, kasegere ugagota
hu'naza vahe'ene, Farisi vahera, tamagi'ari hutma tavre vahe
mani'naze. Na'ankure tamagra efeke paseteti vahe kerire
frentageno amega kerimo'a avusese huno knare'za hiankna
nehaze. Hianagi agu'afinka fri vahe'mokizmi zaferinamo'ene
avusese osu'nea zantamimo avite'ne. 28 E'inahu kante amega'a
vahe zamurera tamagra fatgo huta mani'none nehaze. Hianagi
tamagu'afinka tavrema hu'zamo'ene tra kema amage'ma
onte'zamo osu'zamo avite'ne. 29 Kva hiho, kasegere ugagota
hu'naza vahe'ene, Farisi vahera, tamagi'ari hutma tavre vahe
mani'naze, na'ankure tamagra kasnampa vahe'mokizimi keri tro
nehutma, fatgo vahe'mokizmi keri konariri hunentaze. 30 Ana
nehutma amanage huta nehaze, korapa tagehezane mani'nona
sinifa, tagra anampina ufrete, zamagra'nena kasnampa vahe
korana eri megira otro'sine nehaze. 31 Amanahu kema
nehazana agafatami hufore hutma, tagra kasnampa vahe'ma
zamahe fri'naza vahe'mokizmi zamagehete hutma nehaze.
32 Tamagra nermageho'zama hunaza'zana huvagareho. 33
Tamagra osifave, tamagra ha' osifavemofo mofavre zage.
Inankna hutma tevefima vugahaze huno huramante'neana
maniganegahaze? (Geenna g1067) 34 E'ina hu'negu keho, Nagra

kasnampa vahe'ene, antahi'zane vahe'ma, kasegere ugagota
hu'naza vahezaga, huzmantoge'za neaze, mago'amokizimia
zamahetma hantigahaze. Mago'amokizmia osi mono'nontamifi
zamazeritmanofi knonu sefu nezamitma, rankumate kumate
zamazeri haviza hutma vano hugahaze. **35** Aha'ma hanageno'a
mika fatgo vahe ama mopafi zamahageno tagirami'nea koramo
mofo kumimo'a tamagrite egahie. Fatgo ne' Eboli koranteti agafa
huno Berekaia nemofo Zekaraiama, tamagrama ra mono none,
kre sramanavu itamofo amu'nompima ahe fri'naza ne'mofo
koramofo knazana tamagra erigahaze. **36** Nagra tamage hu'na
neramasmue. Amana knafi vahe'motmage', ama ana knazana
erigahaze. **37** Jerusalemi vahere, Jerusalemi vahere. Kasnampa
vahe zamahe nefritma, huzmantoge'za tamagritega aza vahera
have kanonu zamahe'naze. Nama'a kna mofavre'zagatamia
kokoremo anenta'a zaga agekonanu zamazeri atru huno refite
zamanteankna hunaku nehuanagi tamagria tamave'nosie. **38**
Keho, tamagri ra mono nomo'a, vahera omanigeno megusa
avu'ava hie. **39** Na'ankure Nagra neramasmue, meninteti
agafa hutma tamagra Nagrira onagetma manime nevuta anage
hugahaze. Anumzamofo agifima e'nemofona asomu hunteno
huta hugahaze.

24 Hagi Jisasi'ma mono nonkuma'ma atreno nevige'za,
amage'ma nentaza disaipol naga'mo'za ra mono nonte'ma
kinaza nontami eme averisagu e'naze. **2** Hianagi zamagrikura
anage Jisasi'a hu'ne, Amama me'nea nontamina negazafi?
Nagra tamage hu'na neramasmue, mago havemo'e huno mago
havemofo agofetura omanetfa hugahie. Ana miko'mo'a tagnavazi
ramigahie. **3** Olivi agonarema vuno unemanige'za amage'ma
nentaza disaipol naga'mo'za, zamagra'agu e'za Jisasina eme

antahige'za, Nazupa kema hanazana fore hugahifi tasamio.
Kagrama eku'ma nehnankeno'ene, ama mopama vagareku'ma
hanigeno'a, nankna avame'za fore hugahie? Hu'za hu'naze.

(aiōn g165) 4 Jisasi'a ke'nona zamirera anage hu'ne, Mago'a
vahe'mo'za havi kante tmavare'za vezankura kva hiho. 5
Na'ankure rama'a vahe'mo'za, Nagri nagihe'za, tagra kraisigate
nehu'za rama'a vahe'zaga zamazeri savri hugahaze. 6 Ha'mofo
nanekea nentahitma, ha'mofo agigenkea antahigahazanagi
tamagra korera osiho. Na'ankure amanahu'zana amne fore
hugahie. Hianagi mopa vagarekna zahufa ne-e. 7 Na'ankure
mago rankuma naga'mo'za, oti'za mago rankuma nagara ha'
huzmantege'za, mago kini ne'mofo naga'mo'za oti'za mago kini
nemofo nagara hara huzmantege'za, agate'zamo'ene iminkomo
hakare kaziga tusi'za hugahie. 8 Hianagi ana maka zama fore
haniana, mofavre kasenteku'ma eneria kna ataza ama erigafa
nehie. 9 Henka'a, ha' vahete tamagrira tamavare'za vnage'za
tamata neramiza tamahe frigahaze. Hakare kuma'mo'za tusi'za
hu'za zmavesra huramantegahaze. Na'ankure Nagri nagireku
hu'za ana huramantegahaze. 10 Ana knafina hakare'mo'za
nagrite'ma zamentintia hunaza zana atre'za vu'za, komoru
ohunte ahunte nehu'za, zamavesra ohunte ahunte nehanage'za,
11 hakare havige kasnampa vahetamina fore hu'za mika
vahera havigante zamavarentegahaze. 12 Hagi na'ankure ke
ontahi'zamo'a ame'namepi agatereno marenerinkeno, hakare
vahe'mofo avesinte avu'avazamo zasi hugahie. 13 Hu'neanagi
aza'o amentintifima oti hampo'nama huno atupare'ma vanimofona
aguvazigahie. 14 Anumzamofo kuma'mofo Knare Musenkea miko
mopane mopane huama hutesageno, hagi vagarekna egahie.
15 Hianagi tusi'a haviza'mo'ma ruotge hu'nea kumapima efreno

knare'zama ahe fanane nehanigetma negesutma ksanampa
ne' Danieli hunte'neazamo'e hiho. Hagi ama nanekema
hamprisamo'za antahi ama hiho. (Dan 9:27, 11:31, 12:11) **16**
Hagi Judiama mani'namo'za fre'za agonarega viho. **17** Aza'o
nomote mani'nesimo'a, uramino noma'afintira mago'zana e'orino.
18 Hagi hozafima mani'nesimo'a ruvahe huno nakre ku'a ome
e'orino. **19** Zamu'ene hu'naza a'nene, mofavre aminuntage ana
knafi hanaza a'nemo'za, tusi'a knaza fore hugahianki kva hiho.
20 Nunamu nehinkeno fretma vuzamo'a, zasi knarero manifruhu
knazupa (sabat) fore osino. **21** Na'ankure ana knafima fore'ma
hania knazamo'a, ese'ma mopa fore'ma huneregati fore osu'nea
knaknaza tusi'a knaza fore hanigeno, henka'a anahu knazana
fore osugahie. **22** Hanki ana knamo atupama osanigeno'a,
magomo'e huno omanigahie. Hu'neanagi huhampri zmante'nea
vahetu huno knamofona eritupa hugahie. **23** Mago'mo'ma
tamagriku huno, keho, Kraisi'a amananki huge, Agra antune
hania kerera tamentinti osiho. **24** Na'ankure havige kraisi'ene,
havige kasnampa vahe'mo'za efore hu'za, tusi'a avame'zane
kaguva'za hu'za zamazeri savari nehu'za, hampo'nama atisu'za,
Anumzamo'ma huhampri'zmante namokizmia zamazeri savari
hugahie. **25** Hagi antahi ankereho, korapa Nagra fore hugahie
hu'na tmasmi'noane. **26** Hagi henka'ma mago'mo kagriku
huno'ma, Agra ka'ma kopi eanki ko hanigenka ovutfa huge, ko,
antu hunaragine nompi mani'ne huno hanigeta, tamentinti osiho.
27 Na'ankure kopsi'namo zage hanatitegati zage fretega tevenefa
tagivazu huno viankna nehanigeno, Vahe'mofo mofavrea egahie.
28 Na'ankure frino kasrine'niazama me'nesirega, anantega tumpa
namamo'za utru hugahaze. **29** Tusi'a knazama evutesigeno'a,
ana knafina ame huno zagemo'a tusi'a haninkisigeno, ikamo'a

tavira ontisigeno, ofuzagamo'a monafintira atafriramisigeno, hagi monamofo hankavemo'a kogekoge hugahie. (Joel 2:31, Rev-Huf 6:12, 13) **30** Ana hanigeno Vahe'mofo Mofavremofo avame'zana monare fore hanige'za, mika kazigatira nagatenofite vahe'mo'za zamasunku nehu'za negesageno, Vahe'mofo Mofavre'a tusi'a hanave'ane masazama'afi mona hamponte eramigahie. **31** Hagi ankerovo vahe'zaga'a huzamantesige'za ufena nere'za, mopa omete emete huneregati'ma Agrama huhampri'ma zmante'nemokizmi, monamofo mago agenttega vuno mago agentegatira zmavare atru hugahaze. **32** Fiki zafareti fronka kea rempi huta antahiho, knare huno amena'mo vuno eno huno ani'nama erimaregetma, zagegna egofta nehie hutma nehaze. **33** Anahu kna kante, tamagrama ama ana zantmima negesutma, Agrama esia knamo'a kofta huno kafantfante me'nne hutma tamagesa antahiho. **34** Tamagerafa hu'na Nagra neramasmue. Ama knafima mani'naza vahera ofrita mani'nesageno, ana mika'zana fore hugahie. **35** Monane mohanena fanane hugahie. Hianagi Nagri nanekemo'a fanane osu mevava hugahie. **36** Hu'neanagi anama esia knane zagenena, mago nemo'a ontahi'tfaza hu'ne. Monafinka ankeromo'zane Nemofo'enena ontahine. Hagi Nenfake'za antahi'ne. **37** Na'ankure Noa knafi hu'nazankna avu'ava'za nehnageno Vahe'mofo Mofavrea egahie. (Jen-Agf 6:5-8) **38** Na'ankure tina ohage'nege'za, ana knafina, vahe'mo'za ne'zana nene'za, aka tina nene'za, a'nea e'heriza, ara masi omiami nehazage'no, Noa'a ventefina umarer'i'ne. **39** Zamagra mago zankura ontahi'za mani'nageno tinko'mo hageno eme zmaheno refite vagare'ne. Vahe'mofo mofavrema enaku'ma hanigeno'a, e'inahu'za fore hugahie. (Jen-Agf 7:6-24) **40** Hagi tare ne'trena hozafi tragote'ne mani'nesnakeno

mago'mofo netreno, mago'mofona avregahie. **41** Tare a'tremoke'a witi raga neganesakeno, mago'mofona netreno mago'mofo avregahie. **42** E'ina hu'negu kavua ketenka manio, na'ankure kagri Ramo'a nanknare egahio, kagra ontahi'nane. **43** Hianagi ama'na kea antahi ankerenka antahio, nomofo nef'a'ma musufa ne'mo'ma kenagepima ne-esia knama antahi ankere'nesuno'a, agra kvahu ankere'neno atresigeno noma'a tagana vazino uofregahie. **44** E'ina hu'negu tamagranena trotra hoho, na'ankure Vahe'mofo mofavremo'a tamagra egahie hutma antahi omisaza knazupa egahie. **45** Aza'o ke amage'anteno knare antahintahine kazokazo eri'za ne'ma mani'nesiana, kva'amo noma'afi vahete kva hunte'nesigeno, ruga'a kazokazo eri'za vahera kna fatgorera ne'zana zamigahie. **46** Kazokzo eriza ne'mo kegava huno mani'nesigeno, kva'amo eno eme kesimo'a muse hino. **47** Tamage hu'na Nagra neramasgue, kva'amo eri'za nera huntesigeno, miko zama'arera kegava hugahie. **48** Hu'neanagi ana havi kazokzo eriza nemo'ma agragu'ma huno, Nagri kva ne'mo'a hago zaza kna umanie nehuno, **49** agra agafa huno, magoka eri'za e'neriza kazokzo eri'za vahe nezmaheno, aka ti ne'za neginagi nehaza vahe'ene ne'zane, tinena ne'ne. **50** Anante ana kazokzo eri'za ne'mo kva'agu omegahie huno, keno antahino osnia knare'ma esuno'a, **51** aheno rutnerare huteno, huntenkeno tavre vahe'mofo kumapi umanigahie. Ana kumate zavike nehuno, ave' aninkreki hugahie.

25 E'i ana knafina mona kumamo'a 10ni'a venenene omase mofanemo'za lampe tavizami'a eriri eriri huza, a' erinaku hia ne' ome tutagiha hunaku vu'naza kna hu'ne. **2** Mago 5fu'a vene omase mofane'mokizmia knare antahintahia omanene. Hagi mago 5fu'a vene omase mofane'mokizmia knare antahintahi

me'ne. 3 Hagi knare antahintahima omanenea mofane'mo'za
rampe tavi zamia eri'nazanagi, mago'a masevena e'ori'naze. 4
Hu'neanagi knare antahintahima me'nea mofane'mo'za tafero
zamifina mago'a masevena eririza rampe tavi zaminena vu'naze.
5 Hagi a'ma erinaku'ma hu'nea nera kora omegeno zamu
toko hige'za mase'haze. 6 Hianagi kenage amu'nompi mago
ne'mo kezatino, A'ma eri nera hago e'ne! Atiramita eme keho!
Hige'za, 7 anante ana maka mofanemo'za oti'za tavizmi erira
hu'naze. 8 Anante knare antahintahima omane'nemo'za, knare
antahintahima me'nemokizmia zmantahige'za, mago'a masavena
tamiho, na'ankure tavi timo'a asu nehie huza hazage'za, 9 knare
antahintahima eri'namo'za kenona huzamante'za, i'o masave
timo'a tamagri'ene tagri'enena knareru huorantegosianki, feno
nontega vuta, tamagra su'zana ome miza seho hu'naze. 10 Ana
masave mizasenaku nevazageno, a'ma eriku'ma hu'nea nera
ege'za, tro'ma hu'za mani'naza mofa'nemo'za, aravehu ne'zama
retro hunte'nea nompi agrane marerizageno kahana erigi'ne. 11
Henka ana knare antahizazmi omane 5fu'a mofa'nemo'za e'za
Ramoke, Ramoke kahana anagiranto hu'naze. 12 Hianagi kenona
huzamanteno, tamage hu'na neramasmue, nagra tamagena
antahina osu'hoe. 13 E'ina hu'negu kva huta maniho, na'ankure
Vahe'mofo Mofavrema ete esiankna ontahi'naze. 14 Mago'ane
Jisasi'a anage hu'ne, mona kuma'mo'a amanahukna hu'ne,
Mago ne'mo'a ru kaziga umanigeno enaku nehuno, eri'za vahe'a
kehutru huno, zamagri'zmi avamente zago'a refako huzami'ne.
15 Hagi mago'mofona 5tauseni'a zago amino, mago'mofona
2 tauseni'a zago amino, magomofona 1tauseni zago ami'ne.
Hanave zamimofo avamente refako huzamiteno, atreno afete
kana vu'ne. 16 Anama kva amo'ma nevigeno, ame huno 5

tauseni'a zagma eri'nea ne'mo'a, ana zagonuti eri'za erino
mago'ane 5 tauseni'a zago eri fore hu'ne. 17 Anahu kna huno
2 tauseni'a zago eri'nea ne'mo'a, mago'ane 2 tauseni'a zago
erifore hu'ne. 18 Hu'neanagi 1 tauseni'a zagma eri'nea eri'za
ne'mo'a, mopafi keri ome kafino kva'amofo zagoa asente'ne.
19 Hagi zazakna kva zimimo'a umaniteno, eno kazokzo eri'za
naga'a ke hutru huno, zagma zami'nea zago eri fatgo huno
kenaku zamantahige'ne. 20 5 tauseni'a zagma eri'nea eri'za
ne'mo'a, mago'ene 5 tauseni'a zagoa eri agofetu huno eno
amanage hu'ne. Ramoke kagra antahi naminkama 5 tauseni'a
zagma nami'nana zagoreti, mago'ane 5 tauseni'a zago eri
agofetu hu'na zagoa erifore hu'noe higeno, 21 kva'amo'a
kenona huntenu, knare'zantfa hane, kagra knare hunka fatgo
eri'za nere. Osi'a zantera knare hunka kegava hanku, Kagra
kavare antesnugenka rama'a zante kegava krigahane. Hagi
enka Nagrane muse eme huo hu'ne. 22 Anante 2 tauseni'a
zagma eri'nea ne'mo eno amanage hu'ne, ramoka, antahi
naminkama 2 tauseni'a zago nami'nantetira ko, ete 2 tauseni'a
zago eriagofetu hu'noe higeno, 23 kva'amo ke nona huno,
knare'zantfa hane, kagra knare hunka fatgo eriza nere, osi'a
zantera knare hunka kegava hanku, Nagra kavarentesnugenka
rama'a zante ke kva krigahane. Hagi enka Nagranena musena
eme huo hu'ne. 24 Anante 1tauseni'a zagma eri'nea eri'za ne'mo
eno amanage hu'ne, Ramoka kagra himamu ne' mani'nankena
kage'na antahi'na hu'noe, kagra ohankre'nana hoza nevsagenka,
avimza orani'nana ne'za nevasganku, 25 kagoro hugante'na
zagoka'a keri ome kafi'na mopafi asente'noreti, ama ana maka
zago ka'a vati'na eri'na oanki ko higeno, 26 kva'amo kenona
huntenu, kagra haviza hunka, eri'za e'ori ne' mani'nane. Kagra

ko nagenka nantahinka hu'hane, ohankre'noa hoza nevasage'na,
avimza orani'noa ne'za enerugu, **27** kagra zagoni'a zago nompi
ome ante'nankeno, mago'ane zagoa erifore nehige'na, ete eme
eruresine. **28** E'ina hu'negu zagoa agripintira eritma, 10 tauseni'a
zagoma eri'nemofo amiho hu'ne. **29** Na'ankure mago'azama
ante'nesamo'za mago'ane eneri'za, zamesi' hesiazana rama'a
erigahaze. Hu'neanagi mago'a zama onte'nesimofompintira
eri'nesnia zana eritregahie. **30** Hagi ama kefo eri'za nera
avreta fegi'a kumzu hanimpi ome matevuta atreho, e'i anampina
vahe'mo'za zavi krafa nehu'za, zamave anikreki hugahaze. **31**
Hagi Vahe'mofo Mofavremo ete hanave'afine masa zama'afima
mika ankeru zaga'anema esuno'a, Agra masa nentake tra'are
emanigahie. **32** Mika kokankokati vea'mo'za Agri avure emeritru
hanageno afu kva nemo, afu kevufinti memene sipisipi afutami
refako hugantugma hiankna huno, zamazeri kantugma hugahie.
33 Sipisipi afu'tmina, Agra aza tamaga kaziga zmavrenenteno,
meme afutamina aza hoga kaziga zamavarentegahie. **34**
Anante kinimo'a azantmaga kazigama mani'namokizimigura
amanage huno hugahie. Nafa'nimo'a asomu huramante'neanki,
etma mona mopa tro osu'nenoma retro huramante'nea kuma
emerihu hugahie. **35** Na'ankure nagama'netegeta Nagrira
ne'za namizage'na ne'noe. Tinku nave'nesigeta Nagrira tina
namizage'na ne'noe. Nantu vahe Nagra neogetma nontamifi
navrente'naze. **36** Navufa navapa mani'nogetma Nagrira kukena
hunante'naze. Kri eri'nogeta Nagrira kegava hunante'naze,
Kina nompi mani'nogeta, Nagrira eme nage'naze hanige'za,
37 anante fatgo vahe'mo'za ke nona hunte'za, Ramoke,
nazumepaga kagakura nehanketa ne'zana kam'i'none? Inazupa
tinkura kave'nesigeta, kamunkenka ne'nane? **38** Nazumepaga

kagonkenka Kagra nantu vahera neanketa kavare nontifina
kante'none? Nazupa Kagra kavufa kavapara mani'nanketa,
kukena hugante'none? 39 Nazumepaga kagonkenka, Kagra
kria eri'nane, nazupa Kagra kina nompina mani'nanketa, ome
kagenone? 40 Kini ne'mo kenona huzmanteno amanage
hugahie, tamage hu'na neramasamue, amama zamagima
omane nafuhe'impinti mago zmimofoma nankna avu'ava
huzmante'nazana, Nagri hunante'naze. 41 Nehuno anante aza
hoga kazigama mani'namokizmia amanage huzmantegahie,
tamagra kazusifi mani'naze, maniganeta kefo nemofone, ankero
naga'amofoma retro'ma huzmante'nea tevava tevefi ufreho.

(aiōnios g166) 42 Na'ankure naga'ma netegeta magore hutma
ne'zana namizage'na one'noe. Tinku nave'nesigeta magore
hutma tina afi onami'naze. 43 Nantu vahe neogeta nontimifina
navre onte'naze. Navufa navapama mani'nogetma kukena
huonante'naze. Krima eri'noane, kina nompima mani'nogeta
eme onage'naze. 44 Ana vahe'mo'za kenona huntegahaze,
Ramoka, nazu'mepa kagonkenka kagakura hu'nane, hifi
tinkura kavesi'ne, hifi nantu vahera e'nane, hifi kavufa kavapa
mani'nanketa, kukena huogante'none, hifi kria eri'nane, hifi kina
nompina mani'nanketa kaza osu'none? 45 Hanageno Agra
ke nona huzmantegahie. Tamage hu'na neramasamue, amama
zamagi omne'nea vahe'pinti, mago zmimofoma mago'zama
huonte'nazana, Nagri huonante'naze. 46 Hanige'za ana
vahe'mo'za manigane'za mani'vava zamatazampi vugahaze.
Hianagi fatgo vahe'mo'za mani'vava mani'zampi vugahaze.

(aiōnios g166)

26 Hagi Jisasi'ma ana maka nanekema huvagareteno, amanage
huno amage'ma nentaza disaipol nagara zamasmi'ne. 2

Antahi'naze Anumzamo Israeli vahe'ma kinafinti zmare'nea kna,
tare knama agteresigeno egahie. Hagi Vahe'mofo Mofavre avare
zamisage'za, ahe'za keka zafare hantigahaze. **3** Hanki ugagota
pristi vahe'mo'zane, Israeli vahe'mokizmi ranra kva vahe'mo'za
ugagota mono kva ne' Kaiafasi kumapi atru nehu'za, **4** Jisasima
havige hunte'za, azeri'za ahefrisaza naneke, oku'a huge antahige
hu'naze. **5** Hu'neanagi anage hu'za aru amu'nozmifinti ke
hakare hu'za ha' eri fore hu'zanku kinafinti zmare'nea knagu
antahimi'za ne'zane knarera anara osugahune hu'naze. **6**
Jisasi'a Betani kumate Saimoninku fugo ne're nehaza nemofo
nompi umarerino mani'negeno, **7** mago a'mo hentofa have
tafempi mananentake huno mizama'amo mareri'nea masave
erineno, Jisasi'a aza tununte itare mase'negeno, asenire tagino
frente'ne. **8** Hianagi amage'ma nentaza disaipol naga'mo'za,
anama hiaza nege'za zamarimpa haviza nehige'za, ama
masavena na'a higeno amne zanknara nehie hu'naze? **9**
Ra mizante atreno, zago erino amunte omne vahe zamigare
nehazageno, **10** Jisasi'a keno antahino nehuno'a anage hu'ne,
Nahigetma ama ara antahi haviza hunentaze? Na'ankure
agra knare avu'avaza hunenante. **11** Zamunte omne vahera
zamagra mika zupa tamagrane manigahaze. Hagi Nagra mika
zupa tamagranena omanigahue. **12** Ama a'mo'ma navufare
masavema frenenanteana, asemanante'zamofo nazeri retro
nehie. **13** Tamage hu'na nerasmhue, mopane mopane vu'za
e'za nehu'za, knare muse keni'a huama hanarega, ama a'mo
hia avu'avazankura huama hu'za vahera nezmasmisse'za,
zamagesa antahimigahaze. **14** Anante 12fu'a amage nentaza
disaipol naga'afinti Judas Isakarioti'e nehaza ne'mo, ugagota
pristi vahete vuno, **15** amanage huno zamantahige'ne. Na'a

namisagu nagra Jisasina avreramigahue? Hige'za 30'a Silva
zagoa hampriza ami'naze. (Zek 11:12-13) **16** Ana knaretima
vu'neana Jisasima avare zamisia kankamu fore hanigu Judasi'a
hakrene. **17** Hagi zo'ore Breti nenaza hompa knamofona ese
zupa, amage nentaza disaipol naga'mo'za Jisasinte e'za eme
antahige'za, inantega kinafinti zmare'nea knagu antahimi ne'zana
retro hugante'sunkenka negahane? **18** Jisasi'a ke nona'a huno,
Rankumate ufresuta'a mago ne' ome kegaha'anki amanage
huta ome asami'o, rempi hurami' ne'mo'a amanage huno hu'ne.
Knani'a atupa nehigu nonka'afi namage'ma nentaza disaipol
nagani'ane kinafinti zmare'nea knagu antahimi ne'zana negahune
hune hutna hi'o. **19** Higene Jisasi'ma huznantea kante anteke,
amage'ma nenta'a disaipol netremokea ne'zana ome retro
hu'na'e. **20** Anama higeno Jisasi'a 12fu'a amage' nentaza disaipol
naga'ane neza nenaza trate zamaza tununte mani'naze. **21** Ne'za
nenageno Jisasi'a zamasamino, Tamage hu'na neramasmue,
mago'moka ha'ma renenantaza vahe'mokizmi zamazampi
komoru hunka nevrentegahane. **22** Amage' nentaza disaipol
naga'mo'za zmusunku nehu'za magoke magokemo'za Jisasinku
anage hu'naze, Ramoka tamage nagriku nehampi? **23** Higeno
Jisasi'a kenona'a huno, ama tafepinti'ma ne'zama magoka
Nagrane nenompinti, mago'moka nagrira ha' vahe zamazampi
navarentegahane. **24** Agriku'ma hu'za krente'naza kante,
Vahe'mofo mofavremo frigahie. Hianagi kva hino, komoru
huno ha' vahete navre zamisnia ne'mo'a, nerera'ma kase
ontene'sinia knare hisine. **25** Komoru huno ha' vahe avare
zmisia ne' Judasi'a amanage hu'ne, Hurami' ne'moka tamage
nagriku nehampi? huno higeno, Izo kagra ha e'i nehane, huno
Jisasi'a asmi'ne. **26** Anama nenageno, Jisasi'a breti erino

Ramofonte susu huno nunamu huteno, erigorino amage'ma nentaza disaipol naga'a nezmino amanage hu'ne, Ama'i nagri navufgagi erita neho. **27** Anante Jisasi'a mago waini tafero erino Anumzantega susu huno nunamu huteno nezamino, Mika'mota ama anampinti neho hu'ne. **28** Na'ankure Anumzane huhagerafita manisnaza'zamo avempa huno mesnigu ama'i korani'e. Mika vahemofe kefo zazmi eri apase zmantenigu korani'a tagi neramue. **29** Amanage hu'na neramasgue, meninteti'ma vaniana wainia mago'ene one'na henka'a, Nafa'nimofo kumapi tamagrane kasefa wainia negahune. **30** Hutege'za anante mago zagame hute'za, atirami'za Olivi agonare vu'naze. **31** Jisasi'a amanage huno zamasmi'ne, Meni kenegetfa Nagrite'ma fore'ma hania zanku natretma fregahaze. Na'ankure ko avontafepina krenteno, Nagra sipisipi kva ne' ahesuge'za sipisipi kevumo'za panini hu'za ufre efre hugahaze hu'ne. (Zek 13:7) **32** Hianagi fripinti oti'na Galili ugote'na vugahue. **33** Higeno Pita'a kenona huno, mikamo'za kagrite'ma fore'ma hania zankura katre'za fre vagaregahaze. Hianagi nagra onkatretpa hugahue. **34** Jisasi'a huno, Tamage hu'na negasamue, meni kenegetfa kokorege osu'nenkenka, tagufa zupa Nagrikura onke'noe hunka vahane hugahane. **35** Pita'a amanage huno asmine. Ha nagra Kagrane fritfa hugahue, hanki'na Kagririra onkage'noe hu'na vahane huogantegahue. Hige'za ana miko amage'ma nentaza disaipol naga'mo'za ana kege hu'naze. **36** Higeno Jisasi'a amage nentaza disaipol naga'ene Getsamenie nehzarega vuteno, anage huno zamasami'ne, Amare mani'nenkena Nagra amanure nunamu ome huteno nehuno, **37** Pita nevreno Zeveti ne'mofavrea zanagri kogna Jemisine Jonine zanavreno nevigeno agafa huno rimpamo tusi kna avenesigeno agu'amo haviza nehigeno, **38** amanage

huno zamasmi'ne, Nagu namemo'a tusiza huno kna nehuno, nazeri fri kante nevie. Amare mani'neta Nagrane kvahuta maniho. **39** Osi'a vu ogamnu'a atreno avugosaregati mopafi unemaseno, Anumzamofontega nunamu huno, Nafa'nimoka knare'ma hu'nesiana, ama'i knazana eri atrenanto. Hu'neanagi Nagri navesira ovaririo. Kagri kavesizamo forehino. **40** Ananteti amage'ma nentaza disaipol nagate eno, zamageana, zamu mase'nageno, Pitanku amanage hu'ne. Tamagra mago auafina Nagranena kva osugahazo? **41** Reramatagafi ufreta traka hanagi, kva huneta nunamu hiho. Avamu timimo'a ave'nesianagi, amega tamavufgamo'a avenosie. **42** Ete mago'ene vuno nunamu ome huno, Nafa'ni moka ama'i knazamofo taferora eri atre onante'nanke'na nesuana, Kagri kvesimo forehugahie. **43** Ete eno eme zamageana zamu toko hige'za zamu mase'nageno, **44** ete zmatreno vuno tagufa zupa ko'ma hu'neankna ke huno Anumzantega nunamu ome hu'ne. **45** Ananteti eno amage'ma nentaza disaipol naga'a zamasmi'ne, Tamagra manigsa nehutma tamu masenazo? Keho, Vahe'mofo mofavrema komoru hu'za kumi vahe'mokizmi zamazampi avremisaza knahie. **46** Otinke' vammeno, komoru huno navre zamisia nera ama ne-e. **47** Jisasi'a ke huvaga ore'negeno 12fu'a amage'ma nentaza disaipol naga'afinti mago'mo Judasi ehanitino tusi'a vahe kevune e'ne. Ugagota pristi kva vahe'mo'zane, Jiu kva vahe'mo'za huzmantage'za kazinknone kumpa knone eri'za e'naze. **48** Judasi'a komoru hu'nemo zamasmino, Agi'ma antako hanuana, e'i ana neki azeriho. **49** Judasi'a ame huno Jisasinte vuno, Knare kenegere hurami ne'moke nehuno, agi antako hu'ne. **50** Jisasi'a ke nona'a huno, Rone'nimoka hunakurema hunka anazana huo. Anante ruga'amo'za e'za

Jisasina eme azeri'naze. **51** Hianagi mago Jisasi'ene mani'nea ne'mo, kazinknoma'a erino ugagota pristi ne'mofo kazokzo eri'za ne' agesa rukafri atre'ne. **52** Ana higeno Jisasi'a amanage huno asmi'ne, Kazi knonka'a anomaa'afi vazinto. Kazi knonu ha' nehaza vahe'mokizmi'a kazi knonu zamahe frigahaze. **53** Kagra ontahinampi, Nagrama Nenfanku antahigesugeno'a, mago'ane 12 tauseni'a sondia ankero kevu vahe menitfa erami'za naza hanazana? **54** Hianagi Nagrama anama hanugeno'a, amanahu kante fore'ma hino huno Anumzamofo avontafepima kre'nea kemo'a, inankna huno efore hugahie? **55** Ana knafi Jisasi'a ana vahe kevu amanage huno zamasmi'ne, Nagri nazerikura nahigeta kazinknone kumpa kno erita kumzafa vahe zamazeriku nehzankna hutma neaze? Knaneknane ra mono nompi mani'ne'na naneke huneramasmugeta naze'ori'naze. **56** Hagi ana maka zama fore hu'neana korapa kasnampa vahe'mo'za, fore hugahie hu'za kre'naza'zamo avufga'a fore hu'ne. Ananknafi amage nentaza disai pol naga'mo'za atre'za fre'naze. **57** Jisasima azeri'za vu'naza vahe'mo'za, Kaifasi ugagota pristi nemofo nompi avare'za vu'naze, ana nompina kasegera ugagota hu'naza vahe'ene Jiu ranra kva vahe'mo'za atru hu'za mani'nazafi avare'za vu'naze. **58** Hu'neanagi Pita'a ogama'a zamavaririno nevuno, ana mono ne'mofo nonkumapi ufre, Jisasinte'ma fore haniaza kenaku eri'za vahe'ene umani'ne. **59** Hagi ugagota pristi vahe' mo'zane ana miko kanisol (Senhitren) vahe'mo'za, Jisasima havige huntesage'za ahefrisaza vaheku hakare'naze. **60** Hianagi miko vahe'mo'za eama hu'za havige huntazanagi, mago havizama'a hake'za eri fore osu'naze. Hianagi henka'a taremake eama huke, **61** Jisasinku anage hu'na'e, Ama ne'mo Anumzamofo ra mono nona tapage hu'na

tagufa knafi ki vagaregahue, huno hu'nea nere. **62** Anante ugagota pristi ne'mo'a otino amanage hu'ne, Ama nanekema hunegantarera kenona osugahampi? Na'a hu'nanke'za ama vahe'mo'za kea hunegantaze? **63** Jisasi'a ke osu' mani'negeno ana ugagota pristi ne'mo amanage hu'ne, Kasefa huno mani'nea Anumzamofo agire nehuanki tasamio. Kagra, Kraisiga Anumzamofo Nemofogafi? higeno, **64** Izo Kagraka'a hago nehane. Hianagi amanage hu'na mika motmagura nehue, henka'a Vahe'mofo mofavremo'a, negesnageno Anumzamofo azantmaga kaziga manino hihamu'ane mona hampompi ne-enketa kegahaze. **65** Higeno ugagota mono kva ne'mo kukena'a eritagato hunetreno amanage hu'ne, keho Anumzamofonku azanava ke nehie! Mago'ene naneke huontegosune, tamagra tami azanava kema huntea kea nentahize. **66** Hagi na'ane tamagesa nentahize? Hige'za kenona hu'za, hazenke hu'neankino frisie. **67** Nehu'za Jisasina avufi zmetu henente'za zamaza kano ahe'naze. Mago'amo'za zamaza rutarete'za nehe'za, **68** amanage hu'za antahige'naze, Kagra Kraisige, aza negahefi kasnampa ke hu'ama hunka tasimio? **69** Ana kumapi fegi'a Pita'a umani'negeno mago eri'za mofa'mo eno, Kagranena Galili ne' Jisasi'ene vano nehazafinti mago zamimoke, hu'ne. **70** Pita'a maka vea zamufi vahane huno, Nagra ontahi'noa zanku nehane. **71** Ananteti atiramino ana kumamofo kafante vigeno, mago ru eriza mofa'mo negeno, Anante'ma mani'naza vahera zamasmino, ama nera Jisasi Nazareti ne'ene nemania nere. **72** Pita'a mago'ene vahane huhampo'na huno, Nagra onke'noa neku nehane hu'ne. **73** Anante osi'a kna evige'za, oti'za mani'naza vahe'mo'za Pitante eza, anage hu'naze, tamage kagra mago zamimoke, na'ankure kageru'mo hufore nehie. **74** Pita'a hanave kefinti agra'agu

huhaviza nehuno, monamo'a antahine, tamage nagra onke'noa
neku nehaze, higeno kokoremo'a ana agi'ene krafa hu'ne. 75
Anante Jisasi'ma hu'nea kere Pita'a agesa antahigeno vu'ne,
Kokoremo krafa osu'enkenka onke'noa nere hunka tagufa zupa
vahane hugahane hu'nea kegu nentahino, Pita'a fegi atramino
tusi asunku huno zavi ate'ne.

27 Ko'matigeno nanterama'a maka ugagota mono kva vahe'ene,
ranra kva vahe'mo'za atru huza Jisasi ahefrisnaza naneke
hunaki'naze. 2 Ana hute'za Jisasina azeri'za nofi kite'za,
rankumamofo kagota kva ne' (Gavana) Paeroti avare'za
omemi'naze. 3 Hagi komoru huno avare zami'nea ne' Judasi'a
antahiamma Jisasi frigahie kema nentahino'a, rama'aasuza
e'nerino, 30'a silva zago ami'naza zago'a erino ugagota mono
kava vahete'ene ranra vahete vuno, 4 amanage hu'ne, Hazenke'a
omane ne'ma komoru hu'ha avare tamuana, nagra kumi hue
huno hige'za zamagra anage hu'naze, tagri zana omane'neanki
kagri'zane hu'haze. 5 Judasi'a ana zago'a mate'vuno ra mono
nomofa agu'afi netreno, vuno kana ome he'ne. 6 Ugagota mono
kva vahe'mo'za ana zago eneriza anage hu'naze, Trakemo'a
i'o hu'negu vahe'ma zamahe frikuma mizama ase'naza zago'a
mono nomofa zago tafempina ontegahune. 7 Anante kehuge
antahige hute'za, ana zagonuti mopa kavo tro nehia ne'mofo
mopa, ru kazigati emani vahe fri hanageta asezamantesuna
mope hu'za mizase'naze. 8 Amana kegafare, ana mopagura
kora mope hu'za meninena nehaze. 9 Anante kasnampa ke
Jeremaia hunte'nea kemo avufga'a fore hu'ne. Israeli vahe'mo'za
agri avufgare huhamprinte'haza 30'a silva zagoa zamagra
eri'naze, 10 nehu'za ana zagoa eri'za, Ramo nasm'i'nea kante
mopa kavo tro' nehia ne'mofo mopa miza senaze. 11 Jisasi'a

anante rankumamofo kva (Gavana) ne' avuga uotigeno agenoka
huno, Kagra Jiu vahe'mokizmi Kini mani'nano? Izo e'ima kagra
nehanane, huno Jisasi'a ke'hona hu'ne. **12** Hagi ra mono kva
vahe'mo'zane, ranra kva vahe'mo'za naneke humanentageno'a
Jisasi'a kenona huozmante'ne. **13** Anante Paeroti'a amanage
hu'ne, Hakare hazenkema hu'nana zanku'ma naneke'ma huma
negantazana nentahimpi? **14** Hianagi Jisasi'a magore huno,
keagama huntea kerera, kenona'a osutfa higeno, Paeroti'a tusi'a
antri hu'ne. **15** Hagi rankumate kva ne'mo'a agri'a avu'avakino
mika kafurera kinafinti zamavare'nea knare muse hu'za kave'ma
nenaza zupa (pasova) kinafinti zamesimofonku hazageno avare
fegu'a netreane. **16** Hagi ana knafina mago nera agi'a Barabasi'e
tusi hazenketi'nea ne' kina nompi mani'ne. **17** Maka veama
atru hutageno'a, Paeroti'a zamantahigeno, azanku tamenesi'a
katufe tamisue? Barabasipi, Jisasinku Kraisi'ema nehaza nere?
18 Krunonkema Jisasi hunte'za avare'za eme ami'nazana
agra antahinokeno hu'ne. **19** Paeroti'a ke refakohu tra'are'ma
mani'negeno'a, nenaro'a ke atregeno vu'ne. Meni kenagera
mase'ne'na Agrite'ma ke'noa avanamo'a tusi nagogofe'ne. E'i
Nera fatgo ne' mani'neanki, mago zana huonto. **20** Hianagi
ra mono kva vahe'mo'zane, ranra kva vahe'mo'za, Barabasi
tamiho nehutma Jisasina ahefrio hutma hiho, hu'za mika atru
hunaza veara masave ke zmasami'naze. **21** Hagi rankuma
kva ne'mo'a, ama tare netrempitira inamofonku tamenesigu
nagra katufe tamisue? Higeza zamagra Barabasie hu'naze. **22**
Paeroti'a zmasamino, Jisasinku tazahu ne' Kraisi'ema nehaza
nera na'a huntuesegu tamenesi'e? Hige'za ana mika veamo'za,
Rugeka zafare aho, hu'za kezatiza hazageno, **23** Paeroti'a
kenona huzmanteno, naza havizana hu'negeta neheze? huno

hige'za, mago'ene kezati'za, Rugeka'zafare ahegeno frino. 24
Hazageno Paeroti'a keana maka veamo'za rankege hazageno,
mago'za huga nosuno tifino hakare vea zamufi aza sese
nehuno, ama ne'mofa kora kumira nagripina omanegahianki,
tamagri zane. 25 Hige'za hakare veamo'za kenona'a hu'za,
atregeno agri kora kumimo'a, tagripine mofavretifine meno
hu'naze. 26 Anante Paeroti'a Barabasina atregeno vigeno,
Jisasina sefu amite'za rugeka zafare hesnazegu avare'zmine. 27
Rankumate kva ne'mofa sondia vahe'mo'za Jisasi avare'za ana
nemofo kumapi mika sondia vahe nemaniza kumate ufrageno
regaginte'naze. 28 Anante Jisasina kukena'a eri'hate netre'za
koranke kukena hunente'za, 29 ave'avenofite kini vahe'mokizmi
fetorikna huza tro hu'za asenire antaninte'za, azota tmaga
azampi erinte'naze. Hagi avuga kaziga zamarena renamagi'za
revatga nehu'za, Jiu vahe'mokizmi kini nera ama'ne, hu'za
hu'naze. 30 Zametu ahenente'za azampinti azota hanare'za
anumpi amasagi'naze. 31 Ana hu'za huhaviza huntete'za, ana
koranke kukena hatenetre'za, agri kukena ete erihuntete'za,
rugeka zafare ahe'za hantinaku avare'za vu'naze. 32 Anama
atinerami'za mago nera Sairini kazigati Saimoni'e hu'za nehaza
ne'eme nege'za, Jisasi rugeka zafa eri kofino vinogu tutu
hunte'naze. 33 Mago kumara aseni zaferine nehzare (Golgota)
uhanati'naze. 34 Anante waini timpi akaza erihava hute'za,
Jisasina amizageno neno keana higeno, one'ne. 35 Rugeka
zafare azerinte'za hanto'ma ahete'za kukena refako huku
kasi zokago (tais) re'naze. 36 Anante Jisasinte kvagri'za
mani'naze. 37 Hagi anuntega avoma kre'za ahente'nazana,
ama nera Jisasi'e. Jiu vahe'mokizmi kini nere hu'naze. 38
Anante ruga raga asopare kumzafa netrena rugeka zafare

zanahe'za magoka hanti'naze. **39** Hagi ana kante agatere'za vu'za e'za haza vahe'mo'za, azanva ke nehu'za zmagena ru'za, **40** amanage hu'naze, Kagra ra mono nona tapage hunka tagufa knafina ete kivaga'regahue hu'nane, hagi Anumzamofo Mofavre mani'nesnunka kagraka'a kaza hunka rugeka zafaretira eramio. **41** Anahu kante anteza ugagota pristi vahe'mo'zane, kasegere ugagota hunaza vahe'mo'zane, ranra vahe'mo'za azanva ke nehu'za amanage hu'naze. **42** Ru vahe'mokizmi zamagu vazineanagi Agra'a agura novazie. Israeli vahe'mokizmi Kinima maninesuno'a! Atregeno rugeka zafaretira menina eraminketa, tagra Agrite tamentinti hamaneno. **43** Anumzanku amentinti nehie. Atregeno Anumzamo avesima antesuno'a menina aguvazino, na'ankure Anumzamofo Mofavre mani'noe huno hu'ne. **44** Hagi tare kumzafa netre Agri'ene znahe'za hantinaza netremokea, ana zanke huke huhaviza hunte'na'e. (Sam-Zga 22:7-8.) **45** Hagi zagemo anuntupi me'negeno mika mopafina haninkino kinaga 3 kiloki uhaniti'ne. **46** Jisasi'a ranke huno, Eloi eloi lema sabaktani, Hibru kefina Anumzanimoke, Anumzanimoke, nahigenka kamagena hune'namine huno hu'ne. (Sam-Zga 22:1) **47** Anage hige'za anante mago'a ot'i'za mani'namo'za nentahiza, llajjanku ke nehie hu'naze. **48** Ame huno mago'zimimo agareno kapuku (Spans) urino aka waini timpi areteno zotare antenagamu teno Jisasi nesiegu ami'ne. **49** Ruga'amo'za anage hu'naze. Elaija eme agu vazigahifi atre'nenketa kamaneno, hu'za hu'naze. **50** Jisasi'a mago'ene kezatino ra krafa nehuno, asimu'a atreno fri'ne. **51** Anama nehigeno'a, ra mono nomofo kasante tfi'nea tavravemo amu'nompinti sgane huno nagamuti tami'ne. Ana nehigeno imi enerigeno, ranra haveramimo rutane herafine. **52** Ana nehigeno fri vahe'mofo keriramimo, hagro

nehige'za korapa'ma rama'a fatgo veama fri'namo'za oti'naze. **53**
Jisasima otitege'za, matipinti otite'za Jerusalemi ruotage hu'nea
rankumapi ufre'za hakare vahete eama hu'naze. **54** Anante
100'a sondia vahe'mokizmi kva ne'ene, mago'ama Jisasinte
kvagri'naza sondia vahe'mo'za imima enerigeno fore hiaza
nege'za tusi kore nehu'za, Tamage ama Nera Anumzamofo
Mofavre! hu'naze. **55** Galili kazigati hakare a'nenemo'za, aza
nehu'za magoka vano nehazamo'za anampi ogamu'a mani'ne'za
ke'naze. **56** Ana a'nefina, mago a'ra Maria'e Makdala kazigatire.
Hagi mago a'ra Jemisine Josefegizni neznerera Maria'e. Hagi
mago a'ra Zeveti mofavre'mokizini neznera'e. **57** Kinaga segeno
mago afufenone nera agi'a Josefe, Jisasi amage nentea ne'
Arimatia kazigati e'ne. **58** Paerotinte vuno Jisasi avufga amisiegu
ome antahige'ne. Paeroti'a Jisasi avufga eriamihio higeno,
sondia vahe'mo'za eri ami'naze. **59** Josefe'a kahefa tavaravefi
erinteno ano vazino, **60** agri'a keri havefi kasefa asente'nazafi
ome asenteno, ra have retufeno ana have kana runkni reteno
vu'ne. **61** Hagi ana kerimofo tva'onte kanti kaziga, mago ara
Maria Makdala kazigati a'ene, Mariake anantera mani'nene
ke'na'e. **62** Trotra huknamo vagaregeno mani fruhu knamofo
amefi zupa ra mono kva vahe'mo'zane, Farisi mono vahe
mo'zane Paerotinte vu'za, **63** amanage hu'naze. Ra nemoke ana
havige ne'mo ofri mani'neno amanage hu'ne. Frite'na tagufa kna
manitena, ete otigahue hu'nea kegu nentahune. **64** Ana hu'negu
huzmantegi'za, vu'za ana kerire tagufa knafina ome kva hihio.
Ru agri'ma amage'ma nentaza disaipol vahe'mo'za e'za avufga'a
musufa emeneriza, vahe'mokzimi zmasamiza Jisasi'a frinefinti
otine hanaza kemo'a, kote krunage zmia agatereno, rankrunage
fore hugahie. **65** Paeroti'a amanage huno zamasmi'ne, Sondia

vahé ome zamavareta tamagrama antahizaza huta ome kva
hiho. **66** Hagi zamagra sondia vahé'ene vu'za, ana have rezahe
hutre'zanku kase ome hunente'za sondia vahé'mo'za kegava
hu'naze.

28 Hagi mani fruhu kna vagaregeno ese knazupa ame
nanterampi, Makdala kumateti Maria ene Mariake matimati
havega kenaku e'na'e. **2** Ame huno tusi'a imikrefa erine,
na'ankure Ramofo ankeromo monafinti eramino matite runkani
re'naza have eme revahe hugantu atreno ana agofetu manine. **3**
Ana ankeromofo masa'amo'a kopsinamoma hiaza nehigeno,
kukena'amo'a efeke hampomo'ma hiaza hu'ne. **4** Matite
kva hu'naza vahé'mo'za ana ne'ku tusi agoro hunente'za
zmahiritege'za fri vahé kna hu'naze. **5** Hianagi ankeromo'a
ana a'trena zanismino korora osi'o, na'ankure nagra antahinue,
Jisasima rugeka zafare ahe'zama hantinaza neku eme nehaka'e.
6 Agra amafina omanine, na'ankure koma hu'nea kante oti'ne.
Amare eta avifama ante'nazafina eme ke'o. **7** Ame' hutna
amage nentaza disaipol nagara, Agra ko fripintira otine huta ome
smasami'o, Galili vugotegahianki Agrira anantega ome kegahaze.
Nagrama tanasamua nanekea antahi ankere'o. **8** Higeke ana keria
atreke kore nehune tusi musezampi zanagareke amage nentaza
nagatega ananke zamasminaku vu'na'e. **9** Antari ha'aza huno
Jisasi'a tutagiha huznenteno, Nanterane huznantegeke, zanagra
Agrite eke agiare eme azeri hanavetineke mono hunte'na'e.
10 Anante Jisasi'a zanasmino, Korora osio, vutna nafuhe'ina
Galili viho hutna ome zamismi'o. Anantega Nagrira nagegahaze.
11 Hagi ana a'trema nevake'za matite'ma kva hu'naza sondia
vahepinti, mago'amo'za rankuma agu'afi ufre'za, fore'ma hu'nea
zama'a maka ugagota pristi vahetaminte huama hu'naze. **12** Hagi

vugota pristi vahe'mo'za mono kva vahe enema atru hu'za kema
retro hute'za, ana sondia vahe'mokizamia rama'a zago nezamiza,
13 anage hu'za zamasmi'haze, Amanahu ke tamagra hugahaze.
Amage'ma nentaza disaipol naga'mo'za ana nera kenage'afi tavu
mase'nonke'za kerfa'a musufa emeriza fre'naze, hutma hiho. **14**
Ama kemo'ma rankuma kva (Gavana) ne'mofo agesare hanigeta,
tagra kaziga avrenenteta, hazenkefima ufreku hanazana tamaza
hugahune. **15** Hazage'za sondia vahe'mo'za ana zago eneri'za,
zamisminaza kante kea Jiu vahepina huganti kama hazage'za
ana kemo'a meninena meno ne-e. **16** Ananteti 11ni'a Jisasi
amage nentaza disaipol naga'moza Galili vu'za, Jisasi'ma
zmasamino vihoma hu'nea agonare. **17** Agri'ma ome nege'za
mono hunte'naze. Hianagi mago'amo'za tare antahintahi hu'naze.
18 Anante Jisasi zmagrite eno amanage hu'ne, Maka monafine
mopafinema kegavahu hihamu'a, Anumzamo'a ko Nagri namine.
19 E'ina hunegu kokankoka vutma, namage ante disaipol naga
zamazeri retro hunezmanteta, Nefa agifine, Mofavre'amofo
agifine, Ruotge Avamumofo agifi mono tina frenezamanteta, **20**
Nagrama huramantoa kasege rempi huzaminke'za ana miko
vahe'mo'za avariraho. Hagi kama antahihi, Hakare zupa tamagra
ne manina nevanenkeno makaza vagaregahie. (aiōn g165)

Maki

1 Hagi Anumzamofo Mofavre Jisas Kraisi Knare Musenkea ama agafa hu'ne. **2** Kasnampa ne' Aisaia'a amanage huno avona krentene, Antahiho, nagra huntanenko nagri naneke erino ome huamahu ne'mo'a ugagota kagrira huganteno, kana retro hugahie. **3** Ka'ma kopinti mago'mofo agerumo amanage huno kezanetie, ramofo kana retro nehutma, kama vania kana erinte fatgo hiho. **4** Ka'ma mopafinti mono ti frezmanente Joni'a eama nehuno, agafa huno kumi'zmigu zamagu'ama rukrahe hanageno apasezmanente mono tima fresaza'zanku huama huno zamasmi'ne. **5** Maka Judia kazigati vahe'mo'zane Jerusaleti'ene, agrite maka'mo'za vu'za huama kumizmia ome hazageno, Jodani timpina mono tina frezmanente'ne. **6** Hagi Joni'a kemori azokate tro hu'nea anakre ku'a hu'neno, zagagafa akruteti tro hu'nea amu nofi afafafi rugagino hu'neno, kenu'ene afi' tumemofo tima'ane nenea nere. **7** Hanki mago'ma henkama ne-emo'a nagrira nagetereno hanave'ane ne' neankina, prihu'na aga anomofonte anakinea nofira kazufega osu'noe. **8** Nagra tintfanu mono tina freneramantoe. Hianagi Agra Ruotge Avamunu, mono tina freramantegahie, huno huama huno zmasamine. **9** Ana knafi Galili kaziga Nazareti kumateti Jisasi'a egeno, Joni'a Jodani timpi mono tina frente'ne. **10** Timpinti anama Jisasi'a marerino ne-egeno, mona kamo hagro nehigeno Ruotge Avamumo maho namagna huno hareno Agrite emanine. **11** Monafinti mago agerumo'a amanage hu'ne, Kagra navesimanegantoa mofavre' nimokagina muse hugantoe. **12** Avamumo'a ame huno ka'ma kopi atufegeno vu'ne. **13** Ka'ma kopina 40'a kna umani'negeno, Sata'a revatga hu'ne. Agra afizaga kfane maninegeno, ankero vahe'mo'za aza hu'naze. **14** Hagi Jonima kina huntogeno, Jisasi'a ana knafi Galili vuno

Anumzamofo knare so'e naneke huama huno, **15** Anumzamo'ma
huhampri'nea kna hago eforehie. Anumzamofo kumamo'a hago
eravao hie. Tamagu'a rukrahe huta Knare Musenkere tamentinti
hiho. **16** Galili timofo ankenare Jisasi'a nevuno Saimoni'ene
Endrukea, koganararemoke, kuko timpi netrakeno ome znagene.
Na'ankure zanagra nozame ahe ne'trene. **17** Jisasi'a anage huno
zinasami'ne, Enamage antenkena, Nagra vahe'ma avazu hu'zana
huranami'neno. **18** Higeke ame huke kuko zani'a netre'ne amage
anteke vu'na'e. **19** Ananteti Jisasi'a mago'ene osi'a nevuno,
Jemisi'a Zebeti nemofookino nefu'ene votifi mani'ne'za kukozamia
nehatizageno ome zamage'ne. **20** Neznageno zanagi higeke,
neznafa Zebetine eri'za vahe'a ana votifi nezmatreke ame huke
amage eme ante'ne vu'na'e. **21** Hagi zamagrama Kapaneam
kumate'ma umahanatite'za, mani fruhu knama egeno'a ame
huno Jisasi'a osi mono nompi vuno rempi ome huzami'ne.
22 Vahe zagamo'za tusiza hu'za rempima huzamia zankura
antri hu'naze. Na'ankure kasegere ugagota hu'naza vahe'mo'za
nehazaza osu'neanki, hanave'ane agi me'nea vahe'mo rempi
hu'nezamiankna hu'ne. **23** Anama nehigeno'a mago'mofona
agu'afi havi avamu fre'nea ne'mo osi mono nompinti kezatino,
24 Nazareti Jisasiga na'a hurantenaku nehane? Tagri tazeri
haviza hunaku neampi? Nagra antahi'noe, Kagra Anumzamofona
Ruotge hunamoke. **25** Hianagi Jisasi'a kesuno, Taganenka
atrenka atiramio! **26** Ana havi avamumo'a azeri hirahi hirahi
nehuno, tusiza huno krafage nehuno ana ne' agu'afinti atiramino
evu'ne. **27** Ana'ma hige'za vahe'mo'za tusiza hu'za zmagogogou
nehu'za, ontahige antahige hu'za, amazana na'a fore nehie,
kahefaza hanave'ane rempi nehuno, havi avamumofona kea
higeno ke'a amagenente. **28** Anama hiazamofo agenkemo'a

maka Galili kaziga ame huno vuno eno hu'ne. **29** Hanki osi mono nompinti' atirami'za Saimonine Endru kizini nonte Jemisi'ene Joniza vu'za umarer'i'naze. **30** Hagi Saimoni nenaro nerera'a avufa amuhohu kri erino maseno maninegeno, Jisasina krima eri'nea kea ame hu'za ome asami'naze. **31** Anama hige'za ana a'te vuno azante ome azeriotigeno, avufgama tevehama nehiazamo'a atrentegeno, otino ne'za kre zamante'ne. **32** Hagi zagea uramino kinagasegeno, vahe'zagamo'za krima eri'naza vahe'ene, havi avamu'mo'ma zamagu'afi mani'nea vahera zamavare'za Jisasinte e'naze. **33** Ana rankumate vahe'mo'za ana kasante eme eritru huvagare'naze. **34** Ana nehazageno rama'a ruzahu ruzahu krima eri'naza vahera zamazeri so'e nehuno, havi avamu'mo'zama rama'a zamagu'afi mani'nazana hufegi netreno, ama anazankura kea osiho huno havi avamura i'o huzmante'ne. Na'ankure havi avamumo'za Agrira ke'za antahi'za hu'naze. **35** Hagi kotu hanimpi Jisasi'a ana nompinti atiramino vuno vahe omani'afi umani'neno, anantega nunamu hu'ne. **36** Hagi Saimoni ene mago'amo'za oti'za hake'naze. **37** Hagi ome age'za erifore nehu'za, mika vahe'mo'za kagriku nehakraze hu'za asami'naze. **38** Anage huno Agra kenona zamirera zamasmi'ne, Erinketa tava'onte'ma me'nea kumatamimpi vuta, anantega mono kea huama haneno. Na'ankure Nagra e'ina agafare e'noe. **39** Anage nehuno maka Galili kaziga vano nehuno, osi mono nontamimpi mono naneke huama nehuno, havi avamutmina zamagu'afima freneana hufegi atrezmante'ne. **40** Hagi mago fugo namurenena ne'mo Jisasinte eno kepri huno agiafi traka humaseno, Muse hugantoanki Kagrama nazeri knamrenaku hanunka, amne nazeri agru huo, huno antahigene. **41** Higeno Jisasi'a asunku hunenteno, azana asuteno avako nehuno anage hu'ne, Nagri'ma

navesiana knare huo! Higeno, 42 ana fugo namumo'a ame huno vagarentegeno agru hu'ne. 43 Hanki Jisasi'a amazama hugantoazankura vahera ozamasamio huno hanave avumro nenteno, ame huno hunenteno, 44 Kama antahio, ama'nazama hugantoa zankura mago'mofona osamitfa huo. Hianagi pristi nete vunka kavufga ome averi hugeno keno. Anante Mosese'ma ko'ma huno kazeri agrumahu ofa ome hugahane hu'nea kante ome hugeno, veamo'za nege'za hago agru hu'ne hu'za hiho. 45 Hianagi ana ne'mo nevuno, kri'ama azeri knamare neazankura vahепи huama nehige'za, rama'a vahe'mo'za nentahizageno, ana kemo'a ra hiazanku, rankumapina Jisasi'a eamara huno omeno, megia rama'a vahera omani'naza kumapi umaninege'za rama'a vahe'mo'za anantega eme ke'naze.

2 Mago'a kna evutegeno Jisasi'a rukrahe huno Kapaneamu nemania kumate eman'i'nege'za, Jisasi'ma e'ne kema veamo'za antahi'naze. 2 Hagi rama'a vahe krerfamo'za atru hu'za nompine kasante'ene mani titipa nehazageno, mono kea zamasmi'ne. 3 Hagi mago'a vahe'mo'za aga sti'nea ne' avare'za e'naze. Hagi 4'a vahe'mo'za sesenku hu'za erizafa hu'za e'naze. 4 Zamagra zafahu'za ufrega osu'naze, na'ankure rama'a vahe krefamo'za manihiza hazageno, Jisasi'ma mani'nea avamenteti nomuza eri anasege'za, ana nera sesenkufi mase'nege'zanofite azerineza atrageno akoheno urami'ne. 5 Anama hazageno'a Jisasi'a avare'za e'namokizmi zamentinti negeno, agama sti'nea nera amanage huno asami'ne, Ne'nimoka kumika'a apasegantoe. 6 Hianagi anampina mago'a kasegere ugagota hu'naza vahe'mo'za mani'ne'za, anage hu'za zamagu'afina antahi'naze. 7 Na'a higeno ama ne'mo'a kumira atregantoe nehie? Anumzamofo huhaviza hunente! Iza Agra kumira atregantoe nehie, Anumzamoke

kumira atrentegahie hu'za antahinaze? **8** E'i anage hu'za zamagesa nentahizageno, Jisasi'a zamagu'afi negeno, ame huno zamasami'ne, Na'a higetma tamaguafina e'inahu antahintahia nehaze? **9** Agama sti'nea nera ina'i kema hanua kemo fru huntiegahie. Kumi ka'a atregantoe hanua kemopi, ontinka sesenku ka'a erinka vuo hanua kemo fru huntiegahio? **10** Hianagi tamagra antahitama ketma hugahaze. Vahe'mofo Mofavremo'a, ama mopafi vahe'ma kumi'ma atrente hihamua erineankino, kumira atrentegahie. **11** Nagra hugantoanki otinka sesenkuka'a erinka nonka'arega vuo. **12** Higeno ame huno otino sesenku'a eri kofino mika vahe zamure atiramino vu'ne. Nevige'za mika vahe'mo'za zamagogo fege'za, Anumzamofo agi erisaga nehu'za, e'inahu ruzahu ruzahu avu'ava zana nonkonaza erifore nehie, hu'naze. **13** Henka ete Jisasi'a Galili tiru ankenarega nevige'za, veamo'za eri hantage'za mani'nerega azageno rempi huzami'ne. **14** Agra nevuno Alfiasi nemofo agi'a Livae takisi e'neriza osi nompi mani'negeno ome negeno amanage hu'ne, Eme namage anto higeno otino amage vu'ne. **15** Hagi Jisasi'ma Livae nompi ne'za ome ne'negeno'a, rama'a takesi zagoma eneriza vahe'mo'zane, kumi vahe'mo'za Jisasi'ene amage'ma nentaza disaipolo naga'ane magopi ne'za ne'naze. Na'ankure rama'a vahe'mo'za Jisasina amagera ante'naze. **16** Hagi kasegere ugagota hu'naza vahe'ene, Farisi vahe'mo'zama, kazageno kumi vahe'ene takisi zagoma e'neri'za vahe'ene, magopima manineno tine ne'zama nenazageno, na'a higeno takesi e'neri'za vahe'ene kumi vahe'enena magopina ne'zana nene? Hu'za amage'ma nentaza disaipol nagara zmantahige'naze. **17** Jisasi'a ana naneke nentahino amanage huno zamasmi'ne, Krima e'orinaza vahe'mo'zage tusa vahetera novaze. Hanki krima eri'naza

vahe'mo'za tusa vahetera nevaze. Nagra fatgo vahe kehunakura omenoanki, kumi vahe kehuku e'noe. **18** Hagi Joni amage'ma nentaza disaipol naga'mo'zane, Farisi mono vahe'mo'za, ne'zana a'o nehaze. Anama hu'naza zanku mago'a vahe'mo'za Jisasinte e'za anage hu'naze. Na'a higeno Joni amage'ma nentaza disaipol vahe'ene Farisi vahe'mo'za ne'za a'o nehazanagi, Kagri kamagema nentaza disaipol vahe'mo'za ne'zana a'o nosaze?

19 Hazageno Jisasi'a anage huno zamasami'ne, Aravema hunakuma hirema etruma hu'naza naga'mo'za aravema hunaku hu'nesia ne'ma zamagri enema mani'nenige'za ne'zana a'o hugahazafi? Aravema hu'naku hu'nesia ne'ma mani'nenigeno'a, ne'zana a'o osugahaze. **20** Hianagi mago'a kna ne-eankino, aravema hunaku hania ne'ma avare'za vutesageno, ana knafi ne'zana a'o hugahaze. **21** Hagi mago vahe'mo'e huno atafa kenama tagato hu'nerera kasefa tavravea erinteno ohatigahie. Sese nehanigeno ampimpi nehuno mago'ene ruragato hura hu'zanku anaranosie. **22** Magore huno vahe'mo'a kahefa wainia, atafa tintafema meme akrute tro huntepina taginonte. Na'ankure wainimo'a ana tafena rutagato hanigeno, wainimo'ene ana tintafemo'enena haviza hugaha'e. Hagino kahefa wain'i'a kahefa tintafempi tagintegahie. **23** Mago mani fruhu knazupa Jisasi'a witi hozafi rukitagino nevigeno, Agri'ma amage'ma nentaza disaipol naga'mo'za mago'a witi eritaniza nene'za vu'naze. **24** Ana hazageno Farisi vahe'mo'za anage Jisasinkura hu'naze. Ko, na'a hige'za kasegemo mani fruhu knazupa osiho hu'neazana nehaze?

25 Hazageno agra anage huno zamasami'ne, Devitima mago zupama hu'nea zana tamagra hamprita ontahinazo? Agra'ene magokama vu'naza vahe'mo'za, zamaga'ma atege'za hu'naza zana zanku nehue. **26** Abiatama, ugagota Prisima maninerera,

Deviti'ma Anumzamofo nompi ufrenero, pristi vahe'moke nenea
bretia erino neneno zami'neana, kasegemo'a pristi vahe'mo'zage
negahaze hu'nea bretia ne'neazamofo kea ontahineta nehazo?
27 Huteno Jisasi'a anage huno zamasami'ne, Anumza'mo'ma
mani fruhu knama anteneana, vahe'mofo aza hinogu antene.
Hagi vahe'mo'za mani fruhu kna aza hanazagura ontene. **28**
Hagi Vahe'mofo Mofavremo'a mani fruhu knamofo ra mani'ne.

3 Mago'anee Jisasi'a osi mono nompi ufregeno, aza stinea nera
anampinka mani'ne. **2** Hagi vahe'mo'za Jisasi'ma aza stinea
ne'ma azeri so'e mani fruhu knazupa hanige'za, keagama Agrira
huntesagu zamua antete'za mani'haze. **3** Hagi Jisasi'a azama
sti'nea ne'mofonku anage hu'ne, Ama vahe'zagamofo zamavuga
eme otio! **4** Anante Jisasi'a anage huno zamasami'ne, Mani
fruhu knazupa vahe aza hanuna zamo'a kasegefinna knare
tavutava hugahumpi, havi tavutva hugahune, hifi vahe aza
hugahumpi, vahe ahe frigahune? Higeno ke'zamia omane'ne. **5**
Hagi zamarimpamo hanavetia zanku, arimpa henezmanteno
keganti kegama huno nezmageno, asunku huno aza sti'nea
nera Kazana rusuto higeno azana rusutegeno, azamo'a so'e
hunte'ne. **6** Anama hige'za Farisi vahe'mo'za ame hu'za
atirami'za Heroti naga'ene Jisasima ahe frisnaza naneke
ome huge antahige hu'naze. **7** Hagi anampinti Jisasi'ene
amage'ma nentaza disaipol naga'mo'za atre'za tinkenarega
nevazageno, Galiliti'ene Judiat'enena tusi'a vahe krerfamo'za
avaririza vu'naze. **8** Jerusalemi kumateti'ene, Itumia kuma
Jodani timofo kantu kazigati'ene Tairi kumapinti ene Saidoni
kuma agu'afinti'ene tusi'a veamo'za Jisasi'ma hiazamofo kema
nentahiza, erihantge'za Agrite omeri atru hu'naze. **9** Hagi tusi'a
vahe'ma emetruma hazazanku, amage'ma nentaza disaipol

naga'agu mago voti retro hunantenkeno veamo'za naretufe'za
omeho huno zmasamine. **10** Na'ankure rama'a vahezagama
zamazeri so'e hu'negu, krima eri'naza vahe'mo'za Jisasima
avako hanageno kri zamimo'a atre zamantesiegu oretufe aretufe
hu'naze. **11** Hagi agru osu havi avamu'mo'za, Jisasi'ma nege'za
upri hu'za ranke hu'za, Anumzamofo nemofoge hu'naze. **12**
Hianagi ana havi avamukura Jisasi'a huhankavetino, Nagra
iza'na mani'noe vahera ozmasamiho huno huzmante'ne. **13**
Hagi Jisasi'a agonarega marerino umaniteno, avesi'nea vaheke
zamagi hige'za agra mani'nerega e'naze. **14** Azageno 12fu'a
aposol namage'ante nagare huno huhampri zmantene. Agrane
mani'ne'nageno huzmantesige'za mono kea huama hanagu
huhampri nezmanteno, **15** havi avamu'ma huzmante hihamua
zami'ne. **16** Hagi 12fu'a huhamprizmanteno, Saimoninkura Pita'e
huno agi'a antemi'ne, **17** Zebeti mofavre'rarena, Jemisine Joni
kizanigura Boaneges'ne, ana agimofona agafa'amo'a mona
krafagemofo Mofavre huno znagia ante'ne. **18** Hagi Endruki,
Filipiki, Vatoromuki, Matiuki Tomasi'e, hanki Arafiasi nemofo agi'a
Jemisi'e. Hagi Tatiasiki, mago ne' agi'a Saimoni'a Zelati nagapinti
nere. **19** Hanki Judasi Isakariotikino, henka'a Jisasima ha'
vahe'amokizmi zamazampi komoru huno avrentesige'za ahesaza
nere. **20** Hagi Jisasi'a kumatega ete vige'za, hakare veamo'za eri
hantage'za ome atru hazage'za, Jisasi'ene amage'ma nentaza
disaiopol naga'mo'za ne'za neknazmia omanene. **21** Ana kema
naga'amo'za nentahiza avrenaku vu'naze. Na'ankure zamagra'ma
zamagesama antahi'zana hago negi nenegahie hu'za hu'naze. **22**
Hagi Jerusaleti erami'naza kasegere ugagota hu'naza vahe'mo'za
anage hu'naze. Belsebuli agu'afi fre'negeno, ugagota havi
Avamumofo hanavefi, havi avamura hunente hu'naze. **23** Anage

nehazageno Jisasi'a nentahino, kehige'za azageno fronka kea
anage huno zamasmi'ne, Inankna huno Sata'a, Satana ahenanti
tregahie? 24 Hagi mago rankumapi vahe'mo'za refko hu'za ha'
orente arente hanu'za oti hanave otigahaze. 25 Hagi mago
nompi vahe'mo'za refko'ma hu'za ha' orente arente hanu'za, oti
hanave otigahaze. 26 Hagi Sata'ma otinoma agra'ama ha'ma
renenteno, amu'nompinti refko'ma haniana, oti hanave otino
vagaregahie. 27 Hianagi mago'mo'e huno hanave ne'mofo
nompinti kumzafama asenakura, amane vuno musufa ose'neno,
ana nera azerino anaki atretno, anante noma'afinti'zana enerie.
28 Tamage hu'na neramasmue, Anumzamo'a vahe'mo'za ana
miko kumi'ma hanaza zane huhavizama huntesaza kumira
apase zamantegahie. 29 Hianagi Ruotge Avamumofo huhaviza
huntesimofona, kumi'a eri atre ontisigeno, kumi'amo'a mevava
hugahie. (aiōn g165, aiōnios g166) 30 Na'ankure zamagra hu'za,
Jisasi'a agru osuno havi avamu ene mani'ne hu'za hu'naza kegu
hu'ne. 31 Hagi anante Jisasi nerera'ene aganahe'zane e'za fegi'a
eme oti'neza, ome asaminkeno eno hu'za ke huzmante'naze. 32
Anante tusi'a vahe'mo'za mani kaginte'nazafi anage hu'za ome
asami'naze, antahio, negarera'ene kaganahe'zane kasarahe'za
megia mani'ne'za kagriku ke nehaze. 33 Hazageno ana
kenona'a amanage huno zamasami'ne, Iza'za nagri nenrera'ene
naganahe'za mani'naze? 34 Keganti kegama huno manigagi'naza
vea nezmageno anage hu'ne, Keho, nenrera'ene naganahe'za
ama mani'naze. 35 Hagi iza'zo Anumzamofo avesizama
amage'ma nentamo'za, nenaganaki nensaroki nenreraki hu'za
mani'naze.

4 Mago'ene Jisasi'a rantiru'mofo ankenare mani'neno naneke
erigafa huno rempi huzami'ne. Ana nehige'za tusi'a vahe

krerfamo'za regorave hazageno, Jisasi'a votifi marerino mani'nege'za, tusi'a vahe krerfamo'za tiru ankenarega mani'naze.

2 Ana nehuno agra rama'a fronka ke zamasami'ne. Rempima huzamifina, anage hu'ne, 3 Kama antahihō! Hoza ne'mo avimaza ruraniku hozarega vu'ne. 4 Ana'ma huno ome runeranigeno, mago'a avimzamo'a kamofo ankinafi evuramigeno, namamo'za eme ne'naze. 5 Mago'a avimaza avimo'a havege huno rama'a mopa omanenefi evuramiteno ame huno hagene. Na'ankure havege huno osia mopa me'negen'e. 6 Hagi zagemo'a hanatino teosaparene, na'ankure rafu'namo'a fempina uorami'negeno osapare'ne. 7 Mago'a avimaza avimo'a ave'ave trazampi evuramigeno, aveave trazamo'a hageno, rentrako higeno raga'a reonte'ne. 8 Hu'heanagi mago'a avimzamo'a tima'ane mopafi evuramiteno hageno raga'a rente'ne. Mago'amo'a 30'a rentegeno, mago'amo'a 60'a rentegeno, mago'amo'a 100'a rente'ne. 9 Ana nehuno anage hu'ne, Izano agesa me'enigeno nentahisimofona, atregeno ama kea antahise hino.

10 Hagi anama huteno Jisasi'ma Agrake'ma umani'nege'za, mago'a manigagi'naza vahe'mo'zane, 12fu'a amage'ma nentaza disaipol naga'mo'za, ana fronka keramimofo agafa'a antahise hunaku antahige'naze. 11 Jisasi'a anage huno zamasami'ne, Anumzamofo kumamofo oku'a antahintahia tamagrira ko tame. Hianagi meg'iama mani'naza vahe'mo'za fronka kege nentahize. 12 Ana higu Avontafepina anage hu'ne, kegahazanagi keama osugahaze. Antahigahazanagi antahi amara osugahaze. Zamagra aru zmagu'a rukrahe hanageno Anumzamo kumizimi eri atrezankure anara hugahie. (Ais 6:9-10) 13 Anante Jisasi'a anage huno zamasami'ne, Ama fronka kemofo agafa'a antahi ama'ma osanutma, inankna hutma mika fronka kemofo agafa'a

antahi amara hugahaze? 14 Avimaza rurani'nea ne'mo'a,
Anumzamofo ke ome krine. 15 Mago'a avimazama kamofo
ankinarega evurami'neana, mago'a vahe'mo'za Anumzamofo
kea nentahizageno, Sata'a ame huno zamagu'afima krinea
kea eritrene. 16 Havege mopafima rurani'neana, Anumzamofo
kema nentahi'za, muse hu'za ame hu'za eneri'ze. 17 Hianagi
zamagu'afina rafuna ore'neza oti hanave oti'hazankiza, anante'ma
Anumzamofo kegu hu'za hazenke zano, zamazeri haviza
huzama fore hige'za, ame hu'za atre'za nevaze. 18 Mago'amo'za
ave'ave trazampi avimaza ruranineankna hu'naze. Anamo'za
Anumzamofo kea antahinazanagi, 19 mopafi zankuke zamagesa
nentahi'za, zago afu fenoma eri atruma huzamo rezmatga
nehuno, mago'azama zamesinte'zamo zamagu'afina efreneo
Anumzamofo nanekea retrako higeno ne'za raga'a renonte.
(aiōn g165) 20 Hianagi tima'ane mopafi rurani'nea avimazana,
zamagra Anumzamofo kea antahi ankere'za, ana kea e'neri'za
nena raga'a renentaze. Mago'mo'a 30'a rentegeno, mago'mo'a
60'a rentegeno, mago'mo'a 100'a renente. 21 Jisasi'a amanage
huno mago'ane zamasmi'ne, Rampe tavi'ma rekruma hazana,
sipagampi ome nentafi, kavo agu'afinka ome nentazo? A'o
anara nosaze. Rekru hutma tavima rekru hunte azotare ome
nentaze. 22 Na'ankure miko'zama fra'ma ki'nesiazamo'a, eama
nehanigeno, oku'a me'nesiazamo'a, masare eama hugahie. 23
Izano agesa me'enigeno nentahisimofona, atregeno ama kea
antahise hino. 24 Mago'ane anage huno zamasmi'ne, Kema
nentahizana antahi so'e hiho. Tamagrama amisaza avamente,
ana avamente tamagrira neramamino, mago'ane agofetu huno
tamamigahie. 25 Na'ankure iza'o eri'enemimofona mago'ene
agofetu huno amigahie. Hagi iza'o e'orinesimofona, osiama

eri'nenia zana eritre vagaregahie. **26** Hagi Jisasi'a mago'ane
anage hu'ne, Anumzamofo kumamo'a, mago vahe'mo avimza
avi mopafi ruranino kriankna hu'ne. **27** Kriteno umasenegeno
feru ene kenage'enena hageno, ana avimza avimo'a ru hanana
huno hagegeno, anama hageana nankna huno hage'neo agra
ontahine. **28** Mopamo'a agra'a azerinena higeno ne'zama'a
rente'ne, esera asina reno rampa'a fore huteno, anante amosare
aheno, ramparera ne'zana rente avinete. **29** Ananter a raga'a
renteno nena hutegeno, agena kazaki kazinteti eme taga
hu'ne. Na'ankure hozama hamarekna egeno'e. **30** Hagi Jisasi'a
mago'ane anage huno zamantahige'ne, Inankna ke hunteta
Anumzamofo kumakura hugahune. Inankna fronka ke hunteta
eriamma hugahune? **31** Masteti raga'agna hunege'za mopafi
negrize, ama mopafima me'nea avimzana agatereno onensatfa
hu'ne. **32** Hagi kritageno'a hageno nena huno, maka hozafima
me'nea ne'zana ra huno agetenereno, rama'a azankuna'a hageno
vuno eno higeno, maka afi' namamo'za ana zafamofo tonapi nona
eme kigahaze. **33** Ana nehuno rama'a fronka kefinti zamagrama
antahi ama' hanaza avamente zamasami'ne. **34** Agra mago'a
kema hunakura fronka kefintike zamasmi'ne. Ana hu'neanagi
amage'ma nentaza disaipol nagamo'zama zamagrake'ma
mani'nageno, eriamma huno maka'zana zamasami'ne. **35** Hagi
ananzupa kinagasegeno Jisasi'a amage nentaza disaipol
naga'agura anage hu'ne, Erinketa kantu kaziga tinkenare
vamnenno huno hige'za, **36** vahe krerfa zamatrete'za Jisasi'ma
mani'nea votifi mareri'za vazageno, mago'a ventea zamagrane
vu'naze. **37** Nevazageno tusi'a ununko atuno, tina erikranto
kranto nehuno, ana votifi timo'a marevite'za higeno, timpi
votimo'a tami'za hu'ne. **38** Hagi Jisasi'a votimofona arigarega fita

runo mase'negeza, azeri oti'za anage Agrikura hu'naze. Rempi
hurami ne'moka, timo'ma tazeri nakri'za nehiana nonkano? **39**
Anante otino zaho'mofona kesuno, Tami avazago huno timofona
higeno, akoheno urami avazagene. **40** Ana higeno Jisasi'a
anage huno zmantahige'ne, Nahigetma amanahu huta koro
nehaze? Tamentintia nosazo? **41** Ana nehige'za zamagra tusi'a
zamagogo fege'za, inankna ne'mo kea nehigeno zahomo'ene
timokea ke'a antahinezmi'e hu'za hu'naze.

5 Hagi Ventefi vu'za Galili timofo kantu kaziga'a Gerasin
uhanati'naze. **2** Anama Jisasi'a votifinti eneramigeno'a, agru osu
havi avamumo agu'afi fre'nea ne'mo'a, ame huno hezamopinti
(matipinti) eme tutagiha hunte'ne. **3** Ana ne'mo vahe asenentea
kumapi mani'nege'za, mago vahemo'e huno azerino anaki
ontege, seni nofinu anaki onte'ne. **4** Na'ankure ana ne'mofona
azeriza seni nofi'nu azampi kina renentaza aeni agare azantera
kina rente'naze. Hianagi ana ne'mo'a azampine agafinema
rente'neanofira rukampruhu osi osi hu'ne. Ana higeno mago
vahe'mo'a hanaveti'za azeri arava hugara osu'naze. **5** Mika
zupa hanine, zugene vahe asenentaza kumapine agonaregane
vano nehuno, rankege huno, have erino avufa tagarago hu'ne. **6**
Jisasi'a afete mani'negeno ana ne'mo negeno, agareno agafi
ome renaren, **7** anante ranke huno kezatino, Jisasiga marerisa
Anumzamofo Mofavremoka, na'a hurante'za nehane! Nagra
Anumzamofo agifi huhanavetina negasamue, tazeri havizana
osuo! **8** Na'ankure Jisasi'a havi avamumofonku huno, Ama
ne'pintira atiraminka evuo huno hu'negeno'e! **9** Jisasi'a Kagi'a
iza'e huno antahigegen? Nagini'a hakarena mani'noe, Na'ankure
tagra rama'a sondia vahe mani'none. **10** Jisasiga amafintira
hurantegeta atreta ovamnenno huno kazikazi huno asami'ne. **11**

Hagi agonamofo asoparega rama'a afu'mo'za ne'za nene'za mani'naze. **12** Ana havi avamumo'za kazigazi hu'za antahige'za, tataregeta antu afutamimofo zamagu'afi uframaneno hu'za hu'naze. **13** Jisasi'a knareki viho huno ana havi avamutamina huzmanteg'e'za, ana ne'mofo agu'afinti atirami'za, afu'mokizmi zamagu'afi ufre'naze. Ana maka afu'tamina 2 tauseni'a afu'mo'za agonaregati tragi'za uramiza zavaniteti timpi takaure'za ti nakri'za fri'naze. **14** Anante afu kva vahe'mo'za koro nehu'za, fre'za vu'za rankumate'ene osi kumate'ene ke huganti hugma hu'za vahera zamasmi'naze. Nezmasmige'za ana veamo'za nentahi'za ana'ma hu'neaza kenaku eri hantage'za e'naze. **15** Jisasinte e'za eme kageno havi avamu'mo'ma agu'afi fre'nea ne'mo'a anante mani'nege'za ke'naze. Kukena nehuno fatgo antahintahi erino mani'nege'za, rama'a havi avamumo agu'afi fre'nea nere nehu'za koro hu'naze. **16** Hagi ana nete'ma fore'msa nehuno afute'enema fore hu'neazama ke'naza vahe'mo'za onke'naza vahe'mokizmi zamasmi vagarage'za antahi'naze. **17** Hagi ana vahe'mo'za Jisasinku hankavetiza, ama mopa atreno vanie hu'za hunte'naze. **18** Hagi Jisasi'a votifi marenerigeno havi avamu'mo'ma agu'afi fre'nea ne'mo'a, natregena kagrane va'neno huno antahige'ne. **19** Hianagi Jisasi'a nagranena ovugahane nehuno, anage huno asami'ne, Kumakarega vunka, vahe ka'afi Ramo'ma asunku'ma huganteno, razama so'eza hugante'nea zankura ome zamasamio. **20** Anage huno asamigeno atreno Dekapolisi 10ni'e nehaza kumate vuno Jisasi'ma knare huno aza hu'nea nanekea zamasmige'za, maka vahe'mo'za nentahi'za antarintru hu'naze. **21** Hagi Jisasi'a ete votifima vuno kantu kaziga Galili tiru ankenare'ma umahanatige'za, hakare veamo'za agrite e'za eme regagi ante'naze. Anama hazazanku Jisasi'a

anante mani'ne. **22** Anante osi mono nonte kva vahe zaga finti mago ne'mofa agi'a Jairusi'e nehaza ne'mo'a, eno Jisasima eme negeno'a, agafi emaseno, **23** muse hugantoanki, osi mofa'nimo'a fri'za higena neonki, enka kazana agofetu eme antegeno ofrino manino huno antahige'ne. **24** Higeno Jisasi'a ana ne'ene nevigeno tusi'a vahe krerfamo'za otufe atufe hu'za vu'naze. **25** Hagi mago ara korankria 12fu'a zage kafufi eri'nea a'mo anampi mani'ne. **26** Zago afufenoma'a ana krimoma vagarentesigu atrevagareno rama'a tusa vahe'mofa ome miza hu'neanagi, atage'za amizageno ana kri'amo'a vagaore rura hu'ne. **27** Hagi ana a'mo'a Jisasi agenke antahiteno tusi vea kevufinti, Jisasina amefiti zaza kena'are eme avako hu'ne. **28** Na'ankure antahintahi afina kukena'are ome avako hanugenoke kri'nimo'a atrenantegahie huno nentahino, **29** ome avako higeno ame huno korankrima eri'neazamo'a atrentegeno keno antahino hu'ne. **30** Hagi Jisasina mago'a hanave'amo agripinti nevigeno nentahino, ame huno ana vahe kevufinti rukrahe huno anage hu'ne, Kenani'arera iza avako hu'ne? **31** Higeno Agri amage'ma nentaza disai pol naga'mo'za anage hu'za, mika vahe'mo'za oretufe aretufe hu'nazanki nahigenka, aza navako hu'ne nehane? **32** Hianagi Jisasi'a rukrehe huno keganti kegma huno avako hu'nemofonku hakare'ne. **33** Nehakregeno ana a'mo'a koro nehuno agu'amo'a fakifaki nehigeno kri'ama amane hu'nea zanku nentahino, avuga kepri huno maka kri'amo vagarenteazana huama huno asami'ne. **34** Jisasi'a anage huno ana akura hu'ne, Mofa, kagri ka'a kamentintimo kazeri knare hianki, karimpa frune vugeno krikamo'a atreganteno. **35** Anage huno nehigeno'a, osi mono nomofo kva ne' nompinti e'naza vahe'mo'za, Jairusinku hu'za mofa kamo'a hago fri'neanki rempi

hurami ne'mofona kna omio. **36** Hianagi anama hazankea
Jisasi'a antahi amane nehuno, ana kva nera anage huno
asami'ne, Korora osunka kamentinti huo. **37** Nehuno maka
vahera maniho hunezmanteno, Pitama Jemisi nefu Joni'ma
Jemisima huno zamavarege'za amage ante'za vu'naze. **38**
Zamagrama ana mono kva ne'mofo nontema uhanatiza kazana,
ranke hu'za tusi zavi krafa hu'za zavira netageno, Jisasi'a
zamage'ne. **39** Ana nompima unefreno'a, Na'a higetma ranke
hutma zavira netaze, mofavremo'a ofrineanki amane mase'ne. **40**
Anagema hiankegura zamagra kiza re'naze. Hianagi miko meg'i'a
huzmantege'za mani'zageno, ana mofo'mofo nererane, nefane
nezanevareno amage'ma nentaza disaipol naga'a nezamavareno
ana mofa'ma hunaragi antepinka ante'nazafinka ufre'naze. **41**
Anante ana mofamofo azante akoheno aze'nerino Talita kum!
Zamagri'a kefina osi mofo'moka Nagra kagriku huanki otio hu'ne.
42 Ana mofamo'a 12fu'a zagegafu hu'neakino ame huno otino
kana vano hige'za tusi antri hu'naze. **43** Jisasi'a hanavetino
ama zankura mago vahere hutma ozmasamiho nehuno, ne'za
aminkeno neno huno zamasami'ne.

6 Hagi Jisasi'a ana kumara netreno kuma'arega ege'za,
amage'ma nentaza disaipol naga'mo'za avariri'za e'naze. **2**
Mani fruhu knama (Sabat) egeno'a agafa huno osi mono
nompi rempi huzamigeno, rama'a vahe'mo'za antahizamo'za,
antri hu'za zmagogogu nehu'za anage hu'naze, igati amanahu
antahintahia erine? Iza amanahu knare antahintahizana ami'ne,
nankna huno kagu'vazana eri fore nehie? **3** Ama kapenta ne'
Maria mofavrefi? Jemisi'ma Josefema Judasima Saimonikizmi
nempu'zimi mani'ne. Hanki asarahe'za tagrane mani'nazafi?
Anage nehu'za ha' arente'naze. **4** Anante Jisasi'a anage

huno zamasami'ne, Kasnampa ne'mofona mika vahe'mo'za
antahi amiza, ra agi'a amigahazanagi, kuma'are vahe'mo'za
antahi nomizageno, naga'amo'zane, noma'afi vahe'mo'zanena
antahi omi'naze. 5 Anampina mago'a kaguvazana Agra eri
fore osu'neanagi, mago mago kri vahete azanteno zamazeri
so'e huzmantetere hu'ne. 6 Hanki zamentintima osaza'zankura
Jisasi'a antahintahi hakare nehuno, mago'a kuma tamimpi
vano huno, Agra rempi huzami'ne. 7 Hagi Jisasi'a 12fu'a
amage nentaza disaipol naga zamagi hige'za ageno, tare
tare huno hunezmanteno, agru osu havi avamu humazmante
hihamu zami'ne. 8 Agra amana hugahaze huno zamasami'ne,
Nevanutama bretine, kutamine, zagonena erinetama oviho,
azompage eritma viho. 9 Tamaga ano vazigahazanagi, tare
kukena hutma oviho. 10 Ina nonte'ma vanutma, ana nompinke
maninetma ana kumara atretma viho. 11 Hagi mago kumate
nevanage'za oramavrege, naneketimi ontahisagetma zamatretra
nevuta, tamagareti kugusopa rupopo hunetretma vinke'za,
anazama hanaza zamo'a hazenkefi mani'naze huno zamaveri
hino. 12 Ana hige'za amage'ma nentaza disaipol naga'mo'za
vu'za, zmagu'a rukrehe hanazegu, mono kea ome huama hu'za
mika vahe zmasami'naze. 13 Ana nehu'za zamagra rama'a havi
avamura hunezmante'za, krima eri'naza vahe'mokizimi, masave
tagi'za frenezmante'za, zamazeri kanamare'naze. 14 Hagi kini
ne' Heroti'a Jisasi agi agenkemo'a ra higeno nentahige'za,
mago'amo'za hu'za mono ti frezmante Joni fri'nefinti ot'i'negu
kagu'vazana nehie hu'naze. 15 Hianagi mago'amo'za Elaaj'e
hu'za nehazageno, mago'amo'za hu'za, agra korapa mani'naza
kasnampa vahekna nere hu'naze. 16 Hagi mago'ane Heroti'ma
nentahino'a anage hu'ne, Joni agenama akafrinoa ne'mo otino

e'negahie! Hu'ne. **17** Na'ankure nefu, Filipi nenaro Herotiasi, Herotima rehanare'nea agenke Jonima huama hu'neazanku, Heroti'a huzmantege'za Jonina ome azeri'za kina nompi ome ante'naze. **18** Na'ankure Joni'a hanavetino ke huvava huno Herotina asamino, negafu a'ma rehanarenka a'ma erinanana kasege rufutaginka knare avu'avara osu'nane. **19** Ana higeno Herodiasi'a Jonina rimpa ahenteno ahe frinaku hu'ne. Hianagi ahe ofri'ne. **20** Na'ankure Heroti'a Joninku koro nehuno, kegava krintene. Na'ankure agra antahino keno hu'ne. Joni'a fatgo huno ruotage hu'nea nere. Joni agenke nentahino agogogu hu'neanagi, Jonima hania kema antahinakura muse hu'ne. **21** Mago kankamu eforema hu'neana, Herotima kasente'nea kna fore higeno, muse huno kasente'nea kna'are ne'za nenaku atru nehu'za, agri nompima eri'zama e'neriza vahe'ene, sondia vahe'mokizimi ugagota kva vahe'ene, Heroti'a ne'zana ne'ne. **22** Herodiasi mofamo'a efreno avoa eme nehagegeno, Heroti'ene ne'za neku zamagima hu'nea vahe'mo'za muse hu'naze. Ana hazageno Heroti'a ana kasefa mofara asamino, na'ankuro kave'masinia zanku'ma nantahi kesnanke'na, amane kamigahue hu'ne. **23** Heroti'a huvempa huno ana mofara asamino, na'ankuro kavesinesia zanku'ma nantahi kesnankena amane negamina, kegavama kri'hoa kumara amu'nompintira refko hu'na kamigahue. **24** Anage higeno ana mofa'mo atiramino vuno, nererankura na'ane hu'na ome antahigegahue? Higeno nerera'a anage hu'ne, mono ti frezmante Joni agenope hunka ome huo huno asamigeno, **25** ana mofa'mo'a ame huno Herotinte vuno, menintfa Mono ti frezmante Joni agenopa rukafrinka zuompafi antenka erinka eme namisane huno higeno, **26** Kini ne'mo'a nentahino Joninkura tusiza huno asuragi ante'neanagi, hanave huvempa kema mofa'ama agrane

mani'naza vahe zamufi hunte'nea kegu nentahino, i'ora osu'ne.

27 Hagi kini ne'mo'a ame huno agenama ome akafri vahe
huntegeno kina nompi vuno, Joni agena ome akafrine. 28
Ana ne'mo'a agenopa'a zoumpafi erino vuno, ana mofa ome
ami'geno, ana mofamo erino vuno nererana ome ami'ne. 29
Hagi Joni amage'ma nentaza disaipol naga'mo'za ana kema
nentahi'za, avufa'a emeri'za havegampi ome asente'naze. 30
Anante Jisasi aposol naga'mo'za, ehanati'za miko'zama nehu'za,
vahe'ma rempima hu'zami'naza nanekea eme asami'naze.

31 Jisasi'a anage huno zamasami'ne, Nagrane enketa vahe
omanitega onisia umanikasa hammeno, (na'ankure vahe'mo'za
vute'ete hazageno, ne'zama nesaza knazimi omanenegure.) 32
Zamagraku vahe omani kaziga vunaku votifi mareri'za vu'naze.

33 Hianagi zahufama nevazageno, hakare veamo'za e'irega
vazanki hu'za nentahi'za, mopafi rugagi'za miko kumapinti
veamo'za kote'za anama umanisare, ko umani'naze. 34 Hagi
Jisasi'ma anante uhanitino votifinti'ma takaireno, tusi'a vea
kevu nezamageno'a asunku huzmante'ne. Na'ankure zamagra
kvazimi omani sipisipigna hu'nazageno agafa huno hakare kea
rempi huzami'ne. 35 Hagi kinaga nesegeno'a amage'ma nentaza
disaipol naga'mo'za Jisasinte e'za anage hu'naze, Vahe omani
ka'ma kopi mani'nonkeno hago kinaga nesegu, 36 huzmantenge'za
hozafi kiza mani'naza kumapine, kuma tamimpi vu'za ne'zama
nesazazana ome miza seho hu'naze. 37 Hianagi Jisasi'a anage
huno zamasami'ne, Tamagratmi ne'zana zaminke'za neho,
hige'za zamagra anage hu'naze, 8'a ikampi eri'za erino miza eriga
mizanteti ne'zana mizaseta zamigara hu'ne hu'za asami'naze.

38 Agra anage huno zamasami'ne, Nama'a breti eri'nazafi ome
keho? Huno hige'za ome kete'za e'za 5fu'a bretigi, tare nozame

me'ne hu'za hu'naze. **39** Anante Jisasi'a amage'ma nentaza disaipol naga'a huzmanteno, zafa asinage hu'nea apepate huzmantenke'za omeri atru, eme eritru hu'za maniho huno huzmante'ne. **40** Maka vahe'mo'za refko hu'za mago'a kevufina 100'a vahe nemanizageno, mago'a kevufina 50'a nemanizageno hutere hu'naze. **41** Mani'hageno 5fu'a bretine, tare noza'ene erino kesga huno monafi negeno, Anumzamofontega susu huteno, eri korino amage'ma nentaza disaipol naga'a veva hanazegu nezamino, nozamea anazanke huno refko huno zami'ne. **42** Ana maka'mo'za nazageno zamu hu'ne. **43** Nene'zama atraza bretine, noza enena zog'i'za, 12fu'a eka eka kupi eri avite'naze. **44** Bretima ne'nazana 5tauseni'a venenemo'za ne'naze. **45** Hagi Jisasi'a ame huno amagema nentaza disaipol naga'a votifi vugote'za kantu Betsaida kaziga vihogu huzmantage'za nevazageno, vahetaminkura viho huno huzmante'ne. **46** Viho huno huso'e huzmanteteno, agonarega nunamu hunaku vu'ne. **47** Kinagama segeno'a votimo'a timofo amunompi nevigeno, Agrake moparera mani'ne. **48** Jisasi'a nezmagege'za, tusi maraguzati'za azotanu tina vakakiza vu'naze. Na'ankure zahomo tusiza huno eme zamaretunefefe'za, maraguzati'za nevazageno ko'ma atu masa hu'za nehigeno, Jisasi'a timofo avozare eno zamagatere'za nehige'za, **49** zamagrama timofo agofetu nevigeza nege'za, zamagesama antahi'zana hankrore nehu'za zamagogo nehu'za krafa hu'naze. **50** Na'ankure makamo'za nege'za zmagogogu hu'naze. Hianagi hantaka huno anage huno zamasami'ne, Nagragi oti hanavenetita, korora osiho. **51** Anage huteno mani'naza ventefi marerigeno, zaho'mo amane nehige'za tusiza hu'za antri hu'naze. **52** Na'ankure bretima tamanasino zami'nea zamofo agaf'a, ke so'e osazageno zamagu'amo hanavetine. **53**

Hanki kantu kaziga takahe'za Genesareti mopare uhanati'za, votia kina rentete'za, **54** ana votifinti atineramizageno'a, vahe'mo'za ame hu'za Jisasi'e hu'za keama nehu'za, **55** zamaga re'za vu'za e'za hu'za, ana kazigama me'nea maka kumatamimpinti kri vahetamina sesenku hu'za zamavarente'za, Jisasima mani'ne hu'zama hazankumate vu'naze. **56** Hagi ina osi kumatero rankumatero, hozafi ki'za mani'naza kumapino, Jisasi'ma virega kri vahera zamavare'za maketi kumapi ome zmantene'za, Knare zamatresanke'za za'za kena kamofo atupare azerigahuno huza antahinege'za, kukena'arema avakoma hazamokizmia kri zamimo'a vagare'ne.

7 Hagi Farisi mono vahe'mo'zane kasegere ugagota hu'naza vahe'mo'za Jerusalemi kumateti' e'za, Jisasinte emeri atru nehu'za, **2** Jisasi amage'ma nentaza disaipol nagapinti mago'amo'za zamazana sese osu'za bretia nenage'za ke'naze. **3** Na'ankure Farisi vahe'ene, mika Jiu vahe'mo'za, zimagehe'mofo zamavu zmavama avaririza, zamazana sese huso'e osune'za ne'zana nonaze. **4** Hagi maketi kumapinti ne-e'za, zamagra ne'zana onene'za zamazana sese hute'zage ne'zana nenaze. Hagi zamagra rama'a zimagehemofa kasegea eri'naze. Kapuma kavoma tinkavoma nezama anteno ne' zantamima sesehu agruma hute'za, ne'zama ne'zana azenerize. **5** Hagi Farisi vahe'mo'zane, kasegere ugagota hu'naza vahe'mo'za Jisasina antahige'za, Nahige'za kamage'ma nentaza disaipol nagakamo'za tagehe'i avu'avamofo kea amage onte'za, ne'zama nenakura zamazana sese nosaze? **6** Hazageno Jisasi'a anage huno zamasmi'ne, Aisaia'a fatgo huno krunage vahere huno krenteneana, tamagriku hu'ne, Ama vahe'mo'za zamagiteti nagi'a ahentesga nehaze. Hianagi zamagu'amo'a nagritera omaneno,

afete'are me'ne. 7 Amegati nezama'a omane mono hunenante'za,
vahe'mofo kasege rempi nehaze. 8 Hagi Anumzamo'ma
hihoma hu'nea kasegea netre'za, vahe'mofo zamuzma'mofo
ke azeri hanavetiza amage nentaze. 9 Anage huno mago'ane
zamasami'ne, Anumzamofo kasegema eritre kaziga knare
hu'naze. Hanki tamagehe'i avu'ava'mofo amagera nentaze.
10 Na'ankure Mosesi'a anage hu'ne, negafane negreranena
antahiminka agoraga'a manio. Hagi iza'o nefama nererama
agoraga'a omanino, huhaviza huntesimofona, ahe friho hu'ne
hutma nehaze. 11 Hianagi tamagra anage nehaze, aza'o nefama
nererama asamino, Nagrama tanaza hu'zama ante'noana,
Anumzamofo ami'naku ante'noe haniana e'i knare hu'ne huta
nehaze. 12 Ana nehutma, ana ne'mofona atrageno nefane
nereranena mago'zana aza nosie. 13 Tamagri tami tamavu
tamava'za rempima huzamiza'zamo higeta Anumzamofo ke'mofo
hanavea eri netreta, rama'a ama anahu'zana nehaze. 14
Hagi maka veaku Jisasi'a ke hige'za ageno anage huno
zamasmi'ne, Tamagra naneken'i'a nentahita antahi ama' hiho.
15 Magore huno fegiatima vahe'mofo agu'afima ufresiazamo'a,
vahera azeri pehena osugahie. Hianagi vahe'mofo agu'afinti
atiramino esiazamo, vahera azeri pehena hugahie. 16
[Kagesa antahinamoka antahio.] 17 Anage huteno, ana vahe
zamatreno Jisasi'a nompi marerige'za, amage'ma nentaza
disaipol naga'mo'za, ana fronka ke'mofo agafa'agu antahige'naze.
18 Anante Jisasi'a anage huno zamasami'ne, Tamagrira
knare antahi'zana omane'nefi? Tamagra antahi amara nosazo,
inankanzamo'ma fegiatima vahe'mofo agu'afinka ufrezamo'a,
vahe'mofona azeri pehena nosie. 19 Na'ankure anazamo'a
vahe'mofo agu'afina novie. Hanki rimpafi uramiteno, anantetira

rifa kerifi nevie. (Jisasima anagema hu'nea kemo'a, mafka ne'zamo'a agru huno hu'ne.) **20** Hagi Jisasi'a anage huno zamasami'ne, Vahe'mofo zmaguafinti atiramiazamo, zamazeri pehena nehie. **21** Vahe'mofo agu'afinti'ma efore'ma nehiana, havi agu'agesa antahi'zane, monko zane, kumzafa se'zane, vahema ahe fri'zana ne-e, **22** arave hu'nea a'ene vene monko avu'ava hu'zane, agraguuke antahi'zane, havi avu'ava'ene, vahe'mofo krunage hunte'zane, vahemofo kumipi avrente avu'avazane, vahemofo zanku kenunu hu'zama, knare vahemofo havige hunte'zane, neginagi avu'ava hu'zane, avufga eriantesga hu'zane, **23** ana mafkazana vahemofo agu'afinti atiramiazamo vahera azeri pehena nehie. **24** Hagi Jisasi'a otino ana mopa atreno Tairi kuma kaziga vu'ne. Vuno mago nompi ufreno, vahemofo'za emenine huza ontahisaze nehuno umanine, hianagi frakigara osu'ne. **25** Ana hianagi mago mofara havi avamu'mo agu'afi fre'nea mofa'mofo nerera'a Jisasi'ma emani'nea kema nentahino, ame huno eno agafi eme prihuno, **26** ana ara Sairofonesia kumateti Griki megi'a vahepinti a'kino, Jisasinkura muse hugantoanki havi avamura ome huntu huno asami'ne. **27** Higeno Jisasi'a anage huno ana akura hu'ne, Mofavremofo bretima erita kramofo amizamo'a knarerera osu'neanki, atregeno mofavremo kotazana nemu huteno. **28** Higeno ana a'mo'a anage hu'ne, Ramoka tamage hananagi, itaretima mofavre'mo'za nenazageno ankrama heramiam'a kramo'za zog'i'za nenaze. **29** Anante Jisasi'a anage hu'ne, E'inahu kenona hanku vuo, havi avamumo'a mofaka'amofo agu'afinti hago atiramino vu'ne. **30** Higeno noma'arega vuno ome keana, mofa'amofona havi avamumo'a ko atreno vigeno, sipayre mase'negeno ome ke'ne. **31** Anante Jisasi'a Tairi kumara atreno, Saido kumapinti rugitagino Dekapolisi kaziga, Galili

tirutega uhanatige'za, 32 mago agesa ankaniregeno kea nosia ne' avare'za e'za, Jisasinku muse hugantonanki kazana agofetu anto hu'naze. 33 Jisasi'a veara nezmatreno ana ne' awareno znagrake umanine'ne, agesa gampi azana nevazino, avetu aheno azankonu aganefunare avako nehuno, 34 kesga huno monafi negeno ra asimu nenteno, Efata huno hu'ne, (ana kemofo agafa'a ruhagro huo hu'ne.) 35 Higeno ame huno ana ne'mofo agesamo'a ru hagro higeno, agefunamo'a oza higeno, knare huno kea hu'ne. 36 Jisasi'a amazama huazana vahera ozmasamiho huno nezmasamiana netre'za, ete mago'ane vahera huama hu'za zamasami'naze. 37 Hagi tusi zamagogogo fege'za, Agra mika' zana knare'za nehie hu'za nehu'za, zamagesa ankanire'naza vahe erinkro huzmanteg'e'za, knare hu'za kea nentahize. Hagi zamagnefu'na kna hu'nea vahe zamazeri so'e hige'za knare hu'za kea nehaze hu'za hu'naze.

8 Hagi ana knafina maka veamo'za mago'ene eritru hazageno, ne'zana omanegeno, Jisasi'a amage'ma nentaza disaipol naga ke hige'za ageno anage huno zamasmi'ne. 2 Nagra ama vea krerfagura nasunku huzmantoe. Na'ankure zamagra tagufa kna nagri'enena mani'zageno, ne'zama ne'zana omene'ne. 3 Nagrama huzmantesuge'za kuma zimirega zamaga'ma netesige'za vanu'za, mago'amo'za afeteti e'nazanki'za kantega utraka hugahaze. 4 Hige'za Agri amage'ma nentza disaipol naga'mo'za anankemofo nona'a anage hu'za asami'naze, vahe omani mopafi mani'honanki inantegati ne'zana erizamisunke'za neganare hugahaze? 5 Hazageno Jisasi'a huno, Nama'a breti eri'naze? huno zamantahigge'za, 7ni'a breti eri'none, 6 hazageno, Jisasi'a ana maka veara mopafi maniho huno zamasamige'za manizageno, 7ni'a bretia erino Anumzamofo

susu hunteteno, tamanasino amage'ma nentaza disaipol nagara
zamige'za, ana veara refko hu'za zami'naze. 7 Ana nehazageno
onensa nozamene mago'a me'negeno erino Anumzamofo susu
hunteteno, amagema nentazana disaipol nagakura eritma zamiho
huno zamasmi'ne. 8 Maka vahe'mo'za ana ne'za nenageno
zamu hige'za ankra'ama atrazama'a, amagema nentaza disaipol
naga'mo'za 7ni'a ra eka eka kupi zogiri avite'naze. 9 Ana
vahera 4tauseni'a vahe nazamo'za netageno, huzmantege'za
vu'za e'za hu'naze. 10 Jisasi'a anama huteno, ame huno
amage'ma nentaza disaipol naga'ane votifi mareri'za Talmanuta
kaziga vu'naze. 11 Anante Farisi vahe'mo'za e'za Jisasina ke
hakare hunte'za, Monafinti ruzahu hankave kaguvaza erifore
hugeta kamnenno hu'za rehe'za ke'naze. 12 Hagi Jisasina
rimpamo'a kna nehigeno anage hu'ne. Na'a hige'za meni
knafi vahe'mo'za avame'za kenakura nahaze? Nagra tamage
hu'na neramasamue, mago avame'zana ama knafi vahe'mo'za
onkegahaze. 13 Ana huteno zamatreno ete votifi marerino kantu
kaziga vu'ne. 14 Hagi amage'ma nentaza disaipol naga'mo'za
zimagekani'za bretia eri'za omazanagi, magoke bretige votifina
me'nege'za vu'naze. 15 Nevazageno Jisasi'a huno, Farisi
vahe'mokizmi zistigu'ene kini ne' Heroti zistigura kva hiho. 16
Hige'za zamagra zamagra ke huge antahige hu'za bretima erita
ome'nona zanku nehugahie hu'za hu'naze. 17 Nehazageno
Jisasi'a antahino keno nehuno, Nahigeta breti omane'nea
zankura huge antahige nehaze? Tamagra ketma antahi amara
osu'nazafi? Tamagri tamagu'amo'a eriginefi? 18 Tamavurga
me'neana ke so'e nosazafi? Tamagesama me'neana antahi
so'e nosazo? Tamagrira tamage'kaninegahie. 19 Ko'ma 5fu'a
breti tamanasina, 5 tauseni'a venene zami'noge'za nene'za

atrazama'a, nama'a eka eka kupi erivite'naze? 12fu'a eka eka
kupi zogiri'none hu'naze. 20 Hagi 7ni'a bretireti tamanasi'na
4tauseni'a vahem'a zami'noge'za nene'za atrazama'a, nama'a
eka eka kupi zogiri avite'naze? Hige'za 7ni'a kupi zogiri'none
hu'za hu'naze. 21 Anante Jisasi'a anage huno zamasami'ne,
E'ina'ma hu'noazankura menina tamagra tamagesa antahi'ama
nosazafi? 22 Ana hige'za zamagra Bedsaita kumate azageno,
mago'a vahem'o'za avusu hu'nea ne' avare'za Jisasinte e'naze.
Avurgare avako hinkeno so'e huntenogu hanaveti'za Jisasina
antahige'naze. 23 Ana hazageno, Jisasi'a avusu hu'nea ne'mofo
azante avazu huno kumara atreno megj'a vuteno, Jisasi'a
avufi avetu ahenenteno, azanu avako nehuno, Mago'azana
negano? Huno antahigene. 24 Higeno kesga huno avua
negeno, Vahera vano nehazage'na zamagoanagi, zafamo
vano nehiaza nehige'na nezmagoe huno hu'ne. 25 Anante
Jisasi'a mago'ene azanu avurgare avako higeno, ana ne'mofo
avurgamo'a hari higeno, ke ankereno negeno maka'zana keama
huno ke'ne. 26 Anante Jisasi'a hunenteno, Kumapina ufrege
efrege osunka, fatgo hunka nonkarega vuo huno asami'ne.
27 Jisasi'a amage nentaza disaipol naga'ane Sisaria Filipai
kumatamimpi vu'naze. Kantegama nevu'za Jisasi'a anage huno
zmantahige'ne, Nagrikura vahem'o'za iza'e hu'za neheze? 28 Hagi
mago'amo'za, hu'za mono ti frezamante'nea Joni'e hu'za nehaze.
Hagi mago'a mo'za, kasnampa ne' Elaija'e hu'za nehaze. Hagi
mago'amo'za korapa kasnampa vahepinti mago'zmimo'e hu'za
neheze. 29 Anage hazageno Jisasi'a zamagri zamantahigeno,
Hagi tamagra iza'e hutma Nagrikura nehaze? Higeno Pita'a
kenona huno, kgra Kraisige, Anumzamo'ma huhamprino
vahem'a zamavaregahanema hu'nea nere hu'ne. 30 Agra hu

hankavetino mago vahera ana naneke huama hutma ozmasmiho
huno zamasmi'ne. **31** Anante Jisasi'a erigafa huno amage'ma
nentaza disaipol naga'a rempi huzamino, Vahe'mofo Mofavremo'a
rama'a ata e'nerisigeno, mono kva vahe'mo'zane, ugagota
kva vahe'mo'zane, kasegere ugagota hu'naza vahe'mo'za
zamefi humiza ahefrisageno, tagufagna maseteno otigahie
huno zamasami'ne. **32** Hagi ana nanekea huama huno amate
zmasamigeno, Pita'a nentahino Jisasina avaregantiteno, agafa
huno e'inahu kea osuo huno kesu'ne. **33** Hianagi Jisasi'a rukrahe
huno, amage nentaza disaipol nagatega nezmageno Pitana
kesuno, Sataga manignenka namefiga'a evuo, Anumzamofo
antahintahi novaririnanki, vahe'mofo antahintahi nevaririne. **34**
Anante Jisasi'a maka veamokizmi ke hige'za, amage'ma nentaza
disaipol naga'ene emetru hazageno, anage huno zamasami'ne,
Mago vahe'mo nagri namage'ma antenaku'ma hanuno'a, agra'a
avesi'zana netreno, keka zafa'a erigofino namage egahie. **35**
Na'ankure iza'o, agra'a agu'vazino eri so'e huku hanimo'a,
asimu'a atregahie. Iza'o nagriteku'ene Knare Musenkerema
asimu'a atresimo'a agu'vazigahie. **36** Mago vahe'mo'ma ama
mopafi fenoza eri atruma nehanigeno, agu amema'a fnanema
haniana, nankna aza hu'za erigahie? **37** Na'a vahe'mo'a asimuma
erisigura nona'a huno Anumzamofona amigahie? **38** Iza'o ama
knafi keontahi kumike vahepi, Nagriku'ene Nanekenimofoma
agaze huntesimofona, henka Vahe'mofo Mofavremo Nafa'amofo
hanavefima routage ankero vahe'ane esuno'a, Agranena
zamagaze hunte'nesamokizmia,eme agaze huzmantegahie.

9 Hagi Jisasi'a mago'ane zamasamino, Tamage hu'na
neramasmue, amafi otiza mani'naza vahepintira, ofri mani'ne'za
Anumzamofo kumamo'a hanave'ane esige'za kegahaze. **2** Hagi

6'a zagegna evutegeno, Jisasi'a Pitama, Jemisima, Jonikizmia
zamavareno za'za agonafi mareriza zamagrake umani'ne'za,
negageno Jisasi avufagamo'a rukrehe huno ruzahne nehigeno,
3 kukena'amo'a efe anentake huno tampre tampre hu'ne.
Mopafina kukena sese nehigeno e'inahukna efenentake nosiaza
huno efenentake hu'ne. **4** Hagi Elaija'a Mosesi'ene zamavuga
efore huke Jisasi'ene naneke hu'naze. **5** Ana higeno Pita'a
anage huno Jisasina asami'ne, Hurami' ne'moke, knare amafina
mani'none. Hagi tagufa tona nona kigahune. Mago nona Kagriki,
mago nona Mosesinki, mago nona Elaijanki huta kigahune.
6 Na'ankure zamagra tusi koro nehazageno, na'ane naneke
hugahie, Pita'a ontahineno ana kea hu'ne. **7** Anante hampomo
refitenezmantegeno, mago agerumo amanage ana hampompinti
hu'ne, ama'i tusiza hu'na navesima nentoa Mofavreni'e. Agrama
hania kea antahi amiho! **8** Hagi keganti kegma hu'za kazana,
ame huke Moseke Elaijake omani'nakeno, Jisasi'a Agrake
mani'nege'za ke'naze. **9** Hagi zamagrama agonaregati magoka
eneramizageno hanave ke zamasamino, ke'naza zana vahera
ozmasamitfa hu'enkeno, Vahe'mofo Mofavremo'a fripinti otiteno
hu'ne. **10** Hagi fritena otigahema hia nanekema zamagra'a
nentahiza, na agu'agesare nehie hu'za hu'naze. **11** Anante
zamagra Jisasina anage hu'za antahige'naze, na'a hige'za
kasegere ugagota hu'naza vahe'mo'za, hu'za Elaija'a etenkeno'e
hu'za nehaze? **12** Jisasi'a anage huno zamasami'ne, Tamage
Elaija ko eno maka'zama haviza hu'neazana eriso'e hu'ne. Hagi
na'a higeno avontafepina krenteno, Vahe'mofo Mofavremo'a
rama'a ataza erina, vahe'mo'za zamefi humigahaze hu'ne? **13**
Hianagi anage hu'na neramasamue, Elaija'a ko' ehanatige'za
nanknazama hunte'naku'ma haza'zana avontafepima kre'nea

kante ante'za maka'zana hunte'naze. **14** Jisasi'ene tagufa amage'ma nentaza disaipol naga'mo'zama, ete ruga'a amage'ma nentaza disaipol nagatema, e'za eme zamagazana kasegere ugagota hu'naza vahe'mo'za keha renezmantazage'za eme zamage'naze. **15** Anante ana maka vahe'mo'za Jisasina nege'za antri nehu'za, ame hu'za zamagare'za vu'za muse ome hunte'naze. **16** Jisasi'a huno, Na'antru kehara zamagranena nehaze huno zamantahige'ne? **17** Tusi'a vahepinti mago'mo ana kemofo nona'a anage hu'ne, Rempu hurami ne'moke, havi avamumo agu'afi mani'neno agira eri antrako higeno, ke nosia mofavreni'a avarena Kagrite neoe. **18** Anama havi avamu'mo'ma agu'afi nefreno'a azeri traka hutregeno mopafi masenegeno, ahirahi neregeno agipinti agremo zuzu nehigeno, avera anikreki nehuno mase havavu nehie. Ana nehige'na avre'na Kagri kamage'ma nentaza disaipol nagate havi avamu humegi atresazegu zamantahigo'anagi, azeri so'e huonte'naze. **19** Ana kemofo nona'a Jisasi'a anage huno zamasami'ne, Tamagra tamentinti osu vahere! Nama'a gna tamagra nena manigahue? Nama'agna tamagri kna erina vugahue? Ana mofavre avaretma Nagrite eho. **20** Hagi ana mofavre aware'za azageno, havi avamumo Jisasima anama negeno'a, ana mofavre azeri traka hutregeno mopafi traka huno maseno rukre rukre nehigeno, agipintira agremo'a zuzu hurami'ne. **21** Ana nehigeno Jisasi'a ana mofavremofo nefana antahigeno, Nanknafi ana zana agafa hu'ne? Higeno, mofavre mani'negeno anzana fore humine huno hu'ne. **22** Rama'a zupa tevefine tirupine ahefri'naku azeri traka hunetre. Hagi Kagrama azahuga hunesunka, kasunku hurantenka taza huo huno hu'ne. **23** Higeno Jisasi'a anage huno ana mofavremofo nefana asami'ne, Na'a higenka kagrama

azahuga hunesunka azeri otio hunka nehane? Hagi mago'moma
amentinti huno, maka'zana fore hugahie hanimofontera, amane
maka'zana fore hugahie. 24 Ana mofavremofo nef'a ranke huno
anage hu'ne, namentinti huanki namentintima osu'zana naza
huo! 25 Hagi Jisasi'ma keama rama'a vahe'mo'za ame hu'za
eritru nehazageno, havi avamura hanavetino hunteno, Kagra
vahe'mokizmi zamazeri negi nenenga zamagi zamazeri antrako
nehana havi avamumoka, hugantoanki agu'afintira atiraminka
nevunka, mago'anena eofro. 26 Higeno ranke huno azeri tagosi
tagosi nehuno atiramino enevigeno, ana mofavremo fri vahekna
huno mase'nege'za, hago frine hu'za hakare vahe'mo'za sumi
sumi ke hugantigama hu'naze! 27 Hianagi Jisasi'a azante
akoheno azeri otigeno ot'i'ne. 28 Ana huteno Jisasi'a nompi
umarerige'za, amage'ma nentaza disaipol naga'mo'za, Agrane
zamagraku umani'ne'za, na'a higeta havi avamura ahenati
notrone hu'za antahige'naze? 29 Hazageno Jisasi'a anage
huno zamasami'ne, Amana huknazana, nunamuhu kantetike
huntesageno atiramigahie. 30 Hagi Jisasi'ene amage'ma nentaza
disaipol naga'mo'za ana kumara atre'za, atiramiza Galili kaziga
rukitagiza vu'naze. Hianagi Jisasi'a kama vazama'a mago vahemo
antahi zankura ave'osine. 31 Na'ankure amage'ma nentaza
disaipol nagara rempi hunezamino, anage huno zamasami'ne,
Vahe'mofo Mofavre avare'za ha' vahe zamazampi antesage'za
ahe fritesageno, tagufa kna maniteno kerifintira otigahie. 32
Hianagi ana naneke antahi ama nosu'za, antahige'zankura koro
hu'naze. 33 Anantetira Kapaneamu kumatega ete'za, Jisasima
nompinka enemanino'a anage huno zamantahige'ne. Kantegama
ne-eta na'anku keaga huta e'naze? 34 Hianagi kantegama
ne-eza i'za amu'nontifintira ugagota hu'ne hu'za hugantugama

hu'nazagu, zamagra kea osutfa hu'haze. 35 Anante'ma Jisasi'ma mopafima nemanino'a 12fu'a amage'ma nentaza disaipol naga'a, kehuno anage huno zamasami'ne, Iza'o ugagota hunaku'ma hanimo'a, henkarfa nemanino, maka vahe'mofo eriza vahe manigahie. 36 Agra osi mofavre amunozmifi azante azerino azeri onetino, anage huno zamasami'ne. 37 Iza'o amanahu'kna osi mofavre, Nagri nagifi avreno azeri so'e huntesimo'a, Nagri navareno nazeri so'e hunantegahie. Iza'o Nagri'ma nevareno nazeri so'e hunante'nimo'a, Nagrike navareno nazeri so'e osugahianki, Nenfa hunantege'na e'nomofo avreno azeri so'e huntegahie. 38 Anante Joni'a Jisasina asamino, Hurami ne'moka mago ne'mo kagri kagifi havi avamutamina humegi netregeta negeta, ana osuo huta hunte'none. Na'ankure ana ne'mo'a tagranena vano osu'negu ana osuo huta asevazinte'none. 39 Hianagi Jisasi'a anage hu'ne, l'o huonteho, na'ankure mago vahe'mo'e huno Nagri nagifima kaguvazama nehanimo'a, hantga huno hu haviza hu onantegahie. 40 E'ina hu'negu iza'o tagri'ma ha'marema norante'nimo'a, tagri kaziga mani'ne. 41 Na'ankure tamage hu'na neramasamue, iza'o, Kraisi amage'ma nentaza disaipol naga zamaza hanue huno nehuno, tima afi tamisimofona, mizama'amo'a fanane osugahie. 42 Jisasi'a anage huno zamasami'ne, Iza'o ama osi mofavremo'za, Nagrite'ma zamentinti nehaza mofavre nagama kumipi zamarentesamokizmia, tusi'a monu havereti anankempi rentete'za, hagerimpi matevu'za atresageno uramisiana knare'zantfa hugahie. 43 Hagi kazamo'ma kumipi kavare nentesigenka akafri atro. Na'ankure ru tare kaza me'enigeno asu osu tevava tevefi kavarente zanku, magoke kaza me'nena manivava asimu erisanana knare hugahie. (Geenna g1067) 44 [Anampina kanimo'a zamufgafi manivava hugahie.

Hanki tevemo asu osu tevava hugahie.] 45 Hagi kagamo'ma kumipi kavare nentesigenka akafri tro, na'ankure ru tare kaga me'neno asu osu tevava tevefi kavarente'zanku, magoke kaga me'nena, manivava asimu erizampi ufresanana knare hugahie.

(Geenna g1067) 46 [Anampina kanimo'a zamufgafi manivava hugahie. Hanki tevemo asu osu tevava hugahie.] 47 Hagi kavurgamo'ma kumipi kavare nentesigenka, anankavuraga tagati atro, na'ankure ru tare kavurga me'neno, asu osu tevava tevefi kavretre'zanku, magoke kavurgama me'nena, Anumzamofo kumapima ufresanana knare hugahie. (Geenna g1067) 48 Anampina kanimo'a zamufgafi manivava hugahie. Hanki tevemo asu osu tevava hugahie. (Ais 66:24) 49 Na'ankure hagereti'ma ofama eri hagama nehiaza huno ana mikomofona tevenu kre fatgo hugahie. 50 Hagemo'a knare hu'neanagi, haga'ama atresigenka, inankna hunka ete kagra eri haga hugahane? Tamagra hagegna huta amuno tamifina ovesinte avesinte hutma tamarimpa frune maniho.

10 Hagi Jisasi'a ananku'ma atreno Judia kaziga vuno Jodani tina takaheno kantu kaziga vu'ne. Nevige'za tusi'a veamo'za mago'ene Agrite emeri atru hazageno anante umani'neno, ko'ma nehiaza huno naneke mago'ene agafa huno rempi huzami'ne. 2 Farisi vahe'mo'za e'za Jisasina rehe'za anage hu'za antahige'naze, vemoma nenaro atrezamo'a kasege amage antegahifi? 3 Hu'za nehazageno ana kenona'a anage huno zamasami'ne, Na'a hiho huno Mosesi'a kasegea krerami'ne? 4 Hige'za Zamagra anage hu'naze, Mosesi'a avompina, vemo'a nenaro atrenakura amane katroe huno eriamahu avona kre nemino, huntenkeno vugahie. 5 Hianagi Jisasi'a amanage huno zamasmi'ne, Na'ankure tamarimpamo'a hankavetino erigi'nea

zanku huno Mosesi'a ana kasegea kreno tamami'ne. 6 Hianagi Anumzamo'a ese agafare vene a'ene trohu zanante'ne. 7 E'i ana agafare vemo'a nefane nereranena netreno, nenaro'ene hagerfino, (Diu-Kas 24:1, Jen-Agf 1:27, 5:2) 8 erimago znavufa neseke, mago'ane tare vahera omanina'anki, magoke mani'na'e. 9 E'ina hu'negu nazano Anumzamo'ma eri hagerafi neniazana, atregeno mago vahe'mo'a eri ovasaneno. 10 Ete mago'ene nompi umarer'i'za mani'neza amage'ma nentaza disaipol naga'mo'za aravema refutagizankura antahige'naze. 11 Jisasi'a ke'hona zamire anage huno zamasami'ne, Iza'o ese a'ma netreno aru a'ma erisia ne'mo'a, ese a'mofona kumi huntenu monko avu'avaza hugahie. 12 Hagi mago a'moma neve netreno, aru ve eri snimo'a, monko avu'ava hugahie. 13 Anante vahe'zagamo'za ne'one mofavreramina Jisasi'ma azanteno asomu huzmantenogu zmavare'za neage'za, amage'ma nentaza disaipol naga'mo'za kezamasu'za azeri amuho osiho hu'naze. 14 Hianagi Jisasima nezmageno asi vazigeno, anage huno zamasami'ne, Zamazeorita zamatrenke'za osi mofavre'mo'za Nagrite eho. Na'ankure Anumzamofo kumara e'inahu vahe'mofo kuma me'ne. 15 Tamage hu'na neramasamue, iza'o Anumzamofo kumama mofavre'moma eneriaza huno e'orisimo'a, uofretfa hugahie. 16 Jisasi'a anage huteno, ana mofavre'rami zamavareno, azana zamagofetu anteno agafa huno asomu kea huzmante'ne. 17 Hagi Jisasi'a otino kantega nevigeno mago ne'mo negeno, agareno agafi rena omenereno anage huno hu'ne, knare rempi hurami ne'moka, nankna hanuna manivava asimura erigahue? (aiōnios g166) 18 Higeno Jisasi'a anage huno ana nera asami'ne, Na'a higenka kagra knare hu'nane hunka nehane? Mago vahe'mo'e huno knare osu'neanki, Anumzamo Agrake

knarera hu'ne. 19 Hagi kasegefina ko amanage hu'negenka antahinane, vahe ahe ofrio, rumofo a'enena monko'zana osuo, kumzafa oso, vahera havige huozmanteho, vahezana eri savarira osiho, negrerane negafa kea antahi zanaminka zanamage antegahane hu'negenka antahinane. 20 Anante ana ne'mo'a Jisasina anage huno asami'ne Rempi hurami ne'moka, osi'ma mani'noretima eno menima ama knarema eana, nagu'areti hu'na maka ana kasegea amage ante'noe. 21 Jisasi'a ana nera negeno avesinteno anage hu'ne, Mago'zanku atupa hu'nane, vunka inanknazama ante'nesnana zana, maka zagore ome atrenka eritenka, ana zago erinka zamunte omane vahe nezamigeno, monafinka fenonka'a meno. Ana nehunka kagra, Nagri eme namage'anto. 22 Ana naneke nentahigeno, avugosamo ruzahē higeno, rama'a afufeno ante'negu rimpagna nehuno atreno oti'no vu'ne. 23 Vigeno Jisasi'a ome zamage eme zamage nehuno, amanage huno amage'ma nentaza disaipol naga'a zamasmi'ne, Afufenozamine vahe'mo'za Anumzamofo kumapi ufraknu'ma hanazana, tusi'a amuho hugahaze! 24 Anagema hige'za amagema nentaza disaipol naga'mo'za antri ana kegura hu'naze. Hianagi mago'ene Jisasi'a anage huno zamasami'ne, Mofavre naga'mote, Anumzamofo kumapima ufre'zamo'a tusi'a amuho hu'ne! 25 Kemoli afumo'za nekazamofo kampima ufrakuma nehzana amuhoa hunozmante. Hianagi afufenone vahe'mo'za Anumzamofo kumapi ufre'naku hanazana, tusi amuho huzmantegahie. 26 Mago'ene antri hu'za tusi zmagogogu nehu'za, zamagra zamagra anage hu'naze, hagi iza manivava manizana erigahie? 27 Hazageno Jisasi'a nezmageno ana kenona amanage huno hu'ne, Vahetfamota amanahu'zana hugara osu'nazanki, Anumzamo'a amane maka'zana hugara

hu'ne. 28 Higeno Pita'a anage huno Jisasina asmi'ne, ko, tagra mafka'zana atreta kagri kamage'nentone. 29 Higeno Jisasi'a anage hu'ne, Tamage hu'na neramasamue, iza'o Nagriku'ene Knare Musenkereku'ma huno noma'afi, afuhe'impi, asarahehe'impi, nererampi, nefampi, mofavre'zaga'afi hoza ramima'ama atresimo'a, 30 ana nona'a maka'zana 100'a agatereno menina ama knafina rama'a e'nerino, rama'a kuma'ene, nefu'zane nesaro'zane nererane mofavre' naga'ane, hoza'ane e'nerisige'za, vahe'mo'za azeri haviza nehanageno, henkama esia knarerera manivava asimu erigahie. (aiōn g165, aiōnios g166) 31 Hianagi rama'amo'za ugagota hu'enamo'za, henka esnage'za, rama'a henka e'enamo'za, ugagota hu'za vugahaze. 32 Hagi Jerusalemi vu kantega mareri'za nevazageno, Jisasi'a ugota huno vu'ne. Hianagi amagema nentaza naga'mo'za antri nehazageno, zamavaririza vu'naza vahe'mo'za koro hu'naze. Hianagi Jisasi'a 12fu'a amage'ma nentaza disaipol nagara zamare kanti mago'ene zamanteno, agafa huno agrite'ma fore hania zamofo naneke zamasami'ne. 33 Keho, Jerusalemi kumate marerita meni nevunankino, Vahe'mofo Mofavrea azeriza ugagota mono kva vahete'ene kasegere ugota hu'naza vahe zamazampi avrentegahaze. Zamagra ahe friho nehu'za, fegi'a vahe zamazampi avrentegahaze. 34 Ana vahe'mo'za huhaviza hunente'za, zamavetu ahenente'za sefunemiza, ahe frigahaze. Hianagi tagufa zagekna zupa frinefintira otigahie. 35 Anante tare Zebeti nemofoke Joni'ene Jemisikea Jisasinte e'ne anage hu'na'e, Hurami ne'moka, menima tagrima tavemanesiza hurantogu kantahinego'e? 36 Jisasi'a anage hu'ne, Na'a huranantesuegu neha'e? 37 Anage huke asami'na'e, monafima hihamu hanaveka'afima kinima umaninunka tatregeno, mago'mo'a

kazantmaga manina, mago'mo'a kaza hoga'a maninogu nehue.

38 Hianagi Jisasi'a anage huno znasami'ne, Tanagra antahitna ketna osu na'azanku nantahinega'e! Tanagra nesua kapufintira negaha'o, hifi tima fresuaza hutna, tina fregaha'o? 39 Higeke ana netremoke anage huke Jisasina asami'na'e, tagra amane negahu'e huke hakeno, anante Jisasi'a anage huno znasami'ne, Nagrama nesua kapufintira amane neta, tima frezama nehua tina fregaha'e. 40 Hu'neanagi nazantamaga mani'zane, naza hogama mani'zana Nagri'zana omane'ne. Anumzamo'ma huhampri zamanteno, retro'ma huzmanteno erigahazema hu'nea vahem'za erigahaze. 41 Anage nehige'za 10'a amage'ma nentaza disaipol naga'mo'za ana naneke nentahi'za, Jemisine Jonigiznia agafa hu'za zamarimpa aheznante'naze. 42 Hagi Jisasi'a mika'amokizmi ke hige'za ageno anage huno zamasmi'ne, Megi'a vahepinti kva vahere hu'za antahizamiza vahem'za ra vahem'zimi nemanizage'za, iza'zo ra zamagima eri'za vahem'za hanave zamireti zmagatere'za kegava hunezmantaze. 43 Hu'neanagi tamagra anahuknara osugahaze. Hianagi iza'o ra vahem'za hanimo'a, tamagri amu'nompina eri'za vahem'za hanimo'a, mika'motma kazo kazo eriza vahem'za manigahie. 45 Ana hu'negu Vahe'mofo Mofavre'mo enena, eri'za erintehogura ome'ne. Hianagi eri'za erino tamagri tamaza nehuno, Agra'a asimura atreno rama'mokizmi miza sezmantenaku e'ne. 46 Hagi zamagrama Jeriko kumate ehanatite'za, Jisasi'ene amage'ma nentaza disaipol naga'ene tusi'a veamo'za ana kuma atre'za nevazageno, Timeasi nemofo Batamiasi'a avusuhi ne'mo, kamofo ankenarega mani'neno, azama hanagu meme hu'ne. 47 Hagi ana ne'mo'a antahiamma Nazareti Jisasi ne-e hiankema

nentahino'a, agafa huno kezatino, Jisasiga Deviti nemo fogoa
nagrira kasunku hunantenka nazahuo! **48** Hage'za rama'a
vahe'mo'za kesu'za, kagra tagano hu'naze. Hianagi mago'ene
kezatino, Jisasiga Deviti nemo fogoa nagrira kasunku hunantenka
nazahuo! **49** Higeno Jisasi'a nevifinti uotino, Ke hinkeno eno
hige'za, zamagra ana avusu hu neku, kagriku ke nehianki
krimpamo'a so'e nehinkenka otinka eno hu'za hu'naze. **50** Ana
ne'mo zanra anakreku'a netreno ame huno otino Jisasinte e'ne.
51 Higeno anante Jisasi'a anage hu'ne, Na'a hugante'huegu
kave'nesie? Hurami ne'moka, ete navu kenaku nehue. **52**
Higeno, Jisasi'a anage huno asami'ne, Kamentintimo kazeri so'e
hianki vuo higeno, ame huno avurgamo'a ete hari higeno amage'
avaririno kantega vu'ne.

11 Hagi Jerusalemi kuma tava'onte e'naze. Betfakene Betania
Olive agonare me'nea kumate ne-eza, Jisasi'a tare amage'ma
nenta'a disaipol netre'na huznanteno, **2** anage huno znasami'ne,
Tanagra ugoteta antu kumapi vi'o. Kasefa donki vahe'mo'a
agumpi omaninenia kina arente nenigeta ome kenutna,nofira
eri katufetna avazu huta e'o. **3** Hanki ana nehanakeno mago'a
vahe'mo, na'a hu'naku nevra'e huno hinketna'a anage hi'o,
Ramofona eri'za me'ne hutna hanakeno'a, ame huno atrenketna
avretna egaha'e. **4** Huno huznantegeke karanka nevu'ne
ome ka'ana, fegia nomofo kafante rente'nagene ome negene
katufe'na'e. **5** Anante oti'naza vahe'mo'za, na'a hunaku donkia
katunefae hu'za znantahige'naze? **6** Hazageno Jisasi'ma hu'nea
kea nezmasamige'za, anante'ma oti'naza vahe'mo'za knarere
hu'za huznante'naze. **7** Anante ana kasefa donkina avre'ne
Jisasinte ne-ene anakreku'zani zafi'ne ana donkimofa agumpi
tafevasi nentakeno, Jisasi'a ana agofetu manino vu'ne. **8** Mika

veamo'za zaza anakre ku'zimi zafiza kampi vasiza nevazage'za,
mago'amo'za zafa asina hozafinti akafr'i'za kampi tafe vasiza
nevazageno, Jisasi'a ana tafete vu'ne. **9** Hagi kote'za vaza
vahe'mo'zane henkama aza vhemo'zanena amrara hu'za ranke
hu'za muse hunente'za, Tazahu nera, hosanna ramofo agifi ne-
emofona asomu huntesanie! (Sam-Zga 118:25-26) **10** Nerafa
Deviti nagapintima ne-emofonkura marerisa Anumzamofona
muse hunenteta, Tazahu ne'mofona agi'a ahentesga hanune. **11**
Anante Jisasi'a Jerusalemi kumapi vuno, ra mono nompi ufreto
maka'za ome kagino ke vagareteno, atiramino 12fu'a amage'ma
nentaza disaipol naga'a zagemo kinaga segeno nezamavareno
atreto Betani kumate vu'ne. **12** Hagi masete'za nanterana Betani
kumara atre'za neageno, Jisasina aga ate'ne. **13** Fiki zafa'mofo
asina kuronkuro huno ogamanu me'negeno negeno, nezama
rente'nenigu kenaku eme ke'ne. Hianagi eme keana asinage
me'negeno ke'ne. Na'ankure fiki zafa raga rentekna omane'ne.
14 Ana higeno ana zafamofonkura anage huno hu'ne, Mago'ene
raga oresnanke'za veamo'za tagi'za onegahaze. Anage hige'za
amage'ma nentaza disaipol naga'mo'za ana naneke antahi'naze.
(aiōn g165) **15** Hagi Jisasi'ene amagema nentaza disaipol naga'ane
Jerusalemi kumate uhanati'zageno, Jisasi'a ra mono nompi
mareriteno agafa huno maketima nehaza vhahera zamahenati
netreno, zagore netre'za miza nesaza vahe'mokizmi trara erikaha
hunetreno, mani'ne'za maho nama zagore netraza tra'ene
zagoma rezahema nehaza vahe trara erikaha hutre'ne. **16** Ana
huteno feno zantamia mago vahe'mote hutma eritma ra mono
nompina aru kitagita vuta eta osutfa hiho huno hu'ne. **17** Ana
huteno agafa huno rempi hunezamino anage huno zamasm'i'ne,
Amanage huno Anumzamofa avontafepina krente'ne, Nagri

nona mika kaziga vea'moza nunamu hanaza no me'ne, hianagi tamagra kumzafa vahe'mo'za fraki nonkuma eri tro nehaze. (Ais 56:7, Jer 7:11) **18** Hagi ra mono kva vahe'mo'zane, kasegerema ugagota hu'naza vahe'mo'za nentahiza, inankna huta ahiegahune hu'za ahesaza kankamunku hakrenaze. Na'ankure zamagra koro Agrikura hu'naze. Hagi maka vahe'mo'za rempima huzamia zankura antri hu'naze. **19** Ana kinaga Jisasi'ene amage'ma nentaza disai pol naga'mo'za, rankuma atre'za fegi'a vu'naze. **20** Nantera enevu'za kazana, sifnama Jisasi'ma ahente'nea fiki zafamo'ene arfu'na'amo'a, osapa re'nege'za ke'naze. **21** Pita'a Jisasi'ma hu'nea kegu age'sa nentahino anage hu'ne, Rempi hurami ne'moka ko! Okima sifna kema hunka raga renontenka osaparo hu'nana Fiki zafamo'a osapa re'ne. **22** Jisasi'a kenona anage huno zamagrira zamasami'ne, Anumzamofonte tamentinti hoho. **23** Tamage hu'na neramasamue, mago vahe'mo'ma ami agonagu'ma huno, otinka hagerimpi takauro huno tare agesa ontahi amentinti nehuno hanigeno'a, amane ke haniaza huno fore hugahie. **24** E'ina hu'negu anage hu'na neramasamue. Nazankuma nunamu hunka Anumzamofo antahima kesunka, hago eri'noe hunka kamentinti hanunka erigahne. **25** Hagi otinka nunamu hunakuma hanunka, mago'mo haviza hugante'nesnia zana atrento. Anama hanankeno'a, monafi nemania Nafakamo'a kagri'enena kumika'a atregantegahie. **26** [Hu'neanagi kagra vahe'mofo kefoza atre ozmantesanana, monare mani'nea Nafakamo kagri kefozana ana zanke huno atre ogantegahie.] **27** Hagi Jerusalemi kumate ete uhanatizageno, Jisasi'a ranmono kumapi nevige'za, ra mono kva vahe'mo'zane, kasegere ugagota hu'naza vahe'mo'zane, mago'a ugagota kva vahe'mo'zane, nege'za Jisasinte e'za, **28** anage hu'za antahige'naze, Kagra ina

hihamure hakare zana eri fore nehane? Iza hihamua kamigenka
hakare zana nehane? **29** Jisasi'a zamagrikura anage huno
hu'ne, Nagra ete tamagrira mago'zanku tamantahigegahue,
ana kenona'a hutkena, aza hihamu namige'na eri'zana
e'nerufi tamasmigahue. **30** Hagi nasamiho, Jonima mono ti
frezmante'nea, zana monafintire huta hanunkeno'a, Agra anage hugahie.
Hagi nahigetma tamentintia ana zankura nosaze? huno hugahie.
32 Hianagi vahe'mo eri fore hu'ne, huta osugosune, nehu'za
maka veaku koro hu'za atre'naze. Na'ankure maka veamo'za
Joninkura tamage kasnampa nere hu'za antahi'naze. **33** Anage
nehu'za Jisasina kenona hunte'ze, ontahi'none hazageno Jisasi'a
anage huno zamasami'ne, Nagranena iza hihamufi eri'zana
enerue ontamasmigahue huno hu'ne.

12 Jisasi'a erigafa huno fronka kea zamasami'ne, Mago mopa
agafa ne'mo'a waini hoza kri'ne. Ana hoza kegina huno, wainima
tatisia keria asenteteno, mani'neno kvahu nona kinte'ne. Hagi
zoka umani'neno enaku ikante zago miza seterehu (rent) vahete,
hoza'a netreno afete ka vu'ne. **2** Hagi hozama vasage knama
egeno'a, kazokzo eri'za ne'a huntogeno, agri'ma refko hu'za
amisnazama'a erisnigu, kegava hune'za ikantema mizama (rent)
nezamiza naga'mokizmire e'he. **3** Ana hianagi, anama kegavama
hu'naza naga'mo'za, azeri'za knonkeve nemi'za, atrageno
mago'zana e'ori amane vu'ne. **4** Ete mago'ane ru kazokazo
eri'za ne'a huntogeno vige'za, anu rutane'za ahete'za, ke
huhaviza hazageno atreno e'he. **5** Ana hazageno ete mago'ene
huntogeno vimofona, ahe frigeno hakare'a huzmantge'za
nevazageno, mago'a knonkeve nezami'za, mago'a zamahe

fri'naze. **6** Ana hazageno, magoke avesi avesi hunentea mofavrege mani'ne. Ana huzmante vagareteno, henkarfana magoke mani'nea mofavre'a hunenteno, zamagra magoke mofavre ni'agi'za antahimigahaze hu'ne. **7** Hianagi ana hoza kva hu'naza vahe'mo'za, zamagra zamagra anage hu'naze, nafa'amofo zama erisanti haresia nera ama eanki, enketa ahe frisunkeno nefo fenozamo'a, tagrizase'nie! Hu'za hu'naze. **8** Ana nehu'za azeri'za ana mofavrea ahe frite'za, avufa'a waini hozafinti megi'a mate vu'naze. **9** Hagi waini hozamofo nefo'a nankna eme hugahie? Agra eno waini hoza kegava krinaza vahera eme zmaheno, waini hoza ru vahe'mokizmi eri zaminke'za, kegava hugahaze. **10** Hanki ama naneke Anumzamofo avontafepi krente'nazana hampritma ontahinazo? Nogi vahe'mo'za haviza hie huza atre'naza havemo'a, no renage antepinka no azeri hanaveti have fore hu'ne. **11** Anumzamo ama anazana hu'neanki, tavuma konana knare zantfa hu'ne. (Sam-Zga 118:22-23.) **12** Hagi ana vahe'mo'za azeri'saza kanku hakre'naze. Na'ankure fronka kema hu'neana zamagriku hu'ne. Hianagi zamagra tusi'a vahe kevugu koro nehu'za atre'za vu'naze. **13** Hagi Juda kva vahe'mo'za Jisasina rehe'za kema huhaviza hanige'za, ana ke eri'za keaga hunte'naku, mago'a farisi vahe'ene, Heroti naga'ane huzmantage'za vu'naze. **14** Zamagrama Jissasinte'ma ne-eza anage hu'naze, Hurami ne'moka, tagra antahi'none, kagra tamagege nehunka, mago vahekura koro nosunka, havi vahe'ene fatgo vahe'ene mago'zanke hunka Anumzamofo fatgo kankura rempi huneraminketa nentahune. Hagi knare Sisana takesia amigahumpi omigahune? **15** Hianagi krunage haza nezamageno, anage huno zamasami'ne, Na'a higetma Nagrira renahetma negaze? Mago zagoa eritma enkena kaneno, **16** hige'za mago

zago eri'za eme amizageno, Iza amema'ane avone me'ne?
Hige'za zamagra hu'za, Sisane hu'za hu'naze. **17** Anante Jisasi'a
amanage huno hu'ne, Knareki Sisa zana Sisa amigahaze.
Hagi Anumzamofo zana, Anumzamofo amigahaze huno hige'za
tusiza hu'za antri hu'naze. **18** Hagi mago'a Satusi mono
vahe'mo'za (fripinti o'otigahaze nehaza vahe'mo'za) Jisasinte
e'za anage hu'za antahige'naze. **19** Hurami ne'moke, anage
huno korapa Mosesi'a avona krerami'ne, mago ne'mo'ma ara
eriteno mofavre onteno frinkeno'a, nefu ana ara erineno, mofavre
kasentesigeno, nefu agimo'a fanane osugahie huno avona
krente'ne. (Diu-Kas 25:5-6) **20** Hagi 7ni'a kogna mani'nazafinti,
agonesa zimimo ara eriteno mofavre onteno frine. **21** Nagna'amo
ana ara eri'ne. Eriteno mofavre onte frigeno, anante'mo'a
anazanke huno ana ara eriteno, mofavre onteno fri'ne. **22**
Ana 7ni'a kogna naga'mo'za, magore hu'za mofavre kase onte
fri vagaretageno, ana ara henka'a fri'ne. **23** Fripinti'ma oti
knazupa, ana maka kognamo'za fripinti'ma oti'nageno'a, iza a'
manigahie? Na'ankure maka ana 7ni'a kognamo'za ana ara kazo
eritere hute'za fri'naze. **24** Jisasi'a anage huno zamasami'ne,
Hantagama hazana, tamagra Anumzamofo avontafepi kre'nea
kea antahitama ketma osuta, Anumzamofo hihamu'a onkenetma
nehazafigure. **25** Na'ankure fri'nehnafinti'ma oti snazana, arave
hu'zana omnesigeno, ara vasi omi ami hu'zana omnesigeno,
monafinka ankero vahe'kna hu'za manigahaze. **26** Hianagi
tamage nanekema me'neana frite'za otigahaze. Anumzamo'a
onensa zafa tevenerefinti Mosesenku ke higeno antahiteno,
avontafepi krente'neana omne'negeta hamprita onkenetma
nehazo? Anumzamo amanage huno asami'ne, Nagra Abrahamu
Anumza mani'na, Aisaki Anumza mani'na Jekopu Anumza

mani'noe. (Eks-Ati 3:2, 6) 27 Huno hu'negu, Agra fri vahe'mokizmi Anumzana omani'neanki, kasefa hu'za mani'naza vahe'mokizmi Anumza marine, tamagra tusi'a hantaga nehaze. 28 Hagi mago kasegere ugagota hu'nea ne'mo eme antahama ke hakare nehazageno, Jisasi'a so'eza huno kenona zimirera nezmasamigeno, ananke eme nentahino, Jisasina antahigeno, Maka kasegefina ina kasegemo vugota hu'ne? 29 Higeno Jisasi'a amanage huno hu'ne, Kagota kasegea amanahu me'ne, Israeli vahe'mota antahiho, Ramo'a tagri Anumzane. Rana agrake mani'ne. 30 Kagra kagu'areti Anumza ka'amofona avesinto, maka kamema'areti hunka avesinto, maka antahintahi ka'areti hunka avesinto, maka hanave ka'areti hunka avesinto hu'ne. (Diu-Kas 6:4-5) 31 Anantero amanahu kasege me'ne, kagragu kavesi nentanaza hunka tva'onkare'ma mani'enimofona avesinto. (Lev-Pris 19:18) Ama tare kasegemofona mago kasegemo'e huno znagateore'ne 32 Higeno kasegere ugota hu'nea ne'mo'a anage hu'ne, Hurami ne'moka, tamage hunka hane, Agra magoke mani'neankino magore huno amefiga'a vahera omani'ne. 33 Ana hanigeta Anumzamofona tagu'areti avesinteta, maka antahintahireti avesinteta, maka hanavereti avesinteta, tagragu tavesi nentonaza huta tva'onte maninesaza nagara zmavesinte sunazamo'a, Kresramana vuzane, Anumzamofo hakare zanka'a ami'zana agatereno ugagotaza me'ne. 34 Jisasima antahama ana ne'mo'ma kenona'a hu so'e higeno, anage huno asami'ne, Kagra Anumzamofo kuma tava'onte mani'nane. Higeno mago'a vahe'mo'za antahige zankura koro hu'za antahi onke'naze. 35 Jisasi'ma ra mono nompi rempi hunezamino'a anage hu'ne, Na'ante kasegere ugagota hu'naza vahe'mo'za Kraisinkura, Deviti nemofo'e nehaze? 36 Hagi Ruotge Avamu'mo Devitina azeri

otigeno amanage hu'ne, Ramo'a anage huno Ranimofonkura hu'ne, Nazantmaga kaziga trate manige'na, ha' vaheka'a kagafinka zamazeri fenkamu atraneno hu'ne. (Sam-Zga 110:1)

37 Devitima agra'ama huno Ranimo'e hanigeno'a, inankna huno Deviti mofavre manigahie? 38 Rempima huzamifina Jisasi'a anage huno mago'ene zamasami'ne, Kasegere ugagota hu'naza vahekura kva hiho. Zamagra za'za kukena hu'za maketi kumapi vano nehazage'za hakare vahe'mo'za nezmage'za muse huzmante zanku zamavesi vhahere. 39 Hanki osi mono nompi vugota hu'nea trate unemaniza, nezama nepina zamagi eri trate nemanize. 40 Kento a'nemokizmi krunage hu'za fenozimi eneri'za zamo, eama hu'zanku za'za nunamu nehaze. Ana hu'negu ama anazamofo mizama'a, agatere'za ranknaza erigahaze. 41 Jisasi'a ra mono nompi, zagoma nentaza taferomofo tva'onte mani'neno zagoma eme antazana zmage'ne. Fenozimi me'nea vahe'mo'za rama'a zago eme ante'naze. 42 Ana nehageno amunte omane kento a'mo eno, tare osi koranke zago mago toza avamente me'nea erino ana taferopi eme netregeno, 43 Jisasi'a amage'ma nentaza disaipol nagara ke hige'za ageno anage huno zamasami'ne, Tamage hu'na neramasmue, ama amunte omane kento a'mo rama'a zagoa ruga'a vahera zamagetereno taferopina eme ante'ne. 44 Na'ankure maka vahe'mo'za rama'a ante'nafinti, osi'a ofa zagoa eme ante'naze. Hianagi ama kento a'mo'a amunte omanetfa hunefinti eri'neama'a ante vaga reneankino, miza seno neneno manisiazana omane'ne.

13 Hagi Jisasi'ma Ra mono nompinti atiramigeno'a, amage'ma nentaza disaipol nagapinti mago'mo'a anage hu'ne, Hurami ne'moke, asinentike havereti'ma hiro naro nontamina ki'nazanki ko! 2 Higeno Jisasi'a anage huno zamasami'ne, Tamagra ama

hironaro nontami negazo? Mago havemo'a, mago havemofo
agofetura omane'tfa hugahie. Mika havemo'a fragu vazi
ramigahie. 3 Anante ra mono nomofo kantu kaziga, Olive agonare
Jisasi'a marerino umaninege'za, Pita'ma, Jemisi'ma, Joni'ma,
Endru'ma hu'za zamagrake emanine'za Jisasina amanage
hu'za antahige'naze. 4 Tagrira tasamio, nankna zupa anazana
fore hugahie? Anazama fore hunaku'ma hanigeno'a, nankna
avame'za fore hinketa ketenunkeno, ana knazana fore hugahie?
hu'za hu'naze. 5 Hazageno Jisasi'a agafa huno zamasami'ne,
Mago'mo havige huno tamavareno havi kante vu'zankura,
kva hiho. 6 Rama'a vahe'mo'za Nagri nagifi ne-eza anage
hugahaze, nagra ana ne' ama'i neoe nehu'za, rama'a vahe
havi kante zamavrentegahaze. 7 Hanki ha'ma hania kema
nentahita, ha'mofo zaho nanekema antahisanuta korora osiho.
E'ina hu'zana fore hugahie. Hianagi vagare kna ome'ne. 8
Hanki anantera mago kumate naga'mo'za, ot'i'za mago kumate
nagara zamahegahaze. Mago kaziga vahe'mo'za ot'i'za, mago
kaziga vahera ha' rezmantegahaze. Ana nehanageno mago'a
kumapina imi e'nerisigeno, mago'a kumapina agate'za fore
hugahie. Ama ana zamo'a, a'mo'ma mofavre kasentenaku
higeno, agafa huno ata negriankna ataza fore hugahie. 9
Hanki tamagratamia kva hutma maniho. Kanisolo vahete
tamavare'za nevu'za, osi mono nompinti tamavre'za kanonkeve
ome nerami'za, rankuma kva vahete'ene kini vahe zamavure
tamavrentesageta otigahaze. Na'ankure nagriteku ana hanageno,
e'i anazama fore'ma haniana nagri musenkema eri'ama hutma
nezmasami'za zanteku fore hugahie. 10 Hanki esera maka
mopane mopanena vahe'mo'za Knare Musenkea huama
hanageno antahi vagarettesageno'e. 11 Hagi keaga hurmanteku

tamazeri'za vanagetma, na'ane huta hugahune hutma antahintahi hakarea osiho. Ana knafima hiho huno'ma hania nanekea amane hiho. Na'ankure ana nanekea tamagra'a osugahazanki, Ruotage Avamumo hugahie. **12** Ana knafi nefuna ahe frinogu avare nezaminkeno, nef'a nemofona avreno ahe frinogu ana zanke nehinkeno, mofavremo'za ana zanke huza nerera nefana zamahe frinogu avare zamigahaze. **13** Maka vahe'mo'za tamagrira zamarimpa kna huneramante'za ha' reramantegahaze. Na'ankure Nagri nagimo'a tamagripi me'negu hu'za anara huramante'gahaze. Hianagi iza'o oti hanavetino manino vu refarega vanimofona agu vazigahie. **14** Hagi Jisasi'a anage huno zamasami'ne, Nanekema hampri snamota, nehamprita ama hiho. Tusi'a havizantfa huno agotenesiazamo, agra otiga osu'nenia trate otina, ana knazupa Judiama mani'nesaza veamo'za freza agonare viho. (Dan 9:27, 11:31, 12:11) **15** Nomofo agofetuma mani'nesamo'za, uramiza nompintira mago'a zana eriza atioramigahaze. **16** Hozafima mani'ne snimo'a, kuma'aregati nakre ku'a eme e'orino. **17** Ananknafima amu'ene hu'nesnia a'negu'ene, mofavre aminte mani'nesnia a'negura, nasunku huzmantoe. **18** Hianagi nunamuna nehinkeno, tusi'a zasi knafina anazana forera osino. **19** Na'ankure ananknafina tusi'a knaza fore hugahankino, Anumzamo'ma mopama tro hu'nereti eno menima ehanatinerera, fore osu'neankna knaza fore hugahie. Hagi henka'a ana hukna knazana fore osutfa hugahie. **20** Ramo'a ana knama eri atupa osanigeno'a, mago'a vahera omanigahie. Hianagi Nagri vahere huno hunefinti huhampri'nea vahekuma agesama antahiteno, ana kna eri atupa hugahie. **21** Ana knafi mago'a vahe'mo'za hu'za, keho amal'i kraisi'e huge, agra antu mani'ne hanagetma tamentintia osutfa hiho!

22 Na'ankure ana knafina mago'a havige krais'i'e huza efore
nehu'za, kasnampa vahe efore hu'za, haviza hu'za kagu'vazane
avame'za hugahaze. Anama hanazana Anumzamo'ma huhampri
zmante'nea vahe'mokizmi, rezmataga hu'naku hugahaze.
Hianagi zamagra Anumzamo'ma huhampri zamante'nea vahe'ma
zamazeri savari hu'nakuma hanuza anara hugahaze. **23** Hagi
tamagra kva hutma maniho! Ana maka'zana fore osunege'na,
tamagrira neramasamue. **24** Hianagi ana knafina tusi'a knazamo
vagama resigeno'a, zagemo hani hanigeno, ikamo'a remsa
osanigeno, **25** monafinti hanafi tamimo'za atafri neraminage'za,
monafi me'nea hanave zantamimo'za tore hugahaze. (Ais
13:10, 34:4, Joel 2:31-32) **26** Anante Vahe'mofo Mofavremo'a
hampompi, tusi'a hihamu'ane masa'afi ne-esigeta kegahaze.
(Dan 7:13) **27** Anante ankero vahe'a huzmantena, Anumzamo
huhampri zamante'nea vahera mona mopa ome tre emetre
kazigatira ome zmavare eme zmavare hu'za zamazeri atru
hugahaze. **28** Ama fronka kema fiki zafare'ma hanua fronka
kereti antahi'zana eriho. Azanku'namo asinaren amo'srema
nehegetma, hago zagegna tava'o nehie hutma nentahize. **29**
Hagi tamagra anahu zama fore'ma hanigetma negesnutma, hago
Vahe'mofo Mofavre esia kna'a tava'o huno kafante me'ne hutma
tamagedesa antahiho. **30** Tamage hu'na tamagrira neramasamue.
Ama knafi veamota ofri mani'nesnageno, ana zana fore hugahie.
31 Monane mopane fanane hugahianagi, Nagri nanekemo'a
fanane osu mevava hugahie. **32** Hianagi mago vahe'mo'e huno
anazama fore'ma hania knane zagenena ontahi'ne. Monare
nemaniza ankero vahe'mo'za ontahi'zageno, Mofavre'amo'a
ontahi'ne. Nefa Agrake ana kna antahi'ne. **33** Kva hunetma retro
hutma maniho. Na'ankure tamagra anazama efore'ma hania kna

ontahi'naze. 34 Amanahu hugahie, mago ne'mo afete yunaku, kazokzo eriza vahe'a noma'a kegava hoho hunezmanteno, magoke magoke eri'za vahe'a eri'za refko hunezamino, kafante kva nekura kavu antenka maninenka kva hu so'e huo huno hunte'ne. 35 E'ina hu'negu tamagra anahu kna huta, kva hu so'e huta maniho. Nomofo nafa'amo esnia kna ontahi'naze. Kinaga esifi, kenage amu'no esifi, kokore ke nehinkeno esifi, nantera esifi ontahi'naze. 36 Aru masenenageno, ame huno eno eme tamageno eri fore hanigi, kva hutma maniho. 37 Hanki tamagri'ma neramasmuana mifka veaku nehue. Kva huso'e hoho.

14 Hagi Anumzamo'ma Israeli veama kinafinti zamare'nea kanagu antahimi'za zo'ore breti nenaza kna zahufa tare zagegna me'nege'za, ra mono kva vahe'mo'zane, kasegere ugagota hu'naza vahe'mo'zane, Jisasima havige hunte'za oku azerizama ahesaza kanku hake'za ahe fri'naku huge antahige hu'naze. 2 Na'ankure mafka vahe'mo'za ana ne'zama (pasova) nenaza knare'ma ana'ma hanunke'za, ke hakare nehu'za ha'azeri oti'za hugahaze. 3 Hagi Jisasi'a Betani kumate ko'ma fugo namumare'nea ne'mofo Saimoni nompi, zamaza tununte manine'za trateti ne'za nenageno, mago a'mo'a zago'amo'a mareri'nea, mananentake masave zafa rafunareti tro hu'naza, alabasta tafempi erino e'ne. Ana tafe avaza'a runagino Jisasina anumpi taginte'ne. 4 Hianagi mago'amo'za anampi mani'namo'za zamasigu nehu'za, zamagra zamagra anage hu'naze, Na'a higeno ana masavena amne tagi netre? 5 Mizante atreta 300'a silva zago nazana erita zamunte omane vahe zamunesine. Hianagi nahigenka amnefina tagi neutrane? Anage nehu'za ana ara kesu'naze. 6 Hianagi Jisasi'a amanage huno zamasmi'ne,

Arenkeno manino, nahigeta ama ara knanemize? Agra knare so'eza hunenante. 7 Hianagi zamunte omane veara hakare kna tamagrane mani'nenageta, ina knare'ma, knare tamavu tamavama huzmantenaku'ma hanutma, amne huzamantegahaze. Hianagi Nagra hakare kna tamagranena omanigahue. 8 Agra nazano hunantenaku hiazana hago hunante. Kerifima ufresugu masave frenanteno retro hunante. 9 Nagra tamage hu'na neramasamue, inantego knare musenkeni'a, eri'za kokankoka ome huama hanarega, ama a'mo hu'nea avu'avamofo agenkea, nehanage'za antahigahaze. 10 Hagi 12fu'a amage'ma nentaza disaipol nagapinti, Judas Iskarioti'a Jisasina komoru huno avrezamisia naneke vugota mono kva vahera ome zamasami'ne. 11 Ana nanekema nentahiza muse hunte'naze. Judasina zago kamigahune hu'za huvempa kea asamizageno, Jisasima komoru huno ha' vahe zamazampi avare'zamisia, kanku agafa huno hakre'ne. 12 Hagi (Zo'ore breti nenaza kna efore higeno) ese knazupa kinafinti Anumzamo'ma ozmahe zamagatere'nea kna antahimiza sipisipi afu anenta aheza Kresramana nevaza knazupa, Jisasima amage nentaza disaipol naga'mo'za anage hu'za antahige'naze, Inantega Kagirira kinafinti zmvare'nea knagu antahimi'za nenaza (Pasova) ne'zana retro hugantesunegu kave'nesie? 13 Hazageno Jisasi'a tare disaipol ne'tre amage'ma nentaza nagapinti zanasmino, Jerusalemi kumapi ufresakeno'a, mago ne'mo'a tima afi kavofi tifino ne-enketa ome tutagiha huntesuta, ana ne'avaririta vugaha'e. 14 Hagi ana ne'mo'ma ina nompino umarerisiana, ana nomofo nefana amanage huta antahige'o, Rempi hurami ne'mo'a kagrikura huno, inantega disaipol naga'nianena Anumzamo'ma ozmaheno zamagatere'nea zanku antahimiza nenaza ne'zana, kankamuna me'nea negahune

hu'ne. 15 Hanankeno'a mago hunaraginte nomofo anaga kaziga, ra kakamu me'nesifi agra tanaveri hugahie. Anampina ne'zane sipa ko retro hunte'naze. Ana nompi mareritna ne'zana ome retro huranteho. 16 Anage hige'ne ana netre mokea rankumate vu'ha'e. Anante Jisasi'ma zanasami'nea kante fore higene ke'na'e. Anumzamo'ma ozmahe zamagatere'nea knagu antahimiza nenaza ne'zana ome retro hu'na'e. 17 Kinaga sege'za, Jisasi ene amagema nentaza 12fu'a disaipol naga'ane e'naze. 18 Ne'zane sipay mani'neza ne'za nenageno, Jisasi'a amanage huno zamasmi'ne, Tamage hu'na neramasamue, amafima magoka nezama nenompinti, mago'moka komoru hunka ha' vahe zamazampi navrentegahane. 19 Hige'za zamarimpamo'a ana kegura kna nehige'za, mago mago'mo'za nagra anara hugahue hunka nehampi? 20 Hazageno Jisasi'a kenona zimirera amanage huno zamasami'ne, 12fu'a nagamotafinti, Nagrane magoka zoumpafinti breti areno nenesnimo'e. 21 Na'ankure Anumzamofo avontafepi krente'nea kante, Vahe'mofo Mofavremo'a vugahie. Hianagi Vahe'mofo mofavrema komoru huno ha' vahe zamazampima avrente'simo'a, knaza erigahiankina nasunku huntroe. Nererama kase onteasina knare'zantfa hisine! 22 Hagi ne'zana nenageno, Jisasi'a mago breti erino Anumzamofo antahigegeno asomu hutegen, tamanasino nezmino amanage huno zamasmi'ne, Ama'i Nagri navufe, erita neho. 23 Hagi waini tintafe erino Anumzamofo nunamu huno antahigegeno asomu huntogeno, zamige'za maka'mo'za anampinti ne'naze. 24 Nenageno amanage huno zamasmi'ne, Ama'i Nagri korane, ama ana koromo Anumzane huhagerafita manisaza manizana eri kasefa hugahie. Maka'mofonku huno tagine. 25 Tamage hu'na neramasamue, Waini ragamofo tima'a mago'ene one'na

henka'a Anumzamofo kumapi kasefa waini negahue. **26** Mono
zagame hute'za, atirami'za Olive Agonarega vu'naze. **27** Hagi
Jisasi'a amanage huno zamasmi'ne, Tamagra makamota natreta
fregahaze. Na'ankure Anumzamofo avontafepina amanage huno
krentegeno me'ne, Anumzamo'na sipisipi afu kva vahe'mofona,
ahanena sipisipimo'za panani hu'za ufre efre hugahaze hu'ne.
(Zek 13:7.) **28** Hianagi fritena otisuna, tamagrira vugota
huramante'na Galili vugahue. **29** Higeno Pita'a anage huno
Jisasina asami'ne, mika'mo'za katre'za vanazanagi, nagra
katrena ovutfa hugahue. **30** Higeno Pitana kenona Jisasi'a
amanage huno asami'ne, Tamage hu'na negasamue, meni
kenagera tare zupa kokoremo'a krafa osu'nesigenka, tagufa zupa
Jisasina onke'noa nere hunka vahane hugahane. **31** Hianagi
Pita'a agra'a kere hu hankavetino, vahane huogantegosue
nehuno, amne kagranena friga hanigena frigahue huno hu'ne.
Hige'za mika'mo'za ana kege'za hu'naze. **32** Hagi Jisasi'ene
amage nentaza disaipol naga'mo'za Getsamenie nehzare
ehanati'naze. Anante Jisasi'a zmasamino, Amare mani'enkena
nunamuna haneno. **33** Anante Pitanki, Jemisinki, Joninki huno
zmareno nevigeno, agu'amo'a tusi'gna nehigeno, asunku hu'ne.
34 Jisasi'a amanage huno zamasmi'ne, Nagu' namemo'a tusi
kna navenesino nahe friza nehianki, amare mani'neta kva
hiho. **35** Nehuno osi'a vugamuteno mopafi vutrakahu maseno,
Anumzamofonte nunamu ome nehuno, knare'ma hanigeno'a,
ana knamo'a evu nagateresie hu'ne. **36** Agra huno, Aba,
Nafanimoke! Maka'zana amane hugahane, ama kapua eri
atro. Hianagi Nagri navesira ovarario, Kagra kavesi avaririo.
37 Ana huteno eno eme amagema nentaza disaipol nagama
zamageana masenageno, Pitanku amanage huno antahige'ne,

Saimoniga kavu mase'nano? Knare osi'agnafina kva krigahampi?

38 Kvahuta mani'neta, nunamuna nehuta revatgazama esifina evuoramiho. Tamagu'amofona avenesianagi, tamavufamofona hanave'a nomane. **39** Ete mago'ane vuno, anahu kna nunamu ome hu'ne. **40** Agrama mago'ene ete eno eme zimageana, mase'hagenokino zamuma hari huzamo'a kna huzmante'ne.

Na'ane huta ke'arera hugahune hu'za kegura hake'naze. **41**

Anante Jisasi'a mago'ene tagufa zupa zamagrite eno, amanage hu'ne, Tamavu nemaseta manigasa nehazo? Ha vagare!

Nagrira knani'a ama eanki keho. Vahe'mofo Mofavrea kumi vahe'mokizmi zamazampi komoru hu'za avrente'gahaze. **42**

Otinketa tagra vamaneno! Keho Nagri'ma komoru huno ha' vahe zamazampima navrentesia nera, ama erava'o nehie. **43**

Hagi anankea huvaga ore'negeno, amage'ma nentaza 12fu'a disai pol nagapinti mago'zmimo, Judas Iskarioti anante ehanatine.

Agri'enena sondia vahe'mo'za kaziknontamine, kumpa knozmine eri'neza, pristi kva vahe'mo'zane, kasegere ugagota hu'naza vahe'mo'zane, ugota kva vahe'mo'za huzmantage'za e'naze. **44**

Hagi Judasi'a ha' vahe zamazampi komoru huno avrezmi ne'mo'a anage huno zamasami'ne, Amanahu avame'za hugahuanki keho, ome agi'ma antakoma hanuana, e'i ana neki ome azerita kegava huta avreta viho. **45** Hagi Judasi'ma anantema ne-eno'a, Jisasinte hantka huno vuno, Rempi Hurami Nemoke, nehuno agira antako hu'ne. **46** Anante mafka vahe'mo'za zamaza ante'za, azeri'naze.

47 Hianagi ot'i'nazafinti mago'mo kazinknoma'a erisaga huno, ugagota pristi ne'mofo kazokzo eriza ne'mofo agesa rukfri atre'ne. **48** Jisasi'a amanage huno zamasami'ne, Nahigeta Nagri nazeriku bainati kazintamine kumpa knontaminena eneritma kumzafa vahe zamazeri ku nehzankna hutma neaze? **49**

Maka knane knane, ra mono nompi tamagrane maninena
rempi huneramugeta, naze'ori'naze. Hianagi amama fore'ma
nehizana, korapa avontafepi kre'nea kemofo avufga'a fore nehie.

50 Anage nehige'za amage'ma nentaza naga'mo'za, atre'za
koro fre'naze. 51 Mago nehaza nera amage anteno vu'nea
ne'mo'a, mago'a kukena osu'neanki za'za kukenage'za hu'nea
ne' azeri'naze. 52 Hianagi ana za'za kukena'a ruzafi atreno,
avufa avapa koro fre'ne. 53 Hagi anante Jisasina aware'za
ugagota pristi kva nete vazageno, ranra pristi kva vahe'mo'zane
ranra kva vahe'mo'zane, kasegere ugota hu'naza vahe'mo'za
atru hu'naze. 54 Pita'a, Jisasina amefi afete avaririno, ugagota
pristi ne'mofo kumapi ufre'ne. Teve hegare'nare avufa ome
tonehino ra mono noma kegava nehaza ati vahe'ene umani'ne.

55 Ugagota pristi vahe'mo'zane, maka kanisolo vahe'mo'za
Jisasina havige hunte'za ahesnaza ke agafa'agu hakre'naze.
Hianagi magore hu'za ke'za eri fore osu'naze. 56 Rama'a
vahe'mo'za havige hunte'nazankino, ana kezmimo'a magoke
kantera ovu'ne. 57 Mago'amo'za oti'za amanage hu'za havige
hunte'za, 58 Tagra nentahunkeno ama ne'mo'a anage hu'ne,
Ra mono nona vahe'mo'za zamazanuti ki'naza nona tapage
hunetrena, tagufa knamofo agu'afi vahe'mo azanuti onki'nea
mono no ru kigahue hu'ne. 59 Hianagi kezamimo'a fatgo
osu'ne. 60 Anante ugagota pristi kva ne'mo zamuga otino,
anage huno Jisasina antahige'ne, na'anee hunka kezimirera
huzmante'gahane? Na'anku Kagira keaga hunegantaze? 61
Hianagi ke nona'a osu akoheno mani'negen, mago'ene ugota
pristi ne'mo'a antahigeno, Kagra Kraisigo, Mrerisa Anumzamofo
mofavremokafi? 62 Jisasi'a huno, E'i Nagre kagra negesankeno,
Vahe'mofo Mofavremo Anumzamofona azantmaga kaziga

manino hampompi tusi'a hanave'ane egahie. (Eks-Utr 3:14, Sam-Zga 110:1) **63** Anankema nentahino, ugota pristi ne'mo agra'a kukena eri tagato nehuno anage hu'ne. Na'anku mago'enena keagama hufore hunte vahekura hakegahune. **64** Hagi tamagra nentahizageno Ramofona huhaviza hunte'ne! Tamagra na'ane hutma hugahaze? Makamo'za huza Anumzamofo huhaviza hunteankino frisie hu'za hunte'naze. **65** Anante mago'amo'za zamavetu ahenente'za avu kisu hune'za, zamaza knonu nehe'za, Kagra kasnampa ke hunka, iza negahefi hufore huo. Mago'a ra mono noma kegava nehaza ati vahe'mo'zanena avugosa ruhapati'za ahe'naze. **66** Hagi Pita'a ufenkamuteno kva nemofo kumapi mani'negeno, anante ugagota pristi nemofo eri'za mofane zagafinti mago'mo e'no, **67** Pita'ma teve tonehino mani'negeno eme negeno, kagranena Nazareti kumateti' Jisasi'ene vanoma nehana ne' mani'nane hu'ne. **68** Hianagi Pita'a vahane huno, nagra antahina kena osu'nogenka nehane! Anante kama emrerite nevigeno mago kokorege hu'ne. **69** Ete ana mofa'mo mago'ene Pita negeno anante oti'naza vahe zmasmino, e'i nera Jisasi amage anteno vano nehia nere huno hu'ne! **70** Hianagi ete Pita'a, mago'ene vahane hu'ne. Anante oti'naza vahe'mo'za, osiagna manige'za Pitankura anage hu'za, tamage kagra mago zmimoke. Na'ankure Galili ne' tfa mani'nane. **71** Anante Pita'a Ontahinoa neku nehaze nehuno, nagra tamage ana nekuma havigema hanenkeno'a, huvempa huankino Anumzamo nazeri haviza hanie huno, **72** nehigeno, ame huno mago'ane anante kokorege nehigeno, Pita'a, Jisasi'ma asmi'nea kegu agesa antahi'ne. Tare zupa kokorege osunenigenka, tagufa zupa Nagrikura onkenoe hunka vahane hugahanema huno asami'nea kegu agesa nentahino zavite'ne.

15 Hagi nanterame ranra pristi mono kva vahe'mo'zane, ranra
kva vahe'mo'zane, kasegere ugagota hu'naza vahe'mo'zane,
maka kanisol vahe'mo'za, ome atru hute'za, Jisasina nofi kinte'za
avre'za Paeroti ome ami'naze. **2** Paeroti'a agenoka huno, Kagra
Jiu vahe'mokizmi kini mani'nano? huno Jisasina antahige'ne. E'i
kagra nehanane huno Jisasi'a hu'ne. **3** Anante ranra pristi kva
vahe'mo'za, Jisasinkura rama'a haviza hu'ne hu'za hunte'naze.
4 Paeroti'a mago'ane agenoka huno, Ko, Kagrira rama'a ke
hunegantazanki, Kagra ke zamirera kenona hugahampi? **5**
Hianagi Jisasi'a ana kemofo nona'a osu mani'negeno, Paeroti'a
tusiza huno antri nehuno agogogu hu'ne. **6** Kafune kafune
Anumzamo kinafinti zmauvre'nea knama egeno'a, Paeroti'a kina
vahepintima zmavesimofonku hazageno kazufe netrea kna e'ne.
7 Hagi ana knafina mago nera Barabasi'e nehia ne'ene, mago'a
kamani vahe'mo'zane ha' hu'naza knafi, vahe zamahe fri'naza
zanku kina huzmante'naza vahe'ene anampina mani'naze. **8**
Hagi maka veamo'za Paerotinte e'za, ana kna'ma egeno nehiaza
huno kina vahe katufe atresnigu antahige'naze. **9** Anante
Paeroti'a kenona huno anage hu'ne, Jiu vahe kini ne' katufe
tamisuegu tamave'nesio? **10** Na'ankure agra, ranra pristi kva
vahe'mo'za kanive renente'za, avare'za eme ami'zama'a ko
antahi'ne. **11** Hianagi ranra pristi kva vahe'mo'za maka vahe
zamarimpa rekehu'za, Barabasi kazufe tamio hutma hihohu'za
zmasami'naze. **12** Anante Paeroti'a mago'ene kenona huno, Jiu
vahe kinie hutma nehaza nera, na'a huntuesuegu tmave'nesie?
13 Hige'za ete mago'ane kezati'za, Aheta kekazafare hantiho
hu'naze. **14** Hianagi Paeroti'a anage huno zamasami'ne, na'a
kefoza hune, inankna kefoza hu'negeta aheta hantiho nehaze?
Hianagi zamagra mago'ene ranke hu'za, ahe friho hu'naze.

15 Na'ankure Paeroti'a ana maka veamokizmi zamarimpamo so'e hania kazigati, Barabasi kazufe nezamino, Jisasina sefu amiho hige'za, sefu amitazageno keka zafare ahe'za hantisagu avrezmi'ne. **16** Anante sondia vahe'mo'za avare'za marerisa kumapi ufre'naze. (E'i ana kumara Gavana ne'mofo kumapi) maka Romu sondia vahetamina ome ke hutru hu'naze. **17** Zamagra fitunke kukena hunente'za, ave'avenofite kini vahe'mokizmi fetorikna huza fetori tro hu'za asenire antaninte'naze. **18** Kezanke hunte'za, Jiu vahe'mofo kinimokagura ferure hugantone. **19** Mago'ane kno eriza asenire nemasagi'za, zmavetu ahenente'za, zmarena renamagiza, pri hu'za havi mono hunte'naze. **20** Zamagrama azanava anteteza fitunke kukena erizafi netre'za, ete Agri kukena eri huntete'za, keka zafare aheza hantinaku megi'a avare'za vu'naze. **21** Hagi Sairini kumateti ne' Saimoni, (Aleksendane Rufusikizni neznafa) fegu'ati rankumapi evu frenaku enevige'za, Jisasi keka zafa'a erio hu'za hunente'za kofintageno eri'ne. **22** Hagi Jisasina avare'za Golgotehazaza agonare uhanati'naze. (Tagri kefima rukrahe'ma hanunana, anu zaferine hu'ne.) **23** Anante waini tine mere zafa arima'ane magopi taginte'za eri havia hute'za tagiami'zana, one atre'ne. **24** Hagi Jisasina rugeka zafare ahe'za hantite'za, mago'mo tagatere simo erisie nehu'za taisi zokogo re'za kukena'refko hu'naze. **25** Nanterama zage hanatino 9 kiloki hige'za, Jisasina rugeka zafare ahe'za hanti'naze. **26** Ahe'naza nanekemofo agafa'ama avoma krente'nazana, JIU VAHE'MOKIZMI KINI NERE, hu'za krente'naze. **27** Ana nehu'za tare kumzafa netrena magoka zanahete'za, magomofona azantmaga'a nehantiza, magomofona hoga'a hanti'naze. **28** [Ana hazageno korapa'ma Anumzamofo avontafepima kre'nea kemofo avufga'a efore'

hu'ne. Ana kemo'a, hazenke vahe'kna hugahie hu'ne (Ais 53:12)]. **29** Hagi anante'ma vute ete nehu'za vahe'mo'za azanva ke hu'za, Oho! Kagra ra mono nona tapage hunka tagufa knafi kigahue hu'nana nere, nehu'za zimage'na ru'naze. **30** Kagra ka'a kaza hunka keka zafaretira eramio, hu'naze! **31** Anahukna hu'za ranra pristi kva vahe'mo'zane kasegere ugagota hu'naza vahe'mo'za, azanva ke hunte'za, Ru vahe azama nehiaza huno Agra'a aza osugahifi? **32** Atregeno Kraisi'a Israeli vahe'mokizmi kini ne'mo'a, keka zafaretira menina eraminketa negeta, tamentinti hamaneno! Tare ne'trema keka zafare'ma ahe'za hanti'naza ne'tremokea, anazanke huke Jisasina azanava ke hunte'na'e. **33** Hagi ana knazupa zagemo'a feru trage higeno, maka ana mopafina hanimo refitegeno vuno kinaga 3 kiloki higeno rumasa hu'ne. **34** Tri kiloki higeno Jisasi'a Arami kefinti ranke huno kezatino, ELOI ELOI LEMA SABATANI? Anankemofo agafa'amo'a anage hu'ne, ANUMZANIMOKE ANUMZANIMOKE, NAHIGENKA KAMAGENA HUNENAMINE? (Sam-Zga 22:1.)

35 Hanki tava'onte mani'naza vahe'mo'za nentahi'za, anage hu'naze, Antahiho, Elaijanku ke nehie hu'za hu'naze. **36** Hagi mago'mo aga reno vuno mi'mi'tata hu'nea waini timpi kapukua ome reteno, zotare vazigase huno erino Jisasi'ma nesigu eme nemino anage hu'ne, Atrenenketa Elaijama eme avarefenka atresigura kamneno! **37** Hianagi Jisasi'a rankrafa nehuno, vagare asimu anteteno fri'ne. **38** Ana nehigeno ra mono nomofo agu'afi hanti'naza tavaravemo, anagamuti ruhakeke hutare huno henkamu erami'ne. **39** Hanki 100'a sondia vahete kva (centurian) ne'mo Jisasina avuga mani'neno Jisasima nefrinoma hiazana keteno anage huno hu'ne. Tamage ama nera Anumzamofo Mofavre mani'ne huno hu'ne! **40** Hagi mago'a a'nemo'za ogantu'a

mani'ne'za uruha ke'naze. Ana a'nefina, Makdala kumateti Mariaki, Saromeki mago Mariaki (osi Jemisine, Josefekizni neznareraki) hu'za mani'naze. **41** Ana a'ne zagamo'za Jisasi Galili mopare mani'nege'za amage nente'za aza nehaza ane zagane, mago'a anampina Jerusalemi ne-ege'za avaririza e'naza ane zagane mani'naze. **42** Hagi anazama fore hu'neana Frante zupa kinage. Mani fru hukna esigu (Sabat) retro tra nehaza kna e'ne. **43** Arimatia kumateti ne' Josefe'a koro osu hanave enerino, Jisasi avufa'ama erisigu Paeroti ome antahige'ne. (Ana nera kanisol vahepina agi me'negeno, Anumzamofo Kuma esigu nentahino aveganentea nere.) **44** Hagi Jisasi'ma frine higeno'a, Paeroti'a antri nehuno, 100'a sondia vahete kva (centurian) ne' ke huno frinesigu antahige'ne. **45** Ana sondia kva ne'mo hago fri'ne huno Paerotina asmigeno, Knareki avufga'a erinka vuo huno Josefena hunte'ne. **46** Higeno Josefe'ma efeke tavrave miza huno avufa'a eri mopafi atreno, ana efeke tavravenu kazrinteno, havefi frage'za tro hunte'naza kerifi ome asenteteno, have rekrehe huno kama ufrete runkanire'ne. **47** Makdala kumateti Mariaki, mago Mariaki Josefe nereraki huke anama asentea kumara ke'na'e.

16 Hagi mani fruhu kna (Sabat) vagarege'za Makdalati Mariaki, mago Maria Jemisi nereraki, Salomeki hu'za mananentake masave Jisasi avufare ome frentenaku miza se'naze. **2** Ana wikimofo ese knazupa (Sonta) nanterame zage nehanatige'za, Jisasi kerirega vu'naze. **3** Nevu'za ontahige antahige hu'za, kerimofo kafantema rehiza hu'nea havea iza rekrehe hutregahie, hu'za hume vu'naze. **4** Hianagi tusi'a haveagi, ko revahe hutrenege'za ome ke'naze. **5** Anante have kerigampi ufre'za kazana, mago nehaza ne'mo efeke kukena huno tamaga'a kaziga

mani'nege'za ome nege'za zamagogogu hu'naze. **6** Hianagi
anage huno zamasami'ne, Tamagogogura osiho. Nazareti
Jisasima keka zafarema ahe'naza ne'ku nehakaze. Hianagi Agra
ko oti'ne. Amafina omanine, avufa'ama ante'nazarera ami'nagi
keho! **7** Hianagi vutma amage'ma nentaza disaipol naga'ane,
Pitanena ome zmasamaho, Agra vugota huno Galili vu'ne, koma
tmasami'nea kante antetma anantega Jisasina ome kegahaze.
8 Anagema hige'za zmagare'za keria atre'za atinerami'za,
zmahirahi nerege'za zamagogogu hu'naze. Na'ankure zamagra
koro nehu'za, mago vahere hu'za ozmasami'naze. **9** (note: The
most reliable and earliest manuscripts do not include Mark 16:9-20.) [Hagi
ana wíkimofo ese zupa (Sonta), nanterame Jisasi'a fri'nefinti
otiteno, esera Makdala kumate a' Mariana, 7ni'a havi avamu
agu'afi mani'negeno eri atrente'nea ate efore hu'ne. **10** Hagi
Jisasi'ene vano nehaza vahe'mo'za zavi krafage nehazageno
ana a'mo'a ome zamasami'ne. **11** Ana a'mo'a, Jisasi'a otino
asimu erino maninege'na ke'noe huno'ma hia kegura, antahi
omi'naze. **12** Hagi ana'ma hutegeno tare netremo'kea Jerusalemi
atreke fegi'a nevakeno, Jisasi avufagamo'a ruzahē nehigeno
zanagrite efore hu'ne. **13** Fore nehige'ne kete'ne rukrehe
hune e'ne, mago'a disaipol nagama mani'namokizmi eme
zamasamizage'za, anankegura zamentinti osu'naze. **14** Ana
huteno **11**ni'a amage'ma nentaza disaipol nagatera, ne'za
nene'za maninageno, Jisasi'a zmagrite efore nehuno, frinefinti
oti'ne hu'za zmasami'naza kere antahi ozami'naza zankura,
nahigeta tamentintia osu'naze huno ke zamasu'ne. **15** Anage
hu'ne, maka moparega vutma Knare Musenkea ome huama
hutma, hakare vahera zamasamaho. **16** Hagi iza'o Nagrite'ma
amentinti nehuno, mono ti fresnimofona Anumzamo'a agu'vazina

knare huno manigahie. Hianagi iza'o amentinti osanimo'a, keagafi manino fanana hugahie. 17 Hagi zamentinti hanamo'za amanahu avame'za erigahaze. Nagri nagirera havi avamura hunente'za, kasefa zamageru arugahaze. 18 Ha' osifa'vea zamazanu azeneri'za, avuataga zama nesnaza'zamo'a zamazeri haviza nosinke'za, kri vahete zamazama antesageno'a, krizamimo'a amane hinke'za, knare hu'za manigahaze. 19 Hagi anagema huno Rana Jisasima zamasmitogeno'a, Anumzamo'a Jisasina avareno monafi marerino, azantmaga kaziga ome antegeno mani'ne. 20 Ana huno vutege'za, amage'ma nentaza naga'mo'za maka kaziga vano nehu'za, Ramofona ke'a huama nehazageno, Jisasi'a ana kezmia eri hanavetino avame'zane, kaguva'zanena anama hazankefina hu'ne].

Ruku

1 Hagi Tiofolisiga, korapara rama'a vahe'mo'za zamazanu kre'za eritru hute'za, Anumzamo tagripi erifore hu'nea zamofo nanekea kre'naze. **2** Ese agafare'ma Ramofo eri'za e'neri'za zamavunuma ke'naza vahe'mo'za, anama ke'nazaza krente'naza hunerasamizageta, ama ana naneke krente'none. **3** Ana hu'negu ese agafare'ma fore'ma hige'za krente'naza zana, rezagane so'e hu'na kogeno knaretfa hunantege'na, anama hu'nea kante ante'na, knare ne'moka Tiofolisiga krenegamue. **4** E'i anazanku koma rempima hugamigenka antahinana tamage nanekea, nentahinka tamage huogu nehue. **5** Hagi Herotima kinima Judia kaziga mani'nea knafina, mago pristi nera Zekaraia'e nehia nera, Abaiza nagapinti ne' mani'ne. Hagi nenaro agi'a Elisabeti'e, Aroni nagapinti efore hu'ne. **6** Ana aravemokea Anumzamofo avurera fatgo hu'ne ne' mani'ne, Ramofo maka kasegene tra kea amage nentene, mago havi avu'avara osuke, fatgo huke Ramofontera mani'na'e. **7** Hu'neangi mofavre onte'na'e. Na'ankure Elisabeti'a mofavre ontelo naravo mani'gene tavava ozafa re'na'e. **8** Mago zupa Zekaraia ene ra mono nompi Anumzamofonte kre sramnavu pristi eri'za eneri'za naga'mo'za, zamagrama eri'zama eneri'za kna ege'za emetru hu'naze. **9** Hagi pristi vahe'mo'za koma zamuzmapina Kresramana vunaku taisi zokago razageno, iza agimo'ma e'amama himofo huntageno Ra Anumzamofo ra mono nompi ufreno Ramofonte Kresramana nevia kante, Zekaraina ana hu'za huntageno Kresramana mananentake'za hu'naku ufre'ne. **10** Hagi rama'a vahe'mo'za fegi'a ra mono no agu'afi manine'za, ana gnamofo agu'afina (hour) nunamu nehzageno agu'afina mananentake'zana Kresramana vu erizana eri'naze. **11** Magora Ramofo ankeromo kre sramnavu

tra'mofona tmaga kaziga efore huno oti'ne. **12** Ana'ma higeno'a Zekaraiama ankeroma negeno'a, antri nehuno koro hu'ne. **13** Hianagi ankeromo'a anage huno hu'ne, Zekaraiaga korora osuo, na'ankure nunamunka'a Anumzamo'a antahi'neankino, neganaro Elisabeti'a mago ne'mofavre kasentegahie. Agi'a Joni'e hunka antemigahane. **14** Ana mofavre kasentenkeno krimpa so'e nehina muse hugahane. Hanki rama'a vahe'mo'za ana mofavrema kasente'nia kema antahisuzza anazanke hu'za muse hugahaze. **15** Na'ankure Ramofo avurera ra vahe trohuno manigahie. Agra waini tine, hanave tinena onetfa hugahie. Na'ankure nerera rimpafi mani'nenigeno'a Ruotge Avamumo'a agu'afi fre avitegahie. **16** Ana mofavremo'a hakare Israeli vahe'mokizmi zamazeri rukrahe hinke'za, Rana Anumzazimire egahaze. **17** Ana nehuno agra Ramofona ugota huno nevuno, Elaija'ma eri'neankna hanavene avamu'ene enerino, afahemokizmia zamagu'a zamazeri rukrehe hina mofavrezmire ne-enageno keontahi vahe'mokizamia zamazeri rukrehe hinke'za kentahi vahe manisaza zamo'a, Ramo'ma esiazamofonka retro huntiegahie. (Mal 4:5-6.) **18** Hanki Zekaraia anage huno ankeromofona asami'ne, nankna hanige'na nagra kena antahi'na hugahue? Nagra ozafa rogeno, a'nimo'a anahukna huno tavavate'ne higeno, **19** ankeromo'a anage huno asami'ne, Nagra ankero ne' Gebrieline, Anumzamofo tava'onte nemanuankino, Anumzamo hunanteno, ama Knare Musenke erinka ome asamio huno hunantege'na, eme negasamue. (Den 8:16) **20** Hanki kagra kama antahio, knare ke negasamugenka kamentinti osanku, kagerura orunka mani'nenankeno ana kna forehina kea hugahane. **21** Hagi meg'i'a ra mono nompi Zekaraia avega mani'naza vahe'mo'za, agafa hu'za antahintahi hakare nehu'za, na'a higeno

agru huno Ruotage hu'nea nompina zazakna nemanie hu'za
hu'naze. **22** Hianagi agrama megia ne-eno'a kea eme huozami
avame name hige'za, zamagrama zmagesama antahi'zana,
mago'aza agru huno routage nompina efore higeno ke'ne hu'za
hu'naze. **23** Ra mono nompima kre sramnavu eriza kna'amo
vagaregeno, atreno noma'arega vu'ne. **24** Hagi mago'agna
evigeno, Elisabeti'a amu'ene huno mani frakino mani'negeno,
5fu'a ika enevigeno, amanage huno hu'ne. **25** Amazana
Ramo asunku hunenanteno vahe'mo'zama mofavre onte a're
hu'za nehu'za nagazema eri nemamiza zana eri atre'nante.
26 Elisabeti'a 6si'a ika amu'ene huno mani'negeno, mago
ankeromofo agi'a Gebrieli'e nehimofo Anumzamo'a huntogeno,
Galili kaziga osi kuma Nazaretie nehaza kumate uhanatino,
27 Maria'a vene omase'nea mofara, Josefe Deviti negeho
a' erigahie huza huhampriante'naza mofate uhanati'ne. **28**
Ana ankeromo'a Mariante ehanatino anage hu'ne, Knare kne
Mariaga, Anumzamo'ma avesigantenemoka, Ramo'a kagrane
mani'ne. **29** Hianagi ana mofa'mo'a, ana musenkema nentahino'a,
antahintahi hakare nehuno, ama kea nankna agu'agesa me'nea
musenke nehie huno hu'ne. **30** Ana higeno ankeromo'a ana
mofamofonkura anage hu'ne, Korora osuo Mariaga, na'ankure
Anumzamo'a kagrira antahi muse hunegante. **31** Hanki kama
antahio, kagra kamu'ene hunka ne'mofavre kasentenka agi'a,
Jisasi'e hunka antegahane. **32** Ana mofavremo'a ra vahe
fore nehinke'za vahe'mo'za, Marerisa Anumzamofo Mofavre
nehnageno, negeho Deviti kini trara, Anumzamo'a eri aminigeno
kini manigahie. **33** Agra, Jekopu nagate kegava huzmante
vava nehinkeno, kini eri'zama'amo ene Agrama kegava hania
kumamo'a mevava hugahie. (*aiōn g165*) **34** Maria'a anage huno

ankeromofo asami'ne, Nagra venena omase'noanki inankna huno
fore huku higenka nehane? **35** Higeno ankeromo'a kenona'a
anage huno asami'ne, Ruotge Avamumo kagrite ne-enkenka,
Marerisa Anumzamofo hihamu'amo refitegantegahie. E'ina
hu'negu ksentesana Mofavremo'a ruotge hanigeno, Anumzamofo
mofavre hu'za hugahaze. **36** Hanki ko, negamomo Elizabeti'a
anahukna huno tavava'tefinka amu'ene hu'ne. Naravo a' manino
mofavre onte are hu'nazanagi, menina amu'ene higeno' 6si'a
ika agatere'ne. **37** Na'ankure Anumzamofontera mago'zamo'e
huno amuho osugahie. **38** Higeno Mari'a anage hu'ne, Izo
nagra Ramofo kazokzo eri'za a' mani'noe. Hagi atregeno kema
hanankante efore hino, higeno ankeromo'a atreno vu'ne. **39** Ana
knafina Maria'a agona kumatega ame huno otino Judia kaziga
rankumate uhanatino, **40** Zekaraia nompi umarerino, knare kne
huno Elisabetina humuse huntene. **41** Maria'ma knare kne huntea
kema, Elisabeti'ma nentahigeno'a, rimpafi mani'nea mofavremo'a
muse nehuno, haru huno marerigeno Ruotage Avamumo'a
Elisabetina agu'afi frevite'ne. **42** Ana higeno ana amo'a ranke
huno, Maka a'nemofo asomura agatereno kagirira rama'a asomu
Anumzamo'a huneganteno, karimpafima mani'nea mofavrea
asomu huntene! **43** Nagra iza'na mani'nogeno Ranimofo nerera'a,
eno eme nage. **44** Hanki antahio, kagra humuse hunka, anama
knare kne hunka nehankena nentahugen'o'a, narimpafi mani'nea
mofavremo'a haru huno marenerino muse hu'ne. **45** Hagi
Ramo'ma hu'nea kemofo kamentinti hanku, asomu hunegantena,
anama hu'nea kemo'a, kagripi avufa'a efore hugahie. **46**
Maria'a amanage hu'ne, Nagu'amo'a Ramofo ragi amigeno, **47**
nagri avamunimo'a naguvazi Anumzamofo agafa huno muse
huntene. **48** Na'ankure Agra anteramina kazokzo eriza vahe'ama

mani'noana navu'navara nage'ne. Menima agafa huno vaniana maka vahe'mo'za Anumzamo'a asomu hunte'ne hu'za hugahaze.

49 Na'ankure Hihamu'ane Anumzamo'a raza hunante'ne, Agri agi'a ruotage hu'nemo'e. **50** Izazo Agriku koro hunentaza mokizmia Agra asuragizmanteno zamaza nehuno, zamagripinti efore hunante anante hanamokizmia anazanke huzmantegahie.

51 Ramo'a hanavenentake avu'avaza azanura eri fore nehuno, antahintahizmifima zamagima eri'za mareneri'za vahera zamahe panani hu'ne. **52** Agra hanave kini vahera, kini tratetira zamazuhu fenkama netreno, anteramiza nemaniza vahera ana kini trate zamavare ante'ne. **53** Zamagaku haza vahera, knare'zanu erivite'nezmanteno, fenomo avite'nea vahera, zamaza zamavapa huzmanteg'e'za nevaze. **54** Agra eri'za vah'e a Israeli vahe zamaza nehuno, asunku huzmantegahue huno huvempa hu'nea kegura agera nokanie. **55** Tahi'mofo koma mevava huvempa ke Abrahanku asamino, agehemmo'ma fore hunante fore hunante knane knane hu'noma esia vah'e zamaza huku hunte'ne. (aiōn
g165) **56** Maria'a anage huno Elisabetina asamiteno, 3'a ika agranena maniteno noma'arega vu'ne. **57** Hagi Elisabeti'a mofavre kasentesia kna egeno, ne' mofavre kasente'ne. **58** Ana a'mofo naga'mo'zane, agri kumapi naga'mo'za Ramofo asuntagizamo'ma Elisabetinte'ma eama hu'nea kema nentahiza rama'a musenkase agrane hu'naze. **59** Hagi 8 knazupa Moses kasegemmo'ma hu'nea kante ante'za avufa taga huku e'za, nefä agire Zekaraia'e huta agi'a asamresune hu'za hu'naze. **60** Hianagi nerera'a kenona huno, Ama mofavre'mofo agi'a Joni'e huta antegahune higeno, **61** zamagra anage hu'naze. Tamagri nagapina mago'mofo agi'a Joni'e agine vahera omani'ne. **62** Hu'za nehu'za, nefana zamazanu avame'name hu'za iza'e hunka

agi'a antegahane hu'za antahigageno, **63** avontafe eritma eho
huno azanu avame'name hige'za eri'za eme amizageno, agi'a
Joni'e huno avonakre zamige'za nege'za antri hute'za, hakare
zamagesa nentahizageno, **64** ame huno Zekaraia agimo'a aka
higeno, agefunamo'a agafa huno eri'za erigeno, Anumzamofo
agi erisaga hu'ne. **65** Hagi ana higeno, anama megagi'nea
kumate maka vahe'mokizimi tusi zamagogo nefefege'za, maka
Judia agona kumatega ana agenkea hugantugma hu'naze. **66**
Maka ana nanekema antahizamo'za zamagu'afi netre'za, anage
hu'naze. Henka ama mofavremo'a nankna vahe manigahie?
Na'ankure Anumzamofo hanavemo'a agrane me'ne. **67** Hagi nefo,
Zekeraiana Ruotge Avamumo agu'afi frevitegeno, amanage huno
kasnampa kea hu'ne, **68** Israeli vahe'mofo Rana, ra agi amisune.
Agra'a vahe'a zamaza huno zamagu'vazinaku e'ne. **69** Tagri
Anumzamo'a, Agri eri'za vahe'a Deviti nagapinti hankavenentake
ne' kefozampinti tahokeno taza hania ne' neramie. **70** Korapara
Ramo'a ruotage kasnampa vahe'mofo zamagipi huvazino kea
hu'ne. (aiōng165) **71** Menina ha' vahetimofo azampinti taza nehuno,
maka antahi haviza hurantesaza vahepintira taza hugahie.
72 Amazama hiana tagehe'i asunku hunezmanteno, korapa
ruotge hunea huhagerafino huvempage huno zamasmi'nea
hanave kasegegu, agesa nentahino eriama nehie. **73** Huvempa
huhagerafi kema neregeho Abrahanku huntene. **74** Ha' vahe'mofo
zamazampintira tagu'vazinketa, koro osu manineta eri'zama'a
erintegahune. **75** Mani ruotge nehuta, fatgo avu'ava huta
tasimuma erita manisuna kna'afina Agri avurera hakare gna
manivava hugahune. **76** Hagi kagra ama mofavre'moka, Marerisa
Anumzamofo kasnampa vhahere hugahaze. Na'ankure kagra
Ramofona vugotenka Agri kana retro huntegahane. **77** Kagra,

Agri vahera Anumzamo'ma zamaguma vazino kumizimi eri apasezmanente'nia kea zmasami'sanke'za, zamasunku hanageno zamagu'vazigahie. Agra monafi masa huntenigeno eme remsha hugahie. 78 Na'ankure Anumzamo'a avesiranteno fru avu'ava'ma hurantea zamo'a, nanterama zagemo monafinti hanatino remsa hiankna huno remsa hurantegahie. 79 Zamagrama hanimpi manine'za frizamofo turinapi mani'namokizmia masa nezamino, tagrira tazeri fatgo huno rimpia fru kante tavereno vugahie. 80 Joni'ma ra huno avamupima hanavetiteno, ka'ma mopafi vuno umani'negeno, kna'a egeno Israeli vahepina eama hu'ne.

2 Hagi ana knafi mika Romu kamani vahe'mo'za kva hu'naza mopafina, Romu rankva ne' agi'a Sisa Ogastusi'a kasege erinteno, maka vahe'mo'za zamagia eme kreho hu'ne. 2 Hagi Siria mopafina Kuiriniasi Gavana mani'nere, ana knafi ese kna agafa hu'za zamagia kre'naze. 3 Ana hige'za maka vahe'mo'za zamagi kre'naku mopa agafa zimire vutere hu'naze. 4 Josefe'a agranena kini ne' Deviti nagapinti ne'kino, Nazareti kuma Galili kazigati atreno, Betlehemue nehaza Deviti kumate vu'ne. 5 Josefe'a a'isa kinte'nea a' nevareno, Kamani vahe'mo'za zanagima krenagu amu'ene hu'negene vu'na'e. 6 Hagi anantega umaninakeno, Mariana mofavrema kasentesia kna egeno, 7 ese ne' mofavre kasenteno tavravenu ano vazino, bulimakamofo ne'za zuompafi antegeno mase'ne. Na'ankure miza seno mase nontamina ana mika vahe'moke hisa higeno'e. 8 Hagi ana kuma tva'onte, sipisipi kva vahe'mo'za kenage sipisipia kva hu'za megi'a mani'nageno, 9 ame huno ankeromo efore nehigeno, Ramofo masa'amo anamokizmi remsa hunezmanetege'za koro hu'naze. 10 Hianagi ankeromo anage huno zamasami'ne, Kore osuta antahi so'e hiho, nagra Knare Musenke eri'ha neonkino,

maka ama mopafi vahe'mo'za tusi muse hugahaze. **11** Na'ankure menina Deviti kumatera, tamagri'ma tamagu'vazinia mofavre kasente'ne. Hanki ana nera Ramo, Kraisi'e. **12** Hanki avame'za ome kesnazana amana hu'ne, ana mofavre tavaravefi antegafino bulimakao ne'za zuompafi ante'nenketa ome kegahaze. **13** Anage nehigeno, ame huno rama'a ankeromo'za monafinti anante efore hu'za, Anumzamofo agi erisaga nehu'za anage hu'za, **14** Monafi marerisa kumapi nemania Anumzamo'a Ra agi erino. Hagi mopafina vahe'mo'za zamarimpa frune maniho. Anumzamo'a rimpa fru huzmante! **15** Anage hute'za ankero vahe'mo'za zamatre'za monafi ete marerizage'za, sipisipi afu kva vahe'mo'za zamagragura anage hu'naze, Erinketa Ramo'ma menina Betlehemu kumate hentofazana forehie huno tasamiazana ome kesune. **16** Nehu'za ame hu'za oti'za vu'za ome kazana Maria'ene Josefeke, mofavre'zinia bulimakamofo ne'za zuompafi antemase nege'za ome ke fore hu'naze. **17** Sipsipi kva vahe'mo'za ome ke fore nehu'za, ankero vahe'mo'zama ana mofavregu hu'naza kea, nererane nefanena znasami'naze. **18** Hagi ana kema maka vahe'mo'za antahi'zamo'za, antri nehu'za antahintahi hakare hu'naze. **19** Hianagi Maria'a ana nanekema hazankea nentahino, agu'afi ana maka kea nenteno ana kea agera okani'ne. **20** Hagi sipisipi kva vahe'mo'za rukrahe hu'za nevu'za, ankero vahe'mo'za hu'naza kemofo nena'a maka fore hige'za, nege'za nentahiza hu'naza zanku, Anumzamofo muse hunente'za, Agi'a erisaga hume vu'naze. **21** Hagi 8 knazupa avufa taga nehu'za, agi'a Jisasi'e hu'za antemi'naze. Ana agi'a ankeromo nerera rimpafima fore osu'negeno Jisasi'e hunka agi'a antegahane hu'nea kante ante'za agi'a ante ami'naze. **22** Hagi zamazeri agruhu knama vagaregeno, Mosese kasegemo'ma

hu'nea kante ante'ne Josefe ene Mariakea Jisasina avare'ne Ra Anumzamofo aminaku Jerusalemi kumate ra mono nompi vu'na'e.

23 Ramofo kasegefi krente'neana, Maka ese ne'mofavrema kasentesiana ramofo ami'nigeno, ruotge mofavre manigahie hu'ne. (Eks-Ati 13:2) **24** Ramofo kasegefi huno, kre sramanama hunteszazana, Tare maho namanuro, tare kasefa namanu kre sramana vugahaze hu'nea kante ante'ne ome ana hu'na'e. (Lev-Pri 12:8.) **25** Hagi mago nera Jerusalemi kumate mani'nea ne' agi'a Simioni'e. Ana nera fatgo nekino, kazigazi huno Anumzamofo amage anteno nevuno, Israeli vahe'mokizmi zamahoke ahesnia vahe fore hanigu avega anteno mani'negen, Ruotge Avamumo'a agripina avite'ne. **26** Ruotge Avamumo korapa averi huno, ofri mani'enka, Ra Anumzamo taza hania ne' Kraisina huntena fore hinkenka ketenka frigahne, huno asami'negeno antahino mani'ne. **27** Ana higeno Simionina Ruotage Avamumo azeri otigeno, ra mono nompi marerino umani'negen, Jisasi nerera ene nefakea avare'ne kasegemoma hu'neaza huke e'na'e. **28** Simioni'a ana mofavre nevareno, Anumzamofo ra agi erisaga nehuno amanage huno hu'ne.

29 Ramoka kazokazo eri'za vaheka'amo'na, huvempa kema hunante'nana zana hago fore hige'na koe. Hagi natrege'na kema hunana kante ante'na narimpa frune fri'neno. **30** Na'ankure tahokeno taza hanimofona, nagra navunu koe, **31** Kagra korapa retro hunte'namo maka vahe zamufi efore hie. **32** Agra masagino maka megi'a vahetera remsa hunezmantena, Israeli vahe kamofona ra agi amigahie. **33** Ana mofavremofo nerera'ene nefakea ana kema huntea kegu tusiza hu'ne antri nehune antahintahi hakare hu'na'e. **34** Ana huteno, Simioni'a asomu ke hunezmanteno, anage huno Mariana asami'ne, Antahi so'e huo.

Ama mofavre kamo'a rama'a Israeli vahe'mofo zamazeri traka
nehuno, mago'a nagara zamazeri onetino, mago avame'zankna
huno mani'nena, rama'a vahe'mo'za zamefi humigahaze. **35**
Ana hina tamage maka vahe'mofo oku'a antahintahimofona
eri ama nehina, kagri'enena asane kazimo tumoka'a reaza
hugahie. **36** Hagi anampina anahu kna huno kasnampa ara
agi'a Ana'e, Fanuel mofakino, Asa nagapintire. Ana a'mo ve
erino neve'ene 7ni'a kafuzage mani'negeno, neve'a frigetegeno,
manime vuno tavava teno mani'ne. **37** Ana a'mo'a kentoza huno
maninegeno kafuzage'amo'a 84'a hu'negeno mono nona notreno,
monora Anumzamofona hunenteno, ne'za a'o huno nunamuna
kenage'ene feru enena nehuno mani'ne. **38** Anama nehigeno
anante ana a'mo'a eno, Anumzamofona susu hunenteno,
Jerusalemi vahe'ma zamaza huno zamavaresanigu avegama
ante'naza mofavre fore hie huno huama huno zamasami'ne. **39**
Hagi Josefe ene Mariakea Ramofo kasegemo'ma hu'neazana
ana mika huteke, ete Galili mopare vu'za, Nazarete kumazinire
umani'naze. **40** Ana hu'ne umaninakeno, Mofavre'zinimo nena
huno hanave netino, knare antahintahifi avitegeno, Anumzamofo
asunkuzamo'a Agrane me'ne. **41** Maka kafuma ne-egeno'a Jisasi
nerera ene nefakea, Anumzamo Israeli vahe kinafinti ozmaheno
zmagaterenea kna (Pasova) fore'ma nehigekea, Jerusalemi
vutere hu'na'e. **42** Hagi Jisasi'a 12fu'a kafuzage higeno, koma
neha'aza hu'ne ra knamofo ne'za nenaza kna fore higeke avare'ne
marerine vu'na'e. **43** Hianagi ne'za neknamo vagamaregeno,
nontegama vunaku neazageno, Jisasi'a Jerusalemi kumate
mani'negene, nerera ene nefakea onke atreke e'na'e. **44** Hianagi
zanagrama zanagesa antahi'ana, magoka e'nona vahe'ene
ne-e hu'ne nentahine nevakeno kinagase'ne. Kinaga onke'ne

rone'zinine, mago'a vahé zamantahigazana, a'o tagranena nome hu'naze. **45** Hakreke erifore osuke, ete rukrehe huke Jerusalemi ome hakenaku vu'na'e. **46** Hagi 3'a zagegnama enevige'ne, ra mono nompi kasegemofo rempi huzami vahé'mofo amunompi manineno, kema hazana nentahino zamantahige kea nehigeke, ome kene eri fore hu'na'e. **47** Hagi Jisasi'ma antahino keno nehuno, kenonazamima hiazankura, maka'mo'za ana kema nentahiza, zamagra antri hu'za hakare antahintahi hu'naze. **48** Hagi nererake nefake nege'ne, antri nehune, nerera'a anage huno hu'ne. Mofavre timoka na'a higenka amanahu kavukvara hunerantane? Ko, negafa'ene, nagranena amuhohuta kagrikura nehako'e. **49** Hianagi Jisasi'a kenona huno, Nahigeta Nagrikura nehaka'e? Nafa'nimofo nompi manigahuanki tanagra ontahina'o? **50** Hianagi anagema hiankemofo agafa'a nerera'ene nefakea antahi amara osu'na'e. **51** Anante Jisasi'a nerera'ene nefä'ene Nasareti uramino umani'neno, nererane nefane kea amage ante'ne. Hianagi nerera'a maka'zama hiazana agu'afi erintegeno me'ne. **52** Jisasi'a knare antahintahizane hanavene nena nehigeno, Anumzamo'a avesinentegeno, vahé'mo'zanena avesinte'naze.

3 Hagi Taiberias Sisa'ma Romu kumate 15ni'a zage kafuma kinima mani'negeno'a, Pontius Pailoti'a Judia mopare ugagoteno kva mani'geno, Heroti Antipasi'a rankva Galili manigeno, nefu Filipi'a rankva Ituriane, Trakoniasi kaziga mani'geno, Laiseniasi'a rankva Abilini kumate mani'ne. **2** Ana knafina Anasike, Kaiafasikea mono nonte ugagota pristi netre mani'na'e. Higeno Anumzamofo kemo, vahé omuni hagege kokampi Zekaraia nemofo Joninte e'ne. **3** Joni'a mika Jodani rantima me'nea kaziga vano nehuno, tamagu'a rukrahe nehutma mono ti

nefrenkeno, kumi tamia atreramanteno huno mono ke hu'ne. 4
Kasnampa ne' Aisaia avontafepina amanage huno krente'ne,
Mago vahe'mofo agerumo'a, vahe omani ka'ma kopinti kezatino,
Ramo'ma esia kana retro nehuta, Agri kana azeri ante fatgo
hunteho hu'ne. 5 Mika keri'a antevineteta, mika agona eri agupo
nehutma, kazaki nesia zantamina erintefatgo, nehinkeno, 6 ana
mika vahe'mo'za Anumzamo'ma tahokema heazana kegahaze.
(Ais 40:3-5) 7 Higeno Joni'a agrite'ma mono ti frerantesie
hu'za e'naza vahe krerfamo'za anage huno zamasami'ne,
Tamagra ha' osifave'mofo mofavre nagare! Aza hanigetma
Anumzamofo rimpa hezampintira korera fregahaze? 8 E'ina
hu'negu, tamagrama tamagu'ama rukrehema hu'nenuutma knare
tamavutmava hinkeno hago zamagu'a rukrehe hu'naze hu'za
hugahaze. Tamagra agafa hutma Abrahamu'a tagri nerageho
mani'ne huta osutfa hiho. Na'ankure tamagri'ma neramasmuana,
Anumzamo'a amne ama haveramintetira Abrahamuna mofavrea
erifore humigahie. 9 Menina hago sasumemo'a zafa antaginaku
agafafi kriri'ne, hagino anampinti'ma knare ragama reontesia
zafa antagino tevefi asaga huno kregahie. 10 Hige'za ana vahe
kevumo'za Jonina anage hu'za antahige'naze. Hagi tagra na'a
hugahu'ne? 11 Hu'za antahigageno, Joni'a, zamagari kenona
anage huno zamasmi'ne, azagama tare kenama ante'nesamoka,
magora onte'nesimofo ome fako humio, hagi azagama ne'zama
ante'nesamoka, anazanke hunka fako huzamio. 12 Takisi zagoma
zonegiza vahe'mo'zane, ti frerantegahie hu'za e'namo'zanena,
Jonina anage hu'za antahige'naze. Rempi huzami nemoke,
tagranena nankna hugahune? 13 Agra anage huno zamasmi'ne,
Kvamo'ma eriho hu'nesia kana arugateretma mago'ene zagoa

zo'onkiho. **14** Anante mago'a sondia vahe'mo'za antahige'naze. Hagi tagaranena na'a hugahune? Hazageno Joni'a anage huno zamagrira zamasmi'ne, Vahe'mokizami zagoa tutu huzamanteta havigea hutma e'oriho. Hagi tamarimpa fru hutma mizantami eri fatgo hiho. **15** Anagema hianke vahe'mo'za nentahi'za, Joninkura Kraisi hago ama e'nefi nehu'za, tare tagufa zamagesa antahi'naze. **16** Joni'a mika'mokizmi kenona anage hu'ne, Nagra amane tintafanteti fre'neramantoe. Hianagi magoma ne'emo'a nagrira nagatereno tusi hihamu'ane ne' egahie. Nagra amuha osu'noankina Agri aganomofonofira katu ofegahue. Agra mono tina Ruotage Avamuteti'ene, tevereti'ene freramantegahie. **17** Agra witi eri herahehu fokua azampi eri'no, witi hona'a hare kuma harafi nehuno, nena'a witi ante nompi eri'nenteno, hona'a vaga ore tevefi kre fanene hugahie. **18** Ana huno amanahu kante, Joni'a rama'a knare antahintahi erinteno, vahera Knare Musenkea zamasami'ne. **19** Hianagi Joni'a rankva ne' Herotina haviza hu'nane huno hanavetino asami'ne, na'ankure nefu nenaro rehanereno Herodiasina a' erinte'nea zanku'ene, havi avu'avazama hiazanku anagea hunte'ne. **20** Heroti'a mago'ene ana agofetu kefozama hu'neana, Jonina kina hunte'ne. **21** Maka veamo'za mono ti fretageno, Jisasi'enena mono ti freteno, nunamu nehigeno mona kafamo'a anagigeno, **22** Ruotage Avamumo'a maho namagna huno eramino avufare emanigeno, monafinkati mago agerumo'a anage hu'ne, Mofavrenimoka tusiza hu'na Kagrikura kavesinegante'na muse hunegantoe. **23** Jisasi'ima mono eri'zama'ama erigafa hu'neana, 30'a kafuzage naza huteno erigafa hu'ne. Hanki vea'mo'za zamagesa antahi'zana, Josefe mofavre mani'ne, hu'za zamagesa antahi'naze. Hanki Josefe nef a agi'a Eli'e. **24** Eli nef a agi'a Matati'e. Matati nef a agi'a

Livae'e. Livae nef a agi'a Melki'e. Melki nef a agi'a Janai'e. Janai
nef a agi'a Josefe'e. **25** Hagi Josefe nef a agi'a Matataiasi'e.
Matataiasi nef a agi'a Emosi'e. Emosi nef a agi'a Nahomu'e.
Nahomu nef a agi'a Esli'e. Esli nef a agi'a Nagai'e. **26** Hagi Nagai
nef a agi'a Mati'e. Mati nef a agi'a Matataiasi'e. Matataiasi nef a
agi'a Simei'e. Simei nef a agi'a Joseki'e. Joseki nef a agi'a Jota'e.
27 Hagi Jota nef a agi'a Joanani'e. Joanani nef a agi'a Resa'e.
Resa nef a agi'a Selubabeli'e. Selubabeli nef a agi'a Sieltiel'i'e.
Sieltiel'i nef a agi'a Neri'e. **28** Hagi Neri nef a agi'a Melki'e. Melki
nef a agi'a Ati'e. Ati nef a agi'a Kosamu'e. Kosamu nef a agi'a
Elmadamu'e. Elmadamu nef a agi'a Er'e. **29** Er nef a agi'a Josua'e.
Josua nef a agi'a Eliesa'e. Eliesa nef a agi'a Jorimi'e. Jorimi nef a
agi'a Matati'e. Matati nef a agi'a Livae'e. **30** Hagi Livae nef a agi'a
Simioni'e. Simioni nef a agi'a Juda'e. Juda nef a agi'a Josefe'e.
Josefe nef a agi'a Jonamu'e. Jonamu nef a agi'a Eliakimi'e. **31**
Hagi Eliakimi nef a agi'a Melea'e. Melea nef a agi'a Mena'e. Mena
nef a agi'a Matata'e. Matata nef a agi'a Neteni'e. Neteni nef a agi'a
Deviti'e. **32** Hagi Deviti nef a agi'a Jesi'e. Jesi nef a agi'a Obeti'e.
Obeti nef a agi'a Boasi'e. Boasi nef a agi'a Salmoni'e. Salmoni
nef a agi'a Nasoni'e. **33** Hagi Nasoni nef a agi'a Aminatabu'e.
Aminatabu nef a agi'a Edmini'e. Edmini nef a agi'a Arni'e. Arni
nef a agi'a Hesroni'e. Hesroni nef a agi'a Peresi'e. Peresi nef a
agi'a Juda'e. **34** Hagi Juda nef a agi'a Jekopu'e. Jekopu nef a
agi'a Aisaki'e. Aisaki nef a agi'a Abrahamu'e. Abrahamu nef a
agi'a Tera'e. Tera nef a agi'a Nahori'e. **35** Hagi Nahori nef a agi'a
Seruki'e. Seruki nef a agi'a Reu'e. Reu nef a agi'a Peleki'e. Peleki
nef a agi'a Eberi'e. Eberi nef a agi'a Sela'e. **36** Hagi Sela nef a
agi'a Kenani'e. Kanani nef a agi'a Arfaksati'e. Arfaksati nef a agi'a
Semi'e. Semi nef a agi'a Noa'e. Noa nef a agi'a Lemeki'e. **37**

Lemeki nef a gi'a Metusela'e. Metusela nef a gi'a Inoku'e. Inoku
nef a gi'a Jareti'e. Jareti nef a gi'a Mahalale'e. Mahalale nef a
gi'a Kenani'e. 38 Kenani nef a gi'a Enosi'e. Enosi nef a gi'a
Seti'e. Seti nef a gi'a Adamu'e. Adamu nef a gi'a Anumzane.

4 Jisasi'a Jodani timpi mono ti fretegeno, Ruotage Avamumo
agu'afi efre viteno avareno ka'ma kopi vu'ne. 2 Hagi 40'a
zageferupi Satana mago agi'a hankromofo kvamo, ne'za a'o
huno mani'nea kna'afi Jisasina revatga hu'ne. Anama nehigeno
Jisasi'a agaku hu'ne. 3 Sata'a amanage huno Jisasinkura
hu'ne, Kagrama Anumzamofo mofavre mani'nesnunka ama
havegura breti fore huo hunka hugeno breti fore hino. 4 Jisasi'a
ana kemofo nona'a amanage hu'ne, Avontafepi anage huno
krentene. Vahe'mo'za breti nesafintikera zmasimura e'origahaze
huno krente'ne. (Diu-Kas 8:3) 5 Sata'a Jisasina avareno
za'za agonare marerino, maka ama mopafima me'nea ranra
kumatamina ame huno averi'ne. 6 Ana huteno Sata'a amanage
huno asami'ne, maka'zana nagrike kvafi me'neankina, ama
ana makazana kamigahue. Na'ankure ama ana mikazana,
izano aminaku'ma hanumofona amane amigahue. 7 E'ina
hu'negu kagrama krenarenka mono hunantesankena, ama ana
maka'zana kaminugeno kagriza segahie huno higeno, 8 Jisasi'a
ananke nona'a anage huno hu'ne, Avontafepina anage huno
krente'ne, Kagra ranka'a Anumzamofo monora hunentenka, agri
eri'zanke erigahane huno krente'ne. (Diu-Kas 6:13) 9 Anante
Sata'a Jisasina avareno Jerusalemi kumate vuno, ra mono
nomofa amumpare ome nenteno, amanage huno asami'ne,
Kagra Anumzamofo mofavre mani'nenunka fenamufi takauro, 10
na'ankure avontafepina anage huno krente'ne, Anumzamo'a
ankero vahe'a huzmantenke'za kva hugantesageno, 11 havemo'a

kagia taga hu'zanku zamazampi kavresga hanageno, kagia taga osugahie huno krente'ne, (Sam-Zga 91:11-12) **12** Jisasi'a ana kemofo nona'a anage huno asami'ne, Avontafepi anage huno krente'ne, Ranka'a Anumzamofona rehenka onko huno hu'ne. (Diu-Kas 6:16) **13** Sata'ma mika revatga huvagareteno, henka'a kankamuma fore hanigeno revatga hanigu atreno vu'ne. **14** Jisasi'a ete Galili mopare Avamumofo hihamufi vigeno, agenke'amo ana mopafina vuno eno hu'ne. **15** Ana nehuno Jisasi'a, agafa huno osi mono no zimifi mono kea nehige'za, agi erisga hu'naze. **16** Hagi Jisasi'a nenama hu'nea kumate Nazarete eno, nehiaza huno mani fruhu knazupa (sabat) osi mono nompi marerino avontafe hamprinaku o'netige'za, **17** Kasnampa ne' Aisaia avontafe regazarinte'naza eri'za eme nemizageno, eri vakannereno, hakreno amanage huno kre'nea ke hampri'ne, **18** Ramofo avamumo Nagrane eman'i'ne. Na'ankure agra huhampri nanteno, zamunte omane vahepi Knare Musenkea huama huo huno hunante'ne. Agra hunanteno huama hugeno, kinafi mani'nesaza vahe'mo'za katufe'za nevnageno, zamu suhu vahe'mo'za negesageno, vahe'mo'za zamazeri haviza nehanaza nagamoza fru hu'za nemanisageno, **19** Ramo tamaza huno tamazeri so'ema hiazankura huama hu'na tmasaminaku e'noe. (Ais 61:1-2.) **20** Anage huno hampriteno, ana avontafe regazarino, avontafemofo kva ne' nemino manige'za, ana osi mono nompi mani'namo'za zamua Agri kete'za mani'naze. **21** Ana huteno agafa huno zamasm'i'ne, Amama hamprugetma antahiza kemofo avufa'a meni fore nehie. **22** Hagi maka vahe'mo'za knare kema hia kegura antri nehu'za, mago'ene ontahige antahige nehu'za, ama Josefe mofavre omaninefi? hu'za nehazageno, **23** Jisasi'a anage huno zamasami'ne,

Tamage hutma huvame kea hunantegahaze. Tusa ne'moka kagra kavufa kazeri knare huo! Nehuno anage hu'ne, Kapeniamu kumate kaguvazama erifore hu'hanketa antahi'nonanki, e'i anazana kumaka'are huo hutma hugahaze. **24** Tamage hu'na neramasamue. Magore huno kasnampa vahe'mofona kuma'afinti vahe'mo'za ke'a antahi omigahaze. **25** Hianagi tamage hu'na neramasamue, Israeli vahepin a rama'a kento'ane Elaija knafina mani'nageno, monafinti 3'a kafugi 6si'a ikana kora origeno, tusi agate'za maka mopafina fore hu'ne. **26** Ana hu'neanagi Elaijana huntogeno Israeli mani'naza kento a'nerera ovu'neanki, rurega kento ate huntogeno Sarefati kumate Saidoni mopare vu'ne. (Jem 5:17-18, 1 Kin 17:1-16.) **27** Hanki Israeli mopafina, rama'a fugo namuma zmare'nea vahera kasnampa ne' Elisa knafina mani'nazanagi, mago'mofone huno ana vahepin a fugo namumo'a vagareonte'neanki, Siria ne' Nemaninke ana fugo namumo'a vagarentene. (2 Kin 5:1-14.) **28** Anage hige'za, osi mono nompi mani'naza maka vahe'mo'za nentahiza tusiza hu'za zamarimpa ahente'naze. **29** Zamagra oti'za Jisasina rankumateti retufe'za, kuma zamimofo zava ankinareti aretufe atrenaku vu'naze. **30** Hianagi Jisasi'a amu'no zimifinti nezamatreno vu'ne. **31** Ana huteno Kapaneamu rankumate Galili kaziga uramino umani'neno, mani fruhu knarer (sabat) mono kea rempi huzami'ne. **32** Zamagra rempima huzamia kegu zmagogogu hu'naze. Na'ankure hanave'a me'nea vahe'mo'ma nehiaza huno rempi huzamine. **33** Hanki osi mono nompina agru osu havi avamumo agu'a fre'nea vahemo mani'neno, ranke huno kezati'ne. **34** Ee! Tatregeta mani'maneno Nazareti Jisasiga, Kagra tazeri haviza hu'naku ne-eampi? Nagra antahi'noe, Kagra izage, Kagra Anumzamofona Ruotage hu'namoke! **35** Hianagi Jisasi'a kesuno, Kea osu

atrenka atiramio! Higeno havi avamumo'a ana nera amuno zimifi
rutraka hunetreno, azeri haviza osu atiramino vu'ne. **36** Ana
nehige'za mafka vahe'mo'za antri nehu'za zamagogogu nehu'za
ke ohumi ahumi hu'za anage hu'naze. Nankna hihamu'ane ke
ama ne'mo'a nehie? Na'ankure agi me'nea vahe'mo nehiaza
huno tusi'a hihamu hanave'areti, agru osu havi avamura
huntegeno ke'a antahino atineramie! **37** Ana higeno Jisasi
agenke'amo'a ana mopa kagiafina vuno eno huvagare'ne. **38**
Jisasi'a ana osi mono nompinti atiramino Saimon nompi ufre'ne.
Saimoni nenemo'a avufga teve ha kri erino mase'nege'za,
aza haniegu Jisasina asami'naze. **39** Jisasi'a ana a'te vuno,
teveha kri huntegeno fanane higeno, ame huno ana a'mo'a otino
ne'za kre'zmanente'ne. **40** Zage uramino kinaga sege'za, ruzahu
ruzahu kri eri'za mase'naza vahe'mokizmia, naga'zmimo'za
zamavare'za Jisasinte e'naze. Ageno magoke magoke'mofona
azanu zamako hutere huno zamazeri knamaregeno, ana
krizmimo atre zamante'ne. **41** Ana hukna huno rama'a vahepinti,
havi avamutamina huzmantenge'za atinerami'za ranke hu'za,
Kagra Anumzamofo mofavre! Hu'neanagi Agra zamazeri
korino, e'inage osiho huno hu'ne. Na'ankure Kraisi'e hu'za
zamagra ko antahi'nazageno'e. **42** Jisasi'a maseno ko' atigeno
ka'ma moparega vu'nege'za, vahe'mo'za hakre'za ome ke'za
erifore nehu'za tagrane manigahananki, tarenka ovuo hu'za
kazigazi hu'za antahige'naze. **43** Hianagi Jisasi'a anage
huno zamasami'ne, Nagra Anumzamofo kuma'mofo knare
musenkea aruga'a kumapine huama hu'na vugahue. E'ina
agafare Anumzamo'a hunantege'na ama mopafina e'noe. **44**
Anage nehuno mago'ene Judia osi mono nontamimpi vuno,
vahera mono kea ome zmasamino vano hu'ne.

5 Mago knazupa Jisasi'a Genesareti tiru ankenare otino mani'nege'za, tusi'a vahe kevumo'za Anumzamofo naneke antahinaku ome eritruhu'za manititipa hu'haze. **2** Ana tiru ankenare tare onensa vente me'negeno ke'ne. Hianagi nozamema nehaza naga'mo'za anampintira urami'za, kukozimi umaniza sese hu'haze. **3** Mago votifi Agra umarerine, ana suzana Saimoni votifi marerino antahigegeno tinkenaretira osi'a aretufe ogantu'a atre'ne. Hagi Jisasi'a anampi marerino tamu mani'neno, mika vahe mono kea ana onensa ventefinti zamasmi'ne. **4** Ana nanekema huvama nereno'a Saimoninkura anage hu'ne, Antuma timo'ma avuhanihanima hu'neama'afi aretufe kantu antenka, kukonka'a nozamema avazu hananku atrenkago. **5** Hianagi Saimoni'a kenona'a anage hu'ne, Ramoke, tagra tusi amuho huta meni keragera noza azeri naku tusi'a amuho eri'za erinonanagi, magora aze'orifaza hu'none. Hianagi Kagrama hana kere kukoni'a ataregahue. **6** Anama hute'za zamagra tusi nozamezaga azerizageno kukozamimoa agafa huno tagato hu'za hu'ne. **7** Anama hige'za, zamagra mago votifi mani'naza knampa zamirega eme zamaza hihogu kezanke hugantu atrage'za zamagra e'za tarega votirarena emeri avitageno, anantarega votiraremokea tirami'za hu'na'e. **8** Hianagi Saimon Pita'a ana zama negeno'a, Jisasi agafi renareno anage hu'ne, Ramoka nagri navatetira ogantua vuo. Na'ankure nagra kumimo avite'nea ne'tfa mani'noe! **9** Na'ankure Pita'ene, ruga'a nagama agrane mani'naza naga'mo'za nozamema zamagrama azeri'naza zankura, tusi'za hu'za antri hu'haze. **10** E'i anazanke huke Zebeti ne'mofo Jemiske, Jonikea znagogogu hu'na'e, Saimoni ene tragote'za erizana e'nerizane. Higeno Jisasi'a Saimoninku anage huno asami'ne, Korera osuo, amaretima agafa hunka

vnanana, vahera zamavaregahane. **11** Onensa vente'zamia eri'za tinnenare'ma vute'za, mika zazmia anante netre'za, Jisasi amage ante'naze. **12** Jisasi'ma mago rankumapima umani'negeno'a, mago nera fugo namumo miko avufga azeri anovazi'nea ne'mo, Agrite e'ne. Jisasima eme negeno'a, avugosaregati mopafi prihuno unemaseno anage hu'ne, Ramoka nazeri so'e hunaku'ma kavemasisigenka, kagra amane nazeri so'e huo. **13** Higeno Jisasi'a azana avufare avako nehuno anage hu'ne, Nagri'ma navesiana, kagra so'e huo higeno, ana fugo namumo'a ame huno ana zupage atrente'ne. **14** Anante Agra ana nera asamino, Vahera ozamasmio. Hianagi kagra Pristi nete vunka, kagraka'a ome averinka Mosesima huneagante, ofa erinka ome hugeno, fugo namumo'a hago vagare hu'za vahe'mo'za kageho. **15** Hianagi anama hu'nea avu'avazamofo kemo vuno eno higeno, tusi'a vahe kevumo'za Agri ke nentahisageno, krizmia eriamane hanie hu'za e'naze. **16** Hianagi anama hutageno'a, Jisasi'a zamatreo vahe omani ka'ma kopi viazamo nunamu ome hutere hu'ne. **17** Mago knazupa Jisasima rempima hu'nezamige'za anampina Farisi vaheki, kasegerema ugagote'naza vahe'enena tavaoma'are mani'naze. (Zamagara mago mago ana kumatamina Galilitima, Judiatim, Jerusaletima hu'za Agrane eman'i'naze.) Higeno Ra Anumzamofo vahe'ma zamazeri knamare hanavea, Agripi me'negeno zamazeri so'e hu'ne. **18** Anama hutegen'o'a anante mago'a vahe'mo'za sesenku hu'za avufa fri'nea nera zafa hu'za e'naze. Zamagara ana krima eri'nea nera Jisasi avuga eri'za ufre'za ome antenaku ana'ana hu'naze. **19** Hianagi eri'za ufre kankamuna hakare'za erifore osu'naze. Na'ankure tusi'a vahekrfamo'za hisa hazage'za, ana nera avre'za nomote mareri'za, no amumpa eri akasine'za ana sesenku'aga atrageno

vahe amu'nompinti Jisasina avuga fatgo huno urami'ne. 20
Jisasi'ma ana nagamokizmi zamentintima negeno'a, Agra anage
hu'ne, Ronenimoke, miko kumika'a ama apase kantoe. 21
Anante kasegere ugagota hunaza vahe'ene, Farisi vahe'mo'za
agafa hu'za ke hakare hu'za, ama nera iza Anumzamofona
huhaviza nehie? Iza Agra huno kumira apasenegantoe nehie.
Anumzamoke kumira apasegahianki? 22 Hianagi Jisasi'a
ha'arente antahintahima antahi'zana nezmageno, Agra anage
hu'ne, Nahigetma tamagra e'inahu antahintahia tamagu'afina
nentahize? 23 Inana kemo oza hanigena hugahue, Kumika'a
apasegantoe kemopi, Otinka vuo hanua kemo'e? 24 Hu'neanagi
e'inahu hanigeta, tamagra keta antahita nehuta, Vahe'mofo
Mofavremo'a ama'na mopafina, hanavea eri'neankino kumira
amané apase zamantegahie huta hugahaze. Nehuno ana avufga
fri'nea nera asami'ne, Nagra negasamue, otinka sesenkuka'a
enerinka nonkarega vuo huno hunte'ne. 25 Hagi zamagri
zamufi ame' huno otino, mase'nea tafe'a enerino Anumzamofo
agi erisaga hume noma'arega vu'ne. 26 Anama hiazamo
zamagrira zamazeri zamanovazige'za, ananteti agafa hu'za
Anumzamofo agia erisga nehazageno, kore'zamo zamagripina
avitege'za, ruzahu zantafa menina kone, hu'za hu'naze. 27
Anama huteno Agra meg'i'a nevuno omegeana, takisi zago
zonegia nera agi'a Livae'e mago'a agi'a Matiu'e nehaza ne'mo
zago zogi nompi mani'negeno ome negeno anage agriku huno,
Namage eno. 28 Higeno agra miko'zana anante netreno, otino
amage'anteno vu'ne. 29 Hagi Livae'a tusi'a ne'za noma'afi Jisasina
krentenege'za, anantega takisi zagoma zogi vahe krerafane,
ruga'a vahe'enena zamaza tununte kave'ne sipare zanagrane
atru hu'za mani'neza ne'zana ne'naze. 30 Farisi vahe'ene,

kasegere ugagota hu'naza vahe'mo'za, Jisasi amage nentaza
disaipol nagara kanunkanu hu'za ke ha' rezmante'za anage
hu'naze, na'ahigetma tamagra kave ene, tinena takisi zagoma
eneriza naga'ene, kumike naga'enena nenaze? **31** Jisasi'a
kenona huzamanteno anage hu'ne, Knare huza mani'nesaza
vahe'mo'za tusa vahekura ohakegahaze. Hagi krima erinesaza
vahe'mo'za tusa vahekura hakegahaze. **32** Nagra fatgo vahera
zamagi hukura ome'noe, hagi kumi vahe'mo'za zamagu'a rukrehe
hihogu e'noe. **33** Mago'a vahe'mo'za Jisasina amanage hu'za
asm'i'naz, Jonima amage'ma nentaza disaipol naga'mo'za,
hakare zupa ne'zana a'o hu'za mani'ne'za nunamu huvava
hu'naze. Hagi Farisi mono vahe'mokizmi disaipol vahe'mo'za
anazanke nehazanagi, kagrima kamage'ma nentaza naga'mo'za
nezane, tinena nevava nehaze. **34** Anage hazageno Jisasi'a
kenona anage huno zamagrikura hu'ne, Tamagra mago ne'mo'ma
aravema huku'ma mani'nenigeta, ana ne'mofo ru ne' a'mofonkura,
ne'zana a'o huta maniho hugahazo? Ana ne'ma mani'nenigeta
anara osugahaze. **35** Hianagi mago kna ne-eankino, aravema
huku'ma hunesimofoma zamagripinti avretesigeza, e'i ana
knafina ne'zana a'o hugahaze. **36** Jisasi'a anazanke huno mago
fronka kea zamasmi'ne. Mago'mo'a kahefa kenaretira tagato
huno atafa kenarera anteno ohatigahie. E'inama hanigeno'a,
kasefa kena eri tagato hanigeno, kasefa kenamo'a korapa
kenarera mago knara osugahie. **37** Ana hanigeno magomo'e
huno kahefa wainia, meme afu akruteti tro hunte'nea atafa waini
taferopina tagi ovazigahie. Anama haniana, kahefa wainimo'a
ana akru taferora rezoreno prohuno tagiramisigeno, ana akarura
erihaviza hutregahie. **38** Anama hunakura, kasefa wainia, kasefa
waini akru tafempi tagi vazigahaze. **39** Mago'mo'a atafa wainima

netesuno'a, kasefa wainigura aveosigahie. Na'ankure Agra huno,
atafa suamo'a knare'za hu'ne huno hugahie.

6 Hagi mago mani fruhu kna (Sabat) zupa Jisasi'a witi hozafi
ufreno nevige'za, amage nentaza disaipol naga'amo'za mago'a
witi raga eritaniza, zamazampi arekasegasufe'za ne'naze. **2** Ana
nehazage'za mago'a Farisi vahe'mo'za anage hu'naze, nahigetma
osihoma hu'neazana mani fruhukna (Sabat) zupa nehaze?
3 Jisasi'a kenona zamire anage hu'ne, Tamagra hampritma
ontahi'nazo, Deviti'ene, naga'anema, zamagategenoma hu'nea
zana? **4** Anumzamofo seli mono nompina marerino, nagru
hu'nea breti erino ne'neana, kasegemo'a o'e huno magomo'a
onegahianki, pristi vahe'moke'za negahie hu'nea bretiagi, Deviti'a
neneno naga'a zami'ne. **5** Nehuno zamagriku anage hu'ne,
Vahemofo Mofavremo'a, Agranena mani fruhu knamofona
(Sabat) Ra mani'ne. **6** Hagi ru mani fruhu kna zupa (sabat)
Jisasi'a osi mono nompi (sinagok) marerino mono naneke rempi
hu'nezamigeno, mago nera tamaga kaziga azamo'a sti'nea
ne' mani'ne. **7** Kasegere ugagota hu'naza vahe'ene, Farisi
vahe'mo'zanena, zamua ante'soe hu'za kete'za mani'naze.
Jisasima mani fru knarema ana nera azeri'soe hanige'za,
hagi zamagra kegafa erifore hu'za Agrira azerinaku, kete'za
mani'naze. **8** Hianagi inankna antahintahima hu'nazana,
Agra ko antahino keno nehuno, azama haviza hu'nea neku
huno, Ama maka vahe zamavure otinka eno! Higeno ana
ne'mo'a otino e'ne. **9** Jisasi'a zamagriku anage hu'ne, Nagra
tmantahinegoe, mani fruhukna (Sabat) zupa knare zama
hanuna zamo kasegefina knarera hunefi, havi tavutavama
hanuna zamo knarera hu'ne? Vahera zamaza hugahumpi,
vahera zamazeri haviza hugahune? **10** Arukrahe huno ome

zamagege, eme zamagema huteno Jisasi'a azamo'ma stinea
ne'ku anage huno asami'ne, Kazana arusuto! Higeno agra
ana hu'ne. Anama higeno'a, azamo'a eteno so'e hu'ne. **11**
Hianagi kasegere ugagota hu'naza vahe'ene, Farisi vahera
zamarimpamo'a aka hege'za, Jisasina naza huntegahune hu'za
zamagra zamagra kehugantu hugama hu'naze. **12** Ananknafina
Jisasi'a nunamu hunaku agonarega marerino, Anumzamofontega
ana kenegera nunamu ome nehigeno ko atune. **13** Ko'ma
netigeno'a amagema nentaza disaipol naga'a kehige'za ageno,
anampinti 12fu'a aposolo nagare huno huhamprino, zamagi'a
zami'ne. **14** Saimoninku Pita'e huno mago agi'a nenteno,
nefunku Endru'e hu'ne. Hagi Jemisi'e, Joni'e, Filipi'e, Bataromio'e.
15 Matiu'e Tomasi'e, Alfiasi nemofo Jemisi'e, Saimoni Zelati
nagapinti nere. **16** Hanki Jemisi nemofo agi'a Judasi'e. Hagi
mago ne'mofo agi'a Judas Isakarioti'e, ha' vahe'mokizami
zamazampi Jisasina komoru huno avarentesia nere. **17** Jisasi'a
ameg'ma nentaza disaipol naga'ane agonaregati erami'za
agupofi eme otinege'za, anante amage'ma nentaza tusi'a disaipol
veamo'za eritru nehazageno, maka Judia kazigatiki Jerusaletiki,
Saitonitiki, Tairi hageri ankena regati'enena, **18** ana vea'mo'za
Jisasi naneke nentahisageno krizimi zamazeri knamresiegu
emerri atru nehazageno, agru osu havi avamumo'za zamazeri
haviza hu'naza vahera zamazeri knamare'ne. **19** Hagi tusi
veamo'za avako hunaku hu'naze. Na'ankure tusi'a hihamumo
Agripinti ne-ezeno, avako'ma hia vahera maka krizmimo'a
atrezmante'ne. **20** Jisasi'a amage'ma nentaza disaipol naga'a
zamufi nezmageno, amanage huno zamasami'ne, Tamamunte
omane vahe'mota muse hiho. Na'ankure Anumzamofo Kumara
tamagrire. **21** Tamagaku'ma menina nehanamota, muse

hiho. Na'ankure tamagrira Anumzamo'a tamaminigetma neramu hugahaze. Zavi'ma menima netenamota muse hoho. Na'ankure tamagra kiza regahaze. **22** Vahe'moza antahi haviza huneramante'za, tamahenati'za, kema neramasu'za, Vahe'mofo Mofavrerekhu hu'za havi tamagima tamisazana! Anumzamo'a asomu huramantegahie. **23** Ana knazupa musenkase hugahaze. Na'ankure mizantimimo'a rama'a monafina me'ne. Na'ankure korapa zimagehe'za anahukna kasnampa vahera huzmante'naze. **24** Hianagi fenone vahe'mota tmasunku hutma ranknazampi manigahaze. Na'ankure tamagra ko tamazeri so'e hu'zana erivite'naze. **25** Menima tamagrama knare hutma ne'za neramu nehaza vahe'motma ranknazampi manigahaze. Na'ankure tmagaku hugahaze. Menima kizama neraza vahe'mota, tamagra ranknazampi manigahaze. Na'ankure tusi zavi krafa hugahaze. **26** Mika vahe'mo'za knare vahe mani'naze hu'za tmagriku'ma nehaza vahe'mota ranknazampi manigahaze. Na'ankure zamagri nezmageho'za havige kasnampa vahetera anahukna huzmante'naze. **27** Hianagi anage hu'na neramasamue, izagato kema hugeta nentahimota, ha' vahetamia zamamesi nezmaneteta, antahi haviza huneramantesaza vahera, knare tamavutmava huzmanteho. **28** Tamazeri havizahu ke huramantesaza vahera, asomu ke hunezmaneteta, havi zamavu'zmava huramantesaza vahera nunamu huzmanteho. **29** Kameragente kahesimofona, rukrahe hugeno mago kaziga kameragente kaheno. Nakre kuka'a erisimofona, atregeno sioti ka'ane erino. **30** Mago'a zanku kantahi'gesagenka zami'nenana vahe'mokizmia, ete ome hanavege huzmantenka e'orio. **31** Kagri'ma rumo'zama so'e zmuzma hugantesazegu'ma kave'nesiankna hunka rumokizmia, kagra so'e kavukva huzmanto.

32 Tamagri'ma tamesintesia vahe'ma, zamesi zmantesuta, nankna knare'za erigahaze? Na'ankure kumi' vahe'mo'zanena, zmesizmantaza vahera zamagi'enena anahukna hu'za zmesi nezmantaze. **33** Tamagrama, knare zamavuzmava huramantesaza vahe'ma, knare tamavutmava huzmentesuta, nankna knare'za erigahaze? Na'ankure kumi vahe'mo'za anahukna zmavuzmava zamagranena nehaze. **34** Nofi'ma hu'za erite'za, ete anama'a eme tamigahaze huta antahi nezamita zamisazana, nankna knare'za erigahaze? Kumi' vahe'mo'zanena anahukna hu'za kumi vahe'mokizmia fozana erite'za, ete nofima hu'nazana ana maka eme apanesaze. **35** Hianagi ha' vahe tamia tamavesinezmanteta knare tamavutmava hunezmaneta nofi'ma hu'za erisazana mago'zana ete nona'a erigahune huta ontahihio. E'i'nama hanuta mizantamimo'a rama'a me'nena, tamagra Marerisa Anumzamofo mofavrerami manigahaze. Na'ankure susu hunontaza vahe'ene, havi vahe'mokizmia so'e hunezmante. **36** Nafatmimo'ma asunku hunermanteaza hutma, tamagranena tamasunku huzmanteho. **37** Hagi rumokizmi mani'zama refako'ma huozmantesageno'a, tamagri mani'zanena Anumzamo'a refako huoramantegahie. Hagi Vahe'mofo kumi'zmi atrezmantesnageno'a Anumzamo'a tamagi'enena kumitamia atreramantegahie. Haviza huramantesaza vahe'mokizmia kumizmi atrezmante'nage'za tamagi'enena atreramantegahaze. **38** Vahe'ma tamagrama zaminageno'a tamagi'enena anazanke huno Anumzamo'a neramino, knare'za huno rentrako traku huno tamamina, aviteno herafiramino evugahie. Na'ankure tamagrama vahe'ma zamisnaza avamente, tamagi'enena anazanke huno tamigahie. **39** Jisasi'a anage huno fronka kea zamasami'ne. Avu asuhu ne'mo'a, ete mago avu asuhu nera avazu huno

vugahifi? I'o zanagra ana taregamoke kerifi uramigaha'e. 40
Mago avo noma nehimo'a, rempima humi nera agateore'ne.
Hianagi iza'o rempima humia antahiza eri vagareteno rempima
huzami vahekna nehie. 41 Na'a higenka kugusopa negafu
avufima me'neana negenka, tusi'a zafa kofa kavufima me'neana
ke'so'e nosane? 42 Nankna hunka negafunkura, nenafuo
osasi'za kavufima me'neana natregena eri atraneno nehunka,
tusi'a zafa kofa kavufi me'neana ke so'e nosano? Kagra tavre
vahé mani'nane! Ese'zana tusi'a zafa kofa kavufi me'neana eri
atrenka, kavua ke so'e nehunka, osi kugusopa negafu avufi
me'neana eritregahane. 43 Na'ankure knare zafamo'a havi
raga'a renonte. Hagi havi zafamo'a knare raga renonte. 44
Na'ankure magoke magoke zafamo'a agra'a gna rgama rentenire
kegahane. Ave'ave trazampintira vahé'mo'za fiki raga noragize.
Ave'ave trazampintira vahé'mo'za krepi raga noragize. 45 Knare
vahé'mofona agu'afima knare'zama antegeno me'neazamo,
knare'zana efore nehie. Hanki havi vahé'mofona agu'afina
haviza antegeno aviteno me'neazamo, haviza efore nehie.
Na'ankure nanknazama agu'afima me'neazana, agi'mo hufore
nehie. 46 Nahigeta Nagrikura, Ramo'e Ramo'e nehutma, kema
tmasamuazana nosaze? 47 Iza'o Nagrite ne-eno huankema
antahino amage' anankemofo ante'mofona, Nagra kaveri
hugahue. Ana'mo'a ama anahu'kna hu'ne. 48 Agra mago
ne'mo'ma noma kiakna hu'neankino, mopa kafino uramino have
omeri fore huteno, ana agofetu ki'ne. Tima hageno eno ana
nona eritagana vazinaku hianagi, eri torera osugahie. Na'ankure
hanave nentake hu'nea havere nona ki'ne. 49 Hianagi Nagri
kema nentahino amagenonte'mo'a, noma azeri hanaveti trara
onteneno kahepampi noma kiakna hu'neankino tima hageno

eno emeri tagana vazitregeno, pasaru huno evu ramino haviza
hiankna hugahie.

7 Jisasi'ma ana miko veama rempima huzami vagareteno
zamatreno Kapaneamu kumate vu'ne. **2** Mago 100'a sondia
vahete kva nera, vahe'mo'za antahi nemiza ne'mofo, kazokzo
eri'za ne'amo'a, kri erino fri'za nehigeno, **3** ana sondia vahete
kva ne'mo'a Jisasinkema nentahino, Jiu ranra vahe'mokizmi
huzmantenge'za kazokzo eri'za vahe'a eme azeri so'e hunteniegu
ome antahigenaku Jisasintega vu'naze. **4** Zamagrama Jisasinte
enehanati'za amanage hu'za hanaveti'za antahige'naze. Ana
sondia kva nera knare'za nehia nekinka, Kagra amne aza
hugahane. **5** Na'ankure agra tagrikura avesineranteno, osi
mono nontinena ki'ne. **6** Jisasi'a magoka zamagrane vuno,
nontava'onte uravao nehigeno, ana sondia kva ne'mo'a
rone'amokizimi huzmantenge'za Jisasinte vu'za, huzmante'nea
kea ome asami'naze. Ramoka nagri nontegama ezankura
amuho osuo. Na'ankure nagri nontega kagrama e'arera knarera
osu'noe. E'ina hu'nogu, Kagrite'ma esuana knare osu'noe. **7**
E'ina hu'nogu, Kagrite'ma esuana knare osu'noe. Hianagi eri'za
vahe'nimofo magoke ke hugeno kri'amo'a amne hunteno. **8**
Na'ankure nagranena rankva ne'mofo agoraga'a mani'noge'za,
ete sondia vahe'mo'za nagri nagorga mani'nage'na, nagrama
anamofonku hu'na, vuo hugeno'a agra nevie. Hagi magomofonku
eno hugeno'a, agra ne-e. Kazokzo eri'za vahenigu hu'na, e'ina
huo hugeno anaza nehie. **9** Higeno Jisasi'ma ana ne'mofo
kema nentahino'a tusi'a antri nehuno, rukrahe huno avariri'za
vu'naza vahekura anage huno zamasami'ne. Magore hu'na
Israeli vahepin aamanahu amentintine vahera onketfa hu'noe.
10 Huzmantenge'za e'naza vahe'mo'za rukrahe hu'za nontega

ome kazana, ana kazokzo eri'za ne'mo knamreno mani'nege'za
ome ke'naze. **11** Anama huteno henka Jisasi'a Nainie nehaza
rankumate amage'ma nentaza disaipol naga'ane nevige'za,
tusi'a veamo'za avariri'za magoka vu'naze. **12** Ana kuma
kasante nevigeno, mago fri'nea nera eri'za atirami'zma e'naze.
Ana a'mofona magoke mofavregino, kento'a mani'negeno
ana kumapi tusi'a vahe krefamo'za ana a'enena e'naze. **13**
Ramo ana a'ma ome negeno'a asunku hunenteno, Zavira oto
nehuno, **14** anante eno sesenku'are ome avako nehigeza,
zafa hu'za nevaza vahe'mo'za anante oti'naze. Jisasi'a anage
hu'ne, Nehazavemoka Nagra otio hu'na kagrikura nehue! **15**
Anama fri'nea ne'mo'a otino nemanino, agafa huno keaga
nehigeno, Jisasi'a ana nera avazuhuno nererana ami'ne. **16**
Tusi koro nehu'za Anumzamofo agi erisaga hu'za anage
hu'naze. Agatererfa kasnampa ne' amu'nontifina efore nehigeno,
Anumzamo'a Agra'a vahe'a eno zamaza nehie hu'naze! **17** Ama
anazama Jisasi'ma hiazamofo agenkemo'a maka Judiane mika
megagi'nea kumatamimpina vuno eno hu'ne. **18** Mono ti frente
Jonima amage'ma nentaza disaipol naga'mo'za maka'zama
Jisasi'ma hu'neazamofo agenke'a ome Jonina asamizageno,
tare amage'manenta'a disaipol ne'tre kehuno, **19** Jisasi ome
antahige'ogu huznanteno, Kagra egahiema hu'nea ne Mesaiaga
tazama hunka taguvazi ne'pi, rumofonku avega antegahuno? **20**
Higeno ana netremoke e'ne anage hu'ne Jisasina asami'na'e,
Mono ti fre Joni'a amanage huno hurantegeta kantahigenaku
neo'e. Kagra egahiema higeta avegama ante'nona tazahu
ne' Mesaiagafi, rumofonku avega antegahuno? **21** Anankna
fatgorera hakare rumofo rumofo kri eri'naza vea Jisasi'a zamazeri
so'e nehuno, havi avamutmi zmagu'afinti hunezmanteno, rama'a

zmurga asu hu'nea vahera zamazeri hari huzmante'ne. 22
Ana huteno anage huno kenona zanirera, zanasami'ne, Vuta
nazano negeta nentahita ha'azana Jonina ome asami'o, zamavu
asu hu'nea vahe'mo'za hari nehazageno, zamagia haviza
hu'namo'za zamagia refatgo nehazageno, fugonkrima eri'naza
vahera neganamrazageno, zamagesa ankanire vahe'mo'za
nentahizageno, fri vahe'mo'za onetizageno, zamunte omane
vahe'pina Knare Musenkea huama nehie. 23 Hanki iza'o
Nagri'ma ha'ma reonantesimo'a muse hugahie. 24 Joninkema
eri'ne e'na'a netremokea vutakeno, Jisasi'a agafa huno tusi'a
veapi Joninku huno, Ka'ma kopima vu'nazana na'a kenaku
vu'naze? Jaho'mo hakema eri tagosi hu'nea zampi? l'o. 25
Hianagi Na'a ome kenaku vu'naze? Fru fru huno konariri'ane
kukena hu'nea vahe ome kenafi? l'o, knare konariri'ane
kukenama hu'za, so'e zampima nemaniza vahera, kini vahe
nompi nemanize! 26 Hianagi na'a ome kenaku vu'naze?
Kasnampa nepi? Izo tamage hu'na neramasgue. Ana ne'mo
mika kasnampa vahera zmagatere'ne. 27 E'i ana nekura
avontafepina amanage huno krente'ne, Ko, nagri ke erino
vu vahera, huntogeno ugagota huganteno neviankino, agra
kana variganteno vugahie. (Mal 3:1) 28 Nagra neramasamue,
a'nemo'za kase zamante'naza vahepintira mago'mo'e huno
Jonima agatere'nea nera omanni'ne, ana nehigeno Anumzamofo
Kumapina osi hu'nemo, agrira agetere'ne. 29 Maka vahe'mo'zane
havige hu'za takesi zago eneriza vahe'mo'zanena ana naneke
nentahiza, Anumzamofo avu'avazamo'a fatgo hu'ne hu'naze.
Na'ankure Joni'ma mono tifre zmantenegu ana hu'naze. 30
Hianagi Farisi mono vahe'mo'zane, kasegere ugagota hu'naza
vahe'mo'za, Anumzamo'ma zamagri'ma zamaza hunaku retro

hu'neazana zmefi humi'haze. Na'ankure zamagrira Joni'a mono tina fre ozmante'ne. **31** Hagi na'ante huntena ama knafi vahe'mofo avu'avazankura avame kea hugahue. Zamagra nankna hu'naze hu'na hanue? **32** Zamagra mofavre'ramimo'za maketi kumapi mani'ne'za kehugantigama hiaza nehaze. Nehu'za roane'amokizmigura anage hu'naze, Tagra konke tafe ronanagi, tamagra avoa noraze. Zavite zagame hunanagi, zavira notaze. **33** Na'ankure mono tifrente Joni eno, bretine waini tine nonegetma, tamagra hutma havi avamu agripi mani'ne hu'naze. **34** Vahe'mofo Mofavremo eno ne'zane tine nenegetma, tamagra hutma, keho ne'za nevava nehuno, waini ti neneno, takesi zago eneriza vahe ene kumi vahe'ene raru huno nemanie nehaze! **35** Hianagi knare antahintahizana Agri'ma avaririza vahepi eriama nehie. **36** Mago Farisi ne'mo'a, Jisasina ne'za agrane ome nesniegu agi higeno vu'ne. Farisi ne'mofo noma'afi ne'zane trate aza tununte anteno mani'ne. **37** Anante ana kumateti mago kumi a'mo'a, Farisi ne'mofo nompi Jisasima nezama nene nehzankema nentahino, mago manamentake masave aravasta have tafempi me'negeno erino eno, **38** amefiga'a agare emaniteno, zavi neteno avunuteti agia sese nehuno, azokanu eri ho'mu nehuno, rama'a zupa agia antako nehuno, mana nentake masave tagino agare frente'ne. **39** Hagi Jisasima ke higeno e'nea Farisi ne'mo'a anazana negeno, amanage huno agu'afina agesa antahi'ne, ama kasnampa ne'ma mani'neresina, kumi' hu'nea a'mo avako Agrira nehiankino, agafa'a keno antahino nehuno kumi are huno hisine. **40** Jisasi'a Saimoni antahintahia negeno kenona'a huno, Saimoniga, naneke kasminaku nehue higeno, Saimoni'a huno, knareki Rempi hurami ne'moka amne kea huo. **41** Higeno Jisasi'a amanage hu'ne, Magora nofihu zago netrea ne'mo'a,

tare ne'tre zagoa zanami'ne. Magomo'a 500ti zago nofi huno erigeno, mago'mo'a 5fu'a zota erine. **42** Hanki ana zagomofo nona'a hu'ne amiga osakeno, knareki atre'o, huno huzanante'ne. Iza agtereno ana zagoma nofitema netrea nekura avesinenteno tusi musena huntegahie? **43** Saimoni'a kenona anage hu'ne, nagesama antahuana rama'a zagoma nof'i'ma hu'nemo'e. Higeno Jisasi'a huno, Tamage hufatgo hunka hane. **44** Anante rukrehe huno ana ara negeno, Saimoninku huno, Kagra ama'i ara negano? Nagra nonka'afi emarerugenka nagia sese hanua tina afi onami'nane. Hianagi ko, ama a'mo'a avunuteti nagia sese nehuno, azokateti erihomu hunante'ne. **45** Kagra nonka'afi enefrogenka nantako hunka onavre'nane. Hianagi nonka'afi eforegatira ama amo'a agafa huno nagiamofona antako huvava hu'ne. **46** Kagra masavena taginka nanumpina freonante'nane. Hianagi ama a'mo mananentake masevena tagino nagiamofona masavena frenante'ne. **47** E'ina agafare Saimoniga anage kagriku nehue, rama'a kumi ama amo hu'nege'na eri atrentogeno rama'azampi avesinenante. Hianagi osi'a kumi'ma atrente'nomo'a osi'a avesinenante. **48** Ana huteno Jisasi'a ana a'ku anage huno asami'ne, Kumika'a eritregantoe. **49** Hianagi trate'ma agrane zamaza tununte ante'za mani'namo'za, zamagra'a anage hu'naze. Iza'e ama nera, kumi'ma erinetreana? **50** Jisasi'a amanage huno ana ara asami'ne, Kamentintimo kaguvazianki, krimpa frune vuo.

8 Hagi mago'agna evutegeno Jisasi'a rankuma tamimpine, osi kuma tamimpine vano nehuno, Knare Musenkea rempi hunezamino, Anumzamofo Kumamofo kea huama nehige'za, 12fu'a amagema nentaza disaipol naga'mo'za magoka vano hu'naze. **2** Hagi mago'a, havi avamu mani'negeno eri

atrezmante'nea a'nene, krizimifinti zamazeri so'e hu'nea a'nene vu'naze. Anampina Makdala kumateti Meri'e nehaza a' 7ni'a havi avamu hufegi atre'nea a'ki, 3 Joana Kusa nenaro'e (Heroti eri'za vahe'mofo kva nere) Susana ene, mago'a rama'a a'nema zamagra'a fenozampinti Jisasima azama nehaza a'nene vu'naze. 4 Tusi'a vahe krefamo'za eritru hu'za mani'nageno, mago'a ranra kumateti veamo'za Jisasinte azageno, amanage huno fronka kea zamasmi'ne. 5 Hozafi avimza rurani ne'mo'a, avimaza ruranino nevigeno, mago'a avimzamo'a kampi evuramigeno rentroko hazageno, namamo eme ne'ne. 6 Mago'a avimzamo'za have mopafi evurami'za hage'naze. Hianagi tima'a omneneugu huza amagiza osapa re'naze. 7 Hanki mago'a avimzamo'za ave'ave trazampi evuramiza ave'ave trazane magoka hage'za marerizageno, ave'ave trazamoza hageza no ki rentrako hu'naze. 8 Hanki mago'a avimzamo'za rima'ane mopafi evuramiza hage'za 100'a raga'a agatere'za rente'naze. Anage huteno ranke huno, Iza'o agesama me'enigeno'a ama nanekema antahisimo'a antahise hino! 9 Anagema hige'za amage'ma nentaza disaipol naga'amo'za, ana fronka kemofo agafa'agu, nankna agu'agesa me'nefi tasamio hu'za Jisasina antahige'naze. 10 Agra anage huno zamasami'ne, Tamagra Anumzamofo kumapi oku'azana nentahize. Hianagi mago'amo'za fronka kege nentahize. Ana nehu'za, kegahazanagi onkegahaze. Antahigahazanagi antahise huza agafa'a antahi amara osugahaze. (Ais 6:9-10.) 11 Ana fronka kemofo agafa'a amanahu me'ne. Ana avimazana Anumzamofo ke me'ne. 12 Hanki mago'a avimzamo'za kamofo ankinare evurami'nazana, amana hu'naze, Anumzamofo kea vahe'mo'za antahi'naze. Hianagi aru zamentinti hanageno Anumzamo'ma zamagu vazizanku, Sata'a eno zamagu'afinti

anankea emeri atre'ne. **13** Hanki mago'a avimazama havege
mopafi evurami'neana, Anumzamofo kema nentahi'za muse
huza eri'nazanagi, rafuna ore'naze. Osi'a knafi zamentinti
nehu'za, rezmatga'zama ege'za traka hu'za atre'za nevaze. **14**
Hagi ave'ave trazampima evurami'nea avimzana, Anumzamofo
kea antahi'naze. Hianagi zamavufamofo zamavesi zankuke
nehu'za, mopafi zanku antahintahi hakare nehu'za, fenoma
eri'za mani'zazmima eri so'e hanaza zankuke antahintahi hakare
nehazageno, anazamo kintrako hige'za, raga renontaze. **15**
Hianagi tima'ane mopafima rurani'nea avimzana, Anumzamofo
kea e'i anamo'za antahite'za azeri antrako hu'za, tamage
hu'za fatgo zmarimpareti nena raga'a rente'za kazigazi hu'za
nevaze. **16** Mago vahe'mo'e huno tavira rekru huno, kavofi
runkani rentege, sipa kampina antegera nosie. Hianagi tavira
amate ante'nazageno remsa hu'negeno, nompima efraza
vahe'mo'za negaze. **17** Na'ankure mago'zamo'a fraoki'nigeno,
oku'ama me'nesiazamo'a magore huno frara kino omne'nenige'za
onkegahaze. Hanki eama masare hanige'za maka vahe'mo'za
kegahaze. **18** Ana hu'negu kva hu'neta antahi ankereho, iza'o
mago'ama eri'enemofona mago'ane amigahie. Hianagi iza'o
e'orinenimofona, eri'noe huno agesama antahisama'a, anama'a
hanare vaga regahie. **19** Jisasina nerera'ene aganahe'zane
agritega e'naze. Hianagi zamagra tvaoma'arera ovu'naze.
Na'ankure tusi'a vea mani'nazageno'e. **20** Ana higeno Jisasina
asami'za, negarera'ene kaganahe'za kavega ante'za megj'a
otine'za kagenaku nehaze hu'za asami'naze. **21** Hianagi kenona
zimirera anage huno zamasami'ne, Nenrera ene naganahe'za,
Anumzamofo ke'ma antahi'za amage'ma nentamo'za mani'naze.
22 Mago zupa Jisasi'a amage'ma nentaza disaipol naga'ane

votifi marenerino anage huno zamasami'ne, Tirumofo kantu kaziga vanune hige'za vu'naze. **23** Ana hu'za nevazageno, Jisasi'a avu mase'negeno, tusi'a zaho'mo eramino timofona eri kranto kranto nehuno, votifi marerino erinakriza nehige'za hazenkefi mani'naze. **24** Zamagra Jisasina eme azeri oti'za anage hu'naze. Ramoke, Ramoke, tagra tinakrita fri'za nehune hazageno, Jisasi'a otino zahoku'ene kranto kranto nehia timofona kesigeno, timo'a rurava he'ne. **25** Anante Jisasi'a anage huno amage'ma nentaza disaiopol nagakura zamasami'ne, Tamentintia iga me'ne? Hianagi zamagra zamagogo nefefege'za antri nehu'za, zamagra zamagra anage hu'naze. Iza'e ama nera Agra tine zahomofonku enena ke higeke amagera nenta'e? **26** Ana hutege'za zamagra voti eri'za Geresa mopafi kantu kaziga Galili timofona vu'naze. **27** Anante uhanati'zageno Jisasi'ma votifinti takau reno uneramigeno, ana kumateti mago nera havi avamu'mo agu'afi fre'nea ne'mo'a eme tutagiha hunte'ne. Ana ne'mo'a za'za knafi kukena'a nosuno, nompina omani'ne. Hianagi vahe asenentaza havegampi nemaniane. **28** Ana ne'mo'a Jisasima negeno'a, avuga eme traka humaseno, ranke huno anage hu'ne, Jisasiga Marerisa Anumzamofo mofavremoka nataro! Keke hugantoanki nazeri havizana osuo! **29** Na'ankure Jisasi'a ko ana agru osu havi avamukura ana nemofona atrenka atiramio huno hanave ke hunte'negeno'e. Ana havi avamumo'a rama'a zupa retufenetregeno, ana kumate vahe'mo'za agiare azante seni nofinu anakinte'za kavagri'za mani'nazane. Hianagi ana ne'mo'a, nofira rukno hunetregeno, havi avamumo'a avreno ka'ma kotamimpi vu'ne. **30** Anante Jisasi'a anage huno antahige'ne, Kagika'a izage? Ana ne'mo'a anage hu'ne. Nagini'a hakare'ne. Na'ankure rama'a havi avamu agu'afina maninegu hu'ne. **31**

Ana agru osu havi avamumo'za hu'za, keke hugantonanki hanave kea hurantegeta ro'a omane kerifina ovamneno hu'za hu'naze. (Abyssos g12) 32 Hagi rama'a afutamimo'za agonomofo asoparega ne'za nene'za mani'nageno, havi avamumo'za zamatresege'za vnagu Jisasina keke hunte'za, tataregeta antu afu tamimofo zamagu'afi uframneno hu'za antahigageno, knareki viho huno huzmante'ne. 33 Hanki havi avamumo'za ana ne'mofo agu'afinti atirami'za afu'mokizmi zmagu'afi ufrage'za, agonaregati zmagare'za zavateti tirupi takauramiza ti nakri'za fri'naze. 34 Afu kva vahe'mo'za anazama fore hiaza nege'za, koro fre'za ra kumate'ene osi kumate'ene vu'za, anama fore hiazamofo kea ome zmasami'naze. 35 Anazama hiazanku vahe'mo'za ome kenaku Jisasinte e'naze. Zamagrama eme kazana, havi avamuma atirami'nea nera Jisasi agafi kukena huno knare antahintahi erino maninege'za eme nege'za koro hu'naze. 36 Anazama fore hige'za ke'naza vahe'mo'za, inankna huno ana havi avamuma agu'ama fre'nea nera azeri so'e hunte'nea agenkea onke'namokizmi zamasami'naze. 37 Anante maka Gerasa vahe'mo'zane, ana kaziga mani'naza vahe'mo'za hanavetiza, tatreka vuo hu'naze. Na'ankure zamagra tusi zamano vazige'ze. Ana hazageno Jisasi'a votifi marerino zamatrelo ete vu'ne. 38 Havi avamu'mo'za atirami'naza ne'mo'a atresigeno avaririno vanigu antahige'ne. Hianagi Jisasi'a ana nera hunenteno anage hu'ne. 39 Kuma ka'arega ete vunka, Anumzamo'ma huganteazana vaheka'a ome zamasamio huno Jisasi'ma hiazanku, rukrehe huno rankumapi nevuno, maka vahera knare'za huno azeri so'ema hunte'neazana huama huno zamasamino vu'ne. 40 Anantegatima ete Jisasi'ma egeno'a, tusi'a veamo'za muse hu'za avre'naze. Na'ankure zamagra avega ante'za mani'nazaretire. 41 Anante Jairusi'e

nehaza ne'mo osi mono nomofo kva nekino, Jisasi agiafi eme
rena reno noma'afima esigu tutu huno antahige'ne. **42** Na'ankure
12fu'a kafunaza hu'nea magoke mofa'amo, fri'za nehigeno hu'ne.
Jisasi'ma kantegama nevigeno'a, hakare veamo'za oretufe
aretufe hu'za vu'naze. **43** Anampina mago ara 12'a kafu zagefi
korankria eri'nea a' mani'ne. Hianagi mago vahe'mo'e huno ana
ara azeri so'e osu'ne. **44** Ana a'mo Jisasina amefigati zaza
kena'amofo atumpare eme avako higeno, ana korankrimo'a ame
huno vagarente'ne. **45** Anante Jisasi'a zmantahigeno, Iza navako
hu'ne? Hige'za zamagra onke'none hu'za hazegeno, Pita'a huno,
Kva Nimoka, tusi'a vahekrefamo'za rugagagiza kavate rentrako
hu'naze. **46** Hianagi Jisasi'a anage hu'ne, magomo navako hu'ne,
na'ankure Nagripintira mago'a hanave'nimo'a natreno vu'negena
nehue. **47** Ana a'mo'ma keno antahinoma hiana, frakigama
nosuno'a ahirahi neregeno avuga eme traka humaseno, eme
avako higeno, kri'amo'ma ame huno vagarente'nea kea maka
vahe zamasami'ne. **48** Anante Jisasi'a anage huno ana ara
asami'ne, Mofamoke, kamentintimo kazeri so'e hianki krimpa
frune vuo. **49** Jisasi'ma anagema nehigeno'a, mago ne'mo osi
mono nomofo kava ne' Jairusi nontegati eno, anage huno eme
asami'ne. Mofa kamo'a fri'neanki mago'anena, Rempima hurami
nera kna omio. **50** Hianagi Jisasi'a ananke nentahino, anage
huno kenona hu'ne. Kagra korora osuo, kamentinti hugeno ana
mofamo'a knamareno manino. **51** Hanki nonte'ma eteno'a mago'a
vahera zmatrege'za uofre'naze. Hanki Pitane, Jonine, Jemisine
ana mofamofo nefane nererane ke hige'za zamagrake ufre'naze.
52 Anampina maka zamagra zavi nete'za tusi krafa ana mofaku
nehazageno Jisasi'a anage hu'ne, Ofri amne mase'neanki zavira
oteho. **53** Hige'za ana veamo'za agiza re'naze. Na'ankure ana

mofamo'a frinege'za ke'nazagure. 54 Hianagi Jisasi'a akoheno azante azeri onetino anage hu'ne, Mofavre'moka otio. 55 Ana mofamofo agu amemo ete agu'afi efregeno, ame huno otigeno, ne'za aminkeno neno huno zamasami'ne. 56 Ana mofa'mofo nerera'ene nefakea antri nehakeno, amama huazana vahera ozmasamitfa hi'o huno znasami'ne.

9 Hagi Jisasi'ma 12fu'a amage'ma nentaza disaipol naga'a ke hutruma huteno maka havi avamu'ene krinema eritresaza hanavene hihamune zami'ne. 2 Hanki Anumzamofo Kumamofonku huama nehu'za, kri vahe zamazeri knamarehogu huzmante'ne. 3 Agra anage huno zamasami'ne, Mago zantfane hutma erineta oviho. Azompafi kupi bretifi zagofi tare kukena erinetma oviho. 4 Mago kumate'ma vutma mago nompima umrerinutma, ana nonte manineta, atreta vunakuma hanutma, atretma rankumara viho. 5 Inaregama vanagenoma vahe'mo'za ontamaresnageta, ana kumateti atreta vukuma hanuta, tamagiareti kugusopa rupopo hunetretma vinkeno, ana avu'avazama hanaza zamo'a hazenkefi manize hugahie. 6 Hanki anage'ma hutege'za, atre'za kumatamimpi vu'za eza nehu'za, Knare Musenke huama nehu'za, hakare kaziga kri vahera zamazeri knamare'naze. 7 Ana knafina Heroti'a rankva ne'mo, ana makazama fore hu'nea zamofo agenke'a nentahino, antahintahi hakare hu'ne. Na'ankure mago'a vahe'mo'za mono ti frezamante Joni frinefinti ot'i'ne nehzageno, 8 mago'amo'za Elaija efore hie nehzageno, mago'amo'za mago korapa kasnampa ne' fri'nefinti ot'i'ne hu'naze. 9 Heroti'a anage hu'ne, nagra Jonina ko agena akafri'noanagi, iza e'inahuzana nehige'na agenke'a nentahue? Anage nehuno, Herotia Jisasina kenaku hu'ne. 10 Aposolo naga'mo'za vu'hazaregati ete ehanatiza, eri'zama

eri'naza zamofonkea mika Jisasina eme asami vagare'naze.
Anante zamagrike zamavarege'za anampinti atre'za Betsaide
nehaza kumate vu'naze. **11** Hianagi tusi'a vahe krerfamo'za
Jisasi'ma vu'ne kema nentahiza avaririza vu'naze. Agra muse
huno nezamavareno, Anumzamofo kumamofo ke huama
huno nezmasamino, krizmima eri atrenogu'ma zamesi'nea
vahe'mokizmi kria zamazeri knamare'n. **12** Hanki kinagaseno
hanima hu'za hiazanku, 12fu'a disaipol naga'mo'za e'za Jisasina
anage hu'za eme asami'naze. Ama vahe krefa huzmanteg'eza
tva'onte kuma tamimpina vu'za e'za hu'za mase nonku'ene,
ne'za zimigu'ene ome hakreho. Na'ankure vahe omani kokampi
mani'none. **13** Hianagi Jisasi'a anage huno zamasami'n,
Tamagra ne'zana zaminke'za neho. Zamagra kenona hu'za, tagra
rama'a ne'zana e'orinonanki, 5fu'a bretigi tare nozamegi huta
eri'none. **14** Anampina 5 tauseni'a venene mani'naze. (Anampina
a'nene mofavreramina ohamprine) Anante Jisasi'a amage'ma
nentaza disaipol nagara huzmanteno, Zamasaminke'za 50'a refko
hu'za mago mago kevufina manitere hih. **15** Anama Jisasi'ma
zamasamiaza hu'za amagema nentaza disaipol naga'mo'za,
ana maka vahera zamazeri atru hutere hazage'za mani'naze.
16 Jisasi'a 5fu'a bretine tare noza'ene erino, monafi kesga
huno negeno, Anumzamofo susu hunteteno, ana bretiramina
eritamanasi zamizmi nehige'za, ana amagema nentaza disaipol
naga'mo'za ana ne'zana eri'zami'naze. **17** Ana mikomo'za
nazageno zamuma hutege'za, meama'a eritru hu'za 12fu'a eka
eka kupi eriri'naze. **18** Mago zupa agraku Jisasi'a nunamu
nehigeno, amagema nentaza disaipol naga'mo'za, tava'onte
emani'nazageno anage huno zamantahige'n, Nagrikura
veamo'za iza'e hu'za neheze? **19** Hige'za zamagra kenona'a

anage hu'za hu'naze, mono ti frente Joni'e hu'za mago'amo'za
nehazageno, mago'amo'za Elaija'e nehazageno, mago'amo'a
korapa kasnampa ne' frinefinti oti'ne hu'za nehaze. **20** Jisasi'a
amanage huno zamantahige'ne. Hianagi tamagra iza'e hutma
Nagrikura nehaze? Pita'a ana kenona huno, Kagra Anumzamo
hugantegenka (tahoke henka tagu'vazi ne' e'hana ne' Kraisige.
21 Hianagi Jisasi'a amana kea mago vahere hutma ozmasmitfa
hiho huno hunezmante'no, **22** anage hu'ne, Vahe'mofo
mofavremo'a ruzahu ruzahu knazampi unefresige'za, mono kva
vahe'mo'zane, ugagota pristi vahe'mo'zane, kasegere ugota
hu'naza vahe'mo'za, zamefi humiza ahesageno friteno, tagufa
zagegnare otigahie. **23** Anante Jisasi'a ana maka'mokizmigu
anage huno zamasami'ne, Iza'o namage'ma antenaku'ma
hanimo'a, agra'agura age'nekanino maka knafina keka zafa'a
erino navaririgahie. **24** Na'ankure iza'o asimu'a eriso'e hu'naku
hanimo'a, asimu'a atregahie. Hagi iza'o Nagriku huno asimu'a
atresimo'a, asimu'a erigahie. **25** Mago vahe'mo'ma ama
mopafi zankuke nehuno, agra'a agu'amema atresiana, nankna
so'ezza erigahie. **26** Iza'o nagriku'ene keniagu'ene agazema
hunante'simofona, Vahe'mofo Mofavremo'ma Agra'a masa'afine,
Nefa masa'afine ruotge ankeru vahe zagamofo masafinema
esuno'a agrira eme agaze huntegahie. **27** Hianagi Nagra tamage
hu'na neramasamue, amama otinazafintira, mago'amotma
ofrinetma Anumzamofo kumara kegahaze. **28** Anagema Jisasima
huteno, 8'a zagegnanaza evutegeno, Pitama, Jonima, Jemisima,
huno zamavarege'za, agonarega nunamu hunaku vu'naze. **29**
Nunamuma ome nehigeno, avugosamo'a ruzahu higeno, kukena
amo'a tusi efe'nentake hu'ne. **30** Ananteru ame huke tare netre
Mose'ene Elaijakea oti'nene, Jisasi'enena nanekea hu'naze. **31**

Mosese'ma Elaija'ma Jisasi'ma hu'za tusi'a masafi mani'n'e'za,
Jerusalema Jisasi'ma friteno otino vaniazamofo nanekea hu'naze.

32 Pita enema mani'naza naga'mo'za zamavutoko hige'za
mase'naze. Hianagi zamagrama oti'za nege'za, Jisasi'a tusi'a
masa'afi tare netrene oti'za mani'nageno zamage'naze. **33**
Anante tare netremoke atrene nevakeno, Pita'a anage Jisasinku
hu'ne. Kva'nimoka, amare'ma manunana knare hie. Tatregeta
tagufa tona nona kimneno, magora Kagriki, magora Mosesenki,
magora Elaijane. Anama hu'nea kemofo agafa'a antahini'
osu'neno hu'ne. **34** Pita'a anagema nehigeno'a, hampomo tamino
refite nezmentegeno, ana hampompi mani'n'e'za koro hu'naze.

35 Anante mago agerumo hampompinti anage hu'ne. Ama'i
Nagri Mofavre, Nagra huhampri ante'nom'o'e. Hanki ke'amofona
antahimiho. **36** Ana agerumo'ma kea huvagama retegeno, Jisasi'a
Agrake mani'nege'za amagema nentaza disaipol naga'mo'za
ke'haze. Ana hiazanku zamagra kea eri tagane'za mani'n'e'za, ana
knafina mago vahere hu'za ke'naza'zana ozmasamitfa hu'naze.

37 Nanterana agonaregati eneramizageno, hakare veamo'za eri
hantage'za kantega tutagiha hunte'naze. **38** Anante ana vahe
amu'nompinti mago nemo'a ranke huno, Rempi hurami ne'moka,
keke hugantoanki, magoke ne'mofavre'niagi ko. Na'ankure agra
mago mofavre'n'i'e! **39** Havi avamumo azeri haviza higeno
krafa nehigeno, azeri traka hunetregeno, kentu kentu nehigeno,
agremo zuzu nehigeno, azeri haviza hutere mago'agnafina
nehie. **40** Nagra kamagema nentaza disaipol nagaku keke
huzmante'na, havi avamura humegi atreho huanagi, zamagra
humegi atregara osu'naze. **41** Jisasi'a kenona huno, Tamentinti
osutma fatgo osu vahe ama knafina mani'naze. Nama'a knafi
tamagranena mani'nena tamagri knazana erigahue? Avrenka

negamofona amare eno. **42** Ana mofavrema avreno ne-egeno'a
havi avamumo azeri traka hutregeno, mopafi maseno kentu
kentu hu'ne. Hianagi Jisasi'a ana havi avamu ke nesuno, azeri
so'e huteno nefana ami'ne. **43** Anama hige'za Anumzamofo tusi'a
hihamuma nege'za, antri hu'za zmagogogu hu'naze. Anama
hu'za mika'mo'za antrima nehu'za zamagogogu nehazageno,
Jisasi'a amage'ma nentaza naga'a zamasami'ne. **44** Ama
tmasamisua nanekea eritma tamagu'afi anteho. Vahe'mofo
Mofavrea komoru hu'za ha' vahe'mofo zamazampi avre'za
antegahaze. **45** Hianagi ana nanekea zamagritera frakino
me'nege'za anankea antahi amara osazageno, zamagra ana
nanekemofo agu'agesa'a antahi ama osu'za, azeri akona
osu'naze. Ana nehu'za ana kegura koro hu'za antahi onke'naze.
46 Jisasima amage nentaza disaipol naga'mo'za, agafa hu'za
iza rana manigahie hu'za zamagra zamagra hu'naze. **47**
Hianagi Jisasi'a zamagu'afi nezmageno, osi mofavre avazu huno
eme azeri o'netino, **48** anage huno zamasami'ne, Iza'o ama
mofavrema Nagri Nagifi avreno azeri so'ema huntesimo'a, Nagri
navareno nazeri so'e hunantegahie. Iza'o Nagri'ma naveresimo'a,
hunantege'na e'nomofo avaregahie. Na'ankure iza'o amuno
tamifi anteramino manisimo'a, maka'motma tamagatereno
ra vahe manigahie. **49** Joni'a kenona anage hu'ne, Kva
nemoka, negonkeno Kagri kagifi, mago ne'mo havi avamura
hunetregeta anara osuo huta i'o hunte'none. Na'ankure agra
kamagera anteno tagranena vano nosigu hu'none. **50** Hianagi
Jisasi'a anage huno zamasami'ne, Tamagra i'o huonteho.
Na'ankure tamagri'ma ha'ma reormantesamo'za, tamagri vahe
mani'naze. **51** Agrama monafima marerisia knamo tava'oma
nehigeno, Jisasi'a Jerusalemi kumate vunaku hanave agesa

antahi'ne. **52** Agra mago'a ke eriza vugotahu vahe huzmante'ne. Zamagra Sameria kumate nevnu'za, mago'azana ko ome retro hu'enageno vunaku huzmante'ne. **53** Hianagi anampi vahe'mo'za ozamavare'naze. Na'ankure Agra Jerusalemi vunaku hu'negeze. **54** Ozamavare'nage'ne amagema nentaza disaipol naga'afinti Jemisike Jonike nentahike amanage hu'ne Jisasina antahige'na'e. Ramoka tagra ha'manena monafinti tevemo eramino zamaresniegu nehano? **55** Hianagi Jisasi'a rukrahe huno ke'zanasutege'za, **56** ana kumara atre'za ru kumatega vu'naze. **57** Kantega zamagrama nevazageno, mago vahe'mo Jisasinku huno inantegama vanantega nagra kamage' ante'na vugahue. **58** Hagi Jisasi'a anage huno asami'ne, Afi' kramokizmia nozimia mopagampi me'negen, monafi namamofona nozamia me'ne. Hianagi Vahe'mofo Mofavre'mofona anu anteharege huno mase'zana omane'ne. **59** Jisasi'a magomofonku huno, Enka namage emento. Hianagi agra ke'nona huno, Ramoka kotazana, natregena vuna nenfana ome asenteteno. **60** Hianagi Jisasi'a huno, Atregeno fri vahe'mo'za, fri vahera asezmanteho. Hianagi kagra vunka Anumzamofo kumaku ome huama huo huno asami'ne. **61** Mago'mo enena anage huno asami'ne, Ramoka naganena kamage antegahue. Hianagi natrege'ha nonirega vuna nagani'a ome huso'e huzmantetena, ena kamage emeantaneno higeno, **62** Jisasi'a anage huno asami'ne, Mago'mo'ma hozama erino nevuno, rukrehe rukrehe huno vanimo'a, Anumzamofo Kumapina vugara osu'ne.

10 Hagi ama anazama huteno, Ramo'a 72'a vahe huhampri zamanteno, Agra'ama vunaku'ma hia rankuma ene maka osi kuma tamimpi, ugote'za vihogu tare tare huzmantetere hu'ne. **2** Jisasi'a anage huno zamasami'ne, Hozafina rama'a ne'zamo'a

nena huno meanagi, hoza vasage vahe'mo'za osi'a mani'naze.
E'ina hu'negu nunamu hutma hozamofo Nefa antahigenkeno,
eriza vahera huzamantenkeno hoza ome vassageho. 3 Tamagra
viho! Hianagi antahiho, sipisipi afu anenta naga, afi' kra
nagamofo amunompi huzmantankna hu'na huneramantoe. 4
Tamagra zagoma eriri ku'ene ku'ene tmagamofo anona e'ori
nevutma, kantegama vahe'ma zamagesuta huso'e sa'e huo
zamanteho. 5 Ina nompima ufresuta ese'zana ama nompina,
Anumzamofo rimpia fruzamo mesie hutma ome hiho. 6 Ana
nomofo nefama rimpia fru ne'ma mani'nesnigeno'a, tamagri
tamarimpa fruzamo'a, agrite megahie. Hianagi rimpia frune
vahe'ma omani'enkeno'a, ana asomu kemo rukrehe huno
ete tamagrite egahie. 7 Anama vnaza nompi umaninetma
nazanoma tamisazana nenetma tina neho. Na'ankure eriza
vahe'mo'a mizama'a e'nerie. Ru nontamimpina vutma etma
osih. 8 Rankumate nevnageno vahe'mo'za tamavrente'za,
ne'za retromta huramantesa zana neho. 9 Ana kumate kri
erinesaza vahera krizmia zamazeri so'e nehutma, anage
hutma zmasamiho. Anumzamofo kumamo'a tamagrite erava'o
nehie hiho! 10 Hianagi ina kumate'ma vnagenoma vahe'mo'za
otamavresagetma, atretma ana kuma kampi nevutma anage
hiho. 11 Tamagri kumate kugusopa tagia agusareti rupopo
hutrona zamo'enena, Anumzamo'a ha' reneramante nehie.
Hianagi antahiho, Anumzamofo kumamo'a ko tamagrite e'ne. 12
Antahiho, Nagra anage hu'na neramasamue. Anumzamo'ma
refko hania knazupa, Sodomu kumate vahe'mo'zama erisaza
knazana, tamagra ageteretma ra knaza erigahaze. 13 Nasunku
hurmantoe Korasin vahe'mota! Nasunku hurmantoe Betsaida
vahe'mota! Na'ankure kaguvazama tamagripi hu'noazana,

Tairine Saidoni kumate huasina, ko zamasunku kukena
nehu'za, tanefa fre'za zamasunku hu'za zamagua'a rukrehe
hazasine. **14** Hianagi Anumzamo'ma vahe'ma refkoma hania
knazupa, Tairi vahe'mo'zane Saidoni vahe'mo'zanema erisaza
knazana, tamagra agatereta ranknaza erigahaze. **15** Tamagra
Kapaneamu kumate vahe'mota monafi marerigahazafi? A'o,
tamavretresigetma fri vahe kumapi (Hedes) vugahaze. (**Hadēs**
g86) **16** Anante Jisasi'a disaipol nagakura anage huno
zmasamine, Iza'zo tamagri kema antahi tamamisamo'za, Nagri
ke antahi namigahaze. Iza'zo tamagrime tamatresamo'za Nagri
natregahaze. Hagi Nagri'ma natresimo'a hunantege'na e'nomof
atregahie. **17** Henka 72'a vahe'mo'za huzmantege'za vute'za
ete muse hume ne-eza, anage eme hu'naze. Ramoka havi
avamumo'zanena Kagri kagifi hunezmanonke'za ketia amage
ante'naze! **18** Jisasi'a ana kezmirera anage hu'ne, Sata'a
monafinti kopsinamo hiankna huno takauneregena ke'noe! **19**
Antahiho, Nagra osifavene ha' segintavene, rehapati hihamua
neramina, ha' vahe'mokizmi mika hanavema azeri agateresaza
hanavea tami'noankino, mago'zamo'a tamazeri haviza osutfa
hugahie. **20** Hianagi havi avamumo tagri ketia antahino
amage ante'ne hutma musena osiho. Hanki tamagri tamagima
Anumzamo'ma monafi krente'nea zanku musena hiho. **21** Ana
zupage, Ruotge Avamumo azeri muse Jisasina higeno, anage
huno hu'ne. Nafanimoka monane mopamofo Ramoka susu
huna muse hugantoe. Na'ankure kagra ama zana antahi'zane
vahe'mofontera erifra nekinka, osi mofavre nagakna hu'naza
nagate eri ama nehane. Izo, Nafanimoka ama'i kagrima kavesiazza
hu'nane. **22** Jisasi'ma nunamu huvgamareteno agafa huno kea
zamasami'ne. Nafanimo'a maka'zama kegavahu hihamu namine.

Mago vahe'mo'a, iza'ne Nagrira ke'za antahiza osu'nazanki,
Nefake antahine, Nefa'a iza'e, Nemofoke antahine. Nemofo'ma
avesite zmvrea vahe'mokizmia, Nefana zamaveri nehie. **23**
Anante Jisasi'a rukrehe huno amage'ma nentaza disaipol nagara
zamagrike anage huno zamasami'ne, E'ima negazazama kesaza
vahe'mokizmia asomu huzmantegahie. **24** Na'ankure anage
hu'na neramasamue, korapara rama'a kasnampa vahe'mo'zane,
kini vahe'mo'za e'ima negaza'zana kenaku hunazanagi, anazana
onke'naze. Nentahizaza antahinaku hu'nazanagi ontahi'naze.

25 Hagi mago nera kasegere ugota hu'nea ne'mo otino,
Jisasi reheno kenaku anage hu'ne. Rempi hurami nemoka,
nankna hutena manivava asimura erigahue? (*aiōnios g166*)

26 Jisasi'a kenona'a anage huno asami'ne, Na'ane huno
kasegefina krentene? Nankna hunka ana kasegemofo agu'agesa
hamprinka kenka antahinka hunane? **27** Higeno ana kasegere
ugagota hu'nea nemo'a kenona huno, Anumzankamofona maka
tumokareti'ene, kagu kamenteti'ene hanave kareti'ene, maka
antahintahi kareti'ene avesinentenka, tva'onkare mani'nemofona,
kagragu'ma kavemasinentanaza hunka, kavesinto. (Diu-Kas
6:5, Lev-Pri 19:18) **28** Higeno Jisasi'a anage huno kenona'a
asami'ne, Kagra fatgo hunka kenonana hananki, anama hana
kema amage'ma antesunka mani vava kasimura erigahane.

29 Hianagi ana ne'mo'a, agra'a fatgo hu'noe hunaku anage
huno Jisasina antahige'ne, tavaonire'ma nemaniza nagaku'ma
hanana inamokizmigu hane? **30** Jisasi' kenona'a fronka ke huno,
Mago ne'mo'a Jerusalemi kumateti Jeriko vunaku uneramigeno,
kumzafa vahe'mo'za eme ahe'za kutuma'a nehanare'za, kukena'a
eri varoro hutre'za ahetrageno fri'za huno nemasege'za, atre'za
fre'naze. **31** Mago pristi ne'mo ana kante uramino nevuno ana

nera ome ke'ne. Hianagi ana nera eme agatereno magokazigati vu'ne. **32** Anahu kna huno Livae ne'mo'a eramino, eme keme agatereno vu'ne. **33** Hianagi magora Sameria ne'mo'a ana ne'ma masenea kantega ne-eno, eme negeno asuragi ante'ne. **34** Ana huteno ana nete eno, ahenaza avufga'are, masavene wainine tagino frenenteno anakintene. Ana huteno donki afu'amofo agumpi avrenteno, avreno miza sez a nemasaza nompi ome anteno, ana kenege kegava hunte'ne. **35** Nanterana otino ana nomofo kva nera, tare silva zago nemino anage hu'ne. Nama'a zagoma atrenka mago'ane kegavama krintesanama'a, etenama esu'ha atrenesanama'a eme miza segantegahue nehuno vu'ne. **36** Ana 3'a vahepintira ina ne'mo kagrama kagesama antahinana, anama kumazafa vahe'mo'za ahe'naza ne'mofona tva'onte neknara huno manigahie? **37** Kasegere ugota hu'nea ne'mo huno, asunkuma hunte'nea ne'mo'e higeno, Vunka anahukna ome huo huno Jisasi'a hunte'ne. **38** Jisasi'ene amage'ma nentaza disipol naga'ane kantega nevu'za, mago kumapi zamagra vazageno, Mata'e nehaza a'mo Jisasina agi hige'za noma'afi ufre'naze. **39** Matana nenunkna agi'a Meri'e hu'za nehaza a'kino, Ramofo agafi mani'neno, kema hiana antahine. **40** Hianagi Mata'a ne'zama retromahu erizanku antahintahi hakare nehuno, Jisasinte eno anage hu'ne. Ramoka kagra nogano, nenanunknama natrege'na maka ne'zama nagrake'ma retro'ma nehuana? Huntogeno eme naza hino. **41** Hianagi Ramo'a, kenona'a anage hu'ne, Mata, Mata, kagra antahintahi hakare maka'zanku nehunka antahigna nehane. **42** Hianagi magoke'zantfa razana me'ne, e'i anazana Meri'a hetnofaza huhampriankino, anazana agripintira eri otregahaze.

11 Hagi mago zupa, Jisasi'a magokaziga mani'neno nunamu
huvgaretegeno, amagema nentea disaipol ne'mo'a anage
huno ome antahige'ne. Ramoka nunamuma hu'zana, Joni'ma
amagema nentaza disaipol naga'ama huzami'neaza hunka
rempi huramio huno antahige'ne. **2** Higeno Agra anage huno
zamasami'ne, Nunamuma hanutma anage hiho, Tafatimoka Kagri
Kagimo'a ruotge huno mesie. Kagri kumamo'a e'nie. **3** Magoke
magoke zage knafima nesuna ne'zana (bretia) neraminka,
4 kumitia apaserantegeta, tagranena anzalanke huta miko
kumima hurantesamokizmia atrezmantamneno. Hagi tatregeta
reravataga zampina u'oframneno. **5** Huteno anante Jisasi'a
anage huno zamasami'ne, Hagi magomoka roneka'amofontega
kenage vunka, tagufa breti namitegena, henka nonahuna
kamineno, **6** na'ankure ronenimo'a afeteti eno emaninegena,
ne'zama amisuazana omanenegena nehue hanankeno'a, **7**
nomofu agu'afinti ana ne'mo'a kenona anage hugahie. Ko
kafa erigi'na mofavre'n'i'ane, nagranena tafete mase'nonanki,
mago'zana eri onkamigahuanki eme nazeri oraotio hugahie.
8 Nagra neramasamue, nomofu agu'afima mani'nea ne'mo'a,
arone'amo mani'neanagi otino agrira ne'zana omigahie. Hianagi
na'ankure kazikazima hania zanku avesinesiama'a eri amigahie.
9 Ana hu'negu Nagra neramasamue, antahigegeno, anazana
kamino, hakesunka, kenka eri fore hugahane. Kafante vagre
vagre hugeno, kafamo'a anagi kantegahie. **10** Na'ankure
antahigaza vahe'mo'za e'nerize. Hakraza vahe'mo'za, keza eri
fore nehaze, kafante vagre vagre hanamokizmia, kafana anagi
zmantegahie. **11** Ina ne'mo amuno tamifintira, mofavre'amo'ma
aganetenkeno nozamegu'ma antahigesigeno'a, nozamea omi
osifavea eri amigahio? **12** Hifi kokore amuku'ma antahigesigeno'a,

amanə segintave (Scorpion) amigahio? **13** Hanki tamagra havizama nehzamota, tamagra antahinaze. Knare museza mofavretmia nezamize. Mago'ane monafi mani'nea Neramafa'a, Ruotge Avamuku'ma antahigaza vahera zamigahie! **14** Mago zupa ageruma eri tagane havi avamu mago ne'pinti Jisasi'a humegi atrene. Ana havi avamumo atineramigeno, kema nosia nemo'a agafa huno kea nehige'za, tusi'a veamo'za antri hu'naze. **15** Hianagi mago'amo'za hu'za, havi hankromofo ugagota kvazmimofo Belsebuli hanavefi, Agra havi avamura hunente hu'naze. **16** Mago'amo'za rehe'za kenaku, agafa hu'za monafinti mago avame'za huraveri huo hu'za hankavetiza antahige'naze. **17** Hianagi Jisasi'a antahintahizmia negeno, anage huno zamasmi'ne, Mago rankumo amu'nompinti refko huno ha' orente arente haniana, taregamoke haviza hugaha'e. Mago nompi naga'moma amu'nompinti refkoma hanuno'a traka huno haviza hugahie. **18** Hagi Satama agra'a naga'ane amu'nompinti refko huno ha' orente arente haniana, nankna huno ana kuma'amo'a oti hankavetigahie? Tamantahimanegoana, na'ankure tamagra hutma, Belsebul ugagota havi hankromofo hanavefi, havi hankrora hunente hazazanku nehue. **19** Hagi Nagra'ma ugagota havi hankromofo Belsebul hanavefima, havi hankroma huntesugeno'a, iza hanavefi tamagr'i'ma tamagema nentaza naga'mo'za hunentaze? E'ina hu'neankiza zamagra refko hurmantegahaze. **20** Hianagi Anumzamofo hanaveretima havi avamu hunentesuana, Anumzamofo kumamo'a ko tamagrite e'ne. **21** Hanave ne'moma kuma'ama kegava huno manisigeno'a, maka zama'amo'a mane so'e hugahie. **22** Hianagi mago hanavenentake ne'mo'ma ha'eme hunteno agateresuno'a, maka ati keve'ane, so'e zama'a erino ome refko hugahie. **23** Iza'o Nagranema

nomanimo'a ha' renenante. Iza'o Nagrane emeritru nosimo'a repanini higeno nefre. **24** Agru osu havi avamumo vahepinti atiramino vuteno, ti omane'nea kokampi nevuno, manigasahu kumaku hakeana onkeno anage hu'ne. Ete rukrahe hu'na ko'ma mani'no'a vahe'mofo agu'afi vanue nehuno, **25** vuno ana nonte ome keana, nona harafi huno eri so'ehu fatgo hunte'ne. **26** Anante ete vuno mago'a 7ni'a havi avu'ava agetereno nehia avamutmi ome zmavareno ege'za, ufre'za umani'naze. Hankino ana ne'mofona henka nomani'zamo'a, kote nomanizana agatereno havizantfa hu'ne. **27** Jisasi'a anage huno nehigeno, mago a'mo vea kevumofo amuno'zimifi mani'neno kezatino, amanage hu'ne, Negrera kaseganteno ami kami'hemo'a muse hugahie. **28** Hianagi Jisasi'a kenona huno, Ana hu'neanagi Anumzamofo nanekema nentahino amagema nentemo, agatereno musena hugahie. **29** Tusi'a vea krefamo'za mago'ane etruhu rama nehazageno, Jisasi'a agafa huno anage hu'ne, Ama knafi vahera havi vahe mani'ne'za avame'za kenaku nantahinegaze. Hianagi mago avame'za onkegahazanki, Jona avame zanke kegahaze. **30** Na'ankure Ninive kumate vahe'mokizmire, Jona'a avame'za mani'neankna huno, Vahe'mofo Mofavremo enena anahukna huno menima mani'naza vahe'motarera huramaverina kegahaze. **31** Anumzamo'ma vahe'ma refko huno keagama huzmantesia knarera, Sauti kaziga Siba kumateti Kuini a'mo'a otino, Anumzamo'ma keagama refkoma hanirera, ama knafi vahera keontahi vahe mani'naze huno keaga huzmantegahie. Na'ankure ana kuini amo'a afete'arega mani'neanagi, Solomoni knare antahintahi'a antahinaku e'ne. Hianagi antahihilo, mago nera Solomonima agaterenea nera amuno tamifina mani'ne. **32** Anumzamo'ma vahe'ma refkoma hania knarera, Ninive

vahe'mo'za oti'za ama knafi vhahera keontahi vahe mani'naze
hu'za keaga huzmantegahaze. Na'ankure Jona'ma hia kerera
zamagu'a rukrehe hu'haze. Hanki keho, Jonama agaterenea nera
amafi mani'ne. (Jona 3:4-10,1 Kin 10:1-13.) **33** Hagi vahe'mo'za
tavira rekru hu'za oku'a antege, ekaeka kupina eririza refinotaze.
Hianagi tavira tagiza tavima rekru hunte azotare antenesageno,
remsa hu'enige'za ufresaza vahe'mo'za kegahaze. **34**
Tamavurgamo'a tamavufgamofo tavire, tamavurgamo'ma keama
nehanigeno'a, maka tamavufgamo'a masa hugahie. Hianagi
haviza hanigeno'a maka tamavufgamo'a hani hugahie. **35**
Hanki tamagripima me'nea tavi'moma hanima huzankura,
kva hiho. **36** E'ina hu'negu maka tamavufgafima msamoma
avimatenenko'a, tamavufgafina hanina omnennen, maka
tamavufgamo'a tavimoma hiaza huno remsa hu vagaregahie. **37**
Jisasi'a ana kea huvagaretegeno, mago Farisi ne'mo'a huno,
nagrane feru ne'zana eme no huno antahigegeno, vuno neza
nenaza trate aza tununte (reclined) umanine. **38** Ana Farisi
ne'mo'ma keama, zamagra Farisi vahe'mo'zama zamazama
sesema hute'za nezama nenazaza osu, Jisasima nezama amne
nenegeno'a, antri hu'ne. **39** Hianagi Ramo'a anage huno ana
nera asami'ne, Tamagra Farisi vahe'motma kapune, pletinena
amega sese nehaze. Hianagi tamagu'afina kumazafa zamo'ene,
havi avu'avazamo avite'ne. **40** Tamagra negi vahe mani'naze,
Agra amegama troma hu'nemo'a, agu'afinena trora osunefi?
41 Tamagrama erinenaza zama, muse nehutma tamagu'areti
huta zamunte omane vahe'ma zamamisazana, tamagrira maka
zantamimo'a agru hugahie. **42** Hianagi Farisi vahe'mota kva hiho!
Na'ankure tamagra izane aruine, maka hozafinti manamentake
ne'zana 10ni'a kevufinti, mago kevua refko huta nemizanagi,

Anumzamofo fatgo avu'avazane, avesizamofona netreta,
vahera so'e hunozmantaze. **43** Kva hiho Farisi vahe'motma!
Na'ankure tamagra osi mono nontamimpi ugota trate mani'zanku
tamavenesigetma, maketi kumatamimpi vahe'mo'za antahiramiza
husgama huramantezankuke nehaze. **44** Tamagra Kva hiho! Fri
vahe'mokizmi keri refiteankna huta mani'nage'za, vahe'mo'za
ana agofetu ontahiza vano nehaze. **45** Kasegere ugagota
hu'naza vahepinti mago'mo kenona anage hu'ne, Rempi hurami
ne'moka, kagrama ama kema hanana, tagriku'ene huhaviza
hurantane huno hu'ne. **46** Hianagi Jisasi'a amanage hu'ne,
Kasegere ugagota hu'naza vahe'motmanena kva hiho. Na'ankure
tamagra vahe'mokizmia tusi'a knaza zamizage'za kanagu hu'za
eri'za nevazagetma, tamagra mago tamazankoa antetma knaza
zmia e'norize. **47** Tamagra kva hiho! Na'ankure korapama
neramagehozama zamahe'naza kasnampa vahe'mokizmia keri
tamagra negafize. **48** E'i ana avu'avazamofona, tamagra
vahera zmaveri hutma, neramagehoma hu'neazankura knare
hu'ne hutma nehaze. Na'ankure neramageho'za kasnampa
vahera zamahe fri'nazagetma, tamagra kerizmia kafinentaze.
49 E'i ana agafare, tamagri havi tamavu tamavazamofonku,
Anumzamofo knare antahintahimofo kemo'enena huno, Nagra
kasnampa vahe'ene, aposol nagara huzmantesugenno e'nagetma,
mago'amokizmia zamahe nefritma, mago'amokizmia zamazeri
haviza hugahaze hu'ne. **50** E'ina hu'negu, mona mopama fore'ma
hu'neregatima kasnampa vahe'ma zamahe'za korazmima eritagi
atre'za e'naza zanteria, nona hu'za meni gnafima mani'naza
vahe'mo'za knazana erigahaze. **51** Abelima ahegeno korama'ama
tagiraminereti eno, Kresramana vu itane ra mono nomofo
amu'nompima Zekaraiama ahazageno, korama'ama tagitre'nea

knarema ehanati'nea vahe'mokizmi koramofo nona'a, tamage
ama knafi vahe'motare refko huno nona huramantegahie. **52**
Kasegere ugagota hu'naza vahe'motma kva hoho! Na'ankure
antahi'zama eri kinofira erinetretma, tamagra'a anampina
unofreta, anampima ufrenaku'ma nehaza vahe'mokizmi kana
rehi'za hunezmantaze. **53** Jisasi'ma anama huteno'a, ananteti
atreno nevige'za, kasegere ugagota hunaza vahe'mo'zane, Farisi
vahe'mo'zanena agafa hu'za zamarimpa henente'za, rama'a
zanku agenoka nehu'za, **54** mago'a kema hanifinti azerinaza
kanku hake'naze.

12 Anama nehazage'za mika veamo'za emeritru nehazageno,
rama'a tauseni'a vahe'mo'za titipa hu'za zamagiareti orentrako
arentrako hu'naze. Pusantera Jisasi'a rukrahe huno, amage'
nentaza disaipol naga'a zamavumro ante'ne, Farisi vahe
zamuzmakura havige vaheki kva hoho. **2** Na'ankure mago'zamo'a
refiotegahie. Hakare'za oku'a me'nesnia zana, henka'a amate fore
hugahie. Hakare zama refitenesnia zamo'a, amate efore hanige'za
kegahaze. **3** Inankna kema hanimpima hu'nesana kemo'a, masare
eama hanige'za vahe'mo'za antahigahaze. Hagi sumike'ma
oku'a hunaraginte'pinkama hu'nesanana, anagamu nomumpare
marerino huama hanige'za antahigahaze. **4** Rone'nimotma,
Nagra neramasamue, avufgama ahe frisimofonkura korera
osih. Anama hutesu'za henka'a, mago'enena zamagra
anara huoramantegahaze. **5** Hu'neanagi Nagra kore kea
huneramtoe, Tamagri'ma tamahe frino hanave'reti tevefima
tamasga hu'tresimofo korora hunteho. Nagra neramasamue,
Agri korera hunteho! (**Geenna g1067**) **6** Hagi 5'a kisave nama
tare kasage zagore netraze. Ana nehzankino Anumzamo'a
ana namazagagura agera nokanie. **7** Hagi tamagerafa nehue,

tamasenire'ma me'nea tamazokara maka kohampari'ne. Korera
osiho! Tamagara rama'a kisave namazaga agateretma ra'za
mani'haze. 8 Nagra neramasamue, iza'o Nagri nagi nagenkema
vahe'mokizmi zmavurema huama hanimofona, Vahe'mofo
Mofavremo'a, Anumzamofo ankeromo'kizimi zamurera agi'a
huama hugahie. 9 Hu'neanagi mago'mo'ma Nagriku'ma onke'noe
huno vahe zamufi hufrakisi'mofona, Anumzamofo ankeromokizmi
zamavurera Nagranena, zamagrira ozamage'noe hu'na hu
frakizmantegahue. 10 Hagi iza'o Vahe'mofo Mofavre mago
kema huhaviza huntesimofona, kumi'a eri atrentegahie. Ana
hugahianagi iza'o Ruotage Avamumofo huhaviza huntesimofona,
kumi'a atreontegahie. 11 Hu'neanagi, osi mono nonte kva
vahete'ene, ruga'a kva vahetema tamavre'za vanageta, nanege
hugahune hutma tamagesa ontahiho. 12 Na'ankure Ruotage
Avamumo kema huku'ma hanaza kea rempi huramisigetma ana
knafina hugahaze. 13 Tusi'a veapinti magomo'a amanage huno
Jisasinku hu'ne, Rempi hurami nemode, nenfuna asamigeno
nerfama erisanti haregaha'e huno anterante'nea zampintira,
refako hunamino. 14 Jisasi'a ana kenona huno, Kagri'ene
negafu amu'nompina, iza kva mani'nenka kezani'a nentahinka
refko huzananto huno hunante'ne? 15 Anante amanage
huno zamasmi'ne, Kva hiho! Maka'a ruzahu ruzahu agraguks
antahizamofona ha' renenteta, kva huta maniho, vahe'mofo
mani'zana fenoma eri'zampina omnene. 16 Nehuno fronka ke
zamasmino anage hu'ne, Mago afufenone ne'mofo hozamo'a,
so'ezo huno hakare'a raga rentene. 17 Ana ne'mo'a anage
huno agesa antahi'ne, nezani'a erintesua nona omaneanki
nagra nankna hugahue? 18 Nagra ne'zama erinte nona tagna
vazina erira huna kitena, anampi maka ne'zane, mago'a zani'a

erintegahue huno antahi'i'ne. 19 Ananter a nagrani'agura anage
hugahue, nagra rama'a kafufima nazama hania zantamina eritru
huankina mani fru hu'nena tine nezane nenena musenkase
hugahue hu'ne. 20 Hianagi ana ne'ku Anumzamo'a anage hu'ne,
kagra neginagi vahe maninane! Meni kenageke frigahananki,
maka'za eri atru hu'nanazana iz a erigahie hu'ne? 21 E'inahu'za
zamagra'aguke nentahiza mopafi fenozmima eritru hanaza
vahe'mokizmia fore huzamigahie. Hianagi Anumzamofontera
e'inahu vahe'mokizmia fenozazmi omnene vahe mani'naze.
22 E'i ana agafare Jisasi'a amanage huno amage'ma nentaza
disaipol nagara zamasmi'ne. Tamagra tamavufagura antahintahi
hakare osiho. Nane'za neneta manigahune, nankukena antanita
tavufa refitegahune huta osiho. 23 Na'ankure tasimuma
erita manizamo'a ne'zana ageteregeno, tavufamo'a kukenama
hu'zana agaterene. 24 Namamofo keho, zamagra hoza kriza
ne'zana nogafize. Nezama erinte'za nesaza nona omne'neanagi,
Anumzamo ne'zana nezamie. Tamagra namamofona agatereta
raza vahera mani'naze. 25 Mago'mo tamagripintira antahintahi
hakarema haniazamo'a, asimu'a osi'a erizaza hugahio? 26
Tamagrama ama osizama osanutma, na'a higeta mago'a zankura
antahintahi hakare nehaze? 27 Inozamo'ma hageno amosrema
neheaza keho. Zamagra mragu'za atiza kukena hatiza nontanize.
Hianagi Nagra neramasamue, kini ne' Solomoni'ma avasese'ane
kukena hu'neanagi, ama flauamofo amosaremo agetereno
knarezantfa hu'ne. 28 Hianagi Anumzamo'a meni mesigeno
okima eriza tevefima kresnaza inozana e'inahukna huno
kukena hunezmanteanki, Osi tamentintine vahera! Anumzamo'a
agetereno vahe'mota kukena huormantegosio? 29 Naneza
neneta, nanti negahune huta antahintahi hakarea osiho. 30

Na'ankure zamentinti osu vahe'mo'za anazankura tusi'za hu'za
nehakaze. Hianagi tamagri, Neramafa'a atupama hanaza'zana
ko antahino keno hu'ne. **31** Hu'neanagi kotazana, Anumzamofo
kumaku haketenkeno, ana miko atupama hanaza zana tamigahie.
32 Onensa sipisipi afu kevumota korora osiho. Na'ankure
tamagri Nafatmimo'a, mona kuma'a muse huno tamiku hu'ne.
33 Afufenontamia zagore atretma, zago erita amunte omane
vahe nezminkeno monafi fenozantamimo'a meno, anazamo'a
monafina havizana nosanageno, kumzafa nosesageno, havi
kafamo'za eri havizana osu kumapi antegahaze. **34** Na'ankure
feno zanka'ama me'nenirega, anantegage kagu'a antegahane.
35 Hagi Kukena tamia huta, tro huta mani'neta, tavi tamia
rekru hutma maniho. **36** Kva'zmimo arave hu nezantegati
esigu kva hu'za manine'za, kafante eme vagre vagre nehige'za,
ame hu'za anagi nentazankna huta kva huta maniho. **37**
Hagi kazokzo eriza vahe'mo'za, kva zmimoma esigu kva
hu'za mani'nesaza vahe'mo'za muse hugahaze. Tamage hu'na
neramasamue, Agra'a ana kva nemo amu'nofi nehuno, kukena'a
eri atupa huteno, eri'za vahe'a hanige'za zamaza tununte mani
kagini sageno, kavera agra eme zamigahie. **38** Kenege esio,
kotu avame esio, zamunte'za kva hu'za maninesageno, eme
zamagesia kazokzo eri'za vahe'mo'za, muse hugahaze. **39**
Hu'neanagi ama'nankea antahiho, mago nomofo nefama e'i
knazupa kumzafa vahe'mo'za noni'a tagna vazigahaze huno
antahinesuno'a, kvagrino mani'neno zamatresige'za noma'a
tagna vaziza uofregahaze. **40** Tamagranena tamavu anteta kva
huta maniho. Vahe'mofo Mofavremo'a, omegahie huta hanaza
knafi, egahianki kva hutma maniho. **41** Pita'a anage huno
antahige'ne, Ramoka ama fronka kea tagrikuke nehampi, maka

vaheku'ene nehane? **42** Anante Ramo huno, Knare antahizanteti
eri'zama'a erifatgo nehania ne'mofo kva'amo'a, huntenkeno
mago'a eri'za vahe'a kva krinezmanteno, nezama nesaza zana
kna fatgore refko huzamisia vahera iza'e? **43** Ana kazokzo
eriza ne'mo'ma eri'zama enerino mani'nenigeno, kva'amo'ma
eme kenimo'a, asomu erigahie. **44** Tamage hu'na neramasmue.
Ana nera kva'amo'a huhamprintenkeno, maka zama'a kegava
hugahie. **45** Hianagi ana kazokzo eri'za ne'mo'a agu'afina huno,
kvanimo'a za'za kna maniteno egahie nehuno, agafa huno
eri'zama eneriza kazokzo eri'za vene'nene, ananene nezmaheno,
ne'zana neneno, aka ti neno neginagi nehuno, **46** kva'amo egahie
huno antahiominesia knare'ma esuno'a, eme aheno rutaneteno,
zamentinti osu vahe'mo'za manisaza kumapi antegahie. **47** Hanki
ina kazokzo eriza ne'mo'ma, kva'amofo avesizama keno antahino
hu'neno, ana avesimofonte kva osuno, amagema ontесimofona
rama'a zampi azeri haviza hugahie. **48** Hianagi iza'o antahino
keno osu'neno, knaza erigaza hu'nesimo'a, osia knokeve erigahie.
Maka vahe'ma rama'ama zminemofompintira, mago'ane rama'a
ante agofetu hu'za amisazegu hugahie. Hagi izano antahimino
rama'a ami'nenimofompintira, mago'ane rama'a erinaku agesa
antahigahie. **49** Nagra ama mopa teve taginteku e'noe. Nagri'ma
navesiana tevea rukru hanie! **50** Hianagi tusi'a knazamo navega
ante'neankina ti freankna hu'na, ana kanazampina ufretena
atiramisugeno, ana knazupa vagaregahie! **51** Tamagrama
tamagesama antahi'zana, ama mopafina rimpa fru'za erina enofi?
A'o, amu'nontamifina atane'za eri'na e'noe. **52** Meninena mago
nompi 5fu'a naga mani'nenamo'za amunozamifina atane'za
fore hanigeno, tagufamo'za refko hu'za taremokiznia ha'
reznantesageke, taremakea tagufamokizmia ha'rezman tegaha'e.

53 Famo tremokea refko huke, nef'a nemofo ha' rentena, nemofo'a nef'a ha' rentegahie. Anazanke huno nerera'a refko huno mofa'amofo ha' rente'na, mofa'amo'a nererana ha' rentegahie. Mago a'mo'a nenoferona ha' rentesigeno, nenofero'a, vemofo nererana ha' rentegahie. 54 Hagi Jisasi'a anage huteno, tusi'a veara anage huno zamasami'ne, Kazageno hampomo zage ufrtegama reraga higeta, ko arugahie nehazageno, kora nerie. 55 Hanki mago kaziga asoparegati (sauti) zahoma erigeta, zage ha hugahie nehazageno, ana nehie. 56 Tamagra tavre vahere! Tamagra mopafine monafinema fore hiazana refko hutma negaze. Hianagi menima ama knafima fore'ma hiazana na'a higetma refko hutma nonkaze? 57 Hagi nahigetma tamagra'a refko hutma fatgoma hu'neazana nonkaze? 58 Na'ankure magomo naneke huganteku kavreno kanisol vahete nevanigenka, karankama nevanuta, ko keaga hunka agranena erifatgo huo. Ana'ma osnanana ana ne'mo'a kavreno ke refkohu nete vanigeno, kavreno kina nonte kva nete kantena, kina hugantegahie. 59 Nagra anage hu'na neramasamue, ana kina nompi mani'neta, zagoma miza segahaze huno hurmantenesiama'a miza sevagareteta atiramigahaze.

13 Jisasi'a anante mani'negeno, Galili vahe'ma Paeroti zamahe frino korazmi erino Anumzamofonte Kresramana vu'zane eri havia huzamige'za, Kresramana vu'naza nanekea mago'a vahe'mo'za eme asmizageno, 2 Jisasi'a anage huno eme zamasami'ne, Tamagra tamagesa antahi'zana, ana Galili vahe'mo'za mago'a Galili vahe'mokizmi zmagetere'za tusi'a kumi hu'nazankino anazamo hige'za, ama knazana eri'haze hutma nehazo? 3 Nagra neramasamue, a'o. Hianagi tamagrama tamagu'a rukrehe osanutma, mikamotma anahu hutma frigahaze. 4 Hifi tamagra

antahi'zana 18ni'a vahe'ma Siloamu kumate zaza nomo kriteno
zamahe fri'nea vahe'mokizmi kumi'zmimo'a, maka Jerusalemi
mani'naza vahetmimofo kefovana zamagetere'za hu'naza vahe
fri'naze huta nehazo? 5 Nagra i'o hu'na neramasamue. Hianagi
tamagu'a rukrahe osnutma e'inahu kna hutma tamagranena mika
frigahaze. 6 Anage nehuno, Jisasi'a ama fronka ke zamasami'ne,
Mago ne'mofona waini hoza'afina, fiki zafa kri'neankino, nena
raga'ama rente'nenigu ome keana, raga'a reonte'ne. 7 Hoza
nefa'a, ana hoza'ama kegava kri'nea neku huno kamago,
tagufa kafu zagefima etevute hu'na koana, ama zafamo'a
raga'a reonteanki antagitro! Nahani'geno mopamofo tima'a
eri vagaregahie? 8 Higeno hozare kegava nehia ne'mo'a,
hoza nefana anage huno asami'ne, atregeno ama kafufina
me'nena, agafafina mopa kafina mago'a azeri masavema
hu'zana antanena, 9 ragama anaga'a kafufima renteniana, knare
hugahie. Hanki raga'ama reontesigenka eme antagi atresane
huno asami'ne. 10 Mani fruhu (Sabati) knazupa Jisasi'a osi
mono nompi umrerino rempi hunezmigeno, 11 mago ara 18ni'a
kafu zagefi havi avamumo amagena azeri fagagigeno, pripri
huno vano nehuno, oti fatgo huno vano nosia ara, 12 Jisasi'a
negeno ke higeno egeno, Ama a'moka, krimofo kinafintira
katufegantoe. 13 Nehuno ana a'mofo agofetu azana antegeno,
ame huno ana kri'amo'a vagaregano oti fatgo nehuno, agafa
huno Anumzamofo agi erisaga hu'ne. 14 Hianagi osi mono
nonte kva ne'mofona rimpa he'ne. Na'ankure Jisasi'ma mani
fru knazupa (sabat) ana a'mofo eri so'e hunte'negu, maka
veara amanage huno zamasmi'ne. 6si'a eri'za eneruna kna
me'negu, tamazeri so'e hanie hanutma, e'i ana knafi egahaze.
Hanki mani fruhu (Sabati) knazupa tamazeri so'e hanie hutma

omeho. 15 Hianagi Ramo'a ana kenona'a anage huno asami'ne, Tamagra tavre vahe mani'naze. Makamotma mani fruhu (sabat) knazupa bulimakaotamifi, donki tamimofona kegina zamifinti ti nesnagu katufeta zamavareta novazo? 16 Hanki ama ara Abraha mofakino, Sata'a zaza kna 18ni'a kafuzagefi kina rentegeno mani'nege'na, mani fruhu (sabat) knazupa katufe netrogeta, mani fruhu knagi anahura osuo hutma nehazo? 17 Anagema nehigeno'a, ke ha'ma rentaza vahe'mo'za zamagazegu nehazageno, maka veamo'za hirozantfama hu'nea zankura muse hu'haze. 18 Anante Jisasi'a amanage hu'ne, Anumzamofo kumara inankna hu'ne? Nazante avame kea hunte'na hugahue? 19 Masteti zafamofo raga'a, osi raga'a me'negeno, mago ne'mo erino hoza'afi krigeno hageno ra zafasege'za, hare'za vanoma nehaza namamo'za azankunate nozamima eme kizankna hu'ne. 20 Hagi mago'ane Jisasi'a anage hu'ne, Nazante avame kea Anumzamofo kumakura huntena hugahue? 21 Amanahu kna hu'ne, mago a'mo sikoni krenaku rama'a flauapi, osi'a zisti herafinteno eri havia huntogeno, ana mika flauamo zonerea kna hu'ne. 22 Anage huteno, Jisasi'a ranra kuma'tamimpine, osi kumatamimpi ufrenero rempi huzamime Jerusalemi vunaku nevigeno, 23 mago vahe'mo amanage huno antahige'ne, Ramoka Anumzamo'ma zamaguma vazi'nea vahera osi'a mani'nafi? Jisasi'a anage huno zamasami'ne. 24 Osi kafantema ufrenakura hanavetita ufreho. Na'ankure rama'a vahe'mo'za osi kafanteti ufrenakura hanazanagi, uofregahaze. 25 Nomofo nafa'amo otino kafa ergina, kafante eme otineta vagre vagre nehuta, Ramoka kafa anagiranto! Hanageno ana ne'mo'a huno, igati vahe mani'naze, tamagrira ontmage'noe huno hugahie. 26 Hanigetma tamagra anage hugahaze. Kagrane magopi

mani'neta ne'zane, tinena neneta kumatifi rempi huraminketa
antahi'nomota neone hanageno, **27** Nagra ontamagenoanki,
igati vahe mani'naze, Kefo zanke hu vahe'mota amafintira
maniganeho huno huramantegahie. **28** Anampina zavira neteta
tmavera anikreki nehuta, Abrahamune Aisakine Jekopune, maka
kasnampa vahera Anumzamofo kumapina kegahaze. Hu'neanagi
tamagrira tamasgafetrena megi'a mani'neta krafa hugahaze. **29**
E'ina hanige'za maka veamo'za zage hanati kazigati'ene, zage
fre kazigati'ene, ruga raga soparegati'ene Anumzamofo kumapi
eme eri atru hu'za zamaza tununte (recline) manigagine'za
ne'za netrate ne'zana negahze. **30** Hanki henka mani'nenaza
vahe'mo'za ugota hanage'za, ugota hu'enaza vahe'mo'za
uhenkategahaze. **31** Anagema nehigeza, Farisi vahe'mo'za
e'za amanage hu'za Jisasina asmi'naze, atrenka amafintira ru
kaziga vuo. Na'ankure Heroti'a kahenaku nehie. **32** Jisasi'a huno,
Afi' kragna vahera amanage huta ome asmiho, antahiho havi
avamu'tamina hunentena, kri vahera menine oki'nena zamazeri
neganamrena, anante knazupa eri'zama erivagareku e'nore
uhanatigahue. **33** Tamage Nagra menine oki'nena vuna tagufa
knazupa uhanatigahue. Na'ankure kasnampa nera, Jerusalemi
kumamofo megi'a ahe ofrigahaze. **34** Jerusalemi kumare,
Jerusalemi kumare, Kva huo! Anumzamo huntogeno kagriku'ma
e'nea kasnampa vahera zmahenefrinka, havenkno zamahe'nane!
Nama'a zupa Nagra mofavre raminka'a, a' kokoremo anenta'a
agekona kampi azeri franekiaza hunaku huanagi, kagrira
kave'nosie! **35** Hagi antahiho, nonkumatmimo'a vahe omani
kokankna hugahie. Nagra anage hu'na neramasamue, tamagra
Nagrira onage mani'nesageno mago knama esigetma, anage

hugahaze. Ramofo agifi ne-emofona asomu huntiesie hutma
hugahaze.

14 Mago mani fruhu knazupa (Sabati) Jisasi'a Farisi kva
ne'mofa nompi ne'za nenaku vuno umani'nege'za, nankna
hugahie hu'za zamagra kete'za mani'naze. **2** Ana higeno
avuga mago nera avufga zore krimo azeri haviza hu'nea ne'
mani'ne. **3** Kasegere ugota hu'naza vahe ene, Farisi vahera
Jisasi'a anage huno zmantahigene. Mani fruhu knazupa (Sabat)
knare vahera zamazeri so'e hugahumpi osugahune? **4** Hianagi
zamagra ke osu manizageno, ana nera avufare azerino kri'a
azeri so'e huteno huntogeno vu'ne. **5** Ana huteno anage huno
zamasami'ne, Inamoka mofavrekamo'o bulimakao afukamo ti afi
kerifi uraminenigenka, mani fruhu (Sabati) knazupa ame hunka
ome avare anaga otegahano? **6** Zamagra ana kemofo nona'a
hugara osu'naze. **7** Jisasi'a kegeno ne'za nehogu ke hazage'za
e'naza vahe'mo'za, ra zamajima eri trateke emanizageno,
Jisasi'a anage huno fronka kea zamasami'ne. **8** Mago'a
vahe'mo'ma, tamagri'ma ke hanigetma arave hu nezantema
vanutma, ra agima ami tratera uomanaho. Na'ankure mago vahera
tamagri'ma tamagatere'nesia vahera kea hu'nesigu'enene. **9** Hagi
ana taregamota tanagi hu'nesimo eno, traka'a ama ne' amio huno
hanigenka, kagazegu nehunka atrenka refarega umanigahane.
10 Tamajima hanigetma vanutma henka trate umani'nenkeno,
tamajima higeta vu'nazamo'ma esuno'a, anage huno hugahie.
Ronenimota, enagagateho hanigetma, maka trate'ma mani'naza
vahe zmufina ra tmagia erigahaze. **11** Na'ankure maka vahe'mo'za
zmavufga ra hanamokizmia, Anumzamo'a zamazeri fenka
tregahie. Hianagi zamagra zmavufga anteramisamokizmia,
Anumzamo'a zamazeri sga hugahie. **12** Anage nehuno, ne'za

nehoguma ke hige'za e'naza kva nera asamino, ra ne'za
kresnunka roneka'ane, kafu kaganahe'ine, vaheka'ane afufeno
zimine vahe'ene zamagrike zamagi osuo. Ru ana vahe'mo'za
kagri'enena ke hu'za nona hu'za kamisagenka mizanka'a
erigahane. **13** Hu'neanagi ra nezama retroma nehanunka,
zmunte omne vahe'ene, agia aza stinesia vahe'ene, aga havizahu
vahe'ene, avusu hu'nesnia vahe kea huge'za echo. **14** E'inahu
vahe'mo'za nona hu'za kamigara osu'nazankinka, kagra asomu
erigahane. Na'ankure fatgo vahe'mo'za frinesafintima otisaza
knazupa mizanka'a erigahane. **15** Mago'mo nezane trate zamaza
tununte mani'nafinti ana kema hia nentahino, anage huno
Jisasina asmi'ne. Maka vahe'mo'za Anumzamofo Kumapima
bretima nesamo'za asomu erigahaze! **16** Hianagi Jisasi'a ana
kemofo nona'a anage huno asmi'ne, Mago ne'mo'a ra ne'za
retro huteno hakarea vea ana nezante echo huno ke hu'ne. (Mat
22:1-10) **17** Ne'zama nesaza kna egeno, kazokzo eri'za vahe'a
hunteno, koma zamagi hu'noa vahete vunka echo hunka ome
zamasamio. Na'ankure nezantamia hago retro huramante'ne
hunka ome zmasamige'za echo. **18** Hianagi maka'mo'za hu'za
tasunku hunanki, eri'zanti me'ne hu'naze. Ese'mo'a anage huno
ana kazokzo eriza nera asmi'ne. Nagra mago mopa mizasenoa
ome kegahuankina, nasunku huanki ovugahue. **19** Anante'mo'a
anage hu'ne, 10ni'a hoza eri bulimakao miza sentenorega vu'na
ome avame ante'na kegahuankina, nasunku huanki omegahue.
20 Anante'mo'a anage hu'ne, meni ara eri'noanki'na omegahue.
21 Ana kazokzo eriza ne'mo rukrehe huno kva'amofonte eno
eme asmi'geno, kva nemo'a rimpa hegeno, ana kazokzo eri'za
nera anage huno asmi'ne. Ame hunka ra kumamofo osi kampine
ra kampine nevunka, afufenozmi omne'nesnia vahe'ene, zmagia

zamaza stinesia vahe'ene, zamaga haviza hu'nesnaza vahe'ene, zamavu asu hu'nesnia vahe'ene zamavarenka amare eno huno hunte'ne. **22** Anante kazokzo eri'za ne'mo'a huno kva'nimoka, kema hunantanzana hago huanagi nompina mago'a kankamuna me'ne higeno, **23** kva ne'mo'a anage huno kazokzo eri'za nera asmi'ne. Atiraminka ranra kampine nomofa kegina kante vunka tutu hunka ome zmasamige'za, e'za noni'afina eman aviteho. **24** Na'ankure Nagra anage hu'na negasamue, magore hu'za ko'ma zamagima hu'noa vahe'mo'za, nezani'afintira onetfa hugahaze. **25** Jisasina tusi'a vea krerfamo'za amage avaririza nevazageno, rukrehe huno amanage huno zamasmi'ne. **26** Mago'mo Nagrite enaku nehuno, nefane nererane a'amofone, mofavre'ane afuhe'ine, asarehe'ine, agra'agu'enema ha'ma reontesimo'a, Nagri disaipol omanigahie. **27** Iza'o agra'a keka zafa erigofino Nagri namage omesimo'a, Nagri disaipol omanigahie. **28** Iza'o tmagripintima zaza noma kinaku hanuno'a, kotazana manineno nama'a zagonu nona ki vagaregahue huno refako huno keteno nona kino. **29** Za'za no kinaku eri agafa huno tra'a tro hunteten, kivaga oresigeno, kesnaza vahe'mo'za hunte'za agiza nere'za, **30** ama ne'mo'a knare huno nona agafa hianagi, nona kivagaregara osie hu'za hugahaze. **31** Hagi mago kini ne'mo'ma, mago kini ne'ma ha'ma ome huntakenura, esera mani'neno antahino nagrira 10 tauseni'a sondia vaheni'a maninazankita **20** tauseni'a sondia vahe'mo'zama ha'ma eme hurantesaza vahera zmageteregahumpi, zmagete oregahune huno refko huno nege. **32** Ha'ma agateregama osnuno'a, ha' vahe'amoma afete ne-esigeno, agra mago'a vahe huzmantenke'za vu'za agri agi eriza magoaza ome huhampri nezmante'za ha'ma osu'za zamarimpa fru hu'za manisagu ome asmigahaze. **33** Ana hu'negu mago'mo'e

huno, mikozama'amofo amagena huomisimo'a, Nagri disaipol
omanigahie. 34 Hagemo'a knare hu'neanagi, haga'ama omnena,
ete inankna huno haga'a erigahie? 35 E'i haviza hu'neno
mopamofonena masevena amigara osu'neankino, atresigeno
amnezankna hugahie. Iza'o agesa me'enigeno nentahisimo'a,
atregeno agesa antahise hino.

15 Hanki maka takisi zago e'neriza vahe'mo'zane, kumi
vahe'mo'za Jisasinte erava'o hu'za naneke'a antahinaku hu'naze.
2 Hianagi Farisi vahe'ene kasegere ugota hu'naza (sraib)
vahe'mo'za zamagra'a ke hugantu hugama hu'za, ama nemo'a
kumi vahe zmarenlo ne'zana zamagrane magopi nene hu'za
nehazageno, 3 Jisasi'a ana kenona amanage huno fronka
kea zamasami'ne, 4 Mago'moma tamagripintima, 100'a sipisipi
ante'enifinti mago'mo fanane hanigeno'a inankna hugahie?
99ni'a zamatrenige'za agupofi mani'enageno, fananema
hu'nemofonku hakeva hakeva huno keno erifore hugahie. 5 Ome
keno eri fore huteno, afunte avrenteno muse nehuno, 6 avreno
nontema ehanatino'a, roneamokizmine tva'onte'ma nemaniza
nagara ke hanige'za esageno, anage huno zmasamigahie.
Muse nagri ene eme hinketo. Na'ankure fnanema hu'nea
sipisipia hago hakena eri fore hu'noe huno hugahie! 7 Hanki
Nagra amanage hu'na neramasgue. Anahukna kante, 99ni'a
vahe'mo'za fatgo hu'hazankiza zmagu'a rukrehe osugahazanagi,
mago kumi vahe'mo, agu'a rukrehe nehigeno'a monafina tusi
muse nehaze. 8 Jisasi'a mago'ane huno, Mago a'mo'ma 10ni'a
zago ante'enifinti, magoke zagoma fanane hu'nenkeno'a, rampe
tavi taginteno noma'a harafi huno hakeva hakeva huno keno eri
fore hugahie. 9 Ana a'mo'ma ome ke fore huteno'a, rone'agu'ene,
tva'oma'are nemaniza vaheku'enena zmasamino, Muse nigrane

eme hinketo, na'ankure zagonima fananema hu'neana hago
hakena erifore hu'noe huno hugahie! **10** Hanki amanage hu'na
neramasmue, anahu kante mago kumi vahe'mo'ma agu'ama
rukrahe'ma nehige'za, Anumzamofo ankeromo'za tusi muse
nehaze. **11** Jisasi'a amanage huno zamasmi'ne, Mago ne'mo
tare ne' mofavre zanante'ne. **12** Henka ne'amo nafa'amofonku
anage huno asami'ne, afufeno ka'a nagrama eri snuama'a
refko hunka namisnane higeno, nef'a fenoma'a refko huno
znam'i'ne. **13** Zaza kna omanineno henka ne'amo, fenoma'a
erino afete moparega vu'no anantega umani'neno, aza osu
havi avu'avazante fenozama ome atre eme atre hu'ne. **14**
Maka'zama'a atre vagaretegeno, ana mopafina tusi agate'za
fore higeno, ana ne'mofona mago'zama'a omnegeno tusi'a
agazanku hu'ne. **15** Ana higeno mago mopa agafa nete vuno,
erizampi avresigu ome antahigegeno, ana nemo'a afu'a kegava
hinogu huntogeno afu kevuma mani'narega vu'ne. **16** Magore
huno vahe'mo'za ne'zana omizageno, afumo'za kohe akru'a
nenazafinti nemu hu'naku agesa antahintahi hu'ne. **17** Hianagi
agrama knare antahintahima e'nerino'a, agra'a anage hu'ne.
Mika'a nenfa eri'za vahe'mo'za rama'a breti nenaze. Hianagi
nagra amafi mani'nena nagakura fri'za hue! **18** Nagra otina
nenfante vuna, anage hu'na ome asamigahue. Nafanimoka
Anumzamofonte'ene kagritera kumi hu'nogu, **19** ne'nimo'e hunka
kagra nagrikura osunka, eri'za vaheka'agna hunka navro hu'na
hugahue huno agesa antahine. **20** Anage huteno otino nefantega
e'ne, ogamanu ne-egeno, nafa'amo negeno asuntaginteno,
agareno vuno ome agazafeno, agi antako hu'ne. **21** Ana
nehigeno ana ne'amo anage huno nafa'amofo ome asmi'ne,
Nafa'nimoke, Anumzamofonte ene kagrite'enena kumi hu'noe.

E'ina hu'negu ne'nimo'e hunka nagrikura hugara osu'noe. Hanki eri'za vahe'ni'e hunka huo. **22** Hianagi nafa'amo'a kazokzo eri'za vahe'agu anage huno zmasamine, ame hutma hentofa kena erita eme antaninentetma, azampina asane agia anone eme antaninteho. **23** Agaho bulimakamo'ma afovage hu'nesia avreta eme ahetma, krenketa neneta maka'mota musena hamneno. **24** Na'ankure ama ne'nimo'a fri'neanagi, ete asimu eri'ne. Fanane hu'neanagi, ete hago ehanatine, nehige'za tusi'za hu'za muse hu'naze. **25** Hagi zage ne'mofavre'amo ehanatino nomofo tva'onte ne-eno, zavena neheza avogema nehzana nentahino, **26** mago eri'za vahe ke huno, na'a anamafina nehaze huno antahige'ne. **27** Ana ne'mo'a anage huno asmi'ne, negagna'a ehanatigeno negafa'a afovage hu'nea agaho bulimakao aheno krege'za nene'ze. Na'ankure negagnana mago'zamo'a azeri haviza osigeno ete ehanatigeno'e huno asmine. **28** Hianagi nempu'amofona rimpala hegano, ana nompima ufrezankura avesra hu'ne. Nef'a megia atiramino mofavre'a azeri fru huke hu'ne. **29** Hianagi ana nona'a amanage huno nafa'amofona asmi'ne, kama antahio! Kagri eri'zana kazahu'na vu'noe. Rama'a zagegfufi erizanka'a erinegantena, mago zupe hu'na keka'a rufu'otaginoe. Ana nehugenka magore hunka osi memena naminkena, rone ni'amozanena aheta kreta neneta musena osu'noe. **30** Hianagi ama mofavre kamoma maka zanka'a monko avu'avazante ome atre vagareno eri haviza huteno egenka, kagra afovage agaho bulimakao ahenka krente'nane. **31** Higeno nef'a'anage huno asmi'ne, ne'nimoka kagra hakare zupa nagrane mani'nanankino, maka'zama ante'noana, Kagri su'a me'ne. **32** Hianagi tagra neza neneta muse huntegahune. Na'ankure ama negagna'a fri'ne huta

hu'noanagi, kasefa huno mani'ne. Fanane hu'ne huta hunanagi,
efore hu'ne huno asami'ne.

16 Jisasi'a, mago'ene amage nentaza disaipol naga'amokizmi
anage huno fronka kea zamasmi'ne, Magora afufenone ne'mo'a,
fenoma'are ugagota huno kva nehia eri'za ne'mo, fenoma'a eri
havia hu'nea nanekea, 2 nentahino ugagota eri'za ne'a agi higeno
egeno, na'a hu'nana naneke antahi'noe? Mafka eri'zama eri'nana
avontafe ka'a erinka enka eme erifatgo huo. Na'ankure kagra
mago'ene ugagota kva omanigahane huno higeno, 3 ana ugagota
eri'za kva ne'mo'a amanahu ke agra'a agu'afina antahi'ne, na'a
nagra hugahue. Kva ni'amo'a eri'za ni'a eri atreanki? Nagrira
hoza eri hanaveni'a omnegahiankina vaheku nzahuo huzankura
nagaze hugahie huno nehuno, 4 Nagra naza hugahue hago
antahue, ugagotahu kva eri'za'niafinti hunante'na, vahe'mo'za
muse hunante'za navare'za nozmifi ome nantegahaze. 5 Nehuno
ozafa'amofo zamanofi huno eri'nea vahe, mago mago ke
higeza ageno, ese'ma emofo agra anage huno antahige'ne,
nama'a ozafa'nimofo'zana nofira hunka eri'nane? 6 Higeno ana
ne'mo'a anage hu'ne, 100'a Olivi masaventafe eri'noe higeno,
ana fenonte ugagota hu'nea kva ne'mo anage hu'ne, ame hunka
mopafi maninka avontafe ka'a erinka 50'a masaventafene hunka
avona krento huno asami'ne. 7 Anante rumo egeno ana ugagota
kva eri'za ne'mo antahige'ne, Nama'a kagra nofira hu'nane?
Higeno ana ne'mo'a 100'a witigure higeno, ugagota eri'za kva
nemo'a huno avon tafe erinka 80'a witigure hunka avona krento
hu'ne. 8 Henka kva ne'mo'a, fenozante ugagota huno kvahu so'e
osu'nea kva ne' muse hunte'ne. Na'ankure antahiza me'nea kva
vahemo nehiaza hu'negure. Hagi ama knafi havizama nehaza
vahem'mo'za zamagra zantera knare hu'za kva nehu'za, tavi

masare'ma nemaniza vahera zamagateneraze. (aiōn g165) 9
Amanage hu'na Nagra nerasmue, fenoma erinka ama mopafi
fatgo osu'zante'ma netrana zana, netrenka ana zanteti vahera
zamazeri knampa huzmante'negeno, ana fenoma vagama
resige'za, muse hu'za kavare'za mani vava nonkuma zamirega
vugahaze. (aiōnios g166) 10 Mago'mo'ma osi'zantema so'e huno
kegavahu fatgo hanimo'a, anahu kna huno ra zana kegavahu
fatgo hugahie. Hagi osi'zama kegavahu fatgo osanimo'a, ra zana
kegavahu fatgo osugahie. 11 Kagrama ama mopafi fenozama
kegavahu fatgo osnankeno'a, iza tamage fenoma kvama
kri'zana kamigahie? 12 Kagrama vahe'zama kegava huhaviza
hanankeno'a, kagri'zana iza kamigahie. 13 Mago eri'za ne'mo'a
tare ozafarera eri'zana e'origahie. Mago'mofona antahi haviza
hunenteno, mago'mofona avesi antegahie. Huge mago'mo'ene
mani tragoneteno, mago'mofona atregahie. Kagra Anumzante
ene zagrera eri'zana eriontegahane. 14 Farisi vahe'mo'za ana
maka ke nentahi'za, (zagogu zamesi zamesi nehaza naga'mo'za)
agiza nere'za, hupri hunte'naze. 15 Hu'neanagi Jisasi'a amanage
huno zamasmi'ne, Vahe'mofo zamavurera tamagra fatgo vahere
hutma nehazanagi, Anumzamo'a tamagu'a ke'ne. Na'ankure
vahe'mo'zama knarezantfa me'ne nehaza'zamo'a, Anumzamofo
avufina havizantfa me'ne. 16 Moses kasegene, kasnampa
vahe'mofo kea huama huno Joni knare eme atre'ne. Hagi
ananteti'ma e'neana Anumzamofo kumamofo musenke huama
nehigeno, hakare vahe'mo'za hanaveti'za ana kumapi vanagura
kazigazi hu'za nevaze. 17 Hu'neanagi amane fru huno monane,
mopanena fanane hugahianagi, kasege kefima me'nea osi
avomo'a vaga oregahie. 18 Iza'o a'ma netreno ru a'ma erinuno'a,
anamo'a monko'za hugahie. Hagi mago ne'mo'ma, ve'a atre'nesi'a

a' erisanimo'a, monkoza hugahie huno hu'ne. **19** Jisasi'a amanage hu'ne, Mago ne'mo afufenoma'a hakare me'negeno tusi'a zago atreno, koranke kukena nehuno, asanema nehia ne'za knane knane erino neneno, so'e huno mani'ne. **20** Ana nehigeno noma'a kasante mago nera fenoma'a omane'nea fugo namune ne' antazageno manitere nehiane. Ana ne'mofo agi'a Lasarusi'e. **21** Lasarusi'a maseno mani'neno, feno ne'mo'ma ne'za nenesigeno ankra heramisiama'a erina nesue huno nehuno emani'negeza, kramo'za namuma'reti zamaganefu'nanu hu'ne hane hu'naze. **22** Anante amunte omane nera frige'za, ankero vahe'mo'za eri'za Abrahamu nemania kumate vu'naze. Vutageno afufeno nera anante frige'za eri'za ome asentageno, **23** hagi tevefi manineno tusiza huno ata negrigeno kenagamuteno Abrahamuke Lasarusikea, afete magopi mani'nakeno zanage'ne. (**Hadēs g86**) **24**

Neznageno kezatino, Abrahamuga nafa'nimoka teve nenrege'na natagu nehuanki kasuntagi nantenka, Lasarusina huntogeno timpi azanko agona'a reteno nagefu'nare eme rentenkeno fru hunanteno hu'ne. **25** Abrahamu'a amanage huno asmi'ne, Mofavre'moka kagesa antahio. Mopafi mani'enka knare zampi mani'nankeno Lasarusi'a haviza huno mani'ne. Hu'neanagi menina Lasarusi'a fruzampi emani'negenka kagra kata zampi mani'nane. **26** Hanki mago'zana amanahu kna'za me'ne. Tamagri'ene tagri'ene amu'nompina tusi'a tinka me'negeno, hagro hu'neankita tamagritegama takaheta vu'zanku'ene tagritega ezankura tusi'a amuho hurantegahie. **27** Anante anage higeno, afufenone ne'mo'a amanage hu'ne. Nafa'nimoka Abrahamuga muse hugantoanki Lasarusina huntogeno nenfa nontega vino, **28** na'ankure nafa'nimofo nompina 5fu'a nafuhe'ina zamatre'na e'noanki, Lasarusina huntogeno hanave'nentake kore ke ome

huzmasamisige'za tusi'a ata eri kumapina omeho hu'ne.

29 Hu'neanagi Abrahamu'a kenona huno, Moses nanekene kasnampa vahe'mokizmi nanekea me'neanki'za zamagra ana nanekea antahigahaze. **30** Ana hianagi afufenoma'ane ne'mo'a anage hu'ne, a'o nafa'nimoke higeno, Abrahamu'a anage hu'ne, frinefinti otino ome zamasamisiana zamagu'a rukrahera hugahazo! **31** Anage hianangi Abrahamu amanage huno asami'ne, I'o. Moses nanekene, kasnampa vahe'mokizmi nanekema nontahisu'za, inankna hu'za fripinti otino ome zamasami'nia kerera zamagu'a rukrehe hugahaze huno hu'ne.

17 Jisasi'a amanage huno amagema nentaza disaipol naga'a zamasami'ne, Reheno kezana egahie. Hianagi iza'o reramatga nehimofonkura nasunku huntoe! **2** Witi refuzafu nepaza havere nofi anakiza, anankempi rentete'za, hagerimpi atrenageno uramisiana knare zantfa hugahie. Neone nagapinti magomofo azeri trakama huzankura, **3** tamagra kva hihoh! Neramatfuma kumima hanigeta, haviza nehane huta hinkeno, agu'ama rukrehema hanigeta, kumi'a atrentegahaze. **4** Ana ne'mo'ma mago knamofo agu'afi 7ni'a zupa (seven times) 7ni'a kumi huramanteteno, ana kefozama'agu agu'a rukrahe huno 7ni'a zupa eno nasunku hue hanigeta, kumi'a atrentegahaze. **5** Aposol naga'amo'za, Ramofona anage hu'za asmi'naze, tamentintia eri ra huo hu'za hazageno, **6** Ramo'a anage huno zamasami'ne, Tamagrimala tamementintimo'ma masteti zafa ragagna hu'nenigeta, mulberi zafagura amne tasagi hunka hagerimpi ome regrio hanageno'a, ketamia amage'anteno amne anara hugahie. **7** Ina'imoka amuno tamifina kazokzo eri'za vahe ka'amo'ma hoza tinka eri'zano, sipisipi kegava nehaniregati enkenka, ame hunka emaninka ne'zana no hugahano? **8**

Hu'neanagi kva'amo'a amanahu kea kazokzo eri'za ne'agura
osugahio, kukenaka'a eri hutenka nezama nesuazana retro
hunenantege'na, tine nezanena netesugenka, henka tine nezane
kagra negahane hugahie? 9 Hanki agra kazokzo eri'za ne'agura
musenkea huontegahio? Na'ankure huo huno'ma hunte'neazana
hu'ne. 10 Ana hu'negu kagranena, maka'zama Anumzamo
huo huno hugante'neazama hanunka anage huo, tagra knare
osunona kazokzo eriza vahemota, Anumzamo eriho huno
hurante'nea eri'za e'nerune huta hugahaze. 11 Jisasi'a Jerusalemi
vunaku nevuno, Sameria kuma'ene Galili kumamofo amunompi
rugitagino vu'ne. 12 Nevuno mago kumapi ufregeno, 10ni'a
fugo namune vahe'mo'za ogamnu otiza mani'ne'za ome tutagiha
hunte'naze. 13 Hagi zamagra amanage hu'za kezati'naze,
Jisasiga kva ne'moke, kasuntagiranto! hu'za nehazageno, 14
Jisasi'a nezmageno amanage huno zamasmi'ne, Tamagra
vuta pristi vahete tamavufga ome zamaveri hiho, hige'za
nevazageno fugo namuzmimo'a amne higeza agru hu'naze.
15 Hagi mago'zmimo'a keana avufgamo so'e higeno, rukrahe
huno ranke huno Anumzamofo agi erisaga nehuno, 16 Jisasi
agafi avugosaregati epri huno, susu huno musenke huntene.
Ana nera Sameria nere. 17 Anante Jisasi'a anage hu'ne,
10ni'a vahe'mokizmi fugo namumo'a so'e hige'za agru hu'naze.
Hianagi 9ni'a vahe zaga iga mani'naze? 18 Mago vahe'mo'a
eama huno Anumzamofona ra agi omigeno, ama megi'a
ne'mokepi? 19 Jisasi'a anage huno ana ne'mofonku hu'ne,
Kamentintimo kazeri so'e hianka otinka vuo. 20 Farisi vahe'mo'za
Anumzamofo kumakura, inan knare egahie hu'za Jisasina
antahigazageno, kenona zimirera anage hu'ne, Anumzamofo
kumara mago avame'zane esigeta onkesageno, 21 amagi

keho huge, antugi keho hu'za zamagra osugahaze. Na'ankure
Anumzamofo kumamo'a ko tamagri amu'nompi me'ne. **22**
Anage nehuno, amagema nentaza disaipol naga'a zamasamino,
Mago kna ne-eankino, ana knarera Vahe'mofo Mofavre kenaku
hanazanagi, tamagra onketfa hugahaze. **23** Zamagra anage
hu'za tmasamigahaze, antufi mani'neanki keho huge! Amafi
mani'neanki keho! Hanigetma anantega ovuta, zmavaririta ana
vahera oviho. **24** Vahemofo Mofavre'ma esia kna'arera kopsi'namo
monare rurarage huno remsa nehigeno, mago kazigati remsa
huno mago kaziga atuparega neviankna hugahie. **25** Hu'neanagi
ese'zana Agra rama'a knazampi unefresigeno, ama mani'nona
gnafi vahe'mo'za zmefi humigahaze. **26** Noa knafima hu'nazaza
hu'za, Vahe'mofo Mofavremoma enaku'ma hania knafina, anahu
zamavuzamava nehu'za, **27** zamagra ne'zana nene'za, tina
nene'za, arave nehu'za, ara masi omi ami nehzageno, Noa'a
vente agu'afi marerigeno, timo'a miko zamahe refite'ne. (Jen-
Agfa 7) **28** Loti gnafinena anahukna hu'za, ne'zana nene'za,
tina nene'za, miza neseza, zagore netre'za hoza negriza nona
negiza hu'naze. **29** Hianagi Lotima zamatreño Sodomu kumapinti
atiramino vu'nea knazupa, tefizo hu'nea havemo ko' riaza huno
zamahe refite'ne. **30** Vahe'mofo Mofavrema eama hunaku'ma
hania knarera, anahukna zamavuzmava hugahaze. **31** Ana
knazupa nomofo agofetu mani'nenigeno, fenozama'a agu'afi
me'nesimo'a eramino fenoma'a erino ati oramigahie. Anahukna
huno hozafima mani'nemimo'a rukrehe huno omeno. **32** Hanki
Loti nenanente fore hu'nea zanku tamagesa antahiho. (Jen-Agf
19:24-26) **33** Iza'o asimu'a azeri kona hunaku hanimo'a, asimu'a
atregahianki, iza'o asimu'a atresimo'a, asimu'a erigahie. **34**
Hanki Nagra anage hu'na neramasamue. Ana knazupa tare vahe

sipare kenage mase'nesnake'no, mago'mofo nevreno mago'mofo atregahie. 35 Tare atre'mokea witi raga'a refuzafunepeke mani'nesnapinti, magomofo nevreno mago'mofo atregahie. 36 Hagi tare netremoke hozafi mani'nesnakeno, mago'mofona nevreno, mago'mofona atregahie. 37 Anankemofo nona zamagra Jisasinku hu'za, Ramoka inantega anazana fore hugahie? Hu'za amage'ma nentaza disaipol naga'mo'za antahigazageno, anage huno zamasami'ne, Fri'nea avufgama, me'nesirega anantega tumpa namamo'za eri atru hugahaze.

18 Zamavesra osu maka zupa nunamu hanagu, fronka ke Jisasi'a amagema nentaza disaipol naga'a anage huno zamasami'ne, 2 Mago rankumatera ke refkohu (jas) kva nera mani'neakino, Anumzamofonku korera nosuno, vahe'mokizmia zmagefenkami netrea nere. 3 Magora kento ara ana rankumapina mani'nea amo, ke refko nehia kva nete eva eva nehuno, anage hu'ne. Mago vahe'mo nazeri haviza nehianki naza huo hu'ne. 4 Mago'a knafina ana a'mofo kea antahi omi'neanagi, henka anage huno agesa antahine. Nagra Anumzamofonkura korera nosu'ha, vahe'mokizmia zmagefenkami netroanagi, 5 ama kento a'mo tutu hunenanteno hakare zupa evava nehuno nazeri navesra nehianki, ru evava huno nazeri naveresra hanigi aza hanue hu'ne. 6 Ramo'a anage huno zamasmi'ne, Fatgo osu ke refkohu kva nemo'ma hu'hea kegu tamagesa antahiho hu'ne. 7 Hanki Anumzamo'ma huhampri zmantenea vahe'mo'za, hanine zagine antahigevava nehanageno'a, fatgo avu'avara huno zavikezmia antahino zamaza osugahio? 8 Amanage hu'na neramasamue. Agra ame huno zamasu ragizmanteno zamaza hugahie. Ana hugahianagi Vahe'mofo Mofavremo'ma esuno'a, Agra ama mopafi vahe'mofo zamentintia eme zamagegahifi eme

ozamagegahie? 9 Mago'ane fronka kea huno, zamagrazmigu antahi'za tagra fatgo vahe mani'none nehu'za, ruga'amo'za knare osu vahe mani'naze hu'za zamagefenkami netrazamokizmi zamasami'ne, 10 Tare netremoke nunamu hunaku ra mono nompi mareri'ha'e. Magora Farisi nere, magora takisi zago e'neria nere. 11 Farisi ne'mo'a otineno anage huno agra'agu nunamu hu'ne. Anumzamoka Nagra susu huna muse nehue, mago'a vaheknama osu'na havige huno musufa nesea vaheknara nosuna, kefoza nehaza vahekna osu'na, arave netanaza vahekna nosuna, ama takesi zago eneria ne'kna osu'noe. 12 Maka sontamofo agu'afina tare zupa ne'zana a'o nehu'na, maka'zama atrena zagoma erufintira, 10ni'a kevufintira musezana mago kevu refko huna Anumzamoka negamue. 13 Hianagi takisi zagoma e'neria ne'mo ogantu otino manino monafinka kesga huno nonkeno, kepri huno amimizare nemasagino amanage hu'ne. Kumike vahe mani'noanki Anumzamoka kasuntaginanto huno hu'ne! 14 Amanage hu'na neramasamue, takisi eneria ne'mo'a Farisi ne'mofona agetereno Anumzamofo avurera fatgo huteno noma'arega vu'ne. Na'ankure agra avufga erisagama hanimofona, Anumzamo'a azeri fenka atregahie. Hianagi iza'o avufama anteramisimofona, Anumzamo'a azeri sga hugahie. 15 Mago'a veamo'za ne'one mofavre'zmia Jisasi zamufare zmavako nehuno, asomu ke huzmantenogu zamavare'za neage'za, amage'ma nentaza disaipol naga'mo'za nege'za, ke zamasu'naze. 16 Hianagi Jisasi'a mofavreramina ke hige'za Agrite azageno amagema nentaza disaipol nagara zamagi huno zamasmi'ne, Zamatreke'za ne'one mofavreramina Nagrite echo. Kazmia renkanire ozmanteho. Na'ankure Anumzamofo Kumara, e'inahu vahe'mokizmi kuma me'ne. 17 Tamage hu'na

neramasmue, iza'zo ama mofavre'mo'za enerizankna hu'za
Anumzamofo Kumama e'orisamo'za, uofregahaze. **18** Mago
afufenone kva ne'mo'a amanage huno Jisasina antahige'ne,
Knare Remp i Hurami Ne'moke, nankna hute'na mani vava
asimura erigahue? (aiōnios g166) **19** Higeno Jisasi'a anage huno
kenona ana ne'mofona asmi'ne, Na'a higenka Nagrikura knare
hu'nane hunka nehane? Mago vahe'mo'a knarerera osu'neanki,
Anumzana magokemo knarerera hu'ne. **20** Hanki kagra kasegea
antahinane, rumofo aro vea avazu osuo. Vahera aheofrio.
Maka'zana musufa oso. Ru vahe'mofonkura havigea huonto.
Negrerane negafane keznia erizafa huo, hu'nea kea antahinane.
Huno Jisasi'a higeno, (Eks-Ati 20:12-16, Diu-Kas 5:16-20)
21 ana kva ne'mo'a mofavre mani'na enoregatira ana mika
kesegea amage ante'na e'noe, huno higeno, **22** Jisasi'a ana
ke antahiteno amanage huno ana ne'mofona asmi'ne, Mago
zantfa atupara hu'nane, maka zanka'a zagore atrenka zago
erinka, zamunte omne vahe nezamigeno, monafi fenonka'a
mesigenka enka eme namage anto. **23** Hianagi ama ana naneke
nentahino, rimpagna afufenoma'agura hu'ne. Na'ankure agra
tusi'a afufeno antenegu ana hu'ne. **24** Jisasi'a ana nemofo
negeno anage hu'ne, Fenozmine vahe'mo'za Anumzamofo
Kumapima vunaku'ma hanazana tusi'a maraguzatigahaze!
25 Na'ankure kemorimo'za fru hu'za nekazamofo kampina
ufregahazanagi, afufenone vahe'mo'za tusi'a maraguzati'za
Anumzamofo Kumapina ufregahaze. **26** Anampi mani'naza
vahe'mo'za ana ne'kuma asamia kema nentahiza, hagi iza
manivava asimura erigahie hu'za antahige'naze? **27** Hianagi
Jisasi'a anage hu'ne, Maka'zama vahe'mota osugazana,
Anumzamo'a amne hugahie higeno, **28** Pita'a amanage huno

hu'ne. Ko, mika zantia atreta, Kagri kamage anteta neone.

29 Higeno Jisasi'a anage huno zamasami'ne, Tamage hu'na neramasamue, magomo'a nomo'o nenanoro, afu aganano, nererano nefano, mofavre'ama Anumzamofo Kumaku'ma huno atresimo'a, 30 amama mani'nea knafina rama'azantmi e'nerino, henkama esia knafina monarera, manivava asimura erigahie.

(aiōn g165, aiōnios g166) 31 Jisasi'a 12fu'a amage'nentaza disaipol naga'a zmavrekanti anteno, anage huno zamasami'ne, Antahiho, Tagra Jerusalemi kumate marerita vanunkeno, maka kema kasnampa vahe'mo'za, Vahe'mofo Mofavregu hu'za kre'naza kemofo avufa'a fore hugahie. 32 Na'ankure meg'i'a vahe zamazampi avare amisageno, azanva ke hunente'za, azeri haviza nehu'za, avetu ahentegahaze. 33 Ana nehu'za, sefu amite'za, ahefrisageno friteno, ete tagufa knazupa otigahie. 34 Hianagi amage'ma nentaza disaipol naga'mo'za fritena otigahue hiankemofo agafa'amo'a frakino oku'a me'nege'za, ana kemofo agafa'a antahi amara osu'naze. 35 Jisasi'ma Jeriko kumate vugofa nehigeno, mago avusuhi ne'mo kamofo ankenarega meme nehuno mani'neno, 36 antahigeno rama'a vahe enevazageno, naza fore nehie? huno zmantahigege'za, 37 zamagra asami'za, Nazareti kumateti ne' Jisasi enevie nehazageno, 38 Ranke huno kezatino, Jisasio Deviti Nemofoga kasuntginanto! Higeno, 39 kotama vaza vahe'mo'za ana ke nentahi'za kesu'za, kea osunka kagira hamunkinka manio hu'naze. Hianagi mago'ane kezatino, Deviti Nemofoga kasuntginanto! 40 Jisasi'a neviretira anante uotino, kehinkeno eno hige'za, ana nera ome avare'za erava'o hazageno, anage huno antahige'ne. 41 Na'a huganteku hugenka nehane? Higeno, Ramoka ete navua keso'e hanuegu nehue! 42 Higeno Jisasi'a anage huno asmi'ne. Kamentintimo kazeri hari

hianki kavua ko higeno, **43** avurgamo'a ame huno anante hari
higeno, ete knare huno negeno, Jisasina amage'anteno nevuno,
Anumzamofo agi erisaga nehige'za, miko vahe'mo'za nege'za
zamagranena Anumzamofo agi erisaga hu'haze.

19 Hagi Jisasi'a Jeriko rankumapi ufrenero nevigeno, **2** mago nera
Sakiasi'e nehaza nera, takesi zago eneriza vahe'mokizmi kva
nekino, afufeno ne' mani'ne. **3** Nankna ne' Jisasi'a mani'ne huno
Sakiasi'a kenaku hianagi, tusi'a vahe'mo'za rehiza huntazageno
onke'ne. Na'ankure agra atupa ne' mani'ne. **4** Ana higeno agareno
vugoteno, vunaku'ma hiankante me'nea sikamo zafare umarerino
kenigu mani'ne. Na'ankure Jisasi'a ana kante enaku higeno'e.
5 Jisasi'a anama mani'nere ne-eno, kenagamuteno negeno
anage huno asami'ne, Sakiasiga ame hunka eramio, na'ankure
menina kagri nompi umanigahue. **6** Higeno Sakias'a ame huno
eramino, muse nehuno avreno noma'rega vu'ne. **7** Ana'ma
hige'za maka vahe'mo'za nege'za, ke hakare hunte'za, kumi
vahe'mofo nompina nantura antenente hu'haze. **8** Hanki Sakiasi'a
otino amanage huno Ramofona asmi'ne. Ramoka antahio,
fenoni'a amu'nompinti refko hu'na zmunte omne vahe nezamina,
nagrama rezmatga hu'na eri'noazana refko hu'na **4'a** zupa
zamigahue. **9** Higeno Jisasi'a amanage huno asami'ne, Menina
ama nompi mani'naza vahetera, Anumzamo'a zmahokeno
zamavare'neazamo ko e'ne. Na'ankure agranena Abrahamu
mofavre mani'ne. **10** Na'ankure vahe'mofo Mofavremo'a, fanane
hu'naza vaheku hakeno zamavarenaku e'ne. **11** Ana nanekema
nentahizageno, Jisasi'a mago'ane fronka kea zamasami'ne.
Na'ankure mago'a vahe'mo'za antahi'zana, Anumzamofo kumara
ame huno egahie hu'za nentahizageno, Jisasi'a Jerusalemi
tavaonte mani'neno zamasamino, **12** Mago ne'mo'a mago

kumatega vuno anantega kva umaniteno ete enaku nehuno, **13**
10ni'a kazokzo eri'za vahe'a kehuno, 10ni'a zago nezamino,
anage huno zamasami'ne. Eri'za kante erinenteta mago'a
zagoa retro nehinkena etena henka egahue. **14** Hianagi ana
kumapi nemaniza vahe'mo'za zamasivazinte'za, mago'amokizmi
huzmantage'za vu'za anage hu'naze. Tagra ama ne'mo'ma kvagri
rante'zankura tave'osie hu'naze. **15** Ana kumama omeriteno ete
eno, kazokzo eri'za naga'a koma zami'nea zagoretira, nankna
huza mago'a zagoa retrora hu'naze keno antahino hunaku
zamagi hu'ne. **16** Ese ne'mo'a eno anage hu'ne, Ramoka tare
zotama zago naminantetira, mago'ane ana zagoretira eri'za
eri'na 200 zagoa retro hu'noe, higeno, **17** ana ne'mo'a anage
huno asami'ne, so'e hunka eri'za eri'nane, knare eri'za nemoka,
na'ankure osi'zante knare hunka kegava hu'nanku, menina
10ni'a rankuma kegava hugahane higeno, **18** anante'mo'a
eno anage hu'ne, Ramoka tare zotama zagoma nami'nantetira
eri'za eri'na 100 zagoa retro hu'noe higeno, **19** Ana ra ne'mo'a
anage agri enenkura huno asami'ne, kagranena 5fu'a kuma
kegava hugahane huno asmi'ne. **20** Mago'mo anante eno anage
hu'ne, Ramoka, zagoma nami'nanana hankasipifi ante'novzitena
ante'noankina ama erina oe. **21** Na'ankure kagra hihamu
ne' mani'nenka kema hunka hugahue hanazana nehunka,
kagra rumo'za kri'nazaza enerinka, onkrinananazana negafinka
nehanku kore hu'na fraki'noane. **22** Ana ne'mo'a anage huno
asmi'ne, Kagrama hana kere, kefo kazokzo nemoka kagrira refko
hugahue. Kagra ontahi'nane, Nagra himamu ne' mani'nena,
nagrama onte'noazana eneri'na, okri'noazana nevasaguana
kagra ontahinano? **23** Na'a higenka zagoni'a zagoma nentaza
nompi antenankeno, ruguheno mago'a erifore nehigena ehanatina

e'orue? 24 Anage huteno, anante oti'naza vaheku anage huno zamasami'ne, tare zota'a zago eritma 200 zagoma erifore hu'nea nemofo amiho. 25 Ana vahe'mo'za anage hu'za ana nekura hu'naze. Ramoka, agra 10ni'a zagoa ko eri'ne hu'za hu'naze. 26 Hanki amanage hu'na neramasamue, maka vahe'mo'zama rama'a erinesamokizmia, mago'ane anteaguheno zamigahie. Hianagi e'orinesimofompintira, erineniama'a hanaregahue. 27 Hianagi ama ha' vahe'nimo'za, kvama nagra huzmantezankura zamesra hunantaza vahera, zamavareta nagri navure zamaleta rukafritreho huno hu'ne. 28 Jisasi'a anage huno zamasmiteno, ugagota huzmanteno Jerusalemi kumate vu'naku vu'ne. 29 Jisasima Jerusalemi vunaku Betfagene Betani kumatema nevuno, Olive nehaze agonare erava'o nehuno, amagema nenta'a disai pol ne'trena huznanteno, 30 anage huno zanasami'ne, Ugota huta antu kumapi ufreta ome kesa'ana, vahe'mo'za agofetura mani'za ovu'nesaza donki afu kinare mani'nesigeta kegaha'anki, kazufeta avazu huta amare e'o. 31 Mago'a vahe'mo'zama tanantahimage'za na'a hunaku katunefa'e? Hanageta anage huta znasamaho, Ramofona eri'za me'negeno hurantegeta'e hi'o. 32 Jisasima anage huno huznantegeke vu'ne ome ka'ana, kema huzanante'neaza hu'negene ome ke fore hu'nae. 33 Nofi'ma ana donki rentenea ome katu nefakeno, ana donki afu'mofo nafa'amo'a znantahigeno, Na'a hunaku donki afura katu nefae? huno znantahigege'ne, 34 Ramofona eri'za me'negeno hurantegeta eme katu nefo'e hu'nae. 35 Ana hutene avare'ne Jisasinte uhanatike, zanagra nakre kuzani ana donkimofo agofetu zafike antekeno Jisasi'a agofetu mani'ne. 36 Jisasi'ma nevige'za vahe'mo'za nakrekuzmi zafiza kampi tafe vasinte'nageno ana agofetu vu'ne. 37 Ana'ma

huno Olive agonare vu kantema uneramigeno hanatigeno,
maka amagema nentaza disaipol naga'mo'za, Anumzamofo
agi erisaga hu'naze. Na'ankure maka kaguvazama hige'za
ke'naza zanku ranke hu'za musenkase nehu'za amrara hu'za,
38 ranke hu'za, Ramofo agifima ne-emofona ra agi amisune.
Monafina rimpa fru menkeno, Anumzamofo hihamu hanavemo'a
marerigateresie. (Sam-Zga 118:26, 148:1) **39** Ana veapinti
mago'a Farisi vahe'mo'za anage huza asmi'naze, Rempi hurami
nemoka, kamagema nentaza disaipol nagaka'a ke zamasuge'za
anage osiho hu'za asami'naze. **40** Hianagi Jisasi'a kenona anage
hu'ne, Zamagrama kema taganenageno'a hankami havemo'za,
Anumzamofo agi'a erisaga hugahaze! **41** Jisasima Jerusalemi
kuma tavaonte vugofa huno, ana ran kuma'ma negeno'a zavi
neteno, **42** anage hu'ne, Ama knare'ma kagrima krimpa fruma
hu'zama fore'ma nehiazana, kagra nonkane! Hianagi kagri
kavurera rimpa fruzamo'a frakino me'negenka nonkane. **43**
Na'ankure mago'a kna ne-eankino, ha' vahe'timimo'za eme
tamavazi kagiza, maka asopa eme regagi ramante'za, **44**
makazantmi eritagna vazi atresigeno, mopafi fragu vaziramino
mena, tamagri'ene mofavretamine haviza nehanageno, zamagra
mago havea atresageno mago havemofo agofetura omnegahie.
Na'ankure kagrima Anumzamo'ma kazama hunaku'ma eazana
kenka antahinka osu'nane. **45** Jisasi'a ra mono nonte vuno,
miza neseza zagore netraza nagamofona, agafa huno zamahe
megi netreno, **46** amanage huno zamasmi'ne, Anage huno
avontafepina krentene, Nagri nomo'a nunamu hu no megahie.
Hianagi kumzafa vahe'mofo nonkna eri nehaze. (Ais 56:7, Jer
7:11) **47** Mago mago knarera Jisasi'a ra mono nompi rempi
huzami'ne. Hianagi pristi vahe'mo'zane, kasegere ugagota

hu'naza vahe'mo'zane, ranra vahe'mo'zanena azeri haviza hanaza kanku hakre'naze. **48** Jisasima azeri haviza hanaza kana ke'za eri forera osu'naze. Na'ankure maka vahe'mo'za Jisasima hu'nea ke antahi'nazageno'e.

20 Hagi mago zupa ra mono nompi mani'neno, Knare Musenkea Jisasi'a veamokizmi rempi hunezmigeno, pristi vahe'mo'zane, kasegere ugota hu'naza vahe'mo'zane, ranra vahe'mo'zanena eme nege'za, **2** anage hu'za Jisasina asami'naze, Nankna himamu eri'enka amazana nehampi tasamio. Hifi i'za ama hihamua kaminegenka nehane? **3** Hazageno Jisasi'a kenona anage hu'ne, Nagranena tamagrira tamagenoka hugahuanki nasamaho. **4** Joni'ma mono ti frezmanterea zana, vahe'mofo eri'zampi, monafinti eri'za eri fore hu'neo? **5** Huno zamantahigege'za, zamagra zamagra hugantu hugama hu'za, Monareti eri'za erifore hu'ne huta hanunkeno'a, nahigeta Jonima hu'nea zankura tamentinti osu'naze? Huno hugahie. **6** Hianagi tagrama huta mopafi vahe'mofo eri'zanema hanunkeno'a, maka vahe'mo'za have knonu tahefrigahaze. Na'ankure zamagra ko keza antahiza Joni'a kasnampa ne' mani'ne hu'naze. **7** Anage hu'za nehu'za, Jisasina kenona hunte'za, Mono tima frentezana igati e'neo tagra ontahi'none hazageno, **8** anage huno Jisasi'a zamagrira zamasami'ne, Nagranena i'za hihamu namigena e'nerufi ontamasmigahue huno hu'ne. **9** Hagi Jisasi'a veamokizmia amanahu fronka kea agafa huno zamasmine. Mago ne'mo'a waini hoza anteteno, kna'are kna'are mizaseterehu (rent) vahete waini hoza'a netreno, afete zazakna umaninaku vu'ne. **10** Waini ragama tagi knarera kazokzo eri'za ne'a, waini hozama kegava hu'ne'za mizasetere hugahune hu'naza vahete huntegeno vu'ne. Hianagi ana waini

hoza kegava hu'naza vahe'mo'za kanonkeve nemiza, huntageno
aza avapa vu'ne. **11** Ete mago'ane, mago kazokzo eri'za ne'a
huntegeno vige'za, zamagra kanonkeve nemiza azeri agaze
nehuza huntageno, aza avapa vu'ne. **12** Anante ana hozamofo
nefa'a, ete mago'ane rumofo huntegeno vige'za, anazanke
hu'za ahe kuzafa nente'za, ana hozafintira fegi'a asagafe
atre'naze. **13** Na'a nagra hugahue? huno ana hozamofo nef'a
nehuno, nagrama navesi navesima hunentoa ne' mofavreni'a
huntenugen vanige'za, zamagra antahimigahazafi huno hu'ne.
14 Hianagi waini hozama kegava hu'naza vahe'mo'za nege'za,
zamagra zamagra hu'za, amana mofavre'mo nefazana erisanti
haregahianki, enketa aheta erisantima haresiazama'a erisune
hu'naze. **15** Anage nehu'za azeri'za ana hozafinti fegi'a mate
nevu'za ahageno fri'ne. Hanki e'i anama hu'naza zantera hoza
nafa'amo'a, na'a zamagrira huzmantegahie? **16** Hoza nef'a
Agra eno ana vahera eme zamahe nefrino, ana waini hoza
rumokizmi hanare zamigahie. Jisasima ana kema hige'za
nentahiza, anahura osugahie hu'za zamagra hu'naze! **17**
Hianagi Jisasi'a nezmageno anage hu'ne, Na'ante amanage
huno avontafepina krentene. Nogi vahe'mo'za zamesra huntaza
havemo'a, no renegentete ugagota huno azeri hanaveti have
fore hu'ne? (Sam-Zga 118:22) **18** Maka vahe'ma ana have
agofetuma takauresamo'za, kori kofagofa hugahaze. Hianagi ana
havemo'ma iza agofetu takauresuno'a, rehapatisigeno kugusopa
fore hugahaze. **19** Kasegere ugota hu'naza vahe'mo'zane, pristi
vahe'mo'za Jisasina anante azerinaku hunazanagi, vaheku kore
hu'naze. Na'ankure Agrama fronka kema hu'neana zamagrama
nehaza zamuzmaku hu'negeze. **20** Ana nehu'za zmauvu anteza
keteza manine'za, afure vahe huzmantage'za, fatgo vahekna

huza umanine'za kema hania kere azeriza ugagota vahete
(gavana) vanage'za, kva vahete avrenente'za kegaga huntehogu
vu'naze. **21** Zamagra anage hu'za Jisasina agenoka hu'za,
tagra antahinone, Rempi hurami nemoka, kema nehunka rempi
huzaminana fatgo hunka nehunka, mago vahe aza huzankuke
nosunka, rempima huzaminana fatgo hunka Anumzamofo
avu'avazankuke nehane. **22** Hanki Romu kva ne' Sisama
takisi zago nemunazamo'a knare hunefi, haviza hu'ne? **23**
Hianagi Jisasi'a revatga hunaku'ma hazana ko negeno, amanage
huno zamasmi'ne, **24** Naveri hinkena mago zagoa kaneno,
iza amema'a megeno, na'ane hu'za ananteria krente'naze?
Higeno, zamagra Sisa amema'e hu'za hu'naze. **25** Jisasi'a anage
huno zmasamine, Sisa zama me'enianiana Sisa amiho. Hagi
Anumzamofo zama me'enianiana Anumzamofo amiho. **26** Hige'za
rama'a vahe zamavufi manineno kea nehige'za, zamagra revatga
hu'za ke'afintira magore hu'za azerigara nosu'za, kenona zmima
hiankegura antri hu'za kea osu'naze. **27** Anante mago'a Sadusi
vahe'mo'za, friprintira o'otigahaze nehaza vahe'mo'za, Jisasinte
e'za, **28** anage hu'za antahige'naze. Rempi hurami ne'moka,
Mose'a anage huno avontafema kreraminefina hu'ne, Nempuamo
a' erino manineno, mofavre kaseonteno frinigeno'a, negna ana
ara erino, nefu mofavre erifore hino huno hu'ne. (Diu-Kas 25:5-
6) **29** Hanki 7ni'a kogna mani'nazankino nempuzmimo ara erino
mofavre onte manineno frigeno, **30** negna ana ara eri'ne. Eriteno
mofavre onte manineno fri'ne. **31** Anantemo'a anazanke huno
ana ara erinteno, mofavre onteno frine. Anahukna hu'za ana
maka'mo'za ana ara eri'za mofavre kaseonte manine'za fri'naze.
32 Fri vagaretazageno henkarfana ana ara fri'ne. **33** Hanki
fri'nafinti oti snaza knazupa, inamofo a' manigahie? Na'ankure

ana maka 7ni'amo'za ana ara erinte'naze, hu'za hazageno,
34 Jisasi'a amanage huno zamasmi'nne, Ama knafi mani'naza
vahe'mo'za ara e'neriza, ara masi ome ami nehaze. (aiōn
g165) 35 Hianagi Anumzamo'a huno, veamo'za fri'nena finti'ma
oti'za henka manigahaze hu'nea veamo'za, arave osu'za ara
masi omi ami osugahaze. (aiōn g165) 36 Na'ankure zamagra
mago'anе ofrigahaze. Na'ankure zamagra ankero vahekna hu'za,
Anumzamofo Mofavre nemaniza, kerifinti oti'nea mofavregna
hu'za manigahaze. 37 Hianagi frite'za oti'naza zankura,
Mosese'enena osi zafafinti teve anefa nehigeno ke'neazamofo
naneke krenefina eriama huno, Abrahamuma, Jekopuma, Aisaki
Ra Anumza mani'noe huno hu'ne. (Eks-Ati 3:6) 38 Hagi Agra
fri vahe'mofo Anumzana omanine. Hianagi zamasimu eri'za
nemaniza vahe'mofo Anumza mani'ne. Na'ankure mikamo'za
agriteti zamasimura eri'za mani'naze. 39 Mago'a kasegere ugota
hu'naza vahe'mo'za kenona'a hu'za, Rempи Hurami Ne'moka
knare ke hane hu'za hu'naze. 40 Na'ankure mago'ene Jisasi'ma
mago'azankuma agenoka hugara osu'za, antahionke'naze.
41 Anante Jisasi'a amanage huno zamantahige'ne, Inankna
hu'negu zamagra Kraisinkura Deviti nemofo'e hu'naze? 42
Na'ankure Deviti'a zagame avontafepina huno, Ramo'a nagri
Ramofonku huno, nazantmaga kaziga mani'negena, 43 ha'
vaheka'a kagiafi zamare antanena zamagofetu kagia antenka
manio hu'ne. (Sam-Zga 110:1) 44 E'ina hu'negu Deviti'ma
Ranimо'e hu'neana, inankna huno Deviti mofavrea Ramo'a
manigahie? 45 Hakare veamo'za ana naneke nentahizageno,
Jisasi'a amage'ma nentaza disaipol nagakura anage huno
zamasami'nne, 46 Kasegere ugota hu'naza vahekura kva hihio.
Zaza kukena hu'za vahe zmavuga vu'zankuke nehu'za, maketi

kumapi vahe'mo'za antahinezmiza hu frufra huzmantesaza
zanku nehu'za, osi mono nompina ugota trate manisaza zanku
nehu'za, ra nezama nezupa, knare trate mani'zankuke nentahize.

47 Kento a'nemokizmi fenozantami havige hu'za eneriza, anaza
nosaza vahekna hu'za, vahe'mo'za antahiramisazegu zaza
nunamu nehaze. E'inahukna zmavuzmava nehaza vhahera,
refkoma hania zupa tusi'a knaza zamigahie.

21 Hagi Jisasi'a ra mono nompi mani'neno kesga huno
nezmagege'za, feno vahe'mo'za zagoma ante taferopi ofa
zagoa ante'naze. 2 Hagi amunte omne kento a'mo'a tare osi
zago ana taferopi netregeno negeno, 3 Jisasi'a anage huno
hu'ne, Tamage hu'na neramasamue, ama amunte omne kento
a'mo'a makamokizmia zamagatereno ante'ne. 4 Na'ankure
zamagra rama'a antenafinti, taferopina mago'a eme ante'naze.
Hianagi ama a'mo'a omnetfa hunefinti, agri'ma aza hanigeno
manisia'ma miko ante vagarene. 5 Mago'a amagema nentaza
disaipol naga'mo'za ra mono noma knare have eri'za noma
negiza, vahe'mo'za museza eri'za ementazaza, eriza avasese
hunte'naza zantaminku naneke nehzageno, Jisasi'a amanage
hu'ne, 6 Amazama me'negeta negazazana, magokna esigeno'a
mago havemo'e huno, mago havemofo agofetura atresageno
omanegosianki, ana maka tagna vazitregahaze. 7 Hige'za,
ana kegu anage hu'za antahige'za, rempi hurami ne'moka,
nanknafi anazana fore hugahie? Ana knama atupama hinkeno'a
nankna avame'za fore hinketa ketesunkeno anazana fore
hugahie? 8 Jisasi'a anage hu'ne, Tamagra kva huneta atrenkeno
mago'a vahe'mo'za havi kantera tamavreza oviho. Na'ankure
rama'a vahe'mo'za Nagri nagifina eza anage hugahaze, nagra
ana neki, hago knamo'a koftahie hanigeta, tamagra zamage

anteta ovutfa hiho. **9** Tamagra ha'ma hanaza agenkene, hazenkeza fore'ma haniazamofo agenkema antahisuta korera osiho, na'ankure ese'zana ana zantamina fore hugahianagi, ame huno vagarekna omegahie. **10** Jisasi mago'ane huno, Mago rankumate vahe'mo'za, mago rankumate vahera hara huntesigeno, mago kinimofo naga'mo, mago kinimofo naga hara hunentesigeno, **11** tusi'a imi enerisigeno, mago'a kaziga tusi'a kri fore nehinkeno, mago'a kaziga tusi'a zamaga netenkeno, monarera ruzahu ruzahu avameza fore huno vahera zamazeri zamagogofegahie. **12** Hu'neanagi anazana fore osu'nena, esera tamagrira tamazeri'za kanonkeve neramami'za, tamavre'za osi mono nompine, kina nompi ome neramante'za, kini vahete'ene kamani vahetera, Nagri nagireku hu'za tamavre'za vugahaze. **13** Zamagrama e'inama hanaza zamo'a, mago kankamu tamamisigeta, Nagri nagi nagenkea huama zamagritera hugahaze. **14** Ana hu'negu antahiantahi hakare hutma, inankna hu kehuta tagra'a taguvazigahune hutma osiho. **15** Na'ankure Nagra nanekema hanaza kene antahintahine tamisugeta, kea hanageno, kema huramantesaza vahe'mo'za, ana kema hanazana eri otregahaze. **16** Hianagi tamagritami tamarera tamafazane, tamafuhezane, tamagr'i'a naga'mo'zane, ronetamimozane, komoru hu'za mago'amota tamahe frigahaze. **17** Hagi maka'mo'za, tamagrira antahi haviza huramantegahaze. Na'ankure Nagri nagima tamagripi me'neazanteku anara hugahazanagi, **18** magore huno tamasenifi tamazokamo'a fanane osugahie. **19** Tamagrama ana knazampima oti hanavetita vanutma tamasimura erigahaze. **20** Hianagi tamagrama negesageno sondia vahe'mo'za Jerusalemi kumama eme regagisagetma, Jerusalemi kuma azeri haviza hu'zamo'a egofta

hie hutma antahihō. **21** Anama hanigeno'a Judiama mani'naza
vahe'mo'za freza agonarega vnageno, rankumamofo amunompi
mani'nesamo'za atre'za vinkeno, megiamā mani'nesamo'za
rankumapina uofreho. **22** Na'ankure ama'i ana kna, Anumzamo
kefozazmire nona'a huzmante knagino, maka avontafepi
krente'nea kea eama hugahie. **23** Zamu'enema hu'nesaza
ananene, ana knafi mofavrema ami nemisaza nagamofonkura
nasunku huzmantoe. Na'ankure Anumzamofo tusi'a rimpahē
knazamo, ama mopafine vahete'enena egahie. **24** Hagi bainati
kazinu eme zamahe nefri'za, zamavre'za maka kokantega
kina ome hunezmantesageno, Jerusalemi kumara megi'a
vahe'mo'za zamagiareti regugupa negrisageno, megi'a vahe'mofo
knamo'a vagaregahie. **25** Jisasi'a anage hu'ne, Avame'zana
zagerema ikante'ma ofunte fore nehina, mopafina vahe'mokizmia
antahintahizmimo'a savri nehina, hanavezmi nomnenkeno,
hagerimo kranto kranto huno tusi'a agasasa nerina nentahiza
tusi'a kore hugahaze. (Joel 2:31) **26** Mopafima fore'ma
hanizamofo nege'za vahe'mo'za zamu evuevu hanige'za traka
hu'za masegahaze. Na'ankure monafima me'nea hanave
zantamimo'a toretore hinke'za anara hugahaze. **27** Ana nehina
Vahe'mofo Mofavremo'a hampompi himamu'ane, tusi'a masa'afi
ne-ena kegahaze. (Dan 7:13) **28** Hianagi ana maka'za erigafa
huno fore nehinketa, oti hanavetita tamasenia antesga hutma
keho. Na'ankure tamagri'ma tamavresia knamo'a egofta nehie.
29 Anante Jisasi'a anage huno mago fronka kea zamasmi'ne,
Fiki zafare'ene maka ruga'a zafataraminte keta antahita hiho.
30 Zafamo'ma kasefa asinama regeta, zagegna fore hunaku
higeno'e hutma nehaze. **31** E'inahu avame'zama negesutma,
Anumzamofo kumara kofta hie hutma tamagesa antahihō.

32 Nagra tamage hu'na neramasmue, ama knafi mani'naza
veamo'za ofri mani'nesnageno, ana maka'zana fore hugahie. 33
Monane mopane fanane hugahianagi, Nagri kemo'a fanane osu
mevava hugahie. 34 Jisasi'a mago'ane anage hu'ne, Tamagra kva
hiho. Ru negi ti neta negineneta, makazana kva huso'e nosuta,
tmavufamofo zanku antahintahi hakare hanagi, e'inahuma
hanageno'a krifumo zagagafa azeriakna hu'enigeno, ana
knamo'a ame huno onkesageno tamagratera efore hugahie. 35
Na'ankure maka ama mopafi mani'naza vahete ana knamo'a
efore hugahie. 36 Hanki tamagra maka knafina kva hutma
maninetma, nunamuna huvava nehutma, hankavetita mani'neta
ana maka knazama efore'ma haniana agateneretma, Vahe'mofo
Mofavrema esigura avega anteho. 37 Maka mago mago
knafina ra mono nompi veara rempi hunezmino, kinagasegeno'a
Olivie huza nehaza agonare marerino umanine. 38 Hagi maka
vahe'mo'za nanterampi otiza rempima huzamisige'za antahisagu
ra mono nompi vutere hu'naze.

22 Hagi Anumzamo'a Israeli vahe ozamahe zamagaterenege'za
ana knagu antahimiza, (Pasova) zo'ore bretima kreza nenaza
kna fore hu'za nehige'za, 2 ugagota pristi vahe'mo'zane kasegere
ugota hu'naza vahe'mo'za Jisasima ahefrisaza kanku hake'naze.
Na'ankure vahetaminku kore hu'naze. 3 Ana nehazageno,
Jisasima amage'manentaza 12fu'a disaipol nagapinti, mago
zmimofo Judasinku, Iskarioti'e nehaza ne' agu'afi Sata'a ufre'ne.
4 Hagi ana ne'mo'a pristi vahe'ene, ra mono nonte kegava
nehaza vahe'mokizmi kva vahetaminte vuno, Jisasima komoru
huno avare zamisige'za ahesaza kea ome retro hu'naze. 5
Zamagra muse nehu'za, mago zamarimpa hu'za zago amisaza
nanke hu'naze. 6 Judasi'a mago rimpa ana kerera huteno,

Jisasi'ma Agraku mani'nениго, komoru huno avrezamisia kankamunku hakre'ne. 7 Anantero zo'ore bretima nenaza kna ege'za, ese knazupa sipisipi anenta ahe'za Kresramana (Pasova) nevaza kna fore hu'ne. 8 Anante Jisasi'a Pitane Jonigizni amanage huno huzanante'ne, Israeli vahe'ma Anumzamo'ma ozmahe zamagatere'nea zanku antahimiza nenaza ne'za retro hinketa ome namneno. 9 Zanagra anage hu'na'e, inante ome retro hanu'egu nehane? huke hakeno, 10 Jisasi'a anage huno zanasami'ne, Tanagra rankumapi ufrsakeno'a, mago ne'mo kavofi tina afino afunte nevanigetna ome kesanutna'a, avaririta umarerisia nompi ufre'o. 11 Ana nomofo nefana anage huta asami'o, Rempi hurami ne'mo'a anage kagrikura hu'ne. Anumzamo'ma Israeli vahe ozmahe zamagatere'negu zamagesa antahimiza nenaza ne'zana, inantega namage nentaza disaipol nagani'anena negahune? hune huta ome asami'o. 12 Anagema hanakeno'a, agofetu nomofona, ra kankamu hunaragintenefinka ko retro hunteneankino, tanaveri hanigeta, anante ne'zana retro hugaha'e. 13 Higene zanagra vune ome ka'ana, kehiazza huno makazana fore higene, ana ne'zana ome retro hu'na'e. 14 Ana ne'za nesnaza kna egeno, Jisasi'ene aposol naga'mo'za, ne'za nenaku trate zamaza tununte magopi mani'naze. 15 Anante anage huno zamasami'ne, Nagra knazampina uofrenena, Anumzamo ozmaheno zmagaterenea zanku antahimiza nenaza ne'za tamagrane nesuazankura tusiza huno navesie. 16 Na'ankure Nagra anage hu'na neramasamue, Nagra mago'ene amanahu ne'za onenesugeno, henka Anumzamofo Kumapi avufa'a fore hugahie. 17 Anagema huteno, Jisasi'a waini ti me'nea kapu erino Anumzamofo susu hunteteno, anage huno hu'ne, Ama'i waini tina eriomu ami hutma magopinti neho. 18 Na'ankure Nagra anage

huna neramasamue, Nagra magore hu'na waini tina onena maninenugen, Anumzamofo Kumara egahie. **19** Hagi Jisasi'a bretima erino Anumzamofo susu hunteteno korino nezamino anage hu'ne, Ama'i Nagri navufa tamagrikure huno tami'neanki, nenesutma tamagesa antahinamiho. **20** Ne'zama netageno'a, anahukna huno kapu erino anage huno zamasmi'ne, Ama'i korani'afi kasefa huvempage hagerafita maninunku tamagratera tagitroe. **21** Hu'neanagi keho, komoru huno ha' vahe zamazampi navrentesnia ne'mo, Nagrane magote mani'neno neza nene.

22 Tamage hu'na neramasamue, Anumzamo hu'nea kante anteno, Vahe'mofo Mofavre'mofontera fore hugahianagi, ha' vahe'mofo zamazampima avrentesimofona, nasunku huntoe! **23** Anage hige'za zamagra zamagra ontahige antahige hu'za, iza e'inahu'zana hu'naku higeno nehie? hu'za hu'naze. **24** Jisasima amage'ma nentaza disaipol naga'mo'za, zamagra zamagra kehakare hu'za, i'za amu'nontifina ra vahera manigahie hu'za nehazageno, **25** Jisasi'a anage huno zamasami'ne, Megi'a vahe'mokizmi kinimo'za zamagra'a vahera kegava krineza huzmantaza kea amage'nentaze. Hankave kva mani'noe haza vahe'mo'za, maka vahe'mokizmi rone mani'none hu'za nehaze.

26 Hianagi tamagra anara osugahaze. Hanki mago'mo'ma ra vahema amu'nontamifima mani'naku hanimo'a, osi'tfa manino. Kva vahe maniku amu'nontamifi hanimo'a, eri'za vahetami manigahie. **27** Hanki i'za rankvama manigahie. Nezane trate aza tununte maninemopi? Nezama retroma nehimo'e. Hianagi tamagri amu'nompina, Nagra ne'zama refkoma nehia vahekna hu'na mani'noe. **28** Miko knazama e'nerugeta, tamagra nonatraz. **29** Nenfama kuma'ama nami'neaza hu'na, Anumzamofo kumara neramuankita, **30** anahukna hutma tamagra Nagri kumapina,

Nagrane kini trate maninetma, tine nezane nenetma, Israeli
vahe'mokizmi 12fu'a naga nofimofona kini trate maninetma refko
huzmantegahaze. **31** Saimoniwoe Saimoniwoe, kagra antahio,
witi rgamofo anom'a hareankna huno Sata'a regaheno kenaku
nehie. **32** Hianagi Saimoniga kagrikura nunamu hugantenoankino,
kamentintimo'a evu oramigahie. Hanki henkama rukrahe'ma
hanunka, kagra kafuhe'ina zamazeri hanavetio. **33** Hianagi
Pita'a anage hu'ne, Ramoka, nagra tro hunoankina, Kagra kina
nompi vnanana, nagrane vugahu'e. Frisanana nagrane frigahu'e.
34 Higeno anage Agra hu'ne, Pitaga Nagra negasamue, meni
kenage kokorege osu'nennenkenka, Jisasina onke'noe, hunka tagufa
zupa vahane hugahane. **35** Nehuno anage huno zamasami'ne,
Nagrama erizania omerisazeguma hunermantena, zago eriri
ku'ene, agia nona erineta ovihoma hugeta vazana, tamagra
magozankura atupara hu'nazafi? Hige'za zamagra hu'za, i'o
atupara osu'none hu'naze. **36** Jisasi'a anage huno zamasami'ne,
Hianagi menina, zagoma eriri kura enerita, anahukna hutma kura
eneritma, bainati kaziknoma e'orinenamotma nakre (saket) kutmia
zagore atretma zago eritma bainati kazinknona magora mizaseho.
37 Na'ankure Nagra anage hu'na neramasamue, avontafipima
krente'nea kemo'a, kumi vahe'ene Agrira hampri'naze hu'neana,
Nagriku huno krentenea kemo'a nagrite eama hugahie. (Ais
53:12) **38** Hige'za amage'ma nentaza disaipol naga'mo'za
amanage hu'za hu'naze, Ramoka ko, tare kazi eri'none hu'za
hazageno, Sa eri'naze, huno zamasmi'ne. **39** Jisasi'a anage
huteno, nompinti atiramino koma nehiaza huno Olivi agonare
nevige'za, amagema nentaza disaipol naga'mo'za avariri'za
vu'naze. **40** Jisasi'a ana agonare uhanatiteno, amanage huno
zamasami'ne, Nunamu nehutma reramehe'zama esigetma

evuoramiho. 41 Anage huteno, have matevazageno uneramia
avamente zamatreno vuno, ome renarenamagino agafa huno
nunamu huno, 42 anage hu'ne, Nenfaga Kagri kavesima
me'nenigenka ama knazana eri atrenanto. Hianagi nagri
navesira ovaririnka, Kagra kavesi avaririo, huno nehigeno,
43 anante monafinti mago ankeromo Agrite efore huno azeri
hankavetine. 44 Jisasina tusiza huno knavenesigeno, mago'ane
hanavetino nunamu nehigeno, kora amunasisi huno mopafi
tagiramine. 45 Nunamuma huteno otino vuno ome zmageana,
amagema nentaza disaipol nagara zamasunkuma hazazamo
kna zamesino, zamazeri zamavutoko hige'za mase'nazageno,
46 anage huno zamasami'ne, Nahigeta tamavura mase'naze?
Reramahe'za esigetma traka hu'zanku, otitma nunamu hiho. 47
Jisasi'a anage huno nezmasamigeno, hakare vahekrefamoza
eri hantage'za neazageno, ananpina 12fu'a amagema nentaza
disaipol nagapintira magozamimo, Judasi'ema nehaza ne'mo
zamavreno ne-eno, eama huno Jisasina agi'antako hunaku e'ne.
48 Hianagi Jisasi'a amanage huno Judasina asami'ne, Judasiga
nagi antako nehunka, komoru hunka ha' vahe zamazampi,
Vahe'mofo Mofavre avrente'za nehampi? 49 Anama hige'za,
Jisasi'enema mani'namo'za fore'ma hunaku'ma hiazana nege'za,
Ramoka, bainati kazinkanonu zamantagi sanumpi? nehazageno,
50 magozmimo bainati kazinkno erino ugagota pristi nemofo
kazokzo eri'za nera tamaga kaziga agesa antagi akre'ne. 51
Hianagi Jisasi'a anage hu'ne, Atro, amanahuzana mago'ane
osuo nehuno, agesare avako higeno so'e hu'ne. 52 Anante
Jisasi'a ugota pristi vaheku'ene, mono nompi kegava nehaza
vaheku'ene, mono kva vahe'mo'za azerinakuma aza vahekura
anage huno zamasami'ne, Tamagra bainati kazinknonu'ene

kumpa kanonu kumzafa vahe'ma azerinakuma hiaza hutma hara
renantenaku neazo? **53** Hakare zupa kna'ane kna'ane ra mono
nompi tamagrane magopi mani'noana nazeori'haze. Hanki ama
kna tamagrizane. Hanizamofo hanavemo'a agatere. **54** Jisasina
azerite'za avre'za ugota pristi ne'mofo nonte nevazageno,
Pita'a zmavaririno ogamu'a e'ne. **55** Ugota pristi nemofo
kuma amunompi teve hugrete'za, mani'nageno, anampi Pita'a
zamagrane umani'ne. **56** Mago eri'za mofamo'a Pita'ma teve
anefate mani'negeno ke'nene huno negeno, ama nera Jisasi'ene
nemania nere. **57** Hianagi Pita'a anage hu'ne, ama a'moka nagra
antahina kena osu'noa neku nehane huno vahane hu'ne. **58**
Anante osi'agna evigeno, mago nemo negeno Pitanku huno,
kagranena mago zmimoke! Hianagi Pita'a huno, ama ne'moka
nagra ana nera omani'noe! **59** Mago'a osi'a (aua) knama evigeno,
mago ne'mo eno mago'ane hankavetino, ama nera agrane vano
nehigena kenoa nere. Na'ankure agranena Galili ne' mani'ne. **60**
Hianagi Pita'a anage hu'ne, ama ne'moka, nagra kena antahina
osu'noa neku nehane nehigeno, kokorege hu'ne. **61** Ramo'a
rukrahe huno Pita negegeno, Kokoremo ageru orunenigenka,
3'a zupa Nagrikura onkenoa nere hunka vahane hugahane
huno, Ramo'ma asami'nea kegu Pita'a agesa antahi'ne. **62** Pita'a
megi'a vuno tusiza huno zavi ome ate'ne. **63** Hagi Jisasima
azeri'namo'za azanava ke hunente'za kano nemiza, **64** avua kisu
hunente'za, iza negehefi kasnampa ke hunka huama huo hu'za
antahige'naze. **65** Mago'ane hakare azanava ke hunente'za,
huhaviza hunte'naze. **66** Nanterama segeno'a, kva vahezagane,
ugota pristi vahe'ene, kasegere ugota hu'naza vahe'mo'za,
Jisasina avare'za mono kanisolo vahete vu'za anage hu'naze, **67**
Kagra Kraisiga maninenunka tasamio hazanagi, Jisasi'a anage

huno zamasami'ne, Nagrama tamasamisugetma, tamentintia osugahaze. **68** Hanki Nagrama tamantahiganena, tamagra kenonani'a osugahaze. hu'ne. **69** Hianagi amaretima vaniana, Vahe'mofo Mofavremo'a, Anumzamofo hanavefi azantmaga'a kaziga manigahie. (Sam-Zga 110:1) **70** Hige'za zamagra makamo'za hu'za, e'ina hu'negu kagra Anumzamofo mofavre mani'nampi? Hu'za hazageno, Tamagrama nehzana, izo Nagra anane, hige'za **71** anante zamagra hu'za, mago'enena na'ane hanigeta antahisunku antahigegahune. Na'ankure tagra nentahunkeno Agra'a agipinti Anumzamofo mofavre mani'noe hu'ne.

23 Ana maka vahe'mo'za erihantage'za Paerotinte, Jisasina avre'za vu'za, **2** amanage hu'za erigafa hu'za naneke hunte'za, tagra konkeno ama ne'mo'a havi kante Jiu vahetia zmarenova, Sisana takesi zagoa omiho nehuno, Agra'agura huno Nagra Kraisina kini mani'noe hu'ne. **3** Ana hazageno, Paeroti'a Jisasina anage huno antahigene, Kagra Jiu vahe'mofo kinio? Jisasi'a ana kenona'a anage huno hu'ne, Ha e'i kagraka'a nehan. **4** Anante Paeroti'a ugagota pristi vahe'ene, ana vahe kevugura anage huno zmasamine, nagra ama ne'mofompina mago hazenke zama'a kena eri fore osue. **5** Hianagi zamagra hu hankveti'za, agra rama'a vahe'mokizmi zamarimpa zamazeri otino, maka Judia kaziga rempi huzami'ne. Anazamo'a Galiliti agafa huno amarera ehanati'ne. **6** Paeroti'a ana naneke nentahino, Jisasi'a Galili ne' mani'neo huno hu'ne. **7** Hagi Paerotima antahiamma, Jisasi'a Heroti kvagri'nea mopafinti e'ne nehuno'a, Herotinte hunte'ne. Heroti'a ana knafina Jerusalemi emaninegeno huntege'za avare'za vu'naze. **8** Herotinte avare'za vazageno, Heroti'a Jisasima negeno'a tusi muse hu'ne. Na'ankure

Jisasina agenke'a hakare zupa antahitere nehuno, magokna
Agra kaguvaza eri fore hanigena kesue huno antahinegu hu'ne.
9 Heroti'a rama'a antahige naneke hianagi, Jisasi'a kenona'a osu
mani'ne. 10 Hagi ugagota pristi vahe'mo'zane, kasegere ugota
hu'naza vahe'mo'za, anante oti'za mani'ne'za, hu hankveti'za
Jisasina kegaga hunte'naze. 11 Hanki Heroti'ene sondia
vahe'ane, Jisasina revatga vatago nehu'za, azanava anteza
azeri haviza hute'za, knare avonke kukena eri antaninente'za,
huzmanteg'e'za Paerotinte ete avre'za vu'naze. 12 Na'ankure
zanagra kora ha' vahe tro hune manina'ankino, ana knazupage,
Paeroti'ene Herotikea erimago zanarimpa hu'na'e. 13 Hagi
Paeroti'a ugota pristi vahezagane, kva vahezagane, vahetamine
kehutru huno, 14 anage huno zamasami'ne, Ama ne'ma avretma
nagritema aza nekura hutma, vahetamina avreno havi kante
nevie hutma hazanagi keho, nagrama tamagri tamavuga Agri'ma
rezaganena koana, tamagrama hunentaza kemofona agafa'a
kena erifore osue. 15 Heroti'enena magozahu antahintahi
hu'negu, ama nera huntogeno tagritega e'ne. Antahiho, ama
nera magore huno ahefriga hazenke osu'ne. 16 E'ina hu'negu,
kanonkeve amitena atresugeno vugahie huno Paeroti'a hu'ne. 17
[Amanahukna nehzane, kafune kafunena Anumzamo'ma Israeli
vahema ozamahe zamagtere'negu antahimi ne'za neknarera,
Paeroti'a kina nompinti mago vahe kazufe zamitere nehiane.] 18
Hianagi maka vahe'mo'za ranke hu'za kezati'za, Jisasina avreta
ome ahenefrita, Barabasi katufe tamio! hu'naze. 19 [Barabasi'a,
Jerusalemi rankumate kamani vahe ha' renezmanteno, mago
vahe ahefrigeza kina huntogeno mani'nea nere.] 20 Paeroti
Jisasima atresigeno vanigu, mago'ene veara zamantahigene.
21 Hianagi zamagra mago'anekatziza, Rugeka zafare aheta

hantiho! Rugeka zafare aheta hantiho! Huza nehazageno,
22 Paeroti'a mago'ene 3'a zupa zamantahigeno, Nagafarere?
Nankna hazenke ama ne'mo'a hu'negeta nehaze? Nagrama
kena eri fore'ma huana, friga hazenke'a osu'ne. E'ina hu'negu
nagra kanonkeve amitenam atresugeno vugahie. **23** Hianagi
zamagra kazigazi hu'za, rankefinti antahige'za, Rugeka zafare
ahefrio hu'zama hazankemo, Paerotina agu'a azeri rukrehe
hu'ne. **24** Hagi kema hazare, Paeroti'a antahintahi'a retrohuno
Jisasinkura ahefriho hu'ne. **25** Hagi zamagrama kamani vahe ha'
renezmaneno vahe zamahe fri'nege'za kina hunte'naza neku'ma
antahigaza ne' katufe nezamino, hanki Jisasina ahefrisunema
hazagu avarezami'ne. **26** Jisasima avare'za nevazageno
mago Sailiniti (Afrika) nera agi'a Salmonikino, Jerusalemi ne-
ege'za kantega ome nege'za, Jisasi rugeka zafa erio hu'za
eri kofintageno erino Jisasina avaririno vu'ne. **27** Jisasina
tusi'a vea kevumo'za avaririza nevazageno, ananpina mago'a
a'nenagamo'za zamasunku hunente'za, zavite'za vu'naze. **28**
Hianagi Jisasi'a rukrahe huno nezmageno amanage huno
zamasmi'ne, Jerusalemi kumate a'nemota nagrikura zavira
oteta, tamagragu'ene mofavretamigu'enenku zavira ateho. **29**
Antahihio, mago kna ne-eankiza vahe'mo'za anage hugahaze,
narvo a'ne mo'zane, mofavre onte'anene, mofavre ami anuntage
nosnamo'za muse hiho hu'za hugahaze. **30** Ana nehu'za
zamagra agafa huza, ra agonamoka ankrisenka refiteranto, hu'za
nehu'za, osi 'agonagura refiteranto hu'za hugahaze. (Hos 10:8)
31 Na'ankure kasefa huno me'nenia zafamofoma e'inahuma
huntesuza, osapa zafamofona inanknaza fore hugahie? **32** Tare
kumzafa netrene, Jisarine magoka zanahe frisazegu zanavre'za
vu'naze. **33** Aseni zaferine (Golkote) nehaza agonarema

zamagra vute'za, Jisasine tare kumzafa netrena keka zafare
zamahe'za hanti'naze. Magomofona Jisasi azantmaga ahe'za
nehantiza, magomofona aza hogo hanti'naze. **34** Hianagi
Jisasi'a anage hu'ne, Nafanimoke, ontahine'za anara nehzanki,
kumizmia atrezmanto. Anage nehige'za sondia vahe'mo'za
zaza kena'a refko huza erinaku taisi zokogo re'naze. (Sam-Zga
22:18) **35** Ana nehzageno, hakare veamo'za anante otine'za
uruha nehzageno, kva vahe'mo'zanena azanvanke hunte'za,
vahe'mokizmia zamza nehia neki, Anumzamo huhamprintenemo
Kraisi'ma mani'nesuno'a atregeno agra'a agu'vazisnigura
kamaneno hu'za nehzageno, **36** sondia vahe'mo'zanena
azanava ke nehu'za, akahe'nea waini tina eme nemiza, **37**
Kagra Jiu vahe'mokizmi kinima mani'nesunka, kagra ka'a
kaguvazio! hu'za hu'naze. **38** Hanki asenirega anage hu'za
avona kreza ome hentenaze, ama'i Jiu vahe'mokizmi kinie. **39**
Mago kumzafa ne'ma aheza hantinaza nemo'enena Jisasina
kesuno, Kagra Kraisia omaninano? Kagraka'a kagu'nevazinka,
tagri'enena taguvazio! **40** Hianagi mago'mo'a azerikorino, kagra
Anumzamofonkura korera nosano? Ana mikomota anahukna
knazampi mani'none. **41** Tagra tamage huta hazenke hu'noa
zamofo nona'a, eriga knaza eneru'e. Hianagi ama ne'mo'a mago
hazenke osu'ne. **42** Anantera anage huno ana ne'mo'a hu'ne,
Jisasiga hihamukafima manisunka kagesa antahinamio. **43**
Higeno Jisasi'a anage huno ana nera asami'ne, Tamage hu'na
negasamue, kagra menina Nagrane mona avasese zama'ane
kumapina Paradaisi umanigahane. **44** Hagi 12 kilokinaza higeno,
maka mopafina hanimo refitegeno, kinaga 3 kilokuma higeno
rumsa hu'ne. **45** Na'ankure zagemo'a ananknafina remsa osu'ne.
Hagi ra mono nompi tafinaza tavravemo'a amu'nompinti ruhakeke

huno fenkamu uramine. **46** Jisasi'a ranke huno, Nafa'nimoka kagri kazampi avamuni'a antoe nehuno vagare asimu atreno frine. (Sam-Zga 31:5) **47** Sondia vahe'mokizmi kva ne'mo'a anazama hiazama negeno'a, agafa huno Anumzamofo agi erisaga nehuno, tamage ama fatgo nekino hazenkea omnene hu'ne. **48** Hanki maka vea kevumo'za anazama fore hu'neaza ome kete'za ne-eza, zamasunku zampi zamarimpare zamaza refiteriri hu'za vu'naze. **49** Hanki maka Jisasi rone'amo'zane, Galili kazigati Agrane e'naza a'nanemo'zane, ogantu umani'ne'za ana zama fore hiazana ke'naze. **50** Mago nera Josefe'e nehaza nekino knare huno fatgo avu'va ene ne', kanisol vahe'pina mani'ne. **51** Kanisol vahe'mo'za Jisasima ahenakuma kema retroma hazankerera agra mago rimpa osu'nea nere. Ana nera Jiu vahe'mofo rankumapinti Aramatia nekino, Anumzamofo kumaku avega ante'ne. **52** Ana ne'mo'a Jisasi avufga erino ome asentenigu, Paeroti ome antahigeteno, **53** vuno rugeka zafareti Jisasi avufga ome eri fenkma atreno, efeke tavravefi anovazino erino have fregeno hanagatinte'nea kampi ome antene. Magore huno ana havegampina kora fri vahera ome ontenevi ome ante'ne. **54** Mani fruhu kna (Sabat) eza hige'za ana knarera retrotra nehaza kna fore hu'ne. **55** Galiliti Jisasi amagema ante'za e'naza a'nemo'za, ana havegampima avufga'ama antazana ke'naze. **56** Anante rukrahe hu'za vu'za mana nentake'zane, masavene retro ome hu'naze. Mani fruhu kna (Sabat) zupa kasegemoma hu'nea kante anteza manigsa hu'naze.

24 Hanki ese knazupa Sonta nanterana rumsa osu'nege'za, mananentake'zama tro hu'hazaza eri'za Jisasi afufga'ama havegampi ome ante'narega vu'naze. **2** Hagi zamagrama vu'za ome kazana, ana havegante'ma runkanire'nea havea rezahe

hutrenage'za ke'naze. **3** Hianagi zamagrama havegampima
ufre'za kazana, Ramofo Jisasi avufga omnenege'za ome ke'naze.
4 Avufa'a nonke'za tusi zamagesa nentahizageno, masanentake
huno efeke kukena hu'na'a netremoke ame hu'ne anante
otinake'za, **5** ana a'nemo'za zamagogogu nehu'za, kepri hu'za
mani'nageno, ana netremoke anage hu'ne zamasami'na'e. Na'a
higeta kasefa huno mani'nea vahekura, fri vahe kumapina
nehakraze? **6** Amafina Agra omanine, frinefintira ko ot'i'ne. Hanki
tamagranema Galili mani'neno tamasami'nea kegu tamagesa
antahiho. **7** Vahe'mofa Mofavrea kumike vahe'mofa zamazampi
avrentena, rugeka zafare ahesnageno friteno, tagufa kna manino
otigahie, huno hu'nea kegu tamagesa antahiho, **8** hu'ne nehake'za
ana a'nemo'za Jisasi'ma hu'nea kegu zamagesa nentahi'za, **9** ana
havegana atre'za rukrehe hu'za vu'za, **11** ni'a amagema nentaza
naga'ane, ruga'amokizminena maka nanekea ome zamasmi
vagare'naze. **10** Hanki ana a'nemokizmi zamagi'a, Makdala
kumateti' a' Mariaki, magora Joanaki, Jemisi nerera agi'a Maria
ene, mago'a a'nemo'zane, ana nanekea aposolo nagara ome
zmasami'naze. **11** Hianagi anankema nentahiza amne kehaze
nehu'za, anankegura zamentinti osu'naze. **12** Hianagi Pita'a
otino agareno vuno havegante ome kepri huno agu'afi keana,
efeke travavema ana kinte'naza travavege me'negeno negeno,
rukrahe huno anazanku tusiza huno agesa antahime vu'ne. **13**
Ana zupage tare amagema nenta'a disaipol netremokea Emeus
nehaza kumate vu'na'e. Ana kumateti Jerusalemi vanazana **11**
kilomitanaza me'ne. **14** Zanagra maka'za fore'ma hu'nea zanku
naneke hume nevakeno, **15** Jisasi'a Agra'a ehanatige'za magoka
ana netrene vu'naze. **16** Hianagi zanavurgamofona rehiza
higene Jisasi'e huke ke anke orena'e. **17** Jisasi'a anage huno

zanasami'ne, Na'anku ama nanekea tanagra hugantugma hutna
nea'e? huno znantahigegene anante zanasunku nehuke uoti'na'e.

18 Hagi magomofo agi'a Kriopasi'e nehaza ne'mo ana kemofo
nona'a huno, kagrake'za Jerusalemi nantu antenka ne-enka
amagnafima fore hu'nea zana ontahi'nano? **19** Jisasi'a anage
huno zanasami'ne, Nanknaza fore hu'negeta neha'e? Higeno
Nazareti Jisasinte'ma fore hu'nea zanku nehu'e. Agra kasnampa
ne'kino, Anumzamofo avure'ene, maka vahe'mofo avurera,
eri'zama'amo'ene keamo'enana hanavenentake hu'nea ne'ma,
20 ugagota pristi vahe'mo'zane, kva vahetimo'zane ahesageno
frisniegu, avarezamizage'za ahe'za keka zafare hantinaza ne'ku
nehu'e. **21** Hianagi tagrama tagesa antahunana, Israeli vahe'mota
knazantifinti tahoke ahelia nere huta nentahune. Tamage, ama
anazama fore'ma hu'neana 3'a zagegna evu'ne. **22** Hianagi
tagripinti ana havegante nanterame ome ke'naza, a'nemo'za
antri hu'na ke eme tasamiza, **23** avufa'a omne'nege'za ome
negazageno, avana kazankna huke, tare ankero netremoke,
kasefa huno Jisasi'a mani'ne huke huna'a naneke eme
tasami'naze. **24** Hagi tagripinti mago'amo'za havegantega anaza
ome kenaku vu'naze. Mika zanku'ma ana anemo'za hu'nazaza
ome kazanagi, Jisasina onke'naze. **25** Jisasi'a amanage huno
zanasami'ne, Kasnampa vahe'mo'za hu'naza maka nanekegura
negi nenetma tamagu'afina tamentintia nosaze! **26** Kraisi'a
ataza eriteno, masa'afi ufresiana, knarera osugahio? I'o. **27**
Huteno anante agafa huno, Mosesinteti vuno maka kasnampa
vahe'mo'zama, Agrikuma hu'za krente'naza kea eriama huno
zanasamime vu'ne. **28** Hagi zanagrama vunaku'ma hu'na'a
kumate unehanatizageno, Jisasi'a ana kumara agatereno vaniaza
hu'ne. **29** Hianagi hanavetike agaterenka ovugahane huke

zanagra nehuke, hani huza nehianki masetenka vanane hu'ne
kazigazi hakeno, ana nompi zanagrane umarer'i'ne. 30 Jisasima
nezama nenaku trate umanineno breti erino, Anumzamofo
susu hunteteno, tamanasino agafa huno neznamigeno, 31
zanavurgamo hari higeke Jisasi'e huke ke ankenerakeno,
Jisasi'a ru fanane hu'ne. 32 Zanagra zanagra anage hu'na'e,
kantegama neokenoma keagama nerasamino, Anumzamofo
avontafepinti kema eriama nehigeno'a, tagu'amo'a otianagi,
keta antahita osu'no'e. 33 Zanagra anage nehuke, ame huke
rukrehe huke Jerusalemi kumate vu'na'e. Jisasima amage'ma
nentaza 11ni'a disaipol naga'mo'zane, mago'a naga'moza'nena
eri atru hu'nage'za ome nezmagake'za, 34 Zamagra anage
hu'naze, tamage Ramo'a otino, Saimoninte ufore hu'ne! Hu'za
nehazageke, 35 ana amagema nenta'a disaipol netremoke
kantega fore hu'neazane, breti erino tamanasino znamigeke,
Jisasina ke ankerena'a agenke huama hu'na'e. 36 Ana zanku'ma
naneke nehazageno'a, Jisasi'a amu'nozimifi efore huno otineno
anage hu'ne, Tamarimpa frune maniho. 37 Hianagi zamagra
havi avamu negone hu'za zamagesa nentahi'za, antri hu'za koro
hu'naze. 38 Ana nehazageno Jisasi'a anage huno zmasamine.
Nahigeta korera nehuta, tare tamagutmagesa nentahize? 39 Ama
Nagrani'a mani'noanki nagane, nazanena navako hutma keho.
Na'ankure Nagrima hu'neaza huno, hankromofona avufgane
zaferinanena omane'ne. 40 Anagema huteno'a, agane, azane
anamokizmi zameri hu'ne. 41 Na'ankure zamagra tusi muse
nehu'za, antri nehu'za zamentinti nosazageno, Jisasi'a anage
hu'ne, Tamagra mago'a ne'zana ante'nazafi? 42 Zamagra kre
hagege hunte'nea nozame eri amizageno, 43 anamokizmi
zamure erino nenege'za ke'naze. 44 Jisasi'a anage huno

zamasmi'ne, Nagra tamagrane mani'nena, anage hu'noe,
maka kema Nagrikuma hu'za Mosese kasegefine, kasnampa
vahe'mo'za krenaza kefine, zagame avontafepima krente'nea
zamo'a nena'a fore hugahie. **45** Anante Jisasi'a zamaza huno
antahintahizmia zamazeri ama hige'za, maka Anumzamofo
avontafepima krente'nea kea antahini hu'naze. **46** Agra anage
huno zamasami'ne, Avontafepina amanage huno krente'ne,
Kraisina ahesageno ata erino friteno, tagufa knare otigahie. **47**
Vahe'mo'za Agri agifi, zamagu'a rukrahe hanageno, Anumzamo'a
kefozazimi eritrezamantesia kea, Jerusalemi kumate erigafa
hute'za, mika kokankoka vahete vugahaze. **48** Tamagra
Nagritema fore higetma ke'naza zana huama hugahaze. **49** Hanki
antahiho, Nafa'nimo huvempa huno tamigahue hu'nemofona,
huntesugenno tamagrite egahie. Hu'neanagi tamagra (Jerusalemi)
rankumapi manineta monafinti hanavea eriteta vuta eta hihio.
50 Jisasi'a anage huteno zamavareno Betani vuno azana
erisaga hunagamuteno, asomu ke huzmant'e. **51** Anama
hunezmantegeno, Anumzamo'a avregeno zmatreno monafi
mareri'ne. **52** Zamagra mono huntete'za, tusi musenkase hume
Jerusalemi kumate ete vu'naze. **53** Ana hute'za ra mono nompi
mareri'za Anumzamofo agi erisaga huvava hu'naze.

Joni

1 Ese agafare Ke me'neane, higeno ana Kemo'a Anumzane
me'ne, ana Kea e'i Anumzane. **2** Ese agafarera Agra Anumzane
tragoteno mani'neane. **3** Maka'zana Agrake'za tro hu'ne, hagi
mago'zana ru kampintira fore osu'ne, makazana Agrake tro hu'ne.
4 Agripi asimura me'ne, hagi ana asimumo'a vahe'mofo Masa'e.
5 Ana masamo'a hanizana remsa hunetreankino hanizamo'a
agateore'ne. **6** Hagi mago nera Anumzamo huntogeno e'ne, Ana
ne'mofo agi'a Joni'e. **7** Ana ne'ma e'neana, Masamofo naneke
hanigu e'ne. Ana hanige'za naneke'a nentahiza zamentinti
hugahaze. **8** Agra ana masa omani'ne, hanki ana masamofo
naneke hu'ama hanigu e'ne. **9** Agra tamage masamo ama
mopafi maka vahe remsa huzmentesigu ne-e. **10** Ama mopafi
Agra mani'ne, hagi Agra'a ama mopa tro hu'ne, hu'neanagi
ama mopafi vahe'mo'za Agrira antahi'za ke'za osu'haze. **11**
Agra'a vaheku huno e'ne, hianagi Agri vahe'mo'za ovare'naze.
12 Hianagi izo'zo nevare'za Agri agifima zamentintima nehaza
vahe'mokizmia, Agra'a hugnare hige'za Anumzamofo mofavre
se'haze. **13** Hagi Anumzamofo mofavrema senazana arera afa
zamesitero, vahe avesitero, neve avesitera forera osunazanki,
Anumzamo zamazeri fore hu'ne. **14** Ana Kemo vahe fore huteno,
tagri'ene mani'ne. Agri masazama'a tagra ke'none, magoke
ante'nea Ne'mo hanave'ane masa zama'ane Nefantegati e'ne.
Asunku zamo'ene tamage kemo'a avite'nea Nere. **15** Joni'a
huama huno Agriku hu'ne. Agra kezatino amanage hu'ne,
nagrama amama nehuana Agriku nehue, nagri namage'ma
ne-emo'a, nagrira nagateretfa hu'ne. Na'ankure nagra fore
osu'nogeno Agra pusante fore huno mani'neane. **16** Higeta tagra
ana maka'mota hakare zana Agripi avitenefinti e'herunkeno,

asunku huranteno muse zama'a agumpi agumpi huno neramie.

17 Na'ankure kasegea Mosesempi tami'ne. Hagi asunku'zane tamage kea, Jisas Kraisimpi tami'ne. 18 Mopafi vahe'mo'a magore huno Anumzana onketfa hu'ne. Anumzamofo mofavrea magoke mani'neno, Nafa'amofo asumpinka mani'ne, Agra'a Anumzana mani'neno huama hu'ne. 19 Hagi Jiu kva vahe'mo'za, mono kva pristi vahe'ene Livae vahera Jerusalemi kumateti huma zamantage'za Jonina antahigeku vu'za, Kagra azage? hu'za ome antahige'naze. 20 Antahigageno'a agra huama nehuno vahane osuno, huama huno, Nagra tamazahu nera Krais'i'na omani'noe. 21 Hige'za, hagi azaga mani'nane? Elaijago? hu'za hazageno, a'o, nagra Elaijana omani'noe huno hige'za, kagra kasnampa nero? hu'za antahigageno, agra kezmi nona huno, i'o huno hu'ne. 22 Hagi hurantagetama e'nona vahe ome zamasmisunku nehune. Azaga mani'nane huta kagrikura ome zasmigahune? Kagragura azage hunka nehane? 23 Hazageno Agra anage hu'ne, Mago Kezanke ka'ma mopafi mani'neno keza tino, Ramofo ka azeri ante fatgo hiho huno Aisaia kasnampa ne'mo korapa hunte'nea ne' mani'noe. (Ais 40:3.) 24 Hu'zmantage'za e'naza Farisi vahe'mo'za, 25 zamagra antahige'za, amanage agriku hu'naze, kagra Kraisigafi, Elaijagafi, mago Kasnampa ne'ma omaninenka, nahigenka mono tina fre nezmantane? 26 Joni'a kenona zimirera anage hu'ne, nagra amne tintfanteti mono tina frenermantoe. Hu'neanagi tamagri amunompina magora tamagra keta antahita osu'naza ne' oti'ne. 27 E'ima Agra nagri nimage'ma esanimofona Agri aga'nona knare osu'noankina katu ofegahue. 28 Ana nanekea Betani kumara Jodani timofo asoparega Joni'ma mono tima frenezmanterega antahigazageno zmasami'ne. 29 Anante kotigeno Jisas'i'a agrite

egeno negeno, Joni'a amanage hu'ne, keho, Anumzamofo
Sipisipi anentara, ama mopafi vahe'mokizmi kumira, Agra eri
atregahie! **30** Ama'ne ana nera, Agriku'ma hu'na nagrama kema
hu'noana, nagri namge'ma esnia nera, nagrira nagatereno ra agi
eri'nea nere, nagra fore osu'nogeno, Agra korapa Agraragisa
mani'nea nere. **31** Nagra antahi'na ke'na Agrira osu'noanagi,
Israeli vahe'mo'za Agrira antahiza keza hanaze hu'na, nagra ena
mono tina eme frezmante'noe. **32** Joni'a huama huno amanage
hu'ne, Nagra kogeno Avamura maho namamo hiaza huno
monafinti eramino Agrite emanige'na ke'noe. **33** Nagra ke'na
antahi'na Agrira osu'noanagi, mono tima frezmanto huno'ma
hunante'nea ne'mo'a anage huno nasmi'ne, kesnankenoma
Avamumo'ma monafinkati'ma eramino Agrite'ma eman'i'nea
ne'mo, Agra Ruotge Avamupina mono tina fre zamantegahie
hu'ne. **34** Nagrani'a kete'na, huama hu'na ama Anumzamofo
mofavre hu'na nerasmusue. **35** Anante zupa Joni'a, amage'ma
nenta'a disaipoli netrema'ane oti'neno, **36** Jisasi'a ne-egeno
Joni'a negeno amanage huno hu'ne, Keho, amu Anumzamofo
Sipisipi anentare, **37** anage hige'ne, Joni amagema nenta'a
disaipol netremoke nentahi'ne, Jisasi amage'anteke vu'na'e. **38**
Jisasi'a amage'a nevakeno rukrahe huno neznageno, Na'anu
nehakra'e? huno znantahigege'ne, Rempi hurami ne'moka inante
Kagra nemanine? hu'ne antahigena'e. **39** Agra anage zanagriku
hu'ne, E'netna tanagratani'a emege'o hige'ne, Agrane vuke
nemania nonkuma omenege'ne ana zupa Agrane mani'nakeno,
4 kiloki hu'ne. **40** Hagi nanterana mago'mo Joni hiankema
antahiteno Jisasi amage'ma vu'nea nera Endru'e, Saimon Pitana
nefu'e. **41** Hagi Endru'a, Jisasima keteno pusante Endru'a nefu
Saimoni keno, amanage huno asami'ne. Tagra hago Mesaiana

hakreta erifore hu'none. (E'i ana agima eri rukrehe'ma hu'neana
Kraisi'e hu'ne.) **42** Jisasinte Endru'a, Saimonina avreno vu'ne.
Vigeno Jisasi'a negeno anage huno asmi'ne, Kagra Saimonige
Joni nemofo mani'nane, kagri kagi'a Sifasi'e hugahaze. (E'i
ana agima eri rukrehe'ma hu'neana Pita'e hu'ne.) **43** Mseno
kotigeno Jisasi'a Galili vunaku nehuno Filipi ome negeno, Nagri
namage anto hu'ne. **44** Hanki Filipi'a Betsaidati ne' Andruna,
Pitakiznia rankuma zani'areti nere. **45** Filipi'a, Natanieli'e nehaza
ne' kefore huteno amanage huno asmi'ne, Mosesi'ene kasnampa
vahe'mo'zama avontafepima agenke'ama krente'naza Ne'ma,
Nazareti kumateti Josefe nemofo Jisasi'e hu'naza nera hago
hakreta erifore hu'none, huno asmi'ne. **46** Natanieli'a anage
huno Filipina antahige'ne, Nazaretia knare'zana efore hugahio?
Filipi'a anage hu'ne, kagraka'a enka emego. **47** Natanieli'a
Agritega ne-egeno Jisasi'a negeno amanage hu'ne, Keho,
tamage Israeli vahere agu'afina havige hu'zana omne'ne! **48**
Natanieli'a Agriku anage hu'ne. Kagra inankna hunka nagrira
nage'nane? Jisasi'a ke'nona huno amanage hu'ne, Filipi'a
kagi osu'negenga fiki zafa agafafi mani'nanke'na ko kage'noe.
49 Higeno Natanieli'a Agri ke'nona amanage hu'ne, Hurami
nere, Kagra fatgo hunka Anumzamofo nemofo mani'nane.
Kagra Israeli vahe'mokizmi Kini nere. **50** Higeno, Jisasi'a
ke'are anage huno asmi'ne, Na'ankure Nagrama hu'na fiki
zafa agafafi mani'nanke'na kage'noema huazanku kamentinti
nehano? Henka'a agatere'neaza ruzahu'za kagra kegahane. **51**
Higeno Jisasi'a mago'ane amanage huno Natanielina asami'ne,
Tamagerafa hu'na Nagra kagrira negasamue, kagra negesankeno
mona kafamo'a anagisigeno, Anumzamofo ankero zagamo'za,
Vahe'mofo Mofavrere mareriza tamiza nehanigenka kegahane.

2 Hagi tare knamofo amefi knazupa, arave hunaku Kana kumate
Galili kaziga nehzageno, Jisasi nerera'a anante mani'ne. **2**
Ana hige'za Jisasine Agri amagenentaza disaipol naga'anena,
aravema huku'ma hazarega zamagi hazage'za vu'naze. **3**
Wainima vagaregeno'a, Jisasi nerera'a asmino, waini tina
hagovagare'ne huno Agrira asmi'ne. **4** Higeno Jisasi'a nererana
amanage huno asmi'ne, Ama a' moke, Nagra naza ama zampina
huku hugenka nehane? Nagri kna zahufa efore osu'ne. **5** Jisasina
nerera'a eri'za vaheku anage huno zamasmi'ne, Agrama inankna
kema tamagri'ma tamasminia'zana hiho. **6** Higeno keana 6si'a
havereti tro hunte ti afi kavo Juda vahe'mokizmi avu'avapina
kavofinti ankehi'za tina fre'za avu sese nehzane, tina mago **100**
lita azeritere huga tin kavorami me'ne. **7** Jisasi'a eri'za vahe
huzmanteno Ana kavo zagafi ti ome afi viteho hige'za tina ome
afi vite'naze. **8** Higeno Jisasi'a anage hu'ne, Anampinti mago'a
afita ne'zante kva hu'nea nera ome amiho, hige'za afi'za ome
ami'naze. **9** Ana ne'mo tima neno keana waini ti fore higeno,
igati efore hu'neo antahino keno osu'ne, (hagi tima omefi'naza
vahe'mo'za antahiza ke'za hu'naze), kavete kva hu'nea ne'mo
aravema hia ne' asmino, **10** maka vahe'mo'za pusante knare
wainia tagi zamige'za kema hazage'za, aza vahe'mo'za netageno,
anante evurami'nea wainia tagi zamige'za nenaze. Nehazanagi
kagra knare wainia ante'nanteti menina eri fore hane! **11** Ama
kaguvezana Agra'a ese erigafa huno Jisasi'a Galili kaziga Kana
kumate nehuno, Agri'a hihamu masa zama'a eri ama hige'za,
Agri amage nentaza disaipol naga'mo'za Agrite zamentinti
hu'naze. **12** Anama huteno Jisasi'a Kapaneamu urami'ne,
Agrane nerera ene afuhe'zane amagema nentaza disaipol
naga'anena ana kumate vu'za mago'a zagegna umani'naze.

13 Hagi Jiu vahe'ma kinafinti zamare'nea (Pasova) ne'za'ne
knamo kofta higeno Jisasi'a Jerusalemi kumate mareri'ne. **14**
Vuno ra mono nompi omege'neana vahe'mo'a bulimakaoma,
sipisipi'ma, maho namane, zago rezahe nehaza vahe'mo'za tra
omenta ementa hu'za maketi nehazageno ome zamage'ne. **15**
Ome zamagetenonofite kano tro hiazamo ra mono nompintira
sipisipi'ne bulimakaone vahe'ene zamahenati'netreno zagoma
rezahe'ma nehaza naga'mokizmi zagoa ruherafi netreno, ita
zamia eriruvaheru'ne. **16** Hagi maho namama maketima
nehaza vaheku, Ama nama avreta viho. Nafa'nimofo nona
maketi kumara eri tro osiho, huno zamasmi'ne. **17** Agri amage
nentaza disai pol naga'mo'za, kasnampa vahe'mo'za avontafepi
kre'nea kegu zamagesa antahi'naze. Amanage huno kre'ne
Kagri noma kegava hu'na mani'navesizamo'a nagu'afina tusiza
huno navenesie. (Sam-Zga 69:9) **18** Jiu vahe'mo'za Agriku
anage hu'naze, Kagra inankna avame'za tagrira huraverisanketa
negeta ama nera mrerisa nere huta hugahune? **19** Hazageno
Jisasi'a ana kemofo nona'a amanage hu'ne, Ama ra mono nona
tgana vazitma eri haviza hinkeno tagufa zagegna manite'na
azeri ot'i'nen, huno hige'za, **20** anante Jiu vahe'mo'za anage
hu'naze, 46'a zagegafu eri fri'za ama mono nona ki'naze.
Hagi Kagra inankna hunka tagufa zage knafina kigahane?
21 Hianagi ra mono nonku'ma kema hu'neana, Agra avufagu
hunteno hu'ne. **22** Anagema hu'nere, fri'nefinti'ma otige'za, Agri
amage nentaza disai pol naga'mo'za e'inahu zanku hu'ne hu'za
zamagesa antahi'naze. Nentahi'za avon tafemo hu'nea kere
ene, Jisasi'ma hu'nea nanekere zamagesa nentahi'za zamentinti
hu'naze. **23** Hagi kinafinti zamavare'nea kna antahimiza (Pasova)
muse ne'zama ne'knare Jerusalemi mani'nege'za, hakaremo'za

kaguvazama Agrama hiazana nege'za ke'naze Agri agire zamentinti hu'naze. **24** Hu'nazanagi, Jisasi'a Agra kazigatira antahi ozami'ne. Na'ankure miko vahera Agra zamantahino zamage'ne. **25** Na'ankure, Agra antahiantahi zankura upara osu'neankino magomo'a hugesa osugahie. Na'ankure Agra vahe'mofo agu'afina na'a me'neo, ko antahino keno hu'ne.

3 Hagi Farisi vahepinti mago nera agi'a Nikodimasi, Jiu vahe'mokizmi mono kanisol ne' mani'ne. **2** E'i ana ne'mo'a kenage hanimpi Jisasinte eno amanage huno antahige'ne. Rempi hurami ne'moka antahi'none, Kagrama hurami ne' Anumzamofontegati e'nane. Mago'mo'a Kagrama nehanaza huno amanahu avame zana osugahie, Anumzamo agrane mani'nesimo hugahie. **3** Higeno Jisasi'a kenona'a amanage huno asami'ne, Tamagerafa hu'na ama kea negasamue. Runema kasefa osnimo'a, Anumzamofo kumapina uofregahie, **4** Nikodimasi'a kenona'a huno, inankna huno ra vahe'mo'a ete osi mofavregna huno fore hugahie? Ete ra vahe'mo'a anta'amofo arimpafina ufrenkeno eteno kasentegahifi? **5** Higeno Jisasi'a ana kemofo nona'a amanage huno asmi'ne, Tamagerafa hu'na kagrira negasamue. Aza'o tinteti'ene Avamuteti'ene kasefa osnimo'a, Anumzamofo kumapina uofregahie, **6** Mopafi vahe'mo'ma kasente'nesiana vahere. Hanki Ruotge Avamu'mo'ma eri fore hu'nesia zana avamure. **7** Amama kasamisua zankura Nagriku hie hunka kmanogura osunka, kagra etenka kasefa mofavre hampro, **8** Zahomo'a inantega vunaku hirega nevigenka agasasa'a nentahine. Hagi inantegati eteno, inantega nevio antahinka kenka nosane. E'ina hu'za mika vahe'mo'za Avamupina kasefara nehaze. **9** Higeno Nikodimasi'a ana zanku, amanahu zamo'a inankna hugahie? huno higeno, **10** Jisasi'a ana kemofo nona'a

amanage huno hu'ne, Israeli vahe'mokizmi rempi huzami ne'
mani'nenga, ama nanekea antahi amara nosano? **11** Tamagerfa
hu'na negasamue. Kema nehunana, antahita keta hu'nona zanku
huama nehunketa, ana nanekegura tamagra antahinoramize. **12**
Mopafi zanku'ma neramasamisunketa tamagrama tamentintima
osanuta inankna huta monafi zanku'ma tamasami'sunana
tamentintia hugahaze? **13** Mago'mo'a monafinka mrerino ovu'ne.
Hagi Agra monafinkati'ma erami'neana, Vahe'mofo Mofavremo
erami'ne. **14** Mosesema hagage kokampi osifa'vema erintesga
hu'nea kna hu'za, Vahe'mofo Mofavrea azeri antesga hugahaze.
15 Hanigeno aza'o, Agripi amentinti hanimo'a, manivava asimu
erigahie. (*aiōnios g166*) **16** Anumzamo tusiza huno mopafi
vahoku avesi nezmaneno, magoke ante'nea Ne'mofavre'a
zami'ne. Agrite zamentinti hanamo'za fanane osu'za manivava
zamasimu erigahaze. (*aiōnios g166*) **17** Na'ankure Anumzamo
Mofavre'a huntegeno ama mopafima e'neana, mopafi vahe
refko hinogu huntegeno ome'ne. Hagi Agripinkati vahe'mo'za
zamagu'vazizana erisaze huno huntegeno erami'ne. **18** Aza'o
Agrite'ma amentintima himofona refko huno nanekea hunonte,
iza'o Agrite'ma amentintima nosimofona, trate ko avrenteno keaga
hunte'ne. Na'ankure Anumzamofona magoke Mofavre'amofo
agirera, agra amentinti osigu ana nehie. **19** Nanekema
huzmante'siana, ama kemofo agafare huzmantegahie. Masamo'a
ama mopafima efregeno'a, vahe'mo'za hani avu'ava'zanku
avesinente'za masamofona avesi onte'naze. Na'ankure havi
zamu'zamake'za hu'naze. **20** Aza'o havizama nehia vahe'mo'a,
tavi'mofona zamesra hunente'za, masarera nomaze. Na'ankure
haviza nehazazamo eama huzanku nomaze. **21** Hu'neanagi
aza'o tamage avu'ava'ma nehimo'a tavitera egahie. Na'ankure

hakaremo'za nege'za Anumzamofo avenesiaza nehie hu'za
hugahaze. **22** Hagi ananteti Jisasi'a amagenentaza disaipol
naga'ane, Judia kaziga vu'za mago'a kna umani'ne'za mono
tina fre zamante'naze. **23** E'i ana knafi Joni'a, Salim kumamofo
tava'onte Ainoni kumate mono tina frezmante'ne. Na'ankure
anantega rama'a tina me'nege'za vahe'mo'za ete'vute hu'za mono
tina fre'naze. **24** Na'ankure Jonina kina huonte'naza knafine. **25**
Ana nehazage'za Jonima amage nentaza disaipol naga'ane,
mago Jiu ne'ene, Juda vahe'mokizmi avu'avapi ti fre'za avu sese
nehaza zanku keaga hu'haze. **26** Nehu'za Joninte e'za amanage
hu'za asmi'naze. Hurami (Rabbai) ne'moke, Jodani timofo kantu
kaziga kagrane mani'neama, Agri agi hu'ama hu'nana ne'mo'a,
mono ti frenezmanteg'e'za mika vahe'mo'za Agrite nevaze. **27**
Hazageno Joni'a anage hu'ne, mago vahe'mo'a, Mago zana
e'origahie, ana hugahianagi monafinkati mago'zama amisigeno'a
amne erigahie. **28** Tamagratmi antahi'nage'na amanahu kea
hu'noe, Nagra Kraisi'na omani'noe hu'na hu'noe. Hianagi Agrira
azeri henka atreno, nagrira pusante hunantege'na e'noe. **29**
Mago vemo'ma a'ma erinaku nehigeno rone'amo oti'neno antahi
nemino, aravema huku hia vahe'mofa ageru nentahino muse
nehie. E'ina higu nagrira muse zamo'a avite'ne. **30** Agri agimo
marerisigeno nagri nagimo uramisie. **31** Agra anagamiti e'nemo'a
maka'zana agatere'ne, aza'o ama mopafinti'ma e'nesimo'a, ama
mopafi vahekino, ama mopafi zankuke kea hugahie. Agra aza'o
monafinkati'ma e'nemo'a, Agra maka'zamofona zamagtere'ne.
32 Agrama antahino keno hu'nea zante Agra naneke'a huama
nehie, hianagi mago'mo'e huno agi agenke'a antahi anira osu'ne.
33 Iza'o, Agri agi agenke'a erimo'a, tamage huno Anumzamofo
nanekegura nehie. **34** Na'ankure Agrira Anumzamo huntuge'no

e'neankino, Anumzamofo keaga nehie. Na'ankure Agra refko osuga'are Avamura aviteno ami'ne. 35 Nefa'a, Nemofona avesinteno mika'zana kva hugahie huno, Agri azampi ante'ne.

36 Aza'o Nemofone amentintima hanimo'a manivava asimura erigahie. Hagi iza'o Nemofo kema rutagresimo'a manivava asimura e'origahie. Hanki Anumzamofo tusi'a rimpahé knazamo agrite megahie. (aiōnios g166)

4 Hagi Jisasi'a antahiamma Farisi vahe'mo'za hu'za Jisasi'a, Jonina agatereno rama'a amage antesaza disaipol nagara zamazeritru huno, mono tina frenezmante hu'za nehazanke antahi'ne. 2 (Anage hazanagi Jisas'a Agra'a mono tina freozmante'ne. Hagi Agri'ma amage nentaza disaipol naga'mo'za mono tina fre zamante'naze.) 3 Judia kaziga atreno Agra mago'ene Galili vu'ne. 4 Galilima vunakura Sameria mopa kazigati nevaza kantega rugitagino vu'ne. 5 Anante Sameria mopa kaziga nevuno, ana mopafi mago kuma agi'a Sika nehazare uhanati'ne. Korapara Jekopu'a ana mopa tva'oma'are me'nea mopa, Josefena ami'neane. 6 Ana kuma tva'onte Jekopuna tinker'i'a me'ne. Hagi Jisasi'a kama e'nea zamo avesra higeno ana tinkerire umanigsa hu'ne. Feru avame zageha higeno anante umani'ne. 7 Anante mago Sameria a'mo ti afinaku ana tinkerire egeno, Jisasi'a ana a'mofonku huno, Tina afi namio huno hu'ne. 8 Na'ankure Agri amage nentaza disaipol nagara rankumategati ne'za mizasenaku zamagra vu'nazageno mani'neno anagea hu'ne. 9 Anage higeno ana Sameria a'mo Jisasinku huno, Kagra Jiu ne' mani'nananki nahigenka Sameria a' monagura, tina afi namio hunka nantahi'negane? (Na'ankure Jiu vahe'mo'za Sameria vahe'enena tragote'za nomanize.) 10 Jisasi'a ana ke nona'a anage huno asami'ne, Anumzamo negamia

musezama antahi'nenkasina, iza'o kantahigeno kagriku'ma,
tina afi namige'na na'neno nehia ne'ma kagra antahigankeno,
Agra asimu eri tina kamisine. **11** Ana a'mo Agriku huno, Ra
ne'moke Kagra tima afisana tafena e'ori'nankeno tinkerimo'a
zaza huno urami'ne. Hagi Kagra igati ana asimu eri tina
afigahane? **12** Jekopu neragehon Kagra agterenka onaga'a
mani'nampi? Na'ankure agra ama tinkeria tamine, agra ana
tinkerifinti nenege'za, mofavre naga'amozane afu'zaga'amoza
ne'naza tine. **13** Higeno Jisasi'a ana a'mofo ke nona'a huno
asm'i'ne, Maka'mo'za ama tima nesanuza ete ru'ene tinkura
zamesigahie. **14** Hianagi izano Nagrama amisua tima nesuno'a,
mago'ene tinkura ave'osigahie. Hianagi Nagrama aminaku nehua
timo'a, kampu'i timo hiaza huno agu'afi me'neno, evava nehuno
manivava asimu amigahie. (*aiōn g165, aiōnios g166*) **15** Higeno ana
a'mo Agriku amanage hu'ne, Ra nemoka, ana tina namigeno,
nagrira tinkura nave'osisige'na tima afi'zantera oma'neno, huno
hu'ne. **16** Agra ana akura huno, Vunka, negavena ome ke
hunka avrenka amare eno. **17** Higeno ana a'mo kenona'a huno
asm'i'ne, Nagra ve onte'noe higeno, Jisasi'a ana ara anage huno
asm'i'ne, Kagra vema onte'noe hunkama nehanana tamage
hunka nehane, **18** na'ankure kagra kotenka 5fu'a ve eri'nane, hagi
menima kagrane mani'nea vea negave'a omani'ne. E'igu kagra
tamage hunka nenasmine. **19** Higeno ana a'mo Agrira asmino,
Ra nemoke, nagrama negagoana Kagra mago kasnampa ne'
mani'nane. **20** Tagrira tafahe'za ama agonafi monora hunte'naze.
Jiu vahe'motma Jerusalemi kumateke monora huntegahaze
hutma tamagra nehaze. **21** Higeno Jisasi'a amanage huno
ana ara asami'ne, Ama a'moka, kema hanua kerera kamentinti
huo, mago kna ne-eankino efore'mahina, ama agonafino,

Jerusalemi kumatero tamagra Nerfantera monora huontegahaze.

22 Tamagra ontahi'naza zante monora nehaze, tagra antahi'nona
zante monora nehune. Na'ankure vahe'ma zamagu'vazizana
Jiu vahe'motafi me'ne. **23** Hianagi mago kna ne-ea knamo'a
hago menina ama fore hu'ne. Nenfama tamage mono hunteku
hanamo'za, avamupi tamage avu'avateti monora huntegahaze.
E'inahu hu'za mono'ma huntesaza vaheku Nenfa'a nehakre.

24 Na'ankure Anumzana Agra Avamure, hu'negu mono'ma
hunteku hanamo'za, zamagra zamagu'reti avamuzmifi tamage
monora huntegahaze. **25** Higeno ana a'mo Agrira amanage
huno asmi'ne, Nagra antahi'noe Mesaia'a (tazahu ne') egahie,
(Kraisi'e hu'zama agima ante'naza nera), ana ne'ma esnuno'a,
maka'zana tasmi ama hanigeta antahi'gahune. **26** Jisasi'a ana
ara asmino, Ama nanekema nehua ne'mona ana ne' Mesaia'ne.

27 Anage nehakeno Jisasima amage'ma nentaza disaipol nagara
anante enehanatiza ana a'ene naneke nehige'za nege'za antri
nehu'za hakare antahintahi hu'nazanagi, nazanku nehakre huge,
nazanku a'ene kegaga nehie? Hunora mago'mo'a antahi onke'ne.

28 Anante ana a'mo tinkavo'a netreno, rankumatega viazamo
vene'ne zaga ome zamasmino, **29** Eta eme keho, maka'zama
hu'noa zanku'ma huama huno nasmi'nea nera, Kraisi'ema
hu'naza ne' e'negahie? **30** Ome zamasmige'za, rankumara atre'za
zamagra atirami'za Agritega e'naze. **31** Vahe'ma zamarenaku
vu'nege'za amage nentaza disaipol naga'mo'za Jisasina tutu
hunte'za, hurami ne'moka (Rabbai), ne'zana no hu'naze. **32**
Hianagi Jisasi'a zamasmi'no, Nagrama nesua ne'zama me'neana
tamagra onke'naze, huno zamasmi'ne. **33** Anage hige'za
amagema nentaza disaipol naga'mo'za, ke ohumi ahumi nehu'za,
zamagra hu'za mago'mo ne'zana eme amigeno ne'neno Agra

nehifi? 34 Jisasi'a amanage huno zamagrira zamasmi'ne, Nagri ne'zana aza'o hunantege'na e'nomofo avesite eri'zama'a eri vagaresanugu hunantege'na e'noe. 35 4'a ika maniteta tamagra hozama hamare kna me'ne huta nosafi? Nagra neramasmuanki keho, kesga hutma hozafina tmua keho, ne'zamo afureno ta'nefa ruherafino hoza hamare kna kofta nehie. 36 Ana ne'zama hamare'namo'za hago mizazamia knare hu'za eri'naze. Hagi ana raga'ama hamare'nazana manivava mani'zante vahera zamare'za vu'naze, ana nehina aza'o hozama nehankremo'ene, hozama nehamremokea, zanagu'a musena magoka hugaha'e.

(aiōnios g166) 37 Na'ankure ama ana nanekea tamage ke me'ne. Mago'mo hoza hankretegeno, rumo hoza nehamare hu'za nehaze. 38 Tamagra zamaza hutma avimzana ose'naza hozafi Nagra huneramantoe, rumo'za amuho hu'za eri'za hankre'naza hozafi, tamagra ne'za hamare'sagu huneramantoe. 39 Sameria rankumateti hakare vahe'mo'za Agrite zamentinti hu'naze. Na'ankure ana a'mo'ma huno maka'zama nagra ko'ma hu'noa zana, Agra huama hunante'ne. 40 E'inage hige'za, Sameria vahe'mo'za Jisasinte e'za, tagrane manigahane hu'za hanaveti'za antahigageno, Agra tare zagegna zamagrane mani'ne. 41 Hagi Jisasi'ma zamasmia ke nentahi'za, hakare'a ontahi'naza vahe'mo'zane zamentinti hu'naze. 42 Zamagra ana ara amanage hu'za asmi'naze, kagrama hana kegukera tamentinti nosune, hagi tagra tagesafinti antahita tamentinti nehune. Agra tamage maka kokankoka vahe'mota tazahu nere. 43 Tare zage knama maniteno, Jisasi'a ana kumara atreno Galili vu'ne. 44 Na'ankure Jisasi'a Agra'a huama huno, Kasnampa (profet) vahe agi'a mopa agafa'arera erisaga osugahaze huno hu'ne. 45 Hagi anante Galilima ehanatige'za, kinafinti zamare'nea knagu nentahiza

muse ne'za kreza nenaza knarera (pasova) Jerusalemi vu'ne'za
ke'naza vahe'mo'za musena hunte'naze. **46** Ana hazageno
Kana Galili kaziga, tinteti waini'ma trohu'nea kumate eteno e'ne.
Anante mago kamani eri'za ne'mofo mofavre'mo Kapenium
kumate kri erino mase'ne. **47** Jisasi'a Judia atreno Galili kaziga
ehanatia kema nentahino'a, kri eri'nea mofavre'mofo nef'a
Agrite viazamo asuragi kefinti, Enka mofavre ni'a eme azeri so'e
huo huno nemofo'a fri'kante mase'negeno antahige'ne. **48** Anage
higeno Jisasi'a asmino, Avame'zane kaguvaza hanuazana
ketetage'za, tamagra tamentintia hugahazo! **49** Ana kamani
eri'za ne'mo'a Jisasinkura huno, Ramoke mofavreni'a frisanigi ko
eramio. **50** Higeno Jisasi'a ana nera asmino, Nonkarega vuo,
negamofo'a ofrino amne mani'ne. Ana ne'mo tamage Jisasi'a
nehie huno amentinti nehuno atreno ete noma'arega vu'ne. **51**
Atreno kantega uneramige'za, kazokzo eri'za vahe'amo'za eme
asami'za, negamofona kri'a atrentegeno mani'ne hu'za eme
asmi'naze. **52** Anagema hu'za asmizageno kri'ama atrente'nea
knagu zamantahigege'za zamagra asami'za, Okina wan kiloki
higeno avufa teve ha'zamo'a atrente'ne. **53** Anagema nehazageno
nefa'a agesa antahi'ne, Jisasi'a ana knareku huno, Negamofo'a
ofri amne mani'ne huno hu'ne, nehuno agrane noma'afi nemaniza
naga'ane, maka'moza zamentinti hu'naze. **54** Jisasi'ma Judia
kazigama atreno Galilima emanineno'a, ama'i nampa 2 avame'za
eri fore hu'ne.

5 Ana maka'zama higeno agateretegeno, Jiu vahe'mo'za mono
nehaza kna fore higeno, Jisasi'a Jerusalemi kumate mareri'ne. **2**
Jerusalemi kuma'mofo kaha hagente'za, Sipisipi Kafane hu'naza
tavaonte mago tiru me'nege'za, Hibru kefina Betsaida hu'za
nehaze. Anantero 5fu'a hanko no kinte'naze. **3** Ana hanko

nontera hakare'a kri vahera mase'za mani'naze, zamusuhu
vahe'ene zamagia krere hu'nea vahe'ene zamaga zamaza
sti'hea vahe'ene mani'naze. **5** Mago nera 38'a kafufi kri eri'nea
ne', ana tirutera mani'ne. **6** Anante maseno mani'negeno
Jisasi'a negeno, za'za kna ana krifina mase'ne huno antahi'ne.
Jisasi'a anage huno asami'ne, Kagesama antahinana krika'a
knare hugantesie hunka nentahino? **7** Ana kri ne'mo kenona'a
asmino, Ra vahe'moka timoma kazama nehanigeno navareno
ome nantesia vahera omani'nege'na, ana'ana hu'na nevuge'za
rumo'za tirupina nagtere'za unermize. **8** Jisasi'a nentahino
ana neku huno, Otinka, tafeka'a renamginka e'nerinka vuvo. **9**
Hantaka huno kri'amo atrentegeno, tafe'a erirenamgino e'herino
otino agafa huno kana vu'ne. Ana kna mani fruhu kna (Sabat)
zupa ana kaguvazana hu'ne. **10** Ana hige'za Jiu kva vahe'mo'za
kri'ama eri amne huntea ne' antahige'naze, menina mani fruhu
(Sabat) kna meno nagru hu'neankinka, naverisaka'a erinka vano
osugahane. **11** Hianagi ana ne'mo'a huno, Kri'nima eri amne
hu'nea ne'mo'a nasamino, tafeka'a erinka vuvo huno hunante'ne.
12 Zamagra anage hu'za agrira antahige'naze, Iza ana nera
huganteno, tafeka'a erinka vuvo huno hugante'ne? **13** Hianagi
azeri so'ema hunte'nea ne'mo'a, iza anara hu'neo antahino
keno osu'ne, na'ankure Jisasi'a maka vahepi ruhavia huno
vu'ne. **14** Henka Jisasi'a ana nera ra mono nompi ome kefore
huno asmi'ne, Ko, krika'a hago vagare, mago'ene kumira osuo,
e'inama hanunka tusi'a knaza henka'a erigahane. **15** Ana ne'mo'a
atreto viazamo, Jiu vahera ome zamasmino, Jisasi kri'ni'a eri
amanu hunante'ne huno zamasmi'ne. **16** E'inage hige'za, Jiu kva
vahe'mo'za agafa hu'za Jisasina azeri haviza hu'naze, na'ankure
ana zantamina mago'a mani fruhu kna (Sabat) zupa hu'nea zante

ana hu'naze. 17 Hianagi Agra zamasmino, Nenfa'a meninena eri'zana otreno e'neriankina, Nagra'nena eri'zana enerue. 18 E'i ana agafare, Jiu kva vahe'mo'za Agri ahenaku maraguza'ati'za maka kanku hakre'naze. Na'ankure Agra mani fruhu kasege hantagia zantekukera ana osu'naze. Hagi agra Anumzanku Nenfa'ema hiazamo, agrira azeri Anumzane mago tragave hia zante'ene ahenaku hu'naze. 19 E'inage hazageno Jisasi kenona zamirera amanage huno zamasmi'ne, Nagra tamagerafa hu'na neramasamue, Nemofo'a Agra'a avesitera mago'zana hugara osu'neankino, ke'nesigeno Nefa'ma huveri'nesia zanke, Nemofo'a ana zanke hugahie. 20 Na'ankure Nenfa'a, Nemofona avesinenteno, Agra maka'zama nehia zana averi nehie. Ana nehuno Nefa'a agatereno tusi'aza averi hugahie. Anama hanigeta tamagra antri hugahaze. 21 Na'ankure Nefa'a fri' vahe'ma zamazeri otino, asimu nezmia kna huno, Nemofo'a azano, Agri'ma avesi'nimofona asimura amigahie. 22 Na'ankure Nenfa'a Agra veara refko osugahie. Hagi maka vahe'ma refko hu'zana, Nemofo ami'ne. 23 Ana hina maka'mo'za nefu agima eri sga nehazankna huza Nemofo agi'a erisaga hugahaze. Aza'o Nemofo agima erisaga osanimo'a, huntogeno'ma e'nea Nefana, anazanke huno agi'a erisaga nosie. 24 Nagra tamage hu'na neramasmue, aza'o Nagri nanekema nentahino hunantege'na e'nomofonte amentinti nehimo'a manivava asimu eri'neankino, vahe'ma refko hania knafina, fri'zana agatereno ko asimu erino mani'ne.

(aiōnios g166) 25 Nagra tamage hu'na neramasmue, knamo'a kofta huno ne-eno hago menina ama efore hu'ne, fri'naza vahe'mo'za Anumzamofo Ne' mofavremofo ageru nentahi'za, ana ageru'ma antahisnamo'za manigahaze. 26 Na'ankure Nefa'a asimu erino mani'zamofo agafa'a Agripi me'ne. Nemofona anahu

kna huno asimu erino mani'zamofo agafa'a Agri ami'ne. 27
Ana nehuno Agra Nemofona kema hugnare hunte hanavea
(atoriti) ami'neankino, vahe'ma refko hu'zana Agri ami'ne,
na'ankure Agra Vahe'mofo Mofavre. 28 Ama kegura antria osiho,
na'ankure mago knama fore'ma hina kerifi asezamante'naza
vahe'mo'za Anumzamofo Mofavre'agerura antahi'za, 29 oti'za
esnageno knare avu'ava hu'nesaza naga'mo'za, oti'za kasefa
mani'za erigahaze. Hagi kefo avu'avazampi mani'ne'za fri'ne
hanamokizmia, refako huno naneke huzmantegahie. 30 Nagra
navesitera mago'zana osugahue. Anumzamofo ke nentahi'na
anante zaganena refko nehue. Ana kema refko'ma huana mago
kante ante'na refko nehue. Na'ankure Nagra navesi'zantera
kenontoe, hagi Agrama hunantege'na e'nomofa avesite refkoa
nehue. 31 Hagi Nagrama, tamage nehue hu'na Nagrani'agu
huama hanuana, Nagra havige hugahue. 32 Hianagi Nagri
nagenkema rumo huama (testimoni) nehige'na, Agrama Nagriku
huama hianke nentahi'na, tamage nehie hu'na nehue. 33
Tamagra Joninte vahe huzmantage'za ome antahi'nazana, Joni'a
tamage nanekege huzmasmi'ne. 34 Hu'neanagi Nagrama hua
kema azeri haveti kea mopafi vahe'mo'za antemiza hugahaze
hu'na antahi nozamue. Hianagi Nagrama nehuana tamagri'ma
tamaza huno tamagu vasinigu nehue. 35 Joni'a lampe tavi kna
huno tavi'nereno remsa hurmantegeta, ana tavikura osasi'a
knafi tamagu'a musena hu'naze. 36 Hianagi Nagrama hanua
navu'navamo'a, Joni'ma hu'nea avu'ava zana agatere'ne.
Na'ankure Nenfa'ma nami'nea eri'za Nagra eri vagaresanugu
e'neruankino, ana eri'zama e'nerua eri'zamo, Nagrira veamokzimi
zamavurera eriama huno Nafa'nimo hunantege'na e'noe huno
nehie. Na'ankure Nafa'nimo hunantege'na e'noe. 37 Nenfa'ma

hunantege'na Nagrama e'noana, Nagriku huama Agra hu'ne.
Hianagi tamagra mago'a knarerera Agri agerura ontahitma,
avugosa onke'naze. 38 Agri nanekemo'a tamagri tamagu'afina
omne'ne, na'ankure Agrama hunantege'na Nagrama e'nogura,
tamagra tamentintia Agritera nosaze. 39 Tamagra Anumzamofo
avontafepi nehakraze, na'ankure tamagra mani'vava mani'zana
hago eri'none hutma nentahize. Hianagi e'i ana avontafemo'a
Nagriku huama nehie. (aiōnios g166) 40 Hianagi Nagrite'ma
e'netma tamasimu eri'zankura tamagrira tamavesra nehie.
41 Nagrira vahe'mo'za nagi erisaga (glori) hihogura nosue.
42 Hianagi Nagra tamagrira tamage'na antahi'na hu'noe,
Anumzamofo avesinte'zana tamagri tamagu'afina omane'ne. 43
Nagra Nenfa agifi e'nogeta tamagra nonavraze, hagi mago'mo
agra agire'ma esanimofona ame huta avregahaze. 44 Tamagra
inankna huta tamentintia hugahaze, tamagri'ma ru vahe'mo'za
tamajima erisaga nehzana, magoke Anumzamo tamagri'ma
muse huramante'sia zankura ohakre'gahazo? 45 Nefante
naneke hurantegahie hutma Nagrikura tamagesa ontahihio, kema
hurmantesia nera Moses'e, Mosesente tamentintina huta taza
hugahie huta hu'naze. 46 Hianagi tamagrama tamage hutma
Mosesente'ma tamentinti hunetasina, Nagrite ene tamentinti
hazasine, na'ankure agrama kre'neana, Nagriku huno kre'ne. 47
Hianagi Mosesema kre'nea nanekema tamentinti osanutma,
inankna huta tamagra Nagri nanekugura tamentintia hugahaze?

6 Hagi anazama vagaregeno'a, anantetira Jisasi'a zamatreno
Galili tirumofo mago kaziga vu'ne, mago agi'a Taiberias tirure
hu'za nehaze. 2 Tusi'a vahe krerfamo'za Agrira avariri'za
vu'naze, na'ankure krima vase'naza vahe'ma kaguvazama huno
zamazeri so'e hige'za ke'nagu avariri'za vu'naze. 3 Anante

Jisasi'a agonarega mrerino amage nentaza disaipol naga'ane
Agrane anante umani'naze. **4** Hagi Jiu vahe kinafinti zamare'nea
kna (Pasova) muse hu'za ne'za ne kna'zmi atupa hu'ne. **5** Anante
Jisasi'a, keganti kegma huno keama hakare vahe krerfa Agritega
neageno Filipina asmino, Inantegati bretia miza hanunke'za
ama vahe'mo'za negahaze? **6** Hagi ama kema Jisasi'ma hiana
Filipina reheno ke'ne, na'ankure Agra inankna zano hani'ana
antahi'neno, reheno antahige'ne. **7** Filipi'a ke nona'a amanage
huno asmi'ne, 2 hantreti'a silva zagoreti mizama hania bretimo'a,
mago'mago'mo'ma osi'a neterema haniana ama vea krerfafina
knarera huozmantegahie. **8** Anante Agri amagema nentea
disaipol ne' Endru, Saimon Pita negna amanage huno Jisasina
asm'i'ne, **9** Amafi mago osi' mofavre emani'neno 5fu'a bali
bretigi, tare nozamegi huno eri'neanagi, asi'amo'a inankna huno
ama veapina knarera hugahie? **10** Jisasi'a amanage huno
hu'ne, Zamasaminke'za mopafi maniho. Anampina trazamo
hu'nefi 5 tauseni'a vahe'naza mopafi mani'nage'za, vene'ne age
hampri'naze. **11** Hagi Jisasi'a breti erino Anumzamofonte nunamu
hunteteno, erigorino mani'nare refko huno nezmino, anazanke
huno nozamea zamige'za nenazageno zamu hu'ne. **12** Nazageno
zamu'ma higeno'a, Agri'ma amage' nentaza disaipol naga'a
zamasmino, Atraza ne'zama'a eri atru hiho, e'inahinkeno amne
zankna osnie. **13** Anage hige'za eri atru hazageno, 5fu'a bali
bretima kori'za neneza atraza atupa atupa'a, 12fu'a eka'eka kupi
eriri'naze. **14** E'ina hige'za veamo'za ana kaguvazama Agrama
hiaza nege'za, zamagra anage hu'naze. Ama'i tamage huno
Kasnampa nere, ama mopafima henka'a egahie hu'za hu'naza ne'
mani'ne. (Diu-Kas 18:15.) **15** Hagi ana vahe'mo'za zamagraregati
eme azeriza kini kvazmi manisie hu'za azeri otiku hazageno,

Jisasi'a antahino keno nehuno, anantetira zamatreno agonarega
Agraku mareri'ne. **16** Kinaga sege'za, Agri amage' nentaza
disaipol naga'mo'za ana kumara atre'za hagerintega urami'haze.
17 Anante votifi marerite'za, hagerina takahe'za Kapenium
vu'naze. Hago haninkigeno Jisasi'a zamagrama mani'narega
uhanati'ne. **18** Hagi hagerimo'a tusiza huno kranto kranto
hu'ne, na'ankure tusi'a zaho'mo atufeno egeno anara hu'ne. **19**
Ana nehige'za kuta azotareti tina vakakiza 5fu'o, 6si'a kilo mita
naza nevu'za zamagra kazana Jisasi'a hagerimofo agofetu ne-
eno votimofo tavaonte erava'o hige'za nege'za, zamagra tusi
zamanogu hu'naze. **20** Hianagi Jisasi'a anage huno zamasmi'ne,
Ama Nagragi, korera osho. **21** Anante zamagra muse nehu'za,
Agrira votifi avrentazageno, vunaku zamagesa antahi'naza
mopare ana votimo'a ame huno uhanati'ne. **22** Hagi mase'za
ko'atige'za, ana hagerimofo ankenare mani'naza vahetmimo'za
kazana magore huno votiramimpintira omne'neanki magoke
me'ne. Anampina Agri amage nentaza disaipol naga'enena
Jisasi'a mareorige'za ke'naze. Hianagi Agri'ma amage' nentaza
naga'mo'za zamagraku vu'naze. **23** Hianagi mago'a ne'one
vente rami Taberias kumateti e'za, Jisasi'a susu huteno breti
zamige'za ne'naza mopa tava'onte ehanati'naze. **24** Ehanati'za
kazama Jisasi'ene, Agri'ma amagenentaza disaipol naga'anema
omani'nage'za nege'za, zamagra osasi venteramimpi mareri'za,
Jisasinku hakre'za Kapaneamu vu'naze. **25** Hagi ome hakre'za
hagerimofo kantu kaziga Jisasima azeri fore nehu'za, amanage
hu'za Agrira antahige'naze, Hurami ne'moka (Rabbai) Kagra
nazupa amarera e'nane? **26** Jisasi'a kenonazmia anage huno
zamasmi'ne, Tamage hu'na Nagra neramasmue, tamagra
Nagriku nehakra'zana, kaguvazma hua zantekura nohakraze.

Hagi tamagra bretima nazageno tmu'ma hia zanteku nehakraze.

27 Fanane hania ne'zantera eri'zana e'oriho. Hagi fanane osu manevava hanaza ne'zanku nentahita eri'zana eriho, e'i ana ne'zana Vahe'mofo Mofavremo tamigahie. Na'ankure Nefa, Anumzamo azanko avoma'a retro huno Agri hugnare hunte'ne.

(aiōnios g166) 28 Higeno anankere zamagra anage hu'za Jisasina asmi'naze, Tagra naza huteta, Anumzamo'ma hania eri'zana erigahune? 29 Jisasi'a kenona'a huno zamasmi'ne, Anumzamofona amanahu eri'za erihogu avenesie, Agri'ma huntegeno e'nemofonte tamentinti hiho. 30 Anankere zamagra Agri asmi'naze, Kagra na'a avame'zana nehnanketa negeta, tamage huta Kagritera tamentinti'a hugahune? Kagra nankna'za hugahane? 31 Tagri tfahe'za ka'ma mopafi mana ne'za ne'naze, hu'za krente'naze, Agra monafinti breti neho huno zami'ne.

(Eks-Ati 16:4-36) 32 Anante Jisasi'a zamagrira zamasmi'ne, Nagra tamagerfa hu'na neramasmue, Moses'e'a monafinti bretia agra ontami'ne, hagi menina tamage bretia Nagri Nenfa monafinti neramie. 33 Na'ankure Anumzamofo bretia e'i ama monafinti erami'neankino, miko mopafi vahera zamasimu zamigahie. 34 Zamagra anante Jisasina asmi'naze, Ramoke, e'i ana bretia maka'zupa tmivava huo. 35 Jisasi anage huno zamasmi'ne, Nagra asimu eri bretia mani'noe, aza'o Nagrite esanimo'a aga'zankura osugahie. Hagi aza'o Nagriku amentinti hanimofona tinkura mago'ene ave'ositfa hugahie. 36 Hianagi Nagra neramasmue, tamagra ko Nagrira nage'hazanagi, tamagra tamentintia nosaze. 37 Maka vahe'ma Nenfa'ma, Nagri'ma nemria vahe'mo'za Nagrite egahaze, hanige'na Nagrite'ma esimofona Nagra vuo hu'na retufe otregahue. 38 Na'ankure Nagra monafinti erami'noe, Nagra navesi'za hunaku ome'noe, hagi

hunantege'na e'nomofo avesite erinaku e'noe. 39 Anumzamo
hunantege'na Nagra e'nomofo avesira anahu hu'ne! Nagri'ma
maka vahe'ma nami'nefintira mago'moe huno fanane osugahie,
hagina vagare knarera zamazeri otigahue. 40 Na'ankure
Nenfa avesi'zana amanahu hu'ne, maka'mo'za Nemofo nege'za
Agrite zamentinti huntesamo'za manivava zamasimu erisage'na,
vagamaresia knarera Nagrani'a zamazeri otigahue. (aiōnios
g166) 41 E'igu Jiu vahe'mo'za Agrikura ke hakare hu'naze,
na'ankure Agrama huno, Nagra ana breti monafinti erami'noe
hiazante zamarimpa haviza nehige'za ke hakare hu'naze. 42
Zamagra anage hu'naze, ama Jisasi'ma, Josefe nemofo, nefane
nereranema zanageta antahita hu'nona nepi? Nankna huno
menia monafinti Nagra e'noe huno nehie? 43 Hazageno Jisasi'a
ana kemofo nona'a, amanage huno zamasmi'ne, Tamagra ke
hakare osiho. 44 Mago'mo'a Nagritera omegahie, Nenfa'ma
hunantege'na e'nomo agu'a avazu hanigeno Nagrite esige'na,
vagare kna zupa azeri otigahue. 45 Kasnampa vahe'mo'za
amanage hu'za Avontafepina kre'naze, Ana hanigeno Anumzamo
maka'mokizmia huzmasmigahie. (Ais 54:13) Maka'mo'za Nenfa
ke nentahi'za rempi hanamo'za Nagrite egahaze 46 Mago mo'e
huno Nefana onke'ne, Anumzane mani'neno e'nemo Agrake
Nefana ke'ne. 47 Tamage hu'na Nagra neramasmue, aza'o
amentinti hanimo manivava asimura erigahie. (aiōnios g166) 48
Nagra'ni'a manivava hu'mofo bretia mani'noe. 49 Tmagehe'za
ka'ma mopafi mana nete'za zamagra fri'naze. 50 Ama'ina bretia
monafinti ermi'neankino, mago'mo'ma nesuno'a ofri manigahie.
51 Nagra kasefa mani'zamofo breti monafinti eramino'e, mago'mo
ama ana bretima nesuno'a, agra manivava hugahie, E'i ana
bretia Nagri navufa me'ne, ana navufamo maka mopafi vahe

manivava asimu zamigahie. (aiōn g165) 52 Anage nehige'za
anante Jiu vahe'mo'za nentahi'za, zamagra ke hugantigma
hu'za anage hu'naze, Inankna huno ama ne' mo'a Agra avufa
tamisigeta nenaku hunkeno nehie? 53 Ananku Jisasi'a anage
huno zamasmi'ne, Tamagerfa hu'na neramasmue, Vahe'mofo
Mofavre'mofo avufane, korane onesutma tamasimu eritma
mani'zana tamagripina omnegahie. 54 Mago'mo, Nagri navufa
neneno, Nagri kora nesimo'a manivava asimu erisanige'na,
Nagra vagare knazupa azeri otigahue. (aiōnios g166) 55
Na'ankure Nagri navufgamo'a tamage ne'za megeno, Nagri
koramo'a tamage ti me'ne. 56 Mago'mo Nagri navufa neneno,
Nagri korama nenemo'a agra Nagripi manige'na, Nagra agripi
nemanue. 57 Mani'nea Nenfa, Nagrira hunante'ne, na'ankure
Nenfa'ma mani'negu Nagra mani'noankino, aza'o Nagri'ma
nesimo'a, Nagra mani'nogu agra manigahie. 58 Ama'i monafinti
erami'nea breti me'ne. Tamagehe'za ka'ma mopafi nete'za
fri'naza ne'zana omane'ne, aza'o mago'mo'ma ama bretima
nesimo'a manivava hugahie. (aiōn g165) 59 Hagi ama naneke
zaga Kapaneamu Jiu vahe osi mono nompi (sinagog) mani'neno
Agra'a rempi huzami'nea naneke. 60 Anazanku hu'za hakare'a
Jisasi amage nentaza disaipol naga'mo'za, Ama ana nanekema
nentahi'za, ama kna'nentake naneke nehianki, iza agesa anteno
antahigahie? hu'za hu'naze. 61 Hianagi Jisasi'ma hiankere
amage'ma nentaza disaipol naga'mo'za ke hakare nehazageno
nezmageno, Jisasi amanage huno zamantahige'ne, Amama hua
nanekegu tamarimpa kna nehazo? 62 Vahe'mofo Mofavremo'ma
negesageno ko'ma mani'neregta ete marerisigetma na'a hugahie?
63 Avamu'mo asimura neramie, tavufgamo'a mago'zana eri fore
nosie. Nagrama tamagrime neramasmua kemo'a, avamu ene

kasefa mani'zane me'ne. **64** Hianagi mago'amota tamentintia nosaze. Na'ankure ese agafareti Jisasi'a zamentinti osnaza vahera, nezmageno iza'o komoru hanige'za Agri'ma ahe simofona agu'a ko ke'ne. **65** Anante Agra anange hu'ne, Ama'na agafare Nagra tamagira tamašmi'noe, mago'mo'a Nagritera omegahie, Nenfa'ma avare namisimoke'za egahie. **66** Hagi ana kema hiazanku Agri amage nentaza disaipol nagapintira ruga'amo'za atre'za, Agranena vano osu'naze. **67** E'igu Jisasi'a 12fu'a naga'a zamantahige'ne, Tamagrane natretma vunaku nehazafi? **68** Higeno Saimon Pita'a ana kemofo nona'a Agrira asamino, Rantimoka izante katreta vunaku hunkenka nehane? Kagri kemo manivava asimura vahe'mofona nemie. (*aiōnios g166*) **69** Tagra tamentinti nehuta Kagrira antahita keta hu'none, Kagra magoke Anumzamofo Ruotge' ne', hugantegenka e'nane. **70** Jisasi'a ke nona'a zamagri zamasmi'ne, Nagra 12fu'a nagara huhampri tamante'noe, hianagi mago'moka havi avamu mani'nane. **71** E'i anagema hu'neana Saimon Iskarioti nemofo Judasinku hu'ne, na'ankure 12fu'a nagapinti, agra magozmimo'ma henkama komoru huno Jisasima ha' vahe zamazampi avrezamisige'za ahesamofonku hu'ne.

7 Hagi ana nanekema huteno Galili kaziga vano nehuno, Judia kaziga vu'zankura ave'osi'ne, na'ankure Jiu kva vahe'mo'za ahenaku ke retro nehazageno ovu'ne. **2** Jiu vahe'mo'za fugagi nompi mani'neza, kave eri'za eme ante'za muse hu'za ne'za nekna kofa hu'ne. (Lev-Pri 23:34) **3** Ananku hu'za afu'aganahe'za Jisasina anage hu'za asmi'naze, amafina atrenka Judia kaziga vuge'za, kagri kamagenentaza disaipol naga'mo'za, kagrama eri fore nehana avame'zana kageho. **4** Na'ankure mago'mo'a oku'a mago'zana osugahie. Vahe'mo'ma amate

antahino keno haniema hanunka, avamezama maka mopafi
vahete kagraka'a kazeri ama hunka huge'za kageho, hu'za
hu'naze. 5 Na'ankure Agri afu'aganahe'za anazanke hu'za,
Agritera zamentinti osu'naze. 6 Anazanku Jisasi'a zamagrira
zamasmino, Nagri knamo'a kofta osu'ne, hagi tamagra amne
vano hugahaze. 7 Mopafi vahe'mo'za tmagrikura zamarimpa
aheormantegahaze. Hagi Nagrira zamarimpa ahenantegahaze,
na'ankure Nagrama huama hu'na avu'ava tmimo'a haviza hu'ne,
huazanteku ana nehaze. 8 Tamagra'tmi ana muse nezantera
mrerih, Nagra ana muse nezantera ovugosue, na'ankure Nagri
knamo'a eohanati'ne. 9 Ama ana nanekema zamasmiteno,
Galili kaziga mani'ne. 10 Hianagi Agri afu'aganahe'za ana muse
ne'zantera mareritazageno, anante Agraku anazanke huno
zamage'a mrerino, oku'a vu'ne. 11 Ana hige'za Jiu kva vahe'mo'za
Agriku ana muse ne'za neknare nehakre'za anage hu'naze.
Inantega Jisasi'a mani'nesie? hu'za hu'naze. 12 Jisasinku ana
vahé kevufinti sumi ke ohumi ahumi hu'za, Agra knare Ne'
mani'ne, nehzage'za ruga'amo'za huza a'o havi ne'kino, vahera
zamavareno havi kante nevie hu'naze. 13 Anage hzanagi
mago'mo'e huno eri amateno Agrikura osu'ne, Jiu kva vaheku
kore hu'za ana osu'naze. 14 Hianagi muse ne'zante mani'nageno
knamo'a amu'nompi egeno Jisasi'a ra mono nompi mrerino,
ome agafa huno rempi huzami'ne. 15 Rempi hunezmige'za
Jiu kva vahe'mo'za nentahi'za antri nehu'za, anage hu'naze,
Inantegati ama ne'mo'a antahi'zana eri'nesnie, avonona osu'nea
ne'mo'a? 16 Ana kemofo nona'a Jisasi'a amanage hu'ne,
Nagrama rempima huneramuana, Nagri zana omne'ne, Nagri'ma
hunantege'na e'nomofo Agri sune. 17 Aza'o agu'amo otinkeno
Anumzamofo avesi'za huku hanimo'a, rempima nehuana agra

antahino, Anumzamofonteti e'nefi, Nagrani'a navesite nehufi refko
huno kegahie. **18** Agra'a agu'areti nehanimo'a, agra avufa erira
hunaku nehie. Hagi huntenegego e'nemofo agi erira nehimo'a,
Agra tamage vahe mani'ne. Hagi mago kazaki zama'a Agripina
omane'ne. **19** Mosese'a kasegea taminefi, ontami'negeta,
mika'mota ana kasegea amagera nontazo? Tamagra nahigeta
nahe frinakura nehaze? **20** Ana vahe kevumo'za ke nona'a
asmi'naze, Kagri kagu'afina havi avamu mani'ne! Iza Kagrina
kaheku higenka nehane? **21** Hazageno Jisasi'a ke nona'a anage
huno zamasmi'ne, Nagra magoke avame'za hu'noe, anazanku
maka'mota antri hu'naze. **22** Ama ana agafare Mosese'a eit
zupa mofavre zamufa taga hihohu'ne. Na'ankure Mosesena
agripintira ome'ne. Hagi tamagri tamagehe'impinti e'ne, higetma
mani fruhu kna zupa (sabat) vahe zamufa taga nehaze. **23** Mago
ne'mo avufa mani fruhu kna zupa taga hanigetma, Mosese
kasege ruhanontagie nehaze. Hagi tamagrira tmarimpa nehe,
na'ankure Nagrama vahe'ma mani fruhu knazupa avufa eri so'e
hunte'noa zamo tmasia nevzio? **24** Amega zamufarera vahera
refko hutma keaga (kotim) huozmanteho. Hagi fatgo avu'avate
refko huta nanekea huzmanteho. **25** Anage hige'za mago'a
Jerusalemi kumate vahe'mo'za amanage hu'naze, Ama'na Nera
ahetu'ma nehakraza nepi? **26** Keho, Agra amate kevumokizmi
zamufi naneke nehiana nahige'za kea nosaze? Kva vahe'mo'za
Agrama Kraisi mani'negura, antahi'nafi? **27** Ana hu'neanagi,
tagra antahi'none igati ama nera e'neo, hianagi ina knarema
Kraisi'ma esiana, mago ne'mo'a Agra igati e'neo ontahigahie.
28 E'i anage nehazageno Jisasi'a ra mono kumapinti (tempol)
kezatino rempi hunezmino anage hu'ne, Tamagra, Nagri ene,
inantegati Nagra e'noe tarezana hago antahita, ke'naze. Hagi

Nagra navesitera ome'noe, hianagi aza'o hunantege'na e'nomo,
Agrake tamage nere, tamagra ana nera onke'naze. **29** Nagra,
Anumzamofona ke'na antahi'noe, na'ankure Nagra, Agritegati
Agra hunantege'na e'noe. **30** Anage hige'za Jisasi'na azerinaku
hu'nazanagi, mago'mo'a aze'orine, na'ankure Agri kna zahufa
ome'ne. **31** Hianagi ana vahe kevufinti hakaremo'za, Agrite
zamentinti nehu'za anage hu'naze, Mesaia'ma esuno'a, Agra
hakare'a avame'zama ama ne'moma nehia zana agatereno
hugahifi ana osugahie? **32** Hagi atru hu'naza vahe'mo'za
Jisasinku sumi ke hugantu hugma nehazage'za, Farisi vahe'mo'za
nentahi'za, vugote'naza mono kva (Pristi) vahe'mo'zane Farisi
vahe'mo'za, Jisasi azerihogu ra mono nonte kegava hu'naza
vahe (tempol gats) huzmantage'za vu'naze. **33** Anazanku
Jisasi'a zamasmi'ne, Osi'a kna tamagrane manite'na, ete Agrama
hunantege'na e'noa Netega Nagra vugahue. **34** Tamagra,
Nagrikura hakre gahazanagi, Nagria nagefore osugahaze.
Hagi Nagrama umani'surega tamagra ovugahaze. **35** Jiu kva
vahe'mo'za zamagra zamagra ke hugantu hugma nehu'za
anage hu'naze, Inantega Agra vnigeta Agrira onkeku hunkeno
nehie? Agra tatreno Jiu vahe'mo'za Griki umani'naza vahe ene,
Griki vahe rempi huzamiku Jisasi'a nehio? **36** Inanknahu ke
Agra huno, Tamagra, Nagrikura hakre'gahazanagi, Nagria nage
fore osugahaze, hagi Nagrama mani'nesurega tamagra vuga
osu'naze huno nehie? **37** Ne'za nene'za musenkase nehazageno,
vagare kna zupa ran knagino, Jisasi'a otino kezatino anage
hu'ne, Tinku avesinimofona, atrenkeno Nagrite eno eme neno.
38 Anumzamofo avontafepima kre'nere, Aza'o, Nagrite amentinti
nehanimo'a negahie. Agri agu'afinti manivava timo hageno
evugahie. (Ais 58:11) **39** Hianagi Agrama amanahu kema

hu'neana Ruotge Avamuku hu'ne, Agrite zamentinti hanamo'za erisagu hu'ne, na'ankure Jisasi'a ra agi e'orineno, Ruotge Avamura eoramigeno hu'ne. **40** Hagi ana kema mago'a vahe'mo'za nentahi'za, amanage hu'naze, Ama'i tamage huno kasnampa ne' mani'ne hu'za hu'naze. **41** Ruga'amo'za anage hu'naze, Ama'i Kraisi'e nehazageno, ruga'amo'za hu'za, Galili kazigatira Kraisi'a omesnifigure? **42** Anumzamofo avontafe'mo huno, Deviti nagapinti Betlehemia Kraisi'a fore hugahie. Deviti mani'neno hu'nea kumateku osu'nazo? (Sam-Zga 89:3-4, Maik 5:2) **43** Ana vahe kevufinti Agriku hu'za antahi'zazamifi refko hu'naze, **44** mago'amo'za Jisasina azerinaku hu'nazaranagi, mago'mo'e huno aze'orine. **45** Anante ra mono nonte kva vahe'mo'za azage'za, vugota pristi kva vahe'ene Farisi vahe'mo'za anage hu'naze, Nahigetma Jisasina avretma ome'naze? **46** Ana ra mono nonte kva vahe'mo'za kenona'a hu'za, Mago ne'mo'a kora higeta ontahi'nona naneke, ama ne'mo'a nehie. **47** Farisi vahe'mo'za kenona zamirera amanage hu'za zamantahige'naze. Tamagri'enena anazanke huno havi kante tmareno nevifi? **48** Hagi mago rankva vahe'motafi, Farisi vahe'mota, Jisasintera tamentintia nehumpi nosu'ne? **49** Hianagi ama vahe kevua, kasegema ontahi'nagu havizamofo agu'afi mani'naze. **50** Hagi Nikodimasi'ma kenagepi Jisasinte vu'nea kva ne'mo, amu'no zamifi mani'nereti amanage huno zamasmi'ne. **51** Tagri kase kemo'a mago nera refko huno kegaga hunonteaniki, pusante agripinti na'a hu'nesie kea eriteno, tamagefi havige huteno keaga huntegahie. (Diu-Kas 17:6) **52** Zamagra kenona'a asmi'naze, Kagra anazanke hunka Galili kazigati e'nampi? Anumzamofo avon tafepi hamprinka ko, mago kasnampa (profet) nera Galilia

fore osugahie, hu'za Nikodimasi asmi'naze. **53** Ana nanekema hute'za, mago mago'mo'a noma'arega vuno eno hu'ne.

8 Hianagi Jisasi'a Olivi Agonare vu'ne. **2** Hagi nanterame otino Agra ra mono kumapi eteno ege'za, maka vahe'mo'za Agrite ageno, Agra tamumanino agafa huno rempi huzami'ne. **3** Kasegere ugagota hu'naza vahe'mo'zane, Farisi vahe'mo'za ru vene monko'za hu'nea a' avare'za, vahe'mokizmi amu'nompi eme azeri oti'za, **4** zamagra anage hu'za Jisasina asmi'naze, Rempi hurami ne'moka, ama a'mo'a monko'za nehigeta keta eri fore hu'none. **5** Mosesese kasegemo'a huramino, monko'za hu'nesia a'nea, have knonu ahe friho hu'ne. Hagi Kagra na'ane hunka hugahane? **6** Zamagra anagema hu'nazana Jisasi revatga hu'za naneke huntenaku, kema huntesaza agafa'a keza eri fore hunaku hu'naze. Hianagi Jisasi'a kepri huno azankonu mopare avon kre'ne. **7** Hianagi zamagra kazigazi hu'za antahi'negageno, Jisasi'a otino amanage huno zamagrira zamasmi'ne, Aza'o amu'nontamifi'ma kumi'a omne'nenimo, pusanteria havea erino aheno. **8** Ete pri huno mago'ane azankonu mopare avon kre'ne. **9** Ana naneke zamagra nentahi'za, esera ranra vahe atirami'za nevazageno, ana amage'a magoke magoke'mo'za atirami'za vutere hu'za vuhna hazageno, Jisasi'ene ana a'ene zanagrake anampina mani'na'e. **10** Anante Jisasi'a otino anage huno ana ara asmi'ne, Kaheku'ma haza vahera iga vaze? Magora iza ke naneke hugantegahie? **11** Higeno ana a'mo'a anage hu'ne, Ramoka mago'mo nanekea hunonante, anante Jisasi'a huno Nagranena nanekea hunogantoe. Kagra nevunka, menintetira agafa hunka mago'ene kumira osuo. **12** Anante Jisasi'a mago'ene anage huno zamasmi'ne, Nagra'ni'a ama mopamofo Masa mani'noe, aza'o namge'ma esimo'a hanimpina vano osugahie.

Hianagi asimu eri Masa erigahie. **13** Nehigeno Farisi vahe'mo'za
anage hu'za asmi'naze, Kagrama kema nehanana, Kagra
kagenke huama nehane, Kagrama huama nehanana tamagea
nosane. **14** Hazageno Jisasi'a anankemofo nona'a amanage
huno zamasmi'ne, E'ima Nagrama ke huama Nagragu'ma
nehuana, Nagri nanekemo'a tamage, na'ankure Nagra igati e'na,
ete'na iga vugahuo, Nagra antahi'noe, hianagi Nagra igati e'na,
iga Nagra vugahuo tamagra ontahi'naze. **15** Amega zamuzmate
tamagra vahera refko nehaze, Nagra mago vahera menina
refko nosue. **16** Hianagi Nagrama mago'mofo refko huntegahue
hanuana, Nagrama troma hanua antahi'zamo'a fatgo hugahie,
na'ankure Nagrakera refko nosue, hianagi Nagrane hunantege'na
e'noa Nenfa ene refko nehu'e. **17** Tamagri kasegefina anage
huno krente'ne, tare vahe tremoke ke'ne'na'a zankuma (witnes)
hana'ana tamage. (Diu-Kas 17:6, 19:15) **18** Nagra tamage ke
huama Nagrani'agu nehugen, hunantegen e'noa Nenfa'a
Nagriku tamage huno huama nehie. **19** Zamagra amanage
hu'za asmi'naze, Negafa'a iga mani'ne? Jisasi'a kenona'a
zamasmi'ne, Nagrira nageta antahita osu'nazankita Nenfana
antahita keta osu'naze. Hagi tamagrama Nagri'ma nage'anke
resuta, anahu kna hutma Nenfana kegahaze. **20** Ama nanekema
hu'neana ra mono nompi zagoma nentazare mani'neno, Jisasi'a
rempi hunezmige'za mago'mo'a aze'ori'ne, na'ankure Agri kna'a
ome'ne. **21** Anante ete mago'ene anage huno zamasami'ne,
Nagra tamatre'na vanugeta Nagrikura hakregahaze, tamagra
kumitmifi frigahaze, Nagrama vanurega tamagra ovugosaze. **22**
Hige'za Jiu kva vahe'mo'za anage hu'naze, Agra huno Nagrama
vanurega, tamagra ovugahaze huno'ma nehiana agrazante ahe
fri'naku nehifi? **23** Jisasi'a anage huno zamasmi'ne, Tamagra

amafinti vahe mani'naze, Nagra anagamutire, tamagra ama
mopafi vahe mani'naze, Nagra ama mopafi vahera omani'noe.

24 E'ina hu'negu, kumitamifi tamagra frigahaze hu'na Nagra
neramasmue, na'ankure tamagrama ama kema nehia Nera
ama'ne, hutma tamentintima osnazana, tamagra kumi tamifi
frigahaze. (Eks-Ati 3:14, Jon 8:28, 8:58, 13:19, 18:5-8) **25** Hige'za
zamagra anage hu'za Jisasina asmi'naze, Kagra izage? Jisasi'a
anage huno zamasmi'ne, Na'ane hu'na ese agafarera Nagra
tmasami'noe? **26** Nagra rama'a zanku keaga nehu'na tamagrira
refko huramante'naku nehue. Hianagi hunantege'na e'nomo'a
tamage Nere, Agripinti antahi'noa ke, Nagra ama mopafi vahera
nezmasmue. **27** Nefanku Agra nehige'za zamagra antahi ama
osu'naze. **28** Anante Jisasi'a anage hu'ne, Tamagrama Vahe'mofo
Mofavrema azeri sgama hanutma, tamagra antahi ankeretma
Agra ama ana Nere hugahaze, Nagra'ni'a nagesafintira nosuanki,
Nenfa'ma rempi hunami'nea ke'age nehue. **29** Anumzamo
hunantege'na e'nomo, Nagrane nemanie, Agra natrege'na
Nagrakera nomanue. Na'ankure Nagrama, Agri avesizama
huvava huazankura, Agra muse nehie. **30** Anagema nehige'za
rama'a vahe'mo'za Agrite zamentinti hu'naze. **31** Jisasi'a Jiu
vahe zamentinti hu'namokizmia amanage huno zamasmi'ne,
Nanekeni'a miko knama erizafa huvava hanuta, tamagra Nagri
namage ante disaipol naga manigahaze. **32** Ana nehutma
tamagra tamage naneke antahisnageno, ana tamage nanekemo
katufe tmantegahie. **33** Zamagra kenona'a anage hu'naze,
Tagra Abrahamu agehete, magore huta mago netera kazokzo
eri'zana e'ori'none, Kagra nahigenka katufe tmantesageta amne
vugahaze hunka nehane? **34** Jisasi'a anage huno zamasmi'ne,
Tamagerafa hu'na tamagrira nermasmue, maka kumi'ma nehaza

vahē'mo'za kumi'mofo kazokzo vahē mani'naze. **35** Kazokzo
vahē'mo'a nōmpina manivava nosie, hanki mofavremoke
nōmpina manivava nehie. (aiōn g165) **36** E'inahigu Nemofo'ma
katufe tmantena knare hutma mani so'e hugahaze. **37** Nagra
antahi'noe, tamagra Abrahamu ageheta mani'nazanagi' Nagri
nahe frinaku kanku nehakaze, na'ankure Nagri nanekemo'a
tamagri tamagu'afina omne'ne. **38** Nagrama kema nehuana,
Nenfa'ene mani'nena ke'noa zanku neramasmue, tamagrama
nehzana neramafampinti'ma antahinazaza nehaze. **39** Zamagra
kenona'a Jisasina anage hu'za asmi'naze, Abrahamu'a tagri
nerfa'e, Jisasi'a anage huno zamasmi'ne, A'o, tamagrama
Abrahamu mofavrema mani'nenutma Abrahamu hu'nesia avu'ava
hugahaze. **40** Nagra tamage naneke Anumza'mofompinti
antahi'noa ke neramasmue, hianagi Nagrira nahe'za nehaze.
Abrahamu'a e'inahura osu'neaza tamagra hunaku nehaze.
41 Tamagra neramafa avesiza nehaze. Zamagra kenona'a
anage hu'naze, Tagra savri avu'avatetira fore osu'none, tagrira
magoke Nerfa, Anumzana Agrake mani'ne. **42** Jisasi'a anage
huno zamagrira zamasmi'ne, Anumzamo'ma tamagri nerfa'ma
mani'neasiana, tamagra Nagrira navesi nantasine, na'ankure
Nagra efore hu'noana, Anumzamo hunantege'na e'noe. Nagrani'a
navesitera ome'noe, hagi Anumzamo hunantege'na e'noe. **43**
Nahigeta kema hua nanekea antahi amara nosaze? Na'ankure
Nagrama hua nanekea antahi ama nosazagu, ana nehaze.
44 Tamagra Sata mofavre naga mani'naze, ana hunetma
nermafa'ma avenesia avu'avaza nehaze. Ese agafare vahē ahe
fri'nea ne' mani'neno, tamage nanekemofona amage nonte.
Na'ankure tamage kea agripina omne'ne. Kema hifina, havigege
nehie, agra avu'ava zanku kea nehie. Na'ankure havige ne'

mani'neno, havigemofo nef'a'e. 45 Hianagi na'ankure Nagra tamage nehugetma, tamagra nanekeni'arera tamentintia nosaze.

46 Amama, mani'nafitira izaga Nagrikura kumi hu'ne hunka nanekea hunantegahane? Nagrama tamage nehusugetma, nahnidetma tamentintia osugahaze? 47 Aza'o Anumzamofo naga mani'enimo'a, Anumzamofo naneke nentahie, ama'na agafare tamagra nontahize. Na'ankure tamagra Anumzamofo nagara omani'naze. 48 Jiu vahe'mo'za anage hu'za kenona'a asmi'naze, Hufatgo huta negasmune, Kagra Sameria vahe mani'nankeno hankromo kagu'afi fre'nefi? 49 Jisasi'a anage huno kenona hu'ne, Nagrira nagu'afina hankrora omani'ne, hianagi Nagra Nenfa ra agi nemugetma, tamagra Nagrira nazeri fenka nenatra'ze.

50 Nagra ra nagi erinakura nosuanki, Anumzamo Nagri nagi'a eri ra nehuno, naneketi refko hurantegahie. 51 Tamagerfa hu'na neramasmue, Keni'a antahino amagema nentemo'a agra ofrigahie. (aiōn g165) 52 Jiu vahe'mo'za Jisasinku anage hu'za asami'naze, Menina tagra antahi'none, havi hankromo kagu'afi mani'ne. Abrahamu'a fri'negeno, kasnampa vahe'mo'zanena ana zanke hu'za fri'nazagenka, kagra anage nehane, iza'o nanekeni'a avaririsimo'a, agra ofrigahie hunka nehane. (aiōn g165)

53 Abrahamu nerfa'a ko fri'neanki, Kagra agtere'nano? Kasnampa vahera ko fri'nazanki! Kagra kagesa antahi'nana aza'ne hunka nehane? 54 Jisasi'a anage huno zamasmine, Nagra nagi erira hanuana, ana Nagimo'a amane'za segahie. Hianagi Nenfa'a Nagri nagi erira nehideta, Agrikura tamagra hutma, Agra, tagri Anumzane nehaze. 55 Tamagra Agrira antahinomize, hianagi Nagra antahi'na ke'na Agrira hu'noe, hankina Nagrama hu'na, Agrira antahi'na kena osu'noe hanuana, havige hu'na tamagrikna hugahue, hianagi Nagra Anumzamofona antahina kena hu'nena,

ke'a erizafa nehue. **56** Neramafa Abrahamu'a Nagri kna kenaku muse nehuno, keteno tusi'a muse hu'ne. **57** Jiu vahe'mo'za Jisasinku anage hu'naze, Kagra 50'a kafuzage osu'nane, Kagra Abrahamuna ke'nano? **58** Jisasi'a anage huno zamasmi'ne, Tamagerafa hu'na neramasmue, korapa Abrahamuna kase onte'negena Nagra mani'noane. **59** E'inagema hiazanku have eri'za mate vuza ahe'za hu'naze. Hianagi Jisasi'a ra mono nompinti (tempol) oku'a atiramino fegi'a vu'ne.

9 Hagi anama Jisasi'a vugatereno nevuno, mago nera reranku'afinti avu asuhu'nea ne' kasente'nea omege'ne. **2** Agri'ma amage nentaza disaipol naga'mo'za antahige'za, Rempi hurami ne'moka (Rabbai) aza kumira hu'negeno ama avu asuhu nera kasente'ne, agra'afi nererapi nefae? **3** Hazageno Jisasi'a amanage huno kenona hu'ne, Ama ne'mo kumira osigeno, nerera nefae a kumira osu'ne. Hu'neanagi e'i zama fore hu'neana Anumzamofo eri'zamo agripinti eriama hanigu e'inahu hu'ne. **4** Hunantege'na e'noa ne'mofo eri'zana, tagra zogema me'nesire Agri eri'zana erisune. Hanima esigeno'a mago vahe'mo'a erizana e'origahie. **5** Nagrama ama mopafima emani'noa kna'afina, Nagra ama mopafi vahe'mofo Tavire. **6** Anage Agra huteno, mopare avetu heno eri igri huno, higogna huteno, ana mopa tarega avure frenenteno, **7** amanage huno asami'ne, Vunka Siloamu tirupi ti omefro. (Siloamue hu'nea kemofo agafa'a, huntegeno vu'ne hu'ne.) Ana hutegeno vuno ti ome freteno, avurga hari higeno mika'zana negeno e'ne. **8** E'ina hige'za, ana ne'mofo tavaonte nemani'za vahe'mo'zane, ana ne'mo ke'zatino meme nehige'za negaza vahe'mo'zanena amanage hu'naze, Ama ne'mo mani'neno kezatino meme nehigeta negona nepi ru nere? **9** Mago'amo'za anage hu'naze, Ama ana nere nehazageno,

mago'amo'za hanaveti'za anage hu'naze, A'o agra ana ne'
kna'nehie. Ana ne'mo huno, Nagra ana ne' mani'noe, huno
zamasmi'ne! **10** Zamagra anage hu'za antahige'naze, Ihankna
hankeno kavurga eri hari hugante'ne? hu'za agenoka hu'naze.
11 Agra ana ke'nona anage hu'ne, Mago ne'ma Jisasi'e nehaza
ne'mo, mopa erino tinuti eri igri huteno navurgare frenanteno,
amanage huno nasm'i'ne, Siloamu vunka tirupi omefro hige'na,
vu'na tina ome frogeno, navu ragamo'a hari hige'na navua
ke'noe. **12** Hige'za zamagra ana ne'ku anage hu'naze, Kavuma
eri so'e hu'nea nera inantega mani'ne? Hazageno avuma azeri
harima hunte'nea ne'mo'a, Nagra onke'noe hu'ne. **13** Hagi
anama avu asu hu'negeno azeri hari hu'nea nera, avare'za
Farisi vahete vu'naze. **14** Anankna mani fruhu kna (sabat) zupa
Jisasi'a hapara erino avurga eri hari hu'negeze. **15** Anante Farisi
vahem'o'za mago'ene antahige'za, Nankna hankeno kavumo'a
hari hu'ne hazageno, ana avuma eri so'e hunte'nea ne'mo anage
huno zamasmi'ne, Agra hapa erino navure frenantege'na, ti ome
frogeno navumo'a hari hige'na ke'noe. **16** E'na hu'negu mago'a
Farisi vahem'o'za anage hu'naze, E'i ana nera Anumzamo'a
huntegeno ome'ne, na'ankure mani fruhu kna ana ne'mo'a
kegava nosie. Hianagi mago'amo'za anage hu'naze, inankna
huno kumi ne'mo'a amanahu kaguvazana erifore hugahie?
Anage nehu'za keha're'za amu'nompinti vahera refko hu'naze.
17 Ana hute'za mago'ene avuma asu hu'negeno'ma, eriso'e
hu'nea nera antahige'za, na'ane hunka kavurgama eriso'e
hu'nea nekura nehane? Hazageno ana ne'mo'a huno, Agra
kasnampa nere. **18** Jiu kva vahem'o'za, avurga asu osu'nea neku
nehaze, nehu'za zamentinti osu'za, ana ne'mofo nererane nefane
zanagi hu'naze. **19** Zamagra nererane, nefane zanantahige'za

avusuhunegeta kasente'noe huta huna'ana ama'i mofavrefi?
Hanki inankna huno menina avua nege? **20** Nererake, nefake
kenona'a anage hu'na'e, Tagra antahi'no'e, ama tagri mofavre,
avu asu hu'nea kasente'no'e. **21** Hianagi tagra antahita keta
osu'none, menima avuma negea'zane, aza avua eri so'e
hunte'neo ontahi'no'e. Agra ra vahe mani'neanki, antahigenkeno
agra'a tamasamino. **22** Nererake nefakea amanahu kema
hu'na'ana, na'ankure Jiu mono kva vaheku koro huke anage
hu'na'e. Na'ankure Jiu mono kva vahe'mo'za ke retro hu'za,
mago'mo Jisasinku Kraisi'e huno, huama hanimofona, Jiu
mono nompinti (Sinagog) ahe natigahune, hu'naze. **23** Ana ke
agafare nererake nefakea huke, agra ra vaheki agri antahigeho
hu'na'e. **24** Ete mago'ene, ko'ma avu asuhu'nea ne' agi hu'za
asmi'naze, Anumzamofo avure tamage hunka huo, kavu eri
hari hu'nea nera, kumi ne' mani'negeta tagra antahi'none. **25**
Hazageno ana ne'mo'a anage hu'ne, nagra ontahi'noe Agra
kumi ne' mani'neo, magoke'zama nagra antahi'noana, navua
asu hu'neane, menina navu negoe. **26** Anante Farisi vahe'mo'za
asami'za, Jisasi'a nankna'za kagrira hugante'ne? Inankna huno
Agra kavurga eri hari hu'ne? **27** Avuma eri harima huntenea
ne'mo anage hu'ne, nagra ko tama smi'noanagi ontahi'nazo.
Nahigetma ru'ene antahinakura nehaze? Tamagra nena Agri
amage'ante disaipol naga maninaku nehazafi? **28** Zamagra ana
kemofo nona'a knara kefinti fra vazinte'za, kagra Agri amage
nentana disaipol ne' mani'nananki, tagra Moses amage nentona
vahe mani'none! **29** Anumzamo Mosesena kea humigeta tagra
antahi'none, hianagi ama'i nera igati e'neo, tagra ontahi'none. **30**
Ana ne'mo anage huno zamasmi'ne, Ama ruzahu'zama hu'nea
nera, Agra igati eno, navurga eri hari hige'na ke'noe, tamagra

ontahi'naze! **31** Tagra antahi'none, kumi vahera Anumzamo'a
antahi'nomie, hianagi iza'o mono hunenteno Agri amage' ante
fatgo hani'mofona, Anumzamo antahiamigahie. **32** Mona mopa
fore hu'nea knareti, avu asu hu'nea vahera mago ne'mo'e
huno avurga eri hari hu'nea kea ontahi'none. (aiōn g165) **33**
Hazageno ama ne'ma Anumzamofontegatima ome'nesuno'a,
Agra mago'zana osugahie. **34** Hige'za Farisi vahe'mo'za anage
hu'naze, Kagira miko kumi'zampi kasegante negenka, tagri rempi
hurami'za nehano? Anage nehu'za Jiu vahe mono nompintira
(Sinagog) avazu hu'za, atufe atrageno vu'ne. **35** Hagi ana ne'ma
avazuhu megi atraze kea Jisasi'a nentahino, ome kefore huno
Agra amanage hu'ne, Kagra Vahe'mofo Mofavrere kamentinti
nehano? **36** Higeno ana ne'mo'a anage hu'ne, Agra iza'e ramoka,
nagrama Agrite namentinti'ma hanuana? **37** Jisasi'a anage
huno asmi'ne, Kagra Agrira negane, e'i ana ne'mo kagri'enena
keaga nehie. **38** Avuma eri hari hu'nea ne'mo anage hu'ne,
Ranimoka nagra namentinti hue, nehuno anante mono hunte'ne.
39 Jisasi'a amanage hu'ne, Vahe refko hunaku ama mopafina
ermi'noe, e'ina hanugenzo zamuma nonke'samo'za kesageno,
zamuma negesa'mokizmi zamumo'a asu hugahie. **40** Mago'a
Farisi vahe Agrane anante mani'namo'za, ana naneke nentahi'za
anage hu'za Jisasina antahige'naze, Tagri tavumo'enena asu
hu'nefi? **41** Jisasi'a anage huno zamasmi'ne, Tamavurgamo asu
hu'neasina kumi'tmia omne sine, hianagi tamagra huta tavua
negone nehazagu, kumi'mo'a tamagripina me'ne.

10 Jisasi'a mago'ene amanage hu'ne, Nagra tamagerafa
hu'na neramasmue, iza'o sipisipi keginamofo kafanteti agu'afi
uofreno, ruganteti taka'uresimo'a, kumzafa vahe mani'neno,
vahe'za avazu hugahie. **2** Hianagi iza'o kahantegati ufresimo'a

sipisipi kva fatgo mani'ne. **3** Kafante kva ne'mo agrira kafana anagintegeno, sipisipimo'za agri ageru nentahize. Ana afu kva ne'mo Agri'a sipisipimokizmi zamagi neheno, zamavareno vugota nehie. **4** Agrama sipisipi afu'zaga'ama zamavare atru huteno, vugoteno nevige'za, amage' avriri'za nevze. Na'ankure zamagra agerura antahi ani' nehu'za amage nevaze. **5** Onke'nesaza vahera, tamage hu'za zamagra amagera ovugahaze. Hagi atre'za fregahaze, na'ankure zamagra ontahi'nesaza agerutera kore hugahaze. **6** Hagi Jisasi'a fronka kefinti zamasmineanagi, zamagra nankna kema Agrama zamasmina, ana kemofo agafa'a antahi amara osu'naze. **7** Ana hazageno Jisasi'a mago'ene zamasmino, Tamagerfa hu'na tmagrikura nehue, Sipisipimokizmi kafana Nagra'ni'a mani'noe. **8** Ko'ma egote'za e'naza vahe'mo'za, kumza vahekiza, vahe'za avazu hugahaze. Hianagi sipisipimo'za zamagerura ontahigahaze. **9** Nagra'ni'a kafana mani'noe, iza'o Nagri'teti efresimo'a knare huno mani'neno, efreno atiramino nehuno knare tra'zankura hakregahie. **10** Hanki kumzafa vahe'ma ne-eana kumzafa seno, ahe nefrino, eri haviza hunakuke egahie. Nagrama e'noana zamagra zamasimu e'neri'za, ana asimu eri avitetfa hanazegu e'noe. **11** Nagra'ni'a knare sipisipi kva ne' mani'noe, Knare sipisipi kva vahe'mo'a Agra'a sipisipireku huno asimura atregahie. **12** Zago erinakuma avrema antesigeno eri'zama erisia ne'mo'a, sipisipi kva omanino sipisipi nef'a'a omani'neankino, kesigeno afi krama esigeno'a, sipisipia atreno fresigeno, afi' kramo (wulf) zamagene reno zamahe panani hugahie. **13** Na'ankure agrira zago erizante avrente'nazankino sipisipigura agesa ontahino, agra zamatreno fregahie. **14** Nagra'ni'a knare sipisipi kva mani'noe, Nagra sipisipi nagani'a ke'na antahi'na huge'za, zamagra Nagrira nage'za nantahi'za

hu'naze. **15** Anahukna huno Nenfa'a, Nagrira nageno antahino hige'na, Nagra Nenfana age'na antahi'na hu'noankina, Nagra nasimura sipisipimokizmire atregahue. **16** Ruga'a sipisipini'a ama kegina agu'afina omani'naze, Nagra anahu kna hu'na zamaresuge'za, nagerura nentahi'za, zamagra magoke afu kevu hu'za mani'nageno, magoke afu kva vahe manigahie.

17 Ama'na agafare Nenfa'a avesi'nenante, na'ankure Nagra nasimura atretna, hagi ete nasimura erigahue. **18** Mago'mo'a nasimura Nagripintira eriotre'gahie, hianagi Nagra'ni'a navesite antregahue. Nagrira hanaveni'a me'neankina antete'na, Nagripi hanavea me'neankina ete nasimura erigahue. Ama'na kea Nenfa huhanavetino hunanteno huo hu'neankina hugahue.

19 Hagi anagema hiazanku, Jiu vahe'mo'za zamagra'zmi mago'ene tarefi refko hu'naze. **20** Rama'amo'za hu'za, Kefo hankro'mo agu'a fre'negeno negi neneanki, nahigetma naneke'a nentahi'ze? **21** Mago'amo'za anage hu'naze, kefo hankro'mo agu'afi fre'nea vahe nanekea omne'ne. Kefo hankromo'a avu asuhu vahera erihari hanigeno kegahifi, onkegahie? **22** Anante mono noma renagi'za Anumzamofo ami'naza knagu antahimi'za ne'za nenazankna Jerusalemi kumate fore hu'ne.

23 Zasi ko atu knafi, Ra mono kumapi Jisasi'a, Solomon agire asamare'naza no kinte'nafi vano hu'ne. **24** Jiu kva vahe'mo'za Jisasina eme regagi'za, anage hu'za asmi'naze, Nama'a kna kagra tazeri antesanketa kvega antegahune? Kagra Kraisiga mani'nenunka huama hunka amne tasmio. **25** Hageno Jisasi'a kenona zamire anage huno zamasmi'ne, Nagra ko tamasmi'nogetma, tamagra tamentinti nosaze, mika eri'zama Nenfa agifima enerua eri'zamo, Nagrira nazeri ama nehie. **26** Hianagi tamagra tamentintia nosaze, na'ankure Nagri sipisipia

tamagra omani'naze. 27 Nagri sipisipimo'za nagerura nentahize, hige'na Nagra zmagena antahina hu'noge'za, zamagra Nagrira namage neaze. 28 Nagra manivava zamasimura nezmue. Hagi zamagra fanene osugahaze. Mago ne'mo'a nazampintira eri hanareno ozmavregahie. (aiōn g165, aiōnios g166) 29 Nenfa'ma ana vahe nami'nemo, maka zampina ra mani'neankino, mago'moe huno Nenfa azampintiraohanaregahie. 30 Nenfa'ene, Nagranena magoke mani'no'e. 31 Huno nehige'za Jiu kva vahe'mo'za ahe frinaku ru'ene havenkno eri'naze. 32 Hagi Jisasi'a amanage huno zamasmi'ne, Nenfantegati knare eri'zana hakare'a hurmeri'noanki, ama anampintira ina erizanteku hutma have knonura naheku nehaze? 33 Jiu kva vahe'mo'za ke nona'a anage hu'naze, knare eri'zama eri'nana zantera tagra have knonura onkahe'gosune, hianagi Anumzana huhaviza nehunka, kagra amne vahe'moka, Anumza mani'noema hanazanku kaheku nehune. 34 Jisasi'a kenona'a zamasmi'ne, Tamagri kasegefina na'ane huno korapara krente'ne, Anumzamo'a huno, tamagra tamia anumza mani'naze hu'ne? (Sam-Zga 82:35) 35 E'ina hu'negu korapara Anumzamo'a vahetaminkura huno, tamagra anumzantamine hu'neankino, (Anumzamofo avontafe pi krente'naza kemo'a fuotgigahie). 36 Nenfa'a nazeri ruotge huteno, hunantege'na ama mopafi e'nogu, tamagra Anumzamofo huhaviza hunentane huta Nagrikura nehaze, na'ankure Nagra hu'na Anumzamofo mofavre mani'noe huazankuro? 37 Nagrama Nenfa eri'zama e'norisuana, tamagra Nagritera tamentintia osiho. 38 Hianagi Nagra eri'zama'a e'nerugetagi, tamagra tamentintia Nagrikura nosaze, eri'zama eruazante negetma tamentinti hiho, e'inama hanuta keta antahita hanazana, Nagra Nenfampi manugen, Nenfa'a Nagripi mani'ne hugahaze. 39 Mago'ene azerinaku nehazageno, zamatreno

rufanene hu'ne. 40 Jisasi'a eteno Jodani ti takaheno Joni'ma mono ti ese'ma frezmante'nea kaziga vuno, anantega umani'ne. 41 Hakare vahe'mo'za mani'nerega uhanati'za amanage hu'naze, Joni'a mago avame'za osu'ne, ana hu'neanagi Joni'ma ama ne'ku'ma maka kema hu'neana tamage hu'ne. 42 Anage hige'za, anante rama'a vahe'mo'za Jisasinte zamentinti hu'naze.

11 Hagi mago nera Lasarusi'e nehaza ne'mo'a kri eri'ne. Agra Betanitire, Maria'ene nenunkna Matake neman'i'a kumate nere. 2 Maria'a mananentake masavenu Ramofo agare frenteteno, anu azokateti ana agama eri ho'mu hu'nea a'mofo nesaro kria eri'ne. 3 Ana nanunkna'moke Jisasintega kea atrenteke, anage hu'na'e, Ramoka antahio, Kagrama avesima nentamo'a kri eri'ne. 4 Higeno Jisasi'a ana ke nentahino, anage hu'ne, Ana krimo'a fri kantera avreno ovugahie, na'ankure Anumzamofo ra agi ami'nigeno, ana zantetira Anumzamofo Mofavremo ra agi erigahie. 5 Jisasi'a Matane nenunknane, Lasarusine avesizamante'ne. 6 Hianagi Lasarusi kri eri'ne nanekema hazageno nentahino'a, tare zage'gna anama mani'nea kumate mani'ne. 7 Ana huteno amage'hentaza disaipol nagaku huno, Judia kaziga ete vanune huno zamasmi'ne. 8 Hige'za amage nentaza disaipol naga'mo'za anage hu'za asmi'naze, Rempi hurami ne'moke (Rabbi), Jiu kva vahe'mo'za mensintfama have knonu kahenaku nehzarega, Kagra ete vu'za nehano? 9 Jisasi'a kenona zamire anage hu'ne, 12fu'a kna (aua) mago zagefina omane'hefi? Mago vahe'mo'ma zage ferupima vanuno'a agra traka osugahie, na'ankure ama mopafi masa agra nege. 10 Hu'neanagi mago'mo hanimpima vanuno'a ome traka hugahie, na'ankure masa agripina omne'ne. 11 Anagema huteno, mago'ene Jisasi'a anage hu'ne, Ronetimo Lasarusi'a avu

mase'ne, hianagi menina Nagra ome azeri otigahue. **12** Hige'za amage'nentaza disaipol naga'mo'za anage hu'naze, Ramoka, agra avu'ma mase'nesuno'a, knare hugahie. **13** Hagi Jisasi'ma hu'neana, Lasarusi'a ko fri'nea zanku hu'neanagi, zamagrama antahi'zana amne avu mase'nea zanku nehie hu'za antahi'naze. **14** Jisasi'a anante huama huno zamasmi'ne, Lasarusi'a ko fri'ne, **15** Tamagri tamaza hanigu Nagra muse nehu'na, ana kumatera omani'noe, e'ina hanigeta tamagra tamentinti hugahaze. Hianagi erinketa agritega vamneno. **16** E'ina hianagi Tomasi (Didimas'i'e hu'neana kugavezare) nehaza ne'mo, magoka Jisasi amage nentaza disaipol nagaku huno, tagranena erinketa vuta Agrane ufri'maneno hu'ne. **17** Hagi Jisasi'a ana kumate uhanatino, ome antahiana Lasarusina ko havegampi asentageno, 4'a zagegna evu'ne. **18** Betani kumara Jerusalemi tava'onte 3 kilo mitanaza me'ne. **19** Rama'a Jiu vahe'mo'za e'za Matane Maria kiznia, neznasaro fri'negeza e'za zname rentinti hu'naze. **20** Jisasi ne-e hia kema Matama nentahino, kantega ome kenaku vu'ne. Hianagi Maria'a nompi mani'ne. **21** Mata'a, Jisasina ome keno anage huno asmi'ne, Ramoka, Kagrama amafima mani'nantesina, nensaro Lasarusi'a ofrisine. **22** Hianagi meninena nagra antahi'noe, na'anku'ma Anumzamofo antahige'sankeno'a, Anumzamo'a anazana kamigahie. **23** Jisasi'a kenona huno asmi'ne, Negsaro Lasarusi'a ete otino asimu erigahie. **24** Mata'a amanage huno Jisasina asmi'ne, Nagra antahi'noe, henkama otisaza zupa vagare knarerera, agra otino asimu erigahie. **25** Jisasi'a amanage huno Matana asmi'ne, Fripinti otino asimu erino mani'zamofo agafa'a Nagra mani'noe, iza'o Nagrite'ma amentinti hanimo'a, frigahianagi asimu erino manigahie. **26**
Maka vahe'mo'za mani'neza Nagrite zamentinti hanazana,

ofri'tfa hugahaze. Amama nehua kegura kagra kamentintia
nehampi? (aiōn g165) 27 Higeno Mata'a anage huno asmi'ne, Izo
Ramoka, nagra namentinti hue, Kagra Kraisige, Anumzamofo
mofavre'moka Kagra ama mopafi erami'nane. 28 Mata'a anage
huteno, vuno nenunkna Mariana sumi huno agesafi asami'ne,
Hurami ne'mo'a ne-eno kagriku ke nehie huno asamigeno, 29
ana kema nentahino'a, ame' huno otino Jisasinte vu'ne. 30
Jisasi'a ana kumapina uofreno, kantega Matama omege'nere
mani'negeno, Maria'a emege'ne. 31 Anante Jiu vahe'mo'za
Maria'ene nompi ame rentinti hu'za mani'nareti, kageno'ma
agra ame' huno otino meg'i'a vige'za, zamagra amage nevu'za,
keri'are zavi ome ate'naku nevie hu'za antahi'naze. 32 E'ina
higeno, Maria'a Jisasi'ma mani'nere eno eme negeno, agiafi
emaseno, anage huno asmi'ne, Ramoka, kagrama amafima
mani'ntesina, nensaro Lasarusi'a ofrisine. 33 Jisasima kegeno
zavi'ma netegeno'a, ana a'ene e'naza Jiu vahe'mo'zanema zavi
atageno, Jisasi'a nezmageno agu'afina tusi'za huno rimpamo'a
kna nehigeno, 34 Jisasi'a zamantahigeno, Inantega ana nera
asente'naze? Zamagra kenona hu'za Agrira asmi'naze, Ramoka
enka emego. 35 Hazageno Jisasi'a zavi' ate'ne. 36 Zamasuma
ragiku'ma e'naza Jiu vahe'mo'za anage hu'naze, Keho agrira
tusi'za huno avesinte'ne! 37 Hianagi mago'amo'za anage
hu'naze, Ama ne'mo avu suhu ne' eri hari hunte'neankino, Agra
Lasarusina mago'a zana huntogeno ofrino manisimpi? 38 Anante
Jisasi mago'ene, rimpamo'a kna nehigeno ana ne'mofo kerire
uhanati'ne. Havega me'nege'za ufrekantera have eri'za runkani
re'naze. 39 Jisasi'a huno, Ana have rezahe hutreho, higeno
fri'nea ne'mofo nesaro Mata'a anage huno asami'ne, Ramoka,
menina kno hi'mana vugahie. Na'ankure 4'a zagegna ko mani'ne.

40 Higeno Jisasi'a anage huno ana ara asmi'ne, Ko kasami'noe,
kagrama kamentinti hanunka Anumzamofo hihamu hankave'a
(glori) kegahane hu'na kasmi'nofi? **41** Hige'za anankema
nentahi'za ana have rezahe hutre'naze. Anante Jisasi'a kesga
hunagamuteno, anage hu'ne, Nenfaga, Nagra muse hugantoe,
Kagra ke'nia antahi nami'nane. **42** Nagra antahi'noe, hakare
zupa keni'a nentahine, hianagi kema nehuana ama oti'za
mani'naza vaheku hu'na Nagra nehue. Kagra hunantanke'na
e'noe hu'za zamagra zamentinti hanagu nehue. **43** Jisasi'a
anagema huteno'a, kezatino Lasarusiga, atiraminka eno! **44**
Higeno fri'nea ne'mo atiramino e'ne, agiane, azanena, tavrave
nofi'nu ana'neki'za, avugosa tavravenu anovazinageno Jisasi'a
zamasmino, Tavarave'a vakneta eri atrenkeno vino. **45** E'ina
hige'za, rama'a Jiu vahe'ma Maria'ene e'namo'za, Jisasi'ma hiaza
nege'za, Agrite zamentinti hu'naze. **46** Hianagi mago'amo'za
vu'za Farisi mono vahete uhanati'za, Jisasi'ma hu'nea zamofo
nanek ome zamasmi'naze. **47** E'ina hige'za vugota pristi
vahe'ene Farisi Vahe'mo'za vugota mono kanisol vahe kehutru
(Sanhedrin) hu'za anage hu'naze, Ama ne'mo'a rama'a kaguvaza
nehie. Na'a menina hugahune? **48** Atresunkeno anazanke huno
Agra vaniana, maka vahe'mo'za Agrite zamentinti hanageno,
Romu vahe'mo'za e'za ra mono nontine, mopatinena tarega
hanaregahaze. **49** Anante mago'zmimo, Kaiafas'i'a ra mono
kva (hai pristi) ana kafufina mani'nea ne'mo, anage huno
zamasmi'ne, tamagra mago'za antahintahitamifina nontahize. **50**
Na'a hanigeno maka kumatine, mopatia eri havizana hugahie?
Atrenkeno magoke'mo miko vahekura frisnie. **51** Kaiafas'i'a agra
antahi'zampinti ama kea osu'ne, hianagi ana kafufina ran mono
kva (hai pristi) mani'neno, kasnampa ke huno Jisasima frino maka

Jiu vahe zamaza hania zanku hu'ne, **52** Nehuno Jiu kuma vaheke
Agra zamaza osugahie, e'inama hanuno'a hazagre'za vu'za e'za
hu'naza vahera zamazeri mago hanige'za Anumzamofo mofavre
manigahaze. **53** E'i ana knareti erigafa hu'za, Jisasima ahe
frisaza ke retro hu'naze. **54** E'inama hazazanku Jisasi'a mago'ene
Jiu vahe zamurera kana onte'ne. Hianagi atreno vuno mago
ka'ma kokampi me'nea rankuma kaziga Efraimie nehzarega
amage' nentaza naga'ane umani'naze. **55** Menina Anumzamo
Jiu vahe kinafinti zamare'nea knare (Pasova) ne'za ne kna atupa
nehige'za, rama'amo'za kuma'zmi atre'za Jerusalemi mareri'za,
ne'za nesagu zamagrazmi zamazeri agru huza retro hu'naze. **56**
Ana nehu'za ra mono nomofo (tempol) kumapi oti'za mani'neza
Jisasinku nehakre'za, zamagra zamagra anage hu'naze. Na'ane
hutma tamage'sa nentahize? Agra ama (Pasova) nezantera
egahifi, omegahie? **57** Anante vugota hu'naza pristi vahe'ene,
Farisi vahe'mo'za, anage hu'za rama'a vahepi hu'naze, iza'o
Jisasima kesimo'a, eme tasamisigeta tagra azerisune hu'naze.

12 Hagi kinafinti Jiu vahe zamare'nea kna (Pasova) 6si'a
zagegna atupa nehigeno, fri'nefinti azeri oti'nea ne' Lasarusi'ma
nemania kumate Jisasi'a Betani uhanati'ne. **2** Anante Jisasi'ma
hu'nea ne'zana retro hunte'naze. Mata'a ne'za netigeno
Lasarusi'ene, mago'a vahe'ene kave'ne sipare mani'naze. **3**
Trazamofo rafu'nareti tro hu'naza msavena, zago'amo mareri'nea
masaventafe Maria'a erino, Jisasina agiare tagino frenteteno,
anu azokateti eri ho'mu huntogeno, ana nomofona mana'amo
avite'ne. **4** Hianagi Judas Iskarioti'a, mago amagenentea disaipol
ne'mo, komoru huno Jisasina avreno ha' vahe zamazampi
antesimo'a anage hu'ne, **5** Na'a hanigeta ama masavena
3 hantreti'a silva zagonera atreta, zago erita zamunte omne

vahera zamaza osugahuno? **6** Menima Judas Iskariotima
ama kema nehiana, na'ankure agra zamunte omne vahe
zamaza hunaku nentahino nosie, hagi agra kumza nere. Zago
tafente kva nehia nekino, mago'a zagoma ome nentazana
anampinkati musufa eritere nehia ne'mo anage higeno, **7** Jisasi'a
anage hu'ne, Asenante'saza knagu avega ante'nea zanki,
atrenkeno agra ana hino. **8** Na'ankure zamunte omne vahe'mo'za
maka kna tamagra ne manigahaze, hianagi Nagra, tamagra
nena maka kna omanigahue. **9** Hagi maka Jiu vahe'mo'za
antahi'zana Jisasi emani'ne hige'za, zamagra Jisasinke kenaku
ome'nazanki, Lasarusima, fri'nefinti azeri oti'nea ne' kenaku
e'naze. **10** Hianagi vugota pristi vahe'mo'za Lasarusi'nena
ahe frinaku ke anaki'naze. **11** Na'ankure Lasarusinte'ma fore
hu'nea'zanku, rama'a Jiu vahe'mo'za atre'za nevu'za Jisasinte
zamentinti hu'naze. **12** Anante nanterana rama'a vahe'mo'za,
kinafinti zamare'nea knagu antahimiza ne'za (Pasova) nenaza
knare e'namo'za, Jisasi'a Jerusalemi ne-ea ke antahi'naze. **13**
Antahite'za tofe zafamofo ani'na (Palm tree) hantagi'za e'neri'za,
ome ke'za amrara nehu'za kezati'za, Taza huogu ke'za netune!
(Hosana!) Ramofo Agifi ne-ea nera agi'a hentesga hanune!
Israeli vahe'mofo kinia agi'a hentesga hanune! **14** Hagi Jisasi'a
mago agaho ve tonki afu keteno, agumpi mrerino mani'ne,
kasnampa vahe'mo'za korapa krente'naza kemo efore hu'ne.
15 Korera osiho Saioni veara, Keho tamagri Kinimo'a, agaho
ve donki afumofo agumpi manino ne-e. (Zek 9:9) **16** Hagi agri
amage nentaza disaipol naga'mo'za e'inama pusante hiazana
antahi so'e osu'naze. Hianagi Jisasi'ma hanave'afi mrerino, Ra
agi erige'za zamagra zamagesa nentahi'za, e'i Agriku huno
avontafepina krente'negeno, amazana Agrite fore hie hu'naze.

17 Ana higeno, rama'a vahe'mo'za, Jisasi'a kerifinti Lasarusi
azeri otige'za ke'naza vahe'mo'za, mago'ene ome huama hume
vu'naze. **18** Ama'na agafare, vahe'mo'za anahu kna hu'za
ome Agrira ke'naze. Na'ankure vahe'mo'za nosaza kaguvaza
(mirakol) hu'nea ke nentahi'za ome ke'naze. **19** Ana hige'za
Farisi vahe'mo'za ohumi ahumi hu'za zamagra anage hu'naze,
keho tagrira neratre'za maka vea'mo'za Jisasi amage avriri'za
nevze. **20** Hagi ana zupage Griki vahepinti mago'a vahe'mo'za,
kinafinti zamare'nea ne'za ne'knare mono hunaku mareri'naze.
21 Ana vahe'mo'za Galili kazigati Betsaida kumateti ne' Filipinte
uhaniti'za antahige'za, ramoka Jisasi kenaku nehune. **22** Filipi'a
eno Andruna eme asmitege'ne, tarega'moke vu'ke, Jisasina
ome asmi'na'e. **23** Jisasi'a anage huno kenona zani'arera
hu'ne, Vahe'mofo Mofavremo ra agi erisia kna atupa nehie. **24**
Tamage hu'na neramasmue, witi ragamo'ma mopafi taniramino
ofrisigeno'a anante megahie. Hianagi taniramino mopa agu'afi
frisigeno'a rama'a raga'a rentegahie. **25** Aza'o agragu'ma avesi
antesimo'a, asimu'a atregahie. Iza'o ama mopafi mani'zama'a
ha'rentesimo'a, manivava asimu erigahie. (*aiōnios g166*) **26** Iza'o,
Nagri eri'za erinaku hanimo'a, namage eno. Nagrama umanisure,
eri'za vahe nimo'enena anante umanigahie, iza'o, Nagri eri'za
erisimofona, Nenfa'a ra agi amigahie. **27** Menina Nagu namemo
kna navenesianki, na'ane hu'na Nagra hugahue, Nafa'nimoka,
ama knare (aua) fore hania knazampinti naza huo, hianagi
ama'na agafare ama knarera (aua) e'noe. **28** Nafa'nimoka, ra
kagi erio. Anante mago ageru monafinti eno amanage hu'ne,
Hago Nagra erisaga hu'noanki'na, rune Nagra erisaga hugahue
hu'ne. **29** Rama'a vahe'ma atru hu'za anante oti'namo'za, ana
ageru nentahi'za, monage nehie nehazageno, mago'amo'za

ankeromo naneke hu nemigahie hu'za hu'naze. **30** Jisasi'a kenona'a anage hu'ne, Ama'na agerura Nagri naza hunakura nosianki, tamagri tamaza hunaku nehie. **31** Menina ama mopa refkohu knae, menina ama mopafi kva hu'nea nera retufe atregahie. **32** Hanki, Nagri'ma mopafinti nazeri'sga hanige'na, hakare vahera zamare Nagrarega atregahue, **33** E'inagema hu'neana, fri'zamo avate'ma fore hanigeno frisnigu huama hu'ne.

34 Hakare vahe'ma atru hu'namo'za, Agrikura amanage hu'naze, tagrama kasegefinti'ma antahi'nonana, Kraisi'a manivava hugahie hu'neanki, nahigenka Kagra hunka, Vahe'mofo Mofavrea azerisga hugahie nehane? Iza'e ana Vahe'mofo Mofavre'a? (aiōn g165)

35 Hazageno Jisasi'a kenona anage huno zamasmi'ne, Osi'a knafi Msamo'a tamagri amu nompina me'ne. Msama me'enire kana nentenkeno hanimo'a tmagate oreno, iza'o hanimpima nevimo'a, iga nevio antahino keno nosie. **36** Masama me'enire, kagra Masagura kamentinti'a huo, e'inama hanunka kagra Masamofo mofavre manigahane. Jisasi'a anage huteno, Agra zamatreno vuno ome frakino mani'ne. **37** Jisasi'a rama'a kaguvaza (mirakol) huzmeri hu'neanagi, zamagra zamentintia Agritera osu'naze. **38** Ana higeno kasnampa ne'mo Aisaia hu'nea kemofo avufa'a fore nehie, Ramoka iza tagri kerera amentintia nehie? Ramofo hanave'amo'a izante eama hu'ne? (Ais 53:1)

39 E'i ana agafare vahe'mo'za zamentinti nosaze. Aisaia'a mago'ene anage hu'ne, **40** Ramo'a zamurga erisu nehuno, zamarimpa kafana erigi'ne, e'ina hanige'za zamurga nonke'za, zamarimpa erigisige'za zamagu zamagesa antahi ama nosuza, zamagu'a rukrehe osnage'na, zamazeri so'e osugahue hu'ne. (Ais 6:10.) **41** Hagi ama'i zanku'ma Aisaia'ma hu'neana, na'ankure Jisasi'a hanave'afi mani'negeno ke'negu huno, Agriku hu'ne. **42**

Ana hianagi hakare'a mono kva vahe'mo'za zamentinti Agrite hu'naze. Hianagi Farisi vaheku kore hu'za Jisasi'a, Kraisi'e hu'za huama osu'naze, anagema hanage'za mono nompinti (Sinagog) zamahe fegi atre'zanku kore hu'za osu'naze, **43** Na'ankure vahe'mo'za husga huzmante zanku nehu'za, Anumzamo husga huzmante zankura ontahi'naze. **44** Jisasi'a ranke huno amanage hu'ne, Iza'o Nagrite amentinti nehimo'a hanimo'a, Nagritekera amentinti nosianki, Agrama hunantege'na e'nomofonte amentinti hugahie. **45** Iza'o Nagri'ma nenagemo'a, hunantege'na e'nomofonte nege. **46** Nagra ama mopafi Masa e'noe, maka vahe'mo'za Nagrite zamentinti hanamo'za hanimpina omanigahaze. **47** Iza'o nanekeni'a nentahino, amage nontemofona nanekea huontegahue. Na'ankure Nagra ama mopafi vahe refko hunaku ome'noe. Hianagi mopafi vahe zamaza hu'na zamavarenaku e'noe. **48** Iza'o Nagri nenatreno, ke'ni'a ontahisimofona, e'i anamofona refko'ma haniana, ama nanekema nehua nanekemo maka'za vagare knare, henka'a refko huntegahie. **49** Na'ankure Nagrani'a antahintahifinti ama nanekea nosue, hianagi Nfanimo Agra hunantege'na e'nomofona, zamasmio hianke ana naneke'age nehue. **50** Nagra antahi'noe, Agrama hiho hia kefi mani vava asimura me'ne. E'ina hu'negu Nagrama nehua kea Nenfa'ma huoma hia ke'age nehue. (aiōnios g166)

13 Hagi menina kinafinti zamare'nea knagu antahimiza (Pasova) ne'za nekna atupa higeno, Jisasi'a antahi'ne, ama mopa atreno Nefantega vania kna egeno, amage nentaza disaipol nagara, Agrama zamesi nezmantea zamo'a atupare ehanati'ne. **2** Jisasi'a amage' nentaza disaipol naga'ane ne'za nenegeno, Hankromo (Sata) Judas Iskarioti, Saimon nemofo rimpafi ha' vahe zamazampi komoru huno avrentesia antahi'zana eme ante'ne. **3**

Hagi Jisasi'a antahi'ne, Nefa'a maka'zana Agri azampi ante'ne,
Anumzamofonteti e'neankino, ete Anumzamofontega vugahie.

4 Ne'za nena finti otino, anakre ku'a zafi nenteno, tauri erino
afafafi rugagino anakine. 5 Anante Jisasi'a zompa fi ti taginteno,
amage nentaza disaipol naga zamaga agafa huno sese huteno,
afafafi rugagi'nea taurinu zamagia eriho'mu huzmante'ne. 6

Anante Saimon Pitante aga sese hunte'naku egeno, agra
Jisasinku anage hu'ne, Ramoka nagia sese hugahano? 7 Higeno
Jisasi'a kenona anage huno asmi'ne, Menima ama nehuazana
kagra ontahi'nane, hianagi henka'a antahi ama' hugahane. 8

Pita'a anage huno Jisasina asmi'ne, Kagra nagia sese osu'tfa
hugahane! Higeno Jisasi'a anage huno kenona'a hu'ne, Nagra
kagiama sese osanugenka, Nagranena omanigahane. (aiōn
g165) 9 Higeno Saimon Pita'a anage huno Jisasina asmi'ne,
Ramoka nagiarafana sesera osuo. Hianagi anazanke hunka
nazane, nanune sese huo! 10 Higeno Jisasi'a anage huno
asm'i'ne, Iza'o ko'ma tima fre'nemo'a, agiage sese hugahie.
E'na nehuno avu sese huno manigahie. Hanki kagra ko avu
sese hu'nane, hianagi ana maka'mota avu sese osu'naze. 11
Na'ankure mago'mo komoru huno ha' vahe zamazampima
avrentesimofona, Agra ko antahi'ne, e'na hu'nea agafare,
tamagra maka'mota avu sese osu'naze hu'ne. 12 Anage huteno
Jisasi'a zamagia sese huvaga rezmantete'no, Nakre ku'a erino
mani'neno hu'nere umaniteno, Jisasi'a anage huno zamsmi'ne,
Amazama tamagri'ma hunermantoana antahi'nazo? 13 Tamagra
Nagrikura rempi hurami Ne'ene, Rantie nehzana, tamagra
tamage nehaze, Nagra ana nere. 14 Nagrama Rantimi manina,
hurmasmi Ne'mona tmagia sese hunermantesueta, tamagra
nena anazanke huta rumokizmi zamagia, sese ohunte ahunte

hiho. **15** Nagra hurmeri nehuanki, tamagranena anahu kna hutma rumokizmi'a zamagia sese huzmantegahaze. **16** Tamage hu'na Nagra nermasmue, kazokzo eri'za vahe'mo'a kva'amofona agateoregahie. Kema erino vnimo'a, katogema huntegeno vu'nemofona agateore'ne. **17** Tamagrama amazama keta antahita nehuta, anazama hanutma asomu erigahaze. **18** Hagi nagrama nehuana makamotagura nosue, Nagra huhampri'noa vahera antahi'noe. Hianagi Anumzamofo avontafepi kre'nea nanekea eri knare hugahie. Nagrane breti nenemo ha' renantegahie huno kre'neana, hago avufga'a fore hugahie. (Sam-Zga 41:9)

19 Meninena Nagra anazana efore osu'nege'na neramasmue, anazama efore'ma hanigeta, tamagra tamentinti nehuta, ana nere hutma Nagrikura hugahaze. **20** Tamage hu'na neramasmue, Nagrama huntesugeno vania vahe, avreno azeri so'e huntesimo'a, Nagri navareno nazeri so'e hunantegahie. Iza'o Nagri'ma nazeri so'e hanimo'a, Agra hunantege'na e'nomofo azeri so'e hugahie.

21 Hagi Jisasi'ma anage huvagama reteno, agu'amo kna nehigeno anage hu'ne, Tamage hu'na nermasmue, tamagripinti mago'mo ha' vahe azampina navre antegahie. **22** Hige'za amage nentaza disaipol naga'mo'za zamagra zamagra oge age nehu'za, inamo anara hunaku higeno nehie hu'za hu'naze.

23 Anate amage' nentaza disaipol nagapinti, Jisasi'ma avesi nentemo, azantmaga kaziga tavaonte mani'ne. **24** Ana higeno Saimon Pita'a avesima nentea disaipol nera avame'name huno, Izanku Jisasi'a nehifi antahigenka ko huno asami'ne. **25** Higeno anante avesima nentea ne'mo, Jisasi asumpi mase kantiteno, anage huno Agrira antahige'ne, Ramoka ana nera izale? **26** Jisasi'a kenona anage hu'ne, Bretima sosifima rete'na amisuana e'i ana nere, nehuno bretia sosifi reteno, Saimon

Iskarioti nemofo Judasina ami'ne. **27** Ana bretima netegen, Sata'a havi avamumofo kvamo agu'afi ufre'ne. E'ina nehigeno Jisasi anage huno asmi'ne, Ina knazama hunaku'ma hnunka, kvune antenka huo. **28** Mani'ne'za ne'za ne'naza vahe'mo'za, anama Judasinku'ma hia kea na'a agafare hu'nefi, antahi amara osu'naze. **29** Judasi zago taferote (bogisi) kva nehia neki'za, mago'amo'za antahi'zana mago'a upama hunona ne'za ome miza sege, amunte omne vahe, zago ome zaminogu Jisasi'a hunente hu'za zamagesa antahi'naze. **30** Ana higeno, Judasi'a bretima nehana nehuno'a, atiramino meg'i'a vu'ne. (Ko hani hu'negeno ana hu'ne.) **31** Judasi'ma meg'i'a vutegen, Jisasi'a anage hu'ne, Menina Vahe'mofo Mofavremo ra agi erisigeno, Anumzamo'a ra agi Agriteti eri'nia kna ne-e. **32** Anumzamo ra agi Agriteti eritesuno'a, anazanke huno Anumzamo ra agi Agrira amigahie, nehuno hantaka'a ra agi amigahie. **33** Hagi mofavre zagamota antahiho, Nagra osi'a knafi tamagra nena manigahue. Tamagra Nagrikura hakregahaze, Jiu mono kva vahera anankea ko zamasmi'noe. Meninena ana kege neramasamue, Nagrama inantega vanurega tamagra omegahaze. **34** Nagra kasefa kasege tamagrira neramue, Nagrama navesi neramantoa kna huta rumokizmia zmesinezmanteta, anahu kna hutma ovesinte avesinte hiho. **35** Tamagrama mago'mofo ovesinte avesinte nehnage'za, maka vahe'mo'za nege'za, tamagra Nagri namage nentaza disaiopol naga mani'naze hu'za hugahaze. **36** Higeno Saimon Pita'a anage huno Jisasinkura hu'ne, Ramoka, kagra iga vunaku nehane? higeno Jisasi'a ana kenona'a huno, Nagrama vanurega, menina kagra navaririnka omegahane, hianagi kagra henka egahane. **37** Higeno Pita'a anage Jisasinku hu'ne, Ramoke, na'a hanige'na nagra menina Kagri kmagera

omegahue? Nagra Kagriteku hu'na frinaku menina tro nehue. 38
Higeno Jisasi'a kenona'a anage huno asami'ne, Nagriku hunka
frigahano? Tamage hu'na negasamue, Nagrikura onke'noe hunka
3'a zupa vahane hutesankeno, henka kokoregea hugahie.

14 Hagi atrenkeno tamagu'amo'a kna osino, Anumzamofonte
tamentinti nehuta, anahu kna huta Nagrite'ene tamentinti hiho. 2
Nenfa nompina rama'a hunaraginte nona me'ne, omne'neresina
Nagra ko tamasmusine, Nagra, nonkuma tamia ome retro hunaku
nevue. 3 Nagrama vu'na nonkumatmi ome retro hutesu'na,
ete e'na eme tamavresugeta, Nagrama umanisure, tamagra
Nagrane umanigahaze. 4 Hagi Nagra inantega vugahuo, tamagra
antahi'naze. 5 Tomasi'a anage huno Jisasina asmi'ne, Ramoke
tagra ontahi'none, iga Kagra vugahane, tagra inankna huta ana
kana keta antahita hugahune? 6 Higeno Jisasi'a anage huno
asami'ne, Nagra kana mani'na, tamage ke manina, asimumofo
agafa Nagra mani'noe, mago'mo'a aru kantetira Nenfantera
ovugahie. A'o, Nagriteti vugahie. 7 Nagri'ma nagenka nantahinka
kagra hantesina, Nenfanena anahu kna hunka kenka antahinka
kagra hantesine, meni agafa hunka Agrira nentahinka negane.
8 Filipi'a anage huno Agrira asami'ne, Ramoke Negafana
tveri hugeno tagrira knare huranteno. 9 Jisasi'a anage huno
asmi'ne, Nagra tamagranena rama'a kna mani'noanki, Filipiga
kagra nahigenka Nagrira nagenka antahinka osu'nane? Iza'o
Nagri'ma nagemo'a, Nenfana ke'ne! Nahigenka kagra hunka,
Negafana naveri huo hunka nehane? 10 Nenfampi Nagra
manugen, Nenfa'a Nagripi mani'ne hua kegura, nahigenka
kamentintia nosane? Nagra nagesafinti kea kagrira nonkasamue.
Hianagi Nenfa'a nagu'afi mani'nemo, Agra kaguvaza hu eri'za
e'nerie. 11 Tamentintima hanazana, Nagra Nenfampi manugen,

Nenfa'a Nagripi mani'ne hoho, hu'neanagi ana'ma osnutma
kaguvazama eri forehu eri'zama eri'nogu nentahitma tamentinti
hugahaze. **12** Tamage hu'na Nagra nerasmue, iza'o Nagrite
amentinti hanimo'a, Nagrama e'nerua eri'zana anahu kna huno
kaguvazama eri forehu eri'za e'nerino, Nagatereno ra eri'za
erigahie, na'ankure Nagra Nenfantega vugahue. **13** Inankna
zanku'ma Nagri nagifi nantahigesazana, Nagra amne hugahue.
Ana hanugen Nenfa'a ra agi Nemofompinti erigahie. **14**
Tamagrama inankna zankuro Nagri nagifima nantahi kesage'na,
Nagra anazana amne hugahue. **15** Jisasi'a mago'ane huno,
Nagri'ma navesinantesuta keni'a amage antegahaze. **16** Nenfana
antahigesugeno, Agra mago tamaza hu'zana tamisnigeno,
Agra tamagrane manivava hugahie. (aiōn g165) **17** E'i ana
tamaza hu'zana tamage Avamure, ama mopafi vahe'mo'za
e'origahaze. Na'ankure zamagra ke'za antahi'za osu'naze.
Hianagi tamagra Agrira (Avamura) keta antahita hu'naze.
Na'ankure Agra tamagrane mani'neno, tamagu'afi manigahie. **18**
Nagra tamatresugetma megusa mofavregna huta omanigahaze.
Nagra tamagritega egahue. **19** Osi'a knafi mopafi vahe'mo'za
Nagrira onagegahaze, hianagi tamagra Nagrira nagegahaze.
Na'ankure Nagra mani'noankita, tamagranena anahu kna huta
manigahaze. **20** E'i ana knazupa, tamagra antahigahaze Nagra
Nenfana agu'afi manugeta, tamagra Nagri nagu'afi manisagena,
Nagra tamagri tamagu'afi manigahue. **21** Iza'o Nagri kasegema
amage antesimo'a, Nagrira avesinantegahie, iza'o Nagri'ma
avesinantenimofona Nenfa'a agrira avesintegahie, hanige'na
Nagra avesintena, Nagra'ni'a agrite efore hugahue. **22** Higeno ru
Judasi'a amanage huno Ramofona antahige'ne, Nankna hunka
Kagra tagritera eama nehunka, ama mopafi vahetera eamara

osugahane? 23 Higeno Jisasi'a ana kenona'a anage huno zamasmi'ne, Iza'o Nagri'ma avesi nantesimo'a, ke'nia amage antesigeno, Nenfa'a avesintena tagra, agrane emanigahune. 24 Iza'o Nagri'ma avesi onantesimo'a, Nagri kea amage ontegahie. Ama kema nentahizana Nagri kea omne'ne, hianagi Nenfa'ma hunantege'na e'nomofa ke nontahize. 25 Ama zantaminku'ma Nagra nehuana, tamagrane mani'nena nehue. 26 Hianagi tamaza hu'zana, Ruotge Avamu, Nenfa'a Nagri nagifi huntesigeno eno, Agra maka'zanku eme rempi huramigahie. Nagrama maka'zanku tmasmi'noana hurmagesa hugahie. 27 Tamarimpa fruza Nagra tamagripi nentoe, Nagra narimpa frua tamagri neramue, ama mopafi vahe'mo'za neramizankna tamarimpa frua Nagra noramue. Atrenkeno tamagu'amo'a kna nosina korora osiho. 28 Tamagra nentahizage'na Nagra tamagrira tmasmi'na, tmatre'na vute'na, ete tamagrite egahue hu'noe. Tamagrama Nagri'ma navesinantzaresina muse hazaresine. Na'ankure Nagra Nenfantega vugahue. Nagrira Nenfa'a nagtereno Ra mani'ne. 29 Nagra menina fore osu'negena neramasmue, fore'ma hania zupa, tamagra Nagrite tamentinti hugahaze. 30 Nagra za'zatera nanekea ontamasmigahue, ama mopa kva nehia ne' Sata'a hago ne-e, agrira hanave'a omne'neankino, Nagrira nagateoregahie. 31 Hianagi ama mopafi vahe'mo'a antahino keno hugahie, Nagra Nenfana navesinentoe, Nagra Nenfa'ma huo huno'ma humanante'neaza nehuanki, otinketa amafintira vamneno.

15 Jisasi'a mago'ane anage hu'ne, Nagra tamage waini zafamofo nena'a mani'noe. Nenfa'a waini hozamofo nefae. 2 Hakare azankuna'amo Nagripi me'neno raga reontesimofona, Agra akafri netreno, hakare azankuna'amo raga rentesiana,

mago'ene traga huno eri fatgo hanigeno, aguheno raga
rentegahie. 3 Tamagra ko agru hu'naze, na'ankure kema
tamasmi'noa kemo tamazeri agru hu'ne. 4 Nagri nagu'afi
emaninenke'na, Nagra tamagri tmagu'afi mani'neno. Zafa
azankuna'amo agra avesitera raga'a reontegahie, waini zafare
azankuna'amo ru okamare snuno'a raga reontegahie. Hagi
Nagrite'ma ruokamare'sutma raga'a reontegahaze. 5 Nagra
waini zafa mani'nogeta, tamagra azankuna'a mani'naze. Iza'o
Nagripi manige'na agripi mani'nomo'a, rama'a raga renente,
Nagri'ma natresuta mago'zana osu'tfa hugahaze. 6 Mago
vahemoma Nagri'ene tragoteno omanisimofona, azankuna eritru
hu'nazageno osaparea kna hina, mate vu'za tevefi kregahaze.
7 Tamagrama, Nagri'ene tragoteta mani'ne'nageno, naneke
ni'amo tamagri tamagu'afi'ma me'nena, tamesinia zankuma
nantahigesazana amne erigahaze. 8 Tamagra rama'a raga
renentenkeno, Nenfa'a ra agi erisige'za nege'za, Nagri namage
nentaza disaipol vahere hu'za tamagrirkura hugahaze. 9
Nenfa'ma, Nagri'ma navesi nante'neaza hu'na, Nagranena anahu
kna hu'na tmesi nermantoanki, ana navesimofo agu'afi maniho.
10 Tamagrama kasege ni'ama amage' antesuta, tamagra Nagri
navesimofo agu'afi manigahaze, Nagrama, Nenfa kasegema
amage ante'na, Agri avesizamofo agu'afi mani'noankna huta
manigahaze. 11 Ama zanku'ma Nagra nermasmuana, Nagri
muse zamo tamagri tamagu'afi me'nigeno, musezantmimo'a
avitegahie. 12 Ama'i Nagri kasege, tamararunku ovesinte,
avesinte hiho. Nagrama, tamagri'ma navesi tamante'noa kna
hiho. 13 Mago'mo'ma rone'agu avesinteno, agra asimuma
atreno frisimo'a, tusi'a ugota hu'nea avesiza huzmerigahie. 14
Nagrama neramasmuwa kasegema amage antesutma Tamagra,

Nagri rone manigahaze. **15** Nagra ru'ene kazokzo eri'za
vahe'n'i'e hu'na tmagrikura osugahue, na'ankure kazokzo
eri'za vahe'mo'a kva'amo'ma hiazana ontahi'ne. Hianagi Nagra
rone'nimote hu'na tmagrikura nehue, na'ankure Nenfantegati
maka'zama Nagrama antahuazana, tamagrira neramasmue.

16 Tamagra, Nagrira huhampri'onante'haze, hianagi Nagra,
tamagrira huhampritamantena, tamazeri oti'noe, vuta nena raga'a
ome rentesageno, ana ragamo me'nena, na'ankuro Nagri nagifi
Nenfama antahigesageno'a, Agra amne tmigahie. **17** Nagra ama
kasege neramasmue, tmararuna ovesinte avesinte hiho. **18**
Jisasi'a amanage huno zamasmi'ne, Ama mopafi vahe'mo'za ha'
ermantesaza zanku kva hiho, na'ankure ese agafare, Nagri
ha' renante'haze. **19** Ama'na mopafi vahe mani'naresina, ama
mopafi vahe'mo'za tagri vahere hu'za zamesi rmantasine, ana
hu'neanagi na'ankure tamagra ama mopafi vahera omani'naze.
Hianagi Nagra ama mopafinti tamagrira tmavre'noe, ana
agafare ama mopafi vahe'mo'za hara reneramantaze. **20** Ko'ma
tamasmi'noa kegu tamagesa antahiho, kazokzo eri'za ne'amo'a,
kva vahe'a knara osu'ne. Nagri'ma nazanva ante'nesu'za, tamagri
enena anahu kna hu'za tamazanva antegahaze, ke'ni'a amage
antenare'sina, tamagri kea ana zanke hu'za antahizasine. **21**
Hianagi Nagri nagimo tamagripi me'enigeno'a, e'ina hu'zana
hurmantegahaze, na'ankure hunantege'na e'nomofona ke'za
antahi'za osu'nagu ana hurmategahaze. **22** Nagrama naneke
e'naeme ozmasmuasina, zamagrira kumi'zmi omanesine.
Hianagi menina kumi'zmia eri fraki kazamia omnegahe. **23**
Higeno Nagri'ma ha'ma renantesimo'a, ana zanke huno Nenfana
ha' renente. **24** Mago'a vahe'mo'za e'orinaza kaguva eri'zama
zamagri amu'nompi e'ori'noasinia, kumi'zmia omnesine. Hianagi

menina kaguva eri'zani'a kazanagi, Nagri'ene Nenfanena ha' renerantaze. **25** Menima anazama nehazana, zamagri kasegefi kre'naza ke eri knare nehaze, Mago havizana Nagra osunoge'za, hara renenantaze. (Sam-Zga 69:4) **26** Hagi tamazama hu'zama hunesugeno Nenfantegati tamagrite'ma esuno'a, Agra Tamage Avamukino Nagri nagenkea eriama hugahie. **27** Tamagranena ana zanke hutma Nagri nanekea huama hugahaze, na'ankure tamagra Nagrane mani'nage'na, eri'zana eri agafa hu'na eri'noe.

16 Hagi ama nanekea ru tamentintifinti evuramizanku, menina neramasmue. **2** Jiu vahe mono nompinti (sinagog) tamahenati atregahaze. Mago kna ne-eankino, tamahe frisu'za zamagesa antahisazana Anumzamofo eri'za e'nerune hu'za antahigahaze. **3** E'ina hu'za zamagra hurmantegahaze, na'ankure Nenfane Nagri enena ontahi'nagu anara hurmantegahaze. **4** Hianagi ama zanku Nagra nermasmuankino, ana zagegna (aua) efore'ma hina, Nagrama tamasm'i'noa kegu tamagra antahigahaze. Ese agafare Nagra ontamasami'noe, na'ankure Nagra tamagrane mani'nogu ontamasmi'noe. **5** Hianagi menina Agra hunantege'na e'nomofonte, Nagra vunaku nehugeta mago'moka nantahigenka, iga vunaku nehane? hunka nantahi nonkane. **6** Hianagi vugahue hu'na Nagrama tamasmua kemo, tamagri tamagu'a erigna nehie. **7** Hianagi Nagra tamage neramasmue, tamagrime eme tamaza hanigu vugahue, na'ankure Nagrama tamatre'na ovanugen'o'a, tamaza hu'zana tamagritera omegahie. Hianagi Nagrama vanuna, huntanena, Agra tamagritega egahie. **8** Hankino Agra esuno'a, mopafi vahe'mokizmi kumi'ene, Anumzamofo fatgo avu'ava zane, henkama refko huno keaga huzmantesiaza zameri nehuno, **9** kumi zamimofonku zamasmigahie. Na'ankure zamagra Nagritera zamentintia osu'naze. **10** Na'ankure fatgo navu'navama

hanuana, Nenfantega vanugeta, tamagra Nagira onagegahaze.

11 Hagi kema refko haniaza eme huramerigahie. Na'ankure ama mopa kva hu'nemofona hago keaga hunte'noe. **12** Nagra mago'a rama'a naneke tamasmusine, hianagi menina tamagra antahise osugahaze. **13** Hianagi Tamage Avamu'ma esuno'a, antahi antahimofona eri ama hina tamage nanekea keta antahita hugahaze. Na'ankure Agra'a antahintahi'ane, hanave'arera ana nanekea osugahie, hianagi na'ano Agrama antahisia kege nehuno, henkama esia zamofonku tamasmigahie. **14** Avamumo'a, Nagri nagi erisaga hugahie, na'ankure Nagripi me'neazana erino tamagrira tamasmigahie. **15** Maka'zama Nenfa'ma ante'neana Nagri'zane hu'na hu'noe, e'ina hu'negu Avamumo'a Nagripinti ana nanekea erino tamagrira tamasmigahie. **16** Hagi Osi'a knafi omani'nanena tamagra onagegahaze, hagi ete osia knafi tamagra nagegahaze. **17** Mago'a amage' nentaza disaipol naga'mo'za zamagra zamagra ohumi ahumi nehu'za anage hu'naze, Ama'i nankna naneke tasmino, osi'a knafi tamagra onagegahaze nehuno, ete osi'a knafi nagegahaze nehie. Na'ankure Nagra Nenfante vugahue nehie? **18** Amage' nentaza disaipol naga'mo'za anage hu'naze, Ama'i na'anku Agra anage huno, osi'a knafine nehie? Tagra ontahi'none, na'anku Agra nehifi ontahi'none hu'za hu'naze. **19** Zamagra antahigenaku Jisasina nehzageno nentahino, anage huno zamasmi'ne, Nagra hu'na, osi'a knafi onageta, ete osi'a knafi nagegahaze hua kegu, tamagra antahintahi hakare nehazo? **20** Tamagerfa hu'na neramasmue. Tamagra tamavunu nehina ranke huta zavira ategahaze, hianagi ama mopafi vahe'mo'za muse hugahaze. Tamagra tamarimpa kna hugahazanagi ete tmarimpa knamo'a eri rukrahe hanigeta, muse hugahaze. **21** A'mo mofavrema nenteno'a

atagu nehie, na'ankure mofavrema kasente kna egeno'e,
hianagi mofavrema ksentete'no'a, ana atagura agesa nontahie.
Na'ankure ama mopafi mofavrema kasentea muse nehie. 22
E'i ana hu'negu tamagra menina zavira netaze, hianagi Nagra
henka nermagesugeno, tamagu'amo muse nehina, mago'mo
ana musezana tamagripintira eri otregahie. 23 Ana knarera
Nagrira mago'zankura nantahi onkegahaze. Tamagerafa hu'na
tamagrira neramasmue, Nenfama mago zanku'ma Nagri nagifima
antahigesageno'a, amne tamigahie. 24 Korapara Nagri nagifina
mago'zankura antahi onke'naze. Hianagi tamagra antahigetma
erigahaze, e'ina hanageno muse zantmimo'a avitegahie. 25
Nagra amanage hu'na fronka kefinti neramasmue, mago kna
ne-eanki'na, ana kna zupa fronka kefintira ontamasmigahue.
Hianagi huama hu'na Nenfankura tmasmigahue. 26 E'i ana
knazupa, Nagri nagifi Nenfana antahigegahaze. Nagra tamagri
tamagi eri'na, Nenfana asmigahue hu'na nosue. 27 Hagi
Nenfa'a tamagrira Agra'a avesineramante, na'ankure tamagra
Nagrira tamavesinenteta Nagrikura Anumzamofonteti e'ne huta
tamentinti hu'naze. 28 Nagra Nenfantegati e'na, ama mopafina
e'noe, hianagi ama mopa ete atre'na Nenfa hirega vugahue.
29 Hige'za Agri amage' nentaza disaipol naga'mo'za anage
hu'naze, Ko menina Kagra amate ke huama nehunka, fronka
kea osane. 30 Tagra menina antahi'none, Kagra maka'zana
antahi'nane, mago zankura vahe'mo'a kagenoka osugahie.
E'ina'ma hanazante tagra tamentinti nehuta, Anumzantegati
e'nane huta nehune. 31 Jisasi'a kenona huno, Menina tamagra
tamentinti nehazo? 32 Keho, knamo'a (aua) hago eno ama
e'ne, mago mago'moka nonkarega nevunka, natresanke'na
Nagrake manigahue, ana hugahazanagi Nagrakera omanigahue.

Na'ankure Nenfa'a Nagrane mani'ne. 33 Ama'ina nanekema
Nagra neramasmuana, Nagripinti tamarimpa fru erigahaze.
Ama mopafina hazenke zane, tamasuzamo egahianagi, oti
hanavetiho. Na'ankure Nagra ama mopafi hanavea azeri haviza
hu'na hago agatere'noe.

17 Hagi Jisasi'a ana naneke huvareteno, Agra kesga huno
monafi negeno amanage hu'ne, Nenfaga hago kna (aua)
eforehie, Negamofona ra agi amigeno, Negamofo anazanke
huno, Kagrina rankagi kamino. 2 Maka vahete kvahu hihamu
ami'nane, ana hankeno maka ami'nana vahera, Agra zamaza
huno manivava mani'za zamigahie. (aiōnios g166) 3 Ama'i
manivava mani'zane hu'za, zamagra kage'za antahi'za nehu'za,
magoketfa tamage Anumzane nehu'za, Jisas Kraisi huntanken
e'ne huza keza antahiza hugahaze. (aiōnios g166) 4 Nagra ama
mopafi Kagri kagi eri ra nehu'na, Nagri'ma eri'za erio hunka
nami'nana eri'zana hago eri vagare'noe. 5 Menina Nenfaga,
Kagra kaziga navrento, korapa'ma mopa fore osu'nere mani'neta
hu'no'a konariri zampi, Kagrane umanisu'e. (Eks-Utr 3:14.) 6
Nagra Kagri kagi kagenkeka'a kokankoka vahe'pinti'ma avare
nami'nana vahera zamasmi ama hu'noe. Zamagra Kagrika'a vahe
maninagenka Kagra Nagrina nami'nane. Hagi zamagra keka'a
antahi'za amage ante'naze. 7 Menina maka nami'nana zankura,
Kagra nami'nane hu'za ke'za antahi'za hugahaze. 8 Na'ankure
Kagrama nasm'i'nana kea Nagra zamasmi'noe. Zamagra anankea
eneri'za Nagrikura tamage Agriteti e'ne nehu'za, Agra huntegeno
e'ne hu'za zamentinti hu'naze. 9 Nagra, zamagri zamagi'
eri'na nunamuna nehue. Nagra kokankoka vahe zamagi' eri'na
nosue, hagi Nagri'ma nami'nana vahe zamagi' eri'na nunamuna
nehue. Na'ankure zamagra Kagri suza mani'naze. 10 Hagi

maka Nagri vahe'mo'za Kagri vahere, maka Kagri vahera
Nagri vahere, ana vahe'mo'za Nagrira ra nagi nenamize. **11**
Mago'ene Nagra ama mopafina omanigahue, zamagrazmi
ama mopafina manigahaze. Hige'na Nagra Kagritega neoe.
Ruotge hunana Nenfaga, Kagrama ante nami'nana nagifi
zamagu vazisanke'za, tagrama mago huno'ankna hu'za zamagra
mago hugahaze. **12** Nagra zamagranema mani'nena, Kagri
kagire manisnaze hu'na zamagu'vazina kva huzmante'noe.
Kagrama nami'namokizmia mago'mo'a fanane osu'ne, hianagi
magoke'mofo fanane hinogura huhamrinte'ne, ana hanigeno
Anumzamofo avontafe'mo hu'nea kantera avufa'a fore hugahie.
(Sam-Zga 41:9) **13** Hu'neanagi Nagra, Kagrite menina ne-
e'na, ama mopafina Nagra amanahu kea nehuankino, Nagri
muse zamo'a (joy) zamagripi avitegahie. **14** Nagra, Kagri
nanekea ko zamasmi'noe, huge'za mopa kagi'afi vahe'mo'za
zamesra huzmante'naze, na'ankure zamagra ama mopafi vahera
omani'naze, Nagrama ama mopafi vahe'ma omani'noa kna
hu'naze. **15** Nagra ama mopareti zamavare atrogura nosue,
hagi havi ne'mofo azampinti zamazeri anovazisanegu nehue. **16**
Zamagra ama mopafi vahera omani'naze. Nagra'enena anahu
hu'na, ama mopafi vahera omani'noe. **17** Tamage kefi zamazeri
avusese hunka zamazeri otage huo. Kagri keka'amo'a tamage
me'ne. **18** Kagrama hunantanke'na ama mopafina e'noankina,
Nagra ana zanke hu'na mopa kagi'afi hunezmantoe. **19** Nagra
zamagri huzmeri'na avusese hu'na mani otage hu'noe, ana
nehuanki'za zamagranena anazanke hu'za Kagrite avusese
nehu'za, tamage hu'za mani otage hugahaze. **20** Nagrima
namage nentaza disaiopol nagakuke hu'na nunamuna nosue,
hagi ke'n'i'a huama nehzage'za, Nagrite zamentinti hanaza

naga'enenku nehue, **21** ana hanige'za zamagra maka'mo'za
magoke hu'za, Nenfaga, Nagrane mago huta mani'no'a kna hu'za,
Tagra ene mago hu'za zamagra mani'nesage'za, kokankokati
vahe'mo'za nege'za, Kagra hunantankena e'noe hu'za zamentinti
hugahaze. **22** Kagrama hanavema Nagri nami'nana hanavea,
Nagra zamagri zami'noe. Tagrama mago huta mani'no'a kna hu'za
manisazegu zami'noe. **23** Nagra zamagripi manugenka, Kagra,
Nagripi mani'nane, hanige'za zamagra magoke zamarimpa
hu'za manigahaze. Ana hananke'za ama mopafi vahe'mo'za
nege'za, Kagra hunantankena ama mopafina e'noe hu'za keza
antahiza nehanagenka, Nagri'ma kavesi nante'nana kna hunka,
zamavesi nezmantane huza keza antahiza hugahaze. **24**
Nenfaga, Nagri'ma nami'nana vahe'zaga, Nagrama manisufi
manisazegu nave'nesie. Ana hu'ne'za Nagri'ma nami'nana
hanavea kesaze, na'ankure Kagra korapa mopa omne'nea knafi,
Nagrira kavesinantenka kagu'a antenka hanavea nami'nane.
25 Fatgo Nenfaga, kokankoka vahe'mo'za kage'za antahi'za
osugahazanagi, Nagra kage'na kantahi'na hu'noe, hagi amama
namage'ntaza naga'moza Kagra hunantakena e'noe hu'za
keza antahiza nehaze. **26** Nagra, Kagri kagi'a hu'ama hu'na
zamagrira nezmasamue, hagi'na mago'ene hagerfi'na hu'ama
hu'na zamas migahue. Kavesima nenantana kavesi zamo'a,
zamagri zamagu'afi mesige'na, Nagra anazanke hu'na zamagripi
manigahue.

18 Hagi ana nanekema huvareteno, Jisasi'a atreno disaipol
naga'ane Kidroni agupofi vute'za, ananteti vumare'za mago
knagune zafa hoza me'nefi vu'haze. **2** Judasi'ma komoru huntisia
ne'mo'a, ana zafa knagune hoza ke'ne, na'ankure Jisasi'a
disaipol naga'ane knagune hozafi mago'a knafina zamarenlo

vutere'ma higeno keno antahino hu'ne. 3 Higeno Judasi'a mago'a Romu sondia kevune, ra mono nonte kva nehaza naga'ma (Gats), vugote'naza pristi vahe'mo'zane Farisi vahe'mo'zama huzmantaza vahe'mo'za olivi zafa hozafi tosine, tafentavi'ene, ha'zane eri'nageno Judasi'a zamavareno vu'ne. 4 Mika'zama Agrite fore haniazana, na'ankure Jisasi'a antahino keno nehuno, Azanku nehakraze? huno zamantahige'ne. 5 Zamagra ana kemofo nona'a Agriku hu'za, Nazareti kumateti Jisasinku nehakrone, hazageno, Nagra ana Nere. higeno Judasi'ma komoru huno ha' vahe zamazampi avrentesia ne'mo zamagrane anante oti'ne. 6 Hagi Jisasi'a anage zamagrirkura hu'ne, Nagra ana Nere hige'za, zamefiti vu'za mopafi traka truku humse'naze. 7 Ana hazageno, Jisasi'a mago'ene zamantahige'ne, Tamagra azanku nehakraze? Hige'za zamagra hu'za, Nazareti kumateti Jisasinku nehakrone. 8 Hazageno Jisasi'a ke nona'a huno, Ko'ma Nagra ana Nere hu'na tamasm'i'noe, Nagriku'ma nehakrehanuta, ama vahera zamatreke'za viho. 9 Agrama hu'neana, ko'ma Agra'ama hunte'nea kemofo nena'a fore hinogu hu'ne. Kagrama nami'nana vahepintira magore hu'na Nagra zamatroge'za afe osu'naze, hu'nea kegu hu'ne. 10 Hagi Pita'a bainati kazinkno eri'nereti anoma'afinti avazu hia zamo vugote'nea pristi ne'mofa kazokzo eri'za nera tamaga kaziga agesa ahe tavrofe atre'ne. Ana kazokzo eri'za ne'mofa agi'a Malkusi'e. 11 Ana higeno Jisasi'a Pitankura huno, Bainati kazinka'a anoma'afi vazinto. Nenfa'ma nami'nea tin tafempintira (kapu) Nagra onesuo? 12 Anante mago sondia kevune, sondia vahete vugota huno kvagri zmante'nea ne'ene, Jiu vahe'mokizmi ati vahe'mo'zane, Jisasina azeri'za azante nofi kinte'naze. 13 Anakite'za esera Anasinte aware'za vu'naze, na'ankure agra Kaiafasi nenemo'e. Kaiafasi'a

ana kafumofo agu'afina vugota pristi ne' mani'ne. **14** Korapara
Kaiafasi Jiu kva vahera antahintahizamino, hakare vahe'mokizmi
nona huno magoke ne'mo frigahie huno hu'nea nere. **15** Saimon
Pita ene, magora Jisasima amage' nentea disaipoli ne'ene
Jisasima avare'za Anasinte vazage'za anantega zamavirike
vu'na'e. E'i anama vu'nea disaipoli nera, pristi ne'mo'a ke'nea
disaipoli ne'kino Jisasi'ene vugota pristi ne'mofo kumapina
ufre'ne. **16** Hianagi Saimon Pita'a kasante fegi'a otino mani'ne.
Ana higeno Jisasi amage' nentea disaipoli nera vugota pristi
ne'mo ke'nea ne'mo atiramino, kazokzo eri'za mofa'mo kafante
kva hu'nea mofa asamigeno, Pitana avreno agu'afi emareri'ne.
17 Anante kazokzo eri'za mofa'ma kafante kva nehia mofa'mo
Pitanku amanage huno antahige'ne, Kagra ama Ne' amage'
nentana disaipol nere, tamage ana nepi? Huno antahigegeno,
A'o, Nagra ru nere. **18** Ananteria kazokzo eri'za vahe'ene,
nonte kva nehaza vahe'ene, tanknuzare teve heg're'za oti'za
mani kagi'naze. Na'ankure zasi hige'za teve tohiku hugre'naze.
Pita'enena ana tevere uoti'neno teve tohi'ne. **19** Ana zama
fore nehigeno'a, vugota pristi ne'mo, amage nentaza disaipol
naga'ene, rempi'ma huzami'nea kegu Jisasina agenoka hu'ne.
20 Jisasi'a ana kenona'a anage hu'ne, Nagra amate mika
kaziga nanekea hu'noe. Nagra maka zupa Jiu vahe osi mono
nompine (sinagog) ra mono noma (tempol), Jiu vahe maka
atru nehaza nomofo meg'i'a rempihuzami'noe, Nagra magore
hu'na oku'a nanekea huozmi'noe. **21** Na'anku Nagria nantahi
negane? Nentahizage'na huzmasmi'noa vahe zamantahigenka
ko, Nagrama hu'noa nanekea, zamagra antahi'naze. **22** Jisasi'ma
ana nanekema higeno'a, mago ra mono nonte kva nehia
ne'mo, Jisasina avugosafi ruhapatino neheno amanage hu'ne,

E'inahu hunka vugota pristi vahe kerera ke nona hugahano?

23 Higeno Jisasi'a ke nona huno agri asmi'ne, Havigema hu'nesua zanku'ma nehanugenka, havizani'a hufore huo, hianagi tamage kema nehuana nahigenka kagra nenahane? **24** Higeno anante Anasi'anofira ovasneno huntogeno, Kaiafasivugota pristi nete avare'za vu'naze. **25** Hagi Saimon Pita'a oti'neno teve tonehige'za, tevere mani'naza vahe'mo'za antahige'za, Kagra'nena e'ina ne' amage' nentana disaipol ne' mani'nampi?

Hu'za antahigageno, Pita'a vahane huno, A'o nagra ru nere.

26 Mago vugota pristi ne'mofokazokzo eri'za ne'ma, Pita kazi knonteti (bainat) agesa rutavrofe atre'nea ne'mofona nefu' Pitanku huno, Zafa hozafi Agrane mani'nanke'na kagrira kage'noa nepi, ru nere? **27** Higeno, Pita'a mago'ene vahane nehigeno, ana amage hantaka'a, kokoremo ageru ru'ne. **28** Hagi anantetizamagra Kaiafasintetira ko'atu avame Jisasina avare'za Romu ugagota kva (gavana) ne'mofononente vu'naze. Vunazanagizamagra ugagota nemofo kumapina uofre'naze. Ana zamo zamazeri pehena resige'za, Hibru vahe kinafintizamare'nea knagu antahimi'za neza nenaza knare ovuzanku ana hazageno, **29** Paeroti ne'mo zamagritega meg'i'a atiramino eno anage hu'ne, Ama'na nera nankemofo agafare nanekea hu'nentaze? Hunozamantahige'ne. **30** Zamagra kenona hu'za asmi'naze, Ama ne'mo'ma hazenke ne'ma omani'nesina, tagra avreta kagritera omosine. **31** Hazageno Paerot'i'a zamasmi'ne, Tamagratami avaretma tamagri kasegemo hu'nesia kante Agrira keaga hunteho. Jiu vahe'mo'za Paerotinku anage hu'naze. Tagrira vahe'ma zamahe fri'zantera i'o hurante'naze. **32** Ana kema hu'nazana, Jisasi'ma korapa Agrama fritenoma otinia zankuma zamasmi'nea kemo e'ama hu'ne. **33** E'ina higeno, anante Paerot'i'a

eteno ugagota vahe (gavana) nompi vuno, Jisasina kehuno,
Kagra Jiu vahe'mokizmi Kinifi? Huno antahige'ne. **34** Higeno
Jisasi'a kenona huno, Kagra kagesafinti ke nehampi, mago'a
vahe'mo'za Nagri'kura kasmi nagenka nehano? **35** Paeroti'a ke
nona huno, Nagra Jiu ne' mani'nofi? Kagri vahe'mo'zane, ra
mono kva vahe'mo'za (hai pristi) Kagrira kazerite'za, kware'za
eme nami'naze. Kagra na'a hu'nantere? **36** Jisasi ke nona'a
hu'no, Nagri kumara ama mopafina omne'ne. Ama mopare
kva vahe mani'noresina eri'za vahenimo'za, Nagritekura ha'
hazage'za, Nagrira navre'za Jiu vahera ozamizasine, hianagi
Nagri kumara ama mopafina omne'ne. **37** E'inage higeno
Paeroti'a asmi'ne, Higenka Kagra kinio? Jisasi ke nona'a hu'ne,
Kagra Nagriku'ma kinie nehanana tamage. Ama'na kegafare
Nagra ama mopafina efore hu'noe. Nagra ama'na agafare ama
mopafina e'noe, tamage naneke huama hunaku e'noe. Maka
vahe'mo'za tamage nanekegu zamave'ma nesimo'za, Nagri
nagerute zamagesa ante'za nentahi'za tamage hu'za nehaze. **38**
Higeno Paeroti'a antahige'ne, Tamage nanekea inanknahu ke
me'ne? Anagema huteno'a, meg'i'a atiramino Jiu kva vahete
vuno anage hu'ne, Mago havizana nagra, Agripina ke'na erifore
osue. **39** Hu'neanagi tamagri avu'avate kinafinti tamavare'nea
(Pasova) knare mago ne' kinafinti azeri atretere hugahue hu'negu,
tamagrama antahi'zana nagra kinafintira, Jiu vahe'motma Kini
ne' huntusugeno vanio? **40** Hige'za kezati'za amanage hu'naze,
Ama'na nera avare otre'gahane. Hagi Barabasi avare atro,
Barabasina kumzafa ne'ku hu'naze.

19 Hagi anante Paeroti'a huzmanteg'eza Jisasina sefu ami'naze.
2 Anante sondia vahe'mo'za ave'ave nofite kini vahe'mokizmi
fetorikna huza tro hute'za, Jisasi anunte antani nente'za, koranke

kukena hunte'naze. 3 Zamagra Agrite ete'vute nehu'za, Husga
hunte'za ankaza nente'za, Keho, ama Jiu vahe'mokizmi kinia!
Nehu'za avugosafi mago'ene ruhapa hapa hu'za ahe'naze. 4
Mago'ene Paeroti'a ete atiramino, Jiu kva vaheku amanage huno
zamasmi'ne, Keho, ama ne'ma nagrama aware'na tmagrite'ma
neoana, antahisazana mago keaga Agri'ma hunte'zana omne'ne.
5 Anante Jisasina ave'avenofite fetori'ene, koranke kukena antani
antetageno, atiramino e'ne. Paeroti'a anage hu'ne, Keho, ama
Nera! 6 Vugote'naza pristi vahe'ene, mono no kegava nehaza
vahe'mo'za (gad) Agri'ma nege'za amanage hu'za kezati'naze,
Aheta hantiho, aheta hantiho! Hazageno Paeroti'a zamasmi'ne,
Tamagratmi avretma rugeka zafare ome aheho, na'ankure nagra
mago hazenke'a omne'nege'na negoe, huno zamasmi'ne. 7
Hige'za Jiu kva vahe'mo'za ke nona'a amanage hu'haze, Tagrira
kasegetia me'ne, hagi ana kase kemofo amage' anteno Agra
frigahie. Na'ankure Agra Anumzamofo Ne'mofavre mani'noe huno
hu'ne. 8 Hazageno ana kema Paeroti'a nentahino'a, tusiza huno
agra mago'ene amanogura hu'ne. 9 Eteno Paeroti'a kuma'afi
ufreno, Jisasinku anage hu'ne, Kagra igati e'hane? Hianagi
Jisasi'a magore huno agri kenona'a osu'ne. 10 Ke osigeno,
Paeroti'a anage huno asmi'ne, Kema hunami'zankura nahigeno
kave nosie? Kagra ontahi'nano, Kagri'ma katufe katre hanavene,
rugeka zafare kahena hanti hanavema nagrama eri'noana?
11 Higeno Jisasi'a ke nona'a asmi'ne, Kagra Anumzamoma
hanavema onkamiasina, Nagri'ma kegava hunantega hanavea
e'orintesine, hagi monafinkati ne'mo hanigenka anara hugahane.
Na'ankure navareno kazampima eme ante'nemo'a, kagrira
kagatereno tusi'a kumi hu'ne. 12 Higeno anankema antahiteno'a
Paeroti'a aza huno katufe atrenaku tusiza huno agesa antahi'ne.

Hianagi Jiu kva vahe'mo'za kezati'za, Kagrama ama ne'ma
katufe atresunka, kagra Sisa knampa omani'nane! Mago'mo
kini manigahue hanimo'a, Sisana ha' rentegahie. **13** Hazageno
Paeroti'a ana kema haza nentahino, Jisasina avare fegi'a
atreно naneke fgagohu trate umani'nne, ana kumamofo agi'a,
Havereti simeni hunte'naza kumare nehaze, hagi Hibru/Arami
kefina, Gabate hu'za nehaze. **14** Hagi Jiu vahe'mo'za kinafinti
zamare'nea knagu antahimiza nenaza (Pasova) ne'za retro
tra hunaku nehazageno, zagemo'a feru asegeno Paeroti'a
Jiu vaheku huno, Keho, ama tamagri Kinia! **15** Anagema
hige'za kezanke hu'za, Avretma viho, avretma viho, Agrira
ahetma hantiho! Nehazageno Paeroti'a zamantahige'ne, Nagra,
tamagri Kinia ahena hantisuo? Hige'za pristi vahe'mo'za ke
nona'a hu'za, tagri kinia magora omani'neanki, Sisa agrake
mani'ne. **16** Anagema hazageno Paeroti'a Jisasina ahe'zama
keka zafare hantihogu zamige'za Jisasina azeri'naze. **17** Anante
Jisasi'a keka zafa'a erino, vahe anu zaferine nehazare, Hibru
kefina Golgotе nehazare erino vu'ne. **18** E'i anante Jisasina
nehe'za, tare netrena ruga raga asopare znahe'za rugeka zafare
nehanti'za, Agrira amu'nompi hanti'naze. **19** Paeroti'a mago
avona kreno, ana keka zafare hanti'ne. Anage huno kre'ne,
JISASI'A NAZARETI NERE, JIU VAHE'MOKIZMI KINIE. **20**
Huno krente'nege'za hakare Jiu vahe'mo'za hampri'za ke'naze.
Na'ankure Jisasima ahe'za hanti'naza mopa, rankuma tva'onte
me'ne, ana kema krente'neana Hibru kefine, Latini kefine, Griki
kefima huno ana avona krentene. **21** Anante Jiu vahe'mokizmi
vugota pristi vahe'mo'za Paerotina asami'za, Jiu vahe'mokizmi
Kinie hunka onkrenka, hagi Agra'a huno, Nagra Jiu vahe'mokizmi
Kinie huno hu'ne hunka kro hu'za asmi'naze. **22** Hagi Paeroti'a

ke nonazmire zamasmino, Inankna keo nagrama krente'noana
hago krente'noe. **23** Anante sondia vahe'mo'za, Jisasina rugeka
zafare ahe'za hantite'za, amegati kukena'a eri refko hu'za 4'a
kevu ante'naze, mago'mo mago kevu eritere hu'are, avate
kukena'ama hati'nazana eri mago hu'za anagamuti hati'za
fenkamu urami'naze. **24** Hige'za sondia vahe'mo'za ke hugantu
hugma hu'za, erisagnera osinkero, hagi satu zokago reta
kesune, aza erisifi, e'i ana kemo Anumzamofo avon tafe'mo
hu'nea ke eriama hu'ne, Zamagra amega kena'n'i'a amu'no
zamifi fagago hu'za eri'naze, zamagra nagri kenarera, taisi
zokago re'naze. (Sam-Zga 22:18) Anama kre'naza kante anteza
sondi'a vahe'mo'za ana kemofo eri knare hu'naze. **25** Hianagi
Jisasi ahe'za hanti'naza keka zafamofo agafatina, Agri nereraki,
nererana nenunknaki, Klopasi nenaro Mariaki, Magdala kumateti
Mariaki hu'za oti'naze. **26** Nerera'ene, amage' nentegeno
avesi nentea disaipoli ne' ene anante oti'nakeno Jisasi'ma
neznageno'a, Agra nereranku huno, A'moka ko, ama'ne kagri
ne'mofavrea! **27** Anante amage' nentea disaipoli neku hu'ne,
Ko, kagri negrera'a ama'ne! Ana knareti agafa huno amage'
nentea disaipoli ne'mo ana ara avreno noma'are vu'ne. **28** Hagi
anama huteno'a, Jisasima antahino keno hiama maka'zamo
hago vagaregeno, Anumzamofo avontafemo hu'nea kea eriknare
hunaku, Tinku navenesie, huno hu'ne. (Sam-Zga 69:21) **29**
Mago mopa kavofi akake waini ti aviteno anante menege'za,
kapuku eri'za hisopu zafare anakite'za, ana aka waini timpi
rete'za (spons) erisaga hu'za agite ante'naze. **30** Ana hazageno
Jisasi'ma ana akake waini tima neteno'a, Agra hu'ne, Ha vagare!
nehuno Agra kepri huno avamu'a atre'ne. **31** Anante retrotra
huknazmi me'negu hu'za, mani fruhu kna (sabat) efregahianki

rugeka zafare (avufga'a) kerfa omanesie hu'naze. (Na'ankure
kinafinti zamavare'nea knagu antahimiza ne'za nenaza knane,
mani fruhu (sabat) knanena magoka ra kna'zami me'negu
hu'za,) Jiu kva vahe'mo'za huza, zamagia ru hantagi tenketa,
anante fri kerfa eri mopafi atreta, erita vamnenno hu'za Paeroti
antahige'naze. **32** Higeno sondia vahe'mo'za e'za, Jisasine
znahe'za hanti'naza netremo'kizni znaga ru hantagi'naze, pusante
mago'mofa ruhantagiteno, mago'mofona henka ana hu'ne. **33**
Hianagi Jisasinte'ma e'za eme kazana, ko fri'nege'za tarega
agia ruha'ontagi'naze. **34** Hianagi mago sondia ne'mo krugru
kevereti Agrira asopafi regeno, hantaka huno korane, avufa
rimo'ene herfino evu'ne. **35** E'i ana zama ke'nea ne'mo ama
naneke huama huno kre'ne, agrama hu'nea nanekea tamage
hu'ne, agra antahi'neno tamage huno nehie. Ana hanigenka
kagranena anazanke hunka kamentinti hugahane. **36** Na'ankure
ama anazama fore hu'neana, Anumzamofo avontafepi kre'nea
nanekemo nena'a fore hanigu huno, Agri zaferina magore huza
ruha ontagigahaze. (Sam-Zga 34:20) **37** Ete mago avontafemo
mago'ene huno, Zamagra zamuma kesazana, agri'ma krugru
asopafi re'namofonte kegahaze huno hu'ne. (Zek 12:10.) **38**
Hagi anazama vagaregeno Arimatia kumateti ne' Josefe'a Jisasi
amage'nentea disaipoli ne'mo, Jiu kva vaheku koro nehuno oku'a
Jisasi fri'kerfa erino vanigu Paerotina antahige'ne. Antahigegen
Paeroti'a hugnare huntegeno agra vuno Jisasi fri'kerfa ome
erino vu'ne. **39** Hagi Nikodimasi mago kenage, Jisasinte e'nea
ne'mo, Josefe'ene tragoteno eno, mananentake masavena
mirane, alone, magopi tagi havia hu'nea masvena kna'zanim
34 kilo'naza hu'nea erino vu'ne. **40** Anante zanagra Jisasi
fri'kerfa eri'ne, ana masaventami avufare frente'ne, tvarave

tafepi frikerfa'a kargina'e. Jiu vahe'mo'za vahe ase nezmante'za
nehaza avu'ava hu'na'e. **41** Anama ahe'za Agri'ma hanti'naza
kaziga hoza me'negeno, anante kasefa havegana, vahera ase
ozmante'naza havega ana hozafina me'ne. **42** E'ina hu'negu Jiu
vahe'mokizmi mani fru hunaku retro tra nehaza kna'zmi (sabat)
atupa hige'za, ana tva'onte me'nea havegampi Jisasina eri'za
ome asente'naze.

20 Hagi pusa zagegna Sonta zupa masa osu'negeno, ko'atu
hanimpi Magdala kumateti Maria'a, Jisasima asente'naza kerirega
kenaku uhanatino ome keana, ana keri agite runkanire'naza
havea ko atufe atre'nagano ome ke'ne. **2** Ome keama agite
runkanire have retufe atre'nagano, ete rukrahe huno agareno eno
Saimon Pitane, mago amage nentegeno Jisasi'ma avesi'hentea
disaipoli ne'ene eme znam'i'ne. Ramofo fri'kerfa'a kerifintira
hago erisaga hu'za iga Agrira ome ante'nafi onke'none. **3**
Zanasamige'ne Pita'ene mago'ma amage' ante'nea disaipoli
ne'ene ana keriga ome kenaku vu'na'e. **4** Tarega'moke znaga
re'ne nevapinti, mago'ma amage' ante'nea disaipol ne'mo, Pitana
agtereno kagota huno asente'naza havegantera uhanati'ne. **5**
Uhanatino upri huno ome keana anoma vazinte'naza tavrave
(linen) anante me'negeno ke'ne, hagi agra ana havegamofo
agu'afinka umare ori'ne. **6** Anante Saimon Pita'a amage'a
ne-ereti ehanatino ana havegampi evumareri'ne, marerino
ome keana avufare karagi'naza tavrave ananterea me'negeno
ke'ne. **7** Hagi avugosafi tavravene Jisasi anunte karaginte'naza
tavravema, avufare karaginte'naza tavravenena, omne'negeno
ke'ne. Hianagi avugosafi tavravea regazri'za rure antageno
me'negeno ke'ne. **8** Anante amage nentea disaipoli ne'ma
ese'ma kerire ehanati'nemo, mrerino ome negeno tamage

huno amentinti hu'ne. **9** Na'ankure Anumzamofo avontafepima Jisasi'a friteno otigahie hu'naza nanekea, zamagra antahi ani osune'za ana hu'naze. **10** Ana huteke tarega amage' nenta'a disaipol ne'tremoke, noznirega atre'ne vu'na'e. **11** Hianagi Maria'a fegi'a ana havegante oti'neno zavi neteno mani'ne. Zavi netereti pri huno ana have kamofo agu'afinka keana, **12** tare ankero netremoke efe kukena hute'ne mani'nakeno, Jisasima antemse'nare zanage'ne. Mago'mo'a agama me'nea kaziga manigeno, mago'mo'a asenima me'nea kaziga manigeno hu'na'e. **13** Zanagra ana a'mofonku amanage hu'na'e, Ama a'moka na'anku zavira netane? Maria'a ke nonaznire huno, na'ankure Ranimofona inantega eri'za vu'nazo, inantega ante'nazo nagra ontahi'noe. **14** Anagema ana a'mo'ma huteno'ma rukrahe'ma hiana, Jisasi'a anante oti'negeno keanagi, Jisasi'e huno ontahi'ne. **15** Jisasi'a ana a'ku huno, A'moka na'anku zavira netane? Azanku nehakrane? Na'ankure ana a'mo antahiana hoza kva nehia nere nehuno Agrikura anage hu'ne, Kva vahe'moka, Jisasina inante ome ante'nampi naveri hananke'na Agrira ome eri'na vugahue. **16** Jisasi'a ana a'kura huno, Maria! Higeno a'mo'a rukrehe huno Jisasinku Hibru kefinti, Rabonai! (ana kemofo agafa'a Hibru kefina Rempi hurami nere hu'ne.) **17** Jisasi'a ke nona'a huno, Nagrira eme navako osuo, na'ankure Nenfantega mareori'noe. Hianagi vunka nafuhe'ina ome zamas mio, Nagri'ene tamagri'ene Nerfante, Nagra marerigahue. Nagri Anumzane, tamagri Anumza mani'nerega vugahie hunka ome zamas mio. **18** Higeno Magdala kumateti Maria'a ete rukrahe huno eazamo, amage'ma nentaza disaipol naga'a eme zamas mino, nagra Rantimofona ke'noe! Nehuno ana a'mo'a Jisasi'ma hu'nea ke eme zamas mi'ne. **19** Sontamofo amefi ese knamofo kinaga,

haninkige'za amage nentaza disaipol naga'mo'za Jiu kva vaheku zamagoro hu'za kafa eri ki'za no agu'afi mani'nageno, Jisasi'a eazamo amu'nozmifi eme otino zamagrikura anage hu'ne, Tamarimpamo fru hino, huno zamasmi'ne. 20 Anagema Agra huvagareteno, tarega azane, ratimpa avufane zamaveri higeza nege'za amage' nentaza disaipol naga'mo'za, Rantie hu'za muse hu'naze. 21 Ru'ene Jisasi'a amanage huno zamasmi'ne, Tamarimpamo fru hino, Nenfa hunantege'na e'noaza hu'na, Nagra anazanke hu'na huneramantoe. 22 Anage Agra huteno, Jisasi'a asimu'a zamagritega huhu hunetreno Ruotge Avamu eriho. 23 Hagi tamagra vahe'mokizmi kumi atrezamantesageno'a, kumi'zmia atre zamantegahie. Hagi tamagrama kumi'zmi atre ozmantesageno'a, atre ozmantegahie. 24 Hianag Tomasi'a, 12fu'a amagema nentaza disaipol nagapinti mago zmimokino agi'a Didimasi'e nehaza nere. Ana agi'amofo agu'agesa'a kugavezare nehaza ne'kino, Jisasi'ma e'nea zupa omani'negeno e'ne. 25 Ana hu'negu mago'a amage nentaza disaipol naga'mo'za asami'za, Tagra Ramofona ke'none! Hianagi agra ke nona zamire zamasmino, Azante niri afuhe nege'na niri afuhete avako nehu'na, ratimpare nazama avako hutesu'nage, nagra namentintia hugahue. 26 Hagi 7'a zagegna agaterege'za, rosaza hu'za amage' nentaza disaipol naga'mo'za, Tomasi'ene magopi kafana erigi'za mani'nazageno, zamagri amu'nompi Jisasi'a eme otino, Tamarimpa fru eriho, huno hu'ne. 27 Anante Tomasinku huno, Kza antegma atenka kaza avozareti, Nagri nazana avako hunka ko. Kza antegma atenka nasopare antenka ko. Kmentintifina krogro onkio, hianagi kamentinti huo. 28 Tomasi'a ke nona huno Jisasina asmi'ne, Nagri Ranimoka, nagri Anumzane! 29 Jisasi'a agrikura anage hu'ne,

Kagra Nagri nagetenka kamentintia nehampi? Onage'neza zamentinti hanamo'za, Asomura erigahaze, huno Jisasi'a hu'ne.

30 E'izanku hakare'a kaguvazama Jisasi'a amage nentaza disaipol naga'mokizmi zamufi huzmeri'ne. Ana zantamina ama avontafepina kre onte'noe. **31** Hianagi ama kre'noa avomo hugasamisigenka kamentinti nehunka, Jisasi'a Tazahu ne', Anumzamofo Ne'mofavre, Kraisi'e hunka kamentinti hanunka kgra manivava mani'zana Agri agireti erigahane.

21 Henka'a Jisasi'a mago'ene Taberiasi mago agi'a Galili tiru ankenare, amate efore huzmerige'za amage' nentaza disaipol naga'amo'za ke'naze. Ama'amokizmire efore hige'za ke'naze. **2** Saimon Pita'ma, Tomasi mago agi'a Didimasi'ma, Natanael Kana kumateti ne'ene, Zebeti nemofokegi, tare amage' nenta'a disaipol netrene atru hu'za mani'naze. **3** Saimon Pita'a zamasmino, nagra nozame kuko atreku nevue hige'za, tagra anazanke huta magoka vugahune, nehu'za votifi mareri'za vu'naze. Ana kenagera magore hu'za nozamea avazu osu'naze. **4** Anante ko'ma atigeno, nanterana Jisasi'a tinnenare oti'neanagi, amage nentaza disaipol naga'mo'za, Jisasi'e hu'za keso'e osu'naze. **5** Anante Jisasi'a zamasmi'ne, Mofavre nagare tamagra nozamea avazu osu'naze, tamageo? Huno zamantahigege'za, zamagra ke nona'a Izo avazu osu'none, hu'za hu'naze. **6** Agra zamasmino, Kukontamia eritma votimofo tamaga kazigati omo atretma, mago'a nozamea avazu hugahaze. Hige'za ana kukoma atrete'za, avazu hu'zanku kasgeke hu'naze. Na'ankure rama'a nozamemo ana kukompi frevitege'za avazuhu anaga ana votifi atrezanku hu'naze. **7** Jisasi'ma avesi nentea disaipol ne'mo Pitanku anage hu'ne, antu e'i Ramo'e! Saimon Pita'ma antahiamma Rane higeno'a, amega kukena'a eri hankre'ne, (na'ankure timpi eri'za erinaku agra atova

hutre'nereti ana hu'ne), timpi tkaureno nagosa runo ti ankenarega vu'ne. **8** Hianagi mago'a amage' nentaza disaipol naga'mo'za votifi e'naze. Na'ankure mopa afete'are omane'negeze. Hagi 100'a mita zaza'a hu'nege'za nozame zagamo avi'ma te'nea kukona avazu huzma e'naze. **9** Zamagrama tinnenare e'za eme kazana tanknuza (sakol) teve heg're'nare, mago nozamene, breti'ne ana tevere menege'za ome ke'naze. **10** Jisasi'a zamagriku huno, Menima azeri'za nozamefinti mago'a eritma echo. **11** Higeno Saimon Pita'a votifi marerino ana kukona avazu huno tinnenare e'ne. Ranra nozamea 153'amo avite'ne, mago'a rama'a nozamemo kukompina ufre'neanagi, ana kukona tagato osu'ne. **12** Jisasi'a zamagriku anage hu'ne, Eta nantera ne'za eme neho. Hianangi amage' nentaza disaipol nagapinti mago'mo, Kagra azage, hu'za antahige'zankura koro hu'naze, na'ankure zamagra Rane hu'za ko antahi'naze. **13** Jisasi'a eno breti emerino zamagrira nezmino, nozamea anazanke huno zami'ne. **14** Fri'nefinti Jisasi'ma otino zameri'neana, tagufa zupa amate efore huzmerige'za amage' nentaza disaipol naga'mo'za ke'naze. **15** Nantera ne'zama nehna hutageno, Jisasi'a Saimon Pitanku huno, Saimon, Joni nemofoga, kagra ama vahe'zaga zamagterenka Nagrikura kvesinenantampi? Huno antahi'gegeno, Ozo Ramoka, Kagra antahi'nane, nagra navesi negantoe. Higeno Jisasi'a asmino, Sipisipi nagani'a ne'za zamio. **16** Jisasi'a tare zupa mago'ene anage huno asmi'ne, Saimoni, Joni nemofoga, Nagrikura kave'nesio? Ozo, Ramoka, Kagra antahi'nane nagra Kagirira navesi negantoe, higeno Jisasi agriku huno, Sipisipi zaga'ni'a kegava huo. **17** Higeno Jisasi'a tagufa zupa ana kege huno asmi'ne, Saimon, Joni nemofoga, Nagrikura kavesi nenantano? Higeno Pita'a arimpa kna hu'ne, na'ankure tagufa

zupama Nagrikura kve'nesio? Huno antahigea zankure. Pita'a Agriku hu'ne, Ramoka, Kagra maka'zana antahi'nane. Nagrama navesi negantoana Kagra antahi'nane. Higeno Jisasi'a ke nona'a asmino, Sipisipi zaga'ni'a ne'zana zamio hu'ne. **18** Tamagerfa hu'na negasamue, Kagrama kahefa'ma mani'nantera kenakarera kamu'nofi hunka kavesi'zante kana vano hu'nane, hianagi ranafa resunka, kazana rutaresanke'za rumo'za kagrira kukena hugante'za, ovuku hanantega kavare'za vugahaze. **19** (Menima Jisasi'ma hu'neana, Pitama henka frino Anumzamofoma ra agi ami'nia zanku huama hu'ne.) Ana kema Agra huteno, Jisasi'a Pita asmino, Namage anto! Huno asmi'ne. **20** Hagi Pita'a rukrahe huno keana, Jisasi'ma avesi avesi hunentegeno amage' nentea disaipoli ne'mo znavaririno e'ne. Ana nera Jisasi ahihi'zafi umase tragoteno ne'zama nena fima antahigeno, Ramoke, iza Kagrira vahe zamazampina kazerino antegahie? Huno antahige'nea ne' e'ne. **21** Pita'ma ana ne' negeno'a, Jisasina antahige'ne, Ramoke, ama nera nankna hugahie? **22** Jisasi'a ke nona'a agrira asmino, Nagrama, Agriku mani'nesige'na ete'na esuema hanua knarera, kagri'zana omne'neanki, na'ane hugahane? Kagra namage anto! **23** Higeno anama hu'nea kemo'a Jisasinte zamentinti nehaza nagate vuno eno higeno, ama'na disaipol nera ofrigahie hu'naze. Hianagi Jisasi'a, agrikura ofrigahie huno osu'ne, Hianagi frisio manisio Nagrama mani'nesigena e'tena esue hanuazamo'a kagri'zana omne'neanki, na'ane hugahane? huno hu'ne. **24** Ama'na disaipol ne'mo agra'a amazana huama huno ana zantamina kre'ne, higeta tagra antahita agri kegura (testimoni) tamage huta nehune. **25** Hagi hakare ruga'a zama Jisasi'a hu'nea zana me'ne, ana maka'zama avon tafepima kre'neresina,

nagrama antahuana ama mopafina avon tafemo'a titipa higeno,
anama kraza avontafe ante kankamuna omaneresine.

Aposolo

1 Nagra Luku'na, ese avontafe'ma kre'nofina, Tiofolisiga ko kasmi'noe, Jisasi'ma agafa huno hakarezama nehuno rempima hunezamigeno, **2** avreno monafinka vu'nea knare ehanati'ne. Hianagi vunaku nehuno'a Agrama zamavare'nea aposol nagara ruotge Avamu'mo aza higeno, eri'zama erisaza zankura zamasmi'ne. **3** Ana amage nentaza aposol nagateke, atama erino fri'nefinti otino, Nagra mani'noe huno 40'a zage'gnafina zamavure vano nehuno, anahu kna huno Agra rama'a kampinti, ruzahu ruzahu ke nehuno, mika'zama Anumzamofo kumapima me'nea avu'ava zanku kea nehige'za nege'za antahi'naze. **4** Ko'ma zamagrane mani'neno'a, anage huno huzmante'ne, Jerusalemi kumara otretfa hiho. Hianagi Nenfa'ma huvempa huno huhampri ramante'nea zanku'ma tamasmi'noana avega antetma maniho. **5** Na'ankure Joni'a tintfanu mono tina frezmante'ne, hianagi ama knaretira atupa knafi, tamagra ruotge Avamuteti tina fregahaze. **6** Aposol naga'mo'za eritru hu'za magopi manite'za, agafa hu'za Jisasina antahige'naze. Ramoka magna, Israeli vahe'mokizmi nomani'za zamazeri fatgo nehu'na, kva krizmantegahue hu'nana knafi? **7** Hazageno agra anage huno zamasmi'ne, Tamagri'zana omene'neakita tamaismisugeta ontahigahaze. Nanknarero, nanknafino Nenfa'a agra hanave'afi, anankna huhamprinte'ne. **8** Hu'neanagi ruotge Avamumo tamagrite esigetma, tusi'a hanave eritetma, Nagri nagenkea Jerusalemi kumate huama nehutma, Judiane Sameriane huama nehutma, afete mopa omeatre eme atre arega ome huama hugahaze. **9** Ana naneke zamasmiteno, negageno hampompi ufrege'za onke'haze. **10** Monafi kete'za mani'nageno, ame' huno efeke kukena hu'na'a ne'tremoke anante ot'i'ne'ne, **11** anage hu'na'e, Galili vahe'mote na'a

higetma amarera oti'netma monafinka negaze? Ama ana Jisasi tmatreno monafi negageno mareri'neaza huno, ete anahu kna huno egahie, huke zamasmi'na'e. **12** Anante mago agona Olivie nehaza agona atre'za Jerusalemi e'naze. E'i ana agona Jerusalemi tava'onte me'ne, kama vu'amo'a, mani fruhu kna zupa vute'za neaza avamente me'nea agone. (1 kilomita avamenteku hu'ne.) **13** Zamagrama Jerusalemi ufrete'za, nemaniza nompi anagame umarereri'za hunaragintepinka mani'naze. Pita ene Joniki, Jemisi ene Endruki, Filipi'ene Tomasiki, Bataromio ene Matiuki, Jemisi Alfiasi nemofo ene Zelati nagapinti ne' Saimoniki, Jemisi nemofo Judasiki hu'za anampi umani'naze. **14** Maka ana naga'mo'za magoke antahintahifi maka'zupa nunamu nehu'za mago'a a'nene, Mariaki Jisasi nerera'ene, Jisasi nefu'zagi hu'za mani'naze. **15** Ana knafina zamentinti nehaza nagapinti Pita'a 120'a naza naga amu'nozamifi otino anage hu'ne. **16** Nafuhete, Ruotge Avamumo ko Deviti asmigeno avontafepima krente'neana, Judasi zamareno vige'za ha' vahe'mo'za azeri'naze kemo'a avufa'a forehie. **17** Tagrane mani'neno, agra ama mono eri'zana eri'ne. **18** (Menina Judasi havi avu'ava'mo ana mopa miza se'ne, ana mopafi kanahegeno rimpamo tagatiramine. **19** E'ina huno frige'za Jerusalemi kumate vahe'mo'za ana nanake nentahi'za ana mopagu Aramu kefi Hakaltemie hu'naze, zamagra kefina Korantami'nea mope hu'naze.) **20** Anazanku Zgame avontafipina anage huno kre'ne, Atregeno mago'zana noma'afina omaneno, Anampina atregeno mago vahere huno omanino, (Sam-Zga 69:25), Atregeno mago vahe'mo agri nona erino, eri'zana erino huno avona krente'ne. (Sam-Zga 109:8) **21** Ana hu'negu tagra mago ne azeri otisunkeno, Judasi nona erisie. Ana ne'mo'a tagrane maka knama, Ramo Jisasi'ma mani'nereti

vuno, **22** Joni'ma mono tima fre ante'nea knareti eno, tagripinti aavareno monafi vu'neaza ke'nenimo, fri'nefinti oti'neazana huama huno tagranena vano hugahie. **23** Ana hute'za tare ne'tre znazeri oti'naze, Josefenku Banabasi'e (nehaza ne'kino mago' agi'a Jastusi'e) magora Matiasi'e. **24** Ana hute'za nunamu hu'za, Ramoka kagra hakare vahe'mofo zamarimpa ke'nane. Hanki ama tare ne'trepintira, inamofo huhampri antenampi taveriho. **25** Kamagema'ante'nea aposol ne' Judasi'ma eri'zama atreno kuma'arega vu'nea ne'mofo kuma'ma erino ama ana aposol eri'zama erinogura huhamprinte'nampi taverio. **26** Anante mago'zokago (lots) Taisi zokago reza kazageno, Matiasi huhampri'naza su'amo eama hige'za, Matiasi azeri otizageno, 1lni'a aposol nagapi ufre'ne.

2 Kasefa hoza vasage kna Pentikosl ege'za, aposol naga'mo'za mago nompi atru hu'naze. **2** Ana hu'za mani'nageno amehuno zaho'mofo agasasamo hiazza huno, tusi'a agasasa runo monafinti eramino mani'naza nompi avite'ne. **3** Tevemofo agefu'hagana huno, tagareno vuno eno huno, magoke magoke'mofonte emani'ne. **4** Maka'mofona Ruotge Avamu'mo zamagu'afi viteno, zamazeri otige'za, Avamu'mo zamasamia kante ante'za, agafa hu'za aru agerupinti kea hu'naze. **5** Ana knafina knare hu'za Anumzamofo amagenentaza Juda vahe'mo'za, mopane mopane kotegati e'za Jerusalemi kumate emani'naze. **6** Ana agasasa fore nehige'za, miko vahe'mo'za atru hu'za na'a fore nehie hu'naze. Na'ankure mago mago'mo'a agra'a agerupi antahitere hu'ne. **7** Zamagra antri nehu'za anage hu'naze, ana maka Galili vahe'mo'za kea nehazanki na'a fore nehie? **8** Na'a higeta tagra mago mago'mota tagra'a tageru'ma tarera'ma kaserantegetama neruna tagerupina nentahune? **9** Tagra rukotegati rukotegati

Patia mopareti'ene, Medes mopareti'ene Elami mopareti'ene,
Mesopotemia mopareti'ene, Judia mopareti'ene, Kapatosia
mopareti'ene, Pontusi mopareti'ene, Esia mopareti'ene, 10
Frigia mopareti'ene, Pamfilia mopareti'ene, Isipi mopareti'ene,
Sairini kaziga Livia mopareti'ene, Romuti nantu vahe'ene,
Hibru vahe'ene, megi'a vahe'mo'za zamagu'a rukrahe hu'naza
vahe'enene. 11 Kriti mopareti'ene Arabu mopareti vahe'mota
tagra hanavenentake avu'ava'zama Anumzamo'ma hia zana
tagerupi nentahune! 12 Maka'mo'za mago'ene na'a fore nehie
nehu'za, tusi'za hu'za antahintahi hakare hu'naze. Zamagra'a
ohumi ahumi nehu'za anage hu'naze, Na'a amazana fore
nehie? 13 Hianagi mago'amo'za anama haza zankura anage
hu'za zamagi'za nereza, zamagra kahefa waini ti ne'za negi
nenegahaze! Hu'za hu'naze. 14 Hianagi Pita'a otino 11ni'a
aposol naga'ane mani'neno ranke huno zamasmino, tamagra
Judia vahe'ene, miko Jerusalemi mani'namota amama huankea
tamagesa anteta antahi ankereho. 15 Ama kema nehaza
zanku'ma tamagesa hakare nehzana, menina nantera 9kiloki
hu'neanki'za, zamagra negi tina one'naze. 16 Hu'neanagi ama'i
korapa kasnampa ne'mo, Joeli hu'nea nanekemofo avufa'a
meni negaze. 17 Hagi vagare knafina, Anumzamo'a anage
hu'ne, Nagra Avamuni'a vahepi eri herafi atresugeno, tamagri
ne'mofatamimo'za, kasnampa kea huama nehanage'na, kasefa
vahe'mo'za ava'na keaza nehanage'za, ranafa tamimo'za ava'na
kegahaze. 18 Nagri eri'za vahera, vene'nere ene, a'nerera
Nagra Avamu'n'i'a ananknafina eri herafi atresuge'za zamagra
kasnampa kea hugahaze. 19 Nagra monafina ruzahu'za eri
fore nehu'na, kaguva avame'za ama mopafina erifore nehu'na,
korane, tevene, hampone tokira hugahie. 20 Zagemo'a rukrahe

huno hani hanigeno, ikamo'a kora hanigeno, henka tusi'a hanave'nentake Ramofo kna egahie. **21** Ana nehanigeno miko vahe'mo'za, Ramofo agi hanta nevazisamo'za zamagu'vazinke'za knare kuma erigahaze. (Jol 2:28-32.) **22** Israeli vahe'motma ama kea antahiho, Nazareti ne' Jisasina, Anumzamo azeri ot'nea ne'mo, kaguva zane ruzahu'zane, avame'zana Anumzamo'a, Agripi runtanino amuno tamifina eri'zana erigeta, keta antahita hu'naze. **23** Ama ana nera, Anumzamo antahino ahegahaze huno korapa retro hu'nea kante antetma, tamagra avaretma megi'a vahe zamazampi antage'za, keka zafare hanto ahegeno fri'ne. **24** Hianagi Anumzamo'a fri'nefinti azeri otino, fri'zamofo atazampinti azeri so'e hu'ne. Na'ankure frizamofo hanave'amo'a azerintega osu'ne. **25** Deviti'a amanahu ke agriku hu'ne, Nagra maka zupa negogeno, Ramo'a navuga nemanie, na'ankure Agra nazantmaga'a mani'neankino, mago zamo'a nazeri kazara osugahie. **26** E'ina hu'negu nagu'amo'a so'e nehanigeno, nagipintira tusi'a musenkemo atiramigahie. Navufamo'enena ana zanke huno fore'ma hania zanku avega anteno manigahie. **27** Na'ankure kagra nagu'namena fri vahe kumapina (Heidis), otregahane, huge atresankeno Ruotge hu'nemo'a kerifina onkasrigahie. (*Hadēs g86*) **28** Kagra mani'zanimofa kana ko eri'ama hunami vare'nane. Kagrama navate'ma nemaninkeno'a, nagripina musezamo avinete, huno Deviti'a hu'ne. (Sam-Zga 16:8-11.) **29** Nafuhete, nagra fatgo hu'na neramasmue, mago tahitia Deviti'a frige'za asentageno, keri'amo'a menina tagrane me'ne. **30** Na'ankure agra kasnampa nekino antahine, Anumzamo'a mago negeho avareno tra'are (kini trate) antesigeno mani'nigu averino huvempa hu'ne. **31** Deviti'a kegamuteno, Kraisima friteno otisniazana ke'ne, fri vahe kumapina (Heidis) avufamo'a

atresigeno za'za kna omaneno, onkasrisia zanku hu'ne. (Sam-Zga 16:10.) (**Hadēs g86**) **32** E'i ana Jisasina, Anumzamo'a fri'nefinti azeri otigeta, tagra maka'mota tavufinti ke'nona zanku nehune. **33** Ana higeno Anumzamo ragi nemino, azantamaga kaziga'a avarentegeno, huvempama hu'nea Ruotge Avamura Nefampinti erino, eritagitregeta menina negeta nentahita nehaze. **34** Na'ankure Deviti'a monafinka mareori'neanagi, Deviti agra'a huno, Ramo'a, nagri Ramofonku huno, Naza tamaga kaziga mani'nege'na, **35** Nagra ha' vaheka'a zamazerina kagia tra antesugenka, kagiareti arentrako hugahane huno hu'ne. (Sam-Zga 110:1.) **36** E'ina hu'negu, maka Israeli vahe'motma tamage hutma antahi ankereho, tamagrama aheta hanti'naza nera, Anumzamo'a azeri otigeno, Ra vahe tro huno Kraisi mani'ne. **37** Ana kema zamagrama nentahizageno, kemo'a zamarimpafi agonaza zamarazeaza hige'za, Pitanku'ene ruga'a aposol nagakura anage hu'naze, tafuhete tagra na'a hugahune? **38** Hazageno, Pita'a zamagrikura anage hu'ne, tamagu'a rukrahe nehutma, Jisas Kraisi agifi mono tina frenkeno, kumi'timia apaseramante'na, ruotge Avamu'mofo museza tamagra erigahaze. **39** Na'ankure huvempama hu'neana tamagri'ene, mofavre tamimofonku'ene, afete mani'namokizmigu'ene, ruga'a vahera tagri Ra Anumzamo zamagi hanige'za, Agrite esamoza erigahaze. **40** Rama'a ruga'a ke Pita'a huama nehuno, zamazahuke zamasami'ne. Kefo zampima mani'naza vahepintira, maniganeta manisaza zamo tamagu'vazina, knare huta manigahaze. **41** Agri kere zamentintima haza nagapintira, monoti fre'naze. Anazupage tima fre'nazana, 3tauseni'a nazamo'za fre'naze. **42** Ana vahe'mo'za aposol nagamokizmi naneke antahiza atru hu'za monora rempi hu'za nentahiza, magopi breti kori'za nene'za (Lords sapa)

nunamuna hu'naze. 43 Aposol naga'mo'za hakare ruzahu'zane, kuguva'zana erifore nehazageno, maka'a vahe'mo'za nege'za zamanogu nehu'za amazana na'za fore'nehie hu'naze. 44 Hanki Jisasinte zamentinti hu'naza vahe'mo'za tragote'za nemani'za, maka'za zamia omi'ami nehu'za, 45 mago'a zazamine, mopa zaminena agafa hu'za zagore atrage'za, miza'sage'za zago eri'za upama hu'naza vahe refako hu'za zami'naze. 46 Maka kna ra mono (tempol) kumapi atru hu'za mono kea nehu'za, zamagu'a anterami'za, zamarimpa fruregati nonte nonte bretia kori'za nene'za kave'zamia fako hutere hu'naze. 47 Anumzamofo agi hentesga nehazageno, mago'a vahe'mo'za ana vahe'mokizmi muse huzmante'naze. Ana nehazageno Anumzamo zamagu'ma vazi'nea vahe'mo'za mago mago kna rama'a efre'naze.

3 Mago zupa, Pita'ene Jonikea, ra mono nontega nunamuhi knare, mago kiniga 3 kiloki higeke marerike nevakeno, 2 mago nera, nerera agu'afinti agia frinea kasente'nea nera zafa hu'za vazaza'mo'za ra mono nomofo kasana, knare so'e kasane hu'za agia nehare ome ante'naze. Mika zupa anante ome ante'nageno mani'neno, mono nompima umreriza vahekura, azama hanagu meme nehiane. 3 Ana ne'mo'a znagegene Pita'ene Jonikea ra mono nompi umarerisanuanki nehakeno, ana ne'mo'a zagogu zanantahige'ne. 4 Hianagi Pitake Jonikea avufi kefatgo huke negeke, Kama tagrira tago! Huno Pita'a hu'ne. 5 Higeno, ana ne'mo mago'a zana zanagritegati erigahue huno agu'agesa antahi'ne. 6 Hianagi Pita'a anage hu'ne, Silvane, golinena e'ori'noanki, nagrama eri'noazana kamigahue. Jisas Kraisi Nazareti ne'mofo agifi, otinka vuol! 7 Nehuno Pita'a azantmaga'a ana nera azerino azerioti'ne. Anama nehigeno'a ame' huno agia avozamo'ene, agia avu'a zaferinamo'a hanaveti'ne. 8 Higeno

agra haru huno marerino tamino nehuno, agia reno vu'ne.
Pita'ene Joni'ene magoka ra mono'nompi nevuno, haru huno
marerino tamino huno nevuno, musenkase huno Anumzamofo
agi erisaga hu'ne. **9** Ana hige'za miko vahe'mo'za negageno
nevuno, Anumzamofo agia hesga hu'ne, **10** hige'za mika
vahe'mo'za nege'za, ra mono (tempol) nomofo knare so'e kasante
mani'neno zagogu meme nehia ne'mo amanahura nehianagi,
nankna hu'neha hu'za tusi'a antri nehu'za zamagogogu hu'naze.
11 Pitane Jonikizni ana ne'mo zanazeri'negeke, mika vahe
krerfamo'za magoka zamagare'za zamagritega Solomonine hu'za
humegi atre'naza nompi, vano nehaza kante tusi zamagogogu
nehu'za e'naze. **12** Hianagi anama hazaza Pita'a negeno, anage
huno ana vahe'zaga zamasmi'ne, Israeli vahe'motma nahigeta
amanahu zankura antri nehutma, tamagogogura nehuta, tagrira
uruhara neragaze? Tagritia hanaveretiro, Anumzamofo avu'ava
hu'azamo azeri otigeno kana vifi? I'o, **13** Abrahamune, Aisakine,
Jekopu Anumzana tafahe'i Anumzamo kesga nehia eri'za
Ne'a Jisasina, Paeroti atrenigeno vunaku nehigeta, tamagrama
azeritma ha' vahe azampi ahenogu nenteta, Paeroti ne'mofo avufi
tamefi humi'naze. **14** Hianagi tamagra fatgo huno ruotge hu'nea
Nera, tamefi humitma vahe'ma ahenefria neku avare atreho,
hazage'za avare'za tamami'naze. **15** Hagi tamagra Asimu'mofo
agafa ahe fri'nazanagi, Anumzamo azerioti nemofo, tagra tamage
huta tavufinti ke'no'a zanku nehu'e. **16** Hagi Jisasina agri agire
tamentinti hu'azamo, e'i ama ana agimo amama negaza nera
azeri knare hu'ne. Hagi Jisasinte amentinti hu'nea zamo, mika
vahe'moka kavufina agrira azeri so'e hu'ne. **17** Menina nafuhete,
nagra tamantahi'noe, ontahinetma Jisasima tamavutamava'ma
hunte'nazana, kva tamimo'za nehzankna hutma ontahi'netma

hu'naze. **18** Hianagi korapama Anumzamo'a, Kasnampa vahepima runtanino'ma, Kraisia ata hoza erigahie huno'ma hunte'neazamo, ana kante efore hu'ne. **19** E'i zanku, tamasunku huta tamagu'a rukarehe huta, Anumzamofonte enkeno, kumitamia eri atreramantegahie. **20** Ana knafi Rantimofo avateti kahefa hanave ne-esigeno, hagi ko'ma Agra'ma huramante'nea nera Kraisina huntesigeno egahie. E'i Jisasi'e. **21** Ama ana Nemo'a monafi umani'enigeno, Anumzamo'a mika zana azeri kasefa hugahie, Anumzamo ko' huama hu'ne, korapa knafima ruotge kasnampa vahe'mofo zamagipi huvempa hu'ne. (aiōn g165) **22** Mosese'a huno, Ra Anumzamo'a kasnampa nera nagrikna huno tamagri nagapinti azeri otigahie. Agrama na'ane kema haniana, ke'a erizafa huta amage anteho. **23** Mika vahe'mo'za ana kasnampa ne'mofo kema ontahisnamo'kizmia, zamahe nefrino, vahe'afintira zamahenati tregahie. **24** Anahu kante maka Samuelinteti'ma eno erami'naza kasnampa vahe'mo'za, ke nehu'za huama hu'nazana, ama knagu hu'naze. (Diukas 18:15-19) **25** Tamagra kasnampa vahe'mokizmi mofavre, Anumzamo'ma tmafahe'zanema huvempa huno huhagerafinea kemofo mofavre mani'naze, Abrahamunku'ma huno, Kagri ka'a mofavrefinti, maka kokankoka vahe'mo'za asomura erigahaze hu'ne. (Jen-Agf 22:18) **26** Na'ankure Anumzamo'a pusante eri'za Ne'a azeri otigeno tagrite e'ne, havi zampintira magoke magoke'mota, tazeri rukarahe huno asomu hurante'ne.

4 Pita'ene Jonikema ana vahe zaganema keaga nehake'za, pristi vahe'ene ra mono nonte kva nehaza kva vahe'mokizmi kva'neki, Sadusi vaheki hu'za znagrite e'haze. **2** Na'ankure keagama hapina, vahe'ma frisutma, Jisasi hanavefi etetma otigahaze hu'ne zamasmi'a kegu zamarimpagna hu'naze. **3** Ana hute'za

znazeri'za kina nompi ome zanantage'ne mase'na'e. Na'ankure hago kinaga se'negeno'e. 4 Hianagi mika kema antahi'naza vahe krerafamo'za zamentinti hu'nazana, vene'nema hampri'nazana 5 tauseni'a nazampi mareri'ne. 5 Masakeno ko'atigeno, kasegere ugagota hu'naza vahe'ene mono nonte kva vahe'ene Jerusalemi etru hu'naze. 6 Ugagota hu'nea pristi ne' Ananaisi'a anampina mani'ne. Hagi Kaiafas'i'ma Joni'ma Aleksendaki, ugagota hu'nea pristi ne'mofa nagapinti ruga'a mani'naze. 7 Amu'no zamifima Pitane Joni kizni zanzeri otite'za, agafa hu'za znantahige'naze, lnankna hankavereti ene iza agifi amanahu'zana hu'na'e? 8 Pitana Ruotge Avamu'mo avite'nea ne'mo, zamagri kenona anage hu'ne, Tra kere ugagota hu'naza vahe'ene ranra kva vahere, 9 menima knare tavutva'ma kri ne'ma hunte'no'a zantema, tagri'ma refko hutma tagesnazana, na'amo higeno ama nera kri'amo'a atrente'ne nehzana, 10 tamagrane Israeli vahe'enena antahi ankereho. E'i Nazareti Jisas Kraisima tamagrama aheta hantizageno, Anumzamo'ma azeri oti'neama, e'ina ne'mofa agire, amama tamugama oti'nea nera kri'amo'a knare huntogeno oti'ne. 11 Ama ana Jisasina, Tamagra nogi vahe'motma tamavesra hutma retufe atre'naza haveagi, e'i ana havemo'a no renagentete noma azeri hanaveti have fore hu'ne. (Sam-Zga 118:22) 12 Mago vahe'mo'e huno taza huga osu'ne, na'ankure ama mopafi vahe'motafina, tahokehesia agi'a ontami'neanki, magoke ne' Jisas Krais agifi, Anumzamo'a tahokehegahie. 13 Anante'ma ana vahe'mo'za znagazana, Pitake Jonikea, kema ha'ana korera osake'za, zanagrira antahi ama hu'za, avonona osuke, nontega ne'tremoke Jisasi'enena mani'na'e hu'za antahi ama nehu'za tusi antri nehu'za, nankna'za fore nehie hu'naze. 14 Ana higeno azeri so'e hunte'nea ne', znagranema oti'nege'za nege'za, anazanku

kema huznantekea omane'ne. **15** Hianagi kva vahe'mo'za huznantageke ana atru zamifintima atirami'ne fegia vake'ne, zamagrazmi ke hugantugma hu'za, **16** anage hu'naze, Ama netrena na'a huznantegahune? Na'ankure ama kri ne' azeri so'e'ma hu'nea kaguvezamo'a, mika Jerusalemi mani'naza vahe'pina amate hige'za hago ke'nazankita tagra onke'none huta hufra okigahune. **17** Hianagi ama kemo'ma mago'ane vahepima vuno'eno osanigura, kore ke znasamisunke'ne, mago'ane ama ana agirera mago'a vahera ozanasmisaze huta zanasamisune. **18** Pitane, Joninena ke hazageke efrake'za zanasmi'za, Mago ene Jisasi agirera vahera zamasmige, rempi huzamige osutfa hi'o hu'naze. **19** Hianagi Pitake Jonikea, anage huke ke nona zamire hu'na'e, Anumzamofo avurera knare tamagri ke antahisupi, Anumzamofo ke antahigahu'e, tamagratami refako huta antahiho. **20** Na'ankure tagra keta antahita huno'a zante keaga nehuankita, tagrama kema tagane'zamo'a amuho hurantegahie. **21** Anama hu'za mago'ane korekema huznante'za, kina huzanante kankmuna hake'za eri fore osu'za hu'zanantage'ne vu'na'e. Na'ankure ana mika vahe'mo'za e'inahu zama fore hiazankura Anumzamofo ra agi amizage'za nege'za, vaheku koro hu'naze. **22** Na'ankure ana nera 40'a zagekfu agatere'nea nete ana avame'zana fore huno azeri so'e hu'ne. **23** Humaznantageke, va'azamoke, pristi vahe'mo'zane, ranra vahe'mo'zama maka'zama humaznante'naza kea magoka zamentinti nehaza naga ome zamasmi'na'e. **24** Ana kema nentahi'za, mago zamagu zamagesare zamagerura erintesga hu'za Anumzamofontega anage hu'za hu'naze. Maka'zamofo Ramoke, Kagra monane, mopane, hagerine, hagi mika zama anampinkama me'nea zantamina trohu'nane, **25** Kagra ka'a

Avamukafi hankeno Deviti'a nerafa eri'za ne'kamofo agipi
huvazinkeno anage hu'ne, Na'a hige'za kokankoka vahe'mo'za
zamasigura nehu'za, osuga'zana huku retro nehaze? **26**
Ama mopafi kini vahe'mo'za magote etru hazage'za, trakere
ugagota vahe'tmimo'za zogitru hu'za Ramokane, Kraisinena
ha' reneznantaze. (Sam-Zga 2:1-2) **27** Na'ankure tamagerafa
huno Herotiki, Pointus Pailatiki, megi'a vahe'ene, Israeli
vahe'ene, ama rankumapina zogitru hute'za, Ruotge eri'za
Neka'a huhamprinte'nana Jisasina ha' rente'naze. Tamage
e'i ana avamente Heroti'ene Paeroti'ene ru vahe'ene Israel
vahe'mo'zane ama kumate eri atru hu'za manine'za kagri
mofavre kagrama hampri'nana nera Jisasina ahenaku hu'naze.
28 Himamu hanaveka'afima ko antahinka egahie hunka retro
hunte'nana zamo efore hu'ne. **29** Hagi menina Ramoka, amama
tazeri kore'ma hunerantaza'zana ko, tagra kagri eri'za vaheki,
tazeri hanavetigeta oti hampona huneta Kagri nanekea huama
hugahune. **30** Kagraka'a kazana rusutenka kri vahera krizmia eri
amne nehunka ruzahu ruzahu kaguvasana Kagri ka'a ruotge eri'za
ne' Jisasi agire eri fore huo. **31** Nunamu hutageno, anama zogitru
hu'za mani'naza nomo'a kazakaza higeno, ruotge Avamumo'a
zamagu'afi avitege'za, Anumzamofo nanekea reku osu'za agafa
hu'za hu'naze. **32** Jisasinte zamentinti nehaza vahe'mo'za raru
hu'za mago zamarimpare ene antahintahire nemani'za, tagri'
zane hu'za osu'za havia mika'zana omiami nehu'za mani'naze.
33 Tusi'a hanavereti aposol naga'mo'za, Ramo'ma Jisasi'ma
fripinti oti'nea nanekea huama nehazageno, zamentintima haza
nagara Anumzamo'a tusi'a asunku huzmante'ne. **34** Anampima
mani'naza kevufintira mago'zankura mago'mo'a upara osu'ne.
Na'ankure inamofoma mopa'a me'neo, noma'a me'nemo'a

zagore atreno ana zago erino, 35 aposol naga eme zamizage'za, fako hu'za zagogu'ma atupa'ma hu'naza vahe zami'naze. 36 Hagi mago Livae nera, Saiprus hageri amuragozafi kasente'nea nera Josefe'e, mago agi'a aposol naga'mo'za antemi'nazana Banabasi'e. (Ana agimofo agafa'a, zamazeri hankaveti ke zamasmi mofavre hu'ne.) 37 Hanki agripina mopa'a menegeno ana mopa zagore atreno, ana zagoa erino viazamo aposol nagamofo ome zami'ne.

5 Ana hutegen Ananaiasi ene nenaro Safaira enena anahuke, mopa zania zagore atreteke, 2 nenaro'a mago rimpa huno antahi'negeno, mago'a zagoa refako huno agra suna nenteno, mago'a zagoa erino aposol naga ome zami'ne. 3 Hu'neanagi Pita'a anage hu'ne, nahigeno Ananaiasiga Sata'a kaguafina efregenka ruotge Avamura revataga hunka mago'a zagoa mopama atrantetira refko hunte'nane? 4 Zagore'ma otre'nantera, kagri mopa megeno, zagore'ma atrantera, kagri kavesite me'neane. Na'a higenka amanahu antahintahia kagu'afina antahi'nane? Kagra vahe rezmataga osananki, Anumzamofo revtaga hane. 5 Hagi anankema nentahino'a, Ananaiasi'a traka huno frige'za, anankema antahiza nagatera tusi'a kore'zamo zamagrite e'ne. 6 Anante nehazave naga'mo'za azeri anteno vazite'za, eri'za ome asente'naze. 7 Tri'a aua evigeno nenaro'a anazama fore hu'neana ontahineno anante e'ne. 8 Pita'a, anage huno Safairana antahige'ne, zagorema mopama atra'ana, mizana asma'areke atrenampi? nasamio higeno agra anage hu'ne, Izo atreno'a mizana asi'ne higeno, 9 Pita'a amanage huno Safairana asamine, Nahigetna kagrane negave'enena mago tanarimpa huta Ramofo Avamura reheta nega'e? Negavema ome asentete'za aza vahera, kasante ot'i'nazanki ko, kagrira anazanke

hu'za eri'za vugahaze. **10** Anage nehigeno agafi hantaka'a traka huno frige'za, nehzave zagamo'za emegazana hago fri'nege'za, erizafa hu'za vazazamo'za, nevema asente'naza asopare ome asente'naze. **11** Higeno tusi'a kore zamo ana mika mono vahete'ene, ana zama hia kema antahi'naza vahete enena e'ne. **12** Aposol naga'mo'za rama'a avame'zane, kuguva zane mika vahe vahepi nehuza, ra mono nompi, Solomoni'e hu'za hunaraginte'pinka ana mika vahe'tamimo'za mago zamarimpa huza magopi atru hu'naze. **13** Magore hu'za anampintira zamagripina hageorafi'nazanagi, mika vahe'mo'za kentahiza, agazone hunezmante'za husga huzmante'naze. **14** Hanki hakare vahe krerfamo'za a'nea, vene'nea hu'za Ramofonte zamentintia hu'za, rama'a vahekrerfa efre'naze. **15** Ana higeno mika vahe'mo'za Pita'ma ene vanigeno, amemo'a haguesie huza kri vahera sesenku huza zafa hu'za kampi, nosiva masi'ne'za zmantage'za mase'naze. **16** Anazanke huno ranra kuma'ma Jerusalemi me'nefintira, kri eri'nea vahepi, havi avamu'mo agu'afi fre'nea vahetamina zamare'za ageno, maka vahera zamazeri so'e hu'ne. **17** Hianagi ugagota pristi kva ne'mofo, agri kvafima eri'zama e'neri'za naga'mo'za, (sadusi nagare) aposol nagara kanive rezmante'naze. **18** Zamagra e'za aposol naga eme zamazeri'za mika vahe'mokizmi kina nompi omezmante'naze. **19** Hu'neanagi ana kenegera Ramofo ankeromo'a eno kina vahe kafantmina eme anagino, zamarenlo atineramino, anage huno zamasmi'ne, **20** Ra mono nompi vutma vahepi omo otitma kahefa mani'za eri'zamofo keaga mika zamasmiho. **21** Anankema nentahiza, zahufa ko'ma atiam'aifi, ra mono nompi umarereri'za agafa hu'za rempi huzami'naze. Anante mono nonte ugota kva ne'ene (hae pristi), agranema nemani'za naga'ane

e'za, kanisol (Senhidren) vahe ke hige'za atru nehazageno, ana maka Isareli kva vahetaminena ke hutru hute'za, kina nonte kva vahetega ke atre'za, kinama hu'naza aposol vahera zamaretma eho hu'naze. **22** Hu'neanagi kina nonte eri'za vahe'mo'za kina nompi eme kazana onke'za, ete'za naneke eri'za vazazamo'za ome zamasmi'za, **23** anage hu'naze, Ome konana kina nona nofinu hentrako hunte'za, kerage kva vahe'ene ana nonte kegava hu'naza vahe'mo'za kafante otiza mani'naze. Hu'neanagi tagrama anagitama ufronana, agu'afina mago vahere huta onke'none. **24** Ra mono'nontema kegava nehaza (tempol kat) vahe'mofonte ugagota hu'nea kva ne'ene, mono nonte ugota kva (hae pristi) vahe'mo'za anankema nentahi'za, tusi'za hu'za hava nehu'za antahintahi hu'naze. Amanahu'zamo'a nankna hugahie hu'naze. **25** Hu'neanagi mago vahe'mo eno, kinama ome huzmante'naza vahe'mo'za, mono nompi otine'za, vahe'zagarmi mono naneke rempi hu'nezmize huno zamasmi'ne. **26** Mono nonte kva nehia ne'mo'a, magoka sondia vahe'ene vazazamo'za, ana aposol nagara ome zamavare'za e'nazaragi, sondia vahe'mo'za akohe'za agazone hu'za zamavare'za e'naze. (Na'ankure vahe'mo'za have knonu zamahe frizanku kore hu'za razana osu zamare'za e'naze.) **27** Ome zamare'za ana aposol nagara ete'za kanisol (Senhidren) vahe zamure eme zamazeri ot'i'naze. Mono nontema ugote'nea nemo'a (hae pristi) zamantahigeno anage hu'ne, **28** tagra menina hanave kea huta, mago'anena ama ana agifina vahera rempi huozmanfa hiho huramantone. Keho amama rempima huzamiza zamo'a Jerusalemi kumapina antahi vagaraze, hankino Jisasima ahe'nazana tagriku ahe'naze hutma huneranta'ze. **29** Hu'neanagi Pita'ene ruga'a aposol naga'mo'za kenona zamire anage hu'naze,

Anumzamofo ke'age nentahita ama mopafi vahe'mofonkea ontahigahune. **30** Tagri tafahe'i Anumzamo, keka zafarema ahetma hantinaza nera Jisasina azeri otine. **31** Anumzamo'a azeri otino aza tmaga kaziga'a anteno, ugagota kva ne' taguvazi nere hu'ne. Agrite Israeli vahe'mo'za zamagu'a rukrahe hanageno, kumizmia eri atrezmantegahie. **32** Higeta tagra e'i ana zama fore'ma hu'neana keteta, ama anankea hu'ama nehune. Ana higeno tagrama ke'nonazana ruotge Avamumo'a keteno huama hu'ne, kema antahiza avariri'za vahera Anumzamo'a ana ruotage Avamura zami'ne. **33** Kva vahe'mo'za anankema nentahi'zageno'a, tusi zamarimpa hege'za zamahe frinaku hu'naze. **34** Hianagi Farisi nera Gamalieli'e nehaza ne'mo tra kemofo (lo) kagota huno rempi hunezmige'za, rama'a vahe'mo'za antahinemiza ne'kino otino, osia kna ama vene'ne zaga zamare megi'a zamanteho huno huzmante'ne. **35** Anante amanage huno kansol vahera zamasmi'ne, Israeli vahe'mote, nazanoma huzmantegahune hutma kema retroma hana'zana, antahi so'e hunetma anazana huzmanteho. **36** Mago'a kna koma evunefina, Tiutas'i'a otino, Nagra ra vahe mani'noe hige'za, vahera 400'a naza vene'nemo'za, agranena eme hagerafi'naze. Hianagi agrira ahefri'zage'za, amage'ma nentaza naga'mo'za atre'za panini hazageno mago'zana osu'ne. **37** Anama hutegeno'a ana mefiga, mago Galiliti nera, Judasi'e nehaza ne'mo, zamagi kre'za erifatgo haza knare otino, mago'a vahera zamare agrarega atre'nea nera anazanke huno frige'za amage'ma ante'naza naga'mo'za panini hu'naze. **38** E'inahu'za fore hu'negu, tamagrira ama nankeea neramasmue, ama nagara mago kea huozmanteta zamatreho. Na'anckure, mopafi vahe'mo'ma amanahu'zama hanigeno'a, amne'zankna hugahie. **39** Hianagi Anumzantegati'ma ne'esigetma

keaga huozmantegahaze. Anama hanutma aru Anumzamofo ha'rentezanku nehue, hige'za nentahi'za zamatre'naze. 40 Kanisol vahe'mo'za ana zamumro kema nentahi'za, ana aposol nagara kehu'agu'a zamante'za zamazeri'za tusi sefu zamite'za, mago'anena Jisasi agifina nanekea osutfa hihio nehu'za, zmatrage'za vu'naze. 41 Hige'za aposol naga'mo'za ana kanisol naga zamureti'ma zamatre'za nevu'za, Anumzamofo avure mani'neta Jisasi agire'ma eriga knaza erune, nehu'za muse hume vu'naze. 42 Hanki hakare knafina, ra mono nompine, nonte nontera nevu'za Jisasi'a, tazahu ne' Kraisi'e hu'za knare muse kea rempi hunezmi'za huama hu'naze.

6 Hagi anama haza knafina, Jisasima amage nentaza disaipol naga'mo'za ome rama'a hazageno namba zamimo'a ame'nanempi mareri'zageno, Griki kema nehaza Jiu vahe'mo'za, Hibru kema nehaza Jiu kuma agafa vahetmina kanive rezamante'za, Mika zupa kave'ma fakoma hazana kento a'ne nagara antahi nozamize hu'za hu'naze. 2 Hage'za 12fu'a aposol naga'mo'za ana mika amage'ma nentaza disaipol kevu zamasmizage'za emeritru hazage'za anage hu'naze. Ne'zama fakohu zankuke nehuta Anumzamofo nanekema osanunana knarera osugahie. 3 E'ina hu'negu tafuhete, tamagra amu'no tamifinti keso'e hutma 7ni'a vahe'ma zamu'zmamo knare'ma hu'nesnia vahe'ma, Avamu'ene knare antahi'zamo'ma avitenesia vahe zamazeri otinke'za, esageta tagra ama erizana refako huta zamazampi antesune. 4 Hu'neanagi tagratia nunamu hu'zante'ene, Anumzamofo naneke'a huama huta veamofona zamasmita maka knafina vugahune. 5 Ana mika vahe kevumokizmia zamesige'za, ana hugahune nehu'za, ana 7ni'a vahe huhampri'naze, mago ne'ma hampona amentintine ne'

Ruotge Avamu'mo agu'afima avite'nea nera Stiveni huhampriza
Filipinki Prokulusinki Nikenorinki Taimoninki Pamenasima, mago
Antioku ne' Nikolasi'a megi'a nagapinti ne'mo agu'a akrehe
huno Jiu monopi amentinti nehia ne' huhampri'za zamaretru
hu'naze. **6** Ana hute'za ana vene'ne zaga zamare'za aposol
nagate vazage'za zamaza ante'za, nunamu huzmante'naze.
7 Hagi Anumzamofo kemo'a mago'ane ra huno nevigeno,
amagenentaza disaipol naga'mo'za Jerusalemi kumapina rama'a
efore nehageno, ra'ma'a Jiu pristi vahe'mo'za zamentinti
hu'za ke amage'anteme vu'naze. **8** Ana higeno, Stivenina
Anumzamofo asunkuzamo'ene hihamumo'a avite'negeno, tusi'a
kaguva zane, avame'zanena vahe'mokizmi amunompina erifore
hu'ne. **9** Hianagi mago'a vene'ne zaga, Hibru osi mono nona
(Sinagog Freman) vahe zamazeri atre monore nehazafinti
Sairini kumate'ene, Aleksandria kumate'ene, mago'a Silisiane,
Esia rankuma'mo kegava hu'nefinti (provins) vahe'mo'za oti'za
Stivenina keha rente'naze. **10** Hianagi Stiveni'ma knare
Avamu'mo'ma azama huno knare antahi'zana amigeno kema
hiazamofona, zamagra magore hu'za kea osu'naze. **11** Anante
zamagra oku'a mago'a vahera anage hiho hu'za zamasmi'naze.
Tagra nentahunkeno Mosesene, Anumzamofonena zanazeri
havizahu kea hu'ne hutma hiho hu'naze. **12** Ana kema hazazamo
vahera zamarimpa zamazeri otige'za, ranra vahe'mo'zane
kasegere ugagota hu'naza vahe'mo'zanena oti'za Stivenina
eme avazu hu'za kanisol (Senhitren) vahe zamure vu'naze.
13 Zamagra pusante havigema hunte vahe zamaretogeno,
ana vahe'mo'za hu'za, Ama ne'mo'a, ontagneno Mosese
kasegegu'ene, ra mono nonku enena huhaviza hunte'ne hu'za
hu'naze. **14** Na'ankure tagra nentahunkeno ama nemo'a amanage

huno hu'ne, Nazareti Jisasi'a eri haviza ruotge mono nona
nehuno, Mosesi'ma tami'nea avu'ava'zana, eri atreno kahefa
avu'ava eri fore hunaku nehie. **15** Anankema huntaza fakohu'za
kenaku nehu'za ana mika kva vahe'mo'za avugosafima kazana,
avugosamo'a ankero vahe'mofo avugosamo masa hiaza hige'za
ke'naze.

7 Ugagota pristi ne'mo'a huno, Stiveniga, amama hunegantaza
kemo'a tamagefi? **2** Higeno Stiveni'a huno, nafuhetane
nafaheta mika'motma nagri kea antahiho, nerageho Abrahamu'a,
Mesapotamia mani'negeno, Masanentake Anumzamo'a avure
ehanatitegeno henka'a atreno vuno Harania umani'negeno,
3 Anumzamo'a amanage huno asami'ne, Vaheka'ane
mopaka'anena atrenka, kaveri hanua mopare vuo. (Jen-Agf 12:1)
4 Anante Kaldia mopa atreno, Harani kumate umani'ne. Anante
Abrahamu nef'a frigeno, Anumzamo'a huntegeno amama
menima emani'naza mopare e'ne. **5** Anumzamo'a mago mopa
manisana zane huno Abrahamuna omi'ne, mago osi atupa'e huno
refako huomi'ne. Mofavrea onte'tfa hu'neanagi Anumzamo'a
huvempa hu'ne, ana hu'neanagi Nagra kagri'ene mofavre
zagaka'a henka zamigahue huno hu'ne. **6** Hianagi Anumzamo'a
amanahu ke huno Abrahamuna asami'ne, Kagehe'za ru
vahe mopafi, mopazmi omane vahe umanigahaze. 400'a
Zagegafu'mofo agu'afina, mopa agafa vahe'mo'za kazokzo
eri'za vahe zamavarente'za, kva huso'e huozmantegahaze. **7**
Hianagi Nagrani'a kazokzo eri'za zamisaza mopare vahera,
nona'a zamazeri haviza huzmantegahue, huno Anumzamo'a
hu'ne. Anama hute'za henka zamagra atre'za e'za ama mopare
Nagrira eme nagi hanta vazigahaze. (Jen-Agf 15:13-14) **8**
Anumzamo'a Abrahamu'ene huvempa huno oku avufama tagahu

nanekea huhagerafiteno, Abrahamu'a, Aisakina nefaza higeno
8'a zagegnama nemaniana, oku avufa taga hu'naze. Aisaki'a
Jekopu nefaza higeno, Jekopua 12fu'a tagehemofona nezmafa
mani'ne. (Jen-Agf 17:10-14.) **9** Ana tagehe'mo'za Josefena
kanive rente'za mizante atrage'za ru vahe'mo'za avare'za Isipi
vu'naze. Ana hu'hazanagi Anumzamo'a agrane mani'neno,
10 knama nemizageno'a Anumzamo'a aza nehuno, knare
avu'vazane, antahi'zana Josefena amigeno, Isipi kini ne'mofo
Fero avurera knare higeno, Fero'a huntegeno ugagota kva
Isipia hu'neno, noma'afima me'neazane nemania vahetera
anazanke huno kegava hu'ne. **11** Anante Isipi mopare'ene
Kenani moperara ne'zana fanane higeno, vahe'mo'za tusi'a
zamagate'zampi manizage'za, tagehe'za mago kavera hakare'za
eri fore osu'naze. **12** Hianagi ne'zana Isipi me'ne kema
Jekopu'a nentahino'a, tagehemofona esete ne'za omerihogu
huzmanteg'e'za vu'naze. **13** Anante'ma mago'ane (second
time) vazageno'a, Josefe'nne huno agra'agu huama higeno,
Fero'a, Josefe afuhe'za e'naza kea antahi'ne. **14** Ananter
Josefe'a ke naneke atrenteno nefafa Jekopunku ene ana miko
tuzagarazaga'agura nagritega echo huno hu'ne, ana mika'a
75fu'e. **15** Hanki Jekopu'a Isipi umani'neno, anantega agrane
tagehe'zanena fri'naze. **16** Anantegatira zaferina'a eri'za Sekemu
vazazamo'za, Abrahamu'ma zagoma atreno Hamori mofavre
nagapinti'ma mago'a zagoreti'ma mizama asente'nea kerigampi
Sekamu ome asente'naze. (Jen-Agf 50:13.) **17** Hu'neanagi
Anumzamo'ma, Abrahamuma huvempama hunte'nea knamo'a
kofta huno eku nehigeno, Isipima tagri vahe'ma mani'naza
vahe'mo'za tusi vahe krerfa fore hu'naze. **18** Henka Josefema
antahino keno osu'nea kini ne' Isipi fore huno kegava hu'ne.

19 Ana kinimo'a vahetia rezmatga nehuno, tagehe'ina havi avu'ava hunezmanteno kasefa mofavrema kasentenazana megi'a zamatreke'za friho huno huhanavetine. (Eks-Ati 1:8-2:15) **20** Anama hianknafi Mosesena kasentegeno Anumzamofo avurera hento fa mofavre fore hutegen, 3'a ikamofo agu'afina kegava hazageno nefa nompi manitegeno, **21** henka avare'za megi'a ometrageno, Fero mofamo'a avareno agri'a mofavregna huno kegava hu'ne. **22** Mosese'a Isipi vahe'mofo antahi'zana rempi huno maka eriteno, kema hu'zampine, avu'ava'zama'afina hankave nentake ne' fore huno mani'ne. **23** Hu'neanagi 40'a zagegafu huku'ma nehuno'a nafuhe'i, Israeli vahera nantu antezmante nagesahie huno antahi'ne. **24** Mosese nevuno keana Isipi ne'mo, Israeli kazokzo eri'za nera nehegeno negeno, Israeli ne'mofo ahoke heno Isipi nera ahe fri'ne. **25** Mosese'a antahiana agri vahe'mo'za antahi ama hu'za, nagripi huvalino Anumzamo'a huntegeno tagrira tahokeheno tavarenaku e'ne hu'za hugahaze huno antahine, hianagi zamagra Mosesena antahi omi'naze. **26** Umaseno nanterana Mosese'a nevuno keana, tare Israeli ne'tremoke ha' nehakeno, zanarimpa zanazeri fru hunaku, agra amu'noznifi vuno znazeri atrenaku nehuno anage hu'ne, Ama verarena, tanagra kogna mani'na'e. Nahigeta hara neha'e? **27** Hianagi magomo'ma havizama huntenu ahe frinaku nehim'o'a, Mosesena retufe kanti netreno anage hu'ne, Aza kva mani'enka tagrira refako hurantegahane? **28** Kagra okima Isipi ne'ma hae fri'nanankna hunka nagrira nahe frinaku nehampi? (Eks-Ati 2:14) **29** Ana kema hia Mosese'a nentahino, Isipia atreno viazamo, Midieni mopare anantega rurega vahe umani'ne. Mosese'ma Midienima umani'neno'a, tare ne'mofavre ksezanante'ne. **30** Hagi 40'a zagegfuma agateregeno

mago ankeromo hagage kokampi Sainai agonamofo agiafi
osi zafafi tevesrasra huno nerefi fore humi'ne. **31** Mosese'ma
anazama negeno'a, naza fore nehieha nehuno kenakuma
eravaoma higeno'a, Ra Anumzamo'a kezatino, **32** Nagra kagri
kagehe'i Anumzane, Abrahamuma Aisakima Jekopu Anumzane,
huno higeno, Mosesena, tusi ahirahitegeno avuge'zankura
tusi agogogu nehuno avua onke'ne. **33** Higeno Anumzamo'a
Mosesena anage huno asami'ne, Kagia nona, kagaretira zafitro,
na'ankure e'imma oti'nana mopa, Ruotge hu'nea mopare oti'nane.
34 Vahe'nima Isipima manine'za knama e'neriza zana tamage
hu'na Nagra ke'noe, zamata hozama zamizage'za krafa kema
nehazana Nagra nentahina zamaza hunaku menina erami'noe.
Menina kagra eno, hugantesugenka, etenka Isipi vugahane. **35**
E'imma ana Mosesima zamesra hunente'za, anagema hu'za, Iza
kagrira kva mani'enka vahera refko huo huno huntene'mofo, e'i
ana nera Anumzamo'a hunteno, kva ne' mani'enka, zamazahu
ne' manio huno Anumzamofo ankeromofo azampi osi zafafinti
efore huno hunte'ne, **36** Ana ne'mo zamavareno nevuno Isipi
mopare ene koranke hagerinte'ene ka'ma hagege mopafina
kaguvazane avame'zana 40'a zagegfufina huzmeri hu'ne. **37**
Ama ana Moses, Israeli vahe'zagagura huno, Anumzamo'a
kasnampa vahetmia tamagripintira nagri'ma hiaza huno azeri
otigahie. **38** E'i ana ne'mo, vahe kevumokizmi amu'nompima
ka'ma mopafi mani'negeno ankeromo Sainai agona'fina tagri
tagehemokizmi Anumzamo'a kea huntogeno asimu erino mani
nanke erino'ma eme tami'nea nere. **39** Tagri tagehe'za ke'a
antahizanku zamefi hunemi'za, retufeganti netre'za, zamagu'afina
Isipigura tusi zamagesa antahi'naze. **40** Eronina amanage hu'za
asmi'naze, Kagotama hurantesia anumzantamina tro huranto,

na'ankure ama ana Mosese'ma lsipi mopareti tavarenoma e'nea
nera na'a fore huminefi tagra antahita keta osu'none hu'naze. **41**
Hige'za ana knafina golire havi anumzana bulimakao anenta
kna huza tro hu'za, Kresramana avuga vunente'za anama
zamazanuma troma hazazankura muse hunte'naze. (Eks-Ati
32:1-10) **42** Hu'neanagi Anumzamo'a amagena huzmantege'za,
zamagra havi anumzantema zagere'ma, ofunte'ma ikante
monora hunte'naze, ko'ma kasnampa vahe'moma krente'neana
tamagra Israeli vahe'mota ka'ma kokampima 40'a zage kafufima
ofa nehuta Kresramana vu'nazana Israeli vahemota Nagrite
Kresramana vu'nafi? A'o. Nagrite Kresramana ovu'naze. **43**
Tamagra Moleki havi anumzamofo seli mono no erita magoka
ne-eta, Rafani havi anumzamofo ofu eritma ne-etma, havi
anumzamofo amema'a mono huntenaku tro hu'naze. Ana
hu'negu ama mopafintira tamazeri atranenketma Babilon
kumamofona kantu kaziga umanigahaze. (Emo 5:25-27.) **44**
Tagri neragehoza seli mono no zamia eri'za magoka ka'ma
kopi vu'naze. Anumzamo'ma Mosese asamino e'inahu hunka
tro huo huno hunte'nea kante ante'za, anahu kna hu'za
trohu fatgo hu'naze. (Eks-Ati 25:9) **45** Henka tagehe'mokizimi
mofavreramimo'za ana seli mono nona e'neriza, zamagra ana
mopafi Josua'ene naga'amo'zanena meg'i'a vahe'mofo mopafi
ha'hu'za eri'za mani'neza, seli mono nona kiza mani'nageno
henka Devitinkna e'ne. **46** Anumzamofo avesi zamo'a Devitinte
megeno, Anumzamoka natregena ra mono nonka'a kineno huno
antahige'ne, Jekopu Anumzamo'ma manisia no kinaku hu'ne.
47 Hu'neanagi Solomoni'a Agri ra mono nona kinte'ne. (1 Kin
6:1) **48** Hu'neanagi, Mareri Agatere'nea Anumzamo'a vahe'mo
azanteti kinte nompina omanigahie huno, Kasnampa ne'mo

hunte'ne, **49** Mona kumara trani'e, ama mopa nagiamofo trare, inankna no Nagrira kinantegahaze? Huno Ramo'a hu'ne. **50** Mika'zana monafine mopafinena Nagrake tro hu'noe. (Ais 66:1-2.) **51** Tamagra ke ontahi vahe mani'nageno tamaguamo ene tamagesamo'a tamage kemofona ifo nehie! Tamagra Ruotge Avamumofona tamagehemo'zama hu'naza kna hutma maka kna tamefi hunemize! **52** Kasnampa vahepintira ina'na vahe tamagehe'za zamahe ofri'naze? Fatgoma Hu'nemo'ma esia zamofoma ko'ma huama'ma hu'naza vahera, zamagra zamahe fri'nazanki, tamagratmi menina komoru huta zamahe fri'naze. **53** Korapara Anumzamo'a kasege'a ankeromokizmi zamazampi antege'za, eri'za eme tamizageta enerita, ana nanekea tamagra amagera ontetma kea rutagare'naze. **54** Ana kema Jiu kva vahe'mo'za nentahi'za, tusi zamasi vazige'za zamavera aninkreki hu'naze. **55** Hianagi Stivenina Ruotge Avamumo agu'afi efregeno, kefatgo hunagamuteno monafinka Anumzamofo masa'zana negeno, Jisasi'a Anumzamofo azantamaga kaziga'a oti'negeno ke'ne. **56** Nehuno agra anage hu'ne, Keho Monamo'a anagige'na negogeno, Vahe'mofo mofavremo'a Anumzamofo azantmaga'a oti'negena negoe. **57** Hianagi zamagra tusi'za hu'za rankege nehu'za, zamagesa renkani nere'za, magoka zamagare'za Stivenina ome azeri'naze. **58** Rankumapinti retufe'za megiamate'e'za, agafa hu'za have knonu ahe'naze. Ana nehazage'za, havige hunteza huama hanigeta antahi sune hu'naza vahe'mo'za amega nakreku'zamia hate'za mago nehzavea, Soli'e nehaza ne'mofo agafi eme ante'naze, (Apo 6:13) **59** Stivenima have knonu nehageno'a, Ramofo agi aheno amanage hu'ne, Ramoka Jisasige, avamuni'a erio! **60** Anage huteno rena reno ranke huno

amanage hu'ne, Ramoka kumi'zami'a aze'orinka atrezmanto,
huno nehuno fri'ne.

8 Hagi Stivenima ahe fri'za zankura Solina rimpamo'a so'e hu'ne.
Jerusalemi kumapina mono vahe'ma zamahe'zamo'a tusiza huno
ana knarera avitege'za, maka vahe zagamo'za panini hu'za fre'za
Judia kaziga nevazage'za, Sameria kaziga nevzage'za aposol
vahe'age mani'naze. **2** Knare hu'za fatgoma hu'naza vahe'amo'za
Stiveni asenente'za, tusi zamasunku hu'za zavike agriku hu'naze.
3 Hianagi Soli'a, mono vahe zamazeri haviza nehuno, mago'mago
nompina vuno eno huno vene'nene, a'nene zamavazu hu megi
nezmatreno zamavareno kina ome huzmante'ne. **4** Anante e'ima
zamahe pananima hige'za fre'naza vahe'mo'za, maka kumate
kumate vutere hu'za mono kea hu'naze. **5** Filipi'a Sameria
rankumate viazamo, Kraisinku zamagrite huama ome hu'ne. **6**
Filipi'ma hia nanekema tusi'a vahe'mo'za nentahiza, avame'zama
hiazante'ma nege'za nentahiza, magoke antahintahire mika
vahe krerafamo'za zamagesa ante'za antahi'naze. **7** Na'ankure
havi avamu'tamima zamagu'afima mani'naza vahe'pintira, havi
avamutmimo'za tusi'a kezati'za krafa nehu'za atirami'naze.
Hagi mika zamufa fri'nea vahe'ene, kama vano nosaza vahera
krizamimo'a knare huzmante'ne. **8** Higeno ana rankumapina
tusi'a museza fore hu'ne. **9** Ana rankumatera, Saimoni'e
nehaza ne'mo, afa' vahe'mofo avu'ava'za eri fore huvava
nehia nera mani'neankino, Sameria vahera huzamerige'za
tusi'a zamagogogu nehu'za antri nehageno, agra ra ne'
mani'noe huno hu'ne. **10** Hagi ositetima vuno rante'ma vu'nea
vahe'mo'za, ke'ankere'za nege'za ana mika vahe'mo'za agri
ke nentahi'za anage hu'naze, Ama nera, Ra Anumzamofo
hanavegino, tusi'a hanave hu'za hu'naze. **11** Hige'za agri ke'are

antahi'za amage ante'haze. Na'ankure agrama za'za knafi
havige nehuno, zagoreno eri fore hu'neazanku anara hu'naze.
12 Ana hu'nazanagi Anumzamofo kumamofo avu'avaku'ene,
Jisas Kraisi agire Knare Musenkema Filipi huama nehige'za
zamentintima nehu'za, vene'nene, a'nemo'zanena erigafa hu'za
monoti fre'haze. **13** Saimoni'enena amentinti nehuno henka mono
tina nefreno eteno ovu'are Filipi'ene mani'ne. Hagi mika ruzahu
zane ra avame'zama hiaza fore higeno negeno tusi agogogu
nehuno antri hu'ne. **14** Jerusalemi mani'naza aposol vahe'mo'za
antahizama Sameria vahe'mo'za Anumzamofo naneke erize
kema nentahi'za, Pitane Joni kizni huznante'haze. **15** Zanagrama
uramina'ana nunamu huzmante'sake'za Ruotge Avamu'ma
erisnagu urami'na'e. **16** Na'ankure mago mago'mofontera Ruotge
Avamumo ome'nege'za, ko Ramofo Jisasi agire mono tinke
fre'haze. **17** Anante Pita'ene Jonikea agafa huke zanazama ana
Sameria vahe'mokizmi zamufare antake'za Ruotge Avamura
eri'haze. **18** Hianagi Saimoni'ma kegeno Aposol vahe tfamo'zama
zamazantfama antaza zante'ma Ruotge Avamu'ma zamigeno'a,
agra zagoma zanamikema nehuno'a, **19** anage hu'ne, Amana
hanave'a nagri'enena nami'enkena ina vahe'tema nazama
antesuge'za anahu'za Ruotge Avamura eriho. **20** Hianagi
Pita'a, agrikura anage hu'ne, Zago ka'ane kagranena haviza
hugahie. Na'ankure kagrama kagesama antahinana zagoreti
Anumzamofo muse'zana miza hugahue hunka nehane. **21**
Kagrira ama eri'zampina mago eri'zanka'a omanetfa hu'ne.
Na'ankure Anumzamofo avurera, tumoka'amo'a knarera osu'tfa
hu'ne. **22** E'i zanku kefo kavukva zanka'a neterenka, kagu'a
rukarehe hunka havizama nehana zana atrenka, Ramofonte
nunamu nehugen, kagu'amo'a knarema hanigeno'a kumi ka'a

atregantegahie. **23** Na'ankure nagrama navuma kagoana, kagra kanive nerenga, kumi'mo kegina hugantegenka mani'nane, huno Pita'a higeno, **24** Saimoni'a ke nona anage hu'ne, Nagrikura, tanagra Ramofontega nunamuna hikeno, kema hu'na'a zamo'a nagritera ometfa hino hu'ne. **25** Anante'ma Pita'ene Jonikema hamponati'ne, Ramofo nanekema huama'ma hutekea, ete Jerusalemi vunaku nevuke, Sameria vahe'mokizmi nonkumapi mono naneke hume vuna'e. **26** Anante mago Ramofo ankeromo Filipina asamino, Sameriatira otinka Jerusalemi kaziga Gaza urami'nea kantega kavugosa huntenga vuo. E'i, hagage ka'ma kopi vuo huno asamigeno, **27** nevigeno magora agonkna'za hari'nea Itiopia nera, Kantesi'e nehaza Itiopia kuini a'mofo zagore kegavama hu'nea ne'mo, Jerusalemi mono eme huteno eteno kuma'arega nevigeno, **28** hosimo renteno avazu huno vano nehia karisifi manino nevuno, **29** kasnampa ne' Aisaia krente'nea avontafera hamprime nevigeno Ruotge Avamu'mo'a Filipina asamino, Vunka antuma hosimo renteno avazuma hu'nea karisire urava'o huo higeno, **30** Filipi'a agiareno agrite viazamo ome antahiana, Aisaia kasnampa ne'mofo naneke nehamprigeno nentahino, amama nehamprina nanekea, kagra antahiana nehano? Huno antahige'geno, **31** Ana ne'mo'a huno, Mago'mo'ma huonasamisigena, inankna hu'na antahi amara hugahue? Nehuno Filipina ke higeno umarerino agrane umani'ne. **32** Ana ne'mo'ma hampri'nea avontafemo'a, amanahu ke hu'ne, Sipisipi afu'ma ananke taga hunaku avare'za nevazankna hu'za avre'za nevu'za, sipisipi afu anenta azoka taga hunaku nehazageno, agira aka huno krafa osu'nea kna huno, Agra agira aka osu'ne. **33** Agrira azeri agaze hu'za knare fatgo zamuzmara huonte'naze. Na'ankure ko'ma Agri asimura ama

mopafintira eri'nazana, nankna huno Agra mofavre antegahie?
(Ais 53:7-8) **34** Anante ke'nonama hifina, agonkna'zama hari'nea
ne'mo'a anage huno, Filipinkura hu'ne, Muse hugantoanki
(plis) azanku kasnampa ne'mo'a ama kea hu'ne, agri'agu
hu'nefi, hipi ruga'a vahetu hu'ne? **35** Filipi'a anama hampri'nea
avontafepinti nanekea agafa huno, Jisasi knare musenkea ana
nera asmi'ne. **36** Anama huke karankama nevukea mago'a
ti me'nere eke, agonkna'zama hari'nea ne'mo'a huno, Ko! Ti
me'neaki! Na'amo mono tima frezanifina nazerigahie? huno
nehigeno, **37** [Filipi amanage huno hu'ne, Tamage hunka maka
kagu'reti Jisasinku kamentinti hanunka tina fregahane nehigeno
ozo hu'ne. Anumzamofo nemofo Jisasi Kraisi'a mani'ne, hu'na
namentintia nehue huno hu'ne,] **38** ana hosimo renteno avazu
nehia karisia ana ne'mo kehigeno azerigeno, anantarega'moke
uramike tinte vuke, Filipi'a agonkna'za hari'nea nera mono tina
frente'ne. **39** Anama huteke timpinti'ma meg'i'a akeno'a, Ramofo
Avamumo Filipina avaresga huno vigeno, agonkna'zama hari'nea
ne'mo'a mago'ane nonkeno, tusi muse hume karanka vu'ne. **40**
Hianagi Filipi'a Azotasi kumate mani'neno nankna hu'na e'noeha
huno agra'a keno erifore hu'ne. Ana kazigama nevuno'a mika
ranra kumatera mono kea hutere hume nevuno Sisaria kumate
uhanati'ne.

9 Ana knafinke Soli'a ana zanke huno Ramofo amage' nentaza
disaipol nagara zamahe frinaku tusi asi nevazigeno, rimpa
henezmanteno, ugagota pristi nete vuno, **2** ome antahigegeno
mago'a avona kremigeno erino Damaskasi vuno atruma nehu'za
mono nehaza nontamimpi (sinagoggs) marerino huama huno,
agrama veo, aro Kraisti amage' nentaza vahe'ma zamagesuno'a,
kina rezmanteno eteno zamareno Jerusalemi vugahie huno

kre'ne. 3 Agrama vuno Damaskasi urava'o nehigeno'a, ame huno monafinkati hanavenentake tavi'mo agrite remsa huntegeno, 4 traka huno mopafima nemseno'a, agrama mago kezankema antahi'nea kemo'a anage hu'ne, Sol! Sol! Na'a higenka Nagrira kna nenamine? 5 Higeno kenona'a, Ramoka, Kagra izage? huno higeno, Agra huno, Nagra Jisasine, kagrama knama nenamina Nere. 6 Hu'neanagi otinka ana kumapi ufrenka vuge'za, kagrama nankna'zama hanana zamofo kea kasamigahaze. 7 Soli enema nevaza vene'nemo'za kea osu'za oti'za mani'ne'za, kema hia agerura antahi'nazanagi, mago vahera onke'naze. 8 Soli'a mopafinti otigeno, avumo'a hari hu'neanagi, mago'zana onke'ne. Magoka vu'naza vahe'mo'za azante avazu hu'za Damaskasia avare'za ufre'naze. 9 Taregi magoki zagene haninena, avua onkeno ne'zane, ti'nena oneno amane mani'ne. 10 Magora Jisasi amage'nentea nera, Ananaisi'e nehaza ne'mo Damaskasi kumatera mani'neno, ava'na keankna huno negegeno, Ramo'a anage huno asami'ne, Ananaisi'o! Higeno ke nona hunteno, ama mani'noe Ramoka. 11 Anante Ramo'a asamino, Otinka fatgoe nehaza kuma kampi vunka, Judasi nonte vunka, Tasasiti nera, Soli'e nehaza neku ome zamantahigo, na'ankure menina manino nunamu huvava nehie. 12 Ana nehigeno Soli'ma ava'nagna'zama kefina, Ananaisi'ema nehaza ne'mo efrea zamo avuma kesigura azanteno nunamu hunentegeno, ana avanagnazampina ke'ne. 13 Hianagi Ananaisi'a ke'hona'a huno, Ra Anumzamoka nagra rama'a vahepinti, nama'a vahe krerafama Kagrite'ma zamentintima nehaza vahe'ma Jerusalemi kumapima mani'naza vahetamima zamahe'neana, ana ne'mofo agenkea nagra antahi'noe. 14 Nehuno ama kumapi eno, Kagri kagima nehe'za mono hugante'naza vahe'ma ugagota kva (hai

pristi) vahe'mo'za hugnare hunte'naze. **15** Hianagi Ramo'a anage huno Ananaiasina asami'ne, Vuo, na'ankure agrira ko huhampri ante'noankino, Nagri eri'za ne' manigahie. Hagi Nagri nagi nagenkea erino meg'i a vahete'ene, kini vahete'ene, Israeli vahetera vugahie. **16** Na'ankure nama'a kna'zama Nagri nagire'ma erisia zana, Nagra averi hugahue. **17** Huno higeno, Ananaisi'a otino mani'nea nonte vuno, avufgare'ma azama omenteno nunamuma hunteteno anage huno asami'ne, nenafu Soliga, kantegama neankeno Ramo Jisasi'ma kagrite efore'ma hu'nemo, kagrama etenka kavu negenka, Ruotge Avamura eri avitesane huno hunantege'na nagra e'noe. **18** Anagema nehigeno'a, ame huno avuragafinti iriknazamo kanoperamigeno, avua eteno negeno otino mono ti fre'ne. **19** Hagi anante ne'za neno hanavema e'nerino'a, Jisasima amage'nentaza disaipol naga'ene Damaskas' mago'a kna mani'ne. **20** Ame huno, ana zupage Jisasi agigenkea osi mono nompi marerino, ama Nera Anumzamofo Mofavre huno huama huno zamasm'i'ne. **21** Hige'za maka antahiza vahe'mo'za tusiza hu'za antri nehu'za, anage hu'naze, ama'na nera Jerusalema mani'neno, Jisasi agire'ma zamazeri havizama nehia nero? Menina eno Jisasi agima huama nehaza vahera kina huzamanteno zamareno ugota ra mono (hetprisi) kva vahete vunaku ne-eo? Hu'naze. **22** Hianagi Soli'a, antahintahi'afina hageno nevuno Jisasi'ema nehaza nera tazahu ne' Kraisi'e huno eri ama huno tusiza huno hanavetino nehigeno, ana kema Damaskasima mani'naza Jiu vahe'mo'za, nentahi'za inankna huta nanekea huntesune ha hu'za kea osu'naze. **23** Mago'a knama evutege'za, Jiu vahe'mo'za komoru hu'za Solina ahenuku hu'naze. **24** Hu'nazanagi ana komoru hu'naza kemo'a Soli agesafi efre'ne. Zagene haninena ahe fri'snagu zamurga

ra vihu kafante ke ankerete'za mani'naze. **25** Hu'nazanagi, Polima amage'nentaza disaipol naga'mo'za kerage'afi avare'za eka eka kupi antete'za, kumamofo vihu keginamofo meg'i'a kankamumpinofi rentete'za mago kaziga avazu nehu'za atrageno urami'ne. **26** Jerusalemi ema nehanatino'a, Jisasi amage nentaza disaipol nagapi hagerafigahue huno hianagi, agrikura tusi kore nehu'za agra Jisasi amage' nentea nere hu'za maka'mo'za antahi'za zamifina ontahi'naze. **27** Hianagi Banabasi'a, Solina avreno aposol nagate viazamo, Jisasi'ma kampi kegeno keaga humi'neazane, Damaskasi mani'neno hanavetino'ma Jisasi agifima keaga hu'nea zanku enena hu'ama huno aposol vahera zamasmi'ne. **28** Ana huteno Soli'a zamagrane mani'neno, Jerusalemia fru huno vuno eno huno, Jisasi agigura korera osuno hanavetino keaga huama hu'ne. **29** Agra keaga nehuno, Griki kema nehaza Jiu vahe'enena, keha hu'nazanagi, zamagra ahe frisnaza kanku hakare'naze. **30** Hige'za mono afuhe'za anankema nentahi'za, avare'za Sisaria urami'za ometrageno Tasisi vu'ne. **31** Anante Judia kazigane Galili kazigane Sameriana nemaniza mono vahe'mo'za, hagera hu'za nevu'za zamarimpa fru hu'za neman'i'za, Anumzamofonku kore hunentageno, Ruotge Avamu'mo zamazeri hanavenetige'za, rama'a mono vahe fore hu'naze. **32** Pita'a mago'a kumate kagino vano vano huteno, agra Lida kumate mani'naza (saints) mono nagatega erami'ne. **33** Anampina mago nera Ainiasi'e nehaza ne' 8'a zagegafumofo agu'afi avufa fri kri erino sipa'a atreno novia ne' keno erifore huteno, **34** Pita'a anage huno asami'ne, Ainiasiga, Jisas Kraisi'a krika'a kazeri so'e huganteanki, otinka tafeika'a atrenka vuo, higeno anante ame huno ot'i'ne. **35** Ana hige'za ana mika Lidane, Saroni kumate ene mani'namo'za agri nege'za, Ra

Anumzamofonte zamagu'a rukarehe hu'naze. **36** Jopa kumatera
Jisasi amage nentea a'mofo agi'a Tabita'e. Ana a'mofo agima
(Griki kefi eri rukarehe'ma hazana Dokasi'e hu'naze. Ama
ana agimofo agafa'a, dia afure hu'ne) agripina knare eri'zamo
avite'negeno atupa'ma nehu'za zamasunku zampima nemaniza
nagara miko zupa zamaza hu'ne. **37** Ananknafina kri erino
fri'geno, avufama tinu sesema huntete'za eri'za vazazamo'za,
anaga nomofo hunaragintepinka ome ante'naze. **38** Jopa
kumamo'a Lida kuma tva'onte me'ne, Pita'a anantega Lida
kumate mani'ne hianke nentahiza, Jisasi amage nentaza
disaipol naga'mo'za tare ne'tre huznantageke, vuke hampo'nage
huke, Tagrikura zazatera tavega ontenga muse hugantonanki
(plis) ko eno huke ome asami'na'e. **39** Anankema asamikeno
nentahino'a, Pita'a otino zanagrane vu'ne. Uma hanatige'za,
avare'za anaga agofetu nomofo hunaragintepinka vu'naze. Miko
kento a'nemo'za agrane oti'ne'za, zavira nete'za Dokasi'ma
zamagranema ofri mani'neno tro hu'nea zanra kukenarami'ne,
ruga'a kukenane averi'naze. **40** Hianagi Pita'a ana mika vahera
megi'a hunezmanteno, rena reno nunamu hu'ne. Huteno fri
vahé kerafarega rukarehe huno, Tabitaga otio! Higeno avua hari
huno, Pitana negeno oti'ne. **41** Nehuno Pita'a aza antegantuteno
azeri oti'ne. Anama nehuno zamentintima nehaza naga'ene,
kento a'ne nagara kehuno asimu erie huno avazu huno eme
zami'ne. **42** Anama hia nanekemo'a Jopa kokampina zamukino
vuno eno higeno, rama'a vahé krerfamo'za Ra Anumzamofonte
zamentinti hu'naze. **43** Pita'a mago'a zaza kna, afutamimofo
akruteti hanave'zantami tro nehia ne' Saimoni'ene Jopa mani'ne.

10 Sisaria kumatera mago nera Koniliisi'e nehaza ne'mo, Italie
hu'za nehaza 100'a Romu Sondia vahete ugagota kva nera, **2**

megi'a nagapinti monoku agesa nentahino, noma'afi nemaniza
naga'ane, Anumzamofo kore hunenteno, zamunte omane vahera
ne'zane, kukenanena muse huno nezamino, Anumzantega
nunamuna huvava nehia nere. **3** Mago kinaga ferura 3 kilokinaza
higeno, agra kefatgo huno ava'hagna'za kegeno, Anumzamofo
ankeromo efreno anage hu'ne, Koniliasio! higeno, **4** tusi kore
huno uruha negeno anage hu'ne, Ramoka, na'ahie. Higeno
agra anage huno asami'ne, Nunamu ka'ane, zamunte omane
vahem'a zamaza nehana kavukvara Anumzamo'a ko antahino
keno hu'ne. **5** Menina mago'a vahera huzamantege'za Saimoni'e
nehu'za, mago agi'a Pita'e hu'za nehaza netega Jopa vu'za
ome kehinkeno eno. **6** Mago nera Saimoni'e hu'za nehaza
nera, afutamimofo akruteti hanave'za tro nehia ne'mo, hageri
ankenare noma'a me'nefi anampi Pita'a mani'ne. **7** Kema humia
ankeroma atreno vigeno, agrite eri'za erinent'a netre'ne, mago
sondia ne'mo monoku agesa antahintahi nehuno agri tavaonte
nemani'a ne' ene kehige'za e'naze. **8** Mika kema zamasmiteno
huzmantege'za, Jopa vu'naze. **9** Anante kna zupa kantega vu'za
ranku'ma tavaonte'ma vazageno'a zagemo'ma feru asegeno,
Pita'a no agofetu nunamu hunaku mareri'ne. **10** Huteno aga'zamo
higeno ne'za nenaku nehige'za ne'zama retroma nehazageno'a,
avu evuevu higeno nemaseno ava'na keankna huno, **11** kegeno
monamo'a hagaro higeno, mago'zana tusi'a tavaravegnaza 4'a
atupare atupare azerino atrageno mopafi erami'ne. **12** Anampina
ruzahu ruzahu 4'a agazane zagarmi'ne, ama mopafi zage havu
nehia zagane, zahopi hareno vono nehia nama zagagi hu'za
mani'naze. **13** Anama higeno'a mago ageru'mo agrite eno
Pitaga, otinka ahenka no! **14** Anage hianagi Pita'a huno, l'o
Ramoka kagri kavurema agruma osu'nea zama kasegemoma

i'o hu'nea zana magore huna one'noankina, onetfa hugahie.

15 Higeno mago'ene eteno ana ageru'mo huno, lnankna'zama Anumzamo'ma azeri avusese hu'nesia zankura, avusese osu'ne hunka osuo. **16** Anahu'zana 3'a zupa fore hutegen, anazana ame huno erino monafinka mareri'ne. **17** Pita'a agu'afi nentahino, nazafore hige'na koeha huno agesa omeantahi emeantahi nehigeno, Koniliisi'ma huzmanteg'e'za aza naga'mo'za Saimoni nonku zamantahigeke hu'za, kegina kafante eme oti'ne'za, **18** kezati'za Saimoninku mago agi'a Pita'ema hu'za nehaza agine nera amifina mani'neo hu'za zamantahige'naze. **19** Ava'na kna'zama ke'nea zanku Pita'a agesa nentahigeno, Avamu'mo'a asamino, Ko, 3'a naga'mo'za kagriku nehakaze. **20** Hianagi kagesa ontahinka otinka uraminka zamagrane vuo, na'ankure Nagra hu'zmantoge'za e'naze. **21** Pita'a ana nagate uramino anage huno zamasmi'ne, Antahiho, ama nagrifanku nehakraze, nagafare tamagra e'naze? **22** Hige'za zamagra anage hu'naze, Mago sondia vahe kva nera Koniliisi'e meg'i'a ne'kino fatgo avu'ava nehuno, Anumzamofonku kore nehia nekino, mika Jiu vahe krerafamo'za knare nere hu'za nehaza ne'mofo Ruotge hu'nea ankeromo asamigeno, kagriku noniarega eno keaga eme nasminkena antahineno huno hurantegeta e'none. **23** Higeno Pita'a zamarenompi zamanteg'e'za masete'za, ko ati'geno otino zamagrane nevige'za Jopatira ruga'a zamentinti nehaza afuhe'za agrane vu'naze. **24** Hute'za anante knazupa, Sisaria vu'naze. Koniliisi'a egahaze nehuno, naga'ane tragoteno nemania knampa'aramina kehutru hu'ne. **25** Pita'a noma'afi e'fregeno'a, Koniliisi'a negeno, agafi rena omereno mono hunte'ne. **26** Pita'a avazuhu o'netino anage hu'ne, Otio! Nagra amama hanaza hu'na vahetfa mani'noe. **27** Nehuno agranema keaga hume

nevu'ne, nompima ufreno omegeana rama'a vahe krerafa atru hu'za mani'naze. **28** Pita'a omenezmageno amanage huno zamasmi'ne, Tamagratmi ko kasegea antahitama ketma hu'naze, megi'a vahepinti mago'mo'a Jiu vahe'ene tragotezano, nantu'ma antente zanku'ma i'o hu'za hampo'na kasegema ante'hazana antahi'nazanagi, Anumzamo'a naverino, mago'mofonkura haviza hu'ne huge, avusese osu'ne hunka osuo huno hu'ne. **29** E'ina hu'negu nagriku'ma kema hu'nana ke antahina e'noana, ke huhaviza hurmantezani'a omane'ne, higena nagra kantahinegoe, na'amofo agafare nagrikura huzmantanke'za vu'naze? Huno antahigegeno, **30** Koneliasi'a kenona'a anage hu'ne, 4'a knama evia knafina noni'afi mani'nena, amanahu knare tri kilokia nunamu nehu'na, koana ame huno mago nera masa'nentake kukena hu'nea ne'mo navuga eme o'netino, **31** anage hu'ne, Koniliisiga nunamu nehunka, zamunte omane vahe'ma zamaza nehana kavukvara Anumzamo'a ko antahino keno hu'ne. **32** E'izanku vahera huzmantoge'za Jopa vu'za Saimoninku, mago'agi'a Pita'e hu'za nehaza nera ke humisageno eno. Zgagafa akruteti hampo'naza tro nehia nera, Saimoni'e nehia ne'mofo nompi hageri ankenare mani'ne. **33** Hige'na avega onte'na ko huzmantoge'za kagritega vazagenka knare'za hunka e'nane. E'inahu'ma hu'negu menina, mika'mota Anumzamofo avurera emeritru hu'none. Ramo'ma tagriku'ma ome zamasnio huno hugantegenka e'nana nanekea tasmio. **34** Higeno Pita'a amanage hu'ne, Tamagerafa hu'na menina antahue, Anumzamo'a rukna rukna huno vahera zamesi nozmanteanki, magoke avamente avesinezmante. **35** Hianagi mika kotegati vahe'mo'za (nation) Agri'ma koro hunte'za, fatgoma hu'neazama nehaza vahera, Agra avesi nezmanteno, Agrarega zamarenente. **36** Nagra antah'inoe, tamagra ko

Knare Musenkema Israeli vahe'ma zamasmi'neana antahi'naze. Anumzamofo rimpa fruzana Jisasi Kraisimpi efore hu'ne, Agra mika zamofo Rane. **37** Joni'ma monoti freho kema huama'ma hutegeno'ma Judia kokampi Galiliti'ma agafa huno fore'ma hu'nea zantamina tamagratmi ko antahita ketma hu'naze. **38** Tamagra ko antahi'naze Nazareti Jisasina inankna huno Anumzamo'a Ruotge Avamuteti'ene hanave areti'ene huhamprinte'ne. Ana higeno Jisasi'a vano huno knare hunezmanteno, Sata'ma knama nezmia vahera zamazeri so'e huzmante'ne, na'ankure Anumzamo'a Agrane mani'negeno ana hu'ne. **39** Tagra mika'zama Judia mopafine Jerusalema hiazama tavuma keta antahita hu'nona vahere. Zamagra avare'za keka zafare hantite'za ahe fri'naza zama kenona vahe tagra mani'none. **40** Hu'neanagi ama ana Nera, Anumzamo'a taregi magoki knazupa azeri otino, azeri anteama hu'ne. **41** Mika vahe'mo'za onke'nazanagi, tagra ke'none, Anumzamo'ma ko'ma huhampri tante'nea vahe'mota ke'none, Agrama fripinti'ma otigeta, agranema ne'zane tinema ne'nona vahere. **42** Hagi mono kea vahera ome zamasmiho huno huhanavetino huranteno, kore ke huzmanteta, Anumzamo azeri antesga huno fri vahete'ene mani vahetera keaga Jisasike refko huzmantegahie huno hurantene huta zmasamiho hu'ne. **43** Agrikura korapa mika kasnampa (profeti) vahe'mo'za kea hunte'za, miko'mo'ma Agri agire'ma amentinti hanimofona, kumi'a atrentegahie hu'naze. **44** Pita'ma ana naneke nehigeno'a, Ruotge Avamu'mo ana mika nanekema nentahiza vahete eramine. **45** Hige'za zamufama tagahu'nea vahepinti zamentintima nehaza vahe'ma Pita'enema e'naza vahe'mo'za, megi'a vahete'enena Ruotge Avamu'mofo muse zamo'a herafiramie hu'za tusi antari nehu'za rama'a antahintahi hu'naze. **46** Na'ankure zamagra

nentahizage'za, ruzahu ruzahu zamagerupinti Anumzamofo
muse hunte'za Agi'a hesga hu'naze. Anante Pita'a huama huno,
47 tamagerafa huno, magomo'a timpima vahe'mo'ma mono
tima fre'zankura i'o osugahie. Menima Ruotge Avamu'ma tagra
erunakna hu'za eri'nazankino, mono tima frezamante zampina
iza i'o huzmantegahie? **48** Anante Jisas Kraisi agire mono ti freho
huno hampo'hantake ke zamasmi'nne. Hutege'za mago'agna
tagrane manitenka, vugahane hu'za agrira antahige'naze.
(Hazageno zamagrane mago'agna mani'nne.)

11 Hagi menina Anumzamofo aposol naga ene mago'a Judia
nemani'za mono naga'mo'za, meg'i'a vahe'mo'za (Gentiles)
Anumzamofo naneke eri'naze nanekea antahi'naze. **2** Ana
huteno Pita'a Jerusalemi kumate mrerino vige'za, zamufama
tgahu (circumcised) zamentinti vahe'mo'za agriku ke hakare
hunente'za, **3** kagra zamufa taga osu vahe nompi vunka ne'zana
zamagrane omene'nane. **4** Hu'neanagi Pita'a ke aseni'are erinte
erinte huno huama hu'ne, **5** Nagra Jopa ran kumapi manine'ha
nunamu nehu'na ava'nagna'za kogeno, mago tavrave'gna zana
atupare atupare azeri'heno atregeno monafinti eramino nagrite
e'ne. **6** Keankere'na ana tavravefi koana, **4'a** agiazza hunte'hea
zagagafa ama mopafi mani'neane, trampi zagane asagugati vano
nehia zagane afi' namaramine ke'noe. **7** Nagra nentahugen
mago agerumo'a anage nagrikura hu'ne, Pitaga otinka, ahenka
no hu'ne! **8** Hu'neanagi nagra anage hu'noe, Ra'moka avusese
osuno agru osu'zana hunagru hu'hanke'na nonoa zagagafagina
onegahue hu'na hu'noe! **9** Hianagi ana ageru'mo mago'ene anage
monafinti hu'ne, Anumzamo'ma azeri agruma hu'neniazana,
haviza huno agaru osu'ne hunka osuo! **10** Anazana tagufa
(3'a) zupa fore huteno, ete ana mika'zana avazu higeno monafi

mareri'ne. **11** Ana'ma nehigeno'a, Sisaria kumateti huzmantege'za tagufa vahe'mo'za nemanua nonte ehanati'naze. **12** Avamumo nasamino, I'o osunka ana vahe'ene amane vuo hige'na, 6si'a nenafu'za nagrane azageta Koniliasi nontega vu'none. **13** Koniliasi kegeno ankeromo nom'a'fi oti'neno asami'nea kea, anage huno tasami'ne, huzamantege'za Jopa vu'za Saimoni'e nehaza ne', mago agi'a Pitana avare'za esageno, **14** agra mono naneke neramasaminkeno, kagri'ene mika nagaka'anena, kefo zantmifinti tamahoke ahegahie. **15** Anante naneke erigafa hu'na nehugen, Ruotge Avamu'mo zamagrite erami'ne. Ese'ma tagrite e'neaza huno emani'ne. **16** Ana hige'na Ramo'ma huno, Joni'a tinu mono tina fre ramante'neankino, Avamunu tina frermantegahi hu'nea kegu nagesa antahi'noe. **17** Ana hu'negu Anumzamo'ma magozahu muse'zama (gift) zamagri'ma zami'neana, anahu kna huno Agra Ramofo Jisasi Kraisinte tamentinti nehunkeno tami'neaza hu'negu, iza'na nagra Anumzamofo eri'zankura i'o huzamantegahue? **18** Anankema zamagrama antahite'za, kema huzmanteku'ma hazana netre'za, Anumzamofo ra agi ami'za anage hu'naze, Anumzamo'a megia vahe'enena zamavarege'za zamagu'a rukarehe hu'za zamasimu e'nerize hu'naze. **19** Stivenina ahe nefri'za mago'a nagara zamahe fragu vazige'za, atre'za Fonesiane, Saiprusine, Antiokune, nevu'za ru vahete mono osu, Jiu vaheteke mono kea ome zamasmi'naze. **20** Hu'neanagi Saiprusi vahe'ene Sairini vahe'mo'za zamagripinti mago'a Antioku e'za, agafa hu'za Ramofo Jisasi Knare Musenkea huama hu'za Griki vahe zamasmi'naze. **21** Ramofo hihamumo zamagripi me'negu, tusi'a vahe'mo'za zamagu'a rukarehe hu'za Ramofonte zamentinti hu'naze. **22** Ana'ma zamagrama haza zamofonkemo'a, Jerusalemi mono vahete ege'za nentahi'za,

zamagra Banabasi huntogeno Antioku vu'ne. **23** Agrama eno Anumzamo'ma asunku'ma humazmanteaza negeno, muse nehuno zamazeri hanaveti ke zamasmino, Tamage huta tamagu'areti Ramofonte amage anteho. **24** Banabasi'a knare ne' mani'neno, Avamupi aviteno amentinti hu'negeno, tusi'a veakrerafamo'za maka vahe'mo'za Ramofonte e'naze. **25** Ana huteno Banabasi'a Soli omegenaku Tasisi kumate vuno, **26** ome ke fore huteno awareno Antioku kumate uhanati'na'e. Ana kafufina Banabasi'ene Solikea mono vahe'zaga mono kea hunezamikeno tusi'a vahe fore hu'ne. Anante Jisasima amage'ma nentaza disaipol naga'mo'za pusante (kristen) mono vahere hu'za zamagi'a eri'naze. **27** Ana knafina mago'a kasnampa vahe'mo'za Jerusaleti erami'za, Antioku kumate ehanati'naze. **28** Mago'zmia Agabusi'e hu'za nehaza ne'mo, otino Avamumofo hanavefi maka mopafina agate'za fore hugahie huno hu'ne. (Klaodias Sisama ran kva emania knafi fore hu'ne). **29** Jisasi amage'ma nentamo'za, mago mago'mo'za zagoma eri'naza avamente eritru huta Judia mani'naza tafuhe'intega (mono nagate) zamaga'zanku hugahazanki atre'zmantesune nehu'za, **30** anante eri tru hute'za, mono vahe'mo'za, Banabasine Soli kizani zanamizage'ne, Jerusalemi mono kva vahetega eri'ne vu'na'e.

12 Ana knafina Kini Heroti'a mago'a mono vahe zamahe, frinaku zamazeri'ne. **2** Joni nefu Jemisi azeri'za bainati kazinu ahe fri'naze. **3** Ana'ma hiazama Agrama kegeno Juda vahe'mo'za musema hazageno'a, Pitana azerino kina hunteku hu'ne. (Zo'ore breti muse hu'za nenaza knare, anara hu'ne.) **4** Heroti'a Pitama azeriteno awareno **4'a** sondia vahe kevumofo (16'a sondia vahe) zamazampi ome

antege'za, oza aza hu'za kava kri'naze. Heroti'a Pasova ne'za netesageno, amefi'a maka vahe zamufi Pitana azeri ama hunaku antahi'i'ne. 5 Ana higeno Pita'a kina nompi mani'nege'za, mono vahe'zagamo'za Anumzamo'ma azama hanigura hampo'nati'za nunamu hunte'naze. 6 Ana kenegera masenkeno okina Heroti'a avareno keaga huntegahianki nehigeno, Pita'a tare sondia netremokizni amu'nompi mase'negeno, tarega azantera seni nofiteti kina rentenageno, kva vahe'mo'za kina vahete kava kri'za kafante mani'naze. 7 Anama nehazageno'a ame huno Ramofo ankeromo efore higeno, masamo'a kina vahe nona remsa hu'ne. Ankeromo'a Pitana asoparega aheno, Ame hunka otio! Higeno seninofimo'a Pita azantetira evurami'ne. 8 Ankeromo'a amanage huno Pitana asami'ne, Kamu'nofira nehunka kaga nona vazio, higeno Pita'a aganona antanine. Anante ankeromo'a anage huno asami'ne, Anakre kuka'a nentaninka namage' eno hu'ne. 9 Pita'a amage' avaririno nevuno, ankeromo'ma azama hiazana agra antahino keno osu'neanagi, agra avana negofi huno hu'ne. 10 Ese kafante kava hu'naza sondia vahe'ene, anante kafante kava hu'naza sondia vahe zamagterete'ne, ran kumapi vu kafana aenireti hagente'nea ran kafante akeno agra'a kafamo'a anagige'ne atirami'ne osi kampi nevakeno, ankeromo'a ame huno atreno vu'ne, 11 Pita'a agrake nevuno amanage hu'ne, menina nagra antahi'noe, Ra Anumzamo'a ankeroma'a huntegeno, Heroti'ene Jiu vahe'mo'za maka'zama hunante'naku hazafintira naza huno katufe natre'ne. 12 Anante Pita'ma ana'ma hiazza antahino keno nehuno, Jonina mago agi'a Maki'e nehaza ne'mofo nerera Maria nontega, maka vahe'mo'za mani'neza nunamu nehzarega vu'ne 13 Anante Pita eno meg'i'a kafante eme vagare vagare higeno'a, Roda'e nehaza eri'za mofa'mo eno

eme antahi'ne. **14** Pita ageruma nentahino'a, ana kafana onagi
atreno tusi muse nehuno, agareno vuno Pita'a kafante oti'ne
huno ana vahe zaga ome zamasmi'ne. **15** Hu'neanagi zamagra
anage ana mofakura hu'naze, Kagra negi nenegahane! Ana
mofamo hanavetino tamage Pita'e nehige'za, kagra ankeroma'a
ke'negahane hu'za mago'ane hu'naze. **16** Pita'a vagare vagare
nehigeno, zamagrama kafa anagi'za nege'za, nankna huno
e'neha hu'za tusi'a antri hu'naze. **17** Agra azanu avame hige'za
akohe'za mani'zageno Ramo'ma kina nompinti azama huno aware
atre'nea kea zamasmi'ne. Ana huteno anage hu'ne, Jemisine
mono nafuhe'ina ama ana nanekea zamasmiho huteno atreno ru
kumatega vu'ne. **18** Ko'ma atige'za, kina nonte'ma kva hu'naza
sondia vahe'mo'za tusiza hu'za Pita'a na'a hu'neha hu'za rama'a
antahintahi hu'naze. **19** Anante Heroti'ma hakareno keama, keno
erifore nosuno'a kavama hu'naza vahera kegaga huzmanteno
tamagra frigahaze hige'za, zamahe friku zamare'za vazageno,
henka Judiatira atreno uramino Sisaria umani'ne. **20** Anante
Heroti'a Tairi kumate vahe'ene, Saito kumate vahe'mokizmigura
arimpa ahezamantege'za, zamagra mago zamarimpa hu'za
agrite emeri atru hu'za, kini ne'mofo tva'onte eri'za ne' Blastusi,
zamaza hinogu rimpa azeri fru hute'za, knare nomanizama
kini ne'mo'ma zamisigu antahige'naze. Na'ankure zamagrama
kave'ma e'nerizana kini Heroti'ma kava kri'nea mopafinti e'neri'ze.
21 Mago kna erintaza knazupa, Kini Heroti'a kini vahe kukena
huteno, keaga refakohu trate mani'neno zamagrira rama'a
keaga zamasmi'ne. **22** Hu'neanagi tusi'a vahe'mo'za agafa
hu'za rankeh'u'za mago anumzamofo agerure, hanki vahe'mofo
agerure omane'ne! hu'naze. **23** Ana kema nehzama'a, mago
Ramofo ankeromo Herotina ahe tre'ne, na'ankure Anumzamofo

ra agi omigeno agrira knimo amprigeno fri'ne. 24 Hu'neanagi
Anumzamofo kemo'a hageno rura huno vuno eno hu'ne. 25
Banabasi'ene Solikea Jerusalemi mono eri'zama eri vagareteke,
Jon Makina nevareke ete Antioku kumate vu'na'e.

13 Antiokua mono nonte'ma menima mani'naza kasnampa
vahe'ene, rempi huzmi vahera ama'a mani'naze, Banabasiki,
Simioni (aganumpa nere hu'za nehaza ne'ki), Lusius'i'a Sairini
ne'ki, kumate ugagota kva (Gavana) ne' Heroti knampa,
magoka ositeti rasena'a ne' Manainiki, Soliki hu'za mani'naze. 2
Anamo'za Ramofonte mono hunente'za, ne'za a'o hu'za nunamu
nehazageno, Ruotge Avamu'mo'a anage hu'ne, Banabasine Soli
kizni huhampri znante'keno, eri'za eriogu hua eri'zana eri'o hu'ne.
3 Ana hute'za ne'zama a'o hu'za mani'neza henka zamazana
znagofetu ante'za nunamu hute'za huzamantake'ne vu'na'e.
4 Banabasine Soli kiznia Ruotge Avamu'mo huznantege'ne
Selusia uramike vente omerike Saiprusi ti amu'nompi me'nea
kumate vu'na'e. 5 Zamagrama Saramisi kumate vute'za, agafa
hu'za Anumzamofo kea Jiu vahe osi mono nompi (Sinagog)
huama hu'naze. Zanaza hanigu Joninena avare'ke umani'naze.
(Mago agi'a Jon Maki'e.) 6 Zamagrama maka ti amunompi
kumatami agatere'za nevu'za Pafosi uhanati'za zago nereno
Jiu vahepi havige kasnampa nera, Bar Jisasi'e nehaza nera
mani'negeke ke'na'e. 7 Ana nera, Segius Paulosi knare
antahizamo agatere'nea ne' Romu kamanimo huhamprintegen
ana ti amu'nompi kuma kava hu'nea ne'ene mani'ne, ana
kamani kva (gavana) ne'mo'a Banabasine Soli kizni Anumzamofo
ke eme asami'ogu zanagi hu'ne. 8 Hu'neanagi amene ne'
Elimasi'a zago nereno ha' arezmanteno ana kamani kva ne'mo
amentinti osanie hu'ne. (Elimasi'e huno Griki kefi hu'neana,

avuatga huno zago nereno vahe zamahe fri nere hu'ne.) **9**
Hu'neanagi Solina, mago agi'a Polikino, Ruotge Avamumo'a
agu'afi avinetegeno avua kefatgo huno ana ne' negeno, **10**
anage hu'ne, Kagripina havige avu'avamo'ene havizahu zamo'a
avite'ne. Sata mofavre mani'nenga fatgo avu'avamofona ha'
arenentane, kagra fatgo osu avu'avara netrenka, Anumzamofo
fatgo avu'avara osugahampi? **11** Menina ko, Anumzamofo
azamo'a ha' reganteankino kavurgamo'a asu hanigenka, osi'a
knafina kavua onkegahane! Higeno ame huno avumo'a asu
higeno, azante azerino vanohu vaheku hakre'ne. **12** Anante
kamani (Gavana) kva ne'mo anazama agrite fore hiaza negeno,
amentinti hu'ne. Na'ankure agra tusi'za huno Ramofonkema
rempima humia zankura antri hu'ne. **13** Anante Poli'ene agrane
vu'naza vahe'mo'za Pafosi kuma atre'za ventefi mareri'za
hagerimpi vu'za Pega kumate Pamfalia kaziga ehanati'naze.
Hianangi Joni'a anante ome zanatreno ete Jerusalemi kumate
vu'ne. **14** Pega kumara atreke, zanagra Pisidia Antioku
ehanatike, mani fruhu knazupa osi mono nompi (sinagog)
marerike umani'na'e. **15** Kasegene kasnampa vahe kema hampri
vagarete'za osi mono nompi kva vahe'mo'za ke atrezmante'za
anage hu'naze, Tafuheta mago'a tazeri hanaveti ke eri'enutma
amané hugahaze. **16** Hazageno Poli'a anante otino azanu
avame huno anage hu'ne, Israel vahe'motmane megi'a vahe'ma
Anumzamofonku koroma nehaza'motma antahiho. **17** Ama'i
Israeli vahe'mofo Anumzamo'a, tagri tagehe'ina huhampri
zamanteno, ru vahe kumapima Isipima umani'nageno zamazeri
knare zantfa nehuno hihamu'areti anampintira zamare megi
atre'ne. **18** 40'a kafufi ka'ma mopafi zamareno ome zamanteg'e'za
mani'naze. **19** 7ni'a ranra kumatamimpi mani'naza Kenani vahe

zamahe hana huteno, Anumzamo'a ana mopafi vahe'amo'za manisagu mopa erizamige'za zamagra mopa erise'za mani'naze.

20 Anazama fore'ma hu'neana 450'a zagegafu nazampi fore hu'ne. Ana'ma huteno'a henka kva vahezaga zamazeri otige'za, kva krizmante'za mani'za e'za kasnampa ne' Samueli knare ehanati'naze. **21** Anante kini ne' tamisane hu'za antahigageno, Anumzamo'a Kisi nemofo Benzameni naga nofipinti ne' Soli zamigeno, 40'a zagegfufi kini manino kva huzmante'ne. **22** Anumzamo'a kini Solina azeri netreno, Deviti azeri otigeno kini manino kva huzmante'ne. Agra anage huno Devitinkura hu'ne, Nagra kogeno Jesi nemofo Deviti'a, Nagri'ma nagu'afima navenesia'zana agra nevaririno, maka'zama huo hanuazana hugahie. (Sam-Zga 89:20, 1 Sam 13:14) **23** Ama ana ne'mofo negehompinti, Anumzamo'a Israeli vahe'mota tahoke'ma heno tazahu nera Jisasina huvempa hu'nea kante anteno tami'ne.

24 Jisasi'ma hakare'a Israeli vahe zamufi eama osu'negeno, Joni'a huama huno mono tina fretma tamagu'a rukrehe hiho huno maka Israeli vahe'mota tasami'ne. **25** Hu'neanagi Joni'ma huhamprinte'nea eri'zama'a eri vaga reteno'a, mago'ene anage hu'ne, iza'e hutma nagrikura nentahize? Nagra ana nera omani'noe. Hu'neanagi antahiho, mago'mo'a namage ne-e. Nagra knarera osu'noanki'na agia anonte'ma anaki'neanofira katu ofegahue huno hu'ne. **26** Nafuhetma Abrahamu agigo azankomofo nagare, amama Anumzanku koro nehu'za tamagrane mani'naza megi'a vahe'motma kumipinti tazahu kea tagrite atregeno e'ne. **27** Na'ankure Jerusalemi mani'naza vahe'mo'zane, kva vahe'zmimo'zanena Agra taza hu'nere hu'za ke'za antahi'za osu'naze. Kasnampa vahe'mo'za Agriku hu'za kre'naza kea maka mani fruhu (sabat) mono knare'ma hampri'za

nentahi'za, antahiso'e osu'za ahenaku huhaviza hunte'naza kemo'a, avufa'a fore hu'ne. **28** Ahe fri agafagura ke'za erifore osu'za, zamagra Paerotinte vu'za, antahige'za ahe frio hu'za hu'naze. **29** Agriku'ma hu'zama avon tafepi krente'naza maka nanekea huvgarete'za, keka zafareti erifenka atre'za eri'za vu'za hanagati'za tro hunte'naza kerifi ome ante'naze. **30** Hu'neanagi Anumzamo'a fri kragefe'nefinti azeri otigeno, **31** Galiliti amage' ante'za Jerusalemi mareri'za e'naza vahetaminte rama'a zupa efore hu'ne. E'ima ke'naza naga'mo'za vahepina huama hu'za menina nezamasmize. **32** Hanki neragehokizmima huvempa huzmante'nea Knare Musenke tagrama neramasmunana, **33** ama ana huvempa kea, Anumzamo'a tagrite eri knare huranteno Agra'a mofavre'aza huneranteno, Jisasinena azeri oti'ne, ko'ma nampa **2** zagame avontafepima krente'nea kante, Kagra mofavreni'a menina maninkena, Nagra negafa'na manue huno huama hu'ne. (Sam-Zga 2:7) **34** Hu'neanagi e'ima hunte'nere, Anumzamo'a tamage huno Jisasinena azeri oti'neankino mago'anena frino onkasritfa hugahie, Anumzamo'a anage huno hu'ne, Nagra agru huno ruotge hu'nea huvempa asomu ke Devitima ami'noana, menina tamagrira tamigahue, (Ais 55:3) **35** E'ina hu'negu mago'ene zagame avon tafepina anage huno kre'ne, Kagra atresankeno ruotge hu'nemo'a onkasrigahie. (Sam-Zga 16:10) **36** Deviti'a, agrama manino e'nea knafina Anumzamo'ma erigahane huno hunte'nea eri'zana eri vagareteno, frige'za negehoma asentenafi ome asentageno avufamo'a kasri'ne. **37** Hu'neanagi Jisasinena fri'nefinti Anumzamo azeri otigeno onkasri'ne. **38** E'ina hu'negu nenafutma antahita keta hiho, ama ana ne'pinti kumi tamia eri atresia ke huama hu'na neramasmune. **39** Ama ana nete'ma zamentinti hanu'za fatgo vahe manigahaze. Mosese

kasegemo'a tamazeri fatgo osugahie. 40 Ana hu'negu tamagra kava hu'nenkeno, kasnampa vahe'mo'za hu'naza nanekemo'a tmagritera fore osino. 41 Kiza zokago kema nehaza vahe'tmina, keho! Tamano nevazinketma antri hutma fritma haviza hugahaze! Nagra knare eri'za enerugetma tamentinti'a nosaze. Vahe'mo'ma tamasmi'nigeta tamentintia osugahaze, huno kre'ne. (Hava 1:5.) 42 Anage huteke Poli'ene Banabasike atineramike'za, vahe'mo'za ama ana nanekea ru mani fruhu kna (sabat) zupa knare eme tasmigaha'o, hu'za zanasmi'naze. 43 Mono'ma osi mono nompi (sinagog) huvagarete'za, vu'za e'za nehazage'za, rama'a Jiu vahe'mo'zane, Anumzanku koro nehaza meg'i'a vahe'mo'za, Poline Banabasi kizani zanavriri'za nevzage'ne, zamazeri hanaveti ke hu'ne, Anumzamofo asunku'zampina hanavetita maniho hu'ne ana vahera zamasmi'na'e. 44 Hanki anante mani fruhu kna (Sabat) zupa, ran kumapi mani'naza vahe'mo'za kuma azute'za Ramofo ke antahinaku emeritru hu'naze. 45 Mika vahe eritru nehazage'za Jiu mono vahe'mo'za nezmage'za kanive reneznantageno, Poli'ma hiankegura mago zamarimpa huoznante'za, ana vahe'mo'za ha' reznante'naze.

46 Poli'ene Banabasi'kea hanavetike koro osu anage hu'na'e, Esera Jiu vahe'motma Anumzamofo nanekea tamasmi'nonanagi, tamagra tamefi ana kea hunemitma fatgoma hutma mani'netma manivava asimu erizankura tame'nosigu, meg'i'a vahete tagra rukarehe nehu'e. (aiōnios g166) 47 Ramo'a amanage huno hanavege hurante'ne, Nagra huhampri kantoankinka, kagra meg'i'a vahera tavi zami mani'nenka, kumipinti zamazahu kea erinka mopa atupare uhanatigahane huno tasami'ne. (Ais 42:6, 49:6) 48 Meg'i'a vahe'mo'za ana naneke nentahi'za muse nehu'za, Ramofo kegura tusi'za hu'za musenkase nehzageno,

manivava zamasimu erigahaze huno huhampri zamante'nea
vahe'mo'za zamentinti hu'naze. (aiōnios g166) **49** Ana hazageno
Ramofo kemo'a ana mopa kaziga zamukino vuno eno hu'ne.
50 Hu'neanagi Jiu vahe'mo'za, Anumzamofonku koro nehu'za
zamagi me'nea a'nene, zamagi me'nea vene'nene zamarimpare
ke hu'za zamazeri otizage'za, Poline Banabasi kiznia, ana
mopa kazigatira zamahe anati tre'naze. **51** Zanahe anatizageke
zanagiareti kugusopa rupopo hutra'azamo'a, huzmerino e'izama
hazazamo'a knare osiaza hazankino knazamo'a tamagripi
megahie nehuke, Ikoniamu atreke vu'na'e. **52** Hu'neanagi Antioku
kumate'ma zamentinti nehu'za Ramofo amage nentaza nagapina
musezamo'ene Ruotge Avamu'mo'a avite'ne.

14 Antioku mani'nakeno fore hu'neankna kna'za fore hu'ne,
Poli'ene Banabasikea Ikonia kumate vuke, Jiu vahe osi mono
nompi (sinagog) hampo'natike hakare vahe'mo antahi ama
hu'are, mono kea huama nehake'za, rama'amo'za Jiu vahe'ene
Griki vahe kevumo'za zamentinti hu'naze. **2** Hu'neanagi
Jiu vahe'mo'za zamentinti ana kegura nosuza, meg'i'a vahe
antahintahi eri savri hazage'za, ana netrena ha' rezanante'naze.
3 Ana hazageno mago'a knafina anantega mani'neke, mono
kea hanavetike Ramofonkura nehune, asunku'zamofo kea
nehakeno, avame'zane kaguvazanena zanagri znazampi eri
fore hu'ne. **4** Hu'neanagi ana rankumapi mani'naza vahe
krerafamo'za amu'nompinti refako hu'za, mago'amo'za Jiu
vahetega vazage'za, mago'amo'za aposol vahetega anteza
mago zamarimpa hu'naze. **5** Meg'i'a vahe'ene Jiu vahe'mo'zane
kva vahezamine, zamazeri haviza huta have knonu tare netrena
zanahe frigahune hu'za nehazageke, **6** Poli'ene Banabasikea
ananke nentahi'ne, freke Likonia rankumamofo osi kumatrena

Listrane Debine ana kaziga asoparega meno vu'nea mopare
umani'na'e. 7 Anantega umani'neke mago'ene Knare Musen
Kea huama hu'ne zamasmi'na'e. 8 Listra kumatera mago agia
havizahu ne' kasente'nea ne' mani'ne, kasente'neregatira kana
vano nosia nere. 9 Ana ne'mo Poli'ma huama hiankea mani'neno
antahi'ne. Poli'a ana ne'ma avufi kefatgo huno negeno'a,
amentinti nehiankino knare huntegahie nehuno, 10 ran ke huno
asami'ne, Kagareti oti fatgo huo huno higeno, ana ne'mo'a, haru
huno marerino tamino nehuno otino vu'ne. 11 Poli'ma hiazama
ana vahe tamimo'za nege'za, Lakonia kefinti ranke hu'za,
anumzantamimo vahe fore huno tagrite ne-e hu'za hu'naze! 12
Zamagra Banabasinku Ziusi (havi anumzane) nehu'za, Polinku
Hemesi'e (havi anumzane) hu'za kahefa zanagi ante'naze.
Na'ankure Poli'a ke ne'ku hu'naze. 13 Ziusi havige anumzamofo
mono nona, rankumamofona meg'i'a, tava'onte me'nea nomofo
kva ne'mo'a, mago bulimakaona nevareno mago'a avasase
zantamine erino rankumamofo kahante vige'za, agrane ana mika
vahe'mo'za kresramana huznantenaku hu'naze. 14 Hu'neanagi
aposol Poli'ene Banabasikea ananke nentahike kukena zani'a
tagato tagatu nehu'ne, zanagare'ne ana vahetamimofo amunompi
ufre'ne kezatiike anage hu'na'e. 15 Ama vahe'motma, na'a
amazana nehaze? tagra vahetafa mani'neta tamagri kna
hu'no'e! Tagra Knare Musenke huama huta neramasmu'e,
ana hanuketa tamazama osuno havi zampintira atretma, Agra
monane mopane, hagerine maka'zama tro huno asimu anteno
mani'nea Anumzante monora huntegahaze. 16 Hagi korapa
knafima mani'naza vahera, Anumzamo'a zamatrege'za maka
mopafi vahe'mo'za zamagra zamesia kante vu'za e'za hu'naze.
17 Hu'neanagi Agrama knare'zama hu'neana fraoki'neanki,

monafinti kora atregeno rigeno ne'za raga rentegeno, eri
knare hunermanteno tamesia ne'zana neramino, musezana
tamagu'afina ante'ne. **18** Anahu kea hu'neanagi kresramna
vuznantenaku hu'nazana vahe'ma i'o huzmantenaku hu'noanagi,
tusi'a amuho huzmante'ne. **19** Hu'neanagi Jiu vahe'mo'za
Antioku kumateti'ene Ikonia kumateti e'za, havige nehie hu'za
vahera zamagrarega eme zamavarente'za, Polina have knonu
ahe'za avazu hu'za rankumapinti atirami'za hago frie hu'za
zamagesa nentahiza meg'i'a ome atre'naze. **20** Hu'neanagi
Anumzamofo amage nentaza disaipol naga'mo'za, regorave
nehazageno anampinti otino ran kumapinka eteno ufarene.
Maseke nanterana Banabasi'ene atre'ne Debi vu'na'e. **21**
Ana ran kumate'ma knare muse ke (gutnius) huama hakeno
rama'a vahe'mo'za, amage ante'za disaipol naga fore hazageno,
zanagra Listra kumate'ene Ikoniane Antioku kumate ete vu'na'e.
22 Zanagra Jisasi amage' nentaza disaipol naga zamagu'a
zamazeri hanaveti ke hunezmasmike, hanavetita tamentintifina
maniho, Anumzamofo kumapima vunaku'ma hanuta, rama'a
knazampi ufrreteta henka vugahune hu'na'e. **23** Ana nehuke,
mono kva vahe (elda) mago'a mono nonte zamazeri onetike
ne'zana a'o huneke nunamu nehune, zanamentintima neha'a
Ramofo azampi zamante'na'e. **24** Ananteti Pisidi'a distrikifi
ufreke agatera'azamoke, Pamfilia provinsifi ehanati'na'e. **25**
Zanagra Pega kumate mono naneke ome huteke, Ataria
kumate urami'na'e. **26** Anantetira atre'ne ventefi marerike ete
Antioku kumate vu'na'e, korapara ana kumateti Anumzamofo
asunkuzampi huzamantake'ne vunate ete ehanatina'e. **27**
Zanagrama ehanatike mono vahezaga eme zamazeri atru
huteke, maka'zama Anumzamo'ma zanagripima hu'neazana

nezamasmi'ne, megi'a vahete kama eri hagro hige'za zamentinti hu'naza kea zamasmi'na'e. 28 Ana kumate Anumzamofo amage' nentaza disaiopol naga'ene zazakna mani'na'e.

15 Hagi mago'a vahe'mo'za Judia kazigati e'za Antioku ehanati'za amanage hu'za zamentinti nehu'za amage' nentaza nagara rempi huzami'naze. Mosese hu'nea kere amage' antetma tamavufa taga hiho. Anama osanutma Anumzamo'a tamahokeno tamaza osugahie. 2 Poli'ene Banabasi kema ke hakare ana vahe'enema hugantigama hutageno, mono vahe zagamo'za Poline Banabasine amu'no zamifinti mago'a vahe'mo'zane kehakare hu'nazaza eri fatgo hunaku mago'a, aposol naga'ene mono kva vahe'ene (eldas) mago zamarimpa osu'naza keaga huza eri fatgo hunaku Jerusalemi vu'naze. 3 Ana hige'za mono naga'mo'za, huzamantege'za, Fonesiane Sameria ufare'za agatere'za maka megi'a vahe'tamimo'za zamagu'a rukarehe hu'naza kea mono vahe'zaga zamasmige'za tusi'za hu'za muse hu'naze. 4 Zamagrama Jerusalemi uhanatizage'za, mono vahe'mo'zane, mago'a aposol naga'ene mono kva vahe'mo'za (eldas) muse hu'za zamavrage'za, maka'zama Anumzamo'ma zamagrite'ma hu'neazana huama hu'za zamasmi'naze. 5 Hu'neanagi mago'a Farisi mono vahepinti, zamagua rukarehe hu'za Kraisinte zamentinti hu'namo'za, oti'za anage hu'naze, megi'a vahe'mo'za zamufama taga hute'za Mosesi kasegema amage antesazana knare hugahie. 6 Aposol naga'ene mono kva (eldas) vahe'mo'za atru hu'za ana naneke erifatgo hu'naze. 7 Eri atru hu'za zazate kea refako hu'za antahizageno, Pita otino ana nanekemofo nona'a amanage huno zamasmi'ne, Nenfutma, tamagra antahi'naze mago'a kna evigeno, Anumzamo'a nagri huhamprinanteno, megi'a vahepi mono kea huo huno

hunantege'na, hugeno knare musen ke antahi'za zamentinti hu'naze. 8 Higeno Anumzamo vahe'mofo agu'a keno antahino hu'nemo'a, zamagritera eriama huno Ruotge Avamura zami'ne, na'ankure tagri'ma hu'neazana huno zami'ne. 9 Hankino tagrira Anumzamo'a ruzana huranteno, zamagrira ruzana huozmante'ne, zamentinti nehazageno zamagu'a zamazeri agru hu'ne. 10 Hagi menina nahigetma Anumzamofona rimpa he'zana nehutma, bulimakaomofo zamanankempi anaki nezmantaza kna knanentake agare namare zafa (Yoke) Jisasi amage nentaza disaipol nagapina nentaze. Tagri nerageho'ene, tagranena eriga osu'nonankna knazana zaminaku nehazo? 11 Hu'neanagi tagrama tamentintima nehunana, Ramofo Jisasi asunku'zamo kefo zantifinti tahoke heno zamagri hu'nea kante anteno taza hu'ne. 12 Atru hu'naza maka vahetamimo'za, ke osu mani'nage'za, Polike Banabasikea kaguva'zane avame'zanema zanagripinti Anumzamo'ma meg'i'a vahe'ma huzmante'nea zana zamasmi'na'e. 13 Ana nanekema huvagamaretageno, Jemisi'a anage huno kenona hu'ne, Nafuhetma ke'ni'a antahiho, 14 Saimoni'a anage huno huama hu'ne, Anumzamo'a meg'i'a vahera zamare'na Nagra'ni'a vahere hu'na huhampri zamantegahue hu'ne. 15 Kasnampa vahe'mo'za krente'naza kemo'a, ama kenena mago kna hu'ne, 16 Anama hutesu'na, ete Nagra e'na Deviti noma karite'neana etena eme kigahue. Nagra'ni'a havizama hu'nea nona eriso'e hugahue. 17 Ana nehanena miko vahe'mo'za, Ramo'nagu nehakesagena, zamajima hesuana, mika meg'i'a vahera Nagri vahere hu'na zamagrikura hugahue, huno mika'zama tro'ma hu'nea Ramo'a hu'ne, (Emo 9:11-12) 18 Hagi Korapa'ma evu'nea knafina amazana antahino keno Anumzamo'a hu'neane. (aiōn g165) 19 E'ina hu'negu,

huvgare nanekea nagra (Jemisi'na) amanage nehue, tagra
mago'anena knazana ozamisune, na'ankure megi'a vahe'mo'za
amu'no zamifinti rukarehe hu'za Anumzamofonte e'naze.

20 Hu'neanagi avonkreta amanage huta zamazeri haviza
huzampintira maniganeta maniho huta zamasmi sanune. Havi
anumzamofo ami'nesia zane, monko avu'ava'zane, anankema
taga osu zagagafane, korama me'ne'nia ame'a oneho huta
zamasmisune. **21** Na'ankure tagra antahi'none, ofenka'a
knareti eno menima e'neana, Mosese kasege'a huama hakare
kumatera nehu'za, maka mani fruhu knarerera (Sabat) osi
mono (sinagog) nompi umarerri'za hampri'za nezamasmize.

22 Anante aposol naga'ene, mono kva vahe'mo'zane, maka
mono kevumo'za amuno zamifinti huhampri zamante'nazana
Judasinku Basabasi nehaza ne'ene Sailasi'a ana naga'amofo
kva ne' zamine huhampri zananteke, Poline Banabasikizni
Antioku vihogu huzmante'naze. **23** Ama'na avonkrentage'za
eri'za vu'naze, aposol nagategati'ene mono kva vahe'motane,
tamagri tamafuheta megi'a tafuhetane nerasarogta Antiokune
Siriane, Silisiama mani'namotarega musenke huramantone.

24 Kema antahunkeno'a, mago'a vahe'mo'za tagripinti vu'za,
huozmante'nona ke ome tamasmiza kemo'a, kna neramino
antahintahitamia tamazeri savari hu'naze. **25** Tagra mago tarimpa
huta tavesima nezanantona tagri roneti Banabasine Poline
magoka ama vahera huhampri zamanteta huzamantonke'za
vaze. **26** Zanagra zanavufa tagri Ramofo Jisasi Kraisi agi'are
atre'za neha'a netre'ne. **27** E'ina hu'negu Judasine Sailasikizni
huzmantankino, zanagra zani'a ama kemofona ome hamprike
tamasmigahaze. **28** Na'ankure knare'ma hu'neana, Ruotge
Avamu'ene tagranena, ruga'a knazana ontaminaku nehunanki,

ama kemofo avaririgahaze. **29** Ana hu'neanki havi anumzamofo ami'nesia zane korama'a me'nenia ame'ane, anankema tagaosu zagagafa onetma monko'zana osugahaze. Tamagrama amazama osutma maniganeta manisazana knare hugahaze. Tamarimpa frune maniho. **30** Ana hute'za zamagra atre'za Antioku urami'za, maka naga ome zamazeri atru hute'za anama kre'naza avona zami'naze. **31** Rankema hu'za ana avoma hampritageno, vahetamimo'za zamazeri hanaveti kema hazazankura, tusi'a musenkase hu'naze. **32** Hagi Judasike Sailasikea znagranena kasanampa netrenkike, so'e hu'za mani'saza kene zamazeri hanaveti ke nezmasmike, zamentinti nagara zaza naneke hu'ne zamasmi'na'e. **33** Mago'agna manitakeno, ana kumate zamentinti nehaza naga'mo'za, tanarimpa farune vi'o hu'za huznantageke, e'na'a vahetega eteke vu'na'e. **35** Hu'neanagi Poli'ene Banabasikea, rama'a rempi huzami vahetegene Antioku kumate mani'ne'za rempi hunezami'za Ramofonkea huama hu'za zamasmi'naze. **36** Henka'a mago'a kna evutegeno, Poli'a Banabasina amanage huno asami'ne, Ete vuta maka kumapi zamentinti nagara, Anumzamofo kema zamasmi'no'ana, nankna nehazafi ome zamagesu'e. **37** Banabasi'a, Joninku mago agi'a Maki'e nehaza ne' avare'netta vanu'e hu'ne. **38** Hianagi ko'ma avareke Pamfili'a kumate nevakeno, zanatreno eri'za e'o'ri vu'negu Poli'a hamponatino i'o, avareta ovugahu'e hu'ne. **39** Hu'nege'ne anzanteku fra vaziteke, otare atre hu'na'e. Banabasi'a Makina awareno votifi marerino Saiprusi ti amunompi kumate vu'na'e. **40** Hu'neanagi Poli'a Sailasi awarena vugahue nehige'za, Anumzamofo asunku'zane knare vi'o hu'za mono afuhe'zane asarahehe'zanena musen ke huznantageke atreke

vu'na'e. **41** Siriane Silisi'a kumapi Poli'a ufreно nevuno, mono
vahera zamazeri hanavetime vu'ne.

16 Hagi Poli'a Debe kumate ene Listra kumate'ene ne-eno,
mago nera Timoti'e nehaza ne'kino, nerera'a Jiu a'mo amentinti
nehia a'mofa mofavre. Hianagi nef'a Griki ne' mani'ne. **2**
Listrane Ikoniamu mani'naza zamentinti naga'mo'za knare nere
hu'za nehaza nere. **3** Poli'a avreno Timoti vunaku nehuno
avufa taga huntene. Na'ankure mago'a Jiu vahera ana kumatera
mani'nageno ana hu'ne, makamo'za antahi'naze agri nef'a
Griki ne' mani'ne. **4** Zamagrama kumate kumate ufare'za
nev'u'za, aposol naga'mozane mono (elda) kva vahe'mo'zama
Jerusalem kumate'ma hu'naza kea meg'i'a zamentinti vahe'mo'za
avaririsaze hu'naza ke ome zamasmi'naze. **5** Anama higeno
mono vahe'mo'za zamentintifina hanave e'nerizageno, mago
mago knafina rama'a vahe efare efare hu'za ra hu'naze. **6**
Zamagra Pamfaliane, Galesia kaziga ugatere'za nevazageno,
Ruotge Avamu'mo mono ke Esia kaziga huzanku i'o huno
huzamantege'za agatere'za vu'naze. **7** Zamagrama Misia kaziga
ete'za, Bitania kaziga vunaku hu'nazaragi, Jisasi Avamu'mo
zamatrege'za ovu'naze. **8** Ana hige'za zamagra Misia agatere'za,
Troasi rankumate urami'za vu'naze. **9** Keragera Poli'a mago
ava'nagnaza efore higeno keana, Masedonia ne'mo otino
mani'neno asamino, tagritega erakahenka Masedonia eme taza
huo huno nehigeno ke'ne! **10** Ana avanagnaza Poli'a ketegeta,
Anumzamo'a tasmino Masedonia vutma Knare Musenke ome
zamasmiho nehiankiti, ame huta ome zamasmisune huta
hu'none. **11** Troasi kumateti ventea erigantu atreta hagerimpi
vufatgo huta Samotresi vuta, ugatereta anante kna zupa
Niapolisi kumate uhanati'none. **12** Anantetira atreta Filipai

kumate vu'none, anama mani kagi'naza kumamofo, ran kumara
Masedonia, Romu kamanimo kavagri'nea kumate mago'a kna
ana kumate mani'none. **13** Mani fruhu knazupa rankumamofo
kafampinti atiramita tinnenare nevuta, tagesama antahunana
mago'a Jiu vahe'mo'za nunamu nehaza kumara me'negahie
nehuta, a'ne naga maninageta anante umanita agafa huta,
ana a'ne naga'enena kea hu'none. **14** Mago ara agi'a Lidia'e
nehaza a'mo knare konariri'ane fitu tavrave hatino zagore netrea
a'mo, Taitaria rankumateti a' mani'neno Anumzamofonte mono
hunentea a'mo kema huna kea antahi'ne. Anumzamo'a agu'a
eri rukrehe higeno Poli'ma hiankea antahi'ne. **15** Ana a'ene
noma'afi nemani'za naga'anema mono tima frete'za, anage
huno Lidia'a tantahigeke hu'ne, Tamagra nagriku'ma Ramofonte
mani tragoteno'ma mani'ne hanutma noni'afi eta emanaho, huno
hampo'natino tantahigeke higeta noma'afi vuta umani'none.
16 Anante nunamuhu kumatega vunaku nevunkeno, kazokzo
eri'za mofa'mo'eme tage'ne. Ana mofara havi avamu'mo
agu'afi mani'neno henkama fore'ma haniaza hufore nehigeno,
kva'amo'za hufore'ma nehige'za knare zago e'nerizane. **17**
Hanki ana mofa'mo Poline tagri tamefi tavririno ne-eno kezatino
zmasamine, Ama vahera Marerisa Anumzamofo kazokzo eri'za
eneri'za vahere. Ama vahe'mo'za kefozantamifinti tmahoke
aheno tamavaresia naneke tamasmiku neaze. **18** Hakare
knafina ana mofa'mo anazanke hu'ne. Hu'neanagi Poli'ma
anankege antahiazamo'a avesra higeno, rukrehe huno ana
avamuku anage hu'ne, Nagra Jisas Kraisi agifi hugantoanki
atiraminka evuo! Higeno ana mofara atreno atirami'ne. **19**
Hu'neanagi ana mofa'mofo kva vahe'mo'za zamema ante'za
zagoma e'neriza zama vige'za, Poline Sailasikizni zamagra ome

zanazerite'za, zanavazu hu'za kva vahe'zagare maketi kumapi maninarega vu'naze. **20** Zamagrama kagota hu'za ke fakohu (megistret) kva vahe zagare zanavare'za vute'za anage hu'naze. Ama netremokea tagri ran kumapi vahera zamazeri savari neha'e, na'ankure zanagra Juda netrenkike, **21** zanagrama vahe'ma rempi hunezmike amaza hiho ha'azamo'a, Romu vahe'mota tavutava'za ha'renerante. **22** Rama'a vahe'mo'za eri atru hu'za ha' rezmantageno, ke fakohu kva vahe'mo'za Poline Sailasikizni kukena zani'a eri vararo hutrete'za, kanonteti knonkeve zanami'o hu'za huzmante'naze. **23** Tusiza hu'za sefu kanonkeve zanamite'za, kina nompi zanavare'za ome matevu'za nezanatre'za, kina nonte kva nekura hunte'za, kegava huso'e huo hu'za asami'naze. **24** Ke fakohu kva vahe'mo'za, kina nompi kva ne'ku, kina nompi znavrento hia ke antahiteno, agu'afinka me'nea kinanompi zanavarenteno, zafafi zanagia erinteno anaki znanorge'ne mani'na'e. **25** Kenage amu'nompi Polike Sailasikea, Anumzamofontega nunamune zagate'ene nehakeno, ruga'a kina vahe'mo'za zanantahi'naze. **26** Ana nehakeno ame huno tusi'a imi enerigeno, kina vahe nomofo agafa'amo'a tore tore hu'ne. Ame huno maka kafamo'a anagigeno, maka kina vahe zamazampi rente'naza nofimo'a evurami'ne. **27** Kina vahete kva ne'mo'a avu vase'nefinti otino, keana kafana anagi vagare'negeno, bainati kazinknoma'a erino agra'a ahefrinaku hu'ne. Na'ankure agesama antahiana hago kina vahe'zagamo'za fre'naze hanuno ana hu'ne. **28** Hu'neanagi Pol'i'a amanage huno ranke hu'ne, Kagra kavufarera mago'zana osuo, na'ankure tagra ama ofreta maka mani'none! **29** Tavi tagita eho huteno ana kina nompinka ufareno Poline Sailasi kizni zanagiafi ahirahi neregeno utraka huno umase'ne. **30** Anante otino zanavreno atiramino fegi

nevuno, amanage huno zanantahige'ne, Ina kna hanugeno kefo zaniafinti nahoke ahegahie? **31** Ana ke'arera anage hu'na'e, Ramofo Jisasinte kamentinti nehugeno, kefozanka'afinti kahoke neheno, nonka'afima nemani'za naga'moza'nema zamentintima hanageno'a zamahoke ahegahie. **32** Anage nehuke Ramofonke nesamike, maka noma'afima mani'naza vahera zamasami'na'e. **33** Ana kenageke kina nonte kva nemo'a zanavufafi zanahe'naza namuna sese huznantetegeno, agri'ene noma'afi mani'naza nagara mono ti ana keregeke frezmante'na'e. **34** Kina nonte kva ne'mo zanavreno noma'afi ufareno ne'za ome tro huznanteteno, Anumzante amentinti hia zankura, tusiza huno ana miko noma'afima nemaniza naga'anena musena hu'naze. **35** Nantera ko'atigeno ke fakohu kva vahe'mo'za, ati vahe zaga huzamanteno anage hu'ne, zanatrenke'za ana ne'trena vi'o hu'naze. **36** Kina nonte kva ne'mo Polina amanahu ke ome asami'ne. Ke fakohu kva vahe'mo'za (jas) zanazeri megi'a zanatre'o hunantage'na e'noe, hagi menina atiramita tanarimpa frune vi'o huno zanasmi'ne. **37** Hu'neanagi Poli'a ati vahe'mokizmi ke nona'a amanage huno zamasmi'ne. Zamagra rama'a vahe zamufi knare ke agafa e'orine'za havige zante tahanaze, tagranena Romu mopa agafa vahe mani'nonanagi, kinafi tavare'za emerante'naze. Hagi menina oku'a hurantenaku nehazo? Tamage anara osu'tfa hugahaze! Zamagra'zmi e'za eme tavare megi tatregahaze. **38** Ana naneke ati vahe'mo'za ke fakohu kva vahe ome nezasmig'e'za nentahi'za, Poli'ene Sailasikea Romu vahe mani'no'e hukema ha'azanku zamagogogu nehu'za koro hu'naze. **39** Ana hute'za vu'za Polina zamasunku ke ome huznantete'za, zanavre'za atirami'za ama ran (siti) kumara atreta vi'o hu'za mago'ane huzanante'naze. **40** Anama kina nompinti atiramitekea Lidia

nontega vute'ne, zamentinti nehaza naga ome nezamageke,
zamazeri hanaveti ke hunezmanteke atreke vu'na'e.

17 Hagi amfipolisine Apolonia rankumatre ugatere'za vute'za,
henka Tesalonaika rankumate Jiu vahe osi mono no (sinagog)
anantega me'nere e'naze. 2 Poli'a Jiu vahe'mo'za osi mono
nozmifi mani'nageno marerino, korapa agrama nehiaza huno,
tagufa mani fruhu kna (Sabat) zupa avontafepinti kea zamasmino,
3 ana kemofo agafa'a eriama nehuno huzamasamino, Kraisina
ahesnageno ata eriteno fripintira otigahie hu'ne. Ama ana
Jisasinku'ma nehuana e'i Kraisi'e. 4 Mago'a Jiu vahe'mo'zane,
rama'a Anumzanku koro nehaza Griki vahe'mo'zane, zamagine
a'nemo'zanena Poline Sailasi ene tragote'za hagerafi'za
mani'naze. 5 Hu'neanagi zamarimpa zamazeri otige'za Jiu
vahe'mo'za antahi haviza hunezmante'za, kanivere'za kefo vahe
maki kumapi zamazeritru hu'za, ran kumapi ranke hute'za ana
vahe'mo'za Jasoni nona tagana taganu vazi'za, Poline Sailasi
kiznigu hake'za zanavre'za atru nehazafi vunaku hu'naze. 6
Ana vahe'mo'za Poline Sailasi kizanima hake'za erifore nosu'za,
Jasonine, mago'a zamentinti nehaza afuhe'inena zamazu hu'za
rankumamofo kva (siti ofisa) vahete vu'za ranke hu'za anage
huzmante'naze, ama vahe'mo'za mopane mopane hazenke
eri fore nehaza vahera ama e'naze. 7 Hagino Jasoni'a muse
huno nantu vahe nomafyi osi'agna manihogu zamarente'ne!
Zamagra Sisa hanave tra kea ha' renente'za anage hu'naze,
mago kinima mani'neana agi'a Jisasi'e hu'za nehaze! 8 Ana
vahe'mo'za rama'a vahe'zaga zamazeri savri nehazageno,
rankumamofo kva vahe'mo'za ana kea antahi'naze. 9 Anante ran
kumamofo kva vahe'mo'za Jasoni ene zamentinti naga'mo'za
mizasaza zago erite'za, henka zamatrage'za vu'naze. 10 Hagi

zamentintima nehaza naga'mo'za ame hu'za Poline Sailasinena
kenageke huznantageke, Beria rankumate vu'na'e. Uhanatiteke
Jiu vahe osi mono nonte vu'na'e. **11** Ana Jiu vahe'mo'za antahi'za
zamimo'a knare huno ama' hu'negu, Tesalonaikama nemaniza
Jiu vahe'mo'za nehzaza osu'naze. Na'ankure mono kema
ha'ana muse hu'za ener'i'za, ama kemo'a tamage hu'nefi hu'za
maka zupa avontafepi rezaganeza ke'haze. **12** E'ina hu'negu
rama'a Jiu vahe'mo'za zamentinti nehzage'za, zamajima
me'nea Griki a'nene vene'nemo'zanena zamentinti hu'haze. **13**
Hu'neanagi Tesalonaika mani'naza Jiu vahe'mo'za antahizama,
Poli'a Anumzamofo kea Beria ome huama nehie kema nentahi'za,
zamagranena anantega e'za, keomente emente hu'za, zamagu
zamagesa eri savari hu'haze. **14** Anante Anumzante mani'naza
naga'mo'za, Polina huntogeno ame huno hagerinkena vu'ne,
hianagi Sailasi'ene Timotikea anante Beria kumate mani'na'e.
15 Hanki Poli'ene vu'naza vahe'mo'za, avega hu'za Atens
rankumate ome netrazageno, Sailasine Timoti kiznigu nagritega
ame huke e'o kema humazamantetege'za, atre'za ete Beria
vu'haze. **16** Poli'ma Atens kumate zanavega anteno mani'negeno,
rimpamo'a kna nehigeno asunku hu'ne, na'ankure ana kumapina
havige anumza tro'ma hunte'naza'zamo'a, rama'a me'negeno
negeno ana hu'ne. **17** Ana huteno mago'a Jiu vahe'ene,
Anumzamofonku koro nehaza meg'i'a vahe'ene osi mono nompi
ome zamaretru huno nezamasmino, maketi kumapi maka kna
emeri atruma haza vahera nanekea zamasmi'ne. **18** Anahu
kna huno mago'a Epikurien vahe'ene, Stoik vahe'mo'zanena
vahe'mofo nomani'zama rezagane'zama negaza vahe'mo'za
(Filosofa) kehakare hunentogeno mago'amo'za anage hu'za
antahi'naze, nankna ke ama neginagi vahe'mo'a hunaku nehie?

Ruga'amo'za hu'za, agra ru anumzanku nehia nere. Na'ankure Jisasi agi agenkene, fripinti'ma ot'i'nea Knare Musenkegu hu'naze. **19** Ana hutege'za Polina avre'za (areopagus) kanisol vahe'mo'za ke erifatgo nehazare vu'za anage hu'naze, Knare ama'i kahefa kema rempima hunezamina kea hananketa antahisumpi? **20** Na'ankure tagra tagesa hakare huna ke kagra nehane, hagi ke agafa'amo'a na'ane hu'nefi antahinaku nehune. **21** Maka Atensi vahe'ene ru mopareti vahe'mo'za ana kumapi emani'naza vahe'mo'za knazimi'a atre'za manine'za kahefa zama fore hia zamofo naneke huge antahige hu'naze. **22** Ana higeno Poli'a kanisol vahe'mo'za ke erifatgo nehazare otino (Areopagus) anage hu'ne, Atensi vahe'mota, nagrama koana hakarezante tamagra monora hunentaze. **23** Na'ankure nagra vano nehu'na urava'o hu'na rezagane'na mono'ma hunentaza'zama koana, mago itama (alta) husga huntenarera anage hutma krente'naze, ontahinona Anumzantege hutma hu'naze. E'ina hu'negu ontahinetma mono'ma hunentaza zamofonku, e'i nagra huama hu'na neramasmue. **24** Ama mopane maka'zama me'neaza tro hu'nea Anumzamo, Agra'a monafine mopafinena Ra mani'neno, vahe'mo'za zamazanu ki'naza mono nompina normanie. **25** Mago'a zankura atupara nosigeno vahe'mo'za zamazanu tro hu'za aza nosaze. Na'ankure agra'a asimu anteno mani'zana zamige'za zamasimu antageno, maka'zana hakare vahe'mofona nezamie. **26** Magoke vahepinti Agra maka kaziga kuma ante'za manisaza vahera tro hu'ne. Mopafi manivitesazegu nehuno, manisnaza kna'a nenteno, kuma'ma manisaza kumara, kankamu zamin e'ire manigahaze huno huzmantetere hu'ne. **27** Anumzamofonku hake'za nege'za, agrikura zamazama hu'za hake'za erifore hu'nazanagi, Agra

tagira magoke magokemota afetera omani'ne. **28** Na'ankure agripi manineta mika'zana nehuta, ama mopafina manita neone, mago'a tamagri fronka kemo'a anage hu'ne. Na'ankure tagranena agripinti fore hu'none huta nehaze. **29** Anumzampinti fore huta mani'none hanuta, golima silvare'ma, havereti'ma vahe'mo'zama antahintahi zamireti'ma tro huntaza zankura Anumzamo'a e'inahu kna hu'ne huta ontahisune. **30** E'inahu hu'za zamagena humi'za e'naza kna'a, Anumzamo'a agesa ontahi'ne. Hagi menina agra miko kaziga vahera hankavenentake ke huno, tamagu'a rukarehe hiho huno hu'ne. **31** Na'ankure ama mopama Agrama refako hania kna, agra'a fatgo avu'ava zampi ko huhamprinogeno me'ne. Mago ne' huhampri ante'neana miko vahera amate huzameri huno fri'nefinti azeri oti'ne. **32** Fri'nefinti azeri oti'nea naneke nehige'za nentahiza, mago'amo'za agiza re'naze. Hianagi mago'amo'za anage hu'naze, mago'ane ama nanekea hananketa antahigahune hu'naze. **33** Poli'a havige mono kumara (Areopagus) atreno vu'ne. **34** Hu'neanagi mago'a vaheremo'za Poli'ene hagerafi'za zamentinti hu'naze. Anampintira magora Dionisos'i'e nehaza nera kanisol vahe'mo'za ke erifatgo nehaza kumate kanisol nere, magora Damarisi'e nehaza a'ene mago'amo'za zamentinti hu'naze.

18 Hagi ana amefiga'a, Poli'a Atensi kumara atreno Korinti vu'ne. **2** Anantega mago Jiu ne' ome keno erifore hu'neana, Pontusi kasente'naza ne' agi'a Akuila'e, mensintfa nenaro Prisila ene Italiti e'ha'e. Na'ankure Sisa Klaodiasi'a mika Jiu vahe'ma Romu nemani'za vahera atretma viho huno huzmantegeno Poli'a zanagri ome zanage'ne. **3** Na'ankure agrama mago'zahu eri'zama e'nerigu huno magopi zanagri'ene mani'neno eri'zana eri'ne, (na'ankure zamagra mago kna eri'za antahine'za nofiteti

seli no nehatiza nagare). 4 Nehuno mika mani fruhu kna (Sabat) zupa atru nehu'za mono nehaza osi mono nompi, marerino mono naneke huno, Jiu vahe'ene Griki vahera masevenke huno zamarimpa eri vakaneno zamasmi'ne. 5 Masedoniati Sailasi'ene Timotike eramike akeno, Poli'a agafa huno mika Jiu vahera zamazeri atru huno mono kege'za maka kna nezamasmino, Jisasi'a, Agra'a tazahuno taguvazi nere huno eriama huno zamasmi'ne. 6 Ana nehige'zama ha'ma rente'za krunagema huntaza vahera anakre ku'a (saket) zafino kugusopa rupopo nehuno anage huno zamasmi'ne, tamagri korankumi'mo'a tamagritami tamaßenire megahiel! Nagripina mago knazani'a omanetfa hugahie. Amareti agafa huno vaniana, Jiu vaherompage megi'a vahete vugahue. 7 Huno nezamasmino Poli'a anante osi mono nontetira atreno, mago megi'a nera agi'a Tatus Jastusi'e nehaza ne'mo, Anumzante mono hunentea ne'mofa nontega atru nehu'za mono nehaza nomofo asopare me'negeno vu'ne. 8 Atru nehu'za mono nehaza nonte kegava nehia nera (presitent) Krispusi'e nehaza ne'ene, mika agri kvafi nemaniza vahe'mo'za Ramofonte zamentinti hu'naze. Ana nanekema nentahi'za, rama'a Korinti vahe'mo'za zamentinti hu'za mono ti fre'naze. 9 Ramo'a kerage ava'nagna zampi anage huno Polina asami'ne, Korera osuo, keaga huvava nehunka, keagama hu'zana azeoritfa huo. 10 Na'ankure Nagra kagrane manigahuankino, kahe frikura mago'mo'a kagri kavufarera azana ontetfa hugahie. Na'ankure ama'na rankumapina Nagri vahera rama'a mani'naze, nehigeno ke'ne. 11 Higeno anampina mago kafugi sigisi'a ika mani'neno, ana vahera Anumzamofo keaga rempi huzami'ne. 12 Kalio'ma, ugagota rankvama (Gavana) Akaea kumate'ma mani'nege'za, Jiu vahe'mo'za oti'za mago antahintahi eri retro

hu'za, avare'za ke refakohu trate (koti nonte) vu'za, **13** anage
hu'naze, ama ne'mo'a ruzahu huno tagri tra kemo'a osu'nea
kante, vahekura mono antahihō huno nezamasmie nehazageno,
14 Poli'ma agi'reaka hu'na ke hanuanki huno higeno, Kalio'a
amanage huno Jiu vahera zamasmi'ne, Mago'a hazenke zankuro,
tusi'a havi kefo zanku Jiu vahe'motmama hanazana, knare
hanige'na, nagra tamagri kerera hagerfigahue. **15** Hianagi
amama hunentaza kemo'a tamagra kegu'ene tamagigu'ene,
tamagrati kasege eri hankave netizanki tamagrati erifatgo
hiho. Nagrira nave'osigu ama'na naneke'a erifatgo osugahue.
16 Anante kema refakohu tratetira agra'a zamahe natitre'ne.
17 Anante mika'mo'za mono nonte kva nehia ne' Sosteni
azeri'za kema refkohu tramofo avuga agafa hu'za ahe'naze. Ana
hu'nazanagi Galio'a ana zankura agesa ontahi'ne. **18** Mago'a
rama'a knama Korinti kumate Poli'a maniteno, afuhe'mokizmia
hufru huno mani'neho hunezmanteno, ventefi hageri tkaheno
Siria nevigeke Prisila'ene Akuilake agrane vu'na'e. Na'ankure
Anumzamofo avure'ma huvempama hu'negu, Sensarea kumate
Poli'a anuzokara vagateno erivo'vo hu'ne. **19** Efesasi uhanatite'za,
anante Poli'a Prisilane, Akuilagiznia ome nezanetreno, agra
osi mono nompi umarerino, Jiu vahe'ene naneke hugantugma
hu'za antahi'naze. **20** Ana nehu'za antahige'za za'zakna tagrane
manisane nehazageno, knarere huno osu'ne. **21** Hianagi
hufru hunezmanteno anage hu'ne, Anumzamofo avesi'zama
me'enige'na, ete'na tamagritega egahue. Anage nehuno
Efesasiti'ma ventefi, **22** vuno Sisaria unehanatino, Jerusalemi
umarerino mono vahera musenke hunezmanteno, anantetira
Antioku urami'ne. **23** Antioku'ma mago'a knama maniteno, ana
kumara atreno mago'mago kumate Galesiane Fezianena vano

huno Jisasi amage nentaza disaipol nagara zamazeri hampo'na hu'ne. **24** Mago Jiu nera, agi'a Apolosi'e, Aleksandria kumate kasente'naza nera, knare keaga nehuno avontafera antahi ankere'nea ne'mo Efesasi e'ne. **25** Agri'ma Ramofo Jisasi kanku rempi humi'naza zankura, hamponatino huzmenerino keaga nehuno, Joni'ma tima frezmante'nea zantfa antahi'neanagi, Jisasi avu'ava'mofa nanekea fatgo huno huzamasmi'ne. **26** Agra korora osuno, agafa huno osi mono nompina hu'ama huno mono keaga nehigeke Prisilake, Akuilakea agri kema nentahikea, zanagra avareke va'azamoke Anumzamofo avu'avara mago'ene huhagro huke fatgo kante asami'na'e. **27** Akaea vuku Apolosi'a nentahige'za, mono (kristen) naga'mo'za azeri hanavetike nesamiza huso'e sa'e hunente'za, Jisasi amage nentaza disaipol nagatega azeri so'e hiho hu'za avonkretre'naze. Anante'ma unehanatino'a, Anumzamofo asunku'zamo'a zamaza hige'za zamentinti nehaza nagara tusi'a zampi zamaza hu'ne. **28** Na'ankure agra hampo'natino Jiu vahera zamazeri hagro huno, mika vahe zamufi avontafepinti eriama huno Jisasi'a Tazahu Nere (Kraisi'e) hu'ne.

19 Hagi apolosi'ma Korintima mani'negen, Poli'a agu'afinka kumatamimpi ufreno vuno Efesasi kumate uhanatino, mago'a disaipol naga anantega ome zamageno erifore nehuno, **2** zamagrikura anage hu'ne, tamagrama tamentintima hu'nazana, hago Ruotge Avamura erinafi? Higeno Agrikura anage hu'naze. A'o Ruotge Avamura mani'ne huta tagra ontahitfa hu'none. **3** Hazageno Poli'a zamantahige'ne, Nazamofonte mono tina fre'naze? Zamagra ke'nona hu'za, Joni'ma ti fre'zama huraveri'nea zantere. **4** Poli'a huno, Joni'ma tima frezmante'neana, zamasunku hu'za zamagu'a rukarehe hanaza tine huno frezmantene.

Vahera zamasmino, agri amage'ma ne'emofone Jisasimpi tamentinti hiho hu'ne. **5** Anankema antahite'za, Jisasi Ramofo agifi mono ti fre'naze. **6** Hagi Poli'ma zamagrite azama antegeno'a, Ruotge Avamu'mo'a zamagrite ege'za, agafa hu'za ruzamageru ruzmageru neru'za, henkama esiazamofo kasnampa kea huama hu'naze. **7** Ana mika vene'nea 12fu'a naza eritru hu'naze. **8** Hagi 3'a ikamofo agu'afina, Poli'a osi mono nompi ufreno korera osuno, antahintahizamia eriama huno agrarega zamatreku Anumzamofo avu'ava zankura huankereno zamasmi'ne. **9** Hu'neanagi mago'amo'za antahi'za zami'mo'a hampo'na atige'za, zamentinti hu'zankura zamagena hunente'za, ana vahe'mokizmi zamufi Ramofo avariri kankura huhaviza hunentageno, zamagrira nezamatreno, Jisasi amage' nentaza disaiopol naga nezamavareno, mago nera Tairanus'i'e nehaza ne'mofa rempi huzami nonte via'zamo, mika zupa vahe'ene keaga hu'ne. **10** Amanahu'zana tare kafufi fore huno vu'ne, tarega Jiu vahe'ene Griki vahe'ma Esia provinsifi nemani'za vahe'mo'za Ramofo naneke antahisazegu anahura hu'ne. **11** Anumzamo'a Poli azampi huvazino rama'a ruzahu ruzahu avame'za mago'ane erifore hu'ne. **12** Ana hinogu asime nehamia tavravene (ankasip), tavaravenaza eri'za Poli avufare eme avako hute'za, eri'za kri vahe zamufare ome antageno, krizmimo'a vaganeregeno, havi avamumo'a zamagripintira atirami'ne. **13** Mago kevu Jiu vahe'mo'za retro hu'za mago mago kumate vano vano nehu'za, Jisasi agifi huvame hu'za havi avamura huntenaku nehu'za, ana huvava hu'za nevu'za anage hu'naze. Poli'ma huama nehia Jisasi agifi atiramio huta tagra hunegantone. **14** Mago Jiu vahe'mokizmi rankva nera Skeva'e nehaza ne'mofona, 7ni'a mofavre zaga'amo'za anahu'zana hu'naze. **15** Hianagi ana havi

avamu'mo'a ke'nona zamire huno zamasmi'ne, Jisasina nagra
ke'na antahi'na hu'na, Polina ke'noe, hagi tamagra izagate? **16**
Higeno agu'afima havi avamu'ma fre'nea ne'mo'a zamagumpi
takaureno, himamutino zamaheno rehapatige'za, korankno
eneri'za ana nompinti atriramiza zamufa zamatapake fre'naze. **17**
Efesasi kumate nemaniza Jiu vahe'ene Griki vahe'mo'zane ana
ke nentahizageno, tusiza huno zamagogo nefefege'za Anumza
Jisasi agi'a erisaga hu'naze. **18** Rama'a zamentinti vahe'mo'za
eama hu'za zamasunku hu'za, havi zamu'zma'zana eriama
hu'naze. **19** Huama nehu'za zamene vahe'mo'zane avuatga
vahe'mo'zane kre'naza avontafe tamina eri'za amate hakare
vahe zamure tevefi kre hana hu'naze. Ana avontafe miza se'naza
zagoa 50 tauseni'a zago atre'naze. **20** Ramofo hanavere,
e'inahu'zana fore nehigeno, Ramofo nanekemo vuno eno huno
hankavetino me'ne. **21** Anazana fore hutegeno Poli'a Masedonia
kaziga vute'na Griki kaziga nevu'na Jerusalemi kumate vute'na,
henka'a Romu kuma enena ome kegahue huno agesa antahine.
22 Tare azahu netrema, Timotine Erastusine huzanantegeke
Masedonia kaziga vakeno, osi'agna Poli'a Esia mani'ne. **23** Ana
knafina, Jisasi Kamofonkura tusi'a hazenke Efesasia fore hu'ne.
24 Na'ankure magora silvare tuzampaza tro nehia ne'mofo agi'a
Demetriusikino, silvareti mago amema'a trohu'neana, Atemisi
mono hunentea kna'za tro hu'ne. Anazama tro'ma nehaza
naga'mo'za, tusi'a zagokrerafa anazantetira tro'nehaze. **25**
Demetriusi'a anahu eri'zama antahi'naza eri'za vahera kehutru
huno anage hu'ne. Ama vahe'motagi, amanahu eri'zantetira
zagogrerafa erifore nehune hu'ne. **26** Hanki tamagra ketma
antahitama nehaze, Efesasige ana nosianki, Esia kokampina
Poli'ma vahetamina kema zamasamino, vahe'mo'ma azanteti'ma

trohu'nea anumzana, e'i tamage huno anumzana omanitfa hune
huno tusi'a vahe krerafa zamazeri ruvahe nehie. 27 Hago menina
hazenke fore hu'ne, tagri zago erizankera eri havizana osugahie.
Hianagi so'e a' anumza Atemisi mono nomo'a amne zankna
hanigeno, Esia kokampi vahe'mo'zane, ama mopa kagi'afi
vahe'mo'zama, mono hunentaza vahe'mo'za atre'sageno, ana
a'mofo hanave'amo'a haviza hugahie. 28 Anankema nentahi'za,
zamarimpamo'a haviza nehige'za oti'za keza ati'za Efesasia
so'e rantia, Atemisi'a agrake mani'ne! 29 Higeno rankumapina
rama'a kereso nehu'za, vahe'mo'za magoka zamagare'za
krina nehazage'za mani'neza negaza kumapi (stetium) ufre'za,
Mesadoniati Poli'enema e'na'a netre Gaiusine Aristakusikiznia
zanavazu hu'za vu'naze. 30 Poli'ma ana vahe'zagamo'ma atru
hu'nefima ufreku'ma nehige'za, Jisasi amage nentaza disaipol
naga'mo'za otre'naze. 31 Higeno mago'ene mago'a Esia kumate
kva vahera, Polina knampa'agi'za anama atru hu'nafina keke
huntonanki uofreno hu'za hampo'hati'za kea atrente'naze. 32
Higeno mago'amo'za magoke zanku kezati'zageno, mago'amo'za
otage zanku kezatizageno, anama atru hu'za negaza vahe'mo'za
tusi savari nehazageno, rama'amo'za nahige'za atru hu'nazo
amara osu'naze. 33 Vahepintira Aleksandana Jiu vahe'mo'za
atufe'za zamuga eme nente'za, ama ana zamofo keaga
eriamma hunka zamasnio hu'za huhanaveti'naze. Aleksanda'a
ama ana vahe'mo'zama hazankere nona huzmanteku azana
antesga hu'ne. 34 Hu'neanagi kazama Aleksanda'a Jiu ne'ma
mani'nege'za nege'za, ana mika vahe'mo'za magoke kere
zamagerura erinte'za, 2'a auamofo agu'afina kezati'za, Efesasitira
knare huno agatererfa rantia, Atemisi agrake mani'ne! 35
Rankumapima avoma negrea (kuskus) ne'mo ana vahe kevua

zamazeri rava huteno anage hu'ne. Efesasi vahe'motma antahihō,
ina vahe'mo antahino keno osu'ne? Efesasia ranku'mamo'a
Atemesi agetererfa ra anumzamofo mono nona kegava nehie.
Ana a'mofo amema'a monafinti asga hurami'ne. **36** Ana
hu'negu ama ana zankura ke hakare osugahaze. Taganetma
mani'netma ame'amara osutma tamagesa antahitetma anazana
hugahaze. **37** Na'ankure tamagrama, ama ana vene'nema
zamaretma e'nazana, ra mono nompintira kumazafa ose'na'e,
tagrama anteneta mono hunentona a' anumzankura (goddess)
huhavizana huonte'na'e. **38** E'ina'ma Demetriusi'o agrane eri'za
eneriza naga'mo'zama rumokizmima huzmante'nesigetma ke
refakohu nonte zamaretma vinke'za, kva vahe'mofo zamure
keaga hugantu hugama hugahaze. **39** Hu'neanagi mago'anema
keagama hunaku hanutma, vahe'ma atruhu'za keagama azerirva
nehaza knazupa kanisol vahete mareritma azerirava hugahaze.
40 Na'ankure menima kehakarema nehuna zankuma, Romu
rankva vahe'mo'za tantahigesageta hazenkefi manigahune.
Na'ankure eriama huta zamasmisuna knare agafa'a omane'ne.
41 E'inahu kema huno nezmasmino'a, ana atrua eritrege'za vuza
e'za hu'naze.

20 Hagi ana ke hakare'ma hazazamo'a vagaregeno, Jisasi
amage nentaza disaipol nagara Poli'a kehige'za emeritru
hazageno, zamumro kea anteteno, hufru huno knareki
manineho hunezmanteno, atreno Masedonia vu'ne. **2** Ana
mopa kazigama vano huno rama'a keretima zamentinti naga
zamazeri hanavematiteno, Grisi ehanati'ne. **3** Anantega 3'a ika
maniteno, Siria kaziga ventefi vunaku'ma nehigeno, mago'a Jiu
vahe'mo'za ahenaku kea retro haza nanekema nentahino'a, eteno
Masedonia mopa kampi vunaku Poli'a agesa antahi'ne. **4** Mago'a

vahe'mo'za Poli'ene vu'nazana, Beria kumateti ne' Sopata'a,
Perusi nemofoki, Tesalonikati Aristakusi'ene Sekunduskegi,
Debe kumateti Gaiusiki, Esia kumateti Timotiki, Tikikusiki,
Trofimus'i'za vu'naze. 5 Ama ana vene'nemo'za vugote'za Troasi
ome tavega ante'haze. 6 Zo'ore bretima Juda vahe'mota nenona
kna'mofo amefiga'a hompama vagaregeta, Filipai kumara atreta
ventefi marerita 5fu'a zage ferupi nevuta, Troasi kumate tavega
ante'nare uhanatita ana kumate mago sonta umani'none. 7
Ana Sontamofo pusa kna're bretima kori'za (komonion) neku
eritruma nehunkeno'a, Poli'a oki vugahue huno agesa nentahi'no
keaga nezmasmino, mono kea huvava nehigeno kerage amu'no
ase'ne. 8 Anagamu kino mareri'nea nomofo hunaraginte pinka
rama'a rampe tavira manenegeta atrua hu'none. 9 Hagi mago
nehaza nera agi'a Jutikusi'e, zaho eri kamofo atupare (windo)
marerino mani'neno, Poli'ma keagama huvava huno nevigeno'a,
antahirega avukoko higeno, mase himarenefinti, tagufa nonteti
anagamuti asaga huramino ahe fri'ne. 10 Hianagi Poli'a uramino
agri agumpi umseno azana rugagino anu'nekino tamasunkura
osiho hu'ne. Tamagra antria osiho, na'ankure agra ofri'neanki
amne mani'ne huno hu'ne. 11 Nehuno Poli'a eteno anagamu
marerino, bretima korige'za netageno, za'za kna zamagranena
keaga nehigeno ko'atigeno zamatrevo vu'ne. 12 Ana nehazavea
ofrino mani'nege'za muse nehu'za avare'za nontega vu'naze.
13 Ananteti tagra ventefi umarerita Asosi vunaku nehuta,
Polina avarenteta vunaku tagesa antahi'none, na'ankure ama
kana agra'a azeri antefatgo huno, agra mopafi vugahue huno
agesa antahi'ne. 14 Asosima rutagiha higeta, agrira ventefi
avarenenteta, Miteleni ti amunompi me'nea ran kumate vunaku
vuvava hu'none. 15 Anantetira maseta mago knarera ventefi

nevunkeno ko'atigeta, Kiosi tinkenare uhanatita, mago knarera
Samosi uhanatita, hagi ana kna'mofo amefiga'a Miletusi vu'none.

16 Na'ankure Poli'a Efesasia agateregahue huno antahi'ne,
na'ankure Esia za'za kna omani'na knare'ma hanuna, Jerusalemi
nagra mani'nesugeno hompa (pentikos) kna fore hugahie hu'ne.

17 Mailatusi uhanatite'za, Poli'a ke atrezmanteno Efesasi mono
nonte kva (elda) vahe'zaga eme nageho hu'ne. **18** Ke hige'za
agrite ageno, amanage huno zamasmi'ne, Pusante'ma Esia
mopare nagiamma rentoa zupa, tamagripima maka zupa mani'na
e'noana, tamagratmi ko ketma antahi'naze. **19** Jiu vahe'mo'za
nazeri havizahu kema retro'ma haza zamo'a tusi'a knazamo nagri
navufare ege'na anterami'na zavira nete'na, Ramofo eri'zana
eri'noe. **20** Tamagri'ma tamaza hania kea, korera osu'na huama
hu'na tamasmugetma antahi'naze. Vahepina neramasmi'na,
nonte nontera tamasmugetma ko antahi'naze. **21** Jiu vahe'ene
Griki vahera hu'ama hu'na tamagu'a rukarehe hutma Anumzante
ne-etma, Ranti Jisasinte tamentinti hiho hu'na zamasmi'noe.

22 Hagi menina Ruotge Avamu'mofo ke amage ante'na, nagra
Jerusalemi nevue, nagri navufarera na'a fore hugahio, ontahi'noe.

23 Hankino Ruotge Avamu'mo nagrira nasamino, mika ranra
kumapina, kina hu'zamo'ene kna'zamo'enena kavega ante'ne
hu'ne. **24** Hu'neanagi navufagura nagesa nontahue, tusi'a
zana eri'zani'a erivaga nere'na, Ra Jisasi'ma eri'zama namino
vahe'ma zamasnio hu'nea eri'za eri'na Anumzamofo asunku
zankura knare nanekea vahera zamasmigahue. **25** Hagi
menina nagra antahi'noankitma, azago menima Anumzamofo
kumaku'ma neramasumota, mago'enena nagri navugosafina
onke'tfa hugahaze. **26** E'ina hu'negu, meni nagra huama hu'na
neramasgue, miko vahe'mofo koran kumimo'a nagritera ome'tfa

hugahie. 27 Na'ankure Anumzamofo miko avesi'zama'a nagra korera osu'na hu'ama hu'na neramasmue. 28 Tamagratmia kegava nehutma, lama afu kevua kegava hiho, Ruotge Avamu'mo tamazeri antegetma kva hu'naze. Agrama magoke Mofavre'ama huntegeno koranteti'ma mizama ase'nea Anumzamofo mono nagara zamazeri fatgo hutma kavagri zamantegahaze. 29 Nagrama tamatre'na vanugeno'a amefiga, nagra antahi'noankino, mago'a afi' kra esaniazamo lama afu kevua zamazeri savri hugahie. 30 Kagri ka'a nagapinti enena vahe'mo'za oti'za tamage kea eri ruvahe hu'za rempi hunezmi'za, Jisasima amage' nentaza disaipol nagara zamagrarega zamavarenteku hugahaze. 31 E'na hu'negu tamavura omase kava hute maniho, tamagesama antahi ankeresazana tagufa zagegfumofo agu'afina hanine zagenena ontagane'na kazigazi hu'na zavira nete'na, mago'mago'moka kavumarora ante'noe. 32 Hagi menina nagra Anumzante'ene, Agri asunku'zamofo kere maniho hu'na huneramantoe. Ama kemo'a tamazeri hanavenetina, ruotage'ma hu'za mani'naza nagapi tamagra erisanti haregahaze. 33 Mago'moka silvaguro, goliguro, kukenagu nagra kenasane nehu'na keaga nosue. 34 Tamagratmi ko antahita keta hu'naze, ina zanku'ma nagri'ene, magoka vano nehuna naga'enema atupa'ma nehunazana, ama anazamo erifore huno neramie. 35 Ana mika zampina nagra ko hurameri'noe, anahu'ma huta hanavetita eri'zama erisazana, hanave'a omane vahera aza nehuta, Ramofo Jisasinkere tamagesa antahiho. Agra'a anage hu'ne, Ami'zamofo asomumo'a, eri'zamofona agatere'ne hu'ne. 36 Poli'ma ana nanekema huvama nereno'a, agra renarenzo zamagrane nunamu hu'ne. 37 Anampina zamagra tusi zavi'ate'za Polina anankempi azeri anuki'za antako hu'naze. 38 Kema huno mago'ene onagegahaze

hu'nea kegura, tusi zamasunku hu'naze. Nehu'za ventema
me'nerega avare'za vu'naze.

21 Hagi Tagra anama huteta, zamatreta ventea atufegantu
hagerimpi atreta fatgo huta vuta, Kosie nehaza hageri
amunompi me'hea osi mopare (ailen) vuta, nanterana Rodesie
nehaza kumate (ailen) uhanatiteta, anantetira Patara mopare
uhanati'none. **2** Patara atreta, Fonesia kumate vunaku nehia vente
keta eri fore huteta, miza huta marerunkeno atreno timpi vu'ne.
3 Saiprusima ventemo unemania kumara hoga kaziga agatereta,
Siria Provinsifi vuta, Tairi kumate umani'none. Na'ankure
ventemo'a mago'a fenona anante eri netregete. **4** Jisasima
amage'ma nentaza disaipol nagara ome nezmageta, ana kumate
7ni'a kna mani'none. Zamagra mago'ene Avamu'mo zamazeri
otige'za Poliga Jerusalemi ovuo hu'za hu'naze. **5** Ananknama
vagaregeta, atreta kantega nevunkeno, ana mika'mo'zane,
a'nezamine, mofavre naga'zamine tagrane magoka vazageta
ana kumara atreta vu'none. Hagerinkenare vuteta tarenareta
nunamuna ome huteta, **6** mani'neho huta mago mago'mokizmia
hunezmaneteta ventefi marerita nevunke'za, zamagra rukrahe
hu'za nozimirega vu'naze. **7** Tagra Tairi kumara atreta vuva
vuva huta Tolemais uhanatiteta, mono nagara ome nezmatagita
anante magokna mani'none. **8** Nanterana ana kumara atreta,
Sisaria ehanatita mono nehia ne' (evangelis) Filipina 7ni'a
naga mono kva zamazeri oti'nafinti mago zamimofo nonte
umani'none. (Apo 6:1-6) **9** Ana ne'mofona 4'a ve e'ori kasnampa
mofane'zaga'a mani'naze. **10** Anante mago'a kna mani'nonkeno,
mago kasnampa nera Agabus'i'e nehaza ne'mo, Judia kazigati
eramino anante e'ne. **11** Tagra mani'nontega Agabus'i'a eno,
Polina amu'nofi'a (belt) erino agra azante ene agiare renenteno

anage hu'ne, Ruotge Avamu'mo'a anage hie, Amanahu kante Jerusalemi mani'naza Jiu vahe'mo'za ama amu'nofi'mofo nefana azeri'za kina rente'za meg'i'a vahe zamazampi antegahaze. **12**
Ana naneke antahiteta, tagrane anampi nemani'za vahe'ene kazigazi huta, Poliga Jerusalea mareorio huta asami'none.

13 Anante Poli'a kenona zimirera anage hu'ne, tamagra nahigetma zavira netetma, narimpamofona nazeri kna nehaze? Na'ankure nofinukera nazeriza anaki nantehogukera trora osuanki, Ramofo Jisasi agire Jerusalemi frinaku retro nehue. **14**
Na'ankure agra ketia ontahisiaza higeta, tagra kea osuta Ramofo avesi'zamo fore hanie huta hu'none. **15** Ana knama evutegeta trotra nehuta otita Jerusalemi vu'none. **16** Mago'a Sisaria kumate nemaniza disaipol naga'mo'za tagrane ne-eza tavare'za Saiprusi ne' Masoni nompi vazageta, korapa Jisasi amage nentea disaipol ne'mofo nompi umanigahune hu'nona ne'mofo nompi umani'none. **17** Jerusalemi uhanatunke'za Anumzamofo naga'mo'za muse nehu'za tavatagi'za knare hutma aze hu'naze.

18 Uvasonkeno ko'ma atigeno, Poli'a, Jemisine maka mono kva vahe'zagama (eldas) mani'naza ome zamagenaku tagrane vu'ne. **19** Poli'a ome zamageno zamatagiteno, agra agafa huno mago' mago'zama Anumzamo'ma mono eri'za meg'i'a vahepima e'nerigeno hu'neazana zamasmi'ne. **20** Ama ana nanekema antahite'za, Anumzamofo agi erisaga hu'naze. Zamagra anage hu'za Polina asami'naze, kagra nerfuga antahio, nama'a tauseni'a Jiu vahe'mo'za zamentinti nehu'za, Mosese Kasege'ne amage' nentaza vahe'mo'zanena hampo'nati'za amage' nentaze.

21 Mago'a vahe'mo'za anage hu'za kagrikura zamasmi'naze, kagra maka Jiu vahe'mo'za meg'i'a vahepi mani'nazana, Mosese kasegemo'a taza osugahie hunka nehunka, mofavreramina

zamufa taga huozmanteho nehunka, tagri tavutavamofo avu'avara osugahaze hunka hu'nananke antahi'none. **22** Tagra na'a hugahune? Kagrama kmama e'nana nanekema zamagra antahisu'za tamage hugahaze. **23** Ana hu'negu tagrama kasmisunaza huo. 4'a vene'nemo'za Anumzamofonte huvempa hu'za mani'naze. **24** Hanki zamavarenka kagrane magoka tamazeri agru nehutma, zamazoka'ma haresazazana miza sezmantegahane. E'ina hananke'za, maka vahe'mo'za antahi'za kema hazage'za kagriku'ma antahi'nazana tamage hu'naze hugahaze. Hu'neanagi kagraka'a kasegea amage antenka manigahane. **25** Hu'neanagi meg'i'a vahe'ma zamentinti nehaza vahetega, tagra avonkreta, havi anumzante Kresramana vantesia zagagafane, korane anankema taga osu zagagafane onetma, monko'zana atreho huta tagesa antahiteta kre zami'none. (Apo 15:29) **26** Nanterana Poli'a zamavareno agrane ana vahe'ma zamazeri agru huteno, ra mono nompi vuno, ana zupa mago mago'mofonte Kresramana vuno azeri agaruhu kna vagaregahie huno ome zamasmi'ne. **27** Hagi 7ni'a kna vagare'za nehigeno, Esia provinsifinti Jiu vahe'mo'za ra mono nompi mani'nege'za nege'za, rama'a vahe zamarimpa zamazeri oti'zage'za Polina azeneri'za, **28** anage hu'za ranke hu'naze, Israeli vahe'mote taza hih! Ama ne'mo'a hakare kaziga mani'naza vahetamina rempi hunezmino, vahetine kasegetine, ra mono nontia ha'renente! Mago'enena agra Griki vahera zamareno ra mono nomofo agu'afi nevuno, ruotage hu'nea ra mono nona eri pehena nehie! **29** Zamagra negageno Efesasiti nera Trofimus'i'a, Poli'ene Jerusalemi vano nehige'za negaza ne'ku, ra mono nomofo agu'afinka avreno marerinegahie hu'za zamagesa antahi'naze. **30** Maka vahe'mo'za eritru hu'za zamaga re'za

e'za, Polina azeri'za avazu hu'za ra mono nomofo agu'afinti atimanceramizageno'a, ame hu'za ra mono nonkafana erigi'naze.

31 Polima ahe friku'ma nehazageno, anampinti vahe'mo'za zamaga re'za vu'za, maka Jerusalemi vahe'mo'za ha' nehaze hu'za sondia vahete kva nehia nera ome asmi'naze. **32** Ana sondia kva ne'mo'a ame' huno sondia vahe'zaga nezmaren, mago'a vahe'mokizmi kva vahe'zaga (sensulien, hantretia sondia vahete kva nera) zamarege'za, zamaga re'za ana vahete e'haze. Polima ahenaku nehaza vahe'mo'za, sondia vahe'mokizmi kva ne'ene, sondia vahe'zagama nezamage'za, ohe'za atre'naze. **33** Anante sondia kva ne'mo'a Polina ome azeriteno, huzmanteg'e'za tare seni nofinu anakintetageno, anante sondia kva ne'mo'a, zamantahige'ne, Agra aza'e, agra na'a hu'ne? **34** Hu'neanagi tusi'a vahetamimpinti mago'amo'za ranke hu'za ra kefinti mago zanku kereso nehazageno, mago'amo'za ruge nehazageno, sondia kva ne'mo'a ke agafa'a keno eri fore osu'ne. Na'ankure rama'a vahe'mo'za kehakare nehazageno ontahino, Polina avareta sondia vahe kumapi viho hige'za avare'za vu'naze. **35** Agrama latare'ma ege'za, Polina sondia vahe'mo'za azerisga hu'za mareri'naze. Na'ankure rama'a vahe'mo'za ahenaku nehazageno'e. **36** Rama'a vahe tamimo'za zamavariri'za nevu'za kezati'za, Ahe friho! Ahe friho! hu'naze. **37** Polima avare'za sondia vahe kumapi ufre'za nehazageno sondia kva ne' asamino, Knare mago'a kea kasmisufi? Higeno ana ne'mo, Griki kea antahi'nano? huno Polina antahige'ne. **38** Kagra Isipi ne'ma, mago'a knafima ugota hunka, 4 tauseni'a vahe'ma kamani vahe ha'ma rezmanteku'ma hu'naza vene'nema zamavarenka hagege kokampi vu'nana nepi, ru nere? **39** Poli'a kenona anage hu'ne, Nagra Jiu nere Tasisi kumateti Sirisia provinsfinti, agatere'nea

rankumatetire. Knare natre'nanke'na ama vahetamina kea zamasmigahuo higeno, 40 ana sondia kva ne'mo'a knareki kea huo higeno, Poli'a latare oti'neno azanu avame hige'za keresoma nehazazana eri taganageno, antahi'naza Aramu (Hibru) kefinti, anage huno zamasmi'ne.

22 Hagi nafu'nafaheta, amama nagrama navufa nagu'vazi kema nehua kea antahih. 2 Zamagrama antahizama, Aramu (Hibru) kefinti kema nehige'za nentahi'za, mago'ane zamagasasankea eri anterami'naze. Anante Poli'a anage hu'ne, 3 nagra Jiu nere, Tasisi kumate Silisia kasenante'ne. Hianagi ama ran kumapi ra hutena Gamalieli hinkanaga avonona hu'na, tagehemofo kasegemo hu'nea kante ante'na Anumzamofo avu'avara hanaveti'na avariri fatgo hu'noe. Tamagrama nehzaza hu'na Anumzamofona amage ante'na vu'noe. 4 Nagra amanahu hu'na, zamentinti vahera nezamahe'na, zamahe fri'za nehu'na, vene'ne a'enena kina rezamante'na zamare'na kina nompi ome zamante'noe. 5 Ugagota pristi ne'mo'ene maka kanisol (senhidren) vahe'mo'za, amama nehuazankura tamage hu'za tamasmigahaze. Zamagra mago'a avona kre'nami'za erinka Damaskasi nemaniza kafuhe'intega vuo hazage'na, nagra kina ome rezmante'na zamare'na e'na, Jerusalemi zamata hoza zamihogu kantega vu'noe. 6 Nagrama vuvava hu'na Damaskasi urava'o nehugen'o'a, feru'naza monafinkati masa'nentake tavi'mo ame' huno remsa hunante kagi'ne. 7 Anante nagra traka hu'na mopafi evuramugeno, mago agerumo'a nentahugen'o auge huno nagriku hu'ne, Solio, Solio, na'a higenka Nagrira nazeri havizana nehane? 8 Hige'na Nagra kenona'a, azage Ra'moka? hu'na nehugen'o, Agra anage huno nasami'ne, Nazareteti Jisasi'na nazeri haviza nehane huno hu'ne. 9 Nagrane vu'naza vahe'mo'za

ana masa ke'nazanagi, nanekema hunamia kea antahi ama osu'naze. **10** Ana hige'na nagra na'a hugahue Ramoka? hu'na antahigogeno, Ramo'a nagrikura anage hu'ne, Otinka Damaskasi vugeno, maka'zama hugahane hu'na huhampri kante'hoa zana kasamino. **11** Na'ankure tavi'mofo masamo navurga erihaviza hige'na navua onkoge'za, magokama vu'nona vahe'mo'za Damaskasia nazante navazu hu'za ufre'naze. **12** Ana kumate mago nera mani'neana agi'a Ananaisi kasegemofo avariri fatgo nehige'za, anampima nemani'za maka Jiu vahe'mo'za, knare nere nehaza ne'mo'a, **13** mani'nore eme otino nagriku anage hu'ne, Soliga nenaafuge, kavurgamo'a so'e huganteno! Higeno ame' huno navumo'a hari hige'na kesga hu'na ana ne' ke'hoe. **14** Anante agra anage huno nasami'ne, tagehe'mokizmi Anumzamo ko kagrira huhampitanteno, Agri avesi'za antahinka kenka nehunka, Fatgo Hu'nea Ne' Jisasi negenka, Agra'a agipinti'ma hania kea antahigahane. **15** Na'ankure Agrama kagri'ma eri kaverigenka, negenka nentahinka hu'nana kea, huama hunka maka vahera zamasmigahane. **16** Na'a higenka avega antenka mani'nane? Otinka mono ti nefrenka, agihanta nevazigeno kumi ka'a sese huganteno hu'ne. **17** Ana hutege'na ete rukarahe hu'na Jerusalemi kumate e'na, ra mono nompi nunamu nehu'na ava'nagna'za kogeno, **18** Ramo'a negogeno anage huno nasami'ne, Hantaka'a Jerusalemia atrenka ame' hunka vuo. Na'ankure Nagri nagenkema kagrama hanana kea ontahigahaze. **19** Nagra kenona'a anage hu'noe, Ramoka Kagrite'ma osi mono nompi mono nehu'za, zamentintima nehaza vahe'ma kina nompima zamare nente'na, zamazeri havizama nehu'na zamahe'noazana ko antahi'naze. **20** Kagri kema huama nehia ne'ma Stivenima ahe'za korama'a erimegi

atrazazana, nagrani'a tava'onte mani'ne'na, mago narimpa
nehu'na, ahe'naza vahe'mokizmi anakare ku'zamirera kava
hu'noge'za ahe'naze. **21** Anante Ramo'a anage huno nasami'ne.
Vuo! Na'ankure afete hugante'nugenka megj'a vahepi ke'ni'a
erinka ome zamasmigahane hu'ne. **22** Ana vahetamimo'za
antahime nevazareti'ma, megj'a vaheku'ma agrama kema
hiana nentahi'za zamagerura eri mago hu'za ranke hu'za, ama
mopafintira azeri atreho! Agra ama mopafi manigara osu'ne!
23 Rankege nehu'za kukena'zami zafima netare'za, kugusopa
kate'za zahopi mate vu'naze. **24** Ana'ma haza'zanku Romu
sondia kva ne'mo'a, Polina ete avaretma sondia vahe kumapi
ufreho huno huzmante'ne. Agra zamasmino kao akaruteti
trohunte nofi knonu sefu kno Polina ome nehetma antahigeho,
Jiu vahe'mo'za nanke agafare amanahu rankea Polina hunentafi,
huno huzmante'ne. **25** Knoma ahenaku azama azeri antesga
nehazageno, Poli'a anante otino mani'nea sondia kva ne'
(sensulien, hantretia sondia vahete kva nera), asami'ne, Knare
hu'negu hazenke'a omene Romu vahere huno mani'nesia vahera
ke agafa'a eri fatgo osu'nesia zantera ahegahazafi? **26** Sondia
vahete kva ne'mo'a ana kema nentahino, ugagota sondia nete
vuno, kema hianke ome asamino, anage hu'ne, Kagra na'a
huntenaku nehane? Na'ankure ama'na nera Romu nere huno
mani'nea nere. **27** Anante ugagota sondia kva ne'mo otino
eno Polina anage huno antahige'ne, Kagra nasamio Romu ne'
mani'nano? higeno agra hu'ne, ozo. **28** Ana ugagota sondia kva
ne'mo'a kenona'a anage hu'ne, Nagrama Romu vahe maninakura
rama'a zago mizase'na mani'noe. Hianagi Poli'a kenona'a huno
nagri'enena ama mopare nere huno nenfa'a mani'neno, ome
kasenantege'na, Romu nere hu'na mani'noe. **29** Polima sefu

ami'za nehaza vahe'mo'za ame hu'za atre'za mani ogantu ogama
nehazageno, ugagota sondia kva ne'mo'a antahama Poli'ma
Romu ne' mani'nege'za anakinte'naza zankura kore hu'ne. 30
Maseno ko'atigeno Romu sondia vahete ugagota kva ne'mo'a,
na'a agafare Jiu vahe'mo'za kea Polina hunte'naze antahino
keno hunaku kazufe netreno, pristi vaheku'ene kanisol vahe'zaga
ke hige'za atru hu'naze. Anante Polina avareno eramino zamuga
eme ante'ne.

23 Hagi Poli'a kanisol vahe zamufi keankere'neno anage
hu'ne, Nenafugate nagra magore hu'na havizana osu'noe. Fatgo
huno ama' nagu'nagesare Anumzamofo avurera mani'na ena
ama knarera ehanatue. 2 Anagema higeno, ugagota pristi
ne' Ananaisi'a anante oti'naza vaheku Polina agi ruhapatitma
aheho huzmante'ne. 3 Anante Poli'a anage agrikura hu'ne,
Anumzamo'a kagrira kahegahie. Kagra amega fatgo hu'na knare
hu'noe nehananagi, kagu'afinka haviza hu'nane! Kagra amare
mani'nenka kasegemo'ma hu'nere antenka refako hunenantane.
Kasegea rutagarenka aheho hunka hunezmantano? 4 Ana
tva'onte oti'naza vahe'mo'za anage hu'naze, kagra Anumzamofo
hai pristi ne' huhaviza huntenaku nehampi? Hu'za hazageno, 5
Poli'a kenona zamire anage hu'ne, nenafugata ugagota pristi
ne' mani'ne hu'na nagra ontahi'noe, na'ankure anage huno
avon tafepina krente'ne, kagri vahete'ma kva hu'nea vahera
huhavizana huonto hu'ne. (Eks-Ati 22:28.) 6 Anante Polima
nezmagege'za anama eri tru hu'naza vahepina, Satusi vahe'ene
mago'a Farisi vahe mani'nageno nezmageno, ranke huno anage
hu'ne, Nafu naganaheta nagra Farisi neki, nenfa'a Farisi ne'mo
kasenantege'na mani'noe. Nagri'ma kema hunenantazana,
nagrama namentinti hu'na fripinti otigahie hu'na huazanku kea

hunenantaze! **7** Anage'ma hige'za, Farisi vahe'ene Satusi
vahe'mo'za atruma hu'nafinti amu'nompinti refako hu'za ana kegu
fra vazi'naze. **8** Na'ankure Satusi vahe'mo'za fripinti o'otigahie
nehu'za, ankerovo vahera omanine nehu'za, avamura omani'ne
hu'nazanagi, Farisi vahe'mo'za ana maka'zana me'ne hu'za
antahi'naze. **9** Anampinti kezati'za ranke hu'za kea nehazage'za,
mago'a Farisi nagapinti kasegere ugagota hu'naza vahe'mo'za
oti'za hanave ke hu'za, Mago hazenke'a ama nera keta eri forera
osu'none. Avamu'mo'o, ankeromo'ma kema huminesigeno'a
na'a hugahie? **10** Tusi ke hafra nehazageno, Romu sondia kva
ne'mo aru Poli avazu hu'za azeri taganape'zanku sondia vahera
huzamanteno, uramitma Polina hanavetitma zamagripintira
avaretma sondia vahe kumapi efareho hu'ne. **11** Ana kenage
Ramo'a Polina tava'oma'are oti'neno anage huno asami'ne, Oti
hanavetio, Jerusalema Nagri nagi nagenke huama hu'nanaza
hunka Romu kumatera anazanke hunka ome huama hugahane.
12 Ko'atige'za nanterampi mago'a Jiu vahe'mo'za eri atru hu'za,
hanave ke huvempa hu'za Polima ahensaza naneke retro
nehu'za, ne'zane tine a'o huta mani'neta Polina ahensunkeno
frisnie, hu'za huhankaveti'za kea retro hu'naze. **13** Anampima
nanekema hu'za retro'ma hu'nazana 40'a vahera agatere'za
mani'ne'za retro hu'naze. **14** Zamagra ugota pristi vahete'ene
mono kva (elda) vahe'zagare vu'za anage ome hu'naze. Tagra kea
huvempa huta mago'zana one'mani'neta, Polina ahe farigahune
hu'za hu'naze. **15** Hanki menina kagrane, kanisol vahe'motma
sondia kva vahaku ke eri fatgo hugahunanki avreta eramaho
hinke'za, avare'za eramisnageta, amare erava'o osu'nenageta
kantega kavagrita mani'neta, ahe frisune. **16** Hianagi Polina
nesaro ne' mofavremo ahegahune hazanke nentahino, eno

sondia vahe kumapi efareno Polina kahe ke nehaze huno asami'ne. **17** Poli'a mago kina vahete kva ne' (sensulien), ke huno asami'ne, Avarenka ama arisesa ugagota sondia kva nete vuo, na'ankure mago'a kea agra ome asamigahie huno huntene. **18** Ana higeno hantreti'a sondia vahete kva ne'mo (sensulien,) ana arisesa avareno ugagota sondia kva nete vuno, Poli'a hunanteno avarenka ama arisesa ugagota sondia kva ne'te vuo, na'ankure agra mago'a kea ome asamigahie, hige'na avare'na e'noe. **19** Ana ugagota sondia kva ne'mo azante avazuhuganti ataregene, zanagraku umani'neke, anage huno antahige'ne, Na'ane naneke nasaminaku hu'nane? **20** Ana arise'mo'a anage huno asami'ne, Jiu vahe'mo'za mago zamarimpa nehu'za, havige hu'za kantahigesagenka Polina avarenka okina kanisol vahetega uramisanke'za, keaga refako hu'za mago'ene hake'za ke'naku hu'naze. **21** Ana hu'negu zamatrege'za anara osiho, na'ankure 40'a nazana agatere'naza vahe'mo'za ahe'nakura hu'naze. Zamagra kea huvempa hu'za, ne'zane tine oneneta ahe frigahune nehu'za menina zamagri kere'ma mago karimpa hananku, kavega ante'za mani'naze. **22** Anante ugagota sondia kva ne'mo'a ana risera hunenteno, hamponage asamino, vanunka ama nanekea kva nera ome asami'noe hunka, mago'mofona osamitfa huo. **23** Anante ugagota sondia kva ne'mo, sondia vahete kva ne'tre (sensulien), ke higeke akeno, anage huno zanasmi'ne, 200'a sondia vahera huge'za Siseria kumate vugahazanki tro hiho, anampina 70'a hosifi vano nehu'za ha' nehaza sondia vaheki 200'a karugaru kevereti ha' nehaza sondia vaheki hu'za meni kenagera 9 kiloki vugahazanki tro hiho. Polina hosi afu'zagafintira mago'a amigeno agumpi manina avaretma kva huntetma, Gavana ne' Feliksinte

viho huno zamasmi'ne. **24** Polina hosi afu'zagafintira mago'a amigeno agumpi manina avaretma kva huntetma Gavana ne' Feliksinte viho huno zamasmi'ne. **25** Agra avoma kre'neana amanahu kante kre tre'ne, **26** Nagra Klautiusi Lisiasi'na, knare Gavana kva nemokarega Feliksiga musenke kre'negamue, **27** Ama nera Jiu vahe'mo'za azeri'za ahe'za nehazage'na, sondia vahe'niane e'na aza hu'na avare'noe. Na'ankure nagrama antahuana Romu ne' mani'noe higeta avareta e'none. **28** Na'anteku nanekea hunentazo nagra antahinaku, zamagri kanisol vahete avare'na urami'noe. **29** Nagrama ke'na erifore'ma huana, zamagra'zimi kasegerekhu hu'za ke hakare hunte'naze. Hianagi ahe fri kankamune kina hunte kea kena eri fore osu'noe. **30** Ahenaku kema retro'ma haza naneke eme nenasmige'na, ama nera ame hu'na kagritega huntogeno ne-egena, ke ha'ma rentaza vahera magoka kagri kavure kea huntesazegu huzmantoge'za neaze huno krente'ne. **31** Ana hige'za sondia vahe'mo'za kema huzmantea kante ante'za, Polina avre'za kenageke Antipatrisi rankumate vunaku vu'naze. **32** Mase'za nantera hosifima vano hu'za ha' nehaza sondia vahera zamatrage'za avare'za vazage'za, mago'amo'za ete sondia vahe kumatega e'naze. **33** Hosifima vano nehu'za ha'ma nehaza vahe'mo'za Sisariama e'za ana avona Gavana ne'ma eme nem'i'za, Polina eme ami'naze. **34** Ana Gavana ne'mo'ma avoma hamprino nentahino, anage huno antahige'ne, Kagra ina provinsifinti nere? Higeno Poli'a huno, Nagra Sirisia nere higeno antahiteno, **35** anage hu'ne, kema hugante'naza vahe'ma esage'na, keka'a antahigahue. Higeno anante Heroti kina nompi Polina avaretma ome anteho hu'ne.

24 Hagi 5 fu'agna evigeno ugagota pristi ne' Ananaisi'a, mono kva (elda) vahe'ene, mago aza huno kemahu nera (loya)

Tetulusi nevareno, Polina Gavana ne' avufima kema hunte kea anakite'za e'naze. **2** Polima kema higeno egeno'a, Tetilusi'a agafa huno Gavana nete ke ha' Polina renteno anage hu'ne, Tagra knare'za huta kagrama kavama krirantanketa tarimpa fru huta nemanita, hanki ama kumapima kahefa'zama efare'neana kagrama antahinka kenka retro'ma hanazante efare'ne. **3** Feliksiga knare hu'nane. Mika kazigane, mika zama hanazankura tagra kageta antahita nehuta tusi'a muse hunegantone. **4** Hu'neanagi kagrira mago'ene knaka'a kazeorigahuanki'na anage hu'na negasamue, muse hugantonanki osia kema hanuana kagrama nehana kante antenka ketia antahiramio. **5** Tagrama keta eri fore hunana ama'na nera hazanke nere, rama'a vahe zamazeri agrarega anteno, maka kokantega Jiu vahera keha renezmanteno, Nazarenie nehaza mono naga'mokizmi kva mani'ne. **6** Anama hu'neno'a, agra ra mono nontia eri haviza nehigeta azeri none. **8** Kagrama antahigenka kesunka maka zanku'ma humanentona zana kagraka'a antahigahane. **9** Jiu vahe'mo'zanena Tetulusi kere hagerafi'za, ama'na kema nehiana tamage hu'za hunte'naze. **10** Gavana ne'mo Poli ke hinogu revumi humigeno, Poli'a anage hu'ne, Na'ankure nagra antahi'noe, kagra ama mopafina kema refakohu zantera rama'a kafufi mani'nanku, nagra korera osu'na nazama hania kea hugahue. **11** Kagraka'a ana kea eriama hunka antahi ankeregahane, **12** fu'a kna'nazana agatereno eovu'nege'na Jerusalemi mono hu'naku mareri'noe. **12** Zamagrama naga'zana, nagra mago vahe'enena fra ovazi'na, ra mono nompintira keaga hu'na, rama'a vahe kevua zamazeri savari hu'na nagrarega zamare'ozmante'na, osi mono nonpintiro rankumapinti'enena zamavare nagrarega ontoge'za onke'naze. **13** Hankinka zamagrama kema hunantenaku'ma nehazankea

agafa'a kagridera eri forera osugahaze. **14** Hu'neanagi nagra huama hu'na tamagema kasamisuana, tagigomofo Anumzante monora hunte'noe, Jisasi'ma hu'nea Kama, (sektie hu'zama nehazare) maka Mosesi Kasegemo'ma hu'neazante namentinti nehu'na, kasnampa vahe'mo'zama kre'naza kante avaririnoe. **15** Nagra Anumzamofonte namentinti hu'noe, zamagrama zamentinti hu'naza kna hu'noankino, fatgo vahe'ene, havi vahe'mo'za frite'za otigahaze hu'na namentinti nehue. **16** Ama'na ke agafare, nagra maragu'zatina Anumzamofo avure'ene, vahe'mokizmi zamurera mani fatgo nehue. **17** Mago'a zagegafu evutege'na, zamunte omane vahe'nia, museza (gift) nezami'na, Anumzamofonte ofa antenaku Jerusalea vu'noe. **18** Anama nehuge'za ra mono nompi nage'za eri fore nehu'za, nazeri agruma Anumzamofonte hu'noa zankura, vahe kevumo'zo mago'a rankea huonante'naze. **19** Hu'neanagi mago'a Esia provinsifinti Jiu vahera, amare menina kagri kavure mani'ne'za, nagrima hunante keaga me'neresina hunantasine. **20** Anama osanu'za ama vahe'mo'za, nankna hazenke hu'nofi agafa'a hugahaze. Kanisol vahe zamure'ma oti'ne'na hu'noa kea hufore hugahaze. **21** Hagi mago'zana kea ranke hu'na kanisol vahe zamure'ma oti'nena hu'noe. Menina keagama hunenantazana fripinti otigahaze hu'na huazante hunenantaze. **22** Anante Feliksi'a Jisasima amage'ma antekana ko antahi'neankino, kema antahi kna eriza'za nehuno anage hu'ne, Lisiasi'ma ugagota sondia kva ne'ma eramisige'na, keka'a antahigahue huteno, **23** hagi 100'a sondia vahete kva (sensulien) ne'ku Polina kegava krinto hu'ne. Hianagi atregeno fru huno nemanina naga'amo'zama nazano atupa'ma haniazama eme aminaku hanigeta, i'o huozmanteho hu'ne. **24** Mago'agna evigeno, Feliksi'ene nenaro Drusilake e'na'e, ana ara Jiu a're.

Feliksi'a huzmantege'za Polina ome kehazageno eno, Jisas Kraisinte'ma amentinti hu'nea kea eme zanasmi'ne. **25** Poli'ma fatgo zanku'ene, avufama kava krino manizanku'ene keagare'ma vahe'ma refako'ma hania zanku'ma kema nehigeno'a, Feliksi'a tusi koro nehuno anage hu'ne, menina vu'nege'na henka kankamuma mesige'na, ke hanugenka ete eno huno asami'ne. **26** Ana'ma nehuno'a agesama antahi'ana Poli'a zago namigahie nehuno, ama ana agafare mago'agna Polina ke higeno etere huno agranena keaga hu'ne. **27** Tare zagegafu agateregeno'a Porsius Festusi'a, Gavana eri'zana Feliksi no erino eri'ne, na'ankure Feliksi'a Jiu vahe zamazeri muse hu'naku Polina atregeno kina nompi mani'ne.

25 Festusi'a Gavana erizante Sisaria tagufa kna enemanino, Sisariatira atreno Jerusalemi vu'ne. **2** Higeno ugagota mono kva vahe'ene Jiu vahepinti zamagi me'nea vahe'mo'za, Polina havige hu'za keaga eme agrite huntenaze. **3** Polima kema huntesuna keaga antahi ramigahano hu'za antahige'naze. Festusiga huizo hunka atregeno Poli'a Jerusalemia vino hu'za hampo'na ke hunte'naze. Na'ankure avare'za nevnage'za kantega ome ahe fri'naku keaga retro hunte'neza hu'naze. **4** Hianagi Festusi'a kenona huno, Polina ko azeri'za kina hunte'za azerintageno Sisaria mani'neanki'na, nagra atupa knafi atrena Sisaria vugahue, hu'ne. **5** Nehuno anage hu'ne, Zamatreneke'za kva vahekamo'za nagrane urami'za, ama ne'mo'ma mago'a havizama hu'nesniazama me'nesige'za kesu'za, zamagra keaga agrira hunteho. **6** Festusi'a zamagranema 8'o 10'a kna agateoreno, osi'a knama maniteno'a Sisaria uramino, hagi mago knarera keaga refakohu trate unemanino, Polina awareta echo huno huzmante'ne. **7** Poli'ma ehanatige'za, Jerusalemiti e'naza Jiu vahe'mo'za, azeri

amunompi ante'za otigagine'za, rama'a hamponanentake kea
huntaza kemofona agafa omanetfa hu'ne. **8** Agri'ama azama
hania nanekea Poli'a anage hu'ne, Nagra Jiu vahe Tra Kea
eri haviza osu'noe, ra mono nona eri haviza osuge, Sisana
havizana huontetfa hu'noe. **9** Hianagi Festusi'a Jiu vahe'mo'za
musema huntesaza kazigati Poli antahigeno, kagra knare
Jerusalemia mareri'nanke'na naneke ka'a ome antahigahufi? **10**
Higeno Poli'a kenona'arera anage hu'ne, Nagri'ma keagama
hunantekure hazare, Sisa'ma keagama refako nehia tra'are
menina oti'noe. Nagra Jiu vahera havizana huozmantefha hu'noe.
Ama tamageginka kagra ko antahi ankere'nane. **11** Hagi
nagrama haviza hunesuge'za frigahane hu'za zamagra hanazana,
fri'zankura korera ofregahue. Hu'neanagi zamagrama mago
kema hunantesaza kemo'ma tamage agafa'ama omanenesiana,
mago ne'mo'aamuha osu'neankino zamagri zamazampina
navare ontegahie. Nagra ama keaga Sisante retufentoankino
agra refako hugahie. **12** Higeno Festusi'a kanisol vahe'enema
atru huno keagama huteno'a, ke'nona hunteno, Hago nasaminka
Sisante retufentoe hanankinka Sisante vugahane huno asami'ne.
13 Mago'agna evutegeno kini nera Agripake nesaro Benaisikea,
Festusi antahimi'ne nantu antenteke Sisaria urami'na'e. **14**
Anantega mago'a za'za kna umani'nakeno, Poli agenkea Festusi'a
antahintahi'a erinaku Agripana anage huno asmi'ne, Feliksi'a
mago nera kina nompi ante'ne. **15** Jerusalemi mani'noge'za,
mono nonte ugagota kva (hai pristi) vahe'ene, Jiu ranra
(eldas) vahe'mo'za agri agenkea nenasmi'za hugeta ahe
frimaneno hu'za nantahige'naze. **16** Nagra kenona zamire anage
hu'noe, Romu vahe'mofo avu'ava'mo'a, keagama mago vahe'ma
hunteku'ma hanimo'a, agri'ma keagama hunteku'ma hanamokizmi

zamure otino, agri'ma huntesaza kemofona azahu nanekea hutesige'za henka avaremigahaze. 17 Hu'neanki'na amare'ma atruma hazage'na, ama ana kea huretufe onte'noe. Hagi anante knazupa keagama refakohu trate unemani'na, avaretma egahaze hu'noe. 18 Keaga huntuku'ma haza vahe'mo'za oti'za zamagrama keaga hunte'nazana, havizama hu'nesia zante keaga huntegahaze hu'na nagesama antahi'noa kantera huonte'naze. 19 Hagi zamagrazmi mono'mofo zanku'ene mago nera Jisasi'e hu'za nehaza ne'ma fri'nea zanku'ma, Poli'ma huno mani'ne hu'nea zanku agenoka humare'za agripi atre'naze. 20 Agri'ma hunentaza kemofo agafa'a, nagra ke'na erifore osua kazigati Jerusalemi eteno vanige'za amanahu keagama hunte'naza kea ome erifatgo husanifi hu'na knarerema hanigu antahige'noe. 21 Hianagi Poli'ma huno ete nazeri antenkena kina nompi mani'nesugeno, Sisa'a na'ane keaga hunantegahifi antahineno hige'na, nagra hanavege huzmantoanki'za, agrira kava krinte'nesagena, inanknarero eri fatgoma hutesu'na, Sisantera (Empra) huntesugeno vugahie. 22 Nehigeno anante Agripa'a anage huno Festusina asami'ne, nagranena ana ne'mofo kea nagra'ni'a nagesafinti antahinaku nehue, higeno Festusi'a okine huno Agripana asami'ne. 23 Hianagi anante knarera, Agripake Benasikea mizama'amo marerisa kukena huteke, ana vahe'zagama atruma hu'naza tusi'a nompi ha' kaziga keagare'ma ugagote'naza kva vahe'ene (commanding officers), rankumapi ranra kva vahe'ene ufrageno Festusi'a ke huzmantegi'za Polina aware'za e'naze. 24 Efrageno Festusi'a anage hu'ne, Kini ne' Agripagane miko tagrane mani'naza vahe'motma ama nera keho, maka Jiu vahe krerafamo'za keaga huntenuku nagrite eri'za Jerusalemine amafinema eri'za e'nazana kezati'za, Polina

ahe frisnageno mago'enena amafina omanigahie hu'naze. 25
Hu'neanagi nagrama hakena erifore'ma huana, agri'ma ahe
friga agafa omanetfa hu'ne. Hagi agrama ana kumate'ma
ugagote'nea ne' Sisante'ma keaga'ama mago'ene retufentoe
hu'negu, nagra Polina avretrenaku nagesa antahi'noane. 26
Hu'neanagi agri nanekema, nagrama kre'na rani'a (lord) amiga
keaga nagripina omanetfaza hu'negu tmagrite'ene amu Kini ne'
Agripaga tamagrama haketma keso'e hutesage'na, nagra avona
kresue hu'na Polina aware'na tamagratera neoe. 27 Na'ankure
nagrama nagesama nentahuana mago kina ne'ma keaga
huntaza kemo'ma, knare agafa omnenesire'ma huntezamo'a
knarera osugahie.

26 Agripa'a, Polinku huno, Knarere hugantoanki naneke ka'a
huama hugahane higeno, Poli'a azana ometre emetre nehuno
ahoke'ma ahekeaga agafa huno hu'ne. 2 Jiu vahe'mo'za nagri'ma
ha'ma renante'za navare'za trate'ma neazana ana mika zamofo
agafa'a amananki Kini ne' Agripaga antahi'ankero, nagra tusi'a
muse hu'na kagri kavurera ot'i'na, Jiu vahe'mo'zama hunante'naza
kemofo nona'a huzmantegahue. 3 Hanki Jiu vahe'mokizmi
zamu'zma'ene, Jiu vahe'mo'zama keframa nehaza zana, kagra
ko kenka antahinka hu'nananki, kema hanua keaga akohenka
mani'nenka rezaganenka antahio. 4 Nagra inankna navu'navate
osi'ni'aretira mani'na nehaza nera asete'na, esetetira vahe'ni'afine
Jerusalemima mani'na e'noana, mika Jiu vahe kreralfamo'za
ko antahi'za ke'za hu'naze. 5 Zamagra antahi'naze, na'ankure
korapa nagrira nage'za antahi'naze. Zamagra huama hunaku
zamagesa nentahisu'za, tagri mono'mofo kasegemo'ma, o'e'ma
huno hu'nea kante ante'na avariri fatgo hu'na nagra Farisi nere
hu'na mani'noane. 6 Hige'na menina ama keagarera eme ot'i'noe,

na'ankure Anumzamo'ma tagehe'ima huvempama huzmante'nea
kere namentinti hu'na, mani'noe. 7 Hagi tagrira 12fu'a naga'nofiku
huvempa huno erigahaze hu'nea kere zamua kete'za mani'ne'za,
zagene haninena hanaveti'za monora hunentaze. E'i anazante'ma
navuma ketena namentintima hu'noa zanteku, Juda vahe'mo'za
nagrira hafra hunenantaze. Mareri'namoke! (king) 8 Na'a higetma
ama vahe'motma Anumzamo'ma fri vahera zamazeri oti'zankura
tamentintia nosaze? 9 Nagrama nagesama antahi'noana,
tamageza nehue nehu'na hanaveti'na Nazareti Jisasi agi'a eri
haviza hu'noe. 10 Jerusalemi kumapina amanahu'zana hu'noe.
Rama'a Anumzante mani'naza vahetamina, Jiu vahe mono
nompima ugagote'naza pristi vahe'mo'zanena hugnare hazage'na
zamare'na kina huzamante'na, zamahe frinaku'ma haza vahetera
nagranena nazante'na izo huge'za zamahe'naze. 11 Hanki hakare
zupa maka osi mono nompi mareri'na Anumzama huhaviza
hunteho hu'na zamahe'noe. Na'ankure nagra tusi'za hu'na
narimpa hezmanente'noe. Ru moparegane me'nea ra kumapina
ufre'na zamahe'noe. 12 Anama nehuge'za, mono nonte ugagota
kva vahe'mo'za hugnare hu'za hanave nenami'za hunantage'na
Damaskasi nevu'na, 13 zagemo'a anuntu age12kiloki higeno,
mareri'namokagi (king) monafinkatira masa a'mo'a zagea
agatere'nea tavi'mo nevugeno, nagrane magokama vu'nona
nagate'enena remsa mika hugagi'ne. 14 Ana higeta ana
mika'mota traka huta mopafima nemasonkeno'a, mago kezamo'a
Aramu (Hibru) kefinti antahugenno anage hu'ne, Solio, Solio, na'a
higenka Nagrira nenahane? Nagri'ma nenahana, kgra ka'a
agona zante taru nehane. 15 Hige'na azage Ramoka? hugeno
Ramo'a huno, Nenahamo'na Nagra Jisasi'ne. 16 Hianagi otio,
na'ankure ama'na agafare, Nagra kavurera efore hue, korapa

kagrira eri'za ne' kazeri otisugenka, amama kana zane, Nagri'ma naganane, Nagrama kaveri hanuazana huama hugahane hu'na hugante'noe. **17** Nagra Jiu vahe ka'afinti'ene meg'i'a vahepintira kaza hu'na kava hunegante'na, Nagra hugantesugenka zamagrite vunka, **18** zamurga erihari hananke'za hani'zampintira atre'za masare egahaze. Hagi Sata hanavefintira atre'za Anumzamofo hanavere esageno, kumi'zamia atrezamantesnige'za, Nagrite zamentinti hazage'na, kumi'zmi eri fanane hu'noa naga'enena zamagia erigahaze huno hu'ne. **19** Ana hu'negu, Kini Agripaga, monafinkati'ma ege'na ava'nagnazama ke'noa zama amage'ma onte'zamo'a amuho hunantegahie. **20** Hu'neanagi pusanteria Damaskasi vahe zamasmite'na, Jerusalemine maka Judia vahe'enena zamasmite'na meg'i'a vahe'enena anazanke hu'na zamasmi'na, tmagu'a rukarehe hutma Anumzante nevinkeno, tamu'tmama hanaza zamo'a, hago tamagua rukarehe hu'naze hino. **21** E'ina kegafare mago'a Jiu vahe'mo'za ra mono nompintira navuzuhu fegi'atre'za, nahe fri'nakura nehaze. **22** Hianagi Anumzamo'a nagrira naza hiazana keme e'na ama knarera oe. Hagi ama oti'na mika vahera osi'mofonteti vuno ramofonte'ma vu'neana, nagra huama hu'na nezmasmue. Mago'a kea nosuanagi, Moses'e'ne, kasnampa vahe'mo'zama hu'za, e'inahu'zana fore hugahie hu'naza'zamo fore nehie. **23** Kema hu'za Kraisi'a ataza erino friteno pusante fri'pintira otino, Jiu vahete'ene meg'i'a vahetera tavi'a eri ama hugahie hu'naze. **24** Poli'ma agra'ama agu'mavazisia zamofo keagama nehiana, Festusi'a ranke huno Poliga hago ifo nehano! Ra'ma'a zama rempi hunka antahinana zamo kagrira kazeri savari nehie! **25** Higeno Poli'a huno, Nagrira antahintahinimo'a havizana osu'ne, Festusiga so'e ne' mani'nane. Hianagi nagrama nehua

nanekea tamage hu'na fatgo antahintahizanteti nehue. **26**
Ama'na kema nehuana Kini ne'mo'a antahino keno hu'negu
nagra agritera hu'ama hu'na nehue. Ama anazanku'ma nehuana
kinimofo avurera fra'okine. **27** Kini ne' Agripaga kasnampa
vahe kegu kamentinti'a nehampi? Nagra antahi'noe, kagra
kamentinti nehane. **28** Higeno Kini Agripa'a Polinku anage hu'ne,
Kagrama kagesa antahinana ama atupa knafina nazeri rukarehe
hanankena, nagra (kristen) mono ne' manigahufi? **29** Anage
higeno Poli'a kenona'a huno, atupa knafino, za'za knafino nagra
Anumzantega nunamu nehue, kagrikukera nosuanki ama menima
mani'ne'za nagrama huanke'ma nentahiza vahe'mo'za, nagrikna
hihogu nehuankino, ama'na seni nofinura kina reozmantesaze.
30 Anage hige'za, Kini neki, Gavana neki Benesiki, zamagranema
mani'naza vahe'amo'za oti'naze. **31** Oti'za ana noma atre'za
fegi'a nevu'za, ke huganti hugama hu'za anage hu'naze. Ama'na
nera mago knare ke agafa omaneneankita ahe frige kina huntege
osutfa hugahune hu'za hu'naze. **32** Agripa'a, Festusi asmino,
Sisante'ma vugahue osiasina, ama nera katufe atrosine.

27 Hagi Itali kumate tina takaheta vugahaze hutageta, mago
ruotage hu'za empra 100'a sondia vahete kva nehia ne'
(sensulien) Juliusi kegava hinogu, Poline, ruga'a kina vhahera,
avaremi'naze. **2** Atramitiumiti Esia kaziga rama'a vente manitere
nehia kumate manitere huno, vunaku nehia ventefi marerita
hagerimpi vu'none. Aristakusi'a Tesalonaika rankumapinti
nera, Masedoniatikino tagrane vu'ne. **3** Maseno ko'atia zupa
Saidoni uhanati'none. Hagi Juliusi'a knare avu'ava Polina
hunteno, amane vunka knampa ka'a ome nezmagenka, kazama
hu'zana zamagripinti erigahane huno huntegeno vu'ne. **4** Hagi
Saidonia atreta Saiprusi ti amu'nompi me'nea kuma asogita

vu'none. Na'ankure zaho'mo'a tusiza huno himamutino hagerina erivnape'ne. **5** Hagi Silisiane Pamfilia hagerina arugitagita vunazamota, Maira rankumate Lisia provinsifi umani'none. **6** Anante sondia kva ne'mo'a Aleksandriati ventemo, Itali vunaku nehia vente keteno, anampi tavare antegeta vu'none. **7** Akoheta rama'a kna ana'ana huta vu'none. Tusi knazampi Sindasia ehanati'none, na'ankure zaho'mo'a tusi himamu reno kana renkaniregeta mago'anena ovuta, Kriti ti amunompi me'nea mopa asogita Salmoni vu'none. **8** Agatereta tusi amuho huta Lasia kuma tava'onte, Fea Haveni e'none. **9** Rama'a knamo'a tagateretegen, hagerimpi vuna kamo'a menina hazenke atie, na'ankure Jiu vahe'mo'za kave'ma a'o hukna agateregeno, hampo'na zaho ko atu knafi efrone, Poli'a antahintahi zamino, **10** anage hu'ne, Ama vene'ne zage, nagrama nentahuana, amama vuku'ma nehuna kamofona rama'a hazenkefi ufretta rama'a zanti atregahune, feno'zane ventegerompage, tagranena tasimura atregahune huno zamasmi'ne. **11** Hianagi sondia vahete kva ne'mo'a, ventere'ma aze'neria ne' ene, ventemofo nefake ha'a nanekea nentahino, hagi Poli'ma hiankea ontahi'ne. **12** Na'ankure zahoko'atu knafima ventemo'ma umani kumamo'a knarera osu'ne. Rama'amo'za mago'zamarimpa hu'za, knarekita vugahune hu'naze. Zamagesama antahi'zana Foniksi uhanatigahune hu'za antahi'naze. Kritima ventemo'ma unemania kumamo'a rugaruga asoparega zage ufre kaziga (notwest sautwest) avugosa hunte'negeno zaho ko atu knafina anante umanigahune hu'naze. **13** Kanti sauti kazigati agazone zaho emarerige'za, hago knare hiankita amane vugahu'ne nehu'za, timpi umaniku erinetraza zana anka avazuhu ventefi nente'za, Kriti kaziga vu'za mopa tva'onte vu'naze. **14** Hianagi tusi'a not isti'e hu'za

nehaza zahokino avunenenteno Kriti kazingati tusi himamutino e'ne. **15** Zaho komo'a vente'a eme amasagino azeri rava higeno, ventemo'a azeri agatere'zana osigeta tagrati atronkeno zaho komo taretufeno vu'ne. **16** Kautae nehaza ti amu'nompi mopa asogita tagareta nevuta, tusi amuho hunerantegeta tazama husia votia avazu huno ne-ea votia erinte anaga atre'none. **17** Hagi votia erianaga atrete'za, nofi eri'za ra ventere azerisigu kitragote'haze. Vene'ne zagamo'za ventemo Sitisi tinkenare ome ahe'zankura tusi kore nehu'za zamazeri knama hanige'za ti avozare'ma akohe'za vanagu, kna'age'zama rente'nazanofira eritre'za atrageno zaho'mo zamatufeno vu'ne. **18** Maseno ko'atige'za mago'a fenona ventefintira eri atre'naze, na'ankure zaho komo'a tusi hampo'natino ahegantugama huno azeri nakari'za hige'za ana hu'naze. **19** Hagi nampa 3gnazupa ventemofo eri'za zantamina mago'a asga hu'za mate'vu atre'naze. **20** Tagra zagene hanafi'enema mika knafina hanatigeta onkonkeno zahoko'mo'ma knare osigeno'a, knare hugahune huta tagesama antahi'nona zamo'a amane zankna hu'ne. **21** Za'za kna ne'zana one'za manizageno, Poli'a amu'nozamifi otino anage hu'ne, Ama vene'nemotma nagrama huanke, Amage antetma Krititima atretma omazasina amanahu hazenkene tuzampaza zantamima atraza zana otrasine. **22** Hanki menima tamasmisuana korera osiho, na'ankure amama mani'naza amu'nompintira mago'moka fanane osughananki, ventemoke fanane hugahie. **23** Na'ankure meni keragera nagrama Agri vahé mani'nena eri'zama'a erinentoa Anumzamofo ankeromo'a navuga eme otino, **24** anage hu'ne, Poliga antahio korera osunka amane Sisa avurera ome otio, kagranema ana mika ventefima neaza nagara Anumzamo'a asunku huramanteno

tamaza hugahie hu'ne. **25** E'inage hu'negu ama vene'nezaga korera osihō. Na'ankure nagra Anumzamofonku namentinti nehuankino nasami'nea kante anteno fatgo huno taza hugahie. **26** Hu'neanagi mago ti amu'nompi mopare atresunkeno zaho'mo ventea atufeno have ome amitenō rukaha hanie. **27** Hagi 14ni'a kenage'mofo agu'afima zaho'mo'ma tatufeno Adriatiki hageri amu'hompima nevigeno'a, kerage amu'nompina ventefi eri'za vahe'mo'za hago mopare neone hu'za zamagesa antahi'naze. **28** Nahu'za nofi atumpare knaza eri renente'za, eri hagerimpi re'za kazana, 40'a mita fenkagame urami'ne. Osi'a ogantu'a vuza mago'ane ananofira erire'za kazana, 30'a mita timofo za'za a'mo'a urami'nege'za ke'naze. **29** Have ahegahune hu'za tusi zamagogogou nahu'za, ventema umaniku'ma nehige'za erinetrazaza anka 4'a asgahu netre'za, ko'ma atisigu nunamu hu'naze. **30** Anante ventefi eri'za vahe'mo'za ventefinti atre'za fre'naku nahu'za, havige hu'za nofite knanentake'za eri netraze nehazage'za osi votia hagerimpi eri atre'naze. **31** Poli'a sondia vahete kva ne'ene ruga'a sondia vahera zamasamino, Ama'na vene'ne zagama ventefima omani'snazana tamagra frigahaze hu'ne. **32** Hige'za sondia vahe'mo'za ana osi votire'ma kinte'naza nofira traga hutrageno hagerimpi marenō vu'ne. **33** Ko'atumasa huku higeno, Poli'a mika vaheku ne'za neho huno nezmasmino anage hu'ne, 14ni'a kna'mofo agu'afina naza fore hugahieha hutma ne'zama onetma mago'zama osutma e'naze. **34** E'inama hu'nagu mago'a ne'zana neho hu'na neramasmue, na'ankure tamagri'ma tamazeri hampo'na hanigetma manisnagu nehue. Na'ankure magore hunka osi hazenkea mago'moka e'oritfa hugahane. **35** Anagema huteno'a, ana mika vahe'zamufi breti erino Anumzantega nunamu hunteno, korino agafa huno ne'ne.

36 Ana huno hakare vahera zamazeri hampo'na huke hige'za zamesite ne'zana eri'naze. **37** Ana miko vahe'ma vente agu'afima mani'nonana, 276'a vahe mani'none. **38** Anahu'za zamesiama'a nezamu nehu'za, ventemo'ma oza hanigu witia eri'za hagerimpi matevu atre'naze. **39** Ko'ma atige'za, mago mopa ke'nazanagi ana mopa antahi'za ke'za osu'haze, hianagi timo eri mago huno ufreto knare kahepa ruherafi'nege'za kete'za, knare hanuno'a zahomo vente'a atufeno anante vugahie hu'za antahi'naze.

40 Hige'za vente'ma azerino nemanianofira tgahu'za eri timpi netre'za, ventema azeri ante fatgo higeno nevia apa kanonte'ma ki'nazanofira vakane'naze. Anante avugama me'nea selia eri zaho kantega netre'za, hageri ankena kefatgo hu'za vu'naze.

41 Ventemo'a have ome amasgino anampi vuno'eno osu'are agi'mo'a runtanigeno, ruga ragati hagerimo'a avunema anteno riga'a rutamana hutre'ne. **42** E'i sondia vahe'mo'za kina vahe zamahe frinaku ke retro hu'naze. Hanki mago'mo'a zanagora aruno tatareno ofregahie hu'za hu'naze. **43** Hu'nazanagi sondia vahete kva ne'mo'a' Poli'na avare so'e huno aza huno vuku agesa nentahino, sondia vahe'mo'za kina vahera ozmahesaze nehuno, azagama zanago ruga hu'nesamoka ventefintira takaurenka pusante tinkenare vugahaze huno hige'za, **44** mago'amota, zafa atupare azeritma nevusageno, ventemofo atupare aze'nerita vugahaze, hige'za ana'ma hazana knare hu'za mopare vu'naze.

28 Knare huta mopare'ma unehanatita konana Maltae nehaza ti amu'nompi mopa ke'none. **2** Anampima nemaniza vahe'mo'za knare so'e zamavu'zamava hu'za tavarente'naze. Tusi'a teve hegare'za tazeri so'e hu'naze na'ankure, tusi ko'aruno zasi hige'za ana hu'naze. **3** Poli'ma teve zogino erino eme tevefima negregeno, tevemo'a amuho higeno ana tevefinti mago ha'

osifa'vemo hanatino Poli azante haninkofigeno, arisonamo'a kizu'vazu hu'ne. 4 Kuma agafa vahe'mo'za kazageno osifa'vemo Poli azante haninkofi nege'za, zamagra'a anage hugantugma hu'za, ama'na nera vahé zamahe nefria nepigure, hankino hagerimpi frigara knare huno freno e'neanagi, tagri'ma refko'ma nehia a' anumzamo refako husiana atre'sigeno Poli'a omanigahie.

5 Hianagi Poli'a ana ha' osifavea tevefi rutafri atregeno ata hoza omi'ne. 6 Zamagra'ma antahi'zana, avufamo'a zorege mopafi traka huno frigahie hu'za nentahi'za, za'za kna kete'za mani'zana, mago'zana agritera fore osige'za, antahizazmia rukarehe hu'za ama'na nera anumzampigure hu'za hu'naze. 7 Ana kumate'ma me'nea mopagerfa, ana ti amu'nompi mopare ugagota hu'nea ne' Pabliasi'e nehaza ne'mofona, agupo mopa'a me'nea ne'mo, muse nehuno tavareno noma'are vuno, 3'a kna'mofo agu'afina tazeri so'e hurante'ne. 8 Anama hifina Pabliusi nefana amuho ave'nesino korarifa renagigeno vase'nege'za ome ke'naze. Poli'a omegeno nunamu hunteteno, avufare azana agofetu antegeno, kri'a amane hunte'ne. 9 Anazama fore hige'za, maka ana ti amu'nompi mopare'ma nemaniza kri vahera anahu'za ageno kri'zamia eri amane huzmante'ne. 10 Hagi zamagranena, tagrira husga hunerante'za, vunaku'ma trotra nehunke'za, ina zanku'ma atupa'ma hu'nazana ventefi eri'za ome tami'naze. 11 Hagi 3'a ika maniteta, ana ti amunompi kumate'ma zaho ko'ma atigeno ko'ma emani'nea Aleksandria ventefi vu'none. Ana ventemofo avuga kugaveza anumzane huno tare kogna tremokizni znamema'a me'ne. 12 Vuta 3'a kna (3 dei) Sirakuse kumate ome azerita mani'none. 13 Anantetira rugagita Regiumu uhanati'none. Masonkeno ko'atigeno zage fretegati zaho egeta anagame'a mago knarerera Puteoli uhanatuna

zamota, **14** anampi mago'a tafuhe'ina ome zamageta erifore hunke'za, ke hazageta zamagranena mago sonta umani'none. Ananteti Romu e'none. **15** Hago tagriku'ma emani'naze kema Romu mani'naza tafuhe'za nentahi'za vahe'ma e'nazana, Apiusi kante maketi kumapinti neageno, 3'a no mizase'za nemasaza nonteti tagri'ma tavataginakura e'haze. Poli'ma nezmageno'a hanave e'nerino, Anumzamofo muse hunte'ne. **16** Romuma ufronke'za, kagra kavesi'zante kvama hugante'nia sondia ne'ene manio hu'za Polinkura hunte'haze. **17** Hagi 3'a gna'mofa amefi'a, Poli'a kehige'za Juda kva vahera emeritru hazageno, Juda kva vaheku anage hu'ne, Nafuheta nagra mago havizana vahetia huozmante'na tafahe'i zamu'zmara eri haviza osu'noanagi, nagrira kina vahekna hu'za Jerusalemitira navare'za Romu vahe zamazampi eme natre'naze. **18** Romu vahe'mo'za nagrira refko hu'za nagete'za, katufe natrenaku hu'naze. Na'ankure nahe friku'ma hunantazana, kegafa'a nagripina omanetfa hu'ne. **19** Hianagi Juda vahe'mo'za ana kerera ke ha' renantage'na, rankva Sisa kenakure hu'noe. Hu'neanagi nagrama antahuana mago keaga nagra'n'i'a vahera huozmantegahue hu'noe. **20** E'ina hu'negu nagra neramage'na tamagra ne keaga huku nehue. Na'ankure Israeli vahe'mo'za zamentinti hu'za, zamage'sama nentahiza zante ana agafare nagrira ama'na kinanofira renante'naze. **21** Hige'za anage hu'za asami'naze, Judia kazigatira kagri nanekea avona kre'za atrageta e'ori'none. Hanki tafuhe'za anantegatira e'za naneke'a eme antege, kagri havi kavukva zamofo nanekea ontasmitfa hu'naze. **22** Hianagi menina kagripinti kema antahinaku nehune, na'ankure mika kotegeti vahe'mo'za antahu'nana ama ana kevugura (sekt) huhaviza huneramantaze. **23** Agranema atru

hu'za keaga husnaza knama erinte fatgoma hutage'za, rama'a
vahe'mo'za nemasefinka e'za eme negageno, ana zupa Mosese
kasegefinti'ene kasnampa vahe'mo'zama krente'naza kefinti
erino Anumzamofo mona kuma avu'ava zana huama huno
nezmasmino, ama ana Jisasi avu'ava zante'ma zamentinti
hanagu nanterana agafa huno nezmasmigeno kinaga ome
ase'ne. **24** Poli'ma kema hia kemo'a mago'amokizmia antahintahi
zmia zamare agrarega zamante'ne, mago'amo'za antahi'za
zamentinti huzankura zamesra hu'naze. **25** Zamagra zamagra
hugantigma hu'za mago zamarimpa nosu'za, atre'za nevazageno,
Poli'a vagare keaga huno, Ruotge Avamu'mo tamagehe'ima
keaga huzami'neana, kasnampa ne' Aisaiampi huvazino hufatgo
hu'ne. **26** Ana vahete vunka anage huo, Tamage hutma kea
antahigahazanagi, amara osu'ffaza hugahaze, tamagerafa hutma
kegahazanagi, keanke oregahaze. **27** Na'ankure ama ana
vahe'mokizmi zamagu'amo'a amara huno hagro osu'nege'za
kema antahi'zana, zamagesamo'a antahiso'e nosie, hagi
zamavurga asuki'nege'za zamavua nonke'za zamagesaretira
nontahi'za, zamagu'amo'a amara osanige'za, rukrahe hu'za
omesage'na zamazeri onkanamregahue hu'ne. (Ais 6:9-10.)
28 E'ina hu'negu tamagra antahi ankeresazana, Anumzamo
tahokehe'zana megi'a vahete atregeno e'ne hu'za zamagra
antahigahaze. **30** Poli'a, agra'ama ikante mizaseno ne'mania
nompina, tare zagegafufi anampina mani'nege'za, agri'ma
kekure hu'za amokizmia so'e huzmante'ne. **31** Korera osuno
Anumzamofo mona kumamofo avu'ava zana hu'ama nehuno,
Ramofo Jisasi avu'ava zamofo nanekea rempi hunezamigeno
mago'mo'a aze'orino i'o huonte'ne.

Roma

1 Hagi nagra Poli'na, Krais Jisasi kazokzo eri'za ne'mo'na,
Anumzamo aposol eri'za erio huno huhamprinanteno, Knare
Musenke'a huama hanugu nazeri ruotge hunantene. **2** Ama'na
Knare Musenkea korapa Anumzamo'a huvempa kea kashampa
vahe'amokizmi zamasamige'za, Ruotge Avontafepi krente'naze.
3 E'i ana Mofavre'a Deviti naga nofipinti, ne'mo ama mopafi
avufga erino efore hu'ne. **4** Hagi Ruotge Avamumo'a hihamu'ane
huama huno, Anumzamofo Mofavre fripinti azeri oti'negeta, Jisas
Kraisi'a Rantimo'e nehune. **5** Jisas Kraisi azampi Anumzamo'a
asunku huranteno, Agri agifi Anumzamo'a aposol eri'zama miko
megi'a vahetema erisunku huhampritantene. E'ina hu'negu
zamagra Agri Agifina amagera nente'za zamentintia hugahaze.
6 Tamagranena Jisas Kraisi nagare hu'zama mani'naza nagapi
mani'naze. **7** Anumzamo'ma tamavesinteno kema higeta mika
Romu kumate mani ruotge hutma mani'naza nagamotarega,
Anumza Nafatimofone Rantimofo Jisasi Kraisi asunku'zamo'ene,
rimpa fruzamo'a tamagrane megahie. **8** Hagi kota'zana, Jisas
Kraisi agifi, Anumzani'amofona maka'motamagura susu huntue.
Na'ankure tamagra tamentintima hazazamofonkea, mika kotega
huama nehaze. **9** Na'ankure Anumzamofoma nagra maka
nagu'aretimma eri'zama'a erinente'na, Nemofo Knare Musenkema
huama nehumo, tamagriku'ma nentahi'na nunamuma nehuazana,
nageno antahino nehie. **10** Mika zupa nunamuma hufina,
Anumzamofo avesima me'nesige'na, tamagritegama esugura
nunamuna huvava nehue. **11** Na'ankure tamagri'ma eme
neramage'na, Avamumofo musezama nagripi me'neazama
nerami'nugeno, tamazeri hanavetisia zankura tusiza huno
navenesie. **12** E'i ana zana, tamagri tamentintima azeri hankaveti

ke neramasami'nena, nagri'enena ana zanke huta nazeri hanaveti
kea nenasamisageta tamentintifina oti hanavetita manigahune.

13 Nafuhetane nasaraheta antahisazegu nehue. Nagra nantu
eme antenermantena eri'za tamagripi enerisugeno, megi'a nagapi
hu'neaza huno Avamumofo raga'a tamagripima efore hanigena
kesua zankura, rama'a zupa antahintahini'a retro hu'noanagi
mago'a zamo nazerigena, omena mani'nogeno menina ama
knarera ehanatie. **14** Eri'za eri'na, Griki vahe'ene, ko knafi vahekna
vahe'ene antahintahiza me'nea vahe'ene, antahintahiza omne
vahe'mokizmine, zamaza hanugu nagrira hunante'ne. **15** E'ina
hu'negu Romu kumate mani'naza nagamotarega, Anumzamofo
Knare Musenkema eme huama hu'na tamasami zankura tusi'za
huno nave'nesie. **16** Hagi Kraisi Knare Musenkema huama'ma
huzankura nagazea nosue. Na'ankure e'i Anumzamofo hanave'a
anampina me'neankino, iz'a zo zamentintima hanamokizmia
zmahonekeno, Jiu vahe esera zamavareteno, anante megi'a
vahera zamavaregahie. **17** Na'ankure ama ana Knare Musenkefi,
Anumzamo'ma fatgo avu'avaza hurante'nea avu'avamo'a efore
hu'ne. Eri agafa hu'nereti'ma vuno vagarete'ma uhanatisiana,
amentintima hu'zamo azeri ruotagera hugahie. Avontafepina
huno, Fatgo vahe'mo'za zamentinti zanteti zamasimura eri'za
manigahaze hu'ne. (Hab 2:4.) **18** Na'ankure Anumzamo'a, Agra'a
monafinkatira rimpahenzana eri'ama huno, Anumzamofo fatgo
avu'ava nosu'za, fatgo osu zamavu'zmava nehaza vahe'mo'zama
ana zamuzmateti'ma, tamage kemofoma rentrako nehaza
vahera ha'rezamantegahie. **19** Na'ankure Anumzamofoku'ma
ke'za antahi'zama huzantmina amunozmifina ama hu'ne.
Na'ankure ko Anumzamo'a avu'ava zama'a eriama huno zamaveri
hu'ne. **20** Hakare zama tro'ma higeno fore'ma hu'neregatima

e'neana, Anumzamofo mevava avu'ava zana ke'naze. Hianagi hakare'zama eri fore'ma huneregati'ma e'neana hakare zamo'a Anumzamo'ma tro hunte'nea avamente me'nege'za vahe'mo'za negaze. E'i ana agafare Anumzamofo oku me'nea hankave efore hige'za negazankiza, vahe'mo'za onke'none hu'za osugahaze. (aïdios g126) 21 Hu'negu Anumzamofona ke'za antahi'za hu'nezagi, zamagra Anumzane hu'za ra agi'a nomi'za, humuse hunontaze. Hagi zamagri'a neginagi antahintahizamo zamazeri savri hige'za, zamagu'amo'a hanizampi neme. 22 Zamagra antahi'zane vahe mani'none hu'za nehazanagi, zamagra neginagi vahe fore nehaze. 23 Hagi zamagra manivava Anumzamofo ra agima amigazana, erimare'za fri'naza vahe'mofo amema'agi, namaramimofo amema'agi, 4'a agazane zagagafamofo amema'agi, zmurugufati vano nehaza zagaramimofo amema'a tro hunte'naza zante ra agi nemize. 24 E'ina hu'nagu Anumzamo'a zmatrege'za, zamagra zamaguareti zamavesintaza kefo avu'avazampi unefre'za, kefoza huno havizantfa hu'nea avu'avaza zamagra zamufgare ohunte ahunte nehu'za, zamufga eri haviza hu'naze. 25 Hagi Anumzamofo tamage kea, havigereti eri revahe nehu'za, Anumzamo'ma Agra'a tro'ma hunte'nea zagaraminte monora hunte'za amage nente'za troma hu'nea Anumzamofona ra agia amivava hugazanagi anara nosaze. Tamage. (aiōn g165) 26 Ama anahu agafare Anumzamo'a zamatrege'za, vahe'mofoma agaze ami avu'avazamofo zamavesi zampi havi zamavu'zmavara nehaze. Ane'mo'za osuga zamavu'zmava hu'za zamagra zamagra monko zamavu'zmavara nehaze. 27 Anahukna hu'za venene'mo'za a'nene veazana hugazanagi, netre'za, venenemo'za zamagra zamogra monkozama hu'zanku tusiza

huno zamavenesige'za, zamagaze hu avu'avaza zamagra zamagra nehaze. Ana kumima hazazamofo, mizama'a zamagra'a zamata enerize. **28** Zamagrama Anumzamofo zamefi hunte'za agorga'ama omani'nazana neginagi zane hu'za nehaza zanku, Anumzamo'a atregeno havi antahintahizazmimo rentrako hige'za, osuga avu'ava zana nehaze. **29** Zamagripina hakare havi kefo avu'ava zamo'a avitege'za, kefo zmuzma nehu'za, veva osu agraguке antahi'zane, vahe'mofo avesi onte'zama, antahi mugizama, vahe ahefri'zama, ke ha' huza kanive oreare hu'zama, krunage hu'zama, vahe'mofo fruge huonte'zama, vahe'mofo amefi ke hu'zane, **30** vahe'mofo avufintanke huno hu kofinte'zama, Anumzamofo antahiomи zama, veganokno hu'zama, agra'ama erintesga hu zamavuzmava nehu'za, kasefa kefo avu'avaza eri fore nehu'za, zamarera zamafa agorga nomanize. **31** E'inahu vahepina knare antahintahizana omanegeno, rumofoma antahimizana omanegeno, vahe'mofoma avesinteno, asunku hunte'zana omane'ne. **32** Zamagra ko Anumzamofo kasegemo'ma fatgo osu zamavu'zmava'ma hanaza vahe'mo'za frigahaze hu'nea kea antahi'nazanagi, ana kesеgea amage nonte'za, ana kefo avu'ava zana nehu'za, mago'ane rumokizmia hiho hu'za antahintahia zamizage'za nehaze.

2 E'na hu'negu tamagra antahisazana rumo'za haviza hu'naze hutma refko huzmante gahazanagi, tamagranena anahukna hutma havi vahe mani'nazankitma mago'a kea osugahaze. Tamagrama rumokizamigu'ma havi vahe mani'nazanki'za zamata erigahaze hutama huzmantesazana, tamagranena anahukna hu'nazankino, tamagr'i'enena anazanke hurmantegahie. Na'ankure rumofoma refko nehamoka, kagranena ana hukna hu'nane. **2** Hagi antahi'none, Anumzamo'a

fatgo avu'avazanteti, iza'o anazama hania vahera refko huno
knazana amigahie. 3 Kagra rumozama anazama hazana refko
hunezmantananki, nahigenka kagra zamagrikna hunananki,
Anumzamo'ma refko huzmantesnifintira agateregahue hunka
nehane? 4 Kagra nonkano knaza amunaganagi knarezantfa
huno agazone huneranteno, akeranteno mani Anumzamo'ma
kagri'enema mani'neana? E'i anazamo'a kagritera amneza
me'nefi? Kagra nonkano knare'ma hunegantenoma kumpinti'ma
kagu'a rukrahema hananegu'ma knama kaminoma ne-
eazankura nontahino? 5 Hianagi krimpa'mo hankavetigenka
kumimofoma kamagena humizankura kavenosie. E'i kagra'a,
kefoza huno havizantfa hu'nea mizama erisana mizanka'a eri atru
nehane. Na'ankure Anumzamo'a rimpahé kna ne-enkino fatgo
hunoma refako huzama'a erinte'ama hugahie. 6 Anumzamo'a
zmavu'zamavama nehanaza avamente, magoke magokemofona
mizana amitere hugahie. 7 Iza'zo knare zamuzma huvava hu'za
nev'u'za, ra zamajima erisagu nehake'za, himamu hankave
erisigu nehake'za, haviza osniazanku nehakesamokizmia,
Anumzamo manivava zmasimura zamigahie. (aiōnios g166) 8

Hu'neanagi Agra rimpahé he'zana rukaha hutresigeno, iza'zoma
zamagruguaye nentahiza, tamage ke'mofo amage'ante zanku
zamajena hunemiza, kefo avu'ava nehanaza vahete egahie. 9
Kefoza huno havizantfa hu'nea knazamo, kefozama huvava
hu'za nevanaza vahetera egahie. Esera Jiu vahete eteno,
anahukna huno meg'i'a vahete enena egahie. 10 Hu'neanagi
masanentake avasesezama, ragi eri'zama, rimpahé fruzana
makama knare'zama nehaza vahe Anumzamo'a zamigahie.
Esera Jiu vahe zamiteno, ananteria anahukna huno meg'i'a vahera
zamigahie. 11 Na'ankure Anumzamo'a magoke mofonkuke

osuno, fatgo avesizanteti ana miko vahera refko nehie. **12**
Na'ankure meg'i'a vahe'mo'za Anumzamofo kasege krenteneana
ontahine'za kumira hugahazanagi, zamahe fanene hugahie.
Jiu vahe'mo'za Anumzamofo kasege eri'naza vahe'mo'zama
kumi'ma hanazana, ana kasegereti refkoa huzmanteno knazana
zamigahie. **13** Hu'negu kasegema antahike'zama nehamo'za,
Anumzamofo avurera fatgo osu'haze. Hianagi kasegema amage
nentaza vahe'mo'za Anumzamofo avufina fatgoa hu'naze.
14 Na'ankure meg'i'a vahe'mo'za Anumzamofo kasegema
krente'neana e'orinazanagi, zamagra zamagu'afina ko havizanki
knarezanki hu'za nentahi'za amage'nentaze. **15** E'inahu'ma
hazazamo zamagrira Anumzamofo kasegema zamagu'afi
krenteneana erintearma nehaze. Ana hu'negu zamagra zamagu'afi
nentahizageno, antahintahiza'zmimo'a zamasamino, knare'za
nehazanki haviza nehzanki huno nezmasamie. **16** Hagi
mago kna ne-enkino Anumzamo'a Jisas Kraisimpi ana miko
vahe'mofa oku'a antahintahizmia refko hugahie. Ama Knare
Musenkemo hu'nea kante neramasamue. **17** Hianagi tamagra
Jiu vahe mani'none nehutma, Anumzamofo kasegemofonte
mani'neta, Anumzamo'ene tragoteta mani'none hutma tamagra
tamavufa erisaga nehaze. **18** Tamagra Agri'ma avesi'nea
zana inazamo fatgo hune ko antahi'naze. Na'ankure agri
kasegema korapa rempi huramigeta antahi'naze. **19** Tamagra
zamavu asuhu vahe'mokizmi kama zamaveri nehuta, hanimpima
mani'naza vahe'mokizmi tavi mani'none huta nehaza zankura,
knare'za nehune hutma nehaze. **20** Tamagra tamagesama
antahizana vahe'mo'zama neginagi avu'avazama nehaza
vahe'mokizmi kana zamaveri nehune nehuta, mofavremokizmi
Anumzamofo kana rempi hunezamune huta nehaze. Na'ankure

Anumzamofo kasegefina, knare antahi'zane tamage'zana antahi vagare'none huta nentahize. **21** Tamagrama vahe'mokizmi rempi hunezamita, hagi nahigeta tamagra'a rempi huta nontahize? Tamagra musufa oseho huta nezmasamize. Hianagi tamagra'a musufa nosazo? **22** Tamagra ru venenene anene monkosa osiho huta nehazanagi, tamagra'a anazana nosazo? Tamagra havi anumzante mono huonteho nehuta, mono nozmifintira kumzafa nosazo? **23** Tamagra kasegema antahi'naza zankura tamufga erisaga nehaze. Hu'neanagi kasegema rutagrazana Anumzamofona ra agi eri haviza nehaze. **24** Na'ankure avontafepima hu'neana, Megi'a vahe'mo'zama Anumzamofo ajima huhavizama nehazana, na'ankure tamagrama hazava'u'ava zante anahu kea nehaze hu'ne. (Ais 52:5, Izik 36:20.) **25** Na'ankure Jiu vahe'motma tavufga tgahu tamavutamava zamo'ma knare'ma hanie hanutma, kasegemofa amagema antesageno'e. Hianagi kasegema rutagrenageno'a tamavufga taga nehaza tamavutamavazamo'a amne'zankna hugahie. **26** Hagi megi'a vahe'mo'za zamavufaga taga osune'za, Anumzamofo kasegema amagema'antesazana, zamufga taga osu'naza zamo'a zamufga tgahu vahekna hugahaze. **27** Tamage amega avufga taga osu, megi'a vahepinti iz'a Anumzamofo kasege amagema antesimo, Jiu vahe oku tamavufga taga hu'nesaza vahe'mota Anumzamofo kasege amage nontesaza vahe'motagu keagafi manigahaze hu'za hurmantegahaze. **28** Hu'negu tamagra tamage Jiu vahera omani'naze. Na'ankure Jiu vahe'mo'zama kaseneramante'za oku tamavufga tgama huramante'naza zamo'a tamazeri Jiu vahera ose'ne. **29** Hianagi tamage Jiu vahe'ma mani'naku'ma hanu'za, kasegemofa amage antegahaze. Tamage oku avufgama taga hu'zana agu'afi tumo'amofo Anumzamofo Avamumo erifore

hugahianki, amega avufgare erifore osugahie. E'inama nehaza vahe'mo'za vahe'mofo tegatirompage, Anumzamofontegati ra zamagima erisaza zanku nehakaze.

3 Jiu vaherema nehzana, nankna knare'za eri forera nehaze? Hifi oku'a tavufgama tagahu tavutava zampintira na'a taza hu'zana enerize? 2 Anampina rama'a tamaza hu'za me'negeta enerize! Ese zana Anumzamofo oku me'nea ke'a Jiu vaheku antahiramino eri'ama hu'ne. 3 Ana hanigeno mago'amo'zama zamentintima osanageno'a, ana zamentintima osnazazamo'a, Anumzamo'ma huvempa hu'nea ke'a rufutagigahifi? 4 I'o, Anumzamoke fatgo hu'neanki, maka vahe'mota havige vahe mani'none. Avontafepima krente'neana Kema hananana vahe'mo'za tamage hu'za nehnagenka kegagare kavrentesazana zamageteregahane hu'ne. (Sam-Zga 51:4)

5 Hianagi tagri fatgo osu tavu'tavazamo'ma, Anumzamofo fatgo avu'avazama eri fore'ma nehanigeta, tagra na'ane huta hugahune? Anumzamo'ma rimpaheranteno knazama tamisiana, e'i fatgo avu'ava hugahifi? (Vahe'mota antahintahire, ama'ina kea nehue.) 6 I'o, Anumzamo'ma fatgoma osu'nesuno'a mopafi vahe'ene mikozana refko huga osu'neankino, inankna huno refko hugahie? 7 Nagri havigemo'ma Anumzamofo fatgo avu'avazampine masa'afima eama hanigeno'a, na'ante Anumzamo'a kumi vahe mani'nane huno hugahie? 8 Hagi mago'amo'za tananke nekafriankna hu'za kegaga zamifintira kea nehu'za, mago'ane kumira nehanunkeno knare'za efore hanie hu'za nehaze. Iza'o e'inahukna nanekema nehanimo'a kna erinogu nehie. 9 Hagi na'ane huta hugahune, tagra Jiu vahe'mota mago'a nagara zamagetereta knare hu'none hugahumpi? I'o, na'ankure tagra ko ana miko Jiu vahero, meg'i'a vahera kumimofo

hankavemo refitezmantenegeta zamageta antahita hu'none. Hagi Jiu vahe'mota ru vahera zmageterenompi? **10** Avontafepi krente'neana, Magora fatgo vahera omani'ne. Magore huno omanitfa hu'ne. **11** Magore huno ama' antahi'zane vahera omanine. Mago'mo'e huno Anumzamofonkura nohakre. **12** Miko vahe'mo'za zamagena hunemi'za, ana miko'mo'za haviza nehaze. Magore huno knare'za nehia vahera omanine. Magore huno omanitfa hu'ne. (Sam-Zga 14:1-3) **13** Zamanankemo'a mati kerigamo hagaro huriankna nehie. Zamagefu'nafina havigemo avite'ne. Ha' osifavemofo avuatga zama'amo zamagitera me'ne. **14** Zamagitera vahe'ma sifnama huntezane, aka kegagamo avite'ne. (Sam-Zga 10:7) **15** Vahe'ma zamahe fri zantera ame'ama nehaze. **16** Inantego vazana vahe'ma zamazeri haviza hu'zane vahe'mofoma knama amizamo nezmavararie. **17** Inankna hu'za zamarimpa frua erigahaze zamagra ontahi'naze. (Ais 59:7-8) **18** Anumzamofonku koro hu'zana nomane. (Sam-Zga 36:1.) **19** Tagra antahi'none kasegama krente'nea ke'mo'a kasegema eri'naza vahe nezmasamie. Ana hanigeno mago'mo'a huno nagra fatgo vahe mani'noe huno osugahie. I'o miko mopafi vahe'mota Anumzamofo avurera hazenketi me'nea vahe mani'none. **20** Na'ankure kasegemo'ma hu'neazama avarari zampintira, Anumzamofo avufina mago vahe'mo'a fatgo vahe mani'noe huno osugahie. Na'ankure kasegemo, kumimofo keno antahino huzana erifore nehie. **21** Hu'neanagi menina Anumzamofo fatgozana, kasege amage'ante zantetirompage, kasefa ka taveri hu'ne. Korapama Moses'e'ma krente'nea avompima huvempa nehigeno, kasnampa vahe'mo'za hu'naza kante efore nehie. **22** Tagrama fatgo huta Anumzamofonte manisune hanuta, Jisas Kraisinte tamentintia hanunkeno, Anumzamo'a fatgo vahe

mani'naze huno hurantegahie. Mago kana omnetfa hu'ne. l'o. 23
Na'ankure maka'mota kumi huta Anumzamofona hanave'ane
kumapina umanigara osuta, atupa hu'nonane. 24 Anumzamo'a
knare eri'zama asuragiranteno Kraisimpi eri'nea zanteti, tamagra
fatgo vahe mani'naze hu'ne. Agra e'i ana zana Kraisimpi
miza seranteno katufegeta, kumpintira fru huta mani'none. 25
Anumzamo'a, Jisasina tamigeno kumitimofo nona huno korama'a
tagino, kumitia apaserante'nea zamo'a Anumzamo'a agru huno
fatgo hu'neankita, Agritema tamentinti hanuta Anumzamofontera
egahune. Anumzamo'ma e'inahu hu'neazamo, Anumzamo'a
fatgo hu'ne nehie. Ko'ma kumi hu'naza vahe'ma akoheno
mani'neno kumizmia atrezmante'nea zamo'a eama hu'ne. E'na
zamo'enena eriama huno Jisasimpima zamentintima haz
vahe'ma nezmavreia zamo'a taveri huno Anumzamo'a fatgo hu'ne
nehie. 26 Na'ankure e'i anazama hiazanteti, Agra'a fatgozana
meni knafina eriama nehie. Hanigeno kumi vahe'mo'za fatgo vahe
mani'naze haniana, e'i Jisasi Kraisimpima zamentinti hanaza
vaheku Anumzamo'a fatgo vahere huno huzmantegahie. 27 Hagi
tagra naza hunonkeno Anumzamo'a tavrenegu tavufga erisaga
hugahune? Kasegema amage'ma ante avu'avazamopi? Knare
eri'zama e'nerunazamo'o? l'o. Tamentintima hu'zamo tavufama
erisga hu'zana agatere'ne. 28 Tagri'ma tazeri knare'ma higeta
Anumzamofo avure'ma fatgo hu'nonana kasegema amage'ante
zampitiro'ompge tamentitima hunkeno tazeri fatgo hu'ne. 29
Agra, Jiu vahe'mokizimi Anumzanke mani'nefi? Agra megj'a
vahe'mokizimi Anumzanke maninefi? l'o, Agra ana mikomota
Anumza mani'ne. 30 Zamufga taga hu'naza vahe'ene, zamufa
taga osu vahe'mofona, Magoke Anumzanke mani'neankino,
zamentintima hazvaheku fatgo vahe mani'naze nehie. 31 Hagi

tagra tamentintiguke nehuta, kasegegura amnezane hugahumpi?
I'o, tagrama tamentintima hanuta kasegemofona tamage huta
avariri fatgo hugahune.

4 Abrahamu'a tagrikna vahe mani'neno, neregeho mani'neaki,
na'ane huta hugahune? **2** Hagi agri eri'zamo'ma hanigeno
fatgo hu'noe huno Abrahamu'a avufga erinte marerigahie.
Hu'neanagi Anumzamofo avurera knarera osugahie. **3** Na'ankure
avontafemo'a anage huno hu'ne, Abrahamu'a Anumzamofonte
amentinti higeno, Anumzamo'a fatgo nere huno Abrahamunkura
hu'ne. (Jen-Agf 15:6) **4** Vahe'mo'za eri'zama enerizana muse'za
zamisazegu e'norizanki, miza erinaku energize **5** Hu'neanagi
vahe'mo'za eri'za eri'zazantera Anumzamo'a fatgo vahere huno
hunozamante, hu'neanagi Anumzamo'a kefozanti eritrene hu'za
zamentintima hazageno, fatgo vahere huno hunezmante. **6**
Deviti'a anahukna huno ama anazanku nanekema hu'neana,
Anumzamo'ma kumi vahekuma fatgo vahere huno hu'nea asomu
kema hu'nea nanekefina huno, **7** Anumzamo'ma magomofo
hazenke zama'ane, kumi'ama atrentenesimo'a muse hino. **8**
Kumi hu'nesia zanku'ma Ramo'ma kumi hu'ne huno osania
zankura muse hino. (Sam-Zga 32:1-2) **9** Ama ana asomura
Jiu vahe'mofo zanke me'nefi, oku zamavufaga tagaosu megj'a
vahe'mokizmi zanene? Tagra Abrahamunkura, Anumzamo'a
fatgo nere huno hu'ne huta nehune. Na'ankure agra amentinti
hu'negeno'e. **10** Hu'neanagi inankna higeno anazana efore
hu'ne? Agra oku avufga taga hutegeno fatgo nere huno hu'nefi,
oku avufga taga osu'negeno'e? Ana hu'neankita hufra okigosune.
Abrahamu'a oku avufga taga osu'negeno Anumzamo'a fatago
nere huno hu'ne. **11** Oku avufgama taga hu'zana amentinti
hu'zamofo avame'zankino, ko Abrahamu'a amentinti higeno

Anumzamo'a fatgo nere huno hunte'ne. Oku avufgama taga osu'nere anagea hunte'ne. E'ina hu'negu oku zamavufaga taga osu vahe'mo'za zamentintima haza vahe'mokiziminena, Anumzamo'a fatgo hu'naze huno huzmantesigeno, Abrahamu'a nezmafaza hugahie. **12** Anazanke huno oku zamufga taga hu'nazamo'za Abrahamu'ma oku avufga taga osu'neno amentinti higeno, fatgo nere hu'neankna hu'za zamentinti hanaza vahe'mokizmia, Abrahamu'a nezmafa mani'ne. **13** Na'ankure Anumzamo'ma Abrahamune agehe'mokizmi huvempa ke huzmanteno, ana miko mopa zami'neana Anumzamofo kasege amage antezantera ozami'ne. Hianagi Anumzamo'enema amentintifi'ma fatgo huno mania zante ami'ne. **14** Hagi Anumzamo'ma huvempama huzmante'nemo'za kasege avarari zampinti huvempa huzmante'neazama erizasina zamentinti hu'zamo'a nena raga'a oregeno, huvempa hu'nea kemo'enena amne'za sesine. **15** Hu'negu kasege'mo'a arimpahe'za avreno ne-e. Hianagi kasegema omneresina kasegema rutagre'zana omanesine. **16** E'ina hu'negu Anumzamo'ma huvempa huzmante'neazana zamentinti haza vahe'mo'za enerize. E'i ana musezana Mosese kasege amage nentesio, nontesio Abrahamu'ma hu'neankna amentintima hanimo erigahie. Hu'negu Abrahamu'a ana miko zamentini vahe'mokizimi nezamafa'e. **17** E'i ana zanku avontafepina Anumzamo'a Abrahamuna asamino, Kagra rama'a vahe'mokizmi nezmafaza hugahane hu'ne. E'i anazama fore hu'neana, na'ankure Anumzamo'a fri'naza vahera zamasimu nezamino, hakarea'zana Agra erifore hu'ne huno Abrahamu'a amentinti hu'nea zante anara hune. (Jen-Agf 17:5) **18** Amentintima huzamofona amuha hu'zana omaneanagi, Abrahamu'a ana miko vahe'mokizmi nezmafana manigahue

amentinti azeri hankavetinegeno, Anumzamo'a negeno fatgo nere hunte'ne. Kagehe'moza hakare hanageno hamprigara osugosie hu'ne. (Jen-Agf 15:5) **19** Abrahamu'a 100'a kafuzage maniteno keana avufgamo'a mofavre eri fore huga osigeno, Sara'enena tvavateno mofavre kasentega osu'neanagi, Abrahamu'a amentinti hu'neazana otre'ne. **20** Anumzamo'ma huvempa hunte'nea zankura Abrahamu'a tare rimpia osu'neanki, amentintimo'a mago'ane hankavenetigeno anazamo'a Anumzamofona ragia ami'ne. **21** Anumzamo'a huvempama hunante'neazana amane hunantegahie huno rimpia fru Abrahamu'a erine. **22** E'ina hu'negu Abrahamu'ma amentinti hu'nea zanku, Anumzamo'a fatgo nere huno hunte'ne. **23** Anumzamo'a Abrahamunku fatgo nere huno hunte'neana, agrake azahu'za erisia zanku huno kreonte'neanki, **24** tagriku enenku huno krente'naze. Jisasi'ma fri'nefinti azeri oti'nea Rantimofonte tamentintia hunentonkeno, Anumzamo'a tazeri agru hurante'ne. **25** Na'ankure tagri kumiku Jisasina atregeno efri'nemofo azeri oti'nea zamo, Anumzamofo avurera tagrira tazeri fatgo vahera se'ne.

5 E'ina hu'negu tamentinti nehuta Anumzamofo avufina fatgo vahera nemanune. Na'ankure Jisas Kraisi Rantimo'ma hu'nea zamo higeta, tagra Anumzamo'enena trimpa fru huta nemanune. **2** Na'ankure Kraisimpi tamentinti hunazamo tavreno amama mareri agatere'hea kumapi efregeta menina otineta, hankavea e'hereta, Anumzamo'ma msazama'anema esigura avega ante'nonazamo higeta musena nehune. **3** E'i ana zankerompage tagrama knafima ufresuta muse hanune. Na'ankure tagra antahi'none, e'i ana knazampina knare hu'neankino taza hanigeta oti hanavetineta ana knazama enerita kazigazi huta vugahune. **4** Knazama erino kazigazi huno vu'zamo'a, tavutava fore higeno,

ana zamo'a Anumzamo tavregahie amuhazana eriama nehie.

5 Hagi amuhama humita avega anteta mani'nona zamo'a, amuhama hu'nazana erinotre. Na'ankure tagra antahi'none Anumzamo'ma Ruotge Avamu tamigeno, avesizama'a Ruotge Avamu'afi hvuzino tagu'afi eritagi avinete. 6 Tagratia taza hugara osu'nonkeno, Kraisi'a kumitigura kna fatgo'are efri'ne.

7 Tamage mago'mo'a fatgo vahekura frisnue huno osugahie. Hagi mago'mo knare'ma hanuno'a, amne knare vahekura frigahie. 8 Hianagi Anumzamo'a tusiza huno avesirantenea zama eriama hu'neana, kumi vahe mani'nonkeno Kraisina huntegeno, tagri kumiku huno efri'ne. 9 Hagi Kraisi koramo sese hurantegeta, Anumzamofo avurera fatgo vahe mani nonankino, tamage huno Anumzamofo rimpia hezampintira tagu'vazigahie. 10 Na'ankure Anumzamofo ha' vahekna huta mani'nonkeno, Nemofo frizampi Anumzamo'a ete mago'ane tazeri mago hu'ne. E'na hu'neankino Anumzamo'ma rimpia aherante'nea zampintira Kraisi asimu'a atreneankita tagri'ma taza huno tagu'vazizana erigahune. 11 Hu'negu Rantimofo Jisasi Kraisimpi Anumzamofona musena huntiegahune. Na'ankure Rantimofo Jisas Kraisimpi ete mago'ane, Anumzamo'a tazeri mago hu'ne. 12 E'na hu'negu magoke ne'mo kumi higeno, ama mopafina kumimo'a efre'ne. Kumimo'a fri'za awareno egeno, fri'zamo'a ra huno maka vahetera vuno eno hu'ne. Na'ankure maka vahera kumi vahe mani'none. (Jen-Agf 3) 13 Kumimo'a ama mopafina ko efore hutegeno, henka kasegea zami'ne. Na'ankure kasegema omnnereresina, e'i kumi nehaze huno huozmantesine.

14 Hianagi fri'zamofo hanavemo'a Adamu knaretima eno Mosese knarema ehanati'neana meno e'ne. Adamu hu'neakna kumi osu'nazanagi, frike'za hu'naze. Adamu'a henkama Kraisima

esia Ne'mofo avame'za efore hu'ne. **15** Hu'neanagi Adamu'ma kumimo'ene, Anumzamofo knare musezamo'enena magoknara osu'ne. Na'ankure magoke ne'mofo Adamu kumimo frizana rama'a vahetera awareno ege'za fri'naze. Hianagi Rana Anumzane, mago nera Jisas Kraisimpi knare asunkuzane kumiti apaserante zana tami'ne. **16** Asunkuzama'afi Anumzamo'a tami'nea musezamofo raga'amo'a mago ne'mo'ma kumi'ma hu'nea zamofo raga'agnara osu'ne. Na'ankure Adamu kumimo knaza awareno e'ne. Hianagi Anumzamo'ma amne tami'mea musezamo, rama'a kumi hu'nonanagi Anumzamofo avurera tazeri agru hu'ne. **17** Na'ankure magoke ne'mo Adamu kumi higeno, agri kumite fri zamo'a vahera kva'gri zamanteno e'neanagi Anumzamofo asuntgi'zane fatgo musezama'afi manisamo'za fri zamofone kumimofo hanavea magoke Ne' Krais Jisasimpi azeri ageteregahaze. **18** Magokemo Adamu hu'nea kumimo maka vahe'mofontera knazana erino e'ne. Hianagi magoke ne'mo Kraisi fatgo avu'ava hu'neazamo tazeri agru higeta, Anumzamo'enena fatgo huta nemanita, kasefa manizana hakaremota eri'none. **19** Magoke ne'mo ke hantagi'nea avu'avazamo higeno, rama'a vahe'mofona kumi vahera huzmante'ne. E'ina kante magoke Ne'mo ke erizafa hu'nea avu'ava'zamo rama'a vahera zamazeri fatgo vahe tro huzmantegahie. **20** Anumzamo'ma kasegema zami'neana miko vahe'mo'za kumi'ma nehazaza kesazegu zami'ne. Hianagi vahe'mo'zama rama'a kumi'ma hazageno'a, Anumzamofo knare asunku'zamo'a mago'ane rama'a nehie. **21** Ana hukna huno kumi'mo miko vahera kegava hu'neno fri'zana avrezamigeno, menina Anumzamofo knare asunku'zamo fatgo avu'ava zana eri tamisigeta, Jisas Kraisi Rantimofompinti manivava asimura erigahune. (aiōnios g166)

6 Hagi tagra na'ane huta hugahune, mago'ane kumira
nehanunkeno Anumzamo'a asunku hurantevava hugahio? **2** l'o
anara osutfa hugahie. Tagra kumi'ma huzampina ko fri'none,
nahanigeta kumpina manita neone? **3** Hifi Jisas Kraisinte'ma
tragoteta mono tima frenona, e'i ana hunonana mikamota agri
fri'zane hagerafiteta oti'nazana tamagra ontahi'nazo? **4** E'ina
hu'negu tagra mono tima fronazamo'a, Kraisi'ene frunke'za
aserente'naze nehie. Hagi Kraisima fripinti'ma azeri oti'neaza
huno, Nefa'a Agra'a hankave'anu Kraisi'enema fri'nompintira
tazeri oti'neankita, tagranena kasefa manizampi Kraisi'ene
maninunku anara hu'ne. **5** Tagrama Kraisi'ene hagerafita
fri'nonema hanuta, anahukna huno tagri'enena tazeri'otisigeta
tasimura erigahune. **6** Tagra antahi'none kumi tavutavazana
Jisasi'ene rugeka zafare hanti'neana, kumimofo hankavea
tagripina omanesiegu anara hu'ne. Tagra mago'ane kumimofo
kazokzo eri'za vahera omapi'none. **7** Na'ankure iza'o fri'nemo'a,
kumimofo kinafintira katufentegeno fru huno mani'ne. **8** Hagi tagra
Kraisi'ene frinesuta, tamentintima hunana tagranena Kraisi'ene
manigahune. **9** Tagra ama ana zankura antahi'none. Na'ankure
Kraisi'a fripintira oti'neankino, mago'anena ofrisigeno fri'zamo'a
kegava huontegahie. **10** Agra magoke zupa friteno kumimofo
hankave eritre'ne. Hu'neanagi Agra menina asimu erino mani'ne.
Hagi asimu erino mani'neankino, ete mago'enena ofrigahie. **11**
Hagi tamagra'a refko huta antahiho, ko kumimofo hankavefintira
fri'none huta nehuta, Krais Jisasimpi, Anumzamo'ene kasefa
huta mani'none huta hiho. **12** E'ina hu'negu atrenkeno amega
tamavugamofona kumimo'a kvagrioramantena, tavugamofa
havi avesizana ovariraho. **13** Atrenkeno mago tmavugamo
kumimofo eri'zana e'norina, Anumzamofo tamavugfa ami

vagareho. Na'ankure tamagra ko fri'nazane, hu'neanagi menina kasefa maniza erita mani'naze. Hagi ana miko tamavufgamo'a knare'zama eriforehu erizaza me'enkeno, Anumzamofona ragi amino. **14** Na'ankure kasegemofo agorga'a omani'naze. Hagi Anumzamofo asuntgi zamofo agorga'a mani'nazagu, kumimo'a kva huormantegahie. **15** Mago'ene kasegemofo kvafina omani'none. Anumzamofo asunku'zamo taza hu'ne. Ana hu'negu mago'ene kumira hugahumpi? A'o, ana osugahune. **16** Tamagra amage antegahune hanaza zamofo kazokzo eri'za vahe'ma mani'nazana ontahi'nazo? Tamagra amne kumimofo kazokzo eri'za vahera manigahazanagi, ana zamo fri kante tamavreno vugahie. Anumzamofo amage antesutma fatgo nomaniza erigahaze. **17** Anumzamofona muse huntaho, korapara kumimofo kazokzo eri'za vahe mani'nazanagi, menina tamagu'areti rempima huramuazana amage'uentaze. **18** Menina kumimofo kazokzoma hu' kinafina omani'naze. Hagi tamagra fatgo avu'avazamofo kazokzo eri'za vahe mani'naze. **19** Na'ankure vahe'motama kefo tavu'tvama nehuna zante nagra antahintahitamia eriama hu'naku kazokzo eri'za vahete'ene kva vahetera hunte'na nehue. Korapara kasege ha'nentagita agru huno avu sese osu tamavutamava huta vu'nazanagi, menina atretma fatgozamofo kazokzo eri'za vahe nemanita, agru nehutma ruotge huta manigahaze. **20** Hagi kumi'mofo kazokazo eri'za vahe'ma mani'nazagu, fatgo avu'ava zamofo eri'za vahera omani'naze. **21** E'ina hu'negu nankna tamazahuza eri'naze? Ko'ma hu'naza tamavutamava zamo'a menina tamagaze nehie. Ana avu'avazamo'a fri'za erifore nehie. **22** Hu'neanagi menina kumimo'a kina reoramanttegetma, Anumzamofo kazokzo eri'za vahe'a mani'nazageno, e'i ana avu'avazampinti tamazahu'zana enerizageno, sese huramanteno

tamazeri ruotage nehiankino, manivava tamasimu tamamigahie.
(aiōnios g166) 23 Na'ankure kumi'mofo mizana fri'zane. Hu'neanagi
Anumzamofo muse'zana, Krais Jisasi Rantimofompi mago'za
hunterompge, amne manivava asimura tami'ne. (aiōnios g166)

7 Hagi nenfugatane nasaraheta, tamagra ko kasegea antahita
keta hu'nazanki ontahi'nazo, asimu'ma erino mani'nea vahera
kasegemo kegava huntegeno mani'ne. Hagi frisigeno'a
kasegemo'a kegava huontegahie. 2 Hu'neanagi avame kema
hunte'na hanuana, mago a'mo'ma vema erisigeno'a, ana
a'mofona kasegemo kina rentesigeno, neve'ma asimu'ma
erinoma mani'nesigeno'a neve'ene manigahie. Hianagi neve'ma
frisigeno'a, ana kasegemofo kinafina omanigahie. 3 Hagi
neve'ma ofri mani'nesnigeno'ma ru vema erisiana agra monko
avu'avaza hugahie. Hagi neve'ma frisigeno'a kasegemo'a kina
reontegahiankino, ru vema erisaniana monko avu'ava zana
osugahie. 4 E'ina hu'negu, nafuhetane nasaraheta tamagra
Jisasi'ene tragotaza zamo'a ko Jisasi'ene frita, kasegemofo
agorga omani'naze. Hagi menina Jisasima ko fripinti'ma azeri
otinemo'ene erimago huta Anumzamo'ma ave'nesia avu'ava zana
hugahune. 5 Kumi tavutavamo kegava hurantenegeno'a, kumima
hu' tavesizamo'a tagu'afina efore nehie. Hagi kasegemo'a havi
tavutvamofo avesiza azeri otigeta, kumira hunkeno frizana
avreno ne-e. 6 Hu'neanagi tagra ko kasegemofo kinafintira
katuferantegeta fru huta mani'none. Na'ankure Kraisi'ene
frunkeno mago'ene kasegemofo kinafintira tavre'ne. Hianagi
menina amne Anumzamofo erizana erinenteta, korapa tavutva
huta kasegefima krente'naza kemofo amage' ante'zanompage,
Avamumofo kasefa kante vugahune. 7 Hagi na'ane hugahune,
nagra kasegemo'a kumi me'ne nehufi? I'o. Tamage kasegea

kumira omnene. Hianagi kasegemo kumira tamaveri nehie.
Nagrama rumofo zanku'ma kenunu hu'zana, kumire hu'na antahi
amara osuanagi, kasegemo eriama hige'na keama nehue. **8**
Hianagi kumimo'a ama ana kasegefinti kankamunku keno tavu
masevemahu tavesizana, tagu'afina erifore nehie. Kasegema
omanesigeno'a kumimo'a hankave'a omanesigeno frigahie. **9**
Kasegema ontahinorera nasimu erina mani'noane. Hianagi
kasegema egeno'a kumimo'a asimu erino mani'gena nagra
fri'noe. **10** Ana kasegemofo eri'zana vahe'mofo asimu ami'zanagi,
nagra kasegefintira nasimura e'noruanki, kasegemo'a nahenefrie.
11 Na'ankure kumimo'a kasegefinti kankamuma'a keno erifore
huno renavatga higeno kumimo'a nahe fri'ne. **12** Hianagi
kasegemo'a ruotge higeno, kasegema hunte'neana ruotage
huno fatgo huno knare hu'ne. **13** Hianagi inankna hugahie,
kasegema knarezane nehuazamo nahe nefrifi? I'o, kumi'mo'a
knare zampinti frizana erifore nehie. Hu'negu kumi'mo'a haviza
hu'ne huno Anumzamo'a kasegea eri taveri higeta negone. **14**
Hu'negu kasegefina hazenkea omane'ne, na'ankure mopare
navufga eri'na mani'nogu kumimofo kazokzo eri'za vahe' mizante
atreankna nehue. **15** Nagra'ama nehua navunavara kena
antahina nosue. Na'ankure nagra fatgo zama hunakurema
huazana nosue. Hianagi navesarama hunte'na osugahue hu'na
huaza nehue. **16** Hianagi nagri'ma navenosia zama hanuna,
Anumzamofo kasegemo knare hu'ne hugahue. **17** E'ina hu'negu
nagrani'a kefozana nosuanki, kumimo nagu'afi me'neno ana
kefozana nehie. **18** Higena nagra antahi'noe, knare zana
nagu'afina omane'ne. Knare zana hu'nakure hu'na nentahuanagi,
anazana hugara nosue. **19** Nagrama knare'zama hugahuema
huazana nosue, hagi havizama osugahue huaza nehue.

20 Hagi menima osnuema huazama nehuana, e'i nagrani'a nosue. Hianagi nagu'afina kumi'mo me'neno, anazana erifore nehie. **21** E'ina hu'negu nagrama koana, e'inahu avu'avamo'a nagrira nagu'afina me'neankina fatgo zama hunakure hua zana nosue. **22** Nagra Anumzamofo kasegea ana miko nagu'areti navesinentoe. **23** Hianagi nagu'afina ru kasege me'nea zamo antahintahini'anena hara nehie, e'i ana kasegemo nagu'afi me'neno nazeri kumi'mofo kasegere kina vahe'nenante. **24** Nagra haviza hu'na keforenoanki, iza ama fri navufga naza hugahie? **25** Nagra Jisas Kraisi Rantimofompi Anumzamofona muse huntoe, Anumzamofo kasegea antahintahini'areti amage nentuanagi, amega navufgamo'a kumimofo kazokzo eri'za e'nerie.

8 Ana hu'negu menina Krais Jisasi'ene hagerfi'haza vhahera, havi vhahera huno keaga huozamantegosie. **2** Na'ankure Jisas Kraisimpi asimuma ami Avamumofo kasegemo, kumimofone fri'zamofo kasegefintira kazuferamantene. **3** Anumzamo'ma Mosesema ami'nea kasegemo'a tazahugara osu'ne, na'ankure amega tavufgamo kumike hianagi, Anumzamo'a tazahunaku ru kankamu retro huno Agra'a Mofavre tamigeno mopafi avufga erino tagrikna hu'neanagi, Anumzamo Agra'a Mofavre museza tamigeno kumimofo hankavea ahe fanane hu'he. **4** Fatgo huta kasegemo hu'neankante manisunegu Anumzamo'a anazana hurante'ne. Higeta menina tagra ko'ma kefozama nehunazana netreta, Ruotge Avamumofo avesizante nevune. **5** Mopafi zamufga'mofo avesizama neviririzamokizmia, antahintahiza zmimo'a mopafi zama huzankuke nentahize. Hianagi Avamupima nevaza vhahera Avamumofo zankuke nentahize. **6** Hu'negu ko'ma kumima nehuna tavutava zanku'ma antahizamo'a fri kante tavreno nevie. Hianagi Avamumofo atregeno antahintahi

kegava nehimo'a asimu erino rimpia frune nemanie. 7 Hu'negu
iza'zo kumimofo avu'ava zampima mani'namo'za Anumzamofona
ha' renentaze. E'inahu antahintahine vahe'mo'za Anumzamofo
agorga'a noomaniza, Anumzamofo kasegea amagera antegara
osu'naze. 8 E'ina hu'negu kumi avu'avazampima mani'naza
vahe'mo'za Anumzamofo ave'nesia avu'avara nosaze. 9
Hu'neanagi tagrira kumi tamavutama zamo'a kava huoramanteno.
Hagi Anumzamofo Avamumo kva huneramante. Tamage
huno Anumzamofo Avamu'mo'ma tamagu'afima mani'nenketa,
Avamumofo kvafi manigahaze. Antahiho, Kraisi Avamumo
zamagu'afima omani'nenimo'za, Kraisi vahera omani'naze.
10 Kumimo amega tamavufga tamahe frigahianagi, Kraisima
tamagu'afima mani'nesnigeta tamasimu erita fatgo vahe
manigahaze. Na'ankure Anumzamo tamavrene. 11 Hagi
Anumzamofo Avamu'mo Jisasi'ma frinefinti' azeri ot'i'nea
Avamu'mo'ma tamagu'afima mani'nesnigeno'a, Kraisima fripinti
azeri ot'i'neaza huno tamagu'afina ana avamu mani'neankino,
amega tamavufgamofona asimu amigahie. 12 E'ina hu'negu
knare neneputane nasarahete, mopafi tavufgamofo avesizana
ovriritfa hugahune. 13 Hu'negu tamagrama kumimofo avesi
avariritma manisnuta frigahaze. Hu'neanagi Avamumofo
hanavere'ma kumi tamavutmavazamofo ahefrisuta, tamasimu
erita manigahaze. 14 Na'ankure maka veamo'za Anumzamofo
Avamu'ma atrazageno, vanaza kama zamazeri fatgoma
nehimo'za, Anumzamofo mofavre mani'naze. 15 Ana hu'negu
tamazeri kazokzo eri'za vahe tamanteno tamazeri korohu
Avamura tamagra e'ori'naze. Hianagi tamagra Anumzamofo
mofavre tamazerisegeta Avamu erineta Anumzamofonkura Aba,
Nerafa'e nehune! 16 Ruotge Avamumo tagri avamura taza

higeta huama huta, tagra Anumzamofo mofavre mani'none
nehune. **17** Tagrama Anumzamofo mofavre mani'nesnuta,
Anumzamo huhampri rantenea zamofona Kraisi'ene magoka
erisinti haregahune, Kraisi'ma hu'neaza huta knazama erisuta,
Kraisi'ene magoka rantagi erita manigahune. **18** Nagrama
nentahuana, menima e'neruna tatazamofona, henka'ama
omerisuna masazamo'a ageteretfaza hugahie. **19** Na'ankure ana
miko zama Anumzamo'ma tro'ma huzamante'nea zantmimo'za,
henka'ama Anumzamofo mofavremo'zama e'ama'ma hanaza
knagura, tusiza hu'za nazupa fore hugahie hu'za aveganentaze.
20 E'i ana zantmimo'za zamagra'a zamavesitera mani haviza
hu'za mani'neza ome haviza hu'za novaze, hagi Anumzamo
anara hoho hige'za anara nehaze. **21** Ama knare'zama
fore hanige'za kesagu nentahize, havi'zama hu'za negasriza
kinafintira kazufe'za Anumzamofo mofavreramimofo mago'zamo
kina re'ozmantege'za amne nemaniza avasese zama'afi
ufregahaze. **22** Na'ankure hago antahi'none, Anumzamo'ma
maka zama tro huzmante'nea zamo'za, a'nemo'za mofavre
kasentenaku hazageno zmata negriankna zmata negrige'za
mani'neza ama knarerera enehanatize. **23** E'i ana zantamimoke'za
zmata e'norizanki, tagranena Anumzamo'ma kumpinti miza
serantenemota, Ruotge Avamumofo ese raga'a kna huneta
tagua'fina krigi neruta, tusiza huta Anumzamoma tazeri mofavre'a
zama hanigura avega nentone. E'i ana zana kinafi tavufgamo
mani'neaza Anumzamo katufesnigeta fru huta mani'snuna zanku
avega nentone. **24** Ama ana zama fore hanigu nentahunkeno
tagura nevazie. Hu'neanagi fore hanigu antahintahi hu'zama fore
hanigeno kesiana, e'i fore hanigu antahitahi hu'zana omanene.
Hagi ko'ma fore higeno ke'nea zankura iza fore hanigeno kesigura

nentahie? 25 Hu'neanagi onke'hona zama fore hanigeta kesunku antahintahima nehanuta, agozone huta mani'neta hanavetita avega nentone. 26 E'ina hukna kante Ruotge Avamumo hanavetima omane'nea vahe'mota taza nehie. Nazanku nunamuna hugahune, e'i ontahi nonanagi, Ruotge Avamumo Agra'a tagri taza huno nunamu hunerante. 27 Hagi Anumzamo'a vahe'mota tagu'a negemo Ruotage Avamumofo antahintahia antahine. Na'ankure Ruotge Avamumo'a Anumzamofo avesiza avririno mono vea kevumofonku nunamu hunezmantie. 28 Tagra antahi'none, Anumzamo'a Agri'ma avesinentamokizmi so'eza zamigu maka zamatina eri'zana energize. E'ina vahera Anumzamo'a Agri'a avesi avrilihogu zamagi hu'ne. 29 Hu'negu Anumzamo'a korapa antahineno Nemofo kna hihogu huhamprizamante'ne, hanageno Nemofo'a rama'a mofavre nagapina kota mofavre manigahie. 30 Hagi huhamprima nezamanteno'a, Agrite ehogu ke hu'ne, Agra'a fatgo vahere huno hunezmanteno, Agra'a zamazeri antesga huno ra zamagia zami'ne. 31 Hagi ama ana knare'zama hurantea zankura na'ane huta huga hune? Anumzamo tazama hu'nesigeno'a, iza hara rerantegahie? 32 Anumzamo'a Nemofona aze'orino makamotagu huno tami'neankino, hakarezana tamigahie. 33 Anumzamo'ma huhampri zmante'nea vahera iza keaga huzmantegahie? Agra e'i Anumzamo fatgo vahere huno hurante'ne. 34 Iza hu haviza hurantegahie? Ko Jisas Kraisi'a tagrikura efrino otino Anumzamofona azantmaga kaziga umani'neno, tagri tagi erino Anumzamofontera nunamuna hunerante. 35 Kraisi avesi zampintira nazamo tazeri atregahie? Tusi'a kna zamopi, amuhoma hurante zamopi, tazeri haviza huzamopi, tatamanegria zamopi, kukenagu atupa hanuna zamopi hazenke zamo'a

tagripima Jisasi avesizama me'neana eri otregahie. 36
Avontafemo'a anage hu'ne, Kagrikure nehu'za maka kna tahe
nefrize. Sipsipi afumofo ananke akafrankna nehaze hu'ne.
(Sam-Zga 44:22) 37 Hakare zana hurantega hazanagi, agatere
hankavetia Kraisi'ma avesirante'nemo agra'a mani'ne. 38
Nagrama hankave antahintahima nentahuana, fri'zamo'o, asimu
erino mani'zamo'o, ankeromo'zo, havi avamumozo, meni fore
nehaza zamozo, henka'a fore hanaza zamozo, mago'a hihamu
hankvemozo, 39 amunagamu me'nesaza zamo'zo, fenkagamu
me'nesaza zamo'zo, makaza Anumzamo tro huzmante'nea
zampinti mago' zamo'e huno Anumzamofo avesizama, Jisas
Kraisi Rantmofompi me'nea avesi zampintira tazeri otregahie.

9 Hagi havigea nosuanki, Kraisimpi tamage hu'na nehue.
Ruotage Avamumo'ene nagu'a kenege'na ama' nagu'nagesareti
ama kea tamage nehue. 2 Tusi'a nasuza enerugeno, tumo
niamo'a nata krivava nehie. 3 Na'ankure, nagrima navesiana
Anumzamo'a Jekopu nagara zmvaresiegu navenesie, Kraisima
nagri navesima avaririnigena, nagra nunamuna hanenko
Agra'a vahepintira nahe natitrena, nenafu'za nagri nona
erigahaze. 4 Zamagra Israeli vahera Anumzamo'a zamavarege'za
Agri mofavregna hu'haze. Anumzamo zamagripi masazama'a
eri ama hu'ne. Agra'a huvempa huno, Agrane zamazeri
hagenerefino kasege'a zami'he. Agra'a mono'ma huntesaza
kankmuna neramino, knare zama erisuna zanku'ma huvempa
hurantenea tamine. 5 Zamagri nezmagehoma zamagima me'nea
nagapinti Kraisi'a efore hu'ne. Kraisi'a, Agra Anumza mani'neno
makazamofo aseni mani'negu maka knafina, Agrike agi'a
hentesga huvava hugahune! Tamage. (aiōn g165) 6 Anumzamo'ma
Israeli vaheku'ma huvempa huzamante'nea kea eri raga orenefi?

I'o. Na'ankure maka'ma Israeli vahepima fore hu'naza vahe'mo'za Anumzamofo vahekera omani'naze! 7 Abrahamumpinti fore hu'naza vahe mani'nazanagi, e'i ana zamo'a zamazeri tamage Abrahamu mofavrea nose. Na'ankure avontafemo huno, Abrahamu'a mago'a mofavre'zaga zamante'neanagi, Mofavreka'a Aisakimpinti kagri vahera fore hugahaze huno hu'ne. (Jen-Agf 21:12) 8 E'i vahe'mota kasenentona kna huno Abrahamu'ma kasezmante'nea mofavremo'za, ana miko Anumzamofo mofavregera omani'naze. Hagi Anumzamoma huvempama huzmante'nemo'za, Abrahamu mofavrea mani'naze. 9 Na'ankure Anumzamo'a huvempa huno, Ama ana knare'ma anaga'a kafure'ma esuana, Sera'a ne'mofavre kasentegahie hu'ne. (Jen-Agf 18:10) 10 E'i ana mofavrea nerageho Aisakie. Hagi Aisaki'a, Rebeka ara erigeno, kugave'za mofavre kasezanante'ne. 11 Zanagrira kase ozantanenegeke, havizane knare zanena osu'nakeno, ko Anumzamo'a nezanrerana kea asmine. (E'i ana kemo huama huno, Anumzamo agra'a eri'za kante vahe'mokizimia ko huhamprizmantene. 12 Hianagi knare avu'ava zante keno kea osu'ne.) Neznarerana Anumzamo asmino, Nempuamo'a nagana'amofo katoza humigahie huno hu'ne. (Jen-Agf 25:23) 13 Anumzamofo avontafepi krente'nea kante, Jekopuna navesinentuanagi, Isona navesra hunentoe hu'ne. (Mal 1:2-3) 14 Hagi na'ane hugahune? Anumzamo'a fatgozana nosie huta hugahuno? I'o anara osugahie! 15 Na'ankure Anumzamo'a amanage huno Mosesena asmi'ne, Izano narimpa fru huntenaku hanumofona, narimpa fru hunentena, izano nasurgintenaku hanufona nasuragintegahue hu'ne. (Eks-Ati 33:19) 16 E'ina hu'negu Anumzamo'a vahe'mota tavesite'ene erizanterompge, Agra'a avesizante asuragirante'ne. 17 Na'ankure

Anumzamofo Avontafepina Anumzamo'a Feronkura anage huno
asamine, Nagrama huhamprigantogenka kagrama mani'nanana,
agafa'a me'nerere. Na'ankure Nagri hankavemo'a kagripi
eama nehanigeno, Nagri nagimofona huama hu'za kokankoka
vanageno, ra huno vuno'eno hugahie hu'ne. (Eks-Ati 9:16) **18**
E'ina hu'negu Anumzamo'a izano asuraginte'naku himofona
asuraginenteno, izano rimpama eriginaku'ma himofona erinegie.
19 Hagi tamagra anage huta nagrikura hugahaze. Na'a higeno
Anumzamo'a tamagrikura keontahi vahere huno nehie? Agra
hugahaze huno hiazana tamagra nehzafi? **20** I'o, e'i anahukna
kea osiho. Tamagra izagata, vahetafamota Anumzamofona
tro huhaviza hurantenane huta nehaze? Tro'ma huntenesia
zamo'a, tro'ma huntenesimofona, nahigenka amanahuknara
hunka trohunantenane huno huntegahifi? **21** Mopa kavoma tro
nehanimo'ma, mopareti'ma kavoma troma hunaku'ma hanuno'a,
amanne magoke moparetira konariri zama ante kavoa tro
nehuno, havizama haniazana ante kavo tro osugahifi? **22**
E'i ana kanteke Anumzamo'a, rimpa hezana eriama nehuno,
hankave'a eriama hugahie. Hianagi Agra ra zampi akoheno
mani'neno zamazeri haviza hania vahekura za'za knafina
zamaveganente. **23** E'i ana zama hu'neana, Agri'a mareri'nea
masazama eriama huno asunku'ma huzmante'nea vahetera
eriama hu'ne. E'i anazana ko Agra'a retro huzmante'nemo'za
erigahaze. **24** Jiu vahepinti'ene, meg'i'a vahepintima zmavaretere
hunefina, tagranena anampina mani'none. **25** Hosea'ma
kasnampa kema hu'nefina, Ru vahekura Nagri vahere nehu'na,
navesi'ozmante'nesua vahekura navesizmantegahue huno hu'ne.
(Hos 2:1, 23) **26** E'ina hanugen, tamagra Nagri vahera
oman'i'naze huno zamasmi'nesia kumatera, kasefa huno mani'nea

Anumzamofo mofavreramine hu'za hugahaze. (Hos 1:10) 27
Kasnampa ne' Aisaia'a Israeli vaheku huno, Israeli vahe'mo'za
rama'a hu'za hagerinkenafi kasepankna hu'nazanagi, anampinti
osi'amokizmi Anumzamo'a zamagu'vazigahie. 28 Na'ankure
Ramo'a fatgo avu'ava huno ame huno maka mopafi vahera
refko huzmantegahie. (Ais 10:22, 23) 29 Ko'ma Aisaia hu'nea
kante, Hihamu'ane Ramo tagehe'mokizmia zamahokeno osi'a
zamatrege'za mani'naze. Anama osuneresina Sodomune Komora
kumate vahe'mo'za fanane huvagare'naza kna huta fanane
huvagarontesine. (Ais 1:9) 30 Hagi na'ane huta hugahune?
Megi'a vahe'mo'za Anumzamofo avufi fatgo vahe mani'zankura
nohakazanagi, zamentinti hazageno Anumzamo'a fatgo vahe
mani'naze nehie. 31 Hu'neanagi Israeli vahe'mo'za fatgo vahe
manisunegu maraguzati'za kasegemofo nevaririzanagi, ana
zamofona nena'a eriforera osu'naze. 32 Na'a hige'za anara
osu'naze? Na'ankure zamagra zmentintia osu'naze. Hianagi
eri'zama erisaza zanteti fatgo vahera Anumzamofo avurera
manigahune nehu'za, agigozmi havereti tanafa nehaze. 33
Anumzamofo avontafepi krente'neana anage hu'ne, Keho,
Saionia vahe'mokizmi zamagigozmi have ante'noankino,
vahe'mo'za zamagigo zamite'za tanafa hugahaze. Hagi iza'o
Agrite amentinti hanimo'a agazegura osugosie hu'ne. (Ais 8:14,
28:16)

10 Hagi nafuhetane, nasaraheta, nagri'ma nagu'afima
navenesigena Jiu vaheku'ma Anumzamofontega nunamuma
nehuana, zamahokeno zamaza hanigu nentahue. 2
Na'ankure nagra anage hu'na Israeli vahekura huama
nehue, Anumzamofona antahimi'za avesi avu'avara hanavetiza
nevaririzanagi, Anumzamofo antahi'zana antahi amara hu'za

novaririze. 3 Na'ankure Anumzamofo fatgo avu'avazankura nohakrazanki, zamagra'a zmauzmavateti fatgo zmauzmavara erifore hugahune nehu'za, Anumzamofo fatgo avu'avazamofo agorga'a nomanize. 4 Na'ankure miko kasegemofona Krais'i a emeri knare huvagarene. E'i ana agafare iza'zo Agrite'ma zamentintima hanamo'za Anumzamofo avurera fatgo vahe manigahaze. 5 Fatgo avu'avazanku'ma Mosese kasegemo'ma hu'nea kante krente'neana, Ina ne'mo kasegemo'ma hu'nea kante fatgo avu'avazama hanimo'a, ana fatgo avu'avazanteti asimu erigahie hu'ne. (Lev-Pri 18:5) 6 Hu'neanagi amentintiretim Anumzamofo avure'ma fatgo huno mani'zankura anage hu'ne, Iza monafinka vuno Kraisina tazahinogura avrefenkamia tamigahie hunka kagu'afina ontahio. 7 Hifi iza fri vahe kerifina uramino, Kraisina fripintira avreno marerigahie? (*Abyssos g12*) 8 Hu'neanagi na'ane huno hu'ne? Kemo'a tavaonka'are me'nne, e'i ana kea kagipine tumo ka'afine me'nne. (Diu-Kas 30:12-14) E'i ana kea amentinti kemofonku tagra huama nehune. 9 Hagi tamagra'ma tamagipinti huama huta Jisasi'a Ramo'e nehutma, Anumzamo fripinti Jisasina azeri oti'ne huta tamagu'areti tamentinti hanageno'a, tmaguvazigahie. 10 Na'ankure tamagu'areti tamentinti hazageno, Anumzamo'a fatgo vahere nehigeta, tamaginuti huama nehazageno, tamahokera nehe. 11 Anazankura Avontafemo'a anage hu'ne, Iza'o Agrite'ma amentinti hanimofona agaze huontegahie hu'ne. (Ais 28:16) 12 Na'ankure mago'zamo'a Jiu vahe'ene megj'a vahe'mokizmi amu'nonpina ruzahura osu'ne. Magoke Ramo ana mikamokizmi Rana mani'neno, Agritegama kezamatiza vahera rama'a asomu hunezmante. 13 Na'ankure Iza'zo Ramofo agima ahesaza vahera zamaguvazigahie. (Jol 2:32) 14 Hagi zamentintima hunontesamo'za, inankna hu'za

zamaza hinogura antahigegahaze. Hagi inankna hu'za Agri agenkema ontehinesu'za zmentintia hugahaze? Hagi agenke ama huamahu vahe'ma omaninesige'za, inankna hu'za antahi amara hugahaze? 15 Hagi kema erino ome huama hu vahe'ma humaozmante'snage'za inankna hu'za mono kea huamara hugahaze? Knare Musenkema eri'zama aza vahe'mokizmi zamagamo'a hentofaza hu'ne huno Avontafepi krente'ne. (Ais 52:7) 16 Hu'neanagi ana maka vahe'mo'za Knare Musenke e'ori'naze. E'inanku kasnampa ne'mo' Aisaia huno, Ramoka iza ama anankema huama'ma nehunkeno'a amentintia hugahie hu'ne? (Ais 53:1) 17 E'ina hu'negu vahe'mo'za ke naneke nentahizageno, zamentintia erionetie. E'i anankea Kraisina Knare Musenke me'ne. 18 Hu'neanagi nagra amanage hu'na nehue. Tamage Israeli vahe'mo'za ana nanekea antahinafi? Izo zamagra antahi'naze. Anumzamofo avontafepi hu'neana, Zamagenkemo'a ama mopamofona maka kaziga vuno eno hu'ne. Zamagri kemo'a maka kokankoka vuno eno hu'ne. (Sam-Zga 19:4) 19 Mago'ane nagra tamantahinegoe, Israeli vahe'mo'za antahinira osu'nazafi? Kotazana Mosese'a amanage huno hu'ne, Nagra meg'i'a vahekuke hanugenka kaniveregahane. Antahizazmi omne'nea vahekuke hanena, krimpa hegahie hu'ne. (Diu-Kas 32:21) 20 Hagi Aisaia'a hakavetino anage hu'ne, Nagrikura nohakraza vahe'mo'za, nagefore hu'naze. Nantahi nogaza vahete Nagra'a eama huge'za nenagaze. (Ais 65:1) 21 Hu'neanagi Israeli vahekura amanage huno Anumzamo'a hu'ne, Nagra hakare zupa zamavarenakura nazana rutaneroanagi, ke'ni'a zamefi hunenamiza namagera nontaze hu'ne. (Ais 65:2)

11 Hagi amanage hu'na nehue, Anumzamo'a Agra'a vahera avesra huzmantenefi? l'o anara osugahie. Na'ankure nagranena

Israeli nere, Benzamini nagapinti Abrahamu negehone. 2
Anumzamo'a Agra'a vahe korapa huhampri'zmante'nea vahekino
ozmatre'ne. Ontahi'nazafi mono Avontafe'moma kasnampa ne'
llaijanku'ma hu'neana? Elaija'a Israeli vahekura amanage huno
Anumzamofontega nunamuna hu'ne, 3 Ramoke, kasnampa
vaheka'a zamahe nefrina, kre'sramna vu itaraminka'a tgana
vazinetre'za, nagrake mani'noge'za nahe frinaku nehakraze. (1
Kin 19:10) 4 Hu'neanagi na'ane huno Anumzamo'a ke nona'a
hunte'ne? 7 tauseni'a vahera, Bali havi anumzantera zamarena
re'za monora huonte'namokizmia zamazeri frakuge'za mani'naze.
(1 Kin 19:18) 5 E'inahu kna menina hu'ne. Maka Israeli
vahe'mo'za Anumzamofona zamagenta humizafinti, osi'a naga
Anumzamo'a asuragi zamanteno huhampri zamantenemo'za
mani'naze. 6 Hagi Anumzamo'ma asunku huzmanteno
huhamprima zmantene'sniana, e'i eriza enerizazante anara
osu'ne. Hagi eri'za enerizazantema huhamprima zmante'simpga
asuntagizamo'a, asuntagizana omnesine. 7 Hagi na'a fore
hu'ne? Israeli vahe'mo'za fatgo vahe manisune hute'za ana'ana
hu'za vu'nazanagi, fatgo vahera osenazanagi, huhamprima
zmante'nea vahe'mo'za fatgo vahera sazageno, ruga'amokizmia
zmarimpamo'a hanavetige'za, Anumzamofo kea ontahi'naze.
8 Avontafepi krente'neana, Anumzamo'a zamazeri zmautoko
hu avamu nezmino, zmavua onke'sazegu reso nehuno, ke
ontahisazegu zmagesa renknirege'za, ontahiza manime e'za
ama knare ehanati'naze. (Diu-Kas 29:4, Ais 29:10) 9 Hagi
Devitia amanage huno hu'ne, Zamatrekeno rama'a ne'zama ne
tratema eri atru huno nezamo'a, kukomo zamazeri anka nehuno,
zmagigo zmi havere tanafa hazankna nehina mizazmia eriho.
10 Zamatrekeno zamurgamo'a hanintiri nehinke'za nonkeza,

zamagenamo fagagina pri hute'zage maka kna maniho. (Sam-Zga 69:22-23) **11** Hagi mago'ane zmantahinegoe, Israeli vahe'mo'zama tanafa hu'za traka hu'nazana ete oraoitinaku traka hu'nazafi? I'o trakama hu'nazana otigahaze. Hu'neanagi Anumzamofo zmefi humiza nona'a, Anumzamo'a megia vahe'mokizmia havi avu'ava'zampintira zmaresige'za, Israeli vahe'mo'za megi'a vahera kanive rezmantegahaze. **12** Hagi Israeli vahe'mo'za kumi'ma hu'naza zamo, kokankoka vahetega marerisa asomura vu'ne. Trakama hu'naza zamo'a marerisa asomura megi'a vahe'mokizmia huzmante'ne. Hu'neanagi Israeli vahe'mo'za Anumzamofoma zamefima huomizasina, inanknahu asomu kokankoka vahe'mo'za erizasine. **13** Ana maka kema nehuana, megi'a vahe'mota tamagriku nehue. Anumzamo'a megi'a vahe'mokizmi aposol manio huno huhampri'nantenegu ama ana eri'zamo'a nagripina kota eri'zani'a me'ne. **14** Mago'a kankamumpinti megi'a vahe'mota tamagripi eri'zani'a enerisugen, Jiu vahe'nimo'za kniveneresageno, zmahoke ahesiegu nehue. **15** Na'ankure Israeli vahe'mo'za Anumzamofo zmefi humiza zamo, kokankoka vahera Agrane zamazeri mago zamarimpa hu'ne. Hagi inankna hugahie Israeli vahe'ma Anumzamo'ma ete zmaresnia zamo'a, e'i fripinti oti'za zamasimu erizankna hugahaze! **16** Bretima krenaku heru'ma anteneza anampintima esema refko hu'za kre'za Anumzamofoma nemisageno'a, ana maka herunte'naza bretimo'a ruotage hugahie. Zafa'mofo rafunamo'ma ruotgema hu'enkeno'a, ana maka azankunamo'enena ruotge hugahie. **17** Hu'neanagi olivi zafamofo mago'a azankuna'aramina hantagi netreno, tamagrira afi olivi zafamofo azankuna'a mani'nazageno, tamavreno olivi zafare rukamrermantegeta

amunozmifi mani'neta, zamagrane knare masavena agafafinti enerize. **18** Hu'negu tamagra azankuna'a mani'none hutma rantmagia e'oriho. Na'ankure tamagra rafunamofona aza nosazanki, arfunafinti tamaza hu'zana enerize. **19** Tamagra anage hugahaze, tagri rukamare'rantesnigu azankuna'aramina hantgi zmatrene. **20** E'i tamage, Jiu vahe'mo'za zamentinti osazagu hantgi netreno, megi'a vahe'mota tamentinti hazagu tamazeri rukamareramante'ne. Tamagra'agura antahisga osutma, Anumzamofonku koro huntaho. **21** Na'ankure Anumzamo'ma olivi zafamofo azankuna'a eri hantjima zamatrenesuno'a, tamogra enena tamatresigeta omanigosaze. **22** E'ina hu'negu Anumzamofo fru avu'ava ene hihamu avu'ava'anenku tamagesa antahiho. Trakama hzamokizmia Anumzamo'a zamazeri haviza nehie. Hianagi tamagrira fru avu'ava hurmantegahie. Tamagrama Anumzamofo fru avu'avazama huta ovanageno'a, ru tamagri'enena ana zanke huno ru hantagi tamatregahie. **23** Hagi Israeli vahe'mo'za zamentinti osu zamavuzmavapinti'ma zamagu'a rukrehe hanageno'a, ete Anumzamo'a ana azankunara erino zafa'arera rukamregahie. Na'ankure Anumzamo'a amne anara huga hu'neankino, amne anara hugahie. **24** Na'ankure tamagra afi olivi zafamofo azankuna'a mani'nazageno, taga huno olivi zafa fatgore rukamreramante'neankino, Olivi zafa azankuna'a erino ete olivi zafa fatgorera rukamare zmantesigeno'a, knarezantfa hugahie. **25** Hagi nafuhetane nasaraheta, ama oku kea antahini hanazegu nagrira nave'nesie. Antahi'zantmifina antahi'zane vahe' mani'none huta rantmagia e'oriho. Mago'a Israeli vahe'mokizmi zmarimpamo'a erigineankino, mani'nenageno Anumzamo'a megi'a vahera zamavregahie hu'neama'a efregahaze. **26** Anumzamo'a ana maka

Israeli vahera eteno zamavregahie. Anumzamofo avontafepi
anage huno krente'ne, Vahe'ma knazampintima zamavre nera,
Saioniti egahie. Agra Jekopu nagapintira Anumzane tragoteno
omani avu'ava zana emeri atregahie. **27** Koma Nagrama
huvempa huhagerafi kema huzmante'noa kemofo amage antena,
kumi'zmia eritre zamantegahue hu'ne. (Ais 59:20-21) **28**
Israeli vahe'mo'za Anumzamofo ha' vahekna hu'nazageno,
Knare Musenkemo'a meg'i'a vahemotarega ne-e. Hianagi
zamagrira huhampri zamante'neankino, zamesizmente'ne.
Na'ankure zamagehemofonku huno zamesizmante'ne. **29**
Na'ankure Anumzamo'ma musezama zami'nea vahepintira,
ete ana zana antahintahi'a ete ruzahera hunora e'origahie. **30**
Korapara tamagra meg'i'a vahe'mota Anumzamofo kea amagera
onte'nazanagi, Anumzamofo kema Israeli vahe'mo'za menina
ontahizageno, Anumzamo'a tamagrira asuragi tamante'ne.
31 Ana hu'negu Jiu vahe'mo'za Anumzamofo kea amagera
ontazageno, Anumzamofo rimpa fruzamo'a meg'i'a vahe'mota
tmagrite e'neankino, ana hukna huno tamagritetira ete vugahie.
32 Anumzamo'a maka vahe'mokizmi asuragizmantenaku ana
maka'mokizmi zmatrege'za keontahi avu'avazamifi, kina hu'za
mani'naze. (*eleēsē g1653*) **33** Iza Anumzamofo marerisa
fenozama'agi, antahizama'agi, knare antahintahizama'anena
refko huno kegahie? Anumzamofo knare antahintahizama'ane
avu'avazama'a refako huta antahiamara huga osu'none. **34** Iza
Ramofo antahi'zana antahino keno hu'ne? Hifi iza antahintahi'amo
agaterenesigeno Ramofona antahintahia amigahie? **35** Hagi iza
Ramofona esera agatereno razana ami'nesigu, ete Ramo'a nona
huno mizasentegahie? (Jop 35:7) **36** Na'ankure Agripinti ana

maka zamo'a fore nehuno, Agri hankavefi mikozamo'a me'ne.

Miko zupa Ragi Agra erivava hanie, Tamage. (aiōn g165)

12 E'ina hu'negu, nafu'naganaheta tamantahinegoe, Anumzamo'ma asuragiramante'nea zanku nentahitma, tamagra'a asimu erino mani'neno, Anumzamofonte Kresramana viankna hutma amivareta tamavufa nemita, mani ruotge nehutma, Anumzamofo ragi amiho. E'i avamupima mono hu'zamofo tamavutmavaza mene. **2** Hagi ama mopafi avu'avazanena tagrora oteho. Hianagi tamagra atrenkeno antahintahitamia Anumzamo tamazeri kasefa nehanigeno, tamavutamava zamo'a ruzahē hino. Anama hanuta, tamage Anumzamofo avesizamo'a, knare huno haviza osuno, fatgo hu'ne huta eriama hugahaze. (aiōn g165) **3** Na'ankure Anumzamo'ma asunkuzama'areti asumaraginantenereti, maka motarega amanage nehue, tamagratinigura antahinkeno rana osenketa, vahe'mo'za nemaniza kante maniho. Tamagra'a tamavutamava refako hutma negeta, Anumzamo tamami'nea tamentintireti, tamagra ina avamente mani'nafi refko hutma keho. **4** Magoke tavufgafina hakarea tavufga hunte'neanagi, e'i ana maka tavufgamo'za magoke eri'zana e'norize. **5** Tagri tavufgamo hu'neankna huta tagra rama'a vahe mani'nonanagi, tagra Kraisimpina magoke avufga mani'neta, ruzahu ruzahu avufga'a mani'none. **6** Anumzamo'a Agra'a asunkuzanteti, ruzahu ruzahu eri'zama eri'zamofo muse'zana magoke magoke'mota tamitere hu'ne. Hu'negu Anumzamo'ma kasnampa kema hu hankavema kaminesigenka, Anumzamo'ma kami'nesia kamentinti avamente huama huo. **7** Hagi ru vahe'mokizmi zamazahu musezama tagripima me'nesigeta, so'e zantfa huta zamaza hanune. Hagi rempi huzame musezama

erinesuta, rempi huzami so'e hanune. **8** Iza'o ru vahe'mokizmi zamazeri hankaveti musezama agripima me'nesigeno'a, zamazeri hankavetigahie. Hagi vevahu musezama agripima me'nesigeno'a, mago'a zankuma atupama hanaza vahera zamisige'za rama'a erigahaze. Hagi Anumzamo'ma vahe kva huzamante hankavema aminesiana, agra'a ana eri'zana agu'areti huno eriso'e huno erino. Hagi vahe'ma so'e hunte musezama erinesimo'a, musezampinti so'e zana huzmaverino.

9 Tamage hutma vahe'mofona zmavesizmanteho. Kefo avu'ava zana tamagena hunenteta, knare avu'ava zana azeri hankavetihoh. **10** Tamagra tamage hutma ovesinte avesinte nehuta, tamagra tamavufga anteneramita arumokizmi husga huzamanteho. **11** Tamavesra osutma hanavetitma eri'zana erinkeno, Avamumo'a tamazeri otina Ramofo eri'zana eriho.

12 Fore hanigu hankave antahintahima hunemiza zankura musena nehuta, tusi'a knazama fore'ma hanigetma kazikazi huta nevutma nunamu huvava hiho. **13** Anumzamofo vahe'mo'zama mago'a zankuma atupa hanagetama, zamazama hanagura tro huta maniho. Onkenesnaza vahe'ma esnageta nontamifi kehuta zamavarenteho. **14** Knama tamisamokizmia asomu ke huzmanteho. Anumzamo'a asomu huramantesie nehutma, zamazeri haviza hanie hutma osiho. **15** Musema hanaza vahe'enena muse nehuta, zavi'ma atesnaza vahe'enena zavira ateho. **16** Ovesinte avesinte huta magoke avamente maniho. Tamagra tamavufga erisaga osiho, hianagi agi omane vahe'ene manizanku tamavesino. Tamagra ana miko'zana antahi'none huta osiho. **17** Mago vahe'mo'ma havizama huramantena, ana nona'a havizana huonteho. Ana mikozama hanafina fatgo tamavutmaya nehinke'za, miko vahe'mo'za

tamageho. **18** Tamagrama ana hanutma, miko vahe'enena tamarimpa fru huta manigahaze. **19** Rone' nimota mago'mo haviza hurmantena nona'a huonteho. Hagi Anumzamofo fatgo rimpa hezampi atrenkeno vino. Na'ankure avontafepina anage huno krentene, Nagra'a nona'a huzamantena mizana zamigahue huno, Ramo'a hu'ne. (Diu-Kas 32:35) **20** Hianagi ha'ma remantesaza vahe'mo'za zamagaku'ma hanageta, ne'zana zamiho. Tinku'ma zamavesina, tina zaminke'za neho. E'i ana huknazama hanazana, zamagrama nehaza zmavuzmava zankura zamagaze hugahaze. (Prov-Knr 25:21-22) **21** Tamagra atrenkeno havi avu'avazamo'a tamazeri agate'oreno, hianagi knare tamavutamava hutma havi avu'avara agatereho.

13 Hagi kamani vahe'mokizmi agorga ana mikomota anteramita manigahune. Na'ankure miko hanavea Anumzamofontegati e'neankino, Anumzamo'ma hankavea kamani vahe'mokizmia zamige'za fore hu'za mani'naze. **2** Hu'negu iza'o kamani vahe'ma ha'rentesimo'a, Anumzamofo trake ha'renteankino, ana knazana agra'a erigahie. **3** Na'ankure kamani vahe'ma mani'nazana, fatgo zama haza vahe zamazeri korera nosaze. Hianagi kefozama haza vahe zamazeri korera nehaze. Kamani vahe'ma kore huozmantesue hanunka, fatgo kavukva nehuge'za, kazeri antesga hihio. **4** Kamani vahe'ma mani'nazana tamagri knare zanku huzmanteg'e'za mani'nazanki'za, Anumzamofo eri'za vahere. Hianagi kagrama hazenkema nehanunka, korera hugahane. Na'ankure zamagra hazenkema hanaza vahe'mokizmi, knomazamino zamazeri fatgohu hankavea eri'naze, kano zamiza zamazeri fatgo hanaza agafare, Anumzamo'a zmantege'za mani'naze. **5** E'ina hu'negu kamani vahe'mokizmi zmagorgama mani'zamo'a knare hu'ne. Hianagi

zmaheno zamazeri ante fatgo huzankukerompage, tagra'a tagu'tagesafina fatgo'za nehune huta antahigahune. **6** Ama ana agafare takisi zagoa miza nehune. Na'ankure kamani vahera Anumzamofo eri'za vahe mani'naze. Hakare'a knazupa zamagra vahe'ma kvagrizmante eri'za enerize. **7** Hagi ana miko vahe'mokizmi zama eri'nesaza zana eteta zamiho, takisi zagoma zamiho hunesizana neminka, fenoma mizasenante takesi zago miza hiho hanageta miza nehuta, kore huzmanteho hu'nesaza vahera, kore hunezmaneteta, ra zamagi zamiho hu'nesia vahera, ra zamagi zamiho. **8** Atrenkenonofima hu'zamo'a tamagripina omaneno, hagi rumokizmi zamavesinte nofimoke tamagripina meno. Na'ankure tva'ontamirema nemanizamokizmigu avesintezamo'a, kasegemoma hu'nea ke amage ante fatgo nehie. **9** Na'ankure kasegefina amanage hu'ne, Ru vene a'enena monko'zana osuo, Vahera zamahe ofrio, kumzafa oso, vahe zantera keganunu osuo hu'ne. (Eks-Ati 20:13-17) Hagi ruga'a kasegemo'za ama magoke kasegefi me'naze. E'i ana kasegemo huno, Kagragu'ma kavesi negantanankna hunka, tava'onkare maninesimofona avesinto hu'ne. (Lev-Pri 19:13) **10** Tava'onte'ma mani'namokizmi avesintezamo'a havizana omnene. E'i ana hu'negu vahe'ma zamesinte'zamo'a kasege eri knare nehie. **11** Tamagra ama anahu tamavutamava hiho, na'ankure tamagra antahinaze, menina knamo'a kofa hu'nefi mani'nonanki, masenazafintira otiho. Na'ankure tahokeno tavrezamo'a, tagu'ama rukrehema hunontetima amare'ma ehanatiana, hago menina erava'o nehie. **12** Hanizamo'a kofta huno vagaresigeno, masama fore'ma hania zamo'a kofta hu'ne. Ana hu'negu hanizamofo avu'ava zama nehu'na zana netreta, masamofo ha' kukena hanune. **13** Ana hu'negu masare'ma

nehazankna huta knare tavutava nehuta, hanizamofo muse zampina omanita, aka tina oneta neginagi osuta, monko'zana nosuta, monko avu'ava hu'zampina omanita, mago rimpas osu avu'ava zampinen omanita kanive oreho. 14 Hu'neanagi atrenkeno, Ramo, Jisas Kraisi tamagripina mani'neno, kefozama hu tamavesizana eri atreno.

14 Hagi zamentintifima hanavema ot'i'nesamokizmia tamagrarega zamavarenentetma, antahintahifina knare hu'ne haviza hu'ne hutma zamentinti zamimofona refko huozmanteho. 2 Na'ankure mago'amokizmi zamentintimo'a knare hu'neankita makazana amane negahune nehaze. Hianagi mago'amokizmi zamentintimo'a hanave'otineankiza, hozafi nezanke nenaze. 3 Hagi fatgo hune huno nehuno maka'zama nenesnimo'a, anama nosanimofo kefenkamia ote'no. Hagi mago'a nezama nonesnamo'za, maka'zama nenesnamokizmia refko huozamanteho. Na'ankure Anumzamo'a zamavre'ne. 4 Kagra izaga rumofo eri'za vahera refko hunezmantane? Agri'a kva'amo refko huntene, kagra eri'zanka'are otigahananki, kagra evuramigahananki huno huntegahie. Hu'negu Ramoke azeri otisigeno, otino manigahie. 5 Anahukna kante mago'mo'a, mago zagegnamo'a ruotage huno ruga'a zagegna zamagaterene huno agesa nentahisigeno, ete rumo'a ana'maka zagegnamo'za mago'zanke hune huno agesa nentahie. Hagi mago mago'mo'ma, mago knaguma knare hu'ne huno'ma antahinemisia knagura, atrenkeno tamarimpamo'a fruhino. 6 Iza'o mago zage'gnamo ruotge hu'ne nehuno, Anumzamofo mono huntesiana, agra e'i Anumzamofo mono hunente. Iza'zo ruzahu ruzahu neza nenemo'a, Anumzamofonku nentahiza negahaze. Na'ankure zamagra Anumzamofona susu huntete'za nenaze. 7 Na'ankure

tagra tasimu erita mani'nonana tagra'a suzana omanene, nefruna
zana tagri'a zana omanene. **8** Na'ankure tasimuma eritama
mani'nonana, Ramofonte nemanune. Hagi frunana Ramofonte
nefrune. E'ina hu'negu frisuno, tasimu erita manisunana
Rantimofo'za me'ne. **9** E'i ama ana agafare, Kraisi'a friteno
ete otino asimu erino manine. Hu'negu asimu erino mani'nea
vahe'ene, fri'naza vahe'mokizmi Ra mani'ne. **10** Hu'negu,
nahigenka mono negafu amentintigura knare osu'ne hunka refako
hunentane? Hifi nahigenka mono negafuna hufenkami neutrane?
Na'ankure ana maka'mota Anumzamo refako hurantesia tratera
otigahune. **11** Na'ankure Mono Avontafepina amanage huno
krente'ne, Ramo'a amanage nehie, tamage Nagrama kasfa
hu'na mani'nesnuge'za maka vahe'mo'za Nagrite zmarena
neresageno, anamiko vahe'mo'za, huama hu'za Anumzamofona
ragi amigahaze hu'ne. (Ais 45:23) **12** Ana hu'neankita magoke
magokemota Anumzamofona maka'zama nehu'na zamofo
kea asamigahune. **13** E'ina hu'negu rumokizmima refko
hunezmantona zana atreho. Tamagra'ma antahintahitamima
retro'ma hanazana, mono neramafu zamentintifi zamagigo
zamino, zamazeri tanafahu havegna huta omanisune hiho. **14**
Hagi Ranimo Jisasi'a eriama hige'na kena atahinama huana,
mago'zamo'e huno agru osu'ne huta osugahune, mago'zamo
agru osune hunkama antahisanana, e'i ana zamo'a kagritera
agru osugahie. **15** Hagi mago'a zama nenesana zankuma mono
negafuma antahi havizama nehanigenka, kagra mago'ane
avesi zampina nomanine. Atrenkeno nezama nesaza zamo'a
Kraisi'ma zamagrikuma huno fri'neamokizmia zamarimpa
zamazeri haviza osino. **16** Ana nehuta atrenke'za knare hune
huta tamentinti nehanaza zankura, havizane hu'za osiho. **17**

Na'ankure Anumzamofo Kumara, ne'za ne'zane, ti ne'zana omanene. Hianagi Ruotge Avamupi fatgo avu'avazane, arimpa fru'zane, musenkase hu'za me'ne. **18** Na'ankure iza'o Kraisima ama ana avu'avatetima avaririsimofona, Anumzamo'a muse hunentesigeno, vahe'mo'za nege'za hugnare huntegahaze. **19** E'ina hu'negu atrenketa musezama mono kevufima fore'ma hanea zanku nehuta, tagra'ragara ozeri hankaveti, azeri hanaveti huta tamentintifina hageta ra hanune. **20** Nezantekure huta Anumzamofo eri'zana eri haviza osiho, ana miko'zamo'a avusese hu'ne. Hianagi knare'ma osu'niana, mago'mo'ma nefu azeri tanafa hunaku'ma nesia zamo'e. **21** Hagi ame'a onesuno, negi ti onesuno, mago'azama hanunazamo'a mono nerifu amentintia azeri tanafama osanunana knare hugahie. **22** Kamentintima hanana, kagra Anumzamofo hanave kamentinti hunemine. Iza'o amentintima nehania zanku'ma antahintahifima haviza nosue huno osnimo'a muse hino. **23** Hu'heanagi tare antahintahi nehuno, nesimo'a haviza hane huno agu'amo'a nesamie. Na'ankure amentinti huteno none, hagino ana miko'zama amentintima osu'neno hania zamo'a kumi hugahie.

15 Hagi tamentinti zampima hanavema tinomota, hanavema ot'i'nesamokizmia zamaza hanune. Hagi tagra'ama taza huzankukera ontahisune. **2** Mago'magomota tava'ontirema nemanisamokizmi knare'zanku huta zamaza nehanunke'za, zmentintifina hanaveti'za hage'za marerisaze. **3** Na'ankure Krais'enena agra'a avufga aza haniazankura ontahineanki, avontafepina amanage huno krente'ne, Vahe'mo'za huhavizama hugantazana, nagri nagofetu huntegahaze hu'ne. (Sam-Zga 69:9) **4** Na'ankure ko Anumzamofo avontafepima miko kema krente'naza kemo'a, tazeri antefatgo nehuno,

tazeri hankavetisigeta knazantifina kzigazi huta nevuta, fore'ma hugahie huno avontafepima krente'nea zankura avega antegahune. 5 Anumzamo knazantifima tazeri hankavetigeta kzigazi huta nevumo, Kraisimpina mago tamarimpama hu'zana tamisigeta, magoke huta manigahune. 6 E'ina hu'negu ana mikomota mago tamarimpa nehuta, tagrira erinte mago huta, tagu'areti Rantimofo Jisas Kraisi Nefa, Anumzamofona ragi amisune. 7 E'ina hu'negu, Kraisima tamagrima tamavre'neaza huta, tamafuhe'ina zamavareho, ana hanageno Anumzamo'a ragi erigahie. 8 Antahiho, Anumzamo'ma Israeli vahe'mokizmi nezmageho huvempa huzmantenea kea eriama hanige'za kesazegu, Kraisi'a eri'za vahekna huno zamagritera e'ne. 9 Ana hu'negu meg'i'a vahe'mo'za Anumzamo'ma asunkuma huzmante'nea zankura, ragi amigahaze huno avontafepina krente'ne, E'ina hu'negu nagra meg'i'a vahepin rankagi negamina, nagra zagamera hu'na kagi'a erisaga hugahue hu'ne. (Sam-Zga 18:49) 10 Mago'ane amanage hu'ne, Megi'a vahe'mota, Agri vahe'ene musenkase hiho hu'ne. (Diu-Kas 32:43) 11 Ete mago'ane amanage hu'ne, Ramofona ragi amiho, maka meg'i'a vahe'mota, ana miko mopafi vahe'mota agi erisaga hiho hu'ne. (Sam-Zga 117:1) 12 Ete mago'ane kasnampa ne'mo Aisaia'a anage hu'ne, Jesimpinti efore hanimo'a, Agra meg'i'a vahe'mokizmi kva mani'nenke'za, Agrite zamazama huzankura amuhara hugahaze hu'ne. (Ais 11:10) 13 Fore'ma hanigu'ma amuha'ma nehu'na zamofo Anumzamo, miko musezane rimpa fruzana tamentintifina antevi'netena, Ruotge Avamumofo hankavefi fore'ma hanigura amuhara hugahaze. 14 Nafu nagnaheta nagrani'a antahuana, tamagripina knare tamavutmavamo'ene mika'a antahizamo avite'nena, ozeri

fatgo azeri fatgo hugahaze. **15** Hianagi mago'a nanekegu avompima hankavetina kreraminoana, Anumzamo'ma asunku'ma hunante'nea zanteti ete mago'ane huramagesama hanigu krerami'noe. **16** Krais Jisasi eri'za eri'na megi'a vahetega pristi vahe kna hu'na, Anumzamofo Knare Musenke huama nehue. Ana hanige'za megi'a vahe'mokizmia Ruotge Avamumo zamazeri ruotage hanige'za, Anumzamo'ma muse huno eneria Kresramanavu ofagna hugahaze. **17** E'ina hu'negu Anumzamofo eri'zama enerua zankura, Krais Jisasimpi knare hu'noe hu'na navufa rana hugahue. **18** Mago'a zankura nagra navufga erisaga osugahuanki, Kraisi'ma nagripima eri vagare'nea eri'zamo higeno, megi'a vahe'mo'za amagera nentaze. **19** Ruotge Avamumofo hankavefine, avame'zane, ruzahu ruzahu kaguvaza erifore hu'zamofo hanavere, Kraisi musenkea Jerusaleti huama hu'na Ilirikium kaziga (Masedonia-Italy) ome huvagare'noe. **20** Hianagi nagra, Kraisi agima nohaza vahepi Knare Musenke huama hu'na zmasamisuegu, tusi'za huno navenesiankina nagra, rumo'za kinaza tratera nona nonkue. **21** Hu'neanagi mono avontafepina amanage huno krentene, Agri agi agenkema ozmasminesaza vahe'mo'za negesnage'za, Agri agi agenkema ontahinamo'za antahi ama hugahaze hu'ne. (Ais 52:15) **22** Nagra nantuma antena eme tamagenaku'ma huana ama agafare ome'noe, na'ankure ama megi'a vahe'mokizmi kumapina mono naneke huama nehune. **23** Hianagi nagra ama kaziga menina hago eri'zana eri vagare'noe, hagino rama'a kafufima emema tamagesue hu'na avegama ante'noa zamo'a tusi'za huno navesie. **24** Nagra Speini kumate vunaku antahintahia retro nehuankina, vanu'na onsi'a kna tamagrane umani'nena mono kea nehu'na, vunaku'ma hanugetma naza hanagena vugahue. **25** Hianagi aagra menina

mono kevu naga museza antezmantazaza zaminaku, Jerusalemi kumatega nevue. **26** Na'ankure Masedonia kumateti'ene Akaia kumateti mono kevu'mo'za muse hu'za Jerusalemi kumate mono kevumokizmia amu'nozmifi, zamunte omne nagamokizmi zago eritru hazage'na erina nevue. **27** Zamagra zagoma eri atruma hazazankura tusi'a muse hu'naze. Zamagrama antahi'zana nofi hu'nazaza katufeankna hu'naze. Na'ankure meg'i'a vahe'mo'za Avamumofo asomu'ma eri'naza zanku, Jiu vahera amega zamufamofo zamaza hu'za zami'naze. **28** Hagi ama ana eri'zama erivanere'na, ana zama zamivaretesuna, nagra Speini kumate enevanuna, eme tamageme vugahue. **29** Nagra antahi'noe tamagritegama esu'na, Krais asomumo avite'enkena egahue. **30** Nafu'naganahete, nagra tamantahigoe, Rantimofo Jisas Kraisine Ruotage Avamumofo avesizante, amama amuhoma e'nerua zantera nagri'ene eme hagerafita, Anumzamofontega nunamu hunantesazegu nehue. **31** Nunamu nehinkeno zamentinti osu Judia vahepintira Anumzamo'a nagu'nevazi'na, Jerusalemi mani'naza vahe'mo'za eri'zamofonkema hanuana antahinamiho. **32** Hanigena Anumzamofo avesizama me'nena, nagra tamagritega muse hu'na egahue. Hanigeta tagra ozeri hankaveti azeri hankaveti hugahune **33** Hagi menina rimpa fru Anumzamo tamagrane manisie. Tamage.

16 Hagi Senkeria kumateti diken i mono eri'za e'neria nersaro Fibina knare'za hunteszegu nehue. **2** Muse hutma Anumzamofo naga'pina ragi me'nea vahekna huta Ramofompina nevareta, nazankuro atupama haniazana aza hihogu nehue. Hagi ana a'mo knare huno nagri'ene rama'a vahe'mokizmi taza nehia aki, knare huta aza hiho. **3** Krais Jisasimpima magokama eri'zama e'nerunamokiznia Prisirane Akuilakizania muse keni'a

zñasamihō. 4 Tamage nagu'vazikura zanasimu atresna'aza
neha'e, nagrakera keke hunoznantoanki, ana miko megī'a
mono naga'mo'za musenke huznantaze. 5 Anahukna huta
nozniafima atru nehaza mono nagara musenke huzmantoe. Esia
kazigati, kotama Kraisinte agu'a rukrahe hu'nea roneniamofo,
Epenetusi musenke huntoe. 6 Hagi Maria'a tamagriku hūno
hanavetino eri'zama eneria a'mofona musenke hugantene
hutma asamihō. 7 Nagri'a nagapinti Antronikasi ene Juniake,
nagrane magoka kina hu'namokizni musenke huznantene
hiho. Aposol naga'mo'za zanage'za antahiza hu'naza netrene.
Zanagra kota Kraisintera zanagu'a rukrehe hutake'na, nagra
henka nagu'a rukrehe hu'noe. 8 Ampliatusina, Ramofompi
navesinentua ronenimofona musenke hunteho. 9 Magoka Kraisi
eri'za e'neruna ne' Ubanusina musenke hunentena, knare
roneni'a Stakisina musenke huntoe. 10 Kraisi eri'za tamage hūno
eneria ne' Apellesina musenke hunentena, Aristobulusi nompi
nemaniza nagara, musenkea huzmantoe. 11 Nagri nagapinti
ne' Herotionina musenke hugante'ne hutma asamihō. Nasisusi
nompi, Ramofonte mani'naza nagakura musenke huramante huta
zmasamihō. 12 Ramofonte eri'za hanavetike eneri'a atre Traifena
ene Traifosakigiznia musenke hurantene huta zñasamihō.
Ramofonte tusi'za hūno hanavetino eri'zama energie'na
navesinento'a a'mofo Pesisinena musenke hugante'ne huta
asamihō. 13 Rufusina Ramo, Agri'a suzane hūno huhamprinteno
avrenemofone, agri nerera'a nagri'enena nenareraza hu'nea ara
musenke hugante'ne huta asamihō. 14 Asinkritusima, Flegonima,
Hemesima, Patrovasima, Hemasi'zanema nemaniza tafuhe'ine,
tasarahehe'ina musenke huramantene huta zmasamihō. 15
Filologusima, Juriama, Nereusi ene nesaro a'ene, Olimpas'i'ene,

ana miko Anumzamofonte mani'naza nagatega musenke huramante'ne hutma zmasamiho. **16** Maka Kraisi mono naga'mo'za tamagritega musenke atrazageno vie. Fatgo huno ruotge hu'nea avu'ava hutma agi hene, agona ahene hutma maniho. **17** Hagi nafu nagnahete, hankavetina ama kea neramasamue, Amu'nontamifima atane'zama avrenente'za, koma rempi huramigeta antahi'naza ke'ma, havigeretima eme rempi huramiza tamentintima eri kragogo negiza vahekura, kva hunetma mani kore hutma ogantu'a maniho. **18** Na'ankure e'i ana vahe'mo'za Rantimofo Kraisi eri'zana e'norizanki, zamagra'a knare zankuke nentahize. Haga huno masave ke zamireti, fatgo zamavu'zmava'ma nehaza nagara zamarevatga nehaze. **19** Kema amage nentaza tamavutmavamofo nanekea maka vahe'mo'za antahi vagare'naze. Hianagi tmagrikura musezanimo'a avite'ne. Hianagi nagri'ma navenesiana, knare antahintahi zanteti tamagra knare'ma hu'nesia avu'ava nehutma kefovana osiho. **20** Arimpa fru Anumzamo'a kofa huno Satana, kagafi azeri antefenka anteno rehapatigahie. Rantimofo Jisas Kraisi asuntgizamo'a tamagrane mesie. **21** Magoka eri'za eneru'a ne'mo Timoti'a musenke atreramante. Anahukna hu'za nagri naga'mo'za, Lusiusima, Jesonima Sosipeta'zanena musenke hurmantaze. **22** Nagra Tertiusi'na, Poli'a kea nehige'na ama avoma kre'noa ne'mo'na musenkea Ramofo agifi hurmantoe. **23** Kaiusi'a noma'afi nagri ene mono kevu nagamota tavrentegeta muse huta amafi nemnuna ne'mo, tamagritega musenke atreramante. Erastusi'a rankumamofo zagore kegava hu'nea rankva ne'mo'ene Kuatusi'a, mono nerifu, tmagritega musenke atrermantaze. [Rantimofo Jisas Kraisi asomumo maka tamagrane mesnie.] **25** Anumzamo'a tamagrira knare musenkema neramasamua kante tamazeri

hankavetise. E'i Jisas Kraisi Knare Musenkene, vahe'mota tmavresigu korapa oku'a retro hunte'nea naneke neramasamue.

(aiōnios g166) 26 Hianagi manivava Anumzamo huzamantege'za, kasnampa vahe'mo'za avontafepina krente'naze. Ama ana kemo'a megi'a vahete eama hige'za, maka kaziga vahe'mo'za negaze. Hu'negu zamagranena nege'za zamentinti nehu'za amage antesazegure. (aiōnios g166) 27 Agrake, knare antahi'zane Anumzamo'a, Jisas Kraisimpi, ra agi'a erivava hugahie. Tamage.

(aiōn g165)

1 Korinti

1 Nagra Poli'na Anumzamo Agra'a avesite Krais Jisasi aposol eri'za vahere hu'nemo'na nerafu Sostenesi'ene. **2** Korinti kumate nemaniza Anumzamofo mono nagamotarega, Krais Jisasi'ma tamazeri avusese hurmantegeta ruotge (saints) huta mani'naza nagatega nevuno, mika vahe kokankoka mani'ne'za, tagri Rantie hu'za agi nehaza vahetegane, zamagr'iene tagri'ene Jisas Kraisi Rantimofo kea kreneramune. **3** Nafati Anumzantegati'ene, Ranti Jisas Kraistintegati asunkuzane, rimpia fruzamo'a tamagritega vie.

4 Hagi tamagrikura Anumzamofontega musenke huvava nehue, na'ankure Anumzamo'a asunkuzana, Krais Jisasimpi tami'ne.

5 Hanki Agripinti, keaga hu'zampine, antahintahi zantamifina knare nehetma, maka'zampina eri avi'netaze. **6** Na'ankure Kraisinku'ma huama hu'na tamasm'i'noazamo, tamagripina eritamage nese. **7** E'izanku maka Avamupi neramia musezampina atupa nosuta, Rantimo Jisas Kraisi'ma eama hanigu, tamagu'areti aveganentaze. **8** Hanavea tamisigeta refarera uhanatigahaze. Ana hanigetma Rantimofo Jisas Kraisi'ma esia kna zupa hazenke tamia omnegahie. **9** Anumzamo'a ke hunte'nere ana kemofo amage'nentea Ne'mo, Agra'a Nemofo Jisas Kraisi Rantimo'ene trogoteta magopi manisunegu, tagia hu'ne. **10** Hagi nenafugata hanaveti'na tamantahinegoe, Rantimofo Jisas Kraisi agifi miko'motma mago tamarimpa ohunte ahunte nehanageno amu'nontamifina atane'zana omneno. Ana hanutma fatgo hutma magoke antahi'zampine, tamagesa antahi'zampinena eri mago hugahaze. **11** Nafuhetane nasareheta, mago'a ke ha'ma amu'nontamifima me'nea zankura, Kloesi nagapinti mago'a vahe'mo'za eme nasmi'naze. **12** Hagi nagra ama'na kegu nehue, tamagripinti mago'mo huno, nagra Poli amage'nentoe higeno,

mago'mo huno nagra Apolosi amage'nentoe higeno, rumo'a huno,
nagra Sifasi (Pita) amage'nentoe higeno, eteno rumo'a huno,
nagra Kraisi amage'nentoe nehie. **13** Hagi Kraisti'a Agra ataneno
refako hu'nefi? A'o anara osu'ne. Tamagritekura Poli keka zafarera
fri'nefi? A'o anara osu'ne. Tamagra Poli agifi mono tina fre'nazafi?
A'o anara osu'naze. **14** Nagra Anumzamofona muse huntoe,
na'ankure mono tina magore hu'na vahera freoramante'noe.
Hianagi Krispusine Gaiusikizni zanagrike fre znante'noe. **15**
Ana hu'negu mago'mo'a huno Poli agifi mono tina fregante'noe
huno osugahie. **16** Izo, nagra Stefanasi nompima nemaniza
naga mono tina frezamante'noe. Hagi ananteti'ma e'neana,
mago'a vahera mono tina frezamante'nesuo antahinagekani'noe.
17 Ana hu'negu Kraisi'a mono ti frezamantogura huonante'ne.
Hianagi Knare Musenke huama hanane huno hunante'ne.
Hagi ama mopafi mareri antahi'zampintira, Kraisi'ma keka
zafare fri'nea zamofo hanave'a eriotregahue. **18** Hagi fananema
hanaza vahe'mo'za keka zafamofo nanekgura neginagi naneke
hu'za nentahize. Hu'neanagi tagri'ma tagu'vazino tavre'nea
vahe'mota, e'i Anumzamofa himamu'e huta nehune. **19** Ana
hu'negu korapa avontafe'ma krente'nefina anage hu'ne, Knare
antahi'zane vahe'mofo antahi'zana eri haviza nehu'na, antahi
ankere vahe'mofo antahi'zana eri atregahue huno hu'ne. (Ais
29:14) **20** Antahi'zane nera ina mani'ne? Kasege avontafe'ma
kre antahi'zane nera ina mani'ne? Ama knafi ke hafra hu nera
ina mani'ne? Anumzamo'a ama mopafi antahi'zane vahera,
antahintahi'zazmia zamazeri neginagi nehie. (*aiōn g165*) **21**
Anumzamofa antahintahimo'a ama hu'negenokino, zamatrege'za
ama mopafi vahe'mo'za zamagra'a antahi'zantetira Agrira
antahi amara nosaze. Hianagi Anumzamo'a musema nehiana,

vahe'mo'za neginagi naneke hu'za nehaza nanekema huama
hunke'za zamentinti nehaza vahe zmahoneke. **22** Tamage,
Jiu vahe'mo'za avame'za ketete hu'za antahinegazageno,
Griki vahe'mo'za antahintahi'zanku nehkrazanagi, **23** tagra
Kraisina rugeka zafare ahe'za hanti'naza naneke huama
nehunazamo'a, Jiu vahe'mokizmia zamagigo zamino zamazeri
tanafahu havegna nehuno, megi'a vahetera neginagi nanekegna
nehie. **24** Hu'neanagi, ana Jiu vahe'ene megi'a (Griki)
vahetera, Anumzamo'ma zamagima hu'nea vahe'mo'za, Krais'a
Anumzamofo hankavene, antahintahizama'e hu'za nehaze. **25**
Na'ankure Anumzamofo neginagizane hu'za, nehaza zamo
vahe'mofo antahintahizana agatenereno, Anumzamofo hanave'a
omne'ne hazazamo'a vahe'mofo hanavea agatere'ne. **26**
Nafuheta kama antahiho, inankna vahe mani'nageno tamagia
hu'nefi vahe'mofo zamurera antahi'zane vahera omani'nazane,
rama'amota hanave vahera omani'nonane, rama'amota zmagine
nagapintira omani'nonanagi, **27** Anumzamo'a, mopafi vahe'mo'za
antahintahizmi omane'ne nehu'za, kefenkami netraza vahepi
erizana erino, knare antahintahine vahe mani'none haza vahera,
Anumzamo'a zamazeri zamagaze nehuno, hanave'a omne'ne
huza haza vahepi eri'zana erino, hanave vahere hu'za haza
vahera zamagaze erinezmie. **28** Ana nehuno zmagi omnene
hu'za ke fenkami atraza vahepi, Anumzamo'a huvazino zamagine
hanave vahera zamazeri zamagaze nehie. **29** E'ina hu'negu
mago'mo'a Anumzamofo avufina avufaga mareorigahie. **30**
Hu'neanagi, Agrama eri'nea eri'zamo higeta, Krais Jisasimpi
mani'naze. Krais'a Anumzamofontegati knare antahintahi zantia
efore hu'neana, e'i fatgo, mani ruotge huno mani'zane, miza
hurante Ne' mani'ne. **31** Ana hu'negu Anumzamofo avontafepina

anage huno krente'ne, Avufga antemreriku hanimo'a, Ramofoma antahino keno hu'neazanku avufga antemrerigahie hu'ne. (Jer 9:23-24)

2 Hagi nenfugtane nasareheta, tamagrite'ma e'noana, haganentake ke'ni'areti ene knare antahintahi zanteti Anumzamofo agenke tmasminakura ome'noe. **2** Nagra'ma antahi'zama retro hu'noana, tamagrane mani'nufina mago'zankura ontahigahuanki, Jisas Kraisima ahe'za rugeka zafare hanti'naza zankuke antahigahue. **3** Tamagri'enema manuana hanave'nia omnege'na, kore nehu'na, nahirahi zampi mani'ne'na, **4** rempima hunerami'na, nanekema huama nehuana, tamagri tamagu'a eri vakanenaku knare antahintahi zampintira osu'noanki, Ruotge Avamumo hihamu hanave'a erinte ama nehie. **5** E'na hu'negu tamentintimo'a vahe'mofo knare antahintahi zampina omneno, Anumzamofo himamu hanavefi mesigu anara hu'ne. **6** Tagrama knare antahintahizamofo keagama nehunana, zmentintifima nena hu'naza vahepi nehune. Hianagi ama knare antahintahigu'ma nehunana, ama knafino, ama mopafi fanane hanaza kva vahetmimofo knare antahintahi zankura nosune. (aiōn g165) **7** Tagrama nehunana Anumzamofo knare antahintahia, korapa oku'a retro huntegeno me'neazanku nehune. Ana antahintahizana mopa fore osu'negeno oku me'heana, e'i ana antahintahizana, menima tagrama knare hanunku retro hunte'ne. (aiōn g165) **8** Ana antahintahizana magore huno meni gnafi kva vahe'mo'za antahi amara osu'haze. Na'ankure antahi ama hu'nazasina, hanave'ane Ramofona ahe'za keka zafarera ohantizasine. (aiōn g165) **9** Hu'heanagi, avontafepi kre'nea kante ante'za, Avurgamo onkegeno, agesamo ontahigeno, vahe'mo'za antahi'za ke'za osu'hazana Agriku

zamavesi nentamokizimi Anumzamo retro huzmante'ne.
(Ais 64:4) **10** Hu'neanagi Anumzamo'a, Ruotge Avamu'afi
huvazino, tagritera eriama nehie. Na'ankure Avamu'mo'a
mikazana hakareno, Anumzamofo oku'a antahi'zama'a erinte
ama nehie. **11** Na'ankure, iza vahepintira mago vahe'mofo
antahi'zampima me'nesia antahi'zana keno antahino hugahie?
Agri'a avamu'moke agu'afi me'nesia antahi'zana keno antahino
hugahie. Anahukna kante Anumzamofona oku'a agu'agesa
mago'mo'e huno antahino keno osugahianki, Anumzamofo
Avamu'moke antahino keno hugahie. **12** Menina hago Avamura
eri'none, ama mopafi avamurompage Anumzamofontegati
Avamure, e'ina hu'negu Anumzamo amne neramia zana antahita
keta hugahune. **13** Mika kema nehunana, vahe'mo rempi
huorami'nea antahintahi nosune. Anumzamofo Avamu'mo
rempsi hurami'nea antahintahireti nehunankino, ana Avamu'mo
tazahigeta, avamu antahizampi Avamu'mofo nanekea eri
ante mago huta eriama nehune. **14** Hu'neanagi Anumzamofo
Avamu ene omani'nea vahe'mo'a, Anumzamofo Avamutegati
esiazana e'origahie. Na'ankure zamagra anzama kesazana
neginagi zankna hanige'za, antahi'amara osugahaze. Na'ankure
zamagra Avamu'mo zamaza hanige'za antahi ankeregahaze.
15 Hu'neanagi aza'o Avamu'ene mani'nesimo'a, mika'zana
refko huno antahi ama hugahie. Ana hugahianagi mago'mo'e
huno Avamu'ene mani'nesimofona refko huno ageno antahino
osugahie. **16** Iza Ramofo agu'agesa antahino keno nehuno
antahintahia amigahie? hu'ne. (Ais 40:13) Hianagi Kraisi
antahintahizana, tagra eri'none.

3 Hagi nena fugatane nasareheta tamagranema ko'ma
mani'noana, avamupi nena hu'za mani'naza vahe'mo'za

nehazaza huta mani'nagena nagra noramasamue. Hianagi
mopafi avu'avazampi mani'nagu Kraisimpina osi mofavregna
huta mani'nazage'na neramasmue. 2 Nagra rempima huramufina
amiri tamiaza nehu'na, hanave ne'zana noramue, na'ankure
tamagra hanave ne'zana eriga osu'naze. Tamage, tamagra
hanave ne'zana eri avamentera omani'naze. 3 Na'ankure
mopafi vahe'mo'za nehzankna nehaze. Na'ankure kanive
nereta, ke fra amu'nontamifina nehaze. Tamagra ama mopafi
vahetfa omani'nafi? Tamagra mopafi avu'avazampi vano hiaza
nosazafi? 4 Na'ankure mago'mo'a huno, nagra Poli amage
nentoe nehigeno, rumo'a nagra Apolosi amage nentoe nehiana,
tamagra mono ontahi vahe mani'nazo? 5 Apolosi'a inanknahu
nere? Poli'na iza'ne? Tagra eri'za vahetfa mani'no'e. Ramo
hurantegeta tagra eri'zana e'neru'e. Anumzamo'a tagripi huvazino
tamaza higeta tamentintia hu'naza eri'za ne' trene. 6 Nagra
avimaza asogeno, Apolosi'a ti ami'ne. Hianagi Anumzamoke
azeri nena nehie. 7 Ana higu avimaza kri'nemo' o tima ami'nemo
enena razana omne'neanki, Anumzamo maka'zana azeri nena
nehie. 8 Avimazama ase'nemo'ene tima ami'nemo enena
magoke eri'zanke e'neriankino, eri'zama eri'na'a avamente
ante'ne mizazani'a erigaha'e. 9 Na'ankure tagra Anumzamofo
eri'za vahe manuketa, tamagra Anumzamofo hozane, nonkna
hutma mani'naze. 10 Anumzamo'a asunku zama'areti nami'nea
avamente, nogi antahi'zane vahekna hu'na nomagi trara eri
agafa hunte'noge'za, mago'a vahe'mo'za anante negize. Hianagi
magoke magokemo'a, nankna huno kinaku hanuno'a, kva
huneno ana agofetura nona kino. 11 Hianagi mago'mo'e
huno ru tratera nona eri agafa huno onkino, ko'ma ki'nea
trateke kino, e'i Jisas Kraisi Agrake ana trara mani'ne.

12 Anante'ma mago'amo'za kisazana goliretiro, silva retiro, zago'amo mareri'nea haveretiro, zafaretiro, rampa zantetiro, hofareti negizankna nehzankino, **13** magoke magokemofona eri'zama'amo'a eama hugahie. Refkoma hania knarera tevereti kreno eri'zama'amofona nena'a eriama hugahie. Na'ankure magoke magokemo e'neria eri'zamofo hanave'a, tevenu kreno eriama huno kegahie. **14** Hagi iza ana tra'mofo agofetu eri'za eri'nesia eri'zamo tevema oresigeno'a, mizama'a erigahie. **15** Mago'mofo eri'zama tevemo tevagaresigeno'a, ana eri'zamo'a haviza huno fanane hugahianagi, ana ne'mofona, tevefinti ahokeno avreankna hugahie. **16** Tamagra Anumzamofo mono no mani'nageno, Anumzamofo Avamu'mo'ma tamagu'afima mani'neana ontahi'nazo? **17** Iza'o Anumzamofo noma erihaviza hanigeno'a, Anumzamo'a anamofona azeri haviza hugahie. Na'ankure Anumzamofo nomo'a ruotge hu'negenka, kagra ana no mani'nane. **18** Mago vahe'mo'ma antahintahi huno, nagra knare antahi'zane vahe ama knafina mani'noe hania vahe'mo'a, agra'a ravatga osino. Hanki atrenkeno neginagi vahe maniteno, henka knare antahi'zane vahera efore hino. (aiōn g165) **19** Na'ankure ama mopafi knare antahi'zamo'a neginagi avu'ava Anumzamofo avufina me'ne. Hanki anage huno Anumzamofo avontafepina krente'ne, Knare antahi'zane vahe'mo'za knare antahi'za zmireti, vahe rezmatga hunaku hazana, Anumzamo'a zamazenerie. (Jop 5:13) **20** Mago'ane avontafepina anage hu'ne, Ramo'a knare antahi'zane vahe'mofo agafa'a keno antahino hiana, amnezankna nehie. (Sam-Zga 94:11) **21** Ana hu'negu mago'mo ugota huramante'simofonkura tmavufa ra osiho, na'ankure maka'zana tamagr'i'zane. **22** Poli'nafi, Apolosipi, Sefasipi (Pita), ama mopafi kasefa huno mani'zampi, fri'zampi,

meni knafi, henkama esiankna maka tamagri'za me'ne. 23

Tamagra Kraisi suza manizageno, Kraisi'a Anumzamofo su'za
mani'ne.

4 Hagi vahe'mo'zama tagriku'ma antahi ramisazana, Kraisi
eri'za vahere hu'za nehu'za, Anumzamofo oku'zama eri ama'ma
neha'a netre'ne hugahaze. 2 Hanki menima kva hugahane
huno antahi ami'nesimo'a, kvahu fatgo nehinkeno, tamage
hu'za hugahaze. 3 Nagra nagesa nontahue, tamagrama
refko hunante'nazano, vahe'mo'za nehaza keagafi (kot)
refako'ma hunante'nazana, tamage hu'na nagra'agura refko
nosue. 4 Nagragu'ma antahuana nagu nagesamo'a ama'
hu'ne, hianagi e'izankura nagra'niagura fatgo hu'noe hu'na
nosue. E'i Anumzamo'a Agrake refko nagrira hunantegahie.

5 E'ina hu'negu refko osuta atreta avega ante'nenkeno,
huhamprinte'nea knare'ma Ramo'ma esuno'a, Agra hanimpima
oku'a frakino vahe'mofo tumopima me'nesiazana, emeri ama
nehuno, vahe'mofo agu'afi me'nesiazana eriama hugahie. E'i
anankna, magoke magoke'mofona, Anumzamo'a huzmasga
huzmantegahie. 6 Menina nenfugatane nensarogata nagrare'ene
Apolosinte'ene hunte'na nehuana, tamagri'ma tamaza hanigu
nehue. Ana hanigeta ama kema nehu'a kemofo agu'agesa
keta antahita hugahaze. Avoma krente'nea kante anteramita
nemanita, mago'mofo hufenkami netreta, magomofona husga
huontegahaze. 7 Na'amo vahepintira tamagrira tamazeri ruzahura
nehie? Naza tamagra onte'naza zana Anumzamo'a, ontami'ne?
Hagi koma tamimi'neana, na'a higeta tamufa erira nehuta
e'ori'none huta nehaze? 8 Tamagri'ma tamesiazana ko eri
avite'naze! Tamagra ko tusi'a feno ante'naze. Tagra tamaza
osu'nonanagi, tamagra ko kini vahe mani'naze! Tamage nagri'ma

navenesiana, tamagra ko kini vahe mani'nesage'na, tagranena
anahukna huta kini vahe manigahune. **9** Nagrama nagesama
antahuana, Anumzamo'a tagri Aposol vahe'mota tazeri henkarfa
tante'ne. Vahe'mo'zama ahefrisie hu'za nehzankna nehune,
na'ankure ama mopafi vahe'mo'za hunte'za kiza razankna
nehunkeno, ankeromo'zane vahe'mo'zanena neragaze. **10**
Tagra Kraisi agimo'ma marerinia zanku negi vahe mani'none.
Hianagi tamagra Kraisimpina antahi'zane vahe mani'naze! Tagrira
hanavetia omneanagi, tamagra hanave vahe mani'naze! Tamagri
tamagia ahesga nehzananagi, tagri tagia hupri nehaze. **11** Hanki
meninena, ne'zankura taga'neteno, tinku tave nesino, kukena timo
haviza nehigeno, knona neramizageno, noma mani so'e hu'zana
nomne. **12** Tagra'a tazampinti mraguzatita, eri'za erita ne'zana
erifore nehune. Tagri'ma kema huhaviza hurantageta, asomu ke
hunezmantone, tahageta oti hanavetita anagna e'nerune. **13**
Vahe'mo'za havigema hurantageta, anankegura ontahita akoheta
eri mago huta nemanune, tagra ama mopamofo kugusopa
manineta, vahe'mofo agote'za orogofavegna huta meninena
mani'none. **14** Ama nanekea, tamagaze hinogu kre'noramuanki,
nagra navesinentoa mofavre ni'agna hu'na tamavumro nentoe.
15 Na'ankure tamagrira **10** tauseni'a vahe'mo'za Kraisimpi
kva kriramante'ne'za tamazeri fatgo hugahazanagi, tamagrira
rama'a neramafa omanigahie. Na'ankure nagra Krais Jisaspinti
neramafa'za hu'na mani'ne'na, Knare Musenkea neramasamue.
16 E'ina hu'negu nagra huhanveti'na nermasamuanki, nagri
navu'nava eriho. **17** Ama ana agafare Timotina tamagritega
hunteno vie. Ramofompina kentahino amage nentege'na
navesinentoa mofavre ni'agino, agra nagrama Kraisimpima
mani'na neozana huramagesa nehuno, hakare kaziga maka

mono nompi rempima hunermuankna hugahie. **18** Mago'a mota nagrikura, Omegahie huta nentahita, tamagra tmavufga erisaga nehaze. **19** Hianagi nagra Anumzamofo ave'sizama me'nenige'na ame hu'na esu'na, zamufga rahu vahe'mo'zama nehaza kegera eme ke'na eri fore osugahuanki, nankna himamu eri'nazafi eme zimagegahue. **20** Na'ankure Anumzamofo Kumara kege hu'za omne'neanki, hihamu'ane hanave'a me'ne. **21** Tamagrira na'anku tamave'nesie? Nagra sefu knone e'na eme tamazeri fatgo hanufi, avesinte'zane rimpa fruzane esue?

5 Hagi amanahu naneke eme hazage'na antahi'noe, mago monko avu'ava zamo'a tamagri amunompi fore hu'ne, meg'i'a vahe'mo'za amanahu havi avu'avara nosaze. Ama ana avu'avamo'a amanahu hu'ne, mago'mo'a nef a'ma eri'neazanku nehue. **2** Higetma tamagaze nehuta, tamasunku hugahazanagi, tusi tamavufga ra nehaze. Anazama hu'nemofona amu'nontmifintira avre atregahaze. **3** Tamage huno navufgamo'a tamagranena anampina omani'hoanagi, avamunimo'a tamagrane mani'nege'na, iza'o anazama hu'nemofona, anampi mani'neno hiaza hu'na hago refko hunte'na ke'noe. **4** Tamagrama Rantimofo Jisasi agifima eritruma hanafina, Rantimofo Jisasi hanavefi avamupina tamagrane manigahue. **5** Nagrama nehuana, ana nera Sata azampi avre atrenkeno amega avufga azeri haviza nehinkeno, Ramo'ma esnia knarer aavamu'a agu'vazigahie. **6** Tamagra tamagi erisaga nehazageno knarer nosie. Sikonima herazafima, osi'a zistima antageno ana mika'zama azeri zonereana tamagra ontahi'nazafi? **7** Korapa zistia erinetretma, tamagra kasefa zo-ore bretigna hutma maniho. E'i ana avamente tamage zo-ore breti mani'naze. Na'ankure Kraisi'ma atama eri'nea zamo'a, kinafinti ozmahe zmageterenea knare'ma antahimi'za

nenaza (Pasova) sipisipi afu fri'neankna hu'ne. **8** Ana hu'negu ana knare'ma muse hanunana, korapa zistima ante'nea bretia, kumi'ene havi avu'avateti osanune. Hianagi ana knare musema hanunana, zo'ore bretia, e'i tamage kene, tamage avu'avateti'ene musena hugahune. **9** Ko'ma avoma krerami'nofina monko avu'ava zampi mani'nesia vahe'ene tragotetma omaniho hu'na hu'noe. **10** Nagra nehuana megi'a vahe'mo'za monko avu'ava nehazampi, vahe'mofo zanku kezamanunu nehaza vahepi, zamagraguke nentahiza vahepi, krunage hu'za musufanesaza vahepi, havi anumzante mono hunentaza vahe'ene tragotetma omanihogura nosue. Tamagrama amanahu vahe'ma zamatre varegahunema hanutma, ama mopa atrevagareho. **11** Hu'neanagi nagrama avoma krerami'nofina, mago ne'mo'ma Kraisinte namentinti nehue nehuno, monko avu'avaza nehuno, vahe zante kenunu nehuno, havi anumzante mono hunenteno, vahe huhaviza hunenteno, aka ti neno neginagi nehuno, havige huno kumzafa zante hania vahe'enena tragoteta ne'zana onetfa hiho hu'na hu'noe. **12** Megi'a mani'naza vahe'ma refko'ma huzmante eri'zana nagri zana omne'ne. Hianagi mono agu'afima mani'nea vahera, tamagra amne refko huzmantegahaze. **13** Hu'neanagi Anumzamo megi'a mani'naza vahera refko huzmantegahie. Amu'nontamifinti havi avu'ava'ma hania nera, tamagra'a ahenati atreho. (Diu-Kas 17:7)

6 Hagi mago mono neramafu'ma hazenke huramantesigetma keagare avretma vunaku'ma hanutma, mono kva vahete avaretma vuga'zanagi, nahigetma fatgo osu megi'a kva vahetera avretma nevaze? **2** Anumzamofo naga'mo'za ama mopafi vahe'ma mago knazupama refko'ma hanaza zana, tamagra ontahi'nazafi? Hagi mopafi vahera tamagra refko huzmantegahazanki, na'a

hanigetma tamagra neonse keagama amunontmifima fore'ma hiankea erifatgo nosaze? 3 Tagrama henkama ankero naga'ma refko'ma huzmante'sunana ontahi'nazo? Nahigetma onensa hazenkea refko osugahaze! 4 Hu'negu amu'nontamifima mago tamarimpa osu'zama fore'ma higeta, tamagra nahigetma mono nompima zamajima omne'nea vahera huzmantage'za, ana kema refko hutera o'netize? 5 Ama kema nehuana tamagaze hinogu nehue! Tamagripina magora keaga refkohu knare antahintahine vahera omani'negeno'ma nehiaza nehaze.

6 E'ina hugaragi, mono ne'mo'ma, mono nefuma keaga huntenakura, avreno fegia vahe'mofo zamufi hunente. 7 Na'a hanigeta ana knazana tamagra'a e'origahaze? Na'a higeta havizama hurmantazana atrenozmantaze? E'inama hazazamo'a tamagerafa huno tamagrira tamazeri fenkami netre. 8 Hianagi tamagratmi kefovaza nehutma, reramatga nehaze. E'inahu'ma nehzana, mono tmafuhe'ine tamasarehe'ina kefovaza hazana atrenozmantaze. 9 Anumzamofo Kumara fatgo osu veamo'za erisanti oharegahaze hu'nea kea tamagra ontahi'nazafi? Atrenkeno tamagri'a antahintahimo'a tamazeri havia osino! Monko avu'ava'zamo azeri haviamma nehia vahe'ma, amema'a omne zante mono'ma hunentea vahe'ma ru vemofo a'nene, aravema hu'nea vemo'o, a'mo'ma atreno ru vene savri nehiane, vene'nemo vene'nene monko'za nehia vahe'mo'zane, 10 kumzafa vahe'ene, vahe zante kenunu nehia vahe'ene, aka ti neno havia huno neginagi nehia vahe'ene, vahe'mokizmi zamarimpa zamazeri havizahu ke nehaza vahe'ene, krunage nehaza vahe'mo'za, Anumzamofo Kumapina uofregahaze. 11 Mago'amota e'inahu vahe korapara mani'nazanagi, Anumzamo sese hurmanteno, tamazeri ruotge

hu'ne. Na'ankure Ramofo Jisas Kraisi Agifine, Anumzantimofo Ruotage Avamupi higetma, tamagra Anumzamofo avufina fatgo vahe mani'haze. **12** Miko'zana knare hu'neanki'na amne hugahue hunka hugahananagi, anampintira ana miko'zamo'a kaza osugahie. Ana hugahianagi, mago'zantere hu'na kazokzo huontesue. **13** Ne'zana narimpamofo suzane, narimpamo'a nezamofo suzanagi, ana taregara Anumzamo'a zanazeri haviza hugahie. Kavufga monko avu'ava'za hunka eri haviza hu'zana omne'neanki, Ramofo suza menegeno Ramo'a, tvufgamofo su'ane. **14** Hagi Anumzamo'a Ramofona fripintira azeri oti'neankino, tagri'enena ana zanke huno, Agri'a hanavereti tazeri otigahie. **15** Tamagri tamavufgamo'a, Kraisi avufgama me'neana tamagra ontahi'nafi? Amane Kraisi avufa eri'na monko avu'ava zante'ma atresuana knare hugahifi? I'o anara osutfa hugahie! **16** Huge, iza'o savri a'ene monkozama himo'a, ana a'ene mago zanavufga eri'nesa'ana ontahi'nazafi? Na'ankure avontafepina amanahu ke hu'ne, Taremokea erimago znavufa segaha'e hu'ne. (Jen-Agf 2:24) **17** Hianagi mago'moma Ramo'ene hagerafino manisimo'a, avamupina zanagra magoke Agranena huke manigaha'e. **18** Savari monko avu'ava zampintira atretma freho! Mika kumi'ma mago'mago vahe'mo'ma nehiana, meg'i'a avufare nehianagi, iza'o savari monko'za nehimo'a, agra'a avufga azeri kumi nehie. **19** Tamavufamo'a Ruotage Avamumofo mono no me'negeno, Ruotge Avamuma Anumzamo'ma tamagri'ma tami'nea avamumo'ma anampinkama mani'neana tamagra ontahi'nazo? E'ina hu'negu tamagra'a su'ana omani'naze. **20** Na'ankure tamagrira Anumzamo'a ko tusi'a mizanteti miza seramante'ne. E'ina hu'negu tamavufgareti Anumzamofo Agi'a erisaga hugahaze.

7 Hagi mago ne'mo'ma a'ma e'orisiana knare hugahio hutma avompima kre'naza zanku, menina kenona nehue. **2** Na'ankure monko avu'ava'za hu'zanku, mago mago vemo'a agra'a, a' antenkeno, mago mago a'nemo'a agra'a ve antegahie. **3** Vemo'a agra'a a'ene masenkeno, a'mo'a anazanke huno ve'ane masegahie. **4** A'mo'a agra'a avufgamofo kva omani'neanagi vemo kva hu'ne. Ana hukna huno vemo'a agra'a avufga kva osu'neanki, a'amo kva hu'ne. **5** Tanavufa eri mago huzankura i'o osi'o. Hianagi mago tanarimpa hutna mago'a kna amne mani'neta, nunamu hanu'e hanuta'a, amne anara hugaha'e. Hianagi anama hutesutna ete ko eme tragedeta mani'o. E'i ana hutna tanavufamofo avesizana kegava nehnakeno, Sata'ma reranaheno ke'niana, evu oramigaha'e. **6** Amagema nehuana nagrama nagesa antahiramua kazigatire, hagi ama kema nehuana ana hihogu tutu hunormantoe. **7** Nagra nagesama antahuana, nagrama a' e'ori manuankna hu'za hakare vahe'mo'za manisazegu nehue. Hianagi mago mago'mo'za rumofo rumofo museza Anumzamofonpintira eri'naze. **8** Arave osu vahe'ene, kento vahe'mota knare'ma hurmantesiana, nagrama mani'noaza huta manisazana knare hugahie. **9** Hu'neanagi tamavufamofo avesizama kvama hu'za omne'nesige'za, zamatreke'za ve eri, a' eri hiho. Ana hanagu knare'ma haniana ve eri, a' eri hu'za mani'nesageno monkozamofo zamavesi'zana omanegahie. **10** Hagi ko'ma arave hu'naza vahe'motarega kasege huneramantoe, nagri kasegeompage Ra Anumzamofa kasege. A'mo'a ve'a otreno. **11** (Hu'neanagi anama hanuno'a, atrenkeno ve e'ori amne manino, huge zanarimpa eri mago huke, ete neve'ene, eri hagerafikeno), vemo'a a'amofona otregahie. **12** Hagi ruga'amotagura anage nehue, Ra Anumzamofa keompage

nagra nehue, mago neramafu a'mo amentinti nosnianagi, agri
ene muse huno neminsigeno'a, agra nенарона otregahie. **13**
Anahukna huno mago a'mo eri'nesia vemo, amentinti nosnianagi,
agrane muse huno neminsigeno'a, nevena otregahie. **14** Ana
hu'negu amentinti osu ve'mo'a, nenaro'ene maniazamo azeri
avusesea nehigeno, amentinti nosia a'mofona neve enema
maniazamo, azeri avusesea nehie. Ana'ma osnigeno'a mofavre
zagazniamo'a agrua osisine. Hu'neanagi menina zamagrira
zamazeri ruotge nehie. **15** Hu'neanagi amentinti nosanimo ve
atre, a' atre hukuma haniana, zamaze'ori zmatrenke'za ana
hiho, amama mani'naza nomani'zampina nerafuno, neresarono
mago'zamo'a kina reozmanteno. Hianagi tarimpa frune
manisunegu, Ra Anumzamo'a tagi hu'ne. **16** Hu'negu inankna
hunka a'moka, vekamofo avu'ava'zana antahigahane? Hifi
inankna hunka vemoka, akamofo avu'ava'zana antahigahane?
17 Hagi Ra Anumzamo'a magoke magoke'mofoma inankna
avamente mani'nesigeno, Anumzamo'ma agima hu'nesimo'a,
ana avamente manino. Ama anahukna tra ke miko mono nompina
nezamasamue. **18** Mago'a vene'nemotma oku tmavufa taga
hu'nazageno tamagi hu'nenigetma, tamagra oku tamufgama taga
hu'neaza eriso'e hu'zankura maragu'za otiho. Mago'amo'za oku
zamufga taga osu'nesage'za, zamagi hu'nesimo'za zamagra oku
zamufga taga osiho. **19** Avufgama taga hu'zane, avufgama taga
osu'zamo'a amane'za me'ne. Hianagi Anumzamofo kasegema
amage ante'zamo razana me'ne. **20** Zamatrenke'za mago mago
vene'nemo'za ina avamente mani'nageno zamagi hu'ne, ana
avamentekе maniho. **21** Kazokzo eri'za vahe mani'nankeno,
Anumzamo'a kagi hu'nefi? E'i zankura kagesa ontahio. Ana
hu'neanagi kagrama kankamu me'nesigenka kina vahe'ma

omaninaku'ma hanunka, amne kagra anara hugahane. 22
Hu'negu izano, kazokzo eri'za vahe mani'nesigeno, Ramo'ma agi
hu'nesimo'a, Ramofompina kina vahera omanigahie. Ana kanteke
kina vahe'ma omani'nenigeno agi hunesimo'a, Kraisi kazakzo
eri'za vahe manigahie. 23 Tamagrira tusi'a mizanteti ko miza
seramante'neanki, vahe'mokizmi kazokzo eri'za vahera omaniho.
24 Inankna kante mago'mo'a mani'negeno agi hu'ne, nenfuga
nensaroga, atregeno ana kante Anumzamofompina manino. 25
Arave osu vaheku'ma nantahige'naza zankura Anumzantegatira
mago kasegea e'ori'noe. Hu'neanagi nagrira Ramo'a asunku
zama'areti huvempa hunantege'na mani'nom'o'na, nagrani'a
antahi'za huama nehue. 26 Hu'negu nagrama antahuana, menima
fore nehia hazenke'zampina, ana ne'mo mani'nesia kante'ma
mani'nigeno'a, so'e hugahie. 27 Ko'ma, a'ma eri'nesunka,
a'kamofo atre zankura ontahio. A'ma eritenka atrenesunka,
a'ma erizankura ohakro. 28 Hu'neanagi arave hu'nesamoka,
kumira osu'nane. Hu'negu vene omase mofa'mo aravema
haniana, kumira osugahie. Ana hugahianagi, aravema hanimo'a
ana nomanizampina rama'a knazampi ufregahie. Tamaza
hanigu ama nanekea nehue. 29 E'igu amanage hu'na nehue,
nenfugata nensarogata, knamo'a atupa hu'negu, aza'o a'ma
antenesimo'a, a' onte vahekna huno manino. 30 Zamavunu
nehanimo'za zavi ote vahekna hu'za maninkeno, musema
nehanaza vahe'mo'za muse osu vahe kna hanageno, fenoma
mizanesesimo'a, fenoma'a omane vahe kna huno manino.
31 Ama mopafi zama eri'enemofona atrenkeno anazamo'a
razana oseno. Na'ankure ama mopane anampima menima
me'neazamo'a, fanene hugahie. 32 Nagrama nentahuana ama
mopafi zankura antahintahi hakarea osihogu nehue. Aravema

osu'nea ne'mo'a, Ramofonku antahintahi nehuno, Ramofo azeri
muse huzankuke nehie. **33** Hu'neanagi arave hu'nesia ne'mo'a,
ama mopafi zanku antahintahi'amo'a nehigeno nenaro azeri
muse huzanku nentahie. **34** Ana hu'negenokino ana ne'mofona
avesi'zamo'a fako nehie. Arave osu a'mo'o, mofamo'enena
Ramofo zanku antahintahi neha'e. Avufgare ene avamupina
ruotage huno mani'zankuke nehie. Hu'neanagi arave hu'nenia
a'mo'a, ama mopafi zanku antahintahi nehuno, nevena inankna
hu'na azeri muse hugahue nehie. **35** E'i ama ke'ma nehuana,
tamagri'ma tamazeri hanavetinigu nehu'na, i'o hunoramante'na
tamazeri amuho nosue. Hu'neanagi mopafizamo tamazeri fako
hinketa, havizampina uofreta Ramofonte hanavetita manihogu
neramasamue. **36** Hianagi mago ne'mo'ma vene omase mofa
a'erinaku'ma nehanigeno'a, ve erigahie huno huntenesia knamo
agateresigeno, a'eri avesizamo'ma ra hanigeno'a, akoheno
omaniga osaniana, e'i kumira omneneanki atrenkeno arave
hino. **37** Hu'neanagi mago ne'mo'ma antahintahi'afi huvempama
huno, a' e'origahue huno hu'nesuno'a, agra avesizama kegava
nehuno hantka hantako osnigeno'a knare hugahie. **38** Hu'negu
agra'a vene omase mofa'ma a'ma erigahie hu'nesimofoma a'ma
erisiana knare hugahie. Hu'neanagi aza'o a'ma e'orimo'a knare
zantfa hu'ne. **39** Hagi neve'ma ofrino mani'nesigeno'a, nenaro'a
neve a' tfa mani'neanangi, neve'ma frisigeno'a amane Ramofonte
mani'nesia vea erigahie. **40** Hu'neanagi nagrama antahuana,
ana a'moma vema e'o'ri'ma amanema manisiana, rama'a
muse hugahie. Nagrama antahuana Anumzamofo Avamu'mo
nasamianke nermasamue hu'na nehue.

8 Hagi vahe'mo'za kaza osu'za havige anumza zamazanteti
tro hunte'ne'za, kresramna vunte'naza ne'zanku krenami'naza

zanku tamasami'za hue. Tagra antahi'none ana mikamota
antahi'zana eri'none. Antahi'zamo'a tavufa erisaga hianagi,
avesinte'zamo'a zamazeri hanavenetie. 2 Mago'a vahe'mo'zama
hakare'zana antahi vagare'none hu'za antahigahazanagi, zahufa
zamagrama antahiga avamentera ontahi'naze. 3 Hu'neanagi
iza'o Anumzamofonku avesinentemofona, Anumzamo'a agrira
antahino keno hu'ne. 4 E'ina hu'negu vahe'mo'za kaza osu
havi anumza zamazanteti tro hunte'ne'za, kresramna vumentaza
ne'zama ne'zamofonkura, tagra antahi'none, ama mopafi havi
anumzana amnezane. Hagi mago anumzana omani'neanagi,
mona mopa tro hu'nea Anumzana, Agra magoke mani'ne.
5 Na'ankure rama'a zanku monafine mopafinena anumzane
hu'za nehazanagi, tamage hakare'a anumzane, hakare'a
ra mani'nazanagi, 6 tagrira magoke Anumzana Nerfakino
hakare'zana Agri konkompa fore higeta, tagra Agrite manunkeno,
Agra magoke Rantia Jisas Kraisi mani'ne. Agripinti mikazana
Anumzamo'a tro higeta, tagranena Agripinti tasimura e'nerune.
7 Hu'neanagi ama ana ana antahi'zana ana mika'mo'za ontahi'naze.
Na'ankure mago'amo'za, havi anumzankura tamage'zane
hu'za nentahi'za, antahintahimo'a meninena me'negenokino,
ne'zama kresramna hunte'naza ne'zana nenaze. Zamagra
zamagesama antahi'zana tamage huta Anumzamofo mono
hunentone nehu'za, ne'zana nenageno zamagu zmagesamo'a
savri nehie. 8 Hu'neanagi ne'zamo hinketa Anumzamofontera
uravao osugahune. Ne'za onesunazamo'a, tazeri haviza osuge,
ne'za nesunazamo'a tazeri knare osuge hugahie. 9 Tamagra
antahi oza hutma hanaza zamo, zmentintifi hanave oti'naza
vahera zmagigo zami havegna huzankura kva hiho. 10 Na'ankure
antahintahi zmimo hanave oti'nesaza vahe'mokizmi zamufi knare

antahintahine vahe'moka havi anumzamofo mono nompi ne'za nenesanke'za, ru zamagu'afi me'nea zamagu zamagesa eri hankavetisanke'za, kaza osu havige anumzante kresramana vu'naza ne'za nenaze hu'za hugahaze. **11** Ana hu'negu mareri antahi'zanka'amo hanave'a omne'nesia antahi'zane mono naga, Kraisi zamagriku huno fri'nesia naga zamazeri haviza hugahie. **12** E'ina higu ama ana kazigati hanave'a omne negafuno, negasaroma kumipi avrente'sanana, agu'agesa azeri haviza hu'nanankinka, kagra Kraisintera kumi hu'nane.

13 E'ina hu'negu, ne'zamo'ma nenefuno nensaroma kumipi avarenentesige'na, nagra mago'ane kresramna vu'nesia afu'mofo ame'a onesuazamo'a, mago'mofona kumpina avreontegosue.

(aiōn g165)

9 Hagi nagra kina vahe omani'nofi? Nagra Jisasi aposol eri'za vhahera omani'nofi? Jisasina Rantimofona onke'nofi? Tamagra Ramofonte eri'za eri'noa raga'a omani'nazafi? **2** Hianagi mago'a vahe'mo'zama antahi'zana aposol vhahera omani'ne nehazanagi, tamage tamagritera aposol vahe nagra mani'noe. Na'ankure Ramofonte aposol eri'za eri'noa zamofo nena raga'a tamagra mani'naze. **3** Nagra refkoma hunantaza vahekura amanage hu'na kenona hunezmantoe. **4** Mizantigna huta kave ene tinema erisuna zamo'a, e'i knarerera osu'nefi? **5** Aposol naga'ene Jisasi aganahe'zane Pita'enema hu'nazaza huta zmentintine a'nea eri'neta, zmavareta vanoma hanunana, e'i knarerera osu'nefi? **6** Hanki, Banabasi'ene nagrane tagra'ake zago eri'za erita kegava hanuke'za, mago'amo'za anara osugahazafi? **7** Ha'ma nehia sondia vhahera, agra'a eri'zama'arera, agra'a miza senentefi? I'o ru vahe'mo'za mizana nemize. Iza'o waini hozama kri'nemo'a, raga'a krepia tagino nonefi? Iza'o sipisipi afuzaga kegava

nehimo'a, ami rima'a tatino nonefi? Ozo agra tatino nene. **8** Nagra
vahe antahi'za avaririna kea nehufi? Anumzamofo kasegemo'ene
hu'neaza nehue. **9** Na'ankure Mosesese kasegefina krente'ne,
Tamagra bulimaka'o afu'mo'ma witi akru'ma nehresifina, agitera
ana'okinenkeno anampintira ne'zana zogino neneno witia hareno
hu'neana bulimakaonku hu'nefi? A'o. (Diu-Kas 25:4) Anumzamo'a
bulimakao afukuke ama kea hu'nefi? A'o. **10** Ama tamage tagriku
hu'nefi? Izo, tagriku huno krente'ne, hoza erisimo ne'zama nesigu
amuhara nehanigeno, witi akru hare'nimo enena anampinti'ma
ne'zama refko huno erisigu amuhara hugahie. Mono eri'za
vahera, mono'ma zamasamisaza vahe'mo'za, miza sezmanteho.
11 Tagrama Avamumofo avimzama tamagripima negrita, amega
tavufgare zama tamagripinti erisunazamo knarera osugahio?
E'inahu avu'ava zamo'a nezama krinonaza vasageankna
nehune. **12** Hanki mago'amo'za kema eme huama haza ruga'a
vahe'ma zamaza nehanuta, tagri'enena tagesga huta mizana
ontamigosazafi? Tagra hugazanagi nosune. Na'ankure Kraisi
Knare Musenkemofo kama renkni rezanku anaknaza e'nerue. **13**
Ra mono nompima eri'zama e'neriza vahe'mo'za, kresramana
vunaku ra mono nompi eri'za neaza ne'zampinti, ne'zazmia
e'nerize. Ana hanige'za kre sramnavu itare eri'za e'neriza
vahe'mo'za, ne'za zmia Kresramana vu itareti e'nerizanki tamagra
ontahi'nazo? **14** E'inahu kna kante, Ramo'a huno, Iza'zo mono
ke hanaza vahe'mo'za, zamaza hu'zana, mono kema hanage'za
antahisaza vahepinti erigahaze. (Luk 10:7-9) **15** Hu'neanagi nagra
hugazanagi nosue. Nagra ama avoma kreneramuana, mago'za
hunantehogura nosue. Na'ankure nagrama agi omane vahekna
hu'na frisugen'o'a, knare hugahie. **16** Na'ankure nagra Knare
Musenke hanuazankura nagia e'origahue. Mono kema hu'zana

Anumzamo huo huno hunante'nea eri'zanki'na ana eri'zama e'orisuna nagra havizantfa hugahie. **17** Nagra navesite'ma Knare Musenkema huama'ma nehusimpaga mizani'a erusine. Hianagi nagra navesitera e'horuanki Anumzamo antahinamino, kegava huo hunante'nea eri'zanki'na e'nerue. **18** Nagra na'a mizani'a erigahue? Nagrama Knare Musenkema tmasamua zankura miza seho hunormantoe, ana hu'negu Knare Musenkerera mizana eriga'zanagi e'horue. **19** Na'ankure mago vahetera kina vahekna osu'noe, nagra hakare vahe'mofo kazokzo eri'za vahe mani'ne'na, rama'a vahera zamavregahue. **20** Jiu vahe'ma zmavarenakura zamagrikna hu'na mani'ne'na nezmavroe, nagra'a kasegemofo agorga omani'noanagi, kasegemofo agorga mani namokizmia, kasegemofo agorga mani vahe kna hu'ne'na nezmavroe. **21** Kasegema e'ori namokizmima zmavrenakura, kasege e'ori vahe kna hu'na mani'ne'na nezmavaroe. Nagra Anumzamofo kasegema avariri zantera mani'noanagi, nagra Kraisi kasegemofo agorga'a mani'nena, kasegemofo agorga'a omani'namokizmi nezmavroe. **22** Hanavezimi omne'nemokizmirera, hanaveni'a omne vahe kna hu'na mani'ne'na nezmavroe. Nagra maka vahetera zamagrama mani'naza avutigati hu'na mani'ne'na nezmavre'na, mago'amokizmia zmagu'vazino zmaho'ma kenigu mika'zana nehue. **23** Ama ana miko'zama nehuana, Knare Musenkemu hu'na nehue. E'ina hanige'na anampintira nagra'a asomura erigahue. **24** Zmagare zokago vahe'mo'za zmagama razafina, hakare vahe'mo'za zmaga nerazanangi, magoke'mo zamagatereno mizana e'nerianki ontahi'nazo? E'ina hukna kante tamaganeretma mizana erigahaze. **25** Mika'mo'za zokagopima ufrenaku'ma hazamo'za, zamufamofo zamesizana maka'zampina kegava nehu'za, zamagra zamesi'zana novaririze. Mizama

eri'zana osiagnafi meno haviza nehie. Hianagi tagrama erisuna mizamo'a mevava hugahie. **26** E'ina hu'negu nagrama nagama neroana, uhanatigahue hu'na hu'nore uhanatinaku nagare'na nevue. E'inahu kanteke nagrama nazama atroana, amne zahopina notroanki, ahiegahue hu'na huazana nehoe. **27** Vahe'mokizmi mono ke zmasamite'na, ru nagrani'a miza e'orizanku, nagrani'a navufga hanaveti'na amasagugeno, nagri navesi'za nevaririe.

10 Na'ankure nafuheta, nagrama nentahuana, antahi ama hanazegu nehue, korapara tagehe'za hampomofo agorga'a nevu'za, hagerina takahenaze. **2** E'i ana zamo'a mika vahe'mo'za mono ti freankna hampompine hagerimpina nehu'za, Mosese avariri'nazana, **3** ana mika'mo'za ana hukna avamupi ne'za nene'za, **4** ana mika'mo'za anahukna hu'za avamumofo tina ne'naze. Na'ankure zamagrama tima ne'nazana, zamagranema ne-ea avamupi havereti ne'nazankino, ana havea Kraisi'e. (Eks-Ati 17:6, Nam-Ham 20:11) **5** Hu'neanagi rama'amo'za Anumzamo'a muse osiaza hute'za, ka'ma mopafina ufri efri hu'naze. **6** E'inahu zama zamagripima fore'ma hu'neazamo'a, tagritera avame'za me'neno huraverina, e'inahu kefo avu'ava'zana kerasane osugahune. **7** Tamagra mago'a vahe'mo'za hu'nazaza hutma havige anumzante monora huonteho. Amanage huno Anumzamofo avontafepina krente'ne, Havige anumzante mono hunente'za, ne'zane tine nene'za, oti'za monko avu'avaza hu'naze. (Eks-Ati 32:6) **8** Hagi mago'amo'za monko avu'avaza nehu'za, ana zagefinke 23 tauseni'a vahe fri'nazankna hu'zanku, tagra monko avu'ava'zana osanune. **9** Ramofoma rehe'nazankna huta tagra reheta onkesune, mago'amo'za anahu kna hazageno, ha osifave'mo zamahe fri'ne. **10** Ke hakare hu'nazankna osnune,

mago'amo'zama anahu kna hazageno, vahe'ma zmahefri
ankeromo zamahe fri'ne. **11** Ama ana zantmima zamagrite fore'ma
hu'nea zamo'a, tagri'ma rempima huramiza me'neno tazeri fatgo
hanigu krente'ne. Ama vagare knafima ehanatisia zanku hu'ne.
(aiōn g165) **12** Kagrama oti hanaveti'noe hunka nentahisunka,
traka hu'zanku kva huo! **13** Antahiho! reramataga zama ne-eana
tamagritekera nomeanki, hakare'a vahete neankna huno ne-e.
Anumzamo'a Agra knare hu'neankino atresigeno, ana reramata
zamo'a hanavetino tamazeri otregahie. Reramatgaza ne-enkeno'a
tamatresigeta evuoramigahazanki, kana tamaverina oti hanavetita
manigahaze. **14** E'na hu'negu knare rone'nimota havige
anumzantetira manigneta maniho. **15** Nagrama kema nehuana
knare antahi'zane vahe'motma neramasamue. Tamagra refko
hutma nagra nehua kea antahigahaze. **16** Tagrama kapufintima
tima nenakura, Anumzamofo susu hunteteta nenone. E'i ana
kapufinti tima erifko'ma nehunana, Kraisi korana omne'nefi?
Tagra bretima korita, erifko huta nenonana, e'i Kraisi avufga
omne'nefi? **17** Hianagi magoke breti me'negu, ana maka'mota
hakare mani'none nehunanagi, magoke tavufga me'ne. Na'ankure
mago bretireti refko huta nenone. **18** Israeli vahe'mo'za
hu'naza zanku tamagesa antahiho, kresramna vu itaretira refko
hu'za ne'zana nonazafi? l'o nenaze. **19** Hagi nagra na'anku
nehue? Havige anumzantaminte kresramna vunentaza zana
amnezane, havi anumzana amnezane hu'na nehue. **20** l'o hue!
Fegi'a vahe'mo'za anankavera Anumzamofontera kresramana
vunontazanki, havi avamutaminte kresramna vunentaze.
Nagri'ma nave'nesiana havi avamutaminte tragoteta omanihogu
nehue. **21** Tamagra havi hankromofo kapufinti tina tagitma
nenetma, ete Ramofo kapufinti'enena tagitma onegahaze. Havi

hankromofo tafepinti nenetma, ete Ramofo tafepintira onegahaze.

22 Tagra Ramofo azeri asivazinaku nehumpi? E'ina'ma hanunana tagri hanavemo'a, Ramofo hankavea agetere'ne nehumpi? I'o. **23** Tagra mika'zana amne hugahunanagi, ana mika'zamo'a taza osugahie. Tagra mika'zana amne hugahaze huta hugahunanagi, ana mika'zamo'a, tazeri hanave otigahie. **24** Tagri'ma tazeri knare huzankukera ontahisunanki, tva'ontire'ma nemanizamokizmi zamazeri knare'ma hanunazanku antahisune. **25** Hagi amne ana miko ame'ama zagore'ma atresazana mizaseta negahazanagi, ana ame'a agura igati eri'naze hutma zmantahiogeho. Ru tmagu tamagesa eri haviza hugahie. **26** Na'ankure Mopane anamiko zama agu'afima me'neazana, Ramofozanke me'ne. (Sam-Zga 24:1) **27** Mago amentinti osu vahe'mo'ma kagi hanigenka vanunka, afu ame'ama kamisiazana nenenka antahige' antahagera osuo, ru antahintahi ka'a eri savri hugahane. **28** Hianagi mago'mo kasamino, havi anumzante kresramna vunte'nea afu ame'e hanigenka onegahane. Na'ankure ana kasamisimofo knare'zanku hunka onegeno, anama kasamisimofo kefozane huno antahigahie. **29** Kagrika'a antahintahizankura nosuanagi, rumofo antahintahizanku nehue. Inankna hu'za nagra navesite'ma huazana refko antahintahifina nehaze? **30** Hanki nagra Anumzamofo susu huntete'na ne'zama noazankura, na'anku haviza nehie hu'za nehaze? **31** Hanki, kave nesano tinesano inankna'zama hanunka, Anumzamofo agi erisaga hu'zanke huo. **32** Mago'mofone hunka Jiu vahepino, Griki vahepino, Anumzamofo vahepinena, zamazeri tanafa hu havegnara osiho. **33** Nagranena anahukna hu'na maka'zama huazampina, maka vahe'mo'zama muse hanazaza nehu'na, nagra knare'zankura

nosuanagi, hakare vahe'mokizmi knare'zanku nehanugeno,
rama'amokizmia Anumzamo zamagu'vazigahie.

11 Nagrama Jisas Kraisi nege'na neveraruaza hutma nagri
navu'nava negeta avariraho. **2** Nagra tamagrira tamazeri
antesgahue. Na'ankure ana miko'zama hazafima tamage'sa
antahi nenamitma, antahi'zama rempima huramino'a kante azeri
antroko hu'naze. **3** Hu'neanagi menina tamagrama antahiam
hanazegu'ma nehuana, mika vene'nemokizmi aseni'a Kraisi
manigeno, a'nemofo asenia vene'ne manigeno, Anumzamo'a,
Kraisina aseni'a mani'ne. **4** Hagi mika vene'nemo'za tavrave
zmanunte'ma refitene'za nunamuma hanazano, kasnampa kema
hanaza zamo'a zamagra'a zamasenia zamazeri agaze hugahaze.
5 Hianagi mika a'nemo'za zmanunte refi'otene'za nunamu hanazo,
kasnampa kema hanazana zamagra'a, zamaseni zamazeri
zamagaze nehaze. Na'ankure agra magoke mani'neno, aseni
azoka'ma vazagatetre'nea a'negna nehuno, asenimofona agaze
erinemie. **6** Na'ankure mago a'mo'ma azoka'ma refi'otesuno'a,
agra azokara taga hutregahie. Hianagi azoka'ma tagahu
zamo'ene, azoka'ma vazagate'zamo'ma a'nemofona agaze'za
me'ne hanuno'a, atresageno anuntera refitegahie. **7** Na'ankure
mago ne'mo'a asenirera refi'oteno, agra Anumzamofo amema'ane
ragi ami vahe mani'ne, hu'neanagi a'mo'a ve'mofo ragi vahe
mani'ne. **8** Na'ankure vemo'a, a'pintira eforera osu'neanki,
a'mo ve'mofopintira efore hu'ne. **9** A'mofonkure huno vea trora
osu'neanki, vemononku huno a'ra tro hu'ne. **10** E'ina hu'negu
a'mo'a asenirera avame'za refitenkeno, anazamo'a mago'mofo
kvafi mani'ne huno ankeromokizmi zmaveri hugahie. **11** Ana
hianagi, Anumzamofompina a'mo'a, agra'akera oraoti'neanki,
vemofo hanavefi manigeno, vemo'a agrakera oraoti'neanki a'mofo

hanavefi oti'ne. **12** Na'ankure a'mo'a vahe'mofompinti efore higeno, anahukna huno vemofona a'mo kasenente. E'ina hu'negu, mika'zamo'a Anumzamofompinti efore hu'ne. **13** Tamagra'a refko hiho, amne a'mo'a asenirera tvaravenura refiote'neno Anumzamofontera nunamuma haniazamo'a knare hugahifi? **14** Vemofoma zanra azoka'ma hunte'nesiana agra agaze hugahifi? **15** Hianagi a'mofoma zanra azoka'ma hunte'nesiana agri'a konaririzane. Na'ankure, zanra azoka'ma ami'neana, refitentenogu ami'ne. **16** Hu'neanagi mago'mo'ma ke hafra amana kegu'ma haniana, nagrama hanuana, tagra ru tavutva ovaririgahune. Maka Anumzamofo veamo'za anahukna antahi'za erigahaze. **17** Ama kema avariri hogu'ma kreneramua kefina, tamagrira tamazeri sganosue, na'ankure tamagrama emeri atruma hazafina, knare'zana fore nosianki, havizanke fore nehie. **18** Na'ankure ese knare'ma nagrama antahi'noana, tamagra mono kevunaga mani'none hutma etru hazafina, rama'a atane'za megeno mago tamarimpa hu'zana omane'ne. Anankema nentahi'na tamagefi hu'na hu'noe. **19** Tamage amu'no tamifina atane'zana me'ne. E'ina hanageno Anumzamo refko huno hu izo huzmante'nesamo'za amu'nontamifina eama hugahaze. **20** E'ina hu'negu tamagrama eritruma hazafina mono tivo ne'za (Lord's Supper) nenaku eritru nosaze. **21** Na'ankure tamagrama ne'zama neneta ruga'amokizmigura zamavegaonte ko nenaze. Mago a'mo'za zamaga'ene nemanizageno, mago'amo'za negi ti nene'za tusi neginenaze. **22** Tamagrira tine ne'zanema nesaza nontamia omne'nefi? Hifi tamagra mono no azeri haviza nehutma, zamunte omne nagamokizmi zamazeri zmagaze hu'naku nehazo? Nagra na'aneku ke hurmantegahue? Nagra tamagrira husga hugahifi? I'o. Ama ana zankura tamagrira husga osugahue. **23** Na'ankure

nagrira Ramo rempi hunami'neaza, ete rempi huneramue. Jisas Kraisina komoru hu'za ha' vahe zamazampima avrentenaku haza kenagera, Agra breti erino, **24** Anumzamofona susu hunteteno, ana bretia ko'nerino amanage hu'ne, Ama'i Nagri navufagina, tamagriku hu'na neramuanki, neneta antahinamiho hu'ne. (Mat 26:27, Mak 14:24) **25** Hagi ne'zana netageno, anahukna huno waini kapu erisaga huno amanage hu'ne. Ama'i waini kapua, kasefa hagerafi ke koraniareti nehue, amana hutma maka knama waini tima nenenutma tamagesa antahinamiho. **26** Na'ankure ama bretteine, ama kapufinti'ene nesaza zupa, anazamo'a Ramofo friza huama nehanigeno, ete Ramo'a egahie. (Mat 26:26-28, Mak 14:22-24, Luk 22:17-19) **27** E'ina hu'negu iza'o havi avu'ava hu'neno, bretteine Ramofo kapufinti nesimo'a, Ramofo avufgafine korama'arera kefoza huno, kumi hugahie. **28** Mago'mo'ma bretteine, kapufinti neku'ma hanuno'a, agra'a avu'ava'zana refko huteno, ana bretteine kapufintira negahie. **29** Na'ankure mago'mo bretteine tine nenen, Ramofo avufga, neno huno antahi ama osnimo'a, agra'a azeri haviza nehie. **30** E'ina hu'negu, amu'no tamifintira hakare'amo'za hanavea omne amne hige'za, kria erizageno mago'amo'za ko fri'naze. **31** Hianagi tagra'ama refko huta tazeri fatgo osu'nesuta, keagafi manigahune. **32** Hianagi Ramo'ma tagri'ma refko'ma nehiana, ama mopafi vahe'ma huhampri zmante'nea knazampina uofresunegu tazeri ante fatgo nehie. **33** E'ina hu'negu, nenfugata nensarogata tamagra mono ne'zama nenaku'ma emeri atruma hanuta, zamavega ante'enkeno maka etru hutenketa neho. **34** Hagi mago'mofoma agamatesigeno'a, agra nonkuma'arega neteno eno. Na'ankure tamagrama etruma hanafina, refko ohunte

ahunte zana omnegahie. Hagi mago'azana, henkama esu'na
emerí fatgo hugahue.

12 Hagi nafuhegatane nensarogata avamu'mofo muse
zanku'ma hu'naza zamofonku eriama hu'na tamasami'za hue.
2 Tamagra ko'ma kaza osu havi anumzante'ma mani'naza
no mani'zantmia antahi'naze. Ke osu anumzama antre'za tro
hunte'naza zamo tamavazu higetma, avaririta fanane hukante
vu'naze. 3 E'ina hu'negu nagra anage hu'na antahintahima
eriama hanugura neramasamue, magore huno Anumzamofo
Avamu'ma agu'afima mani'ne'nia vahe'mo'a Jisasina huhaviza
huontegahie. Hagi mago'mo'e huno Jisasi'a Ra mani'ne
huno osugahianagi, Ruotge Avamu'mo aza hanigenoke'za
anankea hugahie. 4 Hagi hakare'a ruzahu ruzahu museza
me'neanagi, magoke Avamu'moke'za neramie. 5 Ruzahu ruzahu
mono eri'za me'neanagi, Ramo'a magoke mani'ne. 6 Hagi
ruzahu ruzahu kankamumpinti eri'zana e'nerianagi, magoke
Anumzamoke hakare zampine, mika vahepina e'nerie. 7
Hu'neanagi Avamu'mofo eri'zamo'a magoke magoke'mofonte,
mikomofo so'ezza efore hanigu ko tami'ne. 8 Hagi mago'mofona
Avamupina knare antahintahiza (wisdom) nemino, mago'mofona
ama' antahi'za (knowledge) nemie. Hianagi magoke Avamu'mo,
9 mago'mofona amentinti hu'za nemino, mago'mofona vahe'ma
azeri knamare museza ami'ne. Hianagi magoke Avamu'mo
zanami'ne. 10 Hagi mago'mofona ruzahu ruzahu kaguvaza eri
fore hu museza nemino, mago'mofona kasnampa ke huamahu
museza nemino, mago'mofona avamutmima rezagneno ke
museza nemino, mago'mofona ruzahu ruzahu zamegeru'maru
museza nemino, hagi mago'mofona ruzahu ruzahu zamageru'ma
rukrehu hu museza ami'ne. 11 Hianagi magoke ana Avamu'moke,

mika'a eri'zana erifore nehie. Hagi agra'a avesite magoke magoke'mofona nazano aminaku'ma hia musezana refko huno nemie. **12** Anahukna huno vahe'mofona magoke avufa me'neanagi, ru avufgamo ru avufgamo rekanuhegeno, magoke vahera fore huno mani'ne. Kraisi'a anahukna hu'ne. **13** Na'ankure mago'amota Jiu vahe manunkeno, mago'amota Griki vahe mani'none. Mago'amota kazokzo eri'za vahe manunkeno, mago'amota amne vahe mani'none. Hianagi tagra magoke Avamupi tina freta, magoke avufafi mani'none. Ana higeta ana miko'mota magoke Avamupinti tazahu'zana e'nerune. **14** Hagi magoke tavufa me'neanagi, ru tavufa ru tavufamo rekanuhegeno magoke tavufa fore hu'ne. **15** Hagi agamo huno, nagra azana omani'noanki'na, mago avufa omani'noe haniana, e'i ana kema haniazamo'a, avufafintira azeri otregahie. **16** Hagi agesamo huno, nagra avurga omaninoanki'na, mago avufa omani'noe haniana, e'i ana kema haniazamo'a, avufafintira azeri otregahie. **17** Hianagi mika avufamo'ma avurgagema mesigeno'a, inafinti kea antahigahie? Hianagi mika avufamo agesage mesigeno'a, inafinti mna antahigahie? **18** Ana hu'negu tamage Anumzamo'a, magoke magoke tavufa eri mago huno ante'neankino, Anumzamo agra'a avesite mesie huno hire mete mete hu'ne. **19** Hu'neanagi mika avufamo magoke avufgage'ma measina, avufamo'a inankna huno mesine? **20** Ana hu'negu hakare avufgamo eme rekanuhegeno, magoke avufa fore huno me'ne. **21** Hagi avurgamo'a azamofonkura huno, kagrama nazama hu'zankura antahi nonkamue huno osugahie. Ana zanke huno asenimo'a agamofonkura huno, kagrama nazama huzankura, nagra antahi nogamue huno osugahie. **22** Hianagi mago'a tavufamokizmia hanavezmi omne'ne huta

huna tavufamo'za, ra eri'za e'nerize. **23** Hagi tagrama knare osu'ne huta huna tavufamofona knare'za hunenteta, hagi tageze tavufe huta huna tavufamofona kukena huzmanteta refi'netone.

24 Knare'ma huno amate me'nea tavufamo'za mago'zankura atupara nosaze. Ana nehunanagi, Anumzamo'a ana miko tavufa eri magoke higeno, tavufamofona eri magoke huno knare osu tavufamo'za knare'za nehaze. **25** E'ina hanigeno avufamo'a atane'zana amu'nozmifina omanegahie. Hagi anahukna huno amu'no zamifina oza aza huno mani'za megahie. **26** Hagi mago kaziga avufamo ata hozama eri sigeno'a, mika'mo'za ana atazana erigahaze. Hagi mago kaziga'a avufamo ra agima erinkeno'a, ana miko avufamo'za muse hugahaze. **27** Menina tamagra Kraisi avufa mani'naze. Hagi magoke magoke'mota, mago avufga'a manite manite hu'naze. **28** Hagi mono eri'za erisagu Anumzamo'ma huhamprizmante'nea vahera, esera aposol nagare, anantera kasanampa vahere, anantera rempi huzami vahere. Ana huteno Anumzamo'a kaguvazama hu vahera zamazeri onetino, mago'amokizmia vahe'ma krifintima zamazeri kanamare muse'za nezamino, mago'amokizmia kva eri'za eri muse'za nezamino, mago'amokizmia ruzahu ruzahu ageru ru muse'za zami'ne. **29** Mika'mo'za aposol nagake mani'nazafi? Mika'mo'za kasanampa vaheke mani'nazafi? Mika'mo'za rempi huzami vaheke mani'nazafi? Mika'mo'za kaguvaza hu vaheke mani'nazafi? **30** Mika'mo'za vahe'ma zamazeri knamare museza eri vaheke mani'nazafi? Mika'mo'za ruzahu, ruzahu zmageru, ru vaheke mani'nazafi? Mika'mo'za zmageru rekrehetu vaheke mani'nazafi? I'o anara osugahaze.

31 Hu'neanagi tamagu'areti huta agetere'nea muse zankura

tamavesinteho. Nagra mago knare'zantfa huno mareri'nea kana tamaveri hugahue.

13 Hagi nagrama vahe zmagerupintiro, ankeru vahe'mokizimi zmagerura rugahuanagi, vahe'ma avesinte'zama omne'nenke'na, bero'mo ra ageru riankna nehu'na, zavena ahageno ageru riankna hugahue. **2** Hagi kasnampa ke hu muse'zana mika e'neri'na, Anumzamofoma oku'a antahizama'a e'neri'na, mika knare antahi'zana e'neri'na, nagra hanave namentintia hanugeno agona retufega hugahianagi, vahe'ma avesinte'zama omne'nenigeno'a ana miko'za hanua zamo'a amnezankna hugahie. **3** Hagi nagrama maka'zani'a zamunte omne vahe nezami'na, atresugenno tevefi navufa krefnane hugahianagi, nagripima vahe'ma avesinte'zama omne'nesigeno'a, ana miko'zamo'a amnezankna hugahie. **4** Vahe'ma avesinte'zana, agazone huno mani'zane, avesinte'zane so'e avu'ava hu'zane, avesinte'zana kenunu hu'za omneno, ra agi eri'zana omne'ne, avesinte'zana avufga ra hu avu'ava hu'zana omne'ne, **5** veganokno'zana omne'ne, agragu ke antahi'zana omne'ne, agra ame'ama huno asi ovazi'zane, rumo haviza hunte'nea zanku nontahino agekanino mani'zane. **6** Vahe'ma avesinte'zamo'a havi avu'ava'zankura musena nosie. Hagi tamagezanku musena nehie. **7** Avesinte'zamo'a, agazone huno mani'neno maka knazana e'nerino, amentinti nehuno, maka'za fore hugahie huno nentahino, maka knazana erino vu'za me'ne. **8** Vahe'ma Avesinte'zamo'a vagaoregahie. Ana hu'neanagi kasnampa ke huzamo'ene, ru vahe zamageru ru'zamo'ene, knare antahintahi zamo'a vagaregahie. **9** Na'ankure tagra osi'a antahi'none. Anama antahi'nona avamente kasnampa kea huama nehune. **10** Hu'neanagi ana miko'zamofo fatgo zama esigeno'a, osi'a zama nentahuna zamo'a fanane hugahie.

11 Ko'ma mofavre'ma mani'norera, mofavremo nehiaza hu'na nanekea nehu'na, antahintahia nehu'na, nagesa antahi'na refko'ma hu'noana mofavremo'za nehzaza hu'noe. Hu'neanagi rama nese'na, mofavre avu'ava'zana atre'noe. **12** E'ina hu'negu kapopima avugosa ke so'e osiakna menina nehunanki, henka'a Anumzamofo avufi oge age hugahune. Menina Agrira osi'a ke'na antahi'na hu'noanagi, henka'a kena antahi'na hugahue. Agrama nagri'ma maka nageno antahini hu'neankna hugahue. **13** Hagi ama'i tagufa'a zamo mevava hugahie, amentintihu zane, fore hugahie huno antahi amuha hu'zane, avesinte zane me'ne. Hu'neanagi ana tagufa zampintira, avesinte'zamo agatereno tusi'a zana me'ne.

14 Hagi tamagra vahe'mokizmia hanavetita tamavesinezmanteta, Avamu'mofo musezantaminkura tusiza huta tamavesinteho. Hianagi Avamumofo musezanpintira, kasnampa ke huama huzanku tamavesinteho. **2** Na'ankure mago'mo ru ageru araniana vahetega norie. Hagi Anumzamofontega ru agerura nerie. Na'ankure mago'mo'a ana agerura antahi ama nosianagi, agra'a avamupi frakino oku me'nea ageru nerie. **3** Hu'neanagi iza'o kasnampa ke nehimo'a, vahe zamazeri hankavenetino, zmazahuke nezmasamino, zamarimpa zamazeri so'e huke zmasamigahie. **4** Iza'o ru ageru nerimo'a, agra'a azeri hanavenetie. Hu'neanagi iza'o kasnampa ke nehimo'a, mono kevumofo zamazeri hanavenetie. **5** Nagri'ma navemanesiana, maka'mota ru tamageru'ma aranazegu navenesie. Hu'neanagi ra navesi'zana, maka'motma kasnampa ke hiho nehue. Hagi iza'o kasnampa ke nehimo'a, ru ageru nerimofona azeri agatere'ne. Hu'neanagi ru agerutamima nerimo'ma, ana ageru'mofo agu'agesa eri ama hanigeno'a, mono kevua

zamazeri hanavetigahie. **6** Menina nenfugatane nasareheta, tamagrite ne-ena ru agerutmima ranuana, inankna huta tamaza hu'zana erigahaze? Hagi nagra eriama nehu'na, antahintahi nerami'na, kasnampa kene nehu'na, rempi hunerami'na, eriama hu'na tmasamisugenoke, antahi amara hugahaze. **7** E'i asimu omne zantamimo, konkemo'ene zavenamo'ene ageru neriankna huno, ageru ru so'ema osaniana nankna hu'za ana konkene zavenamokea zanageru'ma arana'ana antahi amara hugahaze? **8** Hagi ufemo'ma krafa hu so'ema osnigeno'a, iza ha'ma hanigura retro hugahie? **9** Tamagranena e'i anahukna hugahaze. Vahe'mo'za nentahisaza zmageru'ma aranageno'a knare hugahie. Ru zmageru'ma aranage'za, nankna hu'za vahe'mo'za ana ketmia antahi amara hugahaze? Ana keka'amo'a amne'zankna hugahie. **10** Mopafina hakare'a ruzahu ruzahu zmageru me'nne, anamokizmi zmageru'mofona agafa'a me'nne. **11** Hagi ru ageru arania kemofo agafa'ama antahi ama'ma osnuana, nagra agritera ru vahe kna hunentesnugen, agranena nagritera ru vahekna hunantegahie. **12** Tamagra'enena e'inahukna hugahaze. Tamagra Anumzamofo Avamu'mofo musezantminku'ma tusi'a antahintahima hanuta, maka mono kevuma zamaza hania Ruotge Avamumofo musezanku hankavetita eriama hiho. **13** E'ina hu'negu, iza'o ru ageru aranimo'a, ana kema agra'a rekrehe hu'zankura, nunamu huno Anumzamofo antahigeno. **14** Na'ankure nagrama ru agerupinti'ma nunamuma hanuana, avamuni'amo nunamuna nehie. Hianagi antahintahi ni'afina nena'a nomane. **15** Hu'negu nagra na'a hugahue? Antahintahini'areti nunamuna nehu'na, Avamuni'areti ene nunamuna hugahue. Avamuni'areti zagamera nehu'na, antahintahini'areti enena zagamera hugahue. **16** Ana

hu'negu kagrama avamupintike Anumzamofo agima erisaga
nehanankeno'a, inankna hu'za ana ageru'ma noranamo'za antahi
amara hu'za, kagrama hanana kerera tamage hu'za hugahaze?
Na'ankure kagrama agima erisaga hananankea antahi ama'
nosaze. **17** Na'ankure kagra, knare zantfa hunka Anumzamofo
musenke huntegahane. Hu'neanagi rumofona aza hunka azeri
hankave otigahane. **18** Nagrama mika'motma tamagetere'na
rama'a ru agerupinti'ma neruazankura, Anumzamofona
susu huntoe. **19** Hu'neanagi nagri'ma navemanesiana
mono kevufima, antahi ama huga nanekema 5fu'a kema
hanugeno, ruga'amokizmima knare antahintahi zami'zamo'a,
ru agerupinti'ma (10 tauseni'a) kema hanuana agatere'ne. **20**
Nena fugatane nasarehetma, osi mofavregna huta antahintahia
osih, havi avu'ava huzankura aminte mofavre'gna hih.
Hagi antahintahi tamifina ra vahe kna huta maniho. **21**
Nagrini'a vahepina ontahi'naza agerupinti kea hunezami'na,
ru vahe zamagipi huvazi'na hugahuanagi, ontahigosaze,
huno Anumzamofo avontafepina hu'ne. (Ais 28:11-12) **22**
Hu'negu ru ageru'ma ru'zana e'i avame'zane, zamentinti hu'naza
vahe'mokizmi avame zanompage, zamentinti osu vahe'mokizmi
avame'zane. Hu'neanagi kasnampa kema hu'zana, zamentinti
osu vahe'mokizmi zamaza hu'zankurompage, zamentinti hu'naza
vahe'mokizmi zamaza hugahie. **23** E'ina hu'negu maka mono
kevumo'zama eme atru nehu'zama ana maka'mozama ru
agerutmima neranage'zama, ana ageru'ma noranamo'zo,
zamentinti nosnamo'za efresu'za, tamagra neginagi nehaze
hu'za hugahaze. **24** Hu'neanagi maka'motma kasnampa kema
nehanageno, amentinti nosanimo'ene, kasanampa kema
nosanimo'ma efresuno'a ana maka'mota hanaza kemo eriama

hinkeno, kumi'a agra negeno, nagra kumi vahe mani'noe huno
refko hugahie. **25** Ana hanigeno agu'afima oku me'ne'nia
agu'agesamo'a efore hanigeno, agra arena reno avugosaregati
umaseno, Anumzamofona mono hunenteno, hu'ama huno
tamage Anumzamo'a tamagrane amu'nontamifi mani'ne huno
hugahie. **26** E'ina hu'negu nenfugatane nasarehehetna'a efore
hugahie? Eme atru hanaza zupa, mago'mo mono zagamera
nehinkeno, mago'mo rempi huneraminkeno, mago'mo kasefa
zama Anumzamo'ma averi haniaza huama nehinkeno, mago'mo
ru ageru'ma nerinkeno, mago'mo rekrehe hugahie. Hagi e'i
ana maka'zama hanaza zamo'a, knare huno mono kevua
zamaza huno, Ramofompina zamazeri hankavetigahie. **27**
Iza'o ru ageru'ma aranuno'a, taremake ana znagerura ri'o.
Hagi tagufa agetere'amo'za oriho. Mago'mo ru agerura nerina,
mago'mo rekrehe hunete'na hiho. **28** Hu'neanagi rekrehe hu
vahe'ma omani'nena, ru ageru ru vahe'mo'a akoheno taganeno
mono kevufina mani'neno, agra'a Anumzamofontega agerura
akoheno rugahie. **29** Zametrenke'za tareo tagufa kasnampa
vahe'mo'za kasnampa kea nehanage'za ruga'amo'za ana
nanakea refko hu'za antahihi. **30** Hianagi Anumzamo mopafi
mani'nesimofonte'ma kasefa'za averi nehina, kotama kema
nehanimo'a, kea osu taganeno mani'enkeno, kea huama
hugahie. **31** Hagi tamagra maka'mota amne kasnampa kea
magoke magoke'mota hutuhute nehnageno, maka'mofona
antahintahia nezamino, zamazeri hankavetigahie. **32** Kasnampa
kema hu avamu'mofo agorga'a mani'ne'za, kasnampa vahe'mo'za
knazmima esige'za, kasnampa kea hutere hugahaze. **33**
Na'ankure Anumzamo'a ke'onke'za eri savrisavrah Anumzana
omani'ne, hagi rimpa fru Anumzane. Maka Anumzamofo mono

kevu naga zamazeri ruotge hu'neankna hiho. **34** Mono kevuma eritru hanafina, a'nemo'za akohe'za vene'nemofo zamagorga maniho. Na'ankure kema hu'zankura hu izo huozmante'naze. Tra kemo'ma hu'nea kante ante'za vene'nemofo zamagorga'a maniho. **35** Hagi a'nemo'za mago'a zanku antahisunema hanu'za, nontega nezmave antahigeho, na'ankure a'mo mono kevufi ke hu'zamo'a knarera osu'ne. **36** Tamagrama antahi'zana Anumzamofo kema antahizamo'a, tamagripinti agafa huteno, tamagripinke vagaregahie hutma Korinti vahe'mota nehazafi? I'o, tamagra havige nehaze. **37** Mago'mo'ma huno kasnampa vahe mani'noe huge, avamupi antahi'zane vahe mani'noe huno hanimofona, atrenkeno anamo'a amama kreramua avonkura, Ramo huo huno hunte'nea kasege huno agra'a antahi'ama hino. **38** Hagi ama avoma keno antahino osanimofona, agrira ke'za antahi'za osugahaze. **39** Ana hu'negu nafu nagnaheta kasnampa ke hu'zankura tusiza huno tamenesinketa, ru agerupinti'ma ru'zana aseovaziho. **40** Hianagi maka zama hanaza zamo'a, fatgo hina knare kankamunte eriteta hiho.

15 Hanki nenfugatane nasarehegata Anumzamofo Knare Musenke ko tamasamugeta eri'neta, oti hanavetita anankere tamentinti hu'haza naneke hurmagesa hunaku nehue. **2** Ama'i ana Knare Musenkereti tamahokeno tamagu'vazineanki, tamagrama amama huama nehua kema azeri akonama osnageno'a, tamentintimo'a amne'zankna hugahie. **3** Na'ankure miko'zama agatere'neazana nagra ko erite'na, neramasmue. E'i anazana Anumzamofo avontafepi kre'nea kante Kraisi'a tagri kumiku huno efr'i'ne. **4** Anumzamofo avontafepima krente'nea kante ante'za asentetageno frino maniteno tagufa knare oti'ne. **5** Pitante (Sifas) ufore huteno, ete 12fu'a amage'ma nentaza disaipol nagate ufore

hu'ne. **6** Ana huteno 500'a agatere'a amage'ante disaipol naga mani'nazafi ufore hige'za ana miko'mo'za ke'naze. Anampintira rama'amo'za menina ofri manizageno, hagi mago'amo'za fri'naze. **7** Hanki anante Jemisinte ufore huteno, ete maka aposol nagate efore nehuno, **8** hagi henka'arfana, kasentega kna me'negeno ame huno kasenante'nea ne', e'i nagrite efore hu'ne. **9** Na'ankure Anumzamofo aposol nagapina nagra henka vahere, nagrikura tamagra Anumzamofo eri'za vahere hutma huga vahera omani'noe. Na'ankure Anumzamofo mono nagamokizmi ha' rezmante'noe. **10** Hu'neanagi Anumzamofo asunku'zanteti nagra amanahu kna hu'na mani'noe. Hagi nagri'ma asunku'ma hunante'nea zamo'a amne zankanara osu'ne. Ete ana miko eri'za nagara zmagatere'na eri'zana mago'ane eri'noana nagra'niompage, Anumzamofo asunkuzamo'a nigrane me'nege'na eri'noe. **11** Hanki nagra huama hanuo, zamagra eri'za naga'mo'za huama hnazo, tagra ana nanekege huama nehunketa tamagra tamentintia hu'naze. **12** Hagi Kraisi'a fripinti ot'i'ne hu'za huama hu'nazana, inanka huta mago'amota amu'nontmifintira, vahe'mo'za fripintira o'notize huta nehaze? **13** Hu'neanagi friteno ot'i'zama omneneresina, Kraisi'enena ora otisine. **14** Anumzamo'a Kraisina fripinti azeri oraot'i'neresina, mono nanekema huama hunazamo'a amne'zankna higeno, tamagri tamentintimo'enena amne'zankna hisine. **15** Mago ene Anumzamofona havige eri'za vahere huno tazeri fore hisine. Na'ankure Jisasina fri'nefinti Anumzamo azerioti'ne huta tagrama hanuna zamo'a, Anumzamofona ha'rentegahie. Jisasi'a ora'otineresina, fri'namo'za ora'otizaresine. **16** Na'ankure fri'nea vahera azeri oranotiasina, Kraisinena azeri ora otisine. **17** Hanki Kraisima azeri oraotineasina tamagri tamentintimo'a amnezanka

higeta, tamagra kumipi manizasine. **18** Hagi Kraisinku zamentinti
nehu'za fri'naza vahe'mo'za fanene hazasine. **19** Hagi Kraisimpi
menima tasimu erita mani'nona nomanizampinke taza hugahie
huta tamentinti hanunana, vahe'mo'za zamasunku hunezmantaza
vahera zamagatereta, tusi'a zamasunku hurantesaza vahe
manigahune. **20** Hu'neanagi Kraisina fripinti Anumzamo azeri
oti'neazamo'a, fri'naza vahe'mokizmia ese ne'za hozafinti
eriankna hu'ne. **21** Na'ankure magoke ne'pinti fri'zana egeno,
anahukna huno friteno oti'zana magoke nepinti e'ne. **22** Anahukna
hu'za Adamu fri'neaza hu'za maka naga'amo'za frisnageno,
anahukna hu'za Kraisi'ma kasefa huno asimu'ma eri'neaza
hu'za, naga'amo'za zmasimura erigahaze. **23** Hu'neanagi
mago magomofona fripinti'ma azeri otisiana kankamuma'a
metere hu'ne. Esera Kraisi oti'neankino ananteria, Agrama
ete esnia knafina, Kraisi naga'moza otigahaze. **24** Ananteria
mika'zama vagare knamo esigeno, Jisasi'a maka hanave
kumatamine vahe'ene, ugagota kva vahe'ene mika ama mopafi
hanavema zamahe fanane hutenu'o'a, Kraisi'a hanave'a Nef
Anumzamofo azampi antegahie. **25** Na'ankure miko'zamo'a
Kraisi kvafi me'enigeno, mika ha' vahe'amokizmia zamazeri
fenkamitegahie. **26** Henkarafama, azeri fanene haniana
fri'zamo ha'ma renerantea zana, ahe fanane hugahie. **27**
Na'ankure avontafepi amanage hu'ne, Mika'za kegavahu hanavea
Anumzamo'a Kraisi ami'ne. (Sam-Zga 8:6) Hu'neanagi ana
hanavea Anumzamo'a Kraisi ami'neankino, Anumzamo'a Kraisi
agorga omanine. **28** Mika'zana Kraisi'a agatereteno, Agri'ma
hankavema ami'nemofo, Nef Anumzamofo agorga maninkeno,
Anumzamo hakare zampine, mika kaziga manigahie. **29**
Fripinti'ma azeri oti'zama omne'neresina, na'a hugahaze fri

vahe zamaza hukure hu'za mono ti nefraza vahe'mo'za? Ana fri
vahe'mo'zama o'otisageno'a, hagi na'ante fri vahera zamaza
hukure hu'za mono tina nefraze? 30 Hagi nahigeta tagranena
hazenke zampina hakaregna nemnune? 31 Tamage hu'na,
nenfugata nensarogta neramasmue. Ranti Krais Jisasimpi
mani'nena tamagriku muse nehua zamo'a, mika zupa fri'za
hutere nehue. 32 Efesasi kumapima afi' zagane ha'ma hu'noana,
tamagrama antahi'zana nagra na'a eri'noe? Hanki fri vahe'mo'za
o'otizaresina, Menina ne'zane tine negahune, na'ankure okina
frigahune. 33 Hanki negi vahera omaniho. Havi zamavuzmava
nehaza vahe'mo'zane utagroteta manisazana tamazeri havige
vahe asegahaze. 34 Tamagra knare antahintahi enerita kumira
osih. Na'ankure mago'amotma Anumzamofona keta antahita
osu'nazagu, ama kema nehuana tamagaze hinogu nehue. 35
Hu'neanagi mago'mo'a anage hugahie. Inankna huno fri vahera
zamazeri otigahie? Inanknahu zamufgane otigahaze? 36 Kagra
Neginenane! Avimazama mopafi ase'nankeno'a fritenoke rutaha
huno nehage. 37 Avimzama nesanana rutareno ko hage'nea
zana nonkrine. Hianagi witi avimzampi ru avimazana amne
ase'nankeno henka hageno ruzahura nehie. 38 Hu'neanagi
Anumzamo Agra'a avesite mika avimzamofona, mago mago
avimzamofona agri'a avufga'a amite amite hu'ne. 39 Maka
zagamofona mago'zahu avufga omne'ne. Vahe'mota mago'zahu
tavufgane manunkeno, zagagafamo'za ruzahu zamavufaga
erizageno, namamo'za ruzahu zamufga erizageno, noza'mo'za
ru zamufga eri'haze. 40 Anahukna huno monare avufga megeno,
mopare avufga me'ne. Hu'neanagi monare avasese zana mago
megeno, mopare avasese zana mago ete me'ne. 41 Hanki
zagemofona mago avasaseza megeno, ikamofona ru avasaseza

megeno, hanafitamimofona ru avasase zana me'ne. Na'ankure mago mago hanafi'mo'a, agra'a avasasezane me'ne. **42** E'inahu kna huno fri vahe'mokizmi zamazeri otisia zupa, kahefa zamufga fore hugahie. Kerifi asentesia avufga fanane hugahie. Hanki fripinti ete otisania avufga, fanane osu mevava hugahie. **43** Hanki kasrino knare osu'nenia avufga asentegahie. Hianagi azeri otisia avufga, knare huno masa'ane avufgare azeri otigahie. Hanave'a omne avufga asentegahianagi, hanave nentake avufga azeri otigahie. **44** Hagi asentesnia avufga mopafi avufga asentegahie. Azeri otisnia avufga, monare avufga azeri otigahie. Ana hu'negu mopare avufga me'nesigeno'a, anazanke huno monare avufgane megahie. **45** Hagi Anumzamofo avontafepina anage huno krente'ne, Ese nera Adamu tro higeno, asimura erino mani'ne. (Jen-Agf 2:7) Hagi henka fore hu'nea Adamu'a zamasimu zami Avamu efore hu'ne. **46** Hu'neanagi esera monare avufga fore osu'ne. Hagi esera mopare avufga fore hutegen, henka monare avufga fore nehie. **47** Kota nera mopafinti kugupa erino tro higeno asimura erino mani'ne. Hianagi henka nera Kraisikino monafinkati e'ne. **48** Anahukna huno mopare nera manigeno, mopafi vahe'enena mani'naze. Hagi anahukna huno monare nera manigeno, monare vahe'enena mani'naze. **49** Menina mopare tro hu'nea ne'kna huno tro hurante'neankita, anahukna huta henka'a monafinkati ne' kna hugahune. **50** Nena fugata nensarogata amanage hu'na neramasamue, ama tavufgarera Anumzamofo Kumara erisanti oharegahune. Anahu kna huno fananene hu'zamo'a manevava zana erisanti oharegahie. **51** Oku naneke tmasami'za huanki antahiho, mika'mota ofrigahunanagi tagra ruzahé hugahune. **52** Mago knama esigeno'a, tavuraga keramage nehuna kna huno, vagare ufenkrafa hanigeno'a, ana

fri'naza vahe'mo'za o'netisageta mika kasefa huta mani'nomota
tavufamo'a ruzahē hanigeta onkasari hanave tavufa erigahune.

53 Na'ankure kasri avufgamo'a onksari avufga eri hankrenkeno,
fri avufgamo'a ofri avufga eri hankregahie. **54** Hu'neanagi ana
kasri avufgamo'a onkasri avufga erisigeno'a, fri avufgamo'a
ofri avufga erina, avontafepi amanage huno kre'nea kemo
e'ama hugahie, Fri'zana Anumzamo ahe fanane hugahie!

(Ais 25:8) **55** Fri'zamoka ina hanaveka'a me'ne? Fri'zamoka
atama neminazanka'a ina me'ne? (Hos 13:14) (**Hadēs g86**)

56 Kumi'mo fri'zamofo atazana eri fore nehigeno, kumi'mo'a
hanave'a kasegefinti e'nerie. **57** Hu'neanagi Anumzamofo muse
huntesune, Rantimofo Jisasimpi Kraisimpi taza higeta hara
agatenerone. **58** E'ina hu'negu tusiza hu'na navesi nermantoa
nenfugata nensarogta, oti hanavetita kaza osu maniho. Hakare
zupa Ramofo eri'zama eri'zankuke nentahita maniho. Hagi
antahio, Ramofo eri'zama tamamu'nama nehagegetma e'neriza
zamo'a amnezanknara osugahie.

16 Hagi Jerusalemi kumate mani'naza mono naga'mokizmi
zagoma eri atruma nehaza zanku hu'za hue, Galesia
kaziga mani'naza mono naga'ma hiho hu'na huzmante'noaza
hiho. **2** Hakare Sontamofona ese knare, tamagra mago
mago'mota zago'ma erisafintira, erisnaza avamente refko
hutma eri atru hu'enke'na, nagrama esua knafina eri tru
huzankura amuhoa osaneno. **3** Nagrama uhanatisu'na huhampri'
zmante'nesamokizmia, huzmanta'nena, ana musezamofo
agofetura avonkrenta'nena eri'za Jerusalemi kumate vugahaze.
4 Hagi nagrama vuga'ma hanugen'o'a, zamagra nagrane
vugahaze. **5** Hu'neanagi nagra Masetonia vute'na, henka
tamagritega egahue. Na'ankure Masetoniati ru kitagi'na vugahue.

6 Tamagrane osi'agna umanisuo, ete zasi ko'ma atu ikampina tamagrane mani vagaresugeta, inantegama vunaku'ma hanurega naza hu'tma hunante'nage'na vugahue. **7** Na'ankure nagri'ma navenesiana menima vanu'na tamageme vuku nosuanki, Anumzamofo avesima me'enke'na mago'a zaza kna tamagrane umani'ne'na vanuegu nehue. **8** Hu'neanagi Efesasi kumate mani'nesugeno, Pentikos kna efore hugahie. **9** Na'ankure eri'zamo'ma knare huno vuga kana rama'a efore nehigeno, rama'a vahe'mo'zanena ha' renenantaze. **10** Hanki Timoti'ma esigeta, nagra Ramofo eri'za e'neruankna huno e'neria neki, ke'amofona antahinemita azeri so'e hiho. **11** Kva hunenteta agia eri haviza osiho. Hanki ana nehuta aza nehnageno mani'neno, fru huno nagra mani'ne'nurega ehanatisnie. Timoti'ene mago'a nafu naganahe'zane ete esnagu zamavega ante'na mani'noe. **12** Hu'neanagi Apolosi, nerifu kazigagu hu'za hue. Tamagritegama nerufuzanema esia kazigatira, nagra razampi azeri hanaveti kea nesamue. Hagi menima esiana agri'a avesi omne'neanagi, kankamuma me'enkeno'a agra egahie. **13** Hagi kava huta nemanita, tamentinti zampi oti hanavenetita, korera osu hanavetita maniho. **14** Maka'zama hanaza'zampina tamavesinte avu'ava zampinti hiho. **15** Nenfugta nensarogta tamagra antahi'naze, (Stefanisi ene noma'afi mani'nazana, ese'ma Akaia kumateti zmagu'a rukrehe hu'naza nagare. Ana hute'za zamagra zamagu'a mono eri'zampi ami vaganere'za mono eri'za e'neri'za nagare). **16** Hanki tamagranena e'inahukna vahe'mofo avu'ava avaririta mani'neta, hagi anahukna eri'zama zamaza hu'za erisazamokizmine, nezmavariritma zmagorga'a manihogu neramasamue. **17** Stefanasi ene Fotunatusi'ene Akiakusizama aza zankura nagra muse hu'no'e. Na'ankure

tamagrama huga'zana osazage'za zamagra eme naza hu'naze.

18 Na'ankure knare antahintahi nami'za avamu'nifina nazeri
fru nehu'za, tamagri'ene ana hu'naze. E'inahukna vahetmina
zamege so'e hiho. **19** Esia kaziga mani'naza mono naga'mo'za
mussenke atreramantaze. Akuir'aene Prisila'ene noznifima
nemaniza mono naga'mo'zanena anahukna hu'za zamagu'areti
mussenkea atrenermantaze. **20** Maka Anumzamofo naga'mo'za
mussenkezmia atreramantaze. Hanki tamagranena ana zanke
huta mono naga'mota muse ohunte ahunte hiho. **21** Poli'na
nagra, ama mussenkea, nagra nazampinti kre neramue. **22**
Hanki Ramofoma avesi ontesnimo'a, sifnafi manino haviza
hugahie. Rantimoka eno! **23** Hanki Ramofo Jisasi asunku
zamo'a tamagrane mesanie. **24** Nagri nevesi'zamo'a maka Krais
Jisasimpima mani'naza naga'motarega mesanie. Tamage.

2 Korinti

1 Hagi ama avona Poli'na Anumzamo, Krais Jisasi'a aposol eri'za vahe manio huno huhamprinante ne'mo'nane, nerafu Timoti'ene kreneramu'e. Ama ana avona, Korinti mono nagate'ene ana miko Akai (Greece) kaziga Anumzamofo mono naga'ma mani'narega kreneramu'e. **2** Anumzanti nafatimofone, Ranti Krais Jisasi asunkuzamo'ene rimp a fruzamo'a tamagrane mesie. **3** Hagi Rantimofo Krais Jisasi Nefa, Anumzamo Agrake mika asuragi zamofo agafa'a mani'neno, tazeri fruma nehimofe agi erisaga huta musena huntesune. **4** Mika knazantifina Agra tazeri fru nehie. E'inahu nehigu Anumzamo'ma tagri'ma nehiankita rumokizmia knafima mani'nesageta zamazeri fru hanune. **5** Na'ankure Jisas Kraisi'ma, rama'a ataza eri'neankita, tagranena tata anahukna huta enerunanagi, anahukna huno Kraisi rimp a fruzamo'a tagu'afina avi'nete. **6** Tamagri knare zanku'ene tamaho'ma ke'zanku'ene, tagrira tazeri havizana hugahaze. Tamagrama fru huta manisagu, Anumzamo'a tagrira tazeri fru nehie. E'i ana zamo'ma eama nehiana, akoheno manineno, tagrama eneruna kna knazama e'nerimofonte efore nehie. **7** Ana hu'negu hanave antahintahi nehuta amuha'ma huramunana, tagrama erisuna tatazampintima, tamagra'enenema erisazana, tamagra anazanke huta Anumzamo'ma fruzama tamisifintira erigahaze. **8** Nenfugatane nasarehetanena antahigahaze, Esia kaziga kumapina knazampima ufre'nonana, ana kna'zamo'a tazerino arentakro nehuno, tagri hanavea tazeri agateregeta, ana knazana eriga osuta hago nefrumpi huta antahi'none. **9** Tamage, tagrama tagu'afima antahunana, trake'mo refko huranteno frigahaze huno hiankna nehune. Hianagi e'inahuzama fore'ma nehiana, tagra hanavegura ontahigahunanki, Anumzamo'ma

fri'nea vahe'ma zamazeri onetia hanavegu antahigahune.

10 Hagi fri kankamumpintira tahokeno tavreneankino, ete
rune, tavregahie huta tagra amuhara Agriku nehanunkeno
Anumzamo'a mago'ane tahokeheno tagu vazigahie. **11**
Tamagrama nunamuma hutma taza hazazamo'ma eama hiana,
rama'a vahe'mo'za hu musena hu'naze. Na'ankure tagri'ma
kegava krirantezanku nunamuna hazageno, Anumzamo'a ana
nunamuntamia antahizmino taza hu'ne. **12** Hagi tagrama
musema hunana, tamagra manuna knafina ama' tagu'tagesama
tagu'afima e'nerita, hakare'za hu'nazampi mani fatgo nehuta,
ruotge huta nemanita, Anumzamofo so'e avu'avazante nemanita,
ama mopafi antahizankura ontahi'none. **13** Na'ankure avoma
kreraminofina, tamagrama nehampritma antahini osuga'zana
kreonte'noanki, nagrama antahuana, mikozana amatfa hu'naze.

14 Meninena tagrira tageta antahirami so'e osugahazanagi,
Rantimo Jisas Kraisi esia zupa, tamagra musena tagrikura
nehanageta, tagranena anazanke huta tamagrikura musena
hugahune. **15** Nagra tamage ko ke'na antahina huneramina,
ese'ma retro hu'noana, tamagrite'ma esu'azamo'a tare asomura
erigahaze. **16** Masedoniama enevuna eme tamageme evute'na,
ete anantegatima esugeta tamagra naza hanage'na Judia
vugahue. **17** Nahigeno enaku'ma retroma hu'neana atreno ome
huta nantahigegahaze? Nagrikura antahintahini'a retrora osu'nefi
huta hugahaze? Hifi nagra ama mopafi vahe'mo'za i'o hugazanku
izo nehu'za, izo hugazanku i'o nehazankna vahere hutma
nagrikura nehazo? **18** Hu'neanagi Anumzamo'a Agra'a ke'are oti
ne'kina, tagranema neramasamuna nanekemo'a, tamagema
huta izo hanuta, izo hugahune. l'oma hanuta, i'o hugahune. **19**
Na'ankure Anumzamofo mofavre Jisas Kraisi agi agenkema

nagragi, Timotiki, Sailasiki hutama neramasmunana, Jisas Krais'i'a Anumzamofo nemofonku'ma huama huta neramasamunana, Agra izoma nehuno'a, i'o osu Ne'mofo agenke huama huta neramasamune. **20** Anumzamo'ma mika huvempa kema huntea kemo'a, Jisasi simpi avufga'a efore hu'ne. E'i ana hu'negu, Jisasi agima husga huta tamage huta hunazamo, Anumzamofona ra agi nemie. **21** Hagi Agrake Anumzamo, tagri'ene tamagri enena tazeri hanavetino, Kraisimpina huhampritante'ne. **22** Avame'za Avamu'areti tagu'afi anteneranteno Nagri vahere huno hu'ne. Henkama hakare'za tamisiazamofo huvempa hu'ne. **23** Hianagi Anumzamoke nagra nagu'nadena keno antahino hu'ne. Nagra tamage nehuankino Anumzamoke ana tamage keni'a refko hunantegahie. Ana agafare nagra Korinti kumatera mago'ane ome'noe. Na'ankure nagra hanave kefinti eme tamazeri fatgo osugahue. **24** Hianagi tamagri tamentintimofo kvagriramante'nakura nosunanki, magoka tamagrane eri'za erisunketa tamagra muse hugahaze. Na'ankure tamentintifina, tamagra oti hanavetigahaze.

2 E'ina hu'nagu nagra henkama tamagri'ma tamage'haku esu'na, amanahukna hu'na mago'ane tamazeri tamagazea eri oramisue hu'ha nagesa nentahue. **2** Na'ankure nagrama tamarimpa eri haviza hanenko'a, iza nagrira nazeri muse hugahie? Hianagi tamagri'ma, tamarimpa knama eritamumotma nazeri muse hugahaze. **3** E'ina hu'negu, amanahukna avona kreneramue. Nagrama esoa knarera, nazeri musema nehaza nagara, zamarimpa kna eri ozamisue. Tamage nagra antahi'noe, tamagra musema hanage'ha, nagranena muse hugahue. **4** Narimpamo'a tusigna nehige'na zavinete'na, ama avona kreneramue. Tamarimpa tamazeri kna hunakurompage,

nagrama nagu'afima navesineramantoaza antahama hanazegu
kreneramue. 5 Hagi mago'mo'ma tamarimpa knazama eritamiana,
tamagrama hazaza hu'na nagra rama'a narimpagna hunontoe.
Na'ankure anamofona mago'a arimpa kna eriominakure. 6
Rama'amota anamofona ko mago tamarimpa hunontazageno,
anazama hu'nea knazamofo avamente mizama'a e'nerie. 7
Ru arimpagna hu'zamo azeri haviza hanigeno asunkuzampi
mani'zankura, kumi'a atrenenteta azeri so'e hiho. 8 Ana hu'negu
nagra huhankaveti'na nehuanki, tamagrama tamavesi'nentaza
zana erinte ama' hinkeno agra keno. 9 Ama avoma
kreramua agafa'a, ana miko kema tamasami'noa kemofo
amagera nentafi, reramahe'na kenaku kreneramue. 10 Hagi
tamagrama mago vahe'ma kumizmi atrezamantesazana,
nagranena kumizmia atrenezmantoe. Na'ankure nagra kumizmia
atrenezmantoe, [kumima atrezmantegazama menenkena tamage
hu'na atrenezmantoe], Kraisi avurera tamagrama knarema
hanagu atrenezamantoe. 11 E'inahukna hanuta Satana
reravataga hania zampintira evuoramisune. Na'ankure ko
Sata'a reraheno kenaku tro hunte'nea havi antahi'zama'a,
keta antahita hu'none. 12 Hagi nagrama Troasi kumate
Kraisi Knare Musenke huama hunaku uhanatugen'o, Ramo'a
kankamuna erinaginantene. 13 Hianagi narimpa fru e'ori'noe.
Na'ankure nenafu Taitusi'a tamagri tamagenkea erino ome'nea
zanku, Troasia atre'na Masedonia nevu'na, hufru huzmantoe.
14 Hianagi Kraisimpima vugoteno tavreno nevigeta ha'ma
hugateneronkeno tagripi huvazino eri'zana erigeno Agri'ma
ke'za antahi'za hu'zamo'ma maka kaziga knare manamo'ma
vuno eno hiazama nehia Anumzamofona humuse huntoe. 15
Kraisi'ene hagerfinonku knare mna neviankna nehanunkeno,

Anumzamo'a muse hugahie. Ana naneke vuno eno nehigu mna
nentahizankna hu'za maka vahe'mo'za nentahize. Kefozazimifinti
zamahoke nehea vahe'mo'zane kefozazimifinti zamahoke nohea
vahe'mo'zanena nentahize. **16** Fananema hanamokizmirera fri
hi'mana nevie. Hianagi tasimuma erita manisuna vahe'motarera,
asimu erino mani mana vugahie. Hianagi i'za ama ana
erizana eriga hu'ne? **17** Mago'amo'za zago erigahune, nehu'za
Anumzamofo naneke huama nehazana, tagria Anumzamo
hurantegeta fatgo huta huama nehune. Huama'ma nehunana
Kraisi'a tagu'afi maninegeta Anumzamofo avure huama nehune.

3 Hagi tagra mago'ane agafa huta tavufga erisaga hunaku
nehumpi? Hifi mago'a vahe'mo'zama nehazaza huta tagra,
tavufa erisagahu avo kreho nehumpi, hifi rumo'za avonkrerami'za
tagri husga hihogu nehuno? **2** Tamagra'a tagri avona mani'haze.
Ko tagu'afi krentenege'za miko vahe'mo'za nehampriza antahiza
ke'za nehaze. **3** Kraisintegati kretregeno e'nea avontafe kna
huta eama nehazageta, tagra kegava nehune. Ana avona avo
zotaretira onkre'neanki, kasefa huno mani'nea Anumzamofo
Avamuteti krente'ne. Hagi ana avona havere kreonte'neanki,
vahe'mofo tumopi krentene. **4** Ama ana miko zankura Kraisimpina,
Anumzamofonte tamentinti nehuta hankave e'nerune. **5** Ana
miko zama nehuna zankura, tagra'a hankavere nehune huta
osugahune. Hianagi Anumzamo agra'a hankavereti hunerante.
6 Agra anazanke huno tagrira huranteno hankavea tamigeta
kasefa hagerafi kema hu'nea zamofo kegava hu'neta eri'zana
e'nerune. Avompima krente'nea zankura nosunanki, avamupi
zanku nehune. Na'ankure Avompima krente'nea zamo'a zamahe
nefrie. Hianagi avamumo'a, zamasimu nezamie. **7** Hagi, havere
erivakokino krente'nea avompinti fri'zana avareno neazamofo

eri'zamo masa'ane e'ne. Hu'negu Israeli vahe'mo'za, Zamavuginki hige'za Mosesena avugosafina onke'naze. Na'ankure masazamo avugosafintira remsa hige'za nonkageno, ana msamo'a akoheno avugosafintira resu hu'ne. (Diu-Kas 35) **8** E'ina hu'neanagi Ruotge Avamumofo erizamo'a mago'ane agatereno hanave'ane hihamua omanegosifi? **9** Na'ankure vahe'mofoma knama nemia eri'zamofona masa'ane hankave'a me'nenigeno'a, fatgo eri'zamo'a agetereno ra masa'ane hankave'a megahie. **10** Anumzamofo tusi'a masane hanave'amoma me'neana kasefa eri'zama Anumzamo'ma erinea zamo, koma Anumzamo'ma eri'nea eri'zamofo masa'a agatere'ne. Ana higeno ko eri'zamofo masa'mo'a ko vagarene. **11** Hanki fanane huno'ma nevania zamo'ma hankave'ane me'nenigeno'a, mago'ane mevava huno vania zamofo, hankavemo'a agateregahie. **12** E'ina hu'negu tagra fore'ma hanigu amuha nehuta, kea hankavetita nehune. **13** Tagra Mosese knara osu'none, Agra avugosafi tavravenu refitenegeno, Israeli vahe'mo'za avugosafi masazamo'ma fananema hiama'a onke'naze. (Diu-Kas 34:33-35) **14** Hianagi antahintahiza zamimo'a hanavetino antrako hige'za maniza neazageno, ama knarerera ehanatine. Na'ankure korapa huhagerafi kasegema nehamprizageno'a, ana tavravemo'a refiteno ne-egeno, Kraisimpi ana tavravea eritre'ne. **15** Hianagi meninena Mosese'ma krente'nea avoma hampri'zana, ana tavravemo antahintahizazmia refite'ne. **16** Hu'neanagi vahe'mo'zama Ramofontema zamagu'ama rukrehe'ma hazageno, refimatezmantenea tavravea erinetre. **17** Ana hu'negu Ramo'a Avamukino, Ramofo Avamu'ma mani'nesirega, kinarente'zana omanegahie. **18** Hianagi miko tavugosa refiote vahe'mota, Ramofo masazama'amo'a tagrite remasa nehigeta, kapomo

hiankna huta remsa huta Agrikna hunkeno, Ramo'a Avamukino,
agri masazamo'a mago'ane tagripina remsa nehie.

4 E'ina hu'negu Anumzamo'ma asuragi rante'neazamo higeta,
tagra ama erizana e'nerune, e'igu tagrira tavesra nosie. **2**
Hianagi tagra tagazegu huno oku'a huga avu'vara nosune,
vahe'mokizmi rezmatga huta zamazeri havizahu avu'ava zana
nosuta, Anumzamofo kegaga eriruvahe huta vahe'mokizmia
rezmatga nosune. Hianagi Anumzamofo avure'ene vahe'mokizmi
antahizampina, tagripina tamage'zamo eama hanigeza kegahaze.
3 Tagrama Knare Musenke huama hunazamo'ma ama'ma
nosiana, fananema hanaza vahe'mo'za amara nosaze. **4**
Ama mopafi havige anumzamo, Sata'a zamentinti nosaza
vahera antahintahizamia refinetege'za, Knare Musenkemofo
masa Kraisina Anumzamofo amema'a nonkaze. (aiōn g165) **5**
Na'ankure tagra'a nanekea huama nosunanki, Jisas Kraisi'a
Ra mani'negeta, tagra Jisas Kraisinku huta tamagri kazokazo
eri'za vahe mani'none. **6** E'ina hu'negu korapara Anumzamo
huno, hanimpina tavimo'a remasa hino hu'nemofo masamo,
tagrite eman'i'neno tavi'a tagu'afina remsa nehigeta, tagra Jisas
Kraisi avugosa negeta, tagra tusi'a masane hankave'anena
ke'none. **7** Hianagi tagra mopa kavogna hunonkeno zago'amo'a
mareri'nea fenomo agu'afinka me'neankna hu'none. Tamage
hankevea tagritegatira nomeanki, Anumzamofontegati ne-
e. **8** Hakare kazigati knazamo'a trentarako nehianagi, ana
knazamo'a trehapara notigeno, antahintahitimo'a savri hianagi
tamentintia notrone. **9** Knaza tamizanagi, Anumzamo'a noratre,
tahe tatarazanagi, tazeri haviza nosaze. **10** Tagra mika
zupa, tavufgafina Jisasi fri'za erita vano nehunke'za, Jisasi
nomani'zana, tagri tavufafí anazanke huno eama hige'za negaze.

11 Na'ankure tasimu'ma erita mani'nomota Jisasi fri'zanku'ma huama hunazanku, hakare zupa fri kantera tavrenenteankino, Jisasi nomani'zana, ama amega tavufgare eama hanige'za kegahaze. **12** Ana higeno fri'zamo'a tagripina eriza e'nerie. Hianagi asimu erino manizamo'a tamagripina eriza e'nerie. **13** E'ina hu'negu anama tamentintima hu'nonana avontafepina anage huno krente'ne, Nagra namentinti hute'na, kea huama hu'noehu'ne. (Sam-Zga 116:10) Tagranena tamentinti nehunku kea huama nehune. **14** Na'ankure tagra antahi'none, Ramo, Jisasi'ma fri'nefinti azeri oti'nea Anumzamo'a, tagrira ana zanke huno Jisasi'ene magoka tazeriotino, tamagri'ene tagri'enena Agri'a avurera tavrentegahie. **15** Tamagri knarezanku, ama ana miko zana nehunankino, Anumzamofo asunkuzamo ra huno rama'a vahete vuno eno hania zamo hanigeno Anumzamofo ra agi amino musema hunte'zamo avitegahie. **16** Ana hu'negu tavresra nosie. Tamage tavufgamo'a frino negasrianagi, knane knanena avamutimofona erikasefa nehie. **17** Hanki meni tagritema osi knazama fore nehiazamo'a, tagrira monafima umani vava hanunaza retro huneranteankita, knare huta monafi umani vava nehuta, knare'zama omerisuna zamo'a, makazana agateregahie. (aiōnios g166) **18** Hagi negonazaranta tavua onkesunanki, onke'nona zante tavua kesune. Na'ankure negona zamo'a omanegosie. Hianagi onke'nona zamo'a mevava hugahie.

(aiōnios g166)

5 Hagi tagra antahi'none, ama mopafi seli nompima mani'nona nomo'ma tagna vaziramisigeno'a, tagria mevava nontia (tavufga) vahe'mo azanteti tro osu'neanki, Anumzamo tro huntogeno me'neankino monafinka mevava hugahie. (aiōnios g166) **2** Na'ankure ama nompi (tavufga) mani'neta tamage tusiza huta

kragira neruta, monare kasefa mevava kukena huzankura tusiza
huno tavenesigeta, avega ante'none. 3 Na'ankure tagra ana
kukenama hanuta, tagra tavufga tavapara omanigahune. 4
Tagrama ama mopafi tavufgare'ma mani'neta tusiza huta kragira
nerunkeno kna tave'nesie. Na'akure tagra tavufa tavapako
omanita kukena hunaku nehune. Hianagi monare kukena
antaninunkeno asimuma erino manizamo fri tavufga ahe
fanane hanigeta, mevava tavufga erigahune. 5 Anumzamo'a
ama agafare trohuranteno, Agra'a huhamprirante'nea zampinti
esera Avamu'a amne tamineankita, antahita keta hanunana,
makazana amne tamigahie. 6 E'ina hu'negu tagra hakare zupa
hanavenetita, ama tavufgare'ma mani'neta zahufa Ramo'enena
omani'none huta nentahune. 7 Na'ankure tagra onke'nonanagi,
tamentinti nehune. 8 Tagrira taguamo'a hankave e'nerigeta ama
tavufga atreta Ramo'ene umanisuna zanku tave'nesie. 9 E'ina
hu'negu ama mopafima manisunano, Ramo ene umanisunano,
Anumzamofoma ra agima amisunazankuke nehune. 10 Na'ankure
tagra ana miko'mota Kraisi avuga keaga refkohu trate otisunkeno,
magoke magokemota ama tavufgare mani'neta, knare'zano
havizano hu'nesuna avamente anteno, mizana tamitere hugahie.
11 E'ina hu'negu Ramofo'ma koro hunte'za antahi'ama hunonku,
hanavetita vahe'mokizimi antahintahia eriama huta nezamavrone.
Hianagi Anumzamo'a tageno antahino hu'ne. Hagi nagrama
nentahuana tamagranena tageta antahita nehaze. 12 Tagra'a
tavufga tamagrite mago'ane erisagahu kazigatira nosunanki,
tagriku'ma tamavufgama erisagama hanaza zanku nehune,
hu'negu amega zamufare'ma nege'za zamavufga ra nehu'za,
zamaguafizama nonkaza vahera, kenona huzmantegahaze.
13 Na'ankure tagrama neginagizama nehanuta, e'i Anumzamo

ragi erisiegu nehune. Hagi tagrama fatgo antahintahitirema manisuta, e'i tamagri knarezankure. **14** Kraiszi avesizamo tazeri onetigeta tagra antahi'none, na'ankure magokemo, miko'mofonku huno fri'ne. E'ina hu'negu ana miko'mota fri'none. **15** Hagi Agra miko'mofonku fri'negu, iza'o kasefa huno maninesimo'a, agra'a vesizantera omanigahe. Hianagi zamagriku'ma huno fri'teno oti'nemofo Kraiszi avesizante manigahaze. **16** E'ina hu'negu menintetima agafa huno vaniana, vahe'mokizmia amega zamufgarera refko huozmantesune. Ana hu'negu tagranena anahukna huta Kraisina amega avuvgare refakora hunte'nonanagi, menina antahi'none anara nosune. **17** E'ina hu'negu mago'mo'ma Kraisimpima manisimofona Anumzamo'a azeri kasefa vahe fore nehie. Antahi ani huo, korapa avu'avamo'a fanane nehigeno, kasefa avu'ava fore nehie. **18** Ama ana kasefa huno mani avu'avara Anumzamofontegati e'ne. Kraisimpina tagrira tazeri mago nehuno, erimago huno mani eri'zana tagritami'ne. **19** Na'ankure Anumzamo'a Kraisimpi ama mopafi vahera, Agrane tazeri mago hu'ne, vahe'mo'zama kumi'ma hu'nazana antahizmino nona hunozmante. Hagi erimago huno manizamofo knare naneke huama hanunegu, tagrira tami'ne. **20** E'ina hu'negu tagra Kraiszi agi erita mani'none. Higeno Anumzamo'a vahe'agura tagripi huvazino kea nehie. Ana huta tagra Kraisinku huama nehanunketa tamagra Anumzamo'enena erimago hugahaze. **21** Na'ankure Anumzamo'a kumi'a omame'nea ne'mofo Kraisina tagri kumiku, azeri kumi vahekna nehuno, tagri kumira Agumpi erinte'nea zamo, tagrira Anumzamofo avure tazeri fatgo vahera nese.

6 Hagi tagra eri'zama e'nerunana magoka Anumzamo'ene e'neruna nagamota hankavetita neramasmune, Anumzamofo

asunku'zana eriteta, atrenkeno amnezanknara osino. 2
Na'ankure Anumzamo'a anage hu'ne, Kna fatgore ketmia
nentahi'na, tamaguma'vazikna fatgore tamaza hu'noe hu'ne.
(Ais 49:8) Antahihio, menina Anumzamo'ma tagu'vazino
tmavre'naku'ma hunte'nea kna fatgore menina mani'none. 3
Hagi mago'mo'ma kama vanoma nehifina, tagra zamazeri
tanafahu have erinteanknara nosune. Ana hu'negu tagrama
eruna eri'zamofontera vahe'mo'za tazeri tagaze osugahaze. 4
Hakare'azama humpina Anumzamofo eri'za vahe mani'none
huta eriama nehune. Hakare'a knazampima ufronana kazigazi
huta nevuta, maka tatafima nevuta, knazampina unefronke'za,
5 kanonkevea neramiza, kina nonpina tavrenentazageno,
erizamo'a amuho nehigeta, tavura omaseta ne'zana ononkeno,
tagazankura nehuta, 6 manifatgo huta nemanita, antahintahia
e'nerita, akoheta nemanita, so'e avu'ava zana nehuta, Ruotge
Avamupina nemanita, tamage avesizamofo avu'ava zana nehuta,
7 tamage kema huama nehumpine, Anumzamofo hankavefina,
fatgo mani'zamofo ha'zamo'a tamaga tazampine hoga tazampina
me'negeno, 8 mago'amo'za rantagia neramizageno, mago'amo'za
husaga hunorantaze. Tamage kea hunerantazageno, havige
kea hunerantaze. Tagra tamage vahe mani'nonanagi, krunage
vahere hunerantaze. 9 Tagrira tage'za antahiza osu vahe kna
nehunananagi, tagrira miko vahe'mo'za tage'za antahiza hu'naze.
Fri avamente knazampina nevunanagi, kasefa huta nemanune,
kanonkeve tami'nazanagi tahe ofri'naze. 10 Hagi tasuzampi
mani'nonanagi, muse huvava nehune, tamuntera omane'neanagi,
rama'a vahe zamaza hunke'za feno vahera nemanize. Fenona
onte'nonanagi (avamupina) feno vahekna nehune. 11 Korinti
kumate vahe'mota, magozana fra'nokunanki, tagu'areti tamage

huta kea nermasamune. **12** Tagra tamagrira tavesi nermanteta tagu'a kafana anagi nermantonanagi, tamagra tavesi noranteta, tamagu'a kafana anaginorantazageta mago tarimpa nosune.

13 Nagra neramasamue, tamagrira osi mofavre asmiaza hu'na nermasamuanki, tamagranena tamagu'a kafana anagiranteho.

14 Anumzamofonte zamentinti nosnaza vahe'enena tagroteta omaniho. Inankna huno fatgo avu'avazane, kasegema ovariri avu'avamokea erimago hugaha'e? Masazane hanizanena inankna hune erimagora hugaha'e? **15** Kraisi'a inankna huno Sata'enena mago rimpa hugahie? Nankna huno amentinti nehia vahe'mo'a, amentinti osu vahe'enena, mago antahintahirera manigaha'e? **16** Hagi inankna huke Anumzamofo mono none, havi anumzamofo mono nomoke erimago znarimpa hugaha'e? Na'ankure tagra asimu erino mani'nea Anumzamofo mono noma'a mani'none. Anumzamo'a anage hu'ne, Nagra zamagu'afi mani'nena, zamagri'ene kana vano hugahue. Nagra zamagri Anumza mani'nuge'za, zamagra nagri vahe manigahaze hu'ne. (Lev-Pri 26:12) **17** E'ina hu'negu, Zamentinti osu vahepintira atiramita rure maniho huno Ramo'a hu'ne. Agruma osu'nesia zana avako osinkena, Nagra eme tamavregahue. **18** Nagra neramafana mani'nanena, tamagra mofavre zagania manigahaze huno Hanavenentake Ra Anumzamo'a hu'ne. (Ais 52:11.)

7 Na'ankure tagrira Anumzamo'a huvempa hurante'negu, navesima neramanta ronenimota, tagra'a tazeri avusese hanune. Ama tavufgafine avamupima miko kefozamo'ma tazeri haviza hania zampintira, mani ruotage nehuta Anumzamofo koro huntessune. **2** Hagi tamagra'a tamarimpa tamiho. Tagra mago vahera havizana huonte'none, mago vahera azeri haviza osu'hone, mago vahera tagra knare'zankura revatga huta azeri

haviza osu'none. 3 Nagrama ama'i kema nehuana, tamagra havi
vahe mani'naze hunoramantoe. Na'ankure ko tamasimi'none,
tagra tamagri ene magoka manisuno, tamagri'ene magoka
frisunana tamagra antahintahifi mani'naze. 4 Nagra tamagrira
razampi antahinerami'na, tamagrikura tusi muse nehugeno,
nagu'amo'a fru nehigeno, tamagrama hazazamo'a nagrira
naza hige'na, mika knazanifina tusi muse nehue. 5 Na'ankure
tagrama Masedoniamma efronkeno'a, ama tavufgamo'a manifru
osu'ne, rama'a knazamo mika asoparegati egeta hapi ufronkeno,
tagu'amo'a kore nehie. 6 Hu'neanagi knazamo zamazeri haviza
nehia vahe'mokizmi zamazeri hankavenetia Anumzamo tazeri
hankavetineana, e'i Taitusi'ma e'nea zamo'e. 7 Agrama e'nea
zamokero'ompage, agrim'a azeri hankaveti'naza'zamo'e. Agra
nagriku'ma navegama ante'naza zamofo nanekea nenasamino,
nazano fore'ma higeta tamasuzampima mani'naza zamofone,
nagriku'ma nentahiza'zamofo nanekema nasamige'na, mago'ane
tusi muse hu'noe. 8 Na'ankure avoma kreramisua zamo'enema
tamasuzampima tamavrentesuana, nagra e'i anazankura nagesa
ontahigosue. Na'ankure e'i anazamo'a osi'a knafi tamatazana
tamigahie. 9 Nagra menima avoma atreramantesua zankura
muse nehue. Tamagri tamazeri tamagaze hunakuro omage,
tamata neraminketa tamagu'a rukrehe hanazegure. Na'ankure
Anumzamo, vahe'amo'za erisazeguma avenesiankna tasuza
e'nerisunkeno, tamaza hanigeta tagripintira mago'a knazana
e'origahaze. 10 Na'ankure Anumzamo'a tagripima me'nea
tasunku zampi huvazino taza hanigeta, kumira atreta tagu'a
rukrehe hanunkeno taguravazina, tagra knazantigura tagesa
ontahigahune. Hianagi tasunkuke nehuta tagu'a rukrehema
osnunana, fri'za erifore hugahie. 11 Keho Anumzamo'ma

neramia knazamo'ma tagripima asunku'za erifore nehuno, tamazeri o'netigeta kazingazi huta tamagra'a tamazeri ama nehuta, antahi haviza nehuta, tamagu'afi kore nehuta, nagri'ma nagezankura tusiza huno tamavenesigeta, hanavetita havizama hu'nea vahera zamazeri fatgo nehuta, maka'zama hanafina fatgo zanke'za nehaze. **12** Ana hu'negu iza havizana higeno, iza havizana huntene hu'na, e'i agafare avona krenoramue. Hianagi Anumzamofo avufina inanknama huta kvama krinerantaza zamo eama haniegu hu'na kreneramue. **13** E'i ana miko'za hazazamo'a, trimpa so'e nehie. Amama tarimpamo'ma so'ema hire'ma mago'ene musema huramantonana, Tatusima konkeno musema nehuno avamu'afima tamagripinti'ma fruzama eria zankura muse hu'ne. **14** Tamagrik'u'ma musema nehua zankura, ko agrira asami'noe. Hagi tamagra nazeri nageze osu'haze, nagra tamagege'za tamasm'i'noe. Hu'negu tamagrik'u'ma muse nehune huta Tatusima nesamuna zamo'a, tamage'za efore hugahie. **15** Tatusi'a agri'ma nevreta, ke'ama mikomota antahinemita, kore hunteta amagema antenaza zankura, tusiza huno tamagrikura antahineramino agera nokanie. **16** Nagra tusiza hu'na muse nehu'na, hakare'zana amne hugahaze hu'na antahineramue.

8 Hagi nenfugata, Anumzamo'a asunku'zama'areti, Masedonia mono vahera zamaza hu'nea zamofo agenke tagra tmasaminaku nehune. **2** Zamagripina tusi'a knaza fore nehige'za, zamarevatga zampi ufrenazanagi, zamarimpa kna nosu'za, ra muse nehu'za, fenzami omne'neanagi, zamagu'areti fenona zami'naze. **3** Na'ankure nagra eriama hu'na tamasmiza hue, zamagrama amiga avamentera agatere'za, zamagra'a zamavesite rama'a nezamize. **4** E'ina nehu'za, Anumzamofo naga'ma Jerusalemi mani'naza naga'ma, zamazahu muse'zama zamagranema

zamizankura, tusiza hu'za tantahigevava hu'naze. **5** Hagi e'inahu hugahaze huta tagesa antahi ozamunanagi, pusazana zamagrazmi Ramofo amite'za, Anumzamofo avesite tagrira tami'naze. **6** E'i ana hu'negu zago eritruhu eri'za tagripima erigafa hu'nemo, Taitusi'a tamagrane umani'neno tamazahina, ana erizana eri vagaregahaze. **7** Hianagi tamagra hakare zampina knare hu'naze, tamentinti zampima, kegaga huzampima, mika Anumzamofo erizankura kazigazi nehuta, tagrikura tamavesi nerantaze. Ana hukana huta amizampina vugota hutma muse'zampinti zamiho. **8** Nagra ama kema nehuana, amiho hu'na huhankvetina hunormantoe. Hianagi rumo'za kazigazi hu'za nezamizankna huta zmavesinezmenteta, zamigahazafi hu'na reramahena kenaku nehue. **9** Na'ankure Rantimofo Jisas Kraisi asunku'zana tamagra antahi'naze. Fenone ne'mo'agi, tamagriku huno amunte omne nekna hu'ne, e'i anama hu'heana Jisasi'a amunte omnezama'afinti feno vahe tamazeri fore hanigu anara hu'ne. **10** Zago eritruhu erizamofonku nagrani'a antahintahi hu'ama huzahue. Koma evia kafure zago eritru huno ami eri'zana tamagra'a erigafa huneta, ana erizankukera osunazanki, tamagu'areti ene huta ami'naze. **11** Menina ana erizana eri vagaresageno, tamagu'areti tamavenesigeta zago ami eriza eri vagaregahune huta hu'nazazamo'a, zago ante'naza avamente magozahu hugahie. **12** Na'ankure mago'mo'ma feno amizamofo avesizama me'enkeno'a, onte'nesia avamentera omigahianki, nazano ante'nea avamente aminigeno'a, Anumzamo'a muse hugahie. (Mak 12:41-44) **13** Tagri tavesimo'a ruga'amokizmi nezamisageza fru hu'za manisnageta, tamagra atupa huta manisnaze nosunanagi, mani'naza avamente manisnazegu nehune. **14** Menina tamagripi rama'a me'negu, atupa hu'za

mani'naza vahe zamaza hanageno, henka'a tamagrama atupa
hanage'za tamaza hugahaze. E'i ana hanuta magoke avamente
manigahaze. **15** Anumzamofo avontafepina anage huno
krente'ne, Rama'a ne'zama eritru hu'namo'za agatere'za rama'a
onte'naze. Hagi osia'a ne'zama eri tru hu'namo'za atupara
osu'naze. (Diu-Kas 16:18) **16** Tamagriku'ma kazigazi hu'na antahi
neramuankna antahintahima, Anumzamo'ma Tatusima azeri
otigenoma tamagrikuma antahineramia zankura Anumzamofona
muse hunentoe. **17** Na'ankure Tatusi'a tagrama hu'na nanekereke
ovianki, tamagenakura agra'a avesiramante'negu, kazigazi huno
tamagritega e'ne. **18** Mago nerafu, Jisasi knare museke huama
nehige'za maka mono vahe'mo'za agenke'a antahinaza nera,
tagra huntonkeno Tatusi ene vu'na'e. **19** Ana nera mono
vahe'mo'za Jerusalema zagoma omezminaku'ma hanunana,
tagrane vugahie hu'za huhamprinte'naza ne'mo, tagranena
vugahie. Anumzamofo ra agi aminaku anara nehuta, tamage huta
zamaza hu'zana eriama hugahune. **20** Hanki mago'mo'e huno
antahi haviza huorantenogu, rama'a vahe'mota magoka ana
musezama tami'nazana kva huta erita neone. **21** Anumzamofo
avurekera fatgo huta omanisunanki, vahe'mofo avure enena
fatgo huta manisunazanku tavenesie. **22** Ete mago neranuna
hakare zupa reheta konana, mikazampina fatgo huno nemanino,
Korinti vahe'motagu antahineramino tamaza hunaku nehia nera,
Tatusi zane vugahaze. **23** Hanki Tatusi'a tamaza hu'naku
nagrane eri'za e'neria nere. Hagi agrane tare vana'a nerufukiznia
mono nagapinti huzanente'naze. Kraisi agi erisaga nehaza vahe
nevaze. **24** E'ina hu'negu zamesi'nezmanteta zamazeri so'e
nehinke'za, Anumzamofo naga'mo'za nege'za, Poli'ma Korinti

vahe'mokizmi zamavu'zamavaku'ma nehiana tamage hu'ne
hu'za hugahaze.

9 Hagi Jerusalemi mani'naza Anumzamofo nagama zagoma
zamisune hu'naza zankura avona nagra kretamimi'na
huramageda hugara osu'noe. **2** Na'ankure nagra antahi'noe,
tamagu'amo otigeta zamaza hunaku retro'ma hu'nazana,
Masedonia mono vahe, musezampinti zamasami'na amanage
huno'e, ko'ma evia kafufina Griki kaziga Akaia kumate nemaniza
vahe'mo'za, Juda vahe zamaza hu'naku ko retro hu'naze hu'na
tamagriku zamasmi'noge'za, nentahiza zmagu'amo otige'za
hakare vahe'mo'za anahukna huta zamigahune hu'naze. **3**
Hianagi Tatusine tare nerufukiznia tamagrama mani'narega nagra
hunezmantoe. Tamagri tami'naku ko retro hu'naze hu'na hu'noa
kema zamasami'noa zamo'a, amnezankna hanigi, tro hu'nenke'za
vih. **4** Masedonia vahe'ene ru nevnugeno, ana zagoma eri
tru osu'nesageta, ko eritru hu'naze hu'nama hu'noa ke'mo'a,
amnezankna hinketa, tamagrane nagranena tagazegu hugahune.
5 E'ina hu'zanku nagrama nagesa antahuana nerufukizmima
huzmantesunke'za tamagrama mani'narega vugotesageta,
ko'ma eritru huta zamigahune hu'naza zagoa retro hu'nesageta
vugahune. E'ina nehuta muse hutma zagoa nezaminageta,
tagra zagotamia tutu huta avazu osugahune. **6** Nagra menina
amanage nehue, osi'a avimzama nesaza vahe'mo'za, osi'a
ana avamente ne'zana nevasgaze. Hanki rama'a avimaza
nesaza vahe'mo'za, ana avamente rama'a ne'zana nevasgaze.
7 Ana hu'negu magoke magokemotma aminaku'ma hanutma,
tamagu'afima amigahune hutma tamagesa antahinesazama'a
amiho. Vahe'mo tutu hinketa tamarimpa knazanena omiho.
Na'ankure muse huno ami'mofonku, Anumzamo'a avenesie. **8**

Hagi Anumzamo'a knare huno maka'zampina asunku'zama'a
eri aviteramantena, aviteta mani'neta, mika zupa rama'a
me'nesnifinti knare tamavu'tmava huta vahe'mofona zamaza
hugahaze. **9** Anumzamofo avontafepinema krente'neana,
Iza'o refko huno amunte omane vahe'ma musezama nezmia
vahe'mofona, fatgo avu'avazama'amo mevava nehie hu'ne.

(Sam-Zga 112:9) (**aiōn g165**) **10** Hagi Anumzamo'a hozama
kri vahe'mofona avimzana nezamino, bretia ne'zane huno
nezamie. Anahukna huno avimzana veva huno erira nehina,
fatgo avu'ava zantamimo'a raga'a nerena, rama'a nevasageta
mago'ane vahe'mofona zamaza hugahaze. **11** Hakare zampina
rama'a asomu hunermantena, vahe'ma zamaza hanazana
kankamumpinti rama'a zamaza nehanageno, Anumzamofona
ra agi ami'za susu huntegahaze. **12** Na'ankure ama'i vahe'ma
azahu eri'zama e'neriza zamo'a, Anumzamofo nagakera
zamaza nosianki, Anumzamofo susu huntezampinti, ra agi
amizamo'enena avinete. **13** Na'ankure vahe'ma zamaza huta
knazami eri'zamo, knare tamavutava eriamma hina nege'za, Kraisi
Knare Musenkemofona amagenentaze hu'za huama nehu'za,
Anumzamofona ra agi erisaga hugahaze. **14** Nunamuzamifina
tamagrikura antahineramiza nunamuna hunermantaze. Na'ankure
Anumzamofo mareri agatere asunku'zamo tamagrite'ma
me'neazanku anara nehaze. **15** Vahe'mota e'inahu kna nehie huta
erinteamo osuga muse zama neramiazankura, Anumzamofona
susu huntesune.

10 Hagi nagrani'a Poli'na, Kraisi anterami avu'avazampinti'ene
fru avu'avazanteti tamantahinegoe. Nagra tamagranema
mani'nena fru avu'ava huramante'noanagi, afete'ma mani'nena
hanave naneke huneramantoe. **2** Nagrama tamagritega vanu'ha

hankave kea osnuegu nentahue. Hianagi nagra esu'na tagriku'ma
vahe'mofo antahintireti havi eri'za e'nerize nehaza vahe'mofona
hanavege eme huzmantegahue. **3** Tamage mopafi vahe
mani'nonanagi, mopafi vahe'mo'za hzaza huta hara nosune. **4**
Ha'ma huzantamima azeri'nonana, ama mopafi ha'zana omne'ne.
Anumzamofo hankave ha'za me'neankino, Sata vihua ahe'nafru
hugahie. **5** Tagra hakare'a havi antahintahine havigemo'enema
renkani renentegeno vahe'mo'ma Anumzamofoma antahi ama
nosia antahintahizmia, zamazeri rukrehe hanunke'za Kraisi
amagera nentaze. **6** Tamagrama amage'ma ante fatgoma
hanageta, veganokno nehu'za, ke rutrage'namokizmia, ana
nona'a knaza zamigahune. **7** Tamagra mago'amota amega
avufgage negeta agu'afina nonkaze. Hagi Kraisi vahe mani'noe
huno hanave antahintahi nentahinimo'a, atregeno agra'a agu'afi
refko huno negeno, nagra Kraisi vahe mani'noe huno nentahina,
tagra'enena Kraisi vahe mani'none hugahune. **8** Na'ankure
Ramo'ma kva vahe manigahaze huno tazeri otigeta mani'neta
tavufga rama nehunana, tamagri tamazeri so'e hunaku anara
nehunanki, tamazeri haviza hunakura anara nosunankita, tagra
tagazegura osugahune. **9** Hanki tamazeri koro hunaku ama
avontamina krenoramue. **10** Na'ankure mago'amo'za amanage
nehaze, Pol'i avontafepina hankave ke kreneramino, tavure'ma
ne-eno'a, akoheno kea nehige'za, amnege nehie hu'za nehaze.
11 Hanki anagema nehanana vahe'moka antahio. Tagranema
omanineta avontafe'tamimpima hankave kema krerami'nonankna
huta tagrama esuta, hankavege eme hugahune. **12** Na'ankure
mago'amo'za knare vahe mani'none nehaza vahera nezmageta,
tagratia zamagrithera refko huta nonkone. Hianagi zamagra'a
mani'naza avamente refko hu'za nege'za, tagra knare vahe

mani'none hu'za refko hu'za negaza vahe'mo'za, negi vahe mani'naze. **13** Hianagi tagra mani'nona avamena agatereta tavufa ra osugahune. Hianagi Anumzamo'ma e'inahu huta eri'zana erita vahe'ma kegava huzmanteho huno hurante'nesia avamente mani'neta, vahera kegava hunezmaneta tamagri'enena kegava hurmantegahune. **14** Na'ankure tagrama ese knazupa Kraisi Knare Musenke, Anumzamo'ma eriho hu'nea avamente Korintima mani'naza nagamotare erita uhaniti'nona zamofonkura, agatereta tavufga erisaga nosune. **15** Magore huta rumo'za eri'za eri'naza zantera tavufga rana osu'none. Hianagi tagripi'ma fore hanigeta kesune huta antahi neramunana, tamagri tamentintimo nehagenkeno, eri'zama tamagripima erisuna zamo'a ra huno hageno vanie huta nehune. **16** Ana hu'negu, mago'mo'e huno Knare Musenke huama osu'naza afete kumatamimpina, tagra ome huama huta vugahune. Na'ankure koma eri'zama rumo'za e'rinesaza kumatamimpina ome e'nerisunkeno tagenoka osnazegu nehune. **17** Hianagi avontafepina anage hu'ne, Iza'o avufga rama hunaku'ma hanimo'a, Ramofoma keno antahino hu'nea zanku avufga ra hino hu'ne. (Jer 9:24) **18** Na'ankure agra'agu knare hu'noe huno nehimo'ompage, Anumzamo'ma hu izo huno ra agima ami'nesimoke agra'agura musena hugahie.

11 Hagi nagra neginagi naneke huzahuanki akoheta mani'neta antahihio. **2** Na'ankure Kraisinte knare hutma manisazegu hankave antahintahi nehue. Nagrama magoke vere, Kraisinte manisazema hu'noane. Vene omaseno agru hu'nea a'kna hu'nesage'na, tamagrira Kraisinte tamavrentesuegu nehue. **3** Hu'neanagi nagra kore'ma huana, krunage osifavemo lvi revatga hu'neakna huno tamagrira, reramataga nehinketa fatgo huta, ruotge hu'netra Kraisi amage nevaza kana netreta tamagena

humizanku nehue. 4 Tagra Jisasi naneke nermasamunketma
nentahitma, Ruotge Avamura e'nerita nanekema tamasamunana
antahirami'naze. Hianagi tamagra atrazageno ru vahe'mo'za
ne-eza, ru mago Jisasi nanekene, ru Avamumofo nanekea
nermasamizageta, nentahita fru hutma ana nanekemofo
amage nentaze. 5 Ana hankave aposol eri'zama e'neriza
vahe'mokizmia, nagra zamagri zmagorga'a omani'noankiza,
zamagra nagateore'naze. 6 Hianagi nagranena naneke hu'zana
rempi hu'na ontahi'noanagi, antahintahi zania me'ne. Hakare
kampinti, eriama hu'nonketa makazana ke'naze. 7 Nagrания
anteneramina, tamagrama knare hanazegu mizama'a omne
Anumzamofo Knare Musenke tamasamua zamo'a, kefoza hu'na
kumi nehufi? 8 Nagra tamagri'ma tamaza hunakura musufa
aseankna hu'na ru mono nagatetira musezazmia erina, tamagri
eme tamaza hugeta, tamagra mizana ose amne e'nerize. 9
Hagi tamagrane mani'nena magozankuma atupahua knafina,
magomofona kna ami'na nazahuo hu'na osu'noe. Masedoniat
e'naza nerifu'za, atupama huazantamina namizage'na eriknare
hu'noe. Nagrira naza hanazegura knazana noramuankina,
henka'anena anazanke hu'na knazana ontamigahue. 10
Tamage huno Kraisi tamage nanekemo nagu'afi me'nesigena,
nagri'ma naza osazazankura Akaia kumate Grisi kaziga huama
nehanuge'za, tagano hu'za huonantegahaze. 11 Na'a hige'na
e'inahu naneke nehue? Tamagrikura nave'nosifi? A'o tamagrikura
navenesie, Anumzamo'a antahi'ne. 12 Hianagi nagrama amama
nehua navunavara hu'na nevanenke'za, zamagrama nagriku'ma
mago'zanke hu'none nehu'za zamufga rama nehaza zana
ahepasaru hanenko evuramigahie. 13 E'inahu vahe'mo'za
havige aposol vahe mani'ne'za, havige eri'za vahe mani'ne'za,

amega zamufarera Kraisi aposol mani'none nehazanagi, zmagu'afina krunage aposol vahe mani'naze. **14** Na'ankure antri osiho, Sata'enena krunage huno masa ankerovahe kna hugahie. **15** E'ina hu'negu antri osiho. Sata eri'za vahe'mo'za krunaza hu'za fatgo eri'za vahekna hugahaze. Ana nona'a eri'zama e'neri'za avamente mizama'a, henka'a erigahaze. **16** Hagi mago'ane neramasmue, mago'mo'e huno nagrikura neginagi nere huno antahintahia osino. Hianagi neginagi nere huta antahinenamisuta, osi'a nagranena navufga erisagahu nanekema hanuana, neginagi vahe'mofoma antahimia kna huta antahinamiho. **17** Nagra'agu'ma husagama nehu'na, neginagi vahe knama nehuana, Ramo'a huo huno osu'nea naneke nehue. **18** Hakare vahe'mo'za zamagra zamavufaga, ama mopafi vahe'mo'za hazaza hu'za erisaga nehagu, nagranena anahukna hu'na navufga erisaga hugahue. **19** Tamagra neginagi vahe'mokizmia knare huta antahinezamize, na'ankure tamagra knare antahintahine vahe mani'naze. **20** Tamage, tamagra zamatrazage'za vahe'mo'za tamazeri kazokzo eri'za vahe kna huneramante'za, reramatga nehu'za, tamagripinti'ma musufa e'neri'za, zamagra zamufga erisga nehu'za tamavugosafi neramahazageta kea nosaze. **21** Nasunku huanki tagrira hanavetia omaneneankita e'ima hazazana osugahune! Hianagi mago vahe'mo'ma agra'a avufgama erisaga hinkena, nagranena anazanke hu'na navufga erisaga hugahue. **22** Ana vahera Hibru vahepi? Nagranena Hibru nere. Zamagra Israeli vahepi? Nagranena Israeli nere. Zamagra Abrahamu nagapinti efore hunazafi? Nagranena Abrahamu nagapinti efore hu'noe. **23** Zamagra Kraisi eriza vahepi? Ama nanekema hanuana neginagi vahe'mo'za nehazankna nehue. Nagra zamagterena tusiza hu'na

Anumzamofo eri'za e'nerina, zamagterena kina nompina rama'a zupa manina, rama'a zupa kanonutira nahetere hazage'na frikante vu'noe. **24** Hagi 5'a zupa, Jiu kva vahe'mo'za kefo vahe hampriza nezmahaza kna huza 39ni'a zupa sefu knonkeve namiza navufga rutraga hutere hu'naze. **25** Hagi 3'a zupa kumpa knonuti knonkevea nami'naze. Hanki magoke zupa have knonu nahenaze. 3'a zupa ventefi nevugeno haviza huno hageri tamigena, tina nakrikatetena, mago zageferuki, mago haninki huna hageri amunompi mani'noe. **26** Hakare zupama vanoma hufina, rama'a hazenkefi ufrenoe, ti nehegefi tina marekanetogeno, kumzafa vahe'mo'za nahe'za nehazageno, nagrini'a naga'mo'zane, megi'a vahe'mo'za nahekate'naze. Rankumapima manige, ka'ma kokampina nevuge'za nazeri haviza hu'za nehazageno, hagerimpima fanane hu'za nehugen, havige nerifu'zanena nazeri haviza hu'za hu'naze. **27** Amuho hu'na tusi'a eri'za e'neri'na, mago'a kenagera navura ovase'noe. Ne'zane tinena omanege'na nagazanku nehugen, tinku'enena navesi'ne. Kukenani'a omanegeno zasimo'enena nazeri haviza hu'ne. **28** E'i ana knazama eri'notinen, mago mago knafina mono kevugura, inankna hu'za nemanize hu'na tusi antahiantahi nehuazamo'a kna nami'ne. **29** Mono vahe hanave'a omanegeno'a, nagrira hankaveni'a omane'ne? Mago'mo'ma kumipima ufregena, nagra narimpa kna hu'noe. **30** Navufga erisaga hanuna, nagrima hankaveniamma omane'nea zama naveri'ma nehiazanku navufga ra hugahue. **31** Anumzana Rantimofo Jisasi Nefa antahinege'na tamage nehuankino, ra agia erivava hugahie. (**aiōn g165**) **32** Damaskasi kumate'ma mani'noa knafina, Kini ne' Aretasi agorga'a mani'nea gavana ne'mo, rankumamofo kafantaminte mani'neno nazerinaku kava vahe huzamantegeza kava hu'naze. **33** Hianagi

nagrama zamatre'na frenoana eka'eka kupi mani'noge'zanofite
azerine'za natrazagena, zaho eri kampinti (windo) fegu'a uramina
zamatrena fre'noe. (Apo 9:24-25.)

12 Hagi navufgama erisaga hu'zampintira mago'zana
e'noruanagi, Ramo'a oku'a me'nea zane avanagnaza naveri
hu'nea zanku navufga erisagahu kea hugahue. **2** Nagra
antahi'noe, 14ni'a kafu evunefina Kraisi ene hagerafi'nea ne'mo,
nampa **3** monafinka (mareri agatere kumate) marerineana
amega avufgarero, avamupi manineno mareri'neo nagra
ontahi'noe, Anumzamoke antahine. **3** Ana nera nagra ontahi'noe,
amega avufgarero avamupino, nagra ontahi'noe, Anumzamoke
antahine. **4** Hianagi Monafi (Paradise) avreno marerigeno,
hunagru higeno vahe'mo'a huama osuga'za ome antahi'ne.
5 E'i anazama naveri hu'nea ne'mofonku hu'na navufga ra
hugahue. Hianagi nagra'agura navufga ra osugahue. Hagi
hanaveniama omanenesia zanku navufga ra hugahue. **6** Nagra
navufga rama hanuana neginagi vahekna osugahue. Na'ankure
nagra tamage nanekege'za hugahue. Hianagi nagrira antahi
ra huonantesazanki keniare'ene navunava zaniare kesazegu
mago'zana nosue. **7** Na'ankure oku'ma me'nea knare'zantafa
Anumzamo naveri hige'ha ke'noe. Hianagi e'ina zante nege'ha
ra nagi erizankura, nekazagna zamo navufgafi nenreana, e'i
Sata eri'za vahe'mo nata nenamino, nazeri haviza nehanki'ha
navufga ra osnugu anara nehie. **8** Ama ana natama negriazana
Ramo eritrenantesiegu, 3'a zupa kazigazi hu'na antahige'noe. **9**
Hianagi Ramo'a amanage huno nasmine, Nagri nasunkuzamo'a
knare kagrira hugantene. Na'ankure hanave ka'a omanesirera,
Nagri hanavemo'a knare hugantegahie. E'ina hu'negu, Ramofo
hankavemo'a knarezantfa huno refite nantegahiankina hanaveni'a

omanesifina muse nehu'na navufga ra hugahue. **10** E'ina
hu'negu kema nasazano, nazeri haviza hanazo, knaza fore
hanio, amuho erisua knafina rama'a muse nehu'na, narimpa fru
hu'na hankave'nia omnea knafina nemanue. Na'ankure Kraisinku
hu'na hanaveni'a omanea knafina, hankave'nia e'nerue. **11**
Tamagra nagrira knare hu'ne hutma nazeri ante'ama hugaragi,
netreta nagrira nazeri neginagi vahekna nehaza zankura, nagra
navufga ra nehue. Na'ankure nagra amneza mani'noanagi,
ugota aposol vahepinia henkarfana omani'noe. **12** Tamage
aposol vahe'mofo avame'za tamagri amunompina hu'noa zama
kesazana, avame'zama, kagu'vazama hanavenentike eri'zana
eri'na kazigazi hu'na vu'noe. **13** Na'ankure mago'zahu navunava
ana miko mono nagapina nehuanagi, magoke'zama nagrama
huoramante'noana tamagrama kva hunantesazeguma knama
orami'nozamo'e. E'i kefozama hu'nesuana nasunku huanki
kefozania atrenanteho. **14** Hanki antahiho, ko tare zupa
ome tamage'noe, meni mago'ene ome tamageku nehuankina
tamagrira kna ontamigahue. Na'ankure mofavremo'za nerera
nefazana kva hunonteaniki, Nererake nefake mofavre'amo
eriniazana antenteno nevuno kegava hunente. Ana hunegu
tamagripintira mago'zana e'origahuanki, tamagri tamagu tamemo
so'e hanigu nave'nesige'na nehue. **15** Tamagri manizanku hu'na
nagra navufgane, maka'zaniane neramue. Hagi rama'azampima
navesineramantesueta, tamagra osi'a tamavesinantegaahazo?
16 E'nahukna hu'negu tamage hu'na knazana noramue. Hianagi
tamagrama antahi'zana krunage nehuno musufasenaku nehie
hutma nagrikura neheze. **17** Nagrama huzmantoge'zama
tamagri'ma tamaza hanugu'ma vu'naza mono vahepintira,
mago'a nazahuzana reramatga hu'na enerufi? A'o nagra anara

nosue. **18** Nagrama, Taitusine mago nerafunema tutu hu'na huznantogene tamagritega vuna'ana Taitusi'a reramatga huno mago'a azahu zana erinefi? I'o tamagra antahi'naze, Taitusi'ene nagranena magoke avamuteti magozahu huta erizana e'heru'e.

19 Tamagrama tamagesa antahizana, tagrikura zamagra'a ke erihanavetinaku nehaze hutma tamagesa nentahizafi? Tamage e'inahu tamagesa nentahizanagi, Anumzamofo avurera Kraisinku keaga nehuta tamagrimal tamaza hanigeta hageta mrerisaza zanku tamavesi neramantona nerafugatagu nehune. **20** Na'ankure nagri'ma namanoma vaziana, esua zupa nagri'ma naveosi nesiazama tamagripima eme nege'na tamave'osinesia zama huzankure. Nagri'ma namanoma vaziana, tamagripima eme neramege'na, amu'nontamifi ke ha' hu'zama, kanive rezama, arimpa he'zama, atane'zama, havige ohunte ahunte hu'zama, ogenke agenke hu'zama, veganokno hu'zama, mani fatgo osuno makaza erisavri hu avu'avazanku nehue. **21** Nagra ete'na ome tamagesua zupa, Anumzamo'a tamagri tamavufima nazeri nagaze huzankura kore hue. Na'ankure hakaremotma korapa kumitami'a tamagu'a rukrehe osu'naze. Tamagra savri avu'avaza nehutma, monko avu'avaza nehutma, agazehu avu'avaza hu tamaga tevava nehiazankura nagrira zavite nagesa nehie.

13 Hagi ko tarezupa tamagrira eme tamagenoreti, menina eme tamage'haku neoe. Hagi avontafemo'a anage hu'ne. Mika tamage kemofona tareo tagufa vahe'mofo nanekemo hutmagea hanigeno, anankemo'a tamagea megahie hu'ne. (Diu-Kas 19:15) **2** Nagra ese'ma ete'na anantema e'norera, kava huta maniho nanekea ko tamasm'i'noe. Hagi menina tamagri enena omaninoanagi, mago'ane kumima nehaza vahetamine, mago'a vahetaminena kva huta manisaza nanekea neramasamue. Nagrama henkama

esnuna kumi'ma nehaza vahera tamazo onkigahuanki, knaza
eme tamigahue. 3 Kraisi'ma nagri nagipina huvazino nehia
kemofo agafa'a kesunegu'ma nehaza zankura, emeri ama
hugahie. Kraisi'ma tamagripima eri'zama eneriana fru huno
e'norianki hanavetino eri'zana enerie. Agri himamu hankave'mo
tamagripina me'ne. 4 Tamage, hanave'a omanegeno keka
zafarera fri'ne. Menina Agra, Anumzamofo hankavere kasefa
huno asimu erino mani'ne. Na'ankure tagri'enena anahukna
huno hanavetia omneanagi, Kraisimpi mani'neta Anumzamofo
hanave erineta, ana hanavereti tamagripina erizana e'herune.
5 Tamagrati'ma avame antetma tamagu'a refko huta keho,
tamentintifi maninazafi? Hifi tamagra'a tamaguafina refko huta
nonkazafi, Jisas Kraisima tamaguafima mani'neana, Agrira keta
antahita nosaze. 6 Hianagi nagrama namentintima huana, tagratia
rehezampintira evunoramune huta antahita keta hugahaze. 7 Havi
avu'ava osihogu Anumzamofontega nunamuna nehune. Hanki
erizantimofonku vahe'mo'za huknare hihogura nunamuna nosune.
Hianagi erizantimo'a eamara huno knarerla osnianagi, tamagra
fatgo tamavutmava hihogu nunamuna nehune. 8 Na'ankure
tagra tamage kemofo ha'reneneteta rutagregara osunonanagi,
tamage kemofonke amage antegahune. 9 Tagra muse
nehune, na'ankure tagrira hankavetia omne'neanagi, tamagrira
hanavetmia me'negu, tamazeri knare zantfa haniegua nunamuna
hunermantone. 10 Na'ankure tamagri'enena omani'noanagi,
ama agafare avona krenetamuanki'na, nagrama tamagranema
manisuna knazana ontaminaku nehue. Ramo'ma himamuma
nami'nea hanavereti, tamazeri haviza hunakura nosuanki,
tamazeri hanavetisugeta hagetma tamentintifina marerisazegu
nehue. 11 Hagi nafunagnaheta huvagare nanekea anage

hu'na kreneramue, muse nehuta, mago'ane tamamentintifina
hanavenetita, ozeri hanaveti azeri hanaveti nehuta, magoke
antahintahi enerita, tamarimpa fru nehinkeno, avesimaneranteno
rimpafruzama neramia Anumzamo'a tamagrane manigahie **12**
Mago magomofona antako hunentenka avataginka azeri fru huo.

13 Miko Anumzamofo naga'mo'za musenke atreramantaze. **14**
Hagi Ramofo Jisas Kraisi asunku zamo'ene Anumzamofo avesi
zamo'ene Avamumo'enema tagroteno mani' avu'ava zamo'a
mikomotmafi mesie.

Galesia

1 Hagi nagra Poli'na aposolo ne'mo'na, ama eri'zana mago'a
vahe'mo hunantege, mago'a naga'mo'za erio hazage'na e'norue.
Hianagi Anumza Nafatimo Jisas Kraisi'ma fri'nefinti azeri
otine'mo, hunantege'na e'nerue. **2** Maka nagrane mani'naza
nafuhezanena, Galesia mani'naza mono naga'motarega
musenkea atreneramantone. **3** Anumza Nafatimofone Ranti
Jisas Kraisi asunkuzamo'ene rimpala fruzamo'a tamagrane
mesie. **4** Jisas'a asimu'a atreno kumitia atrerante'ne. E'inama
hu'neana Anumza Nafatimofo avesi avaririno, mopafima amama
meni mani'nona kefo avu'avazampintira tahokeno tazahunaku
anara hu'ne. (aiōn g165) **5** Ana hu'negu Anumzamo ra
agia, Agra'a eri vava hugahie! Tamage. (aiōn g165) **6** Hagi
nagra antri hue, Anumzamo'a Jisasi asunkuzanteti tamagi
hu'nea nagamota netretma, ruzahu musenkemofo amage
nentaze. **7** Hanki ru Knare Musenkea omnene, mago'amo'za
tamazeri savri hu'za Jisas Kraisi Knare Musenkea erisavri
hunaku nehaze. **8** Hianagi tagraneno, monafinti ankero
vahe'mo'zanema, ko'ma tamašmi'nona Knare Musenkema
atre'za, ru kema tamašamisazana, kazusifi manigahaze! **9**
Ko'ma tmasmi'nona ke menina mago'ene neramasamue, ko'ma
Knare Musenkema huama hunketa antahi'naza kemofoma
ha'ma rente kazigatima kema hanimo'a, kazusifi manigahie!
10 Na'ankure nagrama e'inagema nehuana, vahe'mo'za
antahi so'e hunantege, Anumzamo antahi so'e hunantenogu
nehufi? Hifi nagrama mraguzamanetuana vahe'mo'za antahi
muse hunantehogupi? Nagrama vahe'mo'za antahi muse
hunante'nazegu'ma nehanu'na, Nagra Kraisi kazokzo eri'za
vahera omani'noe. **11** Na'ankure nena fugata nagri'ma navesiana,

Knare Musenkema huama nehuana, vahe'mofo antahintahireti hunoramie huta antahi ama hanazegu nehue. **12** Na'ankure ama ana kea vahepinti e'orina, vahe'mo'za rempia huonami'naze. Hianagi oku'a frakinea kea Jisasi Kraisdi eriama huno nami'ne.

13 Na'ankure korapama Jiu vahe'mota avu'avaza nagrama nehua knafina, Anumzamofo avu'ava nehue nehu'na, mono naga'ma nezmahe'na, zamazeri havizama hu'noana tamagra ko antahi'naze. (Apo 8:3) **14** Nagra tusi hanaveti'na tagehe'mokizmi zamuzmara amage'nentogeno, anama huazamo'a nagri navuma mani'naza, Jiu vahe'mokizmia zamuzmamofona zmagatere'noe. Nagra tusi hanavetina nagehemofa avu'vara avaririnoe. **15** Hianagi nagra nentrera rimpafina forera osu'nogeno, korapa Anumzamo Agra'a asunkuzanteti huhamprinante'nemo muse hunanteno, **16** Agra'a ne'mofona naveri hige'na, megi'a vahepina Knare Musenkea huama nehue. Mago vahe'mokizmia ame hu'na nagra ama ana kegura zmantahi'onke'noe. **17** Jerusalemi kumatera nagra mareori'na, ko'ma mani'naza aposol nagara ome ozmage'noe. Hianagi nagra Arabia kumate vute'na, ete mago'ene Damasakasi kumate vu'noe. **18** Ana hute'na, 3'a kafu evige'na, Jerusalemi kumate vu'na, Pita'ene kea ome nehu'na, 15ni'agna agrane anante mani'noe. **19** Hianagi mago'a mono nena fugizmia ozmage'noanki, Ramofo negna Jemisinke ke'noe. (Apo 9:26-30, 11:29-30.) **20** Nagrama ama avoma kreneramuana, Anumzamofo avufina tamage hu'na reramatga nosue. **21** Ana hute'na Jerusalemi kumara atre'na Siriane, Silisia kaziga vu'noe. **22** Judia kazigama mono nagama Kraisimpi mani'namo'za, nagrira navufina onage'naze. **23** Hianagi tagrama tamentintima nehunkeno, nerahegeta agenke'a nentahuna ne'mo'a, anama eri havizama nehia amentintimofo kea huama

nehie hu'za nagrikura hu'naze. 24 Na'ankure nagrite'ma fore'ma
hu'neazankura, Anumzamofo agi erisaga hu'naze.

2 Hagi 14ni'a kafuzage manite'na, Jerusalemi kumate
Banabasi'ene ete marerita nevuta, Taitusina avreta vu'no'e. 2
E'inama hu'noana na'ankure oku'a fraki'nea nanekea, Anumzamo
nagri naveri hu'nea naneke megi'a vahepi huama hu'noa kea
ome zmasami'noe. Menima e'nerua erizamo'ene, ko'ma eri'noa
eri'zamo'a amnezanknara osinogu kva vahe zamagrike ome
zamasami'noe. 3 Hianagi Taitusi'a Griki ne'mo nagri'ene vano
nehia neragi, kva vahe'mo'za mago zamarimpa hu'za, oku
avufga anona taga huzankura mago kea osu'naze. 4 Hianagi
havige mono nerafu'za mono vahekna hu'za atrumahumpina
enefre'za, Krais Jisasimpi fruhuta mani'nonazana tavre'za
korapa avu'avazampi kinarerante'naku efre'naze. 5 Hianagi
tagra tamage Knare Musenkemo tamagrane mesiegu, zamagri
kea antahiozamita kankamuna ozami'none. 6 Hianagi ra
zamagi eri'naza vahe'mokizmia, ra zamagima eri'nazo, ra zmagi
e'ori'nazo nagra ana zankura nontahue. Anumzamo'enena
ra zmagigura nontahie. Ana zamagima me'nea vahe'mo'za
mago kea nagri kerera osu'naze. 7 Hianagi zamagrama
ke'za antahizama hazana, Pitama zamufga tgahu Jiu vahete
Knare Musenke ome huama hinogu hunte'neaza huno, nagrira
zamufga taga osu'naza megi'a vahete Knare Musenkea
huama huogu hunante'ne hu'za ke'za antahiza hu'naze. 8
Na'ankure zamufga tagahu Jiu vahepima Pitama aposol erizante
huntegeno vu'nea Anumzamo, nagri'enena aposolo eri'zana
zamufga taga osu megi'a vahepina eriogu hunante'ne. 9
Anumzamo'ma asunkuzama'reti nami'nea eri'zana, Jemisima,
Pita'ma, Joni'ma zamagra mono eri'zamofona hagaza zafa

mani'ne'za keama nehu'za, Banabasine nagri'enena megi'a
vahepi eri'za omerisu'egu magoka hurantageta megi'a vahepina
vu'no'e. Hagi Jiu vahete zamagra eri'zana erisageta, tagra
megi'a vahepi eri'zana erigahu'e. **10** Zamagra zamunte omene
vahemazaza huzankura antahizamiho hu'za hurante'naze.
E'i ana eri'zana nagrira tusi'za huno navenesige'na erinaku
nehua erizanku hu'naze. **11** Hianagi Pita'ma Antioku kumate
ehanatige'na, haviza hu'nane hu'na avufi kesu'noe. **12** Na'ankure
Jemisi'ma huzmantenevahe'mo'zama omenageno'a, Pita'a
knare huno megi'a vahe'enena magopinti ne'zana netere
hu'ne. Hianagi mago'a vahe'ma Jemisi'ma huzmantenge'za
neageno'a, Pita'a anamokizmia zamatreno agragu umani'ne.
Na'ankure zamufga taga hu'naza vaheku koro hu'ne. **13** Maka
Jiu vahe'mo'za, anahukna hu'za krunga zamuzma nehazageno,
ana zamo'enena, Banabasina avazu hu'ne. **14** Hianagi
nagrama kogeno, Knare Musenkefi fatgo hu'za omanizage'na,
maka'mokizmi zamufi anage hu'na Pitana asmi'noe, kagra Jiu ne'
mani'nenka megi'a vahekna hunka nemaninka, Jiu vahekna hunka
nomanine. Nankna hunka megi'a vahe'mokizmia, Jiu vahe'mo'za
nehazaza hiho hunka nehane? **15** Tagra Jiu vahe mani'neta,
megi'a vahe'mokizmi amu'nompina, kumi vahera omari'none. **16**
Tamagerafa hu'za vahe'mo'za kasegemofo erizantetira fatgo
vahera omanigahaze. Hianagi Jisas Kraisinte'ma zamentintima
hazamo'za fatgo vahera nemanizankita, tagranena Jisas Kraisinte
tamentinti nehuta fatgo vahera nemnunankino, kasegema
avaririzamo tazeri fatgo vahera noseankita, Jisas Kraisinte
tamentinti hanunazamo fatgo vahera nemnunanki, kasegema
avaririzamo'a vahe'mota tazeri fatgo nosie. Kasegemo'a mago
vahera azeri fatgo osugahie. **17** Tagrama Jiu vahe'motama

Kraisimpima tazeri fatgo hu kanku'ma nehakesumota, kesunana
kumi vahe mani'none hugahune. Ama'i ana zamo'a huno Kraisi
higeta kumira nehumpi? Anara nosune. **18** Ko'ma atre'noa
kasegema eri kasefa hanu'na, nagra kumi vahe manigahue. **19**
Na'ankure kasegemo'a fri kante navrentege'na, kasegefina ko fri
vahekna hu'na mani'noanagi, menina ama kanteti Anumzanena
nasimu eri'na mani'noe. Nagrira Kraisi'ene rugeka zafare nahe'za
hantizage'na, Agrane ko fri'noe. **20** Nagra Kraisi'ene keka zafare
ko fri'noankina, menima mani'noana nagra'a omani'noanki, Kraisi
nagu'afina mani'negena, nagrama ama navufare'ma mani'noana,
Anumzamofo Nemofonte namentinti nehu'na Agra'a avesinanteno
asimu'a nami'nemofonte mani'noe. **21** Nagra Anumzamofo
asunku'zana namage'na hunemi'na eri amnezanknara osugahue.
Tagrama kasegema avaririsunkeno, Anumzamo'a taguvazigahie
hanunkeno'a, Jisasi'ma frino tazeri agruma hu'neazamo'a
amnezankna hugahie.

3 Hagi tamagra neginagi Galesia vahere, Nagra Jisasima rugeka
zafare ahageno fri'nea kea ko huama hugeta antahi'nazaragi,
ina ne'mo antahintahitamia tamazeri savrira nehie? **2** Nagra
mago'za tamagripintira kena erifore hu'za hue. Tamagrama
Ruotge Avamuma eri'nazana, kasegemofo erizanteti eri'nazafi,
ke nentahita tamentinti nehuta eri'naze. **3** Tamagra negi
nenazafi? Avamumo eri agafa hu'nea eri'zana, tamagrati
hanavereti erivagare'za nehazo? **4** Tamagrama ko'ma knazama
eri'nazana, amane eri'nazo? Nagrama nagesa antahuana
amne knazana e'ori'naze. **5** Anumzamo'ma Ruotge Avamu'a
neramamino, kaguvazama tamagripima erifore hu'neana, Mosese
kasege avaririzageno anara hu'nefi? Anumzamofo ke nentahita,
Agrite tamamentinti hazageno anara hu'ne? **6** Avontafemo'a

anage hu'ne, Abrahamu'a amentinti higeno, Anumzamo'a fatgo
nere huno agrikura hu'ne. (Jen-Agf 15:6) 7 E'ina hu'negu
antahita ketama hanazana, zamentintima hazavahe'mo'zage,
Abrahamu mofavre mani'naze. 8 Avontafepina anage huno
krente'ne, Anumzamo'a meg'i'a vahera zmentinti hanageno
zmavregahie huno hu'ne. E'ina hu'negu Anumzamo'a anage huno
Abrahamuna Knare Musenkea asmino, Maka mopafi vahem'o'za
kagripinti asomura erigahaze huno hu'ne. (Jen-Agf 12:3) 9
E'ina hu'negu iza'o amentintima hanimo'a, amentinti ne'ma
Abrahamuma ami'nea asomura erigahie. 10 Na'ankure kasegema
avaririzante Anumzamo'a muse hunantegahie hanimo'a,
kazusifi mani'ne. Anumzamofo avontafepina anage hu'ne, Mika
vahem'o'za mika kasegema amage'ma ontessamo'za kazusifi
manigahaze hu'ne. (Diu-Kas 27:26) 11 Hagi mago vahem'o'e
huno kasegema amage'ma antezampintira Anumzamofo
avufina fatgo vahera omanigahie. Na'ankure Fatgo vahera
zamentintima hanagu manigahaze. (Haba 2:4) 12 E'inahukna
hianagi, kasegemo'a amentinti hu'zana omnene, Iza'zo e'inahu
hu'za kasegemofo amage'ma nentesazamo'za, ana kasegere
manigahaze. (Lev-Pri 18:5.) 13 Kasegemofo kazusifintira Kraisi'a
mizaseranteno taza hu'neankino, ana kazusia Agra'a erino taza
hu'ne. Na'ankure anage huno avontafepina krentene, Maka
vahem'o'za keka zafare'ma hanti'nesamo'za kazusifi mani'naze
hu'ne. (Diu-Kas 21:22, 23) 14 E'ina hu'negu Abrahamuma
huhamprinte'nea asomumo'a, Kraisi Jisasimpinti megia vahepina
nevanigeta, tagra huvempa hu'nea Avamura tamentinti hanuta
erigahune. 15 Hagi nenfugate, Nagra vahem'o'zama maka
knama nehaza zmavuzmvavate hunte'na tamasamiza hue,
vahem'o'za'ma mago'zama hu'naku mago zamarimpama hu'za

kema hagerafinesaza kea, mago vahe'mo'a rugea huntege, eri
atrege osugahie. **16** Korapara Anumzamo'a Abrahamunku'ene
agripinti fore'ma hania mofavregura huvempa kea hunte'ne. Agra
kagri mofavreramine huno osu'ne. Agra rama'a mofavreraminkura
osu'ne. Magoke mofavregu huno anage hu'ne, Kagripinti fore'ma
hanimo'ema hu'neana, e'i Kraisinku hu'ne. (Jen-Agf 17:7) **17**
Hanki nagrama nehuana amanage nehue, esera Anumzamo'a
Abrahamu'ene huvempa hutegen, 430'a kafuzage evutegen,
henka kasegea efore hu'neankino, kasegemo'a Anumzamo'ma
huvempama hu'nea kea eri otregahie. **18** Na'ankure erisanti
haregahaze hunesia zamo kasegefima manenesiana, huvempa
hu'nea kefina omanesine. Hianagi Anumzamo'a Abrahamuna
huvempa hunte'ne. **19** E'inama hu'nesiana, na'a agafare
kasegea ami'he? Kasegema zami'neana vahe'mo'za kefozama
nehazaza keama hanazegu zami'ne. Hianagi ama ana kasegema
avaririzamo'a memevuno, Anumzamo'ma huvempama hu'nea
Mofavrema esia knare ome vagaregahie. E'i anazamo'a mago'ane
ruzahu hu'ne. Anumzamo'a ankero vahera kasegea zamige'za,
Anumzane, vahe'mofone amuno ne' Mosese ami'naze. **20**
Tare vahe'moke kema hagerafinaku'ma hanakeno'a, amuno
ne' mani'enkene anara hugaragi, Anumzamo Agra'a huvempa
Abrahamuna hunte'ne. **21** Kasegemo'a Anumzamo huvempa
hu'nea kene mago zanarimpa osu'napi? A'o, anara osu'ne!
Hagi maka kasegemo'ma kasefa tasimuma tamisiana, tagra
ana kasegege amage'nenteta Anumzamofo avurera fatgo
vahera manusine. **22** Hianagi Anumzamofo avontafemo'a
anage hu'ne, Kumi'mo'a maka vahera kina huzmante'negu,
Anumzamo'ma huvempa hu'neazama erisazana magoke kana,
Jisas Kraisinte zamentinti hanamo'za erigahaze. **23** Hianagi

amentintima hu'zama omenegeno, kasegemo kina rerantegeta manita neonkeno tamentinti hu'zana efore hu'ne. **24** E'ina hu'negu kasegemo'a kvagriranteno Jisas Krais knare ehanati'neankita, tagrama tamentinti hanuta Anumzamofo avurera fatgo vahera manigahune. **25** Hianagi tamentinti hu'zamo fore'ma hu'nea knafi mani'nonankino, kasegemo'a kegava kriorantegahie. **26** Na'ankure tamagra maka'mota Jisas Kraisinte'ma tamentintima nehuta, Anumzamofo mofavre mani'naze. **27** Na'ankure tamagra maka'mota Jisas Kraisinte mono tina nefreta, Kraisina kukena hiaza nehaze. **28** Hanki Jiu vahero Griki vahera omanita, kazokzo vah'e'ene amne vahera omanita, veo aro omani'naze. Na'ankure tamagra maka'mota Krais Jisasimpina magoke mani'naze. **29** Hagi tamagrama Krais vahe'ma mani'nenuta, tamagra Abrahamu negehogata mani'neta, erisanti haregahazema huno Anumzamo'ma huvempa hunte'nea vahera mani'naze.

4 Hagi nagra anage hu'na nehue, nefo fenozama erisantihare ne'mo'ma osi mofavremo mani'nenu'o'a, maka'zana agri'za megahianagi, kazokzo eri'za vahekna huno manigahie. **2** Hianagi ana mofavremo'a fenozama kegava hu'naza vah'e'ene, agri'ma kegava hu'naza vahe'mofo agorga'a mani'nenigeno, nefo'ma fenozama erisanti haregahane hunte'nesia kna efore hugahie. **3** Anahukna kante tagranena mofavremo mani'neta, ama mopama kegava hu'naza avamutamimofo zmagorga'a mani'neta kazokzo hu'nonane. **4** Hianagi humante'nea kna fatgoma egeno'a, Anumzamo'a Mofavre'a huntegeno, a'mo ana Mofavre kasentegeno, kasegemofo agorga efore hu'ne. **5** Ana hu'negu kasegemofo agorga mani'naza vahera, Agra mizaseranteno tamavresigeta, avreno kri'nea vahekna huta, Agri mofavre manigahune. **6** Na'ankure tamagra mofavre'a

mani'nageno, Anumzamo'a Mofavre'amofo Avamu huntegeno, tagu'afi emani'neno tazeri otino, Aba, Nafa'o huno nehie. 7 E'ina hu'negu mago'ene kazokzo eri'za vahera tamagra omani'naze. Hianagi Anumzamofona mofavrerami mani'naze. Ana hu'nazagu fenozama'a erisantihare vahe mani'naze. 8 Hagi tamagra korapara Anumzana keta antahita osu'neta, amne zanku, anumzantie huta nehazageno, kina reramantegeta anazamofo kazokzo vahe mani'nazane. 9 Hianagi menina Anumzamofona keta antahita hazageno, Anumzamo'enena tamagrira tamegeno antahino hu'neanki, nahigeta tamagena hunemita, haviza huno hanave'a omne avamute nehuta, mago'ane kazokzo eri'za vahe'a manisune huta nehazo? 10 Tamagra Anumzamo'ma muse huramante kazigati, mago knazupo, ikantero, kafurero, knane knanena makazana huge, osugera nehaze. 11 Tamagrikura tusi'za hu'na eri'zana eri'noankino, ana eri'zamo amnezankna huzankura nagra tusiza hu'na kore hue. 12 Nafuheta nagrama hu'noankna hutma, tamagra Jiu vahe'mokizmi kasegemofo kinafina omanihogu navenesige'na tamantahinegoe, hanage'na nagramena tamagrikna hanuegu nehue. Tamagra mago hazenkea nagrira huonante'naze. 13 Hianagi tamagra antahita keta hu'naze. Navufafina kri me'nege'na, Knare Musenkea huama hu'na ese knazupa tamasami'noe. 14 Nagri krimo'a knaza tamagrira tami'ne, hianagi ana krima eri'noazankura tamagra tamavugosa huonantege, tamagena huonami'naze. Hianagi tamagra nagririra Anumzamofo ankero avreankna huge, Krais Jisasima avreankna hutma navre'naze. 15 Hianagi ana musezantamia iga menina me'ne? Nagra tamage hu'na tamagrikura huama nehue. Tamagra ana knazupa tusiza huta nazahunaku hu'nazankita, tamagrama tamavuma tagatita nazamahugama huneresina, amne anara

hazasine. **16** Tamage kema neramasamuazamo, tamagri ha' vahera nemanufi? **17** Antahiho, e'i ana vahe'mo'za tamagrira masavenke hu'za tamavrenaku nehazanagi, tamagrira tamaza hunakura anara nosaze. Zamagra nagriteti tamavazu hu'za zamagrarega antesageta zamaza hanazegu anara nehaze. **18** Hianagi nagrama omanisua knafine, maka zupa knare tamavutmava'ma huzanku'ma hanavematisazana, e'i knare zantfa hugahie. **19** Mofavre'nimote Anumzamofo mofavre'manita, Kraisimpina nena vahekna hutma manisazegu'ma tamagri'ma tamaza hunaku'ma nehugen'o'a a'nemo mofavre kasente'naku nehigeno ata negriankna nata negrie. **20** Hianagi nagrama nagesa antahuana tamagrane menina umani'ne'na, fruhuna kea hu'naku nehue. Na'ankure nagra nankna hu'na tamaza hugahue, antahintahinimo'a savri nehie. **21** Hagi tamagra nasmaho, kasegememofo agorga'a manize nehaze vahe'mota, tamagra kasegememo'ha hu'nea kea ontahinazo? **22** Na'ankure anage huno avontafepina krente'ne, Abrahamuna tare ne' mofavre'a mani'na'e, mago mofavrea kazokzo a'mofo mofavregi, magora kazokzo osu a'mofo ne' mofavre mani'ne. (Jen-Agf 16:15, 21:2) **23** Hianagi kato a'mo Haga ne' mofavrema kasente'neana mopafi vahe'mo'za nehazaza huno ksentegeno, Sera'a kazokzo osu a'mo'a Anumzamo huvempa hu'nea ne' mofavre kasente'ne. **24** Ama ana a'tremokizni kemo'a Anumzamo'ma Agra'a vahe'enema hagerafino manizamofo kemofo erinte'ama hu'ne. Haga'a kazokzo a'mo'a Sainai agonafima Anumzamo'ma huhagerafi'nea kemofo hu avame huno mani'ne. Agri nagapinti'ma fore'ma haza naga'mo'za kasegemofona kazokzo naga mani'naze. **25** Hega'a Arabia kaziga Sainai agonane, menima me'nea Jerusalemi rankuma huvame huno mani'ne. Na'ankure agrane

mofavre'araminena kazokzo naga mani'naze. **26** Hianagi anagamu monafi me'nea Jerusalea, tagri nerarera kazokzo osu a'mo hu avame huno mani'ne. **27** Na'ankure anage huno avontafepina krente'ne, Muse huo mofavre kase onte a'moka, mofavre antezampi katama nogrimoka, ranke hunka kezatio. Na'ankure mofavrema kase onte a'moka nevema mani'nea ara agaterenka, rama'a mofavre kasentegahane hu'ne. (Ais 54:1.) **28** Hagi nena fugata, tamagra Anumzamo Abrahamu huvempa hunte'nea mofavre Aisakinkna hutma mani'naze. **29** Hianagi vahe'mo'za mofavrema erifore nehaza kantetima kasema ante'nea mofavremo'a, Avamumofo kanteti'i'ma fore'ma hu'nea mofavrea hazenke ami'ne. Meninena anahu avu'ava zana me'ne. (Jen-Agf 21:9) **30** Hianagi avontafemo'a na'ane huno hu'ne? Kazokzo a'ene mofavre'anena avare atro hu'ne. Agra mago'azana e'origahianki, kazokzo osu a'mofo ne' mofavremo maka'zana erisinti haregahie huno hu'ne. (Jen-Agf 21:10-12) **31** E'ina hu'negu nena fugata, tagra kazokzo a'mofo mofavrea omani'nonanki, kazokzo osu a'mofo mofavre'rami mani'none.

5 Hagi Kraisi'a kinafinti katufe tamente'heanki kina vahekna huta omanita, oti hanavetita nemanita, ete mago'ane kasegemofo kinafina omaniho. **2** Antahiho, Nagra Poli'na amanage hu'na neramasamue, tamagra tamavufgama atresage'za taga huramante'sazana, Kraisi'a tamaza osugahie. **3** Mago'ane anage nehue, maka zmufama taga hu'naza vahe'mota, maka kasegea amage'antegahaze. **4** Tamagra Anumzamofo avurera kasegefintira fatgo vahera manigahune hutma nehaze. Kraisimpintira ko huramatre'neankita, tamagra Anumzamofo asunku'zampintira evurami'naze. **5** Na'ankure tagra Avamumo taza higeta tamentinti nehuta, fatgo vahere huno hurantesigu

amuhara nehune. **6** Na'ankure tamavufa taga hu'nazo, tamavufa taga osunaza zana Kraisimpina amneza me'ne. Hianagi tamentinti nehunkeno anazamo tazeri otigeta, ovesinte avesinte nehuna avu'avazamo razana me'ne. **7** Kotera knare huta tamentintifina tamaga re'nazanagi, iza ru antahintahi tamamino asevazirmantegetma tamage kema amage'ma nentazazana netraze? **8** Hagi anama ru antahintahi tamamino asevazineramantenea vahera, tamagima hu'nea Anumzamo'a huonte'nea vahe'mo nehie. **9** Hanki osi'a zisimo'a, flauamofona heruntazageno'a maka azeri zonere. **10** Hanki tamagra Ramofo vahe mani'nazankina, nagra antahi'noe. Nagrama huankea antahinenamitma amagera nentaze. Iza'o ana hazenkema erifore'ma nehia vahe'mo'a ra hazenkefi manigahie. **11** Hianagi naufuhete, nagrama tamavufgama taga hihogu'ma huamama nehanugen'o'a, na'a hige'za nagrira nazeri haviza nehaze? Keka zafamofo kemo'a zmagigo zamitnafa hu havegna nehiazamo'a amanezankna hugahie. **12** Nagri'ma navesiana e'ima hazenkema neramiza naga'mo'za, zamagra oku zamavufagama taga nehu'za, zamagonknazama harisazana knare hugahie. **13** Tamagra nena fugata Anumzamo'ma tamagima hu'neana kinafintira katufeta manisazegegu kea hu'ne. Ru tamagra antahita hago kinafintira katufeta mani'none nehuta, korapa tamarimpamofo avu'ava hanagi, anara osugahaze. Tamagra ovesinte avesinte hu avu'ava zampinti oza aza hiho. **14** Na'ankure maka kasegemo'a magoke kasegefei eri knare hu'ne, anagemo'a anage hu'ne, Tavaonkare'ma mani'nesamokizmia, kagrugu'ma kavesintanaza hunka zamavesintegahane hu'ne. (Lev-Pri 19:18) **15** Hianagi tamagra afi zagakafamo hiaza huta, ompri ampri hanutma tamagrati tamazeri haviza hutma fanane hugahazanki kva

hiho. **16** Hianagi anage hu'na neramasamue, Avamu'ene kama vanoma hanazana, tamavufgamofo avesi'zana amagera ontegahaze. **17** Na'ankure avufgamofo avesizamo'a, Avamumofo avesizanena ha'rentegeno, Avamumofo avesi'zamo'a avufgamofo avesi'zana ha'renenteankino, amu'nozanifina ha' orente arente'za me'neankita, nazano hunaku'ma hanaza zana osugahaze. **18** Hianagi tamagrama atresageno Avamumo'ma tamazeri fatgo huno vanigeta, tamagra kasegemofo agorga omanigahaze. **19** Hagi ama tavufgamofo avesi'zana amanahu'za me'negeta negone. Monko avu'avazane, agru osu avu'avazane, havi avu'avazane, **20** havi anumzante mono huntezane, avotga zane, ha' hu'zane, fravazi'zane, kanive re'zane, asi vazi'zane, vaheku agesa ontahi zane, veganokno hu'zane, vahe refko hu'zane, **21** rumofo zankunofi ahe'zane, ti neneno negi ne'zane, atru hu'za ruga'a savri zamofo naneke hu'zane. E'inahukna tavutavazana eri fore nehie. Ko'ma tamasm'i'noana meni mago'ene neramasamue. E'inahu zamavu'zmavama nehaza vahe'mo'za Anumzamofo kumapi omanigahaze. **22** Hianagi Avamumofo avu'ava zana avesinte'zane muse'zane, rimpa fru'zane, akoheno mani'zane, vahe so'e hunte avu'ava zane, knare avu'ava hu'zane, ke amage'anteno avariri fatgohu avu'avazane, **23** akoheno fru avu'ava hu'zane, agra'a avesiza kegava huzamofona mago kasegemo'a hara reontegahie. **24** Hagi Krais Jisasimpi mani'namo'za, zamufamofo avu'avazane, zmesi'zanena rugeka zafare ahe fri'naze. **25** Tagrama Ruotge Avamu'enema mani'nesuta, atrenunkeno maka kama vano huzantifina Ruotge Avamu'mo kana taveri huno vanie. **26** Hanki atrenketa tagra'a tavufga rana nosuta, vahera zamarimpa zamazeri otikea nosuta, kanive orente arente osanune.

6 Hagi nena fugta magotamimo'ma kumipima evuramisigeta,
Ruotge Avamumofo nevaririsamota, ana kumapima
evuramizankura tamagra'a kegava hu'netma, fru avu'avazampinti
e'inahu vahera azeri fatgo hugahaze. **2** Knazama oza aza hutma
erinutma, Kraisi kasegea eri knare hugahaze. **3** Na'ankure
mago'mo'ma agima omnennenimo, nagi me'ne huno agesama
antahisiana, agra'a revatga hugahie. **4** Hianagi magoke
magokemo'a agra'a eri'za rezagneno keso'e huteno, agrama
e'nerisia erizankura agi'a erisaga haniazamo'a agafa'a megahie.
Hanki rumoma enerisia erizantera, agra eri'zana erinteno
rezagneno onkegahie. **5** Na'ankure magoke magokemo'a
agra'a eri'zamofonte knazama'a eritere hugahie. **6** Mago'mo'ma
Anumzamofo kema rempima hune zamisimofona, rempima
hune zamige'za e'nerizamo'za, mika knare'zazamia refko hu'za
amiho. **7** Kagraka'a regavatga nehunka, Anumzamofona
azeri haviza hu naneke huonto, nazano kagrama kri'nesana
zana, kagraka'a kafigahane. **8** Na'ankure vahe'mo'ma
agra'a havi avu'avazama kri'nenia zana, agra'a havi avu'ava
zana kafigahie. Hianagi izo' Avamumofo avesiza avaririno
kri'nenimo'a, Manivava asimu erigahie. (aiōnios g166) **9** E'ina
hanigu knare avu'ava'ma hu'zankura tavesra osanie. Tagrama
hanavetita eri'zama erisuta, nezama kafi knazupa knare ne'za
kafigahune. **10** E'ina hu'negu tagrama vahe'ma zamaza huga
kankamuma fore'ma hanigetma, maka vahera knare tavutva
hune zamita, Ramofonte'ma zamentintima nehaza nagara
zamazahufaza hugahaze. **11** Hanki nagrani'a nazampinti
ama ranra avontamimpinti avona krerami'noanki, tamagra
keho. **12** Zamagrama tamavufgama taga hiho hu'za tutu
hunermantaza vahe'mo'za, tagra knare hu'none hu'za nehu'za,

Kraisi keka zafagu'ma huama nehu'za, knazama eri'zankura
zmave'nosige'za anara nehaze. **13** Na'ankure zamagra'a
zmavufama taga hu'naza vahe'mo'za, zamagra kasegea
amagera nontaze. Hianagi tamagra tamavufa taga hanage'za,
ana tmavufgarekura zamagra zmavufga ra hu'naku neheze. **14**
Hianagi nagra mago'zantere hu'na navufga erisaga osugahuanki,
Rantimo Jisas Kraisi nagriku huno rugeka zafare fri'nea zankuke
navufga ra nehanugeno, Rugeka zafare'ma Kraisima eri'nea
eri'zanteti ama mopafi kefo navu'navazamo'a ko nagripintira
frige'na, nagranena ama mopafi avu'ava zampina ko fri'noe.
15 Na'ankure avufama taga hanio, avufama taga osniana
razana omnene, hianagi agu'a rukrehe huno kasefa'ma huno
mani'zamo tamagezana me'ne. **16** Hanki ama trakemo ke
hu'nea kante ante'za vano nehaza vahe'mofona, rimpa fru'zane,
asunku'zamo'a zamagrane me'nena, tamage Anumzamofo
Israeli vahe manigahaze. **17** Hanki menintetima vaniana,
mago vahe'mo'e huno hazenkea onamino, na'ankure Jisasima
ahazageno avufgare fore hu'neankna afuhe, nagri navufarera
ana nafuhe me'ne. **18** Rantimofo Jisas Kraisi asunku'zamo'a
tamagri avamu'ene mesie. Tamage.

Efesasi

1 Hagi Poli'na, Krais Jisasi aposolo eri'za ne'mo'na Anumzamo Agra'a avesite huhampri nantenege'na, Efesasi kumate zamentinti nehaza naga'ma (Saints) mani'ne'za, Krais Jisasinte tamage zamentinti nehu'za amage' nentaza vahetega ama avona kre netroe. **2** Anumza Nerafantegati'ene Ranti Jisasi Kraisintegati asunku'zane, rimpia fruzamo'a tamagrane mesie. **3** Hagi Anumzamofo ra agi amisune, Ranti Jisas Kraisi Nef'a'ma mona kumapinti Kraisimpi, avamupina maka asomura hurante'ne. **4** Korapara Agra mopa erifore osu'nea knafi agu'areti avesiranteno, Kraisi'ene otage huta fatgo zampi, havizana omanesigeta Agri avure manisnune huno tagrira huhamprirante'ne. **5** Korapa Agra huhampri tanteno mofavreni'aza hugahaze huno Jisas Kraisinteti, tavreno Agrarega tante'ne, Agra'a so'e zanteti antahiramino anara hu'ne. **6** Anumzamo'a avesinentemofo Jisas Kraisimpi taza hu'zana eri tagitregeno erami'nea zankura, ra agi amisune. **7** Kraisi koranu tahokeheno miza seneranteno, maka kumitia eri fanane nehuno, tusi'a asunku zama'areti Agra asuragiranteno taza hu'ne, **8** Agra rama'a zampi tagrira taza hu'ne. Mika fatgo antahintahine, knare tagu tagesa tami'ne. **9** Korapa Agri'a agu'afi oku'a me'nea antahi'za eriama huno taveri hu'ne. Kraisi'a zamaza hugahie huno agu'afi atre'nea tzahu'za, Agra'a eriama hu'ne. **10** Anumzamo ofenka'ati mago knama esia zupa, monane mopane eri mago huno, maka Kraisi kvafi antenaku antahi'neane, **11** korapa agafare Anumzamo'a Agra'a avesite ko antahino keno huteno, maka'zana Kraisinteti erisanti hare'snaze huno tavarenaku huhampri rante'ne. **12** Tagra ana nehuta, Jiu vahe'mota Kraisinte tamentintima pusante nehumota tagra, Anumzamofona ra agi amigahune. **13** Tamagranena tamage kema

Kraisimpinti ko antahitetma, manivava tamasimu eri'zanku Knare
Musenke'are tamentintia nehzageno, Agra Ruotge Avamu'anu
azanko avona kreno huhampri (seal) tamanteno tamami'ne. 14
Avamu'ama tami'neana huhampritanteno henka'anena ruga'a
knarezantmima huhamprirante'nea zantamina erigahune huno
tami'negu Anumzamofona muse hunenteta ra agi amisune. 15
Hagi e'ina hu'nea agafare nagranena, Ranti Jisasinte tamagra
tamentintima nehaza ke'ne, maka Anumzamofo naga otge hu'za
nemani'za naga'ma tamavesima nezmantaza zanku nentahi'na,
16 maka zupa nunamuni'afina nagerakani noramante'na,
tamagrikura Anumzamofona susu hunentoe. 17 Anumzamo'a so'e
hihamu'ane masamofo Nafa'amo Ranti Jisas Krais Anumzamo'a
knare antahi'zane, tamagu tamagesane, tamage ke'a huama
hu antahi'zamofo avamura tamisnigeta Agrira antahita keta
nehuta, avamupina ra hanazegu nehue. 18 Nagra nunamu
nehuankino antahintahitamofona masa tamina, tamagu'amofo
avurgamo hari nehanigetma, Agrama kezatino fore hugahie huno
tamajima nehiazana, tamagra kegahaze. Mizama'a mareri'nea
zantmi, hihamu'ane msazama'afi Anumzamo'a tamina, Agrite
mani ruotge nehaza vahe'mo'zane, tamagra erigahaze. 19 Hanki
ana nehuta tagrama tamentinti nehuna vahe'ma agatererfa
razama, Agra hanave'a tami'neana, ama ana hihamu'agino,
20 tusi'a hihamu'afi Kraisina fri'nefintira, Agra azeri otiteno
monare azantamaga kaziga avare antegeno mani'ne. 21 Mareri
onagate'nea tra'ma kvahu hanavema, maka zante kvama
hu'neane, mika zamofo agima ko'ma antemi'neane, menima
ama mani'nona knafinkerompage, henkama esia knafinena
agatereno onaga'a mani'ne. (aiōn g165) 22 Maka'zana Krais
azampi kva hanie huno ante'ne, Agri kvafi maka'zana mono

kevumotagu (sios) huno ante'ne. 23 Mono kevuma mani'nazana
Kraisi avufgagna mani'naze. Kraisi mani viteno nemanino maka
zampina anazanke huno manivite'ne.

2 Hagi korapara ke ruhanentagita, kumitmifi fri'nazane. 2

Tamagranena maka mopafi vahe'mo'za nehzankna huta havi
kante nevzane, kumi'tmimo avite'negeta, Sata kerera amage
anteta, kankamumpi nemaniza hihamu'ane kva avamutamimofo
amage anteta, Sata eri'zana enerita Anumzamofonte zamagu'a
onte'za zamefi hunemi'za vahe'ene nemanizane. (aiōn g165)

3 Zamogra amu'nompina korapara tagranena anazanke huta
maka havi tavesi'zante amage ante'none, tagu'afine amega
tavufafine tave'manesiaza hutere nehuta, tagra ana kefozampi
fore huta amage' nentonkeno, Anumzamofona asi vazi'zamo
tagrite'ene maka vahete' enena e'ne. 4 Hu'neanagi Anumzamofo
asuragi'zamo vite'ne, na'ankure tusi'a avesi'zanu Agra agu'areti
tagrira avesi rante'ne. 5 Kasege'a ruha'nentagita fri vahe
kna huta mani'nonkeno, asunku'zanteti tahokeno, Kraisimpi
tagrira fri'zampitira tazeri otino, 6 magopi mona kuma'are
tantegeta, Agrane kini tra'are mani'none. 7 Anama hu'heana
henkama fore hania knarera, agatere'nea zana Agri'a marerisa
asunku'zanu tagrira Krais Jisasimpi taza huno agampu
hurantesigu anara hu'ne. (aiōn g165) 8 Na'ankure tamentinti
nehzagu asuntgiramanteno tamaza huno tamavre'ne. Tamagra'a
knare'za hu'naza zante anara osu'neanki Anumzamo museza
(gift) tami'ne. 9 Eri'za eri'hea mizana omnene, e'igu mago
vahe'mo'a, agra'a agi erisaga osugahie. 10 Na'ankure tagrira,
Agra'a tro hurante'ne, Krais Jisasimpi knare eri'za erisunku,
Anumzamo'a korapa ana kana retro hunte'neankita, knare eri'za
enerita ana kantera vugahune. 11 E'i zanku tamagra tamagesa

antahiho, korapara tamagra meg'i'a vahere huta mani'nazane
(Gentiles), tamajima ante'nazana, zamufa taga osu vahere
nehu'za, zamufama taga nehaza vahe'mo'za, (Jiu) e'i zamazanu
zamufa azeri'ne'za taga nehaze. **12** Tamagra tamagesa antahini
hiho, tamagra e'i ana knarerera Kraisina afe'are mani'nazane,
Israeli vahe krerafane omani'nazane, huvempa huno huhagerafi
zamante'nea agu'afina omani'nazane, so'e mani'zama eri
kankamutamia omanegeno, tamagri Anumzana mopafina
omani'neane. **13** Hu'neanagi menina Krais Jisasimpi afete'ma
koteta tamagra mani'nazafintira, Kraisi koramo tamavreno
tava'oma'are neramante. **14** Na'ankure Agra'a tarimpa fru huno
mani'zana (peace) neramino, Jiu vahe'ene meg'i'a vahe'mota ha'
orente arente nehunana tazeri magopi neranteno, amu'nontifima
atane'zama me'neana, eritreno tazeri mago hu'ne. **15** Agra'a
avufareti ha' orente arente nehu'nazana eri fanane nehuno,
Jiu vahe kasege ramine, osi kasege ramimo meg'i'a vahe
(Gentiles) tazeri fegi atre'nea kasege ramina eri netreno, Agra'a
Jiu vahe'ene meg'i'a vahemota tazerino magoke vahe tro
huneranteno, ke ha'ma nehuna zana tazeri fru huno mago
tarimpa hurante'ne. **16** Rugeka zafare Kraisi'a frino ha' frama
tamagra'r'magra hu'zana eritreno, tamazeri mago higetma,
Anumzamofona magoke avufagna hu'naze. **17** Agra eno rimpa
fru huno manizamofo nanekea afete'ma mani'naza vahera mono
kea huzmasmi'ne, hagi tava'onte mani'naza vahera rimpa fru
huzmante'ne. **18** Na'ankure Agripinti tarega vahe'mota, magoke
Avamu e'nerita, Nerfantera vugahune. **19** E'i zanku tamagra
menina meg'i'a vahe'mota, emanı vahe knara osu'naze. Hianagi
tamagra Anumzamofa naga'ene noma'afi nemanize. **20** Aposolo
naga'ene kasnampa naga'mo'za, tra' zafagna hu'naze. Krais

Jisasi'a Agra nomofo renagentete tra havegna hu'ne. 21 Agripi ana miko nomofonte, vazinte zafamo'za ome vazinte eme vazinte hiankna hu'za hagera ra hu'za, Ramofo otage mono noma'a efore nehaze. 22 Tamagra ana nonkna hutma mani'nazageno, Anumzamo'ene Avamu'amo'enena ana nompina mani'ne.

3 Hagi ama'na agafare nagra Poli'na Krais Jisasi eri'zampina kina tamagri'ma (Gentiles) tamazahu zanteru hu'noe. 2 Anumzamo'a asunku hurmanteno tamagritega naneke'ama huamahu eri'zama nami'neana tamagra ko antahinegahaze. 3 Anumzamo oku'a me'nea antahi'zama'a eriama huno naverige'na, nagra osi'a naneke kote'na avompina kre'noe. 4 Kegahazema hu'na kre'noa avoma hamprisuta antahi'zaniafi oku'a me'nea antahi'zama Kraisinku'ma hu'noa kea tamagra antahi ama hugahaze. 5 E'i ana antahi'zana korapa vahe'mo'za eriama hige'za ontahi'nazane. Hagi menina Agra'a aposolo vahete'ene kasnampa vahete Avamu'mo eriama nehie. 6 Ama'i oku'a antahintahigino, meg'i'a vahe'mo'za (Gentiles) Jiu vahe'ene mago'zanke hu'za marerisa knare'zana, Anumzamofo mofavreramine erigahaze. Ana tare kevumo'za knare muse nanekere zamentinti nehu'za, magoke avufa nemani'za, huhampri zamante'nea asomura Krais Jisasimpinti muse hu'za erigahaze. 7 Ama Knare Musenkemofo (Gutnius) eri'za vahe nagra mani'noe, Anumzamo asunku hunanteno muse'za hanavea nami'nea hanave'afi eri'zana e'nerue. 8 Nagra mago'a mono eri'za (saints) vahepina, osi'tfa hu'nogeno asunku hunanteno, urefa erefa'a omne naneke meg'i'a vahepi huama huo huno namige'na, Kraisimpi knare'za me'neaza eriama hu'na neramasgue. 9 Nagrira Anumzamo maka'zama tro'ma hu'nea Ne'mo, oku'a ama naneke korapa ante'nea nanekea huhampri nantege'na, ama nanekea hakare'a vahete

eriamana nehue. (aiōn g165) 10 E'ina hu'neankino Anumzamofona
ruzahu ruzahu knare antahi'zana mono vahe'mo'za eriamana
nehanage'za, mona kunkamumpi kegava nehaza vahe'ene,
manisga hu'naza kva vahe'mo'za kegahaze. 11 Ama'i korapa
monane, mopane tro osu'neno, tro huntegeno me'nea antahintahi
Krais Jisasi Rantimofompi eri ama hu'ne. (aiōn g165) 12 Na'ankure
Kraisinte tagra tamentinti nehunku, koro osuta Anumzamofo
tavaonte nevune. 13 E'ina hianagi nagri'ma tusi'a zampi nazeri
haviza nehaza zankura tamarimpa havizana osiho, e'ima
nazeri haviza nehaza zamo'a tamagri tamaza hanigeta knare
hutma manigahaze. 14 Ama ana agafare, Nerfante narena
re'na nunamuna nehue. 15 Hakare monafi naga'ene, mopafi
naga'mo'za Agripinti zamagia e'nerize. 16 Nagra nunamu
nehue, Agra'a marerisa knare'za huhampri tamanteno hanave'afi
tamazeri hampo'na hanigu, Agra'a Avamu'a vahe'mofo agu'afinka
ante'ne. 17 E'ina hanageno, tamentinti nehazagu Kraisi'a
tamagu'afi mani'nesigetma, tamagra mopafi zafamo rafu'na
reno oti hanave tiankna huta Anumzane, tamararuhe'i kizmia
tamagu'areti huta zamavesi zmantegahaze. 18 Ana nehutma
maka Anumzamofo naga'mo'za (saints) nentahizankna hutma
kagatahu'ane, zaza'ane, atrure'ane, zaza huno fenka urami'nea
avesi'zana kegahaze. 19 Ana nehutma Kraisi agu'areti avesima
rante'nea zamo'a antahi'zana agatere'neakitma ketma antahitama
nehutma, tusi'a zantfa me'neankitma ana mikora antahi amara
osugahaze. E'ina hanigetma tamagra knare mani'zane hanavene
Anumzamofontegati avi'mateno ne-eazana kegahaze. 20 Menina
Agri'ma antahima negona zampina agtereno mevite'neankino,
tagu tagesama nentahunazana agtereno amne anzana hugahie.
Agri hanavemo tagu'afi eri'za e'nerie, 21 Ana hanigeno maka

mono vahe'mo'za, Krais Jisasimpi, Anumzamofo agi'a erisga
huvava hugahaze. Tamage. (aiōn g165)

4 E'ina hu'negu nagra Ramofo kina vahe'mo'na, knare hutma mani'zantamifi kana nevutma, tamagima higetma eri'naza zanku hampo'nati'na tamavumro nentoe. **2** Tamavufga anteramitma, agazone hutma ru vahe'ene nemanitma, ke hakare osutma fru hutma, vahe'mofo antahizamitma zamesi zamanteho. **3** Hakare zupa hanavetitma Avamu'ene tragotetma nemanitma, hamprima tamanteno anaki'ma tamante'nea fruzana erigahaze. **4** Tagra mika'mota magoke tavufgafi magoke Avamu mani'neankino, anahukna huno e'ima tagi hu'neana magoke Anumzamofo naga fore hanunku tagi hu'ne. **5** Magoke Rantia manigeno, magoke tamentinti megeta, magoke mono ti nefrone. **6** Anumza Nerfa'a maka'mota magoke mani'neno kva huneranteno, maka'za kva nehuno maka'zampina mani'ne. **7** Hu'neanagi magoke magoke'mota asunku'zana ruzahu ruzahu muse'za Kraisi'a tami'ne. **8** E'ina hu'negu avontafepina anage hu'ne, Agrama anagamu marenerino'a, Agra vugota huno kina vahe zamareno vu'ne. Agra'a vahera muse'za zami'ne. (Sam-Zga 68:18) **9** Menina anage nehzankea me'ne, anagamu mareri'ne, ana kemofona nankna agu'agesa me'ne, Agra anazanke huno mopa agu'afi urami'neana? **10** Agra urami'nemo otino marerino maka mona agatereno afete mani'neankino, Agra hakare zampina mani avitesigu anara hu'ne. **11** Mago'a nagara Agra aposol eri'za nezmino, mago'a nagara kasnampa eri'za nezmino, mago'a nagara mono ke huamahu eri'za nezmino, mago'a nagara rempi huzmi eriza zami'ne. **12** Eri'za erisaza'zama, naga'amokizmi (Saints) zami'neana, non kiaza hu'za Kraisi avufa eri ra hugahaze,

13 ana nehuta Anumzamofo Mofavre'are tamentintifina eri mago huta keta antahita nehuta, hanave enerita Ramofonte nena vahetfa nemanita, Kraisi avu'avapina aviteta Agri kna huta manigahune. **14** Ana agafare tagra osi mofavregna huta omani'nunkeno, hagerimo erikranto kranto hiankna tamentintifina osnie. Na'ankure mago'amo'za ruzahu ke hunerasmi'za, anankea havige hu'za eri tamage kegna ke nerasmize. **15** Hianagi tamage ke nehuta, tagu'reti vahera zamesi nezmaneteta, hageta nena nehanunkeno maka'zamofona Kraisi aseni'a manigahie. **16** Agripi miko avufamo omoni, emeni huno azeri hanavetisigeno, magoke magoke avufamo'a ruzahu ruzahu eri'za e'nerino, miko avufamo'a ra huno knare avesi'zampi hagegahie. **17** Hagi Ramofo hanave'afi anage hu'na neramasamue, mono nontahiza vahé knara (Gentiles) osiho, zamagra hzanegre'za mago'zana zamagu'reti hugara osu'naze. **18** Antahi'za zamifina hani hige'za, Anumzamofo mani'zampintira atre'za meg'i'a nemanize, na'ankure zamagra antahi'za ke'za nosazageno, zamagu'amo'a hanaveti'ne. **19** Ana nehu'za zamagra havizane knare'zane kegava nosu'za, zamesi'zamofo kefo avu'ava zampi nevazageno, zamagri mani'zampina maka havizamofo avesi'zamo avite'ne. **20** Hu'neanagi tamagra, e'inahu zampintira Kraisina rempi huta ontahi'naze. **21** Tamagrama ko Agriku'ma nentahizageno Agripima rempi hurami'nea zana, Jisasimpi tamage nanekea me'ne. **22** Korapa ama mopafi kasri avu'avaza mani'zantamifi me'neane, maka havi tamagu tamagesa me'neane, havige na atreho. **23** Ana nehuta antahintahifine, avamupi kasefa huta manigahaze. **24** Kasefa vahé tro huta nemanita, Anumzankna huta fatgo avu'ava zampi ruotage huta tamage ke'afi manigahaze. **25** E'ina hu'negu magoke magoke'motma

havige osutma tamage hiho. Mago avufagna hutma mono kevu mani'nonanki, tva'ontamire ru vahe'ma mani'nesiana havigea huonteho. **26** Tamarimpa hegahianagi, ana zampina kumira osiho, tamarimpa hesuta zaza kna omanita ko eri so'e hutenko zage'a ufreto. **27** Hankromofona (Satana) mago kankmuna tamagra omiho. **28** Musufa ne'ma mani nesuno'a musufa oseno. Hianagi agra azampinti eri'za erino knare'zana erifore nehuno, zamagrazmi zamaza huga osu'nesaza nagara zamaza hugahie. **29** Hanki tamagipintira vahe'mokizmia havi nanekene urinke'nena ozmasmitma, zamaza nehutma, hanaveti'za manisaza nanekege nehnageno, antahisamokizmi'a zamaza hugahie. **30** Anumzamofo Avamura mani'zantmifina rimpagna eriomihio. Tmagesa antahiho, Avamu'mo agra azanko avoma'a kreno tamagra nagri nagare hu'neankino, esnia knarera tamaza huno tamavregahie. **31** Rimpa hevava hu'zane, maka rimpa haviza huno ha' hu'zane, rimpa he'zane, rankege hu'zane, vahe zamefi'a ke hu'zana netretma, maka vahe'ma knazama zami'zana atreho. **32** Agazone hutma vaheku tamasuntgi nezmanetma, Kraisimpi kumitia Anumzamo eri atre'rante'neakna hutma, kumi'zmia atre'zmanteho.

5 E'ina hu'negu Anumzamo nehia avu'avakna hutma tamavutmavara hiho, nankure tamagrira agu'areti avesi nermantea mofavre'a mani'naze, **2** tamagra vaheku tamavesi nezmaneta, Kraisimpi agu'areti avesiranteno agra'a avufga atreno tazama hu'neakna nehutma, Agra'a avufa tagriteku huno Anumzamofontega mananentake'za Kresramana vu'neakna hiho. **3** Hianagi monko'zano, kefo avu'avazano, agraguke avemasi'zana tamagripina omne tfaza hino, Anumzamofona otage nagapina (saints) e'inahu zana amu'no zamifina omnegahie. **4** Kefozamofo naneke osutma, vahe agze ami nanekene,

zokago vakago nanekea ana maka netretma Anumzamofo
muse hunteho. 5 Na'ankure tamagra antahi ankere'naze,
monko'za nehaza vahe'ene, kefo avu'ava nehaza vahe'ene,
vahe'zante kezmasane nehaza vahe'ene, havi anumzante
mono hunentaza vahe'mo'za, Kraisine, Anumzamofo kumara
e'origahaze. 6 Hagi atrenkeno mago nemo'a avufa'a omne
keretira reramatga osino, na'ankure e'i ana zamo Anumzamofo
rimpa he'zana erino kema nontahiza vahetera ne-e. 7 E'i
zanku ana vahe'enena tragotetma omaniho. 8 Na'ankure
korapara hanizampi mani'nazane, hianagi menina Ramofo masafi
mofavre'aza hutma, ana msafi vano hutma maniho. 9 Na'ankure
msazamofo raga'a, knare'zama hu'zane, fatgozama hu'zane,
tamage kema hu'za fore nehie. 10 Maraguzatitma Rantamimofo
avema nesiaza rempi hiho. 11 Raga'a reonteno hani avu'ava
zantera tragora otetma, ke huta eriama hiho. 12 Na'ankure
asane osuga'zanku vahe'mokizmi zamagesafina havizama oku'a
nehaza zankura tagaze hugahianki hutma antahitama osiho. 13
Hianagi masamo'ma remsa maka zantamina higeno'a, oku'a
me'nea kefo zantmimo'a amate efore nehie. 14 Na'ankure
hakarezama tavi'mo'ma eri ama nehigeno, e'i ana agafare
amanage hu'ne, Kavu'ma mase'namoka kavunaso, fri'pintira
otio, ana hanankeno Kraisi'a remsa hugantegahie. (Ais 26:19.)
15 E'i zanku kama vano hananana kva huo, antahi'za omne vahe
knara osunka, antahi'za me'nea vahe kna huo, 16 kazigazi hutma
maka knafina knare eri'za e'neritma maniho, na'ankure menina
kefozamo hakare hu'neanknafi nemanune. 17 E'i zanku tamagra
negi vahe knara osutma, Rantimofo avesi'zama hanaza zankuke
tamagesa antahihio. 18 Waini tina netma negia oneho, na'ankure
anazamo tamazeri haviza hugahie. Hianagi atrenkeno Avamu'mo

tamagu'afina avitena, **19** atruma nehanutma, Deviti zagame ene
(Sam zagamere), mono zagame'ene, avamu'mofo zagame'enena
nehutma, Rantmimofona tamagu'areti musena hunenteta, **20**
hakare zupa maka zampina Ranti Jisas Kraisi agifi, Anumza
Nafatimofona musena huntaho. **21** Hagi Kraisina antahi'nemitma
rumokizmia ovesinte avesinte hiho. **22** A'nemotma, Ramofo
agorga nemaniza kna huta tamavenanehe'i agorga maniho. **23**
Na'ankure vemo'a, a'mofona aseni'a mani'ne. Kraisi'a anahu kna
huno mono kevumofo aseni'a mani'ne. Agra ana mono kevu
mofo avufa'a mani'neno aza huno aware'ne. **24** Hianagi mono
kevumo'za Kraisi kvafi nemanizankna hu'za, a'nemo'za nezmave
kvafi maka'zana anazanke hu'za hugahaze. **25** Vene'nemotma,
a'ne tmia tamagu'areti zmavesi zamanteho, Kraisi'ma mono
kevu'agu agu'areti avesi zamanteno zamahoke heno ana a'ku
(sios) fri'nea kna hiho. **26** Ana nehuno Agra'a mono naga'mofona
zamazeri ruotge huzmanteno tinuti sese hiankna huno ke'anu
sese huzmante'ne. **27** Anama hu'neana zamavareno Agrarega
zamantesige'za, ana mono kevumo'za masazampima pehena
omneno, kasmu' oneno, avufa ohakne: otage hu'za fatgo zampi
hazenke omnenke'za manisnazegu ana hu'ne. **28** Hagi anazanke
hu'za vene'nemo'za a'ne zamia, zamagra zamufagu zamavema
nesia kna hu'za zmavesi zamanteho. Aza'o nenaronku avesima
nentemo'a, agra'agu avesinente. **29** Na'ankure maka vahe'mo'za
zamagra zamufagura zamagora note, hianagi zamagra zamufagu
avesinte'za ne'za nem'i'za, kegava hazankna huno Kraisi'a
mono' kevu'are kegava nehie. **30** Na'ankure tagra Agri mago
avufa mani'none. **31** E'i ana agafare Vemo'a nefane, nererane
znatreno, nenaro'ene eri hagerafige'ne, tarega'mokea magoke
znavufaza hugaha'e. (Anumzamofo avon tafepi amanage huno

krente'ne, Jen-Agf 2:24.) **32** Amama oku'a me'nea antahi'zamo'a, razantfa se'ne, hu'neanagi nagrama nehuana Kraisinku ene, mono kevu'agu nehue. **33** Anahuga hianagi, amu'nontamifina mago mago'mo'a nenaronkura avesi nenteno agra avufagu agesa nentahiankna nehnigeno, nenaro'a anazanke huno nevena antahi nemino ke'a erizafa hugahie.

6 Hagi mofavremotma, tamarera tamafa kea antahizmita amage anteho, tamagra Rantimofo suza mani'naze. E'inahu'ma hanageno'a knare hugahie. **2** Pusa kasegefina, huvempa ke'ne agu'afina me'negu, neramrerane neramafa ke antahita amage anteho. **3** E'inama hanutma knare hugahaze, ana nehutma za'za kna'a ama mopafina manigahaze. (Eks-Ati 20:12) **4** Zamafaheta mofavre nagatmia zamarimpa eri haviza osiho, hanki zamazeri fatgo nehutma zamavumro nezmanetma, Ramo'ma hu'neankante antetma huzmasmiho. **5** Hagi kazokzo eri'za vahe'motma, tamagra kva tamima mani'nesimofonku kore hunentetma tamahirahi neresigeta kezmia amage anteta, tamagu'areti kazingazi huta, Kraisi eri'za enerizankna huta eriho. **6** Mopafi kva vahe'tmimo'za neramagesageta eri'zana erisunke'za muse hanaze osiho. Hianagi Kraisi kazokzo eri'za vahe nesampreta, tamagu'areti Anumzamofo avemanesia zanke hugahaze. **7** Mopafi vahe'mokizmi eri'zana e'norizanki, so'e tamariimparesi Ramofo eri'zana eriho. **8** Antahi ankero, mago'mo'ma knare eri'zama enerisuno'a, e'i ana knare eri'zamofo nona'a Ramofonteti mizana erigahie. Kazokzo eri'za ne'mopi amne ne'mopi mago'zahu zanke huke mizana erigaha'e. **9** Hanki kva vahe'motama, eri'za vahetmia magozahu tamavutma hunezmanetma, zamazeri korera osiho, monafi nemania kva ne'mo tarega'motma kva mani'ne, hankino Agra mago'mofona

azeri knare nehuno, mago'mofona azeri havizana osugahie. 10
Hanki vagare nanekema tamasmisuana, Ramofonte hanavetitma
Agri hihamu'mofo hanavefi manigahaze. 11 Maka Anumzamofo
ha' kukena eri hankreho, ana nehutma Sata'ma reramatgama
hania zampina oti hanavetitma manigahaze. 12 Na'ankure
tagra mopafi vahe'enena hara nosune, hagi mopafi kva hu'naza
vahe'ene, hihamune havi avamutamine, mopafi hanizamofo
kva hu'naza ha' vahe'ene, mona kankamumpima kefozamofo
ha' avamu'ene hara nehune. (aiōn g165) 13 E'i zanku maka
Anumzamofo ha' kukena hiho, ana hu'netma havi knafine
ana maka'zama hanafina oti hanave tigahaze. 14 E'i zanku
oti hanavenetita, tamage kereti tamunofira nehutma, fatgo
avu'ava'zana tamahihi'zarera hanko antea kna hiho. 15 Knare
Musenkefinti e'nea rimpafru kea, tamagia ano anteakna
nehuta, hanavetita otigahaze. 16 Maka zampina, tamentintimo'a
hanko tamigna hu'nena, Sata'ma teve taginteno'ma tamagritega
ahetresigeno esnia kevea resu hugahie. 17 Anumzamo'ma
tamagu'vazino tamazahu'nea antahintahia, fetori kna hutma
tamasenirera antegahaze. Avamu'mofo kazinknona Anumzamofo
nanke eneritma, 18 maka zupa nunamu huvava nehutma,
avamupi nunamuna hutma antahigeho. Ana nehanutma tamagra
kva hu'netma kazingazi hutma maka Anumzamofo vahekura
(kristen) nunamu hutma Anumzamofona antahigeho. 19 Ana
nehutma nagriku nunamu hutma antahigenkeno, nagira erioza
hanige'na korera osu'na hanavetina oku'a me'nea nanke
huama hu'na Knare Musenkea zamasmi'neno. 20 Na'ankure
nagri'ma nazeri oti'nege'na, Agri agi eri'na seni nofite kina
hu'na mani'nena, ana nanekema hanufina nagra hanaveti'na
mani'nena huama ha'neno. 21 Hu'neanagi, nagrama mani'noa

zamofona, Tikikusima tavesinentona nerafu'ma, Rantimofo eri'za ne'mo maka nanekea tamasmisigeta tamagra antahigahaze.

22 Nagra anazanku hu'na huntogeno tamagritega neviankitma tagenke'a nentahisageno tamagu'a tamazeri hanavetigahie. **23** Hagi tafuhetane, tasareheta tamamentinti nehutma ovesinte avesintema nehaza naga'motma, Anumza Nerfanteti'ene, Ranti Jisas Kraisine rimpala fruzamo'a tamagrane mesie. **24** Asunku zamo'a Ranti Jisas Kraisinku avesinte vava nehaza vahepi me'enkeno, avesi'ma nentaza zamo'a vaga oregahie. Tamage.

Filipai

1 Hagi Poli'nane, Timoti'ene Krais Jisasi kazokzo eri'zampi
tragoteta kina hu'neta, Filipai kumate Anumzamofo naga
Krais Jisasinte tamentinti nehaza vahe'ene mono kva
nagamotane, eri'za tamaza hu'za eneriza naga'motma ama avona
kreneramu'e. **2** Anumza nafatimo'ene Ranti Jisas Kraisi'enena
asuragiramanteno, rimpia fruzana agampu hurmanteno tamisie.
3 Hagi hakare zupa tamagriku nagesa nentahi'na Anumzamofo
muse hunentena, **4** maka nunamunia'fina musezamo
avi'netege'na nunamu nehu'na maka'motma antahi neramue.
5 Ese'ma agafa hutma mono antahi'naza knareti tamagra
nagri'ene tragoteta Knare Musenke huama hume menina
neaze. **6** Na'ankure nagra antahi'noe, Anumzamo'a tamagripi
knare eri'zama erigafa hu'nea eri'zana erime nevanigeno,
Krais Jisasima esania knare eri vagaregahie. **7** Na'ankure
maka'motma nagu'areti antahi nerami'na, Anumzamofo Knare
Musenkea huama nehugu kina nompine, meg'i'ane ruga'a
vahepi, asunku'zana tagra e'nerune. **8** Na'ankure Krais Jisasi
asuragirmantea tamate'neankna hu'na nagra tamagrikura tusi'za
hu'na nagesa nentahuankino, Anumzamo nagrira huama
hugahie. **9** Nagra nunamuna huneramotoankino, vaheku'ma
avesizamante'zamo tamagripi me'neno ra nehanigetma, tamage
antahi'zampine, knare tamagu tamagesane hagesaze nehue. **10**
Ana nehutma maka'zana refko hutma negetma, so'e zantfama
hu'nesnia zanku nentahitma, avusese hutma fatgo zampi
mani'nesnageno Kraisi'a eteno egahie. **11** Fatgo avu'ava'zama
Jisas Kraisima eri fore'ma nehiazamo tagripi avinete'na,
vahe'mo'za nege'za Anumzamofona ra agi nemiza, agi'a erisaga
hugahaze. **12** Nafuhetane nasaraheta kama antahiho, kinafima

mani'noa zamo Knare Musenkea (gospel) eri ra higeno vuno
eno nehie. **13** E'ina hu'negu, Kraisi eri'zante kina hu'noa
agafare, maka kinimofo avufare kva nehaza vahe'mo'zane,
maka vahe'mo'za nentahize. **14** Kinama hu'noa agafare maka
nenfu'zane nasarhe'zane zamagu'areti Rantimofona antahi
nemi'za, korora osu'za hanaveti'za Anumzamofo nanekea
zamagiteti huama nehaze. **15** Antahi'none, mago'amo'za
hu'za tagra Kraisi naneke huama hugaragi nehu'za, ha'
renenantaze. Hianagi mago'amo'za fatgo kante nehaze. **16** Fatgo
avu'avapi e'neriza naga'mo'za, nagrira zamesi nenante'za Kraisi
naneke huama nehaze. Anumzamo'a nagrira navareno ege'na,
Knare Musenke'agura kehara neroge'za nentahiza, **17** ha'ma
renenantaza vahe'mo'za zamagra zamesi'zante Kraisi nanekea
huama nehaze. Tamage zamagu'areti nosaze, hagi kina nompima
nagri amuho namisagu ana nehaze. **18** Ana nehu'za amega
zamagitetiro zamaguaretiro Kraisinkura huama nehaze. E'inama
nehaza zankura nagra nagu'a muse nehue. Tamage, naguafina
nagra muse nehue. **19** Na'ankure nagra antahi'noe, kina
nompi mani'nogetma, nunamu nehaza zamo'ene, Jisas Kraisi
Avamu'mo naza huno nazeri atregahie. **20** Nagra mani'ne'na
antahuampi, namema erintena antahuana, mago'zama nagazema
erinami'zana osutfa hugahue. Hagi mika zupa nagra Kraisinte
hanaveti'na manigahue, korapa'ma mani'noaza hu'na manisnuo,
frisnua zamo'a, Kraisi ragi amigahie. **21** Na'ankure nagrama
kasefa'ma manisnuana Kraisinte manigahue. Hagi frisnua
knare'zantfa erigahue. **22** Hianagi nagrama mopa navufane
mani'ne'na, eri'zama erisua zamo raga rentegahie. Nagra ina
kamofo avaririgahufi ontahi'noe. **23** Hianagi tarega kazigati e'nea
zamo navazu huno rentrako hu'enante, na'ankure fri'nama

Kraisi'ene umani'snua zamo'a knare zantfa hugahie. **24** Hianagi mopa navufane mani'nua zamo'a mago'ene tamagri tamaza hugahie. **25** Nagra nagu'reti antahi'noe, tamagrane tragote'na miko eri'za e'nerisugen, eri'zamo ra hanigetma negetma, tamentintimofo muse'zama'a kegahaze. **26** Nagri'ma Krais Jisasi'ma hunante'nea zankura nagrama ete'na tamagrane umani'nenketa, musena hugahaze. **27** Kraisi Knare Musenke'amo hu'nesia kante anteta mani'nenke'na eme tamagegahuo, ontamagegahuo, magoke tamagu tamagesare ene antahintahi tmifina hanavetitma mani'netma, Knare Musenke'afi tamentintia nehinke'na tmantahi'neno. **28** Keha'ma renermantaza vahe'mo'za, zamagra'zmi hakare kampinti traka hugahaze. Hianagi tamagra tmazahu'za erigahaze. E'i ana avame zana Anumzamo tamigahie. **29** Na'ankure Kraisinte tamentinti nehaza zantekukera ontami'ne, hianagi Agri eri'zampi kna erisnazegu, tamaza hu'ne. **30** Kote'na knazama eri'hoana tamagra nage'naze, knafima nemanuana meninena nentahize, ama ana hara tamagrane tragoteta nehune.

2 Hagi e'ina higu tamarimpa tamazeri hanaveti kema Kraisinte me'nesiampi, asuragirmanteno avesi tmante'zampi, Avamupi atruma hu'zampi, avesima ante'zane, asunku'zane me'nesiana, **2** nagri muse zane, eri hagerafitma magoke antahintahire'ene, magoke avesizante'ene, magoke tmagu tamagesane, magoke avamupine, magoke antahintahire manigahaze. **3** Inankna zama hanaza zantera ra tamagesa ontahita, tamagrakukera ontahih. Hagi tamavufa anteramita, rumofona antahi nemita husga huzmanteho. **4** Tamagra zankera kegava osiho, hagi ru vahe zanena kegava hiho. **5** Tamagra magozahu tamavutma rumokizmia huzmanteho, Krais Jisasimpima me'nea avu'ava rumokizmia huzmanteho. **6** Ana hu'heanagi Anumzane mago

kna huno mani'nea ne'mo, Kraisi'a Anumzankna hu'na manisnue
huno agesa ontahi'ne. 7 Agra avufagura antahi amneza seno,
agi omne kazokzo eri'za vahe kna huno, mopafi vahe avu'avate
efore hu'ne. 8 Kraisi'a avufa antermino, ke erizafa huteno,
fri kante ruhiza huno, keka zafare fri'ne. 9 Na'ankure ana
agafare, Anumzamo azeri antesga nehuno, musezama (gift)
Agri'ma ami'neana, maka'zamofo agi'a agtere'nea agi ami'ne.
10 Ana hu'negu Jisasi agirera monafine, mopafine, mopa
agu'afine, maka'zamo agrite rena rentegahie. 11 Ana nehanigeno
maka vahe'mo'za Jisas Kraisi'a Rane hu'za zamagiteti huama
nehu'za, Anumza Nerfa'a hanave'afi mani'ne hugahaze.
12 E'izanku navesi neramantoa nafuhetma, tamagranema
mani'nogetma ke'ni'a erizafa nehzankna hutma, omanisua
knafina ke'ni'a amage anteho, tamagra tamazama hu'nea
zanku hutma tamano nevazino, tamahirahi nerena kazigazi
hutma amage anteho. 13 Na'ankure Anumzamo tamagripi
eri'za e'nerie, Agra tmagu'a tamazeri otigetma kezafa hutma
eri'zama'a e'neriza zane, Agri avesi avariri hanave'a tami'ne. 14
Maka'zama hanafina, havi tamarimpa osutma hafra nosutma
tamarimpa frune maninetma hugahaze. 15 Anama hanage'za,
vahe'mo'za neramagesagetma fatgo hutma, ketmia omnesigetma
nemanitma, Anumzamofo mofavre tro hutma nemanitma,
havige huormantesagetma, kazaki'zampi kazigazi nehnaza vahe
amu'no zamifina nemanitma, ofumo remsa hiaza hutma ama
mopafina remsa huzmantegahaze. 16 Kasefa hu'za mani'zamofo
nanke azeri hanavetho, ana nehnage'na Kraisi ete esia
knafi neramage'na hanave'afi muse nehu'na nagare'na nevu'na
eri'zama eri'noazamo'a amane zankna osu'ne hu'na hugahie.
17 Hianagi ana zanke hu'zama waini ofagna hu'zama korani'a

tagi netre'za, kresramana neviaza hanaza zamo'a tamentintia tamaza nehina, nagra nagu'areti musena neha'nena, tamagrane muse hugahaze. **18** Tamagriku'enena, nagra tutu huneramantoe, tamagra anazanke hutma musena nehutma, nagri'enena tragotetma musenkase hugahaze. **19** Hianagi nagra nagesama nentahuana, Timotina osi'a knafi Ranti Jisasi avesizama me'enkena huntanenkeno tamagrama mani'nazarega vugahie. Ana nehanigetma tamagra inankna hutma nemanizafi eme nasmisige'na antahi'na musena hugahue. **20** Na'ankure magora Timoti kna agu'ane vahera tamagri'ma tamema'nesia zama huga hu'nea nera omani'ne. **21** Na'ankure zamagra maka'mo'za zamagri'ma zamenesia zante kegava nehu'za, Krais Jisasi zana kegava nosaze. **22** Hianagi tamagra antahi'naze, Timotima tamage knare eri'za eri'neana, agra nagrane tragoteno Knare Musenke (gospol) hura nehuno, mofavremo nefafa aza nehiankna huno, eri'zana naza huno eri'ne. **23** E'izanku nagrama nagesama nentahuana, ame' hu'na huntesugeno tamagritega vugahie. Inankna zano nagrite'ma fore'ma hanigu kete'na huntesugeno vugahie. **24** Nagra, Ramofonte nagu'a nentoe (trast), osi'a knafi tamagrira eme tamagenaku nagra nagesa nentahue. **25** Hianagi nagrama antahuana tamagritega Epafroditusi'a vugahie. Nagri nenfu magoke eri'za enerita, tragoteta ha' nehu'a ne' (sondia), agra tamagri naneke erino eme nasmisnia ne'kino, upama nehuazana naza nehia nere. **26** Na'ankure agra maka'motma tamagezanku hugeno antahintahi'amo kna higeno avufa ata eri'ne. Na'ankure tamagra krima eri'nea kema antahi'nagu ana hu'ne. **27** Na'ankure tamage krima eri'neana frikante ruhiza huteno kanamare'ne. Hianagi Anumzamo asuntagi ante'ne, agri'keku anara osu'ne, nagriku'ene huno ana hu'ne, ana hina

nasuzamo agofetu agofetu hu'zanku, azeri oti'ne. 28 E'ina
hu'negu huntanena vanigetma negetma muse nehnagena,
nagra tamagrikura nagesa ontahina fru huna manigahue. 29
Uhanatisigetma Rantimofo agifi tmagu'a muse nehutma avreho,
e'inahu vahera antahi nezamita muse huta zamavareho. 30
Na'ankure maka'motma afete mani'netma naza osazageno
tamagri nona huno, Epafrditusi'a avufagura agesa ontahino
eme naza nehuno, Kraisi eri'zanku huno fri' kante ruhiza hu'ne.

3 Hagi nafuheta vagare naneke'ni'a nehuana, Ramofonku
musenkase huntaho. Ete'na tamagri'ma kegava kritmantesia
nanekema mago'ene avoma negroa zamo'a navesra nosie. 2
Kragna vahekura kva hiho, havi mono eri'za vahekura kva hiho,
havige hu'za zamufa taga nehaza vahe'kura kva hiho, 3 Tagra
tamage tavufa tgahu vahe mani'none. Na'ankure Anumzamofo
Avamupi husga huta Krais Jisasina mono hunenteta, vahe'mo'za
zamufama taga nehaza zampina antahi muhara nosune. 4
Nagranena zamufa tgahu zampina antahi muhara nehuani,
mago vahe'mo'ma antahintahi anteno antahi muha'ma zamufa
tgahu zampima haniana, nagra ana vahera zamagatere'na
onaga'a mani'noe. 5 Nagrira nenarera'a kasenantege'na 8'a
zagegna manuge'za, navufa taga hazage'na, Jiu kora mani'noe.
Hagi Benjameni nagapinti fore hu'na, nagra Jiu vahetfa tamage
mani'noe. Farisi vahe mani'nena Jiu vahe kasege amage
ante'noe. 6 Nagra navesite hanaveti'na mono vahera kna
nezamina, nagra Jiu vahe kasege amage ante'na magore
huna mago kasegea agateore'na, avariri fatgo huna hantaga
osu'noe. 7 Hu'neanagi inankna'zama hu'noazana netre'na,
anazana amnezane nehu'na, Kraisi amage'nentoe. 8 E'i ana
zantamimpina, nagra maka'za netre'na agtere'nea antahintahi'afi

Krais Jisasina Ranimofo antahinagena nehu'na, Agri amage anteku maka'zana amnezane hu'na netre'na, Krais amage' nentoe. 9 Agra'ene tragote'na mani'ne'na, nagra'ni'a kasege avarurua kanteti fatgoa osu'noe. Hianagi Kraisinte tamentinti nehunkeno, Anumzamo fatgo vahere hunerante. 10 Nagra ke'na antahi'na Jisasina nehu'na, fri'nefinti azeri oti'nea hanave'a nege'na, nagra Agrama fri'neaza hu'na nataza eri'na frinaku nehue. 11 E'na hu'na mani'ne'na, fri'nefinti oti'neankna hunaku naganena nentahue. 12 Hagi nagra hago anazana eri'noe hu'na nosue, ko fatgo hu'na mani'noe hu'na nosue. Hianagi nagra kazigazi hu'na nevu'na esnia knafima naza hu'zama erisugu nentahi'na, Krais Jisasi'ma namisnia zanku nentahue. 13 Mago tamentinti nehuna nafuhetane, nsareheta sago fatgo vahe nagra mani'ne'na hago anazana azeri'noe hu'na osugahue. Hianagi korapa'zana nage'nekni'na, henkama esiazamofo azerinaku kazigazi nehue. 14 Anumzamo'a Krais Jisasimpi nagi hu'nege'na anagamuti miza omerisugu kazigazi hu'na nagare'na nevue. 15 E'na hu'negu maka antahi'zampi ra hu'nomota, fatgo avu'ava nehuta, ruzahu antahintahi hanazana Anumzamo'a anazana eri tamaveri hugahie. 16 Hanki tamage kema, ko'ma antahi'nona kea azerikona hu'neta amage'antegahune. 17 Nafuheta nasareheta nagra nehua navunavakna nehutma, tagrama rempi huzaminona tavutavazama amagema nentaza vahera ke'so'e hiho. 18 Hakare'a zupa ko tamasm'i'noe, menine mago'ene anankege neramas mugeno navunura nehie. Na'ankure zamagri zamu'zmazamo'a tamage huno Kraisina rugeka zafa'a ha'arenente. 19 Zamagrama fri'snazana, kama vu'zazmimo'a havizantfa hugahie. Zamarimpamofo avesi'zamo oti oti huno anumza zamigna nehige'za, zamagaze osige'za, havi avu'ava

zanku muse nehu'za, mopafi zankuke zamagra nentahize.

20 Tagri kumara monare me'negeta, Tazahu ne'ma eramisigu negeta tagesa are'are nehuta, Ranti Jisas Krais'i'ma esigu avega ante'none. **21** Agra hanave omne fri tavufa eri rukrahe huranteno, hankave avufa kna huno eri tro huneranteno, ana hankave'anu hakare zana kegava hugahie.

4 Hagi nenfugata nensarogta, nagra navesi neramante'na tamage'naku nehumotma, tamagra nagri musezane, eri'zama eri'noazamofo nena'a mani'naze. E'ina hu'negu arone'nimota tamage hutma Ramofonte tamagra mani hanavetita maniho.

2 Nagra tanasmuanki, Yuodia'ene Sintikigata'a Ramofo suza mani'naku mago tanarimpa hutna mani'o. **3** Nagra kantahinegoe, magoka eri'za e'nerumoka, ama a'trena zanaza huo, zanagra hanavetine nagrane meg'i'a vahera Knare Musenkea zamasmi'none. Ana nehuke zanagra Klemen'i ene mago'a eri'za vahenena, zamagia asimu eri avontafepi krente'ne. **4** Hakare zupa Ramofonkura muse hiho, ete mago ene neramasmue, muse hiho! **5** Tamagra atrenke'za knare agazone tamavu'tmavara vahem'o'za keho, Ramo esia kna tva'o nehie. **6** Mago'a zankura tamagesa ontahitma, hakare zankura nunamu nehutma, upama hu'nesaza zanku Anumzamofo nesamitma, hakare zama huramante'nea zankura, Anumzamofona muse huntaho. **7** Anumzamofo rimpa frumo'a, agtere'hearkitma vahemota antahita keta osuga hu'nonankino, tamagu'ane, antahintahi tamia Krais Jisasi kva huramantegahie. **8** Hagi vagare nanekea nafuhetane nasarhetma maka knafina tamavutamavama hanazana, na'amo tamage zana me'ne, na'ante vahem'o'a antahi nemie, na'amo fatgoa hu'ne, na'amo avu sese hu'ne, na'amo vahemofona asane hugahie. Na'amo agi'a erisaga hugahie. So'e zantfama

me'neniane, husga hunte'zama me'nesiana, anazante antahintahi
ne hutma hampona hutma maniho. **9** Nagrama nehugetma rempi
ne hutma e'neritma, nentahitma ke'naza avu'avaza nehinkeno,
rimpa fru Anumzamo'a tamagrane manigahie. **10** Tamagrama
nagriku'ma maka zupa tamagesa mago'ene antahi nenamiza
zankura, nagra tusiza hu'na Ramofona muse hunentoe. Hianagi
atupa knafina tamagrama nazahu kankamuna omane'ne.
11 Mago'a zanku atupama nehu'na ama kea nosue, nagra
antahi'noe, mago'a zana rama'a antesuo, osi'a ante'nesuana,
musenke hugahue. **12** Nagra maka zanku atupa'ma huanknafine,
mika'zama meknafinena, nagra hakare oku'a me'nea kankmuna
rempi nehue. Namu hanio, nagatesio, rama'a antesuo ontesuana
akohena fru hu'na manigahue. **13** Krais'i'a hanavea nemamigena,
Agri hanavefi maka'zana amne hugahue. **14** Hu'neanagi nagri
knazampina tragotetma, knare hutma tamagra naza hu'naze.
15 Tamagra Filipai kumate vahe'motma antahi'naze, Knare
Musenkema pusante Masedonia atrete'na huama'ma hu'noana,
mago mono nomo'e huno nagranena eme tragoteno, zagonazana
eme onamizagena e'orinoe. Hagi tamagrake nami'naze. **16**
Tesalonaika mani'nogetma anahukna hutma mago'a zupa
muse'zana atupamahure nami'naze. **17** Ama kema nehuana
mago museza namihogu meme huna tamantahinogoe, hagi
veva'ma hu'nare, Anumzamoma henka mizama tamamisigu
nehue. **18** Na'ankure rama'aza nagrira namizageno avite'ne,
atupa'ma hu'noa zama'a mika eri'noe. Na'ankure Epafrötusi
musezama antageno erino e'nefina mananentake zama,
Kresramana vu ofagna nehigeno, Anumzamo'a muse huno
e'inahu musezana e'nerie. **19** Nagri Anumzamo, hakare atupa'ma
hanaza zana tamigahie. Agri'a hanave'amo avite'negeno Krais

Jisasimpi runtanino tamigahie. **20** Menina tagri Anumzana
tafati'mofo ra agia ami vava hanune. Tamage. (aiōn g165) **21** Hagi
Krais Jisasi naga'mota musenke huneramantoe. Nafuhe'zane,
nagrane magopi nemanizamo'za musenke hurmantaze. **22** Maka
Anumzamofo naga'mo'za musenke hurmantaze. Sisa nompi
nemanizamo'za musenke hurmantaze. **23** Ranti Jisas Kraisi
asunku'zamo magoke magokemotma tamagrane mesnie.

Kolosi

1 Hagi nagra Poli'na, Anumzamo Agra'a avesizante Jisas
Kraisi aposol manio hu'nemo'nane, Timoti nerifu'ene ama
avona kreneramu'e. **2** Kolosi kumate'ma Anumzamofo
nagama, ke amage'antetma fatgo hutma Kraisimpima nemaniza
tafuhe'motarega, Anumza Nafatimofontegati asunku'zane, rimpa
fruzamo'a tamagritega vie. **3** Hagi tagrama maka knama
tamagriku'ma nunamu hunermanteta, Rantimofo Jisas Kraisi Nef
Anumzamofona susu hunento'e. **4** Na'ankure tamagrama Jisas
Kraisinte'ma tamentintima nehutma, Anumzamofo nagaku'ma
tamavesi nezmantaza zamofo tamagenke nentahuna zanku
hu'none. **5** Tagrama tamage Knare Musenke nentahita,
fore'ma hanigeta kesune huta avegama ante'naza zamofompinti,
amentinti hu'zane, avesinte'zana monafi anteramanterego
me'ne. **6** Ana Knare Musenkemo'a tamagrite e'neankino,
miko kokankoka ama ana Knare Musenkemo'a hageno raga'a
renente. Tamagrama ese knazupa ana Knare Musenkema
nentahitma, Anumzamofo asunkuzana tamage hutma antahi
ama hu'naze. **7** Tamagra ko Epafras tagrane magoka kazokzo
eriza eneruna nerifu rempi huramimigeta antahi'naze. Tamagriku
huno tagrira tazahanigu Kraisi eriza enerino, **8** rumokizmigu
zmavesitezama Ruotage Avamumo'ma neramamia zanku agra
eme neramamia. **9** Hanki e'i'ana agafare, tagrama tamagenkema
antahuna knaretima e'neana, tagra tamagrira Anumzamo
Agra'a avesite avamupi knare antahi'zane, antahi ama hu'zana
antevitermantiesiegu nunamuna huvava huta antahi'negone. **10**
Ana nehutma tamagra hakare'zama hanaza zamo'a, Ramofo
avurera knare nehuno, Ramofona ragi amisageno, ana miko
knare erizantimo'a raga renentenkeno, Anumzamofo knare

antahizampi hageta marerigahaze. **11** Agri'a masanentake hankavereti tamazeri hankavetinketa kazikazi huta nevuta, akoheta agazone huta musezampi manigahaze. **12** Tamazeri knarema hanigetma Anumzamofo naga'mo'za erisintiharegahaze hu'nea masanentake kumakura, Nafatimofona miko zupa susu hunentone. **13** Na'ankure hanizamfo hanavefintira taza huno tavreno avesinentea Ne' Mofavre'amofo kumapi tante'ne. **14** Agrama kefozampinti mizaseranteno, kumitima apaserante ne'mofompi tante'ne. **15** Hagi Kraisi'a onkenona Anumzamofo amema'agino, ana miko'zama Anumzamo'ma tro hunte'nea zantamimofona Agra ese mofavre mani'ne. **16** Na'ankure Agrake'za anamiko zana tro huntene, monafima me'nea zantamima, mopafima me'nea zantamima, negona zantamima, nonkona zantamima, kini vahe traro, ruzahu ruzahu kumaro, kegavahu vahero ruzahu hankavea, Agrake tro hunte'neakino Agri zantami me'ne. **17** Agra ana miko'zamo'a fore osu'negeno mani'neankino, ana mikozana Agrake'za azeri manumanu hu'ne. **18** Kraisi'a mono kevu naga'mofo aseni'a mani'ne. Fri'naza vahepintira Agra esera fripintira oti'negu, ana miko zampina Agrake aseni'a mani'ne. **19** Na'ankure Nemofompima Anumzamo'a Agra'a manivitesigu musena nehie. **20** Keka zafare tagirami'nea koranteti, monafine mopafina rimpa fruzana avrenteno, Kraisimpi ana mikozana Anumzamo'a emeri hagerafino, erimago huno Agrarega avrentene. **21** Hagi korapara tamagrama kefo tamavutmavama nehuta, antahintahi tamifina Anumzamofo ha' vahe'ma manineta afete mani'nazane. **22** Hianagi menina Kraisi'a ama avufgare eme frino, tamazeri mago huno Anumzamofo avurera tamazeri ruotge hu'neankino, magomo'a kea huoramantege, hazenke vahere

huoramantesigetma, havigema huramante zampintira fru hutma manigahaze. **23** Hianagi tamage kegura tamamentinti huvava nehutma, anankere oti hanavetiho. Fore hanigeta kesnaza zanku'ma Knare Musenkefinti'ma antahi'naza zana otreho. Ana Knare Musenkea miko ama mopafi zantaminte huama hu'nazankita ko antahinaze. Nagra Polina e'i anankemofo eri'za vahemani'noe. **24** Tamagriku'ma hu'na natama e'neruazankura nagra muse nehue. Na'ankure Kraisi'ma atama erimete'nea zamo'a ama navufarera natazana erivinetoankita, mono kevumotma, Kraisi avufga mani'naze. **25** Nagrama vahetema kegavahu eri'za vahemani'noe, ana miko Anumzamofo nanekea huama nehue. **26** Ama ana nanekea oku'a ante frakino koma maniza e'naza vahepine, ana knafine anteneane. Hianagi menina Anumzamofo nagatera eri ante'ama nehie. (aiōn g165)

27 Anumzamo'a Agra'a avesite oku'a me'nea kea taveri hu'ne. Ama ana kea knare hu'neankino, maka vahemokizmi zamaza hugahie. Ama ana kea Kraisi'a agra tamagrane mani'neankino tamavreno vanigetma so'ezana kuma'afinti ome erigahaze. **28** Hu'negu miko kazigama vunana Kraisinkura, Anumzamo'ma tami'nea knare antahintahireti kegava hiho nanekea nezmasamita rempia hunezamune. Na'ankure Anumzamofontera fatgo hu'za Kraisi'ene tragote'za manisazegu anara nehu'ne. **29** E'ina hu'negu Kraisima maka hankavema naminereti tusi hankavetina eri'zana e'nerue.

2 Hagi tamagri'ene mago'a Leodisiama nemaniza mono naga'mo'zane, mago'amozanema nagri'ma nage'za antahi'zama osu'namokizmima zamaza hu'naku maragu'zama netuazana antahi amanazegu nehue. **2** Nagrama eri'zama e'heruazamofo

agafa, zamagu'a zamazeri hankavenetisuge'za zmavesizampina erimago nehu'za, knare antahizampina avinetezma, Anumzamofo oku fraki'nea zama'a antahi ama hanazana, e'i Kraisi'e. 3 E'i Agripi miko knare antahintahizamo'ene, miko antahi'zana frakino, zago nompi me'neankna huno me'ne. 4 Ama kema neramasamuana mago'mo atrenkeno knare masevenke'afinti reramatga osino.

5 Na'ankure ama navufgarera tamagri'enena omani'noanagi, avamupina tamagrane mani'noankina tamagrama mani fatgo nehutma Kraisinte'ma hankave tamentinti nehazazama kenugura muse nehue. 6 Hanki e'ina hu'negu Krais Jisasina, Rane huta ko avrenazankita Agra'ene magoka vano hiho. 7 Tamagra Agrite zafamo arafu'narenlo oti hanavetiankna nehutma, nomo hanave zafare oti hanavetiaza hutma onetitma, Knare Musenkera oti hanave netitma, maka knafina Anumzamofona susu huntaho.

8 Kva hunetma zamatreke'za agafa'a omane antahintahi zantetira zamazeri neginagi osiho. Keaga zamimo'a knare'za hugahianagi, zamagra ama mopafi vahemofo antahiza rempi huneramizanki, Kraisintegati enea'zana rempi hunoramize. 9 Na'ankure Kraisi'a tagrikna huno ama avufgare mani'negen, Anumzamofo avu'avamo'a mika Agripi avite'ne. 10 Hagi Kraisi'a ana miko hankavene, ana miko zamofo asenia mani'nemofo avu'avara tamagripi anamiko fore hanie huno tamami'ne. 11 Tamagra kumi tamavutamaza atrazazamo Kraisimpina oku tamavufga taga hu'naze. E'i vahe'mo azantetira ana tamavufga taga osu'neanki, Kraisima eri'nea eri'zamo anara huramante'ne.

12 Mono tima frazana Agri'ene frizageno aseramantegeta tamentintima hazageno'a, Anumzamoma Kraisima fripinti azeri otinemofo hankavemo, magoka Kraisi'ene zamazeri otine. 13 Tamagrama kumipi frinetma, kumira otrenageno, Anumzamo'a

Kraisi'ene magoka tamagira tamazeri kasefa nehuno, mika kefozantamia eri atreramante'ne. **14** Mosese kasegemoma keagama huneranteazana Anumzamo'a tagritetira eritreno Kraisi keka zafare hanti'ne. **15** Hankave avamutamimofo hankavene hankave zantamimofo hankavea keka zafare erinetreno, Anumzamo'a miko vahe zamaveri amate huno, ana mikozamofo hankavea Kraisi'a keka zafare eri netreno zamazeri haviza huno zamazeri amnezankna hutre'ne. **16** Hanki atrenkeno vahe'mo'za ne'za nezantero, ti nezantero, kasefa ikante ne'za retro huno nezantero, mono atru huknarero, manifruhu knagura refako huormanteho. **17** Ama anazantamina henkama esia zantamimofo amema'e. Hu'neanagi Kraisi'a tamageza mani'ne. **18** Mago'mo'ma avanama kenesia zankuma huno, tamagra anteramita ankeromofo mono huntaho hanigetma, tamagra atrenenkeno tamagrira tamazeri fenka otreno. E'inahu vahe'mo'za korapa zamarimpamofo avu'ava nevaririza, zamagrama antahi'zana zamagra'ake knare antahi'zana eri'none hu'za z mavufga ra nehaze. **19** Hianagi Kraisi'ma asenima mani'nea avufgamofonte zamagra rekanuhe'za omani'naze. Na'ankure Kraisi'ma asenima mani'nea avufgamofona hanavea nemino, agruna nofi'mo zaferinafi hagenerafigeno kora nofi'mo vuno eno higeno, Anumzamofo hanavere nehage. **20** Hagi tamagra Kraisi'ene frizageno, Agra ama mopafi havi Avamumofo hankavefintira kazufe tamantegetma fru hutma mani'nazagu, nahigetma ama mopafi tra keramintera amagera antevava nehaze. **21** Ana tra kemo'a huno azeri avako osutma, neta onketma, avakora osiho hu'ne! **22** E'inahu tra kea mopafi vahe'mo rempi huneramiankino, ana tra kema amagema nentaza zamo'a amnezankna hugahie. **23** Ana tra kema avaririsamo'za

knare'za nehune hu'za hugahaze. Zamagra tamagritema eama hanazana, Anumzamofoma mago'ane avesintezama, anteramino manizama, avufgamofo avesizama kegava hazankna hugahaze. Hianagi zamagra taza huza korapa tamavesizana eri atregara osugahaze.

3 Hagi tamagrira Kraisi'ene fripinti Anumzamo'a tamazeri oti'negu, tamagu'a monafinka me'nea zantaminte anteho, Kraisi'ma Anumzamofoma azantamaga kazigama mani'nere. **2** Monare zanku tamagesa areare nehuta, mopafi zankura tamagesa arerera osiho. **3** Tamagra frizageno, tamasimumo'a Kraisi'ene frakino Anumzamofompi me'ne. **4** Hagi Kraisi'a tagri tasimu mani'nemo eama hania zupa, tagranena Kraisi'ene hanavenentake masazama'afi eama hugahune. **5** E'ina hu'negu tamagripima ama mopafi kefo tamavutamava zama me'nesiana ahefriho. Ana avu'avara monko avu'avazama, agru osu avu'avazama, rumofo zantema kenunu hu'zama, havi agu'agesa antahizama, agraguuke antahi avu'avazane, e'inahu avu'avazamo'a havi anumzante mono hunteankna hu'neanki atreho. **6** Na'ankure e'inahu avu'ava'ma nehaza vahete Anumzamofoma rimpahenzamo'a egahie. **7** Tamagra korapara anahukna kante vono nehutma, ana avu'avazampi mani'nazane. **8** Hianagi menina mika havi avu'ava zana eritreho, havi asivazi'zama rimpahenzamo'a, havizama rumokizmi huzmante'zama, urinkema vahe'ma huzmante'zana atreho. **9** Korapa tamavufgamofo havi avu'ava zana ko atrenazanki, orevatga arevatga osiho. **10** Hagi menina magoke magoke'motma kasefa vahe nemanitma, troma huramante'nea nekna maka kna nehutma, mago'ene agrira antahi ama hugahaze. **11** Amafina Griki vahera omanigeno Jiu vahera omanigeno,

avufga taga hu'nea vahero, avufga taga osu vahero, Sinti vahero, Barberia vahero, kazokzo eri'za vahero, kina osu vahero, Kraisi'a ana miko'za mani'neankino, Kraisi mikamotafina mani'ne. **12** E'ina hu'negu Anumzamo'ma huhampri ramantegeta ruotge hazageno'a, Agra tusiza huno avesiramantenegu, tamagra rumokizmia tamasunku huzmanteta zamazeri so'e nehutma, vahemofe knare tamavu'tamava hunezmaneteta, anteramita nemanita, agazone tamavutamava nehuta, akoheno avega anteno mani tamavutmavara kukena hiaza hoho. **13** Mago'moma havizama hugantenesigenka ana knazana e'nerinka, Ramo'ma kumika'a atreganteneaza hunka ana havizama hugantenesimofona, havizama'a atrento. **14** Avesimantezamo ana miko avu'avara agaterenegu, rumokizmi zamavesizamanteho. Avesi'ante avu'vazamo ana miko knare avu'ava zana azeri manumanu hu'ne. **15** Kraisi rimpfa fruzana atrenkeno tamagu'afina kegava hurmanteno, na'ankure tamarimpa fru huta manisazegu kehitgetma mago avufga mani'nazanki, miko zupa Anumzamofona susu huntaho. **16** Hagi atrenkeno Kraisi nanekemo'a tamagu'afina meviteneda, miko knare antahintahireti rempi hunezamita zamazeri fatgo nehutma, Anumzamofo avontafepi zagamera nehutma, krente zagamera nehutma, mono zagamera hutma Anumzamofona tamagu'areti susu huntegahaze. **17** Kegagama hanafino, eri'zama erisafinena, Rantimofo Jisasi agifi maka'zana hoho. Jisasimpi Anumza Nafatimofona susu huntegahune. **18** Hagi a'nemotma neramave agorga'a anteramitma maniho, e'inama hanazana Ramofo avurera knare hu'ne. **19** Venenemota a'netamimofona zamavesinezamanteta, tamarimpa haviza huozmanteho. **20** Mofavre'mota mika zupa neramarera tamafa ke amage anteho, na'ankure Ramo'a muse hugahie. **21** Zamafaheta

mofavre nagamokizmia zamarimpa knama erizamizana osiho, ru zamagra knarerera osu'none hu'za antahigahaze. **22** Hagi kazokzo eri'za vahe'motma maka'zama hanafina ama mopare kva vahe'mofo agorga'a mani'netma hakare'a zama hanafina kva vahe tamimo'ma tamavesi tamantesia kazigati, zamavureke eri'zana e'oriho. Hianagi Rantamimofo ra agi nemitma, tamagu'areti hutma kvatamimofo eri'zana eriho. **23** Ana miko eri'zama erisazana, tamagu'areti huta Ramofo eri'zanki erinteho. Ama mopafi kva vahetamimofo eri'zana e'norize. **24** Tamagra Ramofontegatima musezama erisintiharegahaze hu'nea zama erisanaza zana ko antahi'naze. E'i Ramofo Kraisi eri'za e'nerize. **25** Hianagi iza'o hazenkema hanimofona, Anumzamo'a hazenkema hanirera nona'a huntegahie, hagi magomofonkuke hu Anumzana omani'ne.

4 Hagi kva vahe'mota, kazokzo eri'za vahetamia fatgo huno knarema hu'nesia tamavutamava hunezmaneta magomofonkukera osiho. Na'ankure tamagra antahi'naze, tamagri'enena mago Kva vahetamia monafinka mani'ne. **2** Nunamuma hu'zana azeri hankavetineta, kava huta mani'neta Anumzamofoma susu hunte avu'ava zana otreho. **3** Hagi tagri'enena nunamu hunerantenkeno, Anumzamo'a kana erifore hina nanekema hanunazamo'a, vuno eno hanigeta, Kraisi naneke'ama oku me'nea kea erintearma hamneno. Na'ankure nagrira ana nanekema huama huazanteku kina hunante'naze. **4** Nunamu nehinkeno nanekema huama hanua nanekemo'a, ama hino. **5** Zamentinti osu vahe'ma maninesafina, kakamuma fore hanigetma hakarezama hanazana kva hunetma, ama antahintahi zanteti knare tamavutmava huzamaveri hiho. **6** Maka zupa vahe'mofoma zamazeri so'ehu nanekege nehinke'za,

zamagrama antahisazana, ketamimo'a knare huno haga hino. Tamantahige nanekema hanazana, trohuneta knare hutma kenona huzamanteho. 7 Hagi Tikikusina, tusi'za hu'na navesinentoa nenafukino, vahe kegavahu eri'zana agu'areti tamage huno e'nerino, nagrane magoka Ramofonte kazokzo eri'za eneru'a nekino, ana miko nagri nagenkea eme tamasamigahie. 8 Nagra ama agafare huntogeno tamagritega e'ne. Nankna huta tagra amafina eri'zana e'nerune, anazamofo naneke eme neramasamino tamagu'a tamazeri hankavetigahie. 9 Nagra huntogeno Onesimus'i'a Tikikusi'ene ne-e. Agra tamagripinti magotamimokino, tamage huno agu'areti eri'zana energeta tavesinentona nerufukino, agra Tikikusi'ene esu'ne ana miko'zama tagrite'ma fore'ma nehiazamofo agenkea eme tamasamigaha'e. 10 Hagi Aristakusi'a nagrane kina huta kina nompi manino'a ne'mo musenke atreraramantegeno, anazanke huno Banabasina nefu, Maki'a musenke huramante. Ko'ma agri agenkea tamašmi'noa nekino, tamagritega esigetma muse hutma avreho. 11 Hagi Jisasi'e hu'za nehaza ne'mofo mago agi'a Jastusikino, agranena musenke atreramante. Zamuvufga tgahu Jiu vahepinti e'inama'amo'za nagranena magoka Anumzamofo kumakura eri'zana ereni'za knare hu'za nazeri hanaveneti'za nagare. 12 Epafrasi'a Krais Jisasi kazokzo eri'za ne' tamagri kumateti nekino, musenke atreramante. Agra tamagrikura tusi'za huno, Anumzamo'ma avesinea kante tamaza hanigeta oti hanavenetita, nena vahekna nehutma ana mikomotma hakare zampina ama hanazegu nunamuna maka zupa huneramantea nere. 13 Nagra agrikura huama hu'na tamasamiza hue, agra tusiza huno tamagrik'u'ene Laodisia kumatea mono nagamotane, Hierapolisi mono nagamotagura tusi'za huno agesa

antahineramia nere. **14** Nerafu tusa ne' Luku'ene Demasikea musenke atreramanta'e. **15** Nagri musenkea Laodisia kumate mani'naza mono naga'ene Nimfa'ema nehaza a'ene noma'afima atruma hu'za mono'ma nehaza nagara ome zmasamiho. **16** Tamagrama ama ana avoma hampri vagamaretesuta, Laodisia mono nagara zaminke'za zamagranena hamprisageta, tamagranena zamagri avona hampriho. **17** Hagi Arkipasina asamiho, Anumzamo'ma kami'nea eri'zana kva hu'enka erivagaro huta asamiho. **18** Poli'na nagrani'a nazampinti ama musenkea kreramue. Kinafima mani'noa zankura tamagera kanionanteho. Anumzamofo Asunkuzamo'a tamagrane mesie.

1 Tesaronaika

1 Hagi nagra Polinagi, Sailasi'ene Timotigata ama avona
Tesaronaika kumate Anumza Nafatimofompima mani'naza
naga'motarega kreneramune. Anumza Nafatine, Ranti Jisas
Kraisi asunku'zamo'ene, rimpia fruzamo'a tamagrane mesie.

2 Hagi maka kna tagra, tamagrikura Anumzamofona susu
hunenteta, nunamuna huneramantone. 3 Na'ankure tamagrama
Anumza Nafatimofonte tamentinti nehuta, eri'zama enerita,
vahe avesintezamofo eriza enerita, Rantimo Jisas Kraisi'ma
eforema hanigu, kazigazi hutma Anumza Nafatimofo avure
e'nerizazankura antahirami vava nehune. 4 Nafuhete, tagra
antahi'none, Anumzamo'a avesineramanteno, Agri'a vahe
manisazegu huhampritamante'ne. 5 Na'ankure tagrama Knare
Musenkema nehunana, ke'age nosune. Hianagi Ruotge
Avamumofo hanavere tagu'areti huta huama nehunanki,
tagra inankna vahe'mota tamagrira tamaza hunakura nehune,
tamagra tageta antahita hu'naze. 6 Tamagranena, tagrama
nehunaza tavaririta nehuta, Ramo'ma nehiankna nehutma,
tamagra Anumzamofono naneke e'nerizageno, rama'a knazana
neramizanagi, Ruotge Avamumo tamazeri otigetma muse nehaze.

7 Ana hu'negu tamagra maka Masedoniane Akaia kumate
mani'naza mono vahetera, mago knare avamezankna hutma
mani'naze. 8 Na'ankure Ramofo kemo'a tamagripinti agerura
runo e'neana, Masedoniane Akaia kumateke agerura orune.
Hianagi tamagrama Anumzamofontema tamamentintima hu'naza
zamo'a maka kumatega vuno eno hige'za antahi'nazankita,
tagra mago kea osugahune. 9 Na'ankure rama'a vahe'mo'za
tamagrama neravreta, havi anumzama tamefi hunemitma, kasefa
huno mani'hea tamage Anumzamofontema tamamentinti hu'naza

zana tasami'naze. **10** Hagi monafinti Anumzamofo mofavremo esigu avega anteta mani'nomofa, frinefinti azeri oti'nea Ne' Jisasi'a, Anumzamofo rimpia hezampinti tahokeno taguvazi'ne.

2 Hagi nena fugata tamagra antahi'naze, tamagritegama e'nona zamo'a amnezanknara osugahie. **2** Tagri'ma Filipai kumate'ma tazeri haviza nehu'za, nerahe'za hu'nazazana, tamagra antahi'naze. Hianagi Anumzamo'ma tazeri hanavetigeta, Agri Knare Musenkea huama huta tamagr'i'enena neramasamunkeno, maka vahe'mo'za ha'rerante'naze. (Apo 16:19-24, 17:1-9) **3** Tagrira oku'a antahintahitia omnene, tamagrira tagrarega tamavrententeta, havige huta reramatga nosune. **4** Hianagi anahukna huno Anumzamo'a tagrira tageno antahino huteno, Knare Musenkema huama hu erizana, tamegeta e'nerunanki, vahe'mo'za muse hurantesazegura nosunankino, Anumzamo Agra'a tagu'afina refko huno nerage. **5** Na'ankure tamagra ko antahi'nazageno Anumzamo'enena huama hugahie. Tamagrira masavena noramita, mago zantamigura ke tanunu nehuta ama kea nosune. **6** Tagrama ne hunana, tamagro, mago'a vahe'mo'za tagi erisga hurantesazegu nosune. **7** Tamage, Kraisi aposol vahe'ma mani'nonazamo knazana tamigahianagi, tagra akoheta mani fru nehuta, mofavrema nererama amima nemino kegavama hunteankna nehune. **8** Tagra razampi tamagrira tamavesi neramanteta, Anumzamofo Knare Musenkegera noramasamunanki, tagrati tavufganena neramamune. Na'ankure tamagra raza tagri tavurera mani'haze. **9** Hagi nena fugata tamagra antahi'naze, kenage'ene feru'enema tamuna ne hagegeta maraguzatita tagrima taza haniazanku erizana e'nerita, Anumzamofo Knare Musenkea huama ne hunana, magomofo knaza eri amisunegu anara nosune. **10**

Tamagra antahinazageno, Anumzamo'enena tamamentintima
Kraisintema nehaza nagamotare'ma hunona ruotage tavutavara,
tageno antahino hu'ne. Tagra fatgo tavutavara Anumzamofo
avufi nehuta, havi tavutavazana osu'none. **11** Tamagra
antahinaze, ne'fama mofavre'amofo tutu hunteno azeri hanaveti
ke asamiankna tavutavama huramantenona zana tageta antahita
hu'naze. **12** Tagra ana nehanunketma tamagrama kama
vnazana, Anumzamo'ma tamagi nehuno, Agri'a masanentake
kuma erigahaze hu'nea Ne'mofo so'e kumapi vugahaze.
13 Hagi maka kna tagra Anumzamofona susu hunentone,
tamagrama tamamentintima hu'naza zankura, ana kema
huama hunketma tamagrama eri'nazana, vahe'mofo kema
eriaza hutma e'ori'naze. Hianagi tamagra Anumzamofo
tamage ke tamentintima nehaza nagapi eri'zana enerie. **14**
Na'ankure nerafugta, Anumzamofo nagama Krais Jisasimpi
Judiama mani'naza naga'mokizmi zamavuzmava zamavaririta
tamagra hiho. Na'ankure zamagranena anahukna hu'za tamagri
vahe'mo'za knazama tamami'neaza huza, zamagri'enena Jiu
vahete'ma hu'nazaza hu'naze. **15** Jiu vahe'mo'za Ramofona
nehe'za, kasnampa vahe'mokizmia nezmahe'za, tagrira tahe'za
tretufe netre'za, zamagra Anumzamo'a muse osiaza nehu'za,
maka vahera ha'rezmanterenaze. **16** Megi'a vahe'mofonte'ma
zamahokeheno zamaguvasisia kema huama nehunkeno, rehi'za
hunerantazageno, anama hazazamo'a kumi'ma hu'zana rama'a
hazageno agatereno avite'ne. Hianagi e'inahukna vahetera,
henka Anumzamofo rimpahenzamo zamagridera megahie. **17**
Hianagi nena fugata tagra osia knafi tamagri'enena omanunanagi,
tagra tamagrikura tagera okanitfa hu'none. Tamagrira eme
tamagezankura tusiza nehuta, eme tamagenaku nehune. **18**

Na'ankure tagra tamagritega enaku nehune. Hianagi nagra
Poli'na enaku nehuana, Sata'a kana rehiza hunerante. **19**
Ranti Jisas Kraisi'ma esia knazupa, na'amo tazeri amuhama
humisunazantia mesigeno, nazamo musema hanunazana
mesigeno, tazeri antesgahu kini fetoritia Rantimofo avurera
megahie? Tamagra ana musezantia mani'naze. **20** Tamagriteti,
tagra ra tagi enerita musena hugahune.

3 Hanki tamagri'ma eme tamegesuna tavesizamo'a, marerigeta
manigama nosuta, knarema haniana, Atens kumate manigahune
hu'none. **2** Ana nehuta nerifu Timoti'a, Anumzamofo eriza ne'mo
Kraisi Knare Musenkemofo eriza e'neria ne'mo, eme tamamentinti
tamazeri hanavenetino, tamazeri hanaveti kea tamasaminogu
hunte'none. **3** Tagri'ma tavesiana, mago'amotma amama tagrama
e'neruna knazankura antahigna osiho. Tamagra antahinaze,
tagrikura knazana erigahaze hu'naza vahe mani'none. **4**
Na'ankure tamage huta tamagra nema ko'ma mani'neta
tamasami vava huta, knazampina ufregahune huta hunonankino,
ana knazamo'a, antahinaza kante fore huno evu'ne. **5**
E'ina agafare nagrama avega antena manigama nosuna,
reramatagamahu ne'moma reramatga huzanku koro nehu'na,
tagrama eri'zama tamagripima eri'nona erizamo amnezankna
huzanku, tamamentinti eme kenogu nagra Timoti hunte'noe. **6**
Hianagi menina Timoti'a tagrite eno, tamagrama tamamentinti
nehutma ovesinte avesintema nehaza zankura, musenke
eme neramino, antahi so'ema humanerantaza zanku'ene,
tamagrime tamagenaku nehunankna hutma, tagrima tagenakuma
nehaza zankura eme tasamine. **7** Ama'na agafare, nenfugta
vahe'mo'zama knazama tamiza tatazampima unefronkeno'a,
tamagrama tamentintima hu'naza zamo maka knazantifina

tazeri hanavenetie. **8** Na'ankure tagrama menima tasimu erita mani'nonana, tamagrama Ramofompi hanavetitama mani'naza zamo higeta tasimura erita mani'none. **9** Tagra Anumzamofo susu hunentone. Tamagrama hazazamo higeta, Anumzamofo avurera tagra musena nehune. **10** Hanine zagenena tamavufima tamagezankura nunamuna hanavetita huvava nehuta, tamamentintifima atupama hu'nesazana, tagra tamazeri hanavetigahune. **11** Menina tagri Nerafa Anumzamo'ene, Jisasi Rantimokea vanuna kana taveri hanaketa tamagritega vugahune.

12 Tagri'ma tavesiana, Ramo'a vahe'ma avesinte avu'ava zana eri aviteramantesigetma aviteta maninetma, magoke magokemotma ovesinte avesinte nehutma, tamagri'ma tamavesi neramantonaza hutma, ana miko vahera tamavesizmanteho.

13 E'ina hu'neankino, Jisasi'a maka Naga'anema esia knarera tamazeri hanavetina, maka hazenketamia omnena, ruotge huta nemanita, manifatgo nehuta, Anumza Nafatimofo avurera hazenketamia omanegahie. Tamage.

4 Hagi nafu naganaheta Ramofo Jisasi'imi mani'naza nagamota, rempima huraminona kante antetma manihogu tagra tutu huneramanteta, tamazeri hanavenetunanki, tamagrama nehzaza hutma, mago'ane hanavetita ana avu'avara hiho.

2 Na'ankure kasegema Ramofo Jisasi hanavefima tagrama tamasamunketma ketma antahita hu'naze. **3** Na'ankure ama'i Anumzamofo avesizane, mani agru hutma maka monko avu'ava'zampi maniho. **4** Tamagra mago magomotma tamavufga kegava nehutma, tamazeri agru nehutma, ruotge hutma maniho. **5** Tamagra havi monko tamagu tamagesamofona kazokzo vahe'agnara nosutma, Anumzamofo keno antahino osu vahe'mo'za nehaza zana osiho. **6** Tamagra Ramofo amage'ma

nentesamokizmia, rezmatga hutma mono Neramafu a'nea zamazeri savri osiho. Antahiho, ko tamavumro tamantenone. Iza'o e'inahu avu'avazama hanimofona, ana hazenke'arera, Ramo'a azeri haviza hugahie hu'none. 7 Na'ankure Anumzamo'ma tagrima tagima hu'nea agafa'a, agru osu avu'avaza avaririhogu tagi osu'neanki, mani ruotge hanunegu tagi hu'ne. 8 E'ina hunegu iza'o ama kema amefima hunentemo'a, vahe'mofo ke amagena hunonteanki, Anumzamo Ruotge Avamuma tamaminemofo naneke amagena hunemie. 9 Hagi nenfugta mono vahe'ma avesinte'zamofona mago'ene avona kreta, ovesinte avesinte hoho huta osugahunanki, Anumzamo ovesinte avesinte hu'zana ko rempi huramine. 10 Na'ankure tamage, maka Masedonia kumate mani'naza tafuhe'ina makamotma ovesinte avesinte ko hu'naze. Hianagi tafuhetegata huhanavetike tamasamita, mago'ene ovesinte avesinte hoho huta neramasamune. 11 Tamagra fruma huno manizankura hanavetitma mani'netma, tamagra'a eri/zana eriho. Ko'ma hihoma huta tamasami'nonaza hutma, tamagratami tamazanu eri'zana erigahaze. 12 E'inahukna nehutma, megi'ama mani'naza vahetera, knare tamavutmava nehutma, mago'a zankura atupara osugahaze. 13 Hagi nafuhegta, mono nerifuza koma fri'namo'za nankna hugahazafi, tamagra ketma antahitama nehutma, Jisasi'ma esigu amuhama nosaza vahe'mo'za zavimanetaza zana osugahaze. 14 Na'ankure tagrama tamentintima hunana Jisasi'a friteno oti'neankino, anahukna huno Anumzamo'a zmentintine vahe'ma fri'naza vahera zamazeri otisige'za, Jisasi'ma esiankna zupa magoka egahaze. 15 Na'ankure amanahu kante Ramofonkea neramasamune, mani'nona vahe'mota ovu'nenukeno, fri'naza vahe'mo'za otiza ugota hu'za marerigahaze. 16 Ramo'a Agra'a monafinti

eneramino, hanavege huno kezanke nehanigeno, ugota ankeromo'a ageru nerinkeno, Anumzamofo ufemo krafa nehanigeno, vahe'mo'za Kraisinte zamentinti hute'za frinesaza vahe'mo'za kote'za kerifintira otigahaze. **17** Anantero tagrama ofritama maninesuna vahe'mota, tavresigeta mrerita hampompi omeri mago huteta, magoka anagamu Ramofona ome tutagiha hunenteta, maka kna Agrane manivava hugahune. **18** E'ina hu'negu ama nanekenu, magoke magokemofona ozamazeri hanaveti azamezeri hanaveti hiho.

5 Nagra anazama efore'ma hania zamofonkea, e'i knarero, e'ina zupa fore hugahie hu'na nena fugta kreoramigahue. **2** Na'ankure tamagratmi antahi'naze, Ramo'ma esianknamo'a, kumazafa vahe kenage eankna huno egahie. **3** Vahe'mo'za hu'za knare huta mani'none nehu'za, tarimpa fru huta maniso'e hune hu'za hanaza knafi ame huno zamazeri haviza hu'zamo'a zamagritera, a'nemo'za mofavre antenaku'ma nehazageno zamata negriankna zamata negrina, zamagra ana knazampintira mani onkanegahaze. **4** Hianagi tamagra nena fugate, hanimpina omani'nazankino, ana knamo'a kumazafa vahe'mo'za hanimpi azanknara hanigeta antri osugahaze. **5** Na'ankure tamagra maka'motma tavite vahe mani'netma, masare vahe mani'naze. Tagra kenage vahera omanita, hanimpi vahera omani'none. **6** E'ina hu'negu atrenketa mago'amo'za nemasazaza huta omaseta, tavumo'a hari nehina, ama' antahintahi e'herita kva huta manigahune. **7** Na'ankure zmavuma masaza vahe'mo'za kenegeke nemasageno, aka tima nenaza vahe'mo'za, kenageke aka tina nene'za neginenaze. **8** Hianagi tagra masare vahe mani'nonanki, atrenketa ama' tagutagesa nentahita, tamentintima huzane, vahe'ma avesinte avu'ava

zana tamimizare hanko reheriaza nehuta, Jisasi'ma taguvazino tavresiazanku nentahita amuhama nehunazana, fetori anteaza huta antegahune. **9** Na'ankure Anumzamo'a rimpahē'zama'a erigahaze huno huorantene. Hianagi Ranti Jisas Kraisimpinti tahokeno taguvazizana erisunegu huhamprirante'ne. **10** Jisasi'a tagriku huno fri'neankita, fri'nazo tasimu erita mani'nono, tagra Agrane magopi manisunku huno fri'ne. **11** E'ina hu'negu mago magomotma, ozeri hanaveti azeri hanaveti nehutma, menima nehazaza hutma mago magomofona zamazeri hanavetita maniho. **12** Hianagi nenfugata, tusi maraguzatiza Ramofonte manisaza'zamofo nanekema rempima hunerami'za mono kva vahetamimofona, antahizamita zamagesga huzmanteho huta neramasamune. **13** Hagi eri'zama e'neriza zanku zamesizmanteta, zamagrira zamagi erisaga nehuta, magoke magokemotma tamarimpa frune maniho. **14** Hagi nerafugate, tagra tamazeri otike hanunketma eri'zama e'ori zmesrama nehaza vahera zamazeri fatgo nehutma, koroma nehaza vahera zamazeri hankavenetitma, hanavema ot'i'nesaza vahera zamazeri hanavetihi. Ana nehutma maka vahe enena fru hutma maniho. **15** Mago'mo'e huno havizama huntesimofona, nona'a havizana huonteno. Hianagi maka kna knare avu'avaza ohunte ahunte nehutma, maka vahetera anahukna tamavutmava huzmanteho. **16** Makazupa muse hiho. **17** Hagi nunamuna otretma makakna huvava hiho. **18** Hakare'zampina Anumzamofona susu hunteho, na'ankure Jisasi Krasimpima e'inahu tamavutamavama huzankura Anumzamofona avenesie. **19** Tamagra Ruotge Avamumofo teve ahesu hu avu'ava zana osiho. **20** Kasnampa kemofona antahi amnezanknara osiho. **21** Hianagi rezaganetma makazana ke so'e nehutma, knarema hunesiazana azeri

akona hiho. **22** Ana nehutma, maka havi avu'ava zampintira maniganeta maniho. **23** Hagi rimpa fru Anumzamo'a, Agra maka sese huramanteno tamazeri ruotage nehuno, avamutamine, tamagu tamene, tamavufanena kegava huramantena, Ranti Jisas Kraisi'ma esianknarera kema hurantezana omanetfa hugahie. **24** Anumzamo'ma tamagima hunemo'a, fatgo huno ke'are amage antegahiankino, Agra anahukna huno eriknare huramantegahie. **25** Nenafugate tagrikura nunamuna huranteho. **26** Maka tafu'hemotma mono tamavutamava hutma tamafukre tamafakre hiho. **27** Nagra hanave ke tamasamuanki, ama avona hamprinke'za, maka tafuhe'za antahihi. **28** Hagi Rantimofo Jisas Kraisi asunku'zamo'a tamagrane mesie.

2 Tesaronaika

1 Hagi nagra Poli'nagi Sailasi'ene Timotigata Tesalonaika mani'naza mono nagamota Anumza Nafatine, Ranti Jisas Kraisinte tragotetma mani'nazamotarega, ama avona kre'neramunankino, **2** Anumza Nafatimofone, Ranti Jisas Kraisi Asunku'zamo'ene rimpia fruzamo'a tamagrane mesie. **3** Hagi nenfugata maka knama tamagriku'ma tagesa nentahita Anumzamofona susu hunentona zamo'a, e'i knare'zantfa hu'ne. Na'ankure tamagri tamentintimo'a rura huno nevigetma, magoke magokemotma ovesinte avesintema nehaza zamo'a hageno ra nehie. **4** E'ina hu'negu, tamentinti nehutma, maka tamazeri havizama nehazafine, knazama tamizafima kazikazi hutama neaza zankura, Anumzamofo mono nagamofo amu'nompina tamagri tamagenkema nezamasamita, tamagrikura husaga huneramante'na akaginerone. **5** E'i ana maka'zamo'a Anumzamo'a fatgo refko zama'a erifore nehiankino, e'nahukna tamatazama e'neriza zampi Anumzamo'a tamazeri retro nehina, Anumzamofo kumara erigahaze. **6** Na'ankure Anumzamo'a fatgo zanke nehia Nekino, tamazeri havizama nehaza vahera, nona'a huno zamazeri haviza hugahie. **7** Hianagi Ramo Jisasi'ma monafintima hanavenentake ankeru vahe'anema, teve anefa'ane eama hanuno'a, Agra kanazampintira tamazeri o'za nehuno, tagri'enena knazantifintira eme tazeri o'za hugahie. **8** Hanki Anumzamofoma ke'za antahiza nosuza, Ranti Jisas Kraisi Knare Kusenkema novaririza vahera, nona'a huno knazana eme zamigahie. **9** Ama ana vahe'mo'za havi mizazami e'neriza, Ramofonteti'ene hanavenentake masa'afintira atre'za afete'are mani'ne'za, zamata erivava hugahaze. (aiōnios g166)

10 Anazama fore'ma haniana Ramoma ete esianknarera

Agri vahe'ma mani'naza vahe'mo'zama ra agima nemisafina, tamagranena ana vahe amu'nompi maninetma, ra agi amigahaze. Na'ankure tagrama Agriku'ma huama hu'na kerera, tamagra tamentinti hu'naze. **11** Hagi Anumzamo huhampri tamantenegeta tamagrikura nunamuna huneramantonankino, Anumzamo'a tamazeri knare hina, Agri vahe manigahaze. Tagra nunamuna huwava nehunankino, Anumzamofo hanavemo'a tamaza nehina, maka knare'zama hunaku'ma nehaza zana nehuta, tamamentinti hutma hugahunema nehazazana hugahaze. **12** E'inahuma hanutma Ramofo Jisas Kraisi Agi erihentesga nehnageno, Anumzantine Ranti Jisas Kraisi'enena asunkuzama'areti tamagi erisaga hugahie.

2 Hagi nerefugata Ranti Jisas Kraisi'ma esigeta, Agranema tagrama ome atru hanuna zamofonkura, menina anage huta tagra tamantahinegone. **2** Mago'a vahe'mo'za tamasamiza Ramofo kna hago fore hu'ne hu'za tamasamisazo, mago vahe'mo huno Ruotge Avamumo e'inahu kasnampa kea nasamie huge, mago ke huama nehuno hanio, mago vahe'mo huno, e'inahukna avona hamprita keteta huama hunema hanageta, e'inahu kema antahisutma, antri nehutma ame hutma antahintahi tamifina antahigna osiho. **3** Atrenkeno mago kampintira vahe'mo'za reramatga osiho. Na'ankure ana kna fore osu'nenigeno, kote'zana rama'a vahe'mo'za Anumzamofona zamefi humitesageno, kasegema rutagre ne'mo'a efore nehina, ana ne'mofona azeri haviza hugahie. **4** Ana ne'mo'a agra'a maka'zama anumzane hu'za mono hunentaza'zane, mago'a mono hunentaza zantamina ha'renezmanteno, Nagra ra mani'noe huno Anumzamofo ra mono nompi trate nemanino, agra'a azeri ama huno Anumza mani'noe huno hugahie. **5** Tamagra ontahi'hazo, koma tamagranema

mani'nena e'inahu vhaher fore hugahie hu'na tamasaminoana? 6
Hagi menina nazamo kana rehiza hunte'ne, tamagra antahi'naze,
e'ina hu'neankino agra'a kna fatgore ana ne'mo'a eama hugahie.
7 Na'ankure kasegema rutagre hanavemo'a oku'a erizana
ko e'neriankino, ana kama rehiza hu'nemofona azeri kami
atretenkeno, kasegema rutagre ne'mo'a eama hugahie. 8
Anantera kasegema rutagre ne'mo'a eama hanigeno, Jisas'a
agipinti zahonu huharafu huno ahenefrino, Agrama esia hihamu
masa'amo, ana nera ahefri vagaregahie. 9 Anama hania ne'mo'a,
Sata hanavereti hanavenentakezane, kaguvazane, havige
avame'za erifore nehanigeno, 10 Anumzamo'a zamagu'ma
vazisigu'ma tamage kema zami'neana, zamagra zamentintia
osu atre'nazagu, Agra mika havige avu'ava zante'ma fananema
hu kante'ma nevaza vhaher rezamatga hugahie. 11 Na'ankure
e'ina agafare Anumzamo'a antahintahizamia zamazeri savari
hinke'za, havige zante zmentintia nehu'za, 12 tamage
kerera zamentinti nosu'za, havi avu'avazama hu'zanku muse
nehazankino, ana miko'mokizimia refko huzamanteno knazana
zamigahie. 13 Hianagi tamagriku huta maka kna tagra
Anumzamofona susu huntegahune. Ramo'ma avesi'neramantea
nenafugata ese agafare Anumzamo'a tamagu'vazinaku huhampr'i
ramante'neankino, Avamuteti'ene tamage kerema tamentintima
nehazageno, tamazeri ruotge hu'ne. 14 Tagrama Knare
Musenkema huama hunazampi, Anumzamo'a tamavare kana
retro higetma, Ranti Jisas Kraisi hihamu masazama'a e'nerize.
15 Ana hu'negu nenafugata avoma kreneramita, rempima
hurami'nona kerera azeri hanavetita oti hanavetiho. 16 Menina
Ranti Jisas Kraisine, Anumza Nafatimo, avesinerante'mo asunku
mani vava mani'zane, knare amuhazane asunkuzama'areti

neramino, (aiōnios g166) 17 tamazeri so'e nehuno, kema hanazano, maka knare eri'zama erisazana, tamagu'a tamazeri hanavetigahie.

3 Hanki huvgare nanekea, nenfugata nunamu hunerantenkeno, tamagripima hu'neazana huno Ramofo nanekemo'a, maka kokantega ame huno vuno e'no nehina, ragi amiho. **2** Ana nehanageno, tagrira fatgo osu vahe'ene havi vahepintira tahokeno tavregahie. Na'ankure zamagra maka'mo'za zamentinti osu vahe mani'naze. **3** Hianagi Ramo'a hugahuema haniaza hu'nekino, havi avu'avazama nehia ne'mo'ma tamazeri haviza huzankura kegava huramantegahie. **4** Tagra, tamagrikura hugahaze huta Ramofompina antahineramunankita, tamagrama nehazazana mago'ene nehutma, hihoma hutama huramante'nonazana hugahaze. **5** Ramo'a tamagrira Anumzamofo avesizana tamagu'afina eriama nehina, Kraisi'ma hu'neaza hutma kazigazi hutma vugahaze. **6** Hagi menina nena fugata anage huta hanave kea neramasamune, Ranti Jisas Kraisi agifina, eri'zama eri naneke rempima hunezamunke'za novariri'za, feru nemaniza tafuhe'ina zmatretma ogantu maniho. **7** Na'ankure zamagra antahinaze, tagrama rempima hurami'nona avu'avazamofo negetma avariraho. Na'ankure tagra amu'nontamifima tavesrama osu, **8** magomofo bretia amanea erita o'nenonanki mizaseta neneta, tamagrime knama tamizankura maraguzatita hanine zagenena erizana e'nerune. **9** Hianagi tagra mago'a neza taminageta e'rinakura nosunanagi, tagra knare tavutavama huza tamaveri hanunketma, tamagra ana tavu'tavaza avaririhogu anara nehune. **10** Na'ankure tamagranema manineta, amanahu avu'avaza hugahaze huta hanave kea tama sami'none. Mago vahe'mo'ma eri'zama e'orinakuma hania vahe'mo'a, ne'zana

onegahie. **11** Na'ankure tagrama antahunana amu'nontamifina mago'amo'za erizana e'noriza, vahe'mofo zanku zamagenke nehu'za, eri'za e'ori feru vahe nemanize. **12** Menina e'inahu vahe'mofona, Ramofo Jisas Kraisimpina hanavege huta zamazeri hanave'netita, akohe'za mani"ne'za zamagrazmi zamazampinti erizana eri'za, nomanizazmia retro hu'za maniho huta nehune. **13** Hianagi tamagra nerafugata, knare tamavu'tmavama huzankura tamavesra osino huta nehune. **14** Iza'o ama avompima kre'nona kemofoma amagema ontesimofona, anamofona keni hunetama, agranena tragoteta omaninkeno agra agazegu hino. **15** Hugahianagi, ha vahetamignara anamofona huonteho, hianagi nerafuga haviza hunane hutma azeri fatgo hiho. **16** Menina rimpia fru Ramo, Agra'a maka knama hakare'zama hanafina, tamarimpa frua tamigahie. Ramo'a makamotane manisie. **17** Nagra'a Polina ama musenkea nazanko avona nentena, e'inahukna hu'na krenoankita kegahaze. **18** Rantimofo Jisas Kraisi asunkuzamo'a makamotma tamagrane mesie.

1 Timoti

1 Hagi nagra Poli'na, Krais Jisasi eri'za ne'mo'na Anumza Tazahu ne'ene Krais Jisasike humanantenate, emema tavaresigu Rantimofo avega nentoa aposolo ne'mo'na, **2** Timotiga nagri tamage mofavremoka mago tamentinti nehu'mokarega, Anumza Nerafantegati'ene Krais Jisasi Ranti'mo'a asunku huganteno asurgi'zane, arimpa fruzana kamisigeno kagrane mesie. **3** Hagi Masedonia katre'na vunaku nehu'na, nagra tutu hugante'noe. Efesasi mani'enka havi mono huku hanaza nagara, anara osiho hunka nezmasminka, **4** havige hanaza kegu antahi zamige, korapa fore hu'nesia kanihe kerera antahi ozamiho. Na'ankure ana zamo'a hafra fore huno tamaza osina, Anumza'mofontegati erinaku tamentinti hanaza zana e'origahaze. **5** Hianagi tagrama rempi hunezamuna zamofo agafa'a, zamesi nezmante'za zamagu'areti agru hu'ne'za, knare zamagu'zamagesareti zamentinti hugahaze. **6** Na'ankure mago'a rempi huzmi vahe'mo'za knare'zana agatere'za hazagre'za nevu'za, zamaza osugazanku havi naneke nehantagaze. **7** Kasege huzamasmi vahe nesampra'zanagi, zamagra ana kema hazankea antahinira osu'ne'za, antahi'none nehu'za zamufa eri mareri'zageno kemo'a nena'a nomane. **8** Hu'neanagi tagra antahi'none, kasegemo'a knare hu'negeta, ana kasegema Anumzamo hu'nere, amage anteta avariri sunkeno'a knare hugahie. **9** Hagi tagranena antahi'none kasegema tami'neana fatgozama nehaza vahe'mokizmigure huno ozami'ne. Hagi kasegema ovariri'za ha'nentake nehu'za, Anumzamofo avu'ava nosu'za kumi' nehaza vahe'ene mani otage osu'za, otage huno mani'zanku huhavi'za nehu'za, nezmafano nezamrerano zamahe nefri'za, vahe zamahe nefri'za, **10** monko'za nehaza

vahe'ene, vemo vene mase'zane, vahe kumzafa nesea
vahe'ene, agi'ari vahe'ene, hu'nesia zanteku vahane hu'
vahe'ene, knare'za rempi huzmi zanku huhaviza hu vahe
zami'ne. **11** Masanentake konarari'ane Knare Musenke'afi
(gospol) asomu'ane Anumzamo'a huzamasmio huno nagrira
huhamprinante'nea kante ante'na nezamasmue. **12** Hagi
Krais Jisasi'a tagri Ramo, hihamu nami'negu muse hunentoe.
Na'ankure Agra nagri antahinamiteno, erizani'a erigahane
huno huhamprinante'ne. **13** Hianagi korapara Anumzamofona
nagra azanva ke nehu'na, amage' nentaza vahera zamazeri
kore nehu'na, tusiza hu'na Jisasi agifi amage'nentaza vahera
harezmante'noe. Ana hu'noanagi asunku hunante'ne. Na'ankure
antahi'na ke'na osu'nena namentintia osu'nogu anara hu'noe. **14**
Krais Jisasi'a Rantimo asunku hunanteno naza higena Agrite
namentinti nehu'na avesinte'noe. **15** Ama'i tamage nanekegino,
hakare'a vahe'mo'za zamentinti hugahaze. Na'ankure Krais
Jisasi'a kefoza nehaza vahe zamahokehesigu ama mopafina
erami'ne. Ana agu'afina nagra zamagtere'na hakare vahera
kefo'zana hu'noe. **16** Ana hu'noanagi, nagriku esera asuntagi
nante'ne, nagrite vahe'mo'za avame zana nege'za, Agrite kumi'
vahe'mo'za esnagu agazone huno zamega anteno mani'ne,
Krais Jisasinte zamagra zamentinti nehu'za, kasefa hu'za mani
vavahu nomani'zana erigahaze. (*aiōnios g166*) **17** Menine maka
knafima manivava nehia Kini nera, ofrino, vahe'mo onke, magoke
Anumzana, konariri'ane manivava hugahie. Tamage. (*aiōn g165*)
18 Hagi magoke tamentinti nehu'a mofavre Timotiga, ama
avompima kre negamua nanekegu, kagesa antahio. Ko'ma
mago'mofoma Anumzamofo naneke asamigeno, kagriku huama
hu'nea kasnampa kefi hankavetinka Rantimofo ha'pina, knare

hunka hara huo. **19** Kamentintia azeri hanavetinenka, kagu kagesareti knare antahintahi huo. Na'ankure mago'a vahe'mo'za ana nanekegura zamenosige'za zamentintifina atre'za ventemo tagana vaziankna nehaze. **20** Ana agu'afina Haimenasi ene Aleksandake, e'inahu avamera hu'na'e. Ananku hu'na Sata azampi zanante'noe, Sata'a kna nezanaminke'ne rempi huteke, Anumzamofo agi'amofona azanva kea huontesa'e hu'na hu'noe.

2 Anumzamofo agihanta vazi'zana pusaza me'ne. Nunamu huta agihanta nevazita, tagri'ma tavesinia zanku antahinegeta, muse hunenteta, maka vahe zamagi erita zamaza hanigu antahigesanune. **2** Kini vaheku'ene maka kva krinerantaza vaheku'ene nunamuna huzmantesune, ana nehanunke'za kva huso'e nehanageta, agazone huta fruzampi Anumzamofo avu'avate'ene fatgo mani'zampi so'e huta magokepi manigahune. **3** E'inahu zamo'a Anumzana Tazahu ne'mofo (Savior) avufina knare nehigeno musena nehie. **4** Kefo zampinti tahoke he'nea ne'mo'a, maka vahe'mo'za tamage naneke antahi'za zamasimu erisazegu ave'nesie. **5** Na'ankure Anumzana magoke mani'ne. Anumzane, vahe'mota amu'nompina, anazanke huno amu'no nera magoke mani'ne, ana nera Krais Jisasi'e. **6** Tusi'a mizanteti Agra'a avufga atreteno, maka veara miza seranteno, Anumzamo'ma huhampri ante'nea kna eri ama hu'ne. **7** Ana zanteku huno nagrira nazeri oti'ne, Anumzamofo mono naneke zamasmi'nena antahisnagu, nazeri oti'nea aposolo ne'mo'na, nagra tamage nehuanki havigea nosue. Zamufaga taga osu vahe (gentiles) rempi huzminena zamentinti hu'za tamage nanekea antahihogu huama nehue. **8** E'ina hu'negu nagri'ma nave'nesiana hakare'a kumate vene'nemo'za, ruotage zamazana antesga hu'za nunamuna nehu'za, fra vazi'za ke

hakare osiho. 9 Hagi nagri'ma navesiana, a'nemo'za fatgo huza kukena nehu'za, zamavasesema hanafina vahe'mo'za kezmasane hu'zana nosuza, zamanu zamazoka hane'zane, golire trohunte'naza avasase zane, hage rimpinti zane (pearl), marerisa kukena osiho. 10 Hu'neanagi Anumzamofo amage' nentonema hanaza a'nemo'za, knare avu'ava nehu'za, ana avu'avateti knare avasese hiaza hu'za hugahaze. 11 A'mo'a akohe'no rempi humisia ke erizafa nehuno, ke amage' anteno, agazone huno manigahie. 12 Hu'neanagi nagra a'nemo'za vene'nea rempi huzmi zankuro, kva mani'zankura navenosie. E'igu agazone hu'za manisanaze. 13 Na'ankure koteno ve Adamu tro huteno, henka'a ara, Ivina tro hu'ne. 14 Adamuntera revatga zana fore osu'ne, hagi a'mofo revatga higeno, kumi'pina traka hu'ne. 15 Hu'neanagi a'nemo'za mofavrema kase nezmanente'za, zamentinti nehu'za, ovesinte avesinte nehu'za, mani ruotage hu'za nemani'za, zamagu'ane zamagi'ene, kva hanaza zamo knare mani'zana erigahaze.

3 Hagi ama'i tamage naneke, iza'o mono kva manigahue hanimo'a, knare eri'zane huno erino. 2 Kvama hania ne'mo'a amanahu hino, hazenke'a omneno, magoke a' anteno, mani'zama'a kva nehuno, fatgo zanke nehuno, avufa antermeno nemanino, nantu antentesia vahe agampu nehuno, agra knare'za rempi huzmi ne' nemanino, 3 hanave rina neno negi oneno, hafra osuno, hagi arimpa fru nehuno, ke hakare osuno, zagogu avesinte'zana atreno. 4 Agra knare huno naga'a kva nehuno, mofavre zaga'a zamazeri fatgo hanige'za, knare kante maniho. 5 Hu'neanagi naga'a kvagri so'e nosnimo'a, ina kna huno Anumzamofo mono' nona kegava hugahie? 6 Menima agu'a rukrahe hu'nesnia nera, mono kva ne' manisnie hunka ame'ama

hunka azeri o'otio. Agra avufa erisaga nehnigeno Sata'a ana hanifi efreno azeri traka hugahie. **7** Hagi monopi omani megi'a vahe'mo'za nege'za, knare nere nehanageno, agra havi avu'avapina uramino Sata krifufina ohegahie. **8** Dikenima manisia ne'mo'a, anahu kna huno avu'avapina fatgo huno mani'neno, tare agerura oruno, hanave tintera osuno, havi kantetira vahe'mofo zagoa e'orino, **9** e'inara osuno ani' agu'agesare mani'neno, Anumzamofonte hanave amentintima hu'neana, azeri hampo'na hino. **10** Ana eri'zana erigahazanki hu'enka, esera avame antenka eri'za zamige'za knare hu'zama erisagenka, dikeni eri'zana zamige'za eriho. **11** A'nezamimo'zanena anahu kna hu'za knare hu'za nemani'za, vahe zamefi'a ke osu'za, knare avu'ava hu'za fatgo zanke hakareza hanafina nehnage'za antahi zamigahaze. **12** Dikenima manisimo'a magoke a' anteno, mofavre naga'a knare huno kegava negrino, noma'afi zantamine, vahe enena kegava krigahie. **13** Ana dikeni eri'zama knare hu'za erisamo'za knare zamagi eneri'za, eri'za zamifina otine'za, korera osu'za Krais Jisasintera hanaveti'za zamentinti hugahaze. **14** Nagra ama avoma kre atrogeno kagritega viana, zaza kna omaninesake'na ko e'naku nehue. **15** Hianagi mago'a zamo'ma nazerinke'na omesugenka, nagrama avoma kre troana kagra kenka antahinka hu'nane, vahe'mo'za inankna hu'za Anumzamofo nagara zamagra kegava hugahaze, kasefa huno mani'nea Anumzamofo mono nonte'ma, atru re'nea anumza zafa, tamage kemofo agafa'e. **16** Maka vahe'mota mago trimpa nehune, Anumzamofo avu'avapi tamentintima hu'zamo'a eama nehie, Kraisi'a avufa erino eama higeno, Avamu'mo fatgo avu'ava'a eriama higeno, ankeromoza kageno, Kraisi agi agenke hakare kaziga huama hazageno, miko mopane mopane

vahe'mo'za zamentinti hazageno, tusi'a masanentake konariri'afi
avreno mareri'ne.

4 Hu'neanagi Ruotge Avamumo huama huno nerasmie,
mago'a kna esnia knafina mago'amo'za zamentintia atre'za
evunerami'za, rezmatagahu avamu'ene, hankro'mofo naneke
rempi huzamisage'za zamagesa anteza antahigahaze. **2**
Havige vahe'mo'za zamagra hu'za, amanahu vahe mani'none
nehaza vahe'mo'za havi kereti rezmatga nehu'za, knare zamagu
zamagesa zamagu'afi me'neana, havi kereti zamagu'a kre hagege
nehaze. **3** Ana vahe'mo'za arave osugahaze nehu'za, mago'a
kavera oneho hanazanagi, tamage ke'arema tamentinti nehutma
nentahimota Anumzamo'ma tro hunte'nea zana muse hunenteta
susu huta erigahaze. **4** Na'ankure hakare'zama Anumzamo'ma
tro hunte'nea zamo'a, knare hu'negu mago'zana otreta tamagra
susu hunentetma amne erigahaze. **5** Na'ankure Anumzamofo
ke'mo'ene, nunamumo azeri agru hu'ne. **6** Hagi ama nanekea
hanavetinka monopi mani'naza kafuhe'ima zamasamisunka,
kagra knare hunka Krais Jisasi eri'za ne' nemaninka, hanavetinka
hakare zupa kamentintifina nehagenka maka knare antahi'zana
erinka amage'ma ante'zampina hagegahane. **7** Hu'neanagi
kagra maninka tavava'nemofo knihe kerera fra ovazio, hagi
kagra knaka'ane, hanaveka'a Anumzamofo avu'avapi kazeri
hanavetio. **8** Hanki amega tavufga azeri hanaveti hanuna
zamo'a, osi'a knafi taza hu'zana eri gahunanagi, Anumzamofo
avu'ava'ma (godliness) hanuna zana huvempa hu'negu meni
mani'zampina taza nehuno, henkama esia mani'zampinena
taza hugahie. **9** Ama nanekea tamage naneke me'negu antahi
hanavetita erisnune. **10** Amana zante amuho huta eri'zana
enerita maraguzanetune, na'ankure kasefa huno mani'nea

Anumzamo'ma esanigu tagra tamentinti nehune. Agra mika zamentinti nehaza vahe zamagu'vazino zamahokehe nere. (Savior) **11** Menima negasamua kea hu ankerenka huzamige'za amage anteho. **12** Atregeno mago vahe'mo'a nehaza ne' mani'nane huno kagehenkamu otreno, hianagi zamentintima nehaza nagatera avame zankna hunka keka'afine, kavukvapine, zamesi zamante zane, kamentintifine, agru hu'zane, huzmeri hugahane. **13** Nagra egahuanki, hakare vahera zamazeri atru hunka avontafera hamprinka mono nanekea huama hunka rempi huzamio. **14** Kagra kagera okanitfa huo, Anumza naneke huama (profesi) hazagenka anampinti Avamu'mofo muse'za (gift) erinke'za, mono kva vahe'mo'za zamaza ante'za eri'za eriogu huhampri kante'naze. **15** Mika zupa kagra ama erizana kegava nehunka, anampinka eri'zana enerisankeno nena'a fore hanige'za vahe'mo'za kegahaze. **16** Kagrama kavukvama nehanazana kegava negrinka, rempima vahe'ma hunezmina kenena kegava nehunka, maka zupa ana zanke hunka nevanankeno'a, Anumzamo kagrira kagunevazino, keka'a antahinamokizmia zamagu'vazigahie.

5 Hagi ranra vahekura rankea huontenka, negafanku'ma nehanaza hunka fru kefinti antahigo. Hanki kahefa vahera negafuma huntenaku nehanaza hunka azeri so'e nehunka, **2** ranra a'nea negrerama hunentana kna hunentenka, zahufa a'nea, negasaroma hunentanankna hunka knare antahintahifi fatgo kazigati kva huzmanto. **3** Mago kva krintega vahe'ma omani'nesia kento a'nea, kva krizamanteho. **4** Hu'neanagi mago kento a'ma mofavre'afi, negehoma maninesuno'a esera zamagra rempi hu'za mono'mo hu'nea kante nozamifi zamarera zamafaza kva krizmantehaza nona hu'za kva huzmanteho,

Anumzamofona e'inahu zanku ave'nesie. **5** Ana hianagi agraku nemanisia kento a'mo, Anumzante amentinti nehuno hanine zagine nunamuna huno Anumzana antahigegahie. **6** Hu'neanagi mago kento a'mo agri'ma avenesia zankuke agesa nentahimo'a, kahefa mani'neanagi avamupina ko fri'ne. **7** Vahe'tmina ama naneke zamasmige'za avariraho, e'ina hananke'za mago'amo'za ke huzmante kanku hakegahaze. **8** Hianagi mago'mo'ma kora fatgoama zamazeri so'e osuno, naga'anema zamazeri so'e osnimo'a, amentintimo'a amne zankna hanigeno, zamentinti nosnaza vahera zamagatereno haviza hugahie. **9** Hanki kento a'nea zamazama hunaku zamagima kresafina 60'a zage kafuma huno, nevente mani fatgo hu'nesia kento a'aza hugahaze. **10** Ana kentomo knare avu'ava nehiaza negesageno, mofavre zaga'a negrino, aru vahe agampu nehuno, mono kva vahe zamaga sese nehuno, knafi mani'nesaza vahe zamaza nehuno, ana eri'zama'a arimpa amino knare huno erigahie. **11** Hu'neanagi kahefa kento a'nea zamaza hunaku zamagima kresafina onkreho, na'ankure zamesi'zamo zamavazu hanige'za Kraisimpi hanaveti'za nemaniza'za atre'za ve erigahaze. **12** Ko'ma huvempa hu'naza kea anama hazazamo rufutagige'za, kea eri'za zamagra'a zamufafi emenentaze. **13** Hagi eri'za e'ori amne mani'neza, ru nompi ru nompi mareritere nehu'za, nosuna naneke nehu'za, rumofo nanekere zamefiga'a ke hu'za vano nehu'za, osuga naneke nehaze. **14** Nagrama nagesa nentahuana, kahefa kento a'nemo'za ve eri'za mofavre nente'za, nozamia kegava nehanage'za, huhavi'za huzmanteku hanaza vahe'mo'za kegura hakregahaze. **15** Na'ankure mago'amo'za hago kana atre'za Sata nevaririze. **16** Hagi mago amentinti nehania a'mo naga'afi kento a'nema mani'nesazana, agra

knare'za huno ana a'neramina zamaza hanigeno'a, mono
vahera kna eri ozamisageno, zamagra'zmi zamaza huga
osune'naza kento a'nea, mono vahe'mo'za zamaza hugahaze.

17 Hagi elda vahera, Anumzamofo eri'zante kvagri so'e nehaza
vaheki, zamagi erisaga nehuta antegna huta mago'ene zamiho.
E'ima hanaveti'za mono ke nehu'za, rempima hunezmi'za
vahera mono naga'mo'za zamaza hugahaze. **18** E'i ana kante
mono avontafe'mo'a amanage hu'ne, Bulimakaomo'ma witi
raga refuzafupeno anom'a neharesigeta, zamagiteranofira
ana'okiho. (Diu-Kas 25:4) Anazanke huno eri'zama erisia nona'a
mizama'a erigahie. (Luk 10:7.) **19** Elda ne'ku rumo'za kna
ami ke huntesaza kea ontahio, hianagi tagufa vahe'mo'o, tare
vahe'mo'ma huramagema hanigenka ana nanekea antahio.

20 Hanki kumi'ma nehaza kva vahera, hakare vahe zamufi
zamazeri fatgo nehuge'za, maka vahe'mo'za nege'za, kumi'
huzankura kore hugahaze. **21** Anumzamofo avufine, Krais Jisasi
avufine, huhampri zamante'nea ankero vahe'zmufi kasamuanki,
ama nanekea amage' antenka vahera refko osunka, mago
zanke hunka zamesi zamanto. **22** Ame'ama hunka kazana
mago vahetera antenka mono eri'za erisie hunka azeri o'otio.
Mago'a vahe'mo'za kumi' hanafina kagra ana kumpina kagra
manigru hunka manio. **23** Tinkera onenka, osi'a waini tina
nenegeno krimpamofona kaza hino, na'ankure hakare zupa krima
enerinkure. **24** Hagi Mago'a vahe'mofo kumi'mo'a amate me'ne,
kegaga hunte knare koteno vugahie. Hanki mago'amokizmi
kumi'moa frakino me'neankino henka efore hugahie. **25** Anahu
kante, hakare vahe'mokizmi knare zamu'zmamo'a amate me'ne.
E'ina higeno mago'a vahe'mofo knare zamuzmamo'a oku'a
me'neankino, henka'a efore hugahie.

6 Hagi hakare mono nentahi'za zago e'ori kazokzo eri'za enerimo'za kva vahezamia razampi antahinezamisage'za, nege'za Anumzamofo agi'ane, tagrama knare kema rempima hunezamuna kea huhavizana osugahaze. **2** Iza'o amentintima nehania ne'mo kva'a mani'nesigeno'a, kea ruha'ontagino, na'ankure zamagra neramafuze. Hianagi hakare zupa knare hu'za eriza'zmia eriho, na'ankure e'ima e'nerina eri'zana amentinti nehigeta tavesi'nentona kva ne'mo azahuzana erigahie. Ama'i naneke rempi hunezminka zamasnio. **3** Hanki mago'a vahe'mo havige naneke nehnigeno, Ranti Jisas Kraisi nanekene, mago'zahu nosnigenka, e'inahu nanekemo'a knare Anumzamofo avu'ava enena trago'otene, **4** agra agu'agesa eri antemrenerino mago'zana antahi ama nosie, hianagi agra mago arimpa osu nanekere agenoka nehuno, nanekegu ke hakare nehigeno, e'i anampinti'ma efore hiana rumofo zanku kesane nehuno, fra nevzino, rimpa oti'oti nehinkeno, vahe'ku huhaviza hunenteno, vahe antahi haviza hunenteno, **5** maka'zupa zamagu'amo knare osu'nea vahe'ene fra nevziza, zamagu zamagesamo haviza hu'nea vahe'mo'za tamage kea nosaze. Zamagrama antahi'zana Anumzamofo nanekefintira feno erisanti haregahune nehaze. **6** Ana hu'neanagi Anumzamofo avu'ava'ma nehu'za agazone hu'za mani'snamo'za, knare zantfa erigahaze. **7** Kasema nerantageta ama mopafina mago'zana erineta ome'none, hagi ama mopama atresuta mago'zana erita ovugahune. **8** Hagi ne'zantine kukenatima me'enigeta, e'i ana zankura agazone huta nemanita muse hanune. **9** Ana hianagi feno vahe maniku hanaza vahe'mo'za, rezmatagafi evurami'za krifu aheaza hanageno, maka havi avu'avazamofo zamesizampi negi vahe kna nehu'za, zamazeri haviza huzante kezmasane

hanageno, ana vahera zamahe haviza huno havi kampi zamavreno uramigahie. 10 Zagogu avesi avesihu avu'avazamo'a maka havi avu'avazamofo agafa'e. Mago'a vahe'mo'za zagogu nehakre'za zamentintia atre'za afete nevazageno, zamasuzamo manizazamifina agonazamo kota zamaheankna nehie. 11 Hu'neanagi havizampintira atrenka nefrenka, Anumzamofo vahe mani'nananki, fatgo zanke nehunka, Anumzamofo avu'ava nehunka, kamentintia nehunka, vahera kavesi nezman tenka, hanavetinka nevunka fru hunka manio. 12 Kamentintimofo hara knare ha' nehunka, kagima higenka manivava asimu'ma eri'nanana azeri hanavetio, hakare vahe zamufi kagra ko huama hu'nane. (aiōnios g166) 13 Nagra Anumzamofo avufi negasamue, maka'zama asimu ami'nea ne'ene, Krais Jisasi tamage kema Pontias Pailoti avufima huama hu'negu, 14 kagra ana kasegea eri haviza osunka kva hu'negeno, tagri Rantimo Jisas Kraisi efore hino. 15 Agra knama ante'nere fatgo huno egahie, Agrake asomu'ane vugota hu'nea kva ne'ma (sovereign) kinimo'kizmi Kinie, ramokizmi Rane. 16 Agrake'za ofrino manivava hugahie. Tusi'a masa'afi mani'neankiza vahe'mo'za urva'o osugahaze. Mago'mo'e huno onkeneanki'za onkegahaze. Agripina Ra agine, hanave'anena mevava hugahie. Tamage. (aiōnios g166) 17 Ama mopafi feno vahe mani'naza vahera huzasmig'e'za, ana fenozantera zamufa ra osu'za, ana fenozantera zamentinti osiho, hianagi Anumzamofonte zamentintia hiho, Agrama maka'zama tamigeta enerunazanku huta muse hugahune. (aiōn g165) 18 Zamagrira huzasmig'e'za knare'za nehu'za, knare eri'zamo fenozamigna hanige'za, atupama hu'nesaza vhema zamaza hu'zanku nentahi'za, feno zamia retro hiho. 19 E'inama hanu'za, zamagra henka'a esnia knafima erisnaza zamofo agafa'a knare

hu'za eri atru nehu'za, ana hu'za azerisaza zanteti tamage
mani'zana erigahaze. **20** Hagi Timotiga, Anumzamo antahi
kamino kami'nea eri'zantera kvagri fatgo huo, avufa'a omne'nea
nanekegu hafra hugante'nazana, kamefi hunezminka havigema
hanaza vahera antahi'ozamio. **21** Ana nehu'za mago'amo'za
zamentintia atre'za ru'are vu'naze. Anumzamofo asunku'zamo
kagrane mesie.

2 Timoti

1 Hagi nagra Poli'na, Krais Jisasi aposol ne'mo'na Anumzamo
Agra avesite huhamprinanteno knare mani'zana Krais Jisasimpi
huhampri'ne. **2** Timotiga, nagra navesinegantoa mofavrenimoka
ama avona krenegamuankino, Anumza nafatimo'ene Ranti Jisas
Kraisi asunku'zane arimpa fruzana kaza huno kamigahie. **3**
Nagra Anumzamofo muse hunentoe, nagehe'za hu'nazankna
hu'na, eri'zama'a knare'nagu nagesareti kinagane nanterane
hakare zupa nunamuma hufina kagrikura antahi negamue. **4**
Kavunu herfi'nana zanku nentahi'na mago kna kagesua nagesa
nentahue. Anama hanugeno nagrira muse zamo'a avitegahie. **5**
Nagra antahi'hoe kagra kagu'areti kmentintia nehane, kota'zana
negageho Lois'ene negrera Yunesike znamentinti huna'a
kna huno kagripina kamentintia me'ne hu'na nentahue. **6**
E'izanku Anumzamofo musezama (gift) kagu'afima kami'neana
hugre kru huo, nazama kavufgare nentogeno, kami'nea zanku
hugagesa nehue. **7** Na'ankure Anumzamo'a kore huno fraki
Avamura ontami'ne. Hianagi hanave'ane, avesi'ene, avufga
antermino kentahi avamu tami'ne. **8** Hu'negu Rantimofo naneke
huama hu'zantera kagzegura osuo, nagrama Agri kinama
hu'nogura kagazea osuo. Hagi nagrane tragotenka knazana
Knare Musenkerera (gospol) Anumzamofo hanavefi erio. **9**
Kefo zantifinti taza huno tvareno ruotge kezampinti tagihu'ne.
Mago knare eriza eri'nona zanteku anara osu'ne. Hagi Agra
agafa'a me'negu huno asunku'zanteti Krais Jisasimpi ko'ma
ofenka'ati taza hu'neazamo mevava nehie. (aiōnios g166) **10**
Hianagi menia tazahu ne' Krais Jisasimpi eriama nehuno,
fri'zana eri netreno, tasimu neramino ofri manivava mani'zana
Knare Musenke'afi (gospol) eriama nehie. **11** Ananku huno

Anumzamo'a huhamprinantenege'na ke'a huama nehu'na, aposol eri'zana e'neri'na, vahera Knare Musenkea rempia hunezmue.

12 Na'ankure e'ina nehua agafare natazana e'nerue. Hianagi nagazema hu'zamo'a nazeri otregahie. Na'ankure nagra izantero namentintima nehumofona antahi'na kena nehu'na, eri'zama'a erinentoana, Agra antahineankino kva kri ante'nenkeno ana kna efore hugahie. **13** Nagrama knare nanekema kasmugenka azerinana kea azeri hanavetio. Kamentinti hu'zampine, vahe'ma avesi'zana, e'i Krais Jisasimpi me'ne. **14** Ruotge Avamu'ma tagu'afi mani'nemo kaza nehanigenka, antahi kamino kami'nea kamentintia kegava huo. **15** Kagra antahi'nane maka Esia kaziga mani'naza vahe'mo'za natre'za uvu evuma hu'nazana, ana agu'afina Figelusi'ene Hemogenesi'ke natrena'e. **16** Nagrama seninofite kina nompima mani'nogeno, agazegu osuno nazama hu'nerera, Onesiforusi nagara Ra Anumzamo asuntgi anteno aza hanie. **17** Hianagi Romu kumate enehanatino'a nagriku avune anteno hakreno ne-eno eme nage forehu'ne. **18** Onesiforusina anama hu'nerera, Kraisi'ma esnia zupa Ra Anumzamo asuntaginteno aza hanie. Hanki nama'a zupo agra nazama hiana, Efesasi kumatera kagra ke'nane.

2 Hagi Timotiga navesinegantoa ne'nimoka, Krais Jisasima asunku'ma hunegantegu hunka hanavetinka asunkuzampi manio. **2** Kagra nentahinke'na maka vahe zamufi huzmasamino'a kema amage nentaza vahera huzasmige'za, zamagra ana zanke hu'za ruga'a vahera rempi huzamiho. **3** Kagra nagrama enerua kna kataza enerinka, Krais Jisasina knare sondia vahe'agna huo. **4** Kraisi sondia ne'mo'a mopafi mani'zampina uvazi evazia nosie. Na'ankure huhampri anteno sondia eri'za ami'nea ne' azeri muse hugahie. **5** Ana zanke huno mago ne'mo'ma zokagopi taragino

nevuno, kasege amage' ontresimo'a muse'zana kini fetorira e'origahie. 6 Hanavetino hoza enerisia ne'mo'a hoza'afi fore hania ne'zana ese'zana agra'a erino negahie. 7 Hagi nagrama negasmua naneke antahi ani' huo, Ra Anumzamo ana kemofo agafa'a hunegasmina, hakare zana antahigahane. 8 Hagi Jisas Kraisinku kagesa are'are huo, fripinti eteno oti'ne, Daviti negeho'e, Knare Musenke (gospol) huama nehue. 9 Na'ankure nagra ana zanteku hu'na knazana eneri'na hazenke vahe kna hu'na kina nehue. Hu'neanagi Anumzamofo nanekemo'a kina osu'ne.

10 Na'ankure ana agafare maka vahe'mo'za knare hanazegu kna zampina mase'na oti'na nehue. Ana hanuge'za hamprima zamante'nea naga'mo'za Krais Jisasi'a zamaresige'za manivava konariri masa'a (glori) erigahaze. (aiōnios g166) 11 Ama'i tamage naneke, Jisasi'ene fri'nomota, agrane kasefa huta manigahune.

12 Knazama hanavetita mani'neta tagrama erisunana, henka'a Agrane kini kva vahe tro huta manigahune. Agriku'ma ontahi'none huta tagrama hu frakisunkeno'a, tagrikura ontamage'noe huno Agranena hu frakigahie. 13 Tagra tamentintima osanunana, Agra ke'a ruotagregahie. Na'ankure Agra havigea osugahie. 14 Maka vahera huzmagesa huge'za ama ana nanekea antahihio.

Kazigazi hunka Anumzamofo avufina zamazeri atru nehuge'za, ana nanekegura ke hakare osu'za fra ovaziho. Fra nevazisage'za antahisaza vahe'mokizmia zamazeri havia hugahie. 15 Eri'zanka'a kazigazi hunka e'nerigeno, Anumzamo negageno erizanka'agu muse hunegantena, kagazegura osugahane. Ana nehinkenka tamage naneke'a hufatgo hunka huama hugahane. 16 Hianagi avufa'a omne mopafi zante hantaka hantoko naneke hanafina manigno, na'ankure ana zamo'a zamaza osanige'za Anumzamofo avu'avara osugahaze. 17 Ana naneke zamimo'a zamufgafi

(gengrin, kensa), fugo namumo tera huno via kna nehie. Ana nanekema nehaza vahe'pina, tare netremokizni zanagi'a Himenasi'ene Filetusike, **18** tamage naneke atre'ne hzagrena'a netremoke fri'zanpinti oti'zana hago fore hu'ne nehune, mago'a zamentintine vahera zamarimpa kna erinezmi'e. **19** Ana hu'neanagi Anumzamofo nanekemo avempa huno arafuna reno me'ne, azanko avo (seal) me'negeno amanage huno kre'ne, Ra Anumzamofo nagare hu'za mani'naza vahera zamantahino keno hu'ne. Agi hanta nevaziza Ra Anumzane nehaza maka vahe'mo'za kefo mani'zampina mani agetagi'za maniho. **20** Hagi menia mago ra nompina golire'ene silvareke tro hu'naza tinkavogera omne'ne. Hagi mago'a zafare'ene mopare'ene trohu'naza tinkavone me'ne, mago'a kavomo'a ranra eri'za erigahie. Hanki mago'a kavomo'za, vahe'mo'a antahi omi eri'za erigahaze. **21** Hu'negu mago'mo ana kefo zampinti agu'a sese hanimo'a, ranra eri'za eri tintafe kna hugahie. Zamazeri otage hanige'za, ozafa zamimofo eri'zampina knare hu'za eriga nehu'za, maka knare eri'zama erisagu zamu ante'za manigahaze. **22** Menia kahefa vahe'mo'za kefo avu'avazanku zamagesa nentahizankna osunka atrenka fro, fatgo zamofo nevaririnka, kamentinti nehunka, vaheku kavesi nezmanenka fru hunka manio. Iza'o fatgo huno nemanino, Ra Anumzamofo agihanta nevzisia vahe'ene manio. **23** Hu'neanagi negi neno antahi'za omne vahe knara osuo, antahi sankeno'ma hafra huga hu'nesia kegura kamefi humio. **24** Ra Anumzamofo vahe'mo'za kefra ovazi snaze, hianagi vahera zamesi nezmante'za, rempi hunezmi'za, hazenke huzmante'saza vahe enena agazone hu'za maniho, **25** Fru huta fru kefinti ke hakare hurmantesamokizmia zamazeri fatgo hiho. E'ina hanageno ana ke ontahisaza vahera

Anumzamo'a zamaza hina, zamagu'a rukrahe nehu'za tamage kea antahi'za ke'za hugahaze. **26** Ana hina zamagu'a ante fatgo nehu'za, Sata kifopima ahe'nazana katufegahaze. Sata'a kina huzmante'nege'za avesi'zama nevaririza zampintira atre'za vugahaze.

3 Hianagi kagra Timotiga antahi ani' huo, mona mopa vagaresia knama atupa'ma hanigeno'a, tusi'a knaza fore hugahie. **2** Na'ankure ana knama fore hanige'za, vahe'mo'za zamagraguke zamagesa nentahi'za, zagogu zamesinente'za, zamagra zamufgra ra nehu'za, vahe zamage henkami netre'za, urinkege nehu'za, zamarera zamafa naneke erizafa osu'za, vahera muse kea huozmante'za, agru hu'za omanigahaze. **3** Vaheku zamavesi ozamante'za, kumizmi otrente atrente nosu'za mago zamarimpa hu'za eri fatgo osu'za, vahe zamarimpa nere'za, vahe zamefiga'a ke nehu'za, manirava ohe'za, vahe zamata zamizankuke nehu'za, knare'zama hu'zankura zameosigahie. **4** Hagi vahera komoru (betray) hunezmante'za, vaheku antahiozmi'za, osu'naza zante havige hu'za zmavufga ra nehu'za, mopafi mani'zante zamesinente'za, Anumzama avesi antega kana atregahaze. **5** Zamagra Anumzamofo avu'avara amega zamufareti nehu'za, zamagra tusi'a hanave Anumzamofompi me'neana zamefi hunemize. E'inama nehaza vahera nezmatrenka mani rure hunka manio. **6** Na'ankure amu'nozamifina mago'a vahe'mo'za vahe nompi antagrige antagrige hu'za mareneri'za, zamagu'amo'a hanave otigeno kumipi kna zamesige'za mani'haza a'nemokizmi, kereti zamazeri havia hazage'za, naneke'zmi erizafa nehu'za zamavemanesia zante hakare'a havizana erifore nehaze. **7** Mika zupa ana a'nea rempi huzamige'za nentahizanagi, tamage nanekea antahi ama nosaze. **8** Janesi'ene Jambresikea

korapara Mosesena ke ha'rente'na'e, ana zanke hu'za rempi huzmi vahe'mo'za tamage kemofona ha'renenetaze. Antahintahi zamimo'a savri higeno, zamentintimo'a haviza hu'ne. **9** Hu'neanagi zamagra magore hu'za tagateoregahaze. Maka vahe'mo'za kesazana antahintahi'zamimo'a neginagi hu'ne. Janesi'ene Jambresike neginen'a kna hugahaze. **10** Hagi Timotiga rempi hunezmua kere nevaririne, nagri mani'zane, mago'za hunaku nagesa antahuane, namentinti huane, kafegafa osu'na ako nehe'na, navesi nezmane'na, knafi nemani'na anazanku osu kazigazi nehuaza hunka nevaririne. **11** Nazanva ante'za nahe'za nazeri haviza nehu'za, nataza nenami'za neganke'za Antioku kumate'ma hu'nazane, Ikonium kumate ene Listra kumate enema, naheza nazeri haviza nehazage'na kna zampina mase'na oti'na nehue. Ana hazanagi ana miko zampintira Ra Anumzamo nahokeheno nazeri natre'ne! **12** Tamage, aza'o Krais Jisasimpi hagerfino Anumzamofo avu'avate mani'naku hanimofona, vahe'mo'za knara zamante'za zamazeri haviza hugahaze. **13** Hianagi havi vahe'mo'zane krunage nehaza vahemo'zanena, haviza nehaza zampintira agtere'za tusi'a havizampi ufregahaze. Vahe'ma rezmatga nehaza'zantera, ana zanke hu'za zamagri'enena rezmatga hugahaze. **14** Ana hugahzanagi kagra, kazigazi hunka ko'ma rempima hunka antahinana kea azeri hanavetio. Tagrama rempima hugami'nonazana kagra antahinka kenka hu'nane. **15** Osi'moka otage avontafepima me'nea nanekea antahime enka e'nane, e'i ana nanekemo knare kagukagesa negamina kamentinti nehunka, Krais Jisasipinti kahokeno kagu'vazizana erigahane. **16** Anumzamo huzasmige'za maka ruotage avontafepi me'nea nanekea kre'nazankino, rempima huzmi'sanana knare azahuzana

me'neankino zamazeri fatgo nehuno, kazaki'zana eri fatgo
nehuno, huzmeri hanige'za fatgo avu'ava hu'zankuke zamagesa
antahigahaze. 17 Na'ankure Anumzamofo vahe'mo'za atupa'ma
hu'zankura ana nanekemo vite'zmante'nena, maka knare eri'za
zamia erigahaze.

4 Hagi Timotiga Anumzamofo avufine, Krais Jisasi avufima
kasefa huza mani'naza vahe'ene, fri vahe'ene refko huzmantesia
ne'mofo avufi, Agra'ama eama nehinkeno, Agri'a mona kumamo
efore hania knagura, 2 knare nanekea huzamasnio, kva
hu'enka kna'arero amne knarero, havi knarera zamazeri
fatgo nehunka, hazenke hanazana, hanave kefinti zamazeri
fatgo nehunka, kzone kefinti zamazeri fru nehunka, kavesra
osunka kazigazi hunka knare naneke huama huo. 3 Na'ankure
mago knama enke'za vahe'mo'za knare kema antahizankura
zamesra nehu'za, zamagra zamesiza nevariri'za zamesisia
nanekema hanaza vahe zamage antegahaze. 4 Tamage kea
zamesra hunente'za agafa'a omne kere zamagu'a ante'za
zamavirigahaze. 5 Hu'neanagi kagra knare antahintahi e'nerinka,
maka knaza fore hanifina katazana e'nerinka, kazigazi hunka
Kraisintega vahera zamare anto, Anumzamo'a eri'zama kami'nea
eri'zana erivagaro. 6 Na'ankure nagrira hago kofta knafi, waini ti
ofama hazankna hu'za korani'a eri tagi atregahaze. Nagrama
vanua knani'mo'a hago atupa nehie. 7 Nagra namentintia
azeri hanavetina mani'nena, knare ha' hu'na naglama re'na
e'noana hago ehanatue. 8 Henka tagenoka hania zupa, fatgo
avu'ava zamofo kini fetori antani nantesiana antenante'ne. E'i
Ra Anumzama fatgo huno naneke refko nehia ne'mo, ana
knama ehanatisia zupa namigahie, nagrikera onamigahie. Hagi
maka veama avesi nente'za eama hanigu Agri avegamamentaza

nagamozane erigahaze. **9** Nagrama mani'norega ame' hunka esnanegu nentahue. **10** Na'ankure Demasi'a, ama mopafi zanku avenesigeno, nagrira natreno Tesalonaika kumate vu'ne. Kreseni'a Galesia kumate vigeno, Taitusi'a Dalmatia kumatega vu'ne. (aiōn g165) **11** Luku agrake nagranena mani'ne. Makina esnunka avrenka eno, nagri'ma naza huno'ma eri'za erisigu egahie. **12** Hianagi Tikikusina nagra huntogeno Efesasi kumatega vu'ne. **13** Hanki Timotiga ne-enka anakre ku'nia Troas kumate Kapusi nompi atre'na e'noana e'nerinka, mago'a avontafe'ene, zagagafa akrute kre'naza avontafe ante'noane erinka eno. **14** Alexandama kopama kreno tuzampaza tro nehia ne'mo'a, tusiza huno natazana nami'ne. Ra Anumzamo anazantera nona'a huntegahie. **15** Kagra ana ne'kura kvagrio, na'ankure agra hanavetino tagrama huama nehuna kerera hara renerante. **16** Hianagi ese'ma nanekefima otuge'za magomo'e huno navega osu'ne, natre'za vu'za e'za hu'naze, ana zankure huno Agra nona'a huozmantiesie. **17** Hianagi Ra Anumzamo onatreño nagrane mani'neno hanave nami'ne, ana higeno nagrama nehua nanekemo'a ama hanige'za, maka zamufga taga osu vahe'mo'za antahigahaze. Ananku huno nagrira nahoke aheno laionimofo agipintira navzu hutre'ne. **18** Ra Anumzamo maka havizampinti nahoke heno nenavreno, Agrama nemania kumate monafinka kva hunanteno navareno vugahie. Agra konaririnentake masa'afi nemanimofo agi'a maka zupa hentesga huvava hanune. Tamage. (aiōn g165) **19** Prisilane Akuila kizniregane, Onesiforus nompi nemaniza nagategane musenke vie. **20** Erastusi'a Korinti kumate manige'na, Trofimasi'a kri erige'na Miletusi kumate nagra atre'na e'noe. **21** Kafegafa hunka zasi ikanaohanati'nesigenka eno. Ebulusi'a musenke atregante, anazanke huno Pudensi'ene,

Linusi'ma, Klaudia'ma, maka tafuhe'zane, tasarahe'zane muse
ke atregantaze. **22** Ra Anumzamo kagri avamu'ene manisie.
Asunku'zamo'a kagrane mesie.

Taitus

1 Hagi Anumzamofo eri'zampi nagra Poli'na kina hu'nena, Jisas
Kraisi aposol ne'mo'na, Anumzamo huhampri zamante'nea vahe
zamentinti zamazeri hanavetisuge'za tamage kemofo antahini
nehuza amage'nente'za, Anumzamofo (godly) avu'ava fatgo hu'za
hugahaze. **2** Ana nehanagena zamaza hanuge'za Anumzamo'ma
manivava asimuku'ma hu'negu tamentinti nehuta avega antesune.
Havige osu Anumzamo ama mopa fore osu'negeno, korapa
huvempa hunte'neane. (aiōnios g166) **3** Hianagi Agrama hunte'nea
kna efore higeno, ke'amo eama higeno, mono ke hu'zana nagri
hunantege'na, Anumza Tazahu ne'mofo (Savior) kasege'afi
nehue. **4** Tatusiga tamage mofavre'nimoka, magoke tamentinti
nehu'a ne'mokarega ama avona kre negamue, Arimpa fruzane,
asunku'zanena, Anumza Nerfantegati ene, Krais Jisasi tazahuno
taguvazi ne'mo'a asunkuzama'aretira karimpa frua kamigahie.
5 Hagi nagrama Kritima katre'na vu'noana amanahure, kagra
inazama vagaore'nesia zana eri fatgo hunka, mono nonte vugota
vahera (elda) magoke magoke kumatera nagrama kasamisure
antenka zamazeri otitere huo. **6** Hanki mono kva vahe'ma
zamazeri otisunka, hazenke'a omane, magoke a' ante'nesia
vahe'ma, mofavre zaga'amo zamentinti nehina, ke amage'a
nentesageno, mofavre zaga'agu hazenke nehaze huza nosnia
vahe azeri otio. **7** E'igu mono kva vahera hazenke'a omneno,
na'ankure Anumzamofo eri'zante kegava hugahie. Agra'a avesi'za
ovaririno, ame huno rimpa aka oheno, aka tinte negia oneno, ke
hakare osuno, havi kanteti feno e'norisia vahe azeri otigahane.
8 Hu'neanagi vaheku vhaku'ma nehuno, knare'zanku avenesino,
agra'a mani'za kegava nehuno, fatgo avu'ava nehuno, mani otage
nehuno, ke amage' nenteno, **9** tamage kema husmi'naza kere

amentinti nehuno, agra mago'amokizmia so'e ke nezmasmino, huhaviza hanamokizmi'a zamazeri fatgo nehuno, zamaveri hugahie. **10** Na'ankure maka vahe'mo'za vugote'naza vahe kea ha' renezmante'za, rumokizmigu krunage nehu'za rezmatga nehazana Jiu naga'ma vene'ne zamufa taga nehaza naga'ene tragote'naza vahe'mo'za anara nehaze. **11** Zamasminke'za zamagira hamunki'za maniho, na'ankure zamagra maka famo, tramenia havi kefinti huzmasmi'za tamage kefintira, zamazeri havi kampi nezmatraze. Zamagra zago erinaku ana nehaze. **12** Mago Kriti ne' amu'no zamifi korapa kasnampa ne' (profet) mani'nea ne'mo, zamagriku amanage hu'ne, Kriti vahe'mo'za maka zupa havigege nehu'za afi' zagagafagna hu'za mani'naze. Feru vahe mani'ne'za, zamagra zamarimpa eri avite zankuke nehaze. **13** Ama kea tamage naneke, hu'negu hampo'na kefinti huge'za, zamentintifina fatgo hu'za mani'ne'za, **14** Jiu vahe'mokizmi kanihe kere'ene, kase ke zimirera, tamagesa antahiozamiho zamagra tamage kea zamefi humi'za novaririze. **15** Tamage, hakare veamo'za avusesema hu'enageno'a hakare zamo'a avusese hu'ne. Hianagi zamentinti osu namokizmi'a, mago zamo'a avusese osu'ne. Tamage zamagu zamagesamo ene antahintahi zamimo'a haviza hu'ne. **16** Zamagra Anumzamofona antahita keta hu'none hu'za zamagitetira nehaze. Hu'nazanagi, mani'zazmifina zamagra zamefi Agrira hunemize. Zamavuzavamo'a kasrigeno, kea amage onte'za, mago knare'za hugara osu'naze.

2 Hianagi kagrama rempi huzmisanana, tamage kema hu'hesia ke'age (doctrine) huzamasnio. **2** Ranra vene'nea rempi huzamige'za, fru kefinti kea antemase'za ranke osu'za, knare zmavuzmava nehu'za, knare zamagu'zamagesa antahihio. Hankave zamentinti nehu'za vahoku zamesi nezmane'za,

zamentintifina hanaveti'za maniho. 3 Ana zanke hunka ranra a'ne rempi huzamige'za, mikaza hanafina Anumzamofo agorga mani'ne'za, vahe agenke osu' aka timo'a zamazeri havia osanige'za knare'za rempi huzamiho. 4 Ana nehu'za zamagra zahufa a'ne nagara zamumro antesage'za, ve' zamine, mofavrezaminena zamesi zamantegahaze. 5 Knare zamagu'zamagesa nentahi'za avusese hu'za mani'ne'za, vaheku vahaku nehu'za, nezamave agorga'a mani'nesage'za nege'za Anumzamofo nanekea huhaviza osugahaze. 6 Anahu kna hunka nehazave nagara zamumro antege'za, kegava hu'za maniho. 7 Hakare'zama hanampina knare avu'ava huzamio. Huzameri hanampina zokago vakago osunka tamage ke'age nehunka, 8 tamage ke'age huzamasmigeno mago'mo'a huhaviza huoganteno. E'ina hanankeno aza'o huhaviza hugantesimo'a agzegu hugahie. Na'ankure zamagra havigema hurante zankura hakregahaze. 9 Hagi kazokzo eri'za vahera rempi huzamige'za mika'zama hanafina kva vahe'mokizmi zamagorga mani'ne'za zamazeri muse nehu'za, ke nona'a huozmante'za, 10 mago'zazamia kumzafa oseho. Hagi eri'zana tamage kazigati erifatgo nehanageno, e'i anazamo Anumza tzahu ne'mofo mani'za huzamerisage'za nege'za, mono nontahisaza kva vahe'mo'zane, megi'a vahe'mo'za zamagu'a rukrahe hugahaze. 11 Na'ankure Anumzamofo asunku zamo vahe avare'zana hakare vahete erino efore hu'ne. 12 Tagri rempi huramino mono ontahi avu'ava'zane, ama mopafi zanku avesi'zanena atreho nehuno, hagi tamufa kva huta, fatgo huta Anumzamofo (godly) avu'avate ama kna'afina maniho. (aiōn g165) 13 Hagi ana knama esigu avega anteneta muse nehune, tusi'a masa'afi efore hanigu, Ra Anumzantima, Tazahu ne' Krais Jisasi esigu avega ante'none. 14

Tagriku huno Agra'a avufga atreno kefo'zampinti miza seranteno tware atre'ne, Agri'a vahere huno sese huranteno, tware Agrarega tante'negu, muse nehuta knare zanke hanune. **15** Mika'zana kagripi hampo'na huno me'neanki rempi hunezminka, hampo'na tinka nezmasaminka, zamazeri fatgo nehuge'za, kagrikura amne vahere hu'za osiho.

3 Hagi kagra vahera huzmagesa huge'za, ugagota huno kva hu'nesia nero, kamanifi agi me'nesia ne'mo hania kea amage' ante'za mani'ne'za, knare'zama hu'zanku trohu'za maka'zupa maniho. **2** Zamagra mago mofonkura amefiga'a kea huonte'za, agazone zampi nemani'za, zamarimpa fru hu'za mani'ne'za, maka vahera agazone huzmanteho. **3** Kotera mago'a knafina tagra'nena, haviza huta knare osuta negi neneta, ke ru hanentagita, havige reravatga hazageta, kefo zamofo avu'avapi kina hu'neta, vahe'mofo zanku kersane nehuta, vahe antahi haviza hunezmanteta, tagrati antahi haviza ohu ahu hu'none. Vahe zamatagri naneke nehunkeno, **4** Anumzama, tagri Tazahu ne'mofo Agri'a knare muse'zane, avesi'zanemo eama hu'ne. **5** Agrama taza hu'neana, knare fatgozama hu'ha zankure huno taza osu'ne, hanki Agra'a asunku huranteno taza hu'ne. Agrama taza hu'neana sese huranteno, tazeri kasefa mofavre seranteno Ruotge Avamuteti tazeri kasefa hu'ne. **6** Anama hu'neana Jisas Kraisi tzahu ne', Agripi Avamura azeri usasi okino tagi tregeno e'ne. **7** Hu'neankita tahokeheno asunku zama'areti, kumipinti tazeri fatgo hu'negu huhamprima tantegeta avegama ante'hona mani'vava mani'zana erigahune. **(aiōnios g166)** **8** Ama'na nanekea antahi ankerenka, antahi ani' hanana naneke nehue. Hagi amama ksami'nua nanekea kagra hanavetinka vahera zamasmige'za, Anumzamofonte

zamagu'a nentesamo'za kva hu'ne'za knare zanke'za hugahaze.
Ama zamo'a knare'za fore nehuno, vahera zamaza hugahie.
9 Hu'neanagi, antahi'za omne vahe kna hunka havi kegura
fra vazige, korapa zamagehe'za forehu anante anante hu'za
e'naza vahe zamagireku ene Juda vahe kasekegura fra ovazio.
Na'ankure e'i anazamo'a mago knare'zana erifore osuno, haviza
eri fore hugahie. **10** Hanki tamazeri refko huku hnimofona pusante
agesa eritenka, anante mago'ene avumro antegenoma kema
ontahisigenka, anantera mago'zana osunka kmagenta humio. **11**
Kagra e'inahu vahera kumi' vahe mani'ne hunka antahinka kenka
hugahane, agra'a kefoza hiazamo azeri haviza nehie. **12** Hagi
Atemasimpi, Tikikusino huntesugeno'ma kagritega erizanka'a
kaza huku esnigenka, ame hunka nagritega Nikopolisi kumate
eno, na'ankure zasi ko'ma atania knafina, ana kumate umaniku
nagesa nentahue. **13** Hanavetinka zanazama hania zana Zenasi
ke refkohu (lawyer) ne'ene, Apolosi kiznia ka vu zaznifina
znaza hugeke magozankura upara osi'o. **14** Tagri vahe'mo'za
knare'za hu'zanku zamagesa nentahi'za, mani'za zamifi atupa
hu'ne'za zamaza hania zanku hanaveti'za eri fore nehu'za, ferura
amnea omaniho. **15** Maka nagrane nemanizamo'za musenke
hurmantaze. Zamesima nerante'za, zamentinti nehaza vahetega
musenke vie. Anumzamofo asunku'zamo tamagrane megahie.
Tamage.

Falimoni

1 Hagi nagra Poli'na, Krais Jisasi erizante kina hu'nomo'nane, nena fu Timoti'ene ama avona, Filimoniga magoka eri'za enerita tavesinegantona rone timokaregane, **2** nersaro Apiane, magoka Anumzamofo eri'zama e'neruna ne' Arkipusine mono naga'ma, nonka'afima atruma nehaza nagamotaregane ama avona kreneramune. **3** Anumza Nerfane Ranti Jisas Kraisi asunku'zamo'ene arimpa fruzamo'a tamagrane mesie. **4** Mika zupa nunamuma hufina, kagriku'ma antahinegami'na, Anumzani'amofona susu hunentoe. **5** Na'ankure mono naga'ma kavesinezmantenka, Ramofo Jisasinte'ma kamentintima nehana zamofo kea, nagra antahi'noe. **6** Hagi nagrama nunamuma nehuana, kamentintima nehana zana kagrama tazeri hanavetikema neratasmina zamo'a, antahintahizanka'a erira nehina, Kraisimpima makamota asomu'ma me'neazana antahi ama hugahane. **7** Hu'negu rama'a muse nehu'na hanave enerue, na'ankure kagra nerfuga mono nagamokizmi zamagu'a zamazeri hanavenetinkena muse nehu'na fruhu'na nemanue. **8** E'na hu'negu, nagrira Kraisi'a nazeri hanaveti'neankina hanave ke hu'na fatgoza huo hu'na hugantegaragi, **9** Nagra Poli'na, Krais Jisasi erizante kina hu'noa ne'mona, navesigantoa kazigati, kazeri otike huna kantahinegoe. **10** Kina nompi mani'nena azeri nenamofoza hu'noa mofavreni'a Onisimusinku, nagra kazeri otike hu'na kantahi'negoe. **11** Kotera kagri kavurera mago eri'za eriga osu'neanagi, menina kagrite'ene nagrite'enena, eri'zama'amo'a me'nea ne' efore nehie. **12** Hagi kagritega etena, Onisimusina tumoni'agna hu'nemofo nagra huntogeno nevie. **13** Knare Musenkegu'ma kina hu'na maninofi, kagri no erino manineno naza haniegu navenesie. **14** Hianagi

kagrama ontahinesanke'nama, nagrama mago'zama hentesua
zankura navenosie. Hagi nagra aza huo hanuazanku, aza
hu'zankura navenosianki, kagraka'a kavesite aza huo. **15**
Na'ankure amana agafarepi Onisimusima osia knafima kagri'ma
katreneana, ete avresankeno kagrane manivava haniegu
anara hu'ne. (*aiōnios g166*) **16** Menina Onisimusia mago'ane
kazokzo eri'za nera omanine. Hianagi nagritera kazokzo
eri'za vahera agatereno navesinentoa nenfu'e. Hu'neanagi
menina kagritera amega tavufare'ene Ramofompina mago'ane
mono nerifu manine **17** Hagi nagranema tragoteta eri'zama
e'neru'a zanku'ma nentahisunka, nagri'ma nenavranaza hunka
Onisimusina avro. **18** Mago'za nehuno haviza hugantenesio,
mago nofi hu'nesiana nagra miza hugahue. **19** Poli'na Nagra'a
nazanu ama avona krenegamue. Nagra nona hu'na mizana
hugahue. Nagra kagu kamemofona kaza hunoanagi, kagranofira
hunantenane hu'na nosue. **20** Tamage nenfuga, Ramofompina
knare hunantenka, Kraisimpina nagu'a nazeri kasefahu kea
nasami'nanegu nehue. **21** Nagra kantahi'negoazana, agaterenka
hugahane hu'na antahinegamina, ama avona krenegamue. **22**
Hagi anama nehanunka noma emasesuazana retro hunanto,
na'ankure nagra amuha nehuankino, nunamu tamia Anumzamo'a
antahino, kinafintira katufe natresagena vu'naku aveganentoe.
23 Hagi Krais Jisasi eri'zanku hu'za magoka kina hurante'naza
ne'mo, Epafrasi'a musenkea atregante. **24** Anahukna hu'za
magoka eri'za eneruna naga'mo'zanena, Makima Aristakusima,
Demasima, Luku'ma, musenkea atregantaze. **25** Ranti Jisas
Kraisi asunku'zamo'a tamagrane mesie.

Hivru

1 Hagi Anumzamo'a korapara tagehe'mokizmia, kasnampa
vahepi huvazino hakare'a zupa ruzahu ruzahu kazigati kegaga
huzami'ne. **2** Hianagi menima vagare knafina NemofoMPI
huvazino keaga huramine. Hagi e'i ana Mofavre'amofo azampinti
ama mopa erifore huno maka'zana erisinti harente'ne. (aiōn
g165) **3** Ne'mofavre'amofo Anumzamofo msazama'amo'a
remsa nehigeno, Agrikna huno mani'neno, Agri'a hanave ke'areti
maka'zana eri kasefa huno nevuno, kumi'ma eri agruhu eri'zama
eriteno, Marerisgahu Anumzamofo azantamaga kaziga monafinka
mani'ne. **4** E'ina hu'negu ankerontamimofona zmagetereno
ragi e'nerigeno, Anumzamo'ma Agima ami'nea agimo'a
makamokizmia zamagaterene. **5** Na'ankure Anumzamo'a ina
ankeronku huno, Kagra Ne' Mofavreni'a manisnankena, menina,
Nagra negafana manigahue? nehuno, ete mago'ane huno,
Nagra nefana mani'nenugeno, Agra Mofavreni'a manigahane?
hu'ne. (Sam-Zga 2:7, 1 Kro-Zam 17:13) **6** Hagi zage
mofavre'ama avreno ama mopafima ne-eno'a, atrenkeno ana
miko Anumzamofo ankeromo'za mono hunteho hu'ne. **7**
Anumzamo'a ankerozag'a agura huno, Zamazeri zaho kna
hugahue nehuno, eri'za vahe'agura zamazeri teve anefakna
hugahue hu'ne. (Sam-Zga 104:4) **8** Hu'neanagi Ne' mofavre'agura
huno, Anumzamoka, kinia mani'vava hugahane. Kagra fatgo
kavukavateti kinia maninka kegava hugahane. (aiōn g165)
9 Kagra fatgo zamofo avesinentenka kasegema rutagre
avu'ava zana kavesra hunentane. E'ina hu'negu Anumzamo'a
kagri Anumzankino, magokama maninaza nagapinti kavreno
musezamofo masave frenegante. (Sam-Zga 45:6,7) **10**
Hagi Ramoka ese agafarera Kagra'a ama mopamofo trara

tro nehunka, monafi me'hea zantamina Kagra'a kazampinti trohu'nane. **11** Zamagra frigahazanangi, Kagra maninka nevananke'za, tavravemo atafareno havizahiankna mikamo'za hugahaze. **12** Kagra zamagrira harontafe eri ragazariankna hunezmantenanke'za, kukena hutreankna hugahazanagi, Kagra saganera osunka manivava hugahane. (Sam-Zga 102:25-27) **13** Hianagi ina ankeronku Anumzamo'a huno, Kagra nazantamaga kaziga mani'negena ha' vaheka'a zamazeri kaga tra antaneno hu'ne? (Sam-Zga 110:1) **14** Hagi ankero vahera eri'za vahere, zamagra avamutaminkino Anumzamo'a zamahokeno zamavaresia vahete kegava huzamantenigu huzmantege'za e'naze.

2 Na'ankure e'ina agafare ko'ma antahi'nona kemofona antahini' nehuta atreta akoheta ogamu'a ovanune. **2** Na'ankure Anumzamo ankero vahepi huvazino nehia ke'mo'a, tamage huno efore nehie. Kasegema rutagrezane ke ontahizamofona, mizama'a me'ne hunesiana, **3** Anumzamo'ma tahoke'neazama tamagenama humisuta, tagra inankna huta rimpa hezana agateregahune? Ama ana tahoke'zana esetera Ramo hu'ama higeno, Agrite'ma zamentintima nehaza vahete amara higeta ke'none. **4** Anumzamo'a avamezampima, kaguvazampima, ruzahu ruzahu kaguvazampi huama nehuno, Avamumofo musezanena Agra'a avesite refko huno nezamie. **5** Henkama esia mopaguma nehuna mopa, ankero vahe'mo'za kva hiho huno huozamante'ne. **6** Hagi avontafepina anage hu'haze. Vahera na'a mani'negenka kagra antahintahia hunemine? Vahe'mofo mofavregura antahinemine? **7** Kagra atupa knafi ankero vahe'mokizmi zamagorga Agrira avrenentenka, masazanka'areti kini fetori antenentenka, husga hunentenka, maka'zama tro'ma hunte'nana zantera huntankeno

kegava nehigenka, Kagra makazana Agri kavafi ante'nane. **8**
Kagra maka'zana agri kavafi ante'nane. Na'ankure mago'zamo'a
agri kvafintira mani oganegahianki maka'zamo'a Agri kvafinke
me'ne. Hianagi menima konana, maka'zamo'a Agri kvafina
omanene. (Sam-Zga 8:4-6) **9** Hagi osia knafi ankero agorga
azeri fenkate'nea nera tagra Jisasina kenone, menina azeri
antesga huno msazama'areti kini fetori antente'ne. Hu'negu
Anumzamo asuragirantenegu mikamotagu huno frizampina
ufrene. **10** Ana miko'zana Anumzamofo zantami megeno,
ana maka zantamina Agri'a hankavereti trohune. Hagi ana
miko Anumzamofo mofavre nagara zamahokeno zamaza
hanige'za masazama'afina manisazegu Anumzamo'a fatgo
huno kumi'a omanenea Ne' Jisasina tamigeno atazana eri'ne.
11 Na'ankure vahe'ma zamazeri agru hu'nemo'ene, agruma
hu'naza naga'mo'za, magoke ne'pinti fore hu'nazankino, nensaro
nenafuo huno huzankura agazea nosie. **12** Agra anage hu'ne,
Nagra nafuhemokizaminte kagia huama nehu'na, ana miko
vahe'ma atru hu'nesafi, zagamera hu'na kagika'a ahesaga
hugahue. **13** Mago'ane anage hu'ne, Nagra antahimina agripi
namenanentoe. Nagra Anumzamo'ma nami'nea mofavre zagane
ama mani'noe hu'ne. **14** Hagi mofavre'mo'za zamavufagane
korane mani'nagu, Agranena zamagrikna huno ama avufare eme
frino, fri'zamofo hankavema Sata'ma kinama hurante'nea hanavea
azeri amnezankna hu'ne. **15** Hagi fri'zamofo korozampima
kazokzo eri'za vahekna hu'za kina hu'za mani'namokizmia kazufe
zmantege'za fruhu'za mani'naze. **16** Na'ankure Agra ankero
zamaza hu'nakura ome'neanki, Abrahamumpintima fore'ma
hu'naza nagamokizmi zamaza hu'naku e'ne. **17** E'ina hu'negu
Agri'a nefune nesaroma hunentea avu'ava huno mika'zampina

nehuno, Agra Anumzamofo avurerā asuragiranteno ke'are oti fatgohu pristi ne' nemanino, vahe'mokizmia kumizmi nona hūno magoke zupa apasezmante ne' mani'ne. **18** Na'ankure Agra reheno kezampi ufreño ataza eri'nemo, tamarehe zampima unefrazamota tamaza hugahie.

3 E'ina hu'negu ruotage hu'naza mono nerafugata, tagrama huama nehuna Jisasinkura Aposol ne' mareri agatere'nea pristi nere hutma antahi amiho. **2** Mosesena tamage hūno Anumzamo huhampri antegeno mika vahe'afi mani fatgo hūno mani'neankna hūno, huhampri ante'nemofonte Jisasi'a mani fatgo hūno mani'ne. **3** Hu'heanagi Jisasi'a Mosesena agatereno ra agi erigahie. Nomagi vahe'mo'zama noma ki'naza nomofoma agatere'za ra zamagi enerizankna hugahie. **4** Na'ankure ana miko nona vahe'mo'za negizanagi, Anumzamo mika'zana trohune. **5** Mosese'a mika vahe'afina eri'zana avariri fatgo hūno eneria nekino, henkama fore'ma hania zamofo avame'za mani'ne. **6** Hianagi Ne' mofavre'amo Kraisi'a Anumzamofo vahetera kva mani'ne. Hagi tagra ana vahe mani'nonankita, koro osu hankavetita nemanita, fore'ma hanigeta kesuna zanku'ma musema nehunazana otresune. **7** E'ina hu'negu Ruotge Avamumo hūno, Menima Agri ageruma nentahisutma, **8** korapa ka'ma kopi tamagehe'mo'za Anumzamofo rehe'za ke'nazankna hūno, tamagu'amo'a hankave otino. **9** 40'a kafu zagefima kaguvazama erifore huge'za ke'nazanagi, tamagehemmo'za renahe'za ke'naze. **10** E'ina hu'negu, e'i ananknafi vahekura narimpa henezamante'na, anage hu'noe, zamagu'amo'a savri huvava nehige'za, Nagri kana kenira nosaze. **11** Hu'negu narimpa hezmanrena huvempa hu'na, zamagra manifru kumanifina uofregosaze hu'noe. (Sam-Zga 95:7-11,

Eks-Ati17:1-7) **12** Nafuheta kva hu'neta kumi'mo'ene tamentinti osu'zamoma asimu anteno mani'nea Anumzamofonteti'ma, tamavretre zankura magoke magokemotma kva hoho. **13** Hianagi menima knama me'nenire, mago magomotma ozeri hanaveti, azeri hanaveti maka kna nehinkeno, kumi'mofo havigemo'a rehiza huoramanteno. **14** Na'ankure ese'ma Agritema ne-eta, tamentintima hu'nonazama azeri hankavetisuta, Kraisi'ene tragoteta vagaretera uhanatigahune. **15** Avontafemo'a anage hu'ne, Menina Agri ageruma nentahisuta, koma neramagehozama zamefima humi'nazaza huta, Agritera tamagu'a kafana eri'onkiho hu'ne. **16** Zamagra iza'za Anumzamofo ke nentahiza hara rente'naze? Zamagrira Mosese'a Isipitira zamavareno omenemozafi? **17** Hagi Anumzamofona iza'za 40'a zage kafufina azeri rimpa he'naze? Zamagra ka'ma kokampima kumi'ma hu'za fri'nazamoze. **18** Hagi inamokizmigu Anumzamo'a hankave kea huno, mani fruhu kumaniafina tamagerafa hu'za uofregahaze hu'ne? Zamagra ke'ama amage'ma onte'namokizmigu hu'ne. **19** Tagra refkoma huta konana zamagra zamentintia osu'nazagu, ama ana vahe'mo'za manifruhu kumapima uofre'naze.

4 E'ina hu'negu manifruhu kumapi ufregahaze huno huvempama hu'nea knama me'nesire, mago'tamimo'ma ana manifru hu kumapima uofre'zankura, kore nehutma kva hoho. **2** Na'ankure koma Israeli vahe'tema Knare Musenkema huama hige'za antahi'nazaza hu'za huama hazageta nentahune. Hianagi anankema antahi'naza kemo'a zamaza osu'ne, na'ankure zamagra ana Knare Musenkerera zamentintia osu'nazagen'e. **3** Na'ankure Anumzamo'ma hu'nea kante anteta tamentinti nehumotage manifruhu kumapina ufregahune. Esera ama

mopama tro'ma hiregati mani fru hu kumara ko trohu
vagareneankino, zmentitima nosaza nagakura Anumzamo
huno, Nagra Narimpa henezmate'na huvempa kenia huama
nehuanki'za, zamagra tamage hu'za manifru kuma niafina
uofregosaze. 4 Na'ankure avontafepina 7ni knazupa manifru
huzankura anage hu'ne, Anumzamo'a 7ni knazupa eri'zana
atreo manifru nehie hu'ne. (Jen-Agf 2:2) 5 Hianagi
mago'ane ama nanekefina huno, Zamagra manifruhu kumanifina
uofregahaze hu'ne. 6 E'ina hu'negu manifru kumapima
ufre'zamo'a ko me'neanagi, ese'ma Knare Musenkema huama
hige'za antahi'namo'za uofre'nazana, na'ankure zamagra
ke'ama amagema onte'nazazamo hige'za uofre'naze. 7
Hu'negu Anumzamo'a manifruhu kumapima ufrezankura rugna
huhamprintene, e'i ana kna meninku Deviti ko hu'nea ke huno
avontafepina hu'ne. Hagi menina Anumzamona kema nehanigeta
nentahisuta, tamagu'a kafana eri onkiho hu'ne. 8 Hu'negu
Josua'ma manifruhu kuma'ma zamineresina, Anumzamo'a
ru manifruhu knagura mago'ane kea osiresine. 9 Hu'negu
Anumzamo'ma eri'zama erivagareteno mani fru hu'neaza huno,
mani fruhuzamo'a, Agri vahera zahufa zmavega ante'ne. 10
Hu'negu iza'o Anumzamofo manifru zampima ufre'nakuma
hanimo'a, Aumzamoma ama mopama trohu vaga reteno manifru
hu'neaza hu'za, erizazmi eri vagarete'za manifru hugahaze. 11
E'ina hu'negu manifruhu kumapima ufre'zankura hankavenetita,
ke ontahi vahe'mo'za ke runetrage'za fanane hunazankna
huzankura kva hanune. 12 Na'ankure Anumzamofo kemo'a kasefa
huno me'neno, eri'za enerino, tarega kaziga asanenea kazimofo
asenezama'a agatereno, kantu tagu tamemofone, avamutifine
ufero tagahu rurerure nehuno, kantu tagrunamo hagerafi'nefine,

zaferinamofo asinu'afi ufrelo taga nehuno, tavutavazane tagutagesamofo avesizana refko nehie. **13** Mago'zamo'e huno Anumzamofo avurera, Agrama tro'ma hunte'nea zantamimo'a fraokigosie. Hianagi refkoma hanimofo avurera, ana maka'zamo'a amateke'za nehanigeta, tagranena tamage kege asamigahune. **14** E'ina hu'negu tagrira mareri ageteresa pristi nera monafinka ufrinemofonte, Anumzamofo Ne' Mofavre Jisasinte tamentintia azeri hankavetisune. **15** Hu'negu tagrima antahineramino, asunku'ma hurantega ugota pristi ne'tia mani'ne. Na'ankure miko tagrama unefrona rehe'zampina Agranena ufreneanagi, kumira osu'ne. **16** Hu'negu korera osu hanavetita asunku Anumzamofo tramofo avuga ne-eta, asunkuzane avesirantezanena, atupama hanuna knafina erinunkeno taza hugahie.

5 Hagi miko pristi vahera vahepinti zamavare'za huzamantage'za Anumzamofo avurera vahe'mokizmi zamagi eri'za mani'ne'za Anumzamofontega museza kre sramana vunente'za, kumiku kresramana vunte eri'za vahere. **2** Hagi antahizazmi omne vahe'mo'zane kankuma hazagraza vahe'mokizimia agazone huzamanteno zamaza nehiane, na'ankure agra anahukna huno hanavea omnene. **3** E'i ana agafare agra'a kumikura kresramana nevuno, vahe'mokizmi kumikura kresramana vugahie. **4** Ama ana eri'zana mago vahe'mo'a agra'a e'norianki, Aronima huntogeno eri'neaza huno, Anumzamo huzamantge'za e'nerize. **5** Hu'negu Kraisi'a pristi vahe mani'noe huno agra'a azerintesga osu'neanki, azerintesgama hu'neana Anumzamo Agriku huno, Kagra menina, Nagri mofavre manisankena, Nagra Negafana manigahue hu'ne. (Sam-Zga 2:7) **6** Hagi mago kaziga avontafepina Anumzamo'a huno, Kagra manivava pristi, Melkisedeki kna hunka manigahane hu'ne. (Sam-Zga 110:4)

(aiōn g165) 7 Jisasi'ma ama mopafima mani'neno'a, fripinti Agri'ma azama hanimonfonku, Anumzamofontega kezatino zavineteno, nunamu huno antahinegegeno, Anumzamo'a nunamuma'a antahi ami'ne, na'ankure Agra Anumzamofo antahimizana me'negeno'e. 8 Jisasi'a, Anumzamofo mofavre mani'neanagi, Agrama atazama eri'nea zampinti, kema antahino amage antezana rempi huno antahine. 9 E'i ana atazama eri'nea agofetu Anumzamo'a fatgo nere huntogeno, maka Agri'ma amage'ma antaza vahe'mokizmirera, manivava hanagu zmahokenea zamofo agafa'a mani'ne. (aiōnios g166) 10 Hagi ko Anumzamo'a huno, Melkisedeki mani'neankna Ugota Pristi ne' efore hugahie huno hunte'nea nere. 11 Rama'a ama nazamofo nanakea me'negeta tamasm'i'naku hunanagi, eriama'ma huno tamasm'i'amo'a amuhohie, na'ankure kema ame hutma antahi ama hu'zamo'a amuho huneramante 12 Menina ko rempi hu'zami vahe manizaresinagi, tamagra zahufa aminte mofavregna nehutma hanave ne'zana negara osu'nazankita, avontafe pintira Anumzamofo zankura mago'ane fruma hu'nesiaza rempi huramigahaze. 13 Ami rima nenaza vahe'mo'za mofavregna hu'nazankita, fatgo avu'avazane havi avu'avazane hu'za antahi amara nosaze. 14 Hu'neanagi hanave ne'zana, nenama hu'ne'za, fatgozanki havizanki hu'za kenima nehu'za, fatgozama nehaza vahe'mokizmi nezane.

6 E'ina hu'negu Kraisinku'ma onensi mofavremofo hiaza huta rempima huneramuna zana netretma, nena vahe avamente mani'nenketa, ko'ma fri avu'avazampintima tamagu'a rukrehe hutma Anumzamofonte tamentinti hiho huta tamasami'nona kea, tamasami vava huta ovugahune. 2 Mono tima frezamofo nanekegi, azama anteno nunamuma hu'zamofo nanekegi,

fripinti'ma oti zamofo nanekegi, eteno henkama refko hanigeta
manivava hanaza'zamofo naneke mago'ane huama huta
tamasami vava osugahune. (aiōnios g166) 3 Anumzamo'ma
hu izoma hurantenesigeta, amane anazana hugahune. 4
Hianagi iza'zo koma huzamige'za nentahiza, monafi musezama
ke'za antahiza nehu'za, Avamura e'neriza, 5 Anumzamofo
knare naneke ko eneriza, henkama esianknamofo hankave
ke'za antahiza hu'nesamozama, (aiōn g165) 6 atre'za meg'i'a
zante vute'za, etema e'za zamagu'ama eme rukrahema
hu'zamo'a, tusi'a amuho huzamantegahie. Na'ankure kefozama
hazazamo'a, Anumzamofo Mofavrea mago'ane aheza keka
zafare nehantiza, vahe avufina agazea eri nemize. 7 Ko'mo'ma
mopafi runtegeno, avimzamo koti anivazu huno hageno nena
raga'a retegeno Anumzamo ana mopa asomura hunenteno,
hozama hankorino avimazama hankrenemofo aza nehie.
8 Hu'neanagi ave'ave trazamo'ene havi trazama nehagea
mopa, magoa eri'za eriga osu'neankino, ana mopa Anumzamo
hanigeno haviza hinkeno, tevemo tevagaregahie. 9 Nafuheta
tagra ama anahukna ke nehunanagi, tagra antahinone ama
anazamo'a tamagritera fore osugahianki, tagra antahima
tamunana knare tamavutmvama nehanageno, tamagu vazigahie
huta nehune. 10 Anumzamo'a mago'mofonkuke osu'ne'kino,
amuho huta eri'zama'ama erinenteta Agri'ma avesinenteta
ruغا'a mono vahe'ma kegava huzmanteta nevaza zankura
agera okanigahie. 11 Hianagi tagri'ma tavenesiana, kasefa'ma
huta ama mopare'ma mani'nenare vahe'ma avesinte'zana
azeri hanavetineta vagare knarera unehanatita, amuhama
hu'nemiza zana omerigahaze. 12 E'ina hu'negu feru vahera
omanaho. Hianagi amentintifine akoh'e'za avegante avu'avazampi

mani'ne'za huvempa huzmante'nea zantamima erisintihare'naza
vahekna hiho. **13** Hagi Anumzamo'ma huvempa kema Abrahama
hunte'neana, magora Agri agetere anumzana omani'neankino
Agra'a Agifi huvempa kea Abrahana hunte'ne. **14** Nagra tamage
kagrira asomu hunegantena, kagripinti fore'ma hanaza vahera
zamazeri hakare hanenkeza rama'a vahe efore hugahaze hu'ne.
(Jen-Agf 22:16, 17.) **15** Hu'negu akoheno avega anteno mani'neno
Abrahamu'a, Anumzamo huvempama hunte'neazana erine.
16 Hagi vahe'mo'zama huvempa kema hunakura, zamagrima
zamagaterenea vahe'mofo zmagire hunte'za huvempa kezamia
nehazageno, knazama amu'nozmifima me'neazana eriama
higeno vaga nere. **17** Anahukna huno Anumzamo'a huvempa
hu'neakino, anama huvempa hu'nea kemofona azeri hanavetino,
erisanti haregahaze hu'nea vahetera huvempa huzmantene.
18 Anumzamo'a huvempa hu'nea ke'ane, hugahuema hu'nea
kemoke eri'ante amama hiana, Anumzamo'a havigea osugahie
hu'ne. Ana hu'negu tagra maka havizama ne-enketa, Agritega
freta vuta kasefa hanavea ome enerita, fore'ma hanigu
tamentintima nehu'naza azeri hanavetigahune. **19** Fore
hanigu'ma tamentintima nehunazamo'a, ventemofo azerintegeno
nemanianofikna nehuno, tagutamemofona azerino ra mono
nomofona agu'afinka hantinaza tavaravemofona' agatereno
ruotge hu'nefinka tamentintima nehuna zamo'a ome rusi nehie.
20 Jisasi'ma tagri tagi erino vugoteno ufrenemo, Melkisedeki
nona erino mani'veava Ugota Pristi nera mani'ne. (*aiōn g165*)

7 Hagi ama ana Melkisedeki'a Salemi vahe'mokizmi
kini ne' mani'neno, marerisa Anumzamofo pristi ne'
manine. Hagi Abrahamuma kini vahe'ma ha'ma huno
zamagatereteno, nevigeno'a karanka Melkisedeki'a tutagiha

hunteno asomura huntene **2** Higeno Abrahamu'a maka'zama
erino e'nefintira, nazantrema'a kevu erinteno, refako huno
mago kevua Melkisedekina ami'ne. Hagi Melkisedeki'e agimofo
agu'agesamo'a, fatgo avu'avazamofo kini nere hu'ne. Nehuno
Salemi kini nerema hu'nea agu'agesamo'a, rimpa fruzamofo
kini nere hu'ne. **3** Nerera'ene nefakea omanina'e, agigo
azankomo'a omanigeno, kasente kna'a omanegeno, fri'nea
agenke'a omanegeno, Anumzamofo mofavregna huno pristi ne'
mani vava hu'ne. **4** Melkisedeki'a ra ne' mani'neanki antahiho.
Abrahamu'a tagigomo agranena ra ne' mani'neanagi, hapintima
eri'noma e'nea zantamipintira nazantrema'a kevu refko huteno,
anampintira knare'zantfama hu'nea kevua magora Melkisedekina
ami'ne. **5** Mosese kasegemo'a maka'zama antenesafintira
10ni'a nazantrema'a kevu refko hu'nesageno, mago kevua pristi
vahe'mo'za erigahaze huno krente'ne. E'i anazana zamagra'a
nagapinti'ene erigahaze hu'ne. Na'ankure zamagranena
Abrahamu naga mani'naze. **6** Hianagi Melkisedeki'a Livae
nagapintira omani'neanagi Abrahamu'ma nazantrema'a kevu
refko hutenefintira, anampintira mago knare'zantfama hu'nea
kevua eri'ne. Hagi Melkisedekia Abrahamuna asomura hunte'ne,
ko'ma rama'azankuma huvempama hunte'nea nere. **7** Hianagi
mago kea huontegosune, asomuma nemia ne'mo'a asomu
eneria nera agaterene. **8** Pristi vahe'ma nazantrema'a kevu refko
hunteneta mago kevuma refakoma huta nezamuna vahe'mo'za
fri vagare'naze. Melkisedekia zamagatereno ra vahe mani'ne,
na'ankure agrikura huama hu'za manino vugahie huno hu'ne.
9 Livae naga'mo'za nazantrema'a kevu refko hunte'nafinti
mago kevua eneriza vahe'mo'za ko Abrahamupi Melkisedekina
zamagra nazantrema'a kevu refko huntenafintira mago kevua

ami'naze. **10** Na'ankure Melkisedekima Abrahamuma tutagihama hunteno, nazantrema'a kevu refko huno mago kevuma ami'neana, agripintira Livae vahe'mo'za zahufa forera osu'nazegeno'e.

11 Hagi Mosese kasegemo'a huno, Livae nagapintike pristi vahera manigahie huno hige'za mani'nazanagi, ana pristi vahe'mo'za mago vahera zamazeri knarerera osu'nazagu mago Melkisedekikna pristi ne'ma fore'ma haniana, Aron nagapinti rompage, ru nagapinti fore'ma hanigeno knarerera hugahie hu'ne.

12 Ana hu'negu pristi eri'zamoma zahema nehanageno'a, tra ke mo'enena anahukna huno zahe hugahie. **13** Na'ankure menima keagama nehuna pristi nera, kre sramanavu itare, Kresramana nevaza pristi vahepinti rompage ru nagapinti fore hugahie. **14** Hagi nagrama nehuana Rantimo'a Jiu nagapinti e'ne. Hagi Mosese'a ana nagapinti pristi vahera fore hugahie huno osu'nea nagapinti fore hu'ne. **15** Ama ana miko zantamimo'a eriama huno, magora Melkisedeki kna pristi ne' menina efore nehie hu'ne. **16** Jisasi'ma pristi ne'ma mani'nena tagehe'mo'zama nehzaza huno Livae nagapinti pristi nera omani'neanki, manivava asimumofo hankave pristi ne' mani'ne. **17** Avontafemo'a agrikura huno, Melkisedeki kna hunka manivava pristi nere hu'ne, (Sam-Zga 110:4) (aiōn

g165) **18** Ama ana kanteti eri'zama'ama omene hankave'a omene korapa kasegea retufeganti atrene. **19** Na'ankure kasegemo'a ana mikozana eriknarera nosie. Hianagi knare'zama fore hugahiema huta amuhama hunemunazamo noma'a e'nerino Anumzamofonte tavreno urava'o nehie. **20** Hagi Anumzamo'a Agra'a huvempa huno, Kraisi Agrake pristi nera mika zupa manigahie hu'ne. Hianagi mago'a pristi vahe'ma fore'ma hazageno'a, e'inahukna huvempa kea Anumzamo'a huozmante'ne. **21** Huvempa kema hu'neana, Nagra Ramo'na, huvempa ke hugantoankina

antahintahini'a zahera osugahue. Kagra manivava pristi ne' manigahane hu'ne. (aiōn g165) 22 Na'ankure Anumzamo huvempama hunte'negu, Jisasi'a knare hagerafi huvempa kema tamigahue hu'nea Ne' mani'ne. 23 Rama'a vahe'mo'za pristi eri'zana eri'naze, na'ankure zamagra nefrizageno, rumo'za eri'zazmia eritere hu'naze. 24 Hianagi Jisasi'a manivava pristi ne' mani'nigeno, Agri pristi eri'zamo'a mevava hugahie. (aiōn g165) 25 E'ina hu'negu Agrite'ma etenoma, Anumzamofontema esimofona magoke zupa agu'vazinkeno mani vava hugahie. Na'ankure Agra manivava hu'neno, Anumzamofontega nunamu huno zamaza nehie. 26 E'inahukna ugagota pristi ne'mo tazeri knarera hugahie. Na'ankure Agra ruotge huno kumi'a omanegeno kumi'mo magore huno azeri haviza osu'ne. Menina kumi vahepinti azeri ruotge higeno, monafinka ragi erino mani'ne. 27 Agra ruga'a pristi vahe'mo'zama nehzaza huno mika kna kresrama vuvava nosie. Zamagra kumikura kresramana vute'za, vahe'mokizmi kumikura kresramana nevazanagi, Jisasi'a magoke zupa Agra avufga eme aguza runo, maka vahe kumikura keka zafarera fri'ne. 28 Na'ankure kasegemo'a hanavezami omane ugagota pristi vahe huhamprizmante. Hianagi Anumzamo'a huvempa hunte'nea kemo'a kasegemofo amefi'a e'neana, Agri'a Ne'mofavremo mikazana emeri knare'zantfa nehuno manivava hugahie. (aiōn g165)

8 Hagi tagrama nehunazamofo agafa'a ama'ne, tagrira Ugagota Pristi ne'tia monafinka mareri agaterenea kini trate Anumzamofo azantamaga kaziga mani'ne. 2 Agra monafinka seli mono nomofo agu'afi Pristi eri'za eri ne' manino, eri'zana e'nerie. Ana seli mono nona vahe'mo'za zamazantetira onki'nazanki, Ramo ki'ne. 3 Miko ugota pristi vahe'mo'za musezane, kresramana vu'za eri'za ome

kre sramana nevazankino, tagri Ugagota Pristi Ne'mo kresramana vugahie. 4 Ama mopafima mani'neresina pristi nera omanisine, na'ankure kasegemoma hu'neaza hu'za ko rama'a ugagota pristi vahe mani'ne'za musezana eri'za Anumzamofontega kresramana vunentaze. 5 E'i ama mopafi mono nompi kresramana vu eri'zama enerizana, monafinkama tamazama me'nea zamofo avame'za me'ne. Na'ankure Mosese'ma seli mono noma kinakuma retro nehigeno'a, Anumzamo'a Mosesena hanave ke asamino, E'sema ama agonare mikozama kaveri hu'noa kante antenka, seli nona kio huno huntene. (Eks-Ati 25:40) 6 Hianagi Jisasima eri'nea pristi eri'zamo'a mago'a pristi vahe'mo'zama e'neriza eri'zana agaterenegeno, Agra amuno ne' tagri'ene Anumzamofontera manino, koma huvempama hu'nea hagerafi, kea agatereno mani'ne. 7 Na'ankure kote hagerafi huvempa ke'mo'ma knare'zantfa huneresina, menina mago'ane henka hagerafi huvempa kea osiresine. 8 Hianagi vahepima Anumzamo hazenkema keno erifore nehuno'a, anage hu'ne, Ramo'a huno Antahiho, mago kna ne'eankina, ana knarera kasefa huvempa keni'a Israeli vahete'ene Jiu vahe'motarera hugahue. 9 Ama ana hagerafi huvempa kenimo'a korapama nezamagehoma zamazante zamavazuhuna lsipi mopafinti zamavrena atineramina hunte'noa hagerafi huvempa kegnara osugahie. Zamagra ana hagerafi huvempa kerera mani fatgo osu'nazagu, Nagra namage'na huzami'noe huno Ramo'a hu'ne. 10 Hianagi Israeli vahetera ama kasefa hagerafi huvempa ke Ramo'a huno, henka'a Nagra kasegea antahintahi zamifine zamagu'afine krenente'na, Nagra zamagri Anumza mani'nenke'za zamagra nagri vahe manigahaze hu'ne. 11 Ana knazupa zamagra ko Ramofona ke'za antahiza hu'nazankiza, tava'o zamire'ma mani'nesaza

vahe'ma rempi huzami zankura osugahaze. Osi vahetetima vuno
ra vahetema vaniana, magore hu'za rempi huzamiza tamagra
Ramofona antahinazo hu'za osugahaze. 12 Na'ankure nasunku
hunezmante'na, Nagra kumizamia atrenezamante'na henka'a
ana kumizamigura nagesa ontahigosue hu'ne. (Jere 31:31-34)
13 Anumzamo'ma ama kasefa hagerafi huvempa kema nehuno'a
kote hagerafi huvempa kegura huno, kna'amo'a vagarenkeno,
ko'zama me'nesia zamofona eri'zama'a omanenkeno fanane
hugahie hu'ne.

9 Hagi korapa hagerafi huvempa kemofona mono hu trake'a
megeno mono hunte seli mono nona ama mopafina me'ne. 2 Seli
mono nompina tarefi hunaragintene. Ese'ma hunaragintepinka
tavima rekru hunte azota megeno, nezante sipa megeno ana
agofetura breti me'ne. E'i anama hunaragi ante'neama'agura
ruotge hu'ne hu'za nehaze. 3 Hagi anantera tavrave tafizageno
amefiga'agura ruotage huno ruotge hu'ne hu'za hu'naze. 4
Anampinka mananentake'za kre manavu ita korire tro huntenaza
megeno, erihagerefi huvempe ke hu'za nehzaza vogisi zafareti
trohu'naza me'ne. Ana vogisimofona agu'afina korire trohunaza
kavofi mana neza megeno, Aroni azompare agatama hagenea
megeno, hagerafi huvempama hu'nea kasegea haverera me'ne.
5 Ana vogisimofo agofetura kumimofo nona huno apasezane,
korireti tare masanentake ankero tro huntegeno, zanagekonanu
rutareke ana vogisia refitakeno me'ne. Hianagi menina ana
miko'zamofo agafa'a eri ama osugahue. 6 E'i ana zantamima ese
hunaragintepima noma'arema eriante fatgoma hutegeno, pristi
vahe'mo'za mareriza atiramiza hu'za mono eri'zana e'herize. 7
Hianagi ugagota pristi ne'moke mago kafumofona, magoke kna
zupa seli mono nomofo agu'afinka hunaragi antegeno ruotge

huno, ruotge hu'nefinka, agra kumite'ene vahe'mo'za kefoza
nehu'ne hu'za ontahine'za nehaza kumi apase kora erino unefre.
(Lev-Pri 16:) 8 E'i ana avu'avazampinti Ruotge Avamumo'a eriama
huno seli nomofo kafanteti ufreta Anumzamofonte vu'zama
me'nesigeno'a Anumzamofoma keno antahinoma hu'zamo'a
amuho hugahie hu'ne. 9 E'i ana seli mono nomo'a menima
fore'ma haniaza taveri hu'ne. Na'ankure pristi vahe'mo'zama
kre sramanama vazazamo'a zamagu zmagesafima me'nea
antahintahizazmia zamazeri amara osugahie. 10 Na'ankure ama
ana avu'avazamo'a ne'za nezane ti nezane, tagiama tazama
sesema huzamofonkuke nehuno, amegazama atupa'a knafima
vagaresigeno'a, knarezama esiazanku hu'ne. 11 Ana hu'negu
Kraisi'a ana miko knare zantamima esiazamofo Ugagota Pristi
Ne' mani'ne. Agra monafinka mago vahe'mofo azamo tro osigeno,
knarezantfa hu'nea seli nompi ufrene. 12 Hagi magoke zupa miko
knama kresramnama vezankura Kraisi'a korana erino ruotge huno
ruotge hu'nefinka ufrene. Hianagi e'i ana korana memene anenta
kaomofo koranompage, Agra'a koranuti tagu'vazino mani vavama
hanunkura mizasene. (aiōnios g166) 13 Ko avu'avapina meme
koranki, bulimakaomofo koranki a' kasefa kaomofo tevefi krenaza
osa'areti, pehenama hu'nesafintira zamazeri agru hugahie hu'za
hu'naze. 14 Hagi tamagesa antahihi, Kraisi koramo'a razankrefa
me'neankino, fri avu'avazama nehunkeno tagutagesa azeri
agru higeta, kasefa huno mani'nea Anumzamofona monora
hunentone. Na'ankure manivava Avamumofo hankavere, Kraisi'a
kefozama'a omne ne'mo, Anumzamofonera Agra'a avufga tagri
kumikura aguza rune. (aiōnios g166) 15 E'i ana agafare Kraisi'a
vahe'mokizmine Anumzamofa amu'no nera kasefa hagerafi
huvempa kea mani'ne. Ana hu'negu huhamprima zmantene'mo'za

vahe'mo'za Anumzamo manivava maniza erisinti haregahaze
hu'neazana erigahaze. Na'ankure Kraisi'a frino, kotema hagerafi
kefi manine'za kumima hu'nazana kumizmia mizasezmanento
katufe zmante'ne. (aiōnios g166) **16** Mago vahe'mo'ma frisigeno
fenozama'ama henkama erisinti haregahie huntenenimo'a,
avegante'nenigeno ana nemo'a fritenkeno, ana zama'a erisinti
haregahie. **17** Na'ankure frisugenka erisantima haregahane
hu'ne'mo'ma frisigeno, erisantima haresimo'a amne erigahie.
Hagi amigahuema hunesimoma kasefa huno maninesigeno'a,
magore huno anazama erisanti haregahane huno hunesizana
e'origahie. **18** E'i ana agafare zagagafamofo korantetira kote
hagerafi huvempa kemofo eri hanaveti'naze. **19** Na'ankure
Mosesema Anumzamofo kasegema hamprinoma vahe'ma
nezamasino'a, anenta bulimakaomofo korane mememofo korana
tine eri hava huteno, erino hisopue nehia trazamofo aninaret'iene
koranke hu'nea sipisipi azokateti Anumzamofo kasege me'nea
avontafete'ene vahetera, ana korana rutari hu'ne. **20** Huteno
anage huno zamasmine, Ama koramo'a Anumzamo'ma hagerafi
huvempa kema hiho huno tagrima hurante'nea eri hanavenetie.
(Diu-Kas 24:8) **21** Ana kanteke, anahukna huno korana seli
mono nonte'ene kresramnama nevaza eriza zantamintera
rutri huntene. **22** Mosese kasegemo'ma hu'nea kanteke,
tamage huno ana mikozamo'a korantetike sesehu agru hugahie.
Na'ankure mago zaga aheno korana erifegu otreresina kumima
atrentezana omaneresine. (Diu-Kas 24:6-8.) **23** E'ina hu'negu
ama mopafi seli mono none agu'afima me'nea zantaminena,
monafinkama me'neazamofo avamezane, zaga kfamofo koranteti
azeri agru hugahie. Hianagi tamage zama monafinkama
me'nea zantamina azeri agruma husaniana, zaga kfamofo

korama ageterenea koranteti azeri agru hugahie. 24 Na'ankure Kraisi'a vahe'mo azanu ki'nea mono nompina uofrene. Hagi mona kumapi tagriku huno Anumzamofontera amuno nera mani'ne. Mono hunte'naku kintenaza mono nompi Agra uofre'ne. Na'ankure monafinka me'nea mono nomofo avame'zane. 25 Hagi e'ima ufreneana, Agra'a avufgama aguzama ru'neana, ama mopafi pristi vahe'mo'zama kafugu kafugu magoke knage'za ruotge hune hu'za nehazafi, zaga kfamofo kora eri'za ufre'za kresramana vuvava hazanknara osu'ne. 26 Hanki anara hugara hu'nesiana, ama mopama tro'ma huneregatira fri vava huno visine. Hianagi anara osu'ne. Kumimofo hanavema eri atrenaku, Agra'a avufga tagrikure huno vagare knafi avufga agu'za runo magoke zupa, ana maka knamofonkura fri'ne. (aiōn g165) 27 Hu'negu vahe'mofonku'ma hunteneana, magoke zupa fritesuno'a kegagarera otigahie huno huntene. 28 Hu'negu Kraisi'a magoke zupa frino rama'a vahe kumira eritrezamtene. Agrama henkama esu'no'a kumiti eritrerante'nakura omegahianki, Agriku'ma tusiza hu'za avegama ante'hamokizmi zmahokeno zmavrenaku egahie.

10 Hagi ko avu'avazama Mosese kasegefima me'heana henka knare'zama esiazamofo avame'za me'ne. Hu'negu ko avu'avazampima mago'anena anahukna zana huvava hu'za kafugu kafugura vugahazanagi, mono'ma huntenaku'ma haza vahe'mokizmi, ana zamo'a zamazeri agru osutfa hu'he. 2 Hagi koma kresramna nevaza'zamo'ma mono'ma nehaza vahe'mokizmi kumi'ma sese hu'heresina, kresramna vuvava nosu'za, zamagu zamagesafina kumi me'ne hu'za ontahizasine. 3 Hu'heanagi e'i ana kresramnamo'a kafugu kafuguma hu'naza kumimofo huzmagesa hutere nehie. 4 Na'ankure bulimakaomofo koramo ene mememofo koramo'a kumira sese hugara osu'ne. 5

E'i ana agafare Kraisima ama mopafima ne-eno'a Anumzamofona
anage huno asami'ne, Vahe'mofo kumitema zagagafa korama
Kresramanama vuzankura kavenosie. Hianagi Kagri kemofo
amage antesuegu ama navufga nami'nane. **6** Kumitema zaga
kfama mika Kresramana vuzankura, Kagra musena nosane. **7**
Nagra anage nehue, koma Anumzamoka avontafemo Nagriku
hu'nea kante, Kagri kavesi avaririnaku ama e'noe hu'ne. (Sam-
Zga 40:6-8) **8** Kasegemo'a rempi huramino, kresramna vu'zane
musezane erinka enka kumika'agura kresramnavuo hu'ne.
Hianagi nahigeno Kraisi'a ama ana zankura huama huno
Anumzamofona avenosie hu'ne? **9** Anantero Agra anage
hu'ne, Kagri kavesiza avaririnaku Nagra e'noe hu'ne. Agra
ese hagerafi huvempa kea eri netreno, henka huvempa ke eri
agafa hu'ne. (Sam-Zga 40:7-8) **10** Jisas Kraisi'a Anumzamofo
avesite Agra'a avufga magoke zupa tamigeno mika kna, mika
vahera tazeri ruotge hu'ne. **11** Hagi knane knanena pristi
vahe'mo'za otine'za mono eri'za zamige'za ana hukna hu'za kre
sramana vuvava nehazazamo'a kumiti eritregara osu'ne. **12**
Hianagi tagri Ugagota Pristi nemo'a magoke zupa tagri knare
zanku, Agra'a avufga Anumzamofo amigeno, kumitigura avufa
agu'zarutegeno, Agra Anumzamofo azantamaga kaziga mani'ne.
(Sam-Zga 110:1) **13** Agra anante avega anteno mani'negen,
Ha'marenentaza vahera zamavre agafi antegen, zamagra
agama ante tra trohu'za mani'naze. **14** Na'ankure magoke
zupa avufga agu'za ru'nea zamo, zamazeri ruotge hu'naza
nagamokizmia, miko zupa zamazeri knare'zantfa nehie. **15**
Ruotge Avamumo'a ama ana zankura tagritera huama huno
esera anage hu'ne, **16** Vahe'niarera kasefa hagerafi huvempa
kea ana knareru hugahue huno Ramo'a hu'ne. Nagra kasegea

zamagu'afi nentena antahintahizamifi krentegahue hu'ne. (Jer 31:33-34) 17 Anantera anage hu'ne, Kumi nehu'za kasegema rutagre zamavuzmava nehaza zankura, Nagra mago'ene nagesa ontahigosue hu'ne. 18 Hagi ko'ma kumi'ma atrentenesigeno'a, mago'ane kumikura kresramna ovugosie. 19 E'ina hu'negu nafuheta hanavetita Jisasi koranteti azeri Ruotge hu'nefinka ufrunune. 20 Jisasima tagriku'ma fri'neazamo, kasefa huno asimu eri kama tavravemo runkaniregeno, Ruotgema hu'nefinka kana anagirante'ne. 21 Hagi tagri'ma Mareri Agatere Pristi Ne'mo, Anumzamofo vahetera kegava hu'negu, 22 erinketa tamage tagu'areti Anumzamofontera antahinemita urava'o hamneno. Na'ankure havi tagutagesamofona, Kraisi koranu tagino sesehu agru higeno tavufgamofona sese hurantene. 23 Fore hugahie huta tamentinti nehuta huama nehuna zana azeri hanavetisune. Na'ankure huvempama hurantenemo'a hugahuema hu'neazana amanehu nere. 24 Hagi mago magomotma hanavetita ovesinte avesinte huzanku'ene, knare eri'zama erizankura nentahisunkeno, vahepina eama hanie. 25 Jisasi'ma esia knamo'a kofta nehigu, mago'amo'zama magopima atruma hu'zama netrazaza huta, magopima atruma hu'zana otresune. Tamagra antahinaze, Kraisi'ma esia kofta nehigu, ozeri hanaveti azeri hanaveti hanune. 26 Hagi nafuheta ko'ma tamage kema antahinetama, kumi'ma huvava hanunana, mago'anena ana kumi'ma eriatre kre sramana vu'zana omnegasie. 27 Hianagi Anumzamo'ma refkoma hurante zankura tusi kore nehuta, Anumzamofo ha'renenesia vahe'ma amuhonentake tevefima tasegesagu avega antegahaze. 28 Hagi iz'a'o Mosese kasegemofo agorga'a omanigeno, taremo'o 3'amo'o kete'za ana zanku'ma huama huntege'za, asunkura hunontazanki ahenefrize.

(Diu-Kas 17:2-6) 29 Hagi, Anumzamofo Mofavrema amagena hunemino, hagerafi huvempa kema kumitima sese hu'nea korama ke'amne zankna nehuno, Anumzamofo asunku'zama vahetegama avreno ne-ea Ruotage Avamumofo arimpa knaza erimisia vahe'mofona, tusi'a kefo'za huntegahianki antahiho.

30 Na'ankure tagra antahi'none, Anumzamo'a amanage hu'ne, Nagra nona hu'na hara hugahue. Nagra nona huna mizana zamigahue. Agra mago'ane hune, Nagra nona hu'na mizana zamigahue. Agra ete mago'ane hune, Ramo Agra'a vahera refko huzmantegahie hu'ne. Antahi'none, 31 kasefa huno mani'nea Anumzamo magomofo azeri haviza hu'naku haniana, ana ne'mo'a koro hugahie. 32 Ese'ma Kraisima antahinka kenka hunana knare ete antahigeno vino. Kagesa antahio, tusi'a hazenke zana fore higeno, tusi katazana fore hu'neanagi kamentintia otre'nane. 33 Mago'a zupa vahe avufi kazeri ama hu'za kaheza katazana kami'naze. Anahukna hu'za mago'a zupa zamahe'za zamatama zamiza vahera zamaza hu'nane. 34 Kagra kina nompima zamavarentaza vahe'enena magoka zamagranena katazana enerinka, miko zanka'ama erizagenka muse nehunka, zamatranke'za e'nerize. Na'ankure mevava knare fenozanka'a monafi me'negenka kagra antahi'nane. 35 Hu'negu e'i ana hanave kamentintima Ramofontema hunte'nana zana otro. Na'ankure ana hanave kamentintiretira tusi'a miza erigahane. 36 Akohenka mani'enka knazana erinka vanunka, Anumzamofo avesi nevaririnka, Anumzamo'ma huhampri kante'nea zana erigahane.

37 Na'ankure kofta knafi Egahiema hu'nemo'a avegaonte, ko egahie. 38 Hu'negu fatgo vahe'mo'za zamentintifi manigahaze. Hianagi iza'o amagenama hunamino natre'noma vanimofona musena huontegosue hu'ne. 39 Hianagi Anumzamofonteti

atre'zama nevu'za fanane hanaza vaheknara tagra osanunanki,
tagra hugahunema hu'naza nehuna nagakita, taguvaziza erisuna
vahe mani'none.

11 Hagi amentintima hu'zana, onke'nona zamofo tamage
huno fore hugahie huta amuhama nehuna zane. 2 Korapa
vahe'mo'za zamentinti hu'nazagu, Anumzamo'a fatgo vahere
huno huzmantene. 3 Tamentinti nehunku, Anumzamo'a
ke'areti ama mopane, monanena trohune huta antahi
amara nehune. Ana hu'negu menima tavuma negona zana,
Anumzamo'a nonkona zanteti tro hu'ne. (Jen-Agf 4:3-10.)

(aiōn g165) 4 Ebeli'a amentinti Anumzamofonte nehuno kre
sramana vunte'neazamo, Keni'ma kre sramana vunte'neazana
agaterene. Ebeli'a amentinti higeno Anumzamo'a fatgo
nere huno huso'e huntene. Ebeli'a ko fri'neanagi amentinti
hu'neazamo tagrira meninena hunerasamie. (Jen-Agf 5:21-
24.) 5 Enoku'a amentinti higu Anumzamo'a avregeno ofrineno,
monafinka marerige'za onke'naze. Na'ankure ofrino mani'herera
Anumzamofo avurera fatgo huno mani'negeno, Anumzamo
muse hunteno avare'he. 6 Amentintima omane'nesigeno'a,
Anumzamofo avesizama avaririzamo'a amuho huntegahie.
Na'ankure iza'o Anumzamofontema esimo'a, agra amentintima
haniana, Anumzana mani'neankino, Agriku'ma hakaza vahera
mizana nezamie huno antahino. (Jen-Agf 6:13-22.) 7
Anumzamo'a Noana asamigeno amentinti ana kegura nehuno,
amageanteno tima hagesifima naga'a zamagu vazisigura ventea
tro hu'ne. Fore'ma osu'nea knaza fore hugahie huno Anumzamo'a
asamine. Noama amentinti hu'neazamo, ama mopafi vahe'mofo
kefo avu'avazazmia eriama nehigeno, Anumzamo'a fatgo nere
huno huntene. (Jen-Agf 12:1-8.) 8 Abrahamu'ma henkama

erisinti hareshia kumate vinogu Anumzamo'ma huntogeno'a, inankna kumate vinogu huntene ontahi'neanagi, amentinti nehuno ke amageanteno vu'ne. **9** Hagi Abrahamu'a Anumzamo'ma hunte'nea moparera amentinti nehuno zoka vahekna huno, seli no ome kino umanine. Ana higeno Asaki'ene Jekopukea anahukna huke Anumzamo'a huvempama hunte'nea zana erisintiharegaha'e hunte'nea netrene magoka ana seli nompina umani'naze. **10** Hakare zupa Abrahamu'a amentinti nehuno, henkama hanave ranku'ma Anumzamo retro hunteteno, Agra'a ki'nea ranku'ma erisigu aveganteno manine. **11** Sera'enena tavavategeno avufgamo'a haviza hu'neanagi, amentinti nehuno Anumzamo'ma huvempa hu'nea kemo'a nena'a fore hugahie higu, mofavre kasentene. (Jen-Agf 17:19, 18:11-14, 21:2) **12** Hagi magoke ne' Abrahamu'a ozafarenea nepinti, maka fore hu'naza vahe'mo'za, monafi hanafi kna nehu'za, hagerinkenafi kahepankna hu'za ohampriga'a vahe mani'naze. **13** Ama ana miko vahe'ma fri'nazana, huvempama huzmante'neazana e'orine'za fri'nazanagi, zamagra zmentinti nehu'za, afete'ma ne-eazama kenaza zankura muse nehu'za, ruregati zoka vahekna hu'za emani'naze. **14** E'ina hukna kema nehaza vahe'mo'za, zamagrama umani so'ema hanaza kumaku nehakaze. **15** Zamagrama e'naza kumategama vunakuma antahintahima hazasina, ete e'naza kumatega vazasine. **16** Hianagi knarema hu'nea kumaku nehakazana mona kumare. E'ina hu'negu Anumzamo'a tamagri Anumza mani'noe huzankura, Agra agazea osugahie. Na'ankure Agra mago ranku'ma retro huzmantene. **17** Anumzamo'a Abrahama amentinti reheno kenaku, Aisakina ahenka kre sramana vunanto hu'ne. Huvempa kema huntenemo Abrahamu'a amentinti nehuno, magoke

mofavrea Aisakina ahe fri'za hu'ne. **18** Anumzamo'a Abrahamunku hu'neana, Aisakipinti fore hanaza vaheku, Abrahamu ageheze huno hugahaze huntene. (Jen-Agf 1:12) **19** Abrahamuma agesama antahi'neana, Aisakima ahe frisugeno'a Anumzamo asimura ete amigahie huno agesa antahine. Hagi ana hu'negu nemofoma avreneazamo frizampinti avrenea avame'za huraveri hu'ne. (Jen-Agf 22:1-18.) **20** Aisaki'a amentinti hu'negu, Jekopu'ene Isokea henka'a erisa'a asomu kea huvempa huznantene. (Jen-Agf 27:27-29, 39-40) **21** Jekopu'a amentinti hu'negu, fri'zama nehuno'a Josefena tare mofavreararena asomura hu'nezanenteno kepri huno azompare otineno, monora Anumzamofona huntene. (Jen-Agf 48) **22** Josefe'a amentinti hu'negu, frinaku'ma nehuno'a, hanavetino Israeli vahekura, Isipima atreta vanutma zaferinani'a ramina erineta viho huno huzmantene. (Jen-Agf 50:24-25.) **23** Hagi Mosese nererake nefakea zanamentinti hu'naku, Mosesema kasentegeno'a 3'a ikamofo agu'afina azeri frakintakeno znagranena mani'ne. Na'ankure zanagra ka'ana ana mofavremo'a hentofa mofavre maninegeke, kini nemofo kasegema rutagre zankura korera osu'ha'e. (Eks-Ati 1:22, 2:1-15) **24** Mosese'a amentinti hu'negu, zomareno rama nehuno'a Fero mofamofo mofavre hu'za agrikuma huzankura avesra hu'ne. **25** Anumzamofo vahe'ma zamazeri havizama hazaza hu'za azeri haviza huzanku agesa nentahino, atupa knafi kumimofo kefo avu'avazampi muse huzankura avesra hu'ne. **26** Agra Isipi kumamofo feno erizankura nontahino, Kraisintekuma natama erisuana knare hugahie huno agesa antahine. Na'ankure Anumzamo'ma henkama ra mizama amizanku anara hu'ne. **27** Mosese'a amentinti hu'negu kini ne'mo'ma arimpa ahentezankura koro osu Isipi

mopa atreno vu'ne. Na'ankure agra onkenemofonte avuraga kenteno kazigazi huno vu'ne. **28** Mosese'a amentinti hu'negu, Israeli vahera zamasimge'za sipisipi ahe'za korana nonkafa zamirera frenazageno, Anumzamofo ankeromo'a ozamahe zmagaterene. (Eks-Ati 12:21-30.) **29** Hagi Israeli vahe'mo'za Anumzamofonte zmentinti hu'nazagu, hagege moparema hiaza hu'za hagerina takahenaku hu'nazanagi, ti nakri'naze. (Eks-Ati 14:21-31.) **30** Israeli vahe'mo'za Anumzamofonte zamentinti hu'nazagu, 7ni'a knafina Jeriko kumara kagizageno, vihu keginamo'a fragu vaziramine. (Jos 6:12-21.) **31** Rehapu monko a'mo'agi Anumzamofonte amentinti nehuno, tare afure vahetrena znaza huno zanazeri frakinegu, kuma ane vahe'amo'za keontahiza vahe'ma zamahe frifina agrira ahe ofri'ne. (Jos 2:1-21, 6:22-25.) **32** Hagi na'ane hu'na mago'anena hugahue? Gidionima, Barakima, Samsonima, Jeptama, Devitima, Samueliki, kasanampa vahe'mokizmi zamagenkema tamasamisua knani'a nagrira omne'nene. **33** E'i ana zamentintima haza vahe'mo'za ru kumate vahe'ma ha'ma huzmantazana zmagatenere'za, fatgo zamavuzmava hazagu huvempama hu'nea zana enerizageno, laionimofo zmagira ruhamunki'naze. **34** Zamagra tusi'a tevema nereantevea resu nehazageno, kazintetira zamahe friga osu'naze. Zamagrira hanavezmi omaneneanagi hanave vahe nese'za, hapina hanavetiza ha' vahe zamia zamarotago hu'naze. **35** A'nemo'za zamavesi nentaza vahe'ma fri'nea vahera azeri otige'za nezmavrazageno, mago'amokizmia kanona zamizanagi, Anumzamofona otre kazigazi hu'za amage'anteza nevu'za, zamagra fripinti oti'za knare zmasimuma erisaza zanku antahintahi hu'naze. **36** Mago'amokizmia kiza zokago

ke hu'nezamante'za sefu kanonkeve zamiza zamavufaga
zamahe tragatrogo nehu'za, mago'amokizmi'a seni nofiteti
kina rezmante'za zamavare'za kina hu'nezmantaze. 37
Mago'amokizmia have knonu zamahe nefrizageno, mago'a
mokizmia sonteti refragi tare nehazageno, mago'amokizmi
kaziknonu zamahe fri'naze. Hanki mago'amo'za sipisipine meme
akrute kukena nehu'za, zamagara netegeno, zamazeri haviza
hu'naze. 38 Ama mopafi vahe'mo'za knarerera huozamantege'za,
ka'ma kokampine, agonafine, havegampima, kerigampina
masetere hu'za vano hu'naze. 39 E'i ana maka vahe'mo'za
zmentinti hazagu, Anumzamo'a hugnare huzmantene. Hu'neanagi
Anumzamo'ma huvempa huzamante'nea zana e'orine'za
fri'naze. 40 Ama anazantamina Anumzamo'a knarezantami
retro hurantegeno me'neankino, zamagrama koma erizankura
Anumzamo'a avenosianki, tagranema magoka omerisunegu
retro hurantene.

12 Hagi e'i ana hu'negu korapama Anumzamofontema
zamentintima hu'naza vahe'mo'za, hamponkna hu'za
regagirantenazagu, tazeri knama nehia zane, kumimo'enema
rugagino tazeneria zana netreta, Anumzamo'ma tagima hu'nea
agamareno tragi zokagopina tagareta kazigazi huta vanune. 2
Tagra tavuraga Jisasinte kentesune, tamentintima azeri knarema
huzamofo agafa'a mani'ne. Na'ankure Agranena musezamo
avega'antenegeno, agazegura osuno kazigazi huno knazana
erino keka zafarera vuteno, menina Anumzamofo azantamaga
kaziga mareri agaterenea tratera mani'ne. 3 Hagi kumi
vahe'mo'zama e'inahukna knazama Jisasima amizageno kazigazi
huno erino vu'neazanku, nentahita tamagu'a kragogo onkita
tamentintia otreho. 4 Kumi'ma agaterenaku'ma hama hutama

e'nafina, korana oraginaze. **5** Hagi tamagra tamagekaninazo, Anumzamo'ma tamazeri hanaveti nanekema mofavre naga'agna huno tavumaroma anteneana anage hu'ne, Mofavrenimoka Anumzamo'ma tamavumaroma antesia zankura amnezane huta antahi oza osiho, tamazeri fatgoma hunaku'ma hanave kema nehanigeno'a tamagu'amo'a kragogo onkino. **6** Na'ankure Anumzamo'a avesinte'nemofona, azeri fatgo nehie. Na'ankure Nagri mofavre huno himofona, kano amino azeri fatgo nehie hu'ne. (Prov-Knr 3:11, 12) **7** Anumzamo'a Agri mofavregna hu'nageno knazana neramie hutma nentahita kazigazi huta knazana erita viho. Na'ankure ina mofavremofo nef'a'a avumrora nonte huta hugahune. **8** Anumzamo'a ana miko mofavre zaga'a zamazeri fatgo nehie. Hagi kagrima kazeri fatgoma osanigenka, kagra nerera'ene nef'a omani mofavregna hugahane. **9** Hagi ama mopafi nerafaza tazeri fatgoma hazageta antahinezamune. Hagi tagrama avamupi, Nerafa agorga anteramita manisunana manivava osugahuno? **10** Na'ankure ama mopafi nerafaza antahi'naza avamente onasia kafufima manisunku tazeri fatgo nehaze. Hianagi Anumzamoma tazeri fatgoma nehia zamo'a knare'zantfa hu'negu, Agri ruotage zampina manigahune. **11** Avumroma antezana musezana omane'neanki atafi ufreqahie. Hianagi e'inahukna kantema maninesuno'a, henka mizana arimpa fru erino manigahie. **12** E'ina hu'negu hanave'a omanea kazane kahirahima nerea krena erinte fatgo huo. **13** Hagi kagamoma vania kana erintefatgo nehugen, hanavezmi nomanegeno zamagamo haviza hu'nesia vahe'mo'za, oti hanavenetiza trakara osu'za kavaririza viho. **14** Miko vahe'enena hanavetinka karimpa fru hunka nemaninka, mani ruotage nehunka, agru hunka manio. Na'ankure mani ruotage osunesimo'a Ramofona onkegahie. **15**

Anumzamofo asunkuzampintima evuramizankura ogava agava
hiho. Atrenkeno tamarimpa hezamo'a, tamagu'afina akara heno
hazenkezana avreno omena, anazantetira miko vahe'mo'za
havizana osiho. **16** Atrenkeno kefo avu'avazamo'a tamazeri
traka nosina, koma Isoma Anumzamofo amagena hunenteno,
ese mofavremo eri asomuma atreneakna osiho. **17** Henkama
ana asomuma erinakura agu'areti zavineten, agu'a rukrahe
huno asunkura hu'neanagi agra e'orine. (Jen-Agf 27:30-40.)
18 Tamagra ama mopafi Sainai agonare teve anefa nehigeno,
haninenkigeno, hanave zahoko netigeno, Israeli vahe'mo'za
hu'nazankna agonare ome'naze. **19** Ufeneregogeno, mago
vahe'mo kezatino nehige'za, Israeli vahe'mo'za zamagogogu
nehu'za, Mosesena asamiza hugeno taganeno hu'naze. **20**
Na'ankure Anumzamo'ma zamasimia nanekegura koro hu'naze.
Zagakafamo'enema ana agonarema erava'o hanigenka havenu
ahefriho hune. (Eks-Ati 19:13) **21** Ana zama fore'ma hige'za
ke'naza zankura tusi koro nehazageno, Mosesen enena tusiza
huno koro nehuno, Nagranena nahirahi neregena koro nehue
huno hu'ne. (Eks-Ati 19:12-22, 20:18-21.) **22** Hu'neanagi
kagra ko Saioni agonare, kasefa huno mani'nea Anumzamofo
kumapi monafinka Jerusalemi kumate, hampriga osu'nea
ankero kevumo'za muse hu'za mani'nafi ehanatinane. **23** Hagi
kagra Anumzamofo zage mofavremokizmi zamagi'a monafinka
krentenege'za atru hu'nafi e'nane. Kagra Anumzamofonte mika
vahe refko nehia Nete e'nane. Miza sezamantege'za fatgo
huza agru huza mani'naza vahe'mofo avamuzmimo mani'nea
kumate kagra e'nane. **24** Jisasi'ma amuno ne'mo'ma kasefa
hagerafi huvempa kema huno kora tagitre'nea koramo'a, Ebeli
korana agaterenea Nete e'enane. **25** Hagi kema neramasamia

Anumzamofo kema rutregezankura kava hiho. Na'ankure Israeli vahe'mo'za Sainai agonareti kema zamasamige'za rutagre'nazana Agrira agate'orenazanki, tagra ina'kna huta monafinti kema rutragesunana Agrira agateregahune? **26** Agrama Sainai agonare'ma kema nehigeno'a, agerumo'a ama mopa azeri tore hu'ne. Hianagi Agra huvempa huno, Nagra mago'anena mopagera eritore osugahuanki, monane eritore hugahue hu'ne.
(Hag 2:6) **27** E'inahu kema hu'neana, Anumzamo'ma ana mikro tro'ma hunte'nea zantamimo'a tagosi hanigeno, tagosi'ma osania zantamimo'a mevava hugahie. **28** E'ina hu'negu tagrama e'neruna kumara eri tagosi osu hanavenentake kuma e'nerune. Hu'negu Anumzamofona muse hunenteta, tagu'a anteramita Agri'ma avesinigeno muse hania mono huntesune. **29** Na'ankure tagri Anumzamo'a srasra huno teno erivagare tevegna hu'ne.

13 Hagi mono nagamota ovesinte avesitema hu avu'ava'zantamimo'a meno vino. **2** Ketma antahitama osu'nesaza vahe'ma ne-esagetama nontamifi zamavarente zankura tamagera okanino. Na'ankure mago'amo'za korapara ontahine'za nozamifina zmavrente'nazana, ankero vahe anara huzamante'naze. (Jen-Agf 18:1-19:1) **3** Hagi kina nompima mani'nesamokizmia kagerakani ozmantenka, kagranema kina nompima mani'enoma hiaza hunka, kagesa antahizamio. Vahe'mo'za zamazeri haviza hanage'za zamatazampima mani'nesaza vahe'mokizmia, tamagera akani ozmanteta, tagranema tata zampima mani'enoma hiaza huta knazmia eriho. **4** Aravema huno a'ane ve'anema manifatgoma huno mani'zana, raza amunontamifina meno. Hagi aravema osu' vahe'mo'ma monkozama hanimofone, koma aravema hu'nesimoma atreno, ru vene a'ene monko avu'ava'zama hanimofona, Anumzamo keaga

huzmantegahie. 5 Hagi zagogu'ma avesi avesi huntezankura kava huo, anama erinesanama'agura museho. Na'ankure Anumzamo'a anage hu'ne, Nagra kagrira onkatre'na, Nagra namagena huogamigahue hu'ne. (Diu-Kas 31:6-8, Jos 1:5)

6 Hu'negu tagra antahinemita, hanavetita anage hugahune, Ramo'a nazahige'na mani'nogu nagra korera osugahue. Na'a vahetfamo'a hunantegahie? hugahune. (Sam-Zga 118:6) 7 Hagi vugotama huramante'naza vahe'mo'zama Anumzamofo nanekema tamasm'i'naz kegu tamagesa antahiho. Nomani zazmia refako huta negeta tamentintifina, zamagrikna huta maniho. 8 Jisas Kraisi'a okima mani'neakna huno menina mani'neno, anahukna huno hakare'a knafina manivava hugahie. (aiōn g165) 9 Hu'negu atrenkeno ruzahu ruzahu kasefa antahintahizamo'a tamavazu huno afetera ovino. Tamaguamofona atrenkeno Anumzamofo asunkuzamo tamazeri hakavetino, mago'amo'za zamavu'zmava'zama avaririza ne'zama retro'ma hu'za nezamo'a, tamazeri hanavea notie. 10 Kresramanavu itatia, tagrira me'neankino, seli mono nompima eri'zama eneri'za pristi vahe'mo'za onetfa hugahaze. 11 Jiu vahe'mokizmi zamavu'zmavapina vugota pristi vahe'mo'za kumimofo nona hu'za zagagafamokizmi korana eri'za ruotage'ma hu'nefinka unefraze. Hianagi zagagafamofo zamavufaga eri'za kuma'mofona fegi'a negraze. (Lev-Pri 16:27) 12 Ana hu'negu Jisasi'a vahe'amokizmi kumizmi zamazeri agruma huno zamazeri ruotge hanigura, rankumamofo kasampinti atiramino fegia avufga aguzaruno korana tagine. 13 Hu'negu kuma'mofo fegu'a Agrite nevuta, Agrama hu'neaza huta tagazezana erigahune.

14 Na'ankure ama mani'nonana rankumatia zoka kumate mani'none, hu'negu tagra henkama ne-ea rankumaku avega

anteta mani'none. **15** Ana hu'negu Jisasi Agifi, tagrati tavufga Anumzamofona ami vaganereta, ra agia ami vava nehuta, Agri Agima tagipinti huama hunazamo raga'a fore nehie. **16** Hagi knare tamavu'tamavama nehuta, atupama hanaza vahe'ma zamaza huzankura tamagera okaniho. Na'ankure e'inahukna avu'avapima tagra'ama amivagareta amizankura, Anumzamo'a muse nehie. **17** Hagi vugotama hurmantenesimofona agorga nemanita, ke'zamia amage anteho. Na'ankure zamagra tamogra tamagu'are kegava nehu'za, henkama Anumzamofo refako huzampina tamogra tamagenkema hu'ama hanaza vahe mani'naze. Hagi ana eri'zama erisazana zamatrenke'za musezampinti e'neri'za zamata e'oriho, na'ankure ana zamo'a tamaza osugahie. **18** Nunamuna huranteho, tagra antahunana antahintahitimo'a ama' hu'negeta mikazama hanumpina fatgoza hanunegu tavenesie. **19** Nagra hanavetina tamantahigoanki, nunamu nehinkena tamagritega koftahu'na aneno. **20** Hagi arimpa fru Anumzamo, ugagota sipisipi afu kva ne' Ranti Jisasina fri'nefinti azeri oti'nemofo korama'areti, mevava hagerafi huvempa ke hu'ne. (*aiōnios g166*) **21** Agri avesizama'a avaririzantema upama hanarerera, maka knare zama'areti tamazeri knare hugahie. Hakare'zana Jisas Kraisimpi nehanunkeno Anumzamo'a muse hanie. Hakarea ra agia Agrake erivava hanie. Tamage. (*aiōn g165*) **22** Hagi nafuheta hanavetina ama atupa avoma kreramuana tamagesa antahi'so'e hiho. **23** Nagra tamasamuana, ko nerifu Timotina kinafinitira kazufetre'naze. Agrama esige'na, avare'na tamagritega vugahu'e. **24** Kava vahetamine, maka mono naga'motarega musenke atreramantoe. Italima mani'naza mono naga'mo'zanena musenkea hurmantaze. **25** Anumzamofo asunku zamo'a maka nagamotare mesie.

Jemisi

1 Hagi Jemisi'na Anumzamofone Ranti Jisas Kraisi kazokzo
eri'za ne'mo'na, 12fu'a naga'nofi'ma mopa atretma kokankokama
umani emani hu'naza nagamotarega, ama avona kreneramue. 2
Nenafugta knazampima ufresutma, muse zane hutma tamagesa
antahiho. 3 Na'ankure tamagra antahi'naze, tamentintima
reramaheno ke'zamo'a, knazampima oti hankavetineno, knazama
kazigazi huno erino vu'za erifore nehie. 4 Hagi maka kna tamagra
oti hanavetita, knazana erita nevinkeno, ana tamavutmavazamo'a
hanavetino nevina, Anumzamofo avu'ava'ma huzampina,
atupara osnageno, fatgo huno knare hugahie. 5 Hianagi
iza'o knare antahintahigu'ma atupama hanuno'a, Anumzamofo
antahigenkeno amino, maka vahe'mo'za nunamu hu'za Agri'ma
antahigazamokizmia, rimp a heozmante amne nezmiankino, amne
tamigahie. 6 Hu'neanagi antahigesimo'a, amentinti nehuno tare
agu'agesaretira antahionkeno, na'ankure tare agu'agesareti'ma
antahigemofona, zaho erino hage rimomofo eri kranto kranto
hiankna nehie. 7 E'inahu vahe'mo'a Ramofontegati mago'zana
erigahue huno agesa ontahino, 8 agra tare antahintahine vahe
mani'neankino, mika zama hifina magoke kante anteno nosie. 9
Hagi mago'mo amunte omne'nenigeno, Anumzamofo amage
nentenimo'a muse hino, Anumzamofo avurera ra agi erine.
10 Hu'neanagi Anumzamo feno ne'ma azeri anteramisigeno
mani'nesimo'a musehino. Na'ankure feno vahe'mo'za trazamofo
amosre'amo hianka hu'za ko fanane hugahaze. 11 Na'ankure
zagemo'a amuho'ane marerino, ana trazana te hagage higeno,
amosre'amo'a hagage huno evuramigeno, konariri'amo'a fanane
nehie. Anahukna hu'za feno vahe'mo'za, ana fenozmine
fanane hugahaze. 12 Hagi Rehe'za ne-esigeno kazigazi

huno agatereno vania vahe'mo'a asomu'ma erisiana, kini fetori eriankna huno manivava asimura erigahie. Anumzamo'a agri'ma avesinentaza vahe ko huhampri zamante'nea, asimu erigahie. **13** Mago zamo'ma avazu hanigeno rehezampima ufresuno'a, kefo avu'avazanteti Anumzamo'a renahenoke huno huonteno, na'ankure Agra mago vahera havi avu'avatetira reheno onkegahie. **14** Hu'neanagi mago magomofona agri'a kefo avesi'zamo, avazu huno rehezampina avarenente. **15** Hagi havi avu'avazahu avesi'zamo, a'nemo amu'ene hiankna higeno, kumi erifore higeno, kumi'mo hagerama nehuno'a, fri'za eri fore nehie. **16** Navesineramantoa nafuhetma tamagra'a reramatga osiho. **17** Mika knare huno fatgo hu'nea, musezana anagamuti eneramie, monafinkati masazamofo Nefantegati ne-ea, avu'avazama'amo zahe osuno turunamo hiankna huno zaza huteno, atupa huteno osugahie. **18** Mika'zama tro'ma hu'nea zamofo ese raga'a manisunku, Agra'a avesite tamage kereti tazeri fore hu'ne. **19** Hagi knare nafuheta, ama kea antahi so'e hihio, mika'motma ame hutma kea antahigahazanagi, akoheta kea nehinkeno tamarimpa oheno. **20** Na'ankure vahe'mofo rimpa he'zamo'a, Anumzamofo fatgo avu'ava zana avreno omegahie. **21** E'ina hu'negu mika agru osu avu'ava zana erinetreta, tamagu'afima kefo avu'avazama me'nesiana erinetretma, anteramitma, tamagu tamema tamaguma vazisia nanekema Anumzamo'ma tamagu'afima hankre'neana eriho. **22** Amnea Anumzamofo Ke'agera ontahio, kagraka'a regavatga hugahananki, ana nanekemoma hania kante antenka amage anto. **23** Mago'mo'ma kema nentahino, ana kema amage'ontesiana, agra kapopi avugosa keteno, **24** atreno nevuno anama agra avugosa ke'neana, ame huno agenekania kna nehie. **25** Hu'neanagi,

inamo'ma kinafinti tazeri fru nehia, hentofa kasegefima
avuma ke ankenereno, kazigazi huno avaririno antahi'nesia
naneke age'okanino amage'antesimofona, mika'zama hanifina
Anumzamo'a, asomu huntegahie. **26** Mago'moka mono
vahe'mani'noe nehunka kagefu'na kegava osnanana, kagra'a
regavatga hanankeno mono kamo'a amnezankna hugahie. **27**
Agru huno fatgo monoku'ma Anumza Nafatimofona ave'nesiana,
e'i megusa mofavre'zagane, kento a'ne zaga knazampima
mani'nesazana kegava hunezmanteta, atrenkeno ama mopafi
kefozamo'a tamazeri pehena osino.

2 Hagi nafuhete, hanavenentake masa'ane Rantimofo Jisasi
Kraisimpi tamentinti nehaza vahe'motma, rezogitma mago
vahekuke tamavesi onteho. **2** Atru hu'nesafima mago feno
ne'mo hentofa kukena erinehankreno, korire asa eri'nentanino
efresnigeno, mago amunte omane ne'mo pehenage kukena huno
mono'ma nehanafima efresiana, **3** hentofa kukena huno ea feno
ne'mofo kesga huntenga anage nehane, ama knare trate emanio
nehunka, amunte omane pehenage kukena huno ea ne'ku, amure
otio huge ama nagafi mopare emanio nehane. **4** Tamagra'a
amu'nontamifina vahe zamazeri havizahu naneke nehutma, kefo
antahizanteti vahera refako nehazafi? **5** Antahiho, knare nafuheta,
Anumzamo'a ama mopafi vahe zamavufi zamunte omane vaheku'
zamentintifi feno vahere huno huhampri zamanteno, Anumzamofo
kuma erisanti haregahaze huno Agri'ma avesinentaza vahe
huvempa huozmante'nefi? **6** Hu'neanagi zamunte omane nagara
zamazeri haviza nehaze. Feno vahe'mo'za knaza neramami'za,
tmavare'za naneke hu tratera nevazafi? **7** Jisas Krais Knare
agil'ane Ne'mofo nagama mani'nazana, zamagra zamazeri haviza
osu'nazafi? Izo zamagra zamazeri haviza hu'naze. **8** Fatgo

hutma avontafepima me'nea kasegema amage'antesnutma,
Tavaontamire'ma nemanisaza vahe'mokizmia tamagraguma
tamavesi nentesazaza hutma rumokizmia tamavesi zamanteho,
anama hanutma tamage avu'avaza hugahaze. **9** Hu'neanagi
rezogitma mago vahekuke tamavesi antesazana, kumi
hanageno kasegemo'a tamazeri ama'hina, kasegea hantagi
vahe manigahaze. **10** Na'ankure, aza'o ana mika kasegema
amage'nenteno, anampinti Anumzamofoma magoke kasege'a
ruhantagisiana, ana mika kasege ruhantagigahie. **11** Na'ankure
Rumofo vene, a'ene monko'zana osiho huno hu'nea Anumzamo
Vahera ahe ofriho huno hu'ne. E'na hu'negu kagrama
rumofo vene, a'ene monko'zana osugahananagi, vahe'ma ahe
frisazana e'i kasege hantagi vahe manigahane hu'ne. **12**
Hagi keagatamifine, tamavu'tamava hanafina, kinafinti tamavre
atre'nea kasegemo refako hurantegahie hutma antahiho.
13 Na'ankure vaheku'ma kasunku huozmante vahe'moka,
Anumzamo'a asunkura huogantegosie. Hianagi kagrama
vahe'mofoma kasumantagintesanana, Anumzamo'a kagri'enena
asuragigante'nna vahe'ma refko huknarera, keaga hugante
kemofona agateregahane. **14** Hagi nafuhetma, mago ne'mo'ma
namentinti nehue nehuno, ana amentintima avu'avapima erinteno
osaniana nankna azahu'za erigahie? E'inahu amentintimo'a
aguuvazigahifi? I'o. **15** Magoke magoke knazupa mago negafu'o,
negasaro'ma kukenaguro, ne'zankuma atupa hu'enigenka, **16**
knareki vuo nagesa antahuana Anumzamo'a knare hugantegahie
nehunka, knare kukena nehunka ne'zana negamu huo hunka
hunentenka, atupama hunesiazama azama osnanana, e'i kemo'a
inankna huno aza hugahie? **17** Amentinti hu'zamo'enena e'inahu
kna hu'ne, tamentinti nehune nehuta, avu'avapima erinteta

osanunana, tamentintimo'a amne'zankna hugahie. **18** Ana hu'neanagi mago'mo'a anage hugahie, mago'amokizmi zamentinti me'geno, mago'amokizmia knare eri'zama eri zamavu'zamava me'ne. Nagra anage nehue, knare erizanka'a omnesigena, nagra kamentintia onkegosue. Hianagi nagra knare eri'za niareti kagrira, namentintini'a kaveri hugahue. **19** Tamagra magoke Anumza mani'ne hutma tamentinti nehzana, e'i tamage, havi hankro'mo'zanena anahukna zamentinti nehu'za, kore nehu'za zamahirahi nerege'za mani'naze. **20** Kagra negi nagi vahere! Antahi ama'ma huzankura nontahino, eri'zama'a omane kamentintimo'a amnezankna hugahie. **21** Nerageho Abrahamu nemofo Aisakima kresramanavu itare, Anumzamofoma ami'nea zanku'ma, fatgo nere huno hu'neana ontahi'nazafi? (Jen-Agf 22:1-14) **22** Antahi ama huo, Abrahamu'ma amentintima hiazamofona avu'avapi erinteno, ana avu'ava higeno amentintima hu'neazana erignare hu'ne. **23** Hagi avontafepima hu'nea kemo'a before hu'ne, Abrahamu'a Anumzamofonte amentinti higeno, Anumzamo'a fatgo nere hunte'ne, ana hu'negu Anumzamofo rone'a mani'ne hu'za vahe'mo'za nehaze. (Jen-agf 15:6.) **24** Ana hu'negu antahiho, tagra Anumzamofo avure'ma fatgo vahe'ma manisunana, tamentinti'retikerompage, tamentintima nehuta tavutavapima erinteta hanunkeno, fatgo vahere huno hurantegahie. **25** Anahukna huno, Rehappu monko a'mo'a afure vahe'ma noma'afi zamavare frakiteno, ru kampinti zamavare atrege'za vu'naza avu'avazama'amo, Anumzamofo avure fatgo ara mani'ne hu'ne. (Jos 2:1-21) **26** Tavufafima tasimu'ma omanesiana frigahune. Hanki anahu'kna huno tamentiintige nehuta, tavutavapima eriontesunkeno'a, tamentintimo'a frino amne'zankna hugahie.

3 Hagi nena fugtane nasarahetanena rempi huzami vahera rama'amota manisune hutma ontahiho, na'ankure tamagra ko antahi'naze, maka rempima hunezamumota Anumzamo'a hanavetino keaga hurantegahie. **2** Na'ankure rama'a zampi havizana nehune. Hagi iza'o agrama kema hanifima fatgo osu kegaga huzanku'ma kva'ma hanimo'a, agra soe ne'kino amne mika avufgamofona kvahu so'e nehie. **3** Hanki osi ainia hosirimimofo zamagipi tamage'antesie huta nofi renteta, zamazeri rukre hanunkeno'a, amne hosimofo mika avufgamo'a tamage'anteno rukre hugahie. **4** Hagi vente'mofone keho, tusi'aza me'neanagi ra zahomo retunefe. Hianagi osi zotareti, inantego ventema azeri ne'moma vunakuma hirega, azeri rukre higeno nevie. **5** Hagi anahukna huno agefuno osi avufgamo'agi, tusi'a veganokno ageru rugahie. Osi teve regregeno, ra avo'no traza afe teaza hugahie! **6** Hagi tagefunamo'a tevegna hu'ne. Tagefunafina kefo kemo avite'neankino, amne ana miko kavufamofona eri haviza hugahie. Amne ana miko kavufga teve kampina avrenente. Ana tevea teve kuma'mo taginte'ne. (**Geenna g1067**) **7** Na'ankure mika ruzahu ruzahu afi' zagakfama, namazagama, zmasaguregati regrarohe'za vano nehaza zagaramima, hagerimpi zagamofona vahe'mo'za azeri agazone neheze. **8** Hianagi vahe'mo'a, agefunamofo kegava krino, azeri agazonea osugahie. Vahe'mofo azeri fri avua tagazamo avitegeno, kefo kemoke atirami vava hugahie. **9** Tagnefunanu Rantimofone, Anumzanena ra zanagia nezanamita, ana tagnefunanura Anumzamo'a Agragna retro huzmente'nea vahe'mokizmi sifna kea hunezmantone. **10** Ana agipintike asomu kene, sifna kenena atineramie. Nenfugta nasarehetanena e'inahu'zana omneno. **11** Amne magoke kampuipintira, tintfane,

hagerinena ehanatigaha'o? **12** Nenfugata nasarahetanena, fiki zafamo'a olivi raga amne rentegahifi, krepinofimo fiki raga rentegahio? I'o. Anahu kna huno hagerimpintira tintfana fore osugahie. **13** Hagi iza amu'nontamifintira ama antahintahine mika zampima anihu vahera mani'ne? Ana knare antahintahi'a atrenkeno knare eri'zama'amoki, avufa anteramino mani avu'ava zamo, erinte ama hino. **14** Hianagi vahe'mofoma antahimugi ante'zamo'ene kagraguke antahizamo kagu'afi mevitenenigenka, kavufga mareri kavukvatetira tamage kemofo eri amnezanknara osuo. **15** E'inahukna havi antahintahizana, monafintira nomeanki, ama mopafi kefo hankrotegati ne-e. **16** Krimpa mugj'zane, kavufa antemarer'i'zama me'nesifina, miko'mako havi fatgo osu'zana me'nениgenka kegahane. **17** Hu'neanagi monafinti erami'nea knare antahintahizana, ese'zana agru huno mani antahintahiza me'ne. Rimpa fruma huno mani'zane, miko kna akoheno mani'zane, rumofo ke antahimi'zane, asunku hu'zane knare'zane aviteno nemanie. Mago'mofonkuke hu'zana omaneno tamage avu'avake hu'zane. **18** Rumokizmima zamarimpa fruma erinezamiza vahe'mo'za, zamarimpa fruzamofo avimaza nehankrazanki'za, nena'ama vasagesazana fatgo avu'avaza hamaregahaze.

4 Hagi na'amo amu'nontamifina kefra hu'zane, ha' hu'zana eri forenehie? Havi tamavesi'za tamagu'afi me'neno ha'nerea zampinti efore nehifi? **2** Mago'a zanku tamave'nesigetma kenunu nehazanagi e'norize. E'ina nehutma vahera zamahe nefrizanagi anazana e'norize. Rumofo zankura ke hakare nehutma franevazitma hara nehazanagi, mago'zana e'hor'i'ze. Na'ankure Anumzamofona tamagra nunamuna hutma antahinonkaze. **3** Tamagrama antahigaza zana e'norize, na'ankure knare osu

antahintahireti antahigazagu e'norize. Anama tamisia zana eritma tamagrimalamavenesia zante atregahaze. 4 Tamagra monko a'nemo hiankna hutma, ru anumzante mono hunentaza vahe'motma, ama mopafi avu'avazamofonte'ma tragoneteta ana avu'ava'ma hanazana, Anumzamofona ha'rentegahazanki tamagra ontahi'nazo? E'ina hu'negu iza'o ama mopafi zante tragotesimo'a, Anumzamofo ha' vahe fore nehie. 5 Avontafemo'a anage hu'neana, amne ke hu'nefi? Anumzamo'ma Avamu'ama tagu'afi antegeno mani'neana, Agri agorga manisiegu avenesie. E'ina'ma osigeno'a rimpagna nemie. 6 Hu'neanagi agra razampi asuraginerante, e'ina agafare avontafemo'a anage hu'ne, Anumzamo'a zamufga antemareriza vahe ha'renezmanteno, zamufga anteneramiza vahera asuraginezmante. 7 E'ina hu'negu Anumzamofo agorga anteramita nemanitma, Satana ha'renteta retufe atrenkeno tamatrelo freno. 8 Anumzante erava'o hinkeno, Agranena tamagaritera erava'o hino. Kumi vahe'motma tamazana sese nehutma, tare tagufa antahintahine vahera tamagu'a eri avusese hiho. 9 Kumima nehaza zankura tamasunku nehutma, krafa hutma zaviteho. Kiza zokagoma nehazazana netretma, zavi krafa nehutma musema nehaza zana atretma tamasunku hiho. 10 Anumzamofo avurera tamagra tamavufga anteraminkeno, Agra tamazeri sga hino. 11 Hagi nafuhetma, huhaviza ohunte ahunte osiho. Iza'o nefuma huhaviza huntege refakoma huntesimo'a, agra kasegemofo huhaviza nehuno, refako nehie. Kasegema refako'ma hananana, kasegea amage nontananki, kasege refako hu vahe nemanine. 12 Kasege neramino, refakoma hurante Nera Anumzana magoke mani'ne, Agrake tagu'vazige, tahe fanane huge hugahie. Hu'neanagi tamagra azagata neramafuna refako hunentaze? 13 Hagi

menina antahiho, anahukna kema nehzamotma, menino okino rankumapi vuta, mago kafufi umanineta, zago eri'za omerita, mago'ane zagoa (win moni) trohugahune huta hugahaze. **14** Hagi okima tamagrite'ma fore'ma haniazana ontahi'naze. Tamagra nanterampi hamponkna hu'nazankitma osi'a kna manitetma fanane hugahaze. **15** Tamagra anage hugare, Anumzamofo avesi'ma me'nesigeta, tagrama tasimu erita manisuta, e'izana huge, amazana hugahune huta hugaragi, **16** knare hu'none hutma tamufaga marenerize. Ana mika tamufga mareri'zana kefo avu'ava'za nehaze. **17** E'ina hu'negu, iza'o fatgozama hu'zama antahineno, anazama osanimo'a kumi hugahie.

5 Hagi menina kea antahiho, feno vahe'motma, tamasunku huta zaviteho. Na'ankure tamazeri haviza hu'zana tamagrite ne-e. **2** Tamagri feno zantamimo'a kasrigeno, hakanomo kukenatamia traga nehigeno, **3** goline silva zagotamimo'a krogru heno amnezankna hu'ne. Fenozana eri atru nehzankino, kegaga refkohu knazupa ana krogru he'zamo'a, tevegna huno tamavufga teno erihna hugahie. **4** Antahiho, hozatamifi eri'za eneriza vahe'mofo, mizama ozami'naza mizamo'a ranke huno keaga huneramante. Hoza hamare vahe'mofo zavi krafagemo'a, hanavenentake Ramofo agesafi unefre. **5** Ama mopafima manizana so'e nomanizampi nemanitma, mika tamavesi'zana eriknare nehaze. Tamagra knare neza nenetma tamazeri afovage nehutma, tamahema fri'nianknare neaze. **6** Tamagri'ma ha'ma huoramante'za hazenkezmia omne vahera, huhaviza hunezamanteta zamahe nefrise. **7** Hagi nafuhetma, tamarimpa antefru hutma mani'netma, Ramo'ma esigura avega anteho. Hoza vahe'mokizmi zamageho, zamarimpa antefru hu'za mani'ne'za, hozazamifima ese ko runtege, vagare ko

runtenige'za hozazmifinti knare nezama hamarenaku avegama
nentazankna hiho. **8** Tamagranena akohetma mani'netma
oti hanavetiho, na'ankure Ramo'ma esania knamo'a kofta
hu'ne. **9** Nafuhetane nasarahetanena, keaga refkohu trate
otisageno refako huramantegahianki amu'nontamifina ha' orente
arente osiho. Refako hu nera kafante otine! **10** Nafuhetma,
Anumzamofo Agifima nanekema hu'naza kasnampa vahe'mo'za,
akohe'za manine'za knazama eri'zamofona ko huraveri'naze.
11 Antahi'naze, knazampima ufre'za azeri agatere'naza vahera
muse hiho hunezamantone. Jopu'ma knazampima kazigazi
huno agatere'nea zamofo agenke'ane, henka'ama hunte'nea
zamofona antahi'naze. Ramofompina asunku'zane, vahe'ma
avesinteno asuraginte'zana avite'ne. **12** Razana, nena fugatane
nensarogata, monarero moperero mago'azantera huntetma
huvempa osiho. Iza'o huvempa hunaku'ma hanimo'a, izoma
hunakure hanimo'a, i'zo hino, i'o hunakuma hanimo'a, i'o
hino, ana'ma osanimo'a henka keagare otigahie. **13** Hagi
amunontamifima magomo'ma hazenkefi mani'nenu no'a, Agra
nunamu Anumzamofonte hino. Amu'nontamifima mago'mo'ma
musema nehanuno'a, agra Ramofo agi erisagahu zagame
hugahie. **14** Amunontamifina mago'mo'ma krima erinenuno'a,
Agra mono kva vahe ke hanige'za, nunamu eme hunente'za
Anumzamofo agifi masave frenteho. **15** Hagi zamentinti
nehu'za nunamu huntesageno, Ramo'a kri'ma eri'nea vahera
azeri neganamreno azeri onetino, kumi'ma hunesiana, kumi'a
atrentegahie. **16** E'ina hu'negu kumitamia huama hutma kumira
otrente atrente nehutma, nunamuna ohunte ahunte nehinkeno,
Ramo'a tamazeri kanamareno, fatgo ne'mofo nunamumo'a
hanavenentake hu'neankino eri'za erigahie. **17** Elaija'a tagri

kna ne'mo, ko'ma orinogura hanavenentake huno nunamuna
higeno, mopafina 3'a zagekafugi 6si'a ikampina kora oru'ne.

18 Eteno Elaija nunamu higeno monafinti komo'a tagiramino
mopafina korarigeno kavera fore hu'ne. (1 Kin 17-18) **19**
Nafuhetmane nasarahete, mago'tamimo tamage nanekea atreno
hazamagrenesigeno, mago'mo azeri rukrehema hanigeno,
ete tamage kantema esiana, **20** agra antahino, fri'zampinti
agu'nevazino rama'a kumira refitegahie.

1 Pita

1 Hagi nagra Pita'na Jisas Kraisi aposol ne'mo'na, Anumzamo'ma huhampri tamente'nea naga'motma, mopatmi atretma panini hutma Pontusi kazigane, Galesia kazigane, Kapodosia kazigane, Esia kazigane, Bitinia kazigama fretma vu'naza naga'motarega ama avona kreneramue. **2** Anumzana Tafatimo'a, ko antahino keno hu'nea kante, Ruotge Avamumo tamazeri agru hu'nea naga'mota, Jisas Kraisi amage'ma antageno, korama'a tagitreno sese huramante'nea nagamotma, asunku'zane rimpa fruzamo'a tamagrane aviteno mesie. **3** Hagi Ranti Jisas Kraisi Nefa Anumzamofo agi'a erisaga hanune, Agri'a tusi'a asunku'zamo higeta, tagu'a rukrehe hunkeno kasefa tasimura tamigeta, Jisasi'ma friteno oti'nea zankura amuhara nehune. **4** Ana kasefa tasimu erisanti hare'nunana, vaga oreno, havizana osuno, fananene osaniaza monafinka Anumzamo'a anteramante'ne. **5** Tamagra Anumzamofonte tamentinti hazageno, Anumzamo'a hanave'areti kegava huramante'neankita, so'e hutma manigahaze. Tamagri tamahokeno tamaza hunaku retro huntogeno me'neankino, e'i anazama haniana mona mopa vagamare'nea knazupa eama hugahie. **6** Anazama erisaza zankura muse nehazanagi, ama atupa knafina ruzahu ruzahu knazama e'nerisageno, **7** ana knazamo'a tamentintimofona azeri ama huno, golima tevefi kre agru huno azeri hentofaza hiankna nehiankino, tamentintimo'a goli'a agaterene. E'ina hu'negu ruzahu ruzahu knazama e'nerisageno, tamentintimo'ma hanavematino mesiana, Jisasi'ma eama hania knazupa, husga huramanteno, ra tamagia tamigahie. **8** Hanki tamagra Agrira onke'nazanagi avesinentetma, menina Agrira onkenazanagi, Agritera tamentinti nehuta, tusi musenkase

huneta agi'a erisaga nehaze. **9** Tamagrama tamentintima hanaza zamofo mizama'a, Anumzamo'a tamagu tamamena tamagu vazigahie. **10** Hagi ama ana tahokeno taguvazizana, korapara mago'a kasnampa vahe'mo'za asunkuzamo'ma tamagrite'ma esigura kasnampa kea nehu'za, antahige'za rezagane so'e hu'za ke'naze. **11** Kraisi Avamumo zamagripi mani'neno, Kraisi'ma atama eriteno, ra agima erisia zankura zmasami'ne. Ana nehige'za zamagra Kraisi'a inankna Ne'mo, ina zupa efore hugahie hu'za hu'naze. **12** Zamagrite'ma eriamama hiana zamagra'a zamaza nosazanagi, tamagriku Knare Musenkema huama hazafina, monafinti'ma e'nea Ruotge Avamumofo hanavere huama nehaze. Ankero vahe'mo'za anama huamama hzazama kesagura, tusiza huno zmavesi'ne. **13** E'ina hu'negu retro huta antahintahitamia nemanita, tamavufgamofo avesizana kegava negritma, ana miko amuha zantamia, Jisasi'ma eama hanigeno, Anumzamo'a tamaza hania asunkuzante anteho. **14** Ke amage'ante mofavremo'za nehzaza nehutma, koma ontahinetma hu'naza tamavutamavamofo avesizana ovaririho. **15** Hianagi Ruotge Hu'nemo'ma tamagima hu'nea ne'kna nehuta, maka'zama hanafina mani ruotge hiho. **16** Na'ankure anage huno avontafepina krentene, Tamagra ruotge huta maniho, na'ankure Nagra ruotge hu'noe. (Lev-Pri 11:44-45) **17** Tamagrama hutma nerafa'e nehaza Anumzamo'a, Agra magokemefonkuke osu Anumzankino, maka vahe'mo'za zamavuzmavama nehzare refkoa huzmantegahie. Ana hu'negu, ama mopafima zoka vahekna huta atupa knafima mani'nenerera, Anumzamofonku kore hunentetma ra agi amiho. **18** Na'ankure tamagrama ketma antahitama hanazana, korapa tamagehe'za zamaza osu zamavu'zmava nehaza kante nevazagu, anampinti

mizaseramante'ne. Miza seramante'neana haviza nehiazanu, silvane golireti miza seoramante'ne. **19** Hianagi haviza osuno afuhe omne sipisipi anenta, Kraisi korana marerisa mizanteti mizana seramante'ne. **20** Na'ankure korapa Anumzamo'a, monane mopane tro osu'neno, tazama hanigura Kraisina huhamprinte'ne. Hianagi menina vagare knafina tamagri'ma tamaza hanigu efore hu'ne. **21** Kraisi taza higeta, fripinti azeri otino husga hunte'nea Anumzamofontera tamentintia nehune. E'ina hu'negu tamagra Anumzamofontera tamentintia nehutma, amuhara nehaze. **22** Tamagrama tamage kere'ma amagema antetma nevazazamo, tamazeri agru tamagu tamena higetma, neramafuma ovesinte avesinte tamagu'areti nehutma, tamaguareti hutma mago magomota ovesinte avesintea nehaze.

23 Na'ankure tamagra kasefa'ma hu'nazana, haviza nehia avimazanteti rompage, haviza osu avimzama Anumzamofo mevava kea asimu me'nea ke'areti kasefara hu'haze. (Jon 3:1-9)

(aiōn g165) **24** E'ina hu'negu avontafepina anage hu'ne, Maka vahe'mo'za trazankna hu'nazankino, maka konariri zamimo'a trazamofo amosregna higeno, ana trazamo hagege higeno, amosre'amo evuramiankna hugahaze. **25** Hianagi Anumzamofo nanekemo'a mevava hugahianki'za, ama'i ana naneke huama hu'za tamasami'naze. (Ais 40:6-8.) (aiōn g165)

2 Hagi e'ina hu'negu tamagra vahe'ma azeri havizahu avu'avazane, havige hu'zane, tavrenke hu'zane, kenunu hu avu'ava'zane, vahe'mofo amefi ke hu'zana netretma, **2** meni kasentea mofavremo aminku avesiankna hutma Anumzamofo kegura tamavenesita, Anumzamofo agru hu'nea nanekea e'neritma nena hugahaze. Ana nehanageno tamagu vazino'ma, tamahoke ahe'nea zampina nena hugahaze. **3**

Hanki e'inama hutma Anumzamo'ma so'ema huneramantea
zamofo haga'ama erisuta, Ramo'a so'e hu'ne hutma hugahaze.

4 Hagi Kraisi'a asimu eri have mani'nemofonte tamagra
Agrite neaze. Ana havea vahe'mo'za haviza hu'ne hu'za eri
atrenazanagi, Anumzamo'a huhamprintegeno, Agri avurera
mrerisa have me'ne. 5 Tamagranena asimu eri havegna
hu'nazageno, avamupi mono nona kiaza nehitgetma, avamupi
ruotge pristi vahe'mofo nonkna nehutma, Anumzamo avesi'nea
ofa Jisasimpi avamupina hunentaze. 6 Na'ankure anage huno
avontafepina me'ne, Keho Zaioni agonarera marerisa have
huhamprintoankino, nomofo renagentete azeri hanaveti have
me'ne. Hanki iza'o Agrite'ma amentinti hanimo'a, agaze osugahie
hu'ne. (Ais 28:16.) 7 Hanki tamagrama tamentintima haz
vahe'motarera, ana havemo'a mrerisa have me'ne. Hianagi iza'zo
zamentintima nosaza vahetera, Nogi vahe'mo'za zamavresara
higeza atraza havemo'a, nomofo renagentepinka azeri hanaveti
have fore nehuno, (Sam-Zga 118:22) 8 zamagigo zamin
zamazeri tanafa nehuno, zamazeri traka hu have fore hu'ne.
(Ais 8:14) Na'ankure zamagra trakama nehazana, ke'arera
amagera nontazanki'za, traka hu'za haviza hugahaze. 9
Hianagi Anumzamo tamagrira huhampriramante'nea naga
mani'neta, kinimofo pristi naga mani'neta, ruotge hu'nea naga
mani'nazageno, Anumzamo'ma Nagri nagare huno hu'nea
naga mani'nazankita, Anumzamo'ma hanimpinti'ma tamagima
huno, ruzahu masazama'are'ma tamante'nea so'ezama'agura
huama hugahaze. 10 Hianagi kora tamagra Anumzamofo
vahera omani'nazanagi, menina Anumzamofo vahe mani'naze.
Tamagra Anumzamofo asunkuzana e'orinazanagi, menina
tamagra Anumzamofo asunkuzana eri'naze. 11 Hagi navesima

neramantoa nena fugta, tamagra zoka vahe mopazmi omne
vahekna hutma ama mopafina mani'naze. E'ina hu'negu,
tamavufamofo havi avesizamo'ma ha'ma reneramantea zampina
uofreho hu'na nagra huneramasamue. **12** Hagi maka kna
tamagra megi'a vahe'mokizmi amu'hompima mani'netma,
knare tamavutmava nehinke'za, zamagrama huhavizama
huramantesu'za, knare tamavu'tamavaza zamagra nege'za,
Anumzamo'ma refkoma hania knarerera, ana tamavutamava
hu'naza zankura, Agi erisaga hugahaze. **13** Tamagra Ramofonku
hutma, maka kamani vahe'mofo kea amage nentetma, kini
vahera ugagota hu'nagu, kezmia antahitama amage nentetma,
14 Gavana vahe'mo'zanema hanaza kea amage anteho. Hazenke
hanaza vahe zamazeri fatgo nehuno, fatgoza hanaza vahe husga
huzmantesagu huzmanteg'e'za mani'naze. **15** Na'ankure e'inahu
tamavutmavama hanazana Anumzamofo avesiza avaririta
fatgo nehanageno, ke ontahi neginagi zmavuzmavama nehaza
vahe'mo'za kea osugahaze. **16** Kina vahera omi'nazanki,
fru huta mani'nagu, fru huta mani'none nehutma, ana fru
tamavutamava zampina antegafita, kefo avu'ava zana osutma,
Anumzamofo kazokzo eriza vahe maniho. **17** Maka vaheku
husga hunezmanetma, maka zamentintima nehaza tamafuhe'ina
zmavesinezmantetma, Anumzamofonku kore hunentetma, kini
vahe'mokizmi zamagorga maniho. **18** Eri'za vahe'motma,
kegavama huramante'nesaza vahe'mokizmia kore huzmantetma
zamagorga nemanitma, fru hu'za knare'ma huramante'naza
kva vahe'mokizmi zamagorgagera nemanita, havizama
huramantesaza kva vahe'mokizminena zamagorga maniho.
19 Tamagrama Anumzamofonte'ma fatgo tamagu tamagesa
antahitama mani'enageno, havigema huramante'za tamazeri

havizama hanazana, Anumzamo asomu huramantegahie. 20
Tamagrama haviza hu'nenage'za, havizamofo nona hu'za
tamazeri haviza hanazana, mago knare'zana e'origahaze. Hianagi
tamagrama knare tamavu'tamavazama nehanage'za, tamazeri
havizama hanazana, Anumzamo'a asomu huramantegahie.
21 Na'ankure tamagrira ana knaza erisazegu tamagi hu'ne.
Kraisi enena anahukna huno atazana erino huraveri hu'neankita,
Agrama hu'neankna tavutava huta avaririgahune. **22** Agra
kumira osuno, mago havigea agipintira osu'ne. (Ais 53:9) **23**
Hanki Agri'ma huhavizama huntageno'a, zamagrira nona huno
huhavizana huozmantene, Agri'ma azeri havizama huntageno'a,
zamagrira nona huozmanteno zamazeri havizahu kea osuno,
Anumzamo fatgo huno refko nehimofo antahi nemino, ana
knazana Agri azampi ante'ne. **24** Agra avufare kumiti erino
rugeka zafare hantinegu, tagra kumi'ma hu'zampina nefrita, fatgo
tavutava'ma huzampina, kasefa huta manigahune. Na'ankure
Agri avufgama aguzama ru'nazazamo, tagrira tazeri so'e hu'ne.
25 Na'ankure tamagra sipisipi afukna hutma hazagre'nazanagi,
menina tamagra rukrehe hutma sipisipi kva ne, tamagu tamemofo
kva Nete e'naze.

3 Hagi anahukna kante, a'nemotma neramave agorga
nemaninke'za, mago'a Anumzamofo kema amagema nontesaza
neramave'za nege'za, mago kea osugahazanagi, knare
tamavutamavaza nege'za zamagu'a rukrahe hugahaze. **2**
Na'ankure tamagra a'nemotma fatgo hutma vetamimofo agorga'a
mani'nazagu anara hugahaze. **3** Tamagrama a'nemotma
tamazoka'ma ki hariritma golire tamavasese nehutma, kukena
nehutma, amega tamavufgare konariri huzankukera osiho.
4 Hianagi tamagu'afi havizama osania avasesezana, fru

huno akoheno mani avasese'za hiho. E'inahu avasese zanku Anumzamofona avenesie. 5 Na'ankure korapa knafima ruotge hu'za mani'naza a'nemo'za, e'inahukna hu'za zmavasesea hu'ne'za, Anumzamo'ma huvempama huzmante'nea zama fore'ma hanigu Anumzamofonte amuha nehu'za, ve'zamimofo agorga mani'naze. 6 Anahukna huno Sera'a Abrahamu amage nenteno, ranimo'e huno Abrahamunkura hu'ne. Tamagra neramave agoraga nemanita knare zanke'ma hanutma, Sera mofane manigahaze. 7 Hanki vene'nemota knare antahintahi avariritma, a'ne tamimo'zanena so'e hutma maniho. A'nemo'za hanave oti'nagu, knare tamavutmava huzmanteho. Tamagrama antahi'nazana a'nemo'za zamagranena zmasimu erigahaze. E'inahu hutma avaririsageno'a, magozamo'a nunamuma hanaza nunamuntamia rehizara osufa hugahie. 8 Hagi maka'motma magopi fru hutma nemanitma, vahe'mokizmia tamasunku hunezmantetma, kogna hutma nemanitma, tamagu'areti so'e tamavutma nehuta, tamagu'a anteramita maniho. 9 Vahe'mo'za havizama huramantesagetma, nona hutma haviza huozamanteho. Kema huhavizama huramantesageta, nona hutma kea huhavizana huozmanteta, tamagra Anumzamofo antahigenkeno asomu huzmanteno, Anumzamo'ma tamagima hu'neana, e'inahu hanazegu tamagi hu'neankitma, asomura tamagra erisanti haregahaze. 10 Iza'o knare hu'na manisue huno agesa nentahino, knare knama kesiazanku'ma avesintesimo'a, kefo kema hu'zankura agefu'na kegava nehuno, agipinti'ma havige huzankura kva hino. 11 Kefo avu'avazampintira atreno, knare avu'avaza nehuno, rimpa fruma huno mani'zanku hakeno avaririno. 12 Na'ankure fatgo vahe'mokizmia Anumzamo'a avua anteno kegava hunezmanteno, numamuzmia antahi

nezamie. Hianagi havi zamavu'zmavama nehaza vahe'mokizmia, Anumzamo'a zmefi huzamino ha'renezmante. (Sam-Zga 34:12-16.) **13** Hagi tamagrama hanavetitma so'e tamavutamava nehnageno'a, iza tamazeri havizana hugahie? **14** Hianagi tamagrama fatgo tamavutamava'ma nehanage'za, tamazeri haviza hugahazanagi tamagra asomu erigahazanki, korera osuta tamazeri kore hanaza zankura antahintahi hakare osiho **15** Hianagi tamagu'afina Kraisina atrenkeno ruotge huno Rana nemanina, tamagrama fore'ma hanigu amuha'ma nehutma tamentintima nehaza zanku'ma tamantahima kesageta, maka knafina tro hutma mani'netma, antahinezamita akohetma fru kefinti kenona hunezmaneteta, **16** tamagutamagesafina ama' huta fatgo hutma maniho. E'inahu'ma hanutma, Krais'i'enema knare'ma hutma mani'naza zanku'ma havigema humaneramantesia vahe'mo'za zamagazegu hugahaze. **17** Na'ankure Anumzamofo avesi'ma me'nenigeta tagrama knare tavu'tava'ma nehanunke'zama, tazeri havizama hanazana, knare hugahie. Hianagi tagrama havi tavutavama hanunte'ma, knama tamisazana havizantfa hugahie. **18** Na'ankure Krais'i'a maka vahe'mofo kumiku huno, magoke zupa fatgo ne'mo, fatgo osu vahe'motagu fri'neankino, Agra tavareno Anumzamofonte vanigu ahazageno fritegeno, Anumzamofo Avamu'mo azeri otigeno, kasefa huno mani'ne. **19** Agra vuno kina kumapima mani'naza avamutaminte kea ome huama hu'ne. **20** E'i ana avamutamina korapama Noama ventema negigeno, Anumzamofo ke eri atrazanagi, Anumzamo'a akoheno zamavega anteno mani'nea avamutamine. Hankino 8'a naga'moke'za ana timo'ma zamahe refitegeno'a, zamaguravazi'ne. (Jen-Agf 6-8) **21** E'i ana timo'a mono tima frezamofo avame zankino, Jisasi Krais'i'ma

friteno oti'neazamofo hanavemo tamagura vazi'ne. Hankino mono tima frezamo'a pehena erinotreanki, agru tagutagesareti Anumzamofoma antahimisunazane. 22 Hagi Jisasi'ma monafinka vuno Anumzamofo azantmaga umani'nege'za, maka ankero vahe'mo'zane, maka avamutamimozane, maka hanavezmima me'hea zagaramimo'za Agri agorga'a mani'naze.

4 E'ina hu'negu Kraisi'ma avufafima atazama eri'neankna nehutma, tamagra anahukna antahintahi erita maniho. Na'ankure tamagrama anahu knazama eri'nutma kumi'ma hu'zana atregahaze. 2 Anahukna huno ama avufganema mani'nenu'o'a, vahe'mofo havi avesizampina ovugahianki, Anumzamofo avesizampi vugahie. 3 Tamagra Anumzamofoma keno antahino osu vahekna hutma, zaza kna ama mopafina mani'neta, havi tamagu tamagesa nentahitma, havizamofo avesizampi nemanitma, negi tina nenetma, ranke huta vano nehuta, ne'za kretma nenetma, havi anumzamofo mono hunte'naze.

4 Menina korapa arone timimo'za havi tamavutamavara nosazage'za neramage'za, nahige'za tagranena vano nosaze hu'za antri nehu'za, tamazeri haviza huke nehaze. 5 Hianagi zamagra keagama refko'ma hu Jasi nemofonte oti'za, nankna zamavu'zamava hu'hazana nesamisage'za, fri vahe ene kasefa hu'za mani'naza vahe'enena refko huno keaga huzmantegahie.

6 E'i ana agafare Knare Musenkea fri'haza vahete'enena huama hazage'za antahi'naze. Nazano ama zamufare mani'ne'za hu'nesaza zante refko huzmantegahie. Hianagi avamu'zmimo'a, Anumzamofo avesite manigahie. 7 Hagi maka'zama vagaresia knamo'a, hago kofta hie. E'ina hu'negu antahintahia hu so'e nehutma, nunamuma hu tamavu'tamava'mofona azeri hanavenetita, kazigazi hutma viho. 8 Maka'zama

agatere'neazama hanazana, vaheku'ma ovesinte avesinte hu
avu'ava zana otretfa hiho, na'ankure avesinte avu'avazamo'a,
rama'a kumi refinete. 9 Mono tamafu tamagnazama esageta, so'e
tamavutamavaza hunezmanetma, antahi havizana hutma ke
hakarea huozmanteho. 10 Magoke magokemotma Anumzamo'a
so'e musezama'a tami'negu, ana musezanteti rumokizmia
so'e tamavu'tamavaza hunezmanenkeno Anumzamofo so'e
avu'avazamo'a, tamagripina aviteno vino. 11 Magomo'ma
Anumzamofo nanekema huamahu musezama eri'enimo'a,
huama nehina, mago'mo'ma vahe'ma azahu musezama
eri'enimo'a, Anumzamo'ma ami'nea hanavereti vahera aza
nehinketa, maka'zama hanazana Anumzamofoma ra agima
amizanke hiho. Na'ankure Jisas Kraisi'a masanentake huno
hanave'ane mani'ne. Tamage. (aiōn g165) 12 Ronenimota
tamagra reramahe zampima nevazazamo'a, tevefi viaza
nehazagu kasefa'za fore nehie hutma antria osiho. 13 Hianangi
ana tamatazama e'neriza zankura muse huvava hiho. E'i
anazamo'a Kraisi'ma atama eri'neaza nehazankino, Agrama
hanavenentake masa'ane eama hanigetma, magokama muse
hanaza zamofo retro huneramante. 14 Hanki Kraisi agi
tamagripi me'enige'za, tamazeri haviza hanazana, asomu
erigahazanki muse hiho. Na'ankure hanavenentake masa'ane
Avamumo'ene Anumzamo'enena tamagrane mani'ne. 15 Tamagra
vahe ahefrizantero, kumazafa sezantero, mago'a hazenkerero,
vahe'mokizmi zante tamagena vazige'vazige nehutma, tamata
eri'zanku kegava hiho. 16 Hianagi iza'o (kristen) mono vahe'ma
mani'enigeno, atama amisaza zankura agazegura osino.
Hianagi e'i ana mono agima eri'nea zankura, Anumzamofo agi
erisaga hino. 17 Na'ankure Anumzamo'ma vahe'ma refko hania

kna hago neankino, esera Anumzamo'a Agri'a naga'mota refko
hugahie. Hanki tagrite'ma agafama huno refko'ma hanuno'a,
Knare Musenkere'ma zamentintima nosaza vahetera, inankna
hugahie. **18** Anumzamofo avontafemo'a anage hu'ne, Fatgo vahe
zamaguma'vazizamo'ma amuhoma hanigeno'a, Anumzamofoma
atrezama kumima nehaza vahetera, inanknaza fore hugahie?
(Pro-Knr 11:31) **19** E'ina hu'negu tamagrama Anumzamofo
avesizama amage'ma nentenageno, vahe'mo'za tamatazama
tamisageta, tamagri'ma tro'ma huramante'nemofonte tamentintia
nehutma, fatgo tamavutamava huta maniho.

5 Hagi mono kva vahe'motma, naganena tamagrikna hu'na
mono kva ne' mani'nena, Kraisi'a atazana erige'na, ke'nomo'nane,
tamagrane magoka Kraisi hanavemo eama hanigeta erisumo'na
neramasamue. **2** Sipisipi kva vahe'mota, Anumzamofo sipisipi
kevu naga'ma kegavama hanazana, vahe'mo higure huta
osutma, tamagu'areti Anumzamofo avesi'mo'ma hu'nea kante
kazigazi hutma kegava nehutma, havige hutma zagoma
tro hukazigatira anara osiho. **3** Tamagri kvafima mani'naza
vahetera, ra vahe mani'nonankita kegava huzmantegahune
hutma ana vahekura osiho. Hianagi knare tamavu'tmava'za
huzmaveri nehinke'za nege'za, tamavariraho. **4** Hagi Kraisi'ma
ugota Sipisipi kva ne'ma efore'ma hania zupa, hanave'amo'a
vagaore kini fetori eme tamigahie. **5** Hagi kahefa vahe'mota,
anahukna hutma ugagota huramantenesaza ra vahe'mokizmi
nanekke antahizmita zamage anteho. Maka'motma anterami
tamavu'tamavara kukena hiazza nehutma, rumokizmi zamagorga
umani eman hiho. Tamage huno avontafemo'a anage hu'ne,
Zamagra zamavufgama erisaga haza vahera Anumzamo'a
ha'renezamanteno, zamavufgama anteramiza mani'naza vahera

knare hunezmante. (Pro-Knare nomaniza 3:34) 6 E'ina hu'negu tamagra Anumzamofo hanavenentake azampi anteramita mani'enkeno, kna fatgore tamazeri antesga hino. 7 Hakare'a knazantmia Agrite atreho, na'ankure Agra tamagrira kva huneramante. 8 Tamagra negia onetma, kva hutma maniho. Ha' vahetamimo Sata'a agra laionigna huno akoheno rerakaureno krafa huno vano nehuno, ahenoma nesia vaheku nehake. 9 Hu'neanagi, tamentinti azeri hankavetineta, Satana retufe atreho. Antahi'naze, Anumzamofo amage nentaza vahe'ma, mika kaziga tamafuhe'zane tamasarahehezane mago'zahu knazane, zamata zana e'nerize. 10 Hanki atupa'a knafi tamatazana erigahazanagi, tamagri'ma Kraisi manivava masa'afima tamagima hu'nea Anumzamo'ma tamazeri knaretfa nehuno, knare hu'naze huno huneramanteno, tamazeri hanavetina, oti hanavetita manigahaze. (aiōnios g166) 11 Maka hanavea Agrite me'neno, mevava hugahie. Tamage. (aiōn g165) 12 Hanki Sailasi'a nazahigeta ama atupa avona kre'no'e, nagrama kena antahinama agri'ma huana, fatgo huno Ramofona amage nentea nenafu mani'ne. Nagra ama atupa avoma kreneramuana, tamazeri hanaveti ke hu'na, Anumzamofo tamage asunku zankura kreneramuanki, ana asunku zantera oti hanavetihio. 13 Anumzamo'ma huhampri zamantge'za, Babilonima mani'naza naga'mo'za, musenke atreramantaze. Maki'a nagri mofavreni'agna hu'nemo'a, musenkea atreramante. 14 Magoke magoke'motma fatgo huno ruotge hu'nea avu'ava hutma, agi ohene ahene hutma maniho. Kraisimpima mani'naza nagamotma, rimpa fruzamo'a tamagrane mesie.

2 Pita

1 Nagra Saimoni Pitana, Jisas Kraisi kazokzo eri'za aposol ne'mo'na, ana miko tagrama hunakna huta Anumzama Jisas Kraisi tamagu'mavazi ne'mo'ma Anumzamofonte'ma tazeri fatgoma nehia Nete'ma tamentintima nehazamotarega, ama avona kreneramue. **2** Anumzamo'a asunku zama'areti'ene, rimpafuru zanteti, Ranti Jisasi Kraisima kenka antahinkama hu'nana antahintahi zampina, asomu hunegante'na mago'ane hagenka marerigahane. **3** Hagi tagrama Jisasima keni'ma nehunkeno'a, Agri'a hankavemo mika zanku'ma Agri'ma avenesia avu'ava zampima upama hunazana neramie. Agri'a hanave masazama'ane, knare avu'avazama'a erisunegu, tagrira tagi hu'ne. **4** E'i ama anazampi mareri agatereno, knarezantfa hu'nea huvempa kea huhamprirante'ne, hu'negu tagranena, Agri'a avu'avazama'a nehuta, ama mopafi kefo tavesizamofo havizampintira agateregahune. **5** E'ina hu'negu ama ana agafare tamentintimo'ma hage ra hanigura mago'ane hanavetita, knare tmavutmava nehutma, knare tamavutamavatetira, knare antahintahi eneritma, **6** ana knare antahintahireti tamavufamofo avesi'zana kegava nehutma, tamavufamofo avesi'zama kegava huzanteti, knazama erita nevutma, knazama erino vuzantetira, Anumzamofo avu'avaza nehutma, **7** Anumzamofo avu'avazantetira, neramafuna knare tamavu'tmava hunezmaneta ovesinte avesinte hiho. **8** Tamagripima ama ana avu'avazama me'nesigeta hageta marerisageno'a, e'i ana tamavu'tamavazamo'a eri ama'ma haniana, Ranti Jisasi Kraisima ketma antahitmama hu'naza zamo'a amnezanknara osugahianki, nena raga'a rentegahie. **9** Hianagi iza'o e'inahu avu'avazama nosanimo'a, avua asu huge, avua afetera nonkeankino, ko'ma

Anumzamo'ma kumi'ama azeri agru huno atrente'neazankura agenekanie. **10** E'ina hu'negu nena fugata, hakarezama hanafina, Anumzamo huhamprintanteno tagi hune hutma hanavetita ketma antahitama ne hutma, mani fatgo hiho. Na'ankure tamagrama e'inahu tamavutamavama hanuta trakara osugahaze. **11** E'inahu kante'ma vanageno'a, Ranti Jisas Kraisi'ma taguvazi ne'mo'a, manivava kuma'amofo kafana anagi hagro hanigeta ufregahaze. (aiōnios g166) **12** E'ina hu'negu tamagra ana tamage nanekema antahita oti hanaveti'nazanagi, nagra huramagesa huvava hugahue. **13** Nagrama ke'na antahinama huana, ama mopafima kasefa hu'na mani'nenua, nagra huramagesa huvava hanuana knare hu'ne. **14** Na'ankure Ranti Jisas Kraisi'a nasamino ko naveri hu'neankina, ama mopafina zazakna omanigahue. **15** E'i ana agafare hanavetina eri'zana eneruankita, nagrama fri'na vanugetma, anama huramagesa nehua kegura, tamagera okanigahaze. **16** Na'ankure antahi'zane vahe'mo'zama ne hazaza huta, tagra Ranti Jisas Kraisima esia zankura havigea nosune. Hianagi marerisa masa'ane mani'negeta tagra tavufinti ke'nona zanku neramasamune. **17** Na'ankure Anumza Nafatimo Agra'a ra agi nemino, masa'a eriama nehuno, hanavenentake masa'afinti anage huno Jisasinkura hu'ne, Ama'i Nagri Mofavre, navesinentena muse hunentoa Mofavre'ni'e hu'ne. **18** Higeta tagra'a agonafima mani'nonkeno ana kea monafinti higeta antahi'none. (Mat 17:1-8, Mak 9:2-8, Luk 9:28-36) **19** Ana higeta tagra kasanampa vahe'mo'zama hu'naza kea antahi amama ne huta tamentinti hu'none. E'ina hu'negu tamagra ana kemofona keni ne hinkeno, zamagri kemo'a hanimpima tavimo remsa huno viankna ne hina, nantera ofumo, Kraisi'a tamaguafinti remsa hugahie. (Nam-Ham 24:17, Rev-

Huf 22:16) 20 Hianagi tamagrama antahiam'a ma hanazana,
magore huno avon tafepima me'nea kasnampa kea, kasnampa
vahe'mo'za zamagra'a zamagesafintira kreonte'naze. 21
Na'ankure vahe'mo'za zamagra'a zamavesite, ana kasnampa
kea kreonte'naze. Hianagi Anumzamo'ma hu'neankea Ruotge
Avamumo zamazeri otige'za krente'naze.

2 Hianagi havige kasnampa vahera amu'nozmifinti ot'i'neankino,
anahukna huno mago'a havige rempi hurami vahera
amu'nontamifinti ot'i'za, zamagra fraki'za maka krunage hu'za,
tamentinti azeri haviza hunaku anara nehu'za, Ramo'ma miza
sezmant'e'nea Nera zamefi hu'nemi'za, tusi'a knaza zamagrazmi
zamagofetu erintegahaze. 2 Rama'a vahe'mo'za zamagra'a
monkozamofo zamavesi'za nevaririsageno, ana zanteku hu'za
tamage kemofona huhaviza huntegahaze. 3 Anama nehaza
vahera maka zanku kezmanunu hu vaheki'za, havi kereti tamazeri
savri hugahaze. Hianagi Anumzamo'a korapa zamazeri haviza
hunaku krunage vahera huhampri zmante'neankino, anama
zamazeri havizama haniazamo'a ne-e. 4 Na'ankure anker
vahe'mo'zama kumi'ma hazageno'a Anumzamo'a ozamatre'nne,
hianagi zmasga huno teve kumapi zmatrege'za, haninentake kerifi
mani'ne'za, keagare'ma otisageno refkoma haniazanku avega
ante'za mani'naze. (Tartaroō g5020) 5 Hianagi korapa knafi vahera,
ozamatreno zmahe frivagarene. Hianagi fatgo avu'avazankuke
kea huama nehia ne' Noanki 7ni'a naga'agi huno nozmaheno, kefo
avu'avazama nehaza vahera, tusi'a ko tinu zamahe frivagare'nne.
6 Hagi anahukna huno Agrama Sodom Komora vahe'ma
tevereti'ma zamahe fanane hige'za, tanefa'ma samprenaza
zamo'a, mago avame'za me'neno huraveri huno, Anumzamofo
avu'ava'ma osnaza vahera zamahe fanane hugahie huno nehie.

(Jen-Agf 19:24) 7 Hanki kefo monko avu'avaza nehu'za, zamagra fatgo osu zamavu'zmava nehazageno rimpagna hunezmantea fatgo nera Lotina, Anumzamo'a agu'vazine. 8 Na'ankure fatgo ne'moma zamagri amunompi mani'neno, nezmageno nentahino nehige'za, kasege rutagre zamavu'zamava'ma knane knanema nehazageno'a, rimpagna hutere hu'ne. (Jen-Agf 19:29) 9 Hanki e'i Anumzamofo fatgo avu'ava'ma nehaza vahe'ma, zamagu'mavazi'nea kankamuna antahineankino, hazenke zampintira zmagu nevazino, havi zamavu'zmavama hanaza vahe'mo'za menintetira knazampi manime vu'za, vahe'ma refkoma huzmante knarera uhanatigahaze. 10 Mago'a vahe'mo'za havi miza erigahaze. E'inahu vahe'mo'za zamagu'amo'a otige'za, monko'za hu zamagesama nentahiza, tra kea kefenkami netre'za, ana vahe'mo'za zamavufga ra nehu'za, ugota ankerovo'za, knare hu'za hanavenentake vahe mani'nazanagi, zamagra Ramofo avurera vahe'mofona refkoa hunozmantaze. 12 Hianagi ana havige rempima huzami vahe'mo'za zagakfagna vaheki'za, zamazeri'za zamahe frisaza vahe fore hu'nazankino, zamagri zamagu'zmagesamo zamazerino zamahe frigahie. Zamagra havizankuke nehu'za mago'zana ontahi'naze. Hianagi zamagri havi zamavuzmavazamo zamahe frigahie. 13 Zamagra havi zamavu'zamava nehzanki'za, mizama'a haviza erigahaze. Zamagrama zamagesama antahi'zana, musenkase huta aka tina zage ferupina negahune nehu'za, havi zamaguzmagesareti ne'zama kagranema nenaza zamo'a, zamagraguke antahi zamavu'zamava nehu'za, zamagazehu zamavu'zamava hu'za nevazankino, ana zmavu'zamavamo'a, zamazeri haviza hugahie. 14 Maka kna, zamagra rumofo a'ene, rumofo venema savrima

huzankuke nentahiza, havi zamavu'zamavama huzana otre'za
huvava nehu'za, zamagra mago'a vahe'mofona fru hu'za
rezmatga nehazageno, zamagra guke antahi antahintahizmimo'a
avinete. Hianagi zamagra hazenkegu nehakaze! **15** Zamagra
fatgo kana atre'za hza negraze. Beori nemofo Balamu'ma havi
avu'ava nehuno, miza erinaku avenesiaza hu'za fatgo osu kante
nevaze. **16** Hianagi donkimo keosu zagamo vahe'mofo zmageru
aruno, Balamuna Beori nemofo neginagi avu'avazamofona
azeri fatgo hukea hu'ne. (Nam-Ham 22:1-24:25) **17** E'inahu
vahe'mo'za kampui tinkerimo taneankna nehu'za, hampomo
korimpena retufeno viankna hu'za kankekanke nehazanki'no,
haninentake teve kumamo'a zmavega ante'nne. (questioned) **18**

Ana vahe'mo'za rankege nehu'za, havige zamireku zamavufaga
ra nehu'za, vahera zamazeri oti ke hu'za monko zamavuzmava
nehu'za, maka zamagra zamavufarera monko zamavuzmava
nehaze. Zamagra monko zamavuzmavamofo zamesizana
notre'za, e'inahu zamavuzmava nehu'za zamentintimo hanave
oti'nea vahera zamami'mi hu'za zamavazu nehaze. **19** Ana
nehu'za, maka vahekura fru hutma maniho hu'za huvempa
ke hunezmantazanagi, zamagra havi zamaguzmagesamofo
kazokzo eri'za vahe mani'naze. Na'ankure vahe'mo'za nankna
zamuzmama nehazazamofo kazokzo eri'za vahe mani'naze.
20 Na'ankure zamagrama ama mopafi havi avu'avaza atre'za,
Ranti Taguvazi Ne'ma Jisas Kraisima ke'za antahiza hu'nesaza
zama, ete atre'za koma mani'naza havi avu'avapima ufresu'za,
ese'ma mani'naza havi avu'avara agatere'za, havizantfa
hu'za manigahaze. **21** Na'ankure fatgo avu'avamofo kama
ke'za antahizama osu'neza, ruotge kasegema rutragazasina
knarezantfa hisine. **22** Nanknaza zamagratera fore'ma hu'neana,

knare antahizamofo tamage kemo'a anage hu'ne, Kramo'a ete
eno amu'ma atitrenea eme nenege, afumo'a sese huno
agruma hu'neana, ete atreno ome hapa negrie hu'ne.

3 Navesi neramanta rone'nimota, ama'i anante avo
kreneramuankita tamage antahi'zana eneritma, tamagera
okanisazegu tamazeri hanaveti ke neramasamue. **2** Anumzamofo
ruotge kasnampa vahe'mo'zama hu'naza ke'mo'a, avufa'a
fore hugahie. Ranti Taguvazi Ne'mo aposol vahepi huvazino
tamasami'nia kasegea tamagera okaniho. **3** Hu'neanangi
tamagrama ketma antahitama hanazana, vagama reknafina,
tamage kema huhaviza hu vahe'mo'za, tamage kemofona
huhaviza nehu'za, zamagra'a havi zmaguzmagesa nevaririza,
4 anage hugahaze, Egahue huno Rantimimo'ma huvempama
hu'neana, omeanki inazupa egahie? hu'za hugahaze. Korapa'ma
mani'naza kva vahe'mo'za frizageno, ese agafa huno maka'zama
troma hu'neazamo'a, zahera osuno anankante me'neaza
huno me'ne. **5** Korapara Anumzamo'a ke nehigeno mona
fore nehigeno, tinke me'nefinti mopa eri fore hu'neazamofo
kea zamage'nekanize. **6** Anantero ama mopafima me'hea
zantamina, tusi'a tinu ahe fanane hu'ne. **7** Hianagi ama
mopane monane henkama refko'ma hanianknarera Agra
tevenuti kre fanane hugahue, huno kea huntogeno me'ne.
Hagi Anumzamofo avu'aval'ma nosaza vahe'enena zamahe
fanane hugahie. **8** Hianagi navesi neramanta ronenimota
amazana tamagera okaniho, Ramofontera mago zage ferumo'a
1tauseni'a zagekfugna higeno, 1tauseni'a zagekafumo'a magoke
zage ferukna hu'ne. **9** Ramo'a huvempama hu'nea kerera,
mago'a vahe'mo'zama nentahizaza huno akoheno eri'zana
e'norie. Hagi akoheno kavega anteno mani'neno, mago'a

vahe'mo'za fanane osnaze huno mani'ne. Hianagi maka
vahe'mo'za zamagu'a rukrehe hanazegu zamavega anteno
mani'ne. **10** Rantimo'ma esianknamo'a kumzafa vahe'mo'za
ontasmi'za neazankna hanigeno, monafima me'neazamo'a ra
ageru neruno fanane hanigeno, tusi'a amuhonentake tevemo
maka'zama ama mopafi me'neazana tefanane hugahie. **11**
E'inahu kante ana makazamo vagaregahianki, tamagra inankna
hutma manigahze. Mani ruotge nehuta, Anumzamofo fatgo
avu'avaza nehutma, mani'enkeno anazana fore hino. **12**
Ananknama esie hanutma eri'za enerinkeno, ame huno eno.
Anankna zupa tevemo mona te fanane nehanigeno, maka'zana te
maramra huno, te mekitrere hugahie. **13** Hianagi Anumzamo'a ko
huvempa huranteno kasefa monane mopane tro hanugeno, fatgo
avu'avazamoke megahie hu'ne. E'i anazama fore hanigu avega
ante'none. **14** E'ina hu'negu ronenimota, tamagra anazama
fore'ma hanigura avega ante'nazanki, tamagratmia tamazeri agru
hutma Anumzanena tamarimpa frune nemanita, hazenkezana
omnena, keaga huramante'zana omnena, ananknagura avega
anteta maniho. **15** Anumzamo'ma akoheno tavega anteno
mani'neazankura tamagera okaniho. Na'ankure Agra maka
vahe zmahokeno zmagu vazinakure, nerifu Poli'enena ama
anazankura Anumzamo'ma knare antahintahima aminereti
kretamine. **16** Ama anazanku'ma huno Polima maka avoma
kre'nea avomofoma tagrama antahiamma hu'zamo'a amuho
hu'ne. Mago'amo'za ana kemofo rempi hu'za ontahi'za,
manifatgo nosaza vahe'mo'za, ana nanekea ru agu'agesa
rukrehe hu'za neramasamize. Zamagra anahukna hu'za mago'a
avontafepi kenena erirukrehe nehu'za, zamagra'a kanazana
zamavufare erigonefize. **17** Hagi ronenimote, e'inahu'zana fore

hugahie hu'na ko tamasami'noe! E'ina hanigeta havi vahe'mofo
zamavu'zmava'zamo tamavareno havi kante vezankura kva
hu'netma, traka hu'zankura oti hanavetiho. **18** Hianagi Ranti
Taguvazi Ne' Jisasi Kraisi asunkuzane, Agri antahintahi zampi
hageta ra hiho. Menine henkanena, Agra'a hihamu masa'afi ra
agia erivava hugahie. Tamage. (aiōn g165)

1 Joni

1 Ama Kea ese agafare korapa me'nea ke, nentahita tavunu negeta, konazana tazanu avako nehuta, asimu eri Kegu nehune. **2** Ana asimu'mo eama higeta tagra negeta, huama huta mevava asimura, Nefa ene me'nea tagrite eama hu'neazanku neramasmune. (aiōnios g166) **3** Keta antahita hu'nonazanku, tagra tamagri enena neramasmunankita, tamagra tagri'ene emeri mago hutma manisageta, tamage huta Nefane, Nemofo Jisas Kraisi'enena tragoteta manigahune. **4** Tagra ama naneke negronankino, ama anazamo musezantia avitesiegu nehune. **5** Menina Knare Musenke Agripinti antahi'nona ke neramasmune, Anumzana masa mani"neankino, Agripina hanizana magore huno omanetfa hu'ne. **6** Tagrama huta Agrane vano nehune huta nehuta, hanizampima vano hanunana tagra havige nehuta, tamage kemofona amage nontone. **7** Hu'neanagi tagrama masare'ma vano huta, Agrama masare mani'nea kna'ma nehuta, tagrama trogoteta manisunkeno'a, Anumzamofo Nemofo Jisasi koramo mika kefozantia sese hunerante. **8** Tagrama huta kumi osu'none hanuta, tagra'a reravatga hanunkeno, tamage ke'mo'a tagri tagu'afina omanegahie. **9** Hianagi tagrama kumitima huama hanunkeno'a, Agra tamage huno fatgo hu'neankino, kumitia atreranteno maka fatgo osu avu'avapintira sese hurantegahie. **10** Tagrama huta kumi osu'none hanuta, Anumzamofona azeri havige ne' kna nehunkeno, ke'amo'a tagu'afina nomane.

2 Osi mofavre'nimota kumi osnazegu ama avona kre'neramue. Hianagi mago vahe'mo'ma kumi'ma haniana, tagrira amu'no netia Nerafa'ene mani'ne, ana nera fatgo ne' Jisas Kraisi'e. **2** Agra'a kumitimofona nona huno apaserante'ne, tagri kumike sese huorante'neanki, maka mopafi vahe kumi'ene sese huzmante'ne.

3 Agri kase kema erizafa nehanuta, Agri vahe'mani'none huta keta antahita hugahune. **4** Aza'o huno Anumzamofona antahi'na ke'na hu'noe nehuno, kasege'a amage ontesimo'a, havige vahe mani'neankino, e'inahu vahepina tamage kemo'a agu'afina omanegahie. **5** Hianagi aza'o Agri kema amage antesimofona, tamage e'i ana vahepina Anumzamofo avesi'zamo fatgo huno megahie. E'inama hanigeta tagra antahita keta nehuta, Agripi manigahune. **6** Mago'mo'ma Anumzane mani'noe hanimo'a, Jisasi'ma vano hu'nea kna huno vano hugahie. **7** Rone'nimota kasefa kasege krenoramuaniki, korapa'ma antahi'naza kasege neramasamue. Ana naneke pusante'ma antahi'naze. (Jon 13:34) **8** Mago kazigama antahisazana, kasefa kasege kreneramue, tamage huno Jisasimpine tamagripinena megahie. Na'ankure hanimo'a hago enevigeno, tamage tavi'mo'a remsa hu'ne. **9** Mago'mo'ma masare mani'noe nehuno, Jisasinte amentinti nehia nefuma ha'ma rentesuno'a, hanizampi mani'ne. **10** Mago'mo'ma amentinti nehia nefunku avesinentemo'a, masare mani'neankino mago'zamo'a azeri traka osugahie. **11** Mago'mo'ma amentinti nehia nefunku antahi haviza huntesuno'a, hanizampi mani'neno, hanizampi kana nevuno, agra iga nevie ontahi'ne. Na'ankure hanizamo'a avuraga erisu hu'ne. **12** Osi mofavrenimota ama avoma kre neramuana, Anumzamo'a Jisasi agifi kumitimima apaseramante'negu kreneramue. Na'ankure Agri Agire kumitimia apaseramante'ne. **13** Nagra ama avona, tafahemota kre neramue, ko'ma ese agafare mani'nea nera, ko keta antahita hu'naze. Ama avona kasefa vahe'motma kre neramue, ko Satana agatere'naze. **14** Nagra ama avona mofavre nagamotarega kre neramue, tamagra ko Nefana keta antahita hu'naze. Ra vahe'motarega ama avona kre neramue,

ko'ma ese agafare'ma mani'nea Nera ko keta antahita hu'naze.
Kahefa vahe'motarega ama avona kre neramue, tamagra ko
hanavetizageno, Anumzamofo kemo'a tamagu'afina hanavetino
megetma Satana agatere'naze. **15** Ama mopafi avu'ava
zanku'ene, mopafi zanku tamesionteho. Mago vahe'mo'ma
ama mopagu'ma avesintesuno'a, Nerafa avesi'zamo'a agripina
omane'ne. **16** Na'ankure maka mopafi me'neazana, avufamofo
avesi'zane, kenunu hu'zane, agraguke antahi'zanena ama
mopafizane. Nerafapintira nome-e, hianagi ama mopafinti fore
hu'ne. **17** Ama mopane, maka'a avesi'zamo'a vagaregahie.
Hianagi iza'o Anumzamofo avesi'ma amage'antesimo'a, manivava
hugahie. (aiōn g165) **18** Mofavre nagamote, hago vagare
knafi one, ko'ma Kraisima huhaviza hunte havige anti Kraisi
fore hugahie higetma antahi'naze. Menina Kraisima huhaviza
hunte vahera havige enti Kraisi rama'a hago efore hu'naze.
E'i anazama keta antahita nehuta, vagare knafi neone huta
hugahune. **19** Zamagra tagripinti tatre'za vu'naze, hianagi
zamagra tagri naga tfana omani'naze. Na'ankure zamagrama
tagri naga'ma mani'naresina, zamagra tagrane manizasine.
Hu'neanagi zamagra atre'za tagripinti vu'naza zamo'a, taveri
hiana, maka'mo'za tagri nagara omani'naze. **20** Hianagi anage
hu'na nehue, Ruotage'ma Hu'nemo, Anumzamo tamagrira
huhampri ramantegeta, maka'motma ko antahi'naze. **21** Tamage
ke ontahi'naze hu'na avona kre noramue, hianagi tamagra ko
antahi'nazankino, ana tamage kefina havigea omane'ne. **22** Iza
havige vahera mani'ne? Hianagi Jisasinku Kraisi'a omani'ne
huno hufrakisimo'a, agra havige anti kraisi nemanino, Nefane
Nemofone amefi huntenimo'a, Kraisi ha' vahe mani'ne. **23** Iza'o
Nemofoma onke'noe huno hufrakisimo'a, Nefana ovare'ne. Aza'o

nemofonku huama hanimo'a, Nefana avare'ne. 24 Hagi tamagra, ko'ma ese'ma antahi'naza tamage kea atrenkeno tamagripina meno, tamagra ko'ma antahinaza mono kemo tamagripi me'enigeta, anahu kna huta Nemofonte'ene Nefampina manigahaze. 25 Agra'ama huvempa kema hurante'neana, mani'vava asimu erigahaze huno hurante'ne. (aiōnios g166)

26 Ama ana zanku'ma kre neramuana, reramataga huku'ma nehaza vaheku hu'na kre neramue. 27 Hagi menina tamagriku huno, huhampri ramante'neaza Avamura Agripinti eri'nazageno tamagu'afi mani'neanki mago vahe'mo'a huramagesa hu'zankura ontahigahaze. Hu'neanagi Agri Avamu'mo maka'zana rempi huramigahiankino havi kea osu tamage hugahie. Tamasm'i'nea kante antetma Agripi manigahaze. 28 Hagi menina osi mofavre naganimote, Kraisimpi mani'enkeno, Agrama efore'ma hanigetma oti hanavenetita, ete esigetma tamagazegura huta korera osugahaze. 29 Tamagrama ketma antahita Kraisima hanazama fatgoma Agrama hu'enigetma, tamagranena ko'ma antahi'nazane, iza'o hakare vahepinti'ma fatgo zamavu'zmava hanamokizmia nezmafa manigahie.

3 Kesunana Nerafa'ma rimpama hagerafiramino avesi'zama tantenea zana Anumzamofo mofavre hurante'ne. Ana hu'negu tagrikura Anumzamofo mofavre hu'za hugahaze. Tamage! Ama ana agafare ama mopafi vahe'mo'za antahiorami'naze. Na'ankure zamagra ke'za antahi'za Agrira osu'naze. 2 Ronenimote, menina tagra Anumzamofo mofavre mani'none, henkama maninuna nomani'zana eforera osu'ne. Tagra antahita keta hu'none, inanknarero Agrama eama'ma hanigeta, tagra, Agrikna hugahune. Na'ankure tagra negeta Agra e'inahu Nere huta hugahune. 3 Ana hu'neankino maka vahe'mo'za zamavuma kete'za mani'he'za

zamentintima nehaza vahe'mo'za, zamagrazmi zamazeri agru
nehu'za, Jisasi'ma mani'neaza hu'za nemanize. 4 Maka kumi'ma
nehaza vahe'mo'za, kasege runetagraze, hankino kumi'mo'a
kasege rutagre'zane. 5 Hanki tamagra antahi'naze, Jisas
Kraisi'a efore'ma hu'neana kumi eri atrenaku e'neakino, Agripina
kumira omane'ne. 6 Maka vahe'mo'za Agripima nemaniza
vahe'mo'za, kumira nosaze. Kumi'ma nehaza vahe'mo'za,
Agrira ke'za antahi'za nosaze. 7 Osi mofavre naga'mote,
atrenkeno mago'a vahe'mo'za reramatga osiho, fatgo avu'ava
nehaza vahe'mo'za fatgo vahe'mani'ne'za, Jisasi'ma mani'neakna
hu'za fatgo hu'za neman'i'ze. 8 Mago'mo'ma kumi avu'ava
himo'a, Sata vahe nemanie. Na'ankure Sata'a ese agafare kumi
hu'negure. Ama ana agafare Anumzamofo mofavremo, eama
huno Sata erizana eri haviza hu'naku mopafi efore hu'ne. 9
Maka vahe'mo'za Anumzamofo mofavre nagapima efore hu'za
mani'naza vahe'mo'za kumira nosaze. Na'ankure Anumzamofo
avu'ava zamagripi me'neanki'za, kumira mago'enena osugahaze.
Na'ankure ko Anumzamofo mofavre mani'naze. 10 Ama ana
tamavu tmava'mo eriama huno Anumzamofo mofavregi, Sata
mofavregi huno eama hanigetma kegahaze. Maka vahe'mo'za
fatgo avu'ava nosu'za, amentinti nehia nefunku avesi nontamo'za,
Anumzamofo mofavre omani'naze. 11 E'ina hu'negu rumokizmigu
ovesinte avesinte hanunana ama'i knare musen (gutnus)
kea ese agafare ko antahi'naze. 12 Kenima hu'neankna
osuta, havi ne'mofo avu'ava erino Ebolina awareno ome ahe
fri'nea knara osanune. Na'a higeno ahe fri'ne? Na'ankure
avu'ava'mo'a haviza hu'negure. Hianagi negna'a fatgo avu'ava
hu'nea zanteku huno ahe'ne. 13 E'ina hu'negu nena fugatane
nasarahetma ama mopafi vahe'mo'za ha'ma reramantesageta

antria osiho. 14 Tagra antahita keta hu'none, fri'zampintira
atreta tasimu eri kaziga mani'none. Na'ankure amentintima
nehia nerafuna avesinentonkure. Iza'o rumokizamigu'ma avesi
nontesimo'a, fri vahekna huno mani'ne. 15 Hakaremo'za
zamentinti nagaku'ma (kristen) zamarimpa kna huntesamo'za,
vahe ahe fri vahe mani'naze. Tamagra antahi'naze, vahe'ma
ahe fri vahepina mani'vava asimura omane'ne. (aiōnios g166)

16 Menina tagrama vahe'ma avesinte'zanku'ma antahama'ma
hanunana, Jisasi Agra'a asimura tagriteku huno atre'ne.
Ana hu'negu tagranena zamentinti tafuhe'ina tasimu atreta
zamaza hugahune. 17 Hianagi iza'o ama mopafi afu feno
ante'nesimo, amentinti nehia nefu'ma atupama hu'nenigeno
negeno asuragi anteno azama osanigeno'a, nankna huno
Anumzamofo avesi'zamo'a, e'inahu vahepina megahie? 18 Osi
mofavre naganimote kereti'ene tagitetikera tavesi negantone
huta osanune. Hianagi tavutvapi erinteta tamage huta zamesi
zamantesune. 19 Ana tavutva'ma hanuta, tamage tavutava
nehune huta tagra keta antahita nehuta, tagutagesamo'ma
keagama hunerantena, fru huta Agri avufina manigahune. 20
Hu'neanagi tagri taguamo, keaga hurante'niana Anumzamo'a
tagri tagutagesa agatereno ra hu'neankino, maka'zana Agra
antahino keno hu'ne. 21 Ronenimote, tagu tagesamo keaga
huorantesigeta, tagra Anumzamofo avufina knare'zantfa huta
hanavetita nemanune. 22 Na'anku'ma antahigona'zana tagra
e'nerune, na'ankure Agri kasegea amage nenteta, Agrama muse
hiaza nehunkeno'e. 23 Menina ama'i Agri kasege, tagra Agri
Nemofo Jisas Kraisi agifi tamentinti nehuta, Agrama hiho huno
tami'nea kasegere amage anteta ovesinte avesinte hugahune. 24
Mago vahe'mo'ma Anumzamofo kasegema antahino avaririmo'a

Anumzane manigeno, Anumzamo'a agrane nemanie. Anumzamo
Avamu'ma tami'nea Avamuteti antahita, Anumzamo'a tagrane
mani'ne huta hugahune.

4 Ronenimote, vahe'mo'za maka avamuteti nehune hanaza
zankura tamentinti osiho. Hianagi Anumzamofontegati ne-
efi avame anteta keho. Na'ankure rama'a havige kasnampa
vahera, ama mopafina vuno eno hu'ne. **2** Amanahu kantegati
Anumzamofo avamure hunka kenka eri fore hugahane. Ina
vahe'mo huama huno Jisasi'a, Kraisikino mopare avufa erino
e'ne hania avamura Anumzamofontegati e'ne. **3** Hianagi
vahe'mo'ma huama huno, Jisasi'a Anumzamofontegatira
ome'ne hania avamura, e'i Anumzamofontegatira ome'neanki,
Kraisima huhaviza hunte havige enti Kraisi, ko'ma egahie
higetma antahi'nazana, menina ko ama mopafi fore huno
mani'ne. **4** Mofavre naganimote Anumzamofo mofavre
mani'naze. Mani'nageno tamagu'afima mani'nea Avamu'mo'a,
mopafima mani'nea havi avamura agatere'ne. **5** Zamagra
ama mopafi vahere, ana hu'nagu kema hazana mopafi
zankuke nehazageno, mopafi vahe'mo'za ke'zamia nentahize.
6 Tagra Anumzamofo nagare, Anumzamofoma keno antahino
hu'nemo'a, ketia nentahie. Hianagi Anumzamofo naga'ma
omani'namo'za ketia nontahize. E'inama higeta keta antahita
huta tamage Avamuki, havi avamuki huta nehune. **7**
Ronenimote, rumokizmigura ovesinte avesinte hanune, na'ankure
avesinte'zana Anumzamofompinti e'ne. Maka vahe'mo'za
ovesinte avesintema nehaza vahera, Anumzamo'a nezmafa'za
nehige'za, Anumzamofona ke'za antahi'za nehaze. **8** Vaheku'ma
avesima onte vahe'mo'a, Anumzamofona keno antahino
osu'ne. Na'ankure Anumzamo'a avesizamofo agafa'e. **9**

Anumzamo'ma avesi rante'neazama eri taveri hu'neana amane,
ana kankamuntetire, Agripinti tasimura erisunegu magoke
ante'nea mofavre'a ama mopafina huntegeno e'ne. **10** Ama ana
avesi'zana, tamage tagra Anumzamofona avesi ontelonkeno,
Agra'a tagrira avesi ranteno, magoke ante'nea Nemofona
huntegeno, kumitimofona nona huno apaserante'ne. **11**
Ronenimote, Anumzamo'ma tagri'ma avesi rante'nенигета,
anazanke huta rumokizmia tagra ovesinte avesinte hugahune.
12 Mago vahe'mo'e huno Anumzamofona onke'ne, tagrama
rumokizmigu ovesinte avesintema hanunkeno'a, Anumzamo'a
tagrane manina, Agri avesizamo'a fatgo huno tagrane
megahie. **13** E'na'ma hanuta tagra antahita keta huta
Anumzamo'ene mani'none hanunkeno, Agra tagrane nemanie.
Na'ankure Agra'a Avamura tamigeno tagrane mani'ne. **14**
Tagra negeta huama huta Nef'a, Nemofo huntegeno ama
mopafi vahe'mota tahoke heno taza hunaku e'ne. **15** Hagi
mago'a vahe'mo'ma Jisasinku Anumzamofo mofavre huno'ma
huama'ma hanimofona, Anumzamo'a Agripi manigeno, anamo'a
Anumzamofompi mani'ne. **16** Tagra keta antahita nehuta,
tamentintia Anumzamo'ma avesima rante'nea'zankura nehune.
Anumzamo'a avesi'zamofo agafa'e. Hanki iz'a' avesizama'afima
manisimo'a, Anumzamofompi maninigeno, Anumzamo'a agripi
manigahie. **17** Ana avesizamo'ma fatgo huno tagranema
mesigeta, refko'ma hania knarera, hanavetita otigahune.
Na'ankure ama mopafi mani'nonanagi, Jisasikna huta fatgo huta
mani'nonkeno'e. **18** Avesinte zampina koro'ma hu'zana omane'ne,
hianagi tamage avesi'zamo'a, koroma hu'zana erinetre.
Na'ankure koro'ma haniana refko'ma hurante'zankure. Knama
eri'zanku'ma koro'ma hanimofona, avesinte'zana fatgo huno

agripina omane'ne. **19** Tagripima ovesinte avesinte avu'ava'ma me'neana, na'ankure Agra esera avesirante'ne. **20** Hagi mago'mo huno, Anumzamofo navesinentoe nehuno, amentintima nehia nefuma avesi ontesuno'a, havige vahe mani'ne. Na'ankure mago'mo amentinti nehia nefuma negemofama avesi ontesuno'a, Anumzana nonkemofona avesi ontegahie. **21** Jisasi'a amanage huno kasegea tami'ne, Anumzamofoma avesintesimo'a, amentinti nehia nefuna ana huno avesintegahie.

5 Iza'o Jisasinku Kraisi'e huno amentinti hanimo'a, Anumzamofo mofavre. Iza'o Nefanku'ma avesintesimo'a, Mofavre'a avesintegahie **2** Anama huta ovesinte avesinte hanuta antahita keta nehuta, Anumzamofo mofavre zagagura zamesi nezmantone hugahune. Anama hanuta Anumzamofo avesinenteta, kasege'a amage antegahune. **3** Na'ankure ama'i Anumzamofo avesi'zane, tagra amage nentonkeno, ana kasege'amo'a kna noramie. **4** Na'ankure maka vahe'mo'za Anumzamo'ma nezmafa'zama himo'za, ama mopafi hanavea agateneraze. Ama mopafi hanavema agatemanerea hanavea, e'i tamentintie. **5** Iza ama mopafi hanave agatenere? Jisasinku'ma Anumzamofo mofavre hazamo'za agateneraze. **6** Jisas Kraisi'a mopafi e'neana, mono tine, keka zafare kora tagi atrenaku e'ne, tintekera ome'ne. Hianagi mono tine kora tagi atrenaku e'ne huno, Avamu'mo huama nehie. Na'ankure Avamu'mo'a tamage nehie. **7** Na'ankure 3'amo'za ana zankura huama nehaze, **8** Avamu'mo'ene, tima frezamo'ene, korama'amo enena mago zamarimpa hu'za huama nehaze. **9** Tagrama mopafi vahe'mofo avu'avazanku'ma tamage nehanuta, Anumzamofo avu'avazamo'a rankrefa hu'ne. Na'ankure ama ana avu'ava zana Anumzamofo avu'avakino, Nemofo Jisasimpi Anumzamo'a huama hu'ne. **10** Iza'o Anumzamofo

nemofonte'ma amentinti nehimofona Agri kemo'a anamofompi
me'he, Anumzamofonte'ma amentinti osimo'a, Anumzamofonkura
havige nere nehie. Na'ankure Anumzamo'ma Nemofonku'ma
huama hu'hea kegura amentintia nosie. **11** Hagi amazamo huama
hu'ne, Anumzamo'a manivava asimura tami'ne, ana asimura
Nemofo Jisas Kraisimpi me'ne. (*aiōnios g166*) **12** Hagi iza'o
Nemofo Jisasi Kraisima avare'nenimo, ana manivava asimura
eri'ne. Iza'o Anumzamofo mofavrema ovare'nenimo'a, ana
asimura e'ori'ne. **13** Nagrama ama nanekema negroana, izago
Anumzamofo Nemofo agire'ma kamentinti nehamoka, ko ana
manivava asimura eri'nane. (*aiōnios g166*) **14** Ana hu'negu tagra
hanavetita Anumzamofo avure vuta, Agri avesi'zamofo amage
nenteta, nazankuro antahigonkeno'a, agra amane ketia nentahie.
15 Hagi tagrama na'ankuro antahigonaza neramigeta antahita
keta nehuta, tagra antahi'none mago'a zanku'ma antahigonazana
Agripintira e'nerune. **16** Mago'mo'ma kesigeno, amentinti
nehia nefu'ma ahe friga kumi'ma hanigeno'a, Anumzamofo
antahigenigeno Anumzamo'a friga kumi'ma hu'enimofo asimura
amino, mago'a kumimo'a ahe frigahie. Nagra e'inahu kumikura
nunamuna hino hu'na nosue. **17** Maka fatgo osu avu'avara
kumire, hianagi mago'a kumira vahera ahe ofri kumi me'ne. **18**
Tagra antahi'none, Anumzamofo mofavre mani'naza naga'mo'za
kumira nosaze, hianagi Anumzamo'a mofavre'a nagara kva
kri nezmanteankino, Sata'a eme zamavakora osugahie. **19**
Tagra antahi'none, Anumzamofo mofavre naga mani'nonkeno,
ama mopamo'a havige ne' Sata hanavefi me'ne. **20** Tagra
antahita keta nehune, Jisas Krais, Anumzamofo Nemofo eno
tamage Anumzana taveri hu'ne. Na'ankure antahi'none, Jisasi'ma
e'neazamo tamage Anumzanehu antahintahia tamigeta, tamage

Anumzane nehuta, tagra Agripina nemanita, Nemofo Jisas
Kraisimpina nemanune. Tamage Anumzane nehuta manivava
asimure huta nehune. (aiōnios g166) 21 Mofavre naganimota, havi
anumzamo tamavazu hu'zanku kva hiho.

2 Joni

1 Nagra mono kva ne'mo'na, huhampri kante'nea a'mokane,
mofavrezaga ka'ane nagrama tamage kemofoma navesima
nentomo'na, (nagrakerompage, anahukna hu'za tamage kema
antahi'namo'zane tavesi neramantone). **2** Na'ankure tamage
kemo tagu'afi me'neankino, maka kna tagrane mevava hugahie.
(aiōn g165) **3** Asunku'zane asuragirante'zane, Nafati Anumzamofo
rimpa fruzamo'ene, Nemofo Jisas Kraisintegatira tamagene,
avesinte'zamo'a tagrane megahie. **4** Nagra tusi muse hue,
na'ankure nagrama ke'na erifore'ma huana, mago'a mofavre'
nagakamo'za tamage kemo'ma hu'nea kante amage ante fatgo
hu'za nemani'za, Nerafa'ma kema humarante'nea kante ante'za
avariri fatgo hu'naze. **5** Hu'neanagi menina kantahinegoe,
a'moka aru kasegea kre'nogamue, hianagi rumokizimigu ovesinte
avesinte hiho huno ese agafare'ma higeta antahi'nona kasege.
6 Hanki menina avesinte'zane, Agri kasegemo'ma hu'nea kante
anteta tagra kana vanune. Ama ana kasegea kagrama ese
agafare ko antahi nanankinka, kagra ana kante vu fatgo
hugahane. **7** Na'ankure havige hu'za zamagrarega zamavarente
vahera rama'a kokankoka vano nehzankino, Jisasi'a tazahu ne'
Kraisikino mopafi avufa erino e'ne huno huama osanimo'a, ana
nera havige ne' agrarega zamaretre ne'kino, havige kraisi'e!
8 E'i ana hu'negu kava huo, tagrama maraguzatita eri'zama
e'nerunazana, atre'zankura kava hanune, hianagi eri'zama
e'neruna zantera, ana miko mizama'a erifatgo hanune. **9** Iza'o
ugoteno nevuno, Kraisi'ma rempima hu'nea kefima omanisimo'a,
Anumzamofona avareonte'ne. Iza'o Jisasi'ma rempima hu'nea
kefima manisimo'a, Nefane Nemofonena avarente'ne. **10** Mago'a
vahemo'ma kagrite eno, rempima hu'nea tamage kema erino

omesimofona, avarenka nonka'afina antege, mago'a huso'e hunka agazone kea huonto. **11** Na'ankure iza'o ana vahe'ma huso'e huntesimo'a, havi avu'ava zama'amofo aza huno ana avu'avaza hugahie. **12** Hakare naneke me'neana nonkre'na tamagra ne magopi umani'ne'na naneke nehamanenko tarimpa so'e hugahie. **13** Anumzamo huhampri'nea negasaro mofavre naga'mo'za, ferure huramantaze.

3 Joni

1 Nagra Joni'na mono kva ne'mo'na (elda), Gaiusiga knare
nenafuga tamage kemofoma navesima nente'na, navesima
negantoa ne'moka krenegamue. 2 Ronenimoke, nagra nunamu
nehuankino hakare zamo'a knare hugantena, kria e'orinka
kagu'amo'ma hu'nea kna hunka knare hugahane. 3 Na'ankure
mago'a nenufu'za e'za tamage kemo'ma kagu'afi me'nea kema
huama hazage'na, tamage kemo'ma hu'nea kante mani fatgo
hu'nana zankura, nagra tusi muse hu'hoe. 4 Antahuama mofavre
naganimozza tamage kemofompi mani'haze hazazankura, nagra
mago'a knama nehua musena, agatere'na tusi muse hu'hoe. 5
Knare rone'nimoke, maka'zama kafuheinte'ene, ru vahete'enema
huzmantenana zamo'a, knare kavukva'ma hunka vu'nanazana
eri ama hu'ne. 6 Kagrama zamesima zamantenka, knare
kavukva'ma huma zamante'nana zankura, mono vahe zamure
eme huama hu'za tasami'haze. Kama vunaku'ma hanagenka,
Anumzamofo knare avu'ava zampi, so'e kavukva huzmantenge'za
vih. 7 Na'ankure ana vahe'mo'za, Jisasi Agi'a eri'za vu'za
e'za nehu'za, zamagra mago zmazahu'zana mono ontahi
vahepintira e'origahaze. 8 Ana hu'negu, tagra e'inahu vahera
zamaza hugahune, ana'ma hanuta tamage kemofo eri'zana
magoka tragoteta erigahune. 9 Nagra mono naga'motmarega
mago avona ko kre rami'noanagi, Diotrefesi'a zamagridera
agra avesite ugagota huzmantenaku nehunokino, tagrira
tageno antahino osu'ne. 10 E'i ana hu'negu, nagrama esu'na,
agrama nehia avu'avamofo kea eme antahinege'na, havigema
huma rante'nea kea antahigahue! E'i ana kege osu'neanki,
nerafu'zama azageno'a agra muse huno ozmare'ne. Hianagi
knare kema nehu'za zamazeri so'e huku'ma haza vahera, mono

nompintira zamahenatitre'ne! **11** Ronenimote havi zamu'zma'ma
nehazamokizmi zamavu'zmavara e'oriho. Hianagi knare'ma
hu'nenia tamutma hiho. Mago'mo'ma knare avu'ava'ma himo'a
Anumzamofo vahe mani'ne, hagi mago'mo'ma havi avu'ava'ma
nehimo'a, Anumzamofona onke'ne. **12** Demitriasisinkura rama'a
vahe'mo'za huama hunentageno, tamage kemo'enena huama
hunte'ne. Tagranena anazanke huta huama nehunkenka,
kagra antahinka kenka hu'nane, tagrama hunankemo'a tamage
me'ne. **13** Hakare avoma kreramisua nanekea me'neanagi,
avo zotareti'ma krerami'zankura nagesa nontahue. **14** Hianagi
mensintfana tamagenakure hu'na nagesa nentahue, magopi
mani'neta keaga hanunegu nehue. Ramofo rimpa fruzamo'a
tamagrane mesie. Amafima nemaniza ronenimo'za musenke
huramantaze. Magoke magoke'mokizmi zamagire musenkea
huramantaze.

Zute

1 Juti'na, Jemisi nefu'na Jisas Kraisi kazokzo eri'za e'nerumo'na, Anumza Nafatimofo avesipine, Jisas Kraisi kavafima kehigeta mani'nazamotarega, ama avona kre'neramue. **2** Anumzamofo asunkuzanki, arimpa fru'zanki, avesi'zanena mago'anerisageno, aviteno tamagripina mesie. **3** Navesi neramanta nafuheta, Anumzamo'ma tagu'mavazinia zankura huama nehu'na avoma kreramizankura antahintahinimo'a tusiza huno onetige'na retro nehue. Hianagi menina mago'a zanku avona kreramisue hu'na huana, Knare Musenkema, Anumzamo'ma Agri'a ruotge hu'nea vahe'arema magoke zupa zami'neazamo maka kna mevava nehina, tamage nanekere tamentintima nehunazanku, tamentinti otretma hanavetita azeri akona hanazegu tamasmiza nehue.

4 Na'ankure mago'a mono ontahi vahe'mo'za onkazageno, ko rerakaure'za amuno tamifi efre'naze. Ana vahe'mo'za amanage hugahaze, Anumzamo'a kumira atre'nezamantea zanku amane havi avu'avara hugahune hu'za nehaze. E'inahukna vahe'mo'za inankna henka hugahaze, korapa refako huzamantene. Na'ankure Kva netimofo Ranti Jisas Kraisina ha'rentegahaze. **5** Ko amana zana maka antahinazanki, huramagesahu kema tamasamisuana, Ramo'a Israeli vahera miko Isipitira zamagu'vazino zamavareno atirami'neanagi, henka ana Israeli vahe'mo'za, Agrite'ma zamentintima osazageno'a zamahe fanane hu'ne. **6** Hagi Anumzamoma ankero vaheku'ma huno, e'i avamente maniho huzmanteg'eza ana kemofo agorga'a omanizageno, katuofe kina rezamanteno hanizampi kina huzamanteg'eza mani'neza, henkama ranknarema refakoma hania knama esigu avega ante'za mani'naze. (aïdios g126)

7 Hagi tamagera okaniho, Sodomu rankumate'ma, Gomora

rankumate'ma, ana tava'onte'ma me'nea kumatamimpima monko
avu'avazama hu antahintahimo avitege'za, omane'neankna
monko'za hu'naze. E'i ana kumatamina tevereti zamahe fanane
hu'neankino, e'i ana hukna hu'za kefo'zama nehaza vahera,
henka'a tevava tevefi mani'ne'za zamata erigahaze. (Jen-Agf

19.) (aiōnios g166) 8 E'i anhukna kante, ana vahe'mo'za zamagra
avanama kazazamo zamavufaga zamazeri pehenage nehige'za,
kavama krizmante'nemofo agorga'a nomaniza, masazama'ane
nemaniza ankero vahetamina huhaviza hunezmantaze. 9
Hu'neanagi Maikoli ugota ankero ne'mo, Mosese avufama
erinaku keha'ma Sata'enema nereno'a, huhavizana huonte'ne.
Hianagi Ramo'a kagrira kea kasuno kea hugantesie huno Satana
asami'ne. 10 Hianagi zamagra antahi'za ke'zama osu'naza
zankura huhaviza hunente'za, afu kra antahintahine mani'ne'za,
e'inama hazazamo zamagra'a zamazeri haviza nehaze. 11
Zamagra'a kva hiho! Zamagritera havizantfa fore hugahianki,
na'ankure Keni'ma kefo avu'ava'ma huno nagna'amofoma ahe
fri'neanka nehaze. Hagi Balamu'ma hu'neaza hu'za hakare'a
zama hanazana zagore hugahaze. Kora'ma mago rimpia osuno
ha'ma rezmante avu'avaza nehu'za, fanane hu'neaza hu'za
fanane hugahaze. (Jen-Agf 4:1-8, Nam-Ham 16, 22) 12 Hagi
ana vahe'mo'za Ramofo avesizanku'ma muse huta ne'zama
retro'ma hanafina zamagraguke nentahi'za zamagazegura
nosu'za tamagripima efresu'za, hagerimpi havemo me'neno
ventema ahe haviza hiankna nehu'za, hampomo eri atru huteno
ko'ma orienkna hu'za rama'a huvempa hugahazanagi, anama
huvempa hu'nesazazana osugahaze. Zamagra raga'a tagi
knafi raga reonte zafagna hu'naze. Hanki zafamofo rafu'na'aga
tasagi hutreankna hanige'za magoke zupage ofrigosazanki, tare

zupa frigahaze. **13** Zamagra hagerimo kranto kranto nehuno, agrenke hiankna hu'za, zmagazehu zamavu'zmava huhakarehu vahe mani'naze. Zamagra hanafimo magokete mani so'e osu vuno eno hiankna vahe mani'nazankino, haninentake kumapi manivava hanazegu Anumzamo'a retro huzmante'ne. (aiōn g165)

14 Hagi Inoku'a, Adamunteti maniza e'naza vahepintira 7nire ehanati'nea naga nofipinti ne'mo ama ana vahekura kasanampa kea hunteno anage hu'ne, Ramo'a hampriga osu'nea ruotge hu'namo'zane ne-eanki keho. **15** Agra ama mopafi vahera refkoma hunezmanteno, Anumzamofo avu'ava'ma nosu'za havi zamavu'zmava nehu'za, Anumzamofo eri'zama e'noriza, Agri'ma huhavizama huntesaza vahera, hanavetino kea huzmantegahie.

16 Zamagra zamarimpa knage nehu'za, nazinke nehantage'za, kefozama hunaku'ma hanazaza hugahaze. Zamagra rankege nehu'za ru'mozama zamigima zamizankuke hu vahe manigahaze.

17 Hu'neanagi navesima neramantoa nena fugata tamagera okaniho, Rantimofo Jisasi Kraisi aposol naga'mo'za tamasimiza,

18 henka vagare knafina hunte'za kiza zokago ke hunte vahe fore nehu'za Anumzamofoma zamage'na hunemi'za, kefo zamavuzamava hanaza vahe manigahaze. **19** E'ina vahe'mo'za amu'no tamifina atane'zana avare'neramize. Zamagra ama mopafi vahe'mofo antahintahi nevaririze. Na'ankure Anumzamofo Avamumo'a' zamagripina omanine. **20** Hianagi navesima neramantomota tamagra ruotge hu'nea tamentintifina hagetma mrenerita, Ruotge Avamumo'a tamaza nehina nunamuna hihon.

21 Hagi Anumzamofo avesizampi nemanita, Rantimo Jisasi Kraisi asunku zampima manivava manizama tamikema hu'nea zankura tamavresra osu avega anteho. (aiōnios g166) **22** Zamentintimo hanavema otinesia vahera, zmasunku huzmanteta zamaza

hiho. 23 Hagi mago'amo'za tevefi ko mani'nazanki, ame huta
tevefintira zamaza huta hanageho. Mago'amokizmia tamasunku
huzmanteta zamaza hugahazanagi, zamagri kefo'zamoma
tamazeri havizama huzankura, tamagra kva hoho. 24 Hagi menina
Anumzamo'a tanafama hu'zankura kegava huneramanteno, Agra
tavaresigeta Agri'a masafi kumitami omanena, tusi'a musezampi
manigahaze. 25 Ramo, Jisas Kraisimpi tagu'vazino taza hu'nea
Nera, Agrake Anumzamo mani'ne, Tamage. Masazanki, ra
ajigi, hanavegi, kavatia Agrake korapara mani'neankino menina
mani'neno, henka manivava huno vugahie. Tamage. (aiōn g165)

Hufore Hu'nea Naneke

1 Anumzamo'a eri'za vahe'araminte kofta huno fore'ma
haniazana, oku'a me'hea ke Jisasi'a ankero ne'a amino
huntegeno, eri'za ne'are Joninte emeri ama hu'ne. 2
Joni'a Anumzamofonkea huama nehuno, Jisasi agenkene
maka'zama ke'nea zamofo kea huama hu'ne. 3 Ama kasnampa
kema hamprinaza vahe'ene, antahi'naza vahe'ene, ana kema
amage'ma antenaza vahe'mo'za asomu erigahaze. Na'ankure
anazama fore'ma hania knamo'a, hago kofta nehie. 4
Nagra Joni'na, ama naneke Esia kaziga 7ni'a mono nonte
naga'motarega avona kreneramue. Hagi korapa mani'neno,
menima mani'neankino, henkama mani'nia Anumzamo, Agra'a
asuragi'zane, rimpia fruzana tamina, fru hutma manigahaze.
Hagi 7ni'a Avamutamima Anumzamofo kini tramofo avugama
nemanizamo'za, zamagranena zamasu ragiramante'za, tamazeri
fru hanigeta, fru hutma nemanisageno, 5 Jisas Kraisi fatgo huno,
Anumzamofo ke'a huama nehimo, Agra'a fri'naza vahepintira
ugagota huno ese oti'nemo, maka mopafi vahe'mokizmi kini
vahe kegava huzmantenea ne'manin'eankino, Agra kumitifima
mani'nonkeno, avesiranteno korama'reti mizaseno katufe
tantenegu agi'a erisaga hanune. 6 Agra'a vahe tazeri retro
huneranteno, agra tavreno Anumzamofo eri'za erisuna pristi
vahe retro hurante'neankino, Agrake'za maka kna ra agi'a
e'nerino hanavea erino, manivava hugahie. Tamage. (aiōn
g165) 7 Keho, Agra hampompi ne-eankino, (Dan 7:13) maka
vahe'mo'za negesageno, keka zafare'ma krugruma renaza
vahe'mo'zanena negesageno, maka ama mopafi vahe'mo'za
zavi krafa hugahaze. Hanki e'ina hu'zana fore hugahie. Tamage.
8 Nagrani'a ese agafahu manina (Alfa), vagare mani'hoe

(Omega). Korapa mani'nena, menina mani'noankina, henka egahue huno hanavenentake Ra Anumzamo'a hu'ne. **9** Nagra Joni'na neramafu'na Anumzamofo kumaku'ma knama enerita Jisasinte'ma kazigazi huta magoka nevumo'na, navre'za ti amunompi Patmosie nehaza mopa, me'nere ome nante'naze. Na'ankure Anumzamofo kerek'uene, Jisasi agenkema huama'ma nehua zanku anara hu'naze. **10** Hanki Ramofo knazupa, nagra avamupi mani'ne'na nentahugeno, namefigatira mago agerumo'a ra ufereaza huno anage hu'ne, **11** Amama kana zantamina avontafe krenka, 7ni'a kumate me'nea mono nontaminte atregeno vino. Efesasima, Smenama, Pegamamima, Taitariama, Sadisima, Fildafiamma, Ledosiama hunka krezaolio. **12** Anagema huno hige'na, rukrehe hu'na kema hia vahe kenaku'ma huana, 7ni'a tavi rekrus hunte'naza azota golire tro hunte'nea me'negena ke'noe. **13** Ana lamu tavimofo amu'hompina, Vahe'mofo Mofavregna ne'mo, efeke za'za kukena antaninegeno agia ruhananegeno, golire tro hunte'naza nofinu afumpinti rutahera higeno, asoparega kreramino vu'nege'na ke'noe. **14** Hagi Agri asenimo'ene azokamo'a efenentake huno efeke hampokna higeno, avurgamo'a teve anefakna hu'negena ke'noe. **15** Ana Ne'mofo agamo'a brasima tevefima krefizo hazageno, masanentake nehiankna nehigeno, agerumo'a rama'a timofo agasasa kemo'ma hiazza hu'ne. **16** Ana ne'mo'a azantmaga 7ni'a hanafi azeri'negeno, tare kaziga asane kazimo agipintira atiramino egeno, Agri avugosamo'a zagemo remsa hiankna huno hanavenentake huno remsa hu'ne. **17** Nagrama ana ne'ma nege'na, agafi traka hu'na fri vahekna hugeno, tamaga azanu nagofetu nenteno anage hu'ne, Korera kagra osuo, Nagrani'a ese agafahu mani'na, vagarera mani'noe. **18** Kasefa hu'na

mani'nomo'na ko frite'na, otii'na mani'noanki, keho, henka'a
ofri'na manivava hugahue. Fri'zane, fri vahe'mofo kumate ki
nofira Nagra azeri'noe. (aiōn g165, Hadēs g86) 19 E'ina hu'negu
maka'zama menima kana zane, menima me'neazane, henkama
fore'ma haniazanena avontafepi krento. 20 Kagrama 7ni'a
hanafi'ma tamaga nazampima me'negenka negenka, golire
tavima rekru hunte azotama ke'nanana oku'a agu'agesamo'a
amanahu hu'ne, 7ni'a ofuna, 7ni'a mono no kumate ankero
vahetami ke'nane, tavi'ma rekru hunte azotama, golire tro
huntenegenka 7ni'a ke'nanana, 7ni'a mono nontami me'negenka
ke'nane huno nasami'ne.

2 Efesasi kumate mono naga'mokizmi, ankeromofona amanage
hunka kremio, Nagra 7ni'a hanafira nazantamaga azenerina,
7ni'a tavi'ma rekru hunte golire azotaramimofo amu'nompi vano
nehumo'na, nehuanki antahihi. 2 Hanavetinka eri'zama e'nerinka,
maragu'zama netinka, maka knazama e'nerinka, kazigazima
hunka nevunka, havi zamavu'zmava nehaza vahe'enema
tragotenka omaninka, havige hu'za aposol vahe mani'none
nehaza vahera refko huzmantenka negenka, havige nehaze
hunkama nehanazana, Nagra ke'na antahi'na hu'noe. 3
Nagri nagireku'ma hu'za knama kamizana, kagra akohenka
mani'nenka, ana knazana enerinka, kavesragura osunka
kazigazi hunka knazana eri'nane. 4 Hianagi kagrira anage
hu'na hugantegahue! Kagrama koma navesi nanteneankna
hunka menina, navesi nonantane. 5 E'ina hu'negu kagrama
trakama hu'nante kagesa nentahinka, ese'ma kagu'a rukrehe
nehunka hu'nana kavukva hunka, kagu'a rukrehe huo. Anama
osananke'na, e'na tavika'ama me'neretira emeri atregahue.
6 Hu'neanagi kagra amanahu nehane, Nikolasi avu'ava'ma

nevaririza vahe'mofo zamavu'zmavara kavesra hu'zmante'nane.
Nagranena navesra hunezmantoa zamavu'zmava osu'nane. 7
Izano agesama me'enimo'a, Avamumo'ma mono nagate'ma
huamama nehia kea antahino, iza'o ha'ma ageteresimofona,
Nagra atresugeno, monafinka Anumzamofo hozafi me'nea
asimu eri zafa raga negahie. 8 Hagi Smena kumate mani'naza
mono naga'mokizmi ankeromofona amanage hunka krezamio,
Nagra'a ese agafahu mani'na, vagare mani'nena, frite'na otina
mani'nom'o'na, anage nehue, 9 Nama'agna kazeri haviza
nehazageno, kamunte omne'neana Nagra antahi'noe. Hianagi
kagra tusia feno vahe mani'nane, zamagrama Jiu vahe mani'none
nehazanagi, zamagra Jiu vahera omani'naze. Hianagi zamagra
Sata naga mani'naze. 10 Hanki ko, kagrama knazampi ufresnana
knamo'a kofta nehianki korera osuo. Sata'a hanige'za mago'a
nagatamia zamavare'za kina hunezmante'za, reramahe'za
kesageta 10ni'a gnamofo agu'afi knazana erigahazanki, kazigazi
huta nevuta ome frisagena, Nagra asimu erino mani asimura
tamamigahue. 11 Izano agesama me'enigeno netahisimo'a,
Avamu'mo'ma mono nagate'ma huama'ma nehia kea antahise
hino, Iza'o ha'ma agateresimofona, nampa 2 fri'zamo'a azeri
havizana osugahie. 12 Hagi Pegamam kumate nemaniza
mono naga'mokizmi ankeromofona amanage hunka krezamio,
tarega kaziga asanenea kazima eri'nea ne'mo'a amanage
nehie. 13 Nagra antahi'noe, Sata'ma kini tra anteno mani'nea
kumate mani'enka, Nagri nagima azeri hanavemati'nanana,
Sata'ma mani'nere'ma mani'nankeno, Nagri naneke huama nehia
ne'ma, Antipasina tamagri amu'nompinti avare'za ahe'naze.
Ana hazanagi tamagra Nagrite'ma tamamentintima hu'naza
zana otretfa hu'naze. 14 Hianagi Nagra osia zanku kea

kagrikura huzahue, na'ankure mago'amo'za Baramu'ma rempima
Barakima humino, Israeli vahe'ma kumi hihogu zamazeri trakama
hukema huno, havi anumzante Kresramana vunte'naza ne'za
nene'za, monko avu'avazama hihogu'ma hu'neazana kagra
antahi'nane. **15** Anahukna hu'za Nikolasi'ma rempima hurami'nea
kea amu'nontamifina mago'amo'za azeri'naze. **16** E'ina hu'nagu
tamagu'a rukrehehiho, anama osanage'na ame hu'na e'na,
nagipima asane kazima me'nea kazinu, eme ha' huzmantegahue.
17 Izano agesama me'nenimo'a Avamumoma mono nagamofo
nesamia naneke antahise hino. Ha'ma agateresimofona,
framaki'nea mana ne'za mago'a nemina, magora efeke have
nemina, agi'a ana havere krentenugeno, rumo'a ana agia
ontahigahianki, ana havema erisimoke, ana agia antahigahie. **18**
Taiataira kumate nemaniza mono naga'mokizmi ankeromofona
amanage hunka krezzamio, Anumzamofo mofavremofona
avurgamo'a teve anefakna nehigeno, agamo'a pehe huno
bronsi havegna huno marave marave hu'nemo'a anage
hu'ne. **19** Nagra kavukvama hanana antahi'na ke'na hu'noe.
Kagra kavesinenantenka, vahe'mokizmia kavesi nezmantenka,
kamentinti nehunka, eri'zama e'nerinka knazama ne-egenka
kazigazi nehunka, ese knama kamentintima hu'nana zana,
menima hana kamentintimo'a agatereno so'e zantfa hu'ne. **20**
Hianagi Nagra anage hu'na hanaveti'na keaga hugantegahue.
Jesebelina kasnampa a' mani'noe nehia ara atrankeno,
kagrane mani'neno, kazokazo eri'za vaheni'a rempi hunezamino,
zamavreno havi kante nevige'za, monko avu'ava zana nehu'za,
havi anumzante kresramna vunte'nea ne'zana ne'naze. **21**
Nagra mago'a knaza ami'na, monko avu'ava'ma nehiazana agu'a
rukrehe hanie huanagi, agra agu'a rukrehera osu'ne. **22** Keho,

Nagra kri ami'hugeno, kri tafete masegahie. Agranema monko avu'avazama nehaza vahe'mo'za, anama nehaza zanku'ma zamagu'ama rukrehema osnazana, rama'a knazampi ana a'ene ufregahaze. **23** Nagra ana a'mofoma amage'ma nentaza vahera zamahe fri'nena, maka mono vahe'mo'za ke'za antahi'zama hanazana, maka vahe'mofo antahi'zane, zamagu'zmagesa nege hu'za nehanage'na, magoke magokemozama zamavu'zmavama hanare, mizana zamatere hugahue. **24** Hanki mago'a Taiataria mani'nazamota Jesebelima rempi hurami'nea kea amagera nontetma, rempima hurami'nea kea azenoritma, Satana oku'a antahintahia nontahitma, zamagrama hu'naza zana osu'nazanki'na, Nagra mago'a knazana ontamigahue. **25** Ana hu'negu nazano menima azeri'nana zana azeri hanavetinege'na, Nagra a'neno. **26** Iza'o ha'ma agatenereno, Nagri navu'nava huno vagare knare'ma vanimofona, anamofona Nagra hanavea amisugeno, rama'a vahe kegava krizmantegahie. **27** Ana nehuno agra kini vahe'mo'ma e'neria aeni azotareti, mopa kavoramima rufuzafu'peankna huno vahetamina kegava hugahie. Nagnitude Nenfantegatima vahe'ma kegava hu hanavema, eri'noankna hanave erigahie. **28** Ana nehanige'na Nagra nanterama remsa nehia ofuna amigahue. **29** Iza'o agesama me'enigeno nentahisimo'a, Avamu'mo'ma mono nagate'ma huamama nehiana antahise hino.

3 Sadisi kumate mono naga'mokizmi ankeromofona amanage hunka kremio, Nagra Anumzamofo 7ni'a Avamura nazampina eri'nena, 7ni'a ofuna eri'nomo'na, ke'ma hanuana antahiho. Kagrama nehana kavukvara antahi'na ke'na hu'noe. Maka vahe'mo'za kagra kasefa hunka mani'nane hu'za nehazanagi, kagra ko fri'nane. **2** Hanki otinka, kagripima fri vagaregeno'ma

osiazama me'neazamo'ma fri'zama nehiana, azeri hanavetio.
Na'ankure kagri'ma kagoana, Nagri Anumzamofo avurera, fatgo
kavukvara nosane. 3 Ana hu'negu ko'ma rempi hugamizagenka,
nentahinka eri'nana kea azeri kona nehunka, kagu'a rukrehuo.
E'ina hu'negu, kagrama otinka, kagu'ama rukrehe osnanke'na,
omegahie hunka kagesa ontahi'nana knafi, kumazafa vahe'mo'za
neazankna hu'na egahue. 4 Hianagi osi'a naga Sadisi kumate
mani'namo'za, havi zamavuzmava osu'za kukena zamia eri
pehana osu'nazanki'za, zamagra efeke kukena nehu'za, Nagrane
kana vugahaze. Na'ankure zamagra Nagrane vuga hu'naze.
5 Iza'o ha'ma agteresimo'a zamagrikna huno efeke za'za
kukena nehanige'na, asimuma erino mani avontafepintira, agi'a
reohanegahue. Nenfane, ankerovo vahe'amofo zmavurera agi'a
huama hugahue. 6 Iza'o agesama me'enigeno nentahisimo'a,
Avamu'mo'ma mono nagate'ma huamama nehia kea, antahise
hino. 7 Fildelfia kumate nemaniza mono naga'mokizmi
ankeromofona amanage hunka kremio, Agra ruotge huno,
tamage Ne'mo, Deviti kinofi eri'neankino, kafama anagisiana,
magomo'a eri onkisigeno, erigisiana mago'mo'a eri anagigara
osu'nemo anage nehie. 8 Nagra kavukvaka'a kage'na antahi'na
hu'noe, ko, kavuga kahana anaginte'noankino, mago vahe'mo'a
erionkigahie. Na'ankure kagra osi'a hanaveka'a me'negenka,
nanekeni'a amagenentenka, nagi'a eri frara oki'nane. 9 Ko, Sata
mono naga'mo'za hu'za, Jiu vahe mani'none nehu'za havige
nehaza vahera, Nagra zamatufesuge'za e'za, tamagri tamagafi
eme zamarenare'za, tamage Nagra tamavesineramantoe hu'za,
zamagra ke'za antahi'za hugahaze. 10 Na'ankure kagra
kazigazi hunka, Nagri kea amage ante'nane. Ana hu'nanku ama
mopafi miko vahe'mo'zama rehezampima ufresaza knafina,

katresugenka rehezampina kagra uofregahane. **11** Nagra ame hu'na egahuanki, ko'ma eri'nana zana azeri kona huo, ana'ma osnanke'za rumo'za kini fetorika'a erigahaze. **12** Iza'o ha'ma azeri agateresimofona, Anumzanimofono ra mono nompi, no azeri hanaveti anumza zafa tro hunente'na, agrira atrenugeno atinoramina, Anumzanimofono agine, kasefa Jerusalemi ku'ma monafinti, Anumzanimofontega atreno eraminia kuma'mofo agi'a krenente'na, Nagra kasefa naginena krentegahue. **13** Iza'o agesama me'enigeno'ma nentahisimo'a, Avamu'mo'ma mono nagate'ma huama'ma nehiankea antahise hino. **14** Laodisia kumate nemaniza mono naga'mokizmi ankeromofona amanage hunka kremio, Nagra tamage ne'mo'na, maka kea avariri fatgo nehu'na, fatgo hu'na maka kea huama nehumo'na, Nagra maka zama Anumzamo'ma, ese agafereti'ma tro'ma hu'nea zamofo agafa'a mani'nomo'na, ama naneke atrogeno kagritega e-e. **15** Mika tamavutmava hunazana ke'na antahina hu'noe. Tamagra amuho osutma, zasira osutma hunazanagi, Nagri'ma nave'ma nesiana, amuhoma hanamotma, amuho hinkeno, zasima hanamota, zasi hiho. **16** Amuhone zasi'enena osutma, amunonte mani'nagu, Nagra nagipintira amu'ati tamatregahue. **17** Na'ankure kagra anage hunka nehane, rama'aza ante'nena, tusi'a fenone vahe mani'noe hunka nehunka, mago'zankura upara osu'noe hunka nehananagi, kagrama havizantfama hunka, kasunku hugantega kante mani'nenka, kamunte omaneno, kavu asu higenka, kavufa kavapa mani'nanana kagra nonkane. **18** Nagrama kasamisuana, tevefima kreno eri agruma hu'nea golia Nagripinti mizasetenka, feno vahera nemaninka, efeke za'za kukena miza senka kukena nehugen, kagaze kavufamo'a amatera nosina, avure fre masave Nagripinti miza senka, fretenka

kavua ke so'e huo. 19 Nagrama navesizmantoa naga'mofona hanavetina, zamazeri fatgo nehu'na, zamavumarora nentoe. E'ina hu'negu knare tamavu'tmavama hu'zanku nentahitma, tamagu'a rukrehe huta fatgo huta maniho. 20 Keho, Nagra kafante oti'ne'na vagre vagre nehue. Iza'o Nagri nageru antahino, kafama anagisimofona, Nagra efre'na agrane ne'zana nesugeno, agra Nagrane negahie. 21 Iza'o ha'ma azeri agateresimofona, Nenfa trate'ma ha'ma azeri agatere'na mani'noaza huno, ha'ma azeri agateresimofona, atresugeno Nagri trate magoka manigahu'e. 22 Iza'o agesama me'enigeno'ma nentahisimo'a, Avamu'mo'ma mono nagate'ma huama'ma nehiankea antahise hino.

4 Ama anazama evutege'na, nagra kogeno, mona kafamo'a anagino ruhagro higeno, ese ageru'ma antahi'noa agerumo ufenkrafama hiaza nehige'na antahugen, Nagrikura anage huno hu'ne, Amare ege'na, amazama evanigeno, henkama fore'ma hania zana kaveri haneno. 2 Anage nehige'na ame hu'na nagra avamupi mani'ne'na koana, mona kumapina kini tra me'negen, mago'mo ana kini tratera mani'nege'na ke'noe. 3 Ana ne'mofo masa'amo'a rumsa huno jasapa havegna nehuno, koranentike huno konilienie hu'za nehaza havegna hu'ne. Mago furagena'mo kini tramofona rugagintegen, zafa asinage huno emerelie nehaza havegna huno remsa hu'ne. 4 Ana kini tramofona 24'a kini tratami manegorave huntogeno, ana 24'a kini tratera ugota kva vahe'mo'za mani'ne'za, efeke zaza kukena hu'za, golire kini fetori zamasenirera antani'naze. 5 Ana tra'ma me'nefintira trage huno kopsina e'nerino, tusi'a monage nehigeno, kini tramofo avuga 7ni'a tavi tevemo'a hagana hagana huno te'ne. E'i ana 7ni'a tevema hagana hagana huno nereana, Anumzamofo 7ni'a Avamutami me'ne. 6 Hagi ana kini tra'mofo

avuga, kapoteti tro huntogeno masanentake huno rumarave
nehiankna hageri megeno, ana kini tramofo amu'nompine
rugaruga, 4'a asimu anteno mani'nea zagaramina, zamavugane
zamefika zamavurgamo'a avite'nea zagamo'za mani korave
hu'nazage'na zamage'noe. 7 Ese'ma mani'nea zagamo'a
laionigna higeno, anante zagamo'a kaogna higeno, nampa
3zagamofona vahe avugosagna higeno, nampa 4zagamofona
hareno vano nehia tumpamofo avugosagna hu'nea zaga ke'noe.
8 Hanki anama kasefa hu'za mani'naza 4'a zagamofona, mago
magomofona 6si'a agekona huzmantegeno, zamagekonamofo
fenka kizigane, zamavugane zamefi'enena zamavurgamo'a
hakare huno avitenege'za, ontagane'za zagine hanine anage
nehaze, Ruotage hu'nane ruotage hunane, Ra Anumzamoka
Ruotgera hu'nane, Hanavenentake hunka, Ko mani'enka,
menina mani'nanankinka, henka egahane hu'za nehaze. 9

Hanki anantema zamasimu ante'za mani'naza zagamo'za, kini
tratema mani'nea Ne'mofo husga hunte'za, ra agi nemi'za, susu
hunte'za Agra manivava hugahie hu'za agia erisaga huvava
nehazageno, (aiōn g165) 10 ana 24'a ugota kva vahe'mo'za, kini
trate'ma mani'nea Ne'mofo avuga zmavugati zmarena omere'za
umase'za, manivava nehia Nera mono hunente'za kini fetorira,
ana kini tra'mofo avuga zafi netre'za, anage nehaze, (aiōn g165)

11 Kagrake knare hunka mareri'nane, tagri Ra maninka, tagri
Anumza mani'nane. Kagrake rankagia e'nerinka, kagia erisaga
nehageno, hanavekamo'a marerinie. Na'ankure Kagri kavesite
maka zana efore huno me'ne hu'za hu'naze.

5 Hanki kini tratte mani'nea Ne'mofo tamaga azampine
agu'afine amefiga'anena, avo krente'nea avontafera, 7ni'a
fukinu rekamrente'nege'na ke'noe. 2 Ana hige'na kogeno

hanavenentake ankeromo ranke huno anage hu'ne, Iza knarera
hu'ne'nimo, ama fuki'ma rekamrente'nea avontafera erignopeno
erivaka regara hu'ne? 3 Hanki monafi mani'nesimo'o, mopafi
mani'nesimo'o, mopa agu'afi mani'nesimo'a, mago'mo'e huno
ama ana avontafera erivaka orege, agu'afina erivakareno kegara
osu'ne. 4 Ana hige'na krafage hu'na zavira ate'noe. Na'ankure
mago'mo'e huno ana avontafera erivaka orege, agu'afina
kegara osu'nege'ne. 5 Ana 24'a (elda) kva vahepinti mago'mo
anage huno nasami'ne, Zavira otenka ko! Juda naga'nofipinti
Deviti negeho ha'ma agatere'nea Laionimo, Agra 7ni'a fukina
eriganopega hu'neankino ana avontafera erivakarega hu'ne. 6
Anante kogeno mago Sipisipi anentamo'a kini tramofone, 4'a
kasefa hu'za zamasimu'ma ante'za mani'naza zagaramimofo
amu'nompi oti'nege'za, 24'a elda kva vahe'mo'za regorave
hunte'naze. Ana Sipisipi anentara korapama ahe'naza Sipisipi
anenta kna hu'ne. Ana Sipisipi anentamofona 7ni'a pazive
huntegeno, 7ni'a avurga hunte'neankino, e'i ana avurgamo'a
Anumzamofo 7ni'a avamutaminkino, maka kaziga mopafi
huzmanteg'e'za nevaze. 7 Hagi Agra vuno trate'ma mani'nemofo
tamaga azampintira avontafera omeri'ne. 8 Hagi ana Sipisipi
afu anentamo'ma avontafe'ma omenerige'za, 4'a zamasimu
eri'za mani'naza zagaraminki, 24'a (elda) kva vahe'mo'za,
Sipisipi anentamofo agafi zamarenare'za magoke magoke'mo'za
zavena (harp) eri'ne'za, zamente zamente mananentake'zama
kre sramnavu'za mevite'nea golire zuompa eri'nazana, e'i
anazana Anumzamofo naga'mofo nunamune. 9 Hagi zamagra
kasefa zagame nehu'za anage hu'naze, Kagra avontafera
erinka rekamrente'naza fukintamina eriganopega hu'nane.
Na'ankure Kagrira kahe frizagenka koranka'anu, mika nofi

nagapinti'ene, zamagerupinti'ene, vahepinti'ene, mopafi vahera
mi'za sezmante'nane. **10** Kagraka'a kumaka'afi huhampri
zmantanke'za, kinimofo pristi vahe trohu'za manizanki'za,
zamagra ama mopafi veara kegava hu'za manigahaze. **11**
Anantera nege'na nentahugen, rama'a ankero vahe'mo'za kini
tra'mofona regagi'ne'za, kasefa hu'za mani'naza zagamo'zane,
24'a elda kva vahe'mo'zane, tusi'a hampriga osuga'a vahe'mo'za,
12 ranke hu'za anage hu'naze, Agri'ma ahazageno fri'nemo,
hanavene so'e feno zane, knare antahi'zane, himamu hanavene,
husga huno ra agia ami'zana Agrake erigahie. **13** Hanki
maka'zama tro huzmantege'za zamasimu ante'za monafine,
mopamofo agu'afima mani'naza zagamo'zane, hagerimpi
mani'naza zagamo'za, nentahuge'za anage hu'za, Kini trate'ma
mani'nemo'ene Sipisipi anentamo'a asomu'ene ra agine,
kegavamahu hanavemo'a, Zanagrite mevava hugahie hu'za
hu'naze. (*aiōn g165*) **14** Kasefa hu'za mani'naza 4'a zagamo'za
tamage hu'za huvava nehzageno, 24'a (elda) kva vahe'mo'za
zamarenare'za mono huznante'naze.

6 Anante nagra kogeno, Sipisipi anentamo 7ni'a fukinu
rekamerente'nea avontafepinti, mago fuki eriganopegeno, 4'a
kasefa hu'za mani'naza zagafinti mago'zmimo'a monage'mo'ma
hiaza huno anage hu'ne, Eno! **2** Hige'na anante negogeno,
efeke hosi afu'mofo agofetu'ma mani'nemo'a, ati eri'hegeno
kini fetorira amigeno, harafa vahe'mo ha' huno zamagtereno
viankna huno vu'ne. **3** Anante'ma Sipisipi anenta'mo nampa
2 fukima rekamrente'nea avontafera, eri kanopegeno, kasefa
huno mani'nea zagafinti nampa 2 zagamo'a eno, hu'ne! **4**
Anantera mago koranke hosi atiramino egeno, hosi afumofo
agofetu'ma mani'nemofona hanave amigeno, rimpia fruma

erino mopafi mani'zana eritregeno, vahe'mo'za ohefri ahefri hanazegu, bainati kazina agrira ami'ne. (Mat 24:6-7.) 5

Anante nampa 3 fukima rekamare'nea avontafe Agrama eri kanonepegeno, kasefa huno mani'nea nampa 3 zagamo'a anage hu'ne, Eno. Hige'na koana mago hanike hosi egeno, ana hosimofo agofetuma mani'nemofona maka'zama refko huno kna'ama ke'za sigeli azampina me'ne. 6 Hagi anantera antahugenno monagemo'ma hiaza huno 4'a kasefa hu'za mani'naza zagaramimofo amu'nompintira anage hu'ne, Mago knamofo erizante miza eriakna huno mago osi witi ku erigeno, mago knamofo erizante miza eriakna huno, 3'a onesisi bali enerinka, masavene waininena eri haviza osunka atregeno me'no hu'ne. 7 Anantera Sipisipi anentamo'a avontafe'ma nampa 4 fukima rukamare'nea eriganopegeno, kasefa huno mani'nea nampa 4 zagamo'a eno! hu'ne. 8 Hige'na anantera kogeno, kanifuge hosimofo agofetu'ma mani'nemofona agi'a, fri'zane huno me'ne. Higeno fri vahe kuma'mo'a amage avaririno ne-egeno, vahe'ma zamahe fri hanave amigeno, 4'a kevu vahe'ma mani'nafintira, mago kevu vahera bainati kazinu'ene, agama ate'zamo'ene, krimo'ene ama mopafi afi zagamo'zane, tusi zagamo'za zamahehana hanage'za frigahaze. (Hadēs g86) 9 Anantera Sipisipi anentamo'ma avontafera nampa 5 fukima rukamare'nea eri kanonepegeno, kre sramnavu ita agafafintira, Anumzamofo ke'ma nentahi'za amage'ma nentazageno, zamahage'za fri'namo'za, 10 ranke hu'za kezati'za, Ramoka Ruotge hunka tamage nehamoka, Kagra tagri koramofo nona'a, nazupa keaga huzmantenka mopafima mani'naza vahera refko huzmantegahane? hu'naze. 11 Hagi efeke kukena anamokizmia hunezmanteno, akoheta osia knafina mani fru

hunenkeno, mago'a Anumzamofo naga'ene neramafugizmia, tamagri'ma tamahe fri'neaza hu'za zamahe fri vagareteno huno hu'ne. **12** Anante avontafete'ma nampa 6 fukima rekamarente'neana, Agra eri kanopege'na kogeno, tusi'a iminkrefa mopafina erigeno, zagemo'a hinunke kukenagna higeno, ikamo'a korankna huno koranentike higeno, **13** monafi hanafitamimo'a, hanave zahomo fiki zafamofo eritagosi higeno afuore ragamo tagiramiaza huno, mopafi atafri rami'naze. **14** Hagi negogeno monamo'a sagane huno, harontafe regazarino neviankna huno nevigeno, maka agonamo'zane, ti amu'nompi me'nea mopamo'za kuma'zamia atre'za vu'naze. **15** Anantera ama mopafi kini vahe'mo'zane, marerisa vahe'mo'zane, harafa vahe'mo'zane, feno vahe'mo'zane, hanave vahe'mo'zane, maka kazokzo eri'za vahe'mo'zane, fru hu'za mani'naza vahe'mo'za, zamagra havegampine, agonafi me'nea havefi fraki'naze. **16** Ana nehu'za agonamofonku'ene havemofonkura anage hu'naze. Tagri tagofetu eraminka, kini trate'ma mani'nemofo avure'ene, Sipisipi anentamofo rimpa herante zampintira refiteranto. **17** Na'ankure Anumzamofone, Sipisipi anentamoke zanarimpama kumi vahe'ma aheznante'za refkoma ha'a rankna hago efore nehianki, izi zanavurera otigara hu'ne? hu'za hu'naze.

7 Anama hutege'na kogeno, 4'a rugaraga asoparega ama mopamofona ankeru vahe'mo'za ot'i'ne'za, 4'a kaziga e'heria zahora zamazampi azerinageno, mopafine hagerimpine, zafafinena zahora e'ori'ne. **2** Hagi anantera kogeno mago ankeromo'a zage hanati kazigati ehanatino, manivava Anumzamo hunagru huno nagrizane hu'nea avame'za, erineno mopane hagerine eri haviza hugahaze huzmante'nea 4'a ankeru vahera ranke huno zamasami'ne. **3** Mopane hagerine, zafaraminena

zamazeri haviza osu'nenketa, Anumzamofo kazokzo eri'za
vahetamimofo kokovite avame'zana rekamare antezmantetaneno
hu'ne. **4** Ananteria antahugenno avame'za rekamare zmante'nea
vahe'ma hamprineana 144 tauseni'a mani'naze. Ana vahera
maka Israeli mofavreramimofo naga nofipinti vahetami
hampri'ne. **5** Juda nagapintira 12 tauseni'a huhamprino,
avame'za rekamrezmanteno, Rubeni nagapintira 12 tauseni'a
huhamprino, avame'za rekamare zamanteno, Gati nagapintira
12 tauseni'a huhamprino, avame'za rekamare zmanteno,
6 Asa nagapintira 12 tauseni'a huhamprino, avame'zana
rekamarezmanteno, Naftali nagapintira 12 tauseni'a huhamprino,
avame'zana rekamarezmanteno, Manase nagapintira 12 tauseni'a
huhamprino, avame'za rekamarezmanteno **7** Simioni nagapintira
12 tauseni'a huhamprino avame'zana rekamarezmanteno,
Livae nagapintira 12 tauseni'a huhamprino, avame'za
rekamarezmanteno, Isaka nagapintira 12 tauseni'a huhamprino,
avame'zana rekamare zamanteno **8** Zebuluni nagapintira
12 tauseni'a huhamprino, avame'zana rekamarezmanteno,
Josefe nagapintira 12 tauseni'a huhamprino, avame'zana
rekamare zamanteno, Benzameni nagapintira 12 tauseni'a
huhamprino, avame'zana rekamarezmantene'. **9** Anazama
hutege'na kogeno, tusi'a vahekrefa mago'mo'e huno hamprigara
osu'nea vahe'mo'za maka kumapinti'ene, naga nofipinti'ene,
vahepinti'ene, maka agerupinti'ene, Sipisipi Afu anentamofo
tra'mofo avuga, efeke za'za kukena hu'ne'za, zamazampina tofe
zafamofo ani'na hantagi'za eri'ne'za oti'naze. **10** Zamagra ranke
hu'za anage hu'naze, Tagri Anumzama trate'ma mani'nemo'ene,
Sipisipi anentamo'ene, tagu'vezine tahokehenale hu'za hu'naze.
11 Mika manigagi'naza ankero vahe'mo'zane, ugagota kva

vahe'mo'zane, 4'a kasefa hu'za mani'naza zagamo'za, kini
tramofona manikanegi'za zmavugosaregati zamarenare'za
umase'za, Anumzamofona mono hunte'za, 12 amanage hu'naze,
tamage husgama hunte'zane, ra agine, knare antahi'zane,
muse hunte'zane, antahisga hunte'zane, hihamune hankavea
Anumzamo eri vava hugahie tamage hu'za hu'naze! (aiōn

g165) 13 Hagi anante 24'a ugagota kva vahepinti mago'mo
nantahigeno, Amama efeke zaza kukenama hu'nazana, zamagra
iza'za mani'ne'za, igati zamagra e'naze? Hige'na, 14 nagra
anage hu'na asami'noe, Ranimoka kagra antahi'nane hu'na
hugeno, Agra anage huno nasami'ne, Ama'i zamagra tusi'a
hazenkezampi ufratageno ha' vahe'mo'za nezamahazageno,
za'za kukenazamia Sipisipi Anentamofo koranteti sese hugaru
huzmantage'za efeke hu'namoze. 15 Na'ankure ama ana agafare,
Anumzamofo kini tra avuga oti'ne'za hanine zagenena Agri ra
mono nompi eri'zama'a erinentazankino, trate'ma mani'nemo'a,
Agra kegava huzmantegahie. 16 Zamagrira zmagamate'zane,
tinku zmavesizane omnena, zage hara zamave'osina, amuhogura
osugahaze. 17 Na'ankure tra'mofo amu'nompima mani'nea
Sipisipi anentamo, kegava huzmanteno asimu erino mani
tinkapuite vanigeno, Anumzamo'a maka zamavunura eri ho'mu
huzmante vagaregahie huno hu'ne.

8 Hanki anante Sipisipi anentamo'ma avontafeteti nampa 7ni
fukima eri kanopegeno, monafina hafu'a auafi agasasana
eritagane'ne. 2 Anantero Anumzamofo avuga 7ni'a ankero vahe
oti'namokizmia 7ni'a ufe eri nezamizage'na ke'noe. 3 Anantero
mago ankeromo golire tro hunte'nea zuompa eri'heno kresramna
vu itare eme otigeno, Anumzamofo kini tra'mofo avuga golire
tro hunte'naza kre sramnavu itare Anumzamofo nagamokizmi

nunamune erinteno kresramna vanigu rama'a mananentake'zana ami'ne. 4 Hagi mananentake zamofo tevegumo'ene, Anumzamofo naga'mofo nunamumofo mna'amo'a, ankeromofo azampinti marerino Anumzamofo avure vu'ne. 5 Anantero ankeromo'a zuompa erino kre sramnavu itaretira, golire tro hunte'naza zuompafi tevea tagino eri aviteteno, matevuno mopafi atregeno, tusi'a monage nehigeno, kopsina e'nerigeno, imi eri'ne. 6 Hanki anantero 7ni'a ankeromo'za 7ni'a ufe erine'za, ufe renaku retro hu'naze. 7 Ese ankeromo uferegeno, komopa ko'ene korane tevea eri havia hu'neana, zamagra mopafi matevu'za atrazageno, tagufa kevufintira, mago kevu mopamo'a teveregeno, tagufa kevu zafafintira, mago kevu zafamo'za teverazageno, maka zafa sinage tra'zamo'za tevere'naze. 8 Nampa 2 ankeromo ufe regeno, ra agona gnazamo'a teve neregeno hagerimpi mate vuno atregeno, tagufa hageri me'nefintira, mago hagerimo'a koranke higeno, 9 tagufa kevu hagerimpi zagrami mani'nafintira, mago kevumo'za frizageno, tagufa kevu venterami me'nefintira, mago kevu ventemo'za haviza hu'naze. 10 Nampa 3 ankeromo'a uferegeno, ra hanafimo monafinti teve taginaku kasagasa hu'za taginefa hiankna tavimo remsa huno atafariramigeno, tagufa kevu tira me'nefinti mago kevu tirante'ene osi tinte'ene kampui tinte'ene takaure'ne. 11 Ana ofumofo agi'a Akahe'ne, hu'za hu'naze. Tagufa kevufinti, mago kevu timo'za akahazageno, rama'a vahe'mo'za ana tina nene'za fri'naze. Na'ankure ana timo'a akahunegen'e. 12 Nampa 4 ankeromo'a ufe regeno, zagemofona tagufa kevu refko higeno, ikamofona tagufa kevu refko higeno, tagufa kevu hanafitami me'nefintira, magoke magoke kevuzmia amasagigeno haninki'ne. Mago zage ferumofoma tagufa kevu masama me'nefintira, mago kevu masamo'a hani hu'ne. Hanimo'enena

anazanke hu'ne. (Mat 24:29.) **13** Anantero nege'na antahugen, mago tumpamo monamofo amu'nompi hareno enevuno, ranke huno anage hu'ne, Kva hiho, kva hiho, mopafima mani'naza vahe'mota hazenke ne-eanki kva hiho. Na'ankure 3'a ankero vahe'mo'za ufena ore'nazanki'za, kofa knafi ufena regahaze!

9 Hagi anantero nampa 5fu ankeromo'a ufe regeno, monafinti hanafimo'a mopafi atafariramige'na kogeno, riga omne kerimofo kinofira ami'ne. (*Abyssos g12*) **2** Higeno agra riga omne keria anagigeno, tusi teve nerefinti atiramino eviakna huno, ana kerifintira teve tokimo'a evu'ne. Zagene zahomofona ana kerifinti teve tokimo refitegeno tusi hani hu'ne. (*Abyssos g12*)

3 Anantero ana teve tokipinti kenutamimo'a atiramino ama mopafi evigeno, segintavemofo hanavema ama mopafima ami'neaza huno hanave zami'ne. **4** Hanki ana kenutamimofonkura anage huno zmasami'ne, Mopafima me'nea tra'zana eri havizana osuge, zafasinage huno me'nea tra'zana eri havizana osuge, zafa eri havizana osiho. Hianagi Anumzamo'ma hunagru hu'nea avame'zama kokovite'ma rukamare onte'nesia vahe'mokizmige zamazeri havizana hiho hu'ne. **5** Ana nehazageno anage huno huzmante'ne, vahera zamahe ofrigahazanagi, 5fu'a ikamofo agu'afi zamatazanke zamiho huno huzmante'ne. Ana zamatazama zami'nea knazamo'a segintavemo'ma vahe'ma zamaprigeno zamatakma kriankna zamata krigahie. **6** Hanige'za ana knafina vahe'mo'za frisaza kanku hakaregahaze. Hianagi ofritfa nehu'za, frinaku hugahazanagi, fri'zamo'a zamagritetira fresige'za ofrigahaze. **7** Hanki ana kenu tamimofoma ke'noana zamavu'zamava'mo'a hosimo hate vunaku retro hiankna nehazageno, zamasenirera golire tro hunte'naza kini fetori knaza megeno, zamavugosamo'a

vahe'mofo zamavugosagna hu'ne. **8** Zamazokamo'a a'nemofo zamazokamo'ma hiaza huno za'za higeno, zamavemo'a laionimofo avemo'ma hiankna hu'ne. **9** Zamimizarera hankomo'a me'ne, ana hankomo'a, aenire hankogna hu'ne. Zamagekonamofo zamagasasankemo'a, hosiramimo renteno avazu huno nevia zamo, hate vunaku agareno nevigeno neriankna agasasaru'ne. **10** Ana kenutamimofona zamarisona me'negeno, ana zamarisonamo'a segintavemofo risonagna hu'negeno ana risonanu vahera nezamare. Ana risonamofona 5fu'a ikampi vahe'mofona zamatama zami hanave'a zami'ne.

11 Hanki zamagrira mago kinimo kegava huzmante'ne, ana kinia ariga omne kerimofo kva ankeronkino, agi'a Hibru kefina Abadonie (fri'ne hu'ne) hu'za nehaze. Mikaza eri havizahu nere nehu'za, Griki kefinena Apolonie hu'za agi'a neheze. (*Abyssos g12*)

12 Hanki nampa 1ni knazankuma kva hihohu'neaknazamo'a evigeno, tare knazamo ne-eanki kva hihohu'ne. **13** Anante nampa 6si ankeroma uferegeno, nagra antahugenogeno Anumzamofo avurega golire tro hunte'naza kresramnavu itareti 4'a pazine me'nefinti mago'mo huno, **14** nampa 6gisi ankeromo ufema erinemofona ana agerumo'a asamino, Yufretis rantinte'ma 4'a ankerona anaki zamante'nazana katufe zamantrenke'za viho huno hu'ne.

15 Hanki 4'a ankeroma retro'ma huzmantenge'za mani'naza ankerona katufe zamatrenige'za ana auagi, ana zage knagi, ana ikanki, ana kafumofo kna fatgore, 3'a kevu refko vahera hu'za, mago kevu vahe'mokizmia mika zamahe vagaregahaze. **16** Hagi hosi agumpima mani'naza ha' vahe'mokizmi nampamo'a 200 milioni'a mani'naze nehige'na antahi'noe. **17** Hagi amanahu'za avanagnazama kofina ke'noe, hosi afutamimofo agumpima mani'ne'za eri'za nevaza vahe'mo'za zamimizare'ma rufite'naza

hankozmimofo avoma'amo'a, koranke nehigeno, hokonke
nehigeno, kaninkruke nehigeno, tevene salfa havemo toki
nehigeno, ana hosi afutamimofo zamagenopamo'a laioni
agenopagna nehigeno, zamagipintira tevene, salfa havemo'a
toki hiakna huno atiramino evu'ne. **18** Zamagipinti'ma evu'nea
tevemoki, salfa havere'ma nerea tevemo, ana 3'a knazamo
maka kokankonka 3'a kevu vahepinti, mago kevu vahera
zamahe vagarege'za fri'naze. **19** Na'ankure hihamu hanavemo'a
ana hosiramimofona zamagipine zmarisonafine me'ne. Ana
hosiramimofona zmarisonamo'a, osifavegna huno asenia
huntegeno, ana aseniretira vahe'mofona hazenke zamigahaze.
20 Hagi ana knazamo'ma ozmahege'za mani'naza vahe'mo'za,
kumi'ma hu'naza zankura zamagu'a rukrehera nosu'za,
hankromofona mono hunonte'za, zamagra'a zamazampinti
golire'ene silvare'ene brasire'ene havere'ene, zafa atupare'ene,
zmavua onkege zmagesa ontahige kaza osu'za tro hunte'naza
zante monora hunte'naze. **21** Ana nehu'za vahe'ma zamahe
nefriza, avuatga ha' nehu'za, monko avu'ava'ma nehu'za,
kumzafama nesaza zankura magomo'e huno agu'a rukrahera
osu'ne.

10 Hagi anante mago hanavenentake ankeromogeno, mona
atreno eramigeno kukena hamponu huntenu, furegena'mo asenire
megeno, avugosamo'a zagegna higeno, agimo'a no azeri hanaveti
avempa zafagna huno teve anefa hu'ne. **2** Azampina osi avontafe
vakarente'nea eri'ne. Ana ankeromo'a tamaga agia hagerimpi
reno, hog a agia mopafi reno otineno, **3** ranke huno laionimo
ageru neriankna huno agerura nerigeno, 7ni'a monage'mo'za
zamagerura ru'naze **4** Ana zmagerura nerazage'na, avompi
krentenaku nehugen'o'a, monafinti anage huno hu'ne, 7ni'a mona

ageru'ma antahi'nana eriginka rekamrenentenka, avontafepina
kreontenka atregeno frakino meno huno hu'ne. 5 Anantero kogeno
hagerimpima tamaga agama nenteno, hoga agama mopare'ma
ante'nea ankeromo'a tamaga azana monafinka rusute'nagamu
atreno, 6 huvempa kea manivava nehimofonte huno, Monane
maka'zama agu'afima me'neazama tro'ma nehuno, mopane
maka'zama agu'afi me'neazama tro nehuno, hagerine maka'zama
agu'afi me'nezama tro'ma hu'nemokino, mago'ane avega
ontegahie. (Eks-Ati 20:11, Diu-Kas 32:40, Dan 12:7) (aiōn g165) 7

Hianagi nampa 7ni ankeromoma ageruma runakuma nehigeno'a,
Anumzamo'ma oku'a ante'nea kea, kasnampa eri'za vahetema
asami'nea kemo'a efore hugahie. 8 Anante monafinti'ma ko'ma
antahi'noa agerumo'a mago'ane kea hunamino anage hu'ne,
Vunka hagerimpine mopafinema agamareno oti'nea ankeromofo
azampima vakarente'nea avontafera omerio huno nasm'i'ne. 9
Hanki anage hige'na nagra vu'na, osi avontafe naminogu ana
ankeromofo ome antahigogeno, agra anage huno nasami'ne,
erinka nesankeno'a karimpafina aka hugahianagi, kagitera
tumerimo'ma hiaza huno tusi haga kavesigahie. 10 Ana osi
avontafera ankeromofo azampintira nagra omeri'na nogeno,
nagipina tume rimo'ma hiaza huno haga hige'na netogeno,
narimpafina tusi aka ahe'ne. 11 Anante zamagra nagrikura anage
hu'naze, Kagra mago'ane rama'a vaheku'ene kumataminku'ene,
zmagerukuma, kini vahekura kasnampa kea ome huo hu'za
hu'naze.

11 Anante mago azota anteno mesarimi huno ke'za nenamigeno
mago'mo huno, Anumzamofo ra mono none, kresramna
vunentaza ita azota antenka mesarim nehunka, anampima
mono'ma hunentaza vahera, hamprinka ko. 2 Hagi ra mono

nomofo meg'i'a kumara azota antenka mesarimia osunka
atro, na'ankure megia vahe'mofo zamineankino, 42'a ikampi
ruotge'ma hu'nea rankumara, zamagareti eme repehana
hugahaze. **3** Hanki ana hanige'na Nagri nanekema huama
hana'a netrena, hanavea zanami'nuge'ne, 1,260'a zagegnafi
zanasunku kukena huke, kasnampa kea huama hugaha'e. **4**
Ama ana netrena, tare olivi zafane, tare lamu tavikna huke,
maka ama mopamofo Ramofo avugama oneti'a netrene. **5** Hanki
iza'o ana netre'ma znahenakuma hanamokizmia, znagipinti
tevemo'a hagana hagana huno atiramino ana vahera tefanane
hugahie. Hagi ina vahe'mo'za znahenaku'ma hanamokizmia,
anahukna kante ahegahie. **6** Ama ana netremokea monama
eriginakeno ko'ma orania hanavea erina'ankino, kasnampa
kema huamama hana'a knafina, kora azerinakeno norina, tina
amne eri koranke nehuke, zanagrima zanavesisiaza huke amne
mopamofona knazana amigaha'e. **7** Zanagrama ana nanekema
huvgamaretesakeno'a, riga omene kerifinti'ma etiramino esia
afi zagamo hara huznagatereno zanahe frigahie. (**Abyssos g12**)
8 Hagi ana znahe frisia zanavufamo'a, rankuma'mofo kampi
me'enigeta, e'i ana kumaku fronka ke huta Sodomune Isipie
huta hugahune. E'na kumapinke Razanimofona rugeka zafare
ahe'naza kumapi, zanavufgamo'a megahie. **9** Ama ana fri'na'a
znavufgamofona 3'a knagi mago zageferupi mene'nige'za,
maka vahepinti'ene, naga nofipinti'ene, zmagerupinti'ene, maka
kazigati vahe'mo'za znagegahaze. Hianagi kerifima eriza ome
aseznante zankura i'o huzmantegahie. **10** Hagi mopafima
mani'namo'za ana kasnampa netrema fri'na'a zankura musena
nehu'za, ana zankura ne'zana retro hu'za nene'za, musezana
omi ami hugahaze. Na'ankure ana tare kasnampa netremokea

mopafima mani'naza vhahera zamatazama zami'naza zanku,
ana musena hugahaze. **11** Hianagi 3'a knagi mago zageferu
evanigeno'a, Anumzamo'a zanasimura zanamina, zanagra
oti'nakeno, kesaza vahe'mo'za tusi kore hugahaze. **12** Hagi ana
netre'mokea nentahikeno, monafinti ranke huno, amare emarer'i'o
huno higene, ha'ma reznante'naza vahe'mo'za nezanagage'ne
hampompi monafi mareri'na'e. **13** Anama neha'a kna fatgore
tusi'a imi erigeno 10ni'a ranku'ma me'nefinti, mago rankuma'mo'a
fragu vaziramigeno, 7 tauseni'a veara imimo'a zamahe fri
vagaregeno, mago'amo'za kore hu'za monafi Anumzamofo ra
agi erisaga hu'naze. **14** Hanki nampa 2 knazamo'a agatereno
evige'na negogeno, nampa 3 knazamo'a ame huno fore hu'za
nehianki kva hiho. **15** Anante nampa 7ni ankeromo ufe regeno,
ranke hu'za monafintira kezati'za anage hu'naze. Ama mopafi
rankumamo'a, tagri Ramofo kuma nesenkeno, Agri Kraisi kuma
fore hinkino, Agra kini manino kegava huvava hugahie. (aiōn g165)

16 Hanki 24'a ugagota kva vahe'mo'za kini trate'ma Anumzamofo
avuga mani'nazareti, atre'za zamavugosaregati emase'za,
Anumzamofo mono hunente'za, **17** anage hu'za, Hanavenentake
Ra Anumzamoka, tagra rankagi kamune, korapa mani'namoka,
menina mani'nane, na'ankure Kagra tusi'a hihamu hanave
e'nerinka, menina erigafa hunka kini maninka kegava nehane.
18 Hagi miko kokankoka vahe'mokizmia zamarimpa nehenkeno,
Kagri karimpa hezamo'a ne-enkeno, fri vahe'ma refkoma
hanana knamo'a ne-enkeno, kazokzo eri'za vahe'ene kasnampa
vaheka'ane mono naga'ene zamagi me'nenia vahero, zamagi
omnene'nia vahe'mo'za Kagri kagigu'ma kore'ma nehaza vhahera
mizana nezaminka, ama mopafima vahe zamahenefriza vhahera,
zamahe frigahane. **19** Hagi monafima me'nea Anumzamofo ra

mono nomofo kafamo'a anagi hagro higeno, Agrama huvempa
ke huno huhagerafi'nea vogisimo'a, Agri mono nompintira efore
higeno, kopasinamo'a trege huno vuno eno higeno, ranke huno
monage nehigeno, imi e'herigeno, tusi ko'mopa ko ru'ne.

12 Mago ruzahukna huno tusi'a avame'za monafina efore
hige'na kogeno, mago a'mo'a zagenku kukena hu'negeno, ikamo'a
agafi menegeno, asenifina 12fu'a hanafimo kini fetorikna huno
asenire me'ne. 2 Ana a'mo'a amu'ene huno mofavre kasenteza
nehuno, ranke huno mofavre'za negegeno krafa hu'ne. 3
Anantera ru avame'za monafina efore hige'na kogeno, mago
agaza hunte koranke osifavemofona, 7ni'a agenopa me'hegeno,
10ni'a pazine hanatinegeno, aseniramintera 7ni'a kini fetori
me'ne. 4 Hanki risonamo'a tagufa kevu hanafi monafi me'nefinti,
mago kevu hanafira mopafi ruharfi huzmatre'ne. Ana osifavemo'a,
a'mo'ma mofavrema kasentenaku'ma nehia avuga oti'ne. Anama
hu'neana ana mofavre kasentenkeno aheno asga hunakrinaku
oti'ne. 5 Anante ana a'mo ne'mofavre kasente'ne. Henka'a ana
mofavremo nena huno maka vahera aeni azompareti kegava
huzmantenia ne'kino, ana mofavre avreno Anumzamofonte
vuno, Agri'a kini trate avreno ome antene. 6 Anantera ana
a'mo'a kore freno Anumzamo'ma retro hunte'nea mopare
ka'ma kopi umani'ne. Anantega ana ara kegava krinte'za
ne'zana nemisageno, 1,260'a kna manigahie. 7 Hanki tusi'a ha'
monafina fore hu'ne. Maikoli'ene ankero naga'amo'za, osifavene
ana osifavemofo ankero naga'a hara huzmantene'ne. 8 Ana
osifavemofo ankero naga'mo'za hanavezmia omnege'za, hara
agateregara osazageno monafima manisaza kumara omnene.
9 Ana koranke osifavea asgahutregeno erami'neankino, ana
ne'kura korapa mani'nea osifave nehu'za, hankrore nehu'za,

Sata'ema nehaza ne'ma ama mika mopafi vahe'ma rezmatgama
nehia nera, asgafetregeno ankero naga'ane mopafi erami'naze.

10 Anante nentahugeno mago ra ageru monafinti runo anage
hu'ne, Menina vahe'ma ahoke aheno agu'vazizane, hanavene,
tagri Anumzamofo kumamo'ene Agrama huhampriranteno
tavaregahie hu'nea ne'mo'a, hago tusi'a hihamu eri'ne. Na'ankure
tagri nerufukizmima hanine zagine, tagri Anumzamofo avure
agra havige kegaga hunezmantea nera asgahu atregeno
urami'ne. **11** Zamagra ana ne'mo'ma ha'ma huzmantea hara,
Sipisipi anentamofo koranteti'ene agenke'ama huama hazareti
agatenere'za, zamagra zamavufagura nontahi'za, zamagri'ma
zamahe fri'zanku'enena korera osu'naze. **12** Na'ankure ama
ana agafare, monafinka mani'namota muse hiho. Hianagi
mopane hagerimoka kva hi'o, na'ankure hankromo'a tanagrite
ko uramine. Keno antahinoma hiana osi'agna me'negeno, tusi
rimpa nehegeno urami'ne. **13** Ana agaza hunte osifavemo'ma
keno antahino'ma hiana mopafima mate'mavutregeno'a, ne'
mofavrema kasente'nea ara eme aheno atahoza ami'naku
avariri'ne. **14** Hianagi tusi'a tumpamofo agekonarere ana ara
amigeno, ana a'mo'a hareno vahe omani ka'ma mopafi, ana
osifavea atreno, 3'a kafugi 6gisi'a ikampi agri kuma'ma retro'ma
hunte'nerega umani'enigeno kegava huntegahie. **15** Hanki ana
osifavemo'a, ana ara ti mreno vaniegu agipinti tina ruvaritregeno,
tusi'a ti hageaza huno ana ara avaririne. **16** Hianagi ana agaza
hunte osifavemofo agipinti'ma evu'nea rantina, mopamo ana ara
aza huno ana tina agira aka huno nakri vagare'ne. **17** Ana higeno
ana tusi'a osifavemo'a ana a'mofona rimpa ahenenteno, maka
mofavrenaga'amo'za Anumzamofo kasege amage nente'za,

Jisasi avu'avazama nevaririza naga ha' huzmante'naku vu'ne.

Ana agaza hunte osifavemo hagerinkenare otino mani'ne.

13 Anantero mago afi zaga hagerimpinti hanatino marerige'na kogeno, 7ni'a agenopa megeno, 10ni'a pazine ana agenopafintira marerigeno, ana 10'a pazivetera kini fetori me'negeno, Anumzamofo huhaviza hunte agiramina zamasenire me'ne.

2 Hagi ana afi zagama ke'noana lepatigna higeno, agamo'a bea agagna higeno, agi'mo'a laioni agikna hu'ne. Hanki agaza hunte tusi osifavemo agra'a hihamu hanavene, kini tra'ane maka kegavahu hanavea ami'ne. **3** Nagra koana mago agenopa ko ahenazanagi, anama ahe'naza zamo'a teganigeno so'e hunte'ne. Higeno maka mopafi vahe'mo'za antri nehu'za, muse hunte'za, ana afi zagamofo amage ante'naze. **4** Ana vahe'mo'za agaza hunte osifavemofo monora hunte'naze. Na'ankure ana agaza hunte osifavemo'a, afi zagamofona kegavahu hanavea ami'nega, ana vahe'mo'za monora tusi zagamofona hunente'za anage hu'naze, Iza ama tusi zagagna hu'nesimo hara huntiga hu'ne? hu'za hu'naze. **5** Hanki Anumzamo'a atregeno, ana afi zagamo'a avufga ra nehuno, Anumzamofona azanava kea hunenteno, 42'a ikamofo agu'afi hanavea amigeno ruzahu ruzahu kaguvazana hu'ne. **6** Hanki ana afi zagamo'a ajira aka huno, Anumzamofona azanava kea hunenteno, Agi'amofona huhaviza hunenteno, Agri naga'ma monafinka mono noma'agna hu'za mani'naza nagara, huhaviza huzmante'ne. **7** Hagi Anumzamofo naga'ma ha'marezmane hanavenena amigeno, hahu zamagatenereno, maka naganofi'ma, vahe'ma, zamageru'ma maka kuma'ma, kegavama kri hanave ami'ne. **8** Maka ama mopafi mani'naza vahe'ma, ahe'naza Sipisipi Anentamofo asimu eri avontafepi zamagima, monane mohanem tro'ma osu'neno kre onte'nesia

vahe'mo'za, ana afi zagarera monora huntegahaze. **9** Izago kagesa me'enigenka nentahisamoka, antahise huo. **10** Izano Anumzamo'ma huno, avreno kina huntegahie hu'nesimo'a, kina ome hino. Izano kazinknonteti ahefrigahie hu'nesimofona kazinknonteti ahefrigahie. Hanki ama ana zamavu'zmavazana akohe'za mani'neza kazigazi hu'za knazama eri'za vanagu kea hu'ne! **11** Ananteru ru afi zagamo mopafinti hanatino egena kogeno, Sipisipi anentamofo tare pazivekna pazive asenirera me'negeno, kema hiana tusi'a agaza hunte osifavemofo agerukna ageru ru'ne. **12** Nampa 2 afi zagamo'a, nampa 1ni afi zagamofo kegavahu hanave'a, agri avure eri ama nehuno, maka ama mopafi mani'naza vahera, nampa 1ni afi zagama ko'ma ahazageno namuma'amo tegani'nemofo monora hunteho hu'ne. **13** Anante nampa 2 afi zagamo'a ruzahu ruzahu avame'za eri fore nehuno, maka vahe'mokizmi zamavufi kaguvaza higeno monafinti'enena tevea reno erami'ne. **14** Ana nehuno mopafima mani'naza vahera rezmataga hu'ne, na'ankure nampa 1ni afi zagamofo avufina, ruzahu ruzahu avame'za nehuno, nampa 1ni afi zagama ko'ma kazinknonu ahazageno friteno asimu'ma eri'nea afi zagamofo amema'a tro hiho huno zamasami'ne. **15** Asimu'ante hanave amizageno, ana amema'a tro hunte'naza amema'a asimu amigeno, ana amema'amo'a keaga higeno, ana amema'ama mono huontesaza vahera zamahe frigahie. **16** Hagi anante nampa 2 afi zagamo huzmanteno, mika amane vahero zamagi me'nea vahero, zago'a me'nea vahero, zago'a omne vahero, amne vahero, kazokazo eri'za vahe'mokizmia avame'za tamaga zmazante'ene, kokovite'enena krentegahaze. **17** Ana hanigeno mago vahe'mo'e huno mizasege, zagonera atrege osugahianki, ana afi zagamofo agimofo nampama

eri'nenia vahe'moke mizasege, zagore atrege hugahie. 18
Vahe'mo'ma knare antahintahima eri'nenimo'a atregeno, ana
afi zagmafo nampana refko huno keno, ana nampana mago
ne'mofo nampakino, ana nampana 666 me'ne.

14 Anantera Sipisipi Anentamo'a Saioni agonare oti'negeno,
Agri agine, Nefa aginema kokovite'ma krente'neana 144 tauseni'a
vahe'mo'za magoka oti'nazage'na ke'noe. 2 Ana hige'na
mago agerura antahuana monafintira agerura rama'a timofo
agasaraso'ma hiaza nehigeno, mona kemo'ma hiaza nehige'na,
mago ageru'ma antahuana kita (harp) ahazageno neriankna
ageru nerige'na antahi'noe. 3 Ana nehu'za kini trate'ene, 4'a
kasefa hu'za mani'naza zagane, 24'a ugota kva vahe zamurera
kasefa zagamera hu'naze. Ana zagamera mago vahe'mo'e
huno ontahi'nazankino, 144 tauseni'a nagama maka mopafinti
mizama sezamantenea vahe'mo'za antahi'naze. 4 Hanki ana
vahe'mo'za a'nene savrira osu fatgo hu'za mani'naze. Na'ankure
zamagrazmi agru hu'za mani'naze. Ama ana vahe'mo'za Sipisipi
Anentamo'ma inaregama viana zamagra nevaririza vahere.
Ana vahera Anumzamo'a ese hoza vasageankna huno maka
vahepinti miza sezmente'neankino, Anumzamofone Sipisipi
afu Anentamofo naga manigahaze. 5 Hagi ana vahe'mofo
zamagipina havigea omnetfa higeno, hazenkezmia omane vahe
zamagra mani'naze. 6 Hagi anantera mago ankero kogeno
monafi hareno enevuno, mevava Knare Musenkea mopafima
mani'naza vahete ene, maka kumate'ene naga nofite'ene,
zamagerute'ene, vahete'ene huama hu'ne. (aiōnios g166) 7 Ana
nehuno ranke huno amanage hu'ne, Anumzamofonku kore
hunentetma ra agi amiho. Agrama vahe'ma refko'ma haniankna
hago e'ne. Monane mopane hagerine, maka tinkampuima

tro'ma hu'nemofo monora hunteho hu'ne. 8 Ananter a nampa 2
ankeromo kota ankeromofo amefi hareno ne-eno anage hu'ne,
Babiloni tusi'a kumamo'a trakahu'ne, trakahu'ne, ana amo'a
maka mopafi kumatamina, agra havi avu'avaza hanavetino
hu avesizamofo waini tina zamige'za ne'naze. 9 Ananter a
nampa 3 ankeromo'a, tare ankerofomo zanamefi ne-eno anage
huno ranke hu'ne, iza'o afi zagamofone, amema'are'ma mono
hunenteno, azante'ene kokovite'ma avame'zama'a eri'enimo'a,
10 Anumzamofo tusi'a rimpahé knazamofo waini erihavia huno
tagi avite'nea kapufinti neneno, ana vahe'mo'a ruotge ankero
vahe'ene, Sipisipi anentamofo avure, havere te kasinkasi nehia
tevefi atazana erigahie. 11 Ana afi zagare'ma mono hunente'za,
amema'are'ma mono hunentesageno, iza'zo agri agimofo
avame'zama'a erisamo'za, zamatazama erisaza tevemofo tokimo
mareri vava nehina, hanine zagenena fru hu'za omanigahaze.
(aiōn g165) 12 Anumzamofo kasege amage'nente'za zamentintima
Jisasinte nehaza vahe'mo'za amanahu hugahaze, akohe'za
mani'ne'za kazigazi hu'za knazana ener'i'za oti hanavetigahaze. 13
Anante mago ageru monafinti arige'na nentahugeno anage hu'ne,
Avona krento, Ramofompi mani'ne'za fri'namo'za, meninteti'ma
agafa huno vaniana muse hugahaze! Ozo huno Avamumo'a
hu'ne. Zamagrama maraguzati'za e'naza zana manifru hugahaze.
Na'ankure zamagrama knare zamavu'zamavama hu'zama
e'naza zamavu'zamavamo'a, zamagrane magoka zamage'a
zamavaririno ne-e. 14 Anante kogeno efeke hampopina
Vahe'mofo Mofavregna Ne' mani'neno, golire tro hu'naza kini fetori
asenire antanineno, sikolie nehaza ananke fagagino asane'nea
kazi azampina eri'ne. 15 Hanki mago ankeromo mono nompinti
atiramino, ranke huno hampopima mani'nemofonkura huno,

kazinkno ka'a erinka kavera hamaro. Na'ankure ne'zama hamare kna e'ne, na'ankure mopafina nezamo'a afureanki ome hamaro huno hu'ne. **16** Anante efeke hampopima mani'nemo'a ananke fagagino asane'nea kazi erino, maka mopafima nenahu'nea hoza hamare'ne. **17** Anantero mago ankeromo, ra mono no monafi me'nefinti atiramino, agranena sikolie nehaza ananke fagagino asane kazi eri'negena ke'noe. **18** Anante ru ankerona, tevema kvahu hanavema eri'nemo, kresramnavu itareti eno, ranke huno asane kazima eri'nemofonkura anage hu'ne, Sikolie nehaza ananke fagagi kazinka'a erinka waini zafa raga mopafintira tagio, na'ankure raga'amo'a afure'ne. **19** Anante ankeromo'a ananke fagagi asane kazima'a erino mopafi uramino waini raga taga huno eri atru nehuno, ana wainia erinteno rerati keri havereti tro huntenefi atre'ne. E'i anazamo'a Anumzamofo tusi'a rimpahé knaza huvame huno me'ne. **20** Rankuma'mofo megi'a, waini raga rerati keri havereti tro hunte'naza kerifi rehana neti'zageno, kora'mo tusiza huno vu'ne. Hanki ana koramo'a 300 kilo mitanaza vu'ne. Hanki tusiza huno nevuno tiru nemareno, marerino hosimofo agite ome atre avamente vu'ne.

15 Hanki anantero monafina tusi'a ruzahu avame'za fore nehige'na negogeno, 7ni'a ankeromo'za, tusi'a rimpahé knazana 7ni'a eri'haze. E'ina knazana Anumzamofo vagare rimpahé'zane. Na'ankure Anumzamofo rimpahé'zamo'a, e'i ana knazampi vagaregahie. **2** Anantero kogeno mago hagerina kapokna hu'negeno, tevene eri havia hu'ne. Afi zagamofone, amema'ane, agi'amofo nampama azeri agatere'naza naga'mo'za, kapokna hu'nea hagerimofo agofetu oti'ne'za, Anumzamofo zavenna (harps) azeri'haze. **3** Anumzamofo eri'za vahe Moses Zagame'ene Sipisipi Anentamofo Zagame hu'za anage hu'naze, Tusiza hunka

ruzahu eri'za eri'nane, Ra Anumzamoka tusi hanavenentake hu'nane. Kagri kamo'a fatgo huno tamage hu'ne, maka kumapi vahe'mokizmi kini Nere! 4 Ramoka, iza kagrikura korera nosuno, kagi'a erisaga osugahie? Na'ankure Kagrake Ruotge hu'nane. Maka kumapi vahe'mo'za, e'za Kagri kavuga monora eme hugantegahaze. Na'ankure fatgo kavukvazamo'a eama hu'ne. (Eks-Ati 15:1-18, Diu-Kas 32:1-44). 5 Ananter a ma anazama fore'ma hutege'na, Anumzamofo agi agenkehu seli mono nomo'a monafina anagi'nege'na kogeno, 6 7ni'a knazama eri'naza, 7ni'a ankeromo'za, ra mono nona atre'za atiramiza, za'za kukena (linen) hu'nazageno agru huno efenentake higeno, golire tro hu'naza nofi zamafunteti kreramino zamasoparega evurami'nea nofi hu'naze. 7 Anante 4'a kasefa hu'za nemaniza zagafinti mago'zmimo'a, 7ni'a golire zuompafi kasefa huno manivava Anumzamofo rimpahé knazamo mevite'nea erino, 7ni'a ankero vahera ome zamige'na ke'noe. (aiōn g165) 8 Hanki ra mono nomofona, Anumzamofo masa'zamofone, Agri hihamu hanavemofo tokimo avitegeno, mago vahe'mo'a, ana ra mono nompina ufregara osu'negeno, 7ni'a knazamofo eri'zana, 7ni'a ankero vahe'mo'za eri vagare'naze.

16 Ananter a mago ra ageru antahugen Anumzamofo ra mono nompinti, 7ni'a ankero vahekura anage hu'ne, Vutma 7ni'a Anumzamofo rimpahé knazama me'nea zuompa mopafina omeri tagi atreho. 2 Hanki nampa 1ni ankeromo'a vuno Anumzamofo rimpahé zuompa mopa agofetu ome tagitregeno, afi zagamofo avame'za eri'ne'za amema'are'ma mono'ma hunentaza vhete haviza huno agotega namuntamimo fore hu'ne. 3 Anante nampa 2 ankeromo'a Anumzamofo rimpahé zompa'a hagerimpi tagitregeno, fri'nea vahe'mofo korankna higeno,

maka zamasimu ante'za mani'naza zagamo'za hagerimpina fri vagare'naze. **4** Ananter nampa 3 ankeromo'a Anumzamofo rimp ahe'zana zoumpafintira, ranra tiranpine osi ti tamimpinena eri tagi atregeno, maka timo'za koranke hu'naze. **5** Nagra nentahugen tintamima kvama hu'nea ankeromo'a huno, Kagra fatgo hu'nane, korapara mani'nanankinka, menina mani'nane. Kagrake Ruotge hu'nane. Na'ankure Kagra ana maka'zana refko nehane. **6** Na'ankure zamagra Anumzamoka kagri nagaka'ane, kasnampa vaheka'amofo korama zamahe'za eri tagi atre'nagu, Kagra karimpa he'zamofo korantima zaminke'za, zamagra ana koranti nega nagaki'za ne'naze! **7** Anante nentahugen kresramnavu itamo'a huno, ozo Hanaveka'ane Ra Anumzamoka, refako huzanka'amo'a, tamage huno fatgo hu'ne. **8** Anante nampa 4 ankeromo Anumzamofo rimpahem zompa zagemofonte eritagitregeno, zagem'o tevemo'ma hiaza huno ana vahera zmatugare rentege'za zmatagu hu'naze. **9** Zagemofo amuhomo'a tevemo'ma hiaza huno ana vahera zmatugare rentege'za, zmatagu nehu'za ana knazama atregeno erami'nea Anumzamofo agi'a huhaviza hunente'za, zmagu'a rukrehe hu'za ra agi omi'naze. **10** Ananter nampa 5 ankeromo Anumzamofo rimpahem knaza me'nea zuompa afi zagamofo trate eritagitregeno, agrama kegava hu'nea kuma'mo'a hani higeno, ana kumapima mani'naza vahem'o'za tusi'a zmatagu nehu'za zamagnefu'na anitraga nehu'za, **11** monafi mani'nea Anumzamofona huhaviza hu'naze. Na'ankure zmatama kri'nea zanku'ene namuma zmare'nea zanku anara nehu'za, ana zamavu'zmavazankura zmagu'a rukrehe osu'naze. **12** Ananter nampa 6 ankeromo'a Anumzamofo rimpahem knaza me'nea zuompa tusi'a Yufretisi tirampi tagi atregeno, ana tiramo'a ho'mu huno, zage hanati

kazigati esnaza kini vahe'tamimofo ka retro hu'ne. **13** Ana hige'na kogeno agaza hunte osifavene, afi zagamofo agipinti'ene, havige kasnampa ne'mofo agipintira, 3'a agru osu avamutamina hogakna hu'naza atirami'naze. **14** Na'ankure zamagra hankrotamimofo avamutamimo'za, avame'zana erifore nehu'za, maka ama mopafi kini vahete vu'za ome zamazeri atru nehu'za, tusi'a hihamu hanave'ane Anumzamo'ma vahe'ma refko hania knare'ma, ha'ma hanagu zamazeri retro hu'naze. **15** Antahio, Nagra kumzafa vahe eaza hu'na egahue Iza'o kukena'ama huno omase otino mani'enimo'a, muse hugahie. Ana nehuno avufga avapara ovanigeno, vahe'mo'za agaze avufga onkegahaze. **16** Ana nehu'za havi avamu'mo'za kini vahe'zmine, ha' vahe'zminena Hibru kefina Amakedonie nehaza kumate zamazeri atru hu'naze. **17** Anantera nampa 7ni ankeromo Anumzamofo rimpaherezama me'nea zuompa zahopi eritagi atregeno, ra mono no agu'afi me'nea kini trateti magomofo agerumo ranke huno, havagare hu'ne. **18** Anante kopsina e'nerino, agasasa nerigeno, monage nehigeno, tusi'a imi eri'neana, vahe'ma fore'ma huneregatira, e'inahu imina e'ori'neankna tusi'a iminkrefa eri'ne. **19** Babiloni rankumamo'a ruhantagino 3'afi fore higeno, mopafi ranra kumatamimo'za traka humase'naze. Babiloni kuma'mofo kefo avu'ava zana, Anumzamo'a antahino keno hu'neankino rimpahewaini kapu tina amigeno ne'ne. **20** Ana higeno maka ti amu'nompi me'naza mopamo'za fanane hazageno, agonamo'za tamiza agupo mopa se'naze. **21** Hagi tusi'a komopa ko monafinti aru'neana, mago mago aragana'amo'a 50'a kilonaza hu'nea komopa komo, vahete evuramino zamahe haviza hige'za, ana vahe'mo'za Anumzamofona huhaviza hunte'naze. Na'ankure Anumzamofo rimpahenazamofo komopa kokino,

ana komopamo'a tusi havizantfa hu'neakino, vahera zmahe
haviza hu'ne.

17 Anantero 7ni'a zuompama 7ni'a ankero vahe'mo'za
azerinazafinti magomo eno nagrikura anage hu'ne, Amare
ege'na tusi monko a'mo rama'a tintamimofo agofetu mani'nea
a'mo'ma erisia knazana kaveri haneno hu'ne. 2 Ana a'ene
maka mopafi kini vahe'mo'za, rama'a monko zamu'zamaza
nehazageno, mopafima mani'naza vahe'mo'za, ana a'mofo havi
avu'avazamofo waini ti ne'za neginagi hu'naze. 3 Anantetira
ana ankeromo'a avamupi navareno vahe omani ka'ma mopafi
vige'na, nagra kogeno mago a'mo, koranke afi zagamofo agumpi
mani'negeno, Anumzamofoma azanava kemahu agiramina ana
afi zagamofo avufgare mevagaregeno, 7ni'a agenopa megeno
ana agenopafina, 10ni'a pazivea me'ne. 4 Ana a'mo'a fitunke'ene
koranke kukena nehuno, golire'ene marerisa havere'ene, perie
(pearls) nehaza zanteti tro hu'naza avasasezana erinehankreno,
azampina maka kasri avu'ava'amo'ene, monko avu'ava'amo
avite'nea golire kapu eri'ne. 5 Ana a'mofo kokovitera mago
oku'a agi'a anage huno krente'neana, Babilonia tusi'a agatere
kumare, monko a'nemokizmine, ama mopafi kasri avu'ava
zantamimofo nezmarera'e huno krente'ne. 6 Hanki negogeno
ana a'mo'a Anumzamofa naga'mokizmi korane, Jisasi agi
agenkema huama'ma nehaza naga'mokizmi korana neneno
neginagi nehige'na, nege'na nagra tusiza hu'na antri hu'hoe. 7
Hagi ana ankeromo'a anage huno nasami'ne, Nahigenka antria
nehane? Ana a'ene, agofetu manino nevia afi zagagi, ana afi
zagamofo 7ni'a agenopagi, 10ni'a pazive'ama me'neazamofo
oku'a agu'agesa'a kasamigahue. 8 Ana afi zagama ke'nanana,
korapa mani'heana, menina omani'neankino, kofa'a knafi riga

omane kerifinti hanatino, eama huteno haviza hugahie. Ama
mopama tro'ma osu'negeno, mopafima mani'naza vahe'ma
zamagima asimu eri avontafepima kreonte'nea vahe'mo'za,
korapa mani'neana, menina omani'neankino, henkama eama'ma
hanige'za kesanu'za antri hugahaze. (Abyssos g12) 9 Asenifima
knare antahintahizama me'nenia vahe'mo'a antahi ama'
hino, 7ni'a agenopa, e'i ana a'mo'ma agofetu mani'nea
7ni'a agonamo'za 7ni'a kini vahetami'ne. 10 Ana 7ni'a
kini vahepinti 5fu'amo'za evuramizageno, magomo menina
manigeno, magomo'a ome'neankino, esuno'a osi'a knafi kinia
emanigahie. 11 Hanki afi zagama korapama mani'neama,
menina omani'neana, agra e'i nampa 8ti kinigino, 7ni'a kini
vahepinti mago zamimokino, agra haviza hugahie. 12 Hagi
10ni'a pazive'ma agenopafima ke'nanana, 10ni'a kini vaheki'za
kuma kegavahu hanavea e'ori'nazanagi, zamagra afi zagane
magoke auafi kinia manigahaze. 13 Ama ana kini vahe'mo'za
magoke antahintahifine, mago zamarimpa hu'za hanave zamine
hihamuzmia afi zagamofo amigahaze. 14 Ana kini vahe'mo'za
Sipisipi Anentamofo ha' hunte'naku hugahazanagi, Sipisipi
Anentamo'a zamaheno zamagateregahie. Na'ankure Agra
ramokizmi, Ra mani'neno, kini'mokizmi Kini mani'ne. Agrama
zamigi huno huhampri zamantege'za mani fatgo hu'namo'za,
Agranena manigahaze. 15 Hagi ankeromo'a anage huno
nasami'ne, Monko a'mo'ma agofetu mani'negenka ke'nana
tintamina, e'i zamagra mika nofi naga'ene, zamageru'ene,
tusi'a vahe'ene, kumatami huvame huno me'ne. 16 Hagi
10ni'a pazive'ene afi zaganema ke'nanana, zamagra monko
a'mofona zamavesra hunente'za kukena'a azeri'za erivararo
hanageno mago'zana avufarera omanetfahina, avufga avapa

mani'nena avufga'a nene'za, tevefi kre fanane hugahaze. 17

Na'ankure Anumzamo Agri avesi'za eri knare hanazegu, ana kini vahera antahintahi zamige'za magoke antahintahire'ene, magoke zamagu zamagesare zamagrama kegava hu'naza kumatamina afi zagamofo amizageno, Anumzamofo kemofona avufga'a fore hu'ne. 18 Hanki ana monko a'ma ke'banana, e'i tusi'a kumamofo hu avame huno mani'neno, maka ama mopafi kini vahe'mokizmi kegava hunezmante hu'ne.

18 Anazama fore'ma hutegen, mago monafinti tusi'a hanave eri'nea ankeromo'a eneramige'na kogeno, masa'amo'a mopafina remsa hu'ne. 2 Hanki agra hanavege huno, tusi'a Babiloni kuma'mo'a evuramie, evuramie! Ana a'mo'a havi hankromo'za mani kuma tro nehigeno, maka agru osu avamu tami'mo'za kina hanaza kuma fore nehuno, maka agru osu nama zagamo'za mani'naza kuma fore nehuno, agru osu afi zagamo'za mani'naza kuma fore hu'ne. 3 Na'ankure maka kumatamimpi vahe'mo'za monko avu'avazama'a, waini tima neaza hu'za kapu'afinti nene'za, negi ne'nazage'za mopafi kini vahe'mo'za ana a'ene monko avu'avaza nehzage'za, ama mopafi vahe'mo'za, ana a'mofo monko avu'avazama'areti tusi'a feno (bisinisi) vahera tro hu'za mani'naze. 4 Ana hutege'na mago ageru monafinti arige'na antahugen, anage hu'ne, Vahe'nimoka ana ara atrenka atineraminka, kumira ana a'enena nehunka agranena knazama'a e'orio. 5 Na'ankure ana a'mofo kumi'mo'a, aviteno monafi marerigeno, Anumzamo'a ana a'mofo havi avu'avazama'amofona agesa antahi'ne. 6 Ruga'amokizmima huzmante'nea kante antenka ana ara nona hunentenka, avu'avazama hu'nea kante antenka, mago'ene erinteguhenkana nona'a hunentenka, ana a'mo'ma waini tima eri havia hu'nea kapufi mago'ane

erianto aguhenga erihavia humio. 7 Ana a'mo'a, agra'a agi
erisaga nehuno, rama'a monko avu'avaza nehuno, ruga'a havi
avu'ava zana hu'ne. Anama hu'nea havi avu'avazama'amofo
avamente atazana aminkeno, rama'a zavi ateno. Na'ankure
agra'agura anage nehie, kuini mani'na, kuini trate mani'noankina,
kento a' knara osu'na, zavira otegahue hu'ne. 8 E'ina
hu'negu magoke zagefi, knazana enerino, kria enerino, zavira
netena, tusi'a agate'za agritera fore nehina, agrira (Babilonia)
tevemo'a te fanane hugahie. Na'ankure tusi'a hanave'ane
Ra Anumzamo, agrira refko hu'neankino haviza hugahie. 9
Ama mopafi kini vahe'mo'za, ana a'enema havi avu'avaza
nehu'za, ana havi avu'avazampi agrane knare huta mani'none
nehaza vahe'mo'zama, ana a'ma terasagesia teve tokimo'ma
marerisige'za negenu'za, krafa hu'za zavira atentegahaze. 10
Ana a'ma azeri haviza haniazanku kore hu'za afete ot'i'ne'za
anage hugahaze, tasunku hune tasunku hune, Babiloni hanave
rankumakura na'ankure magoke knafi haviza hie. 11 Mopafi
vahe'mo'za zagonu mizaseza zagore netraza naga'mo'za
(bisinisi) ana a'mo'ma havizama hiazanku zavite'naze. Na'ankure
vahe'mo'za fenozazmi magoane miza osegahaze. 12 Ana
fenozana e'i goline, silvane, mareri havene, periema nehaza
zane, knare za'za tavravene, fitunke tavravene, silkare tavravene,
koranke tavravene, maka sitronie nehaza manantake zafareti
tro hu'naza zantamine, elefanti afumofo ave'areti troma (ivori)
hu'naza zantamine, mizama'amo mrerinea zafareti tro hu'naza
zantamine, bronsie nehazazane, aenine, mabolie nehaza
havene, 13 zarafune (sinamon), manantake zane, ne'za eri
hagahu aka nezane, tevefi krazageno knare mna neviazane,
zamavufare nefraza manantake masavene, knare manavu

zafarine (frenkinsens), wainine, olivi masavene, flaua'ene, witine, bulimakaontamine, sipisipiramine, hosi afuzagane, karisine, zamasimu eri'za mani'naza kazokzo eri'za vahera, izaza mizasegahaze. **14** Hu'za nehu'za ana vahe'mo'za amanage hugahaze, Babiloni kuma'moka knare'zama erifore'ma nehana zanku'ma kvenesiazane, marerisa nomanizama nemaninazamo'a kagripintira fanane hiankiza, vahe'mo'za ana knare'zanka'a onkegahaze. **15** Ana a'mofonte'ma zagore atre'za ra zagoma tro'ma huza feno vahe'ma nesaza vahe'mo'za, afete'are otiza manigahaze. Na'ankure ana a'mo'ma atama eri'neazanku kore nehu'za zavira nete'za, **16** anage hu'za, Tasunku hune, tasunku hune, knare ran kuma ana a'mo'a knare zaza efeke kukena nehuno, fitunke'ene koranke'ene, avasesezama golireti'ene, marerisa havereti'ene, periema (pearls) nehaza zane, eri hankre'neane, **17** na'ankure tusi'a fenomo'a mago auafi amnezankna hie! Ana higeno maka ventemofo azerino (kepten) nevia vahe'mo'zane, ventefi maniza nevaza vahe'mo'zane, ventefi eri'za vahe'mo'zane, hagerimpi zantetima zagoma eri'za nomanizama retro'ma hu'za nemaniza vahe'mo'za, afete oti'za mani'neza, **18** ana a'mofoma tegasagea teve tokima nege'za, zavira nete'za anage hu'za, Ina rankuma'mo amanahu rankumakna hugahie? hu'za hu'naze. **19** Hagi ana nehu'za kugusopa kate'za zamanunte netreza ranke hu'za, zavi krafa, nehu'za anage hu'naze, Tasunku hune tasunku hune rankumamofonkura, maka feno vahe'mo'za ventema antene'za ana a'mofompintima feno vahe'ma nemaniza zamo'a magoke auafina ana maka fenomo haviza hie. **20** Monamokane, Anumzamofo naga'motane, aposol naga'motane, kasnampa naga'motanena muse hiho, na'ankure ana a'mo'ma tamagri'ma

tami'nea knazarera Anumzamo'a refko huno mizama'a nona huno nemie. **21** Anantero tusi hanavenentake ankeromo, witi refuzafu nepeankna ra have erino hagerimpi matevu netreno anage hu'ne, Havema atreankna huno Babiloni rankumara azeri haviza hugahiankita, mago'ene onkegahu'ne **22** Ana kumara fanane hinkeno, zavenama ahe vahe'ene konkene ufene, zavenagna musikima nehaza (harp) vahe'mo'za mago'ane nehesagenka ontahigahane. Keonke'zama tro'mahu vahe'mo'za mago'ane trora osanageno, witi akaruma hare'naza agerura ontahigahane. **23** Hagi ramumofo masa'a mo mago'ane remsa huogantesigeno, a'ma eriku'ma hania ne'ene, vema eriku'ma hana'a zanagasankea ontahigahane. Na'ankure kagri vahe'mo'za zagonu mizaseza zagore netraza naga'mo'za (bisinisi) maka mopafi vahe'mofo avurera ra vahe mani'nazangi, maka mopafi vahera kagra avuatga zankareti rezmataga hu'nane. **24** Hagi ana a'mofompina kasnampa vahe'ene, Anumzamofo naga'ene maka ama mopafima Anumzamofo amage nentazageno zamahe'nea vahe'mokizmi koramo me'nege'za ke'naze.

19 Hagi anazama fore'ma hutege'ha, nagra antahugen, tusi'a vahe'mokizmi zamagerukna hu'za monafinti zamageru ru'za anage hu'naze, Ra agi amisune! Masazane hihamune hanavene tahokeno tagu'vazi'zana, tagri Anumzamofo su'zane. **2** Na'ankure Anumzamo'ma refko'ma hiazamo'a, tamage huno fatgo hu'ne, na'ankure tusi'a monko a'ma Anumzamo'ma refko'ma hunte'nea a'mo'a, ama mopafi vahera havi monko avu'avazama'reti zamazeri haviza nehuno, Anumzamofo kazokzo eri'za vahera zamaheno korana eritagi atrenegu, Anumzamo'a nona ana ara hunte'ne. **3** Anante ete mago'ane anage hu'naze, Anumzamofona Ra agi amisune! Ana a'mofo

krerasagea teve tokimo'a mareri vava nehie hu'za hu'naze.

(aiōn g165) 4 Anante 24'a ugagota kva vahe'mo'zane, 4'a kasefa
hu'za mani'naza zagamo'za zmavugosaregati mopafi mase'za,
kini tratet'ma mani'nea Anumzamofo monora hunente'za, anage
hu'naze, Tamage Anumzamofona ra agi amisune! hu'za hu'naze.

5 Hagi mago agerumo kini trateti huno anage hu'ne, Maka
Agri kazokzo eri'za vahe'motane, Anumzamofonku'ma kore'ma
hunentaza vahe'motane, tamagi omne vahe'motane, tamagi
me'nea vahe'mota, Anumzamofona ra agi erihentesga hiho
huno hu'ne. 6 Ananteria nentahugenno tusi'a vahe'mofo agerukna
huno zmagerura neru'za, ranra timofo agasasa kegna nehu'za,
tusi'a monage hiankna hu'za anage hu'naze, Anumzamofona
ra agi amisune! Na'ankure hanavenentake Ra Anumzantimo'a
kini manino kegava hu'ne hu'za hu'naze. 7 Tagra musenkase
huta ra agi amisune, na'ankure Sipisipi anentamo'ma aravema
hania kna egeno, ana ne'mofonte'ma maresia a'mo'a retro
huno mani'ne. 8 Ana a'mofona kukenama hanigu agru huno
za'za efeke kukena ami'ne. E'i ana zaza kukena Anumzamofo
naga'mokizmi fatgo zamavu'zmavazane. 9 Ananteria ankeromo'a
anage huno nasami'ne, Sipisipi anentamo'ma aravema hania
ne'zante'ma agima hu'nemo'a muse hino hunka krento, mago'ane
anage huno nasami'ne, Ama'i tamage Anumzamofo naneke. 10
Anante nagranena agiafi narenare'na mono hunte'za huanagi,
ana ankeromo'a anage huno nasamine, E'inahura osuo,
kagrane negafuzane nehzazza hu'na nagra Anumzamofo eri'za
vahe mani'neta, Jisasi'ma hu'nea ke'mofo huama nehuta,
Anumzamofo monora huntiegahune. Na'ankure Jisasi'ma hu'nea
kemo vahe'mofona azeri otigeno, kasnampa kea huama nehaze.
11 Hagi monamo'a anagige'na efeke hosi afu'mofo agumpi mago

ne' mani'nege'na ke'noe. Ana ne'mofonkura, hugahue huno'ma
hiaza nehimo'e hu'za nehu'za tamage nere hu'za nehazamo'e.
Fatgo avu'avate refko huno hara nehie hu'ne. **12** Avurgamo'a
teve anefakna nehigeno, asenirera rama'a kini vahe'mofo
fetori megeno, Agrira mago agi avufarera krente'ne, mago
vahe'mo'a ana agia ontahigahianki, Agrake antahine. **13** Ana
ne'mo'a korampi re'nea zaza kukena hu'ne. Agi'ama henazana,
Anumzamofo Naneke hu'naze. **14** Hanki monafi mani'naza sondia
vahe'mo'za agru huno knarezantfa hu'nea efeke kukena hu'ne'za,
amage ante'za efeke hosi afutamimofo agumpi vu'naze. **15** Ana
ne'mofo agipintira tarekaziga asane kazi atirami'neankino, ana
kazinuti maka kumapi vahera nezmaheno, aeni azompareti kini
manino kegava hunezmante'na, hanavenentake Anumzamofo
rimpahe knazamo'a, agareti waini regatiti nehiakna huno
zmahegahie. **16** Hanki zaza kukena'are'ene amotera anage
huno krentene, Mika kini vahe'mofo Kini manino, maka ra
vahe'mokizmi Ra mani'ne huno krente'ne. **17** Anantera mago
ankeromo'a zagefi oti'nege'na kogeno, ranke huno anage
hu'ne, Maka monafima hareno vano nehia nama zagagura
huno, Anumzamofo tusi'a nezantera etaru hutma, **18** kini
vahe'mofo zamavufgane, ugota sondia vahe'mofo zamavufgane,
hanavenentake vahe'mofo zamavufgane, hosi afu'mokizmi
zamavufgane, hosimofo zamagofetu'ma nemaniza vahe'mofone,
maka vahe'mofone, amne vahe'mofone, kazokazo vahe'ene
zamagi omne vahe'ene, zamagi me vahe'mofo zamavufga
negahaze huno zamasmi'ne. **19** Anantera afi zagane, mopafi
kini vahe'mo'zane, sondia vahe'zmimozanena eri atru hute'za,
hosí afumofo agumpi Mani'nemofone, sondia vahe'anena
ha' huzmantenaku eri atru hu'naze. **20** Ana nehazageno

ana afi zagane, havige kasnampa vahe'ene zanazerino kina rezanante'ne. Ana kasnampa vahe'mo'a, afi zagamofo avure ruzahu ruzahu avame'za eri fore nehuno, ana afi zagamofo nampama eri'naza vahe'ene, afi zagamofo amema'are mono hunentaza vahe'ene rezmataga hu'ne. E'ima rezmatga hu'nea kasnampa vahe'ene ana afi zagane mani'nakeno havere tevava nehia teve tirupi znavre atrenigeke manigaha'e. (*Limnē Pyr g3041 g4442*) 21 Hanki ruga'amokizmia, hosi agumpi manino nea ne'mofo agipinti atirami'nea tare kaziga asane'nea kazimo, zamahe vagaregeno maka namaramimo'za zamavufga nevagare'naze.

20 Hanki monafinti mago ankeroma riga huonte kerimofo kine, ra seninofi azampi eri'neno eramige'na kogeno, (*Abyssos g12*) 2 agaza hunte osifavema, korapa osifavea, havi hankroku'ma, Sata'ema nehzankino, eme azerino 1 tauseni'a zage kafu kina hunte'ne. 3 Ana ankeromo eme azerino riga huonte kerifi maka ama mopafi vahera vuno eno huno rezmatga osaniegu, matevunetreno avazarera refiteno renkanirente'nesigeno, 1 tauseni'a zagekafua evutesigeno, atupa'a knafi anagi atresigeno maka mparega vuno eno hugahie. (*Abyssos g12*) 4 Hanki anantera kini tratami me'nege'na kogeno, ana trate'ma mani'naza vahera keagama refko hanaza hanave Anumzamo'a zami'ne. Anantera kogeno, Jisasinte'ma zamentintima nehu'za Anumzamofo kere'ma amage'ma nente'za, afi zagamofo amema'are'ma mono hunonte'za, kokovite'ene zamazante'ma nampama e'ori'naza vahe'mokizmia zamanankema akafri'naza vahe'mo'za, zamasimu eri'za Jisasi'ene 1 tauseni'a kafu zagefina kini vahe manigahaze. 5 Ruga'a fri vahe'mo'za oraoti mani'nage'za, 1 tauseni'a kafuzage vagare'ne. Fripinti'ma omati'nazana, e'i ese kna otigahaze. 6 Ese knama fripinti oti'namo'za ruotge hu'nazanki muse hiho. Henka

fri'zamofo hanavemo'a zamahe ofrigahie. Hianagi zamagra Kraisi'ne, Anumzamofo pristi vahe 1 tauseni'a zagekafu Kraisi'ene manigahaze. 7 Hagi 1 tauseni'a zagekafu evutenigeno'a, Satana kina hu'nenifintira anagitrenigeno, 8 atiramino nevuno, zage hanati kazigane, zage ufre kazigane rugaraga soparegama ama mopafi mani'naza vahera rezmatga huno, Goku vahe'ene Megoki vahe'ene ha'ma hanagura vahera zamazeri atru hugahaze. Ana vahe'mofo nampamo'a hagerinkenafi kasepankna hu'za atru hugahaze. 9 Anantera ana vahe'mo'za agupofi emareri'za, Anumzamofo naga'mo'zama nemanizageno avesima nentea rankumate vu'za ome regagigahaze. Hianagi monafinti tevemo'a eramino ana vahera te fanane hugahie. 10 Hagi rezmatga hu'nea hankromofone, afi zagane, havige kasnampa ne'ma matevu zamatreniana salfa havere nerea teve tirupi mate vuzmatrena, zamagra anampina mani'ne'za hanine zagenza zamata erivava hugahaze. (aiōn g165, Limnē Pyr g3041 g4442) 11 Anantera tusi'a efeke kini tra kogeno, ana trate'ma Mani'nemofo avu kore huke monane mohanemokea frakeno, mago kumara omnetfa hu'ne. 12 Anantera fri'naza vahe zamagogeno, zamagi me'nea vahe'ene, zamagi omane'nea vahe'mo'za, keaga refkohu trate oti'nageno, avontafetamina eri vakarente'ne, magora asimu eri avontafeiki, fri'naza vahe'mo'za zamagrama hu'naza zamavu'zmava'ma krente'nea avontafe tamimpinti refko hunezmanege'na ke'noe. 13 Hagi hagerimpima fri'naza vahera, hagerimo'a avreno eme amigeno, fri'zamo'ene, (Hedes) fri vahe kuma'mo'enena, fri'naza vahera zamavare'za eme aminkeno, Anumzamo'a mago mago'mo'ma hu'nea avu'avate anteno refko huzmante'ne. (Hadēs g86) 14 Anantera fri'zane, fri vahe kuma'enena matevuno teve tirupi zanatregeke urami'na'e. E'i ana teve tirura nampa 2 fri'zane.

(Hadēs g86, Limnē Pyr g3041 g4442) 15 Hanki izano agima asimu
eri avontafepima kre ontenesimofona, mate vuno teve tirupi
atregahie. (Limnē Pyr g3041 g4442)

21 Anantera kasefa monane, kasefa mopane ke'noe. Na'ankure
ese monane, ese mopamo'a fanane higeno, mago'enena hagerina
omane'ne. 2 Anantera kogeno Ruotge hu'nea rankumara e'i
kasefa Jerusalemo, Anumzamofontegati mona atreno eramino,
a'mo'ma vema erinaku'ma retro'ma huno eaza huno e'ne. 3
Anantera antahugeno kini tratetira, ranke huno anage hu'ne,
Keho! Anumzamofo mono nomo'a vahe'ene nemanianki'za, Agra
zamagrane nemanisigeno, Agri vea zamagra nemanisageno,
Anumzamo Agra'a zamagri amu'nompina manigahie. 4 Ana
nehuno maka zamavunura eri homu huzmante vagaresigeno,
mago'ene fri'zana omnenkeno, zamasunku hu'za zavi'ma ate'zana
omnena, zamatama krizana omnienigeno, ese'ma me'nea
zantamina omnegahie. 5 Ana higeno kini trate'ma mani'nemo'a
anage hu'ne, Nagra maka'zana eri kasefa hu'na tro nehue.
Nehuno anage mago'ane hu'ne, na'ankure ama kemo'a fatgo huno
tamage hu'neanki, fore hugahianki avontafepi krento. 6 Anantera
anage huno nasami'ne, Maka zamo'a havagare, Nagrani'a
(Alfa) ese agafahu mani'na, (Omega) vagarera mani'noe,
ese agafahu'ene vagare'enena mani'noanki'na, iza'o tinku'ma
avesinimofona, mizama'a omne asimu eri tima nehanatifintira
Nagra ami'nugeno negahie. 7 Iza'o ha'ma agateresimo'a
ama anazantamina erisanti haresige'na Nagra agri Anumza
mani'nena, agra Nagri mofavre manigahie. 8 Hagi koro vahe'ene,
zamentinti nosnaza vahe'ene, hi'mange zamavu'zmavama
nehaza vahe'ene, vahe'ma zamahe nefriza vahe'ene, monko
avu'avazamofonku'ma antahintahifima nentahiza, monko'zama

nehaza vahe'ene, avuatga ha' nehaza vahe'ene, havi anumzante mono hunentaza vahe'ene krunage nehaza vahe'mo'za, mizama erisazana, havere tevava nehia teve tirupi manigahaze. E'i nampa 2 fri'zane. (*Limnē Pyr g3041 g4442*) 9 Hagi anantera 7ni'a ankerompinti mago'mo Anumzamofo tusi'a rimpahé vagare knazana 7ni'a zuompafi avite'nea eri'neno anage huno nasami'ne, Ege'na Sipisipi anentama erisia ara kaveri haneno huno hu'ne. 10 Hagi Ruotge Avamumo'a nagrite hanavetino egeno, ankero vahe'mo navareno tusi'a agonafi ome nante'ne. Jerusalema ruotge hu'nea mona kuma'mo Anumzamofontegati atreno erami'ne. 11 Anumzamofona tusi'a masamo ana kumara remsa higeno konariri'amo'a, zago'amo marerisa havegna higeno, klasifi kenkro huno negea Jaspa havegna hu'ne. 12 Ana kuma'mofona tusi'a zaza kegina megeno, 12fu'a kafa megeno, ana kafantamintera magoke magoke ankero vahe'mo'za otitere hu'nazageno, 12fu'a Israeli naga'nofimofo zamagi'a ana kafantamintera krente'naze. 13 Ana kuma'mofona 3'a kafa, zage hanati kaziga megeno, zage fre kaziga 3'a kafa megeno, ruga raga asoparega 3'a kafa metere hu'ne. 14 Ana rankumamofo keginama hu'neana, 12fu'a havenu trara anteteno, ana haveramimofo agofetu regrino kegina hu'ne. Ana 12fu'a haveramintera, Sipisipi anentamofo 12fu'a aposol naga'mokizmi zamagi metere hu'ne. 15 Ana ankeromo'ma nagranema keagama himo'a, golire tro hunte'naza azota anteno ke'za (mesarim) eri'neno, ana ranku'ma ene, kafantamine ana keginane anteno kenaku eri'ne. 16 Ana rankuma'ma tro'ma hu'neana, ana miko asopa'amo'a magozahu higeno, zaza'amo ene atupa'amo'a magozahu huno ra higeno, ana rankumara golire'ma tro'ma hu'nea azotareti anteno (mesarim) huno kegeno, za'za'amo'a

2, 200 kilomita higeno, mareri'amofo za'za'ane atupa'ane, asopa'amo'a magozahu hu'ne. **17** Ana nehuno rankuma'mofo keginama anteno (mesarim) huno kegeno'a, tapa'amo'a 144 kiubits (66 mitagna) higeno, anama eri'neno anteno ke'nea azota vahe'mo'zama ante'za negaza (mesarim) azotareti, ana ankeromo'a anteno ke'ne. **18** Ana keginama hu'neana, Jaspae nehia havereti tro nehuno, ana rankumara goliretike trora hu'negeno, kenkre huno'ma negea klasigna hu'ne. **19** Ana rankuma'mofo kegina tra'ama avasesema hunte'neana, marerisa haveraminteti tro hu'ne. Nampa 1nia jaspe nehia havereti tra'a tro nehuno, nampa 2a safie nehia havereti tro nehuno, nampa 3a agetie nehie havereti tro nehuno, nampa 4a emeletie nehia havereti tro nehuno, **20** nampa 5fu'a sadoniksie nehia havereti tro nehuno, nampa 6si'a saldiusie nehaza havereti tro nehuno, nampa 7nia krisolaetie nehaza havereti tro nehuno, nampa 8tia berlelie nehaza havereti tro nehuno, nampa 9nia topasie nehaza havereti tro nehuno, nampa 10nia krisoprasie nehaza havereti tro nehuno, nampa 11nia jasintie nehaza havereti tro nehuno, nampa 12fu'a ametistie nehaza havereti tro hu'ne. **21** Hanki 12fu'a kafana perie nehaza zanteti mago mago kafana hagentetere hu'naze. Ana rankumamofo kana goliretike tro huntogeno, masa huno kenkre hu klasigna hu'ne. **22** Ana rankumapina mago ra mono nona nagra onketfa hu'noe. Na'ankure Hanavenentake Ra Anumzamo'ene, Sipisipi anentamo'ene zanagrake ana rankumofo mono nona mani'na'e. **23** Hanki ana rankumamofona zagemo ene ikamo'enena remsa huontene. Na'ankure Anumzamofo msamo remsa nehigeno, Sipisipi anentamo'a ana kumamofo lamu tavikna huno remsa hu'ne. **24** Maka kumate vahe'mo'za ana masare vano nehanageno, mopafi kini vahe'mo'za, ra zamagima e'neriza

fenoza zmia eri'za ana kumapi ufregahaze. 25 Ana kumapina hanina onkina masa zamoke mevava hina, kafantamina eriogi'za anagintesageno mevava hugahie. 26 Ana hanageno maka kumapi vahe'mo'za, ra zamajima nezamiza zane feno zazmia eri'za ana kumapina ufregahaze. 27 Hagi pehena zane, havi anumzante mono hunente'za, havigema nehaza vahe'mo'za, ana kumapina uofretfa hugahaze. Hianagi Sipisipi anentamofo asimu eri avontafe'afima, zamajima me'nenimo'zage ana kumapina ufregahaze.

22 Anantera ankeromo'a mago rantina avu sese huno klasigna hu'nea asimu eri tina naveri hige'na kogeno, Anumzamofone Sipisipi anentamofo kini trapinti hanatino ne-eno, 2 ana rankuma'mofo amu'nompi nevigeno, ana timofo ruga raga ankenarega asimu eri zafa me'neno, mago'mago ikantera raga rentetere nehie. E'i 12fu'a zupa raga renente. Ana zafamofo asi'namo'a, mika kumate vahera zamazeri knamaregahie. 3 Ana kumapina magore huno zamazeri havizama hu'zana omnena, Anumzamofone, Sipisipi anentamofo kini tramoke'za me'nena, kazokzo eri'za vahe'amo'za monora huntegahaze. (Jen-Agf 3:14-19) 4 Ana vahe'mo'za Agri avugosa negenageno, Agri agimo'a kokovi zamire megahie. 5 Hanki ana kumapina hanima hu'zana omnetfa hanigeno, lamumofo msane, zagemofo masagura ontahitfa hugahaze. Na'ankure Ra Anumzamo Agra'a tavi masala, ana kuma'mofona manino remsa huzmantenige'za, zamagra kva vahe mani'vava hugahaze. (aiōn g165) 6 Hanki anante ana ankeromo anage huno nasm'i'ne, Ama nanekemo'a tamage hu'neankino maka vahe'mo'za zamentinti hugahaze. Kasnampa vahe'mokizmi avamuzmimofona, Ra Anumzamo ankeroma'a huntegeno, Agri kazokazo eri'za vahera makazama ame huno

efore'ma haniaza eme zamaveri hu'ne. 7 Hanki antahiho,
Nagra ko egahue, iza'o ama avontafepima me'nea kasnampa
kema antahino amage antesimo'a, muse hugahie. 8 Nagra
Joni'na ana maka'zana nentahina avanagnaza kenomo'na, ana
zama nege'na nentahi'nama hute'na, naveri'ma hia ankeromofo
agafi, narena re'na mono hunte'naku hu'noe. 9 Hianagi
ana ankeromo'a anage huno nasami'ne, E'inahura osuo,
Nagrane kagranena magozahu huta Anumzamofo eri'za vahe
mani'neno'e. Kasnampa negafu'zane, ama avontafepima me'nea
nanekema nentahi'za amage'ma nentaza vahe'enena eri'za
vaheke mani'none. Hanki Anumzamofonke monora hundo
huno hu'ne. 10 Hanki anantero anage huno nasami'ne, Ama
avontafepi me'nea kasnampa nanekea refiraoto, na'ankure
knamo'a hago kofta nehie. 11 Hagi iza'o havi avu'avazama
nehimofona atregeno havi avu'ava zana huno vino, iza'o pehena
avu'avazama nehanimofona, atregeno pehena avu'avaza huno
vino, iza'o fatgo avu'avazama nehanimofona, atregeno fatgo
avu'avaza huno vino, iza'o ruotgema hunenimo'a, atregeno
mani ruotge huno vino. 12 Higeno Jisasi'a anage hu'ne,
Antahiho, Nagra ame hu'na mizana eri'nena egahuankina,
maka vahe'mo'zama nehanaza zamavu'zmavate mizana eme
zamigahue. 13 Nagra'a esera manina (Alfa) vagare mani'noe.
(Omega), Nagrani'a agafahu mani'na, vagarera mani'noe. 14
Kukenzmima sesema hanamo'za muse hiho, anama hanageno'a
hu izo huzmantenke'za, asimu eri zafa raga nene'za Anumzamofo
rankuma'mofo kafantetira ufregahaze. 15 Hagi avuatga ha'
nehaza vahe'mo'zane monko'za nehaza vahe'mo'zane vahe
zamahe nefrina vahe'mo'zane, havi anumzante mono hunentaza
vahe'mo'zane, krunage huzanku zamave'nesiza, krunage nehaza

vahe'mo'zane, kragna vahe'mo'za ana kumapi ovu'za fegi'a manigahaze. **16** Nagra'a Jisasina ama anazana ankeroniamo huama huno, mono kevumota tamasamihogu hunte'noe. Nagra'a Deviti naga nofi'mofo agafa mani'na, Nagrani'a nanterama remsama nehia ofuna mani'noe. **17** Hagi Avamu'ene, Sipisipi anentate'ma vema erinaku'ma nehamokea eno nehakeno, ama nanekema nentahisimo'enena, eno nehina, tinku'ma avenesinimo'a eno hina, mizama'a omne asimu eri tinku'ma ave'nesinimo'a, amane emerino. **18** Ama avontafepi me'nea kasnampa naneke nentahiza vaheku nagra huama nehue, iza'o mago'a omneneria kasnampa kema avrentesimofona, ama avontafepima knazanku'ma krente'nea ke'mo'a, agrite efore hugahie. **19** Hagi mago vahe'mo'ma ama kema avontafepi me'nea eri atresimofona, Anumzamo'ma asimuma eri zafa rgaguma negahie huno hu'neana oneno, Ruotge hu'nea rankumaku'ma ama avontafepi krente'nea kumapina uofregahie. **20** Amama ana naneke huama'ma nehimo'a huno, Izo Nagra ko ame hu'na egahue. Tamage. Ramoka Jisasiga eno. **21** Ranti Jisasi asunku'zamo'a maka'motma tamagrane mesie. Tamage.



Anantera kogeno Ruotge hu'nea rankumara e'i kasefa Jerusalemo, Anumzamofontegati
mona atreno eramino, a'mo'ma vema erinaku'ma retro'ma huno eaza huno e'ne. Anantera
antahugenno kini tratetira, ranke huno anage hu'ne, Keho! Anumzamofo mono nomo'a vahe'ene
nemanianki'za, Agra zamagrane nemanisigeno, Agri vea zamagra nemanisageno,
Anumzamo Agra'a zamagri amu'nompina manigahie.
Hufore hu'nea naneke 21:2-3

Reader's Guide

Kamano-Kafe at AionianBible.org/Readers-Guide

The Aionian Bible republishes public domain and Creative Common Bible texts that are 100% free to copy and print. The original translation is unaltered and notes are added to help your study. The notes show the location of eleven special Greek and Hebrew Aionian Glossary words to help us better understand God's love for individuals and for all mankind, and the nature of afterlife destinies.

Who has the authority to interpret the Bible and examine the underlying Hebrew and Greek words? That is a good question! We read in 1 John 2:27, "*As for you, the anointing which you received from him remains in you, and you do not need for anyone to teach you. But as his anointing teaches you concerning all things, and is true, and is no lie, and even as it taught you, you remain in him.*" Every Christian is qualified to interpret the Bible! Now that does not mean we will all agree. Each of us is still growing in our understanding of the truth. However, it does mean that there is no infallible human or tradition to answer all our questions. Instead the Holy Spirit helps each of us to know the truth and grow closer to God and each other.

The Bible is a library with 66 books in the Protestant Canon. The best way to learn God's word is to read entire books. Read the book of Genesis. Read the book of John. Read the entire Bible library. Topical studies and cross-referencing can be good. However, the safest way to understand context and meaning is to read whole Bible books. Chapter and verse numbers were added for convenience in the 16th century, but unfortunately they can cause the Bible to seem like an encyclopedia. The Aionian Bible is formatted with simple verse numbering, minimal notes, and no cross-referencing in order to encourage the reading of Bible books.

Bible reading must also begin with prayer. Any Christian is qualified to interpret the Bible with God's help. However, this freedom is also a responsibility because without the Holy Spirit we cannot interpret accurately. We read in 1 Corinthians 2:13-14, "*And we speak of these things, not with words taught by human wisdom, but with those taught by the Spirit, comparing spiritual things with spiritual things. Now the natural person does not receive the things of the Spirit of God, for they are foolishness to him, and he cannot understand them, because they are spiritually discerned.*" So we cannot understand in our natural self, but we can with God's help through prayer.

The Holy Spirit is the best writer and he uses literary devices such as introductions, conclusions, paragraphs, and metaphors. He also writes various genres including historical narrative, prose, and poetry. So Bible study must spiritually discern and understand literature. Pray, read, observe, interpret, and apply. Finally, "*Do your best to present yourself approved by God, a worker who does not need to be ashamed, properly handling the word of truth.*" 2 Timothy 2:15. "*God has granted to us his precious and exceedingly great promises; that through these you may become partakers of the divine nature, having escaped from the corruption that is in the world by lust. Yes, and for this very cause adding on your part all diligence, in your faith supply moral excellence; and in moral excellence, knowledge; and in knowledge, self-control; and in self-control patience; and in patience godliness; and in godliness brotherly affection; and in brotherly affection, love. For if these things are yours and abound, they make you to be not idle nor unfruitful to the knowledge of our Lord Jesus Christ,*" 2 Peter 1:4-8.

Glossary

Kamano-Kafe at AionianBible.org/Glossary

The Aionian Bible un-translates and instead transliterates eleven special words to help us better understand the extent of God's love for individuals and all mankind, and the nature of afterlife destinies. The original translation is unaltered and a note is added to 64 Old Testament and 200 New Testament verses. Compare the meanings below to the Strong's Concordance and Glossary definitions.

Abyssos g12

Greek: proper noun, place

Usage: 9 times in 3 books, 6 chapters, and 9 verses

Meaning:

Temporary prison for special fallen angels such as Apollyon, the Beast, and Satan.

aidios g126

Greek: adjective

Usage: 2 times in Romans 1:20 and Jude 6

Meaning:

Lasting, enduring forever, eternal.

aiōn g165

Greek: noun

Usage: 127 times in 22 books, 75 chapters, and 102 verses

Meaning:

A lifetime or time period with a beginning and end, an era, an age, the completion of which is beyond human perception, but known only to God the creator of the aiōns, Hebrews 1:2. Never meaning simple endless or infinite chronological time in Greek usage. Read Dr. Heleen Keizer and Ramelli and Konstan for proofs.

aiōnios g166

Greek: adjective

Usage: 71 times in 19 books, 44 chapters, and 69 verses

Meaning:

From start to finish, pertaining to the age, lifetime, entirety, complete, or even consummate. Never meaning simple endless or infinite chronological time in Koine Greek usage. Read Dr. Heleen Keizer and Ramelli and Konstan for proofs.

eleēsē g1653

Greek: verb, aorist tense, active voice, subjunctive mood, 3rd person singular

Usage: 1 time in this conjugation, Romans 11:32

Meaning:

To have pity on, to show mercy. Typically, the subjunctive mood indicates possibility, not certainty. However, a subjunctive in a purpose clause is a resulting action as certain as the causal action. The subjunctive in a purpose clause functions as an indicative, not an optative. Thus, the grand conclusion of grace theology in Romans 11:32 must be clarified. God's mercy on all is not a possibility, but a certainty. See ntgreek.org.

Geenna g1067

Greek: proper noun, place

Usage: 12 times in 4 books, 7 chapters, and 12 verses

Meaning:

Valley of Hinnom, Jerusalem's trash dump, a place of ruin, destruction, and judgment in this life, or the next, though not eternal to Jesus' audience.

Hadēs g86

Greek: proper noun, place

Usage: 11 times in 5 books, 9 chapters, and 11 verses

Meaning:

Synonomous with Sheol, though in New Testament usage Hades is the temporal place of punishment for deceased unbelieving mankind, distinct from Paradise for deceased believers.

Limnē Pyr g3041 g4442

Greek: proper noun, place

Usage: Phrase 5 times in the New Testament

Meaning:

Lake of Fire, final punishment for those not named in the Book of Life, prepared for the Devil and his angels, Matthew 25:41.

Sheol h7585

Hebrew: proper noun, place

Usage: 66 times in 17 books, 50 chapters, and 64 verses

Meaning:

The grave or temporal afterlife world of both the righteous and unrighteous, believing and unbelieving, until the general resurrection.

Tartaroō g5020

Greek: proper noun, place

Usage: 1 time in 2 Peter 2:4

Meaning:

Temporary prison for particular fallen angels awaiting final judgment.

Glossary +

AionianBible.org/Bibles/Kamano---Kamano-Kafe/Noted

Glossary references are below. Strong's Hebrew and Greek number notes are added to 64 Old Testament and 200 New Testament verses. Questioned verse translations do not contain Aionian Glossary words and may wrongly imply *eternal* or *Hell*. * The note placement is skipped or adjusted for verses with non-standard numbering.

Abyssos

Ruku 8:31
Roma 10:7
Hufore Hu'hea Naneke 9:1
Hufore Hu'hea Naneke 9:2
Hufore Hu'hea Naneke 9:11
Hufore Hu'hea Naneke 11:7
Hufore Hu'hea Naneke 17:8
Hufore Hu'hea Naneke 20:1
Hufore Hu'hea Naneke 20:3

Aposolo 3:21
Aposolo 15:18
Roma 1:25
Roma 9:5
Roma 11:36
Roma 12:2
Roma 16:27
1 Korinti 1:20
1 Korinti 2:6
1 Korinti 2:7
1 Korinti 2:8
1 Korinti 3:18
1 Korinti 8:13
1 Korinti 10:11
2 Korinti 4:4
2 Korinti 9:9
2 Korinti 11:31
Galesia 1:4
Galesia 1:5
Efesasi 1:21
Efesasi 2:2
Efesasi 2:7
Efesasi 3:9
Efesasi 3:11
Efesasi 3:21
Efesasi 6:12
Filipai 4:20
Kolosi 1:26
1 Timoti 1:17
1 Timoti 6:17
2 Timoti 4:10
2 Timoti 4:18
Taitus 2:12
Hivru 1:2
Hivru 1:8
Hivru 5:6
Hivru 6:5
Hivru 6:20
Hivru 7:17
Hivru 7:21
Hivru 7:24
Hivru 7:28
Hivru 9:26
Hivru 11:3
Hivru 13:8
Hivru 13:21
1 Pita 1:23

1 Pita 1:25
1 Pita 4:11
1 Pita 5:11
2 Pita 3:18
1 Joni 2:17
2 Joni 1:2
Zute 1:13
Zute 1:25
Hufore Hu'hea Naneke 1:6
Hufore Hu'hea Naneke 1:18
Hufore Hu'hea Naneke 4:9
Hufore Hu'hea Naneke 4:10
Hufore Hu'hea Naneke 5:13
Hufore Hu'hea Naneke 7:12
Hufore Hu'hea Naneke 10:6
Hufore Hu'hea Naneke 11:15
Hufore Hu'hea Naneke 14:11
Hufore Hu'hea Naneke 15:7
Hufore Hu'hea Naneke 19:3
Hufore Hu'hea Naneke 20:10
Hufore Hu'hea Naneke 22:5

aïdios

Roma 1:20
Zute 1:6


aiōn

Matiu 12:32
Matiu 13:22
Matiu 13:39
Matiu 13:40
Matiu 13:49
Matiu 21:19
Matiu 24:3
Matiu 28:20
Maki 3:29
Maki 4:19
Maki 10:30
Maki 11:14
Ruku 1:33
Ruku 1:55
Ruku 1:70
Ruku 16:8
Ruku 18:30
Ruku 20:34
Ruku 20:35
Joni 4:14
Joni 6:51
Joni 6:58
Joni 8:35
Joni 8:51
Joni 8:52
Joni 9:32
Joni 10:28
Joni 11:26
Joni 12:34
Joni 13:8
Joni 14:16

aiōnios

Matiu 18:8
Matiu 19:16
Matiu 19:29
Matiu 25:41
Matiu 25:46
Maki 3:29
Maki 10:17
Maki 10:30
Ruku 10:25
Ruku 16:9
Ruku 18:18
Ruku 18:30
Joni 3:15
Joni 3:16
Joni 3:36
Joni 4:14
Joni 4:36
Joni 5:24
Joni 5:39
Joni 6:27
Joni 6:40
Joni 6:47
Joni 6:54
Joni 6:68


Joni 10:28	Maki 9:45	Sams-Zgame 116:3
Joni 12:25	Maki 9:47	Sams-Zgame 139:8
Joni 12:50	Ruku 12:5	Sams-Zgame 141:7
Joni 17:2	Jemisi 3:6	Mani'zanti Mofo Nanekee 1:12
Joni 17:3		Mani'zanti Mofo Nanekee 5:5
Aposolo 13:46	Hades	Mani'zanti Mofo Nanekee 7:27
Aposolo 13:48	Matiu 11:23	Mani'zanti Mofo Nanekee 9:18
Roma 2:7	Matiu 16:18	Mani'zanti Mofo Nanekee 15:11
Roma 5:21	Ruku 10:15	Mani'zanti Mofo Nanekee 15:24
Roma 6:22	Ruku 16:23	Mani'zanti Mofo Nanekee 23:14
Roma 6:23	Aposolo 2:27	Mani'zanti Mofo Nanekee 27:20
Roma 16:25	Aposolo 2:31	Mani'zanti Mofo Nanekee 30:16
Roma 16:26	1 Korinti 15:55	Ikritisatis 9:10
2 Korinti 4:17	Hufore Hu'nea Naneke 1:18	Soromoni' 8:6
2 Korinti 4:18	Hufore Hu'nea Naneke 6:8	Aizaia 5:14
2 Korinti 5:1	Hufore Hu'nea Naneke 20:13	Aizaia 7:11
Galesia 6:8	Hufore Hu'nea Naneke 20:14	Aizaia 14:9
2 Tesaronaika 1:9		Aizaia 14:11
2 Tesaronaika 2:16		Aizaia 14:15
1 Timoti 1:16	Hufore Hu'nea Naneke 19:20	Aizaia 28:15
1 Timoti 6:12	Hufore Hu'nea Naneke 20:10	Aizaia 28:18
1 Timoti 6:16	Hufore Hu'nea Naneke 20:14	Aizaia 38:10
2 Timoti 1:9	Hufore Hu'nea Naneke 20:15	Aizaia 38:18
2 Timoti 2:10	Hufore Hu'nea Naneke 21:8	Aizaia 57:9
Taitus 1:2		Izikeli 31:15
Taitus 3:7		Izikeli 31:16
Falimoni 1:15	Sheol	Izikeli 31:17
Hivru 5:9	Jenesis 37:35	Izikeli 32:21
Hivru 6:2	Jenesis 42:38	Izikeli 32:27
Hivru 9:12	Jenesis 44:29	Hosea 13:14
Hivru 9:14	Jenesis 44:31	Emosi 9:2
Hivru 9:15	4 Mose 16:30	Jona 2:2
Hivru 13:20	4 Mose 16:33	Havakaki 2:5
1 Pita 5:10	Tiuteronomi Kasege 32:22	
2 Pita 1:11	1 Samue 2:6	Tartaroō
1 Joni 1:2	2 Samue 22:6	2 Pita 2:4
1 Joni 2:25	1 Kva 2:6	
1 Joni 3:15	1 Kva 2:9	Questioned
1 Joni 5:11	Jovu 7:9	2 Pita 2:17
1 Joni 5:13	Jovu 11:8	
1 Joni 5:20	Jovu 14:13	
Zute 1:7	Jovu 17:13	
Zute 1:21	Jovu 17:16	
Hufore Hu'nea Naneke 14:6	Jovu 21:13	
	Jovu 24:19	
eleēsē	Jovu 26:6	
Roma 11:32	Sams-Zgame 6:5	
	Sams-Zgame 9:17	
	Sams-Zgame 16:10	
Geenna	Sams-Zgame 18:5	
Matiu 5:22	Sams-Zgame 30:3	
Matiu 5:29	Sams-Zgame 31:17	
Matiu 5:30	Sams-Zgame 49:14	
Matiu 10:28	Sams-Zgame 49:15	
Matiu 18:9	Sams-Zgame 55:15	
Matiu 23:15	Sams-Zgame 86:13	
Matiu 23:33	Sams-Zgame 88:3	
Maki 9:43	Sams-Zgame 89:48	




Abrahamulma henkama erisinti haresia kumate vinogu Anumzamo'ma huntegeno'a, inankna kumate vinogu hunteene ontahineanagi, amentinti nehuno ke amageanteno vuhe. -
Hivnu 11:8

Israel's Exodus


N ▲



Hagi Fero'ma Isipi'i ma zmatrege'za vu'hazana. Filistia mopa'fima vu kara tavaonte me'heanagi, Anumzamo'a zmatrege'za ar'a kantera ovuhaze.
Na ankure Israeli vahera ha' huzmantesage'za rukrehu'za Isipi e'zanku Anumzamo'a zmatrege'za ovuhaze. - Zmavarene 13:17



Ana hihedju Vahē'mo Mofavremo enena, er'za erintehogura one'ne. Hianagi eriza erino tamaza nehuno,
Agra'a asimura atreno rāma'mokizmi miza sezmantenaku e'ne. - Maki 10:45



Paul's Missionary Journeys

1. from Antioch with Barnabas
2. from Antioch with Silas
3. from Antioch to Churches
4. from Jerusalem to Rome in chains

Hagi nagra Poll'na, Krais Jisasi kazokzo er'i'za ne'mo'na, Anumzamo apsol er'i'za erio huno huhamprinanteno, Knare Musenke'a huama hanugu nazeri ruotge hunantene.

- Roma 1:1

Creation 4004 B.C.

- Adam and Eve created
Tubal-cain forges metal
- Enoch walks with God
- Methuselah dies at age 969
- God floods the Earth
- Tower of Babel thwarted
- Abraham sojourns to Canaan
- Jacob moves to Egypt
- Moses leads Exodus from Egypt
- Gideon judges Israel
- Ruth embraces the God of Israel
- David installed as King
- King Solomon builds the Temple
- Elijah defeats Baal's prophets
- Jonah preaches to Nineveh
- Assyrians conquer Israelites
- King Josiah reforms Judah
- Babylonians capture Judah
- Persians conquer Babylonians
- Cyrus frees Jews, rebuilds Temple
- Nehemiah rebuilds the wall
- Malachi prophesies the Messiah
- Greeks conquer Persians
- Seleucids conquer Greeks
- Hebrew Bible translated to Greek
- Maccabees defeat Seleucids
- Romans subject Judea
- Herod the Great rules Judea**

Jesus Christ born 4 B.C.
(The Annals of the World, James Usher)

New Heavens and Earth

- Christ returns for his people
- Jim Elliot martyrdom in Ecuador
- John Williams reaches Polynesia
- Zinzendorf leads Moravian mission
- Japanese kill 40,000 Christians
- Jesuits reach Mexico
- Martin Luther leads Reformation
- Gutenberg prints first Bible
- Franciscans reach Sumatra
- Ramon Llull trains missionaries
- Crusades tarnish the church
- The Great Schism
- Adalbert martyrdom in Prussia
- Bulgarian Prince Boris converts
- Boniface reaches Germany
- Alopen reaches China
- Longinus reaches Alodia / Sudan
- Saint Patrick reaches Ireland
- Carthage ratifies Bible Canon
- Ulfila reaches Goth / Romania
- Nicæa proclaims God is Trinity
- Denis reaches Paris, France
- Tertullian writes Christian literature
- Titus destroys the Jewish Temple
- Paul imprisoned in Rome, Italy
- Thomas reaches Malabar, India
- Peter reaches Gentile Cornelius
- Holy Spirit empowers the Church**

(Wikipedia, Timeline of Christian missions)

Resurrected 33 A.D.

What are we?	▶ Genesis 1:26 - 2:3	Mankind is created in God's image, male and female He created us
How are we sinful?	▶ Romans 5:12-19	Sin entered the world through Adam and then death through sin
		When are we? ▼
Where are we?		Innocence Fallen Glory
	Eternity Past Creation 4004 B.C.	Fall to sin No Law 1500 B.C. Christ 33 A.D. Church Age Kingdom Age
God	Father John 10:30 God's perfect fellowship	1 Timothy 6:16 Living in unapproachable light John 8:58 Pre-incarnate Psalm 139:7 Everywhere Genesis 1:31 God's perfect fellowship with Adam in The Garden of Eden
	Son	John 1:14 Incarnate John 14:17 Living in believers
Holy Spirit	Living	Epistles 2:1-5 Serving the Savior or Satan on Earth Luke 16:22 Blessed in Paradise
Mankind	Deceased believing	Luke 16:23, Revelation 20:5-13 Punished in Hades until the final judgment
	Deceased unbelieving	Hebrews 1:14 Serving mankind at God's command
Who are we?	Holy	2 Peter 2:4, Jude 6 Imprisoned in Tartarus
	Imprisoned	Revelation 20:13 Thalaasa
	Fugitive	Matthew 25:41 Revelation 20:10
Angels	First Beast	Lake of Fire prepared for the Devil and his Angels
	False Prophet	Revelation 19:20 Lake of Fire
	Satan	Revelation 20:2 Abyss
Why are we?	▶ Romans 11:25-36, Ephesian 2:7	For God has bound all over to disobedience in order to show mercy to all

Destiny

Kamano-Kafe at AionianBible.org/Destiny

The Aionian Bible shows the location of eleven special Greek and Hebrew Aionian Glossary words to help us better understand God's love for individuals and for all mankind, and the nature of after-life destinies. The underlying Hebrew and Greek words typically translated as *Hell* show us that there are not just two after-life destinies, Heaven or Hell. Instead, there are a number of different locations, each with different purposes, different durations, and different inhabitants. Locations include 1) Old Testament *Sheol* and New Testament *Hadēs*, 2) *Geenna*, 3) *Tartaroō*, 4) *Abyssos*, 5) *Limnē Pyr*, 6) *Paradise*, 7) *The New Heaven*, and 8) *The New Earth*. So there is reason to review our conclusions about the destinies of redeemed mankind and fallen angels.

The key observation is that fallen angels will be present at the final judgment, 2 Peter 2:4 and Jude 6. Traditionally, we understand the separation of the Sheep and the Goats at the final judgment to divide believing from unbelieving mankind, Matthew 25:31-46 and Revelation 20:11-15. However, the presence of fallen angels alternatively suggests that Jesus is separating redeemed mankind from the fallen angels. We do know that Jesus is the helper of mankind and not the helper of the Devil, Hebrews 2. We also know that Jesus has atoned for the sins of all mankind, both believer and unbeliever alike, 1 John 2:1-2. Deceased believers are rewarded in Paradise, Luke 23:43, while unbelievers are punished in Hades as the story of Lazarus makes plain, Luke 16:19-31. Yet less commonly known, the punishment of this selfish man and all unbelievers is before the final judgment, is temporal, and is punctuated when Hades is evacuated, Revelation 20:13. So is there hope beyond Hades for unbelieving mankind? Jesus promised, "*the gates of Hades will not prevail*," Matthew 16:18. Paul asks, "*Hades where is your victory?*" 1 Corinthians 15:55. John wrote, "*Hades gives up*," Revelation 20:13.

Jesus comforts us saying, "*Do not be afraid*," because he holds the keys to *unlock* death and Hades, Revelation 1:18. Yet too often our *Good News* sounds like a warning to "*be afraid*" because Jesus holds the keys to *lock* Hades! Wow, we have it backwards! Hades will be evacuated! And to guarantee hope, once emptied, Hades is thrown into the Lake of Fire, never needed again, Revelation 20:14.

Finally, we read that anyone whose name is not written in the Book of Life is thrown into the Lake of Fire, the second death, with no exit ever mentioned or promised, Revelation 21:1-8. So are those evacuated from Hades then, "*out of the frying pan, into the fire?*" Certainly, the Lake of Fire is the destiny of the Goats. But, do not be afraid. Instead, read the Bible's explicit mention of the purpose of the Lake of Fire and the identity of the Goats, "*Then he will say also to those on the left hand, 'Depart from me, you cursed, into the consummate fire which is prepared for... the devil and his angels.'*" Matthew 25:41. Bad news for the Devil. Good news for all mankind!

Faith is not a pen to write your own name in the Book of Life. Instead, faith is the glasses to see that the love of Christ for all mankind has already written our names in Heaven. Jesus said, "*You did not choose me, but I chose you*," John 15:16. Though unbelievers will suffer regrettable punishment in Hades, redeemed mankind will never enter the Lake of Fire, prepared for the devil and his angels. And as God promised, all mankind will worship Christ together forever, Philippians 2:9-11.



World Nations

Eira hunegu kokankoka vutma, namage ante disaipol naga zamazeri retro hunezmaneta, Nefā agifine, Mofavre'ānōfo agifine, Ruotge Avamumoto agifi mono tina frenezamaneta,
- Matiu 28:19